


Kitaaba Qulqulluu, Hiikkaa Ammayyaa Banamaa

Haaraa, Loqoda Dhi'aa



Oromo, West Central: Kitaaba Qulqulluu, Hiikkaa Ammayyaa
Banamaa Haaraa, Loqoda Dhi'aa (Bible)

Kitaaba Qulqulluu, Hiikkaa Ammayyaa Banamaa Haaraa, Loqoda Dhi'aa

Oromo, West Central: Kitaaba Qulqulluu, Hiikkaa Ammayyaa Banamaa Haaraa, Loqoda Dhi'aa (Bible)

copyright © 2022 Biblica, Inc.

Language: Afaan Oromoo (Oromo, West Central)

Contributor: Biblica, Inc.

Biblica® Hiikkaa Ammayyaa Banamaa Haaraa™, Loqoda Dhi'aa

Mirgi seeraan eegama © 2009, 2020, 2022 Biblica, Inc.

Biblica® Open New Oromo Contemporary Version™, Western

Copyright © 2009, 2020, 2022 by Biblica, Inc.

“Biblica” jechuun mallattoo eenyummaa kan Biblica, Inc., Waajjira Eeyyamaa fi Mallattoo Eenyummaa kan Ameerikaa keessaatti galmessee dha.

“Biblica” is trademark registered in the United States Patent and Trademark Office by Biblica, Inc. Used with permission.

Creative Commons License

Hojiin kun Creative Commons Attribution-ShareAlike 4.0 International License (CC BY-SA) keessatti qopheeffamee dhi'aate. Garagalcha eeyyama kanaa arguudhaaf liinkii kana banadhaa creativecommons.org/.../4.0 yookaan gara teessoo kanaatti xalayaa ergadhaa. Creative Commons, PO Box 1866, Mountain View, CA 94042, USA.

Biblica® jechuun mallattoo eenyummaa kan Biblica, Inc., galmeeffatee dha; mallattoo eenyummaa Biblica® kanatti fayyadamuun immoo eeyyama Biblica, Inc., kan barreeffamaan kennama barbaachisa. Hama mallattoo eenyummaa Biblica, Inc., akkuma inni jirutti eegdetti, walii galtee eeyyama seeraa CC BY-SA jalatti, hojii kana utuu hin jijjiirin garagalchaan fudhattee yookaan waraabbattee deebitee raabsuu ni dandeesa. Yoo garagalchaa isaa jijjiirte yookaan hojii kana akka haaraatti hiiktee akkasiin hojii haaraa hojii Biblica® irratti hundaa'e tokko uummatte, mallattoo eenyummaa Biblica® achi irraa balleessuu qabda. Hojii haaraa hojii Biblica irratti hundooftee hiikte sana keessatti immoo waan hojii Biblica irraa jijjiirtee adda goote ibsitee akka itti aanee jiru kanatti abbaa jalqabatti waan kana uume himuu qabda: “Hojiin Biblica, Inc., jalqabatti hojjete kan hin jijjiiramin liinkii www.biblica.com fi <https://open.bible> keessatti argama.”

Beeksisni mirga abbaa maxxansee mataa duree irratti yookaan fuula mirga abbaa hojii kanaa irratti bifa asii gadi jiru kanaan mul'achuu qaba:

Biblica® Hiikkaa Ammayyaa Banamaa Haaraa™, Loqoda Dhi'aa

Mirgi seeraan eegama © 2009, 2020, 2022 Biblica, Inc.

Biblica® Open New Oromo Contemporary Version™, Western

Copyright © 2009, 2020, 2022 by Biblica, Inc.

“Biblica” jechuun mallattoo eenyummaa kan Biblica, Inc., Waajjira Eeyyamaa fi Mallattoo Eenyummaa kan Ameerikaa keessaatti galmessee dha.

“Biblica” is a trademark registered in the United States Patent and Trademark Office by Biblica, Inc. Used with permission.

Hojii haaraa hojii Biblica irratti hundooftee hiikte sanas akka inni eeyyama seeraa (CC BY-SA) jalatti argamu gochuu qabda.

Yoo akka hojii kana deebistee akka haaraatti hiiktee Biblica, Inc., beeksisuu barbaadde, liinkii kanaan nu qunnam: <https://open.bible/contact-us>.

This work is made available under the Creative Commons Attribution-ShareAlike 4.0 International License (CC BY-SA). To view a copy of this license, visit creativecommons.org/.../4.0 or send a letter to Creative Commons, PO Box 1866, Mountain View, CA 94042, USA.

Biblica® is a trademark registered by Biblica, Inc., and use of the Biblica® trademark requires the written permission of Biblica, Inc. Under the terms of the CC BY-SA license, you may copy and redistribute this unmodified work as long as you keep the Biblica® trademark intact. If you modify a copy or translate this work, thereby creating a derivative work, you must remove the Biblica® trademark. On the derivative work, you must indicate what changes you have made and attribute the work as follows: “The original work by Biblica, Inc. is available for free at www.biblica.com and open.bible.”

Notice of copyright must appear on the title or copyright page of the work as follows:

Biblica® Hiikkaa Ammayyaa Banamaa Haaraa™, Loqoda Dhi'aa

Mirgi seeraan eegama © 2009, 2020, 2022 Biblica, Inc.

Biblica® Open New Oromo Contemporary Version™, Western

Copyright © 2009, 2020, 2022 by Biblica, Inc.

“Biblica” jechuun mallattoo eenyummaa kan Biblica, Inc., Waajjira Eeyyamaa fi Mallattoo Eenyummaa kan Ameerikaa keessaatti galmeessee dha.

“Biblica” is a trademark registered in the United States Patent and Trademark Office by Biblica, Inc. Used with permission.

You must also make your derivative work available under the same license (CC BY-SA).

If you would like to notify Biblica, Inc. regarding your translation of this work, please contact us at open.bible/contact-us.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God’s Word involves a great responsibility to be true to God’s Word. See Revelation 22:18-19.

2023-04-13

PDF generated using Haiola and XeLaTeX on 21 Feb 2024 from source files dated 14 Apr 2023
9a7d95fd-7bcd-5e4d-ad23-4d7148b8e269

Contents

Uumama	1
Ba'uu	55
Lewwota	99
Lakkoobsa	129
Keessa Deebii	175
Iyyaasuu	211
Abbootii Murtii	236
Ruut	261
1 Saamu'eel	265
2 Saamu'eel	298
1 Mootota	328
2 Mootota	362
1 Seenaa	395
2 Seenaa	435
Izraa	472
Nahimiyaa	484
Asteer	501
Iyyoob	509
Faarfannaa	550
Fakkeenya	666
Lallaba	708
Weedduu	719
Isaayyaas	727
Ermiyaas	814
Faaruu	891
Hisqi'eel	902
Daani'el	957
Hoose'aa	973
Yoo'eel	987
Amoos	993
Obaadiyaa	1004
Yoonas	1006
Miikiyaas	1009
Naahoom	1017
Anbaaqoom	1021
Sefaaniyaa	1025
Haagee	1030
Zakkaariyaas	1032
Miilkiyaas	1042
Maatewos	1045
Maarqos	1086
Luqaas	1112
Yohannis	1154
Hojii	1184
Roomaa	1221
1 Qorontos	1237
2 Qorontos	1252
Galaatiyaa	1262
Efesoos	1267
Fiiliphisiyuus	1272

Qolosaayis	1276
1 Tasaloniqee	1280
2 Tasaloniqee	1284
1 Xiimotewos	1286
2 Xiimotewos	1291
Tiitoo	1294
Fiilmoonaa	1296
Ibroota	1297
Yaaqoob	1309
1 Phexros	1313
2 Phexros	1318
1 Yohannis	1321
2 Yohannis	1325
3 Yohannis	1326
Yihuudaa	1327
Mul'ata	1329

Seera Uumamaa

Jalqaba

¹ Jalqabatti Waaqni samiiwwanii fi lafa uume. ² Lafti kan bifa hin qabnee fi duwwaa turte; dukkannis tuujuba irra ture; Hafuurri Waaqaas bishaan irra sosocho'a ture.

³ Waaqnis, "Ifni haa ta'u" jedhe; ifnis ni ta'e. ⁴ Waaqnis akka ifni sun gaarii ta'e arge; ifaa fi dukkanas gargar baase. ⁵ Waaqnis ifa sanaan "Guyyaa" jedhe; dukkana sanaan immoo "Halkan" jedhee moggaase. Galgalas ta'e; ganamas ta'e; guyyaa tokkoffaa.

⁶ Waaqnis, "Bishaanii fi bishaan gargar baasuuf bantiin bishaanota gidduu haa jiraatu" jedhe. ⁷ Kanaafuu Waaqni bantii tolchee bishaan bantii jalaatii fi kan bantiin olii gargar baase. Akkasumas ta'e. ⁸ Waaqnis bantii sana "samii" jedhee moggaase. Galgalas ta'e; ganamas ta'e; guyyaa lammaffaa.

⁹ Waaqnis, "Bishaan samiidhaa gad jiru iddoo tokkotti walitti haa qabamu; lafti gogaanis haa mul'atu" jedhe. Akkasumas ta'e. ¹⁰ Waaqni lafa gogaa sanaan "lafa" jedhe; bishaanicha walitti qabameen immoo "galaana" jedhee moggaase. Waaqnis wannii kun akka gaarii ta'e arge.

¹¹ Ammas Waaqni, "Lafti biqiltuuwwan haa baastu; biqiltuuwwan akkuma gosa gosa isaaniitti sanyii baasan, mukkeen ija kennanii iji isaanii immoo sanyii of keessaa qabu adduma addaan akkuma gosa gosa isaaniitti lafa irratti haa argaman" jedhe. Akkasumas ta'e. ¹² Laftis biqiltuu akkuma gosa isaatti sanyii baasu, muka ija kennu, kan iji isaas sanyii of keessaa qabu adduma addaan akkuma gosa isaatti baaste. Waaqnis wannii kun akka gaarii ta'e arge. ¹³ Galgalas ta'e; ganamas ta'e; guyyaa sadaffaa.

¹⁴ Waaqnis akkana jedhe; "Guyyaa fi halkan gargar baasuuf bantii samii irratti ifawwan haa ta'an; isaanis mallattoowwan waqtiileen, guyyoonnii fi waggoonni ittiin beekaman haa ta'an; ¹⁵ isaanis ifawwan bantii samii irraa kan lafaaf ifa kennan haa ta'an." Akkasumas ta'e. ¹⁶ Waaqni ifa gurguddaa lama uume; kunis akka ifni guddaan guyyaa, inni xinnaan immoo halkan mo'uuf. Akkasuma urjiiwwan illee uume. ¹⁷ Waaqnis akka isaan lafaaf ifa kennaniif bantii samii irra isaan kaa'e; ¹⁸ kunis akka isaan guyyaa fi halkan mo'aniif fi akka ifa sana dukkana irraa gargar baasaniif. Waaqnis wannii kun akka gaarii ta'e arge. ¹⁹ Galgalas ta'e; ganamas ta'e; guyyaa afuraffaa.

²⁰ Waaqnis, "Bishaan uumamawwan lubbu qabeeyyii munyuuqaniin haa guutam; simbirroonis lafaa olitti, bantii samii keessa haa barrisan" jedhe. ²¹ Kanaafuu Waaqni uumamawwan galaanaa gurguddaa, lubbu qabeeyyii munyuuqan kanneen galaana keessa jiraatan hundaa fi simbirroota qoochoo qaban hunda akkuma gosa isaaniitti uume. Waaqnis wannii kun akka gaarii ta'e arge. ²² Waaqnis, "Huraa; baay'adhaa; bishaan galaanotaas guutaa; simbirroonis lafa irratti haa baay'atan" jedhee isaan eebbise. ²³ Galgalas ta'e; ganamas ta'e; guyyaa shanaffaa.

²⁴ Waaqnis, "Lafti akkuma gosa gosa isaaniitti uumamawwan lubbu qabeeyyii jechuunis horii, uumamawwan lafa irra munyuuqan, bineensota akkuma gosa gosa isaaniitti haa kennitu" jedhe. Akkasumas ta'e. ²⁵ Waaqni bineensota akkuma gosa gosa isaaniitti, horii akkuma gosa gosa isaaniitti, uumamawwan lafa irra munyuuqanis akkuma gosa gosa isaaniitti uume. Waaqni wannii kun akka gaarii ta'e arge.

²⁶ Waaqnis, "Kottaa akka bifa keenyaatti, akka fakkeenya keenyaattis nama uumnaa; isaanis qurxummii galaanaa irratti, simbirroo samii irratti, horii irratti, lafa hundumaa fi uumamawwan lafa irra munyuuqan hundumaa irratti aangoo haa qabaatan" jedhe.

²⁷ Kanaafuu Waaqni akka bifa isaatti nama uume;

akka bifa Waaqaatti isa uume;

innis dhiiraa fi dubartii taasisee isaan uume.

²⁸ Waaqnis isaan eebbisee, "Huraa, baay'adhaas; lafa guutaatii harka keessan jalattis bulfadhaa. Qurxummii galaanaa irratti, simbirroota samii irratti, uumama lafa irra munyuuqu hunda irratti aangoo qabaadhaa" jedheen.

²⁹ Ergasii Waaqni akkana jedhe; "Kunoo ani akka isaan nyaata isinii ta'aniif biqiltuu lafa hunda irratti sanyii kennu hundaa fi muka iji isaa sanyii of keessaa qabu gosa hunda

isinii kenneera. ³⁰ Anis bineensa lafaa hundaaf, simbirroota samii hundaaf, uumama lafa irra munyuuqu hundaaf jechuunis waan hafuura jireenyaa of keessaa qabu hundaaf akka nyaata isaanii ta'uuf biqiltuu lalisaa hunda nan kenna." Akkasumas ta'e.

³¹ Waaqnis waan hojjete hunda ilaale; wanni sunis dhugumaan gaarii ture. Galgalas ta'e; ganamas ta'e; guyyaa ja'afaa.

2

¹ Uumamni samiitii fi lafaa, kan waan isaan keessa jiru hundaas haala kanaan xumurame.

² Waaqni hojii hojjechaa ture hunda guyyaa torbaffaatti fixe; kanaafuu inni guyyaa torbaffaatti hojii isaa hundumaa irraa boqote. ³ Waaqni sababii gaafa sana hojii waa uumuu kan hojjechaa ture hunda irraa boqoteef guyyaa torbaffaa eebbisee qulqulleesse.

Addaamii fi Hewaan

⁴ Seenaan samiiwwaniitii fi lafaa kan yeroo isaan uumamanii, yeroo WAAQAYYO Waaqni lafaa fi samiiwwan uumee kanaa dha.

⁵ Sababii WAAQAYYO Waaqni bokkaa hin roobsiniif, namni lafa qotus waan hin jiraatiniif margi tokko iyyuu lafa irratti hin mul'anne; biqiltuunis lafa qotiisaa irratti hin biqille ture. ⁶ Garuu bishaan lafa keessaa burqee lafa hunda obaasa ture. ⁷ WAAQAYYO Waaqni biyyoo lafaa irraa nama tolche; hafuura jireenyaas funyaan isaatti baafate; namnis uumama jiraataa ta'e.

⁸ WAAQAYYO Waaqnis Eeden keessatti gama ba'a biiftuutti iddoo biqiltuu qopheesse; nama tolche sanas achi keessa kaa'e. ⁹ WAAQAYYO Waaqni mukkeen gosa hundaa lafa keessaa biqilche; inni mukkeen ija namaatti tolanii fi nyaataafis gaarii ta'an biqilche. Iddoo biqiltuu sana keessas muka jireenyaatii fi muka waan gaarii fi waan hamaa nama beeksisutu ture.

¹⁰ Lagni iddoo biqiltuu sana obaasu tokkos Eeden keessaa burqa ture; lagni sun Eedenii ka'ee gargar ba'ee laga afur ta'e. ¹¹ Maqaan laga tokkoffaa Phiishoon; innis guutummaa biyya Hawiilaa, iddoo warqeen jirutti naanna'ee yaa'a. ¹² Warqeen biyya sanaa gaarii dha; hapheen urgaa'uu fi sardooniksiin achitti argamu. ¹³ Maqaan isa lammaffaa Giihooni; innis guutummaa lafa Itoophiyaatti naanna'ee yaa'a. ¹⁴ Maqaan laga sadaffaa Xegroosi; innis karaa ba'a biiftuutiin Asoor cina yaa'a. Lagni afuraffaan immoo Efraaxiis jedhama.

¹⁵ WAAQAYYO Waaqni akka inni isa misoomsuu fi akka inni isa eeguuf jedhee nama fuudhee Iddoo Biqiltuu Eeden keessa kaa'e. ¹⁶ WAAQAYYO Waaqnis akkana jedhee nama ajaje; "Muka iddoo biqiltuu kana keessa jiru hunda irraa nyaachuu ni dandeessa; ¹⁷ garuu muka waan gaarii fi waan hamaa nama beeksisu sana irraa hin nyaatin; gaafa isa irraa nyaatte dhugumaan ni duutaatii."

¹⁸ WAAQAYYO Waaqni, "Namni kophaa isaa ta'uun gaarii miti; gargaartuu isatti toltu nan tolchaaf" jedhe.

¹⁹ WAAQAYYO Waaqnis bineensaa fi simbirroota samii hundumaa lafa irraa tolche. Maqaa inni isaaniif baasu ilaaluuf jedhees gara namichaatti isaan fide; wanni namichi sun tokkoo tokkoo uumamawwan lubbu qabeeyyii ittiin waame kan iyyuu maqaa ta'eef. ²⁰ Namichi sunis horii qe'ee hundaaf, simbirroota samii hundaaf, bineensa hundaaf maqaa baase.

Addaamiif garuu gargaartuun isatti toltu hin argamne. ²¹ Kanaafis WAAQAYYO Waaqni akka namichi hirribaana of wallaalu godhe; utuma inni rafaaf jiruu lafee cinaacha isaa keessaa tokko fuudhee iddoo sana fooniin duuche. ²² WAAQAYYO Waaqni lafee cinaachaa kan namicha keessaa fuudhe sana irraa dubartii tolchee gara namichaatti geesse.

²³ Namichis akkana jedhe;
"Egaa lafeen kun lafee lafee kootii ti;
foon kunis foon foon kootii ti;
isheen waan dhiira irraa argamteef
'dubartii' jedhamti."

²⁴ Kanaafuu namni abbaa fi haadha isaa ni dhiisa; niitii isaatti ni maxxana; isaanis foon tokko ta'u.

²⁵ Namichii fi niitiin isaa qullaa isaanii turan; garuu wal hin qaana'an ture.

3

Kufaatii Namaa

¹ Bineensa WAAQAYYO Waaqni uume hunda keessaa bofti haxxee ture. Dubartittiidhaanis, “Dhuguma Waaqni, ‘Muka iddoo biqiltuu keessa jiru kam irraa iyyuu hin nyaatinaa’ isiniin jedheera?” jedhe.

² Dubartittiinis deebiftee bofa sanaan akkana jette; “Ija mukkeen iddoo biqiltuu keessa jirani nyaachuu ni dandeenya; ³ garuu Waaqni, ‘Muka walakkaa iddoo biqiltuu sanaa keessa jiru irraa ija hin nyaatinaa; ittis hin bu’inaa; yoo kanaa achii ni duutuu’ jedheera.”

⁴ Bofichis deebisee dubartittiidhaan akkana jedhe; “Isin dhugumaan hin duutan. ⁵ Waaqni akka yommuu isin ija mukichaa nyaattan iji keessan banamu, akka isin waan gaarii fi waan hamaa beekuudhaan akka Waaqaa taatan ni beekaatii.”

⁶ Dubartittiinis yommuu akka iji mukichaa nyaataaf gaarii, kan ija namaatti tolu, ogummaa argachuufis akka nama gojomaasisu argitetti fudhattee nyaatte. Dhirsi ishees ishee wajjin ture; isaafis ni laatte; innis ni nyaate. ⁷ Iji lachan isaaniis ni baname; qullaa hafuu isaaniis beekan; kanaafis baala harbuu hodhanii marxoo tolfatan.

⁸ Akkuma aduun qabbanoofteenis namichii fi niitiin isaa utuu WAAQAYYO Waaqni iddoo biqiltuu sana keessa deemuu sagalee isaa dhaga’an; isaanis mukkeen iddoo biqiltuu keessa WAAQAYYO Waaqaa duraa dhokatan. ⁹ WAAQAYYO Waaqni garuu namicha waamee, “Ati eessa jirta?” jedheen.

¹⁰ Namichis deebisee, “Ani utuu ati iddoo biqiltuu keessa deemtuu nan dhaga’e; waan qullaa koo tureefis nan sodaadhe; nan dhokadhes” jedheen.

¹¹ Innis, “Eenyutu akka ati qullaa taate sitti hime? Muka ani ija isaa hin nyaatin jedhee si ajaje sana irraa nyaatte moo?” jedheen.

¹² Namichis, “Dubartittii ati akka isheen na wajjin jiraattuuf naa kennite sanatu ija mukichaa irraa naa kenne; anis nan nyaadhe” jedhe.

¹³ WAAQAYYO Waaqnis dubartittiidhaan, “Wanni ati hojjette kun maali?” jedhe.

Dubartittiin immoo, “Bofti na gowwoomsinaan nyaadhe” jette.

¹⁴ Kanaafuu WAAQAYYO Waaqni bofichaan akkana jedhe; “Ati sababii waan kana gooteef,

“Horii hundumaa keessaa, bineensa hundumaa keessaas

kan abaarante ni taata!

Bara jireenya keetii guutuu

garaa keetiin lafa irra loota;

biyyoo illee ni nyaatta.

¹⁵ Si’ii fi dubartittii, sanyii keetii fi

sanyii ishee gidduutti

diinummaa nan uuma;

inni mataa kee ni tuma;

atis koomee isaa ni iddita.”

¹⁶ Dubartittiidhaanis akkana jedhe;

“Yommuu ati mucaa deessutti ani dhiphina kee akka malee nan baay’isa;

ciniinsuudhaanis ijoollee ni deessa.

Fedhiin kee garuma dhirsa keetii ta’a;

innis sirratti ol aantummaa qabaata.”

¹⁷ Addaamiin immoo akkana jedhe; “Waan ati dubbii niitii keetii dhageessee muka ani ija isaa irraa, ‘hin nyaatin’ jedhe irraa nyaatteef,

“Lafti sababii keetiif kan abaarante taati;

atis bara jireenya keetii guutuu

dadhabbiidhaan ishee irraa nyaatta.

¹⁸ Isheen qoraattii fi sokorruu sitti biqilchiti;

atis biqiltuu lafaa ni nyaatta.

¹⁹ Ati waan lafa irraa argamteef,

hamma lafatti deebitutti

dafqa fuula keetiitiin buddeena nyaatta;

waan biyyoo taateefis,

gara biyyootti deebita.”

²⁰ Addaamis sababii isheen haadha jiraatoo hundaa taateef niitii isaa “Hewaan” jedhee moggaase.

²¹ WAAQAYYO Waaqni Addaamii fi Hewaaniif gogaa irraa uffata hojjete isaaniitti uffise.

²² WAAQAYYO Waaqnis, “Kunoo namni waan gaarii fi waan hamaa beekuudhaan nu

keessaa akka isa tokkoo ta'eera. Ammas harka isaa hiixatee, ija muka jireenyaa cirate nyaachuun, bara baraanis jiraachuun isaaf eeyyamamuu hin qabu" jedhe. ²³ Kanaafuu WAAQAYYO Waaqni lafa biqiltuu Eeden keessaa namicha baasee akka inni lafuma irraa argame sana misoomsu godhe. ²⁴ Erga nama achii baasee booddee karaa muka jireenyaatti geessu eegsisuuf jedhee kiirubeelotaa fi goraadee boba'u kan asii fi achi gagaragaluu tokko Iddoo Biqiltuu Eedeniitiin gama ba'a biiftuu kaa'e.

4

Qaayinii fi Abeel

¹ Addaam niitii isaa Hewaan bira ga'e; isheenis ulfoofttee Qaayinin deesse. Isheenis, "Ani gargaarsa WAAQAYYOOTIIN ilma tokko argadheera" jette. ² Itti aansitees obboleessa isaa Abeelin deesse.

Abeel tiksee hoolotaa ture; Qaayin immoo lafa qota ture. ³ Yeroo muraasa keessatti Qaayin waan lafti baafteef keessaa WAAQAYYOOF aarsaa dhi'eesse. ⁴ Abeel immoo hangafoota hoolotaa isaa keessaa cooma cooma isaa dhi'eesse. WAAQAYYO faara tolaadhaan gara Abeelii fi gara aarsaa inni dhi'eesse sanaa ilaale. ⁵ Gara Qaayinii fi gara aarsaa isaa garuu hin ilaalle. Kanaafuu Qaayin akka malee aaree fuulli isaa gurraacha'e.

⁶ WAAQAYYOS Qaayiniin akkana jedhe; "Ati maaliif aarte? Fuulli kees maaliif gurraacha'e? ⁷ Utuu waan qajeelaa hojjettee silaa ati fudhatama argatta mitii? Garuu yoo waan qajeelaa hojjechuu baatte cubbuun balbala kee duratti riphee si eeggata; si qabachuu barbaadas; ati garuu isa mo'achuu qabda."

⁸ Qaayinis ergasii obboleessa isaa Abeeliin, "Kottu mee dirreetti baanaa" jedhe. Utuma dirree irra jiranuus Qaayin obboleessa isaa Abeelitti ka'ee isa ajjeese.

⁹ WAAQAYYOS, "Obboleessi kee Abeel eessa jira?" jedhee Qaayin gaafate.

Qaayin immoo, "Ani hin beeku; ani eegduu obboleessa kootiitii?" jedhee deebise.

¹⁰ WAAQAYYO akkana jedhe; "Ati maal goote? Dhiigni obboleessa keetii lafaa natti iyyaa jira. ¹¹ Ati amma abaaramaa dha; lafa dhiiga obboleessa keetii si harkaa fudhachuuf afaan banatte irraas ni ari'ama. ¹² Yeroo ati lafa qotattutti lafti deebitee midhaan siif hin kennitu. Ati lafa irratti joortuu boqonnaa hin qabne taata."

¹³ Qaayin immoo WAAQAYYON akkana jedhe; "Adabamuun koo waan ani baachuu danda'uun ol. ¹⁴ Kunoo ati har'a biyyaa na ari'aa jirta; anis fuula kee duraa nan dhokadha; lafa irratti joortuu boqonnaa hin qabne nan ta'a; namni na argatu kam iyyuus na ajjeesa."

¹⁵ WAAQAYYO garuu, "Akkana miti; namni Qaayinin ajjeesu kam iyyuu dachaa torba haaloo baafama" jedheen. WAAQAYYOS akka namni isa argatu tokko iyyuu isa hin ajjeefneef Qaayiniitti mallattoo godhe. ¹⁶ Ergasii Qaayin fuula WAAQAYYOO duraa ba'ee Eeden irraa karaa ba'a biiftuutiin biyya Noodi keessa jiraate.

¹⁷ Qaayin niitii isaa beeke; isheenis ulfoofttee Henookin deesse. Qaayinis magaalaa tokko hundeesse; magaalaa sanas Henook jedhee maqaa ilma isaatiin waame. ¹⁸ Henook Iiraadin dhalche; Iiraadi Me'eelin dhalche; Mehuuyaa'eel Matusaa'elin dhalche; Matusaa'el immoo Laamehin dhalche.

¹⁹ Laameh dubartoota maqaan isaanii Aadaa fi Xiilaa jedhamu lamaan fuudhe. ²⁰ Aadaan Yaabaalin deesse; Yaabaalis abbaa warra dunkaana keessa jiraatanii horii horsiisanii ture. ²¹ Maqaan obboleessa isaa Yuubaal ture; inni immoo abbaa warra kiraara rukutaniitii fi ulullee afuufanii ti. ²² Xiilaan immoo ilma Tuubaal Qaayin jedhamu kan naasii fi sibiila tumee meeshaawwan garaa garaa hojjetu deesse; obboleettiin Tuubaal Qaayinis Na'amaa turte.

²³ Laameh niitota isaatiin akkana jedhe;

"Aadaa fi Xiilaan na dhaga'aa;

yaa niitota Laamehii dubbii koo dhaggeeffadhaa.

Nama tokko waan inni na madeesseef,

dargageessa tokko waan inni na miidheef ani isa ajjeeseera.

²⁴ Yoo Qaayiniif dachaa torba haaloon baafame

Laamehiif immoo dachaa torbaatamii torba ni baafama."

²⁵ Addaam ammas niitii isaa beeke; isheenis ilma deesse; maqaa isaas, "Erga Qaayin Abeelin ajjeesee as Waaqni iddoo Abeel daa'ima biraa naa kenneera" jettee "Seeti" jettee moggaafte. ²⁶ Seetiifis ilmi ni dhalate; innis Enoosh jedhee isa moggaase.

Bara sana namoonni maqaa WAAQAYYOO waammachuu jalqaban.

5

Addaamii Jalqabee Hamma Nohiitti

¹ Kun galmee sanyii Addaam.

Waaqni yeroo nama uumetti akka fakkeenya Waaqaatti isa tolche. ² Innis dhiiraa fi dubartii taasisee isaan uume; isaan eebbises. Yeroo uumamanis “Nama” jedhee isaan waame.

³ Addaam waggaa 130 jiraate; innis akka fakkaattii isaatti, akka bifa isaattis ilma dhalchee Seeti jedhee maqaa baaseef. ⁴ Addaam erga Seeti dhalatee booddee waggaa 800 jiraate; innis ilmaanii fi intallan biraa dhalche. ⁵ Walumatti Addaam waggaa 930 jiraatee du’e.

⁶ Seeti waggaa 105 jiraatee Enooshin dhalche. ⁷ Erga Enooshin dhalchee booddees Seeti waggaa 807 jiraate; innis ilmaanii fi intallan biraa dhalche. ⁸ Walumatti Seeti waggaa 912 jiraatee du’e.

⁹ Enoosh waggaa 90 jiraatee Qeenaanin dhalche. ¹⁰ Erga Qeenaanin dhalchee booddees Enoosh waggaa 815 jiraate; innis ilmaanii fi intallan biraa dhalche. ¹¹ Walumatti Enoosh waggaa 905 jiraatee du’e.

¹² Qeenaan waggaa 70 jiraatee Mahalaleelin dhalche. ¹³ Erga Mahalaleeliin dhalchee booddee Qeenaan waggaa 840 jiraate; innis ilmaanii fi intallan biraa dhalche. ¹⁴ Walumatti Qeenaan waggaa 910 jiraatee du’e.

¹⁵ Mahalaleel waggaa 65 jiraatee Yaaredin dhalche. ¹⁶ Erga Yaaredin dhalchee booddee Mahalaleel waggaa 830 jiraate; innis ilmaanii fi intallan biraa dhalche. ¹⁷ Walumatti Mahalaleel waggaa 895 jiraatee du’e.

¹⁸ Yaared waggaa 162 jiraatee Henookin dhalche. ¹⁹ Erga Henookin dhalchee booddee Yaared waggaa 800 jiraate; innis ilmaanii fi intallan biraa qaba ture. ²⁰ Walumatti Yaared waggaa 962 jiraatee du’e.

²¹ Henook waggaa 65 jiraatee Matuusela dhalche. ²² Henook erga Matuusela dhalchee booddee waggaa 300 Waaqa wajjin deddeebi’e; innis ilmaanii fi intallan biraa dhalche. ²³ Walumatti Henook waggaa 365 jiraate. ²⁴ Henook Waaqa wajjin deddeebi’e; waan Waaqni isa fudhateef inni deebi’ee hin argamne.

²⁵ Matuuselaan waggaa 187 jiraatee Laamehin dhalche. ²⁶ Erga Laamehin dhalchee booddee Matuuselaan waggaa 782 jiraate; innis ilmaanii fi intallan biraa dhalche. ²⁷ Walumatti Matuuselaan waggaa 969 jiraatee du’e.

²⁸ Laameh waggaa 182 jiraatee ilma dhalche. ²⁹ Innis, “Hojii nu lafa WAAQAYYO abaare kana irratti hojjennuu fi dadhabbi harka keenyaa kana keessatti nu jajjabeessa” jechuudhaan maqaa isaa Nohi jedhee moggaase. ³⁰ Laameh erga Nohin dhalchee booddee waggaa 595 jiraate; innis ilmaanii fi intallan biraa dhalche. ³¹ Walumatti Laameh 777 jiraatee du’e.

³² Nohi erga waggaa 500 jiraatee booddee Seem, Haamii fi Yaafetin dhalche.

6

Bishaan Badiisaa

¹ Yeroo namoonni biyya lafaa irratti baay’achuu jalqabanii intallan dhalataniifitti, ² ilmaan Waaqaa akka intallan namootaa babbareedoo ta’an argan; isaan keessaas abbuma filatan fuudhan. ³ Yommus WAAQAYYO, “Namni waan foon ta’eef Hafuurri koo bara baraan isa keessa hin jiraatu; barri jireenya isaas waggaa dhibba tokkoo fi digdama ta’a” jedhe.

⁴ Bara sanaa fi ergasiis Nefiliimonni lafa irra turan; ilmaan Waaqaas yommuu gara intallan namaa dhaqanitti ijoollee dhalchan. Isaanis gootota durii warra beekamoo turan.

⁵ WAAQAYYOS akka jal’inni namaa lafa irratti baay’atee, wanni namni yeroo hunda garaa isaatti yaadu hundinuus jal’aa gofa ta’e arge. ⁶ WAAQAYYOS waan lafa irratti nama uumeef ni gaabbe; garaan isaas ni gadde. ⁷ Kanaafuu WAAQAYYO, “Ani sanyii namaa kan ofii kootiin uume lafa irraa nan balleessa. Namaa fi horii, uumama lafa irra munyuuqu, simbirroota samii nan balleessa; ani isaan uumuu kootii gaabbeeraatii” jedhe. ⁸ Nohi garuu fuula WAAQAYYOO duratti surraa argate.

⁹ Seenaan Nohii fi maatii isaa kanaa dha.

Nohi namoota bara isaa turan gidduutti nama qajeelaa, nama hir’ina hin qabne kan Waaqa wajjin deddeebi’u ture. ¹⁰ Nohi ilmaan sadii dhalche; isaanis: Seem, Haamii fi Yaafet.

¹¹ Lafti fuula Waaqaa duratti faalamtee jeequmsaan guutamte turte. ¹² Sababii namoonni lafa irraa hundinuu karaa isaanii faalaniif, Waaqni akka lafti faalamte arge. ¹³ Kanaafuu Waaqni Nohiin akkana jedhe; “Waan lafti sababii isaaniitiin jeequmsaan guutamteef, ani nama hunda nan balleessa; kunoo ani dhugumaan lafaa fi isaan nan barbadeessa. ¹⁴ Ati muka Goofar irraa doonii tolfadhu; keessa isaattis kutaa garaa garaa qopheessi; keessaa fi duuba isaas hapheedhaan duuchi. ¹⁵ Haalli ati ittiin doonicha tolchitu kanaa dha; dheerina isaa dhundhuma dhibbaa sadii, bal’ina isaa dhundhuma shantama, ol dheerina isaa dhundhuma soddoma godhi. ¹⁶ Doonichaaf bantii dhundhuma tokko ol ka’u hojjedhu; cinaacha isaa irrattis balbala baasi; kanas abbaa darbii sadii jechuunis kan gadii, kan gidduutii fi kan gubbaa godhii hojjedhu. ¹⁷ Kunoo, ani uumamawwan lubbu qabeeyyii hunda samii jalaa balleessuuf bishaan badiisaa lafatti nan fida; wanni lafa irra jiraatu hundinuus ni bada. ¹⁸ Si wajjin garuu kakuu nan gala; atis doonii seenta; atii fi ilmaan kee, niitiin keetii fi niitonni ilmaan keetis ni seentu. ¹⁹ Uumamawwan lubbu qabeeyyii hundumaa keessaa akka isaan si wajjin jiraataniif lama lama, kormaa fi dhalaa doonichatti galchi. ²⁰ Simbirroota keessaa akkuma gosa gosa isaaniitti, horii keessaa akkuma gosa gosa isaaniitti, uumamawwan lafa irra munyuuqan keessaas akkuma gosa gosa isaaniitti, lama lama ta’anii jiraachuuf gara kee dhufu. ²¹ Waan nyaatamu hunda keessaa waa fuudhii of biratti walitti qabi! Kunis nyaata keetii fi nyaata isaanii ni ta’a.”

²² Nohi akkuma Waaqni isa ajajetti waan hunda hojjete.

7

¹ WAAQAYYOS Nohiin akkana jedhe; “Ani akka ati dhaloota kana keessaa na duratti qajeelaa taate argeeraatii maatii kee hundumaa wajjin doonicha seeni. ² Bineensa qulqulluu gosa hunda keessaa kormaa fi dhalaa cimdii torba, bineensa qulqulluu hin ta’in gosa hunda keessaa cimdii tokko, ³ gosa simbirrootaa hunda keessaa illee akka sanyiin lafa hunda irratti hafee jiraatuuf kormaa fi dhalaa cimdii torba fudhadhu seeni. ⁴ Ani guyyaa torba booddee halkan afurtamaa fi guyyaa afurtama bokkaa nan roobsa; uumama jiraataa ani mataan koo uume hunda lafa irraa nan haxaa’a.”

⁵ Nohis waan WAAQAYYO isa ajaje hunda ni hojjete.

⁶ Yeroo bishaan badiisaa dhufetti Nohi nama waggaa dhibba ja’a ture. ⁷ Nohii fi ilmaan isaa, niitii isaatii fi niitonni ilmaan isaa bishaan badiisaa jalaa ba’uuf doonii seenan. ⁸ Bineensonni qulqulluu fi kan qulqulluu hin ta’in, simbirroonni fi uumamawwan lafa irra munyuuqan hundi, cimdii cimdiihaan, ⁹ kormaa fi dhalaa gara Nohi dhufanii akkuma Waaqni Nohiin ajajetti doonicha seenan. ¹⁰ Guyyaa torba booddee bishaan badiisaa lola’ee lafa guute.

¹¹ Bara jireenya Nohi waggaa dhibba ja’affaa keessa, ji’a lammaffaatti, ji’a sana keessaas guyyaa kudha torbaffaatti burqaawwan tuujuba gurguddaa hundi ni dho’an; foddawwan bishaan samiis ni banaman. ¹² Bokkaanis guyyaa afurtamaa fi halkan afurtama lafatti roobe.

¹³ Guyyuma sana Nohii fi ilmaan isaa, Seem, Haamii fi Yaafet, niitii isaatii fi niitota ilmaan isaa sadanii wajjin doonicha seenan. ¹⁴ Isaanis bineensota hunda, akkuma gosa isaaniitti, horii hunda akkuma gosa isaaniitti, uumamawwan lafa irra munyuuqan hundaa fi simbirroota hunda akkuma gosa isaaniitti, waan qoochoo qabu hundas of faana fudhatanii seenan. ¹⁵ Uumamawwan hafuura jireenyaa of keessaa qaban hundinuus cimdii cimdiihaan gara Nohi dhufanii doonicha seenan. ¹⁶ Bineensonni akkuma Waaqni Nohin ajajetti dooniitti galan kormaa fi dhalaa uumamawwan lubbu qabeeyyii hundaa turan; ergasii immoo WAAQAYYO alaan itti cufe.

¹⁷ Bishaan badiisaas ittuma fufee guyyaa afurtamaaf lafa irra ture; bishaan sunis dabalaa deemee doonii sana lafa irraa ol kaase. ¹⁸ Bishaanichis ol ka’ee lafa irratti akka malee baay’ate; dooniin sunis bishaanicha irra deeme. ¹⁹ Bishaanichis akka malee ol ka’aa deemee tulluuwwan samii jala jiran hunda haguuge. ²⁰ Bishaanichi dhundhuma kudha shan caalaa ol ka’uudhaan tulluuwwan dhokse. ²¹ Uumamawwan lubbu qabeeyyiin lafa irra jiraatan hundi jechuunis, simbirroonni, horiin, bineensonni, uumamawwan lafa irra munyuuqan hundii fi namoonni hundi ni barbadaa’an. ²² Wanni lafa gogaa irra jiraatu kan funyaan isaatiin hafuura jireenyaa baafatu hundinuu ni du’e. ²³ Uumamawwan lubbu qabeeyyiin lafa irra jiraatan hundinuu ni haxaa’aman; namnii fi horiin, uumamawwan lafa irra munyuuqanii fi simbirroonni samii, lafa irraa ni haxaa’aman. Nohii fi warra isa wajjin doonii keessa turan qofattu hafe.

²⁴ Bishaan sunis bultii dhibba tokkoo fi shantama lafa irra lola’e.

8

¹ Waaqni garuu Nohin, bineensotaa fi horii isa wajjin doonii keessa turan hunda yaa-date. Innis bubbee lafatti erge; bishaanichis gad gale. ² Burqaawwan tuujubawwaniitii fi foddaawwan samiiwwanii ni cufaman; bokkaan samii keessaa gad roobus ni caame. ³ Bishaan sunis suutuma suuta lafa irraa hir'achaa deemee dhuma bultii dhibba tokkoo fi shantamaatti gad bu'e. ⁴ Dooniin sunis guyyaa kudha torbaffaa ji'a torbaffaatti tulluu Araaraati gubbaa qubate. ⁵ Bishaanichi hamma ji'a kurnaffaatti gaduma galaa deeme. Guyyaa jalqaba ji'a kurnaffaattis mataawwan tulluuwwanii mul'atan.

⁶ Guyyaa afurtama booddee Nohi foddaa dooniitti baasee ture sana bane; ⁷ innis arraagessa tokko gad dhiise; arraagessi sunis hamma bishaanichi lafa irraa gogutti asii fi achi deddeebi'aa ture. ⁸ Ergasii immoo akka bishaanichi lafa irraa hir'ate hubachuuf gugee tokko erge. ⁹ Garuu sababii bishaan lafa hunda irra guutee jiruuf gugeen sun iddoo qubatu dhabdee gara Nohi dooniitti deebite. Innis harka isaa gad hiixatee gugee sana gara dooniitti iddoo ofii jirutti ol galche. ¹⁰ Ammas guyyaa torba turee gugee sana doonii keessaa gad baasee erge. ¹¹ Gugeen sunis galgala yommuu gara isaatti deebitetti kunoo, baala ejersaa kan amma kutame afaanitti qabattee turte. Kanaanis Nohi akka bishaanichi gad hir'ate beeke. ¹² Ammas guyyaa biraa torba turee gugee sana deebisee erge; gugeen sun garuu lammata gara isaatti hin deebine.

¹³ Umurii Nohii waggaa dhibba ja'aa fi tokkoffaatti, guyyaa tokkoffaa ji'a jalqabaatti, bishaanichi lafa irraa goge. Nohis qadaada doonii sanaa irraa fuudhee ilaalee kunoo akka lafti gogde erge. ¹⁴ Guyyaa digdamii torbaffaa ji'a lammaffaatti lafti guutummaan guutuutti gogde.

¹⁵ Waaqnis Nohiin akkana jedhe; ¹⁶ "Atii fi niitiin kee, ilmaan keetii fi niitonni ilmaan keetii kottaa doonii keessaa ba'aa. ¹⁷ Akka isaan lafa irratti baay'ataniif, akka isaan horanii lafa irratti baay'ataniif, gosa uumamawwan lubbu qabeeyyii si wajjin jiran hunda jechuunis simbirroota, bineensotaa fi uumamawwan lafa irra munyuuqan hunda gad baasi."

¹⁸ Kanaafuu Nohi ilmaan isaatii fi niitii isaa, niitota ilmaan isaa wajjin gad ba'e. ¹⁹ Bineensonni hundii fi uumamawwan lafa irra munyuuqan hundinuu, simbirroonni hundi jechuunis wannii lafa irra jiraatu hundi gosuma gosaan doonii sana keessaa gad ba'an.

²⁰ Nohis WAAQAYYOOF iddoo aarsaa ijaare; horii fi simbirroota qulqulluu hunda keessaa fuudhee iddoo aarsaa sana irratti aarsaa gubamu dhi'eessse. ²¹ WAAQAYYOS foolii tolaa sana urgeeffatee garaa isaa keessatti akkana jedhe; "Yoo wannii namni ijoollummaa isaatii jalqabee garaa isaatti yaadu hammina ta'e illee ani sababii namaatiif jedhee lammata lafa hin abaaru. Ani akkan kanaan dura godhe sana deebi'ee uumamawwan jiraatoo hunda hin balleessu.

²² "Hamma lafti jirtutti, midhaan facaasuu fi walitti qabuun, dhaamochii fi ho'i, bonnii fi ganni, halkanii fi guyyaan gonkumaa hin hafan."

9

Kakuu Waaqni Nohi wajjin Gale

¹ Waaqni akkana jedhee Nohii fi ilmaan isaa eebbise; "Huraa, baay'adhaa, lafas guutaa. ² Sodaachisuu fi naasisuun keessan bineensota lafaa hundumaa fi simbirroota samii hundumaa, uumamawwan lafa irra munyuuqan hundumaa fi qurxummiwwan galaanaa hundumaa irra haa bu'u; isaan harka keessanitti kennamaniiru. ³ Wannii jiraatuu fi wannii munyuuqu hundi nyaata isiniif ni ta'a. Ani akkuman biqila lalisaa isinii kenne sana ammas waan hunda isiniif nan kenna.

⁴ "Isin garuu foon lubbuu isaa wajjin jechuunis dhiiga isaa wajjin hin nyaatinaa. ⁵ Ani dhugumaan dhiiga keessan kan lubbuun keessan keessa jirtu nan barbaada. Bineensa hunda irraa nan barbaada. Obboleessa nama hundaa irraas lubbuu namaa nan barbaada.

⁶ "Nama dhiiga namaa dhangalaasu, dhiigni isaa harka namaatiin dhangalaafama; Waaqni bifa Waaqaatiin nama uumeetii.

⁷ Isinis horaa, baay'adhaa; lafa guutaa, irrattis baay'adhaa."

⁸ Ergasii Waaqni Nohii fi ilmaan isaa warra isaa wajjin turaniin akkana jedhe; ⁹ “Kunoo ani isinii fi sanyii keessan warra isin booddee wajjin kakuu koo nan hundeesa. ¹⁰ Akkasumas uumamawwan lubbu qabeeyyii isin wajjin turan hunda jechuunis simbirroota, horii fi bineensota lafaa hunda, waan isin wajjin doonii keessaa ba’e hunda, uumamawwan lafa irra jiraatan hunda wajjinis kakuu koo nan hundeesa. ¹¹ Akka si’achi wannu lubbuu qabu hundi deebi’ee bishaan badiisaatiin hin badneef, si’achi bishaan badiisaa lafa balleessuuf gonkumaa akka hin dhufneef ani isin wajjin kakuu koo nan hundeesa.”

¹² Waaqni akkana jedhe; “Mallattoon kakuu kan ani ofii kootii fi isin gidduutti, uumamawwan lubbuu qabeeyyii isin bira jiran hunda gidduutti, dhaloota dhufuuf jiru hundaaf galu kanaa dha. ¹³ Ani sabbata koo duumessa keessa dhaabeera; innis kakuu anaa fi lafa gidduu jiruuf mallattoo ta’a. ¹⁴ Yeroo ani lafa irratti duumessa fidee sabbanni koo duumessa keessaan mul’atutti, ¹⁵ ani kakuu koo kan ofii kootii fi isin gidduu, uumamawwan lubbu qabeeyyii gosa hundaa gidduus jiru sana nan yaadadha. Bishaanonnis deebi’anii lubbuu hunda balleessuuf gonkumaa bishaan badiisaa hin ta’an. ¹⁶ Yeroo sabbanni koo duumessa keessaan mul’atutti, ani isa ilaalee kakuu bara baraa kan Waaqaa fi uumamawwan lubbu qabeeyyii gosa hundaa kanneen lafa irra jiraatan gidduu jiru sana nan yaadadha.”

¹⁷ Kanaafuu Waaqni Nohiin, “Kun mallattoo kakuu ani ofii kootii fi lubbuu lafa irra jiraatu hunda gidduu dhaabe sanaa ti” jedhe.

Ilmaan Nohi

¹⁸ Ilmaan Nohi warri doonii keessaa ba’an Seem, Haamii fi Yaafet turan. Haam abbaa Kana’aanii ti. ¹⁹ Ilmaan Nohi jara kana sadan turan; sanyiin namaa kan lafa hunda irra bittinneeffames isaanuma irraa argame.

²⁰ Nohi qonnaan bulaa ta’ee wayinii dhaabuutti nama jalqabaa ture. ²¹ Innis daadhii wayinii sanaa dhugee machaa’e; qullaa isaas dunkaana isaa keessa ciise. ²² Haam abbaan Kana’aan qullaa abbaa isaa argee obboloota isaa lamaan ala turanitti hime. ²³ Seemii fi Yaafeti garuu wayyaa fuudhanii gatiitti isaanii lamaan irra buufatanii dugda duubaan deemanii qullaa abbaa isaanii uffisan. Waan fuulli isaanii achi garagalee tureef isaan qullaa abbaa isaanii hin argine.

²⁴ Nohis yeroo machiin isaa irraa galetti waan ilmi isaa inni xinnaan isatti hojjete beekee ²⁵ akkana jedhe;

“Kana’aan abaaramaa haa ta’u!

Inni obboloota isaatiif
garba garbootaa haa ta’u.”

²⁶ Akkanas jedhe;

“WAAQAYYO Waaqni Seem haa eebbifamu!

Kana’aan immoo garbicha Seem haa ta’u.

²⁷ Waaqni biyya Yaafet haa bal’isu;

Yaafet dunkaanota Seem keessa haa jiraatu;

Kana’aan immoo garbicha isaa haa ta’u.”

²⁸ Bishaan badiisaa booddee Nohi waggaa 350 jiraate. ²⁹ Walumatti Nohi waggaa 950 jiraatee du’e.

10

Sanyii Ilmaan Nohi

¹ Seenaan ilmaan Nohi jechuunis kan Seem, kan Haamii fi kan Yaafet kana; isaanis bishaan badiisaa booddee ilmaan dhalchan.

Sanyii Yaafeti

10:2-5 kwf - 1Sn 1:5-7

² Ilmaan Yaafet:

Goomer, Maagoog, Meedee, Yaawaan, Tuubaal, Meshekii fi Tiiraas turan.

³ Ilmaan Goomer:

Ashkenas, Riifaatii fi Toogarmaa turan.

⁴ Ilmaan Yaawaan:

Eliishaa, Tarshiish, Kitiimii fi Roodaanota turan. ⁵ Uummanni qarqara galaanaas tokkoon tokkoon isaanii akkuma afaan isaaniittii fi akkuma saba isaaniitti gara biyyoota isaaniitti bibittinnaa’an.

Sanyii Kaam

10:6-20 kwf - 1Sn 1:8-16

- ⁶ Ilmaan Haam:
Kuushi, Misrayim, Fuuxii fi Kana'aan turan.
- ⁷ Ilmaan Kuushi:
Saabaa, Hawiilaa, Sabtaa, Ra'ima'a fi Sabtekaa turan.
- Ilmaan Ra'ima'a:
Shebaa fi Dedaan turan.
- ⁸ Kuushi abbaa Naamruud; Naamruudis lafa irratti loltuu jabaa ta'e. ⁹ Innis fuula WAAQAYYOO duratti adamsaa jabaa ture; kanaafuu, "Fuula WAAQAYYOO duratti adamsaa jabaa akka Naamruudi" jedhame. ¹⁰ Jalqabni mootummaa isaa Shine'aar keessatti Baabilon, Ereki, Akaadii fi Kaalnee ture. ¹¹ Innis biyya sanaa ba'ee Asoor dhage; achittis Nanawwee, Rehoobootii fi Kaalaha ijaare; ¹² akkasumas Resen ishee Nanawwee fi Kaalah gidduutti argamtu ni ijaare; Resen kunis magaalaa guddoo dha.
- ¹³ Misrayim immoo abbaa
Luudii mootaa, Anaamiimotaa, Lahaabiimotaa, Naftahiimotaa, ¹⁴ Fatrusiimotaa, Kaseluhiiimotaa, jechuunis warra Filisxeemonni irraa dhalatani fi Kaftooriimotaa ti.
- ¹⁵ Kana'aan abbaa Siidoon
ilma isaa hangaftichaa, akkasumas kan Heetotaa, ¹⁶ Yebuusotaa, Amoorotaa, Girgaashotaa, ¹⁷ Hiiwotaa, Arkaawotaa, Siinotaa, ¹⁸ Arwaadewotaa, Zemaarotaatii fi Hamaatootaa ture.
- Ergasii gosoonni Kana'aan ni bibittinnaa'an; ¹⁹ daariin Kana'aanis Siidoonii ka'ee karaa Geraaraatiin hamma Gaazaatti bal'ate; karaa Sodoom, Gomoraa, Adimaatii fi Zeboo'iimiitiinis hamma Lashaatti bal'ate.
- ²⁰ Ilmaan Haam akkuma gosaa fi afaan isaaniitti, akkuma biyyaa fi saba isaaniitti kanneenii dha.
- Sanyii Seem*
10:21-31 kwi - Uma 11:10-27; 1Sn 1:17-27
- ²¹ Seemiifis ilmaan ni dhalatan; obboleessi Seem hangafti Yaafet ture; Seemis abbaa ilmaan Eeber hundaa ture.
- ²² Ilmaan Seem
Eelaam, Ashuur, Arfaakshad, Luudii fi Arraam turan.
- ²³ Ilmaan Arraam
Uuzi, Huuli, Geterii fi Meshak turan.
- ²⁴ Arfaakshad Sheelaa dhalche;
Sheelaan immoo Eeberin dhalche.
- ²⁵ Eeberiifis ilmaan lamatu dhalate; sababii bara isaa keessa lafti gargar qoodamteef maqaan isa tokkoo Felegi jedhamee moggaafame; maqaan obboleessa isaa immoo Yooqxaan jedhamee moggaafame.
- ²⁶ Yooqxaan immoo
Almoodaad, Sheleef, Hazarmaawet, Yaaraa, ²⁷ Hadooraam, Uuzaal, Diqlaa, ²⁸ Oobaal, Abiimaa'eel, Shebaa, ²⁹ Oofiir, Hawiilaa fi Yoobaabin dhalche. Warri kunneen hundinuu ilmaan Yooqxaanii ti.
- ³⁰ Lafti jireenya isaanii Meeshaa ka'ee karaa Sefariitiin hamma gaarran ba'a biiftuutti bal'ata.
- ³¹ Ilmaan Seemi akkuma gosaa fi afaan isaaniitti, akkuma biyyaa fi saba isaaniitti kanneenii dha.
- ³² Warri kun gosoota ilmaan Nohi kanneen akkuma dhaloota isaaniitti saba isaanii keessa jirani dha; bishaan badiisaatiin booddee saboonni warruma kana irraa lafa irra faffaca'an.

11

Gamoo Baabel

¹ Bara sana addunyaan guutuun afaan tokkoo fi haasaa tokko qaba ture. ² Namoonni akkuma gara ba'a biiftuutti godaananiin, Shine'aar keessatti lafa diriiraa argatanii achi qabatan.

³ Isaanis, "Kottaa mee xuubii hojjennee ibiddaan gubnaa" waliin jedhan. Isaanis qooda dhagaa, xuubiitti fayyadaman; haphedhaaf immoo leeleetti fayyadaman. ⁴ Ergasii, "Kottaa mee akka ofii keenyaa maqaa argannuu fi akka addunyaa guutuu irra hin bibittinnoofneef magaalaa gamoon isaa samii qaqqabu tokko ijaarrannaa" jedhan.

⁵ WAAQAYYO garuu magaalaa fi gamoo isaan ijaaraa turan sana ilaaluuf gad bu'e. ⁶ WAAQAYYOS akkana jedhe; "Erga isaan akka saba tokko kan afaanuma tokko dubbatuutti waan kana hojjechuu jalqabani, yoos amma wanni isaan hojjechuuf karoofatan kan isaaniif hin danda'amne tokko iyyuu hin jiraatu. ⁷ Kottaa mee gad buunee, akka isaan wal hin hubanneef afaan isaanii waliin dhoofnaa!"

⁸ Kanaafuu WAAQAYYO achii isaan baasee lafa hunda irra isaan bittinnesse; isaanis magaalaa ijaaruu dhiisan. ⁹ Waan WAAQAYYO achitti afaan addunyaa hunda waliin makeef iddoon sun Baabilon jedhame; WAAQAYYO iddoo sanaa isaan baasee lafa hunda irra isaan bittinnesse.

Seemii Jalqabee Hamma Abraamitti

11:10-27 kwf - Uma 10:21-31; 1Sn 1:17-27

¹⁰ Seenaan maatii Seem kana.

Bishaan badiisaa booddee waggaa lamatti Seem yeroo umuriin isaa waggaa 100 guutetti Arfaakshadin dhalche. ¹¹ Seem erga Arfaakshadin dhalchee booddee waggaa 500 jiraatee ilmaanii fi intallan biraa dhalche.

¹² Arfaakshad waggaa 35 jiraatee Sheelaa dhalche. ¹³ Arfaakshad erga Sheelaa dhalchee booddee waggaa 403 jiraatee ilmaanii fi intallan biraa dhalche.

¹⁴ Sheelaan waggaa 30 jiraatee Eeberin dhalche. ¹⁵ Sheelaan erga Eeberin dhalchee booddee waggaa 403 jiraatee ilmaanii fi intallan biraa dhalche.

¹⁶ Eeber waggaa 34 jiraatee Felegin dhalche. ¹⁷ Eeber erga Felegin dhalchee booddee waggaa 430 jiraatee ilmaanii fi intallan biraa dhalche.

¹⁸ Felegi waggaa 30 jiraatee Re'uu dhalche. ¹⁹ Felegi erga Re'uu dhalchee booddee waggaa 209 jiraatee ilmaanii fi intallan biraas dhalche.

²⁰ Re'uun waggaa 32 jiraatee Seruugin dhalche. ²¹ Re'uun erga Seruugin dhalchee booddee waggaa 207 jiraatee ilmaanii fi intallan biraa dhalche.

²² Seruugi waggaa 30 jiraatee Naahoorin dhalche. ²³ Seruugi erga Naahoorin dhalchee booddee waggaa 200 jiraatee ilmaanii fi intallan biraa dhalche.

²⁴ Naahoor waggaa 29 jiraatee Taaraa dhalche. ²⁵ Naahoor erga Taaraa dhalchee booddee waggaa 119 jiraatee ilmaanii fi intallan biraa dhalche.

²⁶ Taaraan waggaa 70 jiraatee Abraam, Naahoorii fi Haaraanin dhalche.

Maatii Abraam

²⁷ Seenaan maatii Taaraa kana.

Taaraan Abraam, Naahoorii fi Haaraanin dhalche. Haaraan immoo Looxin dhalche. ²⁸ Haaraan utuma abbaan isaa Taaraan jiruu Uuri biyya Kaldootaa keessatti lafuma itti dhalatetti du'e. ²⁹ Abraamii fi Naahoor niitii fuudhan. Maqaan niitii Abraam Saaraa, maqaan niitii Naahoor immoo Miilkaa ture. Miilkaan intala Haaraan. Haaraan kun immoo abbaa Miikaatii fi Yiskaa ture. ³⁰ Saaraan dhabduu turte; ijoollees hin deenye.

³¹ Taaraan ilma isaa Abraamin, ilma ilma isaa jechuunis Loox ilma Haaraanii fi niitii ilma isaa jechuunis Saaraa niitii Abraam fudhatee Kana'aan dhaquuf, Uuri biyya Kaldootaatii walii wajjin ba'an; garuu yeroo Kaaraan ga'anitti achuma qubatan.

³² Taaraan waggaa 205 jiraatee Kaaraanitti du'e.

12

Waamamuu Abraam

¹ WAAQAYYO Abraamiin akkana jedhe; "Biyya kee, saba keetii fi mana abbaa keetii dhiisiitii gara biyya ani si argisiisuu dhaqi.

² "Ani saba guddaa sin taasisa;
sin eebbisas;

maqaa kee illee guddaa nan taasisa;
atis eebba taataa.

³ Ani warra si eebbisan nan eebbisa;
warra si abaaran nan abaara;

sabni lafa irraa hundinuu
karaa keetiin eebbifama."

⁴ Kanaafuu Abraam akkuma WAAQAYYO isatti himetti ka'ee deeme; Looxis isa wajjin deeme. Abraam yeroo Kaaraanii ba'etti nama waggaa torbaatamii shan ture. ⁵ Innis niitii isaa Saaraa, ilma obboleessa isaa Loox, qabeenya walitti kuufatan hundumaa fi

namoota Kaaraanitti argatan hundumaa qabatee Kana'aan dhaquuf ka'ee; isaanis achi ga'an.

⁶ Abraamis hamma qilxuu Mooree kan Sheekem keessatti argamuutti biyyattii keessa deeme. Yeroo sana warri Kana'aan biyya sana keessa turan. ⁷ WAAQAYYO Abraamitti mul'atee, "Ani biyya kana sanyii keetiif nan kenna" jedheen. Kanaafuu inni achitti WAAQAYYO isatti mul'ate sanaaf iddoo aarsaa ijaare.

⁸ Achii ka'ee gara gaarran Beet'eel irraa gara ba'a biiftuutti argamanii deeme Beet'eelin gara lixa biiftuutti, Aayin immoo gara ba'a biiftuutti hambisee dunkaana isaa dhaabbate. Achitti WAAQAYYOOF iddoo aarsaa ijaaree maqaa WAAQAYYOO waammate.

⁹ Abraam ergasii ka'ee gara Negeebitti karaa isaa itti fufe.

Abraam Biyya Gibxi Keessatti

12:10-20 kwi - Uma 20:1-18; 26:1-11

¹⁰ Bara sana beelli biyya sanatti bu'ee ture; beelli sun waan hammaateef Abraam achi jiraachuuf jedhee Gibxitti gad bu'e. ¹¹ Innis yeroo Gibxi seenuu ga'etti niitii isaa Saaraan akkana jedhe; "Ani akka ati dubartii bareedduu taate nan beeka. ¹² Warri Gibxi yommuu si argan, 'Kun niitii isaa ti' jedhanii na ajjeesu; si'i immoo ni hambisu. ¹³ Akka isaan siif jedhanii haala tolaan na ilaalanii fi akka lubbuun koos sababii keetiin du'a ooltuuf maaloo, 'Ani obboleettii isaa ti' jedhi."

¹⁴ Yeroo Abraam Gibxi seenettis warri Gibxi akka Sooraan dubartii baay'ee bareedduu taate argan. ¹⁵ Qondaaltonni Fara'oonis yommuu ishee arganitti ishee jajanii Fara'oonitti himan; isheenis masaraa mootummaa Fara'ooniitti geeffamte. ¹⁶ Fara'oon sababii isheetiif jedhee Abraamin haala tolaadhaan ilaale; Abraamis hoolotaa fi loon, harroota korommii fi dhaltuu, tajaajiltoota dhiiraa dubartii, gaalas argate.

¹⁷ WAAQAYYO garuu sababii niitii Abraam, sababii Saaraatiif jedhee Fara'oonii fi warra mana isaa jiraatan dhukkuba hamaan dha'e. ¹⁸ Kanaafuu Fara'oon Abraamin ofitti waamee akkana jedheen; "Ati maal natti hojjetee? Akka isheen niitii kee taate maaliif natti hin himin? ¹⁹ Ati maaliif, 'Isheen obboleettii koo ti' jettee, akka ani niitummaaf ishee fudhadhu na goote? Ammas niitiin kee kunoo ti; ishee fudhadhuu deemi!" ²⁰ Fara'oonis waa'ee Abraam irratti namoota isaa ajaje; isaanis Abraamii fi niitii isaa, waan inni qabu hunda wajjin geggeessan.

13

Abraamii fi Loox Gargar Ba'uu Isaanii

¹ Abraam niitii isaatii fi waan qabu hunda wajjin Gibxii ka'ee Negeebitti ol ba'ee; Looxis isa wajjin deeme. ² Abraamis horiin, meetii fi warqeedhaan akka malee soorome.

³ Innis Negeebii ka'ee hamma Beet'eel, iddoo Beet'eelii fi Aayi gidduu, lafa dunkaanni isaa jalqabatti ture sana ga'utti iddoo tokkoo gara iddoo biraatti deemsa isaa itti fufe; ⁴ iddoo sunis lafa inni yeroo jalqabaatiif iddoo aarsaa itti ijaaree dha. Abraamis achitti maqaa WAAQAYYOO waammate.

⁵ Loox namichi Abraam wajjin deemaa ture suni akkasuma bushaayee, saawwanii fi dukaanota qaba ture. ⁶ Yeroo isaan walii wajjin jiraatanitti lafti isaanitti dhiphatte; sababii qabeenyi isaanii akka malee guddateefis isaan wal bira jiraachuu hin dandeenye. ⁷ Kanaafuu tiksoota Abraamii fi tiksoota Loox gidduutti lollu uumame. Yeroo sanatti Kana'aanonni fi Feerzonnis biyya sana keessa jiraachaa turan.

⁸ Abraamis Looxiin akkana jedhe; "Nu waan obboloota taaneef, si'ii fi ana gidduu yookaan tiksoota keetii fi tiksoota koo gidduu lolli hin jiraatin. ⁹ Lafti inni fuula kee dura jirti mitii? Kottu gargari godaannaa. Yoo ati gara bitaatti deemte, ani gara mirgaatti nan deema; yoo ati gara mirgaatti deemte immoo ani gara bitaatti nan deema."

¹⁰ Looxis ol jedhee ilaalee akka hurufni Yordaanos hundi akkuma iddoo biqiltuu WAAQAYYOO akkuma biyya Gibxi kan karaa Zo'ar irra jiru sanaa bishaan baay'ee qabu arge. Kunis utuu WAAQAYYO Sodoomii fi Gomoraa hin balleessiniin dura ture. ¹¹ Kanaafuu Loox hurufa Yordaanos guutummaatti ofii isaatii filatee gara ba'a biiftuutti godaane. Jarri lamaanis akkasitti gargari ba'an. ¹² Abraam biyya Kana'aan keessa jiraate; Loox immoo magaalawwan dirree irra jiran gidduu jiraatee dunkaana isaa Sodoom bira dhaabbate. ¹³ Warri Sodoom jal'oota fuula WAAQAYYOO duratti akka malee cubbuu hojjetan turan.

¹⁴ Erga Loox isa biraa godaanee booddee WAAQAYYO Abraamiin akkana jedhe; "Iddoo amma jirtu kanaa ija kee ol fudhadhuutti gara kaabaa fi kibbaa, gara ba'a biiftuutti fi lixa biiftuu ilaali. ¹⁵ Anis biyya ati argitu kana hunda bara baraan si'ii fi sanyii keetiif nan kenna. ¹⁶ Ani sanyii kee akkuma biyyoo lafaa nan baay'isa; yoo namni biyyoo lafaa

lakkaa'uu danda'e, sanyiin kee akkasuma lakkaa'amu danda'a. ¹⁷ Ka'iiiti dheerinaa fi bal'ina lafa kanaa keessa dedeemi; ani isa siihin kennaatii."

¹⁸ Kanaafuu Abraam dunkaana isaa buqqifatee qilxuwwan Mamree kanneen Kebroonitti argaman bira jiraachuu dhaqe; achittis iddoo aarsaa WAAQAYYOOF tolche.

14

Looxi Harka Diinaatii Baafame

¹ Bara sana keessa Amraafel mootiin Shine'aar, Ariyook mootiin Elaasaar, Kedoorlaa'omer mootiin Eelaamii fi Tidi'aal mootiin Sabootaa ka'anii, ² Beraa mooticha Sodoom, Birishaa mooticha Gomoraa, Shinaab mooticha Adimaa, Shemeeber mooticha Zeboo'iimii fi mooticha Belaa ishee Zo'aar jedhamtu sanaa loluu dhaqan. ³ Mootonni shanan kunneen hundi sulula Siidiim isa Galaana Soogiddaa jedhamu keessatti wal ga'anii humna tokkummaa uummatan. ⁴ Isaanis waggaa kudha shan Kedoorlaa'omer jalatti bulan; waggaa kudha sadaffaatti garuu ni fincilan.

⁵ Waggaa kudha afuraffaatti Kedoorlaa'omerii fi mootonni isa wajjin turan ba'anii warra Refaayim Ashteroot Qaarnaayimiitti, warra Zuuzim Haamitti, warra Eemiim Shaawii Kiriyaataayimiitti, ⁶ warra Hoori immoo lafa gaara See'iiriitii jalqabanii hamma Eel Phaaraan kan gammoojjiitti dhi'oo jiru sanaatti mo'atan. ⁷ Ergasii of irra deebi'anii Een Mishiphaati jechuunis Qaadash dhaqanii biyya warra Amaaleq hundaa fi warra Amoor kanneen Hazezoon Taamaar keessa jiraatan humnaan qabatan.

⁸ Mootichi Sodoom, mootichi Gomoraa, mootichi Adimaa, mootichi Zeboo'iimii fi mootichi Belaa jechuunis Zo'aar ba'anii Sulula Siidiim keessatti loluuf hiriiran. ⁹ Isaanis Kedoorlaa'omer mootii Eelaam, Tidi'aal mootii Sabootaa, Amraafel mootii Shine'aariitii fi Ariyook mootii Elaasaar lolan; mootonni afran kunneen mootota shananiin morman. ¹⁰ Sululli Siidiim boolla leeleetiin guutamee ture; mootonni Sodoomii fi mootonni Gomoraas baqatanii namoonni tokko tokko boolla sana keessa bu'an; warri hafan immoo gara gaarraniitti baqatan. ¹¹ Mootonni afran sun mi'aa fi nyaata warra Sodoomii fi Gomoraa hunda saamanii sokkan. ¹² Waan Loox ilmi obboleessa Abraam Sodoom keessa jiraachaa tureef mootonni sun isa illee qabeenyuma isaa wajjin booji'anii deeman.

¹³ Namichi baqatee ba'e tokko dhufee oduu kana Abraam Ibrichatti hime. Abraamis qilxuwwan Mamree kan namicha Amoorii sana bira jiraachaa ture; Mamreen kun obboleessa Eshkoolii fi Aaneer ture; isaan Abraam wajjin kakuu galanii turan. ¹⁴ Abraam akka firri isaa booji'ame dhageenyaan namoota mana isaatti dhalatani leenjifaman 318 walitti waammatee hidhachiisee hamma Daaniitti faana bu'e. ¹⁵ Abraamis isaan loluuf jedhee halkaniin namoota isaa gargari qoode; hamma Hoobaa ishee kaaba Damaasqootti argamtu sanaattis faana bu'ee isaan dha'e. ¹⁶ Innis mi'a hunda deebifate; fira ofii isaa Looxii fi qabeenya isaa, dubartootaa fi namoota kaanis deebifate.

¹⁷ Abraam Kedoorlaa'omerii fi mootota isa wajjin turan mo'atee deebinaan mootiin Sodoom Sulula Shaawii kan Sulula Mootii jedhamu keessatti isa simachuu ba'e.

¹⁸ Malkiiseedeq mootiin Saaleemis buddeenaa fi daadhii wayinii fideef; innis luba Waaqayyo Waaqa Waan Hundaa Oliy ture; ¹⁹ innis akkana jedhee Abraamin eebbise; "Abraam, Waaqayyo Waaqa Waan Hundaa Oliy,

isa samii fi lafa uume sanaan haa eebbifamu.

²⁰ Waaqayyo Waaqni Waan Hundaa Oliy,

inni diinota kee dabarsee harka keetti kenne sun haa eebbifamu."

Ergasii Abraam waan hunda irraa kudhan keessaa tokko isaaf kenne.

²¹ Mootiin Sodoomis Abraamiin, "Namoota naa kenniitii qabeenya immoo ofii keetii fudhadhu" jedhe.

²² Abraam garuu mootii Sodoomiitiin akkana jedhe; "Ani harka koo gara WAAQAYYO, Waaqa Waan Hundaa Oliy, Uumaa samiitii fi lafaatti ol fudhadhee kakadheen jira; ²³ akka ati, 'Anatu Abraamin sooromse' hin jenneef ani waan kan kee ta'e keessaa tokko iyyuu, fo'aa yookaan teepha ittiin kophee hidhatan iyyuu hin fudhadhu. ²⁴ Waan namoonni koo nyaatanii fi qooda namoota ana wajjin deemanii jechuunis qooda Aaneer, kan Eshkooliitii fi kan Mamree malee ani ofii koo homaa hin fudhadhu; isaan qooda isaani haa fudhatan."

15

Kakuu Waaqni Abraam Wajjin Gale

¹ Kana booddee dubbiin WAAQAYYOO mul'ataan gara Abraam dhufee akkana jedhe; "Yaa Abraam hin sodaatin;

ani gaachana keetii fi gatii kee guddicha.”

² Abraam garuu, “Yaa WAAQAYYO Gooftaa, waan ani ijoollee hin qabneef namni qabeenya koo dhaaluuf jiru Eli’ezer namicha Damaasqoo kana; egaa ati maal naa kennita?” jedhe. ³ Abraam, “Kunoo ati ijoollee tokko illee naa hin kennine; hojjetaan mana koo jiraatu tokko kunoo na dhaaluuf jira” jedhe.

⁴ Kunoo dubbiin WAAQAYYOO gara isaa dhufee, “Ilma gudeeda keetiitu dhaaltuu kee ta’a malee namichi kun dhaaltuu kee hin ta’u” jedhe. ⁵ Innis Abraamin gad baasee, “Samiwwan ol ilaaliitii yoo urjiwwan lakkaa’uu dandeesse lakkaa’i” jedhe. Itti fufees, “Sanyiin kees akkanuma baay’ata” jedheen.

⁶ Abraam WAAQAYYOTTI amane; innis qajeelummaatti lakkaa’eeef.

⁷ Innis, “Ani WAAQAYYO isa akka ati ishee dhaaltuuf biyya kana siif kennuuf jedhee Uuri biyya Kaldootaa keessaa si baasee dha” jedheen.

⁸ Abraam garuu, “Yaa WAAQAYYOO Gooftaa, ani biyya kana dhaaluu koo akkamittin beeka?” jedhe.

⁹ Kanaafuu WAAQAYYO, “Goromsa tokko, re’ee tokkoo fi korbeessa hoolaa tokko kanneen tokkoon tokkoon isaanii waggaa sadii sadii guutan, akkasumas gugee tokkoo fi gugee sookkee tokko naa fidi” jedheen.

¹⁰ Abraamis warra kana hunda gara isaatti fidee, qixxee lamaanitti kukkute; warra qixxee lamaanitti kukkutamanis gamaa gamana kaa’e; simbirroota garuu qixxee lamaanitti hin kukkunne. ¹¹ Ergasii allaattiin foon sanatti gad buute; Abraam garuu irraa ari’e.

¹² Utuma aduun dhi’aa jirtuu hirribni guddaan Abraamin qabe; kunoo dukkanni guddaani fi sodaachisaan isa irra bu’e. ¹³ WAAQAYYOS akkana isaan jedhe; “Akka sanyiin kee biyya kan isaa hin ta’in keessatti alagaa ta’ee waggaa dhibba afuris achitti garboomfamee cunqurfamu dhugumaan beeki. ¹⁴ Ani garuu saba isaan akkuma garbootaati tajaajilan sana nan adaba; ergasii immoo isaan qabeenya guddaa fudhatanii achii ba’u. ¹⁵ Ati garuu nagaan gara abbootii keetii dhaqxa; bara dheeraas jiraattee awwaalanta. ¹⁶ Sanyiin kee dhaloota afuraffaatti as deebi’a; cubbuun Amoorotaa amma iyyuu hin guunneetii.”

¹⁷ Yommuu aduun lixee dukkanaa’ettis kunoo barbadaan ibiddaa aaru guca tokko wajjin mul’atee foon kukkutame sana gidduu darbe. ¹⁸ Gaafa sanas WAAQAYYO akkana jedhee Abraam wajjin kakuu gale; “Ani biyya laga Gibxii jalqabee hamma laga Efraaxiis guddichaatti jiru kana sanyii keetiif nan kenna; ¹⁹ kunis biyya Qeenotaa, Qenezotaa, Qadmoonotaas, ²⁰ kan Heetotaa, Feerzotaa, Refaayimootaa, ²¹ Amoorotaa, Kana’aanotaa Girgaashotaatii fi kan Yebuusotaa jechuu dha.”

16

Aggaarii fi Ishmaa’eel

¹ Saaraan niitiin Abraam ijoollee isaaf hin deenye turte. Garuu isheen garbittii Aggaar jedhamtu tokko qabdi turte; Aggaaris nama biyya Gibxi turte; ² Saaraanis Abraamiin, “Kunoo WAAQAYYO ijoollee na dhowwateera. Dhaqitii garbittii koo wajjin ciisi; tarii ani karaa isheetiin ijoollee nan argadhan ta’aatii” jette.

Abraamis waan Sooraan jette fudhate. ³ Erga Abraam waggaa kudhan Kana’aan keessa jiraatee booddee niitiin isaa Saaraan garbittii ishee Aggaar kan nama biyya Gibxi turte sana fuutee akka isheen niitii isaa taatuuf dhirsa isheetiif kennite. ⁴ Abraamis Aggaar wajjin ciise; isheenis ni ulfoofte.

Yommuu akka ulfoofte of irratti beektetti giiftii ishee tuffachuu jalqabde. ⁵ Saaraan immoo Abraamiin, “Miidhaa na mudate kanatti situ gaafatama. Garbittii koo anattu bobaa kee jala siif galche; amma garuu isheen akka ulfoofte of irratti beeknaan na tuffatte. Egaa WAAQAYYO sii fi ana gidduutti murtii haa kennu” jette.

⁶ Abraamis, “Garbittiin kee keessa harkuma kee jirti; waanuma feete ishee godhi” jedheen. Saaraanis akka malee ishee cunqursite; kanaafuu Aggaar fuula ishee duraa sokkite.

⁷ Ergamaan WAAQAYYOO gammoojjii keessatti, burqaa bishaanii tokko biratti Aggaarin arge; burqaan bishaanii sunis karaa Shuuritti geessu irra ture. ⁸ Ergamaan sunis, “Yaa Aggaar, garbittii Saaraa, ati eessaa dhufte? Eessa dhaquutti jirta?” jedhe.

Isheenis, “Giiftii koo Saaraa baqachuuttin jira” jetteen.

⁹ Kana irratti ergamaan WAAQAYYOO sun, “Gara giiftii keetiitti deebi’i; gad of qabiitii isheef buli” jedheen. ¹⁰ Ergamaan Waaqayyoo sunis itti dabalee, “Ani sanyii kee

akka malee nan baay'isa; sababii baay'ina isaatiifis namni tokko iyyuu lakkaa'uu hin danda'u" jedhe.

¹¹ Ergamaan WAAQAYYOO sun amma illee akkana isheen jedhe; "Kunoo ati ulfoofteerta;

ilmas ni deessa.

Maqaa isaas Ishmaa'eel jedhii moggaasi;

WAAQAYYO dhiphachuu kee dhaga'eeraatii.

¹² Inni nama akka harree diidaa ta'a;

harki isaa nama hunda irratti ka'a;

harki nama hundaas isa irratti ka'a;

obboloota isaa hundaanis jibbamaa jiraata."

¹³ Isheenis maqaa WAAQAYYO isheetti dubbate sanaa, "Elroo'ii" jettee waamte. Isheen, "Ani dhugumaan Isa na argu sana argeera" jetteertiitii. ¹⁴ Sababiin boolli bishaanii sun, "Be'eer Lahaayiroo'ii" jedhameefis kanuma. Innis hamma har'aatti illee Qaadeshii fi Bereed gidduu jira.

¹⁵ Aggaaris Abraamiif ilma deesse; Abraamis ilma isheen deesse sana Ishmaa'eel jedhee moggaase. ¹⁶ Yeroo Aggaar Ishmaa'eelin isaaf deessetti Abraam nama waggaa saddeettamii ja'aa ture.

17

Kakuu Dhagna qabaa

¹ Yeroo Abraam nama waggaa sagaltamii sagalii turetti WAAQAYYO isatti mul'atee akkana jedheen; "Ani Waaqa Waan Hundumaa Danda'uu dha; ati fuula koo dura amanamummaan deddeebi'i; hir'inās hin qabaatin. ² Ani kakuu koo anaa fi si gidduu nan dhaaba; guddaas sin baay'isa."

³ Abraamis adda isaatiin lafatti gombifame; Waaqnis akkana isaan jedhe; ⁴ "Kunoo, kakuun ani si wajjin galu kana: ati abbaa saba baay'ee taata. ⁵ Ati si'achi Abraam jedhamtee hin waamantu; waan ani abbaa saboota baay'ee si taasiseef maqaan kee Abrahaam ta'a. ⁶ Ani akka ati guddaa baay'attu nan godha; akka sabni hedduun si keessaa argamu nan godha; mootonnis si keessaa ni argamu. ⁷ Ani Waaqa keetii fi Waaqa sanyii kee kan si duubaan dhufuu ta'uuf jedhee kakuu koo anaa, sii fi sanyii kee kan si duubaa, dhaloota dhufuuf jiru gidduutti kakuu bara baraa godhee nan dhaaba. ⁸ Biyya Kana'aan guutuu lafa ati amma orma taatee jiraattu kana ani dhaala bara baraa godhee si'ii fi sanyiiwwan kee warra si booddeetiif nan kenna; anis Waaqa isaanii nan ta'a."

⁹ Waaqni Abrahaamiin akkana jedhe; "Ati immoo kakuu koo eeguu qabda; ati, sanyiin kee warri si duubaas dhaloota isaanii keessatti kakuu koo eeguu qabdu. ¹⁰ Kakuun koo kan isin anaa fi si'ii gidduutti, sanyii kee kan si'ii duubaan dhufu gidduuttis eeguu qabdan kanaa dha; innis isin keessaa dhiirri hundinuu dhagna haa qabatu. ¹¹ Qola keessan dhagna qabadhaa; kunis kakuu anaa fi isin gidduu jiruuf mallattoo ta'a. ¹² Isin keessaa dhiirri guyyaa saddeet guute dhagna haa qabatu; dhaloota keessan hunda keessatti dhiirri mana keetti dhalate yookaan kan nama biyya ormaa irraa maallaqa keetiin bitame hundi kan sanyii kee hin ta'in dhagna haa qabatu. ¹³ Mana keetti dhalatanis yookaan maallaqa keetiin bitamanis isaan dhagna haa qabatan. Kakuun koo kan foon keessan irratti godhame kun kakuu bara baraa ta'a. ¹⁴ Dhiirri dhagna hin qabatin, kan qola foon isaa dhagna hin qabatin kam iyyuu saba ofii isaa keessaa balleeffama; inni kakuu koo cabseeraatii."

¹⁵ Waaqni ammas Abrahaamiin akkana jedhe; "Ati si'achi niitii kee Sooraadhaan, Sooraa hin jettu; maqaan ishee Saaraa ta'a. ¹⁶ Ani ishee nan eebbisa; ishee irraas ilma siif nan kenna. Akka isheen haadha sabootaa taatuufis ishee nan eebbisa; mootonni sabootaas ishee keessaa argamu."

¹⁷ Abrahaamis addaan gombifame; kolfees, "Nama waggaa dhibbaatiif ilmi ni dhalataa? Saaraanis waggaa sagaltamatti mucaa deessii?" jedhee yaade. ¹⁸ Abrahaamis Waaqaan, "Maaloo utuu Ishmaa'eel fuula kee dura naa jiraatee!" jedhe.

¹⁹ Waaqnis akkana jedhe; "Tole; garuu niitiin kee Saaraan ilma siif deessi; maqaa isaas Yisihaaq jedhii moggaasi. Anis kakuu koo sanyii isaa kan isa duubaan dhufuuf kakuu bara baraa godhee isa wajjin nan dhaaba. ²⁰ Waa'ee Ishmaa'eel immoo ani si dhaga'eera; kunoo ani, isa nan eebbisa; akka inni baay'atu nan godha; guddaa isa nan baay'isa. Inni abbaa bulchitoota kudha lamaa ta'a; anis saba guddaa isa nan godha. ²¹ Kakuu koo garuu Yisihaaq isa Saaraan waggaa dhufu keessa yeroo kanatti siif deessu

wajjin nan dhaaba.” ²² Waaqni erga Abrahaam wajjin haasa’ee fixatee booddee isa biraa ol ba’ee.

²³ Abrahaamis guyyuma sana ilmaan isaa Ishmaa’eelii fi warra mana isaatti dhalatan yookaan warra maallaqa isaatiin bitaman hunda, dhiira mana isaa hundumaas fuudhee akkuma Waaqni isatti himetti dhagna qabe. ²⁴ Abrahaam yeroo dhagna qabatetti nama waggaa sagaltamii sagalii ture. ²⁵ Ilmi isaa Ishmaa’eel immoo yeroo dhagna qabatetti nama waggaa kudha sadii ture. ²⁶ Abrahaamii fi ilmi isaa Ishmaa’eel guyyuma sana dhagna qabatan. ²⁷ Dhiirri mana Abrahaam hundinuu, warri mana isaatti dhalatan yookaan warri orma irraa maallaqaan bitamanis isa wajjin dhagna qabatan.

18

Keessummoota Sadan

¹ Utuma Abrahaam guyyaa saafaadhaan qilxuu Mamree bira balbala dunkaana isaa dura taa’ee jiruu WAAQAYYO isatti mul’ate. ² Abrahaamis ol ilaalaa namoota isa bira dhadhaabatan sadii arge. Innis akkuma isaan argeen balbala dunkaana isaa duraa ka’ee isaan simachuudhaaf itti fiige; hamma lafa ga’uttis gad jedhee harka fuudhe.

³ Innis akkana jedheen; “Gooftaa ko, yoo ani si duratti fudhatama argadhe, garbicha kee bira hin darbin. ⁴ Bishaan xinnoo isiniif haa fidan; miilla dhiqadhaatii muka kana jala boqodhaa. ⁵ Erga isin gara garbicha keessanii dhufanii, ani akka isin dadhabbii baatanii karaa keessan itti fuftaniif waan isin nyaattan isiniifin kenna.”

Isaanis, “Akkuma jette sana godhi” jedhanii deebisan.

⁶ Kanaafuu Abrahaam dafee Saaraatti dunkaana seenee, “Dafii daakuu bullaa’aa safartuu sadii sukkuumiitii maxinoo tolchi” jedheen.

⁷ Innis gara saawwaniitti fiigee jabbii gabbatee itti tole tokko filatee hojjetaa tokkotti kenne; hojjetaan sunis qopheessuuf ariifate. ⁸ Abrahaamis itittuu fi aannan, foon jabbii qopheeffame sanas geessee isaanii dhi’esse; yeroo isaan nyaachaa turanittis Abrahaam muka tokko jala isaan bira dhaabachaa ture.

⁹ Isaanis, “Niitiin kee Saaraan eessa jirti?” jedhanii isa gaafatan.

Innis, “Kunnoo dunkaana keessa jirti” jedheen.

¹⁰ Isaan keessaa tokko, “Ani dhugumaan bara dhufu keessa yeroo akkanaatti deebi’ee gara kee nan dhufa; niitiin kee Saaraan ilma ni deessi” jedhe.

Yeroo sana Saaraan balbala dunkaana kan isa duubaan jiru keessaan dhaggeeffachaa turte. ¹¹ Abrahaamii fi Saaraan umuriin isaanii dheeratee dulloomanii turan; Saaraanis umurii itti mucaa da’uu daandeessu dabartee turte. ¹² Kanaafuu Saaraan, “Ani erga jaaree bututee, gooftaan koos erga dulloomee booddee, gammachuu kana qabaachuu nan danda’aa?” jettee of keessatti kolfite.

¹³ Kana irratti WAAQAYYO Abrahaamiin akkana jedhe; “Saaraan maaliif, ‘Ani ergan dulloomee booddee amma dhugumaan mucaa nan da’aa?’ jettee kolfite? ¹⁴ Wannii WAAQAYYOF hin danda’amne tokko iyyuu jiraa? Ani bara dhufu keessa yeroo murteeffametti deebi’ee gara kee nan dhufa; Saaraan ilma ni deessi.”

¹⁵ Saaraanis waan sodaatteeff sobdee, “Ani hin kolfine” jette.

Inni garuu, “Lakkii kolfiteertaa” jedhe.

Abrahaam Sodoomiif Kadhachuu Isaa

¹⁶ Namoonni sun yommuu deemuuf ka’anitti gara Sodoom gad ilaalan; Abrahaamis isaan geggeessuuf jedhee isaan wajjin ba’ee. ¹⁷ Ergasii WAAQAYYO akkana jedhe; “Ani waanan gochuuf jiru Abrahaamin nan dhoksaa? ¹⁸ Abrahaam dhugumaan saba guddaa fi jabaa ta’a; sabni lafa irraa hundinuu karaa isaatiin eebbifama. ¹⁹ Akka inni ijoollee isaatii fi sanyii isaa warra isa duubaan dhufan, akka isaan waan qajeelaa fi sirrii ta’e hojjechuudhaan karaa WAAQAYYOO eegan ajajuuf ani isa filadheeraatii; kunis akka WAAQAYYO waan Abrahaamiif kakate sana isaaf guutuuf.”

²⁰ WAAQAYYOS akkana jedhe; “Iyyi Sodoomii fi Gomorraa irratti iyyame guddaa dha; cubbuun isaanis waan akka malee hamaa ta’eef ²¹ ani gad bu’ee akka wannii isaan hojjetan akkuma iyya na qaqqabe sanaa hamaa ta’e nan ilaala. Yoo akkas ta’uu baate immoo natu beeka.”

²² Namoonni sunis garagalaniis Sodoomitti qajeelan; Abrahaam garuu WAAQAYYO dura dhaabatee hafe. ²³ Abrahaamis isatti dhi’aatee akkana jedhe; “Ati nama qajeelaa nama jal’aa wajjin ni balleessitaa? ²⁴ Yoo namoonni qajeeloon shantamni magaalatti keessa jiraatan hoo? Ati dhugumaan ishee ni balleessitaa? Sababii qajeelota shantamman ishee keessa jiraatan sanaatiif jettee ishee hin oolchituu? ²⁵ Qajeelaa fi hamaa wal qixxee ilaaluuudhaan nama qajeelaa nama hamaa wajjin balleessuun sirraa haa fagaatu. Kun sirraa haa fagaatu! Abbaan murtii lafa hundaa waan qajeelaa hin hojjetuu?”

²⁶ WAAQAYYOS, “Ani yoo magaalaa Sodoom keessatti qajeeltota shantama argadhe, isaanii jedhee iddoo sana guutuu nan oolcha” jedhe.

²⁷ Abrahaam ammas akkana jedhe; “Kunoo ani utuman awwaaraa fi daaraa ta’ee jiruu Gooftaatti dubbachuuf ija jabaadheera; ²⁸ yoo baay’inni qajeeltotaa shantama irraa shan hir’ate hoo? Ati sababii namoota shanan sanaatiif jettee magaalaa sana guutuu ni balleessitaa?”

Innis, “Ani yoo nama afurtamii shan achitti argadhe ishee hin balleessu” jedhe.

²⁹ Abrahaam amma illee, “Yoo qajeeltonni afurtamni qofti achitti argaman hoo?” jedhee isatti dubbate.

Gooftaanis, “Ani warra afurtama sanaaf jedhee nan dhiisa” jedhe.

³⁰ Abrahaamis, “Mee nan dubbadhaatii Gooftaan, hin aarin. Yoo namoonni soddomni qofti achitti argaman hoo?” jedhe.

Gooftaanis, “Ani yoon nama soddoma achitti argadhe ishee hin balleessu” jedhee deebise.

³¹ Abrahaamis, “Kunoo amma erga ani Gooftaatti dubbachuuf ija jabaadhe, yoo namoonni digdamni qofti achitti argaman hoo?” jedhe.

Gooftaanis, “Ani sababii namoota digdama sanaatiif jedhee ishee hin balleessu” jedhe.

³² Abrahaamis, “Yaa Gooftaa amma illee yeroo tokko waa sin gaafadhaatii maaloo hin aarin; yoo namni kudhan qofti achitti argame hoo?” jedhe.

Gooftaan immoo, “Ani sababii namoota kurnan sanaatiif jedhee ishee hin balleessu” jedhe.

³³ WAAQAYYOS erga Abrahaam wajjin dubbatee fixee booddee achii deeme. Abrahaam immoo iddoo ofii isaatti deebi’e.

19

Badiisa Sodoomiitii fi Gomoraa

¹ Ergamoonni Waaqayyoo sun lamaan galgala sana Sodoom ga’an; Looxis karra Sodoomii dura taa’aa ture. Innis yeroo jara argetti, isaan simachuuf ka’ee isaanitti deeme; gad jedhees adda isaatiin lafatti gombifame. ² Innis, “Yaa gooftota ko, maaloo mana garbicha keessaniitti goraatii miilla dhiqadhaa bulaa; barri barraaqaan kaatanii karaa keessan itti fufuu dandeessu” jedhe.

Isaan immoo, “Hin ta’u; nu waltajjii karaa irra bullaa” jedhaniin.

³ Inni garuu akka malee isaan dirqisiise; kanaafuu goranii mana isaa seenan; innis maxinoo tolchee nyaata qopheesseef; isaanis ni nyaatan. ⁴ Utuu isaan hin rafin namoonni kutaalee magaalaa Sodoom hunda keessaa dhufan hundi dargaggoonni fi jaarsoliin mana sana marsan. ⁵ Isaanis Looxin waamanii, “Namoonni galgala kana gara kee dhufan eessa jiru? Akka nu isaan wajjin ciifnuuf gad nuu yaasi” jedhan.

⁶ Looxis jara sanatti gad ba’ee balbala of duubaan cufe; ⁷ Akkanas jedhe; “Yaa obholoota ko, waan hamaa kana hin hojjetinaa! ⁸ Kunoo ani intallan lama kanneen takkumaa dhiira wajjin hin ciisin qaba. Lamaanuu gad isinii nan baasa; isinis waan feetan isaan gochuu dandeessu. Namoota kanneen garuu waan isaan bantii mana koo jala jiraniif homaa isaan hin godhinaa.”

⁹ Isaanis, “Badi asii!” jedhaniin. Ittuma fufaniis, “Namichi kun nama ormaa kan nu keessa jiraachuu dhufee dha; amma immoo abbaa murtii nutti ta’uu fedha! Nu waan hamaa jara irratti hojjennu caalaa sirratti hojjenna” jedhaniin. Isaanis Looxin humnaan dhiibanii balbala sana cabsuu ga’an.

¹⁰ Namoonni sunis hiixatanii Looxin harkisanii manatti ol deebisan; balbalichas ni cufan. ¹¹ Ergasii immoo namoota balbala manaa dura turan sana akka isaan balbalicha hin argineef xinnaa fi guddaa isaanii dha’ichaan ija jaamsan.

¹² Namoonni lamaan sun Looxiin akkana jedhan; “Ati nama biraa tokko illee jechuunis soddoota, ilmaan yookaan intallan yookaan nama kan kee ta’ee tokko illee magaalaa kana keessaa qabdaa? Asi keessa isaan baafadhu; ¹³ nu iddoo kana balleessuuf deemnaatii. Sababii iyyi saba ishee irratti iyyame fuula WAAQAYYOO duratti guddaa ta’eef, Waaqni akka nu ishee balleessinuuf nu ergeera.”

¹⁴ Kanaafuu Loox gad ba’ee soddoota isaa warra intallan isaa fuudhuuf jiraniin, “Sababii WAAQAYYOO magaalaa kana balleessuuf ka’eef, dafaatii asii ba’aa!” jedhe. Soddoonni isaa garuu waan inni qoosu se’an.

¹⁵ Yeroo boruun diimatetti ergamoonni Waaqayyoo sun Looxin jarjarsanii, “Niitii keetii fi intallan kee lamaan as jiran fudhadhuutii dafii ba’i! Yoo kanaa achii yeroo magaalattiin adabamtutti atis ni baddaa” jedhaniin.

¹⁶ Inni garuu duubatti harkifate; waan WAAQAYYO isaaniif garaa laafeef namoonni sun harka isaatii fi harka niitii isaa, intallan isaa lamaanis harka qabani magaalattii keessaa isaan baasan. ¹⁷ Akkuma gad isaan baasaniinis ergamoota sana keessaa inni tokko, “Lubbuu kee oolfachuuf baqadhu! Of duuba hin mil’atin! Dirree irra iddoo tokko illee hin dhaabatin! Tulluuwwanitti ol baqadhu; yoo kanaa achii ni baddaa!” jedhe.

¹⁸ Loox garuu akkana isaaniin jedhe; “Yaa gooftota ko, maaloo akkas miti!” ¹⁹ Kunoo garbichi kee fuula kee duratti fudhatama argateera; ati lubbuu koo oolchitee gara laafina guddaa na argisiifteerta. Ani garuu gara tulluutti ol baqachuu hin danda’u; balaan kun na argata; anis nan du’aa. ²⁰ Kunoo, magaalaa itti baqachuun danda’amu tokko as dhi’oo jirti; isheen kanneenoo dha. Ani gara isheetti nan baqadha; isheen baay’ee xinnoo dha mitii? Akkasitti lubbuun koo ni baraaramti.”

²¹ Ergamaan sunis akkana jedheen; “Kunoo, ani kadhaa kana siif nan dhaga’aa; magaalaa ati waa’ee ishee dubbattu kana ani hin balleessu. ²² Garuu sababii ani hamma ati achi geessutti homaa gochuu hin dandeenyeef dafi achitti baqadhu!” Wannii magaalaa sun Zo’aar jedhamteefis kanuma.

²³ Yeroo Loox Zo’aar ga’etti aduun baatee turte. ²⁴ WAAQAYYO samiiwwan keessaa WAAQAYYO biraa, dinyii boba’u Sodoomii fi Gomoraa irratti roobse. ²⁵ Innis akkasiin magaalawwan kanneenoo fi dirreewwan sana guutuu, warra magaalawwan sana keessa jiraatan hundaa fi biqiltuu biyya sanaa balleesse. ²⁶ Niitiin Looxi garuu of duuba ilaaltee utubaa soogiddaa taatee hafte.

²⁷ Abrahaamis guyyaa itti aanu ganama obboroon ka’ee iddoo duraan fuula WAAQAYYOO dura dhaabachaa ture sanatti deebi’ee. ²⁸ Innis gara magaalawwan Sodoomii fi Gomoraa, gara lafa dirree sanaa hundaas ilaaltee aara akka aara boolla ibiddaa keessaa ba’uu tokko isaa biyya sana keessaa ol ka’u arge.

²⁹ Waaqni yeroo magaalawwan dirree sanaa balleessetti Abrahaamin yaadate; kanaafuu yommuu magaalawwan Loox keessa jiraachaa ture balleessetti Looxin balaa sana keessaa baase.

Looxi fi Intallan Isaa

³⁰ Loox waan Zo’aar keessa jiraachuu sodaateef intallan isaa lamaan wajjin Zo’aarii ba’ee gaarran irra qubate. Innis intallan isaa lamaan wajjin holqa tokko keessa jiraate.

³¹ Gaaf tokko intalli isaa isheen hangafti ishee quxisuudhaan akkana jette; “Abbaan keenya dulloomeera; akka bartee lafa hunda irra jiruutti dhiirri nu wajjin ciisu tokko iyyuu naannoo kan hin jiru. ³² Kottu mee abbaa keenya daadhii wayinii obaasnee isa wajjin ciifnaa; akkasiin sanyiin abbaa keenyaa lafa irratti akka hafu goona.”

³³ Isaanis halkan sana abbaa isaanii daadhii wayinii obaasan; intalli isheen hangafti ol seentee isa wajjin ciifte. Inni yeroo isheen ciiste yookaan yeroo isheen kaate hin beekne.

³⁴ Guyyaa itti aanutti intalli hangafti ishee quxisuudhaan akkana jette; “Kunoo ani eda abbaa koo wajjin ciiseera. Kottu edanas daadhii wayinii isa obaasnaa; atis ol seenii isa wajjin ciisi; akkasitti sanyiin abbaa keenyaa akka hafu goona.” ³⁵ Isaan halkan sanas abbaa isaanii daadhii wayinii obaasan; intalli quxisuun dhaqxee isa wajjin ciiste. Inni ammas yeroo isheen ciiste yookaan yeroo isheen kaate hin beekne.

³⁶ Akkasiin intallan Loox lamaanuu abbaa isaaniitiif ulfaa’an. ³⁷ Intalli isheen hangafti ilma deessee maqaa isaa Mo’aab jettee moggaafte. Inni abbaa Mo’aabota har’aa ti. ³⁸ Intalli isheen quxisuunis ilma deessee maqaa isaa Ben-Amii jettee moggaafte; inni immoo abbaa Amoonota har’aa ti.

20

Abrahaamii fi Abiimelek

20:1-18 kwi - Uma 12:10-20; 26:1-11

¹ Abrahaam achii ka’ee Negeebitti godaanee Qaadeshii fi Shuuri gidduu jiraate. Innis yeroodhaaf Geraaraa keessa ture. ² Achittis Abrahaam, “Isheen obboleettii koo ti” jedhee waa’ee niitii isaa, waa’ee Saaraa dubbate. Abiimelek mootiin Geraaraas nama itti ergee Saaraa fudhate.

³ Waaqni immoo halkan abjuudhaan Abiimelekitti dhufee, “Kunoo sababii dubartii sana fuudhatteef ati nama du’ee dha; isheen dhirsaa qabdiitii” jedheen.

⁴ Abiimelek garuu isheetti hin dhi’aanne ture; kanaafuu inni akkana jedhe; “Yaa Gooftaa ati saba qajeelaa balleessitaa? ⁵ Inni mataan isaa, ‘Isheen obboleettii koo ti’ naan hin jennee? Isheenis akkasuma, ‘Inni obboleessa koo ti’ hin jennee? Anis sammuu qulqulluu fi harka qulqulluudhaan waan kana hojjedhe.”

⁶ Waaqni abjuu sana keessa akkana isaan jedhe; “Eeyyee! Ani akka ati sammuu qulqulluudhaan waan kana hojjette beeka; kanaafuu ani akka ati cubbuu natti hin

hojjenneef si dhowween jira. Sababiin ani akka ati ishee bira geessu si hin dhiisiniifis kanuma. ⁷ Egaa amma niitii namichaa deebisiif; inni waan raajii ta'eef, Waaqa siif kadhata; atis ni jiraatta. Garuu yoo ishee deebisuu baatte, ati akka duutu, warri kan kee ta'an hundis akka du'an dhugumaan beeki."

⁸ Abiimelek guyyaa itti aanu ganama obboroon ka'ee qondaaltota isaa hunda walitti waamee waan ta'e hunda isaanitti hime; isaanis akka malee sodaatan. ⁹ Abiimelekis Abrahaamin ofitti waamee akkana jedheen; "Ati maaliif akkana nu goote? Ani maal si goonaan ati cubbuu guddaa akkanaa anaa fi mootummaa kootti fidde? Ati waan namni hin hojjenne anatti hojjette." ¹⁰ Abiimelekis "Ati maaliif waan kana hojjette?" jedhee Abrahaamin gaafate.

¹¹ Abrahaam immoo akkana jedhee deebise; "Ani, 'Biyya kana keessa dhugumaan Waaqa sodaachuun hin jiru; isaan sababii niitii kootiif jedhaniin na ajjeesu' jedheen yaadee ture. ¹² Ta'us isheen dhugumaan obboleettii koo ti; yoo haadha koo irraa dhalachuu baatte iyyuu isheen intaluma abbaa koo ti; isheenis niitii koo taate. ¹³ Anis yeroo Waaqni mana abbaa kootii na baase sana isheedhaan, 'Haalli ati ittiin jaalala naaf qabdu mul'iftu kanaa dha; lafa nu dhaqnu hundumaatti, "Inni obboleessa koo ti" jedhiitii waa'ee koo dubbadhun' jedhe."

¹⁴ Abiimelek ergasii hoolaa fi loon, garboota dhiiraa fi nadheenii fidee Abrahaamiif kenne; niitii isaa Saaraas ni deebiseef. ¹⁵ Abiimelekis, "Kunoo biyyi koo fuula kee dura jira; idduma feete jiraadhu" jedheen.

¹⁶ Saaraadhaanis, "Kunoo ani meetii saqilii kuma tokko obboleessa keetiifin kenna. Kunis akka dhugaa qabaachuun kee fuula warra si wajjin jiranii duratti beekamuuf; ati guutumaa guutuutti dhugaa argatteerta" jedhe.

¹⁷ Abrahaamis Waaqa kadhate; Waaqni immoo Abiimelek, niitii isaatii fi garboota isaa dubartoota fayyise; isaanis ijoollee godhatan. ¹⁸ WAAQAYYO sababii niitii Abrahaam sababii Saaraatiif jedhee gadameessa dubartoota mana Abiimelek jiraatanii hunda cufee tureetii.

21

Dhalachuu Yisihaaq

¹ WAAQAYYO akkuma dubbate sana Saaraa yaadate; WAAQAYYO waan waadaa galeef sana ni raawwateef. ² Saaraan ulfooftee bara dulluma isaa keessa yeruma Waaqni waadaa isaaf seene sanatti Abrahaamiif ilma deesse. ³ Abrahaamis ilma Saaraan isaaf deesse sana Yisihaaq jedhee moggaase. ⁴ Abrahaam akkuma Waaqni isa ajaje sanatti Yisihaaq dhalatee guyyaa saddeettii dhagna isa qabe. ⁵ Yeroo ilmi isaa Yisihaaq dhalateeffitti Abrahaam nama waggaa dhibbaa ture.

⁶ Saaraanis, "Waaqni kolfa naa kenneera; namni waan kana dhaga'u hundis na wajjin kolfa" jette. ⁷ Ittuma fuftees, "Silaa eenyutu Abrahaamiin, 'Saaraan daa'ima hoosisti' jedha ture? Garuu ani bara dulluma isaa keessa ilma nan da'eef" jette.

Aggaarii fi Ishmaa'eel Manaa Ari'amu Isaanii

⁸ Mucichi guddatee harma guufame; Abrahaam gaafa Yisihaaq harma guufame sana cidha guddaa qopheesse. ⁹ Saaraan garuu yeroo ilmi Aggaar Gibxittiin Abrahaamiif deesse sun Yisihaaqitti qoosu argite; ¹⁰ isheenis Abrahaamiin, "Garbittii kanaa fi ilma ishee ari'i; ilmi garbittii kanaa kun ilma koo Yisihaaq wajjin hin dhaaluutii" jette.

¹¹ Wanni kunis sababii ilma isaatiif Abrahaamin akka malee rakkise. ¹² Waaqni garuu akkana jedheen; "Waa'ee garbittii keetiitii fi waa'ee mucichaa hin yaadda'in. Sababii sanyiin kee Yisihaaqiin siif waamamuuf waan Saaraan siin jettu hunda dhaga'i. ¹³ Inni sanyii kee waan ta'eef ani ilma garbittii sanaa saba nan taasisa."

¹⁴ Abrahaamis guyyaa itti aanu ganama obboroon ka'ee nyaata muraasaa fi bishaan qalqala tokko fuudhee Aggaariif kenne. Waan kanas gatiitii ishee irra kaa'eeffii mucaa wajjin ari'e; isheenis achii baatee Gammoojii Bersheebaa keessa joorte.

¹⁵ Yommuu bishaan qalqala keessaa dhumetti, isheen mucaa ishee daggala tokko jala keesse. ¹⁶ Isheenis, "Mucaa kana isaa du'u ani hin ilaalu" jettee garaa isheetti waan yaaddeef gara darba xiyyaa tokko xinnoo achi hiiqxee naannoo isaa teesse; achi teessees sagalee ishee ol fudhattee boosse.

¹⁷ Waaqni boo'icha mucichaa ni dhaga'e; ergamaan Waaqayyoo samii keessaa Aggaarin waamee akkana jedheen; "Yaa Aggaar ati maal taate? Hin sodaatin; Waaqni boo'icha mucichaa iddoo inni ciisee jiruu dhaga'eeraatii. ¹⁸ Sababii ani saba guddaa isa godhuuf ka'itii harka keetiin mucicha ol fuudhi; jabeessitii isa qabi."

¹⁹ Waaqni ija ishee baneefii jennaan boolla bishaanii tokko argite. Kanaafuu dhaqxee qalqala sana bishaaniin guuttee, waan inni dhugu mucichaaf kennite.

²⁰ Waaqnis mucicha wajjin ture; mucichis ni guddate. Innis gammoojjii keessa jiraate; xiyya darbachuudhaanis beekamaa ture. ²¹ Innis gammoojjii Phaaraan keessa jiraate; haati isaas biyya Gibxiitii niitii argatteef.

Walii Galtee Bersheebaatti Godhame

²² Yeroo sana Abiimelekii fi Fiikool ajajaan loltoota isaa Abrahaamiin akkana jedhan; “Waan ati hojjetu hunda keessatti Waaqni si wajjin jira. ²³ Ati akka ana yookaan ijoollee koo yookaan sanyii koo hin gowwoomsine amma as fuula Waaqaa duratti naa kakadhu. Akkuma ani garaa siif laafe sana atis anaa fi biyya amma orma taatee keessa jiraattu kanaaf garaa laafi.”

²⁴ Abrahaamis, “Ani nan kakadha” jedhe.

²⁵ Ergasii Abrahaam waa’ee boolla bishaanii garboonni Abiimelek isa irraa fudhatan tokkoo Abiimelekitti himate. ²⁶ Abiimelek immoo, “Ani nama waan kana hojjetu hin beeku. Atis natti hin himne; ani waa’ee isaa har’uman dhaga’e” jedhe.

²⁷ Kanaafuu Abrahaam hoolaa fi loon fidee Abiimelekiif kenne; jarri lamaanis walii galtee uummatan. ²⁸ Abrahaam gorommii hoolaa torba bushaayee keessaa kophaatti baase; ²⁹ Abiimelekis, “Hiikkaan gorommii hoolaa torban ati kophaa isaanii baafte kanneenii maali?” jedhee Abrahaamin gaafate.

³⁰ Abrahaamis, “Akka ani boolla bishaanii kana qotadhe akka ragaa ta’uuf, gorommii hoolaa torban kanneen na harkaa fudhadhu” jedhee deebise.

³¹ Sababii jarri lamaan sun achitti walii kakataniif iddoon sun Bersheebaa jedhamee waamame.

³² Erga walii galteen sun Bersheebaatti ta’ee booddee Abiimelekii fi Fiikool ajajaan loltoota isaa gara biyya Filisxeemotaatti deebi’an. ³³ Abrahaamis Bersheebaa keessa muka tamirii dhaabe; innis achitti maqaa WAAQAYYO Waaqa Bara Baraa waammate.

³⁴ Abrahaam biyya Filisxeemotaa keessa bara dheeraa jiraate.

22

Abrahaam Qorame

¹ Yeroo muraasa booddee Waaqni Abrahaamin qore. Innis, “Abrahaam!” jedhee isa waame.

Abrahaamis, “Kunoo asan jira” jedhee deebise.

² Waaqnis akkana jedheen; “Ilma kee Yisihaaq, ilma kee tokkicha isa jaallattu sana fudhiitii biyya Mooriyaa dhaqi. Tulluu ani sitti himu irratti qalma gubamu godhiitii isa dhi’eessi.”

³ Abrahaamis guyyaa itti aanu ganama barraaqaan ka’ee harree isaa fe’ate. Innis hojjetoota isaa keessaa nama lamaa fi ilma isaa Yisihaaqin fudhatee qoraan qalma gubamuuf ga’u cabsatee gara iddoo Waaqni isatti hime sanaatti qajeele. ⁴ Guyyaa sadaffaattis Abrahaam ol ilaalee iddoo sana fagootti arge. ⁵ Innis hojjetoota isaatiin, “Isin harree wajjin asuma turaa. Anii fi mucichi duuba sana dhaqnaa; achittis waaqeffannee gara keessanitti deebinaa” jedhe.

⁶ Abrahaamis qoraan aarsaa gubamuuf ta’u fuudhee ilma isaa Yisihaaqin baachise; ofii isaatiin immoo ibiddaa fi billaa harkatti qabate. Isaan lamaan utuu walumaan deema jiranuu, ⁷ Yisihaaq, “Yaa abbaa koo” jedhee abbaa isaa Abrahaamitti dubbate.

Abrahaamis, “Asan jira ilma koo” jedhee deebise.

Yisihaaqis deebisee, “Ibiddii fi qoraan kunoo ti; hoolaan qalma gubamuuf ta’u immoo eessa jira?” jedhe.

⁸ Abrahaamis deebisee, “Yaa ilma ko, Waaqni mataan isaa hoolaa qalma gubamuuf ta’u ni kenna” jedhe. Isaan lamaanis walumaan karaa isaanii itti fufan.

⁹ Yeroo iddoo Waaqni isatti hime sana ga’anitti, Abrahaam iddoo aarsaa achitti ijaaree iddoo aarsaa sana irra qoraan naqe; ilma isaa Yisihaaqin hidhees iddoo aarsaa sana irra qoraan gubbaa ciibse. ¹⁰ Ergasii inni ilma isaa qaluuf jedhee harka isaa hiixatee billaa fudhate. ¹¹ Ergamaan WAAQAYYOO garuu, “Abrahaam! Abrahaam!” jedhee samii keessaa isa waame.

Abrahaamis, “Kunoo asan jira” jedhee deebise.

¹² Innis, “Ati harka keetiin gurbicha hin tuqin; waan tokko illee isa hin godhin. Waan ati ilma kee, ilmuma tokkicha anaaf jettee hin mararfatiiniif, ani akka ati Waaqa sodaattu amma beekeera” jedhe.

¹³ Abrahaamis ol ilaalee kunoo korbeessa hoolaa kan gaanfi isaa daggala keessatti qabamee jiru tokko arge; innis dhaqee hoolaa sana fuudhee qooda ilma isaa qalma gubamu godhee dhi’eesse. ¹⁴ Kanaafuu Abrahaam iddoo sana “WAAQAYYO ni kenna”

jedhee moggaase; hamma har'aatti illee, "Tulluu WAAQAYYOO irratti, ni kennama" jedhama.

¹⁵ Ergamaan WAAQAYYOO sunis samii keessaa lammata Abrahaamin waamee ¹⁶ akkana jedheen; "WAAQAYYOO akkana jedha; sababii ati waan kana gootee fi ilma kee, ilmuma kee tokkicha illee na hin dhowwatiniif ani maqaa kootiin nan kakadha; ¹⁷ ani dhugumaan eebba, sin eebbisa; sanyii kees akkuma urjii samiitii fi akkuma cirracha qarqara galaanaa nan baay'isa. Sanyiiwwan kees magaalawwan diina isaanii ni dhuunfatu. ¹⁸ Waan ati naa ajajamteef sabni lafa irraa hundinuu karaa sanyii keetiin eebbifama."

¹⁹ Ergasii Abrahaam tajaajiltoota isaatti deebi'e; isaanis walumaan Bersheebaatti qajeelan; Abrahaamis Bersheebaa keessa jiraate.

Ilmaan Naahoor

²⁰ Yeroo muraasa booddee akkana jedhamee Abrahaamitti himame; "Kunoo, Miilkaan obboleessa kee Naahooriif ilmaan deesseerti;

²¹ ilmaan isheen deesses inni hangafni Uuzi, obboleessi isaa Buuz, abbaan Arraam immoo Qamu'eel,

²² Keseedi, Hazoo, Fiildaas, Yiidlaafii fi Betuu'eel jedhamu."

²³ Betuu'eel Ribqaa dhalche.

Miilkaan isaan kana saddeettan Naahoor obboleessa Abrahaamiif deesse.

²⁴ Naahor saajjato Re'uumaa jedhamtu tokko qaba ture; isheen ilmaan Xebaa, Gaham, Tahaashii fi Ma'akaa jedhaman deesseef.

23

Saaraan Du'uu ishee

¹ Saaraan waggaa dhibba tokkoo fi digdamii torba jiraatte; barri jireenya Saaraas kanama ture. ² Isheenis Kiriyaati Arbaaq jechuunis Kebroon biyya Kana'aan keessaa sanatti duute; Abrahaamis Saaraadhaaf gadduu fi boo'uudhaaf jedhee dhage.

³ Abrahaam reeffa niitii isaa biraa ka'ee Heetotaan akkana jedhe; ⁴ "Ani gidduu keessanitti ormaa fi keessummaa dha. Akka ani du'aa koo itti awwaalladhuuf lafa awwaalaaf ta'u natti gurguraa."

⁵ Heetonnis akkana jedhanii Abrahaamii fi deebii kennan; ⁶ "Gooftaa, nu dhaga'i. Ati nu gidduutti shuumii jabaa dha. Du'aa kee iddoo awwaala keenyaa keessaa kan akka malee filatamaa ta'etti awwaalladhu. Nu keessaa namni iddoo awwaala isaatti du'aa kee awwaallachuu si dhowwatu tokko iyyuu hin jiru."

⁷ Abrahaamis ol ka'ee fuula namoota biyya sanaa fuula Heetotaa duratti gad jedhee harka fuudhe. ⁸ Akkanas isaaniin jedhe; "Ani du'aa koo akkan awwaalladhu fedhii yoo qabaattan na dhaga'aatii Efron ilma Zoohar sana naa kadhadaa. ⁹ Innis holqa Makfelaa jedhamu kan qarqara lafa qotiisaa isaatti argamu sana natti ni gurgura. Inni iddoo awwaalaa sana gatii guutuudhaan fuula keessan duratti akka natti gurguruuf naa gaafadhaa."

¹⁰ Efron Heetichi saba isaa gidduu taa'aa ture; innis utuma Heetonni gara karra magaalaa isaa dhufan sun hundi dhaga'anuu akkana jedhee Abrahaamiif deebii kenne; ¹¹ "Gooftaa ko, akkana miti; mee na dhaggeeffadhu; ani lafa qotiisaa kana siif nan kenna; holqa achi jirus siif nan kenna; ani fuula saba koo duratti holqa kana siifin kenna; du'aa kee itti awwaalladhu."

¹² Abrahaam amma illee fuula saba biyya sanaa duratti gad jedhee harka fuudhee, ¹³ utuma isaan dhaga'anuu Efroniin, "Yoo fedhii kee ta'e, na dhaga'i. Ani gatii lafa qotiisaa kanaa nan kaffala. Akka ani du'aa koo achitti awwaalladhuuf gatii kana na harkaa fudhadhu" jedhe.

¹⁴ Efronis akkana jedhee Abrahaamiif deebii kenne; ¹⁵ "Gooftaa ko, mee na dhaga'i; gatiin lafa kanaa meetii saqilii dhibba afur ta'a; garuu kun anaa fi si gidduutti maali? Du'aa kee itti awwaalladhu."

¹⁶ Abrahaamis waan Efron dubbate sana fudhatee gatii inni utuma Heetonni dhaga'anuu himate sana madaaleef; gatiin sunis akka madaalii daldaltoota yeroo sanaatti meetii saqilii dhibba afur ture.

¹⁷ Akkasitti lafti qotiisaa Efron kan fuula Mamree dura, Makfelaa keessa jiru sun jechuunis lafti qotiisaatii fi holqi isa keessa jiru, mukni daangaa lafa qotiisaa sana keessa jiru hundi, ¹⁸ fuula Heetota gara karra magaalaa dhufan hundaa duratti akka dhaalaatti Abrahaamitti dabarfame. ¹⁹ Ergasii Abrahaam biyya Kana'aan keessa, holqa Makfelaa kan Mamree bira jechuunis Kebroon bira jiru sanatti niitii isaa Saaraa Awwaallate.

²⁰ Akkasitti lafa qotiisaa sunii fi holqi achi keessaa akka lafa awwaalaa ta'uuf Heetota irraa akka dhaalaatti Abrahaamitti dabarfame.

24

Yisihaaqii fi Ribqaa

¹ Yeroo sana Abrahaam dulloomee, umuriin isaa akka malee dheeratee ture; WAAQAYYOS waan hundumaan isaa eebbise. ² Innis tajaajilaa mana isaa hangafa kan waan inni qabu hunda irratti itti gaafatamaa ta'een akkana jedhe; "Mee harka kee gudeeda koo jala kaa'i. ³ Ani akka ati intallan warra Kana'aa kanneen ani gidduu isaanii jiraadhuu keessaa ilma kootiif niitii hin fidneef WAAQAYYOO Waaqa samiitii fi Waaqa lafaatiin kakattu nan barbaada; ⁴ garuu gara biyya kootii fi gara firoota koo dhaqti ilma koo Yisihaaqiif niitii barbaadi."

⁵ Tajaajilaan sun immoo, "Yoo dubartiin sun na wajjin gara biyya kanaa dhufuuf fedhii qabaachuu baatte hoo? Ani ilma kee gara biyya ati keessaa dhufte sanaatti deebisee geessuun qabaa?" jedhee isa gaafate.

⁶ Abrahaamis akkana isaan jedhe; "Ati akka ilma koo deebiftee biyya sanatti hin geessine of eeggadhu. ⁷ WAAQAYYOO Waaqni samii inni mana abbaa kootii fi biyya ani itti dhaladhe keessaa na fidee, 'Ani biyya kana sanyii keetiif nan kenna' jechuudhaan natti dubbatee kakatee waadaa naa seene sun akka ati achii ilma kootiif niitii fidduuf ergamaa isaa fuula kee dura ni erga. ⁸ Yoo dubartiin sun si wajjin dhufuuf fedhii qabaachuu baatte immoo ati kakuu koo kana irraa bilisa taata. Ilma koo garuu gonkumaa achi hin deebisin." ⁹ Kanaafuu tajaajilaan sun harka isaa gudeeda gooftaa isaa Abrahaam jala kaa'ee waa'ee waan kanaa kakateef.

¹⁰ Tajaajilaan sunis gaala gooftaa isaa keessaa kudhan fudhatee gooftaa isaa biraa immoo kennaawwan filatamoo gosa hundaa fe'atee qajeel; innis magaalaa Naahoor ishee kaaba dhi'a Phaadaan Arraam keessatti argamtuu dhaqe. ¹¹ Innis akka gaalawwan sun magaalattiin alatti boolla bishaanii cina jijilbeenfatan godhe; yeroon sun gara galgalaa yeroo itti dubartoonni bishaan waraabbachuu ba'an ture.

¹² Innis akkana jedhee kadhate; "Yaa WAAQAYYOO Waaqa gooftaa koo Abrahaam, har'a na milkeessitii gooftaa koo Abrahaamiif garaa laafi. ¹³ Kunoo, ani burqaa kana bira dhaabadheen jira; intallan warra magaalaa kanaas bishaan waraabbachuuf as ba'aa jiru. ¹⁴ Intalli ani, 'Maaloo akka ani bishaan dhuguuf okkotee kee gad qabi' jedheenii isheenis, 'Dhugi; ani gaalawwan kees siifin obaasaa' naan jette ishee ati garbicha kee Yisihaaqiif filatte haa taatu. Anis kanaan akka ati gooftaa kootiif garaa laafte beeka."

¹⁵ Utuu inni kadhatee hin fixatin Ribqaan okkotee ishee gatiitti baadhattee dhufte. Isheenis intala ilma Miilkaa kan Betuu'eel jedhamu sanaa turte; Miilkaan immoo niitii obboleessa Abrahaam kan Naahoor jedhamu sanaa ti. ¹⁶ Intalli sunis akka malee bareedduu fi durba turte; dhiirri tokko iyyuu ishee wajjin hin ciifne. Isheenis gara burqaatti gad buutee okkotee isheetti bishaan guuttattee ol deebite.

¹⁷ Tajaajilaan sunis ishee simachuuf itti fiigee, "Maaloo okkotee kee keessaa bishaan xinnoo ishee naa kenni" jedheen.

¹⁸ Isheenis, "Yaa gooftaa koo, dhugi" jetteenii dafttee okkotee ishee harkatti gad buufattee bishaan dhugaatii kenniteef.

¹⁹ Isheenis erga bishaan isa obaaftee booddee, "Ani gaalawwan keetiifis hamma isaan dhuganii dheebuu ba'anitti nan waraaba" jette. ²⁰ Dafttee okkotee ishee keessaa bidiruutti garagalchitee ammas bishaan waraabuudhaaf gara boolla bishaaniitti fiigde; gaalawwan isaa hundaafis bishaan waraabde. ²¹ Namichi sunis akka WAAQAYYOO karaa isaaf milkeesse yookaan akka isaaf hin milkeessin baruuf jedhee cal'isee xiyyeeffatee ishee ilaalaa ture.

²² Erga gaalawwan bishaan dhuganii booddee namichi amartii funyaanii kan warqee kan walakkaa saqilii ulfaatuu fi bitawoo warqee kan saqilii kudhan ulfaatuu lama gad baasee, ²³ "Ati intala eenyuu ti? Yoo mana abbaa keetiif iddoon bulan jiraatte maaloo mee natti himi" jedhee gaafate.

²⁴ Isheenis, "Ani intala Betuu'eel; Betuu'eel immoo ilma Miilkaan Naahooriif deessee dha" isaan jette. ²⁵ Itti dabaltees, "Cidii fi okaa baay'ee qabna; kutaan isin bultanis jira" jetteen.

²⁶ Namichis gad jedhee WAAQAYYOOOF sagade; ²⁷ akkanas jedhe; "WAAQAYYOO Waaqni gooftaa koo Abrahaam kan arjummaa isaatii fi amanamummaa isaa gooftaa koo hin dhowwatin sun haa eebbifamu. WAAQAYYOO anas gara mana obboloota gooftaa kootti karaa irra na qajeelcheera."

²⁸ Intalattiinis fiigdee dhaqxee warra mana haadha ishee jiranitti waa'ee waan kanaa himte. ²⁹ Ribqaan obboleessa Laabaa jedhamu tokko qabdi turte; Laabaanis fiigee namicha burqaa bishaanii bira jiru sana bira dhaqe. ³⁰ Innis yommuu obboleettii isaa irratti amartii funyaanii warqetii fi bitawoo argetti, yommuu utuu Ribqaan waan namichi sun isheedhaan jedhe dubbattuu dhaga'etti, gara namichaatti gad ba'e; namichis burqaa bishaanii cina gaalawwan bira dhaabatee ture. ³¹ Namicha sanaanis, "Yaa namicha WAAQAYYO eebbise, kottu; ati maaliif ala dhaabatta? Ani manicha qopheesseera; gaalawwaniifis iddoo qopheesseera" jedhe.

³² Kanaafuu namichi sun gara manaa dhaqe; Laabaanis gaalawwan irraa fe'iisa buusee cidii fi okaa kenneef; akka miilla isaanii dhiqataniif immoo namichaa fi warra isa wajjin turaniif bishaan kenne. ³³ Ergasiis nyaanni dhi'aateef; namichi sun garuu, "Ani hamman dhimma koo himadhutti hin nyaadhu" jedhe.

Laabaanis, "Himadhukaa" jedheen.

³⁴ Innis akkana jedhe; "Ani tajaajila Abrahaamii ti. ³⁵ WAAQAYYO, gooftaa koo guddaa eebbiseera; innis sooromeera. Hoolotaa fi loowwan, meetii fi warqee, garboota dhiiraatii fi dubartii, gaalawwanii fi harroota isaaf kenneera. ³⁶ Niitiin gooftaa kootii Saaraan bara dullama ishee keessa ilma isaaf deesse; innis waan qabu hunda ilma isaatiif kenneera. ³⁷ Gooftaan koo akkana jedhee na kakachiise; 'Ati intallan Kana'aan kanneen ani biyya isaanii keessa jiraadhu keessaa ilma koof niitii hin fidin; ³⁸ garuu gara mana abbaa kootii fi gara gosa koo dhaqii ilma kootiif niitii fidi.'

³⁹ "Anis, 'Yoo dubartiin sun na wajjin dhufuuf fedhii qabaachuu baatee hoo?' jedhee gooftaa koo nan gaafadhe.

⁴⁰ "Innis akkana naan jedhe; 'WAAQAYYO inni ani fuula isaa dura jiraadhu ergamaa isaa si wajjin ergee karaa kee siif milkeessa; atis gosa koo fi mana abbaa koo keessaa ilma kootiif niitii ni fidda. ⁴¹ Ati yommuu gara gosa koo dhaqxu kakuu koo irraa bilisa taata; yoo isaan intala sana sitti kennuu didani iyyuu ati kakuu koo irraa bilisa taata.'

⁴² "Ani har'a yommuun gara burqaa kanaa dhufetti akkanan jedhe; 'Yaa WAAQAYYO, Waaqa gooftaa koo Abrahaam yoo fedhii kee ta'e karaa ani deemu naa milkeessi. ⁴³ Kunoo, ani burqaa kana bira dhaabadheera; yoo durbi tokko bishaan waraabbachuu dhuftee ani immoo, "Maaloo okkotee kee keessaa bishaan xinnoo ishee na obaasi" jedheenii, ⁴⁴ isheenis, "Dhugi; ani gaalawwan keetiifis nan waraaba" naan jette, isheen kan WAAQAYYO ilma gooftaa kootiif file haa taatu.'

⁴⁵ "Utuu ani garaa koo keessatti kadhadhee hin fixatin Ribqaan okkotee ishee gatiitti baadhattee gad dhufte. Isheenis gara burqaa sanaatti gad buutee bishaan waraabbatte; anis, 'Maaloo bishaan na obaasi' nan jedheen.

⁴⁶ "Isheenis dafttee okkotee ishee gatiittii irraa gad buufattee, 'Dhugi; ani gaalawwan kees nan obaasaa' jette. Anis nan dhuge; isheen immoo gaalawwan obaafte.

⁴⁷ "Anis, 'Ati intala eenyuu ti?' jedheen ishee gaafadhe.

"Ishee immoo, 'Ani intala Betuu'eel; Betuu'eel immoo ilma Miilkaan Naahooriif deessee dha' jette.

"Anis funyaan isheetti amartii, harka isheetti immoo bitawoo nan kaa'e. ⁴⁸ Anis gad jedhee WAAQAYYOOF nan sagade; WAAQAYYO Waaqa gooftaa koo Abrahaam isa akka ani intala fira isaa ilma isaatiif geessu karaa qajeelaa irra na buuse sana nan eebbise. ⁴⁹ Egaa isin yoo gooftaa kootii garaa laafummaa fi amanamummaa argisiifan natti himaa; yoo ta'uu baate immoo akka ani gara bitaatti yookaan gara mirgaatti goru natti himaa."

⁵⁰ Laabaa fi Betuu'eelis akkana jedhanii deebisan; "Wanni kun WAAQAYYO bira dhufe; nu waan hamaa yookaan waan tolaa sitti dubbachuu hin dandeenyu. ⁵¹ Kunoo, Ribqaan fuula kee dura jirti; ishee fudhadhuu deemi; isheenis akkuma WAAQAYYO dubbatetti niitii ilma gooftaa keetii haa taatu."

⁵² Tajaajilaan Abrahaamis yommuu waan isaan jedhan dhaga'etti lafatti gombifamee WAAQAYYOOF sagade. ⁵³ Kana booddees tajaajilaan sun faaya meetii fi warqee, uffata adda addaas baase Ribqaadhaaf kenne; obboleessa isheetii fi haadha isheetiifis kennaa gatii guddaa baasu kenne. ⁵⁴ Innii fi namoonni isa wajjin turanis nyaatanii dhuganii achuma bulan.

Yommuu isaan guyyaa itti aanu ganamaan ka'anitti tajaajilaan sun, "Akka ani gara gooftaa kootii deebi'uuf na geggeessaa" jedhe.

⁵⁵ Obboleessi isheetii fi haati ishee garuu, "Intalattiin guyyuma kudhan illee nu bira haa turtu; ergasiis isheen deemuu dandeessi" jedhan.

⁵⁶ Inni garuu, "Erga WAAQAYYO karaa koo naa milkeessee isin na hin tursinaa; akka ani gara gooftaa kootii deebi'uuf na geggeessaa" isaaniin jedhe.

⁵⁷ Isaanis, "Mee intalattii waamnee waan isheen jettu gaafanna" jedhan. ⁵⁸ Kana irratti isaan Ribqaa waamanii, "Namicha kana wajjin deemuu feetaa?" jedhanii ishee gaafatan.

Isheenis, “Ani nan deema” jette.

⁵⁹ Kanaafuu isaan obboleettii isaanii Ribqaa fi guddiftuu ishee, tajaajilaa Abrahaamii fi namoota isaa wajjin geggeessan. ⁶⁰ Isaanis akkana jedhanii Ribqaa eebbisan; “Yaa obboleettii keenya,

kumaa kumaatama ta’i;

sanyiin kee

karra diinota isaa haa dhaalu.”

⁶¹ Ribqaa fi tajaajiltuuwwan ishee qophaa’anii gaalawwan isaanii yaabbatanii namicha faana bu’an; namichis Ribqaa fudhatee deeme.

⁶² Yeroo sana Yisihaaq boolla bishaanii Be’eer Lahaayiroo’iitii dhufee Negeeb keessa jiraachaa ture. ⁶³ Innis gaaf tokko gara galgalaa utuu bakkeetti ba’ee waa yaadaa jiruu oli ilaaltee kunoo gaalawwan dhufaa jiran arge. ⁶⁴ Ribqaanis ol ilaaltee Yisihaaqin argite; gaala irraas buutee ⁶⁵ tajaajilaa sanaan, “Namichi nu simachuuf bakkee keessa as deemaa jiru sun eenyu?” jettee gaafatte.

Tajaajilaan sunis, “Inni gooftaa koo ti” jedhee deebiseef. Kanaafuu haguuggii ishee fudhattee ofitti haguugde.

⁶⁶ Tajaajilaan sunis waan hojjete hunda Yisihaaqitti hime. ⁶⁷ Yisihaaqis dunkaana haadha isaa Saaraatti ol ishee galfate; Ribqaa fuudhes. Akkasiin isheen niitii isaa taate; innis ishee jaallate; Yisihaaqis du’a haadha isaa irraa ni jajjabaate.

25

Abrahaam Du’uu Isaa

25:1-4 kwf – 1Sn 1:32-33

¹ Abrahaamis niitii biraa kan maqaan ishee Qexuuraa jedhamu fuudhe. ² Isheenis Zimraan, Yoqshaan, Medaan, Midiyaan, Yishbaaqii fi Shuwaa isaaf deesse. ³ Yoqshaan Shebaa fi Dedaan dhalche; ilmaan Dedaan immoo Ashuurim, Letuushimotaa fi Le’umoota turan. ⁴ Ilmaan Midiyaan Eefaa, Efer, Henook, Abiidaa fi Eldaa’aa turan. Warri kunneen hundi sanyiiwwan Qexuuraa ti.

⁵ Abrahaam waan qabu hundumaa Yisihaaqiif kenne. ⁶ Ilmaan saajjatoowwan isaatiif garuu utuma lubbuun jiruu kennaa kenneefii ilma isaa Yisihaaq biraa gara biyya ba’a biiftuutti isaan erge.

⁷ Abrahaam waggaa dhibba tokkoo fi torbaatanii shan jiraate. ⁸ Innis umurii dheeraa fi jireenya gaarii jiraatee dulloomee hafuura dhumaa baafatee du’e; saba isaattis dabalame. ⁹ Ilmaan isaa Yisihaaqii fi Ishmaa’eel lafa qotiisaa Eeroon ilma Zoolhar namicha gosa Heeti sanaa keessatti holqa Makfelaa kan Mamree biratti argamutti isa awwaalan. ¹⁰ Lafti qotiisaa sunis kan Abrahaam Heetota irraa bitatee dha; Abrahaamis achitti niitii isaa Saaraa biratti awwaalame. ¹¹ Erga Abrahaam du’ee booddee Waaqni ilma isaa Yisihaaqin eebbise; Yisihaaqis Be’eer Lahaayiroo’ii bira jiraate.

Ilmaan Ishmaa’eel

25:12-16 kwf – 1Sn 1:29-31

¹² Seenaan maatii Ishmaa’eel ilma Abrahaam kan Aggaar garbittiin Saaraa intalli biyya Gibxi sun Abrahaamiif deesse sanaa kana.

¹³ Maqaan ilmaan Ishmaa’eel kan akkuma dhaloota isaaniitti tartiibaan barreef-fame kana:

Nabaayooti ilma Ishmaa’eel hangafticha,
Qeedaar, Adbi’eel, Miibaami,

¹⁴ Mishmaa, Duumaa, Maasaa,

¹⁵ Hadaad, Teemaa, Yexuur,

Naafiishii fi Qeedmaa.

¹⁶ Jarri kunneen ilmaan Ishmaa’eel; maqaawwan kunneenis akkuma gandootaa fi iddoo qubata isaaniitti maqaawwan bulchitoota gosoota kudha lamaanii ti.

¹⁷ Ishmaa’eel waggaa dhibba tokkoo fi soddomii torba jiraate; innis hafuura dhumaa baafatee du’e; saba isaattis dabalame. ¹⁸ Sanyiin isaa immoo daangaa Gibxi bira, karaa Asooritti geessu irra, lafa Hawiilaa jalqabee hamma Shuuriitti jiru irra jiraatan. Isaanis obboloota isaanii hundatti diina ta’anii jiraatan.

Yaaqoobii fi Esaawu

¹⁹ Seenaan maatii Yisihaaq ilma Abrahaam kana.

Abrahaam Yisihaaqin dhalche; ²⁰ Yisihaaq yeroo Ribqaa fuudhetti nama waggaa afurtamaa ture; Ribqaan kunis intala Betuu'eel namicha Arraam kan kaaba dhi'a Phaadaan Arraamiitii fi obboleettii Laabaa namicha Arraam sanaa ti.

²¹ Yisihaaq sababii niitiin isaa dhabduu turteef WAAQAYYO isheef kadhate. WAAQAYYOS kadhannaa isaatiif deebii kennee niitiin isaa Ribqaani ulfoofte. ²² Daa'immanis garaa ishee keessatti wal dhiibaa turan; isheenis, "Wanni kun maaliif natti dhufe?" jette; kanaafuu WAAQAYYO gaafachuu dhaqxe.

²³ WAAQAYYO immoo akkana jedheen;
"Saboota lamatu gadameessa kee keessa jira;
uummanni lamaan ati deessus gargari ba'u;
sabni tokko saba kaan irra ni jabaata;
inni hangafni isa quxisuu tajaajila."

²⁴ Yeroo da'umsi ishee ga'etti ilmaan lakkuutu gadameessa ishee keessa ture. ²⁵ Mucaan jalqabatti dhalate diimaa dha; dhagni isaa guutuun uffata rifeensa qabu fakkaata ture; kanaafuu Esaawu jedhanii isa moggaasan. ²⁶ Kana booddee obboleessi isaa koomee Esaawu harkaan qabatee gad ba'e; maqaan isaas Yaaqoob jedhame. Yeroo Ribqaan isaan deessetti, Yisihaaq nama waggaa jaatamaa ture.

²⁷ Ijoolleen kunis ni guddattan; Esaawu adamsaa beekamaa fi nama bakkee ooluu ta'e; Yaaqoob garuu nama cal'isaa dunkaana keessa oolu ta'e. ²⁸ Yisihaaq waan foon bineensa bosonaa mi'eeffateef Esaawun jaallate; Ribqaan garuu Yaaqoobin jaallatte.

²⁹ Gaaf tokko utuu Yaaqoob ittoo qopheessaa jiruu Esaawu akka malee beela'ee bakkeedhaa dhufe. ³⁰ Innis Yaaqoobiin, "Ani akka malee beela'eeraatii, mee ittoo diimaa sana irraa xinnoo naa kenni!" jedhe. Sababiin inni Edoom jedhameefis kanuma.

³¹ Yaaqoob immoo deebisee, "Dura mirga hangafummaa keetii natti gurguri kaa" jedhe.

³² Esaawus, "Kunoo, ani du'uu ga'eera; yoos mirgi hangafummaa maal na fayyada ree?" jedhe.

³³ Yaaqoob garuu, "Duraan dursii naa kakadhu" jedheen; akkasiin inni kakatee mirga hangafummaa isaa Yaaqoobitti gurgurate.

³⁴ Ergasiis Yaaqoob buddeenaa fi ittoo misiraa Esaawuuf kenne; innis nyaatee dhugee ka'ee achii deeme.

Esaawus akkasiin mirga hangafummaa isaa tuffate.

26

Yisihaaqii fi Abiimelek

26:1-11 kwi - Uma 12:10-20; 20:1-18

¹ Beela isa bara Abrahaam biyyichatti bu'e sana malee beelli biraa tokko ammas biyya sanatti bu'e; Yisihaaqis gara Geraaraa gara Abiimelek mooticha Filisxeem dhaqe. ² WAAQAYYOS Yisihaaqitti mul'atee akkana jedhe; "Biyya ani akka ati keessa jiraattuuf sitti himu keessa jiraadhu malee Gibxitti gad hin bu'in. ³ Biyyuma kana jiraadhu; ani si wajjin nan ta'a; sin eebbisas; biyya kana hunda sii fi sanyii keetii nan kennaatii. Ani kakuun abbaa kee Abrahaamiif kakadhe sana nan guuta. ⁴ Ani akkuma urjiiwwan samii sanyii kee nan baay'isa; biyya kana hundas isaaniif nan kenna; saboonni lafa irra jiran hundinuus karaa sanyii keetiitiin eebbifamu. ⁵ Kunis waan Abrahaam dubbii koo dhaga'ee fedhii koo, ajaja koo, labsii kootii fi seera koo eegeef." ⁶ Yisihaaqis Geraaraa keessa jiraate.

⁷ Innis yommuu namoonni biyya sanaa waa'ee niitii isaa isa gaafatanitti waan Ribqaan bareedduu taateef, "Namoonni naannoo kanaa sababii isheetiif na ajjeesu ta'a" jedhee yaaduudhaan, "Isheen niitii koo ti" jechuu sodaatee, "Isheen obboleettii koo ti" jedhe.

⁸ Erga Yisihaaq yeroo dheeraa achi jiraatee booddee, Abiimelek mootichi Filisxeemii foddaa keessaan gad ilaale; utuu Yisihaaq niitii isaa Ribqaa hooqsuu arge. ⁹ Abiimelekis Yisihaaqin ofitti waamee, "Isheen dhugumaan niitii kee ti! Yoos ati maaliif, 'Isheen obboleettii koo ti' jette ree?" jedheen.

Yisihaaqis, "Waan ani sababii isheetiif lubbuu koo nan dhaba ta'a jedhee yaadeef" jedhee deebiseef.

¹⁰ Abiimelek immoo, "Wanni ati nutti hojjette kun maali? Utuu namoota kanneen keessaa tokko niitii kee wajjin ciisee jiraatee silaa ati yakka nutti fiddee turte" jedheen.

¹¹ Kana irratti Abiimelek, "Namni namicha kana yookaan niitii isaa tuqu kam iyyuu dhugumaan ajjeefamuu qaba" jedhee nama hundaaf ajaja kenne.

¹² Yisihaaqis biyya sanatti midhaan facaafatee waan WAAQAYYO isa eebbiseef baruma sana keessa dachaa dhibba galfate. ¹³ Innis ni hore; hamma akka malee sooromuttis

qabeenyi isaa ittuma fufee baay'ate. ¹⁴ Innis bushaayee, loowwanii fi hojjettoota hedduu qaba ture; Filisxeemonnis isatti hinaafan. ¹⁵ Kanaafuu Filisxeemonni boolla bishaanii hojjettoonni abbaa isaa bara Abrahaam keessa qotan hundatti biyyoo naqanii duuchan.

¹⁶ Abiimelekis Yisihaaqiin, "Ati baay'ee nu caalaa jabaatteertaatii nurraa deemi" jedhe.

¹⁷ Yisihaaq achii ka'ee sulula Geraaraa keessa qubatee achi jiraate. ¹⁸ Yisihaaqis boollawwan bishaanii bara abbaa isaa bara Abrahaam keessa qotaman kanneen Filisxeemonni erga Abrahaam du'ee booddee duuchan sana deebisee bane; innis maquma abbaan isaa kenneefii ture sanaan isaan waame.

¹⁹ Tajaajiltoonni Yisihaaq sulula sana keessatti lafa qotanii boolla bishaan burquu argatan. ²⁰ Tiksoonni Geraaraa, "Bishaan kun kan keenya!" jedhanii tiksoota Yisihaaq wajjin wal lolan. Kanaafuu inni sababii wal falmaniif boolla bishaanii sana, "Eeseeq" jedhee moggaase. ²¹ Ergasiis boolla bishaanii biraa qotan; isaan garuu boolla bishaanii sana irrattis wal lolan; kana irratti Yisihaaq boolla bishaanii sana "Sixinaa" jedhee moggaase. ²² Innis achii ka'ee iddoo biraa dhaqee boolla bishaanii biraa achitti qote; namni tokko iyyuu isa irratti wal hin lolle. Innis, "WAAQAYYO amma iddoo bal'aa nuu kenneera; nu biyyattii keessatti ni baay'anna" jechuudhaan Rehooboot jedheen.

²³ Innis achii ka'ee gara Bersheebaatti ol ba'e. ²⁴ WAAQAYYOS halkanuma sana isatti mul'atee akkana jedheen; "Ani Waaqa abbaa kee Abrahaam; ani waan si wajjin jiruuf hin sodaatin. Garbicha koo Abrahaamiif jedhees ani sin eebbisa; sanyii kees nan baay'isa."

²⁵ Yisihaaq achitti iddoo aarsaa ijaaree maqaa WAAQAYYOO waammate. Dunkaana isaas achi dhaabbate; tajaajiltoonni isaas iddoo sanatti boolla bishaanii qotatan.

²⁶ Ergasiis Abiimelek gorsaa isaa Ahuzaatii fi ajajaa loltoota isaa Fiikool wajjin Geraaraadhaa ka'ee gara Yisihaaq dhufe. ²⁷ Yisihaaq immoo, "Isin erga na jibbitanii of biraa na ariitani maaliif gara koo dhufan?" isaaniin jedhe.

²⁸ Isaanis akkana jedhanii deebisan; "Nu akka WAAQAYYO si wajjin jiru ifaan ifatti argineerra; kanaafuu nu, 'Kakuun walii galtee gidduu keenya jechuunis nuu fi si gidduu jiraachuu qaba' jenne; mee kottu si wajjin walii galtee godhannaa. ²⁹ Kunis akkuma nu utuu waan gaarii malee waan hamaa sirraan hin ga'in nagaan of irraa si geggeessine sana akka atis nu hin miineef. Ati amma illee nama WAAQAYYOO eebbisee dha."

³⁰ Yisihaaqis nyaata isaaniif qopheesse; isaanis ni nyaatan; ni dhuganis. ³¹ Namoonni sun guyyaa itti aanu ganama barraaqa ka'anii walii kakatan. Yisihaaqis isaan geggeesse; jarris nagumaan isa biraa deeman.

³² Guyyuma sana hojjettoonni Yisihaaq dhufanii waa'ee boolla bishaanii qotan sanaa isaatti himan. Isaanis, "Nu bishaan arganneerra!" jedhan. ³³ Innis boolla bishaanii sana, "Shibe'aa" jedhee moggaase. Hamma har'aatti maqaan magaalaa sanaa Bersheebaa jedhama.

³⁴ Esaawu yeroo umuriin isaa waggaa afurtama guuteetti Yoodiiti intala Bi'eer namicha gosa Heeti akkasumas Baasmati intala Eeloon namicha gosa Heeti fuudhe.

³⁵ Isaanis Yisihaaqii fi Ribqaa gaddisiisan.

27

Yisihaaq Yaaqoobin Eebbise

¹ Yisihaaq dulloomee yeroo iji isaa arguu dadhabetti ilma isaa hangafa Esaawun ofitti waamee, "Yaa ilma koo" jedheen.

Innis, "Kunoo asan jira" jedhee deebise.

² Yisihaaq akkana jedhe; "Kunoo, ani dulloomeera; guyyaa du'a koo hin beeku.

³ Kanaafuu maaloo mi'a adamoo keetii jechuunis korojoo xiyya keetii fi iddaa kee qabadhuutii gara dirreetti ba'iitii bineensa naa adamsi. ⁴ Akka ani utuun hin du'iniin dura si eebbisuuf, nyaata mi'aawaa gosa ani jaalladhu naa qopheessiitii akka ani nyaadhuuf naa dhi'eessi."

⁵ Yommuu Yisihaaq ilma isaa Esaawutti dubbatetti Ribqaan ni dhaggeeffatti turte. Yeroo Esaawu bineensa adamsee fiduuf gara dirreetti gad ba'etti, ⁶ Ribqaan ilma ishee Yaaqoobiin akkana jette; "Kunoo, ani utuu abbaan kee obboleessa kee Esaawutti dubbatuu dhaga'eera; ⁷ innis, 'Akka ani utuun hin du'in fuula WAAQAYYOO duratti si eebbisuuf bineensa adamsii fidiitii akka ani nyaadhuuf nyaata mi'aawu naa qopheessi' jedheen. ⁸ Egaa yaa ilma ko, akkuma ani si ajajutti dubbii koo dhaga'i. ⁹ Ani akkan abbaa keetiif akkuma inni jaallattutti nyaata mi'aawaa qopheessuuf gara bushaayee dhaqitiin ilmoolee re'ee filatamoo lama naa fidi. ¹⁰ Akka inni nyaatee utuu hin du'in si eebbisuuf abbaa keetiif nyaata dhi'eessi."

¹¹ Yaaqoobis haadha isaa Ribqaadhaan akkana jedhe; “Kunoo, obboleessi koo Esaawu dabbasaa’aa dha; ani garuu rifeensa hin qabu. ¹² Yoo abbaan koo na qaqqabatee waan ani isa gowwoomse se’e, ani qooda eebbaa abaarsa ofitti nan fida.”

¹³ Haati isaa immoo, “Yaa ilma ko, abaarsi sun naaf haa ta’u; ati waanuma ani siin jedhe godhi; dhaqiitii re’oota sana naa fidi” jetteen.

¹⁴ Innis dhaqee ilmoolee re’ootaa sana qabee haadha isaatiif fide; isheen immoo akkuma abbaan isaa jaallattutti nyaata mi’aawu qopheessiteef. ¹⁵ Ergasiis Ribqaan uffata Esaaw ilma ishee hangaftichaa kan ishee bira ture keessaa kan hunda irra bareedu fuutee Yaaqoob ilma ishee isa quxisuu sanatti uffifte. ¹⁶ Harka isaatii fi morma isaa iddoo rifeensa hin qabnetti gogaa re’ootaa uffifte. ¹⁷ Ergasiis nyaata mi’aawaa fi buddeena qopheessitee turte sana ilma ishee Yaaqoobitti kennite.

¹⁸ Innis gara abbaa isaa dhaqee, “Yaa abbaa koo” jedhe.

Innis, “Yaa ilma ko, kunoo asan jira; ati eenyu?” jedhee deebise.

¹⁹ Yaaqoobis abbaa isaatiin akkana jedhe; “Ani Esaawu ilma kee isa hangafticha; akkuma ati natti himte sana godheera; akka na eebbiftuuf mee ol jedhiitii waan ani adamsee fide nyaadhu.”

²⁰ Yisihaaq ilma isaatiin, “Yaa ilma ko, akkamitti akkana daftee argatte?” jedhe.

Yaaqoob immoo, “WAAQAYYO Waaqa keetu na milkoomse” jedhee deebise.

²¹ Yisihaaqis Yaaqoobiin, “Akka ani si qaqqabadhee ilma koo Esaaw ta’uu fi ta’uu baachuu kee beekuuf mee as dhi’aadhu” jedhe.

²² Yaaqoobis abbaa isaa Yisihaaqitti dhi’aate; abbaan isaas isa qaqqabatee, “Sagaleen kun sagalee Yaaqoob; harki kun garuu harka Esaawu” jedhe. ²³ Waan harki isaa akkuma harka Esaawu rifeensa qabuuf Yisihaaq gargar baasee isa beekuu hin dandeenye; kanaafuu isa eebbise. ²⁴ Innis, “Ati dhugumaan ilma koo Esaawuu?” jedhee gaafate.

Inni immoo, “Eeyyee ani isuma” jedhee deebise.

²⁵ Yisihaaqis, “Yaa ilma ko, akka ani nyaadhee si eebbisuuf mee waan adamsitee fidde sana naa kenni” jedhe.

Yaaqoob ni dhi’eesseef; innis ni nyaate; daadhii wayiniis ni fideef; innis ni dhuge.

²⁶ Abbaan isaa Yisihaaqis, “Yaa ilma koo as kottuu na dhungadhu” jedheen.

²⁷ Innis itti dhi’aatee isa dhungate. Yisihaaqis foolii wayyaa isaa suufee isa eebbise; akkanas jedhe;

“Ilaa, fooliin ilma koo,

akkuma foolii lafa qotiisaa

WAAQAYYO eebbisee ti.

²⁸ Waaqni fixeensa samii,

lafa gabbataa, midhaanii fi

wayinii akka malee baay’atu siif haa kennu.

²⁹ Saboonni si haa tajaajilan;

uummannis siif haa sagadan.

Obboloota kee irratti gooftaa ta’i;

ilmaan haadha keetiis siif haa sagadan.

Warri si abaaran haa abaaraman;

warri si eebbisan immoo haa eebbifaman.”

³⁰ Akkuma Yisihaaq Yaaqoobin eebbisee fixee Yaaqoob immoo fuula abbaa isaa fuula Yisihaaq duraa gad ba’een, obboleessi isaa Esaawu adamoodhaa dhufee ol gale. ³¹ Innis nyaata mi’aawaa qopheessee abbaa isaatiif fide; abbaa isaatiinis, “Yaa abbaa ko, ati akka na eebbiftuuf ol jedhiitii waan ani ilmi kee adamsee fide nyaadhu” jedhe.

³² Abbaan isaa Yisihaaqis, “Ati eenyu?” jedhee isa gaafate.

Innis, “Ani ilma kee Esaawu hangafticha” jedhe.

³³ Yommu Yisihaaq akka malee hollachaa, “Yoos namni waa adamsee naa fide eenyu ree? Ani utuu ati hin dhufin hunduma isaa nyaadheen isa eebbise; inni dhugumaan ni eebbifama!” jedhe.

³⁴ Esaawu yommuu waan abbaan isaa dubbate dhaga’etti, abbaa isaatiin, “Yaa abbaa ko, anas eebbis!” jedhee sagalee ol fudhatee hiqqifatee boo’ee.

³⁵ Yisihaaq garuu, “Obboleessi kee haxxummaadhaan dhufee eebba kee fudhateera” jedhe.

³⁶ Esaawus, “Maqaan isaa iyyuu dhugumaan Yaaqoob jedhama mitii? Inni kana wajjin yeroo lama na gowwoomsuu isaa ti; jalqabatti hangafummaa koo narraa fudhate; amma immoo eebba koo fudhateera” jedhe. Ergasiis inni, “Ati eebba tokko illee naa hin hambifnee ree?” jedhee gaafate.

³⁷ Yisihaaq immoo akkana jedhee Esaawuuf deebise; “Kunoo ani akka inni sirratti gooftaa ta’uu fi akka firoonni isaa hundi tajaajiltoota isaa ta’an godheera; akka inni

midhaanii fi daadhii wayinii qabaatuufis isa eebbiseera. Egaa yaa ilma koo ani maal siif gochuun danda'a?"

³⁸ Esaawus abbaa isaatiin, "Yaa abbaa ko, ati eebbuma tokko qofa qabdaa? Yaa abbaa ko, anas eebbisi!" jedhe. Esaawus sagalee ol fudhatee boo'e.

³⁹ Abbaan isaa Yisihaaqis akkana jedhee deebiseef;

"Iddoon jireenya keetii

lafa gabbataa irraa ni fagaata;

fixeensa samii gubbaa irraas ni fagaata.

⁴⁰ Ati goraadeedhaan jiraatta;

obboleessa kees ni tajaajilta.

Yeroo isaan mormitutti garuu

waanjoo isaa cabsitee

morma kee irraa buufta."

Yaaqoob gara Laabaatti baqate

⁴¹ Esaawu sababii abbaan isaa Yaaqoobin eebbiseef Yaaqoobitti haaloo qabate. Innis garaa isaatti, "Yeroon itti abbaa kootiif boo'an dhi'aateera; anis yeroo sana obboleessa koo Yaaqoobin nan ajjeesa" jedhee yaade.

⁴² Yommuu wanni Esaawu ilmi ishee hangaftichi jedhe isheetti himametti Ribqaan Yaaqoob ilma ishee quxisuu waamsiftee akkana jetteen; "Kunoo, obboleessi kee Esaawu si ajjeesee garaa isaa qabbaneeffachuu barbaada. ⁴³ Kanaafuu yaa ilma koo na dhaga'i; ka'iitii gara obboleessa koo Laabaa kan Kaaraan keessa jiraatu sanaatti baqadhu. ⁴⁴ Hamma aariin obboleessa keetii qabbanaa'utti yeroo gabaabaaf isa bira turi. ⁴⁵ Yommuu aariin obboleessa keetii qabbanaa'ee innis waan ati isa goote sana irraanfatuuti ani dhaamsa sitti ergee achii sin fichisiisa. Ani maaliifan guyyaa tokkotti isin lachuu dhaba?"

⁴⁶ Ribqaanis Yisihaaqiin akkana jette; "Ani sababii dubartoota Heetotaa kanneeniif jiraachuu jibbeera. Yoo Yaaqoob dubartoota biyya kanaa jechuunis dubartoota Heetotaa kanneen keessaa niitii fuudhe, jireenyi koo maal anaaf godha ree!"

28

¹ Yisihaaqis Yaaqoobin waamee eebbisee akkana jedhee isa ajaje: "Intallan warra Kana'aan keessaa hin fuudhin. ² Ammuma ka'iitii gara kaaba dhi'a Phaadaan Arraam mana abbaa haadha keetii mana Betuu'eel dhaqi. Achii intallan obboleessa haadha keetii intallan Laabaa keessaa tokko fuudhi. ³ Waaqni Waan Hunda Danda'u sun si haa eebbisu; sanyii siif haa kennu; akka ati saba bal'aa taatuufis si haa baay'isu. ⁴ Ati biyya amma alagummaadhaan keessa jiraattu, biyya Waaqni dhaala godhee Abrahaamiif kenne sana akka dhaaltuuf inni eebba Abrahaamiif kenne sii fi sanyii keetiif haa kennu." ⁵ Yisihaaqis akkasitti Yaaqoobin erge; Yaaqoobis gara kaaba dhi'a Phaadaan Arraam gara Laabaa ilma Betuu'eel namicha Arraam sanaa dhaqe; Laabaan kun immoo obboleessa Ribqaa, haadha Yaaqoobii fi Esaawu.

⁶ Esaawu akka Yisihaaq Yaaqoobin eebbisee akka inni achii niitii fuudhuuf gara kaaba dhi'a Phaadaan Arraamitti isa ergee fi akka isa eebbisetis "Intallan warra Kana'aan hin fuudhin" jedhee isa ajaje yommuu beeketti; ⁷ Yaaqoob abbaa fi haadha isaatiif ajajamee gara kaaba dhi'a Phaadaan Arraam dhaqe. ⁸ Esaawus intallan warra Kana'aan fuula abbaa isaa Yisihaaq duratti hammam jibbamoo akka ta'an hubate. ⁹ Kanaafuu Esaawu gara Ishmaa'eel ilma Abrahaam dhaqee Maahalaati intala Ishmaa'eel obboleettii Nabaayoti niitota dur qabu irratti dabalee fuudhe.

Abjuu Yaaqoob Beet'eelitti Abjoote

¹⁰ Yaaqoob Bersheebaa ba'ee Kaaraan dhaqe. ¹¹ Innis iddoo tokko ga'ee aduun dhiinaan achi bule; dhagoota achi turan keessaa tokko fudhatee mataa jala kaa'atee rafuuf ciise. ¹² Innis achitti abjuu abjoote; kunoo yaabbannoo lafa dhaabatee fiixeen isaa immoo samii ga'u tokko arge; kunoo ergamoonni Waaqayyoo yaabbannoo sana irra ol ba'aa fi gad bu'aa turan. ¹³ Kunoo WAAQAYYO yaabbannoo sana gara irraa dhaabatee akkana jedhe; "Ani WAAQAYYO Waaqa abbaa kee Abrahaamii fi Waaqa Yisihaaq; ani lafa ati irra ciiftu kana siif fi sanyii keetiif nan kenna. ¹⁴ Sanyiin kee akkuma biyyoo lafaa ni baay'ata; atis gara dhi'aatti, gara ba'aatti, gara kaabaattii fi kibbaatti ni babal'atta. Uummanni lafa irraa hundinuu karaa keetii fi karaa sanyii keetiitiin ni eebbifama. ¹⁵ Kunoo ani si wajjinan jira; lafa ati dhaqxu hundattis sin eega; gara biyya kanaattis deebisee sin fida. Ani hamman waanan waadaa siif gale sana siif guutuutti si hin dhiisu."

¹⁶ Yaaqoobis yommuu hirribaa ka'etti, "Dhugumaan WAAQAYYO iddoo kana jira; ani waan kana hin hubanne" jedhe. ¹⁷ Innis sodaatee, "Iddoon kun akkam nama sodaachisa! Kun mana Waaqaa ti malee waan biraa miti; kun karra samiiti" jedhe.

¹⁸ Yaaqoobis guyyaa itti aanu ganama obboroo ka'ee dhagaa mataa jala kaa'atee ture sana fuudhee akka utubaatti ol dhaabe; fiixee isaa irrattis zayitii dhangalaase. ¹⁹ Innis maqaa iddoo sanaa Beet'eel jedhee moggaase; duraan garuu magaalaa sun Luuzi jedhama ture.

²⁰ Ergasiis Yaaqoob akkana jedhee wareege; "Yoo Waaqni na wajjin ta'e, yoo inni karaa ani deemu kana irratti na eege, yoo waan ani nyaadhuu fi waan ani uffadhu naa kenne, ²¹ yoo ani nagaan mana abbaa kootti deebi'e, WAAQAYYO Waaqa koo ni ta'a; ²² dhagaan ani utubaa godhee ol dhaabe kunis mana Waaqaa ta'a; waan ati naa kennitu keessaa kudhan keessaa tokko siifin kenna."

29

Yaaqoob Phaadaan Arraam Ga'e

¹ Yaaqoobis karaa isaa itti fufee gara warra biyya ba'aa dhufe. ² Innis ilaalee kunoo boolla bishaanii tokko dirree irratti arge; kunoo karri hoolotaa sadii sababii achii bishaan dhuganiif boolla bishaanii sana bira ciciisaa turan. Dhagaan afaan boolla bishaanii sanaa irra ture guddaa ture. ³ Yeroo karri hoolotaa hundi achitti walitti qabamanitti tiksooni afaan boolla bishaanii irraa dhagaa gangalchani hoolota bishaan obaasu turan. Ergasii immoo dhagaa sana iddoo isaatti deebisanii afaan boolla bishaanii irra kaa'u turan.

⁴ Yaaqoobis tiksoota sanaan, "Yaa obboloota ko, isin warra eessaati?" jedhee gaafate. Isaanis, "Nu warra Kaaraaniiti" jedhanii deebisan.

⁵ Innis, "Laabaa ilma Naahoor beektuu?" jedheen.

Jarris, "Eeyyee, beekna" jedhanii deebisan.

⁶ Yaaqoob immoo, "Inni fayyuma?" jedhee isaan gaafate.

Isaanis, "Eeyyee, fayyuma; kunoo intalli isaa Raahel iyyuu hoolota fiddee dhufaa jirti" jedhaniin.

⁷ Innis, "Kunoo, amma lafti guyyaa dha; yeroo itti hoolonni walitti qabaman miti. Hoolota bishaan obaasaatii dhagaa dheechisaa" jedheen.

⁸ Isaanis, "Nu hamma karri hoolotaa hundinuu walitti qabamanii dhagaan sun afaan boolla bishaanii irraa gangalfamutti hin dandeenyu; ergasii hoolota bishaan obaafna" jedhanii deebisan.

⁹ Utuma inni jara wajjin haasa'aa jiruu, Raahel waan tiksee turteef hoolota abbaa ishee ooftee dhufte. ¹⁰ Yaaqoob yommuu Raahel, intala obboleessa haadha isaa intala Laabaatii fi hoolota Laabaa argetti dhaqee dhagaa afaan boolla bishaanii irraa gangalchee hoolota eessuma isaa bishaan obaase. ¹¹ Yaaqoobis Raaheliin dhungate; sagalee ol fudhatee booe. ¹² Inni fira abbaa ishee akka ta'ee fi ilma Ribqaa akka ta'ee Raahelitti hime; isheenis fiigaa dhaqxee abbaa isheetti himte.

¹³ Laabaan akkuma waa'ee ilma obboleettii isaa waa'ee Yaaqoob dhaga'een isa simachuuf ariifatee ba'ee. Innis erga hammatee dhungatee booddee mana isaatti fudhatee gale; Yaaqoobis waan kana hunda Laabaatti hime. ¹⁴ Laabaan immoo, "Ati dhugumaan foon kootii fi dhiiga koo ti" jedheen.

Yaaqoob Liyaa fi Raahelin Fuudhe

Yaaqoob erga ji'a tokko guutuu Laabaa wajjin turee booddee, ¹⁵ Laabaan akkana isaan jedhe; "Ati sababii fira koo taateef tola naa hojjechuu qabdaa? Mindaan kee akka hammam ta'uu qabu natti himi."

¹⁶ Laabaan intallan lama qaba ture; maqaan ishee hangafaa Liyaa ture; maqaan ishee quxisuu immoo Raahel jedhama ture. ¹⁷ Iji Liyaa dadhabaa ture; Raahel garuu bareedduu fi simboo qabeettii turte. ¹⁸ Yaaqoob Raahelin jaallatee, "Ani waa'ee intala kee ishee quxisuu, Raaheliif jedhee waggaa torba sin tajaajila" jedheen.

¹⁹ Laabaan immoo, "Nama biraaf ishee kennuu irra siif kennuu naa wayya; asuma na bira turi" jedhe. ²⁰ Kanaafuu Yaaqoob Raahelin argachuuf jedhee waggaa torba tajaajile. Inni waan ishee jaallateef waggoonni kunneen guyyoota muraasa isatti fakkaatan.

²¹ Yaaqoobis Laabaadhaan, "Waan yeroon koo xumurameef akka ani ishee bira ga'uuf niitii koo naa kenni" jedhe.

²² Kanaafuu Laabaan namoota iddoo sana jiran hunda walitti qabee cidha qopheesse. ²³ Garuu yeroo lafti galgalaa'etti intala isaa Liyaa fidee Yaaqoobiif kenne; Yaaqoobis ishee bira ga'ee. ²⁴ Laabaanis akka isheen hojjettuu ishee taatuuf garbittii isaa Zilfaa, intala isaa Liyaadhaaf kenne.

²⁵ Yommuu lafti bari'etti kunoo Liyaa ta'uun ishee beekame! Yaaqoobis Laabaadhaan, "Wanni ati na goote kun maali? Ani Raaheliif jedhee si hin tajaajillee? Yoos ati maaliif na gowwoomsite ree?" jedhe.

²⁶ Laabaanis akkana jedhee deebise; "Biyya keenya keessatti intala hangafa dura intala quxisuu heerumsiisuun duudhaa keenya miti. ²⁷ Torban misirrummaa intala kanaa raawwadhu; ergasii yoo ati waggaa biraa torba naaf hojjette quxisuu ishees siif kennina."

²⁸ Yaaqoobis akkasuma godhe. Torban sanas Liyaa wajjin dabarse; ergasiis Laabaan intala isaa Raahelin isatti heerumsiise. ²⁹ Laabaan akka isheen hojjettuu ishee taatuuf xomboree isaa Bilihaa, intala isaa Raaheliif kenne. ³⁰ Yaaqoobis Raahel bira ga'e; innis Liyaa caalaatti Raahelin jaallate. Waggoota biraa torbas Laabaaf hojjete.

Ijoollee Yaaqoob

³¹ WAAQAYYO yommuu akka Liyaan hin jaallatamin argetti gadameessa ishee baneef; Raahel garuu dhabduu turte. ³² Liyaan ulfoofttee ilma deesse. Isheenis waan, "WAAQAYYO dhiphina koo argeeraatii dhugumaan si'achi dhirsi koo na jaallata" jetteef maqaa isaa Ruubeen jettee moggaafte.

³³ Isheen ammas yommuu ulfoofttee ilma deessetti, "WAAQAYYO sababii akka ani hin jaallatamin dhaga'eef ilma kanas naa kenne" jettee maqaa isaa Simi'oon jettee moggaafte.

³⁴ Ammas ulfoofttee ilma deesse; isheenis, "Sababii ani ilmaan sadii isaaf da'eef amma dhirsi koo natti maxxana" jette; kanaafuu mucaan sun Lewwii jedhamee moggaafame.

³⁵ Ammas isheen ulfoofttee ilma deesse; isheenis, "Amma WAAQAYYO nan galateef-fadha" jette. Kanaafuu maqaa isaa Yihuudaa jettee moggaafte. Ergasiis da'uu ni dhiifte.

30

¹ Raahel yommuu akka Yaaqoobiif ijoollee tokko iyyuu hin da'in argitetti obboleettii isheetti hinaafte. Yaaqoobiinis, "Ijoollee naa kenni, yoo kanaa achii nan du'a!" jette.

² Yaaqoobis isheetti aaree, "Anatu iddoo Waaqa isa ijoollee si dhowwate sanaa jira moo?" jedheen.

³ Isheenis, "Xomboreen koo Bilihaan kunoo ti; akka isheen qooda koo ijoollee naaf deessee anis karaa isheettiin ijoollee argadhuuf dhaqii ishee bira ga'i" jette.

⁴ Isheenis xomboree ishee Bilihaa akka niitii isaa taatuuf kenniteef. Yaaqoobis ishee bira ga'e; ⁵ isheenis ulfoofttee ilma isaaf deesse. ⁶ Kana irratti Raahel, "Waaqni naa murteeseera; kadhannaa koos dhaga'ee ilma naa kenneera" jette. Kanaafuu maqaa isaa Daan jettee moggaafte.

⁷ Xomboreen Raahel Bilihaan ammas ulfoofttee Yaaqoobiif ilma lammaffaa deesse. ⁸ Raahelis, "Ani obboleettii koo wal'aansoo guddaa qabee mo'adheera" jette. Maqaa isaa Niftaalem jettee moggaafte.

⁹ Liyaan akka ijoollee da'uu dhiifte hubatte; xomboree ishee Zilfaa fuutee akka niitii isaa taatuuf Yaaqoobiif kennite. ¹⁰ Xomboreen Liyaa Zilfaanis Yaaqoobiif ilma deesse. ¹¹ Liyaan immoo, "Maal milkiin akkanaa!" jettee maqaa isaa Gaad jettee moggaafte.

¹² Xomboreen Liyaa Zilfaan Yaaqoobiif ilma lammaffaa deesse. ¹³ Ergasiis Liyaan, "Ani akkaman gammade! Dubartoonnis, 'Ebbifamtuu' naan jedhu" jette. Kanaafuu maqaa isaa Aasheer jettee moggaafte.

¹⁴ Yeroo haamaa qamadiitti Ruubeen gara bakkeetti ba'ee ija hudhaa argatee haadha isaa Liyaadhaaf fide. Raahelis Liyaadhaan, "Maaloo ija hudhaa ilma keetii irraa wa naa kenni" jette.

¹⁵ Liyaan immoo, "Dhirsa koo narraa fudhachuun kee sitti xinnaatee? Hudhaa ilma koos ni fudhattaa?" jetteen.

Raahelis, "Qooda hudhaa ilma keetii inni edana si wajjin haa bulu" jetteen.

¹⁶ Gaafa sana galgala yeroo Yaaqoob lafa qotiisaatii galetti Liyaan isa simachuuf gad baatee, "Waan ani hudhaa ilma kootiin si kireeffadheef ati har'a na wajjin bulu qabda" jetteen. Yaaqoobis halkan sana ishee wajjin bule.

¹⁷ Waaqnis Liyaa dhaga'e; isheenis ulfoofttee Yaaqoobiif ilma shanaffaa deesse. ¹⁸ Liyaanis, "Waan ani xomboree koo dhirsa kootiif kenneef Waaqni gatii koo naa baaseera" jette. Kanaafuu Yisaakor jettee isa moggaafte.

¹⁹ Liyaan ammas ulfoofttee Yaaqoobiif ilma ja'affaa deesse. ²⁰ Liyaanis, "Waaqni kennaa gaarii naaf kenneera; sababii ani ilmaan ja'a isaaf da'eef dhirsi koo si'achi ulfina naa kenna" jette. Kanaafuu maqaa isaa Zebuuloon jettee moggaafte.

²¹ Ergasiis intala tokko deessee Diinaa jettee moggaafte.

²² Waaqnis Raahelin yaadate; kadhannaa ishees dhaga'ee gadameessa ishee baneef. ²³ Isheenis ulfooftee ilma deessee, "Waaqni gaanii koo narraa fuudheera" jette. ²⁴ Isheenis maqaa isaa Yoosef jettee moggaaftee, "WAAQAYYO ilma biraa naaf haa dabalu" jette.

Yaaqoob Hoolota Hore

²⁵ Erga Raahel Yoosefin deessee booddee Yaaqoob Laabaadhaan akkana jedhe; "Akka ani biyya dhalootaa kootti deebi'uuf, gad na dhiisi. ²⁶ Ani nan deemaatii niitota koo fi ijoollee koo warra ani isaaniif jedhee siif tajaajile naa kenni. Akka ani hojii baay'ee siif hojjedhe ati iyyuu beekta."

²⁷ Laabaan garuu akkana jedheen; "Maaloo yoo ani fuula kee duratti fudhatama argadhee jiraadhe asuma turi; ani akka WAAQAYYO sababii keetiin na eebbise mul'ataan beekeeraatii." ²⁸ Itti fufeess, "Mee mindaa ani siif kaffaluu qabu natti himi; ani siifin kaffalaatii" jedhe.

²⁹ Yaaqoobis akkana jedheen; "Akka ani hammam siif hojjedhe, horiin kees hammam akka harka kootti baay'ate atuu ni beekta. ³⁰ Wanni xinnaan ati utuu ani hin dhufin dura qabdu sun amma akka malee siif baay'ateera; lafa ani ture kamitti iyyuu WAAQAYYO si eebbiseera. Garuu yeroon ani itti maatii kootiif yaadu yoomi ree?"

³¹ Innis, "Wanni ani siif kennu maali ree?" jedhee gaafate.

Yaaqoob immoo akkana jedhee deebise; "Homa naaf hin kennin; garuu yoo ati waan kana naaf goote ani ittuma fufee bushaayee kee nan tiksaa; nan eegas; ³² ani har'a bushaayee kee hunda keessa ba'ee hoolota cocorree fi buburree hunda, hoolaa magaalaa fi re'oota cocorree yookaan buburree hunda addaan nan baasa; isaan kunneen mindaa koo ta'u. ³³ Yeroo ati mindaa naa kennite sana to'achuu dhufutti, amanamummaan koo dhugaa naa ba'a. Hoolotaa fi re'oota koo keessatti re'een cocorree yookaan buburree hin ta'in kam iyyuu, hoolaa keessaa immoo kan gurraacha hin ta'in kam iyyuu yoo argame akka waan hatameetti haa ilaalamu."

³⁴ Laabaanis, "Tole, akkuma ati jette haa ta'u" jedhe. ³⁵ Guyyuma sana Laabaan korbeeyyii re'ee halluu qaxxaamuroo qabaniif fi buburree hunda, goromii re'ee cocorree fi buburree kanneen adaadii qaban hunda, akkasumas hoolota gugurraacha hunda fuudhee ilmaan isaatti kenne. ³⁶ Innis ofii isaatii fi Yaaqoob gidduutti lafa adeemsa guyyaa sadii hambise; Yaaqoob immoo bushaayee Laabaa kanneen hafan tiksuu itti fufe.

³⁷ Yaaqoobis damee alaltuu, kan looziiitiif fi hadheessa jiidhaa isaa darbee darbee naannessee qoola isaa irraa quncisuudhaan dhagna mukichaa isa keessaa adii sana mul'ise. ³⁸ Yaaqoobis yeroo bushaayeen sun bishaan dhuguuf dhufanitti damee qolli irraa quncifame sana fuula isaanii dura bidiruu bishaan itti obaasan keessa kaa'e. Bushaayeen yeroo sun bishaan dhuguu dhufanitti gojoma'anii ³⁹ ulee sana duratti wal hobobsu turan; isaanis ilmoolee halluu qaxxaamuroo qaban, cocorree fi buburree dhalan. ⁴⁰ Yaaqoobis ilmoolee bushaayee kophaatti baase; bushaayee Laabaa kanneen hafan garuu warra halluu qaxxaamuroo qabaniif fi gurraacha dura dhaabe. Akkasitti hoolota isaa addaan baase malee bushaayee Laabaatti hin makne. ⁴¹ Yeroo dhaltuuwwan jajjaboon gojoma'an kam iyyuu, Yaaqoob akka isaan ulee sana biratti wal hobobsaniif jedhee ulee sana fuula isaanii dura bidiruu keessa kaa'aa ture; ⁴² dhaltuuwwan dadhaboo dura garuu ulee sana hin keenye. Kanaafuu warri dadhaboon kan Laabaa, warri jajjaboon immoo kan Yaaqoob ta'an. ⁴³ Namichi kun haala kanaan akka malee soorome; innis bushaayee baay'ee, garboota dubartootaatiif fi dhiirotaa, gaalawwanii fi harroota qaba ture.

31

Yaaqoob Laabaa Jalaa Baqate

¹ Yaaqoobis akka ilmaan Laabaa, "Yaaqoob waan abbaan keenya qabu hunda fudhateera; qabeenya kana hundas waanuma kan abbaa keenyaa ture irraa argate" jedhan dhaga'e. ² Yaaqoobis fuula Laabaa ilaale; kunoo fuulli isaa akka duraatti isatti hin tolle.

³ WAAQAYYOS Yaaqoobiin, "Biyya abbaa keetii fi fra keetti deebi'i; anis si wajjin nan ta'a" jedhe.

⁴ Kanaafuu Yaaqoob akka isaan bakkeetti lafa bushaayeen isaa jiranitti gad ba'aniif gara Raahelii fi Liyaatti ergaa erge. ⁵ Innis akkana isaaniiin jedhe; "Ani akka abbaan keessan akka kanaan duraa sana fuula natti hin tolle hubadheera; garuu Waaqni abbaa kootii na wajjin jira. ⁶ Akka ani humna koo guutuudhaan abbaa keessaniif hojjedhe isinuu beektu; ⁷ ta'us abbaan keessan mindaa koo yeroo kudhan geeddaruudhaan

na gowwoomse. Waaqni garuu akka inni na miidhu hin eeyyamneef. ⁸ Yeroo inni, 'Bushaayeen cocorreen mindaa kee ta'u' jedhetti, bushaayeen hundi ilmaan cocorree dhalan; yeroo inni, 'warri halluu qaxxaamuroo qaban mindaa kee ta'u' jedhetti immoo bushaayeen hundi ilmaan qaxxaamuroo qaban dhalan. ⁹ Waaqni karaa kanaan horii abbaa keessanii fuudhee naa kenne.

¹⁰ "Anis gaaf tokko waqtii gaana bushaayeetti abjuu keessa ol ilaalee kunoo korbeeyyiin re'ootatti hobobsan akka halluu qaxxaamuroo qaban, cocorree fi buburree ta'an nan arge. ¹¹ Ergamaan Waaqayyoos abjuu keessa, 'Yaaqoob' naan jedhe. Ani, 'Kunoo asan jira' jedheen deebise. ¹² Inni immoo akkana naan jedhe; 'Akka korbeeyyiin re'ootaa kanneen bushaayeetti hobobsan hundinuu halluu qaxxaamuroo qaban, cocorree fi buburree ta'an ol jedhii ilaali. Ani waan Laabaan sitti hojjete hunda argeeraatii. ¹³ Ani Waaqa Beet'eel lafa ati itti utubaa dibdee wareega naaf wareegde sanaa ti. Amma ka'iitii biyya kana keessaa ba'iitii gara biyya fira keetiitti deebi'." "

¹⁴ Kana irratti Raahelii fi Liyaan akkana jedhanii deebisan; "Qoodni yookaan dhaalli mana abbaa keenyaatii nuu hafe jiraa? ¹⁵ Inni akkuma ormaatti nu ilaala mitii? Inni nu gurgurateeraatii maallaqa sababii keenyaaf kenname nyaatee fixeera. ¹⁶ Qabeenyi Waaqni abbaa keenya irraa fuudhe hundi kan keenyaa fi kan ijoollee keenyaa ti. Egaan waan Waaqni sitti hime hunda godhi."

¹⁷ Yaaqoobis ijoollee isaatii fi niitota isaa gaalawwan irra kaa'ate; ¹⁸ horii fi qabeenya kaaba dhi'a Phaadaan Arraamiitti horatte hunda of dura oofee gara biyya Kana'aan abbaa isaa Yisihaaq bira dhaquuf ka'e.

¹⁹ Laabaan hoolota isaa irraa rifeensa murmuruu dhaqe; Raahel immoo waaqota abbaa ishee hatte. ²⁰ Yaaqoobis akka isa dhiisee baqachuu yaade isa dhoksuudhaan Laabaan namicha Arraam sana gowwoomse. ²¹ Innis waan qabu hunda fudhatee baqate; laga Efraaxiis ce'ee biyya gaara Gili'aaditti qajele.

Laabaan Yaaqoob Duukaa Bu'e

²² Akka Yaaqoob baqate guyyaa sadaffaatti Laabaatti himame. ²³ Laabaanis firoota isaa fudhatee guyyaa torba Yaaqoob duukaa bu'ee biyya gaara Gili'aaditti isa qaqqabe. ²⁴ Waaqnis halkan abjuudhaan gara Laabaan namicha biyya Arraam sanaa dhufee, "Ati waan gaariis ta'u hamaa tokko iyyuu Yaaqoobitti akka hin dubbanne of eeggadhu" isaan jedhe.

²⁵ Yaaqoob yeroo Laabaan isa qaqqabetti, biyya gaara Gili'aad keessa dunkaana isaa dhaabbatee ture; Laabaa fi firootni isaas achi qubatan. ²⁶ Laabaanis Yaaqoobiin akkana jedhe; "Ati na gowwoomsitee intallan koo akka booji'amtoota waraanaatti fudhattee deemuun kee maal gochuu kee ti? ²⁷ Ati maaliif dhoksaan baqate? Maaliifis na gowwoomsite? Akka ani gammachuu fi faarfannaadhaan, dibbee fi baganaadhaan si geggeessuuf maaliif natti himuu didde? ²⁸ Ati akka ani ijoollee ijoollee kootiitii fi intallan koo dhungadhee nagaatii jedhu naaf hin eeyyamne. Ati hojii gowwummaa hojjete. ²⁹ Ani isin miidhuuf humna qaba; garuu eda Waaqni abbaa keessanii, 'Ati waan gaariis ta'u hamaa tokko illee Yaaqoobitti akka hin dubbanne of eeggadhu' naan jedhe. ³⁰ Ati sababii mana abbaa keetiitti deebi'uu akka malee hawwiteef deemteerta; garuu maaliif waaqota koo hatte?"

³¹ Yaaqoobis akkana jedhee Laabaaf deebii kenne; "Ati intallan kee humnaan narraa fudhatta jedhee waanan sodaadheef nan deeme. ³² Namni ati waaqota kee isa biratti argattu jiraachuu hin qabu. Akka wannu kan kee ta'e na bira jiruu fi akka hin jirre atuu fuula firoota keenyaa duratti sakatta'i; yoo jiraate immoo fudhadhu." Yaaqoob Raahel waaqota sana hattuu ishee Yaaqoob hin beeku ture.

³³ Laabaanis dunkaana Yaaqoob, dunkaana Liyaatii fi dunkaana xomboreewwan lamaanii seenee homaa dhabe. Erga dunkaana Liyaatii ba'ee booddees dunkaana Raahel seene. ³⁴ Raahel immoo waaqota mana keessaa hatte sana kooraa gaalawwan ishee jala keessee irra taa'aa turte. Laabaanis waan dunkaanicha keessa jiru hunda keessa barbaade; garuu homaa hin arganne.

³⁵ Raahelis abbaa isheetiin, "Yaa gooftaa ko, sababii ani ka'ee fuula kee dura dhaabachuu dadhabeef hin aarin; ani xuriin of irraa qabaa" jette. Innis ni sakatta'e malee waaqota sana hin arganne.

³⁶ Yaaqoobis Laabaatti aaree isatti dheekkame. Innis akkana jedhee gaafate; "Yakki koo maali? Wannu ati akkana na adamsituuf ani cubbuu maalii hojjedheeti? ³⁷ Ati mi'a koo hunda sakattaateerta; egaan mi'a mana keetii keessaa maal argatte? Yoo jiraate firoota keetii fi firoota koo duratti dhi'eessitii isaan nu lamaan gidduutti murtii haa kennan.

³⁸ “Ani waggoota digdaman kana si wajjin jiraadheera. Hoolonni fi re’oonni kee tokko iyyuu hin gatanne; ani bushaayee kee keessaas korbeeyyii hin nyaanne. ³⁹ Ani horii bineensi cabse gara keetti hin fidne; horii bades anatu kaffalaa ture. Waan guyyaas ta’u halkan hatame hundaaf ati na kaffalchiifatta turte. ⁴⁰ Haalli ani keessa jiraadhe kana ture; guyyaa ho’a, halkan immoo dhaamochatu na waxala ture; hirribnis ija koo irraa bade. ⁴¹ Akkasiin ani waggoota digdamman kana mana kee ture. Ani waggaa kudha afur intallan kee lamaaniiif jedhee, waggaa ja’a immoo bushaayee keetiif jedhee siif hojjedheera; ati immoo yeroo kudhan mindaa koo geeddarte. ⁴² Waaqni abbaa ko, Waaqni Abrahaam, Sodaan Yisihaaq utuu na wajjin jiraachuu baate ati silaa harka duwwaa na baasta turte. Waaqni garuu rakkina koo fi dadhabbi koo argee eda sitti dheekkame.”

⁴³ Laabaan akkana jedhee Yaaqoobiif deebise; “Dubartoonni kunneen intallan koo ti; ijoolleen kunneenis ijoolluma koo ti; bushaayeen kunneenis bushaayee koo ti. Wannani ati argitu hundi kanuma koo ti. Yoo anii waa’ee intallan koo kanneeniitii fi waa’ee ijoollee isaan da’anii har’a maal gochuun danda’a? ⁴⁴ Kottu mee anii fi ati amma walii kakannaa; kakuun kunis anaa fi si gidduutti ragaa haa ta’u.”

⁴⁵ Yaaqoobis dhagaa tokko fuudhee akka utubaatti dhaabe. ⁴⁶ Innis firoota isaatiin, “Dhagaa walitti qabaa” jedhe. Isaanis dhagaa walitti qabanii tuulan; jarris tuullaa sana biratti nyaata nyaatan. ⁴⁷ Laabaan tuullaa sanaan “Yigaarsahaadutaa” jedhee moggaase; Yaaqoob immoo “Gili’aad” jedheen.

⁴⁸ Laabaanis, “Tuullaan kun anaa fi si gidduutti ragaa dha” jedhe. Gaala’aad jedhamuun isaa kanumaaf. ⁴⁹ Akkasumas Miisphaa jedhame; Laabaan akkana jedhee tureetii; “Yeroo nu gargar baanutti WAAQAYYO sii fi ana gidduutti eegduu haa ta’u. ⁵⁰ Yoo ati intallan koo rakkifte yookaan yoo ati intallan koo irratti niitota biraa fuute, yoo namni tokko iyyuu nu bira hin jirre kunoo Waaqni anaa fi si’i gidduutti ragaa dha.”

⁵¹ Laabaan ammas Yaaqoobiin akkana jedhe; “Tuullaa kanaa fi utubaa ani sii fi ana gidduu dhaabe kana ilaali. ⁵² Akka ani si miidhuuf jedhee tuullaa kana darbee gara keetti hin ceene, akka atis na miidhuuf jettee tuullaa kanaa fi utubaa kana dabartee gara kootti hin ceene tuullaan kun ragaa dha; utubaan kunis ragaa dha. ⁵³ Waaqni Abrahaam, Waaqni Naahoor, Waaqni abbootii isaanii nu gidduutti murtii haa kennu.”

Yaaqoobis akkasitti maqaa Sodaan abbaa isaa Yisihaaqiin kakate. ⁵⁴ Innis biyya gaaraa sanatti aarsaa dhi’eessee firoota isaa nyaatatti waame. Isaanis erga nyaatanii booddee achuma bulan.

⁵⁵ Laabaanis guyyaa itti aanu ganama bariidhaan ka’ee ijoollee ijoollee isaatii fi intallan isaa dhungatee isaan eebbise. Ergasiis achii ka’ee gara iddoo isaatti deebi’e.

32

Yaaqoob Esaawuun Wal arguuf Qophaa’e

¹ Yaaqoobis karaa isaa itti fufe; ergamoonni Waaqayyos isatti dhufan. ² Innis yommuu isaan argetti, “Kun buufata Waaqaa ti” jedhe; iddoo sanas Mahanayyim jedhee moggaase.

³ Yaaqoobis gara obboleessa isaa Esaawu kan biyya Edoom lafa See’iir jedhamu keessa jiraatuutti ergamoota of dura erge. ⁴ Innis akkana jedhee isaan ajaje: “Isin gooftaa koo Esaawuun akkana jedhaa: ‘Garbichi kee Yaaqoob akkana jedha; ani Laabaa bira jiraadhee hamma ammaattis isuma biran ture. ⁵ Ani loonii fi harroota, hoolotaa fi re’oota, hojjetoota dhiiraatii fi dubartootas qaba. Ammas ani fuula kee duratti surraa akkan argadhuuf ergaa kana gooftaa kootti nan erga.’”

⁶ Ergamoonni sunis gara Yaaqoobitti deebi’anii, “Nu obboleessa kee Esaawu bira dhaqneerra; innis si simachuuf dhufaa jira; namoonni dhibba afur isa wajjin jiru” jedhaniin.

⁷ Yaaqoobis akka malee sodaatee dhiphate; namoota isa wajjin turanis garee lamatti qoode; bushaayee, loowwanii fi gaalawwan illee akkasuma garee lamatti qoode. ⁸ Innis, “Yoo Esaawu dhufee garee tokko dha’e, gareen kaan jalaa ba’a” jedhee yaade.

⁹ Yaaqoob akkana jedhee kadhate; “Yaa Waaqa abbaa koo Abrahaam, Waaqa abbaa koo Yisihaaq, yaa WAAQAYYO, isa ‘Ati gara biyya keetii fi gara firoota keetiitti deebi’, ani waan gaarii siifin godhaa’ naan jette sun, ¹⁰ ani gaarummaa fi amanamummaa ati ana garbicha kee argisiifte kana hundaaf hin malu. Ani yeroo Yordaanos kana ce’etti ulee koo qofa qaban ture; amma garuu garee lama ta’een jira. ¹¹ Ani akka ati harka obboleessa koo Esaawu jalaa na baastu sin kadhada. Ani, ‘Inni dhufee na ajjees; haadhotas ijoollee isaanii wajjin ni ajjees’ jedhee sodaadheeraatii. ¹² Ati

garuu, 'Ani dhugummaan waan gaarii siihin godha; sanyii kees akka cirracha galaanaa kan lakkaa'amuu hin dandeenye sanaa nan godha' jetteerta."

¹³ Inni halkan sana achuma bule; waan of biraa qabu keessaas kennaa obboleessa isaa Esaawuuf kennu filate; ¹⁴ isaanis re'oota dhaltuu dhibba lama, korbeeyyii re'ee digdama, hoolota dhaltuu dhibba lama, korbeeyyii hoolaa digdama, ¹⁵ gaalawwan dhalaa soddama ilmaan isaanii wajjin, saawwan afurtama, jiboota loonii kudhan, harroota dhaltuu digdama, wadala harrootaa kudhan turan. ¹⁶ Innis karra karraan addaan baasee tajaajiltoota isaatti kennee, "Na dura darbaa deemaa; karrawwan horii gidduuttis lafa hambisaa" jedhee tajaajiltoota isaa ajaje.

¹⁷ Namicha fuula duraan jiru sanaanis akkana jedhe: "Yoo Esaaw obboleessi koo sitti dhufe, 'Ati kan eenyuu ti? Eessa dhaqxa? Horiin fuula kee dura jiru kun kan eenyuu ti?' jedhee si gaafate, ¹⁸ ati, 'Kan garbicha kee Yaaqoob. Isaanis kennaa gooftaa koo Esaawuuf ergamanii dha; kunoo, Yaaqoobis nu duubaan dhufaa jira' jechuu qabda."

¹⁹ Namicha lammaffaa, sadaffaa fi warra karrawwan sana faana deeman hundas akkana jedhee ajaje; "Isinis yoo Esaawun argitan waanuma kana isatti himaa. ²⁰ Akkasumas, 'Kunoo garbichi kee Yaaqoob nu duubaan dhufaa jira' jedhaa." Inni, "Ani kennaa of dura ergeef kanaan isa nan araarfadha; ergasii immoo ani yommuun isa argutti tarii inni na simata ta'a" jedhee yaadee tureetii. ²¹ Kennaan Yaaqoobiis isa dura darbe; Yaaqoob garuu halkan sana qubata sana keessa bule.

Yaaqoob Waaqa Wal'aansoo Qabe

²² Halkanuma sana Yaaqoob ka'ee niitota isaa lamaan, xomboreewwan isaa lamaanii fi ilmaan isaa kudha tokko fudhatee malkaa Yaaboq ce'e. ²³ Innis erga laga isaan ceesisee booddee qabeenya isaa hunda erge. ²⁴ Yaaqoob immoo kophaa isaa hafe; namichi tokkos hamma lafti bariitutti wal'aansoo isa qabe. ²⁵ Namichis yommuu akka Yaaqoobin mo'achuu hin dandeenye argetti, buusaa luqqeettuu Yaaqoob tuqe; yeroo inni namicha wajjin wal'aansoo qabettis luqqeettuun Yaaqoob ni adoode. ²⁶ Namichis, "Waan bari'uu ga'eef gad na dhiisi" jedhe.

Yaaqoob garuu, "Yoo ati na eebbifte malee ani gad si hin dhiisu" jedhee deebise.

²⁷ Namichis, "Maqaan kee eenyu" jedhee isa gaafate.

Inni immoo, "Yaaqoob" jedhee deebise.

²⁸ Namichis, "Ati sababii Waaqa fi namoota wajjin wal'aansoo qabdee mo'atteef si'achi Israa'el jedhamta malee Yaaqoob hin jedhamtu" jedhe.

²⁹ Yaaqoobis, "Maaloo maqaa kee natti himi" jedheen.

Inni garuu, "Ati maaliif maqaa koo gaafatta?" jedheen. Ergasiis inni achumatti isa eebbise.

³⁰ Yaaqoobis, "Ani ifaan ifatti Waaqa argeeraatii; lubbuun koo garuu oolfamteerti" jedhee iddoo sana Phenii'eel jedhee moggaase.

³¹ Akkuma inni Phenii'eelin darbeen aduun isatti baate; innis sababii luqqeettuu isaatiif okkolaa ture. ³² Kanaafuu Israa'eloonni hamma har'aatti ribuu tafaan hin nyaatan; inni buusaa luqqeettuu Yaaqoob kan tafaan wal qabatu tuqee tureetii.

33

Yaaqoobii fi Esaawu Wal argan

¹ Yaaqoobis ol jedhee ilaalee kunoo Esaawu namoota dhibba afur wajjin utuu dhufaa jiruu arge; innis Liyaatti, Raahelii fi xomboreewwan lamaanitti ijoollee gargari hire. ² Xomboreewwanii fi ijoollee isaanii dura aanse; Liyaa fi ijoollee ishee itti aansee, Raahelii fi Yoosefin immoo dugda duuba buuse. ³ Ofii isaatii immoo isaan dura darbee hamma obboleessa isaa bira ga'utti yeroo torba lafatti gad jedhee harka fuudhe.

⁴ Esaawu garuu Yaaqoobin simachuuf itti fiigee isa hammate; morma isaattis marmee isa dhungate. Isaan lachannu walitti boo'an. ⁵ Esaawus ol jedhee ilaalee dubartootaa fi ijoollee argee, "Warri si wajjin jiran kunneen eenyu?" jedhee gaafate.

Yaaqoobis deebise, "Isaan ijoollee Waaqni arjumaadhaan ana garbicha keetii kennee dha" jedhe.

⁶ Xomboreewwanii fi ijoolleen isaanii dhi'aatanii gad jedhanii harka fuudhan. ⁷ Itti aansaniis Liyaa fi ijoolleen ishee dhufanii gad jedhanii harka fuudhan. Dhuma irratti immoo Yoosefii fi Raahel dhufanii gad jedhani harka fuudhan.

⁸ Esaawu, "Bushaayee fi loon ani argu kun hundi maali?" jedhee gaafate.

Yaaqoobis, "Ani fuula kee fuula gooftaa koo duratti fudhatama argachuuf jedhee ti" jedhe.

⁹ Esaawu immoo, "Yaa obboleessa koo ani waan na ga'u qaba. Ati waan qabdu ofuma keetii hambifadhu" jedheen.

¹⁰ Yaaqoobis akkana jedhe; “Maaloo akkas miti! Yoo ani fuula kee duratti fudhatama argadhee jiraadhe, kenna kana na harkaa fudhadhu. Eгаа amma ati fuula tolaadhaan na simatteerta; fuula kee arguun anaaf akkuma fuula Waaqaa arguutii. ¹¹ Sababii Waaqni natti arjoomee anis waan na barbaachisu hunda qabuuf maaloo kenna ani siif fide kana fudhadhu.” Esaawus waan Yaaqoob cimsee isa kadhateef kenna sana ni fudhate.

¹² Esaawus, “Kottu karaa keenya itti fufnee haa deemnu; ani si dura nan bu’aa” jedhe.

¹³ Yaaqoob garuu akkana isaan jedhe; “Akka ijoolleen dadhaboo ta’anii fi akka anis hoolootaa fi saawwan hoosisaniif kunuunsa gochuu qabu ati gooftaan koo ni beekta. Horiin kunneen yoo guyyuma tokkoon jarjarsuudhaan oofaman hundi isaanii ni dhumu. ¹⁴ Gooftaan koo garbicha isaa dura darbee haa deemu; ani immoo hamman See’iiritti gooftaa koo qaqqabutti akkuma humna bushaayee fuula koo dura jirutii fi akkuma humna ijoolleetti suuta jedhee nan deema.”

¹⁵ Esaawus, “Yoo namoota koo keessaa muraasa si biratti nan dhiisa” jedhe.

Yaaqoob immoo, “Kun maaliif barbaachisaa? Fuula gooftaa koo duratti fudhatama argachuun gofti na ga’a” jedhe.

¹⁶ Esaawus guyyuma sana karaa isaa irra See’iiritti deebi’e. ¹⁷ Yaaqoob garuu Sukooti dhaqee achitti ofii isaatiif mana ijaarrate; horii isaatiif immoo daasii ijaare. Kanaafuu iddoon sun Suukooti jedhame.

¹⁸ Yaaqoob erga kaaba dhi’a Phaadaan Arraamiitii deebi’ee booddee nagaan magaalaa Sheekem ishee biyya Kana’aan keessaa sana ga’ee fuula magaalattii dura qubate. ¹⁹ Innis lafa dukaana isaa irra dhaabate sana ilmaan Hamoor irraa meetii dhibbaan bitate; Hamoor immoo abbaa Sheekem. ²⁰ Yaaqoobis achitti iddoo aarsaa ijaaree El Elohee Israa’el jedhee moggaase.

34

Diinaan Gudeedamte

¹ Diinaan intalli Liyaan Yaaqoobiif deesse sun dubartoota biyyattii ilaaluudhaaf gad baate. ² Sheekem ilmi Hamoor namicha gosa Hiiwii kan bulchaa biyya sanaa ture ishee arge; innis qabee humnaan ishee gudeede. ³ Qalbiin isaas Diinaa intala Yaaqoobiin fudhatame; innis ishee jaallatee afaan tolaa itti dubbate. ⁴ Sheekemis abbaa isaa Hamooriin, “Intala kana na fuusisi” jedhe.

⁵ Yaaqoob yommuu intalli isaa Diinaan akka gudeedamte dhaga’etti, ilmaan isaa dirree irra horii tiksu turan; kanaafuu Yaaqoob hamma isaan galanitti ni cal’ise.

⁶ Hamoor abbaan Sheekemis Yaaqoob wajjin dubbachuu dhaqe. ⁷ Ilmaan Yaaqoobis akkuma waan uumame sana dhaga’aniin dirreedhaa dhufan. Isaanis sababii Sheekem intala Yaaqoob wajjin ciisuudhaan Israa’el keessatti waan jibbiisiisaa hojjetee fi gaddan; akka malees aaran.

⁸ Hamoor garuu akkana isaaniin jedhe; “Qalbiin ilma koo Sheekem intala keessan irra bu’eera. Maaloo isatti ishee heerumsiisaa. ⁹ Fuudhaa fi heerumaan walitti firoomnaa; intallan keessan nuu kenna; intallan keenyas fuudhaa. ¹⁰ Nu wajjin jiraadhaa; biyyattiin fuula keessan dura jirti; keessa jiraadhaatii itti daldalaa; qabeenyas itti horadhaa.”

¹¹ Sheekemis abbaa Diinaatii fi obboota isheetiin akkana jedhe; “Ani fuula keessan duratti fudhatama argannaan waanuma isin naan jettan isiniif nan kenna. ¹² Isinis gabbara misirrittiitii fi kenna ani fiduu qabu hamma feetan natti muraa; anis waan isin naan jettan nan baasa. Intalattii qofa natti heerumsiisaa.”

¹³ Ilmaan Yaaqoob immoo waan Sheekem obboleettii isaanii Diinaa gudeedeef yeroo Sheekemii fi abbaa isaa Hamooriif deebii kennanitti haxxummaadhaan dubbatan. ¹⁴ Isaanis akkana isaaniin jedhan; “Nu waan akkanaa gochuu hin dandeenyu; nu nama dhagna hin qabatinif intala keenya kennuu hin dandeenyu. Kun nuuf salphina. ¹⁵ Nu waan tokko qofaan tole isiniin jenna; kunis yoo isin dhiira keessan hunda dhagna qabdani akkuma keenya taatanii dha. ¹⁶ Ergasii nu intallan keenya isinii kennina; intallan keessan immoo ni fuuna. Gidduu keessan ni jiraanna; isin wajjinis saba tokko ni taana. ¹⁷ Garuu yoo isin dhagna qabachuu diddan nu obboleettii keenya fudhannee deemna.”

¹⁸ Dubbiin isaanii Hamoorii fi Sheekem ilma Hamoor ni gammachiise. ¹⁹ Sheekem namoota mana abbaa isaa jiraatan hunda caalaa kabajamaa ture; inni sababii intala Yaaqoobitti gammadeef waan kana lafa irra hin harkifne; ²⁰ Hamoorii fi ilmi isaa Sheekem gara karra magaalaa isaanii dhufanii namoota magaalaa isaaniitiin akkana jedhan; ²¹ “Jarri kun nuuf warra nagaa ti; kanaafuu biyyattii keessa jiraatanii itti haa

daldalatan. Biyyattiin isaaniif lafa bal'aa qabdi; nu intallan isaanii haa fuunu; isaanis intallan keenya haa fuudhan. ²² Garuu namoonni kunneen akka saba tokkootti nu wajjin jiraachuuf tole kan jedhan yoo dhiironni keenya akkuma isaanii dhagna qabatan qofa. ²³ Loon isaanii, qabeenyi isaaniitii fi horiin isaanii kaan hundinuu kanuma keenya hin ta'anii? Kanaafuu kottaa tole isaaniin jenna; isaanis nu wajjin ni jiraatu."

²⁴ Namoonni karra magaalaa sanaatiin gad ba'an hundinuu Hamoorii fi ilma isaa Sheekemiin walii galan; dhiironni karra magaalaa sanaatiin gad ba'an hundinuu dhagna qabatan.

²⁵ Guyyaa sadii booddee utuma isaan dhukkubsachaa jiranuu, ilmaan Yaaqoobii keessaa namni lama Simi'oonii fi Lewwiin, obbollooni Diinaa, goraadee isaanii fudhatanii magaalaa homaa quba hin qabne sana dha'anii dhiira hunda ajjeesan.

²⁶ Isaanis goraadeedhaan Hamoorii fi ilma isaa Sheekemin ajjeesani Diinaa immoo mana Sheekemiitii fudhatanii qajeelan. ²⁷ Ilmaan Yaaqoobis reeffawwan irra darbanii magaalaa obboleettiin isaanii itti gudeedamte sana saaman. ²⁸ Isaanis bushaayee isaanii, loon isaanii, harroota isaaniitii fi waan isaan magaalaa keessaa fi alaa qaban hunda fudhatan. ²⁹ Qabeenya isaanii hunda, dubartootaa fi ijoollee isaanii hunda fudhatanii deeman; waan mana keessa jiru hundas ni booji'an.

³⁰ Yaaqoobis Simi'oonii fi Lewwiidhaan akkana jedhe; "Isin akka ani Kana'aanotaa fi Feerzota biyya kana jiraatanitti xireeffatamu gochuudhaan rakkoo natti fiddan. Nu baay'inaan xinnoo dha; yoo isaan humna walitti dabalatanii na lolan anii fi warri mana koo hundinuu ni dhumna."

³¹ Isaan garuu, "Yoo inni akkuma sagaagaltuu tokkootti obboleettii keenyatti haa taphatuu ree?" jedhanii deebisan.

35

Yaaqoob Beet'eelitti Deebi'e

¹ Waaqni Yaaqoobiin, "Ka'iitii Beet'eelitti ol ba'ii achi jiraadhu; achittis Waaqa yeroo ati obboleessa kee Esaawun baqatetti sitti mul'ate sanaaf iddoo aarsaa tolchi" jedhe.

² Yaaqoob warra mana isaa jiranii fi warra isa wajjin turan hundaan akkana jedhe; "Waaqota ormaa kanneen isin of biraa qabdan irraa fagaadhaa; of qulqulleessaa; uffata keessanis geeddaradhaa. ³ Kottaa kaanee Beet'eelitti ol baanaa; anis achitti Waaqa gaafa rakkina kootii deebii naa kenne isa iddoo ani dhaqe hundumatti na wajjin ture sanaaf iddoo aarsaa nan tolcha." ⁴ Isaanis waaqota ormaa kanneen isaan of biraa qaban hundaa fi lootii gurra isaanii Yaaqoobitti kennan; Yaaqoobis fuudhee qilxuu Sheekemii jalatti awwaale. ⁵ Isaanis ka'anii qajeelan; akka namni tokko iyyuu isaan duukaa hin buuneeff naasisuun Waaqaa magaalawwan naannoo isaanii jiran irra bu'e.

⁶ Yaaqoobii fi namoonni isa wajjin turan hundi gara Luuzi kan Beet'eel jedhamtuu ishee biyya Kana'aan keessatti argamtu sanaa dhufan. ⁷ Innis achitti iddoo aarsaa tolchee sababii yeroo inni obboleessa isaa jalaa baqachaa turetti Waaqni achitti isatti of mul'iseef iddoo sana El Beet'eel jedhee waame.

⁸ Debooraan guddiftuun Ribqaa duutee Beet'eelii gaditti qilxuu jalatti awwaalamte. Maqaan isaas Aloonbaakut jedhame.

⁹ Erga Yaaqoob kaaba dhi'a Phaadaan Arraamiitii deebi'ee booddee Waaqni ammas isatti mul'atee isa eebbise. ¹⁰ Waaqni, "Maqaan kee Yaaqoob; si'achi garuu ati Yaaqoob hin jedhamtu; maqaan kee Israa'el jedhama" jedheen. Maqaan isaas Israa'el jedhame.

¹¹ Waaqni akkana isaan jedhe; "Ani Waaqa Waan Hunda Danda'u dha; hori; baay'adhus. Sabnii fi waldaan sabootaa sirraa argamu; mootonnis mudhii kee keessaa ba'u. ¹² Ani biyya Abrahaamii fi Yisihaaqiif kenne siifis nan kenna; ani biyya kana sanyii kee warra si booddeetiifis nan kenna." ¹³ Waaqnis iddoo itti isa wajjin haasa'aa ture sanatti isa dhiisee ol ba'e.

¹⁴ Yaaqoob iddoo itti Waaqni isa wajjin dubbate sana utubaa dhagaa tokko dhaabee kennaa dhugaattii irratti dhangalaase; zayitiis irratti dhangalaase. ¹⁵ Yaaqoobis iddoo itti Waaqni isa wajjin dubbate sana Beet'eel jedhee moggaase.

Du'a Raahelii fi Yisihaaq

35:23-26 kwi - 1Sn 2:1-2

¹⁶ Isaanis Beet'eelii ka'anii adeemsa isaanii itti fufan. Akkuma isaan Efraataatti dhi'aatanii Raahel ciniinsuun qabamtee akka malee muddamte. ¹⁷ Utuu isheen da'uuf ciniinsuu jabaa keessa jirtuus deessiftuun, "Ati waan ilma biraa deessuuf hin sodaatin" jetteen. ¹⁸ Raahel garuu waan du'uu geesseef utuma lubbuun ishee ba'aa jirtuu Ben-Oonii jettee ilma ishee moggaafte. Abbaan isaa garuu Beniyaam jedhee isa moggaase.

¹⁹ Akkasiin Raahel duutee karaa Efraataatti geessu irratti awwaalante; Efraataan kun immoo Beethlehem. ²⁰ Yaaqoobis awwaala ishee irra soodduu dhaabe; soodduun sunis hamma har'aattuu awwaala Raahel argisiisa.

²¹ Israa'el ammas achii ka'ee Migdaal Eederiin gamatti dunkaana isaa dhaabbate. ²² Utuu Israa'el biyya sana jiraatuu Ruubeen ol seenee saajjato abbaa isaa Bilihaa wajjin ciise; Israa'elis waan kana dhaga'e.

Yaaqoob ilmaan kudha lama gaba ture; isaanis:

²³ Ilmaan Liyaa:

Ruubeen jechuunis ilma Yaaqoob isa hangafa,
Simi'oon, Lewwii, Yihuudaa, Yisaakorii fi Zebuuloon.

²⁴ Ilmaan Raahel:

Yoosefii fi Beniyaam.

²⁵ Ilmaan Bilihaa jechuunis xomboree Raahel:

Daanii fi Niftaalem.

²⁶ Ilmaan Zilfaa jechuunis xomboree Liyaa:

Gaadii fi Aasheer.

Isaan kunneen ilmaan Yaaqoob kanneen kaaba dhi'a Phaadaan Arraamiitti isaaf dhalatani dha.

²⁷ Yaaqoobis gara abbaa isaa, gara Yisihaaq, gara magaalaa Mamree ishee Kiriyaati Arbaaq kan Kebroon jedhamtuu, iddoo Abrahaamii fi Yisihaaq alagoota ta'anii jiraachaa turan sanaa dhufe. ²⁸ Yisihaaq waggaa dhibba tokkoo fi saddeettama jiraate. ²⁹ Innis umurii quufee, dulloomee hafuura isaa kan dhumaa baafatee du'e; gara saba isaattis dabalame. Ilmaan isaa Esaawuu fi Yaaqoobis isa awwaalan.

36

Sanyiiwwan Esaawu

36:10-14 kwf - 1Sn 1:35-37

36:20-28 kwf - 1Sn 1:38-42

¹ Seenaan maatii Esaawu kan Edoom jedhamu sanaa kana.

² Esaaw niitota isaa dubartootaa Kana'aan keessaa fuudhe; isaanis Aadaa intala Eeloon namicha gosa Heetii fi Oholiibaamaa intala Aannaa ilma Zibe'oon namicha gosa Hiiwii, ³ akkasumas Baasmati intala Ishmaa'eel obboleettii Nabaayoti.

⁴ Aadaan Eliifaazin Esaawuuf deesse; Baasmati immoo Re'uu'eelin deesse.

⁵ Oholiibaamaanis Ye'uushi, Ya'ilaamii fi Qoorraahi deesse. Isaan kunneen ilmaan Esaawu kanneen Kana'aanitti isaaf dhalatani dha.

⁶ Esaawu niitota isaa, ilmaan isaa, intallan isaatii fi warra mana isaa jiraatan hunda, akkasumas karra loon isaa, horii isaa kaan hundaa fi qabeenya biyya Kana'aanitti horate hunda fudhatee obboleessa isaa Yaaqoob biraa ka'ee biyya biraa dhaqe. ⁷ Waan qabeenyi isaanii akka malee baay'ateef isaan walii wajjin jiraachuu dadhaban; lafti isaan jiraachaa turanis sababii baay'ina horii isaanitiif isaan ga'uu hin dandeenye.

⁸ Esaawu biyya gaara See'iir keessa jiraate; Esaawu jechuun Edoomii dha.

⁹ Seenaan maatii Esaawu abbaa Edoomotaa kan warra biyya gaara See'iir keessa jiraatani kana.

¹⁰ Maqaan ilmaan Esaawu:

Eliifaaz, ilma Aadaa niitii Esaawuutii fi Re'uu'eel ilma Baasmati niitii Esaawuu ti.

¹¹ Ilmaan Eliifaaz:

Teemaan, Oomaar, Zefoo, Gaataamii fi Qenaz. ¹² Eliifaaz ilmi Esaawus saajjato Tiimnaa jedhamtu gaba ture; isheenis Amaaleeqin Eliifaaziif deesse. Isaan kunneen ilmaan ilmaan Aadaa niitii Esaawu.

¹³ Ilmaan Re'uu'eel:

Nahaati, Zeraa, Shamaa fi Miizaah. Isaan kunneen ilmaan ilmaan Baasmati niitii Esaawu.

¹⁴ Oholiibaamaan niitiin Esaawu intalli Aannaa ilma Zibe'oon Esaawuuf:

Ye'uushi, Ya'ilaamii fi Qoorraahi deesse.

- ¹⁵ Isaan kunneen sanyiiwwan Esaawu keessaa hangafoota turan:
 Ilmaan Eliifaaz ilma Esaawu isa hangafaa:
 Teemaan hangafticha, Oomaar hangafticha, Zefoo hangafticha, Qenaz hangafticha,
¹⁶ Qooraaahi hangafticha, Gaataam hangaftichaa fi Amaaleq hangafticha. Isaan kunneen hangafoota biyya Edoom keessatti Eliifaaz irraa dhalatanii dha; isaanis ilmaan Aadaa ti.
- ¹⁷ Ilmaan Re'uu'eel ilma Esaawu:
 Nahaati hangafticha, Zeraa hangafticha, Shamaa hangaftichaa fi Miizaah hangafticha. Isaan kunneen hangafoota biyya Edoomitti Raaqu'el irraa dhalatanii dha; isaanis ilmaan Baasmati niitii Esaawu.
- ¹⁸ Ilmaan Oholiibaamaa niitii Esaawu:
 Ye'uushi hangafticha, Ya'ilaamaa hangaftichaa fi Qooraaahi hangafticha. Isaan kunneen hangafoota Ahiliibaamaa niitii Esaawu intala Aannaa irraa dhalatanii dha.
- ¹⁹ Isaan kunneen ilmaan Esaawu Edoom jedhamu sanaa turan; isaan kunneenis hangafoota isaanii turan.
- ²⁰ Isaan kunneen ilmaan See'iir namicha gosa Hoorii kanneen biyya sana keessa jiraachaa turanii dha; isaanis:
 Looxaan, Sobaal, Zibe'oon, Aannaa, ²¹ Diishoon, Eezerii fi Diishaan. Ilmaan See'iir kanneen biyya Edoom keessaa kunneen hangafoota hoorotaa turan.
- ²² Ilmaan Looxaan:
 Hoorii fi Hoomaam. Tiimnaa obboleettii Looxaan.
- ²³ Ilmaan Sobaal:
 Aliwaan, Maanahaat, Eebaal, Shefoo fi Oonaami.
- ²⁴ Ilmaan Zibe'oon:
 Ayyaa fi Aannaa. Aannaan kunis namicha utuu harroota abbaa isaa Zibe'oon tiksuu gammoojjii keessatti burqaa bishaan danfaa argatee dha.
- ²⁵ Ijoollee Aannaa:
 Diishoonii fi Oholiibaamaa intala Aannaa.
- ²⁶ Ilmaan Diishoon:
 Hemdaan, Eshbaan, Yitraanii fi Keraan.
- ²⁷ Ilmaan Eezeri:
 Bilhaan, Zaawaanii fi Aqaan.
- ²⁸ Ilmaan Diishaan:
 Uzuzi fi Araan.
- ²⁹ Isaan kunneen hangafoota Hoorotaa ti:
 Looxaan, Sobaali, Zibe'oon, Aannaa, ³⁰ Diishoon, Eezerii fi Diishaan.
 Isaan kunneen biyya See'iiri keessatti akkuma gosa gosa isaaniitti hangafootaa Hoorotaa turan.

Mootota Edoom

36:31-43 kwf - 1Sn 1:43-54

- ³¹ Mootonni utuu mootiin Israa'el tokko iyyuu hin mo'in dura Edoom keessatti mo'an kanneen turan:
- ³² Belaa ilmi Be'oor mootii Edoom ta'e. Magaalaan isaa Diinhaabaa jedhamee moggaafame.
- ³³ Belaa duunaan Yoobaab ilmi Zeraa namichi Bozraa iddoo isaa bu'ee mootii ta'e.
- ³⁴ Yoobaab duunaan Hushaam namichi biyya Teemaan iddoo isaa bu'ee mootii ta'e.
- ³⁵ Hushaam duunaan Hadaad ilmi Bedad inni biyya Mo'aabitti Midiyaanin mo'ate sun iddoo isaa bu'ee mootii ta'e. Maqaan magaalaa isaa Aawiit jedhame.
- ³⁶ Hadaad duunaan Samlaan namichi Masreeqaa iddoo isaa bu'ee mootii ta'e.
- ³⁷ Samlaan duunaan Shaawul namichi biyya Rehoobooti ishee laga bira jirtu sanaa iddoo isaa bu'ee mootii ta'e.
- ³⁸ Shaawul duunaan Ba'aal-Haanaan ilmi Akboor iddoo isaa bu'ee mootii ta'e.
- ³⁹ Ba'aal-Haanaan ilmi Akboor duunaan immoo Hadaad iddoo isaa bu'ee mootii ta'e. Magaalaan isaas Faa'uu jedhame. Maqaan niitii isaa immoo Maheexabi'eel jedhama ture. Isheenis intala Maxreed intala Mee-Zaahaab turte.

⁴⁰ Hangafoonni Esaawu irraa dhalatan akkuma gosa gosa isaaniittii fi akkuma naannoo jireenya isaaniitti maqaa maqaan kanneenii dha:
 Tiimnaa, Aalwaa, Yeteeti,

⁴¹ Oholiibaamaa, Eelaa, Phiinoon,

⁴² Qenaz, Teemaan, Mibzaar,

⁴³ Magidii'eelii fi Iiraam.

Namoonni kunneen akkuma lafa biyya qabatanii keessa jiraataniitti hangafoota Edoom turan.

Esaawuun kunis abbaa Edoomotaa ti.

37

Abjuu Yoosef

¹ Yaaqoob biyya abbaan isaa ture, Kana'aan keessa jiraate.

² Seenaan maatii Yaaqoob kana.

Yoosef yeroo dargaggeessa waggaa kudha torba turetti obboloota isaa, ilmaan niitota abbaa isaa jechuunis ilmaan Bilihaatii fi Zilfaa wajjin bushaayee tiksa ture; innis waa'ee obboloota isaa oduu hamaa abbaa isaatiif fide.

³ Israa'el waan bara dullumaa keessa isa dhalcheef ilmaan isaa hunda caalaa Yoosefin jaallata ture; innis qoloo faayeffame hojjetef. ⁴ Obboloonni isaas yommuu akka abbaan isaanii isaan hunda caalaa isa jaallate hubataniitti Yoosefin jibban; afaan nagaas itti dubbachuu hin dandeenye.

⁵ Yoosef abjuu abjootee obboloota isaatti hime; isaanis ittuma caalchisanii isa jibban. ⁶ Innis akkana isaanii jedhe; "Mee abjuu ani arge kana dhaga'aa: ⁷ Nu lafa qotiisaa keessatti bissii midhaanii hidhaa ture; kunoo, bissiin koo ol jedhee dhaabate; bissiiwwan keessan immoo bissii kootti naanna'anii gad jedhanii sagadaniif."

⁸ Obboloonni isaas, "Ati nu irratti mootii ta'uu barbaaddaa? Dhugumaan situ nu bulchaa?" jedhaniin. Isaanis sababii abjuu isaatii fi sababii waan inni dubbateetiif ittuma caalchisanii isa jibban.

⁹ Ergasiis abjuu biraa abjootee obboloota isaatti hime. Akkanas jedheen; "Kunoo, ani abjuu biraa abjoodheera; aduu fi ji'i, urjiiwwan kudha tokkos gad jedhanii naa sagadu."

¹⁰ Yommuu inni waan kana abbaa isaatii fi obboloota isaatti himetti abbaan isaa, "Abjuun ati abjootte kun maali? Ani, haati keetii fi obboloonni kee dhugumaan dhufnee fuula kee duratti gad jennee siif sagadnaa?" jedhee isatti dheekkame. ¹¹ Obboloonni isaa isatti hinaafan; abbaan isaa garuu waan kana garaatti qabate.

Yoosef Obboloota Isaatiin Gurgurame

¹² Gaaf tokko obboloonni isaa bushaayee abbaa isaanii Sheekem bira dheechisuu dhaqan; ¹³ Israa'elis Yoosefin, "Akkuma ati beektu obboloonni kee Sheekem bira bushaayee dheechisaa jiru. Mee kottu ani gara isaanii si ergaa" jedhe.

Yoosefis, "Kunoo asan jira" jedheen.

¹⁴ Israa'el immoo, "Mee dhaqitii akka obboloonni kee, bushaayeenis nagaa ta'anii fi akka hin ta'in ilaaliitii deebi'ii natti himi" jedheen. Innis akkasiin Sulula Kebrooniitii Sheekemitti isa erge.

Yoosefis Sheekem ga'ee; ¹⁵ namichi tokko isa arge; kunoo inni dirree irra joraa ture; namichi sunis, "Ati maal barbaadda?" jedhee isa gaafate.

¹⁶ Yoosefis deebisee, "Ani obboloota koon barbaada. Ati iddoo isaan bushaayee isaanii dheechisan mee natti himi" jedheen.

¹⁷ Namichis deebisee, "Isaan asii deemaniiru; 'Gara Dootaan haa dhaqnu' jechuu isaanii dhaga'eera" jedhe.

Yoosefis obboloota isaa duukaa bu'ee Dotaayin biratti isaan argate. ¹⁸ Isaan garuu fagootti isa arganii isa ajjeesuuf utuu inni isaan bira hin ga'in mari'atan.

¹⁹ Isaanis akkana waliin jedhan; "Kunoo abbaan abjuu sun dhufaa jira! ²⁰ Kottaa ajjeefnee boollawwan as jiran keessaa tokkotti isa gannee bineensa hamaatu isa nyaate jenna. Ergasii immoo abjuun isaa maal akka ta'u ilaalla."

²¹ Ruubeen waan kana dhageenyaan isaan harkaa isa baase. Innis akkana jedhe; "Lakkii isa hin ajjeefnu; ²² dhiiga hin dhangalaasinaa. Gammoojjii keessatti boolla kana keessa isa buusaa malee harka keessaniin isa hin tuqinaa." Ruubeen isaan harkaa isa baasee gara abbaa isaatti isa deebisuuf akkana jedhe.

²³ Yeroo Yoosef obboloota isaa bira ga'etti isaan qoloo inni uffate, qoloo miidhagaa sana isa irraa baasanii, ²⁴ isa fuudhanii boollatti gad darbatan. Boollii sunis duwwaa ture; bishaanis hin qabu ture.

²⁵ Obbolloonni isaa buddeena nyaachuuf tataa’an; ol jedhaniis kunoo, daldaltoota warra Ishmaa’eel kanneen Gili’aadii dhufaa jiran argan. Isaanis urgooftuu, haphee dibataatii fi qumbii gaalawwan isaaniitti fe’atanii Gibxitti geessaa turan.

²⁶ Yihuudaanis obbolloota isaatiin akkana jedhe; “Obboleessa keenya ajjeefnee dhiiga isaa dhoksuun bu’aa maalii nuu qaba?” ²⁷ Kottaa Ishmaa’eelootatti isa gurgurra malee harka keenyaan isa hin tuquuu; inni obboleessa keenyaa fi foon keenya.” Obbolloonni isaas yaada kana fudhatan.

²⁸ Yommuu daldaltoonni Midiyaan achiin darbuuf dhufanittis obbolloonni Yoosif boolla keessaa harkisanii ol isa baasanii meetii saqilii digdamaatti Ishmaa’eelootatti isa gurguratan; jarris Gibxitti isa geessan.

²⁹ Ruubeen gara boolla sanaatti deebi’e; Yoosif boolla sana keessa hin turre; innis uffata ofii isaa tarsaase. ³⁰ Innis gara obbolloota isaa dhaqee, “Gurbichi achi hin jiru! Egaa ani eessan dhaqa?” jedheen.

³¹ Isaanis qoloo Yoosif fuudhanii re’ee tokko qalanii qoloo sana dhiiga keessa cuuphan.

³² Qoloo miidhagaa sanas abbaa isaaniitti geessanii, “Nu qoloo kana arganneerra; mee qoloo ilma keetii ta’uu fi ta’uu baachuu isaa ilaali” jedhan.

³³ Innis qoloo sana beekke, “Kun qoloo ilma kootii ti! Bineensa hamaatu isa nyaate. Dhugumaan Yoosif biccirameera” jedhe.

³⁴ Kana irratti Yaaqoob uffata ofii isaa tarsaase; wayyaa gaddaa mudhiitti hidhatee guyyaa baay’ee ilma isaatiif gadde. ³⁵ Ilmaan isaatii fi intallan isaa hundinuu isa jajjabeessuuf ka’an; inni garuu jajjabaachuu didee, “Lakkii ani gaddaa gara ilma koo sii’oolitti gad bu’a” jedhe. Akkasiin abbaan isaa ni boo’ee.

³⁶ Gidduu sana warri Midiyaan sun Gibxi keessatti Phoxiifaaraa namicha qondaaltota Fara’oon keessaa tokko ture kan ajajaa waardiyyaa ta’e tokkotti Yoosifin gurguratan.

38

Yihuudaa fi Taamaar

¹ Yeroo kanatti Yihuudaan obbolloota isaa biraa deemee namicha Adulaam kan Hiiraam jedhamu tokko bira jiraachuuf gad bu’e. ² Achittis Yihuudaan intala namicha Kana’aan kan Shuuwaan jedhamu tokkoo arge; innis ishee fuudhee ishee bira ga’e; ³ isheenis ulfooftee ilma deesse; maqaan isaas Eer jedhame. ⁴ Ammas ulfooftee ilma deesse; maqaa isaas Oonaan jettee moggaafte. ⁵ Ammas ittuma dabaltee ulfooftee ilma biraa deessee maqaa isaa Sheelaa jettee moggaafte. Isheenis Kiziibitti isa deesse.

⁶ Yihuudaanis Eer ilma isaa hangafticha niitii fuusise; maqaan ishee Taamaar jedhama ture. ⁷ Garuu Eer ilmi Yihuudaa hangaftichi sun fuula WAAQAYYOO duratti hamaa ture; kanaafuu WAAQAYYOO isa ajjeese.

⁸ Yihuudaanis Oonaaniin, “Obboleessa keetiiif sanyii dhaabuuf jedhiitti niitii obboleessa keetii bira ga’iitti dirqama waarsummaa keetii isheef guuti” jedhe. ⁹ Oonaan garuu akka ijoolleen dhalattu sun kan isaa hin taane beeke; kanaafuu akka obboleessa isaatiif sanyii hin dhaabneef jedhee yeroo niitii obboleessa isaa bira ga’u hunda afetaa lafatti dhangalaasa ture. ¹⁰ Wannin inni hojjete sun fuula WAAQAYYOO duratti hamaa ture; kanaafuu WAAQAYYOO isas ni ajjeese.

¹¹ Ergasii Yihuudaan niitii ilma isaa Taamaariin, “Hamma ilmi koo Sheelaa guddatutti haadha hiyyeessaa ta’iitii mana abbaa keetii jiraadhu” jedhe. Inni, “Mucaan kunis akkuma obbolloota isaa du’aa laata” jedhee yaadee tureetii. Kanaafuu Taamaar mana abbaa ishee jiraachuu dhaqxe.

¹² Bara dheeraa booddees intalli Shuuwaa niitiin Yihuudaa duute. Yihuudaanis gadda isaa irraa bayyananaan gara Tiimnaahitti lafa warra hoolota isaa irraa rifeensa murmuraaniitti ol ba’e; michuun isaa Hiiraam namichi Adulaam isa wajjin deeme.

¹³ Taamaaris, “Kunoo abbaan dhirsa keetii hoolota isaa irraa rifeensa murmuruuf jedhee Tiimnaahitti ol ba’aa jira” jedhanii yeroo itti himanitti, ¹⁴ wayyaa haadha hiyyeessaa of irraa baaftee of dhoksuuf haguuggii haguuggatte; ergasiis balbala Enaayimitti ol galchu kan daandii Tiimnaahitti geessu irra jiru dura teesse. Sheelaa guddatu iyyuu isheen akka niitummaadhaan isaaf hin kennamin beektee turteetii.

¹⁵ Yihuudaan yommuu ishee argetti sababii isheen fuula ishee haguuggatte turteef sagaagaltuu ishee se’e. ¹⁶ Innis utuu akka isheen niitii ilma isaa taate hin beekin karaa cina iddoo isheen jirtu ishee bira dhaqee, “Mee kottu si wajjin nan ciisaa” jedheen.

Isheenis, “Ati na wajjin ciisuuf maal naa kennita?” jettee isa gaafatte.

¹⁷ Inni immoo, “Ani bushaayee koo keessaa ilmoo re’ee tokko siifin erga” jedheen.

Isheenis, “Hamma ilmoo sana naa ergitutti waan biraa qabsiisa naa kennitaa?” jetteen.

¹⁸ Innis, “Ani qabsiisa maalin siif kenna?” jedheen.

Isheenis deebiftee, “Chaappaa kee hidhaa isaa wajjin, ulee qabatee deemtus naa kenni” jetteen. Innis wantoota kanneen kenneefii ishee wajjin ciise; isheenis ni ulfooftte.
¹⁹ Erga achii deemtee booddee haguuggii ishee of irraa baaftee wayyaa dhirsi ishee irraa duunaan uffattee turte sana deebiftee uffatte.

²⁰ Yihuudaan waan qabsiisa kenne dubartii sana irraa deebifachuuf jedhee karaa michuu isaa namicha Adulaam sanaatiin ilmoo re’ee ergeef; namichi garuu ishee hin argine. ²¹ Namichis, “Sagaagaltuun* Enaayim bira, daandii irra taa’aa turte sun eessa jirti?” jedhee warra achi jiraatan gaafate.

Jarri immoo deebisanii, “Sagaagaltuun tokko iyyuu as hin turre” jedhan.

²² Innis gara Yihuudaatti deebi’ee, “Ani dubartittii arguu hin dandeenye. Akkasumas warri iddoo sana jiraatan, ‘Sagaagaltuun tokko iyyuu as hin turre’ jedhan” jedheen.

²³ Yihuudaanis, “Isheen waan qabatte sana haa hambifattu; yoo kanaa achii nu waan kolfaa taanaa. Kunoo ani ilmoo re’ee kana isheef ergeera; ati garuu ishee dhabde” jedhe.

²⁴ Gara ji’a sadii booddee, “Taamaar niitiin ilma keetii sagaagaltuu taateerti; kanaanis isheen amma ulfooftteerti” jedhanii Yihuudaatti himan.

Yihuudaan immoo, “Gadi baasaatii ibiddaan gubaa ishee ajjeesaa!” jedhe.

²⁵ Isheenis utuma gad baafamaa jirtuu, “Ani abbaa mi’a kanaa irraa ulfaa’eera” jettee abbaa dhirsa isheetti erga ergate. Akkasumas, “Chaappaa fi kirriin isaa, uleen kunis kan eenyuu akka ta’e mee ilaalii addaan baafadhu” jetteen.

²⁶ Yihuudaanis mi’a kana beekke, “Sababii ani ilma koo Sheelaatti ishee hin heerumsiiniif, isheen na caalaa qajeeltuu dha” jedhe. Innis deebi’ee ishee bira hin geenye.

²⁷ Yommuu yeroon da’umsa ishee ga’etti, kunoo, ilmaan lakkuutu gadameessa ishee keessa ture. ²⁸ Utuu isheen da’umsa irra jirtuu inni tokko harka isaa gad baafate; deessiftuunis qabdee, “Isa kanatu dura lafa ga’e” jettee kirrii diimaa harka isaatti hiite.

²⁹ Akkuma inni harka isaa ol deebifateen kunoo obboleessi isaa dhalate; deessiftuunis, “Ati akkamiin ofuma keetiin cabsitee baate?” jette. Maqaan isaas Faares jedhame.

³⁰ Obboleessi isaa kan kirrii diimaa harka irraa qabu sunis ni dhalate; innis Zaaraa jedhamee moggaafame.

39

Yoosefi fi Niitii Phoxiifaaraa

¹ Yeroo kanatti Yoosef Gibxitti geeffamee ture. Phoxiifaaraan namichi Gibxi qondaalli Fara’oon kan ajajaa waardiyyaa ture sun Ishmaa’eeloota achi isa geessan irraa isa biteate.

² Yoosefis waan WAAQAYYO isa wajjin tureef nama milkaa’aa ta’e; innis mana gooftaa isaa namicha biyya Gibxi sanaa jiraate. ³ Gooftaan isaas akka WAAQAYYO isa wajjin jiruu fi akka WAAQAYYO waan inni hojjetu hunda keessatti isa milkoomse arge; ⁴ Yoosefis fuula gooftaa isaa duratti fudhatama argatee hojjetaa isaa amanamaa ta’e. Phoxiifaaraanis mana isaa irratti isa muude; waan qabu hundumas akka inni eeguuf imaanaa itti kenne. ⁵ Gaafa inni mana isaatii fi waan inni qabu hunda irratti isa muudee jalqabee WAAQAYYO sababii Yoosefiif jedhee mana namicha Gibxi sanaa eebbise. Eebbi WAAQAYYOS waan Phoxiifaaraan manaa fi alaa qabu hunda irra ture. ⁶ Kanaafuu Phoxiifaaraan waan qabu hunda harka Yoosef jala galche; innis waan nyaatu qofa malee qabeenya isaa tokko illee hin beeku ture.

Yoosef dhaaba toleessa fi miidhagaa ture; ⁷ niitiin gooftaa isaas waan kana booddee ija ishee Yoosef irra buufattee, “Kottuu na bira ga’i!” jetteen.

⁸ Inni garuu didee akkana isheen jedhe; “Kunoo, gooftaan koo waan mana keessa jiru tokko illee hin beeku; inni waan qabu hunda natti kenneera. ⁹ Mana kana keessatti namni na caalu tokko iyyuu hin jiru. Sababii ati niitii isaa taateef si’i malee wanni gooftaan koo natti hin kennin tokko iyyuu hin jiru. Yoos ani akkamittan waan hamaa akkasii raawwachuudhaan Waaqatti cubbuu hojjedha ree?” ¹⁰ Isheen guyyuma guyyaan Yoosefitti dubbattu iyyuu, inni ishee bira ga’uu yookaan ishee biratti argamuu illee ni dide.

¹¹ Gaaf tokko Yoosef hojii isaa hojjechuuf mana seene; tajaajiltoota warra mana sanaa keessaas namni tokko iyyuu achi hin turre. ¹² Isheenis wayyaa isaa qabatee, “Kottuutti na bira ga’i!” jetteen. Inni garuu wayyaa isaa isheetti gad lakkisee fiigee manaa ba’e.

¹³ Isheenis yommuu akka inni wayyaa isaa isheetti gad lakkisee fiigee manaa ba’e argitetti, ¹⁴ hojjetoota mana ishee waamtee akkana jetteen; “Kunoo, inni Ibricha kana

* **38:21** 38:21 Sagaagaltuun dubartii waaqeffannaa waaqa sobaatiif jettee mana sagadaa keessatti gocha sagaagalummaa hojjetuu dha.

akka nutti taphatuuf fide! Inni na bira ga'uuf natti ol seennaan ani sagalee guddaan iyye. ¹⁵ Innis gargaarsa barbaachaaf iyyuu koo dhageenyaan wayyaa isaa na biratti dhiisee fiigee manaa ba'e."

¹⁶ Isheen hamma gooftaan isaa galutti wayyaa isaa of bira keesse. ¹⁷ Akkana jettees oduu kana isatti himte: "Garbichi Ibrichi ati nuu fidde sun natti taphachuuf natti ol seene. ¹⁸ Garuu akkuma ani gargaarsa barbaachaaf iyyeen inni wayyaa isaa na biratti dhiisee fiigee manaa ba'e."

¹⁹ Gooftaan isaa yommuu oduu niitiin isaa, "Wanni garbichi kee na godhe kana" jettee itti himte sana dhaga'etti aaree gubate. ²⁰ Gooftaan isaas Yoosefin fuudhee mana hidhaa iddoo hidhamtoonni mootichaa itti eegaman keessa buuse.

Ta'us yeroo Yoosef mana hidhaa keessa turetti, ²¹ WAAQAYYO isa wajjin ture; fuula ajajaa mana hidhaa sanaa durattis gaarummaa isaa itti argisiise; akka fudhatamas argatu godhe. ²² Ajajaan mana hidhaa sunis namoota mana hidhaa jiran hunda irratti Yoosefin muude; waan achitti hojjetamu hunda irrattis itti gaafatamaa isa godhe. ²³ Sababii WAAQAYYO isa wajjin turee fi waan inni hojjetu kam iyyuu isaa milkeesseef ajajaan mana hidhaa sun waan itti gaafatama Yoosef jala jiru hundaaf yaaddoo tokko illee hin qabu ture.

40

Yoosef Abjuu Hiikuu Isaa

¹ Kana booddee namichi mootii Gibxiitiif dhugaatii dhi'eessuu fi namichi buddeena tolchu gooftaa isaanii mootii Gibxi sana gaddisiisan. ² Fara'oonis qondaaltota isaa lamaanitti jechuunis itti gaafatamaa dhugaatiitii fi itti gaafatamaa tolchaa buddeenaatti aare; ³ innis mana ajajaa waardiyyaa keessa mana hidhaa iddoo Yoosef itti hidhamee ture keessa isaan buuse. ⁴ Ajajaan waardiyyaa Yoosefitti isaan kenne; Yoosefis isaan tajaajilaa ture.

Jarris guyyaa baay'ee mana hidhaa turan; ⁵ isaan lachanu jechuunis namichi mootii Gibxiitiif dhugaatii dhi'eessuu fi namichi buddeena tolchu tokkoon tokkoon isaanii halkanuma tokko keessatti abjuu abjootan; tokkoon tokkoon abjuu sanaas hiikkaa mataa isaa qaba ture.

⁶ Yoosef guyyaa itti aanu ganama isaan bira dhaqe; kunoo utuu gaddanii jiranuus isaan arge. ⁷ Innis, "Fuulli keessan har'a maaliif akkana dukkanaa'a?" jedhee qondaaltota Fara'oon warra isa wajjin mana gooftaa isaa keessa mana hidhaa turan sana gaafate.

⁸ Isaanis, "Nu lachuu abjuu abjonnee nama nuu hiiku dhabne" jedhaniin.

Kana irratti Yoosef, "Hiikkaan kan Waaqaa ti mitii? Mee abjuu keessan natti himaa" jedheen.

⁹ Itti gaafatamaan dhugaatii sun akkana jedhee abjuu isaa Yoosefitti himate; "Abjuu koo keessatti kunoo muka wayinii tokkotu fuula koo dura ture; ¹⁰ mukti wayinii sunis damee sadii qaba ture. Innis akkuma lateen daraare; hurbuun ija isaas ni bilchaatte. ¹¹ Xoofoon Fara'oon na harka ture; anis ija wayinii fuudhee xoofoo Fara'oonitti cuunfee xoofoo sana harka Fara'oonitti kenne."

¹² Yoosefis akkana jedheen; "Hiikkaan isaa kana; dameewwan sadan sun guyyaa sadii. ¹³ Guyyaa sadii keessatti Fara'oon mataa kee ol qaba; taayitaa keettis si deebisa; akkuma yeroo dhugaatii dhi'eessaafii turte sana atis xoofoo Fara'oon harka isaatti ni kennita. ¹⁴ Garuu yeroo sitti tollutti na yaadadhu; waan gaariis naa godhi. Waa'ee koo Fara'oonitti himiitii mana hidhaa kanaa na baasi. ¹⁵ Ana biyya Ibrootaatii hatanii na fidaniitii; biyya kana keessattis ani waan boolla kana keessa na buusisu tokko illee hin hojjenne."

¹⁶ Itti gaafatamaan buddeena sunis yommuu akka Yoosef abjuu sanaaf hiikkaa gaarii kenne argetti Yoosefiin akkana jedhe; "Anis abjuu tokkon abjoodhe; kunoo gundoowwan buddeena sadii mataa koo irra turan. ¹⁷ Gundoo ol aanu irra buddeena gosa garaa garaa kan Fara'ooniif qopheeffametu ture; garuu simbirroonni matuma koo irratti gundoo sana keessaa nyaachaa turan."

¹⁸ Yoosef immoo akkana jedhe; "Hiikkaan isaa kana; gundoowwan sadan sun guyyaa sadii. ¹⁹ Guyyaa sadii keessatti Fara'oon mataa kee ol qaba; mukatti si rarraasa. Simbirroonnis foon kee ni nyaatu."

²⁰ Guyyaan sadaffaan guyyaa itti Fara'oon dhalate ture; Fara'oonis qondaaltota isaatiif cidha qopheesse. Innis itti gaafatamaa dhugaatiitii fi itti gaafatamaa buddeena sana fuula qondaaltota isaa duratti dhi'eesse: ²¹ Itti gaafatamaa dhugaatii sana hojii isaatti deebise; namichi xoofoo sana ammas harka Fara'oonitti kenne. ²² Itti gaafatamaa buddeena sana garuu akkuma Yoosef abjuu isaanii hiikeeffitti rarraase.

²³ Ta'us itti gaafatamaan dhugaatii sun Yoosefin ni irraanfate malee isa hin yaadanne.

41

Abjuu Fara'oon

¹ Erga waggaan lama guutuun darbee booddee Fara'oon abjuu tokko abjoote. Kunoo inni qarqara laga Abbayyaa dhaabachaa ture. ² Kunoo, saawwan babbareedoo fi gagabbatoon torba laga Abbayyaa keessaa ol ba'an; isaanis shambaqqoo keessa dheedaa turan. ³ Ammas kunoo, saawwan fofokkisoo fi huhuqqatoon kanneen biraa torba laga Abbayyaa keessaa ol ba'anii saawwan ededa lagaa turan sana bira dhadhaabatan. ⁴ Saawwan fofokkisoo fi huhuqqatoon sunis saawwan babbareedoo fi gagabbatoo torban sana nyaatan. Fara'oonis hirribaa dammaqe.

⁵ Ammas deebi'ee rafee abjuu lammaffaa abjoote; kunoo mataan midhaanii torba misee tolee somaa tokko irratti guddachaa ture. ⁶ Ergasii immoo kunoo mataan midhaan qaqancaroo hobombolettii ba'aa biiftuutiin gubatanii torba biraa bibbiqilan. ⁷ Mataan midhaan qaqancaroo sanaas mataa misee tole torban sana lilliqimse; Fara'oonis hirribaa dammaqe; kunoo wanni sunis abjuu ture.

⁸ Ganama sana yaadni isaa ni jeeqame; inni nama ergee tolfattootaa fi beektota Gibxi hunda waamsifate. Fara'oonis abjuu isaa isaanitti hime; garuu namni abjuu sana isaaf hiikuu danda'u tokko illee hin argamne.

⁹ Ergasii itti gaafatamaan dhugaatii sun Fara'ooniin akkana jedhe; "Ani har'a balleessaa koo yaadadheera. ¹⁰ Yeroo tokko Fara'oon tajaajiltoota isaatti aaree anaa fi itti gaafatamaa buddeenaa sana mana ajajaa waardiyyaa keessatti hidhe. ¹¹ Tokkoon tokkoon keenya halkanuma tokkoon abjuu abjoonne; tokkoon tokkoon abjuu sanaas hiikkaa mataa isaa qaba ture. ¹² Ibrichi dargaggeessi tokko nu wajjin achi ture; innis tajaajilaa ajajaa eegumsaa ture. Nu abjuu keenya itti himannaan inni tokkoo tokkoo keenyaaf akkuma abjuu keenyaatii hiikkaa isaa nutti hime. ¹³ Akkuma inni nuu hiike sana ta'e; ani iddoo kootti nan deebi'e; namichi kaanis ni fannifame."

¹⁴ Fara'oonis nama ergee Yoosefiin waamsise; boolla hidhaa keessaa baasaniis dafanii isa fidan. Innis haaddatee uffata isaas geeddarratee fuula Fara'oon duratti dhi'aate.

¹⁵ Fara'oonis Yoosefiin, "Ani abjuu abjoodheen ture; garuu namni tokko iyyuu naa hiikuu hin dandeenye. Ani akka ati yeroo abjuu dhageessu hiikuu dandeessu dhaga'eera" jedhe.

¹⁶ Yoosef immoo, "Ani hiikuu hin danda'u; Waaqni garuu Fara'ooniif deebii nagaa ni kenna" jedhee Fara'ooniif deebise.

¹⁷ Fara'oonis Yoosefiin akkana jedhe; "Ani abjuu kootiin qarqara laga Abbayyaa irra dhaabachaan ture; ¹⁸ Kunoo saawwan gagabbatoo fi babbareedoon torba lagicha keessaa ol ba'anii shambaqqoo keessa dheedaa turan. ¹⁹ Isaan duubaan immoo saawwan huhuqqatoo, baay'ee fofokkisoo fi qaqqalloon biraa torba ol ba'an; ani takkumaa saawwan fofokkisoo akkanaa guutummaa biyya Gibxi keessatti hin argine. ²⁰ Saawwan huhuqqatoo fi fofokkisoon sun saawwan gagabbatoo duraan ol ba'an torban sana nyaatan. ²¹ Garuu erga isaan nyaatanii booddee namni tokko illee akka isaan saawwan sana nyaatan beekuu hin dandeenye; isaan akkuma utuu hin nyaatiniin dura turan sana fofokkisoo turaniitii. Anis hirribaa nan dammaqe.

²² "Akkasumas ani abjuu kootiin mataa midhaanii torba kan misee fi gaggaarii somaa tokko irratti guddachaa jiru nan arge. ²³ Isaan duubaanis kunoo mataan midhaanii cocoollagaan, qaqqalaan kan hobombolettii ba'a biiftuutiin gubate torba ol ba'e. ²⁴ Mataawwan midhaanii qaqqal'aan sun mataa midhaanii gaggaarii torban sana liqimsan; anis waan kana tolchitootatti nan hime; garuu namni tokko iyyuu naa ibsuu hin dandeenye."

²⁵ Yoosef immoo Fara'ooniin akkana jedhe; "Abjuun Fara'oon lamaanuu tokkuma. Waaqni waan hojjechuuf jiru Fara'oonitti mul'iseera. ²⁶ Saawwan babbareedoon torba waggaa torba; mataawwan midhaanii gaggaarii torbas waggaa torba; abjuun sun tokkuma. ²⁷ Saawwan qaqqaloo fi fofokkisoon torban duubaan ol ba'anis waggaa torba; mataawwan midhaanii qaqancaroon hobombolettii ba'a biiftuutiin gubatan torban immoo waggoota beelaa torba.

²⁸ "Wanni kun akkuma ani Fara'oonitti himee dha. Waaqni waan hojjechuuf jiru Fara'oonitti argisiiseera. ²⁹ Barri quufaa guddaan isaa torba biyya Gibxi guutuutti ni dhufa; ³⁰ isaan booddeedhaan garuu waggoonni beelaa torba ni dhufu. Quufni biyya Gibxi hundi ni irraanfata; beelli sunis biyya balleessa. ³¹ Waan beelli duubaan dhufu sun baay'ee hamaa ta'uuf quufni biyyattii hin yaadatamu. ³² Abjuun kun bifa lamaan Fara'oonitti kennamuun isaa waan dubbichi Waaqaan murteeffameef dha; Waaqnis waan kana dafee ni raawwata.

³³ “Kanaafuu Fara’oon nama hubataa fi beekaa tokko filatee biyya Gibxi irratti haa muudu. ³⁴ Fara’oon akka isaan waggoota quufaa torban keessa midhaan biyya Gibxiitii galfamu harka shan keessaa harka tokko walitti qabaniif qondaaltota biyya irratti haa muudu. ³⁵ Isaanis waggoota gaarii dhufuuf jiran kana keessa midhaan hunda walitti haa qaban; akka nyaataaf ta’uufis midhaan kana taayitaa Fara’oon jalatti magaalawwan keessatti haa kuusan; haa eeganis. ³⁶ Midhaan kunis akka biyyattiin beelaan hin badneef waggoota beelaa torban Gibxitti dhufuuf jiru keessa akka fayyaduuf biyyattiidhaaf ol haa kaa’amu.”

³⁷ Dubbichis Fara’oonii fi qondaaltota isaa hunda biratti gaarii ture. ³⁸ Fara’oonis, “Nama akka namicha kanaa kan Hafuurri Waaqaa keessa jiru argachuu dandeenyaa ree?” jedhee isaan gaafate.

³⁹ Fara’oonis Yoosefiin akkana jedhe; “Erga Waaqni waan kana hunda sitti mul’ise, namni akka kee hubataa fi beekaa ta’e tokko iyyuu hin jiru. ⁴⁰ Ati masaraa koo irratti itti gaafatamaa taata; sabni koo hundinuus ajaja kee jalatti bula. Ani ulfina teessoo qofaan si caala.”

Yoosef Gibxi Irratti Muudame

⁴¹ Fara’oonis Yoosefiin, “Ilaa, ani biyya Gibxi hunda irratti si muudeera” jedhe. ⁴² Ergasii Fara’oon qubeelaa chaappaa isaa quba isaa irraa baasee quba Yoosefitti kaa’e. Uffata quncee talbaa haphii irraa hojjetame isatti uffise; amartii warqee morma isaatti kaa’e. ⁴³ Innis gaarii isaa isa lammaffaa irra isa teessise; namoonnis, “Sagadaa!” jechaa fuula isaa dura deemanii iyyaa turan; akkanaa Fara’oon biyya Gibxi hunda irratti isa muude.

⁴⁴ Ergasiis Fara’oon Yoosefiin, “Ani Fara’oonii dha; garuu ajaja kee malee namni guutummaa Gibxi harka isaa yookaan miilla isaa sochoosu tokko iyyuu hin jiru” jedhe. ⁴⁵ Fara’oonis Yoosefiif maqaa Zaafenaat-Phane’aa jedhamu baase; intala Phooxiiferaa lubicha magaalaa Ooni kan Aasenati jedhamtu illee itti heerumsiise. Yoosefis biyya Gibxi hunda keessa naanna’e.

⁴⁶ Yoosef yeroo tajaajila Fara’oon mooticha Gibxi jalqabetti nama waggaa soddomaa ture; innis fuula Fara’oon duraa ba’ee deemee biyya Gibxi hunda keessa nanaanna’e. ⁴⁷ Waggoota quufaa torban sana keessa lafti midhaan akka malee baay’atu kennite. ⁴⁸ Yoosefis midhaan waggoota torban sana keessa Gibxii galfame hunda walitti qabee magaalawwan keessatti kuuse. Midhaan lafa qotiisaa naannoo magaalaa tokkoo tokkoo magaalaa sanaa keessatti kuuse. ⁴⁹ Yoosefis midhaan baay’inni isaa guddaa akka cirracha galaanaa ta’e kuuse. Waan midhaan sun safaramuu hin danda’amiif inni safaruu dhiise.

⁵⁰ Yoosef utuu waggoonni beelaa sun hin dhufin dura Aasenati intala Phooxiiferaa lubicha magaalaa Ooni irraa ilmaan lama dhalche. ⁵¹ Yoosefis, “Waaqni rakkina koo hundaa fi mana abbaa koo hunda na irraanfachiiseera” jedhee maqaa ilma isaa hangafichaa Minaasee jedhee moggaase. ⁵² “Waaqni biyya ani itti rakkadhe keessatti na baay’iseera” jedhee ilma isaa isa lammaffaa immoo Efreem jedhee moggaase.

⁵³ Gibxi keessatti waggoonni quufaa torban sun darbee, ⁵⁴ akkuma Yoosef dubbate sana waggoonni beelaa torba jalqabe. Biyyoota biraa hunda keessa beelatu ture; biyya Gibxi guutuu keessa garuu midhaanitu ture. ⁵⁵ Yeroo Gibxi guutuun beela’uu jalqabetti namoonni midhaan barbaadani Fara’oonitti iyyatan; Fara’oon immoo warra Gibxi hundumaan, “Yoosef bira dhaqaatii waan inni isinitti himu godhaa” jedhe.

⁵⁶ Beelli guutummaa biyyattii keessa babal’annaan Yoosef mankuusaalee hundumaa bane namoota Gibxitti midhaan gurgure; beelli Gibxi hunda keessatti hammaatee tureetii. ⁵⁷ Waan guutuu addunyaa irratti beelli hammaateef biyyoonni hundinuu Yoosef irraa midhaan bitachuuf gara Gibxi dhufaa turan.

42

Obbolloonni Yoosef Gibxi Dhaqan

¹ Yaaqoob yommuu akka Gibxi keessa midhaan jiru dhaga’etti, ilmaan isaatiin, “Isin maaliif wal ilaaltu?” jedhe. ² Itti fufees, “Kunoo ani akka Gibxi keessa midhaan jiru dhaga’eera. Akka nu du’a jalaa baanee jiraannuuf gad bu’aatii achii midhaan nuu bitaa” jedhe.

³ Obboloota Yoosef keessaa kudhan Gibxi keessaa midhaan bituuf gad bu’an. ⁴ Yaaqoob garuu balaatu isa irra ga’a jedhee waan sodaateef obboleessa Yoosef Beniyaamin isaan wajjin hin ergine. ⁵ Beelli biyya Kana’an keessa waan tureef ilmaan Israa’elis warra midhaan bitachuun dhaqan wajjin deeman.

⁶ Yoosefis bulchaa biyyattii kan uummata biyyattii hundatti midhaan gurguru ture. Obboleonni Yoosefis yommuu achi ga'anitti fuula isaaniitiin lafatti gombifamanii sagadaniif. ⁷ Yoosef akkuma obboloota isaa argeen isaan beeke; garuu akkuma nama isaan hin beekneetti afaan hamaa isaanitti dubbatee, "Isin eessaa dhufftan?" jedhee isaan gaafate.

Jarris, "Midhaan bitachuuf jennee Kana'aanii dhufne" jedhanii deebisan.

⁸ Yoo Yoosef obboloota isaa beeke iyyuu jarri isa hin beekne. ⁹ Innis abjuu waa'ee isaanii abjoota sana yaadatee, "Isin basaastota dadhabbii biyyattii basaasuuf dhufftanii dha!" jedheen.

¹⁰ Isaan immoo akkana jedhanii deebisan; "Yaa gooftaa akkas miti; nu garboonni kee midhaan bitachuu dhufne. ¹¹ Nu hundi ilmaan abbaa tokkoo ti; nu garboonni kee namoota amanamoo dha malee basaastota miti."

¹² Innis, "Akkas miti; isin dadhabbii biyyattii basaasuu dhufftan" jedheen.

¹³ Isaan garuu akkana jedhanii deebisan; "Nu garboonni kee obboloota kudha lama, ilmaanuma abbaa tokkoo kan biyya Kana'aan jiraatuu ti. Kunoo quxisuun hunda keenyaa amma abbaa keenya bira jira; inni tokko garuu hin jiru."

¹⁴ Yoosef garuu akkana jedheen; "Akkuma ani isiniin jedhe sana isin basaastota! ¹⁵ Akki isin ittiin qoramtan kana; ani maqaa Fara'ooniin nan kakadha; yoo obboleessi keessan quxisuun sun as dhufe malee isin asii hin sochootan. ¹⁶ Akka inni dhaqee obboleessa keessan fiduuf of keessaa nama tokko ergaa; isin warri haftan immoo mana hidhaatti galfamtu; akkasiinis dubbiin keessan qoratamee akka dhugaa ta'ee fi akka dhugaa hin ta'in ni ilaalama; yoo kanaa achii, ani maqaa Fara'ooniin nan kakadha; isin dhugumaan basaastota!" ¹⁷ Innis hunda isaanii guyyaa sadii mana hidhaa keessa turse.

¹⁸ Guyyaa sadaffaatti Yoosef akkana isaaniin jedhe; "Isin waan kana godhaa; ni jiraattu; ni Waaqa nan sodaadhaatii. ¹⁹ Isin yoo namoota amanamoo taatan obboloota keessan keessaa tokko as mana hidhaa haa turu; warri kaan garuu deema; maatii keessan kanneen beela'aniif midhaan geessaa. ²⁰ Garuu obboleessa keessan quxisuu naa fidaa; akkasiin dubbiin keessan ni mirkaneeffama; isinis hin duutan." Isaanis akkasuma godhan.

²¹ Isaanis akkana waliin jedhan; "Nu dhugumaan sababii obboleessa keenyaatiif adabamaa jirra. Yeroo inni nu kadhatetti lubbuun isaa hammam akka dhiphachaa turte argineerra; nu garuu isa dhaga'uu didne; dhiphinni kun kanaaf nutti dhufe."

²² Ruubeen immoo, "Ani, 'Gurbaa kana hin miidhinaa' jedhee isinitti hin himnee? Isin garuu na dhaga'uu diddan! Kunoo nu dhiiga isaatti ni gaafatamna" jedhe. ²³ Sababii Yoosef karaa nama afaan hiikuutiin isaanitti dubbachaa tureef isaan akka inni waan isaan dubbatan hubatu hin beekne.

²⁴ Yoosef achi isaan irraa garagalee boo'uu jalqabe; ergasii immoo isaanitti garagalee isaanitti dubbate. Simi'ooninis isaan keessaa baasisee fuuluma isaanii duratti hiisise.

²⁵ Yoosef akka qalqalloo isaaniitti midhaan guutaniif, akka meetii tokkoo tokkoo isaanii deebisanii qalqalloo isaanii keessa isaaniif kaa'anii fi akka karaa isaaniitiif galaa isaaniif kennan ajaje. Erga wanni kun isaaniif godhamee booddee ²⁶ jarri midhaan isaanii harroota isaaniitti fe'atanii qajeelan.

²⁷ Isaan keessaa inni tokko iddoo bulanitti harree isaatiif nyaata kennuuf jedhee qalqalloo isaa bane; kunoo afaan qalqalloo keessattis meetii isaa argate. ²⁸ Innis obboloota isaatiin, "Meetiin koo naa deebi'eera; kunoo qalqalloo koo keessa jira" jedhe.

Kana irratti isaan na'anii walitti garagalanii hollachaa, "Wanni Waaqni nutti hojjete kun maali?" jedhan.

²⁹ Isaanis gara biyya Kana'aan abbaa isaanii Yaaqoob bira dhufanii waan isaan irra ga'e hunda isatti himan; akkanas jedhan; ³⁰ "Namichi gooftaa biyya sanaa ta'e afaan hamaa nutti dubbatee akka waan nu biyyattii basaasuu dhaqneetti nu lakkaa'e. ³¹ Nu garuu akkana jenneen; 'Nu namoota amanamoo dha malee basaastota miti. ³² Nu obboloota kudha lama ilmaanuma abbaa tokkoo ti; inni tokko hin jiru; quxisuun hunda keenyaa immoo abbaa keenya bira biyya Kana'aan jira.'

³³ "Namichi gooftaa biyya sanaa ta'e immoo akkana nuun jedhe; 'Akki ani akka isin namoota amanamoo taatanii fi hin ta'in ittiin beeku kana; obboloota keessan keessaa isa tokko as na biratti dhiisaatii maatii keessan kan beela'aniif midhaan geessaa. ³⁴ Garuu akka ani akka isin namoota amanamoo malee basaastota hin ta'in beekuuf obboleessa keessan isa quxisuu sana naa fidaa. Ergasii ani obboleessa keessan deebisee isinii kenna; isinis biyya kana keessatti daldalachuu ni dandeessu.'"

³⁵ Yommuu isaan qalqalloo isaanii keessaa midhaan garagalchanitti, kunoo meetiin tokkoo tokkoo isaanii hidhaa hidhaan qalqalloo isaanii keessa ture. Isaanii fi abbaan isaanii yeroo meetii hidhame sana arganitti ni rifatan. ³⁶ Abbaan isaanii Yaaqoobis,

“Isin ijoollee koo na dhabsiiftan. Yoosef hin jiru; Simi’oonis hin jiru. Amma immoo Beniyaamin fudhachuu barbaaddu. Wannii hundi natti hammaateera!” jedheen.

³⁷ Ruubeen immoo abbaa isaatiin, “Yoo ani deebisee isa siif fiduu baadhe ilmaan koo lamaan ajjeesuu ni dandeessa; isa imaanaa natti kenni; ani deebisee isa nan fida” jedhe.

³⁸ Yaaqoob garuu akkana jedhe; “Ilmi koo isin wajjin achi gad hin bu’u; obboleessi isaa du’eera; isa qofatu hafe. Yoo karaa keessan irratti balaan isa irra ga’e, isin akka arriin koo gaddaan awwaala seenu gootu.”

43

Obboloonna Yoosef Lammata Gibxitti Deebi’an

¹ Amma illee beelli biyyattiitti baay’ee hammaatee ture. ² Erga isaan midhaan biyya Gibxiitti fidan sana nyaatanii fixanii booddee abbaan isaani, “Ammas dhaqaatii midhaan xinnoo dabalaa nuu bitaa” jedheen.

³ Yihuudaan immoo akkana isaan jedhe; “Namichi sun, ‘Yoo obboleessi keessan isin wajjin dhufe malee isin lammata ija koo hin argitan’ jedhee of eeggannoo cimaa nuu kenne. ⁴ Yoo ati obboleessa keenya nu wajjin ergite nu dhaqnee midhaan siif binna. ⁵ Sababii namichi sun, ‘Yoo obboleessi keessan isin wajjin dhufe malee isin lammata ija koo hin argitan’ nuun jedheef, yoo ati isa ergite malee nu gad hin buunu.”

⁶ Israa’el immoo, “Isin maaliif akka obboleessa biraa qabdan namichatti himuudhaan rakkina natti fiddan?” jedhee gaafate.

⁷ Isaanis akkana jedhanii deebisan; “Namichi waa’ee mataa keenyaatii fi waa’ee maatii keenyaa jabeessee nu gaafate. Innis, ‘Abbaan keessan amma iyyuu jiraa? Obboleessa biraa qabduu?’ jedhee nu gaafate; nu gaaffiidhuma isaa deebifneef. Yoos akka inni, ‘Obboleessa keessan as fidaa’ nuun jedhu akkamiin beekuu dandeenya ree?’”

⁸ Yihuudaanis abbaa isaa Israa’eliin akkana jedhe; “Akka nu, atii fi ijoolleen keenya du’a jalaa baanee jiraannuuf gurbicha na wajjin ergi; nu kaanee deemnaatii. ⁹ Ani wabii isaafin ta’a; waa’ee isaas anuma mataa koo gaafachuu ni dandeessa. Yoo ani deebisee isa siif fidee fuula kee dura dhaabuu baadhe, ani bara jireenya koo guutuu fuula kee duratti balleessaa kanatti nan gaafatama. ¹⁰ Utuu turuu baannee silaa yoona yeroo lama dhaqnee deebineerra ture.”

¹¹ Kana irratti abbaan isaani Israa’el akkana isaaniin jedhe; “Erga akkas ta’ee waan kana godhaa; oomisha biyya kanaa filatamaa keessaa kennaa tokko tokko jechuunis haphee dibatan xinnoo ishee, damma xinnaa isaa, urgooftuu fi qumbii xinnoo ishee, ocholoonii fi lawuzii xinnoo ishee geessaatii namichaaf kenna. ¹² Isin waan meetii afaan qalqalloo keessanii keessa kaa’amee isinii deebi’e sana deebisuu qabdanif meetii sana harka lama fudhadhaatii deemaa; meetiin sun dogoggoraan dhufe ta’aatii. ¹³ Obboleessa keessanis fudhadhaatii dafaa gara namichaatti deebi’aa. ¹⁴ Akka inni obboleessa keessan kaanii fi Beniyaamin illee isin wajjin deebisee erguuf Waaqni Waan Hunda Danda’u akka namichi garaa isinii laafu haa godhu. Ani yoo ijoollee dhabe illee ijoollee nan dhaba.”

¹⁵ Namoonni sunis kennaawwan sana, meetii sana harka lamaa fi Beniyaaminis fudhatanii ariitiidhaan Gibxitti gad bu’anii fuula Yoosef dura dhadhaabatan. ¹⁶ Yoosefis yommuu Beniyaamin isaan biratti argetti hangafa hojjetoota mana isaatiin, “Namoota kana mana kootti geessi; horii tokko qalii nyaata qopheessi; isaan sa’aatii ja’atti na wajjin nyaatuutii” jedhe.

¹⁷ Namichi sunis akkuma Yoosef isa ajaje godhe; jara sanas mana Yoosefitti geesse. ¹⁸ Namoonni sun yeroo mana Yoosefitti geeffamanitti sodaatanii akkana jedhan; “Nu sababii meetii yeroo jalqabaa deebi’ee afaan qalqalloo keenyaa keessatti argame sanaatiif as fidamne; inni nu rukutee, nu mo’atee, akka garbootaatti nu qabatee harroota keenya fudhachuu barbaada.”

¹⁹ Kanaafuu jarri gara hangafa hojjetoota Yoosefitti ol ba’anii balbala manaa duratti itti dubbatan. ²⁰ Akkanas jedhan; “Yaa gooftaa, nu yeroo jalqabaa midhaan bitachuuf as gad buunee turre. ²¹ Nus yeroo iddoo bullu geenyee qalqalloo keenya bannetti tokkoon tokkoon keenya afaan qalqalloo keenyaa keessatti meetii keenya akkuma jirutti arganne. Kanaafuu meetii sana deebifnee fidnee dhufneerra. ²² Meetii biraas ittiin midhaan bitachuuf fidnee dhufneerra. Eenyu akka meetii keenya qalqalloo keenya keessa nuu kaa’es hin beeknu.”

²³ Innis deebisee, “Homaa miti; hin sodaatinaa. Waaqni keessan, Waaqni abbaa keessanii qalqalloo keessanitti badhaadhummaa isinii naqeera; meetiin keessan na ga’ee jira” jedheen. Ergasiis Simi’oonin gara isaaniitti gad baase.

²⁴ Hangafni hojjetootaa sunis jara sana mana Yoosefitti geessee akka isaan miilla isaanii dhiqataniif bishaan kenneef; harrroota isaaniiif immoo okaa kenne. ²⁵ Isaanis achitti akka nyaatan waan dhaga'aniif dhufaatii Yoosef kan sa'aatii ja'aatiif kennaa isaanii qopheeffatan.

²⁶ Yeroo Yoosef manatti galetti isaan kennaa manatti ol galchaniituran sana kennaniif; fuula isaa durattis lafatti gombifamanii harka fuudhan. ²⁷ Innis nagaa isaan gaafatee, "Abbaan keessan jaarsi isin waa'ee isaa natti himtan sun akkam? Inni amma iyyuu jiraa?" jedheen.

²⁸ Jarris, "Tajaajilaan kee abbaan keenya amma iyyuu ni jira; nagumas" jedhanii deebisan. Ulfina isaaf kennuufis gad jedhan.

²⁹ Innis ol ilaalee obboleessa isaa, ilma haadha isaa Beniyaamin argee, "Inni kun obboleessa keessan quxisuu isin waa'ee isaa natti himtan sanaa?" jedhee gaafate. Itti fufees, "Ilma ko, Waaqni si haa eebbisu" jedheen. ³⁰ Yoosef yommuu obboleessa isaa argetti garaan raafamee dafee gad ba'e; boo'uu barbaadees kutaa mana isaa seenee achitti boo'e.

³¹ Ergasiis fuula isaa dhiqatee gad ba'e; of jajjabeessee, "Nyaanni haa dhi'aatu" jedhe.

³² Jarris sababii warri Gibxi Ibroota wajjin hin nyaanneef Yoosefiif kophaatti, obboloota isaatiif kophaatti, warra Gibxi kanneen isa wajjin nyaataniifis kophaatti dhi'eessan; Ibroota wajjin nyaachuun warra Gibxi biratti jibbisiisaa tureetii.

³³ Namoonni sunis akkuma umurii isaanii hangafaa jalqabanii hamma quxisuutti fuula isaa dura tataa'anii dinqifatanii wal ilaalan. ³⁴ Maaddii Yoosef irraas nyaanni qoodameef; qoodni Beniyaam garuu qooda tokko tokko isaaniiif kenname dachaa shan ta'a ture. Jarris akkasiin Yoosef wajjin dhuganii itti ho'e.

44

Xoofoo Meetii Qalqalloo Keessaa

¹ Yoosefis akkana jedhee hangafa hojjetoota mana isaa ajaje; "Qalqalloo jara kanaa hamma baachuu danda'utti midhaan itti guuti; meetii tokkoo tokkoo isaaniis afaan qalqalloo isaanii keessa kaa'i. ² Xoofoo koo isa meetii irraa hojjetame immoo meetii inni ittiin midhaan bitachuu dhufe wajjin afaan qalqalloo isa quxisuu sanaa keessa kaa'i." Namichis akkuma Yoosef isa ajaje godhe.

³ Namoonni sun akkuma lafti bariiteen harroota isaanii wajjin geggeeffaman. ⁴ Utuma isaan magaalaa sana irraa hin fagaatin Yoosef hangafa hojjetoota isaatiin akkana jedhe; "Dafii jara kana duukaa bu'i; yommuu qaqqabdutti immoo akkana jedhiin; 'Isin maaliif waan gaarii waan hamaadhaan deebiftu? ⁵ Xofoon kun xoofoo gooftaan koo ittiin dhuguu fi ittiin waa himu mitii? Isin waan kana gochuudhaan waan hamaa hojjetan.'" ⁶ Innis yommuu isaan qaqqabetti waanuma kana isaanitti dubbate. ⁷ Jarris akkana isaan jedhan; "Gooftaan koo maaliif dubbii akkanaa dubbata? Waan akkanaa hojjechuun tajaajiltoota kee irraa haa fagaatu! ⁸ Kunoo nu meetii afaan qalqalloo keenyaa keessatti arganne iyyuu biyya Kana'aaniitii deebifnee siif fidne. Yoos nu maaliif mana gooftaa keetiitii meetii yookaan warqee hanna ree? ⁹ Tajaajiltoota kee keessaa namni wanni kun biratti argame kam iyyuu haa du'u; nu warri hafne immoo garboota gooftaa koo ni taana."

¹⁰ Inni immoo jaraan, "Amma akkuma isin jettan haa ta'u; abbaan wanti kun biratti argame garbicha naaf ta'a; isin warri kaan immoo gad dhiifamtu" jedhe.

¹¹ Tokkoon tokkoon isaanii dafanii qalqalloo isaanii lafa keeeyyataniis hiikan. ¹² Hangafni hojjetootaa sunis hangafaa jalqabee hamma quxisuutti sakatta'e. Xofoon sunis qalqalloo Beniyaam keessatti argame. ¹³ Kana irratti isaan uffata isaanii tarsiisaan. Hundi isaanii harroota isaanii fe'atanii magaalattiitti deebi'an.

¹⁴ Yoosef yeroo Yihuudaa fi obbollooni isaa ol seenanitti amma iyyuu mana keessa ture; isaanis fuula isaa duratti kukkufan. ¹⁵ Yoosefis, "Wanti isin hojjetan kun maal? Akka namni akka kootii hooda himuudhaan waa arguu danda'u isin hin beektanii?" isaaniiin jedheen.

¹⁶ Yihuudaan immoo akkana jedhee deebise; "Nu gooftaa kootiin maal jechuu dandeenya? Nu maal dubbachuu dandeenya? Nu qulqulluu ta'uu keenya akkamiin mirkaneessuu dandeenya? Waaqni balleessaa garboota keetii ifatti baaseera. Kunoo nu garboota gooftaa koo ti; nu hundi keenya, namni xofoon sun biratti argames garboota kee ti."

¹⁷ Yoosef garuu, "Waan akkanaa hojjechuun narraa haa fagaatu! Nama xofoon biratti argame qofatu garbicha koo ta'a. Warri haftan garuu nagaadhaan gara abbaa keessaniitti deebi'aa" jedhe.

¹⁸ Yihuudaan immoo Yoosefitti dhi'aatee akkana jedhe: "Maaloo gooftaa ko, akka garbichi kee waan tokko gooftaa kootti dubbatu eeyyamiif. Ati akkuma Fara'oon taatus garbicha keetti hin aarin. ¹⁹ Gooftaan koo, 'Isin abbaa yookaan obboleessa qabduu?' jedhee garboota isaa gaafatee ture. ²⁰ Nus, 'Abbaa dulloomaa tokko qabna; ilmi quxisuun bara dullama isaa keessa isaaf dhalate tokkos jira. Obboleessi isaas du'eera; ijoollee haati isaa deesse keessaa isa qofatu hafe; abbaan isaa isa jaallata' jennee turre.

²¹ "Atis garboota keetiin, 'Akka ani ija kootiin isa arguuf naa fidaa' jette. ²² Nus gooftaa kootiin, 'Mucichi abbaa isaa dhiisee deemuu hin danda'u; yoo inni isa dhiisee biraa deeme abbaan isaa ni du'a' jenne. ²³ Ati immoo garboota keetiin, 'Yoo obboleessi keessan inni quxisuun isin wajjin dhufuu baate, isin lammaa fuula koo hin argitan' jette. ²⁴ Nus yeroo gara garbicha kee abbaa kootti deebinetti waan gooftaan koo jedhe isatti himne.

²⁵ "Abbaan keenya, 'Ammas dhaqaatii midhaan xinnoo dabalaa nuu bitaa' nuun jedhe. ²⁶ Nu garuu, 'Nu dhaquu hin dandeenyu; yoo obboleessi keenya inni quxisuun nu wajjin jiraate qofa dhaqna. Yoo obboleessi keenya inni quxisuun nu wajjin dhaquu baate nu fuula namichaa arguu hin dandeenyu' jenne.

²⁷ "Abbaan koo garbichi kee immoo akkana nuun jedhe; 'Akka niitiin koo ilmaan lama naa deesse isin ni beektu. ²⁸ Isaan keessaas inni tokko na biraa ba'e; anis, 'Inni dhugumaan ciccirameera' nan jedhe. Ani ergasii isa hin argine. ²⁹ Yoo isin isa kanas na duraa fuutani balaan isa irra ga'e, isin akka arriin koo gaddaan awwaala seenu gootu.'

³⁰ "Kanaafuu amma yeroo ani gara garbicha kee abbaa kootti deebi'utti, yoo mucichi nu wajjin jiraachuu baate abbaan koo kan jireenyi isaa jirenya mucichaatiin walitti dhidhame sun, ³¹ akka mucichi nu wajjin hin jirre argee du'a. Nu garboonni kees akka arriin abbaa keenya garbicha keetti gaddaan awwaala seenu goona. ³² Ani garbichi kee akka mucaan kun nagaadhaan deebi'u abbaa koo duratti wabii ta'ee, 'Yaa abbaa ko, yoo ani deebisee isa siif fiduu baadhe, ani bara jirenya koo guutuu fuula abbaa koo duratti balleessaa kanatti nan gaafatama!' jedhe.

³³ "Eгаа amma ani garbichi kee iddoo mucichaa garbicha gooftaa koo ta'ee asitti nan hafa; mucichi immoo obboloota isaa wajjin haa deebi'u. ³⁴ Yoo mucichi na wajjin hin jiraatin ani akkamittin gara abbaa kootti deebi'uu danda'a? Waawuu; akka ani gadda abbaa kootti dhufu argu na hin godhin."

45

Yoosef Of Beeksise

¹ Kana irratti Yoosef namoota hunda duratti of qabuu dadhabee, "Namoota hunda fuula koo duraa gad yaasaa!" jedhee iyye. Kanaaf yommuu Yoosef obboloota isaatti of beeksisetti namni tokko iyyuu isa bira hin turre. ² Sababii inni guddisee boo'eef warri Gibxi ni dhaga'an; warra masaraa Fara'oon birattis ni dhaga'ame.

³ Yoosefis obboloota isaatiin, "Ani Yoosef; abbaan koo amma iyyuu jiraa?" jedhee gaafate. Obboloonni isaa garuu sababii fuula isaa duratti na'anii turaniif deebii isaaf kennuu hin dandeenye.

⁴ Yoosefis obboloota isaatiin, "Mee as natti dhi'aadhaa" jedhe. Isaan isatti dhi'aannaan inni akkana jedhe; "Ani Yoosef obboleessa keessan isa isin Gibxitti gurgurtan sanaa dha! ⁵ Ammas sababii asitti na gurgurtaniif hin gaabbinaa; ofittis hin aarinaa. Waaqni lubbuu baraaruuf jedhee isin dura na ergeeraatii. ⁶ Waggoota lamaan kana beelatu biyyattii keessa ture; waggoota shanan dhufan keessas lafa qotachuu fi midhaan galfachuu hin jiru. ⁷ Waaqni lafa irratti sanyii siniif hambisuu fi furii guddaadhaan lubbuu keessan oolchuuf jedhee isin dura na erge.

⁸ "Waaqatu as na erge malee isin miti. Inni Fara'ooniif abbaa na godhe; warra mana isaa jiran hunda irratti gooftaa, biyya Gibxi hunda irratti immoo bulchaa na godhe. ⁹ Ammas dafaa gara abbaa kootti deebi'aatii akkana isaan jedhaa; 'Ilmi kee Yoosef akkana jedha: Waaqni Gibxi hunda irratti gooftaa na godheera. Gara kootti gad bu'i; hin turinis. ¹⁰ Ati biyya Gooshen keessa ni jiraatta; ati, ijoolleen keetii fi ijoolleen ijoollee keetii, bushaayeen kee, loon keetii fi wannii ati qabdu hundi natti dhi'aattanii jiraatu. ¹¹ Sababii amma iyyuu waggaan beelaa shan dhufaa jiruuf ani achitti sin soora; yoo kanaa achii atii fi warri mana kee jiraatan, wannii ati qabdu hundinuus ni rakkattu.'

¹² "Akka namni isiniitti dubbachaa jiru kun anuma ta'e kunoo, iji keessan, iji obboleessa koo Beniyaamis ni arga. ¹³ Ulfina Gibxi keessatti naa kenname hundaa fi waan argitan hunda abbaa kootti himaa. Abbaa koos dafaatii as fidaa."

¹⁴ Ergasiiis morma obboleessa isaa Beniyaamitti marmee boo'e; Beniyaamis boo'aa isa hammate. ¹⁵ Yoosefis obboloota isaa hunda dhungatee itti boo'e. Ergasii obboloonni isaa isa wajjin haasa'an.

¹⁶ Yommuu akka obbolloonni Yoosef dhufan masaraa Fara'oonitti dhaga'ametti, Fara'oonii fi qondaaltonni isaa ni gammadan. ¹⁷ Fara'oonis Yoosefiin akkana jedhe; "Obbolloota keetiin akkana jedhi; 'Waan kana godhaa: Horii keessan fe'adhaa biyya Kana'aaniitti deebi'aatii ¹⁸ abbaan keessanii fi maatiiwwan keessan natti fidaa. Ani lafa biyya Gibxi keessaa lafa hunda caalu isiniif nan kenna. Isin cooma biyyattii ni nyaattu.'

¹⁹ "Akkasumas akkana jedhii isaanitti himi; 'Waan kana godhaa: Ijoollee keessaniifis, niitota keessaniifis biyya Gibxiitti gaariwwan fudhadhaa; abbaa keessanis fidaatii kottaa. ²⁰ Waa'ee qabeenya keessanii hin yaadda'inaa; wanni biyya Gibxi guutuu keessaa waan hunda caalu kan keessan ta'aatii.'"

²¹ Ilmaan Israa'elis akkasuma godhan. Yoosefis akkuma Fara'oon isa ajajetti gaariwwan kenneefii karaa isaanitiif illee galaa galaaseef. ²² Tokkoo tokkoo isaanitiif wayyaa kenne; Beniyaamiif garuu meetii saqilii dhibba sadiitii fi wayyaa irraa jalaa shan kenne. ²³ Abbaa isaatiif immoo harroota, wanni biyya Gibxi gaggaariin itti fe'ame kudhan, akkasumas harroota dhaltuu midhaan, buddeenaa fi galaan biraa karaa isaatiif itti fe'ame kudhan erge. ²⁴ Innis akkasitti obbolloota isaa erge; innis yeroo isaan qajeelanitti, "Karaatti wal hin lolinaa!" jedheen.

²⁵ Isaanis Gibxi keessaa ol ba'anii gara biyya Kana'aan abbaa isaanii Yaaqoob bira dhaqan. ²⁶ Isaanis, "Yoosef amma iyyuu jira! Biyya Gibxi guutuu iyyuu isumatu bulcha" jedhaniin. Yaaqoob immoo naasuudhaan of wallaale; jara amanuus hin dandeenya. ²⁷ Garuu yeroo jarri waan Yoosef isaaniiin jedhe hunda isatti himanii innis gaariwwan Yoosef isa fichisiisuuf ergeef sana argetti lubbuun abbaa isaanii Yaaqoob ni bayyanatte. ²⁸ Israa'elis, "Na ga'a! Ilmi koo Yoosef amma iyyuu jira. Anis utuun hin du'in dhaqee isa nan arga" jedhe.

46

Yaaqoob Biyya Gibxi Dhaqe

¹ Israa'el waan qabu hunda fudhatee ka'e; yeroo Bersheebaa ga'ettis Waaqa abbaa isaa Waaqa Yisihaaqiifis aarsaa dhi'eesse.

² Waaqnis halkan mul'ataan, "Yaaqoob! Yaaqoob!" jedhee Israa'elitti dubbate. Innis, "Kunoo ani as jira" jedhee deebise.

³ Waaqnis akkana jedhe; "Ani Waaqayyo, Waaqa abbaa keetii ti. Gibxitti gad bu'uu hin sodaatin; ani achitti saba guddaa sin taasisaatii. ⁴ Ani si wajjin Gibxitti gad bu'ee deebisee sin fida. Harkuma Yooseftu ija kee walitti siif qaba."

⁵ Yaaqoobis Bersheebaadhaa ka'ee qajelee; ilmaan Israa'elis abbaa isaanii Yaaqoob, ijoollee isaanitiif fi niitota isaanii gaariwwan Yaaqoobin baachuuf Fara'oon erge sana irra teessisan. ⁶ Yaaqoobii fi sanyiin isaa hundis horii isaanitiif fi qabeenya Kana'aanitti horatan of faana fudhatanii Gibxitti godaanan. ⁷ Innis sanyii isaa hunda jechuunis ilmaan isaa, ilmaan ilmaan isaa, intallan isaatii fi intallan ilmaan isaa fudhatee Gibxitti godaane.

⁸ Maqaawwan ilmaan Israa'el warra Gibxitti godaanan sanaa jechuunis Yaaqoobii fi sanyiiwwan isaa kanneenii dha:

Ruubeen jechuunis ilma Yaaqoob hangafticha.

⁹ Ilmaan Ruubeen:

Henook, Faluusoo, Hezroonii fi Karmii.

¹⁰ Ilmaan Simi'oon:

Yemuu'eel, Yaamiin, Oohad, Yaakiin, Zooharii fi Shaawul ilma dubartii Kana'aan sanaa.

¹¹ Ilmaan Lewwii:

Geershoon, Qohaatii fi Meraarii.

¹² Ilmaan Yihuudaa:

Eeri, Oonaan, Sheelaa, Faaresii fi Zaaraa. Eerii fi Oonaan garuu biyya Kana'aanitti du'an.

Ilmaan Faares:

Hezroonii fi Hamuul.

¹³ Ilmaan Yisaakor:

Toolaa, Fuwaa, Yoobii fi Shimroon.

¹⁴ Ilmaan Zebuuloon:

Sered, Eeloonii fi Yahili'eel.

¹⁵ Isaan kunneen intala isaa Diinaa dabalatee ilmaan Liyaan kaaba dhi'a Phaadaan Arraamitti Yaaqoobiif deessee dha. Ilmaanii fi intallan isaa kunneen walumaa galatti soddomii sadii turan.

¹⁶ Ilmaan Gaad:

Ziifyon, Hagii, Shuunii, Esboon, Eerii, Aroodii fi Ari'eel.

¹⁷ Ilmaan Aasheer:

Yimnaa, Yishwaa, Yishwii fi Beriiyaa. Obboleettiin isaaniis Seraa dha.

Ilmaan Beriiyaa:

Hebeerii fi Malkii'eel.

¹⁸ Isaan kunneen ijoollee Ziifaan Yaaqoobiif deessee dha. Ziifaan ishee Laabaan intala isaa Liyaadhaaf kenne sanaa dha. Isaan walumaa galatti kudha ja'a turan.

¹⁹ Ilmaan Raahel niitii Yaaqoob:

Yoosefii fi Beniyaam.

²⁰ Minaasee fi Efreem, Aasenati intala Phooxiiferaa lubicha magaalaa Ooni sanaa irraa Gibxi keessatti Yoosefiif dhalatan.

²¹ Ilmaan Beniyaam:

Belaa, Beker, Ashbeel, Geeraa, Na'amaan, Eehii, Roosh, Muufim, Hufimii fi Ardi.

²² Isaan kunneen ilmaan Raahel Yaaqoobiif deessee dha; isaanis walumaa galatti nama kudha afur turan.

²³ Ilmi Daan:

Hushiimii dha.

²⁴ Ilmaan Niftaalem:

Yahizeel, Guunii, Yeexerii fi Shiileem.

²⁵ Isaan kunneen ilmaan Bilihaan Yaaqoobiif deessee dha; Bilihaan ishee Laabaan intala isaa Raaheliif kenne sanaa dha; isaan walumaa galatti nama torba turan.

²⁶ Namoonni Yaaqoob wajjin Gibxitti godaanan utuu niitota ilmaan isaa hin dabalatin sanyiin isaa walumaa galatti jaatamii ja'a turan. ²⁷ Ilmaan Gibxitti Yoosefiif dhalatan lamaan dabalatee miseensonni maatii Yaaqoob warri Gibxitti godaanan walumaa galatti torbaatama turan.

²⁸ Yaaqoobis akka inni dhaqee karaa Gooshenitti nama geessu gaafatuuf Yihuudaa of dura gara Yoosefitti erge. Yommuu isaan Gooshen ga'anitti, ²⁹ Yoosef gaarii isaa qopheeffatee abbaa isaa Israa'el simachuuf Gooshenitti qajelee. Innis akkuma fuula isaa duratti mul'ateen morma isaatti marmee yeroo dheeraa boo'e.

³⁰ Israa'elis Yoosefiin, "Ani sababii akka ati amma iyyuu lubbuun jirtu ofii kootiin argeef si'achi du'u illee hin gaabbu" jedhe.

³¹ Yoosefis obboloota isaatii fi warra mana abbaa isaa jiraataniin akkana jedhe; "Ani ol ba'ee Fara'oonitti nan dubbadha; akkanas nan jedhaan; 'Obboloonni koo fi warri mana abbaa koo jiraatan kanneen biyya Kana'aan jiraachaa turan natti dhufaniiru. ³² Namoonni kunneen tiksoota; isaan loon tikfatuutii. Isaan bushaayee isaanii, loonii fi waan qaban hunda fudhatanii dhufan.' ³³ Yoo Fara'oon ofitti isin waamee, 'Hojiin keessan maal?' jedhee isin gaafate, ³⁴ 'Nu garboonni kee akkuma abbootii keenyaa ijoollummaa keenyaa jalqabnee hamma ammaatti horii tikfachaa turre' jedhaa deebisaa. Yoos inni sababii tiksoonni hundinuu warra Gibxi biratti jibbamaniif akka isin biyya Gooshen keessa jiraattan isinii eeyyamaa."

47

¹ Yoosefis gara Fara'oon dhaqee, "Abbaan kootii fi obboloonni koo bushaayee isaanii, loon isaaniitii fi waan qaban hunda fudhatanii biyya Kana'aan dhufanii kunoo biyya Gooshen jiru" jedhee itti hime. ² Innis obboloota isaa keessaa nama shan filatee Fara'oonitti dhi'eese.

³ Fara'oonis, "Hojiin keessan maali?" jedhee obboloota Yoosef gaafate.

Isaanis, "Nu garboonni kee akkuma abbootii keenyaa tiksoota" jedhanii deebisaniif.

⁴ Akkanas jedhaniin; "Sababii beelli biyya Kana'aanitti cimee bushaayeen garboota keetii waan dheedan dhabaniif nu yeroo gabaabaa as jiraachuu dhufne. Akka nu garboonni kee biyya Gooshen keessa jiraannuuf maaloo nuu eeyyami."

⁵ Fara'oonis Yoosefiin akkana jedhe; "Abbaan keetii fi obbolloonni kee siif dhufaniiru; ⁶ lafti Gibxi fuuluma kee dura jira; abbaa keetii fi obbolloota kee iddoo lafa hundumaa caalu irra qubachiisi. Isaan biyya Gooshen keessa haa jiraatan. Ati yoo namoota isaan keessaa dandheetii qaban beekte loon koo irratti itti gaafatamtoota isaan godhi."

⁷ Ergasii Yoosif abbaa isaa Yaaqoobin fidee fuula Fara'oon duratti dhi'eesse. Erga Yaaqoob Fara'oonin eebbisee booddee, ⁸ Fara'oon, "Umuriin kee hamman?" jedhee isa gaafate.

⁹ Yaaqoobis Fara'ooniin akkana jedhe; "Barri ani keessummaaman jiraadhe waggaa dhibbaa tokkoo fi soddoma. Baroonni koos muraasa; hamaadhas; innis bara abbootiin koo keessummaaman jiraatan sanaan wal qixxee miti." ¹⁰ Kana booddee, Yaaqoob Fara'oonin eebbisee fuula isaa duraa gad ba'e.

¹¹ Yoosifis akkuma Fara'oon isa ajajetti abbaa isaatii fi obbolloota isaa Gibxi keessa qubachiise; lafa lafa hunda caalu, aanaa Raamsee handhuuraa godhee isaanii kenne. ¹² Akkasumas Yoosif abbaa isaatiif, obbolloota isaatii fi warra mana abbaa isaa jiran hundaaf akkuma baay'ina ijoollee isaaniitti midhaan kenne.

Yoosifi fi Beela

¹³ Waan beelli akka malee cimeef biyyattii guutuu keessa wanni nyaatamu hin jiru ture; sababii beela sanaatiinis Gibxii fi Kana'aan akka malee miidhaman. ¹⁴ Yoosifis kaffaltii midhaan namoonni bitachaa turan sanaa maallaqa biyya Gibxii fi Kana'aan keessatti argamu hunda walitti qabee masaraa Fara'oonitti galche. ¹⁵ Maallaqni warra Gibxii fi warra Kana'aan dhumnaan warri Gibxi hundi gara Yoosif dhufanii, "Midhaan nuu kenni. Nu maaliif fuula kee duratti duuna? Maallaqni keenya dhumeera" jedhan.

¹⁶ Yoosif immoo, "Erga maallaqni keessan dhumee horii keessan fidaa; qooda horii keessanii ani midhaan isiniif nan kenna" jedhe. ¹⁷ Isaanis horii isaanii Yoosifitti fidan; Yoosifis qooda fardeen isaanii, qooda bushaayee isaanii, qooda loowwan isaaniitti fi qooda harroota isaanii midhaan kenneef. Innis bara sana geeddaraa horii isaanii hundaa midhaan isaan soore.

¹⁸ Waggaan sun dhumnaan jarri waggaa itti aanutti gara isaa dhufanii akkana jedhan; "Erga maallaqni keenya dhumee horiin keenya kan kee ta'ee as, yaa gooftaa keenya akka dhagna keenyaa fi lafa keenya malee wanni tokko iyyuu nuuf hin hafin nu gooftaa keenya jalaa hin dhoksinu. ¹⁹ Nu maaliif fuula kee duratti duuna? Nu fi lafti keenyas maaliif badna? Nu fi lafa keenya fudhadhuutii qooda isaa midhaan nuuf kenni. Nu lafa keenya wajjin Fara'ooniif ni garboomna. Akka nu du'a jalaa baanee jiraannuuf, akka laftis duwwaa hin hafneef sanyii nuuf kenni."

²⁰ Yoosifis lafa biyya Gibxi hundumaa Fara'ooniif bite. Warri Gibxi hundi waan beelli isaaniitti cimeef lafa isaanii gurguran; laftis kan Fara'oon ta'e; ²¹ Yoosifis daangaa biyya Gibxi tokko irraa hamma daangaa kaaniitti saba garbummaa jala galche. ²² Lafti inni hin bitin lafa lubootaa gofa ture; kunis sababii isaan Fara'oon irraa qooda argatanii fi sababii qooda Fara'oon isaaniif kennu sanaan jiraataniif. Kanaafuu isaan lafa isaanii hin gurgurre.

²³ Yoosifis saba sanaan akkana jedhe; "Kunoo ani har'a isinii fi lafa keessan Fara'ooniif biteera. Kunoo lafatti sanyii facaafadhaa. ²⁴ Yommuu midhaan galfamutti harka shan keessaa harka tokko Fara'ooniif ni kennitu. Harka afran hafe immoo sanyii facaafattan, nyaata ofii keessanii, nyaata warra mana keessan jiraataniitti fi nyaata ijoollee keessanii godhattu."

²⁵ Jarris, "Ati du'a nu oolchiteerta; nu fuula gooftaa keenyaa duratti fudhatama haa argannuu malee Fara'ooniif garboota ni taana" jedhan.

²⁶ Yoosifis akkasiin akka harka shan keessaa harki tokko kan Fara'oon ta'uuf Gibxi keessatti seera lafaa dhaabe; seerri sun hamma har'aatti illee ittiin hojjetamaa jira. Lafa lubootaa qofattu utuu kan Fara'oon hin ta'in hafe.

²⁷ Israa'eloonnis Gibxi keessa kutaa biyya Gooshen keessa qubatan. Achittis qabeenya argatan; horaniis guddaa baay'atan.

²⁸ Yaaqoob waggaa kudha torba biyya Gibxi keessa jiraate; barri jireenya isaas waggaa dhibba tokkoo afurtamii torba ture. ²⁹ Israa'elis yeroon du'a isaa dhi'aannan ilma isaa Yoosifin ofitti waamee akkana jedheen; "Yoo ani fuula kee duratti fudhatama argadhe, mee harka kee gudeeda koo jala kaa'iitii akka gaarummaa na argisiiftuu fi akka naaf amanamtu waadaa naaf seeni. Gibxitti na hin awwaalin; ³⁰ yeroo ani abbootii koo wajjin boqodhutti biyya Gibxii na baasii iddoo isaan itti awwaalamanitti na awwaali."

Innis, "Akkuma ati jette nan godha" jedhe.

³¹ Israa'elis, "Naa kakadhu" jedheen. Yoosifis ni kakateef. Israa'el immoo mataa ulee isaatti irkatee sagade.

48

Minaasee fi Efreem

¹ Yeroo muraasa booddee, “Kunoo, abbaan kee dhukkubsateera” jedhanii Yoosefitti himan. Innis ilmaan isaa lamaan Minaasee fi Efreemin fudhatee dhaqe. ² Yaaqoob yeroo, “Ilmi kee Yoosef gara kee dhufeera” jedhanii itti himanitti, Israa’el of jajjabeessee ka’ee siree irra taa’ee.

³ Yaaqoobis Yoosefiin akkana jedhee; “Waaqni Waan Hunda Danda’u biyya Kana’aan keessatti Luuzitti natti mul’atee achitti na eebbise; ⁴ akkanas naan jedhee; ‘Ani akka ati hortuu fi akka ati baay’attu nan godha. Tuuta sabaa sin godha; ani biyya kana dhaala bara baraa godhee sanyiiwwan kee warra si booddeetiif nan kenna.’

⁵ “Egaa amma ilmaan kee lamaan warri utuu ani as gara kee hin dhufin dura Gibxitti siif dhalatan sun akkuma ilmaan kootti ilaalamu; akkuma Ruubeenii fi Simi’oon kan koo ta’an sana Efreemii fi Minaaseenis kanuma koo ta’u. ⁶ Ijoolleen isaan booddeen siif dhalatan kan kee ta’u. Dhaala qoodachuu keessatti immoo maqaa obboloota isaanii jalatti lakkaa’amu. ⁷ Yeroo ani kaaba dhi’a Phaadaaniitii deebi’aa turetti utuma Efraataa ga’uuf xinumma nuu hafee jiruu Raahel biyya Kana’aan keessatti na jalaa duunaan achumatti karaa Efraataa dhaqu biratti awwaalladhe.” Efraataan kunis Beetlihemii dha.

⁸ Israa’el yeroo ilmaan Yoosef argetti, “Isaan kunneen eenyu?” jedhee gaafate.

⁹ Yoosef immoo abbaa isaatiin, “Isaan kunneen ilmaan biyya kanatti Waaqni naaf kennee dha” jedhee.

Kana irratti Israa’el, “Akka ani isaan eebbisuuf natti fidi” jedhee.

¹⁰ Yeroo kanatti Israa’el dulloomee jji isaa dadhabee ture; innis waa hubachuu hin danda’u ture. Kanaafuu Yoosef ilmaan isaa Israa’elitti dhi’eesse; Israa’elis isaan dhungate; isaan hammate.

¹¹ Israa’elis Yoosefiin, “Ani fuuluma kee iyyuu nan arga jedhee hin yaadne; Waaqni garuu akka ani ijoollee kee iyyuu argu naa eeyyame” jedhee.

¹² Yoosefis jilba Israa’el irraa achi isaan butee fuula isaatiin lafatti gad gombifame. ¹³ Innis ergasii lamaan isaanii iyyuu fuudhee Efreemin karaa mirga isaatiin gara harka Israa’el isa bitaatti, Minaasee immoo bitaa isaatiin gara harka Israa’el isa mirgaatti fidee isatti dhi’eesse. ¹⁴ Israa’el garuu utuma Efreem quxisuu ta’ee jiruu harka isaa mirgaa mataa Efreem irra kaa’e; Minaaseen immoo utuma hangafa ta’ee jiruu Israa’el harka isaa wal qaxxaamursee harka isaa bitaa mataa Minaasee irra kaa’e.

¹⁵ Innis akkana jedhee Yoosefin eebbise;

“Waaqni inni abbootiin koo Abrahaamii fi Yisihaaq
fuula isaa dura jiraatan,

Waaqni inni bara jireenya koo guutuu
hamma har’aatti tiksee koo ture sun,

¹⁶ Ergamaan Waaqayyoo kan balaa hunda jalaa na baase sun
ilmaan kanneen haa eebbisu.

Isaan maqaa kootiin,
maqaa abbootii koo Abrahaamii fi

Yisihaaqiin haa waamaman;
isaan lafa irratti guddaa haa baay’atan.”

¹⁷ Yoosef yommuu akka abbaan isaa harka isaa mirgaa mataa Efreem irra kaa’e argetti ni gadde; kanaafuu inni harka abbaa isaa mataa Efreem irraa fuudhee mataa Minaasee irra kaa’uuf jedhee kaase. ¹⁸ Yoosef abbaa isaatiin, “Yaa abbaa ko, akkas miti; inni kun hangafa; harka kee mirgaa mataa isaa irra kaa’i” jedhee.

¹⁹ Abbaan isaa garuu didee akkana jedheen; “Ani nan beeka; yaa ilma koo nan beeka. Innis saba ta’a; saba guddaa isaa ta’a. Ta’us obboleessi isaa inni quxisuun isa caalaa guddaa ta’a; sanyiin isaas tuuta saba baay’ee ni ta’a.” ²⁰ Innis gaafa sana akkana jedhee isaan eebbise;

“Israa’el maqaa keetiin eebba kana kenna;

‘Waaqni akka Efreemii fi akka Minaasee isin haa taasisu.’”

Yoosefis akkasiin Minaasee dura Efreemin dabarse.

²¹ Ergasii Israa’el Yoosefiin akkana jedhee; “Kunoo ani du’uu ga’eera; Waaqni garuu isin wajjin ta’ee biyya abbaa keessaniitti isin deebisa. ²² Ani qooda obboloota keetii caalchisee qooda tokko siifin kenna; kunis lafa ol ka’aa ani Amoorota irraa goraadee koo fi iddaa kootiin fudhadhe sanaa dha.”

49

Yaaqoob Ilmaan Isaa Eebbise

49:1-28 kwi – KeD 33:1-29

¹ Yaaqoob ilmaan isaa ofitti waamee akkana jedhe: “Akka ani waan bara dhumaa keessa isinitti dhufu isinitti himuuf mee walitti qabamaa.

² “Yaa ilmaan Yaaqoob mee walitti qabamaa dhaggeeffadhaa; abbaa keessan Israa’elin dhaggeeffadhaa.

³ “Yaa Ruubeen, ati ilma koo hangafa; humna koo, mallattoo jalqabaa kan jabina kootii ti; ati ulfinaan ni caalta; humnaan illee ni caalta.

⁴ Ati akka bishaanii asii fi achi raafamta; ol aantummaas hin qabaattu; ati siree abbaa keetiitti ol baatee, afata kootti ol baatee xureessiteertaatii.

⁵ “Simi’oonii fi Lewwiin obboloota; goraadeen isaanii mi’a fincilaa ti.

⁶ Lubbuun koo marii isaaniitti hin seenin; ulfinni koos yaa’ii isaaniitti hin dabalamin; isaan dheekkamsa isaaniitiin nama ajjeesaniiruutii; fedhii ofii isaaniitiinis qotiyyoo naafachiisaniiru.

⁷ Aariin isaanii inni hamaan, dheekkamsi isaanii inni gara jabeessi abaaramaa haa ta’u! Ani Yaaqoob keessa isaan nan bittinneessa; Israa’el keessas isaan nan facaasa.

⁸ “Yaa Yihuudaa obboloonna kee si leellisu; harki kee morma diina keetii qaba; ilmaan abbaa keetii siif sagadu.

⁹ Yaa Yihuudaa ati saafela leencaa ti; yaa ilma koo ati adamoodhaa deebita. Inni akka leencaa, akka leenca dhalaas, riphee ciisa; eenyutu ija jabaatee isa kaasa ree?

¹⁰ Hamma bulchaan dhufutti bokkuun harka Yihuudaatii, uleen bulchiinsaa miilla isaa gidduudhaa hin dhabamu; saboonnis isaaf ni ajajamu.

¹¹ Inni harree isaa muka wayiniitti, ilmoo harree isaa immoo damee filatamaatti hidhata; wayyaa isaa daadhii wayiniitiin, wandaboo isaa immoo dhiiga gumaa wayiniitiin miiccata.

¹² Iji isaa daadhii wayinii irra diimata; ilkaan isaa immoo aannan irra addaata.

¹³ “Zebuuloon qarqara galaanaa jiraata; buufata dooniiwwaniis ta’a; daangaan isaas hamma Siidoonaatti bal’ata.

¹⁴ “Yisaakor harree jabaa fe’iisa lama gidduu ciisuu dha.

¹⁵ Innis yeroo akka iddoon boqonnaa isaa hammam gaarii ta’ee fi akka lafti isaa tolaa ta’e argutti ba’aa baachuuf gatiitii isaa gad qabata; hojii humnaa hojjechuuf of kenna.

¹⁶ “Daan gosoota Israa’el keessaa akka isa tokkootti, saba isaatiif murtii qajeelaa ni kenna.

¹⁷ Daan bofa qarqara karaa ti; akka buutii daandii irraa, kan akka namichi farda yaabbatu gara duubaatti kufuuf kottee fardaa idduu ni ta’a.

18 “Yaa WAAQAYYO, ani fayyisuu kee nan eeggadha.

19 “Gaad weerartootaan ni dha’ama;
inni garuu faana bu’ee isaan dha’a.

20 “Aasheer buddeenni isaa furdaa dha;
inni mootiidhaaf nyaata tolaa ni kenna.

21 “Niftaalem borofa hiikamtee dha;
dubbii gaariis ni dubbata.

22 “Yoosef muka wayinii ija qabeessa,
muka wayinii ija qabeessa burqaa bishaaniitti dhi’oo jiruu dha;
dameen isaa dallaa irra yaa’a.

23 Warri iddaa qabatan waraana isatti banan;
isatti futtaasan; isa jibbanis.

24 Garuu iddaan isaa jabaatee hafe;
irreen harka isaa,

harka Waaqa Jabaa Yaaqoobiin jabeeffame.
Achiis Tiksee sanaan, Kattaa Israa’eliin,

25 Waaqa abbaa keetii isa si gargaaruun,
Waaqa Waan Hunda Danda’u isa
eebba samii gubbaatiin,
eebba gadi fagoo isa jalaatiin,
eebba harmaatii fi gadameessaatiin si eebbisu sanaan
ni eebbifamta.

26 Eebbi abbaa keetii,
eebba tulluuwwan durii,
arjummaa gaarran durii caala.

Kun hundi mataa Yoosefiitti,
gubbee mataa isa obboloota isaa keessaa
hoogganaa ta’eetti haa qabatu.

27 “Beniyaam yeeyyii baay’ee beela’ee dha;
ganama waan adamse itti gaggabee nyaata;
galgala immoo boojuu hira.”

28 Warri kunneen hundi gosoota Israa’el kudha lamaan; kunis waan abbaan isaanii yeroo eebba tokkoo tokkoo isaanii ta’uun isaan eebbiseetti isaanitti dubbatee dha.

Yaaqoob Du’uu Isaa

29 Ergasiis Yaaqoob akkana jedhee isaan ajaje; “Ani gara saba kootiitti walitti qabamuu ga’eera; holqa lafa qotiisaa Efron namicha gosa Heeti sanaatti abbootii koo biratti na awwaalaa. ³⁰ Holqi kunis holqa biyya Kana’aan keessatti Mamree biratti lafa qotiisaa Makfelaa keessatti argamu kan Abrahaam iddoo awwaalaa godhachuuf Efron namicha gosa Heeti sana irraa lafa qotiisaa wajjin bitatee dha. ³¹ Abrahaamii fi niitiin isaa Saaraan achitti awwaalaman; Yisihaaqii fi niitiin isaa Ribqaan achitti awwaalaman; anis achumattan Liyaa awwaale. ³² Lafti qotiisaatii fi holqi isa keessa jiru Heetota irraa bitaman.”

³³ Yaaqoob akkuma ilmaan isaa ajajuu raawwateen miilla isaa siree irratti ol deebifatee hafuura dhumaa baafate; gara saba isaattis walitti qabame.

50

1 Yoosefis abbaa isaa irratti kufee boo’eef; isa dhungates. ² Ergasii immoo Yoosef tajaajiltoota isaa kanneen ogeessota fayyaa ta’an akka isaan reeffa abbaa isaa qorichaan sukkuuman ajaje; jarris reeffa Israa’el qorichaan sukkuuman; ³ waan kana gochuun bultii afurtama guutuu isaanitti fudhate; yeroon qoricha reeffa dibuuf barbaachisu kana tureetii. Warri Gibxiis bultii torbaatama isaaf boo’an.

⁴ Guyyoonni gaddaa darbinaan Yoosef warra mana Fara’oon jiraataniin akkana jedhe; “Yoo ani fuula keessan duratti fudhatama argadheera ta’e, akkana jedhaatii Fara’oonitti naa himaa: ⁵ ‘Abbaan koo akkana jedhee na kakachiiseera; “Kunoo ani du’uu ga’eera; awwaala ani biyya Kana’aan keessatti ofii kootiif qotadhetti na awwaalaa.” Kanaafuu maaloo ani amma dhaqee abbaa koo nan awwaalladha; ergasii immoo nan deebi’a.”

⁶ Fara'oonis, "Dhaqiitii akkuma inni si kakachiise sanatti abbaa kee awwaalladhu" jedheen.

⁷ Yoosefis abbaa isaa awwaallachuu dhaqe. Qondaaltonni Fara'oon hundinuu hangafoonni mana isaatii fi hangafoonni Gibxi hundi isa wajjin deeman. ⁸ Akkasumas warri mana Yoosef jiraatan, obbolloota isaatii fi warri mana abbaa isaa jiraatan hundi isa wajjin deeman. Ijoollee isaanii, bushaayee isaaniitii fi loon isaanii qofattu, Gooshenitti hafe. ⁹ Gaariiwwanii fi warri farda yaabbatanis isa wajjin deeman. Tuunni sunis akka malee guddaa ture.

¹⁰ Isaanis yommuu Yordaanos gama oobdii Axaad bira ga'anitti sagalee isaanii ol fudhatanii gadoodanii boo'an. Yoosefis achitti abbaa isaatiif guyyaa torba boo'e. ¹¹ Namoonni Kana'aan warri achi jiraachaa turan boo'icha oobdii Axaad biratti boo'ame sana arganii, "Boo'ichi kun warra Gibxiitiif boo'icha guddaa dha" jedhan. Kanaafuu iddoon sun Abeel Misraayim jedhamee moggaafame. Iddoon sunis Yordaanos gamatti argama.

¹² Ilmaan Yaaqoob akkuma inni isaan ajaje sana godhan; ¹³ isaanis biyya Kana'aanitti isa geessanii holqa Mamree biratti lafa qotiisaa Makfelaa keessatti argamu kan Abrahaam iddoo awwaalaa godhachuudhaaf Efroon namicha gosa Heeti sana irra lafa qotiisaa wajjin bitate sanatti awwaalan. ¹⁴ Yoosef erga abbaa isaa awwaallatee booddee obbolloota isaatii fi warra isa wajjin abbaa isaa awwaaluu dhaqan hunda wajjin Gibxitti deebi'e.

Yoosef Obbolloota Isaa Jajjabeesse

¹⁵ Obbolloonni Yoosef erga abbaan isaanii du'ee booddee, "Yoo Yoosef hamaa nu isatti hojjennee hundaaf haaloo qabatee haaloo nutti ba'e hoo?" jedhan. ¹⁶ Isaanis akkana jedhanii Yoosefitti dhaammatan; "Abbaan kee utuu hin du'in dura akkana jedhee ajaje; ¹⁷ 'Isin akkana jedhaa Yoosefitti himaa; ani akka ati cubbuu fi balleessaa obbolloonni kee si miidhuuf jedhanii sitti hojjetan sana isaanii dhiiftu sin kadhada.' Maaloo cubbuu tajaajiltoota Waaqa abbaa keetii dhiisi." Yoosefis yommuu ergaa isaanii dhaga'etti ni boo'e.

¹⁸ Obbolloonni isaas dhufanii fuula isaa duratti lafa dha'anii, "Kunoo nu garboota kee ti" jedhan.

¹⁹ Yoosef garuu akkana isaaniin jedhe; "Hin sodaatinaa. Anatu iddoo Waaqaa bu'aa? ²⁰ Isin hamaa natti yaaddan; Waaqni garuu akkuma amma ta'ee jiru kana lubbuu nama baay'ee baraaruuf jedhee waan gaariif yaade. ²¹ Egaa hin sodaatinaa. Ani isinii fi ijoollee keessan nan sooraatii." Innis waan garaa isaan ciibsu isaanitti dubbatee isaan jajjabeesse.

Yoosef Du'uu Isaa

²² Yoosef maatii abbaa isaa wajjin Gibxi keessa ture. Innis waggaa dhibba tokkoo fi kudhan jiraate. ²³ Dhaloota sadaffaa ijoollee Efreem arge. Akkasumas ilmaan Maakiir ilma Minaasee jilba Yoosef irratti dhalatan.

²⁴ Yoosefis obbolloota isaatiin akkana jedhe; "Ani du'uu ga'eera. Waaqni garuu dhugumaan dhufee isin gargaara; biyya kanaa isin baasees gara biyya Abrahaamiif, Yisihaaqii fi Yaaqoobiif kakuun waadaa gale sanaatti isin geessa." ²⁵ Yoosefis ijoollee Israa'el kakachiisee akkana jedheen; "Waaqni dhugumaan dhufee isin gargaara; isinis lafee koo biyya kanaa ol baasuu qabdu."

²⁶ Yoosefis waggaa dhibba tokkoo fi kudhanitti du'e. Jarris qorichaan sukkuumanii Gibxitti sanduuqa reeffaa keessa isa kaa'an.

Seera Ba'uu

Israa'eloonni Cunqurfaman

¹ Maqaan ilmaan Israa'el kanneen maatii isaanii qabatanii Yaaqoob wajjin Gibxi dhaqanii kanaa dha:

² Ruubeen, Simi'oon, Lewwii fi Yihuudaa;

³ Yisaakor, Zebuuloonii fi Beniyaam;

⁴ Daanii fi Niftaalem;

Gaadii fi Aasheer.

⁵ Namoonni sanyii Yaaqoob irraa dhalatan walumaa galatti torbaatama turan; Yoosuf durumaanuu Gibxi ture.

⁶ Yoosefii fi obholoota isaa hundi, dhaloonni sun hundinuus, ni du'an. ⁷ Israa'eloonni garuu horanii akka malee baay'atan; baay'ataniis akka malee jabaatan; biyyattii keessas ni guutan.

⁸ Ergasii mootiin waa'ee Yoosuf hin beekin haaraan tokko bulchaa Gibxi ta'e. ⁹ Innis saba isaatiin akkana jedhe; "Kunoo, Israa'eloonni nu caalaa baay'ataniiru; nu caalaas jabaataniiru. ¹⁰ Kottaa akka isaan kana caalaa hin baay'anneef, yoo waraanni ka'es diinota keenya gargaaranii akka nu hin waraannee fi akka biyyattii keessaa baqatanii hin baaneef haxxummaadhaan isaan qabna."

¹¹ Kanaafuu itti gaafatamtoota isaan cunqursanii hojii humnaa hojjechiisan isaanitti muudan; Israa'eloonnis Fiitoomii fi Raamsee magaalawwan waa itti kuusan godhanii Fara'ooniif ijaaran. ¹² Isaan garuu hamma cunqursaan isaanitti jabaachaa deeme sana baay'ataniif lafa guutan; kana irratti warri Gibxi saba Israa'el sodaatan. ¹³ Warri Gibxis Israa'elootatti gara jabinaan isaan hojjechiifatan. ¹⁴ Isaanis suphee fi xuubii hojjechiisuudhaan, lafa qotiisaa keessas hojii garaa garaa hunda hojjechiisuudhaan hojii itti cimsanii jireenya isaanitti hadheessan; warri Gibxi hojii jabaa jara hojjechiisan hunda keessatti garaa isaaniif hin laafan ture.

¹⁵ Mootiin Gibxi deessistoota Ibrootaa kanneen Siipaaraa fi Fuuhaa jedhamaniin akkana jedhe; ¹⁶ "Isin yommuu dubartoota Ibrootaa da'umsa irratti gargaartanii fi barcuma da'umsa irratti isaan argitan, yoo dhiira ta'e ajjeesaa; yoo durba taate immoo haa jiraattuu dhiisaa." ¹⁷ Deessistoonni sun garuu waan Waaqa sodaataniif, waan mootiin Gibxi isaanitti hime sana hin goone; ijoollee dhiiraas akka isaan jiraataniif dhiisan. ¹⁸ Mootiin Gibxis deessistoota sana ofitti waamee, "Isin maaliif waan kana gootan? Maaliifis ijoollee dhiiraa akka isaan jiraataniif dhiifatan?" jedhee isaan gaafate.

¹⁹ Deessistoonni sunis, "Dubartoonni Ibrootaa akka dubartoota warra Gibxi miti; isaan waan jajjaboo ta'aniif utuu deessistoonni isaan bira hin ga'in da'anii nama eegu" jedhanii Fara'ooniif deebisan.

²⁰ Waaqnis deessistoota sanaaf waan gaarii godhe; Israa'eloonnis baay'ataniis akka malee jabaatan. ²¹ Sababii isaan Waaqa sodaataniif Waaqni deessistoota sanaaf maatii ofii isaanii kenneef.

²² Kana irratti Fara'oon, "Ilma dhalatu hunda laga Abbayyaa keessa buusaa; durbi hundi garuu haa jiraattuu dhiisaa" jedhee saba isaa hunda ajaje.

2

Dhalachuu Musee

¹ Sanyii Lewwii keessaa namichi tokko intala Lewwii tokko fuudhe; ² isheenis ulfooftee ilma deesse. Yommuu akka inni bareedaa ta'e argitetti ji'a sadii isa dhoksite. ³ Kana caalaa isa dhoksuu akka hin dandeenye yeroo beektetti garuu guuboo dhallaadduu irraa hojjetame tokko fuutee happee fi leelee itti dhoobde; mucaa sana guuboo keessa ciibsatee qarqara laga Abbayyaa shambaqqoo keessa keesse. ⁴ Obboleettiin isaa immoo waan mucicha irra ga'u ilaaluuft jettee fagoo dhaabachaa turte.

⁵ Yeroo sana intalli Fara'oon dhagna dhiqachuuf gara laga Abbayyaatti gad buute; dubartoonni ishee tajaajilanis qarqara laga sanaa irra asii fi achi dedeemaa turan. Isheenis guuboo sana shambaqqoo keessatti argitee akka dhaqxee fidduuf garbittii

ishee ergite. ⁶ Isheenis guuboo bantee mucaa sana argite; kunoo mucichis boo'aa ture. Isheenis garaa laafteefii, "Kun daa'imman Ibrootaa keessaa tokkoo dha" jette.

⁷ Obboleettiin mucichaas intala Fara'ooniin, "Akka isheen hoosiftee siif guddiftuuf dhaqee dubartoota Ibrootaa keessaa guddiftuu tokko siif waamuu?" jette.

⁸ Isheenis, "Eeyyee, dhaqi" jetteen. Intalli sunis dhaqxee haadha mucaa sanaa waamte. ⁹ Intalli Fara'oonis dubartiidhaan, "Mucaa kana fuudhii naa hoosisi; ani mindaa kee siifin kennaa" jette. Dubartiin sunis daa'ima sana fuutee hoosifte. ¹⁰ Mucaan sun guddannaan isheen intala Fara'oonitti fidde. Innis ilma ishee ta'e. Isheenis, "Ani bishaan keessaa isa nan baase" jechuudhaan maqaa isaa Musee jettee moggaafte.

Museen Gara Midiyaanitti baqate

¹¹ Museen erga guddatee booddee gaafa tokko lafa sabni isaa ture dhaqee utuu isaan hojii dadhabsisaa hojjatanuu arge; utuu namni Gibxi tokkos Ibroota saba isaa keessaa nama tokko rukutuu arge. ¹² Innis asii fi achi ilaalee akka namni tokko iyyuu hin jirre mirkaneeffate; namicha Gibxi sana ajjeesee cirracha keessa dhokse. ¹³ Guyyaa itti aanutti immoo gad ba'ee utuu Ibroonni lama wal lolanuu arge. Ibricha balleessaa qabuunis, "Ati maaliif Ibricha akka keetii rukutta?" jedhee gaafate.

¹⁴ Namichi sunis, "Eenyutu nurratti bulchaa fi abbaa murtii si godhe? Akkuma namicha Gibxi ajjeefte sana ana illee ajjeesuu barbaaddaa?" jedheen. Kana irratti Museen, "Dhugumaan wanni ani hojjedhe sun beekameera jechuu dha" jedhee sodaate.

¹⁵ Fara'oon yommuu waan kana dhaga'etti Musee ajjeesuu yaale; Museen garuu Fara'oon jalaa gara Midiyaanitti baqate; yommuu achi ga'ettis boolla tokko bira taa'e. ¹⁶ Lubni Midiyaan tokko intallan torba qaba ture; isaanis dhufanii bushaayee abbaa isaanii obaasuuf bishaan budduugsaanii bidiruutti guutaa turan. ¹⁷ Tiksoonnis dhufanii isaan ari'an; Museen garuu ka'ee isaan gargaaree bushaayee isaanii obaaseef.

¹⁸ Yeroo dubarri sun gara abbaa isaanii Re'uu'eelitti deebi'anitti, inni, "Isin har'a akkamiin daftanii deebitan?" jedhee isaan gaafate.

¹⁹ Isaanis, "Namicha Gibxi tokkotu tiksoota jalaa nu baase; inni bishaan iyyuu nuu budduugsee bushaayee nuuf obaase" jedhanii deebisan.

²⁰ Inni immoo intallan isaatiin, "Inni eessa jira? Isin maaliif isa dhiiftanii dhuffan? Akka inni waa nyaatuufis dhaqaatii waamaa" jedhe.

²¹ Museenis namicha bira jiraachuu jaallate; namichis intala isaa Ziphooraa Museetti heerumsiise. ²² Siipaaraan ilma deesse; Museenis, "Ani alagaa ta'ee biyya ormaa jiraadheera" jechuudhaan maqaa isaa Geershoom jedhee moggaase.

²³ Bara dheeraa sana keessa mootiin Gibxi ni du'e. Namoonni Israa'elis sababii garbummaa keessa turaniif ni aadan; ni iyyanis; iyyi isaan sababii garbummaa jala turaniif gargaarsa argachuuf iyyanis Waaqa bira ga'e. ²⁴ Waaqnis aaduu isaanii dhaga'ee kakuu isaa kan Abrahaam, Yisihaaqii fi Yaaqoob wajjin gale sana yaadate. ²⁵ Waaqnis saba Israa'el ilaale; Waaqni akka isaan itti jiran beeke.

3

Musee fi Daggala Boba'u

¹ Museen bushaayee abbaa niitii isaa Yetroo lubicha Midiyaan sanaa tiksaa ture; innis gaaf tokko hamma dhi'a lafa gammoojjiitti bushaayee sana oofee gara tulluu Waaqaa gara Kooreeb dhufe. ² Achittis Ergamaan WAAQAYYOO daggala boba'u keessaa arraba ibiddaa keessaan isatti mul'ate. Museenis daggalli sun boba'u illee akka hin gubatin arge. ³ Museenis, "Daggalli kun maaliif hin gubatu laata? Ani itti goree waan dinqisiisaa kana ilaaluu qaba" jedhe.

⁴ WAAQAYYOS yommuu akka Museen ilaaluufti achi gore argetti, Waaqni daggala sana keessaa, "Musee! Musee!" jedhee isa waame.

Museenis, "Kunoo ani asan jira" jedhee deebise.

⁵ Waaqni immoo, "As hin dhi'aatin; Sababii iddoon ati dhaabatu kun qulqulluu ta'ee kophee kee baafadhu" jedheen. ⁶ Itti fufees, "Ani Waaqa abbaa keetii, Waaqa Abrahaam, Waaqa Yisihaaqii fi Waaqa Yaaqoob" jedhe. Kana irratti Museen Waaqa ilaaluu waan sodaateef fuula isaa dhokfate.

⁷ WAAQAYYO akkana jedhe; "Ani dhugumaan dhiphina saba koo warra Gibxi keessa jiraatan irra ga'u argeera. Iyya isaan warra humnaan isaan hojjechiisan jalaa ba'uuf iyyanis dhaga'eera; ani rakkina isaaniis nan beeka. ⁸ Kanaafuu ani harka warra Gibxiitti isaan baasee gara biyya gaarii fi bal'aatti, biyya aannanii fi dammi keessaa burquutti jechuunis gara biyya Kana'aanotaatti, Heetotaatti, Amoorotaatti, Feerzotaatti, Hiiwotaattii fi Yebuusotaatti ol isaan baasuuf jedhee gad bu'eera. ⁹ Amma kunoo iyyi Israa'elootaa na bira ga'eera. Ani haala itti warri Gibxi isaan cunqursanis argeera.

¹⁰ Kanaafuu ati amma dhaqi. Ani akka ati saba koo Israa'eloota Gibxi keessaa baaftuuf Fara'oonitti sin erga."

¹¹ Museen garuu Waaqaan, "Fara'oon bira dhaqee Gibxii Israa'eloota baasuuf ani eenyu?" jedhe.

¹² Waaqnis akkana jedhe; "Ani si wajjin nan ta'a. Ati saba sana Gibxii yommuu baaftutti isin tulluu kana irratti Waaqa waqeffattu. Si erguu kootiifis kun mallattoo siif ta'a."

¹³ Museen immoo Waaqaan, "Kunoo ani gara Israa'elootaa dhaqee, 'Waaqni abbaa keessanii na ergeera' yommuu jedhutti yoo isaan, 'Maqaan isaa eenyu?' jedhanii na gaafatan, ani maal jedheen isaanitti hima?" jedhe.

¹⁴ Waaqnis Museedhaan, "ANI ANUMA; ati saba Israa'eliin, 'Inni ANI ANUMA jedhu sun gara keessanitti na ergeera' jedhi" jedheen.

¹⁵ Waaqni ammas Museedhaan akkana jedhe; "Israa'elootaan akkana jedhi; 'WAAQAYYO Waaqni abbootii keessanii, Waaqni Abrahaam, Waaqni Yisihaaq, Waaqni Yaaqoob isinitti na ergeera."

"Maqaan kun bara baraan maqaa koo ti;

maqaa ani dhalootaa hamma dhalootaatti
ittiin yaadatamuu dha.

¹⁶ "Dhaqii maanguddoota Israa'el walitti qabiitii akkana jedhiin; 'WAAQAYYO Waaqni abbootii keessanii, Waaqni Abrahaam, kan Yisihaaqii fi kan Yaaqoob natti mul'atee akkana jedhe: "Ani isin ilaaleera; waan Gibxitti isin irra ga'es argeera. ¹⁷ Kanaafuu ani rakkina Gibxi keessaa isin baasee biyya aannanii fi dammi keessaa burqu jechuunis biyya Kana'aanotaa, Heetotaa, Amoorotaa, Feerzotaa, Hiiwotaatii fi biyya Yebuusotaatii isin geessuuf murteesseera."

¹⁸ "Maanguddoonni Israa'el si dhaga'u. Atii fi maanguddoonni Israa'el mootii Gibxi bira dhaqxanii, 'WAAQAYYO Waaqni Ibrootaa nutti mul'ateera; egaa amma akka nu WAAQAYYO Waaqa keenyaaf aarsaa dhi'eessinuuf gara gammoojjii karaa guyyaa sadii nuu eeyyami' jettuun. ¹⁹ Garuu akka mootiin Gibxi yoo irreen jabaan isa dirqisiise malee deemuuf isinii hin eeyyamne anuu beeka. ²⁰ Ani dinqii isaan gidduutti hojjedhu hundaan irree koo hiixadhee namoota Gibxi nan dha'a. Ergasii inni akka deemtan isiniif eeyyama.

²¹ "Anis akka sabni kun fuula warra Gibxi duratti surraa argatu nan godha; isinis yommuu Gibxii baatanitti harka duwwaa hin baatan. ²² Tokkoon tokkoon dubartii mi'a meetii, mi'a warqetii fi uffata gaafatee ollaa isheettii fi dubartii mana ishee jiraattu irraa haa fudhattu; kanaanis ilmaanii fi intallan keessanitti uffiftu. Akkasiinis qabeenya warra Gibxi boojitanii baatu."

4

Mallattoo Museedhaaf Kenname

¹ Museen, "Yoo isaan, 'WAAQAYYO sitti hin mul'anne' jedhanii na amanuu yookaan na dhaga'uu didan hoo?" jedhee deebise.

² Kana irratti WAAQAYYO, "Wanti harka kee keessa jiru sun maali?" jedheen.

Museen immoo, "Ulee dha" jedhee deebise.

³ WAAQAYYOS, "Lafa buusi" jedheen.

Museen lafa buufnaan uleen sun bofa ta'e; innis irraa baqate. ⁴ WAAQAYYO garuu Museedhaan, "Harka kee hiixadhuutii eegee isaa qabi" jedhe. Museenis hiixatee bofa sana qabe; bofti sunis harka isaa keessatti deebi'ee ulee ta'e. ⁵ WAAQAYYOS, "kun akka isaan WAAQAYYO Waaqni abbootii isaanii, Waaqni Abrahaam, Waaqni Yisihaaq, Waaqni Yaaqoob sitti mul'ate akka amananiif" jedhe.

⁶ WAAQAYYOS Museedhaan, "Harka kee bobaa kee keessa kaa'adhu" jedhe. Museenis harka isaa bobaa isaa keessa kaa'ate; yommuu inni baafatettis, kunoo harki isaa lamxii akka cabbii ta'e.

⁷ Innis Museedhaan, "Harka kee deebisii bobaa kee keessa kaa'adhu" jedhe; Museenis deebisee harka isaa bobaa isaa keessa kaa'ate; yommuu inni baafatettis, kunoo harki isaa deebi'ee akkuma dhagna isaa isa kaanii ta'e.

⁸ WAAQAYYOS akkana jedhe; "Isaan yoo si amanuu baatanii mallattoo isa jalqabaa fudhachuu didan mallattoo lammaffaa ni amanu ta'a. ⁹ Yoo isaan mallattoo kana lamaan amanuu baatanii si dhaga'uu didan bishaan laga Abbayyaa budduuqsiitii lafa gogaa irratti dhangalaasi. Bishaan ati lagicha irraa budduuqsite sunis lafa gogaa irratti dhiiga ta'a."

¹⁰ Museenis WAAQAYYON, "Yaa Gooftaa, ani duris ta'u yookaan erga ati garbicha keetti dubbachuu jalqabdee as nama arraba qajeelu miti. Ani nama afaan isaa hidhamee arrabni isaas itti ulfaatuu dha" jedhe.

¹¹ WAAQAYYON akkana isaan jedhe; "Kan afaan namaa uume eenyu? Kan akka namni arrab-didaa ta'u yookaan duudu godhu eenyu? Kan agartuu ijaa namaaf kennu yookaan jaamsu eenyu? Anuma WAAQAYYON mitii? ¹² Amma dhaqi; ani afaan kee wajjin nan ta'a; waan ati jettus sin barsiisa."

¹³ Museen garuu, "Yaa Gooftaa, maaloo nama biraa ergi" jedhe.

¹⁴ Dheekkamsi WAAQAYYOS Musee irratti boba'ee; innis akkana jedhe; "Obboleessi kee Aroon Lewwichi jira mitii? Ani akka inni akka gaariitti dubbatu nan beeka. Kunoo, inni gara kee dhufuutti jira. Inni yommuu si argutti ni gammada. ¹⁵ Ati isatti dubbatee afaan isaa keessa dubbii ni keessa; anis afaan keetii fi afaan isaa wajjin nan ta'a; waan isin hojjettanis isin nan barsiisa. ¹⁶ Inni uummatatti siif dubbata; inni afaan siif ta'a; ati immoo isaaf akka Waaqaa ni taata. ¹⁷ Ati ulee ittiin mallattoo argisiiftu kana harkatti qabadhu."

Museen Gibxitti Deebi'e

¹⁸ Museen gara abbaa niitii isaa gara Yetrootti deebi'ee, "Akka ani gara saba koo warra Gibxi jiraatanitti deebi'ee hamma ammaatti lubbuun jiraachuu isaanii arguuf maaloo naa eeyyami" jedheen.

Yootooris, "Nagaan dhaqi" jedheen.

¹⁹ WAAQAYYON Midiyaanitti Museedhaan, "Namoonni si ajjeesuu barbaadan hundi du'aniruutti Gibxitti deebi'i" jedhee ture. ²⁰ Kanaafuu Museen niitii isaatii fi ilmaan isaa fuudhatee harree irra kaa'ee Gibxitti deebi'e. Innis ulee Waaqaa harkatti qabatee ture.

²¹ WAAQAYYON Museedhaan akkana jedhe; "Ati yeroo Gibxitti deebi'utti dinqiiwwan ani akka ati hojjetuuf humna siif kenne sana hunda fuula Fara'oon duratti hojjedhu. Ani garuu akka inni saba sana gad hin lakkifne mata jabeessa isa nan godha. ²² Ati Fara'oonni akkana jedhi; 'WAAQAYYON akkana jedha: Israa'el ilma koo hangafa; ²³ anis, "Akka ilmi koo na tajaajiluuf gad lakkisi" jedhee sitti himeera. Ati garuu isa gad lakkisu didde; kanaafuu, kunoo ani ilma kee hangafa nan ajjeesa."

²⁴ WAAQAYYON karaa irratti iddoo bultii Museetti dhufee isa ajjeesuu barbaade. ²⁵ Ziphooraa garuu dhagaa qara qabu fudhattee qola dhagna ilma ishee kuttee ittiin miilla Musee tuqxe. Isheenis, "Ati dhugumaan anaaf misirricha dhiigaati" jette. ²⁶ WAAQAYYON isa dhiise. Yeroo sana isheen waa'ee dhagna qabaatiif, "Misirricha dhiigaati" jette.

²⁷ WAAQAYYON Arooniin, "Ati Musee simachuuf gara gammoojjii dhaqi!" jedhe. Innis dhaqee Tulluu Waaqaa irratti Musee argatee isa dhungate. ²⁸ Yeroo sana Museen dubbii WAAQAYYON akka inni dubbatuuf isa erge hundaa fi mallattoowwan akka inni hojjetuuf isa ajaje hunda Aroonitti hime.

²⁹ Musee fi Aroon maanguddoota Israa'el hunda walitti qaban; ³⁰ Aroonis waan WAAQAYYON Museetti hime hunda jaratti hime. Mallattoowwanis fuula namootaa duratti hojjete; ³¹ isaanis ni amanana. Jarris yommuu akka WAAQAYYON saba Israa'el ilaalee fi akka inni rakkina isaanis arge dhaga'anitti gad jedhanii sagadan.

5

Xuubii Cidii Hin qabne

¹ Ergasii Musee fi Aroon Fara'oon bira dhaqanii, "WAAQAYYON Waaqni Israa'el akkana jedha; 'Akka inni gammoojjiitti ayyaana naa ayyaanessuuf saba koo gad dhiisi.'" ² Fara'oon immoo, "Akka inni isaaf ajajamee Israa'elin gad dhiisuuf WAAQAYYON kun eenyu? Ani WAAQAYYON sana hin beeku; Israa'elinis gad hin dhiisu" jedhe.

³ Isaanis akkana jedhan; "Waaqni Ibrootaa nutti dhufeera. Akka nu WAAQAYYON Waaqaa keenyaaf aarsaa dhi'eessinuuf gara gammoojjiitti karaa guyyaa sadii nuu eeyyami; akkas ta'uu baannaan inni dha'ichaan yookaan goraadeedhaan nu dha'a."

⁴ Mootiin Gibxi garuu, "Yaa Musee fi Aroon, isin maaliif saba kana hojji dhowwitu? Hojji keessanitti deebi'aa!" isaanin jedhe. ⁵ Fara'oonis ittuma fufee, "Kunoo sabni biyyattii amma baay'ateera; isin immoo hojii isaan dhowwaa jirtu" jedhe.

⁶ Guyyuma sana Fara'oon akkana jedhee itti gaafatamtoota hojjiiti fi qondaaltota sabaa ajaje; ⁷ "Si'achi xuubii hojjechuudhaaf saba kanaaf cidii hin kenninaa; isaan ofuma isaanitti dhaqanii cidii haa barbaaddatan. ⁸ Garuu akka isaan lakkoobsa xuubii kan duraan hojjechaa turan sana hojjetan godhaa; hamma isaanitti ramadame hin hir'isinaa. Isaan dhibaa'oo dha; kanaafuu, 'Nu dhaqnee Waaqaa keenyaaf aarsaa dhi'eessina'

jedhanii iyyaa jiru. ⁹ Akka isaan hojiidhaan qabamanii dubbii sobaatiif xiyyeeffannoo hin kennineef hojii isaanitti cimsaa.”

¹⁰ Itti gaafatamtoonni hojiitii fi qondaaltonni sabaas gad yaa'anii saba sanaan akkana jedhan; “Fara’oon akkana jedha: ‘Ani si’achi cidii isinii hin kennu. ¹¹ Lafa itti argachuu dandeessan dhaqaatii ofii keessanii cidii barbaaddadhaa; hojii keessan garuu gonkumaa hin hir’atu.’” ¹² Sabni sun qooda cidii, haafa walitti qabachuuf jedhee biyya Gibxii guutuu keessa faffaca’e. ¹³ Itti gaafatamtoonni sunis, “Isin hojii keessan kan guyyaa guyyaa akkuma yeroo cidiin ture sanaatti hojjedhaa raawwadhaa” jedhanii isaan jarjarsaa turan. ¹⁴ Israa’eloonni qondaaltota hojii ta’an kanneen itti gaafatamtoota garboota Fara’ooniin muudamanis reebamanii, “Isin kaleessaa fi har’a maaliif qooda xuubii kan akka hojjettaniif isinii ramadame sana akkuma duriitti hin guuttanne?” jedhamanii gaafatamaa turan.

¹⁵ Israa’eloonni to’attoota hojii ta’anis dhaqanii akkana jedhanii Fara’oonitti iyyatan; “Ati maaliif tajaajiltoota kee akkas goota? ¹⁶ Cidiin tajaajiltoota keetiif hin kennamu; ta’us, ‘Xuubii hojjedhaa!’ nuun jedhan. Kunoo tajaajiltoonni kee reebamaa jiru; balleessaan garuu kanuma saba keetii ti.”

¹⁷ Fara’oonis akkana jedhe; “Isin dhibaa’oo dha; isin dhibaa’oo dha! Kanaafuu isin, ‘Nu dhaqnee WAAQAYYOOF aarsaa dhi’eessina’ jettan. ¹⁸ Amma dhaqaatii hojjedhaa; cidiin isiniif hin kennamu; garuu xuubii isinitti ramadame hojjetanii guutuu qabdu.”

¹⁹ Israa’eloonni to’attoota hojii ta’an yommuu, “Isin lakkoobsa xuubii kan guyyaa guyyaatti akka hojjettaniif isin irraa eegamu sana hir’isuu hin qabdan” jedhamee isaanitti himametti akka rakkina keessa seenan hubatan. ²⁰ Yeroo Fara’oon biraa gad ba’anitti utuu Musee fi Aroon isaan eegannu argatan; ²¹ isaanis, “Waan isin akka Fara’oonii fi qondaaltonni isaa nu xireeffatan gootanii akka isaan nu ajjeesaniif goraadee harka isaanii keessa keessaniif WAAQAYYO isinitti haa ilaalu; isinitti haa murus!” jedhan.

Waaqni Furama Abdachiise

²² Museen gara WAAQAYYOOTTI deebi’ee akkana jedhe; “Yaa Gooftaa, ati maaliif saba kanatti rakkina fidde? Ati kanaaf na ergitee? ²³ Gaafa ani maqaa keetiin dubbachuuf Fara’oon bira dhaqee jalqabee inni saba keetti rakkinuma fidaa jira; ati garuu gonkumaa saba kee hin furre.”

6

¹ WAAQAYYOS Museedhaan, “Amma waan ani Fara’oon irratti hojjedhu ati ni argita: sababii irree koo jabaa sanaatiif mootichi gad isaan dhiisa; sababii irree koo jabaa sanaatiifis mootichi biyya isaa keessaa isaan ari’a” jedhe.

² Waaqni ammas Museedhaan akkana jedhe; “Ani WAAQAYYO. ³ Ani akka Waaqa Waan Hunda Danda’uuttan Abrahaamitti, Yisihaaqittii fi Yaaqoobitti mul’adhe; garuu maqaa koo WAAQAYYON isaanitti of hin beeksifne. ⁴ Akkasumas ani biyya Kana’aan lafa isaan akka alagaatti keessa jiraattan sana isaanii kennuuf jedhee isaan wajjin kakuu galeera. ⁵ Kana irrattis, ani aaduu saba Israa’el kanneen warra Gibxiin garboomfaman sanaa dhaga’ee kakuu koo yaadadheera.

⁶ “Kanaafuu saba Israa’eliin akkana jedhi: ‘Ani WAAQAYYO; waanjoo warra Gibxi jalaa isin nan baasa; ani garbummaa isaanii jalaa isin nan baasa; irree diriiraa fi murtii jabaadhaanis isin nan fura. ⁷ Ani akka saba ofii kootti isin fudhadha; Waaqa keessan nan ta’a. Yeroo sana isin akka ani WAAQAYYO Waaqa keessan kan waanjoo warra Gibxi jalaa isin baase ta’e ni beektu. ⁸ Ani biyya isan Abrahaamiif, Yisihaaqii fi Yaaqoobiif kennuuf harka koo ol qabadhee kakadhe sanatti isin nan galcha. Dhaala godhees isiniif kenna. Ani WAAQAYYO.’”

⁹ Museenis waan kana saba Israa’elitti hime; isaan garuu waan abdi kutatanii fi garbummaa hamaa keessa turaniif isa hin dhageenye.

¹⁰ WAAQAYYO Museedhaan akkana jedhe; ¹¹ “Dhaqitii akka inni biyya isaa keessaa Israa’eloota gad lakkisuuf Fara’oon mooticha Gibxitti himi.”

¹² Museen garuu WAAQAYYON, “Kunoo Israa’eloonni na hin dhageenye; yoo Fara’oon akkamitti na dhaga’a ree? Afaan koo qajeelchee hin dubbatatuutii” jedhe.

Hidda Dhaloota Musee fi Aroon

¹³ WAAQAYYO garuu waa’ee Israa’elootaatiif fi waa’ee Fara’oon mooticha Gibxi Musee fi Aroonitti dubbatee akka isaan saba Israa’el Gibxii baasan isaan ajaje.

¹⁴ Hangafoonni balbalawwan isaanii kanneenii dha:

Ilmaan Ruubeen ilma Israa'el hangaftichaa:
Henook, Faluus, Hezroonii fi Karmii.
Warri kunneen gosoota Ruubeen.

¹⁵ Ilmaan Simi'oon:

Yemuu'eel, Yaamiin, Oohad, Yaakiin, Zoohar, Shaawul ilma dubartittii Kana'aan.
Isaan kunneen maatiiwwan Simi'oon.

¹⁶ Maqaan ilmaan Lewwiis akkuma dhaloota isaaniitti kanaa dha:
Geershoon, Qohaatii fi Meraarii.

Lewwiin waggaa 137 jiraate.

¹⁷ Ilmaan Geershoon akkuma maatii isaaniitti:

Loobeenii fi Shime'ii.

¹⁸ Ilmaan Qohaati:

Amraam, Yizihhaar, Kebroonii fi Uzii'eel.

Qohaati waggaa 133 jiraate.

¹⁹ Ilmaan Meraarii:

Mahilii fi Muusii.

Isaan kunneenis akkuma dhaloota isaaniitti maatiiwwan Lewwii ti.

²⁰ Amraam obboleettii abbaa isaa Yookebeedin fuudhe; isheenis Aroonii fi Musee deesseef.

(Amraam waggaa 137 jiraate.)

²¹ Ilmaan Yizihhaar:

Qooraaahi, Naafegii fi Zikrii.

²² Ilmaan Uzii'eel:

Miishaa'eel, Elzaafaanii fi Sitrii.

²³ Aroon intala Amiinaadaab obboleettii Nahishoon Eliishebaa fuudhe; isheenis Naadaab, Abiihuu, Ele'aazaarii fi Iitaamaarin deesseef.

²⁴ Ilmaan Qooraaahi:

Asiir, Elqaanaa fi Abii'aasaaf.

Isaan kunneenis maatiiwwan Qooraaahii ti.

²⁵ Ele'aazaar ilmi Aroon intallan Fuut'eel keessaa tokko fuudhe; isheenis Fiinehaasin deesseef.

Isaan kunneenis akkuma maatiiwwan isaaniitti hangafoota balbala Lewwii ti.

²⁶ Aroonii fi Museen warri WAAQAYYO, "Isin akkuma kutaa kutaa isaaniitti Gibxi keessaa Israa'eloota baasaa" jedheen sun isaanuma kana. ²⁷ Isaanis warra waa'ee Gibxi keessaa Israa'eloota baasuu Fara'oon mooticha Gibxitti dubbatan sanaa dha. Musee fi Aroon isaanuma kana.

Aroon Qooda Musee Dubbachuu Isaa

²⁸ WAAQAYYO yeroo Gibxi keessatti Museetti dubbate sana ²⁹ akkana jedheen; "Ani WAAQAYYO dha. Waan ani sitti himu hunda Fara'oon mooticha Gibxitti himi."

³⁰ Museen garuu WAAQAYYON, "Kunoo, ani waan afaan koo qajeelchee dubbachuu hin dandeenyeef Fara'oon akkamiin na dhaga'a?" jedhe.

7

¹ WAAQAYYO Museedhaan akkana jedhe; "Ilaa, ani Fara'ooniif waaqa si godheera; obboleessi kee Aroon immoo raajii siif ta'a. ² Ati waan ani si ajaju hunda ni dubbata; obboleessi kee Aroon immoo akka inni Israa'eloota biyya isaa keessaa gad dhiisu Fara'oonitti ni hima. ³ Ani garuu Fara'oonin mata jabeessa nan godha; yoo ani biyya Gibxi keessatti mallattoowwanii fi dinqiiwwan koo baay'ise iyyuu, ⁴ inni isin hin dhaggeeffatu. Ani harka koo Gibxi irratti ol nan kaasa; murtii jabaadhaanis raayyaa koo, saba Israa'el biyya Gibxi keessaa nan baasa. ⁵ Warri Gibxi yommuu ani harka koo Gibxi irratti ol kaafadhee saba Israa'el achi keessaa baasutti akka ani WAAQAYYO ta'e ni beeku."

⁶ Musee fi Aroonis akkuma WAAQAYYO isaan ajaje godhan. ⁷ Yeroo Fara'oonitti dubbatanitti Museen nama waggaa saddeettama ture; Aroon immoo nama waggaa saddeettamii sadii ture.

Uleen Aroon bofa ta'e

⁸ WAAQAYYOS Musee fi Arooniin akkana jedhe; ⁹ "Yommuu Fara'oon, 'Dinqii hojjedhaa' isiniin jedhutti, ati immoo Arooniin, 'Ulee kee fuudhiitii fuula Fara'oon duratti lafa buusi' jetta; uleen sunis bofa ta'a."

¹⁰ Musee fi Aroon Fara'oon bira dhaqanii akkuma WAAQAYYO isaan ajaje sana godhan. Aroon fuula Fara'oonii fi qondaaltota isaa duratti ulee isaa lafa buuse; uleen sunis bofa taate. ¹¹ Fara'oonis beektota fi falfaloota ofitti waame; tolfattoonni Gibxi ogummaa isaanii dhokataa sanaan akkasuma godhan. ¹² Tokkoon tokkoon isaanii ulee isaanii lafa buusan; uleen isaanii bofa ta'e. Uleen Aroon garuu ulee isaanii liqimsite. ¹³ Ta'us Fara'oon akkuma WAAQAYYO dubbate sana mata jabeessa ta'ee isaan dhaggeeffachuu dide.

Dha'icha Dhiigaa

¹⁴ Kana irratti WAAQAYYO Museedhaan akkana jedhe; "Fara'oon mata jabeessa ta'eera; saba sanas gad dhiisuu dide. ¹⁵ Ganamaan gara Fara'oon dhaqi; kunoo inni bishaanitti gad ba'a. Ulee bofatti geeddaramte sana harkatti qabadhuutii qarqara laga Abbayyaatti isa eegi. ¹⁶ Akkanas jedhiin; 'WAAQAYYO Waaqni Ibrootaa akkana jedhee sitti na ergeera: Akka sabni koo dhaqee gammoojjii keessatti naaf sagaduuf gad lakkisi. Ati garuu hamma ammaatti ajajamuu diddeerta. ¹⁷ WAAQAYYO akkana jedha: Akka ani WAAQAYYO ta'e ati kanaan beekta: Kunoo ani ulee harka koo keessa jiru kanaan bishaan Abbayyaa nan dha'a; bishaan sunis dhiigatti geeddarama. ¹⁸ Qurxummiwwan Abbayyaa keessaa ni du'u; lagni sunis ni ajaa'a; warri Gibxis bishaan laga sanaa dhuguu hin danda'an."

¹⁹ WAAQAYYO immoo Museedhaan akkana jedhe; "Arooniin akkana jedhi; 'Ulee kee qabadhuutii bishaanota Gibxi irratti, lageen isaanii irratti, doloolloo isaanii irratti, haroo isaaniitii fi kuusaa bishaanii hunda irratti harka kee diriirsi.' Isaanis dhiigatti geeddaramu. Gibxi guutuun dhiigaan guutama; qodaan mukaatii fi okkoteen dhagaa dhiigaan guutaman."

²⁰ Musee fi Aroon akkuma WAAQAYYO isaan ajaje sana godhan. Aroon ulee isaa ol fuudhee fuula Fara'ooniitii fi qondaaltota isaa duratti bishaan Abbayyaa dha'e; bishaan sun hundis dhiigatti geeddaramu. ²¹ Qurxummiwwan Abbayyaa duunaan lagichi ajaa'a; warri Gibxis bishaan isaa dhuguu hin dandeenye. Gibxi guutuunis dhiigaan guutame.

²² Garuu tolfattoonni Gibxi tolcha isaaniitiin akkasuma hojjetan; Fara'oonis mata jabeessa ta'e. Innis akkuma WAAQAYYO jedhe sana Musee fi Aroon dhaga'uus dide. ²³ Fara'oonis deebi'ee masaraa isaa seene; innis waan kana yaadatti illee hin qabanne. ²⁴ Warri Gibxi hundi waan bishaan laga sanaa dhuguu hin danda'iniif bishaan dhugaatii baafachuuf jedhanii qarqara Abbayyaa qotatan.

Dha'icha Fattee

²⁵ Erga WAAQAYYO Abbayaan dha'ee guyyaan torba darbe.

8

* ¹ WAAQAYYO Museedhaan akkana jedhe; "Fara'oon bira dhaqii akkana jedhiin; 'WAAQAYYO akkana jedha: Akka sabni koo na tajaajiluuf gad dhiisi. ² Yoo ati gad isa dhiisuu didde immoo kunoo ani biyya kee guutuutti dha'icha fattee nan erga. ³ Lagni Abbayyaa fatteedhaan guutama; isaanis ol ba'anii mana keetti, dinqa keetti, siree keetti, mana hojjetoota keetiitti, saba keetti, iddoo ibiddaa keetti, qodaa bukoo keetiittis nam'u. ⁴ Fatteewwan kunneen si'ii fi saba kee, qondaaltota kee hundas ni yaabbatu.'"

⁵ WAAQAYYO Museedhaan akkana jedhe; "Arooniin akkana jedhi; 'Ulee kee qabadhuutii harka kee burqaawwan irratti, lageenii fi kuusaa bishaanii irratti ol kaafadhuutii akka fatteewwan biyya Gibxitti dhufan godhi.'"

⁶ Aroon harka isaa bishaanota Gibxitti ol kaafate; fatteewwanis ol ba'anii biyya sana guutan. ⁷ Tolfattoonnis falfala isaaniitiin akkasuma godhan; biyya Gibxittis fatteewwan fidan.

⁸ Fara'oonis Musee fi Aroonin ofitti waamee, "Akka inni anaa fi saba koo irraa fatteewwan fageessuuf WAAQAYYO kadhadhaa; anis akka sabni keessan dhaqee WAAQAYYOOF aarsaa dhi'eessuuf gadin dhiisa" jedhe.

⁹ Museenis Fara'ooniin, "Akka fatteewwan si'ii fi manneen kee irraa badanii laga Abbayyaa qofa keessatti hafaniif yeroo ani itti siif, qondaaltota keetii fi saba keetiif illee Waaqa kadhadhu ati na beeksisi" jedhe.

¹⁰ Fara'oon immoo, "Bor" jedheen.

* 8: 8 Kutaan 8:1-4 kitaaba Afaan Ibraayisixii keessatti 7:26-29 jedhamee, kutaan 8:5-32 immoo 8:1-28 jedhama.

Museenis akkana jedhee deebise; “WAAQAYYO Waaqa keenyaa fakkaatu kan tokko iyyuu akka hin jirre akka beektuuf akkuma ati jettu ta'a. ¹¹ Fatteewwan sun si'ii fi manneen kee irraa, qondaaltota keetii fi saba kee irraa ni badu; laga Abbayyaa qofa keessattis ni hafu.”

¹² Musee fi Aroon erga Fara'oon biraa gad ba'anii booddee Museen waa'ee fatteewwan Waaqni Fara'oonitti erge sanaa WAAQAYYOTTI iyye. ¹³ WAAQAYYOS akkuma Museen kadhate godhe. Fatteewwan sunis mana keessatti, oobdii irratti, dirree irrattis dhuman. ¹⁴ Fatteewwan sunis walitti qabamanii tuulaman; biyyattiinis ni ajoofte. ¹⁵ Fara'oon garuu yommuu akka dha'ichi sun qabbanaa'e argetti akkuma WAAQAYYO dubbatee ture sana mata jabeessa ta'ee Musee fi Aroonin dhaga'uu dide.

Dha'icha Injiraanii

¹⁶ Ergasiis WAAQAYYO Museedhaan, “Arooniin, ‘Ulee kee ol kaasiitii awwaara lafaa dha'i' jedhi; awwaarri sunis biyya Gibxi guutuu keessatti injiraan ta'a” jedhe. ¹⁷ Isaanis akkasuma godhan. Yommuu Aroon harka isaa isa ulee qabate ol kaafatee awwaara lafaa dha'etti injiraan namaa fi horiitti duudde. Awwaarri guutuu biyya Gibxi keessa jiru hundi injiraan ta'e. ¹⁸ Tolfattoonni garuu falfala isaaniitiin injiraan gad yaasuu yaalanii dadhaban.

Injiraanis namaa fi horii irra ture. ¹⁹ Tolfattoonnis Fara'ooniin, “Kun quba Waaqaa ti” jedhan. Fara'oon garuu akkuma WAAQAYYO dubbate sana mata jabeessa ta'ee dhaga'uu dide.

Dha'icha Tisiisaa

²⁰ WAAQAYYO Museedhaan akkana jedhe; “Ganama barii ka'itii fuula Fara'oon duratti dhi'aadhu; kunoo inni gara bishaanitti gad ba'a; akkanas jedhiin; ‘WAAQAYYO akkana jedha: Akka inni na tajaajiluuf saba koo gad dhiisi. ²¹ Yoo ati saba koo gad dhiisuu didde immoo kunoo, ani tuuta tisiisaa sitti, qondaaltota keetti, saba keetti, manneen keetti nan erga. Manneen warra Gibxi, lafti isaan jiraatanis tisiisaan guutamu.

²² “‘Ani garuu guyyaa sana iddoo sabni koo jiraatu Gooshenin haala addaatiin nan ilaala; akka ati akka ani WAAQAYYO biyya kana keessa jiru beektuuf tisiisni tokko iyyuu achi hin jiraatu. ²³ Ani saba kootii fi saba kee gidduutti garaa garummaa nan uuma. Mallattoon kunis bori ta'a.”

²⁴ WAAQAYYOS akkasuma godhe. Tisiisni baay'een mana Fara'oonii fi manneen qondaaltota isaatti duude; biyyi Gibxi guutuunis tisiisaan balleeffame.

²⁵ Fara'oonis Musee fi Aroonin ofitti waamee, “Dhaqaatii biyyuma kana keessatti Waaqa keessaniif aarsaa dhi'eessaa” jedheen.

²⁶ Museen immoo deebise akkana jedhe; “Akkas gochuun qajeelaa hin ta'u; aarsaan nu WAAQAYYO Waaqa keenyaaf dhi'eessinu warra Gibxi biratti jibbamaa dha. Kunoo, yoo nu aarsaa fuula isaanii duratti jibbamu dhi'eessine isaan dhagaadhaan nu hin tumanii ree? ²⁷ Akkuma inni nu ajajetti nu WAAQAYYO Waaqa keenyaaf aarsaa dhi'eessuuf gara gammoojjii karaa guyyaa sadii deemuu qabna.”

²⁸ Fara'oonis, “Ani akka isin gammoojjii keessatti WAAQAYYO Waaqa keessaniif aarsaa dhi'eessitaniif gadin isin dhiisa; garuu baay'ee fagaattani hin deeminaa. Isinis Waaqa naa kadhadaa” jedhe.

²⁹ Museenis akkana jedhee deebise; “Kunoo, ani akkuman si biraa deemeen akka bor tisiisni Fara'oon irraa, qondaaltota isaatii fi saba isaa irraa ka'u WAAQAYYO nan kadhada. Yaa Fara'oon ati garuu, akka sabni kun WAAQAYYOOOF aarsaa dhi'eessuuf gad dhiisuu diddee ammas nu hin gowwoomsin.”

³⁰ Museenis ergasii Fara'oon biraa ba'ee WAAQAYYO kadhate; ³¹ WAAQAYYOS akkuma Museen isa kadhate sana godhe; tisiisni sunis Fara'oonin, qondaaltota isaatii fi saba isaa gad dhiisee deeme; tisiisni tokko iyyuu hin hafne. ³² Fara'oon garuu ammas mata jabeessa ta'e; saba sanas gad dhiisuu dide.

9

Dha'icha Horiitti Dhufe

¹ WAAQAYYO Museedhaan akkana jedhe; “Fara'oon bira dhaqitiiti akkana jedhiin; ‘WAAQAYYO Waaqni Ibrootaa akkana jedha; “Akka sabni koo na tajaajiluuf gad dhiisi.” ² Yoo ati gad dhiisuu diddee isaan danqite, ³ kunoo harki WAAQAYYOO horii kee kanneen dirree irra oolan fardeen, harrootaa fi gaalawwan keetti, loon, hoolotaa fi re'oota keetti dha'icha hamaa ni fida. ⁴ WAAQAYYO garuu akka horiin saba Israa'el tokko iyyuu hin duuneef horii Israa'elii fi horii warra Gibxi gidduutti garaa garummaa ni uuma.”

⁵ WAAQAYYO yeroo murteesse, “WAAQAYYO bor waan kana biyyattii keessatti ni hojjeta” jedhe. ⁶ WAAQAYYOS guyyaa itti aanutti waan kana hojjete: Horiin warra Gibxi hundi ni dhume; horii warra Israa’el keessaa garuu tokko iyyuu hin duune. ⁷ Fara’oonis namoota qoratan ergee, kunoo akka horii saba Israa’el keessaa tokko illee hin du’in beeke. Ta’us Fara’oon mata jabeessa ta’ee saba sana gad dhiisuu dide.

Dha’icha Dhullaa

⁸ WAAQAYYO immoo Musee fi Arooniin akkana jedhe; “Daaraa harka guutuu iddoo ibiddaatii hammaaraa; Museenis daaraa sana fuula Fara’oon duratti samiitti ol haa facaasu. ⁹ Innis biyya Gibxi guutuu keessatti awwaara ta’a; dhullaan malaa yaasu namaa fi horii guutuu biyyattii keessa jiranitti yaa’a.”

¹⁰ Isaan boolla ibiddaa irraa daaraa hammaarratanii fuula Fara’oon dura dhaabatan. Museenis daaraa sana samiitti ol facaase; dhullaan malaa yaasus namaa fi horiitti yaa’e. ¹¹ Tolfattoonnis sababii dhullaatiif Musee dura dhaabachuu hin dandeenye; dhullaan tolfattootaa fi warra Gibxi hundatti yaa’ee tureetii. ¹² Garuu WAAQAYYO akkuma Museetti hime sana WAAQAYYO Fara’oonin mata jabeessa godhe; innis Musee fi Aroonin dhaga’uu dide.

Dha’icha Cabbii

¹³ WAAQAYYO Museedhaan akkana jedhe; “Ganama barii ka’iitii fuula Fara’oon dura dhaabadhu; akkanaa jedhiin; WAAQAYYO Waaqni Ibrootaa akkana jedha; akka sabni koo na tajaajiluuf gad dhiisi; ¹⁴ yoo kanaa achii ani amma dha’icha koo hunda sitti, qondaaltota keetii fi saba keetti nan erga; kunis akka ati akka Waaqni akka koo lafa hunda irra hin jirre beekuuf. ¹⁵ Silaa amma ani harka koo ol fudhadhee si’ii fi saba kee dhukkuba hamaan dha’uu nan danda’a ture; atis lafa irraa badda turte. ¹⁶ Ani garuu humna koo sirratti argisiisuu fi akka maqaan koo lafa hunda irratti labsamuuf jedheen kaayyoo kanaaf si jiraachise. ¹⁷ Ati amma iyyuu saba koo irratti ol of qabda; jaras gad hin dhiiftu. ¹⁸ Kunoo ani bori yeroo akkanaatti cabbii hamaa erga Gibxi hundeeffamtee jalqabee hamma ammaatti takkumaa Gibxitti hin bu’u in tokko nan buusa. ¹⁹ Egaa amma nama ergiitii horii keetii fi waan alaa qabdu hunda manatti galchisiisi; cabbiiin sunis namaa fi horii manatti hin galin kanneen alatti hafan hundatti ni bu’a; isaanis ni dhumu.”

²⁰ Qondaaltota Fara’oon keessaa warri dubbii WAAQAYYOO sodaatan garboota isaaniitii fi horii isaanii manatti galfachuuf ariifatanii sokkan. ²¹ Warri dubbii WAAQAYYOOTIIF xiyyeeffannoo hin kennin immoo garboota isaaniitii fi horii isaanii alatti dhiisan.

²² WAAQAYYO Museedhaan, “Akka cabbiiin biyya Gibxi hundatti namatti, horii fi biqiltuu lafa qotiisaa Gibxi hunda irratti bu’uuf harka kee gara samiitti diriirsi” jedhe. ²³ Yommuu Museen ulee isaa gara samiitti diriirsettis WAAQAYYO kakawwee fi cabbii erge; ibiddis gara lafaatti gad bu’e. WAAQAYYOS biyya Gibxitti cabbii roobse; ²⁴ cabbiiin ni bu’e; ibiddis cabbii wajjin wal make. Cabbiiin hamaan akkanaa erga Gibxi saba taatee beekamtee as takkumaa guutuu biyyattiitti hin buune. ²⁵ Cabbiiin sunis biyya Gibxi keessatti waan ala jiru hunda namas horiis ni dha’e; biqiltuu lafa qotiisaa hundas ni balleesse; muka hundas ni barbadeesse. ²⁶ Lafti cabbiiin itti hin bu’u in biyya Gooshen iddoo Israa’eloonni jiraatan qofa ture.

²⁷ Fara’oonis Musee fi Aroonin ofitti waamee akkana jedheen; “Ani amma cubbuu hojjedheera; WAAQAYYO qajeelaa dha; anii fi sabni koo garuu balleessaa hojjenneerra. ²⁸ Sababii bakakkaa fi cabbiiin nutti baay’ateef isin WAAQAYYON nuuf kadhadhaa. Anis gad isin nan dhiisa; isin hammana caalaa as turuu hin qabdan.”

²⁹ Museenis akkana jedhee deebise; “Ani yommuu magaalaa kana keessaa ba’utti harka koo bal’isee WAAQAYYO nan kadhadha. Bakakkaan ni dhowwama; cabbiiinis si’achi hin jiraatu; kanaanis ati akka lafti kan WAAQAYYOO taate ni beekta. ³⁰ Ani garuu akka atii fi qondaaltonni kee amma iyyuu WAAQAYYO Waaqa hin sodaanne nan beeka.”

³¹ Waan talbaan daraaree, garbuun immoo bilchaatee tureef talbaa fi garbuun ni badan. ³² Qamadii fi honboriin garuu waan turanii bilchaataniif hin badne.

³³ Museenis Fara’oon biraa deemee magaalaa keessaa gad ba’e; innis harka isaa gara WAAQAYYOOTI bal’ise; bakakkaa fi cabbiiin ni dhowwaman. Bokkaanis deebi’ee biyyattiitti hin roobne. ³⁴ Fara’oonis yommuu akka bokkaan, cabbii fi bakakkaan dhowwaman argetti ammas cubbuu hojjete; innii fi qondaaltonni isaa mata jabeeyyii ta’an. ³⁵ Akkuma WAAQAYYO karaa Museetiin dubbate sana, Fara’oon mata jabeessa ta’e; saba Israa’elis gad dhiisuu dide.

10

Dha'icha Hawwaannisaa

¹ WAAQAYYOS Museedhaan akkana jedhe; "Fara'oonitti ol seeni; ani akka mallattoowan koo kanneen isaan gidduutti hojjedhuuf jedhee Fara'oonii fi qondaaltota isaa mata jabeeyyii godheera; ² kunis akka ati waan ani warra Gibxi godhe, mallattoo ani isaan gidduutti argisiises ijoollee keetii fi ijoollee ijoollee keetiitti himtee akka ani WAAQAYYO ta'e akka beektaniif ta'e."

³ Musee fi Aroonis Fara'oon bira dhaqanii akkana jedhaniin; "WAAQAYYO Waaqni Ibrootaa akkana jedha: 'Ati hamma yoomiitti fuula koo duratti gad of qabuu didda? Akka isaan na tajaajilaniif saba koo gad dhiisi. ⁴ Yoo ati gad isaan dhiisuu didde, kunoo ani bori biyya keetti hawwaannisaa nan fida. ⁵ Hawwaannisni kunis hamma namni tokko iyyuu arguu dadhabutti lafa haguuga. Innis waanuma cabbii irraa isinii hafe illee ni fixa; mukkeen alatti isinii guddachaa jiranis nyaatee fixa. ⁶ Inni mana kee, mana qondaaltota keetii hundaa fi mana warra Gibxi hundumaa guuta; kunis waan abbootiin keetii fi abbootiin abbootii keetii gaafa biyya kana qubatanii jalqabanii hamma har'aatti hin arginii dha.'" Kana booddee Museen garagalee Fara'oon biraa ba'e.

⁷ Qondaaltonni Fara'oonis, "Namichi kun hamma yoomiitti kiyyoo nutti ta'a? Namoonni kun akka WAAQAYYO Waaqa isaanii tajaajilaniif gad dhiisi. Akka Gibxi badde ati amma illee hin hubannee?" jedhaniin.

⁸ Musee fi Aroonin deebisanii Fara'oonitti geessan; Fara'oonis, "Dhaqaatii WAAQAYYO Waaqa keessan waaqeffadhaa! Garuu eenyutu deema?" jedheen.

⁹ Museenis, "Nu sababii ayyaana WAAQAYYOO ayyaanefannuuf dargaggoota keenyaa fi maanguddoota keenya, ilmaanii fi intallan keenya, bushaayee fi loon keenya qabannee deemna" jedhee deebise.

¹⁰ Fara'oonis akkana jedhe; "Yoo ani dubartoota keessanii fi ijoollee keessan isin wajjin gad dhiise, mee WAAQAYYO isin wajjin haa ta'u! Kunoo waan hamaatu isin dura jira.

¹¹ Kun hin ta'u! Akka warri dhiiraa qofti dhaqanii WAAQAYYO waaqeffatan godhaa; isin kanuma barbaaddaniitii." Isaanis fuula Fara'oon duraa gad baafaman.

¹² WAAQAYYOS Museedhaan, "Akka hawwaannisni biyya Gibxitti bu'ee biqiltuu lafa gotiisaa hunda, waan cabbii irraa hafe hundas nyaatuuf harka kee Gibxi irratti diriirsi" jedhe.

¹³ Museenis ulee isaa Gibxi irratti diriirsinaan WAAQAYYO guyyaa sana guutuu fi halkan sana guutuu akka bubbeen ba'a biiftuu biyyattii keessatti bubbisu godhe; ganama itti aanus bubbeen sun hawwaannisaa fidee dhufe; ¹⁴ hawwaannisni sunis Gibxi guutuu weerare; biyya hunda keessas baay'inaan qubate. Dha'ichi hawwaannisaa kan akkasii duraan takkumaa bu'ee hin beeku; ergasiis takkumaa deebi'ee hin buune. ¹⁵ Hawwaannisni sunis hamma lafti gurraacha'utti lafa hunda haguuge; innis waan cabbii irraa hafe hunda, waan alatti biqile hunda, ija mukaa illee ni nyaate. Biyya Gibxi hunda keessatti wanni lalisaan tokko iyyuu muka irratti yookaan biqiltuu irratti hin hafne.

¹⁶ Fara'oonis dafee Musee fi Aroonin waamee akkana jedheen; "Ani WAAQAYYO Waaqa keessanii fi isinitti cubbuu hojjedheera. ¹⁷ Egaa mee cubbuu koo naa dhiisaa; akka inni dha'icha nama ajjeesu kana narraa fuudhuufis WAAQAYYO Waaqa keessan naa kadhadaa."

¹⁸ Museenis Fara'oon biraa gad ba'ee WAAQAYYO kadhate. ¹⁹ WAAQAYYOS bubbee sana gara bubbee lixa biiftuu jabaatti geeddare; bubbeen sunis hawwaannisaa sana fuudhee Galaana Diimaatti naqe. Gibxi keessatti hawwaannisni tokko iyyuu hin hafne. ²⁰ WAAQAYYO garuu Fara'oonin mata jabeessa godhe; Fara'oonis Israa'eloota gad hin dhiifne.

Dha'icha Dukkanaa

²¹ WAAQAYYO immoo Museedhaan, "Akka dukkanni Gibxi irra bu'uuf harka kee gara samiitti diriirsi" jedhe. ²² Museen harka isaa gara samiitti diriirse; dukkanni limixiin isaa guyyaa sadii Gibxi guutuu haguuge. ²³ Guyyaa sadan sana namni wal hin argu ture; lafa jiruus hin socho'u ture. Israa'eloonni hundi garuu iddoo jiraatanitti ifa qabu turan.

²⁴ Fara'oonis Musee ofitti waamee, "Dhaqaatii WAAQAYYO waaqeffadhaa. Dubartoonnii fi ijoolleen keessanis isin wajjin haa deemani; bushaayee fi loon keessan qofa dhiisaa deema" jedheen.

²⁵ Museen garuu akkana jedhe; "Ati akka nu WAAQAYYO Waaqa keenyaaf aarsaa fi qalma gubamu dhi'eessinuuf nuu eeyyamuu qabda. ²⁶ Horiin keenyas nu wajjin dhaquu qaba; kotteen tokko iyyuu hin hafu. WAAQAYYO Waaqa keenya waaqeffachuuf isaan

keessaa tokko tokkotti fayyadamna; hamma achi geenyutti WAAQAYYO waaqeffachuuf maallitti akka fayyadamnu hin beeknu.”

²⁷ WAAQAYYO garuu Fara'oonin mata jabeessa godhe; innis gad isaan dhiisuu dide. ²⁸ Fara'oonis Museedhaan, “Fuula koo duraa badi! Lammata fuula koo akka hin argine beekkadhu; ati gaafa fuula koo argite ni duuta!” jedhe.

²⁹ Museenis deebisee, “Akkuma ati jette, ani lammata fuula keetti hin mul'adhu” jedhe.

11

Dha'icha Hangafa Irra Ga'e

¹ WAAQAYYO Museedhaan akkana jedhe; “Ani amma illee dha'icha tokko Fara'oonii fi Gibxitti nan fida. Ergasii inni asii isin baasa; yeroo asii isin baasutti immoo inni guutummaan guutuutti isin ari'a. ² Akka tokkoon tokkoon dhiiraatii fi tokkoon tokkoon dubartii ollaa isaanii irraa mi'a meetiitii fi mi'a warqee ergifatan saba kanatti himi.” ³ WAAQAYYO akka sabni Israa'el fuula warra Gibxi duratti surraa argatan godhe; kana malees Museen biyya Gibxi keessatti, fuula qondaaltota Fara'ooniitii fi fuula saba Gibxi duratti akka malee ulfina qabeessa ture.

⁴ Museen akkana jedhe; “WAAQAYYO akkana jedha; ‘Ani gara halkan walakkaatti Gibxi hunda keessa nan darba. ⁵ Ilma Fara'oon namicha teessoo irra taa'u sanaa hangafaa jalqabee hamma ilma xombolees ishee midhaan daaktu sanaa hangafaatti ilmi hangafni biyya Gibxi keessaa hundi ni du'a; akkasumas hangafni horii hundi ni du'a. ⁶ Biyya Gibxi guutuu keessattis wawwaachuu guddaan takkumaa dhaga'amee hin beekin yookaan deebi'ees hin dhaga'amne tokko ni dhufa. ⁷ Garuu saba Israa'el keessaa nama tokkotti iyyuu yookaan horii tokkotti iyyuu sareen tokko iyyuu hin duttu.’ Isinis waan kanaan akka WAAQAYYO Gibxii fi Israa'el gidduutti garaa garummaa fidu ni beektu. ⁸ Qondaaltonni kee kunneen hundinuu gara koo dhufanii naa sagadan; ‘Atis, namoonni si duukaa bu'an hundinuu deemaa!’ jedhu; anis ergasii nan deema.” Museenis akka malee aaree Fara'oon biraa ba'e.

⁹ WAAQAYYO Museedhaan, “Akka dinqiin koo biyya Gibxitti baay'atuuf Fara'oon isin dhaga'uu dida” jedhe. ¹⁰ Musee fi Aroonis dinqiiwwan kanneen hunda fuula Fara'oon duratti hojjetan; WAAQAYYO garuu Fara'oonin mata jabeessa godhe; innis akka Israa'eloonni biyya isaa keessaa hin baane dhowwe.

12

Faasiikaa

12:14-20 kwf - Lew 23:4-8; Lak 28:16-25; KeD 16:1-8

¹ WAAQAYYOS biyya Gibxi keessatti Musee fi Arooniin akkana jedhe; ² “Ji'i kun ji'a jalqabaa isinii haa ta'u; innis waggaa keessaa ji'a jalqabaa isinii haa ta'u. ³ Ji'a kana keessa bultii kurnaffaatti tokkoon tokkoon namaa xobbaallaa hoolaa tokko akkuma manneen abbootii isaaniitti tokkoo tokkoo manaatii fi xobbaallaa hoolaa tokko akka fudhatu guutummaa hawaasa Israa'elitti himaa. ⁴ Yoo warri mana tokko jiraatan muraasa ta'anii hoolaa tokko guutummaatti fixuu baatan, isaan akkuma baay'ina namoota achi jiraataniitti ollaa isaaniitti aanu wajjin haa goodatan. Isinis akkuma waan tokkoon tokkoon namaa nyaachuu danda'uutti xobbaallaa hoolaa hamma akka barbaachisu murteessuu qabdu. ⁵ Xobbaallaan keessan ilmoo hoolaa waggaa tokkoo kan mudaa hin qabne ta'uu qaba; xobbaallaa sanas hoolota keessaa yookaan re'oota keessaa fudhachuu dandeessu. ⁶ Xobbaallaa sanas hamma bultii kudha afuraffaa ji'a kanaatti eegaa; yaa'iin waldaa Israa'el guutuunis galgala sana xobbaallaa sana haa qalatu. ⁷ Ergasii immoo dhiiga sana irraa xinnoo fuudhanii michichila balbalaa lamaanii fi buusaa balbalaa isa ol aanu kan mana itti xobbaallaa sana nyaatanii haa diban. ⁸ Isaanis halkanuma sana foon sana ibiddaan waaddatanii biqiltuu hadhooftuu fi maxinoon haa nyaatan. ⁹ Ibiddaan waaddaahaatii nyaadhaa malee foon dheedhii yookaan kan bishaaniin affeelame hin nyaatinaa; mataa isaa, lukaa fi mi'a garaa wajjin waaddadhaatii nyaadhaa. ¹⁰ Hamma lafti bariitutti homaa hin hambisinaa; waan hamma ganamaatti irraa hafu garuu gubaa. ¹¹ Haalli isin itti nyaattanis kunoo ti; mudhii keessan hidhadhaa; kophee keessan miillatti kaa'adhaa; ulee keessan illee harkatti qabaddhaatii jarjarsuun nyaadhaa; inni Faasiikaa WAAQAYYOO ti.

¹² “Anis halkanuma sana Gibxi keessa nan darba; hangafa Gibxis namaa fi horii nan dha'a; waaqota Gibxi hundattis nan mura; ani WAAQAYYO. ¹³ Dhiigni sunis manneen isin keessa jiraattan irratti mallattoo isinii ta'a; ani yommuun dhiiga sana argutti isin irra nan darba. Yeroo ani biyya Gibxi dha'uttis dha'ichi badiisaa tokko iyyuu isin hin tuqu.

¹⁴ “Guyyaan kun guyyaa yaadannoo isiniif haa ta’u; akka ayyaanaatti WAAQAYYOOFF ni ayyaaneffattu; dhaloota keessan hunda keessattis sirna bara baraa godhataanii ni eegdu. ¹⁵ Isin bultii torba maxinoo nyaachuu qabdu; guyyaa jalqabaatti mana keessanii raacitii baasaa gataa; namni kam iyyuu guyyaa jalqabaatii kaasee hamma guyyaa torbaffaatti yoo buddeena bukaa’e nyaate saba Israa’el keessaa haa balleeffamu. ¹⁶ Guyyaa jalqabaatii wal ga’ii qulqulluu qabaadhaa; wal ga’ii qulqulluu biraa immoo guyyaa torbaffaatti qabaadhaa. Waan namni hundi nyaatu qopheessuu malee guyyoota kanneen hojii tokko iyyuu hin hojjetinaa; wanni isin hojjechuu dandeessan kanuma.

¹⁷ “Sababii guyyaan ani itti raayyaa keessan Gibxi keessaa baase guyyuma kana ta’eef Ayyaana Maxinoo kana ayyaaneffadhaa; guyyaa kanas sirna bara baraa godhadhaatii dhaloota keessan hunda keessatti ayyaaneffadhaa. ¹⁸ Isin ji’a jalqabaa keessa galgala bultii kudha afuraffaadhaa hamma galgala guyyaa digdamii tokkoffaatti maxinoo nyaatu. ¹⁹ Bultii torbaaf raacitiin tokko illee mana keessanitti hin argamin; alagaas ta’u dhalataan biyyaa, namni waan raacitii qabu nyaatu kam iyyuu waldaa Israa’el keessaa haa balleeffamu. ²⁰ Waan raacitii qabu tokko illee hin nyaatinaa; lafa jiraattan hundatti Maxinoo nyaadhaa.”

²¹ Museen maanguddoota Israa’el hunda ofitti waamee akkana jedheen; “Dhaqaatii maatii keessanii xobbaallaa filadhaatii Faasiikaa qalaa. ²² Hiisophii qabaa tokkoo fuudhaa; dhiiga waciitii keessa jiru sana keessa cuuphaatii michichila balbalaa lamaanii fi buusaa balbalaa isa ol aanu dibaa. Isin keessaa namni tokko iyyuu hamma lafti bariitutti balbala mana ofii isaatii gad hin ba’in. ²³ WAAQAYYOO yeroo warra Gibxi dha’uuf biyyattii keessa darbutti michichila balbalaa lamaan irrattii fi buusaa balbalaa isa ol aanu irratti dhiiga sana argee balbala sana bira darba; akka inni waa balleessu sun mana keessan seenee isin ajjeessu hin eeyyamuuf.

²⁴ “Isinis qajeelfama kana akka seera bara baraa kan isinii fi sanyii keessaniif kennameetti kabajaa. ²⁵ Isinis yeroo biyya WAAQAYYOO akkuma waadaa gale sanatti isinii kennu seentanitti sirna kana eegaa. ²⁶ Yommuu ijoolleen keessan, ‘Sirni kun isiniif hiikkaa maalii qaba?’ jedhanii isin gaafatanitti, ²⁷ akkana jedhaa isaanitti himaa; ‘Kun qalma Faasiikaa WAAQAYYOO ti; inni yeroo warra Gibxi dha’etti manneen Israa’eloota Gibxi keessa turan sanaa irra darbee manneen keenya nuuf oolcheeraatii.’ ” Kana irratti namoonni gad jedhanii waaqeffatan. ²⁸ Israa’eloonnis akkuma WAAQAYYOO Musee fi Aroonin ajaje sana godhan.

²⁹ Halkan walakkaatti WAAQAYYOO ilma Fara’oon namicha teessoo irra taa’u hangafaa jalqabee hamma ilma namicha boolla mana hidhaa keessa jiru hangafaatti hangafoota Gibxi hunda dha’e; hangafoota horiis akkasuma dha’e. ³⁰ Fara’oonii fi qondaaltonni isaa hundi, warri Gibxi hundis halkaniin ka’an; sababii manni namni keessaa hin du’in tokko iyyuu hin turiniif boo’icha guddaatu Gibxi keessa ture.

Gibxii Ba’uu

³¹ Fara’oonis halkan sanaan Musee fi Aroonin ofitti waamee akkana jedhe; “Ka’aa! Isinii fi Israa’eloonni saba koo keessaa ba’aa! Akkuma gaafattan sana dhaqaatii WAAQAYYON waaqeffadhaa. ³² Akkuma jettan sana bushaayee fi loon keessan fudhadhaatii deemaa; anas eebbisaa.”

³³ Warri Gibxis akka sabni sun dafee biyya sanaa ba’u jarjarsan; isaanis, “Yoo kanaa achii nu hundi ni dhumnaa” jedhan. ³⁴ Kanaafuu sabni sun bukoo isaanii utuu hin bukaa’in fudhatanii, qodaa bukoo isaanis wayyaa isaaniitiin maranii gatiittiitti baadhatan. ³⁵ Israa’eloonnis akkuma Museen isaanitti hime sana godhan; isaanis mi’a meetiitii fi warqee, wayyaas warra Gibxi gaafatan. ³⁶ Sababii WAAQAYYOO fuula warra Gibxi duratti Israa’elootaaf surraa kenneef, warri Gibxi waan isaan gaafatan hunda kennaniif; isaanis akkasiin qabeenya warra Gibxi booji’anii ba’an.

³⁷ Israa’eloonnis Raamseedhaa ka’anii Sukootitti qajeelan. Isaanis nadheenii fi ijoollee malee namoota lafoo gara kuma dhibba ja’a turan. ³⁸ Uummanni walitti makame hedduun, akkasumas horiin jechuunis bushaayee fi loon baay’een isaan wajjin ba’an. ³⁹ Isaanis bukoo Gibxi fudhatanii dhufan sana irraa Maxinoo tolfatan. Sababii isaan jarjarsuudhaan Gibxi keessaa baafamanii yeroo itti nyaata qopheeffatan illee dhabanii bukoon sun raacitii hin qabu ture.

⁴⁰ Barri Israa’eloonni Gibxi keessa jiraatan waggaa 430 ture. ⁴¹ Dhuma waggaa 430 sanaatti guyyuma sana raayyaan WAAQAYYOO hundi biyya Gibxiitii ba’e. ⁴² WAAQAYYOO Gibxi keessaa isaan baasuudhaaf dammaqee halkan sana waan isaan eegeef, halkan kun Israa’eloota hundumaaf halkan itti WAAQAYYOO ulfina kennuudhaaf dammaqanii eeganii dha.

Seera Faasiikaa

⁴³ WAAQAYYOS Musee fi Arooniin akkana jedhe; “Seerri Faasiikaa kanaa dha: “Ormi tokko iyyuu isa irraa hin nyaatin. ⁴⁴ Garbichi bitame kam iyyuu erga dhagna qabdaniid booddee haa nyaatu; ⁴⁵ keessummaan yookaan namni hojjetaan qacarame garuu hin nyaatin.

⁴⁶ “Hoolaan sun manuma tokko keessatti haa nyaatamu; foon isaa tokko iyyuu manaa gad hin baasinaa. Lafee isaa keessaas tokko iyyuu hin cabsinaa. ⁴⁷ Waldaan Israa’el hundis ayyaana kana haa ayyaaneffatu.

⁴⁸ “Ormi isin wajjin jiraatu yoo Faasiikaa WAAQAYYOO ayyaanessuu barbaade inni dhiirota mana isaa jiraatan hunda dhagna haa qabu; ergasiis akkuma dhalataa biyyaatti ayyaanicha haa ayyaanessu. Dhiirri dhagna hin qabatini tokko iyyuu garuu hoolaa sana hin nyaatin. ⁴⁹ Dhalataa biyyaatiifis ta’u orma isin gidduu jiraatuuf seerri tokkuma.”

⁵⁰ Israa’eloonni hundis akkuma WAAQAYYO Musee fi Aroonin ajaje sana godhan. ⁵¹ WAAQAYYOS gaafuma sana kutaa kutaa isaaniiitiin Israa’eloota biyya Gibxi keessaa baase.

13

Hangafni Waaqaaf Addaan Baafamuu Isaa

¹ WAAQAYYO Museedhaan akkana jedhe; ² “Dhiira hangafa hunda addaan naa baasi; Israa’eloota keessaa namas ta’u horiin hangafni gadameessa banu kam iyyuu kan koo ti.”

³ Yommuu Museen uummataan akkana jedhe; “Sababii WAAQAYYO irree jabaadhaan achii isin baaseef guyyaa itti mana garbummaatii Gibxi keessaa baatan kana yaadadhaa. Waan raacitii qabu tokko illee hin nyaatinaa. ⁴ Isin ji’a Abiibii keessa guyyaa har’aa baatan. ⁵ Yeroo WAAQAYYO gara biyya Kana’aanotaa, Heetotaa, Amoorotaa, biyya Hiiwotaa fi Yebuusotaatti jechuunis biyya aannanii fi damma baasu kan inni akka siif kennu abbootii keetiif kakate sanatti si galchutti ati ji’a kana keessa ayyaana kana ayyaaneffatta; ⁶ ati bultii torba Maxinoo nyaatta; guyyaa torbaffaatti immoo ayyaana WAAQAYYOO ta’a. ⁷ Guyyaa torban sana Maxinoo nyaadhu; wanni raacitii qabu tokko iyyuu si biratti hin argamin; daangaa kee hunda keessattis raacitiin hin argamin. ⁸ Gaafas, ‘Ani waan WAAQAYYO yeroo ani Gibxi keessaa ba’etti naa godhe sanaaf jedhee waan kana godha’ jedhiitii ilma keetti himi. ⁹ Sirni kunis akka seerri WAAQAYYOO arraba kee irra jiraatuuf harka kee irratti akka mallattoo, adda kee irratti immoo akka yaadannoo siif ta’a. ¹⁰ WAAQAYYO harka isaa jabaa sanaan Gibxii si baaseetii. ¹¹ Atis sirna kana wagguma waggaa yeroo isaatti eeguu qabda.

¹² “Yommuu WAAQAYYO akkuma si’ii fi abbootii keetiif kakuudhaan waadaa gale sanatti biyya Kana’aanotaatti si galchee biyyattii siif kennutti, ¹³ ati hangafa gadameessa banu hunda WAAQAYYOOF kennita. Kormi horii keetii hangafni hundinuu kan WAAQAYYOO ti. ¹⁴ Harree hangafa kam iyyuu ilmoo hoolaaatiin furi; yoo furuu baatte garuu morma isaa cabsi. Ilmaan kee keessaas hangafa kam iyyuu furi.

¹⁵ “Bara dhufuuf jiru keessa yoo ilmi kee, ‘Kun maal jechuu dha?’ jedhee si gaafate ati akkana jedhiin; ‘WAAQAYYO harka jabaadhaan Gibxii, mana garbummaa keessaa nu baase. ¹⁶ Yommuu Fara’oon mataa jabaatee gad nu dhiisuu didetti, WAAQAYYO hangafa Gibxi hunda namaa fi horii ajjeese. Sababiin ani korma hangafa gadameessa banu hunda WAAQAYYOOF aarsaa dhi’eessuu fi sababiin ani ilmaan koo keessaa hangafa hunda furuuf kanuma.’ ¹⁷ WAAQAYYO irree jabaadhaan Gibxii nu baasuu isaatiif wanni kun harka kee irratti mallattoo, adda kee irrattis mallattoo ta’a.”

Galaana Ce’uu

¹⁸ Yeroo Fara’oon saba sana gad dhiisetti karichi gabaabaa ta’u iyyuu Waaqni karaa biyya Filisxeem irra isaan hin qajeelchine; sababiin isaas Waaqni, “Isaan yoo waraanni isaan mudate yaada geeddarratani Gibxitti deebi’uu danda’an” jedhee ti. ¹⁹ Kanaafuu Waaqni karaa naannoo gammoojjitiin gara Galaana Diimaatti saba sana qajeelche. Israa’eloonnis waraanaaf qophaa’anii biyya Gibxiitii ba’an.

²⁰ Sababii Yoosof, “Waaqni dhugumaan isin gargaara; isinis gaafas lafee koo asii fuudhaa ba’aa” jedhee Israa’eloonni kakachiisee tureef Museen lafee Yoosof fuudhee ba’ee.

²¹ Isaanis Sukootii ka’anii Eetaam keessa qarqara gammoojjii qubatan. ²² WAAQAYYO akka isaan halkanii guyyaa deemuu danda’aniiif guyyaa utubaa duumessaatiin isaan dura deemee karaa isaan argisiise; halkan immoo isaaniiif ibsuuf jedhee utubaa ibiddaatiin isaan dura deema ture. ²³ Utubaa duumessaa guyyaa guyyaa, utubaan ibiddaa immoo halkan uummata duraa hin dhabamne ture.

14

¹ Ergasii WAAQAYYO Museedhaan akkana jedhe; ² "Akka isaan of irra garagalani Pih Hahiroti bira, Migdoolii fi galaana gidduu qubatan Israa'elootatti himi. Isaan fuullee Ba'aal Zefoon, galaana cina qubachuu qabu. ³ Fara'oonis, 'Israa'eloonni burjaaja'anii biyya keessa jooraa jiru; gammoojjiin isaan marseera' jedhee yaade. ⁴ Anis garaa Fara'oon nan jabeessa; inni faana dha'ee isaan duukaa bu'a. Anis karaa Fara'ooniitii fi karaa loltoota isaa hundaatiin ofii kootiif ulfina nan argadha; warri Gibxi akka ani WAAQAYYO ta'e ni beeku." Israa'eloonnis akkasuma godhan.

⁵ Mootiin Gibxi akka sabni sun baqatee ba'e yommuu itti himametti Fara'oonii fi qondaaltonni isaa yaada waa'ee saba sanaa qaban geeddarratanii, "Akka sabni Israa'el nu tajaajiluu dhiisee deemuuf gad dhiisuun keenya maal gochuu keenya?" jedhan. ⁶ Innis gaarii isaa qopheeffatee, loltoota isaas fudhatee ka'e. ⁷ Gaariiwwan filatamoo dhibba ja'a, gaariiwwan Gibxi biraa hunda kanneen ajajjuuwwan isaan hunda irra jiran fudhatee ka'e. ⁸ WAAQAYYOS Fara'oon mooticha Gibxi mata jabeessa godhe; Fara'oonis Israa'eloota warra sodaa malee ba'aa turan sana duukaa bu'ee ari'e. ⁹ Warri Gibxis fardeenii fi gaariiwwan Fara'oon hundi, abbootiin fardaatii fi loltoonni lafoon Israa'eloota duukaa bu'anii isaanii Pih Hahiroti bira fuullee Ba'aal Zefoon qarqara galaanaa qubatanii jiran qaqqaban.

¹⁰ Yeroo Fara'oon itti dhi'aatettis Israa'eloonni ol ilaalani kunoo warri Gibxi dugda duubaan isaan faana dhufan argan. Isaanis sodaatanii WAAQAYYOTTI iyyatan. ¹¹ Isaanis Museedhaan akkana jedhan; "Ati waan iddoon awwaalaa Gibxi hin jirreef akka nu gammoojji keessatti dhumnuuf as nu fiddee? Ati Gibxi nu baasuun kee maal nu gochuu kee ti? ¹² Nu Gibxi keessatti, 'Akka warra Gibxi tajaajiluuf nu dhiisi' siin hin jennee? Gammoojji keessatti dhumuu irra warra Gibxi tajaajiluu nu wayya ture!"

¹³ Museen akkana jedhee saba sanaaf deebise; "Hin sodaatinaa; jabaadhaa dhaabadhaa! Fayyisuu WAAQAYYOO kan inni har'a isinii godhu ilaalaa! Warra Gibxi kan har'a argitan kana lammata deebitanii hin argitan. ¹⁴ WAAQAYYO isiniif lola; isin gab jedhaa."

¹⁵ WAAQAYYOS Museedhaan akkana jedhe; "Ati maaliif natti iyyita? Akka isaan adeemsa isaanii itti fufaniif Israa'elootatti himi. ¹⁶ Ulee kee ol fuudhiitii harka kee galaana irra diriirfadhu; akka Israa'eloonni lafa gogaa irra galaana gidduu darbanii bishaan gargari qoodi. ¹⁷ Ani immoo akka isaan dugda isaanii duubaan seenaniif garaa warra Gibxi nan jabeessa. Anis Fara'oonii fi loltoota isaa hunda irratti, gaariiwwan isaatii fi abbootii fardaa isaa irratti ulfina nan argadha. ¹⁸ Yeroo ani Fara'oon irratti, gaariiwwan isaatii fi abbootii fardaa isaa irratti ulfina argadhutti warri Gibxi akka ani WAAQAYYO ta'e ni beeku."

¹⁹ Yommu ergamaan Waaqayyoo kan saba Israa'el dura deemaa ture sun ka'ee gara dugda isaanii duubaatti darbe. Utubaan duumessaa sunis fuula isaanii duraa ka'ee isaan duuba dhaabate; ²⁰ utubaan sunis loltoota Gibxii fi loltoota Israa'el gidduu seene. Duumessi sun halkan sana gama tokkotti dukkana, gama kaanitti immoo ifa fide; kanaafuu halkan sana guutuu garee lamaan keessaa tokko illee garee kaanitti hin dhi'anne.

²¹ Museenis harka isaa galaana irra diriirfate; WAAQAYYOS halkan sana guutuu bubbee ba'a biiftuu jabaadhaan galaanicha gara duubaatti deebisee galaanicha lafa gogaa godhe. Bishaan sunis gargari qoodame; ²² Israa'eloonnis galaanicha gidduu lafa gogaa irra darban; bishaanichis karaa mirgaa isaaniitii fi karaa bitaa isaanii keenyan ta'eef.

²³ Warri Gibxi isaan duukaa bu'anii fardeen Fara'oon, gaariiwwan isaatii fi abbootiin fardaa isaa galaana seenan. ²⁴ Yommuu lafti bari'etti WAAQAYYO utubaa ibiddaati fi duumessaa keessaa loltoota Gibxi sana gad ilaalee gara itti goran isaan wallaalchise. ²⁵ Akka isaan rakinaan oofaniifis gommaa gaariiwwan isaanii irraa baase. Warri Gibxis, "Waan WAAQAYYO gama Israa'elootaa dhaabatee warra Gibxi lolaa jiruuf kottaa isaan duraa baqannaa" jedhan.

²⁶ WAAQAYYOS Museedhaan, "Akka bishaanonni warra Gibxi irra, gaariiwwanii fi abbootii fardaa isaanii irra garagalaniif harka kee galaana irratti diriirsi" jedhe. ²⁷ Museenis harka isaa galaanicha irratti diriirse; yeroo lafti bari'ettis galaanni sun iddoo isaatti deebi'e. Warri Gibxis bishaan sana jalaa baqatan; WAAQAYYOS haxaa'ee galaanatti isaan naqe. ²⁸ Bishaan sun iddoo isaatti deebi'ee gaariiwwanii fi abbootii fardaa jechuunis loltoota Fara'oon kanneen Israa'eloota duukaa bu'anii galaana seenan sana hunda liqimse. Isaan keessaas namni tokko iyyuu hin hafne.

²⁹ Israa'eloonni garuu bishaanichi karaa mirga isaaniitii fi karaa bitaa isaaniitiin keenyan ta'eefii galaanicha keessa lafa gogaa irra darban. ³⁰ Gaafas WAAQAYYO harka warra Gibxi jalaa Israa'eloota baase; warri Israa'elis reeffa warra Gibxi qarqara galaanaatti argan. ³¹ Israa'eloonnis yommuu humna guddaa kan WAAQAYYO warra Gibxi

irratti mul'ise sana arganitti, WAAQAYYON sodaatan; isaanis WAAQAYYOO fi tajaajilaa isaa Musee amanan.

15

Faarfannaa Museetii fi Maariyaam

- ¹ Yommus Musee fi Israa'eloonni Faarfannaa kana WAAQAYYOOOF faarfatan:
 “Ani WAAQAYYOOOF nan faarfadha;
 inni ol ol jedheeraatii.
 Inni fardaa fi namicha farda yaabbate
 galaanatti gad darbateera.
- ² “WAAQAYYO jabina kootii fi faarfannaa koo ti;
 inni fayyina koo ta'eera.
 Inni Waaqa koo ti; anis isa nan jajadha;
 inni Waaqa abbaa kootii ti; anis isa ol ol nan qaba.
- ³ WAAQAYYO goota waraanaa ti;
 maqaan isaa WAAQAYYO.
- ⁴ Inni gaariiwwan Fara'oonii fi loltoota isaa
 galaanatti gad darbateera.
 Qondaaltota Fara'oon keessaa filatamtoonni,
 Galaana Diimaa keessa dhidhimaniiru.
- ⁵ Tuujubni isaan irra gara gale;
 isaanis akkuma dhagaa tuujubatti gad dhidhiman.
- ⁶ Yaa WAAQAYYO,
 harki kee mirgaa humnaan ulfina qabeessa.
 Yaa WAAQAYYO,
 harki kee mirgaa diina ni hurreessa.
- ⁷ “Ati guddina ulfina keetiitiin
 warra siin morman gad darbatte.
 Aarii kee boba'aa ni ergite;
 innis akkuma habaqaatti gubee isaan fixe.
- ⁸ Hafuura funyaan keetiitiin
 bishaanonni tuulaman.
 Bishaan yaa'u akkuma keenyaniitti ol dhaabate;
 tuujuboonnis walakkaa galaanaatti ititan.
- ⁹ Diinni, 'Ani faana bu'ee isaan qaqqaba.
 Boojuu nan goodadha;
 ani isaan irratti fedhii koo nan guutadha.
 Goraadee koo nan luqqifadha;
 harki koo isaan barbadeessa' jedhee nan dhaadate.
- ¹⁰ Ati garuu bubbee kee itti bubbifte;
 galaanni immoo isaan irra gara gale.
 Isaanis akkuma sibiilaa
 bishaanota jajjaboodhaan liqimfaman.
- ¹¹ Yaa WAAQAYYO,
 waaqota keessaa eenyutu si fakkaata?
 Qulqullinaan simboo qabeessi,
 ulfinaan sodaachisaan,
 hojii dinqii hojjechuuttis
 kan akka keetii eenyu?
- ¹² “Ati harka kee mirgaa diriirfannaan,
 lafti isaan liqimsite.
- ¹³ Ati saba furte sana,
 jaalala kee hin geeddaramneen geggeessita.
 Jabina keetiinis
 gara iddoo jireenya keetii qulqulluutti isaan qajeelchita.
- ¹⁴ Saboonni dhaga'anii hollatu;
 muddamsuunis saba Filisxeem qabate.
- ¹⁵ Hangafoonni Edoom ni rifatu;
 bulchitoota Mo'aabis naasuutu qabata;

warri Kana'aanis bishaanuma ta'u;

¹⁶ sodaa fi abdi kutachuun isaan irra bu'a.

Yaa WAAQAYYO, hamma sabni kee darbutti,

hamma sabni ati bitatte sun darbutti

jabina harka keetiitiin

isaan akkuma dhagaa cal'isu.

¹⁷ Yaa WAAQAYYO, ati gara tulluu dhaala keetiitti,

gara lafa iddoo jireenya keetii godhachuuf tolfatteetti,

yaa Gooftaa ati gara iddoo qulqulluu harki kee hundesseetti

ol galchitee isaan dhaabda.

¹⁸ "WAAQAYYO,

bara baraa hamma bara baraatti mo'a."

¹⁹ Yommuu fardeen, gaariiwwanii fi abbootiin fardaa kan Fara'oon galaana seenanitti WAAQAYYO bishaanota isaan irra garagalche; Israa'eloonni garuu lafa gogaa irra deemanii galaana keessa darban. ²⁰ Miiriyaam obboleettiin Aroon raajittiin sun dibbee harkatti qabatee kaate; dubartoonni hundinuus dibbee isaanii fudhatanii sirbaa ishee faana bu'an. ²¹ Miiriyaamis akkana jettee isaaniif faarfate:

"WAAQAYYO faarfadhaa;

inni ulfinaan mo'ateeraatii.

Inni fardaa fi namicha farda yaabbate

galaanatti gad darbateera."

Bishaan Maaraatii fi Bishaan Eelim

²² Museenis saba Israa'el Galaana Diimaa biraa fuudhee qajeelche; isaanis Gammoojjii Shuuri seenan. Israa'eloonnis utuu bishaan hin argatin guyyaa sadii gammoojjii keessa deeman. ²³ Isaanis yommuu Maaraa ga'anitti bishaan isaa dhuguu hin dandeenye; bishaan sun hadhaa'aa tureetii. Wannii iddoo sun Maaraa jedhameefis kanuma. ²⁴ Jarri sunis, "Nu maal haa dhugnuu?" jedhanii Museetti guunguman.

²⁵ Yommuu Museen WAAQAYYOTTI iyyinaan, WAAQAYYO muka tokko isa argisiise. Innis muka sana bishaanatti gad darbate; bishaan sunis ni mi'aawe.

WAAQAYYOS iddoo sanatti sirnaa fi seera isaaniif baase; achittis isaan qore. ²⁶ Innis akkana jedhe; "Ati yoo sagalee WAAQAYYO Waaqa keetii garaa tokkoon dhageesse, yoo waan fuula isaa duratti qajeelaa ta'e hojjette, yoo ajaja isaa qalbeeffatee fi yoo seera isaa hunda eegde, ani dhukkuba warra Gibxitti fide sana keessaa tokko iyyuu sitti hin fidu; ani WAAQAYYO si fayyisuudhaatii."

²⁷ Isaanis gara Eelim iddoo burqaan kudha lamaa fi mukkeen meexxi torbaatamni turan dhufanii achi bishaan bira qubatan.

16

Mannaa fi Dimbiriqqee

¹ Waldaan Israa'el hundi biyya Gibxiitii ba'anii ji'a lammafaatti, ji'a sana keessaa guyyaa kudha shanafaatti Eeliimii ka'anii gara gammoojjii Siin isa Eeliimii fi Siinaa gidduu jiru sanaa dhaqan. ² Gammoojjii keessattis hawaasni sun guutuun Musee fi Aroonitti guunguman. ³ Israa'eloonnis akkana isaaniin jedhan; "Nu biyya Gibxiiti yeroo okkotee foonii bira teenyee hamma quufnutti buddeena nyaachaa turre sana harka WAAQAYYOOTTI utuu duuneerra ta'ee! Isin garuu akka waldaan kun guutuun beela'ee dhumu gochuuf achii nu baafthanii gammoojjii kanatti nu fiddaniirtu."

⁴ WAAQAYYO immoo Museedhaan akkana jedhe; "Kunoo, ani samii irraa buddeena gad isinii nan roobsa. Sabni sunis guyyuma guyyaan gad ba'ee waan guyyaa tokkoof isa ga'u walitti haa qabatu. Anis karaa kanaan isaan qoree seera koo eeguu fi eeguu baachuu isaanii nan ilaala. ⁵ Isaanis guyyaa ja'affaatti waan walitti qabatan sana haa qopheeffatan; wannii kunis waan isaan guyyaa biraa walitti qabatanitti harka lama haa ta'u."

⁶ Musee fi Aroon Israa'eloota hundaan akkana jedhan; "Kan biyya Gibxiitii isin baase WAAQAYYO akka ta'e galgala kana ni beektu. ⁷ Ganama immoo ulfina WAAQAYYOO argitu; inni akka isin isatti guungumtan dhaga'eraatii. Nu eenyu taanaan isin nutti guungumtu?" ⁸ Museenis akkana jedhe; "Yeroo inni akka isin nyaattaniiif galgala foon, ganama immoo buddeena isin barbaaddan hunda isinii kennutti isin akka inni WAAQAYYO ta'e ni beektu; inni guungummii isin isatti guungumtan dhaga'eraatii. Nu eenyuu dha? Isin WAAQAYYOTTI guungumaa jirtu malee nutti hin guungumne."

⁹ Yommu Museen, "Waldaa Israa'el hundaan, 'Sababii inni akka isin guungumtan dhaga'eef isin fuula WAAQAYYOO duratti dhi'aadhaa' jedhi" jedhee Aroonitti hime.

¹⁰ Yeroo Aroon guutummaa waldaa saba Israa'elitti dubbachaa turetti isaan gara gammoojjii ilaalaa turan; kunoo, ulfinni WAAQAYYOO duumessa keessaan mul'ate.

¹¹ WAAQAYYOS Museedhaan akkana jedhe; ¹² "Ani guungummii saba Israa'el dhaga'eera. Ati immoo, 'Isin yeroo lafti dimimmisooftutti foon nyaattu; ganama immoo buddeena nyaattanii quufu. Isinis yeroo sana akka ani WAAQAYYOO Waaqa keessan ta'e ni beektu' jedhii isaanitti himi."

¹³ Galgaluma sana dimbiriqqeen dhuftee iddoo qubannaa sana guutte; guyyaa itti aanu ganama immoo fixeensi naannoo qubannaa sanaa ture. ¹⁴ Yommuu fixeensi bu'ettis, kunoo wantoonni haphiin akka qorraa lafa irraa addaatan dirree gammoojjii irraa bubbu'an. ¹⁵ Israa'eloonnis yommuu waan kana arganitti, "Wanni kun maali?" waliin jedhan. Isaan wannu sun maal akka ta'e hin beekne tureetii.

Museenis akkana isaaniin jedhe; "Wanni kun buddeena akka isin nyaattaniif WAAQAYYOO isiniif kennee dha. ¹⁶ WAAQAYYOO akkana jedhee ajajeera: "Tokkoon tokkoon namaa hamma barbaadu walitti haa qabatu. Akkuma baay'ina nama dunkaana keessan keessaatti tokkoo tokkoo namaatiif gomoorii tokko fudhadhaa."

¹⁷ Israa'eloonni akkuma isaanitti himame godhan; garri tokko baay'ee, warri kaan immoo xinnoo walitti qabatan. ¹⁸ Yommuu isaan gomooriidhaan safaranitti isa baay'ee walitti qabate irraa hin hafne; isa xinnoo walitti qabatettis hin hir'anne. Tokkoon tokkoon namaa hammuma barbaadu walitti qabate.

¹⁹ Museenis, "Namni tokko iyyuu waan walitti qabate keessaa tokko illee ganamaaf hin bulfatin" jedheen.

²⁰ Ta'us isaan keessaa namoonni tokko tokko Musee hin dhageenye; waan walitti qabatan keessaas gartokko ganamaaf bulfatan; innis raamma'ee ajaa'e. Kanaafuu Museen isaanitti aare.

²¹ Tokkoon tokkoon namaa ganama ganama hammuma barbaadu walitti qabate; innis yommuu aduun ho'itetti baqee bade. ²² Guyyaa ja'ffaatti jarri harka lama jechuunis mata mataatti gomoorii lama walitti qabatan; hooggantoonni waldichaa hundis dhaqanii Museetti himan. ²³ Innis akkana jedheen; "WAAQAYYOO akkana jedhee ajaje: 'Bor guyyaa sanbata boqonnaa ta'a; innis sanbata WAAQAYYOOOF qulqullaa'ee dha. Waan tolfachuu barbaaddan tolfadhaa; waan affeelachuu barbaaddanis affeeladhaa. Waan irraa hafu hunda immoo hamma ganamaatti turfadhaa.'"

²⁴ Jarris akkuma Museen isaan ajajetti hamma ganamaatti turfatan; nyaanni sunis hin ajofne yookaan hin raammofne. ²⁵ Museenis akkana jedhe; "Waan guyyaan har'aa sanbata WAAQAYYOO ta'eef nyaata kana har'a nyaadhaa; isin har'a dirree irratti isa hin argattan. ²⁶ Isinis nyaata sana guyyaa ja'a walitti qabadhaa; guyyaa torbaffaatti jechuunis guyyaa Sanbataatiin garuu tokko iyyuu hin argamu."

²⁷ Jara sana keessaa namoonni tokko tokko immoo guyyaa torbaffaatti walitti qabachuuf gad ba'an; garuu homaa hin arganne. ²⁸ Kana irratti WAAQAYYOO Museedhaan akkana jedhe; "Isin hamma yoomiitti ajaja koo fi qajeelfama koo eeguu diddu?" ²⁹ WAAQAYYOO Sanbata akka isinii kenne hubadhaa. Sababiin inni guyyaa ja'ffaatti buddeena guyyaa lamaaf ta'u isinii kennuufis kanuma. Namni hundinuu guyyaa torbaffaatti idduma jiru haa turu. Namni tokko iyyuu gad hin ba'in." ³⁰ Sabni sunis guyyaa torbaffaatti ni boqote.

³¹ Sabni Israa'el buddeena sana "manna" jedhee moggaase. Mannaan kunis sanyii dinbilaalaa fakkaata; adiidhas; mi'aan isaas akka bixxillee dammaan tolfamee ti. ³² Museen akkana jedhe; "WAAQAYYOO akkana jedhee ajaje: 'Akka inni dhaloota dhufuuf turfamuuf Mannaa gomoorii tokko fuudhaa; kunis akka isaan buddeena ani yeroo biyya Gibxi keessaa isin baasetti akka isin gammoojjii keessatti nyaattaniif isinii kenne sana arganiif.'"

³³ Museen Arooniin, "Okkotee tokko fuudhiitti mannaa gomoorii tokko itti naqi; akka mannaan kun dhaloota dhufuuf turfamuuf fuula WAAQAYYOO dura kaa'i" jedhe.

³⁴ Aroonis akkuma WAAQAYYOO Musee ajaje sanatti akka mannaan sun turfamuuf fuula Dhugaa Ba'uu dura kaa'e. ³⁵ Sabni Israa'el hamma biyya keessa qubatamu sana ga'anitti waggaa afurtama mannaa nyaatan; isaanis hamma daarii biyya Kana'aan ga'anitti mannaa nyaatan.

³⁶ Gomooriin tokko harka kurnaffaa iifii tokkoo ti.

¹ Waldaan ijoollee Israa'el hundi akkuma WAAQAYYO ajajetti Gammoojjii Siiniitii ka'anii iddoo tokko irraa gara iddoo biraatti darbaa dhaqanii Refidiim qubatan. Garuu sabni sun bishaan dhugaatii hin arganne. ² Kanaafuu isaan, "Bishaan dhugnu nuu kenni" jedhanii Musee lolan.

Museen immoo deebisee, "Isin maaliif na loltu? WAAQAYYOS maaliif qortu?" jedheen. ³ Jarris bishaan dheebotanii Museetti guunguman; akkanas jedhan; "Ati maaliif akka nu, ijoolleen keenyaa fi horiin keenya dheebuun dhumnuuf biyya Gibxiitii nu baafte?"

⁴ Kana irratti Museen gara WAAQAYYOOTTI iyee, "Ani saba kana maal godha? Isaan dhagaan na tumuuf xinumatu hafe" jedhe.

⁵ WAAQAYYO immoo akkana jedhee Museef deebii kenne; "Saba kana dura darbii deemi. Maanguddoota Israa'el keessaa tokko tokko of faana fudhadhuutii ulee ittiin laga Abbayyaa dhoofta sana harkatti qabadhuu deemi. ⁶ Kunoo ani kattaa Kooreeb sana bira fuula kee dura achi nan dhaabadha; akka namoonni bishaan dhuganiif ati kattaa sana dha'i; bishaanis isa keessaa ni ba'a." Kanaafuu Museen fuula maanguddoota Israa'el duratti akkasuma godhe. ⁷ Sababii Israa'eloonni lola kaasanii fi sababii isaan, "WAAQAYYO nu wajjin jira moo hin jiru?" jechuudhaan WAAQAYYON qoraniif Museen iddoo sana Maasaahii fi Mariibaa jedhee moggaase.

Amaaleqoonni Mo'ataman

⁸ Amaaleqoonni dhufanii Refidiimitti Israa'eloota lolan. ⁹ Museenis Iyyaasuudhaan, "Namoota keenya keessaa muraasa filadhuutii dhaqii Amaaleqoota loli. Ani bor ulee Waaqaa harka kootti qabadhee fiixee gaara irra nan dhaabadha" jedhe.

¹⁰ Yeroo Museen, Aroonii fi Huuri fiixee gaaratti ol ba'anitti, Iyyaasuun akkuma Museen ajajetti Amaaleqoota lola ture. ¹¹ Yeroo Museen harka isaa ol qabatutti Israa'eloonni ni mo'atu turan; yeroo inni harka isaa gad buufatu immoo Amaaleqoonni ni mo'atu turan. ¹² Isaanis yeroo harki Musee dadhabaa deemetti dhagaa tokko fuudhanii isa jala kaa'an; innis irra taa'e. Aroonii fi Huuri inni tokko garanaan inni kaan immoo garasiin goranii akka harki isaa hamma aduun dhiitutti gad hin deebineef ol qabaniif. ¹³ Akkasiin Iyyaasuun loltoota Amaaleqootaa goraadeedhaan mo'ate.

¹⁴ Ergasii WAAQAYYO Museedhaan akkana jedhe; "Akka wanni kun yaadatamuuf kitaabatti barreessi; Iyyaasuun waan kana dhaga'uu isaa mirkaneessi; ani guutumaan guutuutti yaadannoo Amaaleqootaa samii jalaa nan balleessaatii."

¹⁵ Museenis iddoo aarsaa ijaaree, "WAAQAYYO Faajjii koo ti" jedhee moggaase. ¹⁶ Innis, "Harki gara teessoo WAAQAYYOOTTI ol kaafameera. WAAQAYYOS dhaloota tokkoo gara dhaloota kaaniitti Amaaleqoota ni lola" jedhe.

18

Yootoor Gara Musee Dhufe

¹ Yetroo lubichi Midiyaaniitii fi abbaan niitii Musee sun waan Waaqni Musee fi saba isaa Israa'eliif godhe hunda, akkasumas akka WAAQAYYO itti Israa'elin Gibxii baase dhaga'e.

² Erga Museen niitii isaa Ziphoraara ergee booddee Yetroo abbaan niitii Musee, ishee fi ³ ilmaan ishee lamaan simate. Maqaan ilma isaa tokkoo Geershoom jedhame; Museen, "Ani biyya ormaa keessatti alagaa ta'eera" jedheeraatii. ⁴ Kaan immoo, "Waaqni abbaa kootii gargaaraa kooti; inni goraadee Fara'oon jalaa na baaseera" jechuudhaan Elii'ezer jedhee moggaase.

⁵ Yetroon abbaan niitii Musees niitii Museetii fi ilmaan Musee wajjin gammoojjii keessatti gara tulluu Waaqaa iddoo Museen qubatee jirutti isa bira dhufe. ⁶ Yetroonis, "Ani abbaan niitii keetii Yootoor niitii keetii fi ilmaan ishee lamaan wajjin gara kee dhufaa jira" jedhee dhaamsa itti ergee ture.

⁷ Museenis abbaa niitii isaa simachuuf gad ba'e; gad jedhees harka fuudhee isa dhungate. Isaanis nagaa wal gaafatanii dunkaana seenan. ⁸ Museen waan WAAQAYYO sababii saba Israa'eliif jedhee Fara'oonii fi warra Gibxi irratti hojjete, rakkina karaa irratti isaan mudate hundaa fi akka itti WAAQAYYO isaan oolche abbaa niitii isaatti hime.

⁹ Yetroonis waan gaarii WAAQAYYO harka warra Gibxi keessaa isaan baasuudhaan saba Israa'eliif godhe hundaaf ni gammade. ¹⁰ Innis akkana jedhe; "WAAQAYYO harka warra Gibxii fi harka Fara'oon keessaa isin baasee fi inni saba sana harka warra Gibxiitii baase sun haa eebbifamu. ¹¹ Ani amma akka WAAQAYYO waaqota kaan hunda caalaa guddaa ta'e nan beeka; inni warra of tuulummaadhaan Israa'elin rakkisan irratti waan kana raawwateeraatii." ¹² Yommuu Yetroon abbaan niitii Musee sun aarsaa gubamuu fi aarsaa biraa Waaqaaf fide; Aroonis fuula Waaqaa duratti Musee fi abbaa niitii Musee wajjin buddeena nyaachuuf maanguddoota Israa'el hunda wajjin dhufe.

¹³ Guyyaa itti aanutti Museen sabaaf murtii kennuuf taa'e; sabni sunis ganamaa hamma galgalaatti naannoo isaa dhaabate. ¹⁴ Abbaan niitii isaas yommuu waan Museen sabaaf hojjetu hunda argetti, "Wanni ati sabaaf hojjetu kun maali? Ati maaliif kophaa kee teessee sabni kun immoo ganamaa hamma galgalaatti naannoo kee dhadhaabata?" jedhe.

¹⁵ Museen immoo akkana jedhee deebiseef; "Sabni kun fedhii Waaqaa barbaacha gara koo dhufaati. ¹⁶ Isaan yommuu falmii qabaatanitti dhimma isaanii natti dhi'eeffatu; anis abbootii dhimmaa gidduutti murtii nan kenna; sirnaa fi seera Waaqaas isaanitti nan hima."

¹⁷ Abbaan niitii Musee akkana jedhee deebise; "Wanni ati gootu kun gaarii miti. ¹⁸ Aatii fi sabni si bira dhufu kun akkasumaan of dadhabsiiftu. Hojiin kunis akka malee sitti ulfaata; ati kophaa kee hojjechuu hin dandeessu. ¹⁹ Ani gorsa siif kennaatii amma na dhaga'i; Waaqni si wajjin haa ta'u. Ati fuula Waaqaa duratti iddoo bu'aa saba taatee dhimma isaanii Waaqatti fiduu qabda. ²⁰ Sirnaa fi seera isaan barsiisi; akka isaan itti jiraachuu qabaniif fi waan isaan hojjechuu qaban isaanitti argisiisi. ²¹ Kana malees ati saba hunda keessaa namoota dandheetii qaban jechuunis, namoota Waaqa sodaatan, namoota amanamoo kanneen matta'aa jibban filadhuutii ajajjuuwwan kumaa, ajajjuuwwan dhibbaa, ajajjuuwwan shantamaatii fi ajajjuuwwan kudhanii godhii muudadhu. ²² Isaan yeroo hunda sabaaf murtii haa kennan; dubbii cimaa hunda garuu sitti haa fidan; dubbii laayyoo immoo ofumaan haa murteessan. Kun ba'aa kee siif salphisa; isaan si wajjin ba'aa ni baatuutii. ²³ Yoo ati waan kana goote, yoo Waaqnis waanuma kana si ajaje ati jabaatee dhaabachuu dandeessa; sabni kun hundis nagaadhaan mana ofii isaatti gala."

²⁴ Museenis abbaa niitii isaa dhaga'ee waan inni jedhe hunda godhe. ²⁵ Innis Israa'el hunda keessaa namoota dandheetii qaban filatee hooggantoota saba, ajajjuuwwan kumaa, ajajjuuwwan dhibbaa, ajajjuuwwan shantamaatii fi ajajjuuwwan kudhanii isaan godhate. ²⁶ Isaanis abbootii murtii ta'anii yeroo hunda saba sana tajaajilan; dubbii jabaa Museetti fidan; dubbii laayyoo ta'e hunda immoo ofumaan murteessan.

²⁷ Ergasiis Museen abbaa niitii isaa geggeesse; Yootooris deebi'ee biyya isaatti gale.

19

Gaara Siinaa Biratti

¹ Israa'eloonni erga Gibxii ba'anii as ji'a sadaffaa keessa guyyuma itti Gibxii ba'an sana Gammoojjii Siinaa ga'an. ² Isaanis erga Refidiimii ka'anii booddee Gammoojjii Siinaa seenan; sabni Israa'el is Gammoojjii sana keessa fuullee tulluu sanaa qubatan.

³ Museenis gara Waaqaatii ol ba'e; WAAQAYYOS tulluu irraa isa waamee akkana jedheen; "Ati mana Yaaqoobiin akkana jetta; saba Israa'elittis waan kana himi: ⁴ 'Waan ani warra Gibxi godhee fi akka ani itti qoochoo risaa irratti isin baadhee gara kootti isin fide isin mataan keessan iyyuu argitaniirtu. ⁵ Ammas isin yoo naaf ajajamtan, yoo kakuu koo eegdan isin saboota hunda keessaa qabeenya addaa naaf taatu. Yoo lafti hundinuu kan koo ta'e illee, ⁶ isin mootummaa lubootaatii fi saba qulqulluu naaf taatu.' Dubbiin ati saba Israa'elitti himuu qabdu kanuma."

⁷ Museen deebi'ee maanguddoota saba walitti waamee, dubbii akka inni dubbatuuf WAAQAYYO isa ajaje sana hunda fuula isaanii duratti dhi'eesse. ⁸ Jarri hundinuu afaan tokkoon, "Nu waan WAAQAYYO jedhe hundumaa ni goona" jedhanii deebisan; Museen immoo waan jarri jedhan deebisee WAAQAYYOTTI fide.

⁹ WAAQAYYO Museedhaan akkana jedhe; "Akka sabni kun anaa si wajjin dubbatu dhaga'ee yeroo hunda si amanatuuf kunoo ani duumessa yabbuu keessaan gara kee nan dhufa." Ergasiis Museen waan sabni sun jedhe WAAQAYYOTTI hime.

¹⁰ WAAQAYYOS Museedhaan akkana jedhe; "Gara saba dhaqiiiti har'aa fi bori isaan qulqulleessi. Akka isaan wayyaa isaanii miiccatanii ¹¹ guyyaa sadaffaaf qophaa'an godhi; gaafa sana utuma sabni hundi ilaaluu WAAQAYYO Tulluu Siinaa irratti gad ni bu'aatii. ¹² Naannoo tullichaatti saba sanaaf daangaa tolchiitii akkana jedhiin; 'Isin akka tulluu sanatti ol hin baane yookaan akka qarqara isaa illee hin tuqne of eeggadhaa. Namni tulluu sana tuqu kam iyyuu haa ajjeefamu. ¹³ Inni dhagaadhaan haa tumamu yookaan xiyyaan haa waraanamu; harki tokko iyyuu isa hin tuqin; horiis ta'u namni akka jiraatu hin eeyyamamuuf.' Isaan yeroo malakanni utuu gargar hin citin afuufamu qofa tulluutti ol ba'uu danda'u."

¹⁴ Museen tulluu irraa gara sabaatti gad bu'ee saba sana qulqulleesse; isaanis uffata isaanii miiccatan. ¹⁵ Innis saba sanaan, "Guyyaa sadaffaaf of qopheessaa; dubartii biras hin ga'inaa" jedhe.

¹⁶ Ganama guyyaa sadaffaa sana tulluu sana irra bakakkaa, balaqqeessaa fi duumessa yabbuu, akkasumas sagalee malakataa guddaatu dhaga'ame. Warri iddoo qubataa sana keessa jiraatan hundis ni hollatan. ¹⁷ Museenis saba sana iddoo qubannaatii baasee gara Waaqaatti fide; jarris miilla tulluu sanaa jala dhadhaabatan. ¹⁸ Tulluun Siinaa hundis sababii WAAQAYYO ibiddaan irratti gad bu'eef aaraan haguugame. Aarri sunis akkuma aara boolla ibiddaatii ba'uutti ol ba'e; tulluun sunis guutamaan guutuutti akka malee raafame; ¹⁹ sagaleen malakataa ittuma guddachaa deeme. Museenis ni dubbate; sagaleen Waaqaas deebii kenneef.

²⁰ WAAQAYYO fiixee Tulluu Siinaa irratti gad bu'ee Musee gara fiixee tulluu sanaatti ol waame. Museenis ol ba'e; ²¹ WAAQAYYO immoo akkana isaan jedhee; "Akka isaan WAAQAYYO ilaaluuf jedhanii daarii hin dabarree fi akka isaan keessaas namni baay'een hin duuneef gad bu'iitii isaan akeekkachiisi. ²² Akka WAAQAYYO isaan hin balleessineef luboonni WAAQAYYOTTI dhi'aatan iyyuu of haa qulqulleessan."

²³ Museen immoo WAAQAYYON, "Sababii ati mataan kee, 'Naannoo Tullichaatti daangaa dhaabiitii isa qulqulleessiitii addaan baasi' jettee akeekkachiisa nuu kenniteef sabni kun Tulluu Siinaatti ol ba'uu hin danda'u" jedhee.

²⁴ WAAQAYYOS, "Gadi bu'iitii Aroonin fidii kottu. Garuu luboonnii fi uummanni gara WAAQAYYOOTTI ol dhufuuf jedhanii daangaa hin darbin; yoo kanaa achii inni isaan balleessa" jedhee deebise.

²⁵ Museenis gad bu'ee waan kana uummatatti hime.

20

Ajajawwan Kurnan

20:1-17 kwf - KeD 5:6-21

¹ Waaqni akkana jedhee dubbii kana hunda dubbate:

² "Ani WAAQAYYO Waaqa kee kan Gibxii, biyya garbummaatii si baasee dha.

³ "Ati ana malee waaqota biraa tokko illee hin qabaatin.

⁴ Ati bifa waan ol samii gubbaa yookaan gad lafa irra yookaan bishaan lafa jalaa keessa jiru kamiitiin iyyuu Waaqa tolfamaa ofii keetiif hin tolfatin. ⁵ Isaaniif hin sagadin yookaan isaan hin waaqeffatin; ani WAAQAYYO Waaqni kee Waaqa hinaafu kan sababii cubbuu abbootiitiif jedhee ijoollee warra na jibbanii hamma dhaloota sadii fi afuriitti adabee ⁶ warra na jaallatanii ajajawwan koo eegan immoo hamma dhaloota kumaatti jaallatuu dha.

⁷ Maqaa WAAQAYYO Waaqa keetii akkasumaan hin dha'in; WAAQAYYO warra akkuma argan maqaa isaa dha'an utuu hin adabin hin dhiisuutii.

⁸ Guyyaa Sanbataa qulqulleessuudhaan yaadadhu. ⁹ Guyyoota ja'a hojjedhu; hojii kee hundas hojjetadhu; ¹⁰ guyyaan torbaffaan garuu sanbata WAAQAYYO Waaqa keetii ti. Gaafas hojii tokko illee hin hojjetin; ati yookaan ilmi kee yookaan intalli kee yookaan hojjetaan kee yookaan xomboreen kee yookaan horiin kee yookaan alagaan magaalaa kee keessa jiraatu tokko iyyuu homaa hin hojjetin. ¹¹ WAAQAYYO guyyaa ja'a keessatti samii fi lafa, galaanaa fi waan isaan keessa jiru hunda uumee guyyaa torbaffaatti boqoteetii. Kanaafuu WAAQAYYO Sanbata eebbisee qulqulleesse.

¹² Akka biyya WAAQAYYO Waaqni kee siif kennu keessa bara dheeraa jiraattuuf abbaa keetii fi haadha keetiif ulfina kenni.

¹³ Hin ajjeesin.

¹⁴ Hin ejjin.

¹⁵ Hin hatin.

¹⁶ Ollaa keetti sobaan dhugaa hin ba'in.

¹⁷ Mana namaa hin hawwin. Niitii namaa yookaan hojjetaa isaa yookaan xomboree isaa yookaan qotiyyoo isaa yookaan harree isaa yookaan waan namaa kam iyyuu hin hawwin."

¹⁸ Jarri hundinuus yommuu bakakkaa fi balaqqeessa, sagalee malakataatii fi tulluu aaru hubatanitti sodaadhaan hollatan. Isaan fagoo dhaabatanii ¹⁹ Museedhaan, "Ati mataan kee nutti dubbadhu; nu ni dhaggeeffannaa. Garuu Waaqni nutti hin dubbatin. Yoo kanaa achii nu ni dhumnaa" jedhan.

²⁰ Museen immoo saba sanaan, "Hin sodaatinaa. Akka Waaqa sodaachuun isin wajjin jiraatee cubbuu hojjechuu irraa isin eeguuf jedhee Waaqni isin qoruuf dhufeera" jedhee.

²¹ Yeroo Museen dukkana limixii iddoo Waaqni turetti dhi'aatetti, namoonni fagoo dhaabatan.

Waaqota Tolfamoo fi Iddoowwan Aarsaa

²² Ergasii WAAQAYYO Museedhaan akkana jedhe; “Saba Israa’elitti waan kana himi: ‘Akka ani samii irraa isinitti dubbadhe isin mataan keessan argitaniirtu; ²³ ana biratti waaqota kam iyyuu hin tolfatinaa. Waaqota meetii yookaan waaqota warqee hin tolfatinaa.

²⁴ “Biyyoo lafaa irraa iddoo aarsaa naa tolchiitii isa irratti qalma gubamu, aarsaa nagaa, hoolota kee, re’oota keetii fi loon kee aarsaa dhi’eessi. Ani iddoo akka maqaan koo itti yaadatamu godhu hundatti gara kee dhufee sin eebbisa. ²⁵ Yoo dhagaa irraa iddoo aarsaa naa ijaarte immoo dhagaa soofame irraa hin ijaarin; yoo meeshaadhaan isa tuxxe ni xureessitaatii. ²⁶ Akka qullaan kee isa irratti hin mul’anneef gulantaadhaan iddoo aarsaa kootti ol hin ba’in.’

21

¹ “Seerawwan ati isaan dura keessu kanneenii dha:

Seera Waa’ee Garbootaa

21:2-6 kwf - KeD 15:12-18

21:2-11 kwi - Lew 25:39-55

² “Ati yoo Ibroota keessaa garbicha bitatte inni waggaa ja’a siif haa hojjetu. Waggaa torbaffaatti garuu inni kaffaltii malee bilisa haa ba’u. ³ Inni yoo kophaa isaa dhufee jiraate kophaa isaa bilisoomee haa deemu; yeroo dhufutti inni yoo niitii qabaate isheenis isa wajjin haa deemtu. ⁴ Yoo gooftaan isaa niitii isa fuusisee isheenis ilmaan yookaan intallan deesseefii jiraatte, ishee fi ijoolleen ishee kan gooftaa ishee ta’u; namichi qofti bilisa ta’ee haa deemu.

⁵ “Garuu garbichi sun, ‘Ani gooftaa koo fi niitii koo, ijoollee koos nan jaalladha; ani bilisa ba’ee deemu hin barbaadu’ yoo jedhe, ⁶ gooftaan isaa fuula abbootii murtii duratti isa haa dhi’eessu; gara balbalaatti yookaan gara michichila balbalaatti geessee mutaadhaan gurra isaa haa uru. Ergasii inni bara jireenya isaa guutuu isa tajaajila.

⁷ “Namni yoo intala isaa akka garbittiitti gurgurate, isheen akka garbichi tokko itti bilisa ba’utti bilisa hin ba’in. ⁸ Yoo isheen goofticha ofii isaatiif ishee filate sanatti toluu baatte inni akka isheen furamtuu haa godhu. Inni waan isheef amanamuu dhabeef dabarsee ormatti ishee gurguruuf mirga hin qabu. ⁹ Yoo ilma isaatiif ishee filate immoo mirga intala ofii isaatiif kennu isheefis haa kennu. ¹⁰ Yoo niitii biraa fuudhe immoo niitii isaa kan jalqabaa sana nyaata, uffataa fi mirga niitiif malu itti hin hir’isin. ¹¹ Yoo inni wantoota sadan kanneen isheef gochuu dide garuu isheen kaffaltii maallaqaa tokko malee bilisa ba’uu qabdi.

Miidhaa Nama Irraan Ga’uu

¹² “Namni nama rukutee ajjeesu innis haa ajjeefamu. ¹³ Inni riphee utuu hin eeggatin Waaqatu harka isaa buuse yoo ta’e garuu iddoo ani ramadutti haa baqatu. ¹⁴ Garuu yoo namni tokko ittuma yaadee dabaan nama ajjeese iddoo aarsaa koo biraa fuudhaatii ajjeesaa.

¹⁵ “Namni abbaa isaa yookaan haadha isaa rukutu haa ajjeefamu.

¹⁶ “Namni nama hatee yoo gurgurate yookaan namichi hatame sun harka isaatti yoo argame hattichi haa ajjeefamu.

¹⁷ “Namni abbaa isaa yookaan haadha isaa arrabsu haa ajjeefamu.

¹⁸ “Yoo namoonni wal lolanii inni tokko isa kaan dhagaadhaan yookaan abootteedhaan rukutee namichi rukutame sun du’uu baatee garuu siree irratti hafe, ¹⁹ ergasii immoo yoo inni ka’ee ulee isaa dhadhaabachaa asii fi achi ala keessa deddeeme namichi isa dha’e sun itti hin gaafatamu; sababii yeroo namicha miidhame sanaa jalaa balleesseef garuu gatii haa baasu; hamma inni guutumaan guutuutti fayyuttis isa haa wal’aanu.

²⁰ “Yoo namni tokko uleedhaan garbicha isaa yookaan garbittii isaa dha’ee garbichi sunis harka isaatti du’e namichi haa adabamu; ²¹ garuu sababii garbichi sun qabeenya isaa ta’eef yoo garbichi sun bultii tokko yookaan bultii lama booddee ka’e, namichi hin adabamu.

²² “Yoo namoonni wal lolaa jiran dubartii ulfoofte tokkotti bu’anii ulfii garaadhaa ba’ee garuu miidhamni hamaan ishee hin qaqqabin, namichi ishee miidhe sun waan dhirsi dubartittii isa gaafatee fi waan abbootiin murtii murteessan baasuu qaba. ²³ Yoo miidhamni hamaan jiraate garuu, qooda lubbuu, lubbuu; ²⁴ qooda ija, ija; qooda ilkaanii, ilkaan; qooda harkaa, harka; qooda miillaa, miilla; ²⁵ qooda gubuu, gubuu; qooda madaa, madaa; qooda buruqsuu, buruqsuu baafta.

²⁶ “Namni tokko yoo ija garbicha isaa yookaan ija garbittii isaa rukutee jaamse, inni qooda ija sanaa garba sana bilisa haa baasu. ²⁷ Inni yoo ilkaan garbicha isaa yookaan ilkaan garbittii isaa rukutee cabse, qooda ilkaan sanaa garba sana bilisa haa baasu.

²⁸ “Qotiyoon tokko yoo dhiira yookaan dubartii waraane ajjeese qotiyoon sun dhagaadhaan tumamee haa ajjeefamu; foon isaas hin nyaatamin. Garuu abbaan qotiyoo sanaa itti hin gaafatamu. ²⁹ Yoo qotiyoon sun durumaanuu amala nama waraanuu qabaachuun isaa beekamee abbaan isaas akka isa eeggatu gorfamee garuu waan inni isa eeggachuu dideef qotiyoon sun dhiira yookaan dubartii ajjeese, qotiyoon sun dhagaadhaan rukutamee haa ajjeefamu; abbaan qotiyoo sanaas haa ajjeefamu. ³⁰ Ta'us inni yoo gumaa gaafatame waan gaafatame hunda kaffalee lubbuu isaa haa oolfatu. ³¹ Yoo qotiyoon sun ilma yookaan intala tokko waraane illee seeruma kanatu hojjeta. ³² Yoo qotiyoon sun garbicha yookaan garbittii waraane abbaan qotiyoo sanaa gooftaa garba sanaatiif meetii saqilii* soddoma haa kaffalu; qotiyoon sunis dhagaan rukutamee haa ajjeefamu.

³³ “Namni tokko yoo boolla afaan banaa dhiise yookaan yoo boolla qotee utuu hin duuchin dhiisee sangaan yookaan harreen boolla sana keessa bu'e, ³⁴ abbaan boolla sanaa abbaa horii sanaatiif maallaqa haa baasu; horiin du'e sun immoo kan isaa haa ta'u.

³⁵ “Yoo qotiyoon nama tokkoo qotiyoo nama biraa miidhee du'aan ga'e jarri qotiyoo fayyaa sana haa gurgurani; gatii qotiyoo sanaatiif fi qotiyoo du'e sana qixxeetti haa qooddatani. ³⁶ Yoo qotiyoon sun durumaanuu amala horii waraanuu qabaachuun isaa beekamee garuu waan abbaan isaa isa eeggachuu dideef abbaan qotiyoo sanaa qooda qotiyoo, qotiyoo haa baasu; qotiyoon du'e sun immoo kan isaa haa ta'u.

22

Egumsa Qabeenyaaf Godhamu

¹ “Namni tokko yoo sangaa yookaan hoolaa hatee qalate yookaan gurgurate, qooda qotiyoo tokkoo sangaa shan, qooda hoolaa tokkoo immoo hoolaa afur haa baasu.

² “Hattuun tokko utuu cabsee seenuu yoo qabamee tumamee kanumaan du'e, namichi isa ajjeese sun dhiiga isaatti yakkaan hin gaafatamu; ³ garuu yoo wannu kan erga aduun baatee ta'e, namichi dhiiga sanatti yakkaan ni gaafatama.

“Hattuun waan hate haa deebisu; homaa hin qabu yoo ta'e garuu hanna isaatiif gatii baasuudhaaf haa gurguramu. ⁴ Horiin hatame sun sangaa yookaan harree yookaan hoolaa taanaan yoo utuu lubbuun jiruu harka isaatti argame hattuun sun dachaa baasuu qaba.

⁵ “Namni tokko yoo utuu lafa qotiisaa yookaan dhaabaa wayinii keessa horii tikfatuu horii isaa gad lakkisee horiin sun dhaqee kaloo nama biraa dheede, inni lafa qotiisaa ofii isaa irraa yookaan dhaabaa wayinii ofii isaa irraa kan waan hunda caalu iddoo haa buusuuf.

⁶ “Yoo ibiddi ka'ee daggala seenee akkasiin midhaan tuulame yookaan midhaan dhaabatu yookaan lafa qotiisaa gube, namichi ibidda qabsiise sun gatii baasuu qaba.

⁷ “Namni tokko yoo maallaqa yookaan mi'a imaanaa namatti kennatee, wanni sun mana namichaatii hatamee hattuun sun qabame, hattichi dachaa kaffaluu qaba. ⁸ Yoo hattuun sun hin argamin garuu abbaan mana sanaa akka mi'a nama kaanii tugee fi akka hin tuqin mirkaneessuuf fuula abbootii murtii duratti haa dhi'effamu. ⁹ Namni tokko yoo qotiyoo, harree, hoolaa, uffata yookaan mi'a bade tokko miliqsee namni tokko dhufee, 'Kun kan koo ti' jedhe, falmiin isaanii fuula abbootii murtii duratti haa dhi'effamu. Namichi abbootiin murtii itti muran sunis ollaa isaatiif harka lama haa baasu.

¹⁰ “Yoo namni tokko ollaa isaatiif harree, qotiyoo, hoolaa yookaan horii biraa imaanaa kennatee horiin suni utuu namni hin argin du'e yookaan miidhame yookaan hatame, ¹¹ namichi sun akka qabeenya ollaa isaa hin tuqin mirkaneessuuf fuula WAAQAYYOO duratti haa kakatu; abbaan qabeenyaa sunis kakuu kana fudhachuu qaba; gatiis hin gaafatu. ¹² Yoo horiin sun isa jalaa hatamee jiraate garuu namichi abbaa horii sanaatiif baasuu qaba. ¹³ Yoo horii sana bineensatu nyaate ta'e immoo akka ragaa ta'uuf waan bineensa irraa hafe haa dhi'eessu malee horii nyaatame sanaaf gatii hin baasin.

¹⁴ “Namni tokko yoo ollaa isaa irraa horii ergifatee horiin sun iddoo abbaan horii hin jirretti miidhame yookaan du'e, namichi ergifate sun gatii haa baasu. ¹⁵ Yoo abbaan

* 21:32 21:32 Saqiliin tokko giraamii 345.

horii sanaa achi jiraate garuu namichi ergifate sun gatii baasuu hin qabu. Yoo horiin sun kireeffamee jiraate immoo maallaqni baafame sun kiraa horii du'e sanaa haa ta'u.

Itti Gaafatama Hawaasummaa

¹⁶ “Namni tokko yoo durba hin kaadhimatamin gowwoomsee ishee wajjin ciise, inni gabbara misirrittiif malu baaseefii ishee haa fuudhu. ¹⁷ Yoo abbaan ishee intalattii namichaaf kennuu dide immoo namichi sun gabbara durbaaf malu baasuu qaba.

¹⁸ “Ati akka dubartiin falfaltuun lubbuun jiraattu hin eeyyamin.

¹⁹ “Namni horii wajjin ciisu kam iyyuu ajjeefamuu qaba.

²⁰ “Namni WAAQAYYI tokkichaaf malee Waaqa biraatiif aarsaa dhi'eessu galaafatamuu qaba.

²¹ “Isinis waan biyya Gibxii keessatti alagoota turtaniif alagaatti daba hin hojjetinaa; hin cunqursinaas.

²² “Haadha hiyyeessaatii fi ijoollee abbaan irraa du'e hin hakuucinaa. ²³ Yoo isin isaan miitani isaan immoo natti boo'an ani dhugumaan boo'icha isaanii nan dhaga'a. ²⁴ Aariin koo ni boba'a; anis goraadeedhaanan isin fixa; niitonni keessan haadhota hiyyeessaa ta'u; ijoolleen keessanis kanneen abbaa hin qabne ta'u.

²⁵ “Ati yoo saba koo keessaa hiyyeessa si bira jiraatu tokkoof maallaqa liqeessite, akka nama hiiqii argachuuf kennuu hin ta'in; dhalas hin gaafatin. ²⁶ Ati yoo wayyaa nama biraa qabdi qabatte, utuu aduun hin dhi'in deebisiif; ²⁷ wannii inni dhagna isaatti uffatu wayuma sanaatii. Wannii inni uffatee rafu biraa maali? Ani waanan gara laafessa ta'ee, yoo inni natti ol iyyate nan dhaga'a.

²⁸ “Waaqa hin arrabsin; bulchaa saba keetiis hin abaarin.

²⁹ “Mataa midhaan keetiitii fi dhangala'aa wayinii keetii irraa aarsaa dhi'eessuu hin tursin.

“Ilmaan kee keessaas hangafa naa kennuu qabda. ³⁰ Loon keetii fi hoolota kee akkanuma godhi. Isaanis bultii torba haadha isaanii bira haa turan; guyyaa saddeettaffaatti garuu naa kenni.

³¹ “Isin saba koo qulqulluu ni taatu. Kanaafuu foon horii bineensi alatti cabsee kam iyyuu hin nyaatinaa; foon akkanaa saree dura buusaa.

23

Seera Murtii Qajeelaa fi Araaraa

¹ “Oduu sobaa hin odeessin; dhuga ba'uu jal'aa kennuudhaan nama balleessaa hojete hin gargaarin.

² “Waan hamaa hojjechuuf jettee nama baay'ee faana hin bu'in. Fuula seeraa duratti yommuu dhugaa baatu, gara nama baay'ee gortee murtii hin jal'isin; ³ murtii irratti hiyyeessaaf hin loogin.

⁴ “Yoo sangaa yookaan harree diina keetii kan baduutti jiru argite deebisii geessiif. ⁵ Yoo harree nama si jibbu tokkoo utuu isheen ba'aa baattee kuftee jirtuu argite achitti hin dhiisin; isa gargaarii ol kaasi.

⁶ “Murtii irratti hiyyeessa saba keetii jalaa murtii hin dabsin. ⁷ Himata sobaa keessatti hin hirmaatin; waan ani nama balleessaa hojete hin qulqulleessineef nama yakka hin qabne yookaan nama qajeelaa hin ajjeesin.

⁸ “Ati matta'aa hin fudhatin; matta'aan ogeeyyii ni jaamsaatii; dubbii qajeeltotaas jal'isa.

⁹ “Alagaa hin cunqursin; isin waan biyya Gibxiitii alagaa turtaniif alagaa ta'uun maal akka ta'e isin mataan keessan ni beektuutii.

Seera Sanbataa

¹⁰ “Waggaa ja'a lafa qotiisaa kee facaafadhu; midhaanis galfadhu; ¹¹ waggaa torbaffaatti garuu lafa sana boqochiisi malee hin qotin. Akkasiin hiyyeeyyiin saba keetii laficha irraa nyaata argatu; waan isaan irraa hafe immoo bineensi haa nyaatu. Muka wayinii keetiitii fi muka ejersa keetiis akkasuma godhi.

¹² “Guyyaa ja'a hojii kee hojjetadhu; akka sangaan keetii fi harreen kee boqotaniif, akka garbichi mana keetti dhalatee fi alagaan aara galfataniif guyyaa torbafaatti hin hojjetin.

¹³ “Waan ani isinitti hime hunda eegaa; maqaa waaqota biraa hin waammatinaa; afaan keessanii iyyuu hin ba'in.

Ayyaana Waggaa Sadan

¹⁴ “Ati waggaatti yeroo sadii ayyaana naa ayyaaneffadhu.

¹⁵ “Ayyaana Maxinoo Ayyaaneffadhu; akkuma ani si ajaje sana bultii torba Maxinoo nyaadhu. Waan kanas ji'a Abiibii keessa yeroo murtaa'etti godhi; ati ji'a sana keessa Gibxii baateetii.

“Namni tokko iyyuu harka duwaa fuula koo duratti hin dhi'atin.

¹⁶ “Mataa midhaan keetii kan lafa qotiisaa keetti facaafatteen Ayyaana Galchaa Midhaanii ayyaaneffadhu.

“Dhuma waggaatti yeroo midhaan kee lafa qotiisaa irraa walitti qabattutti Ayyaana Galchaa Midhaanii ayyaaneffadhu.

¹⁷ “Dhiirri hundi waggaatti yeroo sadii fuula WAAQAYYOO Gooftaa duratti haa dhi'aatu.

¹⁸ “Dhiiga aarsaa waan raacitii qabu wajjin naa hin dhi'eessin.

“Coomni aarsaa ayyaana koos hamma bariitti hin turin.

¹⁹ “Mataa midhaan lafa keetii keessaa filatamaa isaa gara mana WAAQAYYOO Waaqa keetii fidi.

“Ilmoo re'ee aannan haadha isheetiin hin affeelin.

Ergamaan Waaqayyoo Karaa Qopheessuu Isaa

²⁰ “Akka inni karaa irratti si eegee iddoo ani qopheessetti si galchuuf kunoo ani fuula kee dura ergamaa koo tokko nan erga. ²¹ Xiyyeeffadhuutii waan inni jedhu dhaggeeffadhu. Isatti hin fincilin; inni waan Maqaa koo of irraa qabuuf fincila kee siif hin dhiisuutii. ²² Yoo ati waan inni jedhu akka gaarii dhaggeeffatee waan ani dubbadhu hunda goote, ani diinota keetti diina nan ta'a; warra siin mormaniinis nan morma. ²³ Ergamaan koos fuula kee dura deemee biyya Amoorotaatti, Heetotaatti, Feerzotaatti, Kana'aanotaatti, Hiiwotaattii fi Yebuusotaatti si galcha; anis jara nan balleessa. ²⁴ Waaqota isaaniiif hin sagadin; hin waaqeffatinis; hojii isaanii faanas hin bu'in. Ati isaan balleessitee soodduu waaqeffanna isaanii illee caccabsuu qabda. ²⁵ WAAQAYYOO Waaqa kee waaqeffadhu; innis midhaan keetii fi bishaan kee ni eebbisa. Dhukkubas isin gidduudhaa nan balleessa; ²⁶ biyya kee keessatti dubartiin ulfi irraa ba'u yookaan dhabduun tokko iyyuu hin argamtu. Jirenya guutuus siif nan kenna.

²⁷ “Ani sodaachisuu koo si dura ergee saba ati itti dhufuu hunda nan burjaajessa. Akka diinonni kee hundinuu dugda sitti galanii baqatanis nan godha. ²⁸ Akka inni Hiiwota, Kana'aanotaa fi Heetota karaa kee irraa ari'uuf ani si duraan sonsa nan erga. ²⁹ Akka lafti onee bineensi wal horee sitti hin baay'anneef ani waggaa tokko keessatti saba kana si duraa ari'ee hin baasu. ³⁰ Hamma ati baay'attee biyyattii dhaaltutti ani xinnoo xinnoon fuula kee duraa isaan nan baasa.

³¹ “Anis daarii kee Galaana Diimaadhaa jalqabee hamma Galaana Filisxeemiitti, lafa alootii jalqabee hamma Laga Efraaxiisiitti siifin dhaaba. Namoota biyya sana jiraatanis dabarsee harka keetti nan kenna; ati immoo of duraa ariitee isaan baafata. ³² Ati isaan wajjin yookaan waaqota isaanii wajjin kakuu tokko illee hin galin. ³³ Akka isaan biyya kee keessa jiraatan hin eeyyamaniif; yoo akkas ta'e isaan akka ati cubbuu natti hojjettu si godhu; ati waaqota isaanii waaqeffannaan kun dhugumaan kiyyoo sitti ta'atii.”

24

Kakuun Jabeeffame

¹ WAAQAYYOO Museedhaan akkana jedhe; “Atii fi Aroon, Naadaabii fi Abiihuu, maanguddoota Israa'el keessaas namoonni torbaatamni gara WAAQAYYOTTI ol ba'aa; alaalatti sagadaa; ² garuu Museen qofti WAAQAYYOTTI haa dhi'aatu; warri kaan immoo hin dhi'atin. Sabni isa wajjin ol hin ba'in.”

³ Museenis dhaqee dubbii fi seera WAAQAYYOO hunda saba sanatti hime; sabni sunis, “Nu waan WAAQAYYOO jedhe hunda ni goona” jedhee afaan tokkoon deebise. ⁴ Ergasii Museen waan WAAQAYYOO dubbatte hunda barreesse.

Guyyaa itti aanu ganamaanis ka'ee miilla tulluu jalatti iddoo aarsaa ijaare; utubaa dhagaa kudha lama kanneen gosoota Israa'el kudha lamaan iddoo bu'aniis dhaabe. ⁵ Innis dargaggoota Israa'el erge; isaanis aarsaa gubamuu fi jiboota aarsaa nagaa godhanii WAAQAYYOO dhi'eessan. ⁶ Museenis walakkaa dhiiga sanaa waciitiitti naqe; walakkaa hafe immoo iddoo aarsaa irratti faffacaase. ⁷ Innis kitaaba kakuu fuudhee saba sanaaf dubbise. Isaanis, “Nu waan WAAQAYYOO jedhe hunda ni goona; ni ajajamnas” jedhanii deebisan.

⁸ Yommu Museen dhiiga sana fuudhee sabatti faffacaasee, “Kunoo kun dhiiga kakuu kan WAAQAYYOO akkuma dubbii kana hundaatti isinii dhaabee dha” jedhe.

⁹ Musee fi Aroon, Naadaabii fi Abiihuu, maanguddoonni Israa'el torbaatamnis ol ba'anii ¹⁰ Waaqa Israa'el argan. Miilla isaa jalattis waan akka afaa dhagaa Sanpeer kan akkuma samiitti qulqullaa'e tokkootu afamee ture. ¹¹ Waaqni garuu qondaaltota

saba Israa'el kanneenitti harka isaa ol itti hin kaafne; isaan Waaqa argan; ni nyaatan; ni dhuganis.

¹² WAAQAYYOS Museedhaan, "Gara kootti tulluutti ol ba'i; asis turi; anis gabateewwan dhagaa kanneen ani akka qajeelfama isaanii ta'uuf seeraa fi ajajawwan itti barreesse siif nan kenna" jedhe.

¹³ Ergasii Museen gargaaraa isaa Iyyaasuu wajjin ka'ee deeme; Museenis tulluu Waaqaatti ol ba'e. ¹⁴ Innis maanguddoota sanaan akkana jedhe; "Hamma nu gara keessanitti deebinutti asitti nu eegaa. Kunoo Aroonii fi Huuri isin bira jiran; namni falmii qabu isaan bira dhaquu danda'a."

¹⁵ Yeroo Museen tulluutti ol ba'etti duumessi tulluu sana haguuge; ¹⁶ ulfinni WAAQAYYOS Tulluu Siinaa irra bu'e. Duumessi sunis guyyaa ja'a tulluu sana haguuge; guyyaa torbaffaatti immoo WAAQAYYO duumessicha keessaa Musee waame. ¹⁷ Ulfinni WAAQAYYOS ibidda waa gubu fakkaatee fiixee tulluu irraa saba Israa'elitti mul'achaa ture. ¹⁸ Museen tulluutti ol ba'ee duumessa keessa seene. Innis guyyaa afurtamaa fi halkan afurtamaa tulluu sana irra ture.

25

Kennaa Dunkaana Qulqulluuf Walitti Qabamu

25:1-7 kwf - Bau 35:4-9

¹ WAAQAYYO Museedhaan akkana jedhe; ² "Akka isaan kennaa naa fidaniif saba Israa'elitti himi. Nama garaa isaa guutuudhaan kennuu fedhu hunda harkaa kennaa naa fuudhaa.

³ "Kennaan isaan harkaa fuutanis:

"Warqee, meetii fi naasii;

⁴ kirrii bifa cuquliisaa, dhiilgee, bildiimaa fi wayyaa haphii quncee talbaa irraa hojjetame;

rifeensa re'ee;

⁵ gogaa korbeessa hoolaa kan halluu diimaa cuuphame, gogaa duugame, muka laaftoo,

⁶ ibsaadhaaf, zayitii ejersaa,

urgooftuuwwan immoo zayitii dibatamuu fi ixaana urgaa'uuf;

⁷ dhagaawwan sardooniksii, dooqa gati jabeessa, dirataa fi qomee irratti kaa'atamuu dha.

⁸ "Ergasii akka isaan iddoo qulqulluu naa qopheessan godhi; anis gidduu isaanii nan jiraadha. ⁹ Dunkaana qulqulluu kanaa fi mi'a isaa hunda akkuma bifa ani sitti argisiisuutti hojjedhaa.

Taabota

25:10-20 kwf - Bau 37:1-9

¹⁰ "Isaan muka laaftoo irraa taabota haa tolchan; taabonni sunis dhundhuma lamaa fi walakkaa dheerata; dhundhuma tokkoo fi walakkaa bal'ata; dhundhuma tokkoo fi walakkaa ol dheerata ture. ¹¹ Keessaa fi duuba isaatti warqee qulqulluu uffisi; naannoo isaattis marsaa faaya warqee naannessii tolchi. ¹² Taabota sanaafis qubeelaa warqee afur tolchiitii miilla isaa afranitti jechuunis lama gama tokkoon, lama immoo gama kaaniin itti kaa'i. ¹³ Muka laaftoo irraa danqaraawwan tolchiitii warqee itti uffisi. ¹⁴ Taaboticha ittiin baachuudhaaf danqaraawwan sana qubeelaawwan keessa loosi. ¹⁵ Danqaraawwan kunneen qubeelaawwan taabotichaa keessa haa turan; keessaa baafamuus hin qaban. ¹⁶ Atis dhuga ba'umsa ani sitti kennu Taaboticha keessa kaa'i.

¹⁷ "Warqee qulqulluu irraa teessoo araaraa tolchi; dheerinni isaas dhundhuma lamaa fi walakkaa, bal'inni isaa immoo dhundhuma tokkoo fi walakkaa haa ta'u. ¹⁸ Moggaa lamaan teessoo araaraa irratti warqee tumame irraa Kiirubeelii lama tolchi. ¹⁹ Kiirubii tokko moggaa tokko irratti, kiirubii lammaffaa immoo moggaa kaan irratti tolchi; kiirubeelii sanas teessoo araaraa wajjin kutaa warqee tokkicha irraa moggaa lamaan irratti tolchi. ²⁰ Kiirubeeliin sun qoochoo isaanii ol bal'ifatanii teessoo araaraa ittiin haa gaaddiseessan; Kiirubeeliin kunneen fuula isaanii walitti garagalfatanii teessoo araaraa haa ilaalan. ²¹ Teessoo araaraa sana taaboticha irra kaa'i; dhuga ba'uu ani sitti kennu immoo taaboticha keessa kaa'i. ²² Ani achitti si arga; teessoo araaraa irraa, kiirubeelii lamaan taabota kakuu seeraa irra jiran gidduudhaa waa'ee ajajawwan ani saba Israa'elittiif sitti kennu hundaa sittin hima.

*Minjaala**25:23-29 kwf - Bau 37:10-16*

²³ “Muka laaftoo irraa minjaala dhundhuma lama dalga dheeratu, kan dhundhuma tokko bal’atee ol dheerinni isaa immoo dhundhuma tokkoo fi walakkaa ta’e tolchi. ²⁴ Warqee qulqulluu itti uffisiitii naannoo isaatti marsaa warqee tolchi. ²⁵ Naannoo isaa irrattis hidhii hamma bal’ina harkaa ga’uu fi faaya warqee tolchi. ²⁶ Minjaala kanaafis qubeelaa warqee afur hojjedhuutii goleewwan afranitti iddoo miilli afran jiranitti kaa’i. ²⁷ Qubeelaawwan kunneenis akka danqaraa ittiin minjaala baatan qabataniif xiyyoo sanatti dhi’aachuu qabu. ²⁸ Muka laaftoo irraa loosawwan tolchi; warqee itti uffisiitii minjaala sana ittiin baadhu. ²⁹ Dhibaaayyuu dhi’eessuufis caabiwwan isaa, waciitiiwwan isaa, okkoteewwan isaatii fi waciitiiwwan isaa warqee qulqulluu irraa tolchi. ³⁰ Buddeena ilaalchaas yeroo hunda fuula koo dura minjaala kana irra kaa’i.

*Baattuu Ibsaa**25:31-39 kwf - Bau 37:17-24*

³¹ “Baattuu ibsaas warqee qulqulluu irraa tolchi; baattuun ibsaa kunis tumamee haa tolfamu; somaa isaa, damee isaa, waciitii isaa, hudhaa isaatii fi daraaraa isaa warqeedhuma sana irraa tolchi. ³² Bitaa mirga baattuu ibsaa sana keessaas dameewwan ja’a jechuunis sadii gama tokkoon, sadii immoo gama kaaniin haa baafaman. ³³ Xofoowwan lawuzii fakkaatan kanneen tokkoon tokkoon isaanii hudhaa fi daraaraa qaban sadii damee tokko irratti, waciitiiwwan lawuzii fakkaatan kanneen tokkoon tokkoon isaanii hudhaa fi daraaraa qaban sadii immoo damee kaan irratti tolchi; dameewwan ja’aan baattuu ibsaa irraa babba’an hunda irrattis akkasuma tolchi. ³⁴ Xofoowwan hudhaa fi daraaraa qaban kanneen bifa lawuziitiin hojjetaman afur baattuu ibsaa sana irra haa jiraatan. ³⁵ Hudhaan tokko cimdii jalqabaa kan dameewwan baattuu ibsaa irraa babba’an jala, hudhaan lammaffaan cimdii lammaffaa jala, hudhaan sadaffaan immoo cimdii sadaffaa jala ture. Walumaa galatti dameewwan ja’atu ture. ³⁶ Hudhaawwanii fi dameewwan hundinuu baattuu ibsaa sana wajjin warqeedhuma qulqulluu tumame tokko irraa haa tolfaman.

³⁷ “Atis ibsaawwan torba tolchiif; akka lafa fuula isaanii dura jiru ibsaniifis baattuu ibsaa irra isaan dhadhaabi. ³⁸ Wannii ittiin daaraa isaa dhadha’anii fi caabiin daaraa sana baattu warqee qulqulluu irraa haa hojjetaman. ³⁹ Baattuun ibsaatii fi mi’i isaa hundi warqee qulqulluu taalaantii tokkootiin haa hojjetamani. ⁴⁰ Atis akkuma fakkeenya tulluu irratti sitti argisiifame sanaatti hojjechuu kee mirkaneeffadhu.

26*Dunkaana Qulqulluu**26:1-37 kwf - Bau 36:8-38*

¹ “Golgaawwan kudhan kanneen quncee talbaa gaarii fo’amee fi kan kirrii bifa cuqulisaa, dhiilgee fi bildiimaa irraa hojjetamaniin dunkaana qulqulluu hojjedhu; golgaawwan sana irrattis ogeessi harka qajeelu tokko kiirubeelii haa hojjetu. ² Golgaawwan hundinuu wal qixxee haa ta’an; dheerinni tokkoo tokkoo golgaawwanii dhundhuma digdamii saddeeti, bal’inni isaa immoo dhundhuma afur haa ta’u. ³ Golgaawwan shan walitti qabsiisi; golgaawwan hafan shanan kaan illee akkasuma walitti qabsiisi. ⁴ Golgaawwan walitti qabsiifaman kanneen jalqabaa keessaa handaara isa moggaa irratti huccuu bifa cuqulisaa irraa gurroowwan tolchi; golgaawwan walitti qabsiifaman lammaffaa irrattis akkasuma tolchi. ⁵ Gurroowwan shantama golgaa tokko irratti tolchi; gurroowwan shantama immoo golgaawwan walitti qabsiifaman lammaffaa keessaa moggaa isa tokkootti tolchi. Gurroowwan sunis gamaa gamanatti haa tolfaman. ⁶ Akka dunkaanni qulqulluun sun tokko ta’uufis hokkoowwan warqee shantama tolchiitti golgaawwan sana ittiin walitti qabsiisi.

⁷ “Haguuggii gubbaa dunkaana qulqulluu irra jiru haguuguufis golgaawwan rifeensa re’ootaa kudha tokko hojjedhu. ⁸ Golgaawwan kudha tokkoon sun hundi wal qixxee haa ta’an; dheerinni isaanii dhundhuma soddoma, bal’inni isaanii immoo dhundhuma afur haa ta’u. ⁹ Golgaawwan shan iddoo tokkotti walitti qabsiisi; golgaawwan ja’an kaan immoo iddoo tokkotti walitti qabsiisi; golgaa ja’affaa sanas fuula dunkaanichaa duraan iddoo lamatti ol dachaasi. ¹⁰ Golgaawwan gama tokkoon walitti qabsiifaman keessaa handaara isa moggaa irratti gurroowwan shantama tolchi; golgaawwan gama kaan irratti walitti qabsiifaman keessaas handaara isa moggaa irratti gurroowwan shantama tolchi. ¹¹ Ergasiis qabduuwwan naasii shantama tolchi; qabduuwwan sanas akka inni tokko ta’uuf ittiin walitti qabsiisuuf gurroowwan keessa galchi. ¹² Wannii golgaawwan dunkaanichaa irraa hafe, walakkaan golgaa hafe sanaa dugda dunkaana

qulqulluu irraan gad haa rarra'u. ¹³ Akka dankaana qulqulluu sana haguuguufis dheerina golgaawwan dankaanicha irraa hafe keessaa dhundhumni tokko gama tokkoon, dhundhumni tokko immoo gama kaaniin bitaa fi mirgaan dankaana qulqulluu irraan gad haa rarra'u. ¹⁴ Dankaana sanaafis irra buusaa kaldhee korbeessa hoolaa kan halluu diimaa cuuphame, isa irraan immoo irra buusaa gogaa duugamee hojjedhu.

¹⁵ "Dankaana qulqulluu sanaafis muka laaftoo irraa tuggeewwan qaqqajeeloo hojjedhu. ¹⁶ Dheerinni tokkoo tokkoo tuggeewwan sanaas dhundhuma kudhan, bal'inni isaa immoo dhundhuma tokkoo fi walakkaa haa ta'u; ¹⁷ tokkoon tokkoon tuggeewwan sanaas akka wal keessa galuu danda'uuf mucha lama lama haa qabaatu; tuggeewwan dankaana qulqulluu sanaa hunda akkasitti tolchi. ¹⁸ Gama kibba dankaana qulqulluu sanaatiifis tuggeewwan digdama hojjedhu; ¹⁹ tuggeewwan digdamman sana jalatti miilla meetii afurtama jechuunis tuggee tokko jalatti miilla lama gurra isaa lamaaniiif, tuggee kaan jalattis miilla lama gurra isaa lamaaniiif tolchi. ²⁰ Gama dankaana qulqulluu sanaa kaaniifis karaa kaabaatiin tuggeewwan digdama tolchi; ²¹ miilla meetiis afurtama jechuunis tuggee tokko jalatti miilla lama, tuggee kaan jalattis miilla lama tolchi. ²² Karaa lixa biiftuutiin, dugda duuba dankaana qulqulluu sanaatiif tuggee ja'a tolchi; ²³ karaa dugda duubaas golee dankaana qulqulluu sanaatiif utubaa lama tolchi. ²⁴ Tuggeewwan golee kunneen jalaa hamma gubbaatti walitti fayyifamanii bantii irratti qubeelaa tokkoon walitti haa qabsiifaman; tuggeewwan golee lamaanis akkasuma ta'uu qabu. ²⁵ Kanaafuu tuggeewwan saddeeti kanneen miilla meetii kudha ja'a qabanitu jira; tokkoon tokkoon tuggee sanaas miilla lama lama qaba.

²⁶ "Akkasumas muka laaftoo irraa dagaleewwan tolchi; tuggeewwan dankaana qulqulluu sana irra gama tokkoon jiraniif dagaleewwan shan, ²⁷ tuggeewwan gama kaaniin jiraniif dagaleewwan shan, shan tuggeewwan dugda duubaan karaa lixa biiftuutiin jiraniif immoo dagaleewwan shan tolchi. ²⁸ Dagalee walakkaa jiru sana akka inni gidduu tuggeewwaniitiin moggaa tokkoo hamma moggaa kaaniitti fulla'u godhi. ²⁹ Tuggeewwan sana irras warqee itti uffisi. Akka dagaleewwan baataniif qubeelaawwan warqee itti tolchi; dagaleewwan sanas akkasuma warqee itti uffisi.

³⁰ "Dankaana qulqulluu kana akkuma karoora tulluu irratti sitti argisiifame sanaatti dhaabi.

³¹ "Kirrii bifa cuquliisaa, dhiilgee, bildiimaa fi quncee talbaa haphii irraa golgaa tulchi; golgaa kana irrattis ogeessi harka qajeelu tokko fakkii kiirubeelii haa tolchu. ³² Golgaa kana hokkoo warqeeitiin utubaawwan muka laaftoo kanneen warqeen itti uffifamee miilla meetii afur irra dhadhaabatan afuritti rarraasi. ³³ Golgaa sana hokkoowwanitti rarraasiitii taabota kakuu seeraa immoo dugda isaa duubaan kaa'i. Golgaan sunis Iddoo qulqulluu, Iddoo Iddoo Hunda Caalaa Qulqulluu ta'e sana irraa addaan baasa. ³⁴ Teessoo araraas Iddoo Iddoo Hunda Caalaa Qulqulluu ta'e sana keessa taabota kakuu seeraa irra kaa'i. ³⁵ Minjaala sanas golgaadhaan ala, gama kaaba dankaana qulqulluutiin dhaabi; baattuu ibsaa immoo fuullee minjaala sanaa gama kibba dankaanichiatiin dhaabi.

³⁶ "Balbala dankaanichaatiif immoo golgaa kirrii bifa cuquliisaa, dhiilgee, bildiimaa fi quncee talbaa kan qal'ifamee fo'amee harkaan irratti hodhame tokko faayessii tolchi.

³⁷ Golgaa kanaafis hokkoo warqeeiti fi utubaa muka laaftoo kan warqeen itti uffifame shan tolchi. Naasii tumiitii miilla shan tolchiif.

27

Iddoo Aarsaa Kennaa Gubamuu

27:1-8 kwf - Bau 38:1-7

¹ "Muka laaftoo irraa iddoo aarsaa dhundhuma sadii ol dheeratu ijaari; iddoon aarsaa kunis dheerina dhundhuma shanii fi bal'ina dhundhuma shanii qabaatee gama afraniinuu wal qixxee haa ta'u. ² Tokkoo tokkoo goleeewwan afraniitti gaanfa tolchi; gaanfaa fi iddoon aarsaa sun mukuma tokko irraa haa ta'u; iddoo aarsaa sana irrattis naasii uffisi. ³ Mi'a isaa hunda jechuunis waan ittiin daaraa haran, waan ittiin daaraa hammaaran, waciitii, hokkoo fooniitii fi baattuu ibiddaa naasii irraa tolchi. ⁴ Naasii wal keessa xaxameen gingilchaa hojjedhuutii tokkoo tokkoo rogawwan gingilchaa sanaa afraniif qubeelaawwan naasii tolchi. ⁵ Gingilchaa sanas akka inni hamma walakkaa iddoo aarsaatti ol ka'uuf qarqara iddoo aarsaa jalaan kaa'i. ⁶ Iddoo aarsaa sanaafis danqaraawwan muka laaftoo tolchiitii naasii itti uffisi. ⁷ Danqaraawwan sunis akka yeroo iddoon aarsaa baatamutti gama lamaaniiin oolaniif qubeelaawwan keessa haa loofaman. ⁸ Akkuma tulluu irratti sitti argisiifame sanatti iddoo aarsaa kan keessi isaa duwwaa ta'e saanqaa irraa hojjedhu.

*Oobdii**27:9-19 kwf - Bau 38:9-20*

⁹ “Dunkaana qulqulluu sanaaf oobdii hojjedhu. Oobdichis gama kibbaatiin dhundhuma dhibba tokko haa dheeratu; innis golgaa quncee talbaa gaarii fo’ame irraa hojjetamee ¹⁰ utubaawwan digdamaa fi miilla naasii digdama qaban haa qabaatu; hokkoowwanii fi somaawwan utubaawwan kanneenis meetii irraa haa hojjetaman. ¹¹ Gama kaabaatiinis akkasuma dhundhuma dhibba tokko dheeratee golgaawwan utubaawwan digdamaa fi miilla naasii digdama qaban haa qabaatu; hokkoowwanii fi somaawwan utubaawwan kanaas meetii irraa haa tolfaman.

¹² “Oobdiin kun gama lixaatiin dhundhuma shantama bal’atee golgaawwan, utubaa kudhanii fi miilla kudhan qaban haa qabaatu. ¹³ Oobdiin kun fiixee ba’aatii karaa ba’a biiftuutiin akkasuma dhundhuma shantama haa bal’atu. ¹⁴ Golgaawwan dhundhuma kudha shan dhedheeratanii utubaa sadii fi miilla sadii qabanis karaa balbala tokkoo irra haa jiraatan. ¹⁵ Golgaawwan dhundhuma kudha shan dhedheeratanii utubaa sadii fi miilla sadii qabanis gama kaaniin haa jiraatan.

¹⁶ “Balbala oobdii sanaatiifs golgaa dhundhuma digdama dheeratee utubaa afurii fi miilla afur qabu kan kirrii bifa cuquliisaa, dhiilgee, bildiimaa fi quncee talbaa kan qal’ifamee fo’ameen dha’amee irratti faayeffamee hojjetame tokko tolchi. ¹⁷ Utuboanni naannoo oobdii sanaa hundinuu somaawwanii fi hokkoowwan meetiitii fi miillawwan naasii haa qabaatan. ¹⁸ Oobdiin sun dheerina dhundhuma dhibba tokkoo fi bal’ina dhundhuma shantamaa haa qabaatu; golgaa quncee talbaa gaarii fo’amee dhundhuma shan ol dheeratuu fi miillawwan naasii irraa hojjetame haa qabaatu. ¹⁹ Mi’i tajaajila dunkaana qulqulluu sanaatiif fayyadu biraa hundi, tajaajila kam iyyuu taanaan, qofoo dunkaanichaatii fi qofoo oobdii sanaa hunda dabalatee naasii irraa haa hojjetamu.

*Zayitii Baattuu Ibsaa**27:20-21 kwf - Lew 24:1-3*

²⁰ “Akka ibsaan ittuma fufee boba’uuf akka isaan zayitii ejersa cuunfame taliila isaa ibsaadhaaf siif fidan saba Israa’el ajaji. ²¹ Aroonii fi ilmaan isaa dunkaana wal ga’ii keessatti golgaa fuula taabota kakuu seeraa dura jiruun alatti akka ibsaan sun galgalaa hamma ganamaatti fuula WAAQAYYOO duratti boba’uu haa godhan. Wannii kunis saba Israa’el keessatti dhaloota dhufuuf seera bara baraa haa ta’u.

28*Uffata Lubummaa*

¹ “Akka isaan luboota ta’anii na tajaajilaniif obboleessa kee Aroon, isa wajjinis ilmaan isaa Naadaab, Abiihuu, Ele’aazaarii fi Iitaamaarin saba Israa’el keessaa ofitti dhi’eessi. ² Akka inni ulfinaa fi miidhagina argatuufis obboleessa kee Arooniif uffata qulqulluu hodhi. ³ Akka inni luba ta’ee na tajaajiluuf namoota beekumsa qaban kanneen ani ogummaa akkanaa kenneef hunda akka isaan akka inni addaan baafamuuf jedhanii Arooniif uffata hodhan itti himi. ⁴ Uffanni isaan hojjetanis: kiisii qomaa, dirata, wandaboo, kittaa miidhagfamee dhawame, marata mataatii fi sabbataa dha. Jarris akka isaan luboota ta’anii na tajaajilaniif obboleessa kee Aroonii fi ilmaan isaatiif uffata qulqulluu kana haa hojjetan. ⁵ Ogeeyyiin sunis warqee fi kirrii bifa cuquliisaa, dhiilgee, bildiimaa fi quncee talbaa kan qal’ifamee fo’ametti haa fayyadaman.

*Efuudii**28:6-14 kwf - Bau 39:2-7*

⁶ “Ogeessa harka tolu tokko warqee, kirrii bifa cuquliisaa, dhiilgee fi bildiimaa fi quncee talbaa kan qal’ifamee fo’ameen dirata hojjechiisi. ⁷ Diranni kunis akka walitti guduunfamuu danda’uuf funyoo gatiitii lama kanneen fiixee isaa lamaanitti rarraafaman haa qabaatu. ⁸ Sabbanni isaa kan ogummaadhaan dha’ames akkuma isaa dirata wajjin tokko ta’ee warqeedhaan, kirrii bifa cuquliisaa, dhiilgee, bildiimaa fi quncee talbaa kan qal’ifamee fo’ameen haa hojjetamu.

⁹ “Dhagaawwan sardooniksii lama fuudhiitii maqaa ilmaan Israa’el isaan irratti soofii barreessi. ¹⁰ Akkuma toora dhaloota isaanitti, maqaa ja’a dhagaa tokko irratti, maqaa ja’aan hafes dhagaa kaan irratti soofii barreessi. ¹¹ Akkuma ogeessi faayaa tokko chaappaa soofee hojjetu sana atis dhagaa lamaan sana irratti maqaa ilmaan Israa’el soofii barreessi; ergasiis faaya warqee itti naannessitii ¹² akka inni ilmaan Israa’eliiif dhagaa yaadannoo ta’uuf funyoo gatiitii dirata sanatti qabsiisi. Aroonis maqaa sana yaadannoo godhee fuula WAAQAYYOO duratti gatiitii isaa lamaanitti haa baatu. ¹³ Ati immoo faaya warqee itti naannessitii ¹⁴ foncaa warqee qulqulluu kan akka funyootti fo’ame lama tolchi; foncaa fo’ame sana illee faaya sanatti qabsiisi.

*Kiisii Qomaa**28:15-28 kwf - Bau 39:8-21*

¹⁵ "Ogeessa harka tolu tokko kiisii qomaa kan murtii hojjechiisi; isas akkuma dirata sanaatti warqeedhaan, kirrii bifa cuquliisaa, dhiilgee, bildiimaa fi quncee talbaa kan qal'ifamee fo'ameen hojjedhu. ¹⁶ Kiisiin qomaa kun gama afraniinuu wal qixxee fi dachaa ta'ee dheerina taakkuu tokkoo fi bal'ina taakkuu tokko haa qabaatu. ¹⁷ Dhagaawwan gati jabeeyyiis toora afuriin irratti maxxansi. Toora jalqabaa irratti sardiyyoon, tophaaziyyoonii fi biiralee; ¹⁸ toora lammaffaa irratti baluur, sanpeerii fi almaaz; ¹⁹ toora sadaffaa irratti yaakinti, kelqedoonii fi yaakinti, ²⁰ toora afuraffaa irratti biiralee, sardooniksii fi yaasphiidi maxxansi. Dhagaawwan kanneenittis marsaa faaya warqee tolchi. ²¹ Dhagaawwan kudha lama kanneen tokkoo isaani irratti maqaa gosoota kudha lama keessaa maqaan tokko akkuma chaappaatti soofame haa jiraatan; tokkoon tokkoon dhagaawwan sanaas maqaa ilmaan Israa'el tokko tokkoof dhaabata.

²² "Kiisii qomaatiifis foncaa warqee qulqulluu akka funyootti fo'ame tolchi. ²³ Kiisii qomaa sanaafis qubeelaa warqee lama tolchiitti qubeelaa warqee lamaan roga kiisii qomaa lamaanitti qabsiisi. ²⁴ Foncaa warqee sana lamaan qubeelaawwan rogawwan kiisii qomaa sanatti guduunfi. ²⁵ Mataa lamaan foncaa lamaan sanaa kaan immoo marsaawwan faayaa lamaanitti guduunfiitti karaa fuula duraatiin foncaa dirataa kan gatiitiitti qabsiisi. ²⁶ Qubeelaawwan warqee lama tolchiitti rogawwan kiisii qomaa biraa kanneen karaa mogga keessaatiin diratatti aananii jiran lamaanitti kaa'i. ²⁷ Ammas qubeelaawwan warqee lama biraa tolchiitti sabbata dirataatiin olitti hodhaatti dhi'eessii funyoo gatiitiitti lamaan fuula dirataa duraan jiru sana jalaan itti hidhi. ²⁸ Akka kiisiin qomaa dirata irraa hin sochooneef qubeelaawwan kiisii qomaa sun sabbata mudhiitiin walitti qabsiifamanii funyoo bifa cuquliisaatiin qubeelaawwan diratatti haa qabsiifaman.

²⁹ "Aroon yeroo iddoo qulqulluu ol seenu hunda akka fuula WAAQAYYOO duratti yaadannoo bara baraa ta'uuf laphee isaa irratti kiisii qomaa kan murtiitiin maqaa ilmaan Israa'el ni baata. ³⁰ Akka isaan yeroo Aroon fuula WAAQAYYOO dura dhufu hunda laphee isaa irra jiraataniif Uriimii fi Tumiimii akkasuma kiisii qomaa keessa kaa'i. Akkasiinis Aroon yeroo hunda mi'a ittiin Israa'elootaaf murtii kennu fuula WAAQAYYOO duratti laphee isaa irratti baata.

*Uffata Lubummaa Kaan**28:31-43 kwf - Bau 39:22-31*

³¹ "Huccuu bifti isaa guutummaan guutuutti cuquliisa ta'e irraa wandaboo dirataa tolchi; ³² walakkaa gubbaa isaattis afaan ittiin mataa seensifatan tolchi. Akka inni hin tarsiifameefis qarqara afaan isaa irra wanni faayeffamee qopheeffame haa jiraatu. ³³ Naannoo xiyyoo wandaboo sanaatti immoo kirrii bifa cuquliisaa, dhiilgee fi bildiimaadhaan roomaanii hojjedhuutti gidduu isaatti immoo bilbila warqee tolchi. ³⁴ Bilbilli warqetii fi roomaaniin sun wal jala dadarbanii naannoo xiyyoo wandaboo sanaatti haa hojjetaman. ³⁵ Aroon yeroo tajaajilu wandaboo kana haa uffatu; akka inni hin duoneef yommuu inni fuula WAAQAYYOO dura iddoo qulqulluu seenuu fi yommuu inni achii gad ba'utti sagaleen bilbila sanaa ni dhaga'ama.

³⁶ "Warqee qulqulluu irraa faaya tolchii,

Kan WAAQAYYOOOF Qulqulleeffame,

jedhiitti akkuma waan chaappa irratti soofamuutti soofii barreessi. ³⁷ Faaya sana marata mataatiin wal qabsiisuuf funyoo bifa cuquliisaa itti hidhi; innis marata mataa fuula duraan haa ta'u. ³⁸ Faayi kunis adda Aroon irra taa'a; Aroonis yakka kennaawwan qulqulluu ilmaan Israa'el dhi'eessan keessatti argamu hunda ni baata. Kunis akka isaan fuula WAAQAYYOO duratti fudhatama argataniif adda Aroon irra jiraata.

³⁹ "Quncee talbaa kan qal'ifamee fo'ame dhoofsisiitti qomee hojjedhu; marata mataa illee quncee talbaa gaarii irraa tolchi. Sabbannis ogeessa harka qajeeluun haa tolfamu. ⁴⁰ Akka ilmaan Aroonis ulfinaa fi miidhagina argataniif qomee, sabbataa fi marata mataa tolchiif. ⁴¹ Erga uffata kana obboleessa kee Aroonitii fi ilmaan isaatti uffitfee booddee dibii isaan muudi. Akka isaan luboota ta'anii na tajaajilaniif isaan qulqulleessi.

⁴² "Qumxaa wayyaa jalaa kan mudhiidhaa jalqabee hamma gudeedaatti qullaa namaa dhoksu quncee talbaa irraa hojjedhuuf. ⁴³ Aroonii fi ilmaan isaa akka balleessaa hojjetanii hin duoneef yeroo dunkaana wal ga'ii seenan yookaan Iddoo Qulqulluu sanatti tajaajila kennuuf iddoo aarsaatti dhi'aatan uffata kana uffachuu qabu.

"Kunis Aroonii fi sanyii isaatiif sirna bara baraa haa ta'u.

29

Qulqulleeffamuu Lubootaa

29:1-37 kwf - Lew 8:1-36

¹ “Akka isaan luboota ta’anii na tajaajilaniif wanni ati isaan qulqulleessuuf gootu kanaa dha; dibicha tokkoo fi korbeeyyii hoolaa kanneen mudaa hin qabne lama fuudhi. ² Daakuu qamadii filatamaa irraa Maxinoo, Maxinoo zayitiidhaan sukkuumamee fi bixxillee zayitiin irra dibame tolchi. ³ Isaan kanas gundoo keessa kaa’iitii dibichaa fi korbeeyyii hoolaa wajjin dhi’eessi. ⁴ Ergasii immoo Aroonii fi ilmaan isaa gara balbala dunkaana wal ga’iitti fidiitii bishaaniin isaan dhiqi. ⁵ Uffatas fuudhiitii qomee, wandaboo dirataa, dirataa fi kiisii qomaa Aroonitti uffisi. Dirata sanas sabbata ogummaadhaan dha’ameen hidhi. ⁶ Mataa isaatti marata mari; marata sanatti immoo gonfoo qulqulluu qabsiisi. ⁷ Zayitii ittiin dibdu fuudhiitii mataa isaa irratti dhangalaasuudhaan isa dibi. ⁸ Ilmaan isaa fidii qomee isaanitti uffisi; ⁹ mataa isaanitti marata mari. Ergasii immoo Aroonii fi ilmaan isaatti sabbata hidhi. Lubummaan is seera bara baraatiin kan isaanii ti.

“Atis akkasiin Aroonii fi ilmaan isaa muudi.

¹⁰ “Dibicha sana gara fuula dunkaana wal ga’iitti fidi; Aroonii fi ilmaan isaa immoo harka isaanii mataa isaa irra haa kaa’an. ¹¹ Atis fuula WAAQAYYOO duratti, balbala dunkaana wal ga’ii irratti isa qali. ¹² Dhiiga dibicha sanaa irraa xinnoo fuudhiitii quba keetiin gaanfa iddoo aarsaa dibi; kan hafe immoo miilla iddoo aarsaa irratti dhangalaasi. ¹³ Moora mi’a garaatti haguugame hunda, haguuggii tiruutii fi moora kalee lamaanitti haguugame fuudhiitii iddoo aarsaa irratti gubi. ¹⁴ Foon dibicha sanaa, gogaa isaatii fi cumaa isaa garuu qubata keessaa gad baasii gubi. Inni aarsaa cubbuu ti.

¹⁵ “Korbeeyyii hoolaa sana keessaa tokko fidi; Aroonii fi ilmaan isaas harka isaanii mataa isaa irra haa kaa’an. ¹⁶ Korbeessa hoolaa sana qalii dhiiga isaa fuudhiitii gama hundaan iddoo aarsaatti facaasi. ¹⁷ Korbeessa hoolaa sana gargar kukkutti mi’a garaatii fi luka isaa miiciitii mataa fi kutaawwan kaan wajjin kaa’i. ¹⁸ Korbeessa hoolaa sana guutummaan guutuutti iddoo aarsaa irratti gubi. Kunis qalma WAAQAYYOOOF gubamu, aarsaa urgaa’aa ibiddaan WAAQAYYOOOF dhi’eeffamuu dha.

¹⁹ “Korbeessa hoolaa kaan illee fidi; Aroonii fi ilmaan isaa harka isaanii mataa isaa irra haa kaa’an. ²⁰ Korbeessa hoolaa sana qali; dhiiga isaa irraas fuudhiitii fiixee gurra Aroon mirgaatii fi fiixee gurra ilmaan isaa mirgaa dibi; quba abbuudduu harka mirgaa isaanitii fi quba abbuudduu miilla mirgaa isaanii illee dibi. Dhiiga hafe immoo gama hundaan iddoo aarsaatti facaasi. ²¹ Dhiiga iddoo aarsaa irra jiru irraa, zayitii ittiin diban irraas fuudhiitii Aroonii fi uffata isaatti, ilmaan isaatii fi uffata isaanitii facaasi. Akkasiin innii fi ilmaan isaa, uffanni isaanis ni qulqullaa’u.

²² “Korbeessa hoolaa kana irraas cooma, duboo, moora mi’a garaa haguugu, haguuggii tiruu, kalee lamaanii fi moora isaanitti jiru, akkasumas tafa mirgaa fuudhi. Korbeessi hoolaa kunis hoolaa ittiin lubummaa kennanii dha. ²³ Gundoo Maxinoo baatu kan fuula WAAQAYYOO dura jiru sana irraa maxinoo tokko, maxinoo zayitiidhaan tolfame tokkoo fi bixxillee tokko fuudhi. ²⁴ Wantoota kanneen hunda harka Aroonii fi harka ilmaan isaa keessa kaa’iitii aarsaa sochoofamu godhii fuula WAAQAYYOO duratti sochoosi. ²⁵ Ergasii immoo harka isaanitii fuudhi akka urgaa WAAQAYYOTTI tolu ta’uuf aarsaa gubamu wajjin iddoo aarsaa irratti gubi; kunis aarsaa ibiddaan WAAQAYYOOOF dhi’eeffamuu dha. ²⁶ Erga handaraafa hoolaa Aroon ittiin luba ta’e sana fuutee booddee aarsaa sochoofamu godhiitii fuula WAAQAYYOO duratti sochoosi; kunis qooda kee ti.

²⁷ “Handaraafa aarsaa sochoofamuu, luka korbeessa hoolaa isa kan Aroonii fi ilmaan isaa isa yeroo isaan luba ta’an aarsaa ta’ee dhi’aate sana qulqulleessi. ²⁸ Kunis qooda bara baraa kan sabni Israa’el yeroo hunda Aroonii fi ilmaan isaatiif kennuu dha. Innis gumaacha sabni Israa’el aarsaa nagaa irraa WAAQAYYOOOF kennuu dha.

²⁹ “Akka isaan ittiin dibamanii luba ta’anii uffanni Aroon qulqulluun kan ilmaan isaa haa ta’u. ³⁰ Ilmi iddoo isaa bu’ee luba ta’uudhaan Iddoo Qulqulluu keessa tajaajiluuf gara dunkaana wal ga’ii dhufu bultii torba uffata kana haa uffatu.

³¹ “Korbeessa hoolaa isa ittiin luba ta’an sana fuudhiitii foon isaa Iddoo Qulqulluutti affeeli. ³² Aroonii fi ilmaan isaa foon hoolaa sanaatii fi buddeena gundoo irraa sana balbala dunkaana wal ga’ii duratti haa nyaatan. ³³ Isaanis aarsaa isaan ittiin luba ta’anii fi qulqulleeffamuu isaanitii ittiin araarri bu’e haa nyaatan. Sababii aarsaan sun qulqulluu ta’eef garuu namni kaan hin nyaatin. ³⁴ Yoo foon korbeessa hoolaa ittiin luba ta’an kam iyyuu yookaan buddeenni kam iyyuu hafee bule ibiddaan gubi; sababii qulqulluu ta’eef nyaatamuu hin qabu.

³⁵ “Waan ani si ajaje hunda Aroonii fi ilmaan isaatiif godhi. Bultii torba guutuu seera lubummaa isaaniif raawwadhu. ³⁶ Akka araarri bu'uufis guyyuma guyyaan dibicha qalii aarsaa cubbuu dhi'eessi. Iddoo aarsaa sanaaf aarsaa araaraa dhi'eessuudhaan qulqulleessi; addaan baasuudhaafis isa dibi. ³⁷ Iddoo aarsaa sanaafis bultii torba araara buusiitii isa qulqulleessi. Yoos iddoon aarsaa sun waan hunda caalaa qulqulluu ta'a; wanni isa tuqu hundinuus ni qulqulleeffama.

³⁸ “Wanni ati yeroo hunda iddoo aarsaa irratti guyyaa guyyaan dhi'eessitu kanaa dha: Xobbaallaawwan kanneen umuriin isaanii waggaa tokko tokko ta'e lama; ³⁹ tokko ganama, kaan immoo galgala dhi'eessi. ⁴⁰ Xobbaallaa jalqabaa sana wajjinis daakuu ba'eessa isaa iifii tokko irraa harka kudhan keessaa harki tokko zayitii ejersaa kan cuunfamee iinii tokko harka afur keessaa harka tokkoon sukkuumame dhi'eessi; akkasumas daadhii wayinii iinii harka afur keessaa harka tokko dhibaayyuu godhii dhi'eessi. ⁴¹ Xobbaallaa hoolaa kaan immoo kennaa midhaaniitii fi kan dhibaayyuu wajjin akkuma isa ganamaa sanaatti galgala dhi'eessi; kunis aarsaa urgaa'aa ibiddaan WAAQAYYOO dhi'effamuu dha.

⁴² “Qalmi gubamu kun dhaloota dhufu keessattis yeroo hunda balbala dunkaana wal ga'ii irratti fuula WAAQAYYOO duratti haa dhi'effamu. Anis gara keessan dhufee achitti isinitti nan dubbadha; ⁴³ saba Israa'el wajjinis achumatti wal argina; iddoon sunis ulfina kootiin ni qulqulleeffama.

⁴⁴ “Ani dunkaana wal ga'ii fi iddoo aarsaa sana nan qulqulleessa; Aroonii fi ilmaan isaas akka isaan luboota ta'anii na tajaajilaniif nan qulqulleessa. ⁴⁵ Anis saba Israa'el keessa nan jiraadha; Waaga isaaniis nan ta'a. ⁴⁶ Isaanis akka ani WAAQAYYOO Waaga isaanii kan gidduu isaanii jiraachuuf jedhee biyya Gibxiitii keessaa isaan baase ta'e ni beeku; ani WAAQAYYOO Waaga isaanii ti.

30

Iddoo Aarsaa Ixaanaa

30:1-5 kwf - Bau 37:25-28

¹ “Iddoo aarsaa kan ixaanni irratti aarfamu muka laaftoo irraa tolchi. ² Iddoon aarsaa kunis dalga dheerina dhundhuma tokko, bal'ina dhundhuma tokkootii fi ol dheerina dhundhuma lamaa qabaatee gama afraniinuu wal qixxee haa ta'u; gaanfawwan isaas iddoo aarsaa sanaan walitti waanuma tokko irraa haa tolfaman. ³ Gubbaa isaa irra, cinaacha isaa hundumaa fi gaanfawwan isaatti warqee qulqulluu uffisiitii naannoo isaatti marsaa warqee naannessii tolchi. ⁴ Iddoo aarsaa sanaafis marsaawwan warqee isaatii gaditti qubeelaawwan warqee lama tolchi; qubeelaawwan kanas akka isaan danqaraawwan ittiin iddoo aarsaa baatan qabatanii gamaa gamanaan cinaacha lamaanitti tolchi. ⁵ Danqaraawwan muka laaftoo tolchiitii warqee itti uffisi. ⁶ Iddoo aarsaa sanas fuula golgaa taabota kakuu seeraa bira jiru sanaa dura, fuula teessoo araaraa kan kakuu seeraatiin ol jiruu dura iddoo ani itti si argu sana dhaabi.

⁷ “Aroon yommuu ganama ganama ibsaa qoqopheessutti iddoo aarsaa irratti ixaana urgaa'aa haa aarsu. ⁸ Akka ixaanni sun dhaloota dhufu keessatti illee yeroo hunda fuula WAAQAYYOO duratti aaruuf Aroon yommuu galgala galgala ibsaa qabsiisutti ixaana haa aarsu. ⁹ Iddoo aarsaa kana irratti ixaana gosa biraa yookaan qalma gubamu yookaan kennaa midhaanii hin dhi'eessin; dhibaaayyuu irratti hin dhibaatatin. ¹⁰ Aroonis waggaa yeroo tokko gaanfawwan iddoo aarsaa irratti aarsaa araara buusu haa dhi'eessu; aarsaan waggaa dhi'effamu kun dhiiga aarsaa cubbuu kan araarri ittiin argamu wajjin dhaloota dhufu keessatti haa dhi'effamu. Aarsaan kunis WAAQAYYOO waan hundumaa caalaa qulqulluu dha.”

Maallaqa Ittiin Araarri Bu'u

¹¹ Ergasii WAAQAYYOO Museedhaan akkana jedhe; ¹² “Yommuu ati baay'ina saba Israa'el lakkoofutti tokkoon tokkoon namaa yeroo lakkaa'amutti furii lubbuu isaa WAAQAYYOO haa kennu. Yoos yeroo ati isaan lakkoofutti dha'ichi tokko iyyuu isaan hin argatu. ¹³ Namni warra lakkaa'amanitti dabalamu kam iyyuu akkuma saqilii iddoo qulqulluu kan geeraa digdamaa ulfaatu sanaatti walakkaa saqilii haa kennu. Walakkaan saqilii kunis kennaa WAAQAYYOO dhi'effamuu dha. ¹⁴ Warra lakkaa'aman keessaa kanneen umuriin isaanii waggaa digdama yookaan isaa oli ta'e hundinuu WAAQAYYOO kennaa haa dhi'eessan. ¹⁵ Yommuu isin lubbuu keessan furuuf jettanii WAAQAYYOO kennaa dhi'eessitanitti sooreyyiin walakkaa saqiliitii oli hin kennin; hiyyeeyyiinis walakkaa saqiliitii gad hin kennin. ¹⁶ Maallaqa furii sanas Israa'eloota harkaa fudhiitii tajaajila dunkaana wal ga'ii sanaa irra oolchi; kunis lubbuu keessaniif furii ta'uuf fuula WAAQAYYOO duratti yaadannoo saba Israa'el ta'a.”

Caabii Itti Dhiqatan

¹⁷ Ergasiis WAAQAYYO Museedhaan akkana jedhe; ¹⁸ "Gabatee naasii kan miilla naasii qabu dhiqannaadhaaf tolchi. Isas dunkaana wal ga'iitii fi iddoo aarsaa gidduu kaa'iitii bishaan itti naqi. ¹⁹ Aroonii fi ilmaan isaa bishaani sanaan harka isaaniitii fi miilla isaanii haa dhiqatan. ²⁰ Isaanis akka hin duuneef yeroo dunkaana wal ga'ii seenan bishaaniin dhiqatu; akkasumas yommuu aarsaa ibiddaan WAAQAYYOOF dhi'eeffamu gubudhaaf tajaajiluuf iddoo aarsaatti dhi'aatanitti, ²¹ akka hin duuneef harka isaaniitii fi miilla isaanii haa dhiqatan. Kunis dhaloota dhufu keessatti Aroonii fi sanyii isaatiif seera dhaabataa ta'a."

Zayitii Ittiin Dibaman

²² Ergasiis WAAQAYYO Museedhaan akkana jedhe; ²³ "Urgooftuwwan urgooftuu hunda caalan jechuunis qumbii qulqulluu saqilii 500, qarafaa urgaa'aa walakkaa isaa jechuunis saqilii 250, marga citaa urgaa'aa saqilii 250, ²⁴ burgudii saqilii 500 fudhadhu; hundi isaa iyyuu akkuma saqilii iddoo qulqulluutti haa ta'u; akkasumas zayitii ejersaa iinii tokko fudhadhu. ²⁵ Urgooftuwwan kanneeniinis zayitii ittiin diban qulqulluu isaa jechuunis makaa urgaa'aa akkuma ogeessa urgooftuu qopheessu tokkootti tolchi. Kunis zayitii ittiin diban qulqulluu isaa ta'a. ²⁶ Zayitii kanaanis dunkaana wal ga'ii, taabota kakuu seeraa, ²⁷ minjaalaa fi mi'a isaa hunda, baattuu ibsaa fi mi'a isaa, iddoo aarsaa ixaanaa, ²⁸ iddoo aarsaa qalma gubamuutii fi mi'a isaa hunda, gabatee itti dhiqatanii fi miilla isaa dibi. ²⁹ Akka isaan waan hunda caalaa qulqulluu ta'aniif isaan qulqulleessi; wanni isaan tuqu kam iyyuus ni qulqullaa'a.

³⁰ "Akka isaan luboota ta'anii na tajaajilaniif Aroonii fi ilmaan isaa dibi qulqulleessi. ³¹ Israa'eelootaan akkana jedhi; 'Kun zayitiin qulqulluu ittiin dhaloota dhufuuf jiru diban naaf haa ta'u. ³² Zayitii kana dhagna nama biraa irratti hin dhangalaasin yookaan zayitii kam iyyuu karaa kanaan hin qopheessin. Zayitiin kun qulqulluu dha; innis isiniif qulqulluu haa ta'u. ³³ Namni shattoo shattoo sana fakkaatu hojjetu kan nama biraattis dibu saba isaa keessaa haa balleeffamu.'"

Ixaana

³⁴ WAAQAYYOS Museedhaan akkana jedhe; "Urgooftuu jechuunis hamphee urgaa'u, eellaan urgaa'u, aannan muka urgaa'uu, ixaana makaa hin qabne kan hundi isaa iyyuu baay'ina wal qixxee qabu fudhadhuutii, ³⁵ akkuma namni urgooftuu qopheessu tokko hojjetutti ixaana makamaa urgaa'u tolchi. Ixaana kanattis soogidda naqitii qulqulleessi; akka qulqulluu ta'us godhi. ³⁶ Isa keessaas gartokko daakii bulleessiitii dunkaana wal ga'ii keessa fuula taabota kakuu seeraa dura iddoo ani itti si argu sana kaa'i. Innis kan waan hunda caalaa qulqullaa'uu isiniif haa ta'u. ³⁷ Haala kanaan ixaana ofii keessaniif hin qopheeffatinaa; akka inni WAAQAYYOOF qulqulluu ta'es hubadhu. ³⁸ Namni urgaa isaatti gammaduuf jedhee waan isa fakkaatu tokko illee hojjetu saba ofii keessaa haa balleeffamu."

31*Bezali'eelii fi Oholiyaab*

31:2-6 kwf - Bau 35:30-35

¹ WAAQAYYO Museedhaan akkana jedhe; ² "Ilaa, ani gosa Yihuudaa keessaa Bezali'eel ilma Uuri, ilma Huuri filadheera; ³ ani Hafuura Waaqaatiin, ogummaadhaan, dandeettii fi beekumsa hojii harkaa gosa hundumaan isa guuteera; ⁴ Kunis akka inni warqeedhaan, meettii fi naasidhaan hojii ogummaa hojjetuuf; ⁵ akka inni dhagaawwan muree qopheessuuf, akka muka soofuu fi akka hojii ogummaa harkaa kan gosa hundaa keessatti hirmaatuuf. ⁶ Akkasumas ani kunoo akka inni isa gargaaruuf Oholiyaab ilma Ahiisaamaak kan gosa Daan sana muudeera.

"Akka isaan waan ani si ajaje hunda hojjetaniif ogeeyyii hojii harkaa hundaaf ogummaa kenneera.

⁷ "Isaanis dunkaana wal ga'ii,

taabota kakuu seeraatii fi teessoo araaraa kan taabota sana irra jiru,

mi'a dunkaana sana hunda jechuunis

⁸ minjaalaa fi mi'a isaa,

baattuu ibsaa kan warqee qulqulluu irraa tolfamee fi mi'a isaa hunda,

iddoo aarsaa ixaanaa,

⁹ iddoo aarsaa qalma gubamuutii fi mi'a isaa hunda,

gabatee itti dhiqatanii fi miilla isaa,

- ¹⁰ wayyaawwan miidhagfamanii dha'aman,
wayyaawwan Aroon lubichaaf qulqulleeffamanii fi
wayyaawwan ilmaan isaa yeroo lubummaadhaan tajaajilan uffatan,
¹¹ Iddoo Qulqulluu sanaaf immoo zayitii dibataatii fi ixaana urgaa'u haa qopheessan.

“Isaan akkuma ani si ajaje sanatti haa hojjetan.”

Sanbata

¹² WAAQAYYO Museedhaan akkana jedhe; ¹³ “Saba Israa’eliin akkana jedhi; ‘Isin Sanbattoota koo eegaa. Ani WAAQAYYO isa isin qulqulleessu akkan ta’e akka beektaniif kun dhaloota dhufu keessatti anaa fi isin gidduutti mallattoo ta’a.

¹⁴ “‘Waan Sanbanni isiniif qulqulluu ta’eef isa eegaa. Namni Sanbata xureessu haa ajjeefamu; namni guyyaa sana hojii hojjetu kam iyyuu saba isaa keessaa haa balleeffamu. ¹⁵ Guyyaa ja’a hojiin haa hojjetamu; guyyaan torbaffaan garuu sanbata boqonnaa ti; guyyaan kun WAAQAYYOOF qulqulluu dha. Namni guyyaa Sanbataa hojii hojjetu kam iyyuu haa ajjeefamu. ¹⁶ Israa’eloonni Sanbata kana kakuu bara baraa godhatanii dhaloota dhufu keessa haa eegan. ¹⁷ Kunis anaa fi Israa’eloota gidduutti mallattoo bara baraa ta’a; WAAQAYYO guyyaa ja’a keessatti samii fi lafa uumee guyyaa torbaffaatti boqotee aara galfateeraatii.’”

¹⁸ WAAQAYYO akkuma Gaara Siinaa irratti Museetti dubbatee raawwateen gabatee dhugaa lamaanis jechuunis gabateewwan dhuga ba’umsaa kanaan qubni Waaqaa irratti barresse sana isatti kenne.

32

Jabbii Warqee Irraa Hojjetame

¹ Sabni sunis yommuu akka Museen tulluu irra ture argetti Aroonin marsee, “Musee namicha biyya Gibxiitii baasee nu fide sana waan inni ta’e hin beeknuutii ka’ii waaqota nu dura deeman nuu tolchi” jedhe.

² Aroon immoo, “Warqee gurraa kan niitonni keessan, ilmaan keessanii fi intallan keessan keeyyatan irraa baasaatii natti fidaa” jedhee deebiseef. ³ Namoonni hundinuu warqee gurra isaanii of irraa baasanii Aroonitti fidan. ⁴ Innis warqee sana isaan harkaa fuudhee mi’a ittiin hojjetaniin baqsee Waaqa tolfamaa bifa jabbiiitiin hojjetame tokko tolche; isaanis, “Yaa Israa’el isaan kunneen waaqota kee warra biyya Gibxiitii si baasanii dha” jedhan.

⁵ Aroonis yommuu waan kana argetti fuula jabbii sanaa duratti iddoo aarsaa ijaaree, “Bori WAAQAYYOOF ayyaanni ni ayyaaneffama” jedhee labse. ⁶ Isaanis guyyaa itti aanu ganama bariin ka’anii, aarsaa gubamu dhi’eessanii aarsaa nagaas fidan. Kana irratti nyaachuu fi dhuguuf tataa’an; sirbuufis ka’an.

⁷ WAAQAYYO Museedhaan akkana jedhe; “Sabni kee kan ati biyya Gibxiitii baaftte fidde sun xuraa’eeraatii gad bu’i. ⁸ Isaan dafanii karaa ani isaan ajaje irraa jal’ataniiru; Waaqa tolfamaa bifa jabbiiitiin baqfamee qopheeffame illee ofii isaaniitiif tolfatanii aarsaa dhi’eessaniif, ‘Yaa Israa’el isaan kunneen waaqota kee warra biyya Gibxiitii si baasanii dha’ jedhanii isa waaqeffataniiru.

⁹ “WAAQAYYO Museedhaan akkana jedhe; ‘Kunoo, ani akka sabni kun mata jabeessa ta’e argeera. ¹⁰ Kanaafuu akka aariin koo isaanitti boba’uu fi akka ani isaan balleessuuf na dhiisi. Yommuus ani saba guddaa si taasisa.’”

¹¹ Museen garuu fuula gargaarsa WAAQAYYO Waaqa isaa barbaaddate; akkanas jedhe; “Yaa WAAQAYYO, dheekkamsi kee maaliif saba kee warra ati humna guddaa fi irree jabaadhaan biyya Gibxiitii baaftte sanatti boba’a? ¹² Warri Gibxii maaliif, ‘Inni duruma iyyuu yaada hamaadhaan tulluuwwan irratti isaan fixuu fi lafa irraa isaan balleessuuf Gibxii isaan baasee?’ jedhu. Aarii kee boba’aa sana irraa deebi’i; obsis; saba keettis badiisa hin fidin. ¹³ Garboota kee Abrahaam, Yisihaaqii fi Israa’elin warra, ‘Ani sanyii kee akka urjiiwwan samii irraa nan baay’isa; lafa ani waadaa isaaniif seene kana hundas sanyii keessaniif nan kenna; isaanis bara baraan lafa sana ni dhaalu’ jettee maqaa keetiin kakatteef sana yaadadhu.” ¹⁴ Kana irratti WAAQAYYO yaada geeddaratee badiisa saba isaatti fiduuf ture sana dhiise.

¹⁵ Museenis gabateewwan kakuu lamaan sana harkatti qabatee deebi’ee tulluu irraa gad bu’e. Gabatee sana irrattis karaa lachuu, duraa duubaan barreeffamee ture. ¹⁶ Gabateewwan sanas Waaqatu hojjete; katabbiin sunis katabbii Waaqaa kan gabateewwan sana irratti soofamee barreeffamee dha.

¹⁷ Iyyaasuunis yommuu waca namootaa dhaga’etti Museedhaan, “Iddoo buufataa keessa sagalee waraanaatu jira” jedhe.

¹⁸ Museen immoo akkana jedhee deebise:

“Sagaleen ani dhaga'u kun
sagalee sirbaati malee sagalee moo'uu,
yookaan sagalee mo'atamuu miti.”

¹⁹ Museenis akkuma iddoo qubataatti dhi'aatee jabbii fi shuubbisa sana argeen aaree gubate; gabateewwan sana harka isaa irraa darbatee tulluu sana jalatti caccabse. ²⁰ Innis jabbii jarri tolchan sana fuudhee ibiddaan gube; daakee bulleessees bishaanitti firfirsee Israa'eloota obaase.

²¹ Museenis Arooniin, “Sabni kun maal si goonaan ati cubbuu guddaa akkasii keessa isaan buufte?” jedhe.

²² Aroon immoo deebisee akkana jedhe; “Yaa gooftaa ko, aartee hin gubatin; akka sabni kun gara hamminaatti jal'atu atu beekta. ²³ Isaan, ‘Musee namicha Gibxii baasee nu fide sana waan inni ta'e hin beeknuutii waaqota nu dura deeman nuu tolchi’ naan jedhan. ²⁴ Anis, ‘Namni warqee qabu of irraa haa baasu’ jedheen; isaanis warqee sana natti kennan; anis ibidda keessa nan buuse; inni immoo jabbii ta'ee ba'ee!”

²⁵ Museen akka sabni sun gad dhiisiitti jiraate, Aroonis akka isaan to'annaadhaan ala ta'an akka godhee fi akka isaan diinota isaanii birattis waan kolfaa ta'an arge. ²⁶ Kanaafuu Museen karra qubataa dura dhaabatee, “Mee warri gara WAAQAYYO gortan hundi gara koo kottaa” jedhe. Lewwonnii hundis isa biratti walitti qabaman.

²⁷ Ergasii inni akkana isaaniin jedhe; “WAAQAYYO Waaqni Israa'el akkana jedha; ‘Tokkoon tokkoon namaa mudhii isaatti goraadee haa hidhatu; tokkoon tokkoon namaas qubata sana keessa karra tokko irraa gara karra kaaniitti asii fi achi deemee obbolloota isaa, michoota isaatii fi ollaa isaa haa ajjeesu.’” ²⁸ Lewwonnis akkuma Museen isaan ajaje godhan; guyyaa sana saba sana keessaa nama gara kuma sadiitu du'e. ²⁹ Museenis, “Isin waan ilmaan keessanii fi obbolloota keessanitti kaataniif har'a WAAQAYYOOF addaan baafamtaniirtu; innis guyyaa har'aa isin eebbiseera” jedhe.

³⁰ Museen guyyaa itti aanutti saba sanaan, “Isin cubbuu guddaa hojjetaniirtu. Garuu ani amma gara WAAQAYYOOTTI ol nan ba'a; tarii ani cubbuu keessaniif araara nan buusa ta'a” jedhe.

³¹ Museenis deebi'ee gara WAAQAYYOO dhaqee akkana jedhe; “Wayyoo! Sabni kun cubbuu akkam guddaa hojjetu! Isaan ofii isaaniitiif waaqota warqee tolfataniiru. ³² Ta'us maaloo amma cubbuu isaanii dhiisiif; yoo kanaa achi kitaaba barreessite sana keessaa maqaa koo haqi.”

³³ WAAQAYYO immoo Museedhaan akkana jedhe; “Ani nama cubbuu natti hojjetu kitaaba koo irraa nan haqa. ³⁴ Amma ka'iitii gara lafa ani sitti hime sanaatti saba kana qajeelchi; kunoo ergamaan koos fuula kee dura ni deema. Garuu gaafa yeroon ani isaan adabu ga'utti ani cubbuu isaaniitiif isaan nan adaba.”

³⁵ Sababii balleessaa isaan jabbii Aroon tolche sanaan hojjetaniitiif WAAQAYYO balaadhaan saba sana dha'e.

33

¹ WAAQAYYO Museedhaan akkana jedhe; “Atii fi sabni ati biyya Gibxiitii baaftee fide kun asii ba'aatii gara biyya ani Abrahaamiif, Yisihaaqii fi Yaaqoobiif, ‘Ani sanyii keetiif nan kenna’ jedhee kakadhe sanaa dhaqaa. ² Ani ergamaa koo fuula kee duraan ergee Kana'aanota, Amoorota, Heetota, Feerzota, Hiiwotaa fi Yebuusota ari'ee nan baasa. ³ Gara biyya aannanii fi dammi keessaa burquu dhaqi. Garuu waan ati saba mata jabeessa taateef ani akka karaatti si hin balleessineef si wajjin hin deemu.”

⁴ Jarri yommuu oduu hamaa kana dhaga'anitti gadduu jalqaban; isaan keessaas namni tokko iyyuu faaya tokko illee hin kaa'anne. ⁵ WAAQAYYO Museedhaan akkana jedheeraatii; “Saba Israa'eliin akkana jedhi; ‘Isin saba mata jabeeyyii dha. Ani utuu yeruma muraasa illee isin wajjin deemee silaa isin balleessa ture; isin amma faayawwan keessan of irraa baasaa; anis waanan isin godhu nan murteessaa.’” ⁶ Kanaafuu Israa'eloonni Gaara Kooreeb biratti faayawwan isaanii of irraa baasan.

Dunkaana Wal ga'ii

⁷ Museen dunkaana tokko fuudhee iddoo qubataa sana keessaa baasee achi fageessee dhaaba ture; dunkaana sanas, “dunkaana wal ga'ii” jedhee moggaase. Namni WAAQAYYOON barbaadatu hundinuu iddoo qubataa sana keessaa ba'ee gara dunkaana wal ga'ii sanaa dhaqa ture. ⁸ Yeroo Museen ba'ee gara dunkaana sanaa dhaqu hunda sabni hundinuu ka'ee balbala dunkaana ofii isaa dura dhaabatee hamma inni dunkaanicha seenutti ilaala ture. ⁹ Yeroo Museen dunkaana sana seenutti utubaan duumessaa gad bu'ee balbala dunkaanichaa dura dhaabata ture; WAAQAYYOS Musee

wajjin dubbata ture. ¹⁰ Sabni yeroo utubaa duumessaa kan balbala dunkaanaa dura dhaabatu argutti hundi isaa ol ka'ee tokkoon tokkoon namaa dunkaana ofii isaa duratti sagada ture. ¹¹ WAAQAYYOS akkuma nama michuu isaa wajjin haasa'u tokkootti ifumaan ifatti Museetti dubbachaa ture. Ergasiis Museen iddoo qubataatti deebi'a ture; gargaaraan isaa, Iyyaasuun ilmi Nuuni dargaggeessi suni garuu dunkaana sana biraa hin deemu ture.

Musee fi Ulfina WAAQAYYOO

¹² Museen WAAQAYYON akkana jedhe; "Ilaa, ati, 'saba kana dura bu'ii baasi' naan jetteerta; garuu ana wajjin eenyun akka ergitu na hin beeksifne. Ati, 'Ani maqaadhaan si beeka; ati na biratti fudhatama argateerta' jette. ¹³ Ammas ani fuula kee duratti surraa argadhee yoon jiraadhe, akka ani si beekuu fi akka ani fuula kee duratti surraa argadhuuf karaa kee na barsiisi; akka sabni kun saba kee ta'es yaadadhu."

¹⁴ WAAQAYYOS deebisee, "Ani si wajjin nan deema; boqonnaas siifin kenna" jedhe.

¹⁵ Museen immoo akkana jedheen; "Yoo ati nu wajjin deemuu baate, asii nu hin baasin. ¹⁶ Ati nu wajjin deemuu baannaan namni akkamiin akka ati anaa fi saba keetti gammaddu beeka? Wannani anaa fi saba kee saboota lafa irraa kaan hunda irraa addaan baasu biraa maali ree?"

¹⁷ WAAQAYYO immoo Museedhaan, "Ani waan ati amma kadhatte kana nan godha; ati fuula koo duratti ayyaana argatteertaatii; anis maqaadhaan si beeka" jedhe.

¹⁸ Museenis, "Maaloo ulfina kee na argisiisi" jedhe.

¹⁹ WAAQAYYO immoo akkana jedhe; "Ani gaarummaa koo hundumaa fuula kee dura nan dabarsa; maqaa WAAQAYYOO fuula kee duratti nan labsa. Ani kanan maaru nan maara; kanan garaa laafuufiis garaa nan laafa. ²⁰ Garuu waan namni fuula koo argee jiraachuu hin dandeenyeef ati fuula koo arguu hin dandeessu."

²¹ Ergasiis WAAQAYYO akkana jedhe; "Kunoo as na bira iddoo ati kattaa irra dhaabachuu dandeessu jira. ²² Ani yeroo ulfinni koo darbuutti jiru holqa kattaa keessa si kaa'ee hamma ani darbutti harka kootiin si da'eessa. ²³ Ergasiis ani harka koo nan fudhadha; atis dugda koo ni argita; fuulli koo garuu argamuu hin qabu."

34

Gabateewwan Dhagaa

¹ WAAQAYYO Museedhaan akkana jedhe; "Gabateewwan dhagaa lama akkuma kanneen duraa sanaatti soofi; anis dubbii gabateewwan ati caccabsite sana irra turan isaan irratti nan barreessa. ² Atis ganamaan qophaayitii Tulluu Siinaatti ol ba'i. Achitti, fiixee tulluu sanaa irratti fuula koo duratti of dhi'eessi. ³ Namni tokko iyyuu si wajjin hin dhufin yookaan tulluu sana irratti eessumattuu hin mul'atin. Bushaayee fi loon iyyuu fuula tulluu sanaa duratti hin bobba'in."

⁴ Museenis gabateewwan dhagaa lama akkuma kanneen jalqabaatti soofe; innis gabateewwan lamaanis harkatti qabatee akkuma WAAQAYYO isa ajajetti ganama bariin Tulluu Siinaatti ol ba'e. ⁵ WAAQAYYO duumessaan gad bu'ee isa wajjin achi dhaabate; maqaa WAAQAYYOS ni labse. ⁶ Waaqayyo fuula Musee dura darbee akkana jedhee labse; "WAAQAYYO, WAAQAYYO Waaqa gara laafessaa fi arjaa, kan dafee hin aarre, kan jaallalii fi amanamummaan isaa guddaa, ⁷ kan araara isaa dhaloota kumaatamaaf tursu, kan hammina, fincilaa fi cubbuu namaaf dhiisuu dha. Ta'u illee inni nama yakka hojjetu adabu malee hin dhiisu; inni hamma dhaloota sadaffaa fi afuraffaatti sababii cubbuu abbootii isaaniiif jedhee ijoollee isaaniiiti fi ijoollee ijoollee isaanii ni adaba."

⁸ Museen yommuu suma lafatti gad jedhee sagade. ⁹ Innis, "Yaa Gooftaa, yoo ani fuula kee duratti ayyaana argadhee jiraadhe, Gooftaan nu wajjin haa deemu. Yoo sabni kun saba mata jabeessa ta'e illee hammina keenyaa fi cubbuu keenya nuu dhiisi; dhaala kees nu godhadhu" jedhe.

¹⁰ Kana irratti WAAQAYYO akkana jedhe; "Kunoo ani si wajjin kakuu nan gala. Ani fuula saba kee hundaa duratti dinqiiwwan kanaan dura saba kam iyyuu keessatti, addunyaa hunda keessatti takkumaa hin hojjetamin nan hojjedha. Sabni ati keessa jiraattus akka hojiin ani WAAQAYYO siif hojjedhu hammam sodaachisaa ta'e ni arga. ¹¹ Waan ani har'a si ajajuuf ajajami. Anis Amoorota, Kana'aanota, Heetota, Feerzota, Hiiwotaa fi Yebeusota fuula kee duraa ari'ee nan baasa. ¹² Akka warra biyya ati itti galuuf deemtu sana keessa jiraatan wajjin kakuu hin galleef of eeggadhu; yoo kanaa achii isaan kiyyoo sitti ta'u. ¹³ Iddoowwan aarsaa isaanii diigaa; siidaawwan waaqeffannaa isaanii caccabsaa; utubaawwan Aasheeraa isaanii jijjigaa. ¹⁴ Sababii WAAQAYYO maqaan isaa Hinaafaa jedhamu sun Waaqa hinaafu ta'eef ati Waaqa biraa hin waaqeffatin."

¹⁵ “Ati akka warra biyya sana keessa jiraatan wajjin kakuu hin galleef of eeggadhu. Sababiin isaa isaan yommuu waaqota isaanii wajjin sagaagalanii fi yommuu waaqota isaaniiitiif aarsaa dhi'eessanitti si waamu; atis aarsaa isaanii ni nyaatta. ¹⁶ Yeroo ati ilmaan kee intallan isaanii fuusiftee, intallan isaanii sun waaqota isaanii wajjin sagaagalanitti isaan akka ilmaan kees akkuma isaanii sagaagalan godhu.

¹⁷ “Waaqota tolfamoo baqfamanii hojjetaman hin tolfatin.

¹⁸ “Ayyaana Maxinoo ayyaaneffadhu. Ati sababii ji'a Abiibii keessa Gibxii baateef akkuma ani si ajaje sanatti ji'a Abiibii keessa yeroo murteeffametti bultii torba Maxinoo nyaadhu.

¹⁹ “Kan jalqabatti gadameessa saaqee ba'u hundi kan koo ti; kormi horii keetii hangafni jechuunis kormi looniitti fi kormi hoolotaa hangafni koo ti. ²⁰ Harree hangafa xobbaallaa hoolaatiin furi; yoo furuu baatte immoo morma isaa cabsi. Ilmaan kee hangafa hundas furi.

“Namni tokko iyyuu harka duwwaa fuula koo duratti hin dhi'aatin.

²¹ “Guyyaa ja'a hojii hojjedhu; guyyaa torbaffaatti garuu boqodhu. Yeroo qonnaatii fi yeroo midhaan galfamutti boqodhu.

²² “Mataa qamadii jalqabaa irratti Ayyaana Torbanootaa ayyaaneffadhu; dhuma waggaa irratti immoo ayyaana galchaa midhaanii ayyaaneffadhu. ²³ Dhiirri kee hundi waggaatti yeroo sadii fuula WAAQAYYO Gooftaa, fuula Waaqa Israa'el duratti haa dhi'aatan. ²⁴ Ani Namoota Ormaa si duraa ari'ee nan baasa; daangaa kee nan bal'isa; yoo ati waggaatti yeroo sadii WAAQAYYO Waaqa kee duratti dhi'aachuu dhaqxus namni tokko iyyuu biyya kee fudhachuu hin hawwu.

²⁵ “Dhiiga aarsaa waan raacitii qabu wajjin naa hin dhi'eessin; qalmi Ayyaana Faasiikaa irraa hafus hamma bariitti hin turin.

²⁶ “Mataa midhaan lafa keetii keessaa filatamaa isaa gara mana WAAQAYYO Waaqa keetii fidi.

“Ilmoo re'ee aannan haadha isheetiin hin affeelin.”

²⁷ WAAQAYYOS Museedhaan, “Dubbii kana barreessi; ani akkuma dubbii kanaatti si'ii fi saba Israa'el wajjin kakuu galeeraatii” jedhe. ²⁸ Museenis utuu buddeena hin nyaatin yookaan utuu bishaan hin dhugin guyyaa afurtamaa fi halkan afurtama WAAQAYYO bira achi ture. Innis dubbii kakuu sana jechuunis Ajajawwan Kurnan gabateewwan sana irratti barreesse.

Calaqqisuu Fuula Musee

²⁹ Museen gabateewwan Dhuga ba'umsaa lamaan sana harkatti qabatee Tulluu Siinaa irraa gad bu'e; innis sababii WAAQAYYO wajjin dubbachaa tureef akka fuulli isaa calaqqisu hin beekne ture. ³⁰ Yommuu Aroonii fi sabni Israa'el hundi Musee arganitti kunoo, fuulli isaa calaqqisaa ture; isaanis isatti dhi'aachuu sodaatan. ³¹ Museen garuu isaan waame; Aroonii fi bulchitoonni hawaasichaa hundinuus gara isaatti deebi'an; innis isaanitti dubbate. ³² Sabni Israa'el hundi isatti dhi'aate; innis waan WAAQAYYO Gaara Siinaa irratti isatti dubbate hunda isaan ajaje.

³³ Museen yommuu isaanitti dubbatee fixatetti fuula isaa haguuggate. ³⁴ Yommuu WAAQAYYO wajjin dubbachuudhaaf fuula isaa duratti ol seenu garuu hamma achii ba'utti haguuggii sana of irraa fuudha ture. Yommuu inni achii ba'ee waan ajajame sana saba Israa'elitti himutti, ³⁵ isaan akka fuulli isaa calaqqisu argan. Ergasii Museen hamma WAAQAYYO wajjin dubbachuuf ol galutti fuula isaa deebisee haguuggata ture.

35

Sirna Sanbataa

¹ Museen waldaa Israa'el guutuu walitti qabee akkana jedheen; “Wanni WAAQAYYO akka isin hojjetan isin ajaje kana: ² Guyyaa ja'a hojiiin haa hojjetamu; guyyaan torbaffaan garuu isiniif guyyaa qulqulluu dha; WAAQAYYOOF immoo sanbata boqonnaa ta'a. Namni guyyaa kana hojii hojjetu kam iyyuu haa ajjeefamu. ³ Guyyaa Sanbataatiin lafa jiraattan kamitti iyyuu ibidda hin qabsiisinaa.”

Mi'a Dunkaana Qulqulluu

35:4-9 kwf - Bau 25:1-7

35:10-19 kwf - Bau 39:32-41

⁴ Museenis waldaa Israa'el guutuudhaan akkana jedhe; “Wanni WAAQAYYO ajaje kana: ⁵ Waan qabdan irraa WAAQAYYOOF kennaa dhi'eessaa. Namni fedhii qabu hundinuus:

“kennaa warqee, meetii fi naasii WAAQAYYOOF haa fidu.

- ⁶ Kirrii bifa cuquliisaa, dhiilgee, bildiimaa fi quncee talbaa gaarii, rifeensa re'ee,
⁷ gogaa korbeessa hoolaa kan halluu diimaa cuuphamee fi gogaa duugame, muka laaftoo,
⁸ ibsaadhaaf zayitii ejersaa,
 zayitii ittiin dibanii fi ixaana urgaa'uuf immoo urgooftuuwwan,
⁹ dhagaawwan sardooniksii, dooqa gati jabeessa, dirataa fi qomee irratti kaa'atamu kan biraa haa fidu.

¹⁰ "Isin keessaa namoonni ogeeyyiin hundi dhufanii waan WAAQAYYO ajaje hunda haa hojjetan:

- ¹¹ "Kunis dunkaana qulqulluu dunkaana isaatii fi irra buusaa isaa wajjin, hokkoowwan isaa, tuggee isaa, dagalee isaa, utubaa isaa, miilla isaa,
¹² taabota danqaraa isaa wajjin, teessoo araaraatii fi golgaa isa dhoksus,
¹³ minjaala danqaraa isaatii fi mi'a isaa hunda wajjin, buddeena ilaalchaa;
¹⁴ baattuu ibsaa kan ifaaf ta'u mi'a isaa wajjin, ifa sanaafis ibsaa fi zayitii,
¹⁵ iddoo aarsaa ixaanaa danqaraa isaa wajjin, zayitii ittiin dibanii fi ixaana urgaa'u, karra ittiin dunkaana qulqulluu seenaniifis golgaa balbalaa,
¹⁶ iddoo aarsaa kan qalma gubamuu gingilchaa isaa kan naasii irraa hojjetame wajjin, danqaraawwan isaatii fi mi'a isaa hunda, caabii naasii miilla isaa wajjin,
¹⁷ golgaawwan oobdii utubaawwanii fi miillawwan isaanii wajjin, golgaa karra oobdii sanaa,
¹⁸ dunkaana qulqulluu fi qofoowwan oobdii dunkaana qulqulluutii fi funyoowwan isaanii,
¹⁹ wayyaawwan fo'amanii dha'aman kanneen isaan yeroo iddoo qulqulluu keessa tajaajilan uffataman jechuunis wayyaawwan Aroon lubichaaf qulqulleffamanii fi wayyaawwan ilmaan isaa yeroo lubummaadhaan tajaajilanitti uffatan haa hojjetan."

²⁰ Ergasiis hawaasni Israa'el guutuun Musee biraa ba'anii deeman; ²¹ namni fedhii qabuu fi namni yaadni isaa isa kakaase hundi dhufee hojii dunkaana wal ga'ii sanaatiif, tajaajila isaa hundaa fi hojii wayyaawwan qulqulluu sanaatiif kennaa WAAQAYYOOF fide. ²² Dhiirrii fi dubartiin fedhii qaban hundi mi'a warqee irraa hojjetame kanneen gosa gosaa fidan; bitawoo, lootii, qubeelaa fi faaya fidan. Hundi isaanii iyyuu warqee isaanii aarsaa sochoofamu godhanii WAAQAYYOOF dhi'eessan. ²³ Namni kirrii bifa cuquliisaa, dhiilgee yookaan bildiimaa yookaan quncee talbaa ba'eessa yookaan rifeensa re'ee, kaldhee korbeessa hoolaa kan halluu diimaa cuuphamee fi gogaa duugame qabu hundi ni fide. ²⁴ Warri kennaa meetii yookaan naasii dhi'eessan kennaa WAAQAYYOOF dhi'eeffamu godhanii fidan. Namni muka laaftoo kan qooda hojii sanaa kamiif iyyuu ta'u qabu hundas ni fide. ²⁵ Dubartoonni ogeeyyiin hundis harkaan fo'anii kirrii bifa cuquliisaa, dhiilgee, bildiimaa fi quncee talbaa ba'eessa fo'an sana fidan. ²⁶ Dubartoonni fedhii fi ogummaa qaban hundinuus rifeensa re'ee fo'an. ²⁷ Bulchitoonni dhagaawwan sardooniksii fi dhagaawwan gati jabeeyyii biraa dirataa fi kiisii gomaatti akka kaa'atamuuf fidan. ²⁸ Akkasumas urgooftuu fi zayitii ibsaadhaaf, zayitii ittiin dibanii fi ixaana urgaa'us fidan. ²⁹ Dhiironnii fi dubartoonni Israa'el warri fedhii qaban hundi hojii akka isaan hojjetaniif WAAQAYYO karaa Museetiin isaan ajaje sana hundaaif fedhii isaaniitiin WAAQAYYOOF kennaa fidan.

Bezali'eelii fi Oholiyaab

35:30-35 kwf - Bau 31:2-6

³⁰ Yommu Museen saba Israa'eliin akkana jedhe; "Ilaa WAAQAYYO gosa Yihuudaa keessaa Bezali'eel ilma Uuri ilma Huuri flateera; ³¹ Hafuura Waaqaatiin, ogummaadhaan, dandeettii fi beekumsa hojii harkaa gosa hundumaan isa guuteera. ³² Kunis akka inni warqeedhaan, meetii fi naasiidhaan hojii ogummaa hojjetuuf, ³³ akka dhagaawwan muree qopheessuuf, akka muka soofuu fi akka hojii ogummaa harkaa kan gosa hundaa keessatti hirmaatuuf. ³⁴ Waaqnis Bezali'eelii fi Oholiyaab ilma Ahiisaamaak kan gosa Daan sanaaf dandeettii isaan ittiin warra kaan barsiisan kenne. ³⁵ Akka isaan ogeeyyii hojii harkaa, bifa baastotaa fi warra kirrii bifa cuquliisaatiin, dhiilgeen, bildiimaa fi quncee talbaa ba'eessaan miidhagsanii fi wayyaa dhooftota hundi isaanii ogeeyyii hojii harkaatiifi bifa baastota ta'anii ogummaa hojii gosa hundaa hojjechuutiin isaan guute.

36

¹ Bezali'eel, Oholiyaabii fi namni WAAQAYYO ogummaa fi dandeettii isaan ittiin hojii ijaarsa iddoo qulqulluu sanaa hunda beekan kenneef hundi akkuma WAAQAYYO ajajetti hojii kana haa hojjetan."

² Museen Bezali'eel, Oholiyaabii fi ogeessa WAAQAYYO dandeettii kenneef kan dhufee hojii sana hojjechuuf fedhii qabu hunda waame. ³ Isaanis kennaawwan Israa'eloonni ijaarsa iddoo qulqulluu sanaatiif jedhanii fidan hunda Musee harkaa fuudhan. Namoonni Israa'elis fedhii isaaniitiin ganama ganama kennaa isaanii fiduu itti fufan. ⁴ Ogeeyyiin hojii harkaa kanneen iddoo qulqulluu sana hojjetan hundi hojii isaanii dhiisanii dhufanii ⁵ Museedhaan, "Sabni kun waan hojii WAAQAYYO akka hojjetamuuf ajaje sanaaf barbaachisu caalaa fidaa jira" jedhan.

⁶ Museenis ajaja kenne; isaanis, "Dhiirri yookaan dubartiin tokko iyyuu waan biraa tokko illee kennaa godhee iddoo qulqulluu sanaaf hin dhi'eessin" jedhanii iddoo qubataa sana keessatti labsan. Kanaafuu namoonni itti fufanii waa fiduu dhowwaman. ⁷ Wanti isaan duraanuu qaban hojii hunda hojjechuuf ga'aa fi irraa hafaa tureetti.

*Dunkaana Qulqulluu**36:8-38 kwf - Bau 26:1-37*

⁸ Hojjetoota sana keessaas ogeeyyiin hundi golgaawwan kudhan kanneen quncee talt-baa gaarii fo'amee fi kan kirrii bifa cuquliisaa, dhiilgee fi bilidiimaa irraa hojjetamaniin dunkaana qulqulluu haa hojjetan; golgaawwan sana irrattis ogeeyyiin harka qajeelan kiirubeelii hojjetan. ⁹ Golgaawwan sun hundinuu wal qixxee ta'anii tokkoon tokkoon isaanii dheerina dhundhuma digdamii saddeetiitii fi bal'ina dhundhuma afur qabu ture. ¹⁰ Isaanis golgaawwan shan walitti qabsiisan; shanan kaan illee akkasuma walitti qabsiisan. ¹¹ Isaanis golgaawwan walitti qabsiifaman kanneen jalqabaa keessaa handaara isa moggaa irratti huccuu bifa cuquliisaa irraa gurroowwan tolchan; golgaawwan walitti qabsiifaman lammaffaa irrattis akkasuma tolfaman. ¹² Isaanis golgaa tokko irratti gurroowwan shantama tolchan; gurroowwan shantama immoo golgaawwan walitti qabsiifaman lammaffaa keessaa isa moggaa irratti tolchan; gurroowwan sunis gamaa gamanaan turan. ¹³ Akka dunkaanni qulqulluun sun tokko ta'uufis hokkoowwan warqee shantama tolchanii golgaawwan sana ittiin walitti qabsiisan.

¹⁴ Isaanis haguuggii gubbaa dunkaana qulqulluu sanaa irra jiru haguuguuf golgaawwan rifeensa re'ee kudha tokko hojjetan. ¹⁵ Golgaawwan kudha tokkoon sun hundi wal qixxee turan; dheerinni isaanii dhundhuma soddoma, bal'inni isaanii immoo dhundhuma afur ture. ¹⁶ Isaanis golgaawwan shan iddoo tokkotti walitti qabsiisan; golgaawwan kaan ja'aan immoo iddoo tokkotti walitti qabsiisan. ¹⁷ Ergasiis golgaawwan gama tokkoon walitti qabsiifaman keessaa handaara isa moggaa irratti gurroowwan shantama tolchan; golgaawwan gama kaan irratti walitti qabsiifaman keessaa handaara isa moggaa irratti gurroowwan shantama tolchan. ¹⁸ Akka dunkaanni sun tokko ta'uuf ittiin walitti qabsiisuuf qabduuwwan naasii shantama tolchan. ¹⁹ Dunkaana sanaafis irra buusaa kaldhee korbeessa hoolaa kan halluu diimaa cuuphame, isa irraan immoo irra buusaa gogaa duugamee hojjetan.

²⁰ Dunkaana qulqulluu sanaafis muka laaftoo irraa tuggeewwan qaqqajeeloo hojjetan. ²¹ Dheerinni tokkoo tokkoo tuggeewwan sanaas dhundhuma kudhan, bal'inni isaa immoo dhundhuma tokkoo fi walakkaa ture. ²² Tokkoon tokkoon tuggeewwan sanaas akka wal keessa galuu danda'uuf mucha lama lama qaba ture. Tuggeewwan dunkaana qulqulluu sanaa hunda akkasitti tolchan. ²³ Gama kibba dunkaana qulqulluu sanaatiifis tuggeewwan digdama hojjetan; ²⁴ tuggeewwan digdamman sana jalatti miilla meetii afurtama jechuunis tuggee tokko jalatti miilla lama gurra isaa lamaaniiif, tuggee kaan jalattis miilla lama gurra isaa lamaaniiif tolchan. ²⁵ Gama dunkaana qulqulluu sanaa kaaniifis karaa kaabaatiin tuggeewwan digdama tolchan. ²⁶ Isaaniifis miilla meetiis afurtama jechuunis tuggee tokko jalatti miilla lama, tuggee kaan jalattis miilla lama tolchan. ²⁷ Karaa lixa biiftuutiin, dugda duuba dunkaana qulqulluu sanaatiif tuggee ja'a hojjetan. ²⁸ Karaa dugda duubaas golee dunkaana qulqulluu sanaatiif utubaa lama tolchan. ²⁹ Tuggeewwan golee kunneen jalaa hamma gubbaatti walitti fayyifamanii bantii irratti qubeelaa tokkoon walitti qabsiifaman; tuggeewwan golee lamaanis akkanuma hojjetan. ³⁰ Kanaafuu tuggeewwan saddeeti kanneen miilla meetii kudha ja'a qabanitu ture; tokkoon tokkoon tuggee sanaas miilla lama lama qaba ture.

³¹ Akkasumas muka laaftoo irraa dagaleewwan tolchan; tuggeewwan dunkaana qulqulluu sanaa irra gama tokkoon jiraniif dagaleewwan shan, ³² tuggeewwan gama kaaniin jiraniif shan, tuggeewwan dugda duubaan karaa lixa biiftuutiin jiraniif immoo dagaleewwan shan tolchan. ³³ Dagalee walakkaa jiru sana akka inni

gidduu tuggeewwaniitiin moggaa tokkoo hamma moggaa kaaniitti fulla'u godhan. ³⁴ Tuggeewwan sanaattis warqee dibanii akka dagaleewwan baataniif qubeelaawwan warqee itti tolchan. Dagaleewwan sanaattis akkasuma warqee uffisan.

³⁵ Isaanis kirrii bifa cuquliisaa, dhiilgee, bildiimaa fi quncee talbaa haphii irraa golgaa tolchan; golgaa kana irrattis ogeessi harka qajeelu tokko fakkii kiirubeelii tolche. ³⁶ Gollaa sanaafis utubaawwan muka laaftoo afur tolchanii warqee itti uffisan; utubaa sanaafis hokkoowwan warqee hojjetanii miilla meetii afur itti tolchan. ³⁷ Isaanis balbala dunkaanichaatiif golgaa kirrii bifa cuquliisaa, dhiilgee, bildiimaa fi quncee talbaa kan qal'ifamee fo'amee harkaan irratti hodhame tokko faayessanii tolchan. ³⁸ Isaanis utuboota hokkoo qaban shan hojjetanii, fiixee fi somaawwan utubootaatti warqee uffisan; miilla isaanii shananis naasii irraa tolchan.

37

Taabota

37:1-9 kwf - Bau 25:10-20

¹ Bezali'eel muka laaftoo irraa taabota tolche; taabonni sunis dhundhuma lamaa fi walakkaa dheerata; dhundhuma tokkoo fi walakkaa bal'ata; dhundhuma tokkoo fi walakkaa ol dheerata ture. ² Innis keessaa fi duuba isaatti warqee qulqulluu uffise; naannoo isaattis marsaa faaya warqee naannessee tolche. ³ Qubeelaa warqee afur tolcheefii miilla isaa afranitti qabsiise; qubeelaa lama gama tokkoon, qubeelaa kaan immoo gama kaaniin itti kaa'e. ⁴ Ergasiis muka laaftoo irraa danqaraawwan tolchee warqee itti uffise. ⁵ Innis taabota sana ittiin baachuudhaaf danqaraawwan sana qubeelaawwan keessa loose.

⁶ Innis warqee qulqulluu irraa teessoo araaraa tolche; teessoon sunis dheerina dhundhuma lamaa fi walakkaa fi bal'ina dhundhuma tokkoo fi walakkaa qaba ture. ⁷ Moggaa lamaan teessoo araaraa irratti warqee tumame irraa Kiirubeelii lama tolche. ⁸ Innis Kiirubii tokko moggaa tokko irratti, Kiirubii lammaffaa moggaa kaan irratti tolche; kiirubeelii lamaan sana moggaa teessoo araaraa lamaan irratti teessoo araaraa wajjin mukuma tokko irraa tolche. ⁹ Kiirubeeliin sun qoochoo isaanii ol bal'ifatanii teessoo araaraa sanatti gaaddiseessu turan. Kiirubeeliin kunneen fuula isaanii walitti garagalfatanii gara teessoo araaraa ilaalu turan.

Minjaala

37:10-16 kwf - Bau 25:23-29

¹⁰ Isaanis muka laaftoo irraa minjaala dalga dheerinni isaa dhundhuma lama, bal'inni isaa dhundhuma tokko, ol dheerinni isaa dhundhuma tokkoo fi walakkaa tolchan. ¹¹ Isaanis warqee qulqulluu itti uffisanii naannoo isaatti marsaa warqee tolchan. ¹² Naannoo isaa irrattis hidhii hamma bal'ina harkaa ga'uu fi faaya warqee tolchan. ¹³ Isaanis qubeelaa warqee afur minjaala sanaaf hojjetanii iddoo miilli afran turetti goleewwan afranitti qabsiisan. ¹⁴ Qubeelaawwan sunis akka danqaraa minjaalli sun ittiin baatamu qabaniif xiyyoo sanatti dhi'eeffamanii kaa'aman. ¹⁵ Danqaraawwan minjaalli ittiin baatamu sun muka laaftoo irraa hojjetamanii warqeen itti uffifamee ture. ¹⁶ Mi'oota minjaala sana irra kaa'aman jechuunis caabiiwwan isaa, waciitiwwan isaa, waciitiwwan isaatii fi okkoteewwan isaa kanneen ittiin dhibaayyuu dhibaafatan warqee qulqulluu irraa tolchan.

Baattuu Ibsaa

37:17-24 kwf - Bau 25:31-39

¹⁷ Baattuu ibsaa, somaa isaatii fi damee isaa wajjin warqee qulqulluu irraa tumanii tolchan; waciitii isaa, hudhaa isaatii fi daraaraa isaa illee warqeedhuma tokko irraa tolchan. ¹⁸ Bitaa mirga baattuu ibsaa sana keessaas dameewwan ja'a jechuunis sadii gama tokkoon sadii immoo gama kaaniin baafaman. ¹⁹ Xofoowwan lawuzii fakkaatan kanneen tokkoon tokkoon isaanii hudhaa fi daraaraa qaban sadii damee tokko irratti, waciitiwwan lawuzii fakkaatan kanneen tokkoon tokkoon isaanii hudhaa fi daraaraa qaban sadii immoo damee kaan irratti tolchan. Dameewwan ja'aan baattuu ibsaa irraa babba'an hunda irrattis akkasuma tolchan. ²⁰ Xofoowwan hudhaa fi daraaraa qaban kanneen bifa lawuziitiin tolfaman afur baattuu ibsaa sana irraa turan. ²¹ Hudhaan tokko cimdii jalqabaa kan dameewwan baattuu ibsaa irraa babba'an jala, hudhaan lammaffaan cimdii lammaffaa jala, hudhaan sadaffaan immoo cimdii sadaffaa jala ture; walumaa galatti dameewwan ja'atu ture. ²² Hudhaawwanii fi dameewwan hundinuu baattuu ibsaa sana wajjin warqeedhuma qulqulluu tumame tokko irraa tolfaman.

²³ Ibsaa torban sana, waan ittiin daaraa isaa dhadha'anii fi baattuu daaraa sana baattu illee warqee qulqulluu irraa tolchan. ²⁴ Baattuu ibsaatii fi mi'a isaa hunda warqee qulqulluu taalaantii tokko irraa tolchan.

Iddoo Aarsaa Ixaanaa

37:25-28 kwf - Bau 30:1-5

²⁵ Isaanis muka laaftoo irraa iddoo aarsaa ixanaa tolchan; iddoon aarsaa kunis dalga dheerina dhundhuma tokko, bal'ina dhundhuma tokkoo fi ol dheerina dhundhuma lamaa qabaatee gama afraniinuu wal qixxee ture. Gaanfawwan isaas iddoo aarsaa sanaan walumatti hojjetaman. ²⁶ Isaanis gubbaa isaa irra, cinaacha isaa hundumaa fi gaanfawwan isaatti warqee qulqulluu uffisanii naannoo isaatti marsaa warqee naannessanii tolchan. ²⁷ Iddoo aarsaa sanaafis marsaawwan warqee isaatii gaditti qubeelaawwan warqee lama tolchan; qubeelaawwan kanas akka isaan danqaraawwan ittiin iddoo aarsaa baatan qabataniif gamaa gamanaan cinaacha lamaanitti tolchan. ²⁸ Isaanis danqaraawwan muka laaftoo tolchanii warqee itti uffisan.

²⁹ Akkasumas akkuma ogeessa urgooftuu qopheessu tokkootti zayitii ittiin diban qulqulluu fi ixanaa urgaa'aa makaa hin qabne tolchan.

38

Iddoo Aarsaa Qalma Gubamuu

38:1-7 kwf - Bau 27:1-8

¹ Isaanis muka laaftoo irraa iddoo aarsaa qalma gubamuu kan dhundhuma sadii ol dheeratu ijaaran; iddoon aarsaa kunis dheerina dhundhuma shanii fi bal'ina dhundhuma shanii qabaatee gama afraniinuu wal qixxee ture. ² Tokkoo tokkoo goleewwan afraniitti gaanfa tolchan; gaanfaa fi iddoo aarsaa sana mukuma tokko irraa tolchan; iddoo aarsaa sana irrattis naasii uffisan. ³ Isaanis mi'a isaa hunda jechuunis waan ittiin daaraa haran, waan ittiin daaraa hammaaran, waciitii, hokkoo fooniitii fi baattuu ibiddaa naasii irraa tolchan. ⁴ Iddoo aarsaa sanaafis naasii wal keessa xaxameen gingilchaa hojjetanii akka inni hamma walakkaa iddoo aarsaatti ol ba'ee marsaa isaa jalaan jiraatu godhan. ⁵ Akka isaan danqaraawwan qabataniifis goleewwan gingilchaa naasii sanaa afraniif qubeelaawwan naasii hojjetan. ⁶ Danqaraawwan muka laaftoo tolchanii naasii itti uffisan. ⁷ Iddoo aarsaa sana ittiin baachuufis danqaraawwan sana qubeelaawwan gamaa gamanaan iddoo aarsaa irra jiran keessa galchan. Iddoo aarsaa sanas keessa isaa duwwaa godhanii saanqaa irraa tolchan.

Gabatee Itti Dhiqatan

⁸ Isaanis gabatee itti dhiqatan kan naasii miilla isaa kan naasii irraa hojjetame wajjin of ilaaleewwan dubartoota balbala dunkaana wal ga'ii dura tajaajilani irraa tolchan.

Oobdii

38:9-20 kwf - Bau 27:9-19

⁹ Kanatti aansanii oobdii tolchan. Oobdichis gama kibbaatiin dhundhuma dhibba tokko dheeratee golgaa quncee talbaa kan qal'ifamee fo'ame irraa hojjetames qaba ture; ¹⁰ utubaawwan digdamaa fi miilla naasii digdama qaba ture; utubaawwan kunneenis hokkoowwanii fi somaawwan meetii irraa hojjetaman qabu ture. ¹¹ Gama kaabaatiinis akkasuma dhundhuma dhibba tokko dheeratee utubaawwan digdamaa fi miilla naasii digdama qaba ture; utubaawwan sunis hokkoowwanii fi somaawwan meetii irraa tolfaman qabu turan.

¹² Gama lixaatiin dhundhuma shantama bal'atee golgaawwan utubaa kudhanii fi miilla kudhan qaba ture; hokkoowwanii fi somaawwan utuboota sanaas meetii irraa hojjetaman. ¹³ Fiixee ba'aatiin, karaa ba'a biiftuutiin dhundhuma shantama bal'ata ture. ¹⁴ Golgaawwan dhundhuma kudha shan dhedheeratanii utubaa sadii fi miilla sadii qabanis karaa balbala tokkoo irra turan. ¹⁵ Golgaawwan dhundhuma kudha shan dhedheeratanii utubaa sadii fi miilla sadii qabanis balbala oobdii sana irra gama kaaniin turan. ¹⁶ Golgaawwan naannoo oobdii sanaa hundi quncee talbaa kan qaldhifamee fo'ame irraa tolfaman. ¹⁷ Miillawwan utuboota sanaa naasii irraa tolfaman. Hokkoowwanii fi somaawwan utubootaa immoo meetii irraa tolfamanii fiixee utuboota sanaatti meetii uffisan. Utuboanni oobdii sanaa hundinuus somaawwan meetii qabu turan.

¹⁸ Golgaan balbala oobdii sanaa kirrii bifa cuquliisaa, dhiilgee, bildiimaa fi quncee talbaa kan qal'ifamee fo'ameen dha'amee irratti faayeffamee hojjetame tolfame. Innis dhundhuma digdama dalga dheeratee akkuma oobdichaa dhundhuma shan ol dheerata ture; ¹⁹ utubaa afurii fi miilla naasii afuris qaba ture. Hokkoowwanii fi somaawwan

isaanii meetii irraa tolfamanii fiixee isaanitti meetiin uffifamee ture. ²⁰ Qofoon dunkaana qulqulluutii fi qofoon naannoo oobdii sanaa hundi naasii irraa tolfaman.

Mi'a Dunkaanni Ittiin Hojjetame

²¹ Baay'inni mi'a dunkaanni qulqulluun jechuunis dunkaanni dhuga ba'umsaa ittiin hojjetamee kan Lewwonni ajaja Museetiin qajeelfama Iitaamaar ilma Aroon lubichaatiin galmeessan kanaa dha. ²² Bezali'eel ilmi Uuri jechuunis ilmi ilma Huur namichi gosa Yihuudaa sun waan WAAQAYYO Musee ajaje hunda hojjete. ²³ Oholiyyaab ilmi Ahiisaamaak namichi gosa Daan sunis isa wajjin ture; innis ogeessa hojii harkaa, ogeessa bifa baasuu fi kan kirrii bifa cuquliisaa, dhiilgee, bildiimaa fi quncee talbaa kan qal'ifamee fo'ameen waa faayessu ture. ²⁴ Baay'inni warqee aarsaa sochoofamuu kan hojii iddoo qulqulluu sanaa hunda irra oole walumaa galatti akka madaalii saqilii iddoo qulqulluutti taalaantii 29 fi saqilii 730 ture.

²⁵ Meetiin namoota waldaa keessaa lakkaa'aman irraa argames akka madaalii saqilii iddoo qulqulluutti taalaantii 100 fi saqilii 1,775 ture. ²⁶ Namoonni warra duraan lakkaa'amanii jiranitti dabalaman kanneen umuriin isaanii waggaa digdama yookaan hammanaa ol ta'e 603,550 turan. Isaan kunneenis akka madaalii iddoo qulqulluutti matuma mataan beekaa* tokko tokko jechuun walakkaa saqilii tokko tokkoo baasan. ²⁷ Meetii taalaantii 100 sanaan miillawwan iddoo qulqulluutii fi miillawwan golgaatu hojjetame; taalaantii 100 fi miilla 100 hojjetame; miilla tokkoof taalaantii tokkotu barbaachise jechuu dha. ²⁸ Isaanis saqilii 1,775 sana hokkoo utubaawwanii tolchuuf, fiixee utubaawwanii uffisuu fi somaawwan isaanii tolchuuf itti fayyadaman.

²⁹ Naasiin aarsaa sochoofamuus taalaantii 70 fi saqilii 2,400 ture. ³⁰ Isas miilla balbala dunkaana wal ga'ii, iddoo aarsaa kan naasii irraa hojjetame, gingilchaa isaa kan naasii irraa hojjetamee fi mi'a isaa hunda tolchuuf itti fayyadaman; ³¹ akkasumas miilli naannoo oobdii, miilli balbala oobdii, qofoowwan dunkaana qulqulluu hundii fi qofoowwan naannoo oobdii hundi naasii irraa hojjetaman.

39

Uffata Lubummaa

¹ Isaanis uffata kirrii bifa cuquliisaa, dhiilgee fi bildiimaan dha'ame kan iddoo qulqulluu keessa tajaajiluuf fayyadu hojjetan. Akkuma WAAQAYYO Musee ajajettis uffata qulqulluu Arooniif hojjetan.

Efuudii

39:2-7 kwf - Bau 28:6-14

² Isaanis warqee fi kirrii bifa cuquliisaa, dhiilgee, bildiimaa fi quncee talbaa kan qal'ifamee fo'ameen dirata hojjetan. ³ Isaanis kirrii bifa cuquliisaa, dhiilgee, bildiimaa fi quncee talbaa qal'aa isaa tolchuuf jedhanii warqee sana ogummaa harkaatiin tumanii akka baalaatti haphisanii fo'aa fo'aatti gargar kukkutan. ⁴ Isaanis akka inni walitti guduunfamuu danda'uuf funyoo gatiittii kan golee isaa lamaanitti hidhamee ture dirata sanaaf tolchan. ⁵ Sabbanni isaa kan ogummaadhaan dha'ames akkuma isaa dirata wajjin tokko ta'ee warqeedhaan, kirrii bifa cuquliisaa, dhiilgee, bildiimaa fi quncee talbaa kan qal'ifamee fo'ameen akkuma WAAQAYYO Musee ajajetti hojjetame.

⁶ Isaanis dhagaawwan sardooniksii qopheessanii marsaa faaya warqee naannoo isaatti tolchan; maqaa ilmaan Israa'elis akka chaappaatti isaan irratti soofan. ⁷ Ergasiis akka ilmaan Israa'eliif dhagaa yaadannoo ta'uuf akkuma WAAQAYYO Musee ajajetti dhagaawwan sana funyoo gatiittii dirata sanatti qabsiisan.

Kiisii Qomaa

39:8-21 kwf - Bau 28:15-28

⁸ Isaanis akkuma dirata sanaatti warqeedhaan, kirrii bifa cuquliisaa, dhiilgee, bildiimaa fi quncee talbaa kan qal'ifamee fo'ameen ogummaadhaan kiisii qomaa tolchan. ⁹ Kiisiin qomaa kun gama afraniinuu wal qixxee ture; innis walitti dachaa ta'ee dheerina taakkuu tokkoo fi bal'ina taakkuu tokkoo qaba ture. ¹⁰ Dhagaawwan gati jabeeyyiis toora afuriin irratti maxxansan. Toora jalqabaa irratti sardiyoan, tophaaziyoonii fi biiralee, ¹¹ toora lammaffaa irratti baluur, sanpeerii fi almaaz, ¹² toora sadaffaa irratti yaakinti, kelqedoonii fi yaakinti, ¹³ toora afuraffaa irratti biiralee, sardooniksii fi yaasphiidi maxxansan. Dhagaawwan kanneenittis marsaa faaya warqee tolchan. ¹⁴ Dhagaawwan kudha lama kanneen tokkoo tokkoo isaanii irratti maqaa

* 38:26 38:26 Beekaan tokko giraamii 7.

gosoota kudha lama keessaa maqaan tokko akkuma chaappaatti soofame ni turan; tokkoon tokkoon dhagaawwan sanaas maqaa ilmaan Israa'el tokko tokkoof dhaabate.

¹⁵ Kiisii qomaatiifis foncaa warqee qulqulluu akka funyootti fo'anii tolchan. ¹⁶ Isaanis marsaa faaya warqee lamaa fi qubeelaa warqee lama tolchanii qubeelaawwan sana rogawwan kiisii qomaa keessaa lamatti guduunfan. ¹⁷ Foncaa warqee sana lamaanis qubeelaawwan rogawwan kiisii qomaa sanatti guduunfan. ¹⁸ Mataa lamaan foncaa lamaan sanaa kaan immoo marsaawwan faayaa lamaanitti guduunfanii karaa fuula duraatiin foncaa dirataa kan gatiitti qabsiisan. ¹⁹ Qubeelaawwan warqee lama tolchanii rogawwan kiisii qomaa biraa kanneen karaa moggaa keessaatiin diratatti aananii jiran lamaanitti qabsiisan. ²⁰ Ergasiis qubeelaawwan warqee lama biraa tolchanii sabbata mudhiitti olitti garjalee funyoo gatiitti lamaan, fuula dirataa duraan jiru sanaatti qabsiisan. ²¹ Isaanis akka kiisiin qomaa dirata irraa hin sochooneef qubeelaawwan kiisii qomaa sana sabbata mudhiitiin walitti qabsiisanii akkuma WAAQAYYO Musee ajajetti funyoo bifa cuquliisaatiin qubeelaawwan diratatti qabsiisan.

Uffata Lubummaa Kan Biraa

39:22-31 kwf - Bau 28:31-43

²² Isaanis huccuu guutumaan guutuutti bifti isaa cuquliisa ta'e irraa wandaboo dirataa tolchan; ²³ walakkaa gubbaa wandaboo sanaattis afaan ittiin mataa seensifatan tolchan; akka inni hin tarsaaneefis qarqara afaan isaa irra waa naannessanii hodhan. ²⁴ Isaanis xiyyoo wandaboo sanaatti kirrii bifa cuquliisaa, dhiilgee, bildiimaa fi quncee talbaa kan qal'ifamee fo'ameen roomaanii hojjetan. ²⁵ Warqee qulqulluu irraas bilbila hojjetanii roomaanota gidduudhaan naannoo xiyyoo wandaboootti qabsiisan. ²⁶ Bilbillii fi roomaaniin sun akkuma WAAQAYYO Musee ajajetti tokko tokkoon wal keessa makamanii naannoo xiyyoo wandaboo tajaajilaaf uffatamu sanaatti qabsiifaman.

²⁷ Aroonii fi ilmaan isaatiif immoo kittaa quncee talbaa kan qal'ifamee fo'ameen dhoofsisanii hojjetan; ²⁸ akkasumas quncee talbaa qal'aa isaatiin marata mataa, quncee talbaatiin gonfoo, quncee talbaa kan qal'ifamee fo'ameen immoo uffata wayyaa jalaa hojjetaniif. ²⁹ Sabbannis quncee talbaa kan qal'ifamee fo'amee fi kirrii bifa cuquliisaa, dhiilgee fi bildiimaan faayeffame akkuma WAAQAYYO Musee ajajetti hojjetame.

³⁰ Isaanis warqee qulqulluu irraa faaya gonfoo qulqulluu tolchanii akkuma waan chaappaa irratti qirixamuutti:

Kan WAAQAYYOOF Qulqulleeffame,

jedhanii irratti barreessan. ³¹ Ergasiis faaya sana marata mataatiin wal qabsiisuuf jedhanii akkuma WAAQAYYO Musee ajajetti funyoo bifa cuquliisaa itti hidhan.

Museen Hojii Dunkaana Qulqulluu To'ate

39:32-41 kwf - Bau 35:10-19

³² Akkasiin hojii dunkaana qulqulluu kan dunkaana wal ga'ii hundi xumurame. Israa'eloonnis akkuma WAAQAYYO Musee ajajetti waan hunda hojjetan. ³³ Isaanis dunkaana qulqulluu sana Museetti fidan:

dunkaanaa fi mi'a isaa hunda, hokkoowwan isaa, tuggeewwan isaa, dagaleewwan isaa, utuboota isaatii fi miillawwan isaa;

³⁴ irra buusa kal'ee korbeessa hoolaa kan halluu diimaa cuuphame, irra buusa gogaa duugameetii fi golgaa da'eessu;

³⁵ taabota kakuu seeraa, danqaraa isaatii fi teessoo araaraa wajjin;

³⁶ minjaala mi'a isaa hundaa fi buddeena ilaalchaa wajjin;

³⁷ baattuu ibsaa kan warqee qulqulluu irraa hojjetame, ibsaawwan tarree galanii fi mi'a isaa hunda wajjin, zayitii ibsaa;

³⁸ iddoo aarsaa kan warqee irraa hojjetame, zayitii ittiin diban, ixaana urgaa'u, golgaa balbala dunkaanaa;

³⁹ iddoo aarsaa kan naasii irraa hojjetame, gingilchaa isaa kan naasii irraa hojjetame wajjin,

danqaraawwan isaatii fi mi'a isaa hunda, caabii miilla isaa wajjin;

⁴⁰ golgaawwan oobdii utubaawwanii fi miillawwan isaanii wajjin,

golgaa karra oobdii sanaa, funyoowwanii fi qofoowwan oobdii,

mi'a dunkaana qulqulluu kan dunkaana wal ga'ii hunda;

⁴¹ wayyaawwan fo'amani dha'aman kanneen yeroo iddoo qulqulluu keessa tajaajilan uffataman, jechuunis wayyaawwan Aroon lubichaaf qulqulleeffamanii fi wayyaawwan ilmaan isaa yeroo lubummaadhaan tajaajilanitti uffatan fe'a.

⁴² Israa'eloonnis akkuma WAAQAYYO Musee ajajetti hojii hunda hojjetan. ⁴³ Museenis hojii sana to'atee akkuma WAAQAYYO ajajetti hojjechuu isaanii arge. Museenis isaan eebbise.

40

Dunkaana Qulqulluu Dhaabuu

¹ WAAQAYYO Museedhaan akkana jedhe: ² "Guyyaa jalqaba ji'a jalqabaatti dunkaana qulqulluu jechuunis dunkaana wal ga'ii dhaabi. ³ Taabota kakuu seeraa isa keessa kaa'iitii taaboticha golgaadhaan da'eessi. ⁴ Minjaala ol galchiitii mi'a isaa tottolchi. Ergasiis baattuu ibsaa ol galchiitii ibsaa isaa irra dhaabi. ⁵ Iddoo aarsaa ixaanaa kan warqee irraa hojjetame fuula taabota kakuu seeraa dura dhaabiitii balbala dunkaana qulqulluutti immoo golgaa fannisi.

⁶ "Iddoo aarsaa qalma gubamuu sanas fuula balbala dunkaana qulqulluu jechuunis dunkaana wal ga'ii dura dhaabi; ⁷ gabatee itti dhiqatanis dunkaana wal ga'iitii fi iddoo aarsaa gidduu dhaabiitii bishaan itti naqi. ⁸ Naannoo isaattis oobdii hojjedhuutii balbala isaatti golgaa kaa'.

⁹ "Zayitii ittiin diban fuudhiitii dunkaana qulqulluu fi waan isa keessa jiru hunda dibi; dunkaanichaa fi mi'a isaa hunda qulqulleessi; innis ni qulqullaa'a. ¹⁰ Ergasiis iddoo aarsaa qalma gubamuutii fi mi'a isaa hunda dibi; iddoo aarsaa sana qulqulleessi; innis waan hunda caalaa qulqullaa'aa ta'a. ¹¹ Gabatee itti dhiqatanii fi miilla isaa dibiitii isaan qulqulleessi.

¹² "Aroonii fi ilmaan isaa gara balbala dunkaana wal ga'iitii fidiitii bishaaniin isaan dhiqi. ¹³ Ergasii Aroonitti wayyaa qulqulluu uffisi; akka inni lubummaadhaan na tajaajiluufis dibiitii isa qulqulleessi. ¹⁴ Ilmaan isaas fidiitii kittaa itti uffisi. ¹⁵ Akka isaan lubummaadhaan na tajaajilaniifis akkuma abbaa isaanii dibde sanatti isaan dibi; dibamuun isaanii kunis dhaloota dhufu hunda keessatti lubummaa itti fufu ta'a." ¹⁶ Museenis akkuma WAAQAYYO isa ajajetti waan hunda hojjetete.

¹⁷ Kanaafuu dunkaani qulqulluun sun waggaa lamaffaa keessa guyyaa jalqabaa kan ji'a jalqabaatti dhaabame. ¹⁸ Museen yeroo dunkaana qulqulluu sana dhaabetti miillawwan dunkaanichaa itti kaa'e; tuggeewwan isaa dhadhaabe; dagaleewwan isaa loose; utuboota isaa dhadhaabe. ¹⁹ Innis akkuma WAAQAYYO isa ajajetti dunkaana qulqulluu irraan dunkaana diriirsee dunkaana sanatti immoo irra buusa uffise.

²⁰ Dhuga ba'umsa sana fuudhee taabota keessa kaa'e; dangaraawwanis taabotatti hidhe; teessoo araaraa immoo taabota gubbaa kaa'e. ²¹ Museen akkuma WAAQAYYO isa ajajetti taabota sana dunkaana qulqulluutti ol galchee golgaa da'eessu fanniseef; taabota kakuu seeraa sanas da'eesse.

²² Museenis minjaala sana gama kaaba dunkaana qulqulluutiin dunkaana wal ga'ii keessa golgaa sanaan ala kaa'e. ²³ Akkuma WAAQAYYO isa ajajettis fuula WAAQAYYOO duratti buddeena achi irra kaa'e.

²⁴ Baattuu ibsaa immoo gama kibbaa dunkaana qulqulluutiin dunkaana wal ga'ii keessa fuulle minjaalaatiin kaa'e. ²⁵ Akkuma WAAQAYYO isa ajajettis ibsaawwan sana fuula WAAQAYYOO dura dhadhaabe.

²⁶ Museenis iddoo aarsaa kan warqee irraa hojjetame sana fuula golgaa duraan dunkaana wal ga'ii keessa dhaabe. ²⁷ Akkuma WAAQAYYO isa ajajettis ixaana urgaa'aa isa irratti aarse.

²⁸ Balbala dunkaana qulqulluu irrattis golgaa fannise. ²⁹ Inni akkuma WAAQAYYO isa ajajetti iddoo aarsaa qalma gubamuu sana balbala dunkaana qulqulluu kan dunkaana wal ga'ii bira dhaabee qalma gubamuu fi kennaa midhaanii isa irratti dhi'eesse.

³⁰ Gabatee sanas dunkaana wal ga'iitii fi iddoo aarsaa gidduu kaa'ee bishaan dhiqataa itti naqe; ³¹ Museen, Aroonii fi ilmaan Arooniis harka isaaniitii fi miilla isaanii dhiqachuuf itti fayyadamu turan. ³² Isaanis akkuma WAAQAYYO Musee ajajetti yeroo dunkaana wal ga'ii seenan yookaan yeroo iddoo aarsaatti dhi'aatan hunda ni dhiqatu turan.

³³ Museenis naannoo dunkaana qulqulluutii fi iddoo aarsaatti oobdii hojjetee balbala waltajjichaa irra golgaa dhaabe; akkasiin Museen hojii sana hojjetee fixe.

Ulfina WAAQAYYOO

³⁴ Ergasiis duumessi dunkaana wal ga'ii haguuge; ulfinni WAAQAYYOOOS dunkaana qulqulluu sana guute. ³⁵ Museenis sababii duumessi sun dunkaana wal ga'ii irra bu'ee fi sababii ulfinni WAAQAYYOO dunkaana qulqulluu guuteef dunkaana wal ga'ii seenuu hin dandeenye.

³⁶ Israa'eloonni karaa isaanii hunda keessatti yommuu duumessi dankaana qulqulluu irraa ka'u hunda ka'anii deemsa isaanii itti fufu turan. ³⁷ Yoo duumessi irraa ka'uu baate garuu hamma gaafa duumessi sun irraa ka'uutti hin deeman ture. ³⁸ Kanaafuu karaa isaanii hunda keessatti fuula saba Israa'el hundaa duratti guyyaa guyyaa duumessi WAAQAYYOO dankaana qulqulluu irra ture; halkan halkan immoo ibiddi duumessa sana keessa ture.

Seera Lewwotaa

Aarsaa Gubamu

¹ WAAQAYYOO Musee waamee dunkaana wal ga'ii keessaa akkana jedhee itti dubbate; ² "Israa'elootatti dubbadhu; akkanas jedhiin: 'Isin keessaa namni kam iyyuu yommuu horii keessaa WAAQAYYOOF kenna dhi'eessutti karra loonii yookaan bushaayee keessaa haa dhi'eessu.

³ "Yoo kennaan sun qalma gubamu kan karra loonii ta'e, namichi sun korma hir'ina hin qabne haa dhi'eessu. Akka aarsaan sun fuula WAAQAYYOO duratti fudhatama argatuufis balbala dunkaana wal ga'ii duratti haa dhi'eessu. ⁴ Namichis mataa horii aarsaa gubamuuf dhi'effamu sanaa irra harka isaa haa kaa'u; kunis araara isaaf buusuuf qooda isaa fudhatama argata. ⁵ Innis fuula WAAQAYYOO duratti korma haa qalu; ilmaan Aroon luboonni dhiiga sana fuudhaniid iddoo aarsaa kan balbala dunkaana wal ga'ii dura jirutti gama hundaan haa facaasan. ⁶ Innis aarsaa gubamu sana irraa gogaa baasee kutaa kutaatti murmura. ⁷ Ilmaan Aroon lubichaa immoo iddoo aarsaa irratti ibidda qabsiisani qoraan irra haa naqan. ⁸ Ergasii ilmaan Aroon luboonni kutaa murmurame, mataa fi cooma isaas qoraan iddoo aarsaa irratti boba'u irra tarree haa naqan. ⁹ Innis mi'a garaatii fi miilla qalma sanaa bishaaniin haa dhiqu; lubichis hunda isaa iddoo aarsaa irratti haa gubu. Kunis aarsaa gubamu kan ibiddaan dhi'aatuu fi kan urgaan isaa WAAQAYYOTTI toluu dha.

¹⁰ "Yoo aarsaan sun qalma gubamu kan bushaayee jechuunis hoolaa yookaan re'ee ta'e namichi dhi'eessu sun korma hir'ina hin qabne haa dhi'eessu. ¹¹ Innis gama kaaba iddoo aarsaatiin fuula WAAQAYYOO duratti haa qalu; ilmaan Aroon luboonni immoo gama hundaan dhiiga isaa iddoo aarsaatti haa facaasan. ¹² Namichi sunis kutaa kutaatti haa murmuru; lubichi immoo mataa fi cooma isaa qoraan iddoo aarsaa irratti boba'aa jiru irra tarree haa naqu. ¹³ Innis mi'a garaatii fi miilla qalma sanaa bishaaniin haa dhiqu; lubichi immoo hunda isaa fidee iddoo aarsaa irratti haa gubu. Kunis aarsaa gubamu kan ibiddaan dhi'aatuu fi kan urgaan isaa WAAQAYYOTTI toluu dha.

¹⁴ "Yoo aarsaan WAAQAYYOOF dhi'aatu sun qalma gubamu kan simbirrootaa ta'e namichi sun gugee yookaan gugee sookkee haa dhi'eessu. ¹⁵ Lubichi sun gara iddoo aarsaatti haa fidu; mataa isaas micciiree irraa haa kutu; ergasii immoo iddoo aarsaa irratti haa gubu; dhiigni isaa immoo iddoo aarsaa cinatti haa coccobu. ¹⁶ Mi'a garaa isaa baallee isaa wajjin baasee karaa ba'a biiftuutiin iddoo aarsaa cinatti lafa daaraan jirutti haa gatu. ¹⁷ Karaa qoochoo isaatiin haa baqaqsu; garuu guutumaan guutuutti gargar hin baasin; ergasii lubichi iddoo aarsaa irratti qoraan boba'aa jiru irratti haa gubu. Kunis aarsaa gubamu kan ibiddaan dhi'aatuu fi kan urgaan isaa WAAQAYYOTTI toluu dha.

2

Kenna Midhaanii

¹ "Namni tokko yommuu kenna midhaanii WAAQAYYOOF dhi'eessutti, kennaan isaa daakuu bullaa'aa haa ta'u. Innis zayitii itti haa naqu; ixaanas itti dabalee, ² ilmaan Aroon luboota sanatti haa fidu. Lubichis daakuu bullaa'aa zayitiin itti naqame sana irraa konyee tokko ixaana hunda wajjin haa fuudhu; kanas kutaa yaadannoo aarsaa gubamu kan ibiddaan dhi'effamu kan urgaan isaa WAAQAYYOTTI toluu godhee iddoo aarsaa irratti haa gubu. ³ Kennaan midhaanii hafe immoo kan Aroonii fi ilmaan isaa ti; kunis kutaa aarsaawwan hunda caalaa qulqulluu kan ibiddaan WAAQAYYOOF dhi'effamuu dha.

⁴ "Yeroo ati kenna midhaanii barbadaa ibiddaa irratti tolfamee dhi'eessitutti, kennaan sun daakuu bullaa'aa jechuunis maxinoo zayitiin itti makame yookaan bixxillee raacitii malee tolfamee zayitiin irra dibame haa ta'u. ⁵ Kennaan kee kenna midhaanii kan eelee irratti qopheeffame taanaan kennaan sun daakuu bullaa'aa hin bukaa'in kan zayitiin itti makame irraa haa ta'u. ⁶ Isa caccabsiitii gubbaa isaatti zayitii naqi; inni kenna midhaanii ti. ⁷ Kennaan midhaan keetii yoo eelee irratti qopheeffame, kennaan sun daakuu bullaa'aa fi zayitii irraa haa qopheeffamu. ⁸ Kenna midhaanii kan wantoota kanneen irraa qopheeffame WAAQAYYOOF fidi; kanas luba iddoo aarsaatti geessutti kenni. ⁹ Innis Kenna midhaanii sana irraa kutaa yaadannoo fuudhee kenna ibiddaan dhi'effamu kan urgaan isaa WAAQAYYOTTI toluu godhee iddoo aarsaa irratti

haa gubu. ¹⁰ Kennaan midhaanii hafe immoo kan Aroonii fi ilmaan isaa ti; kunis kutaa aarsaawwan hunda caalaa qulqulluu kan ibiddaan WAAQAYYOOF dhi'effamuu dha.

¹¹ “Kennaan midhaanii kan isin WAAQAYYOOF dhi'eessitan hundinuu utuu raacitiin itti hin makamin qopheeffamuu qaba; isin kenna ibiddaan WAAQAYYOOF dhi'effamu tokko keessatti raacitii yookaan damma tokko illee gubuu hin qabdaniitii. ¹² Kenna kanas akka mataa midhaaniitti WAAQAYYOOF dhi'eessu dandeessu; garuu akka kenna urgaa'aa tokkootti iddoo aarsaa irratti dhi'aachuu hin qabu. ¹³ Kenna midhaan keetii hunda soogiddaan mi'eessi; soogidda kakuu Waaqa keetii kenna midhaan keetii keessaa hin hambisin; kenna kee hundatti soogidda dabali.

¹⁴ “‘Ati yoo mataa midhaanii keessaa kenna midhaanii WAAQAYYOOF fidde, mataa midhaan asheetee ibiddaan waadamee sukkuumamee dhi'eessi. ¹⁵ Zayitii itti naqiitii ixaanas itti dabali; kun kenna midhaanii ti. ¹⁶ Lubni sunis kutaa yaadannoo midhaan sukkuumamee sanaatii fi zayitii sana ixaana hunda wajjin kenna ibiddaan WAAQAYYOOF dhi'effamu godhee haa gubu.

3

Aarsaa Nagaa

¹ “Kennaan nama tokkoo yoo aarsaa nagaa ta'e, namichi sunis karra loonii keessaa horii tokko, korma yookaan dhalaa yoo dhi'esse, inni horii hir'ina hin qabne fuula WAAQAYYOOF duratti haa dhi'eessu. ² Namichi sun mataa kenna isaa irra harka isaa haa kaa'u; balbala dunkaana wal ga'ii durattis haa qalu. Ergasii immoo ilmaan Aroon luboonni sun dhiiga horii sana iddoo aarsaa sanatti gama hundaan haa facaasan. ³ Innis aarsaa nagaa irraa aarsaa ibiddaan WAAQAYYOOF dhi'effamu haa fidu; kunis moora mi'a garaa haguuguu fi kan itti maxxanu hunda, ⁴ kalee lamaanii fi moora isaan irra jiru kan mudhiitti dhi'aatu, haguuggii tiruu kan namichi kaleedhaan walitti qabee baasu fa'a. ⁵ Ergasii ilmaan Aroon waan kana aarsaa ibiddaan dhi'effamu kan urgaan isaa WAAQAYYOTTI tolu godhanii iddoo aarsaa irratti aarsaa gubamu kan qoraan boba'u irra jiru irratti haa guban.

⁶ “‘Inni yoo bushaayee keessaa horii tokko akka aarsaa nagaatti WAAQAYYOOF dhi'esse, korma yookaan dhalaa hir'ina hin qabne haa dhi'eessu. ⁷ Inni yoo xobbaallaa hoolaa dhi'esse, fuula WAAQAYYOOF duratti haa dhi'eessu. ⁸ Namichi sunis mataa kenna isaa irra harka isaa kaa'ee balbala dunkaana wal ga'ii duratti haa qalu. Ergasii immoo ilmaan Aroon dhiiga horii sanaa iddoo aarsaa irratti gama hundaan haa facaasan. ⁹ Innis aarsaa nagaa sana irraa qalma ibiddaan WAAQAYYOOF dhi'effamu haa fidu; kunis cooma isaa, duboo isaa kan lafee dugdaatti dhi'effamee kutame hunda, moora mi'a garaa haguuguu fi kan itti maxxanu hunda, ¹⁰ kalee lamaanii fi moora isaan irra jiru kan mudhiitti dhi'aatu, haguuggii tiruu kan namichi kaleedhaan walitti qabee baasu fa'i. ¹¹ Lubni sunis waan kana nyaata godhee iddoo aarsaa irratti haa gubu; nyaanni kunis aarsaa ibiddaan WAAQAYYOOF dhi'effamuu dha.

¹² “‘Yoo kennaan isaa re'ee ta'e, inni fuula WAAQAYYOOF duratti haa dhi'eessu. ¹³ Namichi sun mataa re'ee sanaa irra harka isaa kaa'ee fuula dunkaana wal ga'ii duratti haa qalu. Ergasii immoo ilmaan Aroon dhiiga horii sanaa iddoo aarsaa irratti gama hundaan haa facaasan. ¹⁴ Innis waan dhi'eessu keessaa kenna kan kenna ibiddaan WAAQAYYOOF dhi'effamu godhee haa dhi'eessu; kunis moora mi'a garaa haguuguu fi kan itti maxxanu hunda, ¹⁵ kalee lamaanii fi moora isaan irra jiru kan mudhiitti dhi'aatu, haguuggii tiruu kan namichi kaleedhaan walitti qabee baasu fa'i. ¹⁶ Lubni sunis waan kana nyaata godhee iddoo aarsaa irratti haa gubu; kunis aarsaa urgaa'aa ibiddaan dhi'effamuu dha. Coomni hundinuu kan WAAQAYYOOF ti.

¹⁷ “‘Isin cooma tokko illee yookaan dhiiga tokko illee hin sooratinaa; wanni kun lafa isin jiraattan hundatti dhaloota dhufuuf jiru keessatti seera hin geeddaramnee dha.’”

4

Aarsaa Cubbuu

¹ WAAQAYYO akkana jedhee Museetti dubbate; ² “Israa'elootaan akkana jedhi; ‘Yoo namni utuu hin beekin waan WAAQAYYO dhowwe cabsuudhaan cubbuu hojjete.

³ “‘Lubichi dibame yoo cubbuu hojjete akkasiin sabatti cubbuu fide, inni cubbuu hojjete sanaaf dibicha hir'ina hin qabne tokko aarsaa cubbuu godhee WAAQAYYOOF haa dhi'eessu. ⁴ Innis dibicha sana balbala dunkaana wal ga'ii irratti fuula WAAQAYYOOF duratti haa dhi'eessu. Mataa dibicha sanaa irras harka isaa kaa'ee fuula WAAQAYYOOF duratti haa qalu. ⁵ Lubni dibame sun dhiiga dibicha sanaa irraa fuudhee dunkaana wal ga'iitti qabatee haa seenu. ⁶ Lubni sunis quba isaa dhiiga keessa cuphee dhiiga sana

irraa golgaa iddoo qulqulluu duratti yeroo torba fuula WAAQAYYOO duratti haa facaasu. ⁷ Ergasiis lubni sun dhiiga sana irraa gaanfawwan iddoo aarsaa ixaana urgaa'u kan dunkaana wal ga'ii keessa fuula WAAQAYYOO dura jiru sana irratti haa naqu. Dhiiga dibicha sanaa kan hafe hunda immoo balbala dunkaana wal ga'ii irratti miilla iddoo aarsaa gubamuu jalatti haa dhangalaasu. ⁸ Innis dibicha aarsaa cubbuutiif dhi'eeffame sana irraa cooma hunda haa baasu; kunis moora mi'a garaa haguuguu fi kan itti maxxanu hunda, ⁹ kalee lamaanii fi moora isaan irra jiru kan mudhiitti dhi'aatu, haguuggii tiruu kan inni kaleedhaan walitti qabee baasu fa'i; ¹⁰ waan kanas akkuma loon aarsaa nagaatiif dhi'eeffamu irraa moorri baafamu sanatti haa baasu. Lubnis iddoo aarsaa kan aarsaa gubamuu irratti haa gubu. ¹¹ Garuu gogaa dibicha sanaatii fi foon isaa hunda, mataa fi miilla isaa, mi'a garaatii fi cumaa isaa, ¹² jechuunis waan dibicha sanaa kan hafe hunda qubata keessaa gad baasee gara iddoo seeraan qulqulluu ta'e kan daaraan itti gatamuutti haa geessu; daaraa tuulame irrattis ibidda qoraaniitiin haa gubu.

¹³ " 'Yoo waldaan Israa'el hundi utuu hin beekin cubbamee waan ajaja WAAQAYYOO keessatti dhowwame hojete waldaan sun waa'ee waan sanaa beekuu baatu illee yakka qabeessa ta'a. ¹⁴ Yommuu cubbuun isaan hojjetan beekamuutti waldaan sun dibicha tokko aarsaa cubbuu godhee dunkaana wal ga'ii duratti fidee haa dhi'eessu. ¹⁵ Maanguddoonni waldaa fuula WAAQAYYOO duratti mataa dibicha sanaa irra harka isaanii haa kaa'an; dibichi sunis fuula WAAQAYYOO duratti haa qalamu. ¹⁶ Lubni dibame sun dhiiga dibicha sanaa irraa fuudhee gara dunkaana wal ga'iitti haa fidu. ¹⁷ Innis quba isaa dhiiga keessa cuuphee golgaa duratti yeroo torba fuula WAAQAYYOO duratti haa facaasu. ¹⁸ Lubni sunis dhiiga sana irraa gaanfawwan iddoo aarsaa kan dunkaana wal ga'ii keessa fuula WAAQAYYOO dura jiru sana irratti haa naqu. Dhiiga dibicha sanaa kan hafe hunda immoo balbala dunkaana wal ga'ii irratti miilla iddoo aarsaa gubamuu jalatti haa dhangalaasu. ¹⁹ Inni cooma hunda irraa baasee iddoo aarsaa irratti haa gubu; ²⁰ dibicha kanas akkuma dibicha aarsaa cubbuutiif dhi'eeffame sana godhe haa godhu; lubnis haaluma kanaan araara isaaniif buusa; isaanis dhiifama argatu. ²¹ Innis ergasii dibicha sana qubata keessaa gad baasee akkuma dibicha jalqabaa gube sana haa gubu; kunis aarsaa cubbuu waldaa ti.

²² " 'Bulchaan tokko yoo utuu hin beekin cubbuu hojjetee waan ajaja WAAQAYYOO Waaqa isaa keessatti dhowwame hojete inni yakka qabeessa ta'a. ²³ Inni yommuu cubbuu hojete sana beeketti korma re'ee kan hir'ina hin qabne tokko aarsaa ofii isaatiif haa fidu. ²⁴ Mataa re'ee sanaa irra harka isaa kaa'ee iddoo aarsaan gubamu itti qalamutti fuula WAAQAYYOO duratti haa qalu; kunis aarsaa cubbuu ti. ²⁵ Lubni sunis ergasii dhiiga aarsaa cubbuutiif dhi'eeffame irraa quba isaatiin fuudhee gaanfa iddoo aarsaa kan aarsaan gubamu irratti dhi'eeffamutti haa naqu; dhiiga hafe immoo miilla iddoo aarsaa jalatti haa dhangalaasu. ²⁶ Innis akkuma cooma aarsaa nagaatiif dhi'eeffame gube sana moora hunda iddoo aarsaa irratti haa gubu; lubichi haala kanaan namichaaf araara cubbuu buusa; innis dhiifama argata.

²⁷ " 'Saba keessaa namni tokko yoo utuu hin beekin waan ajaja WAAQAYYOO keessatti dhowwame keessaa tokko illee cabsuudhaan cubbuu hojete inni yakka qabeessa ta'a. ²⁸ Inni yommuu akka cubbuu hojete beeketti cubbuu hojete sanaaf re'ee dhaltuu hir'ina hin qabne tokko aarsaa ofii isaatiif haa fidu. ²⁹ Mataa re'ee aarsaa cubbuutiif dhi'eeffame sanaa irras harka isaa kaa'ee iddoo aarsaa gubamuutti haa qalu. ³⁰ Lubni sunis ergasii dhiiga sana irraa quba isaatiin fuudhee gaanfa iddoo aarsaa kan aarsaan gubamu irratti dhi'eeffamutti haa naqu; dhiiga hafe hunda immoo miilla iddoo aarsaa jalatti haa dhangalaasu. ³¹ Akkuma moorri itti aarsaa nagaa irraa baafamutti inni moora hunda haa baasu; lubni immoo aarsaa urgaan isaa WAAQAYYOTTI tolu godhee iddoo aarsaa irratti haa gubu. Akkasiinis lubni araara buusaaf; innis dhiifama argata.

³² " 'Inni yoo hoolaa tokko aarsaa cubbuu ofii isaatiif fide, dhaltuu hir'ina hin qabne haa fidu. ³³ Mataa hoolaa sanaa irras harka isaa kaa'ee iddoo aarsaan gubamu itti qalamutti aarsaa cubbuutiif haa qalu. ³⁴ Lubni sunis ergasii dhiiga aarsaa cubbuutiif dhi'eeffame irraa quba isaatiin fuudhee gaanfa iddoo aarsaa kan aarsaa gubamuutti haa naqu; dhiiga hafe hunda immoo miilla iddoo aarsaa jalatti haa dhangalaasu. ³⁵ Akkuma moorri itti hoolaa aarsaa nagaatiif dhi'eeffamu irraa baafamutti inni moora hunda haa baasu; lubni immoo aarsaa ibiddaan WAAQAYYOOFF dhi'eeffamu gubbaatti iddoo aarsaa irratti haa gubu. Lubnis akkasiin cubbuu namichi hojjeteeff araara buusaaf; innis dhiifama argata.

5

¹ “‘Namni tokko yoo waan nama kakachiisu dhaga’ee waa’ee waan arge yookaan beeku sanaa dhugaa ba’uu diduudhaan cubbuu hojjete inni itti gaafatama.

² “‘Yookaan namni tokko yoo waan akka seeraatti xuraa’aa ta’e jechuunis raqa bineensa xuraa’aa yookaan horii xuraa’aa yookaan uumamawwan xuraa’oo kanneen lafa irra munyuuqanii utuu hin beekin tuge inni xuraa’eera; yakka qabeessas ta’a. ³ Yookaan inni yoo xuraa’ummaa namaa jechuunis waan isa xureessu kam iyyuu utuu hin beekin tuge, yommuu waan sana beeketti yakka qabeessa ta’a. ⁴ Yookaan namni yoo utuu itti hin yaadin waan gaarii yookaan hamaa gochuuf kakate, waa’ee waan utuu itti hin yaadin kakate sanaa beekuu baatu illee maalumaafuu yommuu waan sana beeketti inni yakka qabeessa ta’a. ⁵ Inni yoo karaa kanneen keessaa tokkoon iyyuu yakka qabeessa ta’e karaa kamiin akka hojjete haa himatu; ⁶ adaba cubbuu hojjete sanaatiifis akka aarsaa cubbuu isaaf taatuuf bushaayee keessaa hoolaa yookaan re’ee dhaltuu WAAQAYYOOF haa fidu; lubnis cubbuu namichaatiif aarsaa araaraa haa dhi’eessu.

⁷ “‘Namichi sun cubbuu hojjeteef hoolaa dhi’eessuutti harka qalleessa yoo ta’e adabbii cubbuu isaatiif gugee lama yookaan gugee sosookkee lama, tokko aarsaa cubbuutiif tokko immoo aarsaa gubamuuf WAAQAYYOOF haa fidu. ⁸ Lubattis isaan haa fidu; lubni immoo kan aarsaa cubbuutiif taatu duraan dursee haa dhi’eessu. Innis mataa ishee micciiree morma ishee haa cabsu; garuu irraa hin kutin. ⁹ Dhiiga aarsaa cubbuu sana irraa fuudhee cinaacha iddoo aarsaatti haa facaasu; dhiigni hafe immoo miilla iddoo aarsaa jalatti haa dhangalaafamu; kun aarsaa cubbuu ti. ¹⁰ Ergasiis lubichi akkuma ajajametti kan lammaffaa sana aarsaa gubamu godhee cubbuu namichi hojjeteef aarsaa araaraa haa dhi’eessu; innis dhiifama argata.

¹¹ “‘Namichi sun yoo gugee lama yookaan gugee sosookkee lama dhi’eessuutti harka qalleessa ta’e inni cubbuu hojjete sanaaf daakuu bullaa’aa iifi tokkoo keessaa harka kurnaffaa aarsaa cubbuutiif haa dhi’eessu. Sababii wanni kun aarsaa cubbuu ta’eef namichi zayitii yookaan isaxana itti hin dabaln. ¹² Innis lubatti haa fidu; lubichi immoo konyee tokko irraa fuudhee akka kutaa yaadannoo tokkootti aarsaa ibiddaan WAAQAYYOOF dhi’effame gubbaatti iddoo aarsaa irratti haa gubu; kun aarsaa cubbuu ti. ¹³ Lubichis haala kanaan cubbuu namichi hojjeteef araara buusa; innis dhiifama argata. Aarsaan hafe immoo akkuma aarsaa midhaaniitti kan lubichaa ta’a.”

Aarsaa Yakkaa

¹⁴ WAAQAYYO Museedhaan akkana jedhe; ¹⁵ “‘Namni yoo seera cabsee utuu hin beekin waan WAAQAYYOOF qulqulleeffame kam iyyutti cubbuu hojjete inni adabbii cubbuu isaatiif bushaayee keessaa korbeessa hoolaa kan hir’ina hin qabne kan gatiin isaa akka saqilii iddoo qulqulluutti meetiidhaan tilmaamame tokko aarsaa yakkaa godhee WAAQAYYOOF haa fidu; kun aarsaa yakkaa ti. ¹⁶ Namichi sunis waan wantoota qulqulluu irraa hir’ise sana iddoo haa buusu; gatii waan sanaa illee harka shan keessaa harka tokko itti dabalee hunda isaa lubatti haa kennu; lubni sunis korbeessa hoolaa aarsaa yakkaatiif dhi’effame sanaa araara buusaaf; innis dhiifama argata.

¹⁷ “‘Namni yoo cubbuu hojjete waan ajajawwan WAAQAYYO keessatti dhowwame hojjete, inni yoo beekuu baate illee yakka qabeessa ta’eera; itti gaafatamas. ¹⁸ Innis akka tilmaama keetiitii bushaayee keessaa korbeessa hoolaa hir’ina hin qabne tokko aarsaa yakkaa godhee lubatti haa fidu. Lubichis haaluma kanaan yakka namichi utuu hin beekin hojjeteef araara buusa; innis dhiifama argata. ¹⁹ Kun aarsaa yakkaa ti; namichi sun WAAQAYYOTTI yakka hojjeteera.”

6

¹ WAAQAYYO Museedhaan akkana jedhe; ² “‘Namni yoo waa’ee waan imaanaa isatti kennamee yookaan waan isa bira kaa’amee yookaan waan hatame tokkoo ollaa isaa gowwoomsuudhaan yookaan saamuudhaan cubbuu hojjete WAAQAYYOOF amanamuu baate, ³ yookaan yoo qabeenya bade argee waa’ee isaa soba dubbate yookaan yoo sobaan kakate yookaan yoo cubbuu akkasii kan namoonni hojjetan kam iyyuu hojjete, ⁴ yoo akkasiin cubbuu hojjete yakka qabeessa ta’e inni waan hate yookaan waan humnaan saame yookaan waan imaanaa isatti kenname yookaan waan bade kan lafaa arge sana ⁵ yookaan waan sobaan itti kakate hunda haa deebisu. Inni waan sana guutumaatti iddoo haa buusu; gatii waan sanaas harka shan keessaa harka tokko itti dabalee hunda isaa guyyuma aarsaa yakka ofii isaa dhi’eeffatutti abbaa qabeenya sanaatiif haa kennu. ⁶ Ergasiis inni bushaayee keessaa korbeessa hoolaa hir’ina hin qabne kan gatiin isaa gatii adabbii yakka tokkootti tilmaamamu aarsaa yakka ofii isaa kan WAAQAYYOOF dhi’eeffamu godhee lubatti haa fidu. ⁷ Lubichi haaluma kanaan fuula

WAAQAYYOO duratti araara isaaf buusa; innis wantoota kanneen keessaa waan hojjete kan yakka qabeessa isa godhe kamiif iyyuu dhiifama argata.”

Aarsaa Gubamu

⁸ WAAQAYYO Museedhaan akkana jedhe; ⁹ “Aroonii fi ilmaan isaatiif ajaja kana kenni: ‘Seerri aarsaa gubamuu kanaa dha; aarsaan gubamu hamma lafti bariitutti halkan guutuu ibidda iddoo aarsaa irra jiru gubbaa haa turu; ibiddis ittuma fufee iddoo aarsaa irratti haa boba’u. ¹⁰ Lubni sunis uffata isaa kan quncee talbaa irraa hojjetamee fi uffata wayyaa jalaan dhagna isaatti aanu kan quncee talbaa irraa hojjetame haa uffatu; ergasiis daaraa aarsaa gubamuu kan ibiddi iddoo aarsaa irratti gubee fixe sana haree iddoo aarsaa cina haa kaa’u. ¹¹ Ergasiis uffata sana of irraa baasee kan biraa haa uffatu; daaraa sanas baatee qubata keessaa gad baasee lafa akka seeraatti qulqulluu ta’etti haa geessu. ¹² Ibiddi iddoo aarsaa irra jiru yeroo hunda boba’uu qaba; yoom iyyuus hin dhaamin. Lubichi ganama ganama ibidda sanatti qoraan haa naqu; aarsaa gubamu ibidda irratti haa qopheessu; kana irrattis cooma aarsaa nagaa haa gubu. ¹³ Iddoo aarsaa irratti ibiddi yeroo hunda haa boba’u; gonkumaas hin dhaamin.

Kennaa Midhaanii

¹⁴ “Seerri kennaa midhaanii kanaa dha: Ilmaan Aroon waan kana fuullee iddoo aarsaatti fuula WAAQAYYOO duratti haa dhi’eessan. ¹⁵ Lubnis daakuu bullaa’aa konyee tokkoo fi zayitii, ixaana kennaa midhaanii irra jiru hunda wajjin fuudhee urgaa WAAQAYYOTTI tolu godhee akka kutaa yaadannooti iddoo aarsaa irratti haa gubu. ¹⁶ Aroonii fi ilmaan isaa immoo waan irraa hafe haa nyaatan; kun maxinoo iddoo qulqulluutti nyaatamuu qabuu dha; isaanis oobdii dunkaana wal ga’ii keessatti haa nyaatan. ¹⁷ Wanni kun raacitiidhaan tolfamuu hin qabu; ani kennaa ibiddaan naa dhi’eeffamu keessaa akka qooda isaaniitti waan kana isaaniif kenneera. Kunis akkuma aarsaa cubbuutii fi aarsaa yakkaatti waan hunda caalaa qulqulluu dha. ¹⁸ Sanyiin Aroon kan dhiira ta’e kam iyyuu waan kana nyaachuu danda’a. Kunis qooda kennaa ibiddaan WAAQAYYOO dhi’eeffamu keessaa dhaloota keessan kan dhufutti bara baraan Arooniif kennamee dha; namni isa tuqu hundinuu ni qulqullaa’a.”

¹⁹ WAAQAYYO Museedhaan akkana jedhe; ²⁰ “Kennaan Aroonii fi ilmaan isaa guyyaa inni dibamutti WAAQAYYOO dhi’eessuu qaban kanaa dha: Daakuu bullaa’aa iifii* kudhan keessaa tokkoo jechuunis walakkaa isaa ganama, walakkaa immoo galgala yeroo hunda kennaa midhaanii godhanii haa dhi’eessan. ²¹ Kunis zayitiidhaan eelee irratti haa tolfamu; akka gaariitti walitti makiitii kennaa midhaan sanaa caccabsii urgaa WAAQAYYOTTI tolu godhii dhi’eessi. ²² Ilmi isaa kan luba ta’ee dibamee iddoo isaa bu’u waan kana haa qopheessu; kennaan kun sababii qooda WAAQAYYOO kan bara baraa ta’eef guutummaatti haa gubamu. ²³ Kennaan midhaanii kan lubichi dhi’eessu hundi guutummaatti haa gubamu; aarsaan sun nyaatamuu hin qabuutii.”

Aarsaa Cubbuu

²⁴ WAAQAYYO Museedhaan akkana jedhe; ²⁵ “Aroonii fi ilmaan isaatiin akkana jedhi: ‘Seerri aarsaan cubbuu ittiin dhi’eeffamu kanaa dha: Aarsaan cubbuu iddoo aarsaan gubamu itti qalamutti fuula WAAQAYYOO duratti haa qalamu; aarsaan kun waan hunda caalaa qulqulluu dha. ²⁶ Lubni isa dhi’eessu aarsaa kana haa nyaatu; kunis oobdii dunkaana wal ga’ii keessatti iddoo qulqulluutti nyaatamuu qaba. ²⁷ Namni foon sana tuqu kam iyyuu ni qulqullaa’a; yoo dhiigni isaa tokko iyyuu uffatatti faca’ee uffata sana iddoo qulqulluutti miicuu qabda. ²⁸ Okkoteen suphee kan foon sun itti affeelame haa cabsamu; yoo okkotee naasiitti affeelame garuu haqamee bishaaniin haa dhiqamu. ²⁹ Dhiirri gosa lubootaa ta’e kam iyyuu foon kana nyaachuu ni danda’a; kun waan hunda caalaa qulqulluu dha. ³⁰ Garuu aarsaan cubbuu kan araara buusuudhaaf dhiigni isaa gara dunkaana wal ga’ii Iddoo Qulqulluutti fidamu kam iyyuu nyaatamuu hin qabu; inni gubamuu qaba.

7

Aarsaa Yakkaa

¹ “Seerri aarsaa yakkaa kan waan hunda caalaa qulqulluu ta’ee sanaa kana: ² Aarsaan yakkaa iddoo aarsaan gubamu itti qalamutti haa qalamu; dhiigni isaa immoo gama hundaan iddoo aarsaatti facaafamuu qaba. ³ Moorri isaa hundinuu aarsaa ta’ee dhi’eeffamuu qaba; kunis duboo fi moora mi’a garaa haguugu, ⁴ kalee lamaanii fi moora isaan irra jiru kan mudhiitti dhi’aatu, haguuggiin tiruu kan kaleewwan wajjin ba’u

* 6:20 6:20 Iifin tokko kiiloo giraamii 22.

wal faana haa dhi'aatu. ⁵ Lubichis aarsaa ibiddaan WAAQAYYOOF dhi'aatu godhee iddoo aarsaa irratti haa gubu; kun aarsaa yakkaa ti. ⁶ Dhiirri gosa lubootaa ta'e kam iyyuu foon kana nyaachuu danda'a; kun garuu iddoo qulqulluutti nyaatamuu qaba; aarsaan kun waan hunda caalaa qulqulluu dha.

⁷ "Seerri aarsaan cubbuutii fi aarsaan yakkaa ittiin dhi'effamu tokkuma; aarsaawwan kunneenis kan luba ittiin araara buusuu ta'u. ⁸ Lubni namaaf jedhee aarsaa gubamu dhi'eessu tokko gogaa aarsaa gubamu sanaa ofii isaatiif haa fudhatu. ⁹ Kennaan midhaanii kan barbadaa ibiddaa irratti yookaan eelee irratti yookaan beddee irratti bilchaate kam iyyuu luba isa dhi'eessuuf haa kennamu; ¹⁰ kennaan midhaanii kam iyyuu jechuunis kan zayitiin itti makame yookaan goggogaan ilmaan Aroon hundaaf wal qixxee haa kennamu.

Aarsaa Nagaa

¹¹ "Seerri aarsaa nagaa kan namni tokko ittiin WAAQAYYOOF dhi'eessuu qabu kana.

¹² "Inni yoo galata galchuuf aarsaa dhi'effate, aarsaa galataa kana wajjin maxinoo zayitiin itti makame, bixxillee raacitii malee tolfamee zayitiin irra dibamee fi maxinoo daakuu bullaa'aa kan akka gaarii sukkuumamee zayitiin itti makame haa dhi'eessu. ¹³ Aarsaa nagaa kan galataaf dhi'effatu wajjinis kenna maxinoo raacitii qabu haa dhi'eessu. ¹⁴ Aarsaa hunda keessaa tokko tokko fuudhee akka kenna WAAQAYYOOF dhi'effamu tokkootti haa fidu; kunis luba dhiiga aarsaa nagaa facaasu sanaaf haa kennamu. ¹⁵ Foon aarsaa nagaa kan galataaf dhi'effamu gaafama dhi'aate sana nyaatamee dhumuu qaba; wanni tokko iyyuu isa irraa hafee buluu hin qabu.

¹⁶ "Yoo aarsaan isaa wareega guuttachuuf yookaan aarsaa fedhiidhaan dhi'aatu ta'e, aarsaan sun guyyama inni dhi'eesse nyaatamuu qaba; kan hafe garuu guyyaa itti aanu nyaatamuu danda'a. ¹⁷ Foon aarsaa sana irraa hamma guyyaa sadaffaatti hafe gubamuu qaba. ¹⁸ Foon aarsaa nagaa sana irraa yoo wanni tokko iyyuu guyyaa sadaffaatti nyaatame aarsaan sun hin fudhatamu. Kun sababii xuraa'aa ta'eef nama dhi'eesse sanaaf fudhatama hin qabaatu. Namni foon sana irraa nyaatu itti gaafatama.

¹⁹ "Foon waan akka seeraatti xuraa'aa ta'e kam iyyuu tuqe hin nyaatamin; foon sun gubamuu qaba. Foon kaan garuu namni akka seeraatti qulqulluu ta'e kam iyyuu nyaachuu danda'a. ²⁰ Garuu namni xuraa'aan yoo foon aarsaa nagaa kan WAAQAYYOOF dhi'effame nyaate, inni saba ofii keessaa haa balleffamu. ²¹ Namni yoo waan xuraa'aa jechuunis xuraa'ummaa namaa yookaan horii xuraa'aa yookaan waan xuraa'aa kam iyyuu, waan jibbisiisaa tuqee ergasii immoo foon aarsaa nagaa kan WAAQAYYOOF dhi'aate keessaa nyaate namni sun saba ofii keessaa haa balleffamu."

Moorrii fi Dhiigni Hin Sooratamu

²² WAAQAYYO Museedhaan akkana jedhe; ²³ "Israa'elootaan akkana jedhi; 'Moora loonii yookaan kan hoolaa yookaan kan re'ee kamii iyyuu hin nyaatinaa. ²⁴ Coomni horii du'ee argamee yookaan bineensi ajjeesee waan biraaf haa oolu; isin garuu isa nyaachuu hin qabdan. ²⁵ Namni horii ibiddaan WAAQAYYOOF dhi'effame irraa cooma isaa nyaate kam iyyuu saba ofii isaa keessaa haa balleffamu. ²⁶ Isin lafa jiraattan hundatti dhiiga simbirroo yookaan horii gosa kamii iyyuu hin nyaatinaa. ²⁷ Namni kam iyyuu yoo dhiiga nyaate saba ofii isaa keessaa haa balleffamu."

Qooda Lubootaa

²⁸ WAAQAYYO Museedhaan akkana jedhe; ²⁹ "Israa'elootaan akkana jedhi; 'Namni aarsaa nagaa WAAQAYYOOF dhi'eessu kanuma irraa fuudhee aarsaa ofii isaa WAAQAYYOOF haa dhi'eessu. ³⁰ Aarsaa ibiddaan WAAQAYYOOF dhi'effamus harkuma isaatiin haa fidu; cooma sana handaraafa wajjin haa fidu; handaraafas aarsaa sochoofamee godhee fuula WAAQAYYO duratti haa sochoosu. ³¹ Lubichi cooma sana iddoo aarsaa irratti haa gubu. Handaraafni isaa garuu Aroonii fi ilmaan isaatiif haa kennamu. ³² Tafa mirgaa kan aarsaa nagaa keessanii kenna godhaatii lubaaf kenna. ³³ Ilmi Aroon kan dhiigaa fi cooma aarsaa nagaa dhi'eessu sun tafa mirgaa qooda ofii isaa godhee haa fudhatu. ³⁴ Ani aarsaa nagaa kan Israa'elootaa irraa handaraafa sochoofamee fi tafa dhi'aate sana fudhadheera; kanas akka qooda isaan bara baraan Israa'elootaa irraa argataniitti Aroon lubichaa fi ilmaan isaatii kenneera."

³⁵ Gaafa isaan lubummaadhaan WAAQAYYOON tajaajiluuf dhi'aatanitti aarsaa ibiddaan WAAQAYYOOF dhi'aate irraa qoodni Aroonii fi ilmaan isaatiif ramadame kana. ³⁶ Guyyaa isaan dibamanitti, akka Israa'eloonni qooda isaanii godhanii bara baraan dhaloota dhufutti waan kana isaanii kennan WAAQAYYO ajajeera.

³⁷ Egaa seerri dhi'eessuu aarsaa gubamuu, kenna midhaanii, aarsaa cubbuu, aarsaa yakkaa, seerri dibamuu lubummaatii fi aarsaa nagaa kanaa dha; ³⁸ kunis ajaja

WAAQAYYO gaafa akka Israa'eloonni Gammoojjii Siinaatti kennaa isaanii WAAQAYYOOF dhi'eessan Gaara Siinaa irratti Museedhaaf kennee dha.

8

Muudamuu Arooniiti fi Ilmaan Isaa

8:1-36 kwf - Bau 29:1-37

¹ WAAQAYYO Museedhaan akkana jedhe; ² "Aroonii fi ilmaan isaa, uffata isaanii, zayitii ittiin diban, dibicha aarsaa cubbuutiif dhi'eeffamu, korbeeyyii hoolaa lamaa fi gundoo maxinoo baatu fidi; ³ waldaa hundas balbala dunkaana wal ga'ii duratti walitti qabi." ⁴ Museenis akkuma WAAQAYYO isa ajaje sana godhe; waldaan hundis balbala dunkaana wal ga'ii duratti walitti qabame.

⁵ Museenis waldaa sanaan, "Wanni WAAQAYYO akka hojjetamu ajaje kana" jedhe. ⁶ Ergasiis Museen Aroonii fi ilmaan isaa gara fuula duraatti fidee bishaaniin isaan dhiqe. ⁷ Innis Aroonitti kittaa uffisee sabbataan hidheef; wandaboos itti uffisee isa irratti dirata dabaleef; dirata sanas sabbata ogummaadhaan hojjetameen hidheef. ⁸ Kiisii qomaa itti kaa'ee kiisii sana keessa immoo Uriimii fi Tumiimii kaa'e. ⁹ Museenis akkuma WAAQAYYO isa ajajetti mataa Aroonitti marata mare; marata sana irrattis karaa fuula duraatiin faaya warqee kan gonfoo qulqulluu tolche.

¹⁰ Ergasii Museen zayitii ittiin diban fuudhee dunkaana qulqulluu fi waan achi keessa jiru hunda dibee qulqulleesse. ¹¹ Zayitii sana irraas fuudhee iddoo aarsaa irratti yeroo torba facaase; akka isaan qulqulleessuufis iddoo aarsaati fi mi'a isaa hunda akkasumas gabatee itti dhiqatan miilla isaa wajjin zayitii dibe. ¹² Zayitii ittiin diban irraas fuudhee mataa Aroon irratti dhangalaase; isa qulqulleessuufis isa dibe. ¹³ Museenis akkuma WAAQAYYO isa ajajetti ilmaan Aroon gara fuula duraatti baasee kittaa itti uffise; sabbata hidheefii gonfoo mataa isaaniitti kaa'e.

¹⁴ Ergasii immoo aarsaa cubbuutiif dibicha dhi'eesse; Aroonii fi ilmaan isaas mataa dibicha sanaa irra harka isaanii kaa'an. ¹⁵ Museenis dibicha sana qalee dhiiga fuudhee iddoo aarsaa qulqulleessuuf quba isaatiin gaanfa iddoo aarsaa hunda dibe; dhiiga hafe immoo miilla iddoo aarsaa jalatti gad nage. Araara isaaf buusuufis iddoo aarsaa sana qulqulleesse. ¹⁶ Akkasumas moora naannoo mi'a garaa jiru, haguuggii tiruu, kalee lamaani fi moora isaanii fuudhee iddoo aarsaa irratti gube. ¹⁷ Dibicha sana, gogaa isaa, foon isaatii fi cumaa isaa garuu akkuma WAAQAYYO isa ajajetti qubata keessaa gad baasee gube.

¹⁸ Ergasii immoo aarsaa gubamuuf korbeessa hoolaa dhi'eesse; Aroonii fi ilmaan isaas mataa hoolaa sanaa irra harka isaanii kaa'an. ¹⁹ Museen immoo korbeessa hoolaa sana qalee dhiiga isaa iddoo aarsaatti gama hundaan facaase. ²⁰ Korbeessa hoolaa sana gargar kukkutee mataa, bu'aa fi cooma isaa gube. ²¹ Innis mi'a garaatii fi luka bishaaniin dhiqee korbeessa hoolaa sana guutuu iddoo aarsaa irratti gube. Kunis aarsaa gubamu, foolii namatti tolu, aarsaa nyaataa akkuma WAAQAYYO Musee ajajetti WAAQAYYOOF dhi'eeffamee dha.

²² Innis ergasii korbeessa hoolaa kaan jechuunis hoolaa ittiin muudan sana dhi'eesse; Aroonii fi ilmaan isaa immoo mataa hoolaa sanaa irra harka isaanii kaa'an. ²³ Museenis hoolaa sana qalee dhiiga isaa irraa fuudhee fiixee gurra Aroon mirgaa, quba abbuudduu harka isaa mirgaatii fi quba abbuudduu miilla isaa mirgaa dibe. ²⁴ Ilmaan Aroonis gara fuula duraatti baasee dhiiga fuudhee fiixee gurra isaanii mirgaa, quba abbuudduu harka isaanii mirgaatii fi quba abbuudduu miilla isaanii mirgaa ittiin tuqe. Ergasiis dhiiga sana iddoo aarsaatti gama hundaan facaase. ²⁵ Innis cooma, duboo, moora naannoo mi'a garaa jiru, haguuggii tiruu, kalee lamaani fi moora isaanii, tafa mirgaa fuudhe. ²⁶ Ergasiis gundoo maxinoo baatu kan fuula WAAQAYYO dura ture sana irraa maxinoo tokko, maxinoo zayitiidhaan tolfame tokkoo fi bixxillee tokko fuudhe; waan kanas cooma sanaa fi tafa mirgaa irra kaa'e. ²⁷ Innis wantoota kanneen hunda harka Aroonii fi harka ilmaan isaa keessa kaa'ee aarsaa sochoofamu godhee fuula WAAQAYYO duratti sochoose. ²⁸ Museenis wantoota kanneen harka isaaniitti fuudhee aarsaa ittiin luba ta'an kan ibiddaan WAAQAYYOOF dhi'eeffamu, foolii namatti tolu, aarsaa nyaataa godhee iddoo aarsaa irratti aarsaa gubamu gubbaatti gube. ²⁹ Museenis handaraafa fuudhee aarsaa sochoofamu godhee fuula WAAQAYYO duratti sochoose; kunis akkuma WAAQAYYO isa ajajetti qooda Museen korbeessa hoolaa ittiin luba ta'an irraa argatuu dha.

³⁰ Ergasiis Museen zayitii ittiin dibanii fi dhiiga iddoo aarsaa irra jiru irraa fuudhee Aroonii fi uffata isaatii, ilmaan isaattii fi uffata isaaniitti facaase; akkasiinis Aroonii fi uffata isaa, ilmaan isaatii fi uffata isaanii qulqulleesse.

³¹ Museenis Aroonii fi ilmaan isaatiin akkana jedhe; “Foon sana balbala dunkaana wal ga’ii duratti affeellaa; akkuma ani ‘Aroonii fi ilmaan isaa haa nyaatan’ jedhee ajajetti foon sana buddeena gundoo aarsaan ittiin luboota ta’an keessa kaa’amu sana keessa jiru wajjin achumatti nyaadhaa. ³² Foonii fi buddeena hafu immoo ibiddaan gubaa. ³³ Sababii luba ta’uun keessan bultii torba fudhatuuf hamma yeroon luba ta’uu keessanii raawwatutti bultii torba balbala dunkaana wal ga’ii duraa hin deeminaa. ³⁴ Waan har’a hojjetame kana WAAQAYYOTU araara isinii buusuuf akka hojjetamu ajaje. ³⁵ Isin akka hin duuneef bultii torba halkanii fi guyyaa balbala dunkaana wal ga’ii dura turaatii waan WAAQAYYO isin irraa barbaadu hojjedhaa; wanni ani ajajame kanaatii.”
³⁶ Aroonii fi ilmaan isaa waan WAAQAYYO karaa Museetiin ajaje hunda hojjetan.

9

Luboorni Tajaajila Isaanii Jalqaban

¹ Museen bultii saddeettaffaatti Aroon, ilmaan Aroonii fi maanguddoota Israa’el waame; ² Arooniinis akkana jedhe; “Aarsaa cubbuutiif dibicha tokko, aarsaa gubamuuf immoo korbeessa hoolaa tokko kanneen hir’ina hin qabne fuudhii fuula WAAQAYYOO duratti dhi’eessi. ³ Ergasiis Israa’elootaan akkana jedhi: ‘Aarsaa cubbuutiif korbeessa re’ee tokko, aarsaa gubamuuf immoo dibicha tokkoo fi korbeessa hoolaa kanneen umuriin isaanii waggaa tokko tokko ta’ee fi kanneen hir’ina hin qabne, ⁴ aarsaa nagaatiif immoo sangaa tokkoo fi korbeessa hoolaa tokko, kenna midhaanii kan zayitiidhaan sukkuumame wajjin fuula WAAQAYYOO duratti aarsaa gochuuf dhi’eessi. Har’a WAAQAYYO isinitti mul’ataatii.’”

⁵ Isaanis waan Museen isaan ajaje sana fuula dunkaana wal ga’ii duratti fidan; waldaan hundinuus dhufee fuula WAAQAYYOO dura dhaabate. ⁶ Museenis, “Akka ulfinni WAAQAYYOO isinitti mul’atuuf wanni WAAQAYYO akka isin gootan isin ajaje kana” jedhe.

⁷ Ergasii Museen Arooniin akkana jedhe; “Gara iddoo aarsaa kottuutii aarsaa cubbuu keetiitii fi aarsaa kee kan gubamu dhi’eeffadhuutii ofii keetii fi sabaaf araara buusi; akkuma WAAQAYYO ajajettis aarsaa saba dhi’eessiitii araara isaaniif buusi.”

⁸ Aroon gara iddoo aarsaa dhufee dibicha aarsaa kan sababii cubbuu isaatiif dhi’aate sana qale. ⁹ Ilmaan isaas dhiiga isatti fidan; inni immoo dhiiga sana keessa quba isaa cuuphee gaanfawwan iddoo aarsaa dibe; dhiiga hafe immoo miiloo iddoo aarsaa jalatti dhangalaase. ¹⁰ Innis akkuma WAAQAYYO Musee ajajetti aarsaa cubbuu sana irraa moora, kaleewwanii fi haguuggii tiruu iddoo aarsaa irratti gube; ¹¹ foonii fi gogaa isaa immoo qubata keessaa baasee gube.

¹² Inni ergasii aarsaa gubamu qale. Ilmaan isaas dhiiga fidanii itti kennan; innis iddoo aarsaa irratti gama hundaan facaase. ¹³ Isaanis aarsaa gubamu bu’aa bu’aadhaan, mataa wajjin isatti kennan; innis iddoo aarsaa irratti gube. ¹⁴ Mi’a garaatii fi luka qalmaa sanaas dhiqee iddoo aarsaa irratti, aarsaa gubamu gubbaatti gube.

¹⁵ Itti aansees Aroon aarsaa saba dhi’eesse; re’ee aarsaa cubbuu sabaatiif dhi’eeffamu sana fuudhee qale; akkuma duraan hojjetettis aarsaa cubbuu godhee dhi’eesse.

¹⁶ Innis aarsaa gubamu fidee akkuma ajajametti dhi’eesse. ¹⁷ Kenna midhaaniis fidee konyee tokko irraa fuudhee aarsaa ganama ganama gubamu irratti dabalee iddoo aarsaa irratti gube.

¹⁸ Aroonis sangaa fi korbeessa hoolaa sana aarsaa nagaa kan sabaaf jedhamee dhi’eeffamu godhee qale. Ilmaan isaa immoo dhiiga fidanii isatti kennan; innis dhiiga sana iddoo aarsaa irratti gama hundaan facaase. ¹⁹ Cooma sangaatii fi korbeessa hoolaa sana jechuunis duboo, moora mi’a garaa haguugu, kaleewwanii fi haguuggii tiruu, ²⁰ handaraafota irra kaa’an; Aroonis cooma sana iddoo aarsaa irratti gube. ²¹ Aroonis akkuma Museen isa ajajetti handaraafotaa fi tafa mirgaa aarsaa sochoofamu godhee fuula WAAQAYYOO duratti sochoose.

²² Aroon harka isaa sabatti bal’isee isaan eebbise. Erga aarsaa cubbuu, aarsaa gubamuu fi aarsaa nagaa dhi’eesse booddees gad bu’e.

²³ Musee fi Aroonis dunkaana wal ga’ii seenan; yommuu achii ba’anittis saba eebbisan; ulfinni WAAQAYYOS saba hundatti mul’ate. ²⁴ Ibiddis WAAQAYYO biraa ba’ee aarsaa gubamuu fi cooma iddoo aarsaa irra ture sana fixe; sabni hundis waan kana argee ililche; adda isaatiinis gombifamee sagade.

10

Naadaabii fi Abiyuud Du’an

¹ Ilmaan Aroon jechuunis Naadaabii fi Abiihuu girgiraa isaanii fudhatanii ibidda itti naqanii ixaana irratti firfirsan; isaanis ibidda hin eeyyamamne kan Inni hin ajajin fuula

WAAQAYYOO duratti dhi'eessan. ² Kanaafuu ibiddi WAAQAYYO biraa ba'ee gubee isaan fixe; isaanis fuula WAAQAYYOO duratti dhuman. ³ Museenis Arooniin akkana jedhe; "Wanni WAAQAYYO dubbate kanaa dha:

" 'Ani warra natti dhi'aatan gidduutti,
qulqullina koo nan argisiisa;
saba hunda durattis
ani nan ulfaadha.' "

Aroon immoo ni cal'ise.

⁴ Museenis Miishaa'eelii fi Elzaafaan ilmaan Uzii'eel obboleessa abbaa Aroon sanaa ofitti waamee, "Kottaatii durbiiwwan keessan fuula iddoo qulqulluu duraa fuudhaatii qubata keessaa gad baasaa" jedhe. ⁵ Jarris dhufanii akkuma Museen ajajetti akkuma isaan kittaa isaanii uffatanii jiranitti fuudhanii qubata keessaa gad isaan baasan.

⁶ Ergasii Museen Aroonii fi ilmaan Aroon, Ele'aazaarii fi Iitaamaariin akkana jedhe; "Mataa keessan filachuu hin dhiisinaa; wayyaa keessan hin tarsaasinaa; yoo kanaa achii isin ni duutu; WAAQAYYOS saba guutuutti dheekkama. Garuu fiironni keessan manni Israa'el hundi warra WAAQAYYO ibiddaan balleesse sanaaf boo'uu danda'u. ⁷ Sababii zayitiin WAAQAYYOO kan ittiin diban isin irra jiruuf isin balbala dunkaana wal ga'ii duraa hin deeminaa; yoo kanaa achii ni duutu." Isaanis akkuma Museen isaan ajaje godhan.

⁸ WAAQAYYOS Arooniin akkana jedhe; ⁹ "Atii fi ilmaan kee yommuu dunkaana wal ga'ii ol seentanitti daadhii wayinii yookaan dhugaatii nama macheessu hin dhuginaa. Yoo kanaa achii ni duutu. Wanni kun dhaloota dhufuuf seera bara baraa ta'a. ¹⁰ Isin waan qulqulluu fi waan qulqulluu hin ta'in, waan xuraa'aa fi waan xuraa'aa hin ta'in addaan baafatanii beekuu qabdu; ¹¹ seera WAAQAYYO karaa Museetiin isaanii kenne hundas saba Israa'el barsiisuu qabdu."

¹² Museenis Aroonii fi ilmaan Aroon warra hafan jechuunis Ele'aazaarii fi Iitaamaariin akkana jedhe; "Kennaa midhaanii kan aarsaawwan ibiddaan WAAQAYYOO dhi'effaman sana irraa hafe fuudhaatii utuu inni hin bukaa'in tolchaatii iddoo aarsaa biratti nyaadhaa; aarsaan kun waan hunda caalaa qulqulluudhaatii. ¹³ Wanni kun aarsaawwan ibiddaan WAAQAYYOO dhi'effaman keessaa sababii gooda keetii fi gooda ilmaan keetii ta'eef lafa qulqulluutti nyaadhaa; ani akkana ajajameeraatii. ¹⁴ Garuu ati, ilmaan keetii fi intallan kee handaraafa sochoofamee fi tafa dhi'effame sana nyaachuu dandeessu. Waan kanas iddoo seeraan qulqulluu ta'etti nyaadhaa. Wanni kun gooda keetii fi gooda ilmaan keetii ta'ee aarsaa nagaa kan saba Israa'el irraa isiniif kennamee dhaatii. ¹⁵ Tafni dhi'effamee fi handaraafni sochoofame sun akka aarsaa sochoofamu tokkootti akka fuula WAAQAYYOO duratti sochoofamuuf cooma aarsaa ibiddaan dhi'effame wajjin fidamuu qaba; kunis akkuma WAAQAYYO ajajetti gooda keetii fi gooda ilmaan keetii kan bara baraa ti."

¹⁶ Museenis re'ee aarsaa cubbuu sana jabeessee barbaade; kunoo re'een sun gubamee ture; innis ilmaan Aroon warra hafanitti jechuunis Ele'aazaarii fi Iitaamaaritti aaree akkana jedhee isaan gaafate; ¹⁷ "Isin maaliif aarsaa cubbuu sana iddoo qulqulluutti hin nyaatin? Aarsaan sun waan hunda caalaa qulqulluu dha; innis akka isin fuula WAAQAYYOO duratti araara isaaniif buusuudhaan yakka sabaa balleessitaniif isiniif kenname. ¹⁸ Kunoo, dhiigni isaa Iddoo Qulqulluutti ol hin galfamne; isin akkuma ani ajajetti re'ee sana naannoo Iddoo Qulqulluutti nyaachuu qabdu ture."

¹⁹ Aroonis Museedhaan akkana jedhe; "Kunoo, isaan har'a aarsaa isaanii kan cubbuutti fi aarsaa isaanii kan gubamu fuula WAAQAYYOO duratti dhi'eessaniiru; garuu wannii akkasii kun na qaqqabeera. Utuu ani aarsaa cubbuu sana har'a nyaadhee jiraadhee silaa wannii sun fuula WAAQAYYOO duratti ni fudhatama turee?" ²⁰ Museenis yommuu waan kana dhaga'etti ni gammade.

11

Nyaata Qulqulluu fi Nyaata Qulqulluu Hin Ta'in
11:1-23 kwf - KeD 14:3-20

¹ WAAQAYYOS Musee fi Arooniin akkana jedhe; ² "Israa'elootaan akkana jedhaa: 'Bineensota lafa irra jiraatan hunda keessaa kanneen isin nyaachuu dandeessan isaan kanaa dha: ³ Bineensa kotteen isaa guutumaan guutuutti baqaqaa ta'e kan alala guuru kam iyyuu nyaachuu dandeessu.

⁴ "Kanneen alala qofa guuran yookaan kotteen isaanii qofti baqaqaa ta'e garuu nyaachuu hin qabdan. Gaalli yoo alala guure iyyuu kottee baqaqaa hin qabu; inni isiniif qulqulluu miti. ⁵ Osoleen yoo alala guurte iyyuu kottee baqaqaa hin qabdu; isheen isiniif

qulqulluu miti. ⁶ Illeettiin yoo alala guurte iyyuu kottee baqaqaa hin qabdu; isheen isiniif qulqulluu miti. ⁷ Booyyeen yoo kottee baqaqaa qabaate iyyuu alala hin guuru; inni isiniif qulqulluu miti. ⁸ Isin foon isaanii nyaachuu yookaan raqa isaanii tuquu hin qabdan; isaan isiniif qulqulluu miti.

⁹ “Uumamawwan bishaan galaanotaa fi bishaan lageenii keessa jiraatan hunda keessaa kanneen qoochoo fi qola qaban kam iyyuu nyaachuu dandeessu. ¹⁰ Garuu uumamawwan galaanotaa fi lageen keessa jiraatan kanneen qoochoo fi qola hin qabne hundi, uumamawwan bishaan keessa munyuuqan hundi yookaan kanneen bishaan keessa jiraatan hundi isiniif xuraa’oo haa ta’an. ¹¹ Isaan isin duratti xuraa’oo waan ta’aniif foon isaanii hin nyaatinaa; raqni isaaniis xuraa’aa haa ta’u. ¹² Wanni bishaan keessa jiraatu kan qoochoo fi qola hin qabne kam iyyuu isiniif xuraa’aa haa ta’u.

¹³ “Isaan kunneen simbirroota isin jibbuu qabdaniidha; hin nyaataman; isaan xuraa’oo dha: risaa, rumicha, rumicha gurraacha, ¹⁴ culullee, culullee gurraacha gosa garaa garaa, ¹⁵ arraagessa gosa garaa garaa, ¹⁶ guchii, urunguu, allaattii bishaanii, coroffee gosa garaa garaa, ¹⁷ urunguu xinnaa, daakiyyee, urunguu guddaa, ¹⁸ urunguu adii, urunguu gammoojjii, allaattii raqaa, ¹⁹ huummoo, huummoo gosa kamii iyyuu, haadha gaayyee, simbira halkanii.

²⁰ “Ilbiisonni barrisan kanneen miilla afraniinuu deeman hundi isiniif xuraa’oo haa ta’ani. ²¹ Ta’us ilbiisonni barrisan kanneen miilla afraniinuu deeman keessaa tokko tokko nyaachuu ni dandeessu; isaanis warra ittiin lafa irra utaaluu miilla dadacha’u qabaniidha. ²² Isaan keessaas hawwaannisa gosa garaa garaa, hawwaannisa magariisa garaa garaa, farda waaqaa garaa garaa fi korophisa garaa nyaachuu dandeessu. ²³ Garuu ilbiisota barrisan kanneen miilla afur qaban biraa hundi isiniif xuraa’oo haa ta’an.

²⁴ “Isin wantoota kanneeniin of xureessitu; namni raqa isaanii tuqu kam iyyuu hamma galgalaatti xuraa’aa dha. ²⁵ Namni reeffa isaanii tokko illee lafaa fuudhu kam iyyuu uffata isaa miiccachuu qaba; inni hamma galgalaatti xuraa’aa ta’a.

²⁶ “Bineensi kottee baqaqaa qabu kan kotteen isaa guutumaan guutuutti gargar hin qoodamin yookaan alala hin guurte kam iyyuu isiniif xuraa’aa dha; namni raqa isaanii tuqu kam iyyuus xuraa’aa ta’a. ²⁷ Bineensota miilla afuriin deeman hunda keessaa kanneen faanaan ejjetan isiniif xuraa’oo dha; namni raqa isaanii tuqu kam iyyuus hamma galgalaatti xuraa’aa ta’a. ²⁸ Namni raqa isaanii lafaa fuudhu kam iyyuu uffata isaa miiccachuu qaba; inni hamma galgalaatti xuraa’aa ta’a. Isaanis isiniif xuraa’oo dha.

²⁹ “Uumamawwan lafa irra munyuuqan keessaa isaan kunneen isiniif xuraa’oo dha; isaanis: tuqaa, hantuuta, loccuu gurguddaa gosa gosaa, ³⁰ loccuu cirrachaa, naacha, qarcoo, qarcabboo fi gaararraa dha. ³¹ Uumamawwan lafa irra munyuuqan keessaa isaan kunneen isiniif xuraa’oo dha; namni raqa isaanii tuqus hamma galgalaatti xuraa’aa ta’a. ³² Uumamawwan sana keessaa tokko yoo du’ee mi’a wayii irra bu’e, mi’i sun faayidaan isaa waan fedhe iyyuu ta’u, inni muka irraa, huccuu irraa, gogaa irraa yookaan keessaa irraa hojjetamu illee mi’i sun xuraa’aa ta’a; mi’a sana bishaan keessa buusaa. Innis hamma galgalaatti xuraa’aa ta’ee ergasii immoo qulqulluu ta’a. ³³ Isaan keessaa tokko okkotee keessa yoo bu’e, wannii okkotee sana keessa jiru hundi xuraa’aa ta’a; isinis okkotee sana cabsuu qabdu. ³⁴ Nyaanni nyaatamuu danda’u kan garuu bishaan okkotee akkasii keessaa itti naqame kam iyyuu xuraa’aa dha; dhugaatiin okkotee sana keessaa dhugamuu danda’u kam iyyuus xuraa’aa dha. ³⁵ Wanni raqa uumamawwan kanaa keessaa tokko iyyuu irra bu’u kam iyyuu xuraa’aa ta’a; eeleen yookaan okkoteen waa itti bilcheessan cabsamuu qaba. Isaan xuraa’oo dha; isinis akka mi’a xuraa’aatti isaan ilaalaa. ³⁶ Burqaan yookaan boolli bishaan itti kuufamu immoo qulqulluu ta’ee tura; garuu namni raqa kana keessaa tokko illee tuqu xuraa’aa dha. ³⁷ Raqni tokko sanyii facaafamuuf jiru irra yoo bu’e sanyiin sun qulqulluu ta’ee hafa. ³⁸ Garuu sanyii sana irratti bishaan naqamee raqni wayii yoo irra bu’e sanyiin sun isiniif xuraa’aa dha.

³⁹ “Horiin akka isin nyaattaniif isiniif eeyyamame tokko yoo du’ee, namni raqa isaa tuqe kam iyyuu hamma galgalaatti xuraa’aa ta’a. ⁴⁰ Namni raqa sana irraa waa nyaatu wayyaa isaa miiccachuu qaba; inni hamma galgalaatti xuraa’aa ta’a. Namni raqa sana lafaa fuudhe wayyaa isaa miiccadhuu qaba; innis hamma galgalaatti xuraa’aa ta’a.

⁴¹ “Uumanni lafa irra munyuuqu kam iyyuu xuraa’aa dha; nyaatamuu hin qabu. ⁴² Uumama lafa irra loo’u kan garaadhaan lafa irra loo’u yookaan miilla afuriin yookaan miilla hedduun deemu kam iyyuu hin nyaatinaa; inni xuraa’aa dha. ⁴³ Uumamawwan kanneen keessaa tokkoon iyyuu of hin xureessinaa. Isin akka xuraa’oo hin taaneef isaaniin of hin xureessinaa. ⁴⁴ Ani WAAQAYYO Waaqa keessanii dha; waan ani qulqulluu

ta'eef isinis of qulqulleessaatii qulqulloota ta'aa. Uumama lafa irra munyuuqu kamiin iyyuu of hin xureessinaa. ⁴⁵ Ani WAAQAYYO kan Waaqa keessan ta'uuf jedhee biyya Gibxiitii isin baasee dha; kanaafuu ani qulqulluudhaatii isinis qulqulluu ta'aa.

⁴⁶ "Seerri waa'ee horii, simbirroo, lubbuu qabeeyyii bishaan keessa munyuuqan hundaa fi uumama lafa irra munyuuqu hundaa kanaa dha. ⁴⁷ Isin waan xuraa'aa fi waan qulqulluu, uumama nyaatamuu fi kan hin nyaatamne addaan baaftanii beekuu qabdu."

12

Da'umsa Booddee Qulqullaa'uu

¹ WAAQAYYO Museedhaan akkana jedhe; ² "Israa'elootaan akkana jedhi: 'Dubartiin ulfooftee ilma deessee jirtu akka seeraatti akkuma yeroo xurii of irraa qabdu sanaatti bultii torbaaf xurooftuu taati. ³ Ilmi sunis guyyaa saddeettaffaatti dhagna haa qabatuu. ⁴ Ergasii dubartiin sun dhiiga ishee irraa qulqulleeffamuuf bultii soddomii sadii eeggachuu qabdi. Ishee hamma yeroon qulqulleeffamuu ishee raawwatamutti waan qulqulluu hin tuqin yookaan gara iddoo qulqulluu hin dhaqin. ⁵ Isheen yoo durba deessee jiraatte akkuma yeroo xurii of irraa qabdu sanaatti torban lamaaf xurooftuu taati; ergasii immoo dhiiga ishee irraa qulqulleeffamuuf bultii jaatamii ja'a eeggachuu qabdi.

⁶ "Isheen gaafa yeroon qulqulleeffamuu ishee kan sababii ilmaa yookaan intalaa raawwatamutti, xobbaallaa hoolaa kan waggaa tokkoo aarsaa gubamuuf, gugee sookkee tokko yookaan gugee tokko aarsaa cubbuutiif balbala dunkaana wal ga'ii duratti gara lubaa haa fiddu. ⁷ Innis isheedhaaf araara buusuuf jedhee waan kana fuula WAAQAYYOO duratti aarsaa dhi'eessa; isheenis ergasii akka seeraatti dhangala'aa dhiiga ishee irraa qulqulloofti.

"Seerri dubartiin ilma yookaan durba deessuu kanaa dha. ⁸ Isheen yoo xobbaallaa hoolaa fiduu hin damdeenyee, gugee lama yookaan gugee sosookkee lama, tokko aarsaa gubamuuf kaan immoo aarsaa cubbuutiif haa fiddu. Haala kanaan lubichi isheedhaaf araara buusa; isheenis ni qulqulloofti."

13

Seera Dhukkuba Gogaa kan Namatti Darbuu

¹ WAAQAYYOS Musee fi Arooniin akkana jedhe; ² "Namni yoo gogaa dhagna isaa irraa iitoo yookaan finniisa yookaan baarolee qabaatee wanni sun gogaa dhagna isaa irratti gara lamxiitti geeddarama, namichi sun gara Aroon lubichaatti yookaan ilmaan isaa luboota keessaa gara isa tokkootti haa geeffamu. ³ Lubni sun madaa gogaa dhagna namichaa irra jiru haa qoru; yoo rifeensi madaa sana irra jiru addaatee madaan sun gogaa keessa darbee foonitti gad seene, dhukkubni sun dhukkuba lamxii ti. Lubichis erga isa qoree booddee akka inni akka seeraatti xuraa'aa ta'e haa labsu. ⁴ Yoo baaroleen gogaa namichaa irra jiru addaatee garuu gogaa keessa darbee foonitti gad hin seenin, yoo rifeensi madaa sana irra jirus hin addaatin, lubichi namicha madaa'e sana bultii torba kophaatti baasee haa tursu. ⁵ Bultii torbaffaatti immoo lubichi isa haa qoru; lubni yoo akka madaan sun hin geeddaraminii fi akka inni gogaa namichaa irra hin faffaca'in arge ammas bultii torba kophaatti baasee isa haa tursu. ⁶ Amma illee lubichi bultii torbaffaatti namicha haa qoru; kunoo, yoo madaan sun qooree gogaa irra hin faffaca'in, lubichi akka namichi qulqulluu ta'e haa labsu; wanni sun cittoo dha. Namichi wayyaa isaa haa miiccatu; inni ni qulqullaa'a. ⁷ Garuu inni erga qulqulluu ta'uun isaa akka labsamuuf lubatti of argisiisee booddee yoo cittoon sun gogaa isaa irra faffaca'e inni amma illee lubatti of argisiisuu qaba. ⁸ Lubichis isa haa qoru; yoo cittoon sun gogaa irra faffaca'ee jiraate lubichi akka inni xuraa'aa ta'e haa labsu; wanni kun lamxii dha.

⁹ "Namni yoo lamxii qabaate inni lubatti fidamuu qaba. ¹⁰ Lubichi isa haa qoru; kunoo yoo iiti adiin kan rifeensa addeesse gogaa irra jiraatee fi foon iita sanaa diimatee mul'ate, ¹¹ wanni sun dhukkuba gogaa kan hin fayyinee dha; lubichis akka namichi xuraa'aa ta'e haa labsu. Waan inni duraanuu xuraa'aa ta'eef lubichi kophaatti baasee isa tursuun barbaachisaa miti.

¹² "Dhukkubni sun hamma lubni arguu danda'utti gogaa isaa irra yoo faffaca'ee gogaa namicha madaa'e sanaa mataadhaa hamma miillaatti haguuge, ¹³ lubichi isa haa qoru; kunoo yoo dhukkubni sun guutumaa guutuutti dhagna namichaa wal ga'e inni akka namichi qulqulluu ta'e haa labsu. Waan dhagni isaa guutuun addaateef namichi sun qulqulluu dha. ¹⁴ Inni garuu yeroo iita foon isaa keessaan diimatee mul'atu qabaatu xuraa'aa dha. ¹⁵ Lubichi yeroo foon diimatee mul'atu argutti akka namichi sun xuraa'aa

ta'e haa labసు; foon diimate xuraa'aa dha; namichis lamxii qaba. ¹⁶ Yookaan yoo foon diimaan geeddaramee addaate namichi lubatti of argisiisuu haa dhaqu. ¹⁷ Lubnis isa haa qoru; yoo madaan sun addaate lubichi akka namichi madaa'e sun qulqulluu ta'e haa labసు; namichis ni qulqullaa'a.

¹⁸ "Namni gogaa isaa irraa dhullaa yoo qabaatee dhullaan sun fayyee jiraate, ¹⁹ yoo iddoo dhullaan ture sanatti iiti adiin yookaan baaroleen diimaan adiin mul'ate inni lubatti of haa argisiisu. ²⁰ Lubnis isa haa qoru; kunoo yoo wanni sun waan gogaa keessa darbee foon seene fakkaatee rifeensi isa keessaas addaate lubichi akka inni xuraa'aa ta'e haa labసు. Wanni kun dhukkuba lamxii iddoo dhullaan turetti ba'ee dha. ²¹ Garuu yommuu lubni baarolee sana qorutti, kunoo yoo rifeensi adiin irra hin jiraatinii fi yoo baaroleen sun utuu gogaa darbee foon hin seenin qooree jiraate lubni kophaatti baasee bultii torba isa haa tursu. ²² Yoo baaroleen sun gogaa irra faffaca'e, lubichi akka namni sun xuraa'aa ta'e haa labసు; kun dhukkuba namatti darbuu dha. ²³ Garuu baaroleen sun yoo hin geeddaraminii fi yoo hin faffaca'in, inni godaannisa dhullaa sanaa ti; lubnis akka namichi qulqulluu ta'e haa labసు.

²⁴ "Yoo namni gogaa isaa irraa gubaa qabaatee foon diimaa iddoo gubamaa sanaa irratti baaroleen diimaan adiin yookaan adiin mul'ate, ²⁵ lubni baarolee sana haa qoru; kunoo yoo rifeensi achi irra jiru addaatee baaroleen sunis gogaa keessa darbee foon seene wanni kun lamxii iddoo gubate sana irratti ba'uu dha. Lubichi akka namni sun xuraa'aa ta'e haa labసు; dhukkubni kun dhukkuba lamxii ti. ²⁶ Garuu yoo lubni iddoo gubate sana qoree rifeensi adiin baarolee sana irra hin jiraatinii fi yoo baaroleen sun utuu gogaa keessa darbee foon hin seenin qooree jiraate lubichi namicha sana kophaatti baasee bultii torba haa tursu. ²⁷ Guyyaa torbaffaatti lubichi isa haa qoru; yoo baaroleen sun gogaa irra faffaca'ee jiraate lubni sun akka namichi xuraa'aa ta'e haa labసు; dhukkubni kun dhukkuba lamxii ti. ²⁸ Ta'us yoo baaroleen sun hin geeddaraminii fi utuu gogaa irra hin faffaca'in bade wanni kun iitoo gubaa sana keessa ba'ee dha. Lubichi akka namichi qulqulluu ta'e haa labసు; wanni kun godaannisa gubaa sanaa ti.

²⁹ "Yoo dhiirri yookaan dubartiin mataa irraa yookaan areeda irraa madaa qabaatan, ³⁰ lubni madaa sana haa qoru; kunoo yoo madaan sun gogaa keessa darbee foon seenee rifeensi achi irra jiru keelloo fakkaatee qaqa'ate, lubichi akka namichi sun xuraa'aa ta'e haa labసు; kun hooqxo mataa yookaan areedaa kan namatti darbuu dha. ³¹ Garuu yeroo lubni madaa akkanaa qorutti kunoo yoo madaan sun waan gogaa darbee foon seene hin fakkaatinii fi yoo rifeensi gurraachi tokko iyyuu madaa sana irra hin jiraatin lubni sun namicha hooqxo qabe sana kophaatti baasee bultii torba haa tursu. ³² Guyyaa torbaffaatti lubni madaa sana haa qoru; kunoo yoo hooqxo sun hin faffaca'in, yoo rifeensi keellon achi irra hin jiraatinii fi hooqxo sun waan gogaa keessa darbee foon seene hin fakkaatin, ³³ namichi sun iddoo madaa'e sana qofa dhiisee mataa isaa haa haadatu; lubni sunis ammas namicha sana kophaatti baasee bultii torba haa tursu. ³⁴ Guyyaa torbaffaattis lubni sun hooqxo sana haa qoru; kunoo yoo hooqxo sun gogaa irra hin faffaca'inii fi waan gogaa keessa darbee foon seene hin fakkaatin lubichi akka namichi sun qulqulluu ta'e haa labసు; namichi wayyaa isaa haa miicatu; innis ni qulqullaa'a. ³⁵ Garuu erga akka namichi qulqulluu ta'e labsamee booddee yoo hooqxo sun gogaa irra faffaca'e, ³⁶ lubni isa haa qoru; kunoo yoo hooqxo sun gogaa irra faffaca'ee jiraate lubichi rifeensa keelloo sakatta'uu hin qabu; namichi sun xuraa'aa dha. ³⁷ Garuu akka hubannaa lubichaatti hooqxo sun geeddaramuu baatee rifeensi gurraachi irratti biqillaan hooqxo sun fayyera; namichis qulqulluu dha; lubnis akka inni qulqulluu ta'e haa labసు.

³⁸ "Yommuu dhiirri yookaan dubartiin gogaa dhagna isaa irraa baarolee qabaatanitti, ³⁹ lubni isaan haa qoru; kunoo yoo baaroleen sun adii daalacha ta'e kun cittoo gogaa irratti ba'e kan nama hin miinee dha; namichis qulqulluu dha.

⁴⁰ "Namni yoo rifeensi mataa isaa dhume molaa'e inni qulqulluu dha. ⁴¹ Yoo rifeensi mataa isaa fuula duraan irraa dhume molaa'es inni qulqulluu dha. ⁴² Garuu inni yoo moluu mataa isaa irraa yookaan moluu adda isaa irraa madaa adii diimatu qabaate wanni kun lamxii moluu mataa isaa yookaan moluu adda isaa keessa ba'uu dha. ⁴³ Lubni isa haa qoru; kunoo yoo madaan iita'e kan mataa isaa irraa yookaan adda isaa irraa sun akkuma lamxii gogaa irratti ba'ee adii diimatu ta'e, ⁴⁴ namichi dhukkubsataa fi xuraa'aa dha. Sababii madaa mataa namichaa irra jiru sanaatiifis akka namichi xuraa'aa ta'e lubni sun haa labసు.

⁴⁵ "Namni lamxii akkasii qabu uffata tatarsa'aa haa uffatu; rifeensa mataa isaatti waa hin maratin; afaan isaas haguuggatee, 'Ani xuraa'aa dha! Ani xuraa'aa dha!' jedhee haa iyyu. ⁴⁶ Inni hamma dhukkubni sun irra jirutti xuraa'aa dha; kophaa isaa haa jiraatu; qubata keessaas ba'ee ala haa jiraatu.

Lamxii Uffata Irratti Mul'atu

⁴⁷ “Yoo uffanni suufii irraa yookaan quncee talbaa irraa hojjetame kam iyyuu, ⁴⁸ uffanni quncee talbaa irraa yookaan suufii irraa dha’ame yookaan wal keessa loofamee hojjetame kam iyyuu, gogaa yookaan wanni gogaa irraa hojjetame kam iyyuu lamxii qabaate, ⁴⁹ yoo dhukkubni uffata irra yookaan gogaa irra yookaan uffata dha’ame irra yookaan wal keessa loofamee hojjetame irra yookaan mi’a gogaa irra jiru sun magariisa ta’e yookaan diimate wanni kun waan lamxii ta’eef lubatti haa argisiifamu. ⁵⁰ Lubnis lamxii sana qoree mi’a dhukkubaan faalame sana kophaatti baasee bultii torba haa tursu. ⁵¹ Guyyaa torbaffaatti lubichi lamxii sana haa qoru; yoo lamxiin sun uffata irra yookaan wayyaa dha’ame irra yookaan uffata wal keessa loofamee hojjetame irra yookaan gogaa waan kamiif iyyuu fayyadu irra faffaca’e wanni kun lamxii hamaa dha; mi’i sunis xuraa’aa dha. ⁵² Sababii lamxiin sun hamaa ta’eef lubichi uffata yookaan wayyaa suufii irraa yookaan quncee talbaa irraa hojjetame yookaan wal keessa loofamee hojjetame yookaan mi’a gogaa irraa hojjetame kan dhukkuba sanaan faalame kam iyyuu haa gubu; mi’i sunis gubamuu qaba.

⁵³ “Garuu yeroo lubni lamxii sana qorutti kunoo yoo lamxiin sun uffata irra yookaan wayyaa dha’ame irra yookaan wal keessa loofamee hojjetame irra yookaan mi’a gogaa irraa hojjetame irra faffaca’uu baate, ⁵⁴ lubichi akka mi’i lamxiidhaan faalame sun miiccamu haa ajaju. Ergasii immoo mi’a sana kophaatti baasee ammas bultii torba haa tursu. ⁵⁵ Erga mi’i lamxiidhaan faalame sun miiccamee booddee lubichi mi’a sana haa qoru; lamxiin sun yoo faffaca’u baate illee bifti isaa geeddaramuu baannaan uffanni sun xuraa’aa dha. Yoo lamxiin sun gama tokkoon yookaan gama kaaniin mi’a sana faalee jiraate, mi’i sun ibiddaan haa gubamu. ⁵⁶ Erga mi’i sun miiccamee booddee yeroo lubni qorutti yoo lamxiin sun badee jiraate lubichi iddoo lamxiidhaan faalame sana uffata yookaan gogaa yookaan wayyaa dha’ame yookaan wal keessa loofamee hojjetame irraa haa tarsaasu. ⁵⁷ Garuu yoo lamxiin sun deebi’ee uffata irratti yookaan wayyaa dha’ame irratti yookaan wal keessa loofamee hojjetame irratti yookaan mi’a gogaa irraa hojjetame kam iyyuu irratti argame, lamxiin sun faffaca’aa jira; wanni lamxii qabu ibiddaan haa gubamu. ⁵⁸ Uffanni yookaan wayyaan dha’ame yookaan wal keessa loofamee hojjetame yookaan mi’i gogaa irraa hojjetame kan miiccamee lamxiin irraa bade kam iyyuu ammas haa miiccamu; innis ni qulqullaa’a.”

⁵⁹ Wanni kun seera akka uffanni suufii irraa yookaan quncee talbaa irraa hojjetame, wayyaan dha’ame yookaan wal keessa loofamee hojjetame yookaan mi’i gogaa irraa hojjetamee lamxiidhaan faalame kam iyyuu xuraa’aa ta’ee fi akka hin ta’in labsuuf kennamee dha.

14*Dhukkuba Lamxii Irraa Qulqullaa’uu*

¹ WAAQAYYO Museedhaan akkana jedhe; ² “Kun seera nama lamxii qabu tokkoof guyyaa inni itti qulqulleeffamuuf kennamee dha; namichi lubatti haa fidamu. ³ Lubni sun iddoo qubataa keessaa gad ba’ee namicha haa qoru. Kunoo, yoo namichi lamxii qabu sun fayyee jiraate, ⁴ lubichi akka sababii namicha qulqulleeffamu sanaatiif simbirroonni lubbuu qaban qulqulluun lamaa fi mukni birbirsaa, kirriin bildiimaa fi hiisophiin fidaman haa ajaju. ⁵ Lubni sunis ergasii akka simbirroota sana keessaa isheen tokko bishaan yaa’u kan okkotee keessa jiru irratti qalamtu haa ajaju. ⁶ Innis simbirroo lubbuu qabdu sana fuudhee muka birbirsaa, kirrii bildiimaa fi hiisophii wajjin dhiiga simbirroo bishaan yaa’u irratti qalamte sanaa keessa haa cuuphu. ⁷ Lubichi namicha lamxii irraa qulqulleeffamu sanatti yeroo torba faffacaasee akka inni qulqulluu ta’e haa labsu; ergasii simbirroo lubbuu qabdu sana dirreetti gad haa dhiisu.

⁸ “Namichi qulqulleeffamu sun uffata isaa miiccachuu, rifeensa isaa hunda haad-dachuu fi dhagna isaa bishaaniin dhiqachuu qaba; akkasiin inni akka seeraatti qulqulluu ta’a. Ergasii iddoo qubataatti ol galuu danda’a; garuu bultii torba dunksaana isaatiin ala turuu qaba. ⁹ Guyyaa torbaffaattis rifeensa isaa hunda haaddachuu qaba; mataa isaa, areeda isaa, nyaara isaatii fi rifeensa isaa biraa haa haaddatu. Uffata isaas miiccatee dhagna isaa bishaaniin dhiqachuu qaba; innis ni qulqullaa’a.”

¹⁰ “Guyyaa saddeettaffaattis namichi sun korbeeyyii hoolaa kanneen hir’ina hin qabne lamaa fi hoolaa dhalaa waggaa tokkoo kan hir’ina hin qabne tokko, daakuu bullaa’aa iifii tokkoo kan zayitiidhaan sukkuumame irraa harka kudhan keessaa harka sadii kan kennaa midhaaniitiif ta’uu fi zayitii loogii tokkoo haa fidu. ¹¹ Lubni akka namichi qulqulluu ta’e labsu sun namicha qulqulleeffamu sanaa fi kennaawwan isaa balbala dunksaana wal ga’ii irratti fuula WAAQAYYOO duratti haa dhi’eessu.

¹² “Ergasiis lubichi korbeeyyii hoolaa sana keessaa tokko fuudhee aarsaa yakkaa godhee loogii zayitii tokko wajjin haa dhi’eessu; innis aarsaa sochoofamu godhee fuula WAAQAYYOO duratti haa sochoosu. ¹³ Xobbaallaa hoolaa sanas iddoo aarsaan cubbuutii fi aarsaan gubamu itti qalamanitti haa qalu. Akkuma aarsaa cubbuu sana aarsaan yakkaas kan lubaa ti; aarsaan kun waan hunda caalaa qulqulluu dha. ¹⁴ Lubichis dhiiga aarsaa yakkaa sana irraa fuudhee fiixee gurra mirgaa namicha qulqulleffamu sanaa, quba abbuudduu harka isaa mirgaatii fi quba abbuudduu miilla isaa mirgaa haa dibu. ¹⁵ Lubni sun zayitii loogii sana irraa fuudhee barruu harka isaa bitaatti haa naqu; ¹⁶ quba harka isaa mirgaas zayitii barruu harka isaa irra jiru keessa cuuphee quba isaatiin yeroo torba fuula WAAQAYYOO duratti haa facaasu. ¹⁷ Lubni sun zayitii barruu isaa irratti hafe irraa fuudhee fiixee gurra mirgaa namicha qulqulleffamuu qabu sanaa, quba abbuudduu harka isaa mirgaatii fi quba abbuudduu miilla isaa mirgaa, dhiiga aarsaa yakkaa sana irratti dabalee haa dibu. ¹⁸ Lubichi zayitii barruu harka isaa irratti hafe immoo mataa namicha qulqulleffamuu sanaatti naqee fuula WAAQAYYOO duratti araara haa buusuuf.

¹⁹ “Ergasiis lubichi aarsaa cubbuu dhi’eessie namicha xuraa’ummaa ofii irraa qulqulleffamu sanaaf araara haa buusu. Sana booddee lubni sun aarsaa gubamu haa qalu; ²⁰ kanas kennaa midhaanii wajjin iddoo aarsaa irratti dhi’eessie araara isaaf haa buusu; namichis qulqulluu ta’a.

²¹ “Ta’us namichi sun yoo hiyyeessa ta’ee waan kana dhi’eessuu hin dandeenye, akka sochoofamee araarii isaaf buufamuuf inni xobbaallaa hoolaa tokko aarsaa yakkaa godhee daakuu bullaa’aa zayitiidhaan sukkuumame kan kennaa midhaaniitiif ta’u iifii tokko irraa harka kudhan keessaa harka tokko zayitii loogii tokko wajjin haa fidu; ²² akkasumas waan fiduu danda’u jechuunis gugee lama yookaan gugee sosookkee lama, tokko aarsaa cubbuutiif kaan immoo aarsaa gubamuuf haa fidu.

²³ “Guyyaa saddeettaffaatti inni qulqullaa’ummaa isaatiif balbala dunkaana wal ga’ii irratti fuula WAAQAYYOO duratti waan kana lubatti haa fidu. ²⁴ Lubni sunis xobbaallaa hoolaa aarsaa yakkaa sana zayitii loogii tokko wajjin fuudhee aarsaa sochoofamu godhee fuula WAAQAYYOO duratti haa sochoosu. ²⁵ Xobbaallaa hoolaa sanas aarsaa yakkaatiif qalee dhiiga isaa irraa fuudhee fiixee gurra mirgaa namicha qulqulleffamu sanaa, quba abbuudduu harka isaa mirgaatii fi quba abbuudduu miilla isaa mirgaa haa dibu. ²⁶ Lubichis zayitii sana irraa fuudhee barruu harka isaa bitaa irratti haa naqu; ²⁷ quba harka isaa mirgaatiinis zayitii barruu isaa irra jiru sana irraa yeroo torba fuula WAAQAYYOO duratti haa facaasu. ²⁸ Zayitii barruu isaa irra jiru irraa fuudhee idduma dhiiga aarsaa yakkaa ittiin tuqe sana jechuunis fiixee gurra namicha qulqulleffamu sanaa mirgaa, quba abbuudduu harka isaa mirgaatii fi quba abbuudduu miilla isaa mirgaa haa dibu. ²⁹ Lubichis fuula WAAQAYYOO duratti araara isaaf buusuuf zayitii barruu isaa irratti hafe sana mataa namicha qulqulleffamu sanaa irratti haa naqu. ³⁰ Lubni sunis gugeewwan yookaan gugee sosookkee namichi dhi’eessuu danda’u haa dhi’eessu; ³¹ isaan kanneen keessaas tokko aarsaa cubbuutiif, kaan immoo aarsaa gubamuuf, kennaa midhaanii wajjin haa dhi’eessu. Haala kanaanis lubichi namicha qulqulleffamu sanaaf fuula WAAQAYYOO duratti araara ni buusa.”

³² Kun seera nama lamxii qabaatee waan ittiin qulqulleffamu baasuu hin dandeenyeef kennamee dha.

Lamxii Irraa Qulqulleessuu

³³ WAAQAYYOS Musee fi Arooniin akkana jedhe; ³⁴ “Yommuu isin biyya Kana’aan kan ani akka dhaalaatti isiniif kennu sana seentanii anis mana biyya sanaa keessaa tokkotti dhukkuba lamxii facaasutti, ³⁵ abbaan mana sanaa deeme, ‘Ani mana koo keessatti waan lamxii fakkaatu tokko argeera’ jedhee lubatti haa himu. ³⁶ Lubichis akka wannii mana sana keessa jiru tokko iyyuu xuraa’aa dha jedhamee hin labsamneef utuu lamxii sana qoruuf ol hin seenin dura akka mana sana keessaa mi’i gad baafamu haa ajaju. Ergasii lubichi ol seenee manicha haa qoru. ³⁷ Innis lamxii keenyan manaa irra jiru haa qoru; yoo wannii sun dhooga magariisa yookaan diimatu qabaatee keenyan manaa keessa gad seene, ³⁸ lubichi mana sana keessaa balbalaan gad ba’ee bultii torbaaf mana sana haa cufu. ³⁹ Guyyaa torbaffaatti lubichi mana sana qoruuf haa deebi’u. Kunoo yoo lamxiin sun keenyan manaa irratti babal’atee jiraate, ⁴⁰ lubichi akka dhagaawwan faalaman achi keessaa baafamanii lafa xuraa’aa magaalaa ala jirutti gataman haa ajaju. ⁴¹ Akka keenyan mana sanaa karaa keessaatiin gutummaatti soqamee wannii irraa hooqame sunis lafa xuraa’aa magaalaa ala jirutti gad gatamu haa godhu. ⁴² Iddoo dhagaawwan sun hooqamanii ba’an sanas dhagaawwan haaraa fidanii iddoo haa buusan; dhoqqee haaraadhaanis manicha haa maragan.

⁴³ “Yoo lamxiin sun erga dhagaawwan ba’anii manichi hooqamee maragamee booddee deebi’ee mana keessatti mul’ate, ⁴⁴ lubichi dhagee haa qoru; lamxiin sun kunoo mana keessa babal’atee jiraate, kun lamxii hamaa dha; manichis xuraa’aa dha. ⁴⁵ Manni sun haa diigamu; dhagaan isaa, mukni isaa akkasumas maraggiin isaa hundinuu lafa xuraa’aa magaalaa ala jirutti haa gatamu.

⁴⁶ “Namni yoo utuu manichi fufamee jiruu ol seene, namni sun hamma galgalaatti xuraa’aa dha. ⁴⁷ Namni mana sana seenee rafe yookaan keessatti waa nyaate uffata isaa haa miiccatu.

⁴⁸ “Garuu yoo lubni lamxii sana qoruudhaaf dhufee erga manichi maragamee booddee lamxiin sun babal’achuu baate waan lamxiin sun badeef lubni sun akka manni sun qulqullaa’e haa labsu. ⁴⁹ Innis manicha qulqulleessuuf simbirroo lama, muka birbirsaa, kirrii bildiimaa fi hiisophii haa dhi’eessu. ⁵⁰ Innis simbirroo sana keessaa tokko bishaan yaa’u kan okkotee keessa jiru irratti haa qalu. ⁵¹ Ergasiis birbirsaa, hiisophii, kirrii bildiimaa fi simbirroo lubbuu qabdu sana fudhee dhiiga simbirroo qalamtee fi bishaan yaa’u keessa cuuphee yeroo torba mana sanatti haa facaasu. ⁵² Innis dhiiga simbirrootiin, bishaan yaa’uun, simbirroo jirtuun, birbirsaa, hiisophii fi kirrii bildiimaadhaan manicha haa qulqulleessu. ⁵³ Simbirroo jirtuu immoo magaalaa alatti baasee dirreetti gad haa dhiisu. Haala kanaanis manichaaf araara buusa; manichis ni qulqullaa’a.”

⁵⁴ Kun seera dhukkuba lamxiitii fi hooqxoodhaaf, ⁵⁵ lamxii wayyaa irratti yookaan mana keessatti mul’atuuf, ⁵⁶ iitoodhaaf, finniisaaf yookaan baaroleedhaaf, ⁵⁷ akka wanni tokko qulqulluu yookaan xuraa’aa ta’e addaan baasuuf kennamee dha.

Kun seera lamxiidhaaf kennamee dha.

15

Dhangala’aa Dhangala’aa Dhangala’aa Ba’ee Nama Xureessu

¹ WAAQAYYOO Musee fi Arooniin akkana jedhe; ² “Akkana jedhaatii Israa’elootatti himaa; ‘Namni kam iyyuu dhangala’aa saala isaa keessaa ba’u yoo qabaate, inni sababii dhangala’aa sanaatiifuu xuraa’aa dha. ³ Dhangala’aan sun ittuma fufee saala isaa keessaa ba’us dhaabatus namicha inuma xureessa. Akki itti dhangala’aan saala isaa keessaa ba’u sun isa xureessus kanaa dha.

⁴ “Sireen namni dhangala’aan saala isaa keessaa ba’u irra ciisu hundinuu xuraa’aa ta’a; wanni inni irra taa’u hundinuu xuraa’aa ta’a. ⁵ Namni siree namicha sanaa tuqu uffata isaa haa miiccatu; dhagna isaa bishaaniin haa dhiqatu; inni hamma galgalaatti xuraa’aa ta’a. ⁶ Namni waan namichi dhangala’aan saala isaa keessaa ba’u sun irra taa’e irra taa’u kam iyyuu uffata isaa haa miiccatu; dhagna isaas bishaaniin haa dhiqatu; inni hamma galgalaatti xuraa’aa ta’a.

⁷ “‘Namni nama dhangala’aan saala isaa keessaa ba’u sana tuqu uffata isaa haa miiccatu; dhagna isaas bishaaniin haa dhiqatu; inni hamma galgalaatti xuraa’aa ta’a.

⁸ “‘Yoo namni dhangala’aan saala isaa keessaa ba’u sun nama qulqullaa’aa kamitti iyyuu tufe, namichi itti tufame sun uffata isaa haa miiccatu; dhagna isaa bishaaniin haa dhiqatu; inni hamma galgalaatti xuraa’aa ta’a.

⁹ “‘Kooraan namni dhangala’aan saala isaa keessaa ba’u sun irra taa’u hundinuu xuraa’aa ta’a. ¹⁰ Namni waan isa jala ture tuqu kam iyyuu hamma galgalaatti xuraa’aa ta’a. Namni isaan kanneen lafaa fuudhu uffata isaa haa miiccatu; dhagna isaa bishaaniin haa dhiqatu; inni hamma galgalaatti xuraa’aa ta’a.

¹¹ “‘Namni namichi dhangala’aan saala isaa keessaa ba’u sun utuu harka isaa bishaaniin hin dhiqatin tuqu kam iyyuu uffata isaa haa miiccatu; dhagna isaa bishaaniin haa dhiqatu; inni hamma galgalaatti xuraa’aa ta’a.

¹² “‘Okkoteen suphee kan namni dhangala’aan saala isaa keessaa ba’u sun tuqu haa caccabsamu; mi’i muka irraa hojjetame kam iyyuu bishaaniin haa dhiqamu.

¹³ “‘Namni yommuu dhangala’aan saala isaa keessaa ba’u irraa qulqulleeffamutti akka seeraatti qulqulleeffamuu isaatiif bultii torba haa lakkaa’atu; uffata isaa haa miiccatu; dhagna isaas bishaan yaa’uun haa dhiqatu; innis ni qulqullaa’a. ¹⁴ Innis guyyaa saddeettaffaatti gugee lama yookaan gugee sosookkee lama qabatee fuula WAAQAYYOO dura dhufee balbala dunkaana wal ga’ii irratti lubatti haa kennu. ¹⁵ Lubichis isa tokko aarsaa cubbuutiif kaan immoo aarsaa gubamuuf haa dhi’eessu. Haala kanaanis lubni sun sababii dhangala’aa nama sanaatiif fuula WAAQAYYOO duratti araara buusa.

¹⁶ “‘Namni tokko yommuu afeetaa dhangalaasutti dhagna isaa guutuu bishaaniin haa dhiqatu; inni hamma galgalaatti xuraa’aa ta’a. ¹⁷ Uffanni yookaan itilleen afeetaan tuqu

kam iyyuu bishaaniin haa miiccamu; mi'i sun hamma galgalaatti xuraa'aa ta'a. ¹⁸ Namni yoo niitii tokko wajjin ciisee afeetaa dhangalaase, lamaan isaanii iyyuu bishaaniin dhagna isaanii haa dhiqatan; isaan hamma galgalaatti xuraa'oo ta'u.

¹⁹ "Dubartiin yoo dhangala'aa dhiigaa kan yeroo isaa eeggatee dhagna ishee keessaa ba'u qabaatte, isheen xuraa'ummaa xurii ji'aa isheetiin bultii torba turti; namni ishee tuqu kam iyyuu hamma galgalaatti xuraa'aa ta'a.

²⁰ "Wanni isheen yeroo xurii isheetti irra ciiftu xuraa'aa ta'a; wannii isheen irra teessu kam iyyuus xuraa'aa ta'a. ²¹ Namni siree ishee tuqu uffata isaa haa miiccatu; dhagna isaas bishaaniin haa dhiqatu; inni hamma galgalaatti xuraa'aa ta'a. ²² Namni waan isheen irra teessu tuqu uffata isaa haa miiccatu; dhagna isaas bishaaniin haa dhiqatu; inni hamma galgalaatti xuraa'aa ta'a. ²³ Namni yoo sirees ta'u waan isheen irra taa'aa turte kam iyyuu tuqe inni hamma galgalaatti xuraa'aa ta'a.

²⁴ "Namni yoo ishee wajjin ciisee xuraa'ummaan ishee isa tuqe, inni bultii torba xuraa'aa ta'a; sireen inni irra ciisu kam iyyuus xuraa'aa ta'a.

²⁵ "Dubartiin tokko yoo yeroo xurii ji'aa ishee malee guyyaa baay'eedhaaf dhangala'a dhiigaa qabaatte yookaan yoo dhangala'a dhiigaa kan yeroo xurii ishee booddees ittuma fufu qabaatte isheen akkuma yeroo xurii ishee sanatti hamma dhangala'aan sun jirutti xurooftuu taati. ²⁶ Sireen isheen yeroo dhangala'aan ishee ittuma fufee yaa'utti irra ciiftu akkuma siree ishee kan yeroo xurii ji'aa ishee sanaatti xuraa'aa ta'a; wannii isheen irra teessu kam iyyuu akkuma yeroo xurii isheetti xuraa'aa ta'a. ²⁷ Namni isaan tuqu kam iyyuu ni xuraa'a; inni uffata isaa haa miiccatu; dhagna isaas bishaaniin haa dhiqatu; inni hamma galgalaatti xuraa'aa ta'a.

²⁸ "Isheen erga dhangala'aa ishee irraa qulqullooftee booddee guyyaa torba haa lakkaa'attu; ergasii immoo akka seeraatti ni qulqulloofti. ²⁹ Isheenis guyyaa saddeettaffaatti gugee lama yookaan gugee sosookkee lama fuutee, balbala dunkaana wal ga'ii irratti lubatti haa fiddu. ³⁰ Lubichis isa tokko aarsaa cubbuutiif, kaan immoo aarsaa gubamuuf haa dhi'eessu. Haala kanaanis sababii xuraa'ummaa dhangala'aa isheettiif fuula WAAQAYYOO duratti araara buusa.

³¹ "Isin akka Israa'eloonni iddoo bultii koo kan gidduu isaanii jiru sana xureessuudhaan xuraa'ummaa isaaniitiin hin duuneef waan isaan xureessu irraa addaan isaan baasuu qabdu."

³² Wannii kun seera nama dhangala'aan saala isaa keessaa ba'uuf, nama afeetaan saala isaa keessaa ba'u xureessuuf, ³³ dubartii xurii ji'aa qabduuf, dhiira yookaan dubartii dhangala'aan saala keessaa ba'uu fi nama dubartii akka seeraatti qulqulluu hin ta'in tokko wajjin ciisu kamiif iyyuu kennamee dha.

16

Guyyaa Itti Araarri Bu'u

16:2-34 kwf - Lew 23:26-32; Lak 29:7-11

¹ WAAQAYYOS du'a ilmaan Aroon kanneen yeroo fuula WAAQAYYOO duratti dhi'aatanitti du'an sana lamaanii booddee Museetti dubbate. ² WAAQAYYOO Museedhaan akkana jedhe; "Sababii ani teessoo araaraa gararraatti duumessaan mul'adhuuf akka obboleessi kee Aroon yeruma fedhetti gara Iddoo Iddoo Hunda Caalaa Qulqulluu kan golgaa keessa fuula teessoo araaraa dura taabota irra jiru sanaa ol hin seenne itti himi; yoo kanaa achii inni ni du'a.

³ "Akki Aroon itti Iddoo Iddoo Hunda Caalaa qulqulluu sana seenu kanaa dha: Aarsaa cubbuutiif dibicha tokko, aarsaa gubamuuf immoo korbeessa hoolaa tokko haa fidu. ⁴ Innis kittaa quncee talbaa irraa hojjetame qulqulluu isaatii fi uffata dhagna isaatii aanu kan quncee talbaa irraa hojjetame haa kaa'atu. Sabbata quncee talbaa irraa hojjetame hidhatee marata mataa kan quncee talbaa irraa hojjetames haa maratu; kunneen uffata qulqulluu dha. Kanaafuu inni utuu uffata sana hin uffatin dhagna isaa bishaaniin haa dhiqatu. ⁵ Waldaa saba Israa'el irraas aarsaa cubbuutiif korommii re'ee lama, aarsaa gubamuuf immoo korbeessa hoolaa tokko haa fuudhu.

⁶ "Aroon aarsaa cubbuu ofii isaatiif dibicha sana dhi'eessee ofii isaatii fi warra mana isaa jiraniif araara haa buusu. ⁷ Ergasiis re'oota lamaan sana fuudhee balbala dunkaana wal ga'ii irratti fuula WAAQAYYOO duratti haa dhi'eessu. ⁸ Aroonis re'oota sana lamaanitti ixaa haa buusu; ixaa tokko WAAQAYYOO, kaan immoo re'ee gad lakkifamuuf haa buusu. ⁹ Aroonis re'ee ixaa WAAQAYYOO irra bu'e sana fidee aarsaa cubbuu godhee haa dhi'eessu. ¹⁰ Garuu re'een akka re'ee gad lakkifamu ta'uuf ixaadhaan filatame sun akka re'ee gad lakkifamu tokkootti gammoojjiitti gad ari'amudhaan akka araara buusuuf utuu lubbuudhaan jiruu fuula WAAQAYYOO duratti haa dhi'eeffamu.

¹¹ “Aronis aarsaa cubbuu ofii isaatiif dibicha sana dhi’eessee ofii isaatii fi warra mana isaa jiraniif araara haa buusu; dibicha sanas cubbuu ofii isaatiif haa qalu. ¹² Innis girgiraa barbadaa ibiddaa iddoo aarsaa kan fuula WAAQAYYOO dura jiru irraa itti guutame tokko fuudhee ixaana urgaa’aa daakamee bullaa’es konyee lama fuudhee golgaa sana keessa haa seenu. ¹³ Innis akka hin duuneef, akka aarri ixaana sanaa teessoo araaraa kan dhuga ba’umsaa gubbaa jiru sana haguuguuf ixaana sana ibidda fuula WAAQAYYOO dura jirutti haa naqu. ¹⁴ Dhiiga dibicha sanaa irraa fuudhee karaa fuulduraatiin teessoo araaraatti quba isaatiin haa facaasu; ergasii immoo dhiiga isaa fuudhee fuula teessoo araaraa duratti yeroo torba quba isaatiin haa facaasu.

¹⁵ “Re’ee sanas aarsaa cubbuu sabaa godhee haa qalu; dhiiga isaas fuudhee golgaa keessa seenuudhaan akkuma dhiiga dibicha sanaa godhe sana haa godhu; dhiiga sanas teessoo araaraa irrattii fi fuula teessoo araaraa duratti haa facaasu. ¹⁶ Cubbuun isaanii waanuma fedhe ta’u illee inni sababii xuraa’ummaa fi fincila saba Israa’eliif Iddoo Iddoo Hunda Caalaa Qulqulluu sana haala kanaan araara haa buusu; dunkaana wal ga’ii kan xuraa’ummaa isaanii keessa isaan gidduu jiruufis akkasuma haa godhu. ¹⁷ Yeroo Aroon Iddoo Iddoo Hunda Caalaa Qulqulluu sana keessatti araara buusuuf ol seenee jalqabee hamma inni ofii isaatiif, warra mana isaa jiraniif fi waldaa Israa’el hundaaf araara buusee gad ba’utti namni tokko iyyuu dunkaana wal ga’ii keessatti hin argamin.

¹⁸ “Ergasiis iddoo aarsaa kan fuula WAAQAYYOO dura jiru sanatti gad ba’ee iddoo aarsaa sanaaf araara haa buusu. Innis dhiiga dibicha sanaa irraa fuudhee, dhiiga re’ee sanaa irraas fuudhee gaanfa iddoo aarsaa sanaa hunda irratti haa naqu. ¹⁹ Innis iddoo aarsaa sana xuraa’ummaa saba Israa’el irraa qulqulleessee addaan baasuuf dhiiga sana irraa quba isaatiin yeroo torba iddoo aarsaa irratti haa facaasu.

²⁰ “Aroon erga Iddoo Iddoo Hunda Caalaa Qulqulluu sana, dunkaana wal ga’iitii fi iddoo aarsaatiif araara buusee raawwatee booddee re’ee lubbuudhaan jiru sana gara fuulduraatti haa dhi’eessu. ²¹ Innis harka isaa lamaanuu mataa re’ee lubbuudhaan jiru sanaa irra kaa’ee achi irratti hamminaa fi fincila saba Israa’el jechuunis cubbuu isaanii hunda hima. Yakka hundas mataa re’ee sanaa irra kaa’ee re’ee sana nama hojji kanaaf filatame tokkotti kennee gara gammoojjitti haa ari’u. ²² Re’een sunis cubbuu isaanii hunda of irratti baatee gara lafa namni hin dhaqneetti geessa; namichis gammoojjii keessatti isa gad dhiisa.

²³ “Ergasiis Aroon dunkaana wal ga’ii seenee uffata quncee talbaa irraa hojjetame kan utuu Iddoo Iddoo Hunda Caalaa Qulqulluu sana hin seenin uffate sana baafatee achumatti haa dhiisu. ²⁴ Innis lafa qulqulluu tokkotti dhagna isaa bishaaniin dhiqatee uffata isa haa uffatu; ergasii immoo gad ba’ee ofii isaatii fi saba sanaaf araara buusuuf, ofii isaatiif aarsaa gubamu, saba sanaafis aarsaa gubamu haa dhi’eessu. ²⁵ Cooma aarsaa cubbuu illee iddoo aarsaa irratti haa gubu.

²⁶ “Namichi re’ee sana akka re’ee gad lakkifamu tokkootti gad dhiisu sun wayyaa isaa miiccatee dhagna isaa bishaaniin haa dhiqatu; ergasii gara qubataatti ol galuu danda’a. ²⁷ Dibichii fi re’een aarsaa cubbuutiif dhi’effaman kanneen dhiigni isaanii araara buusuuf Iddoo Iddoo Hunda Caalaa Qulqulluutti fidame sun qubata keessaa haa baafaman; gogaan isaanii, foonii fi mi’i garaa isaanii haa gubamu. ²⁸ Namichi wantoota kanneen gubus uffata isaa miiccatee dhagna isaa bishaaniin haa dhiqatu; ergasii gara qubataatti ol galuu danda’a.

²⁹ “Seerri bara baraan isiniif kenname kanaa dha: Dhalataa biyyaas ta’u alagaan isin gidduu jiraatu guyyaa kurnaffaa ji’a torbaffaatti gad of haa qabu; hojji tokko iyyuus hin hojjetin. ³⁰ Sababiin isaa isin qulqulleessuuf guyyaan kun guyyaa itti araarri bu’u dha; ergasiis isin fuula WAAQAYYOO duratti cubbuu keessan hunda irraa ni qulqullooftu.

³¹ Kun waan sanbata boqonnaa ta’eef isin gad of deebisuu qabdu; innis seera bara baraa ti. ³² Lubni iddoo abbaa isaa bu’ee luba ol aanaa ta’uuf dibamee muudamu araara buusuu qaba; innis wayyaa qulqulluu kan quncee talbaa irraa hojjetame uffatee, ³³ Iddoo Iddoo Hunda Caalaa Qulqulluuf, dunkaana wal ga’iitiif, iddoo aarsaatiif, lubootaa fi miseensota waldaa hundaafis araara haa buusu.

³⁴ “Seerri bara baraan isiniif kenname kanaa dha: Kunis akka cubbuu Israa’elootaa hundaaf waggaatti yeroo tokko araarri buufamuuf.”

Wanni sunis akkuma WAAQAYYOO Musee ajajetti hojjetame.

17

Dhiiga Nyaachuun Dhowwaa dha

¹ WAAQAYYOO Museedhaan akkana jedhee; ² “Aroonii fi ilmaan isaatti, saba Israa’el hundattis akkana jedhii himi; ‘Wanni WAAQAYYOO ajaje kunoo kana: ³ Saba Israa’el

keessaa namni kam iyyuu yoo qubata keessatti yookaan qubataan alatti sangaa yookaan hoolaa yookaan re'ee qalee ⁴ dunkaana qulqulluu WAAQAYYOO duratti aarsaa godhee WAAQAYYOOOF dhi'eessuuf balbala dunkaana wal ga'iitti fiduu baate namichi sun dhiiga dhangalaase sanatti ni gaafatama; inni dhiiga dhangalaaseeraatii saba isaa keessaa haa balleeffamu. ⁵ Kunis akka Israa'eloonni aarsaawwan amma alatti dhi'eessaa jiran kana WAAQAYYOOOF fidaniif. Isaanis aarsaawwan kanneen aarsaa nagaa godhanii WAAQAYYOOOF dhi'eessuuf balbala dunkaana wal ga'ii irratti lubatti haa fidan. ⁶ Lubichis dhiiga sana iddoo aarsaa WAAQAYYOO kan balbala dunkaana wal ga'ii irra jiru sanatti haa facaasu; cooma isaas urgaa WAAQAYYOTTI tolu godhee haa gubu. ⁷ Isaanis si'achi waaqota tolfamoo bifa re'ee kanneen duukaa bu'anii sagaagalaa turan sanaaf aarsaa isaanii tokko illee dhi'eessuu hin qaban; kunis isaaniif dhaloota dhufuuf seera bara baraa ta'a.'

⁸ "Akkanas isaaniin jedhi; 'Saba Israa'el keessaa namni kam iyyuu yookaan alagaan isaan gidduu jiraatu kam iyyuu yoo aarsaa gubamu yookaan qalma dhi'eessaa ⁹ balbala dunkaana wal ga'ii duratti WAAQAYYOOOF aarsaa dhi'eessuuf fiduu baate namichi sun saba isaa keessaa haa balleeffamu.

¹⁰ " 'Saba Israa'el keessaa namni kam iyyuu yookaan alagaan gidduu isaanii jiraatu kam iyyuu dhiiga yoo nyaate, ani nama dhiiga nyaate sana fuula ittin hammaa dha; saba isaa keessa isa nan balleessa. ¹¹ Sababii jireenyi waan lubbuu qabu tokkoo dhiiga keessa jiruuf ani ittiin araara lubbuu keessaniif buusuudhaaf dhiiga sana iddoo aarsaa irratti isinii kenneera; wanni jireenya namaatiif araara buusus dhiiga. ¹² Kanaafuu ani Israa'elootaan, "Isin keessaa namni tokko iyyuu dhiiga hin nyaatin yookaan alagaan gidduu keessan jiraatu dhiiga hin nyaatin" nan jedha.

¹³ " 'Saba Israa'el keessaa namni kam iyyuu yookaan alagaan gidduu keessan jiraatu kan bineensa yookaan simbira nyaatamu adamsu kam iyyuu dhiiga waan sanaa dhangalaasee biyyoo itti haa deebisu; ¹⁴ jireenyi waan lubbuu qabu tokkoo dhiiga isaa ti. Sababii ani Israa'elootaan, "Waan jireenyi waan lubbuu qabu hundaa dhiiga isaa ta'eef isin dhiiga waan lubbuu qabu tokko illee hin nyaatinaa; namni dhiiga nyaatu kam iyyuu saba keessaa haa balleeffamuu" jedheefis kanuma.

¹⁵ " 'Namni kam iyyuu dhalataa biyyaas ta'u alagaan waan du'ee argame yookaan bineensi ciccire nyaatu uffata isaa haa miiccatu; dhagna isaas bishaaniin haa dhiqatu; inni hamma galgalaatti akka seeraatti xuraa'aa dha; ergasii ni qulqullaa'a. ¹⁶ Yoo uffata isaa miiccachuu fi dhagna isaa dhiqachuu baate garuu inni cubbuu sanatti ni gaafatama.' "

18

Wal Bira Ga'uu Seeraan Alaa

¹ WAAQAYYO Museedhaan akkana jedhe; ² "Akkana jedhii Israa'elootatti himi; 'Ani WAAQAYYO Waaqa keessan. ³ Isin waan isaan biyya Gibxi, biyya isin keessa jiraachaa turta sana keessatti hojjetan hin hojjetinaa; waan biyya Kana'aan, biyya ani itti isin galchuuf jiru keessatti hojjetamus hin hojjetinaa. Seera isaani duukaa hin bu'inaa. ⁴ Isin seera kootiif ajajamaa; ajaja koos sirriitti eegaa; ani WAAQAYYO Waaqa keessanii dha. ⁵ Ajaja koo fi seera koo eegaa; namni isaaniif ajajamu isaaniin jiraataatii; ani WAAQAYYO.

⁶ " 'Namni kam iyyuu fira dhiigaa kam iyyuu wajjin wal bira ga'uuf itti hin dhi'aatin; ani WAAQAYYO.

⁷ " 'Haadha kee wajjin wal bira ga'uudhaan abbaa kee hin salphisin; isheen haadha kee ti; ishee wajjin wal bira hin ga'in.

⁸ " 'Niitii abbaa keetii wajjin wal bira hin ga'in; wanni kun abbaa kee salphisa.

⁹ " 'Isheen manuma keettis ta'u yookaan alatti dhalattu illee obboleettii kee, intala abbaa keetii yookaan haadha keetii wajjin wal bira hin ga'in.

¹⁰ " 'Intala ilma keetii yookaan intala intala keetii wajjin wal bira hin ga'in; wanni kun si salphisa.

¹¹ " 'Intala niitii abbaa keetii kan abbaa keetiif dhalatte wajjin wal bira hin ga'in; isheen obboleettii kee ti.

¹² " 'Obboleettii abbaa keetii wajjin wal bira hin ga'in; isheen abbaa keetiif fira dhiigaa ti.

¹³ " 'Obboleettii haadha keetii wajjin wal bira hin ga'in; isheen haadha keetiif fira dhiigaa ti.

¹⁴ " 'Wal bira ga'uuf jettee niitii obboleessa abbaa keetiitti dhi'aatee isa hin salphisin; isheen niitii obboleessa abbaa keetii ti.

¹⁵ " 'Niitii ilma keetii wajjin wal bira hin ga'in. Isheen niitii ilma keetii ti; ishee wajjin wal bira hin ga'in.

16 “Niitii obboleessa keetii wajjin wal bira hin ga’in; wanni sun obboleessa kee salphisa.

17 “Dubartii tokkoo fi intala ishee wajjin wal bira hin ga’in. Intala ilma dubartii sanaa yookaan intala intala ishee wajjin wal bira hin ga’in; isaan isheedhaaf fira dhiigaa ti; wanni kun jal’ina.

18 “Utuu niitiin kee lubbuudhaan jirtuu obboleettii ishee masaanuu ishee gootee hin fuudhin; ishee wajjinis wal bira hin ga’in.

19 “Yeroo dubartiin tokko xuraa’ummaa xurii ji’aa of irraa qabduutti, bira ga’uudhaaf jettee isheetti hin dhi’aatin.

20 “Niitii namaa wajjin wal bira geessee isheedhaan of hin xureessin.

21 “Ijoollee kee keessaa tokko illee akka Moolekiif aarsaa ta’aniif hin kennin; ati maqaa Waaqa keetii hin xureessin. Ani WAAQAYYO.

22 “Akka namni dubartii wajjin ciisu ati dhiira wajjin hin ciisin; wanni kun hojii jibbisiisaa dha.

23 “Horii kam iyyuu wajjin wal bira geessee of hin xureessin; dubartiin horii wajjin wal bira ga’uuf ofii ishee itti hin kennin; kun waan karaa irraa goree dha.

24 “Sababii namoonni ani ari’ee isin duraa baasuuf jiru kunneen haala kanaan xuraa’anii isin karaa kanneen keessaa kamiin iyyuu of hin xureessinaa. 25 Lafti iyyuu xuroofteerti; kanaafuu ani sababii cubbuu isheettiifan ishee adabe; laftis jiraattota ishee ni tufti. 26 Isin garuu ajaja koo fi seera koo eegaa. Dhalataan biyyaatiif fi alagoonni isin gidduu jiraatanis waan jibbisiisaa kana keessaa kam iyyuu hin hojjetin. 27 Namoonni isiniin dura biyya sana keessa jiraatanis waan kana hunda hojjetanii akkasiin biyyattiin xuroofte. 28 Isinis lafa kana yoo xureessitan, lafti akkuma saboota isin dura turan tufte sana isiniin illee ni tufti.

29 “Namni wantoota jibbisiisoo kanneen keessaa tokko illee hojjetu kam iyyuu saba isaa keessaa haa balleeffamu. 30 Ajaja koo eegaa; barteewwan jibbisiisoo isin dura hojjetamaa turan sana keessaa tokko illee duukaa butanii ittiin of hin xureessinaa; ani WAAQAYYO Waaqa keessan.’”

19

Seera Adda Addaa

1 WAAQAYYO Museedhaan akkana jedhe; 2 “Akkana jedhii waldaa saba Israa’el hundatti himi; Ani WAAQAYYO Waaqni keessan qulqulluudhaatii isinis qulqulloota ta’aa.

3 “Tokkoon tokkoon keessan haadha keessanii fi abbaa keessaniif ulfina kennaa; Sanbatoota koos eegaa. Ani WAAQAYYO Waaqa keessan.

4 “Gara waaqota tolfamootii hin deebi’inaa yookaan sibiila baqfame irraa ofii keessaniif waaqota hin tolfatinaa. Ani WAAQAYYO Waaqa keessan.

5 “Yommuu aarsaa nagaa WAAQAYYOOF dhi’eessitanitti akka aarsaan keessan fudhatama isiniif argatu godhaatii dhi’eessaa. 6 Aarsaan isin dhi’eessitanis guyyuma sana yookaan guyyaa itti aanu haa nyaatamu; garuu wanni hafee hamma guyyaa sadaffaatti ture haa gubamu. 7 Waan kana keessaa tokko iyyuu yoo guyyaa sadaffaatti nyaatame xuraa’aa dha; fudhatamas hin argatu. 8 Namni waan sana nyaatu sababii waan WAAQAYYOON qulqulleeffame xureesseef itti gaafatama; namichi sun saba isaa keessaa haa balleeffamu.

9 “Yommuu oomisha lafa keessanii walitti qabattanitti hamma daariitti hin haaminaa; qarmii isaa illee hin funaannatinaa. 10 Qarmii iddoo dhaabaa wayinii keetii hin funaanin yookaan ija wayinii keetii kan harca’e hin funaanin. Hiyyeeyyii fi alagootaaf dhiisaa. Ani WAAQAYYO Waaqa keessan.

11 “Hin hatinaa.

“Hin sobinaa.

“Walis hin gowwoomsinaa.

12 “Sobaan maqaa kootiin hin kakatinaa; akkasiinis maqaa Waaqa keessanii hin xureessinaa. Ani WAAQAYYO.

13 “Ollaa kee gowwoomsitee waa irraa hin fudhatin yookaan hin saamin.

“Mindaa nama qaxarame tokkoo hamma bari’utti of bira hin bulchin.

14 “Nama gurra duudaa hin abaarin yookaan nama jaamaa dura gufuu hin kaa’in; garuu Waaqa kee sodaadhu. Ani WAAQAYYO.

15 “Murtii hin jal’isinaa; nama wal caalchisuudhaan gara hiyyeessaa hin gorinaa; nama guddaafis hin looginaa; ollaa keetiif garuu murtii qajeelaa kenni.

16 “Saba kee gidduutti hamii hin facaasin.

“Waan jireenya ollaa keetii balaa irra buusu hin hojjetin. Ani WAAQAYYO.

17 “Garaa keetti obboleessa kee hin jibbin; akka cubbuu isaa keessatti qooda hin qabaanneef ollaa kee ifaana ifatti itti dheekkami.

18 “Saba kee keessaa nama tokkotti iyyuu haaloo hin ba’in yookaan haaloo itti hin qabatan; ollaa kee garuu akkuma ofii keetiitti jaalladhu. Ani WAAQAYYO.

19 “Sirna koo eegaa.

“Horii gosa gosaa walitti hin diqaalomsinaa.

“Midhaan gosa lama lafa qotiisaa keessanitti hin facaasinaa.

“Wayyaa waan lama irraa hojjetame hin uffatinaa.

20 “Namni garbittii nama biraaf kaadhimamte kan hin furamin yookaan bilisummaan ishee hin kennaminiif wajjin yoo wal bira ga’e isaan adabamuu qabu; ta’us waan dubartiin sun hin bilisoominiif isaan hin ajjeefamin. 21 Namichi sun garuu korbeessa hoolaa tokko aarsaa yakkaatiif gara balbala dunkaana wal ga’iitti WAAQAYYOOF haa fidu. 22 Lubichis korbeessa hoolaa aarsaa yakkaa sanaan cubbuu namichi hojjetee sanaaf fuula WAAQAYYOO duratti araraa haa buusu; cubbuun namichaas ni dhiifamaaf.

23 “Isin yommuu biyyattiitti galtanii muka ija kennu kan gosa hundaa dhaabdanitti, akka waan iji isaa dhowwameetti fudhadhaa. Isin akka waan iji sun hamma waggaa sadiitti dhowwameetti ilaalaa; iji sun hin nyaatamin. 24 Waggaa afuraffaatti immoo iji isaa hundinuu ni qulqullaa’a; WAAQAYYOOFIS aarsaa galataa ta’a. 25 Waggaa shanaffaatti garuu ija isaa nyaachuu dandeessu. Haala kanaan oomishni keessan ni guddata. Ani WAAQAYYO Waaqa keessan.

26 “Utuu dhiigni keessa jiruu foon kam iyyuu hin nyaatinaa.

“Tolcha yookaan falfala hin hojjetinaa.

27 “Rifeensa mataa keessanii naannessitanii hin haaddatinaa yookaan qarqara areeda keessaniis hin murmuratinaa.

28 “Nama du’eef jettanii dhagna keessan hin mammadeessinaa yookaan mallattoo tumaa tokko illee of irratti hin tolfatinaa. Ani WAAQAYYO.

29 “Akka lafti halalummaatti deebitee hamminaan hin guutamneef intala kee akka isheen ejjitu gochuudhaan ishee hin salphisin.

30 “Sanbatoota koo eegaa; iddoo qulqulluu koos kabajaa. Ani WAAQAYYO.

31 “Isin akka hin xuroofneef ilaaltota bira hin deeminaa yookaan warra ekeraa dubbisan hin barbaadinaa. Ani WAAQAYYO Waaqa keessan.

32 “Warra dullomaniif ka’i; jaarsaaf ulfina kenni; Waaqa kee sodaadhu. Ani WAAQAYYO.

33 “Yoo alagaan biyya keessan keessa isin wajjin jiraate isa hin cunqursinaa.

34 Alagaan isin gidduu jiraatu sun akka dhalataa biyya keessaniitti haa ilaalamu. Akka ofii keessaniitti isa jaalladhaa; isinis biyya Gibxitti alagoota turtaniitii. Ani WAAQAYYO Waaqa keessan.

35 “Isin yommuu dheerina, ulfinaa fi baay’ina wayii safartanitti madaalii gowwoomsaatti hin fayyadaminaa. 36 Safartuu fi madaalii dhugaatti, iifii* fi iinii† dhugaatti fayyadamaa. Ani WAAQAYYO Waaqa keessan kan biyya Gibxii baasee isin fidee dha.

37 “Ajajaa fi seera koo hunda eegaatii duukaa bu’aa. Ani WAAQAYYO.’”

20

Adabbii Cubbuun Fidu

1 WAAQAYYO Museedhaan akkana jedhe; 2 “Israa’elootaan akkana jedhi; ‘Namni Israa’el yookaan alagaan Israa’el keessa jiraatu kan ilmaan isaa keessaa Moolekiif kennu kam iyyuu haa ajjeefamu; sabni biyya sanaa dhagaadhaan isa haa tumu. 3 Sababii namichi sun ilmaan isaa Moolekiif kennuudhaan iddoo qulqulluu koo xureessee maqaa koo qulqulluu sana salphiseef, ani fuula itti hammaadhee saba isaa keessaa isa nan balleessa. 4 Sabni biyya sanaa yeroo namichi sun ilmaan isaa keessaa tokko Moolekiif kennutti yoo fuula irraa deebifatee isa ajjeesuu dhiise, 5 ani namicha sanaa fi maatii isaatti fuula hammaadhee isaa fi warra isa faana bu’anii sagaagaluudhaan Moolekitti of kennan hunda saba isaanii keessaa nan balleessa.

6 “Nama isaan duukaa bu’uudhaan sagaagaluuf jedhee gara ilaaltotaatii fi warra ekeraa dubbisaniitti deebi’utti ani fuula ittan hammaadha; saba isaa keessaa isa nan balleessa.

7 “‘Of qulqulleessaa; qulqullootas ta’aa; ani WAAQAYYO Waaqa keessaniitii. 8 Sirna koo eegaa; duukaa bu’aas. Ani WAAQAYYO isa isin qulqulleessuu dha.

* 19:36 19:36 Iifin tokko liitirii 22. † 19:36 19:36 Iiniin tokko liitirii 4.

⁹ “Namni abbaa isaa yookaan haadha isaa abaare kam iyyuu haa ajjeefamu. Inni abbaa isaa yookaan haadha isaa abaareeraatii dhiigni isaa matuma isaatti deebi’a.

¹⁰ “Yoo namni niitii nama biraa wajjin jechuunis niitii ollaa isaa wajjin sagaagale namichi sagaagalee fi niitiin sagaagalte sun haa ajjeefaman.

¹¹ “Namni yoo niitii abbaa isaa wajjin ciise inni abbaa isaa salphiseera. Namichis, dubartiin sunis haa ajjeefaman; dhiigni isaanii matuma isaaniitti deebi’a.

¹² “Yoo namni niitii ilma isaa wajjin ciise lamaan isaanii iyyuu haa ajjeefaman. Isaan haraamuu dha; dhiigni isaanii matuma isaaniitti deebi’a.

¹³ “Yoo namni akkuma dubartii wajjin ciisutti dhiira wajjin ciise lamaan isaanii iyyuu waan jibbisiisaa hojjetaniiru. Isaan haa ajjeefaman; dhiigni isaanii matuma isaaniitti deebi’a.

¹⁴ “Namni tokko yoo intalaa fi haadha ishee fuudhe, wanni kun xuraa’ummaa dha. Akka isin gidduutti xuraa’ummaan akkasii hin argamneef namichii fi dubartoonni lamaan ibiddaan haa gubaman.

¹⁵ “Namni tokko yoo horii wajjin wal bira ga’e haa ajjeefamu; horii sana illee ajjeesaa.

¹⁶ “Yoo dubartiin horii kamitti iyyuu dhi’aattee horii sana wajjin wal bira geesse, dubartiin sunii fi horiin sun haa ajjeefaman; dhiigni isaanii matuma isaaniitti deebi’a.

¹⁷ “Namni tokko yoo obboleettii isaa jechuunis intala abbaa isaa yookaan intala haadha isaa fuudhee wal bira ga’an wanni kun salphina. Isaan tuma sabni isaanii arguu saba isaanii keessaa haa balleeffaman; namichi kun obboleettii isaa salphiseera; itti gaafatamas.

¹⁸ “Namni tokko yoo yeroo dubartiin tokko xurii ji’aa of irraa qabduutti ishee bira ga’e, inni madda dhangala’aa ishee ifatti baaseera; isheenis madda dhangala’aa ishee mul’ifteerti. Lamaan isaanii iyyuu saba isaanii keessaa haa balleeffaman.

¹⁹ “Obboleettii haadha keetii yookaan abbaa keetii wajjin wal bira hin ga’in; wanni sun fira dhiigaa salphisaatii; isin lamaanuus itti gaafatamtu.

²⁰ “Namni tokko yoo niitii eessuma isaa wajjin wal bira ga’e inni eessuma isaa salphiseera. Isaan itti gaafatamu; utuu ijoollee hin argatinis du’u.

²¹ “Namni tokko yoo niitii obboleessa isaa fuudhe, wanni kun hojii xuraa’ummaa ti; innis obboleessa isaa salphiseera. Isaan ijoollee malee hafu.

²² “Akka lafti ani akka isin keessa jiraattaniif itti isin fidu sun isin hin tufneef ajajaa fi seera koo hunda eegaa; duukaa bu’aas. ²³ Isin bartee saboota ani fuula keessan duraa ari’ee baasuuf jiru kanneenii duukaa hin bu’inaa; sababii isaan wantoota kanneen hunda hojjetaniif ani isaan jibbeera. ²⁴ Ani garuu, “Isin lafa isaanii ni dhaaltu; anis lafa aannanii fi damma baasu dhaala godhee isiniifin kenna” jedheera. Ani WAAQAYYO Waaqa keessan kan saboota kaan irraa addaan isin baasee dha.

²⁵ “Kanaafuu isin bineensa qulqullaa’aa fi xuraa’aa, simbirroo xuraa’aa fi qulqullaa’aa addaan baasaa. Bineensa yookaan simbirroo yookaan waan lafa irra munyuuqu kanneen ani isiniif xuraa’ota jedhee addaan baase kamiin iyyuu of hin xureessinaa. ²⁶ Sababii ani WAAQAYYO qulqulluu ta’ee fi akka isin kan koo taataniifis saboota kaan irraa addaan isin baaseef, isin qulqulloota naaf ta’aa.

²⁷ “Dhiirri yookaan dubartiin ilaalan yookaan ekeraa dubbisan haa ajjeefaman. Isaan dhagaadhaan haa tumaman; dhiigni isaanii matuma isaaniitti deebi’a.”

21

Seera Lubootaaf Kenname

¹ WAAQAYYO Museedhaan akkana jedhe; “Akkana jedhiitii ilmaan Aroon luboota sanatti dubbadhu: ‘Lubni tokko nama fira isaa keessaa du’eef jedhee of hin xureessin; ² garuu firoota dhiigaatiif jechuunis haadha isaa, abbaa isaa, ilma isaa, intala isaa, obboleessa isaa, ³ yookaan obboleettii isaa kan sababii hin heeruminiif isa wajjin jiraattuuf jedhee of xureessuu danda’a. ⁴ Garuu namoota karaa fuudhaa fi heerumaatiin firoota isaa ta’aniif jedhee of hin xureessin; akkasiinis xuraa’aa hin ta’in.

⁵ “Luboonni mataa isaanii yookaan qarqara areeda isaanii hin haadatin yookaan dhagna isaanii hin madeessin. ⁶ Isaan Waaqa isaaniitiif qulqulloota haa ta’an; maqaa Waaqa isaaniis hin xureessin. Isaan waan aarsaa ibiddaan WAAQAYYOOF dhi’eefamu, nyaata Waaqa isaanii sana dhi’eessaniif qulqulloota ta’uu qabu.

⁷ “Luboonni sababii Waaqa isaaniitiif qulqulloota ta’aniif isaan dubartoota sagaa-galummaadhaan xuraa’an yookaan kanneen dhirsoota isaanii hiikan fuudhuu hin qaban. ⁸ Ati isa qulqulleessi; inni nyaata Waaqa keetii dhi’eessaatii. Inni siif haa qulqullaa’u; ani WAAQAYYO inni isin qulqulleessu qulqulluudhaatii.

⁹ “Intalli luba tokkoo yoo sagaagalummaadhaan of xureessite isheen abbaa ishee salphifti; isheen ibiddaan haa gubamtu.

¹⁰ “Lubni obbolloota isaa keessaa luba ol aanaa ta’ee zayitiin ittiin diban mataa isaa irratti naqame kan akka uffata lubummaa uffatuuf muudame tokko mataa isaa filachuu hin dhiisin yookaan uffata ofii hin tarsaasin. ¹¹ Inni iddoo reeffi jiru hin seenin. Abbaa isaatiif yookaan haadha isaatiif iyyuu jedhee of hin xureessin; ¹² yookaan sababii zayitiin ittiin diban kan Waaqa isaa isa irra jiruuf inni iddoo qulqulluu sana keessaa hin ba’in yookaan iddoo qulqulluu Waaqa isaa hin xureessin. Ani WAAQAYYO.

¹³ “Dubartiin inni fuudhu durba ta’uu qabdi. ¹⁴ Inni haadha hiyyeessaa, niitii dhirsi hiike yookaan niitii sagaagalummaadhaan xuroofte hin fuudhin; garuu gosa isaa keessaa durba haa fuudhu; ¹⁵ kunis akka inni gosa isaa keessatti sanyii isaa hin xureessineef. Ani WAAQAYYO isa qulqulleessuu dha.”

¹⁶ WAAQAYYO Museedhaan akkana jedhe; ¹⁷ “Arooniin akkana jedhi: ‘Dhaloota itti aanu keessatti sanyii kee keessaa namni hir’ina qabu kam iyyuu nyaata Waaqa isaa dhi’eessuuf hin dhi’aatin. ¹⁸ Namni hir’ina kam iyyuu qabu tokko iyyuu jechuunis namni jaamaan yookaan naafni, namni bifaa fi dhagna hin tolle, ¹⁹ namni miilla yookaan harka cabaa qabu, ²⁰ yookaan namni dugda goophoo yookaan ooluun yookaan namni dhibee ijaa qabu yookaan namni madaa mala’u qabu, yookaan namni citoo qabu fi namni kolaafame hin dhi’aatin. ²¹ Sanyii Aroon lubichaa keessaa namni hir’ina qabu kam iyyuu aarsaa ibiddaan WAAQAYYOOF dhi’eeffamu dhi’eessuuf hin dhi’aatin. Inni waan hir’ina qabuuf nyaata Waaqa isaa dhi’eessuuf hin dhi’aatin. ²² Innis nyaata Waaqa isaa kan nyaata hunda caalaa qulqulluu ta’ee fi nyaata qulqulluu nyaachuu danda’u. ²³ Garuu inni sababii hir’ina qabuuf akka iddoo qulqulluu koo hin xureessineef golgaa keessa hin seenin yookaan iddoo aarsaatti hin dhi’aatin. Ani WAAQAYYO isa isaan qulqulleessuu dha.”

²⁴ Museen Aroonitti, ilmaan Aroonittii fi Israa’eloota hundatti waan kana hime.

22

¹ WAAQAYYO Museedhaan akkana jedhe; ² “Akka isaan maqaa koo qulqullicha hin xureessineef, akka isaan aarsaa qulqulluu Israa’eloonni addaan baasanii naa fidan sana akka gaariitti eeganiff Aroonii fi ilmaan isaatti himi. Ani WAAQAYYO.

³ “Akkanas Isaaniin jedhi: ‘Dhaloota dhufu keessa yoo sanyii kee keessaa namni tokko illee utuu akka seeraatti hin qulqullaa’in aarsaa Israa’eloonni WAAQAYYOOF addaan baasanitti dhi’aate namni sun fuula koo duraa haa balleffamu. Ani WAAQAYYO.

⁴ “‘Sanyii Aroon keessaa namni tokko yoo lamxii yookaan dhangala’aa saala isaa keessaa ba’u qabaate inni hamma qulqullaa’utti aarsaa qulqulluu sana hin nyaatin. Akkasumas yoo waan reeffaan xuraa’e yookaan nama afeetaa saala isaa keessaa dangala’u tuqe, ⁵ yookaan yoo waan lafa irra loo’u kan isa xureessu yookaan nama isa xureessu kam iyyuu tuqe, xuraa’ummaa kam iyyuu taanaan, ⁶ namni waan akkasii kam iyyuu tuqu hamma galgalaatti xuraa’aa ta’a. Inni yoo dhagna isaa bishaaniin dhiqate malee aarsaa qulqulluu sana keessaa tokko illee hin nyaatin. ⁷ Inni yeroo aduun lixxutti ni qulqullaa’a; ergasii immoo sababii wanni sun nyaata isaa ta’eef aarsaa qulqulluu sana nyaachuu danda’u. ⁸ Inni waan du’ee argame yookaan waan bineensi ciccire nyaachuudhaan of hin xurreessin. Ani WAAQAYYO.

⁹ “Luboanni akka ajaja koo tuffachuudhaan cubbuu hojjetanii hin duuneef ajaja koo haa eegan. Ani WAAQAYYO isaan qulqulleessuu dha.

¹⁰ “Namni maatii lubaa hin ta’in yookaan keessummaan lubaa yookaan namni lubichaaf qaxaramee hojjetu tokko illee aarsaa qulqulluu sana nyaachuu hin danda’u. ¹¹ Garuu yoo lubni maallaqaan garbicha bitate, yookaan yoo garbichi mana isaatti dhalate, garbichi sun nyaata lubichaa nyaachuu danda’u. ¹² Intalli lubaa yoo nama luba hin ta’initti heerumte, isheen aarsaa qulqulluu sana irraa nyaachuu hin dandeessu. ¹³ Ta’us intalli lubaa yoo haadha hiyyeessaa taate yookaan dhirsaa wal hiiktee utuu ijoollee hin qabaatin akkuma yeroo ijoollummaa isheetti mana abbaa ishee jiraachuuf deebite, isheen nyaata abbaa ishee irraa nyaachuu ni dandeessi. Ormi garuu nyaachuu hin danda’u.

¹⁴ “‘Namni yoo utuu hin beekin aarsaa qulqulluu tokko nyaate, inni waan sana iddoo buusee gatii waan sanaa harka shan keessaa harka tokko itti dabalee lubichaaf haa kennu. ¹⁵ Luboannis aarsaa qulqulluu Israa’eloonni WAAQAYYOOF dhi’eessan hin xureessin ¹⁶ yookaan akka sabni sun aarsaa qulqulluu sana nyaatu eeyyamuufiidhaan yakka gatii baasisu isaanitti hin fidin. Ani WAAQAYYO isaan qulqulleessuu dha.”

¹⁷ WAAQAYYO Museedhaan akkana jedhe; ¹⁸ “Aronnitti, ilmaan isaattii fi Israa’eloota hundatti akkana jedhii himi; ‘Yeroo saba Israa’el keessaa namni tokko yookaan alagaan Israa’el keessa jiraatu kam iyyuu aarsaa gubamu godhee wareega isaa yookaan aarsaa fedhiidhaan dhi’aatu WAAQAYYOOF dhi’eessutti, ¹⁹ isin akka wanni sun fudhatama isiniif argatuuf loon, hoolota yookaan re’oota keessaa korma hir’ina hin qabne tokko dhi’eessuu qabdu. ²⁰ Sababii inni isinii hin fudhatamneef waan hir’ina qabu kam iyyuu hin dhi’eessinaa ²¹ Yeroo namni loon yookaan bushaayee keessaa wareega guuttachuuf aarsaa fedhiidhaan dhi’effamu godhee aarsaa nagaa WAAQAYYOOF dhi’eessutti akka wanni sun fudhatama argatuuf wanni sun waan fayyaalessa yookaan waan hir’ina hin qabne haa ta’u. ²² Horii jaamaa yookaan cabaa yookaan dooluu yookaan kormommuu yookaan kan dhangala’aan dhagna isaa keessaa ba’u yookaan kan madaa mala’u qabu WAAQAYYOOF hin dhi’eessinaa. Kanneen akkasii keessaa tokko iyyuu aarsaa ibiddaan WAAQAYYOOF dhi’effamu gootanii iddoo aarsaa irra hin kaa’inaa. ²³ Ta’us sangaa yookaan hoolaa gar malee dheeraa yookaan gar malee gabaabaa ta’e aarsaa fedhiidhaan dhi’aatu gootanii dhi’eessuu ni dandeessu; garuu wanni kun wareega keessan guutuuf fudhatama hin argatu. ²⁴ Horii kolaafame yookaan kan tumame, kan kolaan isaa baqaqfame yookaan irraa murame tokko WAAQAYYOOF hin dhi’eessinaa; isin waan akkasii biyya keessan keessatti hin godhinaa; ²⁵ horii akkasii nama ormaa harkaa fuutanii nyaata Waaqa keessanii gootanii hin dhi’eessinaa. Horiin sun waan kolaafamee hir’ina qabuuf isiniif hin fudhatamu.”

²⁶ WAAQAYYO Museedhaan akkana jedhe; ²⁷ “Dibichi yookaan hoolaan yookaan re’een yommuu dhalatutti hamma bultii torbaatti haadha isaa wajjin haa turu. Guyyaa saddeettaffaadhaa jalqabee immoo aarsaa ibiddaan WAAQAYYOOF dhi’effamu ta’ee fudhatama ni argata. ²⁸ Guyyuma tokkotti, sa’a yookaan hoolaa ilmoo isaa wajjin hin galinaa.

²⁹ “Gaafa aarsaa galataa WAAQAYYOOF dhi’eessitanitti akka isiniif fudhatamuuf haala kanaan dhi’eessaa. ³⁰ Aarsaan kunis gaafuma sana nyaatamuu qaba; waan tokko illee hin bulchinaa. Ani WAAQAYYO.

³¹ “Ajajawwan koo eegaa; duukaa bu’aas. Ani WAAQAYYO. ³² Maqaa koo qulqullicha hin xureessinaa. Akka ani qulqulluu ta’e Israa’eloonni haa beeksisan. Ani WAAQAYYO kan isin qulqulleessu ³³ kanan Waaqa keessan ta’uudhaaf biyya Gibxii isin baasee dha. Ani WAAQAYYO.”

23

Ayyaanota Murtaa’oo

¹ WAAQAYYO Museedhaan akkana jedhe; ² “Akkana jedhiitti Israa’elootatti dubbadhu; ‘Kanneen ayyaanota koo murtaa’oo, ayyaanota WAAQAYYOOF kanneen isin guyyoota wal ga’ii qulqulluu jettanii labsitanii dha.

Sanbata

³ “Guyyoonni isin hojii itti hojjettan ja’atu jira; guyyaan torbaffaan garuu sanbata boqonnaa, guyyaa wal ga’ii qulqulluu ti. Isin hojii tokko illee hin hojjetinaa; iddoo isin jiraattan kamitti iyyuu kun sanbata WAAQAYYOOF ti.

Ayyaana Faasiikaatii fi Ayyaana Maxinoo

23:4-8 kwf – Bau 12:14-20; Lak 28:16-25; KeD 16:1-8

⁴ “Isaan kanneen ayyaanota WAAQAYYOOF murteeffamoo, waldaawwan qulqulluu isin yeroo isaaniitti labsitanii dha; ⁵ Faasiikaan WAAQAYYOOF galgala bultii kudha afuraffaa ji’a jalqabaatti jalqabama. ⁶ Guyyaa kudha shanaffaa ji’a jalqabaatti Ayyaana WAAQAYYOOF kan maxinootu jalqabama; isinis guyyaa torba buddeena raacitii hin qabne nyaadhaa. ⁷ Guyyaa jalqabaatti wal ga’ii qulqulluu qabaadhaa; hojii idilees hin hojjetinaa. ⁸ Bultii torba aarsaa ibiddaan WAAQAYYOOF dhi’effamu dhi’eessaa. Bultii torbaffaatti wal ga’ii qulqulluu qabaadhaa; hojii idilees hin hojjetinaa.”

Kennaa Hangafa

⁹ WAAQAYYO Museedhaan akkana jedhe; ¹⁰ “Akkana jedhii Israa’elootatti dubbadhu; ‘Yommuu biyya ani isiniif kennutti galtanii oomisha walitti qabdanitti bissii mataa midhaan walitti qabdan sanaa lubatti fidaa. ¹¹ Innis akka bissiin sun fudhatama isiniif argatuuf fuula WAAQAYYOOF duratti haa sochoosu; lubichis guyyaa Sanbata booddee jirutti haa sochoosu. ¹² Guyyaa bissii sana sochooftanitti, xobbaallaa hoolaa waggaa tokkoo kan hir’ina hin qabne aarsaa gubamu godhaatii WAAQAYYOOF dhi’eessaa; ¹³ kana

wajjinis aarsaa midhaanii daakuu bullaa'aa zayitiidhaan sukkuumame iifii* tokko irraa harka kudhan keessaa harka lama aarsaa urgaa'aa ibiddaan WAAQAYYOOF dhi'eeffamuu fi dhibaaayyuu daadhii wayinii iinii† tokko irraa harka afur keessaa harka tokko dhi'eessaa. ¹⁴ Isin hamma gaafa kennaa kana WAAQAYYOOF dhi'eessitanitti buddeena yookaan akaayii yookaan asheetii hin nyaatinaa. Kunis iddoo isin jiraattan hundatti dhaloota dhufuuf seera bara baraa haa ta'u.

Ayyaana Torbanootaa

23:15-22 kwf - Lak 28:26-31; KeD 16:9-12

¹⁵ "Guyyaa Sanbata booddee jiru, gaafa bissii aarsaa sochoofamu fiddanii jalqabaatii torbanoota torba guutuu lakkaa'aa. ¹⁶ Hamma guyyaa Sanbata torbaffaa booddee jiruutti guyyaa shantama lakkaa'aa; ergasii immoo aarsaa midhaan haaraa WAAQAYYOOF dhi'eessaa. ¹⁷ Iddoo jiraattan hundatti buddeena lama kan daakuu bullaa'aa iifii tokkoo irraa harka kudhan keessaa harka lamaa kan raacitiin itti makamee tolfame kennaa hangafa kan sochoofamu godhaatii WAAQAYYOOF fidaa. ¹⁸ Buddeena kana wajjinis xobbaallaawwan hoolaa torba kanneen hir'ina hin qabnee fi kanneen waggaa tokko tokkoo, dibicha tokkoo fi korbeeyyii hoolaa lama dhi'eessaa. Isaanis aarsaa midhaan isaaniiitti fi aarsaa dhibaaayyuu isaanii wajjin WAAQAYYOOF aarsaa gubamu ta'u; kunis aarsaa ibiddaan dhi'eeffamu kan urgaman isaa WAAQAYYOTTI toluu dha. ¹⁹ Ergasii aarsaa cubbuutiif korma re'ee tokko akkasumas xobbaallaa hoolaa lama kanneen waggaa tokko tokkoo aarsaa nagaatiif qalaa. ²⁰ Lubni immoo xobbaallaa hoolaa sana lamaan aarsaa sochoofamu godhee buddeena jalqabaa wajjin fuula WAAQAYYOO duratti haa sochoosu. Isaan kunneenis kan WAAQAYYOOF qulqulleeffamanii dha; gooda lubootaatis. ²¹ Isin gaafuma sana wal ga'ii qulqulluu labsaa; hojii idilees hin hojjetinaa. Kunis iddoo isin jiraattan hundatti dhaloota dhufuuf seera bara baraa haa ta'u.

²² "Yommuu oomisha lafa keessanii walitti qabdanitti hamma qarqaraatti hin haaminaa yookaan qarmii isaa hin funaaninaa; waan kana hiyyeeyyii fi alagootaaf hambisaa. Ani WAAQAYYO Waaqa keessan."

Ayyaana Malakataa

23:23-25 kwf - Lak 29:1-6

²³ WAAQAYYO Museedhaan akkana jedhe; ²⁴ "Israa'elootaan akkana jedhi; 'Isin guyyaa jalqaba ji'a torbaffaatti sanbata boqonnaa qabaadhaa; yaa'ii qulqulluu sagalee malakataatiin ayyaaneffamu qabaadhaa. ²⁵ Aarsaa ibiddaan WAAQAYYOOF dhi'eeffamu dhi'eessaa malee hojii idilee hin hojjetinaa.' "

Guyyaa Araarri Bu'u

23:26-32 kwf - Lew 16:2-34; Lak 29:7-11

²⁶ WAAQAYYO Museedhaan akkana jedhe; ²⁷ "Guyyaan kurnaffaan ji'a torbaffaa guyyaa araarri bu'uu dha. Wal ga'ii qulqulluu qabaadhaa; gad of deebisaa; WAAQAYYOOFIS aarsaa ibiddaan dhi'eeffamu dhi'eessaa. ²⁸ Sababii guyyaan sun Guyyaa Araarri Bu'u, yeroo itti fuula WAAQAYYO Waaqa keessanii duratti araarri isiniif bu'u ta'eef hojii tokko illee hin hojjetinaa. ²⁹ Namni gaafuma sana gad of hin deebifne kam iyyuu saba isaa keessaa baafamee ni balleeffama. ³⁰ Nama gaafa sana hojii tokko illee hojjetu kam iyyuus ani saba isaa gidduudhaa nan balleessa. ³¹ Isin hojii tokko iyyuu hin hojjetinaa. Kunis lafa isin jiraattan hundatti dhaloota dhufuuf seera bara baraa haa ta'u. ³² Kun isiniif sanbata boqonnaa ti; isinis gad of deebisuu qabdu. Galgala bultii saglaaffaa ji'a sanaatii jalqabaatii hamma galgala itti aanutti sanbata keessan ayyaaneffadhaa."

Ayyaana Daasii

23:33-43 kwf - Lak 29:12-39; KeD 16:13-17

³³ WAAQAYYO Museedhaan akkana jedhe; ³⁴ "Israa'elootaan akkana jedhi; 'Bultii kudha shanaffaa ji'a torbaffaatti Ayyaana Dunkaana Qulqulluu WAAQAYYOOTU jalqabama; kunis bultii torba tura. ³⁵ Guyyaan jalqabaa wal ga'ii qulqulluu dha; hojii idilees hin hojjetinaa. ³⁶ Guyyaa torba aarsaa ibiddaan WAAQAYYOOF dhi'eeffamu dhi'eessaa; guyyaa saddeettaffaatti immoo wal ga'ii qulqulluu godhadhaatii aarsaa ibiddaan WAAQAYYOOF dhi'eeffamu dhi'eessaa; kun guyyaa wal ga'iin qulqulluun itti xumuramuu dha; hojii idilees hin hojjetinaa.

³⁷ "Kunneen ayyaanota WAAQAYYOO murtaa'oo isin aarsaa ibiddaan WAAQAYYOOF dhi'eeffamu, aarsaa gubamu, aarsaa midhaanii, qalmaa fi dhibaaayyuu guyyaa kamiif iyyuu barbaachisu dhi'eessuuf wal ga'iiwwan qulqulluu itti labsitanii dha. ³⁸ Aarsaawwan kunneen kennaawwan isin Sanbata WAAQAYYOOTIIF dhi'eessitanii fi

* 23:13 23:13 Iifin tokko liitirii 22. † 23:13 23:13 Iiniin tokko liitirii 4.

kennaawwan keessan, kennaawwan wareega keessanii fi kennaawwan isin fedhiidhaan kennitan hunda irratti dabaltonii WAAQAYYOO fiddanii dha.

³⁹ “Erga oomisha lafa keessanii walitti qabdani booddee bultii kudha shanaffaa ji’a torbaffaatii jalqabaatii bultii torba WAAQAYYOO ayyaana ayyaaneffadhaa; guyyaan jalqabaa sanbata boqonnaa ti; guyyaan saddeettaffaanis akkasuma sanbata boqonnaa ti. ⁴⁰ Guyyaa jalqabaa ija muka gaarii, damee meexxii, damee muka baala qabuutii fi alaltuu qabadhaatii guyyaa torba fuula WAAQAYYOO Waaqa keessanii duratti gammadaa. ⁴¹ Wagguma waggaan ayyaana WAAQAYYOO guyyaa torba ayyaaneffadhaa. Kunis dhaloota dhufuuf seera bara baraa haa ta’u; ji’a torbaffaattis isa ayyaaneffadhaa. ⁴² Bultii torba daasii keessa turaa; dhalataan Israa’el hundinuu daasii keessa haa turu; ⁴³ ijoolleen keessanis akkasiin akka ani yeroo biyya Gibxiitii Israa’eloota baasetti daasii keessa isaan turse ni beeku. Ani WAAQAYYOO Waaqa keessan.”

⁴⁴ Museenis ayyaanota WAAQAYYOO murtaa’oo Israa’elootatti labse.

24

Zayitii fi Buddeena Fuula WAAQAYYOO Duratti Dhi’eeffamu

24:1-3 kwf – Bau 27:20-21

¹ WAAQAYYOO Museedhaan akkana jedhe; ² “Akka ibsaan ittuma fufee boba’uuf akka isaan zayitii ejersaa kan cuunfamee taliila ta’e siif fidaniif ijoollee Israa’el ajaji. ³ Aroonis ibsaawwan sana golgaa taabota kakuu seeraa kan dunkaana wal ga’ii keessa jiru sanaan alatti fuula WAAQAYYOO duratti galgalaa hamma ganamaatti ittuma fufee haa qopheessu. Kunis dhaloota keessaniif seera bara baraa haa ta’u. ⁴ Ibsaawwan baattuu ibsaa kan warqee qulqulluu irraa hojjetaman irra fuula WAAQAYYOO dura jiran sun ittuma fufanii qopheeffamuu qabu.

⁵ “Daakuu bullaa’aa fuudhiitii buddeena kudha lama tolchi; tokkoon tokkoon buddeena sanaas daakuu iifii* tokkoo irraa harka kudhan keessaa harka lama lamaan haa tolfamu. ⁶ Buddeena kanas toora tokko keessa ja’a ja’a godhiitii minjaala warqee qulqulluu irraa hojjetamee fuula WAAQAYYOO dura jiru irra toora lamaan kaa’i. ⁷ Akka inni qooda buddeena sanaa kutaa yaadannootii fi aarsaa ibiddaan WAAQAYYOO dhi’eeffamu ta’uuf tokkoo tokkoo toora sanaa irra ixaana qulqulluu kaa’i. ⁸ Buddeenni kunis akka kakuu bara baraa ta’ee saba Israa’el iddoo bu’uuf yeroo hunda Sanbatuma Sanbataan fuula WAAQAYYOO dura haa kaa’amu. ⁹ Buddeenni kun qooda Arooniitii fi ilmaan isaa ti; isaanis sababii buddeenni kun qooda isaanii kan bara baraa kan aarsaa ibiddaan WAAQAYYOO dhi’eeffame keessaa kutaa waan hunda caalaa qulqullaa’e ta’eef iddoo qulqulluutti isa haa nyaatan.”

Namni Waaqa Arrabsu Dhagaadhaan Tumama

¹⁰ Namichi haati isaa gosa Israa’elii fi abbaan isaa immoo nama biyya Gibxii ta’e tokko Israa’eloota gidduu ba’e; lollis qubata keessatti isaa fi Israa’elicha tokko gidduutti ka’e. ¹¹ Ilmi dubartii Israa’el sunis Maqaa Waaqaa arrabse; ni abaares; kanaafuu Museetti isa fidan. Maqaan haadha namicha sanaas Sheloomiit jedhama; isheen immoo intala namicha gosa Daanii kan Dibraayi jedhamuu ti. ¹² Isaanis hamma fedhiin WAAQAYYOO isaanii ifutti eegumsa jala isa tursan.

¹³ WAAQAYYOS Museedhaan akkana jedhe: ¹⁴ “Namicha Waaqa arrabse sana qubata keessaa gad baasi. Warri isa dhaga’an hundinuu harka isaanii mataa isaa irra haa kaa’an; waldaan hundi immoo dhagaadhaan isa haa tumu. ¹⁵ Israa’elootaan akkana jedhi; ‘Namni kam iyyuu yoo Waaqa isaa abaare inni cubbuu hojjeteeff itti gaafatama; ¹⁶ namni Maqaa WAAQAYYOO arrabsu haa ajjeefamu. Waldaan hundi dhagaadhaan isa haa tumu. Alagaas ta’u dhalataan biyyaa yoo Maqaa Waaqaa arrabse haa ajjeefamu.

¹⁷ “ ‘Namni nama ajjeese kam iyyuu haa ajjeefamu. ¹⁸ Namni horii namaa ajjeese horii sana iddoo haa buusu. ¹⁹ Namni tokko yoo ollaa isaa miidhe, wanni inni nama sana godhe isa irrattis haa godhamu; ²⁰ kunis qooda cabaa cabaa, qooda ijaa ija, qooda ilkaanii ilkaan jechuu dha. Innis akkuma nama miidhe sana isa irrattis haa godhamu. ²¹ Namni horii ajjeese horii sana iddoo haa buusu; namni nama ajjeese garuu haa ajjeefamu. ²² Alagaas ta’u dhalataa biyyaatiif seera tokkicha qabaadhaa. Ani WAAQAYYOO Waaqa keessan.”

²³ Museen waan kana Israa’elootatti hime; isaanis namicha Waaqa arrabse sana qubata keessaa gad baasanii dhagaadhaan tuman; Israa’eloonni akkuma WAAQAYYOO Musee ajaje godhan.

* 24:5 24:5 Iifin tokko kiiloo giraamii 40.

25

Boqonnaa Waggaa Torbaffaa

¹ WAAQAYYO Gaara Siinaa irratti Museedhaan akkana jedhe; ² “Akkana jedhii Israa’eelootatti himi: ‘Yommuu biyya ani isinii kennutti galtan, biyyattiin mataan ishee sanbata WAAQAYYOO haa kabajju. ³ Waggaa ja’a lafa qotiisaa kee facaafadhu; waggaa ja’a immoo wayinii kee irraa qori; ija isaas walitti qabadhu. ⁴ Waggaa torbaffaatti garuu lafti sanbata boqonnaa haa qabaatu; kunis sanbata WAAQAYYOO kabajamuu dha. Lafa qotiisaa kee hin facaafatin yookaan wayinii kee irraa hin qorin. ⁵ Waan ofiin biqile hin haammatin yookaan wayinii hin qoramin irraa ija walitti hin qabatan. Lafti boqonnaa waggaa tokkoo haa argattu. ⁶ Wann lafti waggaa sanbataatti kennitu nyaata kee haa ta’u jechuunis si’i mataa keetiif, garboota kee dhiiraa fi dubartiidhaaf, warra qaxaramanii hojjetanii fi alagoota yeroodhaaf si wajjin jiraataniif nyaata haa ta’u; ⁷ akkasumas horii keetii fi bineensa daggalaa kanneen biyya kee keessa jiraataniif nyaata haa ta’u. Wann lafti baafu kam iyyuu haa nyaatamu.

Waggaa Iyyoobeeliyyuu

25:8-38 kwi – KeD 15:1-11

25:39-55 kwi – Bau 21:2-11; KeD 15:12-18

⁸ “Waggoota sanbataa torba jechuunis waggoota torba yeroo torba lakkaa’i; waggoonni sanbataa torban waggoota afurtamii sagal ta’u. ⁹ Guyyaa kurnaffaa ji’a torbaffaatti immoo guutummaa biyya keessanii keessatti malakata dhageessisi; Guyyaa Araarri Bu’uttis guutummaa biyyaa keessatti malakata dhageessisaa. ¹⁰ Waggaa shantamaffaa qulqulleessaatii guutummaa biyyattii keessatti jiraattota hundaaf bilisummaa labsaa. Kunis iyyoobeeliyyuu isinii ta’a; tokkoon tokkoon namaa deebi’ee gara qabeenya isaattii fi gara maatii isaatti haa galu. ¹¹ Waggaan shantamaffaan iyyoobeeliyyuu isiniif haa ta’u; hin facaafatinaa; waan ofiin biqile hin haammatinaa; wayinii hin qoramin irraa ija isaa walitti hin qabatinaa. ¹² Kun sababii iyyoobeeliyyuu ta’eeef qulqulluu isiniif haa ta’u; waan lafa qotiisaa irraa galfamu nyaadhaa.

¹³ “Waggaa Iyyoobeeliyyuu kana keessa tokkoon tokkoon namaa gara qabeenya isaatti haa deebi’u.

¹⁴ “Yoo nama saba kee ta’etti lafa gurgurte yookaan waan tokko isa irraa bitte, wal hin gowwoomsinaa. ¹⁵ Ati waggoota waggaa Iyyoobeeliyyuu booddee jiran irratti hundooftee nama saba keetii irraa bitadhu. Innis baay’ina waggoota galchaa midhaanii lakkaa’ee sitti haa gurguru. ¹⁶ Yoo waggaan baay’ee ta’e gatii isaa dabaliif; yoo waggaan isaa gabaabaa ta’e immoo gatii isaa hir’isi; sababiin isaa wanni inni sitti gurguru baay’ina midhaanii ti. ¹⁷ Wal hin cunqursinaa; garuu Waaqa sodaadhaa. Ani WAAQAYYO Waaqa keessan.

¹⁸ “Ajaja koo duukaa bu’aa; seera koo illee eegaa; isinis biyyattii keessa nagaan ni jiraattu. ¹⁹ Lafti ija ni kenniti; isinis hamma quuftanitti nyaattu; nagaadhaanis ni jiraattu. ²⁰ Isinis, “Nu yoo facaafachuu yookaan midhaan keenya walitti qabachuu baanne waggaa torbaffaatti maal nyaanna?” jettanii gaafattu ta’a. ²¹ Akka lafti midhaan waggaa sadiif ga’u isinii kennituuf ani waggaa ja’affaatti eebba koo isiniif nan erga. ²² Yeroo waggaa saddeettaffaatti facaafattanittis waanuma duraan galfattan irraa nyaattu; hamma midhaan waggaa saglaffaa walitti qabattanitti midhaanuma kana nyaattu.

²³ “Lafti sababii kanuma koo taateef bara baraan hin gurguramin; isin anaaf alagaa fi keessumoota. ²⁴ Biyya akka dhaalaatti qabattan guutuu keessatti waan ittiin lafa furtan baasaa.

²⁵ “Obboleessi kee tokko hiyyoomee lafa isaa yoo gurgure, namni fira isaa kan dhi’oo ta’e dhufee waan firri isaa gurgure sana haa furuuf. ²⁶ Garuu yoo namichi sun fira lafa isaa furuuf dhabee inni mataan isaa waan ittiin lafa isaa furatu argate, ²⁷ waggoota yeroo inni lafa isaa gurgure sanaa as jiran lakkaa’ee namicha itti gurgure sanaaf maallaqa isaa haa deebisu; innis gara lafa ofiitti haa deebi’u. ²⁸ Garuu yoo waan namicha sanaaf deebisu dhabee, wanni inni gurgure sun hamma waggaa iyyoobeeliyyuutti harkuma namicha bite sanaa haa turu. Waggaa Iyyoobeeliyyuu keessa ni deebi’aaf; innis gara qabeenya isaatti ni deebi’a.

²⁹ “Nanni yoo magaalaa dallaa qabdu keessatti mana jireenyaa gurgurate, gaafa gurguratee jalqabee waggaa tokko keessatti furachuu danda’a. Mirgi furachuu isaas hamma waggaa tokkootti tura. ³⁰ Yoo utuu waggaan tokko hin guutin furamuu baate manni magaalaa dallaa qabdu keessatti argamu sun qabeenya namicha biteetii fi kan sanyii isaa ta’ee hafa. Waggaa Iyyoobeeliyyuuttis hin deebi’u. ³¹ Manneen gandoota

dallaan itti hin ijaaramin keessa jiran garuu waan akka lafa baadiyyaatti hedamaniif furamuu danda'u. Bara Iyyoobeeliyyuutis ni deebifamu.

³² " 'Lewwonni garuu manneen isaanii kanneen magaalaa'wan isaanii keessatti argaman furachuuf yeroo kam iyyuu mirga qabu. ³³ Qabeenyi Lewwotaa furamuu ni danda'a; manneen magaalaa isaan qabatan keessatti gurguraman bara Iyyoobeeliyyuutti ni deebifamu; manneen magaalaa Lewwotaa keessatti argaman Israa'eloota gidduutti qabeenya Lewwotaatii. ³⁴ Lafti dheedaa kan naannoo magaalaa isaaniitti argamu garuu sababii qabeenya isaanii kan bara baraa ta'eef hin gurguramin.

³⁵ " 'Yoo obboleessi kee tokko hiyyoomee isin gidduutti of gargaaruu dadhabe, akka inni isin gidduu jiraachuu danda'uuf akkuma alagaa yookaan keessummaa tokko gargaartutti isa gargaar. ³⁶ Akka namni sun si wajjin jiraachuu danda'uuf Waaqa kee sodaadhu malee dhala tokko iyyuu isa irraa hin fudhatin. ³⁷ Maallaqa kee dhalaan hin liqeessiniif yookaan nyaata kee bu'aa itti herregattee hin kenniniif. ³⁸ Ani WAAQAYYO Waaqa keessan kan biyya Kana'aan isiniif kennuu fi Waaqa keessan ta'uuf biyya Gibxii isin baasee dha.

³⁹ " 'Yoo obboleessi kee tokko hiyyoomee sitti of gurgure akka garbichaatti isa hin hojjechiifatin. ⁴⁰ Inni akka hojjetaa qaxaramaa yookaan nama yeroodhaaf isin wajjin jiraatuu haa ta'u; inni hamma Waggaa Iyyoobeeliyyuutti siif haa hojjetu. ⁴¹ Ergasii inni ijoollee isaa wajjin gad haa lakkifamu; inni gara maatii isaatii fi qabeenya abbootii isaatti haa deebi'u. ⁴² Israa'eloonni sababii garboota koo warra ani biyya Gibxiitii baasee fide ta'aniif akka garbootaatti hin gurguramin. ⁴³ Waaqa kee sodaadhu malee gara jabinaan isaan hin bulchin.

⁴⁴ " 'Garboonni kee dhiironnii fi dubartoonni saboota naannoo kee jiraatan gidduudhaa haa dhufan; isin isaan keessaa garboota bitachuu dandeessu. ⁴⁵ Akkasumas keessummoota isin gidduu jiraatanii fi maatii isaanii warra biyya keessanitti dhalatan keessaa garboota bitachuu dandeessu; isaanis qabeenya keessan haa ta'an. ⁴⁶ Akka qabeenya dhaalamuutti ijoollee keessanitti dabarsuu dandeessu; bara jireenya isaanii guutuus isaan garboomfachuu dandeessu; Israa'eloota obboloota keessan ta'an garuu gara jabinaan hin bulchinaa.

⁴⁷ " 'Yoo alagaan yookaan keessummaan si wajjin jiraatu tokko sooromee obboleessi kee immoo hiyyoomee alagaa si wajjin jiraatutti yookaan maatii alagaa sanaatti of gurgure, ⁴⁸ inni erga of gurguree booddee furamuuf mirga qaba. Firoota isaa keessaas namni tokko isa furuu danda'a. ⁴⁹ Obboleessi abbaa isaa yookaan ilmi obboleessa abbaa isaa yookaan aantee isaa keessaa firri dhiigaa isa furuu danda'a. Yookaan inni iyyuu yoo soorome of furuu danda'a. ⁵⁰ Innii fi namichi isa bite sun waggaa inni itti of gurguree jalqabee hamma waggaa Iyyoobeeliyyuutti haa lakkaa'an. Gatiin furii isaas baay'ina waggoota sanaa irratti hundaa'a; yeroon inni namicha isa bitate sana bira ture immoo akka nama qacaramee hojjete tokkootti herregama. ⁵¹ Yoo akka herrega isaaniitti waggoonni baay'een hafan inni gatii ittiin bitame sana keessaa harka baay'ee namicha sanaaf deebisu qaba. ⁵² Yoo waggoonni hamma Waggaa Iyyoobeeliyyuutti hafan muraasa ta'an inni waggoota hafan sana herregatee gatii furama isaa haa kaffalu. ⁵³ Inni akkuma nama waggaa waggaa gargaaruu qaxaramu tokkootti isa wajjin haa jiraatu; fuula kee durattis inni gara jabinaan isa hin bulchin.

⁵⁴ " 'Yoo inni karaa kanneeniin furamuu baates innii fi ijoolleen isaa Waggaa Iyyoobeeliyyuutti furamuu qabu; ⁵⁵ Israa'eloonni garboota kootii. Isaan garboota koo kanneen ani biyya Gibxii baasee fidee dha. Ani WAAQAYYO Waaqa keessan.

26

Ebba Ajajamuudhaan Argamu

¹ " 'Waaqota tolfamoo hin tolfatinaa; fakkii yookaan dhagaa waaqeffannaa hin dhaabbatinaa; fuula isaanii duratti sagaduuf jettaniis biyya keessan keessatti dhagaa soofame hin dhaabinaa. Ani WAAQAYYO Waaqa keessan.

² " 'Sanbatoota koo eegaa; iddoo qulqulluu koos kabajaa. Ani WAAQAYYO.

³ " 'Yoo isin sirna koo duukaa buutanii ajajawwan koos eegdanii hojii irra oolchitan, ⁴ ani yeroo isaatti bokkaa isiniifan kenna; lafti midhaan ishee, mukkeen dirrees ija isaanii ni kennu. ⁵ Midhaan dha'achuun keessan hamma yeroo ija wayinii cirattaniitti itti fufa; ija wayinii cirachuun keessan hamma yeroo facaasaatti ittuma fufa; isinis nyaata keessan hamma quufanitti nyaattanii lafa keessan irra nagaadhaan jiraattu.

⁶ " 'Ani biyyattii keessa nagaa nan buusa; isin ni raftu; wanni tokko iyyuu isin hin sodaachisu. Biyyattii keessaa bineensota hamoo nan baasa; goraadeenis biyya keessan keessa hin darbu. ⁷ Isin diinota keessan ni ariitu; isaan immoo goraadeedhaan fuula

keessan duratti dhumu. ⁸ Isin nama shan taatanii nama dhibba tokko ariitu; dhibba tokko taatanii immoo kuma kudhan ariitu; diinonni keessan goraadeedhaan fuula keessan duratti dhumu.

⁹ “Ani fuula tolaadhaan gara keessan ilaalee akka isin hortanii baay’attan nan godha; kakuu isin wajjin qabus nan jabeessa. ¹⁰ Isin midhaan bara darbee nyaachaa utuu inni gombisaa keessaa hin dhumin, midhaan haaraadhaaf iddoo qopheessuuf jettanii midhaan bara darbee sana gad baafu. ¹¹ Iddoo jireenya kootii isin gidduu nan godhadha; lubbuun koos isin hin balfitu. ¹² Ani isin gidduu jiraadhee Waaqa keessan nan ta’a; isinis saba koo ni taatu. ¹³ Ani WAAQAYYO Waaqa keessan kan akka isin lammata garboota warra Gibxi hin taaneef biyya Gibxii baasee isin fidee dha; ani hidhaa waanjoo keessanii kutee akka isin mataa ol qabattanii deemtan godheera.

Adabbii Ajajamuu Diduun Fidu

¹⁴ “Garuu yoo na dhaga’uu diddani ajajawwan kanneen hunda eeguu baattan, ¹⁵ yoo sirna koo tuffattanii seera koo balfitan, yoo ajajawwan kanneen hunda eeguu baattanii kakuu koo cabsitan, ¹⁶ ani wantoota kanneen isinittin fida: Isaanis naasuu, dhukkuba nama huqqisu, dhukkuba dhagna nama gubu kan agartuu namaa balleessee jireenya namaa gogsu isinitti nan fida. Isin akkasumaan midhaan facaafattu; diinota keessantu nyaataatii. ¹⁷ Akka isin diinota keessaniin mo’amtaaniif ani fuula isinittan hammaadha; warri isin jibban isin bulchu; isin utuu eenyu iyyuu isin hin ari’in ni baqattu.

¹⁸ “Yoo isin wantoota kanneen hunda booddee naa ajajamuu diddan ani cubbuu keessaniif dachaa torba isin adaba. ¹⁹ Of tuulummaa humna keessanii nan cabsa; samii keessan akka sibiilaa, lafa keessan immoo akka naasii nan godha. ²⁰ Humni keessan akkasumaan bada; lafti keessan midhaan isaa, mukkeenis ija isaanii hin kennaniiti.

²¹ “Yoo isin naan mormitanii na dhaga’uu diddan, ani akkuma cubbuu keessaniitti dha’icha dachaa torba isinitti nan fida. ²² Anis bineensota bosonaa isinittan erga; isaanis ijoollee keessan isin jalaa ni butatu; horii keessan ni barbadeessu; baay’inni keessan ni xinnaata; daandiiwwan keessanis duwwaa hafu.

²³ “Yoo isin waan kanneeniin deebi’uu diddani naan mormuu keessan itti fuftan garuu, ²⁴ ani mataan koo isiniinan morma; sababii cubbuu keessaniitiif dachaa torba isin nan miidha. ²⁵ Kakuu cabsuu keessaniifis goraadee isinitti fidee haaloo isin nan baafadha. Yommuu isin gara magaalawwan keessaniitti baqattaniiti ani gidduu keessaniitti dha’icha nan erga; isinis dabarfamtanii harka diinotaatti kennamtu. ²⁶ Yommuu ani madda buddeena keessanii gogsutti, dubartoonni kudhan eelee tokkotti buddeena tolchu, isaanis buddeena sana madaalanii isinii kennu; isin ni nyaattu; garuu hin quftan.

²⁷ “Yoo isin waan kanaanis na dhaga’uu diddani garuu naan mormuutti fuftan, ²⁸ anis aaree isiniin nan morma; ani mataan koo sababii cubbuu keessaniitiif dachaa torba isiniinan adaba. ²⁹ Isin foon ilmaan keessaniiti fi foon intallan keessanii ni nyaattu. ³⁰ Iddoowwan sagadaa keessan barbadeessee iddoowwan aarsaa ixaanaa keessan nan caccabsa; reeffa keessanis waaqota keessan warra lubbuu hin qabne sana irra nan tuula; isinis nan balfa. ³¹ Magaalawwan keessan nan diiga; iddoowwan qulqulluu keessan nan onsa; urgaa keessan gammachiisaas hin urgeeffadhu. ³² Ani akka diinonni keessan kanneen achi jiraatan rifataniif biyyattin nan onsa; ³³ ani saboota gidduu isin nan bittinneessa; goraadee koo luqqifadhees isin nan ari’a. Biyyi keessan ni ona; magaalawwan keessan immoo ni diigamu. ³⁴ Biyyattiinis yeroo ontee isin biyya diinota keessanii keessa jiraattanitti sanbata isheetti ni gammaddi; laftis boqottee sanbata isheetti gammaddi. ³⁵ Biyyattiin yeroo onte kana hunda boqonnaa sanbatootaa kan yeroo isin ishee irra jiraattanitti hin argatin ni argatti.

³⁶ “Warra isin keessaa hafan, ani utuma isaan biyya diinota isaanii jiranuu garaa isaaniitti naasuu nan buusa. Sagaleen baala qilleensi raasuu isaan ari’a; utuma namni isaan ari’u tokko illee hin jiraatin isaan akkuma waan goraadee jalaa baqataniitti fiigu; ni kukkufu. ³⁷ Namni isaan ari’u jiraachuu baatu illee isaan akkuma waan goraadee jalaa baqataniitti wal gufachiisu. Isin fuula diinota keessanii dura dhaabachuu hin dandeessan. ³⁸ Isin saboota ormaa gidduutti dhumtu; lafti diinota keessaniis isin liqimsiti. ³⁹ Warri isin keessaa hafan immoo sababii cubbuu isaaniitiif lafa diinota isaanii keessatti badu; sababii cubbuu abbootii isaaniitiinis ni badu.

⁴⁰ “Garuu yoo isaan cubbuu isaaniiti fi cubbuu abbootii isaanii jechuunis gantummaa fi daba isaan natti hojjetan ⁴¹ kan akka ani isaaniin mormuu fi akka ani biyya diinota isaaniitti isaan ergu himatan, yoo garaan isaanii kan dhagna hin qabatin sun gad of deebisee isaan gatii cubbuu isaaniitiif malu baasan, ⁴² ani kakuu koo kanan Yaaqoob wajjin gale, kakuu koo kanan Yisihaaq wajjin gale, kakuu koo kanan Abrahaam wajjin

gale sana nan yaadadha; biyyattiis nan yaadadha. ⁴³ Lafti isaan malee hafti; yeroo isaan malee haftuttis sanbatoota isheetti ni gammaddi. Isaan sababii seera koo tuffatanii ajaja koos balfaniif gatii cubbuu isaanii ni baasu. ⁴⁴ Ta'us utuu isaan biyya diinota isaanii keessa jiranuu ani kakuu koo kanan isaan wajjin gale sana cabsee guutumaan guutuutti isaan balleessuuf jedhee isaan hin tuffadhu yookaan isaan hin balfu. Ani WAAQAYYO Waaqa isaanii ti. ⁴⁵ Garuu ani isaaniif jedhee kakuu ani abbootii isaanii warra ani Waaqa isaanii ta'uuf utuu saboonni arganuu biyya Gibxiitii baasee fide sana wajjin gale nan yaadadha. Ani WAAQAYYO.' "

⁴⁶ Kunneen labsiiwwan, seerawwanii fi qajeelcha WAAQAYYO Gaara Siinaa irratti harka Museetiin ofii isaatii fi Israa'eloota gidduutti baasee dha.

27

Waan Qooda WAAQAYYOO Ta'e Furuu

¹ WAAQAYYO Museedhaan akkana jedhe; ² "Akkana jedhii Israa'elootatti himi: 'Namni yoo gatii wal madaalu kennuudhaan WAAQAYYOO nama kennuuf wareega addaa godhe, ³ dhiira umuriin isaa waggaa digdamaa hamma jaatamaa ta'eef, akka safartuu saqilii iddoo qulqulluutti herregni isaa meetii saqilii shantama haa ta'u. ⁴ Yoo dubartii taate immoo herregni ishee meetii saqilii soddoma haa ta'u. ⁵ Yoo nama umuriin isaa waggaa shanii fi digdama gidduu ta'e, herregni dhiiraa meetii saqilii digdamatti, kan dubartii immoo meetii saqilii kudhanitti haa herregamu. ⁶ Nama umuriin isaa ji'a tokkoo hamma waggaa shanii ta'e immoo herregni isaa, dhiiraaf meetii saqilii shan, durbaaf immoo meetii saqilii sadii haa ta'u. ⁷ Namni umuriin isaa waggaa jaatama yookaan sanaa ol ta'e dhiirri meetii saqilii kudha shanitti, dubartiin immoo meetii saqilii kudhanitti haa herregamu. ⁸ Namni wareega wareegu hiyyoomee gatii murtaa'e sana yoo baasuu dadhabe, Museen nama sana lubatti haa fidu; lubni immoo akkuma dandheetii namicha wareega wareege sanaatti gatii isaa haa herreguuf.

⁹ " 'Wanni namichi sun wareege horii fuula WAAQAYYOO duratti aarsaa fudhatama qabu yoo ta'e horiin WAAQAYYOO kenname kan akkasii hundi ni qulqullaa'a. ¹⁰ Namichis horii sana geeddaruu yookaan horii gaarii horii jibbamaan yookaan horii jibbamaa horii gaarii iddoo hin buusin; yoo inni horii tokko horii biraa iddoo buuse horiin lamaanuu qulqulluu ta'u. ¹¹ Yoo horiin inni wareege sun akka seeraatti xuraa'aa jechuunis kan WAAQAYYOO aarsaa ta'ee dhi'aachuu hin dandeenye ta'e namichi sun horii sana gara lubatti haa fidu; ¹² lubichis akka horiin sun gaarii yookaan jibbamaa ta'e haa madaalu. Gatiin lubni madaale akkasuma haa ta'u. ¹³ Namichi sun yoo horii sana furachuu barbaade gatii herregame sanatti harka shan keessaa harka tokko itti dabaluu qaba.

¹⁴ " 'Yoo namni tokko mana ofii WAAQAYYOO qulqulleesse, akka manni sun gaarii yookaan gadhee ta'e lubichi gatii isaa haa herregu. Gatiin lubni madaale akkasuma haa ta'u. ¹⁵ Namichi mana isaa Waaqaaf qulqulleesse sun yoo mana ofii furachuu barbaade, gatii herregame sanatti harka shan keessaa harka tokko itti dabaluu qaba; manni sunis deebi'ee kan isaa ta'a.

¹⁶ " 'Yoo namni lafa dhaalaan argate irraa WAAQAYYOO qulqulleesse gatiin lafa sanaa akkuma baay'ina sanyii lafa sanaaf barbaachisuutti jechuunis garbuun safartuun homeerii tokko meetii saqilii shantamatti herregama. ¹⁷ Yoo inni lafa qotiisaa isaa Waggaa Iyyoobeeliyyuu keessa qulqulleesse gatiin duraan hedame sun hin geeddaramu. ¹⁸ Garuu yoo inni waggaa Iyyoobeeliyyuu booddee lafa qotiisaa isaa qulqulleesse lubichi akkuma baay'ina waggoota hamma waggaa Iyyoobeeliyyuu itti aanuutti jiraniitti herrega; gatiin shallagame gad bu'a. ¹⁹ Yoo namichi lafa qotiisaa isaa Waaqaaf addaan baasu sun lafa qotiisaa isaa furachuu barbaade, inni gatii hedametti harka shan keessaa harka tokko haa dabaluu; lafti qotiisaa sunis deebi'ee kan isaa ta'a. ²⁰ Ta'us yoo inni lafa qotiisaa sana furachuu baate, yookaan dabarsee nama biraatti gurgure, lafti qotiisaa sun deebi'ee furamuu hin danda'u. ²¹ Lafti qotiisaa sun yommuu Waggaa Iyyoobeeliyyuu keessa gad dhiifamutti akkuma lafa qotiisaa WAAQAYYOO kennameetti addaan baafama; kunis qabeenya lubootaa ta'a.

²² " 'Yoo namni tokko lafa qotiisaa dhaalaan hin argatin kan ofii isaatii bitate WAAQAYYOO qulqulleesse, ²³ lubni gatii lafa qotiisaa sanaa hamma Waggaa Iyyoobeeliyyuutti herrega; namichis gatii herregame sana gaafuma sana kan WAAQAYYOO qulqulleeffame godhee haa baasu. ²⁴ Waggaa Iyyoobeeliyyuuttis lafti qotiisaa sun namichuma irraa bitame kan abbaa lafa qotiisaa sanaa tureef ni deebi'aa. ²⁵ Gatiin hundinuu akka madaalii saqilii iddoo qulqulluutti jechuunis geeraan digdamni saqilii tokkootti herregama.

²⁶ “Ta’us namni tokko iyyuu horii hangafa qulqulleessuu hin danda’u; hangafti duraanuu WAAQAYYOOF qulqulleeffameeraatii; sangaas ta’u hoolaan hangafni kan WAAQAYYOO ti. ²⁷ Yoo horiin sun xuraa’aa ta’e inni gatii herregame irratti harka shan keessaa harka tokko dabalee deebisee bitachuu danda’a. Yoo inni furachuu baate immoo horiin sun gatii isaaf herregametti gurgurama.

²⁸ “Garuu wanni namni qabu kan inni WAAQAYYOOF qulqulleessu tokko illee jechuunis namas ta’u horiin yookaan lafti dhaalaan argame hin gurguramu yookaan hin furamu. Wanni akkasiin qulqulleeffame hundinuu akka malee WAAQAYYOOF qulqulluudhaatii.

²⁹ “Namni akka ajjeefamuuf murteeffame tokko illee hin furamu; inni ajjeefamuu qaba.

³⁰ “Wanni lafti baaftu kam iyyuu sanyiis ta’u ija mukaa harka kudhan keessaa harki tokko kan WAAQAYYOO ti; kun waan WAAQAYYOOF qulqulleeffamee dha. ³¹ Namni yoo kennaa isaa kan harka kudhan keessaa harka tokko ta’e sana furachuu barbaade inni gatii kennaa sanaaf herregame irratti harka shan keessaa harka tokko dabalee haa baasu. ³² Kennaan karra loonii fi bushaayee guutuu keessaa harka kudhan keessaa harka tokko ta’e jechuunis horiin ulee tiksee jala ba’ee darbu hunda keessaa harka kudhan keessaa harki tokko WAAQAYYOOF qulqullaa’a. ³³ Inni horii jibbamaa keessaa horii gaarii hin filatin yookaan iddoo hin buusin; yoo inni iddoo buuse horiin lamaanuu qulqulluu ta’u; furamuus hin danda’u.”

³⁴ Kunneen ajajawwan WAAQAYYO Gaara Siinaa irratti karaa Museetiin Israa’elootaaf kennee dha.

Seera Lakkoobsaa

Lakkoobsa Sabaa

¹ Erga sabni Israa'el biyya Gibxiitii ba'ee booddee waggaa lammaffaa keessaa, guyyaa jalqaba ji'a lammaffaatti WAAQAYYO dunkaana wal ga'ii keessatti, Gammoojjii Siinaa keessatti Museetti dubbate. Innis akkana jedheen; ² "Waldaa saba Israa'el hunda lakkaa'aatii balbala balbalaanii fi maatii maatiidhaan maqaa dhiirotaa tokko tokkoon barreessaa. ³ Namoota Israa'el keessaa dhiirota umuriin isaanii waggaa digdamaatii fi hammasii olii kanneen lola dhaquu danda'an hunda atii fi Aroon kutaa kutaa isaaniitiin lakkaa'aa. ⁴ Tokkoo tokkoo gosaa keessaa namni hangafa maatii ofii isaa ta'e isin gargaaruu qaba.

⁵ "Maqaan namoota isin gargaaruu qabanii kanneenii dha:

"Gosa Ruubeen keessaa Eliizuur ilma Shedee'uur;

⁶ gosa Simi'oon keessaa Shilumii'eel ilma Zuriishadaay;

⁷ gosa Yihuudaa keessaa Nahishoon ilma Amiinaadaab;

⁸ gosa Yisaakor keessaa Naatnaa'el ilma Zuuwaar;

⁹ gosa Zebuuloon keessaa Eliiyaab ilma Heeloon;

¹⁰ ilmaan Yoosef keessaa:

gosa Efreem keessaa Eliishaamaa ilma Amiihuud;

gosa Minaasee keessaa Gamaali'eel ilma Phedaasuur;

¹¹ gosa Beniyaam keessaa Abiidaan ilma Gaadeyoon,

¹² gosa Daan keessaa Ahii'ezer ilma Amiishadaay;

¹³ gosa Aasheer keessaa Fagi'eel ilma Okraan;

¹⁴ gosa Gaad keessaa Eliyaasaaf ilma De'uu'eel;

¹⁵ gosa Niftaalem keessaa Ahiiraa ilma Eenaan."

¹⁶ Namoonni kunneen warra dura bu'oota gosoota abbootii isaanii ta'anii waldaa sana keessaa filatamanii dha. Isaanis hangafoota balbalawwan Israa'el turan.

¹⁷ Musee fi Aroon namoota maqaan isaanii eerame kanneen fudhatanii, ¹⁸ guyyaa jalqaba ji'a lammaffaatti waldaa hunda walitti waaman. Namoonni sunis akkuma balbalaa fi maatii isaaniitti hidda dhaloota isaanii himatan; dhiironni umuriin isaanii waggaa digdamaatii fi hammasii olii maqaan isaanii tokko tokkoon galmeeffame; ¹⁹ innis akkuma WAAQAYYO Musee ajajetti Gammoojjii Siinaa keessatti saba sana lakkaa'e.

²⁰ Sanyii Ruubeen ilma Israa'el hangaftichaa keessaa:

Dhiironni umuriin isaanii waggaa digdamaatii fi hammasii olii kanneen lola dhaquu danda'an hundinuu akkuma galmee balbalaa fi maatii isaaniitti tokko tokkoon maqaa maqaadhaan barreeffaman. ²¹ Baay'inni gosa Ruubeen nama 46,500 ture.

²² Sanyii Simi'oon keessaa:

Dhiironni umuriin isaanii waggaa digdamaatii fi hammasii olii kanneen lola dhaquu danda'an hundinuu akkuma galmee balbalaa fi maatii isaaniitti tokko tokkoon maqaa maqaadhaan barreeffaman. ²³ Baay'inni gosa Simi'oon nama 59,300 ture.

²⁴ Sanyii Gaad keessaa:

Dhiironni umuriin isaanii waggaa digdamaatii fi hammasii olii kanneen lola dhaquu danda'an hundinuu akkuma galmee balbalaa fi maatii isaaniitti maqaa maqaadhaan barreeffaman. ²⁵ Baay'inni gosa Gaad nama 45,650 ture.

²⁶ Sanyii Yihuudaa keessaa:

Dhiironni umuriin isaanii waggaa digdamaatii fi hammasii olii kanneen lola dhaquu danda'an hundinuu akkuma galmee balbalaa fi maatii isaaniitti maqaa maqaadhaan barreeffaman. ²⁷ Baay'inni gosa Yihuudaa nama 74,600 ture.

²⁸ Sanyii Yisaakor keessaa:

Dhiironni umuriin isaanii waggaa digdamaatii fi hammasii olii kanneen lola dhaquu danda'an hundinuu akkuma galmee balbalaa fi maatii isaaniitti maqaa maqaadhaan barreeffaman. ²⁹ Baay'inni gosa Yisaakor nama 54,400 ture.

³⁰ Sanyii Zebuuloon keessaa:

Dhiironni umuriin isaanii waggaa digdamaatii fi hammasii olii kanneen lola dhaquu danda'an hundinuu akkuma galmeeewwan balbalaa fi maatii isaaniitti maqaa maqaadhaan barreeffaman. ³¹ Baay'inni gosa Zebuuloon nama 57,400 ture.

³² Ilmaan Yoosif keessaa:

Sanyii Efreem keessaa:

Dhiironni umuriin isaanii waggaa digdamaatii fi hammasii olii kanneen lola dhaquu danda'an hundinuu akkuma galmee balbalaa fi maatii isaaniitti maqaa maqaadhaan barreeffaman. ³³ Baay'inni gosa Efreem nama 40,500 ture.

³⁴ Sanyii Minaasee keessaa:

Dhiironni umuriin isaanii waggaa digdamaatii fi hammasii olii kanneen lola dhaquu danda'an hundinuu akkuma galmee balbalaa fi maatii isaaniitti maqaa maqaadhaan barreeffaman. ³⁵ Baay'inni gosa Minaasee nama 32,200 ture.

³⁶ Sanyii Beniyaam keessaa:

Dhiironni umuriin isaanii waggaa digdamaatii fi hammasii olii kanneen lola dhaquu danda'an hundinuu akkuma galmee balbalaa fi maatii isaaniitti maqaa maqaadhaan barreeffaman. ³⁷ Baay'inni gosa Beniyaam nama 35,400 ture.

³⁸ Sanyii Daan keessaa:

Dhiironni umuriin isaanii waggaa digdamaatii fi hammasii olii kanneen lola dhaquu danda'an hundinuu akkuma galmee balbalaa fi maatii isaaniitti maqaa maqaadhaan barreeffaman. ³⁹ Baay'inni gosa Daan nama 62,700 ture.

⁴⁰ Sanyii Aasheer keessaa:

Dhiironni umuriin isaanii waggaa digdamaatii fi hammasii olii kanneen lola dhaquu danda'an hundinuu akkuma galmee balbalaa fi maatii isaaniitti maqaa maqaadhaan barreeffaman. ⁴¹ Baay'inni gosa Aasheer nama 41,500 ture.

⁴² Sanyii Niftaalem keessaa:

Dhiironni umuriin isaanii waggaa digdamaatii fi hammasii olii kanneen lola dhaquu danda'an hundinuu akkuma galmee balbalaa fi maatii isaaniitti maqaa maqaadhaan barreeffaman. ⁴³ Baay'inni gosa Niftaalem nama 53,400 ture.

⁴⁴ Dhiironni kunneen warra Musee fi Aroon hangafoota Israa'el kudha lamaaniin lakkaa'aman turan; hangafooni kunneenis tokkoon tokkoon isaanii iddoo bu'oota maatii isaanii turan. ⁴⁵ Israa'eloonni umuriin isaanii waggaa digdamaatii fi hammasii olii kanneen Israa'el keessatti lolaaf ba'uu danda'an hundinuu akkuma maatii isaaniitti lakkaa'aman. ⁴⁶ Walumaa galatti baay'inni namaa 603,550 ture.

⁴⁷ Lewwonni garuu akka gosa abbootii isaaniitti warra kaan wajjin hin lakkaa'amne. ⁴⁸ WAAQAYYO Museedhaan akkana jedhee ture: ⁴⁹ "Ati gosa Lewwii hin lakkaa'in yookaan lakkoobsa saba Israa'eloota kaaniitti hin dabaln. ⁵⁰ Qooda kanaa akka Lewwonni itti gaafatamtoota dukaana dhuga ba'umsaa, mi'a isaa hundaa fi waan inni qabu hundaa ta'aniif isaan muudi. Isaanis dukaana qulqulluu fi mi'a isaa hunda haa baatan; dukaanicha haa tajaajilan; naannoo isaas haa qubatan. ⁵¹ Yeroo dukaanni qulqulluu deemuu qabutti Lewwonni dukaana sana haa buqqisan; yeroo dukaanichi dhaabamus Lewwonni haa dhaaban. Namni dukaanichatti dhi'aatu biraa haa ajjeefamu. ⁵² Israa'eloonnis tokkoon tokkoon namaa qubata isaa keessaa fi faajjii isaa jalatti kutaa kutaadhaan dukaana isaanii haa dhaabbatan. ⁵³ Ta'us Lewwonni akka dheekkamsi WAAQAYYOO waldaa Israa'elitti gad hin buuneef dukaanota isaanii naannoo dukaana dhuga ba'umsaa haa dhadhaabatan. Lewwonni eegumsa dukaana dhuga ba'umsaatti itti gaafatamtoota ta'uu qabu."

⁵⁴ Israa'eloonni akkuma WAAQAYYO Musee ajaje sanatti waan kana hunda hojjetan.

2

Gosa Gosaan Qubachuu Isaanii

¹ WAAQAYYO Musee fi Arooniin akkana jedhe: ² “Israa’eloonnis tokkoon tokkoon namaa faajjii ofii isaanii jalatti faajjii maatii isaa wajjin dunkaana irraa xinnuma fagaatee naannoo dunkaana wal ga’ii haa qubatu.”

³ Gama ba’aatiin, karaa ba’a biiftuutiin:

kutaawwan qubata Yihuudaa faajjii isaanii jala haa qubatan. Hoogganaan ijoollee Yihuudaa Nahishoon ilma Amiinaadaabii ti. ⁴ Lakkoobsi kutaa isaas namoota 74,600.

⁵ Gosti Yisaakor isaanitti aanee haa qubatu. Hoogganaan ijoollee Yisaakor Naatnaa’el ilma Zuuwaar ture. ⁶ Lakkoobsi kutaa isaas namoota 54,400.

⁷ Gosti Zebuuloon kanatti haa aanu. Hoogganaan ijoollee Zebuuloon Eliiyaab ilma Heeloonii ti. ⁸ Lakkoobsi kutaa isaas namoota 57,400.

⁹ Namoonni qubata Yihuudaatti lakkaa’aman hundis akkuma kutaa kutaa isaaniitti 186,400 turan. Isaanis duraan dursanii qajeelu.

¹⁰ Gama kibbaatiin:

kutaawwan qubata Ruubeen faajjii isaanii jalaan haa qubatan. Hoogganaan ijoollee Ruubeen Eliizuur ilma Shedee’uurii ti. ¹¹ Lakkoobsi kutaa isaas namoota 46,500.

¹² Gosti Simi’oon isaanitti aanee haa qubatu. Hoogganaan gosa Simi’oon Shilumii’eel ilma Zuriishadaayii ti. ¹³ Lakkoobsi kutaa isaas namoota 59,300.

¹⁴ Gosti Gaad isaanitti haa aanu. Hoogganaan gosa Gaad Eliyaasaaf ilma De’uu’eelii ti. ¹⁵ Lakkoobsi kutaa isaas namoota 45,650.

¹⁶ Namoonni qubata Ruubeenitti lakkaa’aman hundis akkuma kutaa kutaa isaaniitti 151,450 turan. Isaan kunneenis warra duraatti aananii deemu.

¹⁷ Ergasiin dunkaanni wal ga’iitii fi qubanni Lewwotaa qubatawwan gidduu haa deeman. Isaanis akkuma toora qubata isaaniitti tokkoon tokkoon isaanii iddoo isaanii eeggatanii faajjii isaanii jala haa deeman.

¹⁸ Gama dhi’aatiin gareen qubata Efreem faajjii isaanii jalaan haa qubatan. Hoogganaan ilmaan Efreem Eliishaamaa ilma Amiihuudii ti. ¹⁹ Lakkoobsi kutaa isaas namoota 40,500:

²⁰ Gosti Minaasee isaanitti haa aanu. Hoogganaan ijoollee Minaasee Gamaali’eel ilma Phedaasuurii ti. ²¹ Lakkoobsi kutaa isaas namoota 32,200.

²² Gosti Beniyaam itti haa aanu. Hoogganaan ilmaan Beniyaam Abiidaan ilma Gaadeyoonii ti. ²³ Lakkoobsi kutaa isaas namoota 35,400:

²⁴ Namoonni qubata Efreemitti lakkaa’aman hundis kutaa kutaa isaaniitti 108,100 turan. Isaan kunneen immoo kutaa sadaffaa ta’anii deeman.

²⁵ Gama kaabaatiin kutaawwan qubata Daan faajjii isaanii jalaan haa qubatan. Hoogganaan gosa Daan Ahii’ezer ilma Amiishadaayii ti. ²⁶ Lakkoobsi kutaa isaas namoota 62,700.

²⁷ Gosti Aasheer isaanitti aanee haa qubatu. Hoogganaan ijoollee Aseer Fagi’eel ilma Okraanii ti. ²⁸ Lakkoobsi kutaa isaas namoota 41,500:

²⁹ Gosti Niftaalemitti haa aanu. Hoogganaan ijoollee Niftaalem Ahiiraa ilma Eenaanii ti. ³⁰ Lakkoobsi kutaa isaas namoota 53,400:

³¹ Namoonni qubata Daaniitti lakkaa’aman hundis 157,600 turan. Isaanis dhuma irratti faajjii isaanii jalaan haa deeman.

³² Namoonni kunneen saba Israa’el warra akkuma maatii isaaniitti lakkaa’amanii dha. Lakkoobsi warra qubata keessaa kanneen kutaa kutaa isaaniitiin lakkaa’aman hundaa 603,550. ³³ Lewwonni garuu akkuma WAAQAYYO Musee ajaje sanatti Israa’eloota kaan wajjin hin lakkaa’amne.

³⁴ Akkasiin Israa’eloonni waan WAAQAYYO Musee ajaje hunda hojjetan; isaanis haaluma kanaan faajjii isaanii jala haa qubatan; haaluma kanaan tokkoon tokkoon isaanii balbalaa fi maatii isaanii wajjin ba’anii haa deeman.

3

¹ Yeroo WAAQAYYO Tulluu Siinaa irratti Museetti dubbatetti seenaan sanyii Aroonii fi Musee kanaa dha.

² Maqaan ilmaan Aroon: Naadaab hangafticha, Abiihuu, Ele'aazaarii fi Iitaamaar.
³ Kunneen maqaawwan ilmaan Aroon jechuunis luboota muudaman kanneen akka luboota ta'anii tajaajilaniif dibaman sanaa ti. ⁴ Naadaabii fi Abiihuu garuu yeroo Gammoojii Siinaa keessatti ibidda hin eeyyamamin fuula WAAQAYYOO duratti dhi'eessanitti fuuluma isaa duratti du'an. Isaan ilmaan tokko illee hin qaban ture. Kanaafuu Ele'aazaarii fi Iitaamaar bara abbaan isaanii Aroon lubbuun jiraatetti luboota ta'anii tajaajilan.

⁵ WAAQAYYO Museedhaan akkana jedhe; ⁶ "Gosa Lewwii fidiitii akka isaan Aroon lubicha gargaaraniif isa dura dhaabi. ⁷ Isaanis hojii dunkaana qulqulluu hojjechuudhaan waan isa irraa barbaadamuu fi waan waldaa hunda irraa barbaadamu fuula dunkaana wal ga'ii duratti haa raawwatan. ⁸ Isaan hojii dunkaana qulqulluu hojjetanii dirqama Israa'elootaa guutuudhaan mi'a dunkaana wal ga'ii hunda haa eegan. ⁹ Lewwota sana Aroonii fi ilmaan isaatti kenni; isaan warra saba Israa'el keessaa guutumaan guutuutti isatti kennamanii dha. ¹⁰ Ati akka isaan luboota ta'anii tajaajilaniif Aroonii fi ilmaan isaa muudi; namni biraa kan iddoo qulqulluu sanatti dhi'aatu garuu ajjeefamuu qaba."

¹¹ WAAQAYYO Museedhaan akkana jedhe; ¹² "Kunoo ani Israa'eloota keessaa qooda dhiira hangafa dubartoota Israa'el hundaa Lewwota fudhadheera. Lewwonni kan koo ti; ¹³ hangafti hundinuu kan kootii. Ani yeroo biyya Gibxi keessatti hangafa hunda ajjeesetti hangafa Israa'el hunda jechuunis namas ta'u horii ofii kootiif addaan baafadheera. Isaan kan koo ta'an. Ani WAAQAYYO."

¹⁴ WAAQAYYO Gammoojii Siinaa keessatti Museedhaan akkana jedhe; ¹⁵ "Lewwota maatii isaaniitii fi balbala isaaniitiin lakkaa'i. Dhiira ji'a tokkoo yookaan hammasii olii hunda lakkaa'i." ¹⁶ Museen akkuma dubbiin WAAQAYYOO isa ajajetti isaan lakkaa'e.

¹⁷ Kunneen maqaawwan ilmaan Lewwii ti:

Geershoon, Qohaatii fi Meraarii.

¹⁸ Kunneen maqaawwan ilmaan Geershoonii ti:

Loobeenii fi Shime'ii.

¹⁹ Balbalawwan Qohaatotaa:

Amraam, Yizihhaar, Kebroonii fi Uzii'eel.

²⁰ Balbalawwan Meraarotaa:

Mahilii fi Muusii.

Kunneen akkuma maatii isaaniitti balbalawwan Lewwotaa ti.

²¹ Balbalawwan Liibnii fi Shime'ii kan Geershoon turan; isaanis balbalawwan Geershootaa ti.

²² Baay'inni dhiirota umuriin isaanii ji'a tokkoo fi hammasii olii kanneen lakkaa'aman hundaa 7,500 ture.

²³ Balbalawwan Geershootaa karaa lixa biiftuutiin dunkaana qulqulluu dugda duubaan qubatan.

²⁴ Hoogganaan balbalawwan Geershootaas Eliyaasaaf ilma Laa'el ture.

²⁵ Itti gaafatamni Geershoononni dunkaana wal ga'ii keessatti qabanis dunkaana qulqulluu, dunkaanaa fi irra buusaa isaa, golgaa balbala dunkaana wal ga'ii irra jiru, ²⁶ golgaawwan oobdii, golgaa balbala dallaa kan dunkaana qulqulluu fi iddoo aarsaatti naanna'ee jiru, funyoo fi tajaajila akkanaa kennu hunda eeguu ture.

²⁷ Balbalawwan Amraamotaa, Yizihhaarotaa, Kebroonotaa fi Uzii'eelotaa balbalawwan Qohaatii ti; isaanis balbalawwan Qohaatotaa turan.

²⁸ Baay'inni dhiirota ji'a tokkoo fi hammasii olii hundaa 8,600 ture.

Qohaatonni iddoo qulqulluu sana eeguutti itti gaafatamtoota turan.

²⁹ Balbalawwan Qohaatotaa karaa kibba dunkaana qulqulluutiin qubatan.

³⁰ Hoogganaan maatiiwwan balbalawwan Qohaatotaa Eliisaafaan ilma Uzii'eel ture.

³¹ Isaanis taabota, minjaala, baattuu ibsaa, iddoowwan aarsaa, mi'a iddoo qulqulluu ittiin tajaajilan, golgaa fi wantoota tajaajila akkanaa kennan hunda eeguutti itti gaafatamtoota turan.

³² Hoogganaan Lewwotaa hangafti Ele'aazaar ilma Aroon lubichaa ture. Innis warra itti gaafatamtoota eegumsa iddoo qulqulluu turan sana irratti dibame.

³³ Balbalawwan Mahelootaa fi Muusotaa kan Meraarii turan; isaanis balbalawwan Meraarotaa ti.

³⁴ Baay'inni dhiirota umuriin isaanii ji'a tokkoo fi hammasii olii kanneen lakkaa'aman hundaa 6,200 ture.

³⁵ Hoogganaan maatiiwwan balbalawwan Meraarotaas Zuri'el ilma Abiihaayilii ti; isaanis karaa kaaba dukaana qulqullummaatiin qubatan.

³⁶ Meraaronnis tuggewwan dukaana qulqulluu, dagaleewwan isaa, utubaawwan isaa, miillawwan isaa, mi'a isaa hundaa fi wantoota tajaajila akkanaa kennan hunda, ³⁷ akkasumas utubaawwan oobdii sanatti naanna'anii jiran, miillawwan isaanii, qofoo dukaanaa fi funyoowwan isaa eeguuf muudaman.

³⁸ Museen, Aroonii fi ilmaan Aroon dukaana qulqulluu irraa karaa ba'aa, qixa ba'a biiftuutiin fuula dukaana wal ga'ii dura qubatan.

Isaanis iddoo Israa'elootaa bu'anii iddoo qulqulluu eeguutti itti gaafatamtoota turan. Namni biraa kan iddoo qulqulluu sanatti dhi'aatu haa ajjeefamu.

³⁹ Lewwonni lakkaa'aman hundi kanneen Musee fi Aroon ajaja WAAQAYYOOTIIN akkuma balbala balbala isaaniitti lakkaa'an, dhiironni ji'a tokkoo fi hammasii olii hundi 22,000 turan.

⁴⁰ WAAQAYYO Museedhaan akkana jedhe; "Dhiirota Israa'el hangafoota kanneen ji'a tokkootii fi hammasii olii hunda lakkaa'ii maqaa isaanii barreessi. ⁴¹ Qooda ijoollee Israa'el kanneen hangafa ta'an hundaa Lewwota naa fudhadhu; qooda ilmaan hangafa horii Israa'elootaa hundaa horii Lewwotaa naa fudhadhu. Ani WAAQAYYO."

⁴² Museen akkuma WAAQAYYO isa ajajetti hangafoota Israa'el hunda lakkaa'e. ⁴³ Dhiironni hangafooni ji'a tokkoo fi hammasii olii kanneen maqaa maqaan barreeffaman hundii 22,273 turan.

⁴⁴ WAAQAYYO Museedhaan akkana jedhe; ⁴⁵ "Qooda ijoollee Israa'el kanneen hangafa ta'an hundaa Lewwota fudhadhu; qooda horii Israa'elootaa horii Lewwotaa fudhadhu. Lewwonni kan koo ti. Ani WAAQAYYO. ⁴⁶ Israa'eloota hangafoota 273 kanneen baay'ina Lewwotaa caalan furuuf, ⁴⁷ tokkoo tokkoo isaaniitiif akkuma madaalii saqilii iddoo qulqulluutti saqilii shan shan fuudhi; saqiliin tokko geeraa digdama. ⁴⁸ Maallaqa Israa'eloota dabalaman furuuf fuudhame sanas Aroonii fi ilmaan isaatti kenni."

⁴⁹ Museen maallaqa sana Israa'eloota lakkoobsaan warra Lewwotaan furamaniin ol ta'an sana irraa fuudhe. ⁵⁰ Innis akka madaalii saqilii iddoo qulqulluutti meetii saqilii 1,365 ulfaattu Israa'eloota hangafa irraa fuudhe. ⁵¹ Museenis akkuma dubbii WAAQAYYOOTI, akkuma Waaqni Musee ajajetti maallaqa furii sana Aroonii fi ilmaan isaatti kenne.

4

Qohaatotaa

¹ WAAQAYYO Musee fi Arooniin akkana jedhe: ² "Lewwota keessaa gosa Qohaatotaa balbala balbalaa fi maatii maatii isaaniitiin lakkaa'i. ³ Dhiirota umuriin isaanii waggaa soddomaa hamma shantamaa kanneen hojii dukaana wal ga'ii hojjechuuf dhufan hunda lakkaa'i.

⁴ "Hojiin Qohaatonni wantoota waan hunda caalaa qulqulluu ta'aniin wal qabatee dukaana wal ga'ii keessatti hojjetan kanaa dha. ⁵ Yommuu qubanni deemuuf ka'utti Aroonii fi ilmaan isaa ol galanii golgaa da'eessu sana gad haa buusan; golgaa sanaanis taabota kakuu seeraatti haa haguugan. ⁶ Waan kanattis gogaa duugame uffisanii huccuu bifti isaa guutummaan guutuutti cuquliisa ta'e irraan haa afan. Danqaraawwanis iddoo iddoo isaanii keessa haa galchan.

⁷ "Isaanis huccuu bifa cuquliisaa tokko minjaala Buddeena Ilaalchaatti uffisanii gabatee, caabii fi waciitii akkasumas okkotee ittiin dhibaayyuu dhi'eessan isa irra haa kaa'an; buddeenni yeroo hunda achii hin dhabamne sunis isa irra haa kaa'amu. ⁸ Huccuu bildiimaa isaan irra haa diriirsan; gogaa duugame itti haa uwwisan; danqaraawwan isaas iddoo isaanii keessa haa galchan.

⁹ "Huccuu bifti isaa cuquliisaa fuudhanii baattuu ibsaa kan ibsuuf tolchame ibsaa isaa wajjin, waan ittiin fo'aa ibsaa kutanii fi baattuu daaraa, meeshaawwan zayitii kanneen hojii kanaaf oolan hundas ittiin haa haguugan. ¹⁰ Ergasiis waan kanaa fi mi'a isaa hunda gogaa duugameen maranii wasaasaa ittiin waa baatan irra haa kaa'an.

¹¹ “Huccuu biftii isaa cuquliisa ta’es iddoo aarsaa kan warqee irraa hojjetametti uffisanii gogaa duugame itti haa haguugan; danqaraawwan isaas iddoo isaanii keessa haa galchan.

¹² “Meeshaawwan ittiin iddoo qulqulluu keessa tajaajilan hundas fuudhanii huccuu bifa cuquliisaatiin maranii gogaa duugameen haguuganii wasaasaa ittiin waa baatan irra haa kaa’an.

¹³ “Isaanis iddoo aarsaa irraa daaraa haranii huccuu diimaa dhiilgee itti haa uffisan.
¹⁴ Ergasii mi’a iddoo aarsaa ittiin tajaajilan hunda, baattuu ibiddaa, qabduuwwan foonii, meeshaa ittiin daaraa hammaaranii fi waciiiti isa irra haa kaa’an. Gogaa duugamee isa irraan haa afan; danqaraawwan isaas iddoo isaanii keessa haa galchan.

¹⁵ “Erga Aroonii fi ilmaan isaa meeshaawwan qulqulluu sanaa fi mi’a qulqulluu hunda haguuganii fixanii booddee yeroo qubanni sun godaanuuf ka’utti Qohaatonni mi’a kana baachuudhaaf haa dhufan. Isaan garuu mi’a qulqulluu sana hin tuqin; yoo tuqan ni du’uutii. Qohaatonni waan dunkaana wal ga’ii keessa jiru hunda haa baatan.

¹⁶ “Ele’aazaar ilmi Aroon lubichaa itti gaafatamaa zayitii ibsaa, ixaana urgaa’aa, kennaa midhaanii kan yeroo baay’ee dhi’eefamuu fi zayitii ittiin dibanii haa ta’u. Inni dunkaana qulqulluu hundaa fi waan isa keessa jiru hundatti, mi’aa fi meeshaawwan isaa qulqulluutis itti gaafatamaa haa ta’u.”

¹⁷ WAAQAYYO Musee fi Arooniin akkana jedhe; ¹⁸ “Balbalawwan gosa Qohaatii Lewwota keessaa hin balleessinaa. ¹⁹ Akka isaan yommuu wantoota waan hunda caalaa qulqulluu ta’anitti dhi’aatanitti, akka lubbuun jiraatan malee hin duuneef waan kana isaaniif godhaa: Aroonii fi ilmaan isaa iddoo qulqulluu seenanii waan tokkoon tokkoon namaa hojjetuu fi baatu haa qoqqoodan. ²⁰ Qohaatonni garuu akka hin duuneef yeroo xinnaaf illee wantoota qulqulluu ilaaluudhaaf ol seenuu hin qaban.”

Geershoonota

²¹ WAAQAYYO Musee akkana jedhe; ²² “Geershoonotas maatii maatii isaanii fi balbala balbala isaaniitiin lakkaa’i. ²³ Dhiirota umuriin isaanii waggaa soddomaa hamma shantamaa kanneen hojii dunkaana wal ga’ii hojjechuu dhufan hunda lakkaa’i.

²⁴ “Tajaajilli balbalawwan Geershoonotaa hojii hojjechuu fi ba’aa baachuudhaan tajaajilan kanaa dha: ²⁵ Isaan golgaa dunkaana qulqulluu, dunkaana wal ga’ii, uffata isaa fi irra buusaa isaa kan gogaa duugame irraa hojjetame, golgaa balbala dunkaana wal ga’ii, ²⁶ golgaawwan dallaa dunkaana qulqulluu fi iddoo aarsaatti naanna’ee jiru sanaa, golgaa balbala isaa, funyoo fi mi’a tajaajila kanaaf fayyadu hunda baatu. Geershoononni waan wantoota kanaan hojjetamuu qabu hunda haa hojjetan. ²⁷ Tajaajilli Geershoonotaa hundi ba’aa baachuus ta’u hojiin biraa ajaja Aroonii fi ilmaan isaa kennaniin haa adeemsifamu. Waan isaan baachuu qaban hundas akkuma itti gaafatama isaaniitti qoqqoodaafii. ²⁸ Tajaajilli balbalawwan Geershoonotaa dunkaana wal ga’iitti kennan kanaa dha. Hojiin isaaniis liitaamaar ilma Aroon lubichaatiin haa qajeelfamu.

Meraarota

²⁹ “Meraarota balbala balbalaa fi maatii maatii isaaniitiin lakkaa’i. ³⁰ Dhiirota umuriin isaanii waggaa soddomaa hamma shantamaa kanneen hojii dunkaana wal ga’ii hojjechuuf dhufan hunda lakkaa’i. ³¹ Wanni isaan yeroo hojii dunkaana wal ga’ii hojjetanitti godhan kanaa dha: kunis tuggewwan dunkaana qulqulluu, dagaleewwan isaa, utubootaa fi miillawwan isaanii, ³² utuboota oobdiitti naanna’anii jiran miillawwan isaanii wajjin, qofoowwan dunkaanaa, funyoowwan, mi’a isaanii hundaa fi wantoota hojii kanaaf fayyadan hunda baachuu dha. Isinis waan tokkoon tokkoon namaa baatu addaan baasaatii ramadaafii. ³³ Tajaajilli balbalawwan Meraarotaa qajeelfama liitaamaar ilma Aroon lubichaa jala dunkaana wal ga’ii keessatti kennan kanaa dha.”

Lakkaa’amuu Gosa Lewwotaa

³⁴ Museen, Aroonii fi hooggantoonni waldaas Qohaatota balbala balbalaa fi maatii maatii isaaniitiin lakkaa’an.

³⁵ Dhiironni umuriin isaanii waggaa soddomaa hamma shantamaa kanneen hojii dunkaana wal ga’ii keessaa sana keessa hojjechuuf dhufan hundi ³⁶ balbala balbalaan lakkaa’amanii 2,750 turan. ³⁷ Kun lakkoobsa balbalawwan Qohaatota warra dunkaana wal ga’ii keessa hojjechaa turanii ti. Musee fi Aroon akkuma ajaja WAAQAYYOO kan karaa Museetiin kennameetiin isaan lakkaa’an.

³⁸ Geershoononni balbala balbalaa fi maatii maatii isaaniitiin lakkaa’aman.

- ³⁹ Dhiironni umuriin isaanii waggaa soddomaa hamma shantamaa kanneen hojii dunkaana wal ga'ii keessa hojjechuuf dhufan hundi ⁴⁰ balbala balbalaa fi maatii maatii isaaniitiin lakkaa'amanii 2,630 turan. ⁴¹ Balbalawwan Geershoonotaa, warri hojii dunkaana wal ga'ii keessa hojjetan kanneen Musee fi Aroon akkuma ajaja WAAQAYYOOTTI lakkaa'an hundi kanneenii dha.
- ⁴² Meraaronnis balbala balbalaa fi maatii maatii isaaniitiin lakkaa'aman.
- ⁴³ Dhiironni umuriin isaanii waggaa soddomaa hamma shantamaa kanneen hojii dunkaana wal ga'ii keessa tajaajiluu dhufan hundi ⁴⁴ balbala balbala isaaniitiin lakkaa'amanii 3,200 turan. ⁴⁵ Warri balbalawwan Meraarotaa keessaa lakkaa'aman kanneen Musee fi Aroon akkuma ajaja WAAQAYYOO kan karaa Museetiin kenname sanaatti lakkaa'an kanneenii dha.
- ⁴⁶ Museen, Aroonii fi hooggantoonni Israa'el Lewwota hunda balbala balbalaa fi maatii maatii isaaniitiin lakkaa'an. ⁴⁷ Dhiironni umuriin isaanii waggaa soddomaa hamma shantamaa kanneen hojii tajaajilaa hojjechuu fi dunkaana wal ga'ii baachuu dhufanii ⁴⁸ lakkaa'aman hundi 8,580 turan. ⁴⁹ Isaanis akkuma ajaja WAAQAYYOO kan karaa Museetiin kennameetiin tokkoon tokkoon isaanii waan hojjechuu qabanitti ramadaman; wanni isaan baachuu qabanis isaanitti himame.

Akkasiin isaan akkuma WAAQAYYOO Musee ajajetti lakkaa'aman.

5

Qulqullina Qubataa

¹ WAAQAYYOO Museedhaan akkana jedhe; ² "Nama dhukkuba gogaa kan namatti darbu qabu yookaan nama dhangala'aa dhagnaa qabu yookaan nama sababii waan du'e tokkootiin xuraa'aa ta'e kam iyyuu akka qubata keessaa baasaniif saba Israa'el ajaji. ³ Dhiiras dubartiis gad baasaa; akka isaan qubata isaanii iddoo ani gidduu isaanii jiraadhu sana hin xureessineef qubata keessaa isaan baasaa." ⁴ Israa'eloonnis akkanuma godhanii qubata keessaa isaan baasan. Isaanis akkuma WAAQAYYOO Museetti hime sana godhan.

Kiisii Yakkaaf Baafamu

⁵ WAAQAYYOO Museedhaan akkana jedhe; ⁶ "Warra Israa'eliin akkana jedhi: 'Yoo dhiirri yookaan dubartiin tokko karaa kamiin iyyuu nama kaanitti balleessa hojjechuudhaan WAAQAYYOO duratti amanamummaa dhabe, namni sun yakkamaa dha; ⁷ cubbuu hojjetes himachuu qaba. Yakka isaatiifis guutamaan guutuutti haa kiisu. Kiisii sana irrattis harka shan keessaa harka tokko dabalee namicha miidhame sanaaf haa kennu. ⁸ Namni yakki isa irratti hojjetame sun yoo fira aantee kan kiisii sana isaaf fuudhu qabaachuu baate garuu kiisiin sun kan WAAQAYYOO ti; korbeessa hoolaa ittiin araarri isaaf buufamu wajjin lubaaf haa kennamu. ⁹ Buusiiwwan qulqulluun Israa'eloonni lubatti fidan hundi kan isaa ti. ¹⁰ Wantoonni qulqulluun kanuma abbootii isaanii ti; wanni isaan lubichaaf kennan garuu kanuma lubichaa ti.'"

Niitii Dhirsaaf Hin Amanamne

¹¹ Ergasii WAAQAYYOO Museedhaan akkana jedhe; ¹² "Akkana jedhiitii saba Israa'elitti dubbadhu: 'Yoo niitiin nama kamiin iyyuu karaa irraa baduudhaan isaaf amanamuu baatee ¹³ dhiira biraa wajjin ciifte, yoo dhirsi ishees waan kana beekuu baate, yoo xuraa'ummaan ishee akkuma dhokatetti hafe, yoo namni ishee irratti dhugaa ba'u hin argamin, isheen yoo waan kana irratti hin qabamin, ¹⁴ yoo dhirsa ishee hafuurri hinaaffaa qabatee inni niitii isaa shakke, yoo isheen xurooftuu taate yookaan yoo inni hinaafee ishee shakke isheen xurooftuu hin ta'in, ¹⁵ inni niitii isaa lubatti haa geessu. Akkasumas inni kennaa daakuu garbuu iifii* harka kudhan keessaa harka tokko qooda ishee haa geessu. Kennaan midhaanii kan sababii hinaaffaatiif dhi'eefamu kun waan kennaa yaadannoo kan yakka yaadachiisu ta'eef, inni zayitii fi ixaana itti naquu hin qabu.

¹⁶ " 'Lubichis ishee fidee fuula WAAQAYYOO dura ishee haa dhaabu. ¹⁷ Ergasii inni bishaan qulqulluu okkotee supheetti haa naqu; lafa dunkaana qulqulluu irraa biyyoo fuudhee bishaan sana keessa haa buusu. ¹⁸ Lubichis erga dubartii sana fuula WAAQAYYOO dura dhaabee booddee rifeensa mataa ishee hiikee kennaa yaadannoo jechuunis kennaa

* 5:15 5:15 Iifiin tokko kiiloo giraamii 1.6.

midhaanii kan hinaaffaaf dhi'eeffamu sana harka ishee keessa kaa'a; bishaan hadhaa'aa abaarsa fidu sanas harka ofiitti qabata. ¹⁹ Lubichis dubartii sana ni kakachiisa; akkanas jedhaan; "Yoo utuu ati dhirsaa qabduu namni biraa si wajjin hin ciisinii fi yoo ati karaa irraa baddee hin xuraa'in bishaan hadhaa'aan abaarsa fidu kun si hin miidhin. ²⁰ Garuu ati yoo karaa irraa baddee utuu dhirsaa qabduu nama dhirsaa kee hin ta'in wajjin ciiftee of xureessitee argamte;" ²¹ kana irratti lubichi kakaa abaarsaa ishee kakachiisa; akkanas jedhaan; "WAAQAYYOO gudeeda kee tortorsee garaa kee illee bokoksee saba kee gidduutti kakaa fi abaarsaaf si haa godhu. ²² Akka garaan kee bokokuu fi akka gudeedni kee tortoruuf bishaan abaarsa fidu kun dhagna kee haa seenu."

"Dubartiin sunis, "Ameen, ameen" haa jettu.

²³ "Lubichis abaarsawwan sana kitaaba maramaa irratti haa barreessu; ergasiis bishaan hadhaa'aa sanatti irraa haa dhiqu. ²⁴ Innis akka dubartiin sun bishaan hadhaa'aa abaarsa fidu sana dhugdu haa godhu; bishaan abaarsaa fi dhiphina hamaa fidu sunis ishee seena. ²⁵ Lubichis kennaa midhaanii kan hinaaffaa sana ishee harkaa fuudhee fuula WAAQAYYOO duratti sochoosee gara iddoo aarsaa fida. ²⁶ Lubni sunis kennaa midhaanii sana irraa konyee tokko kennaa yaadannootiif fuudhee iddoo aarsaa irratti haa gubu; ergasiis akka dubartiin sun bishaan sana dhugdu haa godhu. ²⁷ Yoo isheen of xureessitee dhirsaa isheetiif amanamuu baatte, yommuu isheen bishaan abaarsa fidu sana dhugdutti bishaan sun ishee seenee dhiphina hamaa isheetti fida; garaan ishee ni bokoka; gudeedni ishee ni tortora; isheenis saba ishee biratti abaaramtuu taati. ²⁸ Garuu yoo dubartiin sun of xureessuu baattee fi yoo qulqulluu taate isheen yakka irraa bilisa taati; da'uus ni dandeessi.

²⁹ "Yoo dubartiin utuma dhirsaa qabduu karaa irraa gortee of xureessite ³⁰ yookaan yoo dhiirri sababii niitii ofii shakkuuf hafuurri hinaaffaa isa qabate, seerri hinaaffaaf kenname kanaa dha. Lubichi dubartii sana fuula WAAQAYYOO dura dhaabee seera kana hunda ishee irratti haa raawwatu. ³¹ Dhirsii sun balleessaa irraa bilisa ta'a; dubartiin sun garuu gatii cubbuu ishee argatti."

6

Seera Naazirummaa

¹ WAAQAYYOO Museedhaan akkana jedhe; ² "Akkana jedhii saba Israa'elitti dubbadhu: 'Dhiirri yookaan dubartiin tokko yoo WAAQAYYOO addaan of baasuuf wareega addaa yookaan wareega Naazirummaa wareegan, ³ daadhii wayinii fi dhugaatii nama macheessu irraa of haa eeggatan; namni sun dhangaggaa'aa daadhii wayinii irraa hojjetama yookaan dhangaggaa'aa dhugaatii nama macheessuu biraa hin dhugin. Inni cuunfaa gumaa wayinii dhuguu yookaan ija wayinii asheetii yookaan goggogaa isaa nyaachuu hin qabu. ⁴ Innis bara Naazirummaa isaa hunda keessa waan gumaa wayinii irraa argamu kam iyyuu sanyii isaas ta'u qola isaa nyaachuu hin qabu.

⁵ "Bara wareega addaan baafamuu isaa hunda keessa qarabaan tokko iyyuu mataa isaa hin tuqin. Hamaa yeroon inni itti WAAQAYYOO addaan baafame sun xumuramutti inni qulqulluu haa ta'u; akka rifeensi mataa isaa guddatuufis gad haa dhiisu.

⁶ "Naazirichi bara WAAQAYYOO addaan of baase hunda keessa reeffatti dhi'aachuu hin qabu. ⁷ Sababii mallattoon inni ittiin WAAQAYYOO addaan baafame mataa isaa irra jiruuf yoo abbaan isaa yookaan haati isaa, obboleessi isaa yookaan obboleettiin isaa du'an illee isaanii jedhee akka seeraatti of hin xureessin. ⁸ Inni bara itti addaan baafame sana hunda keessa kan WAAQAYYOO qulqulleeffamee dha.

⁹ "Yoo namni tokko iddoo Naazirichi jirutti akka tasaa du'ee akkasiin rifeensa inni addaan baase sana xureesse, inni guyyaa itti qulqulleeffamutti jechuunis guyyaa torbaffaatti mataa isaa haa haaddatu. ¹⁰ Ergasiis inni guyyaa saddeettafatti gugee lama yookaan gugee sosookkee lama balbala dunkaana wal ga'ii irratti lubatti haa fidu. ¹¹ Sababii inni iddoo reeffi jirutti argamuudhaan cubbuu hojjeteeff lubichi isa tokko aarsaa cubbuu, isa kaan immoo aarsaa gubamu godhee araara buusuuf haa dhi'eessuuf. Guyyuma sanas rifeensa mataa isaa addaan haa baasu. ¹² Inni yeroo itti addaan baafame keessa ammas WAAQAYYOO addaan of haa baasu; xobbaallaa hoolaa kan umuriin isaa waggaa tokko ta'es aarsaa yakkaa godhee haa fidu. Garuu sababii inni yeroo addaan ba'isaa isaa keessa xureeffameef guyyoonni darban hin lakkaa'aman.

¹³ "Egaa yeroo addaan ba'umsi isaa xumuramutti seerri Naazirichaa kanaa dha: Inni gara karra dunkaana wal ga'iitti haa fidamu. ¹⁴ Achitti aarsaa isaa WAAQAYYOO haa dhi'eessu; kunis xobbaallaa korbeessa hoolaa hir'ina hin qabnee kan umuriin isaa waggaa tokko ta'e aarsaa gubamuuf, xobbaallaa hoolaa dhaltuu hir'ina hin qabne kan umuriin ishee waggaa tokko ta'e aarsaa cubbuutiif, korbeessa hoolaa hir'ina hin qabne

aarsaa nagaatiif, ¹⁵ kana wajjinis Maxinoo gundoo tokko, Maxinoo daakuu bullaa'aa irraa tolfame kan zayitiidhaan sukkuumame, bixxillee zayitiin irra dibame akkasumas kennaa midhaanii fi dhibaayyuu isaanii haa dhi'eessu.

¹⁶ "Lubichis fuula WAAQAYYOO duratti isaan fidee aarsaa cubbuutii fi aarsaa gubamu haa dhi'eessu. ¹⁷ Innis korbeessa hoolaa sana Maxinoo gundoo irra jiru sana wajjin aarsaa nagaa godhee fuula WAAQAYYOO duratti isaan haa dhi'eessu; akkasumas lubichi kennaa midhaaniitti fi dhibaayyuu isaa haa dhi'eessu.

¹⁸ "Ergasii Naazirichi balbala dunkaana wal ga'ii duratti rifeensa addaan baase sana haa haaddatu. Rifeensa sanas fuudhee ibidda aarsaa nagaa jalaan jiru sana keessa haa buusu.

¹⁹ "Erga Naazirichi rifeensa ittiin addaan baafame sana haaddatee booddee lubni sun foon gatiittii korbeessa hoolaa kan affeelamee fi Maxinoo fi bixxillee hin bukaa'in gundoo sana irraa fuudhee harka namichaa irra haa kaa'u. ²⁰ Ergasiis lubichi aarsaa sochoofamu godhee fuula WAAQAYYOO duratti isaan haa sochoosu; isaanis handaraafa sochoofamee fi tafa dhi'eeffame sana wajjin lubichaaf kan qulqulleeffamanii dha. Ergasii Naazirichi daadhii wayinii dhuguu ni danda'a.

²¹ "Seerri Naaziricha waan kennuu danda'u kaan dabalatee akkuma addaan ba'umsa isaatti kennaa isaa WAAQAYYOO wareegu tokkoo kanaa dha. Innis akkuma seera Naazirichaatti waan wareege sana raawwachuu qaba."

Eebba Lubootaa

²² WAAQAYYO Museedhaan akkana jedhe; ²³ "Aronii fi ilmaan isaatti akkana jedhii himi; 'Akki isin itti Israa'eloota eebbifan kanaa dha. Akkana jedhaanii:

²⁴ "WAAQAYYO si haa eebbisu;

si haa eegus;

²⁵ WAAQAYYO fuula isaa siif haa ibsu;

garaa siif haa laafu.

²⁶ WAAQAYYO fuula isaa gara keetti haa deebisu;

nagaas siif haa kennu."

²⁷ "Akkasitti isaan maqaa koo saba Israa'el irra kaa'u; anis isaan nan eebbisa."

7

Sirna Eebba Dunkaana Qulqulluu

¹ Museen erga dunkaana qulqulluu sana dhaabee fixatee booddee, dunkaanichaa fi mi'a isaa hunda dibe; ni qulqulleesses. Akkasumas iddoo aarsaatii fi mi'a isaa hunda dibee qulqulleesse. ² Ergasii hooggantoonni Israa'el, hangafoonni maatiiwwanii kanneen hooggantoota gosootaa ta'anii warra lakkaa'aman sana qajeelchanis kennaa dhi'eessan. ³ Isaanis gaariiwwan haguugaman ja'aa fi sangoota kudha lama jechuunis tokkoo tokkoo hooggantootaa irraa sangaa tokko, lama lama ta'anii immoo gaarii tokko kennaa ofii godhanii fuula WAAQAYYOO duratti fidan. Kennaawwan kanneenis dunkaana qulqulluu sana duratti dhi'eessan.

⁴ WAAQAYYO Museedhaan akkana jedhe; ⁵ "Akka isaan hojii dunkaana wal ga'ii hojjechuu keessatti fayyadaniif kennaawwan kanneen isaan harkaa fuudhi. Waan kana akkuma hojiin tokkoo tokkoo namaa barbaaddutti Lewwotatti kenni."

⁶ Museenis gaariiwwanii fi sangoota sana fuudhee Lewwotatti kenne. ⁷ Innis akkuma hojii isaaniitiif malutti gaariiwwan lamaa fi sangoota afur ilmaan Geershoonitti kenne; ⁸ gaariiwwan afurii fi sangoota saddeet akkuma hojii isaaniitiif malutti ilmaan Meraaritti kenne. Isaan hundinuu qajeelfama Iitaamaar ilma Aron lubichaa jala turan. ⁹ Ilmaan Qohaati garuu sababii mi'a qulqulluu gatiittiitti baachuun hojii isaanii ta'eef Museen homaa isaaniitti hin kennene.

¹⁰ Yeroo iddoo aarsaa dibametti hooggantoonni kennaawwan isaanii eebba iddoo aarsaatiif fidanii iddoo aarsaa duratti dhi'eessan. ¹¹ WAAQAYYO Museedhaan, "Dura bu'aan tokko guyyuma tokko kennaa isaa sirna eebba iddoo aarsaa sanaatiif haa dhi'eessu" jedhee tureetii.

¹² Namni guyyaa jalqabaatti kennaa ofii fide Nahishoon ilma Amiinaadaab kan gosa Yihuudaa ture.

¹³ Kennaan isaas

gabatee meetii kan akka madaalii saqilii iddoo qulqulluutti saqilii dhibba tokkoo fi soddoma ulfaatu tokkoo fi waciitii meetii kan akka madaalii saqilii iddoo qulqulluutti saqilii torbaatama ulfaatu kan tokkoon tokkoon isaanii akka kennaa midhaaniitti daakuu bullaa'aa zayitiidhaan sukkuumameen guutaman,

- 14 cilfaa warqee kan saqilii kudhan ulfaatee ixaanaan guutame tokko,
 15 aarsaa gubamuufis dibicha loonii tokko, korbeessa hoolaa tokkoo fi xobbaallaa hoolaa kan umuriin isaa waggaa tokko ta'e tokko,
 16 aarsaa cubbuutiif immoo korbeessa re'ee tokko,
 17 aarsaa nagaatiif qaluufis sangoota lama, korbeeyyii hoolaa shan, korbeeyyii re'ee shanii fi xobbaallaawwan hoolaa shan kanneen umuriin isaanii waggaa tokko tokko ta'e ture.

Kennaan Nahishoon ilmi Amiinaadaab dhi'eesse kana ture.

18 Guyyaa lammaffaattis Naatnaa'el ilma Zuuwaar dura bu'aa Yisaakoritu kenna isaa fide.

- 19 Kennaan inni fides gabatee meetii kan akka madaalii saqilii iddoo qulqulluutti saqilii dhibba tokkoo fi soddoma ulfaatu tokko,
 waciitii meetii kan akka madaalii saqilii iddoo qulqulluutti saqilii torbaatama ulfaatu tokko kan tokkoon tokkoon isaanii akkuma kenna midhaaniitti daakuu bullaa'aa zayitiidhaan sukkuumameen guutaman,
 20 caabii warqee kan saqilii kudhan ulfaatee ixaanaan guutame tokko,
 21 aarsaa gubamuufis dibicha loonii tokko, korbeessa hoolaa tokkoo fi xobbaallaa hoolaa kan umuriin isaa waggaa tokko ta'e tokko,
 22 aarsaa cubbuutiif immoo korbeessa re'ee tokko,
 23 aarsaa nagaatiif qaluufis sangoota lama, korbeeyyii hoolaa shan, korbeeyyii re'ee shanii fi xobbaallaawwan hoolaa shan kanneen umuriin isaanii waggaa tokko tokkoo ture.

Kennaan Naatnaa'el ilma Zuuwaar kana ture.

24 Guyyaa sadaffaatti Eliiyaab ilma Heelon hangafa ijoollee Zebuulonitu kenna isaa fide.

- 25 Kennaan isaas gabatee meetii kan akka madaalii saqilii iddoo qulqulluutti saqilii dhibba tokkoo fi soddoma ulfaatu tokko, waciitii meetii kan akka madaalii saqilii iddoo qulqulluutti saqilii torbaatama ulfaatu tokko kanneen tokkoon tokkoon isaanii akkuma kenna midhaaniitti daakuu bullaa'aa zayitiidhaan sukkuumameen guutaman,
 26 xuwwee warqee kan saqilii kudhan ulfaatee ixaanaan guutame tokko,
 27 aarsaa gubamuufis dibicha loonii tokko, korbeessa hoolaa tokko, xobbaallaa hoolaa umuriin isaa waggaa tokko ta'e tokko,
 28 aarsaa cubbuutiif immoo korbeessa re'ee tokko,
 29 aarsaa nagaatiif qaluufis sangoota lama, korbeeyyii hoolaa shan, korommi re'ee shanii fi xobbaallaa korbeeyyii hoolaa shan kanneen umuriin isaanii waggaa tokko tokkoo ture.

Egaa kennaan Eliiyaab ilma Heelon kana ture.

30 Guyyaa afuraffaatti Eliizuur ilma Shedee'uur dura bu'aa ijoollee Ruubeenitu kenna isaa fide.

- 31 Kennaan isaas gabatee meetii kan akka madaalii saqilii iddoo qulqulluutti saqilii dhibba tokkoo fi soddoma ulfaatu tokko, waciitii meetii kan akka madaalii saqilii iddoo qulqulluutti saqilii torbaatama ulfaatu tokko kan tokkoo tokkoon isaanii akkuma kenna midhaaniitti daakuu bullaa'aa zayitiidhaan sukkuumameen guutaman,
 32 xuwwee warqee kan saqilii kudhan ulfaatee ixaanaan guutame tokko,
 33 aarsaa gubamuufis dibicha loonii tokko, korbeessa hoolaa tokko, xobbaallaa hoolaa umuriin isaa waggaa tokko ta'e tokko,
 34 aarsaa cubbuutiif immoo korbeessa re'ee tokko,
 35 aarsaa nagaatiif qaluufis sangoota lama, korbeeyyii hoolaa shan, korbeeyyii re'ee shanii fi xobbaallaa korbeeyyii hoolaa shan kanneen umuriin isaanii waggaa tokko tokkoo ture.

Egaa kennaan Eliizuur ilma Shedee'uur kana ture.

36 Guyyaa shanaffaatti Shilumii'eel ilma Zuriishadaayi hoogganaa ijoollee Simi'oonitu kenna isaa fide.

- 37 Kennaan isaas gabatee meetii kan akka madaalii saqilii iddoo qulqulluutti saqilii dhibba tokkoo fi soddoma ulfaatu tokko, waciitii meetii kan akka madaalii saqilii iddoo qulqulluutti

saqilii torbaatama ulfaatu tokko, kanneen tokkoon tokkoon isaanii akkuma kennaan midhaaniitti daakuu bullaa'aa zayitiidhaan sukkuumameen guutaman,
³⁸ xuwwee warqee kan saqilii kudhan ulfaatee ixaanaan guutame tokko,
³⁹ aarsaa gubamuufis dibicha loonii tokko, korbeessa hoolaa tokko, xobbaallaa hoolaa kan umuriin isaa waggaa tokko ta'e tokko,
⁴⁰ aarsaa cubbuutiif immoo korbeessa re'ee tokko,
⁴¹ aarsaa nagaatiif qaluufis sangoota lama, korbeeyyii hoolaa shan, korbeeyyii re'ee shanii fi xobbaallaawwan hoolaa shan kanneen umuriin isaanii waggaa tokko tokko ture.
 Egaa kennaan Shilumii'eel ilma Zuriishadaayi kana ture.

⁴² Guyyaa ja'affaatti Eliyaasaaf ilma De'uu'eel dura bu'aa ijoollee Gaaditu kennaan isaa fide.

⁴³ Kennaan isaas gabatee meetii kan akka madaalii saqilii iddoo qulqulluutti saqilii dhibba tokkoo fi soddoma ulfaatu tokko, waciitii meetii kana akka madaalii saqilii iddoo qulqulluutti saqilii torbaatama ulfaatu tokko kanneen tokkoon tokkoon isaanii akkuma kennaan midhaaniitti daakuu bullaa'aa zayitiidhaan sukkuumameen guutaman,
⁴⁴ xuwwee warqee kan saqilii kudhan ulfaatee ixaanaan guutame tokko,
⁴⁵ aarsaa gubamuufis dibicha loonii tokko, korbeessa hoolaa tokko, xobbaallaa hoolaa kan umuriin isaa waggaa tokko ta'e tokko,
⁴⁶ aarsaa cubbuutiif immoo korbeessa re'ee tokko,
⁴⁷ aarsaa nagaatiif qaluufis sangoota lama, korbeeyyii hoolaa shan, korommmii re'ee shanii fi xobbaallaawwan hoolaa shan kanneen umuriin isaanii waggaa tokko tokkoo ture.
 Egaa kennaan Eliyaasaaf ilma De'uu'eel kana ture.

⁴⁸ Guyyaa torbaffaatti Eliishaamaa ilma Amiihuud dura bu'aa ijoollee Efreemitu kennaan isaa fide.

⁴⁹ Kennaan isaas gabatee meetii kan akka madaalii saqilii iddoo qulqulluutti saqilii dhibba tokkoo fi soddoma ulfaatu tokko, waciitii meetii kan akka madaalii saqilii iddoo qulqulluutti saqilii torbaatama ulfaatu tokko kanneen tokkoon tokkoon isaanii akkuma kennaan midhaaniitti daakuu bullaa'aa zayitiidhaan sukkuumameen guutaman,
⁵⁰ xuwwee warqee kan saqilii kudhan ulfaatee ixaanaan guutame tokko,
⁵¹ aarsaa gubamuufis dibicha loonii tokko, korbeessa hoolaa tokko, xobbaallaa hoolaa kan umuriin isaa waggaa tokko ta'e tokko,
⁵² aarsaa cubbuutiif immoo korbeessa re'ee tokko,
⁵³ aarsaa nagaatiif qaluufis sangoota lama, korbeeyyii hoolaa shan, korbeeyyii re'ee shanii fi xobbaallaawwan hoolaa shan kanneen umuriin isaanii waggaa tokko tokko ture.
 Egaa kennaan Eliishaamaa ilma Amiihuud kana ture.

⁵⁴ Guyyaa saddeettaffaatti Gamaali'eel ilma Phedaasuur hoogganaa ijoollee Minaaseetu kennaan isaa fide.

⁵⁵ Kennaan isaas gabatee meetii kan akka madaalii saqilii iddoo qulqulluutti saqilii dhibba tokkoo fi soddoma ulfaatu tokko, waciitii meetii kan akka madaalii saqilii iddoo qulqulluutti saqilii torbaatama ulfaatu tokko kanneen tokkoon tokkoon isaanii akkuma kennaan midhaaniitti daakuu bullaa'aa zayitiidhaan sukkuumameen guutaman,
⁵⁶ xuwwee warqee kan saqilii kudhan ulfaatee ixaanaan guutame,
⁵⁷ aarsaa gubamuufis dibicha loonii tokko, korbeessa hoolaa tokko, xobbaallaa hoolaa kan umuriin isaa waggaa tokko ta'e,
⁵⁸ aarsaa cubbuutiif immoo korbeessa re'ee tokko,
⁵⁹ aarsaa nagaatiif qaluufis sangoota lama, korbeeyyii hoolaa shan, korommmii re'ee shanii fi xobbaallaawwan hoolaa shan kanneen umuriin isaanii waggaa tokko tokkoo ture.
 Egaa kennaan Gamaali'eel ilma Phedaasuur kana ture.

⁶⁰ Guyyaa saglaffaatti Abiidaan ilma Gaadeyoon dura bu'aa ijoollee Beniyaamitu kennaan isaa fide.

⁶¹ Kennaan isaas

gabatee meetii kan akka madaalii saqilii iddoo qulqulluutti saqilii dhibba tokkoo fi soddoma ulfaatu tokko, waciitii meetii kan akka madaalii saqilii iddoo qulqulluutti saqilii torbaatama ulfaatu tokko kanneen tokkoon tokkoon isaanii akkuma kennaa midhaaniitti daakuu bullaa'aa zayitiidhaan sukkuumameen guutaman,

⁶² xuwwee warqee kan saqilii kudhan ulfaatee ixaanaan guutame,

⁶³ aarsaa gubamuufis dibicha loonii tokko, korbeessa hoolaa tokko, xobbaallaa hoolaa kan umuriin isaa waggaa tokko ta'e tokko,

⁶⁴ aarsaa cubbuutiif immoo korbeessa re'ee tokko,

⁶⁵ aarsaa nagaatiif qaluufis sangoota lama, korbeeyyii hoolaa shan, korbeeyyii re'ee shanii fi xobbaallaawwan hoolaa shan kanneen umuriin isaanii waggaa tokko tokkoo ture.

Egaa kennaan Abiidaan ilma Gaadeyoon kana ture.

⁶⁶ Guyyaa kudhannaafaatti Ahii'ezer ilma Amiishadaay dura bu'aa ijoollee Daanitu kennaa isaa fide.

⁶⁷ Kennaan isaas

gabatee meetii kan akka madaalii saqilii iddoo qulqulluutti saqilii dhibba tokkoo fi soddoma ulfaatu tokko, waciitii meetii kan akka madaalii saqilii iddoo qulqulluutti saqilii torbaatama ulfaatu tokko kanneen tokkoon tokkoon isaanii akkuma kennaa midhaaniitti daakuu bullaa'aa zayitiidhaan sukkuumameen guutaman,

⁶⁸ xuwwee warqee kan saqilii kudhan ulfaatee ixaanaan guutame,

⁶⁹ aarsaa gubamuufis dibicha loonii tokko, korbeessa hoolaa tokko, xobbaallaa hoolaa kan umuriin isaa waggaa tokko ta'e tokko,

⁷⁰ aarsaa cubbuutiif immoo korbeessa re'ee tokko,

⁷¹ aarsaa nagaatiif qaluufis sangoota lama, korbeeyyii hoolaa shan, korbeeyyii re'ee shanii fi korbeeyyii hoolaa xixinnaa shan kanneen umuriin isaanii waggaa tokko tokkoo ture.

Egaa kennaan Ahii'ezer ilma Amiishadaay kana ture.

⁷² Guyyaa kudha tokkoffaatti Fagi'eel ilma Okraan hoogganaa ijoollee Aasheeritu kennaa isaa fide.

⁷³ Kennaan isaas

gabatee meetii kan akka madaalii saqilii iddoo qulqulluutti saqilii dhibba tokkoo fi soddoma ulfaatu tokko, waciitii meetii kan akka madaalii saqilii iddoo qulqulluutti saqilii torbaatama ulfaatu tokko kanneen tokkoon tokkoon isaanii akkuma kennaa midhaaniitti daakuu bullaa'aa zayitiidhaan sukkuumameen guutaman,

⁷⁴ xuwwee warqee kan saqilii kudhan ulfaatee ixaanaan guutame,

⁷⁵ aarsaa gubamuufis dibicha loonii tokko, korbeessa hoolaa tokko, xobbaallaa hoolaa kan umuriin isaa waggaa tokko ta'e tokko,

⁷⁶ aarsaa cubbuutiif immoo korbeessa re'ee tokko,

⁷⁷ aarsaa nagaatiif qaluufis sangoota lama, korbeeyyii hoolaa shan, korbeeyyii re'ee shanii fi xobbaallaawwan hoolaa shan kanneen umuriin isaanii waggaa tokko tokkoo ture.

Egaa kennaan Fagi'eel ilma Okraan kana ture.

⁷⁸ Guyyaa kudha lamaffaatti Ahiiraa ilma Eenaan hoogganaa ijoollee Nif-taalemitu kennaa isaa fide.

⁷⁹ Kennaan isaas

gabatee meetii kan akka madaalii saqilii iddoo qulqulluutti saqilii dhibba tokkoo fi soddoma ulfaatu tokko, waciitii meetii kan akka madaalii saqilii iddoo qulqulluutti saqilii torbaatama ulfaatu tokko kanneen tokkoon tokkoon isaanii akkuma kennaa midhaaniitti daakuu bullaa'aa zayitiidhaan sukkuumameen guutaman,

⁸⁰ xuwwee warqee kan saqilii kudhan ulfaatee ixaanaan guutame tokko,

⁸¹ aarsaa gubamuufis dibicha loonii tokko, korbeessa hoolaa tokko, xobbaallaa hoolaa kan umuriin isaa waggaa tokko ta'e tokko,

⁸² aarsaa cubbuutiif immoo korbeessa re'ee tokko,

⁸³ aarsaa nagaatiif qaluufis sangoota lama, korbeeyyii hoolaa shan, korbeeyyii re'ee shanii fi xobbaallaawwan hoolaa shan kanneen umuriin isaanii waggaa tokko tokkoo ture.

Egaa kennaan Ahiiraa ilma Eenaan kana ture.

- ⁸⁴ Kennaan hoogantoonni Israa’el gaafa iddoon aarsaa dibame sana sirna eebbaatiif dhi’eessan kana ture; isaanis gabatee meetii kudha lama, waciitii meetii kudha lamaa fi xuwwee warqee kudha lama; ⁸⁵ Tokkoon tokkoon isaanii meetii saqilii dhibba tokkoo fi soddoma ulfaatu ture; tokkoon tokkoon waciitii meetii saqilii torbaatama ulfaata ture. Mi’i meetii kun akka madaalii saqilii iddoo qulqulluutti walumaa galatti saqilii kuma lamaa fi dhibbaa afur ulfaata ture. ⁸⁶ Xuwweewwan warqee kudha lamaan kanneen isaanaan guutamanis tokkoon tokkoon isaanii akka madaalii saqilii iddoo qulqulluutti saqilii kudhan ulfaatu turan. Xuwweewwan warqee walumaa galatti saqilii dhibba tokkoo fi digdama ulfaatu turan.
- ⁸⁷ Baay’inni horii aarsaa gubamuuf dhi’effamanii walumaa galatti jiboota loonii kudha lama, korbeeyyii hoolaa kudha lama, xobbaallaawwan hoolaa kanneen umuriin isaanii waggaa tokko ta’e kudha lama ture; kennaan midhaaniis isaan wajjin dhi’effameera. Korbeeyyiin re’ee kudha lama aarsaa cubbuutiif dhi’effamanii turan.
- ⁸⁸ Baay’inni horii aarsaa nagaatiif dhi’effamanii walumaa galatti sangoota digdamii afur, korbeeyyii hoolaa jaatama, korbeeyyii re’ee jaatamaa fi xobbaallaawwan hoolaa kanneen umuriin isaanii waggaa tokko ture.

Kennaawwan erga iddoon aarsaa dibamee booddee sirna eebba isaatiif dhi’effaman kanneen turan.

⁸⁹ Museen yommuu WAAQAYYO wajjin dubbachuuf dunkaana wal ga’ii ol seenetti teessoo araaraa kan taabota kakuu seeraa irra jiruun olitti kiirubeelii lamaan gidduudhaa sagalee isatti dubbatu dhaga’e. WAAQAYYO isa wajjin dubbate.

8

Ibsaawwan Kaa’uu

¹ WAAQAYYO Museedhaan akkana jedhe; ² “Aronitti akkana jedhii dubbadhu; ‘Yeroo ati ibsaawwan torban qabsiiftutti isaan iddoo baattuu ibsaa fuula dura jiru haa ibsan.’”

³ Aroonis akkasuma godhe; innis akkuma WAAQAYYO Musee ajajetti akka isaan fuula baattuu ibsaa duraan ifa kennaniif ibsaawwan sana qabsiise. ⁴ Akki itti baattuun ibsaa tolfame akkana: Miilla isaa irraa jalqabee hamma daraaraa isaatti warqee tumame irraa hojjetame. Baattuun ibsaa sun akkuma fakkeenya WAAQAYYO Museetti argisiise sanaatti hojjetame.

Addaan Baafamuu Lewwotaa

⁵ WAAQAYYO Museedhaan akkana jedhe: ⁶ “Saba Israa’el keessaa Lewwota fuudhii qulqulleessi. ⁷ Isaan qulqulleessuufis waan kana godhi: bishaan qulqullaa’ummaa isaanitti facaasi; akka isaan dhagna isaanii guutuu haaddatanii akkasiin uffata ofii miiccatanii of qulqulleessan godhi. ⁸ Isaanis dibicha loonii tokko kenna midhaanii kan daakuu bullaa’aa zayitiidhaan sukkuumame wajjin haa fuudhan; atis dibicha loonii lammaffaa aarsaa cubbuutiif fuudhi. ⁹ Lewwota fuula dunkaana wal ga’ii duratti dhi’eessiitii waldaa Israa’elootaa guutuu walitti qabi. ¹⁰ Lewwotas fuula WAAQAYYOO duratti dhi’eessi; sabni Israa’el harka isaanii Lewwota irra haa kaa’an. ¹¹ Aroonis akka Lewwonna WAAQAYYO tajaajilu danda’aniif saba Israa’el keessaa aarsaa sochoofamu godhee fuula WAAQAYYOO duratti isaan haa dhi’eessu.

¹² “Erga Lewwonna harka isaanii mataa jiboota sanaa irra kaa’anii booddee ati Lewwotaaf araaraa buusuudhaaf dibicha tokko aarsaa cubbuu, kaan immoo aarsaa gubamu godhiitii WAAQAYYOF dhi’eessi. ¹³ Akka Lewwonna fuula Aroonii fi fuula ilmaan isaa dura dhaabatan godhi; ergasiis aarsaa sochoofamu godhiitii WAAQAYYOTTI isaan dhi’eessi. ¹⁴ Haala kanaan Israa’elootaa kaan keessaa Lewwota addaan baasi; Lewwonnis kan koo haa ta’an.

¹⁵ “Erga ati Lewwota qulqulleessitee aarsaa sochoofamu gootee isaan dhi’eessitee booddees isaan hojii dunkaana wal ga’ii hojjechuuf haa dhufan. ¹⁶ Isaan Israa’elootaa keessaa guutummaan guutuutti naaf kennamuu qabu. Ani qooda hangafa saba Israa’el kan gadameessa saaqu hundaa Lewwota ofii kootiif fudhadheera. ¹⁷ Israa’el keessaa dhiirri hangafni hundi namas ta’u horiin kan koo ti. Ani yeroon biyya Gibxi keessatti hangafa hunda ajjeese sana ofii kootiif addaan isaan baafadhe. ¹⁸ Ani qooda ilmaan Israa’el hangafoota hundaa Lewwota fudhadheera. ¹⁹ Yommuu Israa’eloonni iddoo qulqulluutti dhi’aatanitti akka dha’ichi isaan hin arganneef, akka isaan Israa’elootaaf araara buusaniif fi akka isaan tajaajila Israa’elootaa dunkaana wal ga’ii keessatti

raawwataniif ani Lewwota saba Israa'el hunda keessaa Aroonii fi ilmaan isaatiif kennaa godhee kenneera.”

²⁰ Museen, Aroonii fi waldaan Israa'el guutuun akkuma WAAQAYYO Musee ajaje sana Lewwotas godhan. ²¹ Lewwonnis of qulqulleessanii wayyaa ofii miiccatan. Aroonis akkuma aarsaa sochoofamuutti fuula WAAQAYYOO duratti isaan dhi'eesse; isaan qulqulleessuufis araara isaaniif buuse. ²² Ergasii Lewwonnii qajeelcha Aroonii fi ilmaan isaatiin hojii dunkaana wal ga'ii hojjechuudhaaf dhufan. Isaanis akkuma WAAQAYYO Musee ajaje sana Lewwotas godhan.

²³ WAAQAYYO Museedhaan akkana jedhe; ²⁴ “Kun seera Lewwotaaf kennamee dha: Dhiironni umuriin isaanii waggaa digdamii shanii fi hammasii olii hojii dunkaana wal ga'ii keessatti hirmaachuuf haa dhufan; ²⁵ umurii waggaa shantamaatti garuu tajaajila isaanii haa dhaaban; deebi'aniis hin tajaajilin. ²⁶ Hojii dunkaana wal ga'ii irratti obboloota ofii gargaaruu ni danda'u; ofii isaaniitii garuu hojii sana hin hojjetin. Egaa kun haala itti ati itti gaafatama Lewwotaa ramadduu dha.”

9

Faasiikaa

¹ WAAQAYYO erga isaan Gibxii ba'anii booddee ji'a jalqabaa kan waggaa lammaffaatti Gammoojii Siinaa keessatti akkana jedhee Museetti dubbate; ² “Israa'eloonni yeroo murtaa'etti Faasiikaa haa ayyaanefatan. ³ Isin akkuma seeraa fi dambii ayyaana kanaa hundaatti yeroo murtaa'etti ji'a sana keessa, dimimmisa galgala guyyaa kudha afuraffaatti ayyaanefadhaa.”

⁴ Museen akka isaan Faasiikaa ayyaanefatan Israa'elootatti hime; ⁵ isaanis ji'a jalqabaa keessa dimimmisa galgala guyyaa kudha afuraffaatti Gammoojii Siinaa keessatti ayyaanefatan. Sabni Israa'el akkuma WAAQAYYO Musee ajajetti waan hunda godhe.

⁶ Isaan keessaa namoonni tokko tokko sababii reeffa tuqanii xuraa'aniif guyyaa sana Faasiikaa ayyaanefachuu hin dandeenye. Isaan guyyuma sana gara Musee fi Aroonii dhufanii, ⁷ Museedhaan akkana jedhan; “Nu sababii reeffa namaa tuqneef xuroofneerra; garuu maaliif yeroo murtaa'e sanatti Israa'eloota kaan wajjin aarsaa WAAQAYYOO dhi'eessuu dhowwanne?”

⁸ Museenis, “Hamma ani waan WAAQAYYO waa'ee keessan ajaju dhaga'utti turaa” jedheen.

⁹ WAAQAYYOS Museedhaan akkana jedhe; ¹⁰ “Israa'elootaan akkana jedhi: ‘Isin keessaa yookaan ilmaan keessan keessaa namni tokko yoo reeffa tuqee xuraa'e yookaan karaa fagoo deeme, inni amma iyyuu Faasiikaa WAAQAYYOO ayyaanefachuu ni danda'a. ¹¹ Isaanis ji'a lammaffaa keessa guyyaa kudha afuraffaa dimimmisa galgala Faasiikaa haa ayyaanefatan. Faasiikaa sanas Maxinoo fi baala hadhaa'aa wajjin haa nyaatan. ¹² Isaanis wantoota kanneen keessaa tokko iyyuu hamma ganamaatti hambisuu yookaan lafee isaa keessaa tokko iyyuu cabsuu hin qaban. Isaan yommuu Faasiikaa ayyaanefatanitti dambiiwwan hunda duukaa bu'uu qabu. ¹³ Garuu namni qulqulluu ta'ee karaa hin deemin yoo Faasiikaa ayyaanefachuu baate inni sababii yeroo murtaa'etti aarsaa WAAQAYYOO hin dhi'eessiniif saba isaa keessaa haa balleffamu. Namichi sun gatii cubbuu isaa ni argata.

¹⁴ “‘Alagaan isin gidduu jiraatu kan Faasiikaa WAAQAYYOO ayyaanefachuu fedhu tokko akkuma seeraa fi dambii Faasiikaatti haa ayyaanefatu. Isinis alagaa fi dhalataa biyyaatiif seeruma tokkicha qabaadhaa.’”

Duumessa Dunkaana Qulqulluudhaan Olii

¹⁵ Gaafa dunkaanni qulqulluun dhaabame sana duumessi dunkaana sana jechuunis dunkaana dhuga ba'umsaa haguuge. Duumessi dunkaana qulqulluudhaan olii sunis galgala hamma ganamaatti ibidda fakkaata ture. ¹⁶ Wannii kunis yeroo hunda akkana ture; guyyaa duumessi isa haguuga ture; halkan immoo duumessi sun ibidda fakkaata ture. ¹⁷ Yeroo duumessi sun dunkaana irraa ka'u Israa'eloonni ka'anii deemu turan; lafa duumessi bu'u immoo Israa'eloonni ni qubatu. ¹⁸ Israa'eloonni ajaja WAAQAYYOOTIIN ka'anii deemu; ajajuma isaatiinis qubatu. Yeroo duumessi dunkaana qulqulluun ol jiru isaanis qubata keessa turan. ¹⁹ Yoo duumessi sun guyyaa hedduu dunkaana gubbaa tures Israa'eloonni seera WAAQAYYOOTIIF waan ajajamaniif iddoo sanaa ka'anii hin deeman ture. ²⁰ Yeroo tokko tokko duumessi sun guyyaa xinnaadhaaf dunkaana qulqulluu gubbaa oolee bula ture; isaanis ajaja WAAQAYYOOTIIN qubatu; ajajuma isaatiinis ka'anii deemu. ²¹ Yeroo tokko tokko duumessi sun galgala hamma ganamaatti jiraata ture; yommuu duumessi ganamaan ka'u isaanis ka'anii deemu.

Guyyaas ta'u halkan, yeroo duumessi ka'u isaanis ka'anii deemu. ²² Yeroo duumessi sun guyyaa lamas ta'u ji'a tokko yookaan waggaa tokko dunkaana qulqulluu irra turutti Israa'eloonni qubatama keessa turu malee ka'anii hin deeman ture; yeroo duumessichi ka'utti garuu ka'anii deemu. ²³ Isaan ajaja WAAQAYYOOTIN qubatu; ajajuma WAAQAYYOOTINIS ka'anii deemu. Akkuma ajaja WAAQAYYO karaa Museetiin kenne sanaattis seera isaatiif ajajamu.

10

Malakatawwan Meetii

¹ WAAQAYYO Museedhaan akkana jedhe: ² "Meetii tumame irraa malakata lama tolfadhuutii hawaasa walitti waamuu fi akka qubanni ka'ee deemu gochuuf itti fayyadami. ³ Yeroo malakanni lamaan afuufamanitti hawaasni hundi balbala dunkaana wal ga'iitti fuula kee duratti walitti haa qabamu. ⁴ Yoo malakanni tokko qofti afuufame garuu hooggantoonni jechuunis abbootiin gosoota Israa'el fuula kee duratti walitti haa qabaman. ⁵ Yeroo malakanni afuufamutti gosoonni gama ba'a biiftuutiin qubatan ka'anii haa deeman. ⁶ Yeroo malakanni si'a lammaffaa afuufamutti immoo gosoonni gama kibbaatiin qubatan ka'anii haa deeman. Malakanni afuufamu sun mallattoo isaan ittiin qubata keessaa ba'anii dha. ⁷ Hawaasa walitti qabuudhaaf malakata afuufi; garuu mallattoo wal fakkaatuun hin afuufin.

⁸ "Ilmaan Aroon luboonni malakatawwan sana haa afuufan. Kunis isinii fi dhaloota dhufuuf seera bara baraa haa ta'u. ⁹ Isin yommuu biyya keessan keessatti diina isin cunqursu tokkotti duuluuf baatanitti malakatawwan sana afuufaa. Yoos WAAQAYYO Waaqni keessan isin yaadatee diina keessan jalaa isin baasa. ¹⁰ Akkasumas guyyaa gammachuu keessanii jechuunis gaafa ayyaana beekamaa fi Ayyaana Baatii Haaraatti aarsaa keessan kan gubamuu fi aarsaa keessan kan nagaa irratti malakatawwan afuufaa; wanni kunis fuula Waaqa keessanii duratti yaadannoo isiniif ta'a. Ani WAAQAYYO Waaqa keessan."

Israa'eloonni Siinaadhaa Ba'an

¹¹ Ji'a lammaffaa waggaa lammaffaa keessa guyyaa digdamaffaatti duumessi sun dunkaana dhuga Ba'umsaa irraa ka'ee. ¹² Israa'eloonnis Gammoojjii Siinaatii ka'anii hamma duumessi sun Gammoojjii Phaaraanii keessa qubatutti iddoo tokko irraa gara iddoo biraatti deeman. ¹³ Isaan yeroo jalqabaa kanatti ajaja WAAQAYYO karaa Museetiin kenneen ka'anii deeman.

¹⁴ Kutaan qubata ijoollee Yihuudaa faajjii isaanii jalaan jalqabatti deeman. Nahishoon ilmi Amiinaadaab ajajaa isaanii ture. ¹⁵ Naatnaa'el ilmi Zuuwaar ajajaa kutaa gosa Yisaakor ture; ¹⁶ Eliiyaab ilmi Heeloon ajajaa kutaa gosa Zebuuloon ture. ¹⁷ Dunkaanni qulqulluun sunis achii buqqifame; akkasiin Geershoononni fi Meraaronni warri dunkaana baatan ka'anii deeman.

¹⁸ Kutaan qubata Ruubeenis faajjii isaanii jalaan itti aananii deeman. Eliizuur ilmi Shedee'uur ajajaa isaanii ture. ¹⁹ Shilumii'eel ilmi Zuriishadaayi ajajaa kutaa gosa Simi'oon ture; ²⁰ Eliyaasaaf ilmi De'uu'eel ajajaa kutaa gosa Gaad ture. ²¹ Ergasii Qohaatonni mi'a qulqulluu baatanii ka'anii deeman. Dunkaanni qulqulluun sun immoo utuu isaan achi hin ga'in dhaabamee ture.

²² Kutaan qubata Efreemis faajjii isaanii jalaan itti aananii deeman. Eliishaamaan ilmi Amiihuud ajajaa isaanii ture. ²³ Gamaali'eel ilmi Phedaasuur ajajaa kutaa gosa Minaasee ture; ²⁴ Abiidaan ilmi Gaadeyoon ajajaa kutaa gosa Beniyaam ture.

²⁵ Dhuma irratti kutaan qubata Daan eegduu karaa duubaa kan kutaawwan hundaa ta'anii faajjii isaanii jalaan ka'anii deeman. Ahii'ezer ilmi Amiishadaay ajajaa isaanii ture. ²⁶ Fagi'eel ilmi Okraan ajajaa kutaa gosa Aasheer ture; ²⁷ Ahiiraan ilmi Eenaan ajajaa kutaa gosa Niftaalem ture. ²⁸ Egaa kutaawwan saba Israa'el yommuu ka'anii deemanitti tartiiba kanaan socho'an.

²⁹ Ergasii Museen Hoobaab ilma Re'uu'eel, namicha Midiyaan abbaa niitti Musee sanaan akkana jedhe; "Nu biyya WAAQAYYO, 'Ani isinii kenna' nuun jedhe sana dhaquuf deemaa jirra. Nu waan gaarii siif goonaatii kottuu nu wajjin deemi; WAAQAYYO waan gaarii Israa'elootaaf kakateeraatii."

³⁰ Inni immoo, "Lakki ani hin deemuu; "Lakki ani hin deemuu; "Lakki ani biyyuma kootti gara saba kootti nan deebi'a" jedhee deebise.

³¹ Museen garuu akkana jedheen; "Maaloo nu dhiistee hin deemin. Ati gammoojjii keessatti iddoo nu qubannu ni beekta; ijas nuu ta'uu dandeesa. ³² Yoo ati nu wajjin deemte nu waan gaarii WAAQAYYO nuu kennu si wajjin qoodanna."

³³ Isaan tulluu WAAQAYYOO irraa ka’anii guyyaa sadii deeman. Taabonni kakuu WAAQAYYOS iddoo isaan boqotan isaaniif barbaaduuf jedhee guyyaa sadanuu isaan dura deeme. ³⁴ Duumessi WAAQAYYOO sun yeroo isaan qubata keessaa ba’an guyyaa guyyaa isaan irra ture.

³⁵ Yeroo taabonni sun ka’ee deemu Museen akkana jedha ture;

“Yaa WAAQAYYO, ka’i!

Diinonni kee haa bittinneeffaman;
warri si jibbanis fuula kee duraa haa baqatan.”

³⁶ Yeroo inni boqochuuf dhufu akkana jedha ture;

“Yaa WAAQAYYO,
gara kumaatama Israa’el hedduutti deebi’i.”

11

Ibidda WAAQAYYO Biraa Gad Bu’e

¹ Sabni sun utuma WAAQAYYO isa dhaga’uu waa’ee rakkina isaa guungume; innis yommuu waan kana dhaga’etti ni aare. Kana irratti ibiddi WAAQAYYOO isaan gidduutti boba’ee qarqara qubata isaani gube. ² Sabni Museetti iyye; Museen immoo WAAQAYYON kadhatee ibiddi sun dhaame. ³ Sababii ibiddi WAAQAYYO biraa gad bu’ee gidduu isaaniitti boba’eef, iddoo sun “Tabeeraa”^{*} jedhamee waamame.

Dimbiriqqee WAAQAYYO Kenne

⁴ Sabni wal makaan isaan wajjin tures nyaata biraa dharra’e; Israa’eloonni ammas akkana jedhanii boo’uu jalqaban; “Nu utuu foon nyaannu argannee! ⁵ Nu biyya Gibxi keessatti qurxummii toluma nyaanne; akkasumas dabaqula, habaabii, goodarree, qullubbii diimaa fi qullubbii adii nyaanne sana ni yaadanna. ⁶ Amma garuu fedhiin nyaataa nurraa badeera; mannaa kana malees waan tokko ille hin argin!”

⁷ Mannaan sun akka sanyii dinbalaalaa ta’ee bifti isaa haphee fakkaata ture. ⁸ Namoonnis mannaa sana nanaanna’anii walitti qabanii dhagaa daakuutti daakachaa yookaan mooyyeetti tumachaa turan. Isaanis mannaa sana okkoteetti affeelu yookaan maxinoo isaa tolfatu turan. Innis akka waan zayitii ejersaatiin qopheeffameetti mi’aawa ture. ⁹ Galgala yommuu fixeensi qubata irra bu’etti mannaan sunis gad bu’e.

¹⁰ Museen utuu namoonni maatii hundaa balbala dunkaana ofii isaa duratti boo’anuu dhaga’e. WAAQAYYOS akka malee aare; Museen immoo ni dhiphate. ¹¹ Innis akkana jedhee WAAQAYYON gaafate; “Ati maaliif dhiphina kana garbicha keetti fidde? Ati kan ba’aa saba kanaa hunda narra keesse ani maal balleessee si gaddisiiseeti? ¹² Saba kana hunda anatu ulfaa’ee? Anatu isaan da’ee? Ati maaliif akka ani akkuma guddiftuun daa’ima baattutti gara biyya ati abbootii isaaniitiif kakuudhaan waadaa galteetti irree kootti baadhee isaan geessuudhaaf na ajajja? ¹³ Ani saba kana hundaaf foon eessaan argadha? Isaan, ‘Foon nyaannu nuu kenni!’ jedhanii natti boo’u. ¹⁴ Ani kophaa koo saba kana hunda baachuu hin danda’u; ba’aan kun akka malee natti ulfaata. ¹⁵ Ati yoo akkana na goota ta’ee, yoo ani fuula kee duratti fudhatama argadhee jiraadhe, maaloo ammuma na ajjeesi; akka ani gidiraa natti dhufu argus na hin godhin.”

¹⁶ WAAQAYYOS Museedhaan akkana jedhe; “Maanguddoota Israa’el keessaa nama torbaatama kanneen hooggantootaa fi qondaaltota sabaa ta’uu isaanii beektu naa fidi. Akka isaan gara dunkaana wal ga’ii dhufanii si wajjin achi dhadhaabatan godhi. ¹⁷ Ani gad bu’ee achitti si wajjin nan dubbadha; Hafuura sirra jiru irraas fuudhee isaan irra nan kaa’a; isaanis akka ati kophaa kee ba’aa sana hin baanneef ba’aa saba sanaa si wajjin baatu.

¹⁸ “Saba kanaan akkana jedhi: ‘Isin bori foon nyaattuutii of qulqulleessaa qophaa’aa. WAAQAYYO yeroo isin, “Nu utuu foonuma nyaannu argannee! Yeroo nu biyya Gibxi keessa jiru nuu wayya ture!” jettanii boossan dhaga’eeraatii. WAAQAYYO amma foon isinii kenna; isinis ni nyaattu. ¹⁹ Isin hamma guyyaa tokkoo, yookaan lamaa, yookaan shanii, kudhanii, yookaan digdamaa qofa hin nyaattan; ²⁰ garuu ji’a tokko guutuu hamma funyaaniin isin ba’utti, hamma nuffitanittis nyaattu; isin WAAQAYYO gidduu keessan jiru sana diddani, “Nu maaliif biyya Gibxi keessaa baane?” jettanii fuula isaa duratti boossanii turtaniitii.’ ”

²¹ Museen garuu akkana jedhe; “Kunoo ani namoota lafoo kuma dhibba ja’a gidduun jira; ati immoo, ‘Ani foon isaan ji’a guutuu nyaatan kennaafi’ jetta. ²² Utuma bushaayee fi karri loonii isaaniif qalamani iyyuu ga’aa laata? Utuma qurxummiin galaana keessaa hundi isaanii qabamee iyyuu ga’aa laata?”

* 11:3 11:3 Tabeeraa Tabeeraa jechuun boba’uu jechuu.

²³ WAAQAYYO Museedhaan akkana jedhe; “Harki WAAQAYYO gabaabaadhaa? Ati akka wanni ani siin jedhu siif guutamuu fi akka siif hin guutamne amma ni argita.”

²⁴ Museen dhaqee waan WAAQAYYO jedhe sana sabatti hime. Innis saba sana keessaa maanguddoota torbaatama walitti qabee akka isaan naannoo dunkaanaa dhadhaabatan godhe. ²⁵ Ergasiis WAAQAYYO duumessaan gad bu’ee isatti dubbate; Hafuura isa irra jirus fuudhee maanguddoota torbaataman sana irra buuse. Isaanis yeroo Hafuurri sun isaan irra boqotetti raajii dubbatan; ergasii immoo deebi’anii raajii sana hin dubbanne.

²⁶ Ta’u illee namoonni lama kanneen maqaan isaanii Eldaadii fi Meedaad jedhaman qubata keessatti hafanii turan. Isaanis maanguddoota sana keessatti galmeeffamanii turan malee gad ba’anii gara dunkaanaa hin dhaqne ture. Hafuurri immoo isaan irra illee bu’e; isaanis qubata keessatti raajii dubbatan. ²⁷ Dargaggeessi tokko fiigee dhaqee, “Eldaadii fi Meedaad raajii dubbachuutti jiru” jedhee Museetti hime.

²⁸ Iyyaasuun ilmi Nuuni kan ijoollummaa ofiitti jalqabee gargaartuu Musee ture sun ka’ee, “Yaa Musee, yaa gooftaa ko, isaan dhowwi!” jedhee dubbate.

²⁹ Museen garuu akkana jedhee deebise; “Ati anaaf hinaaftaa? Ani utuu sabni WAAQAYYO hundinuu raajota ta’anii WAAQAYYOS Hafuura isaa isaan irra kaa’ee nan hawwa!” ³⁰ Ergasiis Musee fi maanguddoonni Israa’el gara qubataatti deebi’an.

³¹ Bubbeen tokkos WAAQAYYO biraa ba’ee galaana keessaa dimbiriqqee gara qubataatti oofe. Bubbeen sunis dimbiriqqee sana naannoo qubata sanaatti gama hundaan hamma deemsa guyyaa tokkoo fagaatu harcaasee hamma dhundhuma lamaa oli tuule. ³² Guyyaa sana guutuu fi halkan sana guutuu, guyyaa itti aanu guutuus sabni sun gad ba’ee dimbiriqqee sana walitti qabate; isaan keessaas namni homeerii kudhanii gad walitti qabate hin turre. Ergasii dimbiriqqee sana naannoo qubata sanaa afatan. ³³ Garuu utuma foon sun amma illee gidduu ilkaan isaanii jiruu, utuu hin alanfatin WAAQAYYO isaanitti aaree dha’icha hamaadhaan isaan dha’e. ³⁴ Sababii isaan namoota nyaata biraa dharra’an achitti awwaalaniif maqaan iddoo sanaa, “Qii brooti Haataa’abaa”† jedhame.

³⁵ Sabni sunis Qii brooti Haataa’abaadhaa ka’ee gara Haxerooti dhaqee achi jiraate.

12

Maariyaamii fi Aroon Museedhaan Morman

¹ Miiriyaamii fi Aroon sababii Museen dubartii Itoophiyaa fuudheef isaan mormuudhaan dubbachuu jalqaban; inni dubartii Itoophiyaa fuudhee tureetii. ² Isaanis, “WAAQAYYO karaa Musee gofaan dubbatee? Inni karaa keenyaanis dubbatee ture mitii?” jedhan. WAAQAYYOS dubbii kana dhaga’ee.

³ Museen namoota lafa irra jiraatan hunda caalaa nama akka malee gad of qabu ture.

⁴ WAAQAYYOS yommusuma Museen, Aroonii fi Miiriyaamiin, “Isin sadanuu gara dunkaana wal ga’iitti gad ba’aa” jedhe. Isaan sadanuu gad ba’an. ⁵ Ergasii WAAQAYYO utubaa duumessaa keessaan gad bu’ee balbala dunkaanaa irra dhaabatee Aroonii fi Miiriyaamin waame. Jarri lachuu isatti dhi’aannan, ⁶ inni akkana jedheen; “Dubbii koo dhaga’aa:

“Yoo raajiin WAAQAYYO gidduu keessan jiraate,
ani mul’ata keessa isatti of nan mul’isa;
abjuudhaanis isatti nan dubbadha.

⁷ Garuu garbichi koo Museen akkana miti;
inni mana koo hunda keessatti amanamaa dha.

⁸ Ani utuu dhoksaadhaan hin ta’in,
ifaan ifatti isatti nan dubbadha;
inni bifa WAAQAYYO ni arga.

Yoos isin maaliif

garbicha koo Museedhaan mormuudhaan dubbachuu hin sodaanne ree?”

⁹ Aariin WAAQAYYOS isaan irratti boba’ee; innis isaan dhiisee deeme.

¹⁰ Yommuu duumessi sun dunkaana gubbaadhaa ol ka’etti kunoo, Miiriyaam lamxooftee akkuma cabbii addaattee turte. Aroonis gara isheetti garagalee akka isheen lamxii qabdu arge; ¹¹ innis Museedhaan akkana jedhe; “Maaloo yaa gooftaa ko, cubbuu nu gowwummaadhaan hojjenne sana nutti hin lakkaa’in. ¹² Akka gatata foon isaa gariin nyaatamee gadameessa haadha isaa keessaa ba’u tokkoo ishee hin godhin.”

¹³ Museen WAAQAYYOTTI boo’ee, “Yaa WAAQAYYO, maaloo ishee fayyisi!” jedhe.

† 11:34 11:34 Qii brooti Haataa’abaa jechuun awwaala dharraatoota jechuu dha.

¹⁴ WAAQAYYO akkana jedhee Museedhaaf deebii kenne; “Utuu abbaan ishee fuula isheetti tufee silaa isheen bultii torba salphina keessa turti mitii ree? Isheen bultii torba qubataan ala haa turtu; ergasii deebitee dhufuu dandeessi.” ¹⁵ Miiriyaam bultii torba qubataan ala turte; sabni sunis hamma isheen deebitutti deemsa itti hin fufne.

¹⁶ Ergasii sabni sun Haxerootii ka’ee Gammoojjii Phaaraan keessa qubate.

13

Basaastonni Gara Kana’aanitti Ergaman

¹ WAAQAYYO Museedhaan akkana jedhe; ² “Akka isaan dhaqanii biyya Kana’aan ishee ani Israa’elootaaf kennuuf jiru sana basaasaniif namoota ergi. Tokkoo tokkoo abbootii gosaa keessaa hoogganaa tokko ergi.”

³ Museen ajaja WAAQAYYOOTIIN Gammoojjii Phaaraan keessaa isaan erge. Hundi isaanii hooggantoota Israa’elootaa turan.

⁴ Maqaan isaanii kanneenii dha:

Gosa Ruubeen keessaa Shamu’aa ilma Zakuur;

⁵ gosa Simi’oon keessaa Shaafaaxi ilma Hoorii;

⁶ gosa Yihuudaa keessaa Kaaleb ilma Yefunee;

⁷ gosa Yisaakor keessaa Yigi’aal ilma Yoosef;

⁸ gosa Efreem keessaa Hooshee’aa ilma Nuuni;

⁹ gosa Beniyaam keessaa Phaaltii ilma Raaphuu;

¹⁰ gosa Zebuuloon keessaa Gadii’eel ilma Soodii;

¹¹ gosa Minaasee jechuunis gosa Yoosef keessaa Gadii ilma Suus;

¹² gosa Daan keessaa Amii’eel ilma Gemaal;

¹³ gosa Aasheer keessaa Sexuur ilma Miikaa’el;

¹⁴ gosa Niftaalem keessaa Naahibii ilma Wofsii;

¹⁵ gosa Gaad keessaa Ge’uu’eel ilma Maakii ti.

¹⁶ Egaa maqaawwan kunneen maqaawwan namoota akka isaan biyya sana basaasaniif jedhee Museen ergee dha. Museenis Hooshee’aa ilma Nuuni sana, “Iyyaasuu” jedhee moggaase.

¹⁷ Museen yommuu akka isaan biyya Kana’aanii basaasaniif isaan ergetti akkana jedheen; “Karaa Negeeb darbaatii gara biyya gaaraatti ol ba’aa. ¹⁸ Biyyi sun maal akka fakkaattu, namoonni achi jiraatanis jajjaboo yookaan dadhaboo, muraasa yookaan hedduu ta’uu isaanii ilaalaa. ¹⁹ Isaan biyya akkamii keessa jiraatu? Gaarii yookaan gadhee? Magaalaawwan akkamii keessa jiraatu? Dallaa dhagaa hin qaban moo da’oo jabaa qabu? ²⁰ Lafti isaa gabbataa dha moo gabbataa miti? Muka qaba moo hin qabu. Jabaadhaatii ija biyyattii keessaa muraasa fidaa.” Waqtiin sun yeroo iji wayinii kan jalqabaa itti bilchaatu ture.

²¹ Isaan ol ba’anii Gammoojjii Siin irraa jalqabani hamma Rehoobitti gara Leeboo Hamaatitti biyyattii basaasan. ²² Isaanis karaa Negeeb ol ba’anii gara Kebroon lafa Ahiiman, Sheeshaayii fi Talmaayi ilmaan Anaqaq sun jiraataniitti dhufan. Kebroon kunis utuu Zoo’aan isheen biyya Gibxi sun hin ijaaramin waggaa torbaan dura ijaaramte. ²³ Isaanis yommuu Sulula Eshkool ga’anitti hurbuu ija wayinii tokko turan. Wayinii sanas roomaanii fi harbuu wajjin nama lama ta’anii danqaraadhaan baatan. ²⁴ Iddoon sun sababii hurbuu ija wayinii kan warri Israa’el kutan sanaatiif Sulula Eshkool jedhame. ²⁵ Jarris dhuma bultii afurtamaatti biyya sana basaasani deebi’an.

Gabaasa Basaastonni Fidan

²⁶ Isaanis gara Qaadsh ishee Gammoojjii Phaaraan keessaa gara Musee fi Aroon, gara waldaa Israa’el guutuu deebi’anii dhufan. Achittis gabaasa isaaniif dhi’eessan; ija biyyattiis isaan argisiisan. ²⁷ Isaanis akkana jedhanii Museetti himan: “Nu gara biyya ati itti nu ergite sanaa dhaqneerra; biyyattiin aannanii fi damma baafti! Iji ishees kunoo kana. ²⁸ Garuu namoonni achi jiraatan jajjaboo dha; magaalaawwan ishee dallaa jabaa qabu; gurguddaa dhas. Nu sanyii Anaqaq iyyuu achitti argineerra. ²⁹ Amaaleqoonni Negeeb keessa jiraatu; Heetonni, Yebuusonni fi Amooronni biyya gaaraa keessa jiraatu; Kana’aanonni immoo galaana biraa fi qarqara Yordaanos jiraatu.”

³⁰ Kaalebis fuula Musee duratti saba cal’isiisee, “Nu dafnee ol baanee biyyattii haa dhaallu; mo’achuu ni dandeenyaatii” jedhe.

³¹ Namoonni isa wajjin ol ba’anii turan garuu, “Nu warra sana dha’uu hin dandeenyu; isaan nurra jajjaboo dha” jedhan. ³² Isaanis waa’ee biyya basaasan sanaa saba Israa’el gidduutti oduu gadhee tamsaasan. Akkanas jedhan; “Biyyi nu basaasne sun biyya warra ishee keessa jiraatu iyyuu nyaattuu dha. Namoonni nu achitti argine hundinuu dhedheeroo dha. ³³ Achitti Nefiliimota argine; ilmaan Anaqaq Nefiliimota irraa dhufan. Nu ofuma keenyatti iyyuu korophisa fakkaanne; fuula isaanii durattis akkasuma taane.”

14

Sabni Finciluu Isaa

¹ Halkan sana namoonni waldaa sanaa hundinuu sagalee isaanii ol fudhatanii boo’an. ² Israa’eloonni hundinuu Musee fi Arooniiitii guunguman; waldaan guutuunis akkana isaaniin jedhe; “Nu utuu biyyuma Gibxitti dhumnee jiraannee! Yookaan utuu gammoojjii kana keessatti dhumnee jiraannee! ³ WAAQAYYO maaliif akka nu goraadeedhaan dhumnuuf jedhee biyya kanatti nu fida? Niittonni keenyaa fi ijoolleen keenya ni booji’amu. Biyya Gibxitti deebi’uun nuu hin wayyuu?” ⁴ Isaanis, “Amma hoogganaa filannee biyya Gibxitti haa deebinu” waliin jedhan.

⁵ Kana irratti Musee fi Aroon fuula guutummaa yaa’ii Israa’el kanneen achitti walitti qabamanii duratti addaan lafatti gombifaman. ⁶ Jarreen biyyattii keessa deemanii basaasan keessaa Iyyaasuun ilmi Nuuniitii fi Kaaleb ilmi Yefunee uffata ofii tarsaasanii, ⁷ guutummaa yaa’ii Israa’elootaatiin akkana jedhan; “Biyyi nu keessa deemnee basaasne sun akka malee gaarii dha. ⁸ WAAQAYYO yoo nutti gammade biyya sanatti nu galchee biyyattii aannanii fi damma baafuu sana nuu kenna. ⁹ Isin garuu WAAQAYYOTTI hin fincilaana. Waan nu isaan lilliqimsinuuf namoota biyya sanaa hin sodaatinaa. Gaaddisni isaan irraa ka’eera; WAAQAYYO nu wajjin jira. Isaan hin sodaatinaa.”

¹⁰ Waldaan guutuun garuu dhagaan isaan tumuudhaaf mari’ate. Ulfinni WAAQAYY-OOS fuula dunkaana wal ga’ii duratti Israa’eloota hundatti mul’ate. ¹¹ WAAQAYYOS Museedhaan akkana jedhe; “Sabni kun hamma yoomiitti akkana na tuffata? Utuma ani mallattoowwan kanneen hunda gidduu isaaniitti hojjedhuu isaan hamma yoomiitti na amanuu didu? ¹² Ani golfaadhaan dha’ee isaan nan balleessa; si’i garuu saba isaan caalaa guddaa fi jabaa sin godha.”

¹³ Museen WAAQAYYON akkana jedhe; “Warri Gibxi waa’ee waan kanaa ni dhaga’u! Ati humna keetiin saba kana gidduu isaaniitii baaftee fiddeertaatii. ¹⁴ Isaanis waa’ee waan kanaa saba biyya sana keessa jiraatutti ni odeessu. Yaa WAAQAYYO, isaan akka ati saba kana gidduu jirtu dhaga’aniiru; yaa WAAQAYYO isaan akka ati fuuluma isaaniitti mul’atu, akka duumassi kee isaaniin ol jiruu fi akka ati guyyaa utubaa duumessaatiin, halkan immoo utubaa ibiddaatiin isaan dura deemtu dhaga’anii jiru. ¹⁵ Yoo ati saba kana yeruma tokkotti barbadeessite, saboonni oduu waa’ee keetii dhaga’an, ¹⁶ WAAQAYYO biyya kakuudhaan waadaa isaaniif gale sanatti saba kana galchuu hin dandeenye; inni kanumaaf gammoojjii keessatti isaan gogorra’e’ jedhu.

¹⁷ “Egaa akkuma ati akkana jettee dubbatte sanatti jabinni Gooftaa haa argisiifamu: ¹⁸ WAAQAYYO dafee hin aaru; jaalalli isaa immoo guddaa dha; inni cubbuu fi fincila namaaf dhiisa. Ta’u illee inni nama yakka hojjetu adabu malee hin dhiisu; inni hamma dhaloota sadaffaa fi afuraffaatti sababii cubbuu abbootii isaaniitiif jedhee ijoollee ni adaba.’ ¹⁹ Akkuma yeroo isaan biyya Gibxii ba’anii jalqabdee hamma ammaatti dhiifama isaaniif goote sana akkuma jaalala kee guddaa sanaatti cubbuu saba kanaa dhiisiif.”

²⁰ WAAQAYYO akkana jedhee deebiseef; “Ani akkuma ati kadhatte sana isaaniif dhiiseera. ²¹ Ta’u illee akkuma ani dhugumaan jiraataa ta’ee fi akkuma ulfinni WAAQAYYOO dhugumaan lafa hunda guute sana, ²² namoota ulfina koo arganii, mallattoowwan ani biyya Gibxiitii fi gammoojjii keessatti hojjedhe arganii garuu naa ajajamuu didanii yeroo kudhan na qoran sana keessaa namni tokko iyyuu, ²³ tokkoon isaani biyya ani kakuudhaan abbootii isaaniitiif waadaa gale sana hin argan. Namni na tuffate tokko biyya sana hin argu. ²⁴ Garbicha koo Kaaleb garuu sababii inni hafuura addaa qabuu fi sababii garaa guutuudhaan na duukaa bu’aa jiruuf, ani biyya inni dhage sanatti isa galcha; sanyiin isaas biyya sana ni dhaala. ²⁵ Sababii Amaaleqoonnii fi Kana’aanonni Sululoota keessa jiraataniif, isin bor deebi’aatii karaa Galaana Diimaatiin gammoojjiitti qajeelaa.”

²⁶ WAAQAYYO Musee fi Arooniin akkana jedhe: ²⁷ “Waldaan hamaan kun hamma yoomiitti natti guunguma? Ani guungummii Israa’eloota guungumtoota sanaa dhaga’eera. ²⁸ Akkana jedhii isaaniitti himi; WAAQAYYO akkana jedha; ani jiraataadhaatii, akkuma isin gurra kootti dubbattan sana anis isinitti godha: ²⁹ Reeffi keessan

jechuunis reeffi warra umuriin isaanii waggaa digdamaa fi digdamaa olii kanneen lakkoobsa uummataa keessatti lakkaa'amanii natti guunguman hundaa gammoojjii kana keessatti harca'ee hafa. ³⁰ Kaaleb ilma Yefuneetii fi Iyyaasuu ilma Nuuni malee tokkoon keessan iyyuu biyya ani keessa isin qubachiisuuf kakadhe sanatti hin galan. ³¹ Ani garuu ijoollee keessan warra isin ni booji'amu jettan sana itti nan galcha; isaanis biyya isin tuffattan sana ni beeku. ³² Isin garuu, reeffi keessan gammoojjuma kana keessatti harca'a. ³³ Ijoolleen keessan waggaa afurtama gammoojjii kana keessa ni jooru; hamma isin hundi gammoojjii keessatti dhumtanitti isaan sababii amanamummaa dhabuu keessaniitiif achitti rakkatu. ³⁴ Isin akkuma bultii afurtama biyya sana basaastan, akkasuma bultiin tokko akka waggaa tokkootti lakkaa'amee waggaa afurtama cubbuu keessaniif dhiphattu; yeroo sana isin akka ani isiniin mormu ni beektu.' ³⁵ Ani WAAQAYYO waan kana dubbadheen jira; ani dhugumaan waan kana waldaa hamaa naan mormuuf walitti gurmaa'e kana guutuutti nan fida. Isaan gammoojjii kana keessatti dhumu; asumattis ni du'u."

³⁶ Namoonni Museen akka isaan biyyattii basaasaniif erge yommuu achii deebi'anitti waa'ee biyya sanaa gabaasa hamaa waldaatti gabaasani akka waldaan Museetti guungumu godhan jechuunis ³⁷ namoonni waa'ee biyyattii gabaasa hamaa gabaasuutti gaafataman sun dha'ichaan fuula WAAQAYYOO duratti dhuman. ³⁸ Namoota biyyattii basaasuu dhaqan keessaa Iyyaasuu ilma Nuunitii fi Kaaleb ilma Yefunee qofatu du'a oole.

³⁹ Museen waan kana hunda Israa'elootatti himnaan isaan akka malee boo'an. ⁴⁰ Isaanis guyyaa itti aanu ganamaan fiixee biyya gaaraatti ol ba'anii, "Nu cubbuu hojjenneerra; nu amma gara lafa WAAQAYYO waadaa nuu gale sanaa dhaqna" jedhan.

⁴¹ Museen garuu akkana jedhe; "Isin maaliif ajaja WAAQAYYOO cabsitu? Wannii kun isiniif hin milkaa'ul! ⁴² Akka diinota keessaniin hin mo'atamneef ol hin ba'inaa; WAAQAYYO isin wajjin hin jiruutii; ⁴³ Amaaleqoonnii fi Kana'aanonni achitti isiniitti dhufuutii. Sababii isin WAAQAYYO irraa garagaltaniif inni isin wajjin hin jiraatu; goraadeedhaan barbadeeffamtu."

⁴⁴ Isaan garuu utuu Musee fi taabonni kakuu WAAQAYYOO qubata keessaa gad hin ba'in yaaduma isaaniitiin ka'anii fiixee biyya gaaraatti ol ba'an. ⁴⁵ Yommuu Amaaleqoonnii fi Kana'aanonni gaara sana irra jiraatan gad bu'anii isaan dha'anii hamma Hormaatti isaan ari'an.

15

Aarsaa Dabalamaa

¹ WAAQAYYO Museedhaan akkana jedhe; ² "Saba Israa'elitti akkana jedhii dubbadhu: 'Yommuu biyya ani akka isin keessa jiraattaniif isiniif kennu sana seentanii ³ aarsaa ibiddaan dhi'effamu kan urgaan isaa WAAQAYYOTTI tolu, loon keessaa yookaan bushaayee keessaa futaanii aarsaa gubamu yookaan qalma wareega addaatiif yookaan aarsaa fedhii keessanii yookaan aarsaa ayyaana waggaa WAAQAYYOOF dhi'eessitu, ⁴ namni aarsaa dhi'eessu sun daakuu bullaa'aa iifii* harka kudhan keessaa harka tokko kan zayitii iinii† harka afur keessa harka tokkootiin sukkumame kenna midhaanii godhee WAAQAYYOOF haa dhi'eessu. ⁵ Tokkoo tokkoo xobbaallaa hoolaa kan aarsaa gubamuuf yookaan qalmaaf dhi'effamu wajjinis daadhii wayinii iinii harka afur keessaa harka tokko dhibaayyuudhaaf qopheessi.

⁶ " 'Korbeessa hoolaa tokko wajjinis daakuu bullaa'aa iifii harka kudhan keessaa harka lama kan zayitii iinii harka sadii keessaa harka tokkoon sukkumameen kenna midhaanii qopheessi. ⁷ Daadhii wayinii iinii harka sadii keessaa harka tokko dhibaayyuu urgaan isaa WAAQAYYOTTI tolu godhii dhi'eessi.

⁸ " 'Ati yommuu dibicha loonii tokko aarsaa gubamu yookaan qalma wareega addaatiif yookaan aarsaa nagaatiif WAAQAYYOOF qopheessitutti, ⁹ dibicha sana wajjin kenna midhaanii fidi; kennaan sunis daakuu bullaa'aa iifii harka kudhan keessaa harka sadii kan zayitii walakkaa iiniitiin sukkumame haa ta'u. ¹⁰ Akkasumas daadhii wayinii iinii walakkaa dhibaayyuu godhii fidi. Wannii kunis aarsaa ibiddaan dhi'effamu kan urgaan isaa WAAQAYYOTTI tolu ta'a. ¹¹ Tokkoon tokkoon dibicha loonii yookaan korbeessa hoolaa, tokkoon tokkoon xobbaallaa hoolaa yookaan korbeessa re'ee xinnaa haaluma kanaan haa qopheeffaman. ¹² Akkuma baay'ina waan qopheessitan sanaatti akkuma lakkoobsa isaaniitti, tokkoo tokkoo isaaniitiif akkanuma godhaa.

¹³ " 'Namni dhalataa biyya sanaa ta'e hundinuu yeroo aarsaa ibiddaan dhi'effamu kan urgaan isaa WAAQAYYOTTI tolu fidutti wantoota kanneen haaluma kanaan haa

* 15:4 15:4 Iifiin tokko kiiloo giraamii 22. † 15:4 15:4 Iiniin tokko liitirii 4.

hojjetu. ¹⁴ Dhaloota dhufu keessattis alagaan yookaan namni gidduu keessan jiraatu yeroo aarsaa ibiddaan dhi'eeffamu kan urgaan isaa WAAQAYYOTTI tolu dhi'eessutti akkuma isin gootan kana haa godhu. ¹⁵ Yaa'iin sun isinii fi alagaa isin gidduu jiraatuuf illee seeruma tokko haa qabaatu; kunis dhaloota dhufuuf seera bara baraa ti. Atii fi alagaan sun fuula WAAQAYYOO duratti wal qixxee dha. ¹⁶ Isiniifis alagaa isin gidduu jiraatuufis seerrii fi dambiin tokkuma haa ta'u."

¹⁷ WAAQAYYOS Museedhaan akkana jedhe; ¹⁸ "Akkana jedhii Israa'elootatti dubbadhu: 'Isin yeroo biyya ani itti isin galchu sana seentanii ¹⁹ midhaan ishee nyaattanitti, nyaata sana irraa WAAQAYYOF kennaa dhi'eessaa. ²⁰ Bukoo keessan kan jalqabaa irraa maxinoo tokko kennaa dhi'eessaa; isas akka aarsaa oobdii irraa fuudhameetti dhi'eessaa. ²¹ Dhaloota dhufu hundumaa keessatti bukoo keessan kan jalqabaa irraa WAAQAYYOF kennaa kennuu qabdu.

Aarsaa Cubbuu Tasa Hojjetamee

²² "Yoo isin utuu hin beekin ajajawwan WAAQAYYO Museetti kenne kanneen keessaa tokko illee ²³ jechuunis yoo isin ajaja WAAQAYYOO kan gaafa WAAQAYYO ajaja kana kennee jalqabee dhaloota dhufu keessa illee ittuma fufuudhaan karaa Museetiin isin ajaje kam iyyuu cabsitan, ²⁴ yoo wanti kun dogoggoraan utuu waldaan hin beekin hojjetamee jiraate waldaan sun hundi dibicha loonii aarsaa gubamu kan urgaan isaa WAAQAYYOTTI tolu, kennaa midhaaniitii fi dhibaayyuu ajajame wajjin, aarsaa cubbuutiif immoo korbeessa re'ee haa dhi'eessan. ²⁵ Lubnis waldaa saba Israa'el hundaaf araara haa buusu; isaanis waan utuu hin beekin cubbuu hojjetaniif, balleessaa isaaniitiifis waan aarsaa ibiddaan dhi'eeffamuu fi aarsaa cubbuu WAAQAYYOF fidaniif dhiifama ni argatu. ²⁶ Sababii sabni hundi balleessaa dogoggoraan hojjetame sana keessatti hirmaateefis waldaan saba Israa'el hundii fi alagaawwan isaan gidduu jiraatan dhiifama ni argatu.

²⁷ "Garuu yoo namni tokko gofti utuu hin beekin cubbuu hojjetate inni goromtii re'ee kan umuriin ishee waggaa tokkoo aarsaa cubbuutiif haa fidu. ²⁸ Lubni sunis namicha utuu itti hin yaadin cubbuu hojjetate sanaaf fuula WAAQAYYOO duratti araara haa buusu; erga araari isaaf bu'ee booddee immoo namichi sun dhiifama ni argata. ²⁹ Dhalataa Israa'eliifis ta'u yookaan alagaa isin gidduu jiraatuuf, nama utuu itti hin yaadin cubbuu hojjetate hundaaf seerri tokkuma haa ta'u.

³⁰ "Garuu dhalataa biyyaas ta'u yookaan alagaan, namni beekaa cubbuu hojjetu WAAQAYYON arrabsuu isaa ti; namichi sun saba isaa keessaa haa balleeffamu. ³¹ Namichi sun sababii dubbii WAAQAYYOO tuffatee fi sababii ajaja isaa cabseef inni haa balleeffamu; balleessaa isaattis isatu gaafatama."

Namni Sanbata Cabse Tokko Ajjeefame

³² Yeroo sabni Israa'el gammoojjii keessa turetti, namni tokko utuu guyyaa Sanbataatiin qoraan walitti qabatuu argame. ³³ Warri utuu inni qoraan walitti qabatuu arganis Museetti, Arooniitii fi waldaa guutuutti isa geessan; ³⁴ sababii wanni isa godhan hin beekamiiniif hidhanii isa tursan. ³⁵ WAAQAYYO Museedhaan, "Namichi du'uu qaba. Waldaan sun guutuun qubataan alatti dhagaadhaan isa haa tumu" jedhe. ³⁶ Waldaan sun akkuma WAAQAYYO Musee ajajetti namicha sana qubata keessaa gad baasee dhagaadhaan tumee ajjeese.

Handaara Wayyaa

³⁷ WAAQAYYO Museedhaan akkana jedhe; ³⁸ "Akkana jedhii Israa'elootatti dubbadhu: 'Dhaloota dhufu hunda keessa qarqara wayyaa keessanii irratti handaara tolfadhaa; tokkoon tokkoon handaara sanaas fo'aa bifa cuquliisaa haa qabaatu. ³⁹ Isin handaara kana ilaaltanii ajaja WAAQAYYOO hunda yaadattu; kunis akka ajaja kana eegdanii hawwii garaa keessaniitii fi hawwii ija keessanii duukaa bu'uudhaan hin sagaagaleef. ⁴⁰ Yoos isin ajaja koo hunda yaadattanii ni eegdu; Waaqa keessaniifis qulqulloota ni taatu. ⁴¹ Ani WAAQAYYO Waaqa keessan kan Waaqa isinii ta'uuf jedhee biyya Gibxii isin baasee dha. Ani WAAQAYYO Waaqa keessan."

16

Qooraaahi, Daataanii fi Aberoon

¹ Qooraaahi ilmi Yizihhaar, ilmi Qohaati, ilmi Lewwii, gosa Ruubeen keessaa immoo ilmaan Eliiyaab, Daataanii fi Abiiraam akkasumas Ooni ilmi Phelet ka'anii ² Museedhaan morman. Isaan wajjinis namoota Israa'el jechuunis hooggantoota waldaa bebeekamoo kanneen miseensa yaa'ii ta'anii muudamanii turan 250 ga'antu ture. ³ Isaanis Musee fi Arooniin mormuuf jedhanii tokkummaadhaan walitti qabamanii dhufanii akkana

isaaniin jedhan; “Isin dubbii baay’iftaniirtu! Waldaan kun guutummaatti tokkoon tokkoon isaanii iyyuu qulqulluu dha; WAAQAYYOS isaan wajjin jira. Yoos isin maaliif waldaa WAAQAYYOO irratti of tuultu ree?”

⁴ Museen dubbii kana dhageenyaan addaan lafatti gombifame. ⁵ Ergasii Qooraahee fi warra isa duukaa bu’an hundaan akkana jedhe: “Bori ganama WAAQAYYOO nama kan isaa ta’ee fi nama qulqulluu ta’e ni argisiisa; akka namni sun gara isaatti dhi’aatu illee ni godha. Inni nama filatee sana akka inni itti dhi’aatu godha. ⁶ Qooraahee, atii fi warri si duukaa bu’an hundi waan kana godhaa: Girgiraawwan fudhadhaatii ⁷ bori fuula WAAQAYYOO duratti ibiddaa fi ixaana itti naqaa. Namni WAAQAYYOO filatu inni nama qulqulluu ta’a. Isin Lewwonni dubbii baay’iftaniirtu!”

⁸ Museenis Qooraaheedhaan akkana jedhe; “Isin Lewwonni mee dhaga’aa! ⁹ Waaqni Israa’el waldaa Israa’el kaan keessaa isin filatee akka isin hojii dunkaana qulqulluu WAAQAYYOO hojjettanii fi akka isin fuula waldaa dura dhaabatanii isaan tajaajiltaanif jedhee ofitti isin dhi’eessuun isaa isin hin ga’uu? ¹⁰ Inni si’ii fi Lewwota si wajjin jiran hunda ofitti dhi’eesseera; isin garuu lubummaa illee fudhachuu barbaaddan. ¹¹ Kanaafuu atii fi miiltonni kee hundinuu walitti qabamtanii WAAQAYYON mormitan. Aroon isin itti guungumtan kun eenyuu dha?”

¹² Museenis ergasii ilmaan Eliiyaab Daataanii fi Abiiraam waamsise. Isaan garuu akkana jedhan; “Nu hin dhufnu! ¹³ Ati gammoojjii keessatti nu fixuuf jettee biyya aannanii fi damma baasu keessaa nu baasuun kee si hin ga’uu? Amma immoo gooftaa nutti ta’uu feetaa? ¹⁴ Kana malee iyyuu ati biyya aannanii fi damma baasutti nu hin galchine yookaan dhaala lafa qotiisaatii fi iddoo dhaabaa wayinii nuu hin kennine. Ati ija namoota kanaa ni baaftaa? Lakkii, nu hin dhufnu!”

¹⁵ Museen akka malee aaree WAAQAYYON, “Aarsaa isaanii hin fudhatin. Ani harree tokko illee isaan irraa hin fudhanne yookaan isaan keessaa nama tokko illee hin miine” jedhe.

¹⁶ Museen Qooraaheedhaan akkana jedhe; “Atii fi miiltonni kee hundinuu akkasumas ati, isaanii fi Aroon bori fuula WAAQAYYOO duratti argamaa. ¹⁷ Tokkoon tokkoon namaa girgiraas isaa fudhatee, ixaana itti naqatee fuula WAAQAYYOO duratti haa dhi’eessu; girgiraawwan kunneenis walumaa galatti 250 ta’u. Akkasumas atii fi Aroon girgiraas keessan dhi’eessuu qabdu.” ¹⁸ Tokkoon tokkoon namaa girgiraas isaa fudhatee, ibiddaa fi ixaana itti naqatee Musee fi Aroon wajjin balbala dunkaana wal ga’ii dura dhaabate. ¹⁹ Yeroo Qooraahee isaaniin mormuuf jedhee duukaa buutota isaa hunda balbala dunkaana wal ga’ii duratti walitti qabetti, ulfinni WAAQAYYOO waldaa guutuutti mul’ate. ²⁰ WAAQAYYOO Musee fi Aroonniin akkana jedhe; ²¹ “Akka ani yeruma tokkoon isaan fixuuf waldaa kana irraa gargar ba’aa.”

²² Musee fi Aroon garuu addaan lafatti gombifamanii akkana jedhanii iyyan; “Yaa WAAQAYYOO Waaqa hafuurota sanyii nama hundaa, ati yoo namni tokko yakke waldaa guutuutti dheekkamtaa?”

²³ WAAQAYYOO Museedhaan akkana jedhe; ²⁴ “Waldaa kanaan, ‘Dunkaanota Qooraahee, kan Daataaniitii fi Abiiraam irraa fagaadhaa’ jedhi.”

²⁵ Museenis ka’ee gara Daataanii fi Abiiraam dhaqe; maanguddoonni Israa’el isaa duukaa bu’an. ²⁶ Innis waldaa sanaan, “Dunkaana namoota hamoo kanneenii irraa fagaadhaa! Isin akka sababii cubbuu isaanii hundaan hin barbadeeffamneef waan kan isaanii ta’e kam iyyuu hin tuqinaa” jedhe. ²⁷ Isaan dunkaanota Qooraahee, kan Daataanii fi kan Abiiraamiis irraa fagaatan. Daataanii fi Abiiraamiis gad ba’anii niitota, ijoollee fi daa’imman isaanii wajjin balbala dunkaanota isaanii dura dhadhaabachaa turan.

²⁸ Ergasii Museen akkana jedhe; “Ani wantoota kanneen hunda akkan hojjedhuuf WAAQAYYOO akka na erge, kunis yaada koo akka hin ta’in isin kanaan ni beektu: ²⁹ Yoo namoonni kunneen du’uma uumamaan dhufu du’anii fi wannii nama hundatti dhufu isaanitti dhufe WAAQAYYOO na hin ergine. ³⁰ Garuu yoo WAAQAYYOO waan guutummaan guutuutti haaraa ta’e tokko isaanitti fidee lafti afaan bantee waan isaan qaban hunda wajjin isaan liqimsite, yoo isaanis utuma lubbuun jiranuu boolla bu’an, isin akka namoonni kunneen WAAQAYYON tuffatan ni beektan.”

³¹ Akkuma inni waan kana hunda dubbatee fixateen lafti isaan jalaa baqaqxe; ³² lafti sunis afaan bantee warra mana isaanii, namoota Qooraahee hundaa fi qabeenya isaanii hunda wajjin isaan liqimsite. ³³ Isaanis waan qaban hunda wajjin jiraatti boolla bu’an; laftis isaan irratti afaan walitti deebifatte; isaanis akkasiin waldaa keessaa balleeffaman. ³⁴ Isaan iyyinaan Israa’eloonni naannoo isaanii turan hundinuu, “Lafti kun nuunis ni liqimsiti!” jedhanii iyyaa baqatan.

³⁵ Ibiddi WAAQAYYOO biraa gad bu’ee namoota 250 kanneen aarsaa ixaanaa dhi’eessaa turan sana fixe.

³⁶ WAAQAYYO Museedhaan akkana jedhe; ³⁷ “Akka inni girgiraawwan sana lafa jarri itti gubamanii fuudhee cilee isaanii kan boba’u achi fageessee keessaa bittinneessuuf Ele’aazaar ilma Aroon lubichaatti himi; girgiraawwan sun qulqulluudhaatii. ³⁸ Girgiraawwan kunneenis girgiraawwan namoota lubbuu isaaniitti muruudhaan cubbuu hojjetanii ti. Girgiraawwan sanas iddoo aarsaatti uffisuudhaaf tumii haphisi; isaan fuula WAAQAYYOO duratti dhi’eeffamanii qulqulluu ta’aniiruutii. Isaanis Israa’elootaaf mallattoo haa ta’an.”

³⁹ Ele’aazaar lubichi girgiraawwan naasii kanneen namoonni gubaman sun dhi’eessan sana iddoo aarsaatti uffisuudhaaf jedhee walitti qabee tume. ⁴⁰ Kanas akkuma WAAQAYYO karaa Museetiin isa ajajetti hojjete. Kunis akka sanyii Aroon malee namni tokko iyyuu ixaana aarsuuf fuula WAAQAYYOO duratti hin dhi’aanne, yoo kanaa achii akka inni akkuma Qoorraahitiiti fi miiltota isaa sanaa ta’u Israa’eloota yaadataniif.

⁴¹ Guyyaa itti aanutti waldaan Israa’el hundi, “Isin saba WAAQAYYOO fiixxan” jedhanii Musee fi Aroonitti guunguman.

⁴² Garuu yeroo waldaan sun Musee fi Arooniin mormuudhaaf walitti qabamee gara dunkaana wal ga’ii ilaaletti, kunoo duumessi dunkaana sana haguuge; ulfinni WAAQAYYOS ni mul’ate. ⁴³ Musee fi Aroon gara fuuldura dunkaana wal ga’ii dhaqan; ⁴⁴ WAAQAYYOS Museedhaan akkana jedhe; ⁴⁵ “Akka ani yommusuma isaan balleessuuf, waldaa kana biraa fagaadhu.” Isaanis addaan lafatti gombifaman.

⁴⁶ Ergasii Museen Arooniin akkana jedhe; “Girgira kee fudhadhuutii iddoo aarsaa irraa ixaana ibidda wajjin itti naqadhuutii araara isaaniif buusuudhaaf gara waldaatti fiigi. Dheekkamsi WAAQAYYO biraa dhufeera; dha’ichi jalqabeera.” ⁴⁷ Aroon akkuma Museen jedhe sana fiigee gidduu waldaa seene. Yeroo kanatti dha’ichi gidduu waldaatti jalqabee ture. Aroon garuu ixaana dhi’eessaa araara isaaniif buuse. ⁴⁸ Innis warra jiruu fi warra du’e gidduu ijaajje; dha’ichi sunis ni dhaabate. ⁴⁹ Garuu namoota sababii Qoorraahitiifi dhuman malee namoota 14,700 ga’antu dha’icha sanaan dhume. ⁵⁰ Aroon sababii dha’ichi sun dhaabateef gara babala dunkaana wal ga’ii gara Museetti deebi’e.

17

Uleen Aroon Late

¹ WAAQAYYO Museedhaan akkana jedhe; ² “Israa’elootatti dubbadhuutii hooggantoota gosa abbootii isaanii harkaa ulee tokko tokko, walumaa galatti uleewwan kudha lama fuudhi. Maqaa tokkoo tokkoo namaas ulee isaa irratti barreessi. ³ Sababii tokkoo tokkoo hoogganaa gosa abbootiitiif uleen tokko jiraachuu qabuuf maqaa Aroon ulee Lewwii irratti barreessi. ⁴ Uleewwan kanneenis dunkaana wal ga’ii keessa fuula taabota kakuu seeraa dura iddoo ani itti isiniin wal argu sana kaa’i. ⁵ Uleen nama ani filadhuu ni lata; anis guungummii Israa’eloonni yeroo hunda isinitti guunguman of irraa nan kuta.”

⁶ Museen Israa’elootatti dubbate; hooggantoonni isaaniis uleewwan kudha lama jechuunis hooggantoota tokkoo tokkoo gosa abbootii isaaniitiif ulee tokko tokko isatti kennan; uleen Aroonis uleewwan sana keessa ture. ⁷ Museenis uleewwan sana dunkaana dhuga ba’umsaa keessa fuula WAAQAYYOO dura kaa’e.

⁸ Guyyaa itti aanutti Museen dunkaana dhuga ba’umsaa seenee uleen Aroon kan gosa Lewwii iddoo bu’u sun isaa latu qofa utuu hin ta’in hudhee daraaree lawuzii naqate arge. ⁹ Museen ulee sana hunda fuula WAAQAYYOO duraa alatti gad baasee Israa’eloota hundatti fide. Isaanis ilaalanii tokkoon tokkoon namaa ulee ofii isaa fudhate.

¹⁰ WAAQAYYO Museedhaan akkana jedhe; “Ulee Aroon fuudhiiti akka inni finciltootaaf mallattoo ta’uuf fuula taabota kakuu seeraa dura deebisii kaa’i. Kun akka isaan hin dhumneef natti guungumuu isaaniis sana dhaabachiisa.” ¹¹ Museenis akkuma WAAQAYYO isa ajaje sana godhe.

¹² Israa’eloonni Museedhaan akkana jedhan; “Nu ni duuna! Nu badneerra; nu hundinuu badneerra! ¹³ Namni dunkaana qulqulluu WAAQAYYOOTTI dhi’aatu kam iyyuu ni du’a. Nu amma du’uuf jirraa?”

18

Hojii Lubootaati fi Lewwotaa

¹ WAAQAYYO Arooniin akkana jedhe; “Ati, ilmaan keetii fi maatiin abbaa keetii si wajjin yakka iddoo qulqulluutti hojjetametti ni gaafatamtu. Yakka lubummaatti hojjetame si’ii fi ilmaan kee qofatu itti gaafatama. ² Akka isaan yeroo atii fi ilmaan kee fuula dunkaana dhuga ba’umsaa duratti tajaajiltanitti sitti dabalamanii si gargaaraniif obboloota kee warra gosa Lewwii, warra gosa abbaa keetii sana fidi. ³ Isaanis ajaja kee dhaga’uudhaan hojiiwwan dunkaana keessaa hunda haa hojjetan; garuu mi’a iddoo

qulqulluutti yookaan iddoo aarsaatti dhi'aachuu hin qaban. Yoo akkas ta'e isaanis, atis ni duutu. ⁴ Isaanis dunkaana wal ga'ii eeguudhaaf isinitti dabalammu qabu; hojii dunkaana sanaa hundas haa hojjetan. Namni biraa iddoo isin jirtanitti dhi'aachuu hin qabu.

⁵ "Isin akka dheekkamsi ammas Israa'eloota irra hin buuneef eegumsa iddoo qulqulluutii fi eegumsa iddoo aarsaatti ni gaafatamtu. ⁶ Ani mataan koo obboloota keessan Lewwota kennaawwan isinii kennaman godhee saba Israa'el keessaa filadheera; isaanis akka hojii dunkaana wal ga'ii keessaa hojjetaniif WAAQAYYOOF kennamanii jiru. ⁷ Garuu hojii iddoo aarsaattii fi hojii golgaa keessaa hunda si'ii fi ilmaan kee qofatu hojjeta. Ani hojii lubummaa kenna godhee isiniif nan kenna. Namni biraa kan iddoo qulqulluutti dhi'aatu haa ajjeefamu."

Kennaawwan Lubootaa fi Lewwotaaf Kennaman

⁸ WAAQAYYO Arooniin akkana jedhe; "Ani mataan koo itti gaafatamaa aarsaawwan naa dhi'eeffamanii si godheera; ani aarsaawwan qulqulluu Israa'eloonni naaf dhi'eessan hunda akka isaan bara baraan qoodaa fi ga'ee keessan ta'aniif si'ii fi ilmaan keetiif kenneera. ⁹ Kunis aarsaawwan waan hunda caalaa qulqulluu ta'an kanneen ibiddi hin tuqin keessaa qooda kee ta'a. Kennaawwan isaan aarsaawwan waan hunda caalaa qulqulluu ta'an godhanii naaf fidan jechuunis aarsaawwan midhaanii yookaan aarsaawwan cubbuu yookaan aarsaawwan yakkaa hunda keessaa qoodni sun kan keetii fi kan ilmaan keetii ti. ¹⁰ Isas iddoo iddoo hunda caalaa qulqulluu ta'etti nyaadhu; dhiirri hundi haa nyaatu; innis qulqulluu siif haa ta'u.

¹¹ "Wanni kunis kanuma kee ti; aarsaan sochoofamu kan kenna saba Israa'el hunda irraa addaan baafame kanuma kee ti. Anis waan kana si'ii fi ilmaan keetii fi intallan kee kanneen si wajjin jiraataniif qooda bara baraa godhee kenneera. Mana kee keessaa namni akka seeraatti qulqulluu ta'e kam iyyuu waan kana nyaachuu ni danda'a.

¹² "Zayitii ejersaa filatamaa hunda, daadhii wayinii filatamaa hundaa fi waan galfatan keessaa mataa midhaanii kan isaan WAAQAYYOOF dhi'eessan siif nan kenna. ¹³ Mataan midhaanii kan isaan waan biyyattii irraa argatan hunda keessaa WAAQAYYOOF fidan kan kee haa ta'u; mana kee keessaa namni akka seeraatti qulqulluu ta'e kam iyyuu waan kana nyaachuu ni danda'a.

¹⁴ "Israa'el keessatti wannii qulqulleeffamee WAAQAYYOOF kennee hundinuu kee ti. ¹⁵ Wannii gadameessa saaqu kam iyyuu namas ta'u horiin WAAQAYYOOF dhi'eeffamu hundi kan kee ti. Ati garuu ilma hangafa, horii qulqulluu hin ta'in keessaa immoo korma hangafa furuu qabda. ¹⁶ Yeroo umuriin isaanii ji'a tokko ta'utti akka saqilii iddoo qulqulluu kan geeraa digdama ulfaatu sanaatti gatii furii murtaa'e meetii saqilii shaniin isaan furi.

¹⁷ "Garuu sangaa hangafa, hoolaa hangafaa fi re'ee hangafa hin furin; isaan qulqulluu dha. Dhiiga isaanii iddoo aarsaa irratti facaasi; cooma isaanii immoo aarsaa ibiddaan dhi'eeffamu kan urgaan isaa WAAQAYYOTTI tolu godhiitti gubi. ¹⁸ Akkuma handaraafni aarsaa sochoofamuutii fi tafni mirgaa kan kee ta'e sana foon isaanii kan kee ta'a. ¹⁹ Ani waan aarsaa qulqulluu Israa'eloonni WAAQAYYOOF dhi'eessan irraa addaan baafame hunda siif, ilmaan keetii fi intallan keetiif qooda bara baraa godhee nan kenna. Innis fuula WAAQAYYOO duratti si'ii fi sanyii keetiif kakuu soogiddaa kan bara baraa ti."

²⁰ WAAQAYYO Arooniin akkana jedhe; "Ati biyya isaanii keessatti dhaala tokko illee yookaan qooda tokko illee isaan gidduudhaa hin qabaattu; ani saba Israa'el keessatti qooda keetii fi dhaala kee ti.

²¹ "Kunoo ani kenna Israa'el keessa jiru kudhan keessaa tokko hunda waan isaan tajaajila dunkaana wal ga'ii tajaajilaniif dhaala godhee Lewwotaaf kenneera. ²² Si'achi Israa'eloonni akka cubbuu hin baannee fi akka hin duuneef dunkaana wal ga'iitti hin dhi'aatin. ²³ Kan hojii dunkaana wal ga'ii hojjetuu fi kan itti gaafatama yakka achitti hojjetamuu fudhatu Lewwotuma. Kunis dhaloota dhufuuf seera bara baraa ti. Isaan saba Israa'el keessatti dhaala tokko illee hin argatan. ²⁴ Qooda kanaa ani waan Israa'eloonni kudhan keessaa tokko aarsaa godhanii WAAQAYYOOF dhi'eessan sana dhaala isaanii godhee Lewwotaaf kenneera. Sababiin ani, 'Isaan saba Israa'el keessatti dhaala tokko illee hin qabaatan' jedhee waa'ee isaanii dubbadheefis kanuma."

²⁵ WAAQAYYO Museedhaan akkana jedhe; ²⁶ "Akkana jedhii Lewwotatti dubbadhu: 'Yommuu kenna harka kudhan keessaa harka tokko kan ani dhaala keessan godhee isiniif kenne sana Israa'eloota irraa fudhatanitti isin kenna sana harka kudhan keessaa harka tokko aarsaa WAAQAYYOO godhaa dhi'eessaa. ²⁷ Aarsaan keessanis akkuma midhaan oobdii irraa yookaan akkuma cuunfaa iddoo ija wayinii itti cuunfanii keessaa ba'eetti isiniif herregama. ²⁸ Isinis haaluma kanaan kenna harka kudhan keessaa harka

tokko kan Israa'eloota irraa argatan hunda keessaa WAAQAYYOOF aarsaa ni dhi'eessitu; kennaawwan kanneen keessaa waan qooda WAAQAYYOO ta'e Aroon lubichaaf kenna. ²⁹ Waan isinii kenname hunda keessaa kutaa waan hunda caalaa gaarii fi qulqulluu ta'e qooda WAAQAYYOO godhaatii dhi'eessaa.'

³⁰ "Lewwotaan akkana jedhi: 'Yommuu isin kutaa waan hunda caalaa gaarii ta'e dhi'eessitanitti kutaan sun akka midhaan oobdii irraa yookaan akka cuunfaa iddoo ija wayinii itti cuunfan keessaa ba'eetti isinii herregama. ³¹ Sababii wannii kun mindaa hojii dunkaana wal ga'ii kan isin hojjettanii ta'eef isinii fi namoonni mana keessan jiraatan waan hafe sana iddoo barbaadan kamitti iyyuu nyaachuu dandeessu. ³² Qooda isaa kan waan hunda caalu sana dhi'eessuudhaan isin waan kana keessatti yakka hin qabaattan; yoo isin aarsaa Israa'elootaa qulqulluu sana hin xureessitan; hin duutanis.'"

19

Bishaan Ittiin Qulqullaa'an

¹ WAAQAYYO Musee fi Arooniin akkana jedhe: ² "Seerri WAAQAYYO ajaje kana: Akka Israa'eloonni goromsa diimtuu hir'ina yookaan hanqina hin qabne kan takkumaa waanjoon morma ishee hin tuqin tokko siif fidan itti himi. ³ Goromsa sanas Ele'aazaar lubichatti kenna; raaddi sunis qubata keessaa gad baafamtee fuula isaa duratti haa qalamtu. ⁴ Ele'aazaar lubichi quba isaatiin dhiiga goromsa sanaa irraa xinnoo fuudhee dunkaana wal ga'ii duratti yeroo torba haa facaasu. ⁵ Utuma inni ilaaluu gogaan, foon, dhiignii fi cumaan goromsa sanaa haa gubamu. ⁶ Lubni sun qoraan birbirsaa, hiisophii fi kirrii bildiimaa goromsa gubamtu sanatti haa darbatu. ⁷ Lubni sun ergasii wayyaa ofii isaa miiccatee dhagna ofii isaa illee bishaaniin dhiqachuu qaba. Innis qubatatti galuu danda'a; garuu hamma galgalaatti akka seeraatti xuraa'aa ta'ee tura. ⁸ Namichi goromsa sana gubus wayyaa isaa miiccatee dhagna isaa bishaaniin haa dhiqatu; innis hamma galgalaatti xuraa'ee tura.

⁹ "Namni qulqulluun tokko daaraa goromsa sanaa walitti haree qubata keessaa baase iddoo seeraan qulqulluu ta'e tokko haa kaa'u. Daaraa kanas waldaan Israa'el bishaan ittiin qulqulleessan wajjin itti fayyadamuudhaaf ol kaa'ata; innis cubbuu irraa qulqulleeffamuuf fayyada. ¹⁰ Namni daaraa goromsa sanaa walitti haru sunis wayyaa ofii isaa miiccachuu qaba; innis akkasuma hamma galgalaatti xuraa'aa ta'a. Kunis Israa'elootaa fi alagoota gidduu isaanii jiraataniif seera bara baraa ta'a.

¹¹ "Namni reeffa nama kamii iyyuu tuqu bultii torba xuraa'aa ta'a. ¹² Inni guyyaa sadaffaa fi guyyaa torbaffaatti bishaaniin of qulqulleessuu qaba; ergasii qulqulluu ta'a. Garuu yoo guyyaa sadaffaa fi torbaffaatti of qulqulleessuu baate inni hin qulqullaa'u. ¹³ Namni reeffa nama kamii iyyuu tuqee of hin qulqulleessin hundi dunkaana WAAQAYYOO qulqullicha sana xureessa. Namni sun saba Israa'el keessaa ni balleeffama. Sababii bishaan ittiin qulqulleessan isatti hin facaafaminiif inni xuraa'aa dha; xuraa'ummaan isaas isuma irratti hafa.

¹⁴ "Yeroo namni tokko dunkaana keessatti du'utti seerri kana: Namni dunkaana sana seenu hundii fi namni dunkaana keessa jiru hundi bultii torbaaf xuraa'aa ta'a; ¹⁵ godaan afaan banaa kan qadaadni jabeeffamee itti hin qadaadamin hundi xuraa'aa ta'a.

¹⁶ "Namni alatti nama goraadeedhaan ajjeefame yookaan nama ofumaan du'e tuqu kam iyyuu yookaan namni lafee namaa yookaan awwaala tuqu kam iyyuu bultii torbaaf xuraa'aa ta'a.

¹⁷ "Nama xuraa'aaf aarsaa ittiin qulqulleessuuf gubame sana irraa daaraa xinnaa isaa fuudhii okkotee tokkotti naqiti bishaan yaa'u itti dhangalaasi. ¹⁸ Ergasiis namni akka seeraatti qulqulluu ta'e hiisophii xinnaa isaa fuudhee bishaan sana keessa cuuphee dunkaanaa fi mi'a isaa hundatti, namoota achi turaniis haa faffacaasu. Akkasumas nama lafee namaa yookaan awwaala yookaan nama ajjeefame yookaan nama ofumaan du'e tuqetti haa faffacaasu. ¹⁹ Namichi qulqulluun sun guyyaa sadaffaa fi torbaffaatti namicha xuraa'aa sanatti haa faffacaasu; guyyaa torbaffaatti immoo isa qulqulleessuu qaba. Namichi qulqulleefamu sun wayyaa ofii isaa miiccachuu, dhagna ofii isaas bishaaniin dhiqachuu qaba; innis galgala sana qulqulluu ta'a. ²⁰ Garuu namni xuraa'aan yoo of qulqulleessuu baate, inni sababii iddoo qulqulluu WAAQAYYO xureesseef waldaa keessaa ni balleeffama. Bishaan ittiin qulqulleessan sun isatti hin facaafamneetii inni xuraa'aa dha. ²¹ Kun isaaniif seera bara baraa ti.

"Namichi bishaan ittiin qulqulleessan faffacaasu sun wayyaa ofii isaa haa miiccatu; namni bishaan ittiin qulqulleessan tuqu hamma galgalaatti xuraa'aa ta'a. ²² Wannii namni xuraa'aan tokko tuqu kam iyyuu xuraa'aa ta'a; namni waan sana tuqu hamma galgalaatti xuraa'aa ta'a."

20

Bishaan Kattaa Keessaa Burqe

¹ Ji'a jalqabaatti waldaan Israa'elootaa guutuun Gammoojjii Siin ga'e; isaanis Qaadesh keessa turan. Miiriyaamis achitti duutee awwaalante.

² Waldaan sun bishaan hin qabu ture; kanaafuu waldaan sun Musee fi Arooniin mormuuf walitti qabame. ³ Isaanis akkana jedhanii Musee fi Arooniin lolan; "Maaloo utuu nus gaafuma obbolloonni keenya fuula WAAQAYYOO duratti du'an sana duunee jiraannee!" ⁴ Isin maaliif waldaa WAAQAYYOO gammoojjii kanatti fiddan? Akka nuu fi horiin keenya asitti dhumnuufii? ⁵ Maaliif biyya Gibxiitii iddoo hamaa kanatti gad nu baaftan? Iddoon kun midhaan yookaan harbuu yookaan ija wayinii yookaan roomaanii hin qabu. Bishaan dhugaatiis hin jiru!"

⁶ Musee fi Aroon waldaa biraa gara balbala dunkaana wal ga'ii deemanii addaan lafatti gombifaman; ulfinni WAAQAYYOS isaanitti mul'ate. ⁷ WAAQAYYOS Museedhaan akkana jedhe; ⁸ "Ulee sana fuudhiitii, atii fi obboleessi kee Aroonis waldaa walitti qabaa. Fuuluma isaanii durattis kattaa sanatti dubbadhaa; kattaan sunis bishaan baasa. Atis kattaa sana keessaa waldaadhaaf bishaan baafta; akkasiin isaanii fi horiin isaanii bishaan dhuguu danda'u."

⁹ Kanaafuu Museen akkuma inni isa ajaje sanatti ulee fuula WAAQAYYOO dura jiru sana fuudhe. ¹⁰ Musee fi Aroon kattaa sana duratti waldaa walitti qaban; Museenis waldaa sanaan, "Finciltoota nana, mee dhaga'aa; nu kattaa kana keessaa bishaan isinii baasuu qabnaa?" jedhe. ¹¹ Museen harka ol fudhatee ulee isaa sanaan yeroo lama kattaa sana dha'e. Bishaan achi keessaa lolaanaan waldaa fi horiin isaanii dhugan.

¹² WAAQAYYO garuu Musee fi Arooniin akkana jedhe; "Sababii isin fuula Israa'elootaa duratti akka qulqullummaa kootiitti na kabajjanii natti amanuu diddaniif, isin biyya ani isaanii kenne sanatti waldaa kana hin galchitan."

¹³ Kun bishaan Mariibaa, lafa Israa'eloonni itti WAAQAYYON wal dhabanii fi lafa inni itti akka qulqulluu ta'e gidduu isaanii of argisiisee ti.

Edoom Israa'elin Karaa Darbuu Dhowwe

¹⁴ Museen akkana jedhee Qaadesh irraa mootii Edoomiitti ergamoota erge:

"Obboleessi kee Israa'el akkana jedha: Ati waa'ee rakkina nutti dhufe hundaa ni beekta. ¹⁵ Abbootiin keenya Gibxiiti gad bu'an; nus waggaa hedduu achi jiraanne. Warri Gibxis nuu fi abbootii keenya cunqursan; ¹⁶ garuu nu WAAQAYYOTI iyyaanaan, inni nu dhaga'ee ergamaa isaa ergee biyya Gibxi nu baase.

"Nu amma as Qaadeshitti jechuunis magaalaa daarii biyya keetii irra jiru tokko keessa jirra. ¹⁷ Maaloo mee akka biyya kee keessa baanee dabarru nuu eeyyami. Nu lafa qotiisaa yookaan iddoo dhaabaa wayinii tokko keessa iyyuu hin yaanu yookaan bishaan boolla bishaanii tokkoo iyyuu si duraa hin dhugnu. Nu karaa mootichaa irra godaanna malee hamma daarii kee keessaa baanutti bitaa mirgatti hin gorru."

¹⁸ Edoom immoo akkana jedhee deebii kenne:

"Isin asiin darbuu hin dandeessan; yoo darbuu yaaltan immoo nu isinitti kaanee goraadeedhaan isin dhoofna."

¹⁹ Israa'eloonnis akkana jedhanii deebii kennan:

"Nu karuma guddicha irra yaana; yoo nu yookaan horiin keenya bishaan keessan kam iyyuu dhuge, nu gatii isinni kaffalla. Nu miilla qofaan yaanee darbuu feena; kana malee waan biraa hin feenu."

²⁰ Isaan amma illee akkana jedhanii deebisan:

"Isin asiin hin dabartan."

Edoomis loltoota baay'ee fi jajjaboo fudhatee isaanitti gad ba'e. ²¹ Sababii Edoom biyya ofii isaa keessaan darbuu isaan dhowweef Israa'eloonni isaan irraa deebi'an.

Aroon Du'uu Isaa

²² Sabni Israa'el hundinuu Qaadeshii ka'ee Tulluu Hoori ga'e. ²³ WAAQAYYOS Tulluu Hoori cinatti daangaa Edoom biratti Musee fi Arooniin akkana jedhe; ²⁴ "Aroon gara abbootii isaatti walitti qabama. Sababii isin lachuu bishaan Mariibaa biratti ajaja kooti fincilantiif, inni biyya ani Israa'elootaaf kennutti hin galu. ²⁵ Aroonii fi ilma isaa Ele'aazaar fuudhiitii Tulluu Hooritti ol baasi. ²⁶ Aroon irraa uffata isaa baasiitii ilma isaa Ele'aazaaritti uffisi; Aroon gara abbootii isaatti walitti qabamaatii. Inni achitti du'a."

²⁷ Museen akkuma WAAQAYYO isa ajaje sana godhe: Isaanis utuma waldaan Israa'el guutuun ilaaluu Tulluu Hooritti ol ba'an. ²⁸ Museenis uffata Aroon irraa baasee ilma isaa Ele'aazaaritti uffise. Aroonis achuma tulluu sana gubbaatti du'e. Musee fi Ele'aazaaris

tulluu sana irraa gad bu'an; ²⁹ yommuu waldaan Israa'el hundi akka Aroon du'e dhaga'etti manni Israa'el guutuun bultii soddoma boo'eef.

21

Aaraad Barbadoofte

¹ Mootiin Aaraad namichi Kana'aan kan Negeeb keessa jiraatu sun akka Israa'el karaa Ataariim irra dhufaa jiru dhageenyaan Israa'eloota lolee isaan keessaa nama tokko tokko booji'e. ² Israa'eloonnis, "Yoo ati saba kana dabarsitee harka keenyatti kennite, nu guutumaan guutuutti magaalaa isaanii barbadeessina" jedhanii WAAQAYYOO wareegan. ³ WAAQAYYOS iyya Israa'el dhaga'ee warra Kana'aan dabarsee harka isaaniitti kenne. Israa'eloonnis isaanii fi magaalawwan isaanii illee guutumaan guutuutti barbadeessan; kanaafuu iddoon sun Hormaa jedhamee waamame.

Bofa Naasii Irraa Hojjetame

⁴ Isaanis Edoom duubaan darbanii deemuuf jedhanii Gaara Hoorii ka'anii karaa Galaana Diimaatti geessu irra qajeelan. Sabni sun garuu karumatti obsa fixate; ⁵ isaanis Waaqaa fi Museedhaan mormanii akkana jechuudhaan dubbatan; "Isin maaliif akka gammoojjii keessatti dhumnuuf biyya Gibxii nu baafan? Buddeenni hin jiru! Bishaan hin jiru! Nus nyaata balfamaa kana jibbineerra!"

⁶ WAAQAYYOS bofawwan hadhaa qaban gidduu isaaniitti erge; bofawwan sunis isaan iddaniis Israa'eloonni baay'een dhuman. ⁷ Sabni sunis gara Musee dhufee akkana jedhe; "Nu yeroo WAAQAYYOO fi sitti afaan dabarre sana cubbuu hojjenne. Akka WAAQAYYO bofawwan kanneen nurraa fageessuuf nuuf kadhadu." Museen saba sanaaf kadhate.

⁸ WAAQAYYO Museedhaan akkana jedhe; "Bofa tokko tolchiitii utubaatti fannisi; namni bofni idde kam iyyuu bofa ati tolchite sana ilaalaa jiraachuu danda'a." ⁹ Museen bofa naasii tokko tolchee utubaatti fannise. Ergasiis namni bofti idde kam iyyuu yeroo bofa naasii sana ilaalu ni jiraata ture.

Israa'eloonni Biyya Mo'aabitti Qajeelan

¹⁰ Israa'eloonni fuula duratti qajeelanii Oobooti keessa qubatan. ¹¹ Ergasiis Oobootii ka'anii Iyyee Abaariim lafa karaa ba'a biiftuutiin fuullee Mo'aabitti gammoojjii keessatti argamu qubatan. ¹² Achii ka'anii Sulula Zered keessa qubatan. ¹³ Achii ka'anii daarii Arnoon lafa gammoojjii keessaa kan bulchiinsa Amoorotaa keessa seentuu sana irra qubatan. Arnoon lafa daarii Mo'aab irraa kan Mo'aabii fi Amoor gidduu jirtuu dha. ¹⁴ Sababiin Kitaabni Waraana WAAQAYYOO akkana jedhuuf kana:

"Waaheb Suufaa keessaa fi lageen,
Arnoonii fi ¹⁵ irraan-gadee sululaa
kan gara Aaritti geessuu fi
daarii Mo'aab irratti argamu."

¹⁶ Achii ka'anii gara Bi'eer boolla bishaanii kan WAAQAYYO Museedhaan, "Saba walitti qabi; ani bishaan kennaafii" jedhe sanaa karaa isaanii itti fufan.

¹⁷ Israa'elis faarfannaa kana faarfate:

"Yaa boolla bishaanii nana, burqi!
Isinis waa'ee isaa faarfadhaa;

¹⁸ Boolla bishaanii ilmaan mootii qotan,
kan kabajamoonni sabaa,
qajeelcha warra seera kennuutiin ulee isaaniitiin qotan faarfadhaa."

Isaan ergasii gammoojjii sana keessaa ba'anii Mataanaa dhaqan; ¹⁹ Mataanaadhaa ka'anii Nahaali'ee dhaqan; Nahaali'eelii ka'anii Baamooti dhaqan; ²⁰ Baamootii immoo ka'anii sulula Mo'aab, iddoo itti fiixeen Phisgaa gammoojjiitti garagaltu qubatan.

Mo'atamuu Sihooniitii fi Oogi

²¹ Israa'elis Sihoon mooticha Amoorotaatiin akkana jechuuf ergamoota ergate:

²² "Akka nu biyya kee keessaan darbinu nuuf eeyyami. Nu lafa qotiisaa yookaan iddoo dhaabaa wayinii tokkotti iyyuu hin gorru yookaan bishaan boolla bishaanii tokkoo illee hin dhugnu. Nu hamma biyya kee keessaa baanutti karaa mootichaa irra yaana."

²³ Sihoon garuu akka Israa'el biyya isaa keessa ba'ee darbu hin eeyyamne. Innis loltoota ofii guutuu walitti qabatee Israa'elin loluuf gammoojjiitti gad ba'e. Yommuu Yaahazi ga'ettis Israa'eliin wal lole. ²⁴ Israa'el garuu goraadeedhaan isa ajjeesee Arnoonii jalqabee hamma Yaaboq ga'utti biyya isaa qabate; garuu sababii dallaan daangaa Amoorotaa jabaa tureef inni hamma daangaa Amoonotaa qofatti deemuu danda'e. ²⁵ Israa'elis magaalawwan Amoorotaa hunda, Heshboonii fi qubatawwan

naannoo ishee jiran hunda qabatee keessa qubate. ²⁶ Heshboon kun magaalaa Sihoon mootii Amoorotaa isa mooticha Mo'aab kan duraa lolee biyya isaa hunda hamma Arnoonitti irraa fudhate sanaa ture.

²⁷ Sababiin weellistoonni akkana jedhaniif kana:
"Gara Heshboon kottaa; isheen deebitee haa ijaaramtu;
Magaalaan Sihoonis haa haaromfamtu.

²⁸ "Heshboon keessaa ibiddi,
magaalaa Sihoon keessaa arrabni ibiddaa ba'e.
Ibiddi sun Aari magaalaa Mo'aab,
jiraattota gaara Arnooniis gubee barbadeesse.

²⁹ Yaa Mo'aab, siif wayyoo!
Yaa warra Kemoosh, isin barbadooftaniirtu!
Inni ilmaan isaa akka baqattootaatti,
intallan isaa immoo akka booji'amtootaatti,
Sihoon mootii Amoorotaatti dabarsee kenneera.

³⁰ "Nu garuu isaan garagalchineerra;
Heshboon hamma Diiboonitti barbadoofteerti.
Nus hamma Noofaa ishee gara Meedebaatti diriirtu sanaatti
isaan barbadeessineerra."

³¹ Akkasiin Israa'el biyya Amoor keessa qubate.
³² Museen Ya'izeeritti basaastota erge; isaanis qubatawwan naannoo ishee qabatani
Amoorota achi keessa jiraachaa turan ari'anii baasan. ³³ Isaanis ergasii deebi'anii karaa
Baashaan qabatani ol ba'an; Oogi mootichi Baashaaniitii fi loltoonni isaa guutuun
Edreyiitti isaaniin wal loluuf itti gad ba'an.

³⁴ WAAQAYYO Museedhaan akkana jedhe; "Sababii ani guutuu loltoota isaatii fi biyya
isaa illee dabarsee harka keetti kenneef isa hin sodaatin. Waanuma Sihoon mootiin
Amoorotaa kan Heshboon bulchaa ture sana goote isa illee godhi."

³⁵ Isaan isa, ilmaan isaatii fi loltoota isaa hunda utuu nama tokko illee hin hambisiniif
dha'anii biyya isaa illee irraa fudhatan.

22

Baalaag Bala'aamin Waame

¹ Israa'eloonni gara dirree Mo'aabitti qajeelanii Yerikoon gama qarqara Yordaanos
qabatan.

² Baalaag ilmi Ziphooori waan Israa'el Amoorotatti hojjete hunda arge; ³ Mo'aabis
waan sabni sun akka malee baay'ee ta'eef ni sodaate. Mo'aabis sababii Israa'elootaatiif
raafame.

⁴ Warri Mo'aabis maanguddoota Midiyaaniin, "Namoonni baay'een kunneen akkuma
gotiyyoon marga bakkee dheedee fixu sana waan naannoo keenya jiru dheedee fixa"
jedhan.

Kana irratti Baalaag ilmi Ziphooori kan yeroo sana mootii Mo'aab ture sun, ⁵ akka
isaan Bala'aam ilma Be'oor kan biyyuma itti dhalate keessa laga Efraaxiis bira Phetoori
keessa jiraachaa ture sana waamaniif ergamoota erge. Baalaagis akkana jedhe:

"Kunoo, sabni tokko biyya Gibxii ba'ee dhufeera; kunoo isaan lafa guutanii natti
aananii qabatanii. ⁶ Sababii isaan na caalaa humna qabaniif amma kottuutii isaan
abaari. Yoos ani isaan mo'adhee biyya keessaa ari'ee isaan baasuu nan danda'a ta'a.
Ani akka warri ati eebbiftu eebbifaman, warri ati abaartus abaaraman nan beekaatii."

⁷ Maanguddoonni Mo'aabii fi Midiyaan sun ka'anii kaffaltii mortuu sanaa fudhatanii
deeman. Isaanis yommuu Bala'aam bira ga'anitti waan Baalaag jedheen sana itti himan.

⁸ Bala'aamis, "Halkan kana asuma bulaa; anis deebii WAAQAYYO naaf kennu isinitti
nan hima" jedheen. Qondaaltonni Mo'aab sun isuma bira turan.

⁹ Waaqni gara Bala'aam dhufee, "Namoonni si wajjin jiran kunneen eenyu?" jedhee
gaafate.

¹⁰ Bala'aamis akkana jedhee Waaqaaf deebii kenne; "Baalaag ilmi Ziphooori, mootichi
Mo'aab akkana jedhee ergaa kana natti erge: ¹¹ 'Kunoo, sabni biyya Gibxii ba'ee dhufe
tokko lafa guuteera; ati amma kottuutii isaan naaf abaari. Yoos ani isaan lolee ari'ee
biyyaa baasuu nan danda'a ta'aatii.'"

¹² Waaqayyo garuu Bala'aamiin, "Isaan wajjin hin deemin. Sababii isaan eebbifamoo
ta'aniif ati saba sana hin abaarin" jedhe.

¹³ Bala'aam ganama itti aanu ka'ee qondaaltota Baalaaqiin, "Sababii WAAQAYYO isin wajjin deemuu na dhowweef, isin amma ka'aa biyya keessanitti deebi'aa" jedhe.

¹⁴ Qondaaltonni Mo'aab gara Baalaaqitti deebi'anii, "Bala'aam nu wajjin dhufuu dide" jedhaniin.

¹⁵ Baalaaqis qondaaltota warra duraa sana caalaa baay'ee fi caalaa bebeekamoo kan biraa arge. ¹⁶ Isaanis dhufanii Bala'aamiin akkana jedhan:

"Wanni Baalaaq ilmi Ziphoori jedhu kunoo kana: 'Maaloo wannu tokko iyyuu gara koo dhufuu si hin dhowwin; ¹⁷ ani ulfina guddaa siif nan kennaatii; waan ati jettu hundas nan guuta. Kottuu saba kana naa abaari.'"

¹⁸ Bala'aam garuu akkana jedhee deebiseef; "Utuu Baalaaq masaraa isaa kan meetii fi warqeen guutame sana naaf kenne illee, ani ajaja WAAQAYYO Waaqa kootiin alatti waan xinnaa yookaan guddaa tokko illee hojjechuu hin danda'u. ¹⁹ Akka ani waan WAAQAYYO natti himu kan biraa beekuu danda'uuf isinis akkuma warra kaanii as bulaa."

²⁰ Halkan sana Waaqayyo gara Bala'aam dhufee, "Sababii namoonni kunneen si waamuu dhufaniif, isaan wajjin deemi; garuu waanuma ani sitti himu qofa hojjedhu" jedheen.

Harree Bala'aam

²¹ Bala'aam ganamaan ka'ee harree isaa irra kooraa kaa'atee qondaaltota Mo'aab sana wajjin deeme. ²² Waaqni garuu inni deemnaan itti aare; ergamaan WAAQAYYOO tokkos isaan mormuuf jedhee karaa irra dhaabate. Bala'aamis harree isaa yaabbatee deemaa ture; tajaajiltoonni isaa lamaan isa wajjin turan. ²³ Harreen sun immoo ergamaa WAAQAYYOO kan goraadee luqqifatee harkatti qabatee karaa irra dhaabatu arginaan of irra gara galtee karaa irraa gortee lafa qotiisaa seente. Bala'aamis karaatti ishee deebisuudhaaf harree sana rukute.

²⁴ Ergamaan WAAQAYYOO sun garuu daandii dhiphoo, iddoo dhaabaa wayinii lama kanneen gama lamaan dallaa qaban gidduu baatu irra dhaabate. ²⁵ Harreen sun ergamaa WAAQAYYOO arginaan, dallaatti maxxantee miilla Bala'aam dallaatti buufte. Inni ammas harree sana rukute.

²⁶ Ergamaan WAAQAYYOO fuula duratti hiiqee daandii dhiphaa iddoo ittiin mirgatti yookaan bitaatti goran hin qabne tokko irra dhaabate. ²⁷ Harreen sun ergamaa WAAQAYYOO arginaan Bala'aam jalaa gad ciifte; innis aaree ulee ofitiin harree sana rukute. ²⁸ Kana irratti WAAQAYYO afaan harree sanaa bane harreen sun Bala'aamiin, "Ani maal si yakkiinaa ati akkas yeroo sadii na rukutte?" jette.

²⁹ Bala'aamis harree sanaa, "Ati na gowwoomsite; ani utuu goraadee of harkaa qabaadhee silaa ammuman si ajjeesa" jedhe.

³⁰ Harreen sun amma illee Bala'aamiin akkana jette; "Ani harree kee kan ati hamma har'aatti guyyaa hunda yaabbattu mitii? Ani takkumaa waan akkasii sitti hojjedhee beekaa?"

Innis, "Lakkii" jedhee deebiseef.

³¹ Yommu WAAQAYYO ija Bala'aam bane; Bala'aamis ergamaa WAAQAYYOO kan goraadee luqqifatee karaa irra dhaabatu arge. Kana irratti inni addaan lafatti gombifamee sagade.

³² Ergamaan WAAQAYYOO sun akkana jedhee isa gaafate; "Ati maaliif yeroo sadan kana harree kee rukutte? Kunoo ani waan karaan kee fuula koo duratti jal'aa ta'eef siin mormuudhaafan dhufe. ³³ Harreen kun na argitee yeroo kana sadanuu narraa gorte. Utuu isheen narraa goruu baattee silaa ani yoon si ajjeesee ishee immoo hambisa ture."

³⁴ Bala'aamis ergamaa WAAQAYYOOTIN, "Ani cubbuu hojjedheera. Ani akka ati naan mormuuf jettee karaa irra dhaabatte hin hubanne. Ammas yoo sitti hin tolin ani nan deebi'a" jedhe.

³⁵ Ergamaan WAAQAYYOO sunis Bala'aamiin, "Namoota kana wajjin deemi; garuu waanuma ani sitti himu qofa dubbadhu" jedhe. Akkasii Bala'aam qondaaltota Baalaaq sana wajjin deeme.

³⁶ Baalaaqis akka Bala'aam dhufaa jiru dhageenyaan, magaalaa Mo'aab kan daarii Arnoon irratti argamtutti isa simachuudhaaf ka'ee deeme. ³⁷ Baalaaqis Bala'aamiin akkana jedhe; "Ani dhaamsa ariifachiisaa sitti hin erginee? Ati maaliif na bira hin dhufne? Ani dhugumaan ulfina siif kennuu hin danda'uu?"

³⁸ Bala'aamis, "Kunoo ani si bira dhufeera. Garuu ani waanuman arge dubbachuu nan danda'aa? Ani waanuma Waaqni afaan koo keessa kaa'u qofan dubbachuu qaba" jedhee deebise.

³⁹ Bala'aamis ka'ee Baalaaq wajjin Qiiriyaati Haxoti dhaqe. ⁴⁰ Baalaaq loonii fi hoollaa aarsaa dhi'eessee gara tokko Bala'aamii fi qondaaltota isa wajjin turaniif kenne.

41 Ganama itti aanus Baalaaq, Bala'aamin Baamooti Ba'aalitti ol baase; innis achi dhaabatee saba Israa'el warra daangaa gamaa irra jiran arge.

23

Ergaa Bala'aam Kan Jalqabaa

¹ Bala'aamis Baalaaqiin, "Iddoo aarsaa torba asitti naaf ijaari; amma illee korommii loonii torbaa fi korbeeyyii hoolaa torba naa qopheessi" jedhe. ² Baalaaqis akkuma Bala'aam jedhe sana godhe; isaan lamaan tokkoo tokkoo iddoo aarsaa irratti korma looniitii fi korbeessa hoolaa tokko tokko aarsaa dhi'eessan.

³ Ergasii Bala'aam Baalaaqiin akkana jedhe; "Ani xinnoo achi sirraa nan siqa; ati immoo asuma aarsaa kee bira turi. Tarii WAAQAYYO anaa wajjin wal arguuf ni dhufa ta'a. Waan inni natti mul'isu kam iyyuu ani sittin hima." Innis gara gara tokkoo dhaqe.

⁴ Waaqayyo isaan wal arginaan Bala'aam, "Ani iddoo aarsaa torba qopheessee tokkoo tokkoo isaa irratti korma loonii tokkoo fi korbeessa hoolaa tokko qopheessee" jedhe.

⁵ WAAQAYYO ergaa tokko afaan Bala'aam keessa kaa'ee, "Baalaaqitti deebi'iitii ergaa kana itti himi" jedheen.

⁶ Bala'aam Baalaaqitti deebi'ee isaa qondaaltota Mo'aab wajjin aarsaa isaa bira dhaabatu arge. ⁷ Bala'aam ergaa isaa akkana jedhee dubbate:

"Baalaaq Arraam irraa,
mootichi Mo'aab gaarran ba'aa irraa na fide.

Innis, 'Kottuutii Yaaqoobin naa abaari;
kottuutii Israa'elin naa balaaleffadhu' jedhe.

⁸ Ani akkamittan warra Waaqni hin abaarin
abaaruu danda'a?

Ani akkamittan warra WAAQAYYO hin balaaleffatin
balaaleffachuu danda'a?

⁹ Fiixee gaarranii irraa ani isa nan arga;
tulluuwwan irraas isa nan ilaala.

Saba kophaa isaa jiraatu,
kan saba kaan keessatti of hin lakkoofne nan arga.

¹⁰ Eenyutu awwaara Yaaqoob lakkaa'uu danda'a?
Eenyutu Israa'el keessaa kurmaana isaa illee lakkaa'a?

Ani du'a nama qajeelaa haa du'u;
dhumni koos akkuma dhuma isaa haa ta'u!"

¹¹ Baalaaqis Bala'aamiin, "Wanni ati na goote kun maali? Ani akka ati diina koo naa abaartuufin si fide; ati kunoo isaan eebbifte malee waan tokko iyyuu isaan hin goone!" jedhe.

¹² Innis, "Ani waan WAAQAYYO afaan koo keessa kaa'u hin dubbadhuu?" jedhee deebii kenneef.

Ergaa Bala'aam Kan Lammaffaa

¹³ Baalaaq, "Mee gara lafa itti isaan arguu dandeessu biraa na wajjin kottu; ati gara tokko qofa malee hunduma isaanii arguu hin dandeessu. Achiis isaan naa abaari" jedheen. ¹⁴ Inni gara dirree Xoofiim kan fiixee Phisgaa irratti argamuutti isa geesse; achittis iddoo aarsaa torba ijaaree tokkoo tokkoo iddoo aarsaa sanaa irratti korma loonii tokkoo fi korbeessa hoolaa tokko aarsaa dhi'eesse.

¹⁵ Bala'aamis Baalaaqiin, "Ati hamma ani achi siqee Waaqa wajjin wal argutti asuma aarsaa kee bira turi" jedhe.

¹⁶ WAAQAYYO Bala'aam wajjin wal argee ergaa tokko afaan isaa keessa kaa'ee, "Baalaaqitti deebi'iitii ergaa kana itti himi" jedheen.

¹⁷ Bala'aam Baalaaq bira dhaqee isaa qondaaltota Mo'aab wajjin aarsaa isaa bira dhaabatu arge. Baalaaqis, "WAAQAYYO maal jedhe?" jedhee Bala'aamiin gaafate.

¹⁸ Bala'aam akkana jedhee ergaa isaa dubbate:
"Yaa Baalaaq, ka'iitii dhaggeeffadhu;

yaa ilma Ziphoori na dhaga'i.
¹⁹ Waaqni nama miti; inni hin sobu;

yookaan gaabbuudhaaf inni ilma namaa miti.
Inni waa dubbatee ergasii hin hojjetuu?

Inni waa abdachiisee ergasii hin raawwatuu?
²⁰ Kunoo ani eebbisuudhaaf ajaja argadheera;

inni eebbiseera; anis geeddaruu hin danda'u.

- 21 “Inni Yaaqoob keessatti daba hin argine;
rakkina tokko illee Israa’el keessatti hin argine.
WAAQAYYO Waaqni isaanii isaan wajjin jira;
ililleen Mootii isaan wajjin jira.
- 22 Waaqayyo biyya Gibxiitii isaan baase;
inni jabina akka jabina gafarsaa qaba.
- 23 Yaaqoob irratti falfalli tokko iyyuu hin hojjetu;
Israa’el irrattis tolchi tokko iyyuu hin hojjetu.
Amma Yaaqoobii fi Israa’eliin,
‘Waan Waaqni hojjete ilaalaa!’ jedhama.
- 24 Kunoo sabni sun akka leenca dhalaatti ka’a;
akkuma leencaattis ol jedha;
inni hamma waan adamsate nyaatee fixutti,
hamma dhiiga waan ajjeefate sanaa dhuguttis hin ciisu.”
- ²⁵ Baalaaq Bala’aamiin, “Ati gonkumaa isaan hin abaarin yookaan isaan hin eebbisiin” jedhe.
- ²⁶ Bala’aamis, “Ani akka waan WAAQAYYO jedhu kam iyyuu hojjedhu sitti hin himnee?” jedhee Baalaaqiif deebise.

Ergaa Bala’aam Kan Sadaffaa

- ²⁷ Ergasii Baalaaq Bala’aamiin, “Mee kottu amma illee ani iddoo biraa sin geessaa. Tarii achii jara naaf abaaruun kee Waaqa gammachiisa ta’aatii” jedhe. ²⁸ Baalaaqis Bala’aamin fiixee tulluu Phe’oor kan irra dhaabatanii gammoojjii sana gad ilaalanitti ol baase.
- ²⁹ Bala’aamis Baalaaqiin, “Iddoo aarsaa torba asitti naaf ijaari; ammas korommii loonii torbaa fi korbeeyyii hoolaa torba naaf qopheessi” jedhe. ³⁰ Baalaaqis akkuma Bala’aam jedheen sana godhe; tokkoo tokkoo iddoo aarsaa irrattis korma loonii tokkoo fi korbeessa hoolaa tokko aarsaa dhi’eesse.

24

¹ Bala’aam yeroo akka Israa’elin eebbisuun WAAQAYYON gammachiise argetti akka yeroo kaanii falfala barbaacha hin dhaqne; garuu fuula isaa gara gammoojjiitti deebifate. ² Yommuu Bala’aam ol mil’atee akka Israa’el gosa gosaan qubate argetti Hafuuri Waaqaa isa irra bu’e; ³ innis akkana jedhee ergaa isaa dubbate:

- “Ergaa Bala’aam ilma Be’oor,
ergaa nama iji isaa sirriitti arguu,
⁴ ergaa nama dubbii Waaqaa dhaga’uu
isa Waaqa Waan Hunda Danda’u irraa mul’ata argu
kan kufee iji isaa banamu sanaa:
- ⁵ “Yaa Yaaqoob, dunkaanonni kee,
Yaa Israa’el, iddoon ati jiraattu akkam miidhaga!
- ⁶ “Isaan akkuma sulula diriiraa,
akkuma iddoo biqiltuu kan afaan lagaa,
akkuma argeessa WAAQAYYO dhaabee,
akkuma birbirsaa qarqara bishaanii ti.
- ⁷ Okolee isaa keessaa bishaantu lola’a;
sanyiin isaa bishaan baay’ee argata.
- “Mootiin isaa Agaag caala;
mootummaan isaa ni kabajama.
- ⁸ “Waaqayyo Gibxii isa baase;
inni jabina akka jabina gafarsaa qaba.
Inni saba diinota isaa ta’e nyaata;
lafee isaanii ni caccabsa;
xiyya ofii isaatiin isaan waraana.
- ⁹ Inni akkuma leencaa ciiseera;
akkuma leenca dhalaas ciiseera; eenyutu isa dammaqsa?
- “Warri si eebbisan haa eebbifaman;
warri si abaaranis haa abaaraman!”

¹⁰ Baalaaq Bala'aamitti aare. Innis harka ofii isaa walitti rurrukutee Bala'aamiin akkana jedhe; "Ani akka ati diina koo abaartuufan si waammadhe; ati kunoo yeroo sadan kana isaan eebbifte. ¹¹ Amma dafii asii deemii mana keetti gali! Ani ulfina guddaa siif nan kenna jedheen ture; amma garuu WAAQAYYO akka ati ulfina hin arganne si godheera."

¹² Bala'aamis Baalaaqiin akkana jedhe; "Ani ergamoota ati natti ergite sanatti akkana jedheen hime mitii? ¹³ 'Utuu Baalaaq masaraa meetii fi warqeen guutame sana naaf kennee iyyuu, ani waanuma WAAQAYYO jedhe qofan dubbadha malee ajaja WAAQAYYOOTIIN alatti waan yaada koo gaarii yookaan hamaa tokko iyyuu hojjechuu hin danda'u." ¹⁴ Kunoo ani amma saba kootti nan deebi'a; garuu mee kottu ani waan sabni kun bara dhufu keessa saba keetiif godhu sin beeksisaa."

Ergaa Bala'aam Kan Afuraffaa

¹⁵ Inni akkana jedhee ergaa isaa dubbate:

Ergaa Bala'aam ilma Be'oor,

ergaa nama iji isaa sirriitti arguu,

¹⁶ ergaa nama dubbii Waaqaa dhaga'uu

kan beekumsa Waaqa Waan Hundaa Ollii qabu

kan Waaqa Waan Hunda Danda'u irraa mul'ata argu

kan kufee diriiruu, iji isaas kan banamu sanaa:

¹⁷ "Ani isa nan arga; garuu amma miti;

ani isa nan ilaala; garuu dhi'ootti miti.

Yaaqoob keessaa urjiin tokko ni ba'a;

Israa'el keessaa bokkuun tokko ol ka'a.

Inni adda warra Mo'aab,

buqqee mataa ilmaan Seet hundaas ni caccabsa.

¹⁸ Edoom ni mo'atama;

See'iir, diinni isaa ni mo'atama;

Israa'el garuu jabaachaa deema.

¹⁹ Yaaqoob keessaa bulchaan tokko ni ka'a;

warra magaalaa sana keessatti lubbuudhaan hafanis ni barbadeessa."

Ergaa Bala'aam Kan Dhuma

²⁰ Ergasiis Bala'aam Amaaleqin argee akkana jedhee ergaa ofii isa dubbate:

"Amaaleq saboota keessaa kan jalqabaa ture;

dhumni isaa garuu barbadaa'uu dha."

²¹ Ergasii Qeenota argee akkana jedhee ergaa ofii isaa itti dubbate:

"Iddoon ati jiraattu jabaa dha;

manni kees kattaa keessatti ijaarame;

²² ta'us isin warri Qeenotaa,

gaafa Asoor isin booji'u ni baddu."

²³ Innis akkana jedhee ergaa isaa itti dubbate:

"Wayyoo! Yeroo Waaqayyo waan kana hojjetu

eenyutu jiraachuu danda'a?

²⁴ Doonniwwan qarqara Kitiim irraa ni dhufu;

isaanis Asoorii fi Eeberin ni qabatu;

garuu isaanis ni barbadeeffamu."

²⁵ Ergasii Bala'aam ka'ee mana ofii isaatti deebi'e; Baalaaq immoo karaa ofii isaa qajelee.

25

Mo'aab Israa'elin Gowwoomse

¹ Israa'eloonni yeroo Shixiim keessa turanitti dhiironni isaanii dubartoota Mo'aab wajjin sagaagaluu jalqaban. ² Dubartoonni kunneenis gara qalma waaqota isaanitti saba sana aferraan, sabni sun qalma sana nyaatee waaqota sanaaf sagade. ³ Israa'el Ba'aal Phe'oor duukaa bu'e. Dheekkamsi WAAQAYYOOS isaanitti boba'e.

⁴ WAAQAYYO Museedhaan akkana jedhe; "Akka dheekkamsi WAAQAYYOO jabaan sun saba Israa'el irraa deebi'uuf, hangafoota saba sanaa hunda fuudhiitii guyyaa adiidhaan fuula WAAQAYYOO duratti isaan fannisi."

⁵ Museen abbootii murtii Israa'eliin, "Tokkoon tokkoon keessan namoota keessan kanneen Ba'aal Phe'oor duukaa bu'an fixaa" jedhe.

⁶ Kunoo namichi Israa'el tokko utuma isaan balbala dunkaana wal ga'ii duratti boo'aa jiranuu fuula Museetii fi fuula waldaa Israa'el guutuu duratti dubartii Midiyaan tokko gara maatii ofii isaatti fidate. ⁷ Fiinehaas ilmi Ele'aazaar ilma Aroon lubichaa waan kana arginaan waldaa sana keessaa ba'ee eeboo harkatti qabatee ⁸ namicha Israa'el sana duukaa bu'ee dunkaana seene; namicha Israa'elii fi dubartittiis walitti waraane dhagna isheetti fullaase. Akkasiin dha'ichi Israa'elitti dhufe sun ni dhowwame. ⁹ Garuu baay'inni namoota dha'icha sanaan dhumanii 24,000 ga'ee ture.

¹⁰ WAAQAYYOS Museedhaan akkana jedhe; ¹¹ "Fiinehaas ilmi Ele'aazaar ilma Aroon lubicha sanaa dheekkamsa koo Israa'eloota irraa deebiseera; inni akka ani hinaaffaa kootiin isaan hin balleessineef, akkuma ani ulfina kootiif isaan gidduutti hinaafu sana innis hinaafeeraatii. ¹² Kanaafuu kunoo akka ani kakuu koo kan nagaa isa wajjin godhadhu itti naaf himi. ¹³ Sababii inni ulfina Waaqa isaatiif hinaafee Israa'elootaaf araara buuseef, innii fi sanyiin isaa kakuu lubummaa kan bara baraa qabaatu."

¹⁴ Maqaan namicha Israa'el kan dubartii Midiyaan wajjin ajjeefame sanaa Zimrii ilma Saaluu ti; innis hoogganaa maatii Simi'oon. ¹⁵ Maqaan dubartii Midiyaan kan ajjeefamte sanaa Kozbii intala Zuuri hangafa maatii Midiyaan tokkoo ti.

¹⁶ WAAQAYYO Museedhaan akkana jedhe; ¹⁷ "Midiyaanota akka diinaatti ilaaliitii ajjeesi; ¹⁸ kunis waan isaan sababii Phe'ooriitii fi obboleettii isaanii Kozbii intala hoogganaa warra Midiyaan, dubartii guyyaa sababii Phe'ooriitiin dha'ichi dhufe sana ajjeefamte sana irratti isin gowwoomsan sana akka diinaatti isin ilaalaniif."

26

Sabni Yeroo Lammaffaa Lakkaa'ame

¹ Dha'icha sana booddee WAAQAYYO Musee fi Ele'aazaar ilma Aroon lubichaatiin akkana jedhe; ² "Waldaa saba Israa'el warra umuriin isaanii waggaa digdamaa fi hammasii ol ta'ee kanneen loltoota Israa'el keessa tajaajiluu danda'an hunda maatii maatiidhaan lakkaa'aa." ³ Musee fi Ele'aazaar lubichi dirreewwan Mo'aab irratti, Yordaanos biratti, Yerikoo gamatti akkana jedhanii isaan wajjin dubbatan; ⁴ "Akkuma WAAQAYYO Musee ajajetti namoota umuriin isaanii waggaa digdamaatii fi hammasii olii lakkaa'aa."

Jarri kunneen Israa'eloota biyya Gibxiitii ba'anii dha:

⁵ Ilmaan Ruubeen ilma Israa'el hangaftichaa:

karaa Henookiitiin, balbala Hanookotaa;

karaa Faluutiin, balbala Faluuwotaa;

⁶ karaa Hezrooniitiin, balbala Asroonotaa;

karaa Karmiitiin, balbala Karmootaa.

⁷ Jarri kunneen balbalawwan Ruubeen; baay'inni isaaniis 43,730 ture.

⁸ Ilmi Faluus Eliiyaab; ⁹ ilmaan Eliiyaabis Nemuu'eel, Daataanii fi Aberoon. Daataanii fi Abiiraam kunneen gondaaltota waldaa kanneen Musee fi Aroonitti fincilanii dha; isaan yeroo Qoorahii fi duukaa buutonni isaa WAAQAYYOTTI fincilan sanas achi keessa turan. ¹⁰ Laftis afaan banattee Qoorahii fi isaan illee liqimsite; warri garee Qoorahi immoo yeroo ibiddii namoota 250 fixe sana dhuman. Isaanis mallattoo namoonni ittiin of eggatan ta'an. ¹¹ Ilmaan Qoorahii garuu hin duune.

¹² Ilmaan Simi'oon akkuma balbala balbala isaaniitti kanneenii dha:

karaa Nemuu'eel, balbala Nemuu'eelotaa;

karaa Yaamiin, balbala Yaamiinotaa;

karaa Yaakiin, balbala Yaakiinotaa;

¹³ karaa Zeraan, balbala Zerootaa;

karaa Shaawul, balbala Shaawulootaa ti.

¹⁴ Jarri kunneen balbalawwan Simi'oonii ti; isaanis namoota 22,200 turan.

¹⁵ Ilmaan Gaad akkuma balbala balbala isaaniitti kanneenii dha:

karaa Zefoon, balbala Zefoonotaa;

karaa Hagii, balbala Hagootaa;

karaa Shuunii, balbala Shuunotaa;

¹⁶ karaa Oznii, balbala Oznootaa;

karaa Eerii, balbala Eerootaa;

¹⁷ karaa Arood, balbala Aroodotaa;
karaa Ari'eel, balbala Ari'eelotaa ti.

¹⁸ Jarri kunneen balbalawwan Gaadii ti; baay'inni isaaniis 40,500 ture.

¹⁹ Eerii fi Oonaan ilmaan Yihuudaa ti; isaan garuu Kana'aan keessatti du'an.

²⁰ Ilmaan Yihuudaa akkuma balbala balbala isaaniitti kanneenii dha:

karaa Sheelaa, balbala Sheelaanotaa;

karaa Faares, balbala Faaresotaa;

karaa Zaaraa, balbala Zaarotaa ti.

²¹ Ilmaan Faaresis kanneenii dha:

karaa Hezroon, balbala Hezroonotaa;

karaa Hamuul, balbala Hamuulotaa ti.

²² Jarri kunneen balbalawwan Yihuudaa ti; baay'inni isaaniis 76,500 ture.

²³ Ilmaan Yisaakor akkuma balbala balbala isaaniitti kanneenii dha:

karaa Toolaa, balbala Toolotaa;

karaa Fuwaa, balbala Fuuwotaa;

²⁴ karaa Yaashuub, balbala Yaashuubotaa;

karaa Shimroon, balbala Shimroonotaa ti.

²⁵ Jarri kunneen balbalawwan Yisaakor; baay'inni isaaniis 64,300 ture.

²⁶ Ilmaan Zebuuloon akkuma balbala balbala isaaniitti kanneenii dha:

karaa Sered, balbala Seredootaa;

karaa Eeloon, balbala Eeloonotaa;

karaa Yahili'eel, balbala Yahili'eelotaa ti.

²⁷ Jarri kunneen balbalawwan Zebuuloon; baay'inni isaaniis 60,500 ture.

²⁸ Ilmaan Yoosif akkuma balbala balbala isaaniitti: Minaasee fi Efreem.

²⁹ Ilmaan Minaasee:

karaa Maakiir, balbala Maakiirotaa; Maakiir kun abbaa Gili'aad;

karaa Gili'aad, balbala Gili'aadotaa ti.

³⁰ Ilmaan Gili'aad isaan kanneenii dha:

karaa Ii'ezer, balbala Ii'ezerootaa;

karaa Heleq, balbala Heleqootaa;

³¹ karaa Asri'eel, balbala Asrii'eelotaa,

karaa Sheekem, balbala Sheekemotaa;

³² karaa Shemiidaa, balbala Shemiidaa;

karaa Heefer, balbala Heeferotaa ti.

³³ Zelofehaad ilmi Heefer ilmaan hin qabu ture; inni intallan qofa qaba ture;

maqaan isaaniis Mahilaa, Nohii, Hoglaa, Miilkaa fi Tiirzaa dha.

³⁴ Jarri kunneen balbalawwan Minaasee ti; baay'inni isaaniis 52,700 ture.

³⁵ Ilmaan Efreem akkuma balbala balbala isaaniitti kanneenii dha:

karaa Shuutelaa, balbala Shuutelootaa;

karaa Beker, balbala Bekerotaa;

karaa Taahan, balbala Taahanotaa ti.

³⁶ Ilmaan Shuutelaa isaan kanneenii dha:

karaa Eeraan, balbala Eeraanotaa ti.

³⁷ Jarri kunneen balbalawwan Efreem; baay'inni isaaniis 32,500 ture.

Isaan kunneen ilmaan Yoosif warra akkuma balbala balbala isaaniitti lakkaa'amani dha.

³⁸ Ilmaan Beniyaam akkuma balbala balbala isaaniitti kanneenii dha:

karaa Belaa, balbala Belaa'otaa;

karaa Ashbeel, balbala Asbeelotaa;

karaa Ahiiraam, balbala Ahiiraamotaa;

³⁹ karaa Shefuufaami, balbala Shefuufaamotaa;

karaa Huufaam, balbala Huufaamotaa ti.

⁴⁰ Ilmaan Belaa, karaa Ardii fi Na'amaan:

karaa Ardii, balbala Ardootaa;

karaa Na'amaan, balbala Na'amaanotaa ti.

⁴¹ Jarri kunneen balbalawwan Beniyaam; baay'inni isaaniis 45,600 ture.

- ⁴² Ilmaan Daan akkuma balbala balbala isaaniitti kanneenii dha:
 karaa Shuuhaam, balbala Shuuhaamotaa ti.
 Jarri kunneen balbalawwan Daan: ⁴³ Isaan hundinuu balbalawwan Shu-
 uhaamotaa ti; baay'inni isaaniis 64,400 ture.
- ⁴⁴ Ilmaan Aasheer akkuma balbala balbala isaaniitti kanneenii dha:
 karaa Yimnaa, balbala Yuumnootaa;
 karaa Yishwii, balbala Yishwiiyotaa;
 karaa Beriiyaa, balbala Beriiyootaa;
⁴⁵ karaa ilmaan Beriiyaa immoo:
 karaa Hebeer, balbala Hebeerotaa;
 karaa Malkii'eel, balbala Malkii'eelotaa ti.
⁴⁶ Aasheer intala Seraa jedhamtu tokko qaba ture.
⁴⁷ Jarri kunneen balbalawwan Aasheer; baay'inni isaaniis 53,400 ture.
- ⁴⁸ Ilmaan Niftaalem akkuma balbala balbala isaaniitti kanneenii dha:
 karaa Yahizeel, balbala Yahizeelotaa,
 karaa Guunii, balbala Guunotaa;
⁴⁹ karaa Yeexer, balbala Yeexirotaa;
 karaa Shiileem, balbala Shiileemotaa ti.
⁵⁰ Jarri kunneen balbalawwan Niftaalem; baay'inni isaaniis 45,400 ture.
- ⁵¹ Walumaa galatti baay'inni dhiira Israa'el 601,730 ture.
- ⁵² WAAQAYYO Museedhaan akkana jedhe; ⁵³ "Biyyi sun akkuma baay'ina maqaa namaatti dhaala ta'ee isaan kanneeniif haa qoodamu. ⁵⁴ Balbala guddaadhaaf dhaala guddaa, balbala xinnaadhaaf immoo dhaala xinnaa kenni; tokkoon tokkoon balbalaa akkuma baay'ina namoota galmeeffamaniitti dhaala isaa haa argatu. ⁵⁵ Garuu biyyi sun ixaadhaan haa qoqoodamtu. Isaanis akkuma maqaawwan gosoota abbootii isaaniitti ni dhaalu. ⁵⁶ Tokkoon tokkoon dhaala sanaa garee guddaa fi garee xinnaa gidduutti ixaadhaan haa qoodamu."
- ⁵⁷ Lewwonnii balbala balbalaan lakkaa'aman kanneenii dha:
 karaa Geershoo, balbala Geershooonotaa;
 karaa Qohaati, balbala Qohaatotaa;
 karaa Meraarii, balbala Meraarotaa ti.
- ⁵⁸ Jarri kunneenis balbalawwan Lewwotaa ti:
 balbala Liibnotaa,
 balbala Kebroonotaa,
 balbala Mahelootaa,
 balbala Muusotaa,
 balbala Qooraahotaa.
 Qohaati abbaa Amraam; ⁵⁹ maqaan niitii Amraam Yookebeed. Isheen intala Lewwii kan biyya Gibxitti Lewwiif dhalattee dha. Amraamiifis Aroon, Musee fi obboleettii isaanii Miiriyaam deesse. ⁶⁰ Aroon abbaa Naadaab, Abiihuu, Ele'aazaarii fi Iitaamaar. ⁶¹ Naadaabii fi Abiihuu garuu yeroo ibidda hin eeyyamamin fuula WAAQAYYOO duratti dhi'eessan sana du'an.
- ⁶² Dhiironni umuriin isaanii ji'a tokkoo fi hammasii ol ta'ee kanneen lakkaa'aman hundi 23,000 turan. Isaanis sababii gidduu isaaniitti dhaala hin argatiniif Israa'eloota kaan wajjin hin lakkaa'amne.
- ⁶³ Isaan kunneen warra yeroo Musee fi Ele'aazaar lubichi dirreewwan Mo'aab irratti, Yordaanos biratti, Yerikoo gamatti Israa'eloota lakkaa'an sana lakkaa'amanii dha.
- ⁶⁴ Namoota karaa Museetii fi Aroon lubichaan Gammoojjii Siinaa keessatti lakkaa'aman keessaa namni tokko iyyuu isaan gidduu hin turre. ⁶⁵ Sababii WAAQAYYO waa'ee isaanii, "Isaan Gammoojjii keessatti ni dhumu" jedhee dubbatee tureef, Kaaleb ilma Yefunee fi Iyyaasuu ilma Nuuni malee isaan keessaa namni tokko iyyuu hin hafne.

¹ Balbala Minaasee ilma Yoosif keessaas intallan Zelofehaad ilma Heefer, ilma Gili'aad, ilma Maakiirri fi ilma Minaaseetu dhi'aate. Maqaan intallan sanaas Mahilaa, Nohii, Hoglaa, Miilkaa fi Tiirzaa dha. ² Isaanis balbala dunkaana wal ga'ii dura, fuula Musee fi Ele'aazaar lubichaa dura, fuula hooggantootaatii fi waldaa hundaa dura dhaabatani akkana jedhan; ³ "Abbaan keenya Gammoojjii keessatti du'e. Inni hooggantoota Qoorraahi kanneen WAAQAYYOTTI fincilan sana keessa hin turre. Garuu inni cubbudhuma ofii isaatiin du'e. Ilmaanin hin qabu ture. ⁴ Maaliif maqaan abbaa keenyaa sababii inni ilma hin qabneef balbala isaa keessaa bada? Firoota abbaa keenyaa gidduutti dhaala nuu kenni."

⁵ Museen dubbii isaanii sana fuula WAAQAYYOO duratti dhi'eesse; ⁶ WAAQAYYOS akkana jedheen; ⁷ "Wanni intallan Zelofehaad jedhan kun sirrii dha. Atis firoota abbaa isaanii gidduutti dhaala kenniif; dhaala abbaa isaanis isaaniif dabarsi.

⁸ "Israa'elootaan akkana jedhi; 'Yoo namni utuu ilma hin dhalchin du'e, dhaala isaa intala isaatiif dabarsaa. ⁹ Yoo inni intalas qabaachuu baate dhaala isaa obboloota isaatiif kennaa. ¹⁰ Yoo inni obboloota qabaachuu baate dhaala isaa obboloota abbaa isaatiif kennaa. ¹¹ Yoo abbaan isaa obboloota qabaachuu baate immoo dhaala isaa balbala isaa keessaa fira aantef kennaa; firri sun haa dhaalu. Kunis akkuma WAAQAYYO Musee ajaje sanatti saba Israa'eliif sirna seera qabeessa haa ta'u."

Iyyaasuun Iddoo Musee Bu'uu Isaa

¹² WAAQAYYO Museedhaan akkana jedhe; "Tulluu Abaariim kanatti ol ba'itii biyya ani saba Israa'eliif kenne ilaali. ¹³ Erga biyya sana argitee booddee atis akkuma obboleessa kee Aroon gara saba keetiitti walitti qabamta; ¹⁴ yeroo waldaan Gammoojjii Siin keessatti natti finceletti isin lachanuus ajaja kootti finciltanii turtaniitii. Isin bishaanota sana biratti fuula isaanii duratti qulqullina koo hin mul'ifne." Bishaanonni kunneenis bishaanota Mariibaa Qaadesh kan Gammoojjii Siin keessa jiranii dha.

¹⁵ Museenis WAAQAYYON akkana jedhe; ¹⁶ "WAAQAYYO Waaqni hafuurota nama hundaa waldaa kana irratti nama tokko haa muudu; ¹⁷ namichi kunis akka sabni WAAQAYYOO akkuma hoolota tiksee hin qabnee hin taaneef kan isaan dura gad ba'uu fi ol galu, kan gad isaan baasuu fi ol isaan galchuu dha."

¹⁸ WAAQAYYO Museedhaan akkana jedhe; "Iyyaasuun ilma Nuuni, namicha hafuurri keessa jiru sana fuudhii harka kee isa irra kaa'i. ¹⁹ Akka inni fuula Ele'aazaar lubichaatii fi fuula waldaa Israa'el hundaa dura dhaabatu godhi; fuuluma isaanii durattis isa muudi. ²⁰ Akka sabni Israa'el hundi isaaf ajajamuuf aangoo kee irraa kenniif. ²¹ Innis fuula Ele'aazaar lubichaa kan fuula WAAQAYYOO duratti Uriimiidhaan gaafatee murtii isaaf kennuu dura dhaabachuu qaba. Innii fi waldaan Israa'elootaa hundi ajaja isaatiin ba'u; ajajuma isaatiinis galu."

²² Museen akkuma WAAQAYYO isa ajaje sana godhe. Innis Iyyaasuun geessee akka inni fuula Ele'aazaar lubichaatii fi fuula waldaa Israa'el hundaa dura dhaabatu godhe. ²³ Ergasiis akkuma WAAQAYYO karaa Museetiin ajaje sana harka ofii isaa isa irra kaa'ee isa muude.

28

Aarsaa Guyyuma Guyyaan Dhi'effamu

¹ WAAQAYYO Museedhaan akkana jedhe; ² "Ajaja kana Israa'elootaaf kenni; akkanas jedhiin: 'Aarsaa nyaataa kan ibiddaan anaaf dhi'effamu kan fooliin isaa natti tolu sana yeroo murtaa'etti naa dhi'eessuu keessan mirkaneeffadhaa.' ³ Akkana isaanii jedhi; 'Aarsaan isin ibiddaan WAAQAYYOO dhi'eessitan isa kana: xobbaallaawwan hoolaa lama kanneen umurii isaanii waggaa tokko tokkootii fi kanneen hir'ina hin qabne aarsaa gubamu kan yeroo hunda guyyuma guyyaan dhi'effamu godhaa dhi'eessaa. ⁴ Xobbaallaa hoolaa tokko ganama, kaan immoo galgala dhi'eessi. ⁵ Kana wajjinis kennaa midhaanii kan daakuu bullaa'aa iifii* tokko irraa harka kudhan keessaa harki tokko zayitii ejersaa kan cuunfamee iinii* tokko harka afur keessaa harka tokkoon sukkuumame dhi'eessi. ⁶ Kunis aarsaa yeroo hunda gubamu kan fooliin isaa toluu fi kan ibiddaan WAAQAYYOO dhi'effamu kan Tulluu Siinaa irratti ajajamee dha. ⁷ Dhibaayyuu tokkoo tokkoo xobbaallaa hoolaa wajjin dhi'effamu dhugaatii cimaa iinii tokko irraa harka afur keessaa harka tokko haa ta'u; dhibaayyuu sanas iddoo qulqulluu keessatti WAAQAYYOO dhangaalaasi. ⁸ Xobbaallaa hoolaa kaan immoo akkuma kennaa midhaaniitii fi kan dhibaayyuu wajjin ganama dhi'eessite sanaa galgalas dhi'eessi. Kunis aarsaa ibiddaan dhi'effamu kan fooliin isaa WAAQAYYOTTI toluu dha.

* 28:5 28:5 Iifiin tokko kiiloo giraamii 22. † 28:5 28:5 Iiniin tokko liitirii 3.8.

Aarsaa Guyyaa Sanbataa

⁹ “Guyyaa Sanbataa xobbaallaawwan hoolaa lama kanneen umuriin isaanii waggaa tokko ta’ee fi hir’ina hin qabne aarsaa dhibaayyuuti fi kennaa midhaanii akkasumas kennaa midhaanii kan daakuu bullaa’aa iifii tokko irraa harka kudhan keessaa harki lama zayitiidhaan sukkuumame wajjin dhi’eessi. ¹⁰ Kunis aarsaa gubamu kan aarsaa yeroo hunda gubamuu fi dhibaayyuu isaatti dabalamee Sanbata Sanbataan dhi’effamuu dha.

Aarsaa Ji’a Ji’aan Dhi’effamu

¹¹ “Jalqaba ji’oota keessanii hundatti jiboota loonii lama, korbeessa hoolaa tokko, xobbaallaawwan hoolaa torba kanneen umuriin isaanii waggaa tokko ta’ee fi kanneen hir’ina hin qabne aarsaa gubamu godhaatii WAAQAYYOOF dhi’eessaa. ¹² Tokkoo tokkoo jiboota loonii wajjin kennaa midhaanii kan daakuu bullaa’aa iifii tokkoo irraa harka kudhan keessaa harki sadii zayitiidhaan sukkuumame, korbeessa hoolaa sana wajjinis kennaa midhaanii kan daakuu bullaa’aa iifii tokkoo irraa harka kudhan keessaa harki lama zayitiidhaan sukkuumame dhi’effamuu qaba; ¹³ tokkoo tokkoo xobbaallaa hoolaa wajjinis kennaa midhaanii kan daakuu bullaa’aa iifii tokkoo irraa harka kudhan keessaa harki tokko zayitiidhaan sukkuumame dhi’effamuu qaba. Kunis aarsaa gubamu kan ibiddaan WAAQAYYOOF dhi’effamuu fi fooliin isaa toluu dha. ¹⁴ Tokkoo tokkoo dibicha loonii wajjin dhibaayyuu daadhii wayinii iinii tokkoo irraa walakkaa isaa, tokkoo tokkoo xobbaallaa hoolaa wajjin iinii tokko irraa harka sadii keessaa harka tokko, korbeessa hoolaa sana wajjinis iinii tokko irraa harka afur keessaa harki tokko haa dhi’effamu. Kunis aarsaa gubamu kan waggaa keessatti baatii haaraatti dhi’effamuu dha. ¹⁵ Akkasumas aarsaa cubbuutiif korbeessa re’ee tokko WAAQAYYOOF dhi’eessaa; innis aarsaa yeroo hunda gubamuu fi dhibaayyuu isaatti dabalamee dhi’effama.

Faasiikaa

28:16-25 kwf - Bau 12:14-20; Lew 23:4-8; KeD 16:1-8

¹⁶ “Bultii kudha afuraffaa ji’a jalqabaatti Faasiikaan WAAQAYYOO ayyaanefmamuu qaba. ¹⁷ Bultii kudha shanaffaa ji’a kanaatti ayyaanatu jira; isinis guyyaa torba Maxinoo nyaattu. ¹⁸ Guyyaa jalqabaatti wal ga’ii qulqulluu qabaadhaa; hojii idilees hin hojjetinaa. ¹⁹ Jiboota loonii lama, korbeessa hoolaa tokko, xobbaallaawwan hoolaa torba kanneen umuriin isaanii waggaa tokko tokko ta’ee fi kanneen hundi isaanii hir’ina hin qabne aarsaa gubamu godhaatii ibiddaan WAAQAYYOOF dhi’eessaa. ²⁰ Tokkoo tokkoo dibicha loonii wajjinis kennaa midhaanii kan daakuu bullaa’aa iifii tokkoo irraa harka kudhan keessaa harki sadii zayitiidhaan sukkuumame, korbeessa hoolaa wajjin iifii tokko irraa harka kudhan keessaa harka lama, ²¹ xobbaallaawwan hoolaa torban wajjin tokkoo tokkoo xobbaallaa hoolaatiif iifii tokko irraa harka kudhan keessaa harka tokko dhi’eessi. ²² Akkasumas akka araarri isinii bu’uuf korbeessa re’ee tokko aarsaa cubbuutiif dhi’eessi. ²³ Kanas aarsaa gubamu kan yeroo hunda ganama ganama dhi’effamutti dabalattii dhi’eessaa. ²⁴ Haaluma kanaan nyaata aarsaa ibiddaan dhi’effamuu kan fooliin isaa WAAQAYYOTTI tolu sana bultii torbaaf guyyuma guyyaan dhi’eessaa; innis aarsaa gubamuu fi dhibaayyuu isaa kan yeroo hunda dhi’effamutti dabalamee haa dhi’effamu. ²⁵ Bultii torbaffaatti wal ga’ii qulqulluu qabaadhaa; hojii idilees hin hojjetinaa.

Ayyaana Torbanootaa

28:26-31 kwf - Lew 23:15-22; KeD 16:9-12

²⁶ “Ayyaana Torbanootaa keessa guyyaa ayyaana mataa midhaaniitti yeroo kennaa midhaan haaraa WAAQAYYOOF dhi’eessitan sana wal ga’ii qulqulluu godhadhaa; hojii idilees hin hojjetinaa. ²⁷ Jiboota loonii lama, korbeessa hoolaa tokkoo fi xobbaallaawwan hoolaa torba kanneen umuriin isaanii waggaa tokko tokko ta’ee aarsaa gubamu kan fooliin isaa WAAQAYYOTTI tolu dhi’eessaa. ²⁸ Tokkoo tokkoo dibicha loonii wajjinis kennaa midhaanii kan daakuu bullaa’aa iifii tokkoo irraa harka kudhan keessaa harki sadii zayitiidhaan sukkuumame haa dhi’effamu. Korbeessa hoolaa wajjin iifii tokko irraa harka kudhan keessaa harki lama, ²⁹ Xobbaallaawwan hoolaa torban sana wajjinis iifii tokko irraa harka kudhan keessaa harki tokko haa dhi’effamu. ³⁰ Akkasumas akka araarri isinii bu’uuf korbeessa re’ee tokko itti dabalaa dhi’eessaa. ³¹ Aarsaawwan kanneen dhibaayyuu isaanii wajjin, aarsaa gubamu kan yeroo hunda dhi’effamuu fi kennaa midhaan isaatti dabalattii dhi’eessaa; horiin sunis kan hir’ina hin qabne ta’uu isaanii mirkaneeffadhaa.

29

Ayyaana Malakataa

29:1-6 kwf - Lew 23:23-25

¹ "Guyyaa jalqaba ji'a torbaffaatti wal ga'ii qulqulluu godhadhaa; gaafas hojii idilee hin hojjetinaa. Guyyaan kun guyyaa isin itti malakata afuufanii dha. ² Dibicha loonii tokko, korbeessa hoolaa tokkoo fi xobbaallaawwan hoolaa torba kanneen umuriin isaanii waggaa tokko tokko ta'ee fi kanneen hundi isaanii hir'ina hin qabne aarsaa gubamu kan fooliin isaa WAAQAYYOTTI tolu dhi'eessaa. ³ Dibicha sana wajjinis kennaa midhaanii kan daakuu bullaa'aa iifii* tokkoo irraa harka kudhan keessaa harka sadii zayitiidhaan sukkuumame dhi'eessaa. Korbeessa hoolaa wajjinis iifii tokko irraa harka kudhan keessaa harka lama, ⁴ xobbaallaawwan hoolaa torban sana wajjinis iifii tokko harka kudhan keessaa harka tokko dhi'eessaa. ⁵ Akkasumas akka araari isinii buufamuuf korbeessa re'ee tokko itti dabalaatii aarsaa cubbuutiif dhi'eessaa. ⁶ Aarsaawwan kunneen akkuma amala isaaniitti aarsaawwan gubaman kanneen ji'a ji'attii fi guyyaa guyyaatti dhi'effamanii fi kennaawwan midhaaniitti fi dhibaayyuu isaaniitti dabalamanii dhi'effamanii dha. Isaanis aarsaawwan ibiddaan WAAQAYYOOT dhi'effaman kanneen fooliin isaanii tolu dha.

Guyyaa Araari Itti Buufamu

29:7-11 kwf - Lew 16:2-34; 23:26-32

⁷ "Bultii kurnaffaa ji'a torbaffaa kanaatti wal ga'ii qulqulluu godhadhaa; isinis gad of deebisaa; hojii tokko illees hin hojjetinaa. ⁸ Dibicha loonii tokko, korbeessa hoolaa tokkoo fi xobbaallaawwan hoolaa torba kanneen umuriin isaanii waggaa tokko tokko ta'ee kanneen hundi isaanii hir'ina hin qabne aarsaa gubamu kan fooliin isaa WAAQAYYOTTI tolu godhaa dhi'eessaa. ⁹ Dibicha sana wajjinis kennaa midhaanii kan daakuu bullaa'aa iifii tokko irraa harka kudhan keessaa harki sadii zayitiidhaan sukkuumamee dhi'eessaa; korbeessa hoolaa wajjinis iifii tokko irraa harka kudhan keessaa harka lama, ¹⁰ xobbaallaawwan hoolaa torban sana wajjinis iifii tokko irraa harka kudhan keessa harka tokko dhi'eessaa. ¹¹ Akkasumas aarsaa cubbuu kan araaraa buusuuf dhi'effamuu fi aarsaa gubamu kan yeroo hunda dhi'effamu, kennaa midhaan isaatii fi dhibaayyuu isaatii dabalaatii korbeessa re'ee tokko aarsaa cubbuutiif dhi'eessaa.

Ayyaana Dunkaana Qulqulluu

29:12-39 kwf - Lew 23:33-43; KeD 16:13-17

¹² "Bultii kudha shanaffaa ji'a torbaffaatti wal ga'ii qulqulluu godhadhaa; hojii idilee hin hojjetinaa. WAAQAYYOOTIS bultii torba ayyaana ayyaaneeffadhaa. ¹³ Jiboota loonii kudha sadii, korbeeyyii hoolaa lamaa fi xobbaallaawwan hoolaa kudha afur kanneen umuriin isaanii waggaa tokko tokko ta'ee fi kanneen hundi isaanii hir'ina hin qabne aarsaa gubamu kan fooliin isaa WAAQAYYOTTI toluu fi kan ibiddaan dhi'effamu dhi'eessaa. ¹⁴ Tokkoo tokkoo jiboota kudha sadaanii wajjinis kennaa midhaanii kan daakuu bullaa'aa iifii tokkoo irraa harka kudhan keessaa harki sadii zayitiidhaan sukkuumame dhi'eessaa; tokkoo tokkoo korbeeyyii hoolaa lamaan sanaa wajjinis iifii tokko irraa harka kudhan keessaa harka lama, ¹⁵ tokkoo tokkoo xobbaallaawwan hoolaa kudha afran sanaa wajjinis iifii tokko irraa harka kudhan keessaa harka tokko dhi'eessaa. ¹⁶ Akkasumas aarsaa gubamu kan yeroo hunda dhi'effamu kennaa midhaan isaatii fi dhibaayyuu isaatii dabalaatii korbeessa re'ee tokko aarsaa cubbuutiif dhi'eessaa.

¹⁷ "Bultii lammaffaatti jiboota loonii kudha lama, korbeeyyii hoolaa lamaa fi xobbaallaawwan hoolaa kudha afur kanneen umuriin isaanii waggaa tokko tokko ta'ee fi kanneen hundi isaanii hir'ina hin qabne dhi'eessaa. ¹⁸ Akka lakkoobsa murtaa'eettii fi akkuma amala isaaniitti jiboota loonii, korbeeyyii hoolaatii fi xobbaallaawwan hoolaa sana wajjin kennaa midhaan isaaniitti fi dhibaayyuu isaanii dhi'eessaa. ¹⁹ Akkasumas aarsaa gubamu kan yeroo hunda dhi'effamu, kennaa midhaan isaatii fi dhibaayyuu isaaniitti dabalaatii korbeessa re'ee tokko aarsaa cubbuutiif dhi'eessaa.

²⁰ "Bultii sadaffaatti jiboota loonii kudha tokko, korbeeyyii hoolaa lamaa fi xobbaallaawwan hoolaa kudha afur kanneen umuriin isaanii waggaa tokko tokko ta'ee fi kanneen hundi isaanii hir'ina hin qabne dhi'eessaa. ²¹ Akka lakkoobsa murtaa'eettii fi akkuma amala isaaniitti jiboota loonii, korbeeyyii hoolaa sanaa fi xobbaallaawwan hoolaa sana wajjinis kennaa midhaan isaaniitti fi dhibaayyuu isaanii dhi'eessaa.

* 29:3 Iifiin tokko kiiloo giraamii 22.

²² Akkasumas aarsaa gubamu kan yeroo hunda dhi'effamu, kennaa midhaan isaatii fi dhibaayyuu isaatii dabalaatii korbeessa re'ee tokko aarsaa cubbuutiif dhi'eessaa.

²³ " 'Bultii afuraffaatti jiboota loonii kudhan, korbeeyyii hoolaa lamaa fi xobbaallaawwan hoolaa kudha afur kanneen umuriin isaanii waggaa tokko tokko ta'ee fi kanneen hundi isaanii hir'ina hin qabne dhi'eessaa. ²⁴ Akka lakkoobsa murtaa'eettii fi akkuma amala isaaniitti jiboota loonii, korbeeyyii hoolaa sanaa fi xobbaallaawwan hoolaa sana wajjin kennaa midhaan isaaniitti fi dhibaayyuu isaanii dhi'eessaa.

²⁵ Akkasumas aarsaa gubamu kan yeroo hunda dhi'effamu, kennaa midhaan isaatii fi dhibaayyuu isaatii dabalaatii korbeessa re'ee tokko aarsaa cubbuutiif dhi'eessaa.

²⁶ " 'Bultii shanaffaatti jiboota loonii sagal, korbeeyyii hoolaa lamaa fi xobbaallaawwan hoolaa kudha afur kanneen umuriin isaanii waggaa tokko tokko ta'ee fi kanneen hundi isaanii hir'ina hin qabne dhi'eessaa. ²⁷ Akka lakkoobsa murtaa'eettii fi akkuma amala isaaniitti jiboota loonii, korbeeyyii hoolaa sanaa fi xobbaallaawwan hoolaa sana wajjin kennaa midhaan isaaniitti fi dhibaayyuu isaanii dhi'eessaa.

²⁸ Akkasumas aarsaa gubamu kan yeroo hunda dhi'effamu, kennaa midhaan isaatii fi dhibaayyuu isaatii dabalaatii korbeessa re'ee tokko aarsaa cubbuutiif dhi'eessaa.

²⁹ " 'Bultii ja'ffaatti jiboota loonii saddeeti, korbeeyyii hoolaa lamaa fi xobbaallaawwan hoolaa kudha afur kanneen umuriin isaanii waggaa tokko tokko ta'ee fi kanneen hundi isaanii hir'ina hin qabne dhi'eessaa. ³⁰ Akka lakkoobsa murtaa'eettii fi akkuma amala isaaniitti jiboota loonii, korbeeyyii hoolaa sanaa fi xobbaallaawwan hoolaa sana wajjin kennaa midhaan isaaniitti fi dhibaayyuu isaanii dhi'eessaa.

³¹ Akkasumas aarsaa gubamu kan yeroo hunda dhi'effamu, kennaa midhaan isaatii fi dhibaayyuu isaatii dabalaatii korbeessa re'ee tokko aarsaa cubbuutiif dhi'eessaa.

³² " 'Bultii torbaffaatti jiboota loonii torba, korbeeyyii hoolaa lamaa fi xobbaallaawwan hoolaa kudha afur kanneen umuriin isaanii waggaa tokko tokko ta'ee fi kanneen hundi isaanii hir'ina hin qabne dhi'eessaa. ³³ Akka lakkoobsa murtaa'eettii fi akkuma amala isaaniitti jiboota loonii, korbeeyyii hoolaa sanaa fi xobbaallaawwan hoolaa sana wajjin kennaa midhaaniitti fi dhibaayyuu isaanii dhi'eessaa. ³⁴ Akkasumas aarsaa gubamu kan yeroo hunda dhi'effamu, kennaa midhaan isaatii fi dhibaayyuu isaatii dabalaatii korbeessa re'ee tokko aarsaa cubbuutiif dhi'eessaa.

³⁵ " 'Bultii saddeettaffaatti wal ga'ii qulqulluu godhadhaa; hojii idilee hin hojjetinaa.

³⁶ Dibicha loonii tokko, korbeessa hoolaa tokkoo fi xobbaallaawwan hoolaa torba kanneen umuriin isaanii waggaa tokko tokko ta'ee fi kanneen hundi isaanii hir'ina hin qabne aarsaa gubamu kan ibiddaan dhi'effamuu fi kan fooliin isaa WAAQAYYOTTI tolu dhi'eessaa. ³⁷ Akka lakkoobsa murtaa'eettii fi akkuma amala isaaniitti dibicha loonii, korbeessa hoolaa sanaa fi xobbaallaawwan hoolaa sana wajjin kennaa midhaan isaaniitti fi dhibaayyuu isaanii dhi'eessaa. ³⁸ Akkasumas aarsaa gubamu kan yeroo hunda dhi'effamu, kennaa midhaan isaatii fi dhibaayyuu isaatii dabalaatii korbeessa re'ee tokko aarsaa cubbuutiif dhi'eessaa.

³⁹ " 'Aarsaa keessan kan gubamu, kennaa midhaan keessanii, dhibaayyuu keessanii fi aarsaa keessan kan nagaa, kan wareega keessaniitti fi aarsaa fedhii keessaniin dhi'eessitanitti dabalaatii ayyaana keessan beekamaa sana irratti WAAQAYYOFF dhi'eessaa.' "

⁴⁰ Museenis waan WAAQAYYO isa ajaje hunda Israa'elootatti hime.

30

Wareegawwan

¹ Museen abbootii gosoota Israa'eliin akkana jedhe: "Wanni WAAQAYYO ajaje kanaa dha: ² Namni tokko yoo WAAQAYYOFF waa wareege yookaan akka waan tokko hojjetu ofumaa isaatiin yoo kakate, inni kakuu ofii sana hin cabsin; qooda kanaa waan dubbate hunda guutuu qaba.

³ "Yoo intalli tokko utuma mana abbaa ishee jirtuu WAAQAYYOFF wareega wareegde yookaan waan tokko gochuudhaaf dirqama keessa seente, ⁴ yoo abbaan ishees waa'ee wareega ishee yookaan dirqama keessa seenuu ishee dhaga'ee homaa isheen jechuu baate wareegni isheettii fi dirqamni isheen seente sun hundi hin geeddaramu. ⁵ Yoo abbaan ishee waan kana dhaga'ee ishee dhowwee garuu wareega ishee yookaan kakuu isheen ittiin dirqama seente keessaa tokko iyyuu hin guutamu; sababii abbaan ishee ishee dhowweef WAAQAYYO ishee ni bilisoomsa.

⁶ "Yoo isheen erga wareega seentee booddee yookaan erga dubbii utuu itti hin yaadin dubbatteen dirqama seentee booddee heerumte, ⁷ dhirsi ishees yoo waan kana dhaga'ee homaa isheen jechuu baate wareegni ishee yookaan dirqamni isheen seente sun hin

geeddaramu. ⁸ Garuu dhirsi ishee yoo yeroo waan kana dhaga'utti ishee dhowwe, wareega ishee kan dirqama keessa ishee galchu yookaan waadaa isheen utuu itti hin yaadin dirqama keessa of galchite sana ishee jalaa diiga; WAAQAYYOS ishee bilisoomsa.

⁹ "Wareegni haadha hiyyeessaa yookaan dubartii dhirsaa jalaa baatee, dirqamni isheen seente kam iyyuu ishee qabata.

¹⁰ "Yoo dubartiin dhirsaa ishee wajjin jiraattu tokko wareega tokko wareegdee yookaan waan tokko gochuudhaaf kakuudhaan dirqama keessa of galchite, ¹¹ dhirsi ishees yoo waan kana dhaga'ee homaa isheedhaan jechuu baate yookaan yoo ishee dhowwu baate wareegni ishee yookaan waadaan isheen ittiin dirqama keessa of galchite sun hundi hin geeddaramu. ¹² Garuu yoo dhirsi ishee yeroo waan kana dhaga'utti ishee jalaa diige, wareega ishee yookaan waadaa afaan isheetii ba'e keessaa tokko iyyuu hojii irra hin oolu; sababii dhirsi ishee ishee jalaa diigeef, WAAQAYYO ishee bilisoomsa. ¹³ Dhirsi ishee wareega isheen wareegdu yookaan waadaa isheen gad of qabuuf kakuudhaan seentu kam iyyuu fudhachuu yookaan diiguu ni danda'a. ¹⁴ Garuu yoo dhirsi ishee guyyuma guyyaan homaa isheen jechuu baate, inni wareega ishee yookaan dirqama ishee irra jiru hunda fudhateera jechuu dha. Inni sababii gaafa waa'ee waan kanaa dhaga'ee sana homaa isheedhaan hin jedhiniif waan sana fudhateera. ¹⁵ Ta'us inni yoo erga waa'ee waan kanaa dhaga'ee booddee waadaa sana diige yakka isheetti ni gaafatama."

¹⁶ Isaan kunneen seerawwan dhirsaa fi niitii gidduu akkasumas abbaa fi intala isaa kan yeroo ijoolummaa isheetti mana isaa jirtu gidduu jiraachuu qabu kan WAAQAYYO Musee ajaje dha.

31

Midiyaanota Irratti Haaloo Ba'uu

¹ WAAQAYYO Museedhaan akkana jedhe; ² "Saba Israa'eliif jedhiitii warra Midiyaan irratti haaloo ba'i. Ergasii ati gara saba keetiitti walitti qabamta."

³ Kana irratti Museen saba sanaan akkana jedhe; "Akka isaan warra Midiyaanitti duulanii haaloo WAAQAYYOO isaan irratti ba'aniif namoota keessan keessaa muraasa hidhachiisaa. ⁴ Tokkoo tokkoo gosa Israa'el keessaa nama kuma tokko tokkoo duulatti ergaa." ⁵ Akkasitti tokkoo tokkoo gosa Israa'el keessaa namoonni kumni tokko tokko walitti buufamanii namni kumni kudha lama lolaaf hidhate. ⁶ Museenis tokkoo tokkoo gosaa keessaa nama kuma tokko tokko Fiinehaas ilma Ele'aazaar lubichaa isa mi'a iddoo qulqulluutii fi malakata afuufamu harkatti qabate sana wajjin gara waraanaatti erge.

⁷ Isaanis akkuma WAAQAYYO Musee ajaje sanatti warra Midiyaan lolanii dhiira hunda ajjeesan. ⁸ Mootonni Midiyaan shanan jechuunis Eewii, Reqem, Zuuri, Huurii fi Rebaanis warra ajjeefaman keessa turan. Akkasumas Bala'aam ilma Be'oor goraadeedhaan ajjeesan. ⁹ Israa'eloonni dubartootaa fi ijoollee warra Midiyaan booji'an; loon, bushaayee fi qabeenya isaanii hundas ni saaman. ¹⁰ Magaalaawwan Midiyaanonni keessa jiraatan hundaa fi qubatawwan isaanii hunda ibiddaan guban. ¹¹ Isaanis waan booji'anii fi waan saaman hunda namaa fi horii illee fuudhanii ¹² warra booji'an, waan qabataniif fi waan saaman gara iddoo qubata isaanii kan fuula Yerikoo dura, Yordaanos cina, dirreewwan Mo'aab keessa jiruutti gara Museetti, gara Ele'aazaar lubichaatii fi gara waldaa Israa'elitti fidan.

¹³ Museen, Ele'aazaar lubichii fi hooggantoonni waldaa hundi qubataan alatti isaan simachuuf gad ba'an. ¹⁴ Museenis ajajjuuwwan loltootaa jechuunis ajajjuuwwan kumaatii fi ajajjuuwwan dhibbaa kanneen lolaa galanitti aare.

¹⁵ Innis akkana jedhe isaan gaafate; "Isin maaliif dubartoota hunda hambifan? ¹⁶ Kunoo warri waan Phe'ooritti ta'ee sana keessatti gorsa Bala'aam fudhachuudhaan akka dha'ichi saba WAAQAYYOO irra bu'uuf Israa'eloota WAAQAYYO irraa deebisan isaan turan. ¹⁷ Ammas ilmaan dhiiraa hunda fixaa; akkasumas dubartii dhiira wajjin ciifte hunda ajjeesaa. ¹⁸ Garuu dubara takkumaa dhiira wajjin hin ciisin ofii keessaniif hambifadhaa.

¹⁹ "Isin keessaa namni nama ajjeese kam iyyuu yookaan namni nama ajjeefame tuqe kam iyyuu bultii torba qubataan ala haa turu. Bultii sadaffaa fi bultii torbaffaattis ofii keessanii fi boojuu keessan qulqulleessaa. ²⁰ Uffata hunda akkasumas waan gogaa irraa, rifeensa re'ee irraa yookaan muka irraa hojjetame hunda qulqulleessaa."

²¹ Ergasiis Ele'aazaar lubichi loltoota duula dhaqanii turan sanaan akkana jedhe; "Qajeelfamni seeraa kan WAAQAYYO Museef kenne kanaa dha: ²² Warqee, meetii, naasii, sibiila, qorqorroo, dilaalii fi ²³ wanni ibidda irraa hafuu danda'u kam iyyuu ibidda keessa dabarfamee qulqullaa'uu qaba. Garuu wanni sun bishaan qulqullaa'ummaatiinis qulqulleeffamuu qaba. Wanni ibidda irra hafuu hin dandeenye kam iyyuu bishaan

sanaan qulqulleeffama. ²⁴ Guyyaa torbaffaatti uffata keessan miiccadhaa; isinis ni qulqulleffamtu. Ergasii qubatatti galuu dandeessu.”

Boojuu Qooddachu

²⁵ WAAQAYYO Museedhaan akkana jedhe; ²⁶ “Ati, Ele’aazaar lubichii fi abbootiin maatii waldaa sanaa namootaa fi horii booji’aman lakkaa’aa. ²⁷ Boojuu sanas loltoota duula dhaqanii turanii fi waldaa hunda gidduutti iddoo lamatti qoodi. ²⁸ Loltoota duulan irraa namas ta’u loon, harroota, hoolota yookaan re’oota dhibba shan keessaa tokko WAAQAYYOF gibira fuudhi. ²⁹ Gibira sanas walakkaa qooda isaanii irraa fuudhii qooda WAAQAYYOO godhiitii Ele’aazaar lubichatti kenni. ³⁰ Walakkaa qooda saba Israa’el irraa immoo namas ta’u loon, harroota, hoolota, re’oota yookaan horii biraa shantama keessaa tokko fuudhiitii Lewwota warra itti gaafatamtoota dunkaana WAAQAYYOO ta’anitti kenni.” ³¹ Musee fi Ele’aazaar lubichi akkuma WAAQAYYO Musee ajaje sana godhan.

³² Wanti boojuu loltoonni fudhatan irraa hafe hoolota 675,000, ³³ loon 72,000, ³⁴ harroota 61,000, ³⁵ dubartoonni takkumaa dhiira wajjin hin ciisin 32,000 turan.

³⁶ Qoodni walakkaa kan warra duulaniif qoodame:

Hoolota 337,500 ³⁷ keessaa gibirri WAAQAYYOO 675 ture;

³⁸ loon 36,000 keessaa gibirri WAAQAYYOO 72 ture;

³⁹ harroota 30,500 keessaa gibirri WAAQAYYOO 61 ture;

⁴⁰ nama 16,000 keessaa gibirri WAAQAYYOO 32 ture.

⁴¹ Museen akkuma WAAQAYYO isa ajaje sanatti gibira sana qooda WAAQAYYOO godhee Ele’aazaar lubichatti kenne.

⁴² Qooda walakkaa kan Museen warra duulan irraa Israa’elootaaf qoode: ⁴³ Walakkaan boojuu kan waldaa sanaa hoolota 337,500, ⁴⁴ loon 36,000, ⁴⁵ harroota 30,500, ⁴⁶ nama 16,000 ture. ⁴⁷ Museen akkuma WAAQAYYO isa ajaje sanatti walakkaa saba Israa’el irraa namaa fi horii shantama keessaa tokko fuudhee Lewwota warra itti gaafatamtoota dunkaana WAAQAYYOO ta’anitti kenne.

⁴⁸ Ergasii ajajjuuwwan loltoota kumaatama irratti aangoo qaban jechuunis ajajjuuwwan kumaatii fi ajajjuuwwan dhibbaa gara Musee dhaqanii ⁴⁹ akkana jedhaniin; “Nu garboonni kee loltoota ajaja keenya jala jiran lakkoofneerra; namni tokko iyyuu hin hir’anne. ⁵⁰ Kanaafuu nu waan tokkoon tokkoon keenya arganne jechuunis mi’a warqee, arboora, bitawoo, qubeelaa chaappaa, lootii fi amartii mormaa akka fuula WAAQAYYOO duratti aarsaa araara nu buusuuf kenna WAAQAYYOF dhi’eeffamu goonee fidneerra.”

⁵¹ Musee fi Ele’aazaar lubichis warqee fi faayawwan harkaan tolfaman hunda isaan harkaa fuudhan. ⁵² Warqeen ajajjuuwwan kumaatii fi ajajjuuwwan dhibbaa kennan kanneen Musee fi Ele’aazaar akka kennaatii WAAQAYYOF dhi’eessan hundi saqilii 16,750 ulfaatu ture. ⁵³ Tokkoon tokkoon loltootaa ofii isaaniitiif boojuu fudhatanii turan. ⁵⁴ Musee fi Ele’aazaar lubichis warqee sana ajajjuuwwan kumaatii fi ajajjuuwwan dhibbaa harkaa fuudhanii akka Israa’eloonni fuula WAAQAYYOO duratti ittiin yaadatamaniif dunkaana wal ga’iitti ol galchan.

32

Gosoota Yordaanos Gamaa

¹ Ilmaan Ruubeenii fi ilmaan Gaad warri loonii fi bushaayee hedduu qaban akka biyyi Ya’izeerii fi biyyi Gili’aad horii isaaniitiif tolu argan. ² Isaan gara Musee, gara Ele’aazaar lubichaatii fi gara hooggantoota waldaa dhufanii akkana jedhan; ³ “Axaaroti, Diiboon, Ya’izeer, Niimraa, Heshboon, Ele’aalee, Sebaamaa, Neboo fi Be’oon, ⁴ biyyi WAAQAYYO fuula waldaa Israa’el duratti rukute sun horiif tolaa dha; nu tajaajiltoonni kees horii qabna. ⁵ Yoo nu fuula kee duratti fudhatama argannee jiraanne biyyi kun nu tajaajiltoota keetiiif handhuuraa ta’ee haa kennamu. Akka nu Yordaanos gama ceenus hin godhin.”

⁶ Museenis ilmaan Gaadii fi ilmaan Ruubeeniin akkana jedhe; “Obboloonni keessan duula dhaqanii isin immoo as teessuu? ⁷ Isin maaliif akka Israa’eloonni biyya WAAQAYYO isaanii kenne sanatti ce’anii hin galleef abdi isaan kutachiiftuu? ⁸ Kun waanuma abbootiin keessan gaafa ani akka isaan biyyattii ilaalaniif jedhee Qaadesh Barnee irraa isaan erge sana hojjetanii dha. ⁹ Isaanis erga gara Sulula Eshkool dhaqanii biyya sana arganii booddee akka Israa’eloonni biyya WAAQAYYO isaaniif kennetti hin galleef abdi isaan kutachiisan. ¹⁰ Dheekkamsi WAAQAYYOS guyyuma sana boba’e; innis akkana jedhee kakate; ¹¹ ‘Waan isaan garaa guutuudhaan na faana deemuu didaniif, namoota

waggaa digdamaatii fi hammasii olii kanneen biyya Gibxiitii ba'anii dhufan keessaa namni tokko iyyuu biyya ani Abrahaamiif, Yisihaaqii fi Yaaqoobiif waadaa gale sana hin argu. ¹² Kaaleb ilma Yefunee kan gosa Qeneezii fi Iyyaasuu ilma Nuuni malee namni tokko iyyuu hin argu; isaan lamaan garaa guutuudhaan WAAQAYYO duukaa bu'aniiruutii.' ¹³ Dheekkamsi WAAQAYYOO Israa'el irratti boba'e; innis hamma dhaloonni fuula isaa duratti waan hamaa hojjete sun hundi dhumutti akka isaan waggaa afurtama gammoojjii keessa jooran godhe.

¹⁴ "Yaa sanyii cubbamootaa nana, isin kunoo dheekkamsa WAAQAYYOO kan Israa'el irratti boba'e sana ittuma caalchisuuf iddoo abbootii keessanii buutaniirtu. ¹⁵ Yoo isin isa duukaa bu'uu irraa garagaltan inni ammas gammoojjii kana keessatti saba kana hunda ni dhiisa; isinis uummata kana ni balleessitu."

¹⁶ Isaan gara isaa dhufanii akkana jedhaniin; "Nu asitti horii keenyaaf dallaa, dubartootaa fi ijoollee keenyaaf immoo magaalaawwan ijaarra. ¹⁷ Nu garuu hamma lafa isaaniitiin isaan geenyutti hidhannee Israa'el dura deemuuf qophaa'oo dha. Yeroo kanatti akka jiraattoonni biyyattii isaan hin tuqneef dubartoonni fi ijoolleen keenya magaalaawwan dallaa jabaa qaban keessa haa jiraatan. ¹⁸ Hamma tokkoon tokkoon Israa'elootaa dhaala ofii isaanii argatanitti nu mana keenyatti hin deebinu. ¹⁹ Sababii dhaalli keenya laga Yordaanos irraa gara ba'aatti nuuf kennameef nu Yordaanos irraa gama kaaniin isaan wajjin waan dhaallu hin qabnu."

²⁰ Museenis akkana isaaniin jedhe; "Yoo isin waan kana gootan, yoo isin fuula WAAQAYYOO duratti hidhattanii duulaaf kaatan, ²¹ yoo isin hundinuu hamma inni diinota ofii isaa fuula ofii isaa duraa ari'ee baasutti hidhattanii fuula WAAQAYYOO dura Yordaanosin ceetan, ²² yeroo biyyattiin fuula WAAQAYYOO duratti mo'atamtutti isin itti gaafatama WAAQAYYOO fi saba Israa'eliif qabdan irraa ni bilisoomtu. Biyyi sunis fuula WAAQAYYOO duratti dhaala keessan ta'a.

²³ "Garuu isin yoo waan kana gochuu baattan, kunoo WAAQAYYOTTI cubbuu hojjechuu keessan; akka cubbuun keessan isin argatu illee beekkadhaa. ²⁴ Dubartootaa fi ijoollee keessaniif magaalaawwan, bushaayee keessaniif immoo dallaa ijaaraa; isin garuu waan waadaa galtan sana guutaa."

²⁵ Ilmaan Gaadii fi ilmaan Ruubeen Museedhaan akkana jedhan; "Nu garboonni kee akkuma gooftaan keenya nu ajaju goona. ²⁶ Ijoolleen keenyaa fi niittonni keenya, bushaayeen keenyaa fi loon keenya, asuma magaalaawwan Gili'aaditti haa hafan. ²⁷ Nu garboonni kee garuu tokkoon tokkoon keenya akkuma gooftaan keenya jedhe sana duulaaf qophoofnee fuula WAAQAYYOO duratti duuluuf ni ceena."

²⁸ Ergasiis Museen waa'ee isaaniin Ele'aazaar lubichaaf, Iyyaasuu ilma Nuunitee fi abbootii maatii gosoota Israa'eliif ajaja kenne. ²⁹ Innis akkana isaaniin jedhe; "Yoo ilmaan Gaadii fi ilmaan Ruubeen, namni waraanaaf hidhate hundi fuula WAAQAYYOO duratti isin wajjin Yordaanos ce'e, yommuu biyyattiin isin harka galtutti biyya Gili'aad sana kennaafii. ³⁰ Garuu isaan yoo duulaaf hidhattanii isin wajjin ce'uu baatan, Kana'aan keessatti isin wajjin lafa haa argatan."

³¹ Ilmaan Gaadii fi ilmaan Ruubeenis akkana jedhanii deebii kennan; "Nu garboonni kee waan WAAQAYYO jedhe ni goona. ³² Nu mi'a lolaa hidhannee fuula WAAQAYYOO dura ceene Kana'aan seenna; garuu qabeenyi nu dhaallu Yordaanosiin gamatti nuuf haa hafu."

³³ Museenis mootummaa Sihoon mootii Amoorotaa fi mootummaa Oogi mootii Baashaan jechuunis biyya sana guutuu magaalaawwan isaaniitii fi bulchiinsa naannoo isaanii jiru sana ilmaan Gaadiitiif, ilmaan Ruubeeniitii fi walakkaa gosa Minaasee ilma Yoosefiif kenne.

³⁴ Ilmaan Gaadis magaalaawwan Diiboon, Axaaroti, Aro'er, ³⁵ Atroot Shoofaan, Ya'izeer, Yogbihaa, ³⁶ Beet Niimraa fi Beet haaraan magaalaawwan jajjaboo godhanii ijaaran. Bushaayee isaaniitiifis dallaa ijaarratan. ³⁷ Ilmaan Ruubeenis magaalaawwan Heshboon, Ele'aaleenii fi Kiriyaataayim, ³⁸ akkasumas Neboo fi Ba'aal Me'oon jechuunis magaalaawwan maqaan isaanii geeddaramee fi Sibimaa deebisanii ijaaran. Isaanis magaalaawwan deebisanii ijaaran sanaaf maqaa baasan.

³⁹ Ijoolleen Maakiir ilma Minaasees gara Gili'aad dhaqanii biyyattii qabatanii Amoorota achi turan ari'anii baasan. ⁴⁰ Museenis Gili'aadin ijoollee Maakiir sanyii Minaaseetiif kenne; isaanis achi qabatan. ⁴¹ Yaa'iir ilmi Minaasees dhaqee gandoota isaanii fudhatee gandoota Yaa'irootaa jedhee moggaase. ⁴² Noobaan immoo Qeenaatii fi gandoota naannoo isaa jiran qabatee Noobaa jedhee maqaa ofii isaatiin waame.

33

Adeemsa Israa'elootaa

¹ Sadarkaaleen adeemsa saba Israa'el kan yeroo isaan kutaa kutaadhaan qajeelfama Museetii fi Aroon jalatti biyya Gibxii ba'anii kana. ² Museen ajaja WAAQAYYOOTIIN sadarkaalee adeemsa isaanii galmeesse. Adeemsi isaanii sadarkaa sadarkaadhaan kunoo ti:

³ Israa'eloonni ji'a jalqabaa keessa guyyaa kudha shanaffaatti guyyaa Faasiikaatti aanu Raamseedhaa ka'anii qajeelan. Isaanis utuma warri Gibxii hundi isaan arganuu irree jabaadhaan deeman; ⁴ yeroo kana warri Gibxi ilmaan hangafa isaanii kanneen WAAQAYYO isaan gidduudhaa fixe hunda awwaallachaa turan; waaqota warra Gibxitti WAAQAYYO muree tureetii.

⁵ Israa'eloonnis Raamseedhaa ka'anii Sukooti qubatan.

⁶ Sukootii ka'anii Eetaam ishee qarqara gammoojjiitti argamtu keessa qubatan.

⁷ Eetaamii ka'anii gara Phii Hahiroti kan gama ba'a Ba'aal Zefooniitti argamtuutti garagalanii Migdool bira qubatan.

⁸ Fiihahirootii ka'anii galaana keessa darbanii gammoojjii seenan; isaanis Gammoojjii Eetaamii keessa bultii sadii deemanii Maaraa qubatan.

⁹ Maaraadhaa ka'anii Eelim lafa burqaa kudha lamaa fi muka meexxii torbaatama qabu sana dhaqanii achi qubatan.

¹⁰ Eelimii ka'anii Galaana Diimaa cina qubatan.

¹¹ Galaana Diimaadhaa ka'anii Gammoojjii Siin keessa qubatan.

¹² Gammoojjii Siiniitii ka'anii Dofqaa qubatan.

¹³ Dofqaadhaa ka'anii Aaluush qubatan.

¹⁴ Aaluushii ka'anii Refidiim lafa bishaan namni dhugu hin jirre qubatan.

¹⁵ Refidiimii ka'anii Gammoojjii Siinaa keessa qubatan.

¹⁶ Gammoojjii Siinaatii ka'anii Qiibrooti Hataabaa qubatan.

¹⁷ Qiibrooti Hataabaadhaa ka'anii Haxerooti qubatan.

¹⁸ Haxerootii ka'anii Riitmaa qubatan.

¹⁹ Riitmaadhaa ka'anii Rimoon Phereez qubatan.

²⁰ Rimoon Phereezii ka'anii Libnaa qubatan.

²¹ Libnaadhaa ka'anii Riisaa qubatan.

²² Riisaadhaa ka'anii Qehelaataa qubatan.

²³ Qehelaataadhaa ka'anii Gaara Shaafer bira qubatan.

²⁴ Gaara Shaafer biraa ka'anii Haraadaa qubatan.

²⁵ Haraadaa ka'anii Maqiheelooti qubatan.

²⁶ Maqiheelootii ka'anii Tahaati qubatan.

²⁷ Tahaatii ka'anii Taaraa qubatan.

²⁸ Taaraadhaa ka'anii Miitiqaa qubatan.

²⁹ Miitiqaadhaa ka'anii Hashmoonaa qubatan.

³⁰ Hashmoonadhaa ka'anii Mooserooti qubatan.

³¹ Mooserootii ka'anii Benee Yaa'akaan qubatan.

³² Benee Yaa'akaanii ka'anii Hoori Hagidgaad qubatan.

³³ Hoori Hagidgaadii ka'anii Yoxbaataa qubatan.

³⁴ Yoxbaataadhaa ka'anii Abroonaa qubatan.

³⁵ Abroonaadhaa ka'anii Eziyoon Geber qubatan.

³⁶ Eziyoon Geberii ka'anii Gammoojjii Siin keessa Qaadesh qubatan.

³⁷ Qaadeshii ka'anii daarii biyya Edoom irra Tulluu Hoori bira qubatan. ³⁸ Aroon lubichis ajaja WAAQAYYOOTIIN Tulluu Hooriitti ol ba'e; innis erga Israa'eloonni biyya Gibxiitii ba'anii booddee waggaa afurtamaffaatti guyyaa jalqaba ji'a shanaffaatti achitti du'e. ³⁹ Aroon yommuu Tulluu Hoori irratti du'e sana umuriin isaa waggaa dhibba tokkoo fi digdamii sadii ture.

⁴⁰ Mootiin Aaraad namichi Kana'aan kan Negeeb keessa jiraachaa ture sun akka sabni Israa'el dhufaa jiru dhaga'e.

⁴¹ Isaanis Tulluu Hooriitii ka'anii Zalmoonaa qubatan.

⁴² Zalmoonadhaa ka'anii Phuunon qubatan.

⁴³ Phuunoniidhaa ka'anii Oobooti qubatan.

⁴⁴ Oobootii ka'anii daarii Mo'aab irra Iyyee Abaariim qubatan.

⁴⁵ Iyyimii ka'anii Diiboongaad qubatan.

⁴⁶ Diiboongaadii ka'anii Almoon Diiblaatayim qubatan.

⁴⁷ Almoon Diiblaatayimii ka'anii Neboo tulluuwwan Abaariim bira qubatan.

⁴⁸ Tulluuwwan Abaariimiitii ka'anii dirreewwan Mo'aab irra, Yordaanos bira, Yerikoo gama qubatan. ⁴⁹ Isaanis dirreewwan Mo'aab kan Yordaanos cina Beet Yashiimootii jalqabee hamma Abeel Shixiimiitti jiru sana irra qubatan.

⁵⁰ WAAQAYYOS dirreewwan Mo'aab irratti, Yordaanos biratti, Yerikoo gamatti Museedhaan akkana jedhe; ⁵¹ "Akkana jedhii saba Israa'elitti dubbadhu; 'Isin yommuu Yordaanos ceetanii Kana'aanitti galtanitti, ⁵² jiraattota biyya sanaa of duraa ari'aa baasaa. Fakkiwwan isaanii kanneen soofamanii hojjetamanii fi waaqota isaanii kanneen baqfamanii tolfaman hunda barbadeessaa; gaarran sagadaa isaanii hundas diigaa. ⁵³ Sababii ani biyyattii handhuuraa godhee isinii kenneef, biyyattii dhuunfadhaa keessa jiraadhaa. ⁵⁴ Biyya sanas maatiiwwan keessaniif dhaala godhaatii ixaadhaan gargari qoodaa; maatii baay'eedhaaf dhaala guddaa, maatii muraasaaf immoo dhaala xinnaa kenna. Iddoon ixaadhaan isaanii ba'e kan isaanii ta'a. Isinis akkuma gosoota abbootii keessaniitti dhaalaa.

⁵⁵ "Garuu yoo isin warra biyya sana jiraatan achii baasuu baattan, warri isin akka isaan achii jiraataniif dhiifan sun akka huuba ija keessaatii fi akka qoraattii cinaacha keessaa isinitti ta'u. Biyya isin keessa jiraattan keessattis isin rakkisu. ⁵⁶ Anis waanan isaan gochuu yaade sana isinitti nan fida."

34

Daangaawwan Kana'aan

¹ WAAQAYYO Museedhaan akkana jedhe; ² "Akkana jedhii Israa'eloota ajaji: 'Yeroo isin Kana'aan seentanitti biyyi akka dhaalaatti isinii kennamtu sun daangaawwan kanneen qabaatti:

³ "Daangaan keessan kan gama kibbaa Gammoojjii Siin kan qarqara Edoom irra jirtu irraa jalqaba; karaa ba'aatiin daangaan keessan kan kibbaa dhuma Galaana Soogiddaa irraa jalqaba; ⁴ daangaan keessan kibba irraa gara tabba Aqrabiimitti deebi'ee, gara Siinitti ce'ee hamma kibba Qaadesh Barneetti deema. Ergasiis gara Hazar Adaaritti ittuma fufee gara Azimoonitti darba. ⁵ Daangaan sunis Azimoon irraa gara laga Gibxitti deebi'ee galaana ga'ee dhuma.

⁶ Daangaan keessan kan gama dhi'aa immoo qarqara Galaana guddichaa ti. Kunis gama dhi'aatiin daangaa keessan ta'a.

⁷ Daarii keessan kan kaabaatiif galaana guddaadhaa hamma Tulluu Huuritti, ⁸ Tulluu Huuriitii hamma Leeboo Hamaatiitti mallattoo tolchaa. Daariin sunis hamma Zedaaditti deemee ⁹ hamma Ziifronitti itti fufee Hazar Eenaan irratti dhuma. Kunis daarii keessan kan kaabaa ta'a.

¹⁰ Daarii keessan kan ba'aatiifis Hazar Eenaanii jalqabaatii hamma Shefaamaatti mallattoo tolchaa. ¹¹ Daariin sunis Shefaamaa jalqabee karaa ba'a Aayiniitiin hamma Riibilaatti gad bu'a; itti fufees hamma ededa gama ba'aa Galaana Kinereetiitti argamuutti deema. ¹² Daariin kunis Yordaanositti gad bu'ee Galaana Soogiddaa ga'ee dhaabata.

"Egaa biyyi gama hundaan daarii qabu kun keessan ta'a."

¹³ Museen akkana jedhee Israa'eloota ajaje: "Biyya kana dhaala godhadhaatii ixaadhaan qoodadhaa; WAAQAYYO akka biyyi kun gosa sagalii fi walakkaadhaaf kennamu ajajeera; ¹⁴ maatiiwwan gosa Ruubeen, kan gosa Gaadii fi walakkaan gosa Minaasee dhaala ofii fudhataniiiruutii. ¹⁵ Gosoonna lamaanii fi walakkaan gosa tokkoo Yordaanos gamaa, fuullee Yerikootii gara ba'a biiftuutti karaa ba'aatiin dhaala isaanii argataniiru."

¹⁶ WAAQAYYO Museedhaan akkana jedhe; ¹⁷ "Maqaan namoota akka dhaalaatti lafa kana isinii qoodaniis Ele'aazaar lubichaa fi Iyyaasuu ilma Nuunii ti. ¹⁸ Isinis akka isaan lafa dhaalaa qoodaniif tokkoo tokkoo gosaa keessaa hoogganaa tokko filadhaa.

¹⁹ "Maqaan isaaniis kanneenii dha:

"Gosa Yihuudaa keessaa, Kaaleb ilma Yefunee;

²⁰ gosa Simi'oon keessaa, Shemuu'eel ilma Amiihuud;

²¹ gosa Beniyaam keessaa, Eliidaad ilma Kisloon;

²² gosa Daan keessaa hoogganaan, Bukii ilma Yoogilii;

²³ gosa Minaasee ilma Yoosif keessaa hoogganaan, Hanii'eel ilma Eefoodi;

²⁴ gosa Efreem ilma Yoosif keessaa hoogganaan, Qamu'eel ilma Shiifxaan;

- ²⁵ gosa Zebuuloon keessaa hoogganaan, Eliisaafaan ilma Phaarnaak;
²⁶ gosa Yisaakor keessaa hoogganaan, Phaaltii'eel ilma Azaan;
²⁷ gosa Aasheer keessaa hoogganaan, Ahiihuud ilma Sheloomii;
²⁸ gosa Niftaalem keessaa hoogganaan, Phedaa'eel ilma Amiihuud.”

²⁹ Namoonni kunneen warra WAAQAYYO akka isaan biyya Kana'aan keessatti Israa'elootaaf dhaala hiraniif isaan ajajee dha.

35

Magaalaawwan Lewwotaaf Kennaman

¹ WAAQAYYOS dirreewwan Mo'aab irratti, Yordaanos biratti, Yerikoo gamatti Museedhaan akkana jedhe; ² “Israa'eloonni dhaala ofii isaanii argachuuf jiran keessaa magaalawwan Lewwonna keessa jiraatan akka isaanii kennan Israa'eloota ajaji. Lafa horii itti bobbaafatanis naannoo magaalawwaniitti haa kennaniif. ³ Isaanis magaalawwan keessa jiraatanii fi lafa itti loon isaanii fi horii isaanii kaan hunda bobbaafatan ni qabaatu.

⁴ “Lafti horiin itti bobba'u kan isin naannoo magaalawwaniitti Lewwotaaf kennitan sun dallaa magaalaa irraa jalqabee gama hundaan dhundhuma kuma tokko achi bal'ata. ⁵ Magaalaa sana gidduutti hambisuudhaan karaa alaatiin gama ba'aatiin dhundhuma kuma lama, gama kibbaatiin dhundhuma kuma lama, gama dhi'aatiin dhundhuma kuma lama, gama kaabaatiin immoo dhundhuma kuma lama safaraa. Iddoowwan kunneen magaalawwan sanaaf iddoowwan itti horii bobbaafatan ta'u.

Magaalaawwan Itti Baqatan

35:6-34 kwi – KeD 4:41-43; 19:1-14; Iya 20:1-9

⁶ “Magaalaawwan ja'an isin Lewwotaaf kennitan magaalawwan itti baqatan kanneen namni nama ajjeese itti baqatu ta'u. Magaalawwan afurtamii lamas kanatti dabalaatii isaanii kenna. ⁷ Walumaa galatti magaalawwan afurtamii saddeet kanneen lafa tika ofii isaanii qaban Lewwotaaf kenna. ⁸ Magaalawwan isin lafa Israa'eloonni dhaalan irraa Lewwotaaf kennitan, akkuma qooda dhaala tokkoo tokkoo gosaatti haa ta'u; gosa dhaala baay'ee qabu irraa magaalawwan baay'ee, gosa dhaala muraasa qabu irraa immoo magaalawwan xinnoo fuudhaa.”

⁹ WAAQAYYOS Museedhaan akkana jedhe: ¹⁰ “Israa'elootatti dubbadhu; akkanas jedhiin: ‘Isin yommuu Yordaanosin ceetanii Kana'aanitti galtanitti, ¹¹ akka isin magaalawwan itti baqatan kanneen namni tasa nama ajjeese itti baqatu isinii ta'aniif magaalawwan filadhaa. ¹² Magaalawwan kunneenis akka namni nama ajjeesuudhaan himatame utuu murtii argachuuf waldaa duratti hin dhi'aatin hin duuneef iddoo inni itti nama haaloo isa ba'u jalaa baqatu ta'u. ¹³ Magaalawwan isin kennitan ja'an kunneenis magaalawwan itti baqattan isinii ta'u. ¹⁴ Yordaanos gamanaan magaalawwan sadii, Kana'aan keessaa immoo magaalawwan sadii, magaalawwan itti baqatan godhaa kenna. ¹⁵ Magaalawwan ja'an kunneen akka namni tasa nama ajjeese kam iyyuu itti baqatuuf Israa'elootaaf, alagootaa fi saba isaan gidduu jiraatuuf iddoo itti baqatan ta'u.

¹⁶ “ ‘Namni tokko yoo meeshaa sibiilaatiin nama dha'ee namichi sun du'e, inni ajjeese sun nama gumaa ti; namichi ajjeese sun ajjeefamuu qaba. ¹⁷ Yookaan namni tokko yoo dhagaa nama ajjeesuu danda'u harkatti qabatee nama dha'ee ajjeese, inni nama gumaa ti; namichi nama ajjeese sun ajjeefamuu qaba. ¹⁸ Yookaan namni tokko yoo meeshaa mukaa kan nama ajjeesuu danda'u harkatti qabatee nama dha'ee namichi sun du'e, inni ajjeese sun nama gumaa ti; namichi nama ajjeese sun ajjeefamuu qaba. ¹⁹ Namichi haaloo dhiigaa ba'u sun namicha nama ajjeese sana haa ajjeesu; inni yommuu argatutti isa haa ajjeesu. ²⁰ Namni tokko yoo jibbaan nama darbatee lafaan dha'ee yookaan beekaa waa itti darbachuudhaan isa ajjeese, ²¹ yookaan yoo diinummaadhaan ka'ee harkaan isa dha'ee namichi sun du'e, inni nama ajjeese sun ajjeefamuu qaba; inni nama gumaa ti. Namichi haaloo dhiigaa ba'u sun namicha nama ajjeese sana yeroo argatutti isa haa ajjeesu.

²² “ ‘Garuu inni yoo utuu diinummaa hin qabaatin tasa nama darbatee lafaan dha'ee yookaan utuu hin beekin waan tokko isatti darbatee ²³ yookaan utuu isa hin argin dhagaa isa ajjeesuu danda'u itti gad dhiisee namichi sun du'e, inni waan diina isaa hin ta'iniif fi isa miidhuuf hin yaadiniif ²⁴ waldaan sun akkuma seera kanneeniitti namicha nama ajjeese sanaa fi isa haaloo dhiigaa ba'u sana gidduutti murtii haa kennu. ²⁵ Waldaan sun namicha nama ajjeesuudhaan himatame sana harka namicha haaloo dhiigaa ba'u sanaa jalaa baasee magaalaa inni itti baqatee ture sanatti deebisee isa haa

ergu. Innis hamma lubni ol aanaan zayitii qulqulluudhaan dibame sun du'utti achuma haa turu.

²⁶ "Ta'us yoo namichi nama ajjeese sun daarii magaalaa itti baqate sanaa keessaa ba'ee ²⁷ namichi haaloo dhiigaa ba'u sun magaalaa sanaan alatti isa argate, namichi haaloo dhiigaa ba'u sun namicha himatame sana ajjeesuu danda'a; yakka ajjeechaa sanaattis hin gaafatamu. ²⁸ Namichi nama ajjeese sun hamma lubni ol aanaan sun du'utti magaalaa itti baqate keessa turuu qaba; inni erga lubichi ol aanaan du'ee booddee gara qabeenya isaatti deebi'uu danda'a.

²⁹ "Isaan kunneenis dhaloota dhufu keessatti lafa isin jiraattan kamitti iyyuu seeraa fi qajeelfama isiniif haa ta'an.

³⁰ "Namni kam iyyuu yoo nama ajjeese namichi sun ragaa dhugaa baatonni kennaniin ajjeefama. Ta'us namni kam iyyuu dhuga ba'umsa nama tokkoo qofaan hin ajjeefamin.

³¹ "Namicha nama ajjeese duuti isaaf malu tokko irraa gumaa lubbuu hin fudhatinaa. Inni ajjeefamuu qaba.

³² "Akka inni utuu lubichi ol aanaan hin du'in dura biyya ofii isaatti deebi'ee achi jiraatu eeyyamuuf jettanii nama gara magaalaa itti baqataniitti baqate kamiif iyyuu gumaa hin fudhatinaa.

³³ "Sababii dhangalaafamuun dhiigaa biyya xureessuuf, isin biyya keessa jiraattan sana hin xureessinaa; dhiiguma namicha dhiiga dhangalaase sanaatiin malees biyya dhiigni itti dhangalaafame sanaaf araari hin buufamu. ³⁴ Biyya isin keessa jirtan iddoo ani jiraadhu sana hin xureessinaa. Ani WAAQAYYO Israa'eloota gidduu nan jiraadhaatii."

36

Dhaala Intallan Zelofehaad

36:1-12 kwf - Lak 27:1-11

¹ Abbootiin maatii ilmaan Gili'aad ilma Maakiir, ilma Minaasee kanneen maatiiwwan ilmaan Yoosef keessaa dhufan sun fuula Museetii fi fuula hooggantoota abbootii maatiiwwan saba Israa'el duratti dhi'aatanii dubbatan; ² akkanas jedhan; "Akka ati biyyattii dhaala gootee ixaadhaan saba Israa'eliiif kennituuf WAAQAYYO Gooftaa koo ajajeera; akkasumas akka ati dhaala obboleessi keenya Zelofehaad intallan isaatiif kennitu inni si ajajeera. ³ Garuu yoo isaan ilmaan gosoota saba Israa'el kaanitti heeruman dhaalli isaanii dhaala abbootii keenyaa keessaa fuudhamee dhaala gosa isaan itti heerumaniitti dabalama. Yoos dhaala ixaadhaan nuu qoodame irraa gariin isaa ni fuudhama. ⁴ Yommuu Waggaan Iyyoobeeliyyuu kan saba Israa'el dhufutti dhaalli isaanii sun dhaala gosa isaan itti heerumaniitti dabalama; dhaalli isaanis dhaala gosa abbootii keenyaa irraa fudhatama."

⁵ Kana irratti Museen akkuma WAAQAYYO dubbate sana akkana jedhee saba Israa'el ajaje: "Wanni gosti ilmaan Yoosef jedhu sirrii dha. ⁶ Wanni WAAQAYYO waa'ee intallan Zelofehaad ajaje kanaa dha: Isaan gosa abbaa isaanii qofa keessaa haa ta'u malee nama jaallatanitti haa heeruman. ⁷ Sababii tokkoon tokkoon ilmaan Israa'el dhaala gosa abbaa isaa irraa argatu jabeessee qabatuuf, dhaalli ilmaan Israa'el gosa tokko irraa gosa kaanitti hin darbin. ⁸ Akka tokkoon tokkoon ilmaan Israa'el dhaala abbootii isaa argatuuf, gosa ilmaan Israa'el keessaa intalli dhaala argattu kam iyyuu gosa abbaa ishee keessaa nama tokkotti heerumuu qabdi. ⁹ Sababii tokkoon tokkoon gosa ilmaan Israa'el dhaala ofii isaa jabeessee qabatuuf, dhaalli tokko iyyuu gosa tokko irraa gosa kaanitti hin darbin."

¹⁰ Intallan Zelofehaad akkuma WAAQAYYO Musee ajaje sana godhan. ¹¹ Intallan Zelofehaad Mahilaan, Tiirzaan, Hoglaan, Miilkaa fi Nohi ilmaan obboloota abbaa isaaniitti heeruman. ¹² Isaanis maatiiwwan ilmaan Minaasee ilma Yoosef keessatti waan heerumaniif dhaalli isaanii gosa maatii abbaa isaanii harkatti hafe.

¹³ Ajajawwanii fi murtiiwwan WAAQAYYO dirreewwan Mo'aab irratti, Yordaanos biratti, Yerikoo gamatti karaa Museetiin ilmaan Israa'eliiif kenne kanneenii dha.

Seera Keessa Deebii

Ajaja Akka Israa'eloonni Koreebii Ba'aniif kenname

¹ Dubbiin kun dubbii Museen yeroo isaan gammoojjii gama ba'a Yordaanositti, Arabbaa fuullee Suufitti argamu sana keessa, Phaaraanii fi Toofel, Laabaan, Haxerootii fi Diizaahaab gidduu turanitti Israa'eloota hundatti dubbatee dha. ² Kooreebii karaa Tulluu See'iiriin Qaadash Barnee ga'uuf guyyoota kudha tokko fudhata.

³ Museenis waggaa afurtamaffaa keessa guyyaa tokkoffaa ji'a kudha tokkoffaatti waan WAAQAYYO waa'ee isaanii isa ajaje hunda Israa'elootatti hime. ⁴ Kunis erga inni Sihoon mootii Amoorotaa kan Heshboon bulchaa ture mo'atee Oogi mootii Baashaan kan Ashtaaroti bulchaa ture illee Edreyiitti mo'atee booddee dha.

⁵ Ba'a Yordaanositti biyya Mo'aab keessatti Museen akkana jedhee seera kana ibsuu jalqabe:

⁶ WAAQAYYO Waaqni keenya Kooreebitti akkana nuun jedhe; "Isin tulluu kana bira yeroo dheeraa turtaniirtu. ⁷ Qubata buqqisaa ka'aatii gara biyya gaaraa Amoorotaatti deema keessan itti fufaa; ergasiis saboota naannoo Arabbaatii argaman hunda keessa, biyya tulluuwwanii keessa, biyyoota gama dhi'aatiin cina tulluuwwaniitti argaman keessa, Negeebii fi qarqara galaanaa, biyya Kana'aanotaatii fi Libaanoon keessa hamma laga Efraaxiis guddichaatti argaman keessa deema. ⁸ Kunoo, ani biyya kana isiniif kenneera. Biyya WAAQAYYO abbootii keessaniif jechuunis Abrahaamiif, Yisihaaqiif, Yaaqoobii fi sanyii isaanii warra isaaniin duubaatiif kennuuf kakate sanatti galaatii dhaalaa."

Muudamuu Hooggantootaa

⁹ Ani yeroo sanatti akkanan isiniin jedhe; "Ani kophaa koo isin baachuu hin danda'u. ¹⁰ WAAQAYYO Waaqni keessan isin baay'iseera; kunoo, isin har'a akkuma urjiuwwan samii baay'attaniirtu. ¹¹ WAAQAYYO Waaqni abbootii keessanii yeroo kuma isin haa baay'isu; akkuma abdii kenne sanattis isin haa eebbisu! ¹² Ani garuu akkamitti kophaa koo rakkina keessan, ba'aa keessanii fi wal mormii keessan baachuu danda'aa? ¹³ Tokkoo tokkoo gosoota keessanii keessaa namoota ogeeyyii, hubattootaa fi kabajamoo filadhaa; anis isin irratti bulchitoota isaan nan taasisa."

¹⁴ Isinis, "Wanni ati dhi'eessite gaarii dha" jettanii naaf deebifan.

¹⁵ Ani hangafoota gosoota keessanii jechuunis namoota ogeeyyii fi kabajamoo fudhadhee akka isaan ajajjuuwwan kumaa, ajajjuuwwan dhibbaa, ajajjuuwwan shantamaatii fi ajajjuuwwan kudhanii ta'anii isin irratti aangoo qabaatan nan muude. ¹⁶ Anis yeroo sanatti akkana jedhee abbootii murtii keessan nan ajaje; "Mormii obboloota keessan gidduutti ka'u dhaga'aa; yoo wal mormiin ka'u sun Israa'eloota obboloota gidduutti yookaan nama Israa'el tokkoo fi alagaa tokko gidduutti ta'e murtii qajeelaa kenna. ¹⁷ Murtii kennuu keessatti nama wal hin caalchisinaa; guddaas xinnaas wal qixxee dhaga'aa. Sababii murtiin kan Waaqaa ta'eef eenyuun iyyuu hin sodaatinaa. Waan humna keessanii ol ta'e natti fidaa; anis nan ilaalaa." ¹⁸ Ani yeroo sanatti waan isin gochuu qabdan hunda isin ajajeera.

Basaastonni Ergamuu isaanii

¹⁹ Nus ergasii akkuma WAAQAYYO Waaqni keenya nu ajajetti Kooreebii kaanee gammoojjii guddaa fi sodaachisaa isin argitan sana keessa dabarree gara biyya gaaraa Amoorotaa dhaqne; akkasiinis Qaadash Barnee geenye. ²⁰ Anis akkana isiniin jedhe; "Isin biyya gaaraa Amoorotaa kan WAAQAYYO Waaqni keenya nuu kennu geessaniirtu. ²¹ Kunoo, WAAQAYYO Waaqni keessan biyyattii isiniif kenneera. Dhaqaatii akkuma WAAQAYYO Waaqni abbootii keessanii isinitti hime sanatti ishee dhaalaa; hin sodaatinaa; abdiis hin kutatinaa."

²² Ergasiis hundi keessan na bira dhuftanii, "Akka isaan biyyattii nuu basaasaniif duraan dursinee namoota erganna; isaanis waa'ee karaa achi nu geessuutii fi magaalawwan nu itti dhufnuu oduu nuu fidu" jettan.

²³ Yaadni sunis gaarii natti fakkaate; ani kudha lamaan keessan jechuunis tokkoo tokkoo gosaa keessaa nama tokko nan filadhe. ²⁴ Isaanis ka'anii biyya gaaraatti ol ba'anii Sulula Eshkool ga'anii biyyattii basaasan. ²⁵ Ija biyyattii keessaas waa fidanii dhufanii, "Biyyi WAAQAYYO Waaqni keenya nuuf kennu kun gaarii dha" jedhanii nutti himan.

WAAQAYYOTTI Finciluu

²⁶ Isin garuu dhaquu diddani ajaja WAAQAYYO Waaqa keessaniitti finciltan. ²⁷ Dunkaana keessan keessattis akkana jettanii guungumtan; “WAAQAYYO nu jibba; kanaafuu biyya Gibxiitii nu baasuun isaatuu akka isaan nu balleessaniif harka Amoorotaatti dabarsee nu kennuuf. ²⁸ Egaa nu eessa dhaquu dandeenya? Obbollooni keenya, ‘Jarri nu caalaa jajjaboo fi hojjaan isaanii dhedheeraa dha; magaalawwan isaanis gurguddaa fi dallaawwan samii ga’aniin marfamaniiru; kana biratti immoo ilmaan Anaaq argineerra’ jedhanii nu sodaachisan.”

²⁹ Anis akkanan isiniin jedhe; “Hin rifatinaa; isaan hin sodaatinaa. ³⁰ WAAQAYYO Waaqni keessan kan fuula keessan dura deemu kun akkuma ija keessan duratti biyya Gibxi keessatti isiniin godhe sana isiniif ni lola; ³¹ gammoojjii keessattis akkasuma. Hamma as geessanittis karaa deemtan hundatti akkamitti akka WAAQAYYO Waaqni keessan akkuma abbaan ilma isaa baatutti isin baate argitaniirtu.”

³² Ta’us isin WAAQAYYO Waaqa keessan ³³ isa iddoo isin qubattan barbaaduu fi daandii isin deemu qabdan isin argisiisuudhaaf jedhee halkan ibiddan, guyyaa immoo duumessaan isin dura deemee isin qajeelchaa ture hin amananne.

³⁴ WAAQAYYOS yommuu waan isin jettan dhaga’etti dheekkamee akkana jedhee kakate: ³⁵ “Dhaloota hamaa kana keessaa namni tokko iyyuu biyya gaarii ani akka abbootii keessaniif kennu kakuu gale sana hin argu; ³⁶ Kaaleb ilma Yefunee sana malee kan argu hin jiru. Inni biyya sana ni arga; sababii inni garaa guutuudhaan WAAQAYYO duukaa bu’eef ani lafa inni miilla isaa irra dhaabbate sana isaa fi sanyii isaatiif nan kenna.”

³⁷ Sababii keessaniif WAAQAYYO natti illee dheekkamee akkana jedhe; “Ati iyyuu itti hin galtu. ³⁸ Gargaaran kee Iyyaasuun ilmi Nuuni garuu itti gala. Inni waan Israa’eloota biyyattii dhaalchisuuf isa jajjabeessi. ³⁹ Daa’imman isin ni booji’aman jettan, ilmaan keessan kanneen waan tolaa fi hamaa gargar baasanii hin beekne biyya sanatti ni galu. Ani isaaniifan kenna; isaanis ni dhaalu. ⁴⁰ Isin garuu duubatti deebi’aatii daandii gara Galaana Diimaatti geessu qabadhaatii gammoojjiitti qajeelaa.”

⁴¹ Isinis, “Nu WAAQAYYOTTI cubbuu hojjenneerra. Dhaqnee akkuma WAAQAYYO Waaqni keenya nu ajajetti lolla” jettanii deebifan. Biyya gaaraa dhaquun waan salphaa isinitti fakkaatee akkasiin tokkoon tokkoon keessan mi’a lolaa qabattanii kaatan.

⁴² WAAQAYYO garuu, “‘Waan ani isin wajjin hin jirreef lolaaf hin ba’inaa. Isin diinota keessaniin ni mo’atamtu’ jedhii isaanitti himi” naan jedhe.

⁴³ Anis akkasuma isinitti hime; isin garuu na hin dhageenye. Ajaja WAAQAYYOTTI finciltanii of tuulummaa keessaniin biyya gaaraatti duultan. ⁴⁴ Amooronni gaarran irra jiraatan isinitti dhufan; isaanis akkuma tuuta kanniisaatti ba’anii isin gugsan; See’iirii hamma Hormaatti isin dha’an. ⁴⁵ Isin deebitanii dhuffanii fuula WAAQAYYOO duratti boossan; inni garuu boo’icha keessan hin dhageenye; gurra isaas isiniif hin kennine. ⁴⁶ Akka yeroo isin achi jiraattaniitti, guyyoonni isin Qaadash keessa jiraattan baay’ee dha.

2*Gammoojjii Keessa Jooruu*

¹ Ergasii akkuma WAAQAYYO natti himetti, duubatti deebinee karaa Galaana Diimaatiin gara gammoojjiitti qajeelle; yeroo dheeraadhaafis naannoo biyya gaaraa See’iir keessa joorre.

² WAAQAYYOS akkana naan jedhe; ³ “Biyya gaaraa kana naanna’uun isin ga’a; gara kaabaatti garagalaa. ⁴ Saba kana akkana jedhii ajaji: ‘Isin biyya obbolloota keessan sanyiiwwan Esaawu kanneen See’iir keessa jiraatanii keessa darbitu. Isaan isin sodaatu; isin garuu jabeessaa of eeggadhaa. ⁵ Lolaaf isaan hin kakaasinaa; ani lafa isaanii irraa iddoo isin miilla keessan irra dhaabbattan illee isiniif hin kennuutii. Ani biyya gaaraa See’iir dhaala godhee Esaawuuf kenneera. ⁶ Nyaata achii nyaattanii fi bishaan dhugdaniif maallaqa baafuu.’”

⁷ WAAQAYYO Waaqni keessan waan isin hojjetan hundaan isin eebbiseera. Inni deemsa dheeraa isin gammoojjii bal’aa kana keessa deemtan irratti isin eegeera. WAAQAYYO Waaqni keessan waggoota afurtamman kanneen isin wajjin ture; isinis waan tokko illee hin dhabne.

⁸ Obbolloota keenya ilmaan Esaawu warra See’iir keessa jiraatan bira dabarree deemne. Nus daandii Arabbaa kan Eelaatii fi Eziyoon Geberii dhufu irraa garagallee karaa daandii gammoojjii Mo’aab deemne.

⁹ Ergasiis WAAQAYYO akkana naan jedhe; “Waan ani lafa Mo’aab irraa isiniif hin kennineef akkasumaan isaan hin rakkisinaa; waraanaafis isaan hin kakaasinaa. Ani Aarin dhaala godhee sanyii Looxiif kenneeraatii.”

¹⁰ Eemiimoonni achi jiraachaa turan; isaanis namoota jajjaboo fi baay’ee dha; akkuma Anaqaotaa dhedheeroo turan. ¹¹ Isaan kunneenis akkuma Anaqaotaa, Refaayimoota jedhamanii hedamu turan; Mo’aabonni garuu Eemiimoota jedhuun. ¹² Huuronni kunneen See’iir keessa jiraachaa turan; ilmaan Esaawu garuu ari’anii achii isaan baasan. Isaanis akkuma Israa’eloonni biyya WAAQAYYO dhaala isaaniif kenne sana keessatti godhan sana Hoorota achii balleessanii ofii isaaniitii biyya jaraa keessa qubatan.

¹³ WAAQAYYO, “Ammuma ka’aatii Laga Zered ce’aa” nuun jedhe. Nu laga sana ceene.

¹⁴ Yeroo nu Qaadesh Barnee kaanee jalqabee hamma laga Zered ceenutti waggaa soddonii saddeet fudhate. Akkuma WAAQAYYO isaanitti kakatetti dhaloonni dhiira waraanaa hundi yeroo sanatti qubata keessaa dhume. ¹⁵ Harki WAAQAYYOS qubata keessaa isaan balleessuudhaaf isaan irra ture.

¹⁶ Yeroo loltoonni hundi saba keessaa dhumanitti, ¹⁷ WAAQAYYO akkana naan jedhe; ¹⁸ “Ati har’a daarii Mo’aab, Aari keessa dabarta. ¹⁹ Yommuu Amoonotatti dhuftanitti akkasumaan isaan hin rakkisinaa yookaan waraanaaf isaan hin kakaasinaa; ani biyya isaanii keessaa tokko illee dhaala godhee isiniif hin kennuutii. Ani biyya isaanii sanyii Looxiif handhuuraa godhee kenneera.”

²⁰ Kunis biyya Refaayimoota achi jiraachaa turaniiti jedhamee hedama; Amoononni garuu Zamzumoota jedhanii isaan waamu ture. ²¹ Isaanis namoota jajjaboo fi baay’ee dha; akkuma Anaqaotaa dhedheeroo turan. WAAQAYYOS fuula Amoonota achii isaan baasanii iddoo isaanii qubatan sanaa duraa isaan barbadeesse. ²² WAAQAYYOS yommuu Hoorota fuula isaanii duraa balleessetti ilmaan Esaawu kanneen See’iir keessa jiraachaa turanis akkasuma godhe. Isaanis jara achii baasanii hamma har’aatti biyya isaanii keessa jiraatan. ²³ Awoota gandoota hamma Gaazaatti jiran keessa jiraatan immoo Kaftooronni Kaftoorii ba’anii dhufan sun balleessanii iddoo isaanii qubatan.

Sihon Mootiin Heshboon Mo’atame

²⁴ “Ka’aatii Laga Arnoon ce’aa; ani kunoo, Sihon Amooricha mootii Heshbooniitii fi biyya isaa illee dabarsee harka keessanitti isinii kenneeraatii. Waraana itti banaatii biyya sana qabachuu jalqabaa. ²⁵ Anis naasisuu fi sodaachisuu keessan saboota samii gad jiran hundatti buusuu hardhuma nan jalqaba. Isaanis oduu waa’ee keessanii dhaga’anii sababii keessaniif hollatu; naasuunis isaan qabata.”

²⁶ Anis akkana jedhee gammoojjii Qidemooti keessaa Sihon mooticha Heshbooniitti ergamoota nagaa nan erge; ²⁷ “Akka nu biyya kee keessaan darbinu nuu eeyyami. Nu karaa guddicha irraa hin gorru; mirgattis gara bitaattis hin gorru. ²⁸ Waan nyaannuu fi bishaan dhugnu maallaqaan nutti gurguri. Akka miilla qofaan achi keessa dabarru nuuf eeyyami; ²⁹ akkuma ilmaan Esaawu kanneen See’iir keessa jiraatanii fi Mo’aabonni Aari keessa jiraatan nuuf godhan sana atis hamma nu gara biyya WAAQAYYO Waaqni keenya nuu kennuutti galuuf laga Yordaanos ceenutti akkasuma nuuf godhi.” ³⁰ Sihon mootiin Heshboon garuu akka nu dabarru nuuf eeyyamuu dide. WAAQAYYO Waaqni keessan akkuma amma godhe kana dabarsee harka keessanitti isa kennuuf mataa fi garaa isaa jabeesse tureetii.

³¹ WAAQAYYOS, “Kunoo, ani Sihoonii fi biyya isaa dabarsee siif kennuu jalqabeera. Ati biyya isaa dhaaluuf qabachuu jalqabi” naan jedhe.

³² Yommuu Sihoonii fi guutummaan loltoota isaa nu waraanuuf Yaahazitti ba’anitti, ³³ WAAQAYYO Waaqni keenya dabarsee harka keenyatti isa nuuf kenne; nus isa, ilmaan isaatii fi loltoota isaa hunda dhoofne. ³⁴ Yeroo sanattis magaalawwan isaa hunda qabannee dhiirota, dubartootaa fi ijoollee, tokkoo tokkoo magaalawwanii guutummaan guutuutti barbadeessine. Nama tokko illee hin hambifne. ³⁵ Garuu horii fi boojuu magaalawwan qabanne sana keessaa boojine ofii keenyaaf fudhanne. ³⁶ Magaalaa Aro’er kan qarqara Sulula Arnoonitti argamuu fi magaalaa sululicha keessatti argamuu jalqabee magaalaa hamma Gili’aaditti argamu keessaa tokko iyyuu nu ittisuu hin dandeenye. WAAQAYYO Waaqni keenya hunda isaanii dabarsee nuuf kenne. ³⁷ Garuu akkuma ajaja WAAQAYYO Waaqni keenya nuuf kenne sanaatti isin gara biyyoota Amoonotaa tokkootti illee yookaan gara biyya qarqara laga Yaaboq irratti argamuu yookaan biyyoota naannoo magaalawwan gaarran irratti argamaniitti hin dabarre.

3

¹ Ergasiis deebinee karaa Baashaan qabannee ol baane; Oogi mootichi Baashaan immoo loltoota isaa guutuu wajjin Edreyiitti nuun wal loluuf gad ba'e. ² WAAQAYYOS, "Waan ani isa, guutummaa loltoota isaatii fi biyya isaa illee dabarsee harka keetti kenneef isa hin sodaatin. Akkuma Sihoon mootii Amoorotaa kan Heshboon bulchaa ture sana goote isa illee godhi" naan jedhe.

³ WAAQAYYO Waaqni keenya Oogi mootii Baashaanii fi guutummaa loltoota isaa dabarsee harka keenyatti kenne. Nus utuu homaa hin hambisiin isaan balleessine. ⁴ Yeroo sanattis magaalaawwan isaa hunda qabanne. Magaalaawwan jaatama mootummaa Oogi mooticha Baashaan kanneen kutaa biyya Argobbi jala turan keessaa kan nu hin qabatin tokko iyyuu hin jiru. ⁵ Magaalaawwan kunneen hundi dallaa dhagaa dhedheeroo, karraa fi danqaraa qabu turan; akkasumas magaalaawwan dallaa hin qabne baay'ee ture. ⁶ Nus akkuma Sihoon mootii Heshboon goone sana dhiirota, dubartootaa fi ijoollee tokkoo tokkoo magaalaawwanii guutummaan guutuutti barbadeessine. ⁷ Horii fi boojuu magaalaawwan isaanii keessaa saamne hunda garuu ofii keenyaaf fudhannee galle.

⁸ Yeroo sanatti mootota Amoorotaa lamaan kana irraa karaa ba'a Yordaanos biyya Sulula Arnooniitii jalqabee hamma Tulluu Hermoonitti jiruu fudhanne. ⁹ Siidoonnis Hermoon kana Siiriyoon jedhanii waamu; Amooronni immoo Seniiri jedhanii waamu. ¹⁰ Nus magaalaawwan dirree irratti argaman hunda, Gili'aad hunda, Baashaanii hamma Salkaa fi Edreyiitti jiru hunda, magaalaawwan mootummaa Oogi kanneen Baashaan keessatti argaman hunda qabanne. ¹¹ Gosa Refaayimootaa keessaa Oogi mootii Baashaan qofatu hafe. Kunoo sireen isaa sibiila irraa hojjetamee dalga dheerinni isaa dhundhuma sagal bal'inni isaa immoo dhundhuma afur ture. Sireen kunis amma iyyuu Rabbaa Amoonotaa keessatti argama.

Hiramuu Biyyattii

¹² Ani biyya yeroo sanatti qabanne keessaa biyya karaa Kaaba Aro'eeriitiin qarqara Sulula Arnoon jirutti dabalee walakkaa biyya gaaraa Gili'aad magaalaawwan isaa wajjin gosa Ruubeenii fi Gaadiif kenne. ¹³ Biyya Gili'aad kan hafee fi guutummaa Baashaan jechuunis mootummaa Oogi walakkaa gosa Minaaseetiifan kenne. Guutummaan kutaa Argobbi kan Baashaan keessaa sun biyya Refaayimootaa jedhamee beekama ture. ¹⁴ Yaa'ir ilmi Minaasee immoo guutummaa kutaa Argobbi kan hamma daarii Geshuurotaatii fi Ma'akaatotaatii jiru fudhate; biyyi sunis maqaa isaatiin moggaafame; kanaafuu Baashaan hamma har'aatti Haaboot Yaa'ir jedhama. ¹⁵ Gili'aad immoo Maakiiriifan kenne. ¹⁶ Walakkaa sulula isaa garuu daangaa gochuudhaan Gili'aadii jalqabee hamma Sulula Arnoonitti, achii immoo bulchiinsa daangaa Amoonotaa kan hamma laga Yaaboqitti jiru gosa Ruubeenii fi Gaadiifan kenne. ¹⁷ Daangaan isaa karaa lixaatiin Yordaanos isa Arabbaa keessatti argamu sanaa dha; kunis Kinereetii jalqabee hamma Galaana Arabbaa kan Galaana soogiddaa jedhamuutti diriiree tabba Phisgaatii gaditti argama.

¹⁸ Anis yeroo sanatti akkana jedheen isin ajaje: "WAAQAYYO Waaqni keessan akka dhaaltaniif lafa kana isiniif kenneera. Ta'us namoonni jajjaboon keessan hundi waraanaaf hidhatanii obboloota keessan Israa'eloota dura gamatti ce'uu qabdu. ¹⁹ Garuu niittonni keessan, ijoollen keessanii fi horiin keessan magaalaawwan ani isiniif kenne keessa haa turan; ani akka isin horii baay'ee qabdan beekaatii. ²⁰ Kunis hamma WAAQAYYO akkuma isin boqochiise sana obboloota keessan boqochiisee isaaniinis lafa WAAQAYYO Waaqni keessan Yordaanosiin gamatti isaaniif kennu sana dhaalanitti. Sana booddee tokkoon tokkoon keessan gara biyya ani dhaala isiniif kenneetti ni deebitu."

Museen Akka Yordaanos Hin Ceene Dhowwame

²¹ Anis yeroo sanatti akkana jedhee Iyyaasuu ajaje: "Ati waan WAAQAYYO Waaqni kee mootota kanneen lamaan godhe hunda ija keetiin argiteerta. WAAQAYYO, mootummoota isin itti yaatan hundas akkasuma ni godha. ²² Isin isaan hin sodaatinaa; WAAQAYYO Waaqni keessan mataan isaa isiniif lolaatii."

²³ Yeroo sanatti ani akkana jedhee WAAQAYYON nan kadhadhe; ²⁴ "Yaa WAAQAYYOO Gooftaa, ati guddina keetii fi harka kee jabaa sana garbicha keetti argisiisuu jalqabdeerta. Silaa kan hojii jabaa akkasii kan ati hojjetu hojjechuu danda'u Waaqa kamtu samii irra yookaan lafa irra jira?" ²⁵ Akka ani ce'ee biyyattii gaarii Yordaanos gama jirtu jechuunis biyya gaaraa gaarii sanaa fi Libaanon argu naa eeyyami."

²⁶ WAAQAYYO garuu waan sababii keessaniif natti dheekkameef, na dhaga'uu dide. WAAQAYYO akkana naan jedhe; "Kun ni ga'a; lammata waa'ee waan kanaa natti hin dubbatin. ²⁷ Fiixee Phisgaatti ol ba'iitii gara lixaa fi kaabaa, gara kibbaa fi ba'aa ilaali. Ati waan Yordaanos hin ceeneef biyyattii ijuma keetiin ilaali. ²⁸ Garuu akka inni saba

kana qajeelchee ceesisee akka isaan biyya ati ilaaltu kana dhaalan godhuuf Iyyaasuu ajaji; isa jajjabeessi; cimsis.”²⁹ Nu sulula Beet Phe’oor bira jiru keessa turre.

4

Seeraaf Ajajamuu

¹ Yaa Israa’el, ajajawwanii fi seerawwan ani isin barsiisu dhaga’aa. Akka jiraattanii fi dhaqxanii biyya WAAQAYYO Waaqni abbootii keessanii isiniif kennu dhaaltaniifis isaan duukaa bu’aa. ² Ajaja WAAQAYYO Waaqa keessanii kan ani isiniif kennu eegaa malee waan tokko illee itti hin dabalinaa yookaan irraa hin hir’isinaa.

³ Isin waan WAAQAYYO Ba’aal Phe’ooritti hojjete ijuma keessaniin argitaniirtu. WAAQAYYO Waaqni keessan warra isin gidduudhaa Ba’aal Phe’oor duukaa bu’an hunda balleesseera; ⁴ isin warri WAAQAYYO Waaqa keessan qabattan hundi garuu hamma har’aatti lubbuudhaan jiraattan.

⁵ Kunoo, akka isin biyya dhaaluuf itti galuuf jirtanitti isaan duukaa buutaniif ani akkuma WAAQAYYO Waaqni koo na ajajetti ajajawwanii fi seerawwan isin barsiiseera. ⁶ Kunis akka saboonni waa’ee ajajawwan kanaa hunda dhaga’anii, “Dhugumaan sabni guddaan kun saba ogeessaa fi hubataa dha” jedhaniif ogummaa fi hubannaa keessan sabootatti argisiisaatii akka gaariitti isaan eegaa. ⁷ Sabni guddaan akka yeroo nu WAAQAYYO Waaqa keenya waammannutti nutti dhi’aatu sana waaqonni isaanii itti dhi’aatan kan biraa kami? ⁸ Sabni guddaan ajajawwanii fi seera qajeelaa akka seera ani har’a fuula keessan dura kaa’u kanaa qabu biraa kami?

⁹ Akka waan jii kee arge hin daganneef yookaan akka hamma ati lubbuudhaan jirtutti garaa keetii hin badneef ofuma eeggadhu; jabaadhuu of eeggadhu. Waan kanas ijoollee keetii fi ijoollee ijoollee ijoollee keetii barsiisi. ¹⁰ Gaafa isin Kooreebitti fuula WAAQAYYO Waaqa keessanii dura dhaabattan, yeroo inni, “Akka isaan hamma lubbuudhaan lafa irra jiraatan hundatti na sodaachuu barataniijoollee ijoollee isaanii illee na sodaachuu barsiisaniif dubbii koo haa dhaga’aniitii namoota walitti qabi” naan jedhe sana yaadadhaa. ¹¹ Isin utumaa tulluun sun boba’aa ibidda hamma wiirtuu samiitti ol ba’ee duumessa gurraachaa fi dukkana limixiidhaan haguugamee jiruu itti dhi’aattanii miilla tulluu sanaa jala dhadhaabattan. ¹² Ergasiis WAAQAYYO ibidda keessaa isinitti dubbate. Isinis sagalee dubbii sanaa malee bifa tokko illee hin argine; sagalee tokko qofatu ture. ¹³ Innis kakuu isaa jechuunis Ajajawwan Kurnan akka isin isaan duukaa buutaniif isin ajaje sana isiniif labse. Ergasii immoo gabatee dhagaa lama irratti isaan barreesse. ¹⁴ WAAQAYYOS yeroo sanatti akka ani ajajawwanii fi seerawwan biyya isin Yordaanos ceetanii dhaaltan sana keessatti duukaa bu’uu qabdan isin barsiisu na ajaje.

Waaqota Tolfamoo Waaqeffachuun Dhowwaa dha

¹⁵ Gaafa WAAQAYYO Kooreeb irratti ibidda keessaa isinitti dubbatetti isin bifa tokko illee hin argine. Kanaafuu jabeessaa of eeggadhaa; ¹⁶ kunis akka isin hin xuroofne, akka Waaqa tolfamaa bifa dhiiraatiin yookaan dubartiitiin soofame kam iyyuu ofii keessaniif hin tolfanne ¹⁷ yookaan horii lafa irra jiraatu yookaan simbira samii keessa barrisu kam iyyuu ¹⁸ yookaan uumama lafa irra munyuuqu kam iyyuu yookaan qurxummii lafa jala bishaan keessa jiraatu kam iyyuu hin tolfanneef. ¹⁹ Ati yommuu samii ol ilaaltee aduu, ji’a, urjiwwanii fi raayyaa samii hunda argitutti gowwoomfamtee fuula waan WAAQAYYO Waaqni kee saboota samiidhaa gadii hundaaf qoodee kennee duratti gad jettee hin sagadin. ²⁰ WAAQAYYO garuu akka isin akkuma amma jirtan kana dhaala isaa taataniif badaa sibiilla itti baqsan jechuunis biyya Gibxiitii baasee isin fide.

²¹ WAAQAYYOS sababii keessaniif natti dheekkamee akka ani laga Yordaanos ce’ee biyya gaarii kan WAAQAYYO Waaqni keessan dhaala godhee isiniif kennu sana hin seenne kakate. ²² Ani biyyuma kanatti nan du’a; ani Yordaanosin hin ce’u; isin garuu ceetanii biyya gaarii sana dhaaluuf jirtu. ²³ Akka kakuu WAAQAYYO Waaqni keessan isin wajjin gale sana hin daganne of eeggadhaa; waaqota tolfamoo WAAQAYYO Waaqni keessan isin dhowwe bifa kamiin iyyuu ofii keessaniif hin tolfatinaa. ²⁴ WAAQAYYO Waaqni keessan ibidda gubee balleessuudhaatii; Waaqa hinaafudhas.

²⁵ Isin erga ijoollee fi ijoollee ijoollee keessanii hortanii biyya sana keessa bara dheeraa jiraattanii booddee, yoo xurooftanii fakkii waaqota tolfamoo bifa kami iyyuu tolchitanii fuula WAAQAYYO Waaqa keessanii duratti waan hamaa hojjetanii dheekkamsaaf isa kakaaftan, ²⁶ akka isin biyya Yordaanos ceetanii dhaaltan irraa ariitiidhaan dhabamtan ani guyyaa har’aa samii fi lafa dhugaa baatota godhee isinitti nan waama. Iddoo sana yeroo dheeraa hin jiraattan; isin guutumaan guutuutti barbadooftu. ²⁷ WAAQAYYOS saboota keessa isin faffacaasa; saboota warra WAAQAYYO isaan gidduutti isin faffacaase

keessattis muraasa taatanii haftu. ²⁸ Isinis achitti waaqota harka namaatiin mukaa fi dhagaa irraa hojjetaman kanneen arguu yookaan dhaga'uu yookaan nyaachuu yookaan fuunfachuu hin dandeenye waaqeffattu. ²⁹ Garuu yoo achittis WAAQAYYO Waaqa keessan barbaaddan ni argattu; isin yoo garaa fi yaada keessan guutuudhaan isa barbaaddan ni argattu. ³⁰ Yommuu dhiphattee wanni kun hundi sitti dhufutti, baroota dhufuuf jiran keessa gara WAAQAYYO Waaqa keetiitti ni deebita; isaafis ni ajajamta. ³¹ WAAQAYYO Waaqni kee Waaqa araaraa ti; inni si hin gatu yookaan si hin balleessu yookaan kakuu abbootii keetiif kakate sana hin dagatu.

WAAQAYYO Waaqa

³² Waa'ee baroota durii kan utuu ati hin dhalatin dura gaafa Waaqayyo lafa irratti nama uumee jalqabee ture sana iyyaafadhaa; daarii samii tokko irraa hamma daarii kaaniitti iyyaafadhaa. Wanni guddaan akkanaa takkumaa uumamee yookaan wanni akkanaa takkumaa dhaga'amee beekaa? ³³ Sabni akka keessan sagalee Waaqaa kan ibidda keessaa dubbatu dhaga'ee lubbuudhaan jiraate kan biraa takkumaa argameeraa? ³⁴ Waaqni kam iyyuu takkumaa akka WAAQAYYO Waaqni keessan utuma iji keessan arguu biyya Gibxitti isinii godhe sana saba tokko saba biraa keessaa qorumsaan, mallattoo fi dinqiidhaan, waraanaan, harka jabaa fi irree diriirfameen, yookaan hojii guddaa fi sodaachisaadhaan baasee kan ofii isaa godhachuu yaale jira?

³⁵ Isinis WAAQAYYO Waaqa ta'uu isaa akka beektaniif wantoonni kunneen isinitti argisiifaman; isa malees kan biraa hin jiru. ³⁶ Inni si adabachuuf jedhee samiiddhaa sagalee isaa si dhageessise. Lafa irratti ibidda isaa guddicha sitti argisiisee atis ibidda keessaa dubbii isaa dhageesse. ³⁷ Inni waan abbootii kee jaallatee isaan booddees sanyiiwwan isaanii filateef ofii isaatiin humna isaa guddaadhaan biyya Gibxiitti baasee isin fide; ³⁸ kana akka har'a ta'ee jiru kana saboota si caalaa gurguddaa fi jajjaboo si duraa ari'ee biyya isaanii dhaala godhee siif kennuuf itti si fide.

³⁹ Har'a akka WAAQAYYO ol samii gubbaatti, gad lafa irrattis Waaqa ta'e beeki; garaa keettis qabadhu. Kan biraas hin jiru. ⁴⁰ Akka sii fi ijoollee kee warra si'iin duubbaatiif toluu fi akka biyya WAAQAYYO Waaqni kee bara baraan siif kennutti umurii kee dheeratuuf qajeelchawwanii fi ajajawwan isaa kanneen ani har'a siif kennu eegi.

Magaalaawwan Itti Kooluu Galan

4:41-43 kwi - Lak 35:6-34; KeD 19:1-14; Iya 20:1-9

⁴¹ Yeroo sanatti Museen magalaawwan ba'a Yordaanos sadii addaan baafate; ⁴² kunis lafa namni nama ajjeese yoo utuu itti hin yaadin nama ajjeese itti baqatuu dha. Innis magalaawwan kanneen keessaa tokkotti baqatee lubbuu isaa oolfachuu danda'a. ⁴³ Magalaawwan sunis kanneen turan: Bezer kan gammoojjii keessa tabba irra jirtu gosa Ruubeeniif, Raamooti kan Gili'aaditti argamtu gosa Gaadiif, Goolaan kan Baashaanitti argamtu immoo gosa Minaaseef.

Ibsa Seericha Irratti Kenname

⁴⁴ Kun Seera Museen Israa'eloota dura kaa'ee dha. ⁴⁵ Qajeelchi, ajajanii fi seerri Museen yommuu isaan biyya Gibxii ba'anitti Israa'elootaaf kenne kanaa dha; ⁴⁶ kunis yeroo isaan Sulula Beet Phe'oor biyya ba'a Yordaanositti argamtu keessa turanitti ta'e; biyyi kunis biyya Sihoon mootii Amoorotaa kan Heshboon keessa jiraachaa turee Musee fi Israa'eloonni yeroo biyya Gibxii ba'anitti isa mo'atanii ti. ⁴⁷ Isaanis biyya isaatii fi biyya Oogi mooticha Baashaan jechuunis biyyoota mootota Amoorii lamaan ba'a Yordaanositti argaman dhaala godhanii fudhatan. ⁴⁸ Biyyi kunis Aro'er kan daarii Sulula Arnoonii jalqabee hamma Gaara Sihoonitti jechuunis hamma Hermooniitti bal'ata; ⁴⁹ innis Arabbaa ba'a Yordaanosii hamma galaana Arabbaatti jiru kan tabba Phisgaatii gaditti argamu hunda dabalata.

5

Ajajawwan Kurnan

5:6-21 kwf - Bau 20:1-17

¹ Museen Israa'eloota hunda walitti qabee akkana isaaniiin jedhe:

Yaa Israa'el ajajawwanii fi seerawwan ani har'a utuma isin dhageessanuu labsu kana dhaga'aa. Baradhaatii jabeessaa isaan duukaa bu'aa. ² WAAQAYYO Waaqni keenya Kooreebitti nu wajjin kakuu gale. ³ WAAQAYYO kakuu kana nu wajjin, nu warra har'a lubbuudhaan as jiraannu hunda wajjin gale malee abbootii keenya wajjin hin galle. ⁴ WAAQAYYO tulluu irratti ibidda keessaa ifaan ifatti isinitti dubbate. ⁵ Yeroo sanatti waan isin ibidda sodaattanii tulluutti ol hin ba'iniif ani dubbii WAAQAYYO isinitti himuuf isinii fi WAAQAYYO gidduun dhaabadhe.

Innis akkana jedhe:

- 6 “Ani WAAQAYYO Waaqa kee kan Gibxii, biyya garbummaatii si baasee dha.
- 7 “Ati ana malee waaqota biraa tokko illee hin qabaatin.
- 8 Ati bifa waan ol samii gubbaa yookaan gad lafa irra yookaan bishaan lafa jalaa keessa jiru waaqa tolfamaa kamiitiin iyyuu ofii keetiif hin tolfatin. ⁹ Isaaniif hin sagadin yookaan isaan hin waaqeffatin; ani WAAQAYYO Waaqni kee, Waaqa hinaafu kan ijoollee warra na jibbanii sababii cubbuu abbootiitiif jedhee hamma dhaloota sadii fi afuriitti adabee ¹⁰ warra na jaallatanii ajajawwan koo eegan immoo hamma dhaloota kumaatti jaallatuu dha.
- 11 Maqaa WAAQAYYO Waaqa keetii akkasumaan hin dha’in; WAAQAYYO warra akkuma argan maqaa isaa dha’an utuu hin adabin hin dhiisuutii.
- 12 Akkuma WAAQAYYO Waaqni kee si ajajetti guyyaa Sanbataa qulqulleessuudhaan eegi. ¹³ Guyyoota ja’a hojjedhu; hojii kee hundas hojjetadhu; ¹⁴ guyyaan torbaffaan garuu sanbata WAAQAYYO Waaqa keetii ti. Gaafas hojii tokko illee hin hojjetin; ati yookaan ilmi kee yookaan intalli kee yookaan hojjetaan kee yookaan xomboreen kee yookaan qotiyyoon kee yookaan harreen kee yookaan horiin kee kam iyyuu yookaan alagaan magaalaa kee keessa jiraatu tokko iyyuu homaa hin hojjetin. Hojjetaan keetii fi hojjetuun kee akkuma kee haa boqotan. ¹⁵ Akka atis biyya Gibxitti garba turtee fi ergasii immoo WAAQAYYO Waaqni kee harka jabaa fi irree diriirfameen achi si baase yaadadhu. Kanaafuu WAAQAYYO Waaqni kee akka ati Sanbata eegdu si ajaje.
- 16 Akka biyya WAAQAYYO Waaqni kee siif kennu keessa bara dheeraa jiraattuu fi akka sitti toluuf akkuma WAAQAYYO Waaqni kee si ajajetti abbaa keetii fi haadha keetiif ulfina kenni.
- 17 Hin ajjeesin.
- 18 Hin ejjin.
- 19 Hin hatin.
- 20 Ollaa keetti sobaan dhugaa hin ba’in.
- 21 Niitii namaa hin hawwin. Mana namaa yookaan lafa qotiisaa yookaan hojjetaa yookaan xomboree isaa, qotiyyoo isaa yookaan harree isaa, yookaan waan namaa kam iyyuu hin hawwin.”

²² Ajajawwan WAAQAYYO tulluu gubbaatti, ibidda, duumessaa fi dukkana limixii keessa waldaa keessan guutuutti sagalee guddaadhaan labse kanneenii dha; wanni inni itti dabales hin jiru. Ergasii inni ajajawwan sana gabateewwan dhagaa lama irratti barreessee natti kenne.

²³ Yeroo isin utuu tulluun sun ibiddaan boba’uu dukkana keessaa sagalee sana dhageessanitti, hooggantoonni gosoota keessaniitii fi maanguddoonni keessan hundi gara koo dhufan. ²⁴ Isinis akkana jettan; “Kunoo WAAQAYYO Waaqni keenya ulfinaa fi guddina isaa nu argiiseera; ibidda keessaas sagalee isaa nu dhageessiseera. Nu har’a akka namni yoo Waaqni isatti dubbate illee jiraachuu danda’u argineerra. ²⁵ Amma garuu nu maaliif duuna? Nu yoo sagalee WAAQAYYO Waaqa keenyaa deebinee dhageenye ni duuna; ibiddii guddaan kunis nu barbadeessa. ²⁶ Nama du’aa hin oolle hunda keessaa eenyutu takkumaa sagalee Waaqa jiraataa ibidda keessaa dubbatuu dhaga’ee akka nu dhageenye jiraanne kana utuu hin du’in hafe? ²⁷ Itti dhi’aadhuutii waan WAAQAYYO Waaqni keenya jedhu hunda dhaga’i. Ergasii immoo waan WAAQAYYO Waaqni keenya sitti himu hunda nutti himi. Nu ni dhaggeeffannaa; ni ajajamnas.”

²⁸ WAAQAYYO yommuu isin natti dubbattanitti isin dhaga’eera; WAAQAYYOS akkana naan jedhe; “Ani waan namoonni kunneen siin jedhan dhaga’eera. Wanni isaan jedhan hundinuu gaarii dha. ²⁹ Akka hamma bara baraatti isaanii fi ijoollee isaanii toluuf isaan utuu yeroo hunda garaa na sodaatee ajaja koo hunda eegu qabaatanii akkam gaarii ture!

³⁰ “Dhaqiitii, ‘Dunkaana keessanitti deebi’aa’ jedhiin. ³¹ Ati garuu asuma na bira turi. Ani ajajawwan, qajeelfamawwanii fi seerawwan ati akka isaan biyya ani dhaala godhee isaaniif kennu keessatti eeganiif isaan barsiiftu hunda sitti nan hima.”

³² Kanaafuu waan WAAQAYYO Waaqni keessan isin ajaje of eeggannaadhaan eegaa; mirgatti yookaan bitaatti hin gorinaa. ³³ Akka biyya dhaaltan keessa jiraachuu dandeessan, akka isinitti tolee umurii dheeraa illee qabaattaniif karaa WAAQAYYO Waaqni keessan isin ajaje hunda irra deema.

6

WAAQAYYO Waaqa Kee Jaalladhu

¹ Ajajawwan, qajeelfamawwanii fi seerri isin yeroo biyya Yordaanos ceetanii dhaalanitti eegdan kanneen akka ani isin barsiisuuf WAAQAYYO Waaqni keessan ajaje kanneenii dha; ² kunis akka bara jireenya keessanii guutuu isin, ijoolleen keessanii fi ijoolleen ijoollee keessanii qajeelfamawwanii fi ajajawwan ani isiniif kennu hunda eeguudhaan WAAQAYYO Waaqa keessan sodaattanii umuriin keessan dheeratuuf. ³ Yaa Israa'el dhaga'i; akka biyya aannanii fi dammi keessaa burqu sana keessatti akkuma WAAQAYYO Waaqni abbootii keetii si abdachiise sanatti sitti tolee guddaa baay'attuuf ajajami.

⁴ Yaa Israa'el dhaga'i; WAAQAYYO Waaqni keenya WAAQAYYO tokkicha. ⁵ Garaa kee guutuudhaan, yaada kee guutuudhaan, humna kee guutuudhaan WAAQAYYO Waaqa kee jaalladhu. ⁶ Ajajawwan ani har'a siif kennu kunneen garaa kee keessa haa jiraatan. ⁷ Ijoollee kees cimsii barsiisi. Yeroo mana teessu, yeroo karaa deemtu, yeroo ciiftuu fi yeroo dammaqutti waa'ee isaanii odeessi. ⁸ Akka mallattootti harkatti hidhadhu; adda kee irrattis maxxanfadh. ⁹ Michichilawwan balbala mana keetiiti fi karrawwan kee irrattis isaan barreessi.

¹⁰ Yeroo WAAQAYYO Waaqni kee biyya magaalaawwan gurguddaa fi babbareedoo kanneen ati hin ijaarin siif kennuuf gara biyya abbootii kee jechuunis Abrahaamiif, Yisihaaqii fi Yaaqoobiif kakate sanatti si galchutti, ¹¹ yeroo manneen mi'a gosa hundaa kan ati hin guutatiniin guutame, boolla bishaanii kan ati hin qotin, mukkeen wayiniitii fi ejersaa kanneen ati hin dhaabin siif kennamanii atis nyaattee quuftutti, ¹² ati akka WAAQAYYO biyya Gibxi, biyya garbummaatii si baase sana hin daganne of eeggadhu.

¹³ WAAQAYYON Waaqa kee sodaadhu; isuma qofa tajaajili; maqaa isaatiinis kakadhu. ¹⁴ Waaqota biraa jechuunis waaqota saboota naannoo keetii duukaa hin bu'in; ¹⁵ sababii WAAQAYYO Waaqni kee inni gidduu kee jiraatu sun Waaqa hinaafu ta'eef, aariin isaa sirratti boba'ee lafa irraa si balleessa. ¹⁶ Akka Maasaah keessatti gootan sana WAAQAYYO Waaqa keessan hin qorinaa. ¹⁷ Ajajawwan WAAQAYYO Waaqa keessanii, qajeelfamawwanii fi seerawwan inni isiniif kenne akka gaariitti eegaa. ¹⁸ Akka sitti toluu fi akka biyya gaarii WAAQAYYO abbootii keetiif kennuuf kakate sana seentee dhaaltuuf waan fuula WAAQAYYOO duratti qajeelaa fi gaarii ta'e hojjedhu. ¹⁹ Ati akkuma WAAQAYYO jedhe sanatti diinota kee hunda fuula kee duraa ni baafata.

²⁰ Gara fuul-duraatti yoo ilmi kee, "Hiikkaan qajeelchawwanii, ajajawwaniitii fi seerawwan WAAQAYYO Waaqni keenya isin ajaje kanaa maali?" jedhee si gaafate, ²¹ akkana jedhii itti himi; "Nu Gibxitti garboota Fara'oon turre; WAAQAYYO garuu harka jabaadhaan Gibxii baasee nu fide. ²² WAAQAYYO fuuluma keenya duratti biyya Gibxitti, Fara'oonii fi namoota mana isaa keessa jiraatan hunda irratti mallattoo fi dinqiiwwan sodaachisaa fi gurguddaa hojjete. ²³ Inni garuu biyya abbootii keenyaaf kakuudhaan waadaa gale sanatti nu galchee nu dhaalchisuuf jedhee achii baasee nu fide. ²⁴ WAAQAYYO akka nu akkuma amma jirru kanatti yeroo hunda nutti tolee jiraannuuf akka nu ajajawwan kanneen hunda eegnuu fi akka WAAQAYYO Waaqa keenya sodaannu nu ajaje. ²⁵ Nu yoo akkuma inni nu ajajetti seera kana hunda fuula WAAQAYYO Waaqa keenyaa duratti of eeggannaadhaan eegne, sun qajeelummaa keenya ta'a."

7

Saboota Ormaa Ari'anii Baasuu

¹ Yommuu WAAQAYYO Waaqni kee biyya ati dhaaluuf itti galaa jirtu kanatti si fidee saboota hedduu jechuunis Heetota, Girgaashota, Amoorota, Kana'aanota, Feerzota, Hiiwotaa fi Yebuusota jechuunis saboota isin caalaa gurguddaa fi jajjaboo torba fuula kee duraa ari'ee baasutti, ² yommuu WAAQAYYO Waaqni kee dabarsee isaan siif kennee atis isaan mo'attutti, guutamaan guutuutti isaan barbadeessi. Isaan wajjin kakuu tokko illee hin seenin; garaas isaanii hin laafin. ³ Isaanitti hin soddoomin; ilmaan isaaniitiif intallan kee hin kennin yookaan intallan isaanii ilmaan keetiif hin fidin; ⁴ sababiin isaa isaan ilmaan kee na duukaa bu'uu irraa deebisanii akka isaan waaqota biraa tajaajilan godhu; dheekkamsi WAAQAYYOS sitti boba'ee dafee si balleessa. ⁵ Wannii isin isaan gochuu qabdan kana: iddoowwan aarsaa isaanii diigaa; siidaawwan waaqeffannaa isaanii caccabsaa; utubaawwan Aasheeraa isaanii jijjigsaa; waaqota isaaniis ibiddaan gubbaa. ⁶ Ati saba WAAQAYYO Waaqa keetiif qulqulluu taatee dha. WAAQAYYO Waaqni kee akka ati saba isaatii fi qabeenya isaa jaallatamaa taatuuf jedhee saboota lafa irra jiraatan hunda keessaa si filate.

⁷ Wannii WAAQAYYO isin jaallatee isin filateef waan isin saboota kaan caalaa baay'ee taataniif miti; isin saboota hunda caalaa xinnoo turtan. ⁸ Garuu wannii WAAQAYYO harka jabaadhaan isin baasee biyya garbummaatii fi irree Fara'oon mooticha Gibxi jalaa isin fureef sababii isin jaallatee kakuu abbootii keessan wajjin gale sana eegeef. ⁹ Kanaafuu akka WAAQAYYO Waaqni kee Waaqa ta'e beeki; inni Waaqa amanamaa warra isa jaallatanii ajaja isaas eeganiif kakuu fi araara isaa hamma dhaloota kumaatti eeguudha. ¹⁰ Warra isa jibban garuu,

balleessuuf gatii isaanii mataa isaanitti deebisa;
 nama isa jibbus gatii isaa mataa isaatti deebisuudhaaf
 lafa irra hin harkifatu.

¹¹ Kanaafuu ati ajajawwan, qajeelchawwanii fi seerawwan ani har'a siif kennu kanneen eegi.

¹² Yoo ati seerawwan kanneeniif xiyyeeffannaa kennitee of eeggannaadhaan duukaa buute, WAAQAYYO Waaqni kee akkuma abbootii keetiif kakate sana kakuu fi araara isaa siifis ni eega. ¹³ Inni si jaallata; si eebbisa; si baay'isas. Biyya siif kennuuf abbootii keetiif kakuu gale keessatti ija garaa keetii, oomisha lafa keetii jechuunis midhaan, wayinii haaraa fi zayitii, jabbiiwwan loon keetii, xobbaallaawwan bushaayee keetii siif eebbisa. ¹⁴ Ati saboota kam iyyuu caalaa ni eebbifamta; dhiira yookaan dubartii kee keessaa tokko illee ijoollee hin dhabu yookaan loon kee keessaa tokko illee hin maseenu. ¹⁵ WAAQAYYO dhukkuba hunda sirraa fuudha. Inni dhukkuboota suukaneessaa ati biyya Gibxitti argite sana warra si jibbanitti fida malee sitti hin fidu. ¹⁶ Ati saboota WAAQAYYO Waaqni kee dabarsee sitti kennu hunda balleessuu qabda. Ati isaaniiif garaa hin laafin; kuni kiyyoo sitti ta'aatii waaqota isaanii hin waaqeffatin.

¹⁷ Ati, "Saboonni kunneen nu caalaa jajjaboo dha; nu akkamitti isaan baafna?" jettee yaaduta ta'a. ¹⁸ Garuu ati isaan hin sodaatin; waan WAAQAYYO Waaqni kee Fara'oonii fi guutummaa Gibxitti hojete sana yaadadhu. ¹⁹ Ati qormaatawwan gurguddaa, mallattoowwanii fi dinqiiwwan, harka jabaa fi irree diriirfame kan WAAQAYYO Waaqni kee ittiin si baase sana ijuma keetiin argiteerta. WAAQAYYO Waaqni kee saboota ati amma sodaattu hundas akkasuma godha. ²⁰ Kana caalaa iyyuu WAAQAYYO Waaqni kee hamma warri lubbuudhaan hafanii si duraa dhokatan iyyuu barbadaa'anitti gidduu isaanitti sonsa ni erga. ²¹ Sababii WAAQAYYO Waaqni kee inni gidduu kee jiru sun Waaqa guddaa fi sodaachisaa ta'eef isaan hin sodaatin. ²² WAAQAYYO Waaqni kee saboota sana xinnoo xinnoodhaan fuula kee duraa ni baasa; akka bineensonni bosonaa naannoo keetii hin baay'anneef yeruma tokkotti isaan balleesuun siif hin eeyyamamu. ²³ WAAQAYYO Waaqni kee garuu hamma isaan badanitti isaan raatessuudhaan dabarsee harka keetii isaan kenna. ²⁴ Mootota isaaniiis dabarsee sitti kenna; atis maqaa isaanii samii jalaa ni balleessita. Hamma ati isaan balleessitutti namni fuula kee dura dhaabachuu danda'u tokko iyyuu hin jiru. ²⁵ Fakkii waaqota isaanii ibiddaan gubi; meetii fi warqee isaan irra jiru hin hawwin; ofii keetiifis hin fudhatin; yoo kanaa achii inni sababii fuula WAAQAYYO Waaqa keetii duratti jibbisiisaa ta'eef kiyyoo sitti ta'a. ²⁶ Waan jibbisiisaa gara mana keetiitti hin galchin; yoo kanaa achii atis akkuma isaa badiisaaf addaan baafamta. Waan inni badiisaaf addaan baafameef ati guutummaan guutuutti isa jibbi; balfis.

8

WAAQAYYON Hin Dagatin

¹ Isin akka lubbuun jiraattan, akka baay'attanii fi akka biyya WAAQAYYO kakuudhaan abbootii keessan abdachiise sanatti galtanii dhaaltaniif ajaja ani har'a siif kennu hunda of eeggannaadhaan duukaa bu'aa. ² WAAQAYYO Waaqni kee gad si qabee si qoruudhaan waan garaa kee keessa jiru jechuunis akka ati ajajawwan isaa eegduu fi hin eegne beekuuf karaa inni waggoota afurtamman kanneen guutuu gammoojjii keessa si qajeelche yaadadhu. ³ Innis gad si deebisee si beelessee "mannaa" ati yookaan abbootiin kee hin beekin si soore; kunis akka namni dubbii afaan WAAQAYYOOTII ba'u hundaan malee buddeena qofaan hin jiraanne si barsiisuuf. ⁴ Waggoota afurtamman kanneen keessa uffanni kee hin dhumne; milli kees hin iitofne. ⁵ Akka WAAQAYYO Waaqni kee akkuma abbaan ilma isaa adabatu akka si adabu beeki.

⁶ Daandiiwwan isaa irra deemuu fi isa sodaachuudhaan ajajawwan WAAQAYYO Waaqa keetii eegi. ⁷ WAAQAYYO Waaqni kee biyya gaarii kan lageen, haroowwanii fi burqaawwan sululootaa fi gaarran keessaa yaa'aniitti si galchaatii. ⁸ Biyya qamadii fi garbuu, wayinii fi harbuu, roomaanii, zayitii ejersaatii fi damma baasutti, ⁹ biyya ati hir'ina malee buddeena nyaattuu fi biyya ati keessaa homaa hin dhabne, biyya kattaan sibiila ta'e, biyya ati gaarran keessaa sibiila diimaa baasuu dandeessuu dha.

¹⁰ Yeroo nyaattee quufuttutti, sababii WAAQAYYO Waaqni kee biyya gaarii akkasii siif kenneef isa jajadhu. ¹¹ Ati akka ajajawwan, qajeelfamawwanii fi seerawwan isaa kanneen ani har'a siif kennu eeguu baachuudhaan WAAQAYYO Waaqa kee hin daganne of eeggadhu. ¹² Yoo kanaa achii yommuu nyaattee quufuttutti, yommuu mana gaarii ijaarrattee keessa jiraattutti, ¹³ yommuu loonii fi bushaayeen kee wal horanii meetii fi warqeen kee dabaluu fi yommuu wannii ati qabdu hundi baay'atutti, ¹⁴ ati of tuultee WAAQAYYO Waaqa kee isa biyya Gibxi, biyya garbummaatii baasee si fide sana ni dagatta. ¹⁵ Inni gammoojjii bal'aa fi sodaachisaa, biyya dheebuutii fi kan bishaan hin qabne, biyya bofa hadhaa qabuu fi torbaanqabaan keessa guute sana keessa si deemsise. Kattaa jabaa keessa bishaan siif burqisiise. ¹⁶ Akka dhuma irratti sitti toluuf jedhee gad si qabuu fi si qoruudhaaf, waan takkumaa abbootiin kee hin beekin gammoojjii keessatti "mannaa" ati nyaattu siif kenne. ¹⁷ Ati, "Humna kootii fi jabina harka kootu qabeenya kana naaf argamsiise jettee" yaadda ta'a. ¹⁸ Garuu WAAQAYYO Waaqa kee yaadadhu; kan akkuma har'a jiru kanatti akka ati qabeenya horattuuf dandeettii siif kennee waadaa kakuudhaan abbootii keetiif gale sana siif eege isaatii.

¹⁹ Yoo ati WAAQAYYO Waaqa kee irraanfatee waaqota biraa duukaa buute, yoo isaan waaqeffatee fi isaaniif sagadde akka isin dhugumaan baddan ani har'a dhugaa isinitti nan ba'a. ²⁰ Akkuma Saboota WAAQAYYO fuula keessan duraa balleesse sanaa WAAQAYYO Waaqa keessaniif waan ajajamuu didaniif akkasuma isinis ni balleeffamtu.

9

Sababii Qajeelummaa Israa'eliif Miti

¹ Yaa Israa'el dhaga'i. Ati Saboota si caalaa gurguddaa fi humna qabeeyyii, magaalawwan dallaa samii ga'uun marfaman qaban achii baafatee dhaaluuf Yordaanos ce'uuf jirta. ² Namoonni sun ilmaan Anaaq warra jajjaboo fi dhedheeroo dha! Atis waa'ee isaanii ni beekta; akka, "Eenyutu Anaaqota dura dhaabachuu danda'a?" jedhamu illee dhageesseerta. ³ Ta'us kan akkuma ibidda waa gubee fixuu si dura ce'u WAAQAYYO Waaqa kee ta'uu isaa har'a beeki. Inni isaan balleessa; fuula kee durattis gad isaan deebisa. Atis akkuma WAAQAYYO si abdachiise sanatti ariitee isaan baafata; daftes isaan fixxa.

⁴ Erga WAAQAYYO Waaqni kee fuula kee duraa ari'ee isaan baasee booddee ati garaa keetti, "WAAQAYYO sababii qajeelummaa kootiif akka ani biyya kana dhaalu as na fide" hin jedhin. WAAQAYYO sababii hammina isaaniitiif saboota kanneen fuula kee duraa ari'ee baasa. ⁵ Ati biyya isaaniitti galtee kan dhaaltu qajeelummaa keetiin yookaan gaarummaa garaa keetiitiin utuu hin ta'in WAAQAYYO kakuu abbootii kee Abrahaaniif, Yisihaaqii fi Yaaqoobiif gale sana guutuudhaaf jedhee WAAQAYYO Waaqni kee saboota kanneen sababii hammina isaaniitiif fuula kee duraa ari'ee baasa. ⁶ Egaa WAAQAYYO Waaqni kee kan biyya gaarii kana akka dhaaltuuf siif kennu sababii qajeelummaa keetiitiif akka hin ta'in hubadhu; ati saba mata jabeessaatii.

Jabbii Warqee

⁷ Ati akkamitti akka gammoojjii keessatti WAAQAYYO Waaqa kee dheekkamsaaf kakaafte yaadadhu; hin dagatinis. Ati gaafa biyya Gibxii baatee jalqabdee hamma as geessutti WAAQAYYOTTI fincilaa turte. ⁸ Isin Kooreebitti iyyuu WAAQAYYON dheekkamsaaf kakaasnaan Waaqayyo isin barbadeessuuf isinitti aare. ⁹ Ani yeroo gabateewwan dhagaa jechuunis gabateewwan kakuu WAAQAYYO isin wajjin gale sanaa fuudhuuf tulluutti ol ba'etti guyyaa afurtamaa fi halkan afurtama tulluu sana irrannu; ani buddeena tokko illee hin nyaanne; bishaan illee hin dhugne. ¹⁰ WAAQAYYOS gabateewwan dhagaa lama kanneen quba Waaqayyootiin irratti barreeffame natti kenne. Ajajawwan WAAQAYYO yeroo isin walitti qabamtanii tulluu irratti ibidda keessaa isinitti labse hundi gabateewwan sana irra turan.

¹¹ Dhuma guyyaa afurtamaatii fi halkan afurtamaatti WAAQAYYO gabateewwan dhagaa lama jechuunis gabateewwan kakuu natti kenne. ¹² Gaafas WAAQAYYO akkana naan jedhe; "Ka'ii dafii gad bu'i; sabni kee kan ati biyya Gibxiitii baaftee fidde sun xuraa'eeraatii. Isaan waan ani isaan ajaje irraa dafanii garagalanii ofii isaaniitiif Waaqa baqamee hojjetame tolfataniiruutii."

¹³ WAAQAYYO ammas akkana naan jedhe; "Ani saba kana argeera; kunoo inni saba mata jabeessa! ¹⁴ Akka ani isaan balleessee maqaa isaanii illee samii gadii haquuf na dhiisi; si'i immoo isaan caalaa saba guddaa fi jabaa nan godha."

¹⁵ Anis of irra garagalee utuma tulluun sun boba'aa jiruu tulluu irraa gad nan bu'e. Gabateewwan kakuu lamaan sunis na harka turan. ¹⁶ Anis nan arge; kunoo isin WAAQAYYO Waaqa keessaniif cubbuu hojjetanii turtan; isin bifa jabbiiitiin Waaqa

baqfamee hojjetame ofii keessaniif tolfattanii turta. Isin daftanii karaa WAAQAYYO isin ajaje irraa jal'attan. ¹⁷ Kanaafuu ani gabateewwan lamaan sana harka koo irraa darbadhee ijuma keessan duratti nan caccabse.

¹⁸ Sababii cubbuu isin hojjetan hundaa kan isin fuula WAAQAYYOO duratti waan hamaa hojjechuudhaan dheekkamsaaf isa kakaaftan sanaatiif ani ammas fuula WAAQAYYOO duratti gombifamee utuuu buddeena hin nyaatinii fi bishaan hin dhugin guyyaa afurtamaa fi halkan afurtaman ture. ¹⁹ Sababii inni isin balleessuuf aaree tureef, ani aarii fi dheekkamsa WAAQAYYOO nan sodaadhe. WAAQAYYO garuu amma illee na dhaga'e. ²⁰ WAAQAYYO Aroonin balleessuuf akka malee itti aaree ture; ani garuu yeroo sana Arooniifis nan kadhade. ²¹ Akkasumas ani cubbuu keessan bifa jabbii isin tolfattan sanaa fuudhee ibiddaan nan gube. Caccabsees hamma inni bullaa'aa akka awwaaraa ta'utti bullessee burqaa tulluu irraa gad yaa'uttan firfirse.

²² Isinis Tabeeraatti, Maasaahii fi Qiibrooti Hataawaatti WAAQAYYO dheekkamsiifan. ²³ WAAQAYYO yommuu Qaadess Barneetii isin baasetti, "Ol ba'aatii biyya ani isiniif kenne sana dhaalaa" isiniin jedhe. Isin garuu ajaja WAAQAYYO Waaqa keessaniitti finciltan. Isas hin amananne; hin ajajamneefis. ²⁴ Isin erga ani isin beekee jalqabdani WAAQAYYOTTI finciltaniirtu.

²⁵ Sababii WAAQAYYO akka isin balleessu dubbatee tureef ani guyyaa afurtamaa fi halkan afurtaman sana fuula WAAQAYYOO duratti lafatti nan gombifame. ²⁶ Anis akkana jedheen WAAQAYYON kadhade; "Yaa WAAQAYYO Gooftaa, ati saba kee, dhaala kee kan humna kee guddichaa fi harka kee jabaadhaan furtee biyya Gibxii baafte kana hin balleessin. ²⁷ Garboota kee Abrahaam, Yisihaaqii fi Yaaqoobin yaadadhu. Mata jabina saba kanaa, hammina isaatii fi cubbuu isaa hin ilaalin. ²⁸ Yoo kanaa achii biyyi ati keessaa nu baafte sun, 'WAAQAYYO waan biyya waadaa isaaniif gale sanatti isaan galchuu hin dandeenyee fi waan isaan jibbeef gammoojjii keessatti isaan fixuuf isaan baase' jedha. ²⁹ Isaan garuu saba keetii fi dhaala kee kan ati humna jabaa fi irree diriirfameen baaftee fiddee dha."

10

Gabateewwan Gabateewwan Jalqabaa Fakkaatan

¹ Yeroo sanas WAAQAYYO akkana naan jedhe; "Gabateewwan dhagaa kanneen gabateewwan jalqabaa fakkaatan lama soofiitii tulluutti ol ba'ii na bira kottu. Taabota mukaas hojjedhu. ² Anis dubbii gabateewwan jalqabaa kanneen ati caccabsite sana irra turan gabateewwan kanneen irratti nan barreessa. Atis taabota keessa isaan keessa."

³ Ani muka laaftoo irraa taabota tolchee gabateewwan dhagaa lama akkuma kanneen jalqabaatti nan soofe; gabateewwan lamaanis harkatti qabadhee tulluu sanatti ol nan ba'e. ⁴ WAAQAYYO guyyaa wal ga'ii sana tulluu irraa Ajajawwan Kurnan ibidda keessaa isinitti dubbate sana akkuma barreeffama duraatti gabateewwan kanneen irratti barreesse; WAAQAYYOS gabateewwan kanneen natti kenne. ⁵ Anis tulluu sana irraa gad bu'ee akkuma WAAQAYYO na ajajetti gabateewwan sana taabota isa ani hojjedhee ture keessa nan kaa'e; isaanis amma achi jiru.

⁶ Israa'eloonnis Bi'eerooti Benee Yaa'akaanii ka'anii gara Mooseraatti qajeelan. Aroonis achitti du'ee awwaalame; ilmi isaa Ele'aazaar iddoo isaa bu'ee luba ta'e. ⁷ Achii ka'anii Gudgodaa dhaqan; ergasiis gara Yoxbaataa biyya bishaanota yaa'an qabduutti darban. ⁸ Yeroo sanatti WAAQAYYO gosa Lewwii akka inni taabota kakuu WAAQAYYOO baatuuf, akka fuula WAAQAYYOO dura dhaabatee isa tajaajiluu fi akka maqaa isaatiin eebbisuuf hamma har'aatti addaan baase. ⁹ Sababiin gosti Lewwii akka obbooota isaa gidduutti qooda yookaan dhaala hin qabaanne godhameefis kanuma. Akkuman WAAQAYYO Waaqni kee isaanitti himetti, WAAQAYYO dhaala isaanii ti.

¹⁰ Ammas ani akkuma yeroo jalqabaa godhe sana guyyaa afurtamaa fi halkan afurtamaa tulluu sana irrann ture; WAAQAYYO ammas na dhaga'e. Inni si balleessuudhaaf fedhii hin qabu. ¹¹ WAAQAYYOS, "Deemi; akka isaan biyya ani abbootii isaanitiif kennuudhaaf kakadhe sana seenanii dhaalaniif saba kana dura bu'ii deemi" naan jedhe.

WAAQAYYON Sodaadhu

¹² Yaa Israa'el, wanni WAAQAYYO Waaqni kee sirraa barbaadu maali? Akka ati WAAQAYYO Waaqa kee sodaattu, akka daandii isaa hunda irra deemtu, akka isa jaallattu, akka WAAQAYYO Waaqa kee garaa kee guutuu fi lubbuu kee guutuudhaan tajaajiltu, ¹³ akka siif toluuf, akka ati ajajawwanii fi qajeelchawwan WAAQAYYOO kanneen ani har'a siif kennu eegduu mitii?

¹⁴ Kunoo samiin, samiin samiiwwanii olii, laftii fi wanni ishee keessa jiru hundinuu kan WAAQAYYO Waaqa keetii ti. ¹⁵ Ta'us akkuma har'a ta'ee jiru kana, WAAQAYYO

jaalalaan qalbii isaa abbootii keessan irra buufate; isin warra sanyii isaanii taatanis saboota hunda caalchisee filate. ¹⁶ Kanaafuu qalbii keessan dhagna qabaa; si'achis mataa jabeeyyii hin ta'inaa. ¹⁷ WAAQAYYO Waaqni keessan Waaqa waaqotaa, Gooftaa gooftotaa, Waaqa guddaa, jabaa fi sodaachisaa, kan nama wal hin caalchifnee fi kan matta'aa hin fudhanneedaati. ¹⁸ Inni ijoollee abbootii hin qabnee fi niitota dhirsooni isaanii irraa du'aniif ni falma; alagootas nyaataa fi uffata isaanii kennuudhaan jaallata. ¹⁹ Alagoota jaalladhaa; isin mataan keessan biyya Gibxitti alagoota turtaniitii. ²⁰ WAAQAYYO Waaqa kee sodaadhu; isa tajaajilis. Isatti maxxani; maqaa isaatiinis kakadhu. ²¹ Inni ulfina kee ti; inni Waaqa kee kan dinqiiwwan gurguddaa fi sodaachisaa ati ija keetiin argite sana siif hojjatee dha. ²² Abbootiin kee warri Gibxitti gad bu'ana nama torbaatama turan; amma garuu WAAQAYYO Waaqni kee akka urjii samii keessaa si baay'iseera.

11

WAAQAYYON Jaalladhuutii Ajajamiif

¹ WAAQAYYO Waaqa kee jaalladhu; yeroo hundas fedhii isaa, qajeelchawwan isaa, seerawwan isaatii fi ajajawwan isaa eegi. ² Kan adabbii WAAQAYYO Waaqa keessanii, surraa isaa, harka isaa jabaa fi irree isaa kan diriirfame beeke yookaan arge isinuma malee akka ijoollee keessan hin ta'in har'a yaadadhaa. ³ Mallattoowwanii fi wantoota inni Gibxi keessatti Fara'oon mootii Gibxii fi biyya isaa guutuu irratti hojjete, ⁴ waan inni loltoota Gibxi, fardeenii fi gaariiwwanis godhe, utuma isaan isin duukaa bu'anuu akka inni Galaana Diimaadhaan isaan haguuge, akka itti WAAQAYYO badiisa bara baraa isaanitti fide yaadadhaa. ⁵ Waan inni hamma isin iddoo kana geessanitti lafa gammoojjii keessatti isiniif godhe kan arge ijoollee keessan miti; ⁶ isaan waan inni gaafa lafti afaan ishee banatee guutummaa Israa'el gidduutti Daataanii fi Abiiraam ilmaan Eliyaab namicha gosa Ruubeen sana maatii isaanii wajjin, dunkaanota isaanii fi qabeenya isaanii kan lubbuu qabu hunda liqimsitetti isaan godhe hin argine. ⁷ Iji keessan garuu waan guddaa WAAQAYYO godhe kanneen hunda argeera.

⁸ Kanaafuu isin akka Yordaanosiin ceetani biyya dhaaluuf jirtanitti galuuf jabaattaniif ajajawwan ani har'a isinii kennu hunda eegaa; ⁹ kunis akka isin biyya WAAQAYYO abbootii keessanii fi sanyii isaaniitiif kennuuf kakate kan aannanii fi damma baasu sana keessatti bara dheeraa jiraattaniif. ¹⁰ Biyyi ati dhaaluuf itti galaa jirtu kun akka biyya Gibxi kan ati keessaa baatee dhufte kan ati akkuma lafa biqiltuutti sanyii kee facaaftee miilla keetiin bishaan obaafte sanaa miti. ¹¹ Biyyi ati Yordaanos ceetee dhaaltu kun garuu biyya tulluuwwanii fi sululawwanii kan samiidhaa bokkaa argatuu dha. ¹² Biyyi kun biyya WAAQAYYO Waaqni kee kunuunsuu dha; jalqaba waggaatii hamma dhuma waggaattis iji WAAQAYYO Waaqa keetii ishee irraa hin buqqa'u.

¹³ Yoo ajajawwan ani har'a isiniif kennu amanamummaadhaan eegdan jechuunis yoo isin WAAQAYYO Waaqa keessan jaallattanii garaa keessan guutuu fi lubbuu keessan guutuudhaan isa tajaajiltan, ¹⁴ akka ati midhaan kee, wayinii keetii fi zayitii kee galfattuuf ani yeroo isaatti bokkaa birraatii fi bokkaa arfaasaa lafa keetti nan roobsa. ¹⁵ Loon keetiif marga bakkee nan kenna; atis nyaattee quufu.

¹⁶ Of eeggadhaa! Yoo kanaa achii isin akka garagaltanii waaqota biraa waaqeffattanii fi isaaniifis sagaddan gowwoomfamtu. ¹⁷ Ergasii dheekkamsi WAAQAYYOO isinitti boba'a; innis akka bokkaan hin roobne, laftis oomisha hin kennineef samiiwwan ni cufa; isinis biyya gaarii WAAQAYYO isiniif kennu irraa daftanii ni baddu. ¹⁸ Dubbiwwan koo kanneen garaa fi qalbii keessanitti qabadhaa; akka mallattootti harkatti hidhadhaa; adda keessan irrattis maxxanfadhaa. ¹⁹ Ijoollee keessanis barsiisaa; yeroo mana teessu, yeroo karaa deemtu, yeroo ciiftuu fi yeroo dammaqxutti waa'ee isaanii odeessi. ²⁰ Michichilawwan balbala mana keetiitii fi karrawwan kee irrattis isaan barreessi; ²¹ kunis akka umuriin keessanii fi umuriin ijoollee keessanii biyya WAAQAYYO abbootii keessaniif kennuuf kakate keessatti akkuma umurii samiiwwan lafaa oli jiraniitti dheeratuuf.

²² Yoo isin ajajawwan ani isiniif kennu kanneen hunda of eeggannoodhaan duukaa buutan jechuunis yoo isin WAAQAYYO Waaqa keessan jaallattan, karaa isaa hunda irra deemtanii fi isatti maxxantan, ²³ WAAQAYYO saboota hunda fuula keessan duraa ari'ee ni baasa; isinis saboota isin caalaa gurguddaa fi jajjaboo ni dhaaltu. ²⁴ Lafti miilli keessan irra dhaabate hundinuu keessan ta'a; daariin keessanis gammoojjiidhaa hamma Libaanoonitti, laga Efraaxiisii hamma galaana lixaatti ni bal'ata. ²⁵ Namni kam iyyuu fuula keessan dura dhaabachuu hin danda'u. WAAQAYYO Waaqni keessan akkuma isin abdachiisetti rifachiisuu fi sodaachisuu keessan lafa isin dhaqxan hunda irra ni buusa.

²⁶ Kunoo, ani har'a eebbaa fi abaarsa fuula keessan dura nan kaa'a; ²⁷ eebbi kunis yoo isin ajajawwan WAAQAYYO Waaqa keessanii kanneen ani har'a isiniif kennu eegdanii dha. ²⁸ Abaarsi immoo yoo isin ajajawwan WAAQAYYO Waaqa keessanii dhaga'uu diddanii karaa ani har'a isin ajaje irraa garagaltanii waaqota biraa kanneen isin duraan hin beekne duukaa buutanii dha. ²⁹ Yommuu WAAQAYYO Waaqni kee biyya ati dhaaluuf itti galta kanatti si fidutti Tulluu Gerziim irratti eebba, Tulluu Eebaal irratti immoo abaarsa labsita. ³⁰ Tulluuwwan kunneen Yordaanos gamatti, karaa gara lixa biiftuutti geessuun gama lixaatti, muka Mooree guddicha biratti, biyya Kana'aanota Arabbaa keessa jiraatan keessatti fuullee Gilgaalitti argamu mitii? ³¹ Isin biyya WAAQAYYO Waaqni keessan isiniif kennu seentanii dhaaluuf Yordaanosin ce'uudhaaf jirtu; yommuu lafa sana dhaaltanii irra jiraattanitti, ³² ajajawwanii fi seerawwan ani har'a fuula keessan dura kaa'u hunda eegaa.

12

Iddoo Waaqeffannaadhaaf Filatame

¹ Sirnawwanii fi seerawwan isin bara lafa irra jiraattan guutuu biyya WAAQAYYO Waaqni abbootii keessanii akka isin dhaaltaniif isiniif kenne keessatti of eeggannaadhaan eegdan kanneenii dha. ² Iddoowwan saboonni isin irraa fudhattan waaqota isaanii itti waaqeffatan kanneen tulluuwwan ol dhedheeroo fi gaarran irraa, akkasumas kanneen muka lalisaa kam iyyuu jalaa hunda guutumaan guutuutti balleessaa; ³ iddoowwan aarsaa isaanii diigaa; utubaawwan isaanii kanneen sagadaa caccabsaa; Aasheeraa isaanii ibiddaan gubaa; fakkii waaqota isaanii kukkuta gataa; maqaa isaanii illee iddoo sanaa balleessaa.

⁴ Isin haala isaan waaqeffataniin WAAQAYYO Waaqa keessan hin waaqeffatinaa. ⁵ Garuu iddoo WAAQAYYO Waaqni keessan Maqaa isaa achi dhaabuuf jedhee iddoo jireenya isaatiif gosoota keessan hunda keessaa filatu barbaadaa. Achis dhaqaa; ⁶ achittis aarsaa gubamuu fi qalma keessan, kennaa keessan kudhan keessaa tokko, kennaa addaa, waan kennuuf wareegdanii fi kennaa fedhiidhaan kennitan, loonii fi bushaayee keessan keessaa hangafa dhi'eessaa. ⁷ Achittis atii fi warri mana kee jiraatan fuula WAAQAYYO Waaqa keessanii duratti ni nyaattu; sababii WAAQAYYO Waaqni keessan hojii harka keessanii hundaan isin eebbiseefis ni gammaddu.

⁸ Akka nu har'a godhaa jirru kana, akka tokkoon tokkoon namaa waanuma tolaa itti fakkaate godhu kana hin godhinaa; ⁹ isin amma iyyuu boqonnaa fi dhaala WAAQAYYO Waaqni keessan isiniif kennu hin geenyeetii. ¹⁰ Garuu Yordaanos ceetanii biyya WAAQAYYO Waaqni keessan dhaala godhee isiniif kennu keessa ni qubattu; innis akka isin nagaan jiraattaniif diinota naannoo keessanii hunda jalaa boqonnaa isinii kenna. ¹¹ Ergasiis gara WAAQAYYO Waaqni keessan iddoo jireenya Maqaa isaatiif filatuutti waan ani isin ajaje hunda fiduu qabdu; kunis aarsaa gubamuu fi qalma keessan, kennaa keessan kudhan keessaa tokko, kennaa addaa, akkasumas wareega filatamaa WAAQAYYOOF kennuuf wareegdan hundaa dha. ¹² Achittis isin, ilmaanii fi intallan keessan, hojjetaa fi xomboreen keessan, akkasumas Lewwonni magaalawwan keessan keessa jiraatan kanneen qooda yookaan dhaala mataa isaanii hin qabnes fuula WAAQAYYO Waaqa keessanii duratti gammadaa. ¹³ Akka aarsaa keessan kan gubamu idduma argatan hundatti hin dhi'eessine of eeggadhaa. ¹⁴ Iddoo WAAQAYYO gosoota kee keessaa filatu tokko qofatti aarsaawwan gubaman dhi'eessi; achittis waan ani si ajaju hunda eegi.

¹⁵ Ta'us akkuma eebba WAAQAYYO Waaqni kee siif kennuutti, magaalawwan kee kam iyyuu keessatti kuruphee yookaan gadamsa qaladhuutti hamma feete nyaadhu; warri akka seeraatti hin qulqullaa'inii fi warri qulqullaa'anis foon kana nyaachuu ni danda'u. ¹⁶ Isin garuu dhiiga sana hin nyaatinaa; akkuma bishaaniitti lafatti dhangalaasaa. ¹⁷ Ati midhaan kee yookaan daadhii wayinii keetii yookaan zayitii kee harka kudhan keessaa harka tokko yookaan kennaa hangafa loon keetii yookaan kan bushaayee keetii yookaan waan kennuuf wareega gootu kam iyyuu yookaan kennaa fedhii keetii kennitu yookaan kennaa addaa magaalawwan kee keessatti hin nyaatin. ¹⁸ Qooda kanaa iddoo WAAQAYYO Waaqni kee filatuutti ati, ilmaan kee, intallan kee, hojjetoonni kee dhiiraa dubartiin, Lewwonni magaalawwan kee keessa jiraatan fuula WAAQAYYO Waaqa keetii duratti nyaadhaa; atis waan harki kee hojjetu hundaan fuula WAAQAYYO Waaqa keetii duratti gammadi. ¹⁹ Bara biyya kee keessa jiraattu guutuu akka Lewwota hin daganne of eeggadhu.

²⁰ Yommuu WAAQAYYO Waaqni kee akkuma si abdachiisetti biyya kee siif bal'isutti, ati yoo foon dharraatee, "Ani foon nyaachuu fedha" jette, hamma feete nyaachuu

dandeessa. ²¹ Yoo iddoon WAAQAYYO Waaqni kee Maqaa isaa achi dhaabbachuuf filatu akka malee sirraa fagoo ta'e, akkuma ani si ajajetti loonii fi bushaayee WAAQAYYO Waaqni kee siif kenne keessaa qalachuu, magaalawwan kee keessattis hamma feete nyaachuu dandeessa. ²² Akkuma kurupheen yookaan gadamsi nyaatamu sana isaan nyaadhu; warri akka seeraatti hin qulqullaa'inii fi warri qulqullaa'an hundi nyaachuu ni danda'u. ²³ Garuu akka dhiiga hin nyaanne of eeggadhu; sababiin isaa dhiigni waan lubbuu ta'eef ati foon wajjin lubbuu hin nyaatin. ²⁴ Ati dhiiga hin nyaatin; akkuma bishaanii lafatti dhangalaasi. ²⁵ Akka si'ii fi ijoollee kee kanneen si duubaan dhalataniif toluuf ati dhiiga hin nyaatin; ati fuula WAAQAYYOO duratti waan qajeelaa hojjechaa jirraatii.

²⁶ Garuu wantoota kee qulqulluu fi waan kennuuf wareegde fudhadhuu iddoo WAAQAYYO filatu dhaqi. ²⁷ Foonii fi dhiiga aarsaa kee kan gubamuu iddoo aarsaa WAAQAYYO Waaqa keetii irratti dhi'eessi. Dhiigni aarsaa keetii iddoo aarsaa WAAQAYYO Waaqa keetii biratti dhangalaafamuu qaba; foon isaa garuu nyaachuu dandeessa. ²⁸ Akka si'ii fi ijoollee kee kanneen si duuba dhalataniif yeroo hunda toluuf qajeelchawwan ani siif kennu kanneen hunda of eeggannaadhaan eegi; sababiin isaa ati ija WAAQAYYO Waaqa keetii duratti waan gaarii fi qajeelaa hojjechaa jirraatii.

²⁹ WAAQAYYO Waaqni kee saboota ati weerartee biyyaa baasuuf jirtu fuula kee duraa ni balleessa. Ati garuu yommuu ariitee isaan baaftee lafa isaanii irra qubattutti, ³⁰ erga isaan fuula kee duraa balleeffamanii booddees, "Saboonni kunneen akkamitti waaqota isaanii tajaajilu? Anis akkasuman godha" jettee waa'ee waaqota isaanii gaafachuudhaan kiyyoo keessa akka hin galle of eeggadhu. ³¹ Isaan sababii waaqota isaanii waaqeffachuudhaan hojii jibbisiisaa WAAQAYYO jibbu hedduu hojjetaniif, ati haala isaaniitiin WAAQAYYO Waaqa kee hin waaqeffatin. Isaan ilmaan isaaniitii fi intallan isaanii illee waaqota isaaniitiif aarsaa godhanii ibiddaan gubu.

³² Ati waan ani si ajaju hunda eegi; itti hin dabalini; irraas hin hir'isin.

13

Waaqota Biraa waaqeffachuu

¹ Yoo raajiin yookaan namni abjuudhaan waan dhufaa jiru himu tokko gidduu keessanitti argamee mallattoowwan yookaan dinqii isinitti hime, ² yoo mallattoon yookaan dinqii inni isinitti hime sun raawwatamee innis, "Kottu waaqota biraa kanneen ati duraan hin beekne duukaa buunee haa waaqeffannu" siin jedhe, ³ ati dubbii raajii yookaan nama abjootu sana hin dhaggeeffatin; WAAQAYYO Waaqni kee akka isin garaa keessan guutuu fi yaada keessan guutuudhaan isa jaallattan qoruuf waan kana godhaatii. ⁴ WAAQAYYO Waaqa keessan duukaa bu'aa; isa sodaadhaa. Ajajawwan isaa eegaa; isaaf ajajamaa; isa tajaajilaa; isattis maxxanaa. ⁵ Raajaan yookaan namichi abjuu abjootu sun, sababii akka isin WAAQAYYO Waaqa keessan kan biyya Gibxiitii isin baasee biyya garbummaa jalaa isin fure sanatti finciltan dubbateef ajjeefamuu qaba; inni karaa WAAQAYYO Waaqni keessan akka duukaa buutan isin ajaje irraa isin jal'isuuf yaaleera; hamaa of keessaa balleessi.

⁶ Yoo obboleessi kee yookaan ilmi kee yookaan intalli kee yookaan niitiin kee kan ati jaallattu yookaan michuun kee, "Kottu waaqota biraa kanneen atis taatu abbootiin kee hin beekin waaqeffannaa" jedhee dhoksaadhaan si dogogorsuu barbaade, ⁷ yoo inni waaqota saboota naannoo keetii, kanneen dhi'oo yookaan fagoo jiran, warra daarii lafaa tokkoo hamma daarii lafaa kaaniitti jirani waaqeffanna, siin jedhe, ⁸ tole hin jedhiniif yookaan isa hin dhaga'in. Hin na'iniif. Isaaf hin hiliin yookaan harka irra hin qabin. ⁹ Ati isa ajjeesuu qabda. Isa ajjeesuufis jalqabatti harki kee, itti aansees harki saba hundaa haa ka'u. ¹⁰ Waan inni akka ati WAAQAYYO Waaqa kee kan Gibxi, biyya garbummaatii si baase sana irraa garagaltu godheef dhagaadhaan tumii isa ajjeesi. ¹¹ Ergasii Israa'eloonni hundi dhaga'anii ni sodaatu; si gidduudhaas eenyu iyyuu deebi'ee waan hamaa akkasii hin hojjetu.

¹² Yoo ati magaalawwan akka ati keessa jiraattuuf WAAQAYYO Waaqni kee siif kennu keessaa tokkotti iyyuu utuu akkas jedhamuu dhageesse, ¹³ yoo namoonni hamoon isin gidduudhaa ka'anii, "Kottaa waaqota biraa kanneen isin hin beekne waaqeffannaa" jedhanii saba magaalaa isaanii dogogorsu ta'e, ¹⁴ dubbii sana iyyaafadhu; qoradhu; sirriitti gaafadhu. Kunoo, yoo dubbii sun dhugaa ta'ee wanni jibbisiisaan kun gidduu keetti hojjetamuun isaa mirkanaa'e, ¹⁵ ati namoota magaalaa sana keessa jiraatan hunda goraadeedhaan fixi; magaalaa sana illee namoota isheetii fi horii ishee wajjin guutummaan guutuutti barbadeessi. ¹⁶ Mi'a boojuu kan magaalaa sana argame hunda walakkaa oobdii isheetii walitti qabiitii magaalaa sana guutuu boojuu ishee wajjin

WAAQAYYO Waaqa keetiif aarsaa guutummaan gubamu godhiitii gubi. Isheen bara baraan barbadooftee haa haftu; deebitees hin ijaaramin. ¹⁷ Akka WAAQAYYO dheekkamsa isaa sodaachisaa irraa deebi'uuf wanni abaarame tokko harka keetti hin argamin; inni siif araarama; garaa siif laafa; akkuma abbootii keetiif kakatetti si baay'isa; ¹⁸ kunis waan ati ajajawwan isaa kanneen ani har'a siif kennu hunda eegdee fuula isaa duratti waan qajeelaa hojjechuudhaan WAAQAYYO Waaqa keetiif ajajantuuf.

14

Nyaata Qulqulluu ta'ee fi Qulqulluu Hin ta'in

14:3-20 kwf - Lew 11:1-23

¹ Isin ijoollee WAAQAYYO Waaqa keessanii ti. Nama du'eef jettanii of hin murmurinaa yookaan rifeensa adda keessaniin oli jiru hin haaddatinaa; ² ati WAAQAYYO Waaqa keetiif saba qulqulluudhaatii. WAAQAYYO akka ati qabeenya isaa jaallatamaa taatuuf jedhee saboota lafa irra jiraatan hunda keessaa si filateera.

³ Ati waan jibbiisaa tokko illee hin nyaatin. ⁴ Horiin isin nyaachuu dandeessan kanneenii dha; sangaa, hoolaa, re'ee, ⁵ gadamsa, kuruphee, borofa, re'ee diidaa, waaliyaa, saalaa fi hoolaa tulluu. ⁶ Horii kotteen isaa baqaqee iddoo lamatti gargar qoodame kan halala guuru nyaachuu ni dandeessu. ⁷ Garuu warra halala guuran yookaan warra kottee baqaqaa qaban keessaa gaala, illeettii, yookaan osolee hin nyaatinaa; isaan kunneen halala guuran iyyuu waan kotteen isaanii duudaa ta'eef isaan akka seeraatti isiniif qulqulluu miti. ⁸ Booyyeenis qulqulluu miti; kotteen isaa baqaqaa ta'us booyyeen halala hin guuru. Isin foon isaanii hin nyaatinaa yookaan raqa isaanii hin tuqinaa.

⁹ Uumamawwan bishaan keessa jiraatan hunda keessaa warra qoochoo fi qola qaban kam iyyuu nyaachuu dandeessu. ¹⁰ Garuu warra qoochoo fi qola hin qabne kam iyyuu hin nyaatinaa; isaan isiniif qulqulluu miti.

¹¹ Isin simbira qulqulluu kam iyyuu nyaachuu dandeessu. ¹² Isaan kanneen garuu hin nyaatinaa; isaanis risaa, rumicha, rumicha gurraacha, ¹³ culullee, culullee gurraacha, culullee gosa garaa garaa, ¹⁴ arraagessa gosa garaa garaa, ¹⁵ guchii, urunguu, allaattii bishaanii, coroffee gosa garaa garaa, ¹⁶ urunguu xinnaa, urunguu guddaa, urunguu adii, ¹⁷ urunguu gammoojjii, abbaa koddaa, urunguu guddaa, ¹⁸ huummoo, allaattii gosa kamii iyyuu, haadha gaayyeetii fi simbira halkanii ti.

¹⁹ Ilbiisonni barrisan hundinuu isiniif qulqulluu miti; isaan hin nyaatinaa. ²⁰ Uumamawwan qoochoo qaban kanneen qulqulluu ta'an kam iyyuu garuu nyaachuu dandeessu.

²¹ Waan ofii isaatiin du'e tokko illee hin nyaatin. Akka inni nyaatuuf alagaa magaalaa kee keessa jiraatuuf kenni yookaan nama ormaa tokkotti gurguradhu. Ati garuu saba WAAQAYYO Waaqa keetiif qulqulleffamtee dha.

Ilmoo re'ee tokko aannan haadhaa isheetiin hin affeelin.

Kudhan Keessaa Harka Tokko

²² Waan lafti qotiisaa kee waggaa kennu hunda keessaa kudhan keessaa tokko kophaatti baasii kaa'i. ²³ Akka WAAQAYYO Waaqa kee sodaachuu barattuuf iddoo inni akka Maqaan isaa achi jiraatuuf filatutti midhaan kee, wayinii kee haaraa fi zayitii kee akkasumas hangafa loonii fi bushaayee kee fuula WAAQAYYO Waaqa keetii duratti nyaadhu. ²⁴ Garuu yoo iddoo sun akka malee fagaatee, atis WAAQAYYO Waaqa keetiin eebbifamtee sababii iddoo WAAQAYYO akka Maqaan isaa achi jiraatuuf filatu sun fagoo ta'eef kennaa kee kudhan keessaa tokko baachuu dadhabde, ²⁵ kennaa kee kan kudhan keessaa tokko sana meetiitti geeddariitii, meetii sana qabadhuutii iddoo WAAQAYYO Waaqni kee filatu dhaqi. ²⁶ Meetii sanaanis waanuma feete jechuunis, loon, hoolota, daadhi wayinii yookaan dhugaatii jabaa, yookaan waan barbaadde kam iyyuu biti. Ergasii atii fi warri mana keetii fuula WAAQAYYO Waaqa keetii duratti nyaadhaa gammadaa. ²⁷ Lewwonni magaalaa kee keessa jiraatan qooda yookaan dhaala ofii isaanii waan hin qabneef ati isaan hin dagatin.

²⁸ Yeroo hunda dhuma waggaa sadaffaatti waan waggaa sana keessa galfatte kudhan keessaa tokko fuudhiitii magaalawwan keessatti kuusi. ²⁹ Kunis akka Lewwonni qooda yookaan dhaala ofii isaanii hin qabne, alagoonni, ijoolleen abbaa hin qabnee fi niittonni dhirsoonni isaanii irraa du'an warri magaalawwan keessa jiraatan nyaatanii quufanii fi akka WAAQAYYO Waaqni kee hojii harka keetii hundaan si eebbisuuf.

15

Waggaa Itti Gatiin Namaaf Dhiifamu

15:1-11 kwi - Lew 25:8-38

¹ Ati yeroo hunda dhuma waggaa torbaffaatti gatii namaaf dhiisuu qabda. ² Kunis akkanatti ta'a: namni liqii kennu hundii liqii ollaa isaa nama Israa'eliif liqeesse dhiisuufii qaba. Sababii yeroon WAAQAYYOO kan itti gatiin namaaf dhiifamu labsameef inni ollaa isaa yookaan obboleessa isaa Israa'elicha irraa waan isaaf liqeesse hin gaafatin. ³ Ati waan alagaaf liqeesse gaafachuu ni dandeessa; garuu waan obboleessi kee sirraa liqeeffate dhiisuufii qabda. ⁴ Ta'us waan WAAQAYYOO Waaqni kee biyya akka ati dhaaltuuf siif kennu irratti akka malee si eebbisuuf hiyyeessi gidduu keetti hin argamu; ⁵ kunis yoo ati guutumaan guutuutti WAAQAYYOO Waaqa keetiif ajajamtee fi yoo ati ajajawwan ani har'a siif kennu kanneen hunda eegde qofa ta'a. ⁶ Waan WAAQAYYOO Waaqni kee akkuma si abdachiisetti si eebbisuuf ati saboota baay'eedhaaf liqeesse malee tokko irraa iyyuu hin liqeeffattu. Ati saboota baay'ee bulchita malee isaan si hin bulchan.

⁷ Magaalaawwan WAAQAYYOO Waaqni kee siif kennu keessatti yoo obbolloota kee gidduu hiyyeessi jiraate obboleessa kee sana irratti garaan kee hin jabaatin yookaan isa gargaaruu irraa harka kee hin deebifatin. ⁸ Qooda kanaa harka kee isaaf diriirsitiin waan isa ga'u liqeesii. ⁹ Akka yaadni hamaan, "Waggaan torbaffaan, waggaan itti gatiin namaaf dhiifamu sun dhi'aateera" jedhu si keessatti kuufamee ati akkasiin obboleessa kee rakkataa ija hamaadhaan ilaaltee gargaaruu hin dhiifne of eeggadhu. Inni WAAQAYYOTTI ol iyyata; kunis cubbuu sitti ta'a. ¹⁰ Ati arjummaadhaan isaaf kenni; yommuu kennituufis garaan kee hin gaabbin; sababii kanaaf WAAQAYYOO Waaqni kee hojii kee hundaa fi waan harki kee qabate hundaan si eebbisa. ¹¹ Yoom iyyuu taanaan hiyyeeyyiin lafa irra ni jiraatu. Kanaafuu ani akka ati harka kee obbolloota keetiif, hiyyeeyyii fi rakkattoota biyya keetiitiif diriirfattu sin ajaja.

Garboota Bilisoomsuu

15:12-18 kwf - Bau 21:2-6

15:12-18 kwi - Lew 25:38-55

¹² Yoo namni gosa Ibrootaa, dhiirri yookaan dubartiin sitti gurguramtee waggaa ja'a siif hojette, waggaa torbafaatti bilisa baasii gad dhiisi. ¹³ Yommuu gad dhiiftuttis harka duwwaa hin geggeessin. ¹⁴ Bushaayee kee keessaa, oobdii fi iddoo cuunfaa wayinii keetii irraa arjummaadhaan kenniif. Akkuma WAAQAYYOO Waaqni kee si eebbiseti isaaf kenni. ¹⁵ Akka atis biyya Gibxitti garba turtee fi akka WAAQAYYOO Waaqni kee si fure yaadadhu. Wannani ani har'a ajaja kana siif kennuufis kanuma.

¹⁶ Garuu yoo garbichi kee sun sababii si'ii fi maatii kee jaallatuuf si wajjin jiraachuun itti tolee, "Ani si dhiisee hin deemu" siin jedhe, ¹⁷ mutaa fuudhii balbala irratti gurra isaa uri; innis bara baraan garbicha kee ta'a. Garbittii kees akkasuma godhi.

¹⁸ Garbicha kee bilisoomsuun waan ulfaataa sitti hin fakkaatin; tajaajilli isaa kan waggaa ja'aa sun gatii nama qaxaramee hojjetu tokkootti harka lama tureetii. WAAQAYYOO Waaqni kee waan ati hojjetu hundaan si eebbisa.

Horii Hangafa

¹⁹ Loonii fi bushaayee kee keessaa korma hangafa hunda WAAQAYYOO Waaqa keetiif addaan baasi; qotiyyoo kee keessaa hangafaan hin hojjetin; hangafa hoolaa keetii irraa rifeensa hin murin. ²⁰ Waggaa waggaadhaan atii fi maatiin kee iddoo WAAQAYYOO Waaqni kee filatutti fuula isaa duratti isaan nyaattu. ²¹ Yoo horiin sun hir'ina qabaate jechuunis yoo inni naafa yookaan jaamaa yookaan mudaa hamaa kam iyyuu qabaate, ati horii sana aarsaa gootee WAAQAYYOO Waaqa keetiif hin dhi'eessin. ²² Ati magaalaa kee keessatti nyaadhu. Akkuma waan horiin sun kuruphee yookaan gadamsa ta'eetti namni akka seeraatti qulqulluu hin ta'inni fi kan qulqulluu ta'e nyaachuu danda'a. ²³ Ati garuu dhiiga sana hin nyaatin; akkuma bishaaniitti lafatti dhangalaasi.

16

Faasiikaa

16:1-8 kwf - Bau 12:14-20; Lew 23:4-8; Lak 28:16-25

¹ Sababii WAAQAYYOO Waaqni kee ji'a Abiibii keessa halkaniin Gibxii si baaseef ji'a Abiibii kabaji; Faasiikaa WAAQAYYOO Waaqa keetiis ayyaanefadhu. ² Iddoo WAAQAYYOO Waaqni kee akka Maqaan isaa achi jiraatuuf filatutti bushaayee kee yookaan loon kee keessaa Faasiikaa godhii WAAQAYYOO Waaqa keetiif qali. ³ Ati akka bara jireenya keetii guutuun guyyaa itti Gibxii baate sana yaadattuuf Faasiikaa sana buddeena raacitii qabu

wajjin hin nyaatin; garuu ati sababii ariitiidhaan biyya Gibxiitii baateef bultii torba maxinoo jechuunis buddeena rakkinaa nyaadhu. ⁴ Guutummaa biyya keetii keessatti bultii torbaaf raacitiin hin argamin. Foon ati galgala guyyaa jalqabaatti aarsaa gootu hamma bariitti hin turin.

⁵ Ati magaalaa WAAQAYYO Waaqni kee siif kennu kamitti iyyuu Faasiikaa hin dhi'eessin; ⁶ garuu lafa inni iddoo jireenya Maqaa isaatiif filatutti galgala yeroo biiftuun gad buututti yaadannoo guyyaa itti biyya Gibxiitii baateetiif aarsaa Faasiikaa dhi'eessi. ⁷ Aarsaa Faasiikaa sana waadiitii iddoo WAAQAYYO Waaqni kee filatutti nyaadhu. Ergasiis ganama gara dunkaana keetiitti deebi'i. ⁸ Bultii ja'a maxinoo nyaadhu; bultii torbaffaatti immoo WAAQAYYO Waaqa keetiif wal ga'ii qulqulluu godhi; hojii illee hin hojjetin.

Ayyaana Torbanootaa

16:9-12 kwf - Lew 23:15-22; Lak 28:26-31

⁹ Gaafa midhaan kee haamuu jalqabdee kaasii torbanoota torba lakkaa'i. ¹⁰ Ergasiis akkuma baay'ina eebba WAAQAYYO Waaqni kee siif kenneetti kennaa fedhiidhaan kenitu dhi'eessuudhaan Ayyaana Torbanootaa WAAQAYYO Waaqa keetiif ayyaaneffadhu. ¹¹ Ati, ilmaanii fi intallan kee, hojjettoonni kee dhiironnii fi dubartiin, Lewwonni magaalaaawwan kee keessa jiraatan, alagoonni, ijoolleen abbaa hin qabnee fi niitonni dhirsoonni isaanii irraa du'an kanneen isin gidduu jiraatan achitti, iddoo WAAQAYYO Waaqni kee iddoo jireenya Maqaa isaatiif filatutti fuula isaa duratti ni gammaddu. ¹² Ati akka Gibxitti garba turte yaadadhu; seera kanas akka gaariitti eegi.

Ayyaana Daasii

16:13-17 kwf - Lew 23:33-43; Lak 29:12-39

¹³ Erga oobdii fi iddoo cuunfaa wayinii keetii irraa oomisha kee galfattee hooddee guyyaa torbaaf Ayyaana Daasii ayyaaneffadhu. ¹⁴ Ati, ilmaanii fi intallan kee, tajaajiltoonni kee dhiironnii fi dubartoonni, Lewwonni, alagoonni, ijoolleen abbootii hin qabnee fi dubartoonni dhirsoonni isaanii irraa du'an kanneen magaalaaawwan kee keessa jiraatan ayyaana kee irratti gammadaa. ¹⁵ Ayyaana kanas iddoo WAAQAYYO filatutti bultii torbaaf WAAQAYYO Waaqa keetiif ayyaaneffadhu. Sababii WAAQAYYO Waaqni kee oomisha keetii fi hojii harka keetii hundaan si eebbisuuf gammachuun kee guutuu ta'a.

¹⁶ Dhiirri kee hundi waggaatti yeroo sadii iddoo inni filatutti fuula WAAQAYYO Waaqa keetii duratti dhi'aachuu qabu; kunis yeroo Ayyaana Maxinoo, yeroo Ayyaana Torbanootaatiif fi yeroo Ayyaana Daasii ti. Namni tokko iyyuu harka duwwaa fuula WAAQAYYOO duratti hin dhi'aatin: ¹⁷ Tokkoon tokkoon keessan akkuma baay'ina eebba WAAQAYYO Waaqni keessan isiniif kenneetti kennaa fidaa.

Abbootii Murtii

¹⁸ Magaalaaawwan WAAQAYYO Waaqni kee siif kennu hundattuu gosoota kee hundaaf abbootii seeraatii fi gondaaltota muudi; isaanis dhugaadhaan namootaaf murtii kennu. ¹⁹ Ati murtii hin jal'isin yookaan nama wal hin caalchisin. Matta'aa hin fudhatin; matta'aan ija ogeeyyii jaamsee dubbii qajeeltotaas jal'isa. ²⁰ Ati akka lubbuudhaan jiraattee lafa WAAQAYYO Waaqni kee siif kennu dhaaltuuf murtii qajeelaa qofa duukaa bu'i.

Waaqota Biraa Waaqeffachuu

²¹ Iddoo aarsaa kan WAAQAYYO Waaqa keetiif dhaabde bira siidaa Aasheeraa hin dhaabin. ²² Soodduu dhagaa kan WAAQAYYO Waaqni kee jibbu ofii keetiif hin dhaabbatin.

17

¹ Sangaa yookaan hoolaa fafa yookaan hir'ina kam iyyuu qabu WAAQAYYO Waaqa keetiif aarsaa hin dhi'eessin; wanni akkasii isa biratti jibbisiisaa dhaatii.

² Yoo dhiirri yookaan dubartiin magaalaaawwan WAAQAYYO Waaqni kee siif kennu keessaa tokko keessa gidduu kee jiraattu tokko kakuu isaa cabsuudhaan fuula WAAQAYYO Waaqa keetii duratti waan hamaa hojjetee argame, ³ yoo ajaja koo darbee waaqota ormaa waaqeffate, gad jedhee biiftuuf yookaan ji'aaf yookaan urjiwwan samitiif sagadde, ⁴ yoo wanni kun sitti himamee atis dhageesse, dubbicha gad qabii akka gaariitti qoradhu; yoo wanni jedhame sun dhugaa ta'ee wanni jibbisiisaan akkasii Israa'el keessatti hojjetamuun isaa mirkanaa'e, ⁵ namicha yookaan dubartii waan hamaa kana hojjetee gara balbala magaalaa sanaatti geessiti dhugaadhaan tumii ajjeesi. ⁶ Namni duuti isaaf malu tokko dhuga ba'umsa nama lamaa yookaan sadiitiin haa ajjeefamu; garuu dhuga ba'umsa nama tokkoo qofaan namni kam iyyuu ajjeefamuu hin qabu.

⁷ Yommuu ajjeefamus jalqabatti harki dhuga baatotaa, itti aansee immoo kan sabaa isa irra haa bu'u; ati waan hamaa of keessaa baasuu qabda.

Mana Murtii Seeraa

⁸ Yoo dubbiiwwan murteessuuf rakkisaa ta'an mana murtii keetti dhi'aatan jechuunis kan akka dhiiga dhangalaasuu, wal mormii seera tokkootii fi kan biraa, yookaan miidhaa dhagna irra ga'u kan garaa garaa gidduutti wanni murtii kennuuf rakkisu yoo ka'ee, ati lafa WAAQAYYO Waaqni kee filatutti geessi. ⁹ Gara Lewwota warra luboota ta'aniitii fi qondaaltota yeroo sana hojii irra turanii dhaqi. Waa'ee dubbii sanaa isaaniin mari'adhu; isaanis murtii isaa sitti himu. ¹⁰ Atis akkuma yaada isaan siif kennan sanaatti iddoo WAAQAYYO filatutti murtii kennuu qabda. Waan hunda qajeelfama isaan siif kennaniin hojjedhu. ¹¹ Akka seera isaan si barsiisaniitii fi akka qajeelfama isaan siif kennaniitti hojjedhu. Waan isaan sitti himan irraa mirgatti yookaan bitaatti hin gorin. ¹² Namni abbaa seeraa yookaan luba WAAQAYYO Waaqa kee tajaajiluuf achi dhaabatu tuffatu haa ajjeefamu. Ati waan hamaa Israa'el keessaa baasuu qabda. ¹³ Sabni hundis waan kana dhaga'ee ni sodaata; itti deebi'ees hin tuffatu.

Mootii Moosifachuu

¹⁴ Ati yommuu biyya WAAQAYYO Waaqni kee siif kennutti galtee dhaaltuu fi biyya sana keessa qubatee, "Akkuma saboota naannoo koo jiraataniitti anis mootii of irrattan moosisa" jettutti, ¹⁵ mootii WAAQAYYO Waaqni kee filatu of irratti moosisi. Nama obboleessa kee Israa'el ta'e keessaa malee nama biyya alaa of irratti hin moosisin. ¹⁶ Sababii WAAQAYYO, "Lammata garas hin deebitan" jedhee sitti himeef, mootichi ofii isaatii fardeen hin baay'ifatin yookaan lakkoobsa fardeenii baay'ifachuuf jedhee gara Gibxitti saba hin deebisin. ¹⁷ Akka yaadni isaa hin badneef inni niitota baay'ee fuudhuu hin qabu; meetii fi warqee baay'isees walitti qabachuu hin qabu.

¹⁸ Inni yommuu teessoo mootummaa isaa irra taa'itti garagalchaa seera kanaa luboota Lewwota ta'an irraa fudhatee kitaaba maramaa irratti ofii isaatii haa barreeffatu. ¹⁹ Inni akka WAAQAYYO Waaqa isaa sodaachuu baratuuf dubbii seera kanaa hundaa fi ajajawwan kanneen of eeggannaadhaan duukaa bu'uuf kitaabichi isa wajjin haa turu; innis bara jireenya isaa guutuu haa dubbisu; ²⁰ kunis akka inni akka waan obboloota isaa caaluutti of ilaalee seericha irraa gara mirgaatti yookaan bitaatti hin gorreef. Akkasiinis innii fi sanyiin isaa mootummaa isaa irratti Israa'el keessatti bara dheeraadhaaf ni moo'u.

18

Qooda Lubootaatii fi Lewwotaa

¹ Luboonni warri Lewwota ta'an jechuunis gosti Lewwii hundi Israa'el wajjin qooda lafaa yookaan dhaala hin argatan. Isaan aarsaa ibiddaan WAAQAYYOOF dhi'aatu irraa haa nyaatan; kun qooda isaaniitii. ² Isaan obboloota isaanii gidduutti dhaala tokko iyyuu hin qabaatin; akkuma inni isaan abdachiisetti WAAQAYYO dhaala isaaniitii.

³ Qoodni luboonni saba aarsaa kormaa yookaan hoolaa dhi'eessu irraa argachuu malan foon harkaa, kan mangaagaatii fi mi'a garaa ti. ⁴ Mataa midhaan keetii, daadhii wayinii haaraa fi zayitii kee kan jalqabaa akkasumas suufii jalqabaa kan hoolaa kee irraa haaddu isaanii kennuu qabda; ⁵ kunis sababii WAAQAYYO Waaqni kee akka isaan yeroo hunda dhaabatanii maqaa WAAQAYYOOTIIN tajaajilaniif gosoota kee hunda keessaa sanyii isaanii filateef.

⁶ Lewwichi tokko yoo magaalaawwan kee kanneen guutummaa Israa'el keessatti argaman kam iyyuu keessaa iddoo jiraatuu ba'ee garaa guutuudhaan iddoo WAAQAYYO Waaqni filatu dhufe, ⁷ innis akkuma Lewwota fuula WAAQAYYOO dura dhaabatanii tajaajilaniitti achitti maqaa WAAQAYYO Waaqa isaatiin haa tajaajilu. ⁸ Inni qabeenya maatii isaa kan gurguramu irraa maallaqa argatu illee Lewwota michoota isaa wajjin faayidaa argamu wal qixxee hirmaachuu qaba.

Hojiwwan Jibbiisoo

⁹ Ati yommuu biyya WAAQAYYO Waaqni kee siif kennutti galtutti, hojii balfamaa saboonni achi jiraatan hojjetan sana hojjechuu hin baratin. ¹⁰ Namni ilma isaa yookaan intala isaa ibiddatti aarsaa godhu, namni waa himu yookaan falfala hojjetu, namni milkii ilaalu, tolfattuun, ¹¹ yookaan xibaartuun, ilaaltuun yookaan eker dubbistuun yookaan namni nama du'e wajjin dubbatu tokko iyyuu gidduu keetti hin argamin. ¹² Namni waan akkasii hojjetu kam iyyuu fuula WAAQAYYOO duratti balfamaa dha; sababii hojii jibbiisaa kanaatiifis WAAQAYYO Waaqni fuula kee duraa saboota ari'ee ni baasa. ¹³ Ati fuula WAAQAYYO Waaqa keetii duratti hir'ina malee jiraachuu qabda.

Raajii

¹⁴ Saboonni ati lafa isaanii irraa buqqiftu warra falfala hojjetan yookaan warra ilaalanii dha. Garuu akka ati waan akkasii hojjetu WAAQAYYO Waaqni kee siif hin eeyyamamne. ¹⁵ WAAQAYYO Waaqni kee obboloota kee keessaa raajii akka kootii tokko siif kaasa. Atis isa dhaga'uu qabda. ¹⁶ Wannii ati gaafa waldaan Kooreebitti walitti qabame, "Ani akka hin duuneef lammata sagalee WAAQAYYO Waaqni kootii hin dhaga'u yookaan ibidda guddaa kana si'achi hin argu" jettee WAAQAYYOON Waaqni kee kadhatte kanaatii.

¹⁷ WAAQAYYO akkana naan jedhe: "Wannii isaanii jedhan gaarii dha. ¹⁸ Ani raajii akka keetii obboloota isaanii gidduudhaa isaaniif nan kaasa; dubbii koo afaan isaa keessa nan kaa'a; innis waan ani isa ajaju hunda isaanitti hima. ¹⁹ Nama dubbii koo kan raajiin maqaa kootiin dubbatu dhaga'uu didu kam iyyuu, ani mataan koo isa nan gaafadha. ²⁰ Garuu raajiin waan maqaa kootiin dubbatu fakkeessee waan ani akka inni dubbatu isa hin ajajin kam iyyuu dubbatu yookaan kan maqaa waaqota biraatiin dubbatu haa ajjeefamu."

²¹ Ati garaa keetti, "Nu dubbii WAAQAYYO nutti hin dubbatin akkamitti beekuu dandeenya?" jetta ta'a. ²² Yoo wannii raajiin tokko maqaa WAAQAYYOON dubbate utuu hin guutamin hafe, dubbiin sun dubbii WAAQAYYO hin dubbatinii dha. Raajiin sun itti fakkeessee dubbateeraatii isa hin sodaatin.

19*Magaalaawwan Itti Baqatan*

19:1-14 kwi - Lak 35:6-34; KeD 4:41-43; Iya 20:1-9

¹ Yommuu WAAQAYYO Waaqni kee saboota biyya isaanii siif kennu balleessutti, yommuu ati ariitee isaan baaftee magaalawwanii fi manneen isaanii keessa qubattutti, ² walakkaa biyya WAAQAYYO Waaqni kee akka ati dhaaltuuf siif kennutti ofii keetiif magaalawwan sadii addaan baafadhu. ³ Akka namni nama ajjeese kam iyyuu itti baqatuuf daandiiwwan hojjedhuutti biyya WAAQAYYO Waaqni kee akka dhaalaatti siif kennu iddoo sadiitti goodi.

⁴ Seerri waa'ee nama nama ajjeesee lubbuu isaa baafachuuf achitti baqatuu jechuunis kan utuu hammina itti hin yaadin akka tasaa nama ollaa isaa ajjeesuu tokko ilaalu kanaa dha. ⁵ Namni tokko yoo muka murachuuf namicha ollaa isaa wajjin bosona seenee utuu muka muruuf qottoo isaa ol fudhatuu akkuma tasaa sibiilli irraa buqqa'ee namicha ollaa isaa sana dha'ee ajjeese, namni sun magaalawwan kanneen keessaa isa tokkotti baqatee lubbuu ofii isaa oolfachuu danda'a. ⁶ Yoo kanaa achii namni haaloo dhiigaa baasu tokko waan namichi nama ajjeese sun utuu duraan dursee hammina itti hin yaadin ollaa isaa ajjeesef yoo ajjeefamuu hin qabaatin illee fagoo ta'u iyyuu inni aariidhaan duukaa bu'ee qaqqabee isa ajjeesuu danda'a. ⁷ Sababiin ani akka ati magaalaa sadii ofii keetiif addaan baafattu si ajajeefis kanuma.

⁸ Yoo WAAQAYYO Waaqni kee akkuma abbootii keetiif kakuudhaan waadaa gale sanatti biyya kee siif bal'isee biyya waadaa isaaniif gale sana guutummaatti siif kenne, ⁹ ati WAAQAYYOON Waaqni kee akka jaallachuu fi yeroo hunda karaa isaa irra akka deemtuuf ajajawwan ani har'a siif kennu hunda akka gaariitti yoo eegde, magaalawwan kanneen irratti magaalawwan sadii ni dabalatta. ¹⁰ Akka lafa kee kan WAAQAYYO Waaqni kee dhaala godhee siif kennu keessatti dhiigni nama qulqulluu hin dhangalaanee fi atis yakka dhiiga dhangalaasuutti akka hin gaafatamneef waan kana godhi.

¹¹ Garuu yoo namni tokko nama ollaa isaa jibbee riphee eeggachuudhaan miidhaa irraan ga'ee isa ajjeesee ergasii immoo magaalawwan kanneen keessaa tokkotti baqate, ¹² maanguddoonni magaalaa inni keessa jiraachaa turee nama itti erganii magaalaa inni itti baqate sanaa isa haa fichisiisan; akka inni ajjeesuufis nama haaloo dhiigaa ba'utti dabarsanii isa haa kennan. ¹³ Garaa hin laafiniif; akka siif toluuf yakka dhangalaafama dhiiga nama qulqulluu Israa'el keessaa balleessi.

¹⁴ Biyya WAAQAYYO Waaqni kee akka dhaaltuuf siif kennu keessatti dhaala dabarfamee siif kennamu irratti dhagaa mallattoo daangaa ollaa keetii kan namoonni durii dhaaban hin hiiqsin.

Dhuga Baatota

¹⁵ Nama yakka yookaan seera cabsuu kamiin iyyuu himatame tokkotti muruuf dhuga ba'umsi nama tokkoo ga'aa miti. Dubbiin sun dhuga baatota lamaan yookaan sadiin mirkaneeffamuu qaba.

¹⁶ Yoo dhuga baatuun jal'aan tokko sobaan nama tokkotti dhugaa ba'e, ¹⁷ namoonni wal dhaban lamaan fuula WAAQAYYOO duratti lubootaa fi abbootii murtii kanneen

yeroo sanatti hojii irra jiran dura haa dhaabatan. ¹⁸ Abbootiin murtiis dubbicha gad fageessanii haa qoran; yoo dhuga baatuun sun sobduu ta'uun isaa mirkanaa'ee obboleessa isaa irratti sobaan dhugaa ba'ee, ¹⁹ waanuma inni obboleessa isaa gochuu yaade sana isa godhaa. Ati hamaa of keessaa baasuu qabda. ²⁰ Namoonni hafan waan kana dhaga'anii ni sodaatu; wanni hamaan akkasiis lammata gidduu keetti hin hojjetamu. ²¹ Ati gara laafina tokko iyyuu hin argisiisin; qooda lubbuu lubbuun, qooda ijaa ijji, qooda ilkaanii ilkaan, qooda harkaa harki, qooda miillaas miilli baafamuu qaba.

20

Waraanaaf Ba'uu

¹ Sababii WAAQAYYO Waaqni kee inni biyya Gibxiitii si baase sun si wajjin jiruuf yommuu diinota kee loluuf baatutti fardeenii fi gaariwwan akkasumas humna waraanaa kan humna waraanaa kee caalu argitutti hin sodaatin. ² Yommuu ati waraanatti dhi'aattutti lubni fuula duratti ba'ee loltootatti haa dubbatu. ³ Innis akkana haa jedhu; "Yaa Israa'el, isin har'a diinota keessan loluuf waraanatti seenuuf jirtu. Garaan keessan hin raafamin yookaan hin sodaatinaa; hin na'inaa yookaan fuula diinota keessanii duratti hin hollatinaa. ⁴ Kan mo'annaa isiniif kennuuf jedhee diinota keessan isiniif loluuf isin wajjin ba'u WAAQAYYO Waaqa keessaniitii."

⁵ Ajajjoonni loltootaa immoo loltootaan akkana haa jedhan: "Namni mana haaraa ijaaree hin eebbisiin tokko iyyuu jiraa? Inni gara mana isaatti haa deebi'u; yoo kanaa achii inni waraana irratti du'ee namni biraa mana isaa eebbisa. ⁶ Namni wayinii dhaabee irraa hin nyaatin jiraa? Inni gara mana isaa haa deemu; yoo kanaa achii inni lola keessatti du'ee namni biraa wayinii sana nyaata. ⁷ Namni niitii fuudhuuf kadhatee utuu hin fuudhin dhufe jiraa? Inni gara mana isaa haa deemu; yoo kanaa achii inni lola irratti du'ee namni biraa ishee fuudha." ⁸ Ajajjoonni loltootaa ammas, "Namni sodaatu yookaan kan garaan isaa raafamu jiraa? Akka garaan obboloota isaas hin raafamneef inni gara mana isaatti haa deebi'u" haa jedhan. ⁹ Ajajjoonni yommuu loltootatti dubbatanii raawwatanitti loltoota irratti ajajjoota haa muudan.

¹⁰ Ati yommuu magaalaa tokko dha'uuf baatutti, duraan dursii namoota magaalaa sana keessa jiraataniif waamicha nagaa godhi. ¹¹ Yoo isaan tole jedhanii balbala siif banan, namni hundi siif haa bulu; hojjetaa kees haa ta'u. ¹² Yoo isaan waamicha nagaa fudhachuu didanii waraanaaf sitti ba'an ati magaalattii marsi. ¹³ Yommuu WAAQAYYO Waaqni kee dabarsee isaan sitti kennutti dhiirota magaalattii keessa jiraatan hunda goraadeedhaan fixi. ¹⁴ Garuu nadheenii fi ijoollee, horii fi waan magaalattii keessatti argamu hunda booji'itii ofii keetti fudhadhu; ati boojuu WAAQAYYO Waaqni kee diinota kee irratti siif kennetti fayyadamuu ni dandeessa. ¹⁵ Akki ati magaalawwan saboota naannoo keetii hin ta'in kanneen akka malee fagoo ta'an gootus kanuma.

¹⁶ Ta'us magaalawwan saboota WAAQAYYO Waaqni kee akka dhaalaatti siif kennu keessatti waan hafuura baafatu tokko illee hin hambisin. ¹⁷ Akkuma WAAQAYYO Waaqni kee si ajajetti guutumaan guutuutti isaan barbadeessi; isaanis Heetota, Amoorota, Kana'aanota, Feerzota, Hiiwotaa fi Yebuusota. ¹⁸ Yoo kanaa achii akka ati waan jibbisiisaa isaan waaqota isaanii waqeffachuudhaan hojjetan sana duukaa buutu si barsiisu; atis WAAQAYYO Waaqa keetti cubbuu hojjetta.

¹⁹ Ati yommuu yeroo dheeraadhaaf magaalaa sana marsitee qabachuudhaaf ishee waraantutti, mukkeen ishee qotoodhaan cirtee hin balleessin; ati midhaan isaanii nyaachuu dandeessaatii isaan hin cirin. Ati kan isaan marsitu mukkeen bosonaa namoota ta'aniitii? ²⁰ Garuu hamma magaalaa si wajjin wal loltu sun kuffutti mukkeen akka isaan gumaa hin naqanne beektu murtee hojii ijaarsa marsuutiitti fayyadamuu ni dandeessa.

21

Aarsaa Ajjeechaa Hin Beekamneef Dhi'eeffamu

¹ Yoo namni tokko biyya WAAQAYYO Waaqni kee akka dhaaltuuf siif kennu keessatti du'ee argamee namni isa ajjeese hin beekamin, ² maanguddoonni keetii fi abbootiin murtii kee dhaqanii fageenya iddoo inni itti du'ee fi magaalawwan itti dhi'aatan gidduu jiru haa safaran. ³ Ergasiis maanguddoonni magaalaa reeffichatti aantu keessa jiraatan goromsa takkumaa hin hojjetin kan waanjoo hin baatin fuudhanii ⁴ goromsa sana gara sulula hin qotamin yookaan wanni tokko iyyuu irra hin facaafamin kan bishaan yaa'u qabuutti haa geessan. Sulula sana keessattis morma goromsa sana haa cabsan. ⁵ Luboonni jechuunis ilmaan Lewwii sababii akka tajaajilani fi akka maqaa WAAQAYYOOTIIN eebbisiiniif, akka dubbii wal dhabisaatii fi miidhaa dhagnaa kami irratti

iyuu murtii kennaniif WAAQAYYO Waaqa keetiin filatamaniif isaan fuulduraatti haa dhi'aatan. ⁶ Ergasii maanguddoonni magaalaa reeffichatti baay'ee dhi'aatu hundi goromsa sulula keessatti mormi cabsame sana irratti harka isaanii haa dhiqatan. ⁷ Isaanis akkana haa jedhan: "Harki keenya dhiiga kana hin dhangalaafne yookaan yommuu wanni kun hojjetame iji keenya hin argine. ⁸ Yaa WAAQAYYO, aarsaa araaraa kana saba kee Israa'el kan furte sanaaf fudhadhu; dhiiga nama qulqulluu kanaas saba keetti hin herregin. Yakkii dhiiga dhangalaafamees isaanii haa dhiifamu. ⁹ Atis sababii waan fuula WAAQAYYOO duratti qajeelaa ta'e hojjeteeff yakka dhangalaafamuu dhiiga nama qajeelaa akkasiin gidduu keetii ni balleessita."

Dubartii Booji' amte Fuudhuu

¹⁰ Ati yommuu diinota kee loluuf duultee WAAQAYYO Waaqni kee dabarsee harka keetti isaan siif kennee boojuu fudhattutti, ¹¹ yoo warra booji'aman keessatti dubartii bareedduu tokko argitee ishee jaallatte niitii ofii keetii godhattee ishee fuudhuu dandeessa. ¹² Mana keetti ishee galchi; isheenis mataa ishee haa haaddattu; qeensa ishees haa qorattu; ¹³ uffata isheen yeroo booji'amtetti uffachaa turtes irraa baasi. Erga isheen mana kee keessa jiraattee ji'a tokko guutuu abbaa fi haadha isheetiif boossee booddee ati ishee wajjin ciiftee dhirsa ishee ta'uu dandeessa; isheenis niitii kee ni taati. ¹⁴ Ati yoo isheetti gammaduu baatte akka isheen gara feete deemtu gad dhiisi. Ati waan ishee salphifteeff ishee gurguruu yookaan akka garbittiitti ishee ilaaluu hin qabdu.

Mirga Hangafaa

¹⁵ Namni tokko yoo niitota lama qabaatee ishee tokko jaallatee garuu lamaan isaanii iyuu ilmaan da'aniif, yoo ilmi hangafni niitii inni hin jaallanne sana irraa dhalate, ¹⁶ namichi yommuu qabeenya isaa ilmaan isaatiif goodutti mirga hangafummaa ilma niitii jibbe sana ilma niitii jaallatuutiif dabarsee kennuu hin qabu. ¹⁷ Garuu ilma hangafticha niitii hin jaallanne sana irraa dhalcheeff gooda dhaala isaa keessaa harka lama kennuufiidhaan isa beeksisuu qaba. Ilmi sun mallattoo jalqabaa kan jabina abbaa isaa ti. Mirgi hangafummaa kan isaa ti.

Ilma Hin Ajajamne

¹⁸ Namni tokko yoo ilma mata jabeessaa fi fincilaa abbaa fi haadha isaatiif hin ajajamnee fi kan yommuu isa adaban hin dhageenye qabaate, ¹⁹ abbaa fi haati isaa qabanii balbala magaalaa isaa duratti maanguddootatti isa haa fidan. ²⁰ Isaanis, "Gurbaan keenya kun mata jabeessaa fi fincilaa dha; nuuf hin ajajamu; inni albaadhessaa fi machooftuu dha" jedhanii maanguddootatti haa himan. ²¹ Ergasii namoonni magaalaa isaa hundi dhagaadhaan tumaniis isa ajjeesu. Ati hamaa of gidduudhaa baasuu qabda. Israa'eloonni hundi waan kana dhaga'anii ni sodaatu.

Seerawwan Garaa garaa

²² Yoo namni tokko cubbuu adabbii du'a isatti mursiisu hojjetee ajjeefamee reeffi isaa mukatti fannifame, ²³ ati reeffa isaa muka irra bulchuu hin qabdu. Waan namni muka irratti fannifamu abaarsa Waaqaa jala jiruuf isa gaafuma sana awwaali. Ati biyya WAAQAYYO Waaqni kee akka dhaalaatti siif kennu hin xureessin.

22

¹ Utuu sangaan yookaan hoolaan obboleessa keetii badaa jiruu yoo argite, deebisiitii isatti fidi malee cal'iftee bira hin darbin. ² Yoo obboleessi sun sirraa fagoo jiraate yookaan yoo isa beekuu baatte sangaa yookaan hoolaa sana fuudhii galiitii hamma inni barbaacha dhufutti of bira tursi. Ergasii deebisii isaaf kenni. ³ Yoo harreen yookaan wayyaan yookaan wanni fedhe iyuu obboleessa kee jalaa badee argite akkasuma godhi malee dhiiftee bira hin darbin.

⁴ Yoo harreen yookaan sangaan obboleessa keetii karaa irratti kufee argite akka inni ol kaasee miilla isaatiin dhaabu gargaari malee bira hin darbin.

⁵ Dubartiin uffata dhiiraa uffachuu hin qabdu yookaan dhiirri uffata dubartii uffachuu hin qabu; WAAQAYYO Waaqni kee nama waan akkasii hojjetu kam iyuu ni jibbaatii.

⁶ Ati yoo mana simbiraa kan muka irra yookaan lafa jiru utuu haati cuucii ishee yookaan anqaaquu ishee hammattee jirtuu karaa cinatti argite haadha sana cuucii ishee wajjin hin fudhatin; ⁷ ati cuucii ishee fudhachuu ni dandeessa; garuu akka siif tolee bara dheeraa jiraattuuf akka haadha gad dhiifte mirkaneeffadhu.

⁸ Yommuu mana haaraa ijaartutti akka namni bantii manaa irraa kufee mana keetti yakka dhangala'uu dhiigaa hin fidneef qarqara bantii isaatti ittisa tolchi.

⁹ Iddoo dhaabaa wayinii keetii keessa sanyii gosa lamaa hin facaasin; yoo ati akkas goote sanyii ati facaafte sana qofa utuu hin ta'in iji iddoo dhaabaa wayinii keetiis ni bada.

¹⁰ Qotiiyyoo fi harree walitti camaddee ittiin hin qotin.

¹¹ Uffata suufii fi quncee talbaa kan walitti fo'amee dha'ame hin uffatin.

¹² Roga wayyaa uffattuu afran irratti handaara tolchi.

Rakkina Gaa'ela Keessatti Uumamu

¹³ Yoo namni tokko niitii fuudhee erga ishee wajjin ciisee booddee ishee jibbee, ¹⁴ ishees qaanessee maqaa balleessuudhaan, "Ani niitii tana fuudheera; garuu yommuu ani ishee wajjin ciisetti waan durbummaa ishee mirkaneessu hin arganne" jedhee, ¹⁵ abbaa fi haati intalattii ragaa durbummaa ishee mirkaneessu balbala irratti maanguddoota magaalattiitti haa dhi'eessan. ¹⁶ Abbaan intalattii maanguddootaan akkana haa jedhu; "Ani intala koo nama kanatti heerumsiiseera; inni garuu ishee jibbe. ¹⁷ Maqaa ishees balleessee, 'Ani intala kee durbummaa isheetiin hin arganne' jedhe. Garuu ragaan durbummaa intala kootii mirkaneessu kunoo ti." Kana irratti abbaa fi haati ishee fuula maanguddoota magaalattii duratti wayyaa sana haa diriirsan; ¹⁸ maanguddoonni sunis namicha sana qabani haa adaban. ¹⁹ Isaanis sababii namichi kun maqaa durba Israa'el tokkoo xureesseef meetii saqilii dhibba tokko baasisanii abbaa intalattiitiif haa kennan; isheen niitii isaa taatee haa jiraattu; innis hamma lubbuudhaan jirutti ishee hiikuu hin danda'u.

²⁰ Ta'us yoo himannaan dhi'aate sun dhugaa ta'ee ragaan durbummaa intalattii mirkaneessu hin argamin, ²¹ isheen balbala mana abbaa ishee duratti fidamtee namoonni magaalaa ishee hamma isheen duututti dhagaadhaan ishee haa tuman; isheen utuma mana abbaa ishee jirtuu sagaagaluudhaan gocha Israa'el keessatti qaani ta'e hojjetteerti. Ati gidduu keetii waan hamaa baasuu qabda.

²² Yoo namni tokko utuu niitii nama biraa wajjin ciisuu argame lamaan isaanii iyyuu, namichi ishee wajjin ciisee fi dubartiin sun ajjeefamuu qabu. Ati Israa'el keessaa waan hamaa baasuu qabda.

²³ Yoo namni tokko durba kaadhimamte magaalatti argee ishee wajjin ciisee, ²⁴ waan isheen utuu magaalaa keessa jirtuu na oolchaa jettee hin iyyiniif, namichi immoo waan niitii nama biraa salphiseef, lamaan isaanii iyyuu gara balbala magaalatti geessaatii hamma isaan du'anitti dhagaadhaan tumaa. Waan hamaa gidduu keessanii balleessaa.

²⁵ Garuu yoo namni tokko durba kadhatamte tokko baadiyyaatti argee ishee gudeede, namichi waan kana godhe gofti haa ajjeefamu. ²⁶ Intalattii hin tuqinaa; isheen cubbuu du'aan ishee ga'u tokko iyyuu hin hojjenneetii. Dubbiin akkasii nama balaa buusee namicha ollaa isaa ajjeesuun wal fakkaata; ²⁷ kunis waan namichi durba kaadhimamte sana baadiyyaatti argatee yoo iyyite illee namni isheef birmatu hin argamneef.

²⁸ Namni tokko yoo durba hin kaadhimamin tokko argee humnaan ishee gudeedee wannu kun beekame, ²⁹ inni abbaa isheetii fi meetii saqilii shantama haa baasu. Inni waan gudeedee durbummaa ishee balleesseeff ishee fuudhuu qaba. Hamma lubbuun jiruttis ishee hiikuu hin danda'u.

³⁰ Namni tokko niitii abbaa isaa fuudhuu hin qabu; inni siree abbaa isaa hin xureessin.

23

Waldaa Irraa Dhowwamu

¹ Namni kolaafame yookaan dhagni saala isaa irraa murame kam iyyuu waldaa WAAQAYYOO hin seenin.

² Namni haraamuudhaan dhalate yookaan sanyiin isaa kam iyyuu hamma dhaloota kurnaffaatti waldaa WAAQAYYOO hin seenin.

³ Namni gosa Amoon yookaan gosa Mo'aab yookaan sanyiin isaa kam iyyuu hamma dhaloota kurnaffaatti waldaa WAAQAYYOO hin seenin. ⁴ Isaan yeroo ati Gibxii baatetti karaa irratti buddeenaan yookaan bishaaniin si hin simanne; gooda kanaa akka inni si abaaruf Bala'aam ilma Be'oor namicha biyya Phetoor ishee Phaadaan Arraamitti argantu sana keessa jiraatu sitti bitan. ⁵ Ta'us WAAQAYYOO Waaqni kee abaarsa sana eebbatti siif geeddare malee Bala'aamin hin dhageenye; WAAQAYYOO Waaqni kee si jaallataatii. ⁶ Ati hamma lubbuudhaan jirutti akka isaan nageenyaa fi badhaadhummaa qabaatan hin barbaadin.

⁷ Waan inni obboleessa kee ta'eef nama gosa Edoom hin tuffatin. Ati sababii akka alagaatti biyya isaa keessa jiraatteeff nama Gibxi hin tuffatin. ⁸ Ijoolleen dhaloota sadaffaa kanneen isaaniif dhalatan waldaa WAAQAYYOO seenuu ni danda'u.

Qulqullina Qubataa Eeguu

⁹ Yommuu diinota kee loluuf baatutti xuraa'ummaa hunda irraa of eegi. ¹⁰ Namni tokko yoo halkan afeetaa dhangalaasuudhaan of xureesse inni qubata keessaa gad ba'ee ala haa turu. ¹¹ Gara galgalaa garuu dhiqatee yeroo aduun dhiitutti gara qubataatti haa deebi'u.

¹² Ati qubataan alatti lafa itti gad baatu qopheeffadhu. ¹³ Meeshaa kee keessaa waan ittiin lafa gottu qabaadhu; ati yommuu gad teessee kaatutti boolla qotiitii biyyoo itti deebisi. ¹⁴ WAAQAYYO Waaqni kee si eeguu fi diinota kee dabarsee sitti kennuudhaaf qubata kee keessa deddeebi'aatii; akka inni gidduu keetti waan xuraa'aa argee sirraa hin deebineef qubanni kee qulqulluu ta'uu qaba.

Seerawwan Garaa garaa

¹⁵ Yoo garbichi tokko kooluu sitti gale, ati dabarsitee gooftaa isaatti isa hin kennin. ¹⁶ Inni gidduu kee lafa jaallatee fi magaalaa filate keessa haa jiraatu. Atis isa hin cunqursin.

¹⁷ Dhiirri yookaan dubartiin Israa'el kam iyyuu sagaagaltuu mana waaqa tolfamaa hin ta'in. ¹⁸ Dubartii yookaan dhiira sagaagalu tokko irraa akka galchaatti kenna fuutee mana WAAQAYYO Waaqni kee biyya ati dhaaluuf itti galtutti waan harki kee tuqe keetii duratti jibbisiisoo dhaatii.

¹⁹ Ati maallaqa yookaan nyaata yookaan waan dhala argamsiisu kam iyyuu dhalaan obboleessa keetiif hin liqeessin. ²⁰ Ati nama ormaa irraa dhala gaafachuu ni dandeessa; garuu akka WAAQAYYO Waaqni kee biyya ati dhaaluuf itti galtutti waan harki kee tuqe hundaan si eebbisuuf obboleessa kee irraa dhala hin fudhatin.

²¹ Ati yoo WAAQAYYO Waaqni kee cimsee waan sana sirraa barbaaduuf akka cubbuu sitti hin taaneef dafitii of irraa baasi malee lafa irra hin harkisin. ²² Yoo wareeguu baatte garuu ati cubbamaa hin taatu. ²³ Waan arrabni kee dubbate gochuuf of eeggadhu; afaanuma keetiin jaallatee WAAQAYYO Waaqni kee wareegdeertaatii.

²⁴ Ati yoo iddoo dhaabaa wayinii ollaa keetii keessa seente, ija feete hunda nyaadhu; garuu tokko illee guuboo kee keessa hin kaa'atin. ²⁵ Yoo lafa qotiisaa midhaan ollaa keetii keessa seente, asheetii cirachuu ni dandeessa; garuu midhaan isaa kan dhaabatutti haamtuu kee hin buusin.

24

¹ Namni tokko erga niitii fuudhee booddee yoo waan fafaa ishee irratti argee ishee jibbe, inni waraqa ragaa hiikkaa barreessee itti kennuudhaan mana isaatii baasee ishee haa geggeessu. ² Isheen erga mana isaatii baatee booddee yoo niitii nama biraa taate, ³ yoo dhirsi ishee lammaffaan ishee jibbee waraqa hiikkaa barreessee kenneefii mana isaatii ishee baase yookaan yoo inni du'e, ⁴ dhirsi inni jalqabaa kan ishee hiike sun erga isheen xurooftee booddee deebi'ee ishee fuudhuun isaaf hin eeyyamamu. Wannii kun fuula WAAQAYYOO duratti balfamaa dha. Ati biyya WAAQAYYO Waaqni kee akka dhaalaatti siif kennutti cubbuu hin fidin.

⁵ Namni dhi'eenyatti niitii fuudhe tokko lafa waraanaatti hin ergamin yookaan akka hojii biraa hojjetu hin dirqamin; inni waggaa tokkoof mana ofii isaa haa turu; niitii isaas haa gammachiisu.

⁶ Ati dhagaa daakuutii fi majii isaa yookaan majii isaa qofa illee taanaan akka qabdiitti hin fudhatin; kun lubbuu namaa qabdi godhanii fudhachuu ta'atii.

⁷ Namni tokko yoo obboleessa isaa kan gosa Israa'el tokko hatee garbicha godhate yookaan gurgurate inni ajjeefamuu qaba. Ati waan hamaa gidduu keetii baasi.

⁸ Waa'ee nama lamxaa'ee garuu akkuma Lewwonna luboota ta'an qajeelcha siif kennan sanatti hojjechuu kee qalbeeffadhu. Ati waan ani isaan ajaje of eeggannaadhaan duukaa bu'uu qabda. ⁹ Waan WAAQAYYO Waaqni kee erga isin biyya Gibxiitii baatanii booddee karaa irratti Miiriyaamitti fide sana yaadadhu.

¹⁰ Yommuu ollaa keetiif liqii gosa kamii iyyuu kennitutti waan inni akka qabdiitti siif kennu fudhachuudhaaf mana isaa hin seenin. ¹¹ Ati ala turiitii namichi ati waa liqeessituuf sun qabdi siif kennu sana siif haa fidu. ¹² Yoo namni sun hiyyeessa ta'e qabdi isaa of bira hin bulchin. ¹³ Akka inni kootii isaa uffatee buluuf utuu aduun hin dhi'in deebisiif. Innis si eebbisa; wannii kun immoo fuula WAAQAYYO Waaqni kee duratti akka hojii qajeelummaatti siif hedama.

¹⁴ Obboleessa kee nama gosa Israa'el yookaan alagaa magaalawwan kee tokko keessa jiraatu illee taanaan hiyyeessa yookaan rakkataa qaxarame tokko hin saamin. ¹⁵ Gatii inni ittiin hojjete gaafama sana utuu aduun hin lixin kenniif; waan hiyyeessa ta'eef inni

abdiidhaan eegataatii. Yoo kanaa achii inni WAAQAYYON sitti waammatee wanni kun cubbuu sitti ta'a.

¹⁶ Abbootiin sababii ijoollee isaaniitiif ajjeefamuu hin qaban yookaan ijoolleen sababii abbootii isaaniitiif ajjeefamuu hin qaban; tokkoon tokkoon namaa sababii cubbuu ofii isaatiif du'a.

¹⁷ Ati murtii alagaa yookaan ijoollee abbaa hin qabnee hin jal'isin yookaan uffata haadha hiyyeessaa qabdii hin fudhatin. ¹⁸ Ati akka biyya Gibxitti garbicha turtee fi akka WAAQAYYO Waaqni kee achii si fure yaadadhu. Wanni ani akka ati waan kana hojjetuuf si ajajuufis kanuma.

¹⁹ Yommuu midhaan lafa qotiisaa keetii walitti qabdutti yoo bisiin hafe jiraate isaaf jettee duubatti hin deebi'in; akka WAAQAYYO Waaqni kee hojii harka keetii hundaan si eebbisuuf alagoota, ijoollee abbaa hin qabnee fi haadha hiyyeessaatiif dhiisi. ²⁰ Yommuu ija muka ejersa keetii harcaaftuttis kan hafe funaannachuuf jettee hin deebi'in; waan hafe sana alagaaf, ijoollee abbaa hin qabnee fi haadha hiyyeessaatiif dhiisi. ²¹ Yommuu ija iddoo dhaabaa wayinii keetii walitti qabduttis waan hafe funaannachuudhaaf hin deebi'in. Waan hafe sana alagaadhaaf, ijoollee abbaa hin qabnee fi haadha hiyyeessaatiif dhiisi. ²² Ati akka Gibxitti garbicha turte yaadadhu. Wanni ani akka ati waan kana gootu si ajajuufis kanuma.

25

¹ Yoo namoonni lama wal dhabanii gara mana murtii dhufan, abbootiin seeraa isa qulqulluu gad dhiisanii isa yakka qabutti muruu qabu. ² Yoo namicha balleessaa qabu sanaaf garafamuun male abbaan murtii akka inni ciisu godhee fuula namichaa duratti lakkoobsa yakka isaatiif maluun isa haa garafsiisu; ³ ta'us inni afurtama caalaa isa hin garafsiisin. Inni kana caalaa yoo garafame obboleessi kee fuula kee duratti ni qaana'a.

⁴ Qotiyoo midhaan siribsiisuutti jiru afaan hin hidhin.

⁵ Yoo obboloonni wajjin jiraatanii isaan keessaa tokko utuu ilma hin dhalchin du'e, niitiin isaa maatiidhaa alatti heerumuu hin qabdu. Waarsaan ishee ishee fuudhee niitii haa godhatu; waan waarsaan tokko guutuufii qabus isheedhaaf haa guutu. ⁶ Akka maqaan isaa Israa'el gidduudhaa hin badneef ilmi isheen deessu hangafni maqaa obboleessa du'e sanaatiin haa waamamu.

⁷ Ta'us yoo namichi sun niitii obboleessa isaa fuudhuu hin barbaanne isheen gara balbala magaalatti maanguddoota bira dhaqxee, "Waarsaan koo maqaa obboleessa isaa Israa'el keessatti waamsisuu dideera. Inni waan waarsaan tokko guutuu qabu naaf hin guutu" haa jettuun. ⁸ Ergasii maanguddoonni magaalaa isaatii waamanii isa haa haasofsiisan. Yoo inni yaada isaa geeddarachuu didee, "Ani ishee fuudhuu hin fedhu" jedhe, ⁹ niitiin obboleessa isaa sun fuula maanguddootaa duratti gara isaa dhaqxee kophee miilla isaa tokko irraa baafiti; fuula isaattis tuftee, "Nama obboleessa isaatiif mana hin dhaabne irratti waan akkanaatu raawwatama" haa jettu. ¹⁰ Sanyiin nama sanaas Israa'el keessatti, "Maatii kopheen irraa baafame" jedhamee waamama.

¹¹ Yoo utuu namoonni lama wal lolanii, niitiin isa tokkoo dhuftee dhirsaa ishee harka namicha isa tumaa jiru sanaatii baasuuf harka ishee hiixattee saala namichaa qabde, ¹² ati harka ishee irraa muri. Garaa hin laafiniif.

¹³ Koroojoo kee keessaa madaaliiwwan wal caalan lama jechuun tokko ulfaataa tokko immoo kan hin ulfaanne hin qabaatin. ¹⁴ Mana kee keessaa safartuuwwan garaa garaa lama jechuunis tokko guddaa tokko immoo xinnaa hin qabaatin. ¹⁵ Ati akka biyya WAAQAYYO Waaqni kee siif kennu keessa bara dheeraa jiraattuuf madaalii fi safartuu qajeelaa fi amanamaa ta'e qabaadhu. ¹⁶ WAAQAYYO Waaqni kee nama waan akkasii hojjetu kam iyyuu, nama jal'ina hojjetu kam iyyuus ni balfaati.

¹⁷ Waan Amaaleqoonni yeroo ati Gibxii baatu karaa irratti si godhan sana yaadadhu. ¹⁸ Isaan yeroo ati dadhabdee bututtee turtetti karaa irratti si argatanii warra duubaan tirachaa turan hunda ajjeesan; Waaqas hin sodaanne. ¹⁹ Yommuu WAAQAYYO Waaqni kee biyya dhaala godhee siif kennu keessatti diinota naannoo keetii irraa boqonnaa siif kennutti, yaadannoo Amaaleq samii jalaa balleessi. Waan kana hin dagatin!

26

Jja Jalqabaa

¹ Ati yommuu biyya WAAQAYYO Waaqni kee dhaala godhee siif kennutti galtee dhaaltee keessa qubattutti, ² midhaan lafa biyya WAAQAYYO Waaqni kee siif kennu irraa argattu hunda irraa mataa isaa fuudhiitii guuboo keessa kaa'i. Ergasiis iddoo WAAQAYYO Waaqni kee iddoo jireenya Maqaa isaatiif filatu dhaqi; ³ luba yeroo sanatti hojii irra jiruun,

“Ani biyya WAAQAYYO akka nuu kennu abbootii keenyaaf waadaa galetti dhufuu koo har’a fuula WAAQAYYO Waaqa keetii duratti nan labsa” jedhi. ⁴ Lubni sunis guuboo sana si harkaa fuudhee iddoo aarsaa WAAQAYYO Waaqa keetii dura ni kaa’a. ⁵ Atis WAAQAYYO Waaqa kee duratti akkana jettee ni labsita; “Abbaan koo nama biyya Arraam kan asii fi achi godaanu ture; innis namoota xinnoo fudhatee Gibxitti gad bu’ee; achis jiraatee saba guddaa, humna qabeessaa fi akka malee baay’ee ta’e. ⁶ Warri Gibxi garuu nu hacuucuu fi nu dhiphisuudhaan hojii jabaa nutti fe’an. ⁷ Nu ergasii gara WAAQAYYO Waaqa abbootii keenyaatti iyyanne; WAAQAYYOS sagalee keenya dhaga’ee rakkina keenya, dadhabbii keenyaa fi hacuucamuu keenya arge. ⁸ Kanaafuu WAAQAYYO harka jabaa fi irree diriirfameen, sodaachisa guddaadhaan, mallattoo fi dinqiidhaan Gibxii nu baase. ⁹ Iddoo kanattis nu fidee biyya aannanii fi damma baafuu kana nuuf kenne; ¹⁰ ammas yaa WAAQAYYO kunoo, ani midhaan lafa ati naa kennitee irraa mataa isaa fideera.” Guuboo sanas fuula WAAQAYYO Waaqa keetii dura kaa’iitii fuula isaa duratti gad jedhii sagadi. ¹¹ Ati, Lewwonnii fi alagoonni gidduu kee jiraatan waan gaarii WAAQAYYO Waaqni kee sii fi maatii keetiif kenne hundaan gammadaa.

¹² Yommuu waggaa sadaffaatti jechuunis waggaa itti kenna kudhan keessaa tokko baafamutti midhaan kee irraa erga kenna kudhan keessaa tokko baaftee raawwatee booddee akka isaan magaalawwan kee keessatti nyaatanii quufaniif Lewwotaaf, alagootaaf, ijoollee abbaa hin qabnee fi haadhota hiyyeessaatiif kenni. ¹³ Ergasii WAAQAYYO Waaqa keetiin akkana jedhi; “Ani akkuma ajaja kee kan ati na ajajje hundaatti gooda qulqulluu mana kootii baasee Lewwotaaf, alagootaaf, ijoollee abbaa hin qabnee fi haadhota hiyyeessaatiif kenneera. Ani ajajawwan kee irraa hin gorre yookaan tokkoo isaanii illee hin daganne. ¹⁴ Ani yeroon gadda irraa tures kutaa qulqulluu sana irraa homaa hin nyaanne; yookaan ani yeroon xuraa’etti isa irraa waan tokko illee hin fuune; warra du’aniifis hin dhi’eessine; ani WAAQAYYO Waaqa kootiif ajajameera; waan ati na ajajje hundas hojjedheera. ¹⁵ Samii irraa, iddoo jireenya keetii qulqulluu irraa gad ilaali; saba kee Israa’elii fi biyya akkuma abbootii keenyaaf waadaa galtetti nuu kennite kan aannanii fi dammi keessaa burqu kana eebbisi.”

Ajajawwan WAAQAYYOO Duukaa bu’uu

¹⁶ WAAQAYYO Waaqni kee akka ati ajajawwanii fi seerawwan kanneen eegdu har’a si ajaja; ati akka garaa kee guutuu fi lubbuu kee guutuudhaan isaan eegdu of eeggadhu. ¹⁷ Ati akka WAAQAYYO Waaqa kee ta’ee fi akka karaa isaa irra deddeebitu, akka qajeelchawwan isaa, ajajawwanii fi seerawwan isaa eegdee isaaf ajajamtu har’a dubbatteerta. ¹⁸ WAAQAYYOS akkuma abdachiise sanatti akka ati saba isaatii fi qabeenya isaa taatee ajajawwan isaa hunda eegdu har’a dubbateera. ¹⁹ Inni akka saboota uume hundaan olitti galataan, maqaa fi ulfinaan ol si kaasuu fi akkuma waadaa gale sanaatti akka ati WAAQAYYO Waaqa keetiif saba qulqulluu taatu dubbateera.

27

Iddoo Aarsaa Kan Tulluu Gebaal Irraa

¹ Musee fi maanguddoonni Israa’el akkana jedhanii saba ajajan; “Ajajawwan ani har’a isiniif kennu kanneen hunda eegaa. ² Erga biyya WAAQAYYO Waaqni kee siif kennutti galuuf Yordaanos ceetanii booddee dhagoota gurguddaa dhaabiitii nooraa dibi. ³ Yommuu akkuma WAAQAYYO Waaqni abbootii keetii si abdachiisetti biyya aannanii fi dammi keessaa burqu kan WAAQAYYO Waaqni kee siif kennutti galuuf ceetutti dubbiiwwan seera kanaa hunda dhagoota irratti barreessi. ⁴ Ati erga Yordaanos ceetee booddee akkuma ani har’a si ajajutti dhagoota kanneen Tulluu Ebaal irra dhaabii nooraa dibi. ⁵ Achittis WAAQAYYO Waaqa keetiif iddoo aarsaa kan dhagaa irraa hojjetame dhaabi; mi’a sibiilaa tokko iyyuu hin fayyadamin. ⁶ Iddoo aarsaa WAAQAYYOO Waaqa keetii dhagaa hin soofamiin hojjedhu; achi irrattis WAAQAYYO Waaqa keetiif aarsaa gubamu dhi’eessi. ⁷ Achittis aarsaa nagaa qalii nyaadhuutii fuula WAAQAYYO Waaqa keetii duratti gammadi. ⁸ Dhagoota irratti dubbiiwwan seera kanaa hunda ibsii barreessi.”

Abaarsa Tulluu Gebaal Irratti Labsame

⁹ Musee fi Lewwonnii luboota ta’an Israa’eloota hundaan akkana jedhan; “Yaa Israa’el, cal’isii dhaga’i! Ati har’a saba WAAQAYYO Waaqa keetii taateerta. ¹⁰ WAAQAYYO Waaqa keetiif ajajamiitii ajajawwan isaatii fi qajeelchawwan ani har’a siif kennu dhaga’i.”

¹¹ Museenis gaafasuma akkana jedhee saba ajaje:

¹² Yommuu isin Yordaanosin ceetanitti gosoonni Simi’oon, Lewwii, Yihuudaa, Yisaakor, Yoosefii fi kan Beniyaam saba eebbisuuf gaara Gerziim irra haa dhaabatan. ¹³ Gosoonni

Ruubeen, Gaad, Aasheer, Zebuuloon, Daanii fi Niftaalem immoo abaaruuftu Tulluu Eebbaa irra haa dhaabatan.

¹⁴ Lewwonnii sagalee isaanii ol fudhatanii akkana jedhanii saba Israa'el hundatti haa labsan:

¹⁵ "Namni fakkii soofu yookaan baqsee Waaqa tolfamaa jechuunis waan fuula WAAQAYYOO duratti balfamaa ta'e hojjetu kan waan ogummaa harkaatiin hojjetame dhoksee ol dhaabu haa abaaramu."

Ergasiis sabni hundi, "Ameen!" haa jedhu.

¹⁶ "Namni abbaa isaa yookaan haadha isaa qaanessu haa abaaramu."

Ergasiis sabni hundi, "Ameen!" haa jedhu.

¹⁷ "Namni dhagaa daarii ollaa isaa dhiibu haa abaaramu."

Ergasiis sabni hundi, "Ameen!" haa jedhu.

¹⁸ "Namni nama jaamaa karaa irraa jal'isu haa abaaramu."

Ergasiis sabni hundi, "Ameen!" haa jedhu.

¹⁹ "Namni murtii alagaa, ijoollee abbaa hin qabneetii fi niitota dhirsoonni isaanii irraa du'anii jal'isu haa abaaramu."

Ergasiis sabni hundi, "Ameen!" haa jedhu.

²⁰ "Namni niitii abbaa isaa wajjin ciisu haa abaaramu; inni siree abbaa isaa xureesseeraatii."

Ergasiis sabni hundi, "Ameen!" haa jedhu.

²¹ "Namni horii kam iyyuu wajjin wal bira ga'u haa abaaramu."

Ergasiis sabni hundi, "Ameen!" haa jedhu.

²² "Namni obboleettii isaa intala abbaa isaa yookaan intala haadha isaa wajjin ciisu haa abaaramu."

Ergasiis sabni hundi, "Ameen!" haa jedhu.

²³ "Namni haadha niitii isaa wajjin ciisu haa abaaramu."

Ergasiis sabni hundi, "Ameen!" haa jedhu.

²⁴ "Namni dhoksaadhaan ollaa isaa ajjeesu haa abaaramu."

Ergasiis sabni hundi, "Ameen!" haa jedhu.

²⁵ "Namni nama qulqulluu ajjeesuuf jedhee matta'aa fudhatu haa abaaramu."

Ergasiis sabni hundi, "Ameen!" haa jedhu.

²⁶ "Namni dubbiiwwan seera kanaa eeguudhaan jabaatee hin dhaabanne haa abaaramu."

Ergasiis sabni hundi, "Ameen!" haa jedhu.

28

Eebba Ajajamuudhaan Argamu

¹ Yoo ati guutumaan guutuutti WAAQAYYOO Waaqa keetiif ajajamtee ajajawwan isaa kanneen ani har'a siif kennu of eeggannaadhaan duukaa buute, WAAQAYYOO Waaqni kee saboota lafa irra jiraatan hundaa olitti ol si qaba. ² Yoo ati WAAQAYYOO Waaqa keetiif ajajamte eebbi kun hundi siif ta'a; si faana deemas:

³ Ati magaalaatti ni eebbifamta; baadiyaattis ni eebbifamta.

⁴ Iji gadameessa keetii, iji lafa keetii, iji horii keetii, jabbiin loon keetiitii fi korbeeyyiin bushaayee keetii ni eebbifamu.

⁵ Guuboon keetii fi mi'i bukoo keetii ni eebbifamu.

⁶ Ati yommuu galtu ni eebbifamta; yommuu baatus ni eebbifamta.

⁷ WAAQAYYOO akka diinonni kee kanneen sitti ka'an fuula kee duratti mo'ataman ni godha. Isaan karaa tokkoon sitti dhufu, garuu karaa torbaan si baqatu.

⁸ WAAQAYYOO gombisaa keetii fi waan harki kee qabate hundatti eebba isaa ni erga. WAAQAYYOO Waaqni kee biyya siif kennu keessatti si eebbisa.

⁹ Yoo ati ajaja WAAQAYYOO Waaqa keetii eegdee karaa isaa irra deddeebite, WAAQAYYOO akkana kakuudhaan si abdachiisetti saba isaa qulqulluu godhee si dhaaba. ¹⁰ Ergasii saboonni lafa irra jiraatan hundi akka ati maqaa WAAQAYYOOTIIN waamamtu arganii si sodaatu. ¹¹ WAAQAYYOO biyya siif kennuuf abbootii keetiif kakate keessatti ijoolleedhaan, jabbootaa fi miidhaan lafaatiin sooruma irra dhangala'aa siif kenna.

¹² WAAQAYYOO yeroodhaan lafa keetii bokkaa ergee hojii harka keetii hunda eebbisuuf gombisaa badhaadhummaa isaa jechuunis samiiwwan ni bana. Ati saboota hedduudhaaf ni liqeessita malee tokkoo isaanii irraa iyyuu hin liqeeffattu. ¹³ WAAQAYYOO mataa si godha malee eegee si hin godhu. Ati yoo ajajawwan WAAQAYYOO Waaqa keetii kanneen ani har'a siif kennu of eeggannaadhaan eegdee duukaa buute, yeroo hunda irra aanta

malee jala hin aantu. ¹⁴ Ati waaqota biraa duukaa bu'uu fi tajaajiluudhaan ajajawwan ani har'a siif kennu kanneen irraa mirgattis bitaattis hin gorin.

Abaarsa Ajajamuu Diduun Fidu

¹⁵ Garuu yoo ati WAAQAYYO Waaqa keetii ajajamuu baattee ajajawwan isaatii fi qajeelchawwan isaa kanneen ani har'a siif kennu hunda of eeggannaadhaan eeguu didde, abaarsawwan kunneen hundi si qaqqabu; si liqimsus:

¹⁶ Ati magaalatti ni abaaramta; baadiyyaattis ni abaaramta.

¹⁷ Guuboon kee ni abaarama; mi'i bukoo keetiis ni abaarama.

¹⁸ Iji gadameessa keetii, iji lafa keetii, jabbiin loon keetiitii fi korbeeyiin bushaayee keetii ni abaaramu.

¹⁹ Ati yommuu galto ni abaaramta; yommuu baatu illee ni abaaramta.

²⁰ Ati sababii isa dhiiftee waan hamaa hojjeteeff WAAQAYYO hamma ati barbadooftee daftes lafa irraa dhabamtutti waan harki kee hojjetu hundaan abaarsa, jooja'uu fi dheekkamsa sitti erga. ²¹ WAAQAYYO hamma biyya ati dhaaluuf itti galto irraa si balleessutti dhukkubaan si dha'a. ²² WAAQAYYO hamma ati lafa irraa dhabamtutti, dhukkuba nama huggisuun, dhagna gubaa fi dhullaadhaan, ho'a aduutii fi bona hamaadhaan, coollaguu fi waagiidhaan si dha'a. ²³ Samiin mataa keetii olii naasii, lafti miilla kee jalaa sibiila ta'a. ²⁴ WAAQAYYO bokkaa lafa keetii awwaraa fi daaraatti geeddara; kunis hamma ati baddutti samiidhaa sitti gad harca'a.

²⁵ WAAQAYYO akka ati diina kee duratti mo'atamtu godha. Ati karaa tokkoon isaanitti dhufta; garuu karaa torbaan isaan duraa baqatta; mootummoota lafa irra jiran hundaaf waan kolfaa taata. ²⁶ Reeffi kee simbirroota samii hundaa fi bineensota lafaatiif nyaata ta'a; namni sodaachisee isaan ari'us hin jiraatu. ²⁷ WAAQAYYOS dhukkuba ati hin fayyine jechuunis dhullaa biyya Gibxiitiin, iitaan, madaa mala'uu fi cittoodhaan si dhiphisa. ²⁸ WAAQAYYO maraatummaadhaan, jaamummaa fi burjaaja'uu sammuu tiin si dhiphisa. ²⁹ Ati guyyaa saafaa akka jaamaa dukkana keessa waa qaqqabatuutti deemta; wannu ati hojjetu hundinuu siif hin milkaa'u; guyyuma guyyaan cunqurfamtee saamamta; kan si oolchus hin jiru.

³⁰ Ati niitii kaadhimatta; garuu nama biraatu ishee wajjin ciisa. Mana ijaarratta; garuu keessa hin jiraattu. Wayinii dhaabbatta, garuu ija isaa hin nyaattu. ³¹ Sangaan kee fuula kee duratti qalama; garuu ati foon isaa irraa homaa hin nyaattu. Harreen kee humnaan sirraa fudhatama; siif hin deebifamus. Hoolonni kee diinota keetiif kennamu; namni isaan harkaa buusuu hin jiru. ³² Ilmaanii fi intallan kee namoota ormaatiif kennamu; iji kees guyyuma guyyaan isaan eeguudhaan fajaja; ati harka ol fudhachuuf humna hin qabaattu. ³³ Oomisha lafa keetiitii fi humna keetii hunda namoonni ati hin beekne ni nyaatu; ati bara jireenya keetii guutuu cunqurfamtee jiraachuu malee homaa hin qabaattu. ³⁴ Wannu ati argitu hundi si maraacha. ³⁵ WAAQAYYO faana miilla keetiitii jalqabee hamma gubbaa mataa keetii ga'utti madaa hin fayyine kan nama dhiphisuun jilbaa fi miilla kee ni dha'a.

³⁶ WAAQAYYO si'ii fi mootii ati of irratti moosiftee saboota ati yookaan abbootiin kee hin beeknitti ni kenna. Atis achitti waaqota biraa, waaqota mukaatiif fi kan dhagaa ni waaqeffatta. ³⁷ Saboota WAAQAYYO itti si geessu hunda keessatti waan qaanii, kan kolfaatiif fi kan quba itti qaban ni taata.

³⁸ Lafa qotiisaa kee keessa sanyii baay'ee facaafatta; garuu sababii hawwaannisni nyaatee fixuuf xinnoo walitti qabatta. ³⁹ Atis wayinii dhaabdee kunuunsita; garuu waan raammoon nyaatuuf daadhii isaa hin dhugdu yookaan ija isaa hin cirattu. ⁴⁰ Biyya kee guutuu keessaa muka ejersaa qabaatta; garuu waan iji isaa lafatti harca'uuf ati zayitii isaatti hin fayyadamtu. ⁴¹ Ati ilmaanii fi intallan qabaatta; garuu isaan waan booji'amaniif kan kee hin ta'an. ⁴² Mukaa fi oomisha lafa qotiisaa keetii hunda tuuta hawwaannisaatu fixa.

⁴³ Alagaan gidduu kee jiraatu si caalaa guddata; ati garuu gad deemta. ⁴⁴ Isatu siif liqeessa malee ati isaaf hin liqeessitu. Inni mataa ta'a; ati garuu eegee taata.

⁴⁵ Abaarso kun hundinuu si qaqqaba. Ati waan WAAQAYYO Waaqa keetiiif hin ajajamnee fi waan ajajawwanii fi qajeelchawwan inni siif kenne hin eeginiif hamma ati baddutti abaarsi kun si biraa hin hafu; si fudhatas. ⁴⁶ Isaan bara baraan si'ii fi sanyii keetti mallattoo fi dinqii ta'u. ⁴⁷ Ati waan yeroo sooromaatti galataa fi gammachuudhaan WAAQAYYO Waaqa kee hin tajaajiliniif, ⁴⁸ beelaa fi dheebuudhaan, daaraa fi hiyyummaa hamaadhaan diinota WAAQAYYO sitti kaasu ni tajaajilta. Inni hamma si balleessutti waanjoo sibiilaa morma keetti kaa'a.

⁴⁹ WAAQAYYO biyya akka malee fagoo irraa, daarii lafaatiis saba akka risaa dafee gad bu'u kan ati afaan isaa hin beekne sitti kaasa; ⁵⁰ innis saba jaarsaaf ulfina hin kennine,

kan daa'immaniif garaa hin laafnee fi kan akka malee sodaachisuu dha. ⁵¹ Isaanis hamma ati baddutti ija loon keetiitii fi ija lafa keetii ni nyaatu. Hamma ati barbadoofutti midhaan tokko iyyuu, daadhii wayinii haaraa yookaan zayitii, jabboota loon keetiitii fi korbeeyyii bushaayee keetii tokko illee siif hin dhiisan. ⁵² Isaan magaalaa biyya keetii hunda hamma dallaawwan ittisaa kanneen ati amanattu jijjiganitti ni marsu; magaalaa biyya WAAQAYYO Waaqni kee siif kennu keessa jiran hunda iyyuu ni marsu.

⁵³ Ati sababii dhiphina diinonni kee yeroo si marsanitti sitti fidaniitiif ija gudeeda keetii, foon ilmaanii fi intallan keetii kanneen WAAQAYYO Waaqni kee siif kennee ni nyaatta. ⁵⁴ Namni gidduu keetii akka malee gara laafessaa fi garraamii ta'e iyyuu obboleessa isaatiif yookaan niitii isaa kan jaallatuuf yookaan ijoollee isaa warra hafaniif garaa hin laafu; ⁵⁵ inni foon ijoollee isaa kan nyaachaa jiru irraa xinnoo ishee illee tokkoo isaaniiitiif iyyuu hin kennu. Sababii dhiphina diinonni kee yeroo magaalaa hunda keessa hunda marsanitti sirraan ga'aniitiif wanni isaaf hafe kanuma qofaati. ⁵⁶ Niitiin arjaa fi boontuun gidduu kee jiraattu kan sababii akka malee arjaa fi boontuu taateef miija isheetiin lafa hin tuqne iyyuu dhirsaa ishee kan jaallattutti, ilma isheetii fi intala isheetii illee ni hammaatti; ⁵⁷ isheen hobbaatii garaa isheetii ba'uu fi ijoollee deessu illee ni jibbiti. Sababiin isheen waan kana gootuufis yeroo marfamaa fi rakkinaatti, yommuu diinonni kee magaalaa kee keessatti si dhiphisaniitti dhoksitee nyaachuuf jettee ti.

⁵⁸ Yoo ati of eeggannaadhaan dubbiiwwan seera kanaa kanneen kitaaba kana keessatti barreeffaman hunda duukaa bu'uu dhiiftee maqaa WAAQAYYO Waaqa keetii kabajamaa fi sodaachisaa sana sodaachuu baate, ⁵⁹ WAAQAYYO si'ii fi sanyii keetti dha'icha sodaachisaa, balaa dhiphisaa fi kan yeroo dheeraa turu, dhukkuba akka malee hamaa fi dafee hin fayyine ni erga. ⁶⁰ Dhukkuboota Gibxi kanneen ati sodaattus sitti fida; isaanis ciniinani sitti qabatu. ⁶¹ Akkasumas hamma ati dhabamtutti WAAQAYYO dhukkubootaa fi rakkinoota biraa kanneen Kitaaba Seeraa kana keessatti hin barreeffamin sitti fida. ⁶² Isin sababii WAAQAYYO Waaqa keessaniif ajajamuu diddaniif isin warra akka urjiiwwan samii baay'attanii turtan keessaa xinnootu hafa. ⁶³ Akkuma isin soormsuu fi isin baay'isuun WAAQAYYO gammachiisu sana isin balleessuu fi isin barbadeessuunis isa gammachiisa. Isin biyya dhaaluuf itti galтан keessaa ni buqqatu.

⁶⁴ Ergasiis WAAQAYYO daarii lafaa tokko irraa hamma daarii lafaa kaaniitti saboota hunda gidduutti si bittinneessa. Ati achitti waaqota biraa, waaqota mukaatii fi kan dhagaa kanneen atii fi abbootiin kee hin beekin ni waaqeffatta. ⁶⁵ Ati saboota sana gidduutti boqonnaa hin argattu; lafa kophee miilla keetii irraa keeyyattu illee hin argattu. Achittis WAAQAYYO sammuu dhiphatu, ija hawwiidhaan fajajuu fi garaa abdi kutatu siif kenna. ⁶⁶ Ati halkanii guyyaa sodaadhaan qabamtee utuu lubbuun kee wabii hin argatin, yeroo hunda yaaddoodhaan jiraatta. ⁶⁷ Sababii sodaa garaa kee guutuu sanaatii fi waan ija keetiin argitu sanaatiif ganama, "Utuu bari'uu baatee!" galgala immoo, "Utuu dhi'uu baatee!" jetta. ⁶⁸ Karaa ani ati lammata as hin deebitu siin jedheenis WAAQAYYO dooniidhaan Gibxitti si deebisa. Achittis akka garboota dhiiraa dubartiitti diinota keessaniitti gurguramuuf of dhi'eessitu; garuu namni tokko iyyuu isin hin bitatu.

29

Kakuun Haaromfamuu Isaa

¹ Dubbiin kakuu kan WAAQAYYO kakuu Kooreebitti isaan wajjin gale sana irratti dabalee akka inni Mo'aab keessatti Israa'eloota wajjin galuuf Masee ajaje kanaa dha.

² Museen Israa'eloota hunda walitti waamee akkana jedheen:

Waan WAAQAYYO Gibxi keessatti Fara'oon irratti, qondaaltota isaa hundaa fi guutummaa biyya isaa irratti hojjete hunda ija keessan argeera. ³ Isin qorumsawwan gurguddaa sana, mallattoowwanii fi dinqiiwwan gurguddaa sana ijuma keessaniin argitaniiru. ⁴ WAAQAYYO garuu hamma har'aatti qalbii hubatu yookaan ija argitu yookaan gurra dhaga'u isinii hin kennine. ⁵ Yeroo waggoota afurtamman ani gammoojjii keessa isin geggeesse sanatti uffanii keessan isin irratti hin dhumne yookaan kopheen miilla keessan irratti hin ciccinne. ⁶ Isin buddeena hin nyaanne; daadhii wayinii yookaan dhugaatii nama macheessu hin dhugne. Ani akka isin akka ani WAAQAYYO Waaqa keessan ta'e beektaniifan waan kana godhe.

⁷ Yommuu isin as geessanitti Sihoon mootiin Heshboonii fi Oogi mootiin Baashaan nu loluuf nutti ba'an; nu garuu isaan mo'anne. ⁸ Biyya isaaniis fudhannee gosa Ruubeeniif, gosa Gaadii fi walakkaa gosa Minaaseetiif dhaala goonee kennine.

⁹ Isin akka waan hojjettan hundaan milkooftaniif dubbiiwwan kakuu kanaa of eeggannaadhaan duukaa bu'aa. ¹⁰ Hundi keessan jechuunis qajeelchitoonni fi hooggantoonni keessan, maanguddoonni fi qondaaltonni keessan akkasumas namoonni Israa'el kanneen biraa hundinuu har'a fuula WAAQAYYO Waaqa keessanii dura dhaabattaniirtu; ¹¹ ijoolleen keessanii fi niittonni keessan akkasumas alagoonni muka kee ciraa, bishaan kees waraabaa qubata kee keessa jiraatan si wajjin dhaabattaniiru. ¹² Atis kakuu WAAQAYYO har'a si wajjin galee kakaadhaan siif mirkaneessu kana WAAQAYYO Waaqa kee wajjin galuuf as dhaabatteerta; ¹³ innis akkuma si abdachiisee abbootii kee Abrahaamiif, Yisihaaqii fi Yaaqoobiif waadaa gale sanatti akka ati saba isaa taatee innis Waaqa kee ta'uuf jabeessee si dhaabuuf waan kana godhe. ¹⁴ Anis kakuu kakaadhaan mirkanaa'e kana isin qofa wajjin utuu hin ta'in, ¹⁵ warra nu wajjin as fuula WAAQAYYO Waaqa keenyaa dura dhaabatan warra har'a as hin jirre wajjinis nan gala.

¹⁶ Akka nu itti Gibxi keessa jiraannee fi yommuu as dhufnus akka nu itti biyyoota keessa dabarre isin mataan keessanuu ni beektu. ¹⁷ Isinis gidduu isaaniitti fakkiwwan isaanii jibbisiisoo, waaqota isaanii tolfamoo kanneen muka, dhagaa, meetii fi warqee irraa hojjetaman argitaniirtu. ¹⁸ Akka dhiirri yookaan dubartiin balballi yookaan gosti garaan isaa WAAQAYYO Waaqa keenya irraa garagalee waaqota saboota sanaa faana bu'e isin gidduu hin jiraanne mirkaneeffadhaa; akka hiddi summii hadhaa'aa akkasii baasu tokko iyyuu isin gidduu hin jiraanne qulqulleeffadhaa.

¹⁹ Namni akkasii yommuu dubbii kakuu kanaa dhaga'utti, garaa isaatti of eebbisee, "Ani yoon akka fedhii kootti deeme illee nagaa qaba" jedhee yaada. Kun immoo lafa jiidhaa irrattis ta'u lafa goggogaa irratti badiisa fida. ²⁰ WAAQAYYO nama sanaaf gonkumaa dhiifama hin godhu; dheekkamsi isaatii fi hinaaffaan isaa namicha sana irratti boba'a. Abaarsi kitaaba kana keessatti barreeffame hundi isa qaqqaba; WAAQAYYOS samii jalaa maqaa isaa ni dhabamsiisa. ²¹ Akkuma kakuu abaarsa Kitaaba Seeraa kana keessatti barreeffame hundaatti, WAAQAYYO gosoota Israa'el hunda keessaa badiisaaf kophaatti isa baasa.

²² Dhaloonni itti aanu jechuunis ijoolleen keessan warri isiniin duuba dhufan akkasumas keessummoonni biyyoota fagootii dhufan dha'icha guddaa biyyattii irra ga'ee fi dhukkuba WAAQAYYO ittiin ishee dha'e ni argu. ²³ Guutummaan biyyattii gammoojjii gubduu kan soogiddaa fi dinyiin guutamte kan wanni tokko iyyuu irra hin dhaabamne, kan wanni tokko iyyuu irratti hin biqille, kan biqiltuu tokko iyyuu irratti hin guddanne taati. Badiisni ishee irra ga'us akka badiisa Sodoomiitti fi Gomoraa, Adimaatii fi Zeboo'iim kanneen WAAQAYYO dheekkamsa guddaadhaan isaan barbadeesse sanaa ni ta'a. ²⁴ Sabni hundinuu, "WAAQAYYO maaliif waan akkasii biyya kanatti fide? Dheekkamsi sodaachisaan boba'u kunis maaliif dhufe?" jedhaniif gaafatu.

²⁵ Deebiin isaas kana ta'a; "Kun sababii sabni kun kakuu WAAQAYYO Waaqni abbootii isaanii yeroo Gibxii isaan baasetti isaan wajjin gale sana dhiisaniif. ²⁶ Isaanis dhaqanii waaqota biraa, kanneen hin beekiniif waaqota inni isaaniif hin kennin waaqeffatan; gad jedhaniis sagadaniif. ²⁷ Kanaafuu dheekkamsi WAAQAYYOO biyya kanatti boba'ee akka inni abaarsa kitaaba kana keessatti barreeffame hunda itti fidu godhe. ²⁸ WAAQAYYOS aarii sodaachisaa fi dheekkamsa guddaadhaan biyya isaaniitii isaan buqqise; akkuma amma jiru kanattis biyya biraatti isaan darbate."

²⁹ Wanti dhoksaan kan WAAQAYYO Waaqa keenyaa ti; kan mul'ifame garuu akka nu dubbii seera kanaa hunda eeguuf bara baraan kan keenyaa fi kan ijoollee keenyaa ti.

30

Badhaadhummaa Gara WAAQAYYOOTTI Deebi'uudhaan Argamu

¹ Yommuu eebbii fi abaarsi ani fuula kee dura kaa'e kun hundi si argatee ati saboota WAAQAYYO Waaqni kee keessatti si bittinneessu hunda gidduu jiraatutti yoo ati waan sana yaadattu, ² yommuu atii fi ijoolleen kee gara WAAQAYYO Waaqa keetiitti deebitanii akkuma waan ani har'a isin ajaju hundaatti garaa keessanii fi lubbuu keessan guutuudhaan isaaf ajajaman, ³ WAAQAYYO Waaqni kee boojuu kee siif deebisee garaa siif laafuudhaan saboota gidduu isaaniitti si bittinneesse hunda keessaa deebisee walitti si qaba. ⁴ Yoo ati samii jalatti lafa akka malee fagootii geeffamtee jiraatte illee WAAQAYYO Waaqni kee walitti si qaba; deebisees si fida. ⁵ Inni biyya abbootii keetiitti si galcha; atis ni dhaalta. Inni abbootii kee caalaa si sooromsa; akka malee si baay'isas. ⁶ Akka ati garaa kee guutuudhaan, lubbuu kee guutuudhaan isa jaallattee jiraattuuf WAAQAYYO Waaqni kee garaa keeti fi garaa sanyiiwwan keeti dhagna ni qaba. ⁷ WAAQAYYO Waaqni kee abaarsa kana hunda warra si jibbanii si rakkisan irra ni kaa'a. ⁸ Atis deebitee WAAQAYYOOF ni ajajamta; ajaja isaa kanneen ani har'a si ajaju hundas ni eegda. ⁹ Ergasiis

WAAQAYYO Waaqni kee hojii harka keetii hundaa fi ijoollee gudeeda keetii ba'aniin, jabboota keetii fi midhaan lafa qotiasaa keetiitiin si sooromsa. WAAQAYYO akkuma abbootii keetti gammade sana sittiis gammadee si sooromsa; ¹⁰ kunis yoo ati WAAQAYYO Waaqa keetii ajajamtee ajajawwanii fi qajeelchawwan isaa kanneen Kitaaba Seeraa kana keessatti barreeffaman eeguudhaan garaa kee guutuu fi lubbuu kee guutuudhaan gara WAAQAYYO Waaqa keetiitti deebite ta'a.

Jireenya Yookaan Du'a Filachuu

¹¹ Wannani har'a si ajaju kun rakkisaa yookaan kan sirraa fagaate miti. ¹² Akka ati, "Akka nu dhageenyee isa eegnuuf eenyutu gara samiitti ol ba'ee fidee nutti hima?" jettee hin gaafanneef inni ol samii gubbaa hin jiru. ¹³ Yookaan akka ati, "Akka nu dhageenyee isa eegnuuf eenyutu galaana ce'ee fidee nutti hima?" jettee hin gaafanneef inni galaana gama hin jiru. ¹⁴ Dubbiin sun garuu baay'ee sitti dhi'oo jira; akka ati isa eegduufis inni afaan keetii fi garaa kee keessa jira.

¹⁵ Kunoo ani har'a jireenyaa fi eebba, du'aa fi badiisa fuula kee dura kaa'eera. ¹⁶ Ani akka ati WAAQAYYO Waaqa kee jaallattu, akka karaa isaa irras deemtuu fi akka ati ajajawwan isaa, qajeelchawwan isaatii fi seerawwan isaa eegdu si ajaja; ergasiis ati lubbuun jiraattee ni baay'atta; WAAQAYYO Waaqni kees biyya ati dhaaluuf itti galtutti si eebbisa.

¹⁷ Garuu yoo yaadni kee karaa irraa jal'atee ati ajajamuu baatte, yoo ati waaqota kaan waaqeffachuu fi isaan tajaajiluuf jettee fudhatamte, ¹⁸ ani akka isin dhugumaan baddan har'a isiniitti hima. Isin Yordaanosin ceetanii biyya itti galtanii dhaaltan keessas bara dheeraa hin jiraattan.

¹⁹ Ani akkan jireenyaa fi du'a, eebbaa fi abaarsa fuula kee dura kaa'ee jiru har'a samii fi lafa ragaan godhee sitti waama. Egaa atii fi ijoolleen kee akka jiraattaniif jireenya filadhu; ²⁰ kunis akka ati WAAQAYYO Waaqa kee jaallatuuf, akka dubbii isaa dhagessee isatti maxxantee jiraattuuf. WAAQAYYO sababii jireenya kee ta'eef, biyya abbootii kee Abrahaamiif, Yisihaaqii fi Yaaqoobiif kennuuf kakateef sana keessatti bara dheeraa siif kenna.

31

Iyyaasuun Iddoo Musee Bu'uu Isaa

¹ Ergasiis Museen dhaqee dubbii kana Israa'el hundatti dubbate: ² "Ani amma nama waggaa dhibbaa fi digdamaa ti; si'achis isin hoogganuu hin danda'u. WAAQAYYO, 'Ati Yordaanos hin ceetu' naan jedheera. ³ WAAQAYYO Waaqni kee mataan isaa si dura ni ce'a. Inni saboota kanneen fuula kee duraa ni barbadeessa; atis biyya isaanii ni dhaalta. Akkuma WAAQAYYO jedhetti, Iyyaasuunis si dura ni ce'a. ⁴ WAAQAYYO akkuma Sihoonii fi Oogi mootota Amoorotaa sana biyya isaanii wajjin balleesse sana isaan kanneenis ni balleessa. ⁵ WAAQAYYO dabarsee harka keessanitti isaan kenna; isinis waan ani isin ajaje hunda isaan gochuu qabdu. ⁶ Cimaa; jabaadhaa. WAAQAYYO Waaqni keessan isin wajjin deemaatii isin sababii isaaniitiif jettanii hin sodaatinaa yookaan hin rifatinaa; inni gonkumaa isin hin dhiisu yookaan isin hin gatu."

⁷ Kana irratti Museen Iyyaasuu ofitti waamee fuula Israa'el hundaa duratti akkana jedheen; "Ati sababii biyya WAAQAYYO isaaniif kennuuf abbootii isaaniitiif kakatetti galuuf saba kana wajjin deemtuuf cimi; jabaadhus; biyyattiis akka dhaalan godhi. ⁸ WAAQAYYO mataan isaa si dura ni deema; si wajjinis ni jiraata; inni si hin dhiisu yookaan si hin gatu. Hin sodaatin; abdiis hin kutatin."

Seera Dubbisuu

⁹ Museenis seera kana barreessee ilmaan Lewwii kanneen luboota ta'anii taabota kakuu WAAQAYYOO baatanii fi maanguddoota Israa'el hundatti kenne. ¹⁰ Ergasiis Museen akkana jedhee isaan ajaje; "Dhuma waggaa torbaffaatti, yeroo itti gatiin dhiifamutti, yeroo itti Ayyaanni Daasii ayyaaneffamutti, ¹¹ yommuu Israa'el hundi fuula WAAQAYYO Waaqa keetii duratti mul'achuuf lafa inni filatu dhufanitti akka isaan dhaga'aniif fuula isaanii duratti seera kana isaanii dubbifta. ¹² Akka isaan dubbii seera kana hunda dhaga'anii WAAQAYYO Waaqa kee sodaachuu barataniif fi of eeggannaadhaan faana bu'aniif namoota jechuunis dhiirota, dubartoota, ijoollee fi alagoota magaalawwan kee keessa jiraatan walitti qabi. ¹³ Bara isin biyya Yordaanos ceetanii dhaaltan keessa jiraattan guutuu ijoolleen isaanii kanneen seera kana hin beeknes dhaga'uu fi WAAQAYYO Waaqa isaanii sodaachuu barachuu qabu."

Israa'el Ni Fincila

¹⁴ WAAQAYYO Museedhaan, “Yeroon ati duutu dhi’aateera. Akka ani waan inni hojjechuu malu itti himuuf Iyyaasuu waamiitii dunkaana wal ga’ii biratti dhi’aadhaa” jedhe. Musee fi Iyyaasuunis dhufanii dunkaana wal ga’ii duratti dhi’aatan.

¹⁵ WAAQAYYO utubaa duumessaatiin dhufee dunkaanicha keessatti mul’ate; duumessi sunis balbala dunkaanichaa dura dhaabate. ¹⁶ WAAQAYYOS Museedhaan akkana jedhe; “Ati abbootii kee wajjin ni boqotta; sabni kun immoo yommuu suma biyya dhaaluuf itti galutti waaqota Namoota Ormaa duukaa bu’ee sagaagaluu jalqaba. Isaan na dhiisanii kakuu ani isaan wajjin gale ni cabsu. ¹⁷ Gaafas ani isaanitti aaree isaan nan dhiisa; fuula koos isaan duraa nan dhoksa; isaanis ni barbaadeffamu. Badiisaa fi rakkoo baay’etu isaanitti dhufa; isaanis gaafasi, ‘Badiisni kun waan Waaqni keenya nu wajjin hin jirreef nutti dhufe mitii?’ jedhanii gaafatu. ¹⁸ Waan isaan gara waaqota biraatti garagalaniif ani sababii hammina isaanii hundaatiif guutumaan guutuutti fuula koo isaan duraa nan dhokfadha.

¹⁹ “Akka isaanitti ragaa naa ta’uuf, faarfannaa kana barreeffadhuutii akka isaan faarfataniif Israa’eloota barsiisi. ²⁰ Yommuu ani biyya aannanii fi dammi keessaa burqu kan ani abbootii isaanitiif kakuudhaan waadaa galetti isaan fidutti isaan nyaatanii quufanii narraa garagaluudhaan waaqota biraa waaqeffatu; na dhiisanii kakuu koo ni cabsu. ²¹ Faarfannaan kunis yommuu badiisnii fi rakkinni isaanitti dhufuti ragaa isaanitti ta’a; kun sanyii isaanii keessatti hin irraanfatuutii. Ani utuu biyya kakuudhaan waadaa isaanii galetti isaan hin fidin iyyuu waan isaan gochuuf yaadan nan beekaatii.” ²² Kanaafuu Museen gaafas faarfannaa kana barreessee Israa’eloota barsiise.

²³ WAAQAYYOS Iyyaasuu ilma Nuunitiif ajaja, “Ati sababii biyya ani kakuudhaan waadaa isaanii galetti Israa’eloota galchituuf cimi, jabaadhu; ani mataan koo si wajjin jiraa” jedhu kenne.

²⁴ Museen erga dubbii seera kanaa jalqabaa hamma dhumaatti kitaaba irratti barreessee fixee booddee, ²⁵ Lewwota taabota kakuu WAAQAYYOO baataniif ajaja kana kenne: ²⁶ “Kitaaba Seeraa kana fudhuutii taabota kakuu WAAQAYYO Waaqa keetii bira kaa’i. Kunis akka inni achuma taa’ee ragaa isinitti ta’uuf. ²⁷ Ani akka isin finciltootaa fi mata jabeeyyii taatan nan beekaatii. Isin yoo utuma ani jiruu WAAQAYYOTTI finciltan, erga ani du’ee booddee immoo hammam caalaa haa finciltan ree! ²⁸ Akka ani akka isaan dhaga’aniif dubbii kana isaanitti hime akka isaanitti ragaa ta’uuf samii fi lafa waammachuu danda’uuf maanguddoota gosoota keessanii hundaa fi qondaaltota keessan hunda fuula koo duratti walitti qabaa. ²⁹ Ani akka isin erga ani du’ee booddee guutumaan guutuutti xurooftanii ajaja ani isinii kenne irraa garagaltan nan beekaatii. Baroota dhufuuf jiran keessa rakkinni isinitti dhufa; isin fuula WAAQAYYOO duratti waan hamaa hojjettanii hojiidhuma harka keessaniitiin dheekkamsaaf isa kakaafuutii.”

Faarfannaa Musee

³⁰ Museenis jalqabaa hamma dhumaatti dubbii faarfannaa kanaa guutummaa waldaa Israa’elitti akkana jedhee dhageessise:

32

¹ Yaa samiiwwan, dhaga’aa; ani nan dubbadha;

yaa lafa, atis dubbii afaan kootii dhaga’i.

² Barsiisni koo akka bokkaa haa roobu;

dubbiin koos akka fixeensaa gad haa coccophu;

marga irratti akka tiifuu,

biqiltuu corqaa irrattis akka bokkaa guddaa haa roobu.

³ Ani maqaa WAAQAYYOO nan labsa.

Guddina Waaqa keenyaa jajadhaa!

⁴ Inni Kattaa dha; hojiin isaa mudaa hin qabu;

daandiiwwan isaa hundinuus qajeelaa dha.

Inni Waaqa amanamaa hin dogoggorre,

tolaa fi qajeelaa dha.

⁵ Isaan hammina isatti hojjetaniiru;

si’achi isaan sababii qaani isaanitiif ijoollee isaa miti;

isaan dhaloota jal’aa fi micciiramaa dha.

⁶ Yaa saba gowwaa, kan ogummaa hin qabne,

ati akkasitti WAAQAYYOO deebii kennitaa?

Inni Abbaa kee, Uumaa kee,
kan si hojjetee fi si tolche mitii?

⁷ Baroota durii yaadadhu;
dhaloota darbe illee qalbeeffadhu.

Inni siif ibsaatii abbaa kee gaafadhu;
maanguddoota kees gaafadhu; isaan sitti himuutii.

⁸ Waaqni Waan Hundaa Olii yommuu sabootaaf dhaala isaaniif kennetti,
yommuu sanyii namaas gargar qoqoodetti,
akkuma baay'ina ilmaan Israa'elitti
namootaaf daarii dhaabe.

⁹ Qoodni WAAQAYYOO saba isaa ti;
Yaaqoob immoo dhaala dhuunfaa isaa ti.

¹⁰ Inni lafa gammoojjii, lafa onaatii fi
gammoojjii nama gubu keessatti isa argate.

Inni gaachana ta'eefii isa eege;
akka qaroo ija isaattis isa eege;

¹¹ akkuma risaan mana ishee diigdee
ilmaan ishee irra qoochoo qabdu,
akkuma qoochoo ishee bal'iftee ol isaan fudhattu,
akkuma qoochoo isheetiin isaan baattu sana,

¹² WAAQAYYO qofatu isa geggeesse;
waaqni ormaa tokko iyyuu isa wajjin hin turre.

¹³ Inni lafa ol ka'aa irra isa burraaqsis;
midhaan lafa qotiisaa isa soore.

Kattaa keessaa damma isa nyaachise;
dhagaa gurraacha keessaa immoo zayitii kenneef;

¹⁴ dhadhaa fi aannan saawaanii fi bushaayee,
xobbaallaawwanii fi re'oota cooman,

korbeeyyii hoolaa filatamoo Baashaan,
ija qamadii gaariis isa soore.

Ati cuunfaa dhiiga wayinii qulqulluus ni dhugde.

¹⁵ Yishuruun ni gabbate; ni dhiite;
nyaatee quufe; ni ulfaate; ni cululuqe.

Waaqa isa uume ni dhiise;
Kattaa Fayyisaa isaa ta'es ni tuffate.

¹⁶ Isaan waaqota ormaatiin isa hinaafsisan;
waaqota jibbisiisoo isaaniitiinis isa dheekkamsiisan.

¹⁷ Isaan hafuurota hamoo Waaqa hin ta'iniif,
waaqota hin beekiniif,
waaqota reefuu dhufaniif,
waaqota abbootiin keessan hin sodaatiiniif aarsaa dhi'eessan.

¹⁸ Ati Kattaa si dhalche gante;
Waaqa si uume irraanfate.

¹⁹ WAAQAYYO waan kana argee isaan tuffate;
inni ilmaanii fi intallan ofii isaatti aareeraatii.

²⁰ Innis, "Ani fuula koo isaan duraa nan dhokfadha;
dhuma isaaniis nan arga" jedhe;

isaan dhaloota jal'aa,
ijoollee hin amanamneedhaatii.

²¹ Isaan waan Waaqa hin ta'iniin na hinaafsisan;
waaqota tolfamoo isaanii kanneen faayidaa hin qabneenis na aarsan.

Anis warra saba hin ta'iniin akka isaan hinaafan nan godha;
saba hubannaa hin qabneenis isaan nan aarsa.

²² Dheekkamsa kootiin ibiddi qabsiifameeraatii;
innis hamma sii'oolitti gad dhidhimee ni boba'a.

Lafaa fi waan isheen baafu ni nyaata;
hundee tulluuwwaniitti illee ibidda qabsiisa.

- 23 “Ani waan hamaa isaan irra nan tuula;
xiyya koos isaanitti nan fixadha.
- 24 Beela hamaa, golfaa nyaatee nama fixuu fi
dha’icha isaanitti nan erga;
ilkaan bineensaa qaramaa isaa,
hadhaa buutii lafa irra lootuus isaanitti nan erga.
- 25 Karaa guddaa irratti goraadeen warra ijoollee hin qabne isaan godha;
mana isaaniitti sodaatu mo’a.
Dargaggoonnii fi dargaggeettiwwan,
daa’immanii fi maanguddoonni ni dhumu.
- 26 Anis isaan nan bittinneessa;
yaadannoo isaaniis sanyii namaa keessaa nan balleessa.
- 27 Garuu akka diinonni isaanii of tuulanii,
‘Harka keenyatu mo’ate malee,
WAAQAYYO waan kana hunda hin goone’ hin jenne,
ani dhaadannoo diinaa sodaadheera.”
- 28 Isaan saba qalbii hin qabne,
kan hubannaa tokko illee hin qabnee dha.
- 29 Isaan utuu ogeeyyii ta’anii waan kana hubatanii
silaa dhuma isaanii ni beeku turan!
- 30 Yoo Kattaan isaanii isaan gurgure malee,
yoo WAAQAYYO dabarsee isaan kenne malee,
akkamitti namni tokko nama kuma tokko
yookaan namni lama nama kuma kudhan gugsaa?
- 31 Kattaan isaanii akka kattaa keenyaa miti;
kana immoo diinonni keenya iyyuu hin ganan.
- 32 Wayiniin isaanii wayinii Sodoomii fi
lafa qotiisaa Gomorraa irraa dhufa.
Iji wayinii isaanii summiidhaan,
hurbuun isaaniis waan hadhaa’uun guutameera.
- 33 Wayiniin isaanii hadhaa bofaa,
summii bofa hadhaan isaa nama ajjeesuu ti.
- 34 “Kun waan na biratti eegame,
kan galme koo keessattis chaappaadhaan cufame mitii?
- 35 Haaloo baasuun kan koo ti; ani gatii nan deebisa.
Yeroo isaatti miilli isaanii ni mucucaata;
guyyaan badiisa isaanii dhi’aateera;
badiisni isaaniis isaanitti ariifateera.”
- 36 WAAQAYYO yommuu akka isaan humna dhaban,
akka garbichis ta’u namni birmaduun tokko iyyuu hin hafne argutti,
saba isaatiif ni murteessa;
tajaajiltoota isaatiifis garaa laafa.
- 37 Innis akkana jedha: “Kattaan isaan itti da’atan,
waaqonni tolfamoon isaanii amma eessa jiru?
- 38 Waaqonni cooma qalma isaanii nyaatan,
kanneen dhibaayyuu daadhii wayinii isaanii dhuganis eessa jiru?
Mee ka’anii isaan haa gargaaran!
Mee da’annoo haa kennaniif!
- 39 “Akka ani mataan koo Isa ta’e beekaa!
Ana malee Waaqni biraa hin jiru.
Ani nan ajjeesa; nan jiraachisas;
nan madeessa; nan fayyisas;
namni harka kootii baasuu danda’u tokko iyyuu hin jiru.
- 40 Ani dhugumaan bara baraan jiraataadhaatii
harka koo samiitti ol qabee nan kakadha;
- 41 ani yommuun goraadee koo calaqqisaa qaradhee
harki koo murtiidhaaf isa qabatutti,
ani diinota koo haaloo nan ba’a;

warra na jibbaniif illee waan isaaniif malu nan kenna.

⁴² Yommuu goraadeen koo foon nyaatutti,
ani akka xiyyi koo dhiigaan machaa'u nan godha;
dhiigni sunis dhiiga warra qalamaniitii fi booji'amanii
kan mataa hooggantoota diinaa ti."

⁴³ Sababii inni haaloo dhiiga tajaajiltoota isaa ba'uuf,
yaa sabootaa, namoota isaa wajjin gammadaa.
Inni diinota isaa haaloo ba'a;

biyyaa fi saba isaatiif araara ni buusa.

⁴⁴ Museenis Iyyaasuu ilma Nuuni wajjin dhufee dubbiiwwan faarfannaa kana hunda namoota dhageessise. ⁴⁵ Innis yommuu dubbiiwwan kanneen hunda Israa'eloota hundatti dubbatee fixetti, ⁴⁶ akkana isaaniin jedhe; "Akka isaan dubbiiwwan seera kanaa hunda of eeggannaadhaan eeganiif akka isin ijoollee keessan ajajjan, dubbiiwwan ani har'a ifa baasee isinitti himu hunda qalbiitti qabadhaa. ⁴⁷ Isaan isiniif jireenya malee dubbii faayidaa hin qabne miti. Dubbiiwwan kanaan biyya laga Yordaanos ceetanii dhaaltan keessa bara dheeraa ni jiraattu."

Museen Tulluu Neboo Irratti Du'uu Isaa

⁴⁸ Gaafasuma WAAQAYYO akkana jedhee Museetti hime; ⁴⁹ "Biyya Mo'aab kan fuullee Yerikoo jiru, tulluuwwan Abaariim keessa tulluu Nebootti ol ba'iitii biyya Kana'aan, biyya ani Israa'elootaaf dhaala godhee kennu fuulleetti ilaali. ⁵⁰ Akkuma obboleessi kee Aroon tulluu Hoori irratti du'ee gara abbootii isaatti walitti qabame sana, atis tulluu yaabbattu sana irratti ni duuta; gara abbootii keetiittis walitti qabamta. ⁵¹ Kunis waan isin lamaanuu Gammoojii Siin, Qaadash keessatti bishaan Mariibaa biratti fuula Israa'elootaa duratti na amanuu diddani fi sababii Israa'eloota gidduutti qulqullummaa koo hin eeginiif. ⁵² Kanaafuu ati fagootti argita malee biyya ani Israa'elootaaf kennu sanatti hin galto."

33

Museen Gosoota Israa'el Ebbisuu Isaa

33:1-29 kwi - Uma 49:1-28

¹ Eebbi Museen namni Waaqaa sun utuu hin du'in dura ittiin Israa'eloota eebbise kana; ² innis akkana jedhe:

"WAAQAYYO tulluu Siinaa irraa dhufe;
isaan irrattis See'iir irraa akka aduu ganamaatti ba'e;
Tulluu Phaaraan irraa isaan eebbise.

Inni qulqulloota isaa kumaatama wajjin dhufe;
karaa harka isaa mirgaatiin ibidda boba'utu ba'e.

³ Dhugumaan situ saba jaallata;
qulqullooni hundinuu harka kee keessa jiru.

Hundi isaanii miilla kee jalatti kufu;
qajeelfamas sirraa argatu;

⁴ Museen seera nuu kenneera;
kunis dhaala waldaa Yaaqoob.

⁵ Yeroo hooggantoonni sabaa
gosoota Israa'el wajjin walitti qabamanitti
inni Yishuruun irratti mootii ture.

⁶ "Ruubeen haa jiraatu malee hin du'in;
yookaan baay'inni namoota isaa hin xinnaatin."

⁷ Waa'ee Yihuudaas akkana jedhe:
"Yaa WAAQAYYO, iyya Yihuudaa dhaga'i;
gara saba isaattis isa fidi.

Inni harka ofii isaatiin of haa eegu.
Yommuu inni diinota isaatiin wal lolutti gargaaraa isaa ta'!"

⁸ Inni waa'ee Lewwiis akkana jedhe:
"Tumiimii fi Uriimiin kee
tajaajilaa kee amanamaadhaaf haa ta'u.

Ati lafa Maasaah jedhamutti isa qorte;
bishaan Mariibaa irratti isa lolte.

⁹ Waa'ee abbaa fi haadha isaas,

'Ani isa hin argine' jedhe.
 Inni obboloota isaa addaan hin baafanne;
 ijoollee isaas hin beekne;
 isaan dubbii keetiif ajajamanii
 kakuu kee eeganiiruutii.
¹⁰ Inni ajaja kee Yaaqoobin,
 seera kee immoo Israa'elin ni barsiisa.
 Fuula kee duratti ixaana,
 iddoo aarsaa keetii irratti illee aarsaa gubamu guutuu ni dhi'eessa.
¹¹ Yaa WAAQAYYO, ogummaa isaa hunda eebbisiif;
 waan harki isaa hojjetuttis gammadi.
 Mo'oo warra isatti ka'anii cabsi;
 akka isaan lammata hin kaane godhiitii diinota isaa dha'i."
¹² Waa'ee Beniyaam akkana jedhe:
 "Namni WAAQAYYO isa jaallatu eegumsa isaatiin nagaan haa jiraatu;
 inni guyyaa guutuu isa eegaatii;
 namni WAAQAYYO isa jaallatu gatiitii isaa gidduu boqota."
¹³ Waa'ee Yoosef akkana jedhe:
 "WAAQAYYO biyya isaa haa eebbisu;
 fixeensa filatamaa samiidhaa buusuudhaan
 bishaan boolla gad fagoo keessaatiin,
¹⁴ midhaan filatamaa aduun biqilchituun,
 waan akka malee gaarii kan ji'i kennuun,
¹⁵ kennaawwan filatamoo tulluuwwan duriitiin,
 badhaadhummaa gaarran bara baraatiin,
¹⁶ kenna filatamaa lafaatii fi guutummaa isaatiin,
 surraa isa daggala boba'u keessa ture sanaatiin haa eebbisu.
 Isaan kunneen hundi mataa Yoosef
 kan obboloota isaa gidduutti bulchaa ta'e sanaa irra haa bu'an.
¹⁷ Inni ulfinaan korma hangafa fakkaata;
 gaanfawwan isaa akka gaanfawwan gafarsaa ti.
 Isaaniinis hamma daarii lafaatti
 saboota ni waraana.
 Isaanis kuma kurnan Efreem,
 akkasumas kumaatama Minaasee ti."
¹⁸ Waa'ee Zebuuloonis akkana jedhe:
 "Zebuuloon ati gad ba'uu keetiin,
 Yisaakor atis dunkaanota kee keessatti gammadi.
¹⁹ Isaan saboota gara tulluutti ni waamu;
 achittis aarsaa qajeelummaa ni dhi'eessu;
 isaan sooroma irra dhangala'aa galaana keessaatiin,
 qabeenya cirracha keessa dhokfameenis ni gammadu."
²⁰ Waa'ee Gaad immoo akkana jedhe:
 "Namni bulchiinsa Gaad bal'isu eebbifamaa dha!
 Gaad irree fi mataa caccabsaa
 akka leencaatti achi jiraata.
²¹ Inni ofii isaatiif lafa gabbataa filate;
 qoodni hooggantootaa isaaf turfame.
 Yommuu hooggantoonni sabaa walitti qabamanitti,
 inni fedhii qajeelummaa WAAQAYYOOTII fi
 murtii Israa'elitti mure sana fiixaan baase."
²² Waa'ee Daanis inni akkana jedhe:
 "Daan akka ilmoolee leencaa
 kan Baashaan keessaa utaalee ba'uu ti."
²³ Waa'ee Niftaalemis akkana jedhe:
 "Niftaalem surraa gonfateera;
 eebba WAAQAYYOOTIINIS guutameera;
 inni biyya karaa lixaatii fi kibbaatiin jiru ni dhaala."
²⁴ Waa'ee Aasheer immoo akkana jedhe:
 "Aasheer ilmaan hunda caalaa eebbifamaa dha;
 inni obboloota isaa duratti fudhatama haa argatu;
 miilla isaas zayitii keessa haa cuuphatu.

- ²⁵ Danqaraan balbala keetii sibiilaa fi naasii ta'a;
jabinni kees akkuma baroota jireenya keetii ni ta'a.
- ²⁶ "Waaqni akka Waaqa Yishuruun,
kan si gargaaruuf jedhee samiiwwan irra,
surraa isaatiinis duumessoota irra gulufu tokko illee hin jiru.
- ²⁷ Waaqni bara baraa iddoo jireenyaa keetii ti;
irreen bara baraa si jalaan jira.
Inni, 'Isaan balleessi!' jedhee
diinota kee fuula kee duraa ni ari'a.
- ²⁸ Kanaafuu Israa'el kophaa isaa nagaadhaan jiraata;
lafa fixeensi samii itti coccophutti,
biyya midhaanii fi wayinii haaraatti
namni burqaa Yaaqoob tuqu hin jiru.
- ²⁹ Yaa Israa'el, ati eebbifamaa dha!
Sabni WAAQAYYO isa fayyise,
kan akka keetii eenyu?
Inni gaachana keetii fi gargaaraa kee ti;
goraadee ulfina keetiitis.
Diinonni kee sodaadhaan fuula kee duraa duubatti deebi'u;
ati immoo iddoowwan waaqeffannaa isaanii irra ejjetta."

34

Du'a Musee

¹ Museenis dirree Mo'aabii ka'ee fuullee fiixee Phisgaa kan Yerikootti argamutti, gaara Nebootti ol ba'e. Achittis WAAQAYYO guutummaa biyyattii isatti argisiise; kunis Gili'aadii hamma Daanitti, ² guutummaa Niftaalem, biyya Efreemiitii fi Minaasee, guutummaa biyya Yihuudaa kan hamma galaana lixaatti bal'atee jiru, ³ Negeebii fi Magaalaa Meexxii kan sulula Yerikootii jalqabee hamma Zo'aariitti argamuu dha. ⁴ Ergasii WAAQAYYO, "Kun biyya ani yeroo, 'Sanyii keetiif nan kenna' jedhetti kakuudhaan Abrahaamiif, Yisihaaqii fi Yaaqoobiif waadaa galee dha. Ani akka ati ija keetiin argitu godheera; ati garuu achi hin ceetu" jedheen.

⁵ Museen garbichi WAAQAYYOOS akkuma WAAQAYYO isaan jedhetti achuma Mo'aab keessatti du'e. ⁶ Innis biyya Mo'aabitti sulula fuullee Beet Phe'ooritti argamu keessatti isa awwaale; garuu hamma har'aatti awwaalli isaa eessa akka jiru namni tokko iyyuu hin beeku. ⁷ Museen yeroo du'etti nama waggaa dhibba tokkoo fi digdama ture; ta'us iji isaa hin dadhabne; humni isaas hin laafne. ⁸ Israa'eloonni hamma yeroon gaddaa raawwatutti dirree Mo'aab irratti bultii soddoma Museedhaaf boo'an.

⁹ Waan Museen harka isaa isa irra kaa'ee tureef Iyyaasuun ilmi Nuuni hafuura ogummaatiin guutame. Kanaafuu Israa'eloonni isa dhaga'anii waan WAAQAYYO Musee ajaje godhan.

¹⁰ Ergasii raajiin akka Musee kan ifaan ifatti WAAQAYYOON beeku tokko iyyuu Israa'el keessatti hin kaane; ¹¹ kan WAAQAYYO akka inni Fara'oon irratti, qondaaltota isaatii fi guutuu biyya isaa irratti mallattoowwanii fi dinqiiwwan sana hojjetuuf Gibxitti ergee waan sana hojjete tokko iyyuu hin jiru. ¹² Namni tokko iyyuu takkumaa humna guddaa yookaan hojii akka malee sodaachisaa Museen fuula Israa'eloota hundaa duratti argisiise sana hin argisiifneeti.

Kitaaba Iyyaasuu

WAAQAYYO Iyyaasuu Ajajuu Isaa

¹ Erga Museen garbichi WAAQAYYOO sun du'ee booddee WAAQAYYO akkana jedhee Iyyaasuu ilma Nuuni gargaaraa Musee sanatti dubbate: ² "Garbichi koo Museen du'eera. Egaa amma atii fi sabni kun hundinuu gara biyya ani isaaniif, Israa'elootaaf kennuuf jiruutti galuuf Laga Yordaanos ce'uuf qophaa'aa. ³ Anis akkuma Museef waadaa gale sanatti iddoo miilli keessan ga'e hunda isiniifan kenna. ⁴ Daangaan keessanis gammoojjidhaa jalqabdee hamma Libaanoonitti, lagicha guddaa Efraaxiisii jalqabdee biyya Heetotaa hunda keessa baatee karaa dhi'aatiin hamma Galaana Guddaatti bal'atti. ⁵ Bara jireenya keetii guutuu namni si dura dhaabachuu danda'u tokko iyyuu hin jiru. Ani akkuman Musee wajjin ture sana si wajjinis nan ta'a; ani gonkumaa si hin gatu yookaan si hin dhiisu. ⁶ Ati sababii akka isaan biyya ani abbootii isaanii kennuuf kakadhe sana dhaalaniif saba kana hoogganuuf cimi; ija jabaadhus.

⁷ "Cimi; ija jabaadhus. Seera garbichi koo Museen siif kenne hundumaaf of eeggannaadhaan ajajami; akka gara deemtu hundumatti siif milkaa'uufis mirgatti yookaan bitaatti hin gorin. ⁸ Kitaabni Seeraa kun afaan keetii hin bu'ay. Waan isa keessatti barreeffame hunda gochuuf akka of eeggattuufis halkanii guyyaa itti yaadi. Akkasiinis ati ni badhaata; ni milkooftas. ⁹ Ani akkana jedhee si hin ajajnee? Cimi; ija jabaadhus. Waan WAAQAYYO Waaqni kee iddoo ati deemtu hundumatti si wajjin ta'uuf, hin sodaatin; abdiis hin kutatin."

¹⁰ Kanaafuu Iyyaasuun akkana jedhee qondaaltota sabaa ajaje: ¹¹ "Qubata keessa dedeemaatii namootaan, 'Galaa keessan qopheeffadhaa. Isin biyya WAAQAYYO Waaqni keessan isinii kennuuf jiru sana dhaala ofii keessanii gootanii fudhachuuf bultii sadii keessatti Yordaanos ni ceetu.'"

¹² Iyyaasuun garuu gosa Ruubeeniin, gosa Gaadiitii fi walakkaa gosa Minaaseetiin akkana jedhe: ¹³ "Ajaja garbichi WAAQAYYO Museen isinii kenne sana yaadadhaa; 'WAAQAYYO Waaqni keessan boqonnaa isinii kenna; biyya kanas isinii kenneera.' ¹⁴ Niitonni keessan, ijoolleen keessanii fi horiin keessan biyya Museen gama ba'a Yordaanos isinii kenne keessa haa turan; garuu namoonni keessan warri lolaaf qophaa'an hundi obboloota keessan dura gamatti haa ce'an. Isin obboloota keessan gargaaruu qabdu; ¹⁵ hamma WAAQAYYO akkuma isinii godhe sana isaaniifis boqonnaa kennee isaanis biyya WAAQAYYO Waaqni keessan isaanii kennu dhaalaniitti isaan gargaaruu qabdu. Ergasii deebitanii biyya keessan kan Museen garbichi WAAQAYYO sun gama ba'a Yordaanositti karaa ba'a biiftuu isinii kenne sana ni dhaaltu."

¹⁶ Isaanis akkana jedhanii Iyyaasuuf deebii kennan; "Nu waan ati nu ajajje kam iyyuu ni hojjenna; gara ati nu ergitu kam iyyuus ni deemna. ¹⁷ Nu akkuma Museedhaaf guutummaan guutuutti ajajamne sana siifis akkasuma ni ajajamna. WAAQAYYO Waaqni kee garuu akkuma Musee wajjin ture sana si wajjinis haa ta'u. ¹⁸ Namni ajaja keetti finciluu fi dubbii ati karaa kamiin iyyuu isa ajajjeef hin ajajamne hundi haa ajjeefamu. Ati qofti cimi; ija jabaadhus!"

2

Ra'aabii fi Basaastota

¹ Ergasii Iyyaasuun ilmi Nuuni, "Dhaqaatii biyya sana, keessumattuu Yerikoo basaasaa" jedhee dhoksaan basaastota lama biyya Shixiimiitii erge. Isaanis deemanii mana sagaagaltitii Rahaab jedhamtu tokkoo seenanii achuma turan.

² Mooticha Yerikoottis, "Kunoo! Israa'eloota keessaa namoonni tokko tokko biyyattii basaasuuf galgala kana as dhufaniiru" jedhamee himame. ³ Kanaafuu mootichi Yerikoo, "Sababii isaan guutummaa biyyattii basaasuuf dhufaniif namoota gara kee dhufanii mana kee seenan sana gad baasi" jedhee dhaamsa kana Rahaabitti erge.

⁴ Dubartittiin garuu namoota lamaan fuutee dhoksite. Isheenis akkana jette; "Dhuguma namoonni gara koo dhufaniiru; ani garuu akka isaan eessaa dhufan hin beekne. ⁵ Isaanis galgala yommuu yeroon karri magaalattii cufamu ga'etti ba'anii deeman. Karaa isaan deemanis ani hin beeku. Isaan qaqqabdu ta'atii dafaa isaan duukaa bu'aa." ⁶ Isheen garuu gara bantii manaatti ol isaan baaftee cidii talbaa kan bantii manaa irratti tuultee turte jala isaan dhoksite. ⁷ Kanaafuu namoonni basaastota

sana duukaa bu'udhaaf karaa gara malkaa Yordaanos geessu irra bu'anii qajeelan; karri sunis akkuma duukaa buutonni sun ba'aniin cufame.

⁸ Isheenis utuu basaastonni sun buluuf hin ciciisin gara bantii manaatti ol baatee ⁹ akkana isaaniin jette; "Ani akka WAAQAYYO biyya kana isinii kennee fi akka isin sodaachuun nurra bu'es nan beeka; namni biyya kana keessa jiraatu hundinuus sababii keessaniif fuula keessan duratti sodaadhaan hollachaa jira. ¹⁰ Yommuu isin Gibxii baatanitti akka itti WAAQAYYO Galaana Diimaa fuula keessan duratti gogse, waan isinis Sihoonii fi Oogi mootota Amoorotaa kanneen gama ba'a Yordaanositti guutumaan guutuutti balleessitan sana lamaan gootan dhageenyeerra. ¹¹ Nu yommuu waa'ee waan kanaa dhageenyetti sababii keessaniif onneen keenya baqxee abdii kutanne. WAAQAYYO Waaqni keessan ol samii gubbaatti, gad lafa irrattis Waaqaatii.

¹² "Egaa amma sababii ani garaa isinii laafeef isinis akkasuma akka maatii kootiif garaa laaftan maqaa WAAQAYYOOTIIN naa kakadhaa. Mallattoo dhugaas naa kennaa; ¹³ kunis akka isin lubbuu abbaa kootii, haadha kootii, obbolootaa fi obboleettota kootii, waan kan isaaniin ta'e hundaa fi lubbuu keenya du'a oolchitaniif."

¹⁴ Namoonnis, "Lubbuun keenya sababii lubbuu keessaniitiif haa badduu! Yoo isin waan nu hojjennu kana namatti himuu baattan nu yommuu WAAQAYYO biyya kana nuu kennutti gara laafinaa fi amanamummaadhaan si simanna" jedhanii ishee abdachiisan.

¹⁵ Kanaafuu isheen sababii manni isheen keessa jiraattu sun dallaa magaalattiitiin wal qabatuuf foddaa keessaan funyoodhaan gad isaan buufte. ¹⁶ Isheenis akkana isaaniin jette; "Akka warri isin duukaa bu'an sun isin hin argineef gara gaarraniitti baqadhaa. Hamma isaan deebi'anitti guyyoota sadii achitti dhokadhaa; ergasii immoo karaa keessan deemaa."

¹⁷ Namoonni sunis akkana jedhaniin; "Kakuun ati nu kakachiifte kun kan nu qabachuu danda'u, ¹⁸ yoo ati yommuu nu biyyattii seennutti funyoo bildiimaa kana foddaa ittiin gad nu buufte kanatti hiitee abbaa keetii fi haadha kee, obboloota keetii fi maatii kee hunda mana keetti galchite qofa. ¹⁹ Namni tokko iyyuu yoo mana kee keessaa gara daandii alaatti gad ba'e, dhiigni isaa matuma isaatti deebi'a; nu itti hin gaafatamnu. Nama si wajjin mana kee keessa jiru immoo yoo harki tokko iyyuu isa tuqe, dhiigni isaa mataa keenyatti deebi'a. ²⁰ Garuu yoo ati waan nu hojjennu kana namatti himte, nu kakuu ati nu kakachiifte sana jalaa bilisa baana."

²¹ Isheenis, "Fudhadheera; akkuma isin jettan haa ta'u" jettee deebifte.

Kanaafuu isheen isaan ergite; isaanis ka'anii deeman. Isheen funyoo bildiimaa sana foddaa sanatti hiite.

²² Isaanis yommuu ba'anitti gara gaarranii deemanii hamma duukaa buutonni sun karaa irra barbaadaniin isaan dhabanii deebi'anitti guyyaa sadii achi turan. ²³ Basaastonni lamaan sunis deebi'anii gaarran keessaa ba'anii malkaadhaan laga ce'uudhaan gara Iyyaasuu ilma Nuuni dhufan; waan isaan irra ga'e hundas isatti himan. ²⁴ Isaanis Iyyaasuudhaan, "WAAQAYYO dhugumaan biyyattii guutuu harka keenyatti kenneera; namoonni hundinuus sababii keenyaaf sodaadhaan hollachaa jiru" jedhan.

3

Yordaanosiin Ce'uu

¹ Iyyaasuu fi Israa'eloonni hundinuus ganama barii Shixiim keessaa ba'anii gara Laga Yordaanos dhufan. Utuu gamatti hin ce'in duras achi qubatan. ² Bultii sadii booddee ajajjoonni loltootaa qubata keessa dedeemanii, ³ akkana jedhanii namoota ajajan: "Isin yommuu taabota kakuu WAAQAYYO Waaqa keessaniitii fi Lewwota luboota ta'an isaaniin taaboticha baatan argitanitti iddoo keessanii kaatanii taaboticha faana bu'uu qabdu. ⁴ Isin sababii duraan karaa kanaan hin darbiniif, karaa deemuun isinii malu ni beektu. Garuu isinii fi taaboticha gidduutti gargari fageenya gara dhundhuma kuma lama hambisaa; ittis hin dhi'aatinaa."

⁵ Iyyaasuunis uummataan, "Of qulqulleessaa; WAAQAYYO bor gidduu keessanitti wantoota dinqisiisaa ni hojjetaatii" jedhe.

⁶ Iyyaasuunis lubootaan, "Taabota kakuu fuudhaatii uummata dura darbaa" jedhe. Kanaafuu isaan taaboticha fuudhanii uummata dura darban.

⁷ WAAQAYYOS Iyyaasuudhaan akkana jedhe; "Akka isaan akka ani akkuman Musee wajjin ture sana si wajjin jiru beekaniif, ani har'a fuula Israa'eloota hundaa duratti nama guddaa si gochuu nan jalqaba. ⁸ Atis luboota taabota kakuu baataniin, 'Isin yommuu qarqara bishaan Yordaanos geessanitti, dhaqaatii laga keessa dhadhaabadhaa' jedhi."

⁹ Iyyaasuunis Israa'elootaan akkana jedhe; "As kottaatii dubbii WAAQAYYO Waaqa keessanii dhaga'aa. ¹⁰ Akki isin itti akka Waaqni jiraataan gidduu keessan jiruu fi akka inni dhugumaan Kana'aanota, Heetota, Hiiwota, Feerzota, Girgaashota, Amoorotaa fi Yebuusota fuula keessan duraa ari'ee baasu beektan kanaa dha. ¹¹ Kunoo, taabonni kakuu Gooftaa lafa hundumaa isin duraan Yordaanos ni seena. ¹² Kanaafuu amma gosoota Israa'el keessaa nama kudha lama jechuunis tokkoo tokkoo gosaa keessaa nama tokko tokko filadhaa. ¹³ Akkuma luboonni taabota WAAQAYYO Gooftaa lafa hundaa baatan miilla isaanii Yordaanos keessa seensisaniin, bishaan isaa kan gubbaadhaa gad yaa'u ni cita; tuulamees ol dhaabata."

¹⁴ Kanaaf yommuu namoonni laga Yordaanos ce'uuf qubata isaanii keessaa ba'anitti, luboonni taabota kakuu baatanii isaan dura darbanii deeman. ¹⁵ Yeroo midhaan galfamu hunda lagni Yordaanos guatee irra dhangala'a. Ta'us akkuma luboonni taaboticha baatan Yordaanos ga'anii miilli isaanii qarqara bishaanii tuqeen, ¹⁶ bishaan burqaa oliitii dhufu yaa'uu dhiise. Iddoo magaalaa Addaam jedhamu kan Zaaretaan biraa sana irraa fagaatee tuulamee dhaabate; bishaan gara Galaana Arabbaatti yookaan Galaana soogiddaatti gad yaa'us guutumaan guutuutti cite. Kanaafuu namoonni fuullee Yerikootiin gara gamaatti ce'an. ¹⁷ Yeroo Israa'eloonni hundi darbaa turanii luboonni taabota kakuu WAAQAYYO baatan sun hamma sabni guutumaan guutuutti lafa goggogaa irra ce'utti walakkaa Yordaanos keessa qajeelanii lafa goggogaa irra dhaabatan.

4

¹ WAAQAYYOS erga sabni guutuun Yordaanosin ce'ee booddee, Iyyaasuudhaan akkana jedhe; ² "Saba keessaa nama kudha lama, tokkoo tokkoo gosaa keessaa nama tokko tokko filadhuutii ³ akka isaan walakkaa Yordaanos keessaa iddoo luboonni dhadhaabatan sanaa dhagoota kudha lama fuudhanii, baatanii isin wajjin deemanii iddoo isin edana bultanitti lafa kakaa'an itti himi."

⁴ Kanaafis Iyyaasuun, namoota kudha lamaan Israa'eloota keessaa, tokkoo tokkoo gosaa keessaa tokko tokko filate sana walitti waamee ⁵ akkana jedheen; "Taabota WAAQAYYO Waaqa keessanii kana dura darbaatii walakkaa Yordaanos seenaa. Tokkoon tokkoon keessanis akkuma baay'ina gosoota Israa'elootaatti dhagaa tokko tokko fudhattanii gatiitii keessanitti baachuu qabdu. ⁶ Kunis akka wanni kun gidduu keessanitti mallattoo ta'uuf. Yommuu ijoolleen keessan gara fuulduraatti, 'Dhagoonni kunneen maal argisiisu?' jedhanii isin gaafatanitti, ⁷ akka bishaan laga Yordaanos fuula taabota kakuu WAAQAYYO duratti gargar cite itti himaa. Yommuu taabonni kun laga Yordaanos ce'etti bishaan Yordaanos gargar cite. Dhagaawwan kunneenis saba Israa'eliif yaadannoo bara baraa ta'u."

⁸ Kanaafuu Israa'eloonni akkuma Iyyaasuun isaan ajaje godhan. Isaanis akkuma WAAQAYYO Iyyaasuutti hime sana, akkuma baay'ina gosoota Israa'elootaatti dhagoota kudha lama walakkaa Yordaanos keessaa fuudhan; hamma iddoo qubata isaaniittis baatanii achitti lafa kaa'atan. ⁹ Iyyaasuunis dhagoota kudha lamaan walakkaa Yordaanos keessa iddoo luboonni taabota kakuu baatan sun ijaajjaa turan sana ol dhadhaabe. Isaanis hamma har'aatti achuma jiru.

¹⁰ Luboonni taabota kakuu baatan sunis hamma wanni WAAQAYYO akka inni namootatti himuuf Iyyaasuun ajaje hundi akkuma Museen Iyyaasuun ajajetti raawwata-mutti walakkaa Yordaanos keessa dhadhaabachaa turan. Namoonnis dafanii ce'an; ¹¹ akkuma hundi isaanii ce'aniinis utuma namoonni arganuu taabonni WAAQAYYOOTII fi luboonni gara gama kaaniitti ce'an. ¹² Ilmaan Ruubeen, ilmaan Gaadii fi walakkaan gosa Minaasee akkuma Museen isaan ajajetti mi'a lolaa hidhatanii Israa'eloota dura gara gamaatti ce'an. ¹³ Namni gara kuma afurtamaa ta'u warraanaaf hidhatee fuula WAAQAYYO dura gara dirree Yerikootii lolaaf ce'e.

¹⁴ WAAQAYYOS guyyaa sana fuula Israa'eloota hundaa duratti Iyyaasuun nama guddaa godhe; isaanis akkuma Museef ulfina kennaa turan sana bara jireenya isaa guutuu Iyyaasuufis ulfina kennan.

¹⁵ Ergasiis WAAQAYYO Iyyaasuudhaan akkana jedhe; ¹⁶ "Akka isaan Yordaanos keessaa ol ba'aniif luboota taabota kakuu seeraa baatan sana ajaji."

¹⁷ Kanaafuu Iyyaasuun, "Yordaanos keessaa ol ba'aa" jedhee luboota ajaje.

¹⁸ Luboonnis taabota kakuu WAAQAYYO baatanii laga keessaa ol ba'an. Akkuma isaan miilla isaanii lafa gogaa irra dhaabbataniin bishaan Yordaanos iddoo ofiitti deebi'ee akkuma duraanii guatee irra dhangala'e.

¹⁹ Guyyaa kurnaffaa ji'a jalqabaatti namoonni Yordaanos keessaa ol ba'anii Gilgaal isa ba'a daarii Yerikoo keessa qubatan. ²⁰ Iyyaasuunis dhagoota kudha lamaan isaan Yordaanos keessaa fuudhan sana Gilgaal keessa dhadhaabe. ²¹ Innis Israa'elootaan

akkana jedhe; “Gara fuulduraatti yoo sanyiin keessan, ‘Dhagaawwan kunneen maal argisiisu?’ jedhani abbootii isaanii gaafatan, ²² ‘Israa’el lafa gogaa irra Yordaanos ce’e’ jedhaa itti himaa. ²³ WAAQAYYO Waaqni keessan hamma isin gamatti ceetanitti fuuluma keessan duratti Yordaanos gogsee tureetii. WAAQAYYO Waaqni keessan akkuma hamma nu ceenutti Galaana Diimaa fuula keenya duratti gogse sana Yordaanosiinis gogse. ²⁴ Innis akka sabni lafaa hundinuu akka harki WAAQAYYOO jabaa ta’e argisiisuu fi akka isinis yeroo hunda WAAQAYYO Waaqa keessan sodaattaniif waan kana hojjete.”

5

Gilgaalitti Dhagna Qabamuu

¹ Mootonni Amoorotaa kanneen gama dhi’a Yordaanos jiraatanii fi mootonni Kana’aanotaa kanneen qarqara galaanaa jiraatan hundi akka WAAQAYYO hamma nu ceenutti fuula saba Israa’el duratti Yordaanos gogse yommuu dhaga’anitti onneen isaanii ni baqxe; deebi’aniis fuula Israa’elootaa dura dhaabachuu sodaatan.

² WAAQAYYO yeroo sana Iyyaasuudhaan, “Haaduu qara qabu tolchiitti ammas Israa’eloota dhagna qabi” jedhe. ³ Kanaafuu Iyyaasuun haaduu qara qabu tolchee Gibe’aat Aaralootitti Israa’eloota dhagna qabe.

⁴ Sababiin Iyyaasuun waan kana hojjeteef kana: Warri biyya Gibxii ba’anii dhufan hundinuu jechuunis dhiironni lolan hundinuu erga Gibxii ba’anii booddee gammoojjii keessatti karaatti dhuman. ⁵ Namoonni Gibxii ba’an hundi dhagna qabatani turan; warri yeroo Gibxii ba’anii gammoojjii keessa deema turanitti karaatti dhalatan garuu dhagna hin qabamne. ⁶ Israa’eloonni sababii WAAQAYYOO ajajamuu didaniif hamma namoonni yeroo Gibxii ba’anitti loluu danda’an hundi dhumanitti waggaa afurtama gammoojjii keessa jooran. WAAQAYYO akka isaan biyya inni nuu kennuuf abbootii isaanii abdachiisee ture, biyya aannanii fi damma baafuu sana hin argine isaanitti kakatee tureetii. ⁷ Kanaafuu inni qooda isaanii ilmaan isaanii kaase; isaanis warra Iyyaasuun dhagna qabee dha. Isaan sababii karaatti dhagna hin qabaminiif hamma har’aatti utuu dhagna hin qabamin jiraatan. ⁸ Isaanis erga sabni guutuun dhagna qabamee booddee hamma fayyanitti lafuma jiran sana qubata keessa turan.

⁹ WAAQAYYOS Iyyaasuudhaan, “Ani har’a arrabsoo Gibxi sana isin irraa gangalcheera” jedhe. Kanaafuu iddoon sun hamma har’aatti Gilgaal jedhamee waamama.

¹⁰ Galgala bultii kudha afuraffaa ji’a sanaatti sabni Israa’el utuma dirree Yerikoo irra Gilgaal keessa qubatee jiruu Faasiikaa ayyaaneffate. ¹¹ Isaanis guyyaa Faasiikaatti aanee dhufu, gaafuma sana midhaan biyyattii keessaa waa nyaatan; kunis Maxinoo fi asheetii waadamee dha. ¹² Mannaanis guyyuma isaan midhaan biyya sanaa nyaatanitti aanu gad bu’uu dhiise; ergasii mannaan tokko iyyuu warra Israa’eliif gad hin buune; garuu isaan waggaa sana keessa midhaan biyya Kana’aan nyaatan.

Yerikoo Jiguu Isaa

¹³ Iyyaasuun yommuu Yerikootti dhi’aatetti, ol mil’atee nama goraadee luqqifame harkatti qabatee isa dura dhaabatu tokko arge. Iyyaasuun gara isaa dhaqee, “Ati gara keenya moo gara diinota keenyaa ti?” jedhee isa gaafate.

¹⁴ Innis deebisee, “Ani gara eenyuu iyyuu miti; garuu ani amma akka ajajaa loltoota WAAQAYYOOTTI dhufeera” jedhe. Iyyaasuunis addaan lafatti gombifamee sagadee, “Ergaan Gooftaan koo garbicha isaatiif qabu maali?” jedhee isa gaafate.

¹⁵ Ajajaan loltoota WAAQAYYOS Iyyaasuudhaan, “Sababii iddoon ati dhaabattu kun qulqulluu ta’eef kophee kee of irraa baasi” jedhe. Iyyaasuunis akkasuma godhe.

6

¹ Yeroo sanatti Yerikoon sababii Israa’elootaatiif jabeeffamtee cufamtee turte. Namni tokko iyyuu gad hin ba’u; namni tokko iyyuus ol hin seenu ture.

² WAAQAYYOS Iyyaasuudhaan akkana jedhe; “Kunoo ani mootii isheetii fi loltoota ishee wajjin Yerikoo dabarsee harka keetti kenneera. ³ Hidhattoota hunda wajjin yeroo tokko magaalattii irra naanna’aa; kanas bultii ja’a hojjedhaa. ⁴ Luboonni torbas malakata torba kanneen gaanfaa hoolaa irraa hojjetaman qabatani taabota dura haa deeman. Isinis guyyaa torbafaatti yeroo torba magaalattii irra nanaanna’aa; luboonnis malakata haa afuufan. ⁵ Yommuu isaan sagalee malakataa dheeraa isaa dhageessisanitti namni hundinuu sagalee guddaadhaan haa iyyu; dallaan magaalaa sanaa yommuusuma jiga; namoonnis ol ba’u; namni hundinuu qajeellee itti seena.”

⁶ Kanaafuu Iyyaasuun ilmi Nuuni luboota ofitti waamee, “Taabota kakuu WAAQAYYOO fuudhaatii luboonni torba malakata baatanii isa dura haa deeman” jedheen.

⁷ Namootaanis, “Fuula duratti deemaatii magaalaa sana irra naanna’aa; loltoonni hidhatanis taabota WAAQAYYOO dura haa deeman” jedhe.

⁸ Erga Iyyaasuun namootatti dubbatee booddee, luboonni torban fuula WAAQAYYOO duratti malakata torba baatan sun malakata isaanii afuufaa dura darban; taabonni kakuu WAAQAYYOOOS isaan duukaa bu’e. ⁹ Loltoonni mi’a lolaa hidhatanis luboota malakata afuufaa turan dura deeman; loltoonni dugda duubaa immoo taaboticha duukaa bu’an. Yeroo kana hundas malakanni afuufamaa ture. ¹⁰ Iyyaasuun garuu namootaan, “Iyya lolaa hin iyyinaa; sagalee keessan ol hin fudhatinaa; hamma guyyaa ani iyyaa isiniin jedhuutti dubbii tokko illee hin dubbatinaa. Gaafas iyyaa!” jedhe. ¹¹ Kanaafuu inni akka taabonni WAAQAYYOO baatamee magaalaa sana irra yeroo tokko naanna’u godhe. Ergasiis namoonni gara qubataatti deebi’anii achi bulan.

¹² Iyyaasuun guyyaa itti aanu ganama barii ka’e; luboonnis taabota WAAQAYYOO ol fuudhan. ¹³ Luboonni torban malakata torba baatanis taabota WAAQAYYOO dura deemaa malakatas afuufaa fuula duratti qajeelan. Loltoonni mi’a lolaa hidhatan isaan dura bu’an; loltoonni dugda duubaa immoo taabota WAAQAYYOO duukaa bu’an; malakannis ittuma fufee afuufamaa ture. ¹⁴ Kanaafuu guyyaa lammaffaatti yeroo tokko magaalattii irra naanna’anii gara qubataatti deebi’an. Kanas bultii ja’a hojjetan.

¹⁵ Guyyaa torbaffaatti ganama barii ka’anii haaluma duraa sanaan yeroo torba magaalattii irra naanna’an; isaan gaafuma sana qofa yeroo torba magaalattii irra naanna’an. ¹⁶ Marsaa torbaffaatti yommuu luboonni malakata afuufanitti Iyyaasuun akkana jedhee namoota ajaje; “Iyyaa! WAAQAYYOO magaalattii isinii kenneeraatii! ¹⁷ Magaalattii fi wanni ishee keessa jiru hundinuu WAAQAYYOO addaan haa baafaman. Sababii isheen basaastota nu erganne sana dhoksiteef, Rahaab sagaagaltittiin qofti warra mana ishee keessa jiran hunda wajjin haa baraaramtu. ¹⁸ Isin garuu akka isaan keessaa tokko illee fudhattanii akkasiin badiisa ofitti hin fidneef waan lagu ta’e irraa fagaadhaa. Yoo kanaa achii isin qubata Israa’eliitti iyyuu badiisa fiddanii rakkina irraan geessu. ¹⁹ Meetii fi warqeen hundi, mi’i naasiitii fi sibiilaa hundi sababii WAAQAYYOO qulqulleffamaniif mankuusa isaatti galuu qabu.”

²⁰ Yommuu malakanni afuufametti namoonni ni iyyan; yommuu sagaleen malakata sanaa dhaga’amee namoonnis sagalee guddaadhaan iyyanitti dallaan magaalaa sanaa ni kufe. Kanaafuu namni hundi fuul duratti girriise seenuudhaan magaalaa sana qabate. ²¹ Isaanis waan magaalaa sana WAAQAYYOO addaan baasaniif waan isa keessa jiru hunda jechuunis dhiiraa dubartii, xinnaa guddaa, loon, hoolotaa fi harroota goraaheedhaan fixan.

²² Iyyaasuunis namoota lamaan biyya sana basaasanii turaniin, “Mana sagaagaltuu sanaa ol seenaatii akkuma isin isheef kakattanitti ishee fi warra kan ishee ta’an hunda gad baasaa fidaa” jedhe. ²³ Kanaafuu dargaggoonni basaasuu dhaqanii turan sun ol seenanii Rahaab, abbaa isheetii fi haadha ishee, obboloota isheetii fi waan kan ishee ta’e hundumaa gad baasan. Maatii ishee hundas alatti baasani qubata Israa’eliitiin ala isaan tursan.

²⁴ Ergasii guutummaa magaalaa sanaatii fi waan ishee keessa jiru hunda guban; garuu meetii fi warqee, mi’a naasiitii fi sibiilaa mankuusa mana WAAQAYYOO galchan. ²⁵ Iyyaasuun garuu sababii isheen namoota inni akka basaasaniif gara Yerikootti ergee ture sana dhoksiteef Rahaab sagaagaltuu sana maatii isheetii fi waan kan ishee ta’e hunda wajjin ni baraare; isheenis hamma ammaatti Israa’eloota gidduu jiraatti.

²⁶ Iyyaasuunis yeroo sanatti akkana jedhee kakate; “Namni magaalaa Yerikoo kana deebisee ijaaru fuula WAAQAYYOO duratti abaaramaa haa ta’u:

“Inni hundee ishee buusnaan,
 ilmi isaa hangafti haa du’u;
 karra ishee ijaaruu jalqabnaan,
 ilmi isaa quxisuun haa du’u.”

²⁷ Kanaafuu WAAQAYYOO Iyyaasuu wajjin ture; maqaan isaas guutummaa biyyatii keessatti beekame.

7

Cubbuu Aakaan

¹ Israa’eloonni garuu waan Waaqayyoofti addaan baafame irratti amanamummaa dhaban; Aakaan ilmi Karmii, ilmi Zabdi, ilmi Zaaraa kan gosa Yihuudaa waan Waaqayyoofti addaan baafame sana keessaa waan tokko tokko fudhate. Kanaafis dheekkamsi WAAQAYYOO Israa’el irratti boba’e.

² Kana irratti Iyyaasuun Yerikoodhaa gara Aayi kan Beet Aawwen bira gama ba'a Beet'eelitti argamtu sanaatti nama ergee, "Dhaqaatii naannoo sana basaasaa" jedhe. Kanaafuu namoonni ol ba'anii Aayin basaasan.

³ Isaanis gara Iyyaasuutti deebi'anii, "Namni hundinuu Aayitti ol ba'uu hin qabu. Sababii namni muraasni gofti achi jiruuf akka isaan dhaqanii biyyattii fudhatanii nama kuma lama yookaan kuma sadii ta'u ergi malee namoota hundumaa hin dadhabsiisin" jedhaniin. ⁴ Kanaafuu namoonni gara kuma sadii ta'an ka'anii ol ba'an; isaan garuu namoota Aayi duraa baqatan; ⁵ namoonni Aayis gara nama soddomii ja'a isaan jalaa fixan. Isaanis karra magaalattiitii jalqabani hamma Shabaariimiitti Israa'eloota ari'anii ededa irratti isaan fixan; kanaanis onneen namootaa baqxee akka bishaanii taate.

⁶ Iyyaasuunis uffata isaa tarsaasee fuula taabota WAAQAYYOO duratti addaan lafatti gombifamee hamma galgalaatti achuma ture. Maanguddoonni saba Israa'elis akkasuma godhani mataa ofii isaanii irratti awwaara firfirsan. ⁷ Iyyaasuunis akkana jedhe; "Yaa WAAQAYYOO Gooftaa, ati maaliif akka isaan nu fixaniif harka Amoorotaati nu kennuuf jettee saba kana Yordaanosiin ceesifte? Silaa utuu Yordaanos gamatii hafnee nuuf wayya ture! ⁸ Yaa Gooftaa, erga sabni Israa'el diinota isaa baqatee ani amma maal jechuu danda'a? ⁹ Kana'aanonni fi saboonni biyya kanaa kan biraa waan kana dhaga'anii nu marsanii maqaa keenya lafa irraa ni balleessu. Yoos ati maqaa kee guddaa sanaaf maal goota?"

¹⁰ WAAQAYYOS Iyyaasuudhaan akkana jedhe; "Ol ka'i! Ati maaliif addaan gombifame? ¹¹ Israa'el cubbuu hojjeteera; isaan kakuu koo kan ani akka isaan eeganiif isaan ajaje sana cabsaniiru. Isaan waan addaan naa baafame keessaa waan tokko tokko fudhataniru; hataniiru; sobaniiru; waan sanas qabeenya isaanii wajjin ol kaa'ataniiru. ¹² Wanni Israa'eloonni diinota isaanii dura dhaabachuu hin dandeenyeeffis kanuma; isaan sababii badiisaaf ramadamaniif dugda duubbatti garagalanii diinota isaanii baqatan. Ani hamma ati waan badiisaaf ajajame kam iyyuu gidduu keessanii balleessitutti si'achi isin wajjin hin jiraadhu.

¹³ "Ka'iitii saba qulqulleessi. Akkanas isaanii jedhi; 'Boriif ofi qulqulleessaa; wanni WAAQAYYOO Waaqni Israa'el jedhu isa kanaatii; yaa Israa'el, wanni hirmii ta'e tokko gidduu keessan jira. Isin hamma waan sana of keessaa baafatanitti diinota keessan of irraa ittisuu hin dandeessan.

¹⁴ "Kanaafuu ganama gosa gosaan ofi dhi'eessaa. Gosti WAAQAYYOO filatu balbala balbalaan gara fuula duraatti haa ba'u; balballi WAAQAYYOO filatus maatii maatiidhaan gara fuula duraatti haa ba'u; maatiin WAAQAYYOO filatus nama tokko tokkoon gara fuula duraatti haa ba'u. ¹⁵ Namni waan balleeffamuu qabu wajjin qabame, waan qabu hundumaa wajjin ibiddaan haa gubamu. Inni kakuu WAAQAYYOO cabseera; waan Israa'el keessatti qaanii ta'es hojjeteera!"

¹⁶ Kanaafuu Iyyaasuun ganama bariin ka'ee saba Israa'el gosa gosaan gara fuula duraatti baase; gosti Yihuudaas ni filatame. ¹⁷ Balballi Yihuudaa gara fuula duraatti ba'e; Iyyaasuunis balbala Zaaraa addaan baase. Balballi Zaaraas maatii maatiin gara fuula duraatti ba'e; Zabdiinis ni filatame. ¹⁸ Iyyaasuunis maatii isaa nama tokko tokkoon gara fuula duratti baase; Aakaan ilmi Karmii, ilmi Zabdi, ilmi Zaaraa kan gosa Yihuudaa ni filatame.

¹⁹ Kana irratti Iyyaasuun Aakaanii akkana jedhe; "Yaa ilma ko, WAAQAYYOO Waaqa Israa'elii ulfina kenni; cubbuu kees isatti himadhu; mee waan hojjette natti himi; na hin dhoksin."

²⁰ Aakaanis akkana jedhee deebise; "Wanni kun dhugaa dha! Ani WAAQAYYOO Waaqa Israa'elitti cubbuu hojjedheera. Wanni ani hojjedhes kunoo kana: ²¹ Ani waan Baabilonii booji'ame keessaa waaroo bareedaa tokko, meetii saqilii dhibba lamaa fi warqee saqilii shantama ulfaatuu arginaan kajelee fudhadheera. Mi'i kunis dunkaana koo keessatti meetii jala lafa keessatti dhokfameera."

²² Kanaafuu Iyyaasuun ergamoota erge; isaanis gara dunkaana sanaatti fiigan; mi'i sunis dunkaanicha keessatti, meetii jala dhokfamee ture. ²³ Isaan mi'a sana dunkaanicha keessaa guuranii gara Iyyaasuutii fi Israa'eloota hundaatti fidanii fuula WAAQAYYOO duratti diriirsan.

²⁴ Ergasiis Iyyaasuuf fi Israa'eloonni hundi Aakaan ilma Zaaraa, meetii, waaroo, muraawarqee, ilmaan isaatii fi intallan isaa, loon isaa, harroota isaa, hoolota isaa, dunkaana isaatii fi waan inni qabu hunda guuranii Sulula Aakooritti geessan. ²⁵ Iyyaasuunis, "Ati maaliif rakkina kana hunda nutti fidde? WAAQAYYOO har'a rakkina sitti fida" jedheen.

Israa'eloonni hundinuu dhagaadhaan isa tuman; jara kaan illee erga dhagaadhaan tumani booddee ibiddaan isaan guban. ²⁶ Aakaan irratti tuulaa dhagaa guddaa hamma

har'aatti illee jiru tokko tuulan. WAAQAYYOS dheekkamsa isaa guddaa sana irraa deebi'e. Kanaafis iddoon sun hamma har'aatti Sulula Aakoor jedhamee waamama.

8

Magaalaan Aayi Barbadeeffamte

¹ Ergasiis WAAQAYYO Iyyaasuudhaan akkana jedhe; "Hin sodaatin yookaan abdiin hin kutatin. Loltoota hunda fudhadhuutii ol ba'ii magaalaa Aayi loli. Ani kunoo mootii Aayi, nama isaa, magaalaa isaatiifi fi biyya isaa harka keetti dabarsee kenneeraatii. ² Akkuma Yerikoo fi mootii ishee goote sana, Aayii fi mootii ishee illee goota; yeroo kana garuu boojuu fi horii ishee ofii keessanii fudhachuu dandeessu. Nama riphee magaalattii eegu karaa duubaatiin kaa'i."

³ Iyyaasuu fi loltoonni hundinuus ka'anii Aayin loluuf ba'an. Innis loltoota isaa warra jajjaboo keessaa nama kuma soddoma filatee halkaniin erge; ⁴ akkanas jedhee isaan ajaje: "Mee qalbiidhaan na dhaga'aa. Isin boroo magaalatti riphxu. Guddiftanii irraa hin fagaatinaa. Hundi keessan qophaa'aa. ⁵ Anii fi warri na wajjin jiran hundi magaalaa sanatti dhi'aanna; yommuu namoonni akkuma duraa sana fuula duraan nutti dhufan nu isaan duraa baqanna. ⁶ Isaanis sababii, 'Jarri kun akkuma duraa sana nu baqachaa jiru' nuun jedhaniif, hamma nu magaalaa sana irraa isaan fageessinutti nu duukaa bu'u. Kanaafuu yommuu nu isaan baqannutti, ⁷ isin immoo iddoo itti riphxanii kaatanii magaalaa sana qabattu. WAAQAYYO Waaqni keessanis magaalaa sana harka keessanitti dabarsee ni kenna. ⁸ Isin yommuu magaalaa sana qabattanitti ibidda itti qabsiisaa. Waan kanas akkuma WAAQAYYO ajajetti hojjedhaa. Kunoo ani isin ajajeera."

⁹ Ergasii Iyyaasuun isaan erge; isaanis gara iddoo itti riphann kan gama ba'a Aayitiin Beet'eelii fi Aayi gidduu jiru sanaa dhaqan; Iyyaasuun garuu halkan sana uummata wajjin bule.

¹⁰ Guyyaa itti aanu ganama barii Iyyaasuun namoota ofii isaa walitti qabatee innii fi maanguddoonni Israa'el namoota dura Aayitti ol qajeelan. ¹¹ Loltoonni isa wajjin turan hundinuu ol ba'anii fuula duraan magaalatti dhi'aatanii karaa kaaba Aayitiin qabatan. Sululli tokkos isaaniifi fi magaalattii gidduutti argama ture. ¹² Iyyaasuun nama gara kuma shan fudhatee gama lixa magaalattiitiin Beet'eelii fi Aayi gidduutti riphsiise. ¹³ Isaanis namoota, jechuunis loltoota gama kaaba magaalattiitiin turan hundaa fi warra dugda duubaan gama lixaatiin riphannii turan iddoo isaaniifi qabsiisan. Iyyaasuun garuu gara sululaatti gad bu'ee halkan sana achi bule.

¹⁴ Mootiin Aayi yommuu waan kana argetti, innii fi namoonni magaalaa sanaa hundinuu iddoo Arabbaan olii tokkotti Israa'elootaan wal waraanuuf ganama bariin ariifatanii ba'an. Inni garuu akka waraanni riphee dugda magaalaa sanaa duubaan isa eeggatu hin beekne. ¹⁵ Iyyaasuu fi Israa'eloonni hundi waan ari'aman of fakkeessanii dugda duubatti deebi'anii fuula isaaniifi dura gara gammoojjiitti baqatan. ¹⁶ Namoonni Aayi hundinuus akka Israa'eloota ari'aniifi walitti waamaman; isaanis Iyyaasuu faana bu'anii akkasiin magaalattii irraa fageeffaman. ¹⁷ Namni Israa'eloota faana bu'ee ari'uuf hin ba'in tokko iyyuu Aayi yookaan Beet'eel keessatti hin hafne. Magaalattiis eegumsa malee hambisaniifi Israa'eloota ari'uuf ba'an.

¹⁸ WAAQAYYOS Iyyaasuudhaan, "Sababii ani magaalattii harka keetti dabarsee kennuuf, eeboo harkaa qabdu gara Aayitti deebifadhu" jedhe. Kanaafuu Iyyaasuun eeboo isaa gara Aayitti deebifate. ¹⁹ Akkuma inni waan kana godheen warri riphannii eeggachaa turan sun dafanii iddoo isaaniifi ka'anii fuul duratti fiigan. Isaanis magaalattii seenanii qabatan; dafaniis ibidda itti qabsiisan.

²⁰ Namoonni Aayi yommuu garagalannii of duuba ilaalanitti aara magaalattii kan samiitti ol ka'u argan; garuu sababii Israa'eloonni duraan gara gammoojjiitti baqatan sun amma warra isaan ari'aa jiranitti garagalaniifi, jarri eessumattuu baqachuuf carraa tokko illee hin arganne. ²¹ Iyyaasuu fi Israa'eloonni hundinuu yommuu akka warri riphee eeggachaa ture sun magaalattii qabatee fi akka aarii magaalattii irraa ka'u arganitti of irra garagalannii namoota Aayi dha'an. ²² Namoonni riphannii turanis magaaladhaa ba'anii isaanitti dhufan; kanaafuu Israa'eloonni gamanaa gamasiin isaan marsanii jarri Israa'eloota gidduutti qabaman. Israa'eloonnis akka namni tokko iyyuu hin hafneef yookaan baqatee hin miliqneef isaan fixan. ²³ Mootii Aayi garuu lubbuudhumaan qabanii Iyyaasuutti fidan.

²⁴ Israa'eloonni yommuu dhiirota Aayi hunda dirree fi gammoojjii jarri itti Israa'eloota ari'an sanatti qalanii isaan fixanitti, Israa'eloonni hundinuu gara Aayitti dacha'anii warra achitti hafes goraadeedhaan barbadeessan. ²⁵ Namoonni Aayi kanneen gaafasi dhuman dhiiraa dubartiin kuma kudha lama turan. ²⁶ Iyyaasuun hamma namoota

Aayi keessa jiraatan hunda fixutti harka isaa kan diriirfatee ittiin eeboo qabate sana hin dachaafanne tureetii. ²⁷ Israa'el garuu akkuma WAAQAYYO Iyyaasuu ajajetti horii fi boojuu magaalattii qofa fudhate.

²⁸ Akkasitti Iyyaasuun Aayin gubee tuulaa daaraa godhe hambise; hamma har'aattis isheen akkuma barbadooftetti jirti. ²⁹ Innis mootii Aayi muka irratti fannisee hamma biiiftuun lixxutti achumatti isa dhiise. Iyyaasuun yommuu aduun dhiitetti akka isaan reeffa isaa muka irraa gad buusani karra magaalattii duratti darbatan isaan ajaje. Isaanis tuulaa dhagaa guddaa hamma har'aattis jiru reeffa sana irratti tuulan.

Tulluu Gebaal Irratti Kakuun Haaromfame

³⁰ Ergasii Iyyaasuun Tulluu Eebaal irratti WAAQAYYO Waaqa Israa'eliif iddoo aarsaa ijaare. ³¹ Iddoo aarsaa kanas akkuma Museen garbichi WAAQAYYOO Israa'eloota ajaje sanatti hojjete. Innis akkuma Kitaaba Seera Musee keessatti barreeffametti dhagaa hin soofamin kan sibiilli hin tuqiniin hojjete; isa irrattis aarsaa gubamu dhi'eessanii aarsaa nagaas WAAQAYYOO qalan. ³² Iyyaasuunis achumatti fuula Israa'elootaa duratti, seera Museen barreessee ture sana dhagaa irratti garagalche. ³³ Israa'eloonni hundinuu, alagaa fi dhalataan biyyaa, maanguddoota isaanii wajjin, ajajjoota loltootaatii fi abbootii seeraa wajjin, Lewwota luboota ta'an kanneen taabota kakuu WAAQAYYOO baatan sanatti fuula deebifatanii bitaa mirgaan dhadhaabatan. Akkuma Museen garbichi WAAQAYYOO akka isaan saba Israa'el eebbisaniiif jalqabatti isaan ajaje sanatti walakkaan isaanii Tulluu Gerziim dura dhadhaabatanii walakkaan isaanii immoo Tulluu Eebaal dura dhadhaabatan.

³⁴ Ergasii Iyyaasuun akkuma Kitaaba Seeraa keessatti barreeffametti dubbii seeraa hunda kan eebbaatii fi kan abaarsaa ni dubbise. ³⁵ Dubbii Museen isa ajaje hunda keessaa wanni Iyyaasuun waldaa Israa'el hundaaf akkasumas dubartootaaf, daa'immanii fi alagoota gidduu isaanii jiraataniif utuu hin dubbisin bira darbe tokko iyyuu hin turre.

9

Gowwoomsaa Warra Gibe'oon

¹ Mootonni Heetotaa, Amoorotaa, Kana'aanotaa, Feerzotaa, Hiiwotaatii fi Yebuusotaa kanneen gama lixa Yordaanos biyya gaaraa, lafa gammoojjitiifi fi qarqara Galaana Gud-dichaa kan hamma Libaanoonitti jiru keessa jiraatan yommuu waan kana dhaga'anitti, ² Iyyaasuu fi Israa'elitti waraana banuuf walitti qabaman.

³ Namoonni Gibe'oon garuu yommuu waan Iyyaasuun Yerikoo fi Aayi godhe dhaga'anitti, ⁴ isaanis gama isaaniitiin daba hojjechuuf mari'atan; isaanis nama karaa deemu fakkaatanii keeshaa moofa'ee fi qalqalloo daadhii wayinii kan dulloomee tarsa'ee erbame harree isaaniitti fe'atanii qajeelan. ⁵ Kophee moofa'ee erbame miillatti kaa'atanii wayyaa moofa'e uffatan. Buddeenni isaan fudhatanii deeman hundis goggogaa fi kan arraa'ee ture. ⁶ Isaanis qubata Gilgaalitti Iyyaasuu bira dhaqanii isaa fi namoota Israa'eliin, "Nu biyya fagoodhaa dhufne; kanaafuu kottaa walii galtee godhannaa" jedhan.

⁷ Namoonni Israa'el immoo Hiiwotaan, "Tarii isin asuma nutti dhi'oo jiraattu ta'a; yoons nu akkamiin isin wajjin walii galtee godhachuu dandeenya ree?" jedhan.

⁸ Isaan garuu Iyyaasuudhaan, "Nu garboota kee ti" jedhan.

Iyyaasuunis, "Isin eenyuu dha? Eessaa dhuftani?" jedhee isaan gaafate.

⁹ Isaanis akkana jedhanii deebisaniiif, "Nu garboonni kee sababii maqaa WAAQAYYO Waaqa keetii dhageenyeeff biyya akka malee fagootii dhufne. Nu oduu waa'ee isaatii fi waan inni biyya Gibxii keessatti hojjete hundumaa dhageenyeeffati; ¹⁰ waan inni mootota Amoorotaa lamaan warra gama ba'a Yordaanos jiraatan jechuunis Sihoon mootii Heshboonii fi Oogi mootii Baashaan kan Ashtaaroti bulchaa ture sana godhe hundumaa dhageenyeeffate. ¹¹ Maanguddoonni keenyaa fi jiraattonni biyya keenyaa hundinuu, 'Karaa keessaniif waan nyaattan harkatti qabadhaatii isaan arguu dhaqaa, "Nu garboota keessanii dha; kanaafuu kottaa walii galtee godhannaa" jedhaanii' nuun jedhan. ¹² Buddeenni keenya kun gaafa nu hidhannee gara keessan dhufuuf manaa baane ho'aa ture. Amma garuu akka inni goggogee arraa'ee argaa. ¹³ Qalqalloon nu daadhii wayinii itti guuttanne kunis haaraa ture; amma garuu akka inni tatarsa'e ilaalaa. Uffanni keenyaa fi kopheen keenyas deemsa karaa dheeraa kanaan nu jalaa dhumeera."

¹⁴ Namoonni Israa'el galaa isaanii irraa waa fudhatan malee WAAQAYYON gorsa hin gaafanne. ¹⁵ Iyyaasuunis akka isaan jiraataniif isaan wajjin walii galtee nagaa godhe; hooggantoonni waldaas waan kana kakuudhaan mirkaneessan.

¹⁶ Warri Israa'el immoo erga Gibe'oonota wajjin walii galtee godhatan guyyaa sadii booddee akka jarri warra naannoo isaanii kanneen isaanitti dhi'oo jiraatan ta'an dhaga'an. ¹⁷ Kanaafuu Israa'eloonni ka'anii guyyaa sadaffaatti gara magaalaa isaanii jechuunis gara Gibe'oon, Kefiiraa, gara Bi'eerootii fi Kiriyaati Ye'aariim dhufan. ¹⁸ Israa'eloonni garuu sababii hooggantoonni waldaa maqaa WAAQAYYO Waaqa Israa'eliitiin isaanii kakananii turaniitiif isaan hin tuqne.

Waldaan sun guutuunis hooggantootatti guungume; ¹⁹ hooggantoonni hundi garuu akkana jedhanii deebisan; "Nu WAAQAYYO Waaqa Israa'eliin isaanii kakanneerra; kanaafuu nu amma isaan tuquu hin dandeenyu. ²⁰ Wannii nu isaan goonu kana: Akka kakuu isaanii kakanne sana cabsinee dheekkamsi nurra hin buuneef akka isaan jiraataniif ittuma dhiifna." ²¹ Hooggantoonni sunis ittuma fufanii, "Jarri haa jiraatan; garuu guutummaa sabaatiif warra muka muranii fi warra bishaan waraaban haa ta'an" jedhan. Akkasiinis kakuun hooggantoonni isaaniif galan sun ni eegame.

²² Iyyaasuunis Gibe'oonota ofitti waamee akkana jedheen; "Isin maaliif utuma nutti dhi'oo jiraatanuu, 'Nu biyya isin irraa fagoo ta'e keessa jiraanna' jettanii nu gowwoomsitan?" ²³ Isin amma abaarsa jala jirtu; tokkoon keessan iyyuu mana Waaqa kootiif muka muruu fi bishaan waraabuu jalaa hin baatan."

²⁴ Isaanis akkana jedhanii Iyyaasuuf deebii kennan; "Akka WAAQAYYO Waaqni kee akka Museen biyyaatiif guutuu isinii kennuu fi akka inni warra achi jiraatan hunda fuula keessan duraa balleesuuf garbicha isaa Musee ajaje nu garboota keetti dhugumaan himameera. Kanaafuu nu sababii keessaniif jennee lubbuu keenyaaf sodaanne; wannii nu waan kana gooneefis kanuma. ²⁵ Nu kunoo amma harka kee keessa jirra. Atis waan gaarii fi qajeelaa seete hundumaa nurratti raawwadhu."

²⁶ Kanaafuu Iyyaasuun Israa'eloota duraa isaan baase; Israa'eloonnis isaan hin ajjeefne. ²⁷ Innis guyyuma sana Gibe'oonota sana saba hundaaf, akkasumas iddoo WAAQAYYO filatutti iddoo aarsaa WAAQAYYOOTIIF warra muka muranii fi warra bishaan waraaban isaan godhe. Isaanis hamma har'aatti kanuma hojjetu.

10

Aduun Idduma Jirtu Dhaabatte

¹ Adoonii-Zedeq Mootiin Yerusaaalem akka Iyyaasuun Aayin qabatee guutumaan guutuutti barbadeesse, akka inni akkuma Yerikoo fi mootii ishee godhe sana Aayii fi Mootii ishee godhe, akkasumas akka namoonni Gibe'oon Israa'eloota wajjin walii galtee nagaa godhatanii isaan bira jiraatan dhaga'e. ² Sababii magaalaa Gibe'oon akkuma magaalaa moototaa tokkootti magaalaa hangafa taateef innii fi namoonni isaa akka malee rifatan; magaalaa Gibe'oon magaalaa Aayi caalaa guddoo turte; namoonni ishees loltoota jajjaboo turan. ³ Kanaafuu Adoonii-Zedeq mootichi Yerusaaalem sun Hoohaam mooticha Kebroonitti, Phiraam mooticha Yarmuutitti, Yaafiyaa mooticha Laakkiishii fi Debiir mooticha Egloonitti ergee, ⁴ "Sababii isheen Iyyaasuu fi Israa'el wajjin walii galtee nagaa godhatteef ol kottaatii Gibe'oonin waraanuu na gargaaraa" jedheen.

⁵ Kanaafuu mootonni Amoorotaa shananuu jechuunis mootiin Yerusaaalem, mootiin Kebron, mootiin Yarmuut, mootiin Laakkiishii fi mootiin Egloon humna waraanaa walitti dabalatan. Isaanis loltoota isaanii hunda fudhatanii ol ba'anii Gibe'oonin marsanii waraanan.

⁶ Namoonni Gibe'oonis qubata Gilgaal gara Iyyaasuutti ergaa erganii akkana jedhaniin; "Ati garboota kee hin dhiisin. Daffii nu qaqqabiitii nu oolchi; sababii mootonni Amoorotaa kanneen biyya gaaraa keessa jiraatan hundi nu waraanuuf loltoota walitti dabalataniif nu gargaari."

⁷ Kanaafuu Iyyaasuun loltoota isaa hunda wajjin, namoota waraanaa jajjabeeyyii hundas dabalatee Gilgaalii ol ba'e. ⁸ WAAQAYYOS Iyyaasuudhaan, "Isaan hin sodaatin; ani harka keetti dabarsee isaan kenneera. Tokkoon isaanii iyyuu fuula kee dura dhaabachuu hin danda'an" jedhe.

⁹ Kanaafuu Iyyaasuun Gilgaalii ba'ee halkan guutuu deemaa bulee tasuma isaanitti dhufe. ¹⁰ WAAQAYYOS fuula Israa'elootaa duratti isaan burjaajesse; Israa'eloonnis Gibe'oonitti mo'annaa guddaadhaan isaan mo'atan. Karaa Beet Horoonitti geessu irra isaan ari'aa hamma Azeeqaa fi Maqeedaatti isaan gogorra'an. ¹¹ Utuma isaan Israa'eloota duraa karaa Beet Horooniin gara Azeeqaatti gad baqachaa jiranuu WAAQAYYO samiidhaa cabbii gurguddaa itti roobse; warra goraadee Israa'elootaatiin dhuman caalaa kanneen cabbii kanaan dhumanitu baay'ata.

¹² Gaafa WAAQAYYO Amoorota dabarsee Israa'elootatti kenne sana Iyyaasuun fuula Israa'elootaa duratti WAAQAYYON akkana jedhe:

“Yaa aduu, Gibe’oon gubbaa dhaabadhu;

yaa ji’a, atis Sulula Ayaaloon gubbaa dhaabadhu.”

¹³ Kanaafuu hamma sabni diinota isaa haaloo baafatutti aduun idduma jirtu dhaabatte; ji’is ni dhaabate;

wanni kun Kitaaba Yaashaar keessatti barreeffameera mitii?

Aduun walakkaa samii keessa dhaabatee guyyaa tokko guutuu utuu hin dhi’in turte. ¹⁴ Guyyaan WAAQAYYO nama dhaga’e kan akkasii gaafasiin dura yookaan ergasii takkumaa ta’ee hin beeku. WAAQAYYO dhugumaan Israa’eliif lolaa ture!

¹⁵ Ergasii Iyyaasuun Israa’eloota hunda wajjin qubata Gilgaal jiru sanatti deebi’e.

Mootonni Amoorotaa Shanan Ajjeefaman

¹⁶ Mootonni shanan sun baqatanii holqa Maqeedaa keessatti dhokatanii turan. ¹⁷ Akka mootonni shanan holqa Maqeedaa keessatti dhokatan Iyyaasuutti himame; ¹⁸ innis akkana jedhe; “Dhagaa guddaa isaa afaan holqa sanaatti gangalchaatii akka isaan eeganiif namoota achitti ramadaa. ¹⁹ Isin diinota keessan ari’aatii karaa dugda duubaatiin rukutaa malee hin dhaabatinaa! Sababii WAAQAYYO Waaqni keessan dabarsee harka keessanitti isaan kenneef akka isaan magaalawwan isaanii seenan hin godhinaa.”

²⁰ Kanaafuu Iyyaasuu fi Israa’eloonni hamma namni muraasni hafutti guutummaan guutuutti isaan barbadeessan. Warri hafan immoo magaalawwan isaanii kanneen jajjabeeffamanii ijaaramanitti galan. ²¹ Loltoonni hundi nagumaan gara qubata Maqeedaa gara Iyyaasuutti deebi’an; namni tokko iyyuu afaan isaa Israa’elootatti hin bananne.

²² Iyyaasuunis, “Mee afaan holqa sanaa banaatii mootota shanan sana gad naa baasaa” jedhe. ²³ Isaanis mootota shanan sana jechuunis mootii Yerusaaalem, mootii Kebroon, mootii Yarmuut, mootii Laakkiishii fi mootii Egloon holqa keessaa baasanii fidan. ²⁴ Yommuu isaan mootota kana shanan Iyyaasuutti fidan, inni namoota Israa’el hunda walitti waamee ajajjoota loltootaa kanneen isa wajjin dhufaniin, “Kottaatii miilla keessaniin morma mootota kanneenii irra ejjadhaa” jedhe. Isaanis gara fuula duraatti ba’anii miilla isaaniitiin morma mootota sanaa irra ejjetan.

²⁵ Iyyaasuun, “Hin sodaatinaa; abdiis hin kutatinaa. Jabaadhaa; cimaas. Wannii WAAQAYYO diinota isin loluuf deemtan hunda irratti godhuuf jirus kanuma” jedheen.

²⁶ Iyyaasuun ergasii mootota sana dha’ee ajjeese mukkeen shan irratti isaan fannise; isaanis hamma lafti galgaloofutti akkuma muka irratti fannifamanitti turan.

²⁷ Yeroo aduun dhiittetti Iyyaasuun ajaja kenne; jarris mukkeen irraa gad isaan buusanii holqa isaan keessa dhokatanii turan sanatti isaan daddarbatan. Afaan holqa sanaa irras dhagaa gurguddaa hamma guyyaa har’aatti illee achuma jiru naqan.

²⁸ Iyyaasuunis guyyuma sana Maqeedaa qabate. Innis magaalaa sanaa fi mootii ishee goraadeedhaan dha’ee nama achi keessa jiru hunda fixe. Nama tokko iyyuu hin hambifne. Mootii Maqeedaas akkuma mootii Yerikoo godhe sana godhe.

Magaalaawwan Kibbaa Qabaman

²⁹ Iyyaasuu fi Israa’eloonni isa wajjin turan hundi Maqeedaadhaa ba’anii dhaqanii Libnaa lolan. ³⁰ WAAQAYYOS magaalaa sanaa fi mootii ishee dabarsee harka Israa’elootaatti kenne. Iyyaasuun magaalattii fi nama ishee keessa jiru hunda goraadeedhaan fixe. Inni nama tokko illee achitti hin hambifne. Mootii ishee illee akkuma mootii Yerikoo godhe sana godhe.

³¹ Iyyaasuu fi Israa’eloonni hundi isa wajjin Libnaadhaa ka’anii Laakkiish dhaqan; isaanis magaalaa sana marsanii waraanan. ³² WAAQAYYOS Laakkiish dabarsee harka Israa’elootaatti kenne; Iyyaasuunis guyyaa lammaffaatti ishee qabate. Akkuma Libnaa godhe sana magaalaa sanaa fi warra ishee keessa jiraatan hunda goraadeedhaan fixe. ³³ Yeroo sanatti Hooraam mootichi Geezir, Laakkiish gargaaruudhaaf dhufee ture; Iyyaasuun garuu isaa fi loltoota isaa ni mo’ate; namni tokko iyyuu hin hafne.

³⁴ Ergasiis Iyyaasuu fi Israa’eloonni hundi Laakkiishii ka’anii gara Egloon dhaqan; marsaniis ishee waraanan. ³⁵ Guyyuma sana ishee qabatanii akkuma Laakkiish godhan sana ishee fi nama ishee keessa jiru hunda goraadeedhaan fixan.

³⁶ Iyyaasuu fi Israa’eloonni hundis isa wajjin Egloonii ka’anii gara Kebroonitti ol ba’anii ishee waraanan. ³⁷ Isaanis magaalattii qabatanii mootii ishee, gandoota isheetii fi nama ishee keessa jiru hunda goraadeedhaan fixan. Nama tokko iyyuu hin hambifne.

Akkuma Egloon godhan sana ishee fi nama ishee keessa jiru hunda guutummaan guutuutti barbadeessan.

³⁸ Ergasiis Iyyaasuu fi Israa'eloonni hundi isa wajjin of irra deebi'anii Debiirin dha'an. ³⁹ Isaanis magaalattii, mootii isheetii fi gandoota ishee qabatanii goraadeedhaan fixan. Namoota ishee keessa jiraatan hundas guutummaan guutuutti fixan. Nama tokko iyyuu hin hambifne. Akkuma Libnaa, mootii isheetii fi Kebroon godhan sana Debiirri fi mootii ishee godhan.

⁴⁰ Iyyaasuunis akkasiin guutummaa biyya sanaa, biyya gaaraa, Negeebi, biyya gammoojjii, tabbawwan tulluutii fi mootota isaanii hundas mo'ate. Inni akkuma WAAQAYYO Waaqni Israa'el ajajetti waan hafuura baafatu hunda guutummaan guutuutti balleesse malee nama tokko illee hin hambifne. ⁴¹ Iyyaasuun Qaadesh Barnee irraa jalqabee hamma Gaazaatti, guutummaa biyya Gooshen hamma Gibe'oonitti qabate. ⁴² Sababii WAAQAYYO Waaqni Israa'el Israa'eliif loleef Iyyaasuun mootota kanneenii fi lafa isaanii loluma tokkoon mo'ate.

⁴³ Ergasii Iyyaasuun Israa'eloota hunda wajjin gara qubata Gilgaalitti deebi'e.

11

Mootonni Kaabaa Mo'ataman

¹ Yaabiin mootichi Haazoor waan kana dhageenyaan Yoobaab mooticha Maadoonitti, mootota Shimroonii fi Akshaafitti ergaa ergate; ² akkasumas mootota kaabaa kanneen tulluuwwan irra jiraatanitti, kanneen gama kibba Kinereetiin Arabbaa keessa jiraatanitti, kanneen gama dhi'a biiftuutiin lafa gammoojjitii fi Door keessa jiraatanitti ergaa ergate; ³ Kana'aanota gama ba'a biiftuutii fi lixa biiftuutiin jiraatanitti, Amoorotatti, Heetotatti, Feerzotaatti Yebuusota biyya gaaraa keessa jiraatanittii fi mootota Hiiwotaa kanneen Gaara Hermoon jala biyya Miisphaa keessa jiraatanitti ergaa ergate. ⁴ Isaanis tuuta loltoota isaanii hunda, fardeenii fi gaariwwan lolaa baay'ee jechuunis humna waraanaa guddaa kan akka cirracha qarqara galaanaa baay'atu qabatanii dhufan. ⁵ Mootonni kanneen hundi loltoota isaanii walitti makatanii Israa'eloota waraanuuf Bishaanota Meeroon cina qabatan.

⁶ WAAQAYYO Iyyaasuudhaan akkana jedhe; "Sababii ani bor yeroo kanatti reeffa isaanii hunda dabarsee Israa'elootatti kennuuf hin sodaatin. Ati hidda kottee fardeen isaanii kukkutee gaariwwan isaanii gubuu qabda."

⁷ Kanaafuu Iyyaasuu fi loltoonni isaa hundi tasuma bishaan Meeroon biratti isaanitti dhufanii isaan dha'an; ⁸ WAAQAYYOS dabarsee harka Israa'elootaatti isaan kenne. Isaanis jara mo'atani hamma Siidoonaa Guddooti, hamma Misrefooti Maayimiitti, hamma Sulula Miisphaa kan gama ba'a biiftuutti isaan ari'an; hamma namni hundi dhumuttis isaan dha'an. ⁹ Iyyaasuunis akkuma WAAQAYYO ajaje sana isaan godhe; innis hidda kottee fardeen isaanii kukkutee gaariwwan isaanii kan lolaa gube.

¹⁰ Yeroo sanatti Iyyaasuun of irra deebi'ee Asoor qabatee mootii ishee goraadeedhaan ajjeese. Haazooris magaalaa guddittii mootummoota kanneen hundumaa turte. ¹¹ Isaanis nama ishee keessa jiru hunda goraadeedhaan fixan. Waan hafuura baafatu tokko illee utuu hin hambisin guutummaan guutuutti balleessan; Iyyaasuun Haazoorinis ni gube.

¹² Iyyaasuun magaalawwan moototaa hundaa fi mootota isaanii illee qabatee goraadeedhaan fixe. Innis akkuma garbichi WAAQAYYOO Museen ajajetti guutummaan guutuutti isaan balleesse. ¹³ Ta'us Israa'eloonni magaalaa Haazoor ishee Iyyaasuun gube sana malee magaalawwan tabba irratti ijaaraman tokko illee hin gubne. ¹⁴ Israa'eloonni boojuu fi horii magaalaa sanaa hunda ofii isaaniitiif fudhatan; namoota hunda garuu guutummaan guutuutti goraadeedhaan fixan; nama hafuura baafatu tokko illee hin hambifne. ¹⁵ Akkuma WAAQAYYO garbicha isaa Musee ajaje sana Museenis akkasuma Iyyaasuu ajaje; Iyyaasuunis akkasuma godhe; inni waan WAAQAYYO Musee ajaje keessaa waan tokko illee utuu hin hojjetin hin hambifne.

¹⁶ Iyyaasuun akkasiin guutummaa biyya sanaa qabate; kunis biyya gaaraa, Negeeb hunda, guutummaa Gooshen, gammoojjii gama lixa aduu, Arabbaa fi gaarran Israa'el gammoojjii isaanii wajjin, ¹⁷ Tulluu Halaag kan gaara See'iritti ol ka'uu jalqabani hamma Ba'aal Gaad kan Tulluu Hermoon jala hamma sulula Libaanoonitti jiru booji'e. Innis mootota isaanii hunda gogorra'ee ajjeese. ¹⁸ Iyyaasuunis bara dheeraa mootota kanneen hundatti waraana banaa ture. ¹⁹ Hiiwota Gibe'oon keessa jiraatan malee magaalaa tokko iyyuu Israa'eloota wajjin walii galtee nagaa hin godhanne; Israa'eloonni magaalawwan hunda waraananii qabatan. ²⁰ Akkuma WAAQAYYO Musee ajaje sanatti gara laafina tokko malee isaan barbadeessuudhaan guutummaan guutuutti

isaan balleessuudhaaf jedhee akka isaan Israa'elootatti waraana bananiif kan garaa isaanii jabeesse WAAQAYYO mataa isaa ti.

²¹ Iyyaasuun yeroo sanatti dhaqee biyya gaaraa keessaa jechuunis Kebroon, Debiirii fi Anaab, akkasumas biyya gaaraa Yihuudaatii fi biyya gaaraa Israa'el hunda keessaa Anaqota barbadeesse. Iyyaasuun isaaniif fi magaalaawwan isaaniis guutummaan guutuutti barbadeesse. ²² Gaazaa, Gaatii fi Ashdoodi malee kutaan biyya Israa'el kan Anaqonni keessatti hafan tokko iyyuu hin turre.

²³ Kanaafuu Iyyaasuun akkuma WAAQAYYO Musee ajaje sanatti biyya guutuu qabatee akkuma mana gosa gosa isaaniitti dhaala godhee Israa'elootaaf kenne. Biyyattiinis akkasiin waraana irraa boqonnaa argatte.

12

Maqaa Mootota Mo'atamanii

¹ Warri Kunneen mootota Israa'eloonni mo'atanii biyyoota isaaniif jechuunis gama ba'a Arabbaa hunda dabalatee, ba'a Yordaanos, Sulula Arnooniitii hamma Tulluu Hermoonitti irraa fudhatanii dha:

² Sihoon mootiin Amoorotaa,

Heshboon keessa taa'ee Aro'eer ishee qarqara sulula Arnoonitti argamtu sanaa jalqabee hamma Laga Yaaboq kana daarii Amoonotaatti bulchaa ture; kunis walakkaa Gili'aad dabalata.

³ Akkasumas ba'a Arabbaa Galaana Kinereetiitii jalqabee hamma Galaana Arabbaa yookaan Galaana Soogiddaatti, hamma Beet Yashiimootitti, achii immoo karaa Kibbaatiin hamma tabba Phisgaatti bulchaa ture.

⁴ Oogi mootichi Baashaan kan sanyii Refaayim keessaa isa dhuma ta'e sun Ashtaarotii fi Edreyii bulchaa ture.

⁵ Innis Tulluu Hermoon, Salkaa, guutummaa Baashaan hamma Geshuurotaattii fi Ma'akaataatti, walakkaa Gili'aad immoo hamma daangaa Sihoon mooticha Heshboonitti bulchaa ture.

⁶ Museen garbichi WAAQAYYOOTII fi Israa'eloonni isaan mo'atan. Museen garbichi WAAQAYYOO biyya isaaniif Ruubeenotaaf, gosa Gaadiitii fi walakkaa gosa Minaaseetiif dhaala godhee kenne.

⁷ Mootonni biyya Iyyaasuu fi Israa'eloonni Yordaanosiin gama lixa biiftuutti mo'atanii kanneenii dha: biyyi isaaniis Ba'aal Gaad Sulula Libaanon keessa jirtu sanaa jalqabee hamma Tulluu Halaq kan gara See'iir lafa Iyyaasuun akkuma gosa gosa isaaniitti dhaala godhee Israa'elootaaf kenne sanaatti ol ka'uu dha. ⁸ Biyyoonni kunneenis biyya gaaraa, biyya karaa lixaa, Arabbaa, tabba tulluu, lafa alootii fi Negeebi jechuunis biyyoota Heetotaa, Amoorotaa, Kana'aanotaa, Feerzotaa, Hiiwotaatii fi Yebuusotaa ti.

Mootonnis kanneenii dha:

⁹ Mootii Yerikoo, tokko

mootii Aayi kan Beet'eel biraa, tokko

¹⁰ mootii Yerusaalem, tokko

mootii Kebroon, tokko

¹¹ mootii Yarmuut, tokko

mootii Laakkiish, tokko

¹² mootii Egloon, tokko

mootii Geezir, tokko

¹³ mooticha Debiir, tokko

mootii Gaadeer, tokko

¹⁴ mootii Hormaa, tokko

mootii Aaraad, tokko

¹⁵ mootii Libnaa, tokko

mootii Adulaam, tokko

¹⁶ mootii Maqeedaa, tokko

mootii Beet'eel, tokko

¹⁷ mootii Tafuu'aa, tokko

mootii Heefer, tokko

¹⁸ mootii Afeeq, tokko

mooticha Lashaaroon, tokko
¹⁹ mootii Maadoon, tokko
 mootii Haazoor, tokko
²⁰ mootii Shimroon Meroon, tokko
 mootii Akshaaf, tokko
²¹ mootii Ta'anaak, tokko
 mootii Megidoo, tokko
²² mootii Qaadesh, tokko
 mootii Yoqeni'aam kan Qarmeloos jiraatu, tokko
²³ mootii Door kan tabba Door irra jiraatu, tokko
 mootii Gooyim kan Gilgaal keessaa jiraatu, tokko
²⁴ mootii Tiirzaa, tokko.

Isaanis walumatti mootota sodomii tokko turan.

13

Biyya Qabatamuuf Jiru

¹ WAAQAYYOS yeroo Iyyaasuun bara dheeraa jiraatee dulloometti akkana jedheen; "Ati amma akka malee dulloomteerta; garuu amma iyyuu lafti dhaalamuu qabu baay'eetu jira.

² "Lafti hafe sunis kanaa dha:

"guutummaa biyya Filisxeemotaatii fi Geshuurotaa, ³ karaa ba'a Gibxiitiin laga Shihoorii hamma kaaba daarii Ashqaloonitti jiru hundi akka biyya Kana'aanotaatti hedama. Kunis biyya Awootaa kan kutaa biyyoota bulchitoota Filisxeemotaa shanan jechuunis

Gaazaa, Ashdood, Eqroon, Gitii fi Eqroon; ⁴ karaa kibbaatiin immoo guutummaa biyya Kana'aanotaa, Me'aaraa Siidonaatii hamma Afeeqiitti biyya Amoorotaa

⁵ kan biyya Gebaalotaa ti;

akkasumas karaa ba'aatiin guutummaa Libaanoon, Ba'aal Gaad kan Tulluu Hermoon jalaa hamma Leeboo Hamaatiitti.

⁶ "Ani mataan koo jiraattota biyya gaaraa kanneen Libaanoonii hamma Misrefooti Maayimiitti jiraatan jechuunis Siidoonota hunda fuula Israa'elootaa duraa ari'ee nan baasa. Ati akkuma ani si ajajetti biyya kana akka dhaalaatti Israa'elootaaf hiri; ⁷ kanas gosoota sagallanii fi walakkaa gosa Minaaseetiif dhaala godhii hiri."

Biyyi Ba'a Yordaanos Hiramuu Isaa

⁸ Walakkaan gosa Minaasee kaan, gosti Ruubeenii fi gosti Gaad biyya Yordaanosiin gama ba'aa kan Museen garbichi WAAQAYYOO isaaniif kennee ture sana akkuma inni isaaniif qoodetti fudhatan.

⁹ Biyyi sunis Aro'eer kan qarqara Sulula Arnooniitti, argamtuu fi magaalaa walakkaa sulula sanaa keessaatii jalqabee dirree Meedebaan dabalatee hamma Diibooniitti diriira; ¹⁰ akkasumas magaalaaawwan Sihoon mootii Amoorotaa kan Heshboon bulchaa ture sanaa hunda dabalatee hamma daarii Amoonotaatti diriira ture.

¹¹ Kana malees Gili'aad, biyya Geshuurotaatii fi Ma'akaatotaa, guutummaa Tulluu Hermoonii fi guutummaa Baashaan hamma Salkaatti ¹² jechuunis guutummaa mootummaa Oogi kan Baashaan keessaa isa Ashtaarotii fi Edreyii bulchaa ture kan sanyii Refaayimootaa keessaa isa dhumaa ta'e sanaatti diriira. Museenis isaan mo'atee biyya isaanii fudhate. ¹³ Garuu sababii Israa'eloonni ari'anii isaan hin baasiniif Geshuuronni fi Ma'akaatonni hamma ammaatti Israa'eloota gidduu jiraatu.

¹⁴ Gosa Lewwiitiif garuu inni dhaala tokko illee hin kennine; akkuma inni waadaa isaaniif gale sanatti aarsaan ibiddaan WAAQAYYO Waaqa Israa'eliif dhi'effamu dhaala isaaniitti.

¹⁵ Wannii Museen gosa Ruubeeniif, balbala balbalaan kenne kanaa dha:

¹⁶ Biyya Aro'eer kan qarqara Sulula Arnoon, magaalattii walakkaa sululaatii jalqabee dirree Meedebaa bira jiru hunda ¹⁷ hamma Heshboonii fi magaalaaawwan ishee kanneen dirree irra jiran hunda jechuunis Diiboon, Baamooti Ba'aal, Beet Ba'aal

Me'oon, ¹⁸ Yaahizaa, Qidemoot, Meefi'aat, ¹⁹ Kiriyaataayim, Sibimaa, Zeret Shahari ishee gaara sululaa irratti argamtu, ²⁰ Beet Phe'oor, tabba Phisgaatii fi Beet Yashiimoot ²¹ jechuunis magaalawwan dirree irraa hundumaa fi guutummaa mootummaa Sihoon mooticha Amoorotaa kan Heshboon keessa jiraatee bulchaa ture hundaa ti. Museenis Sihoonii fi bulchitoota Midiyaanotaa kanneen Eewii, Reqem, Zuuri, Huurii fi Rebaa mo'ate; isaanis Sihooniin walii galanii biyya sana keessa jiraachaa turan. ²² Israa'eloonni warra lola keessatti ajjeefaman irratti dabalani Bala'aam ilma Be'oor falfalticha sanas goraadeedhaan ajjeesan.

²³ Daangaan Ruubeenotaa qarqara laga Yordaanos ture. Magaalawwan kanneenii fi gandoonni isaanii akkuma balbala balbala isaaniitti dhaala gosa Ruubeen.

²⁴ Wannii Museen gosa Gaadiitiif balbala balbalaan kenne kanaa dha:

²⁵ Daangaan isaanis Ya'izeer, magaalawwan Gili'aad hundumaa fi walakkaa biyya Amoonotaa kan hamma Aro'eeritti diriiree gara ba'a Rabbaatti argamuu dha; ²⁶ akkasuma Heshboonii jalqabee hamma Raamaatitti Miisphaa fi Betooniimitti, Mahanayimii jalqabee hamma daangaa Debiiritti diriiruu dha; ²⁷ amma illee sulula keessa, Beet Haaraam, Beet Niimraa, Sukooti, Zaafoonii fi biyya Sihoon mootichi Heshboon bulchu kan gara ba'a Yordaanos kan hamma dhuma Galaana Kinereetitti diriiree jiru sanaa dha.

²⁸ Magaalawwan kunneenii fi gandoonni isaanii akkuma balbala balbala isaaniitti dhaala gosa Gaad.

²⁹ Wannii Museen walakkaa gosa Minaaseetiif jechuunis walakkaa maatii sanyii Minaaseetiif balbala balbalaan kenne kanaa dha:

³⁰ Daangaa biyya Mahanayimii jalqabee biyya Baashaan guutuu dabalatee naannoo bulchiinsa Oogi mooticha Baashaan jechuunis qubata Yaa'iir kan Baashaan keessaa magaalaa jaatama, ³¹ walakkaa biyya Gili'aad, Ashtaarotii fi Edreyii, magaalaa Oogi mootichi Baashaan jiraatuutti diriira.

Kunis gooda sanyii Maakiiriif ilma Minaasee jechuunis walakkaa ilmaan Maakiiriif balbala balbalaan kennamee dha.

³² Kun dhaala Museen yeroo Yordaanos gama jechuunis gama ba'a Yerikoo dirree Mo'aab keessa ture sanatti qoodee dha. ³³ Gosa Lewwiitiif garuu Museen waan tokko illee hin kennine; akkuma inni waadaa isaaniif gale sanatti WAAQAYYO Waaqni Israa'el dhaala isaanii ti.

14

Biyyi Dhi'a Yordaanos Hiramuu Isaa

¹ Lafti Israa'eloonni biyya Kana'aan keessatti akka dhaalaatti argatan kan Ele'aazaar lubichi, Iyyaasuun ilmi Nuunittii fi hangafoonni balbala gosoota Israa'el isaaniif qoodan kanaa dha. ² Dhaalli isaanii kunis akkuma WAAQAYYO Musee ajajetti ixaadhaan gosa sagalii fi walakkaa gosa tokkootii kenname. ³ Museen karaa ba'a Yordaanosiin gosoota lamaanii fi walakkaaf dhaala godhee kennee ture; gosa Lewwiitiif garuu warra kaan gidduutti dhaala tokko illee hin kennine; ⁴ ilmaan Yoosif gosa lama ta'anii turaniitii; isaanis Minaasee fi Efreem. Lewwonnii garuu magaalawwan keessa jiraatan, bushaayee fi loon isaanii bobbaafatan malee gooda lafaa tokko illee hin arganne. ⁵ Kanaafuu Israa'eloonni akkuma WAAQAYYO Musee ajajetti biyya sana hiratan.

Kebroon Kaalebiif Kennamte

⁶ Ergasiis namoonni Yihuudaa Gilgaalitti gara Iyyaasuu dhufan; Kaaleb ilmi Yefunee namichi gosa Qeneez sun akkana jedheen; "Ati waan WAAQAYYO Qaadash Barnee keessatti waa'ee keetii fi waa'ee koo Musee nama Waaqaa sanatti dubbate ni beekta. ⁷ Yeroo Museen garbichi WAAQAYYOO sun akka ani biyyattii basaasuuf Qaadash Barneetii na erge umuriin koo waggaa afurtama ture. Anis gabaasa waan mirkaneeffadhe sanaa nan fideef; ⁸ obboloonni koo warri na wajjin achi dhaqan garuu akka onneen sabaa sodaadhaan baqxu godhan. Ta'us ani garaa koo guutuudhaan WAAQAYYO Waaqa koo duukaa bu'e. ⁹ Kanaafuu Museen gaafas akkana jedhee naa kakate; 'Sababii ati garaa kee guutuudhaan WAAQAYYO Waaqa koo duukaa buuteef, lafti miilli kee tuqe sun hamma bara baraatti dhaala keetii fi dhaala ilmaan keetii ta'a."

¹⁰ "Egaa WAAQAYYO akkuma waadaa gale sanatti, gaafa Museedhaan akkas jedhe kan yeroo Israa'el gammoojjii keessa asii fi achi jooraa turee jalqabee waggaa afurtamii shan

na jiraachiseera. Kanaafuu ani har'a kunoo waggaa saddeettamii shan guuteera! ¹¹ Ani har'as akkuma gaafa Museen na erge sanaa jabaa dha; ani akkuman dur ture sana amma iyyuu duula dhaquuf jabaa dha. ¹² Egaa amma biyya gaaraa kan WAAQAYYO gaafa sana waadaa naa gale kana naa kenni. Ati mataan kee iyyuu akka Anaqonni achi keessa jiraatan, akka magaalawwan isaanii gurguddaa ta'anii fi dallaa jabaan marfaman gaafas dhageesseerta; yoo WAAQAYYO na gargaare garuu ani akkuma Waaqayyo jedhee sanatti ari'ee isaan baasa."

¹³ Iyyaasuunis Kaaleb ilma Yefunee eebbisee Kebroonin dhaala godhee kenneef. ¹⁴ Kanaafuu sababii inni garaa isaa guutuudhaan WAAQAYYO Waaqa Israa'el duukaa bu'eef Kebroon hamma har'aatti iyyuu dhaala Kaaleb ilma Yefunee namicha gosa Qeneez sanaa taatee hafte. ¹⁵ Kebroon duraan maqaa namicha Arbaaq jedhamu kan Anaqota hunda keessaa nama guddaa ture tokkootiin Kiriyaati Arbaaq jedhamtee waamamaa turte.

Ergasiis biyyattiin waraana irraa boqotte.

15

Qooda Gosa Yihuudaa

15:15-19 kwf - AbM 1:11-15

- ¹ Qoodni gosa Yihuudaatiif balbala balbalaan ramadame hamma daarii Edoomitti, qarqara kibbaatiin immoo hamma Gammoojii Siinitti bal'ata.
- ² Daariin isaanii karaa kibbaa galoo galaanaa qarqara kibba Galaana soogiddaattii jalqabee ³ kibba Malkaa Aqraabii qaxxaamuree gara Siin itti fufee hamma kibba Qaadash Barneetti deema. Ergasiis Hezroon darbee Adaaritti ol ba'ee gara Qarqaatti gora. ⁴ Ergasii immoo achii ka'ee karaa Azimooniin darbee hamma lafa goggogaa Gibxiitti dhufee galaana ga'ee dhaabata. Daariin isaanii kan gara kibbaa kanaa dha.
- ⁵ Daariin gara ba'aas Galaana Soogiddaa ture; innis hamma dhuma laga Yordaanositti deema.
- Daariin gara kaabaa immoo galoo galaanaa kan qarqara Yordaanosii jalqabee ⁶ gara Beet Hoglaatti ol ba'ee ergasii immoo karaa kaaba Beet Arabbaatiin gara Dhagaa Boohan ilma Ruubeenitti deema. ⁷ Daariin sunis ergasii Sulula Aakoor keessaa Debiiritti ol ba'ee gara Gilgaal gama kibba laga sanaatiin fuullee Malkaa Adumiim sanaa kaabatti gora. Daariin kun ittuma fufee gara bishaanota Een Shemesh darbee Een Roogeelitti gad ba'a. ⁸ Ergasiis karaa kibba tabba magaalaa Yebuusotaatiin jechuunis Yerusaalemitiin ba'ee Sulula Ben Hinoom irraan darba. Achiis ba'ee qarqara kaaba Sulula Refaayimitti fiixee tulluu gama lixa Sulula Hinoom jirutti ol ba'e. ⁹ Daariin sun ammas fiixee gaaraa irraa ka'ee gara burqaa bishaanota Neftoo'aatti qajeelee magaalawwan Tulluu Efroniin ba'ee gara Ba'aalaatti jechuunis Kiriyaati Ye'aariimitti gad bu'e. ¹⁰ Ergasii Ba'aalaa irraa Tulluu See'iriitti gara lixaatti garagalee tabba kaaba Tulluu Yi'aariim jechuunis Kesaaloon irra ba'ee itti fufuudhaan Beet Shemeshitti gad bu'ee Tiimnaahitti darba. ¹¹ Gara kaaba tabba Eqroonitti darbee Shikeroonitti goree Tulluu Ba'aalaa irra qaxxaamuruudhaan hamma Yabni'eelitti deema. Daariin sunis galaana ga'ee dhaabate.
- ¹² Daariin gara lixaa immoo qarqara Galaana Guddaa ti.

Daariwwan akkuma balbala gosa isaniitti saba Yihuudaa marsanis kanneenii dha.

¹³ Iyyaasuun akkuma WAAQAYYO isa ajajetti, qooda Yihuudaa irraa kutee Kebroon biyya Kiriyaati Arbaaq jedhamtu sana Kaaleb ilma Yefuneetiif kenne. Arbaaq kunis abbaa Anaq. ¹⁴ Kaalebis ilmaan Anaq sadan jechuunis Sheeshaayyiin, Ahiimani fi Talmaayi sanyii Anaq ari'ee achii baase. ¹⁵ Achiis namoota biyya Debiir ishee dur Kiriyaati Seefer jedhamaa turte sana keessa jiraatanitti duule. ¹⁶ Kaalebis, "Ani nama Kiriyaati Seefer lolee qabatutti intala koo Aakkaa nan heerumsiisa" jedhe. ¹⁷ Obboleessi Kaaleb, Otnii'eel ilmi Qenaz magaalatti qabate; Kaalebis intala isaa Aakkaa isatti heerumsiise.

¹⁸ Isheenis yeroo gara Otnii'eel dhuftetti akka inni abbaa ishee lafa qotiisaa kadhatu isa kakaafte. Kaalebis yommuu isheen harree ishee irraa buutetti, "Ani maal siif godhu?" jedhee ishee gaafate.

¹⁹ Isheenis deebiftee, “Waan addaa tokko naa godhi. Akkuma Negeeb keessatti lafa naa kennite sana burqaawwan bishaaniis naa kenni” jetteen. Kaalebis burqaawwan oliitii fi gadii kenneef.

²⁰ Dhaalli gosti Yihuudaa balbala balbalaan argate kunoo kana:

²¹ Negeeb keessaa magaalawwan gosa Yihuudaa kanneen qarqara kibbaatti daarii Edoom irratti argaman kanneenii dha:

Qabzi’eel, Eederi, Yaaguur, ²² Qiinaa, Diimonaa, Adi’aadaa, ²³ Qaadash, Haazoor, Yitinaan, ²⁴ Ziif, Telem, Ba’aalooti, ²⁵ Haazoor Hadaataa, Keriiyooti kan Hezroon jedhamtu sana, ²⁶ Amaam, Shemaa, Molaadaa, ²⁷ Hazar Gadaa, Heshmoon, Beet Phelexi, ²⁸ Hazar Shuu’aal, Bersheebaa, Biziyootiyaa, ²⁹ Ba’aalaa, Iyyiim, Ezem, ³⁰ Eltolaad, Kisiil, Hormaa, ³¹ Siiqlaag, Madmaanaa, Saansaanaa, ³² Lebba’oot, Shiiliihim, Aayinii fi Rimoonii dha; magaalawwanii fi gandoonni isaanii walumaa galatti digdamii sagal turan.

³³ Karaa sulula lixa biifutuutiin immoo:

Eshitaa’ol, Zoraa, Ashinaa, ³⁴ Zaano’aa, Een Ganiim, Tafuu’aa, Eenaami, ³⁵ Yarmuuti, Adulaam, Sookoo, Azeeqaa, ³⁶ Sha’araiim, Aaditaayim, Gedeeraa fi Gedeerootaayimii dha; magaalawwanii fi gandoonni isaanii kudha afur turan.

³⁷ Zenaan, Hadaashaa, Migdaal Gaad, ³⁸ Dili’aan, Miisphaa, Yoqti’eel, ³⁹ Laakkiish, Boozqaati, Egloon, ⁴⁰ Kaboon, Lahimaas, Kiitiliish, ⁴¹ Gedeerooti, Beet Daagon, Na’amaa fi Mageedaa dha; magaalawwanii fi gandoonni isaanii kudha ja’a turan.

⁴² Libnaa, Eteeri, Ashaan, ⁴³ Yiftaa, Ashinaa, Neziibi, ⁴⁴ Qeyiilaa, Akziibii fi Maareeshaa dha; magaalawwanii fi gandoonni isaanii sagal turan.

⁴⁵ Eqroon, qubatawwanii fi gandoota naannoo ishee jiran wajjin, ⁴⁶ akkasumas karaa lixa Egrooniitiin qubatawwanii fi gandoota isaanii kanneen naannoo Ashdood jiran hunda, ⁴⁷ Ashdood, magaalaa isheetii fi gandoota ishee, Gaazaa, magaalaa isheetii fi gandoota ishee kanneen hamma Laga Gibxii fi hamma qarqara Galaana Guddichaatti jiranii dha.

⁴⁸ Biyya gaaraa keessatti immoo:

Shaamiir, Yatiir, Sookoo, ⁴⁹ Danaa, Kiriyaati Sanaa jechuunis Debiir, ⁵⁰ Aanaab, Eshitmo’aa, Aaniim, ⁵¹ Gooshen, hooloonii fi Giiloo dha; magaalawwanii fi gandoonni isaanii kudha tokko turan.

⁵² Araab, Duumaa, Eshi’aan, ⁵³ Yaanuuum, Beet Tafuu’aa, Afeeqaa, ⁵⁴ Humtaa, Kebroon ishee Kiriyaati Arbaaq jedhamtuu fi Zii’oorii dha; magaalawwanii fi gandoonni isaanii sagal turan.

⁵⁵ Maa’oon, Qarmeloos, Ziif, Yutaa, ⁵⁶ Yizri’eel, Yooqidi’aam, Zaano’aa, ⁵⁷ Qaayin, Gibe’aa fi Tiimnaahii dha; magaalawwanii fi gandoonni isaanii kudhan turan.

⁵⁸ Halhuul, Beet Zuuri, Gedoor, ⁵⁹ Ma’aaraati, Beet Anootii fi Eltegoonii dha; magaalawwanii fi gandoonni isaanii ja’a turan.

⁶⁰ Kiriyaati Ba’aal kan Kiriyaati Ye’aariim jedhamtuu fi Raabbaa dha; magaalawwanii fi gandoonni ishee lama turan.

⁶¹ Gammoojjii keessatti immoo:

Beet Arabbaa, Midiin, Sekaakaa, ⁶² Niibishaan, Magaalaa Soogiddaati fi Een Gaadii dha; magaalawwanii fi gandoonni isaanii ja’a turan.

⁶³ Sabni Yihuudaa garuu Yebuusota Yerusaalem keessa jiraachaa turan sana ari’anii baasuu hin dandeenye; Yebuusonnis hamma har’aatti saba Yihuudaa wajjin Yerusaalem keessa jiraatu.

16

Qooda Gosa Efreemii fi Gosa Minaasee

¹ Qoodni Yoosef Yordaanos Yerikoo biratti argamtu, karaa ba’a bishaanota Yerikootti ka’ee gammoojjii keessa qaxxaamuree biyya gaaraa Beet’eelitti ol ba’a. ² Luuzi ishee Beet’eel jedhamtu sanaa ka’ee gara biyya Arkaawotaa kan Axaaroti keessatti argamtu sanaatti ce’a. ³ Achii immoo gara lixaa biyya Yafleexotaatti gad bu’ee Beet Horoon ga’ee gara Geezir itti fufee galaanicha ga’ee dhaabata.

⁴ Akkasitti Minaasee fi Efreem, ilmaan Yoosef dhaala isaanii argatan.

⁵ Qoodni gosti Efreem balbala balbalaan argatte kunoo kana:

Daariin dhaala isaanii gara ba'aatiin Axaaroti Adaarii ka'ee hamma Beet Horoon gara Ol aanuutti deemee ⁶ hamma galaanaatti itti fufa. Karaa kaabaatiin Mikmetaatii ka'ee karaa ba'aatiin gara Taanaat Shiiloo goree achiin darbee ba'a Yaano'aatti qajeela. ⁷ Ergasii immoo Yaano'aadhaa ka'ee Axaarotii fi Na'araatti gad bu'ee Yerikoo irra naanna'ee Yordaanositti gad ba'a. ⁸ Daariin sun Tafuu'aadhaa ka'ee gama Lixaatiin Laga Qaanaatti gad bu'ee galaana ga'ee dhaabata. Dhaalli gosti Efreem balbala balbalaan argatte kanaa dha.

⁹ Daariin kun magaalaawwanii fi olloota isaanii kanneen dhaala gosa Minaasee keessatti gosa Efreemiif hambifaman hundas ni dabalata.

¹⁰ Isaan Kana'aanota Geezir keessa jiraachaa turan sana ari'anii achii hin baafne ture; hamma har'aatti Kana'aanonni saba Efreem gidduu jiraatu; garuu akka hojji humnaa hojjetan dirqamu.

17

¹ Gosti Minaasees qooda argatte; inni ilma Yoosef hangafa turetii. Maakiir ilmi Minaasee hangaftichi abbaan Gili'aadotaa sun sababii loltuu jabaa ta'eef Gili'aadii fi Baashaan isaaf kennaman. ² Kanaafuu qoodni kun saba Minaasee warra hafaniif jechuunis balbala Abii'ezer, Heleq, Asrii'eel, Sheekem, Heferii fi Shemiidaaf kenname. Kunneenis balbala balbala isaaniitiin ilmaan Minaasee ilma Yoosef kanneen biraa ti.

³ Zelofehaad ilmi Heefeer, ilmi Gili'aad, ilma Maakiir, ilmi Minaasee sun intallan malee ilmaan hin qabu ture. Maqaan intallan isaas Mahilaa, Nohii, Hoglaa, Miilkaa fi Tiirzaa. ⁴ Isaanis gara Ele'aazaar lubichaa, gara Iyyaasuu ilma Nuunitii fi gara hooggantootaa dhaqanii "WAAQAYYO akka inni obboloota keenya gidduutti dhaala nuu kennuuf Musee ajajeera" jedhan. Kanaafuu Iyyaasuun akkuma ajaja WAAQAYYOOTTI obboloota abbaa isaanii wajjin dhaala kenneef. ⁵ Minaaseen Gili'aadii fi Baashaan keessaa gama ba'a Yordaanositti lafa iddoo kudhanitti hiramuu qaba ture. ⁶ Kunis sababii intallan gosa Minaasee sun ilmaan dhiiraa gidduutti qooda argataniif. Lafti Gili'aad ilmaan Minaasee kanneen hafaniif kenname.

⁷ Daangaan gosa Minaasee Aasheerii ka'ee hamma Mikmetaati kan karaa ba'a Sheekem jirtu sanaatti bal'ata. Daangaan sunis achii ka'ee kibbaan gad bu'ee saba Een Tafuu'aa keessa jiraatus dabalata. ⁸ Biyyi Tafuu'aa kan Minaasee turte; Tafuu'aan maatan ishee garuu karaa daangaa Minaaseetiin kan ilmaan Efreem turte. ⁹ Daangaan sun karaa kibbaatiin ittuma fufee Laga Qaanaa bira ga'a. Magaalaawwan Efreem kanneen magaalaawwan Minaasee gidduutti argamanitu ture; daangaan Minaasee garuu Kaaba lagichaa irra darbee galaana bira ga'ee dhaabata. ¹⁰ Biyyi sun karaa kibbaatiin kan gosa Efreemiiti; karaa kaabaatiin immoo kan gosa Minaasee ti. Biyyi Minaasee hamma galaanaatti deemee karaa kaabaatiin Aasheerin, karaa ba'aatiin immoo Yisaakorin daangeessa.

¹¹ Minaaseenis Yisaakorii fi Aasheer keessaa Beet She'aan, Yible'aamii fi saba Door, Eendoor, Ta'anaakii fi Megidoo qubatawwan naannoo isaanii jiran wajjin qaba ture; sadaffaan immoo Naafootii dha.

¹² Ta'us sababii Kana'aanonni biyya sana jiraachuuf kutatanii turaniif gosti Minaasee magaalaawwan kanneen qabachuu hin dandeenye. ¹³ Garuu Israa'eloonni yommuu jabina argachaa dhufanitti akka isaan hojji humnaa hojjetan godhan malee Kana'aanota achii hin baafne.

¹⁴ Namoonni Yoosefis Iyyaasuudhaan, "Ati maaliif ixaa tokkoo fi qooda tokko qofa dhaala nuu kennite? Nu saba akka malee baay'ee fi saba WAAQAYYO guddisee eebbisee dha" jedhan.

¹⁵ Iyyaasuunis, "Yoo isin akka malee baay'attanii biyyi gaaraa Efreem kun isinitti dhiphatte bosona seenaatii biyya Feerzotaatii fi Refaayimootaa keessatti iddoo jireenyaa qopheeffadhaa" jedhee deebiseef.

¹⁶ Namoonni Yoosefis, "Biyyi gaaraa kun nu hin ga'u; Kana'aanonni lafa diriiraa irra jiraatan hundi, warri Beet She'aanii fi qubatawwan ishee akkasumas warri Sulula Yizri'eel keessa jiraatan hundi gaariwwan sibiilaa qaban" jedhanii deebisan.

¹⁷ Iyyaasuun garuu mana Yoosefiin jechuunis Efreemii fi Minaaseedhaan akkana jedhe; "Isin saba akka malee baay'ee kan humna guddaa qabuu dha. Ixaa tokko qofa hin qabaattan. ¹⁸ Biyya gaaraa kan bosonaa garuu ni qabaattu; bosona ciraa; biyyattiinis hamma qarqara daangaa isheetti kanuma keessan taati; Kana'aanonni yoo gaariwwan sibiilaa qabaatanii jajjaboo ta'anis isin ariitanii isaan baasuu dandeessu."

18

Biyyi Hafte Qoodamuu Ishee

¹ Guutummaan waldaa Israa'el Shiilootti walitti qabamee dunkaana wal ga'ii achitti dhaabate. Biyyattiin harka isaanii jala galte; ² ta'us amma illee gosoonni Israa'el torba dhaala isaanii hin fudhanne ture.

³ Kanaafuu Iyyaasuun Israa'elootaan akkana jedhe; "Isin utuu biyya WAAQAYYO Waaqni abbootii keessanii isinii kenne kana hin fudhatin hamma yoomiitti turtu? ⁴ Tokkoo tokkoo gosaa keessaa nama sadii sadii kennadhaa. Anis akka isaan biyya sana ilaalanii akkuma dhaala gosa hundaatti waa'ee ishee barreessaniif isaan nan erga. Isaanis ergasii gara kootti deebi'u. ⁵ Isin biyya sana iddoo torbatti goodu qabdu. Yihuudaan biyya karaa Kibbaa keessatti hafee manni Yoosif immoo biyya karaa kaabaatti hafuu qaba. ⁶ Isin erga waa'ee biyya iddoo torbatti qoodamte sanaa barreessanii booddee gabaasa natti fidaa; anis fuula WAAQAYYO Waaqa keenyaa duratti ixaa isinii buusa. ⁷ Gosti Lewwii garuu gidduu keessanitti qooda lafaa hin argatu; sababiin isaa tajaajilli lubummaa kan isaan WAAQAYYOOF kennan sun dhaala isaanii ti. Gosti Gaad, kan Ruubeenii fi walakkaan gosa Minaasee duraanuu karaa ba'a Yordaanosiin qooda isaanii argatanii jiru. Museen garbichi WAAQAYYOO sun isaanii kennee ture."

⁸ Kanaafuu jarri karaa isaanii qabatani qajeelan; Iyyaasuunis warra haala biyyattii barreessuu dhaqaniin akkana jedhe; "Dhaqaatii biyya sana sakatta'aatii waa'ee ishee galmeessaa. Ergasii immoo gara koo kottaa; anis asuma Shiilootti fuula WAAQAYYOO duratti ixaa isiniif nan buusa." ⁹ Kanaafuu namoonni sun ka'anii biyya sana keessa dedeemanii waa'ee haala ishees magaalaa magaaladhaan iddoo torbatti qoodanii kitaaba maramaa irratti barreessanii qubata Shiilootti gara Iyyaasuutti deebi'an.

¹⁰ Iyyaasuun ergasii Shiiloo keessatti fuula WAAQAYYOO duratti ixaa buuseef; akkuma qooda gosa isaaniittis Israa'elootaaf biyyattii hire.

Qooda Beniyaam

¹¹ Ixaan jalqabaa akkuma balbala balbala isaaniitti gosa Beniyaamiif ba'e. Biyyi isaan ixaadhaan argatanis gosa Yihuudaatii fi gosa Yoosif gidduutti argama.

¹² Karaa kaabaatiin daariin isaanii Yordaanosii ka'ee kaaba tabba Yerikoo irra darbuudhaan karaa lixaatiin biyya gaaraatti gad bu'ee gammoojjii Beet Aawweniitiin ba'a. ¹³ Achii ka'ee kibba tabba Luuzitti jechuunis Beet'eelitti darbee gara Axaaroti Adaar kan gaara kibba Beet Horoon isa gadii sanaatti gad bu'a.

¹⁴ Daariin sunis karaa kibbaatiin gaara Beet Horoonitti garagalee jiru sanaa ka'ee karaa lixaatiin gara kibbaatti goree magaalaa ilmaan Yihuudaa kan Kiriyaati Ba'aal jechuunis Kiriyaati Ye'aariim ga'a. Kunis daangaa lixaa ti.

¹⁵ Daangaan kibbaa karaa lixaatiin qarqara Kiriyaati Ye'aariimiitti jalqaba; daangaan isaa immoo gara bishaan Neftoo'aatti gad bu'a. ¹⁶ Daangaan sunis karaa kaaba Sulula Refaayimiitiin gara gaara Sulula Ben Hinoomitti garagalutti gad bu'a. Innis tabba kibba magaalaa Yebuusotaa biraan gara Sulula Hinoomitti itti fufee gara Een Roogeelitti gad bu'a. ¹⁷ Ergasii gara kaabaatti goree Een Shemesh dhaqa; achii ka'ees gara Geliiloot kan Malkaa Adumiimitti gara galtee jirtu sanaa itti fufee hamma Dhagaa Boohan ilma Ruubeen sanaatti gad bu'a. ¹⁸ Ammas gara tabba kaaba Arabbaatti itti fufee gara Arabbaatti gad bu'a. ¹⁹ Ergasii tabba kaaba Beet Hoglaatti qajelee karaa kaaba galoo Galaana Soogiddaa kan karaa kibbaatiin afaan Yordaanositti argamtuutiin ba'a. Kun daarii karaa kibbaa ti.

²⁰ Lagni Yordaanosis karaa ba'aatiin daarii ta'a.

Isaan kunneen daariwwan dhaala ilmaan Beniyaamiitiif karaa hundaan dhaabamanii dha.

²¹ Magaalaawwan gosti Beniyaam akkuma maatii maatii isaaniitti argatan kanneenii dha:

Yerikoo, Beet Hoglaa, Eemeqi Qaziizi, ²² Beet Arabbaa, Zemaaraayim, Beet'eel, ²³ Aawim, Faaraa, Ofraa, ²⁴ Kefar Aamoonaa, Ofnii fi Gebaa dha; magaalaawwanii fi gandoonni isaanii kudha lama turan.

²⁵ Gibe'oon, Raamaa, Bi'eerootti, ²⁶ Miisphaa, Kefiraa, Moozaa, ²⁷ Reqem, Yirphi'eel, Taraalaa, ²⁸ Zeelaa, Haa'elef, magaalaa Yebuusotaa jechuunis Yerusaalem, Gibe'aa fi Qiiriyaati; magaalaawwanii fi gandoonni isaanii kudha afur turan. Dhaalli gosti Beniyaam balbala balbalaan argate kana ture.

19

Qooda Gosa Simi'oon

19:2-10 kwf - 1Sn 4:28-33

¹ Ixaan lammaffaan gosa Simi'ooniif balbala balbalaan ba'e. Dhaalli isaaniis dhaala gosa Yihuudaa keessatti argama. ² Kunis: Bersheebaa yookaan Shebaa, Molaadaa, ³ Hazar Shuu'aal, Baalaa, Ezem, ⁴ Eltolaad, Betuul, Hormaa, ⁵ Siiqilaag, Beet Markaabot, Hazar Suusaa, ⁶ Beet Lebaa'otii fi Shaaruheen; magaalaawwanii fi gandoonni isaanii kudha sadii turan; ⁷ Ayin, Rimoon, Eterii fi Ashaan, magaalaawwanii fi gandoota isaanii afran, ⁸ akkasumas gandoota naannoo magaalaawwan kanneenii jiran kanneen hamma Baa'ilaat Bi'eeritti jechuunis hamma Raamaat ishee Negeeb keessaa sanaatti bal'ata. Dhaalli gosti Simi'oon balbala balbalaan argate kanaa dha. ⁹ Sababii qoodni gosa Yihuudaa hamma isaan barbaadanii ol ta'eef dhaalli gosa Simi'oon kun qooda gosa Yihuudaa irraa fudhatame. Kanaafuu gosti Simi'oon Yihuudaa keessatti dhaala argate.

Qooda Gosa Zebuuloon

¹⁰ Ixaan sadaffaan gosa Zebuulooniif balbala balbalaan ba'e; kunis: Daariin dhaala isaanii hamma Saariiditti deema. ¹¹ Achiiis karaa lixaatiin gara Mare'aalaatti gad bu'ee Dabesheetitti riiqatee hamma laga Yogeni'aam dura jiru sanaatti deema. ¹² Ergasii Saariid irraa gara Kisloti Taaboor biyya ba'a biiftuutti argamtu sanaatti gara ba'aatti goree Daaberaatiitti qajeelaa hamma Yaafiiyaatti deema. ¹³ Achiiis karaa ba'aatiin itti fufee Gat Heferii fi Eetqaaxin dhaqa; Rimooniin gad ba'ee gara Ne'aahitti gora. ¹⁴ Daariin sunis karaa kaabaatiin gara Hanaatoonitti goree Sulula Yiftaa Eelitti dhuma. ¹⁵ Kanneen irrattis Qaataa, Naahaalal, Shimroon, Yidalaa fi Beetlihem dabalamaniiru. Isaaniis gandoota isaanii wajjin magaalaawwan kudha lama turan. ¹⁶ Magaalaawwan kunneenii fi gandoonni isaanii dhaala gosti Zebuuloon balbala balbalaan argatee dha.

Qooda Yisaakor

¹⁷ Ixaan afuraffaan gosa Yisaakoriif balbala balbalaan ba'e. ¹⁸ Biyyi isaaniis: Yizri'eel, Kesuloot, Suunam, ¹⁹ Hafaarayim, Shii'oon, Anaaharat, ²⁰ Rabiit, Kishoon, Ebezi, ²¹ Remeet, Een Ganiim, Een Hadaa fi Beet Phaxeex. ²² Daariin isaanii Taaboor, Shahazumaa fi Beet Shemesh tuqee Yordaanos ga'ee dhaabata. Isaanis gandoota isaanii wajjin magaalaawwan kudha ja'a turan. ²³ Magaalaawwan kunneenii fi gandoonni isaanii dhaala gosti Yisaakor balbala balbalaan argatee dha.

Qooda Gosa Aseer

²⁴ Ixaan shanaffaan gosa Aasheeriif balbala balbalaan ba'e. ²⁵ Biyyi isaaniis: Helqaat, Hali, Beten, Akshaaf, ²⁶ Alaamelek, Amaadii fi Mishi'aal. Daangaan sunis karaa lixaatiin Qarmeloosii fi Shiihoor Libnaat tuqa. ²⁷ Ergasii karaa ba'a biiftuutiin gara Beet Daagonitti goree Zebuuloonii fi Sulula Yiftaa Eelitti qabatee Kaabuulin gara bitaatti dhiisee karaa kaabaatiin Beet Emeeqii fi Ne'ii'eelitti qajeela. ²⁸ Achiiis ka'ee gara Eebroon, Rehoob, gara Hamoonii fi Qaanaatti ol ba'ee hamma Siidoonaa Guddichaatti deema. ²⁹ Daangaan sunis ergasii gara Raamaatti goree magaalaa Xiirroos kan dallaa jabaa qabu sanaa dhaqee gara Hoosaatti goree karaa Akziibiitiin galaana ga'ee dhaabata; ³⁰ kunis biyya Umaa, biyya Afeeqiitii fi Rehoob dabalata. Isaanis gandoota isaanii wajjin magaalaawwan digdamii lama turan. ³¹ Magaalaawwan kunneenii fi gandoonni isaanii dhaala gosti Aasheer balbala balbalaan argatee dha.

Qooda Gosa Niftaalem

³² Ixaan ja'affaan gosa Niftaalemiif balbala balbalaan ba'e; kunis: ³³ Daariin isaanii Heelefi fi muka guddaa Za'aanaaniim keessa jiru sanaa ka'ee Adaamii Neqebii fi Yabni'eel irraan gara Laqumiitti qajeelaa Yordaanos ga'ee dhaabata. ³⁴ Daariin sun Aznoot Taabooritti qajeelaa gara lixaatti goruudhaan Huuqooqi ga'ee dhaabata. Innis karaa kibbaatiin Zebuuloon, karaa lixatiin Aasheer, karaa ba'aatiin immoo Yordaanos tuqa.

³⁵ Magaalaawwan dallaa jabaa qaban kanneenii dha: Zidiimi, Zeeri, Hamaati, Raqaati; Kinereeti, ³⁶ Adaamaa, Raamaa, Haazoor; ³⁷ Qaadesh, Edreyii, Een Haxoor, ³⁸ Yiroon, Migdaal Eel, Horeem, Beet Anaatii fi Beet Shemesh.

Isaanis gandoota isaanii wajjin magaalaawwan kudha sagal turan.

³⁹ Magaalaawwan kunneenii fi gandoonni isaanii dhaala gosti Niftaalem balbala balbalaan argatee dha.

Qooda Gosa Daan

⁴⁰ Ixaan torbaffaan gosa Daaniif balbala balbalaan ba'e. ⁴¹ Biyyi isaan Dhaalaniis:

Zoraa, Eshitaa'ol, Iir Shemesh, ⁴² Sha'alabiin, Ayaaloon, Yitlaa, ⁴³ Eeloon, Tiimnaahi, Eqrtoon, ⁴⁴ Eltegee, Gibetoon, Baa'ilaati, ⁴⁵ Yihuud, Benee Beraaq, Gat Rimoon, ⁴⁶ Meyaarqoonii fi Raqoon Yoopheetti garagalee argamu sanaa dha.

⁴⁷ Ijoolleen Daan garuu sababii lafti dhaalan sun isaanitti dhiphatteef ol ba'anii Lesheemin waraananii qabatan; erga goraadeedhaan dha'anii booddee ishee dhuunfatan. Isaanis Lesheem keessa qubatanii Daan jedhanii maqaa abbaa isaaniitiin ishee moggaasan.

⁴⁸ Magaalaawwan kunneenii fi gandoonni isaanii dhaala gosti Daan balbala balbalaan argatee dha.

Qooda Iyyaasuu

⁴⁹ Israa'eloonnis erga biyyattii ixaadhaan qoodamte sana hiranii fixanii booddee gidduu isaaniitti Iyyaasuu ilma Nuuniitiif dhaala kennan; ⁵⁰ dhaala kanas akkuma WAAQAYYO ajajetti kennan. Isaanis magaalaa inni gaafatee kennaniif; magaalaa sunis Timnaat Seeraa kan biyya gaaraa Efreemitti argamtuu dha. Innis magaalaa sana ijaaree keessa jiraate.

⁵¹ Kunneen biyyoota Ele'aazaar lubichi, Iyyaasuun ilmi Nuunittii fi hangafoonnii gosoota Israa'el Shiilootti fuula WAAQAYYOO duratti balbala dunkaana wal ga'ii irratti ixaadhaan kennanii dha. Isaanis akkasiin biyyattii qooduu xumuran.

20

Magaalaawwan Itti Baqatan

20:1-9 kwi - Lak 35:9-34; KeD 4:41-43; 19:1-14

¹ Ergasii WAAQAYYO Iyyaasuudhaan akkana jedhe: ² "Akkuma ani karaa Museetiin isin ajaje sanatti akka Israa'eloonni magaalaawwan itti kooluu galan filatan itti himi; ³ kunis akka namni tasuma yookaan utuu itti hin yaadin nama ajjeese kam iyyuu itti kooluu galee nama haaloo dhiigaa baasu duraa ba'uuf. ⁴ Inni yommuu magaalaawwan sana keessaa tokkotti kooluu galutti karra magaalattii irra dhaabatee fuula maanguddoota magaalaa sanaa duratti dhimma isaa himachuu qaba. Isaanis ergasii magaalaa isaaniitti isa simatanii akka inni isaan wajjin jiraatuuf iddoo kennuufii qabu. ⁵ Yoo namni haaloo dhiigaa baasu isa duukaa bu'e illee, sababii inni utuu itti hin yaadinii fi utuu duraan jibba wal irraa hin qabaatin nama ollaa isaa ajjeeseef, isaan namicha sana dabarsanii kennuu hin qaban. ⁶ Inni hamma fuula waldaa dura qorumsaaf dhaabatuttii fi hamma lubni ol aanaan yeroo sanatti tajaajilaa ture du'utti magaalaa dhuma sana keessa jiraachuu qaba. Ergasii inni mana isaatti, gara magaalaa keessaa baqate sanaatti deebi'uu danda'a."

⁷ Kanaafuu isaan biyya gaaraa Niftaalem keessaa Qaadesh ishee Galiilaa keessaa sana, biyya gaaraa Efreem keessaa Sheekem, biyya gaaraa Yihuudaa keessaa immoo Kiriyaati Arbaaq kan Kebroon jedhamtu sana filatan. ⁸ Yordaanos gamaa karaa lixa Yeriikootiin, biyya gosa Ruuben keessaa Bezer ishee gammoojjii diriiraa keessaa sana, biyya gosa Gaad keessaa Raamooti ishee Gili'aad keessatti argamtu, biyya gosa Minaasee keessaa immoo Goolaan ishee Baashaan keessatti argamtu sana filatan. ⁹ Magaalaawwan akka namni tasa nama ajjeese kam iyyuu itti baqatuuf Israa'eloota hundaa fi alagoota gidduu isaanii jiraataniif filataman kanneenii dha; kunis akka inni hamma harka waldaa jirutti namicha haaloo dhiigaa baasu sanaan hin ajjeefamneef.

21

Magaalaawwan Lewwotaaf Kennaman

21:4-39 kwf - 1Sn 6:54-80

¹ Hangafoonni maatii Lewwotaa Ele'aazaar lubichatti, Iyyaasuu ilma Nuunittii fi hangafoota maatiiwwan gosoota Israa'el kaanitti dhi'aatanii ² Shiiloo Kana'aan keessatti

argamtu sana keessatti, “WAAQAYYO akka isin magaalaa nu keessa jiraannu lafa tikaa kan horii keenyaaf ta’u wajjin nuu kennitan karaa Museetiin ajajee ture” jedhaniin.

³ Kanaafuu Israa’eloonni akkuma WAAQAYYO ajajetti dhaala ofii isaanii keessaa magaalaaawwan kanneenii fi lafa tikaa Lewwotaaf kennan.

⁴ Ixaan jalqabaa gosa Qohaatiif balbala balbalaan ba’e. Lewwota sanyii Aroon lubichaatiifis gosa Yihuudaa, gosa Simi’oonii fi gosa Beniyaam keessaa magaalaaawwan kudha sadii ixaadhaan argatan.

⁵ Sanyii Qohaati warra hafaniif immoo balbala gosa Efreem, gosa Daanii fi walakkaa gosa Minaasee keessaa magaalaaawwan kudhan ixaadhaan argatan.

⁶ Sanyiiwwan Geershooniif balbala gosa Yisaakor, gosa Aasheer, gosa Niftaaleemii fi walakkaa gosa Minaasee kan Baashaan keessaa sana irraa magaalaaawwan kudha sadii ixaadhaan argatan.

⁷ Sanyiiwwan Meraariis balbala balbalaan gosa Ruubeen, gosa Gaadii fi gosa Zebuuloon keessaa magaalaaawwan kudha lama ixaadhaan argatan.

⁸ Kanaafuu Israa’eloonni akkuma WAAQAYYO karaa Museetiin ajaje sanatti magaalaaawwan kanneenii fi lafa tikaa ixaadhaan Lewwotaaf kennan.

⁹ Gosa Yihuudaa fi gosa Simi’oon irraa magaalaaawwan kanneen maqaa maqaadhaan goodan; ¹⁰ sababii ixaan jalqabaa isaaniif ba’eef magaalaaawwan kunneen sanyiiwwan Aroon warra Lewwota keessaa balbala Qohaati ta’aniif kennaman:

¹¹ Isaanis Kiriyaati Arbaaq jechuunis Kebroon ishee biyya gaaraa Yihuudaa keessaa sana lafa tikaa naannoo ishee wajjin kennaniif. Arbaaq abbaa Anaq ture. ¹² Lafa qotiisaa fi gandoota naannoo magaalattii jiran garuu Kaaleb ilma Yefuneetiif handhuuraa godhanii kennan. ¹³ Kanaafuu sanyiiwwan Aroon lubichaatiif Kebroon jechuunis magaalaa namni nama ajjeesee himatamu tokko itti baqatuu fi Libnaa, ¹⁴ Yatiir, Eshtimo’aa, ¹⁵ Hooloon, Debiir, ¹⁶ Aayin, Yutaanii fi Beet Shemeshi lafa tikaa wajjin kennameef; isaan kunneen magaalaaawwan sagallan gosoota lamaan irraa qoodamaniifii dha.

¹⁷ Gosa Beniyaam irraas

Gibe’oon, Gebaa’i, ¹⁸ Anaatootii fi Almoon lafa tikaa wajjin kennaniif; isaanis magaalaaawwan afurii dha.

¹⁹ Magaalaaawwan lafa tikaa wajjin sanyiiwwan Aroon kanneen luboota ta’aniif kennaman hundi kudha sadii turan.

²⁰ Qohaata balbala Lewwii warra hafaniif gosa Efreem irraa magaalaaawwan kanneentu ixaadhaan argatan:

²¹ Isaanis biyya gaaraa Efreem keessaa Sheekem jechuunis magaalaa namni nama ajjeesee himatamu itti baqatu sanaa fi Geezir, ²² Qibxaayimii fi Beet Horoon, walumatti magaalaaawwan afur lafa tikaa wajjin fudhatan.

²³ Akkasumas gosa Daan keessaa Elteqee, Gibetoon, ²⁴ Ayaaloonii fi Gat Rimoon, walumaa galatti magaalaaawwan afur lafa tikaa wajjin fudhatan.

²⁵ Walakkaa gosa Minaasee keessaa immoo

Ta’anaakii fi Gat Rimoon, magaalaaawwan lama lafa tikaa wajjin fudhatan.

²⁶ Magaalaaawwan kurnan kunneen hundii fi lafti tikaa isaanii balbala gosa Qohaati warra hafaniif kennaman.

²⁷ Geershoonota balbala Lewwiitiif immoo:

Walakkaa gosa Minaasee keessaa,

Goolaan ishee Baashaan keessaa jechuunis magaalaa namni nama ajjeesee himatamu tokko itti baqatu sanaa fi Be’eshitiraa, magaalaaawwan lamaa fi lafa tikaa isaaniitu kennameef;

²⁸ gosa Yisaakor keessaa Kishoon, Daaberaati, ²⁹ Yarmuutii fi Een Ganiim, magaalaaawwan afurii fi lafa tikaa isaaniitu kennameef;

³⁰ gosa Aasheer keessaa

Mishi’aal, Abdoon, ³¹ Helqaatii fi Rehoob, magaalaaawwan afurii fi lafa tikaa isaaniitu kennameef;

³² gosa Niftaaleem keessaa

Qaadash ishee Galiilaa keessaa, magaalaan namni nama ajjeesee himatamu tokko itti kooluu galuu akkasumas Hamoot Doorii fi Qartaan, magaalaawwan sadii lafa tikaa isaanii wajjin kennameef.

³³ Gosoota Geershootaatiif immoo magaalaawwan kudha sadiitu lafa tikaa wajjin kenname.

³⁴ Lewwota hafan warra balbala Meraarii ta'aniif:

gosa Zebuuloon keessaa,

Yoqeni'aam, Qartaa, ³⁵ Dimnaa fi Naahaalal, magaalaawwan afurtu lafa tikaa wajjin kenname;

³⁶ gosa Ruubeen keessaa

Bezer, Yaahizaa, ³⁷ Qidmootii fi Meefi'aat, magaalaawwan afur lafa tikaa wajjin kennameef;

³⁸ gosa Gaad keessaa immoo,

Raamooti ishee Gili'aad keessaa jechuunis magaalaa namni nama ajjeesee himatamu tokko itti kooluu galu, Mahanayim, ³⁹ Heshboonii fi Ya'izeer, walumaa galatti magaalaawwan afurtu lafa tikaa wajjin kennameef.

⁴⁰ Lewwota hafan warra balbala Meraarii ta'aniif walumaa galatti magaalaawwan kudha lamatu ixaadhaan kenname.

⁴¹ Magaalaawwan Lewwotaa kanneen biyya Israa'eloonni dhuunfatan keessatti argaman lafa tikaa wajjin walumaa galatti afurtamii saddeet turan.

⁴² Tokkoon tokkoon magaalaawwan kanneenii naannoo isaaniitii lafa tikaa qabu turan; magaalaawwan hundinuu akkanuma.

⁴³ Kanaafuu WAAQAYYO biyya abbootii isaaniitiif kennuuf kakate hunda saba Israa'eliif kenne; isaanis biyya sana qabatanii achi jiraatan. ⁴⁴ WAAQAYYO akkuma abbootii isaaniitiif kakate sana karaa hundaan boqonnaa isaanii kenne. Diinni isaanii tokko iyyuu fuula isaanii dura dhaabachuu hin dandeenye; WAAQAYYO diinota isaanii hunda dabarsee harka isaaniitti kenne. ⁴⁵ Waadaa gaarii WAAQAYYO mana Israa'eliif gale keessaa tokko iyyuu hin hafne; hundinuu guutameera.

22

Gosoonni Gara Ba'a Biiftuu Biyyatti Deebi'an

¹ Ergasii Iyyaasuun gosa Ruubeen, gosa Gaadii fi walakkaa gosa Minaasee walitti waamee ² akkana jedheen; "Isin waan Museen garbichi WAAQAYYOO ajaje hundumaa hojjettaniirtu; waan ani isin ajaje hundas naa ajajamtaniirtu. ³ Isin bara dheeraaf, hamma har'aatti illee obboloota keessan hin daganne; ajaja WAAQAYYOO Waaqni keessan isinii kennes eegdaniirtu. ⁴ WAAQAYYOO Waaqni keessan akkuma waadaa gale sanatti obboloota keessan boqochiiseera; isin biyya Museen garbichi WAAQAYYOO Yordaanos gamaa isinii kenne sanatti gara mana keessaniitti deebi'aa. ⁵ Garuu akka WAAQAYYOO Waaqa keessan jaallataniif, akka karaa isaa hunda irra deemtaniif, akka ajajawwan isaa eegdaniif, akka isatti maxxantaniif fi akka garaa keessan guutuu fi lubbuu keessan guutuudhaan isa tajaajiltaniif ajajaa fi seera Museen garbichi WAAQAYYOO isinii kenne sana jabeessaa eegaa."

⁶ Ergasiis Iyyaasuun eebbisee gad isaan dhiise; isaanis gara mana isaaniitti deebi'an.

⁷ Museen walakkaa gosa Minaaseetiif Baashaan keessaa lafa kennee ture; Iyyaasuun immoo walakkaa kaaniif Yordaanosiin gama lixaatti obboloota isaanii cinatti lafa kenne. Iyyaasuun yommuu gara mana isaaniitti isaan ergetti isaan eebbise; ⁸ akkanas jedheen; "Qabeenya keessan guddaa jechuunis horii baay'ee, meetii, warqee, naasii fi sibiila akkasumas uffata baay'ee fudhadhaa galaatii boojuu diinota keessan irraa boojitan sana obboloota keessan wajjin qooddadhaa."

⁹ Kanaafuu gosti Ruubeen, gosti Gaadii fi walakkaan gosa Minaasee gara biyya offi isaanii gara Gili'aad ishee akkuma WAAQAYYOO karaa Museetiin ajajetti argatan sanaatti deebi'uuf jedhanii Shiiloo ishee Kana'aan keessaa sanatti Israa'eloota dhiisanii deeman.

¹⁰ Gosti Ruubeen, gostii Gaadii fi walakkaan gosa Minaasee yommuu Galiilooti biyya Kana'aan keessaa kan Yordaanos biraa sana ga'anitti, iddoo aarsaa guddaa isaa Yordaanos biratti tolchan. ¹¹ Israa'eloonni yommuu akka isaan gama Israa'elootaatiin daarii Kana'aan irratti Galiilooti ishee Yordaanos cinaa sanatti iddoo aarsaa tolchan dhaga'anitti, ¹² guutummaan waldaa Israa'el isaanitti duuluuf Shiilooti walitti qabaman.

¹³ Kanaafuu Israa'eloonni Fiinehaas ilma Ele'aazaar lubichaa sana gara gosa Ruubeen, gosa Gaadii fi gara walakkaa gosa Minaasee warra Gili'aad keessa jiraatanitti ergan. ¹⁴ Isa wajjinis hangafoota kudhan, tokkoo tokkoo gosa Israa'eliif nama tokko ergan; tokkoon tokkoon isaaniis hangafa balbala maatii Israa'el.

¹⁵ Isaanis Gili'aaditti gosa Ruubeen, gosa Gaadii fi walakkaa gosa Minaasee bira dhufanii akkana isaaniin jedhan: ¹⁶ "Guutummaan waldaa WAAQAYYOO akkana jedha: 'Isin akkamitti akkanaa amanamummaa Waaqa Israa'el wajjin qabdan sana cabssitu? Isin akkamitti WAAQAYYOO irraa garagaltanii isatti finciluudhaan ofii keessaniif iddoo aarsaa tolfattu?' ¹⁷ Cubbuun Phe'oor keessatti hojjetame sun nu hin ga'uu? Dha'ichi saba WAAQAYYOO irra bu'u iyyuu, nu hamma har'aatti cubbuu sana irraa of hin qulqulleessine. ¹⁸ Isin ammas WAAQAYYOO irraa garagaltuu keessanii?"

"Yoo isin har'a WAAQAYYOTTI finciltan inni immoo bori hawaasa Israa'el hundatti ni dheekkama. ¹⁹ Yoo lafti isin qabattan sun xuroofte, gara lafa WAAQAYYOO iddoo dunkaanni WAAQAYYOO dhaabatuu kottaatii nu wajjin lafa qoodadhaa. Garuu iddoo aarsaa WAAQAYYOO Waaqa keenyaa malee iddoo aarsaa biraa ofii keessanii tolfattanii WAAQAYYOTTI yookaan nutti hin finciliinaa. ²⁰ Yeroo Aakaan ilmi Zaaraa waan dhowwamaa ta'e fudhachuudhaan cubbuu hojjetetti waldaa Israa'el hundatti dheekkamsi hin dhufnee? Namni sababii cubbuu isaatiin du'e isa qofa miti.'"

²¹ Kana irratti gosti Ruubeen, gosti Gaadii fi walakkaan gosa Minaasee akkana jedhanii hangafoota maatiiwwan Israa'eliif deebisan; ²² "WAAQAYYOO Waaqni waaqotaa, WAAQAYYOO Waaqni waaqotaa ni beeka! Israa'elis haa beeku! Yoo wanni kun WAAQAYYOTTI finciluuf yookaan isaa ajajamuu diduuf ta'e har'a nu hin hambisin. ²³ Yoo nu WAAQAYYOO irraa deebi'uuf jennee, aarsaa gubamuu fi kennaa midhaanii, yookaan aarsaa nagaa achi irratti dhi'eessuuf iddoo aarsaa ofii keenyaa tolfannee jiraanne, WAAQAYYOO mataan isaa itti nu haa gaafatu.

²⁴ "Sababiin nu waan kana gooneef ijoolleen keessan gara fuula duraatti ijoollee keenyaan akkana jedhu ta'a jennee sodaannee ti; 'Isin WAAQAYYOO Waaqa Israa'el irraa maali qabdu?' ²⁵ WAAQAYYOO nuu fi isin jechuunis isin gosa Ruubeenii fi gosa Gaad gidduu Yordaanos daarii godhee dhaabeera! Isin WAAQAYYOO irraa qooda tokko illee hin qabdan.' Kanaafuu ijoolleen keessan akka ijoolleen keenya WAAQAYYON sodaachuu dhiisan godhu ta'a.

²⁶ "Sababiin nu, 'Kottaa qophoofnee iddoo aarsaa tokko tolfannaa; garuu iddoon aarsaa kun kan aarsaan gubamu yookaan qalmi irratti dhi'effamuu miti' jenneefis kanuma. ²⁷ Karaa biraa immoo akka iddoon aarsaa kun akka nu aarsaa keenya kan gubamu, qalma keenyaa fi aarsaa nagaatiin iddoo qulqulluu isaatti WAAQAYYON waaqeffannuuf nu, isinii fi dhaloota dhufu gidduutti dhugaa baatuu ta'uuf. Kana booddee ijoolleen keessan ijoollee keenyaan, 'Isin WAAQAYYOO irraa qooda tokko illee hin qabdan' jechuu hin danda'a.

²⁸ "Nus akkana jenne; 'Yoo isaan baroota dhufuuf jiran keessa nuun yookaan dhaloota keenyaan akkas jedhan, mee fakkii iddoo aarsaa WAAQAYYOO kan abbootiin keenya aarsaa gubamu yookaan qalma irratti dhi'eessuuf utuu hin ta'in akka inni nuu fi isin gidduutti dhuga baatuu ta'uuf tolchan kana ilaalaa jennaan.'

²⁹ "Iddoo aarsaa WAAQAYYOO Waaqa keenyaa kan dunkaana isaa qulqulluu dura dhaabatu sana malee har'a iddoo aarsaa kan aarsaan gubamu, kennaan midhaaniitii fi qalmi irratti dhi'effamu kan biraa tolchuudhaan WAAQAYYOTTI fincillee isa irraa garagaluun nurraa haa fagaatu."

³⁰ Fiinehaas lubichi, qajeelchitoonni sabaatii fi hangafoonni maatiiwwan Israa'el yommuu waan gosti Ruubeen, gosti Gaadii fi gosti Minaasee jedhan dhaga'anitti ni gammadan. ³¹ Fiinehaas ilmi Ele'aazaar lubichaas ijoollee Ruubeeniin, ijoollee Gaadii fi ilmaan Minaaseetiin, "Nu har'a sababii isin waan kana keessatti WAAQAYYOOOF amanamummaa hin dhiisiniif akka WAAQAYYOO nu wajjin jiru beekneerra. Isin amma Israa'eloota harka WAAQAYYOO jalaa baaftaniirtu" jedhe.

³² Ergaasiis Fiinehaas ilmi Ele'aazaar lubichaa fi qajeelchitoonni sun ijoollee Ruubeenii fi ijoollee Gaad wajjin Gili'aaditti wal ga'ii godhatanii gara Kana'aanitti deebi'anii oduu achii fidan Israa'elootatti himan. ³³ Isaanis oduu kana dhaga'anii gammadanii Waaqa galateeffatan. Lammatas itti deebi'anii waa'ee isaanitti duuluu fi biyya gosti Ruubeenii fi gosti Gaad keessa jiraatu sana balleessuu hin dubbanne.

³⁴ Gosti Ruubeenii fi gosti Gaadis maqaa kanaan iddoo aarsaa sana moggaasan: Iddoon Aarsaa kun akka WAAQAYYOO Waaqa ta'e Nu Gidduutti Dhugaa Baatuu dha.

23

Haasaa Iyyaasuu Isa Dhumaa

¹ Erga barri dheeraan darbee WAAQAYYOS diinota isaan marsan hunda irraa Israa'eloota boqochiisee booddee Iyyaasuun bara dheeraa jiraatee dulloome; ² innis Israa'eloota hunda jechuunis maanguddoota isaanii, hooggantoota isaanii, abbootii murtii isaanitiifi fi qondaaltota isaanii ofitti waamee akkana jedheen: "Kunoo ani bara dheeraa jiraadhee dulloomeera. ³ Isin mataan keessanuu waan WAAQAYYO Waaqni keessan isiniif jedhee saboota kana godhe hundumaa argitaniirtu; WAAQAYYO Waaqa keessantu isiniif lole. ⁴ Akka ani itti biyya saboota hafanii jechuunis biyya saboota ani Yordaanosii jalqabee hamma lixa Galaana Guddichaatti mo'adhe sanaa hunda gosoota keessaniif dhaala godhee kenne mee yaadadhaa. ⁵ WAAQAYYO Waaqni keessan mataan isaa iyyuu fuula keessan duraa ari'ee isaan baasa. Inni fuula keessan duraa dhiibee isaan baasa; isin immoo akkuma WAAQAYYO Waaqni keessan isin abdachiise sanatti biyya isaanii qabattu.

⁶ "Jabaadhaa dhaabadhaa; akka waan Kitaaba Seera Musee keessatti barreeffame hunda, utuu gara mirgaatti yookaan bitaatti hin jal'atin jabeessaa eegaa. ⁷ Saboota gidduu keessanitti hafan kanneenitti hin makaminaa; maqaa waaqota isaanii hin dha'inaa yookaan ittiin hin kakatinaa. Waaqota sana hin tajaajilinaa yookaan isaanii hin sagadinaa. ⁸ Garuu akkuma hamma har'aatti gochaa turtan sana jabaadhaa WAAQAYYO Waaqa keessanitti maxxanaa.

⁹ "WAAQAYYO saboota gurguddaa fi humna qabeeyyii fuula keessan duraa ari'ee baaseera; hamma ammaatti namni tokko iyyuu isin dura dhaabachuu hin dandeenye. ¹⁰ Sababii WAAQAYYO Waaqni keessan akkuma waadaa gale sana isinii loluuf namni keessan tokkichi nama kuma tokko ari'a. ¹¹ Kanaafuu WAAQAYYO Waaqa keessan cimsaa jaalladhaa.

¹² "Garuu yoo isin karaa irraa jal'attanii hambaa saboota gidduu keessan jiraatan kanneeniitti maxxantan, yoo isin isaaniin walfuutaniis isaanitti makamtan, ¹³ akka WAAQAYYO Waaqni keessan si'achi saboota kanneen isin duraa ari'ee hin baafne beekkadhaa. Qooda kanaa isaan hamma isin biyya gaarii WAAQAYYO Waaqni keessan isiniif kenne kana keessaa dhumanitti iddaa fi kiyyoo isinitti ta'u; dugda keessanitti qacee, ija keessanittis qoraattii ta'u.

¹⁴ "Kunoo ani karaa lafa hundaa deemuufin jira. Akka waadaa gaarii WAAQAYYO Waaqni keessan isiniif gale hunda keessaa tokko iyyuu utuu hin guutamin hafee hin jirre isin garaa keessan guutuu fi lubbuu keessan guutuudhaan ni beektu. Waadaan hundi guutameera; tokko iyyuu hin hir'anne. ¹⁵ Garuu akkuma waadaan gaariin WAAQAYYO Waaqa keessanii hundi guutame sana, WAAQAYYO akkasuma waan hamaa ittiin isin sodaachise sana hunda hamma biyya gaarii isinii kenne kana irraa isin fixutti isinitti fida. ¹⁶ Yoo isin kakuu WAAQAYYO Waaqni keessan isin ajaje cabsitanii dhaqxanii waaqota biraa tajaajiltanii fi isaaniif sagaddan dheekkamsi WAAQAYYOO isinitti boba'a; isinis biyya gaarii inni isinii kenne sana irraa daftanii ni baddu."

24

Kakuu Sheekemitti Haaromfame

¹ Iyyaasuunis ergasii gosoota Israa'el hunda Sheekemitti walitti qabe. Innis maanguddoota, hooggantoota, abbootii murtii fi qondaaltota Israa'el walitti waame; isaanis fuula Waaqaa duratti dhi'aatan.

² Iyyaasuun saba hundaan akkana jedhe; "WAAQAYYO Waaqni Israa'el akkana jedha: 'Abbootiin keessan bara durii, Taaraa abbaa Abrahaamii fi Naahoor dabalatanii Laga gama jiraatanii waaqota biraa waaqeffatan. ³ Ani garuu abbaa keessan Abrahaam biyya Laga gamaatii fuudhee biyya Kana'aan keessa isa dabarsee sanyii baay'ee kenneef. Ani Yisihaaqin isaafan kenne; ⁴ Yisihaaqiif immoo Yaaqoobii fi Esaawun kenne. Biyyaa gaaraa See'iir Esaawufin kenne; Yaaqoobii fi ilmaan isaa garuu Gibxitti gad bu'an.

⁵ "Anis Musee fi Aroon ergee waanan achitti hojjedheen namoota Gibxi dha'ichaan dha'ee achii isin baase. ⁶ Yeroo ani abbootii keessan biyya Gibxi keessaa baasetti, isin gara galaanaa dhufan; warri Gibxi immoo gaariwwan lolaatii fi warra fardeen yaabbataniin hamma Galaana Diimaatti isaan hordofan. ⁷ Isaan gargaarsa barbaaduuf WAAQAYYOTTI iyyatan; innis isaanii fi warra Gibxi gidduu dukkana buuse; warra Gibxitti galaana fidee isaan ukkaamse. Isin waan ani warra Gibxi godhe ijuma keessaniin argitan. Ergasii isin bara dheeraa gammoojjii keessa jiraattan.

⁸ "Anis biyya Amoorota gama ba'a Yordaanos jiraachaa turan sanaatti isin nan fide. Isaanis isin lolan; ani garuu dabarsee harka keessanitti isaan kenne. Ani fuula keessan

duraa isaan nan barbadeesse; isinis biyya isaanii qabattan. ⁹ Baalaaq ilmi Ziphoori mootichi Mo'aab sun yeroo Israa'elitti duuluuf qophaa'etti akka inni isin abaaruuf Bala'aam ilma Be'ooritti dhaamsa ergate. ¹⁰ Ani garuu Bala'aamin hin dhaggeeffanne; kanaafuu inni irra deddeebi'ee isin eebbise; anis harka isaa keessaa isin nan baase.

¹¹ " 'Isinis ergasii laga Yordaanos ceetanii Yerikoo dhufтан. Jiraattonni Yerikoos akkuma Amooronni, Feerzonni, Kana'aanonni, Heetonni, Girgaashonni, Hiiwonni fi Yebuusonni godhan sana isin lolan; ani garuu dabarseen harka keessanitti isaan kenne. ¹² Ani sonsa isaanii fi mootota Amoorotaa lamaan fuula keessan duraa ari'ee baasu isin dura nan erge. Isin goraadee keessanii fi iddaa keessaniin isaan hin ariine. ¹³ Ani akkasiin biyya isin itti hin dadhabinii fi magaalaa isin hin ijaarin isiniifan kenne; isinis isaan keessa jiraatanii iddoo dhaabaa wayiniitii fi muka ejersaa kan ofii keessanii hin dhaabin irraa nyaattan.'

¹⁴ "Egaa WAAQAYYON sodaadhaatii amanamummaa guutuudhaan isa tajaajilaa. Waaqota abbootiin keessan Laga gamaa fi biyya Gibxitti waaqeffatan sana gataatii WAAQAYYON tajaajilaa. ¹⁵ Isin garuu yoo WAAQAYYON tajaajiluu hin barbaanne, waaqota abbootiin keessan Laga gamatti tajaajilaa turan sana yookaan waaqota Amoorotaa biyya isaanii keessa jiraattan kanneenii keessaa har'a filadhaa. Anii fi manni koo garuu WAAQAYYON waaqeffanna."

¹⁶ Sabnis akkana jedhee deebiseef; "Waaqota biraa tajaajiluudhaaf jennee WAAQAYYON dhiisuun nurraa haa fagaatu! ¹⁷ Kan biyya Gibxi, biyya garbummaa sana keessaa nuu fi abbootii keenya baasee waan mallattoowwan gurguddaa sana ija keenya duratti hojjetee WAAQAYYO Waaqa keenyaa dha. Inni karaa keenya hunda irrattii fi saboota nu gidduu isaanii tarre sana hunda gidduutti nu eege. ¹⁸ WAAQAYYO saboota hunda, Amoorota biyya sana keessa jiraachaa turanis fuula keenya duraa ari'ee baase. Sababii inni Waaqa keenya ta'eef nu WAAQAYYON tajaajilla."

¹⁹ Iyyaasuunis sabaan akkana jedhe; "Isin WAAQAYYON tajaajiluu hin dandeessan. Inni Waaqa qulqulluu dha. Inni Waaqa hinaafuu dha. Inni fincila keessanii fi cubbuu keessan isinii hin dhiisu. ²⁰ Yoo isin WAAQAYYON dhiiftanii waaqota ormaa tajaajiltan, inni ergama waan gaarii isinii godhee booddee garagalee balaa isinitti buusee isin balleessa."

²¹ Namoonni garuu Iyyaasuudhaan, "Lakki! Nu WAAQAYYON tajaajilla" jedhan.

²² Iyyaasuunis deebisee, "Isin akka WAAQAYYON tajaajiluu filattan ofii keessanitti dhugaa baatota taataniirtu" jedheen.

Isaanis deebisanii, "Eeyyee, nu dhugaa baatota" jedhan.

²³ Kana irratti Iyyaasuun, "Yoos amma waaqota ormaa kanneen isin gidduu jiran sana baasaa gataatii garaa keessan WAAQAYYO Waaqa Israa'elitti kennaa" jedheen.

²⁴ Sabnis Iyyaasuudhaan, "Nu WAAQAYYO Waaqa keenya tajaajilla; ni ajajamnaafis" jedhe.

²⁵ Iyyaasuun guyyaa sana sabaaf kakuu galee Sheekemitti ajajaa fi seera baase. ²⁶ Innis waan kana Kitaaba Seera Waaqaa keessatti barreesse. Dhagaa guddaa tokkos fuudhee iddoo qulqulluu WAAQAYYOO biratti qilxuu tokko jala dhaabe.

²⁷ Inni nama hundaan akkana jedhe; "Kunoo! Dhagaan kun dhugaa nutti ba'aa. Inni dubbii WAAQAYYO nutti dubbate hunda dhaga'eera. Yoo isin Waaqa keessaniif hin amanamin dhagaan kun dhugaa isinitti ba'a."

Iyyaasuun Du'uu Isaa

24:29-31 kwf - AbM 2:6-9

²⁸ Kanaafuu Iyyaasuun tokkoo tokkoo namaa gara dhaala mataa mataa isaatti erge.

²⁹ Sana booddee Iyyaasuun ilmi Nuuni, garbichi WAAQAYYOO sun, waggaa dhibba tokkoo fi kudhanitti du'e. ³⁰ Isaanis lafa dhaala isaa, Timnaat Seeraa kan biyya gaaraa Efreem keessatti karaa kaaba Tulluu Ga'aashitti argamtu sanatti isa awwaalan.

³¹ Sabni Israa'el bara jireenya Iyyaasuu guutuu fi bara maanguddoota erga inni du'ee as hafanii jiraatanii waan WAAQAYYO Israa'eliiif godhe hunda arganii keessa WAAQAYYON tajaajileera.

³² Lafeen Yoosif kan Israa'eloonni biyya Gibxii baasanii fidanis Sheekemitti lafa Yaaqoob meettii dhibba tokkoon ilmaan Hamoor, abbaa Shekem irraa bitee sanatti awwaalame. Lafti kunis dhaala sanyii Yoosif ta'e.

³³ Ele'aazaar ilmi Aroonis du'ee Gibe'aa lafa biyya gaaraa Efreem kan ilma isaa Fiinehaasiif ixaadhaan kenname keessatti awwaalame.

Kitaaba Abbootii Murtii

Israa'eloonni Kana'aanota Lolan

1:11-15 kwf - Iya 15:15-19

¹ Erga Iyyaasuun du'ee booddee Israa'eloonni, "Kana'aanota loluudhaaf eenyu dursee nuuf haa ba'u?" jedhanii WAAQAYYON gaafatan.

² WAAQAYYOS, "Yihuudaan dursee haa ba'u; kunoo, ani biyyattii dabarsee harka isaatti kenneera" jedhee deebiseef.

³ Namoonni Yihuudaas obboloota isaanii ilmaan Simi'ooniin, "Kottaa gara lafa qooda keenyaatti Kana'aanota loluuf wajjin baanaa; nus gama keenyaan gara lafa qooda keessaniitti isin wajjin ni baanaa" jedhan. Kanaafuu namoonni Simi'oon isaan wajjin ba'an.

⁴ Yommuu Yihuudaan ba'ettis WAAQAYYO Kana'aanotaa fi Feertzota dabarsee harka isaaniitti kenne; isaanis iddoo Bezeq jedhamutti nama kuma kudhan fixan. ⁵ Achittis Adoonii-Bezeq arganii isa lolan; Kana'aanotaa fi Feertzotas mo'atan. ⁶ Adoonii-Bezeq achii baqate; isaan garuu ari'anii isa qaban; quba abbuudduu harkaatii fi quba abbuudduu miilla isaa irraa kutan.

⁷ Ergasiis Adoonii-Bezeq, "Mootonni qubni abbuudduun harka isaaniitii fi qubni abbuudduun miilla isaanii irraa cirame torbaatamni waan maaddii koo jalatti harca'e funaannachaa turan. Amma garuu Waagni waanuma ani isaanitti hojjedhe naa deebise" jedhe. Isaanis Yerusaleemitti isa fidan; innis achitti du'e.

⁸ Namoonni Yihuudaa Yerusaleemiinis akkasuma dha'anii qabatan. Magaalattiis goraadeedhaan dha'anii ibidda itti qabsiisan.

⁹ Ergasiis namoonni Yihuudaa Kana'aanota biyya gaaraa, Negeebii fi gammoojjii karaa lixa biiftuu keessa jiraatan loluudhaaf gad bu'an. ¹⁰ Namoota Kana'aan kanneen Keeroon ishee dur Kiriyaati Arbaaq jedhamtu keessa jiraatanittis duulanii Sheeshaayiin, Ahiimanii fi Talmaayin mo'atan. ¹¹ Achii namoota biyya Debiir ishee dur Kiriyaati Seefer jedhamaa turte sana keessa jiraatanitti duulan.

¹² Kaalebis, "Ani nama Kiriyaati Seefer lolee qabatutti intala koo Aaksaa nan heerumsiisa" jedhe. ¹³ Obboleessi Kaaleb quxisuun, Otnii'eel ilmi Qenaz magaalatti qabate; Kaalebis intala isaa Aaksaa isatti heerumsiise.

¹⁴ Isheenis yeroo gara Otnii'eel dhufetti, akka inni abbaa ishee lafa qotiisaa kadhatu isa kakaafte. Kaalebis yommuu isheen harree ishee irraa buutetti, "Ani maal siif godhu?" jedhee ishee gaafate.

¹⁵ Isheenis deebiftee, "Waan addaa tokko naa godhi. Akkuma Negeeb keessatti lafa naa kennite sana burqaawwan bishaaniis naa kenni" jetteen. Kaalebis burqaawwan oliitii fi gadii kenneef.

¹⁶ Sanyiiwwan Qeenii namicha abbaa niitii Musee sanaa namoota gammoojjii Yihuudaa keessa Negeeb ishee Aaraad biratti argamtu keessa jiraatan gidduu jiraachuuf jedhanii namoota Yihuudaa wajjin Magaalaa Meexxiitii ol ba'an.

¹⁷ Namoonni Yihuudaa obboloota isaanii ilmaan Simi'oon wajjin dhaqanii Kana'aanota Zefaati keessa jiraatan waraanan; magaalattiis guutumaan guutuutti barbadeessan. Kanaafuu magaalattiin Hormaa jedhamtee waamamte. ¹⁸ Akkasumas namoonni Yihuudaa Gaazaa gandoota naannoo ishee wajjin, Ashqaloon gandoota naannoo ishee wajjin, Eqroon naannoo ishee wajjin qabatan.

¹⁹ WAAQAYYO namoota Yihuudaa wajjin ture. Kanaafuu isaan biyya gaaraa sana qabatan; garuu sababii namoonni dirree irra jiraatan gaariwwan sibiilaa qabaniif achii isaan baasuu hin dandeenye. ²⁰ Akkuma Museen abdachiisee turetti Keeroon Kaalebiif kennamte; innis ilmaan Aanaq sadan achii ari'ee baase. ²¹ Ijoolleen Beniyaam garuu Yebuusota Yerusaleem keessa jiraachaa turan sana achii baasuu hin dandeenye; hamma ammaatti Yebuusonni Beniyaamota wajjin iddoo sana jiraatan.

²² Gosti Yoosif immoo Beet'eel waraanan; WAAQAYYOS isaan wajjin ture. ²³ Yommuu isaan gara Beet'eel ishee dur Luuzi jedhamtutti basaastota erganitti, ²⁴ basaastonni sun namicha magaaladhaa ba'ee dhufu tokko arganii, "Karaa ittiin magaalaa seenan nu argisiisi; nus waan gaarii siif goona" jedhaniin. ²⁵ Innis itti argisiise; isaanis namicha sanaa fi maatii isaa guutuu dhiisanii magaalaa sana goraadeedhaan dha'an. ²⁶ Namichis gara Heetotaa deemee magaalaa Loozaa jedhamtu hundeesse; isheenis hamma ammaatti Luuzi jedhamtee waamamti.

²⁷ Minaaseen garuu namoota Beet She'aaniitii fi gandoota naannoo ishee yookaan Ta'anaakii fi gandoota naannoo ishee yookaan Doorii fi gandoota naannoo ishee yookaan Yible'aamii fi gandoota naannoo ishee yookaan Megidoo fi gandoota naannoo ishee jiraatan achii hin baafne; kanaafuu Kana'aannonni ittuma fufanii achi jiraachuuf murteeffatan. ²⁸ Israa'eloonni yommuu jabaachaa dhufanitti akka isaan hojii humnaa hojjetan isaan dirqisiisan malee Kana'aanota guutamaan guutuutti achii hin baafne. ²⁹ Efreemis Kana'aanota Geezir keessa jiraatan achii hin baafne; Kana'aannonni garuu ittuma fufanii achuma isaan gidduu jiraatan. ³⁰ Zebuuloonis Kana'aanota Qixroon yookaan Nahalol keessa jiraatan kanneen gidduu isaaniitti hafan hin baafne; garuu akka isaan hojii humnaa hojjetan godhan. ³¹ Aasheeris warra Akoo yookaan Siidoon yookaan Ahilaab yookaan Akziib yookaan Helbaa yookaan Afiqii fi Rehoob keessa jiraatan hin baafne; ³² namoonni Aasheer sababii isaan jara ari'anii hin baasiniif Kana'aanota biyya sana jiran gidduu jiraatan. ³³ Niiftaalem warra Beet Shemeshii fi Beet Anaati keessa jiraatan hin baafne; namoonni Niiftaalem garuu Kana'aanota biyya sana turan gidduu jiraatan; warri Beet Shemeshii fi Beet Anaati dirqamsiifamanii hojii humnaa hojjechaafii turan. ³⁴ Amooronni immoo warra Daan gara biyya gaaraatti dhiiban malee akka isaan sululatti gad bu'an hin eeyyamneef ture. ³⁵ Amooronnis itti fufanii Tulluu Herees irra, Ayaaloonii fi Sha'albiim keessa jiraatan; garuu yommuu humni mana Yoosif jabaachaa dhufetti isaanis hojii humnaa isaanii hojjechuuf dirqisiifaman. ³⁶ Daariin Amoorotaa Aqrabiimii jalqabee karaa Seelaatiin ol ba'a ture.

2

Ergamaa WAAQAYYOO Bookiim Keessatti

¹ Ergamaan WAAQAYYOO Gilgaalii Bookiimitti ol ba'ee akkana jedhe; "Ani Gibxii isin baasee biyya ani abbootii keessaniif kennuuf kakadhe sanatti isin fideera. Akkanas nan jedhe; 'Ani kakuu isin wajjin gale sana gonkumaa hin diigu; ² isinis warra lafa kana irra jiraatan wajjin kakuu hin galinaa; iddoo aarsaa isaanii garuu caccabsaa.' Ta'us isin naaf hin ajajamne. Isin maaliif waan kana gootan? ³ Kanaafuu ani amma akka fuula keessan duraa ari'ee isaan hin baafne isinitti nan hima; isaan iddaa isinitti ta'u; waqonni isaanii immoo kiyyoo isinitti ta'u."

⁴ Yeroo ergamaan WAAQAYYOO waan kana Israa'eloota hundatti dubbatetti namoonni sagalee isaanii ol fudhatanii bo'o'an; ⁵ isaanis iddoo sana Bookiim jedhanii waaman. Achittis WAAQAYYOOOF aarsaa dhi'eessan.

Ajajamuu Diduu fi Mo'atamuu

2:6-9 kwf - Iya 24:29-31

⁶ Erga Iyyaasuun Israa'eloota gad dhiisee booddee tokkoon tokkoon isaanii biyyattii dhaaluuf gara dhaala ofii isaanii deeman. ⁷ Uummanni bara jireenya Iyyaasuu guutuu fi bara maanguddoota erga inni du'ee as hafanii jiraatanii waan guddaa WAAQAYYOO Israa'eliif godhe argan sunis WAAQAYYON tajaajilan.

⁸ Iyyaasuun ilmi Nuuni garbichi WAAQAYYOO waggaa dhibba tokkoo fi kudhanitti du'e. ⁹ Isaanis lafa dhaala isaa Timnaat Herees kan biyya gaaraa Efreemitti karaa kaaba Tulluu Ga'aashitti argamtu sanatti isa awwaalan.

¹⁰ Erga dhaloonni sun guutuu gara abbootii isaaniitti walitti qabamanii booddee dhaloonni WAAQAYYON hin beekin yookaan waan inni saba Israa'eliif godhe hin beekin kan biraa ka'e. ¹¹ Israa'eloonnis fuula WAAQAYYOO duratti waan hamaa hojjetan; Ba'aaliinis ni tajaajilan. ¹² Isaan WAAQAYYOO Waaqa abbootii isaanii kan Gibxii isaan baase sana ni dhiisan. Waaqota adda addaa kanneen saboota naannoo isaanii jiraatanii duukaa bu'an; ni waaqeffatan. WAAQAYYONIS dheekkamsaaf kakaasan; ¹³ isaan isa dhiisanii Ba'aalii fi Ashtootetin waaqeffataniiruutti. ¹⁴ WAAQAYYOS Israa'elootatti dheekkamee saamtota isaan saamanitti dabarsee isaan kenne. Diinota naannoo isaanii kanneen isaan of irraa ittisuu hin dandeenye hundatti isaan gurgure. ¹⁵ Yommuu Israa'eloonni lolaaf ba'anitti akkuma inni duraan kakate sanatti harki WAAQAYYOO isaanitti hammaatee akka isaan mo'ataman godha ture. Isaanis rakkinna guddaa keessa bu'an.

¹⁶ WAAQAYYOS abbootii murtii kanneen saamtota jalaa isaan baasan isaaniif kaase. ¹⁷ Isaan garuu waaqota biraa wajjin sagaagalanii isaan waaqeffatan malee abbootii murtii sana hin dhaggeeffanne. Karaa abbootiin isaanii WAAQAYYOOOF ajajamuudhaan irra deema turan sana irraa dafanii jal'atan; isaan waan abbootiin isaanii godhan hin goone. ¹⁸ WAAQAYYOO yeroo abbaa murtii tokko isaanii kaasetti hamma abbaan murtii sun jirutti isa wajjin jiraatee harka diinota isaanii jalaa isaan baasa ture; WAAQAYYOO yeroo isaan sababii warra isaan cunqursanii fi warra isaan miidhaniitiin wawwaatanitti garaa

laafaaf tureetii. ¹⁹ Yommuu abbaan murtii sun du'u garuu isaan waaqota biraa duukaa bu'uudhaan, tajaajiluu fi isaan waaqeffachuudhaan abbootii isaanii iyyuu caalaa gara hamminaatti deebi'an. Hojii hamminaatii fi mataa jabina isaanii irraas hin deebi'an ture.

²⁰ Kanaafuu WAAQAYYO Israa'elitti akka malee dheekkamee akkana jedhe; "Waan sabni kun kakuu ani abbootii isaatiif gale sana cabsee anas dhaga'uu dideef, ²¹ ani si'achi saboota Iyyaasuun yeroo du'etti isaan gidduutti dhiise sana isaan duraa ari'ee hin baasu. ²² Karaa saboota kanaatiinis akka isaan akkuma abbootii isaanii karaa WAAQAYYOO eeganii irra deddeebi'anii fi akka isaan hin eegne ilaaluu jedhee Israa'elin nan qora." ²³ Kanaafuu WAAQAYYO akka saboonni kunneen achumatti hafan eeyyame; harka Iyyaasuuttis dabarsee isaan kennuudhaan dafee achii isaan hin baafne.

3

¹ Saboonni WAAQAYYO Israa'eloota waraana Kana'aan keessatti deemsifame kam iyyuu irratti hirmaatanii hin beekin hunda qoruuf jedhee idduma isaan turanitti hambise kanneenii dha; ² innis akka Israa'eloonni kanaan dura waraana keessatti hirmaatanii hin beekin muuxannoo argataniif waan kana godhe; ³ kanneen utuu hin ba'in achumatti hafanis: bulchitoota Filisxeemotaa shanan, Kana'aanota hunda, Siidoonotaa fi Hiiwota Tulluu Ba'aal Hermoonii jalqabani hamma balbala Hamaatitti gaarran Libaanoon gubbaa jiraatanii dha. ⁴ Isaan kunneen warra Israa'eloonni ajaja WAAQAYYOO kan inni karaa Museetiin abbootii isaaniiif kennee ture sana eeguu fi eeguu baachuu isaanii ittiin qoramanii ilalamaniif hambifamanii dha.

⁵ Kanaafuu Israa'eloonni Kana'aanota, Heetota, Amoorota, Feerzota, Hiiwotaa fi Yebuusota gidduu jiraatan. ⁶ Isaanis intallan jaraa fuudhan; intallan ofii isaanii immoo ilmaan isaaniitti heerumsisan; waaqota isaaniis ni waaqeffatan.

Otnii'eel

⁷ Israa'eloonni fuula WAAQAYYOO duratti waan hamaa hojjetan; WAAQAYYO Waaqa isaanii irraanfatanii Ba'aalii fi Asheeraa waaqeffatan. ⁸ Aariin WAAQAYYO Israa'elootatti boba'e; kanaafuu mootii Phaadaan Arraam Kuushan-Rishaataayimitti dabarsee isaan gurgure; Israa'eloonnis waggaa saddeeti isa jalatti bulan. ⁹ WAAQAYYO garuu yeroo isaan gara isaatti iyyatanitti nama isaan furu tokko jechuunis obboleessa Kaaleb quxisuu, Otnii'eel ilma Qenaz sana akka inni isaan furuuf kaaseef. ¹⁰ Hafuurri WAAQAYYOO isa irra bu'e; kanaafuu inni abbaa murtii Israa'elootaa ta'ee duulaaf ba'e. WAAQAYYOS Kuushan-Rishaataayim mooticha Phaadaan Arraam sana dabarsee harka Onnii'elitti kenne; innis isa mo'ate. ¹¹ Kanaafuu biyyi sun hamma Otnii'eel ilmi Qenaz du'utti waggaa afurtama nagaa argate.

Naa'od

¹² Ammas Israa'eloonni fuula WAAQAYYOO duratti waan hamaa hojjetan; sababii isaan waan hamaa kana hojjetaniif WAAQAYYO akka Egloon mootiin Mo'aab harka isaa isaanitti cimsuuf dabarsee isaan kenne. ¹³ Innis Amoonotaa fi Amaaleqoota walitti qabatee Israa'eloota waraane; isaanis Magaalaa Meexxii qabatan. ¹⁴ Israa'eloonni waggaa kudha saddeet Egloon mootii Mo'aab jalatti bulan.

¹⁵ Israa'eloonni ammas gara WAAQAYYOOTTI iyyatan; innis nama isaan furu tokko jechuunis Eehuud nama harka bitaachaa, ilma Geeraa sana gosa Beniyaam keessaa isaanii kaase. Israa'eloonnis akka inni Egloon mootii Mo'aab sanaaf gibira geessu Naa'odin ergan. ¹⁶ Eehuudis goraadee gama lamaan qara qabu kan meetira walakkaa dheeratu tolfatee uffata isaa jalaan tafa mirgaatti hidhate. ¹⁷ Gibira sana Egloon mooticha Mo'aab namicha akka malee furdaa ture sanaaf dhi'eesse. ¹⁸ Naa'od erga gibira sana dhi'eessee booddee namoota baataniifi dhufan geggeesse. ¹⁹ Inni garuu iddoo dhagaan baafamu kan Gilgaal biratti argamu bira ga'ee duubatti deebi'uudhaan, "Yaa mootii ani waan dhoksaatti sitti himu tokko qaba" jedhe.

Mootichis, "Cal'isaa!" jedhe; warri isa bira turan hundinuus isa dhiisanii ba'an.

²⁰ Utuu mootichis kutaa mana isaa iddoo qabbanaa'aa tokko kophaa isaa taa'ee jiruu Eehuud itti dhi'aatee, "Ani ergaa Waaqa biraa siif ergame qaba" jedheen. Egloonis teessoo isaa irraa ol ka'e; ²¹ Eehuud harka isaa bitaa diriirsee tafa mirga isaa irraa goraadee luqqifatee garaa mootichaa keessa fullaase. ²² Qabannoon isaas utuu hin hafin garaa seenee sibiilli isaa duubaan ba'e. Naa'od goraadicha garaa mootichaa keessaa hin buqqifne; moorris goraadee sana haguugee ture. ²³ Ergasiis Eehuud Egloonitti balbala cufee karaa borootiin ba'ee qajelee.

²⁴ Erga Eehuud deemee booddee tajaajiltoonni mootichaa dhufan; balbala kutaa mana ol aanuus akkuma inni cufamee jirutti argan. Isaanis, "Tarii inni mana boolii gad taa'ee

jira ta'a" jedhan. ²⁵ Hamma dadhabanittis eegan; garuu waan inni utuu balbala hin banin tureef furtuu fudhatanii balbala banan. Kunoo gooftaan isaanii du'ee lafa irra diriiree ture.

²⁶ Utuma isaan dhaabatanii eegaa jiranuu Eehuud fagaatee deeme. Karaa lafa dhagaan itti soofamuutiin darbee gara Se'iiraatti baqate. ²⁷ Innis yommuu achi ga'etti biyya gaaraa Efreem keessatti malakata afuufe; Israa'eloonnis hooggantummaa isaatiin biyya gaaraa sana irraa isa wajjin gad bu'an.

²⁸ Eehuudis, "Diina keessan Mo'aabin WAAQAYYO dabarsee harka keessanitti isinii kenneeraatii na duukaa bu'aa!" jedheen. Isaanis malkaa Yordaanos kan gara Mo'aabitti geessu sana qabatanii nama tokko illee achiin darbuu dhowwan. ²⁹ Yeroo sanatti Mo'aabota hundi isaanii jajjaboo fi humna qabeeyyii ta'an kuma kudhan fixan; namni tokko iyyuu isaan jalaa hin baane. ³⁰ Gaafa sana Mo'aab harka Israa'elitti galfamte; biyyattiinis waggaa saddeettamaaf nagaa argatte.

Shamgaar

³¹ Eehuuditti aanee Shamgaar ilmi Anaat ka'e; innis ulee ittiin qotiyyoo tuttuqaniin Filisxeemota dhibba ja'a fixe. Akkasiinis Israa'eloota baraare.

4

Debooraa

¹ Erga Eehuud du'ee booddee Israa'eloonni ammas fuula WAAQAYYOO duratti waan hamaa hojjetan. ² Kanaafuu WAAQAYYO Yaabiin mootii Kana'aa kan Haazoor taa'ee bulchaa turetti dabarsee isaan gurgure. Ajajaan loltoota isaa Siisaaraa jedhama ture; innis Harooshet Hagooyim keessa jiraata ture. ³ Inni sababii gaariwwan sibiilaa dhibba sagal qabuuf waggaa digdama akka malee Israa'eloota hacuuce; isaanis gargaarsa barbaacha WAAQAYYOTTI iyyatan.

⁴ Yeroo sanatti niitiin Lafiidoot Debooraan raajittiin Israa'elin bulchaa turte. ⁵ Isheenis biyya gaaraa Efreemitti Muka Meexxii Debooraa kan Raamaa fi Beet'eel gidduutti argamu sana jala teessee murtii kenna turte. Sabni Israa'elis murtii argachuuf gara ishee dhufaa ture. ⁶ Isheenis Baaraaqi ilma Abiinoo'am biyya Niftaalem magaalaa Qadashiiitii waamsifatee akkana jetteen; "WAAQAYYO Waaqni Israa'el akkana jedhee si ajaja; 'Ka'i; gosa Niftaalemii fi gosa Zebuuloon keessaa nama kuma kudhan fudhadhuutii Tulluu Taabooriitti ol ba'i. ⁷ Anis Siisaaraa, ajajaa loltoota Yaabiin sana gaariwwan lolaatii fi loltoota isaa wajjin akka inni gara Laga Qiishoonitti ba'u nan kakaasa; isas harka keetti dabarsee nan kenna."

⁸ Baaraaqis, "Yoo ati na wajjin deemte, ani nan deema; yoo ati na wajjin hin deemin garuu anis hin deemu" jedheen.

⁹ Debooraanis, "Ani dhugumaan si faana nan deema. Yoo ati haala kanaan deemte garuu ulfinni si'iif hin ta'u; WAAQAYYO dabarsee Siisaaraa harka dubartiitti kennaatii" jetteen. Kanaafuu Debooraan Baaraaqi faana gara Qaadash deemte; ¹⁰ Baaraaqis achitti namoota gosa Zebuuloonii fi gosa Niftaalem walitti waame. Namoonni kuma kudhan isa duukaa bu'an; Debooraanis isa faana deemte.

¹¹ Yeroo sanatti Hebeer namichi gosa Qeen abbaan niitii Musee sun Qeenota ilmaan Hoobaab kaan irraa citee Qaadash biratti lafa Za'anaaniim jedhamutti qilxuu guddaa jala dukaana isaa dhaabbatee ture.

¹² Siisaaraan yommuu akka Baaraaqi ilmi Abiinoo'am sun gara Tulluu Taabooriitti ol ba'ee dhaga'etti, ¹³ gaariwwan sibiilaa dhibba sagalii fi loltoota isaa kanneen Harooshet Hagooyimii hamma Laga Qiishoonitti argaman hundumaa walitti baqate.

¹⁴ Kana irratti Debooraan Baaraaqiin, "Ka'i! Guyyaan WAAQAYYO Siisaaraa dabarsee harka keetti kenne har'a. Kunoo WAAQAYYO si dura ba'eera" jette. Kanaafuu Baaraaqi namoota kuma kudhan fudhatee Tulluu Taaboora irraa gad bu'e. ¹⁵ WAAQAYYOS akka Siisaaraan, gaariwwan isaatii fi loltoonni isaa hundinuu goraadeedhaan fuula Baaraaqi duratti mo'atamanii duubatti deebi'an godhe; Siisaaraan gaarii isaa irraa bu'ee miillaan baqate.

¹⁶ Baaraaqi garuu gaariwwanii fi loltoota Siisaaraa hamma Harooshet Hagooyimiitti ari'e; loltoonni Siisaaraa hundinuu goraadeedhaan dhuman. Namni tokko iyyuu hin hafne. ¹⁷ Siisaaraan garuu sababii Yaabiin mooticha Haazoorii fi Hebeer namicha balbala Qeen sana gidduu hariiroon gaariin tureef gara dukaana Yaa'eel niitii Hebeer sanaatti miillaan baqate.

¹⁸ Yaa'eelis Siisaaraa simachuuf gad baatee, "Kottu yaa gooftaa koo; kottu ol seeni; hin sodaatin" isaan jette. Innis dukaana ishee seene; isheenis wayyaa isa irra buuftee dhoksite.

¹⁹ Innis, “Ani dheebodheera; maaloo bishaan naa kenni” jedheen. Isheenis qabee aannanii bantee waan inni dhugu kenniteefii isa dhoksite.

²⁰ Innis, “Balbala dunkaanana dura dhaabadhu; yoo eenyu iyyuu dhufee, ‘Namni as jiraa?’ siin jedhe, ‘hin jiru’ jedhi” isheen jedhe.

²¹ Yaa’eel niitiin Hebeer garuu utuu Siisaaraan hirriba cimaa keessa jiruu qofoo dunkaanana fi burruusa fudhattee suuta jettee bira geesse. Qofoo sanaanis isa waraantee lafatti hodhite; innis ni du’e.

²² Yommuu Baaraaqi Siisaaraa duukaa bu’ee dhufettis, Yaa’eel isa simachuudhaaf gad baatee, “Kottu nama ati barbaaddu sittan argisiisaa” jetteen. Kanaafuu inni ishee wajjin gara dunkaanichaatti ol seenee Siisaaraa akkuma illeen isaa qofoodhaan waraanametti reeffa isaa arge.

²³ Waaqnis gaafa sana akka Yaabiin mootiin Kana’aanotaa fuula Israa’elootaa duratti mo’atamu godhe. ²⁴ Harki Israa’elootaas hamma isaan Yaabiin mooticha Kana’aanotaa galaafatanitti jajjabaachaa deeme.

5

Faarfannaa Debooraa

¹ Gaafas Debooraa fi Baaraaqi ilmi Abiinoo’am akkana jedhanii faarfatan:

² “Yommuu ilmaan moototaa Israa’elin hoogganan,
yommuu sabni Israa’elis jaallatee of kennutti
WAAQAYYON galateeffadhaa!

³ “Yaa mootota, waan kana dhaga’aa! Bulchitoonnis dhaggeeffadhaa!
WAAQAYYON nan faarfadha; amma illee nan faarfadha;
WAAQAYYO Waaqa Israa’eliif nan weeddisa.

⁴ “Yaa WAAQAYYO, yeroo ati biyya See’iirii baate,
yeroo ati biyya Edoomii kaate,
lafti ni sochoote; samiiwwanis bokkaa,
duumessoonnis bishaan gad roobsan.

⁵ Tulluuwwan fuula WAAQAYYO Waaqa Siinaa duratti,
fuula WAAQAYYO Waaqa Israa’el duratti ni raafaman.

⁶ “Bara ilma Anaat, jabana Shamgaar,
bara Yaa’eel keessa daandiiwwan ni onan;
karaa deemtonnis daandii jajal’aa irra deeman.

⁷ Hamma ani Debooraan,
haadha ta’ee Israa’eliif ka’utti,
gandoonni Israa’el duwvaa hafu.

⁸ Yommuu isaan waaqota haaraa filatanitti,
waraanni hamma karra magaalatti dhufe;
gaachanni yookaan eeboon tokko,

Israa’eloota kuma afurtama gidduutti hin argamne.
⁹ Garaan koo bulchitoota Israa’el kanneen fedhiidhaan
saba gidduutti argaman wajjin jira.
WAAQAYYON leellisaa!

¹⁰ “Isin warri harroota adaadii yaabbatan,
warri kooraa baladii qabu irra teessan,
warri karaa irra deemtan hubadhaa;

¹¹ sagalee faarfattootaa dhaga’aa.
Isaan hojii qajeelummaa WAAQAYYOO,
hojii qajeelummaa loltoonni isaa Israa’el keessatti godhan odeessu.

“Ergasii saboonni WAAQAYYOO,
gara karra magaalattiitti gad bu’an.

¹² ‘Yaa Debooraa! Dammaqi; dammaqi;
dammaqi; dammaqi; faarfannaas faarfadhu!

Yaa Baaraaqi! Dammaqi;
yaa ilma Abiinoo’am booji’amtoota kee booji’ii fudhadhu.’

- 13 “Nameoonni hafanis, gara warra gurguddaatti gad bu’an;
sabni WAAQAYYOOS, akka loltuu jabaatti gara koo dhufe.
- 14 Warri hiddi isaanii Amaaleq keessa jiru tokko tokkos Efreem dhufan;
Beniyaamis namoota si duukaa bu’an wajjin ture.
Ajajjoonni loltoota Maakiir,
warri bokkuu ajajjuu qabatanis Zebuuloonii gad bu’an.
- 15 Hangafoonni Yisaakor Debooraa wajjin turan;
Yisaakoris Baaraaqi wajjin ture;
innis Baaraaqi wajjin gara sululaatti gad bu’e.
Gosa Ruubeen gidduu,
qorannoo yaadaa guddaatu ture.
- 16 Ati maaliif mar’achuu isaanii dhaga’uuf jettee
gola bushaayee keessa turte?
Gosa Ruubeen gidduu,
qorannoo yaadaa guddaa isaatu ture.
- 17 Gili’aad Yordaanos gama taa’e;
Daan maaliif dooniiwwan keessatti hafe?
Aasheer qarqara galaanaatti hafe;
buufata isaa keessas ture.
- 18 Sabni Zebuuloon du’aaf of saaxile;
Niftaalemis gaarran biyya isaa irratti akkasuma godhe.
- 19 “Mootonni dhufanii lolan;
mootonni Kana’aanis Ta’anaakitti
bishaanota Megidoo biratti lolan;
boojuu meetii tokko illee hin fudhanne.
- 20 Samii keessaa urjiiwwan ni lolan;
adeemsa isaanii irrattis Siisaaraadhaan lolan.
- 21 Lagni durii, lagni Qiishoon,
lagni Qiishoon sun haxaa’ee isaan fudhate.
Yaa lubbuu ko, jabaadhuu fuul duratti deemi!
- 22 Kotteen fardeenii guddisee didiche;
ni gulufan; jabeessaniis gulufan.
- 23 Ergamaan WAAQAYYOOS, ‘Meerozin abaaraa.
Saba ishees jabeessaatii abaaraa;
akka WAAQAYYO warra jajjabootti ka’u gargaaruudhaaf,
isaan WAAQAYYON gargaaruudhaaf hin dhufneetii’ jedhe.
- 24 “Yaa’eel niitiin Hebeer Qeenichaa sun
dubartoota hunda keessaa haa eebbifamtu;
isheen dubartoota dunkaana keessa jiraatan hunda keessaa haa eebbifamtu.
- 25 Inni bishaan kadhate; isheen immoo aannan kenniteef;
qabee ulfinaatti ittutuu dhi’eessiteef.
- 26 Harka ishee gara qofoo dunkaanaatti hiixatte;
harka ishee mirgaatiin burruusa fudhatte;
isheenis Siisaaraa dhoofttee mataa isaa buruqsite;
waraantees illee isaa keessa fullaafte.
- 27 Innis miilla ishee jalatti gombifame;
kufee diriirees.
Miilla ishee jalatti gombifame; ni kufe;
iddoo gombifamettis kufee du’e.
- 28 “Haati Siisaaraa foddaa keessaan gad ilaalte;
qaawwa keessaanis iyyitee,
‘Gaariin isaa maaliif dhufuuf lafa irra harkifate?
Didichuun gaariwwan isaa maaliif ture?’ jette.
- 29 Dubartoota ishee keessaa isheen ogeettiin deebii kenniteef;
ta’us isheen ofuma isheetiin deebiftee,
- 30 ‘Isaan boojuu argatanii addaan qoodachuutti jiru mitii?
Tokkoon tokkoon namaa dubartii tokko tokko
yookaan lama lama argata mitii?’

Siisaraadhaaf uffanni boojuu kan halluudhaan faayeffame,
uffanni halluudhaan miidhagfamee hodhame,
morma kootiif immoo uffata akka malee
miidhagfamee hodhame qoodu mitii?
Kun hundi boojuu dha.’

31 “Kanaafuu yaa WAAQAYYO, diinonni kee hundi haa barbadaa’ani!
Warri si jaallatan garuu akka biiftuu,
ishee humna guutuun baatu sanaa haa ta’an.”
Ergasii biyyattiin waggaa afurtama nagaa argatte.

6

Gidewoon

¹ Israa’eloonni fuula WAAQAYYOO duratti waan hamaa hojjetan; innis dabarsee waggaa torbaaf harka Midiyaanotaatti isaan kenne. ² Israa’eloonni sababii harki Midiyaanotaa isaanitti jabaateef tulluuwwan irratti, holqaa fi da’annoo jabaa keessatti ofii isaaniiitiif iddoo jiraatanii fi iddoo itti da’atan qopheeffatan. ³ Yeroo Israa’eloonni midhaan facaafatan hunda Midiyaanonni, Amaaleqoonnii fi namoonni ba’a biiftuu kaan dhufanii isaan weeraru turan. ⁴ Achis qubatanii midhaan hamma Gaazaatti jiru hundumaa balleessan; isaan waan lubbuu qabu hoolota, loon yookaan harroota tokko illee Israa’elootaaf hin hambifne. ⁵ Akkuma tuuta hawwaannisaaattis horii fi dunkaana isaanii fudhatanii isaan irra yaa’an. Namootaa fi gaalawwan isaanii lakkaa’uun hin danda’amu ture; isaanis biyya sana barbadeessuudhaaf weeraran. ⁶ Sababii Midiyaanonni akka malee isaan hiyyoomsaniif Israa’eloonni gargaarsa barbaacha gara WAAQAYYOOTTI iyyatan.

⁷ Yeroo Israa’eloonni sababii Midiyaanotaatiif gara WAAQAYYOOTTI iyyatanitti, ⁸ inni raajii akkana jedhee dubbatu tokko isaaniiif erge; “WAAQAYYO Waaqni Israa’el akkana jedha: Ani biyya Gibxi, biyya garbummaatii baaseen isin fide. ⁹ Ani humna warra Gibxii fi harka cunqursitootaa jalaa isin furee fuula keessan duraas ari’ee isaan baasee biyya isaanii isinii kenneera. ¹⁰ Isiniinis, ‘Ani WAAQAYYO Waaqa keessan; waaqota Amoorotaa kanneen isin biyya isaanii keessa jiraattan sanaa hin waaqeffatinaa’ jedheera. Isin garuu sagalee koo hin dhageenye.”

¹¹ Ergamaan WAAQAYYOS ganda Ofraa jedhamu dhufee qilxuu Yoo’aash namicha sanyii Abii’ezer sanaa jala taa’ee; Gidewoon ilmi Yoo’aash immoo akka Midiyaanonni hin argineef iddoo wuliniin itti cuunfamutti dhoksee qamaadii dha’ata ture. ¹² Ergamaan WAAQAYYOS isatti mul’atee, “Yaa loltuu goota nana, WAAQAYYO si wajjin jira” jedheen.

¹³ Gidewoon garuu akkana jedhee deebise; “Garuu yaa gooftaa, utuu WAAQAYYO nu wajjin jiraatee wanni kun hundi maaliif nurra ga’a? Dinqiiwwan isaa kanneen abbootiin keenya, ‘WAAQAYYO biyya Gibxiitti nu baaseera’ jedhanii nutti himan sun hundi eessa jiru ree? Amma garuu WAAQAYYO nu dhiisee harka Midiyaanotaatti dabarsee nu kenneera.”

¹⁴ WAAQAYYO gara Gidewoonitti garagalee, “Humna qabdu kanaan dhaqiiiti harka Midiyaanotaa jalaa Israa’eloota bilisa baasi. Anatu si ergaa jira mitii?” jedheen.

¹⁵ Gidewoon garuu, “Yaa Gooftaa, gosti koo sanyii Minaasee keessaa baay’ee dadhabaa dha; anis maatii koo keessaa nama gad aanaa dha. Egaa ani akkamittin saba Israa’el bilisoomsuu danda’a ree?” jedhee gaafate.

¹⁶ WAAQAYYOS, “Ani si wajjin jira; atis Midiyaanota hunda walitti qabdee dhoofaa” jedhee deebiseef.

¹⁷ Gidewoonis akkana jedhee deebise; “Yoo ani fuula kee duratti surraa argadhee jiraadhe, kan natti dubbachaa jiru dhugumaan si’i ta’uu mallattoo na argisiisi. ¹⁸ Maaloo hamma ani deebi’ee aarsaa koo fidee fuula kee duratti dhi’eessutti hin deemin.”

WAAQAYYOS, “Ani hamma ati deebitutti sin eega” jedheen.

¹⁹ Gidewoon gara mana isaa deemee ilmoo re’ee tokko qalee qopheessee daakuu iifii tokkoo fuudhee buddeena raacitii hin qabne tolche. Foon sanas gundoo irra kaa’ee bishaan foon sanaa immoo okkoteetti naqee fiduudhaan qilxuu jalatti aarsaa isaa fi dhi’eesse.

²⁰ Ergamaan Waaqaas, “Foonii fi Maxinoo kana fuudhiitti kattaa kana irra kaa’i; bishaan isaa immoo dhangalaasi” jedhe. Gidewoonis akkasuma godhe. ²¹ Ergamaan WAAQAYYOO sunis fiixee ulee harka isaa tureetiin foonii fi Maxinoo sana tuqe. Ibiddi kattaa keessaa ba’ee foonii fi Maxinoo sana nyaate. Ergamaan WAAQAYYOS fuula

isaa duraa dhabame. ²² Gidewoon yommuu akka ergamaa WAAQAYYOO arge beeketti, “Wayyoo, yaa WAAQAYYO Gooftaa! Ani ifaan ifatti ergamaa WAAQAYYOO argeeraatii!” jedhe.

²³ WAAQAYYO garuu, “Nagaan siif haa ta’u! Hin sodaatin, ati hin duutuutii” jedheen.

²⁴ Kanaafuu Gidewoon WAAQAYYOO achitti iddoo aarsaa ijaaree, “WAAQAYYO Nagaa dha” jedhee moggaase. Iddoon aarsaa kun hamma har’aatti lafa Abii’ezerootaa irra iddoo Ofraa jedhamu dhaabateera.

²⁵ WAAQAYYO halkanuma sana akkana isaan jedhe; “Karra loon abbaa keetii keessaa korma lammaffaa kan waggaa torba guute tokko fuudhi. Iddoo aarsaa kan abbaan kee Ba’aaliif tolche diigi; utubaa Aasheeraa kan isa bira dhaabames jigs. ²⁶ Fiixee gaara kanaa irrattis WAAQAYYO Waaqa keetiif iddoo aarsaa bareedaa isaa tolchi. Qoraan utubaa Aasheeraa kan jigsite sanattis fayyadamii korma lammaffaa sana aarsaa gubamu godhiitii dhi’eessi.”

²⁷ Gidewoonis hojjetoota isaa keessaa nama kudhan fudhatee akkuma WAAQAYYO isatti hime sana godhe. Garuu waan maatii isaatii fi namoota magaalaa sana jiraatan sodaateef guyyaa adiin gochuu irra halkan filate.

²⁸ Ganama barii yommuu namoonni magaalaa sanaa hirribaa ka’anitti iddoon aarsaa Ba’aal diigamee, utubaan Aasheeraas kufee kormi lammaffaan iddoo aarsaa haaraa tolfame sana irratti qalamee ture!

²⁹ Isaanis, “Eenyutu waan kana hojjete?” jedhanii wal gaafatan.

Yommuu gad fageenyaan qoratanittis, “Gidewoon ilma Yoo’aashitu waan kana godhe” jedhan.

³⁰ Namoonni magaalaa sanaas Yoo’aashiin, “Ilma kee gad baasi. Inni sababii iddoo aarsaa Ba’aal diigee utubaa Aasheeraas jigseef ajjeefamuu qaba” jedhan.

³¹ Yoo’aash garuu saba aariidhaan guutamee isa marse sanaan akkana jedhe; “Isin Ba’aaliif falmuu barbaaddu? Isas oolchuu feetuu? Namni isaaf falmu yoo jiraate inni ganama haa du’u! Ba’aal utuu dhugumaan Waaqa ta’ee yommuu namni tokko iddoo aarsaa isaa diigu inni of irraa dhowwu danda’a ture.” ³² Kanaafuu isaan sababii inni iddoo aarsaa isaa jalaa diigeef, “Ba’aal mataan isaa haa falmatu” jechuudhaan Gidewooniin, “Yerub-Ba’aal” jedhanii waaman.

³³ Ergasiis Midiyaanonni hundi, Amaaleqoonnii fi namoonni karaa ba’a biiftuu humna isaani walitti dabalatanii Yordaanos ce’uudhaan Sulula Yizri’eel keessa qubatan.

³⁴ Hafuurri WAAQAYYOS dhufee Gidewoon irra bu’e; innis akka Abii’ezeroonni isa duukaa bu’aniif waamuuf malakata afuufe. ³⁵ Guutummaa Minaasee keessas ergamoota ergate; isaanis isa duukaa bu’uuf walitti qabaman; akkasumas gara Aasheer, Zebuuloonii fi Niftaalemitti ergate; isaanis jara simachuuf gad yaa’an.

³⁶ Gidewoonis Waaqaan akkana jedhe; “Yoo ati akkuma waadaa galtetti harka kootiin Israa’el furte, ³⁷ kunoo, ani wayyaa rifeensa hoolaa irraa hojjetame tokko oobdii irra nan diriirsa. Yoo rifeensa hoolaa sana qofa irra fixeensi bu’ee lafti immoo goggogaa ta’e, ani akka ati akkuma jette sana harka kootiin Israa’el furto nan beeka.” ³⁸ Wannis sunis akkasuma ta’e. Gidewoonis guyyaa itti aanu ganamaan ka’e; yeroo inni wayyaa rifeensa hoolaa irraa hojjetame sana micciirettis bishaan waciitii guutuutu keessaa cuunfame.

³⁹ Kana irratti Gidewoon Waaqaan, “Natti hin dheekkamin. Amma illee waan tokkon si gaafadha. Akka ani rifeensa hoolaa sana irratti yaalii biraa godhuuf naa eeyyami. Amma immoo rifeensa sana goggogsiitii fixeensa lafatti uffisi.” ⁴⁰ Waaqnis halkan sana akkasuma godhe. Rifeensa hoolaa sana qofatu goggogaa ture; lafti guutuun fixeemsaan haguugamee ture.

7

Gidewoon Midiyaanota Mo’ate

¹ Yerub-Ba’aal namichi Gidewoon jedhamu sunii fi namoonni isaa hundi ganama ka’anii burqaa Harood bira qubatan. Qubanni Midiyaanotaa iddoo namoonni Gidewoon qubatan sanaan karaa kaabaatiin gaara Mooree bira sulula keessa ture. ² WAAQAYYOS Gidewooniin akkana jedhe; “Akka ani Midiyaanota dabarsee harka isaaniitti hin kennineef Israa’eloonni si wajjin jiran akka male baay’ee dha. Akka sabni Israa’el, ‘Jabina kootu na oolche’ jedhee natti hin koorreef, ³ ‘Namni sodaatee hollate kam iyyuu Tulluu Gili’aad dhiisee gara mana isaatti haa deebi’u’ jedhiitii amma sabatti himi.” Kanaafuu namoonni kuma digdamii lama deebi’anii kuma kudhan achitti hafan.

⁴ WAAQAYYO garuu Gidewooniin akkana jedhe; “Amma iyyuu namoota baay’eeu jira. Isaan fudhadhuutii gara bishaaniitti gad bu’i; ani achitti isaan gargari siif fo’a. Yoo

ani, 'Inni kun si wajjin ni deema' jedhe, inni ni deema; yoo ani, 'Inni kun si wajjin hin deemu' jedhe garuu inni hin deemu."

⁵ Kanaafuu Gidewoon namoota gara bishaaniitti gad buuse. WAAQAYYOS achitti, "Warra akkuma sareetti arrabaan bishaan dhugan, warra jilbeenfatani dhugan irraa gargari baasi" isaan jedhe. ⁶ Namoonni dhibba sadii konyee isaaniitiin waraabbatanii dhugan. Warri hafan hundi garuu dhuguuf jilbeenfatan.

⁷ WAAQAYYO Gidewooniin, "Ani namoota harka isaaniitiin dhugan dhibba sadan kanaan si furee Midiyaanota dabarsee harka keetti nan kenna. Warri kaan hundi gara qe'ee isaaniitti haa deebi'an" jedheen. ⁸ Kanaafuu Gidewoon akka Israa'eloonni hafan hundi gara dunkaana isaaniitti deebi'an godhee namoota dhibba sadan garuu turfate; isaanis warra kaan irraa galaa fi malakata fudhatan.

Qubanni Midiyaanotaas Gidewooniin gad sulula keessa ture. ⁹ Halkanuma sana WAAQAYYO Gidewooniin akkana jedhe; "Ka'iitii qubata sanatti gad bu'i; ani dabarsee harka keetti siifin kennaatii. ¹⁰ Ati yoo gad bu'uu sodaatte garuu tajaajilaa kee Fuuraa wajjin gara qubata sanaatti gad bu'iitii ¹¹ waan isaan dubbachaa jiran dhaga'i. Sana booddee qubata sana rukutuudhaaf jabina ni argatta." Kanaafuu innii fi tajaajilaan isaa Fuuraan gara moggaa qubata sanaatti gad bu'an. ¹² Midiyaanonni, Amaaleqoonnii fi namoonni ba'a biiftuutii dhufan hundi akkuma hoomaa hawwaannisaa walitti gobbatanii sululicha keessa qubatanii turan. Baay'inni gaalawwan isaanis akkuma cirracha qarqara galaanaa lakkoobsa hin qabu ture.

¹³ Gidewoonis utuu namichi tokko waa'ee abjuu isaa michuu ofii isaatti himuu achi ga'e. Namichi sunis akkana jedhe; "Ani abjuu tokko nan abjoodhe; kunoo maxinoon garbuu tokko gangalachaa dhufee qubata Midiyaanotaa irra bu'e. Innis dhufee akka dunkaanni jiguuf humnaan dha'e; dunkaanni sunis ni kufe."

¹⁴ Michuun isaas deebisee, "Kun goraadee Gidewoon ilma Yoo'aash Israa'elichaati malee waan biraa miti. Waaqnis Midiyaanotaa fi guutummaa qubata sanaa dabarsee harka Gidewoonitti kenneera" jedhe.

¹⁵ Gidewoon yommuu abjuu sanaa fi hiikkaa isaa dhaga'etti Waaqaaf sagade. Gara qubata Israa'elootaattis deebi'ee, "Ka'aa! WAAQAYYO qubata Midiyaanotaa dabarsee harka keessaniitti kenneeraa" jedhe. ¹⁶ Innis namoota dhibba sadan garee sadiitti gooduudhaan, harka hunda isaaniitti malakataa fi okkotee guci keessa jiru qabachiise.

¹⁷ Gidewoonis akkana isaaniin jedhe; "Na ilaalaa; waan ani hojjedhus hojjedhaa; yommuu ani qarqara qubata dhi'aadhutti qalbeeffadhaatii waanuma ani godhu godhaa. ¹⁸ Yeroo anii fi warri na wajjin jiran hundii malakata keenya afuufnutti, isinis naannoo qubata hunda afuufaati, 'WAAQAYYOOF, Gidewooniifis' jedhaa iyyaa."

¹⁹ Gidewoonii fi namoonni isa wajjin turan dhibbi sun akkuma waardiyyoonni wal geeddaraniin jalqaba eegumsa walakkaa halkaniitti qarqara qubata sanaa bira ga'an. Isaanis malakata isaanii afuufanii okkotee harka isaanii jiru caccabsan. ²⁰ Garaa sadanuu malakata isaanii afuufanii okkotee harka isaanii jiru caccabsan. Harka bitaatti guca, harka mirgaatti immoo malakata afuufan qabatanii, "Goraadee WAAQAYYOOTII fi Gidewoon!" jedhanii iyyan. ²¹ Tokkoon tokkoon namaas naannoo qubata hundaaf iddoo kennameef qabate; Midiyaanonni hundis iyyaa baqatan.

²² Yeroo malakanni dhibbi sadan sun afuufametti WAAQAYYO akka namni qubata sana keessa ture tokko tokkoon goraadee isaa walitti luqqifatu godhe; raayyaan waraanaas karaa Zereeraatiin gara Beet Shiixaatti, isa biras darbanii hamma daarii Abeel Mehoolaa ishee Xabaati bira jirtu sanaatti baqatanii deeman. ²³ Israa'eloonnis Niftaalem, Aasheerii fi Minaasee hundumaa keessaa waamanii Midiyaanota of dura ari'an. ²⁴ Gidewoonis guutummaa biyya gaaraa Efreemitti ergamoota ergee, "Kottaa Midiyaanotatti duulaatii bishaanota hamma Beet Baaraatti jiranii fi laga Yordaanos isaan dursaatii qabadhaa" jedhe.

Kanaafuu namoonni Efreem hundi ba'anii bishaanota hamma Beet Baaraatti jiranii fi laga Yordaanos qabatan. ²⁵ Akkasumas hooggantoota Midiyaanota lamaan jechuunis Hereebii fi Ze'eebin qabatan. Hereeb kattaa Hereeb biratti Ze'eeb immoo iddoo wayinii itti cuunfan kan Ze'eebiitti ajjeesan. Isaanis Midiyaanota ari'anii mataa Hereebii fi mataa Ze'eeb gara gama laga Yordaanos Gidewoonitti fidan.

8

Zaabiheelii fi Zalmunaa

¹ Namoonni Efreem, "Ati maaliif akkana nu goote? Yeroo Midiyaanin dha'uuf duultetti maaliif nu hin waamin?" jedhanii Gidewoon gaafatan. Akka malees isatti dheekkaman.

² Inni immoo akkana jedhee deebiseef; “Wanni ani hojjedhe yoo waan isin hojjettaniin wal bira qabame gatii maalii qaba? Qarmini wayinii Efreem oomisha wayinii Abii’ezar sana hunda hin caaluu?” ³ Waaqni hooggantoota Midiyaanotaa jechuunis Hereebii fi Ze’eebin dabarsee harka keessanitti kenneera. Egaa ani waan isin hojjettaniin wajjin kan wal qixxaatu maal hojjechuun danda’a ture?” Yommuu inni waan kana jedhettis aariin isaan isatti aaran ni qabbanaa’e.

⁴ Gidewoonii fi namoonni isa wajjin turan dhibbi sadan dhufanii Yordaanos ce’an; isaan akka malee dadhaban iyyuu ittuma fufanii jara ari’an. ⁵ Innis namoota Sukootiitiin, “Loltoota kootiif buddeena kennaa; isaan baay’ee na duraa dadhabaniiruutii; ani amma iyyuu mootota Midiyaanotaa jechuunis Zebaa fi Zalmunaa ari’aa jira” jedhe.

⁶ Qondaaltonni Sukoot garuu, “Loltoota keetiif nu buddeena kan kenninu ati Zebaa fi Zalmunaa harka keetti galfatteertaa?” jedhaniin.

⁷ Gidewoonis deebisee, “Tole kaa, yommuu Waaqayyo dabarsee Zebaa fi Zalmunaa harka kootti kennutti ani qoraattii gammoojjitiifi fi arangamaadhaan foon keessan ciccira” jedheen.

⁸ Achii gara namoota Phenuu’eel dhaqee akkuma warra duraa sana kadhatetti isaanis gaafate; isaan garuu akkuma warri Sukoot deebisanitti deebii kennan. ⁹ Kanaafuu inni namoota Phenuu’eeliin, “Ani yeroo mo’adhee deebi’utti gamoo kana nan jgsa” jedhe.

¹⁰ Yeroo sanatti Zebaa fi Zalmunaan loltoota isaani kanneen kuma kudha shanitti hedaman wajjin iddoo Qarqari jedhamu turan; isaan kunneenis loltoota namoota ba’a biiftuutii walitti qabaman keessaa hafan hundaa dha; warri goraadee hidhatan kumni kudha lama dhumani turaniiti. ¹¹ Gidewoonis karaa warra ba’a Noobaahiitii fi Yogbihaatiin dunkaana keessa jiraatanii ba’ee loltoota homaa hin bir’atin dha’e; raayyaan waraanaa sun of dagatee tureetii. ¹² Mootonni Midiyaan lamaan jechuunis Zebaa fi Zalmunaan ni baqatan; Gidewoon garuu ari’ee isaan qabate; loltoota isaaniis gargari bittinnesse.

¹³ Ergasii Gidewoon ilmi Yoo’aash karaa Malkaa Herees ba’ee duulaa gale. ¹⁴ Innis dargaggeessa Sukoot tokko qabee qorate; dargaggeessi sunis maqaa qondaaltota Sukootii fi maanguddoota magaalatii walumatti maqaa nama torbaatamii torba barreessee kenneef. ¹⁵ Gidewoonis dhufee namoota Sukootiin, “Zebaa fi Zalmunaan isin, ‘Nu namoota kee warra dadhabaniif buddeena kan kenninu ati Zaabiheeliifi Zalmunaa harka keetti galfatteertaa?’ jettanii waa’ee isaanii natti qoostan sun kunoo ti” jedhe.

¹⁶ Innis maanguddoota magaalaa sanaa fuudhee qoraattii fi arangamaa gammoojjitiin adabuudhaan namoota Sukootiitiif barumsa kenne. ¹⁷ Gamoo Phenuu’eelis jigsee namoota magaalatii fixe.

¹⁸ Ergasiis inni, “Namoonni isin Taaboortii fiixan warra akkamiitii?” jedhee Zebaa fi Zalmunaa gaafate.

Isaanis, “Namootuma akka keessanii kanneen hundi isaanii ilmaan mootii fafakkaatanii dha” jedhaniin.

¹⁹ Gidewoonis deebisee, “Isaan obboota koo ilmaanuma haadha kootii turan. Dhugaa WAAQAYYO jiraataa, utuu isin isaan ajjeesuu baattanii ani isin hin ajjeesu ture” jedhe. ²⁰ Innis gara Yeteer ilma isaa hangaftichaatti garagalee, “Ka’iitii isaan fixi!” jedheen. Yeeteer garuu sababii ijoollee ta’eef sodaatee goraadee isaa hin luqqifanne.

²¹ Ergasiis Zebaa fi Zalmunaan, “Ka’iitii atumti nu ajjeesi; ‘Jabinni namaa akkuma dhagna isaatii’” jedhaniin. Gidewoonis ka’ee isaan ajjeese; faaya morma gaalawwan isaaniis fudhate.

Efuudii Gidewoon

²² Namoonni Israa’elii Gidewooniin, “Ati waan harka Midiyaanotaa jalaa nu baaftteef ati, ilmi keetii fi ilmi ilma keetii nu bulchaa” jedhan.

²³ Gidewoon garuu, “Ani isin hin bulchu; ilmi koos isin hin bulchu. WAAQAYYOTU isin bulcha” isaaniin jedhe. ²⁴ Innis, “Ani waa tokko isin kadhadha; kunis akka tokkoon tokkoon keessan qooda boojuu keessanii irraa lootii naa kennitanii dha” jedhe. Lootii warqee kaa’achuun bartee Ishmaa’eelootaa tureetii.

²⁵ Isaanis, “Nu gammachuudhaan kennina” jedhanii deebisan. Kanaafuu wayyaa lafa irra diriirsanii tokkoon tokkoon namaa boojuu isaa irraa lootii itti darbate. ²⁶ Amartiin warqee kan inni kadhate saqilii kuma tokkoo fi dhibba torba yookaan kiiloo giraamii kudha sagalii fi walakkaa ulfaata ture; kunis waan mormatti hidhatan, uffata diimaa dhiilgee kan mootonni Midiyaan uffatanii fi foncaa morma gaalawwan isaaniis irra ture hin dabalatu. ²⁷ Gidewoonis warqee sanaan dirata tolchee magaalaa itti dhalate Ofraa keessa kaa’e. Israa’eloonni hundis achitti efuudicha waaqeffachuudhaan sagaagalan. Kunis Gidewooniif maatii isaatti kiyyoo ta’e.

Gidewoon Du'uu Isaa

²⁸ Midiyaanonnis akkasiin fuula Israa'elootaa duratti mo'ataman; lammatas mataa isaanii ol hin qabanne. Biyyattiinis bara Gidewoon keessa waggaa afurtama nagaa argatte.

²⁹ Yerub-Ba'aal ilmi Yoo'aash achi jiraachuuf gara mana ofii isaatti deebi'e. ³⁰ Inni sababii niitota baay'ee fuudheef ilmaan torbaatama qaba ture. ³¹ Saajjatoon isaa kan Sheekem keessa jiraachaa turtes ilma deesseeffii turte; innis Abiimelek jedhee isa moggaase. ³² Gidewoon ilmi Yoo'aash bara dheeraa jiraatee du'e. Innis Ofraa biyya Abii'ezerootaa keessatti, lafa awwaala abbaa isaa Yoo'aashitti awwaalame.

³³ Akkuma Gidewoon du'een Israa'eloonni amma illee Ba'aal wajjin sagaagalan. Ba'aal Beriitinis Waaqa isaanii godhatanii ³⁴ WAAQAYYO Waaqa isaanii kan harka diinota isaanii hundumaa jalaa isaan baase sana dagatan. ³⁵ Isaanis maatii Yerub-Ba'aaliif jechuunis Gidewooniif waan gaarii inni isaaniif godhe hunda yaadatani arjummaa hin gooneef.

9*Abiimelek*

¹ Abiimelek ilmi Yerub-Ba'aal gara obboloota haadha isaa kanneen Sheekem keessa jiraatanii dhaqee isaanii fi gosa haadha isaa hundaan akkana jedhe; ² "Jiraattota Sheekem hundumaan, 'Kam isinii wayya? Yoo ilmaan Yerub-Ba'aal torbaatamni isin bulchan moo yoo namni tokko isin bulche wayya?' jedhaa gaafadhaa. Akka ani foonii fi dhiiga keessan ta'e immoo yaadadhaa."

³ Obbolooni haadha isaas dubbii kana gurra Shekemotaatiin ga'an; garaan isaaniis gara Abiimelek goruu kajeefe; isaan, "Inni obboleessa keenya" jedhaniiruutii. ⁴ Isaanis mana sagadaa Ba'aal Beriit keessaa meetii gara giraamii dhibba saddeet ulfaatu kennaniif; Abiimelekis meetii sanaan kashlabboota isa faana bu'an qaxarate. ⁵ Gara mana abbaa isaa kan Ofraatti argamuu dhaqee obboloota isaa ilmaan Yerub-Ba'aal torbaatama dhagaa tokko irratti qale. Yootaam ilmi Yiruuba'aal quxisuun garuu dhokatee isa jalaa miliqe. ⁶ Namoonni Shekemii fi Beet Miiloo hundi Abiimelekin moosisuuf jedhanii Shekemitti utubaa mukaa guddaa tokko biratti walitti qabaman.

⁷ Yootaam yommuu wanni kun itti himametti fiixee Gaara Gerziimitti ol ba'ee sagalee guddaadhaan akkana isaaniin jedhe; "Yaa jiraattota Sheekem, akka Waaqni isin dhaga'uuf na dhaggeeffadhaa. ⁸ Gaaf tokko mukkeen mootii moosifachuuf ba'an; isaanis muka ejersaatiin, 'Mootii nuu ta'i' jedhan.

⁹ "Mukni ejersaa garuu, 'Ani mukkeen hundaa olitti raafamuudhaaf jedhee zayitii koo kan Waaqni fi namni ittiin kabajaman dhowwadhuu ree?' jedhee deebise.

¹⁰ "Itti aansaniis mukkeen muka harbuutiin, 'Kottuutii mootii nuu ta'i' jedhan.

¹¹ "Mukni harbuu garuu deebisee, 'Ani mukkeen hundaa olitti ba'ee raafamuuf jedhee ija koo mi'aawaa fi gaarii sana kennuu dhiisuu ree?' jedhe.

¹² "Mukkeenis muka wayiniitiin, 'Kottuutii mootii nuu ta'i' jedhan.

¹³ "Mukni wayinii garuu deebisee, 'Ani mukkeen hundaa olitti ba'ee raafamuuf jedhe daadhii wayinii kootii kan Waaqaa fi nama gammachiisu sana kennuu dhiisuu?' jedhe.

¹⁴ "Dhuma irrattis mukkeen hundi muka qoraattiitiin, 'Kottuutii mootii nuu ta'i' jedhan.

¹⁵ "Mukni qoraattis mukkeeniin, 'Isin yoo dhugumaan na moosifachuu feetan, kottaatii gaaddisa koo jalatti da'effadhaa; yoo akkas ta'uu baate garuu ibiddi muka qoraattii keessaa ba'ee birbirsaa Libaanoon haa barbadeessu!' jedhe.

¹⁶ "Egaa isin Abiimelekin moosisuun keessan yoo karaa dhugaatii fi amanamummaan ta'e, yoo Yerub-Ba'aalii fi maatii isaatiif waan gaarii gochuuf ta'e, yoo waan isaaf malu isaaf gochuuf ta'e, ¹⁷ abbaan koo lubbuu isaa du'aaf saaxilee harka Midiyaanotaa jalaa isin baasuuf isinii loleeraatii; ¹⁸ isin garuu har'a maatii abbaa kooti kaatanii ilmaan isaa jechuunis nama torbaatama dhagaa tokko irratti qaltan; sababii inni fira keessan ta'eef Abiimelek ilma garbittii sana namoota Sheekem irratti moosifatan; ¹⁹ egaa yoo isin har'a dhugaa fi amanamummaadhaan Yerub-Ba'aalii fi maatii isaatiif waan gaarii gootan, isin Abiimelekitti gammadaa; innis isinitti haa gammadu! ²⁰ Akkas ta'uu baannaan garuu ibiddi mana Abiimelekii ba'ee namoota Shekemii fi Beet Miiloo haa fixu; akkasumas ibiddi namoota Shekemii fi Beet Miiloo biraa ba'ee Abiimelekin haa balleessu!"

²¹ Yootaamis Bi'eeritti baqatee sababii obboleessa isaa Abiimelekin sodaateef achuma jiraate.

²² Erga Abiimelek waggaa sadii Israa'el bulchee booddee, ²³ Waaqnis Abiimelekii fi namoota Sheekem gidduutti hafuura hamaa erge; Shekemonnis Abiimelekitti daba

hojjetan. ²⁴ Waaqnis yakka ilmaan Yerub-Ba'aal torbaataman sanatti hojjetamee fi dhiiga isaanii kan dhangalaafame sanaaf, Abiimelek obboleessa isaanii kan isaan qale sanaa fi namoota Sheekem kanneen akka inni obboloota isaa fixuuf isa gargaaran sana haaloo ba'uuf waan kana godhe. ²⁵ Namoonni Sheekemis akka isaan riphaniis isa eegataniif fiixee gaaraa irra namoota kaa'atan; isaanis nama achiin darbu hunda saamaan; wanni kunis Abiimelekitti odeeffame.

²⁶ Yeroo kanatti Ga'aal ilmi Ebeed obboloota isaa wajjin gara Sheekem dhufe; Sheekemonnis isa abdatan. ²⁷ Isaanis erga gara lafa qotiisaa wayiniitti ba'anii wayinii walitti qabatanii booddee cuunfanii galma waaqa tolfamaa isaaniitti ayyaana ayyaaneffatan. Nyaatanii dhuganiis Abiimelekin abaaran. ²⁸ Ga'aal ilmi Ebeedis akkana jedhe; "Akka nu isaaf bulluuf Abiimelekii fi Sheekem eenyu? Abiimelek ilma Yerub-Ba'aal mitii? Zebulis itti aanaa isaa mitii? Isin namoota Hamoor abbaa Sheekem tajaajilaa! Nu maaliif Abiimelekin tajaajilaa?" ²⁹ Utuu sabni kun ajaja koo jala jiraatee silaa ani Abiimelekin lafa irraa nan balleessa ture; 'Waraana kee dabaladhuutii gad ba'!' isaan nan jedhas ture."

³⁰ Zebul bulchaan magaalattii yeroo waan Ga'aal ilmi Ebeed jedhe dhaga'etti akka malee aare. ³¹ Akkana jedhees dhoksaadhaan gara Abiimelekitti ergamoota erge; "Ga'aal ilmi Ebeedii fi obboloonni isaa gara Sheekem dhufanii saba magaalaa sitti kakaasaa jiru. ³² Kanaafuu atii fi namoonni kee halkaniin baatanii lafa qotiisaa keessa riphuu qabdu. ³³ Ganama akkuma aduun baateenis magaalaa sana cabsaa seenaa. Yommuu Gala'aalii fi namoonni isaa sitti dhufanittis waan harki kee hojjechuu malu kam iyyuu hojjedhu."

³⁴ Abiimelekis namoota isaa wajjin turan hunda wajjin halkaniin ka'ee garee afuritti qoodamuudhaan Sheekemitti dhi'aatee riphe. ³⁵ Akkuma Ga'aal ilmi Ebeed ba'ee karra magaalaa sanaa irra dhaabateen, Abiimelek namoota isaa wajjin iddoo riphee ture sanaa itti gad ba'ee.

³⁶ Ga'aal yommuu isaan argetti Zebuliin, "Kunoo namoonni fiixee gaarranii irraa gad dhufaa jiru!" jedhe.

Zebulis deebisee, "Gaaddisa tulluuwwaniitu namoota sitti fakkaate" jedheen.

³⁷ Ga'aal garuu ammas deebisee, "Ilaali; namoonni handhuura lafaatii dhufaa jiru; gareen tokkos karaa muka abdaariitiin dhufaa jira" jedhe.

³⁸ Zebulis, "Ati kan, 'Akka nu isaaf bulluuf Abiimelek kun eenyu?' jette, oduun kee sun amma meerre? Namoonni ati tuffatte isaan kana mitii? Mee ba'iitii jara loli kaa!" jedheen.

³⁹ Kanaafuu Ga'aal namoota Sheekem hoogganee Abiimelekin loluuf ba'ee.

⁴⁰ Abiimelekis isa ari'ee; innis duraa baqate; namoonni baay'eenis madaa'anii hamma karra magaalattiitti harca'an. ⁴¹ Abiimelek Aruumaa keessa ture; Zebul immoo Ga'aalii fi obboloota isaa ari'ee Sheekem keessaa baase.

⁴² Guyyaa itti aanu namoonni Sheekem dirreetti ba'an; wanni kunis Abiimelekitti himame. ⁴³ Innis namoota isaa fudhatee garee sadiitti qoodee dirree irratti riphee eeggate. Yeroo namoota magaalaa ka'anii dhufaa jiran argettis isaan loluudhaaf ka'ee.

⁴⁴ Abiimelekii fi gareen isa wajjin turan gara karra magaalattiitti gugatan. Gareen hafan lamaan immoo gara warra dirree irratti ba'anii turaniitti fiiganiis isaan fixan.

⁴⁵ Abiimelek gaafas guyyaa guutuu lolee magaalattii qabate; jiraattota ishees fiixee magaalattii illee barbadeessee soogidda itti facaase.

⁴⁶ Namoonni gamoo Sheekem keessa jiraatan yommuu waan kana dhaga'anitti gara da'annoo mana sagadaa Elbiriiitti ol galan. ⁴⁷ Abiimelekis yommuu akka namoonni Sheekem achitti walitti qabaman dhaga'etti, ⁴⁸ namoota isaa hundumaa wajjin Tulluu Zalmoonitti ol ba'ee. Abiimelekis qottoo harkatti qabatee dameewwan mukaa mummuree ol fudhee gatiitii isaatti baate. Namoota isa wajjin jiraniinis, "Dafaa! Waanuma anaa godhu argitan sana godhaa!" jedhe. ⁴⁹ Namoonni hundinuus dameewwan mukaa mummuratanii Abiimelekin duukaa bu'an. Dameewwan sanas da'annoo Sheekeminni itti baqatan sanatti irkisanii ibidda itti qabsiisan. Kanaafuu namoonni gamoo Sheekem keessa turan hundinuu dhiironnii fi dubartoonni gara kuma tokko ta'an dhuman.

⁵⁰ Ergasiis Abiimelek gara Tebez dhaqee magaalaa sana marsee qabate. ⁵¹ Ta'us waan gamoon jabaan tokko magaalaa sana keessa tureef jiraattonni magaalaa sanaa dhiiraa dubartiin utuu hin hafin itti baqatan. Keessaanis ofitti cufanii bantii isaatti ol ba'an.

⁵² Abiimelekis dhufee gamoo sana dha'ee; yommuu inni ibiddaan gubuuudhaaf balbala gamoo sanaatti dhi'aatetti garuu, ⁵³ dubartiin tokko gubbaadhaa majii dhagaa itti gad dhiiftee buqqee mataa isaa cabsite.

⁵⁴ Innis dafee dargaggeessa mi'a lolaa baatuuf tokko waamee, "Akka isaan, 'dubartiitu isa ajjeese' jechuu hin dandeenyeef goraadee kee luqqifadhuu na ajjeesi" jedheen.

Kanaafuu dargageessi sun isa waraane; innis ni du'e. ⁵⁵ Israa'eloonnis yommuu akka Abiimelek du'e arganitti gara mana isaaniitti deebi'an.

⁵⁶ Akkasiin Waaqni hammina Abiimelek obboloota isaa torbaatama qaluudhaan abbaa ofiitti hojjeteef gatii hojii isaa kenneef. ⁵⁷ Akkasumas Waaqni hammina namoonni Sheekem hojjetan hunda matuma isaaniitti deebise. Abaarsi Yootaam ilma Yerub-Ba'aalis isaan irra ga'e.

10

Toolaa

¹ Erga Abiimelek du'ee booddee namichi gosa Yisaakor, Toolaan ilmi Phuwaa ilmi Doodoo Israa'el baraaruu ka'e. Innis biyya gaaraa Efreem keessa Shaamiir jiraate. ² Tolaan waggaa digdamii sadii Israa'elin bulche; ergasiis du'ee Shaamiiritti awwaalame.

Yaa'iir

³ Isatti aanee Yaa'iir namichi gosa Gili'aad ka'ee waggaa kudha lama Israa'elin bulche; ⁴ innis ilmaan soddoma kanneen harroota soddoma yaabban qaba ture. Isaanis magaalawwan hamma har'aatti gandoota Yaa'iir jedhaman soddoma Gili'aad keessaa gabu turan. ⁵ Yaa'iiris du'ee Qaamonitti awwaalame.

Yiftaa

⁶ Ammas Israa'eloonni fuula WAAQAYYOO duratti waan hamaa hojjetan. Ba'aalii fi Ashtooreti akkasumas waaqota Sooriyaa, Siidoonaa, Mo'aab, Amoonii fi kan Filisxeem waaqeffatan. Waan Israa'eloonni WAAQAYYON dhiisanii isa waaqeffachuu didaniif, ⁷ inni isaaniitti dheekame. Dabarsees harka Filisxeemotaatii fi Amoonotaatti isaan gurgure; ⁸ isaanis bara sana ijoollee Israa'el gad cabsanii cunqursan. Israa'eloota biyya Amoorotaa kan Gili'aad keessa karaa ba'aatiin laga Yordaanos bira jiraatan hundumaa waggaa kudha saddeet akka malee cunqursan. ⁹ Amoononnis gosa Yihuudaa, gosa Beniyaamii fi mana Efreem waraanuudhaaf laga Yordaanos ce'an. Israa'eloonnis akka malee raafaman. ¹⁰ Kanaafuu Israa'eloonni, "Nu si Waaqa keenya dhiifnee Ba'aal waaqeffachuudhaan yakka sitti hojjenneerra" jedhanii WAAQAYYOTTI iyyatan.

¹¹ WAAQAYYOS akkana jedhee deebiseef; "Yeroo warri Gibxi, Amooronni, Amoononni, Filisxeemonni, ¹² Siidoononni, Amaaleqoonnii fi Maa'oononni isin cunqursinaan isin natti iyyattanitti ani harka isaanii jalaa isin hin baafnee? ¹³ Isin garuu na dhiiftanii waaqota biraa waaqeffattan; kanaafuu ani si'achi isin hin baasu. ¹⁴ Deemaatii waaqota fillatan sanatti iyyadhaa. Yommuu isin rakkattan isaanumti isin haa oolchan!"

¹⁵ Israa'eloonnis WAAQAYYON, "Nu cubbuu hojjenneera. Ati waan feete nu godhi; amma garuu maaloo nu baasi" jedhan. ¹⁶ Isaanis waaqota ormaa gidduu isaaniitii balleessanii WAAQAYYON waaqeffatan. Innis ergasii dhiphina Israa'el cal'isee ilaaluu hin dandeenye.

¹⁷ Yeroo Amoononni Gili'aaditti wal ga'anitti Israa'eloonnis wal ga'anii Miisphaa qubatan. ¹⁸ Hooggantoonni namoota Gili'aadis, "Namni jalqabatti Amoonotatti waraana banu inni jiraatotaa Gili'aad hundaaf hoogganaa ta'a" waliin jedhan.

11

¹ Yiftaan namichi gosa Gili'aad sun goota ture. Abbaan isaa Gili'aad jedhama; haati isaa immoo sagaagaltuu turte. ² Niitiin Gili'aadis Gili'aadiif ilmaan deesse; isaanis yommuu guddatanitti Yiftaadaa, "Ati waan dubartii biraa irraa dhalattee dhaala tokko illee maatii keenya irraa hin argattu" jedhanii isa ari'an. ³ Kanaafuu Yiftaan obboloota isaa duraa baqatee biyya Xoob jedhamu keessa jiraate; gareen kashlabbootaa naannoo isaatti walitti qabamanii isa duukaa bu'an.

⁴ Yeroo xinnoo booddee, yommuu Amoononni saba Israa'elitti waraana kaasanitti, ⁵ maanguddoonni Gili'aad Yiftaa barbaacha gara Xoob deeman. ⁶ Isaanis, "Akka nu Amoonota waraanuu dandeenyuuf kottuu ajajaa nuu ta'i" jedhaniin.

⁷ Yiftaanis, "Isin na jibbitanii mana abbaa kootii na hin ariinee? Amma yommuu rakkattan maalif na bira dhuftu?" isaaniin jedhe.

⁸ Maanguddoonni Gili'aadis, "Nu sababii kanaaf gara kee dhufneerra; Amoonota waraanuudhaaf nu faana kottu; nu warra Gili'aad keessa jiraannu hunda irrattis hoogganaa ni taataa" jedhaniin.

⁹ Yiftaanis, "Yoo isin akka ani Amoonota waraanuuf biyya kootii na deebifanii WAAQAYYOS dabarsee harka kootii isaan kenne, dhugumaan ani hoogganaa keessan nan ta'aa?" jedheen.

¹⁰ Maanguddoonni Gili'aadis deebisanii, "WAAQAYYO dhuga ba'aa keenya; dhugumaan nu akkuma ati jette goona" jedhaniin. ¹¹ Kanaafuu Yiftaan maanguddoota Gili'aad wajjin gajelee; sabni Gili'aadis hoogganaa fi abbaa duulaa isa godhate. Innis iddoo Miisphaa jedhamutti waan duraan dubbate hundumaa irra deebi'ee fuula WAAQAYYOO duratti dubbate.

¹² Yiftaan gara mootii Amoonotaatti ergamoota ergee, "Ati kan biyya keenya waraantuuf rakkina maalii nurraa qabda?" jedheen.

¹³ Mootiin Amoonotaas ergamoota Yiftaatiin, "Sababii Israa'eloonni yeroo Gibxii ba'anitti biyya koo kan Arnoonii fi Yaaboq gidduu jiruu fi biyya koo kan hamma Yordaanositti jiru fudhataniif ani waan kana godheera; kanaafuu amma karaa nagaan naa deebisaa" jedhe.

¹⁴ Yiftaanis gara mootii Amoonotaatti deebisee ergamoota isaa erge; ¹⁵ akkanas jedhe:

"Yiftaan akkana jedha: Israa'el biyya Mo'aab yookaan biyya Amoonota hin fudhanne. ¹⁶ Garuu yeroo Gibxii ba'anitti Israa'eloonni gammoojjii keessa gara Galaana Diimaa, achii immoo gara Qaadesh dhufan. ¹⁷ Israa'elis gara mootii Edoomitti, 'Akka ani biyya kee keessaan darbu naa eeyyami' jedhee ergamoota erge; mootiin Edoom garuu hin dhageenye. Gara mootii Mo'aabittis akkasuma ergan; inni illee ni dide. Kanaafuu Israa'el Qaadesh keessa ture.

¹⁸ "Itti aansee gammoojjii keessa darbee biyya Edoomii fi biyya Mo'aab irra naanna'ee karaa ba'a biyya Mo'aabiin darbee gama kaaniin Arnoon cina qubate. Garuu sababii Arnoon daarii Mo'aab turteef isaan biyya Mo'aab hin seenne ture.

¹⁹ "Ergasiis Israa'el Sihoon mooticha Amoorotaa kan Heshboon bulchaa ture sanatti ergamoota ergee, 'Akka nu biyya kee keessa gara biyya keenyaatti dabarru nuu eeyyami' jedheen. ²⁰ Sihoon garuu akka inni karaa biyya isaatiin darbu Israa'elin hin amanne. Kanaafuu inni namoota isaa walitti qabatee Yaahizaa keessa qubatee Israa'elin lole.

²¹ "WAAQAYYO Waaqni Israa'elis Sihoonii fi namoota isaa hunda dabarsee harka Israa'elitti kenne; Israa'eloonnis jara mo'atan; kanaafuu Israa'eloonni biyya Amoorota achi jiraatan hundaa fudhatan; ²² qabeenya biyya Amoor kan Arnoonii hamma Yaaboqitti akkasumas kan gammoojjii hamma Yordaanositti jiru hunda fudhatan.

²³ "Yoos erga WAAQAYYO Waaqni Israa'el fuula saba Israa'el duraa Amoorota ari'ee baasee ati fudhachuudhaaf mirga maalii qabdaa? ²⁴ Ati waan Kemoosh Waaqni kee siif kennu hin fudhattuu? Nus akkasuma waan WAAQAYYO Waaqni keenya nuu kenne kam iyyuu ni fudhanna. ²⁵ Ati Baalaaq mootii Mo'aab ilma Ziphoori sana ni caaltaa? Inni takkumaa Israa'el waraaneeraa? Yookaan loleeraa? ²⁶ Israa'eloonni waggaa dhibba sadii Heshboon, Aro'eer, qubatawwan naannoo sanaatti fi magaalawwan naannoo Arnoon qabatani turaniiru. Ati yeroo sanatti maaliif deebiftee hin fudhatin? ²⁷ Ani yakka sitti hin hojjenne; ati garuu waraana natti kaasuudhaan na miiteerta. Kanas WAAQAYYO, abbaan murtii ammuma kana ka'ee Israa'elootaa fi Amoonota gidduutti murtii haa kennu."

²⁸ Mootiin Amoonotaa garuu ergaa Yiftaan isatti ergeef gurra hin kennine.

²⁹ Kana irratti Hafuurri WAAQAYYOO Yiftaa irra bu'e. Innis Gili'aadii fi Minaasee keessa darbee Miisphaa ishee Gili'aad keessa jirtu sana keessa qaxxaamuree Amoonotatti duule. ³⁰ Yiftaan akkana jedhee WAAQAYYOOF wareege; "Yoo ati Amoonota dabarsitee harka kootti kennite, ³¹ yommuu ani mo'adhee deebi'utti wanni mana kootii na simachuudhaaf jalqabatti ba'uu kam iyyuu kan WAAQAYYOO ti; anis qalma gubamu godhee isa nan dhi'eessa."

³² Ergasiis Yiftaan Amoonota waraanuuf ba'e; WAAQAYYOS isaan dabarsee harka isaatti kenne. ³³ Innis Aro'eerii jalqabee magaalawwan digdama hamma naannoo Miiniititti akkasumas hamma Abeel Keraamiimitti argaman guutumaan guutuutti barbadeesse. Amoononnis akkasiin Israa'elootaaf bulan.

³⁴ Yeroo Yiftaan gara Miisphaatti mana isaatti deebi'etti, intalli isaa dibbee rukutaa sirbaa isa simachuuf baate! Isheen intala tokkittii inni qabu turte. Inni ishee malee ilma ta'u intala biraa hin qabu ture. ³⁵ Innis yommuu ishee argetti wayyaa isaa tarsiisee, "Wayyoo! Yaa mucattii koo! Na balleessite; dhiphina keessa na galchite; ani wareega cabuu hin dandeenye WAAQAYYOOF wareegeeraatii" jedhee boo'e.

³⁶ Isheenis akkana jette; "Yaa abbaa ko, ati WAAQAYYOOF kakatteerta; sababii WAAQAYYO diinota kee Amoonota haaloo siif ba'eef, ati waan waadaa galte sana anaan guutadhu. ³⁷ Garuu waan tokko naa eeyyami; sababii ani si'achi hin heerumneef akka ani michoota koo wajjin gaarran irra naanna'ee durbummaa kootiif boo'uuf ji'a lama naa kenni."

³⁸ Innis, “Dhaquu dandeessa” jedheen. Akka isheen ji’a lamaaf deemtus eeyyameef. Isheenis waan si’achi heerumuu hin dandeenyeef dubbarran michoota ishee wajjin gaarranitti ol baatee boosse. ³⁹ Ji’a lamaa booddees gara abbaa isheetti deebite; innis akkuma wareege sana godhe. Isheen durba turte.

Yeroo sanaa jalqabee wanni kun Israa’eloota biratti bartee ta’ee ⁴⁰ durboonni Israa’el waggama waggaa ba’anii guyyaa afur intala Yiftaa namicha Gili’aad sanaa gaddaan yaadatu.

12

Yiftaa fi Efreem

¹ Namoonni Efreem walitti qabamanii Daafoon ce’uudhaan Yiftaan, “Ati yeroo Amoonota loluuf baatetti maaliif akka nu si faana deemnuuf nu hin waamne? Nu mana kee sirratti gubna” jedhaniin.

² Yiftaanis akkana jedhee deebiseef; “Anii fi namoonni koo Amoonota loluuf waraana guddaa keessa gallee turre; yommuu ani isin waametti isin harka isaaniitii na hin baafne. ³ Ani yeroo akka isin na hin baafne argetti lubbuu kootti muree Amoonota waraanuuf nan ce’e; WAAQAYYOS isaan irratti mo’annaa naa kenne. Yoos isin har’a maaliif na loluuf dhuftan ree?”

⁴ Yiftaanis ergasii namoota Gili’aad walitti waammatee Efreemitti lola kaase. Sababii namoonni Efreem warra Gili’aadiin, “Isin Gili’aadonni warra Efreemii fi Minaasee gantanii dha” jedhaniif Gili’aadonni isaan dha’an. ⁵ Gili’aadonni malkaawwan Yordaanos kanneen gara Efraataatti geessan qabatan; yeroo baqataan Efraataa tokko, “Ani gamattin ce’a” jedhutti, namoonni Gili’aad, “Ati nama Efreem mitii?” jedhani isa gaafatu. Yoo inni, “Waaawuu” jedhee deebise, ⁶ isaan, “Gaarii dha; ati, ‘Shiiboleeti’ jedhi” jedhaniin. Yoo inni, “Shiiboleeti” jedhe, sababii inni qajeelatti “Shiiboleeti” jechuu hin dandeenyeef qabani malkaawwan Yordaanos irratti isa ajjeesu. Yeroo sanatti namoota Efreem kuma afurtamii lamatu ajjeefame.

⁷ Yiftaan waggaa ja’a Israa’elin bulche. Ergasii Yiftaan namni Gili’aad sun du’ee magaalaa Gili’aad keessaa tokkotti awwaalame.

Ibxaan, Eloomii fi Abdoon

⁸ Isaan duubas Ibzaan namichi Beetlihem sun Israa’elin bulche. ⁹ Innis ilmaan soddomaa fi intallan soddoma qaba ture; intallan isaas warra gosa isaa hin ta’iitti heerumsiise; ilmaan isaatiifis akka isaan niitota ta’aniif gosa biraa keessaa durboota soddoma fide. Ibxaan waggaa torba Israa’el bulche. ¹⁰ Ibzaanis du’ee Beetlihem keessatti awwaalame.

¹¹ Isa booddee Eeloon namichi gosa Zebuuloon sun waggaa kudhan Israa’elin bulche. ¹² Eeloonis du’ee biyya Zebuuloon keessatti Ayaaloonitti awwaalame.

¹³ Isatti aanee immoo Abdoon ilmi Hileel namichi Phiraatoon sun Israa’elin bulche.

¹⁴ Innis ilmaan afurtamaa fi ilmaan ilmaanii soddoma kanneen harroota torbaatama yaabbatan qaba ture. Inni waggaa saddeeti Israa’elin bulche. ¹⁵ Ergasiis Abdoon ilmi Hileel du’ee biyya gaaraa Amaaleqootaatti Efreem keessatti Phiraatoonitti awwaalame.

13

Dhalachuu Saamsoon

¹ Israa’eloonni ammas fuula WAAQAYYOO duratti waan hamaa hojjetan; kanaafuu WAAQAYYO waggaa afurtama dabarsee harka Filisxeemotaatti isaan kenne.

² Namicha gosa Daan keessaa dhalatee Zoraa jiraatu kan Maano’aa jedhamu tokkotu ture; niitiin isaas dhabduu ijoollee tokko illee hin qabne turte. ³ Ergamaan WAAQAYYOS isheetti mul’atee akkana jedheen; “Kunoo ati dhabduu ijoollee hin qabnee dha; garuu ulfooftee ilma deessa. ⁴ Egaa ati akka daadhii wayinii yookaan dhugaatii nama macheessu hin dhugne yookaan waan xuraa’aa tokko illee hin nyaanne of eeggadhu; ⁵ ati ulfooftee ilma da’uuf jirraatii. Qarabaan tokko iyyuu mataa isaa hin tuqin; inni gaafa dhalatee jalqabee Naaziricha ta’uudhaan kan Waaqaaf addaan baafame ta’aatii; inni harka Filisxeemotaatii Israa’eloota furuu jalqaba.”

⁶ Dubartiin sunis gara dhirsa ishee dhaqxee akkana jettee itti himte; “Nama Waaqaa tokkotu gara koo dhufe. Innis ergamaa Waaqayyoo fakkaatee akka malee nama sodaachisa. Ani akka inni eessaa dhufe isa hin gaafanne; innis maqaa isaa natti hin himne. ⁷ Garuu inni, ‘Ati ulfooftee ilma deessa. Egaa si’achi daadhii wayinii yookaan dhugaatii nama macheessu hin dhugin; waan xuraa’aas hin nyaatin; sababiin isaas inni gaafa dhalatee jalqabee hamma du’utti Naaziricha Waaqaa ta’aatii’ naan jedhe.”

⁸ Maano'aanis, "Yaa Gooftaa, akka namichi Waaqaa kan ati gara keenyatti ergite sun ammas dhufee akka nu itti mucaa dhalatu sana guddisuu qabnu nu barsiisuuf akka nuuf ergitu sin kadhada" jedhee WAAQAYYON kadhate.

⁹ Waaqnis Maano'aa dhaga'e; ergamaan Waaqayyoo sunis utuu isheen lafa qotiisaa keessa teessuu gara dubartii sanaa deebi'ee dhufe; dhirsii ishee Maano'aan garuu ishee wajjin hin turre. ¹⁰ Dubartittiinis dhirsaa isheetti himuuf ariifatee, "Kunoo! Namichi guyyaa kaan natti mul'ate sun as jira!" jette.

¹¹ Maano'aanis ka'ee niitii isaa duukaa bu'e. Innis yommuu namicha bira ga'etti, "Namni niitii kootti dubbate si'ii?" jedheen.

Innis, "Anuma" jedhe.

¹² Kanaafuu Maano'aan, "Yeroo dubbiin kee raawwatamutti seerri mucichi ittiin jiraatuu fi hojiin inni hojjetu maali?" jedhee isa gaafate.

¹³ Ergamaan WAAQAYYOS akkana jedhee deebise; "Niitiin kee waan ani itti hime hunda gochuu qabdi. ¹⁴ Isheen waan muka wayinii irraa argamu tokko illee nyaachuu hin qabdu; daadhii wayinii yookaan dhugaatii nama macheessu dhuguu yookaan waan xuraa'aa kam iyyuu nyaachuu hin qabdu. Isheen waan ani ishee ajaje hunda gochuu qabdi."

¹⁵ Maano'aanis ergamaa WAAQAYYOOTIIN, "Hamma nu korbeessa re'ee xinnaa isaa siif qopheessinutti nuu turi" jedhe.

¹⁶ Ergamaan WAAQAYYOO, "Ati na tursitu illee, ani nyaata kee kam iyyuu hin nyaadhu. Garuu yoo aarsaa gubamu qopheessuu feete, isa WAAQAYYOO dhi'eessi" jedheen. Maano'aan akka inni ergamaa WAAQAYYOO ta'e hin beekne ture.

¹⁷ Sana booddee Maano'aan ergamaa WAAQAYYOOTIIN, "Akka nu yeroo dubbiin ati dubbate fiixaan ba'utti ulfina siif kenninuuf maqaan kee eenyu?" jedhee gaafate.

¹⁸ Innis, "Ati maaliif maqaa koo gaafatta? Inni akka malee dinqii dha" jedheen. ¹⁹ Maano'aanis korbeessa re'ee xinnaa isaa kenna midhaanii wajjin geessee kattaa irratti WAAQAYYOO aarsaa godhe. Utuma Maano'aa fi niitiin isaa ilaalanuus WAAQAYYOO waan dinqii godhe. ²⁰ Yeroo arrabni ibiddaa iddoo aarsaa irraa samiitti ol ba'etti ergamaan WAAQAYYOO arraba ibiddaa keessaan ol ba'e. Maano'aa fi niitiin isaa waan kana arganii adda isaaniitiin lafatti gombifaman. ²¹ Ergamaan WAAQAYYOO garuu deebi'ee Maano'aa fi niitii isaatti hin mul'anne. Maano'aanis akka inni ergamaa WAAQAYYOO ta'e beeke.

²² Innis niitii isaatiin, "Nu Waaqa argineerraatii dhugumaan ni duuna!" jedhe.

²³ Niitiin isaa garuu deebiftee akkana jetteen; "WAAQAYYOO utuu nu ajjeessu barbaadee silaa aarsaa gubamuu fi kenna midhaanii nu harkaa hin fudhatu ture; waan kana hundumas nutti hin argisiisu yookaan waan kana amma nutti hin himu ture."

²⁴ Dubartiin sun ilma deesse; Saamsoon jettees isa moggaafte. Innis ni guddate; WAAQAYYOS isa eebbise. ²⁵ Hafuurri WAAQAYYOS yeroo inni Zoraa fi Eshitaa'ol gidduu qubata Daan keessa turetti isa kakaasu jalqabe.

14

Gaa'ela Saamsoon

¹ Saamsoon gara Tiimnaahitti gad bu'ee durba Filixseem tokko achitti arge. ² Yommuu achii deebi'ettis abbaa fi haadha isaatiin, "Ani Tiimnaahitti intala Filixseem tokko argeeraatii na fuusisaa" jedhe.

³ Abbaa fi haatii isaa deebisanii, "Wanni akka ati Filixseemota dhagna hin qabanne keessaa niitii fuutu si godhu firoota kee keessaa yookaan saba keenya hunda keessaa dubartiin dhabamteetii?" jedhaniin.

Saamsoon garuu abbaa isaatiin, "Isheetu naa ta'aatii ishuma naa fidi" jedhe. ⁴ Abbaa fi haatii isaa akka wannii kun WAAQAYYOO biraa dhufe hin beekne; Waaqayyoo karaa ittiin Filixseemota dha'u barbaadaa tureetii. Yeroo sanatti Filixseemonni Israa'eloota gad qabanii bulchaa turan.

⁵ Saamsoon abbaa isaatii fi haadha isaa wajjin gara Tiimnaahitti gad bu'ee. Akkuma isaan iddoo dhaabaa wayinii Tiimnaahi bira ga'aniinis leenci saafelli tokko ittanaa isatti dhufe. ⁶ Hafuurri WAAQAYYOS jabinaan Saamsoon irra bu'e; innis homaa of harkaa qabaachuu baatu illee akkuma nama ilmoo re'ee tokko cicciruutti leenca saafela sana ciccire. Garuu waan hojjete sana abbaa fi haadha isaatti hin himne. ⁷ Ergasii gad bu'ee dubartittii wajjin haasa'e; isheenis ija isaatti tolte.

⁸ Innis yeroo gabaabaa booddee yommuu ishee fuudhuuf achi deebi'etti raqa leenca sanaa ilaaluuf of irra gara gale. Raqa leencichaa keessas tuunni kanniisaa guutee damma dammeessee ture; ⁹ dammichas harka isaatti fudhatee nyaachaa karaa isaa itti

fufe. Yommuu gara abbaa fi haadha isaa dhufettis damma sana irraa isaaniif kenne; isaanis ni nyaatan. Inni garuu akka damma sana raqa leencaa keessaa fuudhe isaanitti hin himne.

¹⁰ Ergasii abbaan isaa intalattii ilaaluufti gad bu'e; Saamsoon akkuma dargaggoonni yeroo fudhanitti cidha godhatan sana achitti cidha qopheesse. ¹¹ Yommuu inni achi dhi'aattis isaa arganii amaamota soddoma isaaf kennu.

¹² Saamsoonis akkana isaaniin jedhe; "Ani hibboo tokko isinitti nan hima; yoo isin guyyoota cidhichaa torban keessatti hiikkaa isaa argattan, ani wayyaa quncee talbaa irraa hojjetame soddomaa fi uffata kittii soddoma isiniifn kenna. ¹³ Isin yoo hiikkaa isaa natti himuu dadhabdan wayyaa quncee talbaa irraa hojjetame soddomaa fi uffata kittii soddoma naa kennitu."

Isaanis, "Hibboo kee ni dhageenyaa nutti hima" jedhan.

¹⁴ Innis deebisee,

"Kan nyaatu keessaa wanni nyaatamu, jабaa keessaa immoo wanni mi'aawu ba'e" isaaniin jedhe. Isaanis hamma guyyaa sadiitti hibboo sana hiikuu hin dandeenye ture.

¹⁵ Isaanis guyyaa afuraffaatti niitii Saamsoonniin, "Akka dhirsii kee hiikkaa hibboo kanaa nutti himuuf mee nuu kadhaddhu; yoo kanaa achii nu si'ii fi mana abbaa keetii ibiddaan gubnaa. Ati nu saamuuf asitti nu waamtee?" jedhaniin.

¹⁶ Niitiin Saamsoonis fuula isaa duratti boo'aa "Ati na jibbiteerta! Ati dhugumaan na hin jaallattu. Ati saba koo hibboo gaafatteerta; garuu hiikkaa isaa natti hin himne" jetteen.

Innis deebisee, "Ani abbaa koottii fi haadha kootti iyyuu hin himne; egaa ani sitti himuu qabaa?" jedheen. ¹⁷ Isheenis guyyaa cidha sanaa torbanuu boottee isa rakkifte; innis sababii isheen ittuma fuftee boqonnaa isa dhowwiteef guyyaa torbaffaatti hiikkaa isaa isheetti hime. Isheen immoo hiikkaa hibboo sanaa saba isheetti himte.

¹⁸ Namoonni magaalaa sanaas guyyaa torbaffaatti utuu biiftuun hin lixin, "Wanni damma caalaa mi'aawu maali?"

Jabaan leenca caalu maali?" jedhaniin.

Saamsoonis,

"Utuu raada kootiin qotachuu baattanii, isin silaa hibboo koo hin hiiktan ture" jedheen.

¹⁹ Kana irratti Hafuurri WAAQAYYOO jabinaan isa irra bu'e. Innis gara Ashqaloonitti gad bu'ee namoota magaalaa keessaa soddoma ajjeese; waan isaan qabanis irraa fudhatee namoota hibboo sana hiikaniif uffata kittii kenne. Aariidhaanis gubachaa gara mana abbaa isaatti deebi'e. ²⁰ Niitii Saamsoonis miinjee isaatti heerumsiisan.

15

Saamsoon Filixeemotatti Haaloo Ba'e

¹ Ergasii yeroo qamadiin walitti qabamutti Saamsoon korma re'ee xinnaa isaa fudhatee niitii isaa ilaaluu dhage. Innis, "Ani daree niitii koo nan seena" jedhe. Abbaan niitii isaa garuu eeyyamuufii dide.

² Innis, "Ani waan ati ishee jibbiteerta jedhee dhugumaan amaneef miinjee keetti ishee heerumsiiseera; obboleettiin ishee quxisuun, ishee caalaa bareedduu mitii? Qooda sanaa ishee fudhadhu" jedheen.

³ Saamsoon deebisee, "Ani yeroo kanatti yoo miidhaa kam iyyuu Filixeemota irraan ga'e itti hin gaafatamu" isaaniin jedhe. ⁴ Kanaafuu inni achii ba'ee waangota dhibba sadii qabee lama lamaan eegee isaanii walitti hidhe. Eegee lamaan lamaan isaanii irrattis guca guduunfe; ⁵ ibiddas itti qabsiisee qamadii Filixeemotaa keessatti waangota sana gad lakkise. Midhaan haamamee fi kan hin haamaminitti akkasumas iddoo dhaabaa wayiniitii fi ejersaa guggube.

⁶ Yeroo Filixeemomni, "Eenyutu waan kana godhe?" jedhaniin gaafatanitti, "Saamsoon dhirsaa intala namicha Tiimnaahi sanaatu sababii niitiin isaa miinjee isaatti jalaa heerumsiifanteef waan kana godhe" jedhamee isaanitti himame.

Kanaafuu Filixeemomni ol ba'anii niitii Saamsoonii fi abbaa ishee gubanii ajjeesan. ⁷ Saamsoonis, "Erga isin akkas gootanii ani hamma haaloo koo baafadhutti isin hin dhiisu" isaaniin jedhe. ⁸ Akka malees isaan dha'ee hedduu isaanii galaafate. Ergasii gad bu'ee holqa kattaa Eexaam keessa jiraate.

⁹ Filixeemomni ol ba'anii naannoo Lehiitti faffaca'anii Yihuudaa keessa qubatan.

¹⁰ Namoonni Yihuudaas, "Isin maaliif nu waraanuuf dhufan?" jedhaniin isaan gaafatan.

Isaanis deebisanii, “Nu Saamsoon hiinee waan inni nu godhe sana isa godhuuf dhufne” jedhan.

¹¹ Ergasiis namoonni kuma sadii Yihuudaadhaa gara holqa Eexaamitti gad bu’anii Saamsoonniin, “Ati maali nu goote? Akka Filisxeemonni nu bulchan hin beektuu?” jedhan.

Innis, “Ani waanuma isaan na godhan sana isaan irratti nan godhe” jedhee deebise.

¹² Isaanis, “Nu si hiinee dabarsinee Filisxeemotatti si kennuuf dhufne” jedhaniin.

Saamsoon immoo, “Isin mataan keessan akka na hin ajjeefne naa kakadhaa” jedhe.

¹³ Isaanis, “Tole, nu si hiinee dabarsinee harka isaaniitti si kennina malee ofii keenyaan si’i hin ajjeefnu” jedhaniin. Kanaafuu funyoo haaraa lamaan isa hidhanii holqa keessaa isa baasan. ¹⁴ Yeroo inni Lehiitti dhi’aatettis Filisxeemonni iyyaa gara isaa dhufan. Hafuurri WAAQAYYOS jabinaan isa irra bu’ee. Funyoon harki isaa ittiin hidhamee ture sun akka quncee talbaa kan ibidda keessa bu’ee ta’ee; hidhaan isaas harka isaa irraa ciccite. ¹⁵ Innis lafee ha’oo harree haaraa isaa argatee hiixatee fudhate; ittiin dha’ee nama kuma tokko fixe.

¹⁶ Kana irrattis Saamsoon,

“Ani lafee ha’oo harree tokkoon,

wal irra isaan nan tuule;

lafee ha’oo harree tokkootiin,

namoota kuma tokko nan ajjeese” jedhe.

¹⁷ Innis erga waan kana dubbatee fixatee booddee lafee ha’oo harree sana achi darbate; iddoo sunis Raamaa Leehii jedhame.

¹⁸ Innis sababii akka malee dheeboteef, “Ati mo’annaa guddaa akkanaa garbicha keetiif kenniteerta. Egaa ani amma dheebuudhaan du’ee harka warra dhagna hin qabatinii keessan bu’aa?” jechuudhaan WAAQAYYON waammate. ¹⁹ Waaqnis boolla Lehi keessa jiru dhoosee bishaan baase. Saamsoonis yommuu bishaan sana dhugetti humni isaa deebi’eeffii jabaate. Kanaafuu burqaan suni Een Haqoree jedhamee moggaafame. Innis hamma har’aatti achuma Leehiitti argama.

²⁰ Saamsoon bara Filisxeemotaa keessa waggaa digdama Israa’eloota bulche.

16

Saamsoonii fi Daliilaa

¹ Gaaf tokko Saamsoon gara Gaazaa iddoo itti sagaagaltuu tokko arge dhaqe. Ishee wajjin buluufis ol seene. ² Namoota Gaazaattis, “Saamsoon as jira!” jedhamee himame. Kanaafuu isaan naannoo sana marsanii halkan guutuu riphaniin karra magaalattii irratti isa eggatan. Isaanis, “Ganama barii isa ajjeefna” jedhaniin halkan sana utuu hin socho’ in bulan.

³ Saamsoon garuu hamma walakkaa halkaniitti achi rafe. Ergasii ka’ee cufaawwan karra magaalattii michichila lama wajjin, danqaraa isaatii fi waan hunda buqqise. Ol fudhees gatiittii isatti baachuudhaan gara fiixee gaara fuullee Kebronitti ol ba’ee.

⁴ Yeroo muraasa booddee Saamsoon jaalala dubbattii sulula Sooreeq keessa jiraattu tokkootiin qabame; maqaan ishees Daliilaa jedhama ture. ⁵ Bulchitoonni Filisxeemotaas gara ishee dhaqanii, “Akka nu hiinee isa miidhuu dandeenyuuf, akka inni icciitii jabina isaa guddaa kanaatii fi akka nu itti isa mo’achuu dandeenyu sitti himuuf isa sossobi. Tokkoon tokkoon keenyas meetii kuma tokkoo fi dhibba tokko siif kenninaa” jedhaniin.

⁶ Daliilaanis Saamsoonniin, “Icciitii jabina kee guddaa sanaatii fi akka ati itti qabamtee hidhamuu dandeessu natti himi” jette.

⁷ Saamsoon immoo deebisee, “Yoo namni kam iyyuu teepha haaraa hin gogin torbaan na hidhe, ani akkuma nama biraa kam iyyuu dadhabaa nan ta’a” jedheen.

⁸ Bulchitoonni Filisxeemotaas ergasii teepha haaraa hin gogin torba fidanii isheetti kennan; isheenis ittiin isa hiite. ⁹ Isheen gola keessatti namoota dhoksatee, “Saamsoon, Filisxeemonni sitti dhufan!” jetteen. Inni garuu teephawwan sana akkuma ribuun yommuu ibidda bira ga’u baqutti rakkina malee of irraa kukkute. Kanaafuu icciitiin jabina isaa hin beekamne.

¹⁰ Daliilaanis Saamsoonniin, “Ati na gowwoomsite; na sobdes. Amma kottuu akka itti hidhamuu dandeessu natti himi” jette.

¹¹ Innis, “Yoo namni kam iyyuu funyoo haaraa namni itti hin fayyadamiin na hidhe, ani akkuma nama biraa kamii iyyuu dadhabaa nan ta’a” jedheen.

¹² Kanaafuu Daliilaanis funyoo haaraa fuutee ittiin isa hiite. Namootas golla keessatti dhoksatee, “Saamsoon, Filisxeemonni sitti dhufan!” jetteen. Inni garuu funyoowwan sana akkuma kirriitti harka ofii irraa kukkute.

¹³ Daliilaanis Saamsoonniin, “Ati hamma ammaatti na gowwoomsiteerta; na sobdeertas. Akka itti hidhamu dandeessu natti himi” jette.

Innis, “Yoo ati guduruu mataa koo torban walitti footee qofootti na hiite, ani akkuma nama biraa kamii iyyuu dadhabaa nan ta’a” isheen jedhe. Daliilaanis utuu inni rafuu guduruu mataa isaa torban walitti footee, ¹⁴ qofootti isa hiite.

Ammas isa waamtee, “Saamsoon, Filisxeemonni sitti dhufan!” jette. Inni garuu hirribaa ka’ee qofoo sana guduruu mataa isaa wajjin buqqise.

¹⁵ Isheenis, “Ati utuu na hin amanin akkamitti, ‘Ani si jaalladha’ naan jetta? Utuu icciitii jabina kee guddaa sanaa natti hin himin, ati na sobuun kee kun yeroo sadaffaa dha” jetteen. ¹⁶ Guyyuma guyyaanis hamma lubbuun isaa jireenya jibbitutti dubbii isheetiin afaan isa gogsite.

¹⁷ Kanaafuu inni waan hunda isheetti hime. Akkanas jedheen; “Sababii ani gaafuma dhaladhee jalqabee Naaziricha ta’ee Waaqaaf addaan baafameef qarabaan takkumaa mataa koo tuqee hin beeku. Yoo mataan koo haadame garuu jabinni koo narraa badee anis akkuma nama biraa kamii iyyuu dadhabaa nan ta’a.”

¹⁸ Daliilaanis yommuu akka inni waan hunda isheetti hime hubattetti, “Inni waan hunda natti himeeraatii mee deebi’aa kottaa” jettee bulchitoota Filisxeemotaatti ergaa ergite. Kanaafuu bulchitoonni Filisxeemotaa harka isaaniitti meetii qabatanii gara ishee dhufan. ¹⁹ Akka inni gudeeda ishee irra ciisu gootee nama tokko waamtee guduruu mataa isaa torban irraa haadchisiifte. Isheenis akka malee isa rakkisuu jalqabde. Jabinni isaas isa irraa bade.

²⁰ Isheenis, “Saamsoon, Filisxeemonni sitti dhufan!” jetteen.

Innis hirribaa ka’ee, “Ani akkuma yeroo kaanii gad ba’ee of irraa harcaasa” jedhe. Garuu akka WAAQAYYO isa dhiisee deeme hin beekne ture.

²¹ Ergasii Filisxeemonni isa qabanii ija isaa keessaa baasanii gara Gaazaatti isa geessan. Fonca naasiitiin isa hidhaniis mana hidhaa keessatti daaktuu midhaanii isa godhan. ²² Rifeensi mataa isaa garuu erga haadamee booddee deebi’ee guddachuu jalqabe.

Saamsoon Du’uu Isaa

²³ Bulchitoonni Filisxeemotaa, “Waaqni keenya, Saamsoon diina keenya sana dabarsee harka keenyatti nuu kenneera” jedhanii gammaduudhaan Daagon Waaqa isaaniitiif aarsaa guddaa dhi’eessuuf walitti qabamanii turan.

²⁴ Namoonnis yeroo isa arganitti Waaqa isaanii galateeffachaa, “Waaqni keenya,

diina keenya kan biyya keenya balleesse,
kan nama baay’ee nu duraa ajjeese sana
dabarsee nuu kenneera” jedhan.

²⁵ Isaanis utuma garaan isaanii gammadaa jiruu, “Akka inni nu bashannansiisuuf mee Saamsoonin waamaa” jedhan. Kanaafuu Saamsoonin mana hidhaatii waamanii fidan; innis isaan bashannansiise.

Yommuu isaan utubaawwan gurguddaa gidduu isa dhaabachiisanitti, ²⁶ Saamsoon tajaajilaa harka isaa qabee ture sanaan, “Akka ani itti irkadhuuf gara utubaawwan mana sagadaa kana qabanii dhaabaniitti na dhi’eessi” jedhe. ²⁷ Manni sagadaa sun dhiiraa dubartiin guutamee ture; bulchitoonni Filisxeemotaa hundinuu achi turan; Saamsoonii tapha argisiisu ilaaluuf jedhanii namoonni kuma sadii bantii manichaa irra turan. ²⁸ Saamsoonis akkana jedhee WAAQAYYON kadhate; “Yaa WAAQAYYO Gooftaa, na yaadadhu. Yaa Waaqi, akka ani ija koo lamaaniif Filisxeemota haaloo baafadhuuf yeroo tokko jabina naa kenni.” ²⁹ Saamsoonis ergasii utubaawwan gurguddaa lamaan kanneen walakkaa mana sagadaa sanaa dhaabatanii mana sana baatanitti hiixatee tokko harka isaa mirgaatiin, kaan immoo harka isaa bitaatiin qabatee, ³⁰ “Ani Filisxeemota wajjin du’a!” jedhee humna qabu hundaan dhiibe; manichi sagadaas bulchitootaa fi namoota achi keessa turan hunda irratti jige. Kanaafuu namoonni inni yeroo du’a isaatti ajjeese kanneen inni yeroo jireenya isaatti ajjeese caalaa baay’ee turan.

³¹ Obboloonni isaatii fi maatiin abbaa isaa hundinuu reeffa isaa fuudhuu gad bu’an. Isaanis isa fidanii Zoraa fi Eshitaa’ol gidduutti iddoo awwaala abbaa isaa kan Maano’aa keessatti isa awwaalan. Inni waggaa digdama Israa’elin bulche.

¹ Namicha biyya gaara Efreem keessa jiraatu kan maqaan isaa Miikaayaa jedhamu tokkotu ture; ² innis haadha isaatiin, “Meetiin kuma tokkoo fi dhibba tokko ulfaatu kan si duraa badee ani utuu ati nama si jalaa fudhate abaartuu dhaga’e sun na bira jira; kan fudhates anuma” jedhe.

Haati isaas, “Yaa ilma ko, WAAQAYYO si haa eebbisu” jetteen.

³ Yommuu inni meetii kuma tokkoo fi dhibba tokko sana deebisee haadha isaatti kennettis, haati isaa, “Akka ilmi koo fakkii meetiin itti uffifame ittiin hojjetuuf ani meetii koo WAAQAYYOOF addaan baaseera. Ani ammas deebisee sittin kenna” jetteen.

⁴ Kanaafuu inni meetii sana deebisee haadha isaatiif kenne; isheen is meetii dhibba lama fuutee tumtuu meetiitti kennite; tumtuun sunis fakkii fi Waaqa tolfamaa ittiin hojjete. Fakkii fi Waaqni tolfamaan sunis mana Miikaayaa keessa kaa’aman.

⁵ Namichi Miikaa jedhamu kunis galma Waaqa tolfamaa qaba ture; innis dirataa fi waaqota tolfamoo tokko tokko tolchee ilmaan isaa keessaa nama tokko luba godhate. ⁶ Bara sana Israa’el keessa mootiin hin jiru ture; tokkoon tokkoon namaa waanuma isatti tole hojjeta ture.

⁷ Yeroo sanatti biyya Yihuudaa keessa dargaggeessa gosa Lewwii kan Beetlihem keessa gosa Yihuudaa gidduu jiraatu tokkotu ture. ⁸ Innis iddoo jireenyaa kan biraa barbaaduuf jedhee magaalaa sana dhiisee deeme. Utuma deemuus gara biyya gaaraa Efreem mana Miikaa dhufe.

⁹ Miikaanis, “Ati eessaa dhufte?” jedhee isa gaafate.

Innis, “Ani nama Lewwii kan Beetlihem biyya Yihuudaatii dhufee iddoo jireenyaa barbaaduu dha” jedheen.

¹⁰ Miikaanis, “Na wajjin jiraadhuutii abbaa fi luba naa ta’i; anis waggaatti meetii kudhan siif kenna; uffata keetii fi nyaata kees nan danda’a” isaan jedhe. ¹¹ Kanaafuu Lewwichi sun isa wajjin jiraachuuf walii gale; dargaggeessi sunis Miikaadhaaf ilmaan isaa keessaa akkuma nama tokkoo ta’e. ¹² Miikaanis dargaggeessa Lewwii sana muudate; innis luba isaa ta’ee mana isaa jiraate. ¹³ Miikaanis, “Erga Lewwichi kun luba koo ta’e, ani akka WAAQAYYO waan gaarii naa godhu nan beeka” jedhe.

18

Namoonni Daan Laayish Keessa Qubatan

¹ Yeroo sanatti Israa’el keessa mootiin hin jiru ture.

Sababii hamma yeroo sanaatti gosoota Israa’el gidduutti dhaalli isaaniif hin kennamiif gosti Daan iddoo qubatan barbaaddachaa turan. ² Kanaafuu warri Daan akka isaan biyya sana basaasaniif fi magaalaa Zoraatii fi Eshitaa’ol keessaa namoota jajjaboo shan ergan. Namoonni kunneenis gosoota isaanii hunda iddoo bu’an. Warra erganiinis, “Dhaqaatii biyyattii sakatta’aa” jedhan.

Ergamoonni sunis biyya gaaraa Efreemiitti ol ba’anii mana Miikaa dhufan; halkan sanas achi bulan. ³ Isaanis yommuu mana Miikaa bira ga’anitti sagalee dargaggeessa Lewwicha sanaa hubatan; kanaafuu itti goranii, “Eenyutu as si fide? Ati maal asii goota? Maaliifis as dhufte?” jedhanii isa gaafatan.

⁴ Innis, “Miikaatu na qaxarate; anis luba isaa ti” jedhee waan inni isaaf godhe isaanitti hime.

⁵ Isaanis, “Maaloo mee akka karaan keenya milkaa’uu fi akka hin milkooftne Waaqa nuu gaafadhu” jedhaniin.

⁶ Lubichis, “Nagaan deemaa; WAAQAYYO karaa keessan isinii mijeesseera” isaaniin jedhe.

⁷ Kanaafuu namoonni shanan sun ka’anii Laayish dhaqan; akka namoonni achi jiraatan, akkuma warra Siidoonaa sodaa tokko malee nagaadhaan jiraatanis argan. Isaanis sababii lafti isaanii waan hunda qabduuf jireenya badhaadhaa jiraatan. Akkasumas sababii warra Siidoonaa irraa fagaatanii jiraachaa turaniif isaan eenyuma wajjinuu walitti dhufeenya tokko illee hin qaban ture.

⁸ Yommuu isaan Zoraa fi Eshitaa’olitti deebi’anitti obbollooni isaanii, “Oduu maalii qabattanii deebitan?” jedhanii isaan gaafatan.

⁹ Isaanis deebisanii akkana jedhaniin; “Ka’aa dhaqnee isaan lolla! Nu akka biyyattiin gabbattuu taate argineerra. Isin waan kana ittuma dhiiftuu? Dhaqxanii qabachuu hin maminaa. ¹⁰ Isinis yommuu achi geessanitti saba yaaddoo tokko malee jiraatuu fi biyya bal’aa Waaqni dabarsee harka keessanitti isinii kennu kan wanni tokko iyyuu itti hin hir’atin argattu.”

¹¹ Kana irratti gosa Daan keessaa namoonni dhibba ja’a mi’a lolaa hidhatanii Zoraa fi Eshitaa’olii ka’an. ¹² Ol ba’anii Yihuudaa keessa iddoo Kiriyaati Ye’aariim jedhamu

bira qubatan. Sababii kanaaf iddoon sun hamma har'aatti qubata Daan jedhamee waamama; qubanni sunis gama lixa Kiriyaati Ye'aariimitti argama. ¹³ Isaanis achii itti fufanii gara biyya gaaraa Efreemitti ol ba'anii mana Miikaa dhufan.

¹⁴ Namoonni Shanan biyya Laayish basaasanii turan sunis, obboloota isaaniitiin, "Isin akka manneen kana keessaa tokko dirata, fakkii waaqota tolfamoo mana keessaa, fakkii soofamee fi fakkii meetiin itti uffifame qabu beektuu? Amma waan gochuu qabdan beekaa" jedhan. ¹⁵ Kanaafuu isaan achi goranii mana Miikaa iddoo Lewwichi dargageessi sun jiraatu dhufanii nagaa isa gaafatan. ¹⁶ Namoonni Daan warri mi'a lolaa hidhatan dhibbi ja'aan balbala ittiin karra seenan irra dhaabatanii turan. ¹⁷ Namoonni biyyattii basaasan shanan ol galanii fakkii soofame, dirata, waaqota tolfamoo mana keessaatii fi Waaqa tolfamaa baqfamee hojjetame fudhatan. Yeroo kanatti lubni sunii fi namoonni mi'a lolaa hidhatan dhibbi ja'aan balbala ittiin karra seenan irra dhaabachaa turan.

¹⁸ Yommuu namoonni kunneen mana Miikaa seenanii fakkii soofame, dirata, waaqota tolfamoo mana keessaa biraatii fi Waaqa baqfamee hojjetame fudhatanitti lubichi, "Isin maal hojjechaa jirtu?" Isaaniin jedhe.

¹⁹ Isaanis, "Cal'isi! Afaan kee qabadhu; nu faana kottuutii abbaa fi luba nuu ta'i. Mana nama tokkoo keessa tajaajiluu irra sanyii fi gosa Israa'eliif luba taatee tajaajiluu siif hin wayyuu?" jedhaniin. ²⁰ Lubni sun ni gammade. Innis dirata, waaqota tolfamoo mana keessaa biraatii fi fakkii soofame sana fudhatee isaan wajjin deeme. ²¹ Isaanis, ijoollee isaanii xixinnoo, horii isaaniitii fi qabeenya isaanii of dura buusanii of irra garagalanii qajeelan.

²² Yeroo isaan mana Miikaa irraa xinnoo fagaatanii deemanittis, namoonni ollaa mana Miikaa wal waamanii namoota Daan duukaa bu'anii qaqqaban. ²³ Isaan itti iyyinaan warri Daan of irra garagalanii Miikaadhaan, "Ati maal barbaaddee namoota kee waammattae nu loluuf dhufte?" jedhan.

²⁴ Innis deebisee, "Isin waaqota ani tolfadhee fi luba koo fudhattaniirtu. Wannii naa hafe maaltu jira? Yoos isin akkamitti, 'Maali taate?' naan jettu ree?"

²⁵ Namoonni Daanis, "Afaan kee nutti hin banin; yoo kanaa achii namoonni obsa hin qabne tokko tokko si dha'u; atii fi maatiin kees lubbuu keessan dhabdu" jedhaniin. ²⁶ Ergasii namoonni Daan karaa isaanii itti fufan; Miikaan akka isaan hamma isaatii ol ta'an hubatee of irra garagalee gara mana ofii isaatti qajelee.

²⁷ Isaan waan Miikaan tolfatee fi luba isaa fudhatanii Laayishitti qajeelanii saba yaaddoo tokko malee nagaan jiraatutti duulan. Goraadeedhaan isaan fixanii magaalaa isaanis guban. ²⁸ Sababii isaan Siidoon irraa fagaatanii jiraatanii fi eenyuma wajjin walitti dhufeenya hin qabneef kan isaan baraaruu tokko iyyuu hin jiru ture. Magaalaan sun sulula keessa Beet Rehooboot biratti argamti turte.

Namoonni Daan magaalaa sana deebisanii ijaaruudhaan achi jiraatan. ²⁹ Magaalaan sun duraan Laayish jedhamti turte; isaan garuu Daan jedhanii maqaa abbaa isaanii Daan namicha Israa'eliif dhalate sanaatiin moggaasan. ³⁰ Achittis namoonni Daan ofii isaaniitii waaqota tolfamoo dhaabbatan; Yoonataan ilmi Geershoom, ilmi Musee sunii fi ilmaan isaa hamma biyyattiin booji'amtetti luboota gosa Daan turan. ³¹ Kanaafuu isaan ittuma fufanii bara manni Waaqaa Shiiloo ture guutuu waaqota Miikaan tolfatetti fayyadamaa turan.

19

Namicha Lewwii Tokkoo fi Saajjato

¹ Yeroo sanatti Israa'el mootii hin qabdu ture.

Lewwichi lafa gammoojjii biyya gaaraa Efreem keessa jiraatu tokko Beetlihēm Yihuudaa keessaa dubartii tokko saajjato godhatee fudhate. ² Isheen garuu isaaf amanamtuu hin taane. Isa dhiiftees gara mana abbaa ishee Beetlihēm Yihuudaatti deebite. Erga ji'a afur achi turtee booddee, ³ dhirsi ishee araarfatee deebisee galfachuudhaaf gara ishee dhage. Innis hojjetaa isaatii fi harroota lama fudhatee deeme. Isheenis mana abbaa isheetti ol isa galchite; abbaan ishees yommuu isa argetti gammachuudhaan isa simate. ⁴ Abbaan niitii isaa jechuunis, abbaan intalattii akka inni achi turuuf jabeessee isa kadhate; kanaafuu isaan nyaachaa, dhugaas bultii sadii isa bira bubbulan.

⁵ Guyyaa afuraffaatti ganamaan ka'anii deemuuf qophaa'an; abbaan intalattii garuu dhirsa intala isaatiin, "Akka jabaatuuf waa nyaadhu; ergasii ni deemtaa" jedhe. ⁶ Kanaafuu lachan isaanii wajjin nyaatanii dhuguuf tataa'an. Ergasii abbaan intalattii, "Maaloo har'a asma buliitii aara galfadhu" jedheen. ⁷ Yommuu inni deemuuf ka'ettis

abbaan niitii isaa jabeessee isa kadhate; kanaafuu inni halkan sana achi bule. ⁸ Guyyaa shanaffaatti yommuu inni ganamaan deemuuf ka'etti abbaan intalattii, "Aara galfadhu. Hamma waaree booddeettis asuma turi!" isaan jedhe. Kanaafuu lachan isaanii iyyuu wajjin nyaatan.

⁹ Yeroo namichi saajjatoos isaatii fi tajaajilaa isaa wajjin deemuuf ka'etti abbaan intalattii, "Ilaali! Aduun dhi'uutti jirti. Asuma bulaa; guyyaan galgalaa'eera. Asuma bulaatii aara galfadhaa. Bori ganamaan kaatanii karaa keessan deemu dandeessu" jedheen. ¹⁰ Namichi garuu gaafa sana achi buluu didee harroota isaa lamaan fe'atee saajjatoos isaa fudhatee qajelee. Gara fuullee Yerusaa'el ishee Yebuus jedhamtu sanaa dhufe.

¹¹ Yommuu isaan Yebuus bira ga'anitti sababii aduun dhiiteef tajaajilaan sun gooftaa isaatiin, "Maaloo kottaa magaalaa Yebuusotaa kanatti gorree haa bullu" jedhe.

¹² Gooftaan isaas deebisee, "Lakkii. Nu magaalaa Namoota Ormaa warra Israa'eloota hin ta'inni hin seenuu. Gara Gibe'aatti dabarra" isaan jedhe. ¹³ Itti fufees, "Kottu Gibe'aa yookaan Raamaa geenyee tokkoo isaanii keessa bullaa" jedheen. ¹⁴ Kanaafuu deemsa isaanii itti fufanii yeroo isaan Gibe'aa ishee Beniyaam keessatti argamtutti dhi'ataanitti aduun dhiite. ¹⁵ Isaanis achi buluuf itti goran. Oobdii magaalaa keessas qubatan; garuu namni tokko iyyuu isaan bulchuuf mana isaatti ol isaan hin galchine.

¹⁶ Galgaluma sana jaarsi biyya gaaraa Efreemiitii dhufee Gibe'aa jiraatu tokko hojii qonnaatii gale. Namoonni biyyattii garuu gosa Beniyaam turan. ¹⁷ Jaarsi sun yommuu ol jedhee oobdii magaalaa keessatti kara deemaa sana argetti, "Ati garam deemta? Eessaa dhufte?" jedhee gaafate.

¹⁸ Lewwichis akkana jedhe; "Nu Beetlihem Yihuudaatii dhufnee gara lafa moggaa biyya gaaraa Efreem iddoo ani jiraadhuu dhaquuf deemna. Ani achi dhaqee ture. Ani amma gara mana WAAQAYYOO dhaqaan jira. Namni mana isaatti na simate tokko iyyuu hin jiru. ¹⁹ Nu tajaajiltoonni kee harroota keenyaaf cidii fi okaa qabna; anaa fi tajaajiltuu keetiif, dargaggeessa nu wajjin jiruufis buddeenaa fi daadhii wayinii qabna. Nu waan tokko illee hin barbaannu."

²⁰ Jaarsichis, "Nagaan siif haa ta'u; ani waan isin barbaachisu hundumaa isiniif nan dhi'eessa; isin garuu oobdii keessa hin bulinaa" jedheen. ²¹ Kanaafuu inni gara mana isaatti ol isa galchee harroota isaatiif waan nyaatan kenne. Isaanis erga miilla isaanii dhiqatanii booddee nyaatanii dhugan.

²² Utuu isaan gammadaa jiranuu kashlabboonni magaalaa sanaa tokko tokko mana jaarsichaa marsan. Balbalas dhadha'anii iyyuudhaan, "Akka nu isatti sagaagalluuf namicha mana kee seene sana gad nuu baasi" jedhaniin.

²³ Abbaan manichaas gad ba'ee akkana isaaniin jedhe; "Lakkisaa yaa firoota ko, hammina akkasii hin hojjetinaa; namichi kun waan keessummaa koo ta'eef waan jibbiisiisaa kana hin hojjetinaa. ²⁴ Kunoo intalli koo durbi qulqulluunii fi saajjatoon namichaa as jiru. Ani isaan gad isinii baasaatii waan feetan isaan godhaa. Namicha kanatti garuu waan jibbiisiisaa akkasii hin hojjetinaa."

²⁵ Ta'us isaan isa hin dhageenye. Kanaafuu Lewwichi saajjatoos isaa gad isaanii baase; isaanis halkan guutuu isheetti taphatanii ganama barii gad ishee dhiisan. ²⁶ Akkuma lafti bariiteenis dubartiin sun gara mana gooftaan ishee ture sanaa dhaqxee balbala duratti kuftee hamma biiftuun baatutti achumatti diriirtee hafte.

²⁷ Yommuu gooftaan ishee ganama barii ka'ee deemuuf balbala banee gad ba'etti, kunoo saajjatoon isaa kuftee harka ishee gulantaa balbala irratti diriirsitee arge. ²⁸ Innis, "Ka'i ni deemnaa" isheen jedhe. Garuu deebiin tokko illee hin turre. Kana irratti namichi sun harree irra ishee kaa'ee gara mana isaatti qajelee.

²⁹ Innis yommuu mana isaa ga'etti haaduu fudhatee saajjatoos isaa sana buusaa buusaatti iddoo kudha lamatti kukkutee guutummaa biyya Israa'elitti erge. ³⁰ Namni waan kana arge hundi, "Erga Israa'eloonni Gibxii ba'anii jalqabee wannii akkasii takkumaa argamee yookaan hojjetamee hin beeku. Waa'ee isaa yaadaa! Hubadhaas! Waan gochuu qabnus nutti himaa!" jedhe.

20

Israa'eloonni Beniyaamota Lolan

¹ Israa'eloonni Daanii hamma Bersheebaatti argaman akkasumas kanneen biyya Gili'aad keessa jiraatan hundi akka nama tokkootti ba'anii iddoo Miisphaa jedhamutti fuula WAAQAYYOO duratti walitti qabaman. ² Hooggantoonni namoota gosoota Israa'el hundi wal ga'ii saba Waaqaa irratti argaman; loltoonni kuma dhibba afur goraadee hidhatanii turan. ³ Namoonni gosa Beniyaam akka Israa'eloonni gara Miisphaatti ol

ba'an dhaga'an. Namoonni Israa'elis, "Mee akka wanni hamaan kun itti hojjetame nutti himaa" jedhan.

⁴ Lewwichi dhirsi dubartii ajjeefamte sanaas akkana jedhee deebise; "Anii fi saajjatoon koo achi buluuf biyya Beniyaam Gibe'aa dhufne. ⁵ Namoonni Gibe'aas na ajjeesuuf halkan mana ani buffe sana marsan. Isaanis saajjatoon koo humnaan gudeedan; isheenis ni duute. ⁶ Anis reeffa saajjatoon koo fuudhee gargari kukkutee gara biyyoota dhaala gosoota Israa'el hundaatti erge; isaan Israa'el keessatti waan jibbiisiisaa fi salphisaa akkasii hojjetaniiruutii. ⁷ Ammas isin Israa'eloonni hundinuu irratti mari'adhaatii murtii keessan kennaa."

⁸ Namoonni hundi akkuma nama tokkootti ka'anii akkana jedhan; "Nu keessaa namni tokko iyyuu gara mana isaatti hin galu. Nu keessaa namni tokko iyyuu mana isaatti hin deebi'u. ⁹ Wannu nu Gibe'aa goonu garuu kana: Akkuma isaan nuu ba'etti itti duuluu dha. ¹⁰ Akka isaan warra duulaniif waan isaan nyaatan fidaniif, gosoota Israa'el hunda keessaa nama dhibba tokko keessaa nama kudhan, nama kuma tokko keessaa nama dhibba tokko, nama kuma kudhan keessaa nama kuma tokko ni fudhanna. Duulli kunis yeroo Gibe'aa ishee Beniyaam keessa jirtu sana qaqqabutti waan isaan Israa'el irratti hojjetan sanaaf adabbii barbaachisaa ni kenna." ¹¹ Kanaafuu namoonni Israa'el hundi walitti qabamanii akkuma nama tokkootti magaalattiitti duulan.

¹² Gosoonni Israa'el gara gosa Beniyaam hundaatti akkana jedhanii nama ergan; "Yakki hamaan gidduu keessanitti hojjetame kun maali? ¹³ Ammas akka nu isaan barbadeessinee Israa'el keessaa hammina balleessinuuf namoota Gibe'aa hamoo sana dabarsaa nutti kennaa."

Beniyaamonni garuu Israa'eloota firoota isaanii dhaga'uu didan. ¹⁴ Isaanis Israa'eloota waraanuudhaaf magaalawwan isaaniitii tokkummaadhaan gara Gibe'aa dhufan. ¹⁵ Beniyaamonni yeruma tokkotti loltoota filatamoo Gibe'aa keessa jiraatan dhibba torba irratti namoota goraadee hidhatan kuma digdamii ja'a magaalawwan isaaniitii hiriirsan. ¹⁶ Loltoota filatamoo kanneen hunda keessaa dhibba torba bitaachota tokkoon tokkoon isaanii rifeensatti dhagaa furrisanii hin dhabne turan.

¹⁷ Israa'eloonni Beniyaamota malee iyyuu namoota goraadee hidhatan kuma dhibba afur qabu turan; kunneen hundinuu gootota turan.

¹⁸ Israa'eloonni Beet'eelitti ol ba'anii, "Beniyaamota waraanuudhaaf nu keessaa jalqabatti enyu haa ba'uu?" jedhanii Waaqa gaafatan.

WAAQAYYOS, "Yihuudaan jalqabatti haa ba'u" jedhee deebise.

¹⁹ Ijoolleen Israa'elis ganamaan ka'anii Gibe'aa marsan. ²⁰ Namoonni Israa'el Beniyaamota waraanuuf ba'anii Gibe'aatti iddoo iddoo isaanii qabatan. ²¹ Beniyaamonnis Gibe'aadhaa ba'anii gaafuma sana dirree waraanaa irratti Israa'eloota kuma digdamii lama fixan. ²² Namoonni Israa'el garuu wal jajjabeessanii iddoodhuma gaafa duraa itti hiriiran sanatti iddoo iddoo isaanii qabatan. ²³ Israa'eloonni ol ba'anii hamma galgalaatti fuula WAAQAYYOO duratti boo'an. Isaanis, "Nu obboloota keenya Beniyaamota waraanuuf amma illee ol baanuu?" jedhanii WAAQAYYON gaafatan.

WAAQAYYOS, "Itti ol ba'aa" jedhee deebise.

²⁴ Israa'eloonni guyyaa lammaffaatti gara Beniyaamotaatti dhi'aatan. ²⁵ Yeroo kanatti, Beniyaamonni Gibe'aadhaa itti ba'anii Israa'eloota goraadee hidhatan kuma kudha saddeet galaafatan.

²⁶ Ergasii ijoolleen Israa'el, sabni hundinuu Beet'eelitti ol ba'anii achitti boo'aa fuula WAAQAYYOO dura tataa'an. Hamma galgalaattis soomanii aarsaa gubamuu fi aarsaa nagaa fuula WAAQAYYOO duratti dhi'eessan. ²⁷ Israa'eloonnis gorsa WAAQAYYOO gaafatan. Bara sana taabonni kakuu Waaqa achuma ture; ²⁸ Fiinehaas ilmi Ele'aazaar, ilmi Aroon fuula isaa dura tajaajilaa ture. Isaanis, "Nu amma illee obboloota keenya Beniyaamota waraanuuf haa baanu moo haa dhiifnu?" jedhanii gaafatan.

WAAQAYYOS, "Ba'aa; ani bori isaan dabarsee harka keessanitti kennaatii" jedheen.

²⁹ Kanaafuu Israa'eloonni naannoo Gibe'aatti riphan. ³⁰ Isaanis guyyaa sadaffaatti Beniyaamotatti duulanii akkuma duraan godhan sana Gibe'aa waraanuudhaaf iddoo iddoo isaanii qabatan. ³¹ Beniyaamonnis isaan waraanuuf ba'anii magaalaa sana irraa faagaan. Akkuma kanaan duraas Israa'eloota dha'uu jalqaban; daandiiwwan Beet'eeliitii fi Gibe'aa irrattis namoota Israa'el gara soddoma ajjeesan. ³² Beniyaamonnis, "Kunoo nu akkuma kanaan duraa isaan mo'achaa jirra" jedhan; Israa'eloonni immoo, "Kottaa nu gara dugda duubaatti deebinee akka isaan magaalaa keessaa ba'an goonaa" jedhan.

³³ Namoonni Israa'el hundinuu iddoo turanii ka'anii Ba'aal Taamaritti iddoo iddoo isaanii qabatan; waraanni Israa'el kan riphee eegaa tures karaa lixa Gibe'aatiin itti ba'e. ³⁴ Sana booddees namoonni Israa'el filatamoon kuma kudhan Gibe'aa irratti

waraana banan. Waraanni sunis akka malee cimaa ture; Beniyaamonna garuu akka badiin isaanitti dhi'aatee jiru hin beekne ture. ³⁵ WAAQAYYO fuula Israa'elootaa duratti Beniyaamota dha'e; Israa'eloonni gaafas Beniyaamota 25,100 kanneen hundi isaanii goraadee hidhatan fixan. ³⁶ Kanaafuu Beniyaamonna akka mo'ataman hubatan.

Yeroo kanatti Israa'eloonni waraana isaanii kan naannoo Gibe'aatti riphee jiru sana abdatanii waan mo'ataman fakkeessanii Beniyaamotaaf iddoo gad dhiisan. ³⁷ Waraanni Israa'el riphee ture sunis yeruma tokkoon cabsee Gibe'aa seenee magaalattii goraadeedhaan dha'e. ³⁸ Namoonni Israa'elis akka waraanni riphee ture sun magaalaa keessaa mallattoo duumessa aaraa guddaa isaa argisiisu walii galanii turan; ³⁹ akkasiiis namoonni Israa'el gara lolaatti dacha'an.

Beniyaamonna waraana jalqabanii Israa'eloota soddoma ajjeesan; kanaafuu, "Nu akkuma yeroo jalqabaa sana isaan mo'achaa jirra" jedhan. ⁴⁰ Garuu yommuu magaalattii keessaa aarii ol ba'uu jalqabetti Beniyaamonna of irra garagalanii aara guutummaa magaalattii keessaa samiitti ol ba'aa jiru argan. ⁴¹ Kana irratti namoonni Israa'el Beniyaamotatti garagalan; Beniyaamonna akka balaan isaanitti dhufe beekanii akka malee sodaataniitii. ⁴² Kanaafuu isaan gara gammoojjiitti fuula deeffatanii Israa'eloota duraa baqatan. Garuu jalaa ba'uu hin dandeenye. Namoonni Israa'el kanneen magaalaa sanaa ba'anii dhufan achitti isaan fixan. ⁴³ Isaanis jara marsanii ari'uudhaan fuulle ba'a Gibe'aatti isaan mo'atan. ⁴⁴ Loltoonni Beniyaam jajjaboon kuma kudha saddeet ni galaafataman. ⁴⁵ Utuu isaan garagalanii gara gammoojji kattaa Rimoonitti baqachaa jiranuu namoonni kuma shan karaa irratti jalaa dhuman. Israa'eloonni ammas hamma Gidoomitti warra hafan duukaa bu'anii nama kuma lama ajjeesan.

⁴⁶ Gaafas Beniyaamota goraadee hidhatan kuma digdamii shanitu ajjeefame; hundi isaanis loltoota bebeekamoo turan. ⁴⁷ Namoonni dhibba ja'a garuu garagalanii gara gammoojjiitti kattaa Rimoonitti baqatan; ji'a afuris achi turan. ⁴⁸ Namoonni Israa'el immoo gara Beniyaamotaatti dacha'anii guutummaa magaalaa sanaa, horii fi waan achitti argan hunda goraadeen fixan. Magaalaa itti dhufan hundas ibiddaan guban.

21

Beniyaamotaaf Niitonna Argaman

¹ Israa'eloonni, "Nu keessaa namni tokko illee Beniyaamotatti intala isaa heerumsiiisuu hin qabu" jedhanii Miisphaatti wal kakachiisani turan.

² Sabnis gara Beet'eel dhaqanii hamma galgalaatti fuula Waaqaa dura taa'uudhaan sagalee isaanii ol fuudhanii hiqqifatanii boo'an. ³ Isaanis, "Yaa WAAQAYYO, Waaqa Israa'el, wanni kun maaliif Israa'el irra ga'e? Har'a gosti tokko maaliif Israa'el keessaa dhabamaa?" jedhanii iyyan.

⁴ Namoonnis guyyaa itti aanutti ganamaan iddoo aarsaa tolchanii aarsaa gubamuu fi aarsaa nagaa dhi'eessan.

⁵ Ergasiis Israa'eloonni, "Gosoota Israa'el hundumaa keessaa gosti fuula WAAQAYYOO duratti wal ga'ii irratti hin argamin kami?" jedhanii gaafatan. Namni fuula WAAQAYYOO duratti wal ga'ii irratti hin argamin haa ajjeefamu jedhanii Miisphaatti walii kakatanii turaniitii.

⁶ Israa'eloonni garuu obboota isaanii Beniyaamotaaf garaa laafanii akkana jedhan; "Har'a gosti tokko Israa'el irraa citeera. ⁷ Ega warra hafaniif akkamitti niitota argachuu dandeenya? Nu akka intallan keenya isaanitti hin heerumsiiifne WAAQAYYON kakanneerraatii." ⁸ Ergasiis, "Gosti Miisphaatti fuula WAAQAYYOO duratti wal ga'ii irratti hin argamin kami?" jedhan. Isaanis akka namni tokko iyyuu Yaabeesh Gili'aadii gara qubataa wal ga'iidhaaf hin dhufin beekan. ⁹ Yeroo namoota lakkaa'anittis akka namni Yaabeesh Gili'aad tokko iyyuu achi hin jirre hubatan.

¹⁰ Kanaafuu waldaan sun loltoota kuma kudha lama gara Yaabeesh Gili'aad ergee akka isaan warra achi jiraatan, dubartootaa fi daa'imman dabalani goraadeedhaan fixan ajaje. ¹¹ Isaanis, "Wanni isin gochuu qabdan kanaa dha; dhiira hundaa fi dubartoota durbummaa hin qabne hunda ajjeesaa" jedhan. ¹² Isaanis namoota Yaabeesh Gili'aad keessa jiraatan keessaa dubarran takkumaa dhiirri bira hin ga'in dhibba afur argatan; gara biyya Kana'aan kan qubata Shiilootti argamu sanaattis isaan fidan.

¹³ Ergasiis waldaan guutuun Beniyaamota kattaa Rimoon bira jiraatanitti waamicha nagaa ergan. ¹⁴ Beniyaamonnis yeroo sanatti ni dacha'an; dubartoonni Yaabeesh Gili'aad kanneen du'a jalaa baraaraman akka niitota isaaniif ta'aniif kennamaniif; garuu hunda isaanii wal hin geenye.

¹⁵ Namoonnis sababii WAAQAYYO gosoota Israa’el gidduutti gargari ba’umsa uumeef Beniyaamiif gaddan. ¹⁶ Maanguddoonni waldaas akkana jedhan; “Dubartoonni Beniyaam dhumaniiru; egaa dhiirota hafaniif akkamitti niitota argachuu dandeenya? ¹⁷ Akka gosti tokko Israa’el keessaa hin badneef Beniyaamonni hafan dhaaltota argachuu qabu. ¹⁸ Nu Israa’eloonni sababii, ‘Namni intala isaa Beniyaamotatti heerumsiisu haa abaaramu’ jennee kakanneef, intallan keenya niitummaadhaan isaanii kennuu hin dandeenyu. ¹⁹ Kunoo ayyaanni WAAQAYYOO tokko wagguma waggaan Shiilootti ni ayyaaneffama; Shiiloon kunis Beet’eel irraa gara kaabaatti, karaa Beet’elii ba’ee Sheekemitti geessu irraa gara ba’aatti akkasumas Leboonaa irraa gara kibbaatti arganti.”

²⁰ Kanaafuu isaan akkana jedhanii Beniyaamota gorsan; “Dhaqaa iddoo dhaabaa wayinii keessa riphaa eeggadhaa. ²¹ Ilaalaa; yommuu dubarri Shiiloo sirbaaf ba’anitti iddoo dhaabaa wayinii keessaa ba’aatii tokkoo tokkoo keessaniif niitii tokko tokko qabaadhaatii gara Beniyaamitti deebi’aa. ²² Yommuu abbootiin isaanii yookaan obboloonni isaanii nutti himatanitti, ‘Sababii nu yeroo waraanaatti tokkoo tokkoo isaaniitiif niitii arguu hin danda’iniif isin isaan gargaaruudhaan dhiifama nuu godhaa; isinis sababii jaallattanii dubara keessan hin kenniniif balleessaa hin qabdan’ jennaan.”

²³ Beniyaamonnis akkuma isaanitti himame sana godhan; utuma dubarran sirbaa jiranuus tokkoon tokkoon namaa tokko tokko butee akka niitii isaa taatuuf fudhatee qajelee. Ergasiis gara dhaala isaaniitti deebi’anii magaalaa isaanii haaromfatanii achi jiraatan.

²⁴ Yeroo sanattis ijoolleen Israa’el iddoo sanaa ka’anii gara mana isaanii, gara gosa isaanii, gara lammii isaaniitii fi gara dhaala isaaniitti deebi’an.

²⁵ Bara sana Israa’el keessa mootiin hin jiru ture; tokkoon tokkoon namaa waanuma isatti tole hojjeta ture.

Kitaaba Ruut

Naa'omiinii fi Ruut

¹ Bara abbootiin murtii bulchaa turanitti beelli biyyatti bu'e; namichi Beetlihem Yihuudaa keessa jiraatu tokko niitii isaatii fi ilmaan isaa lamaan fudhatee biyya Mo'aab jiraachuu dhaqe. ² Maqaan namichaa Eliimelek, maqaan niitii isaa Naa'omiin, maqaan ilmaan isaa lamaanii immoo Mahiloonii fi Kiliyoon jedhama ture. Isaanis namoota Efraataa kan biyya Yihuudaa Beetlihem keessa jiraatan turan. Jarris biyya Mo'aab dhaqanii achi jiraatan.

³ Eliimelek dhirsi Naa'omiin ni du'e; isheenis ilmaan ishee lamaan wajjin hafte. ⁴ Isaanis dubartoota Mo'aab fuudhan; isheen tokko Orphaa kaan immoo Ruut jedhamti. Erga isaan waggaa kudhan achi jiraatanii booddee, ⁵ Mahiloonii fi Kiliyoon ni du'an. Naa'omiinis ilmaan ishee lamaanii fi dhirsa ishee dhabdee kophaa hafte.

⁶ Isheenis utuu Mo'aab jirtuu akka WAAQAYYO saba isaa yaadatee nyaata kenneef dhageesse; Naa'omiinii fi Niitonna ilmaan ishees gara biyya isheetti deebi'uuf qophaa'an. ⁷ Isheenis iddoo jiraachaa turtee kaatee niitota ilmaan ishee wajjin gara biyya Yihuudaatti deebi'uuf karaa qabatte.

⁸ Ergasiis Naa'omiin niitota ilmaan ishee lamaanii akkana jette; "Tokkoon tokkoon keessan gara mana haadhota keessaniitti deebi'aa. Akkuma dhirsoota keessan kanneen du'anii fi anaafis arjoomtan sana WAAQAYYO isiniif haa arjoomu. ⁹ WAAQAYYO tokkoo tokkoo keessaniifis mana dhirsa itti heerumtaniitti boqonnaa isinii haa kennu."

Isheenis ergasii isaan dhungate; isaanis sagalee ol fudhatanii boo'anii ¹⁰ "Waawuu, nu si wajjin gara saba keetiitti deebina" jedhaniin.

¹¹ Naa'omiin garuu akkana jette; "Yaa intallan ko, gara mana keessaniitti deebi'aa. Maaliif na wajjin deemtu? Ani si'achi ilmaan dhirsa isiniif ta'uu danda'an da'aa? ¹² Yaa intallan koo gara mana keessaniitti deebi'aa; ani dhirsa biraatti heerumuudhaaf dulloomeera. Yoo ani abdii qaba jedhee halkanuma kana heerumee ilmaan da'e illee, ¹³ isin hamma isaan guddatanitti ni eeggattuu? Isaan eeggachuuf jettanii utuu hin heerumin haftuu ree? Lakkii yaa intallan koo. Kun isin caalaa natti ulfaata; harki WAAQAYYOO natti garagaleeraatii!"

¹⁴ Isaan amma illee sagalee isaanii ol fudhatanii boo'an. Kana irratti Orphaan haadha dhirsa ishee dhungatee nagaatti jetteen; Ruut garuu isheetti marmite.

¹⁵ Naa'omiinis, "Kunoo, waarsaan kee gara saba isheetii fi waaqota isheetti deebi'aa jirti. Atis ishee wajjin deebi'i" jetteen.

¹⁶ Ruut garuu akkana jettee deebifte; "Akka ani si dhiisu yookaan si biraa deebi'u na hin dirqisiisin. Iddoo ati deemtu nan deema; iddoo ati jiraattus nan jiraadha. Sabni kee saba koo ni ta'a; Waaqni kees Waaqa koo ni ta'a. ¹⁷ Iddoo ati itti duututti anis nan du'a; achittis nan awwaalama. Si'achi yoo duuti gargari nu baase malee yoo ani si dhiisee deeme WAAQAYYO na haa adabu; adabbiin sunis akka malee haa cimuu." ¹⁸ Naa'omiinis yeroo akka Ruut ishee wajjin deemuuf murteessite hubattetti ishee dirqisiisuu dhiifte.

¹⁹ Kanaafuu dubartooinni lachuu hamma Beetlihemitti deeman. Yommuu isaan Beetlihem ga'anittis sababii isaaniitiif guutummaan magaalattii raafamte; dubartooinnis, "Isheen kun Naa'omiinii?" jedhan.

²⁰ Isheenis akkana isaaniin jette; "Naa'omiin jettanii na hin waaminaa! Sababii Waaqni Waan Hunda Danda'u jireenya koo hadheesseef Maaraa jedhaatii na waamaa. ²¹ Ani harka guutuudhaan ba'e; WAAQAYYO garuu harka duwwaa na deebise. Isin maaliif Naa'omiin naan jettu? WAAQAYYO na dhiphiseera; Waaqni Waan Hunda Danda'u rakkina natti fideeraatii."

²² Kanaafuu Naa'omiin, niitii ilma ishee Ruut Mo'aabittii wajjin yeroo garbuun haamamuu jalqabutti Mo'aabii gara Beetlihemitti deebite.

2

Ruut Lafa qotiisaa Bo'eez Keessatti

¹ Naa'omiin balbala Eliimelek keessaa fira dhirsa ishee namicha sooressa Bo'eez jedhamu tokko qabdi turte.

² Ruut Mo'aabittiinis Naa'omiiniin, "Ani nama fuula isaa duratti fudhatama argadhu duubaan qarmii funaannachuuf gara lafa qotiisaatti achi nan ba'a" jette.

Naa'omiinis, "Yaa intala koo dhaqi" jetteen. ³ Kanaafuu isheen gara lafa qotiisaa dhaqxee warra midhaan haaman duubaan qarmii funaannachuu jalqabde. Isheen utuma qarmii funaannachaa jirtuu akka lafti qotiisaa isheen keessa jirtu sun kan Bo'eez ta'e hubatte; Bo'eez kunis sanyii Eliimelek ture.

⁴ Yeruma sanatti Bo'eez Beetlihemii dhufee warra midhaan haamaniin, "WAAQAYYO isin wajjin haa ta'u!" jedhee nagaa isaan gaafate.

Isaanis deebisanii, "WAAQAYYO si haa eebbisu!" jedhaniin.

⁵ Bo'eezis dura bu'aa hojjetoota isaatiin, "Intalli kun kan eenyuu ti?" jedhee gaafate.

⁶ Dura bu'aan sunis akkana jedhee deebise; "Isheen nama Mo'aab; Naa'omiin wajjin biyya Mo'aabii dhufte. ⁷ Isheenis, 'Maaloo akka ani hojjetoota duubaan bissii gidduudhaan qarmii funaannadhu naa eeyyami' jette. Isheen yeroo xinnoof gaaddisa jala boqotte malee ganamaa jalqabdee hamma ammaatti jabaattee hojjechaa turte."

⁸ Kana irratti Bo'eez Ruutiin akkana jedhe; "Yaa intala koo na dhaga'i. Gara lafa qotiisaa biraa dhaqxee qarmii hin funaanin; iddoo kanaas hin deemin. Asuma hojjetoota koo dubbarran wajjin turi. ⁹ Lafa qotiisaa warri dhiiraa keessaa haaman ilaaliitii dubbarran duukaa bu'i. Akka isaan si'i hin tuqne ani warra dhiiraatti himera. Yeroo dheebottus qooda bishaanii dhiironni guutan keessaa budduuxsii dhugi."

¹⁰ Kana irrattis isheen addaan lafatti gombifamtee, "Ani utuu nama biyya ormaa ta'ee jiruu fuula kee duratti surraa argadhee ati na arguun kee kun maaliifi?" jettee isa gaafatte.

¹¹ Bo'eez immoo akkana jedhee deebiseef; "Waan ati erga dhirsi kee du'ee jalqabee haadha dhirsa keetiitiif goote hundumaa, akka ati itti abbaa kee, haadha keetii fi biyya kee dhiiftee saba kanaan dura hin beekin wajjin jiraachuudhaaf dhufte dhaga'eera.

¹² WAAQAYYO waan ati goote hundaaf gatii kee siif haa deebisu. WAAQAYYO Waagni Israa'el kan ati qoochoo isaa jalatti baqachuudhaaf dhufte sun baay'isee siif haa deebisu."

¹³ Isheenis akkana jette; "Yaa gooftaa ko, ani yoo akka hojjetoota kee dubbarran keessaa akka ishee tokkooti madaalamuu baadhe illee sababii ati na jajjabeessitee gara laafinaan ana garbittii keeti dubbatteef ani fuula kee duratti surraa argadheera."

¹⁴ Bo'eezis yeroo laaqanaatti, "As kottu. Buddeenas fudhadhuutii wayinii dhangaggaa'aatti cuuphadhu" jedheen.

Yeroo isheen hojjetoota wajjin teessettis asheetii waadame kenneef. Isheenis nyaattee quuftee xinnoon irraa hafeef. ¹⁵ Akkuma isheen qarmii funaannachuuf ol kaateenis Bo'eez akkana jedhee hojjetoota isaa ajaje; "Yoo isheen bissii gidduudhaa illee qarmii funaannatte ishee hin rifachiisinaa. ¹⁶ Qooda kanaa bissii keessaa tokko tokko luqqisaatii akka isheen funaannatuuf lafa bubuusaafii malee isheetti hin dheekaminaa."

¹⁷ Kanaafuu Ruut hamma galgalaatti lafa qotiisaa keessaa funaannatte. Garbuu funaannatte sanas ni sukkuumatte; innis gara safartuu iifi* tokkoo ta'e. ¹⁸ Isheenis garbuu sana baadhattee magaalaatti deebite; haati dhirsa ishees wanni isheen funaannatte hammam akka ta'e argite. Akkasumas Ruut waan guyyaa nyaattee quuftee ishee irraa hafe sana gad baaftee kenniteef.

¹⁹ Haati dhirsa ishees, "Ati har'a eessaa funaannatte? Eessa hojjechaa oolte? Namni xiyyeeffannoo kana siif kenne sun haa eebbifamu!" jette.

Ergasiis Ruut waa'ee namicha lafa qotiisaa isaa keessaa funaannachaa oolte sanaa haadha dhirsa isheetti himte. Isheenis, "Maqaan namicha ani har'a bira hojjechaa oole sanaa Bo'eez jedhama" jette.

²⁰ Naa'omiinis, "WAAQAYYO inni warra jiraniifis warra du'aniifis gara laafina gochuu hin dhiifne sun isa haa eebbisu!" jette. Iti dabaluudhaanis, "Inni fira keenya kan dhi'oo ti; warra nu dhaaluun irra jiru keessaas isa tokkoo dha" isheedhaan jette.

²¹ Ergasiis Ruut Mo'aabittiin, "Inni, 'Hamma isaan midhaan koo hunda walitti qabanii fixanitti iyyuu hojjetoota koo wajjin turi' naan jedheera" jetteen.

²² Naa'omiinis niitii ilma ishee Ruutiin, "Yaa intala ko, dubbarran isaa wajjin ooluun siif gaarii dha; ati yoo gara lafa qotiisaa nama biraa deemte, miidhaan sirra ga'uu danda'aatii" jette.

²³ Kanaafuu Ruut hamma garbuu fi qamadiin haamamee dhumutti tajaajiltoota Bo'eez dubbarran wajjin turte. Haadha dhirsa ishee wajjinis jiraatte.

3

Ruutii fi Bo'eez Oobdii Midhaanii Irratti

* 2:17 2:17 lifiin tokko kiiloo giraamii 40.

¹ Gaaf tokko Naa'omiin haati dhirsa ishee akkana isheedhaan jette; "Yaa intala ko, ani akka ati itti boqottuuf mana mijaa'aa siif barbaaduu hin qabuu? ² Bo'eez namichi ati tajaajiltoota isaa dubarran sana wajjin turte sun fira keenya mitii? Inni edana oobdiitti garbuu qulleeffata. ³ Kanaafuu dhidhiqadhuutii shittoo dibadhu; uffata kee isa bareedaa illee uffadhu. Ergasiis gara oobdichaa dhaqi; inni garuu hamma nyaatee dhugee raawwatutti akka ati achi jirtu hin beekin. ⁴ Yeroo inni rafutti iddoo inni rafe hubadhu. Ergasii dhaqiitii wayyaa miilla isaa irraa saaqii ciisi. Innis waan ati gochuu qabdu sitti hima."

⁵ Ruutis, "Ani waan ati jettu hunda nan godha" jettee deebifte. ⁶ Kanaafuu Ruut gara oobdii sanaatti gad buutee waan haati dhirsa ishee godhi jetteen hundumaa goote.

⁷ Bo'eezis erga nyaatee dhugee gammadee booddee achi fagaatee tuulaa midhaanii bira rafuu dhaqe. Ruutis suuta jettee dhaqxee miilla isaa irraa wayyaa saaqxee rafte. ⁸ Halkan walakkaatti wanni tokko namicha rifachiise; innis yommuu of irra garagalee ilaaletti dubartii miilla isaa jala ciiftu tokko arge.

⁹ Innis, "Ati eenyu?" jedhee gaafate.

Isheenis, "Ana Ruut tajaajiltuu kee ti. Ati sababii na dhaaluuf fira dhi'oo taateef handaara wayyaa keetii narra buusi" jetteen.

¹⁰ Innis deebisee akkana jedheen; "Yaa intala too, WAAQAYYO si haa eebbisu; arjummaan kun arjummaa ati kanaan dura goote sana caala; ati dargaggeessa yookaan sooressa yookaan hiyyeessa faana hin deemneetii. ¹¹ Ammas yaa intala koo hin sodaatin. Ani waan ati gaafattu hunda siif nan godha. Sabni magaalaa koo keessa jiraatu hundi akka ati dubartii amala gaarii qabdu taate ni beeka. ¹² Akka ani fira dhi'oo ta'e beekamaa dha; ta'us namni dhaaluudhaaf ana caalaa fira dhi'oo ta'e jira. ¹³ Asuma buli; bori ganama namichi yoo si dhaaluu barbaade gaarii dha; inni si haa dhaalu. Yoo inni si dhaaluu hin barbaanne garuu dhugaa WAAQAYYO jiraataa, ani sin dhaala. Hamma lafti bariitutti asuma ciisi."

¹⁴ Kanaafuu isheen hamma lafti bariitutti miilla isaa jala ciifte; garuu utuu namni tokko iyyuu hin beekin dursitee kaate; Bo'eez, "Dubartiin gara oobdii kanaa dhufuun ishee beekamuu hin qabu" jedheeraatii.

¹⁵ Akkasumas, "Wayyaa irraan uffatte ofi irraa fuudhii diriirsii qabi" jedheen. Isheenis ni diriirsite; inni garbuu safartuu ja'a safaree ishee baachise. Ergasiis gara magaalatti deebite.

¹⁶ Yommuu Ruut gara haadha dhirsa isheetti deebiteetti Naa'omiin, "Yaa intala ko, wanni sun akkam ta'e?" jettee ishee gaafatte.

Isheenis waan Bo'eez isheef godhe hunda itti himte; ¹⁷ itti dabaltees, "Gara haadha dhirsa keetti harka duwwaa hin deebi'in" jedhee garbuu safartuu ja'aa kana naa kenne" jetteen.

¹⁸ Naa'omiin immoo, "Yaa intala ko, hamma waan dhufu argitutti obsi. Namichi hamma dubbiin kun har'a fala argatutti hin boqotu" isheedhaan jette.

4

Bo'eez Ruutin Fuudhuu Isaa

¹ Bo'eez gara karra magaalatti ba'ee achi taa'e. Innis yommuu namichi dhaaluuf isa caalaa fira dhi'oo ta'e sun dhufetti, "Yaa michuu ko, as kottuutii na bira taa'i" jedheen. Kanaafuu inni dhaqee taa'e.

² Bo'eezis maanguddoota magaalaa keessaa kudhan waamee, "As taa'aa" jedheen; isaanis ni tataa'an. ³ Kana irratti namicha dhaaluuf aantummaa qabu sanaan akkana jedhe; "Naa'omiin isheen Mo'aabii deebite sun lafa obboleessa keenya Eliimelek gurguruuf jirti. ⁴ Kanaafuu akka ati fuula warra as tataa'aniitii fi fuula maanguddoota saba kootii duratii lafa kana bittuuf ani waan kana sitti himuu yaade. Yoo ofii keetiif dhaaluu barbaadde dhaali. Yoo dhaaluu baatte garuu akka ani beekuuf natti himi. Waan kana gochuuf si malee namni mirga qabu tokko iyyuu hin jiruutii; namni sitti aanee aantummaa qabu ana."

Namichis, "Ani nan dhaala" jedhe.

⁵ Bo'eezis, "Egaa gaafa Naa'omiinii fi Ruuti Mo'aabittii irraa lafa bittutti ati maqaa namicha du'e sanaa qabeenya isaatiin waamsisuudhaaf nuutii isaa illee fudhachuu qabda" jedheen.

⁶ Kana irratti firri dhi'oo sun, "Yoos ani qabeenya mataa kootti rakkina fiduu danda'aatii dhaaluu hin danda'u. Ati mataan kee mirga dhaaluu kootii fudhadhuutii dhaali. Ani waan kana gochuu hin danda'u" jedheen.

⁷ Bara durii biyya Israa’eliitti dhaalaa fi qabeenya walitti dabarsuun gareen tokko kophee isaa of irraa baasee garee kaaniif kennuudhaan mirkaneeffama ture. Israa’el keessatti bituu fi gurguruun haaluma kanaan mirkaneeffama ture.

⁸ Kanaafuu namichi dhaaluuf fira dhi’oo ture sun Bo’eeziin, “Ati mataan kee bitadhu” jedhee kophee of irraa baase.

⁹ Bo’eezis maanguddootaa fi saba hundaan akkana jedhe; “Akka ani qabeenya Eliimelek, qabeenya Kiliyooniitii fi qabeenya Mahiloon hunda Naa’omiin irraa bite isin har’a dhugaa baatota. ¹⁰ Akkasumas akka maqaan isaa maatii isaa keessaa yookaan biyya isaa keessaa hin badneef ani qabeenya isaatiin maqaa isaa waamsisuudhaaf Ruuti Mo’aabittii niitii Mahiloon kana niitii godhadhee fuudhuu kootiif isin har’a dhugaa baatota!”

¹¹ Maanguddoonnii fi namoonni karra sana dura turan hundinuu akkana jedhan; “Nu dhugaa baatota. WAAQAYYO dubartii mana kee dhufaa jirtu kana akka Raahelii fi Liyaa warra tokkummaadhaan mana Israa’el ijaaran sanaa haa godhu. Ati Efraataa keessatti nama jabaa, Beetlihem keessatti immoo beekamaa ta’i. ¹² Karaa sanyii WAAQAYYO dubartii dargaggeettii kana irraa siif kennuutiin maatiin kee akkuma maatii Faares isa Taamaar Yihuudaadhaaf deesse sanaa haa ta’u.”

Hidda Dhaloota Daawit

4:18-22 kwf - 1Sn 2:5-15; Mat 1:3-6; Luq 3:31-33

¹³ Kanaafuu Bo’eez Ruutin fudhatee niitii godhate. Ishee wajjinis ciise; WAAQAYYOS akka isheen ulfooftee ilma deessu ishee gargaare. ¹⁴ Dubartoonnis Naa’omiiniin akkana jedhan; “WAAQAYYO inni nama si dhaalu si hin dhabsiisin sun haa eebbifamu. Guutummaa Israa’el keessattis inni maqaa haa qabaatu! ¹⁵ Innis jireenya kee ni haaromsa; bara dulluma keetiittis si soora. Niitiin ilma keetii isheen si jaallattu kan ilmaan torba siif caaltu sun isa deesseertiitii.”

¹⁶ Naa’omiinis mucicha fuutee hammatte; guddiftuu isaa illee taate. ¹⁷ Dubartoonni ollaas, “Naa’omiin mucaa argatte” jedhan. Maqaa isaas Oobeedi jedhan. Inni akaakayyuu Daawit, abbaa Isseey.

¹⁸ Egaa hiddi dhaloota Faares kanaa dha:

Faares abbaa Hezroon;

¹⁹ Hezroon immoo abbaa Raam;

Raam abbaa Amiinaadaab;

²⁰ Amiinaadaab immoo abbaa Nahishoon;

Nahishoon abbaa Salmoon;

²¹ Salmoon immoo abbaa Bo’eez;

Bo’eez immoo abbaa Oobeedi;

²² Oobeedi immoo abbaa Isseey;

Isseey immoo abbaa Daawit.

Kitaaba Saamu'eel Tökkoffaa

Dhalachuu Saamu'eel

¹ Namicha biyya gaara Efreem keessa Raamaatayiiim Zoofiim jiraatu kan maqaan isaa Elqaanaa jedhamu tokkodu ture; innis ilma Yeroohaam, ilma Eliihuu, ilma Toohuu, ilma Zuufi, ilma Naasiib ture. ² Innis niitii lama qaba ture; maqaan ishee tokko Haannaa, kaan immoo Pheniinaa jedhama ture. Pheniinaan ijoollee qabdi; Haannaan garuu ijoollee tokko illee hin qabdu ture.

³ Elqaanaan wagguma waggaadhaan WAAQAYYOO Waan Hunda Danda'uuf aarsaa dhi'eessuu fi sagaduudhaaf magaalaa jiraatuu ka'ee gara Shiilootti ol ba'a ture. Achittis ilmaan Eelii lamaan Hofniinii fi Fiinehaas luboota WAAQAYYOO turan. ⁴ Yommuu guyyaan itti Elqaanaan aarsaa dhi'eessu ga'utti inni niitii isaa Pheniinaa, ilmaan isaatii fi intallan isaa hundaaf foon sana irraa qooda isaanii ni kenna ture. ⁵ Inni sababii Haannaa jaallatuuf qooda harka lama isheedhaaf kenna ture; WAAQAYYOO garuu gadameessa ishee cufee ture. ⁶ Sababii WAAQAYYOO gadameessa Haannaa cufeeff masaanuun ishee akka isheen aartuuf ishee tuttuqaa turte. ⁷ Kunis wagguma waggaadhaan itti fufe. Yeroo Haannaan gara mana WAAQAYYOOTTI ol baatutti masaanuun ishee, ishee tuttuqaa turte; kanaafuu Haannaan ni boossi, nyaatas hin nyaattu turte. ⁸ Dhirsi ishee Elqaanaanis, "Haannaa ati maaliif boossa? Maaliif hin nyaattu? Garaan kee maaliif gaddaa? Ani ilmaan kudhan siif hin caaluu?" Isheen jedha ture.

⁹ Gaafa tokko isaan Shiilootti erga nyaatanii dhuganii booddee Haannaan ol kaatee dhaabate. Eeliin lubichi dhaaba balbala mana qulqullummaa WAAQAYYOO bira barcuma irra taa'aa ture. ¹⁰ Haannaanis guddaa gadditee hiqqifatee boo'uudhaan WAAQAYYON kadhate. ¹¹ Akkanas jettee wareegde; "Yaa WAAQAYYOO Waan Hunda Dandeessu, yoo ati dhiphina garbittii keetii ilaaltee na yaadatte, yoo ati garbittii kee dagachuu baattee ilma naa kennite ani bara jireenya isaa guutuu isa WAAQAYYOOOF nan kenna; qarabaan tokko iyyuu mataa isaa hin tuqu."

¹² Yeroo Haannaan ittuma fuftee fuula WAAQAYYOO duratti kadhachaa turtettis Eeliin afaan ishee ilaalaa ture. ¹³ Haannaanis garaa isheetti kadhachaa turte; hidhii isheetu socho'a malee sagaleen ishee hin dhaga'amu ture. Kanaafuu Eeliin waan isheen machoofta se'ee, ¹⁴ "Ati hamma yoomiitti machoofta? Daadhii wayinii kee of irraa fageessi" jedheen.

¹⁵ Haannaanis akkana jettee deebifte; "Lakki akkas miti; yaa gooftaa ko, ani dubartii akka malee dhiphatee dha. Ani lubbuu koo fuula WAAQAYYOO duratti dhangalaase malee daadhii wayinii yookaan dhugaatii nama macheessu hin dhugne. ¹⁶ Ati garbittii kee akka dubartii faayidaa hin qabne tokkootti hin ilaalin. Ani sababii dhiphinaa fi gadda koo guddaa sanaatiif hamma ammaatti kadhachara."

¹⁷ Eeliinis, "Nagaan deemi; Waaqni Israa'el waan ati kadhate siif haa kennu" jedhee deebiseef.

¹⁸ Isheenis, "Garbittiin kee fuula kee duratti surraa haa argattu" jette. Ergasiis deemsa ishee itti fufte; nyaata ni nyaatte; gaddis fuula ishee irratti hin mul'anne.

¹⁹ Isaanis guyyaa itti aanu ganama barii ka'anii fuula WAAQAYYOO duratti sagadanii gara mana isaanii Raamaatti deebi'an. Elqaanaan niitii isaa Haannaa bira ga'e; WAAQAYYOS ishee yaadate. ²⁰ Haannaan ulfooftee yeroon isaa geenyaan ilma deesse. Maqaa isaas, "Ani WAAQAYYOO irraa isa kadhadheeraatii" jettee Saamu'eel jettee moggaafte.

Saamu'eel Waaqaaf kenname

²¹ Elqaanaan warra mana isaa jiraatan hunda wajjin WAAQAYYOOOF aarsaa waggaa dhi'eessuu fi wareega isaa galchuuf ol ba'e; ²² Haannaan garuu hin dhaqne. Isheenis dhirsa isheetiin, "Erga mucaan kun harma gu'ee booddee ani isa geesseen fuula WAAQAYYOO duratti isa dhi'eessa; innis jireenya isaa guutuu achuma jiraata" jette.

²³ Dhirsi ishee Elqaanaanis, "Waanuma jaallatte godhi; ati hamma harma isa guusifutti asuma turi; WAAQAYYOO garuu dubbii isaa fiixaan haa baasu" jedheen. Kanaafuu dubartittiin mana turtee hamma harma isa guusifutti ilma ishee hoosifte.

²⁴ Ishee erga mucicha harma guusiftee booddee mucichaa fi dibicha loonii kan umuriin isaa waggaa sadii ta'e, daakuu iifii* tokkoo fi daadhii wayinii qalqalloo tokko fudhattee gara Shiiloo gara mana WAAQAYYOOTTI fidde. Mucichis daa'ima ture. ²⁵ Isaanis dibicha sana qalanii mucicha gara Eeliitti fidan; ²⁶ isheen isakkana jetteen; "Yaa gooftaa ko, du'a lubbuu keetii ti; dubartiin as si bira dhaabattee WAAQAYYON kadhachaa turte sun anuma. ²⁷ Ani mucaa kana argachuuf kadhadheera; WAAQAYYON waan ani isa kadhadhe naaf kenneera. ²⁸ Kanaafuu ani amma WAAQAYYOFAN isa kenna. Bara jireenya isaa guutuu WAAQAYYOF ni kennama." Isaanis achitti WAAQAYYOF sagadan.

2

Kadhannaa Haannaa

¹ Haannaanis akkana jettee kadhatte:
"Garaan koo WAAQAYYOTTI ni gammada;
gaanfi koos WAAQAYYON ol kaafama.
Afaan koos diinota koo irratti of jaja;
ani fayyisuu keetti nan gammadaatii.

² "Qulqulluun akka WAAQAYYOO tokko iyyuu hin jiru;
si malees eenyu iyyuu hin jiru;
kataan akka Waaqa keenyaa tokko iyyuu hin jiru.

³ "Of jajuudhaan hin dubbatinaa;
yookaan dubbiin of tuulummaa akkasii afaan keessanii hin ba'in;
WAAQAYYOO Waaqa beekaadhaatii;
hojiiwwanis isaan madaalamu.

⁴ "Iddaawwan namoota jajjaboo caccabaniiru;
namoonni dadhaboon garuu humna hidhataniiru.
⁵ Warri quufanii turan buddeenatti of gurguraniiru;
warri beela'anii turan garuu si'achi hin beela'an.
Isheen dhabduu turte ijoollee torba deesse;
isheen ijoollee baay'ee qabdu immoo ni dhabde.

⁶ "WAAQAYYOO ni ajjeesa; ni fayyisas;
sii'oolitti gad ni buusa; olis ni baasa.

⁷ WAAQAYYOO ni hiyyoomsa; ni sooromsas;
ni salphisa; ni ulfeessas.

⁸ Inni hiyyeeyyii awwaara keessaa ni kaasa;
rakkattootas tuulaa daaraa keessaa ol fuudha;
inni ilmaan mootii wajjin isaan ni teessisa;
barcumma ulfinaas isaan dhaalchisa.

"Hundeewwan lafaa kan WAAQAYYOO ti;
inni hundeewwan sana irra addunyaa kaa'eera.

⁹ Inni miilla qulqulloota isaa ni eega;
namoonni hamoon garuu dukkana keessatti cal'isu.

"Namni jabina isaatiin hin mo'atu;
¹⁰ warri WAAQAYYON morman ni caccabsamu.
Inni samiidhaa isaanitti qaqaawweessa'a.
WAAQAYYOO daarii lafaatti ni murteessa.

"Inni mootii isaatiif jabina ni kenna;
gaanfa dibamaa isaa illee ol ni kaasa."

¹¹ Ergasii Elqaanaan gara mana isaa Raamaatti gale; mucichi garuu Eelii lubicha jalatti fuula WAAQAYYOO dura tajaajilaa ture.

Hammina Ilmaan Eelii

¹² Ilmaan Eelii namoota hamoo turan; WAAQAYYONIS hin sodaatan ture. ¹³ Akka bartee luboonni saba wajjin qabaniitti yeroo namni kam iyyuu aarsaa dhi'eessutti utuma foon affeelamaa jiruu tajaajilaan lubichaa hokkoo quba sadii qabu tokko harkatti qabatee

* 1:24 1:24 lifiin tokko kiiloo giraamii 40.

dhufee ¹⁴ beddee yookaan huuroo yookaan okkotee yookaan xuwwee keessa galcha ture; lubichis waanuma qabduun sun ol baase ofii isaatii fudhata ture. Israa'eloota gara Shiiloo dhufan hundas haaluma kanaan keessumsiiisu turan. ¹⁵ Garuu utuma coomni isaa hin gubamin dura tajaajilaan lubichaa dhufee nama aarsaa qalma dhi'eessuun, "Waan lubichi foon dheedhii malee affeelamaa si harkaa hin fudhanneef waan isaaf waadamu naa kenni" jedha ture.

¹⁶ Yoo namichi sun, "Jalqaba coomni isaa haa gubamu; ergasii kan barbaadde fudhadhu" jedheenis, tajaajilaan sun deebisee, "Hin ta'uu ammuma naa kenni; yoo ati didde immoo ani humnaan nan fudhadha" isaan jedha ture.

¹⁷ Cubbuun dargaggootaa kun fuula WAAQAYYOO duratti akka malee guddaa ture; isaan aarsaa WAAQAYYOO dhi'eeffamu ni tuffatu tureetii.

¹⁸ Saamu'eel garuu dirata quncee talbaa irraa hojjetame uffatee fuula WAAQAYYOO dura ni tajaajila ture. ¹⁹ Haati isaa yommuu waggama waggaan aarsaa waggaa dhi'eessuuf dhirsa ishee wajjin ciisan dhaga'e. ²⁰ Eeliinis, "Dubartii kana irraa qooda ilma isheen WAAQAYYOO kennite sanaa WAAQAYYOO ijoollee isheef haa kennuu" jedhee Elqaanaa fi niitii isaa eebbise. Isaanis deebi'anii mana isaaniitti galan. ²¹ WAAQAYYOS Haannaa ni yaadate; isheen isulfooftuu ilmaan sadii fi intallan lama ni deesse. Saamu'eel mucichis fuula WAAQAYYOO duratti ni guddate.

²² Yeroo kanatti Eeliin akka malee dulloomee ture; innis waan ilmaan isaa saba Israa'el hundatti hojjetan hunda akkasumas akka isaan dubartoota balbala dukaana wal ga'ii irra tajaajilan wajjin ciisan dhaga'e. ²³ Kanaafuu inni akkana isaaniin jedhe; "Hammina isin gootan ani saba hundumaa irraa dhaga'eera; isin maaliif waan akkasii gootu?" ²⁴ Lakkisaa yaa ilmaan koo; oduun saba WAAQAYYOO keessa faca'ee ani dhaga'u kun gaarii miti. ²⁵ Namni tokko yoo nama biraatti cubbuu hojjetee Waaqayyotuu gidduu galaaf; garuu yoo namni tokko WAAQAYYOTTI cubbuu hojjetee eenyutu gidduu galaaf?" Ta'us sababii WAAQAYYOO isaan ajjeesuu barbaadeef ilmaan Eelii gorsa abbaa isaanii hin dhageenye.

²⁶ Saamu'eel mucichis guddachaa deemee fuula WAAQAYYOTTI fi fuula namaa duratti surraa argate.

Raajii Maatii Eelii Irratti Dubbatame

²⁷ Namni Waaqaa tokko gara Eelii dhufee akkana jedheen; "WAAQAYYOO akkana jedha: 'Yeroo manni abbaa keetii biyya Gibxi keessa garbummaa Fara'oon jala turetti ani isatti of mul'ifnee?' ²⁸ Akka inni luba koo ta'uuf, akka inni gara iddoo aarsaa kootii ol ba'uuf, akka inni ixaana aarsuu fi akka fuula koo duratti dirata uffatuuf, ani gosoota Israa'el hunda keessa abbaa kee filadheera; akkasumas aarsaa Israa'eloonni ibiddaan dhi'eessan hunda maatii abbaa keetiitiif kenneera. ²⁹ Egaa isin maaliif qalma fi aarsaa ani ajaje sana tuffatu? Ati maaliif aarsaa saba koo Israa'elii dhi'eeffamu keessaa filatamaa isaa nyaatanii of gabbisuudhaan ana caalaatti ijoollee keetiif ulfina kennita?"

³⁰ "Kanaafuu WAAQAYYOO Waaqni Israa'el akkana jedha: 'Manni keetii fi manni abbaa keetii bara baraan fuula koo dura akka tajaajilaniif ani waadaa galee ture.' Amma garuu WAAQAYYOO akkana jedha: 'Kun ana irraa haa fagaatu! Warra ulfina naa kennan nan ulfeessa; warri na tuffatan immoo ni tuffatamu. ³¹ Akka maatii kee keessatti jaarsi hin arganneef, yeroon ani itti jabina keetii fi jabina maatii abbaa keetii cabsu tokko ni dhufa; ³² iddoo jireenya koo keessattis rakkina argita. Israa'eliiif wanni gaariin yoo godhamu iyyuu, toora maatii keetii keessatti jaarsi hin argamu. ³³ Namni ani iddoo aarsaa koo biraa hin balleessin hundi ija kee imimmaaniin jaamsuu fi garaa kee gaddisiisuuf hambifama; ijoolleen kee hundinuus umurii ijoollummaatti du'u.

³⁴ "Wanni ilmaan kee lamaan Hofniinii fi Fiinehaasitti dhufu siif mallattoo ta'a; isaan lachanuu guyyuma tokkotti dhumu. ³⁵ Ani luba amanamaa kan akka waan garaa koo keessa jiruu fi akka waan yaada koo keessa jiruutti hojjetu tokko ofii kootiif nan kaafadha; ani isaaf mana bara baraa nan ijaara; innis fuula dibamaa kootii dura bara baraan tajaajila. ³⁶ Namni sanyii kee keessaa hafe hundis, "Akka ani muraa buddeena tokkoo illee nyaadhuuf hojii lubummaa keessaa tokko irratti na ramadi" jedhe dhufee meetii tokkoo fi buddeena tokkoof fuula isaa duratti kufee sagadaaf."

3

WAAQAYYOO Saamu'eelin Waame

¹ Saamu'eel mucichi fuula Eelii duratti WAAQAYYON tajaajilaa ture. Bara sana keessa dubbiin WAAQAYYOO yeroo tokko tokko malee hin dhufu ture; mul'anni baay'eenis hin jiru ture.

² Eeliin inni iji isaa arguu dadhabe sun halkan tokko idduma isaa kan durii rafaa ture. ³ Saamu'eelis mana qulqullummaa WAAQAYYOO keessa iddoo taabonni Waaqaa ture sana ture; ibsaan Waaqaa amma illee hin dhaamne ture. ⁴ WAAQAYYOS Saamu'eelin ni waame.

Saamu'eelis, "Ani asin jira" jedhee deebise. ⁵ Fiigees gara Eelii dhaqee, "Ati waan na waamteef ani kunoo dhufeera" jedheen.

Eeliin garuu, "Ani si hin waamne; deebi'ii ciisi" jedheen; innis deebi'ee ciise.

⁶ Ammas WAAQAYYO, "Saamu'eel!" jedhee waame; Saamu'eelis ka'ee Eelii bira dhaqee, "Ati waan na waamteef ani kunoo dhufeera" jedhe.

Eeliinis, "Yaa ilma koo ani si hin waamne; dhaqii ciisi" jedheen.

⁷ Yeroo sana Saamu'eel WAAQAYYON hin beeku ture; dubbiin WAAQAYYOS isaaf hin ibsamne ture.

⁸ WAAQAYYO yeroo sadaffaadhaaf Saamu'eelin ni waame; Saamu'eelis ka'ee gara Eelii dhaqee, "Ati waan na waamteef ani kunoo dhufeera" jedhe.

Eeliin yeroo kana akka WAAQAYYO mucicha waamaa ture hubate. ⁹ Kanaafuu Eeliin Saamu'eeliin, "Dhaqii ciisi; yoo inni si waame, 'Garbichi kee dhaga'aa jiraatii yaa WAAQAYYO dubbadhu' jedhi" jedheen. Kanaafuu Saamu'eel dhaqee iddoo ofii isaa ciise.

¹⁰ WAAQAYYOS dhufee achi dhaabatee akkuma duraan waametti, "Saamu'eel! Saamu'eel!" jedhee waame.

Saamu'eelis, "Garbichi kee dhaga'aa jiraatii dubbadhu" jedhe.

¹¹ WAAQAYYOS Saamu'eeliin akkana jedhe: "Kunoo ani waan gurra namaatti hin tolle tokko Israa'elitti fiduufin jira. ¹² Gaafas ani waanan maatii Eelii irratti dubbadhe hundumaa jalqabaa hamma dhumaatti Eeliitti nan fida. ¹³ Sababii waa'ee cubbuu inni iyyuu beeku tokkootii ani maatii isaa akkan adabu isatti himeeraatii. Ilmaan isaa waan jibbisiisaa hojjetan; inni garuu isaan hin dhowwine. ¹⁴ Kanaaf ani, 'Cubbuun mana Eelii aarsaadhaan yookaan qalmaan hin haqamu' jedhee kakadheera."

¹⁵ Saamu'eel hamma bari'utti ni rafe; ergasii balbala mana WAAQAYYOO bane. Innis mul'ata sana Eeliitti himuu sodaatee ture. ¹⁶ Eeliin garuu ofitti isa waamee, "Saamu'eel, yaa ilma koo" jedhe.

Saamu'eelis deebisee, "Ani asin jira" jedheen.

¹⁷ Eeliinis, "Inni maal jedhee sitti dubbate? Na hin dhoksin; yoo ati waan inni sitti hime tokko illee na dhoksite Waaqni waan hamaa sitti haa fidu; sitti haa cimsu" isaan jedhe. ¹⁸ Kanaaf Saamu'eel waan tokko illee utuu hin dhoksin waan hundumaa isatti hime. Eeliinis, "Inni WAAQAYYOO dha; waan isatti tole haa godhu" jedhe.

¹⁹ Saamu'eel guddachaa deeme; WAAQAYYOS isa wajjin ture; dubbii isaa keessaas tokko iyyuu lafa hin bu'u ture. ²⁰ Israa'eloonni Daanii hamma Bersheebaatti argaman hundi akka Saamu'eel raajii WAAQAYYOO ta'ee fudhatame beekan. ²¹ WAAQAYYO ammas Shiilootti mul'ate; inni karaa dubbii isaatiin Saamu'eelitti of mul'iseeraatii.

4

¹ Dubbiin Saamu'eel Israa'el hunda bira ga'e.

Filixseemonni Taabota Booji'an

Israa'eloonni Filixseemota waraanuudhaaf ba'an. Israa'eloonnis Ebeenezera bira, Filixseemonni immoo Afeeq keessa qubatan. ² Filixseemonni Israa'eloota waraanuudhaaf loltoota isaanii hiriirsan; akkuma waraanni ho'eenis Israa'eloonni Filixseemotaan mo'atamanii namoonni kumni afur dirree waraanaa irratti ajjeefaman. ³ Yommuu loltoonni Israa'el qubatatti deebi'anitti maanguddoonni Israa'el, "Har'a WAAQAYYO maaliif fuula Filixseemotaa duratti akka nu mo'atamnu godhe? Akka inni nu wajjin deeme harka diinota keenyaa jalaa nu baasuuf taabota kakuu WAAQAYYOO Shiiloodhaa haa fidnu" jedhan.

⁴ Kanaafuu sabni sun gara Shiilootti namoota erguudhaan taabota kakuu WAAQAYYOO Waan Hunda Danda'u isa kiirubeel gidduu taa'u sanaa fidan. Ilmaan Eelii lamaan Hofniinii fi Fiinehaasis taabota kakuu Waaqaa wajjin achi turan.

⁵ Yommuu taabonni kakuu WAAQAYYOO gara qubataatti galetti Israa'eloonni hundinuu iyya gammachuu guddaa isaa iyyanii lafa sochoosan. ⁶ Filixseemonnis yommuu iyya guddaa sana dhaga'anitti, "Iyyi guddaan qubata Ibrootaa keessaa dhaga'amu kun maali?" jedhanii gaafatan.

Yommuu akka taabonni kakuu WAAQAYYOO achi gale hubatanittis, ⁷ Filixseemonni sodaatanii akkana jedhan; "Waaqni tokko gara qubata Ibrootaa dhufeera; nuuf wayyoo! Wannii akkasii ta'ee hin beeku. ⁸ Nuuf wayyoo! Eenyutu waaqota jajjaboo kanneen harkaa nu baasa? Isaan waaqota gammoojjii keessatti dha'icha garaa garaatiin warra Gibxi dha'anii dha. ⁹ Yaa Filixseemotaa jabaadhaa! Dhiirummaa keessanis argisiisaa.

Yoo kanaa achii akkuma isin jara garboomfattan sana Ibroonni garba isin godhatu. Dhiirummaa keessan argisiisaatii lolaa!”

¹⁰ Kanaafuu Filisxeemonni ni lolan; Israa'eloonnis mo'atamanii tokkoon tokkoon namaa gara dunkaana ofii isaatti baqate. Nama baay'eeetu dhume; Israa'elis loltoota lafo kuma soddoma dhabde. ¹¹ Taabonni Waaqaa ni booji'ame; ilmaan Eelii lamaanuu Hofniinii fi Fiinehaas ni du'an.

Eeliin Du'uu Isaa

¹² Gaafuma sana namichi Beniyaam tokko wayyaa isaa tarsaasee, mataa isaatti daaraa firfirsee fiigaa gara Shiiloo dhaqe. ¹³ Eeliinis yeroo namichi achi ga'etti sababii waa'ee taabota Waaqaatiif garaan isaa raafameef waa dhaga'uuf jedhee karaa cina barcuma irra taa'ee eegaa ture. Yeroo namichi sun magaalaa seenee waan ta'e hundumaa odeessetti warri magaalaa sanaa hundi ni iyyan.

¹⁴ Eeliinis yommuu iyya sana dhaga'etti, “Kun iyya maaliitii?” jedhee gaafate.

Namichi sunis dafee dhufee Eeliitti hime; ¹⁵ yeroo kana Eeliin nama waggaa sagaltamii saddeet waan tureef iji isaa arguu dadhabee ture. ¹⁶ Namichis, “Ani ammuma adda waraanaatii dhufuu koo ti; waraana keessaa miliqee ba'uun koos har'uma” jedhee Eeliitti hime.

Eeliinis, “Yaa ilma ko, maaltu ta'e ree?” jedhee gaafate.

¹⁷ Namichi oduu fide sun deebisee, “Israa'eloonni Filisxeemota duraa baqatan; loltoota irras dhumiisa guddaatu ga'e; ilmaan kee lamaanis Hofniinii fi Fiinehaas ajjeefamaniiru; taabonni Waaqaas booji'ameera” jedheen.

¹⁸ Yommuu inni waa'ee taabota Waaqaa dubbatettis, Eeliin barcuma isaa kan balbala cina ture sana irraa dugda duubatti kufe. Nama dulloomaa dhagni isaa ulfaatuu waan tureefis mormi isaa cabee du'e. Innis waggaa afurtamaaf bulchaa Israa'el ture.

¹⁹ Niitiin ilma isaa Fiinehaas ulfa da'a geesse turte. Isheenis yommuu akka taabonni Waaqaa booji'amee fi akka abbaan dhirsaa isheetii fi dhirsi ishee du'an dhageessetti ciniinsuun itti hammaatee jilbeenfattee deesse. ²⁰ Yeroo isheen du'uu geessettis dubartoonni ishee gargaaraa turan, “Dhiira deesseertaa jabaadhu” jedhaniin. Isheen garuu homaa hin deebifne yookaan yaadatti hin qabanne.

²¹ Sababii taabonni Waaqaa booji'amee fi sababii abbaan dhirsaa isheetii fi dhirsi ishee du'aniif, “Ulfinni Israa'el irraa fagaateera” jechuudhaan maqaa mucaa ishee liikaabood jettee moggaafte. ²² Isheenis, “Taabonni Waaqaa waan booji'ameef ulfinni Israa'el irraa fagaateera” jette.

5

Filisxeemonni Taabota Booji'uu Isaanii

¹ Filisxeemonni erga taabota Waaqaa booji'anii booddee Ebeenezarii fuudhanii Ashdooditti geessan. ² Ergasiis taabota sana gara galma Daagonitti geessanii Daagon bira kaa'an. ³ Namoonni Ashdood yommuu guyyaa itti aanu ganamaan ka'anitti Daagon taabota WAAQAYYOO duratti addaan lafatti gombifamee argan! Isaanis lafaa kaasanii iddoo isaatti isa deebisan. ⁴ Garuu yommuu isaan guyyaa itti aanu ganama ka'anitti Daagon taabota WAAQAYYOO duratti addaan lafatti gombifamee ture! Mataa fi harki isaas irraa caccabee gulantaa balbala irraa bubbu'ee ture; dhagna isaa qofatu hafe. ⁵ Wannii luboonni Daagon yookaan namni galma Daagon kan Ashdood jiru sana ol seenu kam iyyuu hamma har'aatti gulantaa balbala irra hin ejjenneef kanuma.

⁶ Harki WAAQAYYOO saba Ashdoodii fi naannoo ishee irratti jabaate; badiisa isaanitti fide; iitoos isaanitti naqe. ⁷ Namoonni Ashdoodis yeroo waan ta'aa ture arganitti, “Sababii harki isaa nuu fi Waaqa keenya Daagon irratti jabaateef taabonni Waaqa Israa'el as turuu hin qabu” jedhan. ⁸ Kanaaf bulchitoota Filisxeem hunda walitti waamanii, “Taabota Waaqa Israa'el maal gochuu qabna?” jedhanii isaan gaafatan.

Isaanis, “Taabota Waaqa Israa'el gara Gaati geessaa!” jedhanii deebisan. Kanaaf taabota Waaqa Israa'el achii baasan.

⁹ Erga taabota sana achii baasanii booddee harki WAAQAYYOO magaalaa sanatti jabaatee badiisa guddaa fide. Namoota magaalaa sana jiraatanis xinnaadhaa hamma guddaatti dha'e; akka dhiitoon isaanitti yaa'us godhe. ¹⁰ Kanaafuu taabota Waaqaa gara Eqroonitti ergan.

Akkuma taabonni Waaqaa Eqroon seeneenis namoonni Eqroon, “Isin nuu fi namoota keenya fixuudhaaf taabota Waaqaa nutti fiddan” jedhanii iyyan. ¹¹ Kanaafuu bulchitoota Filisxeem hunda walitti waamanii, “Taabota Waaqa Israa'el asii fageessaa; iddoo isaatti haa deebi'u; yoo kanaa achii inni nuu fi saba keenya fixa” jedhaniin. Sodaan du'aa

magaalaa sana guutee tureetii; harki Waaqaas akka malee itti jabaatee ture. ¹² Warri hin du'inis waan dhiitootan isaanitti yaa'eef iyyi isaanii samiitti ol ba'e.

6

Taabonni Gara Israa'elitti Deebi'e

¹ Taabonni WAAQAYYOS Filisxeem keessa ji'a torba ture. ² Filisxeemonnis lubootaa fi ilaaltota waamanii, "Taabota WAAQAYYOO maal haa goonu? Iddoo isaatti haala akkamiitiin akka deebifnu nutti himaa" jedhaniin.

³ Isaanis deebisanii, "Yoo taabota Waaqa Israa'el deebifan, kenna yakkaa wajjin malee duwwaa isaa hin deebisinaa; ergasii isin ni fayyitu; harki isaas maaliif akka isin irraa hin kaafamin ni beektu" jedhaniin.

⁴ Filisxeemonnis, "Kennaan yakkaa kan nu erginuuf maal ta'uu qaba?" jedhanii gaafatan.

Isaanis akkana jedhanii deebisan; "Sababii dha'ichi isinii fi bulchitoota keessan rukute tokkuma ta'eef akkuma baay'ina bulchitoota Filisxeemotaatti dhiitoo warqee shananii fi hantuuta warqee shan ergaa. ⁵ Fakkii dhiitoo fi fakkii hantuutaa kanneen biyya balleessaa jirani hojjedhaa; Waaqa Israa'eliif immoo ulfina kenna. Yoos inni harka isaa isin irraa, waaqota keessanii fi biyya keessan irraa ni kaasa ta'a. ⁶ Isin maaliif akka namoota Gibxiitii fi akka Fara'oon mataa jabeeyyii taatu? Yeroo Waaqayyo adaba cimaadhaan isaan adabetti, isaan akka Israa'eloonni gara barbaadan deemaniif hin eeyyamneefii?

⁷ "Kanaafuu gaarii haaraa fi saawwan hoosisan kan waanjoon takkumaa irra hin kaa'amin lama qopheessaa. Saawwan sanas gaarii sanatti camadaa; jabboota isaanii garuu gara manaatti biraa deebisaatii itti cufaa. ⁸ Taabota WAAQAYYOO sanas fuudhaatii gaarii irra kaa'aa; mi'a warqee aarsaa yakkaatiif ergitan sanas sanduuqa taabota Waaqayyoo bira jiru keessa kaa'aa. Akka inni karaa barbaade deemuufis gad dhiisaa; ⁹ garuu ija isa irraa hin buqqifatinaa. Yoo inni gara biyya isaa gara Beet Shemeshitti qajelee rakkina guddaa kana WAAQAYYOTU nutti fide. Yoo gara sanatti qajeeluu baate garuu dha'ichi kun akkuma tasaa nutti dhufe malee Waaqayyo nutti hin fidne."

¹⁰ Isaanis akkasuma godhan. Saawwan lamaan fuudhanii gaariitti camadan; jabboota isaanii manatti deebisanii itti cufan. ¹¹ Isaanis taabota WAAQAYYOO sana gaariitti fe'an. Sanduuqa hantuuta warqeeetii fi fakkii iitoo baatu sanas isa wajjin fe'an. ¹² Saawwan sunis karaa qabataniin utuu bitaa mirgatti hin gorin mar'achaa gara Beet Shemeshitti qajeelan. Bulchitoonni Filisxeemotaa hamma daarii Beet Shemeshitti isaan faana bu'an.

¹³ Yeroo sanattis namoonni Beet Shemeshi sulula keessaa qamadii haamaa turan; isaanis yommuu ol jedhanii taabota sana arganitti akka malee gammadan. ¹⁴ Gaariin sunis lafa qotiisaa Iyyaasuu nama Beet Shemeshi bira ga'ee kattaa guddaa tokko cina dhaabate. Namoonnis muka gaarii sanaa falaxanii saawwan sana aarsaa gubamu godhanii WAAQAYYOOOF dhi'eessan. ¹⁵ Warri Lewwotaas taabota WAAQAYYOO sanduuqicha mi'a warqee baatu sana wajjin gad buusanii kattaa guddaa irra kaa'an; gaafuma sanas namoonni Beet Shemeshi aarsaa gubamuu fi qalma WAAQAYYOOOF dhi'eessan. ¹⁶ Bulchitoonni Filisxeemotaa shanan erga waan kana hunda arganii booddee gaafuma sana Eqroonitti deebi'an.

¹⁷ Iiti warqee kan Filisxeemonni aarsaa yakkaa godhanii WAAQAYYOOOF ergan kanaa dha; isaanis tokko Ashdoodiif, tokko Gaazaaf, tokko Eqrooniif, tokko Gaatiif, tokko immoo Ashqalooniif ergan. ¹⁸ Baay'inni hantuutota warqees akkuma baay'ina magaalawwan Filisxeemotaa kanneen bulchitoota shananiiif kennamaniitti ture. Magaalawwan dallaa jajjaboo qaban kunneenis gandoota of jalaa qabu ture. Kattaan guddichi isaan taabota WAAQAYYOO isa irra kaa'an sunis lafa qotiisaa Iyyaasuu namicha Beet Shemeshi keessatti hamma har'aatti dhugaa baatuu dha.

¹⁹ Waaqnis sababii isaan taabota WAAQAYYOO keessa ilaalaniif namoota Beet Shemeshi dha'ee isaan keessaa nama torbaatama ajjeese. Sababii WAAQAYYOO akka malee isaan dha'eef namoonni sun ni boo'an; ²⁰ namoonni Beet Shemeshis, "Eenyutu fuula WAAQAYYOO, fuula Waaqa qulqulluu kanaa dura dhaabachuu danda'a? Taabonni kun asii ba'ee eenyu bira haa dhaqu?" jedhanii gaafatan.

²¹ Ergasii gara Kiriyaati Ye'aariimitti ergamoota erganii, "Filisxeemonni taabota WAAQAYYOO deebisaniiru; gad kottaatii taabota sana gara keessanitti fudhadhaa" jedhaniin.

7

¹ Kanaafuu namoonni Kiriyaati Ye'aariim dhufanii taabota WAAQAYYOO fudhatanii ol ba'an. Isaanis gara mana Abiinaadaab kan gaara irra jiruutti geessan; akka inni taabota WAAQAYYOO eeguufis ilma isaa Ele'aazaarin qulqulleessan.

Filixseemonni Mo'atamuu Isaanii

² Taabonni sun erga gara Kiriyaati Ye'aariim geeffamee yeroo dheeraa dha; walumaa galatti waggaa digdama taa'e. Sabni Israa'el hundinuus boo'ichaan WAAQAYYOTTI deebi'e. ³ Saamu'eelis guutummaa mana Israa'eliin akkana jedhe; "Yoo isin garaa keessan guutuudhaan WAAQAYYOTTI deebitanii, waaqota ormaatii fi Ashtooretin waaq-effachuu dhiisuudhaan WAAQAYYOTTI of kennitanii isa qofaaf tajaajiltan, inni harka Filixseemotaa jalaa isin ni baasa." ⁴ Kanaaf Israa'eloonni Ba'aalii fi Ashtooretin calaasanii WAAQAYYON qofa tajaajilan.

⁵ Kana irrattis Saamu'eel, "Isin Israa'eloota hundumaa Miisphaatti walitti qabaa; anis WAAQAYYON isiniif nan kadhadhaa" jedhe. ⁶ Isaanis yommuu Miisphaatti walitti qabamanitti bishaan warabanii fuula WAAQAYYOO duratti dhangalaasan. Gaafas soomani, "Nu WAAQAYYOTTI cubbuu hojjenneerra" jedhan. Saamu'eelis Miisphaatti saba Israa'el irratti murtii kenna ture.

⁷ Yommuu Filixseemonni akka Israa'el Miisphaatti walitti qabame dhaga'anitti bulchitoonni Filixseem isaan waraanuudhaaf ol ba'an. Ijoolleen Israa'elis yommuu waan kana dhaga'anitti Filixseemota ni sodaatan. ⁸ Isaanis Saamu'eeliin, "Akka inni harka Filixseemotaa jalaa nu baasuuf gara WAAQAYYOO Waaqa keenyaatti nuu iyyuu hin dhiisin" jedhan. ⁹ Saamu'eelis ilmoo hoolaa kan hodhu tokko fuudhee jiraa isaa aarsaa gubamu godhee WAAQAYYOO dhi'eesse. Qooda Israa'elis gara WAAQAYYOTTI iyye; WAAQAYYOS deebii kenneef.

¹⁰ Utuu Saamu'eel aarsaa gubamu dhi'eessaa jiruu Filixseemonni Israa'elin loluuf dhi'aatan. Gaafas garuu WAAQAYYOO sagalee qaqaawwee guddaa isaa isaan irratti qaqaawweessa'ee waan isaan joojjesseef Filixseemonni fuula Israa'elootaa duratti ni mo'ataman. ¹¹ Israa'eloonnis Miisphaadhaa ba'anii Filixseemota karaa irratti gorra'aa hamma Beet Kaari jalaatti isaan ari'an.

¹² Ergasii Saamu'eel dhagaa tokko fuudhee Miisphaa fi Sheen gidduu dhaabe. Maqaa isaas, "WAAQAYYOO hamma har'aatti nu gargaareera" jedhee, "Ebeenezar" jedhee moggaase.

¹³ Kanaafuu Filixseemonni waan mo'atamaniif lammata deebi'anii biyya Israa'elootaa hin weerarre. Bara jireenya Saamu'eel guutuu harki WAAQAYYOO Filixseemota irratti ni jabaate. ¹⁴ Magaalaawwan Filixseemonni Israa'el irraa fudhatanii turan kanneen Eqroonii jalqabani hamma Gaatitti jiran hundinuu Israa'elootaaf ni deebi'an. Israa'elis daangaa ishee Filixseemota harkaa baafate. Israa'elii fi Amoorota gidduuttis nageenyi bu'ee ture.

¹⁵ Saamu'eelis bara jireenya isaa guutuu abbaa murtii saba Israa'el ture. ¹⁶ Innis waggama waggaa Beet'eel, Gilgaalii fi Miisphaa keessa naanna'ee iddoo hundatti abbaa murtii saba Israa'el ture. ¹⁷ Ergasii gara Raamaa iddoo jireenya isaatti deebi'ee achittis saba Israa'el irratti murtii kenna ture. Achittis WAAQAYYOO iddoo aarsaa ijaare.

8

Israa'el Mootii Moosifachuuf Gaafatte

¹ Saamu'eel yeroo dulloometti ilmaan isaa abbootii murtii godhee Israa'eliif muude. ² Maqaan ilma isaa hangaftichaa Yoo'eel, kan isa lammaffaa immoo Abiyaa jedhama; isaanis Bersheebaa keessatti abbootii murtii turan. ³ Ilmaan isaa garuu fakkeenya abbaa isaanii duukaa hin buune. Bu'aa hin malle argachuuf jedhanii matta'aa fudhatan; murtiis jal'isan.

⁴ Kanaafuu maanguddoonni Israa'el wal ga'anii Saamu'eel bira gara Raamaa dhufan; ⁵ isaanis, "Ati dulloomteerta; ilmaan kee immoo fakkeenya kee duukaa hin buune; akkuma saboonni kaan hundi mootii qaban sana mootii nu bulchu nuu muudi" jedhaniin.

⁶ Garuu, "Mootii nu bulchu nuuf muudi" jechuun isaanii waan Saamu'eelin hin gammachiisiniif inni WAAQAYYON kadhate. ⁷ WAAQAYYOS akkana isaan jedhe; "Waan sabni sun siin jedhu hunda dhaga'i; isaan akka ani mootii isaanii hin taaneef na tuffatan malee si hin tuffanne. ⁸ Isaan waanuma gaafa ani Gibxii isaan baasee jalqabee hamma har'aatti na dhiisanii waaqota gara biraa tajaajiluudhaan natti hojjetan sana sittis hojjechaa jiru. ⁹ Egaa amma waan isaan jedhan dhaga'i; garuu sirriitti isaan akeekkachiisiitii haala mootii isaan irratti moo'u sanaa isaanitti himi."

¹⁰ Saamu'eelis dubbii WAAQAYYOO hunda namoota akka mootiin isaaniif moosifamuuf gaafatan sanatti hime. ¹¹ Akkana isaaniin jedhe; "Wanni mootiin isin irratti moo'u sun godhu kana: Inni ilmaan keessan fudhatee akka isaan gaariwwan isaa irra tajaajilan godha; abbootii fardaas isaan godhata; isaanis gaariwwan isaa dura figu. ¹² Gariin isaani ajajjuuwwan kumaa, gariin isaani immoo ajajjuuwwan shantamaa, kaan immoo akka isaan lafa isaa qotanii midhaan isaa walitti qaban godha; warra hafanis akka isaan mi'a lolaatii fi mi'a gaariwwan isaa hojjetan godha. ¹³ Intallan keessan fudhatee qopheessitoota dibata urgaa'aa, qopheessitoota ittoo fi tolchitoota buddeenaa godhata. ¹⁴ Lafa qotiisaa keessan isa filatamaa, iddoo dhaabaa wayiniitii fi iddoo itti ejersa cuunfan isin irraa fudhatee hojjetoota isaatiif kenna. ¹⁵ Midhaanii fi ija wayinii keessanii harka kudhan keessaa harka tokko fuudhee qondaaltota isaatii fi hojjetoota isaatiif kenna. ¹⁶ Garboota dhiiraatii fi garboota dubartii, horii gagaarii fi harroota keessan fudhatee hojii ofii irratti bobbaafata. ¹⁷ Bushaayee keessan keessaa harka kudhan keessaa harka tokko ni fudhata; isin mataan keessanuu garboota isaa taatu. ¹⁸ Gaafas isin mootii keessan isa ofii keessaniif filattan sana jalaa furamuuf ni iyyitu; garuu guyyaa sana WAAQAYYO deebii isinii hin kennu."

¹⁹ Namoonni sun garuu Saamu'eelin dhaga'uu didanii akkana jedhan; "Hin ta'u! Nu mootii nu bulchu feena. ²⁰ Ergasiis akkuma saboota kaanii taana; mootiin keenyas nu hooggana; nu dura ba'ees lola keenya nuu lola."

²¹ Saamu'eel yeroo waan namoonni sun jedhan hunda dhaga'etti fuula WAAQAYYOO duratti waanuma sana deebisee dubbate. ²² WAAQAYYOS Saamu'eeliin, "Waan isaan jedhan dhaga'iitii mootii moosisiif" jedhe.

Saamu'eelis namoota Israa'eliin, "Tokkoon tokkoon keessan magaalaa keessanitti deebi'aa" jedhe.

9

Saamu'eel Saa'olin Dibuu Isaa

¹ Gosa Beniyaam keessaa namicha jabaa maqaan isaa Qiish jedhamu tokkoto ture; innis ilma Abii'eel, ilma Xiroor, ilma Bekooraat, ilma namicha gosa Beniyaam sanaa ilma Afiiyaa ture. ² Innis dargaggeessa miidhagaa Saa'ol jedhamu tokko qaba ture; namoota Israa'el keessaa namni isa caalaa miidhagu tokko iyyuu hin turre; inni gatiitii isaatii olitti nama hunda caalaa dheeraa ture.

³ Yeroo sanas Qiish abbaa Saa'ol jalaa harroonni badnaan, Qiish ilma isaa Saa'oliin, "Tajaajiltoota keessaa nama tokko fudhadhuutii dhaqii harroota sana barbaadi" jedhe.

⁴ Kanaafuu inni biyya gaaraa Efreemii fi naannoo Shaaliishaa jedhamu keessa naanna'; garuu harroota hin arganne. Isaanis biyya Sha'aliim keessa darban; ta'us harroonni sun achi hin turre. Ergasiis biyya Beniyaamotaa keessa naanna'an; garuu harroota sana hin arganne.

⁵ Yommuu biyya Zuufi ga'anittis Saa'ol tajaajilaa isa wajjin ture sanaan, "Sababii abbaan koo yoonaa waa'ee harrootaa yaaduu dhiisee waa'ee keenya yaadda'uuf kottu ni deebinaa!" jedhe.

⁶ Tajaajilaan sun garuu deebisee, "Kunoo! Magaalaa kana keessa namni Waaqaa tokko jira; innis guddaa kabajamaa dha; wannii inni jedhu tokko iyyuus lafa hin bu'u. Inni karaa deemuu qabnu nutti hima ta'aatii kottu isa bira dhaqnaa" jedhe.

⁷ Saa'olis tajaajilaa isaatiin, "Nu yoo dhaqne namichaaf maal kennina? Nyaanni korojoo keenya keessaa dhumeera. Kennaa nama Waaqaatiif geessinu tokko illee hin qabnu. Egaa maal qabna ree?" jedhe.

⁸ Tajaajilaan sun ammas deebisee, "Kunoo ani meetii saqilii tokko irraa harka afur keessaa harka tokko qaba. Akka inni karaa deemuu qabnu nutti himuuf waan kana nama Waaqaatiif nan kenna" jedheen. ⁹ Bara durii Israa'el keessatti namni Waaqa kadhachuu dhaqu tokko, "Kottaa gara nama mul'ata arguu dhaqnaa" jedha ture; sababiin isaa namni har'a raajii jedhamu bara durii nama mul'ata argu jedhama tureetii.

¹⁰ Saa'olis tajaajilaa isaatiin, "Gaarii dha; kottu ni deemnaa" jedhe. Kanaafuu ka'anii gara magaalaa namni Waaqaa sun turee dhaqan.

¹¹ Utuu isaan gara magaalatti gaara ol ba'aa jiranuu dubarran bishaan waraabuuf deeman arganii, "Namichi mul'ata argu sun as jiraa?" jedhani gaafatan.

¹² Isaanis deebisanii akkana jedhan; "Eeyyee ni jira; inni fuula keessan dura jira. Namoonni waan gaara sagadaa irratti aarsaa dhi'eessaniif inni amma gara magaalaa keenyaa dhufeeraatii dafaa. ¹³ Akkuma magaalaa seentaniin utuu inni nyaataaf gaaratti ol hin ba'in isa ni argattu. Inni waan qalma sana eebbisuu qabuuf utuu inni hin dhufin

namoonni nyaachuu hin jalqaban; sana booddee warri waamaman ni nyaatu. Ammuma ol ba'aa; daftanii isa ni argattu.”

¹⁴ Isaanis gara magaalatti ol ba'an; utuma isaan magaalaa sana seenaa jiranuus Saamu'eel gaara sagadaatti ol ba'uuf jedhee karaatti isaanitti dhufe.

¹⁵ Utuu Saa'ol hin dhufin guyyaa tokko dura WAAQAYYO waan kana Saamu'eelitti mul'isee ture: ¹⁶ “Bori yeroo kanatti biyya Beniyaam irraa nama tokko sitti nan erga. Saba koo Israa'el irratti bulchaa godhiitii isa dibi; innis saba koo harka Filisxeemotaa jalaa ni baasa. Sababii iyyi isaa na bira ga'eef, ani saba koo ilaaleeraatii.”

¹⁷ Saamu'eel yommuu Saa'olin argetti, WAAQAYYO, “Namichi ani waa'ee isaa sitti dubbadhe sun isa kana; inni saba koo ni bulcha” jedheen.

¹⁸ Saa'ol karaa irratti Saamu'eelitti dhi'aatee, “Maaloo manni namicha mul'ata argu sanaa eessa akka ta'e natti himtaa?” jedhee gaafate.

¹⁹ Saamu'eelis akkana jedhee deebise; “Namichi mul'ata argu sun anuma. Isin har'aa waan na wajjin nyaata nyaachuu qabdaniif na dura gaara sagadaatti ol ba'aa. Ani immoo bori ganama sin geggeessa; waan garaa kee jiru hundas sitti nan hima. ²⁰ Waa'ee harroota guyyaa sadiin dura badan sanaa hin yaadda'in; isaan argamaniiru. Hawwiin Israa'el hundi eenyuufii? Si'ii fi mana abbaa keetitiif mitii?”

²¹ Saa'olis deebisee, “Ani nama gosa Beniyaam kan gosoota Israa'el hunda keessaa gad aanaa ta'e sana mitii? Maatiin koo immoo maatiiwwan gosa Beniyaam hunda keessaa gad aana mitii? Yoos ati maaliif waan akkanaa natti dubbatta ree?” jedhe.

²² Saamu'eelis Saa'olii fi tajaajilaa Saa'ol galmatti ol galchee warra nyaataaf waaman kanneen soddoma ta'aniin gara olii isaan teessise. ²³ Saamu'eel namicha nyaata qopheessuun, “Gumaa foonii isa ani kophaa kaa'i siin jedhe sana fidi” jedhe.

²⁴ Namichi nyaata qopheessu sunis foon lukaa gutummaatti fuudhee fuula Saa'ol dura kaa'e. Saamu'eelis, “Kun waan siif kaa'amee dha. Kunis yeroo ani, ‘Ani keessummoota waameera’ jedhee jalqabee yeroo murtaa'aa kanaaf kophaatti siif kaa'ameeraatii nyaadhu” jedheen. Saa'olis gaafa sana Saamu'eel wajjin nyaate.

²⁵ Erga gaara sagadaa irraa gara magaalatti gad bu'anii booddee Saamu'eel bantii mana isaa irratti Saa'ol wajjin haasa'e. ²⁶ Isaanis ganama barrii ka'an; Saamu'eelis bantii manaa irraa Saa'olin waamee, “Qophaa'i ani sin geggeessa” jedheen. Yeroo Saa'ol qophaa'ettis innii fi Saamu'eel walii wajjin gad ba'an. ²⁷ Utuu gara daarii magaalatti gad bu'aa jiranuus Saamu'eel Saa'oliin, “Akka tajaajilaan kee nu dursee deemuuf itti himi” jedhe. Tajaajilaan sunis akkuma itti himame godhe; ergasii Saamu'eel, “Akka ani ergaa Waaqaa sitti himuuf ati xinnoo as turi” jedhe.

10

¹ Ergasii Saamu'eel zayitii bilillee tokko fuudhee mataa Saa'ol irratti dhangaalasee isa dhungatee akkana jedhe; “Akka ati dhaala isaa irratti mootuuf WAAQAYYO si hin dibnee? ² Har'aa ati yeroo na biraa deemtutti biyya Beniyaam keessatti awwaala Raahel biratti iddoo Zelzaa jedhamutti namoota lama ni argita. Isaanis, ‘Harroonni ati barbaadaa turte sun argamaniiru. Amma abbaan kee waa'ee harrootaa yaaduu dhiisee waa'ee kee, “Waa'ee ilma koo ani maal godhu laata?” jedhee yaadda'aa jira' siin jedhu.

³ “Ergasiis achii kaatee hamma qilxuu Taaboer guddichaatti ni deemta. Achittis namoonni sadii kanneen gara Waaqaa, gara Beet'eelitti ol ba'aa jiran, inni tokko ilmoolee re'ee sadii, tokko immoo daabboo sadii, inni kaanis daadhii wayinii qalqalloo tokko baatanii sitti dhufu. ⁴ Isaanis nagaa si gaafatanii daabboo lama siif kennu; atis isaan harkaa ni fudhatta.

⁵ “Sana booddees iddoo hoomaan waraana Filisxeem jiru gara Gibe'aa gara tulluu Waaqaa ni dhaqxa. Atis akkuma magaalatti dhi'aatteen gareen raajotaa tokko masiinqoo, dibbee, ulullee fi baganaa qabatee gaara gubbaadhaa gad sitti dhufa; isaanis raajii ni dubbatu. ⁶ Hafuurri WAAQAYYO humnaan sirra ni bu'a; atis isaan wajjin raajii dubbatta; geeddaramtees nama biraa taata. ⁷ Yeroo mallattoowwan kunneen fiixaan ba'anitti waan harka keetti dhufe hunda hojjedhu; Waaqni si wajjin jiraatii.

⁸ “Ati na dura gara Gilgalaatti gad bu'i. Anis aarsaa gubamuu fi qalma nagaa dhi'eessuuf gara kee nan dhufu; ati garuu hamma ani dhufee waan ati gootu sitti himutti guyyaa torba turuu qabda.”

Saa'ol Mootii Taasifame

⁹ Yeroo Saa'ol Saamu'eelin dhiisee deemuuf fuula isaa garagalfatetti, Waaqni Saa'oliif qalbii haaraa kenne. Mallattoowwan kunneen hundinuus gaafas raawwataman. ¹⁰ Yeroo isaan Gibe'aa ga'anittis gareen raajotaa tokko isatti dhufe; Hafuurri Waaqaas isa irra bu'e; innis isaan wajjin raajii dubbate. ¹¹ Warri duraan isa beekan hundi yeroo

raajota wajjin raajii dubbachuu isaa arganitti, "Ilma Qiishiitti maaltu dhufe? Saa'olis garee raajotaa keessaa tokkoo?" jedhanii wal gagaafatan.

¹² Namichi achi jiraatu tokkos, "Abbaan isaanii eenyu?" jedhee gaafate. Kanaafuu jechi, "Saa'olis garee raajotaa keessaa tokkoo?" jedhu sun mammaaksa ta'e. ¹³ Saa'olis erga raajii dubbachuu raawwatee booddee gaara sagadaatti ol ba'e.

¹⁴ Obboleessi abbaa Saa'olis tajaajilaa isaatiin, "Isin eessa dhaqan?" jedhee gaafate. Saa'olis, "Harroota barbaacha deemne; garuu yommuu deebineti Saamu'eel bira dhaqne" jedhee deebise.

¹⁵ Obboleessi abbaa Saa'ol immoo, "Waan Saamu'eel siin jedhee natti himi" jedhe.

¹⁶ Saa'olis deebisee, "Inni akka harroonni argaman nutti himeera" jedhe; garuu waan akka inni mootii ta'u Saamu'eel itti hime sana obboleessa abbaa isaatti hin himne.

¹⁷ Saamu'eelis namoota Israa'el gara Miisphaatti fuula WAAQAYYOO duratti walitti waamee ¹⁸ akkana isaaniin jedhe; "WAAQAYYOO Waaqni Israa'el akkana jedha: 'Ani Israa'elin biyya Gibxiitii baaseera; harka warra Gibxii fi harka mootummoota isaan cunqursaa turan hundaa jalaa isin fureera.' ¹⁹ Isin garuu amma Waaqa keessan isa dhiphina keessanii fi rakkina keessan hunda jalaa isin baase sana dhiiftaniirtu. Isin, 'waaawuu; mootii nu bulchu nuu muudi' jettaniirtu. Kanaafuu gosa gosaa fi balbala balbala keessaniin fuula WAAQAYYOO duratti of dhi'eessaa."

²⁰ Yommuu Saamu'eel gosoota Israa'el hunda fidettis gosti Beniyaam ni filatame. ²¹ Ergasiis inni gosa Beniyaam balbala balbalaan fuula duratti dhi'eessee balballi Maxriit filatame. Dhuma irrattis Saa'ol ilmi Qiish ni filatame. Inni garuu yommuu isa barbaadanitti hin argamne. ²² Kanaaf namoonni, "Namichi dhufee jiraa?" jedhanii ammas WAAQAYYON gaafatan.

WAAQAYYOS, "Eeyyee; garuu inni mi'a keessa dhokatee jira" jedhe.

²³ Isaanis fiiganii achii isa fidan. Innis yeroo dhufee isaan gidduu dhaabatetti gatiittii isaatii olitti nama hunda caalaa dheeraa ture. ²⁴ Saamu'eelis saba sana hundaan, "Namicha WAAQAYYOO isa filate argituu? Saba hunda keessaa kan akka isaa tokko iyyuu hin jiru" jedhe.

Namoonnis, "Mootichi bara baraan haa jiraatu!" jedhanii iyyan.

²⁵ Saamu'eelis seera mootummaan sun ittiin bulu namootaaf ibse. Kitaaba keessattis barreessee fuula WAAQAYYOO dura kaa'e. Ergasii Saamu'eel namoota hunda gara mana isaaniitti of irraa geggeesse.

²⁶ Saa'ol garuu Gibe'aatti deebi'ee mana ofii isaatti gale; namoonni jajjaboon Waaqni yaada isaanii kakaases isa wajjin deeman. ²⁷ Garuu namoonni kashlabboonni tokko tokko, "Namni kun akkamitti nu oolchuu danda'a?" jedhan. Isas ni tuffatan. Kennaa tokko illees hin fidneef. Saa'ol garuu ni cal'ise.

11

Saa'ol Magaalaa Yaabeesh Baraare

¹ Naahaash namichi Amoon sun ol ba'ee Yaabeesh Gili'aadin marse. Namoonni Yaabeesh hundinuus Naa'aashiin, "Kottu walii galtee godhannaa; nus siif hojjennaa" jedhan.

² Naahaash namichi Amoon garuu, "Ani kanan isin wajjin walii galtee godhadhu yoo ija mirgaa tokkoo tokkoo keessanii isin keessaa baasee akkasiin Israa'el hunda salphise qofa" jedhee deebiseef.

³ Maanguddoonni Yaabeesh immoo, "Akka nu guutummaa Israa'el keessa ergamoota ergannuuf guyyaa torba nuuf obsi; yoo namni nu oolchu tokko iyyuu jiraachuu baate nu siif bulla" isaan jedhan.

⁴ Ergamoonni kunneenis yommuu gara Gibe'aa iddoo Saa'ol jiraatu dhufanii waan kana namootatti himanitti, namoonni hundi sagalee ol fudhatanii ni boo'an. ⁵ Yeroo sanatti Saa'ol sangoota isaa oofaa iddoo qonnaatii gala ture; innis, "Sabni kun maal ta'ee boo'a?" jedhee gaafate. Isaanis waan namoonni Yaabeesh jedhan sana isatti himan.

⁶ Yeroo Saa'ol dubbii kana dhaga'ettis Hafuurri Waaqa humnaan isa irra bu'e; innis aaree boba'e. ⁷ Innis sangoota cimdii tokko fuudhee kukkutee foon isaanii harka ergamootaatti erguudhaan, "Sangoonni nama Saa'olii fi Saamu'eelin duukaa hin buune kamii iyyuu akkas ta'u" jedhee guutummaa Israa'el keessa labse. Sodaachifni WAAQAYYOS waan nama hunda qabateef namni hundinuu akkuma nama tokkootti ba'e. ⁸ Saa'ol iddoo Bezeq jedhamutti walitti isaan qabe; baay'inni Israa'elootaa kuma dhibba sadii, kan warra Yihuudaa immoo kuma soddoma ture.

⁹ Isaanis ergamoota dhufan sanaan, "Namoota Yaabeesh Gili'aadiin, 'Bor yeroo aduun ho'utti bilisa baatu' jedhaatii itti himaa" jedhaniin. Yommuu ergamoonni sun dhaqanii

waan kana isaanitti odeessanitti warri Yaabeesh akka malee gammadan. ¹⁰ Isaanis namoota Amooniin, "Nu bor harka keenya isinitti kennanna; isin waan isinitti gaarii fakkaate hunda nu gochuu ni dandeessu" jedhan.

¹¹ Guyyaa itti aanutti Saa'ol namoota isaa garee sadiitti qoode; gara barii halkanii dallas Amoonotaa cabsanii seenuudhaan hamma lafti ho'utti isaan qalan. Kanneen hafan immoo gargar faffaca'an; isaan keessaas namni lama iyyuu wal biratti hin hafne.

Saa'ol Mootii Ta'uun Isaa Ni Mirkaneeffame

¹² Ergasiis namoonni Saamu'eeliin, "Warri, 'Saa'ol nurratti mootii ta'uu hin qabu' jedhan eenyu fa'i? Namoota kanneen nuu fidi ni ajjeefnaatii" jedhan.

¹³ Saa'ol garuu, "Guyyaan kun gaafa itti WAAQAYYO Israa'elin baraare waan ta'eef namni tokko iyyuu har'a hin ajjeefamu" jedhe.

¹⁴ Saamu'eel immoo namootaan, "Kottaa Gilgaal dhaqnee mootii ta'uu isaa achitti mirkaneessinaa" jedhe. ¹⁵ Kanaafuu namoonni hundinuu gara Gilgaal dhaqanii Saa'ol mootii ta'uu isaa fuula WAAQAYYOO duratti mirkaneessan. Aarsaa nagaas fuula WAAQAYYOO duratti dhi'eessan; Saa'olii fi sabni Israa'el hundis guddaa gammadan.

12

Saamu'eel Ummataan Nagaatti Jedhe

¹ Saamu'eel Israa'eloota hundaan akkana jedhe; "Kunoo ani waan isin naan jettan hunda dhaga'eera; mootii isin irratti moosiseera. ² Nama mootii ta'ee isin hoogganus argattaniirtu. Ani dulloomee arrii baaseera; ilmaan koo kunoo isin wajjin jiru. Ani ijoollummaa kootii jalqabee hamma har'aatti isin hoogganeera. ³ Ani asan jira; isinis fuula WAAQAYYOOTII fi fuula mooticha inni dibee duratti dhugaa natti ba'aa. Ani sangaa eenyuun fudhadhe? Ani harree eenyuun fudhadhe? Ani eenyun gowwoomse? Ani eenyun cunqurse? Ittiin ija koo jaamsuuf ani eenyu harkaan matta'aa fudhadhe? Ani yoon fudhadhee jiraadhe isiniif nan deebisa."

⁴ Isaanis deebisani, "Ati nu hin gowwoomsine yookaan nu hin cunqursine. Nama tokko harkaa iyyuu waan tokko illee hin fudhanne" jedhan.

⁵ Saamu'eel immoo, "Akka isin waan tokko illee harka kootti hin argatin WAAQAYYO isinitti dhugaa ba'a; dibamaan isaas har'a dhugaa ba'a" isaaniin jedhe.

Isaanis, "Inni dhuga ba'aa dha" jedhan.

⁶ Ergasiis Saamu'eel namootaan akkana jedhe; "Kan Musee fi Aroonin dibee abbootii keessan biyya Gibxii baase WAAQAYYOO dha. ⁷ Egaa waa'ee hojii qajeelaa kan WAAQAYYO isinii fi abbootii keessaniif hojjete hunda akka ani fuula WAAQAYYOO duratti isinitti falmuuf as dhaabadhaa.

⁸ "Yeroo Yaaqoob biyya Gibxi seenetti abbootiin keessan WAAQAYYOOTTI iyyatan; WAAQAYYOS Musee fi Aroon warra abbootii keessan biyya Gibxii baasanii iddoo kana qubachiisan erge.

⁹ "Isaan garuu WAAQAYYO Waaqa isaaniin irraanfatan; kanaaf inni dabarsee harka Siisaaraa ajajaa waraana Haazooriitti, Filisxeemotaa fi mootii Mo'aabitti isaan gurgure; jarris waraana itti banan. ¹⁰ Isaanis WAAQAYYOTTI iyyatanii, 'Nu cubbuu hojjenneerra; WAAQAYYON dhiifnee Ba'aalii fi Ashtooretin tajaajilleerra. Amma garuu harka diinota keenyaatii nu baasi; nus si tajaajilla' jedhan. ¹¹ WAAQAYYO Yerub-Ba'aalin, Bedaanin, Yiftaa fi Saamu'eelin ergee akka isin nagaan jiraattaniif kuraa hundaan harka diinota keessaniitii isin baase.

¹² "Yommuu akka Naahaash mootiin Amoonotaa isinitti dhufe argitanitti garuu, WAAQAYYO Waaqni keessan mootii keessan ta'uu iyyuu isin, 'Lakki; nu mootii nu bulchu barbaannaa' jettan. ¹³ Ammas mootiin isin gaafatanii fi filattan kunoo ti! WAAQAYYO mootii isin irratti moosiseera. ¹⁴ Yoo isin WAAQAYYON sodaattan, yoo isa tajaajiltan, yoo isaaf ajajamtanii fi yoo ajaja isaatti finciluu baattan, yoo hundi keessanii fi mootiin isin irratti moosifame sun WAAQAYYO Waaqa keessan faana buutan gaarii dha! ¹⁵ Yoo isin WAAQAYYOOF ajajamuu baattanii ajaja isaatti finciltan akkuma abbootii keessanitti ka'e sana harki isaa isinittis ni ka'a.

¹⁶ "Egaa jabaadhaa dhaabadhaatii waan guddaa WAAQAYYO fuula keessan duratti godhu kana ilaalaa! ¹⁷ Amma yeroo itti qamadiin haamamuu mitii? Ani akka inni qaqawweessaa fi bokkaa erguuf WAAQAYYON nan kadhada. Isin yeroo mootii isin bulchu gaafattanitti akka waan hamaa fuula WAAQAYYOO duratti hojjetan ni hubattu."

¹⁸ Kana irratti Saamu'eel WAAQAYYON waammate; WAAQAYYOS yeruma sana qaqaawweessaa fi bokkaa erge. Namoonni hundinuu WAAQAYYOO fi Saamu'eelin akka malee sodaatan.

¹⁹ Namoonni hundinuu Saamu'eeliin, "Akka nu tajaajiltoonni kee hin dhumneef WAAQAYYON Waaqa kee nuuf kadhahu; nu cubbuu keenya hunda irratti daballee mootiin nurratti akka mo'u gaafachuudhaan daba hojjenneerraatii" jedhan.

²⁰ Saamu'eelis deebisee akkana jedhe; "Hin sodaatinaa; isin hammina kana hunda raawwattaniirtu; ta'us garaa guutuudhaan WAAQAYYON tajaajilaa malee WAAQAYYO irraa hin deebi'inaa. ²¹ Garagaltanii wantoota faayidaa hin qabne kanneen isin fayyaduu yookaan isin oolchuu hin dandeenye duukaa hin bu'inaa; isaan faayidaa hin qabaniitii. ²² WAAQAYYO sababii maqaa isaa guddaa sanaatiif jedhee saba isaa hin gatu; WAAQAYYO kan ofii isaa isin godhachuu jaallateeraatii. ²³ Akka yaada kootti ani isinii kadhachuu dhiisee WAAQAYYOTTI yakka hojjechuun narraa haa fagaatu. Ani karaa gaarii fi qajeelaa ta'e isin nan barsiisa. ²⁴ Garuu WAAQAYYON sodaadhaa; garaa keessan guutuunis amanamuudhaan isaaf hojjedhaa; waan guddaa inni isinii godhes yaadadhaa. ²⁵ Yoo hammina hojjechuu itti fuftan garuu, isinis mootiin keessanis ni baddu."

13

Saamu'eel Saa'olitti Dheekkamuu Isaa

¹ Saa'ol yeroo mootii ta'etti umuriin isaa waggaa soddoma ture; innis waggaa afurtamii lama Israa'elin bulche.

² Saa'ol namoota kuma sadii Israa'el keessaa filate; kumni lama Mikmaasii fi biyya gaaraa Beet'eelitti Saa'ol wajjin, kumni tokko immoo biyya Beniyaam keessatti Gibe'aatti Yoonataan wajjin turan. Namoota kaan garuu gara mana mana isaaniitti deebise.

³ Yoonataan qubata waraana Filisxeemotaa kan Gibe'aa keessa ture sana dha'e; Filisxeemonnis waa'ee kanaa dhaga'an. Kana irratti Saa'ol, "Ibroonni hundinuu haa dhaga'ani!" jedhee biyyattii guutuu keessatti malakata afuufise. ⁴ Israa'el hundinuu oduu, "Saa'ol qubata waraana Filisxeemotaa dha'eera; Israa'elis Filisxeemota biratti balfameera" jedhu dhaga'an. Namoonnis Saa'ol duukaa bu'uuf Gilgaalitti walitti qabaman.

⁵ Filisxeemonnis Israa'eloota waraanuuf gaariiwwan kuma soddoma, namoota gaarii oofan kuma ja'aa fi loltoota akka cirracha galaanaa baay'ataniin hiriiran. Ol ba'aniis karaa ba'a Beet Aawwen iddoo Mikmaas jedhamu qubatan. ⁶ Namoonni Israa'el yommuu akka haalli isaan keessa jiran sodaachisaa ta'ee fi akka loltoonni isaanii sardamaa jiran arganitti holqa keessa, qoraattii keessa, kattaa keessa, bowwaa keessaa fi boolla keessa dhokatan. ⁷ Ibroonni tokko tokko immoo Yordaanos ce'anii biyya Gaadii fi Gili'aad dhaqan.

Saa'ol garuu Gilgaalitti hafe; loltoonni isa wajjin turan hundinuu sodaadhaan hollachaa turan. ⁸ Innis akkuma yeroo Saamu'eel murteesse sanaatti bultii torba eege; Saamu'eel garuu gara Gilgaal hin dhufne; namoonni Saa'olis bibittinnaa'uu jalqaban. ⁹ Saa'olis, "Aarsaa gubamuu fi aarsaa nagaa as naa fidaa" jedhe. Innis aarsaa gubamu ni dhi'eesse. ¹⁰ Akkuma Saa'ol aarsaa dhi'eessee xumureen Saamu'eel dhufe. Saa'olis isa simachuuf gad ba'e.

¹¹ Saamu'eel, "Ati maal gochuu kee ti?" jedhee gaafate.

Saa'olis deebisee akkana jedhe; "Ani yeroon akka sabni bibittinnaa'e, akka ati yeroo murteeffametti hin dhufinii fi akka Filisxeemonni Mikmaasitti walitti qabaman argetti, ¹² Filisxeemonni Gilgaalitti natti dhufan; anis surraa WAAQAYYOO hin kadhanne" jedheen yaade. Kanaafuu aarsaa gubamu dhi'eessuun dirqama natti ta'e."

¹³ Saamu'eelis akkana jedhe; "Ati waan siif hin malle hojjet; ajaja WAAQAYYO Waaqni kee siif kenne hin eegne; utuu ajaja isaa eegdee jiraattee inni mootummaa kee Israa'el irratti jabeessee bara baraan ni dhaaba ture. ¹⁴ Amma garuu mootummaan kee jabaatee hin dhaabatu; WAAQAYYO nama akka fedhii garaa isaa ta'e argateera; sababii ati ajaja WAAQAYYOO hin eeginiif inni dura deemaa saba isaa godhatee isa muudateera."

¹⁵ Ergasii Saamu'eel Gilgaal dhiisee gara Gibe'aa ishee biyya Beniyaam keessatti argamtuutti ol ba'e; Saa'olis namoota isa wajjin turan ni lakkaa'e. Baay'inni isaaniis gara nama dhibba ja'a ture.

Israa'eloonni Meeshaa Waraanaa Hin Qabanne

¹⁶ Yeroo Filisxeemonni Mikmaas keessa qubatanii turanitti Saa'ol, ilmi isaa Yoon-aataanii fi namoonni isaan wajjin turan biyya Beniyaam Gibe'aa keessa turan. ¹⁷ Gareen weerartootaa iddoo sadiitti qoodamanii qubata Filisxeemotaatii ba'an. Gareen tokko gara Ofraa kan biyya Shuu'aali keessa jiru sanaatti qajeelle; ¹⁸ gareen lammaffaan karaa Beet Horoonitti, gareen sadaffaan immoo karaa daarii irraangadee Sulula Zeboo'iim kan fuullee gammoojiitti geessu irra bu'e.

¹⁹ Sababii Filisxeemonni, "Ibroonni goraadee yookaan eeboo ofii isaaniitiif hin tumsiifatin!" jedhanii turaniif Israa'el hunda keessatti namni sibiila tumu tokko iyyuu hin argamne. ²⁰ Kanaafuu Israa'eloonni hundi maarashaa isaanii, gasoo isaanii, dhagaraa fi haamtuu isaanii qarsiifachuuf gara Filisxeemotaatti gad bu'an. ²¹ Gatiin ittiin maarashaa fi gasoo qarsiifatan saqilii tokko irraa harka sadii keessaa harka lama; qorbii, dhagaraa fi meeshaa ittiin qotiyyoo tuttuqan qarsiifachuuf immoo saqilii tokko irraa harka sadii keessaa harka tokko kaffalu turan.

²² Kanaafuu guyyaa waraanaa Saa'olii fi Yoonaataan malee loltoon tokko iyyuu goraadee yookaan eeboo hin qabu ture.

Yoonaataan Filisxeemota Rukutuu Isaa

²³ Gaafuma sana gareen Filisxeemotaa tokko gara malkaa Mikmaasitti gad bu'e.

14

¹ Gaafa tokko Yoonaataan ilmi Saa'ol dargaggeessa mi'a lolaa isaaf baatuun, "Kottu gara qubata Filisxeemotaa kan gama kaaniin jiru sanaatti ceenaa" jedhe. Inni garuu abbaa isaatti hin himne.

² Saa'olis Migroon keessa daarii Gibe'aa muka Roomaanii jala taa'aa ture. Namoonni isa wajjin turanis gara dhibba ja'aa ti; ³ Ahiiyaan inni dirata uffatus isaan keessaa tokko ture. Innis ilma Ahixuub obboleessa Iikaabood, ilma Fiinehaas ilma Eelii kan Shiiloo keessatti luba WAAQAYYOO ture sanaa ti. Akka Yoonaataan deemse namni tokko iyyuu quba hin qabu ture.

⁴ Malkaan ittiin Yoonaataan gara qubata waraana Filisxeemotaatti ce'uu barbaade sun bitaa fi mirgaan kattaawwan qara qaban lama qaba ture; inni tokko Bozeeki, kaan immoo Seenee jedhama. ⁵ Kattaan tokko karaa kaabaa fuullee Mikmaasiin, kaan immoo karaa kibbaa fuullee Gibe'aa dhaabata ture.

⁶ Yoonaataanis dargaggeessa mi'a lolaa isaaf baatuun, "Kottu gara qubata warra dhagna hin qabatin sanaatti ceenaa. Maaltu beeka WAAQAYYO nu gargaara ta'aatii. Baay'eedhaanis ta'u xinnoodhaan wanni fayyisuu irraa WAAQAYYON dhowwu tokko iyyuu hin jiru" jedhe.

⁷ Dargaggeessichi mi'a lolaa isaaf baatu sunis, "Waan qalbiitti yaadee hunda godhi; duubattis hin deebi'in; anis akkuma yaada keetiitti si wajjinan jira" jedhe.

⁸ Yoonaataanis akkana jedhe; "Egaa kottu gara isaaniiti ceenaa; isaan nu hin argan. ⁹ Yoo isaan, 'Hamma nu gara keessan dhufnuttu nu eegaa' jedhan, asumatti isaan eegna; garuu isaanitti ol hin baanu. ¹⁰ Yoo isaan, 'Gara keenyatti ol kottaa' jedhan garuu kun akka WAAQAYYO dabarsee harka keenyatti isaan kenne mallattoo waan nuu ta'uuf itti ol baana."

¹¹ Lamaan isaanii iyyuu qubata loltoota Filisxeemotaatti of argisiisan. Filisxeemonnis, "Kunoo! Ibroonni boolla itti dhokatan keessaa ba'aa jiru" jedhan. ¹² Namoonni qubata Filisxeemotaa keessa jiranis, "Ol kottaa; waan tokko isiniiti argisiisnaa!" jedhanii Yoonaataanii fi dargaggeessa mi'a lolaa isaaf baatu sanatti iyyan.

Kanaaf Yoonaataan dargaggeessa mi'a lolaa isaaf baatuun, "WAAQAYYO harka Israa'elootaatti dabarsee isaan kenneeraatii na faana kottu" jedhe.

¹³ Yoonaataan harkaa fi miilla isaatiin daa'imee ol ba'e; dargaggeessi mi'a lolaa isaaf baatus isa faana ol ba'e. Filisxeemonnis harka Yoonaataaniitiin barbadeeffaman; dargaggeessichi Yoonaataan wajjin tures isa duukaa bu'ee isaan fixe. ¹⁴ Yoonaataanii fi namichi mi'a lolaa isaaf baatu sun rukuttaaj jalqabaa sana keessatti lafa qotiyyoo cimdii tokko oolchuu irratti Filisxeemota gara digdamaa ta'an ajjeesan.

Mo'atamuu Filisxeemotaa

¹⁵ Qubata keessatti, lafa qotiisaa keessattii fi saba gidduutti naasuutu ta'e; loltoonni qubata keessa turanii fi warri balaa buusan ni hollatan; laftis ni raafamte. Naasuun sunis naasuu Waaqa biraa ergame ture.

¹⁶ Yeroo sana waardiyyoonni Saa'ol kanneen biyya Beniyaam keessa Gibe'aa turan utuu loltoonni sun karaa hundaan bittinnaa'anii ni argan. ¹⁷ Saa'ol namoota isa wajjin turaniin, "Mee loltoota lakkaa'aatii nama nu keessaa deeme ilaalaa" jedhe. Yommuu lakkaa'anittis Yoonaataanii fi namichi mi'a lolaa isaaf baatu sun achi hin turre.

¹⁸ Saa'olis Ahiiyaadhaan, "Mee taabota Waaqaa as fidi" jedhe. Yeroo sana taabonni sun Israa'eloota harka ture. ¹⁹ Utuu Saa'ol lubatti dubbachaa jiruu qubata Filisxeemotaa keessatti wacni guddachaa dhufe. Kanaafuu Saa'ol lubichaan, "Harka kee gad deebifadhu" jedhe.

²⁰ Saa'olii fi namoonni isaa wal ga'anii gara waraanaa deeman. Isaanis utuu Filisxeemonni burjaaja'anii goraadee ofii isaaniitiin wal cicciranuu argan. ²¹ Ibroonni

duraan Filisxeemota wajjin turanii fi isaan wajjin gara qubata isaaniitti ol ba'an sun gara Israa'eloota warra Saa'olii fi Yoonaataan wajjin turaniitti deebi'an. ²² Israa'eloonni biyya gaaraa Efreem keessatti dhokatanii turan yommuu akka Filisxeemonni baqachaa jiran dhaga'anitti, lolatti makamanii isaan ari'an. ²³ Gaafas WAAQAYYO Israa'elin ni baraare; lolli sunis Beet Aawwen darbee itti fufe.

Yoonaataan Damma Muuxachuu Isaa

²⁴ Saa'ol, "Hamma galgalaatti, hamma ani diinota koo haaloo baafadhutti namni waa nyaatu kam iyyuu abaaramaa haa ta'u!" jedhee waan saba kakachiisee tureef gaafas namoonni Israa'el akka malee dhiphatanii turan. Kanaafuu loltoota keessaa namni tokko iyyuu waa afaaniin hin qabne.

²⁵ Hoomaan waraanaa hundi bosona seene; dammis lafa ture. ²⁶ Isaanis yeroo bosona seenanitti damma yaa'u argan; ta'us isaan waan kakaa sana sodaatanii namni tokko iyyuu harka isaa afaanitti hin geeffanne. ²⁷ Yoonaataan garuu akka abbaan isaa namoota kakaadhaan qabe hin dhageenye ture; kanaafuu inni fiixee ulee qabatee ture sanaatiin dhaaba dammaa waraaneef afaaniin muuxate; iji isaas ni ifeef. ²⁸ Ergasiis loltoota keessaa tokko, "Abbaan kee, 'Namni har'a waa nyaatu kam iyyuu abaaramaa haa ta'u!' jedhee cimsee hoomaa waraanaa kakaadhaan qabeera; namoonnis kanaaf gaggaban" jedhee isatti hime.

²⁹ Yoonaataan immoo akkana jedhe; "Abbaan koo biyyatti rakkina uumeera. Yommuu ani damma kana irraa xinnoo afaaniin qabetti iji koo akkamitti akka naaf ifee baname mee ilaalaa. ³⁰ Namoonni utuu boojuu diinota isaanii irraa fudhatan keessaa waa nyaatanii akkam gaarii ture. Silaa Filisxeemonni ajjeefaman kana caalaa baay'atu ture mitii?"

³¹ Israa'eloonni gaafa sana erga Mikmaasii hamma Ayaaloonitti Filisxeemota dha'anii booddee akka malee dadhabanii turan. ³² Isaanis itti gaggabanii waan booji'an irratti lafa dha'anii hoolota, sangootaa fi jabboota lafatti qalatan; dhiiguma wajjinis nyaatan. ³³ Isaan keessaas namichi tokko, "Kunoo namoonni foon dhiiga wajjin nyaachuudhaan WAAQAYYOTTI cubbuu hojjechaa jiru" jedhee Saa'olitti hime.

Innis, "Isin seera cabsitaniirtu! Dhagaa guddaa isaa gangalchaatii as naa fidaa" jedhe. ³⁴ Ergasiis, "Isin namoota gidduu faffaca'aatii, Tokkoon tokkoon keessan sangaa fi hoolaa keessan fidaatii qalaa nyaadhaa; isin foon dhiiga isaa wajjin nyaachuudhaan WAAQAYYOTTI cubbuu hin hojjetinaa' isaaniin jedhaa" jedhe.

Kanaafuu namni hundi halkan gaafasii sangaa isaa fidee achitti qale. ³⁵ Saa'olis iddoo aarsaa WAAQAYYOOF ijaare; waan kanas yeroo jalqabaatiif godhe.

³⁶ Saa'ol, "Kottaa Filisxeemota duukaa buunee hamma lafti bari'utti isaan saamnaa; nama tokko illee lubbuun hin hambifnu" jedhe.

Isaanis, "Waan gaarii sitti fakkaate hunda godhi" jedhanii deebisan.

Lubichi garuu, "Asumatti Waaqa gaafanna" jedhe.

³⁷ Saa'olis, "Ani Filisxeemota duukaa bu'uu? Ati dabarsitee harka Israa'elitti isaan ni kennitaa?" jedhee Waaqa gaafate. Waaqni garuu gaafa sana deebii hin kennineef.

³⁸ Kanaafuu Saa'ol akkana jedhe; "Hooggantoonni loltootaa hundi as kottaa; cubbuu har'a hojjetame ifatti baafnaa. ³⁹ Dhugaa WAAQAYYO jiraataa isa Israa'elin baraaruu sanaa, yoo namni cubbuu kana hojjetu ilma koo Yoonaataan illee ta'e inni du'uu qaba." Garuu isaan keessaa namni tokko iyyuu deebii isaaf hin kennine.

⁴⁰ Saa'olis Israa'eloota hundaan, "Isin achi dhaabadhaa; anii fi ilmi koo Yoonaataan immoo as dhaabanna" jedhe.

Namoonnis, "Waan gaarii sitti fakkaate godhi" jedhaniin.

⁴¹ Ergasii Saa'ol, "Deebii qajeelaa naa kenni" jedhee WAAQAYYON Waaqa Israa'el kadhate. Ixaanis Yoonaataanii fi Saa'olitti ba'e; namoonnis bilisa ba'an. ⁴² Saa'olis, "Aanaa fi ilma koo Yoonaataan gidduutti immoo ixaa buusaa" jedhe. Ixaan sunis Yoonaataaniitti ba'e.

⁴³ Saa'olis Yoonaataaniin, "Ati waan goote natti himi" jedhe.

Yoonaataanis, "Ani dhugumaan fiixee ulee kootiin damma xinnoo ishee muuxadheera. Egaa ani du'uun qabaa?" jedhee isatti hime.

⁴⁴ Saa'olis Yoonaataaniin, "Yoonaataan, yoo ati dhugumaan du'uu baatte Waaqni waan kanaa fi kan caalu iyyuu natti haa fidu" jedhe.

⁴⁵ Namoonni garuu Saa'oliin akkana jedhan; "Yonaataan namni mo'annoo guddaa kana Israa'elii fide du'uu qabaa? Kun gonkumaa hin ta'u! Dhugaa WAAQAYYO jiraataa, rifeensi mataa isaa tokko illee lafa hin bu'u; inni gargaarsa Waaqaatiin har'a waan kana godheeraatii." Namoonni akkasii Yoonaataaniin bararaan; innis hin ajjeefamne.

⁴⁶ Saa'olis Filisxeemota ari'uu ni dhiise; isaanis gara biyya isaaniitti dacha'an.

⁴⁷ Saa'ol erga Israa'el irratti mootii ta'ee booddee diinota isaanii kanneen gama hundaan turan hunda jechuunis Mo'aabota, Amoonota, Edoomota, Mootota Zoobaa fi Filisxeemota lole. Lafa dhaqu hundattis isaan barbadeessa ture. ⁴⁸ Gootummaadhaanis Amaaleqoota lolee mo'ate; Israa'elootas harka warra isaan saamanii jalaa baase.

Maatii Saa'ol

⁴⁹ Ilmaan Saa'ol Yoonataan, Yishwii fi Malkii-Shuwwa turan. Maqaan intallan isaa immoo isheen hangafni Meerab, quxisuun immoo Miikaal jedhama ture. ⁵⁰ Maqaan niitti isaa Ahiinoo'am jedhama ture; isheenis intala Ahiima'az turte. Maqaan ajajaa waraana Saa'ol Abneer ilma Neeriti; Neer immoo obboleessa abbaa Saa'ol. ⁵¹ Qiish abbaan Saa'olii fi Neer abbaan Abneer ilmaan Abii'eel.

⁵² Bara jireenya Saa'ol guutuu waraana cimaatu Filisxeemota irratti adeemsifamaa ture; Saa'olis yommuu nama jabaa yookaan goota tokko argutti ofitti fudhatee akka isa tajaajilu godhata ture.

15

Saa'ol WAAQAYYO Biratti Fudhatama Dhabuu Isaa

¹ Saamu'eelis Saa'oliin akkana jedhe; "Akka ati saba isaa Israa'el irratti mootii taatuuf akka ani si dibuuf WAAQAYYO na ergeera; kanaafuu ati amma dubbii WAAQAYYOO dhaga'i.

² WAAQAYYO Waan Hundumaa Danda'u akkana jedha: 'Waan isaan yeroo Israa'el Gibxii ba'etti karaa irratti isaaniin mormuudhaan godhan sanaaf ani Amaaleqoota nan adaba. ³ Amma dhaqii Amaaleqoota dha'iitii waan kan isaanii ta'e hunda barbadeessi. Isaan hin hambisin; dhiirotaa fi dubartoonni, ijoollee fi daa'imman, loonii fi hoolota, gaalawwanii fi harroota fixi.'"

⁴ Kanaafuu Saa'ol iddoo Xilaa'iim jedhamutti namoota walitti qabee lakkaa'e; isaanis loltoota lafoota kuma dhibba lamaa fi namoota Yihuudaa kuma kudhan turan. ⁵ Saa'olis gara magaalaa Amaaleqootaa dhaqee sulula tokko keessa riphee taa'e. ⁶ Innis Qeenotaan, "Akka ani Amaaleqoota wajjin isin hin balleessineef achi hiiqaa; isaan irraa fagaadhaa; isin yeroo Israa'eloonni hundi Gibxii ba'anitti waan gaarii isaaniif gootaniiruutti" jedhe. Kanaafuu Qeenonni Amaaleqoota irraa fagaatan.

⁷ Ergasii Saa'ol Hawiilaa hamma Shuuri kan ba'a Gibxiitti argamuutti Amaaleqoota dha'e. ⁸ Innis Agaag mooticha Amaaleqootaa utuma lubbuun jiruu booji'e; namoota isaa hundas guutumaan guutuutti goraadeen fixe. ⁹ Saa'olii fi loltoonni isaa garuu Agaagin, hoolotaa fi loon, jabbotta coccoomoo fi xobbaallaawwan hoolaa, waan gaarii hundas hin hambisan. Isaan kana guutumaan guutuutti fixuun fedhii isaanii hin turre; garuu waan tuffatamaa fi dadhabaa hunda guutumaan guutuutti barbadeessan.

¹⁰ Kana irratti dubbii WAAQAYYOO akkana jedhee gara Saamu'eel dhufe; ¹¹ "Ani Saa'olin mootii gochuu kootti gaabbeera; inni sababii narraa garagaleef ajaja koo hin eegne." Saamu'eelis akka malee dhiphatee halkan sana guutuu WAAQAYYOTTI boo'aa bule.

¹² Saamu'eelis ganama bariin ka'ee Saa'olin arguu deeme; ta'us, "Saa'ol gara Qarmeloos deemeera. Achittis erga soodduu yaadannoo isaa dhaabbatee booddee gara Gilgaalitti gad bu'eera" jedhamee itti himame.

¹³ Yeroo Saamu'eel Saa'ol bira dhaqettis Saa'ol, "WAAQAYYO si haa eebbisu! Ani ajaja WAAQAYYOO eegeera" jedhe.

¹⁴ Saamu'eel garuu, "Yoos mar'achuun hoolotaatii fi barooduun sangootaa kan ani dhaga'u kun maali ree?" jedhe.

¹⁵ Saa'olis, "Loltootatu Amaaleqoota irraa booji'ee isaan fide; hoolotaa fi loon keessaa kanneen filatamoo ta'an WAAQAYYO Waaqa keetiif aarsaa gochuuf hambisaniiru; nu garuu kanneen hafan guutumaan guutuutti barbadeessineerra" jedhee deebise.

¹⁶ Saamu'eelis Saa'oliin, "Afachu! Ani waan WAAQAYYO eda halkan natti hime sittin himaa" jedhe.

Saa'olis deebisee, "Natti himi" jedhe.

¹⁷ Saamu'eelis akkana isaan jedhe; "Ati ija ofii keetii duratti xinnaa kan taatu iyyuu bulchaa gosa Israa'el hin taanee? WAAQAYYOS Israa'el irratti mootii godhee si dibeera.

¹⁸ Inni, 'Dhaqiiiti Amaaleqoota cubbamoota sana guutumaan guutuutti barbadeessi; hamma isaan fixxuttis isaan waraani' jedhee si ergee ture. ¹⁹ Ati maaliif WAAQAYYOOOF hin ajajamne ree? Maaliif gaggabdee boojuu irratti lafa dhooftee fuula WAAQAYYOO duratti waan hamaa hojjette?"

²⁰ Saa'olis akkana jedhee deebise; "Ani WAAQAYYOOOF ajajameera; gara WAAQAYYO itti na erges dhaqeera. Ani Amaaleqoota guutumaan guutuutti barbadeessee mootii isaanii Agaagin fideera. ²¹ Loltoonni garuu Gilgaalitti WAAQAYYO Waaqa keetiif aarsaa

dhi'eessuuf jedhanii boojuu sana keessaa waan filatamaa Waaqaaf qulqulleeffame keessaa hoolotaa fi loon fudhatan.”

²² Saamu'eelis deebisee akkana jedhe:
“WAAQAYYO akka yeroo sagalee isaatiif ajajamanitti gammadu sana, aarsaa gubamuu fi qalmatti ni gammadaa?
Ajajamuutu aarsaa caala;
dhaga'uunis cooma korbeessa hoolaa caala.

²³ Fincilli akka cubbuu falfala hojjechuu ti;
mata jabinnis akka hammina Waaqa tolfamaa waaqeffachuu ti.
Waan ati dubbii WAAQAYYOO tuffatteef,
anis akka ati mootii hin taane si tuffadheera.”

²⁴ Saa'olis Saamu'eeliin akkana jedhe; “Ani cubbuu hojjeedheera. Ani ajaja WAAQAYY-
OOTII fi dubbii kee fudhachuu dideera. Ani waanan namoota sodaadheef isaanii
ajajameera. ²⁵ Ammas cubbuu koo naa dhiisiitii akka ani WAAQAYYOOF sagaduuf na
wajjin deebi'i.”

²⁶ Saamu'eel immoo, “Ani si wajjin hin deebi'u. Ati dubbii WAAQAYYOO tuffatteera;
WAAQAYYOS saba Israa'el irratti mootii ta'uu kee tuffateera!” jedheen.

²⁷ Akkuma Saamu'eel deemuuf of irra garagaleenis Saa'ol handaara uffata isaa
qabe; uffanni isaas ni tarsa'e. ²⁸ Saamu'eelis akkana isaan jedhe; “WAAQAYYO har'a
mootummaa Israa'el sirraa tarsaasee ollaa kee kan si caalu tokkoof kenneera. ²⁹ Inni
ulfina Israa'el ta'e sun takkumaa hin sobu yookaan yaada isaa hin geeddaru; akka yaada
isaa hin geeddarreef inni nama miti.”

³⁰ Saa'ol immoo deebisee, “Ani cubbuu hojjeedheera. Garuu fuula maanguddoota saba
kootiitii fi fuula Israa'el duratti ulfina naa kenni; akka ani WAAQAYYO Waaqa keetiif
sagaduufis kottuu na wajjin deebi'i” jedhe. ³¹ Saamu'eel akkasiin Saa'ol wajjin deebi'e;
Saa'olis WAAQAYYOOF sagade.

³² Saamu'eelis, “Agaag mootii Amaaleqootaa sana as naa fidaa” jedhe.

Agaagis, “Hadhaan du'aa dhugumaan narraa fagaateera” jedhee gammadaa gara isaa
dhufe.

³³ Saamu'eel garuu,
“Akkuma goraadeen kee dubartoota ilmoo malee hambise sana,
haati kees dubartoota keessaa ilmoo malee hafti”
jedhe. Saamu'eelis Gilgaalitti fuula WAAQAYYOO duratti Agaagin ciccire.

³⁴ Ergasiis Saamu'eel gara Raamaa deeme; Saa'ol garuu gara mana ofii isaa, gara
Gibe'aa Saa'olitti qajelee. ³⁵ Saamu'eel hamma gaafa du'eetti deebi'ee Saa'olin hin
argine; Saamu'eel garuu Saa'oliif boo'aa ture. WAAQAYYOS Israa'el irratti Saa'olin mootii
gochuu isaatti ni gaabbe.

16

Saamu'eel Daawitin Dibuu Isaa

¹ WAAQAYYOS Saamu'eeliin akkana jedhe; “Saa'ol isa ani akka inni Israa'el irratti mootii
hin taaneef tuffadhe sanaaf hamma yoomiitti boossa? Gaanfa keetti zayitii guuttadhuutii
deemi; ani gara Isseeyi nama Beetlihemitti sin erga. Ani ilmaan isaa keessaa isa tokko
akka mootii ta'uuf filadheeraatii.”

² Saamu'eel garuu, “Ani akkamittin deemuu danda'a? Saa'ol yoo waan kana dhaga'e
na ajjeesa” jedhe.

WAAQAYYO immoo akkana jedhe; “Goromsa tokko fudhadhuu dhaqiitii, 'Ani WAAQAYY-
OOF aarsaa dhi'eessuufin dhufe' jedhi. ³ Isseeyinis gara aarsaatti waami; ani waan ati
gootu sitti argisiisa. Atis nama ani sitti argisiisu sana naa dibda.”

⁴ Saamu'eelis waan WAAQAYYO isa ajaje godhe. Yommuu inni Beetlihem ga'etti
maanguddoonni magaalaa sanaa hollachaa isa simachuu dhufanii, “Ati naguma
dhuftee?” jedhanii isa gaafatan.

⁵ Saamu'eelis deebisee, “Eeyyee naguma; ani WAAQAYYOOF aarsaa dhi'eessuun dhufe.
Isinis of qulqulleessaatii na wajjin gara aarsaa kottaa” jedhe. Ergasiis inni Isseeyii fi
ilmaan isaa qulqulleessee gara aarsaatti isaan waame.

⁶ Yeroo isaan achi ga'anittis Saamu'eel Eliiyaabin argee, “Dhugumaan namni
WAAQAYYO dibe as fuula WAAQAYYOO dura dhaabateera” jedhee garaatti yaade.

⁷ WAAQAYYO garuu Saamu'eeliin, “Ani isa tuffadheeraatii bifa isaa yookaan hojjaa isaa
hin ilaalin. WAAQAYYO waan namni ilaalu hin ilaalu. Namni bifa ilaala; WAAQAYYO garuu
waan garaa keessa jiru ilaala” jedhe.

⁸ Isseeiyis ergasii Abiinaadaabin waamee akka inni fuula Saamu'eel dura darbu godhe. Saamu'eel garuu, "WAAQAYYO isa kana hin filanne" jedhe. ⁹ Issee akka Shamaan darbu godhe; Saamu'eel garuu, "WAAQAYYO isa kanas hin filanne" jedhe. ¹⁰ Issee akka ilmaan isaa torbanuu fuula Saamu'eel dura darban godhe; Saamu'eel garuu, "WAAQAYYO isaan kanneen hin filanne" jedhe. ¹¹ Innis, "Ilmaan kee hundi kanneenumaa?" jedhee Isseeiyin gaafate.

Isseeiyis, "Quxxisuun hunda isaanii tokko jira; inni garuu hoolota tiksaa jira" jedhe.

Saamu'eelis, "Nama itti ergiitii isa fichisiisi; nu hamma inni dhufutti hin teenyuutii" jedhe.

¹² Kanaaf Isseeiyi nama itti ergee isa fichisiise. Innis diimaa, nama iji isaa miidhaguu fi nama dhaaba tolu ture.

WAAQAYYOS, "Ka'ii isa dibi; inni ani filadhe isa kanaatii" jedhe.

¹³ Kanaafuu Saamu'eel gaanfa zayitii fuudhee fuula obbolloota isaa duratti isa dibe; guyyaa sanaa jalqabee Hafuurri WAAQAYYOO humnaan Daawit irra bu'e. Saamu'eelis gara Raamaa deeme.

Daawit Saa'olin Tajaajiluu Isaa

¹⁴ Hafuurri WAAQAYYOS Saa'ol irraa fagaate; hafuurri hamaan WAAQAYYO biraa ergame immoo Saa'olin dhiphise.

¹⁵ Tajaajiltoonni Saa'ol akkana isaan jedhan; "Kunoo hafuurri hamaan Waaqa biraa ergamee si dhiphisaa jira. ¹⁶ Egaa gooftaan keenya akka isaan nama baganaa taphachuu danda'u barbaadaniif tajaajiltoota isaa warra fuula isaa dura jiran haa ajaju. Innis yommuu hafuurri hamaan sun Waaqa biraa sitti dhufu baganaa siif taphata; sittiis ni wayyaa'a."

¹⁷ Kanaafuu Saa'ol tajaajiltoota isaatiin, "Nama akka gaariitti baganaa taphachuu danda'u tokko barbaadaatii naa fidaa" jedhe.

¹⁸ Tajaajiltoota sana keessaa tokko, "Kunoo ilma Isseeiyi nama Beetlihem kan baganaa taphachuu beeku tokko ani argeera. Innis jagnaa fi loltuu dha. Nama dubbii beekuu fi miidhagaa dha. WAAQAYYOS isa wajjin jira" jedhee deebise.

¹⁹ Saa'olis Isseeiyitti ergamoota ergee, "Ilma kee Daawit isa hoolota bira jiru sana naa ergi" jedhe. ²⁰ Isseeiyis harree tokko fidee buddeenaa fi daadhii wayinii qalqalloo tokko itti fe'ee, ilmoo re'ee tokko wajjin ilma isaa Daawitin Saa'oliif erge.

²¹ Daawit gara Saa'ol dhufee tajaajila isaa jalqabe. Saa'ol akka malee isa jaallate; Daawitis nama mi'a lolaa isaaf baatu ta'e. ²² Saa'olis, "Akka inni na wajjin ture na tajaajiluuf Daawitiif eeyyami; ani isatti gammadeeraatii" jedhee Isseeiyitti dhaame.

²³ Yommuu hafuurri hamaan Waaqa biraa Saa'olitti dhufu hunda, Daawit baganaa isaa fudhatee taphata ture; Saa'olis boqonnaa argata; itti wayyaa'as ture. Hafuurri hamaan sunis isa dhiisee deema ture.

17

Daawitii fi Gooliyaad

¹ Yeroo sana Filisxeemonni lolaaf humna isaanii walitti qabatanii Yihuudaa keessatti Sookootitti wal ga'an. Isaanis Sakootii fi Azeeqaa gidduu Efes Damiim keessa qubatan. ² Saa'olii fi namoonni Israa'el immoo wal ga'anii Sulula Elaa keessa qubatan; Filisxeemota waraanuufis hiriiran. ³ Filisxeemonni gaara tokko qabatan; Israa'eloonni immoo tulluu kaan qabatan; gidduu isaanii immoo sululatu ture.

⁴ Namichi beekamaan Gaatii dhufe kan maqaan isaa Gooliyaad jedhamu tokko qubata Filisxeemotaa keessaa gad ba'e. Hojjaan isaas dhundhuma ja'aa fi taakkuu tokko ture.

⁵ Innis gonfoo naasii mataatti kaa'atee qomee naasii kan saqilii kuma shan ulfaatuu uffata ture; ⁶ miilla isaattis gambaallee naasii hidhatee gatiitii isaatti eeboo baadhata ture.

⁷ Somaan eeboo isaa furdaa akka muka wayya dhoofuun wayyaa itti martuu ture; sibiilli eeboo isaas saqilii dhibba ja'a ulfaata ture. Baattuun gaachana isaas fuula isaa dura deema ture.

⁸ Gooliyaadis loltoota Israa'el kanneen waraanaaf hiriiranitti iyyee akkana jedhe; "Isin waraanaaf hiriirantani ba'uun keessan maaliif? Ani nama Filisxeem, isin immoo tajaajiltoota Saa'ol mitii? Ofii keessanii nama tokko filadhaatii inni gara kootti gad haa bu'u. ⁹ Yoo inni na lolee na ajjeesuu danda'e, nu isin jalatti bulla; yoo ani isa mo'adhee isa ajjeese garuu isin nu jalatti bultanii tajaajiltoota keenya taatu." ¹⁰ Filisxeemichis, "Ani har'a Israa'eliin nan morkadha! Akka wal lolluuf nama tokko naa kennaa" jedhe. ¹¹ Saa'olii fi Israa'eloonni hundi yommuu dubbii kana dhaga'anitti akka malee raafaman; ni sodaatanis.

¹² Daawit ilma Isseeeyi namicha Efraataa kan Beetlihem Yihuudaa sanaa ti. Isseeeyi ilmaan saddeeti qaba ture; innis bara Saa'ol keessa nama dulloomee jaare ture. ¹³ Ilmaan Isseeey hangafoonni sadan Saa'olin duukaa bu'anii lafa waraanaa dhaqanii turan; maqaan isaaniis inni hangafni Eliiyaab, inni lammaffaan Abiinaadaab, inni sadaffaan immoo Shamaa jedhama ture. ¹⁴ Daawit quxisuu hunda isaanii ture. Isaan hangafoonni sadan Saa'olin duukaa bu'anii deeman; ¹⁵ Daawit garuu hoolota abbaa isaa tiksuuuf jedhee Saa'ol biraa Beetlihemitti deddeebi'aa ture.

¹⁶ Namichi Filisxeem sunis guyyaa afurtama ganama ganamaa fi galgala galgala dhufee isaanitti of mul'isa ture.

¹⁷ Isseeey immoo ilma isaa Daawitiin akkana jedhe; “Akaayii kana irraa iifii* tokkoo fi buddeena kurnan kana fuudhiitii ariitiidhaan obboloota keetiif iddoo qubata isaaniitti geessi. ¹⁸ Baaduu kurnan kana immoo ajajaa kumaa isaaniitiif geessi. Haala obboloonni kee keessa jiran ilaaliitii oduu isaanii fidii kottu. ¹⁹ Isaan Saa'olii fi namoota Israa'el wajjin Sulula Elaa keessatti Filisxeemota lolaa jiru.”

²⁰ Daawitis tiksee biratti bushaayee dhiisee ganama barii ka'ee nyaata sana qabatee akkuma Isseeey isa ajajetti ka'ee qajeele. Innis utuu loltoonni dhaadachaa hiriiraan adda waraanaatti yaa'aa jiranuu lafa qubataa ga'e. ²¹ Israa'elii fi Filisxeemonni tarree tarreedhan fuula walitti garagalatan. ²² Daawitis mi'a isaa eegduu mi'aa biratti dhiisee gara adda waraanaatti fiigee obboloota isaa nagaa gaafate. ²³ Utuma inni isaan wajjin haasa'aa jiruu, Gooliyaad jagnichi Filisxeem namichi Gaati sun hiriira Filisxeemotaa keessaa dubbidhuma kanaan dura dubbachaa ture sana dubbate; Daawitis isa dhaga'ee. ²⁴ Israa'eloonni hundinuu yommuu namicha arganitti sodaa guddaadhaan isa biraa baqatan.

²⁵ Israa'eloonnis, “Isin akka namichi kun as deddeebi'aa jiru argituu? Inni dhugumaan Israa'elii morkachuuf dhufe. Mootiin nama isa ajjeesuuf qabeenya guddaa kenna. Intala isaa illee itti heerumsa; maatii abbaa isaas akka Israa'el keessatti gibira hin gabbarre godha” waliin jechaa turan.

²⁶ Daawit namoota isa bira dhadhaabachaa turaniin, “Nama namicha Filisxeem kana ajjeese Israa'el irraa salphina kana fuudhuuf maaltu godhama? Filisxeemichi dhagna hin qabatin kun akka loltoota Waaqa jiraataa doorsisuuf inni eenyuu?” jedhee gaafate.

²⁷ Namoonnis, “Wanni nama isa ajjeesuuf godhamu kanuma” jedhanii dubbidhuma duraan dubbachaa turan sana irra deebi'anii itti himan.

²⁸ Eliiyaab hangafni Daawit inni jalqabaa Daawit namoota wajjin dubbachaa akka jiru yommuu argetti aaree gubatee akkana jedhe; “Ati maal gochuu as gad buute? Hoolota muraasa sana gammoojjii keessatti eenyutti dhiiftee dhufe? Ani of tuulummaa keetii fi hammina garaa keetii nan beeka; ati waraana ilaaluu dhufteetii.”

²⁹ Daawit immoo, “Ani amma maalin godhe? Ani dubbachuu illee hin danda'uu?” jedhe. ³⁰ Ergasiis gara nama biraatti garagalee waanuma duraa sana gaafate; namoonnis akkuma jalqabaatti deebisaniif. ³¹ Wanni Daawit jechaa tures dhaga'amee Saa'ol qaqqabe; Saa'olis isa waamsise.

³² Daawitis Saa'oliin, “Sababii namicha Filisxeem kanaatiif namni tokko iyyuu abdiin hin kutatin; ani garbichi kee dhaqee isa nan waraana” jedhe.

³³ Saa'olis Daawitiin, “Ati dhaqxee Filisxeemicha kana waraanuu hin dandeessu; ati ijoollee dha; inni immoo ijoollummaa isaatii jalqabee loltuu ture” jedhe.

³⁴ Daawit garuu Saa'oliin akkana jedhe; “Garbichi kee hoolota abbaa isaa tiksaa ture. Yeroo leenci yookaan amaakenni dhufee bushaayee keessaa tokko fudhatutti, ³⁵ ani isa faana fiigee dha'ee hoolaa sana afaan isaatii nan buusisan ture. Yoo inni natti gara gale immoo kokkee isaa qabee dha'ee isa ajjeesa ture. ³⁶ Ani garbichi kee leencaa fi amaaketa ajjeeseera; Filisxeemichi dhagna hin qabatin kunis akkuma tokkoo isaanii ta'a; inni loltoota Waaqa jiraataa doorsiseeraatii. ³⁷ WAAQAYYI inni irree leencaatii fi irree amaaketaa jalaa na baase sun harka Filisxeemicha kanaa jalaa na baasa.”

Saa'olis Daawitiin, “Dhaqi, WAAQAYYI si wajjin haa ta'u” jedhe.

³⁸ Ergasiis Saa'ol uffata lolaa kan ofii isaa Daawititti uffise. Qomee sibiilaa itti uffisee gonfoo naasii mataa isaatti kaa'eef. ³⁹ Daawitis sababii duraan itti fayyadamee hin beekneef uffata Saa'ol irratti goraadee hidhatee asii fi achi deemuu yaale.

Innis Saa'oliin, “Ani waanan duraan itti fayyadamee hin beekneef hidhadhee deemuu hin danda'u” jedhe. Kanaafuu of irraa baase. ⁴⁰ Ergasii ulee isaa harkatti qabatee dhagaa soofamaa shan lagaa filatee kiisii korojoo tikseetti naqate; furrisa isaas harkatti qabatee gara Filisxeemichaatti dhi'aate.

* 17:17 17:17 lifiin tokko gara kiiloo giraamii 16.

⁴¹ Namichi Filisxeem sunis namicha mi'a lolaa isaaf baatu of dura gajeelchee Daawititti dhi'aate. ⁴² Innis Daawitin ilaalee akka inni mucaa diimaa miidhagaa ta'e hubatee isa tuffate. ⁴³ Filisxeemichis, "Kan ati ulee qabatee natti dhuftu ani sareedhaa?" jedhee waaqota ofii isaatiin Daawitin abaare. ⁴⁴ Akkasumas, "As kottu; ani foon kee allaattii samiitii fi bineensota bosonaatiif nan kenna!" jedheen.

⁴⁵ Kana irratti Daawit Filisxeemichaan akkana jedhe; "Ati kunoo goraadee, eeboo fi bodee qabatee natti dhufta; ani garuu maqaa WAAQAYYOO Waan Hunda Danda'uu, Waaqa loltoota Israa'el kan ati doorsifte sanaatiin sittin dhufa. ⁴⁶ Har'a WAAQAYYO dabarsee harka kootti si kenna; anis si ajjeesee mataa kee sirraan kuta. Ani har'a reeffa Filisxeemotaa allaattii samiitii fi bineensota lafaatiif nan kenna; addunyaan hundis akka Israa'el keessa Waaqni jiru ni beeka. ⁴⁷ Namoonni asitti walitti qabaman hundi akka WAAQAYYO goraadee fi eeboodhaan nama hin baafne ni baru; sababii lolli kun kan WAAQAYYOO ta'eef inni dabarsee harka keenyatti isin kenna."

⁴⁸ Yommuu Filisxeemichi isa dha'uuf dhufettis Daawit isa loluuf fiigee adda waraanaa seene. ⁴⁹ Harka isaas korojoo isaa keessa kaa'ee dhagaa tokko fudhatee furrisaan darbatee adda Filisxeemichaa dha'e. Dhagaan sunis adda isaa keessa bade; Filisxeemichis addaan lafatti gombifame.

⁵⁰ Daawit akkasiin furrisaa fi dhagaadhaan Filisxeemicha mo'ate; Daawit utuma goraadee of harkaa hin qabaatin Filisxeemicha dha'ee ajjeese.

⁵¹ Daawit fiigee Filisxeemicha irra ejjete. Goraadee Filisxeemichaas man'ee keessaa luqqisee baafate. Erga isa ajjeesee booddees goraadee sanaan mataa isaa irraa kute.

Filisxeeminni yommuu akka goonni isaanii du'e arganitti of irra garagalanii baqatan. ⁵² Ergasii namoonni Israa'elii fi namoonni Yihuudaa ka'anii dhaadachaa hamma balbala Gaatii fi karra Eqroonitti Filisxeemota ari'an. Reeffi Filisxeemotaas karaa Sha'arayiimitti geessu irratti hamma Gaatii fi Eqroonitti harca'e. ⁵³ Israa'eloonni yommuu Filisxeemota ari'uu irraa deebi'anitti qubata isaanii saaman.

⁵⁴ Daawitis mataa Filisxeemichaa fudhatee gara Yersaaleemitti fide; mi'a lolaa Filisxeemichaas dunkaana ofii isaatti galfate.

⁵⁵ Saa'ol yommuu akka Daawit Filisxeemicha loluuf deemmu argetti, Abneer ajajaa waraana Israa'eliin, "Abneer, gurbaan kun ilma eenyuu ti?" jedhe.

Abneeris, "Yaa Mootii, du'a kee ti ani hin beeku" jedhee deebise.

⁵⁶ Mootichis, "Egaa akka gurbaan kun ilma eenyuu ta'e iyyaafadhuuttii bira ga'i" jedheen.

⁵⁷ Akkuma Daawit Filisxeemicha ajjeesee deebi'een, Abneer Daawitii mataa Filisxeemichaa harkatti qabatee jiru fuula Saa'ol duratti dhi'eesse.

⁵⁸ Saa'olis, "Gurbayyoo ati ilma eenyuu ti?" jedhee gaafate.

Daawit immoo, "Ani ilma garbicha keetii ilma Isseyyi namicha Beetlihem sanaa ti" jedhee deebise.

18

Saa'ol Daawititti Hinaafuu Isaa

¹ Erga Daawit Saa'ol wajjin haasa'ee fixatee booddee, lubbuun Yoonataan lubbuu Daawititti maxxante; Yoonataanis akkuma lubbuu ofii isaatti isa jaallate. ² Saa'olis gaafa sanaa jalqabee Daawitin ofitti fudhate; akka inni gara mana abbaa isaatti deebi'us hin eeyyamneef. ³ Yoonataan sababii akka mataa isaatti isa jaallateef Daawit wajjin kakuu seene. ⁴ Yoonataanis qoloo uffatee ture of irraa baasee kittaa isaa, goraadee isaa, iddaa isaatii fi sabbata isaa dabalee Daawitii kenne.

⁵ Daawit iddoo Saa'ol itti isa erge hunda dhagee ni milkaa'a ture. Saa'olis namoota waraanaa irratti isa sadarkaa ol aanaa kenneef. Wanni kunis saba hundaa fi tajaajiltoota Saa'ol hunda gammachiise.

⁶ Dubartoonnis erga Daawit Filisxeemicha ajjeesee booddee yommuu namoonni gara mana ofii isaaniitti deebi'anitti magaalaawwan Israa'el hunda keessaa masiinqoo fi dibbee qabatanii faarfannaa gammachuutiin faarfachaa fi shuubbisaa Saa'ol mooticha simachuuf ba'an. ⁷ Dubartoonnin sunis wal jalaa qabaniin: "Saa'ol kumaatama ajjeese;

Daawit immoo kuma kumaatamaa ajjeese" jedhanii faarfatan.

⁸ Saa'ol akka malee aare; jechi kunis isa hin gammachiifne. Innis, "Isaan Daawitiiif kuma kumaatama kennan; anaaf garuu kumaatama qofa kennan. Mootummaa fudhachuu malee maaltu isa hafe?" jedhee yaade. ⁹ Gaafasii jalqabee Saa'ol ija hinaffaatiin Daawitin ilaala ture.

¹⁰ Guyyaa itti aanutti hafuurri hamaan Waaqa biraa humnaan Saa'olitti dhufe. Innis mana isaa keessatti raajii dubbachaa ture; Daawit immoo akkuma duraan godhu sana baganaa taphachaa ture. Saa'olis eeboo harkatti qabatee ture; ¹¹ innis, "Ani Daawitin keenyanittan hodha" jedhee waan yaadeef eeboo itti darbate. Daawit garuu yeroo lama isa duraa miliqe.

¹² Saa'olis Daawitin sodaate; WAAQAYYO Saa'olin dhiisee Daawit wajjin tureetii. ¹³ Kanaafuu Saa'ol Daawitin fuula ofii isaa duraa fageessee ajajaa kumaa isa godhe; Daawitis loltoota hoogganee ni ba'a; ni galas ture. ¹⁴ Sababii WAAQAYYO isa wajjin tureef inni waan hojjetu hundumaan ni milkaa'a ture. ¹⁵ Saa'olis yeroo akka inni milkaa'e argetti isa ni sodaate. ¹⁶ Israa'elii fi Yihuudaan hundi garuu Daawitin ni jaallatan; inni fuula isaanii dura ni ba'a; ni galas tureetii.

¹⁷ Saa'olis Daawitiin, "Meerab intalli koo hangafti kunoo ti; ati jagnummaan lola WAAQAYYO loli malee ani ishee sitti nan heerumsiisa" jedhe. Saa'ol, "Harki Filisxeemotaa isa irratti haa ka'u malee ani harka koo isa irratti hin kaasu" jedhee yaadaa tureetii.

¹⁸ Daawit garuu Saa'oliin, "Soddaa mootii ta'uuf ani eenyu? Maatiin koo yookaan gosti abbaa koo Israa'el keessatti maali?" jedhe. ¹⁹ Kanaafuu yommuu yeroon itti Meerab intalli Saa'ol Daawititti heerumtu dhi'aatetti isheen Adrii'eel nama biyya Mehoolaattii heerumte.

²⁰ Miikaal intalli Saa'olis Daawitin jaallattee turte; Saa'olis yeroo waa'ee kanaa dhaga'etti ni gammade. ²¹ Innis, "Akka isheen kiyyoo isatti taatuu fi akka harki Filisxeemotaa isa argatuuf ani ishee isatti nan heerumsiisa" jedhee yaade. Kanaafuu Saa'ol Daawitiin, "Ati amma soddaa koo ta'uuf carraa lammaffaa qabda" jedhe.

²² Ergasiis Saa'ol, "Kunoo mootiin sitti gammada; tajaajiltoonni isaa hundinuus si jaallatu; ati amma soddaa isaa ta'i' jedhaatii dhoksaadhaan Daawititti himaa" jedhee tajaajiltoota isaa ajaje.

²³ Isaanis irra deebi'anii waan kana Daawititti himan; Daawit garuu, "Soddaa mootii ta'uun waanuma salphaa seetanii? Ani hiyyeessa; nama hamma kanatti beekamus miti" jedhe.

²⁴ Tajaajiltoonni Saa'ol waan Daawit jedhe isatti himan; ²⁵ Saa'ol immoo, "Mootichi diinota isaa haaloo ba'uuf misaa Filisxeemotaa dhibba tokko malee gabbara biraa tokko illee sirraa hin barbaadu" jedhaatii Daawititti himaa" jedhe. Karoorri Saa'ol akka Daawit harka Filisxeemotaatti kufu ture.

²⁶ Yommuu tajaajiltoonni sun waan kana Daawititti himanitti, Daawit soddaa mootii ta'uuf ni gammade. Kanaafuu utuu yeroon isaa hin ga'in, ²⁷ Daawitii fi namoonni isaa dhaqanii Filisxeemota dhibba lama ajjeesan. Daawitis soddaa mootii ta'uuf jedhee misaa Filisxeemota ajjeefamanii hunda fidee mootichatti kenne. Kana irratti Saa'ol intala isaa Miikaalin isatti heerumsiise.

²⁸ Saa'ol yommuu akka WAAQAYYO Daawit wajjin jiruu fi akka Miikaal isa jaallate hubatetti, ²⁹ ammas akka malee isa sodaate; bara jireenya isaa kan hafe hundas diina isaa ta'ee jiraate.

³⁰ Ajajjoonni waraana Filisxeemotaas yeroo hedduu waraanaaf ni ba'u turan; yeroo isaan waraanaaf ba'an hundas Daawit qondaaltota Saa'ol kaan caalaa mo'annaa argata ture; maqaan isaas baay'ee beekame.

19

Saa'ol Daawitin Ajjeesuuf Yaale

¹ Saa'ol ilma isaa Yoonaaatanii fi tajaajiltoota hunda akka isaan Daawitin ajjeesan ajaje. Yoonaaatan garuu akka malee Daawitin jaallata ture; ² akkana jedhees isa akeekkachiise; "Saa'ol abbaan koo karaa ittiin si ajjeesu barbaadachaa jira. Bori ganama of eeggadhu; dhokadhuutti achuma turi. ³ Anis gad ba'ee abbaa koo wajjin dirree ati jirtu irra nan dhaabada. Waa'ee kees isa wajjin haasa'ee waan inni jedhe sitti hima."

⁴ Yoonaaatanis akkana jedhee abbaa isaa Saa'olitti waa'ee Daawit waan gaarii dubbate; "Mootichi tajaajilaa isaa Daawititti yakka hin hojjetin; inni homaa si hin goone; wanni inni hojjetes faayidaa guddaa siif argamsiiseera. ⁵ Daawit lubbuu ofii isaatiif yaaduu dhiisee Filisxeemicha ajjeese. WAAQAYYOS Israa'el hundaaf mo'annaa guddaa kenne; atis waan kana argitee gammadeerta. Yoos ati maaliif sababii malee isa ajjeesuudhaan nama yakka hin qabne kan akka Daawititti yakka hojjetta ree?"

⁶ Saa'olis Yoonaaatanin dhaggeeffatee, "Dhugaa WAAQAYYO jiraataa, Daawit hin ajjeefamu" jedhee kakate.

⁷ Kanaafuu Yoonaataan Daawitin waamee waan kana hunda itti hime. Saa'olittis isa fide; Daawitis akkuma duriitti Saa'ol dura dhaabate.

⁸ Ammas lolli ni ka'e; Daawitis dhaqee Filisxeemota lole. Innis humna guddaan isaan dha'e; isaanis isa duraa baqatan.

⁹ Garuu utuu Saa'ol eeboo harkatti qabatee mana isaa taa'uu hafuuri hamaan WAAQAYYO biraa isatti dhufe. Utuu Daawit baganaa taphachaa jiruu, ¹⁰ Saa'ol eeboodhaan Daawitin keenyanitti hodhuu yaale; Daawit garuu duraa miliqe; Saa'olis eeboo sana keenyanitti fixe. Daawitis halkan sana baqatee jalaa ba'e.

¹¹ Saa'ol akka isaan eeganii ganamaan isa ajjeesaniif mana Daawititti namoota erge. Miikaal niitiin Daawit garuu, "Ati yoo halkan kana baqachuu baatte bori ni ajjeefamta" jettee akeekkachiifte. ¹² Kanaafuu Miikaal foddaa keessaan Daawitin gad buufte; innis baqatee miliqe. ¹³ Ergasii Miikaal fakkii Waaqa tolfamaa tokko fuutee wayyaa itti uffiftee siree irra ciibsite; boraatii rifeensa re'ees mataa jala keesseeff.

¹⁴ Yeroo Saa'ol Daawitin qabsiisuuf namoota ergetti Miikaal, "Inni dhukkubsateera" jette.

¹⁵ Saa'ol akka isaan Daawitin ilaalaniif deebisee namoota ergee, "Akka ani isa ajjeesuuf siree isaatiin naa fidaa" isaaniin jedhe. ¹⁶ Yeroo namoonni sun ol seenanitti fakkiin Waaqa tolfamaa sun siree irra ciibsamee, rifeensi re'ees mataa jala kaa'ameeffi argame.

¹⁷ Saa'olis Miikaaliin, "Ati maaliif akka diinni koo miliquuf akkas na gowwoomsite?" jedhe.

Miikaalis, "Isatu, 'Jalaa na miliqsi; yoo kanaa achii ani sin ajjeesaa' naan jedhe" jetteen.

¹⁸ Daawitis yeroo baqatee miliqetti Saamu'eel bira Raamaa dhaqee waan Saa'ol isa godhe hunda itti hime. Ergasii innii fi Saamu'eel gara Naayot dhaqanii achuma turan. ¹⁹ Saa'olittis, "Kunoo Daawit Naayot ishee Raamaa keessatti argamtu keessa jira" jedhaniin himan. ²⁰ Kanaafuu inni akka isa qabaniif namoota itti erge. Isaan garuu yeroo garee raajota raajii dubbatanii kan Saamu'eel hoogganaa isaanii ta'ee achi dhaabachaa ture tokko arganitti Hafuurri Waaqaa namoota Saa'ol irra bu'ee isaanis akkasuma raajii dubbatan. ²¹ Saa'ol yommuu waan kana dhaga'etti namoota biraa erge; isaanis akkasuma raajii dubbatan. Saa'ol ammas yeroo sadaffaaf namoota erge; isaanis akkasuma raajii dubbatan. ²² Dhuma irratti inni ofuma isaatii ka'ee Raamaa dhaqee; boolla bishaanii guddaa Seekuutti argamu bira ga'ee, "Saamu'eelii fi Daawit eessa jiru?" jedhee gaafate.

Namni tokkos, "Isaan Naayot ishee Raamaa keessa jirtu keessa jiru" jedheen.

²³ Kanaafuu Saa'ol gara Naayot ishee Raamaa keessa jirtu sanaa dhaqee. Garuu Hafuurri Waaqaa isaa irra bu'ee; innis hamma Nawaat ga'utti raajii dubbachaa deeme. ²⁴ Wayyaa isaas of irraa baasee fuula Saamu'eel duratti raajii dubbate. Innis halkanii fi guyyaa sana guutuu qullaa isaa ciise. Sababiin namoonni, "Saa'olis raajota keessaa tokkoodhaa?" jedhaniif kanuma.

20

Daawitii fi Yoonaataan

¹ Daawitis Naayot ishee Raamaa keessatti argamtuu baqatee Yoonaataan bira deeme, "Ani maalin godhe? Yakki koos maali? Cubbuun ani fuula abbaa keetii duratti hojjedhee inni na ajjeesuu barbaaduuf kami?" jedhee gaafate.

² Yoonaataanis deebisee, "Kun gonkumaa hin ta'u; ati hin ajjeefamtu! Abbaan koo waan xinnaas ta'u waan guddaa utuu na wajjin hin mari'atin hin hojjetu. Yoos abbaan koo akkam waan kana na dhoksa ree? Wannu kun akkas miti!" jedhe.

³ Daawit garuu akkana jedhee kakate; "Akka ani fuula kee duratti fudhatama argadhe abbaan kee sirriitti beeka; kanaafuu inni, 'Yoonaataan waan gadduuf akka waan kana beeku hin godhinaa' jedheera. Garuu dhugaa WAAQAYYO jiraataa ti; du'a kee ti; anaa fi du'a giddu tarkaanfii tokko qofatu jira."

⁴ Yoonaataanis Daawitiin, "Waan ati akka ani siif godhu barbaaddu hunda siifin godha" jedhe.

⁵ Kanaafuu Daawit akkana jedhe; "Bor Ayyaana Baatii ti; anis mootii wajjin maaddiitti dhi'aachuun qaba; garuu akka ani dhaqee hamma galgala iftaaniitti ala dhokadhu naa eeyyami. ⁶ Yoo abbaan kee na barbaadee na dhabe, 'Daawit waan aarsaan waggaa sababii maatii isaa guutuutiif achitti dhi'eeffamaa jiruuf akka ariitiidhaan gara Beetlehem magaalaa ofii isaa dhaquuf cimsee eeyyama na gaafatee jira' jedhiin. ⁷ Yoo inni, 'Haa ta'u' jedhe, garbichi kee ooleera; yoo inni aare garuu akka inni hammuna natti

yaade hubachuu dandeessa. ⁸ Ati garuu garbicha keetiif garaa laafi. Atii fi garbichi kee fuula WAAQAYYOO duratti kakuu galtaniirtuutii. Yoo ani yakka qabaadhe atuun na ajjeesi! Maaliif dabarsitee abbaa keetti na kennita?"

⁹ Yoonaa taanis, "Wanni kun sirraa haa fagaatu! Ani utuu akka abbaan koo si miidhuu barbaadee beekke silaa sitti hin himun turee?" jedhe.

¹⁰ Daawitis, "Yoo abbaan kee dheekkamsaan siif deebise eenyutu natti hima?" jedhee gaafate.

¹¹ Yoonaa taan, "Kottu alatti baanaa" jedhe. Kanaafuu isaan lamaanuu walii wajjin deeman.

¹² Kana irratti Yoonaa taan Daawitiin akkana jedhe; "Ani WAAQAYYOO Waaqa Israa'eliin nan kakadha; dhugumaan iftaan yoona yaada abbaa koo nan ilaala! Yoo inni yaada tolaa siif qabaate ani dhaamsa sitti ergeen si beeksisa. ¹³ Garuu yoo abbaan koo si miidhuu barbaadee ani immoo si beeksisee nagaadhaan si erguu baadhe, WAAQAYYOO Yoonaa taanin haa adabu; waan caalus itti haa fidu. WAAQAYYOO akkuma abbaa koo wajjin ta'e sana si wajjinis haa ta'u. ¹⁴ Akka ani hin ajjeefamneef ati gara laafina hin geeddaramne kan akka gara laafina WAAQAYYOO sana bara jirenya kootii keessa na argisiisi. ¹⁵ Yeroo WAAQAYYOO diinota Daawit lafa irraa barbaadeessutti illee gara laafinni kee maatii koo irraa hin citin."

¹⁶ Kanaafuu Yoonaa taan, "WAAQAYYOO diinota Daawit itti gaafatamtoota haa godhu" jedhee mana Daawit wajjin kakuu seene. ¹⁷ Yoonaa taan sababii akkuma lubbuu ofii isaatti Daawitin jaallateef akka inni amma illee isaaf kakatu godhe.

¹⁸ Yoonaa taanis Daawitiin akkana jedhe: "Bori Guyyaa Ayyaana Baatii ti. Sababii iddoon ati teessu sun duwwaa ta'uuf akka ati hin jirre ni beekama. ¹⁹ Iftaan galgala iddoo yeroo rakkinni kun jalqabetti itti dhokatte sana dhaqiitii dhagaa Ezeel bira turi. ²⁰ Ani akka nama waan tokkotti xiyyeeffatee darbatuutti xiyya sadii naannoo dhagaa sanaatti nan darbada. ²¹ Ergasiis gurbaa tokko ergee, 'Dhaqiitii xiyya barbaadi' nan jedha. Yoo ani, 'Ilaa, xiyyi siin garana jira; as fidi' jedheen, dhugaa WAAQAYYOO jiraataa, ati homaa hin taatuutti kottu; balaan tokko iyyuu hin jiru. ²² Yoo ani gurbichaan, 'Ilaa, xiyyi siin garas jira' jedhe garuu waan WAAQAYYOO akka ati deemtu barbaadeef deemuu qabda. ²³ Waa'ee waan anaa fi ati mari'anne sanaa akka WAAQAYYOO bara baraan anaa fi si gidduutti dhuga ba'aa ta'e yaadadhu."

²⁴ Kanaafuu Daawit ala dhokate; yeroo Guyyaan Ayyaana Baatii ga'ettis mootichi waa nyaachuuf taa'e. ²⁵ Innis akkuma amala isaa keenyan manaa bira taa'e; Yoonaa taan fuullee isaa, Abneer immoo Saa'ol cina taa'e; iddoon Daawit garuu duwwaa ture. ²⁶ Saa'ol gaafas homaa hin dubbanne; inni, "Wanni akka seeraatti isa xureessu tokko Daawititti dhufuu hin oolu; inni dhugumaanuu xuraa'aa dha" jedhee yaadaa tureeti. ²⁷ Garuu guyyaa itti aanu jechuunis ji'a sana keessaa guyyaa lammaffaatti iddoon Daawit ammas duwwaa ture. Kana irratti Saa'ol ilma isaa Yoonaa taaniin, "Ilmi Isseey sun maaliif kaleessas har'as nyaataaf hin dhufin?" jedhe.

²⁸ Yoonaa taanis akkana jedhee deebise; "Daawit gara Beetlihem deemuuf jedhee jabeessee eeyyama na gaafate. ²⁹ Innis, 'Sababii maatiin keenya magaalaa sana keessatti aarsaa dhi'eessaa jiruu fi sababii obboleessi koo akka ani achitti argamuuf na ajajeef nan dhaqa. Yoo ani fuula kee duratti fudhatama argadhee jiraadhe akka ani obbolloota koo ilaaluu dhaquuf naa eeyyami' jedhe. Wanni inni utuu maaddii mootichaatti hin dhi'aatin hafeefis kanuma."

³⁰ Saa'olis akka malee Yoonaa taanitti aaree akkana jedheen; "Ati yaa ilma dubartii micciiramtuu fi finciltuu sanaa! Akka ati ilma Isseey kan si'ii fi haadha si deesseef qaani ta'e sanaaf tumsite ani hin beekuu?" ³¹ Hamma ilmi Isseey lafa irra jirutti atis mootummaan kees jabaattanii hin dhaabattan. Kanaafuu amma nama itti ergiitii gara koo fichisiisi; inni du'u qabaatii!"

³² Yoonaa taanis, "Inni maaliif ajjeefama? Maali godhe?" jedhee abbaa isaa Saa'olin gaafate. ³³ Saa'ol garuu isa ajjeesuudhaaf eeboo itti darbate. Kanaafuu Yoonaa taan akka abbaan isaa Daawitin ajjeesuuf kutate beeke.

³⁴ Yoonaa taanis akka malee aaree maaddii irraa ka'e; innis sababii hojji qaani kan abbaan isaa Daawititti hojjete sanaan gaddeef bultii lammaffaa ji'a sanaatti homaa hin nyaanne.

³⁵ Yoonaa taan ganama barii Daawitin wal arguuf gad ba'e. Gurbaan xinnaan tokkos isa wajjin ture. ³⁶ Innis gurbaa sanaan, "Fiigitiitii xiyya ani darbada sana barbaadi" jedhe. Akkuma gurbaan sun fiigeen Yoonaa taan isa duubaan xiyya darbate. ³⁷ Yeroo gurbichi iddoo xiyyi Yoonaa taan bu'e sana ga'etti, Yoonaa taan isa waamee, "Xiyyi siin achi jira mitii?" jedhe. ³⁸ Ergasiis, "Ariifadhu! Dafitii deemi! Hin dhaabatan!" jedhee itti iyye; gurbichis xiyya sana fuudhee gara gooftaa isaatti deebi'e. ³⁹ Gurbaan sun

waa'ee waan kana hundaa waan tokko illee hin beekne; Yoonaaatanii fi Daawit qofatu beeka ture. ⁴⁰ Ergasiis Yoonaaataan mi'a isaa kan lolaa gurbichatti kennee, "Fuudhiitii gara magaalaatti deebi'i" jedheen.

⁴¹ Erga gurbichi deemee booddee Daawit karaa kibba dhagaa sanaatii ka'ee yeroo sadii gad jedhee fuula Yoonaaataan duratti addaan lafatti gombifame. Ergasiis isaan wal dhungatanii walitti boo'an; Daawit garuu caalaa boo'e.

⁴² Yoonaaataanis Daawitiin, "Anaa fi si gidduutti, sanyii koo fi sanyii kee gidduutti WAAQAYYO bara baraan dhugaa baatuu dha' waliin jennee akka frummaan keenya jabaatee dhaabatuuf maqaa WAAQAYYOOTIIN walii kakanneerraatii nagaan deemi" jedhe. Ergasiis Daawit ka'ee qajelee. Yoonaaataanis gara magaalaatti deebi'e.

21

Daawit Gara Noob Deemuu Isaa

¹ Daawit gara magaalaati Noob Abiimelek lubicha bira dhaqe. Ahiimelekis yeroo isa argetti hollatee, "Ati maaliif kophaa kee deemta? Maaliif namni tokko illee si wajjin hin jirru?" jedhee gaafate.

² Daawitis Ahiimelek lubichaan akkana jedhe; "Mootichi, 'Namni tokko iyyuu waa'ee ergama keetiitii fi qajeelfama keetii beekuu hin qabu' jedhee na ajajeera. Namoota koo immoo akka isaan iddoo tokkotti na eegan itti himeera. ³ Egaa isin maal of harkaa qabdu? Buddeena shan yookaan waanuma argachuu dandeessan naa kennaa."

⁴ Lubichi garuu Daawitiin, "Ani buddeena namni kam iyyuu nyaachuu danda'u asii hin qabu; ta'us buddeenni qulqullaa'aan namoonni dubartii bira hin ga'in qofti nyaachuu danda'an as jira" jedhe.

⁵ Daawitis, "Dhugumaan akkuma yeroo ani ba'u hunda ta'aa ture sana dubartoonni nurraa dhowwamaniiru. Ergama qulqulluu hin ta'in irratti iyyuu mi'i dargaggootaa qulqulluu dha. Har'a immoo hammam caalaatti haa qulqullaa'uu ree!" jedhee deebise. ⁶ Kanaafuu lubichi buddeena qulqulleeffame sana isaaf kenne; buddeena ilaalchaa kan gaafas buddeena ho'aadhaan iddoo buufamuuf fuula WAAQAYYOO duraa fuudhame sana malee buddeenni biraa achi hin turreetii.

⁷ Gaafasis tajaajiltoota Saa'ol keessaa tokko akka fuula WAAQAYYOO dura turu dirqisiifamee ture; innis Doo'eeg namicha Edoom, itti gaafatamaa tiksee Saa'ol ture.

⁸ Daawitis, "Ati eeboo yookaan goraadee asii hin qabduu? Ani sababii hojiin mootichaa ariifachiisaa ta'eef goraadee yookaan mi'a lolaa tokko illee hin fidannee?" jedhee Ahiimelekin gaafate.

⁹ Lubichis deebisee akkana jedhe; "Goraadeen Gooliyaad Filisxeemichaa kan ati Sulula Eelaa keessatti ajjeefte sanaa as jira; innis huccuudhaan maramee dirataan duuba jira. Yoo barbaadde fudhadhu; isa malee goraadeen biraa as hin jiru" jedheen.

Daawitis, "Kan akka isaa hin jiruutii naa kenni" jedhe.

Daawit Gara Gaatitti Baqate

¹⁰ Daawit gaafas Saa'ol duraa baqatee gara Aakiish mooticha Gaati dhaqe. ¹¹ Tajaajiltoonni Aakiish garuu, "Daawit kun mooticha biyyattii mitii?" Inni kan isaan: "Saa'ol kumaatama ajjeese;

Daawit immoo kuma kumaatama ajjeese' jedhanii faarfatanii sirbaniif sana mitii?"

¹² Daawitis waan kana garaatti qabatee Aakiish mooticha Gaati akka malee sodaate. ¹³ Kanaafuu fuula isaanii duratti akka waan maraatee ta'e; utuma harka isaanii keessa jiruus cufaa karraa hooqee areeda isaa irra gorora yaasee akka nama maraatee of godhe.

¹⁴ Aakiishis tajaajiltoota isaatiin akkana jedhe; "Mee namicha kana ilaalaa! Inni maraatu dha! Maaliif gara koo isa fiddan? ¹⁵ Akka inni fuula koo duratti akkana ta'uuf isa as fiduun keessan ani nama maraate dhabeetii? Namichi kun mana koo dhufuu qabaa?"

22

Daawit Adulaamii fi Miisphaa Keessatti

¹ Daawit Gaatii ka'ee gara halqa Adulaamitti baqate. Obbolooni isaatii fi maatiin abbaa isaa hundi yeroo waan kana dhaga'anitti gara isaa dhaqan. ² Namoonni rakkatan hundi yookaan kanneen gatiin irra jiru hundii fi warri of jibban hundi isa biratti wal ga'an; innis hoogganaa isaanii ta'e. Namoonni isa wajjin turanis gara dhibba afurii ti.

³ Daawit achii ka'ee Miisphaa ishee biyya Mo'aabitti argamtuu dhaqee mooticha Mo'aabiin, "Hamma ani waan Waaqni naaf godhu beekutti akka abbaan koo fi haati

koo dhufanii si bira jiraatan ni eeyyamtaa?" jedhe. ⁴ Innis mootii Mo'aab biratti isaan dhiise; isaanis yeroo Daawit iddoo da'annoo keessa turetti mooticha bira jiraatan.

⁵ Ta'us Gaad raajichi Daawitiin, "Da'annoo keessa hin turin. Biyya Yihuudaatti gali" jedhe. Kanaafuu Daawit achii ba'ee bosona Hereeti seene.

Saa'ol Luboota Noob Fixuu Isaa

⁶ Saa'ol akka Daawitii fi namoonni isaa argaman dhaga'ee. Saa'olis eeboo harkatti qabatee gaara Gibe'aa irra muka tamirii jala taa'aa ture. Qondaaltonni isaa hundinuus isa bira dhaabachaa turan. ⁷ Saa'olis akkana isaaniin jedhe; "Yaa namoota Beniyaam dhaga'aa! Dhugumaan ilmi Isseey lafa qotiisaatii fi iddoo dhaabaa wayinii hunda keessaniif ni kennaa? Hunda keessanis ajajjuuwwan kumaatii fi ajajjuuwwan dhibbaa ni godhaa? ⁸ Sababiin isin hundi natti malattaniif kanaa? Yeroo ilmi koo ilma Isseey wajjin kakuu galutti namni tokko iyyuu natti hin himu. Isin keessaa namni tokko iyyuu dhimma koo hin qabu yookaan akka ilmi koo akka inni akkuma har'a gochaa jiru kana akka tajaajilaan koo riphee na eeggatuuf isa natti kakaasu isin keessaa namni tokko iyyuu natti hin himu."

⁹ Garuu Doo'eeg Edoomichi kan qondaaltota Saa'ol wajjin dhaabachaa ture sun akkana jedhee deebise; "Ani ilma Isseey isaa gara Noob Ahiimelek ilma Ahiixuub bira dhufuu nan arge. ¹⁰ Ahiimelekis WAAQAYYON isaaf kadhate; akkasumas galaa fi goraadee Gooliyaad Filixseemichaa kenneef."

¹¹ Kana irratti mootichi Ahiimelek lubicha ilma Ahiixuubitti nama ergee isaa fi maatii abbaa isaa kanneen Noobitti luboota turan hunda waamsise; isaanis gara mootichaa dhufan. ¹² Saa'olis, "Yaa ilma Ahiixuub dhaga'i" jedhe.

Innis, "Yaa gooftaa, ani kunoo ti" jedhee deebise.

¹³ Saa'olis akkana isaan jedhe; "Ati maaliif buddeenaa fi goraadee kenniteefii Waaqa kadhachuufidhaan akka inni natti fincilee akkuma har'a gochaa jiru kana riphee na eeggatu isa gootee ilma Isseey wajjin natti malatte?"

¹⁴ Ahiimelekis deebise mootichaan akkana jedhe; "Dhirsii intala mootichaa, ajajaa loltoota si eeganiitii fi namni mana kee keessatti akka malee kabajamu tajaajiltoota kee hunda keessaa amanamaan akka Daawit eenyu? ¹⁵ Waaqa isaaf kadhachuun koo har'a guyyaa jalqabaatii? Miti! Mootichi garbicha kee yookaan maatii abbaa isaa keessaa nama tokko illee yakkamaa hin godhin; garbichi kee waa'ee waan kana hundaa homaa hin beekuutii."

¹⁶ Mootichi garuu, "Yaa Ahiimelek, dhugumaan ati ni duuta; atis, maatiin abbaa keetii hundinuus ni duutu" jedhe.

¹⁷ Ergasiis mootichi waardiyyoota isa bira turaniin, "Sababii luboonni WAAQAYYOO kunneen Daawitiif tumsaniif, itti garagalaatii isaan fixaa. Isaan akka inni baqachaa ture ni beeku; ta'us natti hin himne" jedhe.

Qondaaltonni mootichaa garuu luboota WAAQAYYOO dha'uudhaaf harka isaanii ol fudhachuu hin feene.

¹⁸ Mootichis, "Itti garagaliitii luboota fixi" jedhee Doo'eeg Edoomicha ajaje. Kanaafuu Doo'eeg Edoomichi itti garagalee isaan dha'ee. Inni gaafas luboota dirata quncee talbaa irraa hojjetame uffatan saddeettamii shan fixe. ¹⁹ Noob magaalaa lubootaas, dhiirotaa fi dubartoota ishee, ijoollee fi daa'imman ishee, loon, harrootaa fi hoolota ishee goraadeedhaan barbadeesse.

²⁰ Garuu Abiyaataar ilmi Ahiimelek ilma Ahiixuub sun miliqee gara Daawititti baqate.

²¹ Innis akka Saa'ol luboota WAAQAYYOO fixe Daawititti hime. ²² Daawitis Abiyaataariin akkana jedhe; "Ani gaafas yeroo Doo'eeg Edoomichi achi turetti akka inni dhugumaan Saa'olitti odeessu beekeera. Badiisa maatii abbaa keetii hundaaf anatu gaafatama. ²³ Ana wajjin turi; hin sodaatin; namni lubbuu kee barbaadu, lubbuu koos ni barbaada. Ati na wajjin nagumaan jiraatta."

23

Daawit Qeyiilaa Baraaruu Isaa

¹ Daawit yommuu, "Kunoo, Filixseemonni Qeyiilaatti waraana bananii oobdii saamaa jiru" jedhanii itti himanitti, ² "Ani dhaqee Filixseemota kanneen waraanuu?" jedhee WAAQAYYON gaafate.

WAAQAYYOS, "Dhaqii Filixseemota waraaniitii Qeyiilaa baraar" jedhee deebiseef.

³ Namoonni Daawit garuu, "Nu as Yihuudaa keessatti iyyuu sodaachaa jirra. Yoo loltoota Filixseemotaa waraanuuf Qeyiilaa dhaqne immoo hammam haa sodaannu!" jedhaniin.

⁴ Daawit ammas deebi'ee WAAQAYYON gaafate; WAAQAYYOS, "Qeyiilaatti gad bu'i; ani Filisxeemota dabarsee harka keetti nan kennaatii" jedhee deebiseef. ⁵ Kanaafuu Daawitii fi namoonni isaa Qeyiilaa dhaqanii Filisxeemota waraananii horii isaanii booji'an. Daawitis miidhaa guddaa Filisxeemotatti fidee akkasiin saba Qeyiilaa baraare. ⁶ Abiyaataar ilmi Ahiimelek sunis yeroo gara Qeyiilaa gara Daawititti baqatetti dirata fudhatee dhufe.

Saa'ol Daawitin Ari'e

⁷ Akka Daawit Qeyiilaa dhage Saa'olitti himan; innis, "Waan Daawit magaalaa karraa fi danqaraa qabdu keessa seenuudhaan ofitti cufeef Waaqni isa dabarsee natti kenneera" jedhe. ⁸ Saa'olis akka isaan Qeyiilaatti gad bu'anii Daawitii fi namoota isaa marsaniif jedhee loltoota isaa hunda duulaaf walitti waammate.

⁹ Daawitis yeroo akka Saa'ol hammina isatti yaade beeketti Abiyaataar lubichaana, "Dirata sana as fidi" jedhe. ¹⁰ Ergasiis Daawit akkana jedhe; "Yaa WAAQAYYO, Waaqa Israa'el akka Saa'ol gara Qeyiilaa dhufee sababii kootiif jedhee magaalattii barbadeessuuf karoofate garbichi kee dhugumaan dhaga'eera. ¹¹ Jiraattonni Qeyiilaa isatti dabarsanii na kennuu? Akkuma garbichi kee dhaga'e sana Saa'ol ni dhufaa? Yaa WAAQAYYO Waaqa Israa'el mee garbicha keetti himi."

WAAQAYYOS, "Eeyyee inni ni dhufa" jedhe.

¹² Daawit ammas, "Jiraattonni Qeyiilaa anaa fi namoota koo dabarsanii Saa'olitti ni kennuu?" jedhee gaafate.

WAAQAYYOS, "Eeyyee isin kennu" jedhe.

¹³ Kanaafuu Daawitii fi namoonni isaa kanneen gara dhibba ja'a ta'an Qeyiilaadhaa ka'anii gara dhaquu danda'an hunda dhaqan. Saa'olis yommuu akka Daawit Qeyiilaa keessaa baqate dhaga'etti achi hin dhaqne.

¹⁴ Daawitis da'annoowwan gammoojjii keessaatii fi gaarran Gammoojjii Ziif keessa ture. Saa'olis guyyuma guyyaan isa barbaadaa ture; Waaqni garuu dabarsee harka isaatti Daawitin hin kennine.

¹⁵ Daawit utuu Gammoojjii Ziif keessa iddoo Hooreshaa jedhamu tokko jiruu akka Saa'ol isa ajjeesuuf dhufe beeke. ¹⁶ Yoonataan ilmi Saa'olis Daawit bira Hooreshaa dhage; maqaa Waaqaatiinis isa jajjabeesse. ¹⁷ Innis, "Hin sodaatin; abbaan koo Saa'ol harkumaanuu si hin tuqu. Ati mootii Israa'el taata; ani immoo itti aanaa kee nan ta'a. Abbaan koo Saa'ol iyyuu waan kana ni beeka" jedheen. ¹⁸ Isaan lamaanuu fuula WAAQAYYOO duratti kakuu walii galan. Ergasii Yoonataan mana ofii isaatti gale; Daawit immoo Hooreshaatti hafe.

¹⁹ Namoonni Ziif gara Gibe'aa gara Saa'ol dhaqanii akkana jedhan; "Daawit kibba Yasemooniin gaara Hakiilaa irra da'annoowwan Hooreshaa keessa dhokatee gidduu keenya jira mitii? ²⁰ Yaa mootii, ati gaafa dhufuu feete kottu; nu isa dabarsinee sitti ni kennina."

²¹ Saa'olis deebisee akkana jedhe; "Waan isin naa yaaddaniif WAAQAYYO isin haa eebbisu. ²² Dhaqaatii ittuma fufaa qophaa'aa. Iddoo Daawit yeroo baay'ee dhaquu fi nama achitti isa argu illee hubadhaa. Akka inni nama daba hojjetu ta'e natti himaniiru. ²³ Iddoo inni itti dhokatu hundumaa barbaadaatii oduu mirkanaa'aa fidaa kottaa. Ergasii ani isin wajjin nan deema; yoo inni naannoo sana jiraate ani kumaatama Yihuudaa hunda keessaa barbaadee isa nan arga."

²⁴ Kanaafuu isaan ka'anii Saa'ol dursanii Ziif dhaqan. Daawitii fi namoonni isaa gama kibba Yasemooniin Gammoojjii Maa'oon kan Arabbaatti argamtu keessa turan. ²⁵ Saa'olii fi namoonni isaa Daawitin barbaaduu jalqaban; Daawitis yommuu waan kana itti himanitti gara kattaatti gad bu'ee Gammoojjii Maa'oon keessa ture. Saa'olis yeroo waan kana dhaga'etti Daawitin ari'uuf Gammoojjii Maa'oon seene.

²⁶ Saa'ol gaara gubbaa karaa tokkoon deema ture; Daawitii fi namoonni isaa immoo Saa'ol duraa baqachuuf jedhanii ariifachaa tulluu sana irra karaa kaaniin deeman. Yeroo Saa'olii fi namoonni isaa itti dhi'aatanii Daawitii fi namoota isaa qabachuu ga'anitti, ²⁷ ergamaan tokko gara Saa'ol dhufee, "Dafitii kottu! Filisxeemonni biyyattii weeraranii jiruutii" jedhe. ²⁸ Saa'olis Daawitin ari'uu dhiisee Filisxeemotatti gara gale. Kanaafuu iddoon sun, "Kattaa gargar ba'umsaa" jedhame. ²⁹ Daawitis achii deeme da'annoowwan Een Gaadii keessa jiraate.

24

Daawit Saa'olin Ajjeesuu Irraa Of Qabe

¹ Erga Saa'ol Filisxeemota ari'uu irraa deebi'ee booddee, "Daawit Gammoojjii Een Gaad keessa jira" jedhanii isatti himan. ² Kana irratti Saa'ol guutummaa Israa'el keessaa

namoota filatamoo kuma sadii fudhatee Daawitii fi namoota isaa barbaacha gara Kattaa Re'oota diidaa dhage.

³ Saa'olis gara dallaa hoolotaa kan karaa cinaa sanaa dhufe; holqa tokkotu achi ture; Saa'olis gad taa'uuf achi seene. Daawitii fi namoonni isaas holquma sana keessa achi fagaatanii turan. ⁴ Namoonni Daawitis, "Guyyaan WAAQAYYO, 'Ani akka ati akkuma feete isa gootuuf diina kee dabarsee harka keetti nan kenna' jedhee waa'ee isaa sitti hime sun har'a" isaan jedhan. Daawitis lafa irra loo'ee utuu hin beekamin fiixee wayyaa Saa'ol irraa kute.

⁵ Kana booddee Daawit waan fiixee wayyaa Saa'ol kuteef ni gaabbe. ⁶ Namoota isaatiinis, "Gooftaa koo kan WAAQAYYO dibetti waan akkasii gochuu yookaan harka koo isatti ol kaafachuu irraa WAAQAYYO na haa oolchu; inni dibamaa WAAQAYYOOTII" jedhe. ⁷ Daawitis dubbii kanaan namoota isaa ifatee akka isaan Saa'olin hin tuqne godhe. Saa'olis holqa sana keessaa ba'ee qajelee.

⁸ Ergasii Daawit holqa sana keessaa ba'ee, "Yaa goftaa koo mootii!" jedhee Saa'olin waame. Yeroo Saa'ol of irra garagalee ilaaletti Daawit gad jedhee, addaan lafatti gombifamee sagade. ⁹ Innis Saa'oliin akkana jedhe; "Ati maaliif dubbii namoonni, 'Daawit si miidhuu barbaada' jedhan dhageessa? ¹⁰ Akka WAAQAYYO holqa kana keessatti dabarsee harka kootti si kenne har'a ijuma keetiin argiteerta. Namoonni tokko tokko akka ani si ajjeesu na gorsan; ani garuu si ajjeesuu nan dide; anis, 'Sababii inni dibamaa WAAQAYYOO ta'eef, ani goftaa kootti harka koo ol hin fudhadhun' jedhe. ¹¹ Yaa abbaa ko, kunoo fiixee wayyaa keetii harka koo keessatti ilaali! Ani fiixee wayyaa keetii nan kute; garuu si hin ajjeefne. Eгаа akka ani yakka hin qabnee fi fincilaa hin ta'in hubadhu. Ani homaa si hin goone; ati garuu na ajjeesuuf na adamsaa jirta. ¹² WAAQAYYO si'ii fi ana gidduutti murtii haa kennu. Yakka ati natti hojjetta WAAQAYYO haaloo haa baasu; ani garuu harka kootiinuu si hin tuqu. ¹³ Akkuma mammaaksi durii, 'Namoota hamoo irraa waan hamaatu dhufa' jedhu sana harki koo si hin tuqu.

¹⁴ "Mootiin Israa'el eenyuu adamsuuf gad ba'ee? Ati eenyuu ari'aa jirta? Saree duutee? Tafkiidhaa? ¹⁵ WAAQAYYO abbaa murtii nuuf ta'ee gidduu keenyatti haa murteessu. Inni dubbii koo ilaalee naaf haa falmu; harka kee jalaas na haa baasu."

¹⁶ Yeroo Daawit waan kana dubbatee xumuretti Saa'ol, "Daawit yaa ilma ko, kun sagalee keetii?" jedhee gaafate; sagalee ol fudhatees boo'ee. ¹⁷ Innis akkana jedhe; "Ati na caalaa nama qajeelaa dha; yeroo ani waan hamaa sitti yaadetti ati immoo waan gaarii naa goote. ¹⁸ Ati waan gaarii naaf goote amma natti himteerta; WAAQAYYO dabarsee harka keetti na kenne ture; ati garuu na hin ajjeefne. ¹⁹ Namni tokko yeroo diina isaa argutti utuu hin miidhin gad dhiisaa? Waan ati har'a naa goote kanaaf WAAQAYYO gatii siif haa kennu. ²⁰ Akka ati dhugumaan mootii taatuu fi akka mootummaan Israa'el harka keetti jabaatee dhaabatu anuu beeka. ²¹ Ati akka sanyii koo hin balleessine yookaan akka maqaa koos maatii abbaa koo keessaa hin balleessine amma maqaa WAAQAYYOOTIIN naaf kakadhu."

²² Kana irratti Daawit Saa'oliif kakate. Ergasii Saa'ol manatti gale; Daawitii fi namoonni isaa garuu da'annootti deebi'an.

25

Daawit, Naabaalii fi Abiigayyiil

¹ Saamu'eel ni du'e; sabni Israa'el hundi wal ga'ee isaaf boo'e; mana isaa kan Raamaa jirutti isa awwaalan. Kana irratti Daawit achii ka'ee gara Gammoojjii Phaaraanitti gad bu'e.

² Namni Maa'oon kan Qarmeloos keessaa qabeenya qabu tokko akka malee sooressa ture. Innis re'oota kuma tokkoo fi hoolota kuma sadii kanneen Qarmeloositti rifeensa irraa haadatu qaba ture. ³ Maqaan isaa Naabaal, kan niitii isaa immoo Abiigayyiilii dha. Isheen dubartii beektuu fi bareedduu turte; dhirsi ishee garuu addaggee fi hamaa ture; gosti isaas gosa Kaaleb.

⁴ Daawit akka Naabaal Gammoojjii keessatti hoolota isaa irraa rifeensa haaddachaa jiruu ni dhaga'e. ⁵ Kanaafuu akkana jedhee dargaggoota kudhan erge; "Naabaal bira gara Qarmeloos dhaqaatii maqaa kootiin nagaan isa gaafadhaa. ⁶ Akkanas jedhaanii: 'Bara dheeraa jiraadhu! Nagaan siif haa ta'u; nagaan maatii keetiifis haa ta'u! Waan ati qabdu hundaafis haa ta'u!

⁷ " 'Ani amma akka yeroon kun yeroo itti hoolota irraa rifeensa haadan ta'e dhaga'eera. Yeroo tiksooni kee nu wajjin turanitti nu isaan hin miine; yeroo isaan Qarmeloos keessa turan guutuus wanni isaan qaban tokko iyyuu jalaa hin badne.

⁸ Hojjetoota kee gaafadhu; isaan sitti himuutii. Kanaafuu waan nu yeroo gaarii dhufneef

dargaggoota kootiif arjoomi. Maaloo tajaajiltoota keetii fi ilma kee Daawitiif waanuma amma harkaa qabdu kenni.' "

⁹ Namoonni Daawitis yeroo achi ga'anitti maqaa Daawitiin dhaamsa kana Naabaalitti himanii deebii isaa eeggatan.

¹⁰ Naabaalis tajaajiltoota Daawitiif akkana jedhee deebise; "Daawit kun eenyu? Imi Issey kun eenyu? Yeroo ammaa tajaajiltoonni hedduun gooftota isaanii jalaa badaa jiru. ¹¹ Egaa ani maaliifan buddeena koo, bishaan koo fi foon namoota hoolota koo irraa rifeensa haadaniif qale namoota eessaa akka dhufan hin beekamneef kenna?"

¹² Namoonni Daawitis of irra garagalanii deebi'an. Yeroo deebi'anitti waan hunda isatti himan. ¹³ Daawitis namoota isaatiin, "Goraadee keessan hidhadhaa!" jedhe. Kanaafuu isaan goraadee isaanii hidhatan; Daawitis goraadee isaa hidhate. Namoonni gara dhibba afur ta'an Daawit wajjin deeman; namoonni dhibbi lama immoo mi'a biratti hafan.

¹⁴ Tajaajiltoota keessaa inni tokko akkana jedhee Abiigayil niiti Naabaalitti hime: "Daawit akka isaan gooftaa keenyaaf nagaan dhi'eessaniif gammoojjidhaa ergamoota ergee ture; inni garuu akka malee isaan arrabse. ¹⁵ Ta'us namoonni kunneen nuuf baay'ee gaarii turan. Isaan nu hin miine; yeroo isaan wajjin bosona turre hundas wanti tokko iyyuu nu jalaa hin badne. ¹⁶ Yeroo nu hoolota keenya isaan bira tiksaan turre hunda isaan halkanii fi guyyaa dallaa nuu ta'anii turan. ¹⁷ Sababii gooftaa keenyaa fi guutummaa mana isaa balaan marseef ati amma waan gochuu dandeessu yaadi. Sababii inni nama hamaa akkanaa ta'eef namni tokko iyyuu isatti dubbachuu hin danda'u."

¹⁸ Abiigayil yeroo hin balleessine. Isheen buddeena dhibba lama, daadhii wayinii qalqalloo lama; hoolota qalmaa qopheeffaman shan, akaayii safartuu shan, maxinoo ija wayinii dhibba tokkoo fi maxinoo ija harbuu dhibba lama fudhattee harreetti fe'atte. ¹⁹ Ergasii tajaajiltoota isheetiin, "Na dursaatii deemaa; ani isinan qaqqaba" jette. Garuu dhirsaa ishee Naabaalitti hin himne.

²⁰ Utuma isheen harree yaabbattee tulluudhaan da'attee gad bu'aa jirtuu Daawitii fi namoonni isaa isheetti dhufan; isheenis isaan simatte. ²¹ Daawit akkana jedhee ture; "Ani akka wannii inni qabu tokko illee jalaa hin badneef gammoojjiitti qabeenya namicha kanaa eeguun koo gatii dhabeera. Inni waan gaarii ani isaaf godheef waan hamaa naaf deebiseera. ²² Yoo ani bori ganama waan kan isaa ta'e keessaa dhiira tokko illee lubbuun hambise, Waaqni Daawitin haa adabu; adabbiin sunis akka malee haa cimul!"

²³ Abiigayil yeroo Daawitin argitetti dafttee harree ishee irraa buutee adda isheetiin fuula Daawit duratti lafatti gombifamtee sagadde. ²⁴ Isheenis miilla isaa irratti kuftee akkana jette: "Yaa gooftaa koo, balleessaan hundi ana gofa irra haa jiraatu. Maaloo akka garbittiin kee sitti dubbattu eeyyamiif; waan garbittiin kee dubbachuu barbaaddus dhaga'i. ²⁵ Gooftaan koo waa'ee namicha hamaa sanaa waa'ee Naabaal homaattuu hin hedhin. Inni akkuma maqaa isaa ti; hiikkaan maqaa isaas gowwaa jechuu dha. Gowmmaanis isa wajjin jira. Ani garbittiin kee garuu namoota gooftaan koo erge sana hin argine. ²⁶ Akka ati dhiiga hin dhangalaafnee fi akka harka keetiin haaloo hin baafne WAAQAYYO si eegeera; dhugaa WAAQAYYO jiraataa; du'a kee ti; diinonni keetii fi warri gooftaa koo miidhuu barbaadan hundi akkuma Naabaal haa ta'an. ²⁷ Kennaan garbittiin kee gooftaa kootiif fidde kunis namoota si duukaa bu'aniif haa kennamu."

²⁸ "Waan gooftaan koo lola WAAQAYYO loluuf WAAQAYYO gooftaa kootiif dhugumaan mootummaa bara baraa ni dhaabaatii. Maaloo balleessaa garbitti keetii dhiisiif. Bara jireenya keetii keessas yakki tokko iyyuu sirratti hin argamin. ²⁹ Eenyu iyyuu lubbuu kee balleessuuf jedhee si ari'u illee, lubbuun gooftaa koo waldaa jiraattotaa keessatti WAAQAYYO Waaqa keetiin ni eegamti. Inni garuu akkuma waan wiirtuu furrisa keessaa furrifamuutti lubbuu diina keetii furrisee ni darbata. ³⁰ Yeroo WAAQAYYO akkuma gooftaa kootiif waadaa gale sanatti waan gaarii hunda godheefii Israa'el irratti hoogganaa godhee isa muudutti, ³¹ gooftaan koo sababii yakka malee dhiiga dhangalaasuutin yookaan sababii haaloo baafachuutiin waan isa gaabbisiisu yookaan waan qalbii isaa tuqu tokko illee hin qabaatin. Yeroo WAAQAYYO Waaqni kee gooftaa kootiif waan gaarii godhutti garbittii kee yaadadhu."

³² Daawitis Abiigayiliin akkana jedhe; "WAAQAYYO Waaqni Israa'el inni akka ati har'a na argituuf natti si erge haa eebbifamu. ³³ Ati sababii har'a gorsa gaarii naa kennitee dhiiga dhangalaasuu fi harkuma kootiin haaloo baafachuu irraa na deebifteef eebbifami. ³⁴ Dhugaa WAAQAYYO Waaqa Israa'el kan isin miidhuu na dhowwe jiraataa sanaa, utuu ati dafttee na arguuf dhufuu baattee silaa ilmaan Naabaal keessaa dhiirri tokko iyyuu hamma lafti bariitutti hin hambifamu ture."

³⁵ Daawitis ergasii waan isheen isaaf fidde sana harka ishee irraa fuudhatee, “Nagaan gali. Ani waan ati jette dhaga'eera; gaaffii kees fudhadheera” jedhe.

³⁶ Yeroo Abiigayii gara Naabaal dhaqxetti, inni mana isaatti cidha akkuma cidha mootii tokkoo qopheessee ture. Innis gammachuudhaan guutamee akka malee machaa'ee ture. Kanaafuu isheen hamma lafti bariitutti waan tokko illee isatti hin himne. ³⁷ Ganama sanas yeroo machiin Naabaal irraa galetti niitiin isaa waan kana hunda itti himte; onneen isaas ni dhaabatte; innis akkuma dhagaa ta'e. ³⁸ Bultii kudhan booddee WAAQAYYO Naabaalin dha'e; innis ni du'e.

³⁹ Daawitis yeroo akka Naabaal du'e dhaga'etti, “WAAQAYYO isa arrabsoo Naabaal haaloo naaf baaseef galanni haa ga'u. Inni garbicha isaa yakka hojjechuu dhowwee yakka Naabaal matuma isaatti deebiseeraatii” jedhe.

Daawitis akka isheen niitii isaaf taatu gaafachuuf Abiigayilitti ergaa erge. ⁴⁰ Tajaajiltoonni isaas Qarmeloos dhaqanii Abiigayiliin, “Daawit akka ati isaaf niitii taatuuf akka nu isatti si geessinuuf sitti nu erge” jedhan.

⁴¹ Isheenis adda isheetiin lafatti gombifamtee, “Garbittiin kee kunoo ti; ani si tajaajiluu fi miilla tajaajiltoota gooftaa koo dhiquuf qophaa'eera” jette. ⁴² Abiigayiliis dafee harree yaabbattee tajaajiltoota ishee dubara shan qabattee ergamoota Daawit wajjin deebitee dhaqxee Daawitiif niitii taate. ⁴³ Akkasumas Daawit biyya Yizri'eel keessaa Ahiinoo'amin fuudhe; lamaan isaani iyyuu niitota ta'aniif. ⁴⁴ Saa'ol garuu Miikaal intala isaa kan niitii Daawit turte sana Phaltii'eel ilma Laayish kan lammii Galiim ture sanatti heerumsiise.

26

Daawit Ammas Saa'olin Ajeesuu Irraa Of Qabe

¹ Namoonni Ziif gara Gibe'aa Saa'ol bira dhaqanii, “Kunoo Daawit gaara Hakiilaa kan Yasemoonitti garagaltu irra dhokatee jira mitii?” jedhan.

² Kanaafuu Saa'ol namoota Israa'el keessaa filataman kuma sadii wajjin Daawitin barbaacha Gammoojii Ziifitti gad bu'e. ³ Saa'ol qubata isaa daandii gaara Hakiilaa kan Yasemoonitti garagalu sana cina dhaabbate; Daawit garuu gammoojjii keessa ture. Innis yeroo akka Saa'ol isa duukaa bu'aa jiru beeketti, ⁴ basaastota ergee akka Saa'ol dhugumaan achi ga'e mirkaneeffate.

⁵ Daawitis achi ba'ee iddoo Saa'ol qubate dhaqe. Innis iddoo Saa'olii fi Abneer ilmi Neer ajajaan loltootaa ciciisan arge. Saa'ol qubata keessa rafe; loltoonnis isa marsanii turan.

⁶ Daawitis Ahiimelek namicha Heetii fi Abiishaayi ilma Zeruuyaa obboleessa Yoo'aabiin, “Eenyutu na wajjin gara qubata kanaa Saa'olitti seena?” jedhee gaafate.

Abiishaayis, “Anatu si wajjin seena” jedhe.

⁷ Kanaafuu Daawitii fi Abiishaayi halkaniin gara loltootaa dhaqan; Saa'ol eeboo isaa mataa isaa bira lafatti dhaabee qubata keessa rafa ture. Abneerii fi loltoonni immoo isa marsanii ciciisaa turan.

⁸ Abiishaayis Daawitiin, “Har'a Waaqni diinota kee dabarsee harka keetti kenneera. Mee akka ani utuu itti hin deebi'in yeruma tokkoon eeboo kootiin waraane lafatti isa hodhu naa eeyyami; irra deebi'ee dha'uus na hin barbaachisu” jedhe.

⁹ Daawit garuu Abiishaayiin akkana jedhe; “Isa hin ajeesin! Namni nama WAAQAYYO dibetti harka ol fudhatee yakka malee hafu jiraa? ¹⁰ Dhugaa WAAQAYYO jiraataa, WAAQAYYO mataan isaa iyyuu isa ni galaafata yookaan inni yeroon isaa ga'ee ni du'a yookaan duula dhaqee achitti ni du'a. ¹¹ Garuu akka ani dibamaa WAAQAYYOOTTI harka koo ol hin kaafanne WAAQAYYO na haa eegu; amma garuu eeboo fi cuggee bishaanii kan mataa isaa bira jiru fuudhiitii haa deemnu.”

¹² Kanaafuu Daawit eeboo fi cuggee bishaanii kan mataa Saa'ol bira ture sana fudhatee ka'ani deeman. Namni waan kana arge yookaan beeke tokko iyyuu hin turre yookaan namni tokko iyyuu hin dammaqne. Sababii WAAQAYYO hirriba cimaa isaanitti gad dhiiseef hundi isaanii rafanii turan.

¹³ Ergasii Daawit gamatti ce'ee fagaatee fiixee gaara irra dhaabate; gidduu isaaniis lafa bal'aatu ture. ¹⁴ Daawitis loltootaa fi Abneer ilma Neeritiin, “Yaa Abneer, ati deebii naaf hin kennituu?” jedhee lallabe.

Abneeris deebisee, “Ati kan mootiitti iyyitu eenyu?” jedhe.

¹⁵ Daawit akkana jedhe; “Abneer, ati jagna mitii? Israa'el keessatti namni siin qixxaatu eenyu? Ati maaliif gooftaa kee mooticha sirriitti hin eegne? Kunoo namni tokko gooftaa kee mooticha ajjeesuuf dhufee tureetii. ¹⁶ Wannu ati goote gaarii miti. Dhugaa WAAQAYYO jiraataa, atii fi namoonni kee du'uu qabdu; isin gooftaa keessan dibamaa WAAQAYYO

sana hin eegneetii. Mee naannoo kee ilaali. Eeboo fi cuggeen bishaanii kan mataa mootichaa bira ture sun meerre?"

¹⁷ Saa'ol sagalee Daawit beekke, "Yaa ilma koo Daawit, kun sagalee keetii?" jedhe.

Daawitis, "Eeyyee; sagalee koo ti; yaa gooftaa koo mootii" jedhee deebise. ¹⁸ Itti fufees akkana jedhe; "Gooftaan koo maaliif tajaajilaa isaa ari'a? Ani maalin godhe? Ani yakka maalin qaba? ¹⁹ Egaa mee gooftaan koo mootichi dubbii tajaajilaa isaa haa dhaga'u. Yoo WAAQAYYO natti si kakaasee jiraate inni aarsaa haa fudhatu. Garuu namoonni yoo waan kana godhanii jiraatan fuula WAAQAYYOO duratti haa abaaraman! Isaan akka ani dhaala WAAQAYYOO keessaa qooda hin qabaanneef na ari'anii, 'Dhaqiiiti waaqata biraa tajaajili' jedhan. ²⁰ Dhiigni koo fuula WAAQAYYOO duraa fagaatee akka lafatti dhangala'u hin godhin. Akkuma namni tokko gaara gubbaatti gogorrii adamsu sana mootiin Israa'el tafkii barbaaduu ba'eera."

²¹ Saa'olis, "Ani yakka hojjedheera. Yaa ilma koo Daawit kottuu deebi'i. Sababii har'a lubbuun koo fuula kee duratti ulfina argatteef ani lammata si miidhuu hin yaalu. Ani dhugumaan hojii gowwummaa hojjedheera; guddaas dogogoreera jedhe."

²² Daawitis akkana jedhee deebise; "Eeboon mootichaa kunoo ti; dargaggoota kee keessaa namni tokko dhufee haa fuudhu. ²³ WAAQAYYO nama hundaaf qajeelummaa isaatii fi amanamummaa isaatiif gatii ni kenna. WAAQAYYO har'a dabarsee harka kootti si kennee ture; ani garuu dibamaa WAAQAYYOOTTI harka ol hin fudhadhu. ²⁴ Akkuma ani har'a lubbuu kee ulfeesse kana, WAAQAYYOS lubbuu koo ulfeessee rakkina hunda jalaa na haa baasu."

²⁵ Kana irratti Saa'ol Daawitiin, "Yaa ilma koo Daawit eebbifami; ati waan guddaa hojjetta; dhugumaanis ni mo'atta" jedhe.

Kanaafuu Daawit karaa isaa itti fufe; Saa'olis gara manaatti deebi'e.

27

Daawit Filisxeemota Keessa Jiraate

¹ Daawit garuu akkana jedhee yaade; "Guyyoota kanneen keessaa gaafa tokko ani harka Saa'oliin nan ajjeefama. Wannani ani gochuu qabu guddaan gara biyya Filisxeemotaatti baqachuu dha. Ergasiis Saa'ol guutummaa biyya Israa'el keessa na barbaaduu ni dhiisa; anis harka isaa jalaa nan ba'a."

² Kanaafuu Daawit namoota dhibba ja'aa isa wajjin turan wajjin ka'ee Aakiish mooticha Gaati, ilma Maa'ooki bira dhaqe. ³ Daawitii fi namoonni isaa Gaati keessa Aakiish bira turan. Tokkoon tokkoon namaas maatii isaa wajjin ture; Daawitis niitota isaa lamaan jechuunis Ahiinoo'am kan lammii Yizri'eelii fi Abiigayil lammii Qarmeloos kan niitii Naabaal turte sana wajjin ture. ⁴ Saa'olis yommuu akka Daawit gara Gaatitti baqate dhaga'etti isa barbaaduu dhiise.

⁵ Daawitis Aakiishiin, "Yoo ani fuula kee duratti surraa argadhee jiraadhe, akka ani achi jiraadhuuf magaalawwan biyyattii keessaa magaalaa tokko keessatti iddoon naaf haa kennamu. Garbichi kee maaliif si wajjin magaalaa mootii keessa jiraata?" jedhe.

⁶ Akkasiin Aakiish gaafuma sana Siqlaagin isaa kenne; magaalattiinis gaafasi jalqabde kan mootota Yihuudaa taate. ⁷ Daawitis waggaa tokkoo fi ji'a afur biyya Filisxeemotaa jiraate.

⁸ Yeroo sanattis Daawitii fi namoonni isaa ka'anii Geshuurota, Girzootaa fi Amaaleqoota weeraran. Namoonni kunneen bara duriitii jalqabanii biyya Shuuri kan hamma Gibxitti bal'atu keessa jiraachaa turan. ⁹ Daawit yeroo biyya sana lole hunda dhiira yookaan dubartii tokko illee lubbuun hin hambifne; garuu hoolotaa fi loon, harrootaa fi gaalawwan akkasumas uffata fudhatee gara Aakiishitti deebi'e.

¹⁰ Yeroo Aakiish, "Har'a eenyun weerartan?" jedhee gaafatetti, Daawit, "Negeeb Yihuudaa" yookaan "Negeeb Yerami'eelotaa" yookaan "Negeeb Qeenotaa" jedhe. ¹¹ Daawitis, "Waan isaan, 'Wanni Daawit godhe kana dha' jedhanii nurratti odeessan" jedhee yaadeef akka dhiirri yookaan dubartiin tokko iyyuu Gaatitti geeffamaniif lubbuun hin hambifne. Wannani inni yeroo biyya Filisxeem keessa jiraate hunda hojjetes kanuma ture. ¹² Aakiishis waan, "Inni saba isaa Israa'el biratti jibbamaa of godheera; kanaafuu bara baraan garbicha koo ta'a" jedhee yaadeef Daawitin ni amane.

28

Saa'olii fi Eker Dubbiftuu Tokko

¹ Bara sana keessa Filisxeemonni Israa'eloota loluuf humna isaanii walitti qabatan. Aakiishis Daawitiin, "Akka atii fi namoonni kee na wajjin duuluu qabdan beeki" jedhe.

² Daawitis, "Waan garbichi kee hojjechuu danda'u ati iyyuu yeroo sana ni argita" jedhe.

Aakiish deebisee, "Baay'ee gaarii dha; ani bara jireenya koo guutuu waardiyyaa koo sin godhadha" jedhe.

³ Bara sana Saamu'eel du'ee Israa'eloonni hundi boo'aniifii magaalaa isaa Raamaatti isa awwaalan. Saa'olis ilaaltotaa fi eker dubbiftoota biyyaa baasee ture.

⁴ Filisxeemonni wal ga'anii Suunamin qubatan; Saa'ol immoo Israa'eloota hunda walitti qabee Gilbo'aa keessa qubate. ⁵ Saa'ol yeroo qubata Filisxeemotaa argetti ni na'e; garaan isaas sodaan raafame. ⁶ Innis WAAQAYYON gaafate; WAAQAYYO garuu abjuudhaan yookaan Uriimiidhaan yookaan raajotaan deebii hin kennineef. ⁷ Kana irratti Saa'ol tajaajiltoota isaatiin, "Akka ani dhaqee ishee gaafadhuuf dubartii eker dubbiftuu naaf barbaadaa" jedhe.

Isaanis, "Kunoo dubartiin ekeraa dubbiftu tokko Eendoor jirti" jedhan.

⁸ Kanaafuu Saa'ol wayyaa biraa uffatee bifa geeddarachuudhaan tajaajiltoota isaa lama wajjin halkaniiin gara dubartii ekeraa dubbiftuu sanaa dhaqe. Innis, "Ekeraa naaf dubbisiitii nama ani maqaa isaa sitti himu ol naaf baasi" jedhe.

⁹ Dubartiin sun garuu, "Ati waan Saa'ol hojjete dhugumaan beekta. Inni ilaaltotaa fi eker dubbiftoota lafa irraa fixeera. Egaa maaliif lubbuu koo kiyyoo du'aa keessa galchita ree?" jetteen.

¹⁰ Saa'olis maqaa WAAQAYYOOTIIN isheef kakatee, "Dhugaa WAAQAYYO jiraataa, ati waan kanaaf hin adabamtu" jedhe.

¹¹ Dubartittiin sunis, "Ani eenyun ol siif baasu ree?" jettee gaafatte.

Innis, "Saamu'eelin ol naaf baasi" jedhe.

¹² Dubartiin sunis yommuu Saamu'eelin argitetti guddiftee iyyite. Saa'oliin, "Maaliif na gowwoomsite? Ati Saa'olii dha!" jette.

¹³ Mootichis, "Hin sodaatin. Ati maal argaa jirta?" isheen jedhe.

Dubartiin sunis, "Ani hafuura lafa keessaa ol ba'aa jiru tokko nan arga" jette.

¹⁴ Saa'olis, "Inni maal fakkaata?" jedhee gaafate.

Isheenis, "Jaarsi wayyaa dheeraa uffate tokko ol ba'aa jira" jette.

Saa'olis akka namni sun Saamu'eel ta'e beeke; gad jedhees addaan lafatti gombifamee sagade.

¹⁵ Saamu'eelis Saa'oliin, "Ati maaliif ol na baasuudhaan na jeeqxa?" jedhe.

Saa'olis akkana jedheen, "Ani baay'ee dhiphadheera; Filisxeemonni na lolaa jiru; Waaqnis narraa garagaleera. Inni raajotaan yookaan abjuudhaan deebii naa hin kennu. Kanaafuu akka ati waan ani gochuu qabu natti himtuufan si waammadhe."

¹⁶ Saamu'eelis akkana jedhe; "Ati erga WAAQAYYO sirraa garagalee diina sitti ta'ee maaliif na waamta? ¹⁷ WAAQAYYO waanuma duraan dursee karaa kootiin dubbate sana fiixaan baase. WAAQAYYO mootummaa harka kee keessaa butee ollaa kee keessaa nama tokkoof jechuunis Daawitiif kenneera. ¹⁸ Sababii ati WAAQAYYOOF hin ajajamiif yookaan dheekkamsa isaa sodaachisaa sana Amaaleqoota irratti hin raawwatiniif WAAQAYYO har'a waan kana sitti fideera. ¹⁹ Israa'elii fi si'i illee WAAQAYYO dabarsee harka Filisxeemotaatti ni kenna; atii fi ilmaan kee bori gara koo dhuftu. WAAQAYYOS loltoota Israa'el dabarsee Filisxeemotatti ni kenna."

²⁰ Saa'ol waan dubbii Saamu'eeliin akka malee sodaateef yeruma sana hojjaa isaa guutuudhaan kufe. Inni waan halkanii fi guyyaa sana guutuu homaa hin nyaatiniif humna dhaabee ture.

²¹ Dubartittiinis yommuu gara Saa'ol dhuftee akka inni akka malee sodaate argitetti akkana jette; "Kunoo tajaajiltuun kee siif ajajamteerti. Ani lubbuu kootii murteessee waan ati jette godheera. ²² Ammas maaloo tajaajiltuu kee dhaga'i; ani nyaata xinnoo siifan kenna; atis nyaattee jabaattee karaa kee qajeelta."

²³ Inni immoo, "Hin nyaadhu" jedhee dide.

Ta'us namoonni isaa dubartittii wajjin isa jajjabeessinaan inni isaan dhaga'e. Lafaa ka'ees siree irra taa'e.

²⁴ Dubartiin sunis dibicha gabbifame tokko manaa qabdi turte; isheenis yeroodhuma sana qalte. Daakuu xinnoo fuutee sukkuumtee buddeena raacitii hin qabne tolchite. ²⁵ Isheenis Saa'olii fi namoota isaatiif dhi'eessite; isaanis ni nyaatan. Halkanuma sanas achii ka'anii deeman.

¹ Filisxeemonni loltoota isaanii hunda Afeeqitti walitti qabatan; Israa'eloonni immoo burqaa Yizri'eel keessa jiru bira qabatan. ² Yommuu bulchitoonni Filisxeem dhibba dhibbaa fi kuma kumaan qoodamanii duulanitti Daawitii fi namoonni isaa Aakiish wajjin dugda duuba deema turan. ³ Ajajjoonni loltoota Filisxeemis, "Ibroonni kunneen maali asii hojjetu?" jedhani gaafatan.

Aakiishis deebisee, "Kun Daawit qondaalticha Saa'ol mooticha Israa'el sanaa mitii? Inni waggaa tokko caalaa na wajjin ture; gaafa inni Saa'olin dhiisee jalqabee hamma ammaatti ani yakka tokko illee isa irratti hin argine" jedhe.

⁴ Ajajjoonni loltoota Filisxeem garuu isatti aaranii akkana jedhan; "Akka inni iddoo ati isa itti ramadde sanatti deebi'uuf namicha kana deebisii ergi. Inni nu wajjin duuluu hin qabu; yoo kanaa achii inni lola keessatti nutti garagala. Inni yoo mataa namoota keenyaa kukkutuudhaan ta'e malee akkamitti gooftaa isaatti araaramuu danda'a? ⁵ Daawit kun namichuma isaan,

"Saa'ol kumaatama ajjeese;

Daawit immoo kuma kumaatama ajjeese'
jedhanii sirbanii shubbisaniif sana mitii?"

⁶ Kanaafuu Aakiish Daawitin waamee akkana jedheen; "Dhugaa WAAQAYYO jiraataa, ati nama amanamaa ture; ani utuu ati na wajjin loltoota keessa tajaajiltee nan gammada. Gaafa ati na bira dhuftee jalqabee hamma har'aatti ani yakka tokko illee sirratti hin argine; garuu bulchitoonni si hin fudhanne. ⁷ Deebi'ii nagaan deemi; waan bulchitoota Filisxeemotaa gaddisiisu tokko illee hin hojjetin."

⁸ Daawit, "Garuu ani maalin godhe? Erga ani gara kee dhufee jalqabee hamma ammaatti yakki ati tajaajilaa kee irratti argite maali? Ani maaliifin dhaqee diinota gooftaa koo mootichaa waraanuu hin danda'u?" jedhee gaafate.

⁹ Aakiish akkana jedhee deebiseef; "Ani akka ati fuula koo duratti akkuma ergamaa Waaqayyoo namatti toltu beeka; ta'us ajajjoonni Filisxeemotaa, 'Inni nu wajjin duuluu hin qabu' jedhaniiru. ¹⁰ Egaa amma ka'itii tajaajiltoota gooftaa keetii kanneen si wajjin dhufan wajjin ganamaan akkuma lafti ifeen deema."

¹¹ Kanaafuu Daawitii fi namoonni isaa ganama bariin ka'anii gara biyya Filisxeemotaa dhaquuf qajeelan; Filisxeemonni immoo gara Yizri'eelitti ol ba'an.

30

Daawit Amaaleqoota Barbadeesse

¹ Daawitii fi namoonni isaa guyyaa sadaffaatti Xiiqlaag ga'an. Yeroo sanattis Amaaleqoonni Negeebii fi Siiqlaagin weeraranii turan. Isaanis Xiiqlaagin dha'anii ibiddaan guban; ² dubartootaa fi warra achi keessa turan hunda, dargaggeeyyii fi jaarsolii booji'an. Hunda isaanii fudhatanii deeman malee nama tokko illee hin ajjeefne.

³ Yommuu Daawitii fi namoonni isaa Siiqlaag dhufanitti magaalattiin ibiddaan gubamtee niittonni isaanii, ilmaan isaaniitii fi intallan isaanii hundinuu booji'amanii turan. ⁴ Kana irratti Daawitii fi namoonni isa wajjin turan hamma boo'uu dadhabanitti iyyanii boo'an. ⁵ Niittonni Daawit lamaanuu jechuunis Ahiinoo'am Yizri'eelittiinii fi Abiigayii niitiin Naabaal namichi Qarmeloos sun irraa du'e qabamanii turan. ⁶ Daawit waan namoonni dhagaadhaan isa tumuuf mari'achaa turaniif akka malee yaadda'e; tokkoon tokkoon namaa sababii ilmaanii fi intallan isaatiif garaan isaa gubatee ture. Daawit garuu WAAQAYYO Waaqa isaatiin jabina argate.

⁷ Daawitis Abiyaataar lubicha ilma Ahiimelekiin, "Dirata sana naa fidi" jedhe. Abiyaataaris ni fideef; ⁸ Daawitis, "Ani garee weerartootaa kana duukaa bu'uu? Ani isaan qaqqabuu nan danda'aa?" jedhee WAAQAYYON gaafate.

Innis deebisee, "Isaan duukaa bu'aa; ni qaqqabdaatii; boojuu illee dhugumaan irraa buufatta" jedheen.

⁹ Daawitii fi namoonni isa wajjin turan dhibbi ja'an gara Laga Besoor dhufan; gartokkeen isaaniis achitti hafan. ¹⁰ Namoonni dhibba lama waan akka malee dadhabaniif laga Besoor ce'uu hin dandeenye. Daawitii fi namoonni dhibba afur garuu ittuma fufanii duukaa bu'an.

¹¹ Isaanis namicha Gibxi tokko dirree irratti arganii Daawititti fidanii bishaan inni dhuguu fi waan inni nyaatu kennaniif. ¹² Akkasumas bixxillee harbuu cabaa tokkoo fi bixxillee ija wayinii lama kennaniif. Innis nyaatee lubbuun itti deebite; inni guyyaa sadii fi halkan sadii homaa hin nyaanne, bishaanis hin dhugne tureetii.

¹³ Daawitis, "Ati kan eenyuu ti? Eessaa dhufte?" jedhee isa gaafate.

Namichis akkana jedhe; "Ani nama biyya Gibxi; garbicha Amaaleqicha tokkoo ti. Gooftaan koo guyyaa sadiin dura ani fayyaa dhabnaan na gatee deeme. ¹⁴ Nus Negeeb

kan Kereetotaa, kutaa Yihuudaatii fi Negeeb Kaaleb weerarree Siiqlaagin ibiddaan gubne.”

¹⁵ Daawitis, “Iddoo gareen weerartuu kanaa jirutti na geessuu ni dandeessaa?” jedheen.

Innis deebisee, “Akka na hin ajjeefne yookaan akka dabarsitee gooftaa kootti na hin kennine fuula Waaqaa duratti naa kakadhu; anis iddoo isaan jiranitti sin geessaa” jedhe.

¹⁶ Yommuu namichi sun iddoo isaan jiranitti Daawitin geessetti. Amaaleqoonni sababii boojuu guddaa biyya Filisxeemii fi Yihuudaatii fudhatan sanaatiif baadiyyaa keessa faffaca’anii nyaachaa, dhugaa, sirbaas turan. ¹⁷ Daawitis galgala sanaa jalqabee hamma galgala guyyaa itti aanutti isaan waraane; dargaggeeyyii dhibba afur kanneen gaalawwan yaabbatanii baqatan malee isaan keessaa namni tokko iyyuu hin miliqne. ¹⁸ Daawit waan Amaaleqoonni booji’an hunda harkaa buufate; niitota isaa lamaanis ni deebifate. ¹⁹ Wannii tokko iyyuu hin hir’anne; jechuunis dargaggeessi yookaan jaarsi, dhiirri yookaan durbi, wanni saamame yookaan wanni isaan fudhatan tokko iyyuu hin hir’anne. Daawit waan hunda harkaa buufatee fide. ²⁰ Innis bushaayee fi loon isaanii hunda fudhate; namoonni isaas, “Kun boojuu Daawit” jechaa fuula horii kaanii dura isaan oofan.

²¹ Daawit gara namoota dhibba lamaan akka malee dadhabanii isa duukaa bu’uu hin danda’in kanneen Laga Besoor biratti duubatti hafan sanaa dhufe. Isaanis Daawitii fi namoota isaa simachuu gad bu’an. Daawitis yeroo namoota sanatti dhi’aatetti nagaa isaan gaafate. ²² Garuu namoonni hamoonii fi warri rakkina uuman kanneen duukaa buutota Daawit wajjin turan hundi, “Waan isaan nu wajjin hin duuliniif nu boojuu deebifanne kana isaan wajjin hin qooddannu. Ta’us tokkoon tokkoon isaanii niitii fi ijoollee isaanii fudhatanii haa deeman” jedhan.

²³ Daawit immoo akkana jedhee deebise; “Lakkisaa, yaa obboolota ko, isin waan WAAQAYYO nuuf kenne irratti waan akkanaa gochuu hin qabdan. Inni nu eegee waraana nutti dhufe illee dabarsee harka keenyatti kenneera. ²⁴ Eenyutu waan isin jettan kana dhaga’a? Qoodni namicha mi’a eeguu, gooda namicha duula dhaqetiin tokkuma. Isaan hundi haaluma tokkoon qooddatu.” ²⁵ Daawitis gaafasii jalqabee hamma har’aatti waan kana seeraa fi sirna godhee saba Israa’eliif dhaabe.

²⁶ Daawit yommuu Siiqlaag ga’etti, “Kun kennaa boojuu diinota WAAQAYYOO keessaa isinii kennamee dha” jedhee maanguddoota Yihuudaa kanneen michoota isaa turaniif boojuu sana irraa erge.

²⁷ Boojuu sanas warra Beet’eelitti argamaniif, warra Raamoot Negeebii fi Yatiir turaniif, ²⁸ warra Aro’eer, warra Siifmoot, Eshtimo’aa, ²⁹ warra Raakaal akkasumas warra magaalaa Yerami’eelotaatii fi magaalaa Qeenotaa keessa jiraataniif, ³⁰ warra Hormaa, warra Boor Aashaan, warra Ataak, ³¹ warra Kebroon akkasumas iddoowwan Daawitii fi namoonni isaa keessa nanaanna’an hunda jiraataniif erge.

31

Saa’ol Of Ajjeesuu Isaa

31:1-13 kwf - 2Sm 1:4-12; 1Sn 10:1-12

¹ Filisxeemonni yeroo kanatti Israa’elitti waraana kaasan; Israa’eloonnis isaan duraa baqatan; hedduun isaaniis Tulluu Gilbo’aa irratti dhuman. ² Filisxeemonni ittuma jabeessanii Saa’olii fi ilmaan isaa ari’an; isaanis ilmaan isaa jechuunis Yoonataaan, Abiinaadaabii fi Malkii-Shuwaa ajjeesan. ³ Lollis naannoo Saa’olitti baay’ee cime; warri xiyyaan lolanis isa qaqqabanii akka malee isa madeessan.

⁴ Saa’olis namicha mi’a lolaa isaa baatuun, “Goraadee kee luqqifadhuutii na waraani; yoo kanaa achii namoonni dhagna hin qabamin kunneen dhufanii na waraananii natti taphatuu” jedhe.

Namichi mi’a lolaa baatuuf sun garuu waan akka malee sodaateef isa hin waraanne; kanaafuu Saa’ol goraadee ofii isaa luqqifatee irratti kufe. ⁵ Namichi mi’a lolaa baatu sun yommuu akka Saa’ol du’e argetti innis goraadee ofii isaa irratti kufee Saa’ol wajjin du’e. ⁶ Kanaafuu Saa’olii fi ilmaan isaa sadan, namichi mi’a lolaa baatuu fi namoonni isaa hundinuu gaafasuma walumaan dhuman.

⁷ Israa’eloonni qarqara sululaatii fi gama Yordaanos jiran yommuu akka loltoonni Israa’el baqatanii fi akka Saa’olii fi ilmaan isaas dhuman arganitti magaalawwan isaanii dhiisanii baqatan. Filisxeemonni immoo dhufanii keessa qubatan.

⁸ Filisxeemonnis guyyaa itti aanutti yommuu warra dhuman irraa hidhannaa hiikkachuu dhufanitti, akka Saa’olii fi ilmaan isaa sadan Tulluu Gilbo’aa irratti kukkufanii jiran argan. ⁹ Isaanis mataa Saa’ol irraa kutanii, mi’a lolaa isa irraa fudhatanii akka

isaan mana waaqota tolfamoo isaanii keessattii fi saba isaaniitiif oduu kana labsaniif guutummaa biyya Filisxeemotaa keessa ergamoota ergan. ¹⁰ Isaanis mi'a lolaa isaa mana Ashtooreti waaqicha tolfamaa keessa kaa'an; reeffa isaa immoo dallaa Beet Shaanitti hodhan.

¹¹ Namoonni Yaabeesh Gili'aad yommuu waan Filisxeemonni Saa'olin godhan dhaga'anitti, ¹² namoonni jajjaboon isaanii hundi halkaniin ka'anii dhaqanii reeffa Saa'olii fi reeffa ilmaan isaa dallaa Beet Shaan irraa buusanii gara Yaabeeshitti fidanii achitti guban. ¹³ Ergasii lafee isaanii fuudhanii Yaabeeshitti muka tamirii jalatti awwaalan; bultii torbas ni sooman.

Kitaaba Saamu'eel Lammaffaa

Daawit Akka Saa'ol Du'e Dhaga'e

1:4-12 kwf – 1Sm 31:1-13; 1Sn 10:1-12

¹ Saa'ol erga du'ee booddee, Daawit Amaaleqoota rukutuu irraa deebi'ee Siiglaag keessa guyyaa lama ture. ² Guyyaa sadaffaatti namichi tokko qubata Saa'olii dhufe; innis wayyaa isaa tarsaasee mataa isaatti awwaara firfirfatee ture. Yommuu Daawit bira ga'ettis ulfina isaaf kennuuf jedhee addaan lafatti gombifame.

³ Daawitis, "Ati eessaa dhufte?" jedhee isa gaafate.

Namichi immoo, "Ani qubata Israa'elootaa keessaan baqadhee dhufe" jedhe.

⁴ Daawitis, "Maaltu dhalate? Mee natti himi" jedhee gaafate.

Innis, "Namoonni adda waraanaatii ni baqatan. Baay'een isaanii harca'aniiru; du'aniirus. Saa'olii fi ilmi isaa Yoonaataanis du'aniiru" jedheen.

⁵ Kana irratti Daawit dargaggeessa oduu kana fideen, "Akka Saa'olii fi ilmi isaa Yoonaataan du'an ati akkamitti beekte?" jedhe.

⁶ Dargaggeessi sunis akkana jedhee deebise; "Akkuma tasaa ani Tulluu Gilbo'aatti ol ba'een ture; Saa'olis eeboo isaatti irkatee achi ture; gaariwwan lolaatii fi abbootiin fardaa isa bira ga'an. ⁷ Innis yommuu garagalee na argetti na waame; anis, 'Maal siif ajajamu?' jedhee isa gaafadhe.

⁸ "Innis, 'Ati eenyu?' jedhee na gaafate.

"Ani immoo, 'Ani nama Amaaleq' jedheen deebise.

⁹ "Ergasiis inni, 'Narra dhaabadhuu na ajjeesi! Waan lubbuun na keessaa hin ba'iniif ani akka malee dhiphachaan jiraatii' naan jedhe.

¹⁰ "Kanaafuu ani sababiin akka inni erga kufee hin fayyine beekeef isa irra dhaabadheen isa ajjeese. Gonfoo mataa isaatii fi bitawoo harka isaa fuudhee gooftaa kootiif fideera."

¹¹ Daawitii fi namoonni isaa wajjin turan hundi wayyaa of irraa baasanii tatarsaasan.

¹² Isaanis Saa'olii fi Yoonaataaniif, loltoota WAAQAYYOOTII fi mana Israa'el hundaaf gaddanii ni boo'an; hamma galgalaatti ni sooman; isaan goraadeedhaan dhumaniiruutii.

¹³ Daawitis, "Ati eessaa dhufte?" jedhee dargaggeessicha oduu fide sana gaafate.

Innis, "Ani ilma Amaaleq, namicha galtuu ta'e tokkoo ti" jedhee deebise.

¹⁴ Daawit immoo, "Yoos ati dibamaa WAAQAYYOO tokko galaafachuuf harka kee ol fudhachuu maaliif hin sodaatin ree?" jedhee gaafate.

¹⁵ Ergasii Daawit namoota isaa keessaa tokko waamee, "Dhaqiitii dha'ii isa ajjeesi!" jedhe. Innis isa dha'e; namichis ni du'e. ¹⁶ Daawitis, "Sababii afaanumti kee, 'Ani nama WAAQAYYO isa dibe ajjeeseera' jedhee dhugaa sitti ba'eef dhiigni kee matuma keetti deebi'a" jedheen.

Faaruu Daawit Saa'olii fi Yoonaataaniif Faarse

¹⁷ Daawit faaruu kanaan Saa'olii fi ilma Saa'ol Yoonaataaniif boo'e; ¹⁸ akkasumas faaruu iddaa jedhamu kana akka namoonni Yihuudaa barsiisfaman ajaje; kunis kitaaba Yaashaar keessatti barreeffameera. Innis:

¹⁹ "Yaa Israa'el, ulfinni kee gaarran kee irratti ajjeefameera.

Namoonni jajjaboon akkamitti akkas kukkufan!

²⁰ "Waan kana Gaati keessatti hin dubbatinaa;
daandiiwwan Ashqaloon irrattis hin labsinaa;
yoo kanaa achii intallan Filisxeemotaa ni gammadu;
intallan warra dhagna hin qabatiniis ni ililchu.

²¹ "Yaa tulluuwwan Gilbo'aa,
fixeensi isin irra hin bu'in yookaan bokkaan isinitti hin roobin;
yookaan lafti qotiisaa midhaan aarsaaf dhi'eeffamu
biqilchu isin keessatti hin argamin.

Gaachanni nama jabaa achitti xuraa'eeraatii;
gaachanni Saa'ol si'achi zayitii hin dibamu.

²² "Dhiiga namoota dhumanii keessaa,

foon namoota jajjaboo irraa,
iddaan Yoonaataan duubatti hin deebine;
goraadeen Saa'olis akkasumaan hin deebine.
²³ Saa'olii fi Yoonaataan yeroo lubbuun jiraachaa turanitti,
jaallatamoo namni isaanitti gammadu turan;
isaan yeroo du'aattis gargari hin baane.
Isaan risaa caalaa ariifatu,
leenca caalaas jabaatu turan.

²⁴ "Yaa intallan Israa'el,
Saa'ol isa wayyaa bildiimaa fi uffata haphii isinitti uffise,
kan wayyaa keessan warqeedhaan miidhagse,
sanaaf boo'aa.

²⁵ "Namoonna jajjaboon akkamitti waraana keessatti kufu!
Yoonaataan gaarran keessan irratti ajjeefameera.

²⁶ Yaa Yoonaataan obboleessa ko, ani siif gaddeera;
ati anaaf nama akka malee jaallatamaa turte.

Jaallalli ati naaf qabdu dinqisiisaa ture;
jaalala dubartii caalaa dinqisiisaa ture.

²⁷ "Namoonna jajjaboon akkamitti kufan!
Mi'oonni lolaa balleeffamaniiru!"

2

Daawit Dibamee Mootii Yihuudaa Ta'e

¹ Kana booddee Daawit, "Magaalaawwan Yihuudaa keessaa gara isa tokkootti ol ba'uu?" jedhee WAAQAYYON gaafate.

WAAQAYYOS, "Ba'i" jedheen.

Daawit immoo, "Gara isa kamiittin ol ba'a?" jedhee gaafate.

WAAQAYYOS, "Gara Kebroonitti" jedhee deebiseef.

² Kanaafuu Daawit niitota isaa lamaan jechuunis Ahiinoo'am Yizri'eelittii sanaa fi Abiigayiiil kan Naabaal namichi Qarmeloos sun irraa du'e wajjin ol ba'e. ³ Daawit namoota isa wajjin turan tokkoo tokkoo isaanii maatii isaanii wajjin fudhate; isaanis magalaawwan Kebroon keessa qubatan. ⁴ Ergasiis namoonni Yihuudaa gara Kebroon dhufanii mana Yihuudaa irratti Daawitin mootii godhanii diban.

Yeroo akka namoonni Yaabeesh Gili'aad Saa'olin awwaalan Daawititti himametti, ⁵ inni akkana jedhee gara namoota Yaabeesh Gili'aaditti ergamoota erge; "Sababii isin isa awwaaluudhaan Saa'ol gooftaa keessaniif arjummaa akkasii gootaniif WAAQAYYO isin haa eebbisu. ⁶ Ammas WAAQAYYO jaalala isaa kan hin geeddaramnee fi amanamummaa isaa isiniif haa kennu; ani waan isin akkas gootaniif akkasuma waan gaarii isiniif nan godha. ⁷ Egaa amma jabaadhaa; cimaa; Saa'ol gooftaan keessan du'eeraatii; namoonni Yihuudaa immoo mootii godhatanii of irratti na dibaniiru."

Waraana Mana Daawitii fi Mana Saa'ol Gidduu Ture

3:2-5 kwf - 1Sn 3:1-4

⁸ Yeroo sanatti Abneer ilmi Neer ajajaan waraanaa Saa'ol Iish-Booshet ilma Saa'ol fuudhee gara Mahanayiimitti dabarse. ⁹ Innis Gili'aad, Ashuur, Yizri'eel, Efreemii fi Beniyaam, akkasumas guutummaa Israa'el irratti isa moosise.

¹⁰ Iish-Booshet ilmi Saa'ol yeroo Israa'el irratti mootii ta'etti umuriin isaa waggaa afurtama ture; innis waggaa lama mo'e. Ta'us manni Yihuudaa Daawit duukaa bu'e. ¹¹ Daawitis Kebroonitti mana Yihuudaa irratti waggaa torbaa fi ji'a ja'a mootii ta'e.

¹² Abneer ilmi Neer namoota Iish-Booshet ilma Saa'ol sana wajjin Mahanayiimii ka'anii gara Gibe'oon dhaqan. ¹³ Yoo'aab ilmi Zeruuyaa fi namoonni Daawit isaan simachuuf ba'anii haroo Gibe'oon biratti itti dhufan. Gareen tokko gama tokkoon, gareen kaan immoo gama kaaniin haroo sana bira tataa'an.

¹⁴ Abneeris Yoo'aabiin, "Mee dargaggoonni ka'anii fuula keenya duratti wal haa tuman" jedhe.

Yoo'aabis, "Haa ta'u; wal haa tuman" jedhe.

¹⁵ Kanaafuu Beniyaam irraa namoonni kudha lama Iish-Booshet ilma Saa'oliif, namoonni kudha lama immoo ka'anii Daawitiiif lakkaa'aman. ¹⁶ Tokkoon tokkoon

namaas mormituu isaa mataa qabee cinaacha isaatti goraadee diree wal qabataniid kukkufan. Kanaafuu iddoon sun Gibe'oon keessatti lafa goraadee jedhamee waamame.

¹⁷ Lolli gaafa sanaa akka malee jabaa ture; Abneerii fi namoonni Israa'elis namoota Daawitiin mo'ataman.

¹⁸ Ilmaan Zeruuyaa sadan jechuunis Yoo'aab, Abiishaayii fi Asaaheel achi turan. Asaaheel akkuma kuruphee bosonaa fiigichatti nama jabaa ture. ¹⁹ Innis utuu mirgatti yookaan bitaatti hin gorin faana bu'ee Abneerin ari'e. ²⁰ Abneeris of irra garagalee, "Ati Asaaheelii?" jedhee gaafate.

Innis, "Eeyyee anuma" jedhee deebise.

²¹ Ergasiis Abneer, "Gara mirgaatti yookaan bitaatti garagaliitii dargaggeessa tokko qabii mi'a lolaa isaa irraa fudhadhu" jedheen. Asaaheel garuu isa ari'uu hin dhiifne.

²² Abneer ammas Asaaheelin, "Na hin ari'in! Ani maaliifan si galaafadha? Ani akkamittin fuula koo ol fudhadhee obboleessa kee Yoo'aabin ilaala?" jedhe.

²³ Asaaheel garuu isa ari'uu hin dhiifne; kanaafuu Abneer qara eeboo isaatiin garaa isaa waraane; eeboon sunis keessa fulla'ee dugda isaatiin ba'e. Asaaheelis achitti kufee yommuu suma du'e. Namni hundis iddoo Asaaheel itti kufee du'e sana ga'ee dhaabata ture.

²⁴ Yoo'aabii fi Abiishaayi garuu Abneerin ari'an; isaanis yeroo aduun dhi'etti gaara Amaa kan karaa gammoojjii Gibe'oonitti geessu irra Giiyaatti garagalee argamu sana ga'an. ²⁵ Namoonni Beniyaamis Abneer biratti walitti qabaman. Isaanis gareedhaan walgurmeessanii gaara Amaa gubbaatti hiriiran.

²⁶ Abneeris iyee Yoo'aabin waamee, "Goraadeen kun bara baraan waa galaafachuu qabaa? Akka dhumni waan kanaa hadhaa'aa ta'e ati wallaalteetii? Ati hamma yoomiitti akka namoonni kee obboloota isaanii ari'uu dhiisan itti hin himtu?" jedhe.

²⁷ Yoo'aab immoo deebisee, "Dhugaa Waaqa jiraataa, utuu ati waan kana jechuu baatee silaa namoonni hamma lafti bari'utti obboloota isaanii ari'uu irraa hin deebi'an ture" jedhe.

²⁸ Kanaafuu Yoo'aab malakata afuufe; namoonni hundis Israa'eloota ari'uu dhiisan; lammatas waraanni isaan gidduutti hin kaane.

²⁹ Abneerii fi namoonni isaa halkan sana guutuu Arabbaa keessa yaa'anii darban. Isaanis Laga Yordaanos ce'anii guutummaa Biitroon keessa darbanii gara Mahanayiim dhufan.

³⁰ Ergasiis Yoo'aab Abneerin ari'uu dhiisee namoota isaa hunda walitti qabe. Yeroo sanattis akka namoota Daawit keessaa Asaaheelin malee namoonni kudha sagal badan beekame. ³¹ Namoonni Daawit garuu namoota Beniyaam keessaa warra Abneer wajjin turan dhibba sadii fi jaatama ajjeesan. ³² Isaanis reeffa Asaaheel fudhatanii Beetlihemitti iddoo awwaala abbaa isaatti awwaalan. Yoo'aabii fi namoonni isaa halkan guutuu deemaa bulanii barii obboroo Kebroon ga'an.

3

¹ Mana Saa'olii fi mana Daawit gidduu waraana bara dheeraatu ture. Yeroo Daawit jabaachaa deemetti manni Saa'ol immoo dadhabaa deeme.

² Daawit Kebroonitti ijoollee dhalche; isaanis:

Inni hangafni Amnoon isa Ahiinoo'am Yizri'eelittiin deessee dha;

³ inni lammaffaan Kili'aab ilma Abiigayii isheen Naabaal namichi biyya Qarmeloos irraa du'e sun deessee dha;

sadaffaan Abesaaloom ilma Ma'akaa kan intalli Talmaayi mooticha Gesuur sun deessee dha;

⁴ afuraffaan Adooniyaa ilma Hagiit;

shanaffaan Shefaaxiyaa ilma Abiixaal;

⁵ ja'affaan Yitre'aam ilma Eglaa niitiin Daawit deessee dha.

Isaan kunneen Kebroonitti Daawitiif dhalatan.

Abneer Garee Daawit Ta'e

⁶ Yeroo mana Saa'olii fi mana Daawit gidduu waraanni turetti Abneer mana Saa'ol irratti humna isaa jabeeffachaa ture. ⁷ Saa'olis intala Ayyaa kan Riixiphaa jedhamtu saajjatoos godhatee ture. Iish-Booshetis Abneeriin, "Ati maaliif saajjatoos abbaa kootii wajjin rafte?" jedhe.

⁸ Abneer immoo waan Iish-Booshet akkas jedheef akka malee aaree akkana jedhe; “Ani mataa saree Yihuudaatii? Ani hamma har’aatti mana abbaa kee Saa’oliif, mana maatii isaatii fi mana firoota isaatiif amanamaa dha. Si’i illee dabarsee Daawititti hin kennine. Ati garuu amma waa’ee dubartii kanaatiif na himatta!” ⁹ Yoo ani akka abdiin Waaqni Daawitii kenne sun raawwatamu gochuu baadhe WAAQAYYO Abneer irratti waan hamaa haa godhu; sana caalaa iyyuu isatti haa fidu; ¹⁰ wanni Waaqni kakuudhaan isa abdachiise sunis mana Saa’ol irraa mootummaa fuudhee Daanii jalqabee hamma Bersheebaatti Israa’elii fi Yihuudaa irratti teessoo Daawit jabeessee dhaabuu dha.” ¹¹ Iish-Booshet waan isa sodaateef Abneeritti waan tokko illee dubbachuu hin dandeenye.

¹² Ergasii Abneer, “Biyyattiin kan eenyuu ti? Na wajjin walii galtee godhadhu; anis akka Israa’el guutumaan guutuutti gara kee goru sin gargaaraa” jedhee Daawititti ergamoota erge.

¹³ Daawitis, “Gaarii dha; ani si wajjin walii galtee nan godhadha. Garuu waan tokko sin gaafadha; kunis ati yommuu gara koo dhuftutti jalqabatti Miikaal intala Saa’ol naa fidi; yoo kanaa achii gara koo hin dhufin” jedhe. ¹⁴ Ergasii Daawit, “Niitii koo ishee ani misaa Filisxeemota dhibba tokkootiin kaadhimadhe Miikaalin naa ergi” jedhee Iish-Booshet ilma Saa’olitti ergamoota erge.

¹⁵ Kanaafuu Iish-Booshet nama ergee dhirsa ishee Phaltii’eel ilma Laayish irraa ishee fudhate. ¹⁶ Dhirsii ishees hamma magaalaa Bahuurimitti boo’aa ishee duukaa bu’e. Abneeris, “Mana keetti deebi’i!” jedheen. Kanaafuu inni ni deebi’e.

¹⁷ Abneer maanguddoota Israa’el wajjin mari’atee akkana jedhe; “Isin kanaan dura akka Daawit mootii keessan ta’u hawwaa turtan. ¹⁸ WAAQAYYO, ‘Ani garbicha koo Daawitiin saba Israa’el harka Filisxeemotaatii akkasumas harka diinota isaanii hundaa keessaa nan baasa’ jedhee abdachiiseeraatii isin waan kana galmaan ga’aa!”

¹⁹ Abneer namoota Beniyaam birattis ni dubbate. Ergasii Kebroon dhaqee waan Israa’eloonni fi manni Beniyaam hundi gochuu barbaadan Daawititti hime. ²⁰ Yommuu Abneer namoota isaa digdama wajjin Kebroon dhufetti, Daawit isaa fi namoota isaatiif cidha qopheesse. ²¹ Abneeris Daawitiin, “Ani ka’ee deemee akka isaan gooftaa koo mootii wajjin kakuu galanii fi akka ati warra garaan kee fedhe hunda irratti mootii taatuuf Israa’eloota hunda walitti nan qaba” jedhe. Kanaaf Daawit isa geggeesse; innis nagadhaan deeme.

Yoo’aab Abneerin Ajeese

²² Namoonni Daawitii fi Yoo’aab yommuu suma boojuu hedduu fudhatanii duulaa galan. Abneer garuu Daawit wajjin Kebroon hin turre; Daawit isa geggeessee inni nagaan deemeeraati. ²³ Yoo’aabii fi loltoonni isa wajjin turan hundi yommuu achi ga’anitti akka Abneer ilmi Neer mooticha bira dhufee mootichi nagaan isa geggeesse isatti himame.

²⁴ Kanaafuu Yoo’aab gara mootichaa dhaqee akkana jedhe; “Maali gochuu kee ti? Kunoo Abneer gara kee dhufee ture. Ati Maaliif isa geggeessite? Inni amma deemeera!” ²⁵ Ati Abneer ilma Neer ni beekta; inni si gowwoomsee sochii keetii fi waan ati gochaa jirtu hunda basaasuudhaaf dhufe.”

²⁶ Yoo’aabis Daawit biraa ba’ee Abneer duubaan ergamoota erge; isaanis boolla bishaanii kan Siiraa biraa isa deebisan. Daawit garuu waan kana hin beekne. ²⁷ Yeroo Abneer Kebroonitti deebi’ettis Yoo’aab waan kophaatti isa wajjin haasa’uu barbaade fakkeessee gara karraatti isa baase. Achittis haaloo dhiiga obboleessa isaa Asaaheel baasuuf garaa keessa isa waraane; innis ni du’e.

²⁸ Ergasii Daawit yommuu waan kana dhaga’etti akkana jedhe; “Anii fi mootummaan koo bara baraan dhiiga Abneer ilma Neer irraa fuula WAAQAYYOO duratti qulqulluu dha. ²⁹ Cubbuun dhiiga isaa mataa Yoo’aabii fi mana abbaa isaa hundaa irra haa ga’u! Namni madaa malaa yaasu yookaan lamxii qabu yookaan namni uleetti rarra’ee deemu yookaan namni goradeen ajjeefamu yookaan namni waan nyaatu dhabu mana Yoo’aabii hin dhabamin.”

³⁰ Sababii inni lola Gibe’oon irratti obboleessa isaanii Asaaheelin ajjeeseef Yoo’aabii fi obboleessi isaa Abiishaayi Abneerin ajjeesan.

³¹ Daawitis Yoo’aabii fi namoota isa wajjin turan hundaan, “Uffata keessan tarsaasaatii uffata gaddaa uffadhaa; fuula Abneer durattis boo’aa” jedhe. Daawit mootichis reeffa Abneer geggeesse. ³² Isaanis Abneerin Kebroonitti awwaalan; mootichis awwaala Abneer irratti iyyee boo’e; namoonni hundinuus ni boo’an.

³³ Mootichis faaruu gaddaa kana akkana jedhee Abneeriif faarse: “Abneer akka du’a nama yaraa tokkootti du’uu qabaa?”

³⁴ Harki kee hin hidhamne;

miilli kee foncaadhaan hin gaadi'amne.

Ati akkuma nama fuula hamootaa duratti kufu tokkootti kufte."

Namoonni hundinuu amma illee ni boo'aniif.

³⁵ Gara saafaattis namoonni hundi dhufanii akka inni waa nyaatuuf Daawitin kadhatan; inni garuu, "Yoo ani hamma biiftuun lixutti buddeena yookaan waan biraa afaan kootiin qabe Waaqni waan hamaa natti haa fidu; kana caalaa iyyuu natti haa fidu!" jedhee kakate.

³⁶ Namoonni hundinuu waan kana arganii gammadan; dhugumaan wanni mootichi godhe hundi isaan gammachiise. ³⁷ Kanaafuu gaafa sana namoonni hundii fi Israa'el hundi akka ajjeefamuu Abneer ilma Neer keessatti mootichi qooda hin qabne beekan.

³⁸ Mootichis namoota isaatiin akkana jedhe; "Isin akka guyyaa har'aa ilmi mootiitii fi namni guddaan tokko Israa'el keessaa kufe hin beeknee?" ³⁹ Ani mootii dibame ta'u illee har'a nama dadhabaa dha; ilmaan Zeruuyaa kunneen natti jabaataniiru. WAAQAYYO nama waan hamaa hojjetuuf akkuma hammina hojii isaatti isaaf haa kennu!"

4

Iish-Booshet Ajjeefame

¹ Iish-Booshet ilmi Saa'ol yommuu akka Abneer Kebroonitti ajjeefame dhaga'etti humni isaa ni bu'e; Israa'el hundis sodaan guutame. ² Yeroo sanatti Iish-Booshet ilmi Saa'ol dura buutota garee duultotaa lama qaba ture. Inni tokko Ba'anaa, kaan immoo Rekaab jedhama ture; isaanis ilmaan Rimoon namicha Bi'eeroot kan gosa Beniyaam sanaa ti; Bi'eeroot kun akka kutaa Beniyaamitti lakkaa'ama; ³ namoonni Bi'eeroot kunneen gara Gitayimitti baqatanii hamma har'aatti alagummaan achi jiraatuutii.

⁴ Yoonataan ilmi Saa'ol mucaa miilli isaa lachuu naafate tokko qaba ture. Yeroo oduun waa'ee Saa'olii fi Yoonataan Yizri'eel irraa dhufetti inni nama waggaa shanii ture. Guddiftuun isaas isa fudhattee baqatte; garuu utuu isheen baqachuuf ariifattuu mucichi ishee irraa kufee naafate. Maqaan isaas Mefiibooshet jedhama ture.

⁵ Rekaabii fi Ba'anaa ilmaan Rimoon namicha gosa Bi'eeroot ka'anii gara mana Iish-Boosheti qajeelan; yeroon isaan itti achi ga'anis guyyaa saafaa yeroo inni itti aara galfatu ture. ⁶ Isaanis akka nama qamadii barbaaduutti kutaa manaa isa gara keessaatti ol seenanii garaa isaa waraanan. Ergasiis Rekaabii fi obboleessi isaa Ba'anaa miliqanii ba'an.

⁷ Isaanis utuu inni kutaa ciisichaa keessa siree isaa irra rafee jiruu ol seenan. Erga garaa isaa waraananii isa ajjeesanii booddees mataa isaa irraa kutan. Mataa sanas fuudhanii halkan guutuu daandii Arabbaa irra deemaa bulan. ⁸ Isaanis Kebroonitti mataa Iish-Booshet gara Daawit mootichaa fidanii, "Kunoo mataa Iish-Booshet ilma diina kee Saa'ol kan ilma namicha si ajjeesuu barbaadu sanaa. Har'a WAAQAYYO Saa'olii fi sanyii isaa illee gooftaa koo mootichaaf haaloo baaseera" jedhaniin.

⁹ Daawit immoo Rekaabii fi obboleessa isaa Ba'anaa, ilmaan Rimoonii namicha gosa Bi'eerootaa sanaan akkana jedhe; "Dhugaa WAAQAYYO jiraataa isa rakkina hunda jalaa na baase sanaa, ¹⁰ kunoo ani namicha waan oduu gaarii naa fide se'ee, 'Saa'ol du'eera' jedhee natti hime sana qabee Siiqlaagitti ajjeeseera. Egaa wanni ani namicha oduu sana fide badhaase kana dha! ¹¹ Yoos yeroo namoonni hamoonni nama balleessaa hin qabne tokko mana isaa keessatti, siree isaa irratti ajjeesanitti ani dhiiga isaa harka keessan irraa hin barbaaduu ree? Lafa irraas hin balleessuu ree?"

¹² Kanaafuu Daawit namoota isaa ajaje; isaanis jara ajjeesan. Harkaa fi miilla isaanii irraa kukkutanii haroo Kebroon biratti reeffa isaanii fannisan. Mataa Iish-Booshet garuu fuudhanii Kebroonitti awwaala Abneer biratti awwaalan.

5

Daawit Israa'el Irratti Mootii Ta'e

5:1-3 kwf - 1Sn 11:1-3

¹ Gosoonni Israa'el hundi Kebroonitti Daawit bira dhufanii akkana jedhan; "Nu foonii fi dhiiga kee ti. ² Duraan yeroo Saa'ol mootii keenya turetti, namni duula loltoota Israa'el hoogganu si'i ture. WAAQAYYOS, 'Situ saba koo Israa'elin tiksa; bulchaa isaanis ni taata' siin jedhee ture."

³ Yommuu maanguddoonni Israa'el hundi Kebroonitti Daawit mooticha bira dhufanitti mootichi Kebroonitti fuula WAAQAYYOO duratti isaan wajjin kakuu gale; isaanis Daawitin dibanii Israa'el irratti mootii isa godhan.

⁴ Daawit yeroo mootii ta'etti umuriin isaa waggaa soddoma ture; innis waggaa afurtama bulche. ⁵ Kebroon keessatti waggaa torbaa fi ji'a ja'a Yihuudaa irratti mootii ture; Yerusaalem keessatti immoo waggaa soddomii sadii guutummaa Israa'elii fi Yihuudaa irratti mootii ta'e.

Daawit Yerusaalem Qabachuu Isaa

5:6-10 kwf - 1Sn 11:4-9

5:11-16 kwf - 1Sn 3:5-9; 14:1-7

⁶ Mootichii fi namoonni isaa Yebuusota achi jiraatan loluuf gara Yerusaalemitti ni qajeelan. Yebuusonnis Daawitiin, "Ati as hin seentu; jaamaa fi naafni iyyuu of irraa si deebisu" jedhan. Isaan, "Daawit as seenuu hin danda'u" jedhanii yaadan. ⁷ Ta'us Daawit da'annoo Xiyyoon Magaalaa Daawit ni qabate.

⁸ Daawitis gaafas, "Namni Yebuusota dha'uuf ba'u kam iyyuu, 'naafotaa fi jaamota' lubbuu Daawitiin jibhaman bira ga'uuf karaa bo'oo bishaaniitiin darbuu qaba" jedhe. Sababiin isaan, "'Jaamonnii fi naafonni' masaraa mootii hin seenan" jedhaniif kanuma.

⁹ Daawitis iddoo jireenya isaa da'annoo sana godhatee Magaalaa Daawit jedhee moggaase. Inni Miiloodhaa jalqabee naannoo ishee marsee ijaare. ¹⁰ Innis sababii WAAQAYYO Waaqni Waan Hunda Danda'u isa wajjin tureef yeruma yeroon jabaachaa dhufe.

¹¹ Yeroo kanatti Hiiraam mootiin Xiirros ergamoota wajjin muka birbirsaa, namoota muka soofanii fi warra dhagaa soofan gara Daawit erge; isaanis Daawitiif masaraa ijaaran. ¹² Daawitis akka WAAQAYYO saba Israa'el irratti mootii godhee jabeessee isa dhaabee fi akka saba Israa'elii jedhee mootummaa isaa guddiseef ni beeke.

¹³ Daawitis erga Kebroonii ba'ee booddee saajjatoowwanii fi niitota biraa Yerusaalem keessatti fuudhe; ilmaanii fi intallan dabalataa dhalataniif. ¹⁴ Maqaan ijoollee isaa kanneen achitti isaaf dhalataniis Shamu'aa, Shobaab, Naataan, Solomoon, ¹⁵ Yiibehaar, Eliishuuwaa, Nefeg, Yaafiyaa, ¹⁶ Eliishaamaa, Eliyaadaa fi Eliiphelexi jedhamu.

Daawit Filisxeemota Mo'achuu Isaa

5:17-25 kwf - 1Sn 14:8-17

¹⁷ Filisxeemonni yommuu akka Daawit dibamee Israa'el irratti mootii ta'e dhaga'anitti, humna guutuudhaan isa barbaacha ol ba'an; Daawit garuu waan kana dhaga'ee gara da'annoo jabaatti gad bu'e. ¹⁸ Yeroo kanatti Filisxeemonni dhufanii Sulula Refaayim keessa faffaca'an; ¹⁹ kanaafuu Daawit, "Ani ba'ee Filisxeemota dha'uu? Ati dabarsitee harka kootti isaan kennitaa?" jedhee WAAQAYYON gaafate.

WAAQAYYOS, "Ba'i; ani dhugumaan Filisxeemota dabarsee harka keetti nan kennaatii" jedhee deebiseef.

²⁰ Kanaafuu Daawit gara Ba'aal Pheraaziim dhaqe; achittis isaan mo'ate. Innis, "Akkuma bishaan mana isaa cabsee yaa'u sana WAAQAYYO fuula koo duratti diinota koo cabsee ba'eera" jedhe. Kanaafuu iddoon sun Ba'aal Pheraaziim jedhamee waamame. ²¹ Filisxeemonni waaqota isaanii tolfamoo achitti dhiisanii baqatan; Daawitii fi namoonni isaa immoo isaan fuudhanii deeman.

²² Filisxeemonni amma illee dhufanii Sulula Refaayim keessa faffaca'an; ²³ kanaafuu Daawit WAAQAYYON gaafate; Waaqayyos akkana jedheen; "Kallattiidhaan itti hin ba'in; garuu duubaan isaan marsiitii muka qilxuu duratti isaan waraani. ²⁴ Akkuma fixee muka qilxuu irraan sagalee duulaa dhageesseen dafiitii ba'i; WAAQAYYO loltoota Filisxeem dha'uudhaaf si dura ba'eera jechuudhaatii." ²⁵ Kanaafuu Daawit akkuma WAAQAYYO isa ajaje sana Gibe'oon jalqabee hamma Geeziritti Filisxeemota dha'e.

6

Taabonni Gara Yerusaalemitti Fidamuu Isaa

6:1-11 kwf - 1Sn 13:1-14

6:12-19 kwf - 1Sn 15:25-16:3

¹ Daawit ammas namoota Israa'el keessaa filataman kuma soddoma walitti qabate.

² Innii fi namoonni isa wajjin turan hundi taabota Waaqaa kan Maqaa, maqaa WAAQAYYOO Waan Hunda Danda'uu kan taabota gubbaa, kiirubeelii teessoo irra jiran gidduu jiru sanaatiin waamamu sana achii fiduuf gara Ba'aalaa ishee Yihuudaa keessaa sanaa ni dhaqan. ³ Isaanis taabota Waaqaa gaarii haaraa irra kaa'anii mana Abiinaadaab kan gaara irra jiru sanaa baasanii fidan. Ilmaan Abiinaadaabii, Uzaa fi Ahiiyoon gaarii haaraa sana oofaa turan; ⁴ taabonni Waaqaas gaarii irra kaa'amee Ahiiyoon dura dura deema ture. ⁵ Daawitii fi Israa'el hundinuu humna

isaanii guutuudhaan faarfannaadhaan, masiingoodhaan, baganaadhaan, dibbeedhaan, bilbilaan, Kililleedhaanis fuula WAAQAYYOO duratti gammadanii shuubbisaa turan.

⁶ Yommuu isaan oobdii Naakoon bira ga'anitti waan sangoonni gufataniif Uzaan harka isaa hiixatee taabota Waaqaa qabe. ⁷ Sababii hojii isaa kan ulfina hin qabneetiif dheekkamsi WAAQAYYOO Uzaatti boba'e; kanaafuu Waaqni isa rukute; innis achumatti taabota Waaqaa biratti du'e.

⁸ Daawitis sababii WAAQAYYOO akka malee Uzaatti dheekkameef ni aare; iddoon sun hamma har'aatti Phereez Uzaa jedhamee waamama.

⁹ Daawitis gaafa sana WAAQAYYON sodaatee, "Taabonni WAAQAYYOO akkamitti gara koo dhufa?" jedhe. ¹⁰ Innis akka taabonni WAAQAYYOO isa wajjin Magaalaa Daawit keessa jiraatuuf ofitti fudhachuu hin barbaanne. Qooda kanaa gara mana Oobeed Edoom namicha Gitii sanaatti geesse. ¹¹ Taabonni WAAQAYYOS ji'a sadii mana namicha Gitii kan Oobeed Edoom jedhamu sanaa ture; WAAQAYYOS isaa fi warra mana isaa jiraatan hunda ni eebbise.

¹² Yeroo kanatti, "WAAQAYYOO sababii taabota Waaqaatiif jedhee warra mana Oobeed Edoom jiraatanii fi waan inni qabu hunda ni eebbise" jedhanii Daawit Mootichatti himan. Kanaafuu Daawit gad bu'ee taabota Waaqaa sana mana Abiidaaraatii gammachuudhaan gara Magaalaa Daawititti fide. ¹³ Innis akkuma namoonni taabota WAAQAYYOO baatan sun tarkaanfii ja'a achi hiiganiin sangaa tokkoo fi jabbii coomaa tokko aarsaa dhi'eesse. ¹⁴ Daawitis Dirata quncee talbaa irraa hojjetame uffatee qondaaltota isaa wajjin fuula WAAQAYYOO duratti humna isaa guutuun shuubbisaa ture; ¹⁵ innii fi Israa'el hundi "hoo" jechaa sagalee malakataatiin taabota WAAQAYYOO fidan.

¹⁶ Yeroo taabonni WAAQAYYOO Magaalaa Daawit seenutti Miikaal intalli Saa'ol foddaa keessaan ilaalaa turte. Isheenis akka Daawit Mootichi fuula WAAQAYYOO duratti utaalee shuubbisu yommuu argitetti garaa ishee keessatti isa tuffatte.

¹⁷ Isaanis taabota WAAQAYYOO fidanii dunkaana Daawit dhaabeef keessa ni kaa'an; Daawitis aarsaa gubamuu fi aarsaa nagaa fuula WAAQAYYOO duratti dhi'eesse. ¹⁸ Innis erga aarsaa gubamuu fi aarsaa nagaa dhi'eessee booddee maqaa WAAQAYYOO Waan Hunda Danda'uutiin namoota ni eebbise. ¹⁹ Ergasiis inni tokkoo tokkoo nama tuuta Israa'elootaa guutuu keessa jiruutiif jechuunis dhiirotaafis dubartootaafis buddeena tokko tokko, gumaa foonii tokko tokkoo fi bixxillee ija wayinii tokko tokko ni kenne. Namoonni hundinuu gara mana mana isaanii deeman.

²⁰ Yommuu Daawit maatii ofii isaa eebbisuuf deebi'ettis Miikaal intalli Saa'ol isa simachuuf baatee, "Har'a mootiin Israa'el akka nama gatii hin qabne tokkootti fuula xomboreewwan hojjetoota isaa duratti qullaa argamuun isaa ulfina ta'eeti mool!" jette.

²¹ Daawit immoo Miikaaliin akkana jedhe; "Ani fuula WAAQAYYOO isa abbaa keetii fi warra mana isaa jiran caalchisee na filatee saba WAAQAYYOO, Israa'el irratti na muude sanaaf fuula WAAQAYYOO duratti nan shuubbisa. ²² Ani kana caalaa iyyuu ofin xinnessa; ija kee durattis of nan salphisa. Xomboreewwan ati jette kanneeniin garuu nan kabajama."

²³ Miikaal intalli Saa'ol utuu ijoollee hin argatin duute.

7

Abdii Waaqayyo Daawitiif Kenne

7:1-17 kwf - 1Sn 17:1-15

¹ Mootichi erga masaraa isaa keessa jiraachuu jalqabee WAAQAYYOO diinota isaa kanneen naannoo isaa jiran hunda jalaa isa boqochisee booddee, ² Naataan raajichaan, "Ani kunoo mana birbirsaan ijaarame keessan jiraadha; taabonni Waaqaa garuu dunkaana keessa jiraata" jedhe.

³ Naataan immoo mootichaan, "WAAQAYYOO si wajjin jiraatii waan garaa keetti yaadde kam iyyuu godhi" jedhe.

⁴ Halkan sana garuu dubbiin WAAQAYYOO akkana jedhee gara Naataan dhufe:

⁵ "Dhaqiitii akkana jedhii garbicha koo Daawititti himi; 'WAAQAYYOO akkana jedha: Kan mana ani keessa jiraadhu naaf ijaaru si'ii? ⁶ Ani gaafan Israa'eloota Gibxii baasee jalqabee hamma har'aatti mana keessa hin jiraanne. Ani iddoo jireenya koo dunkaana godhadhee iddoo tokkoo gara iddoo bira naanna'an ture. ⁷ Ani iddoon Israa'eloota hunda wajjin naanna'aa ture kamitti iyyuu bulchitoota akka isaan saba koo Israa'elin eeganiif ajaje keessaa nama tokkoon iyyuu, "Isin maaliif mana birbirsaa naaf hin ijaarre?" jedhee beekaa?"

⁸ "Egaa amma akkana jedhii garbicha koo Daawititti himi; 'WAAQAYYON Waan Hunda Danda'u akkana jedha: Ani akka ati bulchaa saba koo Israa'el taatuuf lafa

tikaatii fi bushaayee faana deemuu keessaan si fudhadhe. ⁹ Ani lafa ati dhaqxe hundatti si wajjinin ture; diinota kee hundas fuula kee duraa balleesseera. Ammas ani maqaa kee akkuma maqaa namoota addunyaa irratti akka malee gurguddaa ta'anii guddaa nan godha. ¹⁰ Ani akka isaan mana ofii isaanii qabaatanii fi si'achi hin raafamneef saba koo Israa'eliif lafa kennee isaan nan dhaaba. Namoonni hamoon akka jalqabatti godhan sana deebi'anii isaan hin cunqursan; ¹¹ isaan si'achi waan gaafa ani saba koo Israa'el irratti abbootii murtii muudee as godhan sana illee hin godhan. Ani diinota kee hunda jalaas sin boqochiisa.

“ Akka WAAQAYYO mataan isaa mana siif ijaaru WAAQAYYO sittin hima; ¹² yommuu barri jireenya keetii dhumeeti ati abbootii kee wajjin boqottutti ani akka inni iddoo kee bu'uuf sanyii kee kan gudeeda keetii ba'u nan kaasa; mootummaa isaa illee jabeessee nan dhaaba. ¹³ Kan maqaa kootiif mana ijaaru isa; anis teessoo mootummaa isaa bara baraan jabeessee nan dhaaba. ¹⁴ Ani isaaf abbaa nan ta'a; innis ilma naa ta'a. Yommuu inni balleessaa hojjetuttis ulee namootaatiin isa nan adaba; alangee ilmaan namaa ittiin garafamaniinis nan garafa. ¹⁵ Jaalalli koo garuu akka jaalala ani Saa'ol isa ani fuula kee duraa balleesse sana irraa fudhadhe isa irraa hin fudhatamu. ¹⁶ Mannii fi mootummaan kee bara baraan fuula koo dura ni jiraata; teessoon kees bara baraan jabaatee ni dhaabata.”

¹⁷ Naataanis dubbii mul'ata kanaa hunda Daawititti hime.

Daawit Waaqa Kadhachuu Isaa

7:18-29 kwf - 1Sn 17:16-27

¹⁸ Ergasii Daawit mootichi ol seenee fuula WAAQAYYOO dura taa'ee akkana jedhe:

“Yaa WAAQAYYO Gooftaa, kan ati asiin na geesse ani eenyu? Maatiin koos maali?

¹⁹ Yaa WAAQAYYO Gooftaa, akka waan wannu kun fuula kee duratti ga'aa hin ta'iniiti ati waa'ee mana garbicha keetii kan fuul duratti ta'us dubbatte. Yaa WAAQAYYO Gooftaa, edaa walitti dhufeenyi ati namoota wajjin qabdu kanaa?

²⁰ “Daawit kana caalaa maal jechuu danda'a? Yaa WAAQAYYO Gooftaa, ati garbicha kee ni beektaatii. ²¹ Ati sababii dubbii keetiitii fi akkuma fedhii keetiitii waan guddaa kana hojjettee akka garbichi kee beeku goote.

²² “Yaa WAAQAYYO Gooftaa, ati akkam guddaa dha! Kan akka keetii tokko iyyuu hin jiru; akka nu gurruma keenyaan dhageenyetti si malee Waaqni biraa hin jiru.

²³ Sabni akka saba kee Israa'el, kan Waaqni akka inni saba isaa ta'uuf maqaa ofii isaa dhaabbachuuf jedhee isa furuuf saboota ormaatii fi waaqota isaanii illee fuula isaa duraa ari'uudhaan dinqiiwwan gurguddaa fi sodaachisaa argisiisuudhaan ba'ee biyya Gibxii furee baase kan biraa lafa irraa kamii dha? ²⁴ Ati saba kee Israa'elin kan ofii keetii gootee bara baraan dhaabdeerta; yaa WAAQAYYO ati Waaqa isaanii taateerta.

²⁵ “Ammas yaa WAAQAYYO, yaa Waaqi, ati waadaa garbicha keetii fi mana isaatiif galte sana bara baraan eegi. Kanas akkuma waadaa galte sana raawwadhu; ²⁶ kunis akka maqaan kee bara baraan guddaa ta'uuf. Kana irratti namoonni, 'WAAQAYYON Waan Hunda Danda'u Israa'el irratti Waaqa!' ni jedhu. Manni garbicha kee Daawitis fuula kee duratti jabaatee ni dhaabata.

²⁷ “Yaa WAAQAYYO Waan Hunda Dandeessu, Waaqa Israa'el ati, 'Ani mana siif nan ijaara' jettee garbicha keetii waan kana mul'ifteerta; kanaafuu garbichi kee kadhannaa kana sitti dhi'eessuuf ija jabina argateera. ²⁸ Yaa WAAQAYYO Gooftaa, ati Waaqa! Dubbiin kee amanamaa dha; atis waan gaarii kana garbicha keetiif waadaa galteerta. ²⁹ Akka manni isaa bara baraan jabaattee fuula kee dura dhaabaatuuf ammas mana garbicha keetii eebbisuun fedhii kee ha ta'u; yaa WAAQAYYO Gooftaa, ati dubbatteertaatii; eebba keetiinis manni garbicha keetii bara baraan ni eebbifama.”

8

Mo'annoowwan Daawit

8:1-14 kwf - 1Sn 18:1-13

¹ Ergasii Daawit Filisxeemota mo'atee of jala isaan galfate; magaalaa Meeteeg Amaa jedhamtus harka Filisxeemotaatii baasee fudhate.

² Daawit Mo'aabotas ni mo'ate. Lafa irra tarree ciibsees funyoon isaan safare. Kanneen tarree galan keessaas funyoo lama lama safaree ajjeese; kanneen funyoo tokko tokko safare immoo akka isaan jiraatan eeyyameef. Kanaafuu Mo'aabonni Daawit jalatti bulanii gibira fidaniif.

³ Kana irrattis Daawit yeroo Laga Efraaxiis bira yaadannoo ofii deebisee dhaabbachuu dhaqetti mooticha Zoobaa, Hadaadezer ilma Rehoob mo'ate. ⁴ Daawitis gaariwwan waraanaa isaa kuma tokko, abbootii fardaa kuma torbaa fi loltoota lafoo kuma digdama

isa irraa fudhate. Innis fardeen gaariiwwanii dhibba tokko qofa hambisee kanneen hafan hunda mogolee kukkute.

⁵ Yeroo warri Sooriyaa kanneen Damaasqoo jiraatan Hadaadezer mooticha Zoobaa gargaaruuf dhufanittis Daawit isaan keessaa nama kuma digdamii lama fixe. ⁶ Ergasiis kutaa bulchiinsa Damaasqoo kan biyya Sooriyaa keessa qubata loltootaa dhaabbate. Warri Sooriyaas isa jalatti bulanii gibira fidaniif. WAAQAYYOS Daawitiif lafa inni dhaqe hundatti moo'icha kenne.

⁷ Daawitis gaachana warqee kan ajajjoonni loltoota Hadaadezer qabatan fudhatee gara Yerusaaalem fide. ⁸ Daawit Mootichi magaalawwan Hadaadezer jechuunis Bexaatii fi Beerootaay keessaa sibiila naasii akka malee baay'ee fudhate.

⁹ Too'iin mootiin Hamaati yommuu akka Daawit guutummaa loltoota Hadaadezer mo'ate dhaga'etti, ¹⁰ akka inni sababii mo'annaa Daawit Mootichi Too'iin wal lolaa ture sun waraana keessatti Hadaadezer irratti argateetiif harka isa fuudhee dhaamsa gammachuu isaaf dabarsuuf ilma ofii isaa Yooraamin gara isaatti erge. Yooraamis kennaawwan meetii irraa, warqee fi naasii irraa hojjetaman fide.

¹¹ Daawit Mootichis akkuma meetii fi warqee saboota biraa kanneen of jala galfatu hunda irraa booji'ee ture godhe sana mi'oota kanneen illee WAAQAYYOOF addaan baase. ¹² Warri inni of jala galfatas Edoom, Mo'aab, Amoonota, Filisxeemotaa fi Amaaleq turan. Boojuu Hadaadezer ilma Rehoob mooticha Zoobaa irraa booji'es akkasuma addaan baase.

¹³ Daawitis erga Sulula Soogiddaa keessatti Edoomota kuma kudha saddeet fixee deebi'ee booddee beekamaa ta'e.

¹⁴ Innis guutummaa Edoom keessa qubata loltootaa dhaabbate; Edoomonni hundinuu Daawitiif ni garbooman. WAAQAYYOS lafa inni dhaqe hundatti Daawitiif mo'annaa ni kenne.

Qondaaltota Daawit

8:15-18 kwf - 1Sn 18:14-17

¹⁵ Daawit guutummaa Israa'el irratti mootii ta'ee saba isaa hundaaf murtii qajeelaa fi qajeelummaadhaan hojjetete. ¹⁶ Yoo'aab ilmi Zeruuyaa hoogganaa loltootaa ture; Yehooshaafaax ilmi Ahiilud immoo galmeessaa ture. ¹⁷ Akkasumas Zaadoq ilmi Ahiixuubii fi Abiimelek ilmi Abiyaataar luboota turan; Seraayaan immoo barreessaa ture. ¹⁸ Benaayaa ilmi Yehooyaadaa hoogganaa Kereetotaa fi Pheletotaa ture; ilmaan Daawit immoo luboota turan.

9

Daawitii fi Mefiiboostee

¹ Daawitis, "Akka ani Yoonaataaniif jedhee arjummaa isaaf godhu namni maatii Saa'ol keessaa hafe amma jiraa?" jedhee gaafate.

² Yeroo sanatti namicha Ziibaa jedhamu tajaajilaa mana Saa'ol tokkotu ture. Innis akka fuula Daawit duratti dhi'atuuf waamame; mootichis, "Ati Ziibaadhaa?" jedheen. Innis, "Eeyyee, ana garbicha kee ti" jedhe.

³ Mootichis, "Akka ani arjummaa Waaqaa isaaf godhuuf namni maatii Saa'ol keessaa hafe tokko iyyuu hin jiruu?" jedhee gaafate.

Ziibaa, "Ilmi Yoonaataan tokko jira; miilli isaa lachuus naafa" jedhee mootichaaf deebise.

⁴ Mootichis, "Inni eessa jira?" jedhee gaafate.

Ziibaan deebisee, "Inni iddoo Lodebaar jedhamu mana Maakiir ilma Amii'eel jira" jedhe.

⁵ Kanaafuu Daawit mootichi nama ergee Lodebaar mana Maakiir ilma Amii'eeliitii isa fichisiise.

⁶ Mefiibooshet ilmi Yoonaataan, ilmi Saa'ol yeroo Daawit bira dhufetti ulfina isaaf kennuuf gad jedhe sagadeef.

Daawit immoo, "Mefiiboostee!" jedheen.

Innis, "Garbichi kee kunoo ti" jedhee deebiseef.

⁷ Daawitis, "Ani abbaa kee Yoonaataaniif jedhee arjummaa siifin godhaatii hin sodaatin. Ani lafa akaakayyuu keetii, lafa Saa'ol hunda siifin deebisa; atis yeroo hunda maaddii koo irraa nyaatta" jedheen.

⁸ Mefiibooshetis harka fuudhee, "Ana garbicha kee nama akka saree du'eetti ilaalamuuf waan kana gochuun kee maaliif?" jedheen.

⁹ Mootichis Ziibaa garbicha Saa'ol ofitti waamee akkana jedheen; "Ani ilma ilma goftaa keetiitiif, waan kan Saa'olii fi kan maatii isaa ta'e hunda kenneera. ¹⁰ Ati, ilmaan

keetii fi tajaajiltoonni kee akka ilmi ilma gooftaa keetii waan nyaatu argatuuf lafa isaaf qotuu qabdu. Mefiibooshet ilmi ilma gooftaa keetiis yeroo hunda maaddii koo irraa nyaata." Ziibaan ilmaan kudha shanii fi tajaajiltoota digdama qaba ture.

¹¹ Ziibaanis mootichaan, "Ani garbichi kee waan gooftaan koo mootichi akka ani hojjedhuuf na ajaju hunda nan godha" jedhe. Kanaafuu Mefiibooshet akkuma ilmaan mootii keessaa nama tokkootti maaddii Daawit irraa nyaata ture.

¹² Mefiibooshet ilma dargaggeessa Miikaa jedhamu tokko qaba ture; warri mana Ziibaa jiraatan hundi hojjetoota Mefiiboostee turan. ¹³ Mefiibooshetis sababii yeroo hunda maaddii mootii irraa nyaachaa tureef Yerusaaalem keessa jiraata ture; miilli isaa lachuu naafa ture.

10

Daawit Amoonota Mo'achuu Isaa

10:1-19 kwf - 1Sn 19:1-19

¹ Ergasiis mootiin Amoonotaa ni du'e; ilmi isaa Haanuunis iddoo isaa bu'ee mootii ta'e. ² Daawitis, "Akkuma abbaan isaa naa arjoome sana anis Haanuun ilma Naahaashiif nan arjooma" jedhee yaade. Kanaafuu Daawit gadda waa'ee abbaa isaatiif itti dhaga'ame isaa ibsuuf Haanuunitti ergamoota ni erge.

Yommuu namoonni Daawit gara biyya Amoonotaa dhaqanitti, ³ qondaaltonni Amoonotaa Haanuun gooftaa isaaniitiin, "Ati sababii Daawit akka isaan dhaamsa gaddaa sitti himaniif namoota sitti ergeef inni waan abbaa keetiif ulfina kenne seetaa? Daawit akka isaan magaalattii qoratani, basaasanii fi qabataniiif gara kee isaan erge mitii?" jedhan. ⁴ Kanaafuu Haanuun namoota Daawit sana qaqqabee tokkoo tokkoo isaanii irraa hareeda gama tokkoo haadee wayyaa isaanii illee teessuma irratti cicciree of irraa isaan erge.

⁵ Daawit yommuu wanni kun isatti himametti sababii isaan akka malee qaana'aniif namoota sanatti ergamoota erge. Mootichis, "Isin hamma areedni keessan isinii guddatutti Yerikoo turaatii ergasii deebi'aa kottaa" jedheen.

⁶ Amoononni yommuu akka Daawit isaan xireeffate hubatanitti, Beet Rehobii fi Suubaadhaa loltoota lafoo kan Sooriyaa kuma digdama, mootii Ma'akaa namoota kuma tokko wajjin akkasumas Xoob irraa namoota kuma kudha lama qaxaratan.

⁷ Daawit yommuu waan kana dhaga'etti Yoo'aabii fi guutummaa loltoota ni erge.

⁸ Amoononni immoo ba'anii karra magaalaa sanaa irratti waraanaaf hiriiran; namoonni Sooriyaa warri Suubaa fi Rehob, akkasumas namoonni Xoobiitii fi Ma'akaa immoo kophaa isaanii dirree irra turan.

⁹ Yoo'aabis akka fuula isaa duraa fi dugda isaa duubaan waraanni jiru ni arge; kanaafuu loltoota Israa'el keessaa namoota beebkamoo filatee adda loltoonni Sooriyaa jiranitti bobbaase. ¹⁰ Namoota hafan immoo ajaja obboleessa isaa Abiishaayi jalatti hiriirsee Amoonotatti isaan duulchise. ¹¹ Yoo'aabis akkana jedhe; "Yoo warri Sooriyaa natti jabaatan ati dhuftee na gargaarta; yoo Amoononni sitti jabaatan immoo ani dhufee sin gargaara. ¹² Jabaadhu; saba keenyaa fi magaalawwan Waaqa keenyaatiif garaa kutannaadhaan haa lollu. WAAQAYYOS waan fuula isaa duratti gaarii ta'e ni godha."

¹³ Ergasii Yoo'aabii fi loltoonni isa wajjin turan warra Sooriyaa waraanuuf fuul duratti ni qajeelan; jarris fuula isaa duraa baqatan. ¹⁴ Amoononni yommuu akka namoonni Sooriyaa baqatan arganitti isaanis Abiishaayi duraa baqatanii magaalaa seenan. Akkasiin Yoo'aab Amoonota waraanuu dhiisee Yerusaaalemitti deebi'e.

¹⁵ Namoonni Sooriyaa yommuu akka Israa'eloonni isaan mo'atan arganitti lammata walitti qabaman. ¹⁶ Hadaadezeris ergamoota ergee namoota Sooriyaa kanneen Laga Efraaxiisiitiin gamaa fichisiise; isaanis hoogganummaa ajajaa waraana Hadaadezer kan Shoobak jedhamuun gara Heelaam deeman.

¹⁷ Daawitis yommuu wanni kun isatti himametti, Israa'eloota hunda walitti qabatee Yordaanos ce'ee Heelaam dhaqe. Warri Sooriyaas waraanaaf Daawititti hiriiranii isa lolan. ¹⁸ Isaan garuu Israa'eloota duraa baqatan; Daawitis namoota gaarii waraanaa oofan dhibba torbaa fi loltoota lafoo kuma afurtama fixe. Ajajaa loltoota isaanii Shoobak illee madesse; innis achumatti du'e. ¹⁹ Mootonni Hadaadezerin tajaajilaa turan hundi yommuu akka Israa'elootaan mo'ataman arganitti, Israa'eloota wajjin nagaa uumanii isa jalatti bulan.

Kanaafuu namoonni Sooriyaa ergasii Amoonota gargaaruu sodaatan.

11

Daawitii fi Batisheebaa

¹ Birraa keessa yeroo mootonni waraanaaf ba'anitti, Daawit tajaajiltoota isaatii fi loltoota Israa'el hunda wajjin Yoo'aabin erge. Isaanis Amoonota barbadeessanii magaalaa Rabbaa jedhamtu marsan. Daawit garuu Yerusaa'lemitti hafe.

² Gaaf tokko galgala Daawit siree isaa irraa ka'ee bantii masaraa mootummaa irra asii fi achi deddeebi'aa ture. Innis bantii gubbaa dhaabatee dubartii dhagna ishee dhiqattu tokko arge. Dubartiin sun baay'ee bareedduu turte; ³ Daawitis waa'ee ishee beekuuf nama itti erge. Namichi sunis, "Isheen Batisheebaa intala Eli'aam, niitii Uuriyaa namicha gosa Heet sanaatii mitii?" jedhe. ⁴ Daawitis nama itti ergee ishee fichisiise. Isheenis gara isaa dhufte; innis ishee wajjin ciise. Isheen xuraa'ummaa ishee irraa qulqullooftee turte. Ergasii gara mana isheetti deebite. ⁵ Dubartiin sun ulfooftee, "Ani ulfaa'eera" jettee Daawititti ergaa ergite.

⁶ Kanaafuu Daawit, "Uuriyaa namicha gosa Heet sana naa ergi" jedhee Yoo'aabitti dhaamsa erge. Yoo'aabis gara Daawititti isa erge. ⁷ Daawitis yommuu Uuriyaan gara isaa dhufetti waa'ee Yoo'aab, waa'ee loltootaatii fi haala waraanni keessa jiru isa gaafate. ⁸ Ergasii immoo Daawit Uuriyaan, "Gara mana keetiitti gad bu'itii miilla kee dhiqadhu" jedhe. Kanaafuu Uuriyaan masaraa mootiitii ba'ee deeme; kennaan mootichaas isa faana ergame. ⁹ Uuriyaan garuu tajaajiltoota gooftaa isaa hunda wajjin karra masaraa mootii dura ciise malee gara mana ofii isaatti gad hin buune.

¹⁰ Daawitis yommuu akka Uuriyaan gara mana isaa hin deemin itti himametti, "Ati reefuu karaadhaa dhufte mitii? Maaliif gara mana keetii hin deemne?" jedhee isa gaafate.

¹¹ Uuriyaan immoo Daawitiin, "Taabonnii fi Israa'el, Yihuudaanis dunkaana keessa jiru; gooftaan koo Yoo'aabii fi namoonni gooftaa koo dirree irra bulu. Egaa ani akkamitti nyaachuu fi dhuguuf, niitii koo wajjinis rafuuf jedhee gara mana koo deema? Du'a kee ti; ani waan akkasii hin godhu!"

¹² Daawit, "Ati har'as as buliitii ani bor sin geggeessaa" jedheen. Kanaafuu Uuriyaan gaafa sanaa fi guyyaa itti aanu Yerusaa'lem keessa ture. ¹³ Daawitis isa affeere; innis fuula isaa duratti nyaatee dhuge; Daawitis isa macheesse. Uuriyaan garuu halkan sana afata isaa irra tajaajiltoota gooftaa isaa gidduu ciisuuf gad ba'e malee gara mana ofii isaa hin deemne.

¹⁴ Daawitis lafti bariinaan xalayaa barreessee harkuma Uuriyaatiin Yoo'aabitti erge. ¹⁵ Xalayicha keessattis, "Iddoo waraanni itti cimetti Uuriyaa ramadi. Akka inni achitti dha'amee du'uufis isa dhiisaa duubatti deebi'aa" jedhee barreesse.

¹⁶ Kanaafuu Yoo'aab utuu magaalattii marsaa jiruu iddoo akka loltoonni ciccimoon jiran beeketti Uuriyaa ramade. ¹⁷ Yommuu namoonni magaalaa sanaa itti gad ba'anii Yoo'aabin lolanitti, loltoota Daawit keessaa namoonni tokko tokko du'an; Uuriyaan namichi gosa Heet sunis ni ajjeefame.

¹⁸ Yoo'aabis guutummaa oduu waa'ee lola sanaa Daawitiif erge. ¹⁹ Akkana jedhees ergamaa sana ajaje; 'Yommuu ati waa'ee waraana kanaa mootichatti himtee fixxutti, ²⁰ aariin mootichaa ni boba'a; innis akkana jedhee si gaafachuu danda'a; 'Isin maaliif loluuf akkas magaalaa sanatti dhi'aattan? Isin akka isaan dallaa irraa xiyya isinitti darbatan hin beeknee? ²¹ Eenyutu Abiimelek ilma Yirubeseet sana ajjeese? Dubartiin tokko dallaa irraa majii dhagaa daakuu itti gad dhiiftee Tebeesitti isa hin ajjeefnee? Isin maaliif akkas dallaa sanatti dhi'aattan?' Yoo inni waan kana si gaafate, 'Tajaajilaan kee Uuriyaan namichi gosa Heet sunis du'eera' jedhii itti himi."

²² Ergamaan sunis ka'ee deeme yommuu achi ga'etti waan Yoo'aab akka inni itti himu isa ajaje hunda Daawititti hime. ²³ Ergamaan sun Daawitiin akkana jedhe; "Namoonni nutti jabaatanii dirreetti gad nutti ba'an; nus ariinee gara karra magaalattiitti isaan deebifne. ²⁴ Ergasiis warri xiyya darbatan dallaa irraa tajaajiltoota keetti darbatan; namoonni mootii tokko tokkos ni du'an. Tajaajilaan kee Uuriyaan namichi Heet sunis ni du'e."

²⁵ Daawitis ergamaa sanaa, "Egaa akkana jedhii Yoo'aabitti himi; 'Wanni kun abdiis hin kutachiisin; goraadeen yeroo tokko isa tokko, yeroo kaan immoo kan biraa nyaata. Cimsii magaalattii dha'iitii balleessi.' Waan kanas Yoo'aabin jajjabeessuuf jedhi" jedhe.

²⁶ Niitiin Uuriyaa yommuu akka dhirsi ishee du'e dhageessetti ni boosseef. ²⁷ Erga yeroon boo'ichaa darbee booddee Daawit mana ofii isaatti ishee fudhate; isheenis niitii isaa taatee ilma deesseef. Garuu wannii Daawit hojjetee sun WAAQAYYO hin gammachiisne.

12

Naataan Daawitin Ifate

11:1; 12:29-31 kwf - 1Sn 20:1-3

¹ WAAQAYYOS Naataanin gara Daawititti erge. Innis gara Daawit dhufee akkana jedhe; "Namoota lamatu magaalaa tokko keessa jiraata ture; inni tokko sooressa, kaan immoo hiyyeessa ture. ² Namichi sooressi sun hoolotaa fi loon akka malee baay'ee qaba ture; ³ namichi hiyyeessi sun garuu goromtii hoolaa kan bitate xinnoo tokko malee homaa hin qabu ture; innis goromtii hoolaa sana ni kunuunse; hoolaan sunis isaa fi ijoollee isaa biratti guddatte. Isheen nyaata isaa irraa nyaachaa, dhugaatii isaa irraa dhugaa, bobaa isaa jala ciisaa turte. Goromtiin hoolaa kun isaaf akkuma intala isaa turte.

⁴ "Gaaf tokko keessummaan tokko mana namicha sooressa sanaa dhufe; namichi sooressi sunis hoolota yookaan loon ofii isaa keessaa tokko fuudhee keessummichaaf nyaata qopheessuu mararsiifate. Qooda kanaa ilmoo hoolaa namicha hiyyeessa sanaa fuudhee keessummaa mana isaa dhufe sanaaf qopheesse."

⁵ Daawitis namicha sanatti akka malee aaree Naataaniin akkana jedhe; "Dhugaa WAAQAYYO jiraataa, namichi waan kana godhe sun du'uu qaba! ⁶ Namichi sun qooda hoolaa sanaa harka afur baasuu qaba; inni gara laafina malee waan kana godheeraatii."

⁷ Naataanis Daawitiin akkana jedhe; "Namichi sun suma! WAAQAYYO Waaqni Israa'el akkana jedha: 'Ani Israa'el irratti mootii godhee si dibeera; harka Saa'ol jalaas si baaseera. ⁸ Ani mana gooftaa keetii siif kenneera; niitota gooftaa keetii illee bobaa keetii siif kenneera. Ani mana Israa'elii fi mana Yihuudaa siif kenneera. Utuu kunneen hundi sitti xinnaatanii silaa kana caalaa iyyuu siifin kenna ture. ⁹ Ati maaliif waan ija isaa duratti hamaa ta'e hojjechuudhaan dubbii WAAQAYYOO tuffatte? Ati Uuriyaa namicha Heet sana goraadeen ajjeeftee niitii isaa fudhatteerta. Ati goraadee Amoonotaatiin isa ajjeefte. ¹⁰ Kanaafuu amma sababii ati na tuffattee niitii Uuriyaa namicha Heet sana ofii keetiif fudhatteef goraadeen mana kee irraa hin fagaatu.'

¹¹ "WAAQAYYO akkana jedha: 'Kunoo, ani manuma kee keessaa waan hamaa sitti nan kaasa; utuma iji kee arguu niitota kee fuudhee fira sitti aanuuf nan kenna; innis guyyuma saafaadhaan isaan wajjin ni ciisa. ¹² Ati dhoksaatti akkas goote; ani garuu Israa'eloota hunda duratti guyyuma saafaadhaan waan kana nan godha.'"

¹³ Kana irratti Daawit Naataaniin, "Ani WAAQAYYOTTI cubbuu hojjedheera" jedhe.

Naataan immoo deebisee akkana jedhe; "WAAQAYYO cubbuu kee sirraa haqeeera; atis hin duutu. ¹⁴ Ta'us sababii ati waan kana gochuudhaan WAAQAYYON tuffattee daa'imni siif dhalate sun ni du'a."

¹⁵ Erga Naataan gara mana ofii isaa deemee booddee WAAQAYYO daa'ima niitiin Uuriyaa Daawitiif deesse ni dha'e; mucichis ni dhibame. ¹⁶ Daawitis daa'ima sanaaf Waaqa kadhate. Innis soomee mana isaatti galee halkan hunda lafa rafaa ture. ¹⁷ Maanguddoonni mana isaas lafaa isa kaasuuf isa bira dhadhaabatan; inni garuu ni dide; isaan wajjinis homaa hin nyaanne.

¹⁸ Daa'imni sunis guyyaa torbaffaatti ni du'e. Tajaajiltoonni Daawit akka daa'imni sun du'e isatti himuu sodaatan; isaan, "Nu yeroo daa'imni sun lubbuun jirutti Daawititti dubbannee ture; inni garuu nu dhaga'uu dide. Amma akkamiin daa'imni sun du'eera jennee itti himna? Yoo nu itti himne inni of miidha ta'a" jedhanii yaadanii turaniitii.

¹⁹ Daawit akka tajaajiltoonni isaa walitti asaasaa jiran hubatee daa'imni sun du'uu isaa beeke. Innis, "Mucichi ni du'ee?" jedhee gaafate.

Isaanis, "Eeyyee du'eera" jedhanii deebisan.

²⁰ Daawitis lafaa ka'e. Erga dhagna isaa dhiqatee dibatee booddees uffata isaa geeddaratee mana WAAQAYYOO seenee waaqeffate. Ergasii immoo gara mana ofii isaatti galee nyaata gaafannaan dhi'essaniif; innis ni nyaate.

²¹ Tajaajiltoonni isaas, "Ati maaliif akkana goota? Yeroo mucichi lubbuun jirutti ni soomte; ni boosses. Amma garuu mucichi du'eera; ati immoo kaatee nyaatta!" jedhanii isa gaafatan.

²² Innis akkana jedhee deebise; "Ani yeroo mucichi lubbuun turetti nan soome; nan boo'es. Ani, 'Eenyutu beeka? WAAQAYYO garaa naa laafee mucichi ni fayya' jedhee yaadeen ture. ²³ Amma garuu inni du'eera; yoo ani maaliifin sooma? Ani isa deebisuu nan danda'aa? Anatu gara isaa dhaqa malee inni gara koo hin dhufu!"

²⁴ Ergasii Daawit niitii isaa Batisheebaa ni jajjabeesse; dhaqees ishee wajjin ciise. Isheenis ilma deesseef; maqaa isaas Solomoon jedhanii moggaasan. WAAQAYYOS isa ni jaallate; ²⁵ WAAQAYYO waan isa jaallateef akka inni Yidiidiyaa jedhamee waamamuuf karaa Naataan raajichaatiin dubbii erge.

²⁶ Yeroo sanattis Yoo'aab magaalaa Amoonotaa kan Rabbaa jedhamu waraane da'annoo masaraa mootummaa qabate. ²⁷ Yoo'aabis akkana jedhee Daawititti ergamoota erge; "Ani magaalaa Rabbaa waraane madda bishaan ishee qabadheera. ²⁸ Egaa ati loltoota hafan walitti qabadhuutii magaalattii marsii qabadhu. Yoo kanaa achii ani magaalattii nan fudhadha; isheenis maqaa kootiin moggaafanti."

²⁹ Kanaafuu Daawit loltoota hunda walitti qabatee dhaqee Rabbaa waraanee qabate. ³⁰ Daawitis mataa mootii isaanii irraa gonfoo fudhate; Gonfichis mataa Daawit irra kaa'ame. Gonfoon sun hamma warqee taalaantii tokkoo ulfaatee dhagaawwan gati jabeeyyii of irraa qaba ture. Daawitis magaalaa sana keessaa boojuu akka malee baay'ee fudhatee ³¹ namoota achi keessa turanis gad yaasee akka isaan magaaaziidhaan, gasoo sibiilaatii fi qottoodhaan hojii hojjetan godhe; suphees isaan dhoofsise. Daawit magaalaaawwan Amoonotaa hunda keessattis akkasuma godhe. Ergasii Daawitii fi loltoonni isaa hundinuu Yersaaleemitti ni deebi'an.

13

Amnoonii fi Taamaar

¹ Yeroo tokko Amnoon ilmi Daawit Taamaarin jaallate; isheen akka malee bareedduu, obboleettii Abesaaloom ilma Daawit sanaa turte.

² Amnoon sababii jaalala obboleettii isaa Taamaariitiif akka malee dhiphatee dhibame; sababii isheen durba turteef Amnoon waan waanuma tokko illee ishee gochuu danda'u hin seene.

³ Amnoon michuu akka malee jal'aa kan Yoonaadaab jedhamu tokko qaba ture; Yoonaadaab ilma Shime'aa obboleessa Daawit. ⁴ Yoonaadaabis Amnooniin, "Yaa ilma mootii, dhagni kee maaliif guyyuma guyyaan huqqachaa deema? Ati natti hin himtuu?" jedhee gaafate.

Amnoon immoo, "Ani Taamaar obboleettii Abesaaloom obboleessa kootii jaalladheera" isaan jedhe.

⁵ Yehoonadaabis, "Sobiitii akka nama dhukkubsateetti siree irra ciisi; yommuu abbaan kee si gaafachuu dhufutti, 'Akka ani harka isheetii nyaadhuuf akka obboleettiin koo Taamaar dhuftee fuula koo duratti nyaata naa qopheessitu nan barbaada' jedhiin" jedhe.

⁶ Kanaafuu Amnoon sobee akka nama dhukkubsate tokkootti ciise. Yommuu mootichi isa gaafachuu dhufettis Amnoon, "Akka obboleettiin koo Taamaar dhuftee fuula koo duratti nyaata addaa naaf qopheessitee nyaadhu nan barbaada" jedheen.

⁷ Daawitis gara manaatti Taamaaritti nama ergee, "Gara mana obboleessa kee Amnoon dhaqiitii waan inni nyaatu qopheessiif" jedhe. ⁸ Kanaafuu Taamaar kaatee gara mana obboleessa ishee Amnoon kan ciisee ture sanaa dhaqxe. Daakuu xinnoo ishee fuutee bukeessitee fuula isaa duratti tolchite. ⁹ Ergasiis buddeena tolchite sana eelee irraa fuutee dhi'eessiteef; inni garuu nyaachuu dide.

Amnoon, "Nama hunda narraa baasaa" jedhe. Kanaafuu namni hundi isa biraa ba'e. ¹⁰ Ergasiis Amnoon Taamaariin, "Akka ani harka kee irraa nyaadhuuf buddeenicha kutaa ani ciisutti naa fidi" jedhe. Taamaaris buddeena qopheessitee sana fuutee Amnoon obboleessa isheetiif lafa inni ciisetti geessite. ¹¹ Inni garuu yommuu isheen nyaata dhi'eessiteeffitti humnaan ishee qabatee, "Yaa obboleettii ko, kottuu na wajjin ciisi" jedheen.

¹² Isheen immoo deebiftee akkana jetteen; "Yaa obboleessa ko, waan kana hin godhin! Na hin dirqisiisin. Wannii fokkisaan akkasii Israa'el keessatti hojjetamuu hin qabu! Ati waan hamaa kana hin godhin. ¹³ Ani maalan ta'a? Salphina koos baadhee eessan dhaqa? Ati hoo? Atis Israa'el keessatti akka gowwaa hamaa tokkootti ilaalamuu kee ti mitii? Maaloo mootichatti himadhu; inni sitti heerumuu na hin dhowwuutii." ¹⁴ Inni garuu ishee dhaga'uu dide; waan ishee caalaa jabaa ta'eefis humnaan ishee gudeede.

¹⁵ Ergasii Amnoon jibba guddaa ishee jibbe; dhugumaan hamma dur ishee jaallate caalaa ishee jibbe. Amnoonis, "Ka'iitii ba'ii deemi!" isheen jedhe.

¹⁶ Isheen immoo, "Hin ta'u! Na ari'uun kee yakka ati duraan natti hojjetee caalaa hammaata" jetteen.

Inni garuu ishee dhaga'uu dide. ¹⁷ Tajaajilaa ofii isaas waamee, "Dubartii kana narraa baasiitii balbala itti cufi" jedheen. ¹⁸ Tajaajilaan isaa sunis gad ishee baasee balbala itti cufe. Isheen uffata faaya adda addaatiin miidhagfame uffattee turte; intallan mootii kanneen dubarran qulqulluu ta'an uffata akkasii uffatu tureetii. ¹⁹ Taamaaris mataa isheetti daaraa firfirfattee wandaboo ishee dheeraa faayawwaniin miidhagfame sana tarsaafte. Harka ishees mataa irra kaa'attee sagalee ol fudhattee boo'aa deemte.

²⁰ Abesaaloom obboleessi ishee, "Amnoon obboleessi kee si wajjin turee? Yaa obboleettii ko, cal'isi; inni obboleessuma kee ti. Waan kana garaatti hin qabatin" jedheen. Taamaaris kophaa ishee mana obboleessa ishee mana Abesaaloom jiraatte.

²¹ Daawit mootichi yommuu waan kana hunda dhaga'etti baay'ee aare. ²² Abesaaloom dubbii tolaa yookaan hamaa tokko illee Amnoonitti hin dubbanne; Abesaaloom sababii inni obboleettii isaa Taamaarin salphiseef akka malee Amnoonin jibbee ture.

Abesaaloom Amnoonin Ajjeese

²³ Waggaa lamaa booddee warri hoolota Abesaaloom irraa rifeensa haadan magaalaa Ba'aal Hasoor kan Efreem biratti argamu sana keessa turan; innis akka isaan achi dhaqaniif ilmaan mootii hunda waame. ²⁴ Abesaaloomis gara mootichaa dhaqee, "Namoonni hoolota garbicha keetii irraa rifeensa haadan dhufaniiru. Maaloo mootichii fi gondaaltonni isaa garbicha kee wajjin haa deeman" jedhee kadhate.

²⁵ Mootichi immoo deebisee, "Lakki yaa ilma ko, nu hundinuu deemuu hin qabnu; nu ba'aa qofa sitti taanaa" jedheen. Abesaaloom jabeessee isa kadhata iyyuu inni isa eebbise malee isa faana hin deemne.

²⁶ Abesaaloomis, "Yoo ta'uu baate, maaloo obboleessi koo Amnoon nu wajjin haa deemu" jedhe.

Mootichi immoo, "Inni maaliif si wajjin deema?" jedhee gaafate. ²⁷ Abesaaloom garuu jabeessee isa kadhate; kanaafuu inni Amnoonii fi ilmaan mootichaa kaan isa wajjin erge.

²⁸ Abesaaloom akkana jedhee namoota isaa ajaje; "Dhaga'aa! Yommuu Amnoon daadhii wayinii dhugee machaa'utti ani, 'Amnoonin dha'aa' isiniin jedha; isinis yommuu sumaa isa ajjeesaa. Hin sodaatinaa. Anatu ajaja kana isinii kenne mitii? Jabaadhaa; jagnoomaas." ²⁹ Kanaafuu namoonni Abesaaloom waanuma Abesaaloom isaan ajaje sana Amnoonitti hojjetan. Ilmaan mootichaa hundinuu ka'anii gaangolii isaanii yaabbatanii baqatan.

³⁰ Utuu isaan karaa irra jiranuu oduun, "Abesaaloom ilmaan mootichaa hunda fixeera; tokkoon isaanii iyyuu hin hafne" jedhu Daawit qaqqabe. ³¹ Mootichis ol ka'ee uffata isaa tarsaasee lafa ciise; tajaajiltoonni isaa kanneen isa bira dhadhaabatanii turan hundinuu uffata isaanii tatarsaasan.

³² Yoonadaab ilmi Shime'aa ilmi obboleessa Daawit sun garuu akkana jedhe; "Goofaan koo waan isaan ilmaan mootichaa hunda fixan hin se'in; Amnoon qofatu du'e. Kunis waan Abesaaloom erga Amnoon obboleettii isaa Taamaarin humnaan gudeedee jalqabee itti yaadaa turee dha. ³³ Goofaan koo mootichi waa'ee oduu ilmaan mootichaa hundi ajjeefamaniiru jedhu sanaa hin yaadda'in; Amnoon qofatu du'e."

³⁴ Yeroo kanatti Abesaaloom baqateera.

Namichi eegumsaaf dhaabatee tures ol jedhee ilaalee namoota baay'ee daandii Horonaayim kan gaara cina ba'u irra dhufaa jiran arge. Namichi sunis dhaqee, "Ani karaa Horonaayim, cina gaaraatti namoota nan arga" jedhee mootichatti hime.

³⁵ Yoonadaabis mootichaan, "Kunoo, ilmaan mootichaa dhufanii jiru; wannii kun akkuma garbichi kee jedhe ta'e" jedhe.

³⁶ Akkuma inni dubbatee fixateen ilmaan mootichaa sagalee guddaadhaan boo'aa ol galan. Mootichii fi tajaajiltoonni isaa hundinuu hiqqifatanii boo'an.

³⁷ Abesaaloom garuu baqatee gara ilma Amiihuud, gara Talmaay mooticha Geshuur sanaa dhaqe. Daawit immoo guyyaa hunda ilma isaatiif ni boo'a ture.

³⁸ Abesaaloom erga baqatee Geshuur dhaqee booddee waggaa sadii achi ture. ³⁹ Mootichis du'a Amnoon irraa jajjabaannaan gara Abesaaloom dhaquuf garaan isaa kaka'e.

14

Abesaaloom Yerusaalemitti Deebi'e

¹ Yoo'aab ilmi Zeruuyaa akka garaan mootichaa Abesaaloom itti deebi'e beeke.

² Kanaafuu Yoo'aab gara Teqoo'aatti nama ergee dubartii ogeettii tokko fichisiise. Innis akkana isheedhaan jedhe; "Sobiitii akka nama gadda keessa jiruu ta'i. Wayyaa gaddaa uffadhu; dibata kam iyyuu hin dibatin. Akka dubartii nama du'e tokkoof guyyaa hedduu gaddite tokkoos ta'i. ³ Mooticha bira dhaqiiiti waan kana itti himi." Yoo'aabis waan isheen dubbattu isheetti hime.

⁴ Dubartiin sun yommuu Teqoo'aadhaa gara mootichaa dhuffetti ulfina isaaf kennuuf addaan lafatti gombifamtee, "Yaa mootii, na gargaari!" jette.

⁵ Mootichis, "Ati maal rakkatte?" jedhee ishee gaafate.

Isheenis akkana jette; "Sababii dhirsi koo du'eef ani dhugumaan niitii dhirsa hin qabnee dha. ⁶ Ani garbittiin kee ilmaan lama qaban ture. Isaanis alatti wal lolan; sababii namni wal irraa isaan dhowwu tokko iyyuu achi hin turiniif inni tokko isa kaan dha'ee ajjeese. ⁷ Kunoo, gosti hundi ana garbittii keeti ka'eera; isaanis, 'Waan inni obboleessa ofii isaa ajjeeseef akka nu sababii lubbuu obboleessa isaa kan inni ajjeese sanaa isa

ajjeefnuuf dabarsii nutti kenni; ergasii dhaaltuu isaa illee ni galaafanna' jedhu. Isaanis akkasiin akka dhirsi koo maqaa yookaan sanyii lafa irraa hin qabaanneef ibsaa koo tokkicha hafe kana dhaamsu."

⁸ Mootichis dubartii sanaan, "Ani waa'ee keetiif ajaja nan dabarsaatii ati mana keetti gali" jedhe.

⁹ Dubartiin Teqoo'aa sun garuu, "Yaa gooftaa ko, yaa mooticha, yakki sun anaa fi maatii abbaa koo irra haa bu'u; mootichii fi teessoon isaa yakka irraa haa qulqullaa'an" jedhe.

¹⁰ Mootichis deebisee, "Yoo namni kam iyyuu waan tokko illee sitti dubbate isa natti fidi; innis deebi'ee si hin rakkisu" jedhe.

¹¹ Ishee immoo, "Kanaafuu akka namni haaloo dhiigaa baasu sun ittuma fufee nama biraa ajjeesee akkasiin ilmi koo hin ajjeefamneef mootichi WAAQAYYON Waaqa isaa haa waammatu" jedhe.

Innis, "Dhugaa WAAQAYYO jiraataa, rifeensi tokkittiin mataa ilma keetii irraa lafa hin bu'u" jedhe.

¹² Ergasiis dubartittiin, "Akka ani garbittiin kee gooftaa koo mootichatti dubbii tokkittiin dubbadhu naa eeyyami" jedhe.

Innis, "Dubbadhu" jedhee deebise.

¹³ Dubartittiin immoo akkana jedhe; "Yoo ati maaliif waan akkasii saba Waaqaatti yaadde? Mootichi ilma isaa kan biyyaa baqate sana hin deebifneetii; akkana jechuun isaa ofitti muruu isaa mitii? ¹⁴ Nus akkuma bishaan lafatti dhangala'ee deebi'ee hin waraabamneetti ni duuna. Waaqni garuu karaa namni biyyaa baqate sun ittiin deebi'u barbaada malee akka inni isa irraa fagaatee hafu hin fedhu.

¹⁵ "Kanaafuu sababii namoonni na sodaachisaniif ani dubbii kana gooftaa koo mootichatti himuuf dhufeera. Garbittiin kees waan kana yaadde; 'Ani mooticha nan gaafadha; innis waan garbittiin isaa gaafatte tole jedha ta'a. ¹⁶ Mootichi waan kana dhaga'ee harka namicha anaa fi ilma koo dhaala Waaqni nuu kenne nu dhabsiisuu yaaluu jalaa garbittii isaa ni baasaatii.'

¹⁷ "Ammas garbittiin kee akkana jetti; 'Sababii gooftaan koo mootichi waan gaarii fi hamaa gargari baasee beekuutti akkuma ergamaa Waaqayyoo ta'eef dubbiin gooftaa koo mootichaa boqonnaa naaf haa kennu. WAAQAYYO Waaqni kee si wajjin haa ta'u.' "

¹⁸ Kana irratti mootichi dubartittiidhaan, "Ati waan ani si gaafadhu kam iyyuu na hin dhoksin" jedhe.

Dubartittiinis, "Gooftaan koo mootichi haa dubbatu" jedhe.

¹⁹ Mootichi, "Waan kana hunda keessatti harki Yoo'aab si wajjin jiraa?" jedhee gaafate.

Dubartiin sun immoo akkana jedhee deebifte; "Yaa gooftaa koo mooticha, du'a kee ti; dubbii gooftaan koo mootichi dubbatu irraa namni gara mirgaatti yookaan gara bitaatti goruu danda'u tokko illee hin jiru. Dhuguma namni akka ani waan kana dubbadhu na ajajee fi kan dubbii kana hundas afaan garbittii keetii keessa kaa'e Yoo'aabuma garbicha kee ti. ²⁰ Yoo'aab garbichi kee waan kana gochuun isaa haala yeroo ammaa jiru geeddaruuf. Gooftaan koo ogummaa akkuma ogummaa ergamaa Waaqayyoo qaba; inni waan lafa irratti ta'u hunda ni beeka."

²¹ Mootichis Yoo'aabiin, "Tole; ani waan kana nan godha. Ati dhaqii Abesaaloom dargageessicha fidi" jedhe.

²² Yoo'aabis ulfina isaaf kennuuf addaan gombifamee mooticha eebbise. Yoo'aab, "Sababii mootichi kadhannaa garbicha isaa dhaga'eef inni akka fuula gooftaa isaa mootichaa duratti fudhatama argate har'a ni beeka" jedhe.

²³ Ergasii Yoo'aab Geshuur dhaqee Abesaaloomin deebisee Yerusaleemitti fide. ²⁴ Mootichi garuu, "Inni gara mana isaa deemuu qaba; inni fuula koo arguu hin qabu" jedhe. Kanaafuu Abesaaloom gara mana isaatti gale; fuula mootichaas hin argine.

²⁵ Guutummaa Israa'el keessa namni akka Abesaaloom miidhagama isaatiin baay'ee jajame tokko iyyuu hin turre. Inni mataa isaatii jalqabee hamma faana miilla isaatti hir'ina tokko iyyuu hin qabu ture. ²⁶ Yommuu rifeensi mataa isaa itti ulfaatutti waggaatti yeroo tokko of irraa mura ture; yeroo inni rifeensa mataa isaa kana madaalli mootiitiin madaaluttis rifeensi isaa saqilii dhibba lama ulfaata ture.

²⁷ Abesaaloom ilmaan sadii fi intala tokko dhalche. Maqaan intala sanaa Taamaar jedhama; isheenis dubartii akka malee bareeddu turte.

²⁸ Abesaaloom utuu fuula mootichaa hin argin waggaa lama Yerusaleem keessa jiraate.

²⁹ Ergasii Abesaaloom Yoo'aabin gara mootichaatti erguuf jedhee nama itti erge; Yoo'aab garuu isa bira dhufuu dide. Kanaafuu yeroo lammaffaa nama itti erge; inni garuu dhufuu dide. ³⁰ Ergasiis Abesaaloom hojjettoota isaatiin, "Ilaa, lafti qotiisaa Yoo'aab

lafa qotiisaa kootti aana; innis garbuu achii qaba. Dhaqaatii ibidda itti qabsiisaa" jedhe. Kanaafuu hojjettoonni Abesaaloom dhaqanii lafa qotiisaa sanatti ibidda qabsiisan.

³¹ Kana irratti Yoo'aab gara mana Abesaaloom dhaqee, "Hojjettoonni kee maaliif lafa qotiisaa kootti ibidda qabsiisan?" jedheen.

³² Abesaaloomis deebisee Yoo'aabiin akkana jedhe; "Kunoo ani akka ati, 'Inni, "Ani maaliifni Geshuuri dhufe? Utuun hamma ammaatti achuma jiraadhee naaf wayya ture!" jedha' jettee mootichatti naaf himtuuf gara mootichaatti si ergachuuf, na bira kottu jedhee sitti dhaammadheen ture. Ani amma illee fuula mootichaa arguun fedha; yoo ani yakka tokko illee hojjedhee jiraadhe inni na haa ajjeesu."

³³ Kanaafuu Yoo'aab gara mootichaa dhaqee waan kana itti hime. Mootichis Abesaaloomin waamsise; innis dhufee fuula mootichaa duratti addaan lafatti gombifame. Mootichis Abesaaloomin dhungate.

15

Fincila Abesaaloom

¹ Kana irratti Abesaaloom gaarii lolaatii fi fardeen akkasumas namoota fuula isaa dura fiigan shantama ofii isaatiif qopheeffate. ² Innis ganamaan ka'ee daandii gara karra magaalatti nama geessu irra dhaabata ture. Yeroo namni kam iyyuu iyyata isaa mootii duratti dhi'eeffate murtii argachuuf dhufutti, Abesaaloom ofitti isa waamee, "Ati magaalaa kami dhufte?" jedhee gaafata. Namni sunis, "Garbichi kee gosoota Israa'el keessaa gosa tokko keessaa dhufa" jedhee deebisaaf. ³ Ergasiis Abesaaloom, "Kunoo iyyanni kee dhugaa fi qajeelaa dha; garuu akka inni si dhaga'uuf namni mootiin iddoo buufate tokko iyyuu hin jiru" jedhaan. ⁴ Abesaaloomis itti dabalee, "Maal qaba, utuu ani biyya kanatti abbaa murtii ta'ee! Silaa namni iyyata yookaan himata qabu kam iyyuu na bira dhufee anis murtii qajeelaa isaaf nan kennan ture" jedha.

⁵ Akkasumas yeroo namni tokko fuula isaa duratti jilbeenfachuuf gara isaa dhufutti Abesaaloom harka diriifatee ol isa qabuudhaan isa dhungata. ⁶ Abesaaloom akkasiin Israa'eloota murtii qajeelaa argachuuf gara mootii dhufan hunda simachuudhaan garaa namoota Israa'el hate.

⁷ Abesaaloomis gara dhuma waggaa afuraffaatti mootichaan akkana jedhe; "Akka ani Kebroon dhaqee wareega WAAQAYYOF wareege ture tokko dhi'eessuuf naaf eeyyami. ⁸ Ani garbichi kee yeroon biyya Sooriyaa keessa Geshuur jiraachaa turetti, 'Yoo WAAQAYYO gara Yerusaa'elitti na deebise, ani Kebroonitti WAAQAYYOF nan sagada' jedhee wareega kana wareegeen ture."

⁹ Mootichis, "Nagaan deemi" jedheen. Kanaafuu Abesaaloom gara Kebroon deeme.

¹⁰ Abesaaloom garuu akka isaan, "Isin akkuma sagalee malakataa dhageessaniin, 'Abesaaloom Kebroonitti mootii ta'eera' jedhaa" jedhaniif guutummaa gosoota Israa'el keessa dhoksaadhaan ergamoota bobbaase. ¹¹ Namoonni dhibbi lama Yerusaa'elii ba'anii Abesaaloom faana bu'an. Isaan akka keessummaatti afeeramanii cal'isaniituma deeman malee waa'ee dhimma sanaa waan tokko illee quba hin qaban ture. ¹² Abesaaloom yeroo aarsaa dhi'eessutti namichi gosa Giiloo kan Ahiitofel jedhamu, gorsaan Daawit akka magaalaa isaa Giiloodhaa dhufuuf waamsise. Kanaafuu fincilli sun jabaatee duukaa buutonni Abesaaloomis baay'achaa dhufan.

Daawit Baqachuu Isaa

¹³ Ergamaan tokkos Daawit bira dhufee, "Garaan namoota Israa'el gara Abesaaloom itti deebi'ee jira" jedhee itti hime.

¹⁴ Ergasiis Daawit qondaaltota isaa warra isa wajjin Yerusaa'el keessa turaniin akkana jedhe; "Ka'aa ni baqanna! Yoo kanaa achii tokkoon keenya iyyuu Abesaaloom jalaa hin baanu. Dafnee asii deemuu qabna; yoo kanaa achii inni ariitiidhaan dhufee nu qaqqabee nu balleessaatii; magaalattii illee goraadeedhaan dha'a."

¹⁵ Qondaaltonni mootichaas, "Nu tajaajiltoonni kee waan gooftaan keenya mootichi murteesse kam iyyuu gochuuf qophaa'oo dha" isaan jedhan.

¹⁶ Kanaafuu mootichi warra mana isaa jiraatan hunda of faana fudhatee qajelee; saajjatoowwan isaa kudha garuu akka isaan masaraa mootii eeganiif achumatti dhiise.

¹⁷ Mootichis akkasiin namoota hunda of faana fudhatee ba'e; isaanis xinnoo achi fagaatanii iddoo tokko dhadhaabatan. ¹⁸ Namoonni isaa hundinuu Kereetotaa fi Pheetota hunda wajjin mooticha dura qajeelan; akkasumas Gaatonni dhibba ja'a kanneen Gitii isa faana ba'anis fuula mootichaa dura darban.

¹⁹ Mootichis Itaayi namicha Gitii sanaa akkana jedhe; "Ati maaliif nu faana dhufta? Deebi'iitii Abesaaloom mooticha wajjin turi. Ati keessummaa biyya keetii booji'amtee dhuftee dha. ²⁰ Ati kaleessuma dhufte. Egaa ani utuun ofii kootiifuu garan dhaquu

hin beekin akka ati nu faana joortun si godhaa? Amma beenuu namoota biyya keetii fudhadhuutii deebi'i. Gara laafinnii fi amanamummaan si wajjin haa ta'an."

²¹ Itaayi garuu deebisee mootichaan, "Dhugaa WAAQAYYO jiraataatii fi du'a gooftaa koo mootichaa, jireenyas ta'u du'a taanaan ani tajaajilaan kee gara gooftaan koo mootichi deemu kam iyyuu nan deema" jedhe.

²² Daawit immoo Itaayiin, "Yoos darbii fuula duratti deemi" jedhe. Kanaafuu Itaayi namichi Gitii sun namoota isaatii fi maatii isaa kanneen isa wajjin turan hunda fudhatee deeme.

²³ Yeroo namoonni sun hundi darbanittis warri baadiyyaa jiraatan hundi sagalee ol fudhatanii boo'an. Mootichis Sulula Qeedroon ce'ee deeme; namoonni hundinuus ce'anii gara gammoojjii qajeelan.

²⁴ Zaadoqis achi ture; Lewwonna isa wajjin turan hundinuu taabota kakuu Waaqaa baatanii turan; isaanis taabota Waaqaa lafa kaa'an; Abiyaataar immoo hamma namoonni hundi magaalaa keessaa ba'anitti aarsaa dhi'esse.

²⁵ Ergasii mootichi Zaadoqiiin akkana jedhe; "Ati taabota Waaqaa fuudhiitti gara magaalatti deebi'i. Yoo ani fuula WAAQAYYOO duratti surraa argadhee jiraadhe, inni deebisee na fidee taabota sanaa fi lafa ofii jiraatu na argisiisa. ²⁶ Garuu yoo inni, 'Ani sitti hin gammanne' naan jedhe, ani qophaa'aa dha; inni waan fedhe na haa godhu."

²⁷ Mootichis Zaadoq lubichaan, "Ati nama mul'ataan waa argu mitii? Egaa ilma kee Ahiima'azin akkasumas Yoonataan ilma Abiyaataar fudhadhuutii nagaan gara magaalatti deebi'i. Atii fi Abiyaataar ilmaan keessan lamaan fudhadhaatii deemaa.

²⁸ Ani immoo hamman dhaamsa kee dhaga'utti malkaa gammoojjii keessaa bira nan tura." ²⁹ Kanaafuu Zaadoqii fi Abiyaataar taabota Waaqaa sana fuudhanii Yerusaalemitti deebi'anii achuma turan.

³⁰ Daawit garuu Gaara Ejersaatti ol ba'e; yeroo ol ba'uttis boo'aa deemaa ture; innis mataa isaa haguugatee kophee malee deema ture. Namoonni isa wajjin turan hundinuus mataa isaanii haguuggatanii boo'aa deemu turan. ³¹ Yeroo kanatti, "Ahiitofelis warra Abesaaloom wajjin fincilan keessaa tokkoo dha" jedhamee Daawititti himame. Kanaafuu Daawit, "Yaa WAAQAYYO, gorsa Ahiitofel sana jalaa busheessi" jedhee Waaqa kadhate.

³² Yeroo Daawit iddoo wal ga'ii iddoo itti namoonni Waaqa waaqeffatan ga'ettis Huushaayi namichi gosa Arkii sun wandaboo ofii tarsaasee daaraa mataatti firfirfatee isa simachuuf ba'e. ³³ Daawitis akkana jedheen, "Ati yoo na wajjin deemte ba'aa natti taata. ³⁴ Garuu yoo gara magaalatti deebitee Abesaaloomiin, 'Yaa mootii, ani duraan garbicha abbaa keetiiin ture; amma garuu garbicha kee nan ta'a' jettee gorsa Ahiitofel busheessite na gargaaru dandeessa. ³⁵ Zaadoqii fi Abiyaataar luboonni suma wajjin achi jiraatu mitii? Ati waan masaraa mootiitii dhageessu hunda isaanitti himi. ³⁶ Ilmaan isaanii lamaan Ahiima'az ilmi Zaadoqii fi Yoonataan ilmi Abiyaataar isaanuma wajjin achi jiraatan. Ati waan dhageessu hunda harka isaanitiin naa ergi."

³⁷ Kanaafuu Huushaayi michuun Daawit utuma Abesaaloom Yerusaalem seenaa jiruu achi ga'e.

16

Daawitii fi Ziibaa

¹ Daawit fiixee gaarichaa darbee xinnoo erga deeme booddee Ziibaan tajaajilaan Mefiibooshet harroota lamatti buddeena dhibba lama, bixxillee ija wayinii dhibba tokko, bixxillee ija harbuu dhibba tokkoo fi daadhii wayinii qalqalloo tokko fe'ee isa simachuuf itti dhufe.

² Mootichis, "Kana hunda maaliif fidde?" jedhee Siibaa gaafate.

Ziibaan immoo, "Harroota akka maatiin mootichaa Yaabbataniif, buddeena fi bixxillee ija wayinii akka namoonni nyaataniif, daadhii wayinii immoo akka warri gammoojjii keessatti dadhaban ittiin bayyanataniif" jedhee deebise.

³ Mootichis, "Ilmi ilma gooftaa keetii eessa jira?" jedhee gaafate.

Ziibaan immoo deebisee, "Inni waan, 'Manni Israa'el har'a mootummaa akaakayyuu kootii naa deebisa' jedhee yaaduuf Yerusaalem keessa jiraata" jedhe.

⁴ Mootichis Ziibaadhaan, "Wanni kan Mefiibooshet ta'e hundinuu amma kan kee ti" jedhe.

Ziibaanis, "Ani akkan fuula gooftaa kootii, fuula mootichaa duratti surraa argadhuuf ofi qabeen si kadhada" jedhe.

⁵ Akkuma Daawit mootichi Bahuuriim ga'een namichi balbala maatii Saa'ol tokko itti dhufe. Maqaan isaas Shime'ii ilma Geeraa ti; namichi kunis Daawitin abaaraa gad ba'e. ⁶ Innis utuma qondaaltonnii fi waardiyyoonni Daawit hundinuu mirgaa fi bitaan Daawitin marsanii jiranuu hunda isaaniitti dhagaa darbachaa ture. ⁷ Shime'iinis akkana jedhee isa abaaraa ture; "Asii ba'i; asii ba'i; ati nama dhiigaa ti; namicha hamaa nana! ⁸ WAAQAYYO dhiiga mana Saa'ol kan ati iddoo isaa buutee moote sanaa hundaaf gatii kee siif kenneera. WAAQAYYO mootummaa kee sirraa fuudhee ilma kee Abesaaloomiif kenneera. Ati sababii nama dhiigaa taateef ni badda!"

⁹ Abiishaayi ilmi Zeruuyaa mootichaan, "Sareen du'aan kun maaliif gooftaa koo mooticha abaara? Ani dhaqeen mataa isaa irraa kuta" jedhe.

¹⁰ Mootichi garuu akkana jedhe; "Yaa ilmaan Zeruuyaa, anii fi isin maal wal irraa qabna? Yoo inni sababii WAAQAYYO, 'Ati Daawitin abaari' isaan jedheef na abaare eenyutu, 'Ati maaliif waan kana goota?' jedhee isa gaafachuu danda'a?"

¹¹ Ergasii Daawit Abiishaayii fi qondaaltota isaa hundaan akkana jedhe; "Ilmi koo kan gudeeda kootii ba'e iyyuu lubbuu koo balleessuu barbaada. Yoo namichi gosa Beniyaam kun hammam kana caalaa hin goone ree! Isa dhiisaa; waan WAAQAYYO isa ajajeef inni na haa abaaru. ¹² Tarii WAAQAYYO dhiphina koo argee abaarsa ani har'a abaaramaa jiru kana waan gaariitti naa geeddara ta'aa."

¹³ Kanaafuu Daawitii fi namoonni isaa karaa isaanii itti fufan; Shime'iin immoo isa abaaraa, dhagaa itti darbachaa, awwaaras itti bittinneessaa fuullee isaatiin gaara cina deemaa ture. ¹⁴ Mootichii fi namoonni isa wajjin turan hundi dadhabbii guddaadhaan dhufanii achitti aara galfatan.

Gorsa Kusiitii fi Ahiitofel

¹⁵ Yeroo kanattis Abesaaloomii fi namoonni Israa'el hundi gara Yerusaaalem dhufan; Ahiitofelis isa wajjin ture. ¹⁶ Huushaayi namichi gosa Arkii michuun Daawit sun Abesaaloom bira dhaqee, "Yaa mootii bara baraan jiraadhu! Yaa mootii bara baraan jiraadhu!" jedheen.

¹⁷ Abesaaloomis, "Jaalalli ati michuu keetiif qabdu kanaa? Ati maaliif michuu kee wajjin hin deemne?" jedhee Huushaayin gaafate.

¹⁸ Huushaayi immoo Abesaaloomiin akkana jedhe; "Lakki; ani kan nama WAAQAYYO, sabni kunii fi namoonni Israa'el hundi filatanii nan ta'a; isa wajjinis nan jiraadha. ¹⁹ Kanaa achi ani eenyutu tajaajila? Ani ilma tajaajiluu hin qabuu? Ani akkuman abbaa kee tajaajila sana si'i illee nan tajaajila."

²⁰ Abesaaloomis Ahiitofeliin, "Mee nu gorsi. Nu maal gochuu qabna?" jedhe.

²¹ Ahiitofelis deebisee, "Ol seeniitii saajjatoowwan abbaa keetii kanneen inni akka isaan masaraa mootii eeganiif dhiisee biraa deeme wajjin ciisi. Ergasii Israa'eloonni hundi akka ati abbaa kee jibbite dhaga'ani, harki warra si wajjin jiran hundaas ni jabaataa" jedheen. ²² Kanaafuu bantii manaa irra Abesaaloomiif dunkaana dhaaban; innis Israa'eloota hunda duratti saajjatoowwan abbaa isaa wajjin ciise.

²³ Bara sanatti gorsi Ahiitofel kennaa ture akkuma waan namni tokko Waqa gaafatuutti ilaalama ture. Akki itti Daawitis ta'u Abesaaloom gorsa Ahiitofel hunda dhaga'aa turan kanaa dha.

17

¹ Ahiitofelis Abesaaloomiin akkana jedhe; "Ani namoota kuma kudha lama filadhee halkanuma kana Daawitin nan ari'a. ² Anis yeroo inni dadhabee laafutti isa nan dha'a. Sodaa itti buusee akka namoonni isa wajjin jiran hundis baqatan nan godha. Ani mooticha qofa dha'ee ³ namoota isaa hundas deebisee sittin fida. Duuti namicha ati barbaaddu sanaa deebi'uu nama hundaa ti jechuu dha; ergasii namoonni hundinuu nagaan jiraatu." ⁴ Karoorri kunis Abesaaloomii fi maanguddoota Israa'el hundatti waan gaarii fakkaate.

⁵ Abesaaloom garuu, "Mee Huushaayi namicha gosa Arkii sanas waamaatii waan inni jedhu haa dhageenyu" jedhe. ⁶ Abesaaloom yeroo Huushaayi isa bira dhufetti, "Ahiitofel gorsa kana nuu kenneera. Waan inni jedhe kana haa goonuu? Yoo ta'uu baate immoo yaada kee nuu kenni" jedheen.

⁷ Huushaayis deebisee Abesaaloomiin akkana jedhe; "Gorsi Ahiitofel kenne yeroo kanatti gaarii miti. ⁸ Ati abbaa keetii fi namoota isaa ni beekta; isaan loltootaa fi warra akkuma amaaketa ilmaan ishee jalaa fudhatamteetti nama sodaachisanii dha. Kana irratti abbaan kee muuxannoo waraanaa guddaa qaba; inni halkan halkan loltoota bira hin bulu. ⁹ Amma illee inni holqa keessa yookaan lafa biraa dhokatee jira ta'a. Yoo inni duraan dursee loltoota kee dha'e, namni waa'ee kanaa dhaga'u kam iyyuu,

'Loltoonni Abesaaloom duuka bu'an ni dhuman' jedhee odeessa. ¹⁰ Ergasii immoo sababii Israa'eloonni hundinuu akka abbaan kee nama waraanaa ta'ee fi akka warri isa wajjin jiranis jajjaboo ta'an beekaniif loltoonni ciccimoon warri onneen isaanii akka onnee leencaa ta'e sodaadhaan dhuman.

¹¹ "Egaa wannii ani si gorsu kana: Israa'eloonni lakkoobsi isaanii akka cirracha qarqara galaanaa baay'atu kanneen Daanii hamma Bersheebaatti argaman hundi si biratti walitti haa qabamaniitii ati isaan dura bu'ii lolatti seeni. ¹² Akkasiin lafa inni jirutti isa dhoofna; akkuma Fixeensi ganamaa lafa irra bu'uttis isa irra buuna. Innis ta'u namoonni isaa tokko iyyuu lubbuun hin hafan. ¹³ Yoo inni gara magaalaa sanaatti baqates, Israa'eloonni hundinuu funyoo fidanii hamma dhagaan xinnaan tokko hin hafnetti magaalaa sana gara sululaatti harkifna."

¹⁴ Abesaaloomii fi Israa'eloonni hundinuu, "Gorsa Ahiitofel caalaa gorsa Huushaayi namicha gorsa Arkii sanaatu wayya" jedhan. WAAQAYYO Abesaaloomitti badiisa fiduuf jedhee gorsa Ahiitofel gaarii sana faayidaa dhabsiiseeraatii.

¹⁵ Huushaayis akkana jedhee Zaadoqii fi Abiyaataar lubootatti hime; "Ahiitofel, 'Akkasii fi akkas godhaa' jedhee Abesaaloomii fi maanguddoota Israa'el gorsee ture; ani garuu, 'Akkanaa fi akkana godhaa' jedheen isaan gorse. ¹⁶ Amma gara Daawititti ergamoota ergaatii, 'Ati halkan kana holqawwan gammoojjii keessa hin bulin; utuu hin turin ce'ii deemi; yoo kanaa achii mootichii fi namoonni isa wajjin jiran hundinuu ni liqimfamtu' jedhaa itti himaa."

¹⁷ Yeroo sanattis Yoonataanii fi Ahiima'az iddoo Een Roogel jedhamu turan. Intalli xomboreen tokko dhaqxee isaanitti himti turte; isaan immoo dhaqanii Daawit mootichatti himu turan; isaan akka yeroo magaalaa seenanitti hin argamneef of eeggachaa turaniitii. ¹⁸ Garuu dargaggeessi tokko isaan argee Abesaaloom itti hime. Kanaafuu lamaan isaanii iyyuu dafanii achii ba'anii mana namicha Bahuriim keessa jiraatu tokkoo seenan. Namichi kunis dallaa isaa keessaa boolla qaba ture; isaanis boolla sana keessa lixan. ¹⁹ Niitiin namicha sanaas afaan boolichaa gubbaa waa diriirsitee midhaan achi irra afte. Namni tokko iyyuu waan kana hin beekne.

²⁰ Namoonni Abesaaloom yommuu dubartittii bira mana dhufanitti, "Ahiima'azii fi Yoonataan meerre?" jedhanii gaafatan.

Dubartittiinis, "Isaan laga ce'anii deemaniiru" jettee isaaniif deebifte. Jarris barbaadanii isaan dhaban; kanaafuu Yerusaalemitti deebi'an.

²¹ Erga namoonni Abesaaloom deemanii booddee Ahiima'azii fi Yoonataan boolla keessaa ol ba'anii Daawit mootichatti himuu dhaqan. Isaanis, "Ammuma kana ka'iitii laga ce'i; Ahiitofel, 'Akkasii fi akkas godhaa' jedhee sirratti isaan gorseeraa" jedhaniin.

²² Kanaafuu Daawitii fi namoonni isaa hundi ka'anii Yordaanosin ce'an. Yeroo lafti bariitetti namni utuu Yordaanosin hin ce'in hafe tokko iyyuu hin turre.

²³ Ahiitofelis yommuu akka gorsi isaa fudhatama dhabe beeketti harree isaa fe'atee gara magaalaa iddoo mana jireenya isaatti qajelee. Innis erga mana isaa tottoofatee booddee of fannise. Akkasiinis du'ee awwaala abbaa isaa keessatti awwaalame.

²⁴ Daawit gara Mahanayyim deeme; Abesaaloom immoo namoota Israa'el hunda wajjin Yordaanosin ce'e. ²⁵ Abesaaloomis Amaasaa qooda Yoo'aab ajajaa loltootaa godhee muude; Amaasaan kun ilma namicha gosa Israa'el kan Yitraa jedhamu isa Abiigayil haadha Yoo'aab, obboleettii Zeruuyaa, intala Naa'aash sana fuudhee ture. ²⁶ Israa'eloonnii fi Abesaaloom biyya Gili'aad keessa qubatan.

²⁷ Yommuu Daawit Mahanayyim ga'ettis, Shoobiin ilmi Naahaash namichi gosa Amoon kan Rabbaadhaa dhufe, Maakiir ilmi Amii'eel kan Lodebaarii dhufee fi Barzilaayin namichi gosa Gili'aad kan Rogeliimii dhufe ²⁸ afata, waciitii fi mi'oota suphee irraa hojjetaman fidan. Akkasumas akka isaan nyaataniif gamadii fi garbuu, daakuu fi akaayii, baagelaa fi misira, ²⁹ dammaa fi ittuttuu, hoolotaa fi baaduu aannan loon Daawitii fi namoota isaatiif fidan. Isaanis, "Namoonni lafa gammoojjiitti beela'aniiru, dadhabaniiru, dheebotaniirus" jedhanii turaniitii.

18

Abesaaloom Du'uu Isaa

¹ Daawit namoota isa wajjin turan lakkaa'ee ajajjuuwwan kumaatii fi ajajjuuwwan dhibbaa muudeef. ² Daawitis harka sadii keessaa harka tokko ajaja Yoo'aab jalatti, harka tokko ajaja Abiishaayi obboleessa Yoo'aab ilma Zeruuyaa jalatti, harka tokko immoo ajaja Itaayii namicha Gitii jalatti hiriirsee bobbaase. Mootichis loltootaan, "Ani mataan koo dhugumaan isin wajjin nan ba'a" jedhe.

³ Namoonni garuu akkana jedhaniin; “Ati deemuu hin qabdu; yoo nu baqachuuf dirqamne isaan waa’ee keenya dhimma hin qaban; yoo walakkaan keenyas dhumne isaaniif homaa miti; ati garuu nama akka keenyaa kuma kudhan caalta. Kanaafuu ati yoo magaalaa keessa turtee nu gargaarte wayya.”

⁴ Mootichis, “Ani waan gaarii isinitti fakkaate kam iyyuu nan godha” jedhee deebise. Kanaafuu mootichi yeroo loltoonni hundi garee dhibbaatii fi garee kumaatiin qajeelanitti karra bira dhaabachaa ture. ⁵ Mootichis Yoo’aab, Abiishaayii fi Itaayiin, “Anaaf jedhaatii Abesaaloom dargaggeessichaaf garaa laafaa” jedhee ajaje. Loltoonni hundinuus ajaja Daawit waa’ee Abesaaloom ajajjootaaf kenne dhaga’an.

⁶ Loltoonnis Israa’elin waraanuuf dirree waraanaatti ba’an; lollis bosona Efreem keessatti ka’e. ⁷ Achittis loltoonni Israa’el loltoota Daawitiin dha’aman; hubaatiin gaafasiis akka malee guddaa ture; namoota kuma digdamatu dhume. ⁸ Lolli sunis guutummaa baadiyyaatti babal’ate; namoota goraadeen fixe caalaa kan bosonni liqimsee hambisetu baay’ata.

⁹ Abesaaloom yeroo kanatti akka tasaa namoota Daawititti dhufe. Innis gaangoo isaa yaabbatee deemaa ture; utuma gaangoon isaa dameelee gobbuu qilxuu guddaa tokkoo jala darbaa jirtuu mataan Abesaaloom muka keessatti qabame. Innis qilleensa irratti rarra’ee hafe; gaangoon inni yaabbatee ture sun garuu deemsa ishee ittuma fufte.

¹⁰ Namichi tokko yommuu waan kana argetti, “Ani akka Abesaaloom muka qilxuutti rarra’ee jiru ammuma argeera” jedhee Yoo’aabitti hime.

¹¹ Yoo’aabis namicha waan kana isatti himeen, “Maal jetta! Ati isa argiteertaa? Maaliif achumatti rukuttee lafaan isa dha’uu dhiifte? Silaa ani meetii saqilii kudhanii fi sabbata jagnummaa sin badhaasa turee” jedhe.

¹² Namichi sun garuu, akkana jedhee deebise; “Utuu saqiliin kuma tokko harka kootti naaf safaramee iyyuu ani ilma mootiitti harka koo ol hin fudhadhu. Mootichi utuu nu dhageenyuu si’i, Abiishaayii fi Itaayiin, ‘Anaaf jedhaatii Abesaaloom dargaggeessicha eegaa’ jedhee ajajeera. ¹³ Karaa biraa immoo utuu ani kutadhee lubbuu isaa balleessee, sababii wanti mooticha duraa dhokatu tokko iyyuu hin jirreef ati mataan kee iyyuu natti hin dhi’aattu ture.”

¹⁴ Yoo’aabis, “Kana booddee ani haala kanaan si wajjin yeroo balleessuu hin qabu” jedhe. Kanaafuu ankaasee sadii harkatti qabatee utuma Abesaaloom muka qilxuutti rarra’ee lubbuun jiruu garaa isaatti dire. ¹⁵ Warri Yoo’aabiif mi’a lolaa baatan kurnanis itti naanna’anii Abesaaloomin dha’anii ajjeesan.

¹⁶ Kana irratti Yoo’aab malakata afuufe; loltoonnis sababii inni isaan dhowweef Israa’elin ari’uu ni dhiisan. ¹⁷ Isaanis reeffa Abesaaloom fuudhanii bosona keessatti boolla guddaa tokkotti darbatanii dhagaa gurguddaa isa irra tuulan. Yeroo kanatti Israa’eloonni hundi gara mana isaaniitti baqatan.

¹⁸ Abesaaloom yeroo lubbuun turetti, “Ani ilma maqaa koo waamsisu hin qabu” jedhee iddoo Sulula Mootii jedhamutti yaadannoo ofiitiif soodduu dhaabbate. Soodduu sanas maqaa ofii isaatiin moggaase. Hamma har’aatti illee soodduun sun Soodduu Abesaaloom jedhamee waamama.

Gadda Daawit

¹⁹ Ahiima’az ilmi Zaadoq, “Ani dhaqee akka WAAQAYYO harka diinota isaa jalaa isa baase mootichatti nan hima” jedhe.

²⁰ Yoo’aab immoo, “Namni har’a dhaqee himu si’ii miti; sababii ilmi mootichaa du’eef ati yeroo biraa dhaqxee itti himta; garuu har’a waan kana gochuu hin qabdu” jedheen.

²¹ Ergasiis Yoo’aab Kuushiidhaan, “Dhaqiitii waan argite mootichatti himi” jedhe. Kuushiinis fuula Yoo’aab duratti gad jedhee harka fuudhee fiigaa qajelee.

²² Ahiima’az ilmi Zaadoq ammas Yoo’aabiin, “Wanni fedhe haa dhufu; maaloo anis Kuushii faana nan fiiga” jedhe.

Yoo’aab garuu, “Yaa ilma ko, ati maaliif dhaquu barbaadda? Ati oduu badhaasa siif kennisiisu tokko iyyuu hin qabdu” jedheen.

²³ Inni immoo, “Wanni fedhe haa dhufu; ani fiiguu nan barbaada” jedhe.

Kanaafuu Yoo’aab, “Fiigi!” jedheen. Ergasii Ahiima’az karaa dirreetiin fiigee Kuushii bira darbe.

²⁴ Adoo Daawit karra alaatii fi kan keessaa gidduu taa’ee jiruu eegduun karaa dhaaba gubbaa manaatiin karaatti ol ba’e. Innis achi ilaalee nama kophaa isaa fiigu tokko arge.

²⁵ Eegduun sunis mooticha waamee waan kana itti hime.

Mootichis, “Inni yoo kophaa isaa ta’e, oduu gaarii fiduu qaba” jedhe. Namichi sunis dhi’aachaa dhufe.

²⁶ Ergasiis eegduun sun utuu namni biraa fiiguu argee eegduu karraa waamee, “Kunoo namni biraa tokko kophaa isaa fiigaa jira!” jedheen.

Mootichis, “Innis oduu gaarii fiduu qaba” jedhe.

²⁷ Eegduun sunis, “Inni jalqabaa waan akka Ahiima’az ilma Zaadoqitti fiigu natti fakkaata” jedhe.

Mootichi immoo, “Inni nama gaarii dha; oduu gaarii fidee dhufa” jedhe.

²⁸ Ahiima’az mooticha waamee, “Wanni hundinuu gaarii dha” jedhe; fuula mootichaa durattis addaan lafatti gombifamee, “WAAQAYYO Waaqni kee galata haa argatu; inni warra gooftaa koo mootichatti harka isaanii ol fudhatan dabarsee kenneeraatii” jedhe.

²⁹ Mootichi immoo, “Abesaaloom dargageessichi jalaa ba’eeraa?” jedhee gaafate.

Ahiima’azis, “Yeroo Yoo’aab garbicha mootichaatii fi ana garbicha kee erguuf ka’etti raafama guddaatu ture. Garuu wannu sun maal akka ta’e ani hin beeku” jedhee deebise.

³⁰ Mootichis, “As hiiqii dhaabadhu” jedhe. Kanaafuu inni achi hiiqee dhaabate.

³¹ Ergasiis Kuushiin dhufee, “Gooftaa koo yaa mootii, oduu gammachiisaa dhaga’i! WAAQAYYO har’a warra sitti ka’an hunda jalaa si baaseera” jedhe.

³² Mootichis Kuushiidhaan, “Abesaaloom dargageessichi jalaa ba’eeraa?” jedhee gaafate.

Kuushiinis, “Diinonni gooftaa koo mootichaatii fi warri si miidhuuf sitti ka’an hundi akkuma dargageessa sanaa haa ta’an” jedhee deebise.

³³ Mootichi ni hollate. Kutaa manaa kan karra duraa gubbaattis ol ba’ee boo’e. Yommuu ol ba’uttis, “Yaa ilma koo Abesaaloom! Ilma ko, ilma koo Abesaaloom! Utuu qooda kee ani du’ee jiraadhee; yaa Abesaaloom ilma ko, yaa ilma ko!” jedhe.

19

¹ Yoo’aabbittis, “Daawit mootichi Abesaaloomiif boo’uu fi gadduutti jira” jedhamee himame. ² Sababii guutummaan loltootaa oduu, “Mootichi ilma isaatiif gaddaa jira” jedhu dhaga’eef mo’ichi gaafa sanaa gaddatti geeddarame. ³ Gaafa sana sabni hundis akkuma loltoota mo’atamanii qaana’uudhaan baqatanii magaalaa seenaniitti qaana’ee magaalaa seene. ⁴ Mootichis fuula isaa haguuggatee, “Yaa ilma koo Abesaaloom! Yaa Abesaaloom ilma ko, yaa ilma koo!” jedhee sagalee ol fudhatee boo’e.

⁵ Yoo’aab gara mootichaa mana ol seenee akkana jedhe; “Ati har’a fuula namoota kee kanneen lubbuu kee, lubbuu ilmaan keetiitii fi intallan keetii, lubbuu niitota keetiitii fi saajjatoowwan keetii oolchan sana hundaa qaaniidhaan haguugdeerta. ⁶ Ati warra si jibban jaallatte warra si jaallatan immoo jibbiteerta. Ati akka ajajjoota loltoota keetiitii fi namoota isaanii wayittuu hin hedne har’a mirkaneessiteera. Har’a utuu hundi keenya duunee Abesaaloom jiraatee ati akka gammaddu ani nan arga. ⁷ Amma gad ba’iitii namoota kee jajjabeessi. Yoo ati gad ba’uu baatte akka edana namni tokko iyyuu si biratti hin hafne ani maqaa WAAQAYYOOTIIN nan kakadha. Kun immoo rakkina ati ijoollummaa keetii jalqabdee hamma ammaatti keessa dabarte hunda caalaa hammaata.”

⁸ Kanaafuu mootichi ka’ee karra dura taa’e. Namoonni hundinuus yommuu, “Mootichi karra dura taa’ee jira” jedhamee itti himametti isa bira dhufan.

Yeroo sanatti Israa’eloonni hundi gara mana isaaniitti baqatanii turan.

Daawit Yerusaaleemitti Deebi’e

⁹ Guutummaa gosoota Israa’el keessatti namoonni hundinuu akkana jedhanii wal falmaa turan; “Mootichi harka diinota keenyaa jalaa nu baaseera; namni harka Filixseemotaa jalaa nu baases isuma. Amma garuu inni sababii Abesaaloomiitiif biyyaa baqateera; ¹⁰ Abesaaloom inni nu akka inni bulchaa keenya ta’uuf jennee dibne sun immoo lola irratti du’eera. Kanaafuu waa’ee mooticha as deebisuu irratti isin maaliif waan tokko hin mari’anne?”

¹¹ Daawit mootichis akkana jedhee ergaa kana Zaadoqii fi Abiyaataar lubootatti erge; “Akkana jedhaatii maanguddoota Yihuudaa gaafadhaa; ‘Wanni guutummaa Israa’el keessatti odeeffamaa jiru gurra mootichaa qaqqabeeraatii isin maaliif mooticha mana mootummaa isaatti deebisuu irratti duubatti haftani? ¹² Isin obboloota koo, foon kootii fi dhiiga koo ti; yoo mooticha fiduu irratti maaliif duubatti harkifattan ree?” ¹³ Amaasaanis, “Ati foonii fi dhiiga koo mitii? Yoo ani ammaa jalqabee iddoo Yoo’aab ajajaa loltoota koo si gochuu baadhe, Waaqni waan hamaa natti haa fidu; waan caalu illee natti haa fidu.”

¹⁴ Mootichis akkuma garaa nama tokkootti garaa namoota Yihuudaa hundaa booji’e. Isaanis, “Namoota kee hunda wajjin deebi’i” jedhanii mootichatti ergan. ¹⁵ Mootichis biyyatti deebi’ee hamma Yordaanositti dhufe.

Namoonni Yihuudaas mooticha simatanii Yordaanosin ceesisanii fiduuf hamma Gilgaalitti dhufan. ¹⁶ Shime'iin namichi Bahuuriim ilmi Geeraa kan gosa Beniyaam sunis mooticha simachuuf namoota Yihuudaa wajjin dafee gad bu'e. ¹⁷ Isa wajjinis Beniyaamota kuma tokko akkasumas Ziibaa tajaajilaa maatii Saa'ol, ilmaan isaa kudha shananii fi hojjetoota isaa digdamatu ture. Isaanis mooticha dursanii Yordaanosin ce'an. ¹⁸ Isaanis maatii mootichaa simachuu fi waan inni barbaadu isaaf gochuuf malkaa ce'an.

Shime'iin ilmi Geeraa yommuu Yordaanosin ce'etti mooticha duratti kufee ¹⁹ akkana isaan jedhe; "Gooftaan koo balleessaa natti hin herregin. Balleessaa garbichi kee yeroo ati gooftaan koo mootichi Yersaaleemii baatetti hojjete garaatti hin qabatin. Mootichi waan sana yaada isaa keessaa haa baasu. ²⁰ Ani garbichi kee cubbuu hojjechuu koo beekaatii; har'a garuu ani mana Yoosef hunda keessaa gooftaa koo mooticha simachuuf nama jalqabaa ta'ee dhufeera."

²¹ Abiishaayi ilmi Zeruyyaas, "Shime'iin sababii nama WAAQAYYO dibe abaareef amma du'uun isaaf hin malu?" jedhe.

²² Daawit immoo deebisee, "Yaa ilmaan Zeruyyaa anii fi isin maal wal irraa qabna? Isin yeroo ammaa diinota natti taataniirtu! Har'a namni tokko iyyuu Israa'el keessatti ajjeefamuu qabaa? Ani guyyaa har'aa Israa'el irratti mootii ta'uu koo hin beekuu?" jedhe. ²³ Kanaafuu mootichi Shime'iidhaan, "Ati du'uu hin qabdu" jedhe. Kanas kakaadhaan mirkaneesseef.

²⁴ Mefiibooshet akaakayyuun Saa'olis mooticha simachuuf gad bu'e. Inni gaafa mootichi Yersaaleemii ba'ee jalqabee hamma mootichi deebi'utti miilla isaatiif eegumsa barbaachisaa hin goone yookaan areeda hin haaddanne yookaan uffata isaa hin miicanne ture. ²⁵ Yeroo inni mooticha simachuuf Yersaaleemii dhufettis mootichi, "Mefiibooshet, ati maaliif na wajjin hin deemne?" jedhee isa gaafate.

²⁶ Innis akkana jedhee deebise; "Yaa gooftaa koo mooticha, ani garbichi kee waanan naafa ta'eef, 'Akka ani yaabbadhee mooticha faana deemuu danda'uuf harreen koo naaf haa fe'amu' jedheen ture. Ziibaan tajaajilaan koo garuu na gowwoomse. ²⁷ Inni gooftaa koo mooticha durattis garbicha kee maqaa balleesseera; gooftaan koo mootichi akkuma ergamaa Waaqayyoo ti; kanaafuu waan barbaadde hunda godhi. ²⁸ Silaa wanni maatiin abbaa kootii hundinuu mooticha irraa argachuu malan du'a qofa ture. Ati garuu ana garbicha kee warra maaddii kee irraa nyaatan wajjin teessifte. Kana caalaa wanni ani akka naa godhamuuf mooticha gaafachuuf mirga qabu maalii?"

²⁹ Mootichis, "Maaliif dubbii dheeressita? Ani akka atii fi Ziibaan lafa hunda gargar gooddattan ajajeera" jedheen.

³⁰ Mefiibooshet immoo mootichaan, "Amma erga gooftaan koo mootichi nagaan deebi'ee inni waan hunda haa fudhatu" jedhe.

³¹ Namichi gosa Gili'aad kan Barzilaay jedhamu tokkos Rogeliimii gad bu'e; innis mooticha geggeessuuf isa wajjin Yordaanos ce'e. ³² Barzilaayin jaarsa dulloomaa waggaa saddeettama ture. Innis waan nama sooreessa tureef yeroo mootichi Mahanayyiim jiraatetti waan inni nyaatu dhi'eessaafii ture. ³³ Mootichis Barzilaayin, "Gamatti na wajjin ce'iitii na wajjin Yersaalem jiraadhu; anis sin sooraa" jedhe.

³⁴ Barzilaayin garuu mootichaan akkana jedhe; "Ani si'achi waggaa hammam jiraachuufan mooticha wajjin Yersaalem dhaqa? ³⁵ Ani yeroo ammaa waggaa saddeettama guuteera. Ani waan gaarii fi waan hamaa addaan baasuu nan danda'aa? Garbichi kee mi'aa nyaataa fi dhugaatii beekaa? Ammas sagalee dhiirotaatii fi dubartoota sirbanii dhaga'uu danda'aa? Yoos garbichi kee maaliif gooftaa koo mootichatti ba'aa dabalamaa ta'a ree? ³⁶ Garbichi kee mooticha wajjin Yordaanos ce'e xinnoo ishee ni deema; mootichi garuu maaliif haala kanaan galata naaf deebisa? ³⁷ Akka ani yoon du'e magaaluma kooti awwaala abbaa fi haadha koo biratti awwaalamuuf garbicha kee dhiisi haa deebi'u. Garbichi kee Kimhaam garuu kunoo ti. Inni gooftaa koo mooticha wajjin haa ce'u. Atis waan jaallattu kam iyyuu isaaf godhi."

³⁸ Mootichis, "Kimhaam na wajjin ni ce'a; anis waan ati jaallattu kam iyyuu isaaf nan godha; waan ati narraa barbaaddu kam iyyuus siif nan godha" jedhe.

³⁹ Akkasiin namoonni hundinuu Yordaanosin ce'an; mootichis ni ce'e. Mootichis Barzilaayii dhungatee eebbise; Barzilaayinis gara mana isaatti deebi'e.

⁴⁰ Yommuu mootichi gara Gilgaalitti darbetti Kimhaam isa wajjin deeme. Loltoonni Yihuudaa hundinuu fi walakkaan loltoota Israa'el mooticha ceesisan.

⁴¹ Yommuu suma namoonni Israa'el hundinuu gara mootichaa dhufanii, "Obbloonni keenya warri Yihuudaa maaliif nu dhoksanii mootichaa fi maatii isaa, duukaa buutota isa wajjin Yordaanosin ceesisanii fidani?" jedhaniin.

⁴² Namoonni Yihuudaa hundis deebisanii namoota Israa'eliin, "Nu waan mootichi fira dhiigaa nuuf ta'eef waan kana goone. Isin waa'ee waan kanaa maaliif aartu? Nu waan mootichaa keessaa tokko illee nyaanneerraa? Waan tokko illees ofii keenyaaf fudhanneerraa?" jedhan.

⁴³ Kana irratti namoonni Israa'el namoota Yihuudaatiin, "Nu mooticha irraa qooda harka kudhan qabna; kana malees nu isin caalaa Daawit irraa mirga qabna. Yoo isin maaliif akkas nu tuffattu ree? Akka mootiin keenya nuuf deebi'uuf kan duraan dursinee gaafanne nu mitii?" jedhanii deebisan.

Garuu deebii namoonni Yihuudaa deebisan kan Israa'elootaa irra jabaa ture.

20

Saabe'een Daawititti Finciluu Isaa

¹ Yeroo kanatti namichi dabaan Shebaa jedhamu, ilmi Biikrii namicha gosa Beniyaam tokko achi ture. Innis malakata afuufee sagalee guddaan akkana jedhee iyye; "Nu Daawit irraa qooda hin qabnu;

ilma Isseey irraa dhaala tokko illee hin qabnu!

Yaa Israa'el, tokkoon tokkoon namaa gara dunkaana isaatti!"

² Kanaafuu namoonni Israa'el hundinuu Shebaa ilma Biikrii sana duukaa bu'uuf jedhanii Daawit irraa garagalan. Namoonni Yihuudaa garuu Yordaanosii hamma Yerusaalemitti mootii isaanii wajjin deeman.

³ Daawitis yommuu masaraa isaa kan Yerusaalem keessaatti deebi'etti, saajjatoowwan isaa kurnan akka isaan masaraa eeganiif dhiisee biraa deeme sana fuudhee mana tokkotti galchee akka isaan eegaman godhe. Inni waan isaan nyaatan kenneef malee isaan wajjin hin ciifne. Isaanis hamma gaafa du'aniitti akka nuutota dhirsooni irraa du'aniitti kophaa jiraatan.

⁴ Ergasiis mootichi Amaasaadhaan, "Namoota Yihuudaa guyyaa sadii keessatti walitti naa qabi; atis asitti argami" jedhe. ⁵ Amaasaan garuu yommuu namoota Yihuudaa waamuu deemetti yeroo mootichi isaaf kenne caalaa ture.

⁶ Daawitis Abiishaayidhaan, "Shebaan ilmi Biikrii miidhaa Abesaaloom nu miidhe sana caalaa nu miidha. Ati namoota gooftaa keetii fudhadhuutii isa ari'i; yoo kanaa achii inni magaalaa da'annoo qabu argatee nu jalaa miliqa" jedhe. ⁷ Kanaafuu namoonni Yoo'aabii fi Kereetonnii, Pheletonnii fi namoonni waraanaa jajjatoon hundi ajaja Abiishaayi jalatti hiriirani qajeelan. Isaanis Yerusaaleemii ka'anii Shebaa ilma Biikrii sana ari'uuf qajeelan.

⁸ Utuma isaan Gibe'oon keessa kattaa guddaa bira jiranuu Amaasaan isaan simachuuf dhufe. Yoo'aab uffata isaa kan waraanaa uffate; qalqalli goraadeen isaa keessa jirus sabbataan mudhii isaatti hidhamee ture. Akkuma inni gara fuula duraatti tarkaanfateenis goraadichi qalqala isaa keessaa lafa bu'e.

⁹ Yoo'aabis Amaasaan, "Yaa obboleessoo, akkam jirta?" jedhe. Kana irratti Yoo'aab isa dhungachuuf harka isaa mirgaatiin hareeda Amesaa qabate. ¹⁰ Amesaa akka Yoo'aab goraadee harkaa qabu hin hubanne ture; kanaafuu Yoo'aab goraadee sana gara isaatti dire; mar'umaan isaas lafatti jige. Amaasaanis utuu lammata hin waraanamin du'e. Ergasii immoo Yoo'aabii fi obboleessi isaa Abiishaayi Shebaa ilma Biikrii sana ari'an.

¹¹ Namoota Yoo'aab keessaa inni tokko Amesaa bira dhaabatee, "Namni Yoo'aabin jaallatu, kan garee Daawit ta'e hundi Yoo'aabin duukaa haa bu'u!" jedhe. ¹² Yeroo kanatti reeffi Amaasaa dhiigaan faalamee karaa irra ciisa ture; namichi tokkos akka loltoonni hundi achi dhadhaabatan arge. Innis yommuu akka warri gara Amesaa dhufan hundi dhadhaabatan argetti karaa irraa gara lafa qotiisaatti isa harkisee wayyaa irra buuse. ¹³ Erga reeffi Amesaa karaa irraa kaafamee booddee namoonni hundinuu Shebaa ilma Biikrii sana ari'uuf Yoo'aab faana qajeelan.

¹⁴ Saabe'eenis gosoota Israa'el hunda keessa darbee gara Abeel Beet Ma'aakaatii fi gara biyya Beerit hundaa dhaqe; namoonni Beerit walitti qabamanii isa duukaa bu'an. ¹⁵ Loltoonni Yoo'aab wajjin turan hundinuu dhufanii Abeel Beet Ma'aakaatti Saabe'ee marsan. Isaanis hamma karra magaalaa sanaatti naannessanii biyyoo tuulan; yommuu dallaa magaalaa sanaa jigsuuf tumaa turanittis, ¹⁶ dubartiin ogeettiin tokko magaalattiidhaa isaan waamtee, "Dhaga'aa! Dhaga'aa! Akka ani waa isatti himuu danda'uuf Yoo'aab as haa dhufu itti himaa" jette. ¹⁷ Inni gara ishee dhaqe; isheenis, "Ati Yoo'aabii?" jettee gaafatte.

Innis, "Ani isuma" jedhee deebise.

Isheen immoo, "Waan tajaajiltuun kee dubbattu dhaga'i" jette.

Innis, "Ani dhaga'aan jira."

¹⁸ Isheenis itti fuftee akkana jette; “Bara durii namoonni, ‘Gara Abeel dhaqaa gorsa gaafadhaa’ jedhu ture; akkasiinis dubbiin ni dhuma ture. ¹⁹ Ani warra Israa’el keessa nagaa fi amanamummaan jiraatan keessaa tokkoo dha. Ati magaalaa Israa’el keessatti haadha taate tokko balleessuuf yaadaa jirta. Ati maaliif dhaala WAAQAYYOO liqimsuu barbaadda?”

²⁰ Yoo’aab immoo akkana jedhee deebise; “Wanni kun narraa haa fagaatu! Magaalattii balleessuu yookaan liqimsuun narraa haa fagaatu! ²¹ Wanni kun akkana miti. Namichi Shebaa jedhamu ilmi Biikrii kan biyya gaaraa Efreem sun mootiitti, Daawititti harka isaa ol fudhateera. Namicha tokkicha kana dabarsaa kenna; anis magaalaa kana gad dhiisee nan ba’a.”

Dubartiin sunis Yoo’aabiin, “Mataan namicha sanaa dallaa irraan gad siif darbatama” jette.

²² Ergasii dubartiin sun gorsa ishee kan ogummaan guutame sanaan namoota hunda bira dhaqxe; isaanis mataa Shebaa ilma Biikrii sanaa kutanii Yoo’aabiif gad darbatan. Kanaafuu inni malakata afuufe; namoonni isaa magaalattii dhiisanii tokkoon tokkoon namaa mana ofii isaatti gale. Yoo’aab immoo gara Yerusaalem mooticha biratti deebi’e.

²³ Yoo’aab loltoota Israa’el hunda irratti,

Benaayaa ilmi Yehooyaadaa immoo Kereetotaa fi Pheletota irratti ajajaa ta’e;

²⁴ Adooraa namoota hojii humnaa hojjetan irratti muudame;

Yehooshaafaax ilmi Ahiiluud immoo galmeessaa ta’e;

²⁵ Shewwaan barreessaa,

Zaadoqii fi Abiyaataar immoo luboota turan;

²⁶ akkasumas Iiraas namichi gosa Yaa’iri sun luba Daawit ture.

21

Haaloo Baafachuu Gibe’oonotaa

¹ Jabana Daawit keessa beelli waggaa sadii walitti aansee bu’e; kanaafuu Daawit fuula WAAQAYYOO barbaade. WAAQAYYOS, “Sababii Saa’ol Gibe’oonota ajjeeseef isaa fi mana isaa irra yakka dhiigaatu jira” jedhe.

² Mootichis Gibe’oonota walitti qabee isaan wajjin haasa’e. Gibe’oononni hambaa Amoorotaa turan malee ilmaan Israa’elootaa miti; Israa’eloonni akka isaan eegan kakuu seenaniif; Saa’ol garuu hinaaffaa Israa’elii fi Yihuudaaf qabuun Gibe’oonota balleessuu barbaadee ture. ³ Daawitis, “Ani maalin isiniif godha? Akka isin dhaala WAAQAYYOO eebbiftaniif ani akkamittin arara buusuu danda’a?” jedhee Gibe’oonota gaafate.

⁴ Gibe’oononni immoo, “Nu Saa’ol irraa meetii yookaan warqee gaafachuuf mirga hin qabnu; yookaan akka namni tokko iyyuu Israa’el keessatti du’u gochuuf nu mirga qabnaa?” jedhanii deebisaniif.

Daawitis, “Akka ani maal isiniif godhu barbaaddu?” jedhee gaafate.

⁵ Isaanis akkana jedhanii mootichaaf deebii kennan; “Nama akka nu diigamnuu fi akka nu Israa’el keessattis iddoo tokko illee hin arganne nu godhe sana, ⁶ sanyii isaa keessaa dhiirri torba nuuf haa kennaman; nus dhaqnee biyya Saa’ol namicha WAAQAYYOO filate sanaa, Gibe’aatti fuula WAAQAYYOO duratti isaan fannifnaa.”

Kanaafuu mootichi, “Tole isiniifin kenna” jedhe.

⁷ Mootichi garuu sababii kakuu WAAQAYYOO kan Daawitii fi Yoonaataan ilma Saa’ol gidduutti godhame sanaatiif jedhee Mefiibooshet ilma Yoonaataan ilma Saa’ol du’a jalaa baase. ⁸ Mootichis Armoonii fi Mefiibooshet ilmaan Riixiphaan intalli Ayyaa Saa’oliif deesse lamaanii fi ilmaan Meerob intalli Saa’ol Adrii’eel ilma Barzilaay namicha gosa Mehoolaatiif deesse shanan geesse. ⁹ Innis dabarsee Gibe’oonotatti isaan kenne. Jarris isaan ajjeesani gaara gubbaatti fuula WAAQAYYOO duratti isaan fannisan. Torbaan isaanii iyyuu walumaan dhuman; isaanis akkuma garbuun haamamuu jalqabeen yeroo midhaan haamamutti guyyoota jalqabaatti ajjeefaman.

¹⁰ Riixiphaan intalli Ayyaa sun wayyaa gaddaa fudhattee kattaa irra afatte. Isheenis yeroo midhaan itti haamamuu jalqabdee hamma bokkaan reefa jara ajjeefamanii sanatti samiidhaa roobutti akka guyyaa guyyaa allaattiin samii halkan immoo bineensonni bosonaa reefa sana tuqan hin eeyyamne. ¹¹ Wanni Riixiphaan intalli Ayyaa saajjatoon Saa’ol sun hojjette Daawititti himame; ¹² innis dhaqee lafee Saa’olii fi lafee ilma isaa Yoonaataan namoota Yaabeesh Gili’aad biraa fide. Isaan oobdii Beet Shaan iddoo Filisxeemonni gaafa Gilbo’aatti Saa’olin ajjeesan itti jara fannisan sanaa isaan hatanii turaniitii. ¹³ Daawitis lafee Saa’olii fi lafee Yoonaataan ilma Saa’ol achi fide; lafeen warra ajjeefamanii fannifamanis walitti qabame.

¹⁴ Isaanis lafee Saa'olii fi lafee ilma isaa Yoonataan biyya Beniyaam keessatti, iddoo Zeelaa jedhamutti awwaala Qiish abbaa Saa'ol keessatti awwaalanii waan mootichi ajaje hunda godhan. Sana booddee Waaqni kadhannaa waa'ee biyyattiif dhi'aate ni dhaga'e.

Waraana Filisxeemotatti Baname

21:15-22 kwf - 1Sn 20:4-8

¹⁵ Ammas Filisxeemotaa fi Israa'el gidduutti waraanni ni ka'e. Daawitis namoota isaa wajjin Filisxeemota waraanuuf duule; innis akka malee dadhabe. ¹⁶ Namichi gosa Raafaa kan Yishbii-Benoob jedhamu tokko eeboo naasii kan kiiloo giraamii sadii fi walakkaa ulfaatuu fi goraadee haaraa hidhatee ture; innis Daawitin ajjeesuu barbaade. ¹⁷ Abiishaayi ilmi Zeruyyaa garuu Daawitin baraaruu dhufe; namicha Filisxeem sanas dha'ee ajjeese. Namoonni Daawitis, "Akka ibsaan Israa'el hin dhaamneef ati si'achi nu wajjin waraana hin dhaqxu" jedhanii kakataniif.

¹⁸ Ergasii immoo lafa Goob jedhamutti Filisxeemota wajjin waraanni biraa ka'e. Yeroo sanattis Siibekaay namichi biyya Hushaa namicha Saaf jedhamu tokko sanyii Raafaa keessaa ajjeese.

¹⁹ Waraana biraa kan Filisxeemota wajjin Goobitti godhame keessatti immoo El-haanaan ilmi Ya'iree Oregiim namichi biyya Beetlihem Gooliyaad namicha Gitii kan samaan eeboo isaa loosaa wayya dhooftuu ga'u sana ni ajjeese.

²⁰ Ammas waraana Gaatitti godhame kan biraa keessatti namicha hamma wayii ga'u kan tokkoo tokkoo harka isaa irraa quboota ja'a ja'a akkasumas tokkoo tokkoo miilla isaa irraa quboota ja'a ja'a walumatti quboota digdamii afur qabu tokkotu ture; innis sanyii Raafaa keessaa dhalate. ²¹ Yommuu inni Israa'elin tuttuqettis, Yoonataan ilmi Shime'ii obboleessi Daawit isa ajjeese.

²² Jarri afran kunneen sanyiiwwan Raafaa warra Gaati keessa turanii dha. Isaanis harka Daawitii fi harka namoota isaatiin dhuman.

22

Faarfannaa Galataa Kan Daawit

22:1-51 kwf - Far 18:1-50

¹ Daawit yommuu WAAQAYYO harka diinota isaa hundaa fi harka Saa'ol jalaa isa baasetti dubbii Faarfannaa kana WAAQAYYOOF faarfate. ² Innis akkana jedhe:

"WAAQAYYO kattaa koo ti; da'annoo kootii fi oolchaa koo ti;

³ Waaqni koo kattaa koo kan ani kooluu itti galuu dha; inni gaachana kootii fi gaanfa fayyina koo ti.

Inni da'annoo koo cimaa, kooluu kootii fi fayyisaa koo ti; ati namoota humnaan namatti ka'an jalaas na baasta.

⁴ "Ani WAAQAYYO galanni isaaf malu sana nan waammadha; diinota koo jalaas nan baraarama.

⁵ Dambaliin du'aa na marseera; lolaan badiisaas na liqimseera.

⁶ Funyoon sii'ool natti marame; kiyyoon du'aas natti dhufe.

⁷ "Ani dhiphina koo keessatti WAAQAYYOON nan waammadhe; Waaqa kootti nan iyyadhe.

Innis mana qulqullummaa isaatii sagalee koo dhaga'e; iyyi koos gurra isaa seene.

⁸ Lafti ni hollatte; ni sochootes; hundeewwan samiiwwanii ni raafaman; sababii inni dheekkameefis isaan ni hollatan.

⁹ Aarri funyaan isaatii ol ba'e; ibiddi waa barbadeessu afaan isaatii ba'e; cileen boba'us afaan isaatii ba'e.

¹⁰ Inni samiiwwan tarsaasee gad bu'e; duumessoonni gurraachis miilla isaa jala turan.

¹¹ Inni kiirubeelin yaabbatee barrise; qoochoo qilleensaatiinis ol ba'e.

¹² Inni dukkana, duumessa samii kan bokkaadhaan dukkanaa'e immoo godoo isaa godhate.

¹³ Ifa fuula isaa keessaas

- bakakkaan balaqqisee ba'e.
 14 WAAQAYYO samiidhaa ni qaqaawweessa'e;
 sagaleen Waaqa Waan Hundaa Oliis ni dhaga'ame.
 15 Inni xiyya isaa darbatee diinota bittinneesse;
 bakakkaas gad dhiisee isaan fixe.
 16 Dheekkamsa, WAAQAYYOOTIIN
 humna hafuura funyaan isaatii ba'uutiinis
 sululawwan galaanaa ifatti baafaman;
 hundeewwan lafaas qullaa hafan.
 17 "Inni ol gubbaadhaa gad hiixatee na qabe;
 bishaanota gad fagoo keessaas na baase.
 18 Inni diina koo isa jabaa jalaa, amajaajota koo
 warra akka malee natti ciman jalaas na baase.
 19 Isaan guyyaa rakkina kootti natti dhufan;
 WAAQAYYO garuu gargaarsa koo ture.
 20 Inni iddoo bal'aatti na baase;
 waan natti gammadeefis na oolche.
 21 "WAAQAYYO akkuma qajeelummaa kootiitti naa kenneera;
 akkuma qulqullina harka koottis na badhaase.
 22 Ani karaa WAAQAYYOO eegeeraatii;
 Waaqa koo irraa garagalee hammina hin hojjenne.
 23 Seerri isaa hundinuu fuula koo dura jira;
 anis ajaja isaa irraa hin jal'anne.
 24 Ani fuula isaa duratti mudaa hin qabu ture;
 cubbuu irraas of eeggadheera.
 25 WAAQAYYO akkuma qajeelumma kootti,
 akkuma ani fuula isaa duratti qulqulluu ta'ettis na badhaaseera.
 26 "Ati nama amanamaatti amanamummaa kee argisiifta;
 nama mudaa hin qabnettis kan mudaa hin qabne taata;
 27 nama qulqulluutti qulqulluu taata;
 nama jal'aatti immoo jal'aa taata.
 28 Ati warra gad of qaban ni oolchita;
 warra of tuulan immoo gad deebisuuf iji kee isaan ilaala.
 29 Yaa WAAQAYYO, ati ibsaa koo ti;
 WAAQAYYO dukkana koo ifatti ni geeddara.
 30 Ani gargaarsa keetiin loltoota dhiibbadhee nan deema;
 Waaqa kootiinis dallaa utaaluu nan danda'a.
 31 "Waaqa kana, karaan isaa mudaa hin qabu;
 dubbiin WAAQAYYOO hir'ina hin qabu.
 Warra isatti kooluu galan hundaaf inni gaachana ta'a.
 32 WAAQAYYO malee Waaqni eenyu?
 Waaqa keenya malees Kattaan eenyu?
 33 Kan humna na hidhachiisu,
 kan akka karaan koos nagaa ta'u godhu Waaqa.
 34 Inni miilla koo akka miilla borofaa godha;
 iddoo ol dheeraa irras na dhaabachiisa.
 35 Inni harka koo waraanaaf leenjisa;
 irreen koos iddaa naasii dabsuu ni danda'a.
 36 Ati gargaarsa kee kan nama fayyisu gaachana naaf goota;
 gargaarsi kees nama guddaa na godhe.
 37 Akka koomeen koo hin mucucaanneef,
 miilla kootiif daandii bal'ifteerta.
 38 "Ani diinota koo ari'ee nan balleesse;
 hamma isaan barbadaa'anittis ani duubatti hin deebine.
 39 Ani guutumaan guutuutti isaan nan barbadeesse;
 isaan deebi'anii ka'uu hin danda'an;
 isaanis miilla koo jalatti ni kufan.

- 40 Ati lolaaf humna na hidhachiifte;
amajaajota koos fuula koo duratti gad deebifte.
- 41 Akka diinonni koo dugda duubatti deebi'ani baqatan gooteerta;
anis amajaajota koo barbadeesseera.
- 42 Isaan gargaarsaaf iyyan; garuu kan isaan oolchu tokko iyyuu hin turre;
gara WAAQAYYOOTIS ni iyyatan; inni garuu deebii hin kennineef.
- 43 Anis akkuma awwaara lafaatti isaan nan daake;
bulleessees akkuma dhoqqee daandii irraatti isaan dhidhiite.
- 44 "Ati lola namootaa jalaa na baafteerta;
mataa sabootaa gootee na jiraachifteerta.
- Sabni ani hin beekne na tajaajila;
45 namoonni ormaa na sossobatan;
isaan akkuma waa'ee koo dhaga'aniin naaf ajajaman.
- 46 Isaan hundi abdii kutatan;
hollachaas da'annoo isaanii jabaa keessaa ba'an.
- 47 "WAAQAYYO jiraataa dha! Kattaan koo haa eebbifamu!
Waaqni koo, Kattaan, Fayyisaan koo ol ol haa jedhu!
- 48 Inni Waaqa haaloo naa baasu,
kan sabootas na jala galchu,
49 kan diinota koo jalaas bilisa na baasuu dha.
- Ati amajaajota kootii ol na goota;
gooltota jalaas na baafte.
- 50 Kanaafuu yaa WAAQAYYO, ani saboota gidduutti sin leellisa;
faarfannaa galataa illee maqaa keetii nan faarfadha.
- 51 "Inni mo'annaawwan gurguddaa mootii isaatiif ni kenna;
dibamaa isaa Daawitii fi sanyii isaatiif,
araara bara baraa ni argisiisa."

23

Dubbii Daawit Kan Dhuma

- 1 Dubbiin Daawit dhuma irratti dubbate kanaa dha:
"Himanni Daawit ilmi Isseey,
himanni nama Waaqni Waan Hundaa Olee, ol ol isa qabe,
nama Waaqni Yaaqoob isa dibe
faarfataan Israa'el jaallatamaan sun akkana jedhe:
- 2 "Hafuurri WAAQAYYOO karaa kootiin dubbateera;
dubbiin isaas arraba koo irra ture.
- 3 Waaqni Israa'el dubbateera;
Kattaan Israa'el akkana naan jedhe:
'Namni qajeelummaan saba bulchu,
kan sodaa Waaqaatiin bulchu,
4 inni akka ifa biiftuu ganamaa
kan iddoo duumessi hin jirretti ba'uu,
akkuma ifa aduu kan erga bokkaan caamee hooddee
marga biqilchuu ti.'
- 5 "Manni koo Waaqa duratti qajeelaa mitii?
Inni kakuu bara baraa na wajjin seenee
isas qajeelchee karaa hundaan ni eega mitii?
Isatu fayyina koo fiixaan baasee
fedhii koo hundas naaf guuta mitii?
- 6 Namoonni hamoon hundinuu garuu
akkuma qoraattii harkaan walitti hin qabamneetti gamamu.
- 7 Namni qoraattii tuqu kam iyyuu mi'a sibiilaa
yookaan somaa eeboo qabata;
qoraattiin sunis lafuma jirutti gubama."

*Namoota Daawit Jajjaboo**23:8-39 kwf - 1Sn 11:10-41*⁸ Maqaan namoota Daawit warra jajjaboo kanaa dha:

Yosheeb-Bashebet namichi Tahikmoonni hoogganaa sadanii ture; innis lola tokko irratti eeboo mirmirsee namoota dhibba saddeet fixe.

⁹ Kan isatti aanu immoo Ele'aazaar ilma Doodoo namicha gosa Ahoo'aa ture; innis yeroo Filisxeemota lolaaf achitti walitti qabamanii turan sana waraanuuf kutatanitti, namoota jajjaboo Daawit wajjin turan sadan keessaa tokko ture. Ergasii namoonni Israa'el booddeetti deebi'an; ¹⁰ inni garuu utuu lafa dhaabatee turee hin socho'in hamma harki isaa dadhabee goraadee isaatti gogutti Filisxeemota ni rukute. WAAQAYYO gaafas mo'annoo guddaa kenne. Loltoonnis warra du'an irraa hiikachuu qofaaf gara Ele'aazaaritti deebi'an.

¹¹ Isatti aanees Saamaa ilma Agee namicha gosa Haraaraatu ture. Yommuu Filisxeemonna iddoo Leehi jedhamutti lafa qotiisaa kan misiraan guutame tokko biratti walitti qabamanitti loltoonni Israa'el isaan duraa baqatan. ¹² Saamaan garuu lafa qotiisaa walakkaatti iddoo qabatee ture. Innis irraa ittisuudhaan Filisxeemota fixe; WAAQAYYOS mo'annaa guddaa kenne.

¹³ Yeroo midhaan haammamutti utuu loltoonni Filisxeemotaa Sulula Refaayim keessatti walitti qabamanii jiranuu, hangafoota soddomma sana keessaa namoonni sadii gara holqa Adulaamitti gara Daawit gad bu'an. ¹⁴ Yeroo sanatti Daawit da'annoo cimaa keessa ture; loltoonni Filisxeem immoo Beetlihah turan. ¹⁵ Daawitis Dheebotee, "Utuu namni tokko boolla bishaanii kan karra Beetlihah bira jiru keessaa bishaan dhugaatii naa fidee hoo!" jedhe. ¹⁶ Kanaafuu namoonni jajjaboon sadan sun qubata Filisxeemotaa keessaan darbanii boolla bishaanii kan karra Beetlihah bira jiru keessaa bishaan waraabanii Daawitiif fidan. Inni garuu dhuguu ni dide; gooda kanaa bishaan sana fuula WAAQAYYOO duratti dhangalaase. ¹⁷ Innis, "Yaa WAAQAYYOO, waan kana gochuun narraa haa fagaatu! Bishaan kun dhiiga namoota lubbuu ofii isaaniitti kutatanii deemanii mitii?" jedhe. Kanaafuu Daawit bishaan sana hin dhugne.

Egaa wanni namoonni jajjaboon sadan sun hojjetan kana ture.

¹⁸ Abiishaayi ilmi Zeruuyaa obboleessi Yoo'aab hoogganaa sadan isaani ture. Innis namoota dhibba sadiitti eeboo isaa ol kaafatee isaan fixe; akkasiin innis akkuma namoota sadan sanaa beekamaa ta'e. ¹⁹ Abiishaayin warra sadan caalaa ulfina hin argannee ree? Inni yoo isaan keessaa tokko ta'uu baate iyyuu ajajaa isaani ta'e.

²⁰ Benaayaa ilmi Yehooyaadaa loltoonni cimaa biyya Qabzi'eel sunis loltoonni mo'annaa gurguddaa argamsiise ture. Innis loltoota Mo'aab kanneen akka malee jajjaboo ta'an lama ajjeese. Gaafa cabbiin roobe tokkos boolla keessa seenee leenca ajjeese. ²¹ Inni namicha biyya Gibxi guddicha tokko illee ni ajjeese. Namichi Gibxi sun eeboo harkaa qabaatu iyyuu Benaayaa bokkuudhaan isatti ba'e; innis harka namicha Gibxi sanaatii eeboo butatee eebodhuma isaatiin isa ajjeese. ²² Hojiwwan gootummaa kanneen Benaayaa ilmi Yehooyaadaa hojjete kana fa'i; innis akkuma namoota jajjaboo sadan sanaa nama beekamaa ture. ²³ Inni namoota soddomma sana keessaa nama kam iyyuu caalaa ulfina guddaa argate; garuu namoota Sadan sanatti hin dabalanne. Daawitis ajajaa eegdota ofii isaa isa godhate.

²⁴ Jara soddomma sana keessattis:

Asaheel obboleessa Yoo'aab,

Elhaanaan ilma Doodoo namicha Beetlihah,

²⁵ Shamaa namicha gosa Haroodaa,

Eliiqaa namicha gosa Haroodaa,

²⁶ Heleez namicha Phaaltii,

Iraa ilma Iqees nama Teqoo'aa,

²⁷ Abii'ezer nama Anaatoot,

Mebunaay nama biyya Hushaa,

²⁸ Zalmoon nama Ahoo'aa,

Maharaayi nama Netoofaa,

²⁹ Heeled ilma Ba'anaa nama Netoofaa,

gosa Beniyaam keessaa Iitaayi ilma Riibaay namicha Gibe'aa,

³⁰ Benaayaa nama Phiraatoon

Hidaay namicha sululoota Ga'aash,

³¹ Abii-Alboon namicha biyya Arbaa,

Azmaawet nama Barhuum,

³² Eliiyaabaa namicha Sha'alboon,
 ilmaan Yaasheen,
 Yoonaaatan, ³³ ilma Shamaa namicha Haraaraa sanaa,
 Ahii'aam ilma Shaaraar namicha Aroodaa sanaa,
³⁴ Eliiphelexi ilma Ahasbaayi nama Ma'akaat,
 Eli'aam ilma Ahiitofel nama Gilloon,
³⁵ Hezroo nama Qarmeloos,
 Fa'araay nama biyya Arbii,
³⁶ Yigi'aal ilma Naataan namicha Zoobaa,
 Baanii gosa Gaad,
³⁷ Zeleq namicha gosa Amoon,
 Nahaaraay namicha gosa Bi'eeroot kan Yoo'aab ilma Zeruuyaatiif mi'a lolaa baatu
 sana ture;
³⁸ Iiraas namicha gosa Yitraa,
 Gaareeb namicha gosa Yitraa,
³⁹ akkasumas Uriiyaa namicha Heet.

Walumatti namoota sodomii torba turan.

24

Daawit Loltoota Lakkaa'e

24:1-17 kwf - 1Sn 21:1-17

¹ Aariin WAAQAYYOO ammas Israa'elitti ka'ee Daawitiin, "Dhaqiitii Israa'elii fi Yihuudaa lakkaa'i" jedhee isaanitti kakaase.

² Kanaafuu mootichi Yoo'aabii fi ajajjoota waraanaa kanneen isa bira turaniin, "Akka ani akka isaan hammam akka baay'atan beekuu danda'uuf gosoota Israa'el kanneen Daanii hamma Bersheebaatti jiraatan hunda keessa deemaatii namoota loluu danda'an galmeessaa" jedhe.

³ Yoo'aab garuu deebisee, "WAAQAYYO Waaqni kee loltoota kee dachaa dhibba caalaa haa baay'isu; iji gooftaa koo mootichaas waan kana haa argu. Garuu gooftaan koo mootichi maaliif waan kana gochuu barbaade?" jedhe.

⁴ Ta'us dubbiin mootichaa Yoo'aabii fi ajajjoota loltootaa yaada geeddarachiise; kanaafuu isaan fuula mootichaa duraa ba'anii namoota Israa'el kanneen loluu danda'an galmeessuu deeman.

⁵ Isaanis erga Yordaanos ce'anii booddee gara kibba magaalaa sulula keessatti argamuutiin Aro'eer bira qubatan; achii immoo Gaad keessa darbanii Ya'izeeritti qajeelan. ⁶ Isaanis gara Gili'aadii fi Tabaason Adasaay, itti aansanii gara Daan yaa'anii achii immoo naanna'anii Siidoonaa dhaqan. ⁷ Ergasii immoo gara Da'annoo Xiirros, gara magaalawwan Hiiwotaatii fi Kana'aanotaa hundaa dhaqan. Dhuma irratti immoo gara Bersheebaa kan kibba Yihuudaatti argamtu sanaa dhaqan.

⁸ Isaanis erga guutummaa biyyattii keessa naanna'anii booddee ji'a sagalii fi bultii digdamaatti Yerusaaleemitti deebi'an.

⁹ Yoo'aabis lakkoobsa namoota loluu danda'anii mootichatti hime; Israa'el keessa namoota lolaaf ga'umsa qaban kanneen goraadee qabachuu danda'an kuma dhibba saddeeti, Yihuudaa keessa immoo namoota kuma dhibba shanitu ture.

¹⁰ Daawit waan erga loltoota lakkaa'ee booddee balleessaan itti dhaga'ameef WAAQAYYON, "Ani waan hojjedhe keessatti cubbuu guddaa hojjedheera. Yaa WAAQAYYO, ani akka ati balleessaa garbicha keetii dhiiftuuf sin kadhada. Ani hojii gowwummaa guddaa hojjedheera" jedhe.

¹¹ Guyyaa itti aanutti utuu Daawit hirribaa hin ka'in ergaan WAAQAYYOO gara waa himaa Daawit gara Gaad raajichaa dhufe; ergaan sunis, ¹² "Dhaqiitii Daawitiin, 'WAAQAYYO akkana siin jedha: Ani filannoo sadii siifin kenna; akka ani isa sitti fiduuf isaan keessaa tokko filadhu' jedhi" jedha.

¹³ Kanaafuu Gaad gara Daawit dhaqee, "Waggaa torba biyya kee irra beelli haa bu'uu? Yookaan diinonni kee ji'a sadiif si haa ari'anii? Yookaan dha'ichi guyyaa sadii biyya kee haa dha'uu? Egaa amma itti yaadiitii waan ani isa na erge sanaaf deebisu murteessi" jedheen.

¹⁴ Daawit immoo Gaadiin, "Ani akka malee dhiphadheera. Waan araarri isaa guddaa ta'eef nu harka WAAQAYYOO haa seenu; garuu akka ani harka namaa seenu hin godhin" jedhe.

¹⁵ Kanaafuu WAAQAYYO guyyaa itti aanu ganamaa jalqabee hamma guyyaan murtaa'e raawwatutti Israa'elitti dha'icha fide; Daanii hamma Bersheebaatti namoonni kumni

torbaatamni ni dhuman. ¹⁶ Yeroo ergamaan Waaqayyoo Yerusaalemin balleessuuf harka isaa diriirfatetti WAAQAYYO sababii hubaatiin sun isa gaddisiiseef ergamaa isaa kan saba balleessuuf ture sanaan, “Ni ga’ala! Harka kee deebifadhu” jedhe. Yeroo sana ergamaan WAAQAYYOO oobdii Arawunaa namicha gosa Yebuus sanaa bira ture.

¹⁷ Daawit yommuu ergamaa Waaqayyoo kan namoota ajjeesaa ture sana argetti, WAAQAYYON, “Namni cubbuu fi balleessaa hojjete anuma. Isaan kunneen garuu hoolootaa dha. Isaan maal godhan? Harki kee anaa fi maatii koo irra haa bu’u” jedhe.

Daawit Iddoo aarsaa Tolche

24:18-25 kwf - 1Sn 21:18-26

¹⁸ Gaafas Gaad gara Daawit dhaqee, “Ol ba’iitii oobdii Arawunaa namicha gosa Yebuus sanaa keessatti iddoo aarsaa WAAQAYYOO ijaari” jedheen. ¹⁹ Kanaafuu Daawit akkuma WAAQAYYO karaa Gaadiin isa ajajetti ol ba’ee. ²⁰ Arawunaan yommuu mil’atee mootichaa fi namoota isaa kanneen gara isaa dhufaa jiran argetti, gad ba’ee fuula mootichaa duratti addaan lafatti gombifamee sagade.

²¹ Arawunaanis, “Gooftaan koo mootichi maaliif gara garbicha isaa dhufe?” jedhe.

Daawit immoo, “Ani akka dha’ichi saba irra bu’ee kun dhaabatuuf, oobdii kee bitee isa irratti iddoo aarsaa WAAQAYYOO tolchuufin dhufe” jedhee deebise.

²² Arawunaanis Daawitiin akkana jedhe; “Gooftaan koo mootichi waan isatti tolu kam iyyuu fudhatee haa dhi’eessu. Aarsaa gubamuuf sangoonni kunoo ti; qoraaniif immoo mi’i ittiin midhaan dha’amuu fi waanjoon sangaa as jira. ²³ Yaa mootii, Arawunaan waan kana hunda mootichaaf ni kenna.” Akkasumas Arawunaan, “WAAQAYYO Waaqni kee siif haa fudhatu” isaan jedhe.

²⁴ Mootichi garuu, “Akkas miti; ani gatiidhaan sirraa bituu na barbaachisa. Ani waan gatii itti hin baasin WAAQAYYO Waaqa kootiif aarsaa gubamu godhee hin dhi’eessu” jedhee Arawunaaf deebise.

Kanaafuu Daawit oobdichaa fi sangoota sana meetii saqilii shantamaan bite. ²⁵ Daawitis achitti iddoo aarsaa WAAQAYYOO tolchee aarsaa gubamuu fi aarsaa nagaa dhi’eesse. WAAQAYYOS kadhannaa waa’ee biyyattiif dhi’aateef deebii kenne; dha’ichis Israa’el irraa ni deebi’ee.

Kitaaba Moototaa Tokkoffaa

Adooniyaa Mootii Ta'uu Yaale

¹ Daawit Mootichi yeroo jaaree dulloometti yoo uffata itti tuulan illee dhagni isaa hin ho'uuf ture. ² Kanaafuu tajaajiltoonni isaa akkana jedhaniin; "Durba qulqulluu mooticha tajaajiltuu fi kunuunsitu haa barbaannu. Isheenis gooftaa keenya mootichatti bira ciiftee isa haa ho'iftu."

³ Isaanis biyya Israa'el guutuu keessa durba miidhagduu barbaadanii intala Abiishagi jedhamtu kan gosa Suunan tokko argatanii mootichatti fidan. ⁴ Intalattiin akka malee miidhagduu turte; isheenis mooticha kunuunsite; ni tajaajiltes; mootichi garuu ishee bira hin ga'u ture.

⁵ Yeroo sanatti Adooniyaan ilmi Hagiit kan isheen Daawitiif deesse, "Ani mootii nan ta'a" jedhee ol ol of qabe. Kanaafuu inni gaariwwanii fi fardeen akkasumas namoota fuula isaa dura fiigan shantama qopheeffate. ⁶ Abbaan isaa immoo, "Ati maaliif waan akkanaa goota?" jedhee gonkumaa isa ifatee hin beeku. Inni gurbaa akka malee miidhagaa kan Abesaaloomitti aanee dhalatee dha.

⁷ Adooniyaanis Yoo'aab ilma Zeruuyaatii fi Abiyaataar lubichaan mari'ate; isaanis isa deeggaran. ⁸ Garuu Zaadoq lubichi, Benaayaa ilmi Yehooyaadaa, Naataan raajichi, Shime'iin, Ree'ii fi eegdonni Daawit filatamoon Adooniyaa wajjin hin turre.

⁹ Adooniyaanis dhagaa Zoohelet isa naannoo Een Roogeelitti argamu biratti hoolaa, korma looniitii fi jabboota coccoomoo aarsaa dhi'eesse. Innis obboleota isaa ilmaan mootichaa hunda, namoota Yihuudaa kanneen gondaallota mootichaa ta'an hunda ni waame; ¹⁰ garuu Naataan raajicha yookaan Benaayaa yookaan eegdota filatamoo yookaan obboleessa isaa Solomoonin hin waamne.

¹¹ Ergasii Naataan akkana jedhee Batisheebaa haadha Solomoon gaafate; "Ati akka Adooniyaan ilmi Hagiitii, utuu gooftaan keenya Daawit quba hin qabaatin mootii ta'e hin dhageenye?" ¹² Mee amma kottu akka ati itti lubbuu keetii fi lubbuu ilma kee Solomoon oolchuu dandeessu si gorsaa. ¹³ Amma gara Daawit mootichaa dhaqiitii, 'Yaa gooftaa koo mootii, ati, "Ilmi kee Solomoon anatti aanee dhugumaan mootii ni ta'a; teessoo koo irras ni taa'a" jettee ana garbittii keetiif hin kakannee? Yoos Adooniyaan maaliif mootii ta'e?" jedhiin. ¹⁴ Anis utuma ati achitti mooticha wajjin dubbachaa jirtuu dhufee waan ati jettu sana siif mirkaneessa."

¹⁵ Kanaafuu Batisheebaan kaatee mootii dulloome sana arguuf gara kutaa Abiishagi intalli gosa Suunan sun itti isa kunuunsaa turteetti ol seente. ¹⁶ Batisheebaan gad jettee fuula mootichaa duratti jilbeenfate.

Mootichis, "Ati maal barbaadda?" jedhee gaafate.

¹⁷ Isheenis akkana jettee deebifteef; "Yaa gooftaa ko, ati mataan kee, 'Ilmi kee Solomoon natti aanee mootii ni ta'a; teessoo koo irras ni taa'a' jettee maqaa WAAQAYYO Waaqa keetiitiin ana garbittii keetiif kakattee turte. ¹⁸ Amma garuu Adooniyaan mootii ta'eera; ati gooftaan koo mootichis waan kana quba hin qabdu. ¹⁹ Inni kunoo sangoota, jabboota coccoomoo fi hoolota baay'ee aarsaa dhi'eessee ilmaan mootii hunda, Abiyaataar lubichaa fi Yoo'aab ajajaa loltootaa waameera; garuu garbicha kee Solomoonin hin waamne. ²⁰ Yaa gooftaa koo mooticha, si booddeedhaan eenyu teessoo gooftaa koo mootichaa irra akka taa'u sirraa beekuudhaaf iji Israa'el hundi sirra jira. ²¹ Yoo kanaa achii yeroo gooftaan koo mootichi abbootii isaa wajjin boqotutti anii fi ilmi koo Solomoon akka nama balleessaa qabuutti ilaalamna."

²² Utuma isheen amma illee mooticha wajjin dubbachaa jirtuu Naataan raajichi ni dhufe. ²³ Isaanis, "Naataan raajichi as jira" jedhaniin mootichatti himan. Kanaafuu Naataan dhufee fuula mootichaa duratti gad jedhee harka fuudhe.

²⁴ Naataan akkana jedhe; "Yaa gooftaa koo mootii, ati, 'Adooniyaan natti aanee mootii ta'a; teessoo koo irras ni taa'a' jetteertaa? ²⁵ Inni har'a gad bu'ee sangoota, jabboota coccoomoo fi hoolota baay'ee aarsaa dhi'eesseera. Ilmaan mootichaa hunda, ajajjoota loltootaatii fi Abiyaataar lubicha waameera. Isaan amma iyyuu isa wajjin nyaachaa dhugaa, 'Adooniyaan mootichi bara dheeraa haa jiraatu!' jechaa jiru. ²⁶ Garuu ana garbicha kee, Zaadoq lubicha, Benaayaa ilma Yehooyaadaatii fi garbicha kee Solomoonin hin waamne. ²⁷ Egaa kun waan gooftaan koo mootichi utuu isa

booddeedhaan eenyu akka teessoo gooftaa koo mootichaa irra taa'u garbicha isaa hin beeksisin hojjeteedhaa?"

Daawit Solomoonin Mootii Taasis

1:28-53 kwf - 1Sn 29:21-25

²⁸ Daawit mootichi, "Mee Batisheebaa ol waamaa" jedhe. Kanaafuu isheen gara mootichaatti ol seentee fuula isaa dura dhaabatte.

²⁹ Mootichis akkana jedhee kakateef; "Dhugaa WAAQAYYO jiraataa isa rakkina hundumaa keessaa na baase sanaa, ³⁰ ani waan duraan maqaa WAAQAYYO Waaqa Israa'eliin siif kakadhe sana har'a dhugumaan siif guuta. Ilmi kee Solomoon na booddeedhaan mootii ta'a; iddoo koos teessoo koo irra ni taa'a."

³¹ Batisheebaanis addaan gad jettee harka fuutee fuula mootichaa duratti jilbeenfattee, "Gooftaan ko, Daawit mootichi bara baraan haa jiraatu!" jette.

³² Daawit mootichis, "Mee Zaadoq lubicha, Naataan raajichaa fi Benaayaa ilma Yehooyaadaa as waamaa" jedhe. Yommuu isaan fuula mootichaa duratti dhi'aatanitti, ³³ inni akkana isaaniin jedhe: "Garboota gooftaa keessanii of faana fudhadhaatii ilma koo Solomoonin gaangoo koo irra teessisaatii Giihoonitti gad buusaa. ³⁴ Achittis Zaadoq lubichii fi Naataan raajichi Israa'eloota irratti mootii godhanii isa haa diban. Malakata afuufaatii, 'Solomoon mootichi bara dheeraa haa jiraatu!' jedhaa iyyaa. ³⁵ Isinis ergasii isa wajjin ol ba'uu qabdu; innis dhufee teessoo koo irra taa'ee iddoo koo bu'ee mootii ta'uu qaba. Ani akka inni bulchaa ta'uuf Israa'elii fi Yihuudaa irratti isa muudeera."

³⁶ Benaayaa ilmi Yehooyaadaa akkana jedhee mootichaaf deebise; "Ameen! WAAQAYYO Waaqni gooftaa koo mootichaa akkasuma haa jedhu. ³⁷ WAAQAYYO akkuma gooftaa koo mooticha wajjin ture Solomoon wajjin haa ta'u; teessoo isaas teessoo gooftaa koo Daawit mootichaa caalaa haa jabeessu!"

³⁸ Kanaafuu Zaadoq lubichi, Naataan raajichi, Benaayaa ilmi Yehooyaadaa, Kereetonnii fi Pheletonni gad bu'anii gaangoo Daawit mootichaa irra Solomoon teessisanii Giihoonitti geessan. ³⁹ Zaadoq lubichi dunkaana qulqulluu keessaa gaanfa zayitii fuudhee Solomooniin dibe. Isaanis malakata afuufanii namoonni hundi, "Solomoon mootichi bara dheeraa haa jiraatu!" jedhanii iyyan. ⁴⁰ Namoonni hundi hamma sagalee sanaan lafti sochootutti faaggaa afuufaa gammachuu guddaadhaan isa faana ol ba'an.

⁴¹ Adooniyaa fi keessummoonni isa wajjin turan akkuma nyaata isaanii fixataniin waan kana dhaga'an. Yoo'aabis sagalee malakataa dhageenyaan, "Iyyi magaalaa keessaa kun hundi maalii?" jedhee gaafate.

⁴² Utuma inni dubbachuutti jiruu, Yonaataan ilmi Abiyaataar lubichaa ni dhufe. Adooniyaanis, "Ol seeni. Jabaan akka keetii kun oduu gaarii fiduu qabaa" jedhe.

⁴³ Yonaataanis akkana jedhee deebise; "Akkas miti! Gooftaan keenya Daawit mootichi, Solomoonin mootii godheera. ⁴⁴ Mootichis Zaadoq lubicha, Naataan raajicha, Benaayaa ilma Yehooyaadaa, Kereetotaa fi Pheletotaa isa wajjin erge; isaanis gaangoo mootichaa irra isa teessisan; ⁴⁵ Zaadoq lubichii fi Naataan raajichi Giihoonitti mootii godhanii isa dibaniiru. Isaan gammachuudhaan achii ol ba'an; magaalattiinis iyya isaaniitiin sochoofamte; wacni isin dhageessan kunis kanaa dha. ⁴⁶ Kana caalaa iyyuu Solomoon teessoo mootummaa irra taa'eera. ⁴⁷ Qondaaltonni mootiis, 'Waaqni kee maqaa kee caalaa maqaa Solomoon beekamaa godhee teessoo isaa illee teessoo kee caalaa haa guddisu!' jedhanii gooftaa keenya Daawit mooticha eebbisuuf dhufaniiru. Mootichis siree isaa irratti gad jedhee sagade; ⁴⁸ innis, 'WAAQAYYO, Waaqni Israa'el kan akka iji koo har'a nama iddoo koo bu'ee teessoo koo irra taa'u argitu naa eeyyame sun haa eebbifamu' jedhe."

⁴⁹ Kana irratti keessummoonni Adooniyaa hundi rifatanii ka'anii bibittinnaa'an. ⁵⁰ Adooniyaan garuu Solomoonin sodaatee dhagee gaanfa iddoo aarsaa qabate.

⁵¹ Solomoonittis akkana jedhamee himame; "Adooniyaan Solomoon mooticha sodaatee gaanfa iddoo aarsaa qabatee itti cicheera. Innis, 'Solomoon mootichi akka goraadeedhaan garbicha isaa hin ajjeefne har'a naaf haa kakatu' jedhe."

⁵² Solomoonis, "Yoo inni amanamaa ta'uu isaa mirkaneesse rifeensa mataa isaa keessaa tokko iyyuu lafa hin bu'u; garuu yoo hamminni isa keessatti argame inni ni du'a" jedhee deebise. ⁵³ Solomoon mootichis nama itti erge; isaanis iddoo aarsaa biraa gad isa fidan. Adooniyaanis dhufee fuula Solomoon mootichaa duratti gad jedhee harka fuudhe; Solomoonis, "Deemi, mana keetti gali" jedheen.

2

Ajaja Daawit Solomooniif Kenne

2:10-12 kwf - 1Sn 29:26-28

¹ Daawit Yeroon du'a isaa dhi'aannaan ilma isaa Solomoonin ajaje.

² Innis akkana jedhee; "Ani karaa lafa hundumaa deemuufan jira. Kanaafuu ati jabaadhu; namas ta'i; ³ waan WAAQAYYO Waaqni kee barbaadu eegi; akka waan hojjetu hundaa fi lafa deemtu hundatti milkoofuuf akkuma seera Musee keessatti barreeffametti karaa isaa irra deemi; sirnaa fi ajaja isaa, seeraa fi dambii isaa eegi; ⁴ yoo ati akkas goote, WAAQAYYO waan, 'Yoo ilmaan kee karaa isaanii eeggatan, yoo isaan garaa isaanii guutuu fi lubbuu isaanii guutuudhaan amanamummaadhaan fuula koo dura jiraatan, ati teessoo Israa'el irraa nama hin dhabdu' jedhee na abdachiise sana fiixaan naa baasa.

⁵ "Ati mataan kee iyyuu waan Yoo'aab ilmi Zeruuyaa natti hojjete, waan inni ajajjoota loltoota Israa'el lamaan jechuunis Abneer ilma Neerii fi Amaasaa ilma Yeteer godhe ni beekta. Inni bara nagaa keessa akka waan waraana keessatti ta'eetti isaan ajjeesee dhiiga isaanii dhangalaase; dhiiga sanas sabbata mudhii isaatii fi kophee faana isaatti faale. ⁶ Ogummaa keetiin isa adabi malee akka inni arrii isaatiin nagaan awwaalamu hin godhin.

⁷ "Garuu sababii isaan yeroo ani obboleessa kee Abesaaloom duraa baqadhatti na gargaaraniif ilmaan Barzilaayii namicha gosa Gili'aad sanaatiif arjoomi; isaanis warra maaddii kee irraa nyaatan gidduu haa jiraatan.

⁸ "Shime'iin ilmi Geeraa namichi gosa Beniyaam kan biyya Bahuuriim inni gaafa ani Mahanayyim dhaqetti akka malee na abaare sun kunoo si wajjin jira. Ani garuu yeroo inni na simachuuf Yordaanos dhufetti, 'Ani goraadeedhaan si hin ajjeesu' jedhee maqaa WAAQAYYOOTIIN nan kakadheef. ⁹ Ati garuu sababii nama ogeessa taateef amma akka waan inni balleessaa hin qabaatiniitti isa hin ilaalin. Atuu waan isa gootu ni beekta. Ati mataa isaa kan arraa'e sana dhiigaan awwaala keessa buusi."

¹⁰ Daawitis ergasii abbootii isaa wajjin boqote Magaalaa Daawit keessatti awwaalame. ¹¹ Innis waggaa afurtama Israa'el irratti jechuunis waggaa torba Kebroonitti, waggaa soddomii sadii immoo Yerusaalemitti mootii ta'e. ¹² Kanaafuu Solomoon teessoo abbaa isaa Daawit irra ni taa'e; mootummaan isaas jabaatee dhaabate.

Teessoon Solomoon Jabaachaa Deemuu Isaa

¹³ Yeroo kanatti Adooniyaan ilmi Hagiit gara Batisheebaa gara haadha Solomoon dhaqe. Batisheebaanis, "Ati nagumaaf dhuftee?" jettee isa gaafatte.

Innis, "Eeyyee ani nagumaafan dhufe" jedhee deebiseef; ¹⁴ itti dabalees, "Ani waanan siin jechuu fedhu tokkon qaba" jedheen.

Isheenis, "Mee jedhi" jettee deebifteef.

¹⁵ Innis akkana jedheen; "Akkuma ati beektu mootummaan kan koo ture. Warri Israa'el hundinuus akka ani mootii isaanii ta'u na abdatan. Garuu wannii sun geeddaramee mootummaan gara obboleessa kootiitti deebi'eera; wannii kun WAAQAYYO biraa isaaf dhufeeraatii. ¹⁶ Ani amma waanan si kadhaddu tokkon qaba; maaloo na hin didin."

Isheenis, "Kadhaddu" jetteen.

¹⁷ Innis itti fufee, "Akka inni Abiishagi intala gosa Suunam sana akka niitiitti naaf kennuuf maaloo Solomoon mooticha naa kadhaddu; inni si hin diduutii" jedheen.

¹⁸ Batisheebaanis, "Kun waan gaarii dha! Ani dhaqeen mootichatti siif dubbadha" jettee deebifteef.

¹⁹ Kanaafuu Batisheebaan Adooniyaaf jettee isatti dubbachuuf gara Solomoon Mootichaa dhaqx; Mootichis ishee simachuuf ol ka'ee harka ishee fuudhee teessoo isaa irra taa'e. Inni teessoo haadha mootiitiif fidame tokko of biraa qaba ture; isheenis gama mirga isaatiin teesse.

²⁰ Isheenis, "Ani waanan si kadhaddu xinnoo tokko qaba; maaloo na hin didin" jetteen.

Mootichis, "Yaa haadha koo kadhaddu; ani si hin diduutii" jedhee deebiseef.

²¹ Isheenis, "Obboleessi kee Adooniyaan intala gosa Suunam kan Abiishagi jedhamtu sana haa fuudhu" jetteen.

²² Solomoon mootichis akkana jedhee haadha isaatiif deebii kenne; "Ati maaliif Abiishagi intala gosa Suunam kana Adooniyaaf kadhadda? Ati mootummaa illee akkasuma isaaf kadhaddu; inni obboleessa koo hangafaatii; Abiyaataar lubichaa fi Yoo'aab ilma Zeruuyaatiif illee gaafadhu!"

²³ Solomoon mootichis akkana jedhee maqaa WAAQAYYOOTIIN kakate; "Yoo Adooniyaan gatii kadhaa kanaa lubbuu ofii isaatiin baasuu baate, Waaqni natti haa muru; waan caalu iyyuu natti haa fidu! ²⁴ Kanaafuu dhugaa WAAQAYYO jiraataa isa jabeessee na dhaabee teessoo abbaa koo teessoo Daawit irra na kaa'ee fi isa akkuma waadaa gale sanatti mootummaa naaf hundeesse sanaa Adooniyaan dhugumaan har'a ni ajjeefama!"

²⁵ Solomoon mootichi Benaayaa ilma Yehooyaadaa ajaje; innis dhaqee Adooniyaa dha'ee ajjeese.

²⁶ Mootichis Abiyaataar lubichaan akkana jedhe; "Ati gara lafa qotiisaa kee kan Anaatoot jirtu sanaa deemi. Ati silaa du'uu qabda turte; ani garuu sababii ati fuula abbaa koo Daawit duratti taabota WAAQAYYO Gooftaa baattee rakkina abbaa kootii hunda illee qooddatteef amma si hin ajjeesu." ²⁷ Kanaafuu Solomoon dubbii WAAQAYYO Shiilootti waa'ee mana Eelii dubbate sana guutuudhaan Abiyaataarin lubummaa mana WAAQAYYOO irraa buuse.

²⁸ Yommuu oduun kun Yoo'aab namicha Abesaaloomiif tumsuu dhiisee Adooniyaaf tumse sana bira ga'etti, inni gara dunkaana WAAQAYYOOTTI baqatee gaanfa iddoo aarsaa sana qabate. ²⁹ Akka Yoo'aab gara dunkaana WAAQAYYOOTTI baqatee iddoo aarsaa bira jiru Solomoon Mootichatti ni himame. Solomoonis, "Dhaqiitii isa ajjeesi!" jedhee Benaayaa ilma Yehooyaadaa sana ajaje.

³⁰ Kanaafuu Benaayaa dunkaana WAAQAYYOO ol seenee Yoo'aabiin, "Mootichi, 'Kottu ba'!' siin jedha" jedhe.

Inni garuu, "Ani asumattin du'a malee hin ba'u" jedhee deebise.

Benaayaa immoo, "Yo'aab akkana jedhee naaf deebise" jedhee mootichatti hime.

³¹ Mootichi akkana jedhee Benaayaa ajaje; "Akkuma inni jedhe sana godhi; ajjeesiitii isa awwaali; kanaanis yakka dhiiga nama qulqulluu kan Yoo'aab dhangalaase sanaa irraa anaa fi mana abbaa koo qulqulleessi. ³² Sababii inni utuu abbaan koo Daawit hin beekin namoota lama goraadeen ajjeeseef WAAQAYYO gatii dhiiga inni dhangalaase sanaa isa baasisa. Namoonni inni ajjeese sun lamaan jechuunis Abneer ilmi Neer ajajaan loltoota Israa'elii fi Amaasaan ilmi Yeteer ajajaan loltoota Yihuudaa namoota isa caalaa jajjaboo fi qajeeltota turan. ³³ Yakki dhiiga isaanii mataa Yoo'aabii fi sanyii isaa irra bara baraan haa jiraatu. Garuu Daawitii fi sanyii isaa irra, mana isaatii fi teessoo isaa irra nagaan WAAQAYYOO bara baraan haa jiraatu."

³⁴ Kanaafuu Benaayaa ilmi Yehooyaadaa achi dhaqee Yoo'aabin ajjeese; innis biyya ofii isaatti gammoojjii keessatti awwaalame. ³⁵ Mootichis Benaayaa ilma Yehooyaadaa sana ajajaa loltootaa godhee iddoo Yoo'aab buuse; Zaadoq lubicha immoo iddoo Abiyaataar buuse.

³⁶ Ergasiis mootichi gara Shime'iitti nama ergee akkana jedheen; "Ati Yersaalem keessatti mana ijaarradhuutii achuma jiraadhu; achii baatee gara tokko illee hin deemin.

³⁷ Gaafa achii baatee Sulula Qeedroon ceetutti akka duutu dhugumaan beeki; dhiigni kees matuma keetti deebi'a."

³⁸ Shime'iinis, "Wanni ati jette gaarii dha. Garbichi kee akkuma gooftaan koo mootichi jedhe sana ni godha" jedhee mootichaaf deebise. Shime'iinis bara dheeraa Yersaalem keessa jiraate.

³⁹ Garuu waggoota sadii booddee garboota Saamii keessaa namoonni lama gara Aakiish ilma Ma'akaa mooticha Gaatitti baqatan; Shime'iittis, "Garboonni kee Gaati keessa jiru" jedhamee himame. ⁴⁰ Innis waan kana dhageenyaan ka'ee harree isaa irra kooraa kaa'atee garboota isaa barbaadachuu Aakiish bira Gaati dhaqe. Kanaafuu Shime'iin dhaqee Gaatii garboota isaa fidate.

⁴¹ Yommuu akka Shime'iin Yersaaleemii ba'ee Gaati dhaqee deebi'e Solomoonitti himametti, ⁴² mootichi Shime'ii waamsisee akkana jedheen; "Ani maqaa WAAQAYYOOTIIN si kakachiisee, 'Ati guyyaa kaatee iddoo biraa dhaquuf baate akka duutu beekkadhu' jedhee si hin seerree? Atis gaafas, 'Wanni ati jettu gaarii dha. Ani nan ajajama' naan jette. ⁴³ Yoos ati Maaliif kaku WAAQAYYON kakatte sana eeguu diddee ajaja ani siif kenneefis ajajamuu didde ree?"

⁴⁴ Mootichi amma illee Shime'iidhaan akkana jedhe; "Ati cubbuu abbaa koo Daawititti hojjette hunda garaa kee keessatti ni beekta. WAAQAYYO amma jal'ina kee sana matuma keetti deebisa. ⁴⁵ Solomoon mootichi garuu ni eebbifama; teessoon Daawitis bara baraan jabaatee fuula WAAQAYYOO dura ni jiraata."

⁴⁶ Mootichis Benaayaa ilma Yehooyaadaa ni ajaje; innis dhaqee Saamii dha'ee ajjeese. Mootummaan yeroo kanatti harka Solomoonitti jabaatee dhaabate.

3

Solomoon Ogummaa Kadhate 3:4-15 kwf - 2Sn 1:2-13

¹ Solomoonis Fara'oon mooticha Gibxi wajjin walii galtee uummatee intala isaa fuudhe. Innis hamma masaraa mootummaa ofii isaatii fi mana qulqullummaa WAAQAYYOO ijaaree, naannoo Yersaaleemittis dallaa ijaaruu fixutti magaalaa Daawititti ishee fide.

² Ta'us sababii hamma gaafasiitti manni qulqullummaa Maqaa WAAQAYYOOTIIF hin ijaaraminiif namoonni iddoo ol ka'aa irratti aarsaa dhi'eessaa turan. ³ Solomoon akkuma ajaja abbaan isaa Daawit isaaf kenneetti jiraachaa jaalala WAAQAYYOOOF qabu argisiise; garuu aarsaa fi ixaana aarfamu iddoo ol ka'aa irratti dhi'eessaa ture.

⁴ Mootichi aarsaa dhi'eessuuf gara Gibe'oon dhage; iddoo sunis iddoo sagadaa kan gaara irraa isa baay'ee jaalatamaa isa Solomoon aarsaa gubamu kuma tokko irratti dhi'eesse tureetii. ⁵ WAAQAYYOS Gibe'oonitti halkan abjuu keessa Solomoonitti mul'ate; Waaqnis, "Waan akka ani siif kennu feetu kam iyyuu na kadhadu" jedhe.

⁶ Solomoon immoo akkana jedhee deebise; "Ati sababii inni amanamummaa fi qajeelummaadhaan fuula kee dura jiraatee gara tolina siif qabaateef garbicha kee, abbaa koo Daawitiif arjummaa guddaa goote. Arjummaa guddaa kanas ittuma fufteefii har'a ilma teessoo isaa irra taa'u kenniteefii jirta.

⁷ "Egaa yaa WAAQAYYO Waaqa ko, ati iddoo abbaa koo Daawit, garbicha kee mootii gooteerta. Ani garuu daa'ima xinnaa dha; hojii koos akkan itti hojiedhu hin beeku.

⁸ Garbichi kee kunoo saba ati filatte saba guddaa, kan lakkaa'amuu hin dandeenye yookaan herregamuudhaaf akka malee baay'atu keessa jira. ⁹ Kanaafuu hubannaa ani ittiin saba kee bulchuu fi waan gaarii fi waan hamaa ittiin gargar baasee beeku garbicha keetiif kenni. Yoo akkas ta'uu baate eenyutu saba kee guddaa kana bulchuu danda'a?"

¹⁰ Solomoon waan kana kadhachuun isaa fuula Gooftaa duratti gammachiisaa ture. ¹¹ Kanaafuu Waaqni akkana jedheen; "Ati waan kana kadhatte malee ofii keetiif bara dheeraa yookaan soorama yookaan lubbuu diinota keetii hin kadhanne; garuu waan murtii qajeelaa kennuuf hubannaa kadhatteef, ¹² ani waan ati kadhatte kana siifin kenna. Qalbii ogeessa waa hubatu kan namoonni si dura turan hin qabaatin, kan warri si duubaan dhufanis hin qabaanne siifin kenna. ¹³ Kana malee iyyuu akka bara jireenya keetii keessa mootota gidduudhaa tokko illee siin hin qixxaanneef ani waan ati hin kadhatin sooromaa fi ulfina siifin kenna. ¹⁴ Yoo ati karaa koo irra deemtee akkuma abbaan kee Daawit hojjete sana seeraa fi ajaja koo eegde, ani umurii kee nan dheeressa."

¹⁵ Solomoon ergasii dammaqee akka wanni sun abjuu ta'e hubate. Innis gara Yersaalemitti deebi'ee taabota kakuu Gooftaa dura dhaabatee aarsaa gubamuu fi aarsaa nagaa dhi'eesse. Ergasiis garboota isaa hundaaf cidha qopheesse.

Ogummaadhaan Murtii Kennuu

¹⁶ Yeroo kanatti sagaagaltoonni lama dhufanii fuula mootichaa dura dhaabatan. ¹⁷ Isheen tokko akkana jette; "Yaa Gooftaa ko, anii fi dubartiin kun manuma tokko keessa jiraanna. Utuma isheen na wajjin jirtuu ani mucaan da'e. ¹⁸ Erga ani da'ee guyyaa sadii booddee dubartiin kunis mucaa deesse. Nu kophaa keenya turre; nu lamaan malee namni tokko iyyuu mana sana keessa hin turre.

¹⁹ "Ilmi dubartii kanaa sababii isheen halkan irra ciifteef jalaa du'e. ²⁰ Kanaafuu isheen utuu ani garbittiin kee rafuu halkan walakkaa kaatee mucaa koo na biraa fudhatte. Isheenis laphee ishee jala isa kaa'atee ilma ishee kan du'e sana laphee koo jala keesse. ²¹ Ganama itti aanutti ani ilma koo hoosifachuufan ka'e; kunoo inni du'ee jira! Ani garuu yommuun ifa ganamaatiin itti dhi'aadhee ilaaletti akka inni ilma ani da'e sana hin ta'in nan hubadhe."

²² Dubartiin kaanis, "Akkas miti! Inni jiru kun ilma koo ti; kan du'e sun immoo kan kee ti" jette.

Isheen jalqabaa sun garuu ittuma cimsitee, "Akkas miti! Kan du'e sun kan kee ti; kan jiru kun immoo koo ti" jette. Isaanis akkasiin fuula mootichaa duratti wal falman.

²³ Mootichis, "Isheen kun, 'Ilmi koo ni jira; kan kee immoo du'eera' jetti; isheen kaanis, 'Akkas miti! Ilmi kee du'eera; kan koo immoo ni jira' jetti" jedhe.

²⁴ Kana irratti mootichis, "Goraadee naa fidaa" jedhe. Isaanis mootichaaf goraadee fidan. ²⁵ Mootichis, "Mucaa jiru kana iddoo lamatti wal qixxeetti kutaatii walakkaa isaa ishee tokkoof kenna; walakkaa immoo ishee kaaniif kenna" jedhee ajaje.

²⁶ Dubartiin ilmi ishee lubbuun jiru sun mucaa isheetiif akka malee garaa laaftee mootichaan, "Maaloo yaa Gooftaa ko, mucaa lubbuun jiru kana isheef kenni malee hin ajjeesin" jette.

Isheen kaan immoo, "Inni iddoo lamatti haa muramuu malee anaafis siifis hin ta'ul" jette.

²⁷ Kana irratti mootichi, "Mucaa lubbuun jiru kana dubartii duraa sanaaf kenna malee hin ajjeesinaa; haati isaa isheedhaatii" jedhee ajaje.

²⁸ Israa'el hundi murtii mootichi kenne ni dhaga'an; isaanis sababii akka inni murtii qajeelaa kennuuf Waaqa irraa ogummaa argate hubataniif mooticha ni sodaatan.

4

Qondaaltota Solomoon

¹ Solomoon Mootichis akkasiin Israa'el hunda bulche.

² Jarri kunneenis qondaaltota isaa ol aantota turan:

Azaariyaa ilmi Zaadoq luba ture;

³ Eliihooreffii fi Ahiiyaan, ilmaan Shiishaa'aa barreessitoota turan;

Yehooshaafaax ilmi Ahiiluud galmeessaa ture;

⁴ Benaayaa ilmi Yehooyaadaa ajajaa loltootaa ol aanaa ture;

Zaadoqii fi Abiyaataar immoo luboota turan;

⁵ Azaariyaa ilmi Naataan itti gaafatamaa bulchitoota aanaalee biyyaa ture;

Zaabuud ilmi Naataan lubaa fi gorsituu mootichaa kan dhuunfaa ture;

⁶ Ahiishaar, itti gaafatamaa masaraa mootummaa ture;

Adooniiraam ilmi Abdaa itti gaafatamaa warra hojii humnaa hojjetanii ture.

⁷ Solomoonis Israa'el hunda irratti bulchitoota aanaalee kudha lama kanneen mootichaa fi warra mana mootichaa jiraatanii nyaata dhi'eessan qaba ture. Tokkoon tokkoon isaanis waggaa keessatti ji'a tokko tokko nyaata dhi'eessu ture.

⁸ Maqaan isaanis kanaa dha:

Ben-Huur, biyya gaaraa Efreemitti;

⁹ Ben-Degeer Maqaazitti, Sha'albiimitti, Beet Shemeshitii fi Eeloon Beet Haanaanitti;

¹⁰ Ben-Heseed Aruboot keessaa, Sookootii fi biyyi Heefeer guutuun kan isaa ture;

¹¹ Ben-Abiinaadaab, Naafot Dooritti Xaafati intala Solomoon fuudhee ture;

¹² Ba'anaan ilma Ahiiluud, biyya Ta'anaakii fi Megidootti akkasumas Beet She'aan Zaaretaanitti aanee Yizri'eel gad jiru guutuutti, Beet She'aanii jalqabee hamma Yoqemi'aam ishee Abeel Mehoolaa gamatti;

¹³ Ben-Geeber Raamoot Gili'aad keessatti qubatawwan Yaa'iir ilma Minaasee kanneen Gili'aad keessaa, akkasumas biyyi Argobbi kan Baashaan keessatti argamuu fi magaalawwan gurguddaan dallaan itti ijaaramee dangaraawwan balbalaa kanneen naasii irraa hojjetaman qaban jaatamni kan isaa turan.

¹⁴ Ahiinaadaab ilma Iddoo, Mahanayiim keessatti;

¹⁵ Ahiima'az, Niftaalemitti; innis Baasmati intala Solomoon fuudhee ture;

¹⁶ Ba'anaan ilmi Huushaayi, Aasheerii fi Ba'aalooti keessatti;

¹⁷ Yehooshaafaax ilmi Faaruuwaa, Yisaakor keessatti;

¹⁸ Shime'iin ilmi Eelaa, Beniyaam keessatti,

¹⁹ Geber ilmi Uuri biyya Gili'aad jechuunis biyya Sihoon mooticha Amoorotaatii fi biyya Oogi mooticha Baashaan keessatti; isa qofatu biyya sana bulchaa ture.

Nyaata Guyyaa Guyyaatti Solomooniif Dhi'aatu

²⁰ Namoonni Yihuudaatii fi Israa'el akkuma cirracha qarqara galaanaa baay'ee turan; isaanis nyaatanii dhuganii gammadan. ²¹ Solomoonis mootummoota Laga Efraaxiisii hamma biyya Filisxeemotaatti, hamma daarii Gibxitti jiran hunda bulchaa ture. Biyyoonni kunneenis gibira isaaf fidanii bara jireenya isaa guutuu Solomooniif bulan.

²² Nyaanni guyyuma guyyaatti Solomooniif galu daakuu qulqulluu Koorii soddama, midhaan koorii jaatama, ²³ sangoota coccoomoo kudhan, loon kaloo dheedan digdama, hoolotaa fi re'oota dhibba tokko, akkasumas borofa, kuruphee, gadamsaa fi indaanqoo dha. ²⁴ Inni mootummoota Laga Efraaxiisiin gama dhi'a biiftuu jiran hunda, Tifsaadhaa hamma Gaazaatti bulchaa tureetii; karaa hundaanis nagaa qaba ture. ²⁵ Bara Solomoon keessa Yihuudaa fi Israa'el Daanii jalqabanii hamma Bersheebaatti nagaan jiraatan; tokkoon tokkoon namaas muka wayiniitii fi muka harbuu ofii isaa jala boqote.

²⁶ Solomoonis gola fardeen gaarii harkisan keessa bulan kuma afurii fi fardeen kuma kudha lama qaba ture.

²⁷ Bulchitoonni aanaalee sunis yeroo ji'i isaanii ga'utti tokkoon tokkoon isaanii mootichaa fi warra maaddii Solomoon mootichaa irraa nyaatan hundaaf nyaata dhi'eessu ture. Akka wanni tokko iyyuu hin hanqanneefis ni to'atu turan. ²⁸ Akkasumas fardeen gaarii harkisanii fi fardeen kaaniif iddoo barbaadameefitti garbuu fi cidii dhi'eessu turan.

Ogummaa Solomoon

²⁹ Waaqnis ogummaa fi hubannaa guddaa akkasumas garaa bal'aa akka cirracha qarqara galaanaa Solomooniif kenne. ³⁰ Ogummaan Solomoon ogummaa namoota ba'a biiftuu jiraatanii hunda caala; ogummaa Gibxi hundas ni caala. ³¹ Inni nama kam iyyuu caalaa ogeessa; Eetaan namicha gosa Izraahi sana caalaa, Heemaan, Kalqoolii fi Dardaa ilmaan Maahool caalaa ogeessa. Maqaan isaas saboota naannoo sana jiraatan hunda biratti beekame. ³² Inni fakkeenya kuma sadii dubbate; baay'inni faarfannaa isaas kuma tokkoo fi shan ture. ³³ Inni birbirsaa Libaanoon jalqabee hamma hiisophii dallaa irratti guddatuutti jireenya biqiltuwwanii ibse. Waa'ee bineensotaatii fi waa'ee simbirroo, waa'ee uumamawwan lafa irra loo'aniitii fi waa'ee qurxummii illee dubbateera. ³⁴ Namoonni biyyoota hundaa ogummaa Solomoon dhaga'uuf mootota addunyaa kanneen waa'ee ogummaa isaa dhaga'an hunda biraa dhufaa turan.

5

Qophii Ijaarsa Mana Qulqullummaatiif Godhame

5:1-16 kwf - 2Sn 2:1-18

¹ Hiiraam mootichi Xiirros yommuu akka Solomoon abbaa isaa Daawitin iddoo bu'uuf dibame dhaga'etti ergamoota isaa gara Solomoonitti erge; Hiiraam yeroo kam iyyuu michuu Daawit tureetii. ² Solomoonis akkana jedhee Hiiraamiif ergaa kana deebisee erge:

³ "Akka Abbaan koo Daawit sababii waraana karaa hundaan isa marsee ture sanaatiif hamma WAAQAYYO diinota isaa miilla isaa jala galchuufitti Maqaa WAAQAYYO Waaqa isaatiif mana qulqullummaa ijaaruu hin danda'in atuu beekta. ⁴ Amma garuu WAAQAYYO Waaqni koo karaa hundaan boqonnaa naa kenneera; diinni yookaan balaan tokko iyyuu hin jiru. ⁵ Kanaafuu ani amma akkuma WAAQAYYO abbaa koo Daawitiin, 'Ilmi kee kan ani iddoo kee teessoo kee irra teessisu Maqaa kootiif mana qulqullummaa ni ijaara' jedhe sanatti Maqaa WAAQAYYO Waaqa kootiif mana qulqullummaa ijaaruu yaadeera.

⁶ "Kanaafuu akka birbirsaa Libaanoon naaf muramu ajaji. Namoonni koo namoota kee wajjin hojjetu; anis mindaa ati hojjetoota keetiif murteessitu kam iyyuu siifin kaffala. Akka nu muka baqaqsuu irratti akka Siidoonotaa ogeeyyii hin ta'in atuu beekta."

⁷ Hiiraamis yommuu dhaamsa Solomoon sana dhaga'etti akka malee gammadee, "Har'a WAAQAYYO haa eebbifamu; inni akka Solomoon saba guddaa kana bulchuuf ilma ogeessa kana Daawitiif kenneeraatii" jedhe.

⁸ Kanaafuu Hiiraam akkana jedhee Solomoonitti ergaa erge:

"Ani ergaa ati naa ergite argadheera; birbirsaa fi jirma birbirsaa dhi'eessuudhaan waan ati barbaaddu hunda siifan godha. ⁹ Namoonni koo Libaanoon irraa gara galaanaatti gad fidu; anis walitti hidhee lafa ati fillattutti galaana irra siifan erga; achittis gargari nan hiika. Atis muka sana ni fudhatta; warra mana koo jiraataniif immoo nyaata dhi'eessuudhaan fedhii koo guutta."

¹⁰ Hiiroom akkasiin birbirsaa fi jirma birbirsaa kan Solomooniif barbaachisu dhi'eessaafii ture. ¹¹ Solomoonis akka warra mana Hiiraam jiraataniif nyaata ta'uuf qamadii safartuu qoroosii kuma digdamaa fi zayitii ejersaa kan cuunfame koorii kuma digdama kenne. Solomoon ittuma fufee wagguma waggaan waan kana Hiiraamiif kennaa ture. ¹² WAAQAYYOS akkuma isa abdachiisetti Solomooniif ogummaa ni kenne. Hiiraamii fi Solomoon gidduu walitti dhufeenya nagaatu ture; isaan lamaanuu walii galtee godhatan.

¹³ Solomoon mootichis Israa'el hunda keessaa namoota dirqiidhaan hojii humnaa hojjetan kuma soddoma walitti qabe. ¹⁴ Innis akka isaan ji'a tokko Libaanoon keessa, ji'a lamaa immoo mana isaanii turaniif jedhee, ji'a tokko tokkoof nama kuma kudhan qoodee Libaanoonitti erge. Adooniiraam immoo itti gaafatamaa namoota dirqiidhaan hojii humnaa hojjetanii ture. ¹⁵ Solomoon namoota ba'aa baatan kuma torbaatamaa fi warra dhagaa cabsan kuma saddeettama gaarran keessaa qaba ture; ¹⁶ akkasumas namoota hojii hojjechiisaniif hojjetoota illee to'atan kuma sadii fi dhibba sadii qaba ture. ¹⁷ Isaanis mootichi ajaja kenninaan dhagoota soofamaniin hundee mana qulqullummaa buusuudhaaf dhagoota gurguddaa fi dhagoota gatii guddaa fidan. ¹⁸ Ogeeyyiin hojii harkaa Solomoonii fi Hiiroom akkasumas namoonni Gebaal mana qulqullummaa ijaaruuuf mukaa fi dhagaa cabsanii qopheessan.

6

Solomoon Mana Qulqullummaa Ijaaruu Isaa

6:1-29 kwf - 2Sn 3:1-14

¹ Innis erga Israa'eloonni Gibxi keessaa ba'anii waggaa dhibba afurii fi saddeettam-maffaatti, erga Solomoon Israa'el irratti mootii ta'ee immoo waggaa afuraffaa keessa ji'a Ziif jechuunis ji'a lammaffaa keessa mana qulqullummaa WAAQAYYOO ijaaruu jalqabe.

² Manni qulqullummaa kan Solomoon mootichi WAAQAYYOO ijaare sun dhundhuma jaatama lafa irra dheerata ture; dhundhuma digdama bal'atee dhundhuma soddoma ol dheerata ture. ³ Gardaafoon fuula galma mana qulqullummaa sana dura jiru akkuma mana qulqullummaa sanaa dhundhuma digdama lafa irra dheeratee fuula manichaa duraan dhundhuma kudhan achi ba'a ture. ⁴ Innis akka manichi ifa argatuuf foddawwan faayeffaman itti tolche. ⁵ Naannoo keenyan mana guddichaatii fi naannoo keenyan iddoo qulqulluu manicha keessaattis bifa itti baasee kutaalee ni tolche. ⁶ Kutaan manichaa kan jalaa dhundhuma shan, kan gidduu dhundhuma ja'a, sadaffaan immoo dhundhuma torba bal'ata ture. Innis akka wanni tokko iyyuu keenyan mana qulqullummaa keessa hin suuqamneef alaan manichatti naannesse ittisa hojjete.

⁷ Yeroo mana qulqullummaa sana ijaaranitti dhagaa boolla itti dhagaa cabsanitti soofame qofatti fayyadaman; yeroo manni qulqullummaa sun ijaaramaa turetti iyyi burruusaa, kan qottootii fi kan mi'a sibiilaa kamii iyyuu achitti hin dhaga'amne.

⁸ Balballi kutaa manichaa kan jalaa karaa kibba mana qulqullummaatiin ture; gulantaan tokkos gara kutaa manichaa gidduutii fi gara kutaa manichaa sadaffaatti ol baasa. ⁹ Inni akkasiin mana qulqullummaa sana ijaaree saanqaa birbirsatiin fi dareeraadhaan gubbaa isaa duuhee fixe. ¹⁰ Innis kutaalee alaa sana naannoo mana qulqullummaatti marsee ijaare. Ol dheerinni tokkoo tokkoo isaaniis dhundhuma shan ture. Isaanis muka birbirsatiin mana qulqullummaatti qabsiifaman.

¹¹ Dubbiin WAAQAYYOS akkana jedhee gara Solomoon dhufe: ¹² "Waa'ee mana qulqullummaa ati ijaaraa jirtu kanaa, ati sirna koo duukaa buutee seera kootii fi ajaja koo hundas yoo eegde, ani waadaan abbaa kee Daawitiif gale sana karaa keetiin nan raawwadha. ¹³ Anis Israa'eloota gidduu nan jiraadha; saba koo Israa'elinis hin gatu."

¹⁴ Akkasiin Solomoon mana qulqullummaa sana ijaaree fixe. ¹⁵ Innis hundee mana qulqullummaatii jalqabee hamma gubbaa isaatti mamaxxansuudhaan keenyan manichaa karaa keessaatiin saanqaa birbirsatiin uffise; lafa manichaas saanqaa birbirsatiin uffise. ¹⁶ Karaa boroo mana qulqullummaatiinis iddoo qulqulluu kan keessaa jechuunis Iddoo Iddoo Hunda Caalaa Qulqulluu ta'e hojjechuuf hundee manichaatii jalqabee hamma gubbaa isaatti saanqaa birbirsatiin kutaa dhundhuma digdama bal'atu tokko goode. ¹⁷ Galmi guddichi fuula kutaa kanaa duraan jirus dhundhuma afurtama dheerata ture. ¹⁸ Keessi mana qulqullummaa sanaas birbirsaa fakkiin buqheetii fi daraaraa irratti soofameen faayeffamee ture. Wanni hundinuu birbirsaan hojjetame; dhagaan tokko iyyuu hin mul'atu ture.

¹⁹ Inni taabota kakuu WAAQAYYOO achi keessa kaa'uuf jedhee mana qulqullummaa keessatti iddoo qulqulluu qopheesse. ²⁰ Iddoon qulqulluun manicha keessaa sun dhundhuma digdama lafa irra dheeratee, dhundhuma digdama bal'atee dhundhuma digdama immoo ol dheerata ture. Innis keessa manichaa warqee qulqulluu itti uffise; iddoo aarsaa kan birbirsaa irraa hojjetame sana illee warqee qulqulluu itti uffise. ²¹ Solomoonis keessa mana qulqullummaa sanaa warqee qulqulluu itti uffisee fuula iddoo qulqulluu manicha keessaa kan warqeen itti uffifame sana duraan foncaa warqee diriirse. ²² Innis akkasiin keessa manichaa hunda warqee itti uffise. Iddoo aarsaa kan iddoo qulqulluu gara keessaa cina jiru sana illee warqee itti uffise.

²³ Innis iddoo qulqulluu gara keessaa jiru sana keessatti kiirubeelii muka ejersaa irraa hojjetaman kanneen tokkoon tokkoon isaaniis dhundhuma kudhan kudhan ol dheeratan tolche. ²⁴ Qoochoon kiirubeelii jalqabaa tokkichi dhundhuma shan dalga dheerata; qoochoon kaanis dhundhuma shan dalga dheerata; walumatti fiixee qoochoo tokkootii hamma fiixee qoochoo kaaniitti dhundhuma kudhan dalga dheerata ture. ²⁵ Sababii kiirubeeliin lachuu guddinaan wal qixxee ta'anii bifa tokko qabaataniif kiirubiin lammaffaanis dhundhuma kudhan dalga dheerata ture. ²⁶ Ol dheerinni tokkoo tokkoo kiirubeeliis dhundhuma kudhan kudhan ture. ²⁷ Solomoon kiirubeelii sana mana qulqullummaa keessa kutaa Iddoo Iddoo Hunda Caalaa Qulqulluu ta'e keessa kaa'e; qoochoon isaaniis babal'ifamee ture. Qoochoon kiirubeelii tokkoo keenyan manaa tokko tuqee qoochoon kiirubeelii kaanii immoo keenyan manaa kaan tuqee; qoochoon isaaniis dhufee walakkaa kutaa manichaatti wal tuqa ture. ²⁸ Inni kiirubeelii sanas warqee itti uffise.

²⁹ Solomoonis keenyan mana qulqullummaa sanaa hunda irratti, keessaa fi duubaan itti naannesse fakkiwwan kiirubeelii, mukkeen meexxiitii fi daraarawwanii miidhagsee.

³⁰ Lafa kutaalee mana qulqullummaa sanaa lachuuttis keessaa fi alaan warqee uffise.

³¹ Balbala iddoo qulqulluu kan gara keessaatiifis muka ejersaatiin cufaawwan tolche; cufaawwan sunis bal'ina keenyaniitti harka shan keessaa harka tokko ture. ³² Cufaa muka ejersaa sana lamaan irrattis fakkiwwan kiirubeelii, kan muka meexxiitii fi daraarawwanii miidhagsee fakkiwwan kiirubeelii fi kan muka meexxi sanatti warqee uffise. ³³ Haaluma kanaanis michichila balbalaa kan muka ejersaa irraa hojjetamee roga afur qabu tokko balbala galma guddichaatiif tolche. ³⁴ Akkasumas balbala muka birbirsaa lama kanneen tokkoon tokkoon isaanii saanqaa walitti deebi'ee cufamu lama lama qaban tolche. ³⁵ Achi irrattis kiirubeelii, mukkeen meexxiitii fi daraarawwan miidhagsee warqee tumame wal qixxeessee itti uffise.

³⁶ Innis dhagaa soofamaa toora sadii fi dareeraa birbirsaa, toora tokkoon oobdii manicha keessaa ijaare.

³⁷ Hundeen mana qulqullummaa WAAQAYYOOS waggaa afuraffaatti ji'a Ziif jedhamu keessa buufame. ³⁸ Manni qulqullummaa sunis waggaa kudha tokkoffaatti, ji'a Buul jechuunis ji'a saddeettaffaa keessa akkuma karoorametti guutumaan guutuutti hojjetamee dhume. Solomoonis mana sana ijaaree fixuuf waggaa torba itti fudhate.

7

Solomoon Masaraa Mootummaa Ijaarrate

¹ Solomoon masaraa mootummaa isaa ijaaree fixachuuf waggaa kudha sadii itti fudhate. ² Innis Masaraa Bosona Libaanoon jedhamu ijaarrate; masaraan sunis dhundhuma dhibba tokko dalga dheeratee bal'ina dhundhuma shantamaa fi ol dheerina dhundhuma soddoma qaba ture; innis toora afuriin utubaawwan birbirsaa kanneen dareeraawwan birbirsaa baatan qaba ture. ³ Manni sunis dareeraawwan utubaawwan irra naqaman sanaan olitti bantii birbirsii hojjetame qaba ture; innis toorawwan tokkoon tokkoon isaanii utubaawwan kudha shan qabatan walumaa galatti utubaawwan afurtamii shan qaba ture. ⁴ Foddaawwan isaas ol kaafamanii toora sadii sadiin walitti garagalfamanii hojjetaman. ⁵ Balballii fi michichilli balbalaa hundinuu roga afur afur qabu turan; isaanis karaa fuula duraatiin sadii sadiin walitti garagalfamanii turan.

⁶ Innis galma utubaawwan hedduu qabu kan dhundhuma shantama lafa irra dheeratee dhundhuma soddoma bal'atu ijaare. Fuula galma sanaa duraanis gardaafoo tokkodu ture; gardaafoo sana duraan immoo utubaawwanii fi bantii utubaawwan sana irratti diriirfame tokkodu ture.

⁷ Innis galma teessoo, iddoo itti murtii kennu galma laaftoo ijaaree lafa isaatii jalqabee hamma bantii isaatti muka birbirsaa itti uffise. ⁸ Masaraan mootummaa kan akka inni keessa jiraatuuf ijaarama sunis gara dugda duubaatti hiiqee karooruma wal fakkaatuun hojjetame. Solomoon intala Fara'oon kan fuudhe sanaaf illee masaraa mootummaa kan akkuma galma kanaa ijaare.

⁹ Ijaarsi sun hundinuu alaa jalqabee hamma oobdii guddichaatti, hundee irraa jalqabee hamma mataa keenyan manaatti dhagaa gatii guddaa kan safaramee muramee fi kan keessii fi duubni isaa magaaziidhaan miidhagfameen hojjetame. ¹⁰ Hundeen isaas dhagoota gurguddaa gatii guddaa qaban kanneen gariin isaanii dhundhuma kudhan gariin isaanii immoo dhundhuma saddeeti ta'aniin buufame. ¹¹ Hundee kana irraanis dhagoota gatii guddaa kanneen safaramanii murmuramanii fi birbirsatu ture. ¹² Oobdiin guddichis akkuma oobdii mana qulqullummaa WAAQAYYOO kan keessaatii fi gardaafoo isaa sanaa keenyan manaa kan toora dhagaa soofamee ijaarama sadii fi toora saanqaa birbirsaa kan miidhagfamee hojjetame tokkoon marfame.

Mi'a Mana Qulqullummaa

7:23-26 kwf - 2Sn 4:2-5

7:38-51 kwf - 2Sn 4:6; 4:10-5:1

¹³ Solomoon mootichi Xiirsoositti nama ergee Huuraamin fichisiise; ¹⁴ haati Huuraam haadha hiyyeessaa kan gosa Niftaalem turte; abbaan isaa immoo nama gosa Xiirsoos kan ogummaa hojii naasii qabu ture. Huuraam kun nama ogummaa guddaa qabu kan hojii naasii hunda keessatti muuxannoo qabu ture. Innis gara Solomoon mootichaa dhufee hojii isatti kenname hunda hojete.

¹⁵ Hiiraam utubaa naasii lama kanneen tokkoon tokkoon isaanii dhundhuma kudha saddeet ol dheeratanii dhundhuma kudha lama furdatan hojete. ¹⁶ Fiixee utubaawwan sanaa irra kaa'uudhaafis naasii baqfame irraa guutuu lama tolche; tokkoon tokkoon guutuu sanaas dhundhuma shan shan ol dheerata ture. ¹⁷ Ergasiis guutuwwan fiixee

utubaawwan irraa sanaaf foncaa wal keessa loofame akka gingilchaatti hojjetame lama tolche; tokkoo tokkoo guutuu sanaatiifis gingilchaa torba torbatu qoodame. ¹⁸ Innis guutuwwan fiixee utubaawwanii irra jiran sana miidhagsuuf jedhee tokkoo tokkoo gingilchaa sanaatti naannessee toora lamaan roomaanota tolche. Tokkoo tokkoo guutuwwaniitiifis akkasuma tolche. ¹⁹ Guutuwwan gardaafoo keessa fiixee utubaawwanii irra jiranis daraaraa fakkaatanii dhundhuma afur afur ol dheeratu ture. ²⁰ Guutuwwan fiixee utubaawwan lamaanii irra kutaa waciitii fakkaatu kan gingilchaawwanitti aanuun gara irraa roomaanoota dhibba lamatu tooraan itti naanna'ee ture. ²¹ Innis utubaawwan sana gardaafoo mana qulqullummaa dura dhadhaabe. Utubaa karaa kibbaatiin "Yaakiin" kan karaa kaabaatiin immoo "Bo'eez" jedhe. ²² Guutuwwan fiixee sana irra jiran daraaraa fakkaatu turan. Hojiin utubaawwan irraas akkasiin dhume.

²³ Innis sibiila baqfame irraa Gaanii geengoo afaan isaa qarqara tokkoo hamma qarqara kaaniitti dhundhuma kudhan bal'atee dhundhuma shan ol dheeratu tolche. Naannoon isaas funyoodhaan safaramee dhundhuma soddoma ta'e. ²⁴ Hidhii isaa jalaanis dhundhuma tokko tokko irratti wiillee kudhan kudhanitu naanneffamee ture. Willeewwan sunis Gaanii sana wajjin tarree lamaan walumatti baqfamaniin hojjetaman.

²⁵ Gaanichis korommiin kudha lama kanneen isaan keessaa sadii gara kaabaatti, sadii gara dhi'aatti, sadii gara kibbaatti, sadii immoo gara ba'aatti garagalan irra dhaabate. Gaaniin sun dugda isaanii irra dhaabatee eegeen hunda isaanii gara walakkaatti garagalee ture. ²⁶ Gaaniin sun hamma barruu harkaa yabbata ture; hidhiin isaas akkuma hidhii kubbaayyaa yookaan daraaraa hadaa fakkaata ture. Innis baadoosii kuma lama qabata ture.

²⁷ Akkasumas baattuwwan naasii kanneen iddoo tokkoo socho'uu danda'an kudhan tolche; tokkoon tokkoon isaanii dhundhuma afur afur lafa irra dheeratanii bal'ina dhundhuma afur afuriitii fi ol dheerina dhundhuma sadii sadii qabu turan. ²⁸ Haalli itti baattuwwan kunneen hojjetamanis kana: Isaanis sibiila babal'aa michichilaan marfame qabu ture. ²⁹ Sibiilawwan michichilaan marfaman sana irras fakkii leencawwanii, kan jibootaatii fi kan kiirubeeliitu ture; michichilawwan sana irras akkasuma ture. Fakkii leencawwanii fi jiboota sana jalaa fi gubbaanis fakkii daraaraa fo'amaa kan sibiila tumameen tolfame tokkotu ture. ³⁰ Tokkoon tokkoon baattuu sanaa goommaa naasii afur afurii fi somaa naasii qaba ture; goleewwan afraniinis utubaawwanitu ture; utubaawwan kunneenis baqfamaniin daraaraa fo'amaadhaan miidhagfamaniin tolfaman. ³¹ Gara keessa baattuu sanaatiin uraa geengoo kan dhundhuma tokko gad fagaatutu ture. Uraan kunis geengoo ta'ee jalli isaa dhundhuma tokkoo fi walakkaa bal'ata ture. Naannoo uraa isaatti waan soofamee faayeffame tokkotu ture. Sibiilli baattuu sanaa bal'aan roga afuriin wal qixxee ture malee geengoo hin turre. ³² Goommaawwan afran sun sibiila babal'aa jala turan; samaan goommaawwanis baattuu sanaan walitti qabsiifamee ture. Bal'inni tokkoo tokkoo goommaa sanaas dhundhuma tokkoo fi walakkaa ture. ³³ Goommaawwan sunis akkuma goommaawwan gaariitti hojjetaman. Somaan isaanii, hidhiin isaanii, hokkoon isaaniitii fi handhuurri isaanii hundinuu sibiila baqfame irraa hojjetame.

³⁴ Tokkoo tokkoo goleewwan baattuu sanaa afran irra michichilawwan afurtu ture; michichilawwan isaas baattuudhuma sanaan walitti hojjetaman. ³⁵ Fiixee baattuu sanaa irra geengoo maramaa dhundhuma walakkaa dheeratu tokkotu ture. Michichilawwanii fi sibiilli babal'aan sun fiixee baattuu sanaatti qabsiifamanii turan. ³⁶ Innis michichilawwanii fi sibiila babal'aa irratti iddoo hundatti fakkii kiirubeelii, kan leencotaatii fi kan mukkeen meexxii soofee fakkii daraaraa fo'amees naannoo isaanii guutuutti marse. ³⁷ Haalli inni ittiin baattuwwan kurnan sana hojjetes kanaa dha. Isaan hundinuu haaluma tokkoon baqfamaniin hojjetaman; wal qixxaataniis bifa tokko qabaatan.

³⁸ Ergasiis caabiiwwan naasii kudhan kanneen tokkoon tokkoon isaanii safartuu baadoos afurtama qabaatee bal'inni isaas dhundhuma afur ta'u hojjete; tokkoo tokkoo baattuwwan kurnan sanaa irras caabii tokko tokkotu ture. ³⁹ Innis baattuwwan sana keessaa shan karaa kibba mana qulqullummaatiin, shan immoo karaa kaaba mana qulqullummaatiin dhaabe. Gaanii sana immoo karaa kibbaatiin, kibba ba'a golee mana qulqullummaatiin dhaabe. ⁴⁰ Inni okkoteewwan, waan daaraan ittiin hammaaramuu fi caabiiwwan ittiin dhiiga facaasanis ni tolche.

Hiroomis akkasiin hojii mana qulqullummaa WAAQAYYOO keessatti Solomoon mootichaaf hojjechaa ture hunda fixe; hojiin kunis:

⁴¹ Utubaawwan lamaan;

guutuwwan waciitii fakkaatan kanneen fiixee utubaawwanii irra jiran lamaan; wantoota akka gingilchaa wal keessa loofaman lamaan guutuwwan waciitii fakkaatanii fiixee utubaawwanii irra jiran sana lamaan miidhagsan;

⁴² wantoota akka gingilchaa wal keessa loofaman lamaan sanaafis roomaanota dhibba afur; tokkoo tokkoo wantoota sanaatiif roomaanota tarree lamaa waciitiwwan lamaan guutuwwan kanneen fiixee utubaawwanii irraa sana ni miidhagsan;

⁴³ baattuuwwan kurnan, caabii isaanii kurnan wajjin;

⁴⁴ gaanii fi korommii loonii kudha lamaan isa jalaan jiru;

⁴⁵ okkoteewwan, waan ittiin daaraa hammaaranii fi caabiiwwan.

Mi'i Huuraam mana qulqullummaa WAAQAYYOOTIIF jedhee Solomoon mootichaaf hojjete sun hundinuu naasii cululuqaa irraa tolfame. ⁴⁶ Mootichis mi'oota kanneen dirree Yordaanositti iddoo suphee kan Sukootii fi Zaaretaan gidduu jirutti baqsiisee hojjechiise. ⁴⁷ Solomoon waan isaan akka malee baay'ee ta'aniif mi'oota kanneen hunda hin madaalle; ulfinni naasiis hammam akka ta'e hin beekamne.

⁴⁸ Akkasumas Solomoon mi'oota mana qulqullummaa WAAQAYYOO keessa jiran hunda ni hojjechiise:

Isaanis iddoo aarsaa kan warqee irraa hojjetame;

minjaala warqee kan buddeenni ilaalchaa irra ture;

⁴⁹ baattuuwwan ibsaa kanneen warqee qulqulluu irraa hojjetaman shan karaa mirgaatiin, shan immoo karaa bitaatiin fuula iddoo qulqulluu manicha keessaa dura dhaabaman sana,

daraarawwan, ibsaawwanii fi qabduuwwan warqee irraa hojjetaman;

⁵⁰ caabiiwwan, waan ittiin ibsaa irraa daaraa dhadha'an, waciitiwwan ittiin dhiiga facaasan, caabiiwwanii fi qodaa ixaanaa kanneen warqee qulqulluu irraa hojjetaman;

cufaawwan kutaa manichaa kanneen gara keessaatiif jechuunis Iddoo Iddoo Hunda Caalaa Qulqulluu ta'e sanaaf, akkasumas cufaawwan galma guddichaa kanneen mana qulqullummaatiif aguuraawwan warqee.

⁵¹ Solomoon mootichi yommuu hojiin inni mana qulqullummaa WAAQAYYOOTIIF hojjete hundi raawwatametti mi'oota abbaan isaa Daawit Waaqaaf addaan baase jechuunis meetii, warqee fi mi'oota fidee mankuusa mana qulqullummaa WAAQAYYOO keessa kaa'e.

8

Taabonni Kakuu Mana Qulqullummaatti Galfame

8:1-21 kwf - 2Sn 5:2-6:11

¹ Ergasii Solomoon Mootichi Xiyyoon Magaalaa Daawit irraa taabota kakuu WAAQAYYOO ol fichisiisuudhaaf jedhee maanguddoota Israa'el, abbootii gosootaa hundaa fi hangafoota maatiiwwan Israa'el Yerusaleemitti fuula ofii isaa duratti walitti waame.

² Israa'eloonni hundinuus ji'a Eetaaniim, ji'a torbaffaa keessa yeroo ayyaanaatti Solomoon Mooticha biratti walitti qabaman.

³ Yommuu maanguddoonni Israa'el hundi achi ga'anitti luboonni taaboticha ol fuudhan; ⁴ isaanis taabota WAAQAYYOO sana, dunkaana wal ga'iitii fi mi'oota qulqulleeffaman dunkaanicha keessa turan hunda ni fidan. Luboonnii fi Lewwonnii baatanii ol isaan fidan; ⁵ Solomoon Mootichii fi waldaan Israa'el kan isa biratti walitti qabaman guutuun hoolotaa fi loon akka malee baay'atanii galmeessuu fi lakkaa'uun hin danda'amne aarsaa dhi'eessaa isa wajjin fuula taabotaa dura turan.

⁶ Luboonnis ergasii taabota kakuu WAAQAYYOO sana iddoo isaa gara kutaa qulqullicha mana qulqullummaa keessaa jechuunis Iddoo Iddoo Hunda Caalaa Qulqulluu ta'e sanatti ol galchani qoochoo kiirubeelii jala kaa'an. ⁷ Kiirubeeliinis iddoo taabotichaa irratti qoochoowwan isaanii babal'isani taabotichaa fi dangaraawwan ittiin taabota baatan gaaddiseessan. ⁸ Dangaraawwan kunneen waan akka malee dhedheeratanii fiixeen isaanii Iddoo Qulqulluu fuula iddoo qulqulluu gara keessaa jiru sanaa duraa ni mul'atu ture; garuu Iddoo Qulqulluu sanaa alatti hin mul'atan ture; dangaraawwan kunneen hamma har'aatti illee achuma jiru. ⁹ Taabota sana keessa gabateewwan dhagaa kanneen Museen Kooreebitti iddoo WAAQAYYOO erga Israa'eloonni Gibxii ba'anii booddee itti isaan wajjin kakuu seene sanatti isa keessa kaa'e lamaan malee wanni tokko iyyuu hin turre.

¹⁰ Akkuma luboonni Iddoo Qulqulluu sana keessaa ba'aniin duumessi mana qulqullummaa WAAQAYYOO guute. ¹¹ Luboonnis sababii duumessa sanaatiif hojii isaaniin hojjechuu hin dandeenye; ulfinni WAAQAYYOO mana qulqullummaa isaa guutee tureetii.

¹² Ergasii Solomoon akkana jedhe; "WAAQAYYOO akka duumessa dukkanaa'aa keessa jiraatu dubbateera; ¹³ ani dhugumaan mana qulqullummaa guddaa, iddoo ati bara baraan jiraattu siif ijaareera."

¹⁴ Utuma waldaan Israa'el guutuun achi dhaabatuu mootichi of irra garagalee isaan eebbise. ¹⁵ Akkanas jedhe:

"WAAQAYYOO Waaqni Israa'el inni waan afaan ofii isaatiin abbaa koo Daawitiif waadaa gale sana harkuma ofii isaatiin guute sun haa eebbifamu. Innis akkana jedhee tureetii; ¹⁶ 'Ani gaafan saba koo Israa'elin Gibxii baasee jalqabee akka Maqaan koo achi jiraatuuf jedhee mana qulqullummaa itti ijaarsifachuuf gosoota Israa'el kam iyyuu keessatti magaalaa tokko illee hin filanne; garuu akka inni saba koo Israa'elin bulchuuf Daawitiin filadheera."

¹⁷ "Daawit abbaan koo Maqaa WAAQAYYOO Waaqa Israa'eliif mana qulqullummaa ijaaruu garaa isaatii yaada qaba ture. ¹⁸ WAAQAYYOO garuu abbaa koo Daawitiin akkana jedhe; 'Waan mana qulqullummaa Maqaa kootiif ijaaruun yaada kee keessa jiruuf, ati yaada kana garaadhaa qabaachuun kee gaarii dha. ¹⁹ Ta'us namni mana qulqullummaa naaf ijaaru si'i miti; garuu ilma kee isuma foon keetii fi dhiiga kee ta'etu ijaara; namni mana qulqullummaa Maqaa kootiif ijaaru isa."

²⁰ "WAAQAYYOO waadaa gale sana eegeera; akkuma WAAQAYYOO waadaa gale sana ani amma iddoo abbaa koo Daawit bu'ee teessoo Israa'el irra taa'een jira; Maqaa WAAQAYYOO Waaqa Israa'eliifis mana qulqullummaa ijaareera. ²¹ Anis achi keessatti taabotaaf iddoo qopheesseera; taabota sana keessa immoo kakuu WAAQAYYOO kan inni yeroo Gibxii isaan baasetti abbootii keenya wajjin gale sanatu jira."

Kadhaa Solomoon

8:22-53 kwf - 2Sn 6:12-40

²² Solomoon iddoo aarsaa WAAQAYYOO duratti fuula guutummaa waldaa Israa'el dura dhaabatee harka isaa gara samiitti ol bal'isee ²³ akkanas jedhe:

"Yaa WAAQAYYOO Waaqa Israa'el, Waaqni akka keetii ol samii keessa yookaan gad lafa irra hin jiru; ati garboota kee warra garaa guutuudhaan karaa kee irra deemaniif kakuu fi jaalala kee kan hin geeddaramne sana ni eegda. ²⁴ Ati waadaa garbicha kee abbaa koo Daawitiif galte sana eegdeerta; ati afaanuma keetiin waadaa galtee akkuma har'a ta'ee jiru kana harka keetiin fiixaan baafteerta."

²⁵ "Ammas yaa WAAQAYYOO Waaqa Israa'el, ati waan garbicha kee abbaa koo Daawitiin, 'Yoo ilmaan kee akkuma ati goote sana waan hojjetan hunda keessatti of eeggachaa, amanamummaan fuula koo dura deddeebi'an, ati nama fuula koo dura teessoo Israa'el irra taa'u gonkumaa hin dhabdu' jettee abdachiifte sana eegiif."

²⁶ Kanaafuu amma yaa Waaqa Israa'el dubbiin ati garbicha kee abbaa koo Daawitiif waadaa galte sun haa mirkanaa'u.

²⁷ "Garuu dhugumaan Waaqni lafa irra ni jiraataa? Samiiwwan, samiiwwan samii olii iyyuu si baachuu hin danda'an. Yoos manni qulqullummaa kan ani ijaare kun hammam haa xinnaatu ree! ²⁸ Ta'us yaa WAAQAYYOO Waaqa koo, kadhannaa fi waammata garbichi kee araara barbaaduuf dhi'eessuuf gurra kenni. Iyyaa fi kadhannaa garbichi kee har'a fuula kee duratti dhi'eessu illee dhaga'i. ²⁹ Akka ati kadhannaa garbichi kee fuula isaa garanatti deebifatee kadhatuuf iji kee halkanii fi guyyaa gara mana qulqullummaa kanaa, gara iddoo ati, 'Maqaan koo achi jiraata' jette kanaa haa ilaalu. ³⁰ Yommuu isaan gara iddoo kanaatti fuula deebifatanii kadhatanitti waammata garbicha keetii fi kan saba kee Israa'el dhaga'i. Samii keessaa, iddoo jireenya keetiitii dhaga'i; yommuu dhageessuttis dhiifama godhi."

³¹ "Yoo namni tokko ollaa ofii isaatti daba hojjetee akka kakatu gaafatamee, innis dhufee mana qulqullummaa kana keessatti fuula iddoo aarsaa keetii duratti kakate, ³² ati samii irraa dhaga'iitii tarkaanfii fudhadhu. Nama yakka qabu, yakka isaa matuma isaatti deebistee gatii isaa kennuufiidhaan, nama qajeelaa immoo akkuma qajeelummaa isaatti isaaf falmuudhaan garboota kee gidduutti murtii kenni."

³³ "Yoo sabni kee Israa'el sababii cubbuu sitti hojjeteeff diinaan mo'atamutti, yoo inni gara keetti deebi'ee maqaa keetiif ulfina kennee mana qulqullummaa kana keessatti kadhatee si waammatutti, ³⁴ samii irraa dhaga'iitii cubbuu saba kee Israa'el dhiisiif; biyya abbootii isaaniitiif kennite sanattis deebisii isaan galchi."

³⁵ "Yoo sababii sabni kee cubbuu sitti hojjeteeff samiiwwan cufamanii bokkaan dhabame, yoo isaan sababii ati isaan adabdeeff iddoo kanatti fuula deebifatanii maqaa

kee ulfeessanii cubbuu isaanii irraa deebi'an, ³⁶ ati samii irraa dhaga'iitii cubbuu garboota kee saba kee Israa'el dhiisiif. Karaa qajeelaa isaan jiraachuu qaban isaan barsiisi; biyya dhaala gootee saba keetiif kennite irrattis bokkaa roobsi.

³⁷ "Yommuu beelli yookaan dha'ichi yookaan waagiin yookaan awwaaron yookaan hawwaannisni yookaan korophisni biyyatti dhufutti, yookaan yommuu magaalawwan biyya isaanii kam iyyuu keessatti diinni isaan marsutti, yookaan yommuu balaan yookaan dhukkubni kam iyyuu dhufutti, ³⁸ yoo sabni kee Israa'el rakkina garaa ofii isaa beekkee isaan keessaa eenyu iyyuu gara mana qulqullummaa kanaatti harka isaa bal'isee kadhannaa yookaan waammata dhi'eesse, ³⁹ ati samii irraa, iddoo jireenya keetiitii dhaga'i. Dhiifama godhiif; gargaaris. Si qofatu garaa namaa beekaatii, ati sababii garaa isaa beektuuf tokkoo tokkoo namaatiif akkuma hojii isaa hundaatti waan isaaf malu kenni; ⁴⁰ yoo akkasii isaan bara biyya ati abbootii keenyaaf kennite keessa jiraatan hunda si sodaataniif.

⁴¹ "Akkasumas nama ormaa kan saba kee Israa'el hin ta'in kan maqaa keetiif jedhee, ⁴² sababii isaan waa'ee maqaa kee guddichaa, harka kee jabaa fi irree kee kan diriirfame sanaa dhaga'aniif biyya fagootii dhufe, yoo inni dhufee fuula isaa gara mana qulqullummaa kanaatti deebifatee kadhate, ⁴³ ati samii irraa, iddoo jireenya keetiitii dhaga'i. Akka saboonni addunyaa hundinuu akkuma saba kee Israa'el sana maqaa kee beekani si sodaataniif fi akka isaan akka manni ani ijaare kun maqaa keetiin waamamu illee beekaniif jedhii waan namni ormaa sun si kadhatu hunda godhiif.

⁴⁴ "Yommuu sabni kee diinota isaa loluuf jedhee gara ati itti isa ergitu kam iyyuu duulutti, yoo inni gara magaalaa ati filatee fi gara mana qulqullummaa kan ani Maqaa keetiif ijaare kanaatti fuula deebifatee WAAQAYYON kadhate, ⁴⁵ ati samii irraa kadhannaa isaatii fi waammata isaa dhaga'iitii dhimma isaa isaaf raawwadhu.

⁴⁶ "Sababii namni cubbuu hin hojjenne tokko iyyuu hin jirreef, yommuu isaan cubbuu sitti hojjetanitti ati isaaniiti aartee diina isaan booji'ee biyya isaa kan fagoo yookaan dhi'ootti isaan geessutti dabarsitee isaan kennita; ⁴⁷ yoo isaan biyya boojiudhaan itti geeffamanitti gaabbanii qalbii geeddaratanii, 'Nu cubbuu hojjenneerra; balleessineerra; waan hamaas hojjenneerra' jedhanii biyya boojitoota isaanii keessatti si kadhatan, ⁴⁸ yoo isaan biyya diinota isaanii kanneen booji'anii isaan fudhatan sanaa keessatti garaa fi lubbuu isaanii guutuudhaan gara keetti deebi'anii gara biyya ati abbootii isaaniitiif kenniteetti, gara magaalaa ati filatee fi gara mana qulqullummaa kan ani Maqaa keetiif ijaare sanaatti fuula deebifatanii si kadhatan, ⁴⁹ ati samii irraa, iddoo jireenya keetiitii kadhannaa fi waammata isaanii dhaga'iitii dhimma isaanii isaaniif raawwadhu. ⁵⁰ Saba kee kan cubbuu sitti hojjeteeffis dhiifama godhi; yakka isaan sitti hojjetan hundas isaaniif dhiisiitii akka boojitoonni isaanii garaa isaaniif laafan godhi; ⁵¹ isaan saba keetii fi dhaala kee kan ati Gibxii boolla ibiddaa kan sibiila itti baqsan keessaa baaftedhaatii.

⁵² "Tji kee waammata garbicha keetiitii fi waammata saba kee Israa'el haa argu; atis yeroo isaan sitti iyyatan hunda isaan dhaga'i. ⁵³ Yaa WAAQAYYO Gooftaa, ati akkuma gaafa Gibxi keessaa abbootii keenya baafta sana karaa garbicha kee Museetiin dubbattetti, akka isaan dhaala kee ta'aniif jettee saboota addunyaa kanaa hunda keessaa isaan filatteetii."

⁵⁴ Solomoonis kadhannaa fi waammata WAAQAYYOTTI dhi'eeffachaa ture sana hunda fixannaan fuula iddoo aarsaa WAAQAYYOO duraa, iddoo itti harka isaa samiitti ol bal'ifatee jilbeenfatee ture sanaa ka'ee. ⁵⁵ Innis dhaabatee akkana jedhee sagalee guddaadhaan waldaa Israa'el hunda eebbise:

⁵⁶ "WAAQAYYO akkuma abdachiisee ture sanatti saba isaa Israa'eliif boqonnaa kenne sanaaf galanni haa ta'u. Abdii gaarii inni karaa garbicha isaa Museetiin kenne sana hunda keessaa jechi tokko iyyuu lafa hin buune. ⁵⁷ WAAQAYYO Waaqni keenya akkuma abbootii keenya wajjin ture sana nu wajjin haa jiraatu; inni yoom iyyuu nu hin dhiisiin yookaan nu hin gatin. ⁵⁸ Akka nu karaa isaa hunda irra deemnee ajajawwan, seerawwanii fi qajeelchawwan inni abbootii keenyaaf kennee ture sana eegnuuf inni garaa keenya gara ofii isaatti haa deebisu. ⁵⁹ Akka WAAQAYYO akkuma guyyaa guyyaan barbaachisaa ta'etti garbicha isaatii fi saba isaa Israa'el hunda gargaaruuf kadhannaan koo kan ani fuula WAAQAYYOO duratti dhi'eessu kun halkanii fi guyyaa WAAQAYYO Waaqa keenya bira haa ga'u; ⁶⁰ kunis akka sabni lafa irra jiraatu hundi akka WAAQAYYO Waaqa ta'ee fi akka isa malee Waaqni biraa hin jirre beekuuf. ⁶¹ Kanaafuu isin akkuma har'aa kana seerawwan isaatiin buluu fi ajajawwan isaa eeguudhaaf guutumaan guutuutti WAAQAYYO Waaqa keenyaaf of kennuu qabdu."

*Manni Qulqullummaa Eebbifamuu Isaa**8:62-66 kwf - 2Sn 7:1-10*

⁶² Ergasii mootichii fi sabni Israa'el kanneen isa wajjin turan hundi fuula WAAQAYYOO duratti aarsaa dhi'eessan. ⁶³ Solomoonis aarsaa nagaa WAAQAYYOO dhi'eesse; aarsaan dhi'eeffames loon kuma digdamii lama, hoolotaa fi re'oota kuma dhibba tokkoo fi digdama ture. Akkasiin mootichii fi sabni Israa'el hundi mana qulqullummaa WAAQAYYOO eebbisan.

⁶⁴ Mootichis guyyuma sana iddoo walakkaa oobdii fuula mana qulqullummaa WAAQAYYOO dura jiru sanaa Waaqaaf addaan ni baasee aarsaa gubamu, kenna midhaanii fi aarsaa nagaa achitti dhi'eesse; kunis sababii iddooon aarsaa kan naasii irraa hojjetamee fuula WAAQAYYOO dura jiru sun aarsaa gubamu, kenna midhaanii fi cooma aarsaa nagaa baachuu hin dandeenyef.

⁶⁵ Kanaafuu Solomoon yeroo sanatti Israa'eloota isa wajjin turan hunda wajjin jechuunis waldaa guddicha Malkaa Leeboo Hamaatii jalqabee hamma laga Gibxitti walitti qabame wajjin ayyaana ayyaanefate. Isaanis ayyaana kana bultii torbaa fi bultii biraa torba walumaa galatti bultii kudha afur fuula WAAQAYYOO Waaqa keenyaa duratti ayyaanefatan. ⁶⁶ Innis guyyaa itti aanutti namoota of irraa geggeesse. Isaanis waan gaarii WAAQAYYOO garbicha ofii isaa Daawitii fi saba ofii isaa Israa'eliif hojjetee hundaaf mooticha eebbisanii ililchaa garaa isaanii keessatti gammadaa mana isaaniitti galan.

9*WAAQAYYOO Solomoonitti Mul'ate**9:1-9 kwf - 2Sn 7:11-22*

¹ Yommuu Solomoon mana qulqullummaa WAAQAYYOOTII fi masaraa mootummaa ijaaree waan hojjechuu barbaade hunda fixetti, ² WAAQAYYOO akkuma Gibe'oonitti isatti mul'ate sana ammas yeroo lammaffaa isatti mul'ate. ³ WAAQAYYOO akkana isaan jedhe:

"Ani kadhannaa fi waammata ati fuula koo duratti dhi'eessite dhaga'eera; ani mana qulqullummaa kan ati ijaarte kana maqaa koo bara baraan achi keessa kaa'uudhaan eebbiseera. Iji koo fi garaan koo yeroo hunda achuma jira.

⁴ "Yoo ati akkuma Daawit abbaan kee godhe sana garaa qulqulluu fi qajeelummaan fuula koo dura deemtee waan ani ajaje hunda hojjetee, yoo qajeelchawwanii fi seerawwan koo eegde, ⁵ ani akkuman yeroo, 'Ati nama teessoo Israa'el irra taa'u hin dhabdu' jedhee abbaa kee Daawitiiif waadaa gale sana teessoo mootummaa keetii Israa'el irratti jabeessee bara baraan nan dhaaba.

⁶ "Garuu yoo ati yookaan ilmaan kee narraa gortanii ajajawwanii fi qajeelchawwan ani isinii kenne sana irraa gara waaqota biraa tajaajiluu fi isaan waaqeffachuu dhaqxan, ⁷ ani biyya isaaniif kenne keessaa Israa'elin nan ari'a; mana qulqullummaa kan Maqaa kootiif qulqulleesse kana illee nan balfa. Ergasii Israa'el saboota hunda biratti waan kolfaatii fi waan qoosaa taati. ⁸ Manni qulqullummaa kunis tuullaa waan diigamee ta'a; namni achiin darbu hundis dinqisiifatee, 'WAAQAYYOO maaliif biyya kanaa fi mana qulqullummaa kanatti waan akkasii hojjetee?' jedhee itti qoosa.

⁹ Namoonnis, 'Sababiin inni balaa kana hunda isaanitti fideef waan isaan WAAQAYYOO Waaqa isaanii kan abbootii isaanii Gibxii isaan baase sana dhiisanii, waaqota biraa hammatanii, isaanin waaqeffatanii tajaajilaniif' jedhanii ni deebisu."

*Hojii Solomoon Hojjetee Kan Biraa**9:10-28 kwf - 2Sn 8:1-18*

¹⁰ Dhuma waggaa digdamaatti, yeroo itti Solomoon manneen lamaan jechuunis mana qulqullummaa WAAQAYYOOTII fi masaraa mootummaa ijaare sanatti, ¹¹ Hiiraam mootichi Xiirros akkuma Solomoon Mootichi barbaadetti muka birbirsatiif fi gaattiraa akkasuma warqee kenneef; Solomoon immoo magaalawwan Galiilaa keessa jiran digdama Hiiraam mooticha Xiirrosiif kenne. ¹² Hiiraam garuu yommuu Xiirros irraa ka'ee magaalawwan Solomoon isaaf kenne ilaalu dhaqetti magaalawwan sanatti hin gammanne. ¹³ Innis, "Yaa obboleessoo, magaalawwan ati naa kennite kunneen magaalawwan akkamii ti?" jedhee isa gaafate. Kanaafuu biyya Kaabuul jedhee maqaa hamma har'aatti ittiin waamaman tokko baaseef. ¹⁴ Hiiraamis warqee taalaantii 120 mootichaaf ergee ture.

¹⁵ Seenaan itti Solomoon Mootichi mana qulqullummaa WAAQAYYOO, masaraa mootummaa kan ofii isaa Miiloo, dallaa Yerusaalem, Haazoor, Megidoo fi Geezirin ijaaruuf hojjetoota dirqamanii hojii humnaa hojjetanitti fayyadame kanaa dha. ¹⁶ Fara'oon mootichi Gibxi Geezirin lolee qabatee ture. Innis ibidda itti qabsiise; Kana'anota achi keessa jiraatan fixee intala ofii isaa, niitii Solomoon sanaaf magaalattii gabbara

godhee kenne. ¹⁷ Solomoonis deebisee Geezirin ijaare. Innis Beet Horoon gad aanu, ¹⁸ Baa'ilaati, Tadmoor kan gammoojjii biyya Yihoodaa keessatti argamtu sana, ¹⁹ akkasumas magaalawwan kuusaawwan isaa hunda, magaalawwan gaariiwwanii fi kan fardeen isaa, waanuma Yerusaalemitti, Libaanoonittii fi biyya bulchu hunda keessatti ijaaruu barbaade hundumas ni ijaare.

²⁰ Ammas namoota Israa'eloota hin ta'in kanneen Amoorota, Heetota, Feerzota, Hiiwotaa fi Yebuusota jalaa hafanitu jira. ²¹ Solomoonis sanyiiwwan namoota kanneen hundaa warra biyyattii keessatti hafan kanneen Israa'eloonni balleessuu hin danda'in sana akkuma hamma har'aatti illee jiru kana akka isaan hojii garbummaa hojjetaniif dirqisiise. ²² Solomoon garuu Israa'eloota keessaa nama tokko illee hin garboomsine; isaan loltoota isaa, qondaaltota mootummaa isaa, ajajjuuwwan loltoota isaa, abbootii duulaa, ajajjuuwwan gaariiwwanii fi ajajjuuwwan abbootii fardaa isaa turan. ²³ Isaan akkasumas hojii Solomoon hojjechiisaa ture keessatti qondaaltota hangafoota turan; qondaaltonni 550 hojjetoota hojii hojjetan kana to'achaa turan.

²⁴ Solomoonis erga intalli Fara'oon sun Magaalaa Daawit keessaa gara masaraa mootummaa kan Solomoon isheef ijaare sana dhuftee booddee Miiloo ijaare.

²⁵ Solomoon waggaatti yeroo sadii aarsaa gubamuu fi aarsaa nagaa iddoo aarsaa kan WAAQAYYOO ijaare sana irratti dhi'eessa ni ture; sana wajjinis, fuula WAAQAYYOO duratti ixaana aarsee akkasiin hojii ijaarsa mana qulqullummaa fixe.

²⁶ Solomoon mootichi amma illee Eziyoon Geber ishee biyya Edoom keessa, Eelooti bira jirtu keessatti qarqara Galaana Diimaatti dooniiwwan hojjetete. ²⁷ Hiiraamis akka isaan namoota Solomoon wajjin dooniiwwan irra hojjetaniif namoota isaa warra doonii oofan kanneen galaanicha beekan erge. ²⁸ Isaanis dooniidhaan Oofiir dhaqanii warqee taalaantii 420 fidanii Solomoon mootichatti kennan.

10

Mootittiin Saabaa Solomoonin Arguu Dhaqxe

10:1-13 kwf - 2Sn 9:1-12

¹ Mootittiin Shebaa waa'ee maqaa Solomooniitti fi ulfina inni maqaa WAAQAYYOOTIIF qabu dhageenyaan gaaffiiwwan jajjaboodhaan qortee isa ilaaluuf gara Solomoon dhufte. ² Isheenis miiltoo akka malee baay'ee wajjin gaalawwan urgooftuu, warqee hedduu fi dhagaawwan gati jabeeyyii baatan fudhattee Yerusaalem dhufte; Solomoon bira geenyaanis waan garaa ishee jiru hunda isa wajjin haasofte. ³ Solomoonis gaaffii ishee hundaaf deebii kenne; wanni mootichi isheef ibsuu dadhabe tokko iyyuu hin turre. ⁴ Mootittiin Shebaa yommuu ogummaa Solomoon, masaraa mootummaa kan inni ijaare, ⁵ nyaata maaddii isaa irratti dhi'aatu, haala itti qondaaltonni isaa tataa'an, hojjetoota uffata hojii uffatani hojjetan, warra daadhii isaaf dhi'eessanii fi aarsaa gubamu kan inni mana qulqullummaa WAAQAYYOO keessatti dhi'eesse argitetti akka malee dinqisiifatte.

⁶ Isheenis mootichaan akkana jette; "Oduun ani waa'ee waan ati hojjetetii fi waa'ee ogummaa keetii biyyuma kootti dhaga'e sun dhugaa dha. ⁷ Ani garuu hamman dhufee ijuma kootiin argutti wantoota kanneen hin amanne. Dhugumaan walakkaan isaa iyyuu natti hin himamne; ati ogummaa fi badhaadhummaadhaan oduu ani dhaga'e sana akka malee caalta. ⁸ Namoonni kee hammam haa gammadan! Qondaaltonni kee warri yeroo hunda fuula kee dura dhadhaabatanii ogummaa kee dhaga'an hammam haa gammadan! ⁹ WAAQAYYOO Waaqni kee inni sitti gammadee teessoo Israa'el irra si teessise sun haa galateeffamu. WAAQAYYOO sababii Israa'eliif jaalala bara baraa qabuuf akka ati murtii qajeelaa fi qajeelummaa eegduuf mootii si godheera."

¹⁰ Isheenis warqee taalaantii 120, urgooftuu akka malee baay'ee fi dhagaawwan gati jabeeyyii mootichaaf kennite. Urgooftuun akka urgooftuu mootittiin Shebaa Solomoon Mootichaaf kennite sanaa baay'atu gonkumaa ergasii hin fidamne.

¹¹ Dooniiwwan Hiiraam biyya Oofiir irraa warqee fidan; isaanis fe'iisa muka sandaliitti fi dhagaawwan gati jabeeyyii baay'ee achii ni fidan. ¹² Mootichis muka sandalii sana utubaa mana qulqullummaa WAAQAYYOOTII fi kan masaraa mootummaa akkasumas baganaa fi kiraara faarfattootaa tolchuuf itti fayyadame. Mukni sandalii kan akkas baay'atu ergasii hamma har'aatti takkumaa alaa hin fidamne yookaan hin argamne.

¹³ Solomoon Mootichis waan qabeenya mootummaa ofii isaa keessaa kenneef irratti dabalee waan isheen barbaaddee fi waan isheen kadhatte hunda mootittii Shebaatiif ni kenne. Isheenis ergasii kaatee miiltota ishee wajjin biyya ofii isheetti deebite.

Badhaadhummaa Solomoon

10:14-29 kwf - 2Sn 1:14-17; 9:13-28

¹⁴ Ulfinni warqee kan wagguma waggaan Solomooniif galu taalaantii 666 ture; ¹⁵ kunis gibira daldaltoota qabeenya gurguddaatiif fi xixinnaa irraa argamuu fi galii inni mootota biyya Arabaa hundaa fi bulchitoota biyya keessaa irraa argatu hin dabalatu.

¹⁶ Solomoon Mootichis warqee tumame irraa gaachanawwan gurguddaa dhibba lama ni tolche; tokkoon tokkoon gaachanawwan sanaas warqee saqilii dhibba ja'a fixe. ¹⁷ Akkasumas warqee tumame irraa gaachana xixinnaa dhibba sadii ni tolche; tokkoon tokkoon gaachana sanaas warqee minnaanii dhibba sadii fixe. Mootichis gaachanawwan kanneen masaraa mootummaa kan Bosona Libaanoon keessa ni kaa'e.

¹⁸ Mootichis teessoo guddaa tokko ilka arbaa irraa hojjetee warqee qulqulluu itti uffise. ¹⁹ Teessoon sun gulantaawwan ja'a qaba ture; karaa dugda duubaatiin fiixee geengoo tokko qaba. Karaa teessoo sanaa lamaaniiinis waan harka irra kaa'atanitu ture; tokkoo tokkoo waan harka irra kaa'atan sanaa biras fakkii leencaa tokko tokkotu dhaabatee ture. ²⁰ Gulantaawwan ja'aan sana irras leenconni kudha lama tokko fiixee tokkoon, fakkiin kaan immoo fiixee kaaniin dhadhaabachaa turan. Wannii akkasii takkumaa mootummaa biraa kamiif iyyuu hin tolfamne. ²¹ Mi'i Solomoon Mootichi ittiin dhugu hundinuu warqee irraa hojjetame; mi'i masaraa mootummaa kan Bosona Libaanoon jedhamu sanaa hundi immoo warqee qulqulluu irraa hojjetame. Sababii bara Solomoon keessa meetiin akka waan gatii hin qabne tokkootti ilaalamaa tureef wannii tokko iyyuu meetii irraa hin hojjetamne. ²² Mootichis dooniiwwan Hiiraam gidduudhaa dooniiwwan daldalaa galaana irraa qaba ture. Isaanis waggaa sadii sadiitti yeroo tokko warqee, meetii fi ilka arbaa, qamalee fi jaldeessa fidanii ni dhufu ture.

²³ Solomoon Mootichi badhaadhummaa fi ogummaadhaan mootota addunyaa hunda ni caala ture. ²⁴ Addunyaan hundinuu ogummaa Waaqni garaa isaa keessa kaa'e dhaga'uuf Solomoon bira dhufuu barbaada ture. ²⁵ Namni waggaa waggaati isa bira dhufu hundinuu kennaa mi'a meetii fi kan warqee, uffata, mi'a lolaa, urgooftuu, fardeenii fi gaangolii fidaafii ture.

²⁶ Solomoonis gaariiwwanii fi fardeen walitti ni kuufate; innis gaariiwwan kuma tokkoo fi dhibba afurii fi fardeen kuma kudha lama qaba ture; isaan kanneenis magaalawwan gaariiwwanii keessaa fi Yerusaleem keessa of bira ni kaa'ate. ²⁷ Mootichi akka meetiin Yerusaleem keessatti akkuma dhagaa baay'atu, akka mukni birbirsaa akkuma mukkeen harbuu kanneen gaarran jalaatti baay'atu godhe. ²⁸ Fardeen Solomoon Gibxii fi Qaweedhaa fidaman; daldaltoota mootummaatu Qaweedhaa gatii yerootiin isaan bite. ²⁹ Isaanis gaarii tokko meetii saqilii dhibba ja'aan, farda immoo meetii saqilii dhibba tokkoo fi shantamaan Gibxii bitanii fidan. Akkasumas gaariiwwanii fi fardeen kanneen erganii mootota Heetotaatii fi mootota Sooriyaa hundatti gurguru turan.

11

Niitota Solomoon

¹ Solomoon Mootichi garuu intala Fara'oon irratti dubartoota biyya ormaa hedduu jaallate; isaanis Mo'aabota, Amoonota, Edoomota, Siidoonotaa fi Heetota turan. ² Jarri kunneen saboota WAAQAYYO, "Sababii isaan dhugumaan garaa keessan gara waaqota ofii isaaniitti garagalchaniif isin fuudhaa fi heerumaan jaratti hin makaminaa" jedhee waa'ee isaaniif Israa'elootatti dubbatee turee dha. Ta'us Solomoon jaalalaan isaaniitti hidhame. ³ Innis niitota maatii moototaa keessaa dhalatan dhibba torbaa fi saajjatoowwan dhibba sadii qaba ture; niitonni isaa kunneenis karaa irraa isa balleessan. ⁴ Akkuma Solomoon umuriidhaan dulloomaa deemeen niitonni garaa isaa gara waaqota biraatti garagalchan; garaan isaas akka garaan abbaa isaa Daawit ture sana guutummaan guutuutti WAAQAYYO Waaqa isaatiif hin kennamne. ⁵ Innis Ashtooreti waaqitii Siidoonotaatii fi Moolek waaqicha Amoonotaa jibbisiisaa sana duukaa bu'e. ⁶ Solomoonis akkasiin fuula WAAQAYYOO duratti waan hamaa hojjetee; inni akka Daawit abbaan isaa hojjetee sana guutummaan guutuutti WAAQAYYO duukaa hin buune.

⁷ Solomoonis gaara Yerusaleemiin gara ba'a biiftuu jirtu tokko irratti Kemoosh Waaqa Mo'aab jibbisiisaa fi Moolek Waaqa Amoon jibbisiisaa sanaaf iddoo sagadaa ijaare. ⁸ Inni akka isaan ixaana aarsanii waaqota isaaniitiif aarsaa dhi'eessaniifis niitota isaa kanneen biyya ormaatii fuudhe hundumaaf iyyuu akkasuma godhe.

⁹ WAAQAYYOS sababii garaan Solomoon WAAQAYYO Waaqa Israa'el kan yeroo lama isatti mul'ate sana irraa goreef isatti aare. ¹⁰ Waaqni akka Solomoon waaqota biraa duukaa hin buune isa dhowwu iyyuu, Solomoon ajaja WAAQAYYOO hin eegne. ¹¹ Kanaafuu WAAQAYYO Solomooniin akkana jedhe; "Sababii yaadni kee akkana ta'ee, atis kakuu fi seera ani siif kenne sana hin eeginiif, ani dhugumaan mootummaa sirraa baqaqsee

tajaajilaa keetiif nan kenna. ¹² Ta'us ani sababii abbaa kee Daawitiif jedhee waan kana bara jireenya keetii keessa hin godhu. Harka ilma keetii keessaa mootummaa kana nan baqaqsa. ¹³ Ta'us ani mootummaa sana guutumaan guutuutti isa irraa hin baqaqsu; garuu ani sababii garbicha koo Daawitii fi sababii Yerusaalem ishee ani filadhe sanaatiif jedhee gosa tokko ilma keetiif nan kenna."

Diinota Solomoon

¹⁴ WAAQAYYO diina tokko namicha Hadaad jedhamu kan gosa Edoom namicha sanyii moototaa tokko Solomoonitti kaase. ¹⁵ Duraan yeroo Daawit Edoomiin wal lolaa turetti, Yoo'aab ajajaan loltootaa kan warra du'e awwaaluu dhaqe sun namoota Edoom hunda barbadeesse. ¹⁶ Yoo'aabii fi Israa'eloonni hundinuu hamma namoota Edoom keessa jiraatan hunda fixanitti ji'a ja'a achi turan. ¹⁷ Hadaad garuu yeroo sana mucaa xinnaa ture; innis qondaaltota Edoom kanneen abbaa isaa tajaajilaa turan wajjin Gibxitti baqate. ¹⁸ Isaanis Midiyaanii ka'anii Phaaraan dhaqan. Phaaraan keessaas namoota fudhatanii gara mooticha Gibxi, gara Fara'oon dhaqan; Fara'oonis mana, lafa inni qubatu fi nyaata Hadaadiif kenne.

¹⁹ Fara'oon akka malee Hadaaditti gammadee obboleettii niitii isaa, obboleettii Tahifenees Mootittii isatti heerumsiise. ²⁰ Obboleettiin Tahifenees sunis ilma Geenbaat jedhamu tokko deesseef; Taahefene mucaa sana fuutee masaraa mootummaa keessatti guddifte. Genubatis ijoollee Fara'oon wajjin achi jiraate.

²¹ Hadaad utuu biyya Gibxi keessa jiruu akka Daawit abbootii ofii isaa wajjin boqotee fi akka Yoo'aab ajajaan loltootaa sunis du'e ni dhaga'e. Hadaadis Fara'ooniin, "Akka ani biyya kootti deebi'uuf naa eeyyami" jedhe.

²² Fara'oon immoo, "Ati maal asii dhabdee biyya keetti deebi'uu feeta?" jedhee isa gaafate.

Hadaadis deebisee, "Homaa hin dhabne; garuu akka ani dhaqu naa eeyyami!" jedheen.

²³ Waaqni amma illee diina biraa Rezoon ilma Eliyaadaa namicha gooftaa isaa Hadaadezer mootichaa Zoobaa jalaa baqate sana Solomoonitti kaase. ²⁴ Innis yeroo Daawit loltoota Suubaa barbadeessetti namoota of biratti walitti qabatee hoogganaa tuuta finciltootaa ta'e; finciltoonni sunis Damaasqoo dhaqanii achi jiraatan; isas achitti mootii godhatan. ²⁵ Reezoon rakkina Hadaad fide sanatti dabalee bara jireenya Solomoon hunda diina Israa'el ture. Reezoon bulchaa Sooriyaa ture; Israa'elinis akka malee jibbaa ture.

Yerobi'aam Solomoonitti Finciluu Isaa

²⁶ Yerobi'aam ilmi Nebaat mootichatti fincile. Innis qondaaltota Solomoon keessaa nama tokko ture; inni nama gosa Efraataa kan Zereedaadhaa dhufe ture; haati isaa immoo niitii dhirsaa hin qabne kan Zeruwaa jedhamtu ture.

²⁷ Sababiin inni ittiin mootichatti ka'es kanaa dha: Solomoonis Miiloo ijaaree dallaa magaalaa abbaa isaa Daawit deebisee haaromse. ²⁸ Yerobi'aam goota cimaa ture; Solomoonis akka dargaggeessi sun jabaatee hojii isaa hojjetu arginaan itti gaafatamaa hojjetoota hojii humnaa kan mana Yoosif hundaa isa godhe.

²⁹ Gaaf tokko utuu Yerobi'aam Yerusaalem keessaa ba'aa jiruu Ahiyaan raajichi Shiiloo kaabbaa haaraa uffatee isatti dhufe. Isaan lachuu kophuma isaanii ala turan; ³⁰ Ahiyaan kaabbaa haaraa uffate sana fuudhee iddoo kudha lamatti gargari tarsaase. ³¹ Ergasiis Yerobi'aamiin akkana jedhe; "Qooda kudhan ofii keetii fudhadhu; WAAQAYYO Waaqni Israa'el akkana jedhaatii; 'Kunoo ani harka Solomooniitii mootummaa baqaqsee gosa kudhan siifin kenna. ³² Garuu sababii garbicha koo Daawitii fi sababii magaalaa Yerusaalem kan ani gosa Israa'el hunda keessaa filadhe sanaatiif inni gosa tokko ni argata. ³³ Ani sababii isaan na dhiisanii Ashtooreti waaqittii Siidoonotaa, Kemoosh waaqicha Mo'aabotaatii fi Moolek waaqicha Amoonotaa waaqeffatanii fi sababii isaan karaa koo irra hin deeminiif yookaan sababii waan fuula koo duratti qajeelaa ta'e hin hojjetiniif yookaan sababii isaan akka Daawit abbaan Solomoon hojjetee sana sirnaa fi seera koo hin eeginiif waan kana hojjedhe.

³⁴ "Ani garuu mootummaa sana guutumaan guutuutti harka Solomoonii hin fuudhu; ani sababii Daawit garbicha koo kan ani filadhe, kan ajaja koo fi sirna koo eege sanaatiif jedhee Solomoonin bara jireenya isaa guutuu bulchaa godheera. ³⁵ Ani harka ilma isaatii mootummaa sana fuudhee gosa kudhan siifin kenna. ³⁶ Ani akka garbichi koo Daawit yeroo hunda Yerusaalem magaalaa ani Maqaa koo achi kaa'achuuf filadhe sana keessatti fuula koo duratti ibsaa qabaatuuf jedhee gosa tokko ilma isaatiif nan kenna. ³⁷ Si'i garuu ani nan fudhadha; atis waan garaan kee fedhu hunda ni bulchita; Israa'el irratti mootii ni taata. ³⁸ Yoo ati akkuma garbichi koo Daawit hojjetee sana, waan ani si ajaju hunda

hojjetee karaa koo irra deemte, yoo ati sirnaa fi ajaja koo eeguudhaan waan fuula koo duratti qajeelaa ta'e hojjetee, ani si wajjin nan ta'a. Anis mootummaa bulu kan akkan Daawitiif dhaabe sanaa siifis nan dhaaba; akkasumas Israa'elin sitti nan kenna. ³⁹ Ani waan kanaaf jedhee sanyii Daawit nan dhiphisa; garuu bara baraanii miti.''

⁴⁰ Solomoonis Yerobi'aamin ajjeesuu yaale; Yerobi'aam garuu gara Shiishaaq mooticha Gibxitti baqatee hamma Solomoon du'utti achuma ture.

Solomoon Du'uu Isaa

11:41-43 kwf - 2Sn 9:29-31

⁴¹ Wannii bara mootummaa Solomoon keessa hojjetaman kan biraa, wannii inni hojjetee fi ogummaan isaa hundi kitaaba seenaa Solomoon keessatti barreeffamanii jiru mitii? ⁴² Solomoon Yerusaleem keessatti mootii ta'ee waggaa afurtama saba Israa'el hunda ni bulche. ⁴³ Innis ergasii abbootii isaa wajjin boqotee magaalaa abbaa isaa, magaalaa Daawit keessatti ni awwaalame. Rehoobo'aam ilmi isaa iddoo isaa bu'ee mootii ni ta'e.

12

Israa'el Rehoobo'aamitti Fincile

12:1-24 kwf - 2Sn 10:1-11:4

¹ Rehoobo'aamis sababii Israa'eloonni hundinuu mootii isa gochuudhaaf achi yaa'aniif ka'ee Sheekem dhaqe. ² Yerobi'aam ilmi Nebaat yommuu oduu kana dhaga'etti deebi'ee dhufe; inni yeroo sanatti Solomoon Mooticha jalaa baqatee Gibxi jiraachaa tureetii. ³ Kanaafuu Yerobi'aamitti nama erganii waamanii, innii fi waldaan Israa'el guutuun gara Rehoobo'aam dhaqanii akkana jedhaniin: ⁴ "Abbaan kee waanjoo ulfaatuu nurra kaa'ee ture; ati immoo amma hojii inni humnaan nu hojjechiise sanaa fi waanjoo ulfaataa inni nurra kaa'ee sana nuuf salphisi; nus si tajaajillaa."

⁵ Rehoobo'aam immoo deebisee, "Bultii sadiif deemaatii ergasii deebi'aa gara koo kottaa" jedheen. Kanaafuu namoonni sun ba'anii deeman.

⁶ Ergasiis Rehoobo'aam Mootichi maanguddoota bara jirenya isaa keessa abbaa isaa Solomoonin tajaajilaniin mari'ate. Innis, "Isin akka ani namoota kanaaf maal deebisu na gorsitu?" jedhee gaafate.

⁷ Isaanis, "Yoo ati har'a tajaajillaa saba kanaaf taatee isaan tajaajiltee deebii gaarii kenniteef, isaan yeroo hunda tajaajiltoota kee ni ta'u" jedhanii deebisaniif.

⁸ Rehoobo'aam garuu gorsa maanguddoonni kennaniif didee dargaggoota isa wajjin guddatan kanneen isa tajaajilan wajjin mari'ate. ⁹ Innis, "Gorsi keessan maal? Namoota, 'Waanjoo abbaan kee nurra kaa'ee kana nuuf salphisi' naan jedhan kanaaf akkamitti haa deebisnu?" jedhee isaan gaafate.

¹⁰ Dargaggoonni isa wajjin guddatan sunis akkana jedhanii deebisaniif; "Namoonni kunneen, 'Abbaan kee waanjoo ulfaataa nurra kaa'ee; ati garuu waanjoo keenya nuu salphisi' siin jedhan; ati amma akkana jedhiin; 'Qubni koo xinnaan mudhii abbaa kootii irra furdaa dha. ¹¹ Abbaan koo waanjoo ulfaataa isin irra kaa'ee; ani immoo hamma caalaa iyyuu isinittan ulfaachisa. Abbaan koo qacceedhaan isin garafe; ani immoo torbaanqabaadhaanan isin garafa.'"

¹² Bultii sadii booddee Yerobi'aamii fi namoonni hundi akkuma mootichi, "Guyyaa sadii keessatti deebi'aa gara koo kottaa" jedhe sana gara Rehoobo'aamitti deebi'an.

¹³ Mootichi immoo afaan hamaadhaan namoota sanaaf deebii kenne. Gorsa maanguddoonni kennaniif sana didee ¹⁴ gorsa dargaggootaa fudhatee, "Abbaan koo waanjoo keessan isinitti ulfaachise; ani immoo hamma iyyuu caalaa isinittan ulfaachisa. Abbaan koo qacceedhaan isin garafe; ani immoo torbaanqabaadhaanan isin garafa" jedhe. ¹⁵ Kanaafuu mootichi namoota sana hin dhaggeeffanne; wannii kun akka dubbiin WAAQAYYO karaa Ahiiyaa namicha biyya Shiiloo sanaatiin Yerobi'aam ilma Nebaatitti dubbate sun raawwatamuuf WAAQAYYO biraa dhufetii.

¹⁶ Israa'el hundi yommuu akka mootichi isaan dhaggeeffachuu dide arganitti akkana jedhanii mootichaaf deebii kennan:

"Nu Daawit irraa qooda maalii qabna?"

Ilma Isseey irraas maal qabna?

Yaa Israa'el gara dunkaana keetii!

Yaa Daawit mana kee eeggadhu!"

Kanaafuu Israa'eloonni gara mana ofii isaaniitti deebi'an. ¹⁷ Israa'eloota magaalaa Yihuudaa keessa jiraatan garuu Rehoobo'aamtu bulchaa ture.

¹⁸ Rehoobo'aam Mootichis, Adooraa itti gaafatamaa hojjetoota hojii humnaa ni erge; Israa'el hundi immoo dhagaadhaan tumanii isa ajjeese. Rehoobo'aam Mootichi garuu

ariitidhaan gaarii ofii isaa yaabbatee jalaa miliqee Yerusaalemitti baqate. ¹⁹ Kanaafuu Israa'eloonni hamma har'aatti mana Daawititti fincilaniiru.

²⁰ Israa'eloonni hundinuu akka Yerobi'aam deebi'e dhageenyaan nama itti erganii gara waldaatti isa waamanii Israa'el hunda irratti mootii isa godhan. Gosa Yihuudaa qofatu mana Daawitiiif amanamaa ta'ee hafe.

²¹ Rehoobo'aam yommuu Yerusaaleem ga'etti akka isaan Israa'elitti duulanii Rehoobo'aam ilma Solomooniif mootummaa deebisaniif jedhee mana Yihuudaa hundaa fi gosa Beniyaam keessaa namoota loluu danda'an kuma dhibba tokkoo fi saddeettama walitti qabe.

²² Garuu dubbiiin Waaqaa kun akkana jedhee gara nama Waaqaa, gara Shema'a'iyaa ni dhufe; ²³ "Rehoobo'aam ilma Solomoon mooticha Yihuudaatiin, Yihuudaa fi Beniyaam hundaan, saba hafeenis akkana jedhi; ²⁴ 'WAAQAYYO akkana jedha; obboloota keessan Israa'eloota loluudhaaf jettanii ol hin ba'inaa. Sababii wanni kun ana biraa dhufeff tokkoon tokkoon keessan gara mana keessaniitti galaa.'" Kanaafuu isaan dubbii WAAQAYYOO dhaga'anii akkuma WAAQAYYO ajaje sanatti mana ofii isaaniitti dacha'an.

Jabbiwwan Warqee Irraa Tolfaman

²⁵ Yerobi'aamis ergasii biyya gaaraa Efreem keessatti Sheekemin jabeessee ijaaree achi jiraate. Achiis ba'ee Phenuu'eelin ijaare.

²⁶ Yerobi'aam akkana jedhee garaa isaatti yaade; "Amma mootummaan mana Daawitii ni deebi'a. ²⁷ Namoonni kunneen yoo mana qulqullummaa WAAQAYYOO kan Yerusaaleem jiru sanatti aarsaa dhi'eessuuf ol ba'an amma illee gara gooftaa isaanii Rehoobo'aam mooticha Yihuudaatti garagalu. Isaan na ajjeesanii gara Rehoobo'aam Mootichaatti deebi'u."

²⁸ Kanaafuu mootichi mari'atee jabbiwwan lama warqee irraa tolche. Namoota sanaanis, "Yerusaaleemitti ol ba'uun akka malee isinitti ulfaata. Yaa Israa'el waaqonni keessan kanneen Gibxii baasanii isin fidan kunoo ti" jedhe. ²⁹ Innis jabbii tokko Beet'eel keessa, kaan immoo Daan keessa dhaabe. ³⁰ Wanni kunis cubbuu itti ta'e; namoonnis jabbii achi jiru sana waaqeffachuuf hamma Daanitti deeman.

³¹ Yerobi'aamis gaara irratti iddoo sagadaa ijaaree saboota Lewwota hin ta'in keessaa luboota muude. ³² Innis bultii kudha shanaffaa ji'a saddeettaffaa keessa ayyaana akkuma ayyaana Yihuudaa keessatti ayyaaneffame sanaa tokko hundeessee iddoo aarsaa irratti qalma dhi'eesse. Kanas fakkiwwan jabbii kanneen tolchee ture sanaatiif aarsaa dhi'eessuudhaan Beet'eelitti hojjete. Akkasumas Beet'eelitti iddoo sagadaa kan gaara irratti ijaaree ture sanatti luboota ramade. ³³ Innis bultii kudha shanaffaa ji'a saddeettaffaatti ji'uma ofii filate keessa gara iddoo aarsaa kan Beet'eelitti ijaare sanaatti ol ba'e. Saba Israa'eliifis guyyaa ayyaanaa hundeessee ixaana aarsuuf gara iddoo aarsaatti ol ba'e.

13

Nama Waaqaa Yihuudaadhaa Dhufe

¹ Utuma Yerobi'aam aarsaa dhi'eessuuf iddoo aarsaa bira dhaabachaa jiruu namni Waaqaa tokko ajaja WAAQAYYOOTIIN Yihuudaadhaa ba'ee Beet'eel dhufe. ² Innis ajaja WAAQAYYOOTIIN iddoo aarsaa sanaan mormuudhaan iyee akkana jedhe; "Yaa iddoo aarsaa, yaa iddoo aarsaa! WAAQAYYO akkana jedha; 'Kunoo ilmi Yosiyas jedhamu tokko mana Daawit keessaa ni dhalata. Innis luboota iddoo sagadaa kan gaarran irraa warra amma asitti aarsaa dhi'eessaa jiran kanneen aarsaa godhee sirratti ni dhi'eessa; lafeen namaas sirratti ni gubama.'" ³ Namni Waaqaa sunis gaafasuma akkana jedhee mallattoo kenne; "Mallattoon WAAQAYYO dubbate kanaa dha; kunoo iddoon aarsaa gargar baqaqa; daaraan isa irra jirus gad jiga."

⁴ Yerobi'aam mootichi yommuu waan namni Waaqaa sun iyee iddoo aarsaa kan Beet'eel sanaan mormuudhaan dubbate dhaga'etti iddoo aarsaa biraa namichatti harka qabe, "Isa qabaa!" jedhe. Harki inni namichatti qabe sun garuu gogee hafe; innis harka isaa deebifachuu hin dandeenye. ⁵ Iddoon aarsaa sunis akkuma mallattoo namni Waaqaa sun dubbii WAAQAYYOOTIIN kenne sanaatti gargari baqaqee daaraan isa irra tures lafatti gad jige.

⁶ Mootichi nama Waaqaa sanaan, "Maaloo akka harki koo deebi'ee naa fayyuuuf WAAQAYYO Waaqa kee jabeessii naa kadhaddhu." Kanaafuu namni Waaqaa sun WAAQAYYON jabeessee kadhateef; harki mootichaas fayyee akkuma duraatti deebi'eef.

⁷ Mootichi nama Waaqaa sanaan, "Kottu na wajjin mana kootti galiitii waa nyaadhu; anis kenna siifin kenna" jedhe.

⁸ Namni Waaqaa sun garuu akkana jedhee mootichaaf deebii kenne; “Yoo ati walakkaa gabeenya keetii illee naa kennite ani si wajjin hin deemu yookaan asitti buddeena hin nyaadhu yookaan bishaan hin dhugu. ⁹ Ani, ‘Buddeena hin nyaatin yookaan bishaan hin dhugin yookaan karaa dhufte kanaan hin deebi’in’ jedhamee dubbii WAAQAYYOOTIIN ajajameeraatii.” ¹⁰ Kanaafuu inni karaa biraa qabatee deeme malee karaa gara Beet’eel dhufe sanaan hin deebine.

¹¹ Jaarsa raajii tokkotu Beet’eel keessa jiraachaa ture; ilmaan isaas gara isaa dhufanii waan namni Waaqaa sun guyyaa sana achitti hojjete hunda isatti himan. Isaan waan inni mootichaan jedhes abbaa isaaniitti himan. ¹² Abbaan isaaniis, “Inni karaa kamiin deeme?” jedhee isaan gaafate. Ilmaan isaa immoo karaa namni Waaqaa kan Yihuudaadhaa dhufe sun qabatee deeme isatti argisiisan. ¹³ Kana irratti inni ilmaan isaatiin, “Harree irra kooraa naaf kaa’aa” jedhe. Isaanis harree irra kooraa keenyaaniif inni harree sana yaabbatee ¹⁴ gulufee nama Waaqaa sana duukaa bu’e. Utuu inni muka qilxuu tokko jala taa’uus argee, “Namni Waaqaa kan Yihuudaadhaa dhufe sun si’ii?” jedhee isa gaafate.

Namichis, “Eeyyee ana” jedhee deebise.

¹⁵ Raajiin sunis, “Kottuu na wajjin mana kootti galiitii waa nyaadhu” jedheen.

¹⁶ Namni Waaqaa sun garuu akkana jedhee deebiseef; “Ani deebi’ee si wajjin deemuu yookaan asitti si wajjin buddeena nyaachuu yookaan bishaan dhuguu hin danda’u. ¹⁷ Ani, ‘Ati achitti buddeena hin nyaatin yookaan bishaan hin dhugin yookaan karaa dhufte sanaan hin deebi’in’ jedhamee dubbii WAAQAYYOOTIIN ajajameeraatii.”

¹⁸ Jaarsi raajiin sunis akkana jedhee deebii kenneef; “Ani iyyuu akkuma kee raajii dha. Ergamaan Waaqayyoo tokkos dubbii WAAQAYYOOTIIN akkana naan jedhe; ‘Akka inni buddeena nyaatee bishaan dhuguuf deebisii gara mana keetii isa fidi.’” Jaarsi sun garuu isa sobe. ¹⁹ Kanaafuu namni Waaqaa sun isa wajjin deebi’ee mana isaatti nyaatee dhuge.

²⁰ Utuma isaan maaddiitti dhi’aatanii jiranuu dubbiin WAAQAYYOO jaarsa raajii isa deebisee fide sanatti dhufe. ²¹ Innis nama Waaqaa kan Yihuudaadhaa dhufe sanatti iyyee akkana jedhe; “WAAQAYYO akkana jedha, ‘Ati dubbii WAAQAYYOO xureessiteerta; ajaja WAAQAYYO Waaqni kee siif kennes hin eegne. ²² Ati dugda duuba deebitee lafa inni itti hin nyaatin yookaan hin dhugin siin jedhe sanatti buddeena nyaatee bishaan illee dhugdeerta. Kanaafuu reeffi kee awwaala abbootii keetii keessatti hin awwaalamu.’”

²³ Yommuu namni Waaqaa sun nyaatee dhugee raawwatetti, raajiin deebisee isa fide sun harree isaa irra kooraa kaa’eef. ²⁴ Akkuma inni karaa ofii qabateen leenci tokko karaa irratti itti dhufee isa ajjeese; reeffi isaas karaa irratti gatamee harree fi leenci sun reeffa sana bira dhadhaabatanii turan. ²⁵ Namoonni achiin darban tokko tokko reeffa karaa irratti gatamee leenci bira dhaabate sana arganii gara magaalaa jaarsi raajiin sun jiraatuu dhaqanii odeessan.

²⁶ Raajichi karaadhaa deebisee isa fide sun yommuu waan kana dhaga’etti akkana jedhe; “Inni nama Waaqaa kan dubbii WAAQAYYOOTIIF ajajamuu dide sanaa dha. Akkuma dubbiin WAAQAYYOO isatti dubbatee ture sanatti WAAQAYYO leenca cicciree isa ajjeesutti dabarsee isa kenne.”

²⁷ Raajiin sunis ilmaan ofii isaatiin, “Harree irra kooraa naaf kaa’aa” jedhe; isaanis akkasuma godhan. ²⁸ Innis ka’ee deemee reeffa namichaa kan karaa irratti gatamee harree fi leenci sun bira dhadhaabatan arge. Leenci sun immoo reeffa sana hin nyaanne yookaan harree sana hin ciccirre. ²⁹ Kanaafuu raajiin sun boo’eeffii isa awwaaluuf jedhee reeffa nama Waaqaa sana harree irra kaa’ee fudhatee magaalaa ofii isaatti gale. ³⁰ Innis reeffa sana awwaala ofii isaa keessa ciibse; isaanis, “Wayyoo, yaa obboleessa koo!” jedhanii boo’aniif.

³¹ Innis erga isa awwaalee booddee ilmaan ofii isaatiin akkana jedhe; “Yoo ani du’e awwaala namni Waaqaa kun itti awwaalame keessatti na awwaalaa; lafee koos lafee isaa bira kaa’aa. ³² Ergaan inni iddoo aarsaa kan Beet’eel keessaatii fi iddoowwan sagadaa kanneen magaalawwan Samaariyaa keessa gaarran irra jiran sana hundaan mormuudhaan dubbii WAAQAYYOOTIIN labse sun dhugumaan ni guutamaatii.”

³³ Kana booddees Yerobi’aam karaa isaa hamaa sana irraa hin deebine; garuu amma illee iddoowwan sagadaa kanneen gaarran irraa sanaaf saba hunda keessaa luboota muude. Innis nama luba ta’uu fedhu kam iyyuu iddoo sagadaa sanaaf addaan baase. ³⁴ Cubbuun mana Yerobi’aam kan kufaatii isaatii fi lafa irraa badiisa isaa fide sun kana ture.

14

Raajii Ahiyaan Yerobi'aamiin Mormee Dubbate

¹ Yeroo sana Ahiyaan ilmi Yerobi'aam dhukkubsannaan ² Yerobi'aam niitii ofii isaatiin akkana jedhe; "Ati niitii Yerobi'aam ta'uun kee akka hin beekneef eenyummaa kee dhoksiitii ka'ii Shiiloo dhaqi. Ahiyaan raajichi akka ani saba kana irratti mootii ta'u natti hime sun achi jiraatii. ³ Buddeena kudhan, maxinoo muraasaa fi damma okkotee tokko harkatti qabadhuu gara isaa dhaqi. Inni waan gurbaan kun ta'u sitti hima." ⁴ Kanaafuu niitii Yerobi'aam waan inni jedheen sana gootee gara mana Ahiyyaa Shiiloo dhaqxe.

Yeroo sana Ahiyaan homaa hin argu ture; inni waan dulloomeef agartuun isaa dadhabeef turetii. ⁵ WAAQAYYO garuu Ahiyaadhaan akkana jedhe; "Niitiin Yerobi'aam sababii ilmi ishee dhibameef waa'ee isaa si gaafachuuf dhufuutti jirti; ati akkanaa fi akkana jedhii deebisiif. Isheen yommuu dhufu nama biraa of fakkeessitee dhufti."

⁶ Ahiyaan sagalee faana ishee dhageenyaan balbala irratti akkana jedheen; "Yaa niitii Yerobi'aam ol seeni. Dubartii biraa of fakkeessuu yaaluun kee kun maaliif? Ani ergaa hamaa sitti himuuf ergameera. ⁷ Dhaqiitii WAAQAYYO Waaqni Israa'el akkana jedha jedhiitii Yerobi'aamitti himi: 'Ani saba keessaa si kaafadheen bulchaa saba koo Israa'el si godhe. ⁸ Ani mana Daawit irraa mootummaa tarsaaseen siif kenne; ati garuu akka garbicha koo Daawit kan ajajawwan koo eegee garaa isaa guutuun na duukaa bu'ee waan fuula koo duratti qajeelaa ta'e qofa hojjete sanaa hin taane. ⁹ Ati warra siin dura jiraatan hunda caalaa waan hamaa hojjetteerta. Ati ofii keetiif waaqota biraa fakkiwwan baqfamanii hojjetaman tolfatee dheekkamsaaf na kakaafte; dugda kee duubattis na gatte.

¹⁰ "Sababii kanaaf ani amma mana Yerobi'aam irratti badiisa nan fida. Ani mana Yerobi'aamii dhiira hunda, garbicha yookaan birmaduu Israa'el keessaa nan balleessa. Ani akkuma namni tokko kosii gubee barbadeessutti mana Yerobi'aam gubeen barbadeessa. ¹¹ Nama maatii Yerobi'aam ta'e kam iyyuu kan magaalaa keessatti du'e sareetu nyaata; kan baadiyyaatti du'e kam iyyuu immoo allaattii samiitu nyaata. WAAQAYYO waan kana dubbateeraatii!

¹² "Ati garuu mana keetti gali. Yeroo miilli kee magaalaa seenutti mucaan sun ni du'a. ¹³ Warri Israa'el hundinuu boo'aniifii isa ni awwaalu. Waan WAAQAYYO Waaqni Israa'el mana Yerobi'aam keessaa isa qofa irratti waan gaarii argeef, mana Yerobi'aam keessaa namni awwaala argatu isa qofa ta'a.

¹⁴ "WAAQAYYO Israa'el irratti mootii tokko ofii isaatiif ni kaafata; mootiin sunis maatii Yerobi'aam kutee balleessa. Guyyaan isaas har'a! Kunis ammuma ta'a. ¹⁵ WAAQAYYO Israa'elin dha'ee akkuma shambaqqoo bishaan keessaatti ni raasa. Sababii isaan utubaawwan Aasheeraa dhadhaabani WAAQAYYON dheekkamsiisaniif inni biyya abbootii isaanitiif kenne gaarii sana keessaa Israa'elin buqqisee Laga Efraaxiisiin gamatti isaan ni bitinneessa. ¹⁶ Innis sababii cubbuu Yerobi'aam hojjete akka Israa'elis hojjetu godhe sanaatiif saba Israa'el ni gata."

¹⁷ Niitiin Yerobi'aam kaatee Tiirzaa dhaqxe. Akkuma isheen gulantaa balbalaa geesseen mucaan sun ni du'e. ¹⁸ Jarris isa awwaan; Israa'el hundinuu akkuma WAAQAYYO karaa garbicha isaa Ahiyyaa raajichaatiin dubbate sana ni boo'aniif.

¹⁹ Wannii Yerobi'aam hojjete kan biraa, akki inni itti lolaa turee fi akki inni itti biyya bulchaa ture kitaaba seenaa mootota Israa'el keessatti barreeffameera. ²⁰ Innis waggaa digdamii lama bulchee ergasii abbootii isaa wajjin boqote. Ilmi isaa Naadaab mootii ta'ee iddoo isaa bu'e.

Rehoobo'aam Mooticha Yihuudaa

14:21,25-31 kwf - 2Sn 12:9-16

²¹ Rehoobo'aam ilmi Solomoon biyya Yihuudaa keessatti mootii ture. Yeroo inni mootii ta'etti umuriin isaa waggaa afurtamii tokko ture; innis waggaa kudha torba Yerusaalem magaalaa WAAQAYYO Maqaa ofii isaa achi kaa'achuuf jedhee gosoota Israa'el hunda keessaa filate sana keessatti mootii ta'ee bulche. Maqaan haadha isaa Na'amaa ture; isheen gosa Amoon turte.

²² Yihuudaan fuula WAAQAYYOO duratti hammina hojjete. Isaanis cubbuu hojjetaniin hamma abbootiin isaanii hojjetan sana caalaa dheekkamsa isaa kakaasan. ²³ Akkasumas iddoo ol ka'aa hunda irrattii fi mukkeen babal'aa hunda jalatti iddoowwan sagadaa kanneen gaarran irraa, soodduwwan dhagaatii fi siidaawwan Aasheeraa ofii isaanitiif tolfatan. ²⁴ Manni sagadaa dhiirota sagaagalanis biyya sana keessa ture; namoonni sun gochawwan jibbisiisoo kan saboota WAAQAYYO fuula Israa'elootaa duraa ari'ee baase sanaa hunda keessatti hirmaatan.

²⁵ Waggaa shanaffaa Rehoobo'aam mootii ta'etti Shiishaaq mootiin Gibxi Yerusaaalemin waraane. ²⁶ Innis qabeenya mana qulqullummaa WAAQAYYOOTII fi qabeenya masaraa mootummaa guurratee deeme. Gaachanawwan warqee kanneen Solomoon hojjete dabalatee waan hunda guurratee gale. ²⁷ Kanaafuu Rehoobo'aam mootichi iddoo isaanii buusuuf jedhee gaachana naasii hojjete ajajjuuwwan eegdota dabaree eegumsa balbala masaraa mootummaatti kenne. ²⁸ Yeroo mootichi gara mana qulqullummaa WAAQAYYOO dhaqu hunda eegdonni sun gaachana sana baatanii ergasii immoo kutaa eegdotaatti deebisu ture.

²⁹ Wantoonni Rehoobo'aam bara mootummaa keessa ta'anii fi wanni inni hojjete hundinuu kitaaba seenaa mootota Yihuudaa keessatti barreeffamaniiru mitii? ³⁰ Rehoobo'aamii fi Yerobi'aam gidduu waraana gargari hin cinnetu ture. ³¹ Rehoobo'aamis abbootii ofii wajjin boqotee Magaalaa Daawit keessatti isaan biratti awwaalame. Maqaan haadha isaa Na'amaa ture; isheen gosa Amoon turte. Ilmi isaa Abiyaan iddoo isaa bu'ee mootii ta'e.

15

Abiyaan Mooticha Yihuudaa

15:1-2,6-8 kwf - 2Sn 13:1-2,22-14:1

¹ Bara mootummaa Yerobi'aam ilma Nebaat keessa, waggaa kudha saddeettaffaatti Abiyaan mootii Yihuudaa ta'e; ² innis Yerusaaalem keessa jiraatee waggaa sadii ni bulche. Maqaan haadha isaa Ma'akaa ture; isheen intala Abiishaaloom turte.

³ Innis cubbuu abbaan isaa isaan dura hojjete hunda hojjete; garaan isaa akka garaan abbaa isaa Daawit ture sana guutumaan guutuutti WAAQAYYOO Waaqa isaatiif hin kennamne. ⁴ Ta'u illee WAAQAYYOO Waaqni isaa Daawitiif jedhee akka inni isa dhaaluuf ilma isaaf kaasuu fi Yerusaaalem jajjabeessuudhaan Yerusaaalem keessatti ibsaa kenneef. ⁵ Daawit yakka Uuriyaa namicha Heet sana irratti hojjete malee fuula WAAQAYYOO duratti waan qajeelaa hojjechuudhaan bara jireenya isaa guutuu ajajawwan WAAQAYYOO eege.

⁶ Bara jireenya Abiyaa hunda keessa Rehoobo'aamii fi Yerobi'aam gidduu waraanatu ture. ⁷ Wannii bara bulchiinsa Abiyaan keessa ta'e kan biraa fi wanni inni hojjete hundi kitaaba seenaa mootota Yihuudaa keessatti barreeffamee jira mitii? Abiyaa fi Yerobi'aam gidduu waraanatu ture. ⁸ Abiyaanis Abbootii ofii isaa wajjin boqotee Magaalaa Daawit keessatti awwaalame. Ilmi isaa Aasaan iddoo isaa bu'ee mootii ta'e.

Aasaa Mooticha Yihuudaa

15:9-22 kwf - 2Sn 14:2-3; 15:16-16:6

15:23-24 kwf - 2Sn 16:11-17:1

⁹ Bara mootummaa Yerobi'aam mooticha Israa'el keessa waggaa digdammaffaatti Aasaan mootii Yihuudaa ta'e; ¹⁰ innis waggaa afurtamii tokko Yerusaaalemin bulche. Maqaan akkoo isaa Ma'akaa ture; isheen intala Abiishaaloom turte.

¹¹ Aasaan akkuma Daawit Abbaan isaa hojjete sana waan fuula WAAQAYYOO duratti qajeelaa ta'e hojjete. ¹² Inni mana sagadaa kan dhiirota sagaagalanii biyya sanaa balleessee waaqota tolfamoo abbootiin isaa hojjetan hundas barbadeesse. ¹³ Akkoo isaa Ma'akaa iyyuu waan isheen fakkii Asheeraa jibbisiisaa tokko tolfattee iddoo ulfinaa kan isheen akka haadha mootiitti qabaatte sana irra ishee buuse. Aasaan fakkii sana diigee Sulula Qeedroon keessatti ni gube. ¹⁴ Yoo inni iddoowwan sagadaa kanneen gaarran irraa guutumaan guutuutti balleessuu baate iyyuu bara jireenya isaa guutuu garaan Aasaa WAAQAYYOOFF kennamee ture. ¹⁵ Innis meetii fi warqee akkasumas mi'oota innii fi abbaan isaa Waaqaaf addaan baasan gara mana qulqullummaa WAAQAYYOOTII ni galche.

¹⁶ Aasaa fi Ba'ishaan mooticha Israa'el gidduu bara mootummaa isaanii guutuu waraanatu ture. ¹⁷ Ba'ishaan mootichi Israa'el biyya Yihuudaatti duulee akka namni tokko iyyuu daangaa biyya Aasaa mooticha Yihuudaa keessaa hin baane yookaan akka achi hin seenne gochuudhaaf jedhee Raamaa jabeessee ijaare.

¹⁸ Aasaanis meetii fi warqee mankuusa mana qulqullummaa WAAQAYYOOTII fi masaraa mootummaa ofii isaa keessatti hafe hunda fudhate. Innis waan kana qondaaltota isaatti imaanaa kennee gara Ben-Hadaad ilma Xabrimoon ilma Heziyoon mooticha Sooriyaa kan Damaasqoo taa'ee bulchaa ture sanaatti isaan erge. ¹⁹ Innis, "Akkuma walii galtee kanaan dura abbaa koo fi abbaa kee gidduu ture sanaatti ammas anaa fi si gidduu walii galteen haa jiraatu. Kunoo ani kennaa meetii fi warqee siif ergeera. Akka inni narraa deebi'uuf dhaqiitii walii galtee Ba'ishaan mooticha Israa'el wajjin qabdu sana diigi" jedheen.

²⁰ Ben-Hadaadis yaada Aasaa Mootichaa fudhatee ajajjuuwwan loltoota isaa magaalaa Aasaan Israa'elitti duulchise. Innis Iyyoon, Daan, Abeel Beet Ma'aakaa fi Kinereeti

hunda Niftaalemin dabalee of jala galfate. ²¹ Ba'ishaanis yommuu waan kana dhaga'etti Raamaa ijaaruu dhiisee Tiirzaatti gale. ²² Aasaan mootichis guutummaa Yihuudaatti ajaja baase; namni tokkos hin hambifamne; isaanis dhagaawwanii fi muka Ba'ishaan achitti ittiin hojjechaa ture Raamaadhaa fudhatanii deeman. Aasaa mootichis Beniyaam keessatti Gebaa, akkasumas Miisphaa ittiin ijaarrate.

²³ Wantoonni bara mootummaa Aasaa keessa hojjetaman kanneen biraa hundi, jabinni isaa hundi, wanni inni hojjeje hundii fi magaalaaawwan inni ijaare kitaaba seenaa mootota Yihuudaa keessatti barreeffamaniiru mitii? Bara dulluma isaa keessa garuu miilli isaa ni dhukkubsate. ²⁴ Ergasii Aasaan abbootii ofii wajjin boqotee magaalaa abbaa isaa magaalaa Daawit keessatti abbootii isaa biratti awwaalame. Yehooshaafaax ilmi isaas iddoo isaa bu'ee mootii ta'e.

Naadaab Mooticha Israa'el

²⁵ Naadaab ilmi Yerobi'aamis bara Aasaan mootichi Yihuudaa mootii ta'e keessa waggaa lammaffaatti mootii Israa'el ta'ee waggaa lama Israa'elin bulche. ²⁶ Innis karuma abbaa isaa irra deemee cubbuu abbaan isaa hojjetee saba Israa'elinis hojjechiise sana hojjechuudhaan fuula WAAQAYYOO duratti waan hamaa hojjeje.

²⁷ Utuma Naadaabii fi sabni Israa'el hundi magaalaa Filisxeemotaa kan Gibetoon jedhamtu marsaa jiranuu Ba'ishaan ilmi Ahiyyaa namichi biyya Yisaakor sun Naadaabitti fincillee Gibetoon keessatti dha'ee isa ajjeese. ²⁸ Ba'ishaanis bara Aasaan mootichi Yihuudaa mootii ta'e keessa waggaa sadaffaatti Naadaabin ajjeese iddoo isaa bu'ee mootii ta'e.

²⁹ Inni akkuma mootii ta'een maatii Yerobi'aam hunda fixe. Akkuma dubbii WAAQAYYO karaa garbicha isaa Ahiyyaa namicha Shiilootiin dubbatee ture sanaatti hunda isaanii fixe malee nama hafuura baafatu tokko illee Yerobi'aamiif hin hambifne. ³⁰ Kunis sababii cubbuu Yerobi'aam hojjetee saba Israa'elis cubbuu hojjechiisuudhaan WAAQAYYO Waaqa Israa'el dheekkamsaaf kakaaseefii dha.

³¹ Wantoonni biraa kanneen bara mootummaa Naadaab keessa hojjetamanii fi wanni inni hojjeje hundi kitaaba seenaa mootota Israa'el keessatti barreeffamaniiru mitii? ³² Aasaa fi Ba'ishaan mooticha Israa'el gidduu bara mootummaa isaanii guutuu waraanatu ture.

Ba'ishaan Mooticha Israa'el

³³ Bara Aasaa mooticha Yihuudaa keessa waggaa sadaffaatti Ba'ishaan ilmi Ahiyyaa Tiirzaa keessatti Israa'el hunda irratti mootii ta'ee waggaa digdamii afur bulche. ³⁴ Innis karuma Yerobi'aam irra deemee cubbuu Yerobi'aam hojjetee saba Israa'elis hojjechiise sana hojjechuudhaan fuula WAAQAYYOO duratti waan hamaa hojjeje.

16

¹ Ergasiis dubbiin WAAQAYYOO Ba'ishaaniin mormuudhaan akkana jedhee gara Yehuu gara ilma Hanaanii dhufe: ² "Ani awwaara keessaa si kaaseen bulchaa saba koo Israa'el si godhe; ati garuu karaa Yerobi'aam deemtee saba koo Israa'elin cubbuu hojjechiiftee akka isaan cubbuu isaaniitiin dheekkamsaaf na kakaasan goote. ³ Kanaafuu ani Ba'ishaanii fi mana isaa nan barbadeessa; mana kee illee akkuma mana Yerobi'aam ilma Nebaat sanaa nan godha. ⁴ Namoota Ba'ishaan kanneen magaalaa keessatti dhuman sareetu nyaata; kanneen baadiyyaatti dhuman immoo allaatii samiitu nyaata."

⁵ Wantoonni biraa kanneen bara mootummaa Ba'ishaan keessa hojjetaman, wanni inni hojjetee fi jabinni isaa kitaaba seenaa mootota Israa'el keessatti barreeffamaniiru mitii? ⁶ Ba'ishaan abbootii ofii wajjin boqotee Tiirzaa keessatti awwaalame. Ilmi isaa Eelaan iddoo isaa bu'ee mootii ta'e.

⁷ Sababii inni akkuma mana Yerobi'aam ta'uudhaan hojii harka isaatiin Waaqa dheekkamsaaf kakaasee Yerobi'aaminis ajjeesuudhaan hammina fuula WAAQAYYOO duratti hojjeje hundaaf dubbiin WAAQAYYOO karaa Yehuu raajichaa ilma Hanaaniin gara Ba'ishaanii fi mana isaa dhufe.

Eela Mooticha Israa'el

⁸ Bara Aasaan mootichi Yihuudaa mootii ta'e keessa waggaa digdamii ja'ffaatti Eelaan ilmi Ba'ishaan Tiirzaa keessatti mootii Israa'el ta'ee waggaa lama bulche.

⁹ Garuu qondaaltota isaa keessaa namichi Zimrii jedhamu kan gaariwwan isaa keessaa walakkaa ajaju tokko isatti malate. Yeroo sanatti Eelaan Tiirzaa keessatti mana Arzaa namicha bulchaa masaraa mootummaa kan Tiirzaa keessaa sanaatti dhugee machaa'aa ture. ¹⁰ Zimriinis bara mootummaa Aasaa mooticha Yihuudaa keessaa

waggaa digdamii torbaffaatti ol seenee Eelaa dha'ee ajjeese. Iddoo isaas bu'ee mootii ta'e.

¹¹ Innis akkuma mootii ta'ee teessoo irra taa'een maatii Ba'ishaan hunda fixe. Fira isaa yookaan michuu isaa keessaa dhiira tokko illee hin hambifneef. ¹² Akkasiin Zimriin akkuma dubbii WAAQAYYOO kan Ba'ishaaniin mormuudhaan karaa Yehuu raajichaatiin dubbatame sanaatti maatii Ba'ishaan hunda barbadeesse; ¹³ kunis sababii cubbuu Ba'ishaanii fi ilmi isaa Eelaan hojjetanii akka Israa'eloonnis hojjetan gochuudhaan waaqota isaanii tolfamoo kanneen faayidaa hin qabneen WAAQAYYO Waaqa Israa'el dheekkamsaaf kakaasaniif ta'e.

¹⁴ Wantoonni bara mootummaa Eelaa keessa hojjetaman kanneen biraatii fi wanni inni hojjetete hundi kitaaba seenaa mootota Israa'el keessatti barreeffamaniiru mitii?

Zamrii Mooticha Israa'el

¹⁵ Zimriin bara mootummaa Aasaa mooticha Yihuudaa keessa waggaa digdamii torbaffaatti Tiirzaa keessatti mootii ta'ee bultii torba bulche. Loltoonnis Gibetoon magaalaa Filisxeemotaa bira qubatan. ¹⁶ Israa'eloonni qubata keessa turanis yommuu akka Zimriin mootichatti ka'ee isa ajjeese dhaga'anitti gaafasuma qubata sana keessatti Omrii ajajaa loltootaa sana mootii Israa'el taasisan. ¹⁷ Omrii fi Israa'eloonni isa wajjin turan hundi Gibetoon keessaa ba'anii Tiirzaa marsan. ¹⁸ Zimriinis yommuu akka magaalaa sun qabame argetti dallaa masaraa mootummaa seenee masaraa mootummaa of irratti gubee du'e. ¹⁹ Wanni kunis sababii inni fuula WAAQAYYOO duratti hammina hojjechuu fi karaa Yerobi'aam irra deemuudhaan cubbuu Yerobi'aam hojjetee Israa'elootas hojjechiise sana hojjetee ta'e.

²⁰ Wantoonni Zimriin bara mootummaa isaa keessa hojjetete biraatii fi fincilli inni kaase kitaaba seenaa mootota Israa'el keessatti barreeffamaniiru mitii?

Zanbarii Mooticha Israa'el

²¹ Ergasii sabni Israa'el garee lamatti qoodame; gareen tokko Tiibnii ilma Giinat mootii godhachuuf isa duukaa bu'e; gareen kaan immoo Omrii duukaa bu'e. ²² Garuu duukaa buutonni Omrii duuka buutota Tiibnii ilma Giinat sana caalaa jabaatan. Kanaafuu Taamniin du'ee Omriin mootii ta'e.

²³ Omriinis bara mootummaa Aasaa mooticha Yihuudaa keessa waggaa soddonii tokkoffaatti mootii Israa'el ta'ee waggaa kudha lama bulche; waggoota kanneen keessaa waggaa ja'a Tiirzaa keessa taa'ee bulche. ²⁴ Innis namicha Shemeer jedhamu irraa meetii taalaantii lamaan gaara Samaariyaa bitee magaalaa tokko gaara sana irratti ijaare; magaalaa sanas Samaariyaa jedhee maqaa Saamir abbaa gaara sanaa kan duriitiin moggaase.

²⁵ Omriin garuu fuula WAAQAYYOO duratti hammina hojjetee namoota isa duraan turan hunda caalaa cubbame. ²⁶ Innis karaa Yerobi'aam ilma Nebaat hunda irra deeme cubbuu Yerobi'aam hojjetee saba Israa'elis hojjechiise akka isaan waaqota isaanii tolfamoo kanneen faayidaa hin qabneen WAAQAYYON Waaqa Israa'el aariif kakaasan godhe.

²⁷ Wantoonni bara mootummaa Omrii keessa hojjetaman kaan, wanni inni hojjetee fi jabinni inni argisiise kitaaba seenaa mootota Israa'el keessatti barreeffamaniiru mitii?
²⁸ Omriin abbootii ofii isaa wajjin boqotee Samaariyaatti awwaalame. Ahaab ilmi isaa iddoo isaa bu'ee mootii ta'e.

Ahaab Mootii Israa'el Ta'e

²⁹ Ahaab ilmi Omrii bara mootummaa Aasaa mooticha Yihuudaa keessa waggaa soddonii saddeettaffaatti mootii Israa'el ta'ee Samaariyaa taa'ee waggaa digdamii lama bulche. ³⁰ Ahaab ilmi Omrii warra isa duraan turan kam iyyuu caalaa fuula WAAQAYYOO duratti hammina hojjetee. ³¹ Innis cubbuu Yerobi'aam ilma Nebaat hojjetee sana hojjechuu akka waan salphaa tokkootti ilaaluu bira darbee Iizaabel intala Eteba'aal mooticha Siidoonotaa fuudhe; dhaqees Ba'aalin tajaajiluu fi waqeffachuu jalqabe. ³² Innis mana Ba'aal itti waqeffatamu tokko Samaariyaatti ijaaree iddoo aarsaa tokko achi keessa dhaabe. ³³ Ahaab ammas siidaa Aasheeraa dhaabee waan mootonni Israa'el kanneen isa duraan turan hundi hojjetan caalaa hojjetee WAAQAYYON Waaqa Israa'el aariif kakaase.

³⁴ Bara Ahaab keessa Hii'eel namichi Beet'eel tokko Yerikoo deebisee ijaare. Akkuma dubbii WAAQAYYOO kan karaa Iyyaasuu ilma Nuuniitiin dubbatame sanaatti gaafa inni hundeeffan Yerikoo buusetti Abiiraam ilma isaa hangafatu du'e; gaafa inni karrawwan isaa dhaabetti immoo Seguub ilma isaa quxisuu hundaatu du'e.

17

Eeliyaas Arraagessaan Sooramuu Isaa

¹ Eeliyaas namichi Tishbii kan biyya Gili'aad keessaa magaalaa Tishbiitti dhufe tokko Ahaabiin akkana jedhee; "Dhugaa Waaqa Israa'el, WAAQAYYO jiraataa ani isa tajaajilu sanaa! Yoo ani dubbadhe malee waggoota muraasa dhufan keessa fixeensi yookaan bokkaan hin jiraatu."

² Dubbiin WAAQAYYOS akkana jedhee gara Eeliyaas dhufe; ³ "Asii deemiiti gara ba'a biiftuutti qajeelii Laga Kerit kan gama ba'a Yordaanositti argamu keessa dhokadhu. ⁴ Ati Laga sana keessaa bishaan ni dhugda; anis akka isaan achitti si sooraniif arraageyyii ajajeera."

⁵ Kanaafuu inni dhaqee waan WAAQAYYO isa ajaje sana godhe. Gara Laga Kerit kan gara ba'a Yordaanositti argamu sanaas deemee achi jiraate. ⁶ Arraageyyiin ganama ganama buddeenaa fi foon, galgala galgalas buddeenaa fi foon fidaafii turan; innis bishaan Laga sanaa dhuga ture.

Haadha Hiyyeessaa Kan Saraaphtaa Jiraattu

⁷ Yeroo gabaabaa booddee sababii biyya sana keessa roobni hin jiraatiniif lagichis ni goge. ⁸ Kana irratti dubbiin WAAQAYYOO akkana jedhee gara isaa dhufe; ⁹ "Dafii gara Saraaphtaa Siidoonaa keessatti argamtu sanaa dhaqii achi jiraadhu. Ani akka isheen waan ati nyaattu siif kennituuf haadha hiyyeessaa tokko achitti ajajeeraa." ¹⁰ Kanaafuu inni ka'ee Saraaphtaa dhaqe. Yommuu inni karra magaalaa sanaa bira ga'etti haati hiyyeessaa tokko qoraan funaannachaa turte. Innis ishee waamee, "Maaloo akka ani dhuguuf bishaan xinnoo naa fidi" jedheen. ¹¹ Akkuma isheen bishaan fiduuf deemuu jalqabdeen ishee waamee, "Maaloo buddeena xinnaa isaa illee naa fidi" jedheen.

¹² Isheen immoo akkana jettee deebifte; "Dhugaa WAAQAYYO Waaqa kee jiraataa sanaa, ani daakuu konyee tokkitti okkotee keessa jirtuu fi zayitii xinnoo kubbaayyaa keessa jirtu tokko malee buddeena tokko illee hin qabu. Ani akka nu nyaannee duunuuf manatti galee ofii kootii fi ilma kootiif nyaata qopheessuuf jedhee qoraan funaannachaan jira."

¹³ Eeliyaasis akkana jedhee deebiseef; "Hin sodaatin. Galiitii akkuma jette sana godhi. Jalqabatti garuu waanuma qabdu sana irraa Maxinoo xinnaa isaa tolchii naa fidi; ergasii immoo ofii keetii fi mucaa keetiif qopheessi. ¹⁴ WAAQAYYO Waaqni Israa'el akkana jedhaatii; 'Hamma guyyaa WAAQAYYO lafa irratti bokkaa roobsuutti daakuu okkotee keessaa hin dhumu; zayitiinis cuggee keessaa hin dhumu.'"

¹⁵ Isheenis dhaqxee akkuma Eeliyaas jedheen sana goote. Kanaafuu Eeliyaas, dubartiin sunii fi maatiin ishee guyyaa baay'ee nyaatan. ¹⁶ Akkuma dubbii WAAQAYYOO kan inni karaa Eeliyaasiin dubbate sanaatti daakuu okkotee keessaa hin dhumne; zayitiinis cuggee keessaa hin dhumne.

¹⁷ Ergasii ilma haadha mana sanaa ni dhukkubsate. Dhukkubni isaas ittuma jabaachaa deemee dhuma irratti hafuura baafachuu dadhabe. ¹⁸ Isheenis Eeliyaasiin, "Yaa nama Waaqaa, ati hammina maalii narraa qabda? Ati waa'ee cubbuu koo na yaadachiiftee ilma koo ajjeesuuf dhuftee?" jette.

¹⁹ Eeliyaas immoo, "Mee ilma kee natti kenni" jedheen. Innis harka isheetii fuudhee baatee kutaa manaa kan ol aanu iddoo ofii jiraatutti geessee siree isaa irra isa ciibse. ²⁰ Ergasii inni, "Yaa WAAQAYYO Waaqa ko, ati akka mucaan ishee du'u gochuudhaan haadha hiyyeessaa kan ani gargaarsa isheetiin jiraadhu kanatti illee rakkoo fiddee?" jedhee gara WAAQAYYOOTTI iyye. ²¹ Innis yeroo sadii mucaa sana irratti diriiree, "Yaa WAAQAYYO Waaqa ko, mucaa kana lubbuun isaa itti haa deebitu" jedhee gara WAAQAYYOOTTI iyye.

²² WAAQAYYOS iyya Eeliyaas ni dhaga'e; lubbuun mucaa sanaas itti deebite; innis ni jiraate. ²³ Eeliyaasis mucaa sana baatee kutaa ol aanu sana keessaa gad buusee gara manaatti isa geesse. Haadha isaattis isa kennee, "Kunoo mucaan kee jira!" jedheen.

²⁴ Kana irratti dubartiin sun Eeliyaasiin, "Ani amma akka ati nama Waaqa taatee fi akka dubbii WAAQAYYOO kan afaan keetii ba'u dhugaa ta'e beekeera" jette.

18

Eeliyaasii fi Obaadiyaa

¹ Yeroo dheeraa booddee, waggaa sadaffaatti dubbiin WAAQAYYOO, "Dhaqii Ahaabitti of mul'isi; anis lafa irratti bokkaa nan roobsaa" jedhee gara Eeliyaas dhufe. ² Kanaafuu Eeliyaas Ahaabitti of mul'isuu dhage.

Yeroo kanatti Samaariyaa keessatti beelli hammaatee ture. ³ Ahaabis Obaadiyaa itti gaafatama masaraa mootummaa isaa waamee ture. Obaadiyaan nama akka malee WAAQAYYON sodaatu ture. ⁴ Yeroo Iizaabel raajota WAAQAYYOO ajjeesaa turtetti Obaadiyaan raajota dhibba tokko fuudhee shantama shantamaan holqa lama keessa dhoksee nyaataa fi bishaan dhi'eessaafii ture. ⁵ Ahaabis Obaadiyaadhaan akkana jedhe; "Biyyattii keessa deemiitii gara burqaawwanii fi sululawwan hundaa dhaqi. Akka horii keenya keessaa tokko iyyuu nu jalaa hin duuneef fardeenii fi gaangolii keenya jiraachifachuuf marga muraasa arganna ta'aatii." ⁶ Kanaafuu isaan biyya keessa deemanii waliin ga'uu barbaadan sana gargari qooddatan; Ahaab karaa tokko, Obaadiyaan immoo karaa kaan qajele.

⁷ Utuma Obaadiyaan karaa deemuu Eeliyaas isatti dhufe. Obaadiyaan isa beekke gar jedhee harka fuudhee, "Eeliyaas gooftaan koo dhugumaan si'ii?" jedheen.

⁸ Innis deebisee, "Eeyyee, anuma. Dhaqiitii, 'Eeliyaas as jira' jedhii gooftaa keetti himi" jedheen.

⁹ Obaadiyaanis akkana jedhee gaafate; "Ati akka inni na ajjeesuuf garbicha kee dabarsitee Ahaabitti kennuun kee ani maal balleessee? ¹⁰ Dhugaa WAAQAYYOO Waaqa kee jiraataa sanaa, sabni yookaan mootummaan gooftaan koo si barbaaduuf jedhee nama itti hin ergin tokko iyyuu hin jiru. Yeroo sabni yookaan mootummaan tokko, 'Nu isa hin argine' jedhutti, inni akka isaan akka si hin argin kakatan godha ture. ¹¹ Amma garuu ati, 'Dhaqiitii, "Kunoo Eeliyaas as jira" jedhiitii gooftaa keetti himi' naan jetta. ¹² Ani gara Hafuurri WAAQAYYOO erga ani si biraa deeme itti si geessu hin beeku. Yoo ani dhaqee Ahaabitti himee inni immoo si arguu baate inni na ajjeesa. Garuu ani garbichi kee dargaggummaa kootii jalqabee WAAQAYYON waaqeffachaan jira. ¹³ Yaa gooftaa ko, ati waan ani yeroo Iizaabel raajota WAAQAYYOO ajjeesaa turtetti hojjedhe hin dhageenye? Ani raajota WAAQAYYOO dhibba tokko shantama shantamaan holqa lama keessa dhokseen nyaataa fi bishaan dhi'eesseef. ¹⁴ Amma immoo ati, 'Dhaqiitii, "Kunoo Eeliyaas as jira" jedhii gooftaa keetti himi' naan jetta. Inni dhugumaan na ajjeesa!"

¹⁵ Eeliyaasis deebisee, "Dhugaa WAAQAYYOO Waan Hunda Danda'u kan ani isa tajaajilu sanaa, ani har'a Ahaabitti ofan mul'isa" jedhe.

Eeliyaas Tulluu Qarmeloos Irratti

¹⁶ Kanaafuu Obaadiyaan gara Ahaab dhaqee itti hime; Ahaabis Eeliyaasin Simachuu dhaqe. ¹⁷ Innis Eeliyaasin argee, "Kan Israa'elin jeequ sun si'ii?" jedheen.

¹⁸ Eeliyaas immoo deebisee akkana jedheen; "Si'ii fi mana abbaa keetiitu jeeqe malee ani Israa'elin hin jeeqne. Isin ajaja WAAQAYYOO diddaniirtu; atis Ba'aal duukaa buuteerta. ¹⁹ Egaa amma akka isaan Tulluu Qarmeloos irratti na arganiif saba Israa'el hunda walitti naaf waami. Raajota Ba'aal dhibba afurii fi shantamaa fi raajota Asheeraa dhibba afran maaddii Iizaabel irraa nyaatan sanas naaf fidi."

²⁰ Kanaafis Ahaab guutuu Israa'el keessa ergaa ergee Tulluu Qarmeloos irratti raajota sana walitti qabe. ²¹ Eeliyaasis fuula sabaa duratti gad ba'ee, "Isin hamma yoomiitti yaada lama gidduu deddeebitu? Yoo WAAQAYYOO Waaqa ta'e, isa faana deemaa; yoo Ba'aal Waaqa ta'e immoo isa faana deemaa" jedhe.

Sabni garuu waan tokko illee hin jenne.

²² Eeliyaasis akkana isaaniin jedhe; "Raajota WAAQAYYOO keessaa ana qofatu hafe; Ba'aal garuu raajota dhibba afurii fi shantama qaba. ²³ Mee jiboota lama nuuf fidaa. Isaan dibicha tokko ofii isaaniitiif filatanii qalanii gargar ciranii qoraan irra haa naqan; garuu ibidda itti hin qabsiisin. Anis dibicha isa kaan qopheessee qoraan irra nan kaa'a; garuu ibidda itti hin qabsiisu. ²⁴ Ergasii isin maqaa Waaqa keessanii waamaa; anis maqaa WAAQAYYOO nan waama. Kan ibiddaan deebii kennu inni Waaqa dhugaa ti."

Kana irratti namoonni hundinuu, "Wanni ati jettu kun gaarii dha" jedhan.

²⁵ Eeliyaasis raajota Ba'aaliin akkana jedhe; "Jiboota keessaa isa tokko filadhaatii sababii isin nama hedduu taataniif jalqabatti qalaa qopheessaa. Maqaa Waaqa keessanii waammadhaa; garuu ibidda hin boobeessinaa." ²⁶ Kanaafuu isaan dibicha isaaniif kenname fudhatanii qalanii qopheessan.

Ergasii immoo ganamaa jalqabanii hamma saafaatti maqaa Ba'aal waammachaa oolan. "Yaa Ba'aal deebii nuuf kenni!" jedhanii iyyaa oolan. Garuu deebiin tokko illee hin argamne; kan deebii kennuuf tokko iyyuus hin turre. Iddoo aarsaa kan tolchan sanattis naanna'anii shubbisan.

²⁷ Gara saafaattis Eeliyaas, "Mee sagalee ol fudhadhaatii iyyaa! Inni dhugumaan Waaqa! Yaadni itti baay'ateera ta'a yookaan hojiin qabamee yookaan karaa deeme jira ta'aatii. Inni rafuutti jira ta'aatii dammaquu qaba" jedhee isaanitti qoosuu jalqabe.

²⁸ Kanaafuu isaan akkuma amala isaanii sagalee ol fudhatanii iyyaa, goraadee fi

eeboodhaan of ciranii dhuiga ofii isaanii dhangalaasan. ²⁹ Erga saafaan darbees isaan hamma yeroon aarsaa galgalaa ga'utti raajii dubbachaa turan. Garuu sagaleen tokko iyyuu hin dhaga'amne; kan deebii kenneef tokko iyyuu hin turre; kan wayittuu isaan hedes hin jiru.

³⁰ Eeliyaas immoo ergasii saba hundaan, "Mee as gara koo kottaa" jedhe. Isaan gara isaa dhufnaan inni iddoo aarsaa WAAQAYYOO kan caccabee ture sana deebisee tolche. ³¹ Eeliyaasis akkuma baay'ina gosoota ilmaan Yaaqoob namicha dubbiin WAAQAYYOO gara isaa dhufee, "Maqaan kee Israa'el ni ta'a" jedheen sanaatti dhagaa kudha lama walitti qabe. ³² Dhagaawwan sanaanis maqaa WAAQAYYOOTIIN iddoo aarsaa tolche; naannoo isaattis bo'oo bishaan gara liitira kudha shan qabatu baqaqse. ³³ Innis qoraan qopheessee, dibicha kaan qalee gargar ciree qoraan sana irra foon naqe. Ergasii immoo, "Mee okkotee gurguddaa afur fidaa bishaaniin guutaatii aarsaa fi qoraan irratti naqaa" jedheen.

³⁴ Innis, "Amma illee akkasuma godhaa" jedheen; isaanis amma illee akkasuma godhan.

Innis, "Yeroo sadaffaaf godhaa" jedhee ajaje; isaanis yeroo sadaffaa illee akkasuma godhan. ³⁵ Bishaan sunis naannoo iddoo aarsaa sanaa lola'ee bo'oo guute.

³⁶ Yeroo aarsaan dhi'aattii, Eeliyaas raajichi gad ba'ee akkana jedhee kadhate; "Yaa WAAQAYYOO, yaa Waaqa Abrahaam, Waaqa Yisihaaq, Waaqa Israa'el, akka ati Israa'el keessatti Waaqa taatee fi akka anis garbicha kee ta'ee amma illee waan kana hunda ajajuma keetiin akkan hojjedhe har'a haa beekamu. ³⁷ Yaa WAAQAYYOO deebii naa kenni; yaa WAAQAYYOO akka sabni kun akka ati Waaqa taatee fi akka ati garaa isaa illee gara keetti deebiftu beekuuf deebii naaf kenni."

³⁸ Kana irratti ibiddi WAAQAYYOO gad bu'ee aarsaa, qoraan, dhagaa fi biyyoo gubee bishaan bo'oo keessaa sanas xuuxee fixe.

³⁹ Namoonni hundinuu yommuu waan kana arganitti addaan lafatti gombifamanii, "WAAQAYYOO inni Waaqa! WAAQAYYOO inni Waaqa!" jedhanii iyyan.

⁴⁰ Eeliyaasis, "Raajota Ba'aal kanneen qabaa. Tokkoon isaanii iyyuu hin miliqin!" jedhee isaan ajaje. Isaanis jara ni qaban; Eeliyaasis gara Sulula Qiishoonitti geessee achitti isaan gogorra'e.

⁴¹ Eeliyaasis Ahaabiin, "Deemi; nyaadhuu dhugi; huursaa bokkaa guddaa isaatu dhaga'amaa jiraatii" jedhe. ⁴² Kanaafuu Ahaab nyaachuu fi dhuguuf deeme; Eeliyaas garuu fiixee Qarmeloos ol ba'ee gad jedhee fuula isaa jilba isaa gidduu kaa'ate.

⁴³ Innis hojjetaa isaatiin, "Dhaqiiiti gara galaanaa ilaali" jedhe. Hojjetaan sunis ol ba'ee ilaale.

Innis, "Wanni tokko iyyuu achi hin jiru" jedhe.

Eeliyaasis, "Yeroo torba, deddeebi'ii ilaali" jedheen.

⁴⁴ Hojjetaan sun yeroo torbaffaatti, "Duumessa xinnaa hamma konyee namaa ga'u tokkottu galaana irraa ol ka'aa jira" jedhee itti hime.

Kanaafuu Eeliyaas, "Dhaqiiiti Ahaabiin, 'Gaarii kee yaabbadhuutii utuu bokkaan si hin qabatin gad bu'i' jedhii itti himi" jedheen.

⁴⁵ Yeruma sana samiin duumessaan gurraacha'ee bubbleen bubbise; bokkaan guddaan isaa dhufnaan Ahaab gulufee Yizri'eelitti baqate. ⁴⁶ Humni WAAQAYYOOOS Eeliyaas irra bu'e; innis mudhii isaa hidhatee hamma karra Yizri'eelitti Ahaab dura darbee fiige.

19

Eeliyaas Gara Kooreebitti Baqate

¹ Ahaab waan Eeliyaas hojje hunda fi akka inni itti raajota sana hunda goraadeedhaan fixe Iizaabelitti hime. ² Kanaafuu Iizaabel nama tokko Eeliyaasitti ergitee, "Yoo ani bori yoona lubbuu kee akkuma lubbuu jara sanaa keessaa akka isa tokkoo gochuu baadhe waaqonni na haa adaban; adabbiin sunis akka malee natti haa cimuu" jetteen.

³ Eeliyaas sodaatee lubbuu ofii isaa oolfachuuf ka'ee baqate. Innis yommuu Bersheebaa Yihuudaa keessaa sana ga'etti hojjetaa ofii achitti dhiisee ⁴ ofii isaatii immoo karaa guyyaa tokkoo gammoojjii keessa deeme. Innis muka ittachaa tokkotti dhufee jala taa'ee akka du'uuf, "Yaa WAAQAYYOO na dhaga'i; lubbuu koo fudhadhu; ani abbootii koo hin caaluutii" jedhe. ⁵ Ergasiis muka sana jala ciisee hirribni isa fudhate.

Kunoo ergamaan Waaqayyoo tokko isa tuqee, "Ka'ii waa nyaadhu" jedheen. ⁶ Innis of irra mil'atee Maxinoo cilee irratti bilcheeffame tokkoo fi okkotee bishaanii mataa ofii biratti arge. Nyaatee dhugees amma illee deebi'ee ciise.

⁷ Ergamaan WAAQAYYOO amma illee yeroo lamaffaa dhufee isa tuqee, "Ka'ii nyaadhu; karaan ati deemtu dheeraadhaatii" jedheen. ⁸ Kanaafuu inni ka'ee nyaatee dhuge. Innis

nyaata sanaan jabaatee hamma tulluu Waaqaa kan Kooreeb jedhamu ga'utti halkan afurtamaa fi guyyaa afurtama miillaan deeme. ⁹ Achittis holqa tokko seenee keessa bule.

WAAQAYYO Eeliyaasitti Mul'ate

Dubbiin WAAQAYYOOS gara isaa dhufee, "Eeliyaas, ati maal asii hojjetta?" jedheen.

¹⁰ Innis akkana jedhee deebise; "WAAQAYYO Waaqa Waan Hunda Danda'u sanaaf ani akka malee hinaaffaa qaba. Sabni Israa'el immoo kakuu kee didee iddoowwan aarsaa keetii diigee raajota kees goraadeedhaan fixe. Ana qofatu hafe; isaan amma anas ajjeesuu barbaadu."

¹¹ WAAQAYYOS, "Gadi ba'iitii fuula WAAQAYYOO dura tulluu irra dhaabadhu; WAAQAYYO achiin darbuuf jiraatii" jedheen.

Bubbeen guddaa fi jabaan tokko fuula WAAQAYYOO duratti tulluuwwan gargari dayyaasee kattaawwanis hurreesse; WAAQAYYO garuu bubbee sana keessa hin turre. Bubbee sana booddee sochii lafaa guddaa isaatu ture; WAAQAYYO garuu sochii lafaa sana keessa hin turre. ¹² Sochii lafaa booddee ibiddi ni dhufe; WAAQAYYO garuu ibidda sana keessa hin turre. Ibidda sana booddee immoo hasaasa xinnaa tokkotu ture. ¹³ Eeliyaas yommuu waan kana dhaga'etti uffata ofii isaa fuulatti haguuggatee gara afaan holqa sanaatti hiiqee dhaabate.

Sagaleen tokkos, "Eeliyaas ati maal asii hojjetta?" jedheen.

¹⁴ Innis akkana jedhee deebise; "WAAQAYYO Waaqa Waan Hunda Danda'u sanaaf ani akka malee hinaaffaa qaba. Sabni Israa'el immoo kakuu kee didee, iddoowwan aarsaa keetii diigee raajota kees goraadeedhaan fixe. Ana qofatu hafe; isaan amma anas ajjeesuu barbaadu."

¹⁵ WAAQAYYO garuu akkana jedhee deebiseef; "Karuma dhufte sanaan deebi'iitii Gammoojjii Damaasqoo dhaqi. Yommuu achi geessutti Hazaa'eelin dibiitii Sooriyaa irratti mootii godhi. ¹⁶ Yehuu ilma Nimshiis akkasuma dibiitii mootii Israa'el godhi; Elsa'a ilma Shaafaaxi kan warra Abeel Mehoolaa sana immoo akka inni raajii ta'ee iddoo kee bu'uuf muudi. ¹⁷ Yehuun nama baqatee goraadee Hazaa'eel jalaa ba'u hunda ni ajjeesa; Elsa'a is nama baqatee goraadee Yehuu jalaa ba'u hunda ni ajjeesa. ¹⁸ Ta'us ani nama kuma torba kanneen Israa'el keessatti hambifadhe, warra jilbi isaanii Ba'aaliif hin jilbeenfatin, warra afaan isaaniis isa hin dhungatin qaba."

Waamamuu Elsa'a'i

¹⁹ Kanaafuu Eeliyaas achii ba'ee Elsa'a'i ilma Shaafaaxi argate. Elsa'a'i yeroo sanatti qotiyyoo cimdii kudha lamaatiin lafa qotiisaa qotaa ture; inni mataan isaa immoo cimdii kudha lammaffaa qabatee ture. Eeliyaas gara isaa dhaqee kaabbaa ofii isaa isa irra buuse. ²⁰ Elsa'a'is qotiyyoo ofii isaa dhiisee Eeliyaas duukaa fiigee, "Mee takkaa dhaqee abbaa koo fi haadha koo dhungadhee, 'Nagaatti' jedheen si duukaa bu'aa" jedhe.

Eeliyaas immoo, "Deebi'i; ani maalin si godhee jira?" jedhee deebiseef.

²¹ Kanaafuu Elsa'a'i isa dhiisee deebi'e. Qotiyyoo cimdii tokkoo fuudhee qale. Mi'a ittiin lafa qotiisaa qotu sanas bobeessee foon sana bilcheessee namootaaf kenne; isaanis ni nyaatan. Ergasiis ka'ee Eeliyaas duukaa bu'e; tajaajilaa isaas ta'e.

20

Ben-Hadaad Samaariyaa Lole

¹ Yeroo kanatti Ben-Hadaad mootichi Sooriyaa loltoota ofii isaa guutuu walitti qabate. Mootonni soddomii lama kanneen fardeenii fi gaariwwan qabanis isa wajjin turan. Innis dhaqee Samaariyaa marsee lole. ² Innis akkana jedhee gara magaalaa Ahaab mooticha Israa'elitti ergamoota erge; "Wanni Ben-Hadaad jedhu kanaa dha; ³ Meetiin keetii fi warqeen kee kanuma koo ti; niittonni keetii fi ijoolleen kee babbareedoonis kanuma koo ti."

⁴ Mootiin Israa'el immoo, "Yaa gooftaa koo mooticha, akkuma ati jette sana anii fi wannii ani qabu hundi keetuma" jedhee deebiseef.

⁵ Ergamoonni sun ammas dhufanii akkana jedhaniin; "Wanni Ben-Hadaad jedhu kanaa dha; 'Ani akka ati meetii fi warqee kee, niitotaa fi ijoollee kee naaf kennituuf ergaa sitti ergeera. ⁶ Garuu ani bor yona masaraa mootummaa keetiitii fi manneen qondaaltota keetii soquuf qondaaltota koo nan erga. Isaanis waan ati jaallattu hunda fudhatanii deemu."

⁷ Mootichi Israa'el immoo maanguddoota biyya sanaa hunda walitti waamee akkana jedheen; "Akka namichi kun rakkina uumuu barbaadu mee isinuu ilaalaa! Yeroo

inni niitotaa fi ijoollee koo, meetii fi warqee koo fudhachuuf nama ergetti ani hin dhowwanne.”

⁸Maanguddoonnii fi namoonni hundinuu, “Ati dubbii isaa hin dhaga’in yookaan waan inni barbaadu tole hin jedhin” jedhaniin.

⁹Kanaafuu inni, “‘Garbichi kee waan ati jalqabatti ajajje hunda ni guuta; ani garuu waan ati amma gaafatte kana gochuu hin danda’u’ jedhaatii gooftaa koo mootichatti himaa” jedhee ergamoota Ben-Hadaadiif deebii kenne. Isaanis ka’anii deebii sana fuudhanii Ben-Hadaaditti geessan.

¹⁰Ben-Hadaad immoo, “Yoo biyyoon Samaariyaa namoota koo warra na duukaa bu’an konyee tokko tokko illee wal ga’e, waaqonni na haa adaban; adabbiin sunis akka malee natti haa cimuu” jedhee ergaa biraa Ahaabitti erge.

¹¹Mootiin Israa’elis, “‘Namni mi’a lolaa hidhachaa jiru tokko akka nama mi’a lolaa of irraa hiikaa jiru tokkootti of jajuu hin qabu’ jedhaatii itti hima” jedhee deebise.

¹²Ben-Hadaadis utuma mootota wajjin dunkaana keessatti waa dhugaa jiruu ergaa kana dhaga’ee, “Isin lolaaf qophaa’aa” jedhee namoota ofii isaa ajaje. Kanaafuu isaan magaalaa sana dha’uuf qophaa’an.

Ahaab Ben-Hadaadin Mo’ate

¹³Yeroo kanatti raajiin tokko gara Ahaab mooticha Israa’el dhufee, “WAAQAYYO akkana jedha: ‘Ati loltoota akka malee baay’atan kana argitaa? Ani har’a dabarsee harka keetti isaan nan kenna; atis ergasii akka ani WAAQAYYO ta’e ni beekta.’” jedhe.

¹⁴Ahaab garuu, “Eenyutu waan kana hojjeta?” jedhee gaafate.

Raajiin sunis, “WAAQAYYO akkana jedha; ‘Tajaajiltoota bulchitoota kutaalee biyyaa kanneen dargaggoo ta’anitu waan kana hojjeta.’” jedhee deebiseef.

Innis, “Eenyutu lola jalqaba?” jedhee gaafate.

Raajiin sunis, “Situ jalqaba” jedhee deebiseef.

¹⁵Kanaafuu Ahaab tajaajiltoota bulchitoota kutaalee biyyaa kanneen dargaggoo ta’an dhibba lamaa fi soddonii lama walitti waame. Ergasiis Israa’eloota hafan keessaa walumaa galatti namoota kuma torba walitti qabe. ¹⁶Isaanis utuma Ben-Hadaadii fi mootonni soddonii lama kanneen isa tumsan dunkaana keessatti dhuganii machaa’aa jiranuu guyyaa saafaadhaan itti qajeelan. ¹⁷Tajaajiltoonni bulchitoota kutaalee biyyaa kanneen dargaggoo ta’anis jalqabatti gad ba’an.

Ben-Hadaadis gaaddota ergee ture; isaanis deebi’anii, “Namoonni muraasni Samaariyaadhaa ba’anii dhufuutti jiru” jedhanii isatti himan.

¹⁸Inni immoo, “Yoo isaan nagaaf dhufan utuma isaan lubbuun jiranuu isaan qabaa; yoo isaan lolaaf dhufanis akkasuma utuma isaan lubbuun jiranuu qabaa” jedhe.

¹⁹Tajaajiltoonni bulchitoota kutaalee biyyaa kanneen dargaggoo ta’an sunis loltoota dura bu’anii magaalaa sanaa ba’an; ²⁰tokkoon tokkoon isaaniis diina isaanii dha’anii ajjeesan. Kana irratti warri Sooriyaa ni baqatan; Israa’eloonni immoo isaan ari’an. Ben-Hadaad mootichi Sooriyaa garuu farda yaabbatee abbootii fardaa wajjin baqatee jalaa ba’e. ²¹Mootiin Israa’el ittuma fufee abbootii fardaatii fi gaariwwanii lolee mo’achuudhaan warra Sooriyaa akka malee miidhe.

²²Ergasii raajiin sun gara mooticha Israa’el dhufee, “Of jabeessi; waan gochuu qabdu sirriitti hubadhu; mootiin Sooriyaa bara dhufu keessa deebi’ee si lolaatii” jedhe.

²³Yeroo kanatti qondaaltonni mootii Sooriyaa akkana jedhanii isa gorsan; “Waaqonni isaanii waaqota gaarranii ti. Sababiin isaan akka malee nutti jabaataniif kana. Nu yoo lafa diriiraa irratti isaan lolle garuu dhugumaan isaan caalaa jabaanna. ²⁴Ati amma waan kana godhi: Mootota hunda aangoo isaanii irraa ari’iitti iddoo isaanii ajajjoota kaan buusi. ²⁵Akkasumas loltoota akka loltoota kee kanneen dhuman sanaa jechuunis qooda fardaa farda, qooda gaarii immoo gaarii qopheessi. Akkasiin nu dirree irratti Israa’elin loluu dandeenya; isaan caalaas ni jabaanna.” Innis dubbii isaanii fudhatee akkuma isaan jedhan sana godhe.

²⁶Bara itti aanu keessa Ben-Hadaad namoota Sooriyaa walitti qabatee Israa’elin loluuf Afeeqitti ol ba’e. ²⁷Israa’eloonnis walitti qabamanii waan nyaatan qabataniin jaratti duulan. Israa’eloonni akkuma bushaayee karra xixinnaa lamaatti fuullee isaanii qabatan; warri Sooriyaa garuu baadiyyaa keessa guutan.

²⁸Namni Waaqaa sunis dhufee mootii Israa’eliin akkana jedhe; “WAAQAYYO akkana jedha; ‘Sababii warri Sooriyaa WAAQAYYO Waaqaa gaarraniiti malee Waaqaa sululootaa miti jedhaniif, ani tuuta akka malee guddaa kana hunda dabarsee harka keetti nan kenna; isinis akka ani WAAQAYYO ta’e ni beektu.’”

²⁹Isaanis bultii torbaaf fuullee walii qabataniin, bultii torbaffaatti waraanni jalqabame. Israa’eloonnis guyyuma tokkotti warra Sooriyaa keessaa loltoota lafoo kuma dhibba

tokko ajjeesan. ³⁰ Warri hafan kaan magaalaa Afeeqitti baqatanii achittis nama kuma digdamii torba irratti dallaan dhagaa jige. Ben-Hadaad immoo magaalaa sanatti baqatee kutaa mana tokkoo kan gara keessaa keessatti dhokate.

³¹ Qondaaltonni isaas akkana jedhaniin; “Ilaa, nu akka mootonni mana Israa’el mootota nama maaran ta’an dhageenyeerra. Mee kottaa nu mudhii keenyatti uffata gaddaa hidhannee, mataa keenyatti immoo funyoo marannee mootii Israa’el bira haa dhaqnu. Inni lubbuu kee ni oolcha ta’aatii.”

³² Kanaafuu isaan mudhii isaaniitti uffata gaddaa hidhatanii, mataa isaaniitti funyoo maratani mootii Israa’el bira dhaqanii, “Garbichi kee Ben-Hadaad, ‘Maaloo lubbuu koo naa oolchi’ siin jedha” jedhaniin.

Mootichi immoo, “Inni hamma ammaattuu lubbuun jiraa? Inni obboleessa koo ti” jedhee deebise.

³³ Namoonni sunis waan kana akka mallattoo gaariitti fudhatanii dubbii isaa dafanii qabatanii “Eeyyee, Ben-Hadaad obboleessa kee ti!” jedhan.

Mootichis, “Dhaqaatii isa fidaa” jedhe. Yommuu Ben-Hadaad dhufettis Ahaab akka inni ol ba’ee gaarii isaa keessa seenu godhe.

³⁴ Ben-Hadaadis akkana jedheen; “Ani magaalawwan abbaan koo abbaa kee irraa fudhate sana siifin deebisa. Akkuma abbaan koo Samaariyaa keessatti hojjete sana, ati Damaasqoo keessatti lafa gabaa ofii keetii dhaabbachuu dandeessa.”

Ahaab immoo, “Ani walii galteedhaan gad si dhiisa” jedheen. Kanaafuu isa wajjin walii galtee godhatee gad isa dhiise.

Raajiin Tokko Ahaabitti Mure

³⁵ Ilmaan raajotaa keessaa tokko ajaja WAAQAYYOOTIIN michuu isaa tokkoon, “Maaloo na dha’i” jedhe. Namichi sun garuu isa dha’uu dide.

³⁶ Kanaafuu raajiin sun, “Waan ati dubbii WAAQAYYOOTIIF hin ajajamniif akkuma ati na biraa deemtuun leenci si ajjeesa” jedheen. Erga namichi ka’ee deemee booddee leenci dhufee isa argate isa ajjeese.

³⁷ Raajiin sun nama biraa argee, “Maaloo na dha’i” jedheen. Kanaafuu namichi sun dha’ee isa madeesse. ³⁸ Ergasii raajiin sun ija haguugatee eenyummaa isaa dhokfatee dhaqee qarqara karaa dhaabatee mooticha eegaa ture. ³⁹ Utuma mootichi karaa sana darbaa jiruu raajiin sun isa waamee akkana jedheen; “Garbichi kee lola walakkaa seenee jennaan namni tokko nama booji’ame tokko fidee, ‘Namicha kana eegi. Yoo inni bade lubbuun kee qooda lubbuu isaa baafamti yookaan meetii taalaantii tokkoo baafata’ jedhe. ⁴⁰ Namichi sunis utuu garbichi kee hojiin qabamee asii fi achi fiigaa jiruu bade.”

Mootichi Israa’elis deebisee, “Wanni sitti murtaa’u sanuma; ati mataan kee iyyuu murteerta” jedheen.

⁴¹ Raajiin sunis dafee ija isaa irraa haguuggii gad buufate; mootichi Israa’elis akka inni raajota keessaa isa tokko ta’e hubate. ⁴² Innis mootichaan akkana jedhe; “WAAQAYYO akkana jedha: ‘Ati namicha ani akka inni du’u itti mure gad lakkifteerta. Kanaafuu lubbuun kee qooda lubbuu isaa, sabni kees qooda saba isaa galaafatama.’” ⁴³ Mootichi Israa’el sunis akka malee aaree dheekkamaa gara masaraa mootummaa isaa kan Samaariyaa keessa jiru sanaa dhaqe.

21

Iddoo Dhaaba Wayinii Naabot

¹ Naabot namichi Yizri’eel tokko Yizri’eel keessaa, masaraa mootummaa Ahaab mooticha Samaariyaa biraa iddoo dhaabaa wayinii qaba ture. ² Ahaabis Naabotiin akkana jedhe; “Sababii inni masaraa mootummaa kootti dhi’aatuuf akka ani achi irra biqiltuu dhaabbadhuuf iddoo dhaabaa wayinii keetii naaf kenni. Qooda isaa ani iddoo dhaabaa wayinii kan isa caalu yookaan yoo ati feete gatii isaa maallaqa siifin kennaa.”

³ Naabot garuu, “Dhaala abbootii koo siif kennuu irraa WAAQAYYO na haa eegu” jedhee deebise.

⁴ Kanaafuu sababii Naabot namichi Yizri’eel sun “Ani dhaala abbootii koo siif hin kennu” jedheef Ahaab akka malee aaree dheekkamaa gara mana isaatti gale. Innis fuula isaa garagalatee siree isaa irra ciise; waa nyaachuus ni dide.

⁵ Iizaabel niitiin isaas ol seentee, “Ati maaliif akkana aarta? Maaliif waa hin nyaanne?” jettee isa gaafatte.

⁶ Innis akkana jedhee deebiseef; “Sababii Naabot namichi Yizri’eel sun, ani, ‘Iddoo dhaabaa wayinii keetii natti gurguri, yookaan yoo ati feete qooda isaa iddoo dhaabaa

wayinii biraa siifin kenna' jennaaniin inni immoo, 'Ani iddoo dhaabaa wayinii koo siif hin kennu' naan jedheef."

⁷ Niitiin isaa Iizaabelis, "Ati amma mootii Israa'elii? Ka'ii buddeena nyaadhu! Gammadis. Ani iddoo dhaabaa wayinii Naabot namicha Yizri'eel sanaa siifin kennaa" jetteen.

⁸ Kanaafuu isheen maqaa Ahaabiin xalayoota barreessitee chaappaa isaatiin chaappeessitee maanguddootaa fi namoota bebeekamoo magaalaa Naabot keessa isa wajjin jiraatanitti ergite. ⁹ Xalayoota sana keessattis akkana jettee barreessite:

"Guyyaa soomaa tokko labsaatii akka Naabot waldaa keessa iddoo ol aanu taa'u godhaa. ¹⁰ Namoota kashlabboota lama fuula isaa dura teessisaatii akka isaan akka inni Waaqaa fi mooticha abaare itti rageessan godhaa. Ergasiis gad baasaatii dhagaadhaan tumaa isa ajjeesaa."

¹¹ Kanaafuu maanguddoonni fi namoonni bebeekamoon magaalaa Naabot keessa jiraatan akkuma Iizaabel xalayoota barreessiteef keessatti isaan ajaje sana godhan. ¹² Isaanis sooma labsanii akka Naabot waldaa keessa iddoo ol aanu taa'u godhan. ¹³ Ergasii Kashlabboonni lama dhufanii fuula isaa dura tataa'anii, "Naabot Waaqaa fi mooticha abaareera" jedhanii namoota duratti itti rageessan. Kanaafis magaalaa keessaa gad baasanii dhagaadhaan tumanii isa ajjeesan. ¹⁴ Ergasii isaan, "Naabot dhagaan tumamee du'eera" jedhanii Iizaabelitti ergaa ergan.

¹⁵ Iizaabelis akkuma akka Naabot dhagaan tumamee du'e dhageesseen Ahaabiin, "Ka'itii iddoo dhaabaa wayinii Naabot namichi Yizri'eel sitti gurguruu dide sana dhaali. Inni lubbuun hin jiru; du'eeraa" jette. ¹⁶ Ahaabis akka Naabot du'e dhageenyaan iddoo dhagaan wayinii Naabot sana dhaaluuf ka'ee gad bu'e.

¹⁷ Dubbiin WAAQAYYOO akkana jedhee gara Eeliyaas namicha Tishbii sanaa dhufe; ¹⁸ "Ahaab mooticha Israa'el kan Samaariyaa keessa taa'ee bulchu sana arguuf gad bu'i. Inni amma lafa qotiisaa sana dhaaluuf gad bu'ee iddoo dhaabaa wayinii Naabot keessa jira. ¹⁹ Atis akkana jedhiin: 'WAAQAYYOO akkana jedha; ati nama tokko ajjeeftee qabeenya isaa hin dhaallee?' Ergasiis akkana jedhiin; 'WAAQAYYOO akkana jedha: Iddoo sareen dhiiga Naabot arraabde sanatti sareen dhiiga kees ni arraabdi; eeyyee dhugumaan dhiiga kees ni arraabdi!'"

²⁰ Ahaabis Eeliyaasiin, "Yaa diina ko, ati na argatteerta!" jedhe.

Innis deebisee akkana jedheen; "Sababii ati fuula WAAQAYYOO duratti waan hamaa hojjechuuf of gurgurteef ani si argadheera. ²¹ 'Ani badiisa sitti nan fida. Sanyii kee illee nan balleessa; dhiira mana Ahaab, garbas ta'u birmaduu hunda Israa'el keessaa nan balleessa. ²² Sababii ati aariif na kakaaftee fi akka Israa'el cubbuu hojjetu gooteef ani mana kee akkuma mana Yerobi'aam ilma Nebaat sanaatii fi akkuma mana Ba'ishaan ilma Ahiiyaa sanaa nan godha.'

²³ "Waa'ee Iizaabelis WAAQAYYOO akkana jedha: 'Dallaa dhagaa Yizri'eel biratti saroonni Iizaabelin ni nyaatu.'

²⁴ "Nama Ahaab kan magaalaa keessatti du'u kam iyyuu sareetu nyaata; kan baadiyyaatti du'u immoo allaattii samiitu nyaata."

²⁵ Namni akka Ahaab isa niitii ofii isaa Iizaabeliin kakaafamee fuula WAAQAYYOO duratti waan hamaa hojjechuudhaaf of gurgure sanaa gonkumaa hin jiru. ²⁶ Inni akkuma Amoorota kanneen WAAQAYYOO saba Israa'el duraa ari'ee baase sanaa waaqota tolfamoo duukaa bu'uudhaan waan akka malee jibbisisaa ta'ee hojjete.

²⁷ Ahaab yommuu dubbii kana dhaga'etti uffata isaa tarsaasee, wayyaa gaddaa uffatee soome. Innis wayyaa gaddaatiin ciisaa, mataa buusees deemaa ture.

²⁸ Dubbiin WAAQAYYOOOS akkana jedhee gara Eeliyaas namicha Tishbii sanaa dhufe: ²⁹ "Ati akka Ahaab fuula koo duratti gad of qabe argitee? Sababii inni gad of qabeef ani balaa kana bara isaa keessa hin fidu; garuu bara ilma isaa keessa mana isaatii nan fida."

22

Miikyaas Ahaabiin Mormee Raajii Dubbate

22:1-28 kwf - 2Sn 18:1-27

¹ Waggaa sadiif Sooriyaa fi Israa'el gidduu waraanni tokko iyyuu hin turre. ² Waggaa sadaffaa keessa garuu Yehooshaafaax mootiin Yihuudaa mooticha Israa'el arguuf gad bu'e. ³ Mootiin Israa'el qondaaltota isaatiin, "Isin akka Raamooti Gili'aad biyya keenya taatee nu garuu mootii Sooriyaa irraa ishee deebifachuuf waan tokko illee hojjechuutti hin jirre hin beektanii?" jedhe.

4 Kanaafuu inni, “Ati Raamooti Gili’aadin loluuf na wajjin ni baataa?” jedhee Yehooshaafaaxin gaafate.

Yehooshaafaaxis, “Ani akkuma kee ti; sabni koo akkuma saba keetii ti; fardeen koos akkuma fardeen keetii ti” jedhee mooticha Israa’eliif deebise. 5 Yehooshaafaax garuu mootii Israa’eliin, “Duraan dursii gorsa WAAQAYYOO gaafadhu” jedhe.

6 Kanaafuu Mootichi Israa’el raajota gara dhibba afur walitti qabee, “Ani Raamooti Gili’aadin loluudhaaf ba’u moo dhiisu?” jedhee ni gaafate.

Isaanis, “Dhaqi; Gooftaan dabarsee harka mootichaatti ishee kennaatii” jedhanii deebisaniif.

7 Yehooshaafaax immoo, “Akka nu waa isa gaafannuuf raajii WAAQAYYOO tokko iyyuu as hin jiruu?” jedhee gaafate.

8 Mootiin Israa’el immoo Yehooshaafaaxiin, “Amma illee namichi nu karaa isaatiin WAAQAYYON waa gaafachuu dandeenyu tokko jira; garuu sababii inni yeroo hunda waa’ee koo waan hamaa malee waan gaarii raajii hin dubbanneef ani isa nan jibba. Innis Miikaayaa ilma Yimlaa ti” jedhe.

Yehooshaafaax immoo deebisee, “Mootichi akkas jechuu hin qabu” jedheen.

9 Kanaafuu mootiin Israa’el qondaaltota isaa keessaa nama tokko waamee, “Dhaqiitii Miikaayaa ilma Yimlaa sana daffi fidi” jedheen.

10 Mootichi Israa’elii fi Yehooshaafaax mootiin Yihuudaa uffata isaanii kan mootummaa uffatanii balbala Samaariyaa seensisu bira oobdii keessa teessoo isaanii irra tataa’anii raajonni hundi immoo fuula isaanii duratti raajii dubbachaa turan. 11 Kana irratti Zedeqiyaan ilmi Keni’aanaa gaanfawwan sibiilaa tolchee, “WAAQAYYO, ‘Ati hamma isaan dhumanitti gaanfawwan kanneeniin warra Sooriyaa ni wawwaraanta’ jedha” jedhee labse.

12 Raajonni kaan hundinuu waanuma kana raajan. Isaanis, “WAAQAYYO dabarsee harka mootichaatti ishee kennaatii, Raamooti Gili’aadin lolii mo’adhu” jedhan.

13 Ergamaan Miikaayaa waamuu dhaqe sunis, “Kunoo raajonni kaan utuu gargar hin gorin milkaa’uu mootichaaf himaa jiru. Maaloo dubbiin kees dubbii isaaniitiin tokko akka ta’uuf atis waan tolaa dubbadhu” jedheen.

14 Miikaayaan garuu deebisee, “Dhugaa WAAQAYYO jiraataa, ani waanuma Waaqni natti himu qofan isatti hima” jedhe.

15 Yommuu inni achi ga’ettis mootichi, “Yaa Miikaayaa, nu Raamooti Gili’aaditti duullu moo dhiisnu?” jedhee isa gaafate.

Miikiyaasis, “WAAQAYYO dabarsee harka mootichaatti ishee ni kennaatii waraanii mo’adhu” jedhee deebise.

16 Mootichi immoo, “Ani yeroo hammamin akka ati dhugaa malee waan tokko illee natti hin himne maqaa WAAQAYYOOTIIN si kakachiisa?” jedheen.

17 Kana irratti Miikaayaan akkana jedhee deebise; “Ani Israa’eloota hunda akkuma hoolota tiksee hin qabneetti gaara irratti bittinnaa’an nan arge. WAAQAYYOS, ‘Sabni kun gooftaa hin qabu. Tokkoon tokkoon isaanii nagaadhaan mana isaaniitti haa deebi’an.’”

18 Mootiin Israa’elis Yehooshaafaaxiin, “Ani akka inni waa’ee koo waan hamaa malee waan gaarii tokko iyyuu hin raajne sitti hin himnee?” jedhe.

19 Miikiyaas ittuma fufee akkana jedhe; “Kanaafuu ati dubbii WAAQAYYOO dhaga’i: Ani utuu WAAQAYYO teessoo isaa irra taa’ee ergamoonni samii hundis mirgaa fi bitaa isaatiin naannoo isaa dhadhaabatanuu nan arge. 20 WAAQAYYOS, ‘Eenyutu akka inni dhaqee Raamooti Gili’aadin lolee achitti du’uuf Ahaabin gowwoomsa?’ jedhe.

“Inni tokko waan tokko jedha; inni kaan immoo waan biraa jedha. 21 Dhuma irratti hafuurri tokko dhufee fuula WAAQAYYOO dura dhaabatee, ‘Anatu isa gowwoomsa’ jedhe.

22 “WAAQAYYOS, ‘Karaa kamiin isa gowwoomsita?’ jedhee gaafate.

“Innis, ‘Ani dhaqee afaan raajota isaa hunda keessatti hafuura sobaa nan ta’a’ jedhe.

“WAAQAYYOS, ‘Dhaqiitii isa dogoggorsi; ni milkoofaatiin’ isaan jedheen.

23 “Kanaafuu WAAQAYYO amma afaan raajota kee kanneen hundaa keessa hafuura sobaa kaa’eera. WAAQAYYO badiisa sitti ajajeera.”

24 Kana irratti Zedeqiyaan ilmi Keni’aanaa ol ba’ee Miikaayaa fuula keessa kabalee, “Hafuurri WAAQAYYOO yommuu sitti dubbachuuf na biraa ba’etti karaa kam deeme?” jedhee gaafate.

25 Miikaayaanis, “Ati gaafa dhokachuuf jettee gara kutaa manaa kan gara keessaatti ol galtutti argita” jedhee deebiseef.

26 Kana irratti mootiin Israa’el akkana jedhee ajaje; “Miikaayaa fuudhaatii gara Aamoon bulchaa magaalaa fi gara Yoo’aash ilma mootichaatti geessaatii, 27 ‘Mootichi akkana jedha: Hamma ani nagaan deebi’utti namicha kana mana hidhaa keessa busaas; buddeenaa fi bishaan malees homaa hin kenninaafii’ jedhaan.”

²⁸ Miikaayaan immoo, “Yoo ati nagaan deebite, WAAQAYYO karaa kootiin hin dubbanne” jedheen. Ittuma fufees, “Yaa saboota, isin hundi dubbii koo akeekkadhaa!” jedhe.

Ahaab Reemaat Gili'aaditti Ajjeefame

22:29-36 kwf - 2Sn 18:28-34

²⁹ Kanaafuu mootiin Israa'elii fi Yehooshaafaax mootiin Yihuudaa Raamooti Gili'aaditti ol ba'an. ³⁰ Mootiin Israa'el Yehooshaafaaxiin, “Ani eenyummaa koo dhokfadheen lola seena; ati garuu uffata mootummaa uffadhu” jedhe. Kanaafuu mootiin Israa'el eenyummaa ofii isaa dhokfatee lola seene.

³¹ Yeroo kanatti mootiin Sooriyaa ajajjoota gaariwwan isaa sodomii lamaanii, “Mootii Israa'elitti malee xinnaas ta'u guddaatti, nama tokkottuu lola hin kaasinaa” jedhee ajaje. ³² Ajajjoonni gaariwwanii yommuu Yehooshaafaaxin arganitti, “Dhugumaan kun mootii Israa'el” jedhanii yaadan. Kanaafuu isa rukutuuf itti garagalan; garuu yommuu Yehooshaafaax guddisee iyyetti, ³³ ajajjoonni gaariwwaniis akka inni mootii Israa'el hin ta'in arganii isa ari'uu dhiisan.

³⁴ Garuu namichi tokko xiyya ofii isaa darbatee akkuma tasaa uffata isaa kan sibiilaa gidduudhaan mooticha Israa'el ni waraane. Mootichis ooftuu gaarii isaatiin, “Gaarii naannessiitii lola keessaa na baasi; ani madaa'eeraatii” jedhe. ³⁵ Lolli sunis guyyaa guutuu ittuma cimee oole; mootichis ol qabamee fuula isaa gara warra Sooriyaatti deebifatee gaarii isaa keessa oole. Madaa isaa keessaas dhiigni yaa'ee gaarii keessa lola'e; innis galgaluma sana du'e. ³⁶ Akkuma aduun dhiiteen iyyi, “Tokkoon tokkoon namaa gara magaalaa ofii isaatti; tokkoon tokkoon namaa gara biyya ofii isaatti!” jedhu tokko dhaga'ame.

³⁷ Kanaafuu mootichi duunaan Samaariyaatti geeffame; isaanis achitti isa awwaalan. ³⁸ Isaanis haroo Samaariyaa keessaa kan sagaagaltoonni itti dhiqachaa turan tokko keessatti gaarii sana dhiqan; akkuma dubbiin WAAQAYYOO jedhee ture sana saroonni dhiiga isaa arraaban.

³⁹ Wantoonni bara mootummaa Ahaab keessa hojjetaman biraa, wantoota inni hojjetete hunda dabalatee, masaraa mootummaa inni ijaaree ilka arbaatiin bareeche sun, magaalaaawwan inni dallaa dhagaa itti ijaare kitaaba seenaa mootota Israa'el keessatti barreeffamaniiru mitii? ⁴⁰ Ahaabis abbootii isaa wajjin boqote. Ilmi isaa Ahaaziyaan iddoo isaa bu'ee mootii ta'e.

Yehooshaafaax Mooticha Yihuudaa

22:41-50 kwf - 2Sn 20:31-21:1

⁴¹ Yehooshaafaax ilmi Aasaa, bara mootummaa Ahaab mooticha Israa'el keessa waggaa afuraffaatti mootii Yihuudaa ta'e. ⁴² Yehooshaafaax yeroo mootii ta'etti nama umuriin isaa waggaa sodomii shan ture; innis Yerusaaalem keessa ta'ee waggaa digdamii shan ni bulche. Maqaan haadha isaa Azuubaa ture; isheenis intala Shilhiu turte. ⁴³ Innis waan hundumaan karuma abbaa isaa Aasaa irra deeme malee isa irraa hin jal'anne; fuula WAAQAYYOO durattis waan qajeelaa hojjetete. Ta'us iddoowwan sagadaa kanneen gaarran irraa hin diigamne ture; namoonnis ittuma fufanii achitti aarsaa dhi'eessaa, ixaanas aarsaa turan. ⁴⁴ Yehooshaafaaxis mootii Israa'el wajjin nagaan jiraata ture.

⁴⁵ Wantoonni bara mootummaa Yehooshaafaax keessa hojjetaman kaan, jabinni inni argiisee fi haalli inni itti lolaa ture kitaaba seenaa mootota Yihuudaa keessatti barreeffamaniiru mitii? ⁴⁶ Inni manneen sagadaa dhiirota sagaagalanii kanneen bara mootummaa abbaa isaa Aasaa keessa turan iyyuu biyyattii keessaa ni balleesse. ⁴⁷ Yeroo sanatti Edoom keessa mootiin tokko iyyuu hin jiru ture; itti aanaa mootiitu biyya bulchaa ture.

⁴⁸ Yehooshaafaaxis warqee barbaacha Oofiir dhaquuf jedhee dooniiwwan tolfate; dooniiwwan sun garuu sababii Eziyoon Geberitti caccabaniif achi dhaquu hin dandeenye. ⁴⁹ Yeroo sana Ahaaziyaan ilmi Ahaab Yehooshaafaaxiin, “Mee namoonni koo namoota kee wajjin dooniin haa deeman” jedhe; Yehooshaafaax garuu ni dide.

⁵⁰ Ergasii Yehooshaafaax abbootii isaa wajjin boqotee isaanuma biratti magaalaa abbaa isaa magaalaa Daawit keessatti awwaalame. Yehooraam ilmi isaas iddoo isaa bu'ee mootii ta'e.

Ahaaziyaan mooticha Israa'el

⁵¹ Ahaaziyaan ilmi Ahaab bara Yehooshaafaax mooticha Yihuudaa keessa waggaa kudha torbaffaatti Samaariyaa keessatti mootii Israa'el ta'e; innis waggaa lama Israa'elin bulche. ⁵² Inni karaa abbaa isaatii fi haadha isaa irra akkasumas karaa

Yerobi'aam ilma Nebaat kan Israa'elin cubbuu hojjechiise sanaa irra deemuudhaan fuula WAAQAYYOO duratti waan hamaa hojjete. ⁵³ Innis akkuma abbaan isaa godhe sana Ba'aalin tajaajiluu fi waaqeffachuudhaan WAAQAYYO Waaqa Israa'el dheekkamsaaf kakaase.

Kitaaba Moototaa Lammaffaa

Murtii WAAQAYYO Ahaaziyaatti Mure

¹ Erga Ahaab du'ee booddee Mo'aab Israa'elitti fincile. ² Ahaaziyaanis qaawwa darbii mana isaa kan Samaariyaa keessaan kufee miidhamee ture. Kanaafuu inni, "Akka ani miidhaa kana irraa fayyuu fi fayyuu baachuu koo beekuuf dhaqaatii Ba'aal Zebuul waaqicha Eqroon sana naaf gaafadhaa" jedhee ergamoota erge.

³ Ergamaan WAAQAYYOO garuu Eeliyaas namicha gosa Tishbii sanaan akkana jedhe; "Ka'iitii gara ergamoota mooticha Samaariyaa sanaatti ol ba'iitii akkana jedhii isaan gaafadhu; 'Wanni isin Ba'aal Zebuul waaqicha Eqroon sana gorsa gaafachuuf dhaqxaniif Israa'el keessaa Waaqni dhabameetii?' ⁴ Kanaafuu WAAQAYYO, 'Ati siree amma irra ciiftu kana irraa hin kaatu. Ati dhugumaan ni duuta!' jedha." Kana irratti Eeliyaas ka'ee deeme.

⁵ Mootichis yommuu ergamoonni gara isaatti deebi'anitti, "Isin maaliif deebitan?" jedhee isaan gaafate.

⁶ Isaanis akkana jedhanii deebisan; "Namicha tokkotu karaatti nutti dhufee, 'Gara mooticha isin erge sanaatti deebi'aatii akkana jedhaanii' nuun jedhe; 'WAAQAYYO akkana jedha: Wanni ati Ba'aal Zebuul waaqicha Eqroon sana gorsa gaafachuuf namoota ergituuf Israa'el keessaa Waaqni dhabameetii?' Kanaafuu ati siree irra ciiftu kana irraa hin kaatu. Ati dhugumaan ni duuta!' "

⁷ Mootichi, "Namichi karaatti isinitti dhufee waan kana isinitti hime sun nama akkamii ti?" jedhee isaan gaafate.

⁸ Isaanis, "Inni nama uffata rifeensa irraa hojjetame uffatee sabbata gogaa mudhii isaatti hidhatu tokkoo dha" jedhanii deebisaniif.

Mootichis, "Inni Eeliyaas namicha Tishbii sanaa dha" jedhe.

⁹ Kana irratti mootichi ajajaa waraanaa tokko namoota shantama wajjin Eeliyaasitti erge. Ajajaan sunis fiixee gaara inni irra taa'aa ture tokkootti Eeliyaasitti ol ba'ee, "Yaa nama Waaqaa, mootichi 'Gad kottu!' siin jedha" jedheen.

¹⁰ Eeliyaas immoo ajajaa sanaan, "Yoo ani nama Waaqaa ta'e, ibiddi samii irraa gad bu'ee si'ii fi namoota kee shantamman haa fixu!" jedhe. Ergasii ibiddi samii irraa gad bu'ee ajajaa sanaa fi namoota isaa hunda fixe.

¹¹ Kana irratti mootichi amma illee ajajaa biraa namoota shantama wajjin Eeliyaasitti erge. Ajajaan sunis, "Yaa nama Waaqaa, mootichi, 'Dafii gad bu'iitii kottu!' siin jedha" jedheen.

¹² Eeliyaas garuu, "Yoo ani nama Waaqaa ta'e, ibiddi samii irraa gad bu'ee si'ii fi namoota kee shantammanuu haa fixu!" jedhee deebiseef. Ibiddi Waaqaas samii irraa gad bu'ee isaa fi namoota isaa shantammanuu ni fixe.

¹³ Kanaafuu mootichi ammas ajajaa sadaffaa namoota shantama wajjin ni erge. Ajajaan sadaffaan kun ol ba'ee jilba ofii isaatiin Eeliyaas duratti jilbeenfatee akkana jedhee isa ni kadhate; "Yaa nama Waaqaa, maaloo lubbuun koo fi lubbuun garboota kee shantamman kanneenii gatii hin dhabin! ¹⁴ Kunoo, ibiddi samii irraa gad bu'ee ajajjuuwwan duraa lamaanii fi namoota isaanii hunda fixeera. Amma garuu lubbuun koo fuula kee duratti gatii haa qabaattu!"

¹⁵ Ergamaan WAAQAYYOS Eeliyaasiin, "Isa wajjin gad bu'i; isa hin sodaatin" jedhe. Kanaafuu Eeliyaas ka'ee isa wajjin gara mootichaatti gad bu'e.

¹⁶ Innis akkana jedhee mootichatti hime; "WAAQAYYO akkana jedha: Wanni ati Ba'aal Zebuul waaqicha Eqroon gorsa gaafachuudhaaf ergamoota ergiteef Israa'el keessaa Waaqni gorsa gaafatamu dhabameetii? Ati sababii waan kana hojjetteef siree irra ciiftu kana irraa hin kaatu. Ati dhugumaan ni duuta!" ¹⁷ Kanaafuu inni akkuma dubbii WAAQAYYOO kan Eeliyaas dubbate sanaatti du'e.

Sababii Ahaaziyaan ilma hin qabneef obboleessi isaa Yehooraam iddoo isaa bu'ee mootii ta'e; kunis bara Yehooraam ilmi Yehooshaafaax mootii Yihuudaa ture keessa waggaa lammaffaatti ta'e. ¹⁸ Wantoonni bara mootummaa Ahaaziya keessa hojjetaman kan biraa hundii fi wanti inni hojjetete kitaaba seenaa mootota Israa'el keessatti barreeffamaniiru mitii?

2

Eeliyaas Samiitti Ol Fudhatame

¹ Yeroo WAAQAYYO bubbeedhaan Eeliyaasin gara Samiitti ol fudhachuu ga'etti Eeliyaasii fi Elsa'a'i Gilgaalii ka'anii karaa deemaa turan. ² Eeliyaasis Elsa'a'iin, "Ati asuma turi; WAAQAYYO Beet'eelitti na ergeeraatii" jedhe.

Elsa'a'i garuu, "Dhugaa WAAQAYYO jiraataa, ani lubbuu keetiin nan kakadha; ani gad si hin dhiisu" jedheen. Kanaafuu isaan Beet'eelitti gad bu'an.

³ Erga isaan waldaan raajotaa kanneen Beet'eel turan gara Elsa'a'i dhufanii, "Ati akka WAAQAYYO har'a gooftaa kee si biraa fudhachuuf jiru beektaa?" jedhanii ni gaafatan.

Elsa'a'i immoo, "Eeyyee, ani nan beeka; garuu isin waa'ee isaa hin dubbatinaa" jedheen.

⁴ Eeliyaasis "Yaa Elsa'a'i, ati asuma turi; WAAQAYYO gara Yerikootti na ergeeraatii" jedheen.

Innis, "Dhugaa WAAQAYYO jiraataa, ani lubbuu keetiin nan kakadha; ani gad si hin dhiisu" jedheen. Kanaafuu isaan gara Yerikoo deeman.

⁵ Waldaan raajotaa kanneen Yerikoo turan sun gara Elsa'a'i dhufanii, "Ati akka WAAQAYYO har'a gooftaa kee si biraa fudhachuuf jiru beektaa?" jedhanii gaafatan.

Innis, "Eeyyee nan beeka; isin garuu waa'ee isaa hin dubbatinaa" jedheen.

⁶ Eeliyaasis, "Ati asuma turi; WAAQAYYO Yordaanositti na ergeeraatii" jedheen.

Innis, "Dhugaa WAAQAYYO jiraataa, ani lubbuu keetiin nan kakadha; ani gad si hin dhiisu" jedheen. Kanaafuu isaan lamaanuu ka'anii deeman.

⁷ Isaanis Yordaanos bira dhaabatan; waldaa raajotaa keessaa namoonni shantamni dhaqanii irraa fagaatanii fuula isaanii dura dhadahabatan. ⁸ Eeliyaasis kaabbaa isaa of irraa baasee dadachaasee ittiin bishaan dha'e. Bishaan sunis mirgaa fi bitaatti gargar qoodame; isaan lamaanuu lafa gogaa irra ce'an.

⁹ Eeliyaasis erga ce'anii booddee Elsa'a'iin, "Mee waan ani utuu si biraa hin fudhatamin siif gochuu danda'u natti himi" jedhe.

Elsa'a'i immoo, "Hafuurri kee dachaadhaan narra haa bu'u" jedhee deebiseef.

¹⁰ Eeliyaas immoo, "Ati waan rakkisaa kadhate; ta'us yoo ati yeroo ani si biraa fudhatamutti na argite, hafuurri kun kan kee ta'a; yoo kanaa achi kan kee hin ta'u" jedheen.

¹¹ Utuma isaan haasa'aa deemanuu gaariin ibiddaa tokkoo fi fardeen ibiddaa akkuma tasaa mul'atanii isaan lamaan gargari baasan; Eeliyaasis bubbeedhaan samiitti ol fudhatame. ¹² Elsa'a'i waan kana argee, "Yaa abbaa koo! Yaa abbaa koo! Gaariwwanii fi abbootii farda Israa'el!" jedhee sagalee ol fudhatee iyye. Elsa'a'i ergasii deebi'ee isa hin argine. Innis uffata isaa qabee iddoo lamatti gargari tarsaase.

¹³ Innis kaabbaa Eeliyaas irraa bu'e sana fuudhee deebi'ee qarqara laga Yordaanos dhaabate. ¹⁴ Ergasii kaabbaa Eeliyaas irraa bu'e sana fudhatee ittiin bishaan dha'ee, "WAAQAYYO Waaqni Eeliyaas sun amma eessa jira?" jedhee gaafate. Yommuu inni dha'etti bishaan sun mirgaa fi bitaatti gargari qoodame; Elsa'a'is ni ce'e.

¹⁵ Waldaan raajotaa kanneen Yerikoodhaa dhufanii waan kana ilaalaa turan, "Hafuurri Eeliyaas Elsa'a'i irra bu'uutti jira" jedhan. Isaanis isa simachuudhaaf dhaqanii fuula isaa duratti lafatti gombifaman. ¹⁶ Akkanas jedhaniin; "Kunoo, nu tajaajiltoonni kee namoota ciccimoo shantama of biraa qabna. Isaan dhaqanii gooftaa kee haa barbaadan. Hafuurri WAAQAYYOO ol isa fuudhee tulluu wayii irra yookaan sulula wayii keessa isa buuse ta'aatii."

Elsa'a'i immoo, "Akkas miti; isaan hin erginaa" jedhee deebise.

¹⁷ Isaan garuu hamma inni isaan jalaa diduu qaana'utti isa dirqisiisan. Kana irratti inni, "Isaan ergaa" jedhe. Isaanis nama shantama ni ergan; namoonni sunis bultii sadii barbaadaniis isa dhaban. ¹⁸ Isaanis utuma inni Yerikoo jiruu deebi'anii gara isaa dhufan; innis, "Ani hin deeminaa isiniin hin jennee?" jedheen.

Bishaan Fayyifame

¹⁹ Namoonni magaalaa sanaa Elsa'a'iin, "Kunoo yaa gooftaa keenya, akkuma ati argitu kana haalli magaalaa kanaa namatti tola; garuu bishaan ishee faalamaa dha; lafti ishees midhaan hin baafuu" jedhan.

²⁰ Innis, "Mee waciitii haaraa naa fidaatii soogidda itti naqaa" jedheen. Kanaafuu isaan waciitii sana itti fidan.

²¹ Innis gara burqaatti gad bu'ee, soogidda sana itti naqee akkana jedhe; "WAAQAYYO akkana jedha; 'Ani bishaan kana fayyiseera. Bishaan kun lammata du'a hin fidu yookaan maseenummaa biyyatti hin fidu.'" ²² Bishaan sunis akkuma dubbii Elsa'a'i dubbate sanaatti hamma ammaatti fayyeera.

Elsaa'itti Qoosame

²³ Ergasii Elsa'a'i ka'ee Beet'eel dhaqe. Utuma inni karaa deemuu ijoolleen tokko magaalaa keessaa yaatee, "Namicha mataa moluu nana deemi asii! Namicha mataa moluu nana deemi asii!" jedhanii itti qoosan. ²⁴ Inni of irra garagalee isaan mi'atee maqaa WAAQAYYOOTIN isaan abaare. Yommuu amaakenni lama bosona keessaa ba'anii ijoollee sana keessaa afurtamii lama cicciranii fixan. ²⁵ Elsa'a'is ittuma fufee gara Tulluu Qarmeloos dhaqe; achii ka'ees Samaariyaatti deebi'e.

3*Mo'aab Fincile*

¹ Yehooraam ilmi Ahaab bara Yehooshaafaax mooticha Yihuudaa keessa waggaa kudha saddeettaffaatti Samaariyaa keessatti mootii Israa'el ta'ee waggaa kudha lama bulche. ² Yehooraam fuula WAAQAYYOO duratti waan hamaa hojjet; garuu akka abbaa fi haati isaa hojjetan sana miti. Inni siidaa Ba'aal kan abbaan isaa hojjechiise sana balleesseeraatii. ³ Ta'us cubbuu Yerobi'aam ilma Nebaat kan inni saba Israa'el hojjechiise sana cimsee qabate malee irraa hin deebine.

⁴ Yeroo kanatti Meeshaan mootichi Mo'aab hoolota horsiisa ture; inni waggaa waggaatti xobbaallaa hoolaa kuma dhibba tokkoo fi rifeensa korbeeyyii hoolaa kuma dhibba tokko mootii Israa'elii gibira kenna ture. ⁵ Erga Ahaab du'ee garuu mootichi Mo'aab mootii Israa'elitti ni fincile. ⁶ Kanaafuu yeroo sanatti Yehooraam mootichi Samaariyaadhaa ka'ee saba Israa'el hunda duulaaf hiriirse. ⁷ Innis, "Mootiin Mo'aab natti fincileera; Mo'aabin loluudhaaf ati na wajjin ni baataa?" jedhee Yehooshaafaax mooticha Yihuudaatti ergaa ergate.

Yehooshaafaaxis, "Ani si wajjin nan ba'a; ani akkuma kee ti; sabni koos akkuma saba keetii ti; fardeen koos akkuma fardeen keetii ti" jedhee deebiseef.

⁸ Innis, "Karaa kamiin yaanaa?" jedhee gaafate.

Yehooraam immoo, "Karaa Gammoojjii Edoomiitiin" jedhee deebiseef.

⁹ Kanaafuu mootiin Israa'el mootii Yihuudaatii fi mootii Edoom wajjin ka'ee qajelee. Erga guyyaa torba irra nanaanna'anii booddee loltoonni sun ofii isaaniitiif yookaan horii isaaniitiif bishaan tokko illee hin qaban ture.

¹⁰ Kana irratti mootiin Israa'el, "Wayyoo kaa! WAAQAYYOO nu mootota sadanuu dabarsee mootii Mo'aabitti kennuudhaaf walitti nu waamee?" jedhee iyye.

¹¹ Yehooshaafaax garuu, "Raajjin WAAQAYYOO kan nu karaa isaatiin WAAQAYYON waa gaafannu tokko iyyuu as hin jiruu?" jedhee gaafate.

Qondaalli mootii Israa'el tokkos, "Elsaa'i ilmi Shaafaax as jira. Inni Eeliyaasiif bishaan harkaa buusa ture" jedhee deebise.

¹² Yehooshaafaaxis, "Dubbiin WAAQAYYOO isa bira jira" jedhe. Kanaafuu mootiin Israa'el, Yehooshaafaaxii fi mootiin Edoom gara Elsa'a'itti gad bu'an.

¹³ Elsa'a'i mootii Israa'elii, "Nu maal wal irraa qabna? Ati gara raajota abbaa keetiitii fi gara raajota haadha keetii dhaqi" jedhe.

Mootiin Israa'el, "Akkas miti; WAAQAYYOO nu mootota sadanuu dabarsee Mo'aabitti kennuudhaaf walitti nu waameeraatii" jedhee deebise.

¹⁴ Elsa'a'i immoo akkana jedhee deebise; "Dhugaa WAAQAYYOO Waan Hunda Danda'u kan ani isa tajaajilu sanaa; ani utuu Yehooshaafaax mooticha Yihuudaatiif ulfina kennuu baadhee silaa garagalee si hin ilaalu yookaan wayittuu si hin hedun ture. ¹⁵ Amma garuu nama baganaa taphatu tokko naa fidaa."

Utuma namichi sun baganaa taphachaa jiruu harki WAAQAYYOO Elsa'a'i irra bu'e; ¹⁶ innis akkana jedhe; "WAAQAYYOO akkana jedha: Sulula kana keessatti boolla hedduu gotaa. ¹⁷ WAAQAYYOO akkana jedhaatii: Isin bubbee yookaan bokkaa hin argitan; ta'us sululli kun bishaaniin guutama; isin, loon keessanii fi horiin keessan kaan ni dhugdu. ¹⁸ Wannu kun fuula WAAQAYYOO duratti waan salphaa dha; inni Mo'aabinis dabarsee harka keessanitti ni kenna. ¹⁹ Isin magaalaa dalaan itti ijaarame hundaa fi magaalawwan hunda ni mo'attu. Muka gaarii hunda ni murtu; burqaa hunda gogsitanii lafa qotiisaa gaarii hunda dhagaan balleessitu."

²⁰ Guyyaa itti aanu ganama gara sa'aatii aarsaan itti dhi'eeffamuutti kunoo karaa Edoomiin bishaan gad ni dhangala'e! Biyyi sunis bishaaniin guutamte.

²¹ Yeroo kanatti Mo'aabonni hundi akka mootonni sun isaan loluu dhufan dhaga'an; kanaafuu dargaggeessas ta'u jaarsi mi'a lolaa baachuu danda'u hundi walitti waamee daangaa irratti walitti qabame. ²² Yommuu isaan ganama barii ka'anitti biiftuun bishaan sana irratti ba'aa turte. Bishaan sunis Mo'aabota gama jiranitti akkuma dhiigaa

diimatee mul'ate. ²³ Isaanis, "Wanni sun dhiiga! Mootonni sun wal lolanii wal fixuun isaanii hin oolu. Kanaafuu yaa Mo'aab boojiudhaaf ka'ii!" jedhan.

²⁴ Garuu yeroo Mo'aabonni qubata Israa'el ga'anitti, Israa'eloonni itti ka'anii lolan; jarri sunis ni baqatan. Israa'eloonnis biyya sana weeraranii Mo'aabota gogorra'an.

²⁵ Isaanis akkasiin magaalaa'wwan balleessan; tokkoon tokkoon namaas lafa qotiisaa gaggaarii hunda irratti dhagaa darbatee lafti qotiisaa sun dhagaadhaan guutame. Isaan burqaawwan hunda gogsanii muka gaggaarii hunda ciran. Qiir Hareesheti qofatu dhagaa ishee wajjin hafe; ta'us namoonni furrisaa qaban marsanii ishee dha'an.

²⁶ Mootiin Mo'aab yommuu akka lolli isatti jabaate argetti mooticha Edoomitti cabsee seenuuf namoota goraadee hidhatan dhibba torba fudhatee qajeete; jarri garuu hin dandeenye. ²⁷ Innis ilma isaa hangafa kan iddoo isaa bu'ee mootii ta'uuf jiru fudhatee dallaa magaalaa sanaa irratti aarsaa gubamu godhee dhi'eesse. Dheekkamsi guddaanis Israa'elitti dhufe. Isaanis dugda duubatti deebi'anii biyya isaaniitti ni galan.

4

Zayitii Haadha Hiyyeessaa Tokkoo

¹ Niitiin namicha ilmaan raajotaa keessaa tokko ta'e tokkoo sagalee ol fudhattee Elsaai'ii akkana jette; "Dhirsii koo garbichi kee du'eera; akka inni WAAQAYYON sodaachaa ture atuu ni beekta. Namichi liqii isa irraa qabu tokko garuu amma ilmaan koo lamaan fudhatee garboomfachuuf dhufaa jira."

² Elsaa'is, "Ani akkamittin si gargaaruu danda'a? Mee natti himi; mana kee keessaa maal qabdaa?" jedheen.

Isheenis, "Garbittiin kee zayitii xinnoo tokko malee homaa manaa hin qabdu" jettee deebifte.

³ Elsaa'ii akkana jedheen; "Dhaqiiitti warra ollaa keetii hunda okkotee duwwaa hedduu kadhaddhu. Muraasa hin kadhatin. ⁴ Ergasii ol galiitii ofii keetii fi ilmaan keetii balbala cufi. Okkotee hundatti zayitii naqiiitti yommuu tokkoon tokkoon isaa guutamutti jalaa hiqsi."

⁵ Isheenis isa biraa deemtee ofii isheettii fi ilmaan isheetti balbala cufte. Ilmaan ishee okkotee gara isheetti fidan; isheen immoo zayitii itti naqaa turte. ⁶ Okkoteen hundi guutamaan isheen ilma isheettiin, "kan biraa naaf fidi" jette.

Inni immoo, "Okkoteen tokko iyyuu hin hafne" jedhee deebiseef. Kana irratti zayitiin sun yaa'uu dhiise.

⁷ Isheen dhaqxee nama Waaqaa sanatti himte; innis, "Dhaqii zayitii sana gurguriitii liqii kee baafadhu. Atii fi ilmaan kee waan hafeen jiraachuu ni dandeessu" jedhe.

Mucaan Dubartii Suunam Tokkoo Du'aa Kaafamuu Isaa

⁸ Gaaf tokko Elsaa'ii ka'ee Suunam dhage. Dubartiin soorettiin tokko achi jiraatti turte; isheenis akka inni goree waa nyaatuuf Elsaa'ii kadhatte. Kanaafuu inni yeroo karaa sanaan darbu hunda goree waa nyaata ture. ⁹ Isheenis dhirsaa isheettiin akkana jette; "Ani namichi yeroo hunda karaa keenyaan darbu kun qulqulluu nama Waaqaa akka ta'e nan beeka. ¹⁰ Kottu mee bantii manaa irratti kutaa xinnaa tokko ijaarree siree fi minjaala, barcumaa fi ibsaa achi keessa haa keenyuuf. Ergasiis inni yeroo nu bira dhufu hunda achi jiraachuu danda'a."

¹¹ Elsaa'is gaaf tokko dhufee ol ba'ee kutaa isaa sana keessa ciise. ¹² Innis tajaajilaa isaa Gehaaziin, "Mee dubartii Suunam sana as waami" jedhe. Gehaaz ishee waamaan isheen dhuftee fuula Elsaa'ii dura dhaabatte. ¹³ Elsaa'ii immoo akkana isaan jedhe; "Ati nuuf jettee baay'ee dadhabdeerta. Amma maal siif haa godhu? Iddoo kee buunee mootichatti yookaan ajajaa loltootaatti siif dubbannuu?" jedhii isheetti himi."

Ishee immoo, "Ani saba koo gidduun jiraadha" jettee deebifte.

¹⁴ Elsaa'is, "Maaltu isheef godhamuu danda'a?" jedhee gaafate.

Gehaaz immoo, "Isheen ilma hin qabdu; dhirsii ishees dulloomee jira" jedheen.

¹⁵ Elsaa'is, "Ishee waami" jedheen. Kanaafuu inni ishee waame; isheenis balbala dura dhaabatte. ¹⁶ Elsaa'ii, "Ati waggaa dhufu keessa yeroo kanatti ilma ni hammatta" jedheen.

Isheen immoo, "Akkas miti yaa gooftaa koo; yaa nama Waaqaa, ati garbittii kee hin gowwoomsin!" jette.

¹⁷ Dubartiin sun garuu ni ulfoofte; akkuma Elsaa'ii isheetti hime sanatti waggaa itti aanu keessa yeruma sanatti ilma deesse.

¹⁸ Mucaan sunis ni guddate; innis gaaf tokko gara warra midhaan haamanii abbaa isaa bira dhage. ¹⁹ Innis abbaa isaatiin, "Mataa koo! Mataa koo!" jedhe.

Abbaan isaa immoo hojjetaa tokkoon, “Baadhuutii gara haadha isaatti isa geessi” jedhe. ²⁰ Erga hojjetaan sun fuudhee gara haadha isaati isa geessee booddee mucaan sun hamma saafaatti gudeeda haadha isaa irra taa’ee ergasii immoo ni du’e. ²¹ Isheen ol baatee siree nama Waaqaa sanaa irra isa ciibsite; mana itti cuftees kaatee biraa deemte.

²² Isheen dhirsa ishee waamtee, “Mee akka ani dafee gara nama Waaqaa dhaqee deebi’uuf hojjetaa tokkoo fi harree tokko naaf ergi” jetteen.

²³ Inni immoo, “Har’a ayyaana baatii miti yookaan Sanbata miti. Ati maaliif har’a gara isaa dhaqxa ree?” jedheen.

Isheen, “Nagumaafin dhaqa” jette.

²⁴ Isheenis harree ishee irra kooraa kaa’attee hojjetaa isheetiin, “Karaa qabadhu; yoo ani sitti hime malee anaaf jettee suuta hin deemsisin” jette. ²⁵ Kanaafuu isheen kaatee gara Tulluu Qarmeloos nama Waaqaa sana bira dhaqxe.

Namni Waaqaa sun fagootti ishee arginaan tajaajilaa isaa Gehaaziin akkana jedhe; “Ilaa! Dubartiin Suunam sun kuunoo ti! ²⁶ Fiigii ishee simadhuutii, ‘Ati fayyumaa? Dhirsi kee fayyumaa? Mucaan kee fayyumaa?’ jedhii gaafadhu.”

Isheenis, “Wanni hundinuu naguma” jettee deebifte.

²⁷ Isheen yommuu tulluu sana irratti nama Waaqaa sana bira geessetti, jabeessite miilla isaa qabatte. Gehaaz immoo gad dhiisisuuf dhufe; namni Waaqaa sun garuu, “Ishee hin tuqin! Isheen gadda guddaa keessa jirti; WAAQAYYO garuu waan kana na dhokse; nattis hin himne” jedhe.

²⁸ Isheenis, “Yaa gooftaa koo ani ilma si kadhadheeraa? Ani, ‘Na hin gowwoomsin’ siin hin jennee?” jetteen.

²⁹ Kana irratti Elsa’i Gehaaziin akkana jedhe; “Sabbataan mudhii kee hidhadhuutii, ulee koo harkatti qabadhuutii fiigi. Nama karaatti argite tokko illee hin dubbisin; yoo namni kam iyyuu si dubbise deebii hin kenniniif; ulee koos fuula mucaa sanaa irra kaa’i.”

³⁰ Haati daa’ima sanaa garuu, “Dhugaa WAAQAYYO jiraataa, ani lubbuu keetiin nan kakadha; ani si dhiisee hin deemu” jette. Kanaafuu inni ka’ee ishee duukaa bu’e.

³¹ Gehaaz isaan dura darbee ulee sana fuula mucaa irra kaa’ee; garuu sagaleen yookaan mallattoon tokko iyyuu hin turre. Kanaaf Gehaaz gara Elsa’itti deebi’ee, “Mucaan hin dammaqne” jedhee itti hime.

³² Yommuu Elsa’i mana ga’etti mucaan sun du’ee siree isaa irra ciisaa ture. ³³ Elsa’is ol seenee, ofii fi mucaatti balbala cufee WAAQAYYON kadhate. ³⁴ Ergasiis siree yaabbatee, afaan isaa afaan mucaa irra, ija isaa ija mucaa irra, harka isaa harka mucaa irra kaa’ee mucicha irra ciise. Akkuma inni mucaa sana irratti diriire dhagni mucaa ho’uu jalqabe. ³⁵ Elsa’i achi garagalee mana keessa asii fi achi nanaanna’ee amma illee siree yaabbatee mucaa irratti diriire. Mucaan sunis yeroo torba haxxifatee ija banate.

³⁶ Elsa’is Gehaazin waamee, “Dubartii Suunam sana as waami” jedhe. Innis ishee waame. Elsa’i yommuu isheen gara isaa dhuftetti, “Kunoo mucaa kee fudhadhu” jedheen. ³⁷ Isheen ol seentee, miilla isaa irratti kuftee addaan lafatti gombifamte. Ergasiis mucaa ishee fudhattee gad baate.

Du’a Okkotee Keessaa

³⁸ Elsa’is ka’ee Gilgaalitti deebi’ee; yeroo sanatti biyya sana keessa beelatu ture. Innis utuu waldaan raajotaa fuula isaa dura taa’aa jiranii tajaajilaa isaatiin, “Okkotee guddicha ibiddaa irra kaa’iitti namoota kanaaf ittoo bilcheessi” jedhe.

³⁹ Isaan keessaa namni tokko raafuu funaannachuuf gad ba’ee wayinii bosonaa tokko arge. Wayinii bosonaa sana irraa wiillee ciree dachaa uffata isaa guuttate. Yeroo deebi’ettis buqqee sana murmuree okkotee ittoo sanatti naqe. Namni tokko iyyuu waan sana hin beeku tureetii. ⁴⁰ Ittoon sunis jaraaf dhi’eeffame; isaan garuu akkuma nyaachuu jalqabaniin, “Yaa nama Waaqaa, okkotee kana keessa du’atu jira!” jedhanii iyyan. Isaanis ittoo sana nyaachuu hin dandeenye.

⁴¹ Elsa’i, “Daakuu wayii naa fidaa” jedhe. Daakuu sanas okkoteetti naqee, “Akka nyaataniif namootaaf dhi’eessaa” jedhe. Ergasii wanni nama miidhu tokko iyyuu okkotee sana keessatti hin argamne.

Elsa’i Nama Dhibba Tokko Soore

⁴² Namichi tokko buddeena garbuu kan mataa midhaan bilchaatee irraa tolfame digdamaa fi asheetii midhaanii nama Waaqaa sanaaf fidee Ba’aal Shaaliishaadhaa dhufe. Elsa’is, “Akka isaan nyaataniif namootaaf kenni” jedhe.

⁴³ Tajaajilaan isaa immoo, “Ani akkamiinan waan kana nama dhibba tokko duratti dhi’eessuu danda’a?” jedhee gaafate.

Elsaa'i garuu, "Akka isaan nyaataniif namootaaf kenni. WAAQAYYO akkana jedhaatii; 'Isaan nyaatanii hambaa illee ni qabaatu' " jedhee deebise. ⁴⁴ Innis fuudhee isaan duratti dhi'eesse; isaanis akkuma dubbii WAAQAYYOO sanaatti nyaatanii hambaa hambisan.

5

Na'amaan Lamxii Irraa Fayyifame

¹ Na'amaan ajajaa loltoota mooticha Sooriyaa ture. Sababii WAAQAYYO karaa isaatiin warra Sooriyaatiif moo'icha kenneef inni fuula gooftaa isaa duratti nama guddaa akka malee ulfina qabu ture. Inni loltuu jagna; garuu lamxii qaba ture.

² Bara sana keessa tuunni loltoota Sooriyaa dhaqee intala dargaggeettii gosa Israa'el tokko booji'e; isheenis niitii Na'amaan tajaajilaa turte. ³ Isheenis giiftii isheetiin, "Gooftaan koo utuu raajicha Samaariyaa jiru sana bira dhaqee silaa inni lamxii sana irraa isa fayyisa ture!" jette.

⁴ Na'amaan dhaqee waan intalli Israa'el jetteen sana gooftaa isaatti ni hime. ⁵ Mootiin Sooriyaas, "Waan fedhe illee taanaan ati dhaqi; ani mootii Israa'elitti xalayaa nan barreessaatii" jedhee deebiseef. Kanaafuu Na'amaan meetii taalaantii kudhan, warqee saqilii kuma ja'aa fi uffata irraa jalaa kudhan fudhatee qajelee. ⁶ Xalayaan inni mootii Israa'elitti geesse sun akkana jedha; "Ani akka ati lamxii irraa isa fayyiftuuf xalayaa kana wajjin tajaajilaa koo Na'amaanin sitti ergeera."

⁷ Mootiin Israa'elis akkuma xalayaa sana dubbiseen uffata ofii tarsaasee akkana jedhe; "Ani Waaqaa? Ani nama ajjeesuu fi deebisee jiraachisuu nan danda'aa? Namichi kun maaliif akka lamxiin isaa fayyuu nama natti erga? Mee akka inni lola natti kaasuu barbaadu ilaalaa!"

⁸ Elsaa'i namni Waaqaa sun akka mootiin Israa'el uffata isaa tarsaase dhageenyaan ergaa itti ergee, "Ati maaliif uffata kee tarsaafte? Namicha sana natti ergi; innis akka Israa'el keessa raajiin jiru ni beekaatii" jedheen. ⁹ Kanaafuu Na'amaan fardeen isaatii fi gaariiwwan isaa fudhatee dhaqee balbala mana Elsaa'i dura dhaabate. ¹⁰ Elsaa'i immoo, "Dhaqii Yordaanos keessatti yeroo torba dhiqadhu; foon kee fayyee akka duraatti siif deebi'a; atis ni qulqullooftaa" jedhee nama itti erge.

¹¹ Na'amaan garuu aariidhaan ka'ee biraa deeme akkana jedhe; "Ani waan inni dhugumaan gara koo dhufee dhaabatee maqaa WAAQAYYO Waaqaa isaa waamee iddoo sana irra harka isaa qabee lamxii koo fayyisun se'e. ¹² Abaanaa fi Faarfaan lageen Damaasqoo sun bishaanota Israa'el keessaa kam iyyuu hin caalani? Ani isaan keessatti dhiqadhee fayyuu hin danda'u ture?" Kanaafuu inni akka malee aaree of irra garagalee deeme.

¹³ Tajaajiltoonni Na'amaanis gara isaa dhaqanii, "Yaa abbaa ko, ati utuu raajiin kun waan guddaa tokko hojjedhu siin jedhee ni hojjetta mitii? Yoo inni, 'Dhiqadhuutii qulqullaa'i' siin jedhe immoo hammam caalchiftee hin hojjettu ree?" jedhaniin.

¹⁴ Kanaafuu inni dhaqee akkuma namni Waaqaa sun jedheenitti yeroo torba Yordaanos keessa seenee ba'e; dhagni isaas fayyee akkuma duraatti deebi'eefii akkuma dhagna mucaa xinnaa tokkootti qulqullaa'eef.

¹⁵ Ergasii Na'amaanii fi tajaajiltoonni isaa hundi gara nama Waaqaa sanaatti deebi'an. Ni'imaanis fuula isaa dura dhaabatee, "Ani akka Israa'el keessa malee addunyaa guutuu keessa Waaqni hin jirre amma beekeera. Kanaafuu maaloo garbicha kee irraa kennaa tokko fudhadhu" jedhe.

¹⁶ Raajiin sun immoo, "Dhugaa WAAQAYYO jiraataa ani isa tajaajiluu sanaa, ani waan tokko illee sirraa hin fudhadhu" jedhee deebise. Yoo Na'amaan cimsee isa kadhate iyyuu inni fudhachuu dide.

¹⁷ Kana irratti Na'amaan akkana jedheen; "Yoo fudhachuu baatte immoo, maaloo akka biyyoon gaangoo lamaa ana garbicha keetiif kennamu ajaji; garbichi kee si'achi deebi'ee WAAQAYYOF malee waaqota tolfamoo biraatiif aarsaa gubamuu fi qalma hin dhi'eessuutii. ¹⁸ Garuu WAAQAYYO waan tokkicha kana garbicha keetiif haa dhiisu: Gooftaan koo yommuu achitti sagaduuf mana qulqullummaa Rimoon seenutti natti irkata; anis yommuu inni sagadutti nan sagada; WAAQAYYO waan kana ana garbicha keetiif haa dhiisu."

¹⁹ Eelisaas, "Nagaan deemi" jedheen.

Erga Na'amaan xinnoo achi fagaatee booddee, ²⁰ Gehaaz tajaajilaan Elsaa'i nama Waaqaa sanaa akkana ofiin jedhe; "Gooftaan koo utuu kennaa inni fide sana irraa hin fudhatin Na'amaan namicha warra Arraam kana akkasumatti gad lakkise. Dhugaa WAAQAYYO jiraataa, ani isa faana fiigeen waa irraa fudhadha."

²¹ Kanaafuu Gehaaz dafee Ni'imaan duukaa bu'e. Na'amaanis yommuu akka inni gara isaatti fiigaa jiru argetti isa simachuudhaaf gaarii irraa bu'ee, "Wanni hundi nagumaa?" jedhee isa gaafate.

²² Gehaazis akkana jedhee deebiseef; "Wanni hundinuu naguma. Gooftaan koo, 'Kunoo ammuma waldaa raajotaa keessaa dargaggoonni lama biyya gaaraa Efreem irraa natti dhufaniiru. Maaloo meetii taalaantii tokkoo fi uffata irraa jalaa lama kenniif' akkan siin jedhuuf na erge."

²³ Na'amaan immoo Gehaaziin, "Akkuma fedhe illee ta'u taalaantii lama fudhadhu" jedhe. Innis akka Gehaaz waan sana fudhatuuf cimsee isa kadhate; ergasiis meetii taalaantii lama borsaa lamatti hidhee uffata irraa jalaa lama wajjin tajaajiltoota isaatti kenne. Isaanis baatanii Gehaaz dura qajeelan. ²⁴ Gehaazis yommuu gaara bira ga'etti waan sana hojjettoota sana harkaa fuudhee mana keessa ol kaa'e. Namoota sanas of irraa geggeesse; isaanis ka'anii deeman. ²⁵ Innis ergasii dhaqee fuula gooftaa isaa Elsaa'i dura dhaabate.

Elsaa'is, "Gehaaz, ati eessa turte?" jedhee gaafate.

Gehaaz immoo, "Ani garbichi kee eessa iyyuu hin deemne" jedhee deebise.

²⁶ Elsaa'i garuu akkana jedheen; "Yeroo namichi sun si'i simachuuf gaarii isaa irraa bu'e sanatti hafuurri koo si wajjin hin turree? Yeroon kun yeroo itti maajilaqa yookaan wayyaa, lafa qotiisaa ejersaa, iddoo dhaabaa wayinii, bushaayee, karra loonii yookaan garboota dhiiraa fi garboota nadheenii fudhatanii dhaa? ²⁷ Lamxiin Na'amaan sun hamma bara baraatti si'ii fi sanyii keetiitti qabatee hafa." Innis lamxaa'ee akkuma cabbii addateef fuula Elsaa'i duraa ba'ee deeme.

6

Qottoon Bishaan Irra Deeme

¹ Imaan raajotaa sun Elsaa'iin akkana jedhan; "Kunoo, iddoon nu si wajjin wal geenyu nutti dhiphateera. ² Akka nu Yordaanos dhaqnee tokkoon tokkoon keenya muka cirannee iddoo jiraannu achitti ijaarrannuuf nuu eeyyami."

Innis, "Dhaqaa" jedheen.

³ Isaan keessaa namni tokko, "Maaloo ati nu garboota kee wajjin hin deemtuu?" jedhee gaafate.

Elsaa'i immoo, "Nan deema" jedhee deebise. ⁴ Innis isaan wajjin deeme.

Isaan Yordaanos dhaqanii muka cirachuu jalqaban. ⁵ Isaan keessaa tokko utuu muka muruutti jiruu qottoon muka isaa irraa buqqa'ee bishaan keessa bu'e. Namichi sunis, "Wayyoo kaa, yaa gooftaa koo; wannu kun waan ergifatamee dha!" jedhee iyye.

⁶ Namni Waaqaa sunis "Qottoon eessa bu'e?" jedhee gaafate. Yommuu inni iddoo qottoon sun bu'e isa argisiisetti Elsaa'i muka xinnaa tokko kutee achi keessa buusee akka sibiilli sun bishaan gubbaa deemu godhe. ⁷ Innis, "Ol fudhadhu" jedheen. Namichi sunis harka diriirfatee qottoo isaa fudhate.

Elsaa'i Namoota Sooriyaa Jaamse

⁸ Yeroo sanatti mootiin Sooriyaa Israa'eliin wal lolaa ture. Innis erga ajajjoota loltoota isaatiin mari'atee booddee, "Ani lafa akkasiitii fi lafa akkasii keessa qubata koo nan dhaabbadha" jedhe.

⁹ Namni Waaqaa sunis, "Sababii namoonni Sooriyaa achitti gad bu'aa jiraniif ati akka karaa sanaan hin dabarre of eeggadhu" jedhee mootii Israa'elitti ergaa erge. ¹⁰ Kanaafuu mootiin Israa'el gara iddoo namni Waaqaa sun waa'ee isaa dubbate sanaatti nama ergee ni to'ate. Elsaa'is akka mootichi iddoowwan akkasii irraa of eeggatu ammumaa amma isa akeekkachiise.

¹¹ Wanni kun akka malee mootii Sooriyaa aarse. Innis ajajjoota loltoota isaa walitti waamee, "Isin amma nama nu keessaa mootii Israa'eliiif hojjechaa jiru natti hin himtani?" jedhee gaafate.

¹² Ajajjoota sana keessaa namni tokko akkana jedhe; "Yaa gooftaa koo mooticha, nu keessaa namni akkasii hin jiru; garuu Elsaa'i raajicha Israa'el keessa jiru sanatu dubbii ati diinqa kee keessatti dubbattu hunda mootii Israa'elitti hima."

¹³ Mootichi Sooriyaas, "Akka ani nama itti ergee isa qabsiisuu danda'uuf dhaqaatii lafa inni jiru ilaalaa" jedhee ajaje. Oduun, "Inni Dootaan keessa jira" jedhu tokkos isatti himame. ¹⁴ Innis ergasii fardeen, gaariiwwanii fi waraana jabaa achitti ni erge. Isaanis halkaniin dhaqanii magaalaa sana marsan.

¹⁵ Yommuu tajaajilaan nama Waaqaa sanaa guyyaa itti aanu ganama bariin gad ba'etti humni waraanaa tokko fardeenii fi gaariiwwanii magaalaa sana marsee ture. Tajaajilaan sunis, "Wayyoo kaa, yaa gooftaa ko, maal goonu?" jedhee gaafate.

¹⁶ Raajiin sun immoo, “Hin sodaatin; warri nu wajjin jiran warra isaan wajjin jiran caalaniitii” jedhee deebise.

¹⁷ Elsaa’is, “Yaa WAAQAYYO, akka inni arguu danda’uuf ija isaa baniif” jedhee kadhate. WAAQAYYOS ija tajaajilaa sanaa ni bane; innis mil’atee akka gaarran sun naannoo Elsaa’itti fardeenii fi gaariiwwan ibiddaatiin guutamanii jiran ni arge.

¹⁸ Diinni sun gara isaatti gad buunaan Elsaa’i, “Jara kana jaamsi” jedhee WAAQAYYON kadhate. Kanaafuu Waagii akkuma Elsaa’i isa kadhate sana isaan jaamse.

¹⁹ Elsaa’is, “Karaan sun kana miti; magaalaa sunis kana miti. Amma na duukaa bu’aa; anis nama isin barbaaddanitti isinan geessa” jedheen. Innis akkasiin Samaariyaatti isaan ni geesse.

²⁰ Erga isaan magaalaa sana seenanii booddee Elsaa’i, “Yaa WAAQAYYO akka isaan arguu danda’aniif ija jara kanaa baniif” jedhe. WAAQAYYOS ija isaani ni baneef; isaanis akka Samaariyaa keessa jiran ni argan.

²¹ Mootiin Israa’elis isaan arginaan, “Yaa abbaa ko, ani isaan fixuu? Ani isaan fixuu?” jedhee Elsaa’in ni gaafate.

²² Innis akkana jedhee deebise; “Isaan hin fixin; ati namoota boojite goraadee keetiin yookaan xiyya keetiin ni ajjeettaa? Akka isaan nyaatanii dhuganii gara gooftaa isaaniitti deebi’aniif nyaataa fi dhugaatii dhi’eessii.” ²³ Kanaafuu inni cidha guddaa qopheesseefii erga isaan nyaatanii dhuganii booddee of irraa isaan geggeesse; isaanis gara gooftaa isaaniitti deebi’an. Namoonni Sooriyaas ergasii deebi’anii biyya Israa’el hin weerarre.

Ben-Hadaad Samaariyaa Marse

²⁴ Yeroo gabaabaa booddee, Ben-Hadaad mootichi Sooriyaa loltoota isaa hunda walitti qabatee dhagee Samaariyaa marse. ²⁵ Beela akka malee hamaatu magaalaa sana keessa ture; waan magaalaa sun yeroo dheeraadhaaf marfamteef, mataan harree tokko meetii saqilii saddeettamatti, udaan gugee kiiloon tokko harka afur keessaa harki tokko meetii saqilii shanitti gurgurame.

²⁶ Utuu mootiin Israa’el dallaa dhagaa irraan darbuu dubartiin tokko, “Yaa gooftaa koo mooticha, na gargaari” jettee itti iyyite.

²⁷ Mootichi immoo akkana jedhee deebiseef; “Yoo WAAQAYYO si hin gargaarin ani eessaan gargaarsa siif arga? Oobdii midhaanii irraa moo? Iddoo wayinii itti cuunfan irraa?” ²⁸ Ergasii, “Raktoon kee maal?” jedhee ishee gaafate.

Isheenis akkana jettee deebiseef; “Dubartiin kun, ‘Akka nu har’a isa nyaannuuf mucaa kee nuu kenni; bor immoo mucaa koo nyaannaatii’ naan jette. ²⁹ Kanaaf nu mucaa koo bilcheffannee nyaanne. Guyyaa itti aanutti immoo ani, ‘Akka nu isa nyaannuuf mucaa kee nuuf kenni’ jedheen. Isheen garuu mucaa ishee ni dhokfate.”

³⁰ Mootichi yommuu dubbii dubartii sanaa dhaga’etti uffata isaa tarsaase. Utuu inni dallaa dhagaa irraan darbaa jiruu namoonni akka inni dhagna isaatti aansee wayyaa gaddaa uffatee jiru argan. ³¹ Innis, “Yoo mataan Elsaa’i ilma Shaafaax, edana isa irra bule, Waaqni na haa adabu; adabbiin sunis akka malee natti haa cimuu!” jedhe.

³² Yeroo kanatti Elsaa’i mana isaa keessa taa’aa ture; maanguddoonnis isa wajjin tataa’aa turan. Mootichi ergamaa tokko of dura erge; garuu utuu ergamaan sun hin dhufinuu Elsaa’i maanguddootaan akkana jedhe; “Isin akka namichi nama ajjeesu kun mataa narraa kutuuf nama erge argituu? Kunoo yoo ergamaan sun dhufe balbala cufaatii ol seenuu dhowwaa. Kotteen gooftaa isaa isa duubaan dhaga’amaa jira mitii?”

³³ Utuma inni amma iyyuu isaan wajjin haasa’aa jiruu, ergamaan sun gara isaa dhufe.

Mootichis, “Balaan kun WAAQAYYO biraa dhufe. Ani si’achi maaliifin WAAQAYYON eega?” jedhe.

7

¹ Elsaa’i, “Dubbii WAAQAYYOO dhaga’aa. WAAQAYYO akkana jedha: Bor yoona karra Samaariyaa duratti daakuun safartuun tokko saqilii tokkotti, garbuun safartuun lama immoo saqilii tokkotti gurgurama” jedhe.

² Ajajaan loltootaa kan mootichi irree isaatti irkate sun nama Waaqaa sanaan, “Utuma WAAQAYYO karra burqaa Samiiwwanii bane iyyuu wanni kun ta’uu danda’aa?” jedhe.

Elsaa’i immoo, “Ati ijuma keetiin argita; garuu tokkoo isaa illee hin nyaattul!” jedhe.

Warri Sooriyaa Baqatan

³ Yeroo kanatti namoota lamxii qaban afurtu balbala ittiin magaalattii seenan dura ture. Isaanis akkana waliin jedhan; “Nu maaliif hamma duunutti as teenya? ⁴ Yoo nu, ‘Kottaa magaalaa seennaa’ jenne, beelli achi jira; nus ni duuna. Yoo as turre ni duuna.

Kanaafuu kottaa gara qubata warra Sooriyaa dhaqnaa. Yoo isaan nu maaran ni jiraanna; yoo isaan nu fixan immoo ni dhumna.”

⁵ Isaan galgala dimimmisaan ka’anii gara qubata warra Sooriyaa ni dhaqan. Yommuu isaan qubata sana bira ga’anitti namni tokko iyyuu achi hin turre; ⁶ Kunis sababii Gooftaan akka warri Sooriyaa didichuu gaariwwanii, fardeenitii fi kan waraana guddaa dhaga’anii, “Kunoo, mootiin Israa’el nu dha’uuf jedhee mootii Heetotaatii fi mootii warra Gibxi nutti bitateera!” waliin jedhan godheef. ⁷ Kanaafuu isaan dunkaana isaanii, fardeenii fi harroota isaanii dhiisanii dimimmisaan baqatan. Qubata isaanii akkuma jirutti dhiisanii lubbuu isaanii oolfachuudhaaf ni baqatan.

⁸ Namoonni lamxii qaban sun daarii qubata sanaa bira ga’anii dunkaana tokko seenan. Isaanis waa nyaatanii dhuganii meetii, warqee fi wayyaa guurratanii dhaqanii dhokfatan. Amma illee deebi’anii dunkaana biraa seenanii waa keessaa guurratanii akkasuma dhokfatan.

⁹ Kana irratti isaan akkana waliin jedhan; “Nu waan qajeelaa hojjechuutti hin jirru; guyyaan kun guyyaa oduu gaarii ti; nu garuu inuma cal’ifne. Yoo nu hamma bari’utti cal’ifne adabbiitu nu eeggata. Kanaafuu kottaa dafnee dhaqnee oduu kana mana mootummaatti himnaa.”

¹⁰ Isaanis dhaqanii namoota karra magaalaa eegan waamanii, “Nu gara qubata warra Sooriyaa ni dhaqne; namni tokko illee achi hin turre; sagaleen nama tokkoo iyyuu hin dhaga’amne. Fardeenii fi harroota hidhamanii fi dunkaana akkuma dhaabametti dhiifame qofatu ture” jedhan. ¹¹ Warri karra eegan sunis oduu kana ni labsan; oduun sunis masaraa mootummaa keessatti ni dhaga’ame.

¹² Mootichis halkanii ka’ee ajajjoota loltoota isaatiin akkana jedhe; “Ani waan warri Sooriyaa nutti hojjetan isinittin hima; isaan akka nu beelaan miidhamaa jirru beeku; kanaafuu isaan, ‘Dhugumaan isaan gad ni ba’u; ergasiis nu utuma lubbuun jiranuu isaan qabnee magaalattii seenna’ jedhanii yaaduudhaan baadiyyaa keessa dhokachuudhaaf qubata dhiisanii ba’an.”

¹³ Ajajjoota loltoota isaa keessaa tokko akkana jedhee deebise; “Namoonni tokko tokko fardeen magaalaa keessatti hafan keessaa shan fudhatanii haa deeman. Rakkinni isaanii akkuma Israa’eloota asitti hafan hundaa ti; dhugumaan isaan akkuma Israa’eloota dhumana sana hundaa ni ta’u. Kanaafuu kottaa waan ta’e beekuudhaaf isaan erginaa.”

¹⁴ Kanaafuu isaan gaariwwan lama fardeen isaanii wajjin ni filan; mootichis, “Dhaqaatii ilaalaa” jedhee loltoota Sooriyaa duubaan isaan erge. ¹⁵ Isaanis hamma Yordaanisitti isaan duukaa ba’an; kunoo karaan hundi uffataa fi mi’aa warri Sooriyaa yeroo ariitiidhaan baqatanitti daddarbataniin guutamee ture. Ergamoonni sunis deebi’anii mootichatti himan. ¹⁶ Ergasiis namoonni gad yaa’anii qubata warra Sooriyaa ni saaman. Kanaafuu akkuma WAAQAYYO dubbate sana daakuun safartuun tokko saqilii tokkotti, garbuun safartuun lama immoo saqilii tokkotti gurgurame.

¹⁷ Mootichis yeroo kanatti ajajaa loltootaa kan irree isaatti irkatee ture sana itti gaafatamaa karraa godhee muude; namoonnis karra duratti isa irra yaa’an; innis akkuma namni Waaqaa yeroo mootichi mana isaa dhufetti dubbate sana ni du’e.

¹⁸ Kunis akkuma namni Waaqaa sun, “Bori yoona karra Samaariyaa duratti daakuun safartuun tokko saqilii tokkotti, garbuun safartuun lama immoo saqilii tokkotti ni gurgurama” jedhee mootichatti hime sana ta’e.

¹⁹ Ajajaa loltootaa sunis nama Waaqaa sanaan “Utuma WAAQAYYO karra burqaa samiiwwanii bane illee wanni kun ta’uu danda’aa?” jedhe. Namni Waaqaa sun immoo, “Ati ijuma keetiin argita; garuu tokkicha isaa illee hin nyaattu!” jedhe. ²⁰ Wanni isa irra ga’es dhugumaan kanaa dha; inni waan namoonni karra duratti isa irra yaa’anii du’eetii.

8

Lafti Dubartii Suunan Ni Deebi’eef

¹ Yeroo kanatti Elsa’a i dubartii ilma ishee du’aa kaaseef sanaan, “Sababii WAAQAYYO beela waggaa torba turu tokko biyya kanatti ajajeef, maatii kee wajjin asii deemiitii iddoo jiraachuu dandeessu kam iyyuu jiraadhu” jedhe. ² Dubartiin sunis kaatee akkuma namni Waaqaa sun jedheen goote. Ishee fi maatiin ishee dhaqanii biyya Filisxeemotaa keessa waggaa torba jiraatan.

³ Isheenis dhuma waggaa torbaatti biyya Filisxeemotaatii deebitee manaa fi lafa ishee kadhachuuf gara mootichaa ni dhaqxe. ⁴ Mootichis, “Mee waan Elsa’a i hojjetee gurguddaa natti himi” jedhee Gehaaz tajaajilaa nama Waaqaa sana wajjin haasa’aa ture. ⁵ Utuma Gehaaz akka Elsa’a i nama du’e illee du’aa kaase isatti himuutti jirru

dubartiin Elsa'a'i ilma ishee du'aa kaaseef sun manaa fi lafa ishee kadhachuudhaaf gara mootichaa dhufte.

Gehaazis, "Yaa gooftaa koo mooticha, dubartiin Elsa'a'i mucaa ishee du'aa kaaseef sun kunoo ti" jedhe. ⁶ Mootichi waa'ee waan sanaa dubartittii gaafate; isheenis itti himte.

Innis ergasii qondaala tokko dubbii isheetti ramadee, "Galii guyyaa isheen biyyaa baatee jalqabee lafa qotiisaa ishee irraa argame hunda itti dabaliitii waan kan ishee ture hunda deebisiif" jedheen.

Hazaa'eel Ben-Hadaadin Ajjeese

⁷ Elsa'a'i Damaasqoo dhaqe; Ben-Hadaad mootichi Sooriyaa immoo dhukkubsatee ture. Mootiin sunis yommuu, "Namni Waaqaa sun as dhufee jira" jedhanii itti himanitti, ⁸ Hazaa'eeiin akkana jedhe; "Kennaa wayii fudhadhuutii dhaqii nama Waaqaa sana simadhu. Karaa isaatiinis, 'Ani dhukkuba kana irraa nan hafaa?' jedhii WAAQAYYON gaafadhu."

⁹ Hazaa'eeilis waan Damaasqoo keessaa akka malee gaggaarii ta'e fudhatee kennaa fe'iisa gaala afurtamaatiin Elsa'a'in simachuu dhaqe. Ol seenees fuula isaa dura dhaabatee, "Ilma kee Ben-Hadaad mooticha Sooriyaatu, 'Ani dhukkuba kana irraa hafaa?' jedhee sitti na erge" jedheen.

¹⁰ Elsa'a'i immoo, "Dhaqitiiti, 'Ati dhugumaan irraa haftaa' jedhiin; garuu WAAQAYYO akka inni dhugumaan du'u na argisiiseera" jedhee deebiseef. ¹¹ Elsa'a'i hamma Hazaa'eel qaana'utti utuu ija irraa hin buqqifatin isa ilaale. Ergasii namni Waaqaa sun boo'uu jalqabe.

¹² Hazaa'eeilis, "Gooftaan koo maaliif boo'a?" jedhee gaafate.

Inni immoo akkana jedhee deebise; "Sababii ani miidhaa ati Israa'elitti fiddu beekuuf; ati da'annoo isaaniitti ibidda naqxa; dargaggoota isaanii goraadeedhaan fixxa; daa'imman isaanii lafaan dhoofttee mimmiciriqisita; dubartoota isaanii kanneen ulfaa'an garaa baqaqsita."

¹³ Hazaa'eel, "Ani garbichi kee sareen kun akkamiin waan hamtuu akkana hojjedha?" jedhe.

Elsa'a'i immoo, "WAAQAYYO akka ati mootii Sooriyaa taatu na argisiiseera" jedhee deebiseef.

¹⁴ Hazaa'eel ergasii Elsa'a'i biraa ba'ee gara gooftaa isaatti deebi'e. Yommuu Ben-Hadaad, "Elsa'a'i maal siin jedhe?" jedhee gaafatettis, Hazaa'eel, "Inni akka ati dhugumaan irraa haftu natti hime" jedhee deebise. ¹⁵ Inni garuu guyyaa itti aanu wayyaa furdaa tokko fuudhee bishaan keessa cuuphee fuula mootichaa haguuge; akkasiin mootichi du'e. Ergasii Hazaa'eel iddoo isaa bu'ee mootii ta'e.

Yehooraa Mooticha Yihuudaa

8:16-24 kwf - 2Sn 21:5-10,20

¹⁶ Bara Yehooraa ilma Ahaab mooticha Israa'el keessa waggaa shanaffaatti Yooraaam ilmi Yehooshaafaax mooticha Yihuudaa sun mootii ta'ee bulchuu jalqabe. ¹⁷ Yeroo sanatti umuriin isaa waggaa soddonii lama ture; innis Yerusaaem keessa taa'ee waggaa saddeet ni bulche. ¹⁸ Innis akkuma manni Ahaab godhee ture sana karaa mootota Israa'el duukaa bu'ee; intala Ahaab fuudhee tureetii. Fuula WAAQAYYOO durattis waan hamaa hojjete. ¹⁹ Ta'us WAAQAYYO sababii garbicha isaa Daawitiif jedhee Yihuudaa balleessuun fedhii WAAQAYYOO hin turre. Inni Daawitii fi sanyii isaatiif ibsaa bara baraa dhaabuuf kakuu galee ture.

²⁰ Bara Yooraaam keessa Edoom Yihuudaatti fincilee mootii ofii isaa moosifate. ²¹ Kanaafuu Yooraaam gaariwwan isaa hunda wajjin Zaa'iiri dhaqe. Warri Edoomis isaa fi ajajjoota gaariwwan isaa marsan; inni garuu halkaniin ka'ee isaan ni dha'e; loltoonni isaa garuu gara biyya isaaniitti baqatan. ²² Edoom hamma har'aatti ille akkuma Yihuudaatti finciletti jira. Libnaanis yeruma sanatti fincile.

²³ Wantoonni bara mootummaa Yooraaam keessa hojjetaman kan biraatii fi wanni inni hojjete hundi kitaaba seenaa mootota Yihuudaa keessatti barreeffamaniiru mitii?

²⁴ Yooraaam abbootii ofii wajjin boqotee Magaalaa Daawit keessatti isaan biratti ni awwaalame. Ahaaziyaan ilmi isaa iddoo isaa bu'ee mootii ta'e.

Ahaaziya Mooticha Yihuudaa

8:25-29 kwf - 2Sn 22:1-6

²⁵ Bara Yehooraa ilma Ahaab mooticha Israa'el keessa waggaa kudha lammaffaatti Ahaaziyaan ilmi Yooraaam mootii Yihuudaa ta'ee bulchuu jalqabe. ²⁶ Ahaaziyaan yeroo mootii ta'etti umuriin isaa waggaa digdamii lama ture; innis Yerusaaem keessa taa'ee waggaa tokko ni bulche. Maqaan haadha isaa Aaaliyaa dha; isheenis intala ilma Omrii

mooticha Israa'el sanaa turte. ²⁷ Innis karaa mana Ahaab duukaa bu'ee, akkuma manni Ahaab godhe sana fuula WAAQAYYOO duratti waan hamaa hojjete; inni karaa fuudhaatiin maatii Ahaabitti firoomee tureetii.

²⁸ Ahaaziyaanis Yooraam ilma Ahaab wajjin Hazaa'eel mooticha Arraam loluudhaaf Raamoot Gili'aaditti duule. Warri Arraamis Yooraamin ni madeessan; ²⁹ kanaafuu Yehooraa mootichi madaa warri Arraam yeroo inni Hazaat keessatti Hazaa'eel mooticha Arraam wajjin wal loletti isa madeessan sana fayyuuf jedhee Yizri'eelitti deebi'e.

Kana irratti Ahaaziyaan ilmi Yooraam mootichi Yihuudaa sababii inni madaa'ee tureef Yooraam ilma Ahaab arguuf gara Yizri'eelitti gad bu'e.

9

Yehuun Mootii Israa'el ta'ee Dibame

¹ Elsa'i raajichi ilmaan raajotaa keessaa nama tokko waamee akkana jedheen; "Mudhii kee hidhadhuutii bilqaaxxii zayitii kana fuudhii Raamooti Gili'aad dhaqi. ² Yeroo achi geessutti Yehuu ilma Yehooshaafaax ilma Nimshii sana barbaadi. Gara isaa dhaqiiiti miiltota isaa biraa isa fuudhiitii diinqatti isa galchi. ³ Ergasii bilqaaxxii sana fuudhii zayitii sana mataa isaatti naqiiiti, 'WAAQAYYOO akkana jedha: Ani Israa'el irratti mootii godhee si dibeera.' Ergasii balbala banadhuutii fiigi malee hin turin!"

⁴ Kanaafuu raajichi dargaggeessi sun ka'ee Raamooti Gili'aad dhaqe. ⁵ Yommuu achi ga'ettis ajajoota loltootaa kanneen walitti qabamanii tataa'an arge. Innis, "Yaa ajajaa, ani ergaa siif qaba" jedhe.

Yehuun immoo, "Nu keessaa, ati eenyuuf ergaa qabda?" jedhee gaafate.

Innis, "Yaa ajajaa, si'iif" jedhee deebise.

⁶ Yehuun ka'ee mana ol seene. Raajichi sun mataa Yehuutti zayitii naqee akkana jedheen; "WAAQAYYOO Waaqni Israa'el akkana jedha; 'Ani saba WAAQAYYOO, Israa'el irratti mootii godhee sin diba. ⁷ Ati mana gooftaa keetii mana Ahaab balleessuu qabda; anis dhiiga garboota koo raajotaatii fi dhiiga garboota WAAQAYYOO kanneen Iizaabel dhangalaafte hunda haaloo nan baasa. ⁸ Manni Ahaab guutumaan guutuutti ni bada. Ani dhiira maatii Ahaab kanneen Israa'el keessatti hafan hunda garbas ta'u birmaduu nan balleessa. ⁹ Ani mana Ahaab akkuma mana Yeroobi'aam ilma Nebaatii fi akkuma mana Ba'ishaan ilma Ahiiyaa sanaa nan godha. ¹⁰ Iizaabelin immoo sarootatu biyya Yizri'eel keessatti nyaata; namni tokko iyyuu ishee hin awwaalu.'" Innis ergasii balbala banatee fiige.

¹¹ Yehuun gara ajajjuuwwan isa wajjin turan sanaatti gad baanaan isaan keessaa namni tokko, "Wanni hundi nagumaa? Namichi maraatuun kun maaliif si bira dhufe?" jedhee isa gaafate.

Yehuunis, "Ati namichaa fi waan inni dubbate ni beekta" jedhee deebiseef.

¹² Isaanis, "Kun dhugaa miti! Nutti himi" jedhaniin.

Yehuun, "Wanni inni natti hime kanaa dha; 'WAAQAYYOO akkana jedha: Ani Israa'el irratti mootii godhee si dibeera.'" jedhee deebiseef.

¹³ Isaan dafanii wayyaa isaanii of irraa fuudhanii gulantaawwan duwwaa irra isa jala afan. Ergasii immoo malakata afuufanii, "Yehuun mootii dha!" jedhan.

Yehuun Yehooraaamii fi Ahaaziya Ajeese

9:21-29 kwf - 2Sn 22:7-9

¹⁴ Kanaafuu Yehuun ilmi Yehooshaafaax ilmi Nimshii Yooraamitti malate. Yeroo sanatti Yooraamii fi Israa'el hundi Raamooti Gili'aad irraa Hazaa'eel mooticha Sooriyaa eegaa turan; ¹⁵ Yehooraa mootichi garuu madaa warri Arraam yeroo inni Hazaa'eel mooticha Arraamiitiin wal loletti isa madeessan sanaaf wal'aansa argachuuf jedhee Yizri'eelitti deebi'ee ture. Yehuun, "Yoo yaadni kee kana ta'e, akka namni tokko iyyuu magaalaa keessaa gad ba'ee dhaqee oduu kana Yizri'eel keessatti odeessu hin eeyyamin" jedhe. ¹⁶ Innis ergasii gaarii isaa seenee sababii Yooraam achitti boqochaa jiruu fi sababii Ahaaziya mootichi Yihuudaa isa arguuf gad bu'eef Yizri'eelitti qajeje.

¹⁷ Eegduun gamoo eegumsaa kan Yizri'eel keessaa irra dhaabachaa ture sun yommuu loltoota Yehuu kanneen dhufaa jiran argetti, "Ani loltoota dhufaa jiran tokkon arga" jedhee iyye.

Yehooraaamis, "Abbaa fardaa tokko waamiitii akka inni isaanitti gad ba'ee, 'Isin naguma dhufanii?' jedhee isaan gaafatuuf itti ergi" jedhee ajaje.

¹⁸ Abbaan fardaa sunis Yehuu arguuf gulufee dhaqee, "Mootichi, 'Isin naguma dhufanii?' jedha" jedheen.

Yehuun immoo, “Ati nagaa irraa maal qabda? Garagaliitii na duukaa bu’i” jedhee deebise.

Eegduun sunis, “Ergamaan isaan bira ga’eera; garuu as hin deebine” jedhee hime.

¹⁹ Kanaafuu mootichi abbaa fardaa lammaffaa erge. Innis gara isaanii dhaqee, “Mootichi, ‘Isin naguma dhuftanii?’ jedha” jedheen.

Yehuun immoo, “Ati nagaa irraa maal qabda? Garagaliitii na duukaa bu’i” jedhee deebise.

²⁰ Eegduun sunis, “Inni isaan bira ga’eera; garuu as hin deebine. Oofichi isaa akkuma ooficha Yehuu ilma Nimshii sanaa ti; inni akkuma nama maraate tokkootti oofaatii” jedhee hime.

²¹ Kana irrati Yehooraa, “Gaarii koo naa qopheessaa” jedhee ajaje. Erga gaariin qopheeffamee booddee Yehooraa mootichi Israa’elii fi Ahaaziyaan mootichi Yihuudaa, tokkoon tokkoon isaanii gaarii isaanii yaabbatanii Yehuu simachuu dhaqan. Isaanis lafa qotiisaa Naabot namicha Yizri’eel sanaa keessatti isa argatan. ²² Yehooraa yommuu Yehuu argetti, “Iyyuu, ati naguma dhuftee?” jedhee gaafate.

Yehuun immoo, “Hamma sagaagalummaa fi falfalli haadha kee Iizaabel biyya guutee jirutti nagaa maaltu jiraachuu danda’a?” jedhee deebise.

²³ Yehooraa of irra garagalee Ahaaziyaadhaan, “Yaa Ahaaziya, wanni kun maltum-maa dha!” jedhee baqate.

²⁴ Yehuun xiyya isaa darbatee gatiitii Yehooraa gidduu waraane; xiyyi sunis onnee isaa keessa fulla’e; innis gaarii isaa keessatti kufe. ²⁵ Yehuunis ajajaa gaarii isaa Bidqaariin akkana jedhe; “Isa fuudhiitii lafa qotiisaa Naabot namicha Yizri’eel sanaa keessatti gati. Akka WAAQAYYO gaafa anii fi ati gaariidhaan Ahaab abbaa isaa duubaan gulufaa turre sana akkana jedhee waa’ee isaa raajii dubbate yaadadhu: ²⁶ ‘Ani kaleessa dhiiga Naabotiitii fi dhiiga ilmaan isaa argeera, jedha WAAQAYYO; ani dhugumaan akka ati gatii dhiiga sanaa lafa qotiisaa sana irratti baafuu nan godha’ jedha WAAQAYYO. Egaa amma isa fuudhiitii akkuma dubbii WAAQAYYOOTTI lafa qotiisaa sana keessatti isa gati.”

²⁷ Ahaaziya mootichi Yihuudaa yommuu waan kana argetti karaa Beet Hagaanitti geessuun baqate. Yehuun, “Isas ajjeesaa!” jedhee iyyaa isa ari’e. Isaanis karaa Guuritti geessu irratti Yible’am biratti isa madeessan; inni garuu Megidootti baqatee achitti du’e. ²⁸ Tajaajiltoonni isaa gaariidhaan Yerusaalemitti isa geessanii awwaala isaa kan Magaalaa Daawit keessaatti abbootii isaa biratti isa awwaan. ²⁹ Bara Yooraa ilma Ahaab keessa waggaa kudha tokkoffaatti Ahaaziyaan mootii Yihuudaa ta’e.

Iizaabel Ajjeefamte

³⁰ Ergasii Yehuuun ka’ee Yizri’eel dhaqe. Iizaabel yommuu waan kana dhageessetti ija ishee kuulatee mataa dha’attee foddaa keessaan ala ilaalte. ³¹ Akkuma Yehuuun karraan ol seeneen Iizaabel, “Zimrii, ati namichi gooftaa kee ajjeefte naguma dhuftete?” jetteen.

³² Innis foddaa sana keessaan ol ilaalee, “Eenyutu na bira jira? Eenyuu dha?” jedhe. Xu’aashiiwwan lama yookaan sadii ta’an gara isaa gad ilaalan. ³³ Yehuuun, “Ishee gad darbadhaa!” jedheen. Kanaafuu isaan gad ishee darbatan; akkasiiin dhiigni ishee keenyan manaatii fi fardeen kotteedhaan ishee irra yaa’an sanatti faffaca’e.

³⁴ Yehuuun ol seenee waa nyaatee dhuge. Innis, “Dubartii abaaramtuu kana fuudhaatii awwaalaa; isheen intala mootii turteetii” jedhe. ³⁵ Isaan garuu yeroo ishee awwaaluuf gad ba’anitti buqqee mataa ishee, harkaa fi miilla ishee malee waan tokko illee hin argine. ³⁶ Isaanis deebi’anii Yehuutti himan; innis akkana jedhe; “Kun dubbii WAAQAYYO karaa garbicha isaa Eeliyaas namicha Tishbii sanaatiin akkana jedhee dubbatee dha: Lafa qotiisaa Yizri’eel keessaa tokko irratti saroonni foon Iizaabel ni nyaatu. ³⁷ Reeffi Iizaabel akka namni tokko iyyuu, ‘Kun Iizaabel’ jechuu hin dandeenyeef lafa qotiisaa Yizri’eel keessaa tokko irratti akkuma kosii ta’a.”

10

Maatiin Ahaab Ajjeefaman

¹ Yeroo sanatti Ahaab ilmaan torbaatama Samaariya keessaa qaba ture. Kanaafuu Yehuuun xalayoota barreessee qondaaltota Yizri’eelitti, maanguddootattii fi guddiftoota ilmaan Ahaabitti gara Samaariyaatti erge. Inni akkana jedhe; ² “Akkuma xalayaan kun isin ga’een, waan ilmaan gooftaa keessanii isin bira jiranii fi waan isinis gaariiwwanii fi fardeen, magaalaa jabeeffamee ijaaramee fi mi’a lolaa qabdaniif, ³ ilmaan gooftaa keessanii keessaa kan warra kaan caaluu fi kan ni mala jettanii yaaddan filadhaatii teessoo abbaa isaa irra teessisaa. Ergasiis mana abbaa keessaniitiif lolaa.”

⁴ Isaan garuu akka malee sodaatanii, “Yoo mootonni lama isa hin danda’in nu akkamiin isa dandeenya?” waliin jedhan.

⁵ Kanaafuu bulchaan masaraa mootummaatii fi shuumiin magaalattii, maanguddoonnii fi guddiftoonni, “Nu garboota kee ti; waan ati jettu hunda ni hojjenna. Nu nama tokko illee mootii goonee hin filannu; ati mataan kee waanuma jaallatte godhi” jedhanii ergaa kana Yehuutti ergan.

⁶ Yehuun immoo, “Isin yoo garee koo taatanii fi yoo naa ajajamtan, mataa ilmaan gooftaa keessanii kukkutaatii bori yeroo kanatti Yizri’eelitti naa fidaa” jedhee xalayaa lammaffaa barreesse.

Yeroo kanatti ilmaan mootii torbaatamanuu namoota magaalaa sanaa bebeekamoo kanneen isaan guddisan bira turan. ⁷ Yommuu xalayaan sun isaan ga’etti namoonni kunneen ilmaan mootii torbaataman sana hundumaa ni gogorra’an. Mataa isaaniis guubootti naqanii gara Yizri’eelitti Yehudhaaf ni ergan. ⁸ Ergamtichi yommuu deebi’etti, “Isaan mataa ilmaan mootii fidaniiru” jedhee Yehuutti hime.

Yehuun immoo, “Mee balbala ittiin magaalattii seenan duratti iddoo lamatti tuulaatii hamma lafti bariitutti tursaa” jedhee ajaje.

⁹ Yehuun guyyaa itti aanu ganamaan ka’ee gad ba’e. Fuula namoota hundaa dura dhaabatees akkana jedhe; “Isin yakka hin qabdan. Namni gooftaa kootti malatee isa ajjeese anuma; garuu warra kana hunda eenyutu fixe?” ¹⁰ Kanaafuu akka dubbiiin WAAQAYYO mana Ahaab irratti dubbate tokko iyyuu lafa hin buune beekaa. WAAQAYYO waan karaa garbicha isaa Eeliyaasiin dubbate sana guuteera.” ¹¹ Yehuniis akkaasiin nama mana Ahaab keessaa Yizri’eel keessatti hafe kam iyyuu, namoota isaa gurguddaa, michoota isaa kanneen itti dhi’aatanii fi luboota isaa, utuu nama tokko illee hin hambisin hunda isaanii fixe.

¹² Yehuun ergasii ka’ee Samaariyaa dhaqe. Innis yommuu Beet Eekad ga’etti, ¹³ firoota Ahaaziyaa mootii Yihuudaa keessaa namoota tokko tokko argee, “Isin eenyu?” jedhee gaafate.

Isaanis, “Nu firoota Ahaaziyaa; nu maatii mootichaatii fi ilmaan haadha mootichaa dubbisuu dhufne” jedhanii deebisan.

¹⁴ Innis, “Utuma lubbuudhaan jiranuu isaan qabaa!” jedhee ajaje. Kanaafuu utuma isaan lubbuun jiranuu qabanii boolla bishaanii Beet Eekad biratti afurtamii lamaan isaanii gogorra’an. Inni isaan keessaa nama tokko illee hin hambifne.

¹⁵ Erga achii deemee immoo Yehoonadaab ilma Rekaab utuu inni gara isaa dhufuutti jiruu arge. Yehuniis isa dubbisee, “Akkuma ani gara kee jiru ati gara koo jirta moo?” jedhee isa gaafate.

Yehoonadaabis, “Ani gara kee jira” jedhee deebise.

Yehuniis, “Yoo akkas ta’e harka kee natti kenni” jedheen. Innis harka isaa itti kenne. Yehuniis isa gargaaree gaariitti ol isa baase. ¹⁶ Yehuun, “Na wajjin kottuutii hinaaffaa ani WAAQAYYOOF qabu ilaali” jedheen. Ergasiis gaarii isaatiin isa fudhatee deeme.

¹⁷ Yehuun yommuu Samaariyaa ga’etti maatii Ahaab keessaa kanneen achitti hafan hunda fixe; innis akkuma dubbii WAAQAYYO Eeliyaasitti dubbate sanaatti isaan balleesse.

Tajaajiltoonni Ba’aal ajjeefaman

¹⁸ Ergasii Yehuun saba hunda walitti waamee akkana jedheen; “Ahaab xinnuma Ba’aalin tajaajile. Yehuun garuu guddisee isa tajaajila. ¹⁹ Kanaafuu amma raajota Ba’aal hunda, tajaajiltoota isaa hundaa fi luboota isaa hunda walitti waamaa. Waan ani qalma guddaa isaa Ba’aaliif dhi’eessuuf tokkoon isaanii iyyuu hin hafin. Namni hafu kam iyyuu si’achi lubbuudhaan hin jiraatu.” Yehuun garuu tajaajiltoota Ba’aal barbadeesuudhaaf sobee akkas jedhe.

²⁰ Yehuun, “Ulfiina Ba’aaliif jedhaatii yaa’ii waamaa” jedhe. Kanaafuu isaan ni labsan. ²¹ Kana irratti inni Israa’el guutuu keessa ergaa ergee akkaasiin tajaajiltoonni Ba’aal hundinuu ni dhufan; tokkoon isaanii iyyuu hin hafne. Isaanis mana waqeffannaa Ba’aalitti ol galan; manni sunis gama tokkoo hamma gama kaaniitti guutame. ²² Yehuniis namicha uffata eeguun, “Tajaajiltoota Ba’aal hundaaf uffata fidi” jedhe. Kanaafuu namichi sun wayyaa fideef.

²³ Yehuu fi Yehoonadaab ilmi Rekaab sun mana waqeffannaa Ba’aal ol seenan. Yehuniis tajaajiltoota Ba’aaliin, “Mee asii fi achi ilaalaatii akka tajaajiltoota Ba’aal malee tajaajiltoonni WAAQAYYOO tokko iyyuu isin wajjin as hin jirre hubadhaa” jedhe. ²⁴ Kanaafuu isaan qalmaa fi aarsaa gubamu dhi’eessuuf ol galan. Yehuun yeroo sanatti nama saddeettama ala dhaabee, “Namni warra ani harka keessanitti kennu kanneen keessaa akka tokko iyyuu miliqu godhu kam iyyuu qooda lubbuu namicha sanaa lubbuu isaa dhaba” jedhee akeekkachiisee ture.

²⁵ Yehuun akkuma aarsaa gubamu sana dhi’eessie raawwateen, “Ol seenaatii isaan fixaa; akka namni tokko iyyuu miliqu hin godhinaa” jedhee eegdotaa fi ajajoota sana

ajaje. Kanaafuu isaan goraadeedhaan warra sana cicciran. Eegdotaa fi ajajjoonni sun reeffa isaanii alatti gad dadarbatanii kutaa mana waaqeffannaa Ba'aal kan gara keessaatti ol galan. ²⁶ Isaanis mana Ba'aal keessaa fakkiwwan gad baasanii guban. ²⁷ Isaan fakkii Ba'aal caccabsanii mana Ba'aalis diigan. Namoonnis hamma guyyaa har'aatti lafa itti bobbaa ba'an godhatanii itti fayyadamu.

²⁸ Akkasiin Yehuun Israa'el keessaa waaqeffannaa Ba'aal balleesse. ²⁹ Ta'us inni iyyuu cubbuu Yerobi'aam ilma Nebaat kan inni akka sabni Israa'el hojjetu godhe sana irraa hin deebine; cubbuun kunis fakkii jabbii warqee irraa hojjetamee Beet'eelii fi Daanitti waaqeffachuu isaanii ti.

³⁰ WAAQAYYOS Yehuudhaan akkana jedhe; "Sababii ati waan fuula koo duratti qajeelaa ta'e fiixaan baasuu keessatti waan gaarii hojjettee fi waan ani mana Ahaab irratti hojjechuuf garaadhaa qabu hunda hojjeteeff sanyiiwwan kee hamma dhaloota afurafaatti teessoo Israa'el irra ni taa'u." ³¹ Ta'us Yehuun seera WAAQAYYO Waaqa Israa'el garaa guutuudhaan eeguuf of eeggannoo hin goone. Inni cubbuu Yerobi'aam kan inni akka sabni Israa'el hojjetu godhe sana irraa hin deebine.

³² Bara sana keessa WAAQAYYO lafa Israa'el irraa kukkutee xinneessuu jalqabe. Hazaa'eelis guutummaa bulchiinsa isaanii keessatti Israa'eloota mo'ate; ³³ kunis gama ba'a Yordaanosiin biyya Gili'aad hunda jechuunis biyya Gaad, biyya Ruubeenii fi biyya Minaasee kan Aro'er laga Arnoon biratti argamtu sanaa jalqabee Gili'aadii hamma Baashaaniitti jiruu dha.

³⁴ Wantoonni bara mootummaa Yehuu keessa hojjetaman biraa, wanni inni hojjele hundii fi jabinni isaa hundi kitaaba seenaa mootota Israa'el keessatti barreeffamaniiru mitii?

³⁵ Yehuun abbootii isaa wajjin boqotee Samaariyaa keessatti ni awwaalame. Ilmi isaa Yehoo'aahaaz iddoo isaa bu'ee mootii ta'e. ³⁶ Yehuun Samaariyaa keessa taa'ee waggaa digdamaa saddeet Israa'elin bulche.

11

Ataaliyaa fi Yoo'aash

11:1-21 kwf - 2Sn 22:10-23:21

¹ Ataaliyaan haati Ahaaziyaa yommuu akka ilmi ishee du'e argitetti kaatee maatii mootii guutumaan guutuutti balleessite. ² Yehooshebaati intalli Yooraam mootichaa obboleettiin Ahaaziyaa sun garuu ilmaan moototaa kanneen ajjeefamuuf turan keessaa Yoo'aash ilma Ahaaziyaa hattee fudhatte. Isheenis Ataaliyaa jalaa isa dhoksuuf jettee isaa fi guddiftuu isaa kutaa hirribaa keessa teessifte. Kanaafuu inni hin ajjeefamne. ³ Innis bara Ataaliyaan biyya bulchaa turte hunda guddiftuu isaa wajjin mana qulqullummaa WAAQAYYOO keessatti dhokfamee waggaa ja'a jiraate.

⁴ Yehooyaadaan waggaa torbaffaatti ajajjuuwwan dhibbaa, namoota Kaariitti fi eegdotatti nama ergee akka isaan mana qulqullummaa WAAQAYYOOTII gara isaa dhufan godhe. Innis mana qulqullummaa WAAQAYYOO keessatti isaan wajjin kakuu seene. Ergasiis ilma mootii isaanitti argisiise. ⁵ Akkana jedhees isaan ajaje; "Wanni isin gochuu qabdan isa kana: Isin warri garee sadii keessa jirtan kanneen guyyaa Sanbataatiin hojiitti bobbaatan harka sadii keessaa harkii tokko mana mootii, ⁶ harka sadii keessaa harkii tokko Karra Suur, harka sadii keessaa harkii tokko immoo karra eegdota dabaree dabareedhaan mana qulqullummaa eegan dugda duubaan jiru haa eegu; ⁷ isin warri garee lamaan kaan keessa jirtan kanneen guyyaa Sanbataatiin hojii irraa boqottan hundinuu immoo mana qulqullummaa mootiidhaaf eeguu qabdu. ⁸ Tokkoon tokkoon keessan mi'a lolaa harkatti qabadhaatii mootichatti naanna'aa dhadhaabadhaa. Namni naannoo isin jirtanitti dhi'aatu kam iyyuu haa ajjeefamu. Lafa inni dhaqu hundatti mootichatti dhi'oo jiraadhaa."

⁹ Ajajjuuwwan dhibbaa sunis akkuma Yehooyaadaan lubichi ajaje sana ni godhan. Tokkoon tokkoon isaaniis namoota isaanii warra guyyaa Sanbataatiin hojiitti bobba'anii fi warra hojii irraa boqotan fudhatanii Yehooyaadaa lubicha bira dhufan. ¹⁰ Innis eeboowwanii fi gaachanawwan Daawit Mootichaa kanneen mana qulqullummaa WAAQAYYOO keessa turan ajajjoota sanaaf ni kenne. ¹¹ Eegdonni sunis, tokkoon tokkoon isaanii mi'a lolaa harkatti qabatanii karaa kibbaatii fi karaa kaaba mana qulqullummaatiin iddoo aarsaati fi mana qulqullummaa biratti mootichatti naanna'anii ni dhadhaabatan.

¹² Yehooyaadaanis ilma mootichaa fidee mataa isaa irra gonfoo kaa'ee; inni garagalcha kakuu itti kennee, "Inni mootii dha" jedhee labse. Isaanis isa diban; harka dha'aniis, "Mootichi bara baraan haa jiraatu!" jedhaniis iyyan.

¹³ Ataaliyaan yommuu waca eegdotaatii fi namootaa dhageessetti gara namoota sanaa mana qulqullummaa WAAQAYYOO dhaqxe. ¹⁴ Yeroo isheen ilaaltetti mootichi akkuma barataame sanatti utubaa bira dhaabatee ture. Qondaaltonnii fi warri malakata afuufan mooticha bira turan; namoonni biyya sanaa hundinuus gammadanii malakata afuufaa turan. Kana irratti Ataaliyaan uffata ishee tarsaaftee, “Kun maltummaa dha! Kun maltummaa dha!” jettee iyyite.

¹⁵ Yehooyaadaan lubichis, “Hiriira gidduudhaa baasaatii ishee fidaa; nama ishee irra dhufu kam iyyuu goraadeedhaan ajjeesaa” jedhee ajajjuuwwan dhibbaa kanneen kutaawwan loltootaa sana irratti ramadaman ajaje. Lubichi, “Isheen mana qulqullummaa WAAQAYYOO keessatti ajjeefamuu hin qabdu” jedhee tureetii. ¹⁶ Kanaafuu isaan akkuma isheen balbala fardeen ittiin masaraa mootii seenan geesseen ishee qabanii achumatti ishee ni ajjeesan.

¹⁷ Ergasiis Yehooyaadaan akka isaan saba WAAQAYYOO ta’aniif jedhee WAAQAYYOO fi mootii fi saba gidduutti kakuu dhaabe. Akkasumas mootichaa fi saba gidduutti kakuu ni dhaabe. ¹⁸ Sabni biyyattii hundinuu gara galma Ba’aal dhaqee diige. Isaanis iddoowwan aarsaatii fi waqota tolfamoo caccabsanii hurreessanii Mataan lubicha Ba’aal sana illee iddoowwan aarsaa duratti ni ajjeesan.

Ergasii Yehooyaadaan lubichi mana qulqullummaa WAAQAYYOTTI eegdota ni ramade. ¹⁹ Innis ajajjuuwwan dhibbaa, warra Kaarii, eegdotaa fi namoota biyyattii hunda fudhatee dhaqee isaan wajjinis mana qulqullummaa WAAQAYYOOTII mooticha gad baasanii fidanii karaa karra eegdotaatiin masaraa mootummaa seenan. Mootichis teessoo mootii irra taa’e. ²⁰ Saboonni biyyattii hundi ni iilchan. Sababii Ataaliyaan masaraa mootummaa keessatti goraadeedhaan ajjeefamteef magaalaa sun nagaa argatte.

²¹ Yoo’aash yeroo mootii ta’ee bulchuu jalqabetti nama umuriin isaa waggaa torbaa ture.

12

Yoo’aash Mana Qulqullummaa Haaromse

12:1-21 kwf - 2Sn 24:1-14; 24:23-27

¹ Bara mootummaa Yehuu keessa waggaa torbaffaatti Yoo’aash mootii ta’ee; inni Yerusaalem keessa taa’ee waggaa afurtama bulche. Maqaan haadha isaa Saabiyya ture; isheen nama Bersheebaa ture. ² Yoo’aashis bara Yehooyaadaan lubichi isa gorsaa ture hunda waan fuula WAAQAYYOO duratti qajeelaa ta’e hojjechaa ture. ³ Ta’us iddoowwan sagadaa kanneen gaarran irraa hin diigamne ture; namoonnis ittuma fufanii aarsaa dhi’eessaa, ixaanas achitti aarsaa turan.

⁴ Yoo’aashis lubootaan akkana jedhe; “Maallaqa kennaa qulqulluu godhamee mana qulqullummaa WAAQAYYOOTTI fidame hunda jechuunis maallaqa yeroo uummanni lakkaa’ametti walitti qabame, maallaqa wareega namootaa irraa walitti qabamee fi maallaqa namoonni fedhiidhaan mana qulqullummaatti fidan walitti qabaa. ⁵ Tokkoon tokkoon lubaa qabduu horii irraa maallaqa haa fuudhu; maallaqni sunis waan mana qulqullummaa keessaa caccabe kam iyyuu deebisanii haaromsuudhaaf hojii irra haa oolu.”

⁶ Garuu bara Yoo’aash Mootichaa keessa waggaa digdamii sadaffaatti luboonni sun amma illee mana qulqullummaa sana hin haaromsine ture. ⁷ Kanaafuu Yoo’aash mootichi Yehooyaadaa lubichaa fi luboota kaan walitti waamee, “Isin maaliif kutaa mana qulqullummaa kan diigamaa jiru sana deebifanii hin haaromsine? Isin si’achi maallaqa namoota irraa guurtan of harka hin tursinaa; garuu akka manni qulqullummaa ittiin haaromfamuuf dabarsaa kennaa.” ⁸ Luboonni sunis akka lammata maallaqa waldaa irraa walitti hin qabnee fi akka mana qulqullummaa sana illee ofii isaaniiitiin hin haaromsine walii galan.

⁹ Yehooyaadaan lubichi sanduuqa tokko fuudhee qadaada isaa ure. Sanduuqa sanas karra namni ittiin mana qulqullummaa WAAQAYYOO seenuun karaa mirgaatiin iddoo aarsaa bira kaa’e. Luboonni balbala sana eeganis maallaqa mana qulqullummaa WAAQAYYOOTIIF fidamu hunda sanduuqa sana keessa buusu ture. ¹⁰ Yommuu sanduuqni sun guuttis barreessaan mootiitii fi lubni ol aanaan dhufanii maallaqa mana qulqullummaa WAAQAYYOOTTI galfame sana lakkaa’anii korojootti naqan. ¹¹ Erga baay’inni maallaqa sanaa beekamee booddee isaan warra hojii mana qulqullummaa sana to’achuuf filatamanitti kennan. Jarris namoota hojii mana qulqullummaa WAAQAYYOO irratti bobba’an jechuunis warra muka soofanii fi warra mana ijaaraniif, ¹² warra dhagaadhaan ijaaraniif fi warra dhagaa cabsaniif kaffalan. Akkasumas mana

qulqullummaa WAAQAYYOO haaromsuudhaaf jedhanii mukaa fi dhagaa soofame bitanii baasii ittiin mana qulqullummaa haaromsan hunda baasan.

¹³ Maallaqni mana qulqullummaatti fidame sun mi'a meetii irraa hojjetame kan akka caabii, waan ittiin ibsaa irraa daaraa dhadha'an, waciitii ittiin waa faffacaasan, malakata yookaan mi'a warqee yookaan meetii irraa mana qulqullummaa WAAQAYYOOTIF hojjetaman biraa kamiin iyyuu tolchuuf hojii irra hin oolle; ¹⁴ maallaqni sunis namoota mana qulqullummaa sana haaromsaniif baafame. ¹⁵ Isaan sababii jarri amanamummaa guutuudhaan waan kana hojjetaniif namoota akka isaan warra mana qulqullummaa haaromsaniif kaffalaniif maallaqni itti kenname sana irraa herrega to'achuu hin barbaanne. ¹⁶ Maallaqni aarsaa yakkaatii fi aarsaa cubbuutiif galfame tokko iyyuu mana qulqullummaa WAAQAYYOOTTI hin fidamne; kun gooda lubootaatii.

¹⁷ Yeruma kana keessa Hazaa'eel mootiin Sooriyaa Gaatitti ol ba'ee lolee ishee qabate. Ergasii immoo Yerusaaaleminis loluuf itti gara gale. ¹⁸ Yoo'aash mootichi Yihuudaa garuu mi'oota abbootiin isaa mootonni Yihuudaa Yehooshaafaax, Yehooraamii fi Ahaaziyaa Waaqaaf addaan baasanii fi kan inni mataan isaa Waaqaaf addaan baase, warqee kuusaa qabeenya mana qulqullummaa WAAQAYYOOTII fi kan masaraa mootummaa hunda walitti qabee Hazaa'eel mooticha Sooriyaatiif kenne; Hazaa'eelis ergasii Yerusaaalemi ba'ee deeme.

¹⁹ Wantoonni bara mootummaa Yoo'aash keessa hojjetaman kanneen biraatii fi wanni inni hojjetete hundinuu kitaaba seenaa mootota Yihuudaa keessatti barreeffamaniiru mitii? ²⁰ Qondaaltonni isaa isatti malatanii karaa Siilaatti gad bu'u irratti Beet Miilootti isa ajjeesan. ²¹ Qondaaltonni isa ajjeesanis Yozaakaar ilma Shime'aatii fi Yehooshaabaad ilma Shoomeer turan. Innis du'ee abbootii isaa biratti Magaalaa Daawit keessatti awwaalame. Amasiyaa ilmi isaa iddoo isaa bu'ee mootii ta'e.

13

Yehoo'aahaaz Mooticha Israa'el

¹ Bara mootummaa Yoo'aash ilma Ahaaziyaa mooticha Yihuudaa keessa waggaa digdamii sadaffaatti Yehoo'aahaaz ilmi Yehuu Samaariyaa keessatti mootii Israa'el ta'ee waggaa kudha torba bulche. ² Inni cubbuu Yerobi'aam ilma Nebaat kan inni akka sabni Israa'el hojjetu godhe sana duukaa bu'uudhaan fuula WAAQAYYOO duratti waan hamaa hojete; cubbuu sana irraas hin deebine. ³ Kanaafuu dheekkamsi WAAQAYYOO Waaqaa Israa'elitti ni boba'e; innis yeroo dheeraadhaaf dabarsee harka Hazaa'eel mooticha Sooriyaattii fi harka ilma isaa Ben-Hadaadiitti isaan kenne.

⁴ Yehoo'aahaaz fuula WAAQAYYOO barbaaddate; WAAQAYYOS akka mootiin Sooriyaa sun akka malee Israa'elin cuncurse argee kadhaa isaa dhaga'eef. ⁵ WAAQAYYOS nama isaan baraaruu tokko Israa'elii kenne; akkasiin isaan harka warra Sooriyaa jalaa ni ba'an. Kanaafuu Israa'eloonni akkuma duraatti dukaana isaanii keessa jiraatan. ⁶ Isaan garuu cubbuu mana Yerobi'aam kan inni akka Israa'el hojjetu godhe sana irraa hin deebine; ituma fufanii keessa jiraatan. Siidaan Aasheeraas Samaariyaa keessa dhaabatee hafe.

⁷ Loltoota Yehoo'aahaaz keessaa loltoota fardaa shantama, gaariwwan kudhanii fi loltoota lafoo kuma kudhan malee tokko iyyuu hin hafne; mootiin Sooriyaa warra kaan hunda balleessee akkuma awwaara yeroo midhaan dha'anii isaan godhee tureetii.

⁸ Wanni bara mootummaa Yehoo'aahaaz keessa hojjetame biraa, wanni inni hojjetete hundii fi jabinni isaa kitaaba seenaa mootota Israa'el keessatti barreeffameera mitii? ⁹ Yehoo'aahaaz abbootii isaa wajjin boqotee Samaariyaa keessatti ni awwaalame. Yoo'aash ilmi isaa iddoo isaa bu'ee mootii ta'e.

Yoo'aash Mooticha Israa'el

¹⁰ Bara Yoo'aash mooticha Yihuudaa keessa waggaa soddonii torbaffaatti Yoo'aash ilmi Yehoo'aahaaz Samaariyaa keessatti mootii Israa'el ta'ee waggaa kudha ja'a isaan bulche. ¹¹ Inni fuula WAAQAYYOO duratti cubbuu hojjetee cubbuu Yerobi'aam ilma Nebaat kan inni akka sabni Israa'el hojjetu godhe sana keessaa tokko irraa iyyuu hin deebine; innis ituma fufee cubbuu keessa jiraate.

¹² Wantoonni bara mootummaa Yoo'aash keessa hojjetaman biraa, wanni inni hojjetete hundii fi jabinni isaa, waraanni inni Amasiyaa mooticha Yihuudaa irratti deemsises kitaaba seenaa mootota Israa'el keessatti barreeffamaniiru mitii? ¹³ Yoo'aash abbootii isaa wajjin boqotee Yerobi'aam iddoo isaa bu'ee teessoo irra taa'e. Yoo'aash Samaariyaa keessatti mootota Israa'el biratti ni awwaalame.

¹⁴ Yeroo kanatti Elsa'i dhukkuba du'aan isa ga'uun dhiphachaa ture. Yoo'aash mootichi Israa'el isa ilaaluu gad bu'ee isatti boo'e. Innis, "Yaa abbaa koo! Yaa abbaa koo! Yaa gaariiwaniif fi yaa abbootii fardaa Israa'el!" jedhee iyye.

¹⁵ Elsa'a'i, "Iddaa fi xiyya wayii fudhadhu" jedheen; innis ni fudhate. ¹⁶ Elsa'a'i immoo mooticha Israa'eliin, "Iddaa harkatti qabadhu" jedhe; inni fuunaan Elsa'a'i harka ofii isaa fuudhee harka mootichaa irra kaa'e.

¹⁷ Elsa'a'i, "Foddaa karaa ba'a biiftuu bani" jedheen; innis ni bane. Elsa'a'i, "Xiyya darbadhu!" jedhe; mootichis ni darbate. Elsa'a'is, "Xiyya mo'annoo WAAQAYYOO, xiyya warra Sooriyaa mo'atu!" jedhe. Elsa'a'is, "Ati Afeeqitti warra Sooriyaa guutummaan guutuutti ni barbadeessita" jedhee labse.

¹⁸ Innis ergasii, "Xiyya fudhadhu" jedheen; mootichis ni fudhate. Elsa'a'is "Lafa rukuti" jedheen; mootichis yeroo sadii lafa rukute. ¹⁹ Namni Waaqaa sunis isatti aaree akkana jedhe; "Ati yeroo shan yookaan ja'a lafa rukutuu qabda; silaa warra Sooriyaa mo'attee guutummaan guutuutti isaan balleessita turte. Amma garuu yeroo sadii qofa isaan mo'atta."

²⁰ Elsa'a'i du'ee awwaalame.

Yeroo sana Mo'aabonni saamtonni birraa birraa dhufanii biyyattii saamu ture. ²¹ Gaaf tokko warri Israa'el utuu namichaa du'e tokko awwaaluutti jiranuu garee saamtotaa tokko argan; kanaafuu reeffa namichaa awwaala Elsa'a'itti darbatan. Reeffi sun lafee Elsa'a'i tuqnaan namichi sun du'aa ka'ee miiluma ofii isaatiin dhaabate.

²² Hazaa'eel mootichi Sooriyaa bara mootummaa Yehoo'aahaaz guutuu Israa'elin cunqurse. ²³ WAAQAYYOO garuu sababii kakuu Abrahaam, Yisihaaqii fi Yaaqoob wajjin galee ture sanaatiif jedhee isaanii arjoome; garaas isaaniif laafee fuula isaa gara isaaniiti deebifate. Hamma har'aattis fuula ofii isaa duraa isaan barbadeessuu yookaan gatu hin feene.

²⁴ Hazaa'eel mootichi Sooriyaa du'ee Ben-Hadaad ilmi isaa iddoo isaa bu'ee mootii ta'e. ²⁵ Yoo'aash ilmi Yehoo'aahaaz magaalaawwan inni waraana keessatti abbaa isaa Yehoo'aahaaz irraa fudhatee ture hunda Ben-Hadaad ilma Hazaa'eel irraa deebisee fudhate. Yahoo'asis yeroo sadii isa mo'atee akkasiin magaalaawwan Israa'el deebise.

14

Amasiyaa Mooticha Yihuudaa

14:1-7 kwf - 2Sn 25:1-4,11-12

14:8-22 kwf - 2Sn 25:17-26:2

¹ Bara mootummaa Yoo'aash ilma Yoo'aahaaz mooticha Israa'el keessa waggaa lammaffaatti Amasiyaa ilmi Iyoo'as mootii Yihuudaa ta'ee bulchuu jalqabe. ² Inni yeroo mootii ta'etti nama waggaa digdamii shan ture; innis Yerusaalem keessa taa'ee waggaa digdamii sagal ni bulche. Maqaan haadha isaa Yo'aadaan ture; isheenis nama Yerusaalem turte. ³ Innis waan fuula WAAQAYYOO duratti qajeelaa ta'e ni hojjete. Garuu akka abbaa isaa Daawitiitti miti. Inni waan hunda keessatti fakkeenya abbaa isaa Yoo'aash duukaa bu'e. ⁴ Ta'us iddoowwan sagadaa kanneen gaarran irraa hin diigamne ture; namoonni ittuma fufanii aarsaa dhi'eessaa, ixaanas achitti aarsaa turan.

⁵ Inni erga jabeessee harka isaatti mootummaa qabatee booddee qondaaltota abbaa isaa mooticha ajjeesan sana fixe. ⁶ Ta'us inni akka waan Kitaaba Seera Musee keessatti barreeffame kan WAAQAYYOO, "Abbootiin sababii ijoollee isaaniitiif ajjeefamuu hin qaban yookaan ijoolleen sababii abbootii isaaniitiif ajjeefamuu hin qaban; tokkoon tokkoon namaa sababii cubbuu ofii isaatiif du'a" jedhee ajaje sanaatti ilmaan warra nama ajjeesan sanaa hin fixe.

⁷ Namni Sulula Soogiddaa keessatti Edoomota kuma kudhan mo'atee waraanaa Seelaa qabate kan maqaa isheen hamma har'aatti ittiin waamantu, Yoqti'eel jedhee moggaases isuma.

⁸ Amasiyaanis, "Kottu mee waraana keessatti wal ilaallaa" jedhee qoosee gara Yoo'aash ilma Yehoo'aahaaz, ilma Yehuu, mooticha Israa'elitti ergamoota erge.

⁹ Yoo'aash mootichi Israa'el garuu akkana jedhee Amasiyaa mooticha Yihuudaatiif deebii kenne; "Sokorruun Libaanoon keessaa tokko ergaa ergee birbirsaa Libaanooniin, 'Intala kee ilma kootti heerumsiisi' jedhe. Ergasii bineensi bosona Libaanoon keessaa tokko dhufee sokorruu sana irra miilaan deeme. ¹⁰ Ati dhugumaan Edoomin mo'attee amma of tuulaa jirta. Mo'annoo keetiin gammadi; amma garuu mana kee taa'i! Ati maaliif rakkina barbaaddee ofii keetii fi Yihuudaattis kufaati fidda?"

¹¹ Amasiyaa garuu dhaga'uu dide; kanaafuu Yoo'aash mootichi Israa'el ka'ee lola bane. Inni fi Amasiyaa mootichi Yihuudaa keessatti Beet Shemeshitti walitti ba'an. ¹² Warri Yihuudaas warra Israa'eliin mo'atamanii tokkoon tokkoon namaas gara mana ofii isaatti baqate. ¹³ Yoo'aash mootichi Israa'el, Amasiyaa mooticha Yihuudaa ilma Iyoo'as ilma Ahaaziyaana sana Beet Shemeshitti qabe. Iyoo'asis gara Yerusaalem dhaqee

Karra Efreemiitii jalqabee hamma Karra Goleetti dallaa Yerusaalem kan dhagaa sana diige; kutaan diigame kun dhundhuma dhibba afur lafa irra dheerata ture. ¹⁴ Innis warqee fi meetii hunda akkasumas mi'a mana qulqullummaa WAAQAYYOO keessatti argamuu fi kan kuusaa qabeenya masaraa mootummaa keessaa jiru hunda fudhate; namoota booji'e illee fudhatee gara Samaariyaatti deebi'e.

¹⁵ Wantoonni bara mootummaa Yoo'aash keessa hojjetaman kanneen biraa, wanni inni hojjetee fi jabinni isaa, waraana inni Amasiyaa mooticha Yihuudaatiin loles dabalatee kitaaba seenaa mootota Israa'el keessatti barreeffamaniiru mitii? ¹⁶ Yoo'aashis abbootii isaa wajjin boqotee mootota Israa'el biratti Samaariyaa keessatti awwaalame. Ilmi isaa Yerobi'aam iddoo isaa bu'ee mootii ta'e.

¹⁷ Amasiyaa ilmi Yoo'aash mootichi Yihuudaa erga Yoo'aash ilmi Yehoo'aahaaz mootichi Israa'el du'ee booddee waggaa kudha shan jiraate. ¹⁸ Wantoonni bara mootummaa Amasiyaa keessa hojjetaman kanneen biraa kitaaba seenaa mootota Yihuudaa keessatti barreeffamaniiru mitii?

¹⁹ Isaan Yerusaalem keessatti isatti malatan; innis gara Laakkiishitti baqate; isaan immoo faanuma isaa Laakkiishitti namoota erganii achitti isa ajjeesan. ²⁰ Reeffi isaas fardatti fe'amee dhufee abbootii isaa biratti Yerusaalem keessatti Magaalaa Daawititti awwaalame.

²¹ Ergasii warri Yihuudaa hundinuu Azaariyaa mucaa waggaa kudha ja'aa fuudhanii iddoo abbaa Amasiyaa sana mootii godhatan. ²² Namni erga Amasiyaa abbootii isaa wajjin boqotee booddee Eelaatin deebisee ijaaree warra Yihuudaatti kenne isa.

Yerobi'aam Lammaffaa Mooticha Israa'el

²³ Bara Amasiyaa ilma Yoo'aash mooticha Yihuudaa keessa waggaa kudha shanaffaatti Yerobi'aam ilmi Iyoo'as mooticha Israa'el Samaariyaa keessatti mootii ta'e; innis waggaa afurtamii tokko bulche. ²⁴ Inni fuula WAAQAYYOO duratti waan hamaa hojjete; cubbuu Yerobi'aam ilma Nebaat kan inni akka warri Israa'el hojjetan godhe sana irraas hin deebine. ²⁵ Namni akkuma dubbii WAAQAYYOO Waaqa Israa'el kan inni karaa garbicha isaa Yoonas ilma Amitaayi, raajicha Gat Heeferii dhufee sanaatiin dubbateetti daarii biyya Israa'el Leeboo Hamaatii jalqabee hamma Galaana Arabbaatti iddootti deebise isa ture.

²⁶ WAAQAYYOO akka tokkoon tokkoon nama Israa'el keessa jiraatuu, garbas ta'u birmaduun akka malee rakkachaa jiru arge; namni isaan gargaaru tokko iyyuu hin turre. ²⁷ WAAQAYYOS waan maqaa Israa'el samii jalaa nan balleessa hin jedhiniif harka Yerobi'aam ilma Yoo'aashiitiin isaan baase.

²⁸ Wantoonni bara mootummaa Yerobi'aam keessa hojjetaman biraa, wanni inni hojjetee hundi, jabinni Ioltummaa isaa, akka inni itti Damaasqoo fi Hamaati kanneen duraan Yihuudaa jala turan sana Israa'eliif deebisee dabalatee kitaaba seenaa mootota Israa'el keessatti barreeffamaniiru mitii? ²⁹ Yerobi'aam abbootii isaa mootota Israa'el wajjin boqote; ilmi isaa Zakkaariyaas iddoo isaa bu'ee mootii ta'e.

15

Azaariyaa Mooticha Yihuudaa

15:1-7 kwf - 2Sn 26:3-4,21-23

¹ Bara mootummaa Yerobi'aam mooticha Israa'el keessa waggaa digdamii torbaffaatti, Azaariyaa ilmi Amasiyaa mooticha Yihuudaa sanaa mootii ta'e. ² Inni yeroo mootii ta'etti nama waggaa kudha ja'a ture; innis Yerusaalem keessa taa'ee waggaa shantamii lama ni bulche. Maqaan haadha isaa Yekooliyaa ture; isheenis nama Yerusaalem turte.

³ Innis akkuma abbaa isaa Amasiyaa sana fuula WAAQAYYOO duratti waan qajeelaa ni hojjete. ⁴ Ta'us iddoowwan sagadaa kanneen gaarran irraa hin diigamne ture; namoonni ituma fufanii aarsaa dhi'eessaa, ixaanas achitti aarsaa turan.

⁵ WAAQAYYOS hamma gaafa inni du'eetti mooticha lamxiidhaan dha'e; innis mana kophaa keessa ni jiraate. Yootaam ilmi mootichaa itti gaafatama masaraa mootummaa fudhatee saba biyyattii bulche.

⁶ Wantoonni bara mootummaa Azaariyaa keessa hojjetaman kan biraatii fi wanni inni hojjetee hundi kitaaba seenaa mootota Yihuudaa keessatti barreeffamaniiru mitii?

⁷ Azaariyaa abbootii isaa wajjin boqotee isaanuma biratti Magaalaa Daawit keessatti ni awwaalame. Ilmi isaa Yootaam iddoo isaa bu'ee mootii ta'e.

Zakkaariyaas Mooticha Israa'el

⁸ Bara mootummaa Azaariyaa mooticha Yihuudaa keessa waggaa soddomii saddeettaffaatti Zakkaariyaas ilmi Yerobi'aam Samaariyaa keessatti mootii Israa'el ta'ee

ji'a ja'a bulche. ⁹ Innis akkuma abbaan isaa hojjete sana fuula WAAQAYYOO duratti waan hamaa hojjete. Inni cubbuu Yerobi'aam ilma Nebaat kan inni akka warri Israa'el hojjetan godhe sana irraa hin deebine.

¹⁰ Shaluum ilmi Yaabeesh sun Zakkaariyaasitti ka'ee fuuluma sabaa duratti isa ajjeesee iddoo isaa qabatee mootii ta'e. ¹¹ Wantoonni bara mootummaa Zakkaariyaas keessa hojjetaman kanneen biraa kitaaba seenaa mootota Israa'el keessatti barreeffamaniiru mitii? ¹² Akkasiinis dubbiin WAAQAYYOO kan inni "Sanyiiwwan kee hamma dhaloota Afuraffaatti teessoo Israa'el irra ni taa'u" jedhee Yehuutti dubbate sun ni raawwatame.

Shaluum Mooticha Israa'el

¹³ Shaluum ilmi Yaabeesh bara mootummaa Uziyaan mooticha Yihuudaa keessa waggaa soddomii saglaffaatti Samaariyaa keessatti mootii Israa'el ta'ee ji'a tokko bulche. ¹⁴ Menaahem ilmi Gaadiis Tiirzaadhaa ka'ee Samaariyaa dhaqe. Innis Shaluum ilma Yaabeesh sana lolee Samaariyaa keessatti ajjeesee iddoo isaa bu'ee mootii ta'e.

¹⁵ Wantoonni bara mootummaa Shaluum keessa hojjetaman biraatii fi fincilli inni hojjete kitaaba seenaa mootota Israa'el keessatti barreeffamaniiru.

¹⁶ Yeroo sanatti, Menaahem Tiirzaa ka'ee Tiifsa fi warra magaalaa sana keessaa fi naannoo ishee jiraatu hunda dha'e; kunis sababii isaan karra banuufii didaniif. Innis Tiifsa saamee dubartoota ulfa qaban hunda garaa baqaqse.

Menaahem Mooticha Israa'el

¹⁷ Bara Azaariyaa mooticha Yihuudaa keessa waggaa soddomii saglaffaatti Menaahem ilmi Gaadii mootii Israa'el ta'e; innis Samaariyaa keessa jiraatee waggaa kudhan bulche. ¹⁸ Innis fuula WAAQAYYOO duratti waan hamaa hojjete. Bara biyya bulchaa ture guutuus cubbuu Yerobi'aam ilma Nebaat kan inni akka Israa'el hojjetu godhe sana irraa hin deebine.

¹⁹ Ergasiis Phuuli mootichi Asoor biyyattiitti ni duule; Menaahem immoo akka gargaarsa isaa argate aangoo ofii isaa jalatti mootummaa turfatuuf meetii taalaantii kuma tokko kenneef. ²⁰ Menaahem maallaqa kana warruma Israa'el baasise. Akka mootii Asooriif kennamuuf namni soressi kam iyyuu meetii saqilii shantama baasuu gaba. Kanaafuu mootiin Asoor duubatti deebi'ee malee ergasii biyyattii keessa hin turre.

²¹ Wannii bara mootummaa Menaahem keessa hojjetame kan biraa, wannii inni hojjete hundis kitaaba seenaa mootota Israa'el keessatti barreeffameera mitii? ²² Menaahem is abbootii isaa wajjin boqote. Ilmi isaa Pheqaayaan iddoo isaa bu'ee mootii ta'e.

Pheqaayaan Mooticha Israa'el

²³ Bara Azaariyaa mooticha Yihuudaa keessa waggaa shantammaffaatti Pheqaayaan ilmi Menaahem Samaariyaa keessatti mootii Israa'el ta'ee waggaa lama bulche. ²⁴ Pheqaayaan fuula WAAQAYYOO duratti waan hamaa hojjete. Inni cubbuu Yerobi'aam ilma Nebaat kan inni akka Israa'el hojjetu godhe sana irraa hin deebine. ²⁵ Ajajjoota isaa ol aantota keessaa Pheqaan ilmi Remaaliyaa isatti malate. Innis namoota Gili'aad keessaa nama shantama fudhatee fiixee masaraa mootummaa kan Samaariyaa keessaa irratti Pheqaayaa, Argobbii fi Ariyyee ajjeese. Pheqaanis akkasiin Pheqaayaa ajjeesee iddoo isaa mootii ta'e.

²⁶ Wannii bara mootummaa Pheqaayaa keessa hojjetame kan biraatii fi wannii inni hojjete hundi kitaaba seenaa mootota Israa'el keessatti barreeffameera mitii?

Pheqaa Mooticha Israa'el

²⁷ Bara Azaariyaa mooticha Yihuudaa keessaa waggaa shantamii lammaffaatti, Pheqaan ilmi Remaaliyaa Samaariyaa keessatti mootii Israa'el ta'ee waggaa digdama bulche. ²⁸ Innis fuula WAAQAYYOO duratti waan hamaa hojjete. Cubbuu Yerobi'aam ilma Nebaat kan inni akka Israa'el hojjetu godhe sana irraa hin deebine.

²⁹ Bara Pheqaa mooticha Israa'el keessa Tiiglaat Phileeser mootichi Asoor dhufee liyoon, Abeel Beet Ma'aakaa, Yaano'aa, Qaadeshii fi Haazoor, Gili'aadii fi Galilaa, biyya Niftaalem hundas walumatti qabatee namootas guuree Asooritti geesse. ³⁰ Ergasiis Hooshee'aa ilmi Eelaa, Pheqaa ilma Remaaliyaatti malate. Innis lolee isa ajjeesee bara mootummaa Yootaam ilma Uziyaan keessaa waggaa digdammaffaatti iddoo isaa mootii ta'e.

³¹ Wannii bara mootummaa Pheqaa keessa hojjetame biraa fi wannii inni hojjete hundi kitaaba seenaa mootota Israa'el keessatti barreeffameera mitii?

³² Bara Pheqaa ilma Remaaliyaa mooticha Israa'el keessa waggaa lammaffaatti Yootaam ilmi Uziyaan mooticha Yihuudaa mootii ta'ee bulchuu jalqabe. ³³ Inni yeroo mootii ta'etti nama waggaa digdamii shan ture; Yerusaalem keessa taa'ee waggaa kudha ja'a ni bulche. Maqaan haadha isaa Yaruusaa ture; isheenis intala Zaadoq turte. ³⁴ Innis akkuma abbaan isaa Uziyaan godhe sana fuula WAAQAYYOO duratti waan qajeelaa ni hojjete. ³⁵ Ta'us iddoowwan sagadaa kanneen gaarran irraa hin diigaman ture. Namoonnis ittuma fufanii aarsaa dhi'eessaa ixaanas achitti aarsaa turan. Yootaam Karra mana qulqullummaa WAAQAYYOO kan Ol aanu deebisee ijaare.

³⁶ Wantoonni bara mootummaa Yootaam keessaa hojjetaman kanneen biraatii fi wantoonni inni hojjete kitaaba seenaa mootota Yihuudaa keessatti barreeffameera mitii? ³⁷ Bara sana keessa WAAQAYYOO Reziin mooticha Sooriyaatii fi Pheqaa ilma Remaaliyaa Yihuudaatti kakaasuu jalqabe. ³⁸ Yootaam abbootii isaa wajjin boqotee Magaalaa Daawit, magaalaa abbaa isaa keessatti isaanuma biratti ni awwaalame. Ilmi isaa Aahaaz iddoo isaa bu'ee mootii ta'e.

16

Aahaaz Mooticha Yihuudaa

16:1-20 kwf - 2Sn 28:1-27

¹ Bara mootummaa Pheqaa ilma Remaaliyaa keessa waggaa kudha torbaffaatti Aahaaz ilmi Yootaam mooticha Yihuudaa mootii ta'ee bulchuu jalqabe. ² Aahaaz yeroo mootii ta'etti nama waggaa digdamaa ture; innis Yerusaalem keessa taa'ee waggaa kudha ja'a ni bulche. Inni akka abbaa isaa akka Daawit fuula WAAQAYYOO Waaqa isaa duratti waan qajeelaa hin hojjenne. ³ Inni karaa mootota Israa'el duukaa bu'ee gochawwan jibbiisiisoo saboota WAAQAYYOO fuula Israa'elootaa duraa ari'ee baase sanaa hojjechuudhaan ilma isaa illee aarsaa godhee ibiddaan gube. ⁴ Innis iddoowwan sagadaa kanneen gaarran irraatti, fiixee gaarranii irrattii fi muka lalisaa hunda jalatti qalma dhi'eessaa, ixaanas aarse.

⁵ Reziin mootichi Sooriyaatii fi Pheqaan ilmi Remaaliyaa mootichi Israa'el Yerusaalemin loluuf ol ba'anii Aahaazin marsan; garuu isa mo'achuu hin dandeenye. ⁶ Yeroo sanatti Reziin mootichi Sooriyaa namoota Yihuudaa ari'ee baasuudhaan Eelaatin warra Sooriyaatiif deebise. Ergasiis Edoomoni Eelaattiti godaananii hamma har'aatti achuma jiraatu.

⁷ Aahaazis akkana jedhee gara Tiiglaat Phileeser mooticha Asooritti nama erge; "Ani garbichaa fi ilma kee ti. Kottuutii harka mootii Sooriyaatii fi harka mootii Israa'el kanneen natti duulaniitii na baasi." ⁸ Kana irratti Aahaaz meetii fi warqee mana qulqullummaa WAAQAYYOO keessa jiruu fi kan mankuusaa qabeenya masaraa mootummaa keessatti argamu baasee kennaa godhee mootii Asooritiif ni erge. ⁹ Mootiin Asoor sunis kadhaa isaa tole jedhee Damaasqoo lolee qabate. Jiraattota ishees booji'ee Qiiritti geesse; Reziin immoo ni ajjeese.

¹⁰ Aahaaz mootichi Tiiglaat Phileeser mooticha Asoor arguuf Damaasqoo dhage. Innis iddoo aarsaa tokko Damaasqoo keessatti argee fakkeenya isaatii fi karoora ittiin ijaaran hunda barreessee Uuriyaa lubichatti erge. ¹¹ Kanaafuu Uuriyaa lubichi akkuma karoora Aahaaz mootichi Damaasqoodhaa ergeef sana hundaatti utuu Aahaaz mootichi Damaasqoodhaa hin deebi' in dura iddoo aarsaa sana ijaaree fixe. ¹² Mootichis yommuu Damaasqoodhaa deebi'ee iddoo aarsaa sana argetti itti dhi'aatee irratti aarsaa dhi'eesse. ¹³ Innis aarsaa gubamuu fi kennaa midhaanii dhi'eessaa dhibaayyuu illee dhibaafatee dhiiga aarsaa nagaa kan ofii isaas iddoo aarsaa sana irratti ni facaase. ¹⁴ Iddoo aarsaa naasii irraa hojjetamee fuula WAAQAYYOO dura dhaabatee ture sanas mana qulqullummaa duraa iddoo aarsaa haaraa fi mana qulqullummaa WAAQAYYOO gidduudhaa fidee gama kaabaatiin iddoo aarsaa haaraa bira kaa'e.

¹⁵ Ergasii Aahaaz mootichi akkana jedhee Uuriyaa lubicha ajaje; "Iddoo aarsaa guddicha irratti aarsaa gubamu kan ganamaatii fi kennaa midhaanii kan galgalaa, aarsaa mootichaa kan gubamuu fi kennaa midhaanii, aarsaa namoota biyyattii hundaa kan gubamu, kennaa isaanii kan midhaaniitii fi dhibaayyuu isaanii dhi'eessi. Iddoo aarsaa irratti dhiiga aarsaa gubamuutii fi dhiiga qalma hunda facaasi. Iddoo aarsaa kan naasii irraa hojjetame garuu anatu ittiin gorsa gaafata." ¹⁶ Uuriyaan lubichis akkuma Aahaaz mootichi ajaje sana godhe.

¹⁷ Aahaaz mootichi baattuuwwan asii fi achi sochoofaman sana irraa marsaawwan buqqisee caabiiwwan dhiqannaa illee irraa baase. Gaanii sana baattuuwwan fakkii jibootaa kanneen naasii irraa hojjetaman irraa fuudhee dhagaa afamaa irra kaa'e. ¹⁸ Innis mootii Asooriif jedhee oobdii guyyaa Sanbataatiif hojjetame iddoo isaatii

fuudhee karra alaa kan mootonni ittiin mana qulqullummaa WAAQAYYOO seenanis ni buqqise.

¹⁹ Wannii bara mootummaa Aahaaz keessa hojjetame biraatii fi wannii inni hojjetee kitaaba seenaa mootota Yihuudaa keessatti barreeffameera mitii? ²⁰ Aahaazis abbootii isaa wajjin boqotee isaanuma biratti Magaalaa Daawit keessatti ni awwaalame. Ilmi isaa Hisqiyaaas iddoo isaa bu'ee mootii ta'e.

17

Hoose'aa Mooticha Israa'el Kan Dhuma

17:3-7 kwf - 2Mt 18:9-12

¹ Bara Aahaaz mooticha Yihuudaa keessa waggaa kudha lammaffaatti Hooshee'aa ilmi Eelaa Samaariyaa keessatti mootii Israa'el ta'ee waggaa sagal bulche. ² Innis fuula WAAQAYYOO duratti waan hamaa hojjete; garuu akka mootota Israa'el kanneen isaan dura turan sanaa miti.

³ Shalmaneseer mootichi Asoor Hooshee'aa loluuf ol ba'e; Hoose'aas garboomeefii gibira baaseef. ⁴ Mootiin Asoor garuu akka Hooshee'aa gantuu ta'e hubate; Hoose'aa Siigoor mooticha Gibxitti jaarsa araaraa ergatee ergasii akka duraan wagguma waggaa baasaa ture sana mootii Asooriif gibira baasuu dhiise. Kanaafuu Silmiinaasoor isa qabee mana hidhaa keessa buuse. ⁵ Ergasiis mootichi Asoor guutummaa biyyattii weerare; Samaariyaattis duulee waggaa sadii marsee ishee qabate. ⁶ Bara mootummaa Hooshee'aa keessa waggaa saglaffaatti mootiin Asoor Samaariyaa qabatee Israa'eloota booji'ee Asooritti geesse. Innis Halaa keessa, Goozaan keessa, cina Laga Haaboorii fi magaalaaawwan Midiyaan keessa isaan qubachiise.

Sabni Israa'el Sababii Cubbuutiif Booji'ame

⁷ Wannii kun hundinuu sababii Israa'eloonni WAAQAYYOO Waaqa isaanii isa Gibxii humna Fara'oon mooticha Gibxi jalaa isaan baase sanatti cubbuu hojjetaniif ta'e; isaan waaqota biraa waaqeffatanii ⁸ waan saboonni WAAQAYYOO isaan duraa ari'ee baase sun hojjetan duukaa bu'anii barteewwan hamaa mootonni Israa'el fidanii isaan barsiisan illee fudhatan. ⁹ Israa'eloonni dhoksaadhaan waan qajeelaa hin ta'in WAAQAYYOO Waaqa isaanii hojjetan. Isaan magaalaaawwan isaanii hunda keessatti gamoo eegumsaattii jalqabani hamma magaalaaawwan dallaa jabaa qabaniitti iddoowwan sagadaa kanneen gaarran irraa ijaarratan. ¹⁰ Gaarran ol dhedheeroo hunda gubbaattii fi muka lalisaa hunda jalatti fakkiiwwanii fi siidaa Aasheeraa dhaabbatan. ¹¹ Isaan akkuma saboonni WAAQAYYOO fuula isaanii duraa ari'ee baase godhan sana iddoowwan sagadaa kanneen gaarran irraa hunda irratti isaana aarsan. Waan hamaa aariidhaaf WAAQAYYON kakaasu illee ni hojjetan. ¹² WAAQAYYOS, "Isin waan kana hin hojjetinaa" jedhu illee isaan waaqota tolfamoo waaqeffatan. ¹³ WAAQAYYOO akkana jedhee karaa raajotaatii fi ilaaltota isaa hundaatiin Israa'elii fi Yihuudaa akeekkachiise; "Karaa keessan hamaa kana irraa deebi'aa. Akkuma ajajawwan ani abbootii keessan ajaje hundaattii fi akkuma seera ani karaa garboota koo raajotaatiin isiniif erge sanaatti ajajaa fi seera koo eegaa."

¹⁴ Isaan immoo dhaggeeffachuu didanii akkuma abbootii isaanii keessa WAAQAYYOO Waaqa isaanii amanuu didan sana mataa jabaatan. ¹⁵ Isaan seeraa fi kakuu inni abbootii isaanii wajjin gale akkasumas akeekkachiisa inni isaaniif kenne illee fudhachuu didan. Isaan waaqota tolfamoo faayidaa hin qabne duukaa bu'anii isaanis faayidaa dhaban. Isaan utuma WAAQAYYOO, "Waan jarri hojjetan hin hojjetinaa" jedhee isaan ajajuu saboota ollaa isaanii duukaa bu'anii waan WAAQAYYOO hojjechuu isaan dhowwe ni hojjetan.

¹⁶ Isaan ajaja WAAQAYYOO Waaqa isaanii hunda dhiisanii waaqota tolfamoo baqfamanii bifa jabbitiin hojjetaman lamaa fi siidaa Aasheeraa tolfatan. Raayyaawwan samii hundaaf sagadanii Ba'aalin illee waaqeffatan. ¹⁷ Ilmaan isaanii itti intallan isaanii aarsaa godhanii ibiddaan guban. Warra waa himu gorsa gaafatan; falfalas hojjetanii fuula WAAQAYYOO duratti waan hamaa hojjechuutti dabarsanii of kennanii dheekkamsaaf isa kakaasan.

¹⁸ Kanaafuu WAAQAYYOO akka malee Israa'elitti dheekkamee fuula isaa duraa isaan buqqise. Gosa Yihuudaa qofatu hafe; ¹⁹ Yihuudaan iyyuu ajaja WAAQAYYOO Waaqa isaanii hin eegne. Isaanis bartee Israa'eloonni itti fidan duukaa bu'an; ²⁰ kanaafuu WAAQAYYOO saba Israa'el hunda ni gate; inni isaan miidhee hamma fuula isaa duraa isaan dhabamsiisutti dabarsee harka saamtotaatti isaan kenne.

²¹ Gaafa inni mana Daawit irraa Israa'el baqaqsetti isaan Yerobi'aam ilma Nebaat sana mootii godhatan. Yerobi'aamis akka Israa'eloonni WAAQAYYOO irraa garagalanii cubbuu guddaa hojjetan godhe. ²² Israa'eloonni cubbuu Yerobi'aam hunda keessa jiraatan malee

²³ hamma WAAQAYYO akkuma karaa garboota isaa raajotaatiin akeekkachiise sanatti fuula isaa duraa isaan buqqisutti irraa hin deebine. Kanaafuu sabni Israa'el biyya isaatii boojiudhaan fudhatamee Asooritti geeffame; hamma har'aattis achuma jiraata.

Asooronni Samaariyaa Keessa Qubatan

²⁴ Mootiin Asoor biyya Baabilonii, Kuutaadhaa, Awaadhaa, biyya Hamaatii fi Seefarwaayimii namoota fidee iddoo Israa'elootaa buusuuf jedhee magaalaaawwan Samaariyaa keessa qubachiise. Isaanis Samaariyaa fudhatanii magaalaaawwan ishee keessa ni jiraatan. ²⁵ Isaan yeroo achi jiraachuu jalqabanitti WAAQAYYON hin waaqeffanne; kanaafuu inni gidduu isaaniitti leencota erge; leenconnis isaan keessaa namoota muraasa galaafatan. ²⁶ Mooticha Asoorittis akkana jedhanii himan; "Namoonni ati boojitee magaalaaawwan Samaariyaa keessa qubachiifte sun waan Waaqni biyya sanaa fedhu hin beekan. Inni gidduu isaaniitti leencota erge; leenconnis sababii namoonni waan Waaqni sun fedhu hin beekiniif isaan fixan."

²⁷ Kana irratti mootiin Asoor, "Luboota boojitanii Samaariyaadhaa fiddan keessaa tokko akka inni deebi'ee achi jiraatee waan Waaqni biyya sanaa fedhu namoota barsiisuuf achi deebisaa" jedhee ajaja kenne. ²⁸ Kanaafuu luboota Samaariyaadhaa booji'aman keessaa tokko Beet'eel keessa jiraatee akka isaan itti WAAQAYYON waaqeffatan barsiisuu dhufe.

²⁹ Ta'us tokkoon tokkoon gosaa magaalaa keessa jiraatutti waaqota ofii isaa tolfatee iddoowwan sagadaa kanneen warri Samaariyaa gaarran irratti hojjetanii turan sana irra dhaabe. ³⁰ Warri Baabilonii dhufan Waaqa tolfamaa Sukooti Banooti, warri Kuutaadhaa dhufan Waaqa tolfamaa Nergaal, warri Hamaatii dhufan immoo Waaqa tolfamaa Ashiimaa jedhamu ni tolfatan. ³¹ Awwiimonni waaqota tolfamoo Nibhaazii fi Tartaaq jedhaman tolfatan; Seefarwaayimoonni immoo waaqota tolfamoo Seefarwaayim kanneen Adramelekii fi Anaamelek jedhamaniif ijoollee isaanii aarsaa godhanii ibiddaan guban. ³² Isaan WAAQAYYON waaqeffatan; garuu akka isaan iddoowwan sagadaa kanneen gaarran irraatti luboota ta'anii tajaajilaniif ofuma gidduudhaa namoota ni filatan. ³³ Isaan WAAQAYYON waaqeffatan; garuu akkuma bartee saboota keessaa fidaman sanaatti waaqota ofii isaanii tajaajilan.

³⁴ Isaan hamma har'aatti illee ittuma cichanii bartee isaanii kan qaraa sana keessa jiraatu. Isaan WAAQAYYON hin waaqeffatan yookaan labsii fi qajeelfama, seeraa fi ajaja WAAQAYYO sanyiiwwan Yaaqoob kan Israa'el jedhee moggaase sanaaf kennes duukaa hin bu'an. ³⁵ WAAQAYYO gaafa Israa'eloota wajjin kakuu galetti akkana jedhee isaan ajaje: "Isin Waaqa biraa tokko illee hin waaqeffatinaa yookaan hin sagadinaafi; isaan hin tajaajilinaa yookaan aarsaa isaaniif hin dhi'eessinaa. ³⁶ Garuu WAAQAYYO isin waaqeffachuu qabdan, isa humna jabaa fi irree diriirfameen Gibxii baasee isin fide sanaa dha. Isin isaaf sagaddanii aarsaa dhi'eessuufii qabdu. ³⁷ Isin yeroo hunda labsii fi qajeelfama, seeraa fi ajaja inni isinii barreesse sana of eeggannaadhaan eeguu qabdu. Waaqota biraa hin waaqeffatinaa. ³⁸ Kakuu ani isin wajjin gale sana hin irraanfatinnaa; waaqota biraa hin waaqeffatinaa. ³⁹ Qooda kanaa WAAQAYYO Waaqa keessan waaqeffadhaa; kan harka diina keessan hundaa keessaa isin baasu isumaa."

⁴⁰ Ta'us isaan ittuma cichanii waanuma qaraa sana hojjetan malee isa hin dhageenye. ⁴¹ Yeroo namoonni kunneen WAAQAYYON waaqeffachaa jiranitti illee isaan waaqota tolfamoo isaanii tajaajilaa turan. Hamma guyyaa har'aatti illee ijoolleen isaaniitti fi ijoolleen ijoollee isaanii ittuma fufanii akkuma abbootiin isaanii hojjetan sana hojjechaa jiru.

18

Hisqiyaa Mooticha Yihuudaa

18:2-4 kwf - 2Sn 29:1-2; 31:1

18:5-7 kwf - 2Sn 31:20-21

18:9-12 kwf - 2Mt 17:3-7

¹ Bara Hooshee'aa ilma Eelaa mooticha Israa'el keessa waggaa sadaffaatti Hisqiyaa ilmi Aahaaz mooticha Yihuudaa mootii ta'ee bulchuu jalqabe. ² Inni Yeroo mootii ta'etti nama waggaa digdamii shan ture; innis Yerusaalem keessa taa'ee waggaa digdamii sagal bulche. Maqaan haadha isaa Abiiyaa ture; isheenis intala Zakkaariyaa. ³ Innis akkuma Daawit abbaan isaa godhe sana fuula WAAQAYYOO duratti waan qajeelaa hojete. ⁴ Inni iddoowwan sagadaa kanneen gaarran irraa diige; dhagaawwan waaqeffannaa caccabsee siidaawwan Aasheeraa illee burkuteesse. Sababii Israa'eloonni hamma bara sanaatti ixaana aarsaafii turaniif inni fakkii bofaa kan Museen naasii irraa hojete sana illee ni caccabse. Fakkiin bofaa sun Nehushtaan jedhamee waamama ture.

⁵ Hisqiyaa WAAQAYYO Waaqa Israa'el amanate. Mootota Yihuudaa hunda keessaa namni akka isaa tokko iyyuu isa duraan yookaan isa duubaan hin turre. ⁶ Inni jabaatee WAAQAYYOTTI hiiqe malee isa duukaa bu'uu hin dhiisne; seera WAAQAYYO Museef kenne sanas ni eege. ⁷ WAAQAYYOS isa wajjin ture; inni waan hojjete hunda keessatti ni milkaa'e. Inni mootii Asooritti fincile malee isa hin tajaajille. ⁸ Inni gamoo eegumsaatii jalqabee hamma magaalaa dallaa jabaa qabuutti, hamma Gaazaattii fi daangaa isheetti Filisxeemota ni mo'ate.

⁹ Waggaa afuraffaa bara Hisqiyaa mootichaa keessa jechuunis waggaa torbaffaa bara Hooshee'aa ilma Eelaa mooticha Israa'el keessa Shalmaneseer mootichi Asoor Samaariyaatti duulee marsee ishee qabate. ¹⁰ Dhuma waggaa sadaffaatti Asooronni ishee fudhatan. Akkasiinis Samaariyaan waggaa ja'affaa bara mootummaa Hisqiyaa keessa, waggaa saglaffaa bara Hooshee'aa mooticha Israa'el keessa ni fudhatamte. ¹¹ Mootiin Asooris Israa'eloota booji'ee Asooritti geessee Halaa keessa, Goozaan keessa, Laga Haaboor biraa fi magaalawwan Midiyaan keessa ni qubachiise. ¹² Wanni kun sababii isaan WAAQAYYO Waaqa isaaniitiif ajajamu didanii kakuu isaa, ajaja Museen garbichi WAAQAYYOO isaaniif kenne hunda cabsaniif isaanitti dhufe. Isaan ajaja sana hin dhaggeeffanne yookaan hojii irra hin oolchine.

¹³ Bara mootummaa Hisqiyaa mootichaa keessa waggaa kudha afuraffaatti, Senaaheriib mootichi Asoor magaalawwan Yihuudaa kanneen dallaa jabaa qaban hunda lolee ni qabate. ¹⁴ Kanaafuu Hisqiyaa mootichi Yihuudaa, "Ani balleessaa hojjedheera. Biyya koo keessaa naa ba'i; ani waan ati na gaafattu kam iyyuu siifn kennaa" jedhee gara Laakkiishitti mooticha Asooritti ergaa ergate. Mootichi Asooris, "Meetii taalaantii dhibba sadii fi warqee taalaantii soddoma naa kenni" jedhee Hisqiyaa mooticha Yihuudaa ni gaafate. ¹⁵ Kanaafuu Hisqiyaa meetii mana qulqullummaa WAAQAYYOO keessattii fi kan mankuusaa masaraa mootummaa keessatti argamu hunda guuree kenneef.

¹⁶ Yeroo kanatti Hisqiyaa mootichi Yihuudaa warqee balbalaa fi dhaaba balbala mana qulqullummaa WAAQAYYOTTI uffisee ture irraa baasee mootii Asooriif kenne.

Senaaheriib Yerusaalemin Doorsise

18:13,17-37 kwf - Isa 36:1-22

18:17-35 kwf - 2Sn 32:9-19

¹⁷ Ergasii Mootichi Asoor ajajaa waraanaa isaa ol aanaa, ajajaa hangafaa fi ajajaa waraana isaa loltoota hedduu wajjin Laakkiishii gara Yerusaalemitti Hisqiyaa mootichatti ni erge. Isaanis Yerusaaleem dhufanii bo'oo haroo ol aanuu bira karaa lafa qotiisaa namicha wayyaa miicuutti geessu irra dhadhaabatan. ¹⁸ Isaan mooticha ni waamsifatan; Eliiyyaaqim ilmi Hilqiyaa bulchaan masaraa mootummaa, Shebnaa barreessaanii fi Yoo'aa ilmi Asaaf galmeessaan isaanitti gad ba'an.

¹⁹ Ajajaan waraanaa sunis akkana isaaniin jedhe; "Akkana jedhaa Hisqiyasitti himaa: "Mootiin guddaan, mootichi Asoor akkana jedha: Of amanachuu kee kana maal irratti hundeeffatte? ²⁰ Ati, "Ani tooftaa fi jabina waraanaa qaba" jetta; garuu dubbii faayidaa hin qabne dubbatta. Ati eenyun abdattee natti fincilta? ²¹ Kunoo ati Gibxin jechuunis ulee shambaqqoo caccabaa harka nama isatti irkatu kamii iyyuu waraane madeessu sana abdatteerta! Fara'oon mootichi Gibxis nama isa abdatu hundaaf akkasuma. ²² Yoo isin, "Nu WAAQAYYO Waaqa keenya abdanna" naan jettan, inni isuma Hisqiyaa iddoowwan sagadaa isaatii fi iddoowwan aarsaa isaa diigee Yihuudaa fi Yerusaalemiin, "Isin fuula iddoo aarsaa kan Yerusaaleem keessaa kana duratti waaqeffachuu qabdu" jedhe sana mitii?

²³ "'Amma kottuutii gooftaa koo mooticha Asoor wajjin dubbadhu; anis yoo ati namoota farda yaabban qopheeffachuu dandeesse fardeen kuma lama siifn kenna! ²⁴ Ati yoo gaariiwwanii fi abbootii fardaatiif jettee Gibxin abdatte iyyuu akkamiin qondaaltota gooftaa kootii keessaa ajajaa gad aanaa isaa illee fi irraa deebisuu dandeesa? ²⁵ Ati waan ani dubbii WAAQAYYOO malee iddoo kana lolee barbadeessuuf dhufe seetaa? WAAQAYYO mataan isaa akka ani biyya kanatti duulee ishee barbadeessu natti dubbateera.'"

²⁶ Kana irratti Eliiyyaaqim ilma Hilqiyaa, Shebnaa fi Yoo'aa ajajaa waraanaa sanaan, "Maaloo waan nu dhageenyuuf afaan warra Araamaayikiitiin garboota keetti dubbadhu. Utuma namoonni dallaa irra jiran dhaga'anii afaan Ibrootaatiin nutti hin dubbatin" jedhan.

²⁷ Ajajaan waraanaa sun garuu akkana jedhee deebise; "Namni gooftaan koo akka ani waan kana itti himuuf itti na erge gooftaa keessanii fi isin qofaa? Namoota dallaa irra

tataa'an warra akkuma keessan udaan ofii isaanii nyaatanii fincaan ofii isaanii dhuguu qabaniifis mitii?"

²⁸ Ergasii ajajaan waraanaa sun ol ka'ee afaan Ibrootaatiin akkana jedhe; "Dubbii mooticha guddaa, dubbii mootii Asoor dhaga'aa! ²⁹ Mootichi akkana jedha: Hisqiyaa isin hin gowwoomsin. Inni harka kootii isin baasuu hin danda'u. ³⁰ Hisqiyaa, 'WAAQAYYO dhugumaan nu baasa; magaalaa kunis dabarfamtee harka mooticha Asooritti hin kennamtu' jechuudhaan akka isin WAAQAYYON amanattaniif isin hin sossobin.

³¹ "Hisqiyaa isin hin dhaggeeffatinaa. Mootiin Asoor akkana jedha: Ana wajjin walii galtee naga dhaabbadhaatii natti gad ba'aa. Ergasii tokkoon tokkoon keessan muka wayiniitii fi muka harbuu keessan irraa ni nyaattu; boolla bishaan keessanii keessaas ni dhugdu; ³² kunis hamma ani dhufee gara biyya akkuma biyya keessanii jirtuu, gara biyya midhaanii fi daadhii wayinii haaraatti, gara biyya buddeena fi iddoo dhaabaa wayiniitii, gara biyya muka ejersaatii fi dammaatti isin geessutti ta'a. Isin jireenya filadhaa malee du'a hin filatinaa!

"Waan inni, 'WAAQAYYO nu baraara' jedhee isin dogoggorsuuf Hisqiyaa isin hin dhaga'inaa. ³³ Waaqni saboota kamii iyyuu takkumaa harka mooticha Asoor keessaa biyya ofii baafatee beekaa? ³⁴ Waaqonni Hamaatii fi waaqonni Arfaad eessa jiru? Waaqonni Seefarwaayim, waaqonni Heenaatii fi Iwaa eessa jiru? Isaan harka koo keessaa Samaariyaa baasaniiruu? ³⁵ Waaqota biyyoota kanneenii hunda keessaa kamtu harka koo keessaa biyya isaa baasuu danda'e? Yoos WAAQAYYO akkamiin harka koo keessaa Yerusaalemin baasuu danda'a ree?"

³⁶ Namoonni garuu sababii mootichi, "Deebii hin kenninaafii" jedhee ajajeef inuma cal'isan malee deebii tokko iyyuu hin kennine.

³⁷ Kana irratti Eliiyaaqiim ilmi Hilqiyaa bulchaan masaraa mootummaa, Shebnaa barreessanii fi Yoo'aa ilmi Aasaaf galmeessaan uffata isaanii tatarsaanii gara Hisqiyaa dhaqanii waan ajajaan waraanaa sun jedhe itti ni himan.

19

Furamuun Yerusaalem Duraan Durfamee Himame

19:1-13 kwf - Isa 37:1-13

¹ Hisqiyaa mootichi yommuu waan kana dhaga'etti uffata isaa tarsaasee wayyaa gaddaas uffatee mana qulqullummaa WAAQAYYOO seene. ² Innis Eliiyaaqiim bulchaa masaraa mootummaa, Shebnaa barreessaa fi luboota dura bu'oota hundi isaanii wayyaa gaddaa uffatan Isaayyaas raajicha ilma Amoonsanatti erge. ³ Isaanis akkana jedhanii isatti himan; "Hisqiyaa akkana jedha; Guyyaan kun akkuma yeroo daa'imni tokko dhalachuu ga'ee garuu dubartiin humna ittiin ciniinsifattee deessu dhabduutti guyyaa lubbamuu, kan dheekkamfaatii fi kan salphinaa ti. ⁴ WAAQAYYO Waaqni kee dubbii ajajaa waraanaa kan gooftaan isaa mootichi Asoor akka inni Waaqa jiraataatti qoosuuf erge sanaa hunda dhaga'ee dubbii WAAQAYYO Waaqni kee dhaga'e sanaaf jedhee isatti dheekkama ta'a. Kanaafuu ati hambaawwan hamma ammaatti jiraniif kadhadhu."

⁵ Yommuu gondaaltonni Hisqiyaa mootichaa gara Isaayyaas dhufanitti, ⁶ Isaayyaas akkana isaanii jedhe; "Akkana jedhaa gooftaa keessanitti himaa; 'WAAQAYYO akkana jedha: Ati waan dhageesse jechuunis dubbii garboonni mootii Asoor ittiin na arrabsan sana hin sodaatin. ⁷ Dhaggeeffadhaa! Ani akka inni oduu wayii dhaga'ee gara biyya ofii isaatti deebi'uuf hafuura tokko isa keessa nan kaa'a; achittis akka inni goraadeedhaan ajjeefamu nan godha.'"

⁸ Ajajaan waraanaas yommuu akka mootiin Asoor Laakkiishii ba'ee deeme dhaga'etti, duubatti deebi'ee utuu mootichi Libnaa lolaa jiruu argate.

⁹ Senaaheriibis akka Tiirhaaq mootichi Itoophiyaa sun isa loluuf dhufaa jiru dhaga'ee. Kanaafuu inni akkana jedhee amma illee Hisqiyaa isatti ergamoota erge; ¹⁰ "Hisqiyaa mooticha Yihuudaatiin akkana jedhaa: Waaqni ati abdattu sun, 'Yerusaalem dabarfamtee harka mootii Asooritti hin kennamtu' jedhee si hin gowwoomsin. ¹¹ Ati waan mootonni Asoor guutummaan guutuutti isaan balleessuudhaan biyyoota hunda godhan dhageesseerta. Ati immoo ni haftaa ree? ¹² Waaqonni saboota abbootiin koo barbadeessan sanaa jechuunis waaqonni Goozaan, waaqonni Kaaraan, waaqonni Rezefii fi waaqonni namoota Eden kanneen Telaasaar keessa turan sanaa isaan oolchaniiruu? ¹³ Mootiin Hamaati, mootiin Arfaad, mootiin magaalaa Seefarwaayim yookaan mootiin Heena yookaan mootiin Iwaa eessa jira?"

Kadhaa Hisqiyaa

19:14-19 kwf - Isa 37:14-20

¹⁴ Hisqiyaas ergamoota sana harkaa xalayaa fuudhee dubbifate. Ergasiis gara mana qulqullummaa WAAQAYYOOTTI ol ba'ee xalayaa sana fuula WAAQAYYOO duratti diriirse. ¹⁵ Hisqiyaas akkana jedhee WAAQAYYON kadhate; "Yaa WAAQAYYO, Waaqa Israa'el, kan kiirubeel gidduu teessoo irra jirtu, si qofatu mootummoota lafaa hunda irratti Waaqa. Ati samii fi lafa uumteerta. ¹⁶ Yaa WAAQAYYO, gurra kee as qabiitii dhaga'i; yaa WAAQAYYO ija kees banadhuu ilaali; dubbii Senaaheriib kan inni Waaqa jiraataa arrabsuuf erge kana dhaggeeffadhu.

¹⁷ "Yaa WAAQAYYO mootonni Asoor saboota kanaa fi biyyoota isaanii balleessuun dhugaa dha. ¹⁸ Isaan waaqota jaraa ibiddatti naqanii barbadeessaniiru; waaqonni sun mukaa fi dhagaa harka namaatiin soofaman turan malee waaqota hin turreetii. ¹⁹ Kanaafuu yaa WAAQAYYO Waaqa keenya, akka mootummoonni lafaa hundinuu yaa WAAQAYYO, akka ati gofti Waaqa taate beekaniif harka isaatii nu baasi."

Kufaatii Senaaheriib

19:20-37 kwf - Isa 37:21-38

19:35-37 kwf - 2Sn 32:20-21

²⁰ Sana booddee Isaayyaas ilmi Amoos akkana jedhee Hisqiyaasitti ergaa erge: "WAAQAYYO Waaqni Israa'el akkana jedha: Ani kadhaa kee kan ati waa'ee Senaaheriib mooticha Asoor kadhate sana dhaga'eera. ²¹ Dubbiin WAAQAYYO isaan mormuudhaan dubbate kunoo kanaa dha:

"Intalli Xiyoon Durbi Qulqullitiin
si tuffattee sitti qoosti.

Intalli Yerusaalem yeroo ati baqattutti
mataa ishee sitti raafti.

²² Kan ati itti qoostee arrabsite sun eenyu?
Ati eenyutti sagalee kee ol fudhattee

of tuulummaadhaan ija ol qabatte?
Qulqullichuma Israa'el sanatti mitii!

²³ Ati karaa ergamoota keetiitiin
Goofaatti qoosteerta.

Ati akkanas jetteerta;

"Ani gaariiwwan koo hedduudhaan
fixee tulluuwwaniitti,

fixee Libaanoon kan akka malee ol dheeratuttis ol ba'eera.

Ani birbirsawwan isaa kanneen akka malee dhedheeroo,
gaattiraawwan isaa filatamoo sanas ciccireera.

Ani iddoowwan isaa kanneen akka malee ol fagoo,
bosonoota isaa keessaa, mimmidhagoo qaqqabeera.

²⁴ Ani biyya ormaatti boolla bishaanii qotadhee
achitti bishaan dhugeera.

Ani faana miilla kootiin

lageen biyya Gibxi hunda gogseera."

²⁵ "Ati waan kana hin dhageenyee?

Bara dheeraan dura anatu waan kana hojjete.

Ani bara durii keessa waan kana nan karoofadhe;
amma immoo hojii irra oolfadheera;

kunis akka ati magaalaawwan

dallaa jabaa qaban diigdee tuullaa dhagaa geeddartuu dha.

²⁶ Namoonni isaanii humna dhabanii

abdi kutataniis qaana'an.

Isaan akkuma biqiltuu diidaa,

akkuma biqiltuu kichuu tokkoo,

akkuma marga mana gubbaatti biqilu

kan utuu hin guddatin gubatee ti.

²⁷ "Ani garuu lafa ati jirtu,

yoom akka dhuftuu fi yoom akka deemtu,

akka ati akka malee natti aartu illee nan beeka.

²⁸ Waan ati akka malee natti aartee guggubatee
of tuulummaan kee gurra koo ga'eef,

ani hokkoo koo funyaan kee keessa,

luugama koo afaan kee keessa kaa'een
akka ati karuma dhufte sana
deebitu sin godha.'

²⁹ "Yaa Hisqiyaa kun mallattoo siif ta'a:

"Isin waggaa kana waan ofumaan biqilu,
waggaa lammaffaatti immoo waanuma isa irraa latu nyaattu.

Waggaa sadaffaatti garuu facaafadhaa galfadhaa;
muka wayiniis dhaabbadhaatii ija isaa nyaadhaa.

³⁰ Ammas hambaan mootummaa Yihuudaa tokko
jalaan hidda baafatee gubbaan immoo ija naqata.

³¹ Yerusaaalem keessaa hambaan tokko,

Tulluu Xiyooniitii immoo gareen warra badiisa jalaa ba'e tokkoo ni dhufa.
Hinaaffaan WAAQAYYOO Waan Hunda Danda'uu waan kana ni raawwata:

³² "Kanaafuu WAAQAYYOO waa'ee mooticha Asoor akkana jedha:

"Inni magaalaa kana hin seenu

yookaan xiyya tokko illee asitti hin darbatu.

Inni gaachana qabatee fuula isaa duratti hin dhi'aatu

yookaan tuullaa biyyoo itti hin marsu.

³³ Inni karuma dhufe sanaan ni deebi'a;

magaalaa kanas hin seenu,

jedha WAAQAYYOO.

³⁴ Anis sababii ofii kootii fi sababii garbicha koo Daawitiif jedhee,

magaalaa kana nan eega; nan oolchas.' "

³⁵ Halkanuma sana ergamaan WAAQAYYOO gad ba'ee qubata warra Asoor keessatti nama kuma dhibba tokkoo fi saddeettamii shan fixe. Yommuu namoonni guyyaa itti aanu ganama bariin ka'anitti kunoo reeffi namaa lafa guutee ture! ³⁶ Kanaafuu Senaaheriib mootichi Asoor qubata sana keessaa ba'ee baqate; Nanawweetti deebi'ees achi jiraate.

³⁷ Gaaf tokko utuu inni mana sagadaa waaqa isaa Nisrook jedhamuu keessatti waaqeffachaa jiruu ilmaan isaa Adramelekii fi Sharezer goraadeedhaan isa ajjeesani biyya Araaraatitti baqatan. Ilmi isaa Eesarhadoonis iddoo isaa bu'ee mootii ta'e.

20

Dhukkuba Hisqiyaa

20:1-11 kwf - 2Sn 32:24-26; Isa 38:1-8

¹ Bara sana keessa Hisqiyaa dhukkubsatee du'uu ga'ee ture. Isaayyaas ilmi Amoos raajichi gara isaa dhaqee, "WAAQAYYOO akkana jedha; "Mana kee tottofadhu; ati ni duuta malee hin fayyituutii" jedheen.

² Hisqiyaa is fuula isaa gara keenyan manaatti garagalatee akkana jedhee WAAQAYY-
OON kadhate; ³ "Yaa WAAQAYYOO, akka ani amanamummaa fi garaa tokkoon fuula kee dura jiraadhee waan fuula kee duratti gaarii ta'es hojjedhe yaadadhu." Hisqiyaa is hiqqifatee ni boo'e.

⁴ Utuu Isaayyaas oobdii gara gidduu jiru sana keessaa hin ba'in dubbiin WAAQAYYOO akkana jedhee gara isaa dhufe; ⁵ "Deebi'ii dhaqii akkana jedhii Hisqiyaa hoogganaa saba kootiitti himi; 'WAAQAYYOO Waaqni abbaa kee Daawit akkana jedha: Ani kadhannaa kee dhaga'eera; imimmaan kees argeera; ani sin fayyisa. Ati ammaa jalqabdee guyyaa sadaffaatti gara mana qulqullummaa WAAQAYYOOTTI ol baata. ⁶ Ani umurii kee irratti waggaa kudha shan siifan dabala. Ani si'ii fi magaalaa kana harka mooticha Asooriitii nan baasa. Ani sababii kootii fi sababii garbicha koo Daawitiif jedhee magaalaa kana nan eega.' "

⁷ Kana irratti Isaayyaas, "Maxinoo harbuu tolchaa" jedhe. Isaanis qopheessanii dhullaa isaa irra kaa'aniif; innis ni fayye.

⁸ Hisqiyaa is, "Akka WAAQAYYOO na fayyisuu fi akka ani guyyaa sadaffaatti gara mana qulqullummaa WAAQAYYOOTTI ol ba'uuf maaltu mallattoo ta'a?" jedhee Isaayyaas gaafate.

⁹ Isaayyaas akkana jedhee deebise; "Akka WAAQAYYOO waan waadaa gale sana hojjetuuf mallattoon WAAQAYYOO siif kennu kunoo kanaa dha; gaaddidduun tokko tarkaanfii kudhan gara fuula duraatti haa deemuu moo yookaan tarkaanfii kudhan gara dugda duubaatti haa deebi'uu?"

¹⁰ Hisqiyaas immoo, “Tarkaanfii kudhan gara fuula duraatti deemuun gaaddidduu tokkoof waan salphaa dha; qooda kanaa akka gaaddidduun sun tarkaanfii kudhan gara dugda duubaatti deebi’u godhi” jedhe.

¹¹ Kana irratti Isaayyaas raajichi iyeye WAAQAYYON ni kadhate; WAAQAYYOS akka gaaddidduun sun tarkaanfii kudhan gulantaa Aahaaz irra gara fuula duraatti deeme ture sana irraa tarkaanfii kudhan gara dugda duubaatti deebi’u godhe.

Ergamoota Baabilon Dhufan

20:12-19 kwf - Isa 39:1-8

20:20-21 kwf - 2Sn 32:32-33

¹² Yeroo sanatti Meroodak Baladaan ilmi Baladaan mootiin Baabilon sababii akka Hisqiyaas dhukkubsate dhaga’eef xalayootaa fi kennaa ergeef. ¹³ Hisqiyaasis ergamoota sana simatee waan mankuusa isaa keessa ture hunda jechuunis meeti, warqee, urgooftuu fi zayitii qulqulluu akkasumas kuusaa mi’a lolaa isaa fi waan mankuusa isaa keessatti argamu hunda isaanitti argisiise. Wannii Hisqiyaas masaraa mootummaa isaa keessaa yookaan mootummaa isaa hunda keessaa isaanitti hin argisiisin tokko iyyuu hin turre.

¹⁴ Kana irratti Isaayyaas raajichi gara Hisqiyaas mootichaa dhaqee, “Nameonni sun maal jedhan? Isaan eessaa dhufan?” jedhee gaafate.

Hisqiyaasis, “Isaan Baabilonii biyya fagoodhaa dhufan” jedhee deebise.

¹⁵ Raajichi, “Jarri masaraa mootummaa keetii keessatti maal argan?” jedhee gaafate.

Hisqiyaas immoo, “Isaan waan masaraa mootummaa koo keessa jiru hunda argan. Wannii ani mankuusa koo keessaa isaanitti hin argisiisin tokko iyyuu hin jiru” jedheen.

¹⁶ Isaayyaasis kana irratti Hisqiyaasiin akkana jedhe; “Dubbi WAAQAYYOO dhaga’i: ¹⁷ Yeroon itti wannii masaraa mootummaa keetii keessa jiru hundii fi wannii baabootiin kee hamma har’aatti kuusan hundinuu saamamee gara Baabilonitti geeffamu tokko dhugumaan ni dhufa. Wannii tokko iyyuu hin hafu, jedha WAAQAYYOO. ¹⁸ Sanyii kee keessaa namoonni tokko tokko, foonii fi dhiigni kee kanneen siif dhalatan booji’amanii masaraa mootummaa mooticha Baabilon keessatti xu’aashiiwwan ta’u.”

¹⁹ Hisqiyaasis, “Dubbi WAAQAYYOO kan ati dubbatte kun gaarii dha” jedhee deebise. Inni, “Bara jireenya koo keessa nagaa fi tasgabbiin hin jiraatuu?” jedhee yaadee tureetii.

²⁰ Wantoonni bara mootummaa Hisqiyaas keessa hojjetaman kanneen biraa, jabinni isaa hundii fi akki inni itti haroo fi ujummoo ittiin bishaan harkisanii gara magalaatti fidan hojjetes kitaaba seenaa mootota Yihuudaa keessatti barreeffamaniiru mitii?

²¹ Hisqiyaasis abbootii isaa wajjin boqote. Ilmi isaa Minaaseen iddoo isaa bu’ee mootii ta’e.

21

Minaasee Mooticha Yihuudaa

21:1-10 kwf - 2Sn 33:1-10

21:17-18 kwf - 2Sn 33:18-20

¹ Minaaseen yeroo mootii ta’etti nama waggaa kudha lama ture; innis Yersaaleem keessa taa’ee waggaa shantamii shan bulche. Maqaan haadha isaa Hefziibaa ture.

² Innis waan jibbisiisaa saboota WAAQAYYOO fuula Israa’elootaa duraa ari’ee baase sanaa duukaa bu’uudhaan fuula WAAQAYYOO duratti waan hamaa hojjetee. ³ Inni iddoowwan sagadaa kanneen abbaan isaa Hisqiyaas diigee ture sana illee deebise ni ijaare; akkasumas akkuma Ahaab mootichi Israa’el godhe sana Ba’aaliif iddoowwan aarsaa tolchee siidaa Aasheeraas ni dhaabe. Raayyaawwan samii hundaafis ni sagade; isaan waaqeffates. ⁴ Innis mana qulqullummaa WAAQAYYOO kan WAAQAYYOO, “Ani Maqaa koo Yersaaleem keessa nan dhaaba” jedhee waa’ee isaa dubbate sana keessatti iddoowwan aarsaa tolche. ⁵ Oobdiwwan mana qulqullummaa WAAQAYYOO lamaanuu keessattis raayyaawwan samii hundaaf iddoowwan aarsaa ni tolche. ⁶ Inni ilma ofii isaa ibiddaan aarsaa godhee dhi’eese; tolcha hojjetee, milkii ilaallatee, ilaaltotaa fi eker dubbistoota gorsa gaafate. Inni fuula WAAQAYYOO duratti hammina guddaa ni hojjetee akkasiin dheekkamsaaf isa kakaase.

⁷ Innis fakkii Asheeraa kan soofee hojjetee sana fuudhee mana qulqullummaa kan WAAQAYYOO akkana jedhee waa’ee isaa Daawitii fi ilma isaa Solomoonii dubbatee ture sana keessa kaa’e; “Mana qulqullummaa kana keessaa fi Yersaaleem ishee ani gosoota Israa’el hunda keessaa filadhe sana keessa Maqaa koo bara baraan nan dhaaba. ⁸ Yoo isaan waan ani isaan ajaje hunda hojjetanii Seera garbichi koo Museen isaaniif kenne guutuu eegan, ani si’achi akka miilli Israa’elootaa biyya ani abbootii isaaniitiif kenne keessaa ba’ee jooru hin godhu.” ⁹ Nameonni garuu hin dhaggeeffanne. Minaaseen

karaa irraa isaan jal'ise; kanaafuu isaan saboota WAAQAYYO fuula Israa'elootaa duraa balleesse sana caalaa hammina hojjetan.

¹⁰ WAAQAYYO karaa garboota isaa raajotaatiin akkana jedhee dubbate; ¹¹ “Minaaseen mootichi Yihuudaa cubbuu jibbisiisaa kanneen hojjeteeera. Innis Amoorota isaan dura jiraatan caalaa waan hamaa hojjetee; waaqota tolfamoo isaatiinis Yihuudaa cubbuu hojjechiise. ¹² Kanaafuu WAAQAYYO Waaqni Israa'el akkana jedha: Ani waan hamaa nama isa dhaga'u hunda suukaneessu tokko Yerusaaleemii fi Yihuudaatti nan fida. ¹³ Ani funyoo Samaariyaatii fi tumbii mana Ahaab sana Yerusaaleem irratti nan diriirsa. Akkuma namni caabii haxaa'ee gad gombisutti ani Yerusaaleemin haxaa'ee nan gombisa. ¹⁴ Ani hamaa dhaala koo dhiisee harka diinota isaaniitti dabarsee nan kenna. Isaanis diinota isaanii hundaan ni saamamu; ni booji'amus. ¹⁵ Isaan gaafa abbootiin isaanii Gibxii ba'anii jalqabee hamma har'aatti fuula koo duratti waan hamaa hojjechuudhaan dheekkamsaaf na kakaasaniiruutii.”

¹⁶ Kana caalaas Minaaseen akka warri Yihuudaa fuula WAAQAYYO duratti waan hamaa hojjetan godhee cubbuu isaan hojjechiisuu isaa irra iyyuu dhiiga namoota balleessaa hin qabnee baay'ee dhangalaasee akka Yerusaaleem daangaa tokkoo hamaa daangaa kaaniitti dhiigaan guutamtu godheera.

¹⁷ Wantoonni bara mootummaa Minaasee keessa hojjetaman kanneen biraa, wanni inni hojjetee hundi, cubbuu inni hojjetee dabalatee seenaa mootota Yihuudaa keessatti barreeffamaniiru mitii? ¹⁸ Minaaseen abbootii isaa wajjin boqotee iddoo biqiltuu masaraa mootummaa isaa keessatti, iddoo biqiltuu Uzaa keessatti ni awwaalame. Ilmi isaa Aamoonis iddoo isaa bu'ee mootii ta'e.

Aamoon Mooticha Yihuudaa

21:19-24 kwf - 2Sn 33:21-25

¹⁹ Aamoon yeroo mootii ta'etti umuriin isaa waggaa digdamii lama ture; innis Yerusaaleem keessa taa'ee waggaa lama bulche. Maqaan haadha isaa Meshulemet ture; isheenis intala Haarus nama biyya Yoxbaa turte. ²⁰ Innis akkuma abbaan isaa Minaaseen hojjetee ture sana fuula WAAQAYYO duratti waan hamaa hojjetee. ²¹ Innis karaa abbaa isaa hunda irra deeme; waaqota tolfamoo abbaan isaa waaqeffate illee waaqeffatee isaaniifis sagade. ²² Inni WAAQAYYO Waaqa abbootii isaa dhiise; karaa WAAQAYYO irras hin deemne.

²³ Qondaaltonni Aamoon isatti mari'atanii masaruma mootummaa isaa keessatti mooticha ni ajjeesan. ²⁴ Kana irratti namoonni biyya sanaa warra Aamoon mootichatti malatan hunda fixanii ilma isaa Yosiyaasin immoo iddoo isaa mootii godhatan.

²⁵ Wanni bara mootummaa Aamoon keessa hojjetame kan biraa, wanni inni hojjetes kitaaba seenaa mootota Yihuudaa keessatti barreeffameera mitii? ²⁶ Innis awwaala isaa kan iddoo biqiltuu Uzaa keessatti ni awwaalame. Ilmi isaa Yosiyaasis iddoo isaa bu'ee mootii ta'e.

22

Kitaabni Seeraa Argame

22:1-20 kwf - 2Sn 34:1-2,8-28

¹ Yosiyaas yeroo mootii ta'etti nama waggaa saddeetii ture; Yerusaaleem keessa taa'ees waggaa soddomii tokko bulche. Maqaan haadha isaa Yediidaa dha; isheenis intala Adaayaa nama biyya Boozqaatii ti. ² Inni fuula WAAQAYYO duratti waan qajeelaa ni hojjetee; utuu mirgatti yookaan bitaatti hin gorinis karaa abbaa isaa Daawit irra deeme.

³ Yosiyaas mootichi bara mootummaa isaa keessa waggaa kudha saddeettaffaatti akkana jedhee Shaafaan ilma Azaliyaa ilma Meshulaam barreessaa sana gara mana qulqullummaa WAAQAYYOOTTI erge: ⁴ “Gara Hilqiyaa lubicha ol aanaatti ol ba'iitii akka inni maallaqa gara mana qulqullummaa WAAQAYYOOTTI fidame kan warri balbala eegan namoota irraa waliitti qaban sana lakkaa'u godhi. ⁵ Maallaqni kunis namoota akka hojji mana qulqullummaa to'ataniif muudamanitti imaanaa haa kennamu. Namoonni kunneen immoo warra mana qulqullummaa WAAQAYYO haaromsaniif jechuunis, ⁶ warra muka soofaniif, warra mana ijaaranii fi warra dhagaa soofaniif haa kaffalan. Akkasumas mana qulqullummaa haaromsuuf mukaa fi dhagaa soofame ittiin haa bitan. ⁷ Isaan garuu sababii amanamummaadhaan hojjetaniif, maallaqa imaanaa isaanitti kenname sana to'achuun hin barbaachisu.”

⁸ Hilqiyaa lubichi ol aanaan sunis, Shaafaan barreessaa sanaan, “Ani mana qulqullummaa WAAQAYYO keessatti Kitaaba Seeraa argeen jira” jedhe. Kitaabichas Shaafaanitti kenne; Shaafaan immoo kitaaba sana ni dubbise. ⁹ Ergasiis Shaafaan gara mootichaa dhaqee, “Qondaaltonni kee maallaqa mana qulqullummaa WAAQAYYO

keessa ture baasanii hojjettootaa fi namoota hojii mana qulqullummaa to'atanitti ilmaanaa kennaniiru" jedhee hime. ¹⁰ Shaafaan barreessaan sun, "Hilqiyaa lubichi kitaaba tokko natti kenneera" jedhee mootichatti hime. Shaafaanis fuula mootichaa duratti kitaaba sana dubbise.

¹¹ Mootichis dubbii Kitaaba Seeraa sana dhageenyaan uffata isaa ni tarsaase. ¹² Innis ajaja kana Hilqiyaa lubichatti, Ahiiqaam ilma Shaafaanitti, Akboor ilma Miikaayaatti, Shaafaan barreessichaa fi Asaayaa tajaajilaa mootichaatti ni kenne; ¹³ "Dhaqaatii waa'ee waan kitaaba argame kana keessatti barreeffamee anaaf, sabaa fi Yihuudaa hundaaf WAAQAYYON gaafadhaa. Sababii warri nuun duraa dubbii kitaabaa kanaatiif hin ajajamiif dheekkamsi WAAQAYYOO guddaan nutti boba'eera; isaan akka waan waa'ee keenya barreeffame sana hundaatti hin jiraanneetii."

¹⁴ Hilqiyaa lubichi, Ahiiqaam, Akboor, Shaafaanii fi Asaayaan Huldaanaa raajittii gaafachuu dhagan. Huldaanaan kun niitii Shaluun ilma Tiqwaa, ilma Harhaas kan eegduu uffataa ture sanaa ti. Isheenis Yerusaalem keessa Aanaa Lammaffaa keessa jiraatti turte.

¹⁵ Isheenis akkana isaaniin jette; "WAAQAYYO Waaqni Israa'el akkana jedha: Namicha natti isin erge sanatti akkana jedhaa himaa. ¹⁶ 'WAAQAYYO akkana jedha: Ani akkuma waan kitaaba mootichi Yihuudaa dubbise sana keessatti barreeffame hundaatti iddoo kanaa fi saba isaatti badiisa nan fida. ¹⁷ Sababii isaan na dhiisanii waaqota biraatiif ixaana aarsuudhaan waaqota tolfamoo harki isaanii tolche hundaan dheekkamsaaf na kakaasaniif, dheekkamsi koo iddoo kana irratti ni boba'a; hin dhaamus.' ¹⁸ Mootii Yihuudaa kan akka isin WAAQAYYON gaafataniif isin erge sanatti akkana jedhaatiif himaa; 'Waa'ee dubbii ati dhageesse sanaa, WAAQAYYO Waaqni Israa'el akkana jedha; ¹⁹ "Sababii ati yeroo waan ani waa'ee iddoo kanaatii fi waa'ee saba isaa akka isaan abaaramanii barbadeeffaman waan hamaa dubbadhe dhageessetti garaan kee tuqamee fuula WAAQAYYOO duratti gad of qabdeef, sababii uffata kee tarsaaftee fuula koo duratti boosseef, ani si dhaga'eera" jedha WAAQAYYO. ²⁰ Kanaafuu ani abbootii kee biratti walittin si qaba; atis nagumaan awwaalamta. Waan hamaa ani iddoo kana irratti fiduuf jiru hunda iji kee hin argu.'"

Isaanis deebii ishee fudhatanii gara mootichaatti deebi'an.

23

Yosiyaas Kakuu Haaromsuu Isaa

23:1-3 kwf - 2Sn 34:29-32

23:4-20 kwi - 2Sn 34:3-7,33

23:21-23 kwf - 2Sn 35:1,18-19

23:28-30 kwf - 2Sn 35:20-36:1

¹ Ergasiis mootichi maanguddoota Yihuudaa fi Yerusaalem hunda walitti ni waame. ² Innis namoota Yihuudaa, jiraattota Yerusaalem, lubootaa fi raajota wajjin jechuunis nama xinnaa fi guddaa hunda wajjin gara mana qulqullummaa WAAQAYYOOTII ol ba'e. Dubbii Kitaaba Kakuu kan mana qulqullummaa WAAQAYYOO keessatti argame sanaa hundas akka isaan dhaga'anitti dubbiseef. ³ Mootichis utubaa bira dhaabatee akka WAAQAYYON duukaa bu'u, akka garaa isaa guutuu fi lubbuu isaa guutuudhaan ajaja isaa, dambiiwwan isaatii fi labsiwwan isaa eegee akkasiin dubbiiwwan kakuu kanneen kitaaba kana keessatti barreeffaman hojii irra oolchu fuula WAAQAYYOO duratti kakuu ni haaromse; ergasiis sabni hundi kakuu ni haaromse.

⁴ Mootichis akka isaan mi'oota Ba'aaliif, Asheeraadhaa fi raayyaawwan samiitiif hojjetaman hunda mana qulqullummaa WAAQAYYOO keessaa baasaniif Hilqiyaa lubicha ol aanaa, luboota sadarkaan isatti aananii fi eegdota balbalaa ajaje. Innis mi'oota sana Yerusaalem keessaa baasee dirree Sulula Qeedroon irratti gube; daaraa isaas fuudhee Beet'eelitti geesse. ⁵ Luboota waaqota tolfamoo kanneen akka isaan iddoowwan sagadaa kanneen magaalawwan Yihuudaatii fi naannoo Yerusaalem kanneen gaarran irraatiif ixaana aarsaniif mootonni Yihuudaa muudan sana jechuunis warra Ba'aaliif, aduu fi ji'aaf, tuuta urjiitii fi raayyaawwan samii hundaaf ixaana aarsaa turanis ni barbadeesse. ⁶ Siidaa Aasheeraas mana qulqullummaa WAAQAYYOOTII fuudhee Yerusaalem keessaa baasee Sulula Qeedroonitti geessee achitti ni gube. Isas daakee bulleessee daaraa isaa awwaala namootaa irratti firfirse. ⁷ Innis mana dhiirota mana sagadaa keessatti sagaagalani kan mana qulqullummaa WAAQAYYOO keessa jiru, iddoo itti dubartoonni Asheeraadhaaf golgaa hojjetan sana ni diige.

⁸ Yosiyaasis luboota hunda magaalawwan Yihuudaatii ni fide; innis iddoowwan sagadaa kanneen Gebaadhaa hamma Bersheebaatti turan kanneen luboonni ixaana

itti aarsaa turan sana ni xureesse. Akkasumas galmawwan waqeffannaa karrawwan cinaa kanneen balbala Karra Iyyaasuu bulchaa magaalaa sanaa dura gama bitaa magaalattiin turan sana ni diige. ⁹ Luboonni iddoowwan sagadaa kunneen yoo iddoo aarsaa WAAQAYYOO kan Yersaalem keessaa irra tajaajiluu baatan illee isaan luboota akka isaanii wajjin Maxinoo nyaatan ture.

¹⁰ Innis akka namni tokko iyyuu ilma isaa yookaan intala isaa aarsaa godhee ibiddaan Moolekiif hin dhi'eessineef Toofeti kan Sulula Ben Hinoom keessatti argamu sana ni xureesse. ¹¹ Akkasumas fardeen mootonni Yihuudaa aduudhaaf kennan sana balbala mana qulqullummaa WAAQAYYOTTI geessu irraa fuudhee ni balleesse. Fardeen sun oobdii kutaa mana Naataan-Meelek qondaaltichaa biraa keessa turan. Ergasiis Yosiyaas gaariwwan aduu sana ibiddaan ni gube.

¹² Mootichis iddoowwan aarsaa mootonni Yihuudaa bantii manaa irra, kutaa mana Aahaaz kan ol aanu bira dhaabanii fi iddoowwan aarsaa Minaaseen mana qulqullummaa WAAQAYYOO keessa oobdiwwan lamaan keessa dhaabe sana ni buqqise. Iddoowwan aarsaa sanas achii fuudhee ni caccabsee, caccabaa isaanii Sulula Qeedroon keessatti ni gate. ¹³ Akkasumas mootichi iddoowwan sagadaa kanneen gama ba'a Yersaaleemitti karaa kibba Gaara Faalamuutiin turan kanneen Solomoon mootichi Israa'el Ashtooteti waqittii xurooftuu Siidoonotaa, Kemoosh waqicha xuraa'aa Mo'aabii fi Moolek waqicha xuraa'aa ijoollee Amooniitiif hojjete sana ni xureesse. ¹⁴ Yosiyaas soodduwwan dhagaa caccabsee siidaawwan Aasheeraas diigee iddoo sana lafee namaatiin guute.

¹⁵ Akkasumas iddoo aarsaa Beet'eel keessa ture sanaa fi iddoo sagadaa kan Yerobi'aam ilmi Nebaat inni Israa'elin cubbuu hojjechiise sun ijaare iddoo aarsaa sanaa fi iddoo sagadaa ni diige. Iddoo sagadaa sanas caccabsee, daakee bullesse; siidaa Aasheeraas ni gube. ¹⁶ Yosiyaasis of irra garagalee awwaalawwan tulluu irra jiran achitti arge; nama ergees awwaalawwan sana keessaa lafeewwan fichisiisee akkuma dubbii WAAQAYYOO kan namni Waaqaa inni duraan dursee waan kana dubbate sun labsetti iddoo aarsaa irratti gubee isa xureesse.

¹⁷ Mootichi, "Dhagaan awwaalaa kan ani arguutti jiru kun maal?" jedhee ni gaafate. Namoonni magaalaa sanaa immoo, "Inni awwaala nama Waaqaa kan Yihuudaadhaa dhufee waanuma ati iddoo aarsaa Beet'eel goote kana duraan dursee labse sanaa ti" jedhan.

¹⁸ Innis, "Isa dhiisaa; namni tokko iyyuu lafee isaa hin tuqin" jedhe. Kanaafuu isaan lafee isaattii fi lafee raajicha Samaariyaadhaa dhufe sanaa illee ni dhiisan.

¹⁹ Yosiyaas akkuma Beet'eelitti godhe sana iddoowwan sagadaa kanneen gaarran irraa kanneen mootonni Israa'el magaalawwan Samaariyaa keessatti ijaaranii WAAQAYYON dheekkamsaaf kakaasan sana hunda ni diige. ²⁰ Innis luboota iddoowwan sagadaa kanneen gaarran irraa hunda iddoowwan aarsaa irratti qalee lafee namaas achuma irratti ni gube. Ergasiis gara Yersaaleemitti ni deebi'e.

²¹ Mootichis, "Akkuma Kitaaba Kakuu kana keessatti barreeffame sanatti WAAQAYYO Waaqa keessaniif Faasiikaa ayyaaneffadhaa" jedhee saba hunda ajaje. ²² Bara abbootii murtii kanneen Israa'elin bulchaa turaniitii jalqabee yookaan bara mootota Israa'el hunda keessa yookaan Yihuudaa keessa Faasiikaan akkasii takkumaa ayyaaneffamee hin beeku. ²³ Garuu bara Yosiyaas mootichaa keessa waggaa kudha saddeettaffaatti Faasiikaan kun Yersaaleemitti WAAQAYYOOF ayyaaneffamaa ture.

²⁴ Kana malees Yosiyaas ilaaltotaa fi eker dubbistoota, taraafimii, waaqota tolfamoo fi wantoota jibbisiisoo kanneen Yihuudaa fi Yersaalem keessatti argaman biraa hunda balleesse. Innis seera kitaaba Hilqiya lubichi mana qulqullummaa WAAQAYYOO keessatti arge sana irratti barreeffame hojii irra oolchuudhaaf waan kana godhe. ²⁵ Mootiin akka Yosiyaas kan akka Seera Musee hundaatti garaa isaa guutuudhaan, lubbuu isaa guutuu fi humna isaa guutuudhaan gara WAAQAYYOTTI deebi'e tokko iyyuu isaan duras isaan duubas hin argamne.

²⁶ Ta'us sababii Minaaseen waan hojjete hundaan dheekkamsaaf isa kakaaseef WAAQAYYO dheekkamsa isaa guddaa fi sodaachisaa Yihuudaa irratti boba'e sana irraa hin deebine. ²⁷ Kanaafuu WAAQAYYO, "Ani akkuma Israa'elin balleesse sana Yihuudaas fuula koo duraa nan balleessa; Yersaalem magaalaa ani filadheef mana qulqullummaa kan ani, 'Maqaan koo achi jiraata' jedhee waa'ee isaa dubbadhe kana nan dhiisa" jedhe.

²⁸ Wannii bara mootummaa Yosiyaas keessa hojjetame kan biraatii fi wannii inni hojjetete hundi kitaaba seenaa mootota Yihuudaa keessatti barreeffameera mitii?

²⁹ Bara Yosiyaas mootii turetti, Fara'oon Nekkoon mootichi Gibxi mootii Asoor gargaaruuf jedhee gara Laga Efraaxiisitti ol ba'e. Yosiyaas mootichis of irraa isa ittisuudhaaf itti gad ba'e. Nekkoon garuu isatti dhufee Megidootti isa ajjeese.

³⁰ Garboonni Yosiyaasis gaariidhaan Megidoodhaa gara Yerusaalemitti reeffa isaa fidanii awwaala isaa keessatti isa awwaan. Ergasiis sabni biyya sanaa Yehoo'aahaaz ilma Yosiyaas fuudhanii dibanii iddoo abbaa isaa buusani mootii isa godhan.

Yehoo'aahaaz Mooticha Yihuudaa

23:31-34 kwf - 2Sn 36:2-4

³¹ Yehoo'aahaazis yeroo mootii ta'etti umuriin isaa waggaa digdamii sadii ture; innis Yerusaalem keessa taa'ee ji'a sadii bulche. Maqaan haadha isaa Hamuutaal ture; isheenis intala Ermiyaas kan Libnaadhaa dhuftee turte. ³² Innis akkuma abbootiin isaa hojjetan sana fuula WAAQAYYOO duratti waan hamaa hojjete. ³³ Akka inni Yerusaalem keessa taa'ee hin bulchineef Fara'oon Nekkoon Hamaati keessatti Riiblaati foncaan isa hidhee Yihuudaa irrattis gibira meetii taalaantii* dhibba tokkoo fi warqee taalaantii tokko mure. ³⁴ Fara'oon Nekkoon Eliiyaaqiim ilma Yosiyaas mootichaa iddoo Yosiyaas iddoo abbaa isaa buusee mootii godhe; maqaa Eliiyaaqiimis geeddaree Yehooyaaqiim jedheen. Yehoo'aahaazin garuu fuudhee Gibxitti geesse; innis achitti du'e. ³⁵ Yehooyaaqiimis meetii fi warqee Fara'oon Nekkoon gaafate sana ni baase. Waan kana baasuufis gibira biyyatti muree namoota biyyattii irraa akkuma galii isaaniitti meetii fi warqee walitti qabe.

Yehooyaaqiim Mooticha Yihuudaa

23:36-24:6 kwf - 2Sn 36:5-8

³⁶ Yehooyaaqiim yeroo mootii ta'etti umuriin isaa waggaa digdamii shan ture; innis Yerusaalem keessa taa'ee waggaa kudha tokko bulche. Maqaan haadha isaa Zebuudaa ture; isheenis intala Phedaayaa kan magaalaa Ruumaatii dhufte turte. ³⁷ Innis akkuma abbootiin isaa hojjetan sana fuula WAAQAYYOO duratti waan hamaa hojjete.

24

¹ Bara mootummaa Yehooyaaqiim keessa Nebukadnezar mootichi Baabilon biyya sana ni weerare; Yehooyaaqiimis waggaa sadii isaaf garboome. Ergasii garuu yaada geeddaratee Nebukadnezaritti fincile. ² WAAQAYYOS saamtota Baabilon, saamtota Sooriyaa, saamtota Mo'aabii fi saamtota Amoon isatti erge. Innis akkuma dubbii WAAQAYYOO kan garboonni isaa raajonni dubbatan sanaatti Yihuudaa balleessuudhaaf isaan erge. ³ Dhugumaan wanni kun sababii cubbuu Minaaseetii fi waan inni hojjete hundaatiif fuula isaa duraa isaan balleessuudhaaf akkuma ajaja WAAQAYYOOTTI Yihuudaatti dhufe; ⁴ akkasumas sababii inni dhiiga namoota yakka hin qabnee dhangaalasee fi sababii inni dhiiga namoota yakka hin qabneetiin Yerusaalemin guuteef WAAQAYYO dhiisuufii hin barbaanne.

⁵ Wantoonni bara mootummaa Yehooyaaqiim keessa hojjetaman kanneen biraatii fi wanni inni hojjete hundi kitaaba seenaa mootota Yihuudaa keessatti barreeffamaniiru mitii? ⁶ Yehooyaaqiim abbootii isaa wajjin ni boqote. Ilmi isaa Yehooyaakiin iddoo isaa bu'ee mootii ta'e.

⁷ Sababii mootichi Baabilon biyya isaa hunda, Malkaa Gibxii jalqabee hamma Laga Efraaxiisitti qabateef mootiin Gibxi lammata duulaaf biyya isaatii hin baane.

Yehooyaakiin Mooticha Yihuudaa

24:8-17 kwf - 2Sn 36:9-10

⁸ Yehooyaakiin yeroo mootii ta'etti umuriin isaa waggaa kudha saddeet ture; innis Yerusaalem keessa taa'ee ji'a sadii bulche. Maqaan haadha isaa Nehushtaa ture; isheenis intala Elnaataan namicha Yerusaalem sanaa ti. ⁹ Innis akkuma abbaan isaa hojjete sana fuula WAAQAYYOO duratti waan hamaa hojjete.

¹⁰ Yeruma sanatti loltoonni Nebukadnezar mooticha Baabilon Yerusaalemitti duulanii ishee ni marsan; ¹¹ utuma ajajjoonni loltoota isaa ishee marsaa jiranuu Nebukadnezar mataan isaa gara magaalatti ni dhufe. ¹² Yehooyaakiin mootichi Yihuudaa, haati isaa, garboonni isaa, namoonni isaa bebeekamoonii fi qondaaltonni isaa hundinuu mootii Baabilonitti harka kennatan.

Mootiin Baabilonis moo'ee waggaa saddeettafaatti Yehooyaakiinin booji'ee ni fudhate. ¹³ Nebukadnezaris akkuma WAAQAYYO dubbatee ture sanatti qabeenya mana qulqullummaa WAAQAYYOOTII fi kan masaraa mootummaa keessa ture hunda ni fudhate; mi'a warqee kan Solomoon mootichi Israa'el mana qulqullummaa WAAQAYYOOTIIF tolche hunda isaa immoo caccabse. ¹⁴ Inni warra Yerusaalem keessa jiraatan hunda ajajjoota waraanaatii fi loltoota hunda, warra ogummaa hojii harkaa qabanii fi warra sibiila

* 23:33 23:33 Taalaantiin tokko kiiloo giraamii 34.

tuman hunda walumatti nama kuma kudhan booji'ee ni fudhate. Namoota akka malee hiyyeeyyii qofatu biyya sanatti hafe.

¹⁵ Nebukadnezar Yehooyaakiiniin booji'ee Baabilonitti ni geesse. Akkasumas haadha mootichaa, niitota isaa, qondaaltota isaatii fi namoota biyya sanaa bebbeekamoo booji'ee Yerusaaalemii gara Baabilonitti ni geesse. ¹⁶ Kana malees mootichi Baabilon humna waraanaa guutuu kan nama kuma torba of keessaa qabu, warra ogummaa hojii harkaa qabanii fi warra sibiila tuman kuma tokko booji'ee Baabilonitti ni geesse; isaan kunneen hundi jajjaboo fi warra lola danda'an turan. ¹⁷ Innis Mataaniyaa eessuma Yehooyaakiin sana iddoo isaa mootii godhe; maqaa isaas Zedeqiyaatti ni geeddare.

Zedeqiya Mooticha Yihuudaa

24:18-20 kwf - 2Sn 36:11-16; Erm 52:1-3

¹⁸ Zedeqiya yeroo mootii ta'etti umuriin isaa waggaa digdamii tokkoo ture; innis Yerusaaalem keessa taa'ee waggaa kudha tokko bulche. Maqaan haadha isaa Hamuutaal ture; isheen isintala Ermiyaas kan magaalaa Libnaatii dhufte turte. ¹⁹ Innis akkuma Yehooyaaqiim hojjete sana fuula WAAQAYYOO duratti waan hamaa ni hojjete. ²⁰ Wannii kun hundi sababii dheekkamsa WAAQAYYOOTIIF Yerusaaalemii fi Yihuudaa irra ga'ee; dhuma irrattis inni fuula isaa duraa isaan balleesse.

Kufaatii Yerusaaalem

25:1-12 kwf - Erm 39:1-10

25:1-21 kwf - 2Sn 36:17-20; Erm 52:4-27

25:22-26 kwf - Erm 40:7-9; 41:1-3,16-18

Zedeqiya mooticha Baabilonitti fincile.

25

¹ Kanaafuu bara mootummaa Zedeqiya keessa waggaa saglaffaatti, bultii kurnaffaa ji'a kurnaffaatti, Nebukadnezar mootiin Baabilon guutummaa loltoota isaa wajjin Yerusaaalemitti duule. Innis magaalattiin ala qubatee naannoo ishee hundatti tuullaa biyyoo marse. ² Magaalaan sunis hamma waggaa kudha tokkoffaa bara Zedeqiya Mootichaatti akkuma marfamteetti turte.

³ Bultii saglaaffaa ji'a afuraffaatti, magaalattii keessatti beelli akka malee hammaatee namni waan nyaatu tokko illee dhabe. ⁴ Ergasii dallaan magaalattii cabsamee loltoonni hundinuus utuma Baabilononni magaalaa sana marsanii jiranuu karaa karra dallaa iddoo biqiltuu mootichaa bira jiru lamaan gidduu baasu sanaatiin halkaniin ba'anii baqatan. Isaanis Arabbaatti baqatan; ⁵ loltoonni Baabilon garuu mooticha ari'anii dirree Yerikoo irratti isa qaqqaban. Loltoonni isaa hundis isa irraa gargar ba'anii bibittinnaa'anii turan; ⁶ innis ni qabame.

Gara mootii Baabilonitti Riiblaatti geeffamee achittis itti murame. ⁷ Isaanis ijuma isaa duratti ilmaan Zedeqiya fixan; isaanis ija isaa keessaa baasanii foncaa naasiitiin hidhanii Baabilonitti isa geessan.

⁸ Bara mootummaa Nebukadnezar mooticha Baabilon keessa waggaa kudha saglaffaatti, bultii torbaffaa ji'a shanaffaatti, Nebuzaradaan ajajaan eegumsa mootummaa, qondaalli mootii Baabilon sun gara Yerusaaalem dhufe. ⁹ Innis mana qulqullummaa WAAQAYYOOTI, masaraa mootummaattii fi manneen Yerusaaalem hundatti ibidda qabsiise. Manneen gurguddaa hundas ni gube. ¹⁰ Loltoonni Baabilon kanneen ajajaa eegumsa mootummaa jala turan hundi dallaawwan naannoo Yerusaaalem turan diigan. ¹¹ Nebuzaradaan ajajaan eegumsaa sun namoota magaalaa keessatti hafanii fi warra baqatanii mootii Baabilonitti kooluu galan booji'ee fudhate. ¹² Ajajaan sun garuu hiyyeeyyii biyyattii keessaa gariin akka wayinii kunuunsanii fi lafa qotaniif achitti dhiise.

¹³ Baabilononni sun utubaawwan naasii, baattuwwan iddoodhaa socho'anii fi Gaanii naasii irraa hojjetamee mana qulqullummaa WAAQAYYOO keessa ture caccabsanii naasii sana immoo Baabilonitti geessan. ¹⁴ Akkasumas okkoteewwan, waan ittiin daaraa hammaaran, waan ittiin ibsaas irraa daaraa dhadha'an, caabiiwwanii fi mi'oota naasii irraa hojjetaman kanneen tajaajila mana qulqullummaatiif oolan hunda fudhatan. ¹⁵ Ajajaan eegumsaa sunis girgiraawwanii fi waciitiwwan ittiin dhiiga facaasan kanneen hundi isaanii warqee qulqulluu irraa yookaan meetii irraa hojjetaman fudhatee deeme.

¹⁶ Ulfinni naasii kan Solomoon ittiin utubaawwan lamaan, Gaanii fi baattuwwan iddoodhaa socho'aniin mana qulqullummaa WAAQAYYOOTIIF hojjetee ture waan madaalliin madaaluu danda'uu oli turan. ¹⁷ Tokkoon tokkoon utubaa sanaa dhundhuma kudha saddeet ol dheerata ture. Guutuun naasii kan utubaa tokko irraas dhundhuma sadii ol dheeratee naannoon isaa guutuun sibiila wal keessa loofamee tolfamee fi roomaanii

naasiitiin miidhagfamee ture. Utubaan kaanis sibiila isaa kan wal keessa loofamee tolfame wajjin kanuma fakkaata ture.

¹⁸ Ajajaan eegumsaa sun, Seraayaa lubicha hangafa, Sefaaniyaa lubicha Sadarkaan isatti aanuu fi eegdota balbalaa sadan hidhee fuudhee deeme. ¹⁹ Warra amma illee magaalaa keessatti hafan keessaa ajajaa loltootaatii fi gorsitoota mootii shan fudhate. Akkasumas barreessaa qondaala ol aanaa ture kan saba keessaa loltummaaf namoota filatu sanaa fi namoota isaa kanneen magaalaa keessatti argaman jaatama fudhate. ²⁰ Nebuzaradaan ajajaan sun hunda isaanii guuree Riiblaatti gara mooticha Baabilonitti geesse. ²¹ Mootichis achuma Riiblaat biyya Hamaati keessatti isaan ni fixe.

Yihuudaanis akkasiin booji'amtee biyya isheetii baate.

²² Nebukadnezar mootichi Baabilon akka inni namoota Yihuudaatti hambise sana bulchuuf Gedaaliyaas ilma Ahiiqaam ilma Shaafaan sana muude. ²³ Ajajjoonni loltootaa hundii fi namoonni isaanii yeroo akka mootichi Baabilon Gedaaliyaasin bulchaa kutaa biyyaa godhee muude dhaga'anitti Gedaaliyaas bira Miisphaa dhufan; isaanis Ishmaa'eel ilma Naataaniyaa, Yoohaanaan ilma Qaareyaa, Seraayaa ilma Tanhumeeti namicha Netoof sanaa, Yaazaniyaa ilma namicha Ma'akaatii fi namoota isaanii turan. ²⁴ Gedaaliyaasis, "Qondaaltota Baabilon hin sodaatinaa; biyyattii keessa qubadhaatii mooticha Baabilon tajaajilaa; waan gaariitu isinii ta'aatii" jedhee isaanii fi namoota isaaniiif kakate.

²⁵ Garuu ji'a torbaffaa keessa Ishmaa'eel ilmi Naataaniyaa ilma Eliishaamaa kan sanyii moototaa irraa dhalate sun namoota kudhan wajjin dhufee Gedaaliyaas, namoota Yihuudaatii fi namoota Baabilon kanneen isa wajjin Miisphaa turan fixe. ²⁶ Kana irratti namni hundi xinnaa fi guddaan, Baabilonota sodaatee ajajjoota waraanaa wajjin gara Gibxitti baqate.

Yehooyaakiin Gad Dhiifame

25:27-30 kwf - Erm 52:31-34

²⁷ Yehooyaakiin mootiin Yihuudaa booji'amee waggaa soddonii torbaffaa isaatti, Eewiil Marodaak mootii Baabilon ta'e; innis wagguma sana keessa bultii digdamii torbaffaa ji'a kudha lammaffaatti Yehooyaakiin mootii Yihuudaa sana mana hidhaatii gad dhiise. ²⁸ Afaan tolaadhaanis isatti dubbatee barcuma ulfinaa kan barcuma mootota isa wajjin Baabilon keessa turan kaanii caalu kenneef. ²⁹ Kanaafuu Yehooyaakiin uffata isaa kan mana hidhaatti uffachaa ture sana of irraa baasee bara jireenya isaa guutuu yeroo hunda maaddii mootichaa irraa nyaate. ³⁰ Mootichis hamma inni lubbuudhaan jiraatetti guyyuma guyyaadhaan waan isaaf barbaachisu Yehooyaakiiniif kennaa ture.

Kitaaba Seenaa Tokkoffaa

Sanyii Addaam

Hamma Ilmaan Nohiitti

- ¹ Addaam, Seeti, Enoosh,
² Qeenaan, Mahalaleel, Yaared,
³ Henook, Matuuselaa, Laameh,
 Noh.

⁴ Ilmaan Noh: Seem, Haam, Yaafet:

Yaafetoota

1:5-7 kwf - Uma 10:2-5

- ⁵ Ilmaan Yaafet:
 Goomer, Maagoog, Meedee, Yaawaan, Tuubaal, Meshekii fi Tiiraas turan.
⁶ Ilmaan Goomer:
 Ashkenas, Riifaatii fi Toogarmaa turan.
⁷ Ilmaan Yaawaan:
 Eliishaa, Tarshiish, Kitiimii fi Roodaanota turan.

Kaamota

1:8-16 kwf - Uma 10:6-20

- ⁸ Ilmaan Haam:
 Kuushi, Misrayim, Fuuxii fi Kana'aan turan.
⁹ Ilmaan Kuushi:
 Saabaa, Hawiilaa, Sabtaa, Ra'imaa fi Sabtekaa turan.
 Ilmaan Ra'imaa:
 Shebaa fi Dedaan turan.
¹⁰ Kuushi abbaa Naamruud;
 Naamruudis lafa irratti loltuu jabaa ta'e.
¹¹ Misrayim immoo abbaa
 Luudiiimootaa, Anaamiimootaa, Lehaabiimootaa, Naftahiimootaa, ¹² Fatrusiiimootaa,
 Kaseluhiiimootaa jechuunis warra Filisxeeminni irraa dhalatanii fi Kaftooriiimootaa
 ti.
¹³ Kana'aan abbaa
 Siidoon ilma isaa hangaftichaa akkasumas kan Heetotaa, ¹⁴ Yebuusotaa, Amoorotaa,
 Girgaashotaa, ¹⁵ Hiiwotaa, Arkaawotaa, Siinotaa, ¹⁶ Arwaadewotaa, Zemaarotaatii
 fi Hamaatotaa ture.

Seemota

1:17-23 kwf - Uma 10:21-31; 11:10-27

- ¹⁷ Ilmaan Seem:
 Eelaam, Ashuur, Arfaakshad, Luudii fi Arraam turan.
 Ilmaan Arraam:
 Uuzi, Huuli, Geterii fi Meshek turan.
¹⁸ Arfaakshad Sheelaa dhalche;
 Sheelaan immoo Eeberin dhalche.
¹⁹ Eeberiifis ilmaan lamatu dhalate:
 Sababii bara isaa keessa lafti gargar qoodamteef, maqaan isa tokkoo Felegi jedhamee
 moggaafame; maqaan obboleessa isaa immoo Yooqxaan jedhamee moggaafame.
²⁰ Yooqxaan immoo
 Almoodaad, Sheleef, Hazarmaawet, Yaaraa, ²¹ Hadooraam, Uuzaal, Diqlaa, ²² Eebaal,
 Abiimaa'eel, Shebaa, ²³ Oofiir, Hawiilaa fi Yoobaabin dhalche. Warri kunneen
 hundinuu ilmaan Yooqxaanii ti.

²⁴ Seem, Arfaakshadi, Sheelaa,

²⁵ Eeberi, Felegi, Re'uu,

²⁶ Seruugi, Naahoor, Taaraa,

²⁷ akkasumas Abraam kan Abrahaam jedhame sanaa dha.

Maatii Abrahaam

²⁸ Ilmaan Abrahaam: Yisihaaqii fi Ishmaa'eel.

Sanyiiwwan Aggaar

1:29-31 kwf - Uma 25:12-16

²⁹ Sanyiiwwan isaanii warra kanneenii dha:

Nabaayooti ilma Ishmaa'eel hangafticha, Qeedaar, Adbi'eel, Mibsaami, ³⁰ Mishmaa, Duumaa, Maasaa, Hadaad, Teemaa, ³¹ Yexuur, Naafiishii fi Qeedmaa.

Isaan kunneen ilmaan Ishmaa'eel.

Sanyiiwwan Heeturaa

1:32-33 kwf - Uma 25:1-4

³² Ilmaan Qexuuraan saajjatoon Abrahaam sun deesse:

Zimraan, Yoqshaan, Medaan, Midiyaan, Yishbaaqii fi Shuwaa.

Ilmaan Yokshaan:

Shebaa fi Dedaan.

³³ Ilmaan Midiyaan:

Efaa, Eefer, Henook, Abiidaa fi Eldaa'aa.

Warri kunneen hundi sanyiiwwan Qexuuraa ti.

Sanyiiwwan Saaraa

1:35-37 kwf - Uma 36:10-14

³⁴ Abrahaam abbaa Yisihaaq.

Ilmaan Yisihaaq:

Esaawuu fi Israa'el.

Ilmaan Esaawuu

³⁵ Ilmaan Esaawu:

Eliifaaz, Re'uu'eel, Ye'uushi, Ya'ilaamii fi Qoorraahi.

³⁶ Ilmaan Eliifaaz:

Teemaan, Oomaar, Zefoo, Gaataamii fi Qenaz;

karaa Tiimnaatiin: Amaaleq.

³⁷ Ilmaan Re'uu'eel:

Nahaati, Zeraa, Shamaa fi Miizaah.

Namoota See'iir kanneen Edoom keessa Jiraatan

1:38-42 kwf - Uma 36:20-28

³⁸ Ilmaan See'iir:

Looxaan, Sobaal, Zibe'oon, Aannaa, Diishoon, Eezerii fi Diishaan.

³⁹ Ilmaan Looxaan:

Hoorii fi Hoomaam, Tiimnaa obboleettii Looxaan.

⁴⁰ Ilmaan Sobaal:

Aliwaan, Maanahaat, Eebaal, Shefoo fi Oonaami.

Ilmaan Zibe'oon:

Ayyaa fi Aannaa.

⁴¹ Ilmi Aannaa:

Diishoon.

Ilmaan Diishoon:

Hemdaan, Eshbaan, Yitraanii fi Keraan.

⁴² Ilmaan Eezeri:

Bilhaan, Zaawaanii fi Aqaan.

Ilmaan Diishaan:

Uuzii fi Araan.

Bulchitoota Edoom

1:43-54 kwf - Uma 36:31-43

⁴³ Mootonni utuu mootiin Israa'el tokko iyyuu hin mo'in dura Edoom keessatti mo'an kanneen turan:

Belaa ilma Be'oor kan magaalaa isaa Diinhaabaa jedhamee moggaafame sana.

⁴⁴ Belaa duunaan Yoobaab ilmi Zeraa namichi Bozraa iddoo isaa bu'ee mootii ta'e.

⁴⁵ Yoobaab duunaan Hushaam namichi biyya Teemaan iddoo isaa bu'ee mootii ta'e.

⁴⁶ Hushaam duunaan Hadaad ilmi Bedad inni biyya Mo'aabitti Midiyaanin mo'ate sun iddoo isaa bu'ee mootii ta'e. Maqaan magaalaa isaa Aawii jedhame.

⁴⁷ Hadaad duunaan Samlaan namichi Masreeqaa iddoo isaa bu'ee mootii ta'e.

- ⁴⁸ Samlaan duunaan Shaawul namichi biyya Rehoobooti ishee laga bira jirtu sanaa iddoo isaa bu'ee mootii ta'e.
- ⁴⁹ Shaawul duunaan Ba'aal-Haanaan ilmi Akboor iddoo isaa bu'ee mootii ta'e.
- ⁵⁰ Ba'aal-Haanaan duunaan immoo Hadaad iddoo isaa bu'ee mootii ta'e. Magaalaan isaas Faa'uu jedhame. Maqaan niitii isaa immoo Maheexabi'eel jedhama ture; isheenis intala Maxreed, intala Mee-Zaahaab turte. ⁵¹ Hadaadis ni du'e.

Hangafoota saba Edoom:

Tiimnaa, Aalwaa, Yeteeti, ⁵² Oholiibaamaa, Eelaa, Phiinoo, ⁵³ Qenaz, Teemaan, Mibzaar, ⁵⁴ Magidii'eelii fi Iiraam.

Namoonni kunneen hangafoota Edoom turan.

2

Ilmaan Israa'el

2:1-2 kwf - Uma 35:23-26

¹ Ilmaan Israa'el warra kanneenii dha: Ruubeen, Simi'oon, Lewwii, Yihuudaa, Yisaakor, Zebuuloon, ² Daan, Yoosef, Beniyaam, Niftaalem, Gaadii fi Aasheer.

Yihuudaa

2:5-15 kwf - Rut 4:18-22; Mat 1:3-6

Hamma Ilmaan Hezroonitti

³ Ilmaan Yihuudaa:

Eeri, Oonaanii fi Sheelaa. Isaan kanneen sadanuu intala Shuuwaa, dubartii Kana'aan sanatu isaaf da'e.

Eer ilmi Yihuudaa hangaftichi fuula WAAQAYYOO duratti hamaa ture. Kanaafuu WAAQAYYO isa ajjeese.

⁴ Taamaar niitiin ilma Yihuudaa Faaresii fi Zaaraa Yihuudaaf deesse. Yihuudaan walumaa galatti ilmaan shan qaba ture.

⁵ Ilmaan Faares:

Hezroonii fi Hamuul.

⁶ Ilmaan Zaaraa:

Zimrii, Eetaan, Heemaan, Kalkoolii fi Daardaa. Isaan walumaa galatti dhiirota shan turan.

⁷ Ilma Karmii:

Aakaar isa waan balleeffamuu qabu fudhachuudhaan Israa'elitti rakkina fide.

⁸ Ilma Eetaan:

Azaariyaa.

⁹ Ilmaan Hezroon:

Yerami'eel, Raamii fi Keluubaa.

Raam ilma Hezroonii jalqabee

¹⁰ Raam abbaa Abiinaadaab ture;

Amiinaadaab immoo abbaa Nahishoon hoogganaa saba Yihuudaa ture.

¹¹ Nahishoon abbaa Salmaan;

Salmaan immoo abbaa Bo'eez;

¹² Bo'eez abbaa Oobeedi;

Yoobeed immoo abbaa Isseey.

¹³ Ilmaan Isseey:

Ilmi isaa hangafni Eliiyaab, lammaffaan Abiinaadaab,

sadaffaan Shime'aa, ¹⁴ Afuraffaan Naatnaa'el,

shanaffaan Raadaayi, ¹⁵ ja'affaan Oozem,

torbaffaan Daawit.

¹⁶ Obboleettonni isaanii immoo Zeruuyaa fi Abiigayii turan.

Ilmaan Zeruuyaa sadan Abiishaayi, Yoo'aabii fi Asaaheel turan.

¹⁷ Abiigayii haadha Amaasaa kan abbaan isaa Yeteer nama gosa Ishmaa'eel sanaa ti.

Kaaleb Ilma Hezroon

¹⁸ Kaaleb ilmi Hezroon niitii isaa Azuubaa fi Yeri'ooti irraa ijoollee dhalche. Ilmaan Aazubaa kanneen turan:

Yeesser, Sobaabii fi Ardoon.

- 19 Kaalebis Azuubaan duunaan Efraataa fuudhe. Isheenis Huurin isaaf deesse.
 20 Huuri abbaa Uuri; Uuri immoo abbaa Bezali'eel.
- 21 Ergasii Hezroon yommuu umuriin isaa waggaa jaatama guutetti intala abbaa Gili'aad intala Maakiir fuudhe; isheenis Seguubin isaaf deesse.
 22 Seguub immoo abbaa Yaa'iir ture; innis biyya Gili'aad keessaa magaalaawwan digdamii sadii qaba ture.
 23 Geshuurii fi Arraam, magaalaa Yaa'iir akkasumas Qeenaatii fi gandoota naannoo ishee jiraniin walitti magaalaawwan jaatama irraa fudhatan.
 Isaan kunneen hundi sanyii abbaa Gili'aad sanyii Maakiir turan.
 24 Hezroon erga Kaaleb Efraataatti du'ee booddee, niitiin isaa Abiyaan Ashihuur abbaa Teqoo'aa deesseef.

Yerahimi'eel Ilma Hezroon

- 25 Ilmaan Yerami'eel ilma Hezroon hangafticha sanaa:
 Raam ilma isaa hangafticha, Buunaah, Ooren, Oozemii fi Ahiiyaa. 26 Yerami'eel niitii biraa kan Aaxaaraa jedhamtu qaba ture; isheenis haadha Oonaam turte.
 27 Ilmaan Raam ilma Yerami'eel hangafticha sanaa:
 Ma'aaz, Yaamiinii fi Eeqeer.
 28 Ilmaan Oonaam:
 Shamaayii fi Yaadaa.
 Ilmaan Shamaayi:
 Naadaabii fi Abiishur. 29 Niitiin Abiishur Abiishaayil jedhamti; isheenis Ahibaanii fi Mooliid isaaf deesse.
 30 Ilmaan Naadaab:
 Seleedii fi Afayyim. Seleed utuu ijoollee hin dhalchin du'e.
 31 Ilma Afayyim:
 Yishe'ii; Yishe'iin abbaa Sheeshaan. Sheeshaan immoo abbaa Ahilayi.
 32 Ilmaan Yaadaa kan obboleessa Shamaayi:
 Yeteerii fi Yoonaaataan. Yeteer utuu ijoollee hin dhalchin du'e.
 33 Ilmaan Yoonaaataan:
 Pheletii fi Zaazaa.
 Isaan kunneen sanyiiwwan Yerami'eel turan.

- 34 Sheeshaan intallan malee ilmaan hin qabu ture.
 Innis tajaajilaa lammii Gibxi kan Yarihaa jedhamu tokko qaba ture. 35 Sheeshaan tajaajilaa isaa Yarihaatti intala isaa ni heerumsiise; isheenis Ataayin deesseef.
 36 Ataayi abbaa Naataan;
 Naataan immoo abbaa Zaabaadin;
 37 Zaabaad abbaa Eflaal;
 Efelaal immoo abbaa Oobeedi;
 38 Oobeedi abbaa Yehuu;
 Yehuun abbaa Azaariyaa;
 39 Azaariyaa abbaa Heleez;
 Helees immoo abbaa Ele'aasaa ti;
 40 Ele'aasaan abbaa Sismaayi;
 Sismaayi abbaa Shaluun;
 41 Shaluun abbaa Yeqameyaa ti;
 Yeqameyaan immoo abbaa Eliishaamaa ti.

Gosoota Kaaleb

- 42 Ilmaan Kaaleb obboleessa Yerami'eel:
 Meeshaan ilmi isaa hangaftichi abbaa Ziif; Ziif abbaa Maareeshaa ti;
 Maareeshaan immoo abbaa Kebroon.
 43 Ilmaan Kebroon:
 Qoorraahi, Tafuu'aa, Reqemii fi Shemaa.
 44 Shemaan abbaa Raham;
 Raham immoo abbaa Yorqe'aam.
 Reqem abbaa Shamaayi.
 45 Shamaayi abbaa Maa'oon;
 Maa'oon immoo abbaa Beet Zuuri.
 46 Efaan saajatoon Kaaleb sun haadha
 Haaraan, Moozaa fi Gaazeez.

- Haaraan immoo abbaa Gaazer.
⁴⁷ Ilmaan Yaahidaay:
 Reegeem, Yootaam, Geeshaan, Phelet, Eefaa fi Sha'aaf.
⁴⁸ Ma'akaan saajjatoon Kaaleb sun haadha
 Shebeerii fi Tirhaanaa ti.
⁴⁹ Isheen akkasumas Sha'aaf abbaa Madmaanaa,
 Shewwaa abbaa Makbeenaa fi abbaa Gibe'aa deesse.
 Kaaleb intala Aakkaa jedhamtu qaba ture.
⁵⁰ Isaan kunneen sanyiiwwan Kaaleb turan.

- Ilmaan Huuri ilma Efraataa hangaftichaa:
 Sobaal abbaa Kiriyaati Ye'aariim, ⁵¹ Salmaan abbaa Beetlihem, Haareef abbaa Beet
 Gaadeer.
⁵² Sanyiiwwan Sobaal kan abbaa Kiriyaati Ye'aariim:
 Walakkaan Menuhootaa, Haaroo'ee, ⁵³ akkasumas gosti Kiriyaati Ye'aariim, Yittraa-
 wonni, Fuutonni, Shumaatonni, Mishiraawonni, Zoraatootaa fi Eshitaa'ooloonni
 gosoota isaan kanneen keessaa dhalatanii dha.
⁵⁴ Sanyiiwwan Salmaan:
 Beetlihem, Netoofota, Atroot Beet Yoo'aab, walakkaa Maanaheetotaa, Zoraatota
 fa'i; ⁵⁵ balbala barreessitootaa kanneen Yaabeex keessa jiraatan: Tiraatota,
 Shime'aatotaa fi Sukaatota. Isaan kunneen Qeenota mana abbaa Rekaab Hamaati
 keessaa dhalatanii dha.

3

Ilmaan Daawit

3:1-4 kwf - 2Sm 3:2-5

3:5-8 kwf - 2Sm 5:14-16; 1Sn 14:4-7

¹ Isaan kunneen ilmaan Daawit Kebroonitti dhalchee dha:

- Ilmi isaa hangafni Amnoon kan Ahiinoo'am dubartiin Yizri'eel deessee dha;
 inni lammaffaan immoo Daani'el kan Abiigayii dubartiin Qarmeloos deessee dha;
² sadaffaan Abesaaloom isa Ma'akaan intalli Talmaay mooticha Geshuur deessee dha;
 afuraffaan Adooniyaa ilma Hagiit;
³ shanaffaan Shefaaxiyaa ilma Abiixaal;
 ja'affaan Yitre'aam kan inni niitii isaa Eglaa irraa dhalchee dha.

⁴ Isaan ja'aan kunneen warra yeroo Daawit Kebroonitti waggaa torbaa fi
 walakkaa mootii turetti isaaf dhalatanii dha.

Daawit Yersaalemitti waggaa soddonii sadii mootii ta'ee bulche; ⁵ ijoolleen
 achitti isaaf dhalatanis kanneenii dha:

Shime'aa, Shobaab, Naataanii fi Solomoon. Ilmaan afran kunneen Batisheebaa intala
 Amii'eel irraa dhalatan.

⁶ Akkasumas ilmaan biraa qaba ture; isaanis: Yibehaar, Eliishuuwaa, Eliiphelexi,
⁷ Noogaa, Nefeg, Yaafiyaa, ⁸ Eliishaamaa, Eliyaadaa fi Eliiphelexi; isaanis walumatti
 ilmaan sagal turan.

⁹ Ilmaan saajjatoowwan isaa irraa dhalataniin alatti isaan kunneen ilmaan
 Daawit turan. Taamaar immoo obboleettii isaanii turte.

Mootota Yihuudaa

- ¹⁰ Ilmi Solomoon Rehoobo'aam;
 ilmi Rehoobo'aam Abiyaa dha;
 ilmi Abiyaa Aasaa dha;
 ilmi Aasaa Yehooshaafaax;
¹¹ ilmi Yehooshaafaax Yehooraam;
 ilmi Yoorraam Ahaaziyaa;
 ilmi Ahaaziyaa Yoo'aash;
¹² ilmi Yoo'aash Amasiyaa;
 ilmi Amasiyaa Azaariyaa;
 ilmi Azaariyaa Yootaam;

- 13 ilmi Yootaam Aahaaz;
 ilmi Aahaaz Hisqiyaa;
 ilmi Hisqiyaa Minaasee dha;
 14 ilmi Minaasee Aamoon;
 ilmi isaa immoo Yosiyaa.
 15 Ilmaan Yosiyaa:
 Inni hangafni Yoohaanaan,
 lammaffaan Yehooyaaqiim,
 sadaffaan Zedeqiyaa,
 afuraffaan immoo Shaluum.
 16 Ilmaan Yehooyaaqiim:
 Ilma isaa Yehooyaaqiinii fi
 ilma isaa Zedeqiyaa.

Hidda Dhaloota Moototaa Kan Boojuu booddee ture

- 17 Ilmaan Yehooyaaqiin isa booji'ame sanaa:
 Ilma isaa She'altii'eel, ¹⁸ Malkiiraam, Phedaayaa, Shenaaxaar, Yeqameyaa, Hooshaamaa fi Nedaabiyaa.
 19 Ilmaan Phedaayaa:
 Zarubaabelii fi Shime'ii.
 Ilmaan Zarubaabel:
 Meshulaamii fi Hanaaniyaa. Obboleettiin isaanii immoo Sheloomiit jedhamti.
²⁰ Akkasumas ijoollee gara biraa shanitu ture; isaanis: Hashubaa, Oohel, Berekiyaa, Hasadiyaa fi Yooshab-Heseed.
 21 Ilmaan Hanaaniyaa:
 Phelaatiyaa fi Yeshaayaa; akkasumas ilmaan Refaayaa, ilmaan Arnaan, ilmaan Obaadiyaatii fi ilmaan Shekaaniyaa.
 22 Ilmaan Shekaaniyaa:
 Shemaayyaa fi ilmaan isaa: Haxuush, Yigi'aal, Baariiyaa, Na'aariyaa fi Shaafaax; isaan walumatti ja'a turan.
 23 Ilmaan Na'aariyaa:
 Eliiyoo'eenayi, Hisqiyaaasii fi Azriiqaam; isaan walumatti sadii turan.
 24 Ilmaan Eliiyoo'eenayi:
 Hoodayiwaa, Eliyaashiib, Phelaayaa, Aquub, Yoohaanaan, Delaayaa fi Anaanii; isaan walumatti torba turan.

4

Balbalawwan Yihuudaa Kanneen Biraa

- 1 Ilmaan Yihuudaa:
 Faares, Hezroon, Karmii, Huurii fi Sobaal.
 2 Re'aayaan ilmi Sobaal abbaa Yahaatiiti; Yahaati immoo abbaa Ahuumaayii fi Laahadii ti. Isaan kunneen balbalawwan Zoraatotaa ti.
 3 Ilmaan Eexaam kanneenii dha:
 Yizri'eel, Yishmaa fi Yidbaashi. Obboleettiin isaanii immoo Hazelelphoonii jedhamti. ⁴ Phenuu'eel abbaa Gedoor; Eezer immoo abbaa Huushaam.
 Isaan kunneen sanyii Huuri ilma Efraataa hangaftichaatii fi abbaa Beetlihem sanaa ti.
 5 Ashihuur abbaan Teqoo'aa niitota lama kanneen Heelaa fi Na'araa jedhaman qaba ture.
 6 Na'araan ilmaan Ahuzaam, Heefer, Teemenii fi Haa'ahashitaar jedhaman deesseef. Ilmaan Na'araa isaan kanneen turan.
 7 Ilmaan Heelaa:
 Zeret, Zooharii fi Etnaan; ⁸ Qoosi abbaa Anuub, abbaa Hazobeebaa fi abbaa balbalawwan Ahariheel ilma Haaruumiti.

⁹ Yaabeex nama obboloota isaa caalaa ulfina qabu ture; haatii isaa, "Ani dhiphinaan isa da'e" jettee Yaabeex jettee isa moggaafte. ¹⁰ Yaabeex immoo akkana jedhee Waaqa Israa'elitti iyyate; "Ati na eebbisi; biyya koos naaf bal'isi! Akka ani hin miidhamnee fi akka ani dhiphina jalaa ba'uuf harki kee na wajjin haa jiraatu." Waaqnis waan inni kadhate sana ni kenneef.

¹¹ Kiluub obboleessi Shuhaa abbaa Mihiirii ti; Mehiir immoo abbaa Eshitooniti.

¹² Eshitoonis abbaa Beet Raafaan, abbaa Faasehaa fi Tehiinaa ti; Tahiiinaan immoo abbaa Iir Naahaashii ti. Isaan kunneen namoota Reekaa ti.

¹³ Ilmaan Qenaz:

Otnii'eelii fi Seraayaa.

Ilmaan Otnii'eel:

Hataatii fi Ma'oonotaayi. ¹⁴ Me'oonotaayi abbaa Ofraa ti.

Seraayaan abbaa Yoo'aabii ti; Yoo'aab immoo abbaa Gee Haraashiimii ti.

Maqaan kun sababii isaan ogummaa hojii harkaa qabaniif kennameef.

¹⁵ Ilmaan Kaaleb ilma Yefunee:

Iiruu, Eelaa fi Na'aam.

Ilmi Eelaa:

Qenaz.

¹⁶ Ilmaan Yehaleli'eel:

Ziifii, Ziifaa, Tiiriyaa fi Asareel.

¹⁷ Ilmaan Izraa:

Yeteer, Mered, Eeferii fi Yaaloon.

Niitota Mered keessaa isheen tokko Miiriyaam, Shamaayii fi Yishibaa abbaa Esh-timo'aa sana deesse. ¹⁸ Niitiin isaa dubartiin Yihuudaa sunis Yaared abbaa Gedoor; Hebeer abbaa Sookooniitii fi Yequutii'eel abbaa Zaano'aa deesse.

Isaan kunneen ijoollee Bitiyaa intala Fara'oon kan Mered fuudhe sanaa ti.

¹⁹ Ilmaan niitiin Hoodiyaa obboleettiin Naham sun deesse:

Abbaa Qeyiilaa namicha Garmii sanaatii fi Eshtimo'aa namicha Ma'akaa ti.

²⁰ Ilmaan Simi'oon:

Amnoon, Riinaa, Ben-Haanaanii fi Tiiloon.

Ilmaan Yishi'ii:

Zoheetii fi Ben-Zoheetii ti.

²¹ Ilmaan Sheelaa ilma Yihuudaa:

Eer abbaa Leekaa, La'adaa abbaa Maareshaatii fi balbalawwan Beet Ashibee'aatti warra wayyaa quncee talbaa haphii hojjetanii.

²² Yooqiiim, namoota Koozeebaa, Yoo'aashii fi Saaraaf isa Mo'aabii fi Yaashubi-ileheem bulchu. Barreeffamni kunneenis kan bara durii ti. ²³ Isaanis suphee dhooftuu Nexaayiiimii fi Gedeeraa keessa jiraatan turan; jarri kun mootichaaf hojjechaa achi jiraatu ture.

Simi'oon

4:28-33 kwf - Iya 19:2-10

²⁴ Ilmaan Simi'oon:

Nemuu'eel, Yaamiin, Yaariib, Zeraa fi Shaawul;

²⁵ Shaluum ilma Saa'uul ture; Mibsaam ilma Shaluumiti; Mishmaa immoo ilma Mabsaamiti.

²⁶ Ilmaan Mishmaa:

Ilma isaa Hamuu'eel, ilma isaa Zakuurii fi ilma isaa Shime'ii.

²⁷ Shime'iin ilmaan kudha ja'aa fi intallan ja'a qaba ture; obbollooni isaa garuu ijoollee hedduu hin qaban ture; sababii kanaaf balbalawwan isaanii hundinuu akka gosa Yihuudaa baay'ee hin turre. ²⁸ Isaanis Bersheebaa, Molaadaa, Hazar Shuu'aal, ²⁹ Bilihaa, Ezem, Toolaad, ³⁰ Betuu'eel, Hormaa, Siiglaag, ³¹ Beet Markaabot, Hazar Susiim, Beet Biirii fi Sha'arayiim keessa jiraatan. Magaalaawwan kunneen hamma bara mootummaa Daawitiitti magaalawwan isaanii turan. ³² Akkasumas gandoota Eexaam, Ayin, Reemoo, Tookenii fi Ashaan jechuunis magaalaa shananii fi ³³ gandoota naannoo isaanii argaman hunda keessa hamma Ba'aaliitti jiraatu ture.

Kunneen iddoo isaan jiraatanii dha. Isaanis galme'e hidda dhaloota isaanii kaawwatanii jiran.

³⁴ Meshoobaab, Yamleek,

Yooshaa ilma Amasiyaa, ³⁵ Yoo'eel,

Yehuu ilma Yooshiibiyaa, ilma Seraayaa, ilma Asii'eel,

³⁶ akkasumas Eliiyoo'eenayi, Yaa'iqoobaa, Yashoohayaa,

Asaayaa, Aadii'eel, Yesiimi'eel, Benaayaa,

³⁷ Ziizaa ilma Shiifii, ilma Aloon, ilma Yedaayaa, ilma Shimrii, ilma Shemaa'iyaa.

³⁸ Namoonni maqaan isaanii kanaa olitti himame kunneen hooggantoota balbala isaanii turan.

Baay'inni maatii isaaniis akka malee dabalaa dhufe; ³⁹ isaanis bushaayee isaaniitiif lafa dheedaa barbaacha hamma moggaa Gedoor kan gama ba'a sululaa jiru sanaatti deeman. ⁴⁰ Isaanis naannoo sanatti lafa dheedaa gabbataa fi gaarii argatan; lafni sunis bal'aa, kan nagaa fi tasgabii qabu ture. Bara durii gosoonni Haamii naannoo sana jiraachaa turan.

⁴¹ Namoonni maqaan isaanii dha'ame kunneen bara Hisqiyas mootii Yihuudaa ture keessa dhufan. Isaan akkuma hamma har'aatti illee mul'atu qubata Kaamotaatii fi Me'uunoota achi jiraachaa turanii dha'anii guutumaan guutuutti isaan barbadeessan. Ergasiis sababii lafa dheedaa bal'aa bushaayee isaaniitiif argataniif lafa jaraa irra ni qabatan. ⁴² Simi'oonota kanneen keessaa namoonni dhibba shan ilmaan Yishi'ii Phelaatiyaa, Na'aariyaa, Refaayaa fi Uzii'eel hoogganamani biyya gaaraa See'iir weeraran. ⁴³ Isaanis Amaaleqoota miliqanii hafan balleessanii hamma har'aatti achuma jiraatan.

5

Ruubeen

¹ Ruubeen Israa'eliif ilma hangafa ture; ta'us sababii inni siree abbaa isaa xureesseef mirgi hangafummaa isaa ilmaan Yoosif ilma Israa'el sanaatiif kenname. Kanaafuu inni akka mirga isaa kan dhalootaan argamuutti hidda dhalootaa keessatti hin galmeeffamne; ² Yihuudaan obboloota isaa keessa nama jabaa fi kan mootummaan isa keessaa ba'e ta'u illee mirgi hangafummaa kan Yoosifii ti. ³ Ilmaan Ruubeen ilma Israa'el hangaftichaa:

Henooki, Faluusoo, Hezroonii fi Karmii.

⁴ Ilmaan Yoo'eel:

Shemaa'iyaa ilma isaa, Googi ilma isaa,
Shime'ii ilma isaa, ⁵ Miikaa ilma isaa,
Re'aayaa ilma isaa, Ba'aal ilma isaatii fi

⁶ Bi'eeraa ilma isaa kan mootiin Asoor Tiiglaat-Philneeser booji'ee fudhatee dha. Be'eeraan hoogganaa gosa Ruubeen ture.

⁷ Firoonni isaanii warri akkuma hidda dhaloota isaaniitti balbala balbalaan galmeeffaman kanneenii dha:

Ye'ii'eel hangafticha, Zakkaariyaas, ⁸ Beelaa ilma Aazaazi, ilma Shemaa, ilma Yoo'eel.

Isaanis naannoo Aro'eeri jalqabee hamma Neboo fi Ba'aal Me'ooniitti jiru keessa qabatan. ⁹ Isaanis sababii horiin isaanii Gili'aadi keessatti baay'ateef karaa ba'a biiftuutiin hamma daarii gammoojjii kan gara laga Efraaxiisitti bal'atu sanaatti biyyattii qabatan.

¹⁰ Isaan jabana Saa'ol keessa Aggaariitti waraana kaasan; jarris harka isaaniitti mo'ataman; isaanis iddoo jireenyaa warra Aggaar kan Gili'aadiin gama ba'a biiftuu jiru guutumaan guutuutti qabatan.

Gaad

¹¹ Gosoonni Gaad isaanitti aananii Baashaan keessa lafa hamma Salkaatti argamu irra jiraatan; isaanis:

¹² Yoo'eel hangaftichi, Shaafaam itti aanaan isaa, Ya'inayii fi Shaafaax Baashaan keessa jiraatan.

¹³ Firoonni isaanii maatii maatiidhaan kanneenii dha:

Miikaa'el, Meshulaam, Shebaa, Yooraa, Yaakaan, Zii'aa fi Eeber; walumaa galatti torba turan.

¹⁴ Isaan kunneen immoo ilmaan Abiihaayil ilma Huuri, ilma Yaarokaa, ilma Gili'aad, ilma Miikaa'el, ilma Yeshiishaayi, ilma Yakedoo, ilma Buuzii ti.

¹⁵ Ahiin ilmi Abdi'eel, hangafa maatii isaanii ture; Abdi'eel immoo ilma Guunii ti.

¹⁶ Warri Gaad Gili'aad keessa, Baashaanii fi gandoota daarii isheetti argaman, akkasumas lafa tikaa kan Shaaroon keessatti argaman hundaa fi qarqara isaa jiraatan.

¹⁷ Isaan kunneen hundi jabana Yootaam mootii Yihuudaa turee fi jabana Yerobi'aam mootii Israa'el ture keessa galmee hidda dhalootaa keessatti galmeeffaman.

¹⁸ Ruubeenonni, Gaadonni fi walakkaan gosa Minaasee namoota dandeettii lolaa qaban 44,760 qaban ture; isaanis namoota jajjaboo warra gaachanaa fi goraadee qabachuu danda'an, warra xiyya darbachuu danda'anii fi warra waraanaaf leenjifaman turan. ¹⁹ Jarri kunis warra Aggaariitti, warra Yexuuritti, Naafiishiittii fi Noodaabiitti waraana ni banan. ²⁰ Sababii isaan waraana sana irratti gara Waaqaatti iyyatanii turaniif Waaqni isaan gargaaree warra Aggaariitii fi garee isaanii hunda dabarsee harka isaaniitti kenne. Innis sababii isaan isa amanataniif kadhannaa isaaniitiif deebii kenne. ²¹ Isaanis horii warra Aggaar gaala kuma shan, hoolaa kuma dhibba lamaa fi shantamaa fi harree kuma lama saaman. Akkasumas nama kuma dhibba tokkoo booji'an; ²² sababii lolli sun kan Waaqaa tureef namoonni biraa baay'een ni ajjeefaman. Isaanis hamma bara boojutti biyya sana keessa ni jiraatan.

Walakkaa Gosa Minaasee

²³ Walakkaan gosa Minaasee baay'ee turan; isaanis Baashaanii jalqabanii hamma Ba'aal Hermooniitti, hamma Seniir Tulluu Hermoonitti biyya sana keessa qubatan.

²⁴ Isaan kunneen hangafoota maatii isaanii ti: Eefer, Yishi'ii, Elii'eel, Azrii'eel, Er-miyaas, Hoodayiwaa fi Yadii'eel. Isaan kunneen loltoota gootota, namoota bebbeekamoo fi hangafoota maatii isaanii ti. ²⁵ Isaan garuu Waaqa abbootii isaaniitiif amanamuu didanii waaqota saboota biyyattii wajjin sagaagalan; saboonni kunneenis warra Waaqni fuula isaanii duraa balleessee dha. ²⁶ Kanaafuu Waaqni Israa'el hafuura Fohaa mooticha Asoor jechuunis hafuura Phuuli kakaasee akka inni gosoota Ruubeen, kan Gaadiitii fi walakkaa gosa Minaasee booji'u godhe. Innis warra kanneen gara Halaa, Haaboor, Haaraatii fi gara qarqara laga Goozaaniitti geesse; isaanis hamma har'aatti achuma jiraatan.

6

Lewwii

¹ Ilmaan Lewwii:

Geershoon, Qohaatii fi Meraar.

² Ilmaan Qohaati:

Amraam, Yizihaar, Kebroonii fi Uzii'eel.

³ Ijoolleen Amraam:

Aroon, Musee fi Miiriyaam.

Ilmaan Aroon:

Naadaab, Abiihuu, Ele'aazaarii fi Iitaamaar.

⁴ Ele'aazaar abbaa Fiinehaas;

Fiinehaas immoo abbaa Abiishuuwaa ti;

⁵ Abiishuuwaan abbaa Buukii ti;

Bukiin immoo abbaa Uzii ti;

⁶ Uzii abbaa Zeraayaa ti;

Zaraa'yaan abbaa Meraayootii ti;

⁷ Meraayoot abbaa Amariyaa ti;

Amariyaan abbaa Ahiixuubii ti;

⁸ Ahiixuub abbaa Zaadoqii ti;

Zaadoq abbaa Ahiima'azii ti;

⁹ Ahiima'az abbaa Azaariyaa ti;

Azaariyaa abbaa Yoohaanaanii ti;

¹⁰ Yoohaanaan abbaa Azaariyaa ti;

inni luba ta'ee mana qulqullummaa kan Solomoon Yerusaalemitti ijaare keessa tajaajilaa ture.

¹¹ Azaariyaa abbaa Amariyaa ti;

Amariyaan abbaa Ahiixuubii ti;

¹² Ahiixuub abbaa Zaadoqii ti;

Zaadoq abbaa Shaluunii ti;

¹³ Shaluun abbaa Hilqiyaa ti;

Hilqiyaa abbaa Azaariyaa ti;

¹⁴ Azaariyaa abbaa Seraayaa ti;

Seraayaan abbaa Yehoozaadaaqii ti.

¹⁵ Yeroo WAAQAYYO akka sabni Yihuudaatii fi Yerusaalem Nebukadnezaariin booji'amu godhetti Yehoozaadaaqis booji'amee fudhatame.

¹⁶ Ilmaan Lewwii:

Geershoom, Qohaatii fi Meraarii.

¹⁷ Maqaan Ilmaan Geershoom kanaa dha:

Loobeenii fi Shime'ii.

¹⁸ Ilmaan Qohaati:

Amraam, Yizihhaar, Kebronii fi Uzii'eel.

¹⁹ Ilmaan Meraarii:

Mahilii fi Muusii.

Isaan kunneen Lewwota balbala balbala abbootii isaaniitiin lakkaa'amanii dha:

²⁰ Balbala Geershoom keessaa:

Ilma isaa Loobeen, ilma isaa Yahaati,

ilma isaa Zimaati, ²¹ ilma isaa Yoo'aa,

ilma isaa Iddoo, ilma isaa Zeraa fi

ilma isaa Ye'aateraayi.

²² Ilmaan Qohaati:

Ilma isaa Amiinaadaab, ilma isaa Qoorraahi,

ilma isaa Asiiir, ²³ ilma isaa Elqaanaa,

ilma isaa Ebiyaasaaf, ilma isaa Asiiir,

²⁴ ilma isaa Tahaat, ilma isaa Uurii'eel,

ilma isaa Uziyaa fi ilma isaa Shaawul.

²⁵ Ilmaan Elqaanaa:

Amaasaayi, Ahiimooti,

²⁶ ilma isaa Elqaanaa, ilma isaa Zoofayi,

ilma isaa Naahat, ²⁷ ilma isaa Eliiyaab,

ilma isaa Yeroohaam, ilma isaa Elqaanaa fi

ilma isaa Saamu'eel.

²⁸ Ilmaan Saamu'eel:

Ilma isaa Yoo'eel hangaftichaa fi

ilma isaa lammaffaa Abiyaa.

²⁹ Ilmaan Meraarii:

Mahilii, ilma isaa Loobeen,

ilma isaa Shime'ii, ilma isaa Uzaa,

³⁰ ilma isaa Shime'aa, ilma isaa Hagiya fi

ilma isaa Asaayaa.

Faarfattoota Mana Qulqullummaa

6:54-80 kwf - Iya 21:4-39

³¹ Namoonni erga taabonni dhufee achi boqotee booddee Daawit akka isaan faarfannaadhaan mana WAAQAYYOO keessa tajaajilaniif muude kanneenii dha. ³² Isaanis hamma Solomoon Yerusaalem keessatti mana qulqullummaa WAAQAYYOO ijaaretti dunkaana qulqulluu, dunkaana wal ga'ii duratti faarfannaadhaan tajaajilaa turan. Isaanis akkuma seera isaaniif kenname sanaatti hojii isaanii hojjechaa turan.

³³ Maqaan namoota ilmaan isaanii wajjin tajaajilanii kanneenii dha:

Ilmaan Qohaatotaa keessaa:

Heemaan Faarfataa,

ilma Yoo'eel, ilma Saamu'eel,

³⁴ ilma Elqaanaa, ilma Yeroohaam,

ilma Elii'eel, ilma Too'aa,

³⁵ ilma Zuufi, ilma Elqaanaa,

ilma Mahat, ilma Amaasaayi,

³⁶ ilma Elqaanaa, ilma Yoo'eel,

ilma Azaariyaa, ilma Sefaaniyaa,

³⁷ ilma Tahaat, ilma Asiiir,

ilma Ebiyaasaaf, ilma Qoorraahi,

³⁸ ilma Yizihhaar, ilma Qohaati,

- ilma Lewwii, ilma Israa'el;
³⁹ akkasumas Asaaf obboleessi Heemaan karaa mirgaatiin dhaabata ture:
 Asaaf ilma Berekiyaa, ilma Shime'aa,
⁴⁰ ilma Miikaa'el, ilma Ba'aseeyaa,
 ilma Malkiyaa, ⁴¹ ilma Etnii,
 ilma Zeraa, ilma Adaayaa,
⁴² ilma Eetaan, ilma Zimaa,
 ilma Shime'ii, ⁴³ ilma Yahaati,
 ilma Geershoom, ilma Lewwii;
⁴⁴ karaa bitaa isaatiin immoo warri isaan wajjin turan gosa Meraarii keessaa:
 Eetaan ilma Qiisaa, ilma Abdii,
 ilma Maluuk, ⁴⁵ ilma Hashabiyaa,
 ilma Amasiyaa, ilma Hilqiyaa,
⁴⁶ ilma Amzii, ilma Baanii,
 ilma Shemeer, ⁴⁷ ilma Mahilii,
 ilma Muusii, ilma Meraarii,
 ilma Lewwii.

⁴⁸ Obbolloonni isaanii Lewwonni akka hojii dunkaana qulqulluu mana Waaqaa hunda hojjetaniif ramadamanii turan. ⁴⁹ Aroonii fi ilmaan isaa garuu akkuma waan Museen garbichi Waaqaa sun ajajee ture hundaatti hojii Iddoo Iddoo Hunda Caalaa Qulqulluu ta'e sanaatiif, sababii Israa'eliitiifis araara buusuudhaaf iddoo aarsaa kan aarsaa gubamuutii fi iddoo aarsaa ixaanaa irratti aarsaawwan dhi'eessaa turan.

- ⁵⁰ Ilmaan Aroon kanneenii dha:
 Ilma isaa Ele'aazaar, ilma isaa Fiinehaas,
 ilma isaa Abiishuuwaa, ⁵¹ ilma isaa Bukii,
 ilma isaa Uzii, ilma isaa Zeraayaa,
⁵² ilma isaa Meraayoot, ilma isaa Amariyaa,
 ilma isaa Ahiixuub, ⁵³ ilma isaa Zaadoqii fi
 ilma isaa Ahiima'az.

- ⁵⁴ Sababii ixaan jalqabaa isaaniif ba'eef iddoowwan kunneen Aroonii fi ilmaan isaa kanneen balbala Qohaati keessaa dhufaniif ni kennaman; iddoowwan qubata isaanii kanneen akka biyya isaanii ta'aniif isaaniif ramadamanii dha:
⁵⁵ Kebroon isheen biyya Yihuudaa keessaatii fi lafti dheedaa kan naannoo isheetti argamtu isaaniif ni kennaman. ⁵⁶ Lafti qotiisaatii fi gandoonni naannoo Kebrooniitti argaman garuu Kaaleb ilma Yefuneetiif ni kennaman. ⁵⁷ Ilmaan Arooniif immoo magaalaaawwan itti baqatan Kebroon, Libnaa, Yatiir, Eshtimo'aa, ⁵⁸ Hiileen, Debiir, ⁵⁹ Ashaan, Yootaa fi Beet Shemeshitu lafa dheeda isaanii wajjin kenname.
⁶⁰ Qooda gosa Beniyaam keessaa immoo Gibe'oon, Gebaa, Alemetii fi Anaatootittu lafa dheeda isaanii wajjin ni kennameef.
 Magaalaaawwan balbalawwan Qohaataatiif kennaman kunneen walumaa galatti kudha sadii turan.
⁶¹ Ilmaan Qohaati kanneen hafaniif immoo balbala walakkaa gosa Minaasee irraa magaalaaawwan kudhanitu ixaadhaan kennameef.
⁶² Ilmaan Geershoomiitiif immoo qooda Yisaakor irraa, qooda Aasheer irraa, qooda Niftaalemiitii fi qooda Minaasee kan Baashaanitti argamu irraa magaalaaawwan kudha sadii akkuma gosa gosa isaaniitti kennaman.
⁶³ Ilmaan Meraariitiif qooda gosa Ruubeen irraa, qooda gosa Gaadiitii fi qooda gosa Zebuuloon irraa magaalaaawwan kudha lama akkuma balbala balbala isaaniitti ni kennaman.

- ⁶⁴ Akkasiin Israa'eloonni magaalaaawwan kanneen lafa dheeda isaanii wajjin Lewwotaaf ni kennan.

- ⁶⁵ Gosa Yihuudaa irraa, gosa Simi'ooniitii fi gosa Beniyaam irraa magaalaaawwan maqaan isaanii armaan olitti dha'ame sana ixaadhaan ni kennaniif.

- ⁶⁶ Maatiiwwan Qohaati tokko tokkos qooda gosa Efreem keessaa magaalaaawwan jireenyaa argatanii turan.

⁶⁷ Biyya gaaraa Efreem keessatti magaalawwan itti baqatan Sheekem, Geezir, ⁶⁸ Yoqemi'aam, Beet Horoon, ⁶⁹ Ayaaloonii fi Gat Rimoon lafa dheeda isaanii wajjin kennaniif.

⁷⁰ Akkasumas Israa'eloonni walakkaa qooda gosa Minaasee irraa Aanerii fi Bile'aam lafa dheeda isaanii wajjin balbalawwan Qohaati kanneen hafaniif ni kennan.

⁷¹ Ilmaan Geershoom immoo:

Balbala walakkaa gosa Minaasee irraa Goolaan ishee Baashaan keessaa sanaa fi Ashtaaroti lafa dheeda isaanii wajjin ni argatan;

⁷² gosa Yisaakor irraa

Qaadash, Daaberaati, ⁷³ Raamootii fi Aanem lafa dheeda isaanii wajjin ni argatan;

⁷⁴ gosa Aasheer irraa Maashaal, Abdoon, ⁷⁵ Huuqooqii fi Rehoob lafa dheeda isaanii wajjin ni argatan;

⁷⁶ gosa Niftaalem irraa immoo Qaadash ishee Galiilaatti argamtu, Hamoonii fi Kiriyaataayimin lafa dheeda isaanii wajjin ni argatan.

⁷⁷ Namoonni gosa Meraarii jechuunis warri Lewwotaa kanneen hafan qooda kanaa gadii argatan:

Gosa Zebuuloon irraa Yooqni'aam, Qartaa, Rimoonii fi Taabooin lafa dheeda isaanii wajjin argatan;

⁷⁸ gosa Ruubeen kan ba'a Yerikootti Yordaanosiin gama jiru irraa Bezer ishee gammoojjii keessatti argamtu, Yaahizaa, ⁷⁹ Qidemootii fi Meefi'aati lafa dheeda isaanii wajjin ni argatan.

⁸⁰ Gosa Gaad irraa Raamooti ishee Gili'aad keessaa, Mahanayim, ⁸¹ Heshboonii fi Ya'izeer lafa dheeda isaanii wajjin ni argatan.

7

Yisaakor

¹ Ilmaan Yisaakor:

Toolaa, Phuwaa, Yaashuubii fi Shimroon; walumatti nama afur turan.

² Ilmaan Toolaa:

Uzii, Refaayaa, Yirii'eel, Yaahimaayi, Yibsaamii fi Shemuu'eel; isaan kunneen hangafoota maatii isaanii ti. Bara mootummaa Daawit keessa ilmaan Toolaa warri hidda dhaloota isaaniitiin akka loltoota jajjabooti galmeeffaman nama 22,600 turan.

³ Ilma Uzii:

Yizrahiyaa.

Ilmaan Yizrahiyaa:

Miikaa'el, Obaadiyaa, Yoo'eelii fi Yishiyaa. Shanam isaanii iyyuu hangafoota turan.

⁴ Isaanis waan niitotaa fi ijoollee hedduu qabaataniif akka hidda dhaloota maatii isaaniitti namoota lolaaf qophaa'an 36,000 qabu ture.

⁵ Firoonni loltoota jajjaboo turan kanneen balbalawwan Yisaakorii keessaa dhalatan warri akkuma hidda dhaloota isaaniitti galmeeffaman walumatti nama 87,000:

Beniyaam

⁶ Ilmaan Beniyaam sadan:

Belaa, Bekerii fi Yedii'eel.

⁷ Ilmaan Belaa:

Esboon, Uzii, Uzii'eel, Yeriimootii fi Iirii walumatti shan turan; hangafoonni mana abbootii isaaniis gootota jajjaboo turan; galmeen hidda dhaloota isaanii namoota 22,034 argisiisa.

⁸ Ilmaan Beker:

Zemiraan, Yoo'aash, Elii'ezer, Eliiyoo'eenayi, Omrii, Yereemooti, Abiyaa, Anaatootii fi Alaameti. Isaan kunneen hundi ilmaan Beker turan. ⁹ Hangafoota mana abbootii isaanii kanneen akka dhaloota isaaniitti hidda dhaloota isaaniitiin lakkaa'aman gootota jajjaboo 20,200 turan.

¹⁰ Ilmi Yedii'eel:

Bilihaan.

Ilmaan Bilhaanii:

Ye'uushi, Beniyaam, Eehuud, Keni'aanaa, Zeetaan, Tarshiishii fi Ahiishahar.
¹¹ Ilmaan Yedii'eel kunneen hundi hangafoota maatiiwwanii turan. Isaanis namoota waraana dhaquuf qophaa'an 17,200 qaban ture.

¹² Gosti Shufimiitii fi Hufiim ilmaan Iiri turan; Hushiim immoo ilma Aheerii ti.

Niftaalem

¹³ Ilmaan Niftaalemii:

Yahizii'eel, Guunii, Yeexerii fi Shaluum; isaan kunneen sanyii Bilihaa ti.

Minaasee

¹⁴ Ilmaan Minaasee:

Asrii'eel kan saajjatoon isaa isheen Arraamii dhufte sun deesseef. Isheenis Maakiir abbaa Gili'aad deesse. ¹⁵ Maakiir immoo gosoota Hufimiitii fi Shufiim keessaa niitii fuudhe. Maqaan obboleettii isaas Ma'akaa ture. Sanyiin isaa kan biraa immoo Salpha'aad jedhama; Zelofehaad intallan qofa qaba ture. ¹⁶ Ma'akaan niitiin Maakiirii ilma deessee maqaa isaa Phereesh jettee moggaafte. Obboleessi isaa Sheresh jedhama; ilmaan isaa immoo Uulaamii fi Reqem jedhaman.

¹⁷ Ilmi Uulaam:

Bedaan.

Isaan kunneen ilmaan Gili'aadii ilma Maakiirii, ilma Minaasee sanaa ti.

¹⁸ Hamolekeeti obboleettiin isaa Iisihood, Abii'ezerii fi Mahilaa deesse.

¹⁹ Ilmaan Shemiidaa immoo:

Ahiyyaan, Sheekem, Likhii fi Aniyaam turan.

Efreem

²⁰ Ilmaan Efreem:

Shuutelaa, ilma isaa Bereed,

ilma isaa Tahaat,

ilma isaa Ele'aadaa, ilma isaa Tahaat, ²¹ ilma isaa Zaabaadii,

ilma isaa Shuutelaa.

Eezerii fi Eli'aad yeroo loon warra Gaati kanneen achi jiraatan sanaa booji'uuf gad bu'anitti harka jaraatiin ni ajjeefaman. ²² Efreem abbaan isaanii guyyaa hedduu boo'eef; firoonni isaas isa jajjabeessuu dhufan. ²³ Sana booddees dhagee niitii isaa wajjin ciise; isheenis ulfooftee ilma deesse. Innis sababii maatii isaa keessa rakkinni tureef Beriyaa jedhee maqaa baaseef. ²⁴ Intalli isaa immoo Sheeraa jedhamti; namni magaalawwan Beet Horoonii kan gad aanuu fi kan ol aanu, akkasumas magaalaa Uzeen Sheeraa hundeesse ishee dha.

²⁵ Refaa ilma isaa, Resheef ilma isaa,

Teelaa ilma isaa, Taahan ilma isaa,

²⁶ La'adaan ilma isaa, Amilhuud ilma isaa,

Eliishaamaa ilma isaa, ²⁷ Nuuni ilma isaatii fi

Iyyaasuu ilma isaa.

²⁸ Biyyoonnii fi ardaan qubata isaaniis Beet'eelii fi gandoota naannoo ishee, karaa ba'a biiftuutiin Na'araan, karaa lixa biiftuutiin immoo Geezirii fi gandoota ishee akkasumas Sheekemii fi gandoota ishee kanneen hamma Ayyaa fi gandoota isheetti jiran qabata ture. ²⁹ Daariwwan Minaasee irra Beet She'aan, Ta'anaak, Megidoo fi Dooritu gandoota isaanii wajjin ture. Sanyiiwwan Yoosif ilma Israa'el sanaas magaalawwan kanneen keessa jiraatan.

Aseer

³⁰ Ilmaan Aasheer:

Yimnaa, Yishwaa, Yishwii fi Beriyaa. Obboleettiin isaanii immoo Seraa jedhamti.

³¹ Ilmaan Beriyaa:

Hebeerii fi Malkii'eel abbaa Birzaawitii.

³² Hebeer immoo abbaa Yaafleexii, Shomeerii, Hootaamiitii fi obboleettii isaanii Shuu'aa ti.

³³ Ilmaan Yaafleex:

Phaasaak, Biimihaalii fi Ashwaati.

Isaan kunneen ilmaan Yaafleexii ti.

³⁴ Ilmaan Shemeer:

Ahii, Rohigaa, Yehubaa fi Arraam.

³⁵ Ilmaan obboleessa isaa Heelem:

Zoofaa, Yimnaa, Sheleeshii fi Aamaal.

- ³⁶ Ilmaan Zoofaa:
 Suuwaa, Harnefer, Shuu'aali, Beerii, Yimraa, ³⁷ Bezer, Hoodi, Shamaa, Shilshaa, Yitraanii fi Bi'eeraa.
- ³⁸ Ilmaan Yeteer:
 Yefunee, Fiisiphaa fi Eraa.
- ³⁹ Ilmaan Ulaa:
 Aaraa, Hanii'eelii fi Riiziyaa.
- ⁴⁰ Isaan kunneen hundi gosoota Aasheerii turan; isaanis hangafoota maatii-wwanii, namoota filatamoo, loltoota jajjaboo fi bulchitoota bebbeekamoo turan. Akka galmee hidda dhaloota isaanii keessatti galmeeffametti namoonni isaanii kanneen dandeettii waraanaa qaban 26,000 turan.

8

Hidda Dhaloota Saa'ol Namicha Gosa Beniyaamii

8:28-38 kwf - 1Sn 9:34-44

- ¹ Beniyaam ilma isaa hangafa Belaa, ilma isaa lammaffaa Ashbeel, ilma isaa sadaffaa Aharaa,
² ilma isaa afuraffaa Nohaa fi ilma isaa shanaffaa Raafaa dhalche.
- ³ Ilmaan Belaa:
 Adaar, Geeraa, Abiihuud, ⁴ Abiishuuwaa, Na'amaan, Aho'aa, ⁵ Geeraa, Shefuufaanii fi Huuraam.
- ⁶ Isaan kun ilmaan Eehuudii kanneen hangafoota maatiiwwan warra Gebaa keessa jiraatanii bojuudhaan Maanahatitti geffamaniiti:
⁷ Na'amaan, Ahiyyaa fi Geeraa; Geeraan kun abbaa Uzaa fi Ahiihudii ti; namni bojuudhaan fuudhee isaan geesses isa ture.
- ⁸ Shaharaayim erga niitota isaa Hushiimii fi Ba'araa of jalaa ari'ee booddee Mo'aab keessatti ilmaan dhalche. ⁹ Niitii isaa Hoodesh irraa Yoobaab, Zibiyaa, Meeshaa, Maalkaam, ¹⁰ Ye'uuxi, Saakiyaa fi Miirmaa dhalche; isaan kunneen ilmaan isaa warra hangafoota maatii turanii dha. ¹¹ Niitii isaa Hushiim irraa immoo Abiituubii fi Elpha'al dhalche.
- ¹² Ilmaan Elpha'alii:
 Eeber, Mishaam, shemedi isa magaalaawwan Ooonooniitii fi Lood gandoota naannoo ishee jiran wajjin ijaare; ¹³ Beriyyaa fi Shemaa kanneen hangafoota maatiiwwan warra Ayaaloon keessa jiraatan sanaa ta'anii jiraattota Gaatii ari'anii biyyaa baasanii dha.
- ¹⁴ Ahiyyoon, Shaashaaq, Yereemooti, ¹⁵ Zebaadiyaan, Aaraad, Ederi, ¹⁶ Miikaa'el, Yishiphaa fi Yoohaan ilmaan Beriyyaa turan.
- ¹⁷ Zebaadiyaan, Meshulaam, Hizqii, Hebeer, ¹⁸ Yishimraay, Yizliyaa fi Yoobaab ilmaan Elpha'alii turan.
- ¹⁹ Yaaqiim, Zikriin, Zabdiin, ²⁰ Elii'eenaayi, Ziletaayi, Elii'eel, ²¹ Adaayaa, Beraayaa fi Shiimraat ilmaan Shime'ii turan.
- ²² Yishiphaan, Eeber, Elii'eel, ²³ Abdoon, Zikriin Haanaan, ²⁴ Hanaaniyaa, Eelaam, Antootiyaa, ²⁵ Yifdeyaa fi Phenuu'eel ilmaan Shaashaaq turan.
- ²⁶ Shamisheraayi, Shehaariyaa, Aataliyaa, ²⁷ Ya'ireshiyaa, Eeliyaasii fi Zikriin ilmaan Yiroohamii turan.
- ²⁸ Isaan kunneen hundi akkuma hidda dhaloota isaanii keessatti galmeeffametti abbootii maatiiiti fi hangafoota turan; isaanis Yerusaalem keessa jiraatu ture.
- ²⁹ Ye'ii'eel abbaan Gibe'oonis Gibe'oon keessa jiraata ture;
 maqaan niitii isaa Ma'akaa dha. ³⁰ Ilmi isaa hangafni Abdoon jedhama; kanneen isa booddee dhalatan immoo Zuuri, Qiish, Ba'aal, Neer, Naadaab, ³¹ Gedoor, Ahiyyoo, Zekeerii fi ³² Miiqlooti abbaa Shime'aa turan; isaanis firoota isaanii wajjin Yerusaalem keessa jiraatan.
- ³³ Neer abbaa Qiishii ti; Qiish abbaa Saa'olii ti; Saa'ol immoo abbaa Yoonataan, Malkii-Shuwaa, Abiinaadaabiitii fi Eshba'alii ti.
- ³⁴ Ilmi Yoonataan:
 Meriiba'aal abbaa Miikaa ti.
- ³⁵ Ilmaan Miikaa:
 Phiitoon, Meleek, Taare'aa fi Aahaaz.

- ³⁶ Aahaaz abbaa Yiho'aadaa ti; Yihoo'adaan abbaa Aalemeti, Azmaawetiitii fi Zimrii ti; Zimriin immoo abbaa Moozaa ti. ³⁷ Moozaan abbaa Biine'aa ti; Raafaan ilma isaa ti; Ele'aasaan ilma isaa ti; Aazeelis ilma isaa ti.
- ³⁸ Aazeel ilmaan ja'a qaba ture; maqaan isaaniis: Azriiqaa, Bookeruu, Ishmaa'eel, She'ariyaa, Obaadiyaa fi Haanaan. Isaan kunneen hundi ilmaan Aazeelii ti.
- ³⁹ Ilmaan obboleessa isaa Eseeqii:
Ilmi isaa hangafni Uulaam, ilmi isaa lammaffaan Ye'uushi, ilmi isaa sadaffaan Eliiphelexi. ⁴⁰ Ilmaan Uulaam loltoota jajjaboo xiyyaan loluu danda'an turan. Isaanis ilmaanii fi ilmaan ilmaanii hedduu walumatti nama 150 qabu turan. Isaan kunneen hundi ilmaan Beniyaam turan.

9

¹ Israa'eloonni hundinuu akkuma hidda dhaloota isaaniitti kitaaba mootota Israa'el keessatti galmeeffaman.

Saba Yerusaalem

9:1-17 kwf - Nah 11:3-19

Sabni Yihuudaa sababii cubbuu isaatiif booji'amee Baabilonitti geeffame.

- ² Warri jalqabatti deebi'anii lafaa fi magaalaaawwan ofii isaanii keessa qubatan Israa'eloota tokko tokko, luboota, Lewwotaa fi tajaajiltoota mana qulqullummaa ti.
- ³ Saboonni Yihuudaa, kan Beniyaamii, kan Efreemii fi kan Minaasee warri Yerusaalem keessa jiraachaa turan:
- ⁴ Uutaayi ilma Amiihuud, ilma Omrii, ilma Imrii, ilma Baanii ilmaan Faares ilma Yihuudaa.
- ⁵ Shelaanota keessaa:
Asaayaa ilma isaa hangaftichaa fi ilmaan isaa.
- ⁶ Zaaraahota keessaa:
Ye'uu'eel.
Saboonni Yihuudaa nama 690 turan.
- ⁷ Beniyaamota keessaa:
Sa'aaluu ilma Meshulaam, ilma Hoodayiwaa, ilma Hasenuu'aa;
- ⁸ Bineeyaa ilma Yirooham;
Eelaa ilma Uzii, ilma Mikrii;
Meshulaam ilma Shefaaxiyaa, ilmaa Re'uu'eel, ilma Yibniyaa.
- ⁹ Sabni Beniyaam akka galmee hidda dhaloota isaanii irratti galmeeffametti nama 956 ture. Namoonni kunneen hundi hangafoota maatii isaanii turan.
- ¹⁰ Luboota keessaa:
Yedaa'iyaa; Yehooyaariib; Yaakiin;
- ¹¹ Azaariyaa ilma Hilqiyaa, ilma Meshulaam, ilma Zaadoq, ilma Meraayoot, ilma Ahiixuub qondaalticha itti gaafatamaa mana Waaqaa ta'e sanaa.
- ¹² Adaayaa ilma Yerooham, ilma Phaashihuur, ilma Malkiyaa; Ma'asaayi ilma Aadii'eel, ilma Yahizeeraa, ilma Meshulaam, ilma Meshileemiit, ilma Imeer.
- ¹³ Baay'inni luboota abbootii maatii turaniis 1,760 ture. Isaan kunneen namoota dandeettii qaban kanneen tajaajila mana Waaqaa keessatti itti gaafatamtoota ta'anii dha.
- ¹⁴ Lewwota keessaa:
Shemaa'iyaa ilma Hashuubii, ilma Azriiqaamii, ilma Hashabiyaa namicha gosa Meraarii sanaa;
- ¹⁵ Baqbaqar, Hereesh, Gaalaalii fi Mataaniyaa ilma Miikaa, ilma Zikrii, ilma Asaafi;
- ¹⁶ Obaadiyaa ilma Shemaa'iyaa, ilma Gaalaal, ilma Yeduutuun;
Berekiiyaa ilma Aasaa, ilma Elqaanaa kan gandoota Netoofotaa keessa jiraachaa ture sana.
- ¹⁷ Eegdotaa balbalaa:

Shaluum, Aquub, Talmoon, Ahiimanii fi obboloota isaanii; Shaluum hangafa gosa isaanii ture; ¹⁸ innis hamma ammaatti Karra Mootii kan gama ba'aa biiftuutti ramadameera. Isaan kunneen eegdota balbala qubata Lewwotaa turan.

¹⁹ Shaluum ilmi Qooraahee ilma Ebiyaasaaf, ilma Qoraahiitii fi maatiin isaa jechuunis gosti Qoraahii kanneen isa wajjin karra eegan sun akkuma abbootiin isaanii dur itti gaafatamtoota balbala mana bultii WAAQAYYOO turan sana isaanis itti gaafatamtoota balbala dunkaanaa ta'an.

²⁰ Bara durii keessa Fiinehaas ilmi Ele'aazaar sun dura bu'aa eegdota balbalaa ture; WAAQAYYOS isa wajjin ture.

²¹ Zakkaariyaas ilmi Mesheleemiyaa immoo eegduu balbala dunkaana wal ga'ii ture.

²² Namoonni akka balbala eeganiif filataman walumatti 212 turan. Isaanis akkuma hidda dhaloota isaaniitti gandoota isaanii keessatti galmeeffaman.

Eegdota balbalaa kanneenis Daawitii fi Saamu'eel raajichatu hojii isaaniitti isaan ramade. ²³ Isaanii fi sanyiiwwan isaanii itti gaafatamtoota eegumsa karra mana WAAQAYYOO jechuunis manicha Dunkaana jedhamu sanaa turan. ²⁴ Eegdonni balbalaa kunneen qixaa afraniin jechuunis karaa ba'a biiftuu, karaa lixa biiftuu, karaa kaabaatii fi kibbaatiin turan. ²⁵ Obboloonni isaaniis yeroo yerootti gandoota isaanii keessaa dhufanii bultii torba torba hojii isaan gargaaraa turan. ²⁶ Dura buutota eegdota balbalaa kanneen Lewwota turan afran garuu itti gaafatamummaa kutaalee fi qabeenya mana Waaqaa keessaatu itti kenname. ²⁷ Isaanis sababii manicha eeguu qabaniif halkan halkan naannoo mana Waaqaa dhaabatanii bulu turan; ganama ganamas manicha banuuf itti gaafatamummaa qabu turan.

²⁸ Isaan keessaa namoonni tokko tokko to'attoota mi'a mana qulqullummaa keessatti fayyaduu turan; isaanis mi'a kana yeroo inni gad baafamuu fi yeroo inni ol galfamu ni lakkaa'u ture. ²⁹ Warri kaan immoo akka mi'oota mana qulqullummaa, daakuu isaa, daadhii wayinii isaa, zayitii isaa, ixaana isaatii fi urgooftuuwwan eeganiif ramadaman. ³⁰ Luboota keessaa tokko tokko immoo urgooftuuwwan walitti makanii qopheessu ture. ³¹ Lewwicha Matiitiyaa jedhamu, ilma Shaluum namicha gosa Qooraahee hangaftichatti immoo itti gaafatamummaa buddeena aarsaa tolchuutu kenname. ³² Obboloota isaanii Qohaata tokko tokkotti immoo itti gaafatamummaa buddeena guyyaa Sanbataa hunda minjaala irra kaa'amu qopheessuutu kenname.

³³ Faarfattoonni abbootii maatiiwwani Lewwotaa turan immoo waan halkanii fi guyyaa itti gaafatamummaa hojii qabaniif kutaa mana qulqullummaa keessaa hin ba'an; hojii biraattis hin waamaman ture.

³⁴ Isaan kunneen hundinuu abbootii maatiiwwan Lewwotaa hangafoota gosaa kanneen akkuma hidda dhaloota isaaniitti galmeeffamanii dha; isaanis Yerusaalem keessa jiraatan.

Hidda dhaloota Saa'ol

9:34-44 kwf - 1Sn 8:28-38

³⁵ Ye'ii'eel abbaan Gibe'oonis Gibe'oon keessa jiraata ture.

Maqaan niitii isaa Ma'akaa dha; ³⁶ ilmi isaa hangafni Abdoon jedhama; kanneen isa booddee dhalatan immoo Zuuri, Qiish, Ba'aal, Neer, Naadaab, ³⁷ Gedoor, Ahiyyoo, Zakkaariyaas fi Miiqlooti. ³⁸ Miiqlooti abbaa Shime'aam. Isaanis firoota isaanii wajjin Yerusaalem keessa jiraatan.

³⁹ Neer abbaa Qiishii ti; Qiish abbaa Saa'olii ti; Saa'ol immoo abbaa Yoonataan, Malkii-Shuwaa, Abiinaadaabiitii fi Eshba'alii ti.

⁴⁰ Ilmi Yoonataan:

Meriiba'aal abbaa Miikaa ti.

⁴¹ Ilmaan Miikaa:

Phiitoo, Meleek, Tahiree'aa fi Aahaaz.

⁴² Aahaaz abbaa Ya'iraa ti; Ya'iraan immoo abbaa Aalemeti, Azmaawetiitii fi Zimrii ti; Zimriin immoo abbaa Moozaa ti. ⁴³ Moozaan abbaa Biine'aa ti; Refaayaan ilma isaa ti; Ele'aasaan ilma isaa ti; Aazeelis ilma isaa ti.

⁴⁴ Aazeel ilmaan ja'a qaba ture; maqaan isaaniis:

Azriigaam, Bookeruu, Ishmaa'eel, She'ariyaa, Obaadiyaa fi Haanaan. Isaan kunneen ilmaan Aazeelii ti.

10

Saa'ol Of Ajeese

10:1-12 kwf - 1Sm 31:1-13; 2Sm 1:4-12

¹ Filisxeemonni yeroo kanatti Israa'elitti waraana kaasan; Israa'eloonnis isaan duraa baqatan; hedduun isaaniis Tulluu Gilbo'aa irratti dhuman. ² Filisxeemonni ittuma jabeessanii Saa'olii fi ilmaan isaa ari'an; isaaniis ilmaan isaa jechuunis Yoonataa, Abiinaadaabii fi Malkii-Shuwaaw ajjeesan. ³ Lollis naannoo Saa'olitti baay'ee cime; warri xiyyaan lolanis isa qaqqabaniis isa madeessan.

⁴ Saa'olis namicha mi'a lolaa isaa baatuun, "Goraadee kee luqqifadhuutii na waraani; yoo kanaa achii namoonni dhagna hin qabamin kunneen dhufanii natti taphatuu" jedhe.

Namichi mi'a lolaa baatuuf sun garuu waan akka malee sodaateef isa hin waraanne; kanaafuu Saa'ol goraadee ofii isaa luqqifatee irratti kufe. ⁵ Namichi mi'a lolaa baatu sun yommuu akka Saa'ol du'e argetti innis goraadee ofii isaa irratti kufee du'e. ⁶ Kanaafuu Saa'olii fi ilmaan isaa sadan ni du'an; warri mana isaa hundinuu walumaan dhuman.

⁷ Israa'eloonni sulula keessa turan hundi yommuu akka loltoonni baqatan, akka Saa'olii fi ilmaan isaas dhuman arganitti magaalaaawwan isaanii dhiisanii baqatan. Filisxeemonni immoo dhufanii keessa qubatan.

⁸ Filisxeemonnis guyyaa itti aanutti yommuu warra dhuman irraa hidhannaa hiikkachuu dhufanitti akka Saa'olii fi ilmaan isaa Tulluu Gilbo'aa irratti kukkufanii jiran argan. ⁹ Isaanis erga hidhata Saa'olii hiikkatanii mataa isaan irraa kutanii booddee akka isaan waaqota tolfamoo fi namoota isaaniitti oduu gaarii labsaniif guutummaa Filisxeemiitti ergamoota ni ergan. ¹⁰ Ergasii immoo mi'a lolaa isaa mana waaqota tolfamoo isaanii keessa, mataa isaa immoo mana Daagon waaqicha tolfamaa sanaa keessatti ni fannisan.

¹¹ Jiraattonni Yaabeesh Gili'aad hundi yommuu waan Filisxeemonni Saa'olin godhan dhaga'anitti, ¹² namoonni jajjaboon isaanii hundi dhaqanii reeffa Saa'olii fi reeffa ilmaan isaa guuranii gara Yaabeeshitti ni fidan. Ergasii immoo reeffa isaanii muka guddaa Yaabeesh keessaa tokko jalatti awwaalan; guyyaa torbas ni sooman.

¹³ Saa'ol sababii WAAQAYYOF amanamaa hin ta'iniif du'e; inni dubbii WAAQAYYOOTIIF hin ajajamne; qooda kanaa ilaaltuu gorsa gaafate; ¹⁴ WAAQAYYON gorsa hin gaafanne. Kanaaf WAAQAYYO isa ajjeese; mootummaa isaas dabarsee Daawit ilma Isseeiyiitiif kenne.

11

Daawit Mootii Israa'el Ta'e

11:1-3 kwf - 2Sm 5:1-3

¹ Israa'eloonni hundinuu Kebroonitti Daawit biratti walitti dhufanii akkana jedhan; "Nu foonii fi dhiiga kee ti. ² Duraan, yeroo Saa'ol mootii turetti iyyuu namni duula loltoota Israa'el hoogganu si'i ture. WAAQAYYOO Waaqni kees, 'Situ saba koo Israa'elin tiksa; bulchaa isaaniis ni taata' siin jedhee ture."

³ Yommuu maanguddoonni Israa'el hundi Kebroonitti Daawit Mooticha bira dhufanitti, inni Kebroonitti fuula WAAQAYYOO duratti isaan wajjin kakuu gale. Isaanis akkuma WAAQAYYO karaa Saamu'eeliin abdachiise sanatti dibanii Israa'el irratti mootii isa godhan.

Daawit Yerusaalemin Mo'achuu Isaa

11:4-9 kwf - 2Sm 5:6-10

⁴ Daawitii fi Israa'eloonni hundinuu gara Yerusaalemitti jechuunis Yebuusiitti ni qajeelan. Yebuusonni achi jiraatan garuu ⁵ Daawitiin, "Ati as hin seentu" jedhan. Ta'us Daawit da'annoo Xiyoon jechuunis Magaalaa Daawit ni qabate.

⁶ Daawitis, "Namni duraan dursee dhaqee Yebuusota lolu ajajaa loltootaa ta'a" jedhee ture. Yoo'aab ilmi Zeruuyaa jalqabatti ba'e; kanaafuu inni ajajaa waraanaa ta'e.

⁷ Daawitis iddoo jireenya isaa da'annoo sana keessa godhate; kanaafuu da'annoon sun Magaalaa Daawit jedhamee waamame. ⁸ Innis Miiloodhaa jalqabee naannoo isheetti dallaa dhagaa ni ijaare; Yoo'aab immoo kutaa Magaalaa sanaa kan hafe deebisee ijaare. ⁹ Daawitis sababii WAAQAYYON Waan Hunda Danda'u isa wajjin tureef yeruma yeroon jabaachaa dhufe.

Namoota Daawit Jajjabeeyyii

11:10-41 kwf - 2Sm 23:8-39

¹⁰ Namoota Daawit warra jajjaboo keessaa hangafoonni kanneenii dha; isaanis akkuma WAAQAYYO waa'ee Israa'el dubbate sanatti mootii isa gochuuf jedhanii saba Israa'el hunda wajjin mootummaa isaa keessatti gargaarsa guddaa godhaniif. ¹¹ Maqaan namoota Daawit warra jajjaboo kanaa dha:

Yaashobi'aam namichi gosa Hakmoonni hangafa ajajjoota sanaa ture; innis lola tokko irratti eeboo mirmirsee namoota dhibba sadii fixe.

¹² Kan isatti aanu immoo Ele'aazaar namicha gosa Ahoo'aa, ilma Doodoo ture; innis namoota jajjaboo sadan sana keessaa tokko ture. ¹³ Ele'aazaar yeroo Filisxeemonni waraanaaf walitti qabamanii turanitti Daawit wajjin Phaas Damiim ture. Loltoonnis lafa gotiisaa kan garbuudhaan guutame tokko biratti Filisxeemota duraa baqatan. ¹⁴ Innii fi Daawit garuu lafa gotiisaa walakkaatti iddoo qabatan. Isaanis irraa ittisuudhaan Filisxeemota fixan; WAAQAYYOS mo'annaa guddaa isaanii kenne.

¹⁵ Utuma gareen Filisxeemotaa Sulula Refaayim keessa qubatee jiruu hangafoota soddomman sana keessaa namoonni sadii gara kattaa holqa Adulaamitti gara Daawit gad bu'an. ¹⁶ Yeroo sanatti Daawit da'annoo cimaa keessa ture; loltoonni Filisxeem immoo Beetlihem turan. ¹⁷ Daawitis dheebotee, "Utuu namni tokko boolla bishaanii kan karra Beetlihem bira jiru keessaa bishaan dhugaatii naa fidee hool!" jedhe. ¹⁸ Kanaafuu namoonni Sadan sun qubata Filisxeemotaa keessaan darbanii boolla bishaanii kan karra Beetlihem bira jiru keessaa bishaan waraabanii Daawitiif fidan. Inni garuu dhuguu ni dide; gooda kanaa bishaan sana fuula WAAQAYYOO duratti dhangalaase. ¹⁹ Innis, "Akka ani waan kana hin goone Waaqni narraa haa fageessu! Ani dhiiga namoota lubbuu ofii isaaniitti muranii dhaqan kanaa nan dhugaa?" jedhe. Sababii isaan lubbuu ofii isaaniitti muranii dhaqanii fidaniif Daawit bishaan sana hin dhugne.

Eгаа wannii namoonni jajjaboon sadan sun hojjetan kana ture.

²⁰ Abiishaayi obboleessi Yoo'aab hoogganaa Sadan isaanii ture. Innis namoota dhibba sadiitti eeboo isaa ol kaafatee isaan fixe; akkasiin innis akkuma namoota Sadan sanaa beekamaa ta'e. ²¹ Inni yoo isaan keessaa tokko ta'uu baate iyyuu warra Sadan caalaa ulfina argatee ajajaa isaanii ta'e.

²² Benaayaa ilmi Yehooyaadaa loltoon cimaa biyya Qabzi'eel sunis loltoon mo'annaa gurguddaa argamsiise ture. Innis loltoota Mo'aab kanneen akka malee jajjaboo ta'an lama ajjeese. Gaafa cabbiin roobe tokkoo boolla keessa seenee leenca ajjeese. ²³ Namicha biyya Gibxi kan dhundhuma shan dheeratu tokko illee ni ajjeese. Namichi Gibxi sun eeboo akka danqaraa wayya dhooftuu harkaa qabaatu iyyuu Benaayaa bokkuudhaan isatti ba'e. Innis harka namicha Gibxi sanaatii eeboo butatee eeboodhuma isaatiin isa ajjeese. ²⁴ Hojiiwwan gootummaa kanneen Benaayaa ilmi Yehooyaadaa hojjete kana fa'i; innis akkuma namoota jajjaboo sadan sanaa nama beekamaa ture. ²⁵ Inni namoota Soddomman sana keessaa nama kam iyyuu caalaa ulfina guddaa argate; garuu namoota Sadan sanatti hin dabalanne. Daawitis ajajaa eegdota ofii isaa isa godhate.

²⁶ Namoonni jajjaboon sunis kanneenii dha:

Asaheel obboleessa Yoo'aab,
 Elhaanaan namicha Beetlihem ilma Doodoo,
²⁷ Shamoot namicha gosa Haroor,
 Heleez namicha gosa Pheloonaa,
²⁸ firaa ilma Iqeesh nama Teqoo'aa,
 Abii'ezer nama Anaatoot,
²⁹ Siibekaay nama biyya Hushaa,
 Ilaayi nama Ahoo'aa,
³⁰ Maharaayi nama Netoofaa,
 Heeled ilma Ba'anaa nama Netoofaa,
³¹ gosa Beniyaam keessaa
 Iitaayi ilma Riibaay, namicha Gibe'aa,
 Benaayaa nama Phiraatoon,
³² Huuraayi namicha sululoota Ga'aash,
 Abii'eel namicha biyya Arbaa,
³³ Azmaawet namicha Baharuum,
 Eliiyaabaa namicha Sha'alboon,
³⁴ ilmaan Haasheem namicha Gizoon,
 Yoonaa taan ilma Shaagee namicha Haraaraa,
³⁵ Ahii'aam ilma Saakaar namicha Haraaraa,
 Eliifaal ilma Uuri,
³⁶ Heefer namicha Mekeeraataa,
 Ahiiyaa namicha Pheloonaa,
³⁷ Hezroo nama Qarmeloos,
 Na'araayi ilma Ezbayi,
³⁸ Yoo'eel obboleessa Naataanii,
 Mibehaar ilma Hagrii,

³⁹ Zeleq namicha gosa Amoon,
 Nahaaraay namicha Bi'eeroot kan Yoo'aab ilma Zeruuyaatiif mi'a lolaa baatu sana,
⁴⁰ Iiraas namicha gosa Yitraa,
 Gaareeb namicha gosa Yitraa,
⁴¹ Uuriyaa namicha Heet,
 Zaabaad ilma Ahilayi,
⁴² Aadiinaa ilma Shiizaa namicha gosa Ruubeen, inni hoogganaa Ruubeenotaatii fi kan
 namoota Soddomma isa wajjin turanii ti;
⁴³ Haanaan ilma Ma'akaa,
 Yooshaafaaxi namicha Miitinaa,
⁴⁴ Uziyaa namicha Ashteraati,
 Shaamaa'ii fi Ye'ii'eel ilmaan Hootaam namicha Aro'eer,
⁴⁵ Yedi'yaa'eel ilma Shimrii,
 obboleessa isaa Yoohaa namicha Tiizii,
⁴⁶ Elii'eel namicha Mahawaa,
 Yeriibaayii fi Yooshabiyaa ilmaan Elna'am,
 Yitmaa namicha Mo'aab,
⁴⁷ Elii'eel, Ooobedii fi Ya'isii'el namicha Mezoobaa.

12

Loltoonni Daawititti Dabalammu Isaanii

¹ Namoonni kunneen warra yeroo inni sababii Saa'ol ilma Qiish sanaatiif asii
 fi achi socho'uu dadhabetti Siiqlaagitti gara Daawit dhufanii dha. Isaanis
 loltoota jajjaboo kanneen lola irratti isa gargaaran keessaa tokkoo dha;
² isaan warra iddaa qabatani harka mirgaatiin yookaan harka bitaatiin xiyya
 darbachuu yookaan dhagaa furrissuu danda'anii dha; isaanis gosa Beniyaam
 keessaa warra Saa'oliif firootaa dhiigaa ta'anii dha.

³ Ahii'ezer hangafa isaanii ture; sana booddee immoo Yoo'aashitu ture; lamaan isaanii
 iyyuu ilmaan Shemaa'aa namicha Gibe'aa sanaa turan.
 Ilmaan Azmaawet Yizii'eelii fi Phelet,
 Beraakiyaa, Yehuu namicha Anaatoot, ⁴ Yishma'iyaa namichi Gibe'oonii sun jara
 Soddomma keessaa nama jabaa fi hoogganaa Soddomma isaanii ture;
 Ermiyaas, Yahizii'eel, Yoohaanaan, Yoozaabaad namicha Gedeeraa, ⁵ El'uuzay, Yeri-
 imooti, Be'aaliyaa, Shemaariyaa, Shefaaxiyaa namicha Haruufaa,
⁶ Elqaanaa, Yishiyaa, Azari'eel, Yoozerii fi Yaashobi'aam jarreen gosa Qoorraahi,
⁷ Yoo'elaa fi Zebaadiyaa ilmaan Yeroohaam namicha Gedoor.

⁸ Yeroo Daawit gammoojjiitti da'oo keessa turetti namoonni gosa Gaad tokko tokko
 dhufanii isaatti ni dabalaman. Isaanis loltoota ciccimoo gaachanaa fi eeboo qabachuu
 danda'an kanneen waraanaaf qophaa'an turan. Fuulli isaanii fuula leencaa fakkaata
 ture; isaan akkuma kuruphee tulluu gubbaa saffistoota turan.

⁹ Eezer hoogganaa isaanii ture;
 Obaadiyaan lamaffaa, Eliiyaab sadaffaa,
¹⁰ Mishmanaan afuraffaa, Ermiyaas shanaffaa,
¹¹ Ataayi ja'affaa, Elii'eel torbaffaa,
¹² Yoohaanaan saddeettaffaa, Elzaabaad saglaffaa,
¹³ Ermiyaas kurnaffaa, Makibanaayi kudha tokkoffaa ture.

¹⁴ Jarreen gosa Gaad kunneen ajajjoota loltootaa turan; isaan keessaa inni xinnaan
 akka ajajaa nama dhibbaatti, inni guddaan immoo akka ajajaa nama kumaatti hedama
 ture. ¹⁵ Warri ji'a jalqabaatti yeroo lagni Yordaanos guutee ededa isaa hunda irra
 dhangala'utti ce'anii akka namoonni sululicha keessa jiraachaa turan gara ba'a biiftuutii
 fi gara lixa biiftuutti baqatan godhan namootuma kanneen turan.

¹⁶ Namoonni Beniyaamiitii fi Yihuudaa tokko tokkos Daawit bira gara da'annoo isaa
 ni dhufan. ¹⁷ Daawitis isaan simachuudhaaf gad ba'ee akkana jedheen; "Isin yoo na
 gargaaruudhaaf jettanii nagaadhaan dhuftanii jiraattan, ani ofitti isin dabalachuudhaaf
 qophaa'aa dha. Garuu yoo isin utuu harki koo yakka hin hojjetin diinota kootti
 dabarsitanii na kennuudhaaf dhuftanii jiraattan, Waaqni abbootii keenyaa ilaalee murtii
 haa kennu."

¹⁸ Ergasiis Hafuurri Qulqulluun Amaasaayi hoogganaa namoota Soddomma sanaa irra bu'e; innis akkana jedhe:

"Yaa Daawit, nu kan kee ti!

Yaa ilma Issee, nu suma wajjin jirra!

Milkaa'i, milkaa'i;

warri si gargaaranis haa milkaa'an;

Waaqni kee si gargaaraatii."

Kanaafuu Daawit isaan simatee dura deemtota loltoota isaa isaan godhate.

¹⁹ Yeroo Daawit Saa'olin loluuf jedhee Filisxeemota wajjin duuletti namoonni Minaasee tokko tokko fottoganii gara Daawititti ni goran. Inni garuu sababii bulchitoonni Filisxeem mari'atanii of irraa isa ari'aniif innii fi namoonni isaa Filisxeemota hin gargaarre. Isaanis, "Yoo inni nu dhiisee gara gooftaa isaa gara Saa'ol deebi'e wanni kun nu ficciisaa" jedhanii turaniiti. ²⁰ Yeroo Daawit gara Siqilaag deemetti namoonni Minaasee warri fottoganii gara isaa goran kanneenii dha: Adinaahi, Yoozaabaad, Yedii'eel, Miikaa'el, Yoozaabaad, Eliihuu fi Ziletaayi; isaan kunneen gosa Minaasee keessatti ajajjuuwwan kumaa turan. ²¹ Isaanis balaa buuftota dha'uu irratti Daawitin ni gargaaran; hundi isaanii loltoota jajjaboo fi ajajjoota loltoota isaa turaniiti. ²² Hamma inni loltoota guddaa akka loltoota Waaqaa qabaatutti, namoonni Daawitin gargaaruudhaaf guyyaa guyyaadhaan gara isaa dhufaa ture.

Namoonni Biraas Kebroonitti Daawititti Dabalaman

²³ Baay'inni namoota lolaaf hidhatanii akkuma WAAQAYYO dubbatee turetti mootummaa Saa'ol gara Daawitiitti dabarsuudhaaf jedhanii Daawit bira gara Kebronii dhufanii kanneenii dha:

²⁴ Namoonni Yihuudaa kanneen gaachanaa fi eeboo qabatanii lolaaf qophaa'an 6,800;

²⁵ namoonni Simi'oonii loltoonni waraanaaf qophaa'an 7,100;

²⁶ namoonni Lewwii 4,600; ²⁷ Yehooyaadaan hoogganaa maatii Aroon ture; namoonni 3,700 isa wajjin turan; ²⁸ Zaadoq dargaggeessa loltuu jagnaa sanaa fi maatii isaa keessaa ajajjoota waraanaa 22;

²⁹ namoonni Beniyaam kanneen firoota Saa'olii ta'an 3,000; isaan keessaas hedduun isaanii hamma yeroo sanaatti mana Saa'oliitiif amanamoo turan;

³⁰ namoonni Efreem warri lolatti ciccimoo fi balbala isaanii keessatti bebeekamoo ta'an 20,800;

³¹ walakkaa gosa Minaasee keessaa namoonni Daawitin mootii gochuudhaaf maqaan isaanii galmaa'ee dhufan 18,000;

³² namoota Yisaakor keessaa warra haala yeroo hubatanii waan Israa'eloonni gochuu qaban beekan hangafoota 200, firoota isaanii kanneen isaan jalatti bulan hunda wajjin;

³³ namoota Zebuuloon keessaa loltoonni muuxannoo qaban warri meeshaa lolaa kamiin iyyuu loluuf qophaa'an kanneen Daawitin gargaaruuf garaan isaanii tokko ta'e 50,000;

³⁴ namoota Niftaalem keessaa ajajjoota 1,000; namoota gaachanaa fi eeboo qabatan 37,000 wajjin;

³⁵ namoota Daan kanneen lolaaf qophaa'an 28,600;

³⁶ namoota Aasheer keessaa loltoonni muuxannoo qaban kanneen lolaaf qophaa'an 40,000;

³⁷ gama ba'a Yordaanosiitii namoota Ruubeen, namoota Gaadiitii fi walakkaa gosa Minaasee keessaa namoota mi'a lolaa kan gosa hundaa hidhatan 120,000.

³⁸ Isaan kunneen hundinuu loltoota waraana keessa tajaajiluudhaaf of kennanii dha.

Isaanis Israa'el hunda irratti Daawitin mootii gochuuf kutatanii gara Kebron ni dhufan. Israa'eloonni hafan hundinuu Daawitin mootii gochuuf yaaduma tokko qabu turan. ³⁹ Namoonnis sababii maatiin isaanii waan hunda isaaniif qopheessaniif nyaachaa dhugaa guyyaa sadii Daawit wajjin achi turan. ⁴⁰ Akkasumas olloonni isaanii kanneen hamma Yisaakoriitti, Zebuuloonittii fi Niftaalemiitti jiran harrootatti, gaalawwanitti, gaangolii fi sangootatti nyaata fe'anii fidanii ni dhufan. Sababii Israa'el keessa gammachuun guddaan tureefis daakuun, bixxilleen ija harbuutii fi bixxilleen ija wayinii, daadhiin wayinii, zayitiin, loonii fi hooloonni akka malee baay'een dhi'eeffamanii turan.

13

Taabota Deebisanii Fidan

13:1-14 kwf - 2Sm 6:1-11

¹ Daawit ajajjoota isaa hunda ajajjoota kumaatii fi ajajjoota dhibbaa wajjin ni mari'ate. ² Ergasii inni yaa'ii Israa'el guutuudhaan akkana jedhe; "Yoo wanni kun waan gaarii isinitti fakkaatee fi yoo fedhii WAAQAYYO Waaqa keenyaa ta'e, kottaa mee akka isaan dhufanii hufni dabalamanii obboloota keenya kanneen guutummaa biyya Israa'el keessatti hafanitti akkasumas lubootaa fi Lewwota isaan wajjin magaalawwanii fi lafa dheeda isaanii keessa jiraatanitti ergaa haa erginu. ³ Taabota Waaqa keenyaa deebifnee haa fidannu; nu bara mootummaa Saa'ol keessa isa hin barbaaneetii." ⁴ Sababii wanni kun saba hundatti waan qajeelaa fakkaateef guutummaan yaa'ii sanaa waan kana gochuudhaaf walii gale.

⁵ Kanaafuu Daawit taabota Waaqaa Kiriyaati Ye'aariimii fiduudhaaf Israa'eloota Laga Shihoorii kan biyya Gibxiitti argamuu jalqabee hamma karra Hamaatiitti jiran hunda walitti qabe. ⁶ Daawitii fi Israa'eloonni isa wajjin turan hundi taabota Waaqa kiirubeelii gidduu teessoo irra jiru sanaa jechuunis taabota Maqaa WAAQAYYOOTIIN waamamu sana achii fiduuf jedhanii gara Ba'aalaa jechuunis gara Kiriyaati Ye'aariim ishee Yihuudaa keessaa sanaa ni dhaqan.

⁷ Isaanis taabota Waaqaa sana gaarii haaraatti fe'anii mana Abiinaadaabiitii ni baasan; Uzaa fi Ahiiyoon gaarii sana oofaa turan. ⁸ Daawitii fi Israa'eloonni hundinuu humna isaanii guutuudhaan faarfannaa fi baganaadhaan, kiraaraa fi dibbeedhaan, kilillee fi malakataan fuula Waaqaa duratti gammadanii shuubbisaa.

⁹ Yommuu isaan oobdi Kiidoon bira ga'anitti waan sangoonni gufataniif Uzaan taabota sana qabuuf harka isaa hiixate. ¹⁰ Sababii Uzaan taabota irra harka isaa kaa'eef dheekkamsi WAAQAYYOO Uzaatti boba'e; innis isa rukute; kanaafuu inni achumatti fuula Waaqaa duratti ni du'e.

¹¹ Daawitis sababii WAAQAYYO akka malee Uzaatti dheekkameef ni aare; iddoon sun hamma har'aatti Phereez Uzaa* jedhamee waamama.

¹² Daawitis gaafa sana Waaqa sodaatee, "Ani akkamittan taabota Waaqaa gara mana kootti fiduu danda'a?" jedhee gaafate. ¹³ Innis akka taabonni isa wajjin Magaalaa Daawit keessa jiraatuuf ofitti hin fudhanne. Qooda kanaa gara mana Ooheed Edoom namicha Gitii sanaatti geesse. ¹⁴ Taabonni Waaqaas ji'a sadii maatii Ooheed Edoom wajjin mana isaa keessa ture; WAAQAYYOS warra mana isaa jiraatanii fi waan inni qabu hunda ni eebbise.

14

Mana Daawitii fi Maatii Isaa

14:1-7 kwf - 2Sm 5:11-16; 1Sn 3:5-8

¹ Yeroo kanatti Huuraam mootiin Xiiroos akka isaan Daawitiif masaraa mootummaa ijaaranii ergamoota wajjin muka birbirsaa, warra dhagaa soofanii fi warra ogummaa hojii mukaa qaban gara Daawititti erge. ² Daawitis akka WAAQAYYO saba Israa'el irratti mootii godhee jabeessee isa dhaabee fi akka mootummaan isaas sababii saba Israa'elii akka malee guddate ni beeke.

³ Daawitis Yerusaleem keessatti niitota dabalee fuudhee ilmaanii fi intallan dabalataa dhalche. ⁴ Maqaan ijoollee isaa kanneen achitti isaaf dhalataniis: Shamuu'aa, Shobaab, Naataan, Solomoon, ⁵ Yibehaar, Eliishuuwaa, Eliiphelexi, ⁶ Noogaa, Nefeg, Yaafiyaa, ⁷ Eliishaamaa, Beeliyaadaa fi Eliiphelexi jedhamu.

Daawit Filixeemota Mo'ate

14:8-17 kwf - 2Sm 5:17-25

⁸ Filixeemonni yommuu akka Daawit dibamee guutummaa Israa'el irratti mootii ta'e dhaga'anitti humna guutuudhaan isa barbaacha ol ba'an; Daawit garuu waan kana dhaga'ee isaanitti ba'e. ⁹ Yeroo kanatti Filixeemonni dhufanii Sulula Refaayim weeraran; ¹⁰ kanaafuu Daawit, "Ani ba'ee Filixeemota dha'uu? Ati dabarsitee harka kootti isaan kennitaa?" jedhee Waaqa ni gaafate.

WAAQAYYOS, "Ba'i; ani dhugumaan Filixeemota dabarsee harka keetti nan kennaatii" jedhee deebiseef.

¹¹ Kanaafuu Daawitii fi namoonni isaa gara Ba'aal Pheraaziim ol ba'an; achittis isaan mo'ate. Innis, "Akkuma bishaan mana isaa cabsee yaa'u sana Waaqni harka kootiin diinota koo cabsee ba'eera" jedhe. Kanaafuu iddoon sun Ba'aal Pheraaziim jedhamee

* 13:11 13:11 Phereez Uzaa jechuun galaafatamuu jechuu dha.

waamame. ¹² Filisxeemonni waaqota isaanii tolfamoo achitti ni dhiisan; Daawit immoo akka waaqonni sun ibiddaan gubaman ni ajaje.

¹³ Filisxeemonni amma illee deebi’anii sulula sana weeraran; ¹⁴ kanaafuu Daawit ammas Waaqa gaafate; Waaqnis akkana jedhee deebiseef; “Qajeelumatti itti ol hin ba’in; garuu isaan marsiitii muka qilxuu duratti isaan waraani. ¹⁵ Akkuma fiixee muka qilxuu irraan sagalee duulaa dhageeseen loluuf ba’i; Waaqni loltoota Filisxeem dha’uudhaaf si dura ba’eera jechuudhaatii.” ¹⁶ Kanaafuu Daawit akkuma Waaqni isa ajaje sana ni godhe; isaanis Gibe’oonii jalqabanii hamma Geeziritti loltoota Filisxeem ni dha’an.

¹⁷ Akkasiin maqaan Daawit biyya hunda keessatti beekame; WAAQAYYOS akka saboonni hundinuu isa sodaatan godhe.

15

Taabonni Gara Yerusaalem Fidame

15:25-16:3 kwf - 2Sm 6:12-19

¹ Daawit erga ofii isaatiif Magaalaa Daawit keessatti mana ijaarratee booddee taabota Waaqaatiif lafa qopheessee dunkaana dhaabe. ² Ergasiis Daawit, “Waan WAAQAYYO akka isaan taabota Waaqaa baatanii bara baraan fuula isaa dura tajaajilaniif isaan filateef, Lewwota malee namni biraa taabota WAAQAYYOO hin baatin” jedhee ajaje.

³ Daawitis taabota WAAQAYYOO iddoo qopheesseeff sanatti fiduuf Israa’eloota hunda Yerusaaalemitti walitti qabe.

⁴ Innis sanyiiwwan Aroonii fi Lewwota walitti waame; isaanis:

⁵ ilmaan Qohaati keessaa,

Uurii’eel hoogganaa sanaa fi firoota isaa nama 120;

⁶ ilmaan Meraarii keessaa,

Asaayaa hoogganaa sanaa fi firoota isaa 220;

⁷ ilmaan Geershoom keessaa,

Yoo’eel hoogganaa sanaa fi firoota isaa 130;

⁸ ilmaan Eliisaafaan keessaa,

Shemaa’iyaa hoogganaa sanaa fi firoota isaa 200;

⁹ ilmaan Kebroon keessaa,

Elii’eel hoogganaa sanaa fi firoota isaa 80;

¹⁰ ilmaan Uzii’eel keessaa,

Amiinaadaab hoogganaa sanaa fi firoota isaa nama 112.

¹¹ Ergasiis Daawit luboota jechuunis Saadoqqii fi Abiyaataar akkasumas Lewwota jechuunis Uurii’eel, Asaayaa, Yoo’eel, Shemaa’iyaa, Elii’eelii fi Amiinaadaabin ni waame; ¹² akkanas isaaniin jedhe: “Isin hangafoota maatiiwwan Lewwotaa ti; isinii fi Lewwonni akka keessanii of qulqulleessaa; ergasiis taabota WAAQAYYO Waaqa Israa’el gara iddoo ani qopheesseeffitti fidaa. ¹³ Sababii isin Lewwonni yeroo jalqabaatti taabota sana hin fidiniif WAAQAYYO Waaqni keenya nutti dheekkame. Nu akka seerri ajajutti isa hin barbaaddanneetii.” ¹⁴ Kanaafuu luboonni fi Lewwonni taabota WAAQAYYO Waaqa Israa’el sana fiduuf of qulqulleessan. ¹⁵ Lewwonni akkuma kan Museen dubbii WAAQAYYOOTIIN ajajetti taabota Waaqaa sana danqaraadhaan gatiitii isaaniitti ni baatan.

¹⁶ Daawitis akka isaan meeshaa muuziiqaatiin jechuunis kiraaraan, baganaa fi kililleedhaan faarfannaa gammachuu faarfatanii akka isaan obboloota isaanii muudaniif Lewwota dura deemtotatti ni hime.

¹⁷ Kanaafuu Lewwonni Heemaan ilma Yoo’eel muudatan; obboloota isaa keessaa immoo Asaaf ilma Berekiyaa, obboloota isaanii gosa Meraarii keessaa Eetaan ilma Qushaayaa ni muudatan; ¹⁸ isaan wajjinis obboloota isaanii kanneen isaanitti aannan: Zakkaariyaas, Ya’azii’eel, Shemiiraamoot, Yehii’eel, Unnii, Eliiyaab, Benaayaa, Ma’aseyaa, Matiitiyaa, Eliipheleehuu, Miiqneyaa, Obeed Edoomii fi Ye’ii’eel eegdota balbalaa turan.

¹⁹ Faarfattoonni Heemaan, Asaafii fi Eetaan jedhaman akka kilillee naasiitiin sagalee isaanii ol fudhatanii faarfannaa dhageessisaniif ni muudaman; ²⁰ Zakkaariyaas, Azii’eel Shemiiraamoot, Yehii’eel, Unnii, Eliiyaabi, Ma’aseyaanii fi Benaayaa immoo akka seera *alamootiitti** kiraaraan faarfatu ture; ²¹ akkasumas Matiitiyaan, Eliipheleehuu, Miiqneyaan, Obeed Edoom, Ye’ii’eel, Azaaziyaan akka seera *shiiimiiniitti*† baganaa

* 15:20 15:20 Alamootiin gosa muuziiqaa ti. † 15:21 15:21 Shiimiiniitiin gosa muuziiqaa ti.

taphatu ture. ²² Kenaaniyaan hangaftichi Lewwotaa itti gaafatamaa faarfannaa ture; innis itti gaafatamummaa kana sababii ogummaa isaa qabuuf fudhate.

²³ Berekiyaa fi Elqaanaan eegdotaa balbala taabotaa turan. ²⁴ Luboonni jechuunis, Shebaniyaan, Yooshaafaaxi, Naatnaa'el, Amaasaayi, Zakkaariyaas, Benaayaanii fi Elii'ezer fuula taabota Waaqaa duratti malakata afuufu ture. Oobeed Edoomii fi Yehiyaan immoo eegdotaa balbala taabotaa turan.

²⁵ Kanaafuu Daawitii fi maanguddoonni Israa'el akkasumas ajajjuuwwan kumaa gammachuudhaan taabota kakuu WAAQAYYOO sana mana Oobeed Edoomiitii fiduu dhaqan. ²⁶ Isaanis sababii Waaqni Lewwota taabota kakuu WAAQAYYOO baatan gargaareef korommii loonii torbaa fi korbeeyyii hoolaa torba aarsaa godhan. ²⁷ Daawitis wandaboo haphii quncee talbaa irraa hojjetame kan akka uffata Lewwonni taabota sana baatan, kan akka faarfattoonnii fi Kenaaniyaan qajeelchaan faarfannaa faarfattootaa uffatan sanaa uffatee ture. Daawitis dirata quncee talbaa irraa hojjetames uffatee ture. ²⁸ Akkasiinis Israa'el hundi gaanfa korbeessa hoolaatii fi malakata afuufaa, killillee dhageessisaa, kiraaraa fi baganaadhaan sirbaa taabota kakuu WAAQAYYOO sana ni fidan.

²⁹ Yeroo taabonni kakuu WAAQAYYOO Magaalaa Daawit seenutti Miikaal intalli Saa'ol foddada keessaan ilaalaa turte. Isheenis akka Daawit Mootichi shuubbisee gammadu yommuu argitetti garaa ishee keessatti isa tuffatte.

16

¹ Isaanis taabota Waaqaa fidanii dunkaana Daawit dhaabeef keessa ni kaa'an; aarsaa gubamuu fi aarsaa nagaa fuula Waaqaa duratti ni dhi'eessan. ² Daawitis erga aarsaa gubamuu fi aarsaa nagaa dhi'eessaa booddee maqaa WAAQAYYOOTIN namoota ni eebbise. ³ Ergasiis inni tokkoo tokkoo nama Israa'eliitiif, dhiiraa fi dubartiif buddeena tokko tokko, gumaa foonii tokko tokkoo fi bixxillee ija wayinii tokko tokko ni kenne.

⁴ Innis akka isaan fuula taabota WAAQAYYOO duratti tajaajilaniif, akka isaan WAAQAYYOO Waaqaa Israa'el waammataniif, akka isa galateeffatanii fi akka isa jajataniiif Lewwota tokko tokko ni muuddate; ⁵ isaanis Asaaf hangafticha, Zakkaariyaas itti aanaa isaa, itti fufees Ye'ii'eel, Shemiraamoot, Yehii'eel, Matiitiyaa, Eliiyaab, Benaayaa, Oobeed Edoomii fi Ye'ii'eel fa'i turan. Jarri kunneen kiraaraa fi baganaa taphatu ture; Asaaf immoo killillee dhageessisa ture; ⁶ Benaayaa fi Yahizii'eel luboonni yeroo hunda fuula taabota kakuu Waaqaa duratti malakata afuufu turan.

Faarfannaa Daawit Kan Galataa

16:8-22 kwf - Far 105:1-15

16:23-33 kwf - Far 96:1-13

16:34-36 kwf - Far 106:1,47-48

⁷ Daawitis gaafa sana akka Asaafii fi michoota isaa faarfannaa galataa kana WAAQAYYOO faarfataniiif jalqabatti ajaja kenne:

⁸ WAAQAYYOO galata galchaa; maqaa isaas waammadhaa;

waan inni hojjetes saboota gidduutti beeksisaa.

⁹ Isaaf faarfadhaa; faarfannaadhaan isa galateeffadhaa;

waa'ee hojii isaa isa dinqisiisaa hundaas odeessaa.

¹⁰ Maqaa isaa qulqulluu sanaan boonaa;

garaan warra WAAQAYYON barbaadani haa gammadu.

¹¹ WAAQAYYOO fi humna isaa barbaaddadhaa;

yeroo hunda fuula isaa barbaadaa.

¹² Dinqii inni hojjetee, hojii isaa dinqii sanaa fi

murtii inni labse yaadadhaa;

¹³ isin tajaajiltoonni isaa, warri sanyii Israa'el taatan,

isin filatamtoonni isaa, ilmaan Yaaqoobis kana yaadadhaa.

¹⁴ Inni WAAQAYYOO Waaqa keenya;

murtiin isaas lafa hunda irra jira.

¹⁵ Inni kakuu isaa bara baraan, waadaa gale sanas

dhaloota kumaaf ni yaadata;

¹⁶ inni kakuu Abrahaam wajjin gale,

kakuu Yisihaaqiif kakates ni yaadata.

¹⁷ Kanas Yaaqoobiif seera,

Israa'eliif immoo kakuu bara baraa godhee

akkana jedhee mirkaneesseera; innis:

¹⁸ "Ani biyya Kana'aan qooda ati dhaaltu godhee,

siif nan kenna” jedhe.

- ¹⁹ Isaan yeroo lakkoobsaan xinnoo turanitti,
dhugumaanuu xinnoo fi biyyattii keessattis keessummoota turanitti,
²⁰ saba gara sabaatti, mootummaa tokkoo
gara mootummaa biraatti jooran.
²¹ Inni akka namni tokko iyyuu isaan cunqursu hin eeyyamne;
sababii isaaniitiifis akkana jedhee mootota ifate:
²² “Dibamtoota koo hin tuqinaa;
raajota koos hin miidhinaa.”
- ²³ Lafti hundinuu WAAQAYYON faarfadhaa;
fayyisuu isaas guyyuma guyyaan labsaa.
²⁴ Ulfina isaa saboota gidduutti,
hojii isaa dinqisiisaa sana immoo namoota hunda keessatti labsaa.
²⁵ WAAQAYYO guddaadhaatii galanni baay’een isaaf ni mala;
inni waaqota hundaa olittis sodaatamuu qaba.
²⁶ Waaqonni saboota ormaa hundinuu waaqota tolfamoodhaatii;
WAAQAYYO garuu samiiwwan uume.
²⁷ Miidhaginnii fi surraan fuula isaa dura jiru;
jabinnii fi gammachuunis iddoo jireenya isaa jiru.
²⁸ Yaa maatiiwwan sabootaa, WAAQAYYOOF kenna;
ulfinaa fi jabina WAAQAYYOOF kenna.
²⁹ Ulfina maqaa isaatiif malu WAAQAYYOOF kenna.
Aarsaa fidaatii fuula isaa duratti dhi’aadhaa.
bareedina qulqullummaa isaatiin WAAQAYYON waaqeffadhaa.
³⁰ Isin lafti hundinuu fuula isaa duratti holladhaa!
Addunyaan jabaattee dhaabatteerti; sochoofamuus hin dandeessu.

- ³¹ Samiiwwan haa ililchan; laftis haa gammaddu;
isaan saboota gidduutti, “WAAQAYYO mo’eera!” haa jedhan.
³² Galaannii fi wannii isa keessa jiru hundinuu haa huursu;
dirreewwanii fi wannii isaan irra jiran hundinuu haa gammadani!
³³ Mukkeen bosonaa haa faarfatan;
isaan gammachuudhaan fuula WAAQAYYOO duratti haa faarfatan;
inni lafatti muruudhaaf ni dhufaatii.
- ³⁴ WAAQAYYOOF galata galchaa; inni gaariidhaatii;
jaalalli isaa bara baraan jiraata.
³⁵ Akkana jedhaatii iyyaa; “Yaa Waaqayyo,
Fayyisaa keenya, ati nu baasi;
akka nu maqaa kee qulqulluu sana galateeffannuuf,
akka galata keetiin of jajnuufis, walitti nu qabiitii saboota ormaa jalaa nu oolchi.”
³⁶ WAAQAYYO Waaqa Israa’eliitiif
bara baraa hamma bara baraan galanni haa ga’u.
Kana irratti namni hundinuu, “Ameen; WAAQAYYO haa galatoomu” jedhe.

³⁷ Daawitis akka isaan fuula taabotaa dura yeroo hunda tajaajilaniif, Asaafii fi ob-
bolloota isaa achuma fuula taabota kakuu WAAQAYYOO duratti isaan dhiise. ³⁸ Akkasumas
Oobeed Edoomii fi warra isaan wajjin hojjetan jaatamii saddeettan akka isaan wajjin
tajaajilaniif achitti dhiise. Oobeed Edoom ilmi Yeduutuuniitii fi Hoosaan eegdota
balbalaa turan.

³⁹ Daawit Zaadoq lubichaa fi luboota isa wajjin hojjetan kaan dunkaana WAAQAYYOO
qulqulluu kan Gibe’oon keessatti gaara sagadaa irratti argamu biratti dhiise; ⁴⁰ kunis
isaan akkuma waan Seera WAAQAYYOO kan inni Israa’eliif kenne hunda keessatti
barreeffame sanaatti yeroo hunda galgalaa fi ganama iddoo aarsaa gubamuu irratti
aarsaa gubamu WAAQAYYOOF akka dhi’eessaniif. ⁴¹ Isaan wajjinis Heemaanii fi Yeduu-
tuun akkasumas warra akka, “Jaalalli isaa bara baraan jiraata” jedhanii WAAQAYYOOF
galata galchaniif filatamanii maqaan isaanii beekame biraatu ture. ⁴² Heemaanii fi
Yeduutuun sagalee malakataatiif kilillee dhageessisuu fi akkasumas meeshaa muuziiqaa
kan Waaqaa irratti itti gaafatamtoota turan. Ilmaan Yeduutuun immoo karra eegan.

⁴³ Ergasii namoonni hundinuu achii ka'anii tokkoon tokkoon isaanii gara mana ofii isaatti galan; Daawit immoo maatii ofii eebbisuuf gara manaatti ni deebi'e.

17

Abdii Waaqayyo Daawitin Abdachiise

17:1-15 kwf - 2Sm 7:1-17

¹ Daawit erga masaraa isaa keessa jiraachuu jalqabee booddee Naataan raajichaan, "Ani kunoo mana birbirsaan ijaarame keessan jiraadha; taabonni kakuu WAAQAYYOO garuu dunkaana keessa jiraata" jedhe.

² Naataan immoo deebisee Daawitiin, "Waaqni si wajjin jiraatii waan garaa keetti yaadde kam iyyuu godhi" jedhe.

³ Halkan sana garuu dubbii Waaqayyoo akkana jedhee gara Naataan dhufe:

⁴ "Dhaqiitii akkana jedhii garbicha koo Daawititti himi; 'WAAQAYYOO akkana jedha: Kan mana ani keessa jiraadhu naaf ijaaru si'i miti. ⁵ Ani gaafan Israa'elin Gibxii baasee jalqabee hamma har'aatti mana keessa hin jiraanne. Ani dunkaana tokkoo irraa gara isa kaaniitti, iddoo bultii tokkoo irraa gara iddoo bultii isa kaaniitti darbaan ture. ⁶ Ani iddoo Israa'eloota hunda wajjin naanna'aa ture kamitti iyyuu hooggantoota akka isaan saba koo eeganiif ajaje keessaa nama tokkoon iyyuu, "Isin maaliif mana birbirsaa naaf hin ijaarre?" jedhee beekaa?"

⁷ "Eгаа аmma akkana jedhii garbicha koo Daawititti himi; 'WAAQAYYON Waan Hunda Danda'u akkana jedha: Ani akka ati bulchaa saba koo Israa'el taatuuf, lafa tikaatii fi bushaayee faana deemuu keessaan si fudhadhe. ⁸ Ani lafa ati dhaqxe hundatti si wajjinin ture; diinota kee hundas fuula kee duraa balleesseera. Ammas ani maqaa kee akkuma maqaa namoota addunyaa irratti akka malee gurguddaa ta'anii nan godha. ⁹ Ani akka isaan mana ofii isaanii qabaatanii fi akka isaan si'achi hin raafamneef saba koo Israa'eliif lafa kennee isaan nan dhaaba. Namoonni hamoon akka jalqabatti godhan sana deebi'anii isaan hin cunqursan; ¹⁰ akka yeroo ani saba koo Israa'el irratti abbootii murtii muudee as godhan sana illee hin godhan; ani diinota kee hundas siifin garboomsa.

"Ani akka WAAQAYYOO mana siif ijaaru sittin hima: ¹¹ Yommuu barri jireenya keetii dhumee ati abbootii keetti dabalamuuf dhaqxutti ani akka inni iddoo kee bu'uuf sanyii kee keessaa, ilmaan kee keessaa tokko nan kaasa; mootummaa isaa illee jabeessee nan dhaaba. ¹² Kan mana naaf ijaaru isa; anis teessoo isaa bara baraan jabeessee nan dhaaba. ¹³ Ani isaaf abbaa nan ta'a; innis ilma naa ta'a. Ani akka namicha si dura ture sana irraa fudhadhe, jaalala koo gonkumaa isa irraa hin fudhadhu. ¹⁴ Ani mana koo fi mootummaa koo irratti bara baraan isa nan muuda; teessoon isaas bara baraan jabaatee ni dhaabata.'"

¹⁵ Naataanis dubbii mul'ata kanaa hunda Daawititti hime.

Kadhannaa Daawit

17:16-27 kwf - 2Sm 7:18-29

¹⁶ Ergasii Daawit mootichi ol seenee fuula WAAQAYYOO dura taa'ee akkana jedhe:

"Yaa WAAQAYYOO, yaa Waaqi, kan ati asiin na geesse, ani eenyu? Maatiin koos maali? ¹⁷ Yaa Waaqi, ati akka waan wanni kun fuula kee duratti quubsa hin ta'iniitti ilaaltee waa'ee mana garbicha keetii kan fuul duraa illee dubbatte. Yaa WAAQAYYOO, yaa Waaqi, ati akka waan ani nama hunda caalaa kabajamaa ta'eetti na ilaalte.

¹⁸ "Waan ati garbicha kee ulfeessiteef Daawit kana caalaa maal jechuu danda'a? Ati garbicha kee ni beektaatii. ¹⁹ Yaa WAAQAYYOO, ati sababii garbicha keetiitii fi akkuma fedhii keetiitii waan guddaa kana goote; akka waadaawwan gurguddaan kunneenis beekaman gooteerta.

²⁰ "Yaa WAAQAYYOO, kan akka keetii tokko iyyuu hin jiru; akka nu gurruma keenyaan dhageenyetti si malee Waaqni biraa hin jiru. ²¹ Sabni akka saba kee Israa'el kan Waaqni saba lafa irra jiraatu keessaa saba tokkicha ofii isaatiif furachuu fi ofii keetiitiifis maqaa tolfachuuf jettee fuula saba keetii duraa saboota ari'uudhaan dinqiiwwan gurguddaa fi sodaachisaa hojjechuudhaaf ba'e, kan ati Gibxii baafte sanaa tokko iyyuu jiraa? ²² Ati saba kee Israa'elin bara baraan kan ofii keetii goote; Yaa WAAQAYYOO, ati Waaqa isaanii taateerta.

²³ "Ammas yaa WAAQAYYOO, waadaan ati garbicha keetii fi mana isaatiif galte sun bara baraan jabaatee haa dhaabatu. Ati akkuma waadaa galte sana raawwadhu; ²⁴ kunis akka maqaan kee jabaatee dhaabatee, bara baraanis guddaa ta'uuf. Kana irratti namoonni, 'WAAQAYYON Waan Hunda Danda'u, Israa'el irratti Waaqa; inni

Waaqa Israa'el' ni jedhu. Manni garbicha kee Daawitis fuula kee duratti jabaatee ni dhaabata.

²⁵ “Yaa Waaqa ko, ati akka mana isaaf ijaartu garbicha keetti mul'ifteerta. Kanaafuu garbichi kee si kadhachuudhaaf ija jabina argateera. ²⁶ Yaa WAAQAYYO, ati Waaqa! Ati waan gaarii kana garbicha keetiif waadaa galteerta. ²⁷ Akka manni isaa bara baraan jabaattee fuula kee dura dhaabatuuf ammas mana garbicha keetii eebbisuun fedhii kee ta'eera; yaa WAAQAYYO sababii ati isa eebbifteef, inni bara baraan ni eebbifama.”

18

Mo'annoowwan Daawit

18:1-13 kwf - 2Sm 8:1-14

¹ Ergasii Daawit Filixeemota mo'atee of jala isaan galfate; Gaatii fi gandoota naannoo ishee jiranis harka Filixeemotaatii baase.

² Daawit Mo'aabotas ni mo'ate; isaanis isa jalatti bulanii gibira fidaniif.

³ Kana irrattis Daawit yeroo Laga Efraaxiis bira yaadannoo ofii dhaabbachuu dhaqetti, hamma Hamaatiitti deemee Hadaadezer mooticha Zoobaa mo'ate. ⁴ Daawitis gaariwwan waraanaa isaa kuma tokko, abbootii fardaa kuma torbaa fi loltoota lafoo kuma digdama isa irraa fudhate. Innis fardeen gaariwwanii dhibba tokko qofa hambisee kanneen hafan hunda mogolee kukkute.

⁵ Yeroo warri Sooriyaa kanneen Damaasqoo jiraatan Hadaadezer mooticha Zoobaa gargaaruuf dhufanittis, Daawit isaan keessaa nama kuma digdamii lama fixe. ⁶ Ergasiis kutaa bulchiinsa Damaasqoo kan biyya Sooriyaa keessa qubata loltootaa dhaabbate; warri Sooriyaas isa jalatti bulanii gibira fidaniif. WAAQAYYOS Daawitiif lafa inni dhaqe hundatti moo'icha kenne.

⁷ Daawitis gaachana warqee kan ajajjoonni loltoota Hadaadezer harkatti qabatan fudhatee gara Yerusaleem fide. ⁸ Daawit magaalawwan Hadaadezer jechuunis Xibihaatii fi Kuuni naasii akka malee baay'ee fudhate; Solomoon immoo Gaanii naasii, utubaawwanii fi mi'oota naasii garaa garaa naasii sana irraa hojjete.

⁹ Too'uun mootiin Hamaati yommuu akka Daawit guutummaa loltoota Hadaadezer mooticha Zoobaa mo'ate dhaga'etti, ¹⁰ akka inni sababii ol aantummaa Daawit Mootichi waraana keessatti Hadaadezer irratti argateetiif harka isa fuudhee dhaamsa gammachuu isaaf dabarsuuf ilma ofii Hadooraamin gara isaatti erge; Hadaadezer Too'uu wajjin wal waraanaa tureetii. Adooraamis kennaa gosa hundaa warqee irraa, meetii fi naasii irraa hojjetaman fideef.

¹¹ Daawit Mootichis akkuma meetii fi warqee saboota Edoom, Mo'aab, Amoonota, Filixeemotaa fi Amaaleq hunda irraa booji'ee ture godhe sana mi'oota kanneen illee WAAQAYYOOF addaan baase.

¹² Abiishaayi ilmi Zeruuyaa Sulula Soogiddaa keessatti Edoomota kuma kudha saddeet fixe. ¹³ Innis Edoom keessa qubata loltootaa dhaabbate; Edoomni hundinuus Daawitiif ni garbooman. WAAQAYYOS lafa inni dhaqe hundatti Daawitiif mo'annaa ni kenne.

Qondaaltota Daawit

18:14-17 kwf - 2Sm 8:15-18

¹⁴ Daawit guutummaa Israa'el irratti mootii ta'ee saba isaa hundaaf murtii qajeelaa fi qajeelummaadhaan hojjete.

¹⁵ Yoo'aab ilmi Zeruuyaa hoogganaa loltootaa ture;

Yehooshaafaax ilmi Ahiiluud immoo galmeessaa ture;

¹⁶ Zaadoq ilmi Ahiixuubii fi Abiimelek ilmi Abiyaataar luboota turan;

Shaafisaan immoo barreessaa ture;

¹⁷ Benaayaa ilmi Yehooyaadaa hoogganaa Kereetotaa fi Phelletotaa ture;

ilmaan Daawit immoo mootichatti aananii qondaaltota hangafoota turan.

19

Waraana Amoonota Irratti Baname

19:1-19 kwf - 2Sm 10:1-19

¹ Ergasiis Naahaash mootiin Amoonotaa ni du'e; ilmi isaa iddoo isaa bu'ee mootii ta'e. ² Daawitis, “Sababii abbaan isaa naa arjoomeef anis Haanuun ilma Naahaashiif nan arjooma” jedhee yaade. Kanaafuu Daawit gadda waa'ee abbaa isaatiif itti dhaga'ame isaa ibsuuf Haanuunitti ergamoota ni erge.

Yommuu namoonni Daawit dhaamsa gaddaa itti himuuf Haanuun bira biyya Amoonotaa dhaqanitti, ³ qondaaltonni Amoonotaa Haanuuniin, “Ati sababii Daawit akka isaan dhaamsa gaddaa sitti himaniif namoota sitti ergeef inni waan abbaa keetiif ulfina kenne seetaa? Ergamoonni isaa biyyattii qorachuu, basaasanii qabachuuf gara kee dhufan mitii?” jedhan. ⁴ Kanaafuu Haanuun namoota Daawit sana qaqgabee rifeensa irraa haadee wayyaa isaanii illee teessuma irratti cicciree of irraa isaan erge.

⁵ Daawit yommuu namni tokko dhufee waa’ee namoota sanaa isatti himetti, sababii isaan akka malee qaana’aniif ergamoota gara isaaniitti erge. Mootichis “Isin hamma areedni keessan isinii guddatutti Yerikoo turaatii ergasii deebi’aa kottaa” jedheen.

⁶ Amoononni yommuu akka Daawit isaan xireeffate hubatanitti Haanuunii fi Amoononni Phaadaan Arraamii, Araama’aakaa fi Zoobaadhaa gaariiwwan kireeffachuuf meetii taalaantii* kuma tokko ni ergan. ⁷ Isaanis gaariiwwan kuma soddonii lamaa fi ooftota gaariiwwanii, akkasumas mootii Ma’akaatii fi loltoota isaa kanneen dhufanii Meedebaa bira qubatan sana kireeffatan; Amoononni immoo magaalawwan isaaniitti walitti qabamanii waraanatti ni qajeelan.

⁸ Daawit yommuu waan kana dhaga’etti Yoo’aabii fi guutummaa loltootaa ni erge. ⁹ Amoononni immoo ba’anii karra magaalaa isaanii irratti waraanaaf hiriiran; mootonni dhufan sun immoo kophaa isaanii dirree irra turan.

¹⁰ Yoo’aabis akka fuula isaa duraa fi dugda isaa duubaan waraanni jiru ni arge; kanaafuu loltoota Israa’el keessaa namoota bebeekamoo filatee adda loltoonni Sooriyaa jiranitti bobbaase. ¹¹ Namoota hafan immoo ajaja obboleessa isaa Abiishaayi jalatti ni hiriirre; isaanis Amoonotatti duulan. ¹² Yoo’aabis akkana jedhe; “Yoo warri Sooriyaa natti jabaatan ati na gargaarta; yoo Amoononni sitti jabaatan immoo ani sin gargaara. ¹³ Jabaadhaa saba keenyaa fi magaalawwan Waaqa keenyaatiif garaa kutannaadhaan haa lollu. WAAQAYYOS waan fuula isaa duratti gaarii ta’e ni godha.”

¹⁴ Ergasii Yoo’aabii fi loltoonni isa wajjin turan warra Sooriyaa waraanuuf fuul duratti ni qajeelan; jarris fuula isaa duraa baqatan. ¹⁵ Amoononni yommuu akka namoonni Sooriyaa baqatan arganitti isaanis fuula obboleessa isaa Abiishaayi duraa baqatanii magaalaa seenan. Akkasiin Yoo’aab Yerusaleemitti deebi’ee.

¹⁶ Namoonni Sooriyaa yommuu akka Israa’eloonni isaan mo’atan arganitti ergamoota erganii namoota Sooriyaa kanneen Laga Efraaxiisiitiin gamaa fichisiisan; Shoofaki ajajaan loltoota Hadaadezer sun isaan hoogganaa ture.

¹⁷ Daawitis yommuu wanni kun isatti himametti, Israa’eloota hunda walitti qabee Yordaanos ce’e; innis dursee dhagee fuula isaanii duraan toora lolaa ni qabate. Daawitis warra Sooriyaa waraanuuf loltoota isaa hiriirre; namoonni Sooriyaas ni lolaniin.

¹⁸ Isaan garuu Israa’eloota duraa baqatan; Daawitis namoota gaarii waraanaa oofan kuma torbaa fi loltoota lafoo kuma afurtama fixe. Ajajaa loltoota isaanii Shoofaki illee ni ajjeese.

¹⁹ Tajaajiltoonni Hadaadezeriis yommuu akka Israa’elootaan mo’ataman arganitti Daawit wajjin nagaa uumanii isa jalatti bulan.

Kanaafuu namoonni Sooriyaa ergasii Amoonota gargaaruu hin feene.

20

Qabamuu Magaalaa Raabbaa

20:1-3 kwf - 2Sm 11:1; 12:20-21

¹ Birraa keessa yeroo mootonni waraanaaf ba’anitti Yoo’aab humnoota waraanaa qajeelchee biyya Amoonotaa barbadeesse; ergasii dhagee Rabbaa marse; Daawit garuu Yerusaleemitti hafe. Yoo’aabis Raabbaa waraanees daaraa ishee godhe. ² Daawitis mataa mootii isaanii irraa gonfoo fudhate; gonfoon sun hamma warqee taalaantii tokkoo ulfaatee dhagaawwan gati jabeeyyiis of irraa qaba ture; gonfichis mataa Daawit irra kaa’ame. Innis magaalaa sana keessaa boojuu akka malee baay’ee fudhatee ³ namoota achi keessa turanis gad yaasee akka isaan magaaaziidhaan, gasoo sibiilaatii fi qottoodhaan hojii hojjetan godhe. Daawit magaalawwan Amoonotaa hunda keessattis akkasuma godhe. Ergasii Daawitii fi loltoonni isaa hundinuu Yerusaleemitti ni deebi’an.

Waraana Filixeemotatti Baname

2:4-8 kwf - 2Sm 21:15-22

⁴ Ergasii immoo lafa Geezir jedhamutti Filixeemota wajjin waraanni baname. Yeroo sanattis Siibekaay namichi biyya Hushaa sun Siifaay namicha gosa tokko Refaayin ajjeese; Filixeemonnis ni bulaniif.

* 19:6 19:6 Taalaantiin tokko kiiloo giraamii 34.

⁵ Waraana biraa kan Filisxeemota wajjin godhame keessatti immoo Elhaanaan ilmi Yaa'iir sun Lahemii obboleessa Gooliyaad namicha Gitii kan somaan eeboo isaa loosaa wayya dhooftuu ga'u qabu sanaa ni ajjeese.

⁶ Ammas waraana Gaatitti godhame kan biraa keessatti namicha hamma wayii ga'u kan tokkoo tokkoo harka isaa irraa quboota ja'a ja'a akkasumas tokkoo tokkoo miilla isaa irraa quboota ja'a ja'a walumatti quboota digdamii afur qabu tokkotu ture. Innis sanyii Raafaa keessaa dhalate. ⁷ Yommuu inni Israa'elin tuttuqettis Yoonaataan ilmi Shime'aa obboleessi Daawit isa ajjeese.

⁸ Isaan kunneen sanyiiwwan Raafaa warra Gaati keessa turanii dha; isaanis harka Daawitii fi harka namoota isaatiin dhuman.

21

Daawit Loltoota Isaa Lakkaa'e 21:1-26 kwf - 2Sm 24:1-25

¹ Seexanni Israa'elitti ka'ee akka Daawit saba Israa'el lakkaa'uuf isa kakaase. ² Kanaafuu Daawit Yoo'aabii fi ajajjoota loltootaatiin, "Dhaqaatii Bersheebaadhaa hamma Daaniitti Israa'eloota lakkaa'aa. Ergasii immoo akka ani akka isaan hammam akka baay'atan beekuu danda'uuf deebi'aatii natti himaa" jedhe.

³ Yoo'aab garuu deebisee, "WAAQAYYO loltoota isaa dachaa dhibba caalaa haa baay'isu. Yaa gooftaa koo mooticha, isaan hundi garboota gooftaa kootiif bulan mitii? Gooftaan koo maaliif waan kana gochuu barbaade? Inni maaliif Israa'elitti yakka fida?" jedhe.

⁴ Ta'us dubbiin mootichaa Yoo'aabin yaada geeddarachiise; kanaafuu Yoo'aab achii ba'ee guutummaa Israa'el keessa naanna'ee Yerusaleemitti deebi'e. ⁵ Yoo'aabis lakkoobsa namoota loluu danda'anii Daawititti hime; namoota Yihuudaa keessa jiraatan kuma dhibba afurii fi torbaatama dabalatee namoota goraadee qabachuu danda'an miliyoona tokkoo fi kuma dhibba tokkootu guutummaa Israa'el keessa ture.

⁶ Sababii ajajni mootichaa Yoo'aabin jibbisiiseef inni gosoota Lewwiitii fi Beniyaam itti dabalee hin lakkoofne. ⁷ Ajajni kun fuula Waaqaa durattis waan hamaa ture; kanaafuu inni Israa'elin rukute.

⁸ Kana irratti Daawit Waaqaan, "Ani waan kana gochuudhaan akka malee cubbuu hojjedheera. Amma garuu akka ati balleessaa garbicha keetii dhiiftuuf sin kadhada. Ani hojii gowwummaa guddaa hojjedheera" jedhe.

⁹ WAAQAYYOS Gaad raajii Daawit sanaan akkana jedhe; ¹⁰ "Dhaqiitii Daawitiin, 'WAAQAYYOS akkana siin jedha: Ani filannoo sadii siifin kenna. Akka ani isa sitti fiduuf, isaan keessaa tokko filadhu' jedhi."

¹¹ Kanaafuu Gaad gara Daawit dhaqee akkana jedheen; "WAAQAYYO akkana jedha: 'Filannoo kee addaan baafadhu: ¹² Beela waggaa sadii yookaan ji'a sadii fuula diinota keetii dura ari'amuu fi goraadee isaaniitiin balleeffamuu yookaan guyyaa goraadee WAAQAYYOS sadii jechuunis guyyoota dha'ichi biyyattiitii bu'ee ergamaan WAAQAYYOS kutaa Israa'el hunda balleessu.' Egaa amma waan ani isa na erge sanaaf deebisu murteeffadhu."

¹³ Daawit immoo Gaadiin, "Ani akka malee dhiphadheera. Waan araarri isaa akka malee guddaa ta'eef ani harka WAAQAYYOS seenuu naaf wayya; garuu akka ani harka namaa seenu na hin godhin" jedhe.

¹⁴ Kanaafuu WAAQAYYO Israa'elitti dha'icha ergee namoonni Israa'el kuma torbaatama ni dhuman. ¹⁵ Waaqni akka inni Yerusaleem balleessuuf ergamaa isaa tokko erge. Garuu utuma ergamaan Waaqayyoo sun Yerusaleemin balleessuuf qophaa'aa jirru WAAQAYYO balaa sana argee gaabbee ergamaa isaa kan saba balleessuuf ture sanaan, "Ni ga'a! Harka kee deebifadhu" jedhe. Yeroo sana ergamaan Waaqayyoo sun oobdii Ornaa namicha gosa Yebuus sanaa bira dhaabachaa ture.

¹⁶ Daawitis ol ilaalee ergamaa WAAQAYYOS kan goraadee luqqifamee Yerusaleemitti diriirfame harka isaatti qabatee samii fi lafa gidduu dhaabachaa jiru tokko ni arge. Daawitii fi maanguddoonni wayyaa gaddaa uffatanii fuula isaa duratti addaan lafatti ni gombifaman.

¹⁷ Daawit immoo Waaqaan, "Namni akka loltoonni lakkaa'aman godhe ana mitii? Namni cubbuu fi balleessaa hojjete anuma. Isaan kunneen garuu hoolotaa dha. Isaan maal godhan? Yaa WAAQAYYO Waaqa koo harki kee anaa fi maatii koo irra haa bu'u; garuu akka dha'ichi kun saba kee irra turu hin godhin" jedhe.

¹⁸ Ergasii ergamaan WAAQAYYOS akka Daawit ol ba'ee oobdii Ornaa namicha gosa Yebuus sanaa keessatti iddoo aarsaa WAAQAYYOS ijaaru akka inni Daawititti himu

Gaadin ajaje. ¹⁹ Kanaafuu Daawit dubbii Gaad maqaa WAAQAYYOOTIIN isatti hime sanaaf ajajamee ol ba'e.

²⁰ Ornaan utuu qamadii dha'uutti jiruu ol jedhee ergamaa Waaqayyoo sana arge; ilmaan isaa warri isa wajjin turan afranis ni dhokatan. ²¹ Ergasii Daawit achi ga'e; Ornaan is yommuu mil'atee isa argetti oobdii sana keessaa ba'ee fuula Daawit duratti addaan lafatti gombifamee sagade.

²² Daawitis, "Ani akka isa irratti iddoo aarsaa WAAQAYYOOF tolchee akkasiin dha'ichi saba irra bu'e kun dhaabatuuf oobdii kee naaf kenni. Gatii isaa guutuutti natti gurguri" jedheen.

²³ Ornaan is Daawitiin, "Fudhadhu! Gooftaan koo mootichi waan isatti tolu kam iyyuu haa godhu. Kunoo ani aarsaa gubamuuf sangoota, qoraaniif ulee ittiin midhaan dha'an, kenna midhaan dhi'effamuufis qamadii nan kenna; ani waan kana hunda nan kenna" jedhe.

²⁴ Daawit Mootichi garuu Ornaadhaan, "Kun hin ta'u; ani gatii isaa guutuu siifin kenna. Ani waan kan kee ta'e WAAQAYYOOF hin fudhadhu yookaan waan gatii na hin baasisin aarsaa gubamuuf hin dhi'eessu" jedhe.

²⁵ Kanaafuu Daawit gatii lafa sanaa Ornaadhaaf warqee saqilii dhibbaa ja'a kafale. ²⁶ Daawitis achitti iddoo aarsaa WAAQAYYOOF tolchee aarsaa gubamuu fi aarsaa nagaa dhi'eesse. Innis WAAQAYYON ni waammate; WAAQAYYOS samiidhaa ibiddaan iddoo aarsaa gubamuu irratti isaaf deebii kenne.

²⁷ Sana booddee WAAQAYYO ergamaa isaa sanatti dubbate; innis goraadee isaa man'ee isaatti ni deebise. ²⁸ Daawit yeroo sanatti akka WAAQAYYO oobdii Ornaa namicha gosa Yebuus sanaa irratti deebii isaa kenne ni hubate; achittis aarsaa ni dhi'eesse. ²⁹ Dunkaanni WAAQAYYOO kan Museen gammoojjitti hojjetee fi iddoo aarsaa gubamuu Gibe'oon keessa gaara sagadaa irra ture. ³⁰ Daawit garuu sababii goraadee ergamaa WAAQAYYOO sodaateef achi dhaqee fuula iddoo aarsaa sanaa duratti Waaqa kadhachuu hin dandeenye.

22

¹ Ergasii Daawit, "Kun mana WAAQAYYO Waaqaa ti; kun immoo iddoo aarsaa, aarsaan gubamu Israa'eliif itti dhi'effamuu dha" jedhe.

Qophii Ijaarsa Mana Qulqullummaa

² Kanaafuu Daawit akka alagooni Israa'el keessa jiraatan walitti qabaman ajaje; isaan keessaas akka isaan ijaarsa mana qulqullummaa Waaqaatiif dhagaa soofame qopheessaniif warra dhagaa cabsan ni filate. ³ Inni misaara ittiin hundaa balbala hojjetanii fi mi'a ittiin walitti qabsiisan hojjechuudhaaf sibiila akka malee baay'ee fi naasii madaallin isaa hamma hin qabne ni kenne. ⁴ Daawitis sababii warri Siidoonaatii fi warri Xiirros birbira akka malee baay'ee isaaf fidaniif birbira baay'inni isaa lakkaa'amu hin dandeenye ni kenne.

⁵ Daawit akkana jedhe; "Ilmi koo Solomoon ijoollee dha; muuxannoo illee hin qabu. Manni WAAQAYYOOF ijaaramu kun immoo ulfina qabeessa, kan gurra qabuu fi kan fuula saboota hundaa duratti akka malee miidhagu ta'uu qaba. Kanaafuu ani isaaf qophii nan godha." Akkasiin Daawit utuu hin du'in qophii guddaa godhe.

⁶ Ergasii Daawit ilma isaa Solomoonin waamee akka inni WAAQAYYO Waaqa Israa'eliif mana ijaaru isa ajaje. ⁷ Daawitis Solomooniin akkana jedhe: "Yaa ilma ko, ani Maqaa WAAQAYYO Waaqa kootiif mana ijaaru yaadee ture. ⁸ Garuu dubbii WAAQAYYOO akkana jedhee gara koo dhufe: 'Ati dhiiga baay'ee dhangalaafteerta; lola hedduus lolteerta. Ati sababii fuula koo duratti dhiiga baay'ee lafa irratti dhangalaafteef Maqaa kootiif mana hin ijaartu. ⁹ Kunoo ilmi tokko siif ni dhalata; innis nama boqonnaa ni ta'a; anis diinota isaa kanneen naannoo isaa jiran hunda irraa boqonnaa nan kennaaf. Maqaan isaas Solomoon jedhama; ani bara mootummaa isaa keessa Israa'eliif nagaa fi tsagabbii nan kenna. ¹⁰ Namni Maqaa kootiif mana ijaaru isa. Inni ilma naaf ta'a; anis abbaa nan ta'aaf. Teessoo mootummaa isaas Israa'el irratti bara baraan jabeessee nan dhaaba.'

¹¹ "Egaa yaa ilma ko, akkuma inni waa'ee kee dubbate sanatti akka mana WAAQAYYO Waaqa keetii ijaaruun siif milkaa'uuf WAAQAYYO si wajjin haa ta'u. ¹² Akka ati yommuu inni Israa'el irratti aangoo siif kennutti seera WAAQAYYO Waaqa keetii eegduuf WAAQAYYO ogummaa fi hubannaa siif haa kennu. ¹³ Akkasiin ati yoo ajajaa fi seera WAAQAYYO karaa Museetiin Israa'eliif kenne sana akka gaariitti eegde ni milkoofa. Jabaadhu; onnoomis. Hin sodaatin yookaan abdiin hin kutatin.

¹⁴ "Kunoo, ani ijaarsa mana WAAQAYYOOTIIF warqee taalaantii*" kuma dhibba tokko,

* 22:14 22:14 Taalaantiin tokko kiiloo giraamii 34.

meetii taalaantii miliyoona tokko, naasii fi sibiila akka malee baay'ee kan madaalamuu hin dandeenye, mukaa fi dhagaa illee qopheessuu irratti akka malee dadhabeera. Atis itti dabaluu ni dandeessa. ¹⁵ Ati hojjetoota hedduu qabda; isaanis: warra dhagaa cabsan, warra mana dhagaa ijaaranii fi warra ogummaa hojii mukaa qaban, akkasumas namoota ogummaa hojii gosa gosaa, ¹⁶ kan hojii warqetii fi meetii, kan naasiitii fi sibiilaa, ogeeyyii hojii harkaa warra lakkoobsi isaanii hin beekamne qabda. Egaa amma hojii jalqabi; WAAQAYYOS si wajjin haa ta'u."

¹⁷ Ergasii Daawit akka isaan ilma isaa Solomoon gargaaraniif dura buutota Israa'el hunda ni ajaje. ¹⁸ Akkanas isaaniin jedhe; "WAAQAYYO Waaqni keessan isin wajjin jira mitii? Inni gama hundaan boqonnaa isiniif kenneera mitii? Inni jiraattota biyya kanaa dabarsee natti kenneeraatii; biyyattiinis WAAQAYYOO fi saba isaatiif garboomteerti. ¹⁹ Amma WAAQAYYO Waaqa keessan barbaaduuf garaa fi lubbuu keessan guutuudhaan kutadhaa ka'aa. Akka taabota kakuu WAAQAYYOOTII fi mi'oota qulqulluu kan Waaqaa fiddanii mana qulqullummaa kan Maqaa WAAQAYYOOTIIF ijaaramuuf jiru sanatti galchitaniif mana WAAQAYYO Gooftaa ijaaruu jalqabaa."

23

Lewwota

¹ Daawit erga waggaa hedduu jiraatee dulloomee booddee ilma isaa Solomoonin Israa'el irratti mootii godhe.

² Akkasumas Daawit dura buutota Israa'el hunda, lubootaa fi Lewwota illee walitti qabe. ³ Lewwonni umuriin isaanii waggaa soddomaa fi hammasii olii ni lakkaa'aman; baay'inni dhiirotaa kuma soddonii saddeet ta'e. ⁴ Daawitis akkana jedhe; "Isaan kanneen keessaa kuma digdamii afur hojii mana qulqullummaa WAAQAYYOO haa to'atan; namoonni kuma ja'a qondaaltotaa fi abbootii murtii haa ta'an. ⁵ Kumni afur eegdota balbalaa haa ta'an; kumni afur immoo mi'oota faarfannaa kanneen ani kaayyoo kanaaf kanneen WAAQAYYON haa galateeffatan."

⁶ Daawitis Lewwota akkuma gosoota Lewwiitti garee gareen gargar ni qoode; isaanis: Geershoon, Qohaatii fi Meraarii.

Geershoonota

⁷ Gosa Geershoon keessaa:

La'adaanii fi Shime'ii.

⁸ Ilmaan La'adaanii:

Yehii'eel hangafticha, Zeetaamii fi Yoo'eel; walumatti nama sadii turan.

⁹ Ilmaan Shime'ii:

Sheloomot, Hazii'eelii fi Haaraan; walumatti nama sadii turan.

Isaan kunneen hangafoota Maatii La'adaan turan.

¹⁰ Ilmaan Shime'ii:

Yahaati, Ziinaa, Ye'uushii fi Beriiyaa. Isaan kunneen ilmaan Shime'ii ti; walumatti nama afur turan.

¹¹ Yahaati hangafa; Ziinaan lammaffaa; Ye'uushii fi Beriyaan garuu ilmaan baay'ee hin qaban; kanaafuu isaan akkuma maatii tokkootti lakkaa'aman.

Qohaataota

¹² Ilmaan Qohaatii:

Amraam, Yizihhaar, Kebroonii fi Uzii'eel; walumatti nama afur turan.

¹³ Ilmaan Amraam:

Aroonii fi Musee.

Aroon akka innii fi sanyiin isaa wantoota waan hunda caalaa qulqulluu ta'an Waaqaaf qulqulleessaniif, akka fuula WAAQAYYOO duratti aarsaa dhi'eessaniif, akka fuula isaa dura tajaajilaniif fi akka maqaa isaatiin eebba labsaniif bara baraan addaan baafaman. ¹⁴ Ilmaan Musee nama Waaqaa immoo gosa Lewwiitti dabalamanii lakkaa'aman.

¹⁵ Ilmaan Musee:

Geershoomii fi Elii'ezar.

¹⁶ Ilmaan Geershoomii:

Shebuu'eel hangafa.

¹⁷ Ilmaan Elii'ezarii keessaa:

Rehaabiyaa hangafa.

- Ele'aazaar ilmaan biraa hin qabu ture; ilmaan Rehaabiyaa garuu akka malee hedduu turan.
- 18 Ilmaan Yizihhaar keessaa:
Sheloomiit hangafta.
- 19 Ilmaan Kebroon;
hangaftichi Yeriyyaa, lammaffaan Amariyaa, sadaffaan Yahizii'eel, afuraffaan Yeqame'aam.
- 20 Ilmaan Uzii'eel:
hangaftichi Miikaa, lammaffaan Yishiyaa.
- Meraarota*
- 21 Ilmaan Meraarii:
Mahilii fi Muusii.
- Ilmaan Mahilii:
Ele'aazaarii fi Qiish.
- 22 Ele'aazaar utuu ilmaan hin dhalchin du'e; inni intallan gofa qaba ture.
Durbiiwwan isaanii ilmaan Qiishitu isaan fuudhe.
- 23 Ilmaan Muusii:
Mahelii, Eederii fi Yereemooti; walumatti nama sadii turan.

- 24 Isaan kunneen ilmaan Lewwii kanneen akkuma mana abbootii isaanii itti hangafoonni abbootii warri maqaa maqaadhaan galmeeffamanii tokko tokkoon lakkaa'aman, hojjetoota umuriin isaanii waggaa digdamaa fi sanaa ol ta'e warra mana qulqullummaa WAAQAYYOO keessa tajaajilanii dha.
- 25 Daawit akkana jedhee turetii; "WAAQAYYOO Waaqni Israa'el saba isaatiif boqonnaa kenneera; bara baraanis Yerusaalem keessa ni jiraata; 26 si'achi Lewwonni dunkaana yookaan mi'oota achi keessatti itti fayyadaman hin baatan." 27 Akkuma qajeelcha Daawit dhuma irratti kenneetti, Lewwonni waggaa digdamaa fi sanaa olii hedamaniiruutii.

28 Hojiin Lewwotaas tajaajila mana qulqullummaa Waaqaa keessatti sanyiiwwan Aroonii gargaaruu dha; kunis oobdiiwwanii fi kutaawwan mana qulqullummaa eeguu, mi'oota qulqulluu qulqulleessuu fi hojiiwwan biraas mana WAAQAYYOO keessatti hojjechuu dha. 29 Akkasumas buddeena minjaala irra kaa'uu, daakuu kennaa midhaanii, buddeena utuu hin bukaa'in tolfame, tolchuu fi waliin makuu, safartuu fi madaalii hunda irratti itti gaafatamtoota turan. 30 Isaan guyyaa guyyaadhaan WAAQAYYON galateeffachuu fi jajachuuf ganama ganama fuula isaa dura ni dhaabatu; galgala galgalas akkasuma ni godhu; 31 yeroo aarsaan gubamu guyyaa Sanbataa WAAQAYYOOOF dhi'eeffamutti yeroo Ayyaana Baatii Haaraa fi gaafa ayyaana yeroon isaa murtaa'e kamii iyyuu akkanuma ni godhu. Isaan yeroo hunda akkuma lakkoobsaa fi qajeelfama isaanii kenneetti fuula WAAQAYYOO dura tajaajilu ture.

32 Lewwonni akkasiin itti gaafatama dunkaana wal ga'ii fi Iddoo Qulqulluu eeguuf qaban raawwatan; akkasumas ajaja obboloota isaanii sanyiiwwan Aroon jalatti itti gaafatamummaa mana qulqullummaa WAAQAYYOO keessatti qaban raawwachaa turan.

24

Ramadamu lubootaa

1 Ilmaan Aroon akka armaan gadiitti ramadaman:

Ilmaan Aroon Naadaab, Abiihuu, Ele'aazaarii fi Iitaamaar turan. 2 Naadaabii fi Abiihuu garuu utuu ijoollee hin dhalchin abbaa isaanii dursanii du'an; kanaafuu Ele'aazaarii fi Iitaamaar luboota ta'anii tajaajilan. 3 Daawitis gargaarsa Zaadoq sanyii Ele'aazaar sanaatii fi Ahimelek sanyii Iitaamaariin akkuma tajaajila isaaniitti garee gareen isaan ramade. 4 Sanyiiwwan Iitaamaarii caalaa sanyiiwwan Ele'aazaar keessaa hooggantoonni hedduun ni argaman; isaanis akkanatti ramadaman: sanyiiwwan Ele'aazaar keessaa abbootii maatii kudha ja'a, sanyiiwwan Iitaamaar keessaa immoo abbootii maatii saddeet. 5 Isaan sababii sanyiiwwan Ele'aazaarii fi sanyiiwwan Iitaamaar keessa qondaaltonni mana qulqullummaatii fi qondaaltonni Waaqaa turaniif loogii malee ixaadhaan isaan ramadan.

6 Shemaa'iyaa ilma Naatnaa'el namicha gosa Lewwii barreessaan sun fuula mootichaatii fi qondaaltoota duratti maqaa isaanii Zaadoq lubicha, Ahimelek ilma Abiyaataar, abbootii maatiiwwan lubootaatii fi Lewwota, innis gosa Ele'aazaar keessaa maatii tokko, gosa Iitaamaar keessaa immoo maatii tokko fuudhee barreesse.

⁷ Ixaan jalqabaa Yehooyaariibiif,
 lammaffaan Yedaa'iyaaaf,
⁸ sadaffaan Haariimiif,
 afuraffaan Se'ooriimiif,
⁹ shanaffaan Malkiyaaf,
 ja'affaan Miyaamiiniif,
¹⁰ torbaffaan Haqoosiif,
 saddeettaffaan Abiyaaf,
¹¹ saglaffaan Yeeshuu'aaf,
 kurnaffaan Shekaaniyaaf,
¹² kudhan tokkoffaan Eliyaashiibiif,
 kudha lammaffaan Yaaqiimiif,
¹³ kudha sadaffaan Huphaaf,
 kudha afuraffaan Yeshebe'aabiif,
¹⁴ kudhan shanaffaan Bilgaaf,
 kudha ja'affaan Imeeriif,
¹⁵ kudha torbaffaan Heeziiriif,
 kudha saddeettaffaan Haphizeeziif,
¹⁶ kudha saglaffaan Phetaayaaf,
 digdammaffaan Hisqi'eeliif,
¹⁷ digdamii tokkoffaan Yaakiiniif,
 digdamii lammaffaan Gaamuuliif,
¹⁸ digdamii sadaffaan Delaayaaf,
 digdamii afuraffaan Ma'aaziyaaf ba'e.

¹⁹ Kun seera isaan yeroo mana qulqullummaa WAAQAYYOO seenanitti ittiin tajaajilani dha; seera kanas abbaa isaanii Aroonitu akkuma WAAQAYYO Waaqni Israa'el isa ajajetti isaaniif kenne.

Lewwota Hafan

²⁰ Ilmaan Lewwii warra hafan:

Ilmaan Amraamii keessaa: Shuubaa'eel;
 ilmaan Shuubaa'eel keessaa: Yehideyaa.
²¹ Ilmaan Rehaabiyaa keessaa: Yishiyaa hangafticha.
²² Yizilhaarota keessaa: Sheloomiit;
 ilmaan Sheloomiit keessaa immoo: Yahaati.
²³ Ilmaan Kebroon: Inni jalqabaa Yeriya, lammaffaan Amariyaa, sadaffaan Yahizii'eel, afuraffaan Yeqame'aam.
²⁴ Ilma Uzii'eel: Miikaa.
 ilmaan Miikaa keessaa: Shaamiir.
²⁵ Obboleessa Miikaa: Yishiyaa;
 ilmaan Yishiyaa keessaa: Zakkaariyaas.
²⁶ Ilmaan Meraarii: Mahilii fi Muusii.
 ilma Ya'aziyaa: Banoo.
²⁷ Ilmaan Meraarii:
 Ya'aziyaa irraa: Banoo, Shohaam, Zakuurii fi Ibrii.
²⁸ Mahilii irra: Ele'aazaar; namichi kun ilmaan hin qabu ture.
²⁹ Qiish irraa: Yerami'eel ilma Qiish.
³⁰ Ilmaan Muusii: Mahelii, Eederii fi Yeriimooti.

Isaan kunneen akkuma mana abbootii isaaniitti ilmaan Lewwotaa ti.

³¹ Isaanis akkuma obboloota isaanii ilmaan Aroon sana fuula Daawit Mootichaa duratti, fuula Zaadoq, Ahiimelek, fuula hangafoota maatii lubootaatii fi Lewwotaa duratti ixaa buufatan. Maatii obboleessa hangaftichaatiifis akkuma maatii obboleessa quxisuutti ixaan bu'e.

¹ Daawit ajajjoota loltootaa wajjin akka isaan kiraaraan, baganaa fi kililleetti fayyadamanii raajii dubbataniif maatii Asaaf, Heemaanii fi Yeduutuun keessaa namoota addaan baafate. Maqaan namoota tajaajila kana kennaa turaniis:

² Ilmaan Asaaf keessaa:

Zakuur, Yoosif, Naataaniyaa fi Asareelaa. Ilmaan Asaaf qajeelcha Asaaf jala turan. Asaaf immoo qajeelcha mootichaa jalatti raajii dubbachaa ture.

³ Ilmaan Yeduutuun keessaa:

Gedaaliyaas, Zerii, Isaayyaas, Samee'i, Hashabiyaa fi Matiitiyaa. Isaan kunneen ja'an qajeelcha abbaa isaanii Yeduutuun isa kiraaraan WAAQAYYO galateeffachaa fi jajachaa raajii dubbachaa ture sanaa jala turan.

⁴ Ilmaan Heemaan keessaa:

Bukiya, Mataaniyaa, Uzii'eel, Shebuu'eelii fi Yeriimooti; Hanaaniyaa, Hanaanii, Elii'aataa, Gidaltii fi Roomaanti-Ezer; Yoshibqaashaa, Malootii, Hootiirii fi Mahaaziyyoo ti. ⁵ Isaan kunneen hundi ilmaan Heemaan namicha mootichaaf mul'ata argu sanaa turan. Isaan akka isa kabajaniif akkuma Waaqni abdachiise sanatti isaa ni kennaman. Waaqnis ilmaan kudha afurii fi intallan sadii Heemaaniif ni kenne.

⁶ Namoonni kunneen hundi tajaajila mana Waaqaa keessatti faarfannaa kililleedhaan, kiraaraa fi baganaadhaan mana qulqullummaa WAAQAYYOO keessatti faarfatamu sanaaf qajeelcha abbootii isaanii jala turan.

Asaaf, Yeduutuunii fi Heemaan immoo qajeelcha mootichaa jala turan. ⁷ Isaanii fi firootni isaanii kanneen hundi isaanii faarfannaa WAAQAYYOO faarfatamuun leenjifamanii ogummaa qaban walumaa galatti 288 turan. ⁸ Jarris ramaddii isaanii beekuudhaaf xinnaa fi guddaan, barsiisaa fi barataan haaluma wal fakkaatuun ixaa buufatan.

⁹ Ixaan jalqabatti Asaafiif bu'e sun Yoosefiif, ilmaan Yoosefiitii fi firoota isaatiif ba'e; baay'inni isaaniis kudha lama turan

lammaffaan Gedaliyaasiif, isaaf, firoota isaatii fi ilmaan isaatiif ba'e; baay'inni isaanii kudha lama turan

¹⁰ sadaffaan Zakuuriif, ilmaan isaatii fi firoota isaatiif ba'e; baay'inni isaanii kudha lama turan

¹¹ afuraffaan Izriif, ilmaan isaatii fi firoota isaatiif ba'e; baay'inni isaanii kudha lama turan

¹² shanaffaan Naataaniyaaf, ilmaan isaatii fi firoota isaatiif ba'e; baay'inni isaanii kudha lama turan

¹³ ja'affaan Bukiyaaf, ilmaan isaatii fi firoota isaatiif ba'e; baay'inni isaanii kudha lama turan

¹⁴ torbaffaan Yishiri'eeliif, ilmaan isaatii fi firoota isaatiif ba'e; baay'inni isaanii kudha lama turan

¹⁵ saddeettaffaan Yashaayaaf, ilmaan isaatii fi firoota isaatiif ba'e; baay'inni isaanii kudha lama turan

¹⁶ saglaaffaan Mataaniyaaf, ilmaan isaatii fi firoota isaatiif ba'e; baay'inni isaanii kudha lama turan

¹⁷ kurnaffaan Shime'iif, ilmaan isaatii fi firoota isaatiif ba'e; baay'inni isaanii kudha lama turan

¹⁸ kudha tokkoffaan Azari'eeliif, ilmaan isaatii fi firoota isaatiif ba'e; baay'inni isaanii kudha lama turan

- 19 kudha lammaffaan Hashabiyaaf,
ilmaan isaatii fi firoota isaatiif ba'e;
baay'inni isaanii kudha lama turan
- 20 kudha sadaffaan Shuubaa'eeliif,
ilmaan isaatii fi firoota isaatiif ba'e;
baay'inni isaanii kudha lama turan
- 21 kudha afuraffaan Matiitiyaaf,
ilmaan isaatii fi firoota isaatiif ba'e;
baay'inni isaanii kudha lama turan
- 22 kudha shanaffaan Yereemootiif,
ilmaan isaatii fi firoota isaatiif ba'e;
baay'inni isaanii nama kudha lama turan
- 23 kudha ja'affaan Hanaaniyaaf,
ilmaan isaatii fi firoota isaatiif ba'e;
baay'inni isaanii kudha lama turan
- 24 kudha torbaffaan Yoshibqaashaaf,
ilmaan isaatii fi firoota isaatiif ba'e;
baay'inni isaanii kudha lama turan
- 25 kudha saddeettaffaan Hanaaniif,
ilmaan isaatii fi firoota isaatiif ba'e;
baay'inni isaanii nama kudha lama turan
- 26 kudha saglaffaan Malootiif,
ilmaan isaatii fi firoota isaatiif ba'e;
baay'inni isaanii kudha lama turan
- 27 digdammaffaan Eliyaataaf,
ilmaan isaatii fi firoota isaatiif ba'e;
baay'inni isaanii kudha lama turan
- 28 digdamii tokkoffaan Hootiiriif,
ilmaan isaatii fi firoota isaatiif ba'e;
baay'inni isaanii kudha lama turan
- 29 digdamii lammaffaan Gidaltiif,
ilmaan isaatii fi firoota isaatiif ba'e;
baay'inni isaanii kudha lama turan
- 30 digdamii sadaffaan Mahaaziyootiif,
ilmaan isaatii fi firoota isaatiif ba'e;
baay'inni isaanii kudha lama turan
- 31 digdamii afuraffaan Roomaamti-Ezeriif,
ilmaan isaatii fi firoota isaatiif ba'e;
baay'inni isaanii kudha lama turan.

26

Eegdota Balbalaa

¹ Akka itti eegdonni karraa qoodaman:

Gosa qoree keessaa:

Ilmaan Asaaf keessaa Mesheleemiyaa ilma Qoorraahi.

² Mesheleemiyaa ilmaan qaba ture; isaanis:

Inni hangafti Zakkaariyaas, lammaffaan Yedii'eel,
sadaffaan Zabaadiyaa, Afuraffaan Yatnii'eel,

³ inni shanaffaan Eelaam, ja'affaan Yehohaanaan,
torbaffaan Eliihoo'eenayi.

⁴ Oobeed Edoomis akkasuma ilmaan qaba ture; isaanis:

Inni hangafti Shemaa'iyaa, lammaffaan Yehoozaabaad,
sadaffaan Yoo'aa, afuraffaan Saakaar,

shanaffaan Naatnaa'el, ⁵ ja'affaan Amii'eel,
torbaffaan Yisaakor, saddeettaffaan Phe'uletii;

Waaqni Oobeed Edoomin eebbiseeraatii.

⁶ Shemaa'iyaa ilma isaas ilmaan qaba ture; isaanis waan dandeettii guddaa qabaniif
qajeelchitoota maatii abbaa isaanii turan. ⁷ Ilmaan Shemaa'iyaa:

Otnii, Raafaa'eel, Oobeedii fi Elzaabaad;

firoonni isaa Eliihuu fi Samaakiyaanis dandeettii guddaa qabu ture.

- ⁸ Isaan kunneen hundi ilmaan Oobeed Edoom; isaan, ilmaan isaaniitii fi firoonni isaani namoota jajjaboo dandeettii hojii qaban turan; ilmaan Oobeed Edoom; walumatti nama 62 turan.
- ⁹ Mesheleemiyaa fi firoota dandeettii guddaa qaban qaba ture; isaanis walumatti nama 18 turan.
- ¹⁰ Hoosaan inni gosa Meraarii sun ilmaan qaba ture; isaanis: Shimriin dura bu'aa ture; inni hangafa ta'uu baatu iyyuu abbaan isaa dura bu'aa isa godhee ture;
- ¹¹ inni lammaffaan Hilqiyaa, inni sadaffaan Xibaliyaa, inni afuraffaan Zakkaariyaas. Ilmaanii fi firoonni Hoosaa walumatti nama 13 turan.
- ¹² Garee eegdota karraa kana keessaa hangafoota isaaniitiif hojiin akkuma firoonni isaani hojjetan sanaa mana WAAQAYYOO keessa tajaajiluu ni kennameef. ¹³ Tokkoo tokkoo balbalaatiifis akkuma maatii maatii isaaniitti xinnaa guddaaf ixaan bu'e.
- ¹⁴ Ixaan Karra Ba'a Biiftuu Shelemyaaf ba'e. Ergasii immoo Zakkaariyaas ilma isaa gorsituu ogeessa sanaaf ixaan bu'e; ixaan balbala kaabaa isaaf ba'e.
- ¹⁵ Ixaan Karra gama kibbaa Oobeed Edoomiif, kan mankuusaa immoo ilmaan isaatiif ba'e.
- ¹⁶ Ixaan Karra Lixa biiftuutii fi Karra Shaleekeen kan daandii olii irratti argamu Shufimii fi Hoosaaf ba'e.

Egumsa tokko fuulleedhaan eegumsa biraatu ture:

- ¹⁷ Karaa ba'a biiftuutiin guyyaa guyyaatti Lewwota ja'a, karaa kaabaatiin guyyaa guyyaatti afur, karaa kibbaatiin guyyaa guyyaatti afur, karaa mankuusaa immoo yeroo tokkotti lamatu ture.
- ¹⁸ Oobdii gama lixa biiftuutiin jiruuf daandii irra afur, waltajjicha gubbaa immoo lamatu ture.

¹⁹ Isaan kunneen garee eegdota karraa kanneen ilmaan Qooraahiitii fi Meraarii keessaa dhufanii dha.

To'attoota Qabeenyaatii fi Qondaaltota Biraa

- ²⁰ Lewwota keessaa Ahiyaan itti gaafatamaa qabeenya mana Waaqaatii fi itti gaafatamaa mi'oota qulqulleeffamanii ture.
- ²¹ Sanyiiwwan La'adaan kanneen karaa La'adaaniitiin Geershoota ta'an warri hangafoota maatii La'adaan namicha gosa Geershoota sanaa turan: Yehii'eelii, ²² ilmaan Yehii'eelii, Zeetaamii fi obboleessa isaa Yoo'eel. Isaan kunis itti gaafatamtoota qabeenya mana qulqullummaa WAAQAYYOO turan.

²³ Amraamota keessaa, Yiziharota keessaa, Kebroonota keessaa, Uzii'eel keessaa:

- ²⁴ Shebuu'eel ilmi Geershoom ilma Musee sanaa itti gaafatamaa qabeenyaa hangafa ture. ²⁵ Namoonni karaa Eli'ezeriitiin firoota isaa ta'an immoo: ilma isaa Rehaabiyaa, ilma isaa Isaayyaas, ilma isaa Yooraam, ilma isaa Zikrii fi ilma isaa Sheloomiit. ²⁶ Sheloomiitii fi firoonni isaa mankuusaa mi'oota Daawit mootichi, hangafoonni maatiiwwanii kanneen ajajjuuwwan kumaatii fi ajajjuuwwan dhibbaa turan, akkasumas ajajjoonni loltootaa biraa Waaqaaf addaan baasan irratti itti gaafatamtoota turan. ²⁷ Isaan boojuu waraanaan argame keessaa gara tokko haaromsuu mana qulqullummaa WAAQAYYOOTIIF addaan baasanii kennan.
- ²⁸ Waan Saamu'eel namichi mul'ata argu sun, Saa'ol ilmi Qiish, Abneer ilmi Neerii fi Yoo'aab ilmi Zeruuyaa dhi'eessanii fi waan Waaqaaf addaan baafame hunda Sheloomiitii fi firoota isaatu eega ture.

²⁹ Yiziharota keessaa:

Kenaaniyaa fi ilmaan isaa hojii mana qulqullummaatiin ala ta'etti Israa'eloota irratti qondaaltotaa fi abbootii murtii ta'anii ramadaman.

³⁰ Kebroonota keessaa:

Hashabiyaa fi firoonni isaa kanneen dandeettii qaban kuma tokkoo fi dhibba torba biyya Israa'el kan Yordaanosiin gama lixa biiftuu jirutti hojii WAAQAYYOO hundaa fi tajaajila mootichaa irratti itti gaafatamtoota turan. ³¹ Kebroonota keessaa akkuma galmeed hiddaa dhaloota maatii isaanii Yeriyaan hangafa isaanii ture. Bara mootummaa Daawit keessa waggaa afurtamaffaatti galmeewwan ilaalamanii gosa Kebroon keessaa namoonni dandeettii qaban Ya'izeer biyya Gili'aadi keessaa sanatti argaman. ³² Yiriiyaan firoota dandeettii qaban kanneen hangafoota maatii turan kuma lamaa fi dhibba torba qaba ture; Daawit mootichis waan kan Waagaa ta'eef dhimma mootichaa hunda irratti gosa Ruubeen gosa Gaadii fi walakkaa gosa Minaasee to'attoota godhe.

27

Kutaawwan Loltootaa

- ¹ Lakkoobsi ijoollee Israa'el hangafoonni maatii isaanii, ajajjuuwwan kumaa, ajajjuuwwan dhibbaatii fi qondaaltonni isaanii warri waan kutaawwan loltootaa kanneen waggaa guutuu ji'a ji'aan hojiitti ramadaman sanaa ilaalu hunda irratti mooticha tajaajilan kanaa dha. Tokkoon tokkoon kutaawwan loltootaa kunis nama 24,000 of keessaa qaba ture.
- ² Ji'a jalqabaatiif ajajaan kutaa loltootaa kan duraa Yaashobi'aam ilma Zabdi'i'eel ture. Kutaa loltoota isaa keessas loltoota 24,000 ture. ³ Innis sanyii Faaresii fi hangafa ajajjoota kutaa loltoota hundaa kan ji'a jalqabaa ture.
- ⁴ Doodaayi namichi Ahoo'aa ajaja kutaa waraanaa kan ji'a lammaffaaf ture; Miiqlooti hoogganaa kutaa waraana isaa ture. Kutaan waraana isaas namoota 24,000 of keessaa qaba ture.
- ⁵ Ajajaan kutaa waraanaa sadaffaan kan ji'a sadaffaa immoo Benaayaa ilma Yehooyadaa lubichaa ture. Innis hangafa; kutaan waraana isaa namoota 24,000 of keessaa qaba ture. ⁶ Benaayaa kun isuma warra soddoma keessaa nama jabaa fi ajajaa warra soddoma sanaa ture sanaa dha. Amiizaabaad ilmi isaa immoo ajajaa kutaa waraana isaa ture.
- ⁷ Ji'a afuraffaaf ajajaan kuta afuraffaa Asaaheel obboleessa Yoo'aab ture; kan iddoo isaa bu'e immoo ilma isaa Zebaadiyaa dha. Kutaa isaa keessa namoota 24,000 turan.
- ⁸ Ji'a shanaffaaf ajajaan kutaa shanaffaa Shamhuuti namicha Yizraa ture. Kutaa isaa keessa namoota 24,000 turan.
- ⁹ Ji'a ja'ffaaf iiraa ilmi Iqeesh namicha Teqoo'aa sanaa ajajaa ja'ffaa ture. Kutaa isaa keessa namoota 24,000 turan.
- ¹⁰ Ji'a torbaffaaf Heleez namichi Pheloonaa kan gosa Efreem sun ajajaa torbaffaa ture. Kutaa isaa keessa namoota 24,000 turan.
- ¹¹ Ji'a saddeettaffaaf Siibekaay namichi biyya Hushaa kan gosa Zaarotaa ajajaa saddeettaffaa ture; kutaa isaa keessa namoota 24,000 turan.
- ¹² Ji'a saglaffaaf Abii'ezer namicha Anaatootii kan gosa Beniyaam sanattu ajajaa saglaffaa ture; kutaa isaa keessaa namoota 24,000 turan.
- ¹³ Ji'a kurnaffaaf Maharaayi namicha Netoof kan gosa Zaaraa sanatu ajajaa kurnaffaa ture. Kutaa isaa keessa namoota 24,000 turan.
- ¹⁴ Ji'a kudha tokkoffaaf ajajaan kudha tokkoffaan Benaayaa namicha Phiraatoon kan gosa Efreem sana ture. Kutaa isaa keessa namoota 24,000 turan.
- ¹⁵ Ji'a kudha lammaffaaf ajajaan kudha lammaffaan Heldaayi namicha Netoof kan gosa Otnii'eel sana ture. Kutaa isaa keessa namoota 24,000 turan.

Hangafoota Gosootaa

- ¹⁶ Hangafoonni gosoota Israa'el:

Gosa Ruubeen irratti: Elii'ezer ilma Zikrii;
 gosa Simi'oon irratti: Shefaaxiyaa ilma Ma'akaa;
¹⁷ gosa Lewwii irratti: Hashabiyaa ilma Qemuu'eel;
 gosa Aroon irratti: Zaadoq;
¹⁸ gosa Yihuudaa irratti: Eliihuu obboleessa Daawit;
 gosa Yisaakor irratti: Omrii ilma Miikaa'el;
¹⁹ gosa Zebuuloon irratti: Yishma'iyaa'uu ilma Obaadiyaa;
 gosa Niiftaalem irratti: Yeriimooti ilma Azrii'eel;
²⁰ gosa Efreem irratti: Hooshee'aa ilma Azaziyyaa;
 walakkaa gosa Minaasee irratti: Yoo'eel ilma Phedaayaa;

- ²¹ walakkaa gosa Minaasee kan Gili'aad keessa jiraatuu irratti:
 Iddoo ilma Zakkaariyaas; gosa Beniyaam irratti: Ya'isii'el ilma Abneer;
²² gosa Daan irratti: Azari'eel ilma Yirooham.

Hangafoonni gosoota Israa'el isaan kanneen turan.

²³ Daawit sababii WAAQAYYO saba Israa'el akkuma urjiwwan samiitti baay'isuuf waadaa galeef dhiira waggaa digdamaatii fi digdamaa gad ta'e hin lakkoofne. ²⁴ Yoo'aab ilmi Zeruuyaa dhiirota lakkaa'uu jalqabe malee lakkaa'ee hin fixne; sababii lakkoobsa kanaatiifis dheekkamsi Waaqaa Israa'elitti dhufe; kanaafuu warri hedaman iyyuu galmee Daawit mootichaa keessatti hin galmeeffamne.

Shuumota Mootichaa

- ²⁵ Azmaawet ilmi Aadii'eel shuumii mankuusaa qabeenya mootii ture.
 Yoonataan ilmi Uziyaa immoo shuumii mi'oota aanaalee, magaalawwan, kan gandootaatii fi gamoowwan eegumsaa ture.
²⁶ Ezeriin ilmi Kiluub shuumii qonnaan bultootaa ture.
²⁷ Shime'iin namichi Raamaatii sun itti gaafatamaa iddoo dhaabaa wayinii ture.
 Zabdiin namichi Shifaamii sun itti gaafatamaa mana cuunfaa wayinii iddoo dhaabaa wayinii keessaa ture.
²⁸ Ba'aal-Haanaan namichi Gedeeraa sun shuumii mukkeen ejersaatii fi harbuu tabbawwan gaarran gama lixa biiftuutti argamanii ture.
 Yoo'aash immoo shuumii mana zayitii ejersaa ture.
²⁹ Shitraayi namichi Shaaroon shuumii karra loonni kan Shaaroonitti bobba'uu ture.
 Shaafaax ilmi Aadilaay shuumii karra loowwan sulula keessa jiranii ture.
³⁰ Oobiil namichi gosa Ishmaa'eel sun shuumii gaalawwanii ture.
 Yehideyaan namichi gosa Meeroonotaa shuumii harrootaa ture.
³¹ Yaaziiz namichi gosa Aggaar itti gaafatamaa bushaayee ture.
 Isaan kunneen hundi shuumota qabeenya Daawit mootichaa turan.

³² Yoonataan eessumni Daawit namichi beekaan barreessaan sun gorsituu ture;
 Yehii'eel ilmi Hakmoonii immoo eegduu ilmaan mootichaa ture.

³³ Ahiitofel gorsaa mootichaa ture.

Huushaayi namichi gosa Arki immoo michuu mootichaa ture.

³⁴ Yehooyadaan ilmi Benaayaatii fi Abiyaataar iddoo Ahiitofel bu'an.
 Yoo'aab immoo ajajaa eegdota mootummaa ture.

28

Karoora Daawit Mana Qulqullummaatiif Baase

¹ Daawit akka isaan Yerusaalemitti walitti qabamaniif hangafoota Israa'el hunda ni waame; isaanis: Geggeessitoota gosootaa, tajaajila mootummaa keessatti ajajjoota kutaawwan loltootaa, ajajjoota kumaatii fi ajajjoota dhibbaa, warra qabeenyaa fi horii mootichaatii fi kan ilmaan isaa irratti itti gaafatamtoota ta'an, qondaaltota masaraa mootummaa, namoota jajjaboo fi gootota waraanaa hunda.

² Ergasii Daawit Mootichi ka'ee dhaabatee akkana jedhe: "Yaa obboloota koo fi yaa saba ko, mee na dhaga'aa. Ani taabota kakuu WAAQAYYOOTIIF iddoo inni boqotu, Waaqa keenyaaf immoo iddoo inni miilla dhaabatu ijaaruu yaadee qophaa'eera. ³ Waaqni garuu, 'Ati sababii lola hedduu loltee dhiiga baay'ee dhangalaafteef maqaa kootiif mana hin ijaartu' naan jedhe.

⁴ "Ta'us WAAQAYYO, Waaqni Israa'el akka ani bara baraan Israa'el irratti mootii ta'uuf mana abbaa koo keessaa na filate. Akka inni dura bu'aa ta'uufis Yihuudaa filate; mana Yihuudaa keessaa maatii koo filate; ilmaan abbaa kootii keessaa immoo akka ani guutummaa Israa'el irratti mootii ta'u jaallate. ⁵ WAAQAYYO ilmaan baay'ee naa kenneera; ilmaan koo hunda keessaa immoo akka inni teessoo mootummaa WAAQAYYOO irra taa'ee saba Israa'el bulchuuf ilma koo Solomoonin filate. ⁶ Akkanas naan jedhe; 'Kan mana koo fi oobdiwwan koo naaf ijaaru ilma kee Solomoonii dha; ani akka inni ilma naa ta'uuf isa filadheeraatii; anis abbaa isaa nan ta'a. ⁷ Yoo inni akkuma ammaa kanatti ittuma fufee ajaja koo fi seera koo eege ani bara baraan mootummaa isaa jabeessee nan dhaaba.'

⁸ "Kanaafuu akka isin lafa gaarii kana dhaaltanii ilmaan keessaniif dhaala bara baraa dabarsitaniif, akka isin ajaja WAAQAYYO Waaqa keessanii hunda eegdanii fi isa duukaa

buutaniif ani amma fuula Israa'eloota hundaa duratti, waldaa WAAQAYYOO duratti, akkasumas utuu Waaqni keenya dhaga'uu isinin ajaja.

⁹ “Yaa ilma koo Solomoon atis Waaqayyo Waaqa abbaa keetii beekii garaa tokkoo fi qalbii fedhii qabuun isa tajaajili; WAAQAYYOO waan garaa namaa keessa jiru hunda qoree karoora fi yaada hunda hubataatii. Yoo ati isa barbaadde inni siif argama; yoo ati isa dhiifte garuu inni bara baraan si dhiisa. ¹⁰ Amma qalbeeffadhu; WAAQAYYOO akka ati mana iddoo qulqulluu ta’u tokko ijaartuuf si filateeraatii. Jajjabaadhuu hojjedhu.”

¹¹ Ergasii Daawit karoora gardafoo mana qulqullummaa, kan ijaarsa isaa, kutaawwan mi’i keessa kaa’amu, kan kutaawwan ol aananiitii fi kutaawwan keessaa, akkasumas karoora iddoo teessoo araaraa ilma isaa Solomoonitti kenne. ¹² Akkasumas karoora waan Hafuurri qulqulluun isa yaachisee kan oobdii mana qulqullummaa WAAQAYYOO, kan kutaawwan naannoo isaa jiranii, kutaawwan mana mi’a mana qulqullummaa Waaqaatii fi kan mankuusaa mi’oota Waaqaatiif addaan baafamanii hunda itti kenne. ¹³ Karoora ramaddii hojii lubootaatii fi Lewwotaa, tajaajila mana qulqullummaa WAAQAYYOO keessatti kennamu malu hunda, mi’oota mana qulqullummaa keessatti tajaajilaaf oolan irrattis qajeelfama ni kenneef. ¹⁴ Ulfina warqee mi’oota warqee irraa hojjetamanii tajaajila garaa garaatiif oolan hundaatii fi ulfina meetii mi’oota meetii irraa hojjetamanii tajaajila garaa garaatiif oolan hundaas isa beeksise: ¹⁵ Kunis ulfina baattuwwan ibsaa kanneen warqee irraa hojjetamaniitii fi ibsaawwan isaanii, ulfina warqee tokkoo tokkoo baattuu ibsaatii fi ibsaa isaanii wajjin, akkasumas akkuma hojii tokkoo tokkoo baattuu ibsaa sanaatii ulfina meetii tokkoo tokkoo baattuu ibsaatii fi ibsaawwan isaa, ¹⁶ ulfina warqee tokkoo tokkoo minjaala buddeenni qulqulluun irra kaa’amu, ulfina meetii minjaalli irraa hojjetame, ¹⁷ ulfina warqee qulqulluu fal’aana, waciiiti fi kubbaayyaa, ulfina warqee tokkoo tokkoo caabii warqee irraa hojjetame; ulfina meetii tokkoo tokkoo caabii meetii irraa hojjetame; ¹⁸ akkasumas ulfina warqee qulqulleeffame kan iddoo aarsaa ixaanaatiif qopheeffame. Karoora gaarii jechuunis kiirubeelii warqee irraa hojjetaman kanneen qoochoo isaanii babal’isani taabota kakuu WAAQAYYOO haguugan itti kenne.

¹⁹ Daawitis, “Ani waan kana hunda harka WAAQAYYOO kan narra jiru sanaan barreeffamaan argadhe; innis karoora hojii kanaa hunda irratti hubannaa naaf kenne” jedhe.

²⁰ Daawit ilma isaa Solomooniin akkana jedhe; “Cimi; jajjabaadhus; hojii sanas hojjedhu. Hin sodaatin; abdiis hin kutatin; WAAQAYYOO Gooftaan Waaqni koo si wajjin jiraatii. Inni hamma hojiin tajaajila mana qulqullummaa WAAQAYYOO dhumutti si hin dhiisu yookaan si hin gatu. ²¹ Gareen lubootaatii fi Lewwotaa ijaarsa mana qulqullummaa Waaqaatiif qophaa’oo dha. Namni fedhii qabu kan ogummaa hojii gosa kamii iyyuu qabu hundii hojii hunda si gargaara. Qondaaltonnii fi namoonni hundii ajaja kee hunda ni fudhatu.”

29

Kennaa Ijaarsa Mana Qulqullummaatiif Kenname

¹ Ergasii Daawit mootichi yaa’ii guutuudhaan akkana jedhe; “Ilmi koo Solomoon inni Waaqni filate ijoollee fi nama muuxannoo hin qabnee dha. Manni qulqullummaa kun kan WAAQAYYOO Gooftaati malee waan kan namaa hin ta’iniif hojiin isaa guddaa dha. ² Anis waanan kennu danda’u hunda mana qulqullummaa Waaqa kootiif, hojii warqetiif warqee, kan meetiitiif meetii, kan naasiitiif naasii, kan sibiilaatiif sibiila, kan mukaatiif muka akkasumas waan bareedina duuba isaatiif oolu sardoonsii, keelqedoon, dhagaawwan babbareedoo fi dhagaa adii baay’inaan qopheesseera. ³ Kana malees ani jaalalan mana Waaqa kootiif qabuun waanan duraan kennee turetti dabalee qabeenya ofii koo irraa warqee fi meetii mana qulqullummaa Waaqa kootiif nan kenna; ⁴ kunis keenyan manichaatti uffisuuf warqee qulqulluu warqee, Oofirii taalaantii kuma sadii fi meetii qulqulleeffame taalaantii kuma torba, ⁵ akka hojiin hundi ogeeyyii hojii harkaatiin hojjetamuuf warqee hojii warqetiif, meetii illee hojii meetiif kenneera. Egaa har’a eenyutu fedhii isaatiin WAAQAYYOO addaan of baasa?”

⁶ Ergasii qajeelchitoonni maatii, ajajjoonni gosoota Israa’el, ajajjuuwwan kumaa, ajajjuuwwan dhibbaatii fi qondaaltonni hojii mootii to’atan kennaa isaanii fedhiidhaan kennan. ⁷ Isaanis hojii ijaarsa mana qulqullummaa Waaqaatiif warqee taalaantii kuma shan, warqee daariikii kuma kudhan, meetii taalaantii kuma kudhan, naasii taalaantii kuma kudha saddeetii fi sibiila taalaantii kuma dhibba tokko ni kennan. ⁸ Namni dhagaawwan gati jabeeyyii qabu hundinuus harka Yehii’eel namicha gosa Geershoonitti mankuusaa mana qulqullummaa WAAQAYYOOTTI ni galche. ⁹ Kana irratti

waan dura deemtonni isaa fedhii fi garaa guutuudhaan WAAQAYYOOF kennaniif sabni sun ni gammade. Daawit mootichis akka malee ni gammade.

Kadhannaa Daawit

- ¹⁰ Daawit yaa 'ii guutuu duratti akkana jedhee WAAQAYYO galateeffate; "Yaa WAAQAYYO, Waaqa abbaa keenya Israa'el bara baraa hamma bara baraatti galanni siif haa ta'u.
- ¹¹ Yaa WAAQAYYO sababii wanni samii fi lafa irra jiru hundi kan kee ta'eef guddinnii fi humni, ulfinni, surraa fi simboon kan kee ti.
- Yaa WAAQAYYO mootummaan kan kee ti; ati waan hunda irratti mataa ol ol jettee dha.
- ¹² Badhaadhummaa fi kabajamuun si biraa argama; ati bulchaa waan hundaa ti.
- Ol ol guddisuu fi waan hundaaf jabina kennuuf, jabinnii fi humni si harka jira.
- ¹³ Ammas yaa Waaqa keenya, si galateeffanna; maqaa kee ulfina qabeessa sanas ni jajanna.
- ¹⁴ "Garuu arjummaa akkasii gochuuf ani eenyu? Sabni koos eenyu? Wannii hundi si biraa dhufe; nu waanuma harka keetii dhufe sana qofa siif kennine. ¹⁵ Nu akkuma abbootiin keenya hundi turan sana fuula kee duratti alagootaa fi keessummoota; barri jireenya keenyaas lafa irratti akkuma gaaddidduu ti; abdiil illee hin qabnu. ¹⁶ Yaa WAAQAYYO Waaqa keenya, wannii nu Maqaa kee Qulqullichaaf mana qulqullummaa siif ijaaruuf kennine kun hundinuu harka keetii dhufe; hundi isaas keetuma. ¹⁷ Yaa Waaqa koo akka ati garaa qortuu fi qajeelummaa jaallattu ani beeka. Anis waan kana hunda amanamummaa fi fedhiidhaanan kenne. Ammas akka sabni kee kan as jiru kun fedhiidhaan siif kenne ani argee gammadeera. ¹⁸ Yaa WAAQAYYO Waaqa abbootii keenyaa, Waaqa Abrahaam, Waaqa Yisihaaq, Waaqa Israa'el fedhii kana bara baraan garaa saba keetii keessa tursi; akka garaan isaaniis amanamaa siif ta'u godhi. ¹⁹ Ilma koo Solomooniifis akka inni ajaja kee, qajeelchaa fi labsii kee eegu, akka inni waan kana hunda hojjetee mana qulqullummaa kan ani gumaata godheef kana illee ijaaruuf fedhii garaa guutuu kenniif."
- ²⁰ Sana booddees Daawit yaa 'ii guutuudhaan, "WAAQAYYO Waaqa keessan galateeffad-haa" jedhe. Kanaafuu hundi isaanii WAAQAYYO Waaqa abbootii isaanii ni galateeffatan; fuula WAAQAYYOOTII fi fuula mootichaa duratti addaan gombifamanii ni sagadan.

Solomoon Mootii Ta'uun Isaa Beekame

29:21-25 kwf - 1Mt 1:28-53

²¹ Isaanis guyyaa itti aanutti WAAQAYYOOF qalma qalanii aarsaa gubamu dhi'eessan; aarsaan maqaa Israa'elootaatiin dhi'aates: korommii loonii kuma tokko, korbeeyyii hoolaa kuma tokko, korbeeyyii hoolaa xixinnaa kuma tokko, dhibaayyuu fi aarsaawwan biraa baay'ee dha. ²² Isaanis gaafa sana fuula WAAQAYYO duratti gammachuu guddaadhaan nyaatanii dhugan.

Ergasii immoo Solomoon ilma Daawit mootii godhanii akka inni bulchaa ta'uuf fuula WAAQAYYO duratti yeroo lammaffaa diban; Zaadoqiin immoo luba godhan. ²³ Kanaafuu Solomoon iddoo abbaa isaa Daawit mootii ta'ee teessoo WAAQAYYO irra taa'e. Ni milkaa'es; Israa'eloonni hundis isaaf ajajaman. ²⁴ Ajajjoonni waraanaatii fi namoonni jajjaboon hundi akkasumas ilmaan Daawit mootichaa hundi amanamummaa isaanii Solomoon Mootichaaf mirkanessan.

²⁵ WAAQAYYOS Israa'eloota duratti Solomoonin ol ol kaase; ulfina mootummaa kan mootonni isa dura turan tokko iyyuu Israa'el keessatti hin qabaatin ni kenneef.

Du'a Daawit

29:26-28 kwf - 1Mt 2:10-12

²⁶ Daawit ilmi Isseey guutummaa Israa'el irratti mootii ture. ²⁷ Innis waggaa afurtama Israa'elin bulche; waggaa torba Keeroon taa'ee, waggaa soddomii sadii immoo Yersaaleem taa'ee ni bulche. ²⁸ Daawit bara dheeraa jiraatee, badhaadhummaa fi ulfina argatee dulloomee du'e. Ilmi isaa Solomoon mootii ta'ee iddoo isaa bu'e.

²⁹ Hojiin bara mootummaa Daawit Mootichaa keessa jalqabaa hamma dhumaatti hojjetame kitaaba Seenaa Saamu'eel namicha mul'ata argu sanaa keessatti, kitaaba seenaa Naataan raajichaa keessattii fi kitaaba seenaa Gaad namicha mul'ata argu sanaa

keessatti, ³⁰ bulchiinsi isaa hundii fi humni isaa, barri inni, Israa'elii fi mootunmoonni biyyoota hundaa keessa darban barreeffameera.

Kitaaba Seenaa Lammaffaa

Solomoon Ogummaa Kadhate

1:2-13 kwf - 1Mt 3:4-15

1:14-17 kwf - 1Mt 10:26-29; 2Sn 9:25-28

¹ Sababii WAAQAYYO Waaqni isaa isa wajjin turee fi sababii inni akka malee guddaa isa godheef Solomoon ilmi Daawit jabaatee mootummaa isaa irra bule.

² Ergasiis Solomoon Israa'eloota hundatti, ajajjoota kumaatti, ajajjoota dhibbaatti, abbootii murtiitti, hooggantoota Israa'el hundattii fi hangafoota abbootiitti dubbate; ³ sababii dunkaanni wal ga'ii kan Waaqaa inni Museen garbichi WAAQAYYOO sun gammoojjii keessatti hojjete achi tureef Solomoonii fi yaa'iin guutuun gara iddoo sagadaa kan gaara irraa kan Gibe'oon jiru sanaa ni dhaqan. ⁴ Daawitis taabota Waaqaa Kiriyaati Ye'aariimii gara iddoo qopheesseef sanaatti ni fide; inni Yersaalem keessatti dunkaana dhaabeefii tureetii. ⁵ Garuu iddoo aarsaa kan Bezali'eel ilmi Uuri, ilmi Huuri naasii irraa hojjete sun fuula dunkaana qulqulluu WAAQAYYOO sanaa dura ture; kanaafuu Solomoonii fi yaa'iin sun achitti Waaqa kadhatan. ⁶ Solomoonis gara iddoo aarsaa kan naasii irraa hojjetamee dunkaana wal ga'ii keessa fuula WAAQAYYOO dura jiru sanaatti ol ba'ee aarsaa gubamu 1,000 achi irratti ni dhi'eesse.

⁷ Waaqnis halkan sana Solomoonitti mul'atee, "Waan akka ani siif kennu feetu kam iyyuu na kadhaddhu" jedheen.

⁸ Solomoon immoo akkana jedhee Waaqaaf deebise; "Ati abbaa koo Daawitiif arjummaa guddaa goote; anas iddoo isaa buuftee mootii gooteerta. ⁹ Egaa yaa WAAQAYYO, yaa Waaqi, abdiin ati abbaa koo Daawitiif kennite sun fiixaan haa ba'uu; ati saba akka biyyoo lafaa baay'atu irratti mootii na gooteertaatii. ¹⁰ Akka ani saba kana hoogganuuf ogummaa fi beekumsa naaf kenni. Yoo akkas ta'uu baate eenyutu saba kee guddaa kana bulchuu danda'a?"

¹¹ Waaqnis Solomooniin akkana jedhe; "Sababii wanni kun fedhii garaa keetii ta'ee atis qabeenya, badhaadhummaa yookaan ulfina yookaan akka diinonni kee dhuman hin kadhatinii fi sababii ati bara dheeraa jiraachuuf utuu hin ta'in saba koo kan ani irratti mootii si godhe bulchuuf jettee ogummaa fi beekumsa kadhatteef, ¹² ogummaa fi beekumsi siif ni kennama. Ani qabeenya, badhaadhummaa fi ulfina mootonni si duraan turan tokko iyyuu takkumaa hin qabaatin yookaan kan mootonni siin duubaa tokko iyyuu hin qabaanne siifin kenna."

¹³ Solomoon ergasii iddoo sagadaa kan Gibe'oon keessaa sanaa, fuula dunkaana wal ga'ii duraa ka'ee Yersaalem dhaqe. Innis Israa'el irratti mootii ta'e.

¹⁴ Solomoonis gaariiwwanii fi fardeen walitti ni kuufate; innis gaariiwwan kuma tokkoo fi dhibba afurii fi fardeen kuma kudha lama qaba ture; isaan kanneenis magaalaa gaariiwwanii keessaa fi Yersaalem keessa of bira ni kaa'ate. ¹⁵ Mootichi akka meetii fi warqeen Yersaalem keessatti akkuma dhagaa baay'atu, akka mukni birbirsaa akkuma mukkeen harbuu kanneen gaarran jalaatti baay'atu ni godhe. ¹⁶ Fardeen Solomoon Gibxii fi Qaweedhaa fidaman; daldaloota mootummaatu Qaweedhaa gatii yerootiin isaan bite. ¹⁷ Isaanis gaarii tokko meetii saqilii dhibba ja'aan, farda immoo meetii saqilii dhibba tokkoo fi shantamaan Gibxii bitanii fidan. Akkasumas gaariiwwanii fi fardeen kanneen erganii mootota Heetotaatii fi mootota Sooriyaa hundatti gurguru turan.

2

Qophii Mana Qulqullummaa Ijaaruuf Godhame

2:1-18 kwf - 1Mt 5:1-16

¹ Solomoonis akka Maqaa WAAQAYYOOTIIF manni qulqullummaa ofii isaaf immoo masaraan mootummaa ijaaramu ni ajaje. ² Innis namoota ba'aa baatan 70,000 warra gaarran irratti dhagaa cabsan 80,000 fi warra isaan to'atan 3,600 gurmeesse.

³ Solomoon akkana jedhee Huuraam mooticha Xiirrosiitti ergaa kana erge:

"Akkuma yeroo akka Daawit abbaan koo mana keessa jiraatu ittiin ijaarratuuf muka birbirsaa ergiteef sana anaafis muka birbirsaa ergi. ⁴ Kunoo ani Maqaa WAAQAYYO Waaqa kootiif mana qulqullummaa ijaaree akka isa keessatti ixaanni urgaa'aan fuula isaa duratti aarfamuuf, akka buddeenni qulqulleeffame yeroo yerootti dhi'eeffamuu

fi akka ganama hundaa fi galgala hunda, guyyoota Sanbataa, guyyaa Baatii Haaraatii fi guyyaa ayyaana WAAQAYYO Waaqa keenyaa kan murtaa'etti aarsaan gubamu dhi'eeffamuuf addaan baasee isaa kennuuf yaadeera. Kunis Israa'eliitiif seera bara baraa ti.

⁵ “Sababii Waaqni keenya waaqota kaan hunda irra guddaa ta'eef, manni qulqullummaa kan ani ijaaruuuf jiru guddaa ni ta'a. ⁶ Garuu waan samiiwwanii fi samiiwwan samii olii iyyuu isa baachuu hin dandeenyeef eenyutu mana qulqullummaa isaaf ijaaruu danda'a? Yoos iddoo aarsaan itti fuula isaa duratti gubamu malee mana qulqullummaa isaaf ijaaruuuf ani eenyu?”

⁷ “Kanaafuu akka inni ogeeyyii koo kanneen dandeettii hojii harkaa qaban warra abbaan koo Daawit qopheesse wajjin Yihuudaa fi Yerusaalem keessaa hojjetuuf nama hojii warqetii fi meetiitti, hojii naasiitii fi hojii sibiilaatti hojii kirrii diimaa dhiilgeetiin, diimaa akka dhiigaatii fi cuquliisaatti ogummaa qabaatee ogummaa waa soofuutiin leenjifame tokko naaf ergi.

⁸ “Akkasumas muka gaattiraa, muka birbirsaatii fi muka sandalii Libaanoon keessaa naaf ergi; ani akka namoonni kee ogummaa muka muruu qaban beekaatii. Namoonni koos namoota kee wajjin ni hojjetu; ⁹ sababii manni qulqullummaa kan ani ijaaruuuf jiru guddaa fi akka malee miidhagaa ta'uu qabuuf isaan muka hedduu naa qopheessuutti. ¹⁰ Anis garboota kee warra muka muraniif daakuu qamadii qoroosii kuma digdama, garbuu qoroosii kuma digdama, daadhii wayinii baadoosii kuma digdamaa fi zayitii ejersaa baadoosii kuma digdama nan kenna.”

¹¹ Huuraam mootichi Xiirros akkana jedhee xalayaadhaan Solomooniif deebise:

“WAAQAYYO waan saba isaa jaallatuuf mootii isaanii si godhe.”

¹² Huuraamis ittuma fufee akkana jedhe:

“WAAQAYYO Waaqni Israa'el inni samii fi lafa uume sun haa eebbifamu! Inni Daawit mootichaaf ilma beekaa ogummaa fi hubannaan guutame kan WAAQAYYOOF mana qulqullummaa, ofii isaatiif immoo masaraa mootummaa ijaaruu tokko kenneera.

¹³ “Ani kunoo Huuraamabii namicha ogummaa guddaa qabu tokko siif ergeera; ¹⁴ haati isaa nama biyya Daanii ti; abbaan isaa immoo nama biyya Xiirrosii ti. Innis ogummaa hojii warqetii fi meetii, kan naasiitii fi sibiilaa, kan dhagaatii fi mukaa, akkasumas kirrii diimaa dhiilgee, cuquliisaa, diimaa akka dhiigaatii fi quncee talbaa haphiitiin leenjifameera. Inni nama hojii waa soofuu gosa hundaatiin ogummaa kuufate kan karoora itti kenname kam iyyuu raawwachuu danda'uu dha. Innis ogeeyyii keetii fi ogeeyyii gooftaa koo, abbaa kee Daawit wajjin ni hojjeta.

¹⁵ “Kanaafuu amma gooftaan koo qamadii fi garbuu, zayitii ejersaatii fi daadhii wayinii kan abdachiise sana garboota isaatiif haa ergu; ¹⁶ nus muka si barbaachisu hunda Libaanoonii murree walitti hiinee hamma Yoopheetti galaana irra gad siif ergina. Ati immoo Yerusaalemitti ni geeffatta.”

¹⁷ Solomoon erga Daawit abbaan isaa saba lakkaa'een duubatti alagoota Israa'el keessa jiraatan hunda ni lakkaa'e; baay'inni isaaniis 153,600 ta'e. ¹⁸ Innis isaan keessaa nama 70,000 ba'aa baachuutti, nama 80,000 gaarran irratti dhagaa cabsuutti ramade; nama 3,600 immoo akka isaan namoota hojii hojjechiisaaniif isaan irratti muude.

3

Solomoon Mana Qulqullummaa Ijaaruu Isaa

3:1-14 kwf - 1Mt 6:1-29

¹ Solomoonis Yerusaalem keessatti iddoo WAAQAYYO abbaa isaa Daawititti mul'atetti Tulluu Mooriyaa irratti mana qulqullummaa WAAQAYYO ijaaruu jalqabe. Iddoon kunis iddoo Daawit oobdii Ornaa namicha gosa Yebuus sanaa irratti qopheessee dha. ² Innis bara mootummaa isaa keessa waggaa afuraffaatti, bultii lammaffaa ji'a lammaffaatti ijaaruu jalqabe.

³ Solomoonis mana qulqullummaa Waaqaa ijaaruu dhaaf jedhee hundee dheerinni isaa akka safartuu duriitti dhundhuma jaatama ta'ee dhundhuma digdama bal'atu ni buuse. ⁴ Gardaafon fuula mana qulqullummaa dura tures lafa irra dheerinni isa akkuma bal'ina mana qulqullummaatti dhundhuma digdama, ol dheerinni isaa immoo dhundhuma dhibba tokkoo fi digdama ture.

Innis keessa manichaatti warqee qulqulluu uffise. ⁵ Kutaa guddaa mana sanaattis muka birbirsaa maxxansaa warqee qulqulluu itti uffise; fakkii meexxiitii fi foncaatiinis ni miidhagse. ⁶ Mana qulqullummaa sanas dhagaawwan gati jabeeyyiitiin ni bareeche. Warqeen inni itti fayyadames warqee Farwaayim ture. ⁷ Innis dareeraawwan,

michichilawwan balbalaa, dhaaba manaatii fi cufaawwan mana qulqullummaatti warqee uffise; keenyan manaa sana irrattis fakkii Kiirubeelii soofe.

⁸ Innis Iddoo Iddoo Hunda Caalaa Qulqulluu ta'e ijaare; lafa irra dheerinni iddoo sanaas bal'ina mana qulqullummaatiin wal qixxee ta'ee dheerinni isaa dhundhuma digdama, bal'inni isaa immoo dhundhuma digdama ture. Keessa isaa illee warqee qulqulluu taalaantii* dhibba ja'a itti uffise. ⁹ Mismaaronni warqees saqilii shantama ulfaatu ture. Kutaawwan ol aananittis akkasumas warqee uffise.

¹⁰ Iddoo Iddoo Hunda Caalaa Qulqulluu ta'e keessatti kiirubeelii lama hojjechiisee warqee itti uffise. ¹¹ Qoochoon kiirubeelii lamaanii walumatti dhundhuma digdama ture. Qoochoon kiirubii jalqabaa tokkichi dhundhuma shan dheeratee keenyan mana qulqullummaa tuqa; qoochoon isaa kaan immoo dhundhuma shan dheeratee Qoochoon kiirubii lammaffaa tuqa. ¹² Akkasumas qoochoon kiirubii lammaffaa inni tokko dhundhuma shan dheeratee gama kaaniin keenyan mana qulqullummaa tuqa; qoochoon isaa kaan immoo dhundhuma shan dheeratee qoochoo kiirubii jalqabaa sanaa tuqa. ¹³ Qoochoowwan kiirubeelii kanneenii dhundhuma digdamii shan diriirfaman. Kiirubeeliin kunneenis fuula isaanii gara galma guddichaatti deebifatanii miilla isaaniitiin dhaabatan.

¹⁴ Innis kirrii bifa cuquliisaa, dhiilgee, bildiimaa fi quncee talbaa haphii irraa golgaa hojjetee fakkii kiirubeelii isa irratti tolche.

¹⁵ Innis fuula mana qulqullummaa duratti utubaawwan lama kanneen walumatti dhundhuma soddomii shan dheeratan tolche; tokkoon tokkoon isaaniis guutuu dhundhuma shan dheeratu mataa irraa qabu turan. ¹⁶ Fonca wal keessa loofames hojjetee mataa utubaawwanii irra kaa'e. Akkasumas roomaanoota dhibba tokko hojjetee foncaa sanatti qabsiise. ¹⁷ Innis utubaawwan sana tokko karaa kibbaatiin kaan immoo karaa kaabaatiin fuula mana qulqullummaa dura dhadhaabe. Utubaa karaa kibbaatiin Yaakiin kan karaa kaabaatiin immoo Bo'eez jedhee moggaase.

4

Manni Qulqullummaa Mi'aan Guutame

4:2-6; 10:1-5 kwf - 1Mt 7:23-26,38-51

¹ Iddoo aarsaa kan naasii irraa hojjetamee dheerinni isaa dhundhuma digdama, bal'inni isaa dhundhuma digdama, ol dheerinni isaa immoo dhundhuma kudhan ta'e ni tolche. ² Innis sibiila baqfame irraa Gaanii geengoo afaan isaa qarqara tokkoo hamma qarqara kaaniitti dhundhuma kudhan bal'atee dhundhuma shan ol dheeratu tolche; naannoon isaas funyoodhaan safaramee dhundhuma soddoma ta'e. ³ Hidhii isaa jalaanis dhundhuma tokko tokko irratti fakkii korommii kudhan kudhanitu naaneffamee ture. Korommiin sunis tarree lamaan Gaanii sana wajjin walumatti baqfamanii hojjetaman.

⁴ Gaanichis korommii kudha lama kanneen isaan keessaa sadii gara kaabaatti, sadii gara dhi'aatti, sadii gara kibbaatti, sadii immoo gara ba'aatti garagalan irra dhaabate. Gaaniin sun dugda isaanii irra dhaabatee eegeen hunda isaanii gara walakkaatti garagalee ture. ⁵ Gaaniin sun hamma barruu harkaa yabbata ture; hidhiin isaas akkuma hidhii kubbaayyaa yookaan daraaraa hadaa fakkaata ture. Innis baadoosii kuma sadii gabata ture.

⁶ Innis caabii dhiqannaa kudhan tolchee shan gama kibbaatiin, shan immoo gama kaabaatiin ni kaa'e. Mi'oonni aarsaa gubamuuf fayyadanis caabiiwwan kanneen keessatti miiccamu ture; Gaanicha garuu lubootatu dhiqannaadhaaf itti fayyadama ture.

⁷ Innis akkuma seerri ajajutti baattuwwan ibsaa kanneen warqee irraa hojjetaman kudhan tolchee shan karaa kibbaatiin, shan immoo karaa kaabaatiin mana qulqullummaa keessa ni kaa'e.

⁸ Minjaala kudhan hojjetee shan karaa kibbaatiin, shan immoo karaa kaabaatiin mana qulqullummaa keessa ni kaa'e. Akkasumas waciitti warqee kan ittiin dhiiga facaasan dhibba tokko ni tolche.

⁹ Innis oobdii lubootaa, oobdii guddichaa fi cufaawwan oobdii ni hojjetee; cufaawwan sanas naasii itti uffise. ¹⁰ Gaanichas karaa kibbaatiin golee kibba ba'aa keessa ni kaa'e.

¹¹ Huuraam okkoteewwan, waan daaraan ittiin hammaaramuu fi caabiiwwan ittiin dhiiga facaasanis ni tolche.

Huuraamis akkasiin hojii mana qulqullummaa Waaqayyoo keessatti Solomoon Mootichaaf hojjechaa ture fixe; hojiin kunis:

* 3:8 3:8 Taalaantiin tokko kiiloo giraamii 34.

- ¹² Utubaawwan lamaan;
 guutuwwan wacitiiti fakkaatan kanneen fiixee utubaawwanii irra jiran lamaan;
 wantoota akka gingilchaa wal keessa loofaman lamaan guutuwwan wacitiiti
 fakkaatanii fiixee utubaawwanii irra jiran sana lamaan miidhagsan;
¹³ wantoota akka gingilchaa wal keessa loofaman lamaan sanaafis roomaanota dhibba
 afur, tokkoo tokkoo wantoota sanaatiif roomaanota tarree lamaa wacitiitiwwan
 lamaan guutuwwan kanneen fiixee utubaawwanii irraa sana ni miidhagsan;
¹⁴ baattuwwan caabii isaanii wajjin;
¹⁵ gaanichii fi korommiin loonii kudha lamaan isa jalaan jiru;
¹⁶ okkotee, waan ittiin daaraa hammaaran, qabduu fooniitii fi mi'oota akkanaa hunda.

Mi'i Huuraam-Abiin mana qulqullummaa WAAQAYYOOTIIF jedhee Solomoon Mootichaaf hojjete hundinuu naasii cululuqfame irraa hojjetame. ¹⁷ Mootichis mi'oota kanneen dirree Yordaanositti iddoo suphee kan Sukootii fi Zaaretaan gidduu jirutti baqsiisee hojjechiise. ¹⁸ Solomoonis mi'oota kanneen hunda baay'inaan hojjechiise; ulfinni naasiis hammam akka ta'e hin beekamne.

¹⁹ Akkasumas Solomoon mi'oota mana qulqullummaa Waaqayyoo keessa jiran hunda ni hojjechiise; isaanis:

iddoo aarsaa kan warqee irraa hojjetame;

minjaala buddeenni llaalchaa irra ture;

²⁰ baattuwwan ibsaa kanneen warqee qulqulluu irraa hojjetamanii fi ibsaawwan isaanii; ibsaawwan kunneenis akka akkuma seeraatti fuula iddoo qulqulluu duratti ibsaniif tolfaman;

²¹ daraarawwan, ibsaawwanii fi qabduwwan warqee qulqulluu irraa hojjetaman;

²² waan ittiin ibsaa irraa daaraa dhadha'an, wacitiwwan ittiin dhiiga facaasan, caabiiwwanii fi qodaa ixaanaa warqee qulqulluu irraa hojjetaman; akkasumas cufaawwan mana qulqullummaa cufaawwan gara keessaa kanneen Iddoo Iddoo Hunda Caalaa Qulqulluutii fi cufaawwan galma guddichaa kanneen warqee irraa hojjetaman.

5

¹ Solomoon yommuu hojiin inni mana qulqullummaa WAAQAYYOOTIIF hojje hundi raawwatametti mi'oota abbaan isaa Daawit Waaqaaf addaan baase jechuunis meetii, warqee fi mi'oota hunda fidee mankuusa mana qulqullummaa Waaqayyoo keessa kaa'e.

Taabonni Gara Mana Qulqullummaatti Fidame

5:2-6:11 kwf - 1Mt 8:1-21

² Ergasii Solomoon Xiyoon magaalaa Daawit irraa taabota kakuu WAAQAYYOO ol fichisiisuudhaaf jedhee maanguddoota Israa'el, abbootii gosootaa hundaa fi hangafoota maatiiwwan Israa'el Yerusaalemitti walitti waame. ³ Israa'eloonni hundinuuus ji'a torbaffaa keessa yeroo ayyaanaatti mooticha biratti walitti qabaman.

⁴ Yommuu maanguddoonni Israa'el hundi achi ga'anitti Lewwonni taaboticha ol fuudhan; ⁵ isaanis taabota sana, dukaana wal ga'iitii fi mi'oota qulqulleeffaman kanneen dukaanicha keessa turan hunda ni fidan. Lewwonni luboota ta'anis baatanii ol isaan fidan; ⁶ Solomoon Mootichii fi waldaan Israa'el kan isa biratti walitti qabaman guutuun hoolotaa fi loon akka malee baay'atanii galmeessuu fi lakkaa'uun hin danda'amne aarsaa dhi'eessaa isa wajjin fuula taabotaa dura turan.

⁷ Luboonnis ergasii taabota kakuu WAAQAYYOO sana iddoo isaa gara kutaa qulqullicha mana qulqullummaa keessaa jechuunis Iddoo Iddoo Hunda Caalaa Qulqulluu ta'e sanatti ol galchani qoochoo kiirubeelii jala kaa'an. ⁸ Kiirubeeliinis iddoo taabotichaa irratti qoochoowwan isaanii babal'isani taabotichaa fi danqaraawwan ittiin taabota baatan ni haguugan. ⁹ Danqaraawwan kunneen waan akka malee dhedheeratanii fiixeen isaanii taaboticha biraa dhedheerattee fuula Iddoo Qulqulluu gara keessaa jiru sanaa duraa ni mul'atu ture; garuu iddoo qulqulluu sanaa alatti hin mul'atan ture; danqaraawwan kunneen hamma har'aatti illee achuma jiru. ¹⁰ Taabota sana keessa gabateewwan kanneen Museen Kooreebitti, iddoo WAAQAYYOO erga Israa'eloonni Gibxii ba'anii booddee itti isaan wajjin kakuu seene sanatti isa keessa kaa'e lamaan malee wanni tokko iyyuu hin turre.

¹¹ Luboonnis Iddoo Qulqulluu sanaa ni ba'an. Luboonni achi turan hundinuu yoo dabareen kan isaanii ta'uu baate iyyuu of qulqulleessanii turan. ¹² Lewwonni

faarfattoota turan jechuunis Asaaf, Heemaan, Yeduutuun, ilmaan isaaniitii fi firoonni isaanii wayyaa haphii quncee talbaa irraa hojjetame uffatanii iddoo aarsaa bira karaa ba'a biiftuutiin dhaabatanii kilillee kililchaa, baganaa fi kiraara taphachaa turan. Luboonni 120 kanneen malakata afuufan isaan wajjin turan. ¹³ Warri malakata afuufanii fi faarfattoonni WAAQAYYON leellisuu fi galateeffachuudhaaf jedhanii akkuma nama tokkootti walii galanii sagalee isaanii tokko godhatan. Isaanis malakatatti, kilillee fi mi'oota faarfannaa biraatti fayyadamanii sagalee isaanii ol fudhatanii WAAQAYYON galateeffachuudhaan:

“Inni gaarii dha;

jaalalli isaas bara baraan ni jiraata”
jedhanii faarfatan.

Ergasiis manni qulqullummaa WAAQAYYOO duumessaan ni guutame; ¹⁴ luboonnis sababii duumessa sanaatiif hojii isaanii hojjechuu hin dandeenye; ulfinni WAAQAYYOO mana qulqullummaa Waaqaa guutee tureetii.

6

¹ Ergasii Solomoon akkana jedhe; “WAAQAYYOO akka duumessa dukkanaa’aa keessa jiraatu dubbateera; ² ani mana qulqullummaa guddaa, iddoo ati bara baraan jiraatu siif ijaareera.”

³ Utuma waldaan Israa’el guutuun achi dhaabatuu mootichi of irra garagalee isaan eebbise. ⁴ Innis akkana jedhe:

“WAAQAYYOO Waaqni Israa’el inni waan afaan ofii isaatiin abbaa koo Daawitiif waadaa gale sana harkuma ofii isaatiin guute sun haa eebbifamu. Innis akkana jedhee tureetii; ⁵ ‘Ani gaafan saba koo Gibxii baasee jalqabee akka Maqaan koo achi jiraatuuf jedhee mana qulqullummaa itti ijaarsifachuuf gosoota Israa’el kam iyyuu keessatti magaalaa tokko illee hin filanne, yookaan akka inni bulchaa saba koo Israa’el ta’uuf nama tokko illee hin filanne. ⁶ Amma garuu akka maqaan koo achi jiraatuuf Yerusaalemin filadheera; akka inni saba koo Israa’elin bulchuufis Daawitin filadheera.’

⁷ “Daawit abbaan koo Maqaa WAAQAYYOO Waaqa Israa’eliif mana qulqullummaa ijaaruuftu garaa isaatii yaada qaba ture. ⁸ WAAQAYYOO garuu abbaa koo Daawitiin akkana jedhe; ‘Waan mana qulqullummaa maqaa kootiif ijaaruun yaada kee keessa jiruuf, ati yaada kana garaadhaa qabaachuun kee gaarii dha. ⁹ Ta’us namni mana qulqullummaa naaf ijaaru si’i miti; garuu ilma kee, isuma foon keetii fi dhiiga kee ta’etu ijaara; namni mana qulqullummaa Maqaa kootiif ijaaru isa.’

¹⁰ “WAAQAYYOO waadaa gale sana eegeera; akkuma WAAQAYYOO waadaa gale sana ani amma iddoo abbaa koo Daawit bu’ee teessoo Israa’el irra taa’een jira; Maqaa WAAQAYYOO Waaqa Israa’eliifis mana qulqullummaa ijaareera. ¹¹ Anis achi keessa taabota kaa’eera; taabota sana keessa immoo kakuu WAAQAYYOO kan inni saba Israa’el wajjin galetu jira.”

Kadhannaa Solomoon

6:12-40 kwf - 1Mt 8:22-53

6:41-42 kwf - Far 132:8-10

¹² Solomoon iddoo aarsaa WAAQAYYOO duratti fuula guutummaa waldaa Israa’el dura dhaabatee harka isaa ni bal’ise. ¹³ Waltajjii dhundhuma shan lafa irra dheeratu, kan dhundhuma shan bal’atee dhundhuma sadii ol dheeratu tokkos naasii irraa hojjetee walakkaa oobdii ni dhaabe; innis waltajjii sana irra dhaabatee fuula guutummaa waldaa Israa’el duratti jilbeenfatee harka isaa gara samiitti ol ni bal’ise. ¹⁴ Akkanas jedhe:

“Yaa WAAQAYYOO Waaqa Israa’el, Waaqni akka keetii ol samii keessa yookaan gad lafa irra hin jiru; ati garboota kee warra garaa guutuudhaan karaa kee irra deemaniif kakuu fi jaalala kee kan hin geeddaramne sana ni eegda. ¹⁵ Ati waadaa garbicha kee abbaa koo Daawitiif galte sana eegeerta; ati afaanuma keetiin waadaa galtee akkuma har’a ta’ee jiru kana harka keetiin fiixaan baafteera.

¹⁶ “Ammas yaa WAAQAYYOO Waaqa Israa’el, ati waan garbicha kee abbaa koo Daawitiin, ‘Yoo ilmaan kee akkuma ati goote sana waan hojjetan hunda keessatti of eeggachaa, akkuma seera kooti fuula koo dura deddeebi’an, ati nama fuula koo dura teessoo Israa’el irra taa’u gonkumaa hin dhabdu’ jettee abdachiifte sana eegiif. ¹⁷ Kanaafuu amma yaa WAAQAYYOO Waaqa Israa’el, dubbiiin ati garbicha kee Daawitiif waadaa galte sun haa mirkanaa’u.

¹⁸ “Garuu dhugumaan Waaqni nama wajjin lafa irra ni jiraataa? Samiiwwan, samiiwwan samii olii iyyuu si baachuu hin danda’an. Yoos manni qulqullummaa

kan ani ijaare kun hammam haa xinnaatuu ree! ¹⁹ Ta'us yaa WAAQAYYO Waaqa ko, kadhannaa fi waammata garbichi kee araara barbaaduuf dhi'eessuuf gurra kenni. Iyyaa fi kadhannaa garbichi kee fuula kee duratti dhi'eessu illee dhaga'i. ²⁰ Iji kees halkanii fi guyyaa gara mana qulqullummaa kanaa gara iddoo ati akka Maqaa kee achi kaa'attu dubbatte sanaa haa ilaalu. Kadhannaa garbichi kee gara iddoo kanaatti fuula deebifatee kadhatu illee dhaga'i. ²¹ Yommuu isaan gara iddoo kanaatti fuula deebifatanii kadhatanitti waammata garbicha keetii fi kan saba kee Israa'el dhaga'i. Samii keessaa, iddoo jireenya keetiiti dhaga'i; yommuu dhageessuttis dhiifama godhi.

²² "Yoo namni tokko ollaa ofii isaatti daba hojjetee akka kakatu gaafatamee, innis dhufee mana qulqullummaa kana keessatti, fuula iddoo aarsaa keetii duratti kakate, ²³ ati samii irraa dhaga'iitii garboota kee gidduutti tarkaanfii fudhadhu. Nama yakka qabu, yakka isaa matuma isaatti deebistee gatii isaa kennuufidhaan, nama qajeelaa immoo akkuma qajeelummaa isaatti isaaf falmuudhaan garboota kee gidduutti murtii kenni.

²⁴ "Yoo sabni kee Israa'el sababii cubbuu sitti hojjeteeff diinaan mo'atamutti, yoo inni deebi'ee maqaa keetiif ulfina kennee mana qulqullummaa kana keessatti si duratti kadhatee si waammatutti, ²⁵ samii irraa dhaga'iitii cubbuu saba kee Israa'el dhiisiif; biyya isaanii fi abbootii isaanitiif kennite sanattis deebisii isaan galchi.

²⁶ "Yoo sababii sabni kee cubbuu sitti hojjeteeff samiiwwan cufamanii bokkaan dhabame, yoo isaan sababii ati isaan adabdeeff iddoo kanatti fuula deebifatanii maqaa kee ulfeessanii cubbuu isaanii irraa deebi'an, ²⁷ ati samii irraa dhaga'iitii cubbuu garboota kee, saba kee Israa'el dhiisiif. Karaa qajeelaa isaan jiraachuu qaban isaan barsiisi; biyya dhaala gootee saba keetiif kennite irrattis bokkaa roobsi.

²⁸ "Yommuu beelli yookaan dha'ichi yookaan waagiin yookaan awwaaron yookaan hawwaannisni yookaan korphisni biyyatti dhufutti, yookaan yommuu magaalawwan biyya isaanii kam iyyuu keessatti diinonni isaan marsanitti, yookaan yommuu balaan yookaan dhukkubni kam iyyuu dhufutti, ²⁹ yoo sabni kee Israa'el rakkinaa fi dhukkubbii ofii isaa beekke isaan keessaa eenyu iyyuu gara mana qulqullummaa kanaatti harka isaa bal'isee kadhannaa yookaan waammata dhi'eesse, ³⁰ ati samii irraa, iddoo jireenya keetiiti dhaga'i. Dhiifama godhiif; si qofatu garaa namaa beekaatii, ati sababii garaa isaa beektuuf tokkoo tokkoo namaatiif akkuma hojii isaa hundaatti waan isaaf malu kenni; ³¹ yoo akkasii isaan bara biyya ati abbootii keenyaaf kennite keessa jiraatan hunda si sodaatanii karaa kee irra ni deemu.

³² "Akkasumas nama ormaa kan saba kee Israa'el hin ta'in kan maqaa kee guddichaaf, harka kee jabaa fi irree kee kan diriifame sanaatiif jedhee biyya fagoottii dhufe, yoo inni dhufee fuula isaa gara mana qulqullummaa kanaatti deebifatee kadhate, ³³ ati samii irraa, iddoo jireenya keetiiti dhaga'i. Akka saboonni addunyaa hundinuu akkuma saba kee Israa'el sana maqaa kee beekanii si sodaatanii fi akka isaan akka manni ani ijaare kun maqaa keetiin waamamu illee beekaniif jedhii waan namni ormaa sun si kadhatu hunda godhiif.

³⁴ "Yommuu sabni kee diinota isaa loluuf jedhee gara ati itti isa ergitu kam iyyuu duulutti, yoo inni gara magaalaa ati filattee fi gara mana qulqullummaa kan ani Maqaa keetiif ijaare kanaatti fuula deebifatee si kadhate, ³⁵ ati samii irraa kadhannaa isaatii fi waammata isaa dhaga'iitii dhimma isaa isaaf raawwadhu.

³⁶ "Waan namni cubbuu hin hojjenne tokko iyyuu hin jirreeff yommuu isaan cubbuu sitti hojjetanitti ati isaanitti aartee diina isaan booji'ee biyya fagootti yookaan dhi'ootti isaan geessutti dabarsitee isaan kennita; ³⁷ yoo isaan biyya boojiudhaan itti geeffamanitti gaabbanii qalbii geeddaratanii, 'Nu cubbuu hojjenneerra; balleessineerra; waan hamaas hojjenneerra' jedhanii biyya boojiu isaanii keessatti si kadhatan, ³⁸ yoo isaan biyya boojiudhaan itti geeffaman sana keessatti garaa fi lubbuu isaanii guutuudhaan gara keetti deebi'anii, gara biyya ati abbootii isaanitiif kenniteetti, gara magaalaa ati filattee fi gara mana qulqullummaa kan ani Maqaa keetiif ijaare sanaatti fuula deebifatanii si kadhatan, ³⁹ ati samii irraa, iddoo jireenya keetiiti kadhannaa fi waammata isaanii dhaga'iitii dhimma isaanii isaanii raawwadhu. Saba kee kan cubbuu sitti hojjeteeffis dhiifama godhi.

⁴⁰ "Ammas yaa Waaqa koo kadhannaa iddoo kanatti dhi'aatu iji kee haa argu; gurri kees haa dhaga'u.

⁴¹ "Kanaafuu yaa WAAQAYYO, yaa Waaqi,

ka'iitii gara iddoo boqonnaa keetii kottu; atii fi taabonni jabina keetiis kottaa.

Yaa WAAQAYYO, yaa Waaqi, luboonni kee fayyina haa uffatan;

qulqulloonni kees gaarummaa keetti haa gammadan.

⁴² Yaa WAAQAYYO, Gooftaa, ati dibamaa kee hin gatin;

jaalala guddaa ati gargicha kee Daawitin abdachiifte sana illee yaadadhu.”

7

Manni Qulqullummaa Eebbfame

7:1-10 kwf - 1Mt 8:62-66

¹ Yommuu Solomoon kadhannaa isaa fixatetti ibiddi samiidhaa gad bu'ee aarsaa gubamuu fi aarsaawwan biraa nyaatee fixe; ulfinni WAAQAYYOS mana qulqullummaa guute. ² Sababii ulfinni WAAQAYYOO mana qulqullummaa guuteef luboonni mana qulqullummaa WAAQAYYOO seenuu hin dandeenye. ³ Israa'eloonni hundi yommuu ibidda samiidhaa gad bu'uu fi ulfina WAAQAYYOO mana qulqullummaa irratti arganitti qarqara karaa irratti jilbeenfatani addaan lafatti gombifamuudhaan sagadan; akkana jedhaniis WAAQAYYON galateeffatan:

“Inni gaarii dha;

jaalalli isaas bara baraan jiraata.”

⁴ Ergasii mootichii fi sabni hundi fuula WAAQAYYOO duratti aarsaa dhi'eessan.

⁵ Solomoon Mootichis loon kuma digdamii lama, hoolotaa fi re'oota kuma dhibba tokkoo fi digdama aarsaa dhi'eesse; akkasiin mootichii fi namoonni hundi mana qulqullummaa Waaqaa eebbisan. ⁶ Luboonni akkuma Lewwonni mi'oota faarfannaa WAAQAYYOO kanneen Daawit Mootichi ittiin WAAQAYYON jajachuudhaaf tolche kanneen yeroo inni, “jaalalli isaa bara baraan ni jiraata” jedhee galateeffatutti fayyadan sana harkatti qabatanii dhaaban. Luboonnis fuullee Lewwotaa dhaabatanii malakata isaanii afuufan; Israa'eloonni hundis dhadhaabachaa turan.

⁷ Solomoonis iddoo walakkaa oobdii fuula mana qulqullummaa WAAQAYYOO dura jiru sanaa Waaqaaf addaan ni baase; inni sababii iddooon aarsaa kan inni naasii irraa hojjetee ture sun aarsaa gubamu, kennaa midhaanii fi cooma baachuu hin danda'iniif aarsaa gubamuu fi cooma aarsaa nagaa sana achumatti ni dhi'eesse.

⁸ Kanaafuu Solomoon yeroo sanatti bultii torbaaf Israa'eloota isa wajjin turan hunda wajjin jechuunis waldaa guddicha Malkaa Leeboo Hamaatii jalqabee hamma laga Gibxitti walitti qabame wajjin ayyaana ayyaaneeffate. ⁹ Isaanis sababii bultii torba ayyaana eebba iddoo aarsaa ayyaaneeffatanii bultii torba immoo ittuma fufanii ayyaana daasii ayyaaneeffataniif bultii saddeettaffaatti wal ga'ii guddaa tokko ni godhatan. ¹⁰ Solomoonis guyyaa digdamii sadaffaa ji'a torbaffaatti akka isaan mana isaaniitti galaniif namoota gad dhiise; isaanis sababii WAAQAYYOO Daawitiif, Solomoonii fi saba isaa Israa'eliif waan gaarii godheef garaa isaaniitti gammadani ni ililchan.

WAAQAYYOO Solomoonitti Mul'ate

7:11-22 kwf - 1Mt 9:1-9

¹¹ Yommuu Solomoon mana qulqullummaa WAAQAYYOOTII fi masaraa mootummaa fixee waan mana qulqullummaa WAAQAYYOOTII fi masaraa ofii isaa keessatti hojjechuu barbaade hunda raawwatetti, ¹² WAAQAYYOS halkanii isatti mul'atee akkana jedheen:

“Ani kadhannaa kee dhaga'eera; iddoo kana illee mana qulqullummaa kan aarsaan itti dhi'effamu godhee ofii kootiif filadheera.

¹³ “Ani yommuun akka bokkaan hin roobneef samii cufutti yookaan akka inni lafa

balleessuuf hawwaannisa ergutti yookaan ani yommuun saba kooti dha'icha ergutti,

¹⁴ yoo sabni koo kan maqaa kootiin waamamu gad of qabee na kadhate, yoo inni fuula koo barbaadee karaa isaa hamaa sana irraa deebi'e, ani samii irraa dhaga'ee cubbuu isaa dhiiseefii biyya isaa nan fayyisa. ¹⁵ Ammas kadhannaa iddoo kanatti dhi'aatuuf

iji koo ni banama; gurri koos ni dhaga'a. ¹⁶ Ani akka Maqaan koo bara baraan achi jiraatuuf mana qulqullummaa kana filadhee eebbiseera. Iji koo fi garaan koo yeroo hunda achuma jira.

¹⁷ “Yoo ati akkuma Daawit abbaan kee godhe sana fuula koo dura deemtee waan ani ajaje hunda hojjetee, yoo qajeelchawwanii fi seerawwan koo eegde, ¹⁸ ani akkuman yeroo, ‘Ati nama Israa'elin bulchu hin dhabdu’ jedhee abbaa kee Daawit wajjin kakuu gale sana teessoo mootummaa keetii jabeessee nan dhaaba.

¹⁹ “Garuu yoo isin duubatti garagaltanii seeraa fi ajaja ani isinii kenne sana irraa gara waaqota biraa tajaajiluu fi isaan waaqeffachuu dhaqan. ²⁰ ani biyya koo kanan isaaniif kenne keessaa Israa'elin nan buqqisa; mana qulqullummaa kanan Maqaa kootiif qulqulleesse kana illee nan balfa; saboota hunda birattis waan kolfaatii fi waan qoosaa isa nan godha. ²¹ Manni qulqullummaa kunis tuullaa waan diigamee ta'a. Namni achiin darbu hundis, ‘WAAQAYYOO maaliif biyya kanaa fi mana qulqullummaa kanatti waan akkasii hojjete?’ jedhee itti qoosa. ²² Namoonnis, ‘Sababiin inni balaa kana hunda isaaniitti fideef waan isaan WAAQAYYOO Waaqa abbootii isaanii kan

Gibxii isaan baase sana dhiisanii, waaqota biraa hammatanii, isaanin waaqeffatanii tajaajilaniif jedhanii ni deebisu.”

8

Hojiwwan Biraa Kanneen Solomoon Hojjetee
8:1-18 kwf - 1Mt 9:10-28

¹ Dhuma waggaa digdamaatti yeroo itti Solomoon mana qulqullummaa WAAQAYYOOTII fi mana ofii isaa ijaaretti, ² Solomoon gandoota Huuraam isaaf kennee ture sana haaromsee ijaaree Israa'eloota achi keessa ni qubachiise. ³ Ergasii immoo Solomoon Hamaati Zoobaatti duulee ishee ni qabate. ⁴ Akkasumas gammoojjii keessatti Tadmoorii fi magaalaawwan waa itti kuusan kanneen duraan Hamaatitti ijaaree ture hunda ni ijaare. ⁵ Beet Horoon oliitii fi Beet Horoon gadii magaalaawwan da'annoo godhee dallaa dhagaa, balbalawwanii fi danqaraawwan ittiin cufan itti tolche; ⁶ kana malees Baa'ilaatii fi magaalaawwan isaa kanneen waa itti kuusan hunda, magaalaawwan gaariwwan isaatii fi magaalaawwan fardeen isaa hunda, waanuma Yerusaalemitti, Libaanonittii fi biyya bulchu hunda keessatti ijaaruu barbaade hundumaa ni ijaare.

⁷ Ammas namoota Israa'eloota hin ta'in jechuunis Heetota, Amoorota, Feerzota, Hiiwotaa fi Yebuusota jalaa hafanitu jira. ⁸ Solomoonis sanyiiwwan namoota kanneen hundaa warra biyyattii keessatti hafan kanneen Israa'eloonni hin barbadeessin sana akkuma hamma har'aatti illee jiru kana akka isaan hojii garbummaa hojjetaniif dirqisiise. ⁹ Solomoon garuu hojii isaatiif jedhee Israa'eloota hin garboomsine; isaan loltoota isaa, abbootii duulaa, ajajjuuwwan gaariwwanii fi abbootii fardaa isaa turan. ¹⁰ Isaan akkasumas qondaaltota Solomoon Mootichaa kanneen nama hojjechiisan dhibba lamaa fi shantaman keessaa qondaaltota hangafoota turan.

¹¹ Solomoonis, “Sababii iddoo taabonni WAAQAYYOO seene hundi qulqulluu ta'eef, niitiin koo masaraa mootummaa Daawit Mooticha Israa'el keessa jiraachuu hin qabdu” jedhee intala Fara'oon sana magaalaa Daawit keessaa baasee gara mana isheef ijaare sanaatti ni fide.

¹² Solomoon iddoo aarsaa kan gardaafuu mana qulqullummaa WAAQAYYOO duratti ijaare sana irratti aarsaa gubamu WAAQAYYOO ni dhi'esse; ¹³ kanas akkuma seera waa'ee aarsaa kan guyyaa guyyaa kan Museen Sanbataaf, Ayyaana Baatii Haaraa fi ayyaanota waggaa keessaa sadaniif jechuunis Ayyaana Maxinoo, Ayyaana Torbanootaa fi Ayyaana Daasiif kenne sanaatti ni dhi'esse. ¹⁴ Innis akkuma seera abbaa isaa Daawititti gareewwan lubootaa hojii isaaniitti, Lewwota immoo akka isaan akkuma seera guyyaa guyyaatti tajaajila galataa kennanii fi akka isaan hojii lubootaa gargaaraniif filate. Akkasumas tokkoo tokkoo karraatti garee eegdota karraa ni ramade; Daawit namni Waaqaa sun waan kana ajajeetti. ¹⁵ Isaanis waan mootichii waa'ee mankuusaa fi waa'ee waan biraa irratti lubootaa fi Lewwota ajaje irraa hin jal'anne.

¹⁶ Hojiin Solomoon hundi gaafa hundeen mana qulqullummaa WAAQAYYOO buufamee jalqabee hamma dhuma manichaatti haala tolaadhaan hojjetame. Akkasiinis manni qulqullummaa WAAQAYYOO ni xumurame.

¹⁷ Ergasii Solomoon gara magaalaawwan Eziyoon Geberii fi Eelooti kanneen biyya Edoom keessa qarqara galaanaatti argaman sanaa dhaqe. ¹⁸ Huuraamis dooniiwwan ajajjoonni ofii isaa kanneen galaanicha beekan ajajan ergeef. Isaanis namoota Solomoon wajjin dooniidhaan Oofiir dhaqanii warqee taalaantii dhibba afurii fi shantama fidanii Solomoon Mootichatti kennan.

9

Mootittiin Saabaa Solomoonin Arguu Dhaqxe
9:1-12 kwf - 1Mt 10:1-13

¹ Mootittiin Shebaa waa'ee maqaa Solomoon dhageenyaan gaaffiiwwan jajjaboodhaan qortee isa ilaaluuf gara Yerusaalem dhufte. Isheenis miiltoo akka malee baay'ee wajjin gaalawwan urgooftuu, warqee hedduu fi dhagaawwan gati jabeeyyii baatan fudhattee dhufte; Solomoon bira geenyaanis waan garaa ishee jiru hunda isa wajjin haasofte. ² Solomoonis gaaffii ishee hundaaf deebii kenne; wanni inni isheef ibsuu dadhabe tokko iyyuu hin turre. ³ Mootittiin Shebaa yommuu ogummaa Solomoon, masaraa mootummaa kan inni ijaare, ⁴ nyaata maaddii isaa irratti dhi'aatu, haala itti qondaaltonni isaa tataa'an, hojjetoota uffata hojii uffatanii hojjetan, warra daadhii isaaf dhi'eessanii fi aarsaa gubamu kan inni mana qulqullummaa WAAQAYYOO keessatti dhi'esse argitetti akka malee dinqisiifatte.

⁵ Isheenis mootichaan akkana jette; “Oduun ani waa’ee waan ati hojjetteetii fi waa’ee ogummaa keetii biyyuma kootii dhaga’e sun dhugaa dha. ⁶ Ani garuu hamman dhufee ijuma kootiin argutti waan isaan jedhan sana hin amanne. Dhugumaan guddina ogummaa keetii keessaa walakkaan isaa iyyuu natti hin himamne; ati oduu ani dhaga’e sana akka malee caalta. ⁷ Namoonni kee hammam haa gammadan! Qondaaltonni kee warri yeroo hunda fuula kee dura dhadhaabatanii ogummaa kee dhaga’an hammam haa gammadan! ⁸ WAAQAYYO Waaqni kee inni sitti gammadee akka ati mootii taatee WAAQAYYO Waaqa keetiif bulchituuf teessoo isaa irra si teessise sun haa galateeffamu. Waaqni kee sababii Israa’eliif jaalala qabuu fi sababii bara baraan jabeessee isaan dhaabuuf fedhii qabuuf akka ati murtii qajeelaa fi qajeelummaa eegduuf isaan irratti mootii si godheera.”

⁹ Isheenis warqee taalaantii 120, urgooftuu akka malee baay’ee fi dhagaawwan gati jabeeyyii mootichaaf kennite. Urgooftuun akka urgooftuu mootittiin Shebaa Solomoon Mootichaaf kennite sanaa gonkumaa hin argamne.

¹⁰ Namoonni Hiiraamii fi namoonni Solomoon biyya Oofiir irraa warqee fidan; akkasumas muka sandaliitii fi dhagaawwan gati jabeeyyii ni fidan. ¹¹ Mootichis muka sandalii sana gulantaawwan mana qulqullummaa WAAQAYYOOTII fi kan masaraa mootummaa, akkasumas baganaa fi kiraara faarfattootaa tolchuuf itti fayyadame. Wannii akkasiiis takkumaa Yihuudaa keessatti hin argamne.

¹² Solomoon Mootichis waan isheen barbaadde fi waan isheen kadhatte hunda mootittii Shebaatiif ni kenne; inni waan isheen isaaf geessite caalaa kenneef. Isheenis ergasii kaatee miiltota ishee wajjin biyya ofii isheetti deebite.

Badhaadhummaa Solomoon

9:13-28 kwf - 1Mt 10:14-29; 2Sn 1:14-17

¹³ Ulfinni warqee kan wagguma waggaan Solomooniif galu taalaantii 666 ture; ¹⁴ kunis gibira daldaloota qabeenya gurguddaatii fi kan warra qabeenya xixinnaa irraa argamuu hin dabalatu. Akkasumas mootonni Arabaa fi bulchitoonni biyyaa hundi Solomooniif warqee fi meetii ni fidan.

¹⁵ Solomoon Mootichis warqee tumame irraa gaachanawwan gurguddaa dhibba lama ni tolche; tokkoon tokkoon gaachanawwan sanaas warqee saqilii dhibba ja’a fixe. ¹⁶ Akkasumas warqee tumame irraa gaachana xixinnaa dhibba sadii ni tolche. Tokkoon tokkoon gaachana sanaas warqee saqilii dhibba sadii fixe. Mootichis gaachanawwan kanneen Masaraa mootummaa kan Bosona Libaanoon keessa ni kaa’e.

¹⁷ Mootichis teessoo guddaa tokko ilka arbaa irraa hojjetee warqee qulqulluu itti uffise. ¹⁸ Teessoon sun gulantaawwan ja’a qaba ture; ejjenni miillaa kan warqee irraa hojjetame tokkos itti qabsiifamee ture. Karaa teessoo sanaa lamaaniniis waan harka irra kaa’atanitu ture; tokkoo tokkoo waan harka irra kaa’atan sanaa biras fakkii leencaa tokko tokkotu dhaabatee ture. ¹⁹ Gulantaawwan ja’aan sana irras leenconni kudha lama tokko fiixee tokkoon, fakkiin kaan immoo fiixee kaaniin dhadhaabachaa turan. Wannii akkasii takkumaa mootummaa biraa kamiif iyyuu hin tolfamne. ²⁰ Mi’i Solomoon Mootichi ittiin dhugu hundinuu warqee irraa hojjetame; mi’i Masaraa mootummaa kan Bosona Libaanoon jedhamu sanaa hundi immoo warqee qulqulluu irraa hojjetame. Sababii bara Solomoon keessa meetiin akka waan gatii hin qabne tokkootti ilaalamaa tureef wannii tokko iyyuu meetii irraa hin hojjetamne. ²¹ Mootichis dooniwwan daldalaa kanneen namoonni Huuraam oofan qaba ture. Isaanis waggaa sadii sadiitti yeroo tokko warqee, meetii fi ilka arbaa, qamalee fi jaldeessa fidanii ni dhufu ture.

²² Solomoon Mootichi badhaadhummaa fi ogummaadhaan mootota addunyaa hunda ni caala ture. ²³ Mootonni addunyaa hundi ogummaa Waaqni garaa isaa keessa kaa’e dhaga’uuf Solomoon bira dhufuu barbaadu ture. ²⁴ Namni waggaa waggaa isa bira dhufu hundinuu kennaa mi’a meetii fi kan warqee, uffata, mi’a lolaa, urgooftuu, fardeenii fi gaangolii fidaafii ture.

²⁵ Solomoon gola fardeenii fi gaariwwanii kuma afur akkasumas fardeen kuma kudha lama kanneen magaalawwan gaariwwanii keessaa fi of bira Yerusaaleen keessa kaa’ate qaba ture. ²⁶ Innis mootota Laga Efraaxiisii hamma biyya Filisxeemotaattii fi hamma daarii Gibxitti jiran hunda ni bulche. ²⁷ Mootichi akka meetiin Yerusaaleen keessatti akkuma dhagaa baay’atu, akka mukni birbirsaa akkuma mukkeen harbuu kanneen gaarran jalaatti baay’atu ni godhe. ²⁸ Fardeen Solomoon Gibxii fi biyyoota biraa hunda irraa bitamanii dhufan.

Solomoon Du’uu Isaa

9:29-31 kwf - 1Mt 11:41-43

²⁹ Wannu bara mootummaa Solomoon keessa hojjetaman kan biraa, jalqabaa hamma dhumaatti kitaaba seenaa Naataan raajichaa keessatti, raajii Ahiyyaa namicha Shiiloo sanaa keessattii fi mul'ata Iddoon namichi waa himu sun waa'ee Yerobi'aam ilma Nebaat arge keessatti barreeffamanii jiru mitii? ³⁰ Solomoon Yerusaalem keessatti mootii ta'ee waggaa afurtama saba Israa'el hunda ni bulche. ³¹ Innis ergasii abbootii isaa wajjin boqotee magaalaa abbaa isaa, magaalaa Daawit keessatti ni awwaalame. Rehoobo'aam ilmi isaa iddoo isaa bu'ee mootii ni ta'e.

10

Israa'el Rehoobo'aamitti Fincile

10:1-11:4 kwf - 1Mt 12:1-24

¹ Rehoobo'aamis sababii Israa'eloonni hundinuu mootii isa gochuudhaaf achi yaa'aniif ka'ee Sheekem dhage. ² Yerobi'aam ilmi Nebaat yommuu oduu kana dhaga'etti deebi'ee dhufe; inni Solomoon Mooticha jalaa baqatee Gibxi jiraachaa tureetii. ³ Kanaafuu Yerobi'aamitti nama erganii waamanii, innii fi Israa'el hundinuu gara Rehoobo'aam dhaqanii akkana jedhaniin: ⁴ "Abbaan kee waanjoo ulfaatu nurra kaa'ee ture; ati immoo amma hojii inni humnaan nu hojjechiise sanaa fi waanjoo ulfaataa inni nurra kaa'ee sana nuuf salphisi; nus si tajaajillaa."

⁵ Rehoobo'aam immoo deebisee, "Bultii sadii keessatti deebi'aa gara koo kottaa" jedheen. Kanaafuu namoonni sun ba'anii deeman.

⁶ Ergasiis Rehoobo'aam Mootichi maanguddoota bara jireenya isaa keessa abbaa isaa Solomoonin tajaajilaniin mari'ate. Innis, "Isin akka ani namoota kanaaf maal deebisu na gorsitu?" jedhee gaafate.

⁷ Isaanis, "Yoo ati saba kanaaf garaa laaftee isaan gammachiiftee deebii gaarii kenniteef, isaan yeroo hunda tajaajiltoota kee ni ta'u" jedhanii deebisaniif.

⁸ Rehoobo'aam garuu gorsa maanguddoonni kennaniif didee dargaggoota isa wajjin guddatan kanneen isa tajaajilan wajjin mari'ate. ⁹ Innis, "Gorsi keessan maal? Namoota, 'Waanjoo abbaan kee nurra kaa'ee kana nuuf salphisi' naan jedhan kanaaf akkamitti haa deebisnu?" jedhee isaan gaafate.

¹⁰ Dargaggoonni isa wajjin guddatan sunis akkana jedhanii deebisaniif; "Namoonni, 'Abbaan kee waanjoo ulfaataa nurra kaa'ee; ati garuu waanjoo keenya nuu salphisi' siin jedhan; ati amma akkana jedhiin; 'Qubni koo xinnaa mudhii abbaa kootii irra furdaa dha. ¹¹ Abbaan koo waanjoo ulfaataa isin irra kaa'ee; ani immoo hamma caalaa iyyuu isinittan ulfaachisa. Abbaan koo qacceedhaan isin garafe; ani immoo torbaanqabaadhaanan isin garafa.'"

¹² Bultii sadii booddee akkuma mootichi, "Guyyaa sadii keessatti deebi'aa gara koo kottaa" jedhe sana Yerobi'aamii fi namoonni hundi gara Rehoobo'aamitti deebi'an. ¹³ Mootichi immoo afaan hamaadhaan deebii kenneef. Gorsa maanguddootaas didee, ¹⁴ gorsa dargaggootaa fudhatee, "Abbaan koo waanjoo keessan isinitti ulfaachise; ani immoo hamma iyyuu caalaa isinittan ulfaachisa. Abbaan koo qacceedhaan isin garafe; ani immoo torbaanqabaadhaanan isin garafa" jedhe. ¹⁵ Kanaafuu mootichi namoota sana hin dhaggeeffanne; wannu kun akka dubbiin WAAQAYYO karaa Ahiyyaa namicha biyya Shiiloo sanaatiin Yerobi'aam ilma Nebaatitti dubbate sun raawwatamuuf Waaqayyo biraa dhufetii.

¹⁶ Israa'el hundi yommuu akka mootichi isaan dhaggeeffachuu dide arganitti, akkana jedhanii mootichaaf deebii kennan:

"Nu Daawit irraa qooda maalii qabna?"

Ilma Isseey irraas maal qabna?"

Yaa Israa'el gara dunkaana keetii!

Yaa Daawit atis mana kee eeggadhu!"

Kanaafuu Israa'eloonni hundi gara mana ofii isaaniitti deebi'an. ¹⁷ Israa'eloota magaalaaawwan Yihuudaa keessa jiraatan garuu Rehoobo'aamtu bulchaa ture.

¹⁸ Rehoobo'aam mootichis Hadooraam itti gaafatamaa hojjetoota hojii humnaa ni erge; Israa'eloonni immoo dhagaadhaan tumanii isa ajjeesan. Rehoobo'aam mootichi garuu ariitiidhaan gaarii ofii isaa yaabbatee jalaa miliqee Yerusaalemitti baqate.

¹⁹ Kanaafuu Israa'eloonni hamma har'aatti mana Daawititti fincilaniiru.

11

¹ Rehoobo'aam yommuu Yerusaalem ga'etti akka isaan Israa'elitti duulanii Rehoobo'aamiif mootummaa deebisaniif jedhee mana Yihuudaa fi Beniyaam keessaa namoota loluu danda'an kuma dhibba tokkoo fi saddeetama walitti qabe.

² Garuu dubbiin WAAQAYYOO kun akkana jedhee gara nama Waaqaa gara Shemaa'iyaa ni dhufe; ³ "Rehoobo'aam ilma Solomoon mooticha Yihuudaa fi Israa'eloota Yihuudaa fi Beniyaam keessa jiraatan hundaan akkana jedhi; ⁴ "WAAQAYYOO akkana jedha: Obboloota keessan Israa'eloota loluudhaaf jettanii ol hin ba'inaa. Sababii wanni kun ana bira dhufeeff tokkoon tokkoon keessan gara mana keessaniitti galaa." Kanaafuu isaan dubbii WAAQAYYOOTIIF ajajamanii Yerobi'aamitti duuluu dhiisanii deebi'an.

Rehoobo'aam Magaalaawwan Yihuudaa Jabeessee Ijaare

⁵ Rehoobo'aam Yersaalem keessa jiraatee Yihuudaa keessatti immoo magaalaawwan ittisaa ni ijaarrate; isaanis: ⁶ Beetlihem, Eexaam, Teqoo'aa, ⁷ Beet Zuuri, Sookoo, Adulaam, ⁸ Gaati, Maareeshaa, Ziif, ⁹ Adooraayim, Laakkiish, Azeeqaa, ¹⁰ Zoraa, Ayaaloonii fi Kebrooni. Isaan kunneen magaalaawwan Yihuudaa fi Beniyaam keessatti jabeeffamanii ijaaramanii dha. ¹¹ Innis ittisa isaanii jajjabeessee ajajjoota itti galche; nyaata, zayitii ejersaatii fi daadhii wayiniis achitti ni kuuse. ¹² Magaalaawwan hunda keessas gaachanaa fi eeboo kaa'ee akka isaan jabaatan ni godhe. Akkasiinis Yihuudaa fi Beniyaamin kan ofii isaa godhate.

¹³ Luboonnii fi Lewwonnii aanaalee Israa'el hunda keessa jiraatan gara isaa goran. ¹⁴ Sababii Yerobi'aamii fi ilmaan isaa akka luboota WAAQAYYOOTTI isaan ilaaluu didaniif, Lewwonnii lafa dheeda isaanii fi qabeenya isaanii dhiisanii gara Yihuudaa fi Yersaalem dhufan. ¹⁵ Innis iddoowwan sagadaa kanneen gaarran irraatii fi fakkii waaqota tolfamoo bifa re'ee fi bifa jabbiitiin hojjete sanaaf luboota ofii isaa ni muudate. ¹⁶ Warri gosoota Israa'el hunda keessaa garaan isaanii WAAQAYYOO Waaqa Israa'el bira jiru WAAQAYYOO Waaqa abbootii isaaniitiif aarsaa dhi'eessuudhaaf Lewwota duukaa bu'anii Yersaalem dhaqan. ¹⁷ Isaanis mootummaa Yihuudaa jajjabeessaa waggaa sadii Rehoobo'aam ilma Solomoon ni gargaaran; isaan waggoota sadan kana keessa karaa Daawitii fi Solomoon duukaa bu'aa turaniitii.

Maatii Rehoobo'aam

¹⁸ Rehoobo'aamis Maahalaati intala Yeriimooti ilma Daawitii fi Abihaayil fuudhe; Abihaayil kun immoo intala Eliyaab ilma Isseey. ¹⁹ Isheenis: Ye'uushi, Shemaariyaa fi Zahaam deesseef. ²⁰ Ergasii immoo Ma'akaa intala Abesaaloom ni fuudhe; isheenis Abiyaa, Ataayi, Ziizaa fi Sheloomiit deesseef. ²¹ Rehoobo'aamis niitotaa isaa kaanii fi saajatoowwan isaa caalaa Ma'akaa intala Abesaaloom ni jaallate. Innis walumatti niitota kudha saddeet, saajatoowwan jaatama, ilmaan digdamii saddeetii fi intallan jaatama qaba ture.

²² Rehoobo'aamis mootii isa gochuuf jedhee Abiyaa ilma Ma'akaa sana obboloota isaa ilmaan mootii keessaa hoogganaa godhee muude. ²³ Innis ogummaan ilmaan isaa keessaa tokko tokko aanaalee Yihuudaa fi Beniyaam keessa, gara magaalaawwan jabeeffamanii ijaaraman hundaatti ni erge. Ilmaan isaaf nyaata isaan ga'u kennee niitota baay'ee illee isaan ni fuusise.

12

Shiishaaq Yersaalemitti Duule

12:9-16 kwf - 1Mt 14:21,25-31

¹ Rehoobo'aam erga mootii ta'ee mootummaa isaa cimsatee booddee innii fi Israa'eloonni isa wajjin jiraatan hundi seera WAAQAYYOO eeguu didan. ² Sababii isaan WAAQAYYOOOF amanamuu didaniif waggaa shanaffaa Rehoobo'aam mootii ta'etti Shiishaaq mootiin Gibxi Yersaalemin waraane. ³ Innis gaariwwan kuma tokkoo fi dhibba lama, abbootii fardaa kuma jaatamaa fi loltoota Liibiyaa, kan Sukkiimiitii fi kan Itoophiyaa warra baay'inni isaanii hin beekamne kanneen isa wajjin Gibxii dhufan fudhatee, ⁴ magaalaawwan Yihuudaa kanneen jajjabeeffamanii ijaaraman qabatee hamma Yersaalemiitti ni dhufe.

⁵ Ergasii Shemaa'iyaan raajichi gara Rehoobo'aamii fi bulchitoota Yihuudaa kanneen Shiishaaq sodaatanii Yersaalem keessatti walitti qabamanii dhufee, "WAAQAYYOO akkana jedha; 'Isin na dhiifan; anis harka Shiishaaqitti isin kenneera'" jedhe.

⁶ Bulchitoonni Israa'elii fi Rehoobo'aam mootichi gad of deebisanii, "WAAQAYYOO qajeelaa dha" jedhan.

⁷ Yommuu WAAQAYYOO akka isaan gad of deebisan argetti, dubbiin WAAQAYYOO akkana jedhee gara Shemaa'iyaa dhufe; "Waan isaan gad of deebisaniif, ani dafeen isaan fura malee isaan hin balleessu. Dheekkamsi koos karaa Shiishaaqiin Yersaalemitti hin dhangalaasu. ⁸ Ta'us isaan akka garaa garummaa ana tajaajiluu fi mootota biyya biraa tajaajiluu gidduu jiru beekaniif isaaf ni garboomu."

⁹ Shiishaaq mootiin Gibxi yeroo Yersaalem qabatetti qabeenya mana qulqullummaa WAAQAYYOOTII fi qabeenya masaraa guurratee deeme. Gaachanawwan warqee kanneen Solomoon hojjete dabalatee waan guurratee gale. ¹⁰ Kanaafuu Rehoobo' aam mootichi iddoo isaanii buusuuf jedhee gaachana naasii hojjete ajajjuuwwan eegdota dabaree eegumsa balbala masaraa mootummaatti kenne. ¹¹ Yeroo mootichi gara mana qulqullummaa WAAQAYYOO dhaqu hunda eegdonni sun gaachana sana baachaa isa wajjin deemanii ergasii immoo kutaa eegdotaatti deebisu ture.

¹² Sababii Rehoobo' aam gad of deebiseef dheekkamsi WAAQAYYOO isa irraa ni deebi'e; kanaafuu inni guutummaatti hin balleeffamne; dhugumaan Yihuudaa keessa haala gaariitu ture.

¹³ Rehoobo' aam mootichis Yersaalem keessatti of cimsee mootii ta' ee ni jiraate. Yeroo inni mootii ta' etti umuriin isaa waggaa afurtamii tokko ture. Innis waggaa kudha torba Yersaalem magaalaa WAAQAYYOO Maqaan ofii isaa achi kaa' achuuf jedhee gosoota Israa' el hunda keessaa filate sana keessatti mootii ta' ee bulche. Maqaan haadha isaa Na' amaa ture; isheenis gosa Amoon turte. ¹⁴ Inni sababii WAAQAYYON barbaaduuf garaa isaa hin qopheessiniif waan hamaa hojjete.

¹⁵ Wantoonni bara mootummaa Rehoobo' aam keessa jalqabaa hamma dhumaatti hojjetaman galmee seenaa kan Shemaa' iyaa raajichaa fi seenaa dhalootaa kan Iddoon namichi ilaalaan sun barreesse keessatti barreeffamaniiru mitii? Rehoobo' aamii fi Yerobi' aam gidduu waraana gargari hin cinnetu ture. ¹⁶ Rehoobo' aam abbootii ofii wajjin boqotee Magaalaa Daawit keessatti ni awwaalame. Ilmi isaa Abiyaan iddoo isaa bu' ee mootii ta' e.

13

Abiyaa Mooticha Yihuudaa

13:1-2; 13:22-14:1 kwf - 1Mt 15:1-2,6-8

¹ Bara mootummaa Yerobi' aam keessa waggaa kudha saddeettaffaatti Abiyaan mootii Yihuudaa ta' e; ² innis Yersaalem keessa jiraatee waggaa sadii ni bulche. Maqaan haadha isaa Miikaayaa ture; isheen intala Uurii' eel namicha Gibe' aa sanaa turte.

Abiyaa fi Yerobi' aam gidduu waraanatu ture. ³ Abiyaan humna waraanaa kan namoota lola danda' an kuma dhibba afur of keessaa qabuun duule; Yerobi' aam immoo luboota ciccimoo kuma dhibba saddeettiin ba' ee isa eegate.

⁴ Abiyaan Gaara Zemaaraayim kan biyya gaaraa Efreem irra dhaabatee akkana jedhe; "Yerobi' aamii fi Israa' el hundi mee na dhaggeeffadhaa! ⁵ Isin akka WAAQAYYOO Waaqni Israa' el sun mootummaa Israa' el Daawitii fi sanyiiwwan isaatiif kakuu soogiddaan bara baraan kenne hin beektanii? ⁶ Ta' us Yerobi' aam ilmi Nebaat tajaajilaan Solomoon ilma Daawit sun gooftaa isaatti ni fincile. ⁷ Yeroo Rehoobo' aam ilmi Solomoon ijoollee waa murteeffachuu fi isaaniin mormuufis dandeettii hin qabneetti kashlaboonni faayidaa hin qabne tokko tokko naannoo isaatti walitti qabamanii isaan morman.

⁸ "Isin amma mootummaa WAAQAYYOO kan sanyii Daawit harka jiruun mormuuf yaadaa jirtan. Isin dhugumaan tuuta guddaa dha; fakkiwwan jabbiiwwan warqee kanneen akka isaan waaqota keessan isinii ta' aniif Yerobi' aam isiniif tolche sanas of biraa qabdu. ⁹ Isin garuu luboota WAAQAYYOO, ilmaan Arooniitii fi Lewwota of keessaa baaftanii akkuma namoota biyyoota kaanii luboota ofii keessanii hin muudannee? Namni dibicha loonii tokkoo fi korbeeyyii hoolaa torba qabatee of qulqulleessuu dhufu kam iyyuu waan waaqota hin ta' in sanaaf luba ta' a.

¹⁰ "Nuuf garuu WAAQAYYOO Waaquma keenya; nu isa hin dhiifne. Luboonni WAAQAYYON tajaajilan ilmaan Aroon; Lewwonna immoo isaan ni gargaaru. ¹¹ Isaan ganamaa fi galgala hunda aarsaa gubamuu fi ixaana urgaa' u WAAQAYYOF ni dhi' eessu. Minjaala akka seeraatti qulqullaa' e irra buddeena kaa' anii galgala galgala immoo ibsaa baattuu ibsaa kan warqee irraa hojjetame irra jiru ni qabsiisu. Nu ajaja WAAQAYYOO Waaqa keenyaa ni eegna; isin garuu isa dhiiftaniirtu. ¹² Waaqni nu wajjin jira; inni qajeelchaa keenya. Luboonni isaas malakata isaanii afuufanii waraana isiniitti ni waamu. Yaa namoota Israa' el isin hin milkoofnitiiti, WAAQAYYOO Waaqa abbootii keessanii hin lolinaa."

¹³ Yerobi' aam yeroo kanatti akka isaan utuma inni fuula Yihuudaa duraan jiruu karaa dugda duubaatiin isaan marsaniif loltoota isaa jaratti ni erge. ¹⁴ Namoonni Yihuudaa garagalani akka duraa fi duubaan marfaman ni argan. Isaanis gara WAAQAYYOOTTI ni iyyatan; luboonni immoo malakata isaanii ni afuufan; ¹⁵ namoonni Yihuudaas iyya waraanaa ni dhageessisan. Waaqnis iyya isaaniitiin Yerobi' aamii fi Israa' eloota hunda fuula Abiyaa fi Yihuudaa duraa ni barbadeesse. ¹⁶ Israa' eloonni fuula Yihuudaa duraa

ni baqatan; Waaqnis dabarsee harka Yihuudootaatti isaan kenne. ¹⁷ Abiyaa fi namoonni isaa akka malee isaan miidhan; kanaafuu loltoota Israa'el ciccimoo keessaa namni kuma dhibba shan ni dhume. ¹⁸ Lola sana irrattis namoonni Israa'el akka malee ni dha'aman; namoonni Yihuudaa garuu sababii WAAQAYYO Waaqa abbootii isaanii abdataniif ni mo'atan.

¹⁹ Abiyaanis Yerobi'aamin ari'ee magaalaawwan Beet'eel, Yishaanaa fi Efron, gandoota naannoo isaanii jiran wajjin irraa ni fudhate. ²⁰ Yerobi'aam bara mootummaa Abiyaa keessa deebi'ee bayyanachuu hin dandeenye. WAAQAYYO isa dha'e; innis ni du'e.

²¹ Abiyaan garuu jabaachaa ni deeme. Innis niitota kudha afur fuudhee ilmaan digdamii lamaa fi dubara kudha ja'a ni dhalche.

²² Wannii Abiyaan bara mootummaa isaa keessa hojjete biraa, waan inni hojjete fi wannii inni dubbate galmee seenaa raajicha Iddoo keessatti barreeffameera.

14

¹ Abiyaanis abbootii ofii isaa wajjin boqotee Magaalaa Daawit keessatti awwaalame. Ilmi isaa Aasaan iddoo isaa bu'ee mootii ta'e; bara isaa keessas biyyattiin waggaa kudhan nagaadhaan jiraatte.

Aasaa Mooticha Yihuudaa

14:2-3 kwf - 1Mt 15:11-12

² Aasaan waan fuula WAAQAYYO Waaqa isaa duratti gaarii fi qajeelaa ta'e hojjete. ³ Innis iddoowwan aarsaa waaqota ormaa fi iddoowwan sagadaa kanneen gaarran irraa ni diige; soodduuwwan dhagaa fi siidaawwan Aasheeraa ni caccabse. ⁴ Akka sabni Yihuudaa WAAQAYYO Waaqa abbootii isaa barbaadu, akka seera isaa fi ajaja isaaf bulu ni ajaje. ⁵ Magaalaawwan Yihuudaa hunda keessaas iddoowwan sagadaa kanneen gaarran irraa fi iddoowwan aarsaa ixaanaa balleesse; mootummaan isaa jalatti nagaadhaan ni jiraate. ⁶ Innis waan biyyattiin nagaa argatteef Yihuudaa keessatti magaalaawwan dallaa jabaa qaban ni ijaare. Sababii WAAQAYYO boqonnaa isaaf kenneef waggoota sana keessa namni tokko iyyuu lola isatti hin kaafne.

⁷ Innis namoota Yihuudaan akkana jedhe; "Kottaa nu magaalaawwan kanneen haa ijaarru; dallaa gamoo, cufaa fi danqaraawwan qabu itti naannessinee haa ijaarru; sababii nu WAAQAYYO Waaqa keenya barbaanneef lafti kun ammas keenyuma; nu isa barbaanne; innis karaa hundaan boqonnaa nuuf kenne." Isaan ni ijaaran; hojiin isaanis ni milkaa'eef.

⁸ Aasaan namoota Yihuudaa kanneen gaachana gurguddaa fi eeboo qabatan kuma dhibba sadii, namoota Beniyaam kanneen gaachana xixinnaa fi xiyyawwan qabatan kuma dhibba lamaa fi saddeettama qaba ture. Isaan kunneen hundi loltoota ciccimoo turan.

⁹ Zeraan namichi Itoophiyaa tokko immoo loltoota miliyoona tokkoo fi gaariwwan dhibba sadii fudhatee hamma Maareeshaatti isaanitti ni duule. ¹⁰ Aasaan isatti ba'e; isaanis Sulula Zefaataa keessatti Maareeshaa iddoo lolaa qabatan.

¹¹ Kana irratti Aasaan WAAQAYYO Waaqa isaa waammatee akkana jedhe; "Yaa WAAQAYYO, kan akka kee namoota humna hin qabne gargaaree namoota jajjaboo jalaa baasu tokko iyyuu hin jiru. Yaa WAAQAYYO Waaqa keenya, nu sitti of kennineerraatii nu gargaari; maqaa keetiinis waraana akka malee guddaa kanatti duulleerra. Yaa WAAQAYYO ati Waaqa keenya; akka namni sitti cimuu ofitti hin dhiisin."

¹² WAAQAYYOS fuula Aasaatii fi Yihuudaa duraa namoota Itoophiyoota ni dha'e; namoonni Itoophiyaas ni baqatan. ¹³ Aasaa fi loltoonni isaas hamma Geraaraatti isaan ari'an. Waan Baay'een isaanii dhumaaniif namoonni Itoophiyaa deebi'anii bayyanachuu hin dandeenye; isaan fuula WAAQAYYOO fi fuula loltoota isaa duratti barbadeeffamaniiruutii. Namoonni Yihuudaas boojuu baay'ee fudhatanii deebi'an. ¹⁴ Isaan sababii sodaachisni guddaan WAAQAYYO biraa jaratti dhufeef gandoota naannoo Geraaraa jiran hunda barbadeessan. Isaanis sababii wantoonni booji'aman hedduun achi turaniif gandoota kanneen ni saaman. ¹⁵ Akkasumas qubatawwan tiksootaa dha'anii karra hoolotaa fi re'oota akka malee hedduu fi gaalawwan illee booji'anii fudhatan. Ergasiis Yersaaleemitti dacha'an.

15

Jijjiirama Aasaan Fide

15:16-19 kwf - 1Mt 15:13-16

¹ Hafuurri Waaqaa Azaariyaa ilma Oodeed irra ni bu'e. ² Innis Asaatti gad ba'ee akkana jedheen; "Aasaa fi Yihuudaan hundi, Beniyaamis na dhaga'aa. Yoo isin isa

wajjin jiraattan WAAQAYYO isin wajjin ni jiraata. Yoo isin isa barbaaddan inni isiniif ni argama; yoo isin isa dhiifan immoo innis isin dhiisa. ³Yeroo dheeraadhaaf Israa'eloonni Waaqa dhugaa malee luba isaan barsiisuu fi seera malee jiraachaa turan. ⁴Yeroo rakkina isaaniitti garuu gara WAAQAYYO Waaqa Israa'elitti deebi'anii isa barbaadan; innis isaaniif ni argame. ⁵Sababii bara sana keessa jiraattonni biyyattii hundi raafama keessa turaniif ba'uu fi deebi'anii galuun amansiisaa hin turre. ⁶Sababii Waaqni rakkina gosa hundaatiin isaan dhiphisaa tureef sabni tokko saba biraatiin, magaalaa tokko magaalaa biraatiin barbadeeffamaa ture. ⁷Isin garuu jabaadhaa; harki keessanis hin laafin; hojiin keessan badhaasa argataatii."

⁸Aasaan yommuu dubbii kanaa fi raajii Azaariyaa ilma Oodeed dhaga'etti ni jajjabaate. Innis waaqota jibbisiisoo harka namaatiin hojjetaman biyya Yihuudaa, Beniyaamii fi magaalawwan biyya gaaraa Efreem keessatti qabate hunda keessaa balleesse. Iddoo aarsaa WAAQAYYOO kan gardaafuu mana qulqullummaa WAAQAYYOO dura jiru illee ni haaromse.

⁹Innis Yihuudaa fi Beniyaam akkasumas warra biyya Efreem, Minaasee fi Simi'oonii dhufanii alagummaadhaan isaan gidduu jiraachaa turan hunda walitti qabe; namoonni akka malee baay'een akka WAAQAYYO Waaqni isaa isa wajjin jiru arganii Israa'el keessaa gara isaa dhufaniitii.

¹⁰Isaanis waggaa kudha shanaffaa Aasaan mootii ta'etti ji'a sadaffaa keessa Yerusaalemitti walitti qabaman. ¹¹Yeroo sanattis waan booji'anii fidan keessaa sangoota dhibba torbaa fi hoolota kuma torba WAAQAYYOOOF aarsaa godhan. ¹²Isaanis garaa fi lubbuu isaanii guutuudhaan WAAQAYYO Waaqa abbootii isaanii barbaaduudhaaf kakuu ni galan. ¹³Namni WAAQAYYO Waaqa Israa'el hin barbaanne hundi xinnaas ta'u guddaan, dhiiras ta'u dubartiin ni ajjeefama ture. ¹⁴Isaanis sagalee guddaa fi iyyaan, malakataa fi gaanfa afuufuudhaan WAAQAYYOOOF ni kakatan. ¹⁵Yihuudoonni hundinuu waan garaa guutuudhaan kakataniif kakuu kanatti akka malee gammadan. Isaan fedhiidhaan Waaqa ni barbaadan; innis isaaniif argame. Kanaafuu WAAQAYYO karaa hundaan boqonnaa isaaniif ni kenne.

¹⁶Aasaan Mootichi akkoo isaa Ma'akaa iyyuu waan isheen fakkii Asheeraa jibbisiisaa tokko tolfatteef iddoo ulfinaa kan isheen akka haadha mootiitti qabaate sana irra ishee buuse. Aasaan fakkii sana caccabsee Sulula Qeedroon keessatti ni gube. ¹⁷Yoo inni iddoowwan sagadaa kanneen gaarran irraa guutumaan guutuutti Israa'el keessaa balleessuu baate iyyuu garaan Aasaa bara jireenya isaa guutuu WAAQAYYOOOF kennamee ture. ¹⁸Innis meetii fi warqee akkasumas mi'oota innii fi abbaan isaa Waaqaaf addaan baasan gara mana qulqullummaa Waaqayyooti ni galche.

¹⁹Hamma bara mootummaa Aasaa waggaa soddonii shanaffaatti lolli tokko iyyuu hin kaane.

16

Bara Mootummaa Aasaa Kan gara Dhumaa

16:1-6 kwf - 1Mt 15:17-22

16:11-17:1 kwf - 1Mt 15:23-24

¹Bara mootummaa Aasaa keessa waggaa soddonii ja'ffaatti Ba'ishaan mootichi Israa'el biyya Yihuudaatti duulee akka namni tokko iyyuu daangaa biyya Aasaa mooticha Yihuudaa keessaa hin baane yookaan akka achi hin seenne gochuudhaaf jedhee Raamaa jabeessee ijaare.

²Aasaanis meetii fi warqee mankuusa mana qulqullummaa WAAQAYYOOTII fi masaraa mootummaa isaa keessaa baasee Ben-Hadaad mooticha Sooriyaa kan Damaasqoo taa'ee bulchaa ture sanaaf ni erge. ³Innis, "Akkuma walii galtee kanaan dura abbaa koo fi abbaa kee gidduu ture sanaatti ammas anaa fi si gidduu walii galteen haa jiraatu. Kunoo anni meetii fi warqee siif ergeera. Akka inni narraa deebi'uuf dhaqitiitti walii galtee Ba'ishaan mooticha Israa'el wajjin qabdu sana diigi" jedhe.

⁴Ben-Hadaadis yaada Aasaa mootichaa fudhatee ajajjuuwwan loltoota isaa magaalawwan Israa'elitti duulchise. Isaanis magaalawwan Iyyoon, Daan, Abeel Maayimii fi magaalawwan mankuusa Niftaalem hunda rukutan. ⁵Ba'ishaanis yommuu waan kana dhaga'etti Raamaa ijaaruu dhiisee hojii ofii isaa dhaabe. ⁶Aasaan Mootichis namoota Yihuudaa hunda ni fide; isaanis dhagaawwanii fi muka Ba'ishaan ittiin hojjechaa ture Raamaadhaa fudhatanii deeman. Aasaanis Gebaa fi Miisphaa ittiin ijaarrate.

⁷Yeroo sanattis Hanaaniin ilaalaan sun Aasaa mooticha Yihuudaa bira dhufee akkana jedheen; "Waan ati WAAQAYYO Waaqa kee dhiiftee mootii Sooriyaa amanatteef loltoonni Sooriyaa si harkaa ba'aniiru. ⁸Namoonni Itoophiyaa fi Liibiyaa gaariwwanii fi abbootii

fardaa kanneen akka malee baay'ee qaban sun loltoota jajjaboo hin turree? Ta'us waan ati WAAQAYYON abdatteef inni dabarsee harka keetti isaan siif kenne. ⁹ Iji WAAQAYYOO warra garaa guutuun isa amanatan jajjabeessuuf guutummaa addunyaa ni ilaalaatii. Sababii ati hojii gowwummaa hojjetteef kana booddee waraanni sirraa hin caamu.”

¹⁰ Aasaan sababii kanaaf ilaaltuu sanatti ni aare; akka malee dheekkamees mana hidhaa keessa isa buuse. Yeruma sanatti Aasaan namoota tokko tokko gara jabinaan ni cunqurse.

¹¹ Wannii bara mootummaa Aasaa keessa jalqabaa hamma dhumaatti hojjetame kitaaba mootota Yihuudaa fi Israa'el keessatti barreeffameera. ¹² Aasaanis bara mootummaa isaa keessa waggaa soddomii saglaffaatti dhukkuba miillaatiin akka malee ni dhiphate. Ta'us inni dhukkuba akka malee hamaa kana keessatti illee ogeeyyii fayyaa malee gargaarsa WAAQAYYOO hin barbaanne. ¹³ Ergasii Aasaan bara mootummaa isaa keessa waggaa afurtamii tokkoffaatti du'ee abbootii ofii isaa wajjin boqote. ¹⁴ Isaanis awwaala inni Magaalaa Daawit keessatti dhagaa cabsee ofii isaatii qopheeffatetti isa ni awwaalan. Wasaasaa urgooftuuwwanii fi shittoodhaan guutame irra isa ni ciibsan; ulfina isaatiifis ibidda guddaa bobeessan.

17

Yehooshaafaax Mooticha Yihuudaa

¹ Yehooshaafaax ilmi Aasaa iddoo abbaa isaa mootii ta'e; Israa'elittis ni cime. ² Innis magaalaaawwan Yihuudaa kanneen jabeeffamanii ijaaraman hunda keessa loltoota ni qubachiise; Yihuudaa fi magaalaaawwan Efreem kanneen abbaan isaa Aasaan qabatee ture keessas loltoota magaalaa eegan ni kaa'e.

³ Sababii Yehooshaafaax bara dargaggummaa isaa keessa karaa abbaan isaa Daawit jiraachaa ture irra deddeebi'eef WAAQAYYO isa wajjin ture. Inni Ba'aal duukaa hin buune; ⁴ waan Israa'eloonni hojjetan duukaa bu'uu dhiisee Waaqa abbootii isaa duukaa bu'uudhaan ajaja isaa ni eege. ⁵ WAAQAYYOS harka isaa jalatti mootummaa cimsee ni dhaabe; akka inni qabeenyaa fi ulfina guddaa qabaatuufis Yihuudoonni hundi Yehooshaafaaxiif kennaa fidaa turan. ⁶ Garaan isaas karaa WAAQAYYOOTIIF banamaa ture; kana malees iddoowwan sagadaa kanneen gaarran irraatii fi siidaawwan Aasheeraa Yihuudaa keessaa ni balleesse.

⁷ Bara mootummaa isaa keessaa waggaa sadaffaatti akka isaan magaalaaawwan Yihuudaa keessatti barsiisaniif qondaaltota isaa jechuunis Ben-Haayil, Obaadiyaa, Zakkaariyaa, Naatnaa'elii fi Miikaayaasin ni erge. ⁸ Lewwonni tokko tokko isaan wajjin turan; jarris: Shemaa'iyaa, Netaaniyaa, Zebaadiyaa, Asaaheel, Shemiiraamoot, Yoonaataan, Adooniyaa, Xoobbiyyahuu fi Xoob-Adooniyaa fe'a. Luboonni immoo Eliishaamaa fi Yehooraam turan. ⁹ Isaanis Kitaaba Seera WAAQAYYOO fuudhanii deemanii guutummaa Yihuudaa keessatti ni barsiisan; magaalaaawwan Yihuudaa hunda keessas deemanii saba ni barsiisan.

¹⁰ Sababii sodaachisni WAAQAYYOO mootummoota biyyoota naannoo Yihuudaa jiran irra bu'eef isaan Yehooshaafaax wajjin wal hin lolle. ¹¹ Filisxeemonni tokko tokko kennaawwanii fi meetii akka gibiraatti fidanii Yehooshaafaaxiif ni kennan; Araboonni immoo bushaayee jechuunis korbeeyyii hoolaa kuma torbaa fi dhibba torbaa fi korbeeyyii re'ee kuma torbaa fi dhibba torba fidaniif.

¹² Yehooshaafaaxis ittuma caalchisee jabaachaa ni deeme; Yihuudaa keessattis da'annoowwanii fi magaalaaawwan mi'a itti kuusan ni ijaare; ¹³ inni mankuusaalee baay'ee magaalaaawwan Yihuudaa keessaa qaba ture. Loltoota muuxannoo qabanis Yersaalem keessa turse. ¹⁴ Haalli isaan itti maatii maatiidhaan hiriiranis kana:

Yihuudaa keessaa ajajjoota gareewwanii 1,000:

Adinaahi ajajjichi loltoota 300,000 wajjin;

¹⁵ isatti aanee Yehohaanaan ajajjichi loltoota 280,000 wajjin;

¹⁶ isatti aanee immoo Amaasiyaa ilma Zikrii kan tajaajila WAAQAYYOOTIIF jedhee of kenne loltoota 200,000 wajjin.

¹⁷ Gosa Beniyaam keessaa:

Eliyaadaan loltuun jabaan sun loltoota xiyyaa fi gaachana qabatan 200,000 wajjin;

¹⁸ isatti aanee immoo Yehoozaabaad namoota lolaaf qophaa'an 180,000 wajjin hiriire.

¹⁹ Isaan kunneen namoota inni magaalaawwan guutummaa Yihuudaa keessatti jabeeffamanii ijaaraman keessa qubachiiseen alatti warra mooticha tajaajilaa turanii dha.

18

Miikiyaas Waan Ahaabiin Mormu Raaje

18:1-27 kwf - 1Mt 22:1-28

¹ Yehooshaafaax yeroo kanatti qabeenyaa fi ulfina guddaa qaba ture; innis karaa fuudhaatiin Ahaabitti ni firoome. ² Innis waggoota muraasa booddee Ahaabin arguuf gara Samaariyaatti gad bu'e. Ahaabis isaa fi namoota isa wajjin turaniif hoolotaa fi sangoota baay'ee qalee akka inni Raamooti Gili'aad lolu isa sossobate. ³ Ahaab mootichi Israa'el, "Ati Raamooti Gili'aadin loluuf na wajjin ni baataa?" jedhee Yehooshaafaax mooticha Yihuudaa gaafate.

Yehooshaafaaxis, "Ani akkuma kee ti; sabni koos akkuma saba keetii ti; nu waraana kana irratti isin wajjin dhaabanna" jedhee deebise. ⁴ Yehooshaafaax garuu mootii Israa'eliin, "Duraan dursii gorsa WAAQAYYOO gaafadhu" jedhe.

⁵ Kanaafuu mootichi Israa'el raajota dhibba afur walitti qabee, "Nu Raamooti Gili'aadin loluudhaaf baanu moo dhiisu?" jedhee ni gaafate.

Isaanis, "Dhaqi; Waaqni dabarsee harka mootichaatti ishee kennaatii" jedhanii deebisaniif.

⁶ Yehooshaafaax immoo, "Akka nu waa isa gaafannuuf raajiin WAAQAYYOO tokko iyyuu as hin jiruu?" jedhee gaafate.

⁷ Mootiin Israa'el immoo Yehooshaafaaxiin, "Amma illee namichi nu karaa isaatiin WAAQAYYON waa gaafachuu dandeenyu tokko jira; garuu sababii inni yeroo hunda waa'ee koo waan hamaa malee waan gaarii raajii hin dubbanneef ani isa nan jibba. Innis Miikaayaa ilma Yimlaa ti" jedhe.

Yehooshaafaax immoo deebisee, "Mootichi akkas jechuu hin qabu" jedheen.

⁸ Kanaafuu mootiin Israa'el qondaaltota isaa keessaa nama tokko waamee, "Dhaqiitii Miikaayaa ilma Yimlaa sana dafii fidi" jedheen.

⁹ Mootichi Israa'elii fi Yehooshaafaax mootiin Yihuudaa uffata isaanii kan mootummaa uffatanii balbala Samaariyaa seensisu bira oobdii keessa teessoo isaanii irra tataa'anii raajonni hundi immoo fuula isaanii duratti raajii dubbachaa turan. ¹⁰ Kana irratti Zedeqiyaan ilmi Keni'aanaa gaanfawwan sibiilaa tolchee, "WAAQAYYOO, 'Ati hamma isaan dhumanitti gaanfawwan kanneeniin warra Sooriyaa ni wawwaraanta' jedha" jedhee labse.

¹¹ Raajonni kaan hundinuus waanuma kana raajan. Isaanis, "WAAQAYYOO dabarsee harka mootichaatti ishee kennaatii, Raamooti Gili'aadin lolii mo'adhu" jedhan.

¹² Ergamaan Miikaayaa waamuu dhaqe sunis, "Kunoo raajonni kaan utuu gargar hin gorin milkaa'uu mootichaaf himaa jiru. Maaloo dubbiiin kees dubbii isaanitiin tokko akka ta'uuf atis waan tolaa dubbadhu" jedheen.

¹³ Miikaayaan garuu deebisee, "Dhugaa WAAQAYYOO jiraataa, ani waanuma Waaqni koo jedhu qofan isatti hima" jedhe.

¹⁴ Yommuu inni achi ga'ettis mootichi, "Yaa Miikaayaa, nu Raamooti Gili'aaditti duullu moo ani dhiisu?" jedhee isa gaafate.

Miikaayaanis, "Isaan dabarfamanii harka keetti kennamuutii waraanii mo'adhu" jedhee deebise.

¹⁵ Mootichi immoo, "Ani yeroo hammamin akka ati dhugaa malee waan tokko illee natti hin himne maqaa WAAQAYYOOTIIN si kakachiisa?" jedheen.

¹⁶ Kana irratti Miikaayaan akkana jedhee deebise; "Ani Israa'eloota hunda akkuma hoolota tiksee hin qabneetti gaara irratti bittinnaa'an nan arge. WAAQAYYOS, 'Sabni kun gooftaa hin qabu. Tokkoon tokkoon isaanii nagaadhaan mana isaanitti haa deebi'an.'" ¹⁷ Mootiin Israa'elis Yehooshaafaaxiin, "Ani akka inni waa'ee koo waan hamaa malee waan gaarii tokko iyyuu hin raajne sitti hin himnee?" jedhe.

¹⁸ Miikiyaas ittuma fufee akkana jedhe; "Kanaafuu ati dubbii WAAQAYYOO dhaga'i; ani utuu WAAQAYYOO teessoo isaa irra taa'ee, ergamooinni samii hundis mirgaa fi bitaa isaatiin dhadhaabatanuu nan arge. ¹⁹ WAAQAYYOS, 'Eenyutu akka inni dhaqee Raamooti Gili'aadin lollee achitti du'uuf Ahaab mooticha Israa'el gowwoomsa?' jedhe.

"Inni tokko waan tokko jedha; inni kaan immoo waan biraa jedha. ²⁰ Dhuma irratti hafuurri tokko dhufee fuula WAAQAYYOO dura dhaabatee, 'Anatu isa gowwoomsa' jedhe. "WAAQAYYOS, 'Ati maaliin isa dogoggorsita?' jedhee isa gaafate.

²¹ 'Innis, 'Ani dhaqee afaan raajota isaa hunda keessatti hafuura sobaa nan ta'a' jedhe.

“WAAQAYYOS, ‘Dhaqiitii isa dogoggorsi; ni milkoofaati’ isaan jedheen.

²² “Kanaafuu WAAQAYYO amma afaan raajota kee kanneenii keessa hafuura sobaa kaa’eera. WAAQAYYO badiisa sitti ajajeera.”

²³ Kana irratti Zedeqiyaaan ilmi Keni’aanaa ol ba’ee Miikaayaa fuula keessa kabalee, “Hafuurri WAAQAYYOO yommuu sitti dubbachuuf wa biraa ba’etti karaa kam deeme?” jedhee gaafate.

²⁴ Miikaayaanis, “Ati gaafa dhokachuuf jettee gara kutaa manaa kan gara keessaatti ol galtutti argita” jedhee deebiseef.

²⁵ Kana irratti mootiin Israa’el akkana jedhee ajaje; “Miikaayaa fuudhaatii gara Aamoon bulchaa magaalaa fi gara Yoo’aash ilma mootichaatti geessaati, ²⁶ ‘Mootichi akkana jedha: Hamaa ani nagaan deebi’utti namicha kana mana hidhaa keessa buusaa; buddeenaa fi bishaan malees homaa hin kenninaafii’ jedhaan.”

²⁷ Miikaayaan immoo, “Yoo ati nagaan deebite, WAAQAYYO karaa kootiin hin dubbanne” jedheen. Ittuma fufees, “Yaa saboota, isin hundi dubbii koo akeekkadhaa!” jedhe.

Ahaab Raamooti Gili’aaditti Ajjeefame

18:28-34 kwf - 1Mt 22:29-36

²⁸ Kanaafuu mootiin Israa’elii fi Yehooshaafaax mootiin Yihuudaa Raamooti Gili’aaditti ol ba’an. ²⁹ Mootiin Israa’el Yehooshaafaaxiin, “Ani eenyummaa koo dhokfadheen lola seena; ati garuu uffata mootummaa uffadhu” jedhe. Kanaafuu mootiin Israa’el eenyummaa ofii isaa dhokfatee lola seene.

³⁰ Yeroo kanatti mootiin Sooriyaa ajajjoota gaariwwan isaatiin, “Mootii Israa’elitti malee xinnaas ta’u guddaatti, nama tokkottuu lola hin kaasinaa” jedhee ajaje. ³¹ Ajajjooanni gaariwwanii yommuu Yehooshaafaaxiin arganitti, “Kun mootii Israa’el” jedhanii yaadan. Kanaafuu isa rukutuuf itti garagalan; Yehooshaafaax garuu guddisee iyye; WAAQAYYOS isa gargaare. Waaqnis isa irraa isaan deebise; ³² ajajjooanni gaariwwanii yommuu akka inni mootii Israa’el hin ta’in arganitti isa ari’uu dhiisan.

³³ Garuu namichi tokko xiyya ofii isaa darbatee akkuma tasaa qomee sibiilaa gidduudhaan mooticha Israa’el ni waraane. Mootichis ooftuu gaarii isaatiin, “Gaarii naannessitii lola keessaa na baasi. Ani madaa’eeraatii” jedhe. ³⁴ Lolli sunis guyyaa guutuu ittuma cimee oole; mootiin Israa’elis ol jedhee hamma aduun dhiitutti gara warra Sooriyaatti garagalee irkatee gaarii isaa keessa oole. Yommuu biiiftuun lixsettis ni du’e.

19

¹ Yeroo Yehooshaafaax mootiin Yihuudaa nagaadhaan gara masaraa isaa Yersaalemitti deebi’etti, ² Yehuun raajichi ilmi Hanaanii sun isa simachuuf ba’ee akkana isaan jedhe; “Ati nama hamaa gargaaruu fi warra WAAQAYYON jibban jaallachuu qabdaa? Kanaafuu dheekkamsi WAAQAYYOO sitti dhufeera. ³ Ta’us waan ati siidaawwan Aasheeraa barbadeessitee fi sababii garaan kee Waaqa barbaadudhaaf qophaa’aa ta’eef wanni gaariin si biratti argameera.”

Yehooshaafaax Abbootii Murtii Muude

⁴ Yehooshaafaax Yersaaleem keessa jiraate; innis Bersheebaadhaa hamma biyya gaaraa Efreemitti saba gidduu deemee akka isaan gara WAAQAYYO Waaqa abbootii isaanitti deebi’an godhe. ⁵ Innis biyya sana keessatti magaalawwan Yihuudaa kanneen dallaa jabaa qaban hundatti abbootii murtii muude. ⁶ Akkanas jedheen; “Waan hojjetan qalbeeffadhaa; WAAQAYYO isa yeroo isin murtii kennitanitti isin wajjin jiru sanaaf jettaniitti malee namaaf jettanii murtii hin kennitaniitii. ⁷ WAAQAYYON sodaachuun isin keessa haa jiraatu. Sababii WAAQAYYO Waaqa keenya bira dabi yookaan wal caalchisuun yookaan matta’aa fudhachuun hin jirreef of eggannaadhaan murtii kennaa.”

⁸ Yehooshaafaax akkasumas Yersaaleem keessatti akka isaan seera WAAQAYYOO eeg-sisanii dubbii wal dhabisaatiif illee araara buusaniif Lewwota, lubootaa fi hangafoota maatiwwan Israa’el tokko tokko muude. Isaanis Yersaaleem keessa jiraatan. ⁹ Innis akkana jedhee isaan ajaje; “Isin amanamummaa fi garaa guutuun WAAQAYYON sodaachaa tajaajiluu qabdu. ¹⁰ Himatawwan namoota biyya keessanii kanneen magaalaa keessa jiraatan irraa waa’ee dhiiga dhangalaasuu yookaan waa’ee seeraa, waa’ee ajajawwanii, waa’ee labsii yookaan qajeelcha diduu irratti gara keessan dhufan, akka isaan WAAQAYYOTTI cubbuu hin hojjenneef akeekkachiisaa. Yoo kanaa achii dheekkamsi isaa isinii fi obboloota keessanitti ni dhufaa. Waan kana godhaa; isinis cubbuu hin hojjetan.

¹¹ “Waan kan WAAQAYYOO ta’e kam irratti iyyuu Amariyaan lubichi hangafti, waan kan mootii ta’e kam irratti iyyuu Zebaadiyaan ilmi Ishmaa’eel hoogganaan gosa Yihuudaa isin irratti muudamaniiru; Lewwonni immoo qondaaltota ta’anii fuula keessan dura ni tajaajilu. Jabaadhaa hojjedhaa; WAAQAYYO warra waan gaarii hojjettan wajjin haa jiraatu.”

20

Yehooshaafaax Mo’aabii fi Amoon Mo’ate

¹ Kana booddee Mo’aabonni fi Amoononni Mi’uunota tokko tokko wajjin Yehooshaafaaxin loluuf dhufan.

² Namoonni tokko tokkos dhufanii, “Waraanni akka malee guddaan isaa Edoom gama Galaanaatii sitti dhufaa jira. Duulli kunis kunoo Een Gaadii lafa Hazezoon Taamaar jedhamu ga’ee jira” jedhanii Yehooshaafaaxitti himan. ³ Yehooshaafaaxis waan akka malee sodaateef WAAQAYYON waammachuuf murteeffate; guutummaa Yihuudaa keessattis sooma labse. ⁴ Namoonni Yihuudaas gargaarsa WAAQAYYOO barbaacha walitti ni qabaman; isaan dhugumaan isa barbaacha magaalawwan Yihuudaa hunda keessaa ni dhufan.

⁵ Yehooshaafaaxis mana qulqullummaa WAAQAYYOO keessa oobdii haaraa dura waldaa Yihuudaa fi Yerusaalem gidduu dhaabatee ⁶ akkana jedhe:

“Yaa WAAQAYYO, Waaqa abbootii keenyaa, ati Waaqa samii keessa jiraattu mitii? Ati mootummoota sabootaa hunda bulchita; humnii fi jabinni si harka jiru; namni siin mormuu danda’u tokko iyyuu hin jiru. ⁷ Yaa Waaqa keenya, ati jiraattota biyya kanaa fuula saba kee Israa’el duraa baaftee biyyattii bara baraan sanyiwwan Abrahaam michuu kee sanaaf hin kenninee? ⁸ Isaanis biyya sana keessa jiraatanii Maqaa keetiif mana qulqullummaa ni ijaaran; akkanas jedhan: ⁹ ‘Yoo wanni hamaan nutti dhufe, yoo goraadeen, murtiin yookaan dha’ichi yookaan beelli nutti dhufe, nu fuula kee dura mana qulqullummaa kan Maqaa keetiin waamamu kana dura dhaabannee dhiphina keenya keessatti sitti iyyanna; atis nu dhageessee nu oolchitta.’

¹⁰ “Amma garuu namoonni Amoon, kan Mo’aabii fi kan Gaara See’iir kanneen ati akka Israa’eloonni yeroo Gibxii dhufanitti isaan hin tuqne gootee akkasiin badiisa oolan sun as jiru. ¹¹ Kunoo akka isaan biyya ati dhaala gootee nuu kennite keessaa nu baasuudhaan galata keenya nuu deebisuuf dhufan ilaali. ¹² Yaa Waaqa keenya ati isaanitti hin murtuu? Nu waraana guddaa nutti dhufe kana of irraa deebisuudhaaf humna hin qabnu. Nu waan goonu hin beeknu; iji keenya garuu sirra jira.”

¹³ Namoonni Yihuudaa hundinuu niitota isaanii, ijoollee fi daa’imman isaanii wajjin fuula WAAQAYYOO dura dhadhaabatanii turan.

¹⁴ Yahizii’eel ilma Zakkariyaas ilma Benaayaa, ilma Ye’ii’eel ilma Mataan Lewwicha sanyii Asaaf sana utuma inni waldaa keessa dhabatuu Hafuurri WAAQAYYOO isa irra bu’e.

¹⁵ Innis akkana jedhe; “Yehooshaafaax yaa mootii, warri Yihuudaa fi Yerusaalem keessa jiraattan hundinuu dhaga’aa! WAAQAYYO akkana isiniin jedha: ‘Isin sababii waraana guddaa kanaatiif jettanii hin sodaatinaa yookaan abdiin hin kutatinaa. Lolli kun kan Waaqaa ti malee kan keessan miti. ¹⁶ Bor isaanitti gad bu’aa. Isaan karaa malkaa Ziizi ol ba’u; isin immoo gammoojjii Yiruu’eel keessatti qarqara sululichaa irratti isaan argattu. ¹⁷ Lola kana loluu isin hin barbaachisu. Isin iddoo iddoo keessan qabadhaa; yaa Yihuudaa fi Yerusaalem jabaadhaa dhaabadhaatii mo’annoo WAAQAYYO isiniif kennu ilaalaa. Hin sodaatinaa; abdiis hin kutatinaa. Bor isaanitti ba’aa; WAAQAYYO isin wajjin dhaabata.’”

¹⁸ Yehooshaafaax adda isaatiin lafatti gombifame; namoonni Yihuudaa fi Yerusaalem hundinuu fuula WAAQAYYOO duratti addaan lafatti gombifamanii ni sagadan. ¹⁹ Ergasii immoo garee Qohaatii fi Qooraahi keessaa Lewwonni tokko tokko dhaabatanii, sagalee guddaadhaan WAAQAYYO Waaqa Israa’el ni galateeffatan.

²⁰ Isaanis guyyaa itti aanu ganamaan ka’anii gammoojjii Teqoo’aatti ni qajeelan. Yehooshaafaaxis akkuma isaan ba’aniin dhaabatee, “Namoonni Yihuudaa fi Yerusaalem na dhaggeeffadhaa! Isin ni jabaattuutii WAAQAYYO Waaqa keessan amanadhaa; raajota isaa illee amanaa isin ni milkoofuutii” jedhe. ²¹ Yehooshaafaax erga namoota wajjin mari’atee booddee akka isaan loltoota dura deemanii,

“WAAQAYYON galateeffadhaa;

jaalalli isaa bara baraan jiraataatii”

jehaa WAAQAYYON faarfatanii sababii ulfina qulqullummaa isaatiif isa leellisaniif faarfattoota muude.

²² Akkuma isaan faarfachuu fi galateeffachuu jalqabaniinis WAAQAYYO namoota Amoon kan Mo'aabii fi kan Gaara See'iir kanneen Yihuudaatti duulan sana dura waraana riphee eeggatu tokko ni kaa'e; isaanis ni mo'ataman. ²³ Namoonni Amoonii fi Mo'aab namoota Tulluu See'iir irraa dhufan guutumaan guutuutti barbadeessuudhaaf itti ka'an. Isaanis erga namoota See'iir dhufan sana fixanii booddee deebi'anii wal fixan.

²⁴ Namoonni Yihuudaas yommuu iddoo gara gammoojjitti garagalee jiru ga'anii waraana guddaa sana ilaalanitti reeffa lafatti kufe qofa argan; namni tokko iyyuu hin miliqne. ²⁵ Kanaafuu Yehooshaafaaxii fi namoonni isaa boojuu isaanii guurrachuu dhaqan; isaanis mi'a lolaa hedduu fi uffata akkasumas mi'oota gatii guddaa baasan kan guurratanii fixuu hin dandeenye achitti ni argatan. Boojuun argames waan akka malee baay'ee tureef walitti qabuuf bultii sadii fudhate. ²⁶ Bultii afuraffaatti lafa itti WAAQAYYOOF galata dhi'eessan sana Sulula Beraakaa keessatti walitti qabaman. Kanaafuu iddoo suni hamma har'aatti Sulula Beraakaa jedhamee waamama.

²⁷ Namoonni Yihuudaa fi Yerusaaalem sababii WAAQAYYO waan isaan ittiin diinota isaanii irratti gammadan isaaniiif kenneef Yehooshaafaaxiin hoogganamanii gammachuudhaan Yerusaalemitti deebi'an. ²⁸ Isaanis Yerusaaalem seenanii baganaa, kiraaraa fi malakata qabatanii gara mana qulqullummaa WAAQAYYOO ni dhaqan.

²⁹ Mootummoonni biyyoota hundaas yommuu akka itti WAAQAYYO diinota Israa'el lole dhaga'anitti Waaqa sodaachuun isaan qabate. ³⁰ Mootummaan Yehooshaafaaxis waan Waaqni isaa karaa hundaan boqonnaa isaaf kenneef nagaadhaan ni jiraate.

Dhuma Bara Mootummaa Yehooshaafaax

20:31-21:1 kwf - 1Mt 22:41-50

³¹ Akkasiin Yehooshaafaax mootii ta'ee Yihuudaa ni bulche. Inni yeroo mootii Yihuudaa ta'etti nama umuriin isaa waggaa soddonii shan ture; innis Yerusaaalem keessa taa'ee waggaa digdamii shan ni bulche. Maqaan haadha isaa Azuubaa ture; isheenis intala Shilhii turte. ³² Innis karuma abbaa isaa Aasaa irra deeme malee isa irraa hin jal'anne; fuula WAAQAYYOO durattis waan qajeelaa hojjete. ³³ Ta'us iddoowwan sagadaa kanneen gaarran irraa hin diigamne ture; namoonnis qalbii isaanii gara Waaqa abbootii isaaniitti hin deebine ture.

³⁴ Wantoonni bara mootummaa Yehooshaafaax keessa jalqabaa hamma dhumaatti hojjetaman kanneen biraa seenaa Yehuu ilma Hanaanii kan kitaaba mootota Israa'el keessatti galmeeffame sana keessatti barreeffamaniiru.

³⁵ Ergasii Yehooshaafaax mootichi Yihuudaa, Ahaaziya mootii Israa'el kan hojiin isaa jibbisiiisaa ta'e sana wajjin walii galtee godhate. ³⁶ Innis dooniwwan daldalaa hojjechuuf isaan walii gale; isaanis Eziyoon Geberitti dooniwwan ni hojjechiisan. ³⁷ Elii'ezer raajichi ilmi Doodaawaahuu namichi Maareeshaa sun, "Sababii ati Ahaaziya wajjin walii galtee godhatteef WAAQAYYO hojii kee ni diiga" jedhee Yehooshaafaaxiin mormee raajii ni dubbate. Dooniwwanis ni caccaban; gara Tarshiishis dhaquu hin dandeenye.

21

¹ Ergasii Yehooshaafaax abbootii isaa wajjin boqotee isaanuma biratti magaalaa abbaa isaa magaalaa Daawit keessatti awwaalame. Yehooraam ilmi isaas iddoo isaa bu'ee mootii ta'e. ² Obbolooni Yehooraam ilmaan Yehooshaafaax Azaariyaa, Yehii'eel, Zakkaariyaas, Ezaariyaas, Miikaa'elii fi Shefaaxiyaa jedhaman ture. Isaan kunneen hundi ilmaan Yehooshaafaax mooticha Israa'el sanaa turan. ³ Abbaan isaanis kennaa meetii, kan warqeetii fi mi'oota gatii guddaa baasanii akkasumas magaalawwan Yihuudaa keessaa kanneen dallaa jabaa qaban isaanii kenne; garuu sababii inni hangafa ta'eef mootummaa isaa Yehooraamiif kenne.

Yehooraam Mooticha Yihuudaa

21:5-10,20 kwf - 2Mt 8:16-24

⁴ Yehooraam erga mootummaa abbaa isaa irratti jabaatee dhaabatee booddee obboota isaa hundaas fi qondaaltota Israa'el tokko tokko goraadeedhaan ni fixe. ⁵ Yehooraam yeroo mootii ta'etti umuriin isaa waggaa soddonii lama ture; innis Yerusaaalem keessa taa'ee waggaa saddeet ni bulche. ⁶ Innis akkuma manni Ahaab godhee ture sana karaa mootota Israa'el duukaa bu'e; intala Ahaab fuudhee tureetii. Fuula WAAQAYYOO durattis waan hamaa hojjete. ⁷ Ta'us WAAQAYYO sababii Daawit wajjin kakuu galeef mana Daawit balleessuun fedhii WAAQAYYOO hin turre. Inni isaa fi sanyii isaatiif ibsaa bara baraa dhaabuuf kakuu galee ture.

⁸ Bara Yehooraam keessa Edoom Yihuudaatti fincilee mootii ofii isaa moosifate. ⁹ Kanaafuu Yehooraam qondaaltota isaatii fi gaariwwan isaa hunda wajjin achi dhaqe.

Warri Edoomis isaa fi ajajjoota gaariwwan isaa marsan; inni garuu halkaniin ka'ee isaan ni dha'e. ¹⁰ Edoom hamma har'aatti illee akkuma Yihuudaatti finciletti jira.

Libnaanis sababii Yehoorraam WAAQAYYO Waaqa abbootii isaa dhiiseef yeruma sanatti fincile. ¹¹ Tulluuwwan Yihuudaa irrattis iddoowwan sagadaa ijaaree akka namoonni Yersaalem sagaagalan gochuudhaan Yihuudaa karaa irraa jal'ise.

¹² Yehoorraamis xalayaa Eeliyaas raajicha biraa ergame tokko ni argate; xalayaan sunis akkana jedha:

“WAAQAYYO Waaqni abbaa kee Daawit akkana jedha: ‘Ati karaa abbaa kee Yehooshaafaax irra yookaan karaa Aasaa mooticha Yihuudaatti hin adeemne. ¹³ Ati garuu karaa mootota Israa'el irra deemuudhaan akkuma manni Ahaab godhe sana Yihuudaa fi saba Yersaalem sagaagalchiifte. Obboloota kee miseensota mana abbaa keetii kanneen sirra wayyan sana illee ni fixxe. ¹⁴ Kanaafuu WAAQAYYO amma saba kee, ilmaan kee, niitota kee fi waan ati qabdu hunda dha'icha hamaadhaan dha'uuf jira. ¹⁵ Ati mataan kee iyyuu dhukkuba mar'umaanii kan guyyaa guyyaadhaan hamaachaa deemuun qabamta; dhuma irrattis dhukkubichi mar'umaan kee alatti yaasa.’”

¹⁶ WAAQAYYOS Filisxeemotaa fi Araboota saba Itoophiyaatti dhi'oo jiraatan Yehoorraamitti ni kaase. ¹⁷ Isaanis Yihuudaa dha'anii qabatan; mi'a masaraa mootii keessatti argamu hunda, ilmaanii fi niitota isaa wajjin booji'anii ni fudhatan. Ilma isaa Ahaaziyaa isa quxisuu sana malee ilmi tokko iyyuu hin hafneef.

¹⁸ Waan kana hundaa booddee WAAQAYYO dhukkuba mar'umaanii kan hin fayyineen Yehoorraamin ni dha'e. ¹⁹ Innis ooole bulee dhuma waggaa lammaffaatti sababii dhukkuba hamaa sanaatiif mar'umaan isaa keessaa ni kufe; akka malees dhiphatee ni du'e. Namoonni isaa akka abbootii isaatiif godhan sana ulfina isaatiif jedhanii ibidda hin boobeessine.

²⁰ Yehoorraam yeroo mootii ta'etti nama waggaa soddonii lamaa ture. Innis Yersaalem keessa taa'ee waggaa saddeet ni bulche. Yeroo inni du'etti namni tokko iyyuu isaaf hin gaddine; innis Magaalaa Daawit keessatti awwaalame malee lafa mootonni itti awwaalamanitti hin awwaalanne.

22

Ahaaziyaa Mooticha Yihuudaa

22:1-6 kwf - 2Mt 8:25-29

22:7-9 kwf - 2Mt 9:21-29

¹ Sababii Saamtonni Araboota wajjin qubata loltootaa seenan sun ilmaan isaa hangafoota hunda fixaniif namoonni Yersaalem Ahaaziyaa ilma Yehoorraam sana iddoo isaa buusanii mootii godhan. Kanaafuu Ahaaziyaa ilmi Yehoorraam mooticha Yihuudaa sun mootii ta'ee bulchuu ni jalqabe.

² Ahaaziyaa yeroo mootii ta'etti umuriin isaa waggaa digdamii lama ture; innis Yersaalem keessa taa'ee waggaa tokko ni bulche. Maqaan haadha isaa Ataaliyaa dha; isheen isintala ilma Omrii turte.

³ Innis sababii haati isaa akka inni dogoggora hojjetu isa jajjabeessaa turteef karaa mana Ahaab duukaa bu'e. ⁴ Sababii manni Ahaab erga abbaan isaa du'ee booddee gorsitoota isaa ta'uudhaan gara yakka hojjechuutti isa oofaniif, innis akkuma manni Ahaab godhe sana fuula WAAQAYYOO duratti waan hamaa hojjete. ⁵ Inni yeroo Yehoorraam ilma Ahaab mooticha Israa'el wajjin Raamooti Gili'aaditti Hazaa'eel mooticha Arraam loluudhaaf duuletti gorsuma isaanii duukaa bu'e. Warri Arraam Yoorraamin ni madeessan; ⁶ kanaafuu inni madaa isaan yeroo inni Raamaat keessatti Hazaa'eel mooticha Arraam wajjin wal loletti isa madeessan sana fayyuuf jedhee Yizri'eelitti deebi'e.

Kana irratti Ahaaziyaan ilmi Yoorraam mootichi Yihuudaa sababii inni madaa'ee tureef Yehoorraam ilma Ahaab arguuf gara Yizri'eelitti gad bu'e.

⁷ Sababii inni Yehoorraamin gaafachuu dhaqeef Waaqni Ahaaziyaatti badiisa fide. Ahaaziyaan yommuu achi ga'etti Yehuu ilma Nimshii sana simachuuf Yoorraam wajjin gad ba'e. Yehuun immoo nama WAAQAYYO akka inni mana Ahaab balleessuuf dibee dha. ⁸ Yehuun utuu mana Ahaabitti muraajiruu qondaaltota Yihuudaa fi ilmaan firoota Ahaaziyaa kanneen Ahaaziyaa tajaajilaa turan argee isaan ni galaafate. ⁹ Ergasii immoo inni Ahaaziyaa barbaacha ni deeme; namoonni Yehuus Samaariyaadhaa iddoo inni itti dhokatee turee qabanii Yehuutti fidanii isa ni ajjeesan. Isaanis, “Inni ilma Yehooshaafaax namicha garaa guutuudhaan WAAQAYYON barbaade sanaa ti” jedhanii

isa ni awwaalan. Kanaafuu mana Ahaaziyaa keessaa namni aangoo mootummaa qabachuu danda'u tokko illee hin turre.

Ataaliyaa fi Yoo'aash

22:10-23:21 kwf - 2Mt 11:1-21

¹⁰ Ataaliyaan haati Ahaaziyaa yommuu akka ilmi ishee du'e argitetti kaatee maatii mana mootii Yihuudaa guutumaan guutuutti balleessite. ¹¹ Yehooshebaati intalli Yehooraa Mootichaa garuu ilmaan moototaa kanneen ajjeefamuuf turan keessaa Yoo'aash ilma Ahaaziyaa hattee fudhachuudhaan guddiftuu isaa wajjin dinqatti ni dhoksite. Yoshabeti intalli Iyyooraa Mootichaa, nitiin Yehooyaadaa lubichaa sun obboleettii Ahaaziyaa turte; isheenis akka Ataaliyaan isa hin ajjeefneef mucaa sana dhoksite. ¹² Innis bara Ataaliyaan biyya bulchaa turte hunda isaan wajjin mana qulqullummaa Waaqaa keessatti dhokfamee waggaa ja'a jiraate.

23

¹ Yehooyaadaan waggaa torbaffaatti jabina ofii isaa ni argisiise. Innis ajajjuuwwan dhibbaa jechuunis Azaariyaa ilma Yirooham, Ishmaa'eel ilma Yehohaanaan, Azaariyaa ilma Oobeed, Ma'aseyaa ilma Adaayaa fi Eliishaafaax ilma Zikrii wajjin kakuu seene. ² Isaanis guutummaa Yihuudaa keessa deemanii magaalawwan hunda keessaa Lewwotaa fi hangafoota maatiiwwan Israa'el walitti ni qaban. Yommuu isaan Yerusaalem ga'anittis, ³ waldaan guutuun mana qulqullummaa Waaqaa keessatti mooticha wajjin kakuu seene.

Yehooyaadaanis akkana isaaniin jedhe; "Akkuma WAAQAYYO waa'ee sanyii Daawit waadaa gale sanatti, ilmi mootichaa mootii ni ta'a. ⁴ Wannis isin gochuu qabdan isa kana: Isin lubootaa fi Lewwota guyyaa Sanbataa hojiitti ramadamtan keessaa harka sadii keessaa harki tokko karra, ⁵ harka sadii keessaa harki tokko masaraa mootummaa, harka sadii keessaa harki tokko immoo karra 'Karra Hundee' jedhamu sana eegaa; namoonni kaan hundi immoo oobdii mana qulqullummaa WAAQAYYOO keessatti argamuu qabu. ⁶ Lubootaa fi Lewwota hojii irra jiran malee namni tokko iyyuu mana qulqullummaa WAAQAYYOO hin seenin; isaan sababii qulqullaa'aniif seenuu ni danda'u; warri kaan hundi garuu waan WAAQAYYO isaan ajaje eeguu qabu. ⁷ Lewwonnii tokkoon tokkoon isaani mi'a lolaa harkatti qabatanii mootichatti naanna'anii dhadhaabachuu qabu. Namni mana qulqullummaa seenu kan biraa kam iyyuu haa ajjeefamu. Lafa inni dhaqu hundatti mootichatti dhi'oo jiraadhaa."

⁸ Lewwonnii fi namoonni Yihuudaa hundinuu akkuma Yehooyaadaan lubichi ajaje sana ni godhan. Sababii Yehooyaadaan lubichi gareewwan eegumsaa keessaa tokko illee gad hin dhiisiniif tokkoon tokkoon isaaniis namoota isaani warra guyyaa Sanbataatiin hojiitti bobba'anii fi warra hojii irraa boqotan ni fudhatan. ⁹ Innis eeboowwan, gaachanawwan gurguddaa fi xixinnaa Daawit Mootichaa kanneen mana qulqullummaa Waaqaa keessa turan ajajjuuwwan dhibbaatiif ni kenne. ¹⁰ Akka namoonni hundi mi'a lolaa harkatti qabatanii karaa kibba mana qulqullummaatii hamma karaa kaaba mana qulqullummaatti iddoo aarsaatii fi mana qulqullummaa biratti mootichatti naanna'anii dhaabatan ni godhe.

¹¹ Yehooyaadaa fi ilmaan isaa ilma mootichaa fidanii mataa isaa irra gonfoo kaa'an; isaanis garagalcha kakuu itti kennanii akka inni mootii ta'e ni labsan. Isa dibaniis, "Mootichi bara baraan haa jiraatu!" jedhanii ni iyyan.

¹² Ataaliyaan yommuu waca namoota figanii mooticha leellisani dhageessetti, isaan bira gara mana qulqullummaa WAAQAYYOO dhaqxe. ¹³ Yeroo isheen ilaaltetti mootichi balbala irra utubaa isaa bira dhaabatuu ni argite. Qondaaltonnii fi warri malakata afuufan mooticha bira turan; namoonni biyya sanaa hundinuu gammadani malakata afuufaa turan; faarfattoonni immoo meeshaa muuziiqaatiin faarfannaa qajeelchaa turan. Kana irratti Ataaliyaan uffata ishee tarsaaftee, "Kun malmummaa dha! Kun malmummaa dha!" jettee iyyite.

¹⁴ Yehooyaadaan lubichis, "Hiriira gidduudhaa baasaatii ishee fidaa; nama ishee irra dhufu kam iyyuu goraadeedhaan ajjeesaa" jedhee ajajjuuwwan dhibbaa kanneen kutaawwan loltootaa sana irratti ramadaman erge. Lubichi, "Mana qulqullummaa WAAQAYYOO keessatti ishee hin ajjeesinaa" jedhee turetii. ¹⁵ Kanaafuu isaan akkuma isheen karra "Karra Fardaa" jedhamu kan masaraa mootii duraa geesseen qabani achumatti ishee ni ajjeesan.

¹⁶ Yehooyaadaan akka inni, sabnii fi mootichis saba WAAQAYYOO ta'aniif kakuu ni dhaabe. ¹⁷ Sabni hundinuu gara galma Ba'aal dhaqee diige. Isaanis iddoowwan aarsaatii

fi waaqota tolfamoo caccabsanii Mataan lubicha Ba'aal sana illee iddoowwan aarsaa duratti ni ajjeesan.

¹⁸ Ergasii Yehooyaadaan luboota Lewwota turan kanneen Daawit mana qulqullummaa WAAQAYYOO keessatti ramadee ture sanatti itti gaafatamummaa mana qulqullummaa ni kenne; isaan akkuma Seera Musee keessatti barreeffame sanatti aarsaa gubamu WAAQAYYOO dhi'eessuu qabu; Daawit akka isaan gammachuu fi faarfannaadhaan aarsaa kana dhi'eessan ajajee tureetii. ¹⁹ Akkasumas inni akka namni karaa kamiin iyyuu xuraa'e tokko iyyuu ol hin seenneef balbala mana qulqullummaa WAAQAYYOO dura eegdota ni dhaabe.

²⁰ Innis ajajjuuwwan dhibbaa, namoota bebeekamoo, bulchitoota sabaa fi namoota biyyattii hunda fudhatee dhaqee mana qulqullummaa WAAQAYYOOTII mooticha gad baasee fide. Isaanis karaa, "Karra Ol aanu" jedhamuutiin masaraa mootummaa seenanii mooticha teessoo mootummaa irra teessisan. ²¹ Saboonni biyyattii hundi ni ililchan; sababii Ataaliyaan goraadeedhaan ajjeefamteef magaalaa sun nagaa argatte.

24

Yoo'aash Mana Qulqullummaa Haaromsuu Isaa

24:1-14 kwf - 2Mt 12:1-16

24:23-27 kwf - 2Mt 12:17-21

¹ Yoo'aash yeroo mootii ta'etti nama umuriin isaa waggaa torbaa ture; innis Yersaalem keessa taa'ee waggaa afurtama ni bulche. Maqaan haadha isaa Ziibiyaa ture; isheenis nama Bersheebaa turte. ² Yoo'aash bara Yehooyaadaa lubichaa hunda keessa waan fuula WAAQAYYOO duratti gajeelaa ta'e hojjete. ³ Yehooyaadaan niitota lama isaaf fide; innis ilmaanii fi intallan ni dhalche.

⁴ Yeroo xinnoo booddees Yoo'aash mana qulqullummaa WAAQAYYOO haaromsuuf murteesse. ⁵ Innis lubootaa fi Lewwota walitti waamee, "Gara magaalawwan Yihuudaa dhaqaatii maallaqa waggaa waggaadhaan mana qulqullummaa Waaqa keessanii haaromsuuf oolu Israa'eloota hunda irraa walitti qabaa. Kanas ammuma godhaa" isaaniin jedhe. Lewwonna garuu dafanii hin goone.

⁶ Kanaafuu mootichi Yehooyaadaa lubicha hangafticha waamee, "Ati maaliif akka Lewwonna gibira Museen garbichi WAAQAYYOO fi yaa'iin Israa'el akka dunkaana dhuga ba'umsaatiif baafamu murteessan sana Yihuudaa fi Yersaalem irraa walitti qaban hin godhin?" jedheen.

⁷ Yeroo sana ilmaan Ataaliyaa dubartittii hamtuu sanaa mana qulqullummaa Waaqaa cabsanii seenanii mi'oota qulqulleffaman illee Ba'aalin tajaajiluuf itti ni fayyadaman.

⁸ Kanaafuu mootichi akka isaan sanduuqa maallaqni itti walitti qabamu hojjatanii karaa alaatiin balbala mana qulqullummaa WAAQAYYOO bira kaa'an ni ajaje. ⁹ Akka isaan qaraxa Museen garbichi Waaqaa sun yeroo gammoojjii keessa turanitti Israa'eloota ajaje sana WAAQAYYOO fidaniif Yihuudaa fi Yersaalem keessatti labsiin tokko ni ba'e. ¹⁰ Qondaaltonni hundii fi sabni hundi buusii isaanii gammachuudhaan fidanii hamma inni guututti sanduuqicha keessa ni buusan. ¹¹ Yommuu sanduuqichi Lewwotaan gara qondaaltota mootiitti fidamee qondaaltonni sun akka maallaqni baay'een isa keessa jiru arganitti barreessaan mootichaa fi ajajaan lubicha hangafaa dhufanii maallaqa sana sanduuqa keessaa garagalchani sanduuqicha iddoo isaatti deebisu ture. Isaanis guyyuma guyyaan akkas godhanii maallaqa akka malee baay'ee walitti ni qaban. ¹² Mootichii fi Yehooyaadaanis maallaqa sana warra mana qulqullummaa WAAQAYYOO hojjechiisuuf itti gaafatamummaa fudhatanitti ni kennan. Isaanis mana qulqullummaa WAAQAYYOO haaromsuudhaaf namoota dhagaa cabsanii fi ogeeyyii hojii mukaa, akkasumas mana qulqullummaa haaromsuudhaaf hojjetoota sibiilaa fi naasii ittiin ni qaxaran.

¹³ Hojjettoonni qaxaraman waan jabaatanii hojjetaniif hojiin sun isaaniif ni milkaa'e. Mana qulqullummaa Waaqaa akkuma duraan turetti deebisanii ni haaromsan; ni jabeessanis. ¹⁴ Erga fixanii booddees maallaqa hafe fidanii mootichaa fi Yehooyaadaatti ni kennan; maallaqa sanaanis mi'oota mana qulqullummaa WAAQAYYOO jechuunis mi'oota tajaajilaa fi kan aarsaan gubamu ittiin dhi'eeffamu akkasumas caabiiwwan, mi'oota warqee fi meetii ittiin ni hojjetan. Isaanis bara Yehooyaadaa keessa utuu gargar hin kutin mana qulqullummaa WAAQAYYOO keessatti aarsaa gubamu dhi'eessaa turan.

¹⁵ Yehooyaadaanis bara dheeraa jiraatee dulloomee waggaa dhibba tokkoo fi soddomatti ni du'e. ¹⁶ Innis sababii Israa'el keessatti Waaqaa fi mana qulqullummaa isaatiif waan gaarii hojjeteeff Magaalaa Daawit keessatti mootota biratti ni awwaalame.

Hammina Yoo'aash

¹⁷ Erga Yehooyaadaan du'ee booddee qondaaltonni Yihuudaa dhufanii amanamummaa mootichaaf qaban ni ibsan; innis isaan dhaggeeffate. ¹⁸ Isaanis mana qulqullummaa WAAQAYYOO Waaqa abbootii isaanii dhiisanii siidaawwan Aasheeraa fi waaqota tolfamoo ni waaqeffatan. Sababii balleessaa isaaniifis dheekkamsi Waaqaa Yihuudaa fi Yerusaaleemitti ni dhufe. ¹⁹ Akka isaan gara isaatti saba deebisaniif WAAQAYYOO raajota isaaniiti erge; raajonnis isaaniitti rageessan; isaan garuu dhaga'uu hin barbaanne.

²⁰ Ergasiis Hafuurri Waaqaa Zakkaariyaas ilma Yehooyaadaa lubichaa irra ni bu'e. Innis ka'ee fuula uummataa dura dhaabatee, "Waaqni akkana jedha: 'Isin maaliif ajaja WAAQAYYOO eeguu diddani? Isin hin milkooftan. Sababii isin WAAQAYYON dhiifaniif innis isin dhiiseera'" jedheen.

²¹ Isaan garuu isatti mari'atanii ajaja mootichaatiin oobdii mana qulqullummaa WAAQAYYOO keessatti dhagaadhaan tumanii isa ni ajjeesan. ²² Yoo'aash mootichi arjummaa Yehooyaadaan abbaan Zakkaariyaas isaaf godhe sana hin yaadanne; qooda kanaa inni ilma isaa ni ajjeese; innis yeroo du'utti, "WAAQAYYOO waan kana haa argu; haaloos haa ba'u" jedhe.

²³ Dhuma waggaa sanaattis loltoonni Sooriyaa Yoo'aashitti ni duulan; Yihuudaa fi Yerusaalem qabatanii hooggantoota saba hunda ni fixan. Isaanis waan booji'an hunda gara Damaasqootti mootii isaaniitti ni ergan. ²⁴ Loltoonni Sooriyaa namoota xinnoo qabatanii dhufan illee WAAQAYYOO loltoota akka malee baay'ee harka isaaniitti dabarsee ni kenne. Sababii Yihuudoonni WAAQAYYOO Waaqa abbootii isaanii dhiisanii Yoo'aashitti murtiin murame. ²⁵ Warri Sooriyaa yommuu ba'anitti Yoo'aashin akka malee madeessanii ni deeman. Qondaaltonni isaas sababii inni ilma Yehooyaadaa lubichaa ajjeeseef isatti mari'atanii siree isaa irratti isa ajjeesan. Kanaafuu inni du'ee Magaalaa Daawit keessatti ni awwaalame; garuu iddoo awwaala moototaatti hin awwaalamne.

²⁶ Warri isatti mari'atanis Zaabaad ilma Shime'aati dubartii Amoon sanaa fi Yehooza-abaad ilma Shimriiti dubartii Mo'aab sanaa turan. ²⁷ Seenaan ilmaan isaa, raajiiwwan waa'ee isaa dubbataman hedduunii fi seenaan haaromfamuu mana qulqullummaa Waaqaa kitaaba seenaa moototaa keessatti barreeffameera. Amasiyaa ilmi isaa iddoo isaa bu'ee mootii ta'e.

25

Amasiyaa Mooticha Yihuudaa

25:1-4 kwf - 2Mt 14:1-6

25:11-12 kwf - 2Mt 14:7

25:17-28 kwf - 2Mt 14:8-20

¹ Amasiyaa yeroo mootii ta'etti nama waggaa digdamii shan ture; innis Yerusaalem keessa taa'ee waggaa digdamii sagal ni bulche. Maqaan haadha isaa, Yo'adaan ture; isheenis nama Yerusaalem turte. ² Innis waan fuula WAAQAYYOO duratti qajeelaa ta'e ni hojjete; garuu garaa guutuudhaan miti. ³ Inni erga jabeessee to'annaa isaa jalatti mootummaa qabatee booddee qondaaltota abbaa isaa mooticha ajjeesan sana fixe. ⁴ Ta'us inni akka waan Seera keessatti, Kitaaba Musee keessatti kan WAAQAYYOO, "Abbootiin sababii ijoollee isaaniitiif ajjeefamuu hin qaban yookaan ijoolleen sababii abbootii isaaniitiif ajjeefamuu hin qaban; tokkoon tokkoon namaa sababii cubbuu ofii isaatiif du'a" jedhee ajaje sanaatti tarkaanfii fudhate malee ilmaan warra abbaa isaa ajjeesan sanaa hin fixe.

⁵ Amasiyaa saba Yihuudaa walitti waamee akkuma maatii isaaniitti ajajjuuwwan kumaatii fi ajajjuuwwan dhibbaa guutummaa Yihuudaa fi Beniyaam keessatti ramade. Sana booddees warra umurii isaanii waggaa digdamaa fi sanaa ol ta'e walitti qabee akka namoonni duulaaf qophaa'an kanneen eeboo fi gaachana qabachuu danda'an kuma dhibba sadii ta'an argate. ⁶ Akkasumas Israa'el keessaa loltoota jajjaboo kuma dhibba tokko meetii taalaantii* dhibba tokkoon ni qaxarate.

⁷ Garuu namni Waaqaa tokko isa bira dhufee akkana jedheen; "Yaa mootii, sababii WAAQAYYOO Israa'el wajjinis ta'u namoota Efreem kam iyyuu wajjin hin jirreef loltoonni Israa'el kunneen si wajjin hin duulin. ⁸ Yoo ati sodaa malee lola dhaqxe illee Waaqni fuula diinota keetii duratti si kuffisa; Waaqni gargaaruufis kuffisuufis humna qabaatii."

⁹ Amasiyaa immoo, "Garuu taalaantiin dhibbi ani loltoota Israa'eliif baase sun maal haa ta'u ree?" jedhee nama Waaqaa sana ni gaafate.

Namni Waaqaa sun immoo deebisee, "WAAQAYYOO waan sana caalu iyyuu siif kennuu ni danda'a" jedheen.

* 25:6 25:6 Taalaantiin tokko kiiloo giraamii 34.

¹⁰ Kanaafuu Amasiyaa loltoota biyya Efreemii isa bira dhufan sana akka isaan biyya isaaniitti deebi'aniif gad dhiise. Isaanis Yihuudaatti aaranii akka malee dheekkamaa gara biyya isaaniitti deebi'an.

¹¹ Amasiyaa humna isaa jabeeffatee loltoota isaa gara Sulula Soogiddaatti erge; achittis namoota See'iir kuma kudhan ni fixe. ¹² Loltoonni Yihuudaas namoota kuma kudhan biraa booji'an; fiixee kattaa tokkoottis ol baasanii achi irraa gad isaan dadarbatan; hundi isaaniis caccabanii hurraa'an.

¹³ Loltoonni Amasiyaa akka isaan isa wajjin hin duulleef gara biyya isaaniitti deebisee erge sun garuu magaalaawwan Yihuudaa kanneen Samaariyaadhaa hamma Beet Horoonitti jiran ni dha'an. Isaanis namoota kuma sadii ajjeesanii boojuu baay'ee fudhatanii deeman.

¹⁴ Amasiyaa yommuu namoota Edoom fixee deebi'etti waaqota saba See'iir fudhatee gale. Innis akkuma waaqota isaatti dhaabbatee sagadeefii aarsaa gubamu isaaniif ni dhi'eesse. ¹⁵ WAAQAYYOS akka malee Amasiyaatti aaree raajii tokko itti erge; raajiin sunis, "Ati maaliif waaqota saba kanaa kanneen saba ofii isaa iyyuu harka keetii baasuu hin dandeenye gorsa gaafatta?" jedheen.

¹⁶ Mootichis utuma inni dubbachaa jiruu, "Nu akka ati mootii gorsituuf si muudneer-
raa? Cal'isi! Maaliif rukutamta?" jedheen.

Raajiin sunis ni cal'ise; garuu, "Sababii ati gorsa koo dhaga'uu diddee waan kana gooteef, ani akka Waaqni si balleessuuf murteesse nan beeka" jedheen.

¹⁷ Amasiyaa mootichi Yihuudaa erga gorsitoota isaatiin mari'atee booddee, "Kottu mee waraana keessatti wal ilaallaa" jedhee qoosaa kana gara Yoo'aash ilma Yehoo'aahaaz, ilma Yehuu, mooticha Israa'elitti ni erge.

¹⁸ Yoo'aash mootichi Israa'el garuu akkana jedhee Amasiyaa mooticha Yihuudaatiif deebii kenne; "Sokorruun Libaanoon keessaa tokko ergaa ergee birbirsaa Libaanooniin, 'Intala kee ilma kootti heerumsiisi' jedhe. Ergasii bineensi bosona Libaanoon keessaa tokko dhufee sokorruu sana irra miilaan deeme. ¹⁹ Ati, 'Kunoo ati dhugumaan Edoomin mo'atteerta' ofiin jettee amma of tuulaa jirta. Amma garuu mana kee taa'! Ati maaliif rakkina barbaaddee ofii keetii fi Yihuudaattis kufaatii fidda?"

²⁰ Amasiyaa garuu dhaga'uu dide; sababii isaan waaqota Edoom duukaa bu'aniif Waaqni harka Yoo'aashitti dabarsee isaan kennuuf murteesseeraatii. ²¹ Kanaafuu Yoo'aash mootichi Israa'el ka'ee lola bane. Innii fi Amasiyaa mootichi Yihuudaa biyya Yihuudaa keessatti Beet Shemeshitti walitti ba'an. ²² Warri Yihuudaas warra Israa'eliin mo'atamanii tokkoon tokkoon namaas gara mana ofii isaatti baate. ²³ Yoo'aash mootichi Israa'el, Amasiyaa mooticha Yihuudaa ilma Iyoo'as ilma Ahaaziya sana Beet Shemeshitti qabe. Iyoo'asis gara Yerusaalemitti isa fidee Karra Efreemiitii jalqabee hamma Karra Goleetti dallaa Yerusaalem kan dhagaa sana diige; kutaan diigame kun dhundhuma dhibba afur lala irra dheerata ture. ²⁴ Innis warqee fi meetii hunda, akkasumas mi'a mana qullullummaa Waaqaa keessatti argamu kan Ooheed Edoom eegaa ture hunda, qabeenya masarara mootummaa fi namoota booji'e illee fudhatee gara Samaariyaatti deebi'e.

²⁵ Amasiyaa ilma Yoo'aash mootichi Yihuudaa erga Yoo'aash ilma Yehoo'aahaaz mootichi Israa'el du'ee booddee waggaa kudha shan jiraate. ²⁶ Wantoonni bara mootummaa Amasiyaa keessa jalqabaa hamma dhumaatti hojjetaman kanneen biraa kitaaba mootota Yihuudaa fi Israa'el keessatti barreeffamaniiru mitii? ²⁷ Yeroo Amasiyaa WAAQAYYON duukaa bu'uu irraa garagalee jalqabee isaan Yerusaalem keessatti isatti malatan; innis gara Laakkiishitti baqate; isaan immoo faanuma isaa Laakkiishitti namoota erganii achitti isa ajjeesan. ²⁸ Isaanis fardaan isa fidanii Magaalaa Yihuudaatti abbootii isaa biratti isa ni awwaalan.

26

Uziyaan Mooticha Yihuudaa

26:1-4 kwf - 2Mt 14:21-22; 15:1-3

26:21-23 kwf - 2Mt 15:5-7

¹ Ergasii namoonni Yihuudaa hundi Uziyaan nama waggaa kudha ja'a sana fuudhanii iddoo abbaa isaa iddoo Amasiyaa buusanii mootii ni godhan. ² Erga Amasiyaa abbootii isaa wajjin boqotee booddee namni Eelootin deebisee ijaaree gara Yihuudaatti deebisee Uziyaan ture.

³ Uziyaan yeroo mootii ta'etti nama waggaa kudha ja'a ture; innis Yerusaalem keessa taa'ee waggaa shantamii lama ni bulche; maqaan haadha isaa Yekooliyaa ture; isheenis nama Yerusaalem turte. ⁴ Innis akkuma abbaa isaa Amasiyaa sana fuula WAAQAYYON

duratti waan qajeelaa ni hojjete. ⁵ Inni bara Zakkaariyaas isa akka inni Waaqa sodaatu isa barsiise sanaa keessa Waaqa barbaade. Yeroo inni WAAQAYYON barbaade hundas Waaqni isa ni milkoomse.

⁶ Innis Filisxeemotatti duulee dallaawwan Gaati, kan Yabinee fi kan Ashdood ni diige. Ergasii Ashdood birattii fi bulchiinsota Filisxeemoota kaan keessatti magaalawwan deebisee ni ijaare. ⁷ Yeroo inni Filisxiyaatti, Araboota Guur Ba'aalittii fi Me'uunootatti ka'etti Waaqni isa gargaare. ⁸ Warri Amoonis Uziyaaniif gibira ni fidan; sababii inni baay'ee jabaateef gurri isaa hamma daangaa Gibxitti beekame.

⁹ Uziyaanis Yerusaleem keessatti Karra Golee irratti, Karra sululaa irrattii fi golee dallaa irratti gamoowwan eegumsaa ni ijaare. ¹⁰ Akkasumas inni sababii gaarran jalaa fi dirree irraa horii akka malee baay'ee qabuuf gammoojjii keessatti gamoowwan eegumsaa ijaaree boolla bishaanii hedduus ni qote; inni waan hojii qotiisaa jaallatuuf qottoota gaarranii fi lafa gabbataa qotanii wayiniis dhaaban qaba ture.

¹¹ Kana malee Uziyaan hoomaa waraanaa kan akka gaarii leenjifamee waraanaaf qophaa'e qaba ture; hoomaan waraanaa kunis dura bu'ummaa Hanaaniyaa isa qondaaltota mootichaa keessaa tokko ta'e sanaan akkuma baay'ina isaaniitti garee ga-reedhaan Ye'ii'eel barreessaa sanaa fi Ma'aseyaa ajajjichaaf gurmeeffame. ¹² Baay'inni hooggantota maatii kanneen loltoota irratti muudamanii walumatti 2,600 ture. ¹³ Ajaja isaanii jalattis hoomaa waraanaa kan namoota lolaaf leenjifaman 307,500 of keessaa qabu tokkotu ture; hoomaan kunis humna guddaa kan yeroo mootichi diinota isaatti duulutti isa gargaaruu dha. ¹⁴ Uziyaan loltoota hundaaf gaachana, eeboo, gonfoo sibiilaa, qomee sibiilaa, xiyyaa fi furrisa dhagaa kenne. ¹⁵ Innis Yerusaleem keessatti meeshaawwan namoota ogeeyyiidhaan hojjetaman kanneen gamoowwan eegumsaattii fi goleewwan ittisaa gubbaatti xiyya darbachuu fi dhagaa furuursuuf fayyadan ijaare. Innis hamma jabaatutti waan gargaarsa argateef maqaan isaa fagootti illee bal'inaan ni beekame.

¹⁶ Garuu Uziyaan erga jabaatee booddee, of tuulummaan isaa kufaattii isatti fide. Innis iddoo aarsaa ixaanaatti ixaana aarsuuf mana qulqullummaa WAAQAYYOO seenuudhaan amanamummaa WAAQAYYO Waaqa isaatiif qabu irraa duubatti ni deebi'e. ¹⁷ Azaariyaa lubichis luboota WAAQAYYOO warra waa hin sodaanne kan biraa saddeettama wajjin isa duukaa ni seene. ¹⁸ Isaanis Uziyaan mootichaan mormanii, "Yaa Uziyaan WAAQAYYOO ixaana aarsuun luboota sanyii Aroon warra ixaana aarsuuf filataman sanaaf malee siif hin malu. Ati sababii amanamaa hin ta'iniif WAAQAYYO Waaqa biraa ulfina hin argattuutii iddoo qulqulluu kanaa ba'i" jedhaniin.

¹⁹ Uziyaanis utuu ixaana aarsuuf girgira harkatii qabatee qophaa'ee jiruu ni aare. Innis utuma mana qulqullummaa WAAQAYYOO keessatti iddoo aarsaa ixaana duratti lubootatti aaraa jiruu ijuma isaanii duratti lamxiin adda isaatti ni ba'e. ²⁰ Azaariyaa lubichi hangafnii fi luboonni biraa hundinuu yeroo isa ilaalanitti akka lamxiin adda isaa irra jiru ni argan; kanaafuu isaan dafanii gad isa baasan. Sababii dheekkamsi WAAQAYYOO isa dha'eef dhugumaan inni iyyuu ba'uuf ariifatee ture.

²¹ Uziyaan mootichi hamma gaafa du'uutti lamxaa'ee ture. Innis waan lamxaa'ee tureef mana qulqullummaa WAAQAYYOO irraa citee mana kophaa keessa ni jiraate. Ilmi isaa Yootaam ilmi isaa itti gaafatama masaraa mootummaa fudhatee saba biyyattii bulche.

²² Wantoonni bara mootummaa Uziyaan keessa jalqabaa hamma dhumaatti hojjetaman biraan Isaayyaas raajicha ilma Amooisiin galmeeffamaniiru. ²³ Uziyaanis abbootii isaa wajjin hoqotee sababii namoonni, "Inni lamxii qaba" jedhaniif inni lafa awwaala moototaa keessatti isaanuma biratti ni awwaalame. Ilmi isaa Yootaam iddoo isaa bu'ee mootii ta'e.

27

Yootaam Mooticha Yihuudaa 27:1-4,7-9 kwf - 2Mt 15:33-38

¹ Yootaam yeroo mootii ta'etti nama waggaa digdamii shan ture; innis Yerusaleem keessa taa'ee waggaa kudha ja'a ni bulche. Maqaan haadha isaa Yaruusaa ture; isheenis intala Zaadoq turte. ² Innis akkuma abbaan isaa Uziyaan godhe sana fuula WAAQAYYOO duratti waan qajeelaa ni hojjete; inni garuu akka abbaa isaa mana qulqullummaa WAAQAYYOO hin seenne. Ta'us namoonni cubbuu hojjechuu ittuma fufan. ³ Yootaam Karra mana qulqullummaa WAAQAYYOO kan Ol aanu deebisee ijaare; dallaa dhagaa kan gaara Oofool irrattis hojjiwwan ijaarsaa baay'ee ni hojjete. ⁴ Gaarran Yihuudaa irratti magaalawwan, bosona keessatti immoo da'annoowwanii fi gamoowwan ni ijaare.

⁵ Yootaamis mootii Amoonotaa waraanee isaan ni mo'ate. Waggaa sana keessa Amoononni meetii taalaantii dhibba tokko, qamadii qoroosii kuma kudhanii fi garbuu safartuu qoroosii kuma kudhan ni kennaniif. Amoononni waggaa lammaffaa fi waggaa sadaffaattis hammasuma ni kaffalaniif.

⁶ Yootaam sababii fuula WAAQAYYO Waaqa isaa dura amanamummaan deddeebi'eef jabaachaa deeme.

⁷ Wantoonni bara Yootaam keessa hojjetaman biraa, lola inni lolee fi wantoonni inni hojjete biraa kitaaba mootota Israa'elii fi Yihuudaa keessatti barreeffamaniiru. ⁸ Inni yeroo mootii ta'etti nama waggaa digdamii shan ture. Innis Yerusaalem keessa taa'ee waggaa kudha ja'a ni bulche. ⁹ Yootaam abbootii isaa wajjin boqotee Magaalaa Daawit keessatti ni awwaalame. Ilmi isaa Aahaaz iddoo isaa bu'ee mootii ta'e.

28

Aahaaz Mooticha Yihuudaa

28:1-27 kwf - 2Mt 16:1-20

¹ Aahaaz yeroo mootii ta'etti nama waggaa digdama ture; innis Yerusaalem keessa taa'ee waggaa kudha ja'a ni bulche. Inni akka abbaa isaa akka Daawit fuula WAAQAYYOO duratti waan qajeelaa hin hojjenne. ² Inni karaa mootota Israa'el duukaa bu'ee Ba'aal in waaqeffachuuf jedhees waaqota tolfamoo baqsee ni tolche. ³ Inni gochawwan jibbisiiisoo saboota WAAQAYYO fuula Israa'elootaa duraa ari'ee baase sanaa hojjechudhaan Sulula Ben Hinoom keessatti ixaana ni aarse; ilmaan isaa illee aarsaa godhee ibiddaan gube. ⁴ Innis iddoowwan sagadaa kanneen gaarran irraatti, fiixee gaarranii irrattii fi muka lalisaa hunda jalatti qalma dhi'eessee, ixaanas aarse.

⁵ Kanaafuu WAAQAYYO Waaqni isaa dabarsee harka mootii Sooriyaatti isa kenne. Warri Sooriyaas isa mo'atanii namoota isaa hedduus booji'anii Damaasqootti geessan.

Achii immoo inni harka mootii Israa'elitti dabarfamee ni kenname; mootichis miidhaa guddaa isa irraan ni ga'e. ⁶ Sababii sabni Yihuudaa WAAQAYYO Waaqa abbootii isaa dhiiseef Pheqaan ilmi Remaaliyaa guyyaa tokkotti loltoota Yihuudaa kuma dhibba tokkoo fi digdama ni fixe. ⁷ Zikriin loltoon jabaan gosa Efreem sun immoo Ma'aseyaa ilma mootichaa, Azriiqaam ajajaa masaraa mootummaa fi Elqaanaa itti aanaa mootichaa ni ajjeese. ⁸ Israa'eloonni firootuma isaanii irraa niitota, ilmaanii fi intallan kuma dhibba lama ni booji'an. Akkasumas boojuu akka malee baay'ee fudhatanii Samaariyaatti ni deebi'an.

⁹ Garuu raajiin WAAQAYYOO kan Oodeed jedhamu tokko achi ture; innis yeroo loltoonni Samaariyaadhaa deebi'anitti isaan simachuuf ni ba'e. Innis akkana isaaniiin jedhe; "WAAQAYYO Waaqni abbootii keessanii waan Yihuudaatti aareef dabarsee harka keessanitti isaan kenne. Isin garuu dheekkamsa hamma samiitti ol fagaatuun isaan ni fixxan. ¹⁰ Ammas dhiirotaa fi dubartoota Yihuudaa fi Yerusaalem garboota keessan gochuu ni yaaddan. Isin mataan keessan iyyuu fuula WAAQAYYO Waaqa keessanii duratti cubbuu hin hojjennee ree? ¹¹ Mee na dhaga'aa! Sababii dheekkamsi WAAQAYYOO isinitti boba'eef namoota biyya keessanii kanneen boojitanii fiddan sana deebisaa."

¹² Ergasiis hangafoota namoota Efreem keessaa tokko tokko jechuunis Azaariyaa ilmi Yehohaanaan, Berekiyaan ilmi Meshileemoot, Yehiizqiiyaa ilmi Shaluumii fi Amaasaayi ilmi Hadilaay warra duulaa galaa jiran mormuudhaan ¹³ akkana jedhan; "Isin booji'amtoota kanneen as fiduu hin qabdan; yoo kanaa achii nu fuula WAAQAYYOO duratti cubbamoota ni taana. Isin amma illee cubbuu fi balleessaa keenya ittuma dabalu feetuu? Yakki keenya duraanuu baay'ateera; dheekkamsi isaa Israa'elitti boba'eeraatii."

¹⁴ Kanaafuu loltoonni fuula qondaaltotaatii fi yaa'ii guutuu duratti booji'amtootaa fi boojuu gad dhiisan. ¹⁵ Namoonni maqaan isaanii eerames loltoota harka booji'amtoota ni fuudhan; waan booji'ame irraas warra qullaa jiran hundatti wayyaa ni uffisan. Isaanis uffataa fi kophee, waan nyaatamuu fi waan dhugamuu illee ni kennaniif; dibatas isaan diban. Warra dadhaban hunda immoo harree irra teessisanii biyya firoonni isaanii jiran Magaalaa Meexxii sanatti gara Yerikootti isaan deebisanii ofii immoo Samaariyaatti ni dacha'an.

¹⁶ Yeroo sanatti Aahaaz Mootichi gargaaraa argachuuf gara mootii Asooritti nama ergate. ¹⁷ Edoomoonni ammas dhufanii Yihuudaatti balaa buusanii booji'amtoota fudhatanii deemanii turaniitii; ¹⁸ Filisxeemonni immoo magaalawwan gaarran jalaa fi kanneen gama kibba Yihuudaatti argaman weeraranii Beet Shemeshi, Ayaaloon, Gedeerooti, Sookoo, Tiimnaahi, Gimzoo fi gandoota naannoo isaanitti argaman qabatani keessa ni qubatan. ¹⁹ Sababii Aahaaz mootichi Israa'el saba Yihuudaa cubbuuf kakaasee

ofii immoo WAAQAYYOOF amanamuu dideef WAAQAYYO Yihuudaa ni salphise. ²⁰ Tiiglaat-Philneeser mootichi Asoor gara isaa dhufee ture; ta'us inni qooda isa gargaaru rakkina isatti fide. ²¹ Aahaaz mana qulqullummaa WAAQAYYO keessaa, masaraa mootii fi mana ilmaan mootiitii waan tokko tokko fuudhee mootii Asooriif kennaa godhee ni dhi'eesse; ta'us kunis isa hin gargaarre.

²² Aahaaz Mootichi yeroo rakkina isaa keessa illee ittuma caalchisee WAAQAYYOOF amanamuu ni dide. ²³ Innis waaqota Damaasqoo kanneen isa mo'ataniif aarsaa ni dhi'eesse; "Waaqonni mootota Sooriyaa sababii isaan gargaaraniif akka isaan ana illee gargaaraniif ani aarsaa nan dhi'eessaaf" jedhee yaadee tureetii. Isaan garuu kufaati isaa fi kufaati Israa'el hundaa ni fidan.

²⁴ Aahaaz mi'oota mana qulqullummaa Waaqaa walitti qabee fudhatee deeme. Balbalawwan mana qulqullummaa WAAQAYYOOS cufee golee daandiiwwan Yerusaalem hunda irratti iddoowwan aarsaa ni dhaabe. ²⁵ Magaalaa Yihuudaa hunda keessattis waaqota biraaf ixaana aarsuuf iddoowwan sagadaa kanneen gaarran irraa ijaaree WAAQAYYO Waaqa abbootii isaa dheekkamsaaf ni kakaase.

²⁶ Wantoonni bara mootummaa isaa keessa jalqabaa hamma dhumaatti hojjetaman kanneen biraa fi akki inni itti jiraate hundi kitaaba mootota Yihuudaa fi Israa'el keessatti barreeffamaniiru. ²⁷ Aahaaz abbootii isaa wajjin boqotee magaalaa Yerusaalem keessatti ni awwaalame; garuu iddoo awwaala mootota Israa'el keessa hin kaa'amne. Imi isaa Hisqiyaas iddoo isaa bu'ee mootii ta'e.

29

Hisqiyaas Mana Qulqullummaa Qulqulleessuu Isaa

29:1-2 kwf - 2Mt 18:2-3

¹ Innis Hisqiyaas yeroo mootii ta'etti nama waggaa digdamii shan ture; innis Yerusaalem keessa taa'ee waggaa digdamii sagal bulche. Maqaan haadha isaa Abiyaa ture; isheen isintala Zakkaariyaas. ² Innis akkuma Daawit abbaan isaa godhe sana fuula WAAQAYYO duratti waan qajeelaa hojjetee.

³ Inni bara mootummaa isaa keessa ji'a jalqaba waggaa tokkoffaatti balbalawwan mana qulqullummaa WAAQAYYO ni bane; ni haaromses. ⁴ Lubootaa fi Lewwota waamsisee oobdii karaa ba'a biiftuutiin jiru irratti walitti isaan qabee ⁵ akkana jedheen; "Yaa Lewwota, mee na dhaga'aa! Amma of qulqulleessaati mana qulqullummaa WAAQAYYO Waaqa abbootii keessanii illee qulqulleessaa. Waan xuraa'aa hunda iddoo qulqulluu keessaa baasaa. ⁶ Abbootiin keenya sababii amanamoo hin turiniif fuula WAAQAYYO Waaqa keenyaa duratti waan hamaa hojjetanii isa irraa garagalan. Isaanis iddoo jireenya WAAQAYYO irraa fuula isaanii deebifatanii dugda isaanii isatti garagalchan. ⁷ Akkasumas balbala gardaafoo cufanii ibsaawwan ni dhaamsan. Isaan Waaqa Israa'eliif iddoo qulqulluuti ixaana hin aarsine yookaan aarsaa gubamu hin dhi'eessine. ⁸ Kanaafuu dheekkamsi WAAQAYYO Yihuudaa fi Yerusaalem irra bu'e; inni akkuma isin ija keessaniin arguu dandeessan kana nama qaani, nama qoosaa fi nama kolfaa isaan godhe. ⁹ Sababiin abbootiin keenya goraadeedhaan dhumaniif, sababiin ilmaan keenya, intallanii fi niitonni keenya illee booji'amaniif kanuma. ¹⁰ Ani amma akka dheekkamsi isaa inni sodaachisaan sun nurraa deebi'uuf WAAQAYYO Waaqa Israa'el wajjin kakuu galuu yaadeera. ¹¹ Yaa ilmaan ko, ega hin dagatinaa; WAAQAYYO akka isin fuula isaa dura dhaabbataniif, akka isa tajaajiltaniif, akka fuula isaa duratti hojjetoota isaa taatanii ixaana aarsitaniif isin filateeraatii."

¹² Ergasii Lewwonni kunneen hojiitti bobba'an; isaanis:

Ilmaan Qohaatotaa keessaa,
 Mahat ilma Amaasaayii fi Yoo'eel ilma Azaariyaa;
 ilmaan Meraarotaa keessaa,
 Qiish ilma Abdii fi Azaariyaa ilma Yehaleli'eel;
 ilmaan Geershoonotaa keessaa,
 Yoo'ak ilma Zimaa fi Eeden ilma Yoo'aa;
¹³ ilmaan Eliisaafaanotaa keessaa,
 Shimrii fi Ye'ii'eel;
 ilmaan Asaaf keessaa,
 Zakkaariyaasii fi Mataaniyaa;
¹⁴ ilmaan Heemaan keessaa,
 Yehii'eelii fi Shime'ii;

ilmaan Yeduutuun keessaa,
Shemaa'iyaa fi Uzii'eel.

¹⁵ Isaan erga obboolota isaanii walitti qabaniif of qulqulleessanii booddee akkuma mootichi akka dubbii WAAQAYYOOTTI isaan ajajetti mana qulqullummaa WAAQAYYOO qulqulleessuuf ol ni seenan. ¹⁶ Luboonnis mana WAAQAYYOO qulqulleessuuf ol ni seenan. Isaanis waan mana qulqullummaa WAAQAYYOO keessatti argan kan qulqulluu hin ta'in hunda gara oobdii mana qulqullummaa WAAQAYYOOTTI gad baasan. Lewwonnis achii guuranii Sulula Qeedroonitti geessan. ¹⁷ Isaanis hojii qulqulleessuu kana guyyaa jalqaba ji'a duraatii jalqabaniif bultii saddeettaffaatti gardafoo WAAQAYYOO bira ni ga'an. Guyyaa saddeet itti dabalaniif mana qulqullummaa WAAQAYYOO qulqulleessanii ji'a tokkoffaa guyyaa kudha ja'afaatti fixan.

¹⁸ Isaanis gara Hisqiyaa Mootichaa dhaqanii akkana jedhaniin; "Nu guutummaa mana qulqullummaa WAAQAYYOO, iddoo aarsaan gubamu itti dhi'effamu mi'a isaa hunda wajjin, minjaala buddeenni qulqulleeffame irra kaa'amu mi'a isaa hunda wajjin qulqulleessineerra. ¹⁹ Mi'oota Aahaaz mootichi yeroo mootii turetti amanamummaa dhabee iddoo isaaniitii fuudhe hunda qulqulleessineerra; mi'oonni sunis fuula iddoo aarsaa WAAQAYYOO dura jiru."

²⁰ Hisqiyaa Mootichi guyyaa itti aanu ganama bariidhaan qondaaltota magaalaa walitti qabee gara mana qulqullummaa WAAQAYYOOTTI ol ba'e. ²¹ Isaanis mootummaaf, mana qulqullummaa fi Yihuudaaf korommii loonii torba, korbeeyyii hoolaa torba, xobbaallaawwan torbaa fi korbeeyyii re'ee torba aarsaa cubbuu godhanii ni dhi'eessan. Mootichis akka isaan horii kanneen iddoo aarsaa WAAQAYYOO irratti aarsaa dhi'eessaniif luboota sanyii Aroon sana ni ajaje. ²² Luboonnis korommii loonii sana qalanii dhiiga isaanii iddoo aarsaa irratti faffacaasan; itti aansaniis korbeeyyii hoolaa qalanii dhiiga isaanii iddoo aarsaa irratti faffacaasan; ergasii immoo xobbaallaawwan qalanii dhiiga isaanii iddoo aarsaa irratti faffacaasan. ²³ Re'oonni aarsaa cubbuutiif fidamanis fuula mootichaa fi fuula waldaa duratti dhi'effaman; jarris isaan irra harka isaanii kaa'an. ²⁴ Sababii mootichi aarsaa gubamuu fi aarsaa cubbuu Israa'el hundaaf ajajeef luboonni re'oota qalanii Israa'el hundaaf araara buusuuf dhiiga isaanii iddoo aarsaa irratti dhi'eessan.

²⁵ Innis akkuma Daawitii fi Gaad ilaaltuu mootichaa fi Naataan raajichaan ajajametti Lewwota killillee, baganaa fi kiraara qabachiisee mana qulqullummaa WAAQAYYOOTTI ramade; kunis ajaja WAAQAYYOO karaa raajota isaatiin kennee dha. ²⁶ Kanaafuu Lewwonnii mi'a faarfannaa kan Daawit, luboonni immoo malakata isaanii qabataniif qophaa'anii dhaabatan.

²⁷ Hisqiyaa akka aarsaan gubamu iddoo aarsaa irratti dhi'effamuuf ajaje. Akkuma aarsaan dhi'effamuu jalqabeen faarfannaan malakataa fi mi'a faarfannaa kan Daawit mooticha Israa'eliin WAAQAYYOOOF faarfatanis ni jalqabame. ²⁸ Waldaan guutuun gad jedhee sagade; faarfattoonni ni faarfatan; warri malakata afuufanis ni afuufan. Wannii kun hundi hamma aarsaan gubamu dhi'effamee xumuramutti itti fufe.

²⁹ Yommuu aarsaa dhi'eessuun xumurametti mootichii fi warri isa wajjin turan hundinuu jilbeenfataniif sagadan. ³⁰ Hisqiyaa Mootichii fi qondaaltonni isaa akka Lewwonnii dubbii Daawitii fi dubbii Asaaf ilaaltuu sanaatiin WAAQAYYOOON galateeffatan ajajan. Kanaafuu isaan gammachuudhaan faarfannaa galataa faarfatanii gad jedhanii sagadan.

³¹ Ergasii Hisqiyaa, "Isin amma WAAQAYYOOOF of qulqulleessitaniirtu. Kottaatii qalma fi aarsaa galataa mana qulqullummaa WAAQAYYOOTTI galchaa" jedhe. Kanaafuu waldaan sun qalma fi aarsaa galataa dhi'eesse; warri garaan isaanii jaallate hundis aarsaa gubamu dhi'eessan.

³² Aarsaan gubamu kan waldaan sun dhi'eesses korommii loonii torbaatama, korbeeyyii hoolaa dhibba tokkoo fi xobbaallaawwan hoolaa dhibba lama ture; kunneen hundi aarsaa gubamu ta'anii WAAQAYYOOOF dhi'effaman. ³³ Horiin qulqulleeffamee qalmaaf dhi'effame walumaa galatti korommii loonii dhibba ja'aa fi hoolaa fi re'ee kuma sadii ture. ³⁴ Haa ta'u malee horii aarsaaf dhi'effaman irraa gogaa baasuuf lakkoobsi lubootaa ga'aa hin turre; kanaafuu firoonni isaanii Lewwonnii hamma hojiin sun dhumuttii fi hamma luboonni biraa qulqulleeffamanitti isaan gargaaran; Lewwonnii ofii isaanii qulqulleessuutti luboota caalaa gara toloota turaniitii. ³⁵ Cooma aarsaa nagaa fi dhibaayyuu aarsaa gubamu wajjin dhi'effamu dabalatee aarsaan gubamu akka malee hedduutu ture.

Akkasiin tajaajilli mana qulqullummaa WAAQAYYOO akka duriitti deebi'e. ³⁶ Hisqiyaasii fi namoonni hundi sababii waan Waaqni saba isaaf godheef ni gammadan; wannu kun dafee ta'eetii.

30

Hisqiyaas Faasiikaa Ayyaaneffate

¹ Hisqiyaas akka isaan WAAQAYYOO Waaqa Israa'eliif Faasiikaa ayyaaneffachuuf jedhanii gara Yersaalem, gara mana qulqullummaa WAAQAYYOO dhufaniif Israa'elii fi Yihuudaa hundatti ergaa erge; Efreemii fi Minaaseetti immoo xalayaa barreesse. ² Mootichii fi qondaaltonni isaa akkasumas waldaan Yersaalem keessa jiru hundi ji'a lammaffaatti Faasiikaa ayyaaneffachuuf murteessan. ³ Isaan sababii luboonni of qulqulleessan lakkoobsaan ga'oo hin ta'inni fi sababii namoonni Yersaalemitti walitti hin qabaminiif yeroo barbaachisaa ta'etti Faasiikaa ayyaaneffachuu hin dandeenye. ⁴ Karoorri sunis mootichaa fi waldaa sana guutuu ni gammachiise. ⁵ Isaanis akka namoonni WAAQAYYOO Waaqa Israa'eliif Faasiikaa ayyaaneffachuuf jedhanii gara Yersaalem dhufaniif Bersheebaa hamma Daanitti Israa'el hunda keessa labsii labsuuf murteessan. Ayyaanni Faasiikaa akka barreeffametti iddoo namoonni hedduun jiranitti ayyaaneffamee hin beekuutii.

⁶ Ergamoonnis ajaja mootichaatiin xalayaa mootichaa fi qondaaltota isaa biraa ergame fuudhanii guutummaa Israa'elii fi Yihuudaa keessa qajeelan; xalayaan sunis akkana jedha:

"Yaa saba Israa'el, akka inni gara keessan gara warra haftanii harka mootota Asoor jalaa baatan sanaatti deebi'uuf gara WAAQAYYOO Waaqa Abrahaam, Waaqa Yisihaaqii fi Waaqa Israa'elitti deebi'aa. ⁷ Akka abbootii keessanii fi akka obboloota keessan kanneen inni sababii isaan WAAQAYYOO Waaqa abbootii isaaniiif amanamuu didaniif akkuma isin argitan kana waan fafaa isaan godhe sana hin ta'inaa. ⁸ Isin akka abbootii keessanii mata jabeeyyii hin ta'inaa; WAAQAYYOOTTI harka kennadhaa. Gara iddoo qulqullummaa isaa kan inni bara baraan qulqulleesse sanaa kottaa. Akka dheekkamsi isaa sodaachisaan sun isin irraa deebi'uuf WAAQAYYOO Waaqa keessan tajaajilaa. ⁹ Sababii WAAQAYYOO Waaqni keessan arjaa fi gara laafessa ta'eef isin yoo gara WAAQAYYOOTTI deebitan obboloonni keessanii fi ijoolleen keessan warra isaan booji'an biratti gara laafina ni argatu; biyya kanattis ni deebi'u. Isin yoo gara isaatti deebitan inni fuula isaa isin irraa hin garagalatu."

¹⁰ Ergamoonnis Efreemii fi Minaasee keessa magaalaa tokkoo gara magaalaa kaaniitti naanna'aa hamma Zebuulonitti deeman; namoonni garuu isaan tuffatan; itti qoosanis.

¹¹ Namoonni Aasheer, kan Minaasee fi kan Zebuulon tokko tokko garuu gad of qabanii Yersaalem dhaqan. ¹² Akka isaan waan mootichii fi qondaaltonni isaa akkuma dubbii WAAQAYYOOTTI ajajanii turan sana hojjetaniif harki Waaqaa yaada tokko isaanii kennuuf akkasuma Yihuudaa irra ture.

¹³ Tuunni akka malee guddaan tokko ji'a lammaffaatti Ayyaana Maxinoo ayyaanessuuf Yersaalem keessatti walitti qabame. ¹⁴ Isaanis iddoowwan aarsaa kanneen Yersaalem keessa turan bubuqisani, iddoowwan aarsaa ixaanaas diigani geessanii Sulula Qeedroonitti ni gatan.

¹⁵ Guyyaa kudha afuraffaa ji'a lammaffaattis hoolaa Faasiikaa qalan. Luboonnii fi Lewwonnis qaana'anii of qulqulleessuudhaan aarsaa gubamu gara mana qulqullummaa WAAQAYYOO fidan. ¹⁶ Ergasiis akkuma Seera Musee nama Waaqaa sanaa keessatti ajajametti iddoo isaaniif ramadame ni qabatan. Luboonnis dhiiga Lewwonni isaanitti kennan sana ni faffacaasan. ¹⁷ Sababii waldaa sana keessaa namoonni hedduun of hin qulqulleessiniif Lewwonni namoota akka seeraatti hin qulqullaa'inii fi namoota hoolota isaanii WAAQAYYOOOF qulqulleessuu hin danda'in hundaaf jedhanii hoolota Faasiikaa ni galu turan. ¹⁸ Namoota biyya Efreem, Minaasee, Yisaakorii fi Zebuulonii dhufan hedduu keessaa garri caalu of qulqulleessuu baatan iyyuu isaan waan barreeffameen alatti Faasiikaa nyaatan; Hisqiyaas garuu akkana jedhee Waaqa kadhateef; "Yaa WAAQAYYOO tolaa, ¹⁹ nama garaa isaatiin si'i WAAQAYYOO Waaqa abbootii isaa barbaaduuf kutate hunda yoo inni akka seera iddoo qulqulluutti qulqullaa'aa ta'uu baate illee ati araaramiif." ²⁰ WAAQAYYOS kadhannaa Hisqiyaas dhaga'ee saba sana ni fayyise.

²¹ Israa'eloonni Yersaalem keessatti argamanii turan gammachuu guddaadhaan bultii torba Ayyaana Maxinoo ayyaaneffatan; Lewwonni fi luboonni immoo meeshaalee faarfannaa WAAQAYYOOTIIN guyyaa guyyaadhaan WAAQAYYON galateeffachaa turan.

²² Hisqiyaa is Lewwota waa'ee tajaajila WAAQAYYOO irratti hubannaa gaarii qaban jajjabeessuudhaan itti dubbate. Isaanis bultii torbanuu waan isaaniif qoodame nyaachaa, aarsaa nagaas dhi'eessaa WAAQAYYOO Waaqa abbootii isaaniitiif galata galchan.

²³ Waldaan sun guutuun bultii torba itti dabalee ayyaana sana ayyaaneffachuuf walii gale; kanaafuu isaan bultii torba itti dabalani gammachuudhaan ayyaaneffatan. ²⁴ Hisqiyaa mootichi Yihuudaas korommii loonii kuma tokko, hoolotaa fi re'oota kuma torba waldaa sanaaf ni kenne; qondaaltonni isaa immoo korommii loonii kuma tokko, hoolotaa fi re'oota kuma kudhan ni kennan. Luboonni akka malee baay'eenis of qulqulleessan. ²⁵ Waldaan Yihuudaa hundi, luboota, Lewwotaa fi namoota Israa'el keessaa walitti qabaman hunda, akkasumas alagoota Israa'el keessaa dhufanii fi kanneen Yihuudaa keessa jiraatan hunda wajjin ni gammadan. ²⁶ Bara Solomoon ilma Daawit mooticha Israa'el jalqabee waan wanni akkasii Yerusaalem keessatti takkumaa hin ta'iniif Yerusaalem keessatti gammachuu guddaatu ta'e. ²⁷ Ergasiis luboonni fi Lewwonnii ka'anii saba eebbisan; Waaqnis isaan dhaga'e; kadhannaan isaanii gara samii, iddoo inni jiraatu qulqulluu sana ga'eeraatii.

31

¹ Yommuu wanni kun hundi xumurametti Israa'eloonni achi turan gara magaalawwan Yihuudaa dhaqanii dhagaawwan waaqeffannaa caccabsan; siidaawwan Aasheeraa ni kukkutan. Iddoowwan sagadaa kanneen gaarran irraa fi iddoowwan aarsaa kanneen Yihuudaa, Beniyaam, Efreemii fi Minaasee keessa turan hunda ni balleessan. Israa'eloonnis erga waan kana hunda balleessanii booddee gara magaalawwanii fi qabeenya isaaniitti deebi'an.

Buusii Waaqeffannaaf Godhame

31:20-21 kwf - 2Mt 18:5-7

² Hisqiyaa is tokkoo tokkoo isaanii akka isaan akkuma hojii lubummaa isaaniitti yookaan akkuma hojii Lewwummaa isaaniitti aarsaa gubamuu fi aarsaa nagaa dhi'eessaniif, akka isaan karra iddoo WAAQAYYOO jiraatuu duratti tajaajilaniif, akka isaan galata galchaniif fi akka isaan faarfannaa galataa faarfatanii lubootaa fi Lewwota garee gareedhaan ramade. ³ Mootichis akkuma Seera WAAQAYYOO keessatti barreeffame sanatti, aarsaa gubamu kan ganamaa fi galgalaa akkasumas aarsaa gubamu kan Sanbatootaa, Ayyaana Baatiwwan Haaraa fi guyyaa ayyaana murteeffameetiif qabeenya ofii isaa irraa ni kenne. ⁴ Innis akka luboonni fi Lewwonnii Seera WAAQAYYOOTIIF of kennuu danda'aniif namoota Yerusaalem keessa jiraatan akka isaan qooda jaraaf malu kennaniif ni ajaje. ⁵ Akkuma ajajni sun ba'eenis Israa'eloonni mataa midhaan isaanii kan jalqabaa irraa, daadhii wayinii haaraa irraa, zayitii fi damma irraa akkasumas waan lafa qotiisaa irraa argamu hunda irraa arjumaadhaan kennan. Waan hunda irraa harka kudhan keessaa harka tokko guddisanii ni fidan. ⁶ Namoonni Israa'elii fi Yihuudaa warri magaalawwan Yihuudaa keessa jiraatanis loonii fi bushaayee isaanii irraa harka kudhan keessaa harka tokko, akkasumas waan WAAQAYYOO Waaqa isaaniitiif qulqulleeffame irraa harka kudhan keessaa harka tokko ni fidan; ni tuulanis. ⁷ Isaanis hojii kana ji'a sadaffaatti jalqabanii ji'a torbaffaatti fixan. ⁸ Hisqiyaa isii fi qondaaltonni isaa yommuu dhufanii tuullaawwan sana arganitti WAAQAYYON ni galateeffatan; saba isaa Israa'eliniis ni eebbisan.

⁹ Hisqiyaa is waa'ee tuullaa sanaa lubootaa fi Lewwota gaafate; ¹⁰ maatii Zaadoq keessaa Azaariyaa lubichi hangafni akkana jedhee deebise; "Erga namoonni kennaa isaanii gara mana qulqullummaa WAAQAYYOOTTI fidduu jalqabanii as nu nyaata ga'aa fi irraa hafaa arganneerra; sababii WAAQAYYOO saba isaa eebbiseef hambaan akka malee guddaan kun hafeera."

¹¹ Hisqiyaa is akka isaan mana qulqullummaa WAAQAYYOO keessatti mankuusaalee qopheessan ajaje; isaanis ni qopheessan. ¹² Isaanis ergasii buusii, kennaa harka kudhan keessaa harka tokkoo fi kennaawwan qulqulleeffaman amanamummaadhaan fidan. Wantoota kanneen irrattis Konaneyaan Lewwichi itti gaafatamaa ture; obboleessi isaa Shime'iin immoo sadarkaadhaan itti aanaa isaa ture. ¹³ Yehii'eel, Azariyaa, Nahaati, Asaheel, Yerimooti, Yoozaabaad, Elii'eel, Yismakiyaa, Mahatii fi Benaayaa, Konaneyaa fi obboleessa isaa Shime'ii jalatti to'attoota ta'anii Hisqiyaa mootichaa fi Azaariyaa itti gaafatamaa mana qulqullummaa Waaqaatiin muudaman.

¹⁴ Qoorraahi ilmi Yimnaa Lewwichi, eegduun Karra Ba'aa sun kennaa fedhiidhaan Waaqaaf kenname irratti, akkasumas buusii WAAQAYYOOOF godhamee fi kennaawwan qulqulleeffaman qooduu irratti itti gaafatamummaa qaba ture. ¹⁵ Eeden, Miiniyaamiin, Yeeshuu'aan, Shemaa'yaan, Amariyaa fi Shekaaniyaan magaalawwan lubootaa

keessatti luboota michoota isaaniitiif guddaa fi xinnaa akkuma tokkotti garee garee isaaniitti isaaniif gooduudhaan amanamummaadhaan isa gargaaran.

¹⁶ Kana malees dhiirota umuriin isaanii waggaa sadii fi sanaa ol ta'e kanneen maqaan isaanii galmee hidda dhalootaa keessa jiru warra akkuma itti gaafatamummaa isaanii fi ramaddii isaaniitti gooda hojii isaanii kan guyyaa guyyaa hojjetamu hojjechuuf mana qulqullummaa WAAQAYYOO seenuu danda'an hundaaf akkasuma ni goodan. ¹⁷ Luboota maatii isaaniitiin galmee hidda dhalootaa keessatti galmeeffamanii fi Lewwota umuriin isaanii waggaa digdamaa fi sanaa ol ta'eefis akkuma itti gaafatamummaa fi gooda hojii isaaniitti ni ramadaniif. ¹⁸ Luboonni kunneen ijoollee isaanii xixinnoo, niitota isaanii, ilmaan isaaniitii fi intallan isaanii kanneen waldaa guutuu keessa jiran hunda wajjin ni galmeeffaman; isaan of qulqulleessuudhaan amanamoo turaniitii.

¹⁹ Luboota sanyiiwwan Aroon kanneen lafa gotiisaa naannoo magaalaawwan isaanii yookaan magaalaawwan biraa keessa jiraataniif, dhiirota garee isaanii kanneen galmee hidda dhaloota Lewwotaa keessatti galmeeffaman hundaaf akka goodaniif namoonni filatamanii turan.

²⁰ Hisqiyaas waan kana guutummaa Yihuudaa keessatti ni hojjete; innis waan fuula WAAQAYYOO Waaqa isaa duratti gaarii, qajeelaa fi amanamaa ta'e ni hojjete. ²¹ Innis mana qulqullummaa Waaqaa keessa hojjechuunis ta'u, seeraa fi ajajawwaniif ajajamuudhaan waan hojjete hunda keessatti Waaqa isaa barbaaduudhaaf garaa isaa guutuudhaan ni hojjete; kanaafuu inni ni milkaa'e.

32

Senaaheriib Yerusaalemin Marse

32:9-19 kwf - 2Mt 18:17-35; Isa 36:2-20

32:20-21 kwf - 2Mt 19:35-37; Isa 37:36-38

¹ Erga Hisqiyaas waan kana hunda amanamummaadhaan hojjetee booddee Senaaheriib mootichi Asoor dhufee Yihuudaa weerare. Mo'atee isaan qabachuudhaafis magaalaawwan dallaa dhagaa qaban marse. ² Hisqiyaasis yommuu akka Senaaheriib dhufee Yerusaalemin loluu barbaade argetti, ³ burqaa bishaanii kan magaalaa ala jiru cufuuf qondaaltota isaa fi loltoota isaa wajjin mari'ate; isaanis isa gargaaran. ⁴ Namoonni akka malee hedduun walitti qabamanii, "Mootonni Asoor maaliif dhufanii bishaan baay'ee argatan?" jedhanii burqaawwanii fi lageen biyya sana keessa yaa'an hunda ni cufan. ⁵ Ergasii mootichi jabaatee hojjechuudhaan dallaawwan dhagaa kanneen jijjigan hunda dhaabuudhaan gamoowwan eegumsaa achi irratti ijaare. Isaan alatti immoo dallaawwan biraa ijaaree daangaa Magaalaa Daawit cimse. Akkasumas mi'oota lolaa fi gaachanawwan baay'ee hojjete.

⁶ Innis ajajjoota loltootaa uummata irratti muudee oobdii karra magaalaa irratti fuula isaa duratti walitti qabee akkana jedhee isaan jajjabeesse; ⁷ "Jabaadhaa; cimaa. Isin sababii mootich Asoorii fi sababii loltoota akka malee baay'ee kanneen isa wajjin jiran sanaatiif jettanii hin sodaatinaa; humni nu wajjin jiru kan isa wajjin jiru caalaatii. ⁸ Kan isa wajjin jiru humna foonii qofaa dha; kan nu wajjin jiru garuu WAAQAYYOO Waaqa keenya isa nu gargaaruu fi isa lola keenya nuuf loluu dha." Uummanni dubbii Hisqiyaas mooticha Yihuudaatiin jajjabaate.

⁹ Kana booddees Senaaheriib mootichi Asoor utuma loltoota isaa hunda wajjin Laakkiish marsee jiruu, harka ajajjoota loltoota isaatti akkana jedhee gara Yerusaalemitti Hisqiyaasii fi namoota Yihuudaa kanneen achi jiran hundatti ergaa kana erge:

¹⁰ "Senaaheriib mootichi Asoor akkana jedha: Yerusaaleem ishee marfamte kana keessa turuun keessan of amanachu kee maal irratti hundeeffatte? ¹¹ Hisqiyaas, 'WAAQAYYOO Waaqni keenya harka mootii Asoor jalaa nu baasa' jechuun isaa akka isin beelaa fi dheebuudhaan dhumtaniif mitii? ¹² Namni Yihuudaa fi Yerusaalemiin, 'Isin iddoo aarsaa tokko duratti sagaduu fi isuma irratti aarsaa gubamu dhi'eessuu qabdu' jedhee iddoowwan sagadaa fi iddoowwan aarsaa Waaqa kanaa balleesse Hisqiyaasuma mataa isaa mitii?

¹³ "Isin waan anii fi abbootiin koo saboota biyyoota biraa hunda goone hin beektanii? Waaqonni saboota sanaa biyya isaanii harka koo jalaa takkumaa baasuu danda'aniiruu? ¹⁴ Waaqota abbootiin koo balleessan kanneen hunda keessaa isa kamtu saba isaa harka koo keessaa baasuu danda'e? Yoos Waaqni keessan akkamitti harka koo keessaa isin baasuu danda'a ree? ¹⁵ Ammas Hisqiyaas akkasitti isin gowwoomsee karaa irraa isin hin jal'isin. Waaqni saba yookaan mootummaa kamii iyyuu saba isaa harka koo yookaan harka abbootii koo jalaa baasuu hin dandeenyeetii

isa hin amaninaa. Waaqni keessan immoo harka kootii isin baasuuf hammam haa yaratu reel”

¹⁶ Qondaaltonni Senaaheriibis waan kana caalaa hedduu WAAQAYYO Waaqaa fi Hisqiyaas garbicha isaa irratti ni dubbatan. ¹⁷ Mootichis akkasuma WAAQAYYO Waaqa Israa’el arrabsuudhaan, waan hamaa illee isatti dubbachuudhaan, “Akkuma waaggonni biyyoota biraa saba isaanii harka koo jalaa baasuu hin danda’in sana Waaqni Hisqiyaasis saba isaa harka koo jalaa oolchuu hin danda’u” jedhee xalayaa barreesse. ¹⁸ Kana irratti isaan naasisuu fi sodaachisuudhaan magaalaa sana qabachuudhaaf saba Yersaalem kan dallaa dhagaa irra tureetti afaan Ibraayisxiitiin sagalee isaanii ol fudhatanii iyyan. ¹⁹ Isaan akkuma waa’ee waaqota saboota addunyaa biraa kanneen harka namaatiin hojjetaman sanaa dubbatan sana waa’ee Waaqa Yersaalem dubbatan.

²⁰ Hisqiyaas Mootichii fi Isaayyaas raajichi ilmi Amoos waa’ee waan kanaatiif kadhannaadhaan gara samiitti ol iyyan. ²¹ WAAQAYYOS ergamaa isaa tokko itti erge; ergamaan sunis qubata loltoota mooticha Asoor keessatti loltoota, hooggantootaa fi ajajjoota loltootaa ni balleesse. Kanaafuu mootichi salphinaan gara biyya isaatti deebi’e. Yeroo inni galma Waaqa isaa seenettis ilmaan isaa achumatti goraadeedhaan isa cicciran.

²² WAAQAYYO akkasiin Hisqiyaasii fi namoota Yersaalem harka Senaaheriib mooticha Asoorii fi harka diinota isaa hundaaf jalaa ni baase. Inni karaa hundaan isaan eege. ²³ Namoonni baay’eenis gara Yersaalemitti WAAQAYYOF aarsaa fidan; Hisqiyaas mooticha Yihuudaatiif immoo kennaa gatii guddaa fidan. Innis yeroo sanaa jalqabee fuula saboota hundaaf duratti ulfina argate.

Of tuulummaa, Milkaa’inaa fi Du’a Hisqiyaas

32:24-33 kwf - 2Mt 20:1-21; Isa 37:21-38; 38:1-8

²⁴ Bara sana keessa Hisqiyaas dhukkubsatee du’uu ga’e. Innis WAAQAYYON ni kadhate; Waaqayyos deebii kennee fi mallattoo dingisiisaa isa argisiise. ²⁵ Hisqiyaas garuu garaa isaatti of tuule malee waan gaarii isaaf godhameef deebii malu hin kennine; kanaafuu dheekkamsi WAAQAYYOO isatti, Yihuudaa fi Yersaalemitti dhufe. ²⁶ Kana irratti Hisqiyaas akkuma namoota Yersaalem sanaa of tuulummaa garaa isaa irraa ni deebi’e; kanaafuu bara Hisqiyaas keessa dheekkamsi WAAQAYYOO isaanitti hin dhufne.

²⁷ Hisqiyaas qabeenya akka malee baay’ee fi ulfina guddaa qaba ture; innis meettii isaaf, warqee isaaf, dhagaawwan isaa gati jabeeyyiif, urgooftuuwwan isaaf, gaachanawwan isaa fi mi’oota garaa garaa kanneen gatii guddaa qaban hundaaf mankuusa ni ijaare. ²⁸ Akkasumas midhaaniif gombisaa ijaare; daadhii wayinii haaraa fi zayitiidhaaf godaa itti kuusan qopheesse; loon gosa hundaaf dallaa, bushaayeeff immoo gola ni ijaare. ²⁹ Innis sababii Waaqni badhaadhummaa guddaa isaaf kenneef bushaayee baay’ee, karra loonii hedduus horatee magaalawwanis ni ijaarrate.

³⁰ Namni afaan burqaa Giihoon kan olii cufee bishaan isaa gara lixa Magaalaa Daawititti jal’ise Hisqiyaasuma kana. Hojiin isaa hundis ni milkaa’eef. ³¹ Garuu yeroo bulchittonni Baabilon waa’ee hojii dinqii kan biyya sanatti hojjetamee isa gaafachuuf ergamoota erganitti Waaqni isa qoruu fi waan garaa isaa keessa jiru ilaaluudhaaf isa dhiise.

³² Wantoonni bara mootummaa Hisqiyaas keessa hojjetaman kanneen biraa fi gaarummaan isaa mul’ata Isaayyaas raajicha ilma Amoos, kitaaba mootota Yihuudaa fi Israa’el keessatti barreeffamaniiru. ³³ Hisqiyaasis abbootii isaa wajjin boqotee lafa awwaala sanyiiwwan Daawititti gaara irratti awaalame. Yeroo inni du’ettis Yihuudaa fi sabni Yersaalem hundinuu isa kabajan. Ilmi isaa Minaaseen iddoo isaa bu’ee mootii ta’e.

33

Minaasee Mooticha Yihuudaa

33:1-10 kwf - 2Mt 21:1-10

33:18-20 kwf - 2Mt 21:17-18

¹ Minaaseen yeroo mootii ta’etti nama waggaa kudha lama ture; innis Yersaalem keessa taa’ee waggaa shantamii shan bulche. ² Innis waan jibbisiisaa saboota WAAQAYYO fuula Israa’elootaa duraa ari’ee baase sanaa duukaa bu’uudhaan fuula WAAQAYYOO duratti waan hamaa hojjetete. ³ Inni iddoowwan sagadaa kanneen abbaan isaa Hisqiyaas barbadeessee ture sana illee deebisee ni ijaare; akkasumas Ba’aaliif iddoowwan aarsaa tolchee siidaawwan Aasheeraas ni dhaabe. Raayyaawwan samii hundaafis ni sagade; isaan waaqeffates. ⁴ Innis mana qulqullummaa WAAQAYYOO kan WAAQAYYO, “Maqaan koo bara baraan Yersaalem keessa ni jiraata” jedhee waa’ee isaa dubbate sana keessatti

iddoowwan aarsaa tolche. ⁵ Oobdiiwwan mana qulqullummaa WAAQAYYOO lamaanuu keessattis raayyaawwan samii hundaaf iddoowwan aarsaa ni tolche. ⁶ Sulula Ben Hinoomittis ilmaan isaa ibiddaan aarsaa godhee dhi'eesse; tolchaa fi falfala hojjatee, milkii ilaallatee, ilaaltotaa fi eker dubbistoota gorsa gaafate. Inni fuula WAAQAYYOO duratti hammina guddaa ni hojjatee akkasiin dheekkamsaaf isa kakaase.

⁷ Innis fakkii Waaqa tolfamaa kan hojjatee ture sana geessee mana qulqullummaa Waaqaa kan Waaqni akkana jedhee waa'ee isaa Daawitii fi ilma isaa Solomoonitti dubbatee ture sana keessa kaa'e; "Mana qulqullummaa kana keessaa fi Yersaalem ishee ani gosoota Israa'el hunda keessaa filadhe keessa Maqaa koo bara baraan nan dhaaba. ⁸ Yoo isaan waan ani waa'ee seera, labsii fi qajeelcha karaa Museetii kenname sanaa isaan ajaje hunda hojjetanii ani si'achi akka miilli Israa'elootaa biyya ani abbootii keessaniif kenne keessaa ba'u hin godhu." ⁹ Minaaseen Yihuudaa fi namoota Yersaalem karaa irraa jal'ise; kanaafuu isaan saboota WAAQAYYOO fuula Israa'elootaa duraa balleesse sana caalaa hammina hojjetan.

¹⁰ WAAQAYYOS Minaasee fi saba isaatti dubbateera; isaan garuu dhaga'uu hin feene. ¹¹ Kanaafuu WAAQAYYOO ajajjoota loltoota mootii Asoor isaanitti kaase; isaanis Minaasee qabanii hokkoo funyaanitti ka'aa'ni foncaadhaan hidhanii Baabilonitti isa geessan. ¹² Innis lubbamee WAAQAYYOO Waaqa isaa barbaadee fuula Waaqa abbootii isaa duratti akka malee gad of qabe. ¹³ WAAQAYYOS yeroo inni isa kadhatetti na'eefii waammata isaa dhaga'eef; deebisees gara Yersaalem mootummaa isaatti isa fide. Minaaseenis ergasii akka WAAQAYYOO Waaqa ta'e ni beeke.

¹⁴ Ergasii dallaa Magaalaa Daawit isa alaa, karaa lixa burqaa Giphoon kan sulula keessaa gaara Oofeelitti naannesse hamma Karra Qurxummiitti ni haaromse; dallaa kanas akka malee ol dheerese. Magaalawwan Yihuudaa kanneen dallaa jabaa qaban hunda keessas ajajjoota waraanaa ni qubachiise.

¹⁵ Innis waaqota ormaa fi fakkiiwwan mana qulqullummaa WAAQAYYOO keessaa ni balleesse; akkasumas iddoowwan aarsaa kanneen inni gaarran mana qulqullummaa irraa fi Yersaalem keessatti tolche hundas ni diige; magaalaa keessaas baasee ni gate. ¹⁶ Iddoo aarsaa WAAQAYYOO deebisee dhaabee aarsaa nagaa fi aarsaa galataa irratti ni dhi'eesse; akka isaan WAAQAYYOO Waaqa Israa'el tajaajilaniif namoota Yihuudaa ni ajaje. ¹⁷ Ta'us sabni ittuma fufee iddoowwan sagadaa kanneen gaarran irraa keessatti aarsaa dhi'eesse; garuu uummanni sun WAAQAYYOO Waaqa isaa qofaaf aarsaa dhi'eessaa ture.

¹⁸ Wantoonni bara mootummaa Minaasee keessa hojjetaman kanneen biraa, kadhannaan inni Waaqa isaa kadhatee fi dubbii inni namoota waa arganii himan maqaa WAAQAYYOO Waaqa Israa'eliin isatti himan dabalatee seenaa mootota Israa'el keessatti barreeffameera. ¹⁹ Kadhannaan isaa fi akki Waaqni itti garaa laafeefii kadhannaan isaa dhaga'eef, cubbuun inni hojjete hundii fi amanamummaa dhabuun isaa, akkasumas utuu gad of hin qabin dura iddoowwan sagadaa kanneen gaarran irraa ijaaruu isaa, siidaawwan Aasheeraa fi waaqota tolfamoo dhaabuun isaa hundi galmeewwan namoota waa arganii himanii keessatti barreeffamaniiru. ²⁰ Minaaseenis abbootii isaa wajjin boqotee masaraa mootummaa isaa keessatti awwaalame. Ilmi isaa Aamoonis iddoo isaa bu'ee mootii ta'e.

Aamoon Mooticha Yihuudaa

33:21-25 kwf - 2Mt 21:19-24

²¹ Aamoon yeroo mootii ta'etti umuriin isaa waggaa digdamii lama ture. Innis Yersaalem keessa ta'ee waggaa lama bulche. ²² Innis akkuma abbaan isaa Minaaseen hojjatee ture sana fuula WAAQAYYOO duratti waan hamaa hojjete. Aamoon waaqota Minaaseen tolche waaqeffate; hunda isaaniitifis aarsaa dhi'eesse. ²³ Inni garuu akka abbaa isaa Minaasee fuula WAAQAYYOO duratti gad of hin qabne; Aamoon ittuma caalchisee yakka hojjete.

²⁴ Qondaaltonni Aamoon isatti mari'atanii masaraa mootummaa isaa keessatti isa ajjeesan. ²⁵ Kana irratti namoonni biyya sanaa warra Aamoon Mootichatti malatan hunda fixanii ilma isaa Yosiyasii immoo iddoo isaa mootii godhatan.

34

Geeddarama Yosiyas Fide

34:1-2 kwf - 2Mt 22:1-2

34:3-7 kwi - 2Mt 22:4-20

34:8-13 kwf - 2Mt 22:3-7

¹ Yosiyas yeroo mootii ta'etti nama waggaa saddeetii ture; Yerusaleem keessa ta'ees waggaa soddonii tokko bulche. ² Inni fuula WAAQAYYOO duratti waan qajeelaa ni hojjete; utuu mirgatti yookaan bitaatti hin gorinis karaa abbaa isaa Daawit irra deeme.

³ Inni mootii ta'ee waggaa saddeettaffaatti utuma umurii dargaggummaa keessa jiruu Waaqa abbaa isaa Daawit barbaaduu jalqabe. Waggaa kudha lammaffaatti immoo Yihuudaa fi Yerusaleem keessaa iddoowwan sagadaa kanneen gaarran irraa, siidaawwan Aasheeraa, waaqota tolfamoo fi fakkiwwan baqfamanii tolfaman ni balleesse. ⁴ Qajeelfama isaatiinis iddoowwan aarsaa Ba'aal diigaman; iddoowwan aarsaa ixaanaa kanneen achi irra turan caccabsee siidaawwan Aasheeraa, waaqota tolfamoo fi fakkiwwan hurreesse. Wantoota kanneenis daakee bulleessee awwaala warra isaaniif aarsaa dhi'eessaa turanii irratti bittinneesse. ⁵ Lafee lubootaas iddoowwan aarsaa isaanii irratti guggube. Haala kanaanis Yihuudaa fi Yerusaleemin qulqulleesse. ⁶ Magaalaawwan Minaasee, kan Efreemii fi Simi'oon kanneen hamma Niftaalemitti jiranii fi akkasumas diigamaa naannoowwan isaanii keessatti ⁷ iddoowwan aarsaa fi siidaawwan Aasheeraa ni jijjigse; waaqota tolfamoo daaraa godhe; iddoowwan aarsaa ixaanaa kanneen guutummaa Israa'el keessa jiran hundas ni caccabse. Ergasii Yerusaleemitti deebi'e.

⁸ Yosiyas mootii ta'ee waggaa kudha saddeettaffaatti erga biyyattii fi mana qulqullummaa qulqulleessee booddee mana WAAQAYYOO Waaqa isaa haaromsuuf Shaafaan ilma Azaliyaa, Ma'aseyaa bulchaa magaalaa fi Yoo'aa ilma Yoo'aahaaz galmeessaa sana erge.

⁹ Isaanis gara Hilqiyaa lubicha ol aanaa dhaqanii maallaqa mana qulqullummaa Waaqaatiif fidame sana itti kennan; maallaqa kanas Lewwota balbala eegantu saboota Minaasee irraa, kan Efreem irraa, hambaawwan Israa'el hunda irraa, saba Yihuudaa fi kan Beniyaam hunda irraa akkasumas jiraattota Yerusaleem irraa walitti qabe. ¹⁰ Isaanis maallaqa sana namoota akka hojii mana qulqullummaa WAAQAYYOO to'ataniif muudamanitti imaanaa kennan. Namoonni kunneenis hojjetoota mana qulqullummaa haaromsanii akka duriitti deebisaniif ni kaffalu. ¹¹ Akkasumas akka isaan ijaarsa mootonni Yihuudaa akka diigamu godhan sanaaf dhagaa soofame, laaxaawwan, mukkeen sutaa fi dareeraawwan bitaniif ogeeyyii mukaa fi ijaartotatti maallaqa kennan.

¹² Namoonni sunis amanummaadhaan hojicha hojjetan. Lewwota sanyii Meraarii keessaa Yahaatii fi Obaadiyaan akkasumas sanyii Qohaati keessaa Zakkaariyaasii fi Meshulaam akka jara sana hojjechiisaniif isaan irratti muudaman. Lewwonni meeshaa faarfanna taphachuu beekan hundis ¹³ itti gaafatamtoota hojjetoota hojii humnaa ta'anii hojjetoota hojii garaa garaa illee to'achaa turan. Lewwonni tokko tokkos barreessitoota, qondaaltotaa fi eegdotaa balbalaa turan.

Kitaabni Seeraa Argamuu Isaa

34:14-28 kwf - 2Mt 22:8-20

34:29-32 kwf - 2Mt 23:1-3

¹⁴ Utuma isaan maallaqa mana qulqullummaa WAAQAYYOOTTI galfame sana baasaa jiranuu Hilqiyaa lubichi Kitaaba Seera WAAQAYYOO kan karaa Museetiin kenname sana erge. ¹⁵ Hilqiyaanis Shaafaan barreessaa sanaan, "Ani mana qulqullummaa WAAQAYYOO keessatti Kitaaba Seeraa argeen jira" jedhe; kitaabichas Shaafaanitti kenne.

¹⁶ Shaafaanis kitaabicha fuudhee mootichatti geessee akkana jedhe; "Qondaaltonni kee waan ajajaman hunda hojjechaa jiru. ¹⁷ Maallaqa mana qulqullummaa WAAQAYYOO keessa tures baasanii namoota hojii to'atanii fi hojjetootatti imaanaa kennaniiru." ¹⁸ Kana irrattis Shaafaan barreessaan sun, "Hilqiyaa lubichi kitaaba tokko natti kenneera" jedhee mootichatti hime. Shaafaanis fuula mootichaa duratti kitaaba sana dubbise.

¹⁹ Mootichis yommuu dubbii Seeraa sana dhaga'etti uffata isaa tarsiise. ²⁰ Innis ajaja kana Hilqiyaa, Ahiqaam ilma Shaafaanitti, Abdoon ilma Miikaatti, Shaafaan barreessichaa fi Asaayaa tajaajilaa mootichaatti ni kenne: ²¹ "Dhaqaatii waa'ee waan kitaaba argame kana keessatti barreeffamee anaaf, hambaawwan Israa'el keessaatii fi Yihuudaatiif WAAQAYYON gaafadhaa. Sababii warri nuun duraa dubbii WAAQAYYOO hin eeginiif dheekkamsi WAAQAYYOO guddaan nutti dhangala'eera; isaan akka waan kitaaba kana keessatti barreeffame sana hundaatti hin jiraanneeti."

²² Hilqiyaa fi warri mootichi isa wajjin erge sun gara Huldaanaa raajittii jechuunis niitii Shaluum ilma Toqe'aati, ilma Hasraat kan eegduu mana uffataa turte sanatti himuu dhaqan. Isheenis Yerusaleem keessa aanaa lammaffaa keessa jiraatti turte.

²³ Isheenis akkana isaaniin jette; "WAAQAYYOO Waaqni Israa'el akkana jedha: Namicha natti isin erge sanatti akkana jedhaa himaa; ²⁴ 'WAAQAYYOO akkana jedha: Ani iddoo kanaa fi saba isaatti badiisa jechuunis abaarsa kitaaba fuula mootii Yihuudaa duratti

dubbifame sana keessatti barreeffame hunda nan fida. ²⁵ Sababii isaan na dhiisanii waaqota biraatiif ixaana aarsuudhaan waan harki isaanii tolche hundaan dheekkamsaaf na kakaasaniif dheekkamsi koo iddoo kana irratti ni dhangala'a; hin dhaamus.' ²⁶ Mootii Yihuudaa kan akka isin WAAQAYYON gaafattaniif isin erge sanatti akkana jedhaatii himaa; 'WAAQAYYO Waaqni Israa'el waa'ee dubbii ati dhageesse sanaa akkana jedha: ²⁷ Sababii ati yeroo waan inni waa'ee iddoo kanaatii fi waa'ee saba isaa waan hamaa dubbate dhageessetti garaan kee tuqamee fuula Waaqaa duratti gad of qabdeef, sababii ati fuula koo duratti gad of qabdee, uffata kee tarsaaftee boosseef ani si dhaga'eera, jedha WAAQAYYO. ²⁸ Ani amma abbootii kee biratti walittin si qaba; atis nagumaan awwaalanta. Waan hamaa ani iddoo kanaa fi warra as jiraatanitti fiduuf jiru hunda iji kee hin argu.'"

Isaanis deebii ishee fudhatanii gara mootichaatti deebi'an.

²⁹ Ergasiis mootichi maanguddoota Yihuudaa fi Yerusaalem hunda walitti ni waame. ³⁰ Innis namoota Yihuudaa, jiraattota Yerusaalem, lubootaa fi Lewwota wajjin jechuunis nama xinnaa fi guddaa hunda wajjin gara mana qulqullummaa WAAQAYYOOTTI ol ba'e. Dubbii Kitaaba Kakuu kan mana qulqullummaa WAAQAYYOO keessatti argame sanaa hundas akka isaan dhaga'aniitti dubbiseef. ³¹ Mootichis utubaa isaa bira dhaabatee akka WAAQAYYON duukaa bu'u, akka garaa isaa guutuu fi lubbuu isaa guutuudhaan ajaja isaa, dambiiwwan isaatii fi labsiiwwan isaa eegee, dubbiiwwan kakuu kanneen kitaaba kana keessatti barreeffamaniifis akka ajajamu fuula WAAQAYYOO duratti kakuu ni haaromse.

³² Ergasiis akka namni Yerusaaleemii fi Beniyaam keessa jiraatu hundi kakuu galu ni godhe; namoonni Yerusaaleemis akkuma kakuu Waaqaa jechuunis Waaqaa abbootii isaaniitti waan kana ni godhan.

³³ Yosiyaa isin guutummaa biyya Israa'el keessaa waaqota jibbisiisoo ni balleesse; akka warri Israa'el keessa jiran hundinuu WAAQAYYO Waaqaa isaanii waaqeffatan ni godhe. Isaan hamma inni lubbuun jiraatutti WAAQAYYO Waaqaa abbootii isaanii duukaa bu'uu irraa duubatti hin deebine.

35

Yosiyaa Faasiikaa Ayyaanefbachuu Isaa

35:1,18-19 kwf - 2Mt 23:21-23

¹ Yosiyaa Yerusaaleemitti WAAQAYYOOF Faasiikaa ayyaanesse; hoolaan Faasiikaas guyyaa kudha afuraffaa ji'a jalqabaatti qalame. ² Innis luboota hojii isaanii irratti muudee akka isaan mana qulqullummaa WAAQAYYOO keessa tajaajilan isaan jajjabeesse. ³ Lewwota Israa'eloota hunda barsiisanii fi WAAQAYYOOF qulqullaa'aniinis akkana jedhe; "Taabota qulqullaa'aa sana mana qulqullummaa kan Solomoon ilmi Daawit mooticha Israa'el ijaare keessa kaa'aa. Taabonni kun gatiitii keessanitti hin baatamin. Isin amma WAAQAYYO Waaqaa keessanii fi saba isaa Israa'elin tajaajilaa. ⁴ Akkuma qajeelfama Daawit mooticha Israa'elii fi ilma isaa Solomooniin barreeffame sanaatti isin akkuma maatiiwwan keessaniitti garee gareedhaan of qopheessaa.

⁵ "Kutaa maatiiwwan obboloota keessanii kanneen Lewwota hin ta'iniitiif gareen Lewwotaa tokko kutaa maatii tokkoo iddoo bu'aatii iddoo qulqulluu dhaabadhaa. ⁶ Hoolaa Faasiikaa qalaa; of qulqulleessaatii obboloota keessaniifis xobbaallaawwan hoolaa qopheessaa; waan kanas akkuma WAAQAYYO karaa Museetiin ajaje sanatti godhaa."

⁷ Yosiyaa isin hoolotaa fi re'oota kuma soddomaa fi loon kuma sadii akka aarsaa Faasiikaa ta'aniif namoota achi turan hundaaf qabeenyuma isaa irraa ni kenne.

⁸ Qondaaltonni isaas uummataaf, lubootaa fi Lewwotaaf fedhiidhaan buusii kennan. Hilqiyaa, Zakkaariyaasii fi Yehii'eel bulchitoonni mana qulqullummaa Waaqaa aarsaa Faasiikaatiif hoolotaa fi re'oota kuma lamaa dhibba ja'aa fi loon dhibba sadii lubootatti kennan. ⁹ Konaneyaanis obboloota isaa Shemaa'iyaa fi Naatnaa'el wajjin, akkasumas Hashabiyaan, Ye'ii'eelii fi Yoozaabaad dura buutonni Lewwotaa sun hoolotaa fi re'oota kuma shanii fi loon dhibba shan akka isaan aarsaa Faasiikaa ta'aniif Lewwotatti ni kennan.

¹⁰ Wannii hundinuu qopheeffamnaan akkuma mootichi ajaje sanatti luboonni iddoo isaanii ijaajjan; Lewwonnis toora isaaniitiin ijaajjan. ¹¹ Hoolonni Faasiikaa ni qalaman; luboonnis dhiiga itti kenname ni faffacaasan; Lewwonnis immoo hoolota irraa gogaa ni baasan. ¹² Isaanis akka jarri akkuma Kitaaba Musee keessatti barreeffame sanatti WAAQAYYOOF dhi'eessaniif kutaa maatiiwwan sabaatiif kennuudhaaf aarsaa gubamu kopaatti baasan. Loon illee akkasuma godhan. ¹³ Akkuma ajajame sanattis hoolaa

Faasiikaa ibiddaan waadan; aarsaa qulqulleeffame immoo okkoteetti, hubboo fi xuwwweetti affeelanii yoosuma namoota hundaaf qoqqoodan. ¹⁴ Isaanis ergasii sababii luboonni sanyiin Aroon hamma halkan walakkaatti aarsaa gubamuu fi cooma aarsaa dhi'eessaa turaniif ofii isaaniitii fi lubootaaf qophii godhan. Akkasiin Lewwonni ofii isaaniitii fi luboota sanyii Aroon ta'aniif qopheessan.

¹⁵ Ilmaan Asaaf faarfattoonni akkuma Daawit, Asaaf, Heemaanii fi Yeduutuun waa himaan mootichaa ajajan sana iddoodhuma isaaniif ramadame turan. Eegdonni karraa kanneen tokkoo tokkoo karraa irra turan immoo waan obboloota isaanii Lewwonni qophii isaaniif godhaniif iddoo isaaniitii deemuun hin barbaachifne.

¹⁶ Kanaafuu tajaajilli WAAQAYYOO hundinuu akkuma Yosiyaas Mootichi ajajetti ayyaana Faasiikaa ayyaanessuu fi iddoo aarsaa WAAQAYYOO irratti aarsaa gubamu dhi'eessuun guyyuma sana fiixaan ba'e. ¹⁷ Israa'eloonni achi turanis yeruma sana Ayyaana Faasiikaa ayyaaneffatanii Ayyaana Maxinoo guyyaa torba ayyaaneffatan. ¹⁸ Bara Saamu'eel raajichaatii as Israa'el keessatti Faasiikaan takkumaa akkanatti hin ayyaaneffamne; mootota Israa'el keessaas namni tokko iyyuu takkumaa akka Yosiyaas namicha luboota, Lewwotaa fi namoota Yihuudaa fi Israa'el kanneen saba Yerusaalem wajjin turan sana hunda wajjin godhe sanaatti Faasiikaa akkasii hin ayyaaneffanne. ¹⁹ Faasiikaan kun bara mootummaa Yosiyaas keessa waggaa kudha saddeettaffaatti ayyaaneffame.

Yosiyaas Du'uu Isaa

35:20-36:1 kwf - 2Mt 23:28-30

²⁰ Waan kana hunda booddee yeroo Yosiyaas mana qulqullummaa qopheessetti Nekkoon mootichi Gibxi Karkemuishi ishee Efraaxiis biraa sanatti lolaaf ol ba'e; Yosiyaasis of irraa isa deebisuudhaaf itti gad ba'e. ²¹ Nekkoon garuu, "Yaa mootii Yihuudaa, wanni anaa fi si'i wal lolchiisu maali? Ani yeroo kanatti mana na lolu sana loluufin dhufe malee si loluuf hin dhufne. Waaqni akka ani ariifadhu na ajajeera; kanaafuu ati Waaqa na wajjin jiru kanaan mormuu dhiisi; yoo kanaa achii inni si balleessaatii" jedhee namoota itti erge.

²² Ta'us Yosiyaas eenyumaa ofii isaa wallaalchifatee lola keessa seene malee isa irraa hin deebine. Inni waan Nekkoon Waaqaan ajajamee isatti hime sana dhaga'uu didee dirree Megidoo irratti isa waraanuudhaaf ba'e.

²³ Warri xiyya darbatan Yosiyaas Mootichatti ni darbatan; innis ajajjoota loltoota isaatiin, "Na fuudhaatii deemaa; ani akka malee madaa'eeraatii" jedhe. ²⁴ Kanaafuu isaan gaarii isaa keessaa isa fuudhanii gaarii biraa irra kaa'anii gara Yerusaalemitti isa geessan; innis achitti du'e. Innis awwaala abbootii isaa keessatti awwaalame; Yihuudaa fi Yerusaalem hundi isaaf ni boo'an.

²⁵ Ermiyaasis faaruu boo'ichaa Yosiyaasiif baase; hamma har'aattis dhiironnii fi dubartoonni faarfattoonni hundi faaruu boo'ichaa kanaan Yosiyaasiin yaadatu. Kunis Israa'el keessatti bartee ta'ee Faaruu Boo'ichaa keessatti barreeffame.

²⁶ Wannii bara mootummaa Yosiyaas keessa hojjetame biraa fi gaarummaan isaa akkuma waan Seera WAAQAYYOO keessatti barreeffame sanaatti, ²⁷ seenaan isaa hundi jalqabaa hamma dhumaatti kitaaba mootota Israa'elii fi Yihuudaa keessatti barreeffameera.

36

¹ Ergasiis sabni biyya sanaa Yehoo'aahaaz ilma Yosiyaas fuudhanii Yerusaalem keessatti iddoo abbaa isaa buusanii mootii isa godhan.

Yoo'aahaaz Mooticha Yihuudaa

36:2-4 kwf - 2Mt 23:31-34

² Yehoo'aahaaz yeroo mootii ta'etti umuriin isaa waggaa digdamii sadii ture; innis Yerusaalem keessa taa'ee ji'a sadii bulche. ³ Mootiin Gibxi immoo Yerusaalem keessatti teessoo isaa irraa isa buuse; Yihuudaa irrattis gibira meetii taalaantii dhibba tokkoo fi warqee taalaantii tokko mure. ⁴ Mootiin Gibxis Eliiyaaqiim obboleessa Yehoo'aahaaz Yihuudaa fi Yerusaalem irratti mootii godhe; innis maqaa Eliiyaaqiim geeddaree Yehooyaaqiim jedheen. Nekkoonis Yo'ahaz obboleessa Eliiyaaqiim fuudhee Gibxitti geesse.

Yehooyaaqiim Mooticha Yihuudaa

36:5-8 kwf - 2Mt 23:36-24:6

⁵ Yehooyaaqiim yeroo mootii ta'etti umuriin isaa waggaa digdamii shan ture; innis Yerusaalem keessa taa'ee waggaa kudha tokko bulche. Inni fuula WAAQAYYOO Waaqa isaa duratti waan hamaa hojjete. ⁶ Nebukadnezar mootichi Baabilon isatti duule; gara

Baabilonittis isa geessuudhaaf foncaa naasiitiin isa hidhe. ⁷ Nebukadnezar mi'oota mana qulqullummaa WAAQAYYOO guuree Baabilonitti geessee mana waaqeffannaa isaa keessa ni kaa'e.

⁸ Wantoonni bara mootummaa Yehooyaaqiim keessa hojjetaman kanneen biraa, wanni jibbisiisaan inni hojjetee fi balleessaan isa irratti argame hundi kitaaba seenaa mootota Israa'elii fi Yihuudaa keessatti barreeffamaniiru. Ilmi isaa Yehooyaaqiin iddoo isaa bu'ee mootii ta'e.

Yehooyaaqiin Mooticha Yihuudaa

36:9-10 kwf - 2Mt 24:8-17

⁹ Yehooyaaqiin yeroo mootii ta'etti umuriin isaa waggaa kudha saddeet ture; innis Yersaalem keessa taa'ee ji'a sadii fi bultii kudhan bulche. Fuula WAAQAYYOO durattis waan hamaa hojjetee. ¹⁰ Birraa keessas Nebukadnezar Mootichi nama itti ergee mi'oota mana qulqullummaa WAAQAYYOO kanneen gatii guddaa qaban wajjin gara Baabilon isa fichisiise; Zedeqiyaa obboleessa abbaa Yehooyaaqiin sana immoo Yihuudaa fi Yersaalem irratti mootii godhe.

Zedeqiyaa Mooticha Yihuudaa

36:11-16 kwf - 2Mt 24:18-20; Erm 52:1-3

¹¹ Zedeqiyaa yeroo mootii ta'etti nama waggaa digdamii tokkoo ture; innis Yersaalem keessa taa'ee waggaa kudha tokko bulche. ¹² Inni fuula WAAQAYYOO Waaqa isaa duratti waan hamaa ni hojjetee; fuula Ermiyaas raajicha dubbii WAAQAYYOO isatti dubbate sanaa durattis gad of hin qabne. ¹³ Akkasumas Nebukadnezar Mooticha maqaa Waaqaatiin isa kakachiisee turetti illee ni fincile. Inni mataa jabaatee gara WAAQAYYOO Waaqa Israa'elitti deebi'uu ni dide. ¹⁴ Kana malees dura buutonna lubootaa hundii fi uummanni wantoota jibbisiisoo saboota kaanii hunda duukaa bu'uu fi mana qulqullummaa WAAQAYYOO kan inni Yersaalem keessatti qulqulleesse sana xuressuudhaan ittuma caalchisanii amanamummaa dhaban.

Kufaatii Yersaalem

36:17-20 kwf - 2Mt 25:1-21; Erm 52:4-27

36:22-23 kwf - Izr 1:1-3

¹⁵ WAAQAYYOO Waaqni abbootii isaanii waan saba isaa fi iddoo jireenya isaaf garaa laafeef karaa ergamoota isaatiin ammumaa amma ergaa itti erge. ¹⁶ Isaan garuu ergamoota Waaqaatti qoosan; dubbii isaas tuffatanii raajota isaa xinneessan. Kanaanis dheekkamsi WAAQAYYOO saba isaatti ni bu'e; wanni isa qabbaneessan hin argamne. ¹⁷ Kanaafuu inni mootii warra Baabilon isaanitti fide; mootichis mana qulqullummaa keessatti dargaggoota isaanii goraadeedhaan fixe; dargaggoota yookaan dubara, jaarsolii yookaan warra dullooman tokko illee hin hambifne. Waaqni hunda isaanii dabarsee harka Nebukadnezaritti kenne. ¹⁸ Innis mana qulqullummaa Waaqaatii mi'oota hunda xinnaa fi guddaa, qabeenya mana qulqullummaa WAAQAYYOO, qabeenya mootichaa fi kan qondaaltota isaa saamee Baabilonitti geesse. ¹⁹ Isaan mana qulqullummaa Waaqaatti ibidda qabsiisanii dallaa Yersaalem diigan; masaraawwan mootummaa hunda gubanii waan gatii qabu hundas barbadeessan.

²⁰ Inni hambaa goraadee irraa hafe booji'ee Baabilonitti geesse; isaanis hamma mootummaan Faares aangoo qabatetti tajaajiltoota isaa fi tajaajiltoota ilmaan isaa ta'an. ²¹ Biyyattiin boqonnaa sanbata ishee ni argatte; akka dubbiin WAAQAYYOO kan afaan Ermiyaasiin dubbatame raawwatamuuf hamma waggaan torbaatamni dhumutti biyyattiin yeroo ontee turte guutuu ni boqotte.

²² WAAQAYYOO akka dubbiin WAAQAYYOO kan afaan Ermiyaasiin dubbatame sun raawwatamuuf jedhee bara Qiros mooticha Faares keessa waggaa jalqabaatti akka inni mootummaa isaa hunda keessa labsii tokko dabarsuu fi akka labsiin sunis barreeffamuuf hafuura Qiros mooticha Faares ni kakaase; labsiin sunis akkana jedha:

²³ "Qiros mootichi Faares akkana jedha:

"WAAQAYYOO Waaqni samii mootummoota lafa irraa hunda naaf kenneera; akka ani Yihuudaa keessatti Yersaalemitti mana qulqullummaa isaaf ijaaruufts na muudeera. Saba isaa keessaa nama gidduu keessanitti argamu kam iyyuu WAAQAYYOO Waaqni isaa isa wajjin haa ta'u; innis ol haa ba'u."

Kitaaba Izraa

Labsii Qiros

1:1-3 kwf - 2Sn 36:22-23

¹ WAAQAYYO akka dubbii WAAQAYYOO kan afaan Ermiyaasiin dubbatame sun raawwatamuuf jedhee bara Qiros mooticha Faares keessa waggaa jalqabaatti akka inni mootummaa isaa hunda keessa labsii tokko dabarsuu fi akka labsiin sunis barreeffamuuf hafuura Qiros mooticha Faares ni kakaase; labsiin sunis akkana jedha:

² “Qiros mootichi Faares akkana jedha:

“WAAQAYYO Waaqni samii mootummoota lafa irraa hunda naaf kenneera; akka ani Yihuudaa keessatti Yersaaleemitti mana qulqullummaa isaaf ijaaruufis na muudeera.

³ Saba isaa keessaa nama gidduu keessanitti argamu kam iyyuu Waaqni isaa isa wajjin haa ta’u; innis gara Yersaaleem ishee Yihuudaa keessaa sanaa ol ba’ee mana qulqullummaa WAAQAYYO Waaqa Israa’el, Waaqa Yersaaleem keessa jiraatu sanaa haa ijaaru. ⁴ Warra hafanii iddoo kam iyyuu jiraatan hundaaf sabni biyya isaan keessa jiraatan sanaa kennaa fedhiidhaan mana qulqullummaa Waaqaa kan Yersaaleem keessa jiru sanaaf kennuu irratti dabalee meetii fi warqee, mi’aa fi horii gumaachuudhaan isa haa gargaaran.”

⁵ Ergasii hangafooni maatii Yihuudaa fi Beniyaam, luboonnii fi Lewwonni jechuunis namoonni Waaqni garaa isaanii kakaase hundi dhaqanii mana WAAQAYYOO kan Yersaaleem keessaa sana ijaaruuf qophaa’an. ⁶ Ollooni isaanii hundinuus kennaa fedhiidhaan kennan irratti dabalani mi’a meetii fi warqee, qodaa fi horii akkasumas kennaawwan gatii guddaa baasan gumaachuudhaan isaan gargaaran.

⁷ Kana malees Qiros Mootichi mi’oota mana qulqullummaa WAAQAYYOO kanneen Nebukadnezar Yersaaleemii guurratee mana Waaqa isaa keessa kaa’atee ture sana gad ni baase. ⁸ Qiros mootichi Faares akka Mitredaat itti gaafatamaan qabeenyaa sun mi’a sana fidee Sheeshbazaar bulchaa Yihuudaatiif lakkaa’u godhe.

⁹ Mi’oonni sunis:

saanii warqee 30,
saanii meetii 1,000,
distii meetii 29,

¹⁰ waciitii warqee 30,
waciitii meetii kan qadaada qabu 410,
mi’a gosa biraa 1,000.

¹¹ Walumaa galatti mi’a warqetii fi kan meetii 54,000 ture.

Sheeshbazaaris mi’oota kanneen hunda yeroo booji’amtoota Baabilonii baasee Yersaaleemitti geessetti guuree deeme.

2

Maqaa Namoota Boojuudhaa Deebi’anii

2:1-70 kwf - Nah 7:6-73

¹ Egaa isaan kunneen namoota kutaa biyya sanaa warra boojuu Nebukadnezar mootichi Baabilon sun booji’ee Baabilonitti isaan geessee ture sanaa deebi’anii dha; isaanis Yersaaleemii fi Yihuudaatti deebi’anii tokkoon tokkoon isaanii magaalaa ofii isaaniitti galan; ² isaanis: Zarubaabel, Yeeshuu’aa, Nahimiyaa, Seraayaa, Re’elaayaa, Mordekaayi, Bilshaan, Misphaar, Baguwaayi, Rehuumii fi Ba’anaa wajjin dhufan.

Maqaa namoota saba Israa’el ta’anii:

³ sanyiin Phaaroosh 2,172,

⁴ sanyiin Shefaaxiyaa 372,

⁵ sanyiin Araa 775,

⁶ sanyiin Fahat Mo’aab warri karaa Yeeshu’aa fi Yoo’aab dhalatan 2,812,

⁷ sanyiin Eelaam 1,254,

- 8 sanyiin Zaatuu 945,
 9 sanyiin Zakaayi 760,
 10 sanyiin Baanii 642,
 11 sanyiin Beebay 623,
 12 sanyiin Azgaad 1,222,
 13 sanyiin Adooniiqaam 666,
 14 sanyiin Baguwaay 2,056,
 15 sanyiin Aadiin 454,
 16 sanyiin Ateer warri karaa Hisqiyaa 98,
 17 sanyiin Beesaay 323,
 18 sanyiin Yooraa 112,
 19 sanyiin Haashum 223,
 20 sanyiin Gibaar 95,
 21 namoonni Beetlihem 123,
 22 namoonni Netoofaa 56,
 23 namoonni Anaatoot 128,
 24 namoonni Azmaawet 42,
 25 namoonni Kiriyaati Ye'aariim, kan Kefiiraatii fi Bi'eeroo 743,
 26 namoonni Raamaa fi Gebaa 621,
 27 namoonni Mikmaas 122,
 28 Namoonni Beet'eelii fi Aayi 223,
 29 namoonni Neboo 52,
 30 namoonni Magbiish 156,
 31 namoonni Elaam kaan 1,254,
 32 namoonni Haariim 320,
 33 namoonni Lood, kan Haadiidii fi Oonoom 725,
 34 namoonni Yerikoo 345,
 35 namoonni Senaa'aa 3,630.

36 Luboota:

- Sanyiin Yedaa'iyaa warri karaa maatii Yeeshuu'aan dhufan 973,
 37 sanyiin Imeer 1,052,
 38 sanyiin Phaashihuur 1,247,
 39 sanyiin Haariim 1,017.

40 Lewwota:

- Sanyiin Yeeshuu'aa fi Qadmii'eel, karaa Hoodayiwaa dhufan 74.

41 Faarfattoota:

- sanyiin Asaaf 128.

42 Eegdota karra mana qulqullummaa:

- sanyiin Shaluum, sanyiin Ateer,
 sanyiin Talmoon, sanyiin Aquub,
 sanyiin Haxiixaa fi sanyiin Soobaay 139.

43 Tajaajiltoota mana qulqullummaa:

- sanyii Ziihaa, sanyii Hasuufaa fi sanyii Xabaa'oot,
 44 sanyii Keeroos, sanyii Sii'aa, sanyii Faadon;
 45 sanyii Lebaanaa, sanyii Hagaabaa fi sanyii Aquub;
 46 sanyii Haagaab, sanyii Shalmaayi, sanyii Haanaan;
 47 sanyii Gideel, sanyii Gahar, sanyii Re'aayaa;
 48 sanyii Reziin, sanyii Neqoodaa, sanyii Gazaam;
 49 sanyii Uzaa, sanyii Faasehaa, sanyii Beesaay;
 50 sanyii Asinaa, sanyii Me'uunimii fi sanyii Nefuusiim;
 51 sanyii Baqbuuq, sanyii Haquufaa, sanyii Harhuur;
 52 sanyii Bazluut, sanyii Mihiidaa fi sanyii Harshaa;
 53 sanyii Barqoos, sanyii Siisaaraa fi sanyii Teemahi;
 54 sanyii Neziyyaa fi sanyii Haxiifaa

55 Sanyii tajaajiltoota Solomoon:

- Sanyii Soxaayi,
 sanyii Sofereetii fi sanyii Firuudaa;

⁵⁶ sanyii Ya'ila, sanyii Darqoonii fi sanyii Gideel;

⁵⁷ sanyii Shefaaxiyaa, sanyii Haxiil,
sanyii Fookeret-Hazbaayimii fi sanyii Aamii;

⁵⁸ tajaajiltoota mana qulqullummaatii fi sanyiin tajaajiltoota Solomoon 392.

⁵⁹ Warri armaan gadiis magaalaawwan Teel Melaa, Teel Hareshaa, Kiruub, Adaanii fi Imeeritiiti dhufan; isaan garuu akka maatiin isaanii sanyii Israa'el ta'an mirkaneessuu hin dandeenye; isaanis:

⁶⁰ sanyiin Delaayaa, sanyiin Xoobbiyaa fi sanyiin Neqoodaa 652.

⁶¹ Luboota keessaa immoo:

Sanyii Habayaa, sanyii Haqoosii fi kan Barzilaay; Barzilaayiin kun sababii intala Barzilaay namicha Gili'aad sanaa fuudheef maqaa kanaan waamame.

⁶² Isaan kunneen sababii galmee hidda dhalootaa keessaa maqaa maatii isaanii barbaadani dhabaniif akka xuraa'otaatti ilaalamanii tajaajila lubummaa dhowwaman. ⁶³ Bulchaan biyyattiis hamma lubni Uriimii fi Tumiimiidhaan tajaajilu tokko argamutti akka isaan nyaata nyaata hunda caalaa qulqulluu ta'e kam iyyuu hin nyaanneef isaan ajaje.

⁶⁴ Warri bojuudhaa deebi'an walumaa galatti namoota 42,360 turan; ⁶⁵ kana malees tajaajiltoonni isaanii dhiiraa fi dubartiin 7,337 turan; akkasumas isaan faarfattoota dhiiraa fi dubartii 200 qabu ture. ⁶⁶ Isaan farda 736, gaangolii 245, ⁶⁷ gaala 435 fi harree 6,720 qabu ture.

⁶⁸ Yommuu isaan mana WAAQAYYOO kan Yerusaalem keessa jiru sana ga'anitti hangafoonni maatiiwwanii tokko tokko akka manni Waaqaa iddoo isaatti deebi'ee ijaaramuuf kennaa fedhiidhaan kennamu ni gumaachan. ⁶⁹ Isaanis akkuma dandeeitti isaanii warqee daariikii* 61,000, meetii minnaanii† 5,000 fi uffata lubootaa 100 horii hojii kanaaf walitti qabametti ni dabalalan.

⁷⁰ Luboonni, Lewwonnii, faarfattoonni, eegdonni karraa fi tajaajiltoonni mana qulqullummaa namoota tokko tokko wajjin magaalaawwan ofii isaanii keessa qubatan; Israa'eloonni kaan magaalaawwan ofii isaanii keessa qubatan.

3

Iddoo Aarsaa Deebisanii Tolchuu

¹ Yeroo ji'i torbaffaan dhufee Israa'eloonni magaalaawwan isaanii keessa qubatanitti uummanni akkuma nama tokkootti Yerusaalem keessatti walitti qabame. ² Ergasiis Yeeshuu'aan ilmi Yoozaadaaq firoota isaa luboota wajjin, Zarubaabel ilmi She'altii'eel firoota isaa wajjin akkuma Seera Musee nama Waaqaa sanaa keessatti barreeffametti aarsaa gubamu achi irratti dhi'eessuudhaaf iddoo aarsaa Waaqaa Israa'el ijaaran. ³ Isaanis sababii namoota naannoo isaanii sodaataniif iddoo aarsaa sana hundee isaa irratti ijaaranii achi irratti aarsaa gubamu WAAQAYYOOOF dhi'eessan; aarsaa kanas ganamaa fi galgala dhi'eessan. ⁴ Ergasii akkuma barreeffametti Ayyaana Daasii ni ayyaaneffatan; akkuma baay'ina aarsaa guyyaa guyyaaf ramadameettis aarsaa gubamu ni dhi'eessan. ⁵ Kana booddees isaan aarsaa gubamu kan yeroo yerootti dhi'eeffamu, aarsaa Baatii Haaraa fi aarsaawwan ayyaanota WAAQAYYOOOF qulqulleeffaman hundaaf, akkasumas kanneen fedhiidhaan WAAQAYYOOOF dhi'eeffaman ni kennan. ⁶ Guyyaa jalqaba ji'a torbaffaattis aarsaa gubamu WAAQAYYOOOF dhi'eessuu jalqaban; garuu hundeen mana qulqullummaa WAAQAYYOO amma illee hin buufamne ture.

Mana Qulqullummaa Deebisanii Ijaaruu

⁷ Ergasii isaan warra dhagaa cabsanii fi ogeeyyii hojii mukaatiif maallaqa kennan; warra Siidoonaa fi Xiirrosiif immoo akka isaan akkuma Qiiros mootichi Faares ajaje sanatti Libaanoonni gara Yoopheetti galaana irra birbirsaa gad erganiif nyaata, dhugaatii fi zayitii kennan.

⁸ Isaanis erga mana Waaqaa kan Yerusaalem keessaa sana ga'anii booddee ji'a lammaffaa waggaa lammaffaatti Zarubaabel ilmi She'altii'eel, Yeeshuu'aan ilmi Yoozaadaaqii fi obboloonni isaanii kaan jechuunis luboonni, Lewwonnii fi warri bojuudhaa Yerusaalemitti deebi'an hundinuu akka isaan ijaarsa mana WAAQAYYOO to'ataniif Lewwota umuriin isaanii Waggaa digdamaa fi hammasii olii muudanii hojii sana

* 2:69 2:69 Daariikiin tokko giraamii 8. † 2:69 2:69 Minnaaniin tokko giraamii 600.

jalqaban. ⁹ Yeeshuu'aan ilmaan isaa fi obboloota isaa wajjin, Qadmii'eelii fi ilmaan isaa, ilmaan Yihuudaa, ilmaan Heenaadaadii fi Lewwota, ilmaan isaanii fi firoota isaanii wajjin warra Waaqaa ijaaran to'achuuf tokko ta'an.

¹⁰ Yommuu ijaartoonni sun hundee mana qulqullummaa WAAQAYYOO buusanitti luboonni uffata isaanii uffatanii malakata qabatan; Lewwonnii immoo jechuunis ilmaan Aaaf kilillee qabatanii akkuma Daawit Mootichi Israa'el ajajetti WAAQAYYON jajachuuf iddoo ofii isaanii qabatan. ¹¹ Isaanis, "Inni gaarii dha;

jaalalli inni Israa'eliif qabu bara baraan jiraata" jedhanii leellisuu fi galateeffachuudhaan WAAQAYYON faarfatan. Sabni hundinuu sababii hundeen mana qulqullummaa WAAQAYYOO buufameef iyee sagalee guddaa-dhaan WAAQAYYON galateeffate. ¹² Garuu luboonni, Lewwonnii fi hangafooni maatii warri durii kanneen mana qulqullummaa isa duraa sana argan hedduun yeroo hundeen mana qulqullummaa kanaa buufama arganitti sagalee ol fudhatanii boo'an; warri kaan hedduun immoo gammachuudhaan iyyan. ¹³ Sababii namoonni akka malee wacaniif namni tokko iyyuu iyya gammachuu fi iyya boo'ichaa gargar baasuu hin dandeenye; sagaleen sunis fagootti dhaga'ama ture.

4

Mormii Ijaarsa Mana Qulqullummaa Mudate

¹ Diinonni Yihuudaa fi Beniyaam yeroo akka warri bojuudhaa deebi'an sun WAAQAYYOO Waaqa Israa'eliif mana qulqullummaa ijaaraa jiran dhaga'anitti, ² gara Zarubaabelii fi gara hangafooni maatiiwwanii dhufanii akkana jedhanii; "Sababii nus akkuma keessan Waaqa keessan barbaannee bara Eesarhadoon mooticha Asoor kan as nu fide sanaatii jalqabnee aarsaa dhi'eessafii turreef nus isin wajjin haa ijaarru."

³ Zarubaabel, Yeeshuu'aa fi hangafooni maatii Israa'el kaan garuu, "Isin mana Waaqa keenyaa nu wajjin ijaaruuf qooda hin qabdan. Numa qofatu akkuma Qiros Mootichi Faares nu ajaje sanatti WAAQAYYOO Waaqa Israa'eliif mana qulqullummaa ijaara" jedhanii deebisan.

⁴ Namoonni naannoo isaanii akka isaan itti fufanii ijaaruu sodaataniif namoota Yihuudaa abdi kutachiisuuf ka'an. ⁵ Isaanis bara Qiros mooticha Faaresiitii jalqabee hamma bara Daariyoos mooticha Faaresitti jiru hunda kaayyoo isaanii gufachiisuudhaaf qondaaltota isaaniiin morman itti bitan.

Mormii Bara Ahashweroosii fi Arxeksis Keessa Ture

⁶ Isaanis jalqaba bara mootummaa Ahashweroositti saba Yihuudaa fi kan Yersaalem himatan.

⁷ Bara Arxeksis mooticha Faares keessa Biishlaam, Mitredaat, Xaabi'eelii fi michoota isaa biraa xalayaa tokko Arxeksisitti barreessan. Xalayaan sunis qubee Araamaayikii fi afaan Araamaayikiin barreeffame.

⁸ Rehuum ajajaan qondaaltichii fi Shiimshaayi barreessaan sun Yersaalemiin mormuudhaan akkana jedhanii xalayaa tokko Arxeksis mootichatti barreessan:

⁹ Rehuum ajajaan qondaaltichi, Shiimshaayi barreessaa fi michoota isaanii kaan wajjin jechuunis abbootii murtii fi qondaaltota namoota Tiripooliis, Faaresi, Arkii fi Baabilon dhufan, akkasumas warra Elaamota Suusaa dhufan bulchani fi ¹⁰ namoota Osnaapher guddichii fi kabajamaan sun biyyaa baasee magaalaa Samaariyaa keessaa fi Laga Efraaxiis gama qubachiise kaan wajjin barreessan.

¹¹ Kun garagalcha xalayaa jarri isaaf erganii ti.

Gara Arxeksis Mootichaa,

tajaajiltoota kee warra Laga Efraaxiisiin Gamaa irraa:

¹² Mootichi akka Yihuudoonni si biraa gara keenya dhufan sun Yersaalem dhaqanii magaalaa finciltuu fi hamtuu sana deebisanii ijaaraa jiran beekuu qaba. Isaan dallaa dhagaa deebisanii ijaaruudhaan hundeeffan ishee jajjabeessaa jiru.

¹³ Kana malee iyyuu mootichi akka yoo magaalaa kun ijaaramtee dallaan ishee jajjabeeffame akka si'achi qaraxni, gibirri yookaan ashuraan hin argamnee fi akka galiin mootummaa gad bu'u beekuu qaba. ¹⁴ Nu amma waan itti gaafatamummaa masaraa mootummaa qabnuu fi waan akka mootichi ulfina dhabu arguu hin feeneef akka mootichi beekuuf jennee ergaa kana itti ergineerra; ¹⁵ kunis akka manneen galmee abbootii keetii sakatta'amaniif. Atis galmeeffan kana keessatti akka magaalaa kun durumaa jalqabdee magaalaa finciltuu, kan moototaa fi kutaalee biyyaa rakkiftu, iddoo finciltuu taate ni argita. Wannii magaalaa kun barbadeeffamteefis

kanuma. ¹⁶ Yaa mooticha, yoo magalaan kun ijaaramee dallaan isaas jajjabeeffame, akka ati Laga Efraaxiis Gamaa waan tokko illee hin qabaanne nu sitti himna.

¹⁷ Mootichis akkana jedhee deebii kana erge:

Gara Rehuum ajajaa qondaaltichaa, Shiimshaayi barreessaa fi michoota isaanii kanneen Samaariyaa keessaa fi Efraaxiisiin gama jiraatan kaaniitti:

Nagaan keenya isin haa ga' u.

¹⁸ Xalayaan isin nuuf ergitan sun dubbifamee fuuluma koo duratti hiikameera.

¹⁹ Anis ajaja kennee galmeen qoratameera; magalaan kunis akka durumaa jalqabee moototatti fincilaa turte, akka isheen holqa finciltootaa fi mormitootaa taates beekameera. ²⁰ Yerusaleem mootota ciccimoo guutummaa Gama Laga Efraaxiis bulchan qabdi turte; qaraxni, gibirrii fi ashuuraan isaaniif kennama ture. ²¹ Akka magalaan kun deebifamtee hin ijaaramne hamma ani labsii baasutti akka isaan hojii dhaabaniif isin amma namoota kanneenitti ajaja dabarsaa. ²² Akka waan kana hin tuffanneef of eeggadhaa. Maaliif hamma rakkoon kun guddatee fedhii mootummaatti gufuu ta'utti ittuma dhiiftuu?

²³ Akkuma garagalchi xalayaa Arxeksis Mootichaa sun fuula Rehuum, Shiimshaayi barreessaa fi michoota isaanii duratti dubbifameen isaan yoosuma gara Yihuudoota Yerusaleem keessa jiraatanii dhaqanii humnaan hojii isaan dhaabsisan.

²⁴ Akkasiin hojiin mana Waaqaa kan Yerusaleem keessaa sun hamma waggaa lammaffaa bara Daariyoos mooticha Faaresitti ni dhaabatte.

5

Xalayaa Taatenaayi Daariyoositti Erge

¹ Yeroo kanatti Haageen raajichii fi Zakkaariyaas ilmi Iddoo raajichi, maqaa Waaqa Israa'el kan isaan wajjin jiraatu sanaan Yihuudoota warra Yihuudaa fi Yerusaleem keessa jiranitti raajii dubbatan. ² Kana irratti Zarubaabel ilmi She'altii'eeelii fi Iyyaasuun ilmi Yoosaadaaq Yerusaleem keessatti mana Waaqaa deebisanii ijaaruu jalqaban. Raajonni Waaqaas isaan gargaaruuf isaanuma wajjin turan.

³ Yeroo sanatti Taatenaayi bulchaan Gama Laga Efraaxiis, Satarbuznaayii fi deeggartoonni isaanii gara isaanii dhaqanii, "Akka isin mana qulqullummaa kana deebifanii ijaartanii fi akka isin dallaa dhagaa kanas akka duriitti deebifan eenyutu isiniif eeyyame?" jedhanii gaafatan. ⁴ Akkasumas, "Maqaan warra mana kana ijaaruu enyu fa'it?" jedhanii gaafatan. ⁵ Garuu iji Waaqa isaanii maanguddoota Yihuudaa irra turte; isaanis hamma gabaasni sun Daariyoos bira ga'ee deebiin isaa barreeffamaan dhufutti hojii hin dhaabne.

⁶ Kunis garagalchaa xalayaa Taatenaayi bulchaan Gama Laga Efraaxiis, Satarbuznaayi, deeggartoonni isaanii fi qondaaltonni Gama Laga Efraaxiis jiraatan Daariyoos Mootichatti erganii ti. ⁷ Gabaasni isaan erganiif sunis akkana jedha:

Gara Daariyoos Mootichaa:

Nagaa ulfinaan guutame siif ergina.

⁸ Mootichi akka nu gara aanaa Yihuudaa gara mana qulqullummaa Waaqa guddichaa dhaqnee turre haa beeku. Namoonni dhagaa gurguddaadhaan mana sana ijaaraa, laaxaas keenyan manaa keessa kaa'aa jiru. Hojiin kunis ciminaan hojjetamaa harka isaanii jalatti guddina argisiisaa jira.

⁹ Nu maanguddoota sana dubbifnee, "Eenyutu akka isin mana qulqullummaa kana deebifanii ijaartanii fi akka isin ijaarsa isaa akka duriitti deebifan isiniif eeyyame?" jennee isaan gaafanne. ¹⁰ Akkasumas akka maqaa hooggantoota isaanii barreessinee si beeksifnuuf maqaa isaanii illee gaafannee ture.

¹¹ Isaanis deebii kana nuu kennan:

"Nu garboota Waaqa samii fi lafaa ti; nu mana qulqullummaa kan bara dheeraan dura ijaarama, kan mootiin Israa'el guddichi ijaaree fixe sana deebifnee ijaaraa jirra. ¹² Garuu sababii abbootiin keenya Waaqa samii aarsaniif inni dabarsee harka Nebukadnezar namicha biyya Kaldootaa, mootii Baabilonitti isaan kenne; innis mana qulqullummaa kana barbadeessee uummatas biyyaa baasee Baabilonitti geesse.

¹³ "Ta'u illee waggaa tokkoffaa bara mootummaa Qiros mooticha Baabilon keessa Qiros Mootichi akka manni Waaqaa kun deebifame ijaaramuuf labsii tokko labse. ¹⁴ Innis mi'a warqee fi meetii mana Waaqaa kan Nebukadnezar mana qulqullummaa Yerusaleem keessaa guuree Baabilonitti geesse sana masaraa mootummaa Baabilon keessaa ni baase. Qiros Mootichi namicha Sheeshbasaar jedhamu kan inni bulchaa

godhee muude sanatti mi'a kana kennee ¹⁵ akkana jedheen; 'Mi'a kana fuudhii dhaqiitii mana qulqullummaa kan Yerusaalem keessa jiru sanatti galchi. Mana Waaqaas iddoo isaatti deebisii ijaari.'

¹⁶ "Ergasii Sheeshbasaar kun dhufee hundee mana Waaqaa kan Yerusaalem keessaa buuse. Yeroo sanaa jalqabee hamma ammaatti manni sun ijaaramaa jira; garuu amma illee hin dhumne."

¹⁷ Egaa amma yoo fedhii mootichaa ta'e, Qiros Mootichi dhugumaan akka manni Waaqaa kun Yerusaalem keessatti deebifamee ijaaramuuf labsii baasuu fi baasuu baachuu isaa beekuuf galmeen masaraa mootummaa Baabilon haa qoratamu. Ergasii mootichi yaada waan kana irratti qabu nuuf haa ergu.

6

Labsii Daariyoos

¹ Kana irratti Daariyoos Mootichi ajaja kenne; isaanis galmeewwan mana galmee Baabilon keessatti kuufaman sana ni sakatta'an. ² Kitaabni maramaan tokkos Ahimetaa magaalaa guddaa kutaa biyyaa Meedee keessatti argame; kitaaba sana irrattis akkana jedhamee barreeffamee ture:

Yaadachiisa:

³ Waggaa tokkoffaa bara mootummaa Qiros Mootichaa keessa mootichi waa'ee mana qulqullummaa Waaqaa kan Yerusaalem keessa jiru sanaa akkana jedhee labsii baase:

Manni qulqullummaa kun iddoo aarsaan itti dhi'effamu ta'ee deebifamee haa ijaaramu; hundeen isaas haa buufamu. Manni kunis ol dheerina dhundhuma jaatamaa fi bal'ina dhundhuma jaatama qabaatee ⁴ dhagaa gurguddaa toora sadii sadii fi muka toora tokko tokkoon haa ijaaramu. Baasiin hundinuus qabeenya mootummaa keessaa baafamuu qaba. ⁵ Akkasumas mi'i warqee fi meetii mana Waaqaa kan Nebukadnezar mana qulqullummaa kan Yerusaalem keessaatii Baabilonitti fide sun iddoo isaanitti jechuunis mana qulqullummaa kan Yerusaalemitti deebifamanii mana Waaqaa keessa kuufamu qabu.

⁶ Egaa ati Taatenaayi bulchaan Gama Laga Efraaxiis, Satarbuznaayii fi isin michoota isaanii qondaaltonni kutaa biyya sanaa achii fagaadhaa. ⁷ Isin hojii mana qulqullummaa Waaqaa kana keessa hin seeninaa. Bulchaan Yihuudootaa fi maanguddoonni Yihuudootaa mana Waaqaa kana iddoo isaatti deebisanii haa ijaaran.

⁸ Kana irratti ani waan isin ijaarsa mana Waaqaa kana keessatti maanguddoota Yihuudootaa kanneeniif gochuu qabdan kunoo nan labsa:

Akka hojiin hin dhaabanneef baasiin namoota kanaa guutummaan guutuutti qabeenya mootummaa irraa jechuunis gibira Gama Laga Efraaxiisii walitti qabamu keessaa haa baafamu. ⁹ Wanni barbaachisu kam iyyuu jechuunis jiboanni, korbeeyyiinii fi xobbaallaawwan hoolaa Waaqa samiitiif aarsaa gubamu ta'anii dhi'effaman, akkasumas qamadiin, soogiddi, daadhiin wayinii fi zayitiin akkuma luboonni Yerusaalem keessa jiraatan barbaadanitti utuu gargar hin citin guyyaa guyyaadhaan isaaniif kennamuu qabu; ¹⁰ kunis akka isaan aarsaa Waaqa samiitti tolu dhi'eessanii fi akka isaan jireenya mootichaa fi ilmaan isaatiif Waaqa kadhataniifii dha.

¹¹ Kana caalaa iyyuu yoo namni kam iyyuu ajaja kana dide, ani akka utubaan mana isaa keessaa buqqifamee inni irratti fannifamu labsii kana labseera. Sababii yakka kanaatiif manni isaa tuulaa kosii ni ta'a. ¹² Waaqni inni akka Maqaan isaa achi jiraatu godhe sun mootii yookaan saba labsii kana geeddaruuf yookaan mana qulqullummaa kan Yerusaalem keessaa barbadeessuuf harka ol fudhatu kam iyyuu haa balleessu.

Ani Daariyoos labsii kana labseera. Wanni kunis ariitiidhaan hojii irra haa oolu.

Manni Qulqullummaa Xumuramee Eebifame

¹³ Ergasii Taatenaayi bulchaan biyya Gama Laga Efraaxiis, Satarbuznaayii fi michoonni isaanii akkuma Daariyoos Mootichi labsetti labsii sana ariitiidhaan hojii irra ni oolchan. ¹⁴ Kanaafuu maanguddoonni Yihuudootaa lallaba Haagee raajichaatii fi Zakkaariyaas ilma Iddootiin ijaarsa itti fufan; hojiinis ni milkaa'eef. Isaanis akkuma ajaja Waaqa Israa'elii fi akkuma labsiwwan Qiros, Daariyoosii fi Arxeksis mootota Faaresitti ijaarsa mana qulqullummaa sana ni xumuran. ¹⁵ Manni qulqullummaa sunis

waggaa ja'affaa bara Daariyoos Mootichaa keessa, bultii sadaffaa ji'a Adaaritti ijaaramee dhume.

¹⁶ Ergasii sabni Israa'el jechuunis luboonni, Lewwonni fi booji'amtoonni hafan ayyaana eebba mana Waaqaa gammachuudhaan ayyaaneffatan. ¹⁷ Eebba mana Waaqaa kanaafis jiboota dhibba tokko, korbeeyyii hoolaa dhibba lamaa fi xobbaallaa hoolaa dhibba afur kennan; sababii cubbuu Israa'el hundaaf immoo korbeeyyii re'ee kubbuu lama jechuunis tokkoo tokkoo gosa Israa'eliif re'ee tokko tokko dhi'eessan. ¹⁸ Ergasii immoo akkuma Kitaaba Musee keessatti barreeffametti tajaajila mana Waaqaa kan Yerusaaalem keessaa sanaaf luboota kutaa kutaa isaanitti, Lewwota immoo garee garee isaanitti ramadan.

Faasiikaa

¹⁹ Booji'amtoonnis guyyaa kudha afuraffaa ji'a jalqabaatti Faasiikaa ni ayyaaneffatan. ²⁰ Luboonni fi Lewwonni of qulqulleessanii hundi isaanii akka seeraatti ni qulqullaa'an. Lewwonni warra booji'aman hundaaf, obboloota isaanii lubootaa fi ofii isaaniiif hoolaa Faasiikaa qalan. ²¹ Kanaafuu Israa'eloonni boojiudhaa deebi'an namoota WAAQAYYO Waaqa Israa'el barbaaduudhaaf hojii xuraa'ummaa kan Namoota Ormaa kanneen ollaa isaanii jiraatan sanaa lagatan hunda wajjin Faasiikaa sana ni nyaatan. ²² Sababii WAAQAYYO akka inni hojii ijaarsa mana Waaqayyo Waaqa Israa'el keessatti isaan gargaaruudhaaf yaada mootii Asoor geeddaruudhaan gammachuudhaan isaan guuteef isaan bultii torba guutuu Ayyaana Maxinoo Buddeena gammachuudhaan ayyaaneffatan.

7

Izraan Yerusaaalem Dhufe

¹ Wantoota kanneen booddee bara Arxeksis mooticha Faares keessa Izraan ilmi Seraayaa, ilmi Azaariyaa ilmi Hilqiyaa, ² ilmi Shaluum, ilmi Zaadoq, ilmi Ahiixuub, ³ ilmi Amariyaa, ilmi Azaariyaa, ilmi Meraayoot, ⁴ ilmi Zeraayaa, ilmi Uzii, ilmi Bukii, ⁵ ilmi Abiishuuwaa, ilmi Fiinehaas, ilmi Ele'aazaar, ilmi Aroon lubicha ol aanaa ⁶ Izraan kun Baabilonii dhufe. Innis barsiisaa Seera Musee kan WAAQAYYO Waqni Israa'el kenne sana sirriitti beekuu dha. Sababii harki WAAQAYYO Waaqa isaa isa irra tureef mootichi waan inni kadhate hunda ni kenneef. ⁷ Akkasumas waggaa torbaffaa bara Arxeksis Mootichaa keessa Israa'eloonni tokko tokko jechuunis luboonni, Lewwonni, faarfattoonni, eegdonni karraa fi tajaajiltoonni mana qulqullummaa gara Yerusaaalemitti ol ba'an.

⁸ Izraanis waggaa torbaffaa bara mootii sanaa keessa ji'a shanaffaatti Yerusaaalem ga'e. ⁹ Innis bultii tokkoffaa ji'a jalqabaatti karaa isaa Baabilonii jalqabee bultii tokkoffaa ji'a shanaffaatti Yerusaaalem ga'e; harki Waaqa isaa tolaan sun isa irra tureetii. ¹⁰ Izraan Seera WAAQAYYOO qu'achuu fi eeguudhaaf akkasumas labsii fi ajaja seerichaa Israa'el keessatti barsiisuudhaaf of kennee tureetii.

Xalayaa Arxeksis Mootichi Izraati Erge

¹¹ Kun garagalcha xalayaa Arxeksis Mootichi Izraa lubichaa fi barsiisaa, namicha waa'ee ajajaa fi labsiwwan WAAQAYYO Israa'eliif kenne sanaa baratetti ergee ti:

¹² Arxeksis mootii moototaa irraa;

Gara Izraa lubicha, barsiisaa Seera Waaqa samiitti:

Nagaan siif haa ta'u.

¹³ Ani amma akka namni Israa'el kan mootummaa koo keessa jiraatu kam iyyuu luboonni fi Lewwonni illee abbaan si wajjin Yerusaaalem dhaquu barbaadu dhaquu danda'u labseera. ¹⁴ Ati akka akkuma Seera Waaqa keetii kan harka kee jiru sanaatti waa'ee Yihuudaa fi Yerusaaalem qorattuuf mootichaa fi gorsitoota isaa torbaan ergamteerta. ¹⁵ Kana irrattis meetii fi warqee mootichii fi gorsitoonni isaa Waaqa Israa'el kan Yerusaaalem keessa jiraatuuf tolaa kennan sana fuudhii deemi; ¹⁶ waan kanas meetii fi warqee kutaa biyya Baabiloniitii walitti qabde hundaa fi kennaa sabnii fi luboonni mana qulqullummaa Waaqa isaanii kan Yerusaaalem keessaaf fedhiidhaan kennan wajjin fuudhii dhaqi. ¹⁷ Maallaqa kanaanis jiboota, korbeeyyii hoolaa fi xobbaallaa hoolaa, kenna midhaanii fi dhibaayyuu isaanii wajjin bitaati iddoo aarsaa mana qulqullummaa Waaqa keessanii kan Yerusaaalem sana irratti dhi'eessaa.

¹⁸ Ergasii atii fi obboloonni kee Yihuudoonni meetii fi warqee hafte akkuma fedhii Waaqa keessaniitti waanuma gaarii isinitti fakkaate irra oolchaa. ¹⁹ Mi'a waaqeffannaa mana qulqullummaa Waaqa keetii keessaaf imaanaa sitti kenname hunda Waaqa Yerusaaalem duratti dhi'eessi. ²⁰ Waan mana qulqullummaa Waaqa keetiiif barbaadamu kan kennuu feetu hunda mankuusa mootii keessaa fuudhii kenni.

21 Eгаа ani Arxeksis Mootichi akka qabdoonni maallaqaa kanneen Gama Laga Efraaxiis jiran waan Izraan lubichi, barsiisaan Seera Waaqa samii kun isin gaafatu hunda arjummaadhaan isaaf kennan ajajeera; ²² kunis hamma meetii taalaantii dhibba tokko, qamadii qoroosii* dhibba tokko, daadhii wayinii baadoosii† dhibba tokko, zayitii ejersaa baadoosii dhibba tokkoo fi soogidda hamma hin qabne haa ta'u. ²³ Wannu Waaqni samii ajaje kam iyyuu mana qulqullummaa Waaqa samiiitiif of eeggannaadhaan haa godhamu. Maaliif dheekkamsi mootichaa fi ilmaan mootichaatti dhufa? ²⁴ Amma illee isin akka luboota, Lewwota, faarfattoota, eegdota karraa, tajaajiltoota mana qulqullummaa yookaan hojjettoota mana Waaqaa kana keessa hojjetan kamitti iyyuu gibira, qaraxaa fi ashuuraa murteessuuf aangoo hin qabne beekaa.

²⁵ Eгаа Izraa, ati akkuma ogummaa Waaqa keetii kan harka kee jiru sanaatti akka isaan warra Gama Laga Efraaxiis jiraatan bulchaniif abbootii seeraa fi abbootii murtii kanneen hundi isaanii seera Waaqa keetii beekan muudi. Nama seera Waaqaa hin beekne kam iyyuus barsiisi. ²⁶ Namni seera Waaqa keetiitiif yookaan seera mootichaatiif hin ajajamne kam iyyuu dhugumaan ajjeechaadhaan, biyya keessaa ari'amuudhaan, qabeenyi isaa irraa dhaalamuudhaan yookaan hidhaadhaan adabamuu qaba.

²⁷ WAAQAYYO Waaqni abbootii keenyaa kan akka inni karaa kanaan mana WAAQAYYOO kan Yerusaaalem keessa jiruuf ulfina kennuuf garaa mootichaa keessa yaada kana kaa'e sun haa galateeffamu; ²⁸ Waaqa fuula mootichaa, fuula gorsitoota mootichaa fi fuula qondaaltota mootichaa ciccimoo hundaa duratti gaarummaa ofii isaa na argisiiseef galanni haa ga'u. Sababii harki WAAQAYYO Waaqa koo anarra tureef ani jajjabaadheen akka isaan na wajjin deemaniif Israa'el keessaa namoota bebeekamoo walitti nan gabadhe.

8

Maqaa Abbootii Maatii Kanneen Izraa Waliin Deebi'anii

¹ Warri kunneen hangafoota maatii fi warra isaan wajjin galmaa'an kanneen bara mootummaa Arxeksis Mootichaa keessa na wajjin Baabilonii dhufanii dha:

² Sanyii Fiinehaas keessaa

Geershoom;

sanyii litaamaar keessaa

Daani'el;

sanyii Daawit keessaa

Haxuush ³ sanyii Shekaaniyaa;

sanyii Phaarosh keessaa Zakkaariyaas;

warri isa wajjin galmeeffamanis namoota 150 turan;

⁴ sanyii Fahat Mo'aab keessaa

Eliihoo'eenayi ilma Zaraayaa; warri isa wajjin turanis namoota 200 turan;

⁵ sanyii Zaatu'i keessaa Shekaaniyaa ilma Yahizii'eel;

warri isa wajjin turanis namoota 300 turan;

⁶ sanyii Aadiin keessaa Ebeed ilma Yoonataaan;

warri isa wajjin turanis namoota 50 turan;

⁷ sanyii Eelaam keessaa Yeshaayaa ilma Ataaliyaa;

warri isa wajjin turanis namoota 70 turan;

⁸ sanyii Shefaaxiyaa keessa Zebaadiyaa ilma Miikaa'el;

warri isa wajjin turanis namoota 80 turan;

⁹ sanyii Yoo'aab keessaa Obaadiyaa ilma Yehii'eel;

warri isa wajjin turanis namoota 218 turan;

¹⁰ sanyii Baanii keessaa Sheloomiit ilma Yoosifiyaa;

warri isa wajjin turanis namoota 160 turan;

¹¹ sanyii Beebay keessaa Zakkaariyaas ilma Beebay;

warri isa wajjin turanis namoota 28 turan;

¹² sanyii Azgaad keessaa Yoohaanaan ilma Haqaaxaan;

warri isa wajjin turanis namoota 110 turan;

¹³ sanyii Adooniiqaam keessaa

* 7:22 7:22 Qoroosiin tokko liitirii 220. † 7:22 7:22 Baadoosiin tokko liitirii 22.

warra gara dhumaa kanneen maqaan isaanii Eliiphelex, Ye'ii'eelii fi Shemaa'iyaa jedhamuu dha; warri isaan wajjin turanis namoota 60 turan;

¹⁴ sanyii Baguwaay keessaa

Uutaayii fi Zakuur; warri isaan wajjin turanis namoota 70 turan.

Gara Yersaaleemitti Deebi'uu

¹⁵ Anis laga gara Ahawaatti yaa'u biratti walitti isaan nan qabe; nus guyyaa sadii achi turre. Anis yeroon uummataa fi luboota to'adhetti Lewwota tokko illee isaan keessaa nan dhabe. ¹⁶ Kanaafuu ani Elii'ezer, Arii'eel, Shemaa'iyaa, Elnaataan, Yaariib, Elnaataan, Naataan, Zakkaariyaasii fi Meshulaam warra hooggantoota turanii fi Yooyaariibii fi Elnaataan warra hayyoota ta'an sana nan waamsise; ¹⁷ ergasiis gara Iddoo namicha Kaasiifiyaa bulchuutti isaan nan erge. Anis akka isaan namoota mana Waaqa keenyaa keessa tajaajilan nuuf fidaniif waan isaan Iddoo fi firoota isaa kanneen mana qulqullummaa Kaasiifiyaa keessa tajaajilaniin jechuu qaban isaanitti nan hime. ¹⁸ Isaanis sababii harki Waaqaa tolaan sun nurra tureef sanyii Mahilii keessaa Sheereebiyaa ilma Lewwii, ilma Israa'el, namicha hubataa tokko ilmaan isaa fi obboloota isaa wajjin walumatti nama 18 nuuf fidan; ¹⁹ akkasumas Hashabiyaa fi ilmaan Meraarii keessaa immoo Yeshaayaa, obboloota isaatii fi ilmaan obboloota isaa walumatti nama 20 nuuf fidan. ²⁰ Amma illee tajaajiltoota mana qulqullummaa kanneen Daawitii fi qondaaltonni isaa akka isaan Lewwota gargaaraniif ramadan keessaa nama 220 nuuf fidan. Isaan kunneen hundi maqaa maqaadhaan ni galmeeffaman.

²¹ Anis akka nu, ijoolleen keenyaa fi qabeenyi keenya hundi karaa nagaa deemnuuf akka fuula Waaqa keenyaa duratti gad of qabnee kadhannuuf achuma Laga Ahawaa biratti sooman nan labse. ²² Ani sababii nu, "Harki Waaqa keenyaa inni tolaan nama isa abdatu hunda irra jira; warra isa dhiisu hunda irra garuu dheekkamsi isaa ni bu'a" jennee mootichatti himnee turreef akka isaan karaa keenya irratti diinota nurraa dhowwaniiif loltootaa fi abbootii fardaa mooticha kadhachuu nan qaana'e. ²³ Kanaafuu nu soomnee waan kana irratti Waaqa kadhanne; innis kadhaa keenyaaf deebii kenne.

²⁴ Anis luboota hangafoota keessaa kudha lama jechuunis Sheereebiyaa, Hashabiyaa fi obboloota isaanii keessaa nama kudhan kophaatti nan baase; ²⁵ anis kennaa meetii, warqee fi mi'aa kan mootichi, gorsitoonni isaa, qondaaltonni isaa fi Israa'eloonni achi turan hundi mana Waaqa keenyaatiif kennan irraa madaalee isaaniif nan qoode. ²⁶ Ani meetii taalaantii* 650, mi'a meetii kana taalaantii 100 ulfaatu, warqee taalaantii 100, ²⁷ waciitii warqee 20 kan daariikii† 1,000 baasuu fi mi'a naasii cululuqaa akkuma warqee gatiin isaa guddaa ta'e lama madaaleen qoodeef.

²⁸ Anis akkanan isaaniin jedhe; "Isinii fi mi'i kun WAAQAYYOOF qulqulleffamantiirtu. Meetii fi warqeen kun kennaa fedhiidhaan WAAQAYYOO Waaqa abbootii keessaniitiif kennamanii dha. ²⁹ Hamma kutaalee mana WAAQAYYOO kan Yersaalem keessaa sana keessatti fuula luboota hangafootaa, fuula Lewwotaa fi hangafoota maatii Israa'el duratti madaalantii qooddanitti mi'a kana jabeessaa eegaa." ³⁰ Kanaafuu luboonni fi Lewwonnii meetii, warqee fi mi'a qulqulluu madaalame sana mana Waaqa keenyaa kan Yersaalem keessaatti geessuuf ni fuudhan.

³¹ Nus bultii kudha lammaffaa ji'a tokkoffaatti Yersaalem dhaquudhaaf Laga Ahawaa biraa kaane. Harki Waaqa keenyaa nurra ture; innis diinotaa fi namoota riphanii karaa irratti nama eegatan jalaa nu baase. ³² Akkasiinis Yersaalem geenyee bultii sadii achi boqonne.

³³ Nus bultii afuraffaatti mana Waaqa keenyaa keessatti meetii, warqee fi mi'a qulqulluu sana madaallee harka Mereemooti lubicha ilma Uuriyaa sanaatti ni kennine. Ele'aazaar ilmi Fiinehaas akkasumas Lewwonnii jechuunis Yoozaabaad ilmi Yeeshuu'aa fi Noo'adiyaan ilmi Binuuyii isa wajjin turan. ³⁴ Wannii hundinuus lakkaa'amee madaalame; ulfinni waan madaalame hundaas yeruma sana ni galmeeffame.

³⁵ Ergasiis booji'amtoonni boojudhaa deebi'an sun Israa'el hundaaf jiboota kudha lama, korbeeyyii hoolaa sagaltamii ja'aa fi xobbaallaa torbaatamii torban aarsaa gubamu, korbeeyyii re'ee kudha lama aarsaa cubbuu godhanii Waaqa Israa'eliiif dhi'eessan; kun hundi aarsaa gubama kan WAAQAYYOOF dhi'eeffamee dha. ³⁶ Isaan ajaja mootichaa illee ajajjoota mootummaa fi bulchitoota Gama Laga Efraaxiisitti dabarsan. Jarris sabaa fi mana Waaqaa gargaaran.

9

Waa'ee fuudhaa fi Heeruma Walmakaa

* 8:26 8:26 Taalaantiin tokko kiiloo giraamii 34. † 8:27 8:27 Daariikiin tokko giraamii 8.

¹ Erga wanni kun hojjetamee booddee hooggantoonni gara koo dhufanii akkana jedhan; “Sabni Israa’el lubootaa fi Lewwota illee dabalatee saboota ollaa isaanii kanneen hojii jibbisiisaa hojjetan jechuunis Kana’aanota, Heetota, Feerzota, Yebuusota, Amoonota, Mo’aabota, warra Gibxii fi Amoorota irraa addaan ba’anii hin jiraanne. ² Isaanis intallan jaraa ofii isaaniitiif fuudhanii ilmaan isaaniis fuusisanii sanyii qulqulluu sana saboota naannoo isaaniitti makan. Hooggantoonnii fi qondaaltonnis balleessaa kana hojjechuu keessatti dura aantota turan.”

³ Ani yeroon waan kana dhaga’etti qomee koo fi uffata koo nan tarsaasee, rifeensa mataa koo fi areeda koo of irraa buqqisee akka malee rifadheen taa’ee. ⁴ Kana irratti namoonni dubbii Waaqa Israa’eliin hollatan hundi sababii balleessaa warra boojuudhaa deebi’an kanaaf naannoo kootti walitti qabaman. Anis akka malee rifadhee hamma aarsaa galgalaatti achuman taa’ee.

⁵ Anis yeroo aarsaa galgalaatti akkuma qomee fi uffanni koo tarsi’ee jirutti lafan gaddee taa’aa turee ka’ee jilbeenfadhee harka koo gara WAAQAYYO Waaqa kootti bal’isee ⁶ akkana jedheen kadhadhe:

“Yaa Waaqa ko, sababii cubbuun keenya mataa keenya bira ol darbee yakki keenyas samii ga’eef, yaa Waaqa koo ani fuula koo gara keetti deebiffachuu akka malee qaana’eera; saalfadheeras. ⁷ Bara abbootii keenyaatii jalqabee hamma ammaatti balleessaan keenya guddaa dha. Sababii cubbuu keenyaaf nu, mootonni keenyaa fi luboonni keenya akkuma har’aa kana harka mootota ormaa jalatti goraadee fi boojuutti, saamichaa fi salphinatti dabarfamnee kennamneerra.

⁸ “Amma garuu WAAQAYYO Waaqni keenya hambaa nuu hambisee iddoo isaa qulqulluu sana keessatti iddoo amansiisaa nuuf kennuudhaan yeroo gabaabaadhaaf garaa nuuf laafeera; akkasiinis Waaqni keenya ija keenyaaf ifa kenneera; garbummaa keenya keessattis xinnoo nu boqochiiseera. ⁹ Nu garboota taanu illee Waaqni keenya garbummaa keessatti nu hin ganne. Inni fuula mootota Faares duratti jaalala isaa kan hin geeddaramne sana nu argisiiseera. Inni akka nu mana Waaqa keenyaa deebifnee ijaaruu fi akka diigamaa isaa illee iddooti deebifnuuf jireenya haaraa nuuf kenneera; Yihuudaa fi Yerusaaelem keessattis dallaa da’annoo nuu kenneera.

¹⁰ “Amma garuu yaa Waaqa keenya nu kana booddee maal jechuu dandeenya? Nu ajaja ¹¹ ati karaa garboota kee raajotaan kennite sanaaf hin ajajamneeti; innis akkana jedha: ‘Biyyi isin dhaaluudhaaf seenuutti jirtan xuraa’ummaa saba biyya sanaan xuroofoerti. Isaan hojii jibbisiisaa isaaniitiin handaara tokkoo hamma handaara kaanitti xuraa’ummaa isaaniitiin biyyattii guutaniiru. ¹² Kanaafuu intallan keessan ilmaan isaaniitti hin heerumsiisinaa yookaan ilmaan keessan intallan isaanii hin fuusisinaa. Akka jabaattaniif, akka waan gaarii biyya sanaa nyaattanii biyyatti illee dhaala bara baraa gootanii ijoollee keessanitti dabarsitaniif yoom iyyuu isaan wajjin walii galtee michummaa hin barbaadinaa.’

¹³ “Wanni nurra ga’e kun gatii gochawwan hammina keenyaa fi yakka keenya guddaa sanaa ti; haa ta’uutti ati Waaqni keenya adaba cubbuu keenyaaf maluun gad nu adabdee hambaa akkanaa nuu kenniteerta. ¹⁴ Nu amma illee ajaja kee cabsinee saba hojiiwwan jibbisiisoo hojjetu kanaan wal haa fuunuu? Yoos ati akka malee nutti dheekkamtee hamma hambaan tokko iyyuu hin hafnetti nu hin balleessituu ree? ¹⁵ Yaa WAAQAYYO Waaqa Israa’el, ati qajeelaa dha! Nu har’a hambaa taanee jiraanneerra. Tokkoon keenya iyyuu sababii yakka keenyaaf fuula kee dura dhaabachuu dadhabnu illee nu kunoo yakkuma keenya wajjin fuula kee dura jirra.”

10

Ummanni Cubbuu Isaa Himate

¹ Utuma Izraan mana Waaqaa duratti lafaan of dha’ee boo’aa, cubbuu himachaa, kadhachaa jiruu Israa’eloonni akka malee hedduun dhiironni, dubartoonnii fi ijoolleen naannoo isaatti walitti ni qabaman. Isaanis hiqqifatanii boo’an. ² Ergasiis sanyii Eleaam keessaa Shekaaniyaan ilmi Yehii’eel Izraadhaan akkana jedhe; “Nu waan saboota naannoo keenya jiraatan keessaa dubartoota ormaa fuuneef Waaqa keenyaaf hin amanamne. Wanni kun ta’u illee amma iyyuu Israa’eliif abdiin jira. ³ Kanaafuu kottaa akkuma gorsa goftaa koo fi kan warra ajaja Waaqa keenyaa sodaatanitti dubartoota kanneenii fi ijoollee isaanii hunda of irraa geggeessuuf fuula Waaqa keenyaa duratti kakuu ni galla. Kunis akkuma Seeraatti haa raawwatamu. ⁴ Ka’i; wanni kun suma harka jira. Nu si deeggarra; egaa jabaadhuu hojjedhu.”

⁵ Kanaafuu Izraan ka’ee akka isaan waan jedhame sana raawwataniif luboota hangafoota, Lewwotaa fi Israa’el hunda ni kakachiise; isaanis ni kakatan. ⁶ Ergasii

Izraan fuula mana Waaqaa duraa ka'ee kutaa manaa kan Yehohaanaan ilma Eliyaashiib seene. Inni yeroo achi turetti nyaata tokko illee hin nyaanne; bishaanis hin dhugne; sababii amanamummaa dhabiisa warra boojuudhaa deebi'aniif gaddaa tureetii.

⁷ Ergasii akka warri boojuudhaa deebi'an hundi Yerusaaalem keessatti walitti qabamaniif Yihuudaa fi Yerusaaalem guutuu keessatti labsiin ni labsame. ⁸ Namni kam iyyuu bultii sadii keessatti yoo dhi'aachuu baate akkuma murtii qondaalotaa fi maanguddootaatti qabeenyi isaa hundi irraa ni fudhatama; inni mataan isaas waldaa warra boojuudhaa deebi'ee keessaa ni ari'ama.

⁹ Bultii sadan sana keessatti namoonni Yihuudaa fi Beniyaam hundi Yerusaaalem keessatti walitti qabaman. Bultii digdammaffaa ji'a saglaffaatti namoonni hundi sababii waan kanaa fi sababii rooba guddaatiif akka malee raafamanii oobdii mana Waaqaa dura jiru irra ni tataa'an. ¹⁰ Izraan lubichi ol ka'ee akkana isaaniin jedhe; "Isin amanamoo hin turre; dubartoota ormaa fuudhuudhaanis Israa'el irratti yakka dabaltaniirtu. ¹¹ Egaa amma cubbuu keessan WAAQAYYO Waaqa abbootii keessanitti himadhaatii fedhii isaa guutaa. Saboota naannoo keessan jiraatanii fi niitota warra ormaa keessaa fuutaniin gargar ba'aa."

¹² Guutummaan waldaa sanaa akkana jedhee sagalee guddaadhaan deebise: "Ati sirrii dha! Nu akkuma ati jette gochuu qabna. ¹³ Garuu nama hedduutu as jira; yeroon kunis yeroo roobaa ti; kanaafuu nu ala dhaabachuu hin dandeenyu. Sababii nu waan kana keessatti cubbuu guddaa hojjenneef wanni kun guyyaa tokkotti yookaan guyyaa lamatti fala argachuu hin danda'u. ¹⁴ Qondaaltonni keenya iddoo waldaa guutuu haa bu'an. Ergasii namni magaalawwan keenyaa kan dubartii ormaa fuudhe kam iyyuu hamma dheekkamsi Waaqa keenyaa sodaachisaan sababii waan kanaatiif dhufe sun nurraa deebi'utti maanguddootaa fi abbootii murtii tokkoo tokkoo magaalaa wajjin yeroo murteeffametti haa dhufu." ¹⁵ Yoonaaatan ilma Asaaheeli fi Yahizeyaa ilma Tiqwaa qofatu waan kana morme; Meshulaamii fi Shaabetaayi Lewwichi immoo isaan deeggaran.

¹⁶ Warri boojuudhaa deebi'an sunis akkasuma godhan. Izraan lubichis namoota hangafoota maatii ta'an tokkoo tokkoo garee maatii keessaa nama tokko filatee hunduma isaani maqaa maqaan ramade. Isaanis bultii tokkoffaa ji'a kurnaffaatti dhimma sana qorachuudhaaf tataa'anii ¹⁷ guyyaa tokkoffaa ji'a jalqabaatti waa'ee namoota dubartoota ormaa fuudhan hundaa qoratanii fixan.

Namoota Dubartoota Ormaa Fuudhan

¹⁸ Sanyii lubootaa keessaa namoonni dubartoonni ormaa fuudhan kanneenii dha:

Sanyii Iyyaasuu ilma Yoozaadaaqii fi obboloota isaa keessaa:

Ma'aseyaa, Eli'ezer, Yaariibii fi Gedaaliyaas. ¹⁹ Isaan hundinuu niitota isaani hiikuudhaaf waadaa ni galan; tokkoon tokkoon isaani balleessaa ofii isaaniitiif bushaayee keessaa korbeessa hoolaa tokko aarsaa yakkaatiif ni dhi'eessan.

²⁰ Sanyii Imeer keessaa:

Hanaanii fi Zebaadiyaa.

²¹ Sanyii Haariim keessaa:

Ma'aseyaa, Eeliyaas, Shemaa'iyaa, Yehii'eeli fi Uziyaa.

²² Sanyii Phaashihuur keessaa:

Eliyyoo'eenayi, Ma'aseyaa, Ishmaa'eel, Naatnaa'el, Yoozaabaadii fi Ele'aasaa.

²³ Lewwota keessaa immoo:

Yoozaabaad, Shime'ii, Qeelaayaa isa Qeliixaa jedhamu sana, Phetaayaa, Yihuudaa fi Eli'ezer.

²⁴ Faarfattoota keessaa:

Eliyaashiib.

Warra karra eegan keessaa:

Shaluum, Telemii fi Uuri.

²⁵ Israa'eloota kaan keessaa:

Sanyii Phaarosh keessaa:

Raamiyaa, Zeziyaa, Malkiyaa, Miyaamiin, Ele'aazaar, Malkiyaa fi Benaayaa.

²⁶ Sanyii Eelaam keessaa:

Mataaniyaa, Zakkaariyaas, Yehii'eel, Abdii, Yireemootii fi Eeliyaas.

²⁷ Sanyii Zaatuu keessaa:

- Eliiyoo'eenayi, Eliyaashiib, Mataaniyaa, Yireemooti, Zaabaadii fi Aziizaa.
- ²⁸ Sanyii Beebay keessaa:
Yehohaanaan, Hanaaniyaa, Zaabayii fi Aatilaayi.
- ²⁹ Sanyii Baanii keessaa:
Meshulaam, Maluuk, Adaayaa, Yaasuub, She'aalii fi Raamoot.
- ³⁰ Sanyii Fahat Mo'aab keessaa:
Adinaa, Kelaal, Benaayaa, Ma'aseyaa, Mataaniyaa, Bezali'eel, Binuuyii fi Minaasee.
- ³¹ Sanyii Haariim keessaa:
Elii'ezer, Yishiyaa, Malkiyaa, Shemaai'yaa, Simi'oon, ³² Beniyaam, Maluukii fi Shemaariyaa.
- ³³ Sanyii Haashum keessaa:
Matenaayi, Matataa, Zaabaadii, Eliiphelexi, Yereemaayi, Minaasee fi Shime'ii.
- ³⁴ Sanyii Baanii keessaa:
Ma'adaay, Amraam, Uu'eel, ³⁵ Benaayaa, Beediyaa, Keluuhii, ³⁶ Waaneyaa, Mereemooti, Eliyaashiib, ³⁷ Mataaniyaa, Matenaayii fi Ya'asaawuu,
- ³⁸ Baanii, Binuuyii,
Shime'ii, ³⁹ Shelemiyaa, Naataan, Adaayaa, ⁴⁰ Maknaadebaayi, Shaashaayi, Shaaraayi, ⁴¹ Azari'eel, Shelemiyaa, Shemaariyaa, ⁴² Shaluum, Amariyaa fi Yoosef.
- ⁴³ Sanyii Neboo keessaa:
Ye'ii'eel, Matiitiyaa, Zaabaadii, Zebiinaa, Yaadaayi, Yoo'eelii fi Benaayaa.
- ⁴⁴ Warri kunneen hundinuu dubartoota ormaa ni fuudhan; isaan keessaas tokko tokko niitota kanneen irraa ijoollee ni dhalchan.

Kitaaba Nahimiyaa

Kadhannaa Nahimiyaa

¹ Dubbii Nahimiyaa ilma Hakaaliyaa:

Waggaa digdammaffaatti ji'a Kaaseluu jedhamu keessa utuu ani gamoo Suusaa keessa jiruu, ² obboloota koo keessaa Hanaaniin namoota biraa wajjin Yihuudaadhaa dhufe; anis waa'ee hambaa Yihuudoota boojuu jalaa ba'anii fi waa'ee Yerusaalem isaan nan gaafadhe.

³ Isaanis akkana naan jedhan; "Warri boojiudhaa deebi'anii kutaa biyyaa kana keessa jiraatan rakkinnaa fi salphina guddaa keessa jiru. Dallaan Yerusaalem diigamee karraawwan ishees ibiddaan gubamaniiru."

⁴ Anis waan kana dhageenyaa gad taa'ee boo'ee guyyoota muraasaaf nan gadde; soomees fuula Waaqa samii durattin kadhadhe. ⁵ Akkanas nan jedhe:

"Yaa WAAQAYYO Waaqa samii, Waaqa guddichaa fi sodaachisaa, kan warra si jaallatanii ajaja kee eeganiif kakuu jaalala keetii eegdu, ⁶ akka kadhannaa ani garbichi kee halkanii fi guyyaa fuula kee duratti waa'ee garboota kee saba Israa'el kadhadhu dhageessuuf gurri kee haa banamu; iji kees haa ilaalu. Ani cubbuu nu Israa'eloonni, ani mataan koo fi manni abbaa koo sitti hojjenne nan hima. ⁷ Nu akka malee hammina sitti hojjenneerra. Nu ajaja, labsii fi seera ati garbicha kee Museetti kennite sana hin eegne.

⁸ "Qajeelfama garbicha kee Museetti kennite sana yaadadhu; innis akkana jedha; 'Yoo isin amanamuu baattan ani saboota keessa isin nan bittinneessa; ⁹ garuu yoo isin gara kooiti deebitanii ajaja koo eegdan, yoo namoonni keessan kanneen booji'aman daarii lafaa jiraatan illee ani achii walitti isaanin qabee gara iddoo ani akka Maqaan koo achi jiraatuuf filadhe sanaatti isaan nan fida.'

¹⁰ "Isaan garboota kee fi saba kee warra ati humna kee guddaa fi harka kee jabaa sanaan furtee dha. ¹¹ Yaa Gooftaa, gurri kee kadhannaa garbicha kee kanaa fi kadhannaa garboota kee warra maqaa kee sodaachuutti gammadani sirriitti haa dhaga'u. Fuula namicha kanaa duratti surraa isaaf kennuudhaan har'a garbicha kee milkeessi."

Ani nama mootichaaf daadhii buusun ture.

2

Nahimiyaa Gara Yerusaalemitti Ergame

¹ Waggaa digdammaffaa bara Arxexis Mootichaatti ji'a Niisaan keessa yeroo daadhiin wayinii isaaf dhi'effametti ani daadhii wayinii sana fuudhee mootichaaf nan kenne. Ani fuula isaa duratti gaddee hin beeku; ² kanaafuu mootichi, "Ati utuu hin dhukkub-satin fuulli kee maaliif waan gadde fakkaata? Kun gadda garaa keessaati malee waan biraa miti" naan jedhe.

Anis akka maleen sodaadhe; ³ mootichaanis, "Yaa mootii bara baraan jiraadhu! Utuu magaalaa abbootiin koo keessatti awwaalaman barbadooftee jirtuu, utuu karrawwan ishees ibiddaan barbadeeffamanii jiranuu fuulli koo maaliif hin gaddu?" nan jedhe.

⁴ Mootichis, "Akka ani maal siif godhu barbaadda?" naan jedhe.

Kanaafuu ani Waaqa samii kadhadheen ⁵ akkana jedhee mootichaaf nan deebise; "Yoo wanni kun mooticha gammachiisee garbichi kee fuula kee duratti surraa argate, akka ani magaalattii deebisee ijaaruu gara Yihuudaa, gara magaalaa abbootiin koo itti awwaalamanitti na ergi."

⁶ Kana irratti mootichi utuma mootittiin isa bira teessuu, "Karaan kee yeroo hammamii fudhata? Atis yoomi deebita?" jedhee na gaafate. Na erguun fedhii mootichaa ta'e; isa yeroo nan murteeffadhe.

⁷ Ammas ani akkanan isaan jedhe; "Yoo wanni kun mooticha gammachiisee, akka isaan hamma ani Yihuudaa ga'utti nagaadhaan na dabarsaniif bulchitoota Laga Efraaxiis Gamaatiif xalayaan anaaf haa kennamu. ⁸ Akkasumas akka inni laaxaa ani ittiin dareeraa karra da'annoo mana qulqullummaa, dallaa magaalaa sanaa fi kan mana ani itti galuuf jiruu tolfadhu naaf kennuuf Aasaaf eegduu bosona mootichaaf xalayaan naaf haa barreeffamu." Sababii harki Waaqa koo tolaan sun narra tureef mootichi waan ani

kadhadhe naa kenne. ⁹ Kanaafuu ani gara bulchitoota Gama Laga Efraaxiis dhaqee xalayoota mootichaa isaanitti nan kenne. Mootichi ajajjoota waraanaa fi abbootii fardeenii na wajjin ergee ture.

¹⁰ Sanbalaax Hooroonichii fi Xoobbiyaan qondaaltichi Amoon sun yeroo waan kana dhaga'anitti sababii namni Israa'eliif waan tolaa yaadu tokko dhufeef akka malee ni raafaman.

Nahimiyaan Dallaa Yerusaalem Irra Naanna'ee Ilaale

¹¹ Ani ergan Yerusaalem dhaqee bultii sadii achi bubbulee booddee ¹² halkaniin ka'ee namoota muraasa wajjin nan ba'ee. Ani waan Waaqni koo akka ani Yerusaalemiif godhu garaa koo keessa kaa'ee nama tokkotti iyyuu hin himne. Horii tokkicha ani yaabbadhe sana malee horiin tokko illee na bira hin turre.

¹³ Ani halkaniin Karra Sululaatiin gad ba'ee gara Boolla Bishaan Jawweetii fi gara Karra Dikee dhaqee dallaa Yerusaalem kan diigamee fi karrawwan ishee kanneen ibiddaan barbadeeffaman sana irra naanna'een ilaale. ¹⁴ Ergasiis ani ittuma fufee gara Karra Burqaa fi gara Haroo mootichaa nan dhaqe; garuu karaan horii ani yaabbadhe dabarsu tokko illee hin turre; ¹⁵ kanaafuu ani halkaniin karaa sululaatiin ol ba'ee dallaa sana nan ilaale. Dhuma irrattis dugda duubatti deebi'ee Karra Sululaatiin ol nan seene. ¹⁶ Sababii ani hamma gaafasitti Yihuudootatti yookaan lubootatti yookaan namoota bebeekamooti yookaan qondaaltotatti yookaan namoota hojii sana hojjechuuf jiran biraa kamitti iyyuu homaa hin himiniif qondaaltonni sun gara ani dhaqe yookaan waan ani hojjechaa ture hin beekne.

¹⁷ Anis akkana isaaniin nan jedhe; "Isin rakkoo nu keessa jirru ni argitu; Yerusaalem diigamteerti; karrawwan ishees ibiddaan gubamaniiru. Kottaa nu akka si'achi nama kolfaa hin taaneef dallaa Yerusaalem deebifnee ni ijaarraa." ¹⁸ Ani waa'ee harka Waaqa koo kan narra jiru tolaa sanaa fi waan mootichi naan jedhe illee isaanitti nan hime.

Isaanis, "Kottaa kaanee deebisnee haa ijaarru" jedhanii deebisan. Kanaafuu isaan hojii gaarii kana jalqaban.

¹⁹ Garuu Sanbalaaxi Hooroonichi, Xoobbiyaan qondaaltichi Amoonii fi Gesheem namni Arabaa sun waan kana dhageenyaan nutti qoosanii nutti kolfan. Isaanis, "Wanni isin hojjetan kun maali? Isin mootichatti fincilaa jirtu moo?" jedhanii gaafatan.

²⁰ Ani immoo akkana jedheen deebii kenneef; "Waaqni samii fiixaan nuuf baasa. Nu garboonni isaa immoo kaanee ni ijaarra; isin garuu Yerusaalem keessaa qooda yookaan mirga yookaan yaadannoo tokko illee hin qabdan."

3

Ijaartota Dallaa

¹ Eliyaashiib lubichi ol aanaanii fi luboonni akka isaa ka'anii Karra Hoolotaa ijaaran. Isaan karra sana qulqulleessanii cufaawwan isaa iddootti deebisan; dallaa sanas hamma Gamoo Dhibbaa kan isaan qulqulleessan sanaattii fi hamma Gamoo Hanaani'eelitti ijaaran. ² Namoonni Yerikoo kutaa itti aanu ijaaran; Zakuur ilmi Imrii immoo isaanitti aansee ijaare.

³ Ilmaan Hasenaa'aa Karra Qurxummii deebisanii ijaaran. Isaan demdemoo kaa'anii cufaawwan, loosaa fi danqaraawwan isaa iddootti deebisan. ⁴ Mereemooti ilmi Uuriyaa, ilmi Haqoosi kutaa itti aanu haaromse. Isatti aanee Meshulaam ilma Berekiyaa ilma Mesezebeelitu haaromse; isaanitti aanee immoo Zaadoq ilma Ba'anaatu haaromse. ⁵ Kutaa itti aanu namoota Teqoo'aatu haaromse; namoonni isaanii bebeekamoon garuu hojii Gooftaa isaaniitiif boquu gad hin qabanne.

⁶ Yooyaadaan ilmi Faasehaatii fi Meshulaam ilmi Besoodeyaa Karra Moofaa haaromsan. Isaanis demdemoo kaa'anii cufaawwan, loosaa fi danqaraawwan isaa iddootti deebisan. ⁷ Isaanitti aansee immoo Melaaxiyyaan namichi Gibe'oon, Yaadoon namichi Meeroonot akkasumas namoonni Gibe'ooniitii fi Miisphaa kutaawwan bulchiinsa bulchaa Gama Laga Efraaxiis jala jiran sana haaromsan. ⁸ Tumtuu warqee keessaa Uzii'eel ilmi Harhayaa kutaa itti aanu haaromse. Warra Shiitoo hojjetan keessaa Hanaaniyaan kutaa kutaa sanatti aanu haaromse. Isaanis hamma Dallaa Bal'aatti Yerusaalemin akka duriitti deebisanii ijaaran. ⁹ Refaayaan ilmi Huuri, bulchaan gartokkee aanaa Yerusaalem kutaa itti aanu haaromse. ¹⁰ Isaanitti aansee Yedaayaa ilmi Haruumaaf kutaa fuullee mana ofii isaa haaromse; Haxuush ilmi Hashabniyaa isatti aansee haaromse. ¹¹ Malkiyaan ilmi Haariimiitii fi Hashuub ilmi Fahat Mo'aab

kutaa biraatii fi Gamoo Badaa Ibiddaa haaromsan. ¹² Shaluum ilmi Haloheesh bulchaan gartokkee aanaa Yersaaleemiitii fi intallan isaa kutaa itti aanu haaromsan.

¹³ Haanuunii fi jiraattonni Zaano'aa Karra Sululaa haaromsan. Isaanis karra sana deebisanii ijaaranii cufaawwan, loosaa fi danqaraawwan isaa iddootti deebisan. Akkasumas hamma Karra Dikeetti dallaa dhundhuma kuma tokko lafa irra dheeratu haaromsan.

¹⁴ Malkiyaan ilmi Rekaab bulchaan aanaa Beet Hakerem Karra Dikee haaromse. Innis karra sana deebisee ijaaree cufaawwan, loosaa fi danqaraawwan isaa iddootti deebise.

¹⁵ Shelaa ilmi Kol-Hoozee bulchaan aanaa Miisphaa sun Karra Burqaa haaromse. Innis karra sana haaromsee gubbaa isaa haguugee cufaawwan isaa, loosaa fi danqaraawwan isaa iddootti deebise. Dallaa Haroo Sheelaanii kan Iddoo Biqiltuu Mootichaa biraa sanas hamma waltajjii Magaalaa Daawit irraa gad bu'uutti haaromse. ¹⁶ Isa duubaan Nahimiyaan ilmi Azbuuq bulchaan gartokkee aanaa Beet Zuuri sun hamma iddoo fuullee awwaala Daawititti, hamma haroo kuufamee fi hamma Mana Goototaatti haaromse.

¹⁷ Isatti aanee Lewwonni Rehuum ilma Baaniitiin qajeelfaman ni haaromsan. Isatti aansee immoo Hashabiyaan bulchaan gartokkee aanaa Qeyiilaa sun aanaa ofii isaatiif haaromse. ¹⁸ Isatti aansee namoonni biyya isaanii qajeelcha Bawaayi ilma Heenaadaad bulchaa gartokkee aanaa Qeyiilaa jala turan ni haaromsan. ¹⁹ Isatti aansee Eezer ilmi Yeeshu'aa bulchaan Miisphaa iddoo karaa mankuusa mi'a lolaatti geessu fuul duraa sana hamma roga isaatti kutaa biraa haaromse. ²⁰ Isatti aansees Baaruk ilmi Zabaay roga sanaa jalqabee hamma balbala mana Eliyaashiib lubicha ol aanaatti kutaa biraa hinaaffaadhaan haaromse. ²¹ Isatti aansee Mereemooti ilmi Uuriyaa, ilmi Haqoosi balbala mana Eliyaashiibiitii jalqabee hamma dhuma isaatti kutaa biraa haaromse.

²² Isatti aansee immoo luboota naannoo sana jiranittu haaromse. ²³ Isaaniin achittis Beniyaamii fi Hashuubittu fuula mana isaanii dura haaromse; isaanitti aansee immoo Azaariyaa ilma Ma'aseyaa ilma Anaaniyaatu mana isaa bira haaromse. ²⁴ Isatti aansee Binuuyiin ilmi Heenaadaad mana Azaariyaatii jalqabee hamma rogaa fi golee isaatti kutaa biraa haaromse; ²⁵ Phaalaal ilmi Uuzaay immoo golee sanaa fi gamoo masaraa mootummaa kan ol aanu gubbaatti ijaarame fuullee oobdii eegdotaa bira haaromse. Isatti aansees Phedaayaan ilmi Phaarooshii fi ²⁶ tajaajiltoonni mana qulqullummaa kanneen tulluu Oofeel irra jiraatan hamma iddoo Karra Bishaanii kan gama ba'aatii fi gamoo ol ka'aa sana duraatti haaromsan. ²⁷ Isaanitti aansanii immoo namoonni Teqoo'aa gamoo ol ka'aa guddichaa jalqabanii hamma dallaa Oofeelitti kutaa biraa haaromsan.

²⁸ Karra Fardaatiin olitti tokkoon tokkoon lubootaa fuula mana ofii isaanii dura haaromsan. ²⁹ Isaanitti aansee Zaadoq ilmi Imeer fuullee mana isaa haaromse. Isatti aansee Shemaa'iyaan ilmi Shekaaniyaa eegduun Karra gama Ba'aa sun akkasuma ni haaromse. ³⁰ Isatti aansanii Hanaaniyaan ilmi Shelemiyaatii fi Haanuun ilmi Zaalaaf ja'affaan sun kutaa biraa haaromsan. Isaanitti aansee immoo Meshulaam ilmi Berekiyaa fuullee mana ofii isaa keessa jiraatuu haaromse. ³¹ Isatti aansee immoo tumtuu warqee keessaa Malkiyaan hamma mana tajaajiltoota mana qulqullummaatii fi daldalootaa kan fuullee Karra To'annaatti, hamma kutaa manaa kan golee irraattis haaromse; ³² tumtuun warqetii fi daldaltoonni immoo kutaa manaa kan golee irraa sanaa fi Karra Hoolotaa gidduu jiru haaromsan.

4

Deebisanii Ijaaruu Irratti Mormiin Ka'uu Isaa

¹ Sanbalaaxi akka nu dallaa kana deebifnee ijaaraa jirru dhageenyaan aariin gubatee dheekkame. Innis Yihuudootatti qoosee ² fuula obboloota isaa fi fuula loltoota Samaariyaa duratti akkana jedhe; "Yihuudoonni dadhaboonni kunneen maal hojjechaa jiru? Isaan dallaa isaanii deebisanii ijaaruu? Aarsaa illee ni dhi'eessuu? Guyyaa tokko keessatti ni fixuu? Isaan waan akkas gubamee tuulame keessaa dhagaa fuudhanii akka duriitti deebisuu danda'uu?"

³ Xoobbiyaan namichi Amoon kan isa bira dhaabate sunis, "Waan isaan ijaaraa jiran kana, dallaa isaanii kan dhagaa kana waangoon iyyuu yoo yaabde ni jigsiti!" jedhe.

⁴ Yaa Waaqa keenya nu dhaga'i; nu tuffatamneerraatii. Arraba isaan nu arrabsan matuma isaanitti deebisi. Boojuudhaaf dabarsii biyya ormaatti isaan kenni. ⁵ Sababii isaan fuula ijaartotaa duratti dheekkamsaaf si kakaasaniif yakka isaanii hin dhoksiniif yookaan cubbuu isaanii fuula kee duraa hin haqiniif.

⁶ Nu akkasiin dallaa sana hamma inni walakkaa dheerina isaa ga'utti deebifnee ijaarre; namoonni garaa tokkoon hojjechaa turaniitii.

⁷ Garuu Sanbalaaxi, Xoobbiyaan, Araboonni, Amoononni fi namoonni Ashdood yommuu akka haaromfamuun dallaa Yerusaaalem ittuma fufaa jiruu fi akka qaawwi isaa duuchamaa jiru dhaga'anitti akka malee aaran. ⁸ Isaan hundinuu dhufanii Yersaalemin loluu fi rakkina itti fiduudhaaf tokkummaadhaan malatan. ⁹ Nu garuu Waaqa keenya kadhannee doorsisa kana of irraa ittisuuf jennee waardiyyaa halkanii fi guyyaa eegu tokko kaa'anne.

¹⁰ Sabni Yihuudaas, "Humni hojjetootaa laafeera; sababii diigamni isaa akka malee guddaa ta'eef nu dallaa kana deebifnee ijaaruu hin dandeenyu" jedhe.

¹¹ Diinonni keenyas, "Utuu isaan hin beekin yookaan nu hin argin isaan gidduu seennee isaan fixnee hojii sana dhaabbachiifna" jedhan.

¹² Yihuudoonni isaanitti dhi'oo jiraatan dhufanii, "Yoo isin eessa illee dhaqخان isaan inuma nu lolu" jedhanii yeroo kudhan nutti himan.

¹³ Kanaafuu ani namoota sana keessaa tokko tokko dachaa dallaa duubaan jiru keessa, iddoo ol ka'aa irratti ramadee akka isaan goraadee, eeboo fi iddaa qabatanii dhaabatan nan godhe. ¹⁴ Anis ergan asii fi achi ilaalee booddee ol ka'ee namoota beekkamoodhaan, gondaaltotaa fi uummata kaaniin akkana nan jedhe; "Isin jara hin sodaatinaa. Gooftaa guddichaa fi sodaachisaa sana yaadadhaatii obboloota keessaniif, ilmaan keessaniif, intallan keessaniif, niitota keessanii fi manneen keessaniif lolaa."

¹⁵ Yeroo diinonni keenya akka nu mala isaaniitti dammaqne, akka Waaqnis mala isaanii sana jalaa diige dhaga'anitti nu hundi gara dallaatti, tokkoon tokkoon keenyas hojii keenyatti deebine.

¹⁶ Gaafasii jalqabee namoota koo keessaa walakkaan isaanii hojii hojjetanii walakkaan kaan immoo eeboo, gaachana, iddaa fi mi'a lolaa hidhatan. Ajajjoonnis saba Yihuudaa hunda duubaan dhaabachaa turan; ¹⁷ warri dallaa ijaaranii fi ba'aa baatanis harka tokkoon ni hojjetu, harka tokkoon immoo mi'a lolaa qabatu turan; ¹⁸ tokkoon tokkoon ijaartota sanaa goraadee ofii isaanii mudhiitti hidhatanii hojii hojjetan. Namichi malakata afuufu garuu na wajjin ture.

¹⁹ Anis namoota beekkamoodhaan, gondaaltotaa fi uummata kaaniin akkana nan jedhe; "Hojiin kun guddaa fi bal'aa dha; tokkoon tokkoon keenyas gargar fagaannee dallaa irra jirra. ²⁰ Iddoo itti sagalee malakataa dhageessan kamitti iyyuu nutti makamaa. Waaqni keenya nuuf lolaa!"

²¹ Kanaafuu nu barri barraaqaa jalqabnee hamma urjiiwwan ba'anitti akkuma namoota keenya keessaa gariin eeboo qabatanii jiranitti hojii itti fufne. ²² Anis yeroo sanatti namootaan akkanan jedhe; "Akka isaan halkan akka eegdotaatti, guyyaa immoo akka hojjetootaatti nu tajaajiluu danda'aniif nama kam iyyuu gargaaraa isaa wajjin halkan Yerusaaalem keessa tursaa." ²³ Anis, obboloonni koos, namoonni koos, eegdonni na wajjin turanis uffata keenya hin baafanne; tokkoon tokkoon namaa yeroo bishaan barbaacha deemu illee mi'a isaa kan waraanaa harkatti qabata ture.

5

Nahimiyaan Hiyyeeyyii Gargaare

¹ Yeroo kanatti namoonnii fi niitoonni isaanii obboloota isaanii Yihuudootatti guddisaniin iyyan. ² Isaan keessaa namoonni tokko tokko, "Nu, ilmaan keenyaa fi intallan keenya baay'ee hedduu dha; nu akka nyaannee jiraannuuf midhaan argachuu qabna" jechaa turan.

³ Warri kaan immoo, "Nu yeroo beelaatti midhaan argachuudhaaf jennee lafa qotiisaa keenya, iddoo dhaabaa wayinii keenyaa fi manneen keenya qabsiisaa jirra" jechaa turan.

⁴ Ammas namoonni biraa akkana jedhan; "Nu lafa qotiisaa keenyaa fi iddoo dhaabaa wayinii keenyaatiif gibira mootichaa baasuudhaaf maallaqa liqeeffachuu qabna turre. ⁵ Nu namoota biyya keenyaatiin foonii fi dhiiga tokko taanee ilmaan keenyas akkuma ilmaan isaanii gaarii ta'an illee, nu ilmaan keenyaa fi intallan keenya dabarsinee garbummaaf kennineerra. Intallan keenya keessaa tokko tokko amma iyyuu garboomfamani jiru; garuu lafti qotiisaa keenyaa fi iddoon dhaabaa wayinii keenyaa kan namoota biraa waan ta'aniif nu humna hin qabnu."

⁶ Anis ofiin mari'adhee namoota bebeekamoo fi qondaaltota sana nan ifadhe; akkanas nan jedheen; "Isin hiiqiidhaan liqeessuudhaan namootuma biyya keessanii saamaa jirtu!" Kanaafuu ani yaa'ii guddaa isaanitti waameen ⁸ akkana isaanin jedhe; "Nu hamma nuu danda'ametti obboloota keenya Yihuudoota saba ormaatti gurguramanii turan sana deebifnee bitanneerra. Isin amma illee akka isaan deebifamanii nutti gurguramaniif jettanii obboloota keessaan gurguraa jirtu!" Isaan immoo waan jedhan dhabanii cal'isan.

⁹ Kanaafuu ani ittuma fufeen akkana jedheen; "Wanni isin hojjechuutti jirtan kun sirrii miti. Isin tuffii diinota keenya Namoota Ormaa jalaa ba'uuf, Waaqa keenya sodaachuudhaan jiraachuu hin qabdani? ¹⁰ Ani, obboloota koo fi namoonni koos maallaqaa fi midhaan saba kanaaf liqeessaa jirra. Garuu hiiqiidhaan liqeessuudhaan nama saamuu dhiisaa! ¹¹ Amma dafaatii lafa qotiisaa isaanii, iddoo dhaabaa wayinii isaanii, mukkeen ejersaatii fi manneen isaanii akkasumas waan hiiqiidhaan liqeessitanii dhibbantaan saamtan kanneen akka maallaqaa, midhaanii, daadhii wayinii haaraatii fi zayitii sana deebisaafii."

¹² Isaanis, "Nu waan sana deebifnee ni kennina; deebinee waan tokko illee isaan irraa hin barbaannu. Akkuma ati jette goona" jedhan.

Kana irratti ani luboota ofitti waamee akka namoonni bebeekamoonii fi qondaaltonni waan waadaa galan sana raawwatan nan kakachiise. ¹³ Ammas ani dachaa uffata koo hurgufeen akkana jedhe; "Waaqayyo nama waadaa kana hin eegne kamiin iyyuu mana isaatii fi qabeenya isaa irraa akkana haa hurgufu. Namni akkanaa kun akkasuma hurgufamee harka duwwaa haa hafu!"

Kana irratti waldaan hundi, "Ameen" jedhee WAAQAYYON galateeffate. Uummannis akkuma waadaa gale sana godhe.

¹⁴ Kana caalaas yeroo ani bara Arxexsis mootichaa keessa waggaa digdammaffaatti bulchaa biyya Yihuudaa ta'ee muudamee jalqabee hamma waggaa soddomii lammaffaa mootummaa isaatti jechuunis waggaa kudha lamaaf, anis obboloonni koos nyaata bulchaaf ramadame hin nyaanne. ¹⁵ Garuu bulchitoonni durii kanneen anaan dura turan ba'aa guddaa saba baachisanii nyaataa fi daadhii wayinii malee iyyuu meettii saqilii afurtama isaan irraa fudhachaa turan. Gargaartoonni isaanis akkasuma saba cunqursan. Ani garuu waanan Waaqa sodaadhuuf akkas hin goone. ¹⁶ Qooda kanaa ani hojii dallaa ijaaruu kanaaf of nan kenne. Namoonni koo hundinuu achitti hojiidhaaf walitti qabaman; nu lafa tokko illee hin arganne.

¹⁷ Amma illee namoota saba naannoo keenya jiraatan keessaa dhufan malee Yihuudoonni dhibba tokkoo shantammii fi qondaaltonni maaddii koo irraa nyaachaa turan. ¹⁸ Guyyaa guyyaadhaan sangaan tokko, hoolonni gagabbatoon ja'aa fi indaanqoowwan muraasni, guyyaa kudhan kudhaniin immoo daadhiin wayinii kan gosa hundaa baay'inaan naa qopheeffama ture. Kana hunda malees ani takkuma nyaata bulchaaf ramadamuu qaba hin gaafanne; gaaffiin kun saboota kanneenitti ba'aa guddaa tureetii.

¹⁹ Yaa Waaqa koo waan ani saba kanaaf godhe hunda tolaatti naa lakkaa'i.

6

Mormiin Ijaarsaa Ittuma Fufe

¹ Ani hamma yeroo sanaatti cuftuu balbalaa itti galchuu baadhu illee Sanbalaax, Xoobbiyaan, Gesheem namicha Arabaa sanaa fi diinonni keenya biraan akka ani dallaa sana deebisee ijaaree iddoon hin ijaaramin tokko iyyuu hin hafin dhageenyaan ² Sanbalaaxii fi Gesheem, "Kottu mee gandoota dirree Oonoo irra jiran keessaa isa tokko keessatti wal arginaa" jedhanii ergaa kana natti ergan.

Isaan garuu na miidhuuf malachaa turan; ³ kanaafuu ani akkana jedhee ergamoota isaanittin erge; "Ani waan hojii guddaa hojjechaa jiruuf gad bu'uu hin danda'u. Yeroo ani hojii dhiisee gara keessanitti gad bu'uutti hojiin maaliif dhaabata?" ⁴ Isaan ergaadhuma tokko si'a afur natti ergan; anis si'a afranuu deebiidhuma tokkon kenneef.

⁵ Sanbalaaxis ergaadhuma sana garbicha isaa tokkoon yeroo shanaffaa natti erge; garbichi sunis xalayaa hin cufamin tokko harkaa qaba ture. ⁶ Xalayichis akkana jedha:

"Akkata atii fi Yihuudoonni finciluu barbaaddan uummata keessatti odeeffameera; Gesheemis kanuma mirkaneessa. Wanni isin dallaa ijaartaniifis kanuma; akka oduu kanaatti ati mootii isaanii ta'uu barbaadda; ⁷ ati akka isaan, 'Yihuudaa keessa mootii tokkotu jira!' jedhanii waa'ee kee Yerusaaalem keessatti labsaniif raajota muudatteerta. Oduun kun gara mootichaatti ni deebi'a; kanaafuu kottu wajjin ni mari'anna."

⁸ Kana irratti ani, “Wanni akka waan ati dubbattu kanaa tokko illee hin hojjetamne; ati matuma kee keessaa fuutee dubbattaa” jedheen deebiseef.

⁹ Isaan hundi, “Harki jara kanaa hojii hojjechuu ni dadhaba; hojiin kunis hin dhumu” jedhanii yaaduudhaan nu sodaachisuu yaalaa turan.

Ani garuu, “Amma harka koo naa jajjabeessi” jedheen Waaqa kadhadhe.

¹⁰ Anis gaaf tokko mana Shema’iyaa ilma Delaayaa, ilma Maheexabi’eel kan manuma ofii isaa keessatti itti cufame sanaa nan dhage. Innis akkana jedhe; “Sababii namoonni si ajjeesuuf dhufaa jiraniif, sababii isaan si ajjeesuuf halkaniin dhufaa jiraniif kottu mana Waaqaatti, mana qulqullummaa keessatti wal arginee balbalawwan mana qulqullummaa haa cufannu.”

¹¹ Ani immoo, “Namni akka kootii kun baqachuu qabaa? Yookaan namni na fakkaatu tokko lubbuu ofii isaa oolfachuudhaaf jedhee mana qulqullummaa seenuu qabaa? Ani hin deemu!” jedheen. ¹² Ani akka Waaqni isa natti hin ergin beekkadheera; inni garuu sababii Xoobbiyyaa fi Sanbalaaxi isa bitataniif waa’ee koo waan hamaa raaje. ¹³ Inni na sodaachisee akka ani waan kana hojjechuudhaan cubbuu hojjechuuf, akka isaanis akkasiin maqaa hamaa naa kennanii maqaa na balleessaniif bitame.

¹⁴ Yaa Waaqa ko, sababii waan isaan hojjetan sanaaf jedhiitii Xoobbiyyaa fi Sanbalaaxin yaadadhu; raajjuu Noo’adiyaa jedhamtuu fi raajota na sodaachisuu yaalan kaanis yaadadhu. ¹⁵ Akkasiinis dallaan sun bultii shantamii lamatti, ji’a Eeluuli jedhamu keessa bultii digdamii shanaffaatti ijaaramee dhume.

Ijaarsi Dallaa Xumuramuu Isaa

¹⁶ Yommuu diinonni keenya hundi oduu kana dhaga’anitti, saboonni naannoo keenyaa hundi sodaatanii abdiin kutatan; isaan akka hojiin kun gargaarsa Waaqa keenyaan hojjetame hubataniiruutii.

¹⁷ Bara sana keessa namoonni Yihuudaa bebeekamoon xalayoota hedduu gara Xoobbiyaatti ergaa turan; Xoobbiyaanis deebii isaaniif ni erga ture. ¹⁸ Sababii inni soddaa Shekaaniyaa ilma Aaraa tureef namoonni Yihuudaa keessa jiraatan hedduun isaaf kakatan; akkasumas ilmi isaa Yehohaanaan intala Meshulaam ilma Berekiyaa fuudhee ture. ¹⁹ Kana malees isaan hojii isaa gaarii natti odeessaa, waan ani jedhe illee isatti himaa turan. Xoobbiyaan immoo na sodaachisuuf jedhee xalayoota natti ergaa ture.

7

¹ Erga dallaan sun ijaaramee anis cufaawwan iddootti deebisee booddee karra eegdonni, faarfattoonni fi Lewwonni ni ramadaman. ² Anis Yerusaalem irratti Anaanii obboleessa koo fi Hanaaniyaa ajajaa masaraa mootummaa sana nan muude; Hanaaniyaan kun nama hunda caalaa amanamaa fi kan Waaqa sodaatu turetii. ³ Ani akkanan isaaniin jedhe; “Karrawwan Yerusaalem hamma aduun ho’itutti banamuu hin qaban. Yeroo karra eegdonni hojii irra jiranittis cufaawwan cufamanii danqaraan keessa haa loofamu. Akkasumas jiraattota Yerusaalem keessaa eegdota tokko tokko iddoo isaaniitti, kaan immoo mana isaani biratti ramadaa.”

Maqaa Warra Boojiudhaa Deebi’anii

7:6-73 kwf – IZR 2:1-70

⁴ Magaalattiin guddoo fi bal’oo turte; garuu saba muraasatu ishee keessa jiraata ture. Manneenis amma iyyuu deebifamanii hin ijaaramne. ⁵ Waaqni koos akka isaan maatii maatiidhaan galmeeffamaniif akka ani namoota bebeekamoo, qondaaltotaa fi uummata walitti qabuuf garaa koo keessa kaa’e. Anis galmee hidda dhalootaa kan warra jalqabatti deebi’anii nan argadhe. Wanni barreeffamee ani achitti argadhe kanaa dha:

⁶ Isaan kunneen namoota kutaa biyya sanaa warra boojuu Nebukadnezar mootichi Baabilon sun booji’ee isaan geessee ture sanaa deebi’anii dha; isaanis Yerusaaleemii fi Yihuudaatti deebi’anii tokkoon tokkoon isaanii magaalaa ofii isaaniitti galan; ⁷ isaanis Zarubaabel, Iyyaasu, Nahimiyya, Azaariyaa, Ra’aamiyaa, Nahamaan, Mordekaayi, Bilshaan, Misiphereti, Baguwaayi, Nehuumii fi Ba’anaa wajjin dhufan.

Maqaa namoota saba Israa’el ta’anii:

⁸ Sanyiin Phaaroosh 2,172

⁹ sanyiin Shefaaxiyaa 372

¹⁰ sanyiin Aaraa 652

- 11 sanyiin Fahat Mo'aab warri karaa Yeeshu'aa fi Yoo'aab dhalatan 2,818
 12 sanyiin Eelaam 1,254
 13 sanyiin Zaatuu 845
 14 sanyiin Zabaay 760
 15 sanyiin Binuuyii 648
 16 sanyiin Beebay 628
 17 sanyiin Azgaad 2,322
 18 sanyiin Adooniiqaam 667
 19 sanyiin Baguwaay 2,067
 20 sanyiin Aadiin 655
 21 sanyiin Ateer warri karaa Hisqiyaa 98
 22 sanyiin Haashum 328
 23 sanyiin Beesaay 324
 24 sanyiin Haariif 112
 25 sanyiin Gibe'oon 95
 26 namoonni Beetlihemii fi namoonni Netoofaa 188
 27 namoonni Anaatoot 128
 28 namoonni Beet Azmaawet 42
 29 namoonni Kiriyaati Ye'aariim, kan Kefiiraatii fi Bi'eeroot 743
 30 namoonni Raamaa fi Gebaa 621
 31 namoonni Mikmaas 122
 32 namoonni Beet'eelii fi Aayi 123
 33 namoonni Neboo kaan 52
 34 namoonni Eelaam kaan 1,254
 35 namoonni Haariim 320
 36 namoonni Yerikoo 345
 37 namoonni Lood, kan Haadiidii fi Oonoom 721
 38 namoonni Senaa'aa 3,930.

39 Luboota:

- Sanyiin Yedaa'iyaa warri karaa maatii Yeeshuu'aa dhufan 973
 40 sanyiin Imeer 1,052
 41 sanyiin Phaashihuur 1,247
 42 sanyiin Haariim 1,017.

43 Lewwota:

- Sanyiin Yeeshuu'aa warri karaa Qadmii'eel, karaa Hoodayiwaaw dhufan 74.

44 Faarfattoota:

- Sanyiin Asaaf 148.

45 Eegdota karra mana qulqullummaa:

- Sanyiin Shaluum, sanyiin Ateer,
 sanyiin Talmoon, sanyiin Aquub, sanyiin Haxiixaa fi sanyiin Soobaay 138.

46 Tajaajiltoota mana qulqullummaa:

- Sanyii Ziihaa, sanyii Hasuufaa, sanyii Xabaa'oot,
 47 sanyii Keeroos, sanyii Sii'aa, sanyii Faadon,
 48 sanyii Lebaanaa, sanyii Hagaabaa, sanyii Shalmaayi,
 49 sanyii Haanaan, sanyii Gideel, sanyii Gahar,
 50 sanyii Re'aayaa, sanyii Reziin, sanyii Neqoodaa,
 51 sanyii Gazaam, sanyii Uzaa, sanyii Faasehaa,
 52 sanyii Beesaay, sanyii Me'uuniim, sanyii Nefuushesiim,
 53 sanyii Baqbuuq, sanyii Haquufaa, sanyii Harhuur,
 54 sanyii Bazliit, sanyii Mihiidaa, sanyii Harshaa,
 55 sanyii Barqoos, sanyii Siisaaraa, sanyii Teemahi,
 56 sanyii Neziyyaa fi sanyii Haxiifaa.

57 Sanyii Tajaajiltoota Solomoon:

- Sanyii Soxaayi, sanyii Sofereeti, sanyii Feriidaa,
 58 sanyii Ya'ilaa, sanyii Darqoon, sanyii Gideel,
 59 sanyii Shefaaxiyaa, sanyii Haxiil,
 sanyii Fookeret-Hazbaayimii fi sanyii Aamoon.

⁶⁰ Tajaajiltoota mana qulqullummaatii fi sanyiin tajaajiltoota Solomoon 392.

⁶¹ Warri armaan gadiis magaalaawwan Teel Melaa, Teel Hareshaa, Kiruub, Adoonii fi Imeeritii dhufan; isaan garuu akka maatiin isaanii sanyii Israa'el ta'an mirkaneessuu hin dandeenye; isaanis:

⁶² Sanyiin

Delaayaa, sanyiin Xoobbiyaa fi sanyiin Neqoodaa 642.

⁶³ Luboota keessaa immoo:

Sanyii Habayaa,

sanyii Haqoosii fi kan Barzilaay; Barzilaayiin kun sababii intala Barzilaay namicha Gili'aad sanaa fuudheef maqaa kanaan waamame.

⁶⁴ Isaan kunneen sababii galmee hidda dhalootaa keessaa maqaa maatii isaanii barbaadaniid dhabaniif akka xuraa'otaatti ilaalamaniid tajaajila lubummaa dhowwaman. ⁶⁵ Bulchaan biyyattiis hamma lubni Uuriimii fi Tumiimiidhaan tajaajilu tokko ka'utti akka isaan nyaata nyaata hunda caalaa qulqulluu ta'e kam iyyuu hin nyaanneef isaan ajaje.

⁶⁶ Warri boojiudhaa deebi'an walumaa galatti namoota 42,360 turan; ⁶⁷ kana malees tajaajiltoonni isaanii dhiiraa fi dubartiin 7,337 turan; akkasumas isaan faarfattoota dhiiraa fi dubartii 245 qabu ture. ⁶⁸ Isaan farda 736, gaangolii 245, ⁶⁹ gaala 435 fi harree 6,720 qaban ture.

⁷⁰ Hangafoonni maatiiwwanii tokko tokko hojii sanaaf buusii buusan. Bulchaan biyyaa immoo warqee daariikii* 1,000, waciitii 50 fi uffata lubootaa 530 mankuusaatti galii godhe. ⁷¹ Abbootiin maatiiwwanii tokko immoo hojii sanaaf warqee daariikii 20,000 fi meetii minnaanii† 2,200 mankuusatti galii godhan. ⁷² Uummanni kaan immoo walumaa galatti warqee daariikii 20,000, meetii minnaanii 2,000 fi uffata lubootaa 67 kennan.

⁷³ Luboonni, Lewwonni, eegdonni karraa, faarfattoonni fi tajaajiltoonni mana qulqullummaa namoota tokko tokkoo fi Israa'eloota kaan wajjin magaalaawwan ofii isaanii keessa qubatan.

8

Izraan Seera Dubbise

¹ Yeroo ji'i torbaffaan ga'ee Israa'eloonni magaalaawwan ofii isaanii keessa qubatanitti, uummanni hundinuu akkuma nama tokkootti oobdii Karra Bishaanii duratti walitti qabame. Isaanis akka inni Kitaaba Seera Musee kan WAAQAYYO Israa'eliif ajaje sana fiduuf Izraa barsiisaa seeraa sanatti himan.

² Kanaafuu Izraan lubichi guyyaa jalqaba ji'a torbaffaatti fuula waldaa dhiiraa fi dubartii warra waa hubachuu danda'an hundaa duratti Seera sana fide. ³ Innis barii ganamaa jalqabee hamma saafaatti gara oobdii Karra Bishaaniin duratti garagalee fuula dhiirotaa, dubartootaa fi namoota waa hubachuu danda'an kaanii duratti sagalee isaa ol fudhatee seera sana dubbise. Uummanni hundis kitaaba Seeraa sana qalbeeffatee dhaggeeffate.

⁴ Izraan barsiisaan seeraa sun waltajjii mukaa kan kaayyoo kanaaf hojjetame irra dhaabate. Isa biras karaa mirga isaa Matiitiyaa, Shemaa, Anaayaa, Uuriyaa, Hilqiyaa fi Ma'aseyaatu dhaabate; karaa bitaa isaa immoo Phedaayaa, Miishaa'eel, Malkiyaa, Haashum, Hashbadaanaa, Zakkaariyaasii fi Meshulaamitu dhaabatee ture.

⁵ Izraan Kitaabicha bane. Sababii inni isaanii ol dhaabachaa tureef namoonni hundi isa arguu danda'an; akkuma inni kitaabicha baneenis sabni hundi ka'ee dhaabate.

⁶ Izraanis WAAQAYYO Waaqa guddicha galateeffate; namoonni hundinuu harka ol qabatanii, "Ameen! Ameen!" jedhanii jalaa qaban. Ergasiis gad jedhanii addaan lafatti gombifamanii WAAQAYYOOF sagadan.

⁷ Lewwonni jechuunis Yeeshuu'aan, Baaniin, Sheereebiyaan, Yaamiin, Aquub, Shaabetaayi, Hoodiyaa, Ma'aseyaan, Qeliixaa, Azaariyaa, Yoozaabaad, Haanaanii fi Phelaayaan utuma waldaan achi dhaabatee jiruu seera sana ibsaniif. ⁸ Isaanis akka sabni waan dubbifame sana hubatuuf Kitaaba Seera Waaqaa keessaa dubbisaniid ibsuudhaan hiikkaa isaa kennaa turan.

* 7:70 7:70 Daariikiin tokko giraamii 8. † 7:71 7:71 Minnaaniin tokko giraamii 600.

⁹ Achii immoo Nahimiyaan bulchaan biyyaa, Izraa lubichi barsiisaan seeraa sunii fi Lewwonni uummataaf ibsa kennaa turan sun hunda isaaniitiin, “Guyyaan kun guyyaa WAAQAYYO Waaqa keessaniif qulqulleeffamee dha. Hin gaddinaa yookaan hin boo’inaa” jedhan. Sabni hundi yeroo dubbii seera sanaa dhaga’etti boo’aa tureetii.

¹⁰ Kana irratti Nahimiyaan akkana jedhe; “Dhaqaatii nyaata filatamaa nyaadhaa; dhugaatii mi’aawaa dhugaa; warra waan qophaa’e tokko illee hin qabneef waa ergaa. Guyyaan kun guyyaa Gooftaa keenyaaf qulqulleeffamee dha. Sababii gammachuun WAAQAYYOO jabina keessan ta’eef hin gaddinaa.”

¹¹ Lewwonni, “Cal’isaa; guyyaan kun guyyaa qulqulluudhaatii hin gaddinaa” jedhanii uummata hunda ni tasgabbeessan.

¹² Ergasiis sabni hundi sababii dubbii itti himame sana hubateef nyaatee dhuguuf, nyaata isaa irraa qoodde warra kaaniif illee erguu fi gammachuu guddaan ayyaanef-fachuudhaaf ka’ee deeme.

¹³ Bultii lammaffaa ji’a sanaatti abbootiin maatiiwwanii hundinuu dubbii Seera sanaa qalbeeffachuuf lubootaa fi Lewwota wajjin Izraa barsiisaa sana biratti walitti qabaman.

¹⁴ Isaanis akka ajajni WAAQAYYO karaa Museen kenne kan, Israa’eloonni yeroo ayyaana ji’a torbaffaatti daasii keessa turuu qabu jedhu sun seera keessatti barreeffamee jiru argatan; ¹⁵ akkasumas akka isaan akkuma barreeffamee jirutti, “Daasii ijaarudhaaf biyya gaaraatti ol ba’aatii damee ejersaa fi damee ejersa bosonaa, damee kusaayee, damee meexxii fi damee mukkeen baala qabanii fidaa” jedhanii magaalaawwan isaanii fi Yerusaleem keessatti labsuu qaban ni argatan.

¹⁶ Kanaafuu uummanni sun gad ba’ee dameelee fidee tokkoon tokkoon isaanii bantii mana ofii isaanii irratti, oobdii ofii isaanii irratti, oobdii mana Waaqaa irratti, oobdii Karra Bishaanii fi oobdii Karra Efreem bira jiru irratti daasii ijaarratan. ¹⁷ Waldaan boojudhaa deebi’e hundi daasii ijaarratee keessa jiraate. Bara Iyyaasuu ilma Nuuniitii jalqabee hamma gaafasitti Israa’eloonni akkasitti hin ayyaanefanne. Gammachuun isaanii akka malee guddaa ture.

¹⁸ Izraanis guyyaa jalqabaatii hamma guyyaa dhumaatti guyyuma guyyaan Kitaaba Seera Waaqaa keessaa dubbise. Isaanis guyyaa torba ayyaana sana ayyaanefatanii guyyaa saddeettaffaatti immoo akkuma seeraatti yaa’ii guddaa godhatan.

9

Israa’eloonni Cubbuu Isaanii Himatan

¹ Bultii digdamii afuraffaa ji’a sanaatti Israa’eloonni wayyaa gaddaa uffatanii, daaraa mataatti firfiratanii soomaaf walitti qabaman. ² Warri sanyii Israa’el ta’anis namoota ormaa hunda irraa kophaa of baasan. Isaanis ka’anii cubbuu ofii isaaniitii fi hammina abbootii isaanii himatan. ³ Isaanis idduma turan sana dhaabatanii kurmaana guyyaatiif Kitaaba Seera WAAQAYYO Waaqa isaanii keessaa dubbifatan; kurmaana biraa immoo cubbuu isaanii himachaa WAAQAYYO Waaqa isaanii waqeffatan. ⁴ Lewwonni jechuunis Yeeshuu’aan, Baaniin, Qadmii’eel, Shebaniyaan, Buniin, Sheerebiyaan, Baanii fi Kenaan waltajjiwwan irra dhaabatanii sagalee ol fudhatanii WAAQAYYO isaanii waammatan. ⁵ Lewwonni jechuunis Yeeshuu’aan, Qadmii’eel, Baaniin, Hashabniyaan, Sheerebiyaan, Hoodiyaa, Shebaniyaanii fi Phetaayaadhaan, “Ka’aatii WAAQAYYO Waaqa keessan isa bara baraa hamma bara baraatti jiraatu sana galateeffadhaa” jedhan.

“Maqaan kee inni ulfina qabeessi haa eebbifamu; eebbaa fi galata hundaa olittiis ol ol haa jedhu. ⁶ Suma qofatu WAAQAYYO. Ati samiiwwan, samiiwwan oliitii fi tuuta urjiwwan isaanii hunda, lafaa fi waan lafa irra jiru hunda, galaanaa fi waan isaan keessa jiru hunda uumte. Ati waan hundaaf lubbuu kennita; raayyaawwan samiis si waqeffatu.

⁷ “Ati WAAQAYYO Waaqa Abraamin filattee biyya Kaldootaa Uuri keessa isa baafttee Abrahaam jettee isa moggaaftee dha. ⁸ Ati akka ati yaadni isaa amanamaa siif ta’e argitee biyya Kana’aanotaa, Heetotaa, Amoorotaa, Feerzotaa, Yebuusotaatii fi biyya Girgaashotaa sanyiiwwan isaatiif kennuuf kakuu isaaf galte. Ati waan qajeelaa taateef waadaa kee eegdeef.

⁹ “Ati rakkina abbootiin keenya biyya Gibxi keessatti rakkatan argite; boo’icha isaan Galaana Diimaa biratti boo’an illee ni dhageesse. ¹⁰ Ati sababii warri Gibxi of tuulumadhaan hammam akka isaan dhiphisan beekteef Fara’oonitti, qondaaltota isaa hundattii fi saba biyya isaa hundatti mallattoo fi dinqiiwwan argisiifte. Ati maqaa hamma har’aatii illee jiru ofii keetiif baafatte. ¹¹ Ati akka isaan lafa gogaa irra darbaniif fuuluma isaanii duratti galaana gargar qoodde; warra isaan ari’u garuu akkuma dhagaa bishaan guddaatti gad darbatamuu tokkootti tuujubatti gad isaan

darbatte. ¹² Guyyaa guyyaa utubaa duumessaatiin isaan qajeelchite; halkan halkan immoo karaa isaan deeman irratti ifa isaaniif kennuuf jettee utubaa ibiddaatiin isaan qajeelchite.

¹³ “Ati Tulluu Siinaa irratti gad buute; samii irraas isaanitti dubbate. Ajajawwanii fi seerawwan dhugaa fi qajeelaa, labsiwwanii fi ajajawwan gaariis isaaniif kennite. ¹⁴ Sanbata kee qulqulluu sana isaan beeksiftee karaa garbicha kee Museetiin ajajawwan, labsiwwanii fi seerawwan isaaniif kennite. ¹⁵ Yeroo isaan beela’anitti samiidhaa buddeena kenniteefii yeroo isaan dheebotanitti immoo kattaa keessaa bishaan baafteef; akka isaan biyya ati isaaniif kennuuf kakatte sanatti galanii dhaalanis isaaniitti himte.

¹⁶ “Abbootiin keenya garuu of tuulan; mataa jabaataniis ajaja kee eeguu didan. ¹⁷ Jarris ajajamuu didan; dinqii ati isaan gidduutti hojjetee hin yaadanne. Garbummaa isaaniitti deebi’uuf jedhaniis mataa jabaataniis fincila isaaniitiin hoogganaa muudatan. Ati garuu Waaqa namaaf araaramu, arjaa fi gara laafessa, kan dafee hin aarree fi kan jaalalli isaa dhuma hin qabnee dha. Kanaafuu ati isaan hin ganne; ¹⁸ yeroo isaan ofii isaaniitiif fakkii jabbii tolfatanii, ‘Kun Waaqa keessan kan biyya Gibxii isin baasee dha’ jedhanii Waaqa arrabsanitti illee ati isaan hin ganne.

¹⁹ “Sababii gara laafina kee guddaa sanaatiif ati gammoojjii keessatti isaan hin ganne. Utubaan duumessaa guyyaa guyyaa karaa isaaniis irratti isaan geggeessuu hin dhiifne; utubaan ibiddaa immoo halkan halkan karaa isaanii irratti isaaniif ibsuu hin dhiifne. ²⁰ Isaan barsiisuuf jettee Hafuura kee gaarii sana kennite. Ati mannaa afaan isaaniitii hin dhabamsiifne; dheebuu isaaniitiif bishaan kenniteef. ²¹ Waggaa afurtama gammoojjii keessatti isaan soorte; isaan waan tokko illee hin dhabne; wayyaan isaanii hin dhumne; miilli isaaniis hin iitofne.

²² “Ati daangaa hunda qooddeefii mootumootaa fi saboota isaaniif kennite. Isaanis akkasiin biyya Sihoon mooticha Heshboonii fi biyya Oogi mooticha Baashaanii fudhatan. ²³ Ati ilmaan isaanii akkuma urjiiwwan samii baay’ifte; biyya akka isaan seenanii dhaalaniif abbootii isaaniitti himte sanatti isaan galchite. ²⁴ Ilmaan isaanii itti galanii biyya sana dhaalan. Atis Kana’aanota biyya sana turan isaan jala galchite; akka jarri waanuma fedhan isaan godhaniif Kana’aanota mootota isaaniitii fi saba biyya sanaatiin walitti qabdee dabarsitee harka isaaniitti kennite. ²⁵ Isaanis magaalawwan da’annoo qabaniif fi lafa gabbataa qabatan; manneen mi’a gaggaarii gosa hundaatiin guutaman, boollawwan bishaanii qotaman, iddoo dhaabaa wayinii, lafa qotiisaa mukkeen ejersaatii fi mukkeen ija baasan hedduu dhaalan. Isaan nyaatanii quufanii gabbatan; arjummaa kee guddaa sanaanis ni gammadan.

²⁶ “Isaan garuu ajajamuu didanii sitti fincilan; seera kees of duubatti gatan. Raajota kee kanneen gara keetti isaan deebisuuf jedhanii isaan seeran illee ni fixan; Waaqas ni arrabsan. ²⁷ Kanaafuu ati diinota isaanii warra isaan cunqursanitti dabarsitee isaan kennite. Isaan garuu yeroo cunqurfamanitti sitti iyyatan. Atis samiidhaa isaan dhageessee gara laafina kee guddaa sanaan namoota harka diinota isaanii jalaa isaan baasan kenniteef.

²⁸ “Isaan garuu akkuma boqonnaa argataniin amma illee fuula kee duratti waan hamaa hojjetan. Kana irratti ati akka warri sun isaan bulchaniif jettee harka diinota isaaniitti dabarsitee isaan kennite. Yommuu isaan amma illee gara keetti ol iyyatanitti ati samii irraa dhageessee gara laafina keetiin yeroo hedduu isaan furte.

²⁹ “Ati akka isaan gara seera keetiitti deebi’aniif isaan akeekkachiifte; isaan immoo of tuulani ajaja kee eeguu didan. Ajajawwan kee kanneen ‘namni tokko yoo ajajameef ittiin jirenya argachuu danda’utti illee’ cubbuu hojjetan. Finciluudhaan dugda isaaniis sitti garagalchan; mataa jabaataniis si dhaga’u didan. ³⁰ Ati bara hedduu isaaniif obsite. Karaa raajota keetiitiin Hafuura keetiin isaan akeekkachiifte. Ta’us isaan gurra hin kennine; kanaafuu ati dabarsitee saba biyya sanaatti isaan kennite. ³¹ Ati garuu sababii Waaqa arjaa fi araara qabeessa taateef, araara kee guddicha sanaaf jettee isaan hin balleessine yookaan isaan hin ganne.

³² “Kanaafuu amma yaa Waaqa keenya, Waaqa guddicha, jabaatiif sodaachisaa, kan kakuu jaalala keetii eegdu, ati rakkina nutti dhufe kana hunda jechuunis rakkina bara mootota Asoorii jalqabee hamma har’aatti nutti, mootota keenyaa fi hooggantoota keenyatti, luboota keenyaa fi raajota keenyatti, abbootii keenyaa fi saba kee hundatti dhufe kana akka waan salphaatti hin ilaalin. ³³ Waan nurra ga’e hunda keessatti ati qajeelaa dha; nu yoo hamaa hojjenne iyyuu ati waan qajeelaa hojjetee. ³⁴ Mootonni keenya, hooggantoonni keenya, luboonni keenyaa fi abbootiin keenya seera kee duukaa hin buune; isaan ajaja keetiif yookaan akeekkachiisa ati isaaniif kenniteef xiyeeffannoo hin kennine. ³⁵ Isaan yeroo ati biyya bal’aa fi lafa gabbataa keessatti

waan gaarii isaaniif kennite sana keessatti gammadaa, mootummaa ofii isaanii keessa turanitti illee si hin tajaajille yookaan karaa isaanii hamaa sana irraa hin deebine.

³⁶ “Kunoo nu har’a garboota; biyyuma ati akka isaan midhaan isheetii fi waan gaggaarii isheen baafuu nyaataniif jettee abbootii keenyaaf kennite keessatti garboomneerra. ³⁷ Sababii cubbuu keenyaatiif midhaan ishee baay’een sun gara mootota ati nutti muudde sanaa dhaqa. Isaan nuu fi loon keenya illee akkuma fedhan godhu. Nu rakkina guddaa keessa jirra.

Walii Galtee Sabaa

³⁸ “Sababii waan kana hundaatiif nu walii galtee walitti nu hidhu tokko barreeffamaan gopheessine. Hooggantoonni keenya, Lewwonni keenyaa fi luboonni keenya chaappaawwan isaanii itti rukutan.”

10

¹ Warri chaappaan rukutanis kanneenii dha:

Bulchaa biyyaa

jechuunis Nahimiyaa ilma Hakaaliyaa.

Zedeqiyaa, ² Seraayaa, Azaariyaa, Ermiyaas,

³ Phaashihuur, Amariyaa, Malkiyaa,

⁴ Haxuush, Shebaniyaa, Maluuk,

⁵ Haariim, Mereemooti, Obaadiyaa,

⁶ Daani’el, Ginetoon, Baaruk,

⁷ Meshulaam, Abiyaa, Miyaamiin,

⁸ Ma’aaziyyaa, Bilgaayii fi Shemaa’iyaa.

Warri kunneen luboota turan.

⁹ Lewwonni:

Yeeshuu’aa ilma Azaniyaa, ilmaan Heenaadaad keessaa Binuuyii, Qadmii’eelii fi

¹⁰ obboloota isaanii: Shebaniyaa,

Hoodiyaa, Qeliixaa, Phelaayaa, Haanaan,

¹¹ Miikaa, Rehoob, Hashabiyaa,

¹² Zakuur, Sheereebiyaa, Shebaniyaa,

¹³ Hoodiyaa, Baanii fi Beniinu.

¹⁴ Bulchitoota sabaa:

Phaarosh, Fahat Mo’aab, Eelaam, Zaatuu, Baanii,

¹⁵ Bunii, Azgaad, Beebay,

¹⁶ Adooniyaa, Baguwaay, Aadiin,

¹⁷ Ateer, Hisqiyaas, Azuri,

¹⁸ Hoodiyaa, Haashum, Beesaay,

¹⁹ Haariif, Anaatoot, Nebaayi,

²⁰ Magiphii’aash, Meshulaam, Heeziir,

²¹ Mesheezabeel, Zaadoq, Yaadu’aa,

²² Phelaatiyaa, Haanaan, Anaayaa,

²³ Hooshee’aa, Hanaaniyaa, Hashuub,

²⁴ Haloheesh, Philihaa, Soobeq,

²⁵ Rehuum, Hashabnaa, Ma’aseyaa,

²⁶ Ahiiyaa, Haanaan, Aanaan,

²⁷ Maluuk, Haariimii fi Ba’anaa.

²⁸ “Namoonna hafan kaan jechuunis luboonni, Lewwonni, eegdonni karraa, faarfattoonni, tajaajiltoonni mana qulqullummaatii fi warri Seera Waaqaatiif jedhanii saboota ollaa irraa kophaa of baasan hundinuu niitota isaanii, ilmaanii fi intallan isaanii kanneen waa hubachuu danda’an hunda wajjin ²⁹ obboloota isaanii beekamootti dabalamanii akka Seera Waaqaa kan karaa Musee garbicha Waaqaa sanaatiin kenname sana eeganiif ajaja, seeraa fi labsii WAAQAYYO Gooftaa keenyaa hundaaf ajajamaniif abaarsaa fi kakuudhaan waadaa galan.

³⁰ “Nu akka warra naannoo keenya jiraatanitti intallan keenya hin heerumsiifne yookaan akka ilmaan keenya illee intallan isaanii hin fuusifne waadaa galla.

³¹ “Yoo saboonni ollaa keenya jiraatan mi’a daldalaa yookaan midhaan gurguraa guyyaa Sanbataatiin fidan nu guyyaa Sanbataatiin yookaan guyyaa qulqulluu kamiin iyyuu isaan irraa hin bitannu. Waggaa torbaffaa kam iyyuu lafa qotiisaa boqochiifnee idaa hunda namaaf ni dhiifna.

³² “Akka waggaa hunda tajaajila mana Waaqa keenyaatiif jennee saqilii argannu harka sadii keessaa harka tokko kenninu itti gaafatamummaa ni fudhanna; ³³ kunis buddeena minjaala irratti dhi’effamuuf, kennaa midhaaniiti fi aarsaa gubamu kan yeroo yerootti dhi’effamuuf, aarsaa guyyaa Sanbataatiif, kan ayyaana Baatii Haaraatii fi kan ayyaanota bebeekamoo, aarsaawwan qulqullaa’oodhaaf, aarsaawwan cubbuu kanneen Israa’eliif araara buusuuf dhi’effamaniif, akkasumas hojiiwwan mana Waaqa keenyaa keessaa hundaafii dha.

³⁴ “Nu, luboonni, Lewwonni fi sabni yeroo itti tokkoon tokkoon maatiiwwan keenyaa akkuma Seera keessatti barreeffametti waggaa hunda keessaa yeroo murteffametti iddoo aarsaa WAAQAYYOO Waaqa keenya irratti bobeessuuf kennaa qoraanii gara mana Waaqa keenyaa fiduu qabnu beekuuf ixaa buufanneerra.

³⁵ “Akkasumas nu mataa midhaan keenyaatii fi mataa muka ija kennuu hunda waggaa waggaadhaan gara mana WAAQAYYOO fiduuf itti gaafatama fudhanneerra.

³⁶ “Akkuma Seera keessatti barreeffametti hangafa ilmaan keenyaatii fi hangafa loon keenyaa, hangafa horii keenyaatii fi hangafa bushaayee keenyaa gara mana Waaqa keenyaa, luboota achi keessa tajaajilanitti ni geessina.

³⁷ “Kana malees nu daakuu keenya kan bukeeffame irraa, kennaawwan midhaan keenyaa irraa, ija mukkeen keenyaa hunda irraa, daadhii wayinii keenyaa haaraa fi zayitii irraa mataa fuunee gara mankuusaalee mana Waaqa keenyaa lubootatti geessina. Amma illee sababii warri harka kudhan keessaa harka tokko walitti qaban Lewwota ta’aniif magaalawwan keessa hojjennu hunda keessaa oomisha midhaan keenyaa harka kudhan keessaa harka tokko Lewwotatti geessina. ³⁸ Yeroo Lewwonni kennaa harka kudhan keessaa tokko walitti qabanitti lubni sanyii Aroon keessaa dhalate tokko isaan wajjin jiraachuu qaba; ergasii Lewwonni kennaa walitti qaban sana keessaa harka kudhan keessaa tokko gara mana Waaqa keenyaa, gara mankuusaa qabeenyaatti fiduu qabu. ³⁹ Sabni Israa’elii fi ilmaan Lewwii kennaa midhaanii, kan daadhii wayinii haaraa fi kan zayitii gara mankuusaalee mi’i mana qulqullummaa kaa’amu, iddoo luboonni tajaajilan, eegdonni karraa fi faarfattoonni taa’anitti fiduu qabu.

“Nus mana Waaqa keenyaa hin dagannu.”

11

Jiraattota Yerusaalem Warra Haaraa

11:3-19 kwf - 1Sn 9:1-17

¹ Yeroo sanatti hooggantoonni sabaa Yerusaalem keessa qubatan; warri kaan immoo akka inni Yerusaalem magaalaa qulqulluu sana keessa jiraatuuf nama kudhan keessaa tokko fidachuuf ixaa buufatan; warri hafan sagallan immoo magaaladhuma ofii isaanii keessatti hafan. ² Sabnis namoota Yerusaalem keessa jiraachuuf fedhiin of kennan hunda eebbise.

³ Warri kunneen hooggantoota kutaa biyyaa kanneen Yerusaalem keessa qubatanii dha; magaalawwan Yihuudaa keessa garuu tokkoon tokkoon isaanii qabeenya ofii isaaniitiin magaalawwan ofii isaanii keessa jiraatan; isaanis: Israa’eloota, luboota, Lewwota, tajaajiltoota mana qulqullummaa fi sanyiiwwan tajaajiltoota Solomoon; ⁴ ilmaan Yihuudaa fi ilmaan Beniyaam tokko tokko immoo Yerusaalem keessa jiraatan.

Sanyii Yihuudaa Keessaa:

Ataayaa ilma Uziyaa, ilma Zakkaariyaas, ilma Amariyaa, ilma Shefaaxiyaa, ilma Mahalaleel, sanyii Faares; akkasumas

⁵ Ma’aseyaa ilma Baaruk, ilma Kol-Hoozee, ilma Hazaayaa, ilma Adaayaa, ilma Yooyariib, ilma Zakkaariyaas, sanyii Shelaa.

⁶ Sanyiin Faares warri Yerusaalem keessa jiraatan walumaa galatti namoota jajjaboo 468 turan.

⁷ Sanyii Beniyaam keessaa:

Sa'aaluu ilma Meshulaam, ilma Yoo'eel, ilma Phedaayaa, ilma Qolaayaa, ilma Ma'aseyaa, ilma Iitii'eel, ilma Yeshaayaa, ⁸ duukaa buutota isaa Gabayii fi Salaayi; isaan walumatti nama 928 turan.

⁹ Yoo'eel ilmi Zikrii to'ataa isaanii ture; Yihuudaan ilmi Hasenuu'aa bulchaa itti aanaa ture.

¹⁰ Luboota keessaa:

Yedaa'iyaa, ilma Yooyaaariib, Yaakiin;

¹¹ Seraayaa ilma Hilqiyaa, ilma Meshulaam, ilma Zaadoq, ilma Meraayoot, ilma Ahiixuub, bulchaa mana Waaqaa, ¹² obboloota isaanii kanneen mana qulqullummaa keessa hojjetan; walumatti dhiira 822 turan.

Adaayaa ilma Yerooham, ilma Phelaaliyaa, ilma Amzii, ilma Zakkaariyaas, ilma Phaashihuur, ilma Malkiyaatii fi ¹³ obboloota isaa warra abbootii maatii turan; walumatti dhiira 242 turan.

Amashisaay ilma Azari'eel, ilma Ahazaayi, ilma Mashileemoot, ilma Imeeritiiti fi ¹⁴ obboloota isaa namoota jajjaboo; walumatti dhiira 128 turan.

To'ataan isaanii Zabdi'el ilma Hagdoolim ture.

¹⁵ Lewwota Keessaa:

Shemaa'iyaa ilma Hashuub, ilma Azriiqaam, ilma Hashabiyaa, ilma Buunii;

¹⁶ hangafoota Lewwotaa keessaa Shaabetaayii fi Yoozaabaad warra hojii mana Waaqaatiin alaatti itti gaafatamoo turan.

¹⁷ Mataaniyaa ilma Miikaa, ilma Zabdi, ilma Asaaf, namicha yeroo galataatii fi kadhannaatti sagantaa qajeelchu sana;

Baqbuqiyyaa isa obboloota ofii isaa keessaa lammaffaa ture sana;

Abdaa ilma Shamu'aa, ilma Gaalaal, ilma Yeduutuun.

¹⁸ Lewwonna magaalaa qulqullittii walumatti 284 turan.

¹⁹ Eegdota karraa:

Aquub, Talmoonii fi obboloota isaanii kanneen karra eegan; isaanis walumatti dhiira 172 turan.

²⁰ Israa'eloonni kaan immoo lubootaa fi Lewwota wajjin magaalawwan Yihuudaa keessa tokkoon tokkoon isaanii dhaala ofii isaaniitiin jiraatan.

²¹ Tajaajiltoonni mana qulqullummaa garuu tulluu Oofoel irra jiraatan; Ziihaa fi Gishiphaan immoo ajajjoota isaanii turan.

²² Uuziin ilmi Baanii, ilmi Hashabiyaa, ilmi Mataaniyaa, ilmi Miikaa sun Lewwota Yerusaalem keessa jiraatan irratti qondaala hangafa ture. Uuziin kun sanyiiwwan Asaaf warra faarfattoota itti gaafatamtoota hojii mana Waaqaa turan keessaa tokko ture.

²³ Faarfattoonni sun ajaja mootichaa kan guyyaa guyyaan hojii isaanii qajeelchu jala turan.

²⁴ Phetaayaan ilmi Mesheezabeel inni sanyiiwwan Zaaraa ilma Yihuudaa keessaa tokko ta'e sun dhimma saba ilaalu hunda keessatti iddoo bu'aa mootichaa ture.

²⁵ Gama gandoota lafa qotiisaa qabaniitiin immoo sabni Yihuudaa tokko tokko Kiriyaati Arbaaqii fi gandoota ishee keessa, Diiboonii fi gandoota ishee keessa, Yeqabzi'eelii fi gandoota ishee keessa, ²⁶ Yeeshu'aa keessa, Molaadaa keessa, Beet Phelexi keessa, ²⁷ Hazar Shuu'aal keessa, Bersheebaa fi gandoota ishee keessa, ²⁸ Siiqlaagi keessa, Mekoonaa fi gandoota ishee keessa, ²⁹ Een Rimoon keessa, Zoraa keessa, Yarmuut keessa, ³⁰ Zaano'aa keessa, Adulaamii fi gandoota ishee keessa, Laakkiishii fi lafa qotiisaawwan ishee keessa, Azeeqaa fi gandoota ishee keessa qubatan. Kanaafuu isaan Bersheebaa jalqabanii hamma Sulula Hinoomitti jiraatan.

³¹ Sanyiiwwan Beniyaam Gebaadhaa jalqabanii Mikmaas keessa, Ayyaa keessa, Beet'eelii fi gandoota ishee keessa, ³² Anaatoot keessa, Noobii fi Hanaaniyaa keessa, ³³ Haazoor keessa, Raamaa fi Gitayim keessa, ³⁴ Haadiid keessa, Zeboo'iimii fi Nebalaax keessa, ³⁵ Lood, Oonoo fi Gehaaraashim keessa jiraatan.

³⁶ Garee Lewwota Yihuudaa keessaa tokko tokko immoo gosoota Beniyaam gidduu qubatan.

12

Lubootaa fi Lewwota

¹ Isaan kunneen lubootaa fi Lewwota warra Zarubaabel ilma She'altii'eelii fi Iyyaasu wajjin deebi'anii dha:

Seraayaa, Ermiyaas, Izraa,

- ² Amariyaa, Maluuk, Haxuush,
³ Shekaaniyaa, Rehuum, Mereemooti,
⁴ Iddoo, Ginetoon, Abiyaa,
⁵ Miyaamiin, Ma'aadiyaa, Bilgaa,
⁶ Shemaa'iyaa, Yooyaariib, Yedaa'iyaa,
⁷ Sa'aaluu, Aamoq, Hilqiyaa fi Yedaa'iyaa.

Warri kun bara Iyyaasuu keessa hooggantoota lubootaatii fi obboloota isaanii turan.

⁸ Lewwonni immoo Yeeshuu'aa, Binuuyii, Qadmii'eel, Sheereebiyaa, Yihuudaa akkasumas Mataaniyaa isa obboloota isaa wajjin faarfannaa galataatti itti gaafatamaa ture sana turan. ⁹ Obboleeyyan isaanii Baqbuqiyaa fi Unniin yeroo tajaajilaatti fuullee isaanii dhadhaabachaa turan.

- ¹⁰ Iyyaasuun abbaa Yooyaaqiim;
 Yooyaaqiim abbaa Eliyaashiib;
 Eliyaashiib abbaa Yooyaadaa ti;
¹¹ Yooyaadaan abbaa Yoonataan;
 Yoonataan abbaa Yaadu'aa ti.

¹² Isaan kunneen bara Yooyaaqiim keessa abbootii maatiiwwan lubootaa turan:

- Maatii Seraayaa keessaa Meraayaa;
 maatii Ermiyaas keessaa Hanaaniyaa;
¹³ maatii Izraa keessaa Meshulaam;
 maatii Amariyaa keessaa Yehohaanaan;
¹⁴ maatii Maliikii keessaa Yoonataan;
 maatii Shebaniyaa keessaa Yoosef;
¹⁵ maatii Haariim keessaa Adinaa;
 maatii Meraayoot keessaa Helqaayi;
¹⁶ maatii Iddoo keessaa Zakkaariyaas;
 maatii Ginetoon keessaa Meshulaam;
¹⁷ maatii Abiyaa keessaa Zikrii;
 maatii Miniyaamiinii fi kan Mo'aadiyaa keessaa Philxaayi;
¹⁸ maatii Bilgaa keessaa Shamu'aa;
 maatii Shemaa'iyaa keessaa Yoonataan;
¹⁹ maatii Yooyaariib keessaa Matenaayi;
 maatii Yedaa'iyaa keessaa Uzii;
²⁰ maatii Sheelaay keessaa Qaalaayi;
 maatii Aamoq keessaa Eeber;
²¹ maatii Hilqiyaa keessaa Hashabiyaa;
 maatii Yedaa'iyaa keessaa Naatnaa'el.

²² Abbootiin maatii Lewwotaa bara Eliyaashiib, Yooyaadaa, Yoohaanaanii fi bara Yaadu'aa keessa akkasumas abbootiin maatii lubootaa bara mootummaa Daariyoos namicha Faares sanaa keessa galmeeffaman. ²³ Lewwonni warri abbootii maatii turan hamma bara Yoohaanaan ilma Eliyaashiibitti kitaaba seenaa keessatti galmeeffaman. ²⁴ Hangafoonni Lewwotaas Hashabiyaa, Sheereebiyaa, Yeeshu'aa ilma Qadmii'eel akkasumas obboloota isaanii warra akkuma Daawit namni Waaqaa sun ajajetti faarfannaa fi galata dhi'eessuudhaaf fuullee isaanii dhaabatanii gareen tokko garee kaan jalaa qabu sana turan.

²⁵ Mataaniyaan, Baqbuqiyaan, Obaadiyaan, Meshulaam, Talmoonii fi Aquub mankuusaalee karrawwan bira jiran eegu turan. ²⁶ Isaanis bara Yooyaaqiim ilma Iyyaasuu, ilma Yoozaadaaq keessa, bara Nahimiyaa bulchaa biyyaatii fi bara Izraa lubicha barreessaa sanaa keessa tajaajilaa turan.

Ebba Dallaa Yerusaalem

²⁷ Yeroo ebba dallaa Yerusaalemitti Lewwonni akka faarfannaa galataatiin, kililleedhaan, baganaa fi kiraaraan ayyaana eebbaa sana gammachuun ayyaaneffatanii iddoo jiraatan hundaa barbaadamani gara Yerusaalem fidaman. ²⁸ Faarfattoonnis biyya naannoo Yerusaalem jechuunis gandoota Netoofotaatii, ²⁹ Beet Gilgaalii, naannoo

Gebaatii fi Azmaawetitti walitti fidaman; faarfattoonni naannoo Yerusaalemitti gandoota ofii isaanii ijaarratanii turaniitii. ³⁰ Luboonnii fi Lewwonnii erga akka seeraatti of qulqulleessanii booddee saba, karrawwanii fi dallaa sana qulqulleessan.

³¹ Anis akka hooggantoonni Yihuudaa dallaati ol ba'an nan godhe. Akkasumas akka isaan galata dhi'eessaniif tuuta faarfattootaa lama nan ramade. Tuunni tokko karaa mirgaatiin dallaa irraan gara Karra Dikee dhaqe. ³² Hoosha'iyaa fi hooggantoota Yihuudaa keessaa walakkaan, ³³ Azaariyaa, Izraa, Meshulaam, ³⁴ Yihuudaa, Beniyaam, Shemaa'iyaa fi Ermiyaas wajjin isaan duukaa bu'an; ³⁵ akkasumas luboonni malakata qabatan tokko tokkoo fi Zakkaariyaas ilmi Yoonataan, ilmi Shemaa'iyaa, ilmi Mataaniyaa, Miikaayaa, ilmi Zakuur, ilmi Asaaf isaan duukaa bu'an; ³⁶ amma illee obboloota isaa jechuunis Shemaa'iyaa, Azari'eel, Miilaalaayi, Gilaalayi, Maa'ayi, Naatnaa'el, Yihuudaa fi Hanaaniim akkuma Daawit namni Waaqaa sun ajajetti meeshaa faarfannaa fudhatanii dhaqan. Izraan barreessaan sun immoo isaan hoogganaa ture. ³⁷ Isaanis Karra Burqaa biraa ka'anii gulantaawwan Magaalaa Daawit iddoo dallaan ittiin ol ka'u sanaan mana Daawit irraan qajeelanii gara Karra Bishaanii kan gama ba'a biiftuutti ol ba'an.

³⁸ Tuunni faarfattootaa lammaffaan immoo gara bitaatti qajeele. Anis gartokkee sabaa wajjin dallaa gubbaadhaan gara Gamoo ol dheeraa Iddoo Ibbidaatii fi Dallaa Bal'aatti isaan duukaa bu'e; ³⁹ akkasumas ani Karra Efreem irraan, karaa Karra Moofaa, karaa Karra Qurxummii, karaa Gamoo ol dheeraa Hanaani'elii fi Karaa Gamoo ol dheeraa Dhibbaatiin hamma Karra Hoolotaatti isaan duukaa nan bu'e. Isaanis Karra Eegdotaa bira ga'anii dhaabatan.

⁴⁰ Tuunni faarfattootaa kan galata dhi'eesse sun lachuu mana Waaqaa keessatti iddoo isaa qabate; anis gondaaltota gartokko wajjin iddoo nan qabadhe; ⁴¹ amma illee luboonni jechuunis Eliiyaaqiim, Ma'aseyaan, Miiniyaamiin, Miikaayaan, Eliiyoo'eenayin, Zakkaariyaasii fi Hanaaniyaan malakata isaanii qabatanii ⁴² Ma'aseyaan, Shemaa'iyaa, Ele'aa'zaar, Ooziin, Yehohaanaaniin, Malkiyaan, Eelaamii fi Eezer iddoo iddoo isaanii qabatan. Faarfattoonni immoo Yizrahiyaadhaan qajeelfamanii faarfatan. ⁴³ Isaanis sababii Waaqni gammachuu guddaa isaaniiif kenneef gaafas gammadaa aarsaa guddaa dhi'eessan. Dubartoonnii fi ijoolleenis ni gammadan. Sagaleen gammachuu Yerusaaalem keessaas fagootti dhaga'ame.

⁴⁴ Yeroo sanatti namoonni mankuusaalee gumaachi, mataan midhaaniitii fi kennaan harka kudhan keessaa tokkoo itti galfamu irratti itti gaafatamtoota ta'anii muudaman. Isaanis lafa qotiisaa naannoo magaalaaawwanitti argaman irraa qooda Seerri lubootaa fi Lewwotaaf ajaju sana fidanii mankuusaaleetti galchan; Yihuudaan lubootaa fi Lewwota tajaajilanitti gammadee tureetii. ⁴⁵ Isaanis tajaajila Waaqa isaaniitii fi tajaajila sirna qulqullusuu sana akkuma faarfattoonni fi eegdonni karraa godhan sana akkuma Daawitii fi ilmi isaa Solomoon ajajanitti raawwatan. ⁴⁶ Jabana durii bara Daawitii fi Asaaf keessa qajeelchitoota faarfattootaa, kan faarfannaa Waaqa leellisuutii fi kan Waaqa galateeffachuutu tureetii. ⁴⁷ Kanaafuu bara Zarubaabelii fi bara Nahimiyya keessa Israa'eloonni hundi qooda guyyuma guyyaadhaan faarfattootaa fi karra eegdotaa barbaachisu kennan. Akkasumas Lewwota kaaniif qooda isaanii kophaatti baasan; Lewwonnii qooda sanyiiwwan Aroon kophaatti baasan.

13

Geeddarama Nahimiyaan Dhuma Irratti Fide

¹ Guyyaa sana Kitaabni Musee fuuluma sabaa duratti dubbifame; achi keessattis akka namni Amoon yookaan namni Mo'aab tokko yoom iyyuu waldaa Waaqaatti dabalammuu hin qabne barreeffamee argame; ² isaan akka inni saba Israa'el abaaruf Bala'aaamin qaxaratan malee midhaanii fi bishaaniin Israa'eloota hin simanne. Ta'us Waaqni keenya abaarsa sana eebbatti geeddare. ³ Sabnis seera kana dhageenyaan nama sanyii ormaa hunda Israa'el keessaa kophaatti baase.

⁴ Kanaan dura Eliyaashiib lubichi itti gaafatamaa mankuusaalee mana Waaqaa ture. Innis Xoobbiyaa wajjin walitti dhufeenyaa cimaa qaba ture; ⁵ innis kutaa manaa bal'aa isaan duraan kennaa midhaanii, ixaana mi'a mana qulqullummaa, akkasumas kennaa midhaanii, kan daadhii wayinii haaraa fi zayitii Lewwotaaf, faarfattootaa fi eegdota karraatiif ajajame harka kudhan keessaa tokkoo fi buusii lubootaa kennamu itti kuusan tokko Xoobbiyaadhaaf kennee ture.

⁶ Ani garuu sababii bara Arxeksis mooticha Baabilon keessa waggaa sodomii lammaffaatti gara mootichaa dhaqee tureef yeroo wanni kun hundi ta'etti Yerusaaalem keessa hin turre. Anis yeroo gabaabaa booddee isa irraa eeyyama fudhadhee ⁷ Yerusaalemitti

nan deebi'e. Akka Eliyaashiib oobdii mana Waaqaa keessatti Xoobbiyaadhaaf kutaa tokko kennuun waan hamaa hojjete nan beeke. ⁸ Anis akka malee aareen mi'a manaa kan Xoobbiyaa hunda kutaa sana keessaa gad nan dadarbadhe. ⁹ Ani ergasii akka kutaawwan sun qulqulleeffaman nan ajaje; isaanis ni qulqulleessan; ani immoo mi'a mana Waaqaa, kennaa midhaaniitii fi ixaaana wajjin deebisee itti galche.

¹⁰ Ani akka qoodni Lewwotaaf ramadame sun isaaniif hin kennaminis nan hubadhe; akkasumas akka Lewwonnii fi faarfattoonni tajaajila sanatti itti gaafatamtoota turan hundi gara lafa qotiisaa ofii isaaniitti deebi'an nan beeke. ¹¹ Kanaafuu ani gondaaltota ifadheen, "Manni Waaqaa maaliif dagatama?" jedheen isaan gaafadhe. Ergasiis ani walitti isaan qabee iddoo isaaniitti isaan nan deebise.

¹² Yihuudaan hundi midhaan, daadhii wayinii haaraa fi zayitii harka kudhan keessaa tokko fidanii mankuusaaleetti galchan. ¹³ Anis Shelemiyaa lubicha, Zaadoq barreessichaa fi Lewwicha Phedaayaa jedhamu tokko itti gaafatamtoota mankuusaalee godheen muude; akkasumas sababii isaan amanamoo ta'aniif Haanaan ilma Zakuur, ilma Mataaniyaa sana gargaaraa isaanii nan godhe. Hojiin isaaniis obboloota isaaniitiif nyaata hiruu ture.

¹⁴ Yaa Waaqa ko, waan kanaaf jedhii na yaadadhu; hojii gaarii ani mana Waaqa kootii fi tajaajila isaatiif hojjedhes na duraa hin balleessin.

¹⁵ Ani bara sana Yihuudaa keessatti namoota guyyaa Sanbataatiin iddoo wayiniin itti cuunfamutti wayinii dhidhiitanii midhaan fidanii, daadhii wayinii, ija wayinii, ija harbuutii fi fe'iisa gosa biraa hunda wajjin harrootatti fe'an nan arge. Isaanis waan kana hunda guyyaa Sanbataatiin Yerusaalemitti fidan. Kanaafuu ani akka isaan guyyaa sana nyaata hin gurgurre isaan nan seere. ¹⁶ Namoonni Xiirros warri Yerusaalem keessa jiraatan qurxummii fi mi'a daldalaa kanneen gosa hundaa itti fidanii guyyaa Sanbataatiin Yerusaalem keessatti warra Yihuudaatti gurguraa turan. ¹⁷ Ani immoo akkana jedheen namoota Yihuudaa beebekamoo nan ifadhe; "Wanni hamaan isin guyyaa Sanbataa xureessuudhaan hojjetan kun maal? ¹⁸ Abbootiin keessan iyyuu waanuma kana hojjetanii akkasii Waaqni badiisa kana hunda nuttii fi magaalaa kanatti fide mitii? Isin amma kunoo Sanbata xureessuudhaan dheekkamsa hammas iyyuu caalu Israa'elitti fidaa jirtu."

¹⁹ Anis yeroo gaaddisni galgala Sanbataan dura karrawwan Yerusaalem irra bu'etti akka balbalawwan cufamanii hamma Sanbanni darbutti hin banamne nan ajaje. Akka fe'iisni tokko illee guyyaa Sanbataatiin ol hin galfamneefis namoota koo tokko tokko karrawwan irra nan dhaabe. ²⁰ Daldaltoonni fi gurgurtoonni mi'oota gosa hundaa yeroo tokko yookaan yeroo lama Yerusaaleemiin ala bulaniiru. ²¹ Ani garuu, "Isin maaliif dallaa jala bultu? Yoo isin itti deebitanii akkas gootan ani humnaa isinitti nan dhufa" jedheen isaan nan seere. Gaafasii jalqabanii isaan lammata guyyaa Sanbataatiin hin dhufne. ²² Ani akka Lewwonnii of qulqulleessanii qulqullummaa guyyaa Sanbataa eeguuf dhaqanii karrawwan eegan nan ajaje.

Yaa Waaqa koo waan kanaaf jedhii na yaadadhu; akkuma jaalala kee guddaa sanaattis na araarami.

²³ Kana caalaa iyyuu ani bara sana keessa namoota Yihuudaa kanneen dubartoonni Ashdood, kan Amooniitii fi kan Mo'aab fuudhan nan arge. ²⁴ Ilmaan isaanii keessaa walakkaan afaan Ashdood yookaan afaan saboota biraa dubbatan malee afaan Yihuudaa dubbachuu hin dandeenye. ²⁵ Ani isaan ifadheen isaan nan abaare. Ani namoota tokko tokko rukutee rifeensa isaanii irraa nan bubuqise. Ani akkana jedheen maqaa Waaqaatiin isaan nan kakachiise: "Isin intallan keessan ilmaan isaaniitti heerumsisuu yookaan intallan isaanii ilmaan keessan fuusisuu yookaan ofii keessaniis fuudhuu hin qabdan. ²⁶ Solomoon mootichi Israa'el fuudha akkasiitiin cubbuu hojjete mitii? Saboota baay'ee keessa mootiin akka isaa tokko iyyuu hin turre. Waaqni isa jaallatee Israa'el hunda irratti mootii isa godhe; ta'us dubartoonni ormaa cubbuu isa hojjechiisan. ²⁷ Nu amma akka isinis dubartoota ormaa fuudhuudhaan waan akka malee hamaa kana hunda hojjetanii Waaqa keenyaaf amanamuu diddan dhaga'uu qabnaa?"

²⁸ Ilmaan Yooyaadaa ilma Eliyaashiib lubicha ol aanaa sanaa keessaa tokko dhirsa intala Sanbalaax namicha Hooroon ture. Anis of biraa isa nan ari'e.

²⁹ Yaa Waaqa koo ati isaan yaadadhu; isaan lubummaa, kakuu lubummaatii fi Lewwotaa xureessaniiruutii.

³⁰ Kanaafuu ani waan alaa dhufe hunda irraa lubootaa fi Lewwota qulqulleessee akka tokkoon tokkoon namaa hojii ofii isaa hojjetuuf hojiitti isaan nan ramade. ³¹ Akkasumas kennaa qoraaniitii fi kennaa mataa midhaanii kan yeroo murtaa'etti dhi'effamuuf haala nan mijeesse.

Yaa Waaqa koo ati arjummaadhaan na yaadadhu.

Kitaaba Asteer

Ulfinni Waashtiin Mootittiin Taayitaa Irraa Buute

¹ Wanni bara mootummaa Ahashweroos keessa ta'e kanaa dha: Ahashweroos kun Hindiidhaa jalqabee hamma Itoophiyaatti kutaalee biyyaa 127 bulchaa ture; ² yeroo sanatti Ahashweroos Mootichi, Suusaa magaalaa guddoo sana keessa teessoo mootummaa isaa irra taa'ee bulchaa ture; ³ innis bara mootummaa isaa keessaa waggaa sadaffaatti namoota isaa bebeekamoo fi qondaaltota isaa hundumaaf cidha guddaa tokko qopheesse. Hooggantoonni waraana Faaresii fi Meedee, ilmaan moototaa fi namoonni bebeekamoon kutaa biyyaa achi turan.

⁴ Innis bultii 180 guutuu qabeenya mootummaa isaa guddaa, miidhagummaa fi ulfina jabina isaa gad baasee argisiisaa ture. ⁵ Yeroo guyyoonni kunneen darbanitti mootichi saba gamoo Suusaa keessa jiraatu xinnaa fi guddaa hundaaf oobdii iddoo biqiltuu masaraa mootii keessatti cidha guyyaa torba turu qopheesse. ⁶ Iddoon biqiltuu sunis golgaa quncee talbaa irraa hojjetame adii fi cuquliisa, kirrii adii fi diimaa dhiilgeedhaan qubeelaa meetii kan utubaawwan dhagaa akka cabbiitti hidhame tokko qaba ture. Sireewwan dinkiin kanneen warqee fi meetii irraa hojjetamanis lafa dhagaa diimaadhaan, dhagaa akka cabbiitiin, lula bifa adda addaa qabuu fi dhagaawwan gati jabeeyiidhaan miidhagfamee hafame irra ture. ⁷ Dhugaatiinis xofoo warqeeitiin namaaf dhi'eeffame. Tokkoon tokkoon xofoo sanaas gosa adda addaa ture; daadhiin wayiniis akkuma arjummaa mootichaatti akka malee baay'ee ture. ⁸ Akka tokkoon tokkoon keessummaa akkuma fedhetti dhuguuf mootichi eeyyamee ture; akka tokkoo tokkoo namaatiif waan inni barbaade dhi'eessaniifis mootichi warra daadhii wayinii dhi'eessan hunda ajajee turetiin.

⁹ Waashtiin Mootitiinis masaraa mootummaa Ahashweroos Mootichaa keessatti dubartootaaf cidha qopheessite.

¹⁰ Guyyaa torbaffaatti Ahashweroos Mootichi yeroo daadhii wayinii dhugee gammadetti xu'aashiiwwan isa tajaajilan torban jechuunis Mihuumaan, Biztaa'aa, Harboonaa, Bigtaa'a, Abaagtaa, Zeetaarinii fi Karkas ¹¹ akka isaan Waashtiin mootittii akka isheen namootaa fi qondaaltotatti barreedina ishee argisiiftuuf gonfoo mootummaa isheetti kaa'anii fuula isaa duratti dhi'eessan ajaje; isheen akka malee bareedduu turteetiin. ¹² Garuu yeroo ergamoonni sun ergaa mootichaa itti himaniitti Waashtiin Mootitiin dhufuu didde. Kana irratti mootichi akka malee dheekkamee aariidhaan gubate.

¹³ Sababii waan seeraatii fi murtii qajeelaa irratti hayyootaan mari'achuun bartee mootichaa ta'eef inni namoota ogeeyyii waan baraa beekan ¹⁴ kanneen mootichatti aananiin mari'ate; isaanis Karshenaa, Sheetaar, Adimaataa, Tarshiish, Meres, Marseenaa fi Memuukaa qondaaltota Faaresii fi Meedee torban mootichaan walitti dhi'eenya qaban kanneen mootummaa sana keessatti iddoo ol aanaa qabaniin dha.

¹⁵ Innis, "Akka seeraatti wanti nu Waashtiin mootittii gochuu qabnu maali? Isheen ajaja Ahashweroos Mootichaa kan xu'aashiiwwan isheetti geessan sanaaf hin ajajamneetii" jedhee isaan gaafate.

¹⁶ Memuukaan akkana jedhee fuula mootichaatii fi fuula namoota bebeekamoo duratti deebii kenne; "Waashtiin mootittiin Mooticha qofatti utuu hin ta'in qondaaltota hundattii fi namoota kutaalee biyyaa Ahashweroos Mootichaa hundattii balleessaa hojjette. ¹⁷ Wanni mootittiin guyya kun dubartii hunda biratti beekamee isaan, 'Ahashweroos Mootichi akka Waashtiin Mootittiin fuula isaa duratti dhi'eeffamtu ajajee ture; isheen garuu dhaquu didde' jedhaniin dhirsoota isaanii tuffatuutii. ¹⁸ Guyyuma har'aa kana iyyuu dubartoonni Faaresii fi Meedee bebeekamoon warri gocha mootittii kana dhaga'an qondaaltota mootichaa hundaaf waanuma akkasii deebisu. Tuffii fi lola dhuma hin qabnetu uumama.

¹⁹ "Kanaafuu yoo wannu kun mooticha gammachiise akka Waashtiin lammata fuula Ahashweroos Mootichaa duratti hin dhi'eeffamneef inni labsii mootummaa haa labsu; labsiin sunis seera Faaresii fi Meedee kan diigamuu hin dandeenye sana keessatti haa barreeffamu. Mootichi amma illee sadarkaa ulfinaa kan isheen mootummaa keessatti qabdu dubartii biraa kan ishee caaltuuf haa kennu. ²⁰ Yoos yommuu labsiin mootichaa guutummaa mootummaa isaa keessatti labsamutti dubartoonni hundinuu xinnoo fi guddoon dhirsoota isaaniitiif ulfina kennu."

²¹ Mootichii fi qondaaltonni isaa gorsa kanatti ni gammadan; kanaafuu mootichi yaada Memuukaan dhi'eesse sana hojii irra oolche. ²² Innis biyyoota mootummaa hundatti, tokkoo tokkoo kutaalee biyyaatiif qubeedhuma isaaniitiin, akkasumas tokkoo tokkoo sabaatiif afaanuma isaaniitiin xalayoota ergee akka dhiirri hundi bulchaa mana ofii isaa ta'u afaan gosa hundaatiin labse.

2

Asteer Niitii Mootii Taate

¹ Ahashweroos Mootichi erga aariin isaa qabbanaa'ee booddee waan Waashtiin gootee fi labsii inni waa'ee ishee labse ni yaadate. ² Kana irrattis tajaajiltoonni mootichaa akkana jedhanii yaada dhi'eessan; "Dubarran babbareedoon mootichaaf haa barbaadaman. ³ Akka isaan kutaalee biyyaa mootichaa hunda keessaa dubarran babbareedoo hunda gara Suusaa magaalaa guddoo iddoo dubartoonni jiraatanitti fidaniif mootichi itti gaafatamtoota haa muudu; isaanis Heegaayi xu'aashii mootichaa itti gaafatamaa dubartoota sana jalatti haa ajajaman; dubarran sanaafis kunuunsi miidhaginaa haa godhamu. ⁴ Ergasiis durbi mooticha gammachiiftu iddoo Waashtiin buutee niitii mootii haa taatu." Gorsii kunis mooticha ni gammachiise; innis akkuma jedhame sana godhe.

⁵ Yeroo sanatti gosa Beniyaam keessaa namichi Yihuudaa ilmi Yaa'iir, ilmi Shime'ii, ilmi Qiish kan Mordekaayi jedhamu tokko Suusaa magaalaa muummitti keessa jiraata ture; ⁶ innis warra Yehooyaakiin mooticha Yihuudaa wajjin Yerusaaleemii Nebukadnezar mooticha Baabiloniin booji'amaniin fudhataman keessaa tokko ture. ⁷ Mordekaayis, durbi Hadasaa jedhamtu kan sababii isheen abbaa fi haadha hin qabneef ofitti fudhate tokko qaba ture. Durbi Asteer jedhamtee beekamtu kun dhaabaa fi bifaan jaallatamtuu turte; yeroo abbaa fi haati ishee du'anitti Mordekaayi ofitti fudhatee akkuma intala ofii isaatti guddifate.

⁸ Yeroo ajajniif fi labsiin mootichaa dhaga'ametti dubarran hedduun gara Suusaa magaalaa guddiitti fidamani harka Hegeetti kennaman. Asteeris gara masaraa mootichaatti geeffamtee Heegaayi itti gaafatamaa dubartootaa sanatti imaanaa kennamte. ⁹ Durbi sunis isa gammachiiftee fuula isaa duratti fudhatama argatte. Innis yommusuma dibata miidhagina isheetiif ta'uu fi nyaata addaa kenneef. Dubartoota ishee tajaajilan kanneen masaraa mootichaa keessaa filataman torbas isheedhaaf ramade; ishee fi tajaajiltoota ishee sana gara mana dubartootaa kan mana hunda caalaa filatamaa ta'eetti geesse.

¹⁰ Waan Mordekaayi akka isheen hin himne ishee dhowweef Asteer saba isheetii fi maalummaa maatii ishee hin himne. ¹¹ Mordekaayis haala Asteer keessa jirtuu fi waan ishee irra ga'e beekuudhaaf guyyuma guyyaadhaan fuula oobdii mana dubartootaa dura jiru sana irra deddeebi'aa ture.

¹² Durbi tokko utuu dabareen isheen itti fuula Ahashweroos Mootichaa duratti dhi'effamtu hin ga'in dura akkuma seera dubartootaaf kaa'ame sanaatti kunuunsa miidhaginaa kan ji'a kudha lamaa fixuu qabdi ture; isheenis ji'a ja'a zayitii gumbiitiin, ji'a ja'a immoo shittoo fi dibata garaa garaatiin miidhagfamuu qabdi ture. ¹³ Haalli itti durbi tokko mooticha bira dhaqxu akkana ture: Wannii isheen mana dubartootaati fudhattee gara masaraa mootichaa dhaquu feetu kam iyyuu ni kennamaaf ture. ¹⁴ Isheenis galgala achi dhaqxee ganama immoo gara kutaa mana dubartootaa kan harka Sha'asgaazi xu'aashii itti gaafatamaa saajjatoowwan sana jala jiru kaaniitti deebiti turte; yoo mootichi itti gammadee maqaadhaan waame malee isheen gara mootichaatti hin deebitu turte.

¹⁵ Yommuu dabareen Asteer intalli Abiihaayil obboleessa abbaa Mordekaayi kan Mordekaayi akkuma intala ofii isaatti guddifate sun itti mooticha bira dhaqxu ga'etti isheen waan Heegaayi xu'aashiin mootichaa inni itti gaafatamaa mana dubartootaa ture sun gorse malee waan tokko illee hin gaafanne. Asteeris fuula nama ishee argu hundaa duratti fudhatama argatte. ¹⁶ Isheenis bara mootichaa keessa waggaa torbaffaa ji'a kurnaffaa Teebeeti jedhamu keessa gara mana jireenyaa Ahashweroos Mootichaatti dhi'effamte.

¹⁷ Mootichis dubartoota kaan hunda caalaa Asteerin jaallate; isheenis dubarran qulqulluu kaan hunda caalaa fuula isaa duratti surraa fi fudhatama argatte. Kanaafuu inni gonfoo mootummaa mataa ishee irra kaa'eeffii qooda Waashtiin ishee mootiitii taasise. ¹⁸ Ergasiis mootichi ulfina Asteeriitiif jedhee qondaaltota isaatti fi tajaajiltoota isaatiif cidha guddaa qopheesse. Innis ayyaana kana guutummaa kutaalee biyyaa keessatti labse; akkuma arjooma mootiitti kennaas kenne.

¹⁹ Yommuu dubbarran qulqulloonni sun yeroo lammaffaa walitti qabamanitti Mordekaayi karra mootichaa dura taa'aa ture. ²⁰ Asteer garuu akkuma Mordekaayi ishee gorse sanatti maalummaa maatii isheetii fi saba ishee hin himne; Asteer akkuma yeroo inni ishee guddise sanaatti ajaja Mordekaayi eegaa turteetii.

²¹ Yeroo Mordekaayi karra mootichaa dura taa'aa turetti qondaaltonni mootichaa warri balbala eegaa turan lamaan jechuunis Bigtaanaa fi Tereshi aaranii Ahashweroos Mooticha ajeessuuf malatan. ²² Mordekaayi garuu waa'ee mala kanaa beekke Asteer Mootittiitti hime; Asteer immoo maqaa Mordekaayiin waan kana mootichatti himte. ²³ Yeroo wanni sun qoratamee dhugaa ta'ee argametti qondaaltonni sun lamaanuu muka irratti fannifaman. Wanni kun hundinuu fuula mootichaa duratti kitaaba seenaa keessatti barreeffame.

3

Haamaan Yihuudoota Balleessuuf Malate

¹ Waan kanneen booddee Ahashweroos Mootichi Haamaan ilma Hamedataa namicha biyya Agaag ol ol qabuudhaan teessoo qondaaltota kaanii hunda caalu kenneefii isa kabaje. ² Qondaaltonni mootichaa warri karra eegan hundi jilbeenfatani Haamaaniif ulfina kennan; mootichi waa'ee isaa waan kana ajajee tureetii. Mordekaayi garuu hin jilbeenfanne yookaan ulfina isaaf hin kennine.

³ Qondaaltonni mootichaa warri karra mootichaa dura turan, "Ati maaliif ajaja mootichaa eeguu didda?" jedhanii Mordekaayiin gaafatan. ⁴ Isaan guyyuma guyyaadhaan isatti himaa turan; inni garuu isaan dhaga'uu dide. Kanaafuu isaan sababii Mordekaayi akka nama gosa Yihuudaa ta'e isaanitti hime tureef dubbiin isaa kun akka maal ta'uu qabu beekuudhaaf waan kana Haamaaniitti himan.

⁵ Haamaan akka Mordekaayi isaaf hin jilbeenfatin yookaan ulfina hin kenniniif arginaan akka malee aare. ⁶ Haamaanis eenyummaa saba Mordekaayi beeknaan Mordekaayiin qofa ajjeesuu ni tuffate. Qooda kanaa Haamaan saba Mordekaayi hunda jechuunis Yihuudoota mootummaa Ahashweroos guutuu keessa jiraatan fixuuf karaa barbaadaa ture.

⁷ Isaanis waggaa kudha lammaffaa bara Ahashweroos Mootichaa keessa ji'a jalqabaa ji'a Niisaan jedhamu keessa guyyaa fi ji'a filachuudhaaf fuula Haamaan duratti *Fuur* jechuunis ixaa buusan. Ixaan sun ji'a kudha lammaffaa jechuunis ji'a Adaar irra bu'e.

⁸ Haamaanis Ahashweroos Mootichaan akkana jedhe; "Uummanni tokko saba kutaalee biyyaa mootummaa keetii keessa jiran hunda gidduu faffaca'eera; duudhaan uummata kanaa duudhaa saba kaanii hundaan adda; isaan seera mootichaa hin kabajan; kanaafuu mootichi uummata kanaaf obsa qabaachuun hin malu. ⁹ Yoo wanni kun mooticha gammachiise saba kana balleessuudhaaf labsiin tokko haa ba'u; anis warra waan kana hojjetaniif meetii taalaantii kuma kudhan mankuusa qabeenya mootichaatti nan galcha."

¹⁰ Kanaafuu mootichi qubeelaa chaappaa isaa quba ofii irraa baasee Haamaan ilma Hamedataa namicha biyya Agaag, diina Yihuudootaa sanatti kenne. ¹¹ Mootichis Haamaaniin, "Maallaqnis, sabni sunis sitti kennameeraatii akkuma feete godhi" jedhe.

¹² Guyyaa kudha sadaffaa ji'a jalqabaatti barreessitoonni mootichaa walitti waaman. Isaanis waan Haamaan ajaje sana hunda arfii tokkoo tokkoo kutaa biyyaatiin, afaan saba hundaatiinis gara biyya bulchitoota mootichaatti, bulchitoota tokkoo tokkoo kutaalee biyyaatiin fi gara gurguddoota saba adda addaatti barreessan. Wanni kunis maqaa Ahashweroos Mootichaatiin barreeffamee, qubeelaa chaappaa isaatiin mallatteeffame. ¹³ Xalayoanni akka Yihuudoonni hundi dargaggoonni fi maanguddoonni, dubartoonni fi ijoolleen xixinnoon guyyuma tokkotti jechuunis guyyaa kudha sadaffaa ji'a kudha lammaffaatti, ji'a Adaar jedhamu keessa ajjeefaman, akka barbadeeffamanii fi lafa irraa balleffaman, akka qabeenya isaaniis saamamu gara kutaalee biyya mootichaa hundaatti ajajaan ergamootaan ergaman. ¹⁴ Akka sabni hundi beekke guyyaa sanaaf qophaa'uufis garagalchi barreeffama sanaas akka seeraatti kutaalee biyyaa hunda keessatti saba hundatti labsamuu qaba ture.

¹⁵ Ergamoonni sun ajaja mootichaatiin ariitiidhaan deeman; labsiin sunis Susaa magaalaa guddittii keessatti labsame. Mootichi fi Haamaan waa dhuguudhaaf taa'an; magaalaa Susaa garuu ni jeeqamte.

4

Mordekaayi Gargaarsa Asteer Gaafate

¹ Mordekaayi yeroo waan hojjetame sana hunda beeketti uffata isaa tarsaasee, wayyaa gaddaa uffatee, daaraa ofitti firfirsee, sagalee guddaadhaan wawwaachaa hiqqifatees boo'aa gara walakkaa magaalatti gad ba'e. ² Inni garuu sababii namni uffata gaddaa uffate tokko iyyuu akka ol seenu hin eeyyamameef hamma karra mootichaa qofatti deeme. ³ Kutaalee biyyaa hunda iddoo ajajinii fi labsiin mootichaa ga'etti gaddi guddaan, soomni boo'ichii fi wawwaannaan Yihuudoota gidduu ture; baay'een isaanii uffata gaddaa uffatanii daaraa keessa ciisan.

⁴ Yeroo dubartoonni tajaajiltoonni Asteerii fi xu'aashiiwwan dhufanii waa'ee Mordekaayi isheetti himanitti Asteer akka malee gaddite. Isheenis qooda uffata gaddaa wayyaa inni uffatu ergiteef; inni garuu isaan harkaa fudhachuu dide. ⁵ Kana irratti Asteer xu'aashiiwwan mootichaa keessaa Hataak isa ishee tajaajiluuf ramadame sana waamtee akka inni Mordekaayi bira deeme, rakkoo uumamee fi rakkoon sun maaliif akka tuumame beekuuf ajajje.

⁶ Kanaafuu Hataak gara oobdii magaalattii kan karra mootichaa duraa sanaatti Mordekaayiitti ba'e. ⁷ Mordekaayi waan isa irra ga'e hunda, maallaqa Haamaan Yihuudoota balleessuudhaaf mankuusa qabeenya mootichaatti galchuuf waadaa gale isatti hima. ⁸ Akkasumas Mordekaayi akka inni Asteeritti argisiisee isheedhaaf ibsuuf garagalcha barreeffama labsii kan isaan balleessuudhaaf Suusaa keessatti labsame sana isatti kenne; akka inni akka isheen mooticha bira dhaqxee itti boossee saba isheetiif araara kadhattu itti himuufis isa ajaje.

⁹ Hataak deebi'ee waan Mordekaayi jedhe Asteeritti hime. ¹⁰ Asteer immoo akka inni akkana jedhee Mordekaayiitti himu isa ajajje; ¹¹ "Qondaaltonni mootichaa hundii fi sabni kutaalee biyyaa mootichaa akka mootichi yoo namni kam iyyuu dhiiras ta'u dubartiin utuu hin waamamin kutaa manaa isa gara keessaa ol seenee fuula mootichaa duratti dhi'aate akka mootichi seera tokko qofa qabu jechuunis akka ajjeefamu ni beeku. Namni tokko yoo mootichi bokkuu mootummaa kan warqee sana diriiseef qofa ajjeefamuu oola. Ani mataan koo iyyuu guyyoota soddoman kana keessaa akkan fuula mootichaa duratti dhi'aadhuuf waamamee hin beeku."

¹² Yommuu dubbiin Asteer Mordekaayiitti himametti, ¹³ inni akkana jedhee deebii kana erge: "Ati sababii mana mootichaa keessa jirtuuf Yihuudoota hunda keessaa waan ati qofti baraaramtu hin se'in. ¹⁴ Yoo ati yeroo kanatti cal'ifte gargaarsaa fi furamni Yihuudootaa iddoo biraatii ni dhufa; atii fi manni abbaa keetii garuu ni baddu. Maaltu beeka? Ati taayitaa mootummaa qabachuun kee yeroo akkanaatiif ta'aatii."

¹⁵ Kana irratti Asteer akkana jettee deebii kana Mordekaayiitti ergite: ¹⁶ "Dhaqiiiti Yihuudoota Suusaa keessa jiran hunda walitti qabiitii naa soomaa. Bultii sadii, guyyaa yookaan halkan illee homaa hin nyaatinaa yookaan homaa hin dhuginaa. Anii fi dubartoonni tajaajiltoonni koo iyyuu akkuma keessan ni soomna. Yoo akkas ta'ee wanni kun seeraan ala ta'u illee ani gara mootichaa nan dhaqa. Ani yoon bades nan bada."

¹⁷ Kanaafuu Mordekaayi deeme waan Asteer isa ajajje hunda hojii irra oolche.

5

Waan Asteer Mooticha Kadhatte

¹ Guyyaa sadaffaatti Asteer uffata ishee kan mootummaa uffatee dhaqxee oobdii masaraa mootichaa kan gara keessaa irra fuula galma mootichaa dura dhaabatte. Mootichi immoo galma sana keessa gara balbalaatti garagalee teessoo mootummaa isaa irra taa'ee ture. ² Mootichis utuu Asteer Mootittiin oobdii keessa dhaabachaa jirtuu argee isheetti gammadee bokkuu warqee kan harkatti qabatee ture sana isheef diriirse. Kanaafuu Asteer itti dhi'aatee fiixee bokkuu sanaa tuqxe.

³ Mootichi, "Yaa Asteer Mootittii maal siif godhu? Maal barbaadda? Walakkaa mootummaa koo illee taanaan siif ni kennama" jedheen.

⁴ Asteeris, "Yoo wanni kun mooticha gammachiise, mootichi gara cidha ani isaaif qopheesse sanaa Haamaan wajjin har'a haa dhufu" jettee deebifteef.

⁵ Mootichis, "Akka waan Asteer jette sana goonuuf dafaatii Hamaa fidaa" jedhe.

Kanaafuu mootichii fi Haamaan gara cidha Asteer qopheessite sanaa dhaqan. ⁶ Utuma daadhii wayinii dhuganu mootichi amma illee akkana jedhee Asteerin gaafate; "Mee wanni ati kadhattu maal? Wanni sun siif kennama. Gaaffiin kee maali? Walakkaa mootummaa koo illee taanaan siif kennama."

⁷ Asteeris akkana jettee deebifteef; "Wanni ani kadhathuu fi gaaffiin koo kanaa dha: ⁸ Yoo ani fuula mootichaa duratti surraa argadhee mootichis kadhannaa koo fudhatee waan ani isa gaafadhe naaf guutuun isa gammachiise, mootichii fi Haamaan cidha ani isaanii qopheessu irratti bor haa argaman. Ani ergasii gaaffii mootichaa nan deebisa."

Haamaan Mordekaayiitti Aaruu Isaa

⁹ Gaafas Haamaan gammadee itti tolee gad ba'e. Inni garuu karra mootichaa duratti Mordekaayiin argee yommuu akka inni isaaf hin ka'in yookaan isa hin sodaatin hubatetti Mordekaayiitti akka malee aare. ¹⁰ Ta'u illee Haamaan of qabee mana isaatti gale.

Ergasiis michoota isaatii fi niitii isaa Zeresh walitti qabe; ¹¹ Haamaanis qabeenya isaa guddaa sanaan, ilmaan isaa hedduu sanaan akkasumas ulfina mootichi isaaf kenne hundaa fi akkaataa itti mootichi qondaaltota isaatii fi tajaajiltoota isaa kaanii olitti isa guddiseen isaanitti of jaje. ¹² Haamaan itti fufee akkana jedhee; "Kana qofa miti; namni Asteer Mootittiin akka mooticha wajjin gara cidha qopheessite sanaa dhufu waamte anuma qofa. Boris akkasuma mooticha wajjin na affeerteerti. ¹³ Ta'us wanni kun hundinuu utuu ani Mordekaayi Yihuudicha isaa karra mootichaa dura taa'u arguu na hin gammachiisu."

¹⁴ Niitiin isaa Zeresh fi michoonni isaa hundinuu, "Muka itti nama fannisan kan dhundhuma shantama ol dheeratu dhaabiitii akka Mordekaayi bor ganama irratti fannifamu mooticha gaafadhu. Ergasiis mooticha wajjin gara cidha sanaa dhaqqii gammadi" jedhaniin. Yaadni kun Haamaanin gammachiise; innis muka sana dhaabe.

6

Mordekaayi Ulfina Argate

¹ Halkan sana mootichi rafuu hin dandeenye; kanaafuu inni akka isaan kitaaba seenaa kan waa'ee mootummaa isaa barreeffame isaaf dubbisan ni ajaje. ² Kitaaba sana keessattis Mordekaayi akka Bigtaanaa fi Tereshi xu'aashiiwwan balbala eegan kanneen Ahashweroos Mooticha ajeesuuf mari'atan sana lamaan saaxilee ture barreeffamee argame.

³ Mootichis, "Yoos Mordekaayi sababii waan kanaatiif ulfina yookaan kabaja maalii argate ree?" jedhee gaafate.

Tajaajiltoonni isaa immoo, "Wanni tokko iyyuu hin godhamneef" jedhanii deebisan.

⁴ Mootichis, "Eenyutu oobdii kana keessa jira?" jedhee gaafate. Yeroo sana Haamaan waa'ee Mordekaayiin muka dhaabe sana irratti fannisuu mootichatti himuuf jedhee oobdii masaraa mootummaa isa gara alaa seenee ture.

⁵ Tajaajiltoonni mootichaa, "Haamaanitu oobdii keessa dhaabatee jira" jedhanii deebisan.

Mootichis, "Isa ol galchaa" jedhee ajaje.

⁶ Mootichis yeroo Haamaan ol galetti, "Nama mootichi kabajuu barbaaduuf maaltu godhamuufii qaba?" jedhee isa gaafate.

Haamaanis, "Namni mootichi na caalchisee kabaju eenyu?" jedhee ofi keessatti yaade. ⁷ Kanaafuu Haamaan akkana jedhee mootichaaf deebise; "Nama mootichi kabajuu jaallatuuf, ⁸ uffata mootummaa kan mootichi uffatuu fi farda mootummaa kan mootichi yaabbatu haa fidan; fardi gonfoon mootii mataatti kaa'ameef haa dhufuuf. ⁹ Ergasii uffannii fi fardi sun qondaaltota mootichaa kanneen qondaaltota hunda caalaa beekamoo ta'an keessaa isa tokkotti imaanaan haa kennamuuf; isaan immoo nama mootichi ulfina kennuufii barbaadu sanatti uffata sana haa uffisan; farda yaabbachiisaniis, 'Wanni nama mootichi ulfina kennuufii barbaaduuf godhamu kana!' jedhanii labsaa daandiiwwan magaalattii irra fuula isaa dura haa deeman."

¹⁰ Mootichis akkana jedhee Haamaanin ajaje; "Dafii dhaqqii uffataa fi farda sana fuudhiitti akkuma jette sana Mordekaayi Yihuudicha karra mootii dura taa'u sanaaf godhi. Waan jette sana keessaa tokko illee hin hambisin."

¹¹ Kanaafuu Haamaan dhaqee uffataa fi farda sana fuudhe. Innis uffata sana Mordekaayiitti uffisee fardas yaabbachiisee, "Wanni nama mootichi ulfina kennuufii barbaaduuf godhamu kanaa dha!" jedhee labsaa daandii magaalaa irra fuula isaa dura deeme.

¹² Ergasii Mordekaayi gara karra mootichaatti deebi'e. Haamaan garuu gaddaan mataa haguugatee ariitiidhaan manatti gale; ¹³ waan isa irra ga'e hundas niitii isaa Zeresh fi michoota isaa hundatti hime.

Gorsitoonni isaatii fi niitiin isaa Zosaaraan, "Sababii Mordekaayi inni kufaatiin kee fuula isaa duratti jalqabe sun sanyii Yihuudaa ta'eef ati isaan mormuu hin dandeesu; ati dhugumaan ni badda!" jedhaniin. ¹⁴ Utuma isaan isa wajjin dubbachaa jiranuu xu'aashiiwwan mootichaa dhufanii gara cidha Asteer qopheessitee turte sanaatti Haamaan ariifachiisan.

7

Haamaan Fannifame

¹ Mootichii fi Haamaan gara cidha Asteer Mootittiin qopheessite sanaa dhaqan; ² utuma guyyaa lammaffaa sanatti daadhii wayinii dhugaa jiranuu, mootichi akkana jedhee gaafate; “Yaa Asteer Mootittii wanni ati kadhattu maal? Wanni sun siif kennama. Gaaffiin kee maal? Walakkaa mootummaa koo illee taanaan wanni ati gaafattu siif kennama.”

³ Asteer Mootittiin akkana jettee deebifte; “Yaa mooticha, yoo ani fuula kee duratti fudhatama argadhee jiraadhe, yoo wanni kunis mooticha gammachiise, lubbuu koo naaf oolchi; kadhaan koo kanuma. Saba koo illee naaf baraar; gaaffiin koos kanuma. ⁴ Anii fi sabni koo ajjeefamuutti, barbadeeffamuu fi lafa irraa balleeffamuutti gurguranneeraatii. Nu utuu dhiiraa fi dubartiin garbummaa qofummaa gurguranne ta’ee, ani silaa nan cal’isan ture; rakkinni akkasii mooticha jeequuf sababii ga’aa mitiitii.”

⁵ Ahashweroos Mootichis, “Inni eenyuu? Namni waan akkasii gochuuf ija jabaate sun eessa jira?” jedhee Asteer Mootittii gaafate.

⁶ Asteer immoo, “Amajaajji fi diinni sun Haamaan namichuma jal’aa kanaa dha” jette. Kana irratti Hamaan fuula mootichaatii fi mootittii duratti akka malee rifate. ⁷ Mootichis aaree ka’ee daadhii wayinii isaa dhiisee gad ba’ee iddoo biqiltuu masaraa mootummaa seene. Haamaan garuu akka mootichi isa balleessudhaaf kutate beekatee lubbuu ofii oolfachuudhaaf Asteer Mootittii kadhachuudhaaf duubatti hafe.

⁸ Yeroo mootichi iddoo biqiltuu masaraa mootummaatii gara galma cidhaatti deebi’etti Haamaan siree Asteer itti irkattee turte irratti gombifamee ture.

Mootichis, “Inni inumaa iyuu manuma koo keessatti utuma isheen na wajjin jirtuu ishee qabataa?” jedhee dubbate.

Akkuma dubbiin kun afaan mootichaatii ba’een isaan fuula Haamaan haguugan. ⁹ Ergasiis xu’aashiiwwan mooticha tajaajilan keessaa Harboonaan akkana jedhe; “Mukni dhundhuma shantama ol dheeratu tokko mana Haamaa bira dhaabameera. Muka kanas Haamaanitu Mordekaayi isa mooticha gargaaruudhaaf dubbate sana itti fannisuudhaaf dhaabe.”

Mootichis, “Achi irratti isa fannisaa!” jedhe. ¹⁰ Kanaafuu isaan muka inni Mordekaayiiif qopheesse sana irratti Haamaanin fannisan. Ergasiis aariin mootichaa ni qabbanaa’e.

8

Labsii Yihuudoota Baraaruf Labsame

¹ Gaafuma sana Ahashweroos Mootichi qabeenya Haamaan isa diina Yihuudootaa ture sanaa Asteer Mootittiif kenne. Asteer akka inni fira ishee ta’ee waan mootichatti himtee turteef Mordekaayi fuula mootichaa duratti dhi’aate. ² Mootichis qubeelaa chaappaa isaa kan Haamaan irraa deebisee fudhate sana ofi irraa baasee Mordekaayiiif kenne. Asteeris qabeenya Haamaan irratti Mordekaayiin muudde.

³ Asteer miilla isaa irratti kuftee boo’aa ammas mooticha kadhatte. Isheenis akka inni karoora jal’aa kan Haamaan namichi biyya Agaag sun Yihuudootatti baase sana fashaleessuuf isa kadhatte. ⁴ Mootichis bokkuu warqee Asteerif diriirsinaan isheen kaatee fuula isaa dura dhaabatte.

⁵ Isheen akkana jette; “Yoo wanni kun mooticha gammachiise, yoo ani fuula mootichaa duratti surraa argadhee jiraadhe, yoo wanni kun qajeelaa isatti fakkaatee fi yoo inni natti gammade, xalayaa Haamaan ilmi Hamedataa namichi biyya Agaag sun Yihuudoota kutaalee biyyaa mootichaa hunda keessa jiraatan balleessudhaaf barreesse sana fashaleessuuf ajajni haa barreeffamu. ⁶ Ani utuu balaa saba koo irra ga’u arguu akkamittin obsuu danda’a? Akkamittis badiisa maatii koo argee obsuu danda’a?”

⁷ Ahashweroos Mootichis akkana jedhee Asteer Mootittii fi Mordekaayi Yihuudichaa deebii kenne; “Sababii Haamaan Yihuudoota miidheef ani qabeenya isaa Asteerif kenneera; isaanis muka irratti isa fannisaniiru. ⁸ Sababii labsiin maqaa mootichaatiin barreeffamee chaappaan qubeelaa mootichaa itti godhame diigamuu hin dandeenyeef isin akkuma jaallattanitti waan Yihuudoota ilaalu maqaa mootichaatiin barreessaatii chaappaa qubeelaa mootichaa itti chaappessaa.”

⁹ Barreessitoonni mootichaas yommuusuma bultii digdamii sadaffaa ji’a sadaffaatti ji’a Siiwaan jedhamu keessa walitti waamaman. Isaanis ajaja Mordekaayi hunda gara Yihuudoota, ergamoota, bulchitootaa fi namoota beekkamoo kutaalee biyyaa 127 kanneen biyya Hindiitii hamma Itoophiyaatti jiraatanitti barreessanii ergan. Ajajni kunis arfi tokkoo tokkoo kutaalee biyyaatiin, afaan tokkoo tokkoo sabaatiin akkasumas

Yihuudootatti arfii fi afaanuma ofii isaaniitiin barreeffame. ¹⁰ Mordekaayis maqaa Ahashweroos Mootichaatiin xalayoota barreessee chaappaa qubeelaa mootichaa itti chaappesse; xalayoota sanas abbootii fardaa kanneen fardeen mootichaaf leenjifaman keessaa collee ta'an yaabbatanitti erge.

¹¹ Labsiin mootichaa akka Yihuudoonni magaalawwan hunda keessa jiraatan walitti qabaman, akka of eeganii fi akka isaan humna waraana saba kamii iyyuu yookaan biyya kamii iyyuu kan isaan, dubartoota isaaniiti fi ijoollee isaanii miidhu akka ajjeesan, akka barbadeessanii fi lafa irraa balleessan akkasumas akka qabeenya diinota isaanii saaman mirga kenneef. ¹² Guyyaan akka Yihuudoonni kutaalee biyya Ahashweroos Mootichaa hunda keessatti waan kana godhan murtaa'eeffis bultii kudha sadaffaa ji'a kudha lammaffaa, ji'a Adaar jedhamu keessa ture. ¹³ Garagalchi labsii sanaas kutaalee biyyaa hunda keessatti akka seeraatti raabsamee sabni hundi beekuu qaba ture; kunis akka Yihuudoonnis diinota isaanii haaloo ba'uuf gaafasitti qophaa'aniif.

¹⁴ Ergamoonni fardeen mootichaa yaabbatan sunis ajaja mootichaatiin ariifatanii gulufaa deeman. Labsiin sunis gamoo Suusaa keessatti labsame.

¹⁵ Mordekaayis uffata mootii kan bifa cuquliisaatii fi adii uffatee, gonfoo warqee guddaa isaa kaa'atee wayyaa quncee talbaa irraa hojjetame dhiilgee irraan uffatee fuula mootichaa duraa ba'e. Magaalaan Suusaas gammadde ililchite. ¹⁶ Yeroon sun Yihuudootaaf ifa, gammachuu, ilillee fi yeroo ulfinaa ture. ¹⁷ Kutaalee biyyaatiifi magaalawwan hunda keessatti, lafa labsiin mootichaa ga'e hundatti Yihuudoonni ilillee fi gammachuudhaan, nyaataa fi dhugaatiidhaan ni ayyaaneffatan. Namoonni gosa kaanii hedduun sababii Yihuudoota sodaataniif Yihuudoota ta'an.

9

Mo'annoo Yihuudootaa

¹ Bultii kudha sadaffaa ji'a kudha lammaffaatti, ji'a Adaar keessa labsiin mootichi ajaje sun hojii irra ooluu qaba ture. Guyyaa kanatti diinonni Yihuudootaa isaan mo'achuu abdatanii turan; amma garuu dubbiiin garagalee Yihuudoonni warra isaan jibban sana irratti ol'aantummaa argatan. ² Yihuudoonnis warra badiisa isaanii hawwaa turan sana balleessuudhaaf magaalawwan ofii isaanii kanneen kutaa biyyaa Ahashweroos Mootichaa hunda keessatti argamanitti walitti qabaman. Sababii namoonni saba kaanii hundinuu Yihuudoota sodaataniif namni tokko iyyuu fuula isaanii dura dhaabachuu hin dandeenye. ³ Namoonni beebekamoon kutaalee biyyaa hundi, ergamoonni, bulchitoonni fi qondaaltonni mootichaa sababii Mordekaayiin sodaataniif Yihuudoota gargaaran. ⁴ Mordekaayii masaraa mootummaa keessatti beekamaa ture; waa'een isaa kutaalee biyyaa guutuu ga'e; innis akka malee jabaachaa deeme.

⁵ Yihuudoonni diinota isaanii hunda goraadeedhaan cicciranii ajjeesuudhaan barbadeessanii warra isaan jibbanis akkuma barbaadan godhan. ⁶ Gamoo Suusaa keessattis Yihuudoonni nama dhibba shan qalanii fixan. ⁷ Amma illee Paarsandaataa, Dalfoon, Asfaataa, ⁸ Phoorataa, Adaliyaa, Ariidaataa, ⁹ Paarmaashitaa, Ariisayii, Ariidayii fi Wayizaataa ajjeesan; ¹⁰ isaan kunnneen ilmaan Haamaan ilma Hameddaataa namicha diina Yihuudootaa ture sana kurnanii dha. Yihuudoonni garuu boojuu tokko illee hin tuqne.

¹¹ Baay'inni namoota gamoo Suusaa keessatti ajjeefamaniis guyyuma sana mootichatti himame. ¹² Mootichis Asteer Mootittiidhaan akkana jedhe; "Yihuudoonni namoota dhibba shanii fi ilmaan Haamaan kurnan gamoo Suusaa keessatti ajjeesani balleessaniiru. Kutaalee biyyaa mootichaa kanneen hafan keessatti maal godhan laata? Amma wanni ati kadhattu maali? Wanni sun siif kennama. Gaaffiin kee maali? Wanni sunis siif guutama."

¹³ Asteeris akkana jettee deebifte; "Yoo wanni kun mooticha gammachiise akka Yihuudoonni Suusaa keessa jiran labsii har'aa kana bori illee hojii irra oolchaniif eeyyama kennaniif; ilmaan Haamaan kurnanis muka irratti haa fannifaman."

¹⁴ Kanaafuu mootichi akka wanni kun raawwatamu ajaje. Labsiin tokko Suusaa keessatti labsame; isaanis ilmaan Haamaan kurnan fannisan. ¹⁵ Yihuudoonni Suusaa keessa jiraatan bultii kudha afuraffaa ji'a Adaaritti walitti qabamanii nama dhibba sadii Suusaa keessatti fixan; garuu boojuu tokko illee hin tuqne.

¹⁶ Yeroo kanatti Yihuudoonni kutaalee biyya mootichaa keessatti hafan kaanis mataa isaanii eeguu fi diinota isaanii irraa boqochuuf jedhanii walitti qabaman. Isaanis jara keessaa nama kuma torbaatamii shan fixan; garuu boojuu tokko illee hin tuqne. ¹⁷ Wanni kunis bultii kudha sadaffaa ji'a Adaar keessa ta'e; guyyaa kudha afuraffaatti immoo boqotaniif guyyaa sana guyyaa cidhaa fi gammachuu godhatan.

Ayyaanni Furiim Ayyaaneffame

¹⁸ Ta'us Yihuudoonni Suusaa keessa jiraatan guyyaa kudha sadaffaa fi kudha afuraffaatti walitti qabaman; ergasii immoo guyyaa kudha shanaffaatti boqotanii guyyaa sana guyyaa cidhaa fi gammachuu godhatan.

¹⁹ Sababiin Yihuudoonni baadiyyaa kanneen gandoota keessa jiraatan guyyaa kudha afuraffaa ji'a Adaar akka guyyaa cidhaa fi gammachuutti, akka guyyaa itti kennaa waliif kennaniittis ayyaaneffataniif kanuma.

²⁰ Mordekaayis wantoota kanneen galmeessee Yihuudoota kutaalee biyya Ahashweroos Mootichaa keessa dhi'oo fi fagoo jiraatan hundatti xalayoota erge; ²¹ kunis akka isaan waggaa waggadhaan guyyaa kudha afuraffaa fi kudha shanaffaa ji'a Adaar ²² akkuma yeroo itti Yihuudoonni diinota isaanii irraa boqonnaa argataniittii fi akka ji'a itti gaddi isaanii gara gammachuutti, boo'ichi isaanii immoo gara kolfaatti geeddaramaetti ayyaaneffataniif. Innis akka isaan guyyoota sana akka guyyoota cidhaa fi gammachuutti, akka guyyoota itti nyaata waliif kennanii hiyyeeyyiifis kennaa kennaniitti ayyaaneffatanitti isaaniif barreesse.

²³ Akkasii Yihuudoonni akkuma Mordekaayi isaaniif barreesetti ayyaana ayyaaneffachuu jalqaban sana itti fufuuf walii galan. ²⁴ Haamaan ilmi Hamedaataa namichi biyya Agaag diinni Yihuudoota hundaa sun Yihuudoota balleessuudhaaf isaanitti yaadee akka isaan badanii fi barbadeeffamaniif ixaa *Fuur* jedhamu buusee tureetii. ²⁵ Yeroo yaadni sun gurra mootichaa bu'etti mootichi akka yaadni jal'aan kan Hamaan Yihuudootatti yaade sun matuma isaatti deebi'ee innii fi ilmaan isaa muka irratti fannifamaniif barreeffamaan ajaja dabarse. ²⁶ Kanaafuu guyyoonni sun jecha *Fuur* jedhamu irraa Furiim jedhamanii moggaafaman. Sababii waan xalayaa kana keessatti barreeffame hundaatii fi sababii waan arganiitii fi waan isaan irra ga'ee tureetiif, ²⁷ Yihuudoonni akka guyyoonni lamaan kanneen akkuma barreeffamettii fi yeroo murteeffametti utuu addaan hin citin waggaa waggadhaan ayyaaneffamaniif bartee ofii isaanii, kan sanyiiwwan isaaniitii fi warra isaanitti dabalaman hundaa godhanii dhaabbatan. ²⁸ Guyyoonni kanneen dhaloota hunda keessatti, maatii hundaan, kutaalee biyyaa hundaa fi magaalaa hunda keessatti yaadatamuu fi kabajamuu qabu; guyyoonni Furiim kanneen Yihuudootaan kabajamuunis hafuu hin qabu; yaadannoon guyyoota kanneeniis sanyii isaanii keessaa baduu hin qabu.

²⁹ Kanaafuu Asteer Mootittiin intalli Abiihaayil sun Mordekaayi Yihuudicha wajjin ta'anii xalayaa lammaffaa waa'ee Furiim dubbatu kana mirkaneessuudhaaf aangoo guutuudhaan barreessan. ³⁰ Mordekaayis Yihuudoota kutaalee biyyaa 127 kanneen mootummaa Ahashweroos keessa jiraatan hundatti dubbii hawwii nagaatii fi qabbanaa barreessee erge. ³¹ Kunis akka guyyoonni Furiim kanneen akkuma Mordekaayi Yihuudichii fi Asteer Mootittiin isaaniif labsanitti, akkuma isaanis ofii isaaniitii fi sanyiiwwan isaaniitiif waa'ee soomaatii fi yeroo boo'icha isaanii ilaalchisee dhaabbatanitti yeroo murtaa'etti ayyaaneffamuuf. ³² Labsiin Asteeris seera waa'ee Furiim kana mirkaneesse; wanni kunis galme keessatti barreeffame.

10

Guddina Mordekaayi

¹ Ahashweroos Mootichi hamma qarqara galaanaatti bulchiinsa isaa guutuu irratti gibira buuse. ² Hojiin humnaa fi jabina isaa hundinuu, seenaa guddina Mordekaayi kan mootichi itti ol isa guddise guutuu wajjin kitaaba seenaa mootota Meedee fi Faares keessatti barreeffameera mitii? ³ Mordekaayi Yihuudichi sadarkaadhaan nama Ahashweroos Mootichatti aanu ture; inni sababii uummata isaatiif waan gaarii hojjetee fi sababii nageenya Yihuudoota hundaatiif falmeef obboloota isaa Yihuudoota hedduu biratti ulfina guddaa qaba ture.

Kitaaba Iyyoob

Seensa

¹ Biyya Uuzi jedhamu keessa nama Iyyoob jedhamu tokkotu ture. Namichi kunis nama hir'ina hin qabnee fi qajeelaa, nama Waaqa sodaatuu fi hammina irraa fagaate ture. ² Innis ilmaan torbaa fi intallan sadii qaba ture; ³ akkasumas hoolota kuma torba, gaala kuma sadii, qotiyyoo cimdii dhibba shanii fi harroota dhibba shan, tajaajiltoota hedduus qaba ture; innis namoota biyya Ba'a Biiftuu jiraatan hunda keessaa nama guddaa ture.

⁴ Ilmaan isaas mana isaaniiti dabaree dabareedhaan cidha qopheessanii akka isaan wajjin nyaatanii dhuganiif obboleettota isaanii sadan affeeru ture. ⁵ Erga yeroon cidha sanaa raawwatamee booddee Iyyoob itti ergee ijoollee isaa waamsisuudhaan, "Tarii ijoolleen koo cubbuu hojjetanii garaa isaaniittis Waaqa abaaraniiru ta'a" jedhee ganama barii waa'ee tokkoo tokkoo isaaniitiif aarsaa gubamu dhi'eessuudhaan isaan qulqulleessa ture. Iyyoob yeroo hunda waan kana godha ture.

Qorumsa Iyyoob Kan Jalqabaa

⁶ Gaaf tokko yeroo ergamoonni Waaqayyoo fuula WAAQAYYOO duratti dhi'aachuuf dhufanitti Seexannis isaan wajjin dhufe. ⁷ WAAQAYYOS seexanaan, "Ati Eessaa dhufte?" jedhe.

Seexannis, "Ani lafa hunda irra jooraa, asii fi achis deddeebi'aa tureen dhufe" jedhee WAAQAYYOF deebise.

⁸ WAAQAYYOS Seexanaan, "Ati tajaajilaa koo Iyyoobin qalbeeffatteertaa? Namni isa fakkaatu tokko illee lafa irra hin jiru; inni nama hir'ina hin qabnee fi qajeelaa, nama Waaqa sodaatuu fi hammina irraa fagaatee dha" jedhe.

⁹ Seexanni immoo deebisee akkana jedhe, "Iyyoob akkasumaan Waaqa sodaataa? ¹⁰ Ati naannoo isaatti, warra mana isaa jiraatanii fi waan kan isaa ta'e hundatti dallaa ijaarteerta mitii? Ati akka bushaayee fi loon isaa biyyicha guutaniif hojii harka isaa eebbifteertaaf. ¹¹ Garuu ati mee harka kee diriirsiitii waan inni qabu hunda dha'i; inni dhugumaan ifaan ifatti si abaara."

¹² WAAQAYYOS Seexanaan, "Kunoo, wanti inni qabu hundi si harka jira; isa garuu qubaanuu hin tuqin" jedhe.

Sana booddee Seexanni fuula WAAQAYYOO duraa ba'ee deeme.

¹³ Gaaf tokko utuu ilmaanii fi intallan Iyyoob mana obboleessa isaanii isa hangafaatti nyaachaa, daadhii wayinii dhugaa jiranuu, ¹⁴ ergamaan tokko gara Iyyoob dhufee akkana jedhe; "Utuu qotiyyoon qotaa, harroonni immoo naannuma sana dheedaa jiranuu, ¹⁵ namoonni Shebaa balaa buusanii isaan fudhatanii deeman. Tajaajiltootas goraadeedhaan fixan; ana qofatu miliqee sitti himuuf dhufe!"

¹⁶ Utuma inni dubbachaa jiruu ergamaan biraa dhufee, "Ibiddi Waaqaa samiidhaa bu'ee hoolotaa fi tajaajiltoota gubee fixe; ana qofatu miliqee sitti himuuf dhufe!" jedhe.

¹⁷ Utuu inni dubbachaa jiruu ammas ergamaan biraa dhufee, "Kaldoonni garee sadiitti qoodamanii gaalawwan kee irra yaa'anii isaan oofatanii deeman; tajaajiltootas goraadeedhaan fixan; ana qofatu miliqee sitti himuuf dhufe!" jedhe.

¹⁸ Utuma inni dubbachaa jiruu ergamaan biraa dhufee akkana jedheen; "Ilmaanii fi intallan kee mana obboleessa isaanii isa hangafaatti nyaachaa, daadhii wayinii dhugaa turan; ¹⁹ yeroo kanattis bubbee hamaan akka tasaa gammoojjiidhaa ka'ee golee mana sanaa afran dha'e; manni sunis isaan irratti jigee dhuman; ana qofatu miliqee sitti himuuf dhufe!"

²⁰ Kana irratti Iyyoob uffata isaa tarsaasee mataa isaa haaddate. Lafatti gombifamee sagadee ²¹ akkana jedhe:

"Ani qullaa koon gadameessa haadha kootiitii ba'e;
qullaa koos nan deema.

WAAQAYYOTU kenne; WAAQAYYOTU fudhate;
maqaan WAAQAYYOO haa eebbifamu."

²² Wantoota kanneen hunda keessatti Iyyoob hojii dogoggoraatiin Waaqa himachuudhaan cubbuu hin hojjenne.

2

Qorumsa Iyyoob Isa Lammaffaa

¹ Guyyaa biraas ergamoonni Waaqayyoo fuula WAAQAYYOO duratti dhi'aachuuf dhufan; Seexannis isaan wajjin fuula WAAQAYYOO duratti dhi'aachuuf dhufe. ² WAAQAYYOS Seexanaan, "Ati eessaa dhufte?" jedhe.

Seexannis, "Ani lafa hunda irra jooree asii fi achis deddeebi'aa tureen dhufe" jedhee WAAQAYYOO deebise.

³ WAAQAYYOS Seexanaan akkana jedhe; "Tajaajilaa koo Iyyoobin qalbeeffatteertaa? Namni isa fakkaatu tokko illee lafa irra hin jiru; inni nama hir'ina hin qabnee fi qajeelaa, nama Waaqa sodaatuu fi hammina irraa fagaate dha. Ati akka ani sababii tokko malee isa balleessuuf na kakaaftu iyyuu inni hamma ammaatti qajeelummaa isaa cichee qabateera."

⁴ Seexannis deebisee akkana jedhe; "Gogaan gogaadhaaf! Namni lubbuu isaa oolfachuuf jedhee waan qabu hunda ni kenna. ⁵ Garuu ati mee harka kee diriirfadhuutii foonii fi lafee isaa rukuti; inni dhugumaan ifumaan ifatti si abaara."

⁶ WAAQAYYOS Seexanaan, "Kunoo inni si harka jira; lubbuu isaa garuu hin tuqin" jedhe.

⁷ Kanaafuu Seexanni fuula WAAQAYYOO duraa ba'ee Iyyoobin faana miilla isaatii jalqabee hamma gubbee mataa isaatti madaa hamaadhaan rukute. ⁸ Iyyoobis ittiin of hooquuf jedhee qiraacii fudhatee daaraa keessa taa'e.

⁹ Niitiin isaa, "Ati amma illee qajeelummaa kee cichitee qabatteertaa? Waaqa abaariitii du'ii" isaan jette.

¹⁰ Inni immoo deebisee, "Ati akka dubartii gowwaa tokkootti dubbatte. Nu harka Waaqaatii waan gaarii fudhanneerra; waan hamaa immoo fudhachuu hin qabnuu?" jedhe.

Wantoota kanneen hunda keessatti Iyyoob waan dubbateen cubbuu hin hojjenne.

Michoota Iyyoob Sadan

¹¹ Michoonni Iyyoob sadan jechuunis Eliifaaz namni Teemaan, Bildaad namni Shuhaatii fi Zoofaari namni Naa'imaataa yommuu waan Iyyoob irra ga'e hunda dhaga'anitti rakkina isaa goodachuu fi isa jajjabeessuudhaaf tokkummaan walli galanii mana isaaniitii ba'an. ¹² Yommuu fagootti isa arganitti isa beekuu hin dandeenye; isaanis sagalee ol fudhatanii boo'an; uffata isaaniis tarsaasanii mataa isaaniitti daaraa firfirfatan. ¹³ Ergasii guyyaa torbaa fi halkan torba isa wajjin lafa tataa'an. Isaan sababii dhiphinni isaa akka malee cimaa ta'uu isaa arganiif, namni tokko iyyuu homaa isatti hin dubbanne.

3

Dubbii Iyyoob

¹ Kana irratti Iyyoob afaan isaa banatee guyyaa itti dhalate abaare. ² Innis akkana jedhe:

Iyyoob

³ "Guyyaan ani itti dhaladhe haa badu;
halkan, 'Ilmi dhalate!' jedhame sunis haa badu.

⁴ Guyyaan sun haa dukkanaa'u;
Waaqni ol gubbaadhaa isa hin ilaalin;
ifnis itti hin ifin.

⁵ Dukkannii fi gaaddidduun guddaan isa haa dhaalan;
duumessi isa irra haa bu'u;
ifa isaa dukkanni haa liqimsu.

⁶ Halkan sana dukkanni limixiin haa qabatu;
guyyoota waggaa keessa jiranittis hin dabalamin
yookaan ji'oota kam iyyuu keessatti hin lakkaa'amin.

⁷ Halkan sun haa maseenu;
ililleenis keessatti hin dhaga'amin.

⁸ Warri Lewaataanin kakaasuuf qophaa'an,
kanneen guyyoota abaaran guyyaa sana haa abaaran.

⁹ Bakkalchi barii kan guyyaa sanaa haa dukkanaa'u;
ifa eeggatee haa dhabu;
boruu baqaqus hin argin.

¹⁰ Inni ija koo duraa rakkina dhoksuuf,
balbala gadameessa haadha kootii natti hin cufneetii.

- 11 “Ani maaliif gadameessa haadha kootii keessatti hin badin?
Maaliifis yeruman garaa keessaa ba’etti hin du’in?”
- 12 Jilbawwan na simatan,
harmawwan ani hodhus maaliif achitti argaman?
- 13 Ani silaa yoonaa nagaan nan ciisa;
rafees nan boqodhan tureetii;
- 14 moototaa fi gorsitoota addunyaa
warra iddoowwan amma dūgamanii jiran ofii isaaniitiif qopheeffatan wajjin,
15 bulchitoota warqee qaban, kanneen manneen isaanii
meetiidhaan guutatan wajjin nan boqodhan ture.
- 16 Yookaan ani maaliifin akkuma mucaa du’ee garaa ba’ee,
akkuma daa’ima ifa guyyaa hin arginiitti hin awwaalamin?
- 17 Achittis namoonni hamoonni jeequu ni dhiisu;
dadhaboonnis achitti ni boqotu.
- 18 Booji’amtoonni nagaadhaan walii wajjin jiraatu;
waca cunqursitoota isaaniis hin dhaga’an.
- 19 Xinnaa fi guddaan achi jira;
garbichis gooftaa isaa jalaa bilisoomera.
- 20 “Maaliif warra gadadoo keessa jiraniif ifni
warra lubbuun isaanii gadditeef immoo jireenyi kennama?”
- 21 Warra du’a hawwanii dhabaniif
warra qabeenya dhokfame caalaa du’a barbaadaniif
- 22 warra yommuu awwaalamuu ga’anitti
gammachuun guutamani illichaniif jireenyi maaliif kennama?
- 23 Nama karaan isaa duraa dhokateef
nama Waaqni dallaa itti marse
jireenyi maaliif kennama?
- 24 Gaddi buddeena naa ta’eera;
aaduun koos akka bishaanii dhangala’a.
- 25 Wannii ani sodaadhe natti dhufeera;
wannii na naasisus narra ga’eera.
- 26 Ani nagaa hin qabu; tasgabbiis hin qabu;
jeequmsa malee boqonnaa hin qabu.”

4

Eliifaaz

- 1 Eliifaaz namichi Teemaan sun akkana jedhee deebise:
2 “Yoo namni tokko sitti dubbachuu yaale, ati ni komattaa?
Garuu eenyutu dubbachuu dhiisa?”
- 3 Ati akka nama baay’ee barsiifte,
akka harka dadhabaa illee jajjabeessite yaadadhu.
- 4 Dubbiin kee warra gatantaran gargaaree dhaabeera;
atis jilba laafe jabeessiteerta.
- 5 Amma garuu rakkinni sirra ga’e; atis abdi kutatteerta;
rakkinni si miidheera; atis rifatteerta;
- 6 Waaqa sodaachuun kee irkoo kee,
qajeelinni karaa keetiis abdi kee mitii?
- 7 “Ammas yaadadhu; namni qulqulluun takkumaa badee beekaa?
Qajeelonni eessatti badanii beeku?”
- 8 Akka ani hubadhetti warri waan hamaa qotatan,
kanneen waan hamaa faacaanis isuma haammatu.
- 9 Isaanis hafuura Waaqni isaanitti baafatuun badu;
hafuuraa dheekkamsa isaaniitiinis ni barbadeeffamu.
- 10 Leenci ni aada; ni gururi’as;
ilkaan leenca saafelaa garuu ni caccaba.
- 11 Leenci jabaan waan adamsu dhabee ni du’a;
ilmaan leenca dhaltuus ni bittinnaa’u.
- 12 “Dubbiin tokko icciitiidhaan naa fidame;

- gurri koos asaasa isaa dhaga'e.
 13 Abjuu halkanii sodaachisaa keessa,
 yommuu hirribni cimaan nama qabatutti,
 14 sodaa fi hollachuun na qabatee
 lafee koo hunda raase.
 15 Hafuurri luffi jedhee fuula koo dura darbe;
 rifeensi dhagna koos ka'ee dhaabate.
 16 Innis ni dhaabate;
 ani garuu inni maal akka ta'e hubachuu hin dandeenye.
 Fakkiin tokko ija koo dura dhaabate;
 anis sagalee tasgabbii kan akkana jedhu tokkon dhaga'e:
 17 'Namni du'a hin oolle, Waaqa caalaa qajeelaa ta'uu danda'aa?
 Namni Uumaa isaa caalaa qulqulluu ta'uu danda'aa?
 18 Waaqni tajaajiltoota isaa hin amanatu;
 ergamoota isaas balleessaa isaaniitiin ni gaafata;
 19 yoos warri manneen suphee keessa jiraatan,
 warri hundeen isaanii biyyoo ta'e,
 warri billi caalaa burkutaa'an immoo akkam haa ta'an ree?
 20 Isaan ganamaa fi galgala gidduutti burkutaa'u;
 tasumas bara baraan ni badu.
 21 Akka isaan ogummaa malee du'aniif
 funyoon dunkaana isaanii hin luqqifamnee?'

5

- 1 "Mee waami, namni deebii siif kennu jiraa?
 Qulqulloota keessaas ati gara isa kamiitti gorta?
 2 Nama gowwaa aariitu ajjeesa;
 raatuus hinaaffaatu galaafata.
 3 Namni gowwaan hidda isaa gad fageeffatee nan arge;
 manni isaa garuu yoosuma abaarame.
 4 Ijoolleen isaa nagaa hin qaban;
 isaan karra duratti burkutaa'an; namni isaan oolchus hin jiru.
 5 Namni beela'e midhaan isaa qoraattii keessaa iyyuu fuudhee nyaata;
 inni dheebotes qabeenya isaa hawwa.
 6 Rakkinni biyyoo keessaa hin burquutii;
 dhiphinnis lafa keessaa hin biqilu.
 7 Akkuma qaanqeen ibiddaa ol faca'u
 namni rakkinaaf dhalata.
 8 "Garuu utuu ana ta'ee Waaqa nan barbaaddadha;
 dhimma koos fuula isaa duratti nan dhi'eeffadhan ture.
 9 Inni dinqiiwwan qorarii bira ga'uu hin dandeenye,
 hojiiwwan dinqisiisoo lakkaa'amu hin dandeenye hojjeta.
 10 Inni bokkaadhaan lafa ni quubsa;
 lafa qotiisaas bishaan ni obaasa.
 11 Warra gad qabaman ol baasa;
 warra gaddanis iddoo nagaatti ol kaasa.
 12 Akka hojiin harka isaanii hin milkoofneef,
 inni karoora jal'ootaa ni fashaleessa.
 13 Inni ogeeyyii haxxummaa isaaniitiin qaba;
 malli jal'ootaa immoo dafee ni bada.
 14 Guyyaan dukkana isaanitti ta'a; guyyaa saafaas
 akka nama dukkana keessa jiruu qaqqabannaadhaan deemu.
 15 Inni nama rakkataa goraadee afaan isaanii jalaa,
 harka nama jaba jalaas ni baasa.
 16 Kanaafuu hiyyeessi abdii qaba;
 jal'innis afaan isaa ni cufata.
 17 "Namni Waaqni adabu eebbifamaa dha;
 kanaafuu ati adabbii Waaqa Waan Hunda Danda'uu hin tuffatin.
 18 Inni ni madeessa; ni fayyisas; inni ni cabsa;

- harka isaatiinis deebisee ni fayyisa.
- 19 Balaa ja'a jalaa si baasa;
torba keessattis hin miidhamtu.
- 20 Bara beelaa du'a jalaa,
lola keessattis rukuttaa goraadee jalaa si baasa.
- 21 Ati garaffii arrabaa jalaa ni dhokfamta;
yommuu badiisni dhufuttis hin sodaattu.
- 22 Badiisaa fi beelatti ni kolfita;
bineensota lafaas hin sodaattu.
- 23 Dhagoota bakkee wajjin kakuu galta;
bineensonni bosonaas nagaadhaan si wajjin jiraatu.
- 24 Dunkaanni kee nagaan akka jiru ni beekta;
qabeenya kee ni to'atta; wanni tokko illee si jalaa hin badu.
- 25 Ijoolleen kee akka baay'atan,
sanyiiwwan kees akkuma marga lafaa akka ta'an ni beekta.
- 26 Akkuma bisiin midhaanii yeroo isaatti walitti qabamu sana,
atis bara dheeraa jiraatee awwaala seenta.
- 27 "Nu waan kana qoranneerra; innis dhugaa dha.
Kanaafuu qalbeeffadhu; ofii keetiifis beeki."

6

Iyyoob

- 1 Iyyoobis akkana jedhee deebise:
- 2 "Utuu gaddi koo safaramee
dhiphinni koo hundis madaalii irra kaa'amee jiraatee!
- 3 Waan inni cirracha galaanaa caalaa ulfaatuuf,
ariitiin dubbachuun koo nama hin dinqisiisu ture.
- 4 Xiyyawwan Waaqa Waan Hunda Danda'uu na keessa jiru;
hafuurri koo summii isaanii dhuga;
sodaachisuun Waaqaa natti hiriireera.
- 5 Harreen diidaa utuu marga qabuu halaakaa?
Yookaan qotiyyoon utuu okaa qabuu baroodaa?
- 6 Nyaanni hin mi'oofne soogidda malee nyaatamaa?
Yookaan bishaan hanqaaquu ni mi'aawaa?
- 7 Ani isa tuquu hin fedhu;
nyaanni akkasii na dhukkubsa.
- 8 "Utuu kadhannaan koo deebii argatee,
Waaqnis waan ani hawwu naa kennee jiraatee,
9 utuu na caccabsuun fedhii Waaqaa ta'ee,
utuu harki isaa hiikamee na galaafatee!
- 10 Silaa kun jajjabina naa ta'a ture;
dhukkuba hamaa keessatti iyyuu nan gammada ture;
ani dubbii Qulqullicha sanaa hin ganneetii.
- 11 "Ammas akkan abdadhuuf jabinni koo maali?
Akkan obsuufis humni koo maali?
- 12 Ani jabina dhagaa qabaa?
Foon koos naasiidhaa?
- 13 Ani of gargaaruuf humna tokko illee qabaa?
Ogummaan na keessaa badeera mitii?
- 14 "Namni michuu isaatiif garaa hin laafne
Waaqa Waan Hunda Danda'uu iyyuu sodaachuu dhiiseera.
- 15 Obbolooni koo garuu akka doloolloo,
akkuma laga yeroof guutee darbuu gowwoomsitoota;
- 16 isaan laga cabbiidhaan boora'ee
yommuu cabbiin sun baqutti immoo guutee irra yaa'uu ti.
- 17 Lageen yeroo bonni cimutti ni goggogu;
yeroo ho'aatti immoo iddoo isaaniitii badu.

- 18 Warri gaalaan daldalan karaa isaanii irraa jal'atu;
gammoojjiitti nam'anii dhumu.
- 19 Daldaltoonni Teemaa kanneen gaalaan daldalan bishaan barbaadu;
karaa adeemtonni Shebaa immoo isaan abdatu.
- 20 Isaan waan abdatanii turaniif ni qaana'an;
achi ga'aniis waan jedhan wallaalan.
- 21 Ammas isin akka waan faayidaa hin qabnee taatan;
gidiraa koo argitanii sodaattan.
- 22 Ani takkumaa, 'Waa naaf kennaa' yookaan
'Qabeenya keessan furii naaf godhaa' jedheeraa?
- 23 Yookaan, 'Harka diinaa jalaa na baasaa' yookaan,
'Harka cunqursitootaa jalaa na furaa' jedheeraa?
- 24 "Na barsiisaa; ani nan cal'isa;
iddoo ani itti dogoggores na argisiisaa.
- 25 Dubbiin qajeelaan akkam ulfaataa dha!
Falmiin keessan garuu maal mirkaneessa?
- 26 Isin waan ani jedhu qajeelchuu,
dubbii nama abdiin kutatees akka bubbeetti heduu barbaadduu?
- 27 Isin ijoollee abbaa hin qabnetti ixaa buufattu;
michoota keessaniifis boolla qottu.
- 28 "Amma garuu yoo fedhii keessan ta'e na ilaalaa.
Ani fuula keessan duratti nan sobaa?
- 29 Deebi'aa; murtiis hin jal'isinaa;
hubadhaa; ani nama qajeelaadhaatii.
- 30 Jal'inni arraba koo irra jiraa?
Afaan koo daba addaan baasuu hin danda'uu?

7

- 1 "Jireenyi namaa lafa irratti qabsoo cimaa mitii?
Barri isaas akkuma bara nama qacaramaa tokkootii mitii?
- 2 Akkuma garbicha gaaddisa galgalaa hawwwuu,
yookaan akkuma hojjetaa mindaa isaa eegatu tokkoo,
3 ji'oonni faayidaa hin qabne naa qoodaman;
halkanoonni dhiphinaas naa ramadaman.
- 4 Yommuun ciisutti, 'Ani yoomin ka'a?' jedheen yaada.
Halkan natti dheerata; anis hamma bari'utti nan gaggaragala.
- 5 Nafni koo raammoo fi qonyanyaa uffateera;
gogaan koo babbaqatee mala'aa jira.
- 6 "Barri koo koloo wayya dhooftuu caalaa ariifata;
innis abdiin malee dhuma.
- 7 Egaa yaa Waaqayyo, akka jireenyi koo
akkuma qilleensaa ta'e yaadadhu;
iji koo lammata waan gaarii hin argu.
- 8 Iji amma na argu si'achi na hin argu;
ati na barbaadda; garuu ani hin jiru.
- 9 Akkuma duumessi bittinnaa'ee badus
namni awwaalame hin deebi'u.
- 10 Inni lammata mana isaatti hin deebi'u;
iddoon isaas si'achi isa hin beeku.
- 11 "Kanaafuu ani cal hin jedhu;
ani hafuura koo dhiphate sanaan nan dubbadha;
hadhaa'ummaa lubbuu kootiinis nan guunguma.
- 12 Ati eegduu natti ramaduun kee, ani galaana moo
yookaan bineensa galaanaa ti?
- 13 Yommuu ani, 'Sireen koo na jajjabeessa;
wannani irra ciisu guungummii koo naa xinneessa' jedhutti,
- 14 ati abjuu keessa na sodaachifta;

- mul'ataanis na rifachiifta.
 15 Kanaafuu ani akkasitti jiraachuu irra
 of hudhee du'uu nan filadha.
 16 Jireenya koo nan jibba; ani bara baraan hin jiraadhu.
 Na dhiisi; jiraachuun koo faayidaa hin qabuutii.
 17 "Akka ati isa leelliftuuf,
 akka qalbii kee isa irra keessuufis namni maali?
 18 Ati ganama ganama isa xiinxaltee
 yeroo yerootti isa qorta.
 19 Ati ija kee narraa hin buqqiftuu?
 Hamma ani hancufa liqimsutti kophaa koo na hin dhiiftuu?
 20 Yaa isa nama eegdu,
 yoon cubbuu hojjedhe iyyuu ani maalan si godha?
 Ati maaliif waan itti akeekkattu na godhatte?
 Ani ba'aa sitti ta'eeraa?
 21 Ati maaliif balleessaa koo irra dabartee
 cubbuu koo illee naaf hin dhiifne?
 Yeroon ani itti biyyoo keessa ciisu ga'eeraatii;
 ati na barbaadda; garuu ani hin argamu."

8

Bildaad

- 1 Bildaad Shuhaahichi akkana jedhee deebise:
 2 "Ati hamma yoomiitti waan akkasii dubbatta?
 Dubbiin kee bubbee jabaa dha.
 3 Waaqni murtii qajeelaa jal'isaa ree?
 Waaqni Waan Hunda Danda'u waan qajeelaa jal'isaa?
 4 Yommuu ijoolleen kee cubbuu isatti hojjetanitti,
 inni adabbii cubbuu isaaniitti dabarsee isaan kenne.
 5 Ati garuu yoo Waaqa barbaadatte,
 Waaqa Waan Hunda Danda'u yoo waammatte,
 6 yoo ati qulqulluu fi qajeelaa taate,
 inni waa'ee keetiif ammuma ka'a;
 jireenya qajeelummaa kees siif deebisa.
 7 Jalqabni kee xinnaa ta'u illee,
 dhumni kee baay'ee guddaa ta'a.
 8 "Dhaloota darbe gaafadhu;
 waan abbootiin isaanii qoratanii bira ga'anis hubadhu;
 9 nu waan kaleessa dhalanneef waa tokko illee hin beeknuutii;
 baroonni keenyas lafa irratti akkuma gaaddidduu ti.
 10 Isaan si hin barsiisanii? Sittis hin himanii?
 Dubbii garaa isaanii keessa jirus hin dubbatanii?
 11 Dhallaadduun lafa caffee hin ta'initti guddataa?
 Shambaqqoonis bishaan malee lalisaa?
 12 Isaan utuma guddachaa jiranuu, utuu hin muramin,
 biqiltuuwwan kaan dura dafanii gogu.
 13 Dhumni warra Waaqa irraanfatanis akkasuma ta'a;
 abdiin warra Waaqa hin beeknees ni bada.
 14 Abdiin isaa akkuma salphaatti cita;
 ofitti amanachuun isaas man'ee sariitii ti.
 15 Inni man'ee isaatti irkata; man'een sun garuu hin dhaabatu;
 itti maxxanas; man'een sun garuu danda'ee isa hin baatu.
 16 Inni akka biqiltuu aduu keessatti bishaan obaafamee lalisuutti,
 dameewwan isaa lafa biqiltuu irra diriirfatuu ti.
 17 Hidda isaa tuullaa dhagaatti marata;
 kattaa gidduus iddoo jiraatu ni barbaaddata.
 18 Yommuu inni iddoo isaatii badutti garuu,
 iddoon sun, 'Ani si argee hin beeku' jedhee isa gana.
 19 Kunis dhuma jireenya isaa ti;

biqiltuwwan biraas lafaa ni biqilu.

20 “Waaqni nama hir’ina hin qabne hin gatu;
yookaan harka jal’ootaa hin jabeessu.

21 Inni afaan kee kolfaan,
arraba kee immoo ililleedhaan ni guuta.

22 Warri si jibban salphina uffatu.
Dunkaanni jal’ootaas si’achi hin jiraatu.”

9

Iyyoob

- 1 Iyyoob akkana jedhee deebise:
2 “Ani akka wanni kun dhugaa ta’e beeka.
Namni garuu akkamitti fuula Waaqaa duratti qajeelaa ta’uu danda’a?
3 Namni tokko yoo isa wajjin falmuu barbaade
kuma keessaa si’a tokko illee isaaf deebisuu hin danda’u.
4 Ogummaan isaa gad fagoo dha; humni isaas guddaa dha.
Namni isaan mormee utuu hin miidhamin hafu jiraa?
5 Inni utuu isaan hin beekin tulluuwwan iddoo isaaniitii buqqisa;
dheekkamsa isaatiinis isaan gaggaragalcha.
6 Lafa iddoo isheetii ni sochoosa;
utubaawwan ishees ni raasa.
7 Inni biiftuu ni ajaja; isheenis hin baatu;
urjiiwwanis chaappaadhaan ni cufa.
8 Isa qofatu samiiwwan diriirsa;
dambalii galaanaa irras ni deema.
9 Urjiiwwan Amaaketaa fi urjii sadee,
Urjii torbii fi tuuta ‘Urjiiwwan Kibbaa’ jedhaman isatu uume.
10 Inni wantoota gurguddaa qorataniis bira ga’uun hin danda’amne,
dinqiiwwan hin lakkaa’amne hojjeta.
11 Yommuu inni na bira darbu ani isa arguu hin danda’u;
yommuu inni na cina deemus ani isa hubachuu hin danda’u.
12 Yoo inni butee deeme eenyutu isa dhowwu danda’a?
Eenyutus, ‘Ati maal hojjettaa?’ isaan jechuu danda’a?
13 Waaqni dheekkamsa isaa hin deebisu;
warri Ra’aabin gargaaran iyyuu gad deebi’u.
14 “Yoos ani akkamittan isatti falmuu danda’a?
Isatti falmuufis akkamittan dubbii filachuu danda’a?
15 Ani nama balleessaa hin qabne utuun ta’e iyyuu,
isaaf deebisuu hin danda’u;
abbaa Murtii koo araara kadhachuu qofa nan danda’a.
16 Yoo ani isa waammadhee inni naa deebise illee,
akka inni na dhaga’u ani hin amanu.
17 Inni bubbee hamaadhaan na caccabsa;
madaa koos sababii malee natti baay’isa.
18 Inni waan hadhaa’aadhaan na guute malee
akka inni hafuura fudhadhuuf illee yeroo naaf hin kennine.
19 Waa’ee jabinaa taanaan inni jabaa dha!
Waa’ee murtii qajeelaas taanaan eenyutu isa waamuu danda’a?
20 Utuu ani nama balleessaa hin qabne ta’e iyyuu afaan koo natti mura;
utuma ani hir’ina hin qabaannes yakkamaa ta’uu koo hima.
21 “Ani hir’ina qabaachuu baadhu iyyuu,
waa’ee ofii kootii hin yaadda’u;
jireenya koos nan tuffadha.
22 Wannii hundinuu tokkuma;
kanaafuu ani, ‘Inni isa hir’ina hin qabnes,
isa hamaas ni balleessa’ nan jedha.
23 Yommuu dha’ichi bu’ee du’a tasaa fidutti,
inni badiisa warra yakka hin qabneetti ni qoosa.

- 24 Yommuu lafti harka hamootaa jala galtutti,
inni ija abbootii murtii ishee ni jaamsa;
kun yoo isa ta'uu baate, egaa eenyu ree?
- 25 “Barri jireenya koo nama fiigu caalaa ariifata;
utuu gammachuu tokko illee hin argin darba.
- 26 Inni akkuma bidiruu dhallaadduu irraa hojjetamee,
akkuma risaa waa butachuuf gad barrisuu ariifata.
- 27 Yoo ani, ‘Guungummii koo nan dhiisa;
nyaara guuruus dhiisee nan seeqa’ jedhe,
- 28 ani amma iyyuu dhiphina koo hunda nan sodaadha;
akka ati akka nama balleessaa hin qabneetti na hin hedne nan beekaatii.
- 29 Erga yakkamaa ta'uun koo beekamee,
ani maaliifin akkasumaan dadhaba ree?
- 30 Utuma ani saamunaadhaan dhiqadhee
handooheedhaanis harka koo qulqulleeffadhe iyyuu,
- 31 ati hamma uffanni koos na balfutti,
boolla keessa na dhidhimsita.
- 32 “Akka ani isaa deebisuu fi mana murtiittis wal falminuuf,
inni akka koo nama foonii miti.
- 33 Utuu namni nu lamaan irra harka kaa'u,
kan gidduu keenyattis araara buusu tokko jiraatee,
- 34 utuu Waaqni ulee isaa narraa kaasee
silaa naasisuun isaa na hin sodaachisu ture.
- 35 Silaa ani utuun isa hin sodaatin nan dubbadhan ture;
haalan amma keessa jiruun garuu hin danda'u.

10

- 1 “Ani jireenya koo akka malee jibbeera;
kanaafuu caalchisee nan guunguma;
hadhaa'ummaa lubbuu kootiinis nan dubbadha.
- 2 Waaqaanis akkana nan jedha:
Ati maaliin akka na himattu natti himi malee natti hin murin.
- 3 Hojii jal'ootaa gammachuudhaan fudhattee
ana immoo yommuu cunqursitu,
hojii harka keetiis yommuu tuffattu sitti tolaa?
- 4 Ati ija foonii qabdaa?
Akka namni ilaaluttis ni ilaaltaa?
- 5 Barri kee akka bara namaatii?
Yookaan waggoonni kee akka waggoota namaatii?
- 6 Yoos ati maaliif balleessaa koo barbaaddee
cubbuu koo qoratta?
- 7 Ta'us ati akka ani yakka hin qabnee fi
akka namni harka keetii na baasu tokko iyyuu hin jirre ni beekta.
- 8 “Harki kee tolchee na uume.
Ati amma deebitee na balleessitaa?
- 9 Akka supheetti na tolchuu kee yaadadhu.
Ati amma gara biyyootti na deebiftaa?
- 10 Ati akka aannanii na hin dhangalaafnee?
Akka baaduus na hin itichinee?
- 11 Ati gogaa fi foon natti uffifte;
lafee fi ribuudhaanis walitti hodhitee na tolchite.
- 12 Ati jireenya naa kennitee gaarummaa natti argisiifte;
kunuunsi kees hafuura koo naa eege.
- 13 “Ati garuu waan kana hunda garaatti qabatte;
anis akka wanni kun yaada kee keessa jiru nan beeka.
- 14 Ati yoo ani cubbuu hojjedhe na argita;
balleessaa koos utuu hin adabin bira hin dabartu.

- 15 Yoo ani yakka hojjedhe, anaa wayyoo!
 Ani yoo nama balleessaa hin qabne ta'e illee,
 mataa koo ol qabachuu hin danda'u;
 ani salphina uffadhee
 dhiphina keessa seeneeraatii.
- 16 Yoo ani mataa ol qabadhe ati akka leenca waa adamsuu na adamsita;
 humna kee sodaachisaa sanas ammumaa amma natti argisiifta.
- 17 Ati dhuga baatota haaraa natti fiddee
 dheekkamsa kee natti dabalta;
 loltuus natti fidda.
- 18 "Egaa ati maaliif gadameessa keessaa na baafte?
 Utuu iji tokko iyyuu na hin argin utuun du'ee.
- 19 Ani utuun dhalachuu baadhee
 yookaan utuun akkuman dhaladheen awwaalamee jiraadhee!
- 20 Barri koo gabaabaan dhuma jira mitii?
 Akka ani yeroo xinnoof gammaduuf narraa deebi'i;
- 21 utuu ani lafa dhaqanii hin deebine,
 biyya dimimmisaa fi dukkana limixii hin dhaqin dura,
- 22 gara biyya dimimmisaa'aa akka dukkanaa,
 biyya gaaddidduu du'aatiin guutame,
 kan ifni iyyuu akkuma dukkanaa ta'ee hin dhaqin, narraa deebi'i."

11

Zoofaari

- 1 Zoofaari Naa'imaatichi akkana jedhee deebise:
 2 "Dubbiwwan kunneen hundi deebii argachuu hin qabanii?
 Dubbii baay'isuun qajeelaa nama godhaa?
 3 Of jajuun kee afaan nama qabachiisaa?
 Yommuu ati goostu namni si ifatu hin jiruu?
 4 Ati Waaqaan, 'Barsiisni koo qulqulluu dha;
 ani fuula kee duratti hir'ina hin qabu' jetta.
 5 Maaloo utuu Waaqni sitti dubbatee,
 utuu afaan isaas sitti saaqqatee
 6 icciitii ogummaa siif ibsee ani akkamin hawwa!
 Ogummaan dhugaan bifa lama qabaatii.
 Kanaafuu Waaqni cubbuu kee muraasa akka siif irraanfate beeki.
- 7 "Icciitii Waaqaa qorattee bira ga'uu
 yookaan yaada Waaqa Waan Hunda Danda'uu qorattee bira ga'uu dandeessaa?
 8 Isaan samiwwan caalaa ol fagaatu; ati maal gochuu dandeessa?
 Qilee awwaalaa caalaas gad fagaatu; ati maal beekuu dandeessa?
 9 Safarri isaa lafa caalaa dheerata;
 galaana caalaa bal'ata.
- 10 "Yoo inni dhufee mana hidhaatti si galche,
 yoo waldaa murtiis walitti qabe eenyutu isa dhowwuu danda'a?
 11 Dhugumaan inni sobdoota ni beeka;
 inni yommuu jal'ina argutti hin qalbeeffatuu?
 12 Yoo harreen diidaa nama ta'ee dhalate malee
 gowwaan ogeessa ta'uu hin danda'u.
- 13 "Ta'us yoo ati yaada kee gara isaatti deebiftee
 harka kees gara isaatti diriirsite,
 14 cubbuu harka kee keessa jiru yoo of irraa fageessite,
 akka wannii hamaanis dunkaana kee keessa hin jiraanne yoo goote,
 15 ati qaanii tokko malee fuula kee ol qabachuu dandeessa;
 sodaa tokko malees jabaattee dhaabatta.
 16 Ati dhugumaan rakkina kee ni irraanfatta;
 akkuma lolaa darbeettis ni lakkoofa.
 17 Jireenyi kee aduu saafaa caalaa ifa;
 dukkanni isaas akkuma barii ganamaa ta'a.

- 18 Waan abdiin jiruuf ati hin sodaattu;
naannoo kee ni ilaalta; nagaadhaanis ni boqotta.
19 Ati ni rafta; namni tokko iyyuu si hin sodaachisu;
namoonni baay'eenis fuula kee barbaadu.
20 Iji hamootaa ni dadhaba;
karaan ittiin baqatanis isaan jalaa bada;
abdiin isaaniis du'a qofa."

12

Iyyoob

- 1 Iyyoob akkana jedhee deebise:
2 "Nama jechuun dhugumaan isin;
ogummaanis isin wajjin duuti!
3 Garuu anis akkuma keessan sammun qaba;
ani isinii gad miti.
Namni waan akkanaa hin beekne eenyu?
4 "Ani nama Waaqa waammatee deebii argate ta'u illee,
michoota koo biratti nama kolfaa ta'eera.
Ani utuun nama qajeelaa hir'ina hin qabne ta'ee jiruu nama kolfaa ta'eera.
5 Warri itti tole rakkinatti qoosu;
nama kufuuf miilli isaa mucucaateenis kun hiree isaati jedhu.
6 Dunkaanni saamtotaa hin jeeqamu;
warri Waaqa isaanii harkatti baatanii jooran,
warri Waaqa dheekkamsiisan nagaan jiraatu.
7 "Mee horii gaafadhu; isaan si barsiisu;
yookaan simbirroota samii gaafadhu; isaan sitti himu;
8 yookaan lafatti dubbadhu; inni si barsiisa;
yookaan qurxummiwwan galaanaa sitti haa himan.
9 Akka harki WAAQAYYOO waan kana hojjete,
isaan kanneen hunda keessaa eenyutu hin beekne?
10 Lubbuun uumama hundaa,
hafuurri nama hundaas harka isaa keessa jira.
11 Akkuma arrabni nyaata afaaniin qabu,
gurris dubbii dhaga'ee addaan hin baasuu?
12 Ogummaan jaarsoliin biratti,
hubannaanis warra umuriin dheerate biratti argama mitii?
13 "Ogummaa fi humni kan Waaqaa ti;
gorsii fi hubannaanis kan isaa ti.
14 Waan inni diigu eenyu iyyuu deebisee ijaaroo hin danda'u;
nama inni hidhe eenyu iyyuu hiikuu hin danda'u.
15 Yoo inni bishaan dhowwate, hongeeu bu'a;
yoo inni gad dhiise immoo biyya balleessa.
16 Jabinnii fi ogummaan kan isaa ti;
namni gowwoomfamuu fi inni gowwoomsus kanuma isaa ti.
17 Inni gorsitoota qullaa deemsisa;
abbootii murtiis gowwoota godha.
18 Inni mootota irraa hidhaa hiikkee,
mudhii isaaniitti sabbata hidha.
19 Luboota qullaa deemsisa;
jajjabeeyyiis ni gaggaragalcha.
20 Gorsitoota amanamoo afaan qabachiisa;
hubanna jaarsoliis irraa fuudha.
21 Warra kabajamootti salphina fida;
warra jajjaboo immoo hidhata hiikachiisa.
22 Inni icciitii dukkanaa keessaa ifatti baasa;
dukkana limixiis ifatti geeddara.
23 Inni saboota ni guddisa; ni balleessas;
saboota ni baay'isa; ni bittinneessas.

- 24 Bulchitoota addunyaa hubannaa malee hambisa;
 gammoojjii daandii hin qabne keessas isaan joorsa.
 25 Isaan dukkana ifa hin qabne keessa qaqqabannaadhaan deemu;
 inni akka isaan akkuma nama machaa'eetti gatantaranis ni godha.

13

- 1 "Waan kana hunda iji koo argeera;
 gurri koos dhaga'ee hubateera.
 2 Waan isin beektan anis beeka;
 ani isinii gad miti.
 3 Ani garuu Waaqa Waan Hunda Danda'utti nan dubbadha;
 waa'ee dhimma koos Waaqatti falmuu nan barbaada.
 4 Isin garuu sobaan nama faaltu;
 hundi keessan abbootii qorichaa
 kanneen faayidaa hin qabnee dha!
 5 Isin yoo cal jettan maal qaba!
 Wannu sun ogummaa isiniif ta'a.
 6 Amma falmii koo dhaga'aa;
 kadhannaa afaan kootiis dhaggeeffadhaa.
 7 Isin jal'inaan Waaqaaf dubbattuu?
 Gowwoomsaadhaanis isaaf odeessituu?
 8 Isaaf ni loogduu?
 Waaqaafis ni falmituu?
 9 Yoo inni isin qore wanni gaariin isin irraa argamaa?
 Isin akka nama gowwoomsitan, isa gowwoomsuu dandeessuu?
 10 Yoo isin dhoksaadhaan loogii hojjettan,
 inni dhugumaan isinitti dheekkama.
 11 Surraan isaa isin hin sodaachisuu?
 Sodaachisuun isaa isinitti hin dhaga'amu?
 12 Fakkeenyi keessan fakkeenya daaraa ti;
 da'oon keessanis da'oo suphee ti.
 13 "Akka ani dubbadhuuf isin cal jedhaa;
 ergasii wanni barbaade natti haa dhufu.
 14 Ani maaliifin foon koo ilkaan kootiin,
 lubbuu koos harka kootiin qabadha?
 15 Yoo inni na ajjeese iyyuu ani isa nan abdadha;
 waa'ee dhimma kootii illee fuula isaa duratti nan falmadha.
 16 Kun fayyina koo ni ta'a; warri Waaqatti hin bulle
 fuula isaa duratti dhi'aachuu hin danda'aniitii!
 17 Dubbii koo qalbeeffadhaa dhaggeeffadhaa;
 waan ani jedhus gurri keessan haa dhaga'u.
 18 Kunoo ani himata koo qopheeffadheera;
 akka inni murtii qajeelaa naa kennus nan beeka.
 19 Namni na himatu jiraa?
 Yoo jiraate, ani nan cal'isa; nan du'as.
 20 "Yaa Waaqayyo, ati wantoota kanneen lamaan naa kenni malee
 ani fuula kee duraa hin dhokadhu.
 21 Harka kee narraa fageessi;
 sodaachisni kees na hin rifachiisin.
 22 Ergasii na waami; anis nan owwaadha;
 yookaan nan dubbadha; ati immoo deebii naa kennita.
 23 Ani balleessaa fi cubbuu hammamin hojjedhe?
 Yakka kootii fi cubbuu koo na beeksisi.
 24 Ati maaliif fuula kee dhokfattee
 akka diinaatti na ilaalta?
 25 Baala qilleensi harcaase ni ciccirtaa?
 Habaqii gogaa ni ariitaa?
 26 Ati waan ittiin na hadheessitu natti barreessitaatii;
 cubbuu dargaggummaa kootiis na dhaalchifta.

- 27 Miilla koo jirma gidduu galchita;
faana miilla kootiitti mallattoo gootee
karaa koo hunda xiyyeeffattee duukaa buuta.
- 28 “Namnis akkuma waan bososeetti,
akkuma wayyaa biliin nyaateetti ni dhuma.

14

- 1 “Nama dubartoota irraa dhalate,
barri isaa gabaabaa fi kan rakkinaan guutamee dha.
- 2 Inni akkuma daraaraa ni biqila; ni coollagas;
akkuma gaaddidduu ariifatee darba malee hin turu.
- 3 Jji kee nama akkasii xiyyeeffatee ilaalaa?
Ati murtiif fuula kee duratti isa fiddaa?
- 4 Eenyutu waan xuraa’aa keessaa waan qulqullaa’aa baasuu danda’a?
Namni tokko iyyuu hin danda’u!
- 5 Barri jireenya namaa murtaa’aa dha;
baay’inni ji’oota isaas si bira jira;
daangaa inni darbuu hin dandeenye daangessiteefii jirta.
- 6 Hamma inni akka hojjetaa tokkootti bara isaa raawwatutti,
fuula kee isa irraa deebifadhu; isas dhiisi.
- 7 “Mukni illee abdii qaba:
Yoo murame deebi’ee ni lata;
dameen isaa haaraanis hin gogu.
- 8 Yoo gufuun isaa lafa keessatti dulloomee
gufuun isaa biyyoo keessatti tortore iyyuu,
- 9 foolii bishaaniitiin lata;
akka biqiltuuttis damee ni baafata.
- 10 Namni garuu du’ee awwaalama;
lubbuun isaa keessaa baati; innis hin jiraatu.
- 11 Akkuma bishaan galaanaa gogu
yookaan lagnis dhume gogu sana,
- 12 namnis akkasuma ni ciisa; hin ka’us;
hamma samiiwwan darbanittis hin dammaqu
yookaan hirribaa hin ka’u.
- 13 “Maaloo utuu awwaala keessa na dhoksitee
hamma dheekkamsi kee darbutti na haguugdee!
Maaloo utuu beellama naa kennitee
ergasii immoo na yaadattee!
- 14 Namni tokko yoo du’e deebi’ee ni jiraataa?
Ani hamma haaromfamni koo dhufutti,
bara rakkoo koo hunda obsaan nan eeggadha.
- 15 Ati na waamta; anis si jalaa nan owwaadha;
hojii harka keetiis ni hawwita.
- 16 Yeroo sana ati tarkaanfii koo ni lakkoofa;
cubbuu koo garuu hin to’attu.
- 17 Yakki koo korojootti naqamee chaappeffama;
ati cubbuu koo ni haguugda.
- 18 “Garuu akkuma tulluun lolaadhaan dhiqamee jigu,
kattaanis iddoo isaatii buqqa’u sana,
- 19 akkuma bishaan dhagaa nyaatee haphisu,
akkuma lolaan biyyoo dhiquma sana,
atis akkasuma abdii namaa ni balleessita.
- 20 Ati bara baraan isa ni moota; innis ni bada;
bifa isaa ni geeddarta; of irraas isa fageessita.
- 21 Yoo ilmaan isaa ulfina argatan inni hin beeku;
yoo isaan salphatanis hin argu.
- 22 Dhukkuba dhagna isaa qofatu isatti dhaga’ama;

inni mataa isaa qofaaf boo'a."

15

Eliifaaz

- ¹ Eliifaaz Teemaanichi akkana jedhee deebise:
- ² "Namni ogeessi tokko dubbii faayidaa hin qabneen deebii kennaa?
Yookaan bubbee ba'a biiftuutiin garaa isaa guutataa?
- ³ Inni dubbii faayidaa hin qabneen,
haasaa bu'aa hin qabneenis ni falmaa?
- ⁴ Ati garuu Waaqa sodaachuu ni tuffatta;
Waaqa kadhachuu illee nama dhowwita.
- ⁵ Cubbuun kee afaan kee ni barsiifti;
atis afaan jal'ootaa filatta.
- ⁶ Afaanuma keetu sitti mura malee afaan koo miti;
arrabuma keetu ragaa sitti ta'a.
- ⁷ "Situ nama hunda dura dhalatee?
Yookaan situ tulluuwwan dura argamee?
- ⁸ Ati dhoksa Waaqaa dhageesseertaa?
Ogummaas ofuma keetiif dhuunfattaa?
- ⁹ Wannii ati beektu kan nu hin beekne maali?
Hubannaan ati qabdu kan nu hin qabne maali?
- ¹⁰ Namoonni arrii baasanii fi kanneen jaaran,
warri abbaa kee iyyuu caalaa dullooman nu gidduu jiru.
- ¹¹ Gorsii Waaqaa kan nama jajjabeessu,
dubbiin suutaan sitti himame sun si hanqatee?
- ¹² Yaadni kee maaliif si fudhatee bada?
Ijas maaliif babaafaa?
- ¹³ Wannii akka ati Waaqatti aartu,
akka dubbiin akkasiis afaan keetii ba'u godhe maali?
- ¹⁴ "Akka qulqulluu ta'uuf namni maali?
Yookaan akka qajeeltota ta'aniif warri dubartoota irraa dhalatan maali?
- ¹⁵ Yoo Waaqni qulqulloota isaa illee amanuu baatee
samiiwwan iyyuu fuula isaa duratti qulqulluu ta'uu baatan,
- ¹⁶ yoos sanyiin namaa inni hamaa fi xuraa'aan,
kan akkuma bishaaniitti cubbuu dhugu sun
hammam hammasii gad haa ta'u ree!
- ¹⁷ "Na dhageeffadhu; ani siifan ibsaa;
waan arges sitti nan hima;
- ¹⁸ waan namoonni ogeeyyiin
waan abbootii isaanii irraa dhaga'an keessaa tokko illee utuu hin dhoksin
odeessan sana nan dubbadha;
- ¹⁹ biyyattiin abbootii isaanii qofaaf kennamte;
alagaan tokko iyyuu isaan gidduu hin jiraanne.
- ²⁰ Namni dabaan bara jireenya isaa guutuu,
gara jabeessis bara isaaf qoodame guutuu ni rakkata.
- ²¹ Sagaleen sodaachisaan gurra isaatti ni iyya;
utuma inni nagaan jiraatuus saamtonni tasuma itti dhufu.
- ²² Inni akka deebi'ee dukkana keessaa ba'u hin amanu;
goraadeetu isa eeggata.
- ²³ Inni waan nyaatamu barbaacha asii fi achi jooa;
akka guyyaan dukkanaa dhi'aates ni beeka.
- ²⁴ Dhiphinaa fi gaddi isa sodaachisu;
akkuma mootii lolaaf qophaa'eettis isatti cimuu;
- ²⁵ inni harka isaa Waaqatti ol fudhatee
Waaqa Waan Hunda Danda'us tuffateera;
- ²⁶ gaachana yabbuu fi jabaa qabatee
isaan mormuuf mata jabinaan ba'eera.
- ²⁷ "Yoo fuulli isaa coomaan haguugamee

- mudhiin isaa foon baasee iita'e iyyuu,
 28 inni magaalaawwan barbadaa'an keessa,
 manneen namni tokko iyyuu keessa hin jiraanne,
 kanneen diigamanii tuulamu ga'an keessa jiraata.
 29 Inni si'achi hin sooromu; qabeenyi isaas hin jiraatu;
 yookaan qabeenyi isaa lafa irra hin turu.
 30 Inni dukkana jalaa hin ba'u;
 arrabni ibiddaa damee isaa ni gogsa;
 hafuurri afaan Waaqaatii ba'us isa fudhata.
 31 Inni sababii beenyaa tokko illee hin arganneef,
 waan faayidaa hin qabne amanachuudhaan of hin gowwoomsin.
 32 Inni utuu yeroon isaa hin ga'in ni coollaga;
 dameen isaas hin lalisu.
 33 Inni akka muka wayinii iji isaa utuu hin bilchaatin irraa funaanamee,
 akka ejersa daraaraa isaa of irraa harcaasee ni ta'a.
 34 Gareen warra Waaqaaf hin bullee ni maseena;
 ibiddis dunkaana warra matta'aa jaallatanii ni guba.
 35 Isaan rakkina ulfaa'anii hammina dhalan;
 garaan isaaniis jal'ina yaada."

16

Iyyoob

- 1 Iyyoobis akkana jedhee deebise;
 2 "Ani waan akkanaa baay'ee dhaga'eera;
 hundi keessan jajjabeessitoota nama dhiphistanii dha!
 3 Haasaan faayidaa hin qabne kun hin dhumuu?
 Wannii akka ati oduu dheeressituuf si tuttuqu maali?
 4 Utuu isin iddoo koo jiraattanii
 silaa ani akkuma keessan kana nan dubbadha ture;
 dubbii mi'ooftuu dubbachuudhaanis
 mataa koo isinitti nan raasan ture.
 5 Ani afaan kootiin isin jajjabeessee
 gorsi arraba kootiis qabbana isinii kenna ture.
 6 "Yoo ani dubbadhe dhukkubni koo natti hin wayyaa'u;
 cal jedhus na hin dhiisu.
 7 Yaa Waaqi, ati dhugumaan na dadhabsiifteerta;
 warra mana koo jiru hundas balleessiteerta.
 8 Ati na kokotteessite; kunis ragaa natti ta'e;
 akka malee huqqachuun koos ifatti ba'ee na saaxile.
 9 Waaqni dheekkamsa isaatiin rukutee na ciccire;
 ilkaan isaa natti qarate;
 diinni koo ija isaa natti babaase.
 10 Namoonni natti qoosuuf afaan banatan;
 tuffiidhaan maddii koo kabalan;
 tokko ta'anii natti ka'an.
 11 Waaqnis dabarsee hamootatti na kenne;
 harka jal'ootaa keessas na buuse.
 12 Ani nagaan jiraachaan ture; inni garuu na burkuteesse;
 morma na qabee na caccabse.
 Xiyyeeffannaa isaas na godhate;
 13 loltoonni isaa warri xiyyaan lolan na marsu.
 Inni gara laafina malee kalee koo waraane
 hadhooftuu koo illee lafatti gad jigse.
 14 Inni ammumaa amma na caccabsa;
 akkuma loltuu tokkootti natti fiiga.
 15 "Ani gogaa kootti uffata gaddaa hodhadheera;
 gaanfa koos biyyoo keessatti awwaaleera.
 16 Fuulli koo boo'ichaan diimateera;
 dukkanni limixiinis ija koo irra bu'eera.

- 17 Ta'us harki koo yakka tokko illee hin hojjenne;
kadhannaan koos qulqulluu dha.
- 18 "Yaa lafa, ati dhiiga koo hin dhoksin;
akka iyyi koo iddoo boqonnaa argatus hin godhin!
- 19 Amma iyyuu dhuga ba'aan koo samii irra jira;
abukaattoon koos ol gubbaa jira.
- 20 Michoonni koo na tuffatu;
iji koos imimmaan gara Waaqaatti facaasa;
- 21 akkuma namni michuu isaatiif kadhatu sana
utuu namni Waaqa kadhatu namaaf jiraatee!
- 22 "Waggoota xinnoo booddee,
ani gara deemanii deebi'uun hin jirre nan deema.

17

- 1 Hafuurri koo dadhabeera;
barri koo gabaabbateera;
awwaallis naa qopheeffameera.
- 2 Dhugumaan qoostonni na marsaniiru;
iji koos hojii isaanii isa hamaa sana hubatee ilaala.
- 3 "Yaa Waaqi, qabsiisa naa ta'i;
si malee eenyutu wabii naa ta'a?
- 4 Akka isaan waa hin hubanneef ati sammuu isaanii cufteerta;
kanaafuu ati akka isaan mo'atan hin gootu.
- 5 Yoo namni tokko faayidaa argachuuf
michuu isaa maqaa balleesse, iji ijoollee isaa ni jaama.
- 6 "Waaqni nama hunda biratti nama kolfaa,
nama namni fuula isaatti tufu na godheera.
- 7 Iji koo sababii gaddaatiif arguu dhabe;
dhagni koo guutuunis akkuma gaaddidduu ti.
- 8 Qajeeltonni waan kanaan ni rifatu;
namni balleessaa hin qabnes warra Waaqatti hin bulle irratti ka'a.
- 9 Qajeelaan garuu karaa isaatti cima;
warri harki isaanii qulqulluu ta'es jabaachaa deemu.
- 10 "Hundi keessan garuu mee deebi'aa yaalaa!
Ani isin keessaa nama ogeessa tokko illee hin argadhu.
- 11 Barri koo darbeera; karoorri koo fashalaa'eera;
hawwiin garaa koos akkasuma ta'eera.
- 12 Namoonni kunneen halkan guyyaatti geeddaraniiru;
utuma dukkana arganuus, 'Ifni dhi'aateera' jedhu.
- 13 Yoo manni ani abdadhu awwaala qofa ta'e,
yoo ani dukkana keessatti siree koo afadhe,
- 14 yoo ani boolla qileetiin, 'Ati abbaa koo ti';
raammoodhaan immoo, 'Ati haadha koo ti';
yookaan 'Obboleettii koo ti' jedhe,
- 15 egaa abdiin koo eessa jira?
Eenyutus abdii tokko illee naa arga?
- 16 Inni na wajjin awwaala bu'aa?
Nus walumaan biyyoo seennaa?"

18

Bildaad

- 1 Bildaad Shuhaahichi akkana jedhee deebise:
2 "Isin haasaa kana yoom fixxu?
Mee qalbeeffadhaa; ergasii dubbachuu dandeenya.
- 3 Nu maaliif akka looniitti hedamna?
Maaliifis fuula kee duratti akka gowwaatti ilaalamna?
- 4 Ati kan aariidhaan of ciccirtu,

lafti sababii keetiif duwwaatti haftii?
Yookaan kattaan iddoo isaatii ni buqqifamaa?

- ⁵ “Ibsaan nama hamaa ni dhaama;
arrabni ibidda isaa ifa hin kennu.
⁶ Ifni dunkaana isaa keessaa ni dukkanaa’a;
ibsaan isa bira jirus ni dhaama.
⁷ Jabinni tarkaanfii isaa ni dadhaba;
malli isaas isuma kuffisa.
⁸ Miilli isaa kiyyoo keessa isa buusa;
inni boolla kiyyeeffame irra ni joora.
⁹ Kiyyoon kottee isaa qaba;
futtaasaanis jabeessee isa qaba.
¹⁰ Lafa irra funyoon isaaf dhokfameera;
karaa isaa irras kiyyoon kaa’ameera.
¹¹ Naasuun karaa hundaan isa sodaachisa;
faana isaa bu’ees isa ari’a.
¹² Badiisni afaan itti banateera;
balaanis qophaa’ee jiguu isaa eeggata.
¹³ Gogaan isaa dhukkubaan nyaatamee dhuma;
ilmi du’aa hangaftichi harkaa fi miilla isaa nyaata.
¹⁴ Inni dunkaana abdate keessaa buqqifamee
gara mootii sodaatti geeffama.
¹⁵ Waan kan isaa hin ta’inis dunkaana isaa keessa jiraata;
dinyiin boba’us iddoo inni jiraatu irra faffaca’a.
¹⁶ Jalaan hiddi isaa ni goga;
irraan immoo dameen isaa ni coollaga.
¹⁷ Yaadannoon isaa lafa irraa ni bada;
maqaan isaas lafa irraa ni dhabama.
¹⁸ Inni ifa keessaa gara dukkanaatti darbatama;
addunyaa irraas ni dhabama.
¹⁹ Inni saba isaa gidduutti ijoollee yookaan sanyii,
biyya duraan jiraate keessatti hambaa hin qabaatu.
²⁰ Namoonni dhi’aa waa’ee isaa dhaga’anii rifatu;
warri ba’aas sodaadhaan guutamu.
²¹ Iddoon jireenya nama hamaa, dhugumaan akkana ta’a;
iddoon nama Waaqa hin beeknees kanuma ta’a.”

19

Iyyoob

- ¹ Iyyoobis akkana jedhee deebise:
² “Isin hamma yoomiitti na dhiphistanii
dubbiin na cabsitu?
³ Amma si’a kudhan na arrabsitaniirtu;
qaanii malees na miitaniirtu.
⁴ Yoo ani dhugumaan karaa irraa goree jiraadhe,
dogoggorri koo anuma wajjin jiraata.
⁵ Yoo isin dhugumaan anaa olitti of guddiftanii
na miidhuuf salphina kootti fayyadamtan,
⁶ akka Waaqni na miidhee
kiyyoo isaa illee natti xaxe beekaa.
⁷ “Ani miidhameera!” jedhee iyyadhu illee deebii hin argadhu;
sagalee ol fudhadhee gargaarsaaf iyyus
murtiin qajeelaan hin jiru.
⁸ Akka ani hin dabarreef inni karaa koo cufeera;
daandii koottis dukkana haguugeera.
⁹ Ulfina koo narraa mulqeera;
mataa koo irraas gonfoo fuudheera.
¹⁰ Inni hamma ani badutti gama hundaan na diiga;
abdii koo illee akkuma mukaa buqqisa.

- 11 Dheekkamsi isaa natti boba'a;
akkuma diina isaattis na heda.
- 12 Loltoonni isaa humnaan dhufanii
naannoo kootti da'annaa ijaarratan;
dunkaana koos ni marsan.
- 13 "Inni obboloota koo narraa fageesseera;
michoonna koos keessummaa natti ta'an.
- 14 Firoonni koo na dhiisaniiru;
michuuwwan koos na dagataniiru.
- 15 Keessumoonni mana koo jiranii fi
xomboreewwan koo akka alagaatti na ilaalan;
akka nama ormaattis na hedan.
- 16 Hojjetaa koo nan waama;
afaan kootiin isa nan kadhada;
inni garuu na jalaa hin owwaatu.
- 17 Hafuurri koo niitii kootti illee jibbisiisaa dha;
ani obboloota koottis xiraa'aa dha.
- 18 Ijoolleen xixinnoon iyyuu na tuffatu;
yommuu ani ka'us natti qoosu.
- 19 Michoonna koo kanneen walitti dhi'aannu hundi na balfan;
warri ani jaalladhus natti garagalan.
- 20 Ani gogaa fi lafeedha malee homaa miti;
gogaan ilkaanii qofti naaf hafeen jalaa ba'e.
- 21 "Garaa naa laafaa, yaa michoota koo garaa naa laafaa;
harki Waaqaa na dha'eeraatii.
- 22 Isin maaliif akkuma Waaqni na ari'u sana na ariitu?
Amma illee foon koo isin hin geenyee?
- 23 "Maaloo utuu dubbiin koo barreeffamee jiraatee!
Utuu kitaaba keessatti barreeffamee!
- 24 Utuu sibiilaan kattaa irratti barreeffamee
yookaan bara baraan dhagaa irratti qirixamee jiraatee!
- 25 Ani akka furiin koo jiraataa ta'e,
akka inni dhuma irratti lafa irra dhaabatus nan beeka.
- 26 Erga gogaan koo badee booddee,
ani amma iyyuu foon kootiin Waaqa nan arga;
- 27 ani mataan koo isa nan arga;
utuu nama biraa hin ta'in anuu ija kootiin isa nan arga.
Onneen koo akkam na keessatti gaggabdi!
- 28 "Yoo isin, 'Sababii hiddi rakkina sanaa isa keessa jiruuf
nu akkamitti isa ariina?' jettan,
- 29 sababii dheekkamsi goraadeedhaan adabamuu fiduuf
isin mataan keessan goraadee sodaachuu qabdu;
kunis akka isin akka murtiin jiru beektaniif."

20

Zoofaari

- 1 Zoofaari Naa'imaatichi akkana jedhee deebise:
2 "Waan ani akka malee jeeqameef,
yaadni koo akka ani deebii kennu na kakaasa.
3 Ani dheekkamsa na qaanessu dhaga'aan jira;
qalbiin koos akka ani deebii kennu na kakaasa.
- 4 "Ati erga namni lafa irra kaa'amee bara duriitii jalqabee
wannu kun akkam akka ture ni beekta mitii?
5 Burraaquun jal'ootaa yeroo gabaabaaf tura;
gammachuun warra Waaqaaf hin bullees akkuma liphsoo ijaa ti.
6 Of tuulummaan isaa samiiwwan ga'ee
mataan isaa duumessawwan tuqus,

- 7 inni akkuma awwaaraa bara baraan bada;
warri duraan isa arganis, 'Inni eessa jira?' jedhu.
- 8 Inni akkuma abjuu fiigee bada; deebi'ees hin argamu;
akkuma mul'ata halkaniis dafee dhabama.
- 9 Iji isaa argee ture deebi'ee isa hin argu;
iddoon isaas si'achi isa hin ilaalu.
- 10 Ijoolleen isaa hiyyeeyyiif beenyaa baasu;
harki isaas qabeenya inni saame deebisee kennuu qaba.
- 11 Jabinni dargaggummaa kan lafee isaa keessa guute sun,
isa wajjin biyyoo keessa ciisa.
- 12 "Hamminni afaan isaa keessatti mi'aawee
inni arraba isaa jala dhokfatu iyyuu,
- 13 inni afaanii baafatee gatuu jibbee
afaanuma ofii isaa keessa turfatu iyyuu,
- 14 nyaanni isaa garaa isaa keessatti dhangaggaa'a;
isa keessattis hadhaa bofaa ta'a.
- 15 Inni qabeenya liqimse sana ni tufa;
Waaqnis akka garaan isaa waan sana diddigu ni godha.
- 16 Inni summii bofaa xuuxa;
arrabni buutiis isa ajjeesa.
- 17 Inni laga yaa'u,
burqaa dammaatii fi dhadhaa hin argu.
- 18 Inni waan itti dadhabe utuu hin nyaatin deebisa;
bu'aa daldala isaa irraa argatettis hin gammadu.
- 19 Inni hiyyeeyyii hacuucee harka duwwaa hambiseeraatii;
mana ofii hin ijaarinis humnaan fudhateera.
- 20 "Hawwii isaa hamaa sana irraa boqonnaa hin argatu;
inni qabeenya isaatiin of oolchuu hin danda'u.
- 21 Wannii inni nyaatu tokko iyyuu hin hafuuf;
badhaadhummaan isaas itti fufee hin jiraatu.
- 22 Utuma inni waan hunda qabuu rakkinni isatti dhufa;
dhiphinni cimaanis isa qabata.
- 23 Yeroo inni garaa isaa guutatutti,
Waaqni dheekkamsa isaa sodaachisaa sana itti erga;
dha'icha isaa illee itti roobsa.
- 24 Inni mi'a lolaa sibiilaa baqatu illee,
xiyya naasiitu isa waraana.
- 25 Dudga isaa keessaa xiyya,
tiruu isaa keessaa immoo fiixee calaqqisu buqqisa.
Sodaan guddaan isa qabata;
- 26 dukkanni limixiinis riphee qabeenya isaa eeggata.
Ibiddi namni tokko iyyuu hin afarsin gubee isa fixa;
waan dunkaana isaa keessatti hafes ni barbadeessa.
- 27 Samiiwwan balleessaa isaa saaxilu;
laftis isatti kaati.
- 28 Guyyaa dheekkamsa Waaqaatti lolaan mana isaa,
bishaan yaa'us mi'a isaa fudhatee deema.
- 29 Carraan Waaqni cubbamootaaf kennu,
dhaalli Waaqni isaaniif qoodes kanuma."

21

Iyyoob

- 1 Iyyoob akkana jedhee deebise:
- 2 "Dubbi koo qalbeeffadhaa dhaggeeffadhaa;
kun waan isin ittiin na jajjabeessitan haa ta'u.
- 3 Yeroo ani dubbadhu naa obsaa;
erga ani dubbadhee booddee isin natti qoosuu dandeessu.
- 4 "Dhugumaan kan ani komadhu namaa?

- Ani maaliif obsa hin dhabne ree?
 5 Na ilaalaatii dinqisiifadhaa; harka keessanis
 afaan keessan irra kaa'adhaa.
 6 Ani yommuu waan kana yaadu nan sodaadha;
 hollannaanis na qabata.
 7 Hamoonni maaliif itti fufanii lubbuun jiraatu?
 Maaliif dulloomanii humnas argachaa deemu?
 8 Ijoolleen isaanii naannoo isaaniitti,
 sanyiin isaaniis fuula isaanii duratti jabaatanii dhaabatu.
 9 Manni isaanii nagaa dha; waan sodaatu illee hin qabu;
 uleen Waaqaas isaan hin tuqxu.
 10 Kormi isaanii dhalchuu hin dadhabu;
 saawwan isaanii ni dhalu; hin gatatanis.
 11 Isaan ijoollee isaanii akkuma bushaayeetti bobbaasu;
 daa'imman isaanii immoo ni burraaqu.
 12 Dibbee fi kiraaraan sirbu;
 sagalee ululleetiinis ni gammadu.
 13 Isaan bara isaanii badhaadhummaadhaan fixatu;
 nagaadhaanis ni awwaalamu.
 14 Ta'u illee isaan Waaqaan akkana jedhu; 'Nu dhiisi!
 Nu karaa kee beekuuf fedhii hin qabnu.
 15 Akka nu isa tajaajilluuf Waaqni waan Hunda Danda'u eenyu?
 Nu isa kadhannee maal arganna?'
 16 Badhaadhummaan isaanii garuu isaan harka hin jiru;
 kanaafuu ani gorsa hamootaa irraa nan fagaadha.
 17 "Garuu ibsaan hamootaa yoom iyyuu ni dhaamaa?
 Balaan yoom iyyuu isaanitti dhufaa?
 Waaqnis dheekkamsa isaatiin badiisa isaanitti fidaa?
 18 Isaan akkuma cidii fuula qilleensaa duraa ti;
 akkuma habaqqii bubbleen hamaan fudhatee deemuu ti.
 19 Isin, 'Waaqni balleessaa nama tokkoo ilmaan isaatiif kuusa' jettu.
 Akka inni waan kana beekuuf Waaqni namichuma mataa isaatiif
 gatii isaa haa kennu!
 20 Iji isaa badiisa isaa haa argu;
 inni xoofoo dheekkamsa Waaqa Waan Hunda Danda'uu haa dhugu.
 21 Inni yeroo ji'i isaaf qoodame dhumutti,
 waa'ee maatii isaa kan dhiisee biraa deemu sanaa
 dhimma maalii qabaata?
 22 "Namni tokko iyyuu Waaqa beekumsa barsiisuu danda'aa?
 Waaqni ol aantotatti iyyuu ni muraatii.
 23 Namni tokko utuma itti tolee nagaan jiraatuu,
 utuma humna guutuu qabuu,
 24 utuma dhagni isaa gabbatee jiruu, utuma lafeen isaa
 dhukaan guutamee jiruu ni du'a.
 25 Namni biraa immoo utuu gammachuu tokko illee hin argin,
 jireenya hadhaa'aa jiraachaa du'a.
 26 Isaan biyyoo keessa wal bira ciciisu;
 lachan isaaniittuu raammoon ni tuuta'a.
 27 "Ani yaada keessanii fi
 mala isin ittiin na miidhuu barbaaddan nan beeka.
 28 Isin, 'Manni namicha guddaa,
 dunkaanni namoonni hamoon keessa jiraatan amma eessa jira?' jettu.
 29 Isin namoota karaa deeman hin gaafannee?
 Waan isaan jedhanis hin qalbeeffannee?
 30 Akka namni hamaan guyyaa balaa oolfamu,
 akka inni guyyaa dheekkamsaa illee baraaramu hin qalbeeffannee?
 31 Namni fuuluma isaa dura dhaabatee hojii isaa itti himu eenyu?
 Namni gatii waan inni hojjetee baasuuf eenyu?
 32 Inni gara awwaalaatti geeffama;

awwaalli isaas ni eegama.

³³ Biyyoon sulula keessaa isatti mi'aawa;
namoonni hundi isa duukaa bu'u;
namoonni akka malee baay'eenis fuula isaa dura deemu.

³⁴ "Yoos isin akkamiin waan faayidaa hin qabneen
na jajjabeessuu dandeessu ree?
Deebiiin keessanis soba gofa!"

22

Eliifaaz

- ¹ Eliifaaz Teemaanichi akkana jedhee deebise:
² "Namni Waaqa fayyaduu danda'aa?
Namni ogeessi iyyuu maal isa fayyada?
³ Yoo ati nama qajeelaa taate wanni kun Waaqa Waan Hunda Danda'uuf
gammachuu maalii kenna?
Yoo karaan kee hir'ina qabaachuu baates inni bu'aa maalii argata?
⁴ "Wanni Waaqni sitti dheekkamee murtiitti si dhi'eessuuf
waan ati isa sodaattuufii?
⁵ Hamminni kee guddaa dha mitii?
Cubbuun kees dhuma hin qabu mitii?
⁶ Ati sababii malee obbolloota kee irraa qabdii fudhatteerta;
namoota irraa uffata baaftee qullaa isaan hambifteerta.
⁷ Warra dadhaban bishaan hin obaafne;
kanneen beela'anis nyaata dhowwatteerta;
⁸ namni humna qabu biyya qabaata;
kan ulfina qabus keessa jiraata.
⁹ Ati dubartoota dhirsoonni irraa du'an harka duwwaa gad dhiifte;
irree ijoollee abbaa hin qabnees ni cabsite.
¹⁰ Kanaafuu kiyyoon si marseera;
sodaan tasaas si qabateera.
¹¹ Akka ati hin argineef ifni kee dukkanaa'eera;
lolaan bishaaniis sirra garagala.
¹² "Waaqni samii keessa ol fagoo jiraata mitii?
Inni urjiiwwan ol fagoo jiran illee hammam akka ol fagaatan of jalatti gad ilaala!
¹³ Ati garuu akkana jetta; 'Waaqni maal beeka?
Inni dukkana akkasii keessatti murtii kennaa?
¹⁴ Yommuu inni bantii samii irra deemu,
akka inni nu hin argineef duumessi gobbuun isa haguuga.'
¹⁵ Ati daandii durii
kan namoonni hamoon irra deeman duukaa buutaa?
¹⁶ Isaan utuu yeroon isaanii hin ga'in fudhataman;
hundeen isaanis lolaadhaan haxaa'ame.
¹⁷ Isaanis Waaqaan, 'Nu dhiisi! Waaqni Waan Hunda Danda'u
maal nu gochuu danda'a?' jedhan.
¹⁸ Garuu kan mana isaanii waan gaariin guute isuma;
kanaafuu ani gorsa hamootaa irraa nan fagaadha.
¹⁹ Qajeelonnis badiisa isaanii arganii ni gammadu;
warri balleessaa hin qabnes akkana jedhanii isaanitti qoosu;
²⁰ 'Dhugumaan amajajonni keenya balleeffamaniiru;
qabeenya isaaniis ibiddi barbadeesseera.'
²¹ "Waaqaan walii gali; isa wajjinis nagaan jiraadhu;
haala kanaanis wanni gaariin siif dhufa.
²² Afaan isaatii qajeelfama fudhadhu;
dubbii isaa illee garaatti qabadhu.
²³ Yoo gara Waaqa Waan Hunda Danda'uutti deebite,
ati ni haaromfamta;
yoo dunkaana kee keessaa hammina balleessitee

- 24 warqee kee biyyoo keessa buufte,
yoo warqee Oofirrii immoo dhagaa keessatti gatte,
25 yoo Waaqni Waan Hunda Danda'u warqee,
meetii filatamaas siif ta'a.
26 Ati yeroo sanatti Waaqa Waan Hunda Danda'utti ni gammadda;
fuula kees gara Waaqaatti ol qabatta.
27 Ati isa kadhatta; inni si dhaga'a;
ati immoo wareega kee ni baafatta.
28 Wanni ati murteessite ni ta'a;
ifnis karaa kee irratti ni ifa.
29 Yeroo namoonni gad qabamanitti ati immoo, 'Ol isaan qabi!' jetta;
innis warra gad qabaman ni baraara.
30 Inni nama balleessaa qabu illee ni oolcha;
ati qulqullummaa harka keetiitiin furamta."

23

Iyyoob

- 1 Iyyoob akkana jedhee deebise:
2 "Har'a iyyuu guungummiin koo hadhaa'aa dha;
yoo ani akkam aade iyyuu harki isaa natti ulfaateera.
3 Ani utuu iddoo itti isa argadhu beekke,
utuu iddoo inni jiraatu illee dhaquu danda'ee!
4 Silaa dhimma koo fuula isaa duratti dhi'eeffadhee
afaan koo falmiin guuttadha ture.
5 Waan inni naa deebisu nan beekan ture;
waan inni naan jedhus nan hubadhan ture.
6 Inni humna isaa guddaa sanaan anaan mormaa?
Lakki, na dhaggeeffata malee.
7 Namni qajeelaan achuma fuula isaa duratti dhimma isaa ni dhi'eeffata;
anis isa natti muru jalaa bara baraan nan ba'a.
8 "Garuu yoo ani gara ba'a biiftuu deeme, inni achi hin jiru;
ani yoo gara dhi'aa dhaqes achitti isa hin argadhu.
9 Yommuu inni kaabatti hojii irra jirutti ani isa hin argu;
yommuu inni gara kibbaatti deebi'uttis
ani hamma libsuu ijaa isa arguu hin danda'u.
10 Inni garuu karaa ani ba'u ni beeka;
yommuu inni na qoruttis ani akka warqee ta'ee nan mul'adha.
11 Miilli koo tarkaanfii isaatti dhi'aatee duukaa bu'eera;
ani utuun irraa hin gorin karaa isaa eegeera.
12 Ani ajaja afaan isaa irraa hin fagaanne;
nyaata guyyaa guyyaa caalaas dubbii afaan isaa nan jaalladha.
13 "Inni garuu of danda'ee kophaa isaa dhaabata;
kan isaan mormuu danda'u eenyu?
Inni waanuma jaallatu hojjeta.
14 Inni waan natti mure ni raawwata;
amma illee karoora akkanaa hedduu yaada isaa keessaa qaba.
15 Wanni ani fuula isaa duratti na'uufis kanuma;
ani yommuun waan kana hunda yaadutti isa nan sodaadha.
16 Waaqni garaa koo ni raase;
Waaqni Waan Hunda Danda'u na sodaachise.
17 Haa ta'u malee dukkanni,
dukkanni limixiin fuula koo haguugu iyyuu na hin barbadeessine.

24

- 1 "Waaqni Waan Hunda Danda'u sun maaliif yeroo murtii hin murteessine?
Warri isa beekan maaliif akkasumaan guyyoota isaa hin argine?
2 Namoonni dhagaa daarii ni dhiibu;
bushaayee hataniis ni bobbaasu.

- 3 Isaan harree ijoollee abbaa hin qabnee ooffatanii deemu;
sanga haadha hiyyeessaa qabdii fudhatu.
- 4 Rakkataa karaa irraa balleessu;
hiyyeeyyiin biyyaa hundis isaan jalaa dhokatu.
- 5 Hiyyeeyyiin akkuma harree diidaa kan gammoojjii keessaa
nyaata barbaacha asii fi achi jooru;
gammoojjii sana keessaas ijoollee isaaniitiif nyaata kenna.
- 6 Isaan dirree irratti okaa walitti qabatu;
iddoo dhaabaa wayinii nama hamaa irraas qarmii funaannatu.
- 7 Uffata dhabanii halkan qullaa bulu;
waan dhaamocha keessatti uffatan tokko illee hin qaban.
- 8 Isaan bokkaa tulluutiin tortoraniiru;
waan itti da'atan illee dhabanii kattaa hammatu.
- 9 Mucaan abbaa hin qabne harma irraa butameera;
daa'imni hiyyeessaa qabdii kennameera.
- 10 Isaan uffata dhabanii qullaa deemu;
bissii baatu; garuu ni beela'u.
- 11 Isaan dhagaa gidduutti zayitii ejersaa baasu;
wayinii cuunfu; garuu ni dheebotu.
- 12 Aaduun warra du'uutti jiranii magaalaa keessaa ni dhaga'ama;
lubbuun warra madaa'aniis gargaarsa barbaacha iyyiti.
Waaqni garuu balleessaa tokko iyyuu isaanitti hin lakkaa'u.
- 13 "Warri ifatti fincilan kanneen daandii isaa hin beekne
yookaan daandii ifaa irra hin jiraanne jiru.
- 14 Yommuu aduun dhiitu, namni nama ajjeesu ni ka'a;
innis hiyyeeyyii fi rakkattoota ni ajjeesa;
halkan immoo akkuma hattuu ta'a.
- 15 Iji ejjaan dimimmisa eeggata;
innis, 'Iji na argu hin jirtu' jedha;
fuula isaas ni dhokfata.
- 16 Namoonni dukkana keessa mana cabsanii seenu;
guyyaa garuu ofitti cufanii oolu;
isaan ifa hin beekan.
- 17 Hunda isaaniitiif, dukkanni guddaan barii isaanii ti;
isaan sodaa dukkana guddaatti michoomu.
- 18 "Ta'us isaan hoomacha bishaan gubbaa ti;
akka namni tokko iyyuu gara iddoo dhaabaa wayinii hin dhaqneef,
goodni lafa isaanii abaameera.
- 19 Akkuma ho'ii fi hoongeen cabbii baqee xuuxee fixu,
awwaalli namoota cubbuu hojjetan ni butata.
- 20 Gadameessi isaan irraanfata;
raammoonnis itti duuddee isaan nyaatti;
namoonni hamoon akkuma mukaa ni caccabu;
si'achis hin yaadataman.
- 21 Isaan dubartii dhabduu ni saamu;
haadha hiyyeessaatiif illee garaa hin laafan.
- 22 Waaqni garuu humna isaatiin jajjaboota alatti harkisa;
isaan ol ka'u; garuu wabii jireenyaa hin qaban.
- 23 Inni akka isaan waan nagaan jiraatan se'aniif ittuma dhiisuu danda'a;
iji isaa garuu karaa isaanii ni to'ata.
- 24 Isaan yeroo xinnoof mataa ol qabatu; ergasii immoo ni badu;
gad deebifamaniis akkuma warra kaanii walitti qabamu;
akkuma mataa midhaaniis ni muramu.
- 25 "Yoo kun akkas ta'uu baate
eenyutu sobduu na godhee dubbii koo busheessa?"

- ¹ Bildaad Shuhaahichi akkana jedhee deebise:
² "Mootummaa fi sodaatamuun kan Waaqaa ti;
 inni samiiwwan ol fagoo keessatti nagaa buusa.
³ Loltoonni isaa lakkaa'amu danda'uu?
 Ifni isaa eenyu irratti utuu hin ba'in hafa?
⁴ Yoos namni akkamitti fuula Waaqaa duratti qajeelaa ta'uu danda'a ree?
 Namni dubartii irraa dhalate akkamitti qulqulluu ta'uu danda'a?
⁵ Yoo ji'i illee fuula isaa duratti hin ifne,
 yoo urjiiwwanis ija isaa duratti qulqulluu ta'uu baatan,
⁶ namni raammoo foonii ta'e,
 ilmi namaa kan raammoo ta'e sun hammam kanaa gad haa ta'u ree!"

26

Iyyoob

- ¹ Iyyoob akkana jedhee deebise:
² "Ati nama humna hin qabne hammam gargaarte!
 Irree laafes hammam jajjabeessite!
³ Nama ogummaa hin qabneef gorsa akkamii kennite!
 Beekumsa guddaa akkamiis argisiifte!
⁴ Akka ati dubbii kana dubbattuuf eenyutu si gargaare?
 Hafuura eenyuutu afaan kee keessaa dubbate?"
⁵ "Warri du'an, warri bishaanii gadiitii fi
 kanneen bishaan keessa jiraatan hundii ni hollatu.
⁶ Duuti fuula Waaqaa duratti qullaa jira;
 badiisnis waan isa dhoksu hin qabu.
⁷ Waaqni iddoo duwwaa irra samii kaabaa diriirsa;
 lafas iddoo duwwaa irratti rarraasa.
⁸ Inni duumessa isaatiin bishaanota hidhee qaba;
 duumessi sunis bishaanota jalatti hin dho'u.
⁹ Inni duumessoota isaa itti uffisuudhaan
 fuula ji'aa ni haguuga.
¹⁰ Inni fuula bishaanotaa irratti,
 ifaa fi dukkana gidduu daarii dhaabe.
¹¹ Utubaawwan samii ni hollatu;
 dheekkamsa isaatiinis ni rifatu.
¹² Inni humna isaatiin galaana ni raasa;
 ogummaa isaatiinis Ra'aabin ni ciccira.
¹³ Hafuura baafatuun samiiwwan qulqulleesse;
 harki isaas bofa shawwisaa waraane.
¹⁴ Wantoonni kunneen hojii isaa keessaa qarqaruma qofa;
 hasaasni nu waa'ee isaa dhageenyu hammam xinnaa dha!
 Yoos kakawwee humna isaa eenyutu hubachuu danda'a ree?"

27

- ¹ Iyyoob haasaa isaa itti fufee akkana jedhe:
² "Dhugaa Waaqa jiraataa murtii qajeelaa na dhowwate,
 Waaqa Waan Hunda Danda'u kan lubbuu koo hadheesse sanaa,
³ hamma lubbuun na keessa jirtutti,
 hamma hafuurri Waaqaa funyaan koo keessa jirutti,
⁴ afaan koo hammina hin dubbatu;
 arrabni koos nama hin gowwoomsu.
⁵ Isin qajeeltota jechuu, Waaqni ana irraa haa fagaatu;
 ani hamman du'utti amanamummaa koo hin dhiisu.
⁶ Qajeelummaa koo jabeessee nan qabadha; gadis hin dhiisu;
 bara jireenya kootii guutuu qalbiin koo na hin komattu.
⁷ "Diinni koo akka nama hamaa, mormituun koo
 akka nama jal'aa haa ta'u!
⁸ Yommuu Waaqni lubbuu isaa isa irraa fudhatee isa balleessutti,
 namni Waaqaaf hin bulle abdi maalii qaba?"

- 9 Yeroo rakkinni isatti dhufutti,
Waaqni iyya isaa ni dhaga'aa?
- 10 Inni Waaqa Waan Hunda Danda'utti ni gammadaa?
Yeroo hundas Waaqa waammataa?
- 11 "Ani waa'ee harka Waaqaa isin nan barsiisa;
waan Waaqa Waan Hunda Danda'u bira jirus isin hin dhoksu.
- 12 Hundi keessan waan kana argitaniirtu;
yoos haasaan faayidaa hin qabne kun maali?
- 13 "Carraan Waaqni nama hamaaf qoode,
dhaalli namni jal'aan Waaqa Waan Hunda Danda'u irraa argatu kana:
- 14 Ijoolleen isaa akka malee baay'atan iyyuu goraadeetu isaan eeggata;
sanyiin isaas waan nyaatee quufu hin qabaatu.
- 15 Hambaa isaa dha'ichatu awwaala;
niitonna isaaniis hin boo'aniif.
- 16 Inni meetii akkuma biyyootti tuullatee
uffata immoo akkuma supheetti kuufatu illee,
- 17 waan inni kuufate nama qajeelaatu uffata;
meetii isaa illee nama balleessaa hin qabnetu qooddata.
- 18 Manni inni ijaaru akkuma mana dholdholee ti;
akkuma daasii eegduun ijaaruu ti.
- 19 Inni utuma qabeenya qabuu dhaqee ciisa; garuu itti hin deebi'u;
yeroo inni ija banatutti, qabeenyi isaa hundi hin jiru.
- 20 Sodaan akkuma lolaa isa irra garagala;
bubbeen hamaan immoo halkaniin isa fudhatee sokka.
- 21 Bubbeen ba'a biiftuu isa fudhata;
innis hin argamu; bubbeen sunis lafa inni jiru irraa isa haxaa'a.
- 22 Inni humna bubbee jalaa ba'uuf jedhee baqata;
bubbeen sunis gara laafina tokko malee itti of darbata.
- 23 Harka isaa dhadha'ee itti qoosa;
afuufees iddoo isaatii isa balleessa."

28

- 1 Dhugumaan iddoon meetiin keessaa qotamu,
lafti warqeen itti baafamee qulqulleeffamu jira.
- 2 Sibiilli lafa keessaa baafama;
sibiilli diimaan immoo dhagaa albuudaa irraa baqfama.
- 3 Namni hamma dhuma dukkanaatti deema;
moggaa akka malee fagoo dhaqees,
dukkana hamaa keessa dhagaa albuudaa barbaada.
- 4 Inni lafa namoonni jiraatan irraa fagaatee
iddoo miilli namaa ejjetee hin beeknetti boolla qota;
namoota irraa fagaatee ni rarra'a; asii fi achis ni raafama.
- 5 Lafa irraa garuu nyaatatu argama;
jala isheetiin immoo akka waan ibidda taateetti geeddaramti;
- 6 dhagaan isaa burqaa sanpeerii ti;
biyyoon isaas warqee qaba.
- 7 Allaattiin tokko iyyuu karaa dhokfame sana hin beeku;
iji culullees karaa sana hin argine.
- 8 Bineensonni sodaachisoon irra hin ejjenne;
leencis karaa sana hin darbine.
- 9 Harki namaa dhagaa jabaa cabsa;
hundee tulluuwwanii immoo ni gaggaragalcha.
- 10 Inni kattaa keessaan karaa baasa;
iji isaas waan gatii guddaa hunda arga.
- 11 Madda lageenii ni sakatta'a;
waan dhokfames ifatti ni baasa.
- 12 Ogummaan garuu eessaa arganti?
Hubannaanis eessa jiraata?
- 13 Namni gatii isaa hin beeku;

- inni biyya jiraattotaa keessatti hin argamu.
 14 Tujubni, “Inni na keessa hin jiru” jedha;
 galaannis, “Inni na bira hin jiru” jedha.
 15 Warqeen qulqulluun isa bituu hin danda’u;
 gatiin isaas meetiidhaan hin madaalamu.
 16 Warqee Oofiiriitti, dhagaa gatii guddaa sardooniksiitti
 yookaan sanpeeriitti hin tilmaamamu.
 17 Warqee fi dhagaan akka bilillee calaqqisu ittiin hin qixxaatu;
 inni faaya warqee qulqulluutiin hin geeddaramu.
 18 Elellaanii fi dooqni akka waan gatii qabaniitti hin hedaman;
 gatiin ogummaa lula diimaa caala.
 19 Tophaaizyooniin Itoophiyaa itti qixxaatu;
 warqee qulqulluudhaanis bitamuu hin danda’u.
 20 Yoos ogummaan eessaa dhufti ree?
 Hubannaanis eessa jiraatti?
 21 Isheen ija uumama hundaa jalaa dhokatteerti;
 simbirroota samii jalaas baddeerti.
 22 Badiisnii fi Duuti, “Nu oduu ishee qofa
 gurra keenyaan dhageenye” jedhu.
 23 Waaqa qofatu daandii gara ishee geessu hubatee,
 lafa inni jiraatus beeka;
 24 inni handaara lafaa ni ilaala;
 waan samii jala jiru hunda ni argaatii.
 25 Inni yommuu bubbeedhaaf humna kennee
 bishaanota safaretti,
 26 yommuu bokkaadhaaf seera dhaabee
 bakakkaaf immoo daandii baasetti,
 27 inni ogummaa ilaalee madaale;
 jabeessee dhaabee ishee qorate.
 28 Ergasii ilmaan namaatiin,
 “Gooftaa sodaachuun ogummaa;
 waan hamaa irraa fagaachuunis hubannaa dha” jedhe.

29

- 1 Iyyoob haasaa isaa itti fufee akkana jedhe:
 2 “Ani ji’oota darban, bara Waaqni na eege sana
 akkamin hawwa ture,
 3 yeroo ibsaan isaa mataa koo irratti ife, anis ifa isaatiin
 dukkana keessa darbee yeroon deeme,
 4 yeroo ani nama jabaa ture,
 yeroo michummaan Waaqaa mana koo eebbise,
 5 yeroo Waaqni Waan Hunda Danda’u na wajjin ture,
 yeroo ijoolleen koo naannoo koo turan,
 6 yeroo daandiin koo dhadhaadhaan jiifame,
 yeroo kattaanis laga zayitii ejersaa naaf yaase.
 7 “Yeroo anj gara karra magalaatti gad ba’ee
 oobdii sabaa keessa barcumaa koo irra taa’e,
 8 dargageeyyiin na arganii karaa irraa goru;
 maanguddoonnis ka’anii dhaabatu ture;
 9 hangafoonna sabaa dubbii afaanitti qabatanii
 harka isaanii afaan irra kaa’atu ture;
 10 sagaleen namoota beebekamoo hin dhaga’amu ture;
 arrabni isaanis laagaa isaaniitti ni maxxana ture.
 11 Namni na dhaga’u kam iyyuu na jaja;
 kanneen na arganis na galateeffatu ture;
 12 ani hiyyeessa gargaarsa barbaachaaf boo’u,
 nama abbaa hin qabne kan namni isa gargaaru tokko iyyuu hin jirre fureeraatii.
 13 Namni du’uu ga’e na eebbiseera;
 ani akka garaan haadha hiyyeessaa gammachuun ililchus godheera.
 14 Qajeelummaa akka uffata kootti uffadheera;

- murtiin qajeelaan immoo uffata koo fi marata mataa koo ture.
- ¹⁵ Ani nama jaameef ija,
okkolaaf immoo miilla ta'een ture.
- ¹⁶ Ani rakkataadhaaf abbaan ture;
nama ormaatiif illee nan falman ture.
- ¹⁷ Qarriffaa nama hamaa nan cabse;
waan inni qabates afaan isaatii buuseera.
- ¹⁸ "Ani akkana jedheen yaadee ture; 'Manuma koo keessattin du'a;
barri jireenya kootiis akkuma cirrachaa baay'ata.
- ¹⁹ Hiddi koo gad fagaatee bishaan qaqqaba;
fixeensis halkan guutuu dameewwan koo irra bula.
- ²⁰ Ulfinni koo na keessatti haaraa ta'ee jiraata;
iddaanis harka koo keessatti haaromfama.'
- ²¹ "Namoonna cal'isanii gorsa koo eeggachaa
abdiidhaan na dhaggeeffatu.
- ²² Erga ani dubbadhee booddee isaan deebi'anii hin dubbanne;
dubbiin koos akka gaariitti gurra isaanii seena ture.
- ²³ Isaan akkuma nama bokkaa eeggatuutti na eeggatan;
dubbii koos akkuma bokkaa arfaasaa dhugan.
- ²⁴ Yeroo ani isaaniif seequtti isaan hin amanne;
ifni fuula koos isaaniif waan guddaa ture.
- ²⁵ Ani karaa isaaniif filee akka hangafa isaaniitti nan taa'e;
akka mootii loltoota isaa gidduu jiraatuutti nan jiraadhe;
ani akka nama warra boo'an jajjabeessuus ta'e.

30

- ¹ "Amma garuu warri umuriidhaan naa gadii,
kanneen ani abbootii isaanii
saroota hoolota koo tiksitu wajjin iyyuu
madaaluu tuffadhe, kunoo natti qoosu.
- ² Warra humna dhaban,
jabinni irree isaanii maal na fayyada?
- ³ Isaan rakkinaa fi beelaan laafan;
lafa gogaa keessa,
gammoojjii namni keessa hin jiraanne keessa halkaniin jooran.
- ⁴ Daggala keessaa biqiltuu soogiddaa funaannatan;
nyaanni isaaniis hidda mukaa kan hin mi'oofne ture.
- ⁵ Isaan namoota gidduudhaa ari'aman;
namoonnis akkuma waan hattuuitti iyyaniitti itti iyyan.
- ⁶ Isaan akka laga gogaa keessa,
kattaa gidduu fi boolla lafaa keessa jiraataniif dirqamaman.
- ⁷ Bosona keessatti ni halaaku;
daggala keessattis walitti tuuta'u.
- ⁸ Isaan gowwoota maqaa hin qabne,
kanneen biyyaa ari'aman turan.
- ⁹ "Amma ilmaan isaanii sirba natti baafatan;
ani isaan gidduutti waan kolfaa ta'eera.
- ¹⁰ Isaan xireeffatanii narraa fagaatan;
fuula kooti tufuu irraas duubatti hin deebi'an.
- ¹¹ Sababii Waaqni iddaa koo laafisee gad na deebiseef,
isaan fuula koo duratti luugama baafatan.
- ¹² Karaa mirga kootiin addaggeewwan ka'aniiru;
miilla kootiif kiyyoo kaa'aniiru;
biyyoos akka dallaa natti naannessan.
- ¹³ Isaan karaa koo natti cufu;
na galaafachuufis ni milkaa'u;
namni isaan dhowwu tokko iyyuu hin jiru.
- ¹⁴ Akkuma nama qaawwa bal'aan dhufuutti,

- ona diigamaa keessa gangalachaa natti dhufu.
 15 Sodaan na liqimseera; ulfinni koo akkuma waan
 bubbeedhaan fudhatamuutti narraa fudhatameera;
 badhaadhummaan koos akkuma duumessaa bada.
- 16 “Amma lubbuun koo na keessatti dhumteerti;
 barri rakkinaas na qabateera.
- 17 Halkan keessa lafeen koo ni waraanama;
 dhukkubbiin na nyaatus natti hin furu.
- 18 Waaqni humna jabaadhaan uffata koo qabeera;
 akkuma morma wayyaa kootti hudhee na qabeera.
- 19 Inni darbatee dhoqqee keessa na buusa;
 anis akkuma biyyoo fi daaraa ta’eera.
- 20 “Yaa Waaqi, ani sitti nan iyyadha; ati garuu deebii naa hin kennitu;
 ani nan dhaabadha; ati garuu cal’istee na ilaalta.
- 21 Ati gara jabinaan natti garagalta;
 irree kee jabaadhaanis na dhoofta.
- 22 Ol na buttee fuula bubbee dura na oofta;
 bubbee hamaa keessas asii fi achi na aata.
- 23 Ani akka ati gara du’aatti,
 gara mana warra lubbuun jiraatan hundaaf ramadameetti
 na geessitu nan beeka.
- 24 “Dhuguma iyyuu yeroo inni rakkatee gargaarsa barbaachaaf iyyutti,
 namni harka isaa isa irra kaa’u tokko iyyuu hin jiru.
- 25 Ani warra rakkina keessa jiraniif hin boonyee?
 Lubbuun koos hiyyeeyyiif hin gaddinee?
- 26 Garuu utuu ani waan gaarii abdadhuu, wannii hamaan natti dhufe;
 utuu ani ifa eeggadhuus, dukkanni natti dhufe.
- 27 Keessi koo jeeqamaa jira; gonkumaa hin qabanoofne;
 barri gidiraas natti dhufeera.
- 28 Ani jajjabina dhabee asii fi achi deemee nan boo’a;
 waldaa keessa dhaabadhees gargaarsaaf nan iyya.
- 29 Ani obboleessa waango,
 michuu urunguus ta’eera.
- 30 Gogaan koo gurraacha’ee qolli irraa ka’eera;
 dhagni koos ho’aan boba’eera.
- 31 Baganaan koo boo’ichaaf, ululleen koo immoo
 sagalee iyyaatiif qopheeffameera.

31

- 1 “Ani ija koo wajjin kakuu galeera;
 yoos ani akkamiin hawwiidhaan gara durbaa ilaala ree?
- 2 Carraan namni Waaqa samii biraa qabu,
 dhaalli inni Waaqa Waan Hunda Danda’u irraa argatu maali?
- 3 Hamootaaf badiisa,
 warra jal’ina hojjetaniif immoo dha’icha mitii?
- 4 Inni karaa koo hin arguu?
 Tarkaanfii koo hundas hin lakkaa’uu?
- 5 “Yoo ani karaa sobaa irra deemee
 yookaan miilli koo gara gowwoomsaatti ariifatee jiraate,
- 6 Waaqni madaalii dhugaatiin na haa madaalu;
 akka ani hir’ina hin qabne illee haa beeku;
- 7 yoo tarkaanfiin koo karaa irraa goree,
 garaan koo waan iji koo argu duukaa bu’ee jiraate
 yookaan yoo harki koo xuraa’ee jiraate,
- 8 waan ani facaafadhe namni biraa haa nyaatu;
 midhaan koos haa buqqifamu.

- 9 “Yoo garaan koo dubartiidhaan gowwoomfamee jiraate,
yookaan yoo ani balbala ollaa koo jalatti riphee eeggadhe,
10 niitiin koo midhaan nama biraa haa daaktu;
namoonni biraas ishee wajjin haa ciisan.
11 Kun hammina;
kan abbaa murtiitiinis adabamuu qabuu dha.
12 Kun ibidda hamma Barbadeessutti waa gubuu dha;
midhaan ani qabu hundas gubee balleessa ture.
- 13 “Yoo ani yeroo isaan na himatanitti,
tajaajiltoota koo dhiiraa fi dubartii
murtii qajeelaa dhowwadhee jiraadhe,
14 yeroo Waaqni ka’utti ani maalan godha?
Yoo inni na gaafates ani maalan deebisa?
15 Isuma gadameessa keessatti na uume sanatu isaan uume mitii?
Kan hunda keenya gadameessa keessatti tolches isuma mitii?
- 16 “Yoo ani waan hiyyeessaaf barbaachisu dhowwadhee jiraadhe,
yookaan yoo ani akka iji haadha hiyyeessaa dadhabu godhee jiraadhe,
17 yoo ani buddeena koo utuu ilma abbaa hin qabneef hin qoodin
kophaa koo nyaadhee jiraadhe,
18 ani garuu dargaggummaa kootii jalqabee akkuma abbaattin isa guddise;
dhaloota kootii jalqabees haadha hiyyeessaa karaa argisiise.
19 Ani yoon utuu namni tokko wayyaa dhabee akka malee miidhamuu,
yookaan rakkataa uffata of irraa hin qabne tokko argee
20 sababii ani rifeensa hoolota kootiin isa ho’iseef,
yoo garaan isaa na hin eebbisin,
21 yoo ani mana murtiitti fudhatama qaba jedhee
ijoollee abbaa hin qabnetti harka koo ol kaasee jiraadhe,
22 irreen koo gatiittii koo irraa haa buqqa’u;
irreen koo buusaa isaatti haa cabu.
23 Ani sababiin dha’icha Waaqaa sodaadhee fi
sababiin surraa isaa kabajeef waan akkanaa hojjechuu hin dandeenye.
- 24 “Yoo ani warqee abdadhee yookaan warqee qulqulluudhaan,
‘Ati irkoo koo ti’ jedhee jiraadhe,
25 yoo ani qabeenya koo guddaatti,
milkaa’ina harki koo argatetti gammadee jiraadhe,
26 yoo ani aduu iftu argee
yookaan ji’a miidhaginaan deemu ilaalee kabajee,
27 akkasiinis garaan koo dhoksaan gowwoomfamee
afaan koo harka koo dhungatee jiraate,
28 wanni kun cubbuu adabamuu qabuu dha;
ani Waaqa samiitiif hin amanamne tureetii.
- 29 “Yoo ani badiisa diina kootiitti gammadee
yookaan rakkina isa irra ga’eef ililchee jiraadhe,
30 ani jireenya isaa abaarudhaan
akka afaan koo cubbuu hojjetu hin eeyyamne.
31 Yoo namoonni mana koo jiraatan,
takkumaa, ‘Eenyutu buddeena mana Iyyoob nyaatee hin quufin?’ hin jedhin,
32 sababii manni koo karaa deemuuf banaa tureef,
keessummaan kam iyyuu ala hin bulu ture.
33 Yoo ani akkuma namoonni godhan sana balleessaa koo garaatti qabadhee
cubbuu koos dhokfadhee jiraadhe,
34 ani waldaa guddaa sodaadhee
yookaan tuffiin gosaa na naasisee,
cal’isee gad ba’uu dhiiseeraa?
- 35 “Maaloo ani utuu nama na dhaga’u argadhee!
Ani mallattoo falmii koo nan mallatteessa;
Waaqni Waan Hunda Danda’u deebii naaf haa kennu;

- himataan koo dubbii isaa barreeffamaan haa dhi'eeffatu.
³⁶ Dhugumaan ani gatiittii koo irratti waan kana nan baadha;
 akka gonfoottis mataa irra nan kaa'adhan ture.
³⁷ Tokkoo tokkoo tarkaanfii koo isatti nan hima;
 akkuma ilma mootiittis isatti nan dhi'aadhan ture.
- ³⁸ "Yoo lafti koo natti iyyitee
 bo'oon ishee hundinuu imimmaaniin jiidhe,
³⁹ yoo ani kaffaltii malee midhaan ishee nyaadhe,
 yookaan akka hojjettoonni isaa lubbuu isaanii dhaban godhee jiraadhe,
⁴⁰ qooda qamadii qoraattiin,
 qooda garbuus aramaan itti haa biqilu."
 Dubbiin Iyyoob xumurame.

32

Eeliihuu

- ¹ Sababii Iyyoob nama qajeelaa of se'eef namoonni sadan kunneen deebii kennuufii dhiisan. ² Eeliihuun ilmi Barakeel Buuzichi maatiin Raamii sun garuu sababii Iyyoob qooda Waaqaa qajeelaa of godheef akka malee itti aare. ³ Akkasumas sababii isaan Iyyoobitti muruu malee deebii hin qabaatiniif Eeliihuun michoota Iyyoob sadanitti akka malee aare. ⁴ Eeliihuun waan namoonni sun umuriidhaan isa caalaniif utuu dursee Iyyoobitti hin dubbatin ture. ⁵ Garuu yeroo akka namoonni sun sadan waan dubbatan dhaban argetti aariin isaa ittuma caale.
- ⁶ Kanaafuu Eeliihuun ilmi Barakeel Buuzichaa sun akkana jedhe:
 "Ani umuriidhaan xinnaa dha;
 isin garuu jaarsolii dha;
 kanaafuu ani yaada koo isinitti himuu
 nan saalfadhe; nan sodaadhes.
- ⁷ Ani, 'Umuriin ni dubbata;
 barri dheeraanis ogummaa barsiisa' jedhee yaadeen ture.
- ⁸ Garuu hafuura nama keessa jiru,
 hafuura Waaqni Waan Hunda Danda'u itti baafatutu hubannaa kennaaf.
- ⁹ Ogeessi jaarsa qofa miti;
 kan waan qajeelaa hubatus, nama umurii dheeraa qofa miti.
- ¹⁰ "Kanaafuu ani akkana nan jedhaa na dhaggeeffadhaa;
 anis waanan beeku isinitti nan hima.
- ¹¹ Ani yeroo isin dubbattan nan obse;
 yeroo isin jechoota filattanitti illee
 ani dubbii ogummaa kan isin dubbattan nan dhaggeeffadhe;
¹² ani qalbeeffadheen isin dhaga'e.
- Garuu isin keessaa namni tokko iyyuu akka inni dogoggore
 Iyyoobin hin amansiifne;
 namni tokko iyyuu falmii isaatiif deebii hin kennine.
- ¹³ Isin, 'Nu ogummaa arganneerra;
 nama utuu hin ta'in, Waaqni isa irra haa aanu' hin jedhinaa.
- ¹⁴ Iyyoob garuu dubbii isaatiin na hin tuqne;
 anis falmii keessaniin deebii isaaf hin kennu.
- ¹⁵ "Isaan abdii kutatanii waan jedhan dhaban;
 dubbiinis isaan harkaa badde.
- ¹⁶ Erga isaan cal'isanii,
 erga isaan deebii kennan tokko illee dhabanii achi dhadhaabatanii,
 ani eeguun qabaa?
- ¹⁷ Ani deebii koo nan kenna;
 waanan beeku nan hima.
- ¹⁸ Dubbiin na keessa guuteeraatii;
 hafuurri na keessa jirus na kakaasa;
- ¹⁹ garaan koo akkuma daadhii wayinii kan qadaadamee,
 akkuma qalqalloo daadhii wayinii haaraa dho'uun ga'eetii.
- ²⁰ Ani dubbadhee qabbaneeffachuun qaba;

afaan koo banadhees deebii kennuun qaba.

- 21 Ani nama wal hin caalchisu;
yookaan nama tokko iyyuu hin saadu.
22 Utuu ani nama saaduu beekke,
Umaan koo silaa dafee lafa irraa na balleessa ture.

33

- 1 “Yaa Iyyoob amma garuu ati dubbii koo dhaggeeffadhu;
waan ani jedhu hundas dhaga’i.
2 Kunoo ani afaan koo nan banadha;
dubbiin koos fiixee arraba kootii irra jira.
3 Dubbiin koo garaa qajeelaa keessaa ba’a;
hidhiin koos waan ani beeku ifatti baasee dubbata.
4 Hafuura Waaqaatu na uume;
hafuurri Waaqni Waan Hunda Danda’u baafatus jireenya naa kenna.
5 Eгаа yoo dandeesse deebii naa kenni;
qophaa’iitii fuula koo dura dhaabadhu.
6 Ani fuula Waaqaa duratti namuma akka keetii ti;
anis biyyoo irraan hojjetame.
7 Ati na sodaattee hin raafamin;
harki koos sitti hin ulfaatin.
8 “Dhugumaan ati utuma ani dhaga’uu dubbatteerta;
anis dubbii kee dhaga’eera.
9 Ati akkana jetta: ‘Ani qulqulluu dha; cubbuu illee hin qabu;
ani balleessaa hin qabu; yakka illee hin hojjenne.
10 Waaqni garuu balleessaa narratti argeera;
akka diina isaattis na ilaaleera.
11 Miilla koo gudeelcha gidduu galchee hidha;
karaa koo hundas ni eega.’
12 “Garuu ani sitti nan hima; kana irratti ati qajeelaa miti;
Waaqni nama caalaa guddaadhaatii.
13 Ati maaliif akka waan inni
dubbii namaatiif deebii hin kennineetti isatti guungumta?
14 Namni hubachuu baattu iyyuu,
Waaqni karaa tokkoonis, karaa biraatiinis ni dubbata.
15 Inni utuma isaan siree isaanii irra ciisanuu,
yeroo hirribni cimaan isaan qabutti,
abjuudhaan, mul’ata halkaniitiinis,
16 gurra isaaniitti ni dubbata;
of eeggachiisaanis isaan rifachiisa;
17 jal’ina irraa nama deebisuuf,
of jajuu irraas isa dhowwuuf,
18 lubbuu isaa boolla irraa,
jireenya isaas goraadeedhaan baduu irraa oolchuudhaaf.
19 “Namni tokko dhiphina lafee isaa keessaa
kan gargar hin cinneen, siree dhiphinaa irratti ni adabama ta’a;
20 kanaafuu jireenya isaa nyaata jibba;
lubbuun isaas nyaata filatamaa balfiti.
21 Foon isaa nyaatamee dhuma;
lafeen isaa kan duraan dhokatee ture sun alatti yaa’a.
22 Lubbuun isaa gara boollaatti,
jireenya isaas ergamoota du’aatti dhi’aata.
23 Ta’us yoo kuma keessaa ergamaan Waaqayyoo tokko
akka itti qajeelaa ta’an isaaniitti himuuf,
ergamaan Waaqaa isaanii dhaabatee jiraate,
24 yoo namichaaf garaa laafee ‘Boolla bu’uu irraa isa oolche;
ani furii isaaf argeen jira’ jedhe,
25 dhagni isaa akkuma dhagna daa’imaatti haaromfama;

- akka bara dargaggummaa isaattis ni deebi'a.
- 26 Inni Waaqa ni kadhata; isa birattis fudhatama argata;
fuula Waaqaa ni arga; ni ililchas;
Waaqnis gara qajeelummaa isaa kan duriitti isa ni deebisa.
- 27 Ergasiis gara namootaa dhufee akkana jedha;
'Ani cubbuu hojjedheera; waan qajeelaas jal'iseera;
garuu waan naa malu hin arganne.
- 28 Inni akka isheen boolla hin buuneef lubbuu koo fureera;
anis jiraadhee ifa nan arga.'
- 29 "Waaqni waan kana hunda
yeroo lama, yeroo sadii iyyuu namaaf ni godha.
- 30 Kanas akka ifni jireenyaa isaa ifuuf,
lubbuu isaas boolla irraa deebisuuf godha.
- 31 "Yaa Iyyoob qalbeeffadhuutii na dhaggeeffadhu;
ati cal'isi; ani nan dubbadhaa.
- 32 Yoo waan jettu tokko illee qabaatte deebii naa kenni;
dubbadhu, ani akka ati qajeelaa taate mirkaneessuu nan barbaadaatii.
- 33 Yoo akkas ta'uu baate garuu na dhaggeeffadhu;
cal'isi, anis ogummaa sin barsiisaa."

34

- 1 Eliihuun akkana jedhe:
- 2 "Yaa ogeeyyii, dubbii koo dhaga'aa;
beektonnis na dhaggeeffadhaa.
- 3 Akkuma arrabni nyaata afaaniin qabu,
gurris dubbii calalaatii.
- 4 Waan qajeelaa ta'e ofii keenyaaf haa filannu;
waan gaariis tokkummaadhaan haa barannu.
- 5 "Iyyoob akkana jedha; 'Ani qajeelaa dha;
Waaqni garuu murtii qajeelaa narraa fudhate.
- 6 Ani utuman nama dhugaa ta'ee jiruu,
akka sobduuttin herregame;
ani yakka qabaachuu baadhu illee
xiyyi isaa madaa hin fayyineen na madeesseera.'
- 7 Namni akka bishaaniitti tuffii dhugu,
kan akka Iyyoob eenyu?
- 8 Inni warra hammina hojjetu wajjin walii gala;
jal'oota wajjinis tokkummaa qabaata.
- 9 Inni, 'Waaqa gammachiisuu yaaluun,
namaaf faayidaa tokko iyyuu hin qabu' jedhaatii.
- 10 "Kanaafuu isin yaa hubattoota, na dhaga'aa.
Waan hamaa hojjechuun Waaqa irraa,
dogoggoruunis Waaqa Waan Hunda Danda'u irraa haa fagaatu.
- 11 Inni namaaf akkuma hojii isaatti gatii ni kenna;
waan karaa isaatiif malus itti fida.
- 12 Dhugumaan Waaqni hammina hin hojjetu;
Waaqni Waan Hunda Danda'u murtii qajeelaa hin jal'isu.
- 13 Eenyutu lafa irratti isa muude?
Eenyutus addunyaa guutuu isatti kenne?
- 14 Utuu inni hafuura isaa deebisee fudhatee,
hafuura baafatu illee gara ofii isaatti deebifatee,
- 15 silaa sanyiin namaa hundi walumaan bada;
namnis biyyootti deebi'a ture.
- 16 "Ati yoo hubannaa qabaatte waan kana dhaga'i;
waan ani jedhus dhaggeeffadhu.
- 17 Namni murtii qajeelaa jibbu bulchuu danda'aa?
Atis isa qajeelaa fi humna qabeessa sanatti murtaa?

- 18 Kan moototaan, 'Isin faayidaa hin qabdan;' jedhee
qondaaltotaanis, 'Isin hamoo dha' jedhu isa mitii?
- 19 Inni ilmaan moototaatiif illee hin looguu;
sooreyyii fi hiyyeeyyii wal hin caalchisu;
hundi isaanii hojii harka isaatii.
- 20 Isaan halkan walakkaa tasa du'u;
namoonni hollatanii dhumu;
jajjaboonnis utuma harki namaa isaan hin tuqin ni badu.
- 21 "Jji isaa karaa namootaa irra jira;
inni tarkaanfii isaanii hunda ni arga.
- 22 Iddoon warri waan hamaa hojjetan itti dhokatan,
dukkanni yookaan gaaddisni guddaan hin jiru.
- 23 Akka inni murtiidhaaf fuula isaa duratti dhi'aatuuf,
Waaqni nama kam iyyuu hin beellamu.
- 24 Inni gaaffii tokko malee namoota jajjaboo ni burkuteessa;
warra biraa immoo iddoo isaanii ni kaa'a.
- 25 Inni sababii hojii isaanii beekuuf,
halkan keessa isaan garagalcha; isaanis ni barbadaa'u.
- 26 Sababii jal'ina isaaniitiifis
inni iddoo namni hundi argutti isaan adaba;
- 27 kunis waan isaan isa duukaa bu'uu irraa garagalanii
karaa isaa hunda dhiisaniif.
- 28 Isaan akka inni iyya rakkattootaa dhaga'uuf,
akka iyyi hiyyeeyyii fuula isaa duratti dhaga'amu godhaniiru.
- 29 Yoo inni cal'ise garuu, eenyutu isatti muruu danda'a?
Yoo inni fuula isaa dhokfates eenyutu isa arguu danda'a?
- Ta'us inni namaa fi saba illee ni to'ata;
30 kunis akka namni Waaqaaf hin bulle
mootii hin taanee fi akka isaan sabaaf kiyyoo hin keenyeeffii dha.
- 31 "Namni tokko Waaqaan akkana jedha haa jennu;
'Ani yakka hojjedheera; garuu itti hin deebi'u.
- 32 Waan ani arguu hin dandeenye na barsiisi;
ani yoon dogoggora hojjedhee jiraadhe, lammata itti hin deebi'u.'
- 33 Waaqni sababii ati qalbii jijjiirrachuu didduuf
akkuma yaada keetiitti gatii siif baasaa?
- Situ murteessuu qaba malee ana miti;
kanaafuu ati waan beektu natti himi.
- 34 "Namoonni hubannaa qaban ni dubbatu;
namoonni ogeeyyiin na dhaga'anis akkana jedhu;
- 35 Iyyoob beekumsa malee dubbata;
dubbiin isaas hubannaa cimaa hin qabu.'
- 36 Iyyoob sababii akka nama hamaatti deebii kenneef
maaloo utuu hamma dhumaatti qoramee jiraatee!
- 37 Inni cubbuu isaa irratti fincila dabala;
tuffiidhaan gidduu keenyatti harka dha'a;
Waaqa irrattis waan baay'ee dubbata."

35

- 1 Eliihuunis itti fufee akkana jedhe:
- 2 "Ati waan kana qajeelaa seetaa?
Ati, 'Ani fuula Waaqaa duratti qajeelaa dha' jetta.
- 3 Ati, 'Wanni kun faayidaa maalii naa qaba?
Ani cubbuu hojjechuu dhiisuudhaan maalin argadha?' jettee gaafatta.
- 4 "Ani si 'ii fi michoota kee kanneen si wajjin jiraniif
deebii kennuu nan barbaada.
- 5 Ol jedhiitii samiiwwan ilaali;
duumessoota siin ol jiranis argi.
- 6 Ati yoo cubbuu hojjetee maal isa miita?

- Cubbuun kees yoo baay'ate maal isa godha?
 7 Ati yoo qajeelaa taate, maal isaaf kennita?
 Yookaan inni harka kee irraa maal argata?
 8 Hamminni kee nama akka keetii qofa miidha;
 qajeelummaan kees ilmaan namaa qofa fayyada.
- 9 "Waan cunqursaan itti hammaattee namoonni ni iyyu;
 irree humna qabeessaa jalaa ba'uufis gargaarsaaf wawwaatu.
 10 Garuu namni tokko iyyuu akkana hin jedhu;
 'Waaqni Uumaan koo, inni halkaniin faarfannaa namaa kennu,
 11 kan bineensota lafa irraa caalaa beektota,
 simbirroo samii caalaas ogeeyyii nu godhu eessa jira?'
 12 Inni sababii of tuulummaa jal'ootaatiif
 yommuu namoonni iyyanitti deebii hin kennu.
 13 Dhugumaan Waaqni iyya isaanii kan gatii hin qabne sana hin dhaggeeffatu;
 Waaqni Waan Hunda Danda'u iyya sanaaf gurra hin kennu.
 14 Yoo ati, 'Dubbiin koo fuula isaa dura jira;
 ani isa eeggachaan jira;
 garuu isa arguu hin danda'u' jette,
 inni hammam kanaa gad iyyuu xinneeessaa haa dhaga'u ree!
 15 Amma illee sababii dheekkamsi isaa nama hin adabneef,
 sababii inni balleessaa namaa akka waan guddaa tokkootti hin fudhanneef,
 16 Iyyoob oduu faayidaa hin qabneen afaan bana;
 beekumsa malees dubbii baay'isa."

36

- 1 Eliihuun ittuma fufee akkana jedhe:
 2 "Ani akka gooda Waaqaa wanni jedhamu hedduun jiru
 sitti nan argisiisaatii mee xinnoo naa obsi.
 3 Ani beekumsa koo fagoodhaa nan fida;
 qajeelummaa Uumaa kootiis nan labsa.
 4 Akka dubbiiin koo soba hin ta'in mirkaneeffadhu;
 kan beekumsaan hir'ina hin qabne tokko si wajjin jira.
- 5 "Waaqni jabaa dha; garuu eenyun iyyuu hin tuffatu;
 inni jabaa dha; kaayyoo isaattis cimee dhaabata.
 6 Inni hamoota hin jiraachisu;
 warra rakkataniif garuu murtii qajeelaa ni kenna.
 7 Ija isaa qajeeltota irraa hin buqqifatu;
 mootota wajjin teessoo irra isaan teessisa;
 bara baraanis ol isaan guddisa.
 8 Garuu yoo namoonni foncaadhaan hidhaman,
 yoo funyoo rakkinaatiinis hidhaman,
 9 inni hojii isaanii,
 daba isaan of tuulummaan hojjetanis isaanitti ni hima.
 10 Inni gurra isaanii sirreeffama dhaggeeffachuuf ni bana;
 akka isaan waan hamaa irraa qalbii jijjiirratanis ni ajaja.
 11 Isaan yoo ajamanii isa tajaajilan,
 bara jireenya isaanii badhaadhummaan,
 umurii isaaniis gammachuudhaan fixatu.
 12 Yoo ajajamuu baatan garuu,
 goraadeedhaan badu;
 beekumsa malees ni du'u.
- 13 "Warri garaan isaanii Waaqa irraa fagaate, aarii of keessatti kuufatu;
 yommuu inni foncaan isaan hidhutti illee gargaarsa barbaachaaf hin iyyan.
 14 Isaan dargaggummaa isaanii keessa du'u;
 jireenya isaaniis xuraa'ota gidduutti bada.
 15 Inni garuu warra dhiphatan dhiphina isaanii keessaa baasa;
 rakkoo isaanii keessattis isaanitti dubbata.
- 16 "Inni dhiphina keessaa si baasee

- gara lafa bal'aa dhiphina hin qabneetti,
maaddii coomaan guutametti si geessa.
- 17 Amma garuu murtiin hamootaaf malu sirra tuulameera;
murtii fi haqni si qabataniiru.
- 18 Akka badhaadhummaan si hin gowwoomsine of eeggadhu;
akka baay'inni matta'aas karaa irraa si jal'isu hin godhin.
- 19 Badhaadhummaan kee yookaan tattaaffiin kee guddaan sun hundi
rakkoo irraa si eegu danda'aa?
- 20 Halkan itti namoonni
mana isaaniitii buqqifaman hin hawwin.
- 21 Ati akka hamminatti hin deebine of eeggadhu;
qooda rakkinaa waan kana filatteertaatii.
- 22 "Kunoo Waaqni humna isaatiin ol ol jedheera;
barsiisaan akka isaa eenyu?
- 23 Namni karaa isatti himu,
yookaan kan, 'Ati dogoggor-teerta' isaan jedhu eenyu?
- 24 Hojii isaa kan namoonni faarfannaadhaan jajan sana,
leellisuu hin dagatin.
- 25 Namni hundinuu argeera;
tokkoon tokkoon namaas fagootti xiyyeeffatee ilaala.
- 26 Dhugumaan Waaqni guddaa dha; nus isa hin beeknu;
baay'ina bara isaas namni beekuu hin danda'u.
- 27 "Inni coph bishaanii ol baasa;
hurrii isaas walitti qabee bokkaatti geeddara.
- 28 Duumessis jiidha isaa gad coccobsa;
bokkaan guddaanis namatti rooba.
- 29 Eenyutu akka inni itti duumessoota diriirsu,
akka inni itti dunkaana isaa keessaa qaqqawweessa'us hubachuu danda'a?
- 30 Akka inni itti bakakkaa naannoo isaatti bittinneessu,
akka inni itti tuujuba galaanaa illee haguugu ilaali.
- 31 Kun haala inni ittiin saboota bulchuu fi
nyaata baay'inaan isaaniif kennuu dha.
- 32 Inni harka isaa bakakkaadhaan ni guuta;
akka bakakkaan sun iddoo akeeka isaa dha'us ni ajaja.
- 33 Kakawween isaa akka bakakkaan dhufu labsa;
looni iyyuu akka inni dhi'aate beeksisu.

37

- 1 "Kana irratti onneen koo ni dhikkifata;
iddoo isaatiis ni u'utaala.
- 2 Dhaggeeffadhaa! Iyya sagalee isaa,
guungummii afaan isaatii ba'u illee dhaga'aa.
- 3 Inni bakakkaa isaa samii hunda jalatti gad dhiisa;
gara handaara lafaattis ni erga.
- 4 Ergasii sagaleen guungummii isaa ni dhufa;
inni sagalee isaa ulfina qabeessa sanaan ni qaqqawweessa'a.
- Yommuu sagaleen isaa dhaga'amutti,
inni waan tokko illee hin qusatu.
- 5 Sagaleen Waaqaa haala dinqisiisaadhaan ni qaqqawweessa'a;
inni waan guddaa hubannaa keenyaa ol ta'e godha.
- 6 Inni cabbiidhaan, 'Lafa irra bu'i';
tiifuudhaanis, 'Bokkaa jabaa ta'i' jedha.
- 7 Akka namni inni uume hundi hojii isaa beekuuf,
inni harka tokkoo tokkoo namaa chaappessa.
- 8 Bineensonni holqa isaaniitti galu;
da'annoo isaanii keessas ni turu.
- 9 Bubbeen hamaan iddoo isaatii ni ba'a;
dhaamochis bubbee bittinneessu keessaa ni ba'a.
- 10 Hafuurri Waaqni baafatu cabbii uuma;

- bishaanonni babal'aanis ni ititu.
- 11 Inni duumessoota bishaan baachisa;
bakakkaa isaas isaan keessa facaasa.
- 12 Isaan waan inni ajaju hunda hojjechuuf,
qajeelfama inni kennuun
addunyaa hunda irra naanna'u.
- 13 Inni namoota adabuuf, yookaan lafa isaa obaasee
jaalala isaa argisiisuuf jedhee duumessa fida.
- 14 "Yaa Iyyoob waan kana dhaggeeffadhu; mee of qabiitii
hojii Waaqaa isa dinqisiisaa sana hubadhu.
- 15 Waaqni akkamitti duumessoota
akka ajajuu fi akkamitti akka balaqqeessisu ati ni beektaa?
- 16 Akka itti duumessoonni wal qixxaatanii rarra'an,
hojii dinqisiisaa Waaqaa isa beekumsaan mudaa hin qabne sanaa beektaa?
- 17 Ati kan yeroo lafti bubbee kibbaatiin cal'istutti
ho'a wayyaa keetiitiin waxalamtu,
- 18 samii akkuma of-ilaalee naasii baqfamee jabaatu sana
diriirsuu keessatti isa gargaaruu ni dandeessaa?
- 19 "Waan nu isaan jennu nutti himi;
nu sababii dukkana keenyaatiifuu dubbii keenya qajeelfachuu hin dandeenyu.
- 20 Akka ani dubbachuu fedhu isatti himamuu qabaa?
Namni kam iyyuu liqimfamuuf ni gaafataa?
- 21 Erga qilleensi samiiwwan qulqulleessee booddee,
namni aduu humna guutuun iftu ilaaluu danda'u tokko iyyuu hin jiru.
- 22 Waaqni bareedina warqeetiin kaabaa ni dhufa;
inni ulfina isaa isa sodaachisaa sanaan ni dhufa.
- 23 Waaqni Waan Hunda Danda'u hubannaa keenyaa oli;
inni humnaa fi murtii qajeelaadhaan guddaa dha;
qajeelummaan isaa baay'ee dha; inni nama hin cunqursu.
- 24 Kanaafuu, namoonni isa sodaatu;
inni warra ogeeyyii of se'an hunda wa'ittuu hin hedu."

38

WAAQAYYO Ni dubbata

- 1 Kana irratti WAAQAYYO bubbee jabaa keessaa Iyyoobitti dubbate. Akkana jedhes:
- 2 "Namni dubbii beekumsa malee
dubbataamuun karoora koo dukkanneessu kun eenyu?"
- 3 Mee akka gootaa mudhii kee hidhadhu;
ani sin gaafadha;
ati immoo deebii naa kenni.
- 4 "Yeroo ani hundee lafaa kaa'etti ati eessa turte?
Yoo hubatte mee natti himi.
- 5 Eenyutu bal'ina ishee murteesse? Dhugumaan ni beektaa?
Eenyutu ulee safaraa ishee irra harkise?
- 6 Hundeen ishee maal irra dhaabame?
Yookaan eenyutu dhagaa golee ishee dhaabe?
- 7 Kunis yeroo bakkalchoonni barii walii wajjin faarfatanitti,
yeroo ilmaan Waaqayyoos ililchanitti ture.
- 8 "Yeroo galaanni cabsee garaa lafaa keessaa ba'etti
eenyutu balbala itti cufee ittise?"
- 9 Yeroo ani duumessoota uffata isaa godhee
dukkana guddaan maretti,
- 10 yeroo ani daangaa isaa dhaabee
balbalaa fi danqaraa hojjeheeffitti,
- 11 anis, 'Ati hamma asiitti dhufu; garuu darbuu hin dandeesu;
dambaliin of jajuu keetii illee asumatti dhaabata!' jedheen.
- 12 "Ati bara jireenya keetii barraaqa ajajjee

- yookaan barii obborootti iddoo isaa argisiiftee beektaa?
 13 Akka inni handaara lafaa qabatee
 namoota hamoo achi keessaa hurgufu gooteertaa?
 14 Lafti akka suphee chaappaa jala jiruutti bifa geeddaratti;
 bifti ishees akka bifa uffataatti mul'ata.
 15 Hamoonni ifa isaanii dhowwatamaniiru;
 irreen isaanii inni ol ka'es cabeera.
- 16 "Ati gara burqaa galaanaa gad buutee
 yookaan tuujuba bishaanii seentee hundee isaa irra deemtee beektaa?
 17 Karri du'aa sitti mul'ifameeraa?
 Karra gaaddidduu du'aas argiteertaa?
 18 Bal'ina lafaa guddaa sana hubatteertaa?
 Yoo kana hunda beekte dubbadhu.
- 19 "Karaan iddoo ifni jirutti nama geessu kami?
 Dukkannis eessa jiraata?
 20 Iddoo isaaniitti isaan geessuu dandeessaa?
 Daandii lafa jireenya isaaniitti geessu beektaa?
 21 Ati dhugumaan ni beekta; yeroo sana dhalatteertaatii!
 Ati bara hedduu jiraatteerta!
- 22 "Mankuusa cabbii seentee yookaan mankuusa
 dhagaa cabbii argiteertaa?
 23 Kan ani yeroo rakkinaatiif,
 guyyaa waraanaa fi lolaatiif ol kaa'adhe argiteertaa?
 24 Karaan iddoo ifni itti bittinnaa'utti
 yookaan gara iddoo bubbeen ba'aa itti lafa irra faffaca'uutti nama geessu kami?
 25 Eenyutu lolaadhaaf bo'oo,
 bakakkaadhaaf immoo daandii baasee,
 26 lafa namni tokko iyyuu keessa hin jiraanne,
 gammoojjii namni tokko iyyuu keessa hin jirre bishaan obaasuuf,
 27 lafa namni keessa hin jiraannee fi lafa onaa quubsee
 margas itti biqilchu eenyu?
 28 Roobni abbaa qabaa?
 Cophi fixeensaa eenyutu dhalche?
 29 Cabbiin garaa eenyuutii ba'a?
 Qorra samii eenyutu dhala?
 30 Bishaanonni akka dhagaa jabaatu,
 fuulli tuujubaas akka cabbii ta'a.
- 31 "Urjiiwwan babbareedoo Torbii jedhaman hidhuu ni dandeessaa?
 Yookaan hidhaa Urjii Sadee jedhamuu hiikuu ni dandeessaa?
 32 Tuuta urjiiwwanii waqtiilee isaaniitti fiduu
 yookaan urjii Amaaketa jedhamu ilmaan isaa wajjin bobbaasuu ni dandeessaa?
 33 Seera samiiwwanii beektaa?
 Bulchiinsa isaanii lafa irratti hundeessuu ni dandeessaa?
- 34 "Ati sagalee kee gara duumessaatti ol fudhattee,
 lolaa bishaaniitiin of haguuguu ni dandeessaa?
 35 Ati bakakkaa daandii isaa irra erguu ni dandeessaa?
 Innis, 'Kunoo ani asan jira' siin jedhaa?
 36 Eenyutu yaada garaatiif ogummaa
 yookaan sammudhaaf hubannaa kenne?
 37 Eenyutu duumessoota lakkaa'uuf ogummaa qaba?
 Eenyutu okkotee bishaan samii
 38 yeroo biyyoon jabaattutti,
 yeroo supheen wal qabattutti jal'isuu danda'a?
- 39 "Ati leenca dhalaadhaaf nyaata adamsitee
 saafela leencaas beela baaftee
 40 yeroo isaan man'ee isaanii keessatti riphannitti

yookaan yeroo isaan daggala keessatti riphanii
waa eeggatanitti beela ni baaftaa?

41 Eenyutu yeroo ilmaan ishee gara Waaqaatti iyyan,
yeroo isaan nyaata dhabanii jooranitti,
arraagessaaf nyaata kenna?

39

Iyyoob

- 1 “Yeroo itti qellejjeen dhaltu beektaa?
Yeroo itti borofni ilmoo ishee dhaltu argiteertaa?
- 2 Ji’a isaan garaatti ilmaan baatan ni lakkooftaa?
Yeroo isaan itti dhalan ni beektaa?
- 3 Isaan jilbeenfatani ilmaan isaanii dhalu;
foolachuu isaaniis ni hobbaafatu.
- 4 Ilmaan isaanii ni jabaatu; alattis ni guddatu;
ba’anii ni deemu; hin deebi’anis.
- 5 “Eenyutu harree diidaa gad dhiise?
Funyoo isaas eenyutu hiike?
- 6 Ani gammoojjii mana isaa,
lafa soogiddaas iddoo jireenya isaa godheen kenneef.
- 7 Inni waca magaalaa keessaatti ni kolfa;
iyya konkolaachisaas hin dhaga’u.
- 8 Waan dheedu argachuuf tulluuwwan irra laba;
waan lalisaa hundas ni barbaada.
- 9 “Gafarsi si tajaajiluuf siif ajajamaa?
Dallaa kee keessas ni bulaa?
- 10 Akka inni lafa siif qotuuf funyoodhaan isa hidhuu ni dandeessaa?
Yookaan inni si duubaan bo’oo ni baasaa?
- 11 Ati waan inni humna guddaa qabuuf isa ni amanattaa?
Hojii kee jabaa illee isatti ni dhiiftaa?
- 12 Akka inni midhaan kee walitti qabee
oobdii kee irratti siif tuuluuf isa ni abdattaa?
- 13 “Guchiin gammachuudhaan qoochoo ishee afarsiti;
garuu qoochoo fi baallee huummootiin wal bira hin qabamu.
- 14 Hanqaaquu ishee lafa irratti buufti;
akka itti ho’uufis cirracha keessatti dhiifti;
- 15 garuu akka miilli wayii caccabsu,
akka bineensi irra ejjetu hin yaadattu.
- 16 Cuucii isheettis akka waan isaan kan ishee hin ta’iniitti garaa jabaatti;
yoo dadhabbiin ishee akkasumaan bade illee isheef homaa miti;
- 17 Waaqni ogummaadhaan ishee hin badhaafneetii;
yookaan hubannaa isheef hin goodne.
- 18 Yeroo fiiguuf qoochoo ishee bal’ifattutti,
isheen fardaa fi namicha gulufutti kofalti.
- 19 “Ati fardaaf jabina ni kennitaa?
Yookaan morma isaatti gama uffisuu dandeessaa?
- 20 Akka inni akkuma hawwaannisaatti utaaluu ni gootaa?
Ulfinni korrisa isaas sodaachisaa dha.
- 21 Inni humna isaatti gammadee akka malee guulee lafa dhidhiita;
ba’ees mi’a lolaatti qajeela.
- 22 Inni sodaatti ni kolfa; waan tokko illee hin sodaatu;
goraadee irraas duubatti hin deebi’u.
- 23 Man’een xiyyaa, eeboo fi ankaaseen calaqqisus
cinaacha isaatti bubbu’ee kililcha.
- 24 Si’aa’ee rommuudhaan lafa haadha;
yeroo malakanni afuufamutti illee obsee dhaabachuu hin danda’u.
- 25 Inni yommuu malakanni afuufamutti

'Uffee' jedhee imimsa; waca ajajjootaatii fi iyya waraanaa,
foolii waraanaa illee fagoottu suufa.

- 26 "Cululleen ogummaa keetiin barriftee
qoochoo ishees gara kibbaatti bal'iftii?
27 Risaan ajaja keetiin ol ba'ee
ol fagootti mana isaa ijaarrataa?
28 Inni qarqara hallayyaa irra jiraata; halkanis achuma bula;
kattaa fofottoqaanis da'oo isaa ti.
29 Achi taa'ees waan nyaatu adamsa;
iji isaas fagootti waan sana arga.
30 Cuucoliin isaa dhiiga dhugu;
innis lafa raqni jiruu hin dhabamu."

40

- 1 WAAQAYYOS Iyyoobiin akkana jedhe:
2 "Namni Waaqa Waan Hunda Danda'uun falmu tokko isa ni qajeelchaa?
Namni Waaqa himatu deebii haa kennuuf!"
3 Iyyoobis akkana jedhee WAAQAYYOOF deebise:
4 "Ani nama faayidaa hin qabnee dha; akkamittin deebii siif kenna?
Harka koo afaan koo irra nan kaa'adha.
5 Ani yeroo tokko dubbadheera; garuu ani waanan deebisu hin qabu;
si'a lama dubbadheera; kana caalaa garuu homaa hin jedhu."
6 Kana irratti WAAQAYYO bubbee jabaa keessaa Iyyoobitti dubbate:
7 "Akka dhiiraatti mudhii kee hidhadhu;
ani sin gaafadha;
ati immoo deebii naa kennita.
8 "Ati murtii koo qajeelaa sana gatii dhabsiistaa?
Ofii keetii qajeelaa ta'uuf na himattaa?
9 Irree akka irree Waaqaa qabdaa?
Sagaleen kees akka sagalee isaa qaqaawweessa'uu danda'aa?
10 Ulfinaa fi guddinaan of miidhagsi;
kabajaa fi barreedina uffadhu.
11 Dheekkamsa kee kan guatee irra yaa'u sana dhangalaasi;
nama of tuulu kam iyyuu ilaalii qaanessi.
12 Nama of tuulu hunda ilaalii gad deebisi;
hamoota illee iddoodhuma isaan dhaabatanitti caccabsi.
13 Isaan hunda walitti qabii biyyoo keessatti awwaali;
fuula isaaniis awwaala keessa dhoksi.
14 Yoos ani mataan koo, akka harki kee mirgaa
si oolchuu danda'u siifin mirkaneessa.
15 "Biheemootin ani akkuma si uumettin uume,
kan akkuma qotiyyoo marga dheedu sana mee ilaali.
16 Jabinni isaa dugda isaa keessa,
humni isaa immoo ribuu garaa isaa keessa jira!
17 Eegeen isaa akkuma muka birbirsaa raafama;
ribuun tafa isaa wal keessa xaxamaa dha.
18 Lafeen isaa akka ujummoo naasii ti;
harkii fi miilli isaa immoo akka ulee sibiilaa ti.
19 Inni uumamawwan Waaqaa keessaa hangafa;
garuu inni isa uume goraadee isaatiin isatti dhi'aachuu danda'a.
20 Gaarran marga ni kennuuf;
bineensonni hundi naannoo isaa ni burraaqu.
21 Inni huuxxii qoraattii qabu jala ciisa;
shambaqqoo lafa dhaqdhaqii keessa dhokata.
22 Gaaddisni huuxxii qoraattii qabuu isa haguuga;
alaltuun lagaas isa marsa.
23 Yommuu lagni cabsee yaa'utti iyyuu kunoo, inni hin rifatu.
Lagni Yordaanos afaan isaa irra garagalu iyyuu inni hin shishu.
24 Namni utuma inni arguu isa qabuu

yookaan kiyyoodhaan isa qabee funyaan isaa uruu danda'u tokko iyyuu jiraa?

41

- 1 "Ati hokkoo qurxummiitiin Lewaataan harkiftee baasuu
yookaan arraba isaa funyoodhaan hidhuu ni dandeessaa?
- 2 Funyaan isaa keessa funyoo baasuu
yookaan lafee mangaagaa isaa hokkoodhaan uruu ni dandeessaa?
- 3 Inni akka ati isaaf araaramtuuf guddisee si kadhataa?
Afaan nagaatiinis sitti ni dubbataa?
- 4 Akka ati bara baraan garbicha godhattuuf
inni si wajjin kakuu ni galaa?
- 5 Ati akka simbirroota wajjin taphattu isa wajjin ni taphattaa?
Yookaan shamarran keetiif isa ni hiitaa?
- 6 Daldaltoonni isa irratti gatii wal dubbatuu?
Warra bitee gurguruufis isa ni qooduu?
- 7 Ati gogaa isaa xiyyaan,
yookaan mataa isaa hokkoo ittiin qurxummii qabaniin
wawwaraanuu ni dandeessaa?
- 8 Yoo harka keetiin isa tuqxe, wal'aansoo sana ni yaadatta;
deebitees waan sana hin gootu!
- 9 Isa mo'anna jedhanii abdachuun soba;
ijumaan isa ilaaluunuu nama hollachiisa.
- 10 Namni isa dammaqsuuf garaa qabaatu tokko iyyuu hin jiru.
Eгаа namni na dura dhaabachuu danda'u eenyu?
- 11 Namni waa natti kennatee ani deebisuufii qabu eenyu?
Wanni samii jala jiru hundinuu kanuma koo ti.
- 12 "Ani waa'ee harkaa fi miilla isaa,
waa'ee jabinaa fi dhaaba toluu isaa dubbachuu hin dhiisu.
- 13 Eenyutu uffata inni irraan uffatu irraa baasa?
Eenyutu luugama qabatee isatti dhi'aata?
- 14 Eenyutu balbala afaan isaa
isa ilkaan isaa sodaachisaa sanaan marfame banuu danda'a?
- 15 Dugdi isaa gaachanawwan tarree galan,
kanneen akka malee walitti maxxanfaman qaba;
- 16 tokkoon tokkoon gaachanawwan sanaa
akka qilleensi gidduu isaanii hin baaneef baay'ee walitti maxxanu.
- 17 Isaan jabeeffamanii walitti qabsiifaman;
waan walitti fayyaniif gargar hin baafaman.
- 18 Haxxissoon isaa balaqqeessa ifaa baasa;
iji isaa immoo akkuma ifa biiftuu reefuu baatuu ti.
- 19 Afaan isaa keessaa arraba ibiddaatu ba'a;
qaanqeenis afaan isaa keessaa ni faffaca'a.
- 20 Akkuma aara xuwwee ibidda shambaqqoo
irratti dafqu keessaa ba'uu funyaan isaatii aarri ni ba'a.
- 21 Hafuurri afaan isaatii ba'u cilee ibiddaa qabsiisa;
afaan isaa keessaas arrabni ibiddaa ni ba'a.
- 22 Morma isaa keessa jabinatu jira;
sodaachisuunis fuula isaa dura ni utaala.
- 23 Dachaana foon isaa wal qabateera;
dachaana sunis walitti fayyeera; hin socho'us.
- 24 Lapheen isaa akka kattaa jabaata;
akka dhagaa daakuus jabaa dha.
- 25 Yeroo inni ol ka'utti, jajjaboonni ni sodaatu;
yommuu inni lafa sochoosaa dhufutti isaan of irra garagalanii baqatu.
- 26 Goraadeen itti bu'u illee homaa isa hin godhu;
eeboon yookaan xiyyi yookaan ankaaseenis homaa isa hin godhu.
- 27 Inni sibiila akka cidiitti,
naasii immoo akka muka tortoreetti heda.
- 28 Xiyyi isa hin baqachiisu;
dhagaan furrisaa isaaf akkuma habaqqii ti.

- 29 Bokkuun isaaf akkuma cidii ti;
inni mirmirfamuu eebootti ni kolfa.
- 30 Garaan isaa jalli akka cabaa okkotee kan qara qabuu ti;
akka muka ittiin midhaan dha'aniittis dhoqqee baqaqsa.
- 31 Inni tuujuba akka okkotee dafquutti koqsiisa;
galaanas akkuma bilqaaxxii dibataa raasa.
- 32 Inni duuba isaatiin akka karaan ifu ni godha;
namni waan tuujubni sun rifeensa adii qabu se'a.
- 33 Uumamni homaa hin sodaanne,
kan isaan qixxaatu tokko iyyuu lafa irra hin jiru.
- 34 Inni warra of tuulu ni tuffata;
warra of jaju hunda irratti mootii dha."

42

Iyyoob

- 1 Iyyoobis akkana jedhee WAAQAYYOOF deebii kenne:
- 2 "Ani akka ati waan hunda hojjechuu dandeessu nan beeka;
karoorri kee tokko iyyuu karaatti hin hafu.
- 3 Ati, 'Namni beekumsa malee gorsa koo dhoksu kun eenyu?' jettee gaafatte.
Ani dhugumaan waan naaf hin galin, waan dinqii natti ta'e
kan ani hin beekin dubbadheera.
- 4 "Ati akkana jetteerta;
'Ani nan dubbadhaa mee dhaggeeffadhu;
ani sin gaafadhaa, ati immoo naaf deebisi.'
- 5 Gurri koo waa'ee kee dhaga'ee ture;
amma garuu iji koo si argeera.
- 6 Kanaafuu ani of tuffadhee biyyoo fi
daaraa keessa taa'ee qalbii nan jijjiirradha."

Xumura

7 WAAQAYYO erga waan kana Iyyoobitti dubbatee booddee Eliifaaz Teemaanichaan akkana jedhee; "Sababii isin akka Iyyoob garbichi koo dubbate sana waa'ee koo waan qajeelaa hin dubbatiniif dheekkamsi koo si'ii fi michoota kee lamaanitti boba'eera.

8 Kanaafuu isin amma jiboota torbaa fi korbeeyyii hoolaa torba fuudhaatii gara garbicha koo Iyyoob dhagaatii waa'ee ofii keessaniitiif aarsaa gubamu dhi'eessaa. Iyyoob garbichi koo isinii kadhata; ani kadhannaa isaa nan dhaga'a; akka balleessaa keessaniittis isinitti hin muru. Isin akka Iyyoob garbichi koo dubbate sana waa'ee koo waan qajeelaa hin dubbanneetii."

9 Kanaafuu Eliifaaz Teemaanichi, Bildaad Shuhaahichii fi Zoofaari Naa'imaatichi waan WAAQAYYO isaanitti hime sana godhan; WAAQAYYOS kadhannaa Iyyoob dhaga'e.

10 Erga Iyyoob michoota isaatiif kadhatee booddee WAAQAYYO deebisee isa sooromsee qabeenya inni duraan qabu sana harka lama kenneef. 11 Obbolloonni isaa, obboleettonni isaa hundinuu fi warri dur isa beekan hundi dhufanii mana isaatti isa wajjin nyaatan. Isaanis sababii rakkina WAAQAYYO isatti fide hundaatiif isaaf gaddanii isa jajjabeessan; tokkoon tokkoon isaaniis meetii fi qubeelaa warqee kennaniif.

12 WAAQAYYOS kan duraa caalaa jireenya Iyyoob kan fuul duraa eebbise. Iyyoobis hoolaa kuma kudha afur, gaala kuma ja'a, qotiyyoo kuma lamaa fi harree dhaltuu kuma tokko qaba ture. 13 Akkasumas ilmaan torbaa fi intallan sadii qaba ture. 14 Intala isaa jalqabaa Yemiimaa, ishee lammaffaa Keziyaa, ishee sadaffaa immoo Qeren-Haphuuk jedhee moggaase. 15 Biyya sana hunda keessatti dubartoonni akka intallan Iyyoob babbareedan eessattuu hin argamne. Abbaan isaaniis obbolloota isaanii gidduutti dhaala kenneef.

16 Iyyoobis ergasii waggaa dhibba tokkoo fi afurtama jiraate; innis hamma dhaloota afuriitti ijoollee fi ijoollee ijoollee isaa arge. 17 Innis akkasiin bara dheeraa jiraatee dulloomee du'e.

Kitaabota Faarfannaa Kitaaba Tokkoffaa

1

Faarfannaa 1-41

Karaa Lamaan

- ¹ Namni gorsa hamootaatiin hin deddeebine,
yookaan karaa cubbamootaa irra hin dhaabanne,
yookaan barcuma qoostotaa irra hin teenye, eebbifamaa dha.
- ² Garuu inni seera WAAQAYYOOTTI gammada;
seera isaas halkanii guyyaa irra deddeebi'ee itti yaada.
- ³ Inni akkuma muka qarqara bishaan yaa'uu dhaabamee
yeroo isaatti ija isaa kennu,
kan baalli isaas hin coollagnee ti;
wannu inni hojjetu hundinuus ni tolaaf.
- ⁴ Hamoonni garuu akkana miti;
isaan akka habaqqii qilleensi fudhatee balleessuu ti.
- ⁵ Kanaafuu hamoonni murtii dura,
yookaan cubbamoonni waldaa qajeeltotaa keessa hin dhaabatan.
- ⁶ WAAQAYYO karaa qajeeltotaa ni beekaatii;
karaan hamootaa garuu gara badiitti geessa.

Mooticha Waaqni Dibee Moosise

Faarfannaa 2

- ¹ Namoonni maaliif akkanumaan malatu?
Saboonnis maaliif waan akkanumaan mari'atu?
- ² Mootonni lafaa ka'anii,
bulchitoonnis WAAQAYYOO fi Masiihii isaatiin mormuuf
walitti qabaman;
- ³ isaanis, "Kottaa foncaa isaanii of irraa kukkunnaa;
hidhaa isaaniis of irraa hiiknee gannaa" jedhu.
- ⁴ Inni samii keessa, teessoo irra taa'ee jiru ni kolfa;
Gooftaanis isaanitti qoosa.
- ⁵ Innis aarii isaatiin isaan ifata;
dheekkamsa isaatiinis isaan naasisa;
- ⁶ innis, "Ani tulluu koo qulqulluu irra, Xiyoon irra,
mootii koo teessifadheera" jedha.
- ⁷ Ani seera WAAQAYYOO nan labsa:
innis akkana anaan jedhe; "Ati ilma koo ti;
ani har'a si dhalcheera.
- ⁸ Na kadhadhu;
ani saboota dhaala kee,
handaara lafaas qabeenya kee godhee siifan kenna.
- ⁹ Ati ulee sibiilaatiin isaan cabsita;
akka qodaa supheettis isaan hurreessita."
- ¹⁰ Kanaafuu yaa mootota, qalbeeffadhaa;
bulchitoonni lafaas of eeggadhaa.
- ¹¹ Sodaadhaan WAAQAYYON tajaajilaa;
hollachaas gammadaa.
- ¹² Akka inni hin aarreef,
isisin akka karaa irratti hin badneef ilma isaa dhangadhaa;
dheekkamsi isaa dafee boba'aatii.
Warri isatti kooluu galan hundi eebbifamoo dha.

Kadhannaa Nama Ari'atamaa Jiruu

Faarfannaa 3

Faarfannaa Daawit yeroo ilma isaa Abesaaloom jalaa baqatetti faarfate.

- ¹ Yaa WAAQAYYO, diinonni koo akkam baay'atu!
Namoonni baay'een natti ka'aniiru!
- ² Namoonni baay'een, "Waaqni isa hin baraaru" jedhanii
waa'ee koo dubbatu.
- ³ Yaa WAAQAYYO, ati garuu naannoo kootti gaachana koo ti;
ulfina kootis; mataa koos kan ol qabdu suma.
- ⁴ Ani guddisee WAAQAYYOTTI nan iyyadha;
innis tulluu isaa qulqulluu irraa deebii naa kenna.
- ⁵ Ani nan ciisa; nan rafas;
waan WAAQAYYO ol na qabuuf nan dammaqa.
- ⁶ Saba kumaatama qixa hundaan
ka'ee na marse ani hin sodaadhu.
- ⁷ Yaa WAAQAYYO ka'i!
Yaa Waaqa koo na baraari!
Mangaagaa diinota kootii hundumaa rukuti;
ilkaan hamootaa illee caccabsi.
- ⁸ Fayyinni kan WAAQAYYOO ti.
Ebbi kee saba kee irra haa jiraatu.

Kadhannaa Galgalaa

Faarfannaa 4

Dura bu'aa Faarfattootaatiif. Faarfannaa Daawit kan Baganaadhaan Faarfatamu.

- ¹ Yaa Waaqa qajeelumma kootii,
yommuu ani si waammadhutti deebii naa kenni.
Ati yeroo rakkina kootti na boqochiisi;
araara kee naa buusi; kadhaa koos dhaga'i.
- ² Yaa ilmaan namootaa, isin hamma yoomiitti ulfina koo gara salphinaatti deebiftu?
Isin hamma yoomiitti waan faayidaa hin qabne jaallattanii soba barbaaddu?
- ³ Isin akka WAAQAYYO warra isaaf bulan ofii isaatiif addaan baafate beekaa;
WAAQAYYO yommuu ani isa waammadhutti na dhaga'a.
- ⁴ Yeroo aartanitti cubbuu hin hojjetinaa;
yommuu siree keessan irra jirtanitti,
garaa keessan keessatti yaadaa; cal'isaas.
- ⁵ Aarsaa qajeelummaa dhi'eessaa;
WAAQAYYONIS amanadhaa.
- ⁶ Namoonni, "Eenyutu waan gaarii nu argi argisiisa?" jedhan baay'ee dha;
yaa WAAQAYYO, ifni fuula keetii nurratti haa ifu.
- ⁷ Gammachuu isaan yeroo midhaanii fi daadhiin wayinii isaanii baay'atutti argatan
caalaa,
ati garaa koo gammachuu guddaadhaan guutteerta.
- ⁸ Ani nagaadhaan nan ciisa; nan rafas;
yaa WAAQAYYO si qofatu,
sodaa malee na jiraachisaatii.

Kadhannaa Ganamaa

Faarfannaa 5

Faarfannaa Daawitii kan ululleedhaan faarfatamu.

- ¹ Yaa WAAQAYYO, gurra kee dubbii kootti qabi;
aaduu koo illee naa hubadhu.
- ² Yaa mootii koo fi Waaqa ko,

iyya ani gargaarsaaf iyyadhu dhaggeeffadhu;
ani sin kadhadaatii.

³ Yaa WAAQAYYO, ganamaan sagalee koo ni dhageessa;
anis ganamaan kadhata koo fuula kee duratti nan dhi'eessa;
abdiidhaanis nan eeggadha.

⁴ Ati Waaqa hamminatti gammadu miti;
hamaanis si wajjin hin jiraatu.

⁵ Of tuultonna fuula kee dura dhaabachuu hin danda'an.

Atis warra jal'ina hojjetan hunda ni jibbita;

⁶ Ati warra soba dubbatan ni balleessita.

WAAQAYYO warra dhiiga dheebotanii fi
warra nama gowwoomsan ni xireeffata.

⁷ Ani garuu araara kee baay'ee sanaan mana keetti ol nan gala;
si sodaachuudhaanis gad jedhee

gara mana qulqullummaa kee qulqulluu sanaatti garagalee nan sagada.

⁸ Yaa WAAQAYYO, sababii diinota kootiif jedhiitii
qajeelummaa keetiin na dura bu'i;

karaa kees fuula koo duratti naa qajeelchi.

⁹ Dubbiin afaan isaanii ba'u tokko iyyuu hin amanamu;

garaan isaanii badiisaan guutameera.

Laagaan isaanii awwaala banamaa dha;

arraba isaaniiitiin ni sobu.

¹⁰ Yaa Waaqayyo, yakkitoota ta'uu isaanii isaanitti beeksisi!

Daba isaaniiitiinis haa kufan.

Baay'ina cubbuu isaaniiitiin isaan balleessi;

isaan sitti fincilaniiruutii.

¹¹ Warri kooluu sitti galan hundinuu garuu haa gammadan;

bara baraanis gammachuudhaan haa faarfatan.

Akka warri maqaa kee jaallatan sitti gammadaniif

ati eegumsa kee isaan irra diriirsi.

¹² Yaa WAAQAYYO, ati qajeeltota ni eebbiftaatii;

akka gaachanaattis surraa keetiin isaan marsita.

Kadhannaa Yeroo Dhiphinaa

Faarfannaa 6

Dura bu'aa faarfattootaatiif. Faarfannaa Baganaadhaan faarfatamu. Faarfannaa Daawit kan akka sirna *Shamiiniitiiti* faarfatamu.

¹ Yaa WAAQAYYO aarii keetiin na hin hifatin;

yookaan dheekkamsa keetiin na hin adabin.

² Naa gameeraatii yaa WAAQAYYO naaf araarami;

lafeen koos jeeqameeraatii yaa WAAQAYYO na fayyisi.

³ Lubbuun koo akka malee jeeqameera;

kun hamma yoomiitti? Yaa WAAQAYYO, hamma yoomiitti?

⁴ Yaa WAAQAYYO, deebi'itii lubbuu koo oolchi;

araara keetiif jedhiitii na fayyisi.

⁵ Namni du'e si hin yaadatu.

Sii'ool keessatti eenyutu si galateeffata?

⁶ Ani aaduu kootiin bututeera.

Halkan hunda boo'ichaan siree koo nan dhiqa;

imimmaaniinis iddoo ciisichaa koo nan tortorsa.

⁷ Iji koo gaddaan fajajeera;

sababii diinota koo hundaatiifis dadhabeera.

⁸ Warri hamaa hojjetan hundinuu narraa fagaadhaa;

WAAQAYYO sagalee boo'icha koo dhaga'eeraatii.

⁹ WAAQAYYO waammata koo dhaga'eera;

WAAQAYYO kadhannaa koo ni fudhata.

- ¹⁰ Diinonni koo hundinuu haa qaana'an; akka malees haa rifatan;
qaanii tasaatiinis of irra haa garagalan.

Kadhannaa Namni Qajeelaan Kadhatu

Faarfannaa 7

Shiigaayoonni Daawit kan inni waa'ee Kuushi namicha gosa Beniyaamiif jedhee WAAQAYYOOF faarfate.

- ¹ Yaa WAAQAYYO Waaqa ko, ani kooluu sitti nan gala;
warra na ari'atan hunda jalaa na baasi; na oolchis;
- ² yoo kanaa achii isaan yeroo namni na oolchu hin jirretti,
akka leencaa na cicciratu; na kukkutatus.
- ³ Yaa WAAQAYYO Waaqa ko, yoo ani waan kana godhee jiraadhe
yoo harka koo keessa yakki jiraate,
- ⁴ yoo ani nama nagaadhaan na wajjin jiraatutti hamaa hojjedhee jiraadhe,
yookaan yoo ani sababii malee diina koo saamee jiraadhe,
- ⁵ diinni koo ari'ee na haa qabatu;
jireenya koo lafatti haa dhidhiitu;
ulfina koos awwaara keessa haa buusu.
- ⁶ Yaa WAAQAYYO aarii keetiin ka'i;
dheekkamsa diinota kootti ka'i.
Yaa Waaqa koo anaaf dammaqi; murtii qajeelaa labsi.
- ⁷ Yaa'iin namootaa naannoo keetti walitti haa qabamu;
atis ol gubbaadhaa isaan bulchi.
⁸ WAAQAYYO sabootaaf murtii haa kennu.
- Yaa WAAQAYYO, akka qajeelummaa kootiitti,
akka amanamummaa kootiittis naa murteessi.
- ⁹ Yaa Waaqa qajeelaa,
kan yaadaa fi garaa namaa qortu,
fincila hamootaa balleessi;
qajeeltota immoo jabeessii dhaabi.
- ¹⁰ Gaachanni koo Waaqa;
inni gara toleeyyii ni oolcha.
- ¹¹ Waaqni abbaa murtii qajeelaa dha;
inni Waaqa guyyaa hunda dheekkamsa isaa mul'isuu dha.
- ¹² Yoo namni qalbii jijjiirrachuu baate,
inni goraadee isaa ni qarata;
iddaa isaas dabsee qopheeffata.
- ¹³ Inni meeshaa nama ajjeesu
qopheeffateera; xiyya boba'us ni qopheeffata.
- ¹⁴ Kunoo, namni hamaan hammina ulfaa'a;
jal'ina garaatti baata; soba dhala.
- ¹⁵ Inni gad fageessee boolla qota;
boolla qopheesse sana keessas ni bu'a.
- ¹⁶ Dabni isaa matuma isaatti deebi'a;
jal'inni isaas gubbee mataa isaa irra bu'a.
- ¹⁷ Qajeelummaa isaatiif WAAQAYYON nan galateeffadha;
maqaa WAAQAYYOO Waaqa Waan Hundaa Oliis faarfannaadhaan nan jajadha.

Ulfina Waaqayyoo

Faarfannaa 8

Dura bu'aa faarfattootaatiif. Faarfannaa Daawit kan *Gitiitiidhaan* faarfatamu.

- ¹ Yaa WAAQAYYO Gooftaa keenya,
maqaan kee lafa hundatti akkam ulfina qabeessa!

Ati ulfina kee

samiwwan irratti diriirsiteerta.

² Sababii diinota keetiitiif, amajaajii fi nama haaloo baafatu afaan qabachiisuuf jettee, afaan daa'immaniitii fi mucoolii harma hodhanii irraa galata qopheessiteerta.

³ Yommuu ani hojii quba keetii, samiwwan kee, ji'aa fi urjiiwwan ati hundeessitee ilaalutti,

⁴ akka ati isaaf yaadduuf namni maali? Akka isaaf dhimmituuf ilmi namaa maali?

⁵ Ati xinnoo ishee ofii keetii gad isa goote; ulfinaa fi kabajaan isa gonfite.

⁶ Hojii harka keetii irratti bulchaa isa goote; waan hundas miilla isaa jala galchite;

⁷ bushaayee fi loon hunda, bineensota bosonaas,

⁸ simbirroota samii irraa, qurxummii galaanaa, waan daandii galaanaatiin darbu hundas miilla isaa jala galchite.

⁹ Yaa WAAQAYYO Gooftaa keenya, maqaan kee lafa hundumaa irratti akkam ulfina qabeessa!

Murtii Waaqayyoo

Faarfannaa 9

Dura bu'aa faarfattootaatiif; Yeedaloo, "Du'a ilmaa" jedhamu. Faarfannaa Daawit.

¹ Yaa WAAQAYYO, ani garaa koo guutuudhaan sin galateeffadha; waa'ee dinqii kee hundumaas nan odeessa.

² Ani sittin gammada; nan ililchaa; yaa Waaqa Waan Hundaa Ollii, faarfannaadhaan maqaa kee nan jajadha.

³ Diinonni koo dugda duubatti ni deebi'u; ni gufatu; fuula kee duraas ni badu.

⁴ Mirga koo fi dhimma koo qabatteerta; atis murtii qajeelaa kennaa teessoo kee irra teesseerta.

⁵ Saboota ifattee hamootas balleessiteerta; maqaa isaaniis baraa hamma bara baraatti haqxeerta.

⁶ Diinonni badiisa bara baraatiin balleeffamu; ati magaalaawwan isaanii bubuqqifteerta; seenaan isaaniis barbadeeffameera.

⁷ WAAQAYYO garuu bara baraan ni mo'a; teessoo isaas murtiidhaaf dhaabbateera.

⁸ Inni qajeelummaadhaan addunyaadhaaf murtii ni kenna; sabootas murtii qajeelaadhaan bulcha.

⁹ WAAQAYYO warra cunqurfamaniif irkoo dha; yeroo rakkinaattis da'oo dha.

¹⁰ Warri maqaa kee beekan si amanatu; yaa WAAQAYYO, ati warra si barbaadan gattee hin beektuutii.

¹¹ WAAQAYYO isa Xiyoona irra jiraatu faarfannaadhaan jajadhaa; hojii isaa illee saboota keessatti labsaa.

¹² Inni haaloo dhiigaa baasu sunis isaan yaadataatii; iyya warra dhiphataniis hin irraanfatu.

¹³ Yaa WAAQAYYO, hammam akka diinonni koo na ari'atan ilaali! Naaf araaramiitii afaan boolla du'aa keessaa na baasi;

¹⁴ kunis ani karra Intala Xiyoona irratti akka galata kee labsuu fi fayyisuu keettis baay'isee gammaduuf.

¹⁵ Saboonni boolla qotan keessa bu'an;

- miilli isaaniis kiyyoodhuma isaan dhoksaniin qabame.
 16 WAAQAYYO murtii qajeelaa kennuudhaan beekama;
 hamoonni garuu hojii harka isaaniitiin kiyyoo seenu.
 17 Namoonni hamoon,
 warri Waaqa irraanfatan hundinuus sii'oolitti gad bu'u.
 18 Rakkattoonni garuu yoom iyyuu hin irraanfatan;
 abdiin hiyyeeyyiis bara baraan hin badu.
 19 Yaa WAAQAYYO ka'i; jabinni namaa hin mul'atin;
 fuula kee duratti sabootatti haa muramu.
 20 Yaa WAAQAYYO, sodaa isaanitti buusi;
 saboonnis akka namuma ta'an haa beekan.

Murtii Qajeelaa Argachuuf Waaqa Kadhachuu

Faarfannaa 10

- 1 Yaa WAAQAYYO, ati maaliif achi fagaattee dhaabatta?
 Yeroo rakkinaattis maaliif of dhoksita?
- 2 Namni hamaan of tuulummaa isaatiin hiyyeessa adamsa;
 inni maluma malatuun haa qabamu.
- 3 Namni hamaan hawwii isaatiin of jaja; ofittoo ni eebbisa;
 WAAQAYYON immoo ni arrabsa.
- 4 Namni hamaan sababii of tuuluuf Waaqa hin barbaadu;
 yaada isaa hundumaa keessas Waaqni hin jiru.
- 5 Karaan isaa yeroo hunda ni milkaa'aaf; inni of tuula;
 seerri kees isa irraa fagoo dha;
 diinota isaa hundattis tuffiidhaan qummaada.
- 6 Innis, "Wanni na sochoosu hin jiru;
 rakkinnis gonkumaa na hin argatu" ofiin jedha.
- 7 Afaan isaa abaarsaan, sobaa fi doorsisaan guutameera;
 dabaa fi hamminni arraba isaa jala jiru.
- 8 Inni gandoota keessatti riphee eeggata;
 iddoo dhokataattis warra yakka hin qabne ajjeesa.
 Ija isaatiinis hiyyeeyyii gaada.
 9 Akka leenca daggala isaa keessaatti riphee eeggata.
 Hiyyeessa qabachuudhaaf dhokatee eeggata;
 hiyyeessas qabatee kiyyoo isaatiin harkifata.
- 10 Hiyyeessi sunis ni caccaba; gad of qabas;
 humna nama hamaa jalattis ni kufa.
- 11 Innis, "Waaqa irraanfateera;
 fuula isaas dhokfateera; gonkumaa hin argu" ofiin jedha.
- 12 Yaa WAAQAYYO ka'i! Yaa Waaqi harka kee ol kaafadhu.
 Rakkataas hin dagatin.
- 13 Namni hamaan maaliif Waaqa arrabsa?
 Maaliifis garaa isaatti,
 "Inni waan kanatti na hin gaafatu" jedha?
- 14 Yaa Waaqi, ati garuu rakkinaa fi gadda warra miidhamanii ni argita;
 harka keetiinis gatii baasifta.
 Deegaan dabarsee sitti of kenna;
 ati ijoollee abbaa hin qabneef gargaaraa dha.
- 15 Irree nama hamaatii fi jal'aa cabsi;
 hamma hamminni isaa dhumee dhabamutti,
 hammina isaatti isa gaafadhu.
- 16 WAAQAYYO bara baraa hamma bara baraatti Mootii dha;
 ormoonni lafa isaa irraa ni barbadaa'u.
- 17 Yaa WAAQAYYO, ati hawwii rakkattootaa ni dhageessa;
 isaan jajjabeessita; iyya isaanii illee ni dhaggeeffatta;
- 18 kunis akka namni biyyoo irraa uumame si'achi isaan hin cunqursineef
 ati ijoollee abbaa hin qabnee fi

cunqurfamtootaaf akka dhaabattuuf.

Waaqa Amanachuu

Faarfannaa 11

Dura bu'aa Faarfattootaatiif. Faarfannaa Daawit.

¹ Ani WAAQAYYOTTI kooluu galeera.

Yoos isin akkamitti lubbuu kootiin akkana jechuu dandeessu:

“Ati akkuma simbirroo tulluu keetti barrisi.

² Kunoo namoonni hamoon iddaa isaanii dabsataniiru;

isaan warra toloota ta'an,

dukkana keessa waraanuuf jedhanii,

xiyya isaanii ribuuutti dhaabbataniiru.

³ Yoo hundeewwan diigaman, namni qajeelaan

maal gochuu danda'a?”

⁴ WAAQAYYO mana qulqullummaa isaa qulqulluu sana keessa jira;

teessoon WAAQAYYOO samii irra jira.

Inni ilmaan namootaa ni ilaala;

iji isaas namoota ni qora.

⁵ WAAQAYYO qajeeltotaa fi jal'oota ni qora;

lubbuun isaa garuu nama goolii jaallatu ni jibbiti.

⁶ Inni hamoota irratti, barbadaa ibiddaatiif fi

dinyii boba'u ni roobsa;

goodni isaaniis bubbee finiinaa dha.

⁷ WAAQAYYO waan qajeelaa ta'eef,

murtii qajeelaa jaallata;

toloonnis fuula isaa ni argu.

Kadhannaa Gargaarsa Barbaachaaf Kadhatame

Faarfannaa 12

Dura bu'aa Faarfattootaatiif. Faarfannaa Daawit kan akka sirna *Shamiiniitiitti* faarfataamu.

¹ Yaa WAAQAYYO, namni Waaqa sodaatu hin jiruutii ati na gargaar;

ilmaan namaa keessaas namni amanamu dhabameeraatii.

² Namni hundinuu ollaa isaatti soba dubbata;

isaan nama saadanii garaa lamaan dubbatu.

³ WAAQAYYO afaan nama saadu hunda,

arraba of tuulu hundas haa kukkutu;

⁴ isaanis, “Nu arraba keenyaan ni moona;

hidhiin keenyas keenyuma;

eenyutu nurratti gooftummaa qaba?” jedhu.

⁵ WAAQAYYO, “Ani sababii hacuucamuu hiyyeeyyiitiif,

sababii aaduu rakkattootaatiifis amma nan ka'a.

Nagaa isaan hawwan keessas isaan nan jiraachisa” jedha.

⁶ Dubbiin WAAQAYYOO hir'ina hin qabu;

innis akka meetii boolla ibiddaa keessatti baqfamee

yeroo torba qulqulleeffamee ti.

⁷ Yaa WAAQAYYO ati nu eegda;

dhaloota akkanaa irraas bara baraan nu oolchita.

⁸ Yeroo wanni faayidaa hin qabne ilmaan namaa gidduutti kabajamutti

hamoonni of dhiibuudhaan kallattii hundaan asii fi achi naanna'u.

Iyyata Nama Waaqa Amanatee

Faarfannaa 13

Dura bu'aa faarfattootaatiif. Faarfannaa Daawit.

¹ Yaa WAAQAYYO, hamma yoomiitti?

Ati hamma bara baraatti na irraanfattaa?

Hamma yoomiittis fuula kee na duraa dhoksiita?

- ² Ani hamma yoomiittin rakkina obsee
guyyaa guutuu garaa koo keessatti gadda?
Hamma yoomiitti diinni koo narra aana?
- ³ Yaa WAAQAYYO Waaqa ko, na ilaali; deebii illee naa kenni.
Akka ani hirriba du'aa hin rafneefis ija kootiif ifa kenni;
- ⁴ diinni koo, "Ani isa mo'adheera" jedha;
amajajiiwwan koos kufaati kootti gammadu.
- ⁵ Ani garuu araara kee nan amanadha;
garaan koos fayyisuu keetti ni gammada.
- ⁶ Ani WAAQAYYOOF nan faarfadha;
arjummaan isaa naa baay'ateeraatii.

Namoota Waaqaaf Hin Bulle

Faarfannaa 14

14:1-7 kwf - Far 53:1-6

Dura bu'aa faarfattootaatiif. Faarfannaa Daawit.

- ¹ Gowwaan garaa isaatti,
"Waaqni hin jiru" jedha.
Isaan xuraa'aniiru; hojiin isaaniis jibbisiisaa dha;
namni waan gaarii hojjetu tokko iyyuu hin jiru.
- ² WAAQAYYO yoo namni waa hubatu,
kan Waaqas barbaadu, tokko iyyuu jiraate arguuf jedhee,
samii irraa ilmaan namootaa gad ilaala.
- ³ Hundinuu dogoggoraniiru; hundi isaaniis xuraa'aniiru;
namni waan gaarii hojjetu tokko hin jiru;
tokkumti iyyuu hin jiru.
- ⁴ Warri hammina hojjetan
kanneen akkuma waan buddeena nyaataniitti saba koo nyaatan,
warri WAAQAYYOON hin waammanne hundinuu homaa hin beekani?
- ⁵ Isaan sodaadhaan liqimfamaniiru;
Waaqni dhaloota qajeeltotaa wajjin jiraatii.
- ⁶ Isin jal'oonni karoora hiyyeeyyii jalaa fashaleessitu;
WAAQAYYO garuu da'oo isaanii ti.
- ⁷ Maaloo utuu Xiyoona keessaa fayyinni Israa'eliif dhufee!
Yommuu WAAQAYYO saba isaa warra booji'aman deebisutti,
Yaaqoob haa ililchu; Israa'elis haa gammadu!

Nama Akkamiitu Mana Waaqaa Keessa Jiraachuu Danda'a?

Faarfannaa 15

Faarfannaa Daawit.

- ¹ Yaa WAAQAYYO, eenyutu dunksaa kee keessa jiraata?
Eenyutu tulluu kee qulqulluu sana irra jiraachuu danda'a?
- ² Nama adeemsi isaa mudaa hin qabnee fi
nama waan qajeelaa hojjetu,
nama garaa isaatii dhugaa dubbatuu fi
- ³ kan arraba isaatiin nama hin hamanne,
nama ollaa isaatti waan hamaa hin hojjennee fi
nama ollaa isaa maqaa hin balleessine,
- ⁴ kan nama hamaa tuffatee warra WAAQAYYOON sodaatan garuu kabaju,
yoo waan isa miidhu ta'e illee nama kakuu isaa eegu,
- ⁵ nama maallaqa isaa hiiqiidhaan hin liqeessinee fi
kan nama yakka hin qabne miidhuuf jedhee matta'aa hin fudhannee dha.

Namni wantoota kanneen hojjetu,

gonkumaa hin raafamu.

Waaqayyo Dhaala Koo ti

Faarfannaa 16

Miiktaamii Daawit.

¹ Yaa Waaqi, ani kooluu sitti galeeraatii,
ati na eegi.

² Anis WAAQAYYON, “Ati Gooftaa koo ti;
ani si malee gaarummaa hin qabu” nan jedha.

³ Qulqulloonni lafa irraa garuu ulfina qabeeyyii dha;
anis isaanitti baay’ee nan gammada.

⁴ Warra waaqota tolfamoo duukaa bu’an,
gaddi isaanii ni guddata.

Dhibaayyuu dhiigaa ani isaaniif hin dhibaafadhu;
yookaan afaan kootiin maqaa isaanii hin dha’u.

⁵ WAAQAYYO qooda dhaala kootii fi qooda xooffoo koo ti;
ixaa koos situ naa jiraachisa.

⁶ Funyoon daangaa iddoo gaarii naa bu’eera;
dhugumaan ani dhaala nama gammachiisu qaba.

⁷ WAAQAYYO isa na gorsu sana ani nan jasadha;
halkanis yaadni koo na qajeelcha.

⁸ Ani yeroo hunda fuula koo duraa WAAQAYYON qaba.
Waan inni mirga koo jiruuf ani hin raafamu.

⁹ Kanaaf garaan koo ni gammada; arrabni koos ni ililcha;
foon koos nagaadhaan jiraata;

¹⁰ ati sii’ool keessatti na hin dhiiftuutii,
yookaan amanamaan kee akka tortoru hin gootu.

¹¹ Ati karaa jireenyaa na barsiifta; fuula kee durattis
gammachuudhaan na guutta;
gara mirga keetii gammachuu bara baraatu jira.

Iyyata Nama Qajeelaa

Faarfannaa 17

Kadhannaa Daawit.

¹ Yaa WAAQAYYO, iyyata ani murtii qajeelaaf iyyadhu dhaga’i;
boo’icha koos dhaggeeffadhu.

Kadhannaa koo kan afaan nama hin gowwoomsine
keessaa ba’uufis gurra kenni.

² Murtiin koo si biraa haa dhufu;
iji kees waan qajeelaa haa argu.

³ Ati yoo garaa koo qorte, halkaniinis yoo na ilaalte,
yoo na sakattaates, homaa narratti hin argattu;
ani akka afaan koo cubbuu hin hojjenneef kutadheeraatii.

⁴ Waa’ee hojii namootaa immoo ani dubbii afaan keetiitiin
karaa gooltotaa irraa of eeggadheera.

⁵ Tarkaanfiin koo karaa kee irratti cimeera;
miilli koos hin mucucaanne.

⁶ Yaa Waaqi, waan ati deebii naa kennituuf ani sin waammadha;
gurra kee gara kootti qabiitii kadhannaa koo dhaga’i.

⁷ Yaa isa warra diinota isaanii jalaa sitti baqatan
harka kee mirgaatiin oolchitu,
ati jaalala kee isa hin geeddaramne sana haala dinqisiisaadhaan argisiisi.

⁸ Akka agartuu ija keetiitti na eegi;
gaaddidduu qoochoo keetiitiinis na dhoksi;

⁹ hamoota na dhiphisan jalaa,

diinota na ajjeesuuf na marsan jalaa na baasi.

- 10 Isaan garaa isaanii kan namaa hin naane sana ni guduunfu;
afaan isaaniis of tuulummaadhaan dubbata.
- 11 Isaan faana na dha'uu; ammas na marsaniiru;
lafaan na dha'uudhaafis ija babaasu.
- 12 Isaan akka leenca waa kukkutachuu kajeeluu ti;
akka leenca guddaa riphee waa gaaduu ti.
- 13 Yaa WAAQAYYO ka'i; itti ba'iitii isaan kuffisi;
goraadee keetiinis hamoota jalaa na baasi.
- 14 Yaa WAAQAYYO, namoota akkanaa jalaa,
namoota addunyaa kanaa warra qoodni isaanii jireenyuma ammaa ta'e jalaa
harka keetiin na baraari.
- Garaan isaanii waan ati isaaniif kuufte haa quufu;
ijoolleen isaaniis akka malee haa quufan;
isaanis waan isaan irraa hafe daa'imman isaaniitiif haa kaa'an.
- 15 Ani garuu qajeelummaadhaan fuula kee nan arga;
yommuun dammaquttis ani ulfina kee arguudhaan nan quufa.

Faarfannaa Mo'annaa

Faarfannaa 18

18:1-50 kwf - 2Sm 22:1-51

Dura Bu'aa Faarfattootaatiif. Faarfannaa Daawit garbicha WAAQAYYOO; innis yommuu WAAQAYYO harka diinota isaa hundaa fi harka Saa'ol jalaa isa baasetti dubbii faarfannaa kana WAAQAYYOOF faarfate. Innis akkana jedhe:

- 1 Yaa WAAQAYYO jabina ko, ani sin jaalladha.
- 2 WAAQAYYO kattaa koo, da'annoo kootii fi oolchaa koo ti;
Waaqni koo kattaa koo kan ani kooluu itti galuu dha;
inni gaachana kootii fi gaanfa fayyina koo ti; da'annoo koo cimaa dha.
- 3 Ani WAAQAYYO galanni isaaf malu sana nan waammadha;
diinota koo jalaas nan baraarama.
- 4 Funyoon du'aa na xaxe;
lolaan badiisaas na liqimseera.
- 5 Funyoon sii'ool natti marame;
kiyyoon du'aas natti dhufe.
- 6 Ani dhiphina koo keessatti WAAQAYYON nan waammadhe;
gargaarsaafis Waaqa kootti nan iyyadhe.
Innis mana qulqullummaa isaatii sagalee koo dhaga'e;
iyyi koos gurra isaa seene.
- 7 Lafti ni hollatte; ni sochootes;
hundeewwan tulluuwwaniis ni raafaman;
sababii inni dheekameefis isaan ni hollatan.
- 8 Aarri funyaan isaatii ol ba'e;
ibiddi waa barbadeessu afaan isaatii ba'e;
cileen boba'us afaan isaatii ba'e.
- 9 Inni samiiwwan tarsiisee gad bu'e;
duumessoonni gurraachis miilla isaa jala turan.
- 10 Inni kiirubeelin yaabbatee barrise;
qochoo qilleensaatiinis ol ba'e.
- 11 Inni dukkana haguuggii isaa, duumessa samii kan
bokkaadhaan dukkanaa'e immoo godoo isaa godhate.
- 12 Ifa fuula isaa keessaas duumessi dhagaa cabbiitii fi
bakakkaadhaan tarsiisee ba'e.
- 13 WAAQAYYO samiidhaa ni qaawweessa'e;
sagaleen Waaqa Waan Hundaa Oliis ni dhaga'ame.
- 14 Inni xiyya isaa darbatee diinota bittinneesse;
bakakkaas gad dhiisee isaan fixe.

- 15 Yaa WAAQAYYO, dheekkamsa keetiin,
humna hafuura funyaan keetii ba'utiinis,
sululawwan galaanaa ifatti baafaman;
hundeewwan lafaas qullaa hafan.
- 16 Inni ol gubbaadhaa gad hiixatee na qabe;
bishaanota gad fagoo keessaas na baase.
- 17 Inni diina koo isa jabaa jalaa, amajaajota koo
warra akka malee natti ciman jalaas na baase.
- 18 Isaan guyyaa rakkina kootti natti dhufan;
WAAQAYYO garuu gargaarsa koo ture.
- 19 Inni iddoo bal'aatti na baase;
waan natti gammadeefis na oolche.
- 20 WAAQAYYO akkuma qajeelummaa kootiitti naa kenneera;
akkuma qulqullina harka koottis na badhaase.
- 21 Ani karaa WAAQAYYOO eegeeraatii;
Waaqa koo irraa garagalee hammina hin hojjenne.
- 22 Seerri isaa hundinuu fuula koo dura jira;
anis labsii isaa irraa hin gorre.
- 23 Ani fuula isaa duratti mudaa hin qabu ture;
cubbuu irraas of eeggadheera.
- 24 WAAQAYYO akkuma qajeelummaa kootti,
akkuma harki koo fuula isaa duratti qulqulluu ta'ettis na badhaaseera.
- 25 Ati nama amanamaatti amanamummaa kee argisiifta;
nama mudaa hin qabnettis kan mudaa hin qabne taata.
- 26 Nama qulqulluutti qulqulluu taata;
nama jal'aatti immoo jal'aa taata.
- 27 Ati warra gad of qaban ni oolchita;
ija of tuulu garuu gad deebifta.
- 28 Yaa WAAQAYYO ati ibsaa koo jabeessitee ni ibsita;
Waaqni koo dukkana koo ifatti ni geeddara.
- 29 Ani gargaarsa keetiin loltoota dhiibbadhee nan deema;
Waaqa kootiinis dallaa utaaluu nan danda'a.
- 30 Waaqa kana karaan isaa mudaa hin qabu;
dubbiin WAAQAYYOO hir'ina hin qabu;
warra isatti kooluu galan hundaaf WAAQAYYO gaachana ta'a.
- 31 WAAQAYYO malee Waaqni eenyu?
Waaqa keenya malees kattaan eenyu?
- 32 Kan humna na hidhachiisu,
kan akka karaan koos nagaa ta'u godhu Waaqa.
- 33 Inni miilla koo akka miilla borofaa godha;
iddoo ol dheeraa irras na dhaabachiisa.
- 34 Inni harka koo waraanaaf leenjisa;
irreen koos iddaa naasii dabsuu ni danda'a.
- 35 Ati gargaarsa kee kan nama fayyisu gaachana naaf goota;
harki kee mirgaa ol na qabeera;
gargaarsi kees nama guddaa na godhe.
- 36 Akka koomeen koo hin mucucaanneef,
miilla kootiif daandii bal'ifteerta.
- 37 Ani diinota koo ari'ee nan qaqqabadhe;
hamma isaan barbadaa'anittis ani duubatti hin deebine.
- 38 Ani akka isaan deebi'anii ka'uu hin dandeenyeef isaan nan barbadeesse;
isaanis miilla koo jalatti ni kufan.
- 39 Ati lolaaf humna na hidhachiifte;
amajaajota koos fuula koo duratti gad deebifte.
- 40 Akka diinonni koo dugda duubatti deebi'anii baqatan gooteerta;
anis amajaajota koo barbadeesseera.
- 41 Isaan gargaarsaaf iyyan; garuu kan isaan oolchu tokko iyyuu hin turre;

- gara WAAQAYYOOTIS ni iyyatan; inni garuu deebii hin kennineef.
- 42 Anis akkuma awwaara bubbeen fudhatuutti isaan nan daake;
akkuma dhogqee daandii irraatti isaan nan dhidhiite.
- 43 Ati lola namootaa jalaa na baafteerta;
mataa sabootaa na gooteerta;
sabni ani hin beekne na tajaajila.
- 44 Namoonni ormaa na sossobatan;
isaan akkuma waa'ee koo dhaga'aniin naaf ajajaman.
- 45 Isaan hundi abdi kutatan;
hollachaas da'annoo isaanii jabaa keessaa ba'an.
- 46 WAAQAYYO jiraataa dha! Kattaan koo haa eebbifamu!
Waaqni Fayyisaan koo ol ol haa jedhu!
- 47 Inni Waaqa haaloo naa baasu,
kan sabootas na jalatti bulchuu dha;
48 diinota koo jalaas na baasa.
- Ati amajaajota kootii ol na goota;
gooltota jalaas na baafte.
- 49 Kanaafuu yaa WAAQAYYO, ani saboota gidduutti sin leellisa;
faarfannaa galataa illee maqaa keetiif nan faarfadha.
- 50 Inni mo'annaawwan gurguddaa mootii isaatiif ni kenna;
dibamaa isaa Daawitii fi sanyii isaatiif,
jaalala bara baraa ni argisiisa.

Waaqayyo Biiftuu Qajeelummaati

Faarfannaa 19

Dura Bu'aa Faarfattootaatiif. Faarfannaa Daawit.

- 1 Samiiwwan ulfina Waaqaa odeessu;
bantiin samiis hojii harka isaa labsa.
- 2 Guyyaan tokko guyyaa kaanitti odeessa,
halkan tokkos halkan kaanitti beekumsa mul'isa.
- 3 Haasaan yookaan dubbiin hin jiru;
sagaleen isaaniis hin dhaga'amu.
- 4 Ta'us sagaleen isaanii lafa hundumaa,
dubbiin isaaniis handaara addunyaa ga'e.
- Inni samiiwwan keessatti biiftuudhaaf dunkaana dhaabe;
5 biiftuunis akkuma misirricha dinga isaatii ba'uutii fi
akkuma mo'ataa fiigicha dorgomutti gammadu tokkoo ti.
- 6 Isheenis handaara samiiwwanii tokkoo baatee
gara handaara kaaniitti naannofti;
wanni ho'a ishee jalaa dhokatu tokko iyyuu hin jiru.
- 7 Seerri WAAQAYYOO mudaa hin qabu;
lubbuu namatti deebisa.
- Ajajni WAAQAYYOO amanamaa dha;
nama wallaalaa beekaa godha.
- 8 Seerri WAAQAYYOO qajeelaa dha;
garaadhaaf gammachuu kenna.
- Ajajni WAAQAYYOO qulqulluu dha;
ijaafis ifa kenna.
- 9 WAAQAYYON sodaachuun qulqulluu dha;
bara baraan jiraata.
- Murtiin WAAQAYYOO dhugaa dha;
walumaa galattis qajeelaa dha.
- 10 Inni warqee caalaa, warqee akka malee qulqulleeffame
caalaa iyyuu gatii qabeessa;
inni damma caalaa,
nadhii dammaa caalaa mi'aawaa dha.
- 11 Murtii kanaanis tajaajilaan kee ni gorfama;
isa eeguunis gatii guddaa qaba.

- ¹² Eenyutu dogoggora isaa hubachuu danda'a?
Yakka koo isa dhokfamaa irraa na qulqulleessi.
- ¹³ Tajaajilaa kee cubbuu ija jabinaan hojjetamu irraa eegi;
cubbuun kunis na hin mo'atin.
Yoos ani hir'ina malee nan jiraadha;
dogoggora guddaa irraas qulqulluu nan ta'a.
- ¹⁴ Yaa WAAQAYYO, Kattaa koo fi Furi ko,
dubbiin afaan kootii fi yaadni garaa koo
fuula kee duratti fudhatamaa haa ta'u.

Kadhannaa Mootiif Kadhatame

Faarfannaa 20

- Dura Bu'aa Faarfattootaatiif. Faarfannaa Daawit.
- ¹ Guyyaa rakkinaatti WAAQAYYO deebii siif haa kennu;
maqaan Waaqa Yaaqoobis si haa eegu.
- ² Inni iddoo qulqulluudhaa gargaarsa siif haa ergu;
Xiyoon irraas jabina siif haa kennu.
- ³ Aarsaa kee hunda siif haa yaadatu;
qalma kee kan gubamus siif haa fudhatu.
- ⁴ Hawwii garaa keetii siif haa kennu;
karoora kee hundas fiixaan siif haa baasu.
- ⁵ Yommuu ati mo'attutti ililchinee
maqaa Waaqa keenyaatiin faajjii keenya ol fudhanna.

WAAQAYYO waan ati kadhattu hundumaa siif haa kennu.

- ⁶ Ani akka WAAQAYYO dibamaa isaa fayyisu amma beeka;
Waaqayyo humna nama fayyisu kan harka isaa mirgaa keessa jiru sanaan
samii isaa qulqulluu keessaa deebii ni kennaaf.
- ⁷ Namoonni tokko tokko gaariiwwan amanatu; kaan immoo fardeen amanatu;
nu garuu maqaa WAAQAYYO Waaqa keenyaa amananna.
- ⁸ Isaan gufatanii kufu; nu garuu ol kaana;
jabaannees ni dhaabanna.
- ⁹ Yaa WAAQAYYO, ati mootiidhaaf mo'annaa kenni!
Yommuu nu si waammannuttis deebii nuu kenni!

Galata Waa'ee Mootichaatiif Dhi'aate

Faarfannaa 21

- Dura Bu'aa Faarfattootaatiif. Faarfannaa Daawit.
- ¹ Yaa WAAQAYYO, mootiin jabina keetti baay'ee gammada.
Gargaarsa keettis gammachuun isaa hammam guddaa dha!
- ² Ati hawwii garaa isaa kenniteefii jirta;
kadhannaa afaan isaas isa hin dhowwanne.
- ³ Ati eebba guddaadhaan isa simatte;
gonfoo warqee qulqulluus mataa isaa irra keesse.
- ⁴ Inni jireenya si kadhate; atis ni kenniteef;
bara dheeraas bara baraa hamma bara baraatti kenniteef.
- ⁵ Ulfinni isaa mo'annaa ati isaaf kenniteen guddaa ta'e;
atis ulfinaa fi surraa isatti uwwifte.
- ⁶ Ati eebba bara baraa kenniteef;
akka inni gammachuu argama keetiitiin gammadus goote.
- ⁷ Mootichi WAAQAYYON amanataatii;
sababii jaalala Waaqa Waan Hundaa Olee
kan hin geeddaramne sanaatiifis inni hin raafamu.
- ⁸ Harki kee diinota kee hunda ni qabata;
harki kee mirgaas warra si jibban ni qaba.
- ⁹ Yeroo mul'achuu keetiitti,
akka boolla ibiddi keessaa boba'uu isaan goota.
- WAAQAYYO dheekkamisa isaatiin isaan liqimsa;

ibiddis isaan fixa.

- ¹⁰ Ati sanyii isaanii lafa irraa,
ijoollee isaanii ilmaan namaa gidduudhaa ni balleessita.
¹¹ Isaan yoo waan hamaa sitti yaadan,
yoo daba sitti mari'atanis hin milkaa'an.
¹² Ati yommuu iddaa kee isaanitti qabduutti,
akka isaan baqatan gootaatii.

- ¹³ Yaa WAAQAYYO, jabina keetiin ol ol jedhi;
nu humna kee ni jajanna; ni faarfannas.

Rakkinnaa Fi Abdii Nama Qajeelaa

Faarfannaa 22

Dura Bu'aa Faarfattootaatiif. Yeedaloo "Borofa Ganamaa" jedhu. Faarfannaa Daawit.

- ¹ Yaa Waaqa ko, yaa Waaqa ko, ati maaliif na dhiifte?
Ati na gargaaruu irraa,
iyya koo irraas maaliif akkas fagaatta?
² Yaa Waaqa ko, ani guyyaa guyyaa sittin iyyadha;
ati garuu deebii naaf hin deebiftu;
halkan halkanis afaan hin qabadhu.
³ Ati garuu Qulqullicha teessoo irra taa'uu dha;
ati galata Israa'el.
⁴ Abbootiin keenya si amanatan;
isaan si amanatan; atis isaan oolchite.
⁵ Isaan sitti iyyatan; ni fayyifamanis;
si amanatan; hin qaanofnes.
⁶ Ani garuu raammoodha malee nama miti;
ani nama namni itti qoosuu fi sabnis tuffatuu dha.
⁷ Warri na argan hundinuu natti kolfu;
mataa isaanii raasanii na arrabsu.
⁸ Akkanas jedhu; "Inni WAAQAYYON amanata;
mee WAAQAYYO isa haa oolchu kaa.
Inni waan isatti gammaduuf, isa haa oolchu."
⁹ Ati garuu gadameessa keessaa na baafte;
harma haadha koo irrattis, situ nagaan na eege.
¹⁰ Ani gaafan dhaladhee jalqabee sirratti nan gatame;
erga haati koo na deessee jalqabdee ati Waaqa koo ti.
¹¹ Ati narraa hin fagaatin;
rakkinni dhi'aateeraatii;
namni na gargaarus hin jiru.
¹² Korommiin baay'een na marsu;
korommiin Baashaan jajjaboonis karaa hundumaan na marsu.
¹³ Isaanis akka leenca beela'ee aaduu
afaan isaanii bal'isani natti banatu.
¹⁴ Ani akkuma bishaaniitti nan dhangalaafame;
lafeen koo hundinuu wal gad dhiise.
Onneen koo gara gagaatti geeddarame;
na keessattis baqe.
¹⁵ Jabinni koo akka qiraacii goge;
arrabni koo laagaatti na maxxane;
awwaara du'aa keessas na ciibsite.
¹⁶ Saroonni na marsaniiru;
gareen namoota hamoo na marseera;
isaanis harkaa fi miilla koo waraananii fullaasaniiru.
¹⁷ Ani lafee koo hunda lakkaa'uu nan danda'a;
isaanis ija babaasanii na ilaalu; akkas ta'uu koottis ni gammadu.
¹⁸ Isaan wayyaa koo hiratan;
uffata koottis ixaa buufatan.

- 19 Yaa WAAQAYYO, ati garuu narraa hin fagaatin;
yaa Jabina koo na gargaaruuf ariifadhu.
- 20 Lubbuu koo goraadee jalaa,
jireenya koo immoo humna sarootaa jalaa baasi.
- 21 Afaan leencaa jalaa na miliqsi;
gaanfa gafarsaa jalaas na baasi.
- 22 Maqaa kee obboloota kootti nan labsa;
waldaa keessattis sin jajadha.
- 23 Isin warri WAAQAYYOON sodaattan isa jajadhaa!
Isin sanyiin Yaaqoob hundinuu isa ulfeessaa!
Sanyiin Israa'el hundinuu isa sodaadhaa!
- 24 Inni dhiphina nama dhiphatee hin tuffanne
yookaan hin balfineetii;
yommuu inni gargaarsaaf isatti iyyatettis,
ni dhaga'eef malee fuula isaa hin dhokfanne.
- 25 Galanni ani yaa'ii guddaa irratti siif galchu si biraa dhufa;
warra si sodaatan durattis wareega koo of irraa nan baasa.
- 26 Hiyyeeyyiin nyaatanii quufu;
warri WAAQAYYOON barbaaddatanis isa ni jajatu;
garaan keessan bara baraan haa jiraatu!
- 27 Handaarri lafaa hundinuu ni yaadata;
gara WAAQAYYOOTTIS ni deebi'a;
maatiiwwan sabootaa hundinuu
fuula isaa duratti ni sagadu;
- 28 mootummaan kan WAAQAYYOOTTII;
innis saboota hunda ni bulcha.
- 29 Sooreyyiin lafaa hundinuu ni nyaatu; ni waaqeffatus;
warri of jiraachisuu hin dandeenye kanneen biyyoo seenan hundi
fuula isaa duratti ni jilbeenfatu.
- 30 Dhaloonni dhufu isa tajaajila;
dhaloota boriittis waa'een Gooftaa ni himama.
- 31 Sababii inni waan kana hojjeteef,
isaan saba dhalachuuf jirutti qajeelummaa isaa ni labsu.

Tiksee Gaarii

Faarfannaa 23

Faarfannaa Daawit.

- 1 WAAQAYYO tiksee koo ti; ani homaa hin dhabu.
2 Inni marga lalisaa keessa na boqochiisa;
gara bishaan tasgabbaa'aattis na geessa;
3 inni lubbuu natti deebisa.
- Maqaa isaatiif jedhees
karaa qajeelaa irra na deemsisa.
- 4 Ani yoon sulula gaaddisa du'aa keessa deeme illee
ati waan na wajjin jirtuuf, homaa hin sodaadhu;
uleen keetii fi bokkuun kee na jajabeessu.
- 5 Ati utuma diinonni koo ilaalanuu
fuula koo duratti maaddii naa qopheessita.
Mataa koo zayitii dibda;
xoofoon koos guutuu irraan dhangala'aa dha.
- 6 Dhugumaan gaarummaan keetii fi araarri kee,
bara jireenya kootii hunda na duukaa bu'u;
anis bara baraan, mana WAAQAYYOO keessa nan jiraadha.

Faarfannaa Mootii Ulfinaatiif Faarfatame

Faarfannaa 24

Faarfannaa Daawit.

- 1 Laftii fi wannii lafa irra jiru hundinuu,

- addunyaa fi wanni ishee keessa jiraatu hundinuu kan WAAQAYYOO ti;
² inni galaanota irratti ishee hundesseeraatii;
 bishaan irras ishee dhaabeera.
- ³ Eenyutu tulluu WAAQAYYOOTTI ol ba'a?
 Iddoo isaa qulqulluu sanas eenyutu dhaabata?
- ⁴ Nama harka qulqulluu fi garaa qulqulluu qabu,
 nama lubbuu isaa gara waaqa tolfamaatti ol hin kaafne
 yookaan nama sobaan hin kakannee dha.
- ⁵ Inni WAAQAYYO biraa eebba,
 Waaqa Fayyisaa isaa biraa immoo qajeelummaa ni argata.
- ⁶ Dhaloonni kun dhaloota warra isa barbaadanii ti;
 kan dhaloota warra fuula Waaqa Yaaqoob barbaadanii ti.
- ⁷ Yaa karroota nana, mataa keessan ol qabadhaa;
 isinis balbalawwan durii,
 akka mootiin ulfinaa ol galuuf ol qabamaa.
- ⁸ Mootiin ulfinaa kun eenyu?
 WAAQAYYO jabaa fi humna qabeessa,
 WAAQAYYO isa waraana keessattis humna qabu sanaa dha.
- ⁹ Yaa karroota nana, mataa keessan ol qabadhaa;
 isinis balbalawwan durii akka mootiin ulfinaa ol galuuf
 mataa keessan ol qabadhaa.
- ¹⁰ Mootiin ulfinaa kun eenyu?
 WAAQAYYOON Waan Hunda Danda'u sun,
 inni Mootii ulfinaa ti.

Kadhannaa Yeroo Balaa

Faarfannaa 25

Faarfannaa Daawit.

- ¹ Yaa WAAQAYYO, ani lubbuu koo gara keetti
 ol nan qaba.
- ² Yaa Waaqa koo ani sin amanadha.
 Ati na hin qaanessin;
 akka diinonni koo na mo'atanis hin godhin.
- ³ Namni si eeggatu tokko iyyuu
 yoom iyyuu hin qaaneffamu;
 warri sababii malee yakka hojjetan
 garuu ni qaaneffamu.
- ⁴ Yaa WAAQAYYO, karaa kee na argisiisi;
 daandii kees na barsiisi;
- ⁵ ati Waaqa Fayyisaa koo waan taateef,
 dhugaa keetiin na dura bu'i; na barsiisi;
 anis guyyaa guutuu sin eeggadha.
- ⁶ Yaa WAAQAYYO, araara keetii fi jaalala kee yaadadhu;
 isaan durumaa jalqabanii jiruutii.
- ⁷ Cubbuu afaan kootii
 yookaan dogoggora koo hin yaadatin;
 yaa WAAQAYYO, gaarummaa keetiif jedhiitii
 akkuma araara keetiitti na yaadadhu.
- ⁸ WAAQAYYO gaarii dha; tolaadhas;
 kanaafuu inni daandii isaa cubbamootatti argisiisa.
- ⁹ Warra gad of qaban waan qajeelaa ta'een geggeessa;
 karaa isaas isaan barsiisa.
- ¹⁰ Karaan WAAQAYYOO hundinuu
 warra kakuu isaatii fi seera isaa eeganiif araaraa fi dhugaa dha.
- ¹¹ Yaa WAAQAYYO, cubbuun koo guddaa ta'u iyyuu
 maqaa keetiif jedhiitii dhiifama naa godhi.
- ¹² Namni WAAQAYYOON sodaatu eenyu?

- Waaqayyo karaa inni filachuu qabu isa argisiisa.
 13 Lubbuun isaa badhaadhummaadhaan jiraatii;
 sanyiin isaas lafa dhaala.
 14 WAAQAYYO icciitii isaa warra isa sodaatan duraa hin dhoksu;
 kakuu isaa illee isaan beeksisa.
 15 Iji koo yeroo hunda gara WAAQAYYOO ilaala;
 inni miilla koo kiyyoo keessaa ni baasaatii.
 16 Gara kootti garagali; garaas naa laafi;
 ani kophaa koon jiraatii; rakkataadhas.
 17 Yaaddoon garaa kootii baay'ateera;
 dhiphina koo keessaas na baasi.
 18 Dhiphina kootii fi rakkina koo ilaali;
 cubbuu koo hunda naa dhiisi.
 19 Akka diinonni koo baay'atan,
 hammam akka cimsanii na jibban argi!
 20 Lubbuu koo eegi; na oolchis;
 sababii ani kooluu sitti galeef,
 akka ani qaana'u na hin godhin.
 21 Waan ani si eeggadhuuf, amanamummaa fi
 qajeelummaan ana haa eegan.
 22 Yaa Waaqayyo, rakkina isaa hundumaa keessaa
 Israa'elin furi!

Kadhannaa nama qajeelaa

Faarfannaa 26

Faarfannaa Daawit.

- 1 Yaa WAAQAYYO, sababii ani jireenya hir'ina
 hin qabne jiraadheef, ati naa murteessi;
 anis utuu asii fi achi hin raafamin,
 WAAQAYYON amanadheera.
 2 Yaa WAAQAYYO, qoriitii na ilaali;
 garaa koo fi qalbii koo qori;
 3 jaalalli kee kan hin geeddaramne sun ija koo dura jiraatii;
 anis dhugaa keetiin nan deddeebi'a.
 4 Ani warra nama gowwoomsan wajjin hin taa'u,
 yookaan fakkeessitoota wajjin tokkummaa hin qabaadhu;
 5 ani waldaa warra hammina hojjetanii nan jibba;
 hamoota wajjinis hin taa'u.
 6 Yaa WAAQAYYO, ani harka koo qulqullummaadhaan nan dhiqadha;
 iddoo aarsaa keetii irras nan naanna'a.
 7 Faarfannaa galataa guddisee nan faarfadha;
 dinqii hojii keetii hunda nan odeessa.
 8 Yaa WAAQAYYO, mana ati keessa jiraattu,
 iddoo ulfinni kee jirus nan jaalladha.
 9 Lubbuu koo cubbamoota wajjin, jireenya koos
 warra dhiiga dhangalaasan wajjin hin balleessin;
 10 warra harka isaanii keessa karoorri jal'inaa jiru
 kanneen harki isaanii mirgaa matta'aadhaan guutame wajjin na hin balleessin.
 11 Ani garuu jireenya hir'ina hin qabne nan jiraadha;
 ati na furi; araaras naa buusi.
 12 Miilli koo lafa wal qixxee irra dhaabata;
 waldaa guddaa keessattis WAAQAYYON nan jajadha.

Ija Jabina Nama Waaqayyoo

Faarfannaa 27

Faarfannaa Daawit.

- 1 WAAQAYYO ibsaa kootii fi fayyina koo ti;

- ani eenyunan sodaadha?
 WAAQAYYO da'oo jireenya kootii ti;
 eenyutu na sodaachisa?
- ² Namoonni hamoon yommuu
 foon koo nyaachuudhaaf natti dhufan,
 diinonni koo fi amajaajonni koo
 yommuu na miidhuuf natti ka'an, gufatanii kufu.
- ³ Yoo duulli na marse illee,
 garaan koo hin sodaatu;
 yoo waraanni natti baname illee
 ani hin raafamu.
- ⁴ Ani waan tokko WAAQAYYON nan kadhada;
 waan kanas nan barbaada:
 Kunis bara jireenya kootii guutuu
 mana WAAQAYYO keessa jiraachuu,
 miidhagina WAAQAYYO ilaaluu fi mana qulqullummaa isaa
 keessatti isa kadhachuu dha.
- ⁵ Inni guyyaa rakkinaa
 iddoo ofii jiraatu na kaa'ataatii;
 da'oo dunkaana isaa jala na dhoksa;
 kattaa gubbaattis ol na baasa.
- ⁶ Yommuu diinota na marsanii olitti
 mataan koo ol jedha;
 dunkaana isaa keessatti illee ililleedhaan aarsaa nan dhi'eessa;
 WAAQAYYOOF nan faarfadha; nan weeddisas.
- ⁷ Yaa WAAQAYYO, yommuu ani si waammadhu, sagalee koo dhaga'i;
 naaf araarami; deebiis naaf kenni.
- ⁸ Yommuu ati, "Fuula koo barbaadaa!" jettetti,
 garaan koo, "Yaa WAAQAYYO, ani fuula kee nan barbaada" siin jedha.
- ⁹ Fuula kee na duraa hin dhoksin;
 aartee tajaajilaa kee of irraa hin deebisin;
 ati gargaaraa koo taateerta.
- Yaa Waaqayyo, Fayyisaa ko,
 na hin gatin; na hin dhiisinis.
- ¹⁰ Yoo abbaan kootii fi haati koo na dhiisan illee,
 WAAQAYYO na simata.
- ¹¹ Yaa WAAQAYYO, karaa kee na barsiisi;
 sababii ani diinota baay'ee qabuuf
 daandii qajeelaa irra na buusi.
- ¹² Fedhii diinota kootiitti dabarsitee na hin kennin;
 dhuga baatonni sobduun narratti ka'aniiruutii;
 isaanis hafuura jal'inaa baafatu.
- ¹³ Anis biyya jiraattotaa keessatti
 gaarummaa WAAQAYYO akkan argu
 amma iyyuu nan amana.
- ¹⁴ WAAQAYYON eeggadhu;
 cimi; jabaadhus;
 WAAQAYYON eeggadhu.

Kadhannaa Fi Galata

Faarfannaa 28

Faarfannaa Daawit.

- ¹ Yaa WAAQAYYO, Kattaa ko, ani sin waammadha;
 ati na jalaa hin didin.
 Yoo ati na jalaa didde,
 ani akka warra boolla bu'anii nan ta'a.
- ² Yommuu ani gargaarsaaf si waammadhee harka koo illee
 gara Iddoo Qulqullummaa kee

kan Waan Hundumaa Caalaa Qulqulluu ta'e
sanaatti ol kaafadhu, sagalee kadhannaa koo naa dhaga'i.

³ Namoota hamoo warra jal'ina hojjetan wajjin,
warra garaa isaaniitti hammina qabatanii
olloota isaanii wajjin garuu
nagaa dubbatan wajjin na hin balleessin.

⁴ Akka hojii isaaniitti,
akkuma hojii isaanii hamaa sanaattis deebisiif;
akkuma hojii harka isaaniitti kenniif;
gatii isaaniif malu isaanumatti deebisi.

⁵ Sababii isaan hojii WAAQAYYOO,
yookaan waan harki isaa hojjete hin kabajneef
inni isaan diiga;
deebisees isaan hin ijaaru.

⁶ WAAQAYYO haa eebbifamu!
Inni iyya kadhannaa kootii naa dhaga'eeraatii.

⁷ WAAQAYYO jabina koo fi gaachana koo ti;
garaan koo isa amanata; anis gargaarsa argadheera.
Garaan koo baay'ee gammada;
anis faarfannaadhaan isa nan galateeffadha.

⁸ WAAQAYYO jabina saba isaa ti;
dibamaa isaatiifis da'oo fayyinaa ti.

⁹ Saba kee fayyisi; dhaala kees eebbisi;
tiksee isaanii ta'ii bara baraan isaan baadhu.

Faarfannaa Gooftaa Bubbeetiif Dhi'aate

Faarfannaa 29

Faarfannaa Daawit.

¹ Isin jajjabeeyyiin, WAAQAYYOOF fidaa;
ulfinaa fi jabina WAAQAYYOOF fidaa.

² Ulfina maqaa isaatiif malu WAAQAYYOOF kennaa;
iddoo qulqullummaa isaatti WAAQAYYOON waaqeffadhaa.

³ Sagaleen WAAQAYYOO bishaanota irra jira;
Waaqni ulfinaa ni qaawweessa'a;
WAAQAYYO bishaanota baay'ee irratti ni qaawweessa'a.

⁴ Sagaleen WAAQAYYOO humna qaba;
sagaleen WAAQAYYOO surra qabeessa.

⁵ Sagaleen WAAQAYYOO birbirsaa ni cabsaa;
WAAQAYYO birbirsaa Libaanoon ni caccabsaa.

⁶ Inni Libaanoonin akka jabbiitti,
Siiriyoonin immoo akka dibicha gafarsaatti ni utaalchisa.

⁷ Sagaleen WAAQAYYOO
balaqqeessa bakakkaatiin rukuta.

⁸ Sagaleen WAAQAYYOO gammoojjii sochoosa;
WAAQAYYO Gammoojjii Qaadesh sochoosa.

⁹ Sagaleen WAAQAYYOO qilxuu micciira;
bosonas qullaatti hambisa.

Hundinuus mana qulqullummaa isaa keessatti, "Ulfina!" jedhee iyya.

¹⁰ WAAQAYYO lolaa badiisaatiin olitti teessoo isaa irra taa'a;
WAAQAYYO Mootii ta'ee bara baraan teessoo isaa irra taa'a.

¹¹ WAAQAYYO saba isaatiif jabina kenna;
WAAQAYYO saba isaa nagaadhaan eebbisa.

Galata Nama Afaan Du'aatii Deebi'ee

Faarfannaa 30

Faarfannaa eebba mana qulqullummaatiif Faarfataame. Faarfannaa Daawit.

- 1 Yaa WAAQAYYO, sababii ati ol na fuutee
akka diinonni koo natti hin gammanne gooteef,
ani sin jajadha.
- 2 Yaa WAAQAYYO Waaqa ko,
ani gargaarsaaf sin waammadhe; atis na fayyifte.
- 3 Yaa WAAQAYYO, ati lubbuu koo sii'oolii baafte;
akka ani boolla hin buune gootes na jiraachifte.
- 4 Isin qulqulloonni isaa, faarfannaadhaan WAAQAYYON jajadhaa;
maqaa isaa qulqulluu sanaafis galata galchaa.
- 5 Dheekkamsi isaa hamma liphsuu ijaa ti;
gaarummaan isaa immoo bara jireenyaa guutuudhaaf tura;
boo'ichi galgala tokko qofaaf tura;
ganama garuu ililleetu ta'a.
- 6 Anis yommuun nagaa argadhetti,
"Ani gonkumaa hin raafamu" nan jedhe.
- 7 Yaa WAAQAYYO, ati jaalala keetiin
akka tulluu jabaatti na dhaabde;
yeroo ati fuula kee na duraa dhoksitetti garuu
naasuutu na qabate.
- 8 Yaa WAAQAYYO, ani sin waammadha;
ani gara Gooftaatti akkana jedhee araaraaf nan iyyadha:
- 9 "Du'uu koo keessaa, boolla bu'uu koo keessaas
faayidaa maaliitu argama?
Biyyoon si galateeffataa?
Amanamummaa kees ni odeessaa?"
- 10 Yaa WAAQAYYO na dhaga'i; na maaris;
Yaa WAAQAYYO, gargaarsa naa ta'i."
- 11 Ati boo'icha koo shuubbisuutti geeddarte;
wayyaa gaddaa narraa baaftee gammachuu natti uwwifte;
- 12 kunis akka lubbuun koo faarfannaadhaan si jajattuu fi
akka isheen hin cal'isneefii dha.
Yaa WAAQAYYO Waaqa ko, ani bara baraan sin galateeffadha.

Kadhannaa Yeroo Rakkinnaa

Faarfannaa 31

31:1-4 kwf - Far 71:1-3

Dura bu'aa faarfattootaatiif. Faarfannaa Daawit.

- 1 Yaa WAAQAYYO, ani kooluu sitti galeera;
ati gonkumaa na hin qaanessin;
qajeelummaa keetiin na oolchi.
- 2 Gurra kee gara kootti qabi; dafitii na oolchi;
kattaa ani itti kooluu galu naa ta'i;
na oolchuudhaafis da'oo jabaa naa ta'i.
- 3 Ati waan kattaa koo fi da'oo koo taateef,
maqaa keetiif jedhiitii na qajeelchi; karaa irras na buusi.
- 4 Ati iddoo ani itti baqadhu waan taateef,
kiyyoo diinonni koo naa kaa'an keessaa na baasi.
- 5 Ani hafuura koo dabarsee harka keettin kennadha;
yaa WAAQAYYO Waaqa dhugaa, ati na furi.
- 6 Ani warra waaqota faayidaa hin qabne abdatan nan jibba;
WAAQAYYON garuu nan amanadha.
- 7 Ani jaalala kee kan hin geeddaramne sanatti nan gammada; nan ililchas;
ati dhiphina koo argiteertaatii;
rakkina lubbuu kootii illee beekteerta.
- 8 Ati dabarsitee diinatti na hin kennine;
miilla koos iddoo bal'aa irra dhaabdeerta.

- 9 Yaa WAAQAYYO, ani dhiphina keessan jiraatii na baasi;
iji koo gaddaan, lubbuun koo fi dhagni koo gaddaan dadhabaniiru.
- 10 Jireenyi koo gaddaan, umuriin koo aaduudhaan dhumeera;
jabinni koo sababii dhiphina kootiitiif laafeera;
lafeen koos xuuxameera.
- 11 Sababii diinota koo hundaatiif,
ani olloota koo biratti waan sodaachisaa,
michoota koo biratti immoo waan jibbisiisaa ta'eera;
warri karaa irratti na arganis na baqatu.
- 12 Ani akkuma nama du'eetti irraanfataameera;
akkuma qodaa cabaas nan ta'e.
- 13 Asaasa namoota baay'ee nan dhaga'aatii;
kallattii hundaan sodaatu jira!
Isaan natti malatanii
lubbuu koo balleessuuf mari'atan.
- 14 Yaa WAAQAYYO, ani garuu sin amanadha;
"Ati Waaqa koo ti" nan jedha.
- 15 Barri koo si harka jira; diinota koo jalaa,
warra na ari'atan harkaas na baasi.
- 16 Fuulli kee tajaajilaa kee irratti haa ifu;
jaalala kee kan hin geeddaramne sanaanis na baraari.
- 17 Yaa WAAQAYYO, ani hin qaaneffamin;
ani si waammadheeraatii;
warri hamoon garuu haa qaaneffaman;
cal'isaniis sii'ool keessa haa bu'an.
- 18 Afaan soba dubbatu,
kan of tuulummaa fi tuffiidhaan,
nama qajeelaatti kooree dubbatu haa duudu.
- 19 Gaarummaan kee kan ati warra si sodaataniif ol keesse,
kan ati fuula namootaa duratti
warra kooluu sitti galaniif kennite akkam guddaa dha!
- 20 Da'oo fuula keetiitiin,
waan namoonni isaanitti malatan jalaa isaan dhoksiita;
dunkaana kee keessattis dubbiin tuttuqu jalaa isaan da'eessita.
- 21 WAAQAYYO haa eebbifamu;
inni yeroo ani magaalaa marfamte keessa turetti,
jaalala isaa dinqisiisaa sana na argisiiseeraatii.
- 22 Ani yeroon akka malee dhiphadhetti,
"Ani fuula kee duraa badeera!" jedheen ture.
Ati garuu yeroo ani gargaarsaaf sitti iyyadhetti,
kadhannaa koo naa dhageesse.
- 23 Qulqulloonni isaa hundinuu, WAAQAYYON jaalladhaa!
WAAQAYYO amanamoota ni eega;
of tuultotaaf garuu akkuma hojii isaaniitti irra dabarsee deebisaaf.
- 24 Warri WAAQAYYON abdattan hundinuu jabaadhaa;
garaan keessan hin sodaatin.

Cubbuu Himachuu

Faarfannaa 32

Faarfannaa Daawit. *Maskiil.*

- 1 Namni yakki isaa dhiifameef,
kan cubbuun isaas haguugameef,
eebbifamaa dha.
- 2 Namni WAAQAYYO cubbuu itti hin lakkoofne,
kan hafuura isaa keessas gowwoomsaan hin jirre,
eebbifamaa dha.
- 3 Yeroo ani cubbuu koo himachuu dhiisetti,

- guyyaa guutuu aaduu kootiin,
lafeen koo ni bosose.
- ⁴ Harki kee halkanii fi guyyaa natti ulfaateeraatii;
jabinni koos akkuma waan ho'a bonaatiin ta'uutti xuuxame.
- ⁵ Ergasiis cubbuu koo sitti nan himadhe;
balleessaa koos si hin dhokfanne.
- Anis, "Irra daddarba koo, WAAQAYYOOTTI nan himadha" nan jedhe;
atis yakka cubbuu kootii, naa dhiifteerta.
- ⁶ Kanaafuu namni amanamaan kam iyyuu,
yeroo ati itti argamtutti si haa kadhatu;
lolaan bishaan guddaas isa bira hin ga'u.
- ⁷ Ati iddoo ani itti dhokadhuu dha;
rakkina irraa na eegda;
faarfannaa mo'annaatiinis na marsita.
- ⁸ Ani karaa ati irra deemtu irratti sin qajeelcha; sin barsiisas;
ani ija koo jaalalaatiin sin ilaala; sin gorsa.
- ⁹ Isin akka farda yookaan gaangoo
hubannaa hin qabnee hin ta'inaa;
isaan yoo luugamaa fi fuuloodhaan qabaman malee
gara kee hin dhufan.
- ¹⁰ Dhiphinni namoota hamoo baay'ee dha;
araarri WAAQAYYOO garuu nama isa amanatu ni marsa.
- ¹¹ Yaa qajeeltota, isin WAAQAYYOTTI gammadaa; ililchaas;
warri garaa qulqulluu qabdan hundinuu ililchaa.

Waaqa Jajachuu

Faarfannaa 33

- ¹ Yaa qajeeltota, isin WAAQAYYOTTI gammadaa;
isa jajuun tolootaaf ni mala.
- ² Kiraaraan WAAQAYYON galateeffadhaa;
baganaa ribuu kudhan qabuun isaaf faarfadhaa.
- ³ Faarfannaa haaraa isaaf faarfadhaa; ribuu haalaan rukutaa;
sirriitti rukutaa; gammachuudhaanis ililchaa.
- ⁴ Dubbiin WAAQAYYOO qajeelaadhaatii;
inni waan hojjetu hundumaatti amanamaa dha.
- ⁵ WAAQAYYOO qajeelummaa fi murtii qajeelaa jaallata;
lafitis jaalala isaa kan hin geeddaramneen guutamteerti.
- ⁶ Samiiwwan dubbii WAAQAYYOOTIIN hojjetaman;
tuunni urjiiwwanii hundinuus
hafuura afaan isaatii ba'uun uumaman.
- ⁷ Inni bishaan galaanaa akka tuullaatti walitti qaba;
bishaan tuujubaas kuusaa keessa kaa'a.
- ⁸ Lafti hundi WAAQAYYON haa sodaatu;
sabni addunyaa irra jiraatu hundinuus, guddisee isa haa sodaatu.
- ⁹ Inni dubbateeraatii, wanni inni dubbate ni ta'e;
inni ni ajaje; wanni inni ajajes ni raawwate.
- ¹⁰ WAAQAYYOO marii sabootaa ni fashaleessa;
akka karoorri namootaa hojii irra hin oolles ni godha.
- ¹¹ Karoorri WAAQAYYOO garuu bara baraan, yaadni garaa isaas
dhaloota hundumaa keessatti cimee ni dhaabata.
- ¹² Sabni WAAQAYYOO Waaqa isaaf ta'e,
namoonni inni akka dhaala ofii isaatti filate eebbifamoo dha.
- ¹³ WAAQAYYOO samii irraa gad ni ilaala;
ilmaan namootaa hundas ni arga;
- ¹⁴ Inni teessoo isaa irra taa'ee,
warra lafa irra jiraatan hunda gad ilaala;

- 15 inni garaa nama hundumaa uumu sun,
hojii isaanii hunda ni hubata.
- 16 Mootiin baay'ina loltoota isaatiin du'a hin oolu;
jagnis guddina humna isaatiin du'a jalaa hin ba'u.
- 17 Fardi mo'annaadhaaf abdi gatii hin qabnee dha;
guddinni humna isaas nama hin oolchu.
- 18 Garuu iji WAAQAYYOO warra isa sodaatan irra,
warra araara isaa abdatan irras jira;
- 19 inni lubbuu isaanii du'a jalaa ni baasa;
bara beelaas isaan ni jiraachisa.
- 20 Lubbuun keenya abdiidhaan WAAQAYYON eeggatti;
innis gargaarsa keenyaa fi gaachana keenya.
- 21 Garaan keenya isatti ni gammadaatii;
nu maqaa isaa qulqulluu ni amanannaatii.
- 22 Yaa WAAQAYYO, akkuma nu abdi keenya
sirra kaa'annutti, araarri kee nurra haa bu'u.

Waaqa Murtii Qajeelaa Jajachuu

Faarfannaa 34

Faarfannaa Daawit. Innis fuula Abiimelek duratti maraatu of fakkeesseef Abiimelek isa ariinaan yeroo achii deemetti faarfate.

- 1 Ani yeroo hunda WAAQAYYON nan eebbisa;
galanni isaas yeroo hunda afaanii na hin bu'u.
- 2 Lubbuun koo WAAQAYYON boonti;
cunqurfamtoonni dhaga'anii haa gammadan.
- 3 Na wajjin WAAQAYYOF ulfina kennaa;
kottaa walii wajjin maqaa isaa ol kaafnaa.
- 4 WAAQAYYON nan barbaaddadhe; innis deebii naa kenne;
sodaa koo hunda keessaas na baase.
- 5 Warri gara isaa ilaalan ni ifu;
fuulli isaaniis yoom iyyuu hin qaana'u.
- 6 Hiyyeessi kun ni iyye; WAAQAYYOS isa dhaga'e;
rakkina isaa hundumaa keessaas isa baase.
- 7 Ergamaan WAAQAYYOO naannoo warra Waaqa sodaatanii
ni qubata; isaan ni oolchas.
- 8 Akka WAAQAYYO gaarii ta'e mee mi'eeffadhaa ilaalaa;
namni isatti kooluu galu eebbifamaa dha.
- 9 Isin qulqullooni isaa WAAQAYYON sodaadhaa;
warri isa sodaatan homaa hin dhabaniitii.
- 10 Leenci saafelli iyyuu waa ni dhaba; ni beela'as;
namni WAAQAYYON barbaaddatu garuu
waan gaarii tokko illee hin dhabu.
- 11 Yaa ijoollee ko, kottaa na dhaga'aa;
anis WAAQAYYON sodaachuu isinan barsiisa.
- 12 Namni jireenya jaallatu, kan bara gaarii arguudhaafis
bara baay'ee hawwu eenyu?
- 13 Arraba kee waan hamaa irraa,
afaan kees soba dubbachuu irraa eeggadhu.
- 14 Hammina irraa deebi'i; gaarii hojjedhu;
nagaa barbaadi; duukaa bu'is.
- 15 Iji WAAQAYYOO qajeeltota irra jira;
gurri isaas iyya isaaniitiif banamaa dha;
- 16 yaadannoo isaanii lafa irraa balleessuudhaaf,
fuulli WAAQAYYOO warra hamaa hojjetanitti ni hammaata.
- 17 Qajeeltonni gargaarsaaf iyyatu; WAAQAYYOS isaan dhaga'a.
Rakkina isaanii hunda keessaas isaan baasa.

18 WAAQAYYO warra garaan isaanii cabetti dhi'oo dha;
warra abdiin kutatanis ni fayyisa.

19 Rakkinni nama qajeelaa baay'ee dha;
WAAQAYYO garuu hunda isaa jalaa isa baasa;
20 lafee isaa hunda ni eega;
isaan keessaas tokko illee hin cabu.

21 Hamoota hamminatu ajjeesa;
warra nama qajeelaa jibbanitti ni murteeffama.

22 WAAQAYYO lubbuu tajaajiltoota isaa ni fura;
warra isatti kooluu galan keessaa tokkotti illee hin murteeffamu.

Kadhannaa Nama Dhiphatee

Faarfannaa 35

Faarfannaa Daawit.

1 Yaa WAAQAYYO, warra anaan mormaniin mormi;
warra na lolanis loli.

2 Gaachanaa fi mi'a lolaa qabadhu;
na gargaaruudhaafis ka'i.

3 Warra na ari'anitti
eeboo fi bodee luqqifadhu.

Lubbuu kootiinis,
"Fayyinni kee ana" jedhi.

4 Warri lubbuu koo barbaadan,
haa qaana'an; haa salphatanis;
warri na balleessuuf mari'atanis,
abdiin kutatanii duubatti haa deebi'an.

5 Akka habaqii qilleensa fudhatamee haa ta'an;
ergamaan WAAQAYYOOS isaan haa ari'u.

6 Karaan isaanii dukkanaa'aa fi mucucaataa haa ta'u;
ergamaan WAAQAYYOOS isaan haa ari'u.

7 Isaan sababii malee kiyyoo isaanii dhoksanii
na dura kaa'aniiruutti;
sababii malees boolla naa qotaniiru;

8 utuu inni hin beekin badiisni isatti haa dhufu;
kiyyoon inni dhokse sunis isuma haa qabu;
boolluma qote sanattis haa kufu.

9 Yoos lubbuun ko, WAAQAYYOTTI gammaddi;
fayyisuu isaattis ni ililchiti.

10 Lafeen koo hundi akkana siin jedha:
"Yaa WAAQAYYO, kan akka keetii eenyu?"

Ati dadhabdoota warra isaan caalaa jabaatan jalaa baafta;
hiyyeeyyii fi rakkattoota illee saamtota jalaa baafta."

11 Dhuga baatonni sobaa natti ka'an;
waan ani waa'ee isaa hin beeknes na gaafatu.

12 Isaan qooda waan gaarii waan hamaa naa deebisu;
lubbuu koos kophaatti hambisu.

13 Ani garuu yeroo isaan dhibamanitti,
wayyaa gaddaa nan uffadhe;
lubbuu koos soomaan nan miidhe.

Yeroo kadhannaan koo deebii malee hafettis

14 ani akkuma waan michuu kootiif yookaan obboleessa kootiif gadduutti,
gaddaan asii fi achi deddeebi'e.

Akkuma waan haadha kootiif boo'uuttis,
gaddaan mataa koo nan buuse.

15 Isaan garuu yeroo ani gufadhetti gammadanii walitti qabaman;
utuu ani hin beekin na marsan;
utuu wal irraa hin kutinis na cicciratan.

- 16 Isaan akkuma warra Waaqatti hin bulleetti hamminaan natti qoosan;
ilkaan isaanii illee natti qaratan.
- 17 Yaa Gooftaa, ati hamma yoomiitti cal’istee ilaalta?
Lubbuu koo badiisa isaan fidan jalaa,
jireenya koos leenca jalaa baasi.
- 18 Ani wal ga’ii guddaa keessatti sin galateeffadha;
tuuta guddaa keessatti sin jajadha.
- 19 Warri akkasumaan diina natti ta’an natti hin gammadin;
warri sababii malee na jibban sunis ija natti hin qisin.
- 20 Isaan nagaa hin dubbatan;
warra qabbanaan biyya keessa jiraatanittis,
mala sobaa malatu.
- 21 Isaanis, “Baga! Baga! Ijuma keenyaan isa argine”
jedhanii afaan natti banatu.
- 22 Yaa WAAQAYYO, ati waan kana argiteerta; hin cal’isin.
Yaa gooftaa, narraa hin fagaatin.
- 23 Yaa Waaqa koo fi Gooftaa ko, ati mirga kootiif,
dhimma kootiifis dammaqi; ka’i!
- 24 Yaa WAAQAYYO Waaqa ko,
akkuma qajeelummaa keetiitti naa murteessi;
akka isaan natti gammadanis hin godhin.
- 25 Akka isaan, “Baga! Akkuma nu barbaanne ta’eera!” jedhan,
yookaan akka isaan, “Nu isa liqimsineerra” jedhan hin godhin.
- 26 Warri dhiphina kootti gammadan hundinuu
haa qaana’an; haa burjaaja’anis;
warri natti kooran hundinuu,
qaanii fi salphina haa uffatan.
- 27 Warri qajeelumma koo jaallatan,
sagalee guddaadhaan haa ililchan; haa gammadanis.
Isaan yeroo hunda,
“WAAQAYYO inni nagaa garbicha isaatti gammadu
guddaa dha” haa jedhan.
- 28 Arrabni koo qajeelummaa kee,
guyyaa guutuus galata kee odeessa.

Jal’ina Namaatii Fi Gaarummaa Waaqayyoo

Faarfannaa 36

Dura Bu’aa Faarfattootaatiif. Faarfannaa Daawit Garbicha WAAQAYYOO.

- 1 Ani waa’ee cubbamootaa,
ergaa Waaqa bira dhufe garaa koo keessaa qaba:
Waaqa sodaachuun ija isaanii dura hin jiru.
- 2 Akka cubbuun isaanii ifatti ba’ee hin jibbamneefis,
isaan ijuma ofii isaanii duratti akka malee of saadu.
- 3 Dubbiin afaan isaanii jal’inaa fi gowwoomsaa dha;
isaan ogummaadhaan hojjechuu fi waan gaarii gochuu dhiisaniiru.
- 4 Siree isaanii irratti iyyuu isaan hammina xaxu;
karaa cubbuutti of kennu; waan hamaas hin lagatan.
- 5 Yaa WAAQAYYO, araarri kee samiiwwan bira,
amanamummaan kees duumessa bira ga’a.
- 6 Qajeelummaan kee akka tulluuwwan gurguddaa ti;
murtiin kees akkuma tuujuba guddaa ti.
Yaa WAAQAYYO, ati namaa fi bineensa ni jiraachifta.
- 7 Yaa Waaqi, jaalalli kee inni hin geeddaramne sun akkam ulfina qabeessa!
Ilmaan namootaa, gaaddisa qoochoo keetii jalatti kooluu galu.
- 8 Isaan badhaadhummaa mana keetii nyaatanii quufu;
atis laga gammachuu keetii irraa isaan obaafata.

- ⁹ Burqaan jireenyaa si bira jiraatii;
nu ifa keetiin ifa argina.
- ¹⁰ Jaalala kee warra si beekaniif,
qajeelummaa kees gara toleeyyiidhaaf ittuma fufi.
- ¹¹ Milli of tuultotaa natti hin dhufin;
harki hamootaas dhiibee na hin fageessin.
- ¹² Warri waan hamaa hojjetan kunoo kufanii diriiraniiru;
gad darbatamaniiru; ka'uus hin danda'an!

Qooda Nama Qajeelaa Fi Hamaa

Faarfannaa 37

Faarfannaa Daawit.

- ¹ Ati sababii namoota hamootiif jettee hin aarin
yookaan warra jal'ina hojjetanitti hin hinaafin.
- ² Isaan akkuma margaa dafanii coollagu;
akkuma biqiltuu misee dafanii gogu.
- ³ WAAQAYYON amanadhu; waan gaariis hojjedhu;
biyyattii keessa jiraadhu; nagaas qabaadhu.
- ⁴ WAAQAYYOTTI gammadi;
innis hawwii garaa keetii siif guuta.
- ⁵ Karaa kee WAAQAYYOTTI kennadhu;
isa amanadhu; inni siif milkeessa.
- ⁶ Inni qajeelummaa kee akka aduu ganamaatti,
murtii kee immoo akka aduu saafaatti ibsa.
- ⁷ WAAQAYYO duratti cal'isi;
obsaanis isa eeggadhu;
nama karaan isaa qajeeleefitti,
kan hammina hojjetuttis hin hinaafin.
- ⁸ Aarii irraa of eegi; dheekkamsa irraas deebi'i;
hin aarin; aariin hammina qofatti nama geessaatii.
- ⁹ Namoonni hamoon ni balleeffamuutii;
warri WAAQAYYON abdatan garuu lafa dhaalu.
- ¹⁰ Namoonni hamoon yeroo xinnoodhaaf malee si'achi hin jiraatan;
yoo ati isaan barbaadde illee hin argaman.
- ¹¹ Garraamoni garuu lafa ni dhaalu;
nagaa guddaadhaanis ni gammadu.
- ¹² Namoonni hamoon nama qajeelaatti mari'atu;
ilkaan isaaniis isatti qaratu;
- ¹³ Gooftaan hamootatti ni kolfa;
inni akka guyyaan isaanii dhi'aate ni beekaatii.
- ¹⁴ Namoonni hamoon hiyyeeyyii fi
rakkattoota lafaan dha'uudhaaf,
warra karaan isaanii qajeelaa ta'e immoo gorra'uudhaaf,
goraadee isaanii luqqifatu; iddaa isaaniis ni dabsatu.
- ¹⁵ Goraadeen isaanii garuu garaadhuma isaanii waraana;
iddaan isaaniis ni caccaba.
- ¹⁶ Badhaadhummaa hamoonni baay'een qaban irra,
waan xinnoo namni qajeelaan qabu wayya;
- ¹⁷ humni hamootaa ni cabaatii;
WAAQAYYO garuu qajeeltota jabeessee ni dhaaba.
- ¹⁸ WAAQAYYO bara tolootaa ni beeka;
dhaalli isaaniis bara baraan jiraata.

- 19 Isaan bara hamaa keessa hin qaana'an;
bara beelaa keessas ni quufu.
- 20 Namoonni hamoon garuu ni barbadaa'u;
diinonni WAAQAYYOS akkuma miidhagina daraaraa dirree ti;
isaan ni badu; akkuma aaraa ni badu.
- 21 Namoonni hamoon ni liqeeffatu;
garuu deebisanii of irraa hin baasan;
qajeeltonni garuu arjumaadhaan kennu;
- 22 warri WAAQAYYO eebbisu lafa ni dhaalu;
warri inni abaaru garuu ni balleeffamu.
- 23 Adeemsi nama WAAQAYYO biraa ajajama;
inni karaa namicha sanaatti ni gammada.
- 24 Inni yoo gufate illee lafa hin ga'u;
WAAQAYYO harka isaatiin qabee isa dhaabaatii.
- 25 Ani dargaggeessan ture; amma immoo dulloomeera;
garuu qajeeltonni gatamuu isaanii
yookaan ijoolleen isaaniis buddeena kadhachuu isaanii hin argine.
- 26 Qajeeltonni yeroo hundumaa ni arjoomu; ni liqeessus;
ijoolleen isaaniis ni eebbifamu.
- 27 Waan hamaa irraa deebi'iitii waan gaarii hojjedhu;
yoos ati bara baraan ni jiraatta.
- 28 WAAQAYYO murtii qajeelaa jaallataatii;
warra isaaf amanamanis hin gate.
- Isaanis bara baraan ni eegamu;
sanyiin hamootaa garuu ni balleeffama.
- 29 Qajeeltonni lafa ni dhaalu;
bara baraanis ishee irra ni jiraatu.
- 30 Afaan nama qajeelaa ogummaa dubbata;
arrabni isaas murtii qajeelaa labsa.
- 31 Seerri Waaqa isaa garaa isaa keessa jira;
miilli isaas hin mucucaatu.
- 32 Namoonni hamoon qajeeltota gaadu;
isaan ajjeesuus ni barbaadu;
- 33 WAAQAYYO garuu harka isaaniitti jara hin dhiisu
yookaan yommuu isaan murtiitti dhi'eeffamanitti,
akka isaanitti murteeffamu hin eeyyamu.
- 34 WAAQAYYON eeggadhu; karaa isaas eegi.
Inni akka ati lafa dhaaltuuf ulfina siif kenna;
atis badiisa hamootaa ni argita.
- 35 Nama hamaa fi gara jabeessa,
isaa akkuma muka iddoon isaa itti tolee jiru nan arge.
- 36 Ergasiis achiin nan darbe; inni garuu achi hin turre;
ani cimsee isa nan barbaade; inni garuu hin argamne.
- 37 Nama mudaa hin qabne yaadatti qabadhu; tolootas ilaali;
sanyiin nama nagaa hin baduutii.
- 38 Cubbamoonna hundinuu garuu ni barbadeeffamu;
galgalli nama hamaas hin tolu.
- 39 Fayyinni qajeeltotaa WAAQAYYO biraa dhufa;
inni yeroo rakkinaatti da'oo isaanii ti.
- 40 WAAQAYYO isaan gargaara; isaan oolchas;
harka namoota hamoo jalaa isaan baasa;

isaan baraaras; isaan isatti kooluu galaniiruutii.

Kadhannaa yeroo dhiphinaa

Faarfannaa 38

Faarfannaa Daawit. Yaadannoodhaaf.

- ¹ Yaa WAAQAYYO, aarii keetiin na hin ifatin
yookaan dheekkamsa keetiin na hin adabin.
- ² Xiyyooliin kee na waraananiiru;
harki kees akka malee natti ulfaateera.
- ³ Sababii dheekkamsa keetiitiif dhagni koo fayyaa dhabeera;
sababii cubbuu kootiifis lafeen koo naggaa dhabeera.
- ⁴ Cubbuun koo na liqimseeraatii;
akkuma ba'aa baatamuu hin danda'amne tokkoottis natti ulfaateera.
- ⁵ Sababii gowwummaa kootiitiif,
madaan koo malaa naqate; ni ajaa'es.
- ⁶ Ani gad nan qabame; gadis nan cabe;
guyyaa guutuus gaddaan oola.
- ⁷ Dugdi koo na boba'a;
dhagni koos fayyaa hin qabu.
- ⁸ Ani laafeera; akka malees bututeera;
garaan koo dhiphatee ani aadaan jira.
- ⁹ Yaa Gooftaa, hawwiin koo hundinuu fuula kee duratti beekamaa dha;
argansuun koo si duraa hin dhokatu.
- ¹⁰ Lapheen koo ni dha'atti; jilbis na laafeera;
ifni ija kootiis badeera.
- ¹¹ Michoonni koo fi miiltoon koo sababii madaa kootiitiif narraa hiiqan;
firoonni koos narraa fagaatanii dhadhaabatu.
- ¹² Warri lubbuu koo galaafachuu barbaadan kiyyoo naa kaa'aniiru;
warri na miidhuu barbaadanis waa'ee badiisa kootii dubbatu;
guyyaa guutuus hammina natti yaadu.
- ¹³ Ani garuu akkuma duudaa dhaga'uu hin dandeenyee,
akkuma arrab-didaa dubbachuu hin dandeenyeetii.
- ¹⁴ Ani akka nama dhaga'uu hin dandeenyee,
akkuma nama afaan isaa deebii kennuu hin dandeenyees ta'eera.
- ¹⁵ Yaa WAAQAYYO, ani sin eeggadha;
yaa Waaqayyo Gooftaa ko, ati deebii naa kennita.
- ¹⁶ Ani, "Akka diinonni koo natti gammadan
yookaan akka isaan yeroo miilli koo mucucaatutti natti of jajan
hin eeyyamin" jedheeraatii.
- ¹⁷ Ani kufuu ga'eeraatii;
dhukkubbiin koos takkumaa na hin dhiifne.
- ¹⁸ Ani balleessaa koo nan himadha;
sababii cubbuu kootiitiifis nan gadda.
- ¹⁹ Warri akkasumaan diinota koo ta'an jajjaboo dha;
warri sababii malee na jibbanis hedduu dha.
- ²⁰ Warri qooda waan gaarii waan hamaa naa deebisan diinota koo ti;
ani waan gaarii duukaa nan bu'aatii.
- ²¹ Yaa WAAQAYYO, ati na hin gatin;
yaa Waaqa ko, narraa hin fagaatin.
- ²² Yaa Gooftaa, yaa fayyisaa ko,
na gargaaruudhaaf ariifadhu!

Fuula Waaqaa Duratti Namni Xinnaa Dha

Faarfannaa 39

Dura bu'aa faarfattootaatiif. Yeduutuuniif. Faarfannaa Daawit.

- ¹ Ani akkana nan jedhe; "Ani karaa koo nan eeggadha;

- arraba koos cubbuu irraa nan ittisa;
 hamma namni hamaan na bira jiruttis,
 afaan kootti luugama nan kaa'adha.”
- ² Ani cal'isee akkuma duudaa nan ta'e;
 waan gaarii dubbachuu irraas of nan qusadhe;
 dhiphinni koo garuu ittuma caale;
- ³ onneen koo na keessatti bulluqaa deeme;
 yeroo ani irra deddeebi'ee yaadettis ibiddi sun ni boba'e;
 anis arraba kootiin akkana jedheen dubbadhe:
- ⁴ Yaa WAAQAYYO, ati dhuma jireenya kootii na argisiisi;
 dheerina umurii kootiis na barsiisi;
 jireenyi koo akkam dafee akka darbus na beeksisi.
- ⁵ Kunoo, ati bara koo taakkuu tokkittii gooteerta;
 umuriin koos fuula kee duratti homaattuu hin hedamu;
 jireenyi nama hundumaas akkuma qilleensa shuf jedhee darbuu ti.
- ⁶ Dhuguma iyyuu namni akkuma gaaddidduu deddeebi'a;
 dhugumaan inni akkasumaan goolama;
 namni qabeenya ni kuusa; garuu eenyuuf akka walitti qabu hin beeku.
- ⁷ “Eгаа amma yaa Gooftaa, ani maalin eeggadha?
 Abdiin koo suma irra jira.
- ⁸ Dogoggora koo hunda irraa na oolchi;
 nama gowwoonni itti kolfan na hin godhin.
- ⁹ Ani duudaa dha; afaan koos hin saaqqadhu;
 kan waan kana godhe sumaatii.
- ¹⁰ Ani rukutaa harka keetiitiin dhumeeraatii;
 dha'icha kee narraa fuudhi.
- ¹¹ Ati sababii cubbuu isaaniitiif namoota ifatta; ni adabdas;
 akkuma biliis qabeenya isaanii ni balleessita;
 dhugumaan namni hundinuu qilleensuma shuf jedhee darbuu dha.
- ¹² “Yaa WAAQAYYO, kadhannaa koo naa dhaga'i;
 iyya ani gargaarsa barbaachaaf iyyus dhaggeeffadhu;
 boo'icha koos cal'istee hin ilaalin.
- Ani akka alagaatti si bira nan jiraadhaatii;
 akkuma abbootii koo hundumaattis ani nama biyya ormaa ti.
- ¹³ Utuun godaanee lafa irraa hin dhabamin dura
 akkan deebi'ee gammaduuf, ija kee narraa deebifadhu.”

Faarfannaa Galataatii fi Kadhannaa

Faarfannaa 40

40:13-17 kwf - Far 70:1-5

Dura bu'aa faarfattootaatiif. Faarfannaa Daawit.

- ¹ Ani obsaan WAAQAYYON nan eeggadhe;
 innis gara kootti garagalee iyya koo naa dhaga'e.
- ² Inni boolla sodaachisaa keessaa,
 dhoqqee nama liqimsu keessaas na baase;
 miilla koo kattaa irra dhaabe;
 ejjeta koos naa jabeesse.
- ³ Innis faarfannaa haaraa,
 faarfannaa galataas afaan koo keessa
 Waaqa keenyaaf kaa'e.
- Namoonni baay'een arganii WAAQAYYO sodaatu;
 isas ni amanatu.
- ⁴ Namni WAAQAYYON abdatu,
 kan gara of tuultotaa hin ilaalle,
 namni warra karaa irraa jal'atanii
 waaqota sobaa duukaa bu'initti hin gara galle
 eebbifamaa dha.
- ⁵ Yaa WAAQAYYO Waaqa ko,

dinqiin ati hojjette baay'ee dha;
 waan ati nuuf yaadde,
 namni tokko tokkoon sitti himuu danda'u
 tokko iyyuu hin jiru;
 yoo ani waa'ee isaanii labsee dubbadhe illee,
 baay'inni isaanii hamma hin qabu.

⁶ Ati aarsaa fi kennaa hin feene;

gurra koo garuu naa banteerta;
 aarsaa gubamuu fi aarsaa cubbuu ati hin barbaanne.

⁷ Yeroo sana ani akkana nan jedhe; "Ani kunoo ti; ani dhufeera;
 waa'een koo kitaaba maramaa keessatti barreeffameera.

⁸ Yaa Waaqa ko, ani fedhii kee raawwachuutti nan gammada;
 seerri kee garaa koo keessa jira."

⁹ Ani yaa'ii guddaa keessatti qajeelummaa nan labsa;

Yaa WAAQAYYO, akkuma ati beektu,
 ani afaan koo hin qabadhu.

¹⁰ Ani qajeelummaa kee garaa koo keessa hin dhoksu;
 waa'ee amanamummaa keetiitii fi waa'ee fayyisuu keetii nan odeessa;
 jaalala keetii fi dhugaa kees
 yaa'ii guddaa duraa hin dhoksu.

¹¹ Yaa WAAQAYYO araara kee na hin dhowwatin;
 jaalalli keetii fi dhugaan kee yeroo hunda ana haa eegan.

¹² Rakkinni hamma hin qabne na marseeraatii;
 cubbuun koos na liqimseera; arguus dadhabeera;
 cubbuun koo rifeensa mataa koo caalaa baay'ata;
 onneen koos na keessatti laafteerti.

¹³ Yaa WAAQAYYO, na fayyisuutti gammadi;
 yaa WAAQAYYO, na gargaaruudhaaf dafii kottu.

¹⁴ Warri lubbuu koo galaafachuu barbaadan hundinuu,
 haa qaana'an; haa burjaaja'anis.

Warri badii koo hawwan hundi,
 qaana'anii duubatti haa deebi'an.

¹⁵ Warri, "Baga! Baga!" anaan jedhan,
 qaanii isaaniitiin haa rifatan.

¹⁶ Warri si barbaadan hundinuu garuu
 sitti gammadanii haa lilchan.

Warri fayyisuu kee jaallatan yeroo hunda,
 "WAAQAYYO guddaa dha!" haa jedhan.

¹⁷ Ani garuu hiyyeessaa fi rakkataa dha;
 ta'us Gooftaan naaf yaada.

Ati gargaarsa koo fi fayyisaa koo ti;
 yaa Waaqa ko, hin turin.

Kadhannaa Nama Dhukkubsatee

Faarfannaa 41

Dura bu'aa faarfattootaatiif. Faarfannaa Daawit.

¹ Namni hiyyeessaaf yaadu eebbifamaa dha;
 guyyaa rakkinaatti WAAQAYYO isa ni oolcha.

² WAAQAYYO isa ni eega; bara jireenya isaas ni dheeressa;
 lafa irratti isa eebbisa;
 hawwii diinota isaattis dabarsee isa hin kennu.

³ WAAQAYYO siree inni dhukkubsatee irra ciisu irratti isa kunuunsa;
 fayyisees siree dhukkubaa irraa isa ni kaasa.

⁴ Anis, "Yaa WAAQAYYO na maari;
 ani cubbuu sitti hojjedheeraatii na fayyisi" nan jedhe.

⁵ Diinonni koo hamminaan, "Inni yoom du'ee maqaan isaa

lafa irraa bada?" jedhanii waa'ee koo dubbatu.

⁶ Namni tokko yeroo na gaafachuu dhufutti,
utuma garaa isaatti hammina kuufatee qabuu, sobee dubbata;
gad ba'ees iddoo hundumatti odeessa.

⁷ Warri na jibban hundinuu waa'ee koo walitti hasaasu;
waan akka malee hamaa ta'es natti mari'atu.

⁸ Isaanis, "Dhukkubni hamaan isa qabateera;
inni si'achi iddoo ciisu sanaa hin ka'u" jedhu.

⁹ Michuun koo inni natti dhi'aatu,
inni ani amanadhe,
inni buddeena koo nyaate
koomee isaa natti ol fudhate.

¹⁰ Ati garuu yaa WAAQAYYO na baasi;
akka ani haaloo baafadhuufis ol na kaasi.

¹¹ Akka ati natti gammaddu ani beeka;
diinni koo narra hin aanuutii.

¹² Ati sababii amanamummaa kootiitiif utubdee na qabda;
baruma baraanis fuula kee dura na dhaabda.

¹³ WAAQAYYO Waaqni Israa'el,
bara baraa hamma bara baraatti haa eebbifamu.
Ameen; Ameen.

Kitaaba Lammaffaa

42

Faarfannaa 42-72

Waaqayyon Dheebochuu

Dura bu'aa faarfattootaatiif. *Maskiilii* Ilmaan Qoorraahi.

¹ Akkuma gadamsi bishaan yaa'utti gaggabu sana,
yaa Waaqa ko, lubbuun koo sitti gaggabdi.

² Lubbuun koo Waaqayyoon Waaqa jiraataa dheebotti.
Ani yoomin dhaqee fuula Waaqaa arga?

³ Imimmaan koo halkanii guyyaa soora naa ta'eera;
namoonni guyyaa guutuu "Waaqni kee eessa jira?" anaan jedhuutii.

⁴ Ani yommuun waan kana yaadadhutti,
lubbuu koo of keessatti nan dhangalaasa:

ilillee fi faarfannaa galataatiin
tuuta ayyaana ayyaaneffatu tokko,
hiriiraan gara mana Waaqaatti geggeessaa
tuuticha wajjin akkamitti akka ani deemaa ture yaadadha.

⁵ Yaa lubbuu ko, ati maaliif gaddita?
Na keessattis maaliif raafamta?

Abdii kee Waaqa irra keeyyadhu;
ani amma iyyuu isa nan jajadha.
Fayyisaa koo fi Waaqa koo nan jajadha.

⁶ Lubbuun koo na keessatti gadditeerti;
kanaafuu ani biyya Yordaanos irraa,
fiixee Hermoonii fi

Gaara Miizaarii irraa si yaadadha.

⁷ Huursaa fincaa'aa keetiitiin,
tuujubni tuujuba waama;
dambalii fi dha'aan kee hundinuu, narra yaa'an.

⁸ WAAQAYYO guyyaadhaan jaalala isaa kan hin geeddaramne ni ajaja;
halkan immoo faarfannaan isaa na wajjin jira;
kunis kadhannaa ani Waaqa jireenya kootii kadhadhuu dha.

- ⁹ Anis Waaqa Kattaa kootiin akkana nan jedha;
 “Ati maaliif na dagatte?
 Maaliif ani diinaan cunqurfamee gaddaan jiraadha?”
- ¹⁰ Amajaajonni koo guyyaa guutuu,
 “Waaqni kee eessa jira?” jedhanii natti qoosudhaan,
 akkuma goraadee lafee koo keessaatti na dhiphisu.
- ¹¹ Yaa lubbuu ko, ati maaliif gaddita?
 Na keessattis maaliif raafamta?
 Abdii kee Waaqa irra kaa’adhu;
 ani amma iyyuu isa nan galateeffadha;
 Fayyisaa koo fi Waaqa koo nan jajadha.

Tumsaa fi Furama Barbaachaaf Kadhachuu

Faarfannaa 43

- ¹ Yaa Waaqi, naa murteessi;
 saba hin amanametti dubbii koo naa falmi;
 gowwoomsitootaa fi jal’oota jalaas na baasi.
- ² Ati Waaqa jabina kootii ti.
 Maaliif na gatte?
 Ani maaliifin diinaan cunqurfamee
 gaddaan jiraadha?
- ³ Ifa keetii fi dhugaa kee ergi;
 isaan na haa qajeelchan;
 gara tulluu kee qulqulluutti,
 gara iddoo ati jiraattu sanaatti ana haa fiddan.
- ⁴ Yoos ani gara iddoo aarsaa Waaqaa,
 gara Waaqa gammachuu fi ilillee koo nan dhaqa.
 Yaa Waaqayyo, Waaqa ko,
 ani baganaadhaan sin galateeffadha.
- ⁵ Yaa lubbuu ko, ati maaliif gaddita?
 Na keessattis maaliif raafamta?
 Abdii kee Waaqa irra kaa’adhu;
 ani amma iyyuu isa nan galateeffadha;
 Fayyisaa koo fi Waaqa koo nan jajadha.

Faaruu Boo’ichaa

Faarfannaa 44

- Dura bu’aa faarfattootaatiif. *Maskiilii* Ilmaan Qooraa.
- ¹ Yaa Waaqi, waan ati bara durii,
 jabana isaanii keessa hojjette sana,
 abbootiin keenya nutti himaniiru;
 nuus gurra keenyaan dhageenyerra.
- ² Ati harka keetiin saboota ariitee baafte;
 abbootii keenya immoo ni dhaabde;
 namoota ni balleessite;
 abbootii keenya garuu bilisa baafte.
- ³ Harka kee mirgaatiin, irree keetii fi ifa fuula keetiitiin dhaalan malee
 isaan goraadee isaaniitiin lafa sana hin dhaalle;
 yookaan irreen isaanii mo’annoo isaaniif hin fidne;
 ati isaan jaallatteertaatii.
- ⁴ Ati Mootii koo fi Waaqa koo
 kan Yaaqoobiif mo’icha ajajjuu dha.
- ⁵ Nu siin diinota keenya duubatti deebifna;
 maqaa keetiinis amajaajota keenya gad dhidhiinna.
- ⁶ Ani iddaa koo hin amanadhu;
 goraadeen koos mo’annaa naa hin fidu;
- ⁷ ati garuu diinota keenya jalaa nu oolchita;
 warra nu jibban immoo ni qaannessita.
- ⁸ Nu yeroo hundumaa Waaqaan dhaadanna;

maqaa kees bara baraan ni galateeffanna.

- ⁹ Amma garuu ati nu gatteerta; gadis nu deebifteerta;
ati loltoota keenya wajjin hin baane.
- ¹⁰ Akka nu diinota keenya baqannu nu gooteerta;
warri nu jibbanis nu saamaniiru.
- ¹¹ Ati akka hoolota qalamuuf qopheeffamanii nu gooteerta;
ormoota keessas nu bittinneessiteerta.
- ¹² Saba kee gatii xinnaatti gurgurteerta;
gurgurtaa isaanii irraas bu'aa hin arganne.
- ¹³ Ollaa keenya duratti nama kolfaa,
warra naannoo keenyaa birattis
waan qoosaatii fi nama tuffii nu gooteerta.
- ¹⁴ Ormoota keessatti waan mammaakkaa nu goote;
namoonnis mataa nutti raasan.
- ¹⁵ Salphinni koo guyyaa guutuu fuula koo dura jira;
fuulli koos qaaniidhaan haguugameera.
- ¹⁶ Kunis sababii dubbii warra na tuffataniitii fi warra na arrabsaniitii,
sababii diinaatii fi sababii nama haaloo baafatuutiif ta'e.
- ¹⁷ Kun hundi nutti dhufeera;
ta'us nu si hin daganne;
yookaan kakuu kee keessatti amanamummaa hin dhabne.
- ¹⁸ Garaan keenya dugda duubatti hin deebine;
tarkaanfiin keenyas karaa kee irraa hin jal'anne.
- ¹⁹ Ati garuu iddoo waangoonni jiraatanitti nu caccabsite;
dukkana hamaadhaan nu haguugde.
- ²⁰ Utuu nu maqaa Waaqa keenyaa irraanfannee,
yookaan utuu harka keenya gara waaqa ormaatti bal'ifannee jiraannee,
- ²¹ silaa Waaqni waan kana bira hin ga'u turee?
Inni icciitii garaa namaa beekaatii.
- ²² Nu siif jennee guyyaa guutuu ni ajjeefamna;
akka hoolota qalamuuf jiraniittis lakkaa'amneerra.
- ²³ Yaa Gooftaa dammaqi! Ati maaliif rafta?
Ka'! Bara baraanis nu hin gatin.
- ²⁴ Ati maaliif fuula kee dhokfatta?
Maaliifis dhiphinaa fi hakuucamuu keenya irraanfatta?
- ²⁵ Lubbuun keenya biyyootti dabalanteertii;
garaan keenyas lafatti maxxaneera.
- ²⁶ Ka'iitii nu gargaar; sababii jaalala kee
kan hin geeddaramneetiifis nu furi.

Faarfannaa Cidha Mootii

Faarfannaa 45

Dura bu'aa faarfattootaatiif. Yeedaloo ilmaan Qooraahi kan "Daraaraa" jedhamu.
Maskiil. Faarfannaa cidhaa.

- ¹ Yommuu ani mootiidhaaf faarfadhutti,
yaadni gaariin garaa koo guutee irra dhangala'a;
arrabni koos akkuma biirii barreessaa ogeessa tokkoo ti.
- ² Ati nama hundumaa caalaa miidhagaa dha;
hidhii kee irra surraatu dhangala'a;
kanaafuu Waaqni bara baraan si eebbiseera.
- ³ Yaa gooticha, goraadee kee luqqeettuutti hidhadhu;
ulfinaa fi surraa uffadhu.
- ⁴ Sababii dubbii dhugaatiif, gad of qabiisaa fi qajeelummaatiif,
miidhagina keetiin mo'annaadhaan fuula duratti gulufi;
harki kee mirgaas hojii sodaachisaa haa hojjetu.

- 5 Xiyyawwan kee qara qabeeyyiin sun onnee diinota mootii haa waraanan;
saboonnis miilla kee jalatti haa jijjiganii.
- 6 Yaa Waaqayyo, teessoon kee bara baraa hamma bara baraatti ni jiraata;
bokkuun qajeelummaas bokkuu mootummaa keetii ni ta'a.
- 7 Ati qajeelummaa jaallatta; jal'ina immoo ni jibbita;
kanaafuu Waaqayyo, Waaqni kee hiriyoota kee caalaatti,
zayitiidhaan gammachuu si dibeera.
- 8 Uffanni kee hundinuu qumbiidhaan,
argeessaa fi qundhiidhaan ni urgaa'a;
masaraawwan ilka arbaatiin miidhagfaman keessattis
muuziiqaan mi'a ribuu si gammachiisa.
- 9 Intallan moototaa dubartoota kee warra kabajamoo keessa jiru;
mootittiinis warqee Oofiiriitiin miidhagfamtee
karaa harka mirga keetii dhaabatti.
- 10 Yaa intalaa dhaga'i; hubadhu; gurra kees as qabi;
saba keetii fi mana abbaa keetii irraanfadhu.
- 11 Mootiin miidhagina kee hawwa;
waan inni gooftaa kee ta'eef isa kabaji.
- 12 Intalli Xiiroos kennaa fiddee dhufi;
sooreyyiin garaa si laafifachuu barbaadu.
- 13 Intalli mootii ulfina guddaadhaan diinqa ishee jirti;
uffanni ishees warqeedhaan dha'ame.
- 14 Isheenis uffata halluu garaa garaa qabu uffattee
gara mootiitti geeffamti;
durboonni waa'elli ishees ishee duukaa bu'anii
gara keetti fidamu.
- 15 Isaanis gammachuu fi ililleedhaan ol galfamu;
masaraa mootichaas ni seenu.
- 16 Ilmaan kee iddoo abbootii keetii bu'an;
atis lafa hunda irratti isaan ni moosifta.
- 17 Ani akka maqaan kee dhaloota hunda keessatti yaadatamu nan godha;
kanaafuu saboonni bara baraa hamma bara baraatti si jajatu.

Waaqayyo nu wajjin jira

Faarfannaa 46

Dura bu'aa faarfattootaatiif. Faarfannaa Ilmaan Qoorraahi. Haala *Alaamootiitiin*.

- 1 Waaqni da'oo fi jabina keenya;
inni gargaarsa yeroo hunda rakkina keessatti nu wajjin jiruu dha.
- 2 Kanaafuu yoo lafti raafamtee
tulluuwwanis garaa galaanaa keessa gadi bu'an iyyuu nu hin sodaannu.
- 3 Utuu bishaan isaas huursee hoomachaa'ee
tulluuwwanis raafama isaatiin socho'an iyyuu nu hin sodaannu.
- 4 Lagni yaa'aan isaa magaalaa Waaqaa gammachiisu
kan iddoo qulqulluu Waaqni Waan Hundaa Oliy jiraatuuf
gammachuu kennu tokko jira.
- 5 Waaqni magaalattii keessa jira; isheenis hin raafamtu;
ganama barii Waaqni ishee gargaara.
- 6 Saboonni ni raafaman; mootummoonnis ni kufan;
inni sagalee isaa dhageessise; laftis ni baqxe.
- 7 WAAQAYYON Waan Hunda Danda'u nu wajjin jira;
Waaqni Yaaqoob da'oo keenya.
- 8 Kottaa, hojii WAAQAYYOO ilaalaa;
badiisa inni lafa irratti fides argaa.
- 9 Inni hamma handaara lafaatti waraana ni balleessa;
iddaa ni cabsa; eeboo ni burkuteessa;
gaachanas ibiddaan guba.

¹⁰ “Cal’isaa; akka ani Waaqa ta’es beekaa;
ani saboota gidduutti ol ol nan jedha;
lafa irrattis ol ol nan jedha.”

¹¹ WAAQAYYON Waan Hunda Danda’u nu wajjin jira;
Waaqni Yaaqoob da’oo keenya.

Waaqayyo Mootii Addunyaa ti

Faarfannaa 47

Dura bu’aa faarfattootaatiif. Faarfannaa Ilmaan Qoorraahi.

¹ Isin saboonni hundinuu harka keessan rukutaa;
sagalee ol fudhadhaatii gammachuudhaan Waaqaaf ililchaa.

² WAAQAYYO Waaqa Waan Hundaa Olii,
Mootichi guddaan lafa hundumaa, sodaachisaadhaatii!

³ Inni saboota nu jala,
namootas miilla keenya jala galcheera.

⁴ Innis nu warra Yaaqoob isa inni jaallate sanaaf ulfina taaneef,
dhaala keenya nuu fileera.

⁵ Waaqni ililleedhaan, WAAQAYYO sagalee
malakataatiin ol ba’e.

⁶ Faarfannaa galataa Waaqaaf faarfadhaa;
faarfannaa galataa faarfadhaa;
faarfannaa galataa Mootii keenyaaf faarfadhaa;
faarfannaa galataa faarfadhaa.

⁷ Waaqni Mootii lafa hundaa ti;
faarfannaa galataa hubannaadhaan faarfadhaa.

⁸ Waaqni saboota irratti Mootii dha;
Waaqni teessoo isaa qulqulluu irra taa’eera.

⁹ Qondaaltonni sabootaa,
akkuma saba Waaqa Abrahaamitti walitti qabamu;
mootonni lafa irraa kan Waaqaatii;
innis guddisee ol ol jedheera.

Xiyoon Tulluu Waaqayyoo

Faarfannaa 48

Weedduu. Faarfannaa Ilmaan Qoorraahi.

¹ Magaalaa Waaqa keenyaa keessatti,
tulluu isaa qulqulluu irrattis, WAAQAYYO guddaa dha;
waan hundaa olittis galanni isaaf mala.

² Tulluun Xiyoon gara kaabaatti argama;
dheerina isaatiinis ni bareeda.

Innis gammachuu addunyaa hundaa ti;
magaalaa Mooticha Guddaatis.

³ Waaqni da’annoo ishee keessa jira;
inni da’annoo ishee ta’uu isaa argisiiseera.

⁴ Mootonni humna walitti daratanii
tokkummaadhaan itti qajeelan.

⁵ Isaanis ishee arganii dinqifatan;
sodaataniis baqatan.

⁶ Achittis akkuma muddama dubartii ciniinsifattuutti,
hollannaan isaan qabate.

⁷ Atis bubblee ba’a biiftuutiin
dooniiwwan Tarshiish caccabsite.

⁸ Akkuma dhageenye sana,
magaalaa WAAQAYYOO Waan Hunda Danda’uu keessatti,
magaalaa Waaqa keenyaa keessatti, akkasuma argineerra;

Waaqni bara baraan jabeessee ishee dhaaba.

- ⁹ Yaa Waaqayyo, nu mana qulqullummaa kee keessatti,
jaalala kee kan hin geeddaramne sana irra deddeebinee yaadna.
- ¹⁰ Yaa Waaqayyo, galanni kee akkuma maqaa keetii
handaara lafaa ga'a;
harki kee mirgaas qajeelummaan guutameera.
- ¹¹ Sababii murtii keetiitiif,
Tulluun Xiyoon haa gammaddu;
intallan Yihuudaas haa ililchan.
- ¹² Xiyoon irra naanna'aa; naannoo ishee irras adeemaa;
gamoowwan ishees lakkaa'aa.
- ¹³ Dhaloota itti aanutti akka himtaniif,
dallaa eegumsa ishee sirriitti hubadhaa;
galma ishees ilaalaa.
- ¹⁴ Waaqni kun bara baraa hamma bara baraatti Waaqa keenyaatii;
inni hamma dhumaatti illee nu qajeelcha.

Qabeenya abdachuun faayidaa hin qabu

Faarfannaa 49

Dura bu'aa faarfattootaatiif. Faarfannaa Ilmaan Qooraaahi.

- ¹ Yaa namoota, isin hundi waan kana dhaga'aa;
warri addunyaa kana irra jiraattan hundinuu dhaggeeffadhaa;
- ² xinnaa fi guddaan, soressii fi hiyyeessi walumaan
dhaggeeffadhaa; kunis:
- ³ Afaan koo dubbii ogummaa dubbata;
wanti ani garaatti yaadus hubannaa kenna.
- ⁴ Gurra koo gara mammaaksaatti nan qabadha;
hibboo koos baganaadhaan nan ibsadha.
- ⁵ Bara rakkinnaa, yeroo gowwoomsitoonni hamoon
na marsanitti, ani maaliifan sodaadha?
- ⁶ Isaan qabeenya isaanii amanatu;
guddina sooruma isaaniitiinis boonu.
- ⁷ Namni lubbuu nama gara biraa furu,
yookaan gatii furii nama sanaa Waaqaaf baasu tokko iyyuu hin jiru;
- ⁸ furiin lubbuu namaa gatii guddaa qabaatii;
gatiin quufsaanis yoom iyyuu hin argamu;
- ⁹ silaa inni bara baraan ni jiraata;
hin tortorus ture.
- ¹⁰ Akka ogeeyyiin du'an namni hundinuu ni arga;
gowwoonnii fi raatuwwanis akkasuma ni badu;
qabeenya isaaniis warra kaaniif dhiisu.
- ¹¹ Isaan yoo lafa maqaa isaaniitiin waamamtu qabaatan illee,
awwaalli isaanii bara baraan mana isaanii,
dhalootaa hamma dhalootaattis iddoo boqonnaa isaanii ta'ee hafa.
- ¹² Namni garuu qabeenya qabaatu illee bara dheeraa hin jiraatu;
inni akkuma bineensa du'ee baduu ti.
- ¹³ Wannii namoota ofitti amanatanii fi
warra isaan duukaa bu'anii dubbii isaanii ho'isan eeggatu kanuma.
- ¹⁴ Isaan akkuma hoolaa du'aaf ramadamaniiru;
duuti tiksee isaanii ti;
toloonna ganamaan isaan irratti aangoo qabaatu;
dhagni isaanii mana isaanii irraa fagaatee awwaala keessatti ni tortora;
awwaallis mana jireenya isaanii ti.
- ¹⁵ Waaqni garuu lubbuu koo humna sii'ool jalaa baasa;
inni dhugumaan ofitti na fudhata.

- 16 Yommuu namni tokko sooromu,
yommuu ulfinni mana isaas guddatu hin sodaatin.
- 17 Inni yommuu du'utti waanuma tokko illee fudhatee hin deemuutii;
ulfinni isaas isa wajjin hin dhaqu.
- 18 Inni bara jireenya isaa lubbuu isaa eebbisu iyyuu,
yoo namoonni yeroo ati waan gaarii ofii keetii godhattutti si jajan illee,
- 19 inni gara dhaloota abbootii isaa,
gara warra gonkumaa deebi'anii ifa jireenyaa hin arginee ni dhaqa.
- 20 Namni badhaadhaan hubannaa hin qabne,
akkuma bineensaa du'ee bada.

Waaqeffannaa Dhugaa

Faarfannaa 50

Faarfannaa Asaaf.

- 1 WAAQAYYO, Humna Qabeessi dubbatee
ba'a biiftuutii jalqabee hamma lixa biiftuutti
lafa waameera.
- 2 Xiyoon ishee miidhaginni ishee
hir'ina hin qabne irraa Waaqni ni ibsa.
- 3 Waaqni keenya ni dhufa; hin cal'isus;
ibiddi hamaan fuula isaa dura,
bubbeen jabaanis naannoo isaa jira.
- 4 Inni saba isaatti muruuf jedhee,
samiiwwan oliitii fi lafa akkana jedhee ni waama:
- 5 "Qulqulloota koo warra aarsaadhaan na wajjin kakuu galan,
gara kootti walitti naa qabaa."
- 6 Samiiwwan qajeelummaa isaa ni labsu;
Waaqni mataan isaa abbaa murtiitii.
- 7 "Yaa saba ko, nan dubbadhaatii dhaga'i;
yaa Israa'el, ani dhugaa sitti nan ba'a:
Ani Waaqni Waaqa kee ti.
- 8 Ani aarsaa keetiif sitti hin dheekkamu;
aarsaan kee inni gubamu yeroo hunda fuula koo dura jira.
- 9 Ani dallaa kee keessaa korma,
yookaan karra kee keessaa korbeessa re'ee hin barbaadu.
- 10 Bineensi bosonaa hundinuu,
horiin tulluu kuma irratti bobba'us kan kootii.
- 11 Ani simbirroota tulluuwwan irraa hunda beeka;
wanni lafa irra sosocho'u hundinuu kan koo ti.
- 12 Ani utuun beela'ee iyyuu sitti hin himadhu ture;
addunyaa fi wanni ishee keessa jiru hundi kanuma kootii.
- 13 Ani foon korommii nan nyaadhaa?
Yookaan dhiiga re'ootaa nan dhugaa?
- 14 "Aarsaa galataa Waaqaaf dhi'eessi; wareega kee illee
Waaqa Waan Hundaa Oliitiif galchi;
- 15 guyyaa rakkinaa na waammadhu;
ani sin oolchaa; atis ulfina naa kennita."
- 16 Waaqni garuu nama hamaadhaan akkana jedha:
"Ati seera koo labsuudhaaf,
kakuu koos afaan keetiin dubbachuudhaaf
mirga maalii qabda?"
- 17 Ati adaba koo ni jibbita;
dubbii koos of duubatti gatta.
- 18 Ati yoo hattuu argite isa michuu godhatta;
ejjitoota wajjinis gooda qabaatta.
- 19 Ati afaan kee waan hamaa dubbachuuf itti fayyadamta;
arraba kees gowwoomsaadhaaf dheereffatta.
- 20 Ati teessee obboleessa kee hamatta;
ilma haadha kee maqaa balleessita.

21 Ati waan kana hunda hojjetteerta; ani immoo inuma cal'ise;
 ati akkuma ofii keetii na seete.
 Amma garuu ani sin ifadha;
 ifatti baasees sin himadha.

22 “Isin warri Waaqa irraanfattan waan kana hubadhaa;
 yoo kanaa achii ani isin nan ciccira;
 namni isin oolchu tokko iyyuu hin jiru.

23 Namni aarsaa galataa dhi'eessu ulfina naa kenna;
 anis warra hir'ina hin qabnetti fayyisuu Waaqaa nan argisiisa.”

Kadhannaa Dhiifama Cubbuu

Faarfannaa 51

Dura bu'aa faarfattootaatiif. Faarfannaa Daawit. Faarfannaa kanas inni erga Batisheebaa bira ga'ee booddee yeroo Naataan raajichi gara isaa dhufetti faarfate.

1 Yaa Waaqayyo, akkuma jaalala kee
 kan hin geeddaramne sanaatti na maari;
 akkuma baay'ina araara keetiitti,
 yakka koo narraa haqi.

2 Yakka koo hundumaa narraa dhiqi;
 cubbuu koo irraas na qulqulleessi.

3 Ani yakka koo beekaatii;
 cubbuun koos yeroo hunda fuula koo dura jira.

4 Ani sitti, suma qofatti cubbuu hojjedheera;
 waan fuula kee duratti hamaa ta'es hojjedheera;
 kanaafuu ati murtii keetiin qajeelaa dha;
 yommuu murtii kennituttis hin dogoggortu.

5 Dhuguma iyyuu ani cubbuudhaanan dhaladhe;
 yeroo haati koo na ulfooftee jalqabees cubbamaan ture.

6 Ati keessa namaatti dhugaa hawwita;
 kanaafuu keessa kootti ogummaa na barsiisi.

7 Hiisophiidhaan cubbuu irraa na qulqulleessi; anis nan qulqullaa'a;
 na dhiqi; anis cabbii caalaatti nan addaadha.

8 Gammachuu fi lilillee na dhageessisi;
 lafeen ati caccabsites haa ililchu.

9 Fuula kee cubbuu koo irraa deebifadhu;
 yakka koo hundas narraa haqi.

10 Yaa Waaqayyo, garaa qulqulluu na keessatti uumi;
 Hafuura qajeelaas na keessatti haaromsi.

11 Fuula kee duraa na hin balleessin;
 Hafuura kee Qulqulluus narraa hin fudhatin.

12 Gammachuu fayyina keetii naa deebisi;
 na jiraachisuudhaafis hafuura sarmu naa kenni.

13 Anis warra karaa kee irraa jal'atan nan barsiisa;
 cubbamoonnis gara kee ni deebi'u.

14 Yaa Waaqi, Waaqa na Fayyiftu,
 ati dhiiga dhangalaasuu irraa na oolchi;
 arrabni koos qajeelummaa kee ni faarfata.

15 Yaa Gooftaa, hidhii koo naa bani;
 afaan koos galata kee labsa.

16 Ati aarsaatti hin gammaddu malee silaa nan dhi'eessa ture;
 aarsaa gubamuttis hin gammaddu.

17 Aarsaan Waaqni fudhatu hafuura cabaa dha;
 Yaa Waaqi, ati garaa cabaa fi kan gaabbu hin tuffatu.

18 Jaalala keetiin Xiyooniif waan gaarii godhi;
 dallaa Yerusaaalem ijaari.

19 Yoos ati aarsaa qajeelaatti, qalma gubamuu fi

qalma akkuma jirutti gubamutti ni gammadda;
korommiinis iddoo aarsaa kee irratti ni dhi'eeffaman.

Waan Nama Hamaa Eegatu

Faarfannaa 52

Dura bu'aa faarfattootaatiif. *Maskiilii* Daawit. Doo'eeg namni biyya Edoomii yeroo gara Saa'olii dhaqee, "Daawit gara mana Ahiimelekii dhufeera" jedhee itti himetti faarfatame.

- ¹ Yaa nama jabaa nana, ati maaliif hamminaan koorta?
Ati namni fuula Waaqaa duratti tuffatamtu,
maaliif guyyaa guutuu koorta?
- ² Ati namni nama gowwoomsitu,
arrabni kee badiisa qopheessa;
arrabni kee akkuma qarabaa qaramee ti.
- ³ Ati waan gaarii irra waan hamaa jaallatta;
dhugaa dubbachuu irra immoo soba dubbachuu jaallatta.
- ⁴ Yaa arraba gowwoomsituu nana,
ati dubbii nama miidhu hunda jaallatta.
- ⁵ Kanaafuu Waaqni bara baraan si balleessa:
Inni dunkaana kee keessaa butee si ciccira;
biyya jiraattotaa keessaas si buqqisa.
- ⁶ Qajeeltonni waan kana arganii sodaatan;
isaanis akkana jedhanii isatti kolfan;
- ⁷ "Kunoo, namicha Waaqa da'oo isaa hin godhatin,
qooda kanaa immoo baay'ina qabeenya isaa amanatee
jal'ina ofiitti ciche!"
- ⁸ Ani garuu akkuma ejersa
mana Waaqaa keessatti lalisuu ti;
baraa hamma bara baraattis, jaalala Waaqaa kan
hin geeddaramne sana nan amanadha.
- ⁹ Sababii ati waan kana gooteef
ani bara baraan sin galateeffadha;
sababii maqaan kee gaarii ta'eef ani maqaa kee nan abdadha.
Fuula qulqulloota kee durattis sin leellisa.

Waan Warra Waaqatti Hin Bulle Eegatu

Faarfannaa 53

53:1-6 kwf - Far 14:1-7

Dura bu'aa faarfattootaatiif. Gosa Muuziiqaa *maahilaati* jedhamuun faarfatame. *Maskiilii* Daawiti.

- ¹ Gowwaan garaa isaatti, "Waaqni hin jiru" jedha.
Isaan xuraa'aniiru; karaan isaaniis jibbisiisaa dha;
namni waan gaarii hojjetu tokko iyyuu hin jiru.
- ² Waaqni yoo namni waa hubatu,
kan Waaqas barbaadu tokko iyyuu jiraate
arguuf jedhee,
samii irraa ilmaan namootaa gad ilaala.
- ³ Hundinuu dogoggoraniiru;
hundi isaaniis xuraa'aniiru;
namni waan gaarii hojjetu tokko iyyuu hin jiru;
tokkumti iyyuu hin jiru.
- ⁴ Warri hammina hojjetan,
kanneen akkuma waan buddeena nyaataniitti saba koo nyaatan,
warri Waaqa hin waammanne hundinuu homaa hin beekanii?
- ⁵ Isaan iddoo wanni sodaatamu hin jirretti,
sodaadhaan liqimfamaniiru.
Waaqni lafee warra si marsanii ni bittinneessa;

sababii Waaqni isaan tuffateef, ati isaan qaanessite.

- ⁶ Maaloo utuu Xiyoon keessaa fayyinni Israa'eliif dhufee!
Yommuu Waaqni saba isaa warra booji'aman deebisutti,
Yaaqoob haa iilchu; Israa'elis haa gammadu!

Waaqayyotti Abbaa Murtii Qajeelaatti Iyyachuu

Faarfannaa 54

Dura bu'aa faarfattootaatiif. Mi'a ribuu tiin. *Maskiilii* Daawit. Yeroo warri Ziif Saa'ol bira dhaqanii, "Daawit nu gidduu dhokatee jira" jedhanitti faarfatame.

- ¹ Yaa Waaqi, maqaa keetiin na fayyisi;
humna keetiinis naa murteessi.
² Yaa Waaqi, kadhannaa koo naa dhaga'i,
dubbii afaan kootiis dhageeffadhu.
³ Keessumoonni natti ka'aniiruutii;
warri garaa namaa hin laafne lubbuu koo galaafachuu barbaadu;
Isaanis warra Waaqaaf ulfina hin kenninee dha.
⁴ Kunoo, Waaqni gargaaraa koo ti;
Gooftaan jiraachisaa lubbuu koo ti.
⁵ Hamminni warra maqaa na balleessanii isaanumatti haa deebi'u;
atis amanamummaa keetiin isaan balleessi.
⁶ Ani fedhii kootiin aarsaa siif dhi'eessa;
yaa WAAQAYYO, ani maqaa kee nan galateeffadha;
inni gaariidhaatii.
⁷ Inni dhiphina koo hundumaa keessaa na baaseeraatii;
jii koos ol aantummaadhaan diinota koo of jalatti ilaaleera.

Kadhannaa Yeroo Ari'atamaa

Faarfannaa 55

Dura bu'aa faarfattootaatiif. Mi'a ribuu tiin. *Maskiilii* Daawit.

- ¹ Yaa Waaqi, kadhannaa koo dhaga'i;
waammata koo jalaas hin didin.
² Na dhaga'iitii deebii naa kenni;
komiin koo na dhiphisa; anis nagaa dhabeera.
³ Sagalee diinaatiin,
cunqursa namoota hamoos dhufe;
isaan dhiphina natti fiduutii;
aariidhaanis na jibbu.
⁴ Lapheen koo na keessatti dhiphatte;
sodaan du'aas na qabate.
⁵ Sodaa fi hollannaan natti dhufeera;
naasuunis na fudhateera.
⁶ Anis akkana nan jedhe;
"Utuu ani akkuma gugee qoochoo qabaadhee!
Silaa asii barrisee nan boqodhan ture.
⁷ Silaa fagootti baqadhee
gammoojjii keessa nan bubbula ture;
⁸ silaa bubbee hamaa fi qilleensa jabaa irraa fagaadhee
gara iddoo boqonnaa kootti nan ariifadhan ture."
⁹ Yaa Gooftaa, namoota hamoo burjaajessi;
dubbii isaaniis waliin dha'i;
ani magaalaa keessatti goolii fi lola argeeraatii.
¹⁰ Isaan halkanii guyyaa ol ba'anii dallaa ishee irra naanna'u;
jal'innii fi rakkinni ishee keessa jira.
¹¹ Ishee keessa badiisatu jira;
nama cunqursuu fi gowwoomsuun daandii ishee irraa hin dhabamu.

- 12 Utuu diinni na arrabsee,
silaa obsuu nan danda'a ture;
utuu amajaajiin natti ka'ee,
silaa jalaa dhokachuu nan danda'a ture.
- 13 Garuu si'i namuma akka kootii,
hiriya koo, michuu koo kan natti dhi'aatutu waan kana godhe.
- 14 Tokkummaadhaan mana Waaqaa walii wajjin deemne;
haasaa mi'aawaas walii wajjin haasofne.
- 15 Duuti tasa isaanitti haa dhufu;
utuma lubbuudhaan jiranuu sii'ool keessa haa bu'an;
hamminni mana isaaniitii fi garaa isaanii keessa jiraattii.
- 16 Ani garuu Waaqa nan waammadha;
WAAQAYYOS jalaa na baasa.
- 17 Ani galgala, ganamaa fi waareetti dhiphinaan nan iyya;
innis sagalee koo ni dhaga'a.
- 18 Yoo namni baay'een anaan morme illee,
inni waraana natti ka'e jalaa miidhaa malee na baasa.
- 19 Waaqni inni durumaa jalqabee teessoo irra jiru sun,
Namoota karaa isaanii hin geeddaranne,
kanneen Waaqa hin sodaanne ni dhaga'a;
isaan qaannessas.
- 20 Hiriyaan koo michoota isaatti harka isaa ol fudhate;
kakuu isaa illee ni cabse.
- 21 Dubbiin isaa akkuma dhadhaa ti; nama hin quuqu;
garaa isaa keessa garuu lolatu jira;
dubbiin isaa zayitii caalaa lallaafa;
garuu goraadee luqqifamee dha.
- 22 Yaaddoo kee WAAQAYYOTTI kennadhu;
inni si jiraachisa;
namni qajeelaan akka jeqamus hin godhu.
- 23 Yaa Waaqayyo, ati garuu
namoota hamoo boolla badiisaa keessa ni buufta;
warri dhiiga dhangalaasanii fi gowwoomsitoonni,
walakkaa bara jireenya isaanii iyyuu hin jiraatan.

Ani garuu sin amanadha.

Waaqa Amanachuu

Faarfannaa 56

Dura bu'aa faarfattootaatiif. Yeedaloo "Gugee Qilxuu Fagoo irraa" jedhuun faarfatame. *Miiktaamii* Faarfannaa Daawit. Innis yeroo Filisxeemonni Gaati keessatti isa qaban faarfate.

- 1 Yaa Waaqi na maari;
diinonni koo akka malee na ari'u;
guyyaa guutuus na cunqursu.
- 2 Diinonni koo guyyaa guutuu na gaadu;
namoonni baay'een of tuulumaadhaan na lolu.
- 3 Ani yommuun sodaadhutti sin amanadha.
4 Waaqa ani dubbii isaa jajadhu,
Waaqa nan amanadha; homaa hin sodaadhu.
Namni du'a hin oolle maal na gochuu danda'a?
- 5 Isaan guyyaa guutuu dubbii koo micciiru;
na miidhuudhaafis yeroo hunda natti malatu.
- 6 Isaan ni mari'atu; ni riphus;
lubbuu koo galaafachuuf jedhanii
tarkaanfii koo eegatu.

7 Sababii hammina isaaniitiif akka isaan miliqan hin godhin;
yaa Waaqi, dheekkamsa keetiin saboota gad deebisi.

8 Gadadamu koo galmeeessi;
imimmaan koos kitaaba kee keessatti barreessi;
isaan galmee kee keessa jiru mitii?

9 Yommuu ani gargaarsaaf si waammadhutti,
diinonni koo dugda duuba deebi'u.
Anis kanaan akka Waaqni na wajjin jiru beeka.

10 Waaqa ani dubbii isaa jadjahu,
WAAQAYYO ani dubbii isaa jadjahu,

11 Waaqa nan amanadha; ani homaa hin sodaadhu.
Namni maal na gochuu danda'a?

12 Yaa Waaqi wareegni kee narra jira;
aarsaa galataas siif nan dhi'eessa.

13 Akka ani fuula Waaqaa dura,
ifa jireenyaa keessa deddeebi'uuf,
ati lubbuu koo du'a jalaa,
miilla koos gufachuu oolchiteertaatii.

Diinota Gara Jabeeyyii Gidduutti

Faarfannaa 57

57:7-11 kwf - Far 108:1-5

Dura bu'aa faarfattootaatiif. Yeedaloo "Hin balleessin" jedhuun faarfataame. Faarfannaa Daawit. *Miiktaamii*. Innis yeroo Saa'ol jalaa baqatee holqatti galee faarfate.

1 Na maari; yaa Waaqa na maari;
lubbuun koo sitti kooluu galtiiiti.

Anis hamma balaan darbutti,
gaaddisa qoochoo keetii jalatti kooluu nan gala.

2 Ani gara Waaqa Waan Hundaa Oliitti,
gara Waaqa haaloo naa baasuutti nan iyya.

3 Inni samii irraa ergee na oolcha;
warra akka malee na ari'an ni ifata;
Waaqni jaalala isaatii fi amanamummaa isaa ni erga.

4 Ani leencota gidduun jira;
ani bineensota nama nyaatan,
namoota ilkaan isaanii eeboo fi xiyyaa
kanneen arrabni isaanii akka goraadee qaramaa gidduu ciiseera.

5 Yaa Waaqi, ati samiiwwaniin olitti ol ol jedhi;
ulfinni kees lafa hunda irra haa jiraatu.

6 Isaanis kiyyoo miilla kootiif kaa'an;
lubbuun koos dhiphinaan gad gogdeerti.
Isaan karaa koo irratti boolla qotan;
garuu isaanumattu keessatti kufe.

7 Yaa Waaqi, garaan koo hin raafamu;
garaan koo hin raafamu;
ani nan faarfadha; nan weeddisas.

8 Yaa lubbuu ko, dammaqi!
Yaa kiraaraa fi baganaa dammaqa!
Anis ganamaan nan dammaqa.

9 Yaa Gooftaa, ani saboota gidduutti galata siif nan galcha;
namoota gidduuttis waa'ee kee nan faarfadha.

10 Jaalalli kee guddaa dha; samiiwwanis ga'aatii;
amanamummaan kees samiiwwan qaqqaba.

- ¹¹ Yaa Waaqi, ati samiiwwaniin olitti ol ol jedhi;
ulfinni kees lafa hunda irra haa jiraatu.

Abbaa Murtii Kan Abbootii Murtii Biyya Lafaa

Faarfannaa 58

Dura bu'aa faarfattootaatiif. Yeedaloo "Hin balleessin" jedhuun faarfataame. Faarfannaa Daawiti. *Miiktaamii.*

- ¹ Yaa bulchitoota, isin dhugumaan waan qajeelaa dubbattanii?
Nama gidduuttis murtii qajeelaa kennitanii?
- ² Akkas miti; isin garaa keessan keessatti hammina yaaddu;
harki keessanis lafa irratti goolii kaasa.
- ³ Namoonni hamoon dhalootumaa kaasanii karaa irraa jal'atu;
gadameessa haadha isaaniitii jalqabniis karaa irraa goranii soba dubbatu.
- ⁴ Hadhaan isaanii akkuma hadhaa bofaa ti;
isaan akkuma buutii duudaa gurra isaa cuqqaalatee
- ⁵ sagalee nama isa raatessuu yookaan nama waan ittiin isa raatessu
hojjetu tokkoo dhaga'uu diduu ti.
- ⁶ Yaa Waaqi ati ilkaan isaanii afaan isaanii keessatti caccabsi;
qarriffaa leencotaas daaki, yaa WAAQAYYO!
- ⁷ Isaan akkuma bishaan dhangala'ee baduutti haa badan;
yeroo iddaa futtaasanitti xiyyi isaanii haa doomu.
- ⁸ Akkuma ciilalluu yommuu deemu baquutti,
akkuma daa'ima utuu yeroon hin ga'in dhalatuuttis aduu hin argin.
- ⁹ Utuu okkoteen keessan ibidda qoraattiitiin hin ho'in,
jiidhaas ta'u gogaan isaanii haxaa'amanii balleeffamu.
- ¹⁰ Namni qajeelaan yommuu haaloo ba'uu kana argutti ni gammada;
miilla isaas dhiiga namoota hamootiin ni dhiqata.
- ¹¹ Yommuu namoonni akkana ni jedhu;
"Dhugumaan nama qajeelaadhaaf badhaasni jira;
dhugumaan Waaqni lafa irratti murtii kennu jira."

Kadhannaa Diina Jalaa Ba'uuf Dhi'aate

Faarfannaa 59

Dura bu'aa faarfattootaatiif. Yeedaloo Daawit kan "Hin balleessin" jedhuun faarfataame. *Miiktaamii.* Daawitis yeroo Saa'ol isa ajjeesuudhaaf jedhee namoota ergee mana isaa eegsisetti faarfate.

- ¹ Yaa Waaqi, diinota koo jalaa na baasi;
warra natti ka'an jalaas na furi.
- ² Warra hammina hojjetan jalaa na baasi;
namoota dhiiga dhangalaasan jalaas na baraari.
- ³ Ilaa, isaan riphaniin na eeggachaa jiruu!
Yaa WAAQAYYO, namoonni hamoon,
utuu ani balleessaa fi cubbuu hin qabaatin lola natti kaasu.
- ⁴ Ani balleessaa tokko illee hin hojjennee;
isaan garuu na loluuf qophaa'aniiru.
Na gargaaruudhaaf ka'i; rakkina koos ilaali!
- ⁵ Yaa WAAQAYYO, Waaqa Waan Hunda Danda'u,
yaa Waaqa Israa'el, saboota hunda adabuudhaaf ka'i;
warra hammina isaaniitiin yakka hojjetan tokko illee hin maarin.
- ⁶ Isaanis galgala galgala deebi'anii,
akka saree gururi'aa magaalattii irra naanna'u.
- ⁷ Waan isaan afaan isaaniitii baasan ilaali;
hidhii isaanii irra goraadeetu jira;
isaanis, "Eenyutu nu dhaga'uu danda'a?" jedhu.
- ⁸ Yaa WAAQAYYO, ati garuu isaanitti kolfiti;
saboota sana hundumattis ni qoosta.

⁹ Yaa Jabina ko, ani sin eeggadha;
yaa Waaqi ati da'oo koo,
¹⁰ Waaqa na jaallatuu dha.

Waaqni fuula koo dura deema;
akka ani diinota koo mo'annoodhaan of jalatti ilaalu godha.

¹¹ Yaa Gooftaa, yaa gaachana keenya,
ati garuu isaan hin ajjeesin;

yoo kanaa achii sabni koo ni irraanfata.

Humna keetiin akka isaan jooran godhi; gad isaan deebisis.

¹² Sababii cubbuu afaan isaaniitiif,
sababii dubbii hidhii isaaniitiif,
isaan of tuulummaa isaaniitiin haa qabaman.

Sababii abaarsaa fi soba isaan dubbataniitiif,

¹³ dheekkamsaan isaan balleessi;

akka isaan deebi'anii hin argamneef isaan balleessi.

Kanaanis akka Waaqni Yaaqoob irratti mootii ta'e,
hamma handaara lafaatti ni beekama.

¹⁴ Isaanis galgala galgala deebi'anii,
akka saree gururi'aa, magaalattii irra naanna'u.

¹⁵ Isaan waan nyaatan barbaacha asii fi achi jooru;
yoo quufuu baatan immoo ni iyyu.

¹⁶ Ani garuu waa'ee jabina keetii nan faarfadha;
ganamaanis waa'ee jaalala keetii nan faarfadha;
ati da'oo kootii; yeroo rakkina koottis
ati iddoo ani itti kooluu galuu dha.

¹⁷ Yaa Jabina ko, ani faarfannaa galataa siifin faarfadha;
yaa Waaqi, ati da'oo koo ti;
ati Waaqa ani abdadhuu dha.

Kadhannaa Mo'amuu Booddee Dhi'effame

Faarfannaa 60

Dura bu'aa faarfattootaatiif. Yeedaloo "Daraaraa kakuu" jedhamuun faarfatame. *Miiktaamii* Daawit. Barsiisuuf. Yeroo inni Arraam Nahaaraayimii fi Arraam Zoobaa lolee fi yeroo Yoo'aabin deebisee warra Edoomii keessaa namoota kuma kudha lama Sulula soogiddaa keessatti fixetti faarfatame.

¹ Yaa Waaqi, ati nu gatteerta; nu caccabsiteertas;
nutti aarteerta; amma garuu iddooti nu deebisi!

² Ati lafa sochoofteerta; tarsaaftees afaan bansiifteerta;
caccabaa ishees walitti suphi; isheen raafamteertii.

³ Ati akka sabni kee waan hamaadhaan dhiphatu gooteerta;
daadhii wayinii nu gatantarsus nuu kenniteerta.

⁴ Akka isaan iddaa jalaa gara isaatti baqataniif,
ati warra si sodaataniif mallattoo kenniteerta.

⁵ Akka warri ati jaallattu furamaniif,
harka kee mirgaatiin nu oolchi; nu gargaaris.

⁶ Waaqni iddoo qulqullummaa isaatii akkana jedhee dubbateera;
"Ani gammachuudhaan Sheekemin gargar nan qooda;
Sulula Sukootis nan safara.

⁷ Gili'aad kan koo ti; Minaaseenis kan koo ti.
Efreem gonfoo sibiilaa koo ti;
Yihuudaanis bokkuu mootummaa koo ti.

⁸ Mo'aab caabii dhiqannaa koo ti;
Edoom irra kophee koo darbadhee nan buusa;
Filixseem irrattis mo'annaadhaan nan geerara."

⁹ Eenyutu magaalaa jabeeffamtee ijaaramtetti na fida?
Eenyutu Edoomitti na geessa?

¹⁰ Yaa Waaqi, kan nu gatte suma mitii?

Yaa Waaqi, kan loltoota keenya wajjin ba'uu diddes suma mitii?

¹¹ Diina keenya of irraa dhowwuu nu gargaar;
gargaarsi namaa faayidaa hin qabuutii.

¹² Nu Waaqa wajjin ni mo'anna;
innis diinota keenya gad dhidhiita.

Faarfannaa Nama Booji'amee

Faarfannaa 61

Dura bu'aa faarfattootaatiif. Faarfannaa Daawit kan mi'a ribuutiin faarfatame.

¹ Yaa Waaqi, iyyata koo dhaga'i;
kadhannaa koos dhaggeeffadhu.

² Yeroo garaan koo citetti,
ani handaara lafaatii sin waammadha;
ati gara kattaa na caalaa ol dheeratuutti na geessi.

³ Ati iddoo ani itti kooluu galuudhaatii;
fuula diina koo durattis gamoo jaba'a dha.

⁴ Ani bara baraan dunkaana kee keessa jiraachuu,
gaaddisa qoochoo keetii jalattis kooluu galuu nan hawwa.

⁵ Yaa Waaqi, ati wareega koo dhageesseertaatii;
dhaala warri maqaa kee sodaatan argatanis naa kenniteerta.

⁶ Bara jireenya mootii, umurii isaa illee
dhalootaa gara dhalootaatti dheeressi.

⁷ Innis fuula Waaqaa duratti bara baraan haa mo'u;
akka jaalalli keetii fi amanamummaan kee isa eeganis godhi.

⁸ Anis faarfannaa galataa maqaa keetiif nan faarfadha;
guyyuma guyyaanis wareega koo nan guuttadha.

Waaqa Qofa Abdachuu

Faarfannaa 62

Dura bu'aa faarfattootaatiif. Yeduutuuniif. Faarfannaa Daawit.

¹ Lubbuun koo Waaqa qofa eeggatti;
fayyinni koos isa biraa naa dhufa.

² Kattaan kootii fi fayyinni koo isa qofa;
inni da'oo koo ti; ani gonkumaa hin raafamu.

³ Isin hamma yoomiitti nama miitu?
Hamma yoomiitti akka keenyan manaa kan duufeetti,
akka dallaa raafameettis lafaan isa dha'uu barbaaddu?

⁴ Isaan aangoo isaa guddaa sana irraa,
guutummaatti gad isa deebisuu barbaadu;
isaan sobatti ni gammadu.

Afaan isaaniitiin ni eebbisu;
garaa isaaniitiin garuu ni abaaru.

⁵ Lubbuun koo Waaqa qofa obsaan eeggatti;
abdiin koo isa biraa dhufaatii.

⁶ Kattaan kootii fi fayyinni koo isa qofa;
inni da'oo koo ti; ani hin raafamu.

⁷ Fayyinni kootii fi ulfinni koo harka Waaqaa keessa jira;
kattaan koo jabaan, iddoon ani itti kooluu galu Waaqa.

⁸ Yaa namoota, yeroo hunda isa amanadhaa;
garaa keessanis fuula isaa duratti dhangalaasaa;
Waaqni iddoo nu itti kooluu galluudhaatii.

⁹ Gosa tuffatamaa irraa dhalachuun homaa miti;
gosa kabajamaa irraa dhalachuunis sobuma;
yoo madaaliidhaan madaalaman

lachanuu qilleensa caalaa salphatu.

¹⁰ Waan saamichaan argattan hin amanatinaa;
waan hatameenis hin koorinaa.
Yoo qabeenyi keessan guddate illee,
qalbii keessan isa irra hin kaa'atinaa.

¹¹ Waaqni yeroo tokko dubbate;
ani immoo yeroo lama nan dhaga'ee;
kunis akka humni kan Waaqaa ta'ee dha.

¹² Yaa Gooftaa araarri kan kee ti.
Ati dhugumaan tokkoo tokkoo namaa
akkuma hojii isaatti gatii isaa ni kennitaaf.

Waaqa Barbaacha

Faarfannaa 63

Faarfannaa Daawit. Yeroo inni Gammoojjii Yihuudaa keessa turetti.

¹ Yaa Waaqi, ati Waaqa koo ti;
ani dhugumaan sin barbaadadha;

lafa gogaa fi gammoojjii,
lafa bishaan hin jirretti,
lubbuun koo si dheebotti;
foon koos sitti gaggaba.

² Kanaafuu ani iddoo qulqulluu keessattin si arge;
humna keetii ulfina kees nan ilaale.

³ Waan jaalalli kee jireenya caaluuf,
hidhiin koo si jajatti.

⁴ Ani hamman jirutti sin eebbisa;
maqaa keetiinis harka koo ol nan qabadha.

⁵ Lubbuun koo akka nama dhukaa fi cooma quufeetti quufti;
afaan koos hidhii ililleetiin si jajata.

⁶ Ani siree koo irratti sin yaadadha;
halkan guutuus waa'ee kee nan yaada.

⁷ Waan ati gargaarsa koo taateef,
ani gaaddisa qoochoo keetii jalatti gammachuudhaan nan faarfadha.

⁸ Lubbuun koo sitti maxxanti;
harki kee mirgaa ol na qaba.

⁹ Warri lubbuu koo galaafachuu barbaadan garuu
boolla lafaa isa gad fagoo keessa bu'u.

¹⁰ Isaan dabarfamanii goraadeetti kennamu;
nyaata waangoos ni ta'u.

¹¹ Mootiin garuu Waaqaatti ni gammada;
namni Waaqaan kakatu hundinuu ulfina argata;
afaan warra soba dubbatuu immoo ni cufama.

Warri Nama Arrabsan Adabamuu Isaanii

Faarfannaa 64

Dura bu'aa faarfattootaatiif. Faarfannaa Daawit.

¹ Yaa Waaqi, yommuu ani iyyadhu sagalee koo dhaga'i;
lubbuu koos doorsisuu diinaa duraa baasi.

² Marii jal'ootaa duraa,
mala namoota hamoo duraas na dhoksi.

³ Isaan arraba isaanii akka goraadee qaratan;
dubbii hadhaa'aas akkuma xiyyaatti qopheeffatu.

⁴ Isaan riphanii nama yakka hin qabnetti futtaasu;
akkuma tasaas sodaa malee itti gad dhiisu.

⁵ Kaayyoo jal'inaa irratti wal jajjabeessu;

waa'ee dhoksanii kiyyoo kaa'uus ni mari'atu;
 "Eenyutu isa arguu danda'a?" jedhaniis ni yaadu.
 6 Isaanis jal'ina yaaduudhaan,
 "Nu mala hir'ina hin qabne malanneerra!" jedhu;
 yaadnii fi keessi garaa namaa gad fagoodhaatii.

7 Waaqni garuu xiyya isaa isaanitti futtaasa;
 isaanis akkuma tasaa madaa'u.

8 Innis arrabuma isaaniin isaan balleessa;
 warri isaan argan hundinuu tuffiidhaan mataa raasu.

9 Namoonni hundinuu ni sodaatu;
 isaan hojii Waaqaa ni labsu;
 waan inni hojjete illee ni qalbeeffatu.

10 Namni qajeelaan WAAQAYYOTTI gammada;
 isattis kooluu gala;
 gara toleeyyiin hundinuu isaan ulfina argatu.

Sababii Kenna Isaatiif Waaqayyon Jajachuu

Faarfannaa 65

Dura bu'aa faarfattootaatiif. Faarfannaa Daawit.

1 Yaa Waaqi, Xiyyoon keessatti galatatu si eeggata;
 wareegni keenyas siif galfama.

2 Yaa isa kadhannaa namaa dhageessu,
 namni hundinuu gara kee ni dhufa.

3 Yeroo cubbuun na mo'attetti,
 ati yakka keenya nuu dhiifteerta.

4 Warri ati filattee akka isaan qe'ee kee jiraataniif
 ofitti dhi'eessite eebbifamoo dha!

Nus waan gaarii mana keetiitiin,
 kan mana qulqullummaa keetiitiinis ni quufna.

5 Yaa Waaqi Fayyisaa keenya,
 ati hojii qajeelummaa sodaachisaadhaan
 deebii nuu kennita;

daarii lafaa hundumaaf,
 galaana fagootti argamuufis ati abdii dha;

6 ati humna uffatteerta;
 jabina keetiinis tulluuwwan hundeessite;

7 ati huursaa galaanaa,
 huursaa dha'aa bishaanii,
 raafama uummataas ni cal'isiifte.

8 Warri fagoo jiraatan dinqiiwwan kee ni sodaatu;
 ati yeroo bari'uu fi yeroo dhi'utti,
 akka faarfannaan gammachuu faarfatamu ni goota.

9 Ati lafa ni eegda; bishaanis ni obaafata;
 akka malees ni gabbifta;

akka namootaaf midhaan kennaniifis
 lageen Waaqaa bishaaniin guutamaniiru;
 ati kanumaaf qopheessiteertaatii.

10 Bo'oo isaa bishaan quubsita;
 biyyoo isaas wal qixxeessita;

tiifuu bokkaatiinis ni jiifta;
 biqila isaas ni eebbifta.

11 Gaarummaa keetiin bara ni gonfita;
 daandiiwwan kees cooma coccobsu.

12 Lafti margaa kan gammoojjii akka malee misa;
 gaarranis gammachuudhaan guutamu.

13 Dirreewwan bushaayeedhaan guutamu;
 sululoonni midhaaniin haguugamu;
 isaanis ililleedhaan iyyanii faarfatu.

Waaqa Galateeffachuu

Faarfannaa 66

Dura bu'aa faarfattootaatiif. Faarfannaa.

¹ Isin lafti hundinuu ililleedhaan gara Waaqaatti iyyaa!

² Ulfina maqaa isaa faarfadhaa;
galata isaatiifis ulfina kennaa!

³ Waaqaan akkana jedhaa;

“Hojiin kee akkam sodaachisaa dha!

Sababii humni kee guddaa ta'eef,
diinonni kee fuula kee duratti hollatu.

⁴ Lafti hundinuu siif sagadu;
faarfannaa galataa siif faarfatu;
maqaa keetiifis faarfatu.”

⁵ Kottaatii waan Waaqni hojjete,
hojii sodaachiisaa inni namaaf hojjete ilaalaa!

⁶ Inni galaana lafa gogaatti geeddare;
isaanis miilla isaaniitiin laga ce'an;
kottaa isatti haa gammannu!

⁷ Inni bara baraan humna isaatiin bulcha;
iji isaas saboota ilaala;
finciltoonni ol ol of hin qabin.

⁸ Yaa saboota, Waaqa keenya eebbisaa;
sagaleen isa galateeffatus haa dhaga'amu;

⁹ inni lubbuu keenya jiraachiseera;
miilla keenyas mucucaachuu oolcheera.

¹⁰ Yaa Waaqayyo, ati nu qorteertaatii;
akkuma meetiis nu qulqulleessiteerta.

¹¹ Ati kiyyootti nu galchiteerta;
dugda keenya irras ba'aa keesseerta.

¹² Akka namoonni mataa keenya yaabbatan gooteerta;
nu ibiddaa fi bishaan keessa dabarre;
ati garuu iddoo badhaadhummaatti nu fidde.

¹³ Anis qalma gubamu qabadhee
mana qulqullummaa kee nan seena;
wareega koos siif nan galcha;

¹⁴ kunis wareega yeroo ani rakkina keessa turetti
arrabni koo waadaa galee afaan koos dubbate dha.

¹⁵ Anis horii coccoomoo, qalma gubamu,
korbeeyyii hoolaa immoo aarsaa godhee siif nan dhi'eessa;
jibootaa fi re'oota illee aarsaa siifin dhi'eessa.

¹⁶ Isin warri Waaqa sodaattan hundi kottaa dhaggeeffadhaa;
sin waan inni naaf godhe isinitti nan hima.

¹⁷ Ani afaan kootiin isatti nan iyye;
galanni isaas arraba koo irra ture.

¹⁸ Utuu ani garaa koo keessa cubbuu kaa'adhee jiraadhee,
silaa Gooftaan naaf hin dhaga'u ture;

¹⁹ Waaqni garuu dhugumaan na dhaggeeffateera;
sagalee kadhannaa kootiis dhaga'eera.

²⁰ Waaqni kadhannaa koo hin didin
yookaan jaalala isaa na hin dhowwatin haa eebbifamu!

Faarfannaa Yeroo Midhaan Galfamuu

Faarfannaa 67

Dura Bu'aa Faarfattootaatiif. Mi'a ribuutiin. Faarfannaa.

¹ Waaqni garaa nuuf laafu; nu haa eebbisus;
fuula isaas nurratti haa ibsu;

² kunis akka karaan kee lafa irratti,
fayyisuun kee immoo saboota hundumaa biratti beekamuuf.

- 3 Yaa Waaqayyo, saboonni si haa jajatan;
saboonna hundii si haa jajatan.
- 4 Ati waan qajeelummaadhaan namoota bulchituuf,
saboota lafa irraas waan geggeessituuf,
saboonna haa gammadanis; ililchaniis haa faarfatan.
- 5 Yaa Waaqayyo, saboonni si haa jajatan;
saboonna hundii si haa jajatan.
- 6 Lafti midhaan kenniteerti;
Waaqayyo Waaqni keenyas nu eebbiseera.
- 7 Waaqni nu eebbiseera;
handaarri lafaa hundi isa haa sodaatu.

Faarfannaa Mo'annoo

Faarfannaa 68

- Dura bu'aa faarfattootaatiif. Faarfannaa Daawit.
- 1 Waaqni haa ka'u; diinonni isaas haa bittinnaa'an;
warri isa jibbanis fuula isaa duraa haa baqatan.
- 2 Akkuma aarri bittinnaa'u, ati isaan bittinneessi;
akkuma gagaan ibidda duratti baqu,
hamoonni fuula Waaqaa duraa haa badan.
- 3 Qajeelonni garuu haa gammadan;
fuula Waaqaa durattis baay'ee haa gammadan;
isaan gammachuudhaan haa ililchan.
- 4 Waaqaaf faarfadhaa;
faarfannaa galataa maqaa isaatiif faarfadhaa;
isa duumessaan gulufu sana jajadhaa;
maqaa isaa WAAQAYYOO dha;
fuula isaa durattis baay'ee gammadaa.
- 5 Waaqni warra abbaa hin qabneef abbaa,
niitota dhirsoonni irraa du'aniifis falmaa ta'e sun
iddoo jireenya isaa qulqulluu keessa jira.
- 6 Waaqni warra kophaa ta'an maatii keessa jiraachisa;
warra hidhamanis mana hidhaatii baasa;
finciltoonni garuu lafa gogaa irra jiraatu.
- 7 Yaa Waaqayyo, gaafa ati saba kee dura baate,
gaafa ati gammoojjii keessa dabarte,
- 8 fuula Waaqaa, Waaqa Siinaa duratti,
fuula Waaqaa, Waaqa Israa'el duratti,
lafti ni raafamte; samiiwwanis bokkaa roobsan.
- 9 Yaa Waaqayyo, ati bokkaa baay'ee roobsite;
dhaala kee kan dadhabe illee ni quubsite.
- 10 Sabni kee achi qubate;
yaa Waaqayyo, ati badhaadhummaa kee keessaa
hiyyeeyyii soorte.
- 11 Gooftaan dubbii isaa kenne;
dubartoonni dubbii sana labsanis baay'ee dha:
- 12 "Mootonnii fi loltoonni ariitiin baqatan;
dubartoonni qe'ee oolan boojuu qooddatan.
- 13 Yoo gola hoolotaa gidduutti argamtan illee,
isin akka gugee qoochoon ishee meetiidhaan uffifamee
baalleen ishee immoo warqee calaqqisuun uffifamee ti."
- 14 Yommuu Waaqni Waan Hunda Danda'u
mootota achitti bittinneessetti,
Zalmoon irratti cabbiin bu'e.
- 15 Yaa tulluu Baashaan, yaa tulluu surra qabeessa,
yaa Tulluu Baashaan, yaa tulluu fiixee baay'ee qabu,
- 16 yaa tulluu fiixee baay'ee qabdu,

- ati maaliif tulluu Waaqni bulchuuf filate,
iddoo WAAQAYYO bara baraan jiraatu sana
hinaaffaadhaan ilaalta?
- 17 Gaariwwan Waaqaa kuma hedduu dha;
isaan kumaatama yeroo kumaatamaa ti;
Goftaanis Siinaadhaa gara iddoo qulqulluu dhufeera.
- 18 Ati yommuu ol gubbaa baatetti
boojuu baay'ee fudhate;
yaa WAAQAYYO, yaa Waaqi, ati achi jiraachuuf jettee,
namoota irraa, fincilitoota irraas kennaa fudhatte.
- 19 Goftaan guyyuma guyyaan ba'aa keenya baatu,
Waaqni Fayyissaa keenya ta'e sun haa eebbifamu.
- 20 Waaqni keenya Waaqa fayyinaa ti; du'a jala ba'uunis
WAAQAYYO Goofticha biraa dhufa.
- 21 Waaqni dhugumaan mataa diina isaa,
gubbee mataa warra cubbuu isaaniitti fufanii
kan rifeensa qabu ni caccabsa.
- 22 Goftaan akkana jedha; "Ani deebisee Baashanii isaan nan fida;
tuujuba galaanaa keessaas deebisee isaan nan fida;
- 23 kunis akka ati dhiiga diinota keetii miilla keetiin borcituuf;
arrabni saroota keetiis akka qooda isaanii qabaatuuf."
- 24 Yaa Waaqayyo, hiriirri kee mul'ateera;
hiriirri Waaqa kootiitii fi mootii kootii iddoo qulqulluutti ol galeera.
- 25 Fuula duraan faarfattoota,
dugda duubaan immoo warra muuziiqaa taphatantu ture;
dubartoonni dibbee rukutani gidduu isaanii turan.
- 26 Waldaa guddaa keessatti Waaqa jajadhaa;
yaa 'ii Israa'el keessattis WAAQAYYON jajadhaa.
- 27 Beniyaam gosti xinnichi isaan dura deema;
tuunni ilmaan mootota Yihuudaas achi turan;
ilmaan mootota Zebuuloonii fi Niftaalemis achi turan.
- 28 Yaa Waaqayyo, humna kee ajaji;
yaa Waaqa keenya, akkuma duraan goote sana
jabina kee nu argisiisi.
- 29 Sababii mana qulqullummaa keetii kan Yerusaleem keessaatiif
mootonni kennaa siif fidu.
- 30 Bineensota shambaqqoo keessaa,
karra korommii jabboota sabootaa keessaas ifadhu.
Warra meetii fidan gad deebisi.
Warra waraanatti gammadanis bittinneessi.
- 31 Ergamoonni Gibxi ni dhufu;
Itophiyaanis dafttee harka ishee Waaqatti bal'ifatti.
- 32 Yaa mootummoota lafaa, Waaqa faarfadhaa;
faarfannaa galataas Goftaadhaaf faarfadhaa;
- 33 isa samiiwwan durii keessa gulufu,
isa sagalee jabaadhaan qaqaawweessa'u sana faarfadhaa.
- 34 Waaqa ulfinni isaa Israa'el irra jiru,
isa miidhaginni isaa
samiiwwan keessa jiru sana humna isaa labsaa.
- 35 Yaa Waaqayyo, ati iddoo qulqullummaa keetiitti sodaachisaa dha;
Waaqni Israa'el saba isaatiif humnaa fi jabina ni kenna.

Waaqni haa eebbifamu!

Faaruu Boo'ichaa

Faarfannaa 69

Dura bu'aa faarfattootaatiif. Yeedaloo "Daraaraatiin." Faarfannaa Daawit.

¹ Yaa Waaqi, ati na baasi;

bishaan ol dhufee morma na ga'eeraatii.

² Ani raaree keessa, lafa iddoon miilla dhaabatan
hin jirre keessa seeneera.

Ani tuujuba bishaanii keessa seeneera;
lolaanis narra garagaleera.

³ Ani iyyuudhaan dadhabeera;
laagaan koo babbaqaqera;
iji koo, Waaqa koo eeggachuudhaan dadhabeera.

⁴ Warri lafumaa ka'anii na jibban
rifeensa mataa kootii caalaa baay'atu;

warri na ajjeesuu barbaadan,
warri akkasumaan diina koo ta'an baay'ee dha.

Ani akkan waan hin hatin
deebisu dirgameera.

⁵ Yaa Waaqi, ati gowwummaa koo ni beekta;
yakki koos si duraa hin dhokatu.

⁶ Yaa Gooftaa, WAAQAYYO Waan Hunda Dandeessu,
warri abdi sirra kaa'atan,
sababii kootiif hin qaana'in;

yaa Waaqa Israa'el, warri si barbaadan,
sababii kootiif hin qaaneffamin.

⁷ Ani siif jedhee tuffii obseeraatii;
qaaniinis fuula koo haguugeera.

⁸ Ani obbolloota kootti keessummaa,
ilmaan haadha kootiitis alagaa dha;

⁹ Hinaaffaan mana keetii na guggubeeraatii;
arrabsoon warra si arrabsaniis narra bu'eera.

¹⁰ Boo'uu fi soomuun koo,
arrabsoo natti ta'e.

¹¹ Yommuu ani wayyaa gaddaa uffadhetti,
namoonni natti qoosu.

¹² Warri karra dura tataa'an natti qoosu;
machooftannis waa'ee kootiin sirbu.

¹³ Ani garuu yaa WAAQAYYO,
yeroo ati filattutti sin kadhada;

yaa Waaqi, jaalala kee guddichaan
fayyina kee kan dhugaatiinis deebii naaf kenni.

¹⁴ Akka ani hin liqimfamneef,
raaree keessaa na baasi;

warra na jibban jalaa,
bishaanota gad fagoo keessaas na baasi.

¹⁵ Ati akka lolaan na hin fudhanne,
akka tuujubni na hin liqimsine,
akka boollis afaan isaa natti hin cufanne godhi.

¹⁶ Yaa WAAQAYYO, gaarummaa jaalala keetiitiin
deebii naaf kenni;
araara kee guddichaanis natti garagali.

¹⁷ Fuula kee tajaajilaa kee duraa hin dhokfatin;
waan ani rakkina keessa jiruuf dafiitii deebii naaf kenni.

¹⁸ Natti dhi'aadhuutii na furi;
xiiqii diinota kootiif jedhii na baasi.

¹⁹ Ati akka ani hammam tuffatamee,
salphifamee fi akka ani qaaneffame ni beekta;
diinonni koo hundinuus fuula koo dura jiru.

²⁰ Arrabsoon garaa koo cabse;
anis abdi kutadheera.

Ani nama garaa naaf laafu nan barbaade; garuu nan dhabe;

- nama na jajjabeessus nan barbaade;
garuu tokko illee hin arganne.
- 21 Nyaata kootti hadhooftuu makan;
akka ani dhuguuf immoo waan dhangaggaa'aa naa kennan.
- 22 Maaddiin isaanii iddaa isaanitti haa ta'u;
adabaa fi kiyyoo isaanitti haa ta'u.
- 23 Akka arguu hin dandeenyeef iji isaanii haa haguuggamu;
dugdi isaaniis bara baraan haa goophatu.
- 24 Dheekkamsa kee isaan irratti dhangalaasi;
aariin kee boba'aan sunis isaan irra haa bu'u.
- 25 Qe'een isaanii haa onu;
namni dunkaana isaanii keessa jiraatu tokko iyyuu hin hafin.
- 26 Isaan warra ati madeessite sana ni ari'atuutii;
waa'ee dhukkubbii warra ati miite sanaas ni odeessu.
- 27 Yakka irratti yakka isaanitti dabali;
isaan gara qajeelumma keetii hin dhufin.
- 28 Maqaan isaanii kitaaba jireenyaa keessaa haa haqamu;
qajeeltota wajjinis hin galmeeffamin.
- 29 Ani garuu dhiphinaa fi rakkina keessan jira;
yaa Waaqi, fayyinni kee ol na haa qabu.
- 30 Ani faarfannaadhaan maqaa Waaqaa nan galateeffadha;
galataanis ulfina nan kennaaf.
- 31 Kunis sangaa caalaa, korma gaanfaa fi
kottee qabu dhi'eessuu caalaa WAAQAYYON gammachiisa.
- 32 Hiyyeeyyiin waan kana arganii ni gammadu;
isin warri Waaqa barbaaddan garaan keessan jiraata haa ta'u!
- 33 WAAQAYYO rakkattoota ni dhaga'a;
namoota isaa warra hidhamanis hin tuffatu.
- 34 Samii fi lafti, galaanonni fi
wanni isaan keessa jiraatan hundinuu isa haa leellissan.
- 35 Waaqni Xiyoonin ni fayyisaatii;
magaalaawwan Yihuudaas deebisee ni ijaara.
- Sabni isaas achi qubata; ni dhaalas.
36 Sanyiin tajaajiltoota isaa magaalattii ni dhaalu;
warri maqaa isaa jaallatanis achi jiraatu.

Iyya Dhiphinaa

Faarfannaa 70

70:1-5 kwf - Far 40:13-17

Dura bu'aa faarfattootaatiif. Faarfannaa Daawiti.

- 1 Yaa Waaqi, na fayyisuuf ariifadhu;
yaa WAAQAYYO, na gargaaruuf dafii kottu.
- 2 Warri lubbuu koo galaafachuu barbaadan
hundinuu, haa qaana'an; haa burjaaja'anis;
warri badii koo hawwan hundi
qaana'anii duubatti haa deebi'an.
- 3 Warri, "Baga! Baga!" anaan jedhan
qaana'anii duubatti haa deebi'an.
- 4 Warri si barbaadan hundinuu garuu
sitti gammadanii haa lilchan;
warri fayyisuu kee jaallatan,
yeroo hunda, "Waaqni guddaa dha!" haa jedhan.
- 5 Ani garuu hiyyeessaa fi rakkataa dha;
yaa Waaqi, dafii na qaqqabi.
Ati gargaaraa koo fi fayyisaa koo ti;
yaa WAAQAYYO hin turin.

Kadhannaa Jaarsaa

Faarfannaa 71

71:1-3 kwf – Far 31:1-4

- 1 Yaa WAAQAYYO, ani kooluu sitti galeera;
ati gonkumaa na hin qaanessin.
- 2 Qajeelummaa keetiin na baasi; na oolchis;
gurra kee gara kootti qabi; na fayyisis.
- 3 Ati kattaa ani kooluu itti galu,
iddoo ani yeroo hunda itti baqadhu naa ta'i;
ati waan kattaa koo fi da'oo koo taateef,
na baraaruuf ajaja kenni.
- 4 Yaa Waaqa ko, harka nama hamaa,
qabaa nama jal'aatii fi gara jabeessaa keessaa na baasi.
- 5 Yaa WAAQAYYO Gooftaa, ati abdii kootii;
ijoollummaa kootii kaaftees ati Waaqa ani amanadhuu dha.
- 6 Ani gaafan dhaladhee jalqabee sitti irkadheera;
gadameessa haadha koo keessaas situ na baase.
Ani yeroo hunda sin galateeffadha.
- 7 Ani namoota baay'eedhaaf mallattoo ta'eera;
ati garuu da'oo koo isa jabaa dha.
- 8 Afaan koo guyyaa guutuu,
galataa fi ulfina keetiin guutama.
- 9 Yeroo ani dulloomutti ati na hin gatin;
yeroo humni koo dhumuttis na hin dhiisin.
- 10 Diinonni koo natti mari'atuutii;
warri na ajjeesuuf riphanii eeggatanis walii wajjin natti mari'atu.
- 11 Isaanis, "Waaqni isa dhiiseera;
namni isa oolchu tokko iyyuu hin jiruutii
faana bu'aatii qabaa" jedhu.
- 12 Yaa Waaqi, narraa hin fagaatin;
yaa Waaqa ko, na gargaaruuf daffii kottu.
- 13 Warri na himatan qaana'anii haa badan;
warri na miidhuu barbaadanis
tuffii fi salphina haa uffatan.
- 14 Ani garuu yeroo hundumaa abdii qaba;
ittuma caalchisees sin galateeffadha.
- 15 Ani yoo hammam akka inni ga'u beekuu baadhe illee,
afaan koo waa'ee qajeelummaa keetiitii fi
waa'ee fayyisuu keetii guyyaa guutuu ni odeessa.
- 16 Yaa WAAQAYYO Gooftaa, ani dhufee
hojii kee humna qabeessa sana nan odeessa;
ani qajeelummaa kee qofa labsa.
- 17 Yaa Waaqi, ati ijoollummaa kootii jalqabdee na barsiifteerta;
anis hamma har'aatti hojii kee dinqisiisaa sana nan labsa.
- 18 Yaa Waaqayyo, yeroo ani dulloomee mataan koo arrii ta'utti illee,
hamma ani humna kee dhaloota kanatti,
jabina kees dhaloota dhufuuf jiru hundatti labsuutti,
ati na hin dhiisin.
- 19 Yaa Waaqi, qajeelummaan kee samiiwwan bira ga'a;
ati waan gurguddaa hojjetteerta;
yaa Waaqi, kan akka keetii eenyu?
- 20 Ani rakkinaa fi dhiphina baay'ee na argisiifteerta;
ta'us jireenya koo deebiftee ni haaromsita,
qilee lafaa keessaas deebiftee ol na baafta.
- 21 Ulfina koo ni guddifta;
amma illee na jajjabeessita.

- 22 Yaa Waaqa ko, ani amanamummaa keetiif,
kiraaraan sin faarfadha;
Yaa Qulqullicha Israa'el
ani kiraaraan faarfannaa galataa siif faarfadha.
23 Yommuu ani faarfannaa galataa siif faarfadhutti, hidhiin koo,
lubbuun koo kan ati furtes guddisanii ni ililchu.
24 Warri na miidhuu barbaadan,
waan qaana'anii burjaaja'aniif
arrabni koo guyyaa guutuu
qajeelummaa kee odeessa.

Mooticha Abdiin Eegamu

Faarfannaa 72

Faarfannaa Solomoon.

- 1 Yaa Waaqi, murtii kee mootiidhaaf,
qajeelummaa kee immoo ilma mootiitiif kenni.
2 Innis saba keetiif qajeelummaadhaan murteessa;
hiyyeeyyiifis murtii qajeelaa kenna.
3 Tulluuwwan badhaadhummaa,
gaarran immoo ija qajeelummaa sabaaf haa fidan.
4 Inni hiyyeeyyii saba keessa jiraataniif ni falma;
ijoollee rakkattootaa ni oolcha;
cunqursituu immoo ni barbadeessa.
5 Namoonni hamma aduun jiraattuu fi hamma ji'i jiraatutti,
dhalootaa hamma dhalootaatti si sodaatu.
6 Inni akkuma bokkaa marga haamame irratti roobuu,
akkuma tiifuu lafa jiisuuttis ni dhufa.
7 Bara isaa keessa qajeelummaan ni daraara;
nageenyis hamma ji'i dhabamutti ni baay'ata.
8 Innis galaanaa hamma galaanaatti,
Laga Efraaxiisii hamma moggaa lafaatti ni bulcha.
9 Warri gammoojjii keessa jiraatan fuula isaa duratti ni sagadu;
diinonni isaas biyyoo arraabu.
10 Mootonni Tarshiishii fi mootonni
biyyoota qarqarawwan galaana fagoo gibira isaaf ni fidu;
mootonni Shebaatii fi mootonni Saabaa kenna ni fiduuf.
11 Mootonni hundinuu isaaf ni sagadu;
saboanni hundinuu isa ni tajaajilu.
12 Inni nama rakkatee gara isaatti iyyu,
hiyyeessaa fi nama gargaarsa hin qabne ni bararaatii.
13 Nama dadhabaa fi rakkataaf garaa lafa;
nama rakkataas du'a jalaa baasa.
14 Lubbuu isaaniis hacuuccaa fi cunqursaa jalaa ni fura;
dhiigni isaanii fuula isaa duratti gatii guddaa qabaatii.
15 Umuriin isaa haa dheeratu;
warqeen Shebaa isaaf haa kennamu.
Yeroo hunda Waaqa isaaf haa kadhatan;
guyyaa guutuus isa haa eebbisani.
16 Lafa irratti midhaan akka malee haa baay'atu;
fiixee tulluuwwanii irras asii fi achi haa raafamu.
Iji isaa akka Libaanoon haa tolu;
akka marga lafaas haa misu.
17 Maqaan isaa bara baraan haa jiraatu;
Akkuma aduus itti fufee haa jiraatu.
Saboanni hundinuu isaan ni eebbifamu;
jarris eebbifamaa jedhaanii isa waamu.

- 18 Inni kophaa isaa waan dinqii hojjetu,
WAAQAYYO Waaqni, Waaqni Israa'el haa eebbifamu.
19 Maqaa isaa ulfaataa sanaaf bara baraan galanni haa ta'u;
lafti hundinuu ulfina isaatiin haa guutamu.
Ameen; Ameen.

20 Kadhannaan Daawit ilma Isseey as irratti xumurame.

Kitaaba Sadaffaa

73

Faarfannaa 73-89

Mo'annoo Murtii Qajeelaa

Faarfannaa Asaaf.

- 1 Dhugumaan Waaqni Israa'eliif,
warra garaan isaanii qulqulluu ta'eef gaarii dha.
- 2 Ani garuu miilli koo gufachuu ga'ee,
faanni koos mucucaachuu ga'ee ture.
- 3 Ani yommuun badhaadhummaa hamootaa argetti,
of tuultotatti hinaafeen tureetii.
- 4 Isaan hin dhiphatan;
dhagni isaaniis fayyaa dha; cimaa dhas.
- 5 Rakkinni nama biraatti dhufu isaanitti hin dhufu;
isaan akka namoota kaanii dhukkubaan hin dha'aman.
- 6 Kanaafuu of tuulummaan faaya morma isaanii ti;
fincilas akka wayyaatti uffatu.
- 7 Iji isaanii coomee alatti dhiibama;
hamminni isaan garaatti yaadan dhuma hin qabu.
- 8 Isaan ni qoosu; hamminas ni dubbatu;
of tuulaa cunqursaadhaan nama doorsisu.
- 9 Afaan isaanii samii falmata;
arrabni isaaniis lafa dhaala.
- 10 Kanaafuu sabni gara isaaniitti dacha'ee
bishaan baay'ee dhuga.
- 11 Isaanis, "Waaqni akkamitti beekuu danda'aa?
Waaqni Waan Hundaa Oliy beekumsa qabaa?" jedhu.
- 12 Egaa namoonni hamoon akkana;
isaan yeroo hunda yaaddoo malee jiraatu;
badhaadhummaan is guddachaa deemu.
- 13 Yoos ani akkasumaan garaa koo qulqullinaan eeggadhee
harka koos akkasumaan dhiqadhe kaa!
- 14 Ani guyyaa guutuu dha'ameera;
ganama ganamas adabameera.
- 15 Ani utuu, "Akkana nan dubbadha" jedhee jiraadhee
silaa ijoollee kee nan yakkan ture.
- 16 Garuu yommuu ani waan kana hunda hubachuu yaaletti,
wannu kun hojii dadhabsisaa natti ta'e.
- 17 Kunis hamma ani iddoo qulqullummaa Waaqaa seenutti ture;
ergasiis ani galgala isaanii nan hubadhe.
- 18 Dhugumaan ati iddoo mucucaataa irra isaan dhaabde;
akka isaan kufanii caccabaniifis gad isaan darbatte.
- 19 Isaan akkamiin guutummaan guutuutti sodaadhaan fudhatamanii
akkuma tasaa barbadaa'an!
- 20 Akkuma abjuun yeroo namni hirribaa dammaqutti ta'u sana,
atis yaa Gooftaa, akkasuma yommuu ol kaatu,
hawwii garaa isaanii ni busheessita.

- 21 Yommuu lubbuun koo gadditee
onnoon koos waraanamtetti,
22 ani gowwaa fi wallaalaan ture;
fuula kee durattis akka horii nan ta'e.
- 23 Ta'us ani yeroo hunda si wajjinan jira;
atis harka koo mirgaa ni qabda.
24 Ati gorsa keetiin na qajeelchita;
ergasii immoo ulfinatti na galchita.
25 Ani samii keessaa eenyunan qaba?
Lafa irraas si malee homaa hin fedhu.
26 Foon koo fi onnoon koo dadhabuu danda'u;
Waaqni garuu jabina garaa koo ti;
bara baraanis inni qooda koo.
- 27 Warri sirraa fagoo jiran ni badu;
atis warra siif hin amanamne hunda ni balleessita.
28 Akka ani yaadutti garuu Waaqatti dhi'aachuun gaarii dha;
WAAQAYYO Gooftaa da'oo koo godhadheera;
ani hojii kee hunda nan labsa.

Boo'icha Waa'ee Diigamuu Mana Qulqullummaa

Faarfannaa 74

Maskiilii Asaaf.

- 1 Yaa Waaqi, ati maaliif bara baraan nu gatte?
Aariin kee maaliif hoolota ati bobbaafte irratti akka malee boba'a?
2 Saba ati dur filatte,
gosa dhaala keetii, warra ati furte,
Tulluu Xiyoon iddoo ati jiraattes yaadadhu.
3 Tarkaanfii kee gara waan bara baraan diigameetti qajeelfadhu;
diinni waan mana qulqullummaa keessa jiru hunda barbadeesseera.
- 4 Diinonni kee iddoo qulqulluu kee keessatti bookkisan;
mallattoo isaaniis mallattoo godhanii dhaabbatan.
5 Isaan nama bosona keessatti muka muruuf
qottoo ol fudhatu fakkaatu.
6 Isaanis waan soofame hunda,
qottoo fi burrusaan caccabsan.
7 Isaan mana qulqullummaa kee guban;
lafa jireenya Maqaa keetiis ni xureessan.
8 Garaa isaanii keessatti, "Nu guutumaan guutuutti
isaan barbadeessina!" jedhan.
Iddoo Waaqni biyyattii keessatti itti waaqeffamaa ture hundumas ni guban.
9 Mallattoon dinqii nuu hin kennamne;
si'achi raajiin tokko illee hin jiru;
wanni kun hamma yoomiitti akka turu
nu keessaa namni beeku hin jiru.
- 10 Yaa Waaqi, hamma yoomiitti diinni sitti qoosa?
Amajaajiinis bara baraan maqaa kee xureessaa?
11 Ati maaliif harka kee, harka kee mirgaa dachaafatta?
Harka kee bobaa jalaa baafadhuutii isaan barbadeessi!
- 12 Yaa Waaqi, ati durumaa jalqabdee mootii koo ti;
lafa irrattis hojii fayyinaa hojjetta.
13 Situ humna keetiin galaana gargar qoode;
ati bishaan keessattis mataa bineensa jawwee fakkaatuu caccabsite.
14 Situ mataa Lewaataan caccabsee nyaata godhee
uumamawwan gammoojjii jiraataniif kenne.
15 Situ burqaawwanii fi bishaan yaa'uuf karaa bane;
ati laga yeroo hunda yaa'u illee gogsiteerta.
16 Guyyaan kan kee ti; halkanis keetuma;

ati aduu fi ji'a uumteerta.

17 Situ daarii lafaa hunda dhaabe;
ati bonaa fi ganna uumteerta.

18 Yaa WAAQAYYO, akkamitti akka diinni sitti qoosu,
akkamitti akka namoonni gowwoonnis maqaa kee xureessan yaadadhu.

19 Lubbuu gugee keetii dabarsitee bineensa bosonaatti hin kennin;
jireenya saba kee hiyyoomee bara baraan hin irraanfatin.

20 Kakuu kee eegi;
iddoon lafaa dukkanaa 'aan hundinuu
gooliidhaan guutameeraatii.

21 Warri cunqurfaman qaana'anii duubatti hin deebi'in;
hiyyeeyyii fi rakkattoonni maqaa kee haa galateeffatan.

22 Yaa Waaqi ka'i; dubbii kees falmadhu;
akka gowwoonni guyyaa guutuu sitti qoosan yaadadhu.

23 Dhaadachuu diinota keetii, bookkisuu diina keetii
kan gargar hin cinne sana hin dagatin.

Abbaa Murtii Addunyaa Hundaa

Faarfannaa 75

Dura Bu'aa Faarfattootaatiif. Faarfannaa Yeedaloo, "Hin balleessin" jedhuun faarfatame. Faarfannaa Asaaf.

1 Yaa Waaqi, nu si galateeffanna;
sababii Maqaan kee dhi'oo ta'eef galata siif galchina;
namoonni waa'ee dinqii hojii keetii odeessu.

2 Ati akkana jetta; "Ani yeroo murteeffame nan filadha;
kan qajeelummaadhaan muru ana.

3 Yommuu laftii fi sabni ishee hundi raafamanitti,
kan utubaa ishee jabeessee qabu ana.

4 Ani of tuultotaan akkana nan jedha; 'Of hin jajinaa.'
Hamootaanis, 'Gaanfa keessan ol hin qabatinaa.

5 Gaanfa keessan samiitti hin kaasinaa;
morma keessan dheereffattanii hin dubbatinaa.' "

6 Ulfinni ba'a biiftuutii yookaan lixa biiftuutii
yookaan lafa onaatii hin dhufuutii.

7 Garuu kan murtii kennu Waaqi;
inni nama tokko gad buusa; kaan immoo ol baasa.

8 Harka WAAQAYYOO keessa,
xoofoo wayinii urgooftuudhaan walitti makame
kan hoomachaan guutame tokkodu jira;
inni wayinii sana gad naqa;
hamoonni lafaa hundinuu utuu siicoo isaa illee hin hambisin
xuruurfatanii dhugu.

9 Ani garuu bara baraan waan kana nan labsa;
Waaqa Yaaqoobis nan faarfadha.

10 Gaanfa hamoota hundaa nan caccabsa;
gaanfi qajeeltotaa garuu ol ol jedha.

Faarfannaa Waaqa Sodaatamuu Qabuuf Faarfatame

Faarfannaa 76

Dura Bu'aa Faarfattootaatiif. Mi'a Ribuuu. Faarfannaa Asaaf.

1 Yihuudaa keessatti Waaqni beekamaa dha;
maqaan isaas Israa'el keessatti guddaa dha.

2 Dunkaanni isaa Saalem keessa,
iddoon jireenya isaa Xiyyoon keessa jira.

3 Innis achitti xiyya boba'uu fi gaachana, goraadee fi
meeshaawwan waraanaa caccabse.

- 4 Ati ifa uffattee miidhagdeerta;
ati tulluuwwan bara baraa caalaa Surra qabeessa.
- 5 Gootonni booji'amaniiru;
hirribaanis fudhatamaniiru;
duultota keessaas namni tokko iyyuu
harka sochoofachuu hin dandeenye.
- 6 Yaa Waaqa Yaaqoob, ifannaa keetiin fardeenii
fi warri fardeen yaabbatan of wallaalaniiru.
- 7 Si'i qofatu sodaatamuu qaba.
Yommuu ati aartu eenyutu fuula kee dura dhaabachuu danda'aa?
- 8 Ati samii irraa murtii kennite;
laftis ni sodaatte; ni cal'iftes;
- 9 yaa Waaqi, wanni kunis yommuu ati murtii kennuudhaaf,
rakkattoota biyyattii fayyisuuf kaatetti ta'e.
- 10 Dheekkamsi ati namatti dheekkamtu dhugumaan ulfina siif fida;
warra dheekkamsa kee irraa hafanis ni hidhatta.
- 11 WAAQAYYO Waaqa keessaniif wareegaa; wareegichas guuttadhaa;
warri naannoo isaa jiraatan hundinuus
Waaqa sodaatamuu qabu sanaaf kennaawwan haa fidan.
- 12 Inni hafuura bulchitootaa ni cabsa;
mootonni lafaas isa sodaatu.

Seenaa Israa'el Yaaduu

Faarfannaa 77

Dura Bu'aa Faarfattootaatiif. Yeduutuuniif. Faarfannaa Asaaf.

- 1 Ani gargaarsaaf gara Waaqaatti nan iyyadhe;
ani akka Waaqni na dhaga'uuf nan iyyadhe.
- 2 Yeroo rakkina kootiitti Gooftaa nan barbaaddadhe;
halkanis utuu hin dadhabin harka koo nan diriirfadhe;
lubbun koos jajjabaachuu didde.
- 3 Yaa Waaqi, ani yommuun si yaadadhu nan aada;
ani irra deddeebi'ee nan yaade; hafuurri koos ni laafe.
- 4 Ati akka iji koo hin dunuufanne goote;
ani akka malee lubbamee dubbachuu iyyuu dadhabe.
- 5 Ani waa'ee bara durii,
waa'ee waggoota durii duriis nan yaade;
- 6 ani halkaniin faarfannaa koo nan yaadadhe.
Ani irra deddeebi'ee na yaade;
hafuurri koos akkana jedhee qorate:
- 7 "Gooftaan bara baraan nama gataa?
Inni deebi'ee garaa hin laafuu?
- 8 Araarri isaa bara baraan badee?
Waadaan isaa bara baraan guutamuu dhabee?
- 9 Waaqni arjoomuu irraanfateeraa?
Inni aariidhaan gara laafina isaa dhiiseeraa?"
- 10 Anis, "Harki mirgaa kan Waaqa Waan Hundaa Olii
jijjiirameera jedhee yaaduun koo, dadhabii koo ti" nan jedhe.
- 11 Ani hojii WAAQAYYOO nan yaadadha;
dhugumaan dinqii kee kan durii nan yaadadhaa.
- 12 Ani waan ati hojjetta hunda irra deddeebi'ee nan yaada;
waa'ee hojii keetii illee nan dubbadha.
- 13 Yaa Waaqi, karaan kee qulqulluu dha.
Waaqni guddaan akka Waaqa keenyaa eessa jira?
- 14 Ati Waaqa hojii dinqii hojjettuu dha;
saboota gidduuttis humna kee ni argisiifta.
- 15 Irree kee cimaadhaan saba kee,

sanyii Yaaqoobii fi sanyii Yoosef furteerta.

- ¹⁶ Yaa Waaqi, bishaanonni si argan;
bishaanonni si arganii sodaatan;
tuujubawwan ni hollatan.
- ¹⁷ Duumessi bishaan gad dhangalaase;
samiiwwan ni qaqaawweessa'an;
xiyyi kees qixa hundaan balaqqise.
- ¹⁸ Bakakkaan kee bubbee hamaa keessaa dhaga'ame;
balaqqeesi kee addunyaa ibse;
laftis hollattee sochoote.
- ¹⁹ Daandiin kee galaana keessa,
karaan kee immoo bishaanota gurguddaa keessa ba'a;
garuu faanni kee hin argamne.
- ²⁰ Ati harka Museetii fi harka Arooniin,
saba kee akka bushaayeetti geggeessite.

Seenaa Saba Israa'el

Faarfannaa 78

Maskiilii Asaaf.

- ¹ Yaa saba ko, barsiisa koo dhaga'aa;
dubbii afaan koo dhaggeeffadhaa.
- ² Ani fakkeenyaan afaan koo nan banadha;
waan durumaa jalqabee dhokfames nan dubbadha.
- ³ Kunis waanuma nu dhageenyee fi waanuma nu beeknu,
waan abbootiin keenya nutti himanii dha.
- ⁴ Nus waan kana ijoollee isaanii duraa hin dhoksinu;
hojii WAAQAYYOO ulfina qabeessa sana,
humna isaatii fi dinqii inni hojjete,
dhaloota itti aanutti ni himna.
- ⁵ Inni Yaaqoobiif sirna dhaabe;
Israa'eliif immoo seera kenne;
waan kana illee akka isaan
ijoollee isaanii barsiisaniif,
abbootii keenya ajaje;
- ⁶ kunis akka dhaloonni itti aanu beeku,
akka ijoolleen amma iyyuu hin dhalatin beekan,
isaanis akka ijoollee isaaniitti dabarsanii himaniif.
- ⁷ Yoos isaan Waaqa amanatu;
ajaja isaas ni eegu malee hojii isaa hin irraanfatan.
- ⁸ Isaan akka abbootii isaanii,
akka dhaloota mata jabeessaa fi fincilaa,
warra garaan isaanii Waaqaaf hin ajajamnee,
akka warra hafuurri isaanii isaaf hin amanamin sanaa hin ta'an.
- ⁹ Namoonni Efreem xiyya qabatani turan;
ta'us gaafa lolaa duubatti deebi'an.
- ¹⁰ Isaan kakuu Waaqaa hin eegne;
seera isaattis buluu didan.
- ¹¹ Isaan hojii inni hojjete,
dinqii inni isaanitti argisiises ni irraanfatan.
- ¹² Inni fuula abbootii isaanii duratti,
biyya Gibxi kutaa Zoo'aanitti waan nama dinqisiisu hojjete.
- ¹³ Inni galaana gargar qoodee gidduun isaan dabarse;
bishaan sanas akkuma keenyan manaa dhaabachiise.
- ¹⁴ Guyyaa duumessaan, halkan guutuu immoo
ifa ibiddaatiin isaan geggeesse.
- ¹⁵ Inni gammoojjii keessatti kattaa dayyaasee
bishaan akka galaanaa baay'atu isaanii kenne.
- ¹⁶ Kattaa keessaa burqaa burqisiisee
akka bishaan akkuma lagaatti yaa'u godhe.

- 17 Isaan garuu gammoojjii keessatti Waaqa Waan Hundaa Oliitti fincilan;
ittuma fufaniis isatti cubbuu hojjetan.
- 18 Isaan nyaata dharra'anii, "Fidi" jechuudhaan
beekumsa Waaqaa qoran.
- 19 Akkana jedhanii Waaqa hamatan;
"Waaqni gammoojjii keessatti maaddii qopheessuu danda'aa?"
- 20 Inni kattaa rukunnaan bishaan humnaan keessaa burqe;
burqaan guutee irraan dhangala'e.
Garuu inni nyaata nuu kennuu danda'aa?
Saba isaatiifis foon kennuu danda'aa?"
- 21 WAAQAYYOO yommuu waan kana dhaga'etti baay'ee aare;
Yaaqoob irratti ibiddi isaa ni qabsiifame;
dheekkamsi isaas Israa'elitti dhufe;
- 22 isaan Waaqa hin amananneetii;
fayyisuu isaattis hin amanne.
- 23 Inni garuu samii gubbaatiif ajaja kenne;
balbala samiis ni bane;
- 24 akka isaan nyaataniif mannaa gad roobseef;
midhaan samiis isaaniif kenne.
- 25 Namoonni buddeena ergamoota Waaqayyoo nyaatan;
inni waan isaan nyaatanii quufan ergeef.
- 26 Inni akka bubbeen ba'a biiftuu samii keessaa bubbisu godhe;
bubbee kibbaas humna ofii isaatiin oofe.
- 27 Foon akkuma awwaaraatti, simbirroota barrisanis
akkuma cirracha galaanaatti gad isaaniif roobse.
- 28 Innis akka isaan qubata isaanii keessatti
naannoo dunkaanota isaaniitti gad harca'an godhe.
- 29 Isaanis nyaatanii quufan;
inni waan isaan dharra'an isaaniif kenneeraatii.
- 30 Garuu utuu isaan nyaata dharra'an sana hin quufin,
utuma nyaanni sun afaan isaanii keessa jiruu,
- 31 dheekkamsi Waaqaa isaanitti dhufe;
innis isaan keessaa warra jajjabeeyyii galaafate;
dargageeyyii Israa'elis ni fixe.
- 32 Isaan waan kana hunda irra darbanii cubbuu hojjechuutti fufan;
dinqii isaattis hin amanne.
- 33 Kanaafuu inni akka barri isaanii faayidaa malee darbu,
akka waggoonni isaaniis sodaadhaan dhuman godhe.
- 34 Yeroo Waaqni isaan ajjeese kamitti iyyuu,
isaan isa barbaaddatan;
isaan ammas fedhiidhaan gara isaatti deebi'an.
- 35 Akka Waaqni Kattaa isaanii ta'e,
akka Waaqni Waan Hundaa Olii Furiis isaanii ta'e yaadatan.
- 36 Isaan garuu afaan isaaniitiin isa saadan;
arraba isaaniitiinis isa soban;
- 37 garaan isaanii isaaf amanamaa hin turre;
isaan kakuu isaatiif hin amanamne.
- 38 Inni garuu araara qabeessa waan ta'eef,
cubbuu isaanii ni dhiiseef malee isaan hin fixe.
Inni yeroo yerootti aarii isaa ittifate;
dheekkamsa isaa hundaas hin kakaafne.
- 39 Innis akka isaan nama du'a hin oolle,
qilleensuma darbu kan deebi'ee hin dhufne ta'an yaadate.
- 40 Isaan hammam gammoojjii keessatti isatti fincilanii
gammoojjii keessattis isa gaddisiisan
- 41 Isaan ammumaa amma Waaqa qoran;
Qulqullicha Israa'el sanas ni aarsan.
- 42 Isaan humna isaa yookaan guyyaa inni itti
diinota isaanii jalaa isaan baase hin yaadanne.
- 43 Guyyaa inni itti biyya Gibxi keessatti mallattoo isaa,

- kutaa Zoo'aan keessatti immoo dinqii isaa argisiise isaan hin yaadanne.
- 44 Inni lageen isaanii dhiigatti geeddare;
isaanis burqaawwan isaanii dhuguu hin dandeenye.
- 45 Innis tuuta tisiisaa kan isaan balleessu,
fattee isaan barbadeessu itti erge.
- 46 Midhaan isaanii ilmaan hawwaannisaatiif,
bu'aa dadhabbii isaanii immoo hawwaannisaaf kenne.
- 47 Muka wayinii isaanii cabbiidhaan,
harbuu isaanii immoo dhaamocha hamaan dha'e.
- 48 Loon isaanii cabbiif,
horii isaanii immoo bakakkaaf dabarsee kenne.
- 49 Inni ergamoota badiisa fidan isaanitti erguudhaan
aarii isaa sodaachisaa, dheekkamsa isaa,
dallansuu isaatii fi rakkoo isaanitti gad lakkise.
- 50 Inni aarii isaatiif daandii qopheesse;
lubbuu isaanii dabarsee dha'ichatti kenne malee
du'a isaan hin oolchine.
- 51 Hangafuuta Gibxi hunda,
ilmaan jalqabatti dhalatanis dunkaana Haam keessatti dha'e.
- 52 Saba isaa garuu akkuma nama bushaayee bobbaasuutti achi baase;
akkuma hoolaas gammoojjii keessa isaan geggeesse.
- 53 Inni nagaadhaan isaan geggeesse;
kanaafuu isaan homaa hin sodaanne;
diinota isaanii garuu galaanatu liqimse.
- 54 Innis gara daarii biyya isaa qulqulluutti,
gara biyya gaaraa kan harki isaa mirgaa fudhateetti isaan galche.
- 55 Inni ormoota isaan duraa ari'e;
lafa jaraas dhaala godhee isaanii qoode;
gosa Israa'elis dunkaana isaanii keessa qubachiise.
- 56 Isaan garuu Waaqa qoran;
Waaqa Waan Hundaa Oliitti fincilan;
ajaja isaas hin eegne.
- 57 Akkuma abbootii isaanii duubatti deebi'an; amanamuus ni didan;
akka iddaa micciiramaattis jajal'atan.
- 58 Isaan iddoowwan sagadaa isaanii kanneen gaarran irraatiin isa aarsan;
waaqota isaanii tolfamoodhaanis hinaaffaadhaaf isa kakaasan.
- 59 Waaqnis yeroo isaan dhaga'etti akka malee dheekkame;
guutumaan guutuuttis Israa'elin gate.
- 60 Innis iddoo jireenya isaa kan Shiiloo keessaa,
dunkaana inni namoota gidduu dhaabbate sanas ni dhiise.
- 61 Humna isaa boojiutti,
ulfina isaa immoo harka diinaatti dabarsee kenne.
- 62 Saba isaa dabarsee goraadeef kenne;
handhuuraa isaattis akka malee dheekkame.
- 63 Dargaggoota isaanii ibiddata fixe;
durboota isaaniitiifis sirbi heerumaa hin sirbamne;
- 64 luboonni isaanii goraadeedhaan dhuman;
niitonni dhirsoonni irraa du'an immoo boo'uu hin dandeenye.
- 65 Gooftaanis akkuma waan hirribaa dammaquutti,
akkuma goota sababii wayiniitiin iyyuuttis dammaqe.
- 66 Inni diinota isaa rukutee duubatti deebise;
qaanii bara baraa keessas isaan buuse.
- 67 Dunkaanota Yoosef ni tuffate;
gosa Efreemis hin filanne;
- 68 inni garuu gosa Yihuudaa,
Tulluu Xiyoon kan jaallatu sana ni filate.
- 69 Mana qulqullummaa isaa akka samii ol dheeraatti,
akka lafa bara baraan hundeesseettis ijaare.
- 70 Inni Daawit garbicha isaa ni filate;
dallaa hoolootaa keessaas isa waammate;

⁷¹ akka inni saba isaa Yaaqoobin,
handhuuraa isaa Israa'elin tiksuuf jedhee
hoolota tiksuu irraa isa fide.

⁷² Daawitiz garaa qajeelaadhaan isaan tikse;
ogummaa harka isaatiinis isaan dura bu'e.

Faaruu Boo'ichaa Biyyoolessaa

Faarfannaa 79

Faarfannaa Asaaf.

¹ Yaa Waaqi, namoonni ormaa handhuuraa kee qabataniiru;
mana qulqullummaa kee qulqullicha xureessaniiru;
Yerusaaleminis barbadeessaniiru.

² Akka isaan nyaata isaaniif ta'aniif,
reeffa garboota keetii allaattii samiitiif,
foon qulqulloota keetii immoo bineensota lafaatiif kennaniiru.

³ Dhiiga isaaniis naannoo Yerusaalemitti
akkuma bishaanii dhangalaasan;
namni isaan awwaalu tokko illee hin argamne.

⁴ Ollaa keenya biratti maqaan nu badeera;
warra naannoo keenya jiran birattis nama tuffii fi kolfaa taane.

⁵ Yaa WAAQAYYO, kun hamma yoomiitti?
Ati hamma bara baraatti aartaa?
Hinaaffaan kees hamma yoomiitti akka ibiddaa boba'a?

⁶ Dheekkamsa kee sana saboota si hin beekne irratti,
mootummoota maqaa kee hin waammanne irratti
gad dhangalaasi;

⁷ isaan Yaaqoobin liqimsaniiruutii;
iddoo jireenya isaas balleessaniiru.

⁸ Cubbuu abbootii keenyaa nutti hin herregin;
waan nu baay'ee gad deebifamneef,
araarri kee dafee nu bira haa ga'u.

⁹ Yaa Waaqi Fayyisaa keenya,
ulfina maqaa keetiitiif jedhii nu gargaari;
maqaa keetiif jedhiitii nu oolchi;
cubbuu keenya illee nuu dhiisi.

¹⁰ Ormoonni maaliif,
"Waaqni isaanii eessa jira?" jedhu ree?

Dhiiga tajaajiltoota keetii kan dhangalaafame sanaaf,
akka haaloo baaftu ija keenya duratti saboota gidduutti beeksisi.

¹¹ Aaduun hidhamtootaa fuula kee dura haa ga'u;
jabina irree keetiitiin warra duuti itti murame oolchi.

¹² Yaa Gooftaa, arraba isaan ittiin si arrabsan,
dachaa torba godhiitii ollaa keenyatti deebisi.

¹³ Yoos nu sabni kee, hoolonni tika keetii,
bara baraan si jajanna;

dhalootaa hamma dhalootaattis,
galata kee ni odeessina.

Haaromfama Israa'eliif Waaqa kadhachuu

Faarfannaa 80

Dura Bu'aa Faarfattootaatiif. Yeedaloo, "Daraaraa Kakuutiin" Faarfataame. Faarfannaa Asaaf.

¹ Yaa tiksee saba Israa'el,
kan akkuma bushaayeetti Yoosefin geggeessitu nu dhaga'i;
ati kan kiirubeel gidduu teessoo irra teessu, ifiitii mul'adhu.

² Fuula Efreem, Beniyaamii fi Minaasee duratti
humna kee sochoosi; kottuutii nu fayyisi.

- 3 Yaa Waaqi, iddoo keenyatti nu deebisi;
akka fayyinuufis fuula kee nurratti ibsi.
- 4 Yaa WAAQAYYO, Waaqa Waan Hunda Dandeessu,
ati hamma yoomiitti kadhannaa saba keetiitti aarta?
- 5 Ati buddeena imimmaanii isaan nyaachifte;
imimmaan waciiiti guutuus isaan obaafte.
- 6 Ati akka olloonna keenya nu tuffatan goote;
diinonni keenyas nutti qoosu.
- 7 Yaa Waaqa Waan Hunda Dandeessu,
iddoo keenyatti nu deebisi;
akka nu fayyinuufis fuula kee nurratti ibsi.
- 8 Ati muka wayinii biyya Gibxii buqqiftee fidde;
ormootas ariitee muka sana dhaabde.
- 9 Mukichaafis lafa qopheessite;
mukni sunis hidda gad fageeffatee biyyattii guute.
- 10 Tulluuwwan gaaddisa isaatiin,
birbirsawwan gurguddaanis
dameewwan isaatiin haguugaman.
- 11 Innis dameewwan isaa gara Galaanaatti,
lata isaas hamma Lagaatti diriirfate.
- 12 Yoos ati maaliif akka namni achiin darbu hundinuu
ija isaa ciratu gochuuf jettee dallaa isaa diigde ree?
- 13 Kormi booyyee bosona keessaa ba'ee isa ni balleessa;
bineensi dirrees isa ni nyaata.
- 14 Yaa Waaqa Waan Hunda Dandeessu,
si kadhannaa gara keenyatti deebi'!
Samii irraa gad ilaalii argi!
Muka wayinii kana eegi;
15 mukni kun muka wayinii kan harki kee mirgaa dhaabee dha;
biqiltuu ati ofii keetiif guddifattee dha.
- 16 Wayiniin kee ciramee ibiddaan gubameera;
sabni kees dheekkamsa keetiin bada.
- 17 Harki kee namicha karaa harka kee mirgaa jiru irra,
ilma namaa kan ati ofii keetiif guddifatte irra haa boqotu.
- 18 Yoos nu sirraa hin garagallu;
jireenya nuu kenni; nus maqaa kee ni waammannaa.
- 19 Yaa WAAQAYYO, Waaqa Waan Hunda Dandeessu
iddoo keenyatti nu deebisi;
akka nu fayyinuufis fuula kee nurratti ibsi.

Ayyaana Daasiitiif

Faarfannaa 81

Dura Bu'aa Faarfattootaatiif. Faarfannaa Asaaf Kan *Gitiitiidhaan* Faarfatamu.

- 1 Waaqa jabina nuu ta'eef gammachuudhaan faarfadhaa;
Waaqa Yaaqoobiitiif gammachuudhaan ililchaa!
- 2 Faarfachuu jalqabaa; dibbees rukutaa;
baganaa fi kiraara sagalee gaarii qabu rukutaa.
- 3 Yeroo Baatiin dhalattu, yommuu ji'i goobanutti,
guyyaa ayyaana keenyaa malakata afuufaa;
- 4 kun seera Israa'eliif kenname,
ajaja Waaqa Yaaqoob.
- 5 Inni yeroo biyya Gibxi dha'uuf ba'etti,
waan kana Yoosefiif seera godhee dhaabe.

Anis afaan duraan hin beekin tokko dhaga'e.

6 Innis akkana jedhe;

“Ani gatiitii isaanii irraa ba’aa buuseera;
harki isaanis guuboo baachuu jalaa ba’e.

7 Ati dhiphina kee keessatti na waammatte; anis sin oolche;
anis lafa bakakkaan itti dhokatu keessaa deebii siifin kenne;
bishaan Mariibaa birattis sin qore.

8 “Yaa saba koo dhaga’i; ani siin akeekkachiisa;
yaa Israa’el ati utuu na dhaggeeffate!

9 Waaqni ormaa tokko iyyuu isin gidduu hin jiraatin;
ana malee waaqa biraa hin waaqeffatin.

10 Ani WAAQAYYO Waaqa kee,
kan Gibxii baasee isin fidee dha.
Afaan kee bal’isii banadhu; ani nan guutaa.

11 “Sabni koo garuu na hin dhaggeeffanne;
Israa’el anaaf hin bulle.

12 Kanaafuu ani akka isaan karaa fedhii isaanii deemaniif
dabarsee mata jabina isaaniitti isaan kenne.

13 “Utuu sabni koo na dhaggeeffatee,

utuu Israa’el karaa koo irra deemee jiraatee,

14 ani silaa akkam dafee diinota isaanii jilbeenfachiisee
harka koos amajaajota isaaniitti nan kaasa ture!

15 Warri WAAQAYYON jibban fuula isaa duratti ni gugguufu;
adabbiin isaaniis bara baraan itti fufa.

16 Ani garuu qamadii qulqulluu isin soora;
damma kattaa keessaa baafames isinan quubsa.”

Abbootii Murtii Kanneen Murtii Jal’isan

Faarfannaa 82

Faarfannaa Asaaf.

1 Waaqni, waldaa waaqotaa gidduu dhaabata;
“waaqota” gidduuttis murtii kenna; akkanas jedha:

2 “Isin hamma yoomiitti seera jal’iftu?

Hamma yoomiittis jal’ootaaf dhaabattu?

3 Dadhabdootaa fi ijoollee abbaa hin qabneef murtii qajeelaa kenna;
mirga hiyyeeyyiitii fi cunqurfamtootaas eegsisaa.

4 Warra dadhabaa fi rakkattoota baraaraa;
harka jal’ootaatiis isaan baasaa.

5 “Isaan homaa hin beekan; homaa illee hin hubatan.

Isaan dukkana keessa jiraatu;

hundeen lafaa hundinuu ni raafame.

6 “Anis, ‘Isin, “waaqota;”

hundi keessan ilmaan Waaqa Waan Hundaa Olii ti’ jedheera.

7 Ta’us isin akkuma namatti ni duutu;
akkuma bulchitoota kamii iyyuu ni kuftu.”

8 Yaa Waaqi ka’i; lafatti muri;

sabni hundinuu kan keetiitii.

Kadhannaa Diinota Israa’el Irratti Dhi’aate

Faarfannaa 83

Faarfannaa Asaaf.

1 Yaa Waaqi gab hin jedhin;

yaa Waaqi, hin cal’isin;

akkasumattis hin dhiisin.

2 Diinonni kee akkam akka kaka’an,

warri si jibbanis akkam akka mataa ol qabatan ilaali.

- ³ Isaan saba keetti daba karoofatu;
warra ati eegdutti mari'atu.
- ⁴ Isaanis, "Kottaa akka maqaan Israa'el lammata hin yaadatamneef,
akka isaan saba hin taaneef isaan barbadeessinaa" jedhu.
- ⁵ Isaan yaada tokkoon walii galu;
sittis ni gurmaa'u;
- ⁶ isaanis dunkaanota Edoom, Ishmaa'eeloota,
Mo'aabii fi gosa Aggaar;
- ⁷ Gebaal, Amoonii fi Amaaleq,
Filisxeemii fi namoota biyya Xiiroos wajjin turan.
- ⁸ Warri Asooriis, ilmaan Looxiitiif irree jabaa
ta'uudhaaf isaanitti makaman.
- ⁹ Ati akkuma Midiyaanin goote,
akkuma laga Qiishooniitti Siisaaraa fi Yaabiinin goote sana isaan godhi;
- ¹⁰ isaan Eendooritti dhumani
akkuma kosii lafaa ta'an.
- ¹¹ Gurguddoota isaanii akka Hereebiitii fi Ze'eeb,
ilmaan mootota isaanii immoo akka Zebaa fi Zalmunaa godhi;
- ¹² isaan warra, "Kottaa, lafa tika Waaqaa fudhannee
kan dhuunfaa keenyaa godhannaa" jedhanii dha.
- ¹³ Yaa Waaqa ko, akka awwaara bubbleen fudhatuu,
akka habaqqii qilleensi bittinneessuu isaan godhi.
- ¹⁴ Akkuma ibiddi bosona balleessu,
yookaan akkuma arrabni ibiddaa tulluuwwan gubu,
- ¹⁵ atis akkasuma aarii keetiin isaan gugsi;
bubbee keetiin isaan sodaachisi.
- ¹⁶ Yaa WAAQAYYO, akka isaan maqaa kee barbaaddataniif,
fuula isaanii qaaniin haguugi.
- ¹⁷ Isaan yeroo hunda qaana'anii haa dhiphatan;
salphinaanis haa badan.
- ¹⁸ Isaan akka ati kan maqaan kee WAAQAYYO ta'e sun qofti,
lafa hundumaa irratti Waaqa Waan Hundaa Olii taate haa beekan.

Faarfannaa Yeroo Mana Qulqullummaa Dhaqan Faarfatamu

Faarfannaa 84

Dura Bu'aa Faarfattootaatiif. Kan *Gitiitiidhaan* Faarfatamu. Faarfannaa Ilmaan Qoorraahi.

- ¹ Yaa WAAQAYYOO Waan Hunda Dandeessu,
iddoon ati jiraattu akkam namatti tola!
- ² Lubbuun koo oobdiiwwan WAAQAYYOO hawwiti;
akka malees itti gaggabdi;
onneen koo fi foon koo
Waaqa jiraataadhaaf ililleedhaan ni faarfatu.
- ³ Yaa WAAQAYYOO Waan Hunda Dandeessu,
Mootii koo fi Waaqa ko,
iddoo aarsaa keetii biratti, dimbiitiin iddoo jireenyaa,
girrisnis ofii isheetiif man'ee cuucii ishee keessa kaa'attu argatti.
- ⁴ Warri mana kee keessa jiraatan eebbifamoo dha;
isaan yeroo hundumaa si jajatuutii.
- ⁵ Warri sirraa jabina argatan,
kanneen garaa isaaniitiin karaa kee yaadan eebbifamoo dha.
- ⁶ Isaan yommuu Sulula Baakaa keessa darbanitti,
iddoo sana lafa bishaan keessaa burqu godhatu;
bokkaan jalqabaas eebba itti dhangalaasa.
- ⁷ Isaan hamma Xiyoon keessatti fuula Waaqaa duratti mul'atanitti,
jabina irraa gara jabinaatti ni darbu.

- ⁸ Yaa WAAQAYYO, Waaqa Waan Hunda Dandeessu,
kadhannaa koo dhaga'i;
yaa Waaqa Yaaqoob na dhaggeeffadhu.
- ⁹ Yaa Waaqayyo, gara gaachana keenyaa ilaali;
fuula dibamaa kee sanaas ilaali.
- ¹⁰ Guyyaa kuma tokko iddoo biraa jiraachuu irra,
guyyaa tokko oobdii keetii irra ooluu wayya;
dunkaana hamootaa keessa jiraachuu irra,
eegduu balbala mana Waaqa koo ta'uu naa wayya.
- ¹¹ WAAQAYYO Waaqni aduu fi gaachanaatii;
WAAQAYYO surraa fi ulfina ni kenna;
inni toloota waan gaarii hin dhowwatu.
- ¹² Yaa WAAQAYYOO Waan Hunda Dandeessu,
namni si amanatu eebbifamaa dha.

Kadhannaa Nagaaf Dhi'aate

Faarfannaa 85

Dura Bu'aa Faarfattootaatiif. Faarfannaa Ilmaan Qooraaah.

- ¹ Yaa WAAQAYYO, ati lafa keetiif arjoomteerta;
boojuu Yaaqoobis deebifteerta.
- ² Ati balleessaa uummata keetii dhiifteertaaf;
cubbuu isaanii hundumaas dhoksiteerta.
- ³ Dheekkamsa kee hunda fageessiteerta;
aarii kee sodaachisaa sana irraas deebiteerta.
- ⁴ Yaa Waaqa Fayyisaa keenya, iddoo keenyatti nu deebisi;
dheekkamsa kees nurraa qabi.
- ⁵ Ati bara baraan nutti aartaa? Dheekkamsa kee
dhaloota tokko irraa dhaloota kaanitti dabarsitaa?
- ⁶ Akka sabni kee sitti gammaduuf,
ati lubbuu nutti hin deebiftuu?
- ⁷ Yaa WAAQAYYO, araara kee nutti mul'isi;
fayyina kees nuu kenni.
- ⁸ Ani waan WAAQAYYO Waaqni jedhu nan dhaggeeffadha;
inni saba isaa qulqullootaaf nagaa abdachiisa;
isaan garuu gara gowwummaatti hin deebi'in.
- ⁹ Akka ulfinni isaa lafa keenya irra jiraatuuf,
fayyisuun isaa dhugumaan warra isa sodaatanitti dhi'oo jira.
- ¹⁰ Jaalallii fi amanamummaan wal ga'an;
qajeelummaa fi nagaan wal dhungatan.
- ¹¹ Amanamummaan lafa keessaa burqa;
qajeelummaan immoo samii irraa gad ilaala.
- ¹² WAAQAYYO dhugumaan waan gaarii ni kenna;
lafti keenyas midhaan ishee ni kenniti.
- ¹³ Qajeelummaan fuula isaa dura deema;
miilla isaatiifis karaa qopheessa.

Kadhannaa Yeroo Rakkinnaa

Faarfannaa 86

Kadhannaa Daawit.

- ¹ Yaa WAAQAYYO, waan ani hiyyeessaa fi rakkataa ta'eef,
na dhaga'iitii deebii naa kenni.
- ² Ani sitti of kenneeraatii lubbuu koo eegi.
Ati Waaqa koo ti;
garbicha kee kan si amanatu oolchi.
- ³ Yaa Gooftaa na maari;
ani guyyaa guutuu sin waammadhaatii.
- ⁴ Lubbuu garbicha keetii gammachiisi;

yaa Gooftaa, ani lubbuu koo gara keetti oli nan fuudhaatii.

- ⁵ Yaa Gooftaa ati gaarii dha; dhiifamas namaa goota;
warra si waammatan hundaafis jaalalli kee guddaa dha.
- ⁶ Yaa WAAQAYYO, kadhannaa koo dhaga'i;
iyya waammata koos dhaggeeffadhu.
- ⁷ Ani guyyaa rakkina kootiitti sin waammadha;
ati deebii naa kennitaatii.
- ⁸ Yaa Gooftaa, waaqota keessaa kan akka keetii hin jiru;
hojiin hojii keetiin wal qixxaatu tokko iyyuu hin jiru.
- ⁹ Yaa Gooftaa, saboonni ati uumte hundinuu dhufanii,
fuula kee duratti ni sagadu;
maqaa keetiifis ulfina fidu.
- ¹⁰ Ati guddaa fi kan hojii dinqisiisaa hojjettuu dha;
Waaqni suma qofa.
- ¹¹ Yaa WAAQAYYO, karaa kee na barsiisi;
anis dhugaa keetiin nan bula;
akka ani maqaa kee sodaadhuuf,
garaa gargar hin qoodamne naa kenni.
- ¹² Yaa Waaqa koo Gooftaa, ani garaa koo guutuudhaan sin galateeffadha;
maqaa kee illee bara baraan nan ulfeessa.
- ¹³ Jaalalli ati naa qabdu guddaadhaatii;
lubbuu koo dhidhima sii'ool keessaa baafteerta.
- ¹⁴ Yaa Waaqi, of tuultonna natti ka'aniiru;
tuunni finciltootaa, namoonni si hin sodaanne
lubbuu koo galaafachuu barbaadu.
- ¹⁵ Yaa Gooftaa, ati garuu Waaqa garaa laafessaa fi arjaa dha;
daftee hin aartu; jaalallii fi amanamummaan kee dhuma hin qabu.
- ¹⁶ Gara kootti deebi'iitii na maari;
jabina kee tajaajilaa keetii kenni;
ilma garbittii keetiis oolchi.
- ¹⁷ Akka diinonni koo arganii qaana'aniif,
mallattoo gaarummaa keetii naa kenni;
yaa WAAQAYYO, ati na gargaartee na jajjabeessiteertaatii.

Xiyoon, Haadha Sabootaa

Faarfannaa 87

Faarfannaa Ilmaan Qooraaahi.

- ¹ Hundeen magaalaa isaa tulluu qulqulluu irra jira.
- ² WAAQAYYO iddoo jireenya Yaaqoob hunda caalaa,
karrawwan Xiyoon jaallata.
- ³ Yaa magaalaa Waaqaa,
waa'ee keetiif wannii kabajamaan akkana jedhamee ni dubbatama:
- ⁴ "Ani Ra'aabii fi Baabilonin
warra na beekan gidduutti maqaa nan dha'a;
kunoo, Filisxeemii fi Xiirros Itoophiyaa wajjin,
'Namichi kun achitti dhalate' jedhu."
- ⁵ Dhugumaan waa'ee Xiyoon,
"Inni kunii fi inni sun ishee keessatti dhalatan;
Waaqni Waan Hunda Olee mataan isaa iyyuu ishee dhaaba" jedhama.
- ⁶ WAAQAYYO yeroo saboota galmeessutti,
"Namichi kun achitti dhalate" jedhee barreessa.
- ⁷ Warri faarfatanii fi warri meeshaa muuziiqaa taphatan,
"Burqaan koo hundi si keessatti argama" jedhu.

Kadhannaa Yeroo Rakkinaa

Faarfannaa 88

Dura Bu'aa Faarfattootaatiif. Faarfannaa Ilmaan Qooraahee kan *maahilaati liinootiin** Faarfataame. *Maskiilii* Heemaan Izraahichaa.

- ¹ Yaa WAAQAYYO, Waaqa na fayyiftu,
ani halkanii fi guyyaa fuula kee duratti nan iyyadha.
- ² Kadhannaan koo fuula kee duratti haa dhi'aatu;
atis gurra kee gara iyyannaa kootiitti qabi.
- ³ Lubbuun koo rakkinaan guutamteertii;
jireenyi koos awwaalatti dhi'aateera.
- ⁴ Ani warra boolla keessa bu'anitti nan lakkaa'ame;
akka nama humna hin qabnees nan ta'e.
- ⁵ Ani akka nama gorra'amee awwaala keessa ciisuutti,
akka nama ati deebitee hin yaadanneetti,
akka warra eegumsa kee jalaa ba'aniitti,
warra du'an wajjin gatameera.
- ⁶ Ati boolla gad fagoo keessa,
dukkana hamaa keessas na buufteerta.
- ⁷ Dheekkamsi kee ulfaatee narra ciiseera;
dambalii kee hundas narra garagalchiteerta.
- ⁸ Michoota koo narraa fageessiteerta;
isaan biratti jibbamaa na gooteerta;
akka ani jalaa hin baanettis balballi natti cufameera.
- ⁹ Iji koo gaddaan dadhabeera.
- Yaa WAAQAYYO, ani guyyuma guyyaan sin waammadha;
harka koo illee gara keetti nan bal'ifadha.
- ¹⁰ Ati dinqii kee warra du'anitti ni argisiiftaa?
Warri du'anis ka'anii si galateeffatuu?
- ¹¹ Jaalalli kee awwaala keessatti,
amanamummaan kee immoo Qilee keessatti ni labsamaa?
- ¹² Dinqiiwwan kee dukkana keessatti,
yookaan qajeelummaan kee biyya irraanfannaa keessatti ni beekamaa?
- ¹³ Yaa WAAQAYYO, ani garuu akka ati na gargaartuuf
gara keetti nan iyyadha;
ganamaanis kadhannaan koo fuula kee duratti ni dhi'aata.
- ¹⁴ Yaa WAAQAYYO, ati maaliif na gatta?
Fuula kees maaliif na duraa dhokfatta?
- ¹⁵ Ani ijoollummaa kootii jalqabee rakkadhee du'uu ga'een ture;
naasisuun kee na dhiphiseera; abdiis kutadheera.
- ¹⁶ Dheekkamsi kee narra yaa'e;
naasisuun kees na balleesseera.
- ¹⁷ Isaan guyyaa guutuu akkuma lolaa bishaanii na marsu;
guutumaan guutuuttis na liqimsaniiru.
- ¹⁸ Michoota koo fi warra na jaallatan narraa fudhatteerta;
dukkana qofatu michuu naa ta'e.

Faarfannaa Fi Kadhannaa Amanamummaa Waaqaatiif Dhi'aate

Faarfannaa 89

Maskiilii Eetaan Izraahichaa.

- ¹ Ani waa'ee araara WAAQAYYOO bara baraan nan faarfadha;
afaan kootiinis amanamummaa kee dhaloota hundumatti nan labsa.
- ² Akka araari kee bara baraan jiraatu,
akka ati amanamummaa kee samii keessatti jabeessitee dhaabde nan labsa.
- ³ Ati akkana jetteerta; "Ani filatamaa koo wajjin kakuu galeera;

* **Faarfannaa 88:** 88:0 Maahilaati liinootiin gosa muuziiqaa ti.

Daawit tajaajilaa kootiif illee akkana jedhee kacadheera;

4 'Ani bara baraan sanyii kee nan dhaaba;
teessoo kees dhaloota hundaaf nan cimsa.' "

5 Yaa WAAQAYYO, samiiwwan dinqii kee jaju;

yaa'ii qulqullootaa keessattis amanamummaa kee jaju.

6 Samii keessatti eenyutu WAAQAYYOON qixxaachuu danda'a?

Uumamawwan samii keessaa kan WAAQAYYOON fakkaatu eenyu?

7 Waaqni waldaa qulqullootaa keessatti baay'ee sodaatama;

warra naannoo isaa jiran hunda keessaas isatu sodaachisaa dha.

8 Yaa WAAQAYYO, Waaqa Waan Hunda Dandeessu,

kan akka keetii eenyu?

Yaa WAAQAYYO, ati jabaa dha; amanamummaan kees si marsa.

9 Ati raafama galaanaa ni moota;

yommuu dha'aan isaa jabaatus ni tasgabbeessita.

10 Akka warra qalamaniitti Ra'aabin bulleessite;

irree kee jabaa sanaanis diinota kee ni bittinneessite.

11 Samiiwwan kan kee ti; laftis akkasuma kan kee ti;

ati addunyaa fi waan ishee keessa jiru hunda hundeessiteerta.

12 Kaabaa fi kibba situ uume;

Taaborii fi Hermoon gammachuudhaan

maqaa kee galateeffatu.

13 Ati irree jabaa qabda; harki kee jabaa dha;

harki kee mirgaas ol ka'eera.

14 Qajeelummaa fi murtiin qajeelaan hundee teessoo keetii ti;

araarii fi amanamummaan fuula kee dura deemu.

15 Yaa WAAQAYYO, warri siif ililchuu beekan,

warri ifa iddoo ati jirtuu keessa jiraatan eebbifamoo dha.

16 Isaan guyyaa guutuu maqaa keetiin gammadu;

qajeelummaa keetiinis si jajatu.

17 Ati ulfina jabina isaanii ti;

jaalala keetiinis gaanfa keenya ol qabdeerta.

18 Dhugumaan gaachanni keenya kan WAAQAYYOO ti;

kan mootii keenya Qulqullicha Israa'elii ti.

19 Ati dur akkana jettee saba kee amanamaatti

mul'ataan dubbatteerta:

"Ani loltuu tokkoof humna kenneera;

dargaggeessa saba keessaa filatame tokkos ani ol guddiseera.

20 Ani garbicha koo Daawitin argadheera;

zayitii koo qulqulluunis isa dibeera.

21 Harki koo isa wajjin jira;

irreen koos isa jajabeessa.

22 Diinni tokko iyyuu isa hin mo'atu;

namni hamaanis isa hin hacuucu.

23 Amajaajota isaa fuula isaa duratti nan barbadeessa;

warra isa jibbanis nan dha'a.

24 Amanamummaa fi araarii koo isa wajjin jiraata;

gaanfi isaas maqaa kootiin ol jedha.

25 Ani harka isaa galaana irra,

harka isaa mirgaas lageen irra nan kaa'a.

26 Innis, 'Ati Abbaa koo ti;

Waaqa koo ti, Kattaa Fayyina koo ti' jedhee na waammata.

27 Ani ilma koo hangafa,

kan mootota lafaa hundaa olii isa nan godha.

28 Jaalala koos bara baraan isaaf nan tursa;

kakuun ani isa wajjin qabus hin cabu.

29 Hidda sanyii isaa bara baraan,

teessoo isaa illee hamma samiiwwan jiraatanitti nan dhaaba.

- 30 “Yoo ilmaan isaa seera koo eeguu didan,
yoo isaan ajaja koo faana bu’uu baatan,
31 yoo isaan sirna koo cabsanii
ajaja koo illee eeguu baatan,
32 ani cubbuu isaanii uleedhaan,
yakka isaanii immoo qacceedhaan nan adaba;
33 ani garuu jaalala koo isa irraa hin fudhadhu;
yookaan amanamummaa koo sobatti hin geeddaru.
34 Ani kakuu koo hin cabsu;
yookaan waan afaan koo dubbates hin geeddaru.
35 Si’a tokko yeroo hundaaf, qulqullina kootiin kakadheera;
ani Daawitin hin sobu.
36 Sanyiin isaa bara baraan itti fufa;
teessoon isaas akkuma aduu fuula koo dura jiraata;
37 akkuma ji’aas bara baraan ni jiraata;
hamma samiiwwan jiranittis cimee dhaabata.”
- 38 Ati amma garuu isa dhiifteerta; tuffatteertas;
isa dibde sanatti baay’ee aarteerta.
39 Kakuu tajaajilaa kee wajjin galte cabsiteerta;
gonfoo isaas awwaara keessa buuftee xureessiteerta.
40 Dallaa isaa hunda caccabsiteerta;
da’oo isaa jajjabaas barbadeessiteerta.
41 Warri achiin darban hundi isa saamu;
olloonni isaas itti qoosu.
42 Ati harka amajaajii isaa mirgaa ol qabdeerta;
akka diinonni isaa hundi gammadan gooteerta.
43 Arfii goraadee isaa duubatti deebifteerta;
waraana keessattis isa hin gargaarre.
44 Surraa isaa isa irraa balleessiteerta;
teessoo isaas lafatti gatteerta.
45 Umurii dargaggummaa isaa gabaabsiteerta;
qaaniidhaanis isa haguugdeerta.
- 46 Yaa WAAQAYYO, kun hamma yoomiitti?
Ati bara baraan of dhoksitaa?
Dheekkamsi kee hamma yoomiitti akka ibiddaa boba’a?
47 Umuriin koo hammam akka gabaabaa ta’e yaadadhu.
Ati badiisa akkamiitiif ilmaan namaa hunda uumte!
48 Utuu du’a hin argin jiraachuu kan danda’u
yookaan humna sii’ool jalaa of baasuu
kan danda’u nama akkamii ti?
49 Yaa Gooftaa, jaalalli kee guddaan durii kan ati amanamummaa keetiin
Daawitiif kakatte sun eessa jira?
50 Yaa Gooftaa, akkamitti akka tajaajilaan kee tuffatame,
akkamitti akka ani arrabsoo saboota hundaa
bobaatti baadhe yaadadhu;
51 yaa WAAQAYYO, qoosaa diinonni kee natti qoosan,
kan isaan ittiin tarkaanfii dibamaa keetii hundatti qoosan yaadadhu.

52 Galanni bara baraan WAAQAYYOOF haa ta’u!

Ameen; Ameen.

Kitaaba Afuraffaa

90

Faarfannaa 90-106

Namni Dadhabaa Ta’uu Isaa

Kadhannaa Musee Nama Waaqaa Sanaa.

1 Yaa Gooftaa, ati dhaloota hunda keessatti
iddoo jireenyaa nuu taateerta.

2 Utuu tulluuwwan hin dhalatin

yookaan utuu ati lafaa fi addunyaa hin uumin,
baraa baraa hamma bara baraatti ati Waaqa.

³ Atis, “Yaa ilmaan namootaa, biyyootti deebi’aa”
jettee namoota biyyootti deebista.

⁴ Fuula kee duratti waggaan kummi tokko,
akkuma guyyaa kaleessa darbee ti;
yookaan akkuma dabaree eegumsa halkanii tokkoo ti.

⁵ Ati hirriba du’aatii namoota haxoofttee balleessita;
isaan akkuma marga ganama bayyanatu ti;

⁶ margi sun ganama ganama bayyanatu illee
galgala galgala garuu coollagee goga.

⁷ Aariin kee nu fixeera;
dheekkamsi kees nu naasiseera.

⁸ Yakka keenya fuula kee dura,
cubbuu keenya dhokataa sanas ifa fuula keetii dura keesseerta.

⁹ Barri keenya hundinuu dheekkamsa keetiin dhumeeraatii;
umurii keenyas aaduudhaan fixanna.

¹⁰ Dheerinni bara keenyaa waggaa torbaatama,
yoo jabaanne immoo waggaa saddeettama ta’a;
kuni iyyuu garri caalaan isaa dadhabbii fi rakkinaan guutameera;
inni dafee darbaatii; nus barrifnee ni sokkina.

¹¹ Humna aarii keetii eenyutu beeka?
Dheekkamsi kee akkuma sodaa nu siif qabaachuu qabnu sanaa
guddaadhaatii.

¹² Akka nu garaa ogummaadhaan guutame qabaannuuf,
bara keenya lakkaa’uu nu barsiisi.

¹³ Yaa WAAQAYYO, deebi’i! Kun hamma yoomiitti ta’a?
Tajaajiltoota keetiifis garaa laafi.

¹⁴ Akka nu bara keenya guutuu gammannee ililchinuuf,
ganama ganama araara keetiin nu quufsi.

¹⁵ Hamma baay’ina guyyoota ati nu miite sanaa,
hamma baay’ina waggoota nu rakkanne sanaas nu gammachiisi.

¹⁶ Hojiin kee tajaajiltoota keetti,
ulfinni kees ijoollee isaaniitti haa mul’ifamu.

¹⁷ Eebbi Waaqa keenya Gooftichaa nurra haa bu’u;
hojii harka keenyaas jabeessii nuu dhaabi;
eeyyee, hojii harka keenyaa jabeessii nuu dhaabi.

Eegumsa Waaqa

Faarfannaa 91

¹ Namni da’oo Waaqa Waan Hundaa Olii keessa jiraatu,
gaaddisa Waaqa Waan Hunda Danda’u sanaa jala boqota.

² Anis WAAQAYYON, “Inni iddoo ani itti kooluu galuu fi
da’annoo koo ti;
Waaqa koo kan ani amanadhuu dha” nan jedha.

³ Inni dhugumaan kiyyoo adamsaa jalaa,
dhukkuba nama fixu jalaas si baasa.

⁴ Inni baallee isaatiin si dhoksa;
atis qoochoo isaa jalatti kooluu ni galta;
amanamummaan isaa gaachanaa fi dallaa eegumsaa siif ta’a.

⁵ Atis naasuu halkanii,
yookaan xiyya guyyaan futtaafamu hin sodaattu;

⁶ golfaa dukkana keessa deemu,
yookaan dha’icha guyyaa saafaan nama balleessu hin sodaannu.

⁷ Kummi tokko si cinatti,
kummi kudhan immoo mirga keetti ni kufa;

- garuu sitti hin dhi'aatu.
⁸ Ati ijuma kee gofaan ilaalta;
 adaba hamootatti dhufus ni argita.
- ⁹ Ati waan WAAQAYYON iddoo kooluu itti galtu,
 Waaqa Waan Hundaa Olii iddoo jireenya keetii godhatteef,
¹⁰ wannii hamaan si hin tuqu;
 dha'ichis dunkaana keetti hin dhi'aatu.
¹¹ Inni akka isaan karaa kee hunda irratti si eeganiif,
 ergamoota isaa siif ni ajaja;
¹² isaanis akka miilla keetiin dhagaatti hin buuneef
 harka isaaniitiin ol si fuudhu.
¹³ Ati leencaa fi buutii irra ejjetta;
 leenca saafelaa fi jawwee ni dhidhiitta.
- ¹⁴ WAAQAYYOS akkana jedha;
 "Sababii inni na jaallatuuf, ani isa nan oolcha;
 waan inni maqaa koo beekuuf isa nan eega.
¹⁵ Inni na waammata; anis nan deebisaaf;
 rakkina keessatti ani isa wajjin nan ta'a;
 isa nan oolcha; ulfinas nan kennaaf.
¹⁶ Ani umurii dheeraa isa nan quufsa;
 fayyisuu koos isatti argisiisa."

Gammachuu Nama Qajeelaa,

Faarfannaa 92

Faarfannaa Guyyaa Sanbataa Faarfatamu.

- ¹ WAAQAYYON, galateeffachuun, yaa Waaqa Waan Hundaa Olii,
 maqaa keetiif faarfachuun gaarii dha.
² Jaalala kee ganamaan,
 amanamummaa kees halkaniin labsuun,
³ kiraara ribuu kudhaniitiin,
 sagalee baganaatiinis labsuun gaarii dha.
- ⁴ Yaa WAAQAYYO, ati hojii keetiin na gammachiiftaatii;
 ani sababii hojii harka keetiitiif gammachuudhaan nan faarfadha.
⁵ Yaa WAAQAYYO, hojiin kee akkam guddaa dha;
 yaadni kees akkam gad fagoo dha!
⁶ Namni qalbii hin qabne waan kana beekuu hin danda'u;
 gowwaanis hin hubatu;
⁷ hamoonni yoo akkuma margaa biqilan iyyuu,
 jal'oonni hundinuus yoo daraaran iyyuu,
 isaan bara baraan ni barbadaa'u.
- ⁸ Yaa WAAQAYYO, ati garuu bara baraan ol ol jetta.
- ⁹ Yaa WAAQAYYO, kunoo diinota kee,
 kunoo diinonni kee ni badu;
 warri jal'ina hojjetan hundinuus ni bittinneeffamu.
¹⁰ Ati gaanfa koo akka gaanfa gafarsaa ol ol qabde;
 zayitii haaraa natti dhangalaafte.
¹¹ Iji koo mo'atamuu diinota koo argeera;
 gurri koos badiisa jal'oota natti ka'anii dhaga'eera.
- ¹² Qajeeltonni akkuma muka meexxii ni dagaagu;
 akkuma birbirsaa Libaanoonitti ni guddatu;
¹³ isaan mana WAAQAYYOO keessa dhaabamanii jiru;
 oobdii Waaqa keenyaa keessattis itti tolee misanii jiran.
¹⁴ Isaan amma iyyuu bara dullumaa keessa ija naqatu;
 gabbataniis dagaaganii jiraatu.
¹⁵ Isaanis, "WAAQAYYO tolaa dha; inni Kattaa koo ti;
 hamminni isa keessa hin jiru" jedhanii labsu.

Miidhagina WAAQAYYOO

Faarfannaa 93

- ¹ WAAQAYYO ni mo'a; surraas ni uffata;
WAAQAYYO surra ni uffata; jabinas hidhata.
Addunyaan cimtee dhaabamteerti; hin sochoofamtus.
- ² Teessoon kee durumaa jalqabee cimtee dhaabateera;
ati durii duriitii jalqabdee jirta.
- ³ Yaa WAAQAYYO, galaanonni ol kaasaniiru;
galaanonni sagalee isaanii ol kaafataniiru;
galaanonni huursuu isaanii ol kaafataniiru.
- ⁴ Sagalee bishaan baay'ee caalaa,
jabina dha'aa galaanaa caalaas,
WAAQAYYO ol gubbaa jiru sun humna qabeessa.
- ⁵ Seerri kee jabaatee ni dhaabata;
Yaa WAAQAYYO, qulqullummaan bara baraan
faaya mana keetii ti.

Waaqa Murtii Qajeelaa

Faarfannaa 94

- ¹ Yaa WAAQAYYO, Waaqa haaloo baafu,
Yaa Waaqa haaloo baafu, ifii mul'adhu.
- ² Yaa Abbaa Murtii lafa kanaa ka'i;
of tuultotaaf illee waan isaanii malu kenni.
- ³ Yaa WAAQAYYO, hamma yoomiitti warri hamoon,
warri hamoon hamma yoomiitti burraaqu?
- ⁴ Isaan dubbii of tuulummaa gad roobsu;
jal'oonni hundinuu of dhiibuudhaan guutaman.
- ⁵ Yaa WAAQAYYO, isaan saba kee miidhu;
handhuuraa kees ni hacuucu.
- ⁶ Haadha hiyyeessaatii fi keessummaa ni gorra'u;
ijoollee abbaa hin qabnes ni ajjeesu.
- ⁷ Isaan, "WAAQAYYO hin argu;
Waaqni Yaaqoob hin qalbeeffatu" jedhu.
- ⁸ Warri saba keessaa raatoftan mee hubadhaa;
isin warri gowwoonni yoom ogeeyyii taatu?
- ⁹ Inni gurra uume sun hin dhaga'uu?
Inni ija uume hin argu?
- ¹⁰ Inni saboota sirreessu sun hin adabuu?
Inni nama barsiisu sun beekumsa hin qabuu?
- ¹¹ WAAQAYYO yaada namaa beeka;
akka yaadni namaa faayidaa hin qabnes ni beeka.
- ¹² Yaa WAAQAYYO, namni ati adabdu,
namni ati seera kee irraa barsiiftu eebbifamaa dha;
- ¹³ hamma hamootaaf boalli qotamutti,
guyyaa rakkinaatti ati boqonnaa kennitaaf.
- ¹⁴ WAAQAYYO saba isaa hin gatuutii;
inni akkana illee jedhee handhuuraa ofii isaa hin dhiisu.
- ¹⁵ Murtiin qajeelummaa irratti hundeeffama;
toloonni hundinuu isa faana bu'u.
- ¹⁶ Eenyutu hamootatti naa ka'a?
Eenyutu na cina dhaabatee warra jal'ina hojjetaniin morma?
- ¹⁷ Utuu WAAQAYYO na gargaaruu baatee,
silaa yoona lubbuun koo boolla du'aa keessa jirti.
- ¹⁸ Yaa WAAQAYYO yeroo ani, "Miilli koo mucucaateera" jedhetti,
araarri kee ol qabee na dhaabe.

- 19 Yommuu yaaddoon natti baay'atetti,
jajabeessuun kee lubbuu koo gammachiise.
- 20 Bulchitoonni hamoon, warri seeratti fayyadamanii jal'ina hojjetan
si wajjin tokkummaa qabaachuu danda'uu?
- 21 Isaan tokkummaadhaan nama qajeelaatti ka'anii
nama yakka hin qabnetti du'a muru.
- 22 WAAQAYYO garuu da'oo,
Waaqni koos, kattaa ani itti baqadhu naa ta'eera.
- 23 Inni gatii cubbuu isaanii isaanumatti deebisa;
sababii hammina isaaniitiif illee isaan balleessa;
WAAQAYYO Waaqni keenya isaan barbadeessa.

Faarfannaa Guyyaa Guyyaatti Faarfatamu

Faarfannaa 95

- 1 Kottaa WAAQAYYOOF faarfannaa;
Kattaa fayyina keenyaatiifis ni ililchinaa.
- 2 Galataan fuula isaa duratti haa dhi'aannu;
faarfannaadhaanis isa haa leellifnu.
- 3 WAAQAYYO Waaqa guddaadhaatii;
inni waaqota hundaa olitti Mootii guddaa dha.
- 4 Qileewwan lafaa harka isaa keessa jiru;
fixeewwan tulluus kan isaa ti.
- 5 Galaanni kan isaa ti; isatu hojjeetii;
lafa gogaa illee harka isaatu uume.
- 6 Kottaa gad jennee sagadnaa;
Uumaa keenya WAAQAYYO duratti ni jilbeenfannaa;
- 7 inni Waaqa keenyaatii;
nu immoo saba eegumsa isaa jala jirruu dha;
bushaayee harka isaa keessa jiruudhas.

- Isin har'a yoo sagalee isaa dhageessan,
8 akka Mariibaatti gootan sana,
akka gaafa gammoojjii keessatti Maasaatti gootan sanaa
mataa hin jabaatinaa;
- 9 abbootiin keessan utuma hojii koo arganuu,
achitti qoranii na ilaalan.
- 10 Dhaloota sanatti ani waggaa afurtama nan dheekkame;
anis, "Isaan saba garaan isaanii karaa irraa jal'atee dha;
isaan karaa koo hin beekne" nan jedheen.
- 11 Kanaafuu ani dheekkamsa kootiin,
"Isaan boqonnaa kootti hin galan" jedhee kakadhe.

Waaqni Mootii Fi Abbaa Murtii ti

Faarfannaa 96

96:1-13 kwf - 1Sn 16:23-33

- 1 Faarfannaa haaraa WAAQAYYOOF faarfadhaa;
lafti hundinuu WAAQAYYON faarfadhaa.
- 2 WAAQAYYON faarfadhaa; maqaa isaa eebbisaa;
fayyisuu isaas guyyuma guyyaan labsaa.
- 3 Ulfina isaa saboota gidduutti,
hojii isaa dinqisiisaa sana immoo namoota hunda keessatti labsaa.
- 4 WAAQAYYO guddaadhaatii galanni baay'een isaaf ni mala;
inni waaqota hundaa olittis sodaatamuu qaba.
- 5 Waaqonni saboota ormaa hundinuu waaqota tolfamoodhaatii;
WAAQAYYO garuu samiiwwan uume.
- 6 Miidhaginnii fi surraan fuula isaa dura jiru;
jabinnii fi ulfinni iddoo qulqullummaa isaa keessa jiru.

- 7 Yaa maatiiwwan sabootaa WAAQAYYOOF kennaa;
ulfinaa fi jabina WAAQAYYOOF kennaa.
- 8 Ulfina maqaa isaatiif malu WAAQAYYOOF kennaa;
aarsaa fidaatii oobdii isaa seenaa.
- 9 Bareedina qulqullummaa isaatiin WAAQAYYOON waaqeffadhaa;
isin lafti hundinuu fuula isaa duratti holladhaa.
- 10 Saboota gidduutti, “WAAQAYYO mootii dha” jedhaa;
addunyaan jabaattee dhaabatteerti; sochoofamuus hin dandeessu.
Inni qajeelummaadhaan sabootaaf murtii kenna.
- 11 Samiiwwan haa ililchan; laftis haa gammaddu;
galaannii fi wanni isa keessa jiru hundinuu haa huursu.
- 12 Dirreewwanii fi wanni isaan irra jiran hundinuu haa gammadan.
Mukkeen bosonaa hundinuu gammachuudhaan haa faarfatan.
- 13 Uumamni hundi fuula WAAQAYYOO duratti haa faarfatu; inni ni dhufaatii;
inni lafatti murteessuuf ni dhufa.
- Addunyaatti qajeelummaadhaan,
sabootatti immoo dhugaa isaatiin ni mura.

Mo'achuu WAAQAYYO

Faarfannaa 97

- 1 WAAQAYYO mo'eera; lafti haa gammaddu;
biyyoonni qarqara galaanaa hedduunis haa ililchan.
- 2 Duumessaa fi dukkanni limixiin isa marsaniiru;
qajeelummaa fi murtii qajeelaan hundee teessoo isaa ti.
- 3 Ibiddi fuula isaa dura deemee
diinota isaa naannoo isaatii fixa.
- 4 Balaqqeen isaa addunyaa ibsa;
laftis argitee hollatti.
- 5 Tulluuwwan fuula WAAQAYYOO duratti,
fuula Gooftaa lafa hundumaa durattis akkuma gagaa baqu.
- 6 Samiiwwan qajeelummaa isaa labsu;
saboanni hundinuu ulfina isaa argu.
- 7 Warri fakkii waaqeffatan,
kanneen waaqota tolfamoon of jajan hundi haa qaaneffaman;
isin waaqonni hundinuu isa waaqeffadhaa!
- 8 Yaa WAAQAYYO, sababii murtii keetiitiif,
Xiyoon dhagessee ililchiti;
gandoonni Yihuudaas ni gammadu.
- 9 Yaa WAAQAYYO, ati lafa hundumaa irratti Waaqa Waan Hundaa Ollii ti;
ati waaqota hundumaa irra akka malee ol ol jetteerta.
- 10 Sababii inni lubbuu amanamoota isaa eegee,
harka hamootaa jalaa isaan baasuuf,
warri WAAQAYYOON jaallatan hammina haa jibban.
- 11 Qajeeltota irratti ifni ni ifa;
gara tolootaafis gammachuun ni dhufa.
- 12 Isin qajeeltonni WAAQAYYOTTI gammadaa;
maqaa isaa qulqulluus galateeffadhaa.

Abbaa Murtii Addunyaa Hundaa

Faarfannaa 98

Faarfannaa.

- 1 WAAQAYYOOF faarfannaa haaraa faarfadhaa;
inni dinqii hojjeteeratii;
harki isaa inni mirgaatii fi irreen isaa qulqulluun,
akka inni mo'annaa argatu godhaniiru.
- 2 WAAQAYYO akka fayyisuun isaa beekamu godheera;

- qajeelummaa isaas sabootatti mul'iseera.
³ Inni jaalala isaatii fi amanamummaa isaa
 mana Israa'eliif yaadateera;
 daariin lafaa hundinuu,
 fayyisuu Waaqa keenyaa arganiiru.
- ⁴ Lafti hundinuu WAAQAYYOOF ililchaa;
 faarfannaa gammachuutiin iyjaa; weedduu galataas weeddisaa;
⁵ baganaadhaan faarfannaa galataa,
 baganaa fi sagalee weedduutiin WAAQAYYOOF faarfadhaa;
⁶ malakataa fi sagalee gaanfaatiin,
 fuula WAAQAYYO mootichaa duratti ililchaa.
- ⁷ Galaannii fi wanni isa keessa jiru hundinuu,
 addunyaa fi wanti ishee keessa jiraatu hundinuu haa huursan.
⁸ Lageen harka isaanii haa rurrukutan;
 tulluuwwanis tokkummaadhaan haa ililchan;
⁹ isaan fuula WAAQAYYOO duratti haa faarfatan;
 inni lafatti murteessuu ni dhufaati.
 Inni addunyaaf qajeelummaadhaan,
 namootaaf immoo utuu wal hin caalchisin murtii kenna.

Waaqa Qajeelaa

Faarfannaa 99

- ¹ WAAQAYYO mo'eera;
 saboonni haa hollatan;
 inni kiirubeel gidduu, teessoo isaa irra taa'a;
 lafti haa raafamtu.
- ² WAAQAYYO Xiyoon keessatti guddaa dha;
 inni saboota hunda irra ol ol jedheera.
- ³ Isaan maqaa kee guddichaa fi sodaachisaa sana haa jajan;
 inni qulqulluu dha.
- ⁴ Mootichi humna qabeessa; inni murtii qajeelaa jaallata;
 ati tola hundeessiteerta;
 Yaaqoob keessattis haqaa fi
 qajeelummaa hojjetteerta.
- ⁵ WAAQAYYO Waaqa keenya leellisaa;
 ejjeta miilla isaa jalatti sagadaa;
 inni qulqulluu dha.
- ⁶ Musee fi Aroon luboota isaa keessa turan;
 Saamu'eelis warra maqaa isaa waammatan keessa ture;
 isaan WAAQAYYON waammatan;
 innis deebii kenneef.
- ⁷ Inni utubaa duumessaa keessaa isaanitti dubbate;
 isaanis sirna isaatii fi seera inni isaaniif kenne eegan.
- ⁸ Yaa WAAQAYYO Waaqa keenya,
 ati deebii isaanii kennite;
 ati balleessaa isaanii adabdu illee,
 Israa'eliif Waaqa dhiifama gootu turte.
- ⁹ Waaqa keenya WAAQAYYON leellisaa;
 tulluu isaa qulqulluu irrattis waaqeffadhaa;
 WAAQAYYO Waaqni keenya Waaqa qulqulluudhaatii.

Gorsa Galata Galchuu

Faarfannaa 100

Faarfannaa Galataa.

- ¹ Lafti hundinuu WAAQAYYOOF ililchaa.
² Gammachuudhaan WAAQAYYON waaqeffadhaa;
 faarfannaa gammachuutiinis fuula isaa duratti dhi'aadhaa.

³ Akka WAAQAYYO Waaqa ta'e beekaa;
isattu nu uume; nu kan isaa ti;
nu saba isaa ti; hoolota tika isaa jala jirruu dha.

⁴ Galateeffachuudhaan karrawwan isaa,
jajachuudhaanis oobdii isaa seenaa;
isa galateeffadhaa; maqaa isaa illee eebbisaa.

⁵ WAAQAYYO gaariidhaatii; araarri isaa kan bara baraa ti;
amanamummaan isaas dhalootaa gara dhalootaatti itti fufa.

Bulchiinsa Qajeelaa

Faarfannaa 101

Faarfannaa Daawit.

¹ Ani jaalala keetii fi murtii kee qajeelaa sanaaf nan faarfadha;
Yaa WAAQAYYO ani siif nan faarfadha.

² Ani jireenya hir'ina hin qabne jiraachuuf of nan eeggadha;
ati yoom gara koo dhufta?

Ani garaa qulqulluudhaan,
mana koo nan jiraadha.

³ Ani ija koo dura,
waan hamaa hin kaa'u.

Hojii jal'ootaa nan jibba;
nattis hin qabatu.

⁴ Namoonni yaada micciiramaa qaban narraa haa fagaatan;
ani jal'ina wajjin tokkummaa hin qabaadhu.

⁵ Nama dhoksaan ollaa isaa hamatu kam iyyuu,
ani afaan nan qabachiisa;
nama tuffiin nama ilaaluu fi kan garaa of tuulu qabuuf,
ani obsa hin qabaadhu.

⁶ Akka isaan na wajjin jiraataniif,
iji koo amanamoota biyyattii irra jiraatti;
namni karaa qajeelaa irra deemu, inni na tajaajila.

⁷ Namni nama gowwoomsu tokko iyyuu
mana koo keessa hin jiraatu;
namni soba dubbatu tokko iyyuu
fuula koo dura hin dhaabatu.

⁸ Ani jal'oota biyyattii hunda,
ganama ganama nan barbadeessa;
warra waan hamaa hojjetan
magaalaa WAAQAYYOO keessaa nan balleessa.

Kadhannaa Yeroo Rakkinnaa

Faarfannaa 102

Kadhannaa Namni Dhiphate Tokko Faaruu Boo'ichaa Faarsee Fuula WAAQAYYOO Duratti
Dhi'eeffatu.

¹ Yaa WAAQAYYO, kadhannaa koo naa dhaga'i;
iyyi ani gargaarsaaf iyyadhus si bira haa ga'u.

² Yeroo ani dhiphadhetti,
fuula kee na duraa hin dhoksin.

Gurra kee gara kootti deebisi;
yommuu ani si waammadhu dafiitii deebii naa kenni.

³ Barri koo akkuma aaraatti ni badaatii;
lafeen koos akkuma barbadaa ibiddaa boba'aa jira.

⁴ Garaan koo dhukkubsatee akkuma margaa coollageera;
ani nyaata koo nyaachuu irraanfadhheera.

- 5 Sababii ani guddisee aaduuf,
lafeen koo gogaa kootti maxxaneera.
- 6 Ani akka urunguu gammoojjii,
akka urunguu lafa barbadaa'e keessaa nan ta'e.
- 7 Ani hirriba malee nan bula;
akka simbirroo kophaa ishee guutuu manaa irra jirtuus ta'eera.
- 8 Diinonni koo guyyaa guutuu na arrabsu;
warri natti qoosanis abaarsaaf maqaa kootti fayyadamu.
- 9 Ani akkuma buddeenaatti daaraa nyaadheeraattii;
dhugaatii koottis imimmaan makadheera;
- 10 kunis sababii aarii fi dheekkamsa keetiitiif natti dhufe;
ati ol na fuutee gad na darbatteertaatii.
- 11 Barri koo akkuma gaaddidduu galgalaa ti;
anis akkuma margaa gogeera.
- 12 Yaa WAAQAYYO, ati bara baraan teessoo irra jirta;
yaadannoon kees dhaloota hundatti darba.
- 13 Ati kaatee Xiyooniif garaa ni laafta;
yeroon itti isheen fudhatama argachuu qabdu ammumaatii;
yeroon murteeffame sun ga'eraa.
- 14 Garboonni kee dhagaa isheetti gammaduutii;
biyyoo ishees ni mararfatu.
- 15 Saboonni maqaa WAAQAYYOO ni sodaatu;
mootonni lafaa hundinuus ulfina kee ni kabaju.
- 16 WAAQAYYO deebisee Xiyoonin ijaaraatii;
ulfina isaatiinis ni mul'ata.
- 17 Inni kadhannaa gadadamtootaa ni dhaga'a;
waammata isaaniis hin tuffatu.
- 18 Akka sabni hamma ammaatti hin dhalatin WAAQAYYON galateeffatuuf,
wannu kun akkana jedhamee dhaloota dhufuuf haa barreeffamu:
- 19 "WAAQAYYO iddoo qulqullummaa isaa gubbaa irraa gad ilaale;
samii irraas gara lafaa gad mil'ate;
- 20 kanas aaduu warra hidhamanii dhaga'uu fi
warra duuti itti murame baasuudhaaf hojjete."
- 21 Akkasiin maqaan WAAQAYYOO Xiyoon keessatti,
galanni isaas Yerusaalem keessatti ni labsama;
- 22 kunis yommuu saboonnii fi mootummoonni,
WAAQAYYON waaqeffachuuf walitti qabamanitti ta'a.
- 23 Inni jabina koo karaatti hambise;
umurii koos ni gabaabse.
- 24 Anis akkanan jedhe:
"Yaa Waaqa ko, walakkaa umurii kootti na hin fudhatin;
waggoonni kee dhalootaa hamma dhaloota hundaatti itti fufu.
- 25 Ati jalqabatti lafa hundeessite;
samiwwanis hojii harka keetii ti.
- 26 Isaan ni badu; ati garuu ni jiraatta;
hundumti isaanii akkuma wayyaa ni dhumu.
- Ati akkuma uffataa isaan geeddarta;
isaanis ni badu.
- 27 Ati garuu sanuma;
umuriin kees gonkumaa dhuma hin qabu.
- 28 Ijoolleen garboota keetii sodaa malee jiraatu;
sanyiin isaaniis fuula kee dura jiraata."

Waaqni Jaalala

Faarfannaa 103

Faarfannaa Daawit.

- 1 Yaa lubbuu ko, WAAQAYYON eebbisi;
keessi namummaa koo hundi maqaa isaa qulqulluu sana eebbisaa.
- 2 Yaa lubbuu koo WAAQAYYON eebbisi;

tola isaa hundas hin irraanfatin.

³ Inni cubbuu kee hundumaa siif dhiisa;

dhukkuba kee hundumaa ni fayyisa;

⁴ jireenya kee boolla irraa ni baraara;

jaalalaa fi gara laafinaan si gonfa;

⁵ akka dargaggummaan kee akkuma risaa haaromfamuufis,

inni fedhii kee waan gaariidhaan ni guuta.

⁶ WAAQAYYO warra cunqurfaman

hundaaf qajeelummaa fi murtii qajeelaa kenna.

⁷ Inni karaa isaa Museetti,

hojii isaa immoo saba Israa'elitti beeksise.

⁸ WAAQAYYO gara laafessaa fi arjaa dha;

inni aaruuf hin ariifatu; jaalalli isaas baay'ee dha.

⁹ Inni yeroo hunda hin dheekkamu;

aarii isaa illee bara baraan hin kuufatu;

¹⁰ inni akka cubbuu keenyaatti nu hin adabne;

yookaan akka balleessaa keenyaatti nuuf hin deebifne.

¹¹ Akkuma samiwwan lafa irraa ol fagaatan sana,

jaalalli inni warra isa sodaataniif qabu akkasuma guddaa dha;

¹² akkuma ba'i biiftuu lixa biiftuu irraa fagaatu,

akkasuma inni balleessaa keenya nurraa haqeera.

¹³ Akkuma abbaan ijoollee isaatiif garaa laafu,

WAAQAYYO warra isa sodaataniif garaa ni laafa;

¹⁴ inni akka nu itti uumamne ni beekaatii;

akka nu biyyoo taanes ni yaadata.

¹⁵ Barri namaa akkuma margaa ti;

akka abaaboo dirrees ni misa;

¹⁶ inni yeroo bubbleen itti bubbisutti ni bada;

iddoon isaas deebi'ee isa hin yaadatu.

¹⁷ Jaalalli WAAQAYYOO garuu bara baraa hamma bara baraatti

warra isa sodaatan wajjin ni jiraata;

qajeelummaan isaa immoo ijoollee isaaniitti darba;

¹⁸ warra kakuu isaa eeganitti,

warra ajaja isaatti buluu yaadatanittis ni darba.

¹⁹ WAAQAYYO teessoo isaa samii keessa dhaabbateera;

mootummaan isaas waan hunda bulcha.

²⁰ Isin ergamoonni isaa, warri ajaja isaa eegdan jajjaboon,

warri dubbii isaatiif ajajamtanis WAAQAYYON eebbisaa.

²¹ Raayyaan isaa hundinuu, isin tajaajiltoonni isaa

warri fedhii isaa guuttan WAAQAYYON eebbisaa.

²² Uumamawwan bulchiinsa isaa

jala lafa hunda jirtan hundi WAAQAYYON eebbisaa.

Yaa lubbuu ko, WAAQAYYON eebbisi.

Ulfina Uumamaa

Faarfannaa 104

¹ Yaa lubbuu ko, WAAQAYYON eebbisi.

Yaa WAAQAYYO, Waaqa ko, ati akka malee guddaa dha;

miidhaginaa fi surraa uffatteerta.

² Ati akkuma wayyaa ifa uffatta;

samiwwanis akkuma dunkaanaa diriirsita.

³ Dareeraa diinqa isaa bishaanota irra buufta.

Duumessoota gaarii isaa godhata;

qochoo bubblee yaabbattee deema.

⁴ Inni ergamoota isaa hafuurota,

tajaajiltoota isaa immoo arraba ibiddaa godha.

- 5 Inni lafa hundee ishee irra dhaabeera;
isheenis gonkumaa hin sochootu.
- 6 Ati akkuma wayyaatti tuujubaan ishee haguugde;
bishaanonnis tulluuwwanii ol dhaabatan.
- 7 Ati ifannaan bishaanonni baqatan;
sagalee qaqaawwee keetii dhageenyaan gugatan.
- 8 Isaan tulluuwwan irraan dhangala'an;
gara iddoo ati isaanii qopheessitee,
gara sululootaatti gad yaa'an.
- 9 Akka isaan deebi'anii lafa hin haguugneef
ati daarii isaan darbuu hin dandeenye isaan dura dhaabde.
- 10 Akka burqaawwan sululoota keessa yaa'an goota;
isaanis tulluuwwan gidduu yaa'u.
- 11 Isaan bineensota bakkee hundaaf bishaan kennu;
harroonni diidaas dheebuu ba'u.
- 12 Simbirroonni samii bishaanota biratti mandhee ijaarratan;
dameewwan gidduutti ni faarfatan.
- 13 Inni mana isaa kan olii irraa tulluuwwan bishaan obaafata;
laftis ija hojii keetiitiin quufti.
- 14 Inni lafa irraa nyaata kennuuf jedhee looniif marga,
faayidaa namaatiif immoo biqiltuuwwan biqilcha;
- 15 akka daadhiin wayinii garaa nama gammachiisu,
akka zayitiin fuula nama cululuqsuu fi
akka midhaan nama jajjabeessu ni goota.
- 16 Mukkeen WAAQAYYOO,
birbirsi Libaanoon kan inni dhaabe sun bishaan quufaniiru.
- 17 Simbirroonni achitti mandhee isaanii ijaarratu;
huummoonis birbirsaa irraa mana qabdi.
- 18 Tulluuwwan dhedheeroon da'oo re'ee diidaa ti;
holqi kattaawwanii immoo da'oo osolee ti.
- 19 Inni akka ji'i waqtiilee gargar qoodu godha;
biiftuunis yeroo itti lixxu ni beekti.
- 20 Ati dukkana uumta; halkanis ni ta'a;
bineensonni bosonaa hundis gad yaa'u.
- 21 Leenci saafelli waan nyaatu barbaadee aada;
nyaata isaas Waaqa bira barbaada.
- 22 Isaan yommuu biiftuun baatutti walitti qabamu;
dacha'aniis goda isaanii keessa ciciisu.
- 23 Namni gara hojii isaatti,
hamma galgalaattis gara jiruu isaatti ni ba'a.
- 24 Yaa WAAQAYYO, hojiin kee akkam baay'ee dha!
Ati hunda isaanii ogummaadhaan hojjette;
laftis uumamawwan keetiin guutamte.
- 25 Galaanni guddaa fi bal'aan kun,
uumamawwan hamma hin qabneen guutame;
kan lubbuu qabeeyyiin gurguddaa fi
xixinnoon keessa jiraatan kuunnoo jira.
- 26 Doonniwwan as irra deddeebi'u;
lewaataan kan akka inni achi keessa
taphatuuf ati uumtes achi jira.
- 27 Akka ati nyaata isaanii yeroo barbaachisuutti isaaniif kennituuf,
isaan hundi si eeggatu.
- 28 Yeroo ati isaaniif kennitutti,
isaan walitti qabatu;
yeroo ati harka kee bal'iftutti,
isaan waan gaarii quufu.

- 29 Yeroo ati fuula kee dhokfattutti,
isaan ni na'u;
yeroo ati hafuura isaanii fudhattutti,
isaan du'anii biyyootti deebi'u.
- 30 Yeroo ati Hafuura kee ergitutti isaan ni uumamu;
atis fuula lafaa ni haaromsita.
- 31 Ulfinni WAAQAYYOO bara baraan haa jiraatu;
WAAQAYYO hojii isaatti haa gammadu;
32 inni ilaallaan lafti hollatte;
inni tuqnaan tulluuwwan keessaa aarrii ba'e.
- 33 Bara jireenya koo guutuu ani WAAQAYYOOF nan faarfadha;
hamma lubbuun koo jirtuttis faarfannaadhaan
Waaqa koo nan galateeffadha.
- 34 Irra deddeebi'ee yaaduun koo isa haa gammachiisu;
ani WAAQAYYOTTI nan gammadaatii.
- 35 Cubbamoonni lafa irraa haa badan;
hamoonnis si'achi hin jiraatin.
- Yaa lubbuu koo WAAQAYYON eebbisi.

Haalleluuyaa.

Seenaa Israa'el Isa Dinqisiisaa

Faarfannaa 105

105:1-15 kwf - 1Sn 16:8-22

- 1 WAAQAYYOOF galata galchaa; maqaa isaas waammadhaa;
waan inni hojjetes saboota gidduutti beeksisaa.
- 2 Isaaf faarfadhaa; faarfannaadhaan isa galateeffadhaa;
waa'ee hojii isaa isa dinqisiisaa hundaas odeessaa.
- 3 Maqaa isaa qulqulluu sanaan boonaa;
garaan warra WAAQAYYON barbaadani haa gammadu.
- 4 WAAQAYYOO fi humna isaa barbaaddadhaa;
yeroo hunda fuula isaa barbaadaa.
- 5 Dinqii inni hojjete,
hojii isaa dinqii sanaa fi murtii inni labse yaadadhaa;
- 6 isin tajaajiltoonni isaa, warri sanyii Abrahaam taatan,
isin filatamtoonni isaa, ilmaan Yaaqoobis kana yaadadhaa.
- 7 Inni WAAQAYYO Waaqa keenya;
murtiin isaas lafa hunda irra jira.
- 8 Inni kakuu isaa bara baraan,
waadaa gale sanas dhaloota kumaaf ni yaadata;
- 9 inni kakuu Abrahaam wajjin gale,
kakuu Yisihaaqiif kakates ni yaadata.
- 10 Kanas Yaaqoobiif seera,
Israa'eliif immoo kakuu bara baraa godhee
akkana jedhee mirkaneesseera:
- 11 "Ani biyya Kana'aan
gooda ati dhaaltu godhee siif nan kenna."
- 12 Isaan yeroo lakkoobsaan xinnoo turanitti,
dhugumaanuu xinnoo fi biyyattii keessattis
keessummoota turanitti,
- 13 sabaara gara sabaatti, mootummaa tokkoo gara
mootummaa biraatti jooran.
- 14 Inni akka namni tokko iyyuu isaan cunqursu hin eeyyamne;
sababii isaaniitiifis akkana jedhee mootota ifate:
- 15 "Dibamtoota koo hin tuqinaa;
raajota koos hin miidhinaa."

- 16 Inni beela biyyattiitti waame;
midhaan nyaataa hundas ni balleesse;
- 17 innis Yoosef namicha akka garbaatti
gurgurame tokko isaan dura erge.
- 18 Isaan foncaadhaan miilla isaa luqqisan;
mormi isaas sibiila keessa galfame;
- 19 hamma wannii inni duraan dursee dubbate guutamutti
dubbiin WAAQAYYOO isa qore.
- 20 Mootiin nama ergee gad isa dhiisise;
bulchaan sabaa isa hiiksise.
- 21 Mootichis mana isaa irratti ajajaa,
qabeenya isaa hunda irratti immoo bulchaa isa godhate;
- 22 kanas akka inni akkuma fedhetti qondaaltota isaa gorsuuf,
akka inni maanguddoota isaa ogummaa barsiisuuf godhe.
- 23 Israa'el biyya Gibxi dhaqe;
Yaaqoobis akka alagaatti biyya Haam keessa jiraate.
- 24 WAAQAYYO saba isaa akka malee baay'ise;
akka isaan amajaajota isaanii caalaa jabaatanis godhe;
- 25 innis akka isaan saba isaa jibbanii fi
akka isaan tajaajiltoota isaatti mari'ataniif yaada isaanii geeddare.
- 26 Waaqnis Musee tajaajilaa isaatii fi
Aroon filatamaa isaa erge.
- 27 Isaanis jara gidduutti mallattoo isaa,
biyya Haam keessatti immoo dinqii isaa argisiisan.
- 28 Inni dukkana ergee biyyattii dukkaneesse;
isaan dubbii isaatti fincilaniiruutii.
- 29 Inni bishaanota isaanii dhiigatti geeddaree
akka qurxummiiwwan isaanii dhuman godhe.
- 30 Fatteen biyya isaanii guutee
diinqa mootota isaanii keessa yaa'e.
- 31 Inni dubbannaan tuunni tisiisaatii fi
bookeen biyya isaanii hunda keessa guutte.
- 32 Inni qooda bokkaa cabbii isaaniif roobse;
bakakkaas biyya isaaniitti erge;
- 33 wayinii isaaniitii fi muka harbuu isaanii balleesse;
mukkeen biyya isaaniis ni caccabse.
- 34 Inni dubbannaan hawwaannisni fi
korophisni hedduun dhufan;
- 35 isaanis biqiltuu biyya jaraa hunda nyaatan;
waan lafti isaanii baases ni fixan.
- 36 Ergasii inni hangafa biyya isaanii hunda,
jabina isaanii jalqabaas ni dha'e.
- 37 Akka sabni Israa'el meetii fi warqee baadhatee ba'u godhe;
gosa isaanii keessaa namni tokko iyyuu hin gufanne.
- 38 Israa'eloonni baanaan warri Gibxi gammadan;
isaan Israa'elin sodaatanii turaniitii.
- 39 Inni akka gaaddisaatti duumessa isaan irra qabe;
akka halkaniin isaaniif ibsuuf immoo ibidda qabsiiseef.
- 40 Isaan kadhannaan inni dimbiriqqee kenneef;
buddeena samiitiinis isaan quufse.
- 41 Innis kattaa bane; bishaanis keessaa gad dhangala'e;
akkuma bishaan lagaattis gammoojjii keessaa yaa'e.
- 42 Inni waadaa isaa qulqulluu,
kan garbicha isaa Abrahaamiif gale sana yaadateeraatii.
- 43 Inni saba isaa gammachuun,
warra isaaf filataman immoo ililleedhaan baaseera;
- 44 inni biyya ormootaa isaaniif kenne;
isaanis waan saboonni sun itti dadhaban dhaalan;
- 45 kanas akka isaan sirna isaa eeganii

seera isaatiif bulaniif godhe.

Haalleluuyaa.

Uummanni Cubbuu Isaa Himate

Faarfannaa 106

106:1,47-48 kwf - 1Sn 16:34-36

¹ Haalleluuyaa.

WAAQAYYOOF galata galchaa; inni gaariidhaatii;
jaalalli isaa bara baraan jiraata.

² Enyutu hojii WAAQAYYOO jabaa sana labsuu,
yookaan galata isaa guutummaatti odeessuu danda'aa?

³ Warri jabeessanii murtii qajeelaa eegan,
warri yeroo hunda waan qajeelaa hojjetan eebbifamoo dha.

⁴ Yaa WAAQAYYO, yommuu saba keetti faara toltutti na yaadadhu;
yommuu isaan oolchituttis na gargaari;

⁵ akka ani badhaadhummaa filatamtoota keetii arguuf,
akka ani gammachuu saba keetii keessatti hirmaadhee
dhaala kee wajjin boonuuf na yaadadhu.

⁶ Nu akkuma abbootii keenyaa cubbuu hojjenneerra;
yakka hojjenneerra; hamminas hojjenneerra.

⁷ Abbootiin keenya yeroo biyya Gibxi keessa turanitti,
dinqii kee hin hubanne;

baay'ina araara keetiis hin yaadanne;
isaan galaana biratti, Galaana Diimaa biratti sitti fincilan.

⁸ Ta'us inni akka humni isaa guddaan sun beekamuuf,
maqaa isaatiif jedhee isaan oolche.

⁹ Inni Galaana Diimaa ifate; galaanichis ni goge;
akkuma waan gammoojjii keessa dabarsuutti lafa gogaa irra isaan dabarse.

¹⁰ Harka amajaajii isaanii keessaa isaan baase;
humna diinaa jalaas isaan fure.

¹¹ Bishaanonni diinota isaanii liqimsan;
tokkoon isaanii iyyuu hin hafne.

¹² Ergasii isaan dubbii isaa amananii
faarfannaadhaan isa galateeffatan.

¹³ Isaan garuu yommusuma waan inni hojjetee ture dagatan;
gora isaas obsaan hin eeganne.

¹⁴ Gammoojjii keessatti dharraa hamaadhaan guutaman;
lafa onaa keessattis Waaqa qoran.

¹⁵ Kanaafuu inni waan isaan kadhatan kenneef;
garuu dhukkuba nama huqqisu isaanitti erge.

¹⁶ Isaan qubata keessatti Musee fi
Aroon qulqullicha WAAQAYYOOTTI hinaafan.

¹⁷ Lafti afaan banattee Daataanin liqimsite;
garee Abiiraamis gad fudhatte.

¹⁸ Duuka buutoota isaanii gidduutti ibiddi boba'e;
arrabni ibiddaas hamoota fixe.

¹⁹ Isaan Kooreebitti jabbii tolfatan;
fakkii baqfamee tolfames waaqeffatan.

²⁰ Isa Ulfina isaanii ta'e sana,
fakkii sangaa marga dheeduutti geeddaran.

²¹ Waaqa isaan fayyise,
isa biyya Gibxitti waan gurguddaa hojjetee sana irraanfatan.

²² Dinqii inni biyya Haam keessatti hojjetee,
hojii sodaachisaa inni Galaana Diimaa irratti hojjetes ni irraanfatan.

²³ Kanaafuu utuu filatamaan isaa Museen

akka dheekkamsi Waaqaa isaan hin balleessineef
gidduu galee fuula isaa dura dhaabachuu baatee silaa
Waaqni akka isaan balleessu dubbatee ture.

- 24 Isaanis biyya namatti tolu sana tuffatan;
waadaa Waaqni gales hin amanne.
- 25 Dunkaanota isaanii keessatti ni guunguman;
WAAQAYYOFIS hin ajajamne.
- 26 Kanaafuu inni akka gammoojjii keessatti
isaan gatu harka isaa ol qabatee kakate;
- 27 sanyii isaanii akka saboota gidduutti gatu,
biyyoota hunda keessas akka isaan bittinneessu kakate.
- 28 Isaan Ba'aal Phe'ooritti of kennanii
aarsaa waaqota lubbuu hin qabneef dhi'eeffame nyaatan.
- 29 Hojii isaanii hamaa sanaan
WAAQAYYON dheekkamsaaf kakaasan;
dha'ichis isaan irra bu'e.
- 30 Garuu Fiinehaas ka'ee gidduu seennaan
dha'ichi sun dhaabate.
- 31 Kunis dhalootaa hamma dhalootaatti,
akka qajeelummaatti isaaf herregame.
- 32 Isaan bishaan Mariibaa biratti akka WAAQAYYO aaru godhan.
Museenis sababii isaaniitiif rakkate;
- 33 sababii isaan Hafuura Waaqaatti fincilaniif
Museen utuu itti hin yaadin dubbate.
- 34 Isaan akka WAAQAYYO isaan ajajetti,
saboota hin balleessine;
- 35 isaan garuu ormootatti makamanii
duudhaa isaanii baratan.
- 36 Waaqota isaanii tolfamoo,
kanneen kiyyoo isaaniiti ta'an waaqeffatan.
- 37 Ilmaan isaaniitii fi intallan isaanii
aarsaa godhanii hafuurota hamoof dhi'eessan.
- 38 Isaanis dhiiga warra balleessaa hin qabnee,
dhiiga ilmaan isaaniitii fi intallan isaanii,
kan waaqota tolfamoo Kana'aaniif
aarsaa godhanii dhi'eessan sana dhangalaasan;
biyyattiinis dhiiga isaaniitiin faalamte.
- 39 Isaan waanuma hojjetaniin of xureessan;
hojii isaaniitiin sagaagaltoota of taasisan.
- 40 Kanaafuu WAAQAYYO saba isaatti aare;
handhuuraa isaas ni balfe.
- 41 Inni dabarsee ormootatti isaan kenne;
amajaajonni isaaniis of jalatti isaan bulchan.
- 42 Diinonni isaanii isaan cunqursan;
humna isaanii jalas isaan galfatan.
- 43 Inni yeroo baay'ee isaan baraare;
isaan garuu ittuma fufanii fincilan;
ittuma caalchisaniis cubbuu hojjetan.
- 44 Inni garuu yommuu iyya isaanii dhaga'etti,
rakkina isaanii hubate;
- 45 isaaniif jedhee kakuu isaa yaadate;
sababii jaalala isaa guddaa sanaatiif garaa laafeef.
- 46 Inni akka warri isaan booji'an hundinuu
garaa isaaniif laafaniif godhe.
- 47 Yaa WAAQAYYO, Waaqa keenya nu oolchi;
akka nu maqaa kee qulqulluu sana galateeffannuuf,

akka galata keetiin of jajnuufis,
ormoota keessaa walitti nu qabi.

⁴⁸ WAAQAYYO, Waaqa Israa'eliitiif,
bara baraa hamma bara baraatti galanni haa ga'u.

Namni hundinuu "Ameen!" haa jedhu.

Haalleluuyaa!

Kitaaba Shanaffaa

107

Faarfannaa 107-150

Waaqa Rakkina Hunda Keessaa Nama Baasu

¹ WAAQAYYOOF galata galchaa; inni gaariidhaatii;
jaalalli isaa bara baraan jiraata.

² Warri WAAQAYYO isaan fure,
warri inni harka diinaatii baase,

³ warri inni biyya gara garaatii,
ba'aa fi lixa biiftuutii, kaabaa fi kibbaa walitti qabe waan kana haa dubbatan.

⁴ Isaan keessaa tokko tokko gammoojjii goggogaa keessa jooran;
magaalaa keessa jiraachuu danda'anis hin arganne.

⁵ Isaan ni beela'an; ni dheebotanis;
lubbuun isaaniis isaan keessatti gaggabde.

⁶ Isaan rakkina isaanii keessatti WAAQAYYOTTI iyyatan;
innis dhiphina isaanii keessaa isaan baase.

⁷ Inni hamma isaan magaalaa keessa jiraachuu danda'an ga'anitti
karaa qajeelaa irra isaan qajeelche.

⁸ Isaan sababii jaalala isaa kan hin geeddaramne sanaatii fi
hojii dinqii kan inni ilmaan namaatiif hojjete sanaatiif

WAAQAYYOON haa galateeffatan;

⁹ inni warra dheebotan dheebuu baasee
warra beela'an illee waan gaariidhaan quufsaatii.

¹⁰ Isaan keessaas tokko tokko sibiilaan hidhamanii rakkachaa,
dukkanaa fi dimimmisa keessa jiraatan;

¹¹ isaan dubbii Waaqaatti fincilanii
gorra Waaqa Waan Hundaa Oliis tuffataniiruutii.

¹² Kanaafuu inni dabarsee hojii dadhabsiisaatti isaan kenne;
isaanis ni gufatan; namni isaan gargaaru tokko iyyuu hin argamne.

¹³ Isaan rakkina isaanii keessatti WAAQAYYOTTI iyyatan;
innis dhiphina isaanii keessaa isaan baase.

¹⁴ Inni dukkanaa fi dimimmisa keessaa isaan baase;
foncaa isaanis gargar kukkute.

¹⁵ Isaan sababii jaalala isaa kan hin geeddaramne sanaatii fi
hojii dinqii kan inni ilmaan namaatiif hojjete sanaatiif

WAAQAYYOON haa galateeffatan;

¹⁶ inni balbalawwan naasii caccabsee
danqaraawwan sibiilaa illee kukkutaatii.

¹⁷ Isaan keessaa tokko tokko cubbuu mataa isaaniitiin gowwooman;
sababii balleessaa isaaniitiifis gadadoo keessa seenan.

¹⁸ Isaan nyaata gosa kamii iyyuu balfanii
afaan boolla du'aa ga'an.

¹⁹ Rakkina isaanii keessatti WAAQAYYOTTI iyyatan;
innis dhiphina isaanii keessaa isaan baase.

²⁰ Inni dubbii isaa ergee isaan fayyise;
awwaala keessaas isaan baase.

²¹ Isaan sababii jaalala isaa kan hin geeddaramne sanaatii fi

- hojii dinqii kan inni ilmaan namaatiif hojjete sanaatiif,
WAAQAYYOON haa galateeffatan!
- 22 Aarsaa galataa haa dhi'eessan;
faarfannaa gammachuutiinis hojii isaa haa himan.
- 23 Isaan keessaa tokko tokko dooniidhaan galaana irra deemanii
bishaanota gurguddaa irratti daldalan.
- 24 Isaanis hojii WAAQAYYOOTII fi
hojii isaa dinqisiisaa sana tuujuba keessatti argan.
- 25 Inni dubbatee bubbee jabaa
dambalii galaanaa ol fuudhu tokko kaaseeraatii.
- 26 Isaan samiitti ol ba'anii tuujubatti gad bu'an;
rakkina isaanii keessattis abdii kutatan.
- 27 Akka nama machaa'ee daddarbatamanii gatantaran
ogummaan isaanis faayidaa dhabe.
- 28 Isaan rakkina isaanii keessatti WAAQAYYOTTI iyyatan;
innis dhiphina isaanii keessaa isaan baase.
- 29 Inni akka dambaliin sun qabbanaa'uuf
dha'aa galaanaa cal'isiise.
- 30 Isaan waan dambalii fi dha'aan galaanaa sun cal'isaniif ni gammadan;
haala kanaanis gara qubata doonii barbaadaniitti isaan geesse.
- 31 Isaan sababii jaalala isaa kan hin geeddaramne sanaatii fi
hojii dinqii kan inni ilmaan namaatiif hojjete sanaatiif
WAAQAYYOON haa galateeffatan.
- 32 Waldaa namootaa keessatti isa haa leellisan;
wal ga'ii maanguddootaa keessattis isa haa jajan.
- 33 Innis lagoota gammoojjii taasisee
burqaawwan bishaanis gara lafa goggogaatti geeddare;
- 34 sababii hammina warra achi jiraataniitiif,
biyya midhaan baasu lafa soogiddaa taasise.
- 35 Gammoojjii kuusaa bishaaniitti,
lafa goggogaa immoo burqaa bishaaniitti geeddare;
- 36 inni akka warri beela'an achi jiraatan godhe;
isaanis magaalaa keessa jiraatan ijaarratan.
- 37 Lafa qotisaa isaanii facaafatanii wayiniis ni dhaabbatan;
midhaan gaariis argatan.
- 38 Inni isaan eebbise; baay'ina isaaniis akka malee dabale;
akka loon isaanii lakkoobsaan yarachaa deeman hin goone.
- 39 Yeroo isaan cunqursaadhaan, rakkinaa fi
gaddaan xinnaatanii gad deebi'anitti,
- 40 inni namoota bebeekamoo irratti tuffii roobsee
akka isaan gammoojjii karaa hin qabne keessa jooran godhe.
- 41 Inni garuu rakkattoota dhiphina isaanii keessaa baase;
maatii isaanis akkuma bushaayee baay'ise.
- 42 Qajeeltonni waan kana arganii ililchu;
hamoonni hundinuu garuu afaan qabatu.
- 43 Ogeessi kam iyyuu waan kana yaadatti haa qabatu;
jaalala WAAQAYYOO kan dhuma hin qabne sana illee haa hubatu.

Faarfannaa Ganamaatii Fi Kadhannaa Biyyoolessaa

Faarfannaa 108

108:1-5 kwf - Far 57:7-11

108:6-13 kwf - Far 60:5-12

Faarfannaa Daawit.

¹ Yaa Waaqi, garaan koo hin raafamu; ani nan faarfadha;

lubbuu koo guutuudhaanis sin galateeffadha.

² Yaa kiraaraa fi baganaa dammaqaa!

Anis ganamaan nan dammaqaa.

³ Yaa WAAQAYYO, ani saboota gidduutti galata siif nan galcha;

- namoota gidduuttis waa'ee kee nan faarfadha.
 4 Jaalalli kee guddaa dha; samiiwwanis caalaa ol dheeraadhaatii;
 amanamummaan kees samiiwwan qaqqaba.
 5 Yaa Waaqi, ati samiiwwaniin olitti ol ol jedhi;
 ulfinni kees lafa hunda irra haa jiraatu.
 6 Akka warri ati jaallattu furamaniif,
 harka kee mirgaatiin nu oolchi; nu gargaaris;
 7 Waaqni iddoo qulqullummaa isaatii akkana jedhee dubbateera:
 "Ani gammachuudhaan Sheekemin gargar nan qooda;
 Sulula Sukootis nan safara.
 8 Gili'aad kan koo ti; Minaaseenis kan koo ti;
 Efreem gonfoo sibiilaa koo ti;
 Yihuudaanis bokkuu mootummaa koo ti.
 9 Mo'aab caabii dhiqannaa koo ti;
 Edoom irra kophee koo darbadhee nan buusa;
 Filisxeem irrattis mo'annaadhaan nan geerara."
 10 Eenyutu magaalaa jabeeffamtee ijaaramtetti na fida?
 Eenyutu Edoomitti na geessa?
 11 Yaa Waaqi kan nu gatte,
 kan loltoota keenya wajjin ba'uu diddes suma mitii?
 12 Diina keenya of irraa dhowwwu nu gargaar,
 gargaarsi namaa faayidaa hin qabuutii.
 13 Nu Waaqa wajjin ni mo'anna;
 innis diinota keenya gad dhidhiita.

Kadhannaa Haaloo Baasuuf Dhi'aate

Faarfannaa 109

Dura Bu'aa Faarfattootaatiif. Faarfannaa Daawit.

- 1 Yaa Waaqa ani galateeffadhu
 ati hin cal'isin;
 2 namoonni hamoonnii fi gowwoomsitoonni,
 afaan isaanii natti banatanii jiruutii;
 isaan arraba sobaatiin maqaa na balleessaniiru.
 3 Isaan dubbii jibbaatiin na marsan;
 sababii tokko malees na lolan.
 4 Utuma ani isaan jaalladhuu na himatan;
 ani garuu nan kadhada.
 5 Qooda waan gaarii hammina,
 qooda jaalala koo immoo jibba naa deebisan.
 6 Akka inni isa mormuuf nama itti ramadi;
 seexannis karaa mirga isaa haa dhaabatu.
 7 Yommuu qoratamutti isatti haa muramu;
 kadhannaan isaas cubbuu isatti haa ta'u.
 8 Umuriin isaa haa gabaabbatu,
 aangoo isaa namni biraa haa fudhatu.
 9 Ijoolleen isaa abbaa malee haa hafan;
 niitiin isaas haadha hiyyeessaa haa taatu.
 10 Ijoolleen isaa kadhattoota asii fi achi jooran haa ta'an;
 mana isaanii diigamaa keessaa illee haa ari'aman.
 11 Waan inni qabu hunda namni isa irraa liqii qabu haa fudhatu;
 bu'aa dadhabbii isaa illee karaa adeemtonni haa saaman.
 12 Namni tokko iyyuu isaaf hin na'in,
 yookaan ijoollee isaa kanneen abbaa hin qabneef garaa hin laafin.
 13 Sanyiin isaa haa dhumu;
 maqaan isaanii dhaloota itti aanu keessaa haa balleeffamu.
 14 Balleessaan abbootii isaa fuula WAAQAYYOO duratti haa yaadatamu;
 cubbuun haadha isaas hin haqamin.
 15 Akka inni seenaa isaanii lafa irraa balleessuuf,
 cubbuun isaanii yeroo hunda fuula WAAQAYYOO dura haa jiraatu.

- 16 Inni hiyyeeyyii fi rakkattoota,
warra garaan isaanii madaa'es hamma du'aatti gugse malee
garaa isaaniif laafuu hin yaadneetii.
- 17 Inni abaaruu jaallate;
abaarsi sun isumatti haa deebi'u;
inni eebbisuu hin jaallanne;
eebbis isa irraa haa fagaatu.
- 18 Inni akkuma uffata isaatti abaarsa uffata;
abaarsis akkuma bishaanii dhagna isaa seena;
akkuma zayitiis lafee isaa lixa.
- 19 Abaarsi sun akkuma uffata inni ittiin of haguuguu,
sabbata inni yeroo hunda hidhatuus isatti haa ta'u.
- 20 Kaffaltiin WAAQAYYO warra na himatanii fi
warra jireenya koo irratti waan hamaa dubbataniif kaffalu kanuma haa ta'u.
- 21 Yaa WAAQAYYO Gooftaa,
ati garuu maqaa keetiif jedhii na gargaar;
gaarummaa jaalala keetiitiif jedhiitii na oolchi.
- 22 Ani hiyyeessaa fi rakkataadhaatii;
garaan koos na keessatti madaa'eera.
- 23 Ani akkuma gaaddidduu galgalaa badeera;
akkuma hawwaannisaas olii gad oofameera.
- 24 Jilbi koo soomuudhaan dadhabeera;
dhagni koos huqqatee lafeetti ba'eera.
- 25 Ani warra na himatan biratti waan tuffii ta'eera;
isaan yommuu na argan mataa isaanii raasu.
- 26 Yaa WAAQAYYO Waaqa ko, na gargaari;
akkuma jaalala keetiittis na oolchi.
- 27 Yaa WAAQAYYO, akka wannii kun harka kee ta'e,
akka ati waan kana hojjette isaan haa beekan.
- 28 Isaan ni abaaruu; ati garuu ni eebbifta;
yommuu natti ka'an isaan ni qaana'u;
tajaajilaan kee garuu ni gammada.
- 29 Himattoonni koo salphina haa uffatan;
akkuma nama waaroo uffatuutti qaaniidhaan haa haguugaman.
- 30 Ani afaan kootiin guddisee WAAQAYYON nan galateeffadha;
waldaa guddaa gidduuttis isa nan jajadha.
- 31 Innis warra lubbuu isaatti muran jalaa isa baasuuf jedhee,
karaa harka mirga rakkataatiin dhaabataatii.

WAAQAYYO Mootiidhaaf Ol aantummaa Kennuu Isaa

Faarfannaa 110

Faarfannaa Daawit.

1 WAAQAYYO, gooftaa kootiin:

“Hamma ani diinota kee ejjeta miilla keetii godhutti,
karaa mirga koo taa'i” jedhe.

2 WAAQAYYO, “Diinota kee gidduutti mo'i” jedhee
bokkuu aangoo keetii Xiyoonii siif erga.

3 Gaafa ati waraanaaf baatu,
loltoonni kee fedhee isaaniitiin si faana qajeelu.

Ati gadameessa ganamaa keessaa,
surraa qulqulluu gonfattee fixeensa dargaggummaa keetii qabaatta.

4 WAAQAYYO, “Akka sirna Malkiiseedeqitti,
ati luba bara baraa ti” jedhee kakateera.
Inni yaada isaa hin geeddaru.

5 Gooftaan karaa harka kee mirgaa jira;

inni guyyaa dheekkamsa isaatti mootota ni burkuteessa.

⁶ Inni reeffa tuuluudhaan, bulchitoota guutummaa lafaa
barbadeessuudhaan sabotatti mura.

⁷ Innis laga karaa cina jiru keessaa ni dhuga;
kanaafuu mataa ol qabata.

Hojii WAAQAYYOO Dingisiifachuu

Faarfannaa 111

¹ Haalleluuyaa.

Ani waldaa tolootaatii fi wal ga'ii keessatti,
garaa koo guutuudhaan WAAQAYYON nan galateeffadha.

² Hojiin WAAQAYYOO guddaa dha;
warri itti gammadan hundinuus irra deddeebi'anii yaadan.

³ Hojiin isaa surra qabeessaa fi kabajamaa dha;
qajeelummaan isaas bara baraan jiraata.

⁴ Inni akka dinqiin isaa yaadatamu godheera;
WAAQAYYO arjaa fi gara laafessa.

⁵ Inni warra isa sodaataniif nyaata kenna;
kakuu isaas bara baraan ni yaadata.

⁶ Lafa saboota kaanii isaaniif
kennuudhaan humna hojii isaa saba isaatti mul'iseera.

⁷ Hojiin harka isaa amanamaa fi qajeelaa dha;
ajajni isaa hundinuus amanamaa dha.

⁸ Isaanis bara baraa hamma bara baraatti jabaatanii dhaabatu;
amanamummaa fi qajeelummaadhaanis hojjetamu.

⁹ Inni saba isaatiif furii ergeera;
kakuu isaas bara baraan ajajeera;
maqaan isaa qulqulluu fi sodaachisaa dha.

¹⁰ WAAQAYYON sodaachuun jalqaba ogummaa ti;
warri sirna isaa faana bu'an hundinuu hubannaa gaarii qabu.
Galanni isaa bara baraan jiraata.

Ebbifamuu Nama Qajeelaa

Faarfannaa 112

¹ Haalleluuyaa.

Namni WAAQAYYON sodaatu,
kan ajaja isaatti baay'ee gammadu ebbifamaa dha.

² Sanyiin isaa lafa irratti jabaa ta'a;
dhaloonni tolootaa ni ebbifama.

³ Qabeenyii fi badhaadhummaan mana isaa keessa jira;
qajeelummaan isaas bara baraan jiraata.

⁴ Nama tolaa fi arjaadhaaf,
gara laafessaa fi qajeelaaf,
dukkana keessatti iyyuu ifni ni ba'a.

⁵ Nama arjaa fi nama waa namaa liqeessuuf,
nama hojii isaa qajeelummaadhaan adeemsifatuuf
waan gaariitu ta'a.

⁶ Dhugumaan inni gonkumaa hin raafamu;
namni qajeelaan bara baraan yaadatama.

⁷ Inni oduu hamaa hin sodaatu;
garaan isaas WAAQAYYON amanachuudhaan
jabaatee dhaabata.

⁸ Garaan isaa hin raafamu; hin sodaatus;
dhuma irrattis diinota isaa mo'ata.

⁹ Inni ni bittinneesse; hiyyeeyyiiifis ni kenne;

qajeelummaan isaa bara baraan ni jiraata;
gaanfi isaas ulfinaan ol qabama.

- ¹⁰ Namni hamaan waan kana argee aara;
ilkaan isaa gara; baqees ni bada;
hawwiin hamootaa faayidaa malee hafa.

Galata WAAQAYYOOF Dhi'eeffame

Faarfannaa 113

¹ Haalleluuyaa.

Yaa tajaajiltoota WAAQAYYOO, galata galchaa;
maqaa WAAQAYYOO jajadhaa.

² Ammaa hamma bara baraatti
maqaan WAAQAYYOO haa eebbifamu.

³ Ba'a biiftuutii hamma lixa biiftuutti,
maqaan WAAQAYYOO haa jajamu.

⁴ WAAQAYYO saba hundaa ol jira;
ulfinni isaas samiiwwanii ol.

⁵ Kan akka WAAQAYYO Waaqa keenya
isa gubbaa teessoo isaa irra taa'u sanaa eenyu?

⁶ Kan gad jedhee
samii fi lafa ilaalu eenyu?

⁷ Inni hiyyeessa awwaara keessaa ni kaasa;
rakkataas tuulaa daaraa keessaa ol fuudha;

⁸ inni bulchitoota gidduu,
bulchitoota saba isaa gidduus isaan teessisa.

⁹ Inni akkuma haadha ijoollee kan gammachuudhaan jiraattuutti,
dubartii maseena mana ishee keessa ni jiraachisa.

Haalleluuyaa.

Faarfannaa Faasiikaaf Dhi'eeffamu

Faarfannaa 114

¹ Yeroo sabni Israa'el biyya Gibxii, manni Yaaqoobis
saba afaan ormaa dubbatu keessaa ba'etti,

² Yihuudaan mana qulqullummaa Waaqaa,
Israa'el immoo bulchiinsa isaa ta'e.

³ Galaanni argee baqate;
Yordaanosis duubatti deebi'e;

⁴ tulluuwwan akka korbeeyyii hoolaa,
gaarranis akkuma xobbaallaawwan hoolaa burraaqan.

⁵ Yaa galaana, ati maaliif baqatte?
Yaa Yordaanosis, atis maaliif duubatti deebite?

⁶ Yaa tulluuwwan, isin maaliif akka korbeeyyii hoolaa,
yaa gaarran isinis maaliif akka xobbaallaawwan hoolaa burraaqxu?

⁷ Yaa lafa, fuula Gooftaa duratti,
fuula Waaqa Yaaqoob duratti holladhu;

⁸ inni kattaa gara harootti,
kattaa jabaa immoo gara burqaa bishaaniitti geeddare.

Waaqa Dhugaa Tokkicha

Faarfannaa 115

115:4-11 kwf - Far 135:15-20

- ¹ Nuuf miti; yaa WAAQAYYO, nuuf miti;
garuu jaalalaa fi amanamummaa keetiif jedhiitii
maqaa keetiif ulfina kenni.

- 2 Saboonni maaliif,
 “Waaqni isaanii eessa jira?” jedhu?
- 3 Waaqni keenya samii keessa jira;
 inni waan isa gammachiisu kam iyyuu ni hojjeta.
- 4 Waaqonni isaanii tolfamoon garuu meetii fi
 warqee harka namaatiin hojjetamanii dha.
- 5 Isaan afaan qabu; garuu dubbachuu hin danda’an;
 ijas qabu; garuu arguu hin danda’an;
- 6 gurra qabu; garuu dhaga’uu hin danda’an;
 funyaan qabu; garuu fuunfachuu hin danda’an;
- 7 harka qabu; garuu qaqqabachuu hin danda’an;
 miilla qabu; garuu deemuu hin danda’an;
 laagaa isaanii keessattis sagalee tokko illee hin uuman.
- 8 Warri isaan tolchan
 kanneen isaan amanatan hundi akkuma isaanii ta’u.
- 9 Yaa mana Israa’el, WAAQAYYON amanadhu;
 inni gargaarsaa fi gaachana isaanii ti.
- 10 Yaa mana Aroon, WAAQAYYON amanadhu;
 inni gargaarsaa fi gaachana isaanii ti.
- 11 Isin warri isa sodaattan, WAAQAYYON amanadhaa;
 inni gargaarsaa fi gaachana isaanii ti.
- 12 WAAQAYYO nu yaadata; nu eebbisa;
 inni mana Israa’el ni eebbisa;
 mana Aroonis ni eebbisa;
- 13 inni warra WAAQAYYON sodaatan,
 xinnaas guddaas ni eebbisa.
- 14 WAAQAYYO, isinii fi
 ijoollee keessan haa baay’isu.
- 15 WAAQAYYO samii fi
 lafa Uume sun isin haa eebbisu.
- 16 Samiin samiiwwanii oliis kan WAAQAYYOO ti;
 lafa garuu inni namaaf kenneera.
- 17 Warri du’an yookaan warri gara iddoo cal’isanitti gad bu’an
 WAAQAYYON galateeffachuu hin danda’an;
- 18 nu garuu ammaa jalqabnee bara baraan
 WAAQAYYON ni eebbifna.

Haalleluuyaa.

Haalleluuyaa

Faarfannaa 116

- 1 Ani WAAQAYYON nan jaalladha;
 inni sagalee waammata kootii naa dhaga’eeraatii.
- 2 Sababii inni gurra isaa gara kootti deebiseef,
 ani hamman lubbuun jiraadhutti isa nan waammadha.
- 3 Kiyoon du’aa na marse;
 dhiphinni Sii’oolis na qabate;
 ani rakkinnaa fi gaddaan nan mo’ame.
- 4 Anis, “Yaa WAAQAYYO na oolchi!” jedhee
 maqaa WAAQAYYOO nan waammadhe.
- 5 WAAQAYYO arjaa fi qajeelaa dha;
 Waaqni keenya gara laaffessa.
- 6 WAAQAYYO garraamota ni eega;
 yeroo ani baay’ee rakkadhetti isatu na gargaare.
- 7 Yaa lubbuu ko, boqonnaa keetti deebi’i;

WAAQAYYO waan gaarii siif godheeraatii.

- ⁸ Ati yaa WAAQAYYO lubbuu koo du'a irraa,
ija koo imimmaan irraa,
miilla koo gufachuu irraa waan oolchiteef,
⁹ ani biyya warra jiraatoo keessa,
fuula WAAQAYYOO dura nan jiraadha.
¹⁰ Ani yeroo, "Ani baay'ee dhiphadheera" jedhetti,
amantii koo eeggadheera.
¹¹ Ani yommuun burjaaja'etti,
"Namni hundinuu sobduu dha" nan jedhe.
¹² Waan gaarii inni naa godhe hundaaf,
ani WAAQAYYOOF maalan deebisa?
¹³ Ani xooffoo fayyinaa ol kaasee
maqaa WAAQAYYOO nan waammadha.
¹⁴ Fuula saba isaa hundumaa duratti,
ani wareega koo WAAQAYYOOF nan galcha.
¹⁵ Duuti qulqulloota isaa,
fuula WAAQAYYOO duratti ulfina qaba.
¹⁶ Yaa WAAQAYYO, ani dhugumaan tajaajilaa kee ti;
ani tajaajilaa kee ilma tajaajiltuu keetii ti;
ati foncaa koo narraa hiikteerta.
¹⁷ Ani aarsaa galataa siif nan dhi'eessa;
maqaa WAAQAYYOOS nan waammadha.
¹⁸ Iddoo sabni isaa hundi jirutti,
ani wareega koo WAAQAYYOOF nan galcha;
¹⁹ yaa Yerusaalem si keessatti,
oobdii mana WAAQAYYOO irrattis nan galcha.

Haalleluuyaa.

Waamicha Galataa

Faarfannaa 117

- ¹ Saboonni hundi WAAQAYYOON jajadhaa;
isin namoonni hundinuu isa leellisaa.
² Jaalalli inni nuuf qabu guddaadhaatii;
amanamummaan WAAQAYYOO bara baraan jiraata.

Haalleluuyaa.

Faarfannaa Ayyaana Daasii

Faarfannaa 118

- ¹ WAAQAYYOOF galata galchaa; inni gaariidhaatii;
jaalalli isaa bara baraan jiraata.
² Sabni Israa'el, "Jaalalli isaa
bara baraan jiraata" haa jedhu.
³ Manni Aroonis,
"Jaalalli isaa bara baraan jiraata" haa jedhu.
⁴ Warri WAAQAYYOON sodaatan,
"Jaalalli isaa bara baraan jiraata" haa jedhan.
⁵ Dhiphina koo keessatti ani WAAQAYYOTTI nan iyyadhe;
innis deebii naa kenne; iddoo bal'aas na qubachiise.
⁶ WAAQAYYO na wajjin jira; ani hin sodaadhu;
namni maal na gochuu danda'a?
⁷ WAAQAYYO na wajjin jira; inni gargaaraa koo ti.
Anis diinota koo nan mo'adha.

- 8 Nama amanachuu irra,
WAAQAYYOTTI kooluu galuu wayya.
- 9 Qondaaltota amanachuu irra,
WAAQAYYOTTI kooluu galuu wayya.
- 10 Saboonni hundinuu na marsan;
ani garuu maqaa WAAQAYYOOTIIN isaan nan barbadeesse.
- 11 Isaan karaa hundaan na marsan;
ani garuu maqaa WAAQAYYOOTIIN isaan nan barbadeesse.
- 12 Akkuma tuuta kanniisaa na marsan;
garuu akka qoraattii gubatuutti barbadaa’an;
anis maqaa WAAQAYYOOTIIN isaan nan barbadeesse.
- 13 Ani dhiibamee kufuu ga’een ture;
WAAQAYYO garuu na gargaare.
- 14 WAAQAYYO jabina kootii fi faarfannaa koo ti;
inni fayyina koo ta’eera.
- 15 Sagaleen gammachuutii fi mo’annaa dunkaanota
qajeeltotaa keessaa ni dhaga’ama;
“Harki WAAQAYYOO kan mirgaa waan jabaa hojjeteera!
¹⁶ Harki WAAQAYYO mirgaa ol qabameera;
harki WAAQAYYOO mirgaa waan jabaa hojjeteera!”
- 17 Ani nan jiraadha malee hin du’u;
waan WAAQAYYO hojjetes nan labsa.
- 18 WAAQAYYO jabeessee na adabeera;
garuu dabarsee du’atti na hin kennine.
- 19 Karra qajeelummaa naa banaa;
anis ol galee WAAQAYYOOF galata nan galcha.
- 20 Kun karra WAAQAYYOO,
kan qajeeltonni ittiin ol galanii dha.
- 21 Ati deebii naa kenniteertaatii, ani sin galateeffadha;
ati fayyina naa taateerta.
- 22 Dhagaan ijaarttonni tuffatan,
dhagaa golee ta’eera;
- 23 WAAQAYYO waan kana hojjeteera;
kunis ija keenyatti dinqii dha.
- 24 Guyyaan kun guyyaa WAAQAYYO uumee dha;
kottaa ni ililchina; itti gammannas.
- 25 Yaa WAAQAYYO, si kadhannaa nu oolchi;
Yaa WAAQAYYO, si kadhannaa nu milkoomsi.
- 26 Kan maqaa WAAQAYYOOTIIN dhufu eebbifamaa dha.
Nu mana WAAQAYYOO keessaa isin eebbifna.
- 27 WAAQAYYO Waaqa;
ifa isaas nuu irratti ibseera.
Dameewwan harkatti qabadhaatii
warra ayyaaneffachuu dhaqanitti makamaa;
gara gaanfawwan iddoo aarsaas dhaqaa.
- 28 Ati Waaqa koo ti; ani sin galateeffadha;
ati Waaqa koo ti; anis sin leellisa.
- 29 WAAQAYYOOF galata galchaa; inni gaariidhaatii;
jaalalli isaa bara baraan jiraata.

Seera Waaqaa Jajachuu

Faarfannaa 119

» Aleef

- 1 Warri jireenyi isaanii mudaa hin qabne,
kanneen akka seera WAAQAYYOOTTI jiraattan eebbifamoo dha.
- 2 Warri ajajawwan isaa eegan,
kanneen garaa guutuun isa barbaadan eebbifamoo dha.
- 3 Isaan balleessaa hin hojjetan;
karaa isaa irras ni deemu.
- 4 Akka Seerri kee amanamummaadhaan
eegamuuf ati ajajjeerta.
- 5 Akka ani ajaja kee eeguuf
utuu karaan koo naa qajeelee jiraatee!
- 6 Ani utuun ajajawwan kee hunda xiyyeeffadhee ilaalee
silaa hin qaana'un ture.
- 7 Ani yommuun seera kee qajeelaa sana baradhutti,
garaa tolaadhaan sin galateeffadha.
- 8 Ani sirna keetiif nan bula;
ati gonkumaa na hin dhiisin.

▢ *Beet*

- 9 Dargaggeessi akkamitti jireenya qulqulluu jiraachuu danda'a?
Akka dubbii keetiitti jiraachuudhaan.
- 10 Ani garaa koo guutuudhaan sin barbaada;
akka ani ajajawwan kee irraa jal'adhu na hin godhin.
- 11 Ani akkan cubbuu sitti hin hojjenneef,
dubbii kee garaa koo keessa dhokfadheera.
- 12 Yaa WAAQAYYO, galanni siif haa ta'u;
sirna kee na barsiisi.
- 13 Ani seera afaan keetii ba'u hundumaa,
afaan kootiin nan dubbadha.
- 14 Akkuma namni tokko badhaadhummaa guddaatti gammadu,
ani ajaja kee faana bu'uutti nan gammada.
- 15 Ajajawwan kee irra deddeebi'ee nan yaada;
karaa kee irraas ija koo hin buqqifadhu.
- 16 Ani sirna keetti nan gammada;
dubbii kees hin dagadhu.

▣ *Giimeel*

- 17 Akka ani jiraadhuu fi dubbii kee eeguuf,
garbicha keetiif waan gaarii godhi.
- 18 Akka ani seera kee keessatti
waan dinqisiisaa arguuf, ija koo naa bani.
- 19 Ani lafa irratti keessummaa dha;
ajajawwan kee na duraa hin dhoksin.
- 20 Lubbuun koo yeroo hunda
seera kee hawwuudhaan, laafaa jirti.
- 21 Ati of tuultota warra abaaramoo,
kanneen ajajawwan kee irraa jal'atan ni ifatta.
- 22 Waan ani seera kee eeguuf,
arrabsoo fi tuffii isaanii narraa fageessi.
- 23 Bulchitoonni walii wajjin taa'anii yoo maqaa na balleessan iyyuu,
tajaajilaan kee irra deddeebi'ee labsii kee ni yaada.
- 24 Ajajni kee gammachuu koo ti;
gorsituu kootis.

▤ *Daalet*

- 25 Lubbuun koo biyyootti maxxante;
ati akkuma dubbii keetiitti na oolchi.
- 26 Yeroo ani waa'ee karaa koo sitti himetti,
ati deebii naa kennite; sirna kees na barsiisi.
- 27 Barsiisa seera keetii na hubachiisi;
anis irra deddeebi'ee dinqii kee nan yaada.
- 28 Lubbuun koo gaddaan laafteerti;
ati akkuma dubbii keetiitti na jabeessi.
- 29 Karaa sobaa irraa na fageessi;
arjumaadhaanis seera kee na barsiisi.
- 30 Ani karaa dhugaa filadheera;

seera kees of dura kaa'adheera.

- 31 Yaa WAAQAYYO, ani ajaja kee
jabeessee qabadheera; ati na hin qaanessin.
32 Sababii ati hubannaa koo naa bal'ifteef
ani daandii ajajawwan keetii irra nan fiiga.

¶ Hee

- 33 Yaa WAAQAYYO, akka ani sirna kee duukaa bu'u na barsiisi;
anis hamma dhumaatti isa nan eega.
34 Akka ani seera kee eegee garaa koo guutuun
isaaf ajajamuuf hubannaa naa kenni.
35 Daandii ajajawwan keetii irra na deemsisi;
anis achitti gammachuu nan argadhaatii.
36 Garaa koo gara ofittummaadhaan faayidaa argachuutti utuu hin ta'in,
gara sirna keetiitti naa deebisi.
37 Ija koo waan faayidaa hin qabne irraa deebisi;
akkuma dubbii keetiittis na jiraachisi.
38 Ati akka sodaatamtuuf,
waadaa kee garbicha keetiif guuti.
39 Salphina ani sodaadhu narraa fageessi;
seerri kee gaariidhaatii.
40 Kunoo, ani sirna kee nan hawwa;
qajeelummaa keetiin na jiraachisi.

¶ Waw

- 41 Yaa WAAQAYYO, jaalalli kee kan hin geeddaramne sun,
fayyisuun kees akkuma dubbii keetiitti gara koo haa dhufu;
42 yoos ani sababii dubbii kee amanadhuuf,
warra na arrabsaniif deebii kenna.
43 Waan ani seera kee abdadheef,
ati dubbii dhugaa afaan koo keessaa hin balleessin.
44 Bara baraa hamma bara baraatti,
ani yeroo hunda seera kee nan eega.
45 Ani ajaja kee waanan barbaaduuf,
bilisummaadhaan nan deddeebi'a.
46 Ani waa'ee ajaja keetii mootota duratti nan dubbadha;
hin qaanefamus;
47 waan ani ajajawwan kee jaalladhuuf,
isaanitti nan gammada.
48 Ani gara ajajawwan kee kanneen ani jaalladhu sanaatti
harka koo ol nan fudhadha;
labsii kees irra deddeebi'ee nan yaada.

¶ Zaayin

- 49 Waadaa tajaajilaa keetiif seente sana yaadadhu;
ati isumaan abdiin naa kenniteertaatii.
50 Rakkina koo keessatti jajjabinni koo kana:
Waadaan kee na jiraachisa.
51 Of tuultonna akkuma barbaadanitti natti qoosu;
ani garuu seera kee irraa hin jal'adhu.
52 Yaa WAAQAYYO, ani seera kee durii sana nan yaadadha;
isa keessattis jajjabina nan argadha.
53 Sababii hamoota warra seera kee dhiisaniitiif,
aariin na gugguba.
54 Iddoo keessumummaa koo hundatti
seerri kee faarfannaa koo ti.
55 Yaa WAAQAYYO, ani halkan keessa maqaa kee nan yaadadha;
seera kees nan eega.
56 Waan ani ajaja kee eegeef,
kun naaf ta'eera.

¶ Heeti

- 57 Yaa WAAQAYYO, ati qooda koo ti;
anis dubbii keetiif ajajamuuf waadaa galeera.
58 Ani garaa koo guutuun fuula kee barbaaddadheera;
ati akkuma waadaa keetiitti naa araarami.

- 59 Ani karaa koo itti deddeebi'ee yaadeera;
 tarkaanfii koo gara sirna keetiitti deebiseera.
 60 Ani ajajawwan kee eeguuf,
 nan ariifadha; hin barfadhus.
 61 Hamoonni yoo funyoodhaan na hidhan iyyuu,
 ani seera kee hin irraanfadhu.
 62 Sababii seera kee qajeelaa sanaatiif,
 ani si galateeffachuuf jedhee halkan walakkaa nan ka'a.
 63 Ani warra si sodaatan hundaaf,
 warra ajaja kee eegan hundaafis michuu dha.
 64 Yaa WAAQAYYO, lafti jaalala keetiin guutamteerti;
 sirna kee na barsiisi.

♪ *Teeti*

- 65 Yaa WAAQAYYO, ati akkuma dubbii keetiitti,
 tajaajilaa keetiif waan gaarii gooteerta.
 66 Murtii gaarii fi beekumsa na barsiisi;
 ani ajajawwan keetti nan amanaatii.
 67 Ani utuun hin rakkatin karaa irraa badee ture;
 amma garuu dubbii kee nan eega.
 68 Ati gaarii dha; wanni ati hojjettus gaarii dha;
 sirna kee na barsiisi.
 69 Of tuultonna yoo sobaan maqaa na balleessan iyyuu,
 ani garaa koo guutuudhaan seera kee nan eega.
 70 Onneen isaanii mooraan haguugamteerti;
 ani garuu seera keetti nan gammada.
 71 Akka ani sirna kee baradhuuf,
 rakkachuun koo anaaf gaarii ture.
 72 Meetii fi warqee kumaatama irra,
 seeri afaan keetii ba'u anaaf gaariidha.

` *Yood*

- 73 Harki kee na uume; na tolches;
 akka ani ajaja kee baradhuuf ati hubannaa naa kenni.
 74 Sababii ani dubbii kee abdadheef,
 warri si sodaatan yommuu na arganitti haa gammadan.
 75 Yaa WAAQAYYO, ani akka murtiin kee qajeelaa ta'e,
 akka atis amanamummaadhaan na dhiphiste beeka.
 76 Akkuma ati tajaajilaa keetiif waadaa galte sanatti,
 jaalalli kee kan hin geeddaramne sun na haa jajjabeessu.
 77 Akka ani lubbuun jiraadhuuf gara laafinni kee gara koo haa dhufu;
 seerri kee gammachuu kootii.
 78 Of tuultonna waan sababii malee na yakkaniif haa qaana'an;
 ani garuu irra deddeebi'ee seera kee nan yaada.
 79 Warri si sodaatan, kanneen seera kee hubatan
 gara kootti haa deebi'an.
 80 Akka ani hin qaanofneef
 garaan koo seera kee duratti hanqina hin qabaatin.

♫ *Kaaf*

- 81 Lubbuun koo fayyisuu kee hawwuudhaan gaggabdi;
 ani garuu dubbii kee nan abdadha.
 82 Iji koo waadaa kee eeggachuudhaan dadhabe;
 anis, "Ati yoom na jajjabeessita?" nan jedha.
 83 Qalqaloo wayinii kan aara keessa ture
 fakkaadhus ani ajaja kee hin irraanfadhu.
 84 Tajaajilaan kee hamma yoomiitti obsuu qaba?
 Ati warra na ari'atanitti yoom murta?
 85 Of tuultonna warri akka seera keetiitti hin bulle,
 boolla naa qotaniiru.
 86 Ajajawwan kee hundinuu amanamoo dha;
 namoonni sababii malee waan na ari'ataniif ati na gargaari.
 87 Isaan lafa irraa na balleessuu ga'anii turan;
 ani garuu sirna kee hin dhiifne.
 88 Ati akkuma jaalala keetiitti lubbuu koo baraari;

anis seera afaan keetii ba'u nan eega.

↳ *Laamed*

- 89 Yaa WAAQAYYO, dubbiin kee bara baraan jiraata;
samii keessas jabaatee ni dhaabata.
- 90 Amanamummaan kee dhaloota hundaaf itti fufa;
ati lafa hundeessite; isheenis ni jiraatti.
- 91 Sababii wanni hundinuu si tajaajiluuf,
seerri kee hamma har'aatti jiraateera.
- 92 Utuu seerri kee gammachuu naa ta'uu baatee,
ani silaa rakkina kootiin badeen ture.
- 93 Sababii ati isaan na jiraachifteef,
ani gonkumaa ajaja kee hin irraanfadh.
- 94 Sababii ani kan kee ta'eef na fayyisi;
anis sirna kee barbaadeera.
- 95 Hamoonni na balleessuuf na eeggachaa jiru;
ani garuu irra deddeebi'ee seera kee nan yaada.
- 96 Ani akka wanni mudaa hin qabnee hundinuu daangaa qabu argeera;
ajajni kee garuu baay'ee bal'aa dha.

↳ *Meem*

- 97 Ani seera kee akkaman jaalladha!
Guyyaa guutuu irra deddeebi'ee waa'ee isaa nan yaada.
- 98 Ajajawwan kee waan yeroo hunda na wajjin jiraniif,
diinota koo caalaa ogeessa na godhan.
- 99 Ani sababiin irra deddeebi'ee seera kee yaaduuf,
barsiisota koo hundumaa caalaa hubannaa qaba.
- 100 Ani sababiin ajaja kee eeguuf,
maanguddoota caalaa hubannaa guddaan qaba.
- 101 Ani akkan dubbii kee eeguuf,
karaa hamaa hunda irraa miilla koo adabadheera.
- 102 Waan ati mataan kee na barsiifteef,
ani seera kee irraa hin fagaanne.
- 103 Dubbiin kee akkam arraba kootti mi'aawa;
nadhii dammaa caalaa afaan kootti mi'aawa!
- 104 Ani qajeelfama kee irraa hubannaa argadheera;
kanaafuu daandii sobaa hunda nan jibba.

↳ *Nuun*

- 105 Dubbiin kee miilla kootiif ibsaa dha;
daandii kootiif immoo ifa.
- 106 Ani akkan seera kee qajeelaa sana eeguuf, kakadheera;
kanas mirkaneesseera.
- 107 Ani akka malee dhiphadheen jira; yaa WAAQAYYO,
ati akkuma dubbii keetiitti lubbuu koo baraari.
- 108 Yaa WAAQAYYO,
galata fedhiidhaan afaan kootii ba'u fudhadhu;
seera kees na barsiisi.
- 109 Jireenyi koo yeroo hunda harka koo keessa jiraatu iyyuu,
ani seera kee hin irraanfadh.
- 110 Hamoonni kiyyoo naa kaa'aniiru;
ani garuu ajaja kee irraa hin jal'anne.
- 111 Seerri kee dhaala koo kan bara baraa ti;
gammachuu garaa kootiitis.
- 112 Garaan koo hamma dhumaatti
ajaja kee eeguuf kutateera.

↳ *Saamek*

- 113 Ani nama yaada lamaa nan jibba;
seera kee garuu nan jaalladha.
- 114 Ati iddoo ani itti baqadhuu fi gaachana koo ti;
ani dubbii kee abdadheera.
- 115 Akka ani ajajawwan Waaqa koo eeguuf,
isin warri waan hamaa hojjettan narraa fagaadhaa!

- 116 Ati akkuma waadaa keetiitti na deeggari;
anis nan jiraadha;
akka ani abdii kootti qaana'u na hin godhin.
117 Akka ani nagaadhaan jiraadhuuf na deeggari;
yeroo hunda seera kee nan kabaja.
118 Sababii gowwoomsaan isaanii faayidaa hin qabneef;
ati warra seera kee irraa jal'atan hunda tuffattee gatta.
119 Ati hamoota lafa irraa hunda akka kosiitti gatta;
kanaafuu ani seera kee nan jaalladha.
120 Foon koo si sodaachuudhaan hollata;
anis murtii kee nan sodaadha.

♪ *Aayin*

- 121 Ani waan qajeelaa fi tolaa hojjedheera;
ati warra na hacuucanitti dabarsitee na hin kennin.
122 Nagaan jiraachuu tajaajilaa keetii mirkaneessi;
akka of tuultonna cunqursanis hin eeyyamin.
123 Iji koo fayyisuu kee eeguudhaan,
waadaa kee qajeelaas eeguudhaanis dadhabeera.
124 Akkuma jaalala keetiitti tajaajilaa kee yaadadhu;
seera kees na barsiisi.
125 Ani tajaajilaa kee ti;
akka ani ajaja kee beekuuf hubannaa naa kenni.
126 Yaa WAAQAYYO, kun yeroo ati itti hojjettuu dha;
seerri kee cabsamaa jiraatii.
127 Kanaafuu ani warqee caalaa,
warqee qulqulluu caalaa, ajajawwan kee nan jaalladha;
128 ani akka seerri kee hundi qajeelaa ta'e nan amana;
daandii sobaa hundas nan jibba.

▣ *Pea*

- 129 Sirni kee dinqisiisaa dha;
kanaafuu ani isa nan eega.
130 Ibsamuun dubbii keetii ifa kenna;
wallaalotaafis hubannaa kenna.
131 Ani ajajawwan kee hawwuudhaan
afaan koo banee nan hargana.
132 Ati akkuma yeroo hunda warra maqaa kee jaalataniif gootu sana,
gara kootti garagalii na maari.
133 Akkuma dubbii keetiitti tarkaanfii miilla kootii naa qajeelchi;
cubbuun tokko iyyuu narratti hin mo'in.
134 Akka ani ajaja kee eeguuf
hacuuccaa namootaa jalaa na furi.
135 Akka fuulli kee tajaajilaa kee irratti ifu godhi;
sirna kees na barsiisi.
136 Sababii namoonni seerra kee hin eegneef,
iji koo imimmaan lolaasa.

♪ *Tsaade*

- 137 Yaa WAAQAYYO, ati qajeelaa dha;
murtiin kees qajeelaa dha.
138 Seerri ati kennite qajeelaa dha;
guutummaattis amanamaa dha.
139 Sababii diinonni koo dubbii kee dagataniif,
hinaaffaan ani qabu na guggubeera.
140 Waadaan kee sirriitti qoramee ilaalameera;
tajaajilaan kees isa jaallata.
141 Xinnaadhee tuffatamu iyyuu,
ani ajaja kee hin irraanfadhu.
142 Qajeelummaan kee bara baraan jiraata;
seerri kees dhugaa dha.
143 Rakkinnii fi dhiphinni natti dhufeera;
ajajawwan kee garuu gammachuu koo ti.
144 Seerri kee bara baraan qajeelaa dha;
akka ani jiraadhuuf hubannaa naa kenni.

ፆ *Qoof*

- 145 Yaa WAAQAYYO, ani garaa koo guutuudhaan sin waammadha;
deebii naa kenni; anis sirna keetiif nan ajajama.
- 146 Ani sittin iyyadha; ati na fayyisi;
seera kees nan eega.
- 147 Ani utuu lafti hin bari'in ka'ee gargaarsaaf nan iyyadha;
ani dubbii kee abdadheera.
- 148 Akka ani irra deddeebi'ee waadaa kee yaaduuf,
iji koo halkan guutuu banamee bula.
- 149 Akkuma jaalala keetiitti sagalee koo dhaga'i;
Yaa WAAQAYYO, akkuma seera keetiitti lubbuu koo baraari.
- 150 Warri daba mari'atan as dhi'oo jiru;
seera kee irraa garuu fagoo jiru.
- 151 Yaa WAAQAYYO, ati garuu dhi'oo jirta;
ajajawwan kee hundis dhugaa dha.
- 152 Akka ati ajajawwan kee bara baraan hundeessite,
ani seera kee irraa dur baradheera.

ፇ *Reesh*

- 153 Dhiphina koo argiitii na oolchi;
ani seera kee hin daganneetii.
- 154 Dubbii koo naa falmi; na furis;
akkuma waadaa keetiitti lubbuu koo baraari.
- 155 Sababii isaan sirna kee hin barbaanneef,
fayyinni hamoota irraa fagaateera.
- 156 Yaa WAAQAYYO, gara laafinni kee guddaa dha;
akkuma seera keetiitti lubbuu koo baraari.
- 157 Diinonni koo warri na ari'atan baay'ee dha;
ani garuu seera kee irraa hin jal'anne.
- 158 Sababii isaan dubbii keetiif hin ajajamneef,
ani warra amantii hin qabne ija jibbaatiin nan ilaala.
- 159 Akkam akka ani qajeelfama kee jaalladhu mee ilaali;
Yaa WAAQAYYO, akkuma jaalala keetiitti lubbuu koo baraari.
- 160 Dubbiin kee hundinuu dhugaa dha;
seerri kee qajeelaan hundinuu bara baraan jiraata.

ፈ *Sinii fi Shiin*

- 161 Bulchitoonni sababii malee na ari'atan;
garaan koo garuu dubbii kee
sodaachuudhaan hollata.
- 162 Ani akka nama boojuu guddaa argate tokkootti,
dubbii keetti nan gammada.
- 163 Ani soba nan jibba; nan xireeffadhas;
seera kee garuu nan jaalladha.
- 164 Sababii seera kee qajeelaa sanaatiif,
ani guyyaatti yeroo torba sin galateeffadha.
- 165 Warri seera kee jaallatan nagaa guddaa qabu;
wanni isaan gufachiisu tokko iyyuu hin jiru.
- 166 Yaa WAAQAYYO, ani fayyisuu kee nan abdadha;
ajaja kee duukaas nan bu'a.
- 167 Ani waanan guddaa isa jaalladhuuf,
ajaja kee nan eega.
- 168 Ati karaa koo hunda waan beektuuf,
ani sirna keetii fi seera kee nan eega.

ፉ *Taaw*

- 169 Yaa WAAQAYYO, iyyi koo fuula kee dura haa ga'u;
ati akkuma dubbii keetiitti hubannaa naa kenni.
- 170 Waammanni koo fuula kee dura haa ga'u;
akkuma waadaa keetiitti na baasi.
- 171 Sababii ati qajeelfama kee na barsiiftuuf,
hidhiin koo galata haa dhangalaasu.
- 172 Arrabni koo dubbii kee haa faarfatu;
ajajni kee hundi qajeelaadhaatii.

- 173 Waan ani sirna kee filadheef,
harki kee na gargaaruuf haa qophaa'u.
- 174 Yaa WAAQAYYO, ani fayyisuu kee nan hawwa;
seerri kees gammachuu koo ti.
- 175 Lubbuun koo si galateeffachuuf haa jiraattu;
seerri kees na haa gargaaru.
- 176 Ani akkuma hoolaa badee karaa irraa jal'adheera.
Ani ajajawwan kee hin irraanfanneetii,
tajaajilaa kee barbaadi.

Farra Nagaa

Faarfannaa 120

Faarfannaa Ol ba'uu.

- ¹ Ani rakkina koo keessatti WAAQAYYOTTI nan iyyadha;
innis deebii naa kenna.
- ² Yaa WAAQAYYO, afaan sobuu fi
arraba nama gowwoomsu jalaa na baasi.
- ³ Yaa arraba gowwoomsituu nana, maaltu siif kennama?
Kana caalaas maal godhamta?
- ⁴ Inni xiyya loltootaa kan qarameen,
barbadaa ibiddaa qacamaatiin si adaba.
- ⁵ Ani waanan Meshek keessa taa'ee
dunkaanota Qeedaar gidduu jiraadhuuf, anaaf wayyoo!
- ⁶ Warra nagaa jibban gidduu,
ani yeroo dheeraa jiraadheera.
- ⁷ Ani nama nagaa barbaadu dha;
isaan garuu yeroo ani dubbadhu lolaaf kaka'an.

Egduu Israa'el

Faarfannaa 121

Faarfannaa Ol ba'uu.

- ¹ Ani ija koo gara tulluuwwaniitti ol nan qabadha;
gargaarsi koo eessaa dhufa?
- ² Gargaarsi koo WAAQAYYO
samii fi lafa uume biraa dhufa.
- ³ Inni akka miilli kee mucucaatu hin godhu;
kan si eegu hin mugu;
- ⁴ dhugumaan inni Israa'elin eegu
hin mugu; hin rafus.
- ⁵ WAAQAYYO si eega;
WAAQAYYO karaa mirga keetiitiin gaaddisa siif ta'a;
- ⁶ guyyaa aduun si hin gubu;
halkanis ji'i si hin miidhu.
- ⁷ WAAQAYYO miidhaa hunda irraa si eega;
inni lubbuu kee ni eega;
- ⁸ WAAQAYYO ammaa jalqabee
hamma bara baraatti, ba'uu fi galuu kee ni eega.

Yaa Yerusaalem Iilchi

Faarfannaa 122

Faarfannaa Ol ba'uu. Faarfannaa Daawit.

- ¹ Yommuu isaan, "Kottu gara mana WAAQAYYOO dhaqnaa"
naan jedhanitti, ani nan gammade.
- ² Yaa Yerusaalem,
miilli keenya karrawwan kee irra dhaabata.

³ Yerusaalem akka magaalaa walitti maxxantee
gobbatte tokkootti ijaaramte.

⁴ Kunis iddoo gosoonni,
gosoonna WAAQAYYO,
akka sirna Israa'eliif kenname sanaatti,
maqaa WAAQAYYOO galateeffachuuf itti ol ba'anii dha.

⁵ Teessoowwan murtii,
teessoowwan mana Daawit achi dhaabatu.

⁶ Akkana jedhaa nagaan Yerusaalemiif kadhadaa:
“Warri si jaallatan nagaan haa jiraatan.

⁷ Dallaa kee keessa nagaan,
masaraa mootummaa keetii keessa immoo tasgabbiin haa jiraatu.”

⁸ Ani obboloota kootii fi michoota kootiif jedhee,
“Nagaan si keessa haa jiraatu” nan jedha.

⁹ Mana WAAQAYYO Waaqa keenyaatiif jedhee,
ani akka wanni gaariin siif ta’u nan hawwa.

Kadhannaa Yeroo Rakkinnaa

Faarfannaa 123

Faarfannaa ol ba’uu.

¹ Yaa isa teessoon kee samii irra jiru,
ani ija koo gara keetti ol nan qabadha.

² Akkuma iji garbootaa harka gooftaa isaanii,
iji garbittii immoo harka giiftii ishee ilaalu sana,
hamma inni araara nuu buusutti,
iji keenyas gara WAAQAYYO Waaqa keenyaa ni ilaala.

³ Nu araarami; yaa WAAQAYYO, nuu araarami;
tuffatamuun nutti baay’ateeraatii.

⁴ Arrabni warra of jajaniitii fi
tuffiin warra of tuulanii nutti baay’ateera.

Fayyisaa Israa’el

Faarfannaa 124

Faarfannaa ol ba’uu. Faarfannaa Daawit.

¹ Israa’el akkana haa jedhu:
Utuu WAAQAYYO garee keenya ta’uu baatee,

² utuu WAAQAYYO garee keenya ta’uu baatee,
yommuu namoonni nutti ka’anitti,
³ yommuu aariin isaanii nutti boba’etti,
silaa isaan utuu nu lubbuun jirruu nu liqimsu turan;

⁴ lolaan nu liqimsee
dha’aan bishaanii nurra yaa’a ture;

⁵ bishaan hamaan
nu fudhatee bada ture.

⁶ WAAQAYYO akka nu ilkaan isaaniitiin cicciramnuuf
dabarsee itti nu hin kennin sun haa eebbifamu.

⁷ Akkuma simbirri kiyoo adamsituu jalaa baatu,
nu isaan jalaa baaneerra;
kiyyoon ni ciccite;
nus jalaa baane.

⁸ Gargaarsi keenya maqaa WAAQAYYOO,
Uumaa samii fi lafa sanaa ti.

Waaqayyo Amanamtoota Isaa Ni eega

Faarfannaa 125

Faarfannaa ol ba’uu.

¹ Warri WAAQAYYON amanatan akka Tulluu Xiyoon
kan hin raafamne, kan bara baraan jiraatu sanaa ti.

- ² Akkuma tulluuwwan Yerusaaalemin marsan sana,
WAAQAYYO ammaa jalqabee hamma bara baraatti,
saba isaa ni marsa.
- ³ Akka qajeeltonni jal'ina hojjechuuf
harka isaanii ol hin diriirfanneef,
bokkuun hamootaa lafa qajeeltotaaf
ixaadhaan qoodame irra hin jiraatu.
- ⁴ Yaa WAAQAYYO, warra gaariif,
warra garaa isaaniitiin toloota ta'aniifis waan gaarii godhi.
- ⁵ Warra karaa micciiramaatti garagalan garuu,
WAAQAYYO akkuma warra hammina hojjetan balleessu jaras ni balleessa.
- Nagaan Israa'eliif haa ta'u.

Faarfannaa Warra Boojuudhaa Deebi'anii

Faarfannaa 126

Faarfannaa ol ba'uu.

- ¹ Yeroo WAAQAYYO warra booji'amanii turan gara Xiyoonitti deebisetti,
nu akka warra abjuu abjootanii taane.
- ² Afaan keenya kolfaan, arrabni keenya immoo
faarfannaa gammachuutiin guutame.
Kana irratti saboota gidduutti,
"WAAQAYYO waan guddaa isaaniif godheera" jedhame.
- ³ WAAQAYYO waan guddaa nuuf godhe;
nus ni gammanne.
- ⁴ Yaa WAAQAYYO, akkuma lagoota Negeeb,
boojuu keenya nuu deebisi.
- ⁵ Warri imimmaaniin facaasan,
faarfannaa gammachuutiin ni haammatu.
- ⁶ Namni sanyii facaafamu baadhatee boo'aa gad ba'u,
bissii isaa baadhatee faarfannaa gammachuu faarfachaa deebi'a.

Waaqa Amanachuu

Faarfannaa 127

Faarfannaa Ol ba'uu. Faarfannaa Solomoon.

- ¹ WAAQAYYO mana ijaaruu baannaan,
warri ijaaran akkasumaan dadhabu.
WAAQAYYO magaalaa eeguu baannaan,
warri eegan akkasumaan dhaabachaa bulu.
- ² Isin buddeena dadhabbii guddaan argame nyaachuuf jettanii,
barii barraqaan ka'uun keessan,
turtanii rafuun keessan faayidaa hin qabu;
inni warra jaallatuuf utuma isaan rafanii iyyuu
waan isaan barbaachisu ni kennaaf.
- ³ Kunoo, ijoolleen kennaa WAAQAYYOO ti;
iji gadameessaas badhaasa isaa ti.
- ⁴ Ijoolleen dargaggummaa keessa dhalchan,
akkuma xiyya harka goota tokkoo keessa jiruu ti.
- ⁵ Namni korojoon isaa xiyyaan guutame eebbifamaa dha.
Inni yommuu karra duratti diinota isaatiin falmutti hin qaana'u.

Eebba Qajeeltonni Argatan

Faarfannaa 128

Faarfannaa Ol Ba'uu.

- ¹ Warri WAAQAYYON sodaatan,
kanneen karaa isaa irra deeman eebbifamoo dha.

- ² Ati bu'aa dadhabbii keetii ni nyaatta;
ni eebbifamta; jireenyis sitti tola.
- ³ Niitiin kee mana kee keessatti,
akka muka wayinii kan ija naqatee ni taati;
ijoolleen kees naannoo maaddii keetiitti,
akka lataa muka ejersaa ni ta'u.
- ⁴ Namni WAAQAYYON sodaatu
akkasitti eebbifama.
- ⁵ Bara jireenya keetii guutuu,
WAAQAYYO Xiyoon irraa si haa eebbisu;
atis badhaadhummaa Yerusaaalem argi.
- ⁶ ijoollee ijoollee keetii ni argi;
nagaan Israa'eliif haa ta'u.

Kadhannaa Diinota Xiyooniin Mormuuf Kadhatame

Faarfannaa 129

Faarfannaa ol ba'uu.

- ¹ Israa'el akkana haa jedhu;
"Isaan dargaggummaa kootii jalqabanii akka malee na cunqursaniiru;
² isaan dargaggummaa kootii jalqabanii akka malee na cunqursaniiru;
garuu na hin mo'anne.
- ³ Warri gootiisa qotan dugda koo qotan;
bo'oo isaaniis ni dheeressan.
- ⁴ WAAQAYYO garuu qajeelaa dha;
funyoo jal'ootaa gargar kukkuteera."
- ⁵ Warri Xiyoonin jibban hundinuu,
qaaniidhaan duubatti haa deebi'an.
- ⁶ Isaan akka marga bantii manaa irraa
kan utuu hin guddatin goguu haa ta'an;
- ⁷ namichi haamu qabaa isaa guuttachuu,
yookaan namichi walitti qabu bissii isaa guuttachuu hin danda'u.
- ⁸ Warri achiin darban, "Eebbi WAAQAYYOO isiniif haa ta'u;
maqaa WAAQAYYOOTIIN isin eebbifna" isaaniin hin jedhin.

Waamicha Gargaarsaaf Dhi'aate

Faarfannaa 130

Faarfannaa ol ba'uu.

- ¹ Yaa WAAQAYYO, ani boolla gad fagoo keessaa
sitti nan iyyadha;
² yaa Gooftaa, sagalee koo dhaga'i.
- Gurri kees sagalee waammata koo
xiyyeeffatee haa dhaga'u.
- ³ Yaa WAAQAYYO, utuu ati cubbuu lakkooftee,
yaa gooftaa silaa eenyutu dhaabachuu danda'a?
- ⁴ Garuu dhiifamni si bira jira;
kanaaf ati ni sodaatamta.
- ⁵ Ani WAAQAYYON nan eeggadha; lubbuun koos isa eeggatti;
dubbii isaas nan abdadha.
- ⁶ Eegdota barii lafaa eeggatan caalaa,
dhugumaan eegdota barii lafaa eeggatan caalaa
lubbuun koo Gooftaa eeggatti.
- ⁷ Yaa Israa'el, ati WAAQAYYON abdadhu;
WAAQAYYO bira jaalalli dhuma hin qabne,
furiin guutuunis ni jiraatii.
- ⁸ Inni mataan isaa cubbuu isaanii
hundumaa irraa Israa'elin ni fura.

Waaqa Amanachuu

Faarfannaa 131

Faarfannaa ol ba'uu. Faarfannaa Daawit.

- 1 Yaa WAAQAYYO, garaan koo of hin jaju;
iji koos of hin tuulu;
ani waan guddaa fi waan humna kootii ol ta'e keessa hin seenu.
- 2 Ani garuu lubbuu koo afaan qabachiiseera; cal'isiiseeras;
akkuma daa'imni harma haadha isaa guusan tokko haadhatti irkatee boqotu sana,
akkuma daa'ima harma haadha isaa guusani lubbuun koo na keessatti cal'iste.
- 3 Yaa Israa'el, ammaa fi bara baraaf,
WAAQAYYON abdadhu.

Faarfannaa Deebifamuu Taabotaa

Faarfannaa 132

132:8-10 kwf - 2Sn 6:41-42

Faarfannaa ol ba'uu.

- 1 Yaa WAAQAYYO, Daawitii fi
rakkina inni obse hundumaa yaadadhu.
- 2 Inni kakuu tokko WAAQAYYOOF kakatee
Waaqa Yaaqoob Jabaa sanaaf akkana jedhee wareege:
- 3 "Ani mana koo ol hin seenu;
yookaan siree kootti ol hin ba'u.
- 4 Ani ija kootiif hirriba,
baallee ija kootiitiif immoo mugaatii hin eeyyamu;
- 5 kunis hamma ani WAAQAYYOOF iddoo argutti,
Waaqa Yaaqoob Jabaa sanaaf iddoo jireenyaa argutti."
- 6 Kunoo, Efraataatti waa'ee isaa dhageenye;
Yaa'arittis isa arganne:
- 7 "Kottaa iddoo jireenya isaa dhaqnaa;
ejjeta miilla isaa jalattis kufnee waaqeffannaa.
- 8 'Yaa WAAQAYYO ka'iitii, gara iddoo boqonnaa keetii kottu;
atii fi taabonni jabina keetiis kottaa.
- 9 Luboonni kee qajeelummaa haa uffatan;
qulqulloonni kees gammachuudhaan haa faarfatan.'" "
- 10 Sababii garbicha kee Daawitiif jedhiitii,
dibamaa kee hin gatin.
- 11 WAAQAYYO akkana jedhee kakuu dhugaa tokko Daawitiif kakateera;
inni kakuu kana irraa duubatti hin deebi'u:
"Ani ilmaan kee keessaa isa tokko teessoo kee irra nan teessisa;
- 12 yoo ilmaan kee kakuu koo fi seera ani isaan barsiisu eegan,
ilmaan isaaniis akkasuma bara baraa hamma bara baraatti
teessoo kee irra ni taa'u."
- 13 WAAQAYYO Xiyooinin filateeraatii;
akka isheen iddoo jireenya isaa taatus fedhee akkana jedheera:
- 14 "Kun bara baraa hamma bara baraatti iddoo jireenyaa koo ti;
kanas ani waanan fedheef, as nan jiraadha.
- 15 Ani waan hundaan ishee nan eebbisa;
hiyyeeyyii ishee illee buddeena nan quubsa.
- 16 Luboota isheetti fayyina nan uffisa;
qulqulloonni ishees gammachuudhaan ni faarfatu.
- 17 "Ani achitti akka gaanfi tokko Daawitiif biqilu nan godha;
dibamaa koofis ibsaa qopheesseera.
- 18 Diinota isaatti qaanii nan uffisa;
gonfoon mataa isaa irraa garuu ni ifa."

Jaalala Obbolummaa

Faarfannaa 133

Faarfannaa ol ba'uu. Faarfannaa Daawit.

- ¹ Obboloonni tokkummaadhaan walii wajjin jiraachuun,
akkam gaarii dha! Akkam namatti tolas!
- ² Kun akka zayitii gatii guddaa
kan mataa irratti dhangalaafamee,
akka isa areeda irra gad yaa'uu,
areeda Aroon irra, morma uffata isaa irras gad yaa'a ti.
- ³ Innis akkuma fixeensa Hermoon,
kan Tulluu Xiyoon irra gad yaa'uu ti.
Achi irratti WAAQAYYO hamma bara baraatti eebba isaa,
jireenyas ajajeeraatii.

Faarfannaa Halkanii

Faarfannaa 134

Faarfannaa ol ba'uu.

- ¹ Isin tajaajiltoonni WAAQAYYOO,
warri halkan mana WAAQAYYOO keessa tajaajiltan hundinuu,
WAAQAYYON galateeffadhaa.
- ² Mana qulqullummaa keessatti harka keessan ol qabaatii
WAAQAYYON galateeffadhaa.
- ³ WAAQAYYO samii fi lafa uume sun
Xiyoon irraa isin haa eebbisu.

Faarfannaa Galataa

Faarfannaa 135

135:15-20 kwf - Far 115:4-11

¹ Haalleluuyaa.

- Maqaa WAAQAYYOO jajadhaa;
isin garboonni WAAQAYYOO isa galateeffadhaa.
- ² Isin warri mana WAAQAYYOO keessa,
oobdii mana Waaqa keenyaa keessa tajaajiltan, isa galateeffadhaa.
 - ³ WAAQAYYO gaariidhaatii, WAAQAYYON galateeffadhaa;
inni arjaadhaatii maqaa isaatiif faarfadhaa.
 - ⁴ WAAQAYYO Yaaqoobin ofii isaatiif,
Israa'elin immoo dhaala dhuunfaa isaa godhee filateeraatii.
 - ⁵ Ani akka WAAQAYYO guddaa ta'e,
akka Gooftaan keenya waaqota hunda caalaa guddaa ta'e beeka.
 - ⁶ WAAQAYYO samiiwwan keessattii fi lafa irratti,
galaanotaa fi tuujuba isaanii hunda keessatti,
waan isa gammachiisu kam iyyuu ni hojjeta.
 - ⁷ Inni akka duumessoonni daarii lafaatii ka'an ni godha;
bokkaa wajjin balaqqee erga;
gombisaa isaa keessaas bubbee gad baasa.
 - ⁸ Inni hangafoota Gibxi,
kan namaatii fi kan horii ni dha'e.
 - ⁹ Yaa Gibxi, inni gidduu keetti,
Fara'oonii fi tajaajiltoota isaa hundatti mallattoo fi dinqii isaa ergeera.
 - ¹⁰ Inni saboota baay'ee dha'ee
mootota jajjaboo ajjeese;
 - ¹¹ Sihoon mootii warra Amoorotaa,
Oogi mootii Baashaanii fi mootota Kana'aan hunda ni ajjeese;
 - ¹² lafa isaanii dhaala godhee
akka dhaala isaanii ta'uufis saba isaa Israa'eliif kenne.

- 13 Yaa WAAQAYYO, maqaan kee bara baraan jiraata;
yaa WAAQAYYO, ati dhaloota hunda keessatti ni yaadatamta.
- 14 WAAQAYYO saba isaatiif ni falma;
tajaajiltoota isaatiifis garaa laafa.
- 15 Waaqonni tolfamoon namoota ormaa meetii fi
warqee harka namaatiin hojjetamanii dha.
- 16 Isaan afaan qabu; garuu dubbachuu hin danda'an;
ijas qabu; garuu arguu hin danda'an;
- 17 gurra qabu; garuu dhaga'uu hin danda'an;
yookaan hafuurri tokko iyyuu afaan isaanii keessa hin jiru.
- 18 Warri isaan tolchan kanneen isaan amanatan hundi
akkuma isaanii ta'u.
- 19 Yaa mana Israa'el WAAQAYYON eebbisaa;
yaa mana Aroon WAAQAYYON eebbisaa;
- 20 yaa mana Lewwii WAAQAYYON eebbisaa;
isin warri isa sodaattanis, WAAQAYYON eebbisaa.
- 21 WAAQAYYO inni Yerusaaalem keessa jiraatu sun,
Xiyoon irraa haa eebbifamu.

Haalleluuyaa!

Faarfannaa Wal jalaa Qabanii Faarfatan

Faarfannaa 136

- 1 WAAQAYYOOF galata galchaa; inni gaariidhaatii. Jaalalli isaa bara baraan jiraata.
- 2 Waaqa waaqotaatiif galata galchaa. Jaalalli isaa bara baraan jiraata.
- 3 Gooftaa Gooftotaatiif galata galchaa: Jaalalli isaa bara baraan jiraata.
- 4 inni kophaa isaa dinqii gurguddaa hojjeta; Jaalalli isaa bara baraan jiraata.
- 5 inni ogummaa isaatiin samiiwwan uume; Jaalalli isaa bara baraan jiraata.
- 6 inni bishaanota irratti lafa diriirse; Jaalalli isaa bara baraan jiraata.
- 7 inni ifa gurguddaa hojjete; Jaalalli isaa bara baraan jiraata.
- 8 inni akka biiftuun guyyaa mootu godhe; Jaalalli isaa bara baraan jiraata.
- 9 inni akka ji'ii fi urjiiwwan halkan mo'an godhe; Jaalalli isaa bara baraan jiraata.
- 10 inni hangafa Gibxi dha'e; Jaalalli isaa bara baraan jiraata.
- 11 inni isaan gidduudhaa Israa'elin baase; Jaalalli isaa bara baraan jiraata.
- 12 harka jabaa fi irree diriiraadhaan Israa'elin baase; Jaalalli isaa bara baraan jiraata.
- 13 inni Galaana Diimaa iddoo lamatti gargarii qoode; Jaalalli isaa bara baraan jiraata.
- 14 inni galaana gidduudhaan Israa'elin dabarse; Jaalalli isaa bara baraan jiraata.
- 15 Fara'oonii fi loltoota isaa garuu Galaana Diimaatti naqe; Jaalalli isaa bara baraan jiraata.
- 16 inni saba ofii isaa gammoojjii keessa geggeesse; Jaalalli isaa bara baraan jiraata.

17 inni mootota gurguddaa dha'e;

18 inni mootota jajjaboo fixe;

19 inni Sihoon mootii Amoorotaa ajjeese;

20 inni Oogi mootii Baashaan ajjeese;

21 inni biyya isaanii dhaala godhee kenne;

22 dhaala godhee garbicha isaa Israa'eliif kenne;

23 Inni yeroo nu gad deebinetti nu yaadate;

24 inni harka diinota keenyaatii nu baase,

25 inni uumama hundaaf soora kenna;

26 Waaqa samiitiif galata galchaa.

Jaalalli isaa bara baraan jiraata.

Jaalalli isaa bara baraan jiraata.

Jaalalli isaa bara baraan jiraata.

Jaalalli isaa bara baraan jiraata.

Jaalalli isaa bara baraan jiraata.

Jaalalli isaa bara baraan jiraata.

Jaalalli isaa bara baraan jiraata.

Jaalalli isaa bara baraan jiraata.

Jaalalli isaa bara baraan jiraata.

Jaalalli isaa bara baraan jiraata.

Faarfannaa Booji'amtootaa

Faarfannaa 137

1 Nu yeroo Xiyoonin yaadannetti,
lageen Baabylon bira teenyee boonye.

2 Achittis kiraara keenya
muka alaltuutti fannifne;

3 achitti warri nu booji'an faarfannaa, warri nu dhiphisanis,
"Faarfannaawwan Xiyoon keessaa tokko nuu faarfadhaa!"
jedhanii akka nu faarfannaa gammachuu isaaniif faarfannu nu gaafatan.

4 Nu utuu biyya ormaa jirruu,
akkamitti faarfannaa WAAQAYYOO faarfachuu dandeenya?

5 Yaa Yerusaalem, yoo ani si irraanfadhhe,
harki koo mirgaa ogummaa isaa haa irraanfatu.

6 Yoo ani si yaadachuu baadhe,
yoo ani gammachuu koo guddichaa olitti

Yerusaalemin ilaaluu baadhe,
arrabni koo laagaa kootti haa maxxanu.

7 Yaa WAAQAYYO, waan warri Edoom
gaafa Yerusaalem diigamte jedhan sana yaadadhu;
isaanis, "Ishee diigaa!
Hamma hundee isheetti ishee diigaa!" jedhanii iyyan.

8 Yaa intala Baabylon, kan baduudhaaf qophoofte,
inni waan ati nu goote sanaaf,
gatii kee siif kennu eebbifamaa dha.

9 Inni daa'imman kee qabee
dhagaa irratti caccabsu sun eebbifamaa dha.

Faarfannaa Galataa

Faarfannaa 138

Faarfannaa Daawit.

1 Yaa WAAQAYYO, ani garaa koo guutuudhaan sin galateeffadha;
fuula "waaqotaa" durattis galata kee nan faarfadha.

2 Sababii ati maqaa keetii fi dubbii kee waan hundaa olitti guddifteef,
ani sababii jaalalaa fi amanamummaa keetiitiif
gara mana qulqullummaa kee qulqulichaatti gad jedhee,
maqaa kee nan leellisaa.

³ Yeroo ani si waammadhetti ati deebii naa kennite;
irree keetiinis na jabeessite.

⁴ Yaa WAAQAYYO, mootonni lafaa hundinuu,
yeroo dubbii afaan keetii dhaga'anitti si haa leellisan.

⁵ Ulfinni WAAQAYYOO, guddaadhaatii,
isaan waa'ee karaa WAAQAYYOO haa faarfatan.

⁶ WAAQAYYO yoo ol fagoo jiraate iyyuu,
nama gad qabame ni ilaala;
nama of tuulu immoo fagootti beeka.

⁷ Ani rakkina keessa jiraadhu iyyuu,
ati lubbuu koo ni eegda;

aarii diina kootti harka kee ni diriirsita;
harka kee mirgaatiinis na oolchita.

⁸ WAAQAYYO kaayyoo isaa fiixaan naa baasa;
yaa WAAQAYYO, jaalalli kee bara baraan jiraata;
hojii harka keetii hin gatin.

Waaqa Waan Hunda Beeku

Faarfannaa 139

Dura bu'aa faarfattootaatiif. Faarfannaa Daawit.

¹ Yaa WAAQAYYO, ati na qorteerta;
na beekteertas.

² Ati yeroo ani gad taa'uu fi yeroo ani ol ka'u ni beekta;
yaada koos fagootti hubatta.

³ Deemuu koo fi ciisuu koo addaan baaftee beekta;
karaa koo hundas beekta.

⁴ Yaa WAAQAYYO, akka dubbiin tokko iyyuu arraba koo hin jirre,
ati guutumaan guutuutti ni beekta.

⁵ Ati duraa fi duubaan na marsiteerta;
harka kees narra keesseerta.

⁶ Beekumsi akkanaa anaaf akka malee dinqii dha;
hubachuufis akka malee narraa fagoo dha.

⁷ Hafuura kee biraa ani eessa dhaquun danda'a?
Fuula kee duraas ani eessatti baqachuun danda'a?

⁸ Yoo ani samiiwwanitti ol ba'e, ati achi jirta;
yoo ani siree koo sii'ool keessa dhaabbadhes, achis ni jirta.

⁹ Yoo ani qoochoo ganamaatiin
barrisee qarqara galaanaa fagoo irra qubadhe,

¹⁰ achittis harki kee karaa na argisiisa;
harki kee mirgaas jabeessee na qaba.

¹¹ Yoo ani, "Dhugumaan dukkanni na dhoksa;
ifnis naannoo kootti halkan ta'a" jedhe,

¹² dukkanni iyyuu siif dukkana hin ta'u;
halkanis akkuma guyyaa ifa;
dukkanni siif akkuma ifaatii.

¹³ Ati namummaa koo isa keessaa uumteertaatii;
gadameessa haadha koo keessattis na tolchite.

¹⁴ Ani sababii haala sodaachisaa fi dinqisiisaadhaan uumameef
sin galateeffadha;

hojiin kee dinqisiisaa dha;
kanas ani akka gaariittan beeka.

¹⁵ Yeroo ani iddoo dhoksaatti uumame,
lafeen koo si duraa hin dhokanne.
Yeroo ani dhidhima lafaa keessatti tolfame,

¹⁶ iji kee dhagna koo kan hin tolfamin arge.
Guyyoonni duraan dursanii naaf murteeffaman hundi
utu hin jiraatin,
kitaaba kee keessatti barreeffamaniiru.

- 17 Yaa Waaqi, yaada kee hubachuun akkam ulfaata!
Baay'inni isaas akkam guddaa dha!
- 18 Utuu ani isaan lakkaa'ee jiraadhee,
silaa lakkoobsi isaanii cirracha irra baay'ata.
Ani yeroon dammaqutti, amma iyyuu suma wajjinan jira.
- 19 Maaloo yaa Waaqi, ati utuu hamoota fixxee!
Warri dhiiga namaa dhangalaafan, narraa fagaadhaa!
- 20 Isaan yaada hamaadhaan waa'ee kee dubbatu;
diinonni kee akkasumaan maqaa kee dha'u.
- 21 Yaa WAAQAYYO, ani warra si jibban hin jibbuu?
Warra sitti ka'anis hin xireeffadhuu?
- 22 Ani hamma dhumaatti isaan jibbeera;
akka diina koottis isaan nan heda.
- 23 Yaa Waaqi, na sakatta'i; garaa koos beeki;
qoriitii na ilaali; yaada koos beeki.
- 24 Yoo karaan hamminaa na keessa jiraate mee ilaali;
karaa bara baraa irras na adeemsisi.

Kadhannaa Hamoota Irratti Dhi'aate

Faarfannaa 140

- Dura Bu'aa faarfattootaatiif. Faarfannaa Daawit.
- 1 Yaa WAAQAYYO, namoota hamoo jalaa na baasi;
namoota finciltoota
- 2 warra garaa isaanii keessatti hammina yaadanii
guyyaa hunda waraana kaasan narraa eegi.
- 3 Isaan arraba isaanii akkuma bofaa qaratu;
hadhaan buutii hidhii isaanii jala jira.
- 4 Yaa WAAQAYYO, harka hamootaa narraa eegi;
namoota finciltoota
warra miilla koo kiyyootti galchuu yaadan jalaa na baasi.
- 5 Of tuultonna dhoksanii kiyyoo na dura kaa'aniiru;
ribuu kiyyoo isaanii diriirsaniiru;
karaa koo irras kiyyoo isaanii kaa'aniiru.
- 6 Yaa WAAQAYYO, ani, "Ati Waaqa koo ti" siin nan jedha.
Yaa WAAQAYYO, waammata koo dhaga'i.
- 7 Yaa WAAQAYYO Gooftaa, fayyisaa koo jabaa,
ati guyyaa waraanaatti gaachana mataa naa taate.
- 8 Yaa WAAQAYYO, akka fedhiin hamootaa fiixaan ba'u hin godhin;
akka isaan of hin tuulleef, akka karoorri isaanii milkaa'u hin godhin.
- 9 Mataan warra na marsanii,
hammina afaan isaaniitii ba'uun haa haguugamu.
- 10 Barbadaan ibiddaa isaan irra haa bu'u;
isaan ibiddatti illee haa darbataman;
akka lammata hin kaaneefis boolla qileetti haa darbataman.
- 11 Maqa balleessitoonni lafa irra hin jiraatin;
namni jal'aan waan hamaadhaan haa badu.
- 12 WAAQAYYO rakkattootaaf falmee
hiyyeeyyiif illee murtii qajeelaa akka kennu ani beeka.
- 13 Dhugumaan namni qajeelaan maqaa kee ni galateeffata;
namni tolaanis fuula kee dura ni jiraata.

Akka Qananii Jaldhootaatiin Hin fudhatamne Waaqa Kadhachuu

Faarfannaa 141

Faarfannaa Daawit.

- 1 Yaa WAAQAYYO, ani sin waammadha; dafii na qaqqabi.

- Yommuu ani si waammadhus sagalee koo dhaga'i.
- ² Kadhannaan koo fuula kee duratti akka ixaanaatti anaaf haa fudhatamu; harka koo ol qabachuun koos akka aarsaa galgalaa anaaf haa ta'u.
- ³ Yaa WAAQAYYO, afaan kootiif eegduu naa dhaabi; balbala afaan kootiis naa eegi.
- ⁴ Garaan koo namoota waan hamaa hojjetan wajjin, hojii hamminaa keessatti hirmaachuuf, gara jal'ina kamiitti iyyuu hin harkifamin; akka ani nyaata isaanii mi'aawaa nyaadhus anaaf hin eeyyamin.
- ⁵ Namni qajeelaan na haa rukutu; kun gara laafinaatii; inni ana haa ifatu; kunis zayitii mataa koo irraatti. Mataan koo waan kana hin didu. Ta'us kadhannaan koo yoom iyyuu hojii hamootaatiin mormuu dha.
- ⁶ Bulchitoonni isaanii ededa boollaa irraa gad ni darbatamu; isaan dubbii koo ni dhaga'u; dubbiin koo ni mi'aawaatii.
- ⁷ Isaanis, "Akkuma namni lafa qotu biyyoo bulleessu sana, lafeen keenya afaan sii'ool irratti bittinneeffamee jira" jedhu.
- ⁸ Yaa WAAQAYYO Gooftaa, ani garuu ija koo sirraa hin buqqifadhu; ani kooluu sitti galeera; dabarsitee du'atti na hin kennin.
- ⁹ Kiyyoo isaan naaf kaa'an irraa, kiyyoo warri jal'ina hojjetan naaf qopheessan irraas na eegi.
- ¹⁰ Warri hamoon kiyyoo ofii isaaniitiin haa qabaman; ani garuu nagumaan nan ba'a.

Kadhannaa Nama Ari'atamaa Jiru Tokkoo

Faarfannaa 142

Maaskiilii Daawit

- ¹ Ani gara WAAQAYYOTTI nan iyya; sagalee kootiinis fuula WAAQAYYOO duratti waammata koo nan dhi'eeffadha.
- ² Ani guungummii koo fuula isaa duratti nan dhangalaasa; dhibee koos fuula isaa duratti nan himadha.
- ³ Yeroof hafuurri koo na keessatti laafu, situ karaa koo beeka. Namoonni daandii ani deemu irra, kiyyoo naa kaa'aniiru.
- ⁴ Gara mirga koo ilaali; argis; namni naa yaadu tokko iyyuu hin jiru; ani iddoon itti kooluu galu tokko illee hin qabu; namni jireenya kootiif yaadus hin jiru.
- ⁵ Yaa WAAQAYYO, sitti nan iyyadha; "Ati iddoo ani itti kooluu galuu dha; biyya warra jiraatoo keessattis ati qooda koo ti" nan jedha.
- ⁶ Ani abdii kutadheeraatii, kadhannaa koo naa dhaga'i; warra na ari'atan jalaa na baasi; isaan akka malee natti cimaniiruutii.
- ⁷ Akka ani maqaa kee galateeffadhuuf, lubbuu koo mana hidhaatii naa baasi.
- Sababii ati waan gaarii naa gooteef, qajeeltonni naannoo kootti walitti qabamu.

Gad of qabanii Waaqa Kadhachuu

Faarfannaa 143

Faarfannaa Daawit.

- ¹ Yaa WAAQAYYO, kadhannaa koo naa dhaga'i;
 gurra kees gara waammata kootiitti deebisi;
 amanamummaa fi
 qajeelummaa keetiin, na gargaari.
- ² Ati garbicha kee murtiitti hin dhi'eessin;
 namni lubbuun jiraatu kam iyyuu fuula kee duratti qajeelaa mitiitii.
- ³ Diinni lubbuu koo ari'achaa jiraatii;
 jireenya koos butuchee biyyootti make.
- Akkuma warra dur du'aniittis
 dukkana keessa na jiraachiseera.
- ⁴ Kanaafuu hafuurri koo na keessatti gaggabeera;
 onneen koos na keessatti rifatteerti.
- ⁵ Ani guyyoota durii nan yaadadha;
 waan ati hojjette hundas irra deddeebi'ee nan yaada;
 waan harki kee hojjete illee nan heda.
- ⁶ Harka koo gara keetti nan diriirfadha;
 lubbuun koos akkuma lafa gogaa si dheebotti.
- ⁷ Yaa WAAQAYYO, daffii deebii naa kenni;
 hafuurri koo dadhabeera.
 Fuula kee na duraa hin dhoksin
 yookaan ani akka warra boolla bu'anii nan ta'a.
- ⁸ Ani waanan si amanadheef,
 akka ani ganama ganama oduu jaalala keetii dhaga'u godhi.
 Ani lubbuu koo gara keetti ol nan kaasaatii,
 karaa ani irra deemuu qabu natti argisiisi.
- ⁹ Yaa WAAQAYYO, ani akka ati na dhoksiituuf
 sitti nan baqadhaatii,
 diinota koo jalaa na baasi.
- ¹⁰ Ati sababii Waaqa koo taateef,
 akka ani fedhii kee guutu na barsiisi;
 hafuurri kee gaariin sun
 karaa wal qixxee irra na haa qajeelchu.
- ¹¹ Yaa WAAQAYYO, maqaa keetii jedhiitii lubbuu koo jiraachisi;
 qajeelummaa keetiinis rakkina keessaa na baasi.
- ¹² Ati sababii na jaallatuuf diinota koo fixi;
 waan ani garbicha kee ta'eef,
 warra na cunqursan hunda barbadeessi.

Mo'annaa Argachuuf Kadhachuu

Faarfannaa 144

Faarfannaa Daawit.

- ¹ WAAQAYYO kattaa koo,
 isa harka koo waraanaaf,
 quba koos lolaaf leenjisu sanaaf galanni haa ga'u.
- ² Inni Waaqa na jaallatu fi da'oo koo ti;
 iddoo ani itti da'adhuu fi fayyisaa koo ti.
 Gaachana koo, iddoo ani itti kooluu galu,
 kan na jalatti saba naaf bulchuu dha.
- ³ Yaa WAAQAYYO, akka ati waa'ee isaa yaadduuf, namni maali?
 Akka ati isaaf yaadduuf ilmi namaa maali?
- ⁴ Namni akkuma qilleensa shuf jedhee darbuuti,
 barri isaas akkuma gaaddisa darbuu ti.
- ⁵ Yaa WAAQAYYO, samiiwwan kee tarsaasii gad bu'i;
 akka aarri isaan keessaa yaa'uufis tulluuwwan tuqi.
- ⁶ Bakakkaa ergiitii diina bittinneessi;

- xiyya kee darbadhuutii isaan balleessi.
⁷ Ol gubbaadhaa harka kee gad hiixadhuutii
 bishaan jabaa jalaa,
 harka alagaa duraas,
 na baasi; na oolchis;
⁸ warra afaan isaanii sobaan guutame,
 warra harki isaanii mirgaa nama dogoggorsu duraa na baasi.
- ⁹ Yaa Waaqi, ani faarfannaa haaraa siif nan faarfadha;
 kiraara ribuu kudhaniitiinis siifin weeddisa;
¹⁰ isa moototaaf mo'annoo kennuuf, isa garbicha isaa Daawitin
 goraadee nama ajjeesu jalaa baasuuf nan faarfadha.
- ¹¹ Harka Ormootaa duraa,
 warra afaan isaanii sobaan guutame,
 warra harki isaanii mirgaa
 nama dogoggorsu jalaa na baasi; na oolchis.
- ¹² Ilmaan keenya dargaggummaa isaanii keessatti,
 akka biqiltuu tolee guddatee haa ta'an;
 intallan keenyas akka utubaa golee,
 kan masaraa mootummaa miidhagsuuf
 soofamee haa ta'an.
- ¹³ Gombisaawwan keenya,
 midhaan gosa garaa garaatiin haa guutaman.
 Hoolonni keenya kumaatama haa dhalan;
 dirree keenya irrattis kumaatama kudhaniin
 haa baay'atan;
¹⁴ loon keenya haa dorroban hin gatatin
 yookaan yeroo malee hin dhalin;
 booji'amuunis hin jiraatin;
 wawwaachuunis karaa keenya irratti hin dhaga'amin.
- ¹⁵ Warri eebbi kun ta'eef haa gammadan;
 warri WAAQAYYO Waaqa isaanii ta'eef eebbifamoo dha.

Waaqayyo Mootichaaf Galata Galchuu

Faarfannaa 145

Faarfannaa Daawit.

- ¹ Yaa Waaqa koo Mooticha, ani sin leellisa;
 bara baraa hamma bara baraattis maqaa kee nan galateeffadha.
² Ani guyyuma guyyaan sin galateeffadha;
 bara baraa hamma bara baraattis maqaa kee nan leellisa.
- ³ WAAQAYYO guddaa dha; galateeffamuunis baay'ee malaaf;
 guddina isaa qorataniitti itti ba'uun hin danda'amu.
⁴ Dhaloonni tokko dhaloota biraatti hojii kee ni hima;
 hojiiwwan kee jajjaboos ni labsa.
⁵ Isaanis waa'ee miidhagina ulfina qabeessa
 surraa kee sanaa ni dubbatu;
 anis waa'ee hojii kee dinqisiisaa sanaa irra deddeebi'ee
 itti nan yaada.
⁶ Isaan waa'ee hojii kee sodaachisaa sanaa ni odeessu;
 anis guddina kee nan labsa.
⁷ Isaan yaadannoo gaarummaa keetii baay'isanii odeessu;
 waa'ee qajeelummaa keetiis ililchaniif faarfatu.
- ⁸ WAAQAYYO arjaa fi gara laafessa;
 inni aaruuf hin ariifatu; jaalalli isaas baay'ee dha.
⁹ WAAQAYYO, nama hundaaf gaarii dha;
 inni waan uume hundaaf garaa ni laafa.
¹⁰ Yaa WAAQAYYO, hojiin kee hundinuu si galateeffata;

qulqulloonni kees si leellisu.

- 11 Isaan waa'ee ulfina mootummaa keetii ni odeessu;
waa'ee humna keetiis ni dubbatu;
12 kunis akka namoonni hundi hojii kee humna qabeessa,
surraa ulfina qabeessa mootummaa kee sanaas beekaniif.
13 Mootummaan kee mootummaa bara baraa ti;
bulchiinsi kees dhalootaa gara dhalootaatti darba.

WAAQAYYO dubbii isaa hundaan amanamaa dha;
hojii isaa hundaanis arjaa dha.

- 14 WAAQAYYO warra kufan hunda ol qaba;
warra gad qabaman hundas ni kaasa.
15 Iji nama hundaa si eeggata;
atis yeroo barbaachisutti nyaata isaaniif ni kennita.
16 Ati harka kee bal'iftee
fedhii warra lubbuu qaban hundaa ni guutaa.

- 17 WAAQAYYO karaa isaa hundaan qajeelaa dha;
hojii isaa hundaanis arjaa dha.
18 WAAQAYYO warra isa waammatan hundatti,
warra dhugaadhaan isa waammatan hundatti dhi'oo dha.
19 Inni fedhii warra isa sodaatanii ni guuta;
kadhannaa isaanis dhaga'ee isaan oolcha.
20 WAAQAYYO warra isa jaallatan hunda ni eega;
jal'oota hunda garuu ni balleessa.

- 21 Afaan koo WAAQAYYON galateeffachuudhaan ni dubbata.
Uumamni hundinuu maqaa isaa qulqulluu sana
bara baraa hamma bara baraatti haa eebbisu.

Waaqa Nama Gargaaru Faarfachuu

Faarfannaa 146

1 Haalleluuyaa.

Yaa lubbuu ko, WAAQAYYON galateeffadhu.

- 2 Ani bara jireenya koo guutuu WAAQAYYON nan galateeffadha;
ani hamman jirutti Waaqaaf nan faarfadha.
3 Abdii keessan bulchitoota irra,
namoota du'a hin oolle
warra isin gargaaruu hin dandeenye irra hin kaa'atinaa.
4 Isaan yeruma lubbuun isaan keessaa baatu gara lafaatti deebi'u;
guyyuma sanas karoorri isaanii bada.
5 Namni gargaarsi isaa Waaqa Yaaqoob ta'e, kan abdiin isaas
WAAQAYYO Waaqa isaa ta'e eebbifamaa dha.

6 WAAQAYYO Uumaa samii fi lafaa,
galaanaa fi waan isaan keessa jiru hundaa ti;
inni bara baraan amanamaa ta'e jiraata.

- 7 Inni warra cunqurfamaniif ni mura;
warra beela'aniif nyaata kenna.
WAAQAYYO warra hidhaman illee ni hiika;
8 WAAQAYYO jaamotaaf agartuu ni kenna;
WAAQAYYO warra gad deebi'an ol qaba;
WAAQAYYO qajeeltota ni jaallata.

9 WAAQAYYO alagaadhaaf eegumsa ni godha;
ijoollee haadhaa fi abbaa hin qabnee fi
dubartoota dhirsoonni irraa du'an ni jiraachisa;
karaa jal'ootaa garuu ni balleessa.

- 10 WAAQAYYO bara baraan ni mo'a;
Yaa Xiyoon, Waaqni kee dhaloota hundaaf mootii ta'a.

Haalleluuyaa.

Faarfannaa Waaqa Waan Hunda Danda'uuf Faarfatame

Faarfannaa 147

¹ Haalleluuyaa.

Faarfannaadhaan Waaqa galateeffachuun akkam gaarii dha;
isa galateeffachuun akkam gammachiisaa fi kan maluu dha!

² WAAQAYYO Yerusaalemin ni ijaara;
Israa'eloota booji'amanis walitti qaba.

³ Warra garaan cabe ni fayyisa;
madaa isaaniis walitti hodha.

⁴ Inni baay'ina urjiiwwanii ni beeka;
tokkoo tokkoo isaaniis maqaa maqaadhaan waama.

⁵ Gooftaan keenya guddaa dha; humni isaas jabaa dha;
hubannaan isaas dhuma hin qabu.

⁶ WAAQAYYO warra gad qabaman ni jiraachisa;
hamoota garuu lafatti darbata.

⁷ Galata galchaa WAAQAYYON faarfadhaa;
baganaadhaanis Waaqa keenyaaf weeddisaa.

⁸ Inni samiiwwani duumessaan haguuga;
lafaafis bokkaa kenna;
tulluuwwan irrattis marga biqilcha.

⁹ Horiidhaaf waan isaan dheedan,
yommu ilmaan arraagessaa iyyanitti
nyaata isaaniif ni kenna.

¹⁰ Inni jabina fardaatti hin gammadu;
yookaan miilli namaa isa hin gammachiisu;

¹¹ WAAQAYYO warra isa sodaatanitti,
warra araara isaa abdatanitti ni gammada.

¹² Yaa Yerusaalem, WAAQAYYON galateeffadhu;
Yaa Xiyoon Waaqa kee galateeffadhu.

¹³ Inni dangaraa karra keetii ni jabeessaatii;
ijoollee kees si keessatti eebbisa.

¹⁴ Daarii keetiif nagaa kenna;
qamadii qulqulluudhaanis si quubsa.

¹⁵ Inni ajaja isaa gara lafaatti ni erga;
dubbiin isaas ni ariifata.

¹⁶ Inni cabbii akkuma suufiitti diriirsa;
qorras akkuma daaraatti bittinneessa.

¹⁷ Dhagaa cabbii akkuma cirrachaa gad darbata.
Dhaamocha isaa dura eenyutu dhaabachuu danda'a?

¹⁸ Inni dubbii isaa ergee isaan baqsa;
bubbee isaa ni kaasa; bishaanonnis ni yaa'u.

¹⁹ Inni dubbii isaa Yaaqoobitti,
seeraa fi sirna isaa immoo Israa'elitti mul'iseera.

²⁰ Waan kana saba biraa tokkoof iyyuu hin goone;
isaan seera isaa hin beekan.

Haalleluuyaa.

Uumanni Hundi Waaqa Haa Galateeffatuu

Faarfannaa 148

¹ Haalleluuyaa.

- Samiiwwan irraa WAAQAYYON galateeffadhaa;
ol gubbaatti isa galateeffadhaa.
- ² Ergamoonni isaa hundinuu isa galateeffadhaa;
raayyaan isaa hundinuu isa galateeffadhaa.
- ³ Aduu fi ji'i isa galateeffadhaa;
urjiiwwan ibsitan hundinuu isa galateeffadhaa.
- ⁴ Samiiwwan samii isa galateeffadhaa;
bishaanonni samiin ol jirtanis isa galateeffadhaa.
- ⁵ Isaan maqaa WAAQAYYOO haa galateeffatan;
inni ajajnaan, isaan uumamaniitii.
- ⁶ Inni bara baraa hamma bara baraatti isaan dhaabeera;
seera hin geeddaramnes isaaniif kenneera.
- ⁷ Uumamawwan galaanaatii fi tuujubawwan hundi,
lafa irraa WAAQAYYON galateeffadhaa;
- ⁸ bakakkaa fi dhagaan cabbii, cabbii fu duumessi,
bubbeen jabaan ajaja isaa raawwatan,
- ⁹ tulluuwwanii fi gaarran hundinuu,
mukkeen ija naqatanii fi birbirsi hundinuu,
- ¹⁰ bineensonnii fi loon hundinuu,
uumamawwan xixinnoo fi simbirroonni barrisan,
- ¹¹ mootonni lafaatii fi saboonni hundinuu,
ilmaan moototaatii fi bulchitoonni lafaa hundinuu,
- ¹² dargaggoonnii fi shamarran,
jaarsolii fi daa'imman isa galateeffadhaa.
- ¹³ Maqaan isaa qofti ol ol jedheeraatii,
isaan maqaa WAAQAYYOO haa galateeffatan;
ulfinni isaas lafaa fi samiiwwanii ol jira.
- ¹⁴ Inni saba isaatiif gaanfa ol kaaseera;
kunis qulqulloota isaa hundaaf,
saba Israa'el warra isatti dhi'oo jiran hundaaf ulfina.

Haalleluuyaa.

Faarfannaa Mo'annoo

Faarfannaa 149

¹ Haalleluuyaa.

- Faarfannaa haaraa WAAQAYYOO faarfadhaa;
waldaa qulqullootaa keessatti illee isa jajadhaa.
- ² Israa'el Uumaa isaatti haa gammadu;
sabni Xiyoon Mootii isaatti haa gammadu.
- ³ Maqaa isaas shuubbisuudhaan haa jajatu;
dibbee fi baganaadhaan isaaf haa faarfatu.
- ⁴ WAAQAYYO saba isaatti ni gammadaatii;
warra gad of qabanis fayyina gonfachiisa.
- ⁵ Qulqulloonni ulfina kanatti haa gammadan;
siree isaanii irrattis gammachuudhaan haa faarfatan.
- ⁶ Galanni Waaqaa afaan isaanii keessa haa jiraatu;
goraadeen afaan lamaas harka isaanii keessa haa jiraattu;
- ⁷ kunis sabootatti haaloo ba'uu fi
namoota adabuudhaaf;
- ⁸ mootota isaanii foncaan,
hangafoota isaanii funyoo sibiilaatiin hidhuudhaaf,
- ⁹ murtii barreeffame sana isaan irratti dhugaa ba'uudhaaf.
Kunis amanamtoota isaa hundaaf ulfina.

Haalleluuyaa.

Faarfannaa Galataa

Faarfannaa 150

¹ Haalleluuyaa.

Mana qulqullummaa isaa keessatti Waaqa galateeffadhaa;
 samiiwwan isaa humna qabeeyyii keessattis isa galateeffadhaa.

² Hojiiwwan isaa jajjaboo sanaaf isa leellisaa;
 guddina isaa hamma hin qabne sanaaf isa leellisaa.

³ Malakata afuufuudhaan isa galateeffadhaa;
 baganaa fi kiraaraan isa galateeffadhaa;

⁴ dibbeedhaan shuubbisaatii isa jajadhaa;
 mi'a ribuutii fi ululleedhaan isa jajadhaa.

⁵ Kilillee sagalee qabuun isa jajadhaa;
 kilillee sagalee guddaatiin isa jajadhaa.

⁶ Wannii hafuura baafatu hundinuu WAAQAYYON haa jajatu.

Haalleluuyaa.

Kitaaba Fakkeenya Kaayyoo Ijoo Dubbii Kitaabichaa

- ¹ Fakkeenya Solomoon Ilma Daawit, mootii Israa'el:
² Ogummaa fi qajeelfama qabaachuudhaaf,
 dubbii beekumsa guddaa hubachuudhaaf;
³ ogummaadhaan jiraachuudhaan, qajeelummaadhaan,
 murtii qajeelaa kennuu fi nama wal qixxeessuudhaan
 qajeelfama argachuudhaaf;
⁴ warra waa hin beekneef of eeggannoo kennuudhaaf,
 dargaggootaaf immoo beekumsaa fi hubannaa kennuudhaaf,
⁵ ogeeyyiin dhaggeeffatanii barumsa isaanii irratti waa haa dabalatan;
 warri qalbii qabanis qajeelfama haa argatan;
⁶ kunis fakkeenya fi hiikkaa,
 jechaa fi hibboo ogeeyyii hubachuudhaaf.

- ⁷ WAAQAYYON sodaachuun jalqaba ogummaa ti;
 gowwoonni garuu ogummaa fi adabamuu tuffatu.

Gorsa Akka Namni Ogummaa Argatuuf Kenname

Gowwoomfamuu Irraa Of Eeguu

- ⁸ Yaa ilma ko, gorsa abbaa keetii dhaggeeffadhu;
 barsiisa haadha keetii illee hin gatin.
⁹ Wannii kun mataa kee miidhagsuudhaaf gonfoo,
 morma kee bareechuudhaaf immoo faaya siif ta'a.
¹⁰ Yaa ilma ko, yoo cubbamoonna sossobanii
 ofitti si harkisan, tole hin jedhiniif.
¹¹ Yoo isaan, "Nu wajjin kottu;
 riphnee dhiiga namaa dhangalaasnaa;
 nama balleessaa hin qabne galaafachuudhaafis
 dhokannee eeggannaa;
¹² kottu akkuma awwaalaa jiraatti isaan liqimsinaa;
 akkuma warra boolla keessa buufamaniis
 guutumaan guutuutti isaan liqimsinaa;
¹³ nu waan gatii qabu kan gosa hundaa ni arganna;
 manneen keenya illee boojiudhaan guuttanna;
¹⁴ ixaa kee nu wajjin buufadhu;
 nus koroo tokko si wajjin qooddanna" siin jedhan,
¹⁵ yaa ilma ko, ati isaan wajjin hin deemin;
 miilla keetiin karaa isaanii irra illee hin ejjetin;
¹⁶ miilli isaanii cubbuutti ariifataatii;
 isaan dhiiga dhangalaasuuf jarjaru.
¹⁷ Utuma simbirroonna hundi arganuu,
 kiyoo buusuun waan gatii hin qabnee dha!
¹⁸ Namoonni kunneen dhiiguma ofii isaanii riphanii eegatu;
 lubbuma ofii isaanii gaadu!
¹⁹ Kun dhuma warra qabeenya karaa hamaadhaan argamu duukaa bu'an hundaa ti;
 wannii akkasii jireenya warra isa argatanii balleessa.

Akeekkachiisa Ogummaa Tuffachuu Irratti Kenname

- ²⁰ Ogummaan karaa irratti guddiftee iyyiti;
 iddo wal ga'ii uummataattis sagalee ishee ol fudhatti.
²¹ Isheen fiixee daandii irraa iyyiti;
 karra magaalaa duraas akkana jettee dubbatti:
²² "Isin warri homaa hin beekne
 kun hamma yoomiitti karaa keessan kan faayidaa hin qabne sana jaallattu?
 Warri namatti qoosan hamma yoomiitti qoosaa sanatti gammadanii

- gowwoonnis beekumsa jibbu?
²³ Mormii koo qalbeeffadhaa;
 ani yaada koo isinii nan dhangalaasa;
 dubbii koos isiniifin ibsa.
²⁴ Garuu sababii isin yeroo ani isin waametti diddanii
 yeroo ani harka bal'ifadhetti namni tokko iyyuu na hin dhaggeeffatiniif,
²⁵ waan isin gorsa koo hunda tuffattanii
 dheekkamsa koo dhaga'uu diddaniif,
²⁶ anis badiisa keessanitti nan kolfa,
 yeroo balaan isinitti dhufuttis nan qoosa;
²⁷ yeroo balaan akkuma bubbeetti isin fudhatutti,
 yeroo badiisni akkuma bubbee hamaatti isin haxaa'utti,
 yeroo dhiphinaa fi rakkinni isinitti dhufutti ani isinittan qoosa.
²⁸ "Yeroo sana isaan na waammatu; ani garuu isaan jalaa hin owwaadhu;
 isaan na barbaadu; garuu na hin argatan.
²⁹ Isaan waan beekumsa jibbanii
 WAAQAYYON sodaachuu illee filachuu didaniif,
³⁰ waan gorsa koo fudhachuu didanii
 dheekkamsa koos tuffataniif,
³¹ isaan gatii karaa isaanii ni nyaatu;
 bu'aa jal'ina isaaniis ni quufu.
³² Gowwoota waa dagachuutu isaan balleessaatii;
 quufni gowwootaa isaanuma balleessa;
³³ namni na dhaggeeffatu kam iyyuu garuu nagaadhaan jiraata;
 inni qabbanaan jiraata; wanni hamaanis isa hin sodaachisu."

2

Badhaasa Ogummaa

- ¹ Yaa ilma ko, yoo ati dubbii koo fudhattee
 ajaja koos of keessatti kuufatte,
² yoo ati gurra kee ogummaatti garagalfattee
 yaada kee hubannaatti deebifatte,
³ yoo ati jabaattee qalbeeffannaa barbaaddee
 hubannaa argachuuf jettee iyyitee kadhatte,
⁴ yoo ati akkuma meetiitti isa barbaaddattee
 akkuma qabeenya dhokfameetti isa barbaadde,
⁵ ati WAAQAYYON sodaachuu ni hubatta;
 Waaqa beekuus ni argatta.
⁶ WAAQAYYO ogummaa namaa kennaatii;
 afaan isaa keessaa illee beekumsaa fi hubannaatu ba'a.
⁷ Inni qajeeltotaaf ogummaa dhugaa kuusa;
 warra adeemsi isaanii mudaa hin qabneef gaachana;
⁸ inni daandii tolootaa ni eega;
 karaa qulqulloota isaa illee ni tiksa.
⁹ Ergasii ati qajeelummaa fi murtii qajeelaa,
 nama wal qixxeessuu, karaa qajeelaa hundas ni hubatta.
¹⁰ Ogummaan garaa kee seena;
 beekumsis lubbuu kee gammachiisa.
¹¹ Qalbeeffannaan si eega;
 hubannaanis si tiksa.
¹² Ogummaan karaa hamootaa irraa,
 namoota daba dubbatan jalaas si baraara;
¹³ warra karaa dukkanaa irra deemuudhaaf jedhanii
 daandii qajeelaa dhiisan,
¹⁴ warra waan hamaa hojjechuutti gammadan,
 warra jal'ina hojjechuun itti tolu,
¹⁵ warra daandiin isaanii jal'ate,
 warra karaan isaanii dabe jalaa si baraara.

- 16 Ogummaatu dubartii ganda labee,
niitii dubbiidhaan sossobdee ofitti nama harkiftu jalaa si baraara;
- 17 niitii dhirsa ishee kan jalqabaa dhiiftee
kakuu fuula Waaqaa duratti galte sana dagatte jalaa si baraara.
- 18 Manni ishee gara du'aatti, karaan ishee immoo
gara hafuurota warra du'aniitti nama geessaatii.
- 19 Namni gara ishee dhaqu tokko iyyuu hin deebi'u
yookaan karaa jireenyaa hin argatu.
- 20 Kanaafuu ati karaa namoota gaggaarii irra ni deemta;
daandii qajeeltotaa irraas hin jal'attu.
- 21 Toloonna biyyattii keessa ni jiraatuutii;
warri mudaa hin qabnes achi keessa jiraatu;
- 22 hamoonni garuu biyyattii keessaa ni balleffamu;
warri hin amanamnes ishee keessaa buqqifamu.

3

Eebba Ogummaa

- 1 Yaa ilma ko, barumsa ani siif kennu hin dagatin;
ajaja koos garaatti qabadhu;
- 2 isaan bara baay'ee fi umurii dheeraa,
nagaa fi badhaadhummaa siif dabaluuatii.
- 3 Jaalallii fi amanamummaan yoom iyyuu sirraa hin fagaatin;
morma keetti hidhadhu;
gabatee garaa kee irrattis barreeffadhu.
- 4 Ati karaa kanaan fuula Waaqaatii fi
fuula namaa duratti surraa fi maqaa gaarii ni argatta.
- 5 Garaa kee guutuun WAAQAYYON amanadhu;
hubannaa kees hin abdatin;
- 6 karaa kee hunda keessatti isa dursi;
innis daandii kee siif qajeelcha.
- 7 Ani ogeessa ofiin hin jedhin;
WAAQAYYON sodaadhu; waan hamaa irraas fagaadhu.
- 8 Wanni kun dhagna keetiif fayyaa kenna;
lafee kee illee ni haaromsa.
- 9 Qabeenya keetiin,
mataa midhaan keetii hundaanis WAAQAYYON kabaji;
- 10 yoo gombisaan kee hamma irraan dhangala'utti guutama;
iddoon cuunfaa wayinii keetiis
daadhiidhaan guutamee irraan dhangala'a.
- 11 Yaa ilma ko, adabbii WAAQAYYO hin tuffatin;
dheekkamsa isaas hin jibbin.
- 12 WAAQAYYO akkuma abbaa ilma ofii isaa jaallatu tokkootti
warra jaallatu ni adabaatii.
- 13 Namni ogummaa argatu
kan hubannaas argatu eebbifamaa dha;
- 14 ogummaan meetii caalaa faayidaa qabaatii;
warqee caalaas bu'aa namaaf buusa.
- 15 Gatiin ishee gatii lula diimaa caala;
wannu ati akka malee hawwitu kam iyyuu isheedhaan wal qixxaachuu hin danda'u.
- 16 Jireenyi dheeraan harka ishee mirgaa keessa jira;
badhaadhummaa fi ulfinni harka ishee bitaa keessa jiru.
- 17 Karaan ishee karaa nama gammachiisuu dha;
daandiin ishee hundis nagaa dha.
- 18 Isheen warra jabeessanii ishee qabataniif muka jireenyaa ti;
warri itti cichanii ishee qabatan immoo ni eebbifamu.

- 19 WAAQAYYO ogummaadhaan hundee lafaa buuse;
hubannaadhaanis samiiwwan iddoo isaanii kaa'e;
- 20 beekumsa isaatiin tuujubawwan gargar qoodaman;
duumessoonnis fixeensa coccobsan.
- 21 Yaa ilma ko ogummaa fi hubannaa dhugaa eeggadhu;
isaanis fuula kee duraa hin dhabamin;
- 22 isaan jireenya siif ta'u;
morma kee miidhagsuufis faaya mormaa siif ta'u.
- 23 Yoos ati karaa kee nagumaan deemta;
miilli kees hin gufatu;
- 24 ati yoo raftu hin sodaattu;
hirribni kees yoo ati raftu sitti mi'aawa.
- 25 Balaa akkuma tasaa sitti dhufu
yookaan badiisa hamoota galaafatu hin sodaatin;
- 26 WAAQAYYO irkoo siif ta'aatii;
akka miilli kee kiyyoodhaan hin qabamnes si eega.
- 27 Ati yeroo waan tokko gochuudhaaf aangoo qabduuti,
warra wannii gaariin isaaniif malu irraa waan sana hin hanqisin.
- 28 Utuu amma waa qabduu,
ollaa keetiin, "Yeroo biraa deebi'ii kottu;
ani bori siifin kennaatii" hin jedhin.
- 29 Ollaa kee kan si amanee si cina jiraatu miidhuuf jettee
waan hamaa itti hin yaadin.
- 30 Nama tokko utuu inni homaa si hin godhin
akkasumaan hin miidhin.
- 31 Nama dabaatti hin hinaafin;
yookaan karaa isaa tokko illee hin filatin.
- 32 WAAQAYYO nama jal'aa ni jibbaatii;
nama qajeelaa garuu ofitti aanfata.
- 33 Abaarsi WAAQAYYOO mana nama hamaa irra bu'a;
inni garuu mana nama qajeelaa ni eebbisa.
- 34 Inni qoostota of tuultotatti ni qoosa;
warra gad of qabaniif immoo ayyaana kenna.
- 35 Ogeeyyiin ulfina dhaalu;
gowwoota garuu inni ni qaanessa.

4

Ogummaan Waan Hunda Caalti

- 1 Yaa ilmaan ko, mee gorsa abbaan namaaf kennu dhaga'aa;
qalbeeffadhaatii hubannaa argadhaa.
- 2 Ani barumsa gaarii isinii nan kenna;
kanaafuu barsiisa koo hin dhiisinaa.
- 3 Yeroo ani mucaa xinnaa ta'ee mana abbaa koo turetti,
yeroo ani daa'ima dhiiga ta'ee haadha kootiif ilma tokkicha turetti,
- 4 inni akkana jedhee na barsiise;
"Garaa kee guutuudhaan dubbii koo jabeessii qabadhu;
seera koo eegi; ati ni jiraattaatii.
- 5 Ogummaa argadhu; hubannaas argadhu;
dubbii koo hin dagatin yookaan irraa hin jal'atin.
- 6 Ogummaa hin dhiisin; isheen si eegdii;
ishee jaalladhu; isheenis si tiksitii.
- 7 Ogummaan waan hunda caalti; kanaafuu ogummaa argadhu.
Yoo isheen waan ati qabdu hunda si baasifte illee hubannaa argadhu.
- 8 Ogummaa kabaji; inni ol si guddisaatii;
isa hammadhu; innis si kabajaatii.
- 9 Isheen kallacha bareedaa mataa kee irra siif keessi;
gonfoo miidhagaa illee siif kenniti."

- 10 Yaa ilma ko dhaga'i; waan ani jedhu illee fudhadhu;
barri jireenya keetiis ni baay'ataa.
- 11 Ani karaa ogummaa irra sin qajeelcha;
daandii qajeelaa irras sin buusa.
- 12 Yeroo ati deemtu, tarkaanfiin kee hin ittifamu;
yoo fiigdu illee ati hin gufattu.
- 13 Qajeelfama jabeessii qabadhu; gad hin dhiisin;
waan inni jireenya kee ta'eef jabeessii eeggadhu.
- 14 Daandii hamootaa irra miilla kee hin dhaabin
yookaan karaa jal'ootaa irra hin deemin.
- 15 Irraa fagaadhu; irras hin deemin;
irraa goriitii karaa kee irra qajeeli.
- 16 Isaan waan hamaa hojjetan malee rafuu hin danda'aniitii;
isaan hamma nama gufachiisanitti hirriba hin argatan.
- 17 Isaan buddeena hamminaa nyaatu;
daadhii wayinii kan dabaan argame dhugu.
- 18 Karaan qajeeltotaa akkuma ifa barii barraaqaa
kan hamma saafaatti ittuma fufee ifaa deemuu ti.
- 19 Karaan hamootaa garuu akkuma dukkana guddaa ti;
isaan waan isaan gufachiisu hin beekan.
- 20 Yaa ilma ko, waan ani jedhu qalbeeffadhu;
dubbii kootiifis gurra kenni.
- 21 Akka inni fuula kee duraa dhabamu hin godhin;
garaa kee keessa ol kaa'adhu;
- 22 inni warra isa argatuuf jireenya,
dhagna namaa guutuufis fayyinaatii.
- 23 Waan hunda caalaa qalbii kee eeggadhu;
burqaan jireenyaa achii ba'aatii.
- 24 Dubbii jal'inaa afaan kee keessaa balleessi;
haasaa hamaas arraba kee irraa fageessi.
- 25 Iji kee kallattiidhaan qajeelchee haa ilaalu;
atis xiyyeeffadhuu fuula kee dura ilaali.
- 26 Miilla keetiif daandii wal qixxeeffadhu;
karaan kee hundinuu haa jabaatu.
- 27 Gara mirgaatti yookaan gara bitaatti hin gorin;
miilla kee hammina irraa eeggadhu.

5

Ejja Irraa Of Eeggachuu

- 1 Yaa ilma ko, ogummaa koo qalbeeffadhu;
hubannaa kootiif illee gurra kenni;
- 2 kunis akka ati hubannaa turfatee
arrabni kees beekumsa kuufattuuf.
- 3 Hidhiin ejjituu damma coccoba;
haasaan ishee zayitii caalaa lallaafa;
- 4 dhuma irratti garuu isheen akkuma hadhooftuu hadhoofti;
akkuma goraadee afaan lamaas qara qabeettii dha.
- 5 Miilli ishee gara du'aatti gad bu'a;
tarkaanfiin ishee awwaalatti nama geessa.
- 6 Isheen waa'ee karaa jireenyaa dhimma hin qabdu;
daandiin ishee jal'aa dha; isheen garuu kana hin beektu.
- 7 Egaa yaa ilmaan ko, mee na dhaga'aa;
waan ani jedhu irraa gara kamitti iyyuu hin gorinaa.
- 8 Karaa keessan ishee irraa fageeffadhaa;
balbala mana isheetti hin dhi'aatinaa;
- 9 kunis akka ati ulfina kee nama biraatiif,
umurii kees nama namaaf hin naaneef hin kennineef;
- 10 akkasumas qabeenya kee ormatu nyaata;

- dadhabbiin kees mana alagaa badhaasa.
 11 Dhuma jireenya keetiitti,
 yeroo foonii fi dhagni kee dhumutti ati ni aadda.
 12 Atis akkana jetta; “Ani akkamittin adabamuu jibbee!
 Garaan koos akkam sirreeffamuu tuffate!
 13 Ani barsiistota kootiif hin ajajamne
 yookaan qajeelchitoota koo hin dhaggeeffanne.
 14 Ani waldaa guutuu gidduutti
 qarqara badiisaa ga’een ture.”
 15 Eela kee keessaa bishaan,
 boolla bishaanii kee keessaa immoo bishaan qulqulluu dhugi.
 16 Burqaan kee guutee daandii irra, bishaan kee kan yaa’us
 oobdii keessa dhangala’uu qabaa?
 17 Isaan kan kee haa ta’an;
 ormi si wajjin qooddachuu hin qabu.
 18 Burqaan kee haa eebbifamu;
 niitii dargaggummaa keetiitti gammadi.
 19 Isheen miidhagduu akka borofaa, bareedduu akka gadamsaa ti;
 harmi ishee yeroo hunda sitti haa tolu;
 yeroo hunda jaalalli ishee si haa booji’u.
 20 Yaa ilma ko, ati maaliif ejjituudhaan booji’amta?
 Maaliif bobaa niitii nama biraa hammatta?
 21 Karaan namaa guutumaan guutuutti fuula WAAQAYYOO dura jiraatii;
 innis daandii namaa hunda ni to’ata.
 22 Balleessaan nama hamaa isuma qabaata;
 funyoon cubbuu isaa jabeessee isa qaba.
 23 Inni sababii adabamuu dhabeef du’a;
 guddinni gowwummaa isaas karaa irraa isa balleessa.

6

Akeekkachiisa Waa’ee Gowwummaa Irratti Kenname

- 1 Yaa ilma ko, ati yoo ollaa keetiif wabii taatee
 harka dhoofttee nama ormaatiif kakatte,
 2 yoo waanuma dubbatteen qabamtee
 dubbuma afaan keetiitiin kiyoo seente,
 3 yoos yaa ilma ko,
 ati sababii harka ollaa keetii seentee jirtuuf
 ati of baasuudhaaf
 dafii dhaqiitii gad of qabii
 jabeessiitii ollaa kee kadhadhu!
 4 Ija keetiif hirriba,
 baallee ija keetiitiif immoo mugaatii hin eeyyamin.
 5 Ati akkuma kuruphee harka adamsituutii baatuutti,
 akkuma simbirroo kiyoo nama ishee qabuu jalaa baatuutti of oolchi.
 6 Yaa dhibaa’aa nana mee gara goondaa dhaqi;
 karaa ishee qalbeeffadhuutii ogeessa ta’i!
 7 Inni ajajaa hin qabu;
 to’ataa yookaan bulchaa hin qabu;
 8 ta’u illee inni bona keessa nyaata isaa kuufata;
 yeroo midhaan galfamutti immoo nyaata isaa walitti qabata.
 9 Yaa dhibaa’aa nana, ati hamma yoomiitti ciifta?
 Ati yoomi hirriba keetii kaata?
 10 Hirriba xinnaa, mugaatii xinnaa,
 xinnoo harka walitti marachuu,
 11 hiyyummaan is akkuma hattuutti sitti dhufa;
 deegummaan is akkuma loltuu hidhateetti sitti dhufa.
 12 Namni rakkisaan, namni hamaan,

dubbii sobaatiin asii fi achi naanna'a;
¹³ inni ijaan dha'a;
 miilla isaatiinis mallattoo kenna;
 quba isaatiin argisiisa;
¹⁴ inni garaa isaa isa sobaadhaan hammina yaada;
 yeroo hundas lola kakaasa.

¹⁵ Kanaafuu badiisni yommusuma isatti dhufa;
 inni akkuma tasaa caba; deebi'ees hin fayyu.

¹⁶ WAAQAYYO waan ja'a jibba;
 waan torba immoo ni xireeffata; isaanis:
¹⁷ Ija of tuulu,
 arraba sobu,
 harka dhiiga nama balleessaa hin qabnee dhangalaasu,
¹⁸ garaa mala hamaa malu,
 miilla gara jal'inaatti ariifatu,
¹⁹ dhuga baatuu sobaa kan soba dhangalaasu,
 nama obboloota gidduutti lola kakaasuu dha.

Akeekkachiisa Waa'ee Ejjaa Irratti Kenname

- ²⁰ Yaa ilma ko, ajaja abbaa keetii eegi;
 barsiisa haadha keetii illee hin gatin.
- ²¹ Bara baraan garaa keetti qabadhu;
 morma keettis hidhadhu.
- ²² Yeroo ati deemtu isaan si qajeelchu;
 yeroo ati raftu si eegu;
 yeroo ati hirribaa kaatu illee si haasofsiisu.
- ²³ Ajajni kun ibsaadhaatii;
 barsiisni kunis ifa;
 sirreeffamni amalaa immoo karaa jireenyaa ti;
- ²⁴ isaan dubartii hamtuu irraa,
 niitii kashlabbee afaan dammaa irraa si eegu.
- ²⁵ Garaa kee keessatti bareedina ishee hin dharra'in;
 yookaan akka isheen ija isheetiin si boojitu hin godhin.
- ²⁶ Sagaagaltuun buddeena tokkoon bitamtiitii;
 ejjituunis jireenyuma kee adamsiti.
- ²⁷ Namni bobaa jalatti ibidda baadhatee
 wayyaan isaa hin gubanne jiraa?
- ²⁸ Namni ibidda cilee irra ejjetee
 miilli isaa hin gubanne jiraa?
- ²⁹ Namni niitii nama biraa wajjin ciisus akkasuma ta'a;
 namni ishee tuqu kam iyyuu utuu hin adabamin hin hafu.
- ³⁰ Yoo hattuun tokko beela ba'uuf jedhee hate,
 namoonni hin tuffatan.
- ³¹ Garuu inni yoo qabame dachaa torba baasa;
 mi'a mana isaa hundas ni kenna.
- ³² Namni sagaagalu qalbii hin qabu;
 namni waan akkasii hojjetu ofuma galaafata.
- ³³ Qoodni isaa dhaanamuu fi salphachuu dha;
 qaaniin isaa yoom iyyuu isa irraa hin haqamu.
- ³⁴ Hinaaffaan aarii dhirsaa kakaasaatii;
 inni yeroo haaloo ba'utti dhiifama tokko iyyuu hin godhu.
- ³⁵ Inni beenyaa tokko illee hin fudhatu;
 hammam baay'atu iyyuu inni matta'aa ni dida.

7

Sagaagaltuu Irraa Of Eggachuu

¹ Yaa ilma ko, dubbii koo eegiitii

- ajaja koos of keessatti kuufadhu.
- ² Ajaja koo eegi, ati ni jiraataatii;
barsiisa koos akkuma qaroo ija keetiitti eegi.
- ³ Quba keetti isaan hidhadhu;
gabatee garaa keetii irrattis barreeffadhu.
- ⁴ Ogummaan, “Ati obboleettii koo ti” jedhi;
hubannaa immoo, fira koo jedhii waami;
- ⁵ isaan sagaagaltuu irraa, niitii kashlabbee dubbii isheetiin
nama harkiftu irraa si eegu.
- ⁶ Ani foddaa mana koo biraa keessaan,
karaa qaawwaatiin ala ilaale.
- ⁷ Ani warra homaa hin dandeenye keessatti,
dargaggoota keessatti hubadhee
dargageessa qalbii hin qabne tokko arge.
- ⁸ Innis karaa mana ishee dhaqu qabatee
daandii golee mana ishee bira jiruutiin gad bu’aa ture.
- ⁹ Kunis yeroo aduun dhiitee lafti dimimmisaa’aa turetti,
yeroo halkan dukkanaa’uu jalqabetti ture.
- ¹⁰ Dubartiin tokko akka sagaagaltuutti uffatee
yaada haxxummaatiin isa simachuuf gad baate.
- ¹¹ Isheen iyyituu fi kashlabbee dha;
miilli ishee mana hin dhaabatu;
- ¹² takka daandii irratti, takka oobdii irratti,
golee hundatti riphxee nama eggatti.
- ¹³ Isheen qabdee isa dhungatti;
fuula qaanii hin qabneen akkana jettiin:
- ¹⁴ “Ani aarsaa nagaa dhi’eessuun qaba;
har’a wareega koo guuttadheera.
- ¹⁵ Kanaafuu ani si simachuufin gad ba’e;
ani barbaadee si argadheera!
- ¹⁶ Ani wayyaa bareedduu quncee talbaa irraa hojjetame kan Gibxii dhufeen,
siree koo afee miidhagseera.
- ¹⁷ Ani qumbiin, argeessaa fi qarafaan
siree koo urgesseera.
- ¹⁸ Kottu mee hamma bariitti gad fageenya jaalalaa walii wajjin dhugnaa;
kottu jaalalaan of gammachiifnaa!
- ¹⁹ Dhirsi koo mana hin jiru;
inni karaa dheeraa deemeera.
- ²⁰ Inni boorsaa isaa maallaqaan guuttatee deeme;
hamma ji’i goobanutti manatti hin deebi’u.”
- ²¹ Isheen dubbii mi’ooftuudhaan karaa irraa isa jal’ifte;
haasaa nama sossobuunis isa dirqisiifte.
- ²² Innis akkuma sangaa qalamuuf deemuutti,
akkuma gadamsa kiyyoo keessa seenuuttis
yommusuma ka’ee ishee duukaa bu’e;
²³ akkuma simbira kiyyootti ariifattuutti,
inni hamma xiyyi tiruu isaa waraanutti
akka wanni kun lubbuu isaa galaafatu hin beeku.
- ²⁴ Egaa yaa ilmaan ko, na dhaggeeffadhaa;
waan ani jedhus qalbeeffadhaa.
- ²⁵ Akka garaan kee karaa isheetti garagalu hin godhin;
karaa kee irraas baddee daandii ishee irra hin bu’in.
- ²⁶ Namoonni hedduun warra isheen lafaan dhoofttee dha;
namoonni jajjaboon baay’eenis harka isheetti dhumaniiru.
- ²⁷ Manni ishee karaa qileetti nama geessu,
kan gola du’aatti gad nama buusuu dha.

8

Waamicha Ogummaa

- ¹ Ogummaan hin iyyuu?
Hubannaanis sagalee isaa ol hin fudhatuu?
- ² Isheen qarqara karaa, lafa ol ka'aa irra,
iddoo daandiin itti wal ga'u dhaabatti;
- ³ karra magaalatti nama galchu bira,
balbala dura dhaabatee akkana jettee iyyiti:
- ⁴ "Yaa namoota, ani iyyeen isin waama;
ani ilmaan namaa hundatti sagalee koo ol nan fudhadha.
- ⁵ Isin warri homaa hin beekne, qalbii horadhaa;
isin warri gowwaan hubannaa argadhaa.
- ⁶ Ani waan faayidaa qabu nan dubbadhaatii, dhaga'aa;
waan qajeelaa dubbachuufis afaan koo nan banadha.
- ⁷ Afaan koo dhugaa dubbata;
arrabni koo hammina jibbaatii.
- ⁸ Dubbiin afaan koo hundinuu qajeelaa dha;
dubbii koo keessaa tokko iyyuu jal'aa yookaan micciiramaa miti.
- ⁹ Nama waa hubatuuf dubbiiin koo hundinuu qajeelaa dha;
warra beekumsa qabuufis hir'ina hin qabu.
- ¹⁰ Qooda meetii gorsa koo,
warqee qulqulluu caalaas beekumsa filadhu;
- ¹¹ ogummaan lula diimaa caalaa gatii guddaa qabdi;
wanni ati hawwitu tokko iyyuu isheedhaan wal hin madaalu.
- ¹² "Ani ogummaan, qalbii wajjin nan jiraadha;
ani beekumsaa fi hubannaa qaba.
- ¹³ WAAQAYYON sodaachuun jibbuu dha;
hammina ani of tuulummaa fi of guddisuu,
amala hamaa fi haasaa jal'aa nan jibba.
- ¹⁴ Gorsaa fi murtiin dhugaa kan koo ti;
ani hubannaa fi humna qaba.
- ¹⁵ Mootonni anaan mo'u;
bulchitoonnis anaan seera qajeelaa baasu.
- ¹⁶ Ilmaan moototaa anaan bulchu;
namoonni bebeekamoon hundis anaan biyya bulchu.
- ¹⁷ Ani warra na jaallatan nan jaalladha;
warri na barbaadanis na argatu.
- ¹⁸ Soorumnii fi ulfinni, qabeenyii fi
badhaadhummaan dhuma hin qabne harkuma koo jiru.
- ¹⁹ Iji koo warqee qulqulluu caala;
bu'aan narraa argamus meetii filatamaa caala.
- ²⁰ Ani karaa qajeelummaa irra,
daandii qajeelaa irras nan deema;
- ²¹ warra na jaallatutti qabeenya nan dhangalaasa;
mankuusa qabeenya isaanii illee nan guuta.
- ²² "WAAQAYYO waan bara durii hojjeteen dura,
hojii isaa kan jalqabaatiin dura na aanfate;
- ²³ ani utuu addunyaan hin uumamin dura,
jalqabumatti, bara hamma hin qabneen dura nan muudame.
- ²⁴ Ani utuu tuujubni hin jiraatin,
utuu burqaawwan bishaaniin hin guutamin dhaladhe;
- ²⁵ utuu tulluuwwan iddoo isaanii hin dhaabamin dura,
ani gaarraniin dura nan dhaladhe;
- ²⁶ utuu inni lafa yookaan dirree ishee
yookaan biyyoo addunyaa tokko iyyuu
hin uumin dura nan dhaladhe.
- ²⁷ Yeroo inni samiiwwan hundeessetti,
yeroo inni dhidhima irra muummee kaa'etti ani achin ture;
- ²⁸ yeroo inni gubbaatti duumessa jabeessee dhaabee

- madda tuujubaa illee hundeessetti ani achin ture;
²⁹ yeroo inni akka bishaanonni ajaja isaa hin cabsineef jedhee,
 galaanaaf daangaa dhaabetti,
 yeroo inni lafa hundeessetti ani achin ture.
³⁰ Yeroo sanatti ani ogeessa hojii harkaa ta'ee isa biran ture.
 Ani yeroo hunda fuula isaa dura burraaqaa,
 guyyuma guyyaadhaan gammachuudhaan guutamaan ture;
³¹ ani guutummaa addunyaa isaa keessatti ililchaa,
 ilmaan namaatti illee gammadaan ture.
³² "Eegaa yaa ilmaan ko, mee na dhaga'aa;
 warri karaa koo eegan eebbifamoo dha.
³³ Gorsa koo dhaggeeffadhaatii ogeeyyii ta'aa;
 isa hin tuffatinaa.
³⁴ Namni na dhaga'u,
 kan guyyaa hunda balbala koo eegu,
 kan karra koo dura turu eebbifamaa dha.
³⁵ Namni na argatu kam iyyuu jireenya argata;
 WAAQAYYO biratti illee fudhatama argata.
³⁶ Namni na hin arganne garuu ofuma miidha;
 namni na jibbu hundinuu du'a jaallata."

9

Ogummaa fi Gowwummaa

- ¹ Ogummaan mana ishee ijaarratte;
 utubaa ishee torbanis dhagaa irraa qopheeffate.
² Isheen horii qalatee daadhii wayinii ishee bulbulatte;
 maaddii ishee illee qopheeffatte.
³ Tajaajiltoota ishee dubarran ergattee
 fiixee magaalaa irraa lallabde.
⁴ Isheen warra qalbii hin qabneen akkana jetti;
 "Isin warri homaa hin beekne hundi as kottaa!
⁵ Kottaatii nyaata koo nyaadhaa;
 daadhii wayinii ani bulbuladhe illee dhugaa.
⁶ Karaa gowwummaa keessanii sana dhiisaatii jiraadhaa;
 karaa hubannaa irra deemaa.
⁷ "Namni nama namatti qoosu gorsu kam iyyuu ni arrabsama;
 namni nama hamaa ifatu kam iyyuu ni salphata.
⁸ Ati nama namatti qoosu hin ifatin; inni si jibbaatii;
 nama ogeessa ifadhu; inni si jaallataatii.
⁹ Nama ogeessa gorsi; inni ittuma caalchisee ogeessa ta'aa;
 nama qajeelaaf barumsa kenni; inni beekumsa isaatti dabalaatii.
¹⁰ "WAAQAYYON sodaachuun jalqaba ogummaa ti;
 isa Qulqulluu Sana beekuun hubannaa dha.
¹¹ Karaa kootiin barii jireenya keetii ni dheerata;
 jireenya kee irrattis waggoonni ni dabalamuutii.
¹² Yoo ati nama ogeessa taate, ogummaan kee si badhaasa;
 yoo ati kan namatti qoostu taate suma qofatu gidirama."
¹³ Dubartiin gowwaan oduu baay'ifti;
 isheen raatuu homaa hin beeknee dha.
¹⁴ Isheen balbala mana ishee dura,
 fiixee magaalaa gubbaa barcuma irra teessee
¹⁵ warra achiin darban, kanneen qajeelanii
 daandii isaanii irra deeman waamti.
¹⁶ Isheen warra qalbii hin qabneen akkana jetti.
 "Isin warri homaa hin beekne hundi as kottaa!
¹⁷ Bishaan hatan ni mi'aawa;
 nyaanni dhoksaan nyaatanis guddoo namatti tola!"

¹⁸ Isaan garuu akka warri du'an achi jiran,
akka keessumoonni ishee dhidhima awwaalaa keessa jiran illee
xinnuma beeku.

Fakkeenyawwan Solomoon

10

- ¹ Fakkeenyawwan Solomoon:
Ilmi ogeessi abbaa isaa gammachiisa;
ilmi gowwaan garuu haadha isaa gaddisiisa.
- ² Qabeenyi karaa hamaadhaan horatan gatii hin qabu;
qajeelummaan garuu du'a jalaa nama baasa.
- ³ WAAQAYYO akka warri qajeelaan beela'an hin eeyyamu;
hawwii jal'ootaa garuu ni busheessa.
- ⁴ Harki hojii hin hojjenne nama hiyyoomsa;
harki jabaatee hojii hojjetu garuu nama sooromsa.
- ⁵ Namni yeroo bonaa midhaan walitti qabatu ilma ogeessa;
kan yeroo midhaan galfamutti rafu immoo
ilma nama qaanessuu dha.
- ⁶ Eebbi mataa qajeeltotaatti gonfoo kaa'a;
afaan hamootaa irra garuu jeequmsatu lola'a.
- ⁷ Yaadannoon nama qajeelaa eebba ta'a;
maqaan nama hamaa garuu lafa irraa bada.
- ⁸ Namni garaa isaatti ogeessa ta'e ajaja fudhata;
gowwaan oduu baay'isu garuu ni bada.
- ⁹ Namni amanamaan sodaa malee deema;
kan karaa isaa jal'isu garuu ni saaxilama.
- ¹⁰ Namni ija hamminaatiin waa namaan jedhu rakkoo uuma;
gowwaan oduu baay'isu garuu ni bada.
- ¹¹ Afaan nama qajeelaa burqaa jireenyaa ti;
afaan hamootaa irra garuu jeequmsatu lola'a.
- ¹² Jibbi lola kakaasa;
jaalalli garuu balleessaa hunda haguuga.
- ¹³ Ogummaan hidhii nama waa hubatuu irratti argamti;
uleen immoo dirra nama hubannaa hin qabnee irra bu'a.
- ¹⁴ Namoonni ogeeyyiin beekumsa kuufatu;
afaan gowwaa garuu badiisa waama.
- ¹⁵ Qabeenyi sooreyyii isaaniif magaalaa da'oo qabduu dha;
hiyyummaan garuu badiisa hiyyeeyyii ti.
- ¹⁶ Mindaan qajeeltotaa jireenya;
galiin hamootaa garuu cubbuu fi du'a.
- ¹⁷ Namni gorsa fudhatu karaa jireenyaa irra deema;
namni adaba didu kam iyyuu garuu warra kaan karaa irraa jal'isa.
- ¹⁸ Namni hidhii sobuun jibba dhokfatu,
kan maqaa namaa balleessus gowwaa dha.
- ¹⁹ Yoo dubbiin baay'atu, cubbuun keessaa hin dhabamu;

- namni arraba isaa eeggatu garuu ogeessa.
- ²⁰ Arrabni nama qajeelaa meetii filatamaa dha;
garaan nama hamaa garuu faayidaa xinnoo qaba.
- ²¹ Arrabni nama qajeelaa nama hedduu soora;
gowwoonni garuu hubannaa dhabiisaan du'u.
- ²² Eebbi WAAQAYYOO nama sooromsa;
inni rakkina tokko illee itti hin dabaluu.
- ²³ Gowwaan amala hamaadhaan gammachuu argata;
namni waa hubatu garuu ogummaatti gammada.
- ²⁴ Wannii namni hamaan sodaatu isumatti dhufa;
hawwiin nama qajeelaa immoo ni guutamaaf.
- ²⁵ Yeroo bubbeen hamaan bubbisu namoonni hamoon ni badu;
qajeeltonni garuu bara baraan jabaatanii jiraatu.
- ²⁶ Akkuma wannii dhangaggaa'aan ilkaan miidhee,
aarris ija miidhu sana
namni dhibaa'aan warra isa ergatu miidha.
- ²⁷ WAAQAYYON sodaachuun bara jireenya namaa dheeressa;
umuriin nama hamaa garuu ni gabaabbata.
- ²⁸ Abdiin nama qajeelaa gammachuu ta'a;
wannii namni hamaan eeggatu garuu ni bada.
- ²⁹ Karaan WAAQAYYOO nama qajeelaaf da'oo dha;
nama jal'aaf garuu badiisa.
- ³⁰ Qajeeltonni yoom iyyuu hin fonqolfaman;
hamoonni garuu lafa irratti hin hafan.
- ³¹ Afaan nama qajeelaa ogummaa dubbata;
arrabni jal'aan garuu ni kutama.
- ³² Arrabni nama qajeelaa waan fudhatama qabu dubbata;
afaan nama hamaa garuu waan jal'aa qofa dubbata.

11

- ¹ WAAQAYYO madaalii hin amanamne ni balfa;
madaalii dhugaatti immoo ni gammada.
- ² Gaafa of tuuluun dhufu, salphinatu dhufa;
gad of qabiisa wajjin immoo ogummaatu dhufa.
- ³ Amanamummaan tolootaa isaan dura deema;
warri hin amanamne garuu dabuma isaaniitiin badu.
- ⁴ Guyyaa dheekkamsaatti qabeenyi faayidaa hin qabu;
qajeelummaan garuu du'a jalaa nama baasa.
- ⁵ Qajeelummaan warra mudaa hin qabnee
karaa qajeelaa baasaaf;
hamoonni garuu hamminuma isaaniitiin badu.
- ⁶ Qajeelummaan tolootaa isaan oolcha;
warri hin amanamne garuu
hawwii hamaadhaan qabamu.

- 7 Yeroo namni hamaan du'u, abdiin isaas ni bada;
wannu namni hamaan eeggatus ni barbadeeffama.
- 8 Namni qajeelaan rakkoo jalaa ni baafama;
rakkoon sunis qooda isaa nama hamaa irra ga'a.
- 9 Namni Waaqatti hin bulle dubbii afaan isaatiin ollaa isaa balleessa;
namni qajeelaan immoo beekumsaan miliqa.
- 10 Yommuu namni qajeelaan badhaadhu magaalaa ni gammada;
yommuu namni hamaan barbadaa'u immoo iyya gammachuutu dhaga'ama.
- 11 Eebba nama tolaatiin magaalaa ulfina argata;
afaan nama hamaatiin garuu ni barbadeeffama.
- 12 Namni sammuu hin qabne ollaa isaa tuffata;
kan hubannaa qabu garuu ni cal'isa.
- 13 Namni odeessu dhoksaa gad baasa;
kan amanamu garuu icciitii eega.
- 14 Qajeelfama dhabiisaan sabni ni kufa;
baay'ina gorsitootaatiin garuu nagaatu argama.
- 15 Namni nama hin beekneef wabii ta'u ni rakkata;
namni namaaf kakachuuf jedhee harka dha'uu didu immoo
nagaan jiraata.
- 16 Dubartiin gara laafettiin ulfina argatti;
namoonni garaa dhagaa immoo qabeenya qofa argatu.
- 17 Namni gaariin of fayyada;
gara jabeessi garuu rakkina ofitti fida.
- 18 Namni hamaan mindaa sobaa argata;
kan qajeelummaa facaafatu immoo badhaasa dhugaa argata.
- 19 Namni qajeelaan dhugumaan jireenya argata;
kan waan hamaa duukaa bu'u garuu gara du'aa argata.
- 20 WAAQAYYO warra yaada jal'aa qaban balfa;
warra karaan isaanii mudaa hin qabnetti immoo ni gammada.
- 21 Waan kana hubadhu: Namni hamaan utuu hin adabamin hin hafu;
qajeeltonni garuu bilisa ba'u.
- 22 Dubartiin miidhagduun qalbii hin qabne
akkuma qubeelaa warqee kan funyaan booyyeetti jirtuu ti.
- 23 Wannu qajeeltonni hawwan gaarii ta'aaf;
abdiin hamootaa garuu dheekkamsa qofa ta'a.
- 24 Namni tokko tosuma waa namaa kenna;
ta'us ittuma caalchisee soorama;
kaan immoo waan kennuu malu dhowwata;
ta'us inuma hiyyooma.
- 25 Namni arjaan ni badhaadha;
namni warra kaan dheebuu baasu ofii isaatii illee dheebuu ba'a.
- 26 Nama dhoksee midhaan kuufatu sabni ni abaara;
kan gurguruuf fedhii qabu immoo eebbatu gonfoo ta'aaf.

- 27 Namni waan gaarii barbaadu carraa gaarii argata;
hamminni garuu nama hammina barbaadutti dhufa.
- 28 Namni sooruma ofii isaa abdatu kam iyyuu ni kufa;
qajeelaan garuu akkuma baala magariisaatti lalisa.
- 29 Namni maatii isaatti rakkoo fidu bubbee qofa dhaala;
gowwaan immoo garbicha nama ogeessaa ta'a.
- 30 Iji nama qajeelaa muka jireenyaa ti;
namni lubbuu namaa baraaruu immoo ogeessa.
- 31 Erga qajeeltonni lafa irratti gatii isaanii argatanii,
namni Waaqatti hin bullee fi cubbamaan
hammam caalaa haa argatanii ree!

12

- 1 Namni adabamuu jaallatu kam iyyuu beekumsa jaallata;
kan sirreeffamuu jibbu garuu gowwaa dha.
- 2 Namni gaariin WAAQAYYO biratti fudhatama argata;
WAAQAYYO garuu nama hammina malatutti ni mura.
- 3 Namni tokko hamminaan jabaatee hin dhaabatu;
qajeelaan garuu hin buqqifamu.
- 4 Niitiin amala gaarii dhirsa isheetiif gonfoo dha;
niitiin qaanessitu garuu akkuma tortora lafee isaa keessaa ti.
- 5 Karoorri qajeeltotaa qajeelaa dha;
gorsi jal'ootaa garuu gowwoomsaa dha.
- 6 Dubbiin hamootaa dhiiga dhangalaasuuf
riphée nama eeggata;
haasaan tolootaa garuu du'a jalaa nama baasa.
- 7 Namoonni hamoon ni garagalfamu; deebi'aniis hin argaman;
manni qajeeltotaa garuu jabaatee dhaabata.
- 8 Namni tokko akkuma ogummaa isaatti jajama;
namni yaada jal'aa qabu immoo ni tuffatama.
- 9 Namni tuffatamaan hojjetaa qabu tokko,
nama of kabaju kan waan nyaatu iyyuu hin qabne caala.
- 10 Namni qajeelaan lubbuu horii isaatiif yaada;
hojiin jal'ootaa garuu tolaan isaa iyyuu hammina.
- 11 Namni lafa isaa qotatu nyaata guddaa argata;
kan yaada faayidaa hin qabne duukaa bu'u garuu hubannaa hin qabu.
- 12 Hamoonni boojuu jal'ootaa hawwu;
hiddi qajeeltotaa garuu ni lalisa.
- 13 Namni hamaan cubbuu afaan isaatiin qabama;
namni qajeelaan garuu rakkoo jalaa miliqa.
- 14 Namni waan afaan isaatii ba'uun waan gaariin guutama;
hojiin harka namaas isumaaf deebi'a.
- 15 Nama gowwaa karaan isaa qajeelaa itti fakkaata;
namni ogeessi garuu gorsa dhaga'a.

- 16 Aariin gowwaa yommusuma isa irraa beekama;
namni hubataan garuu arrabsoo tuffata.
- 17 Namni dhugaa dubbatu ragaa amanamaa kenna;
dhuga baatuun sobaa garuu soba dubbatti.
- 18 Dubbiin of eeggannaa hin qabne
akkuma goraadee nama waraana;
arrabni nama ogeessaa garuu nama fayyisa.
- 19 Afaan dhugaa dubbatu bara baraan jiraata;
arrabni soba dubbatu garuu yeroo gabaabaa qofa jiraata.
- 20 Garaa warra waan hamaa malatanii keessa
gowwoomsaatu jira;
warri nagaa buusan garuu gammachuu qabu.
- 21 Qajeeltotatti miidhaan tokko iyyuu hin dhufu;
hamoonni rakkinaan guutamu.
- 22 WAAQAYYO arraba sobu ni jibba;
warra dhugaa dubbatutti garuu ni gammada.
- 23 Namni hubataan beekaa ta'uu isaa dhokfata;
gowwoonni garuu gowwummaa isaanii labsu.
- 24 Harki nama jabaatee hojjetuu ni mo'a;
dhibaa'ummaan garuu garbummaatti nama geessa.
- 25 Garaan yaadda'u gad nama deebisa;
dubbiin tolaan immoo nama gammachiisa.
- 26 Namni qajeelaan ollaa isaa karaa argisiisa;
karaan hamootaa garuu karaa irraa nama jal'isa.
- 27 Namni dhibaa'aan waan adamsee ajjeese hin waaddatu;
kan jabaatee hojjetu immoo qabeenya gatii guddaa argata.
- 28 Karaa qajeelummaa irra jireenyatu jira;
daandii sana irra duuti hin jiru.

13

- 1 Ilmi ogeessi gorsa abbaa isaa dhaga'a;
qoostuun namaa immoo dheekkamsa hin dhaggeeffatu.
- 2 Namni waan afaan isaatii ba'uun waan gaariin gammada;
namni hin amanamne garuu jeequnsaaf ariifata.
- 3 Namni arraba isaa eeggatu, jireenya isaa eeggata;
kan of eeggachuu malee dubbatu immoo baduuf ariifata.
- 4 Fedhiin dhibaa'aa yoom iyyuu hin guutamu;
fedhiin nama jabaatee hojjetuu immoo guutummaan ni milkaa'a.
- 5 Namni qajeelaan soba jibba;
namni hamaan garuu qaanii fi salphina fida.
- 6 Qajeelummaatu nama tolaa tiksa;
hamminni garuu cubbamaa galaafata.
- 7 Namni tokko sooressa of fakkeessa; garuu homaa hin qabu;
tokko immoo hiyyeessa of fakkeessa; garuu qabeenya guddaa qaba.

- ⁸ Soorumni nama tokkoo furii jireenya isaa ta'uu danda'a;
hiyyeessi garuu ifannaa hin dhaga'u.
- ⁹ Ifni nama qajeelaa akka gaarii ifa;
ibsaan nama hamaa garuu ni dhaama.
- ¹⁰ Of tuulummaan lola qofa baay'isa; ogummaan garuu
warra gorsa dhaga'an biratti argamti.
- ¹¹ Maallaqni karaa sobaatiin dhufu dafee bada;
namni xinnoo xinnoon maallaqa walitti qabatu garuu ni kuufata.
- ¹² Abdiin lafa irra harkifatu garaa nama dhukkubsa;
hawwiin guutamu garuu muka jireenyaa ti.
- ¹³ Namni gorsa tuffatu badiisa ofitti fida;
kan ajaja ulfeessu immoo badhaasa argata.
- ¹⁴ Barsiisni nama ogeessaa burqaa jireenyaa ti;
kiyyoo du'aa irraas nama deebisa.
- ¹⁵ Hubannaan gaariin surraa argamsiisa;
karaan warra hin amanamnee garuu
badiisatti isaan geessa.
- ¹⁶ Namni qalbii qabu kam iyyuu beekumsaan hojjeta;
gowwaan immoo gowwummaa isaa mul'isa.
- ¹⁷ Ergamaan hamaan rakkoo keessa seena;
ergamaan amanamaan garuu fayyina fida.
- ¹⁸ Namni adabamuu jibbu ni hiyyooma; ni qaana'as;
kan sirreeffama kabaju immoo ulfina argata.
- ¹⁹ Hawwiin guutame namatti mi'aawa;
gowwoonni garuu waan hamaa irraa deebi'uu balfu.
- ²⁰ Namni nama ogeessa wajjin deemu ogeessa ta'a,
michuun gowwootaa garuu ni miidhama.
- ²¹ Wannii hamaan cubbamoota ari'ata;
badhaadhummaan immoo badhaasa qajeelotaa ti.
- ²² Namni gaariin ilmaan ilmaan isaatiif dhaala dabarsa;
qabeenyi nama cubbamaa garuu qajeeltotaaf kuufama.
- ²³ Qonnaan hiyyeessaa midhaan guddaa baasa;
murtiin jal'aan garuu haxaa'ee duraa balleessa.
- ²⁴ Namni harcummee qusatu ilma isaa jibba;
kan ilma ofii jaallatu immoo ilaallachaa isa adaba.
- ²⁵ Namni qajeelaan hamma quufutti nyaata;
garaan nama hamaa garuu ni beela'a.

14

- ¹ Dubartiin ogeettiin mana ishee ijaarratti;
gowwaan immoo harkuma isheetiin mana ofii diigdi.
- ² Namni qajeelummaan jiraatu WAAQAYYON sodaata;
kan karaan isaa jal'aa ta'e garuu isa tuffata.

- ³ Afaan nama gowwaa dugda isaatti ulee of tuulummaa fida;
arrabni ogeeyyii garuu isaan eega.
- ⁴ Yoo qotiyyoon hin jirre, dallaan duwwaa ta'a;
garuu humna qotiyyoo tokkootiin midhaan baay'een argama.
- ⁵ Dhuga baatuun amanamaan hin sobu;
dhuga baatuun sobaa immoo dhara of keessaa gad naqa.
- ⁶ Qoostuun namaa ogummaa barbaadee hin argatu;
nama waa hubatuuf garuu beekumsi dadhabbi malee dhufa.
- ⁷ Ati nama gowwaa irraa fagaadhu;
arraba isaa irraa beekumsa hin argattuuti.
- ⁸ Ogummaan hubattootaa akka isaan karaa isaanii beekan isaan godha;
gowwummaan gowwootaa garuu karaa irraa isaan balleessa.
- ⁹ Gowwoonni cubbuutti qoosu;
qajeeltota gidduutti garuu hawwii gaariitu argama.
- ¹⁰ Garaan gadda ofii isaa ni beeka;
namni biraa tokko iyyuu gammachuu isaa irraa hin qooddatu.
- ¹¹ Manni nama hamaa ni bada;
dunkaanni nama qajeelaa immoo ni daraara.
- ¹² Karaan qajeelaa namatti fakkaatu tokko jira;
dhuma irratti garuu du'atti nama geessa.
- ¹³ Kolfa keessatti iyyuu garaan nama dhukkubuu danda'a;
gammachuunis gaddaan dhumuu danda'a.
- ¹⁴ Namni hin amanamne gatii karaa isaa,
namni gaariin immoo gatii hojii isaa argata.
- ¹⁵ Namni homaa hin beekne waan hunda amana;
namni qalbii qabu garuu tarkaanfii isaa ilaallata.
- ¹⁶ Namni ogeessi of eeggata; waan hamaa irraas ni deebi'a;
gowwaan garuu waan hundatti jarjara; of illee hin eeggatu.
- ¹⁷ Namni dafee aaru gowwummaa hojjeta;
namni daba hojjetu garuu ni jibbama.
- ¹⁸ Namni homaa hin beekne gowwummaa dhaala;
qalbeeffataan garuu beekumsa gonfata.
- ¹⁹ Namoonni hamoon fuula namoota gaarii duratti,
jal'oonnis karra qajeeltotaa duratti sagadu.
- ²⁰ Hiyyeeyyii olloonna isaanii iyyuu ni jibbu;
sooreyyiin immoo michoota hedduu qabu.
- ²¹ Namni ollaa isaa tuffatu cubbuu hojjeta;
kan rakkataaf garaa laafu garuu eebbifamaa dha.
- ²² Namni hammina yaadu karaa irraa hin baduu?
Warri waan gaarii karoorsan garuu jaalalaa fi
amanamummaa argatu.
- ²³ Jabaatanii hojjechuun hundi bu'aa buusa;
oduun faayidaa hin qabne garuu hiyyummaa qofa fida.

- 24 Gonfoon ogeeyyii qabeenya isaanii ti;
gowwummaan gowwootaa garuu gowwummaa dhala.
- 25 Dhuga baatuun dhugaa lubbuu baraara;
dhuga baatuun sobaa immoo soba dubbata.
- 26 Namni WAAQAYYON sodaatu da'annoo jabaa qaba;
ijoolleen isaas da'oo argatu.
- 27 WAAQAYYON sodaachuun burqaa jireenyaa ti;
kiyyoo du'aa irraas nama deebisa.
- 28 Ulfinni mootii tokkoo baay'ina uummata isaa ti;
yoo uummanni hin jirre garuu ilmi mootiis ni bada.
- 29 Namni obsa qabu hubannaa guddaa qaba;
kan dafee aaru garuu gowwummaa mul'isa.
- 30 Garaan nagaa qabu dhagnaaf jireenya kenna;
hinaaffaan garuu lafee tortorsa.
- 31 Namni hiyyeessa cunqursu kan isa Uume tuffata;
namni hiyyeessaaf garaa laafu immoo Waaqa kabaja.
- 32 Hamoonni jal'inuma isaaniitiin badu;
qajeeltonni garuu du'a keessatti illee
amanamummaa isaaniitiin da'annoo argatu.
- 33 Ogummaan qalbii nama waa hubatuu keessa jirti;
garaa gowwootaa keessatti garuu hin beekamtu.
- 34 Qajeelummaan saba ol guddisa;
cubbuun garuu saba kamiif iyyuu salphina.
- 35 Mootiin tajaajilaa ogeessatti ni gammada;
kan isa qaanessutti garuu ni dheekkama.

15

- 1 Deebiin laafaan dheekkamsa qabbaneessa;
jechi hamaan garuu aarii kakaasa.
- 2 Arrabni nama ogeessaa beekumsa jaja;
afaan nama gowwaa garuu gowwummaa dhangalaasa.
- 3 Iji WAAQAYYOO idduma hunda jira;
nama hamaa fi gaariis ni to'ata.
- 4 Arrabni fayyina fidu muka jireenyaa ti;
arrabni sobu garuu hafuura cabsa.
- 5 Gowwaan adabbii abbaa isaa tuffata;
namni sirreeffama fudhatu kam iyyuu garuu qalbii qabeessa.
- 6 Manni nama qajeelaa badhaadhummaa guddaa qaba;
galiin nama hamaa garuu rakkoo isatti fida.
- 7 Arrabni nama ogeessaa beekumsa facaasa;
garaan nama gowwaa garuu akkas miti.
- 8 WAAQAYYO aarsaa hamootaa ni balfa;
kadhannaan tolootaa garuu isa gammachiisa.
- 9 WAAQAYYO karaa hamootaa ni balfa;

warra qajeelummaa duukaa bu'an garuu ni jaallata.

- 10 Nama daandii irraa jal'atu adabbii hamaatu isa eeggata;
kan sirreeffama jibbu ni du'a.
- 11 Du'aa fi Badiisni fuula WAAQAYYOO duratti beekamoo dha;
yoos garaan namaa hammam caalaa haa beekamu ree!
- 12 Namni qoosu sirreeffama hin jaallatu;
nama ogeessaanis hin mari'atu.
- 13 Garaan gammadu akka fuulli ifu godha;
gaddi garaa garuu hafuura cabsa.
- 14 Garaan waa qalbeeffatu beekumsa barbaada;
afaan gowwaa garuu gowwummaa nyaata.
- 15 Barri nama hacuucamee guutumaan guutuutti gadadoo dha;
garaa gammaduuf garuu guyyaan hundinuu cidha.
- 16 Qabeenya guddaa rakkina of keessaa qabuu mannaa,
WAAQAYYON sodaachaa waan xinnaa qabaachuu wayya.
- 17 Jibbaan cooma sangaa nyaachuu mannaa,
jaalalaan raafuu nyaachuu wayya.
- 18 Namni dafee aaru lola kakaasa;
namni obsa qabu garuu lola qabbaneessa.
- 19 Karaan nama dhibaa'aa qoraattiidhaan cufama;
daandiin tolootaa garuu karaa diriiraa dha.
- 20 Ilmi ogeessi abbaa isaa gammachiisa;
namni gowwaan garuu haadha isaa tuffata.
- 21 Nama qalbii hin qabne gowwummaatu isa gammachiisa;
namni hubataan garuu daandii qajeelaa irra deema.
- 22 Karoorri gorsa hin qabne fiixaan hin ba'u;
garuu gorsitoota hedduudhaan ni milkaa'a.
- 23 Namni tokko deebii malu kennuudhaan gammachuu argata;
dubbiin yeroo isaatti dubbatamu akkam gaarii dha!
- 24 Daandiin nama hubataa akka inni sii'oolitti gad hin buuneef
gara jireenyaatti ol isa baasa.
- 25 WAAQAYYO mana nama of tuuluu ni diiga;
daangaa haadha hiyyeessaa garuu ni dhaaba.
- 26 WAAQAYYO yaada nama hamaa ni balfa;
yaadni nama qulqulluu garuu isa gammachiisa.
- 27 Namni doqni maatii isaatti rakkina fida;
kan matta'aa jibbu garuu ni jiraata.
- 28 Garaan nama qajeelaa haala ittiin deebii kennu yaada;
afaan nama hamaa garuu hammina dhangalaasa.
- 29 WAAQAYYO nama hamaa irraa fagoo jira;
kadhannaa nama qajeelaa garuu ni dhaga'a.
- 30 Fuulli ifaan garaa gammachiisa;

oduun gaariinis lafee haaromsa.

- ³¹ Namni adabbii jireenya kennu dhaggeeffatu,
ogeeyyii gidduu jiraata.
- ³² Namni adabbii tuffatu ofuma tuffata;
kan sirreeffama fudhatu garuu hubannaa argata.
- ³³ WAAQAYYON sodaachuun ogummaa nama barsiisa;
gad of qabuunis ulfina dura dhufa.

16

- ¹ Karoorri garaa kan namaa ti;
deebiin arrabaa garuu WAAQAYYO biraa dhufa.
- ² Nama tokko karaan isaa hundi qulqulluu itti fakkaata;
yaada namaa garuu WAAQAYYOTU madaala.
- ³ Waan hojjetu hunda WAAQAYYOTTI kennadhu;
karoorri kees siif milkaa'a.
- ⁴ WAAQAYYO waan hunda kaayyoo ofii isaatiif hojjeta;
hamoota iyyuu guyyaa badiisaatiif qopheessa.
- ⁵ Namni of tuulu kam iyyuu fuula WAAQAYYOO duratti balfamaa dha;
dhugumaan inni utuu hin adabamin hin hafu.
- ⁶ Namni jaalalaa fi amanamummaadhaan araara cubbuu argata;
WAAQAYYON sodaachuudhaanis hammina irraa cita.
- ⁷ Yoo karaan namaa WAAQAYYON gammachiise,
inni akka diinonni isaas nagaan isa wajjin jiraatan ni godha.
- ⁸ Galii guddaa jal'inaan argatan mannaa
waan xinnoo qajeelummaan argatan wayya.
- ⁹ Namni garaa isaa keessatti karaa isaa karoofata;
WAAQAYYO garuu tarkaanfii isaa illee ni murteessa.
- ¹⁰ Hidhiin mootii hooda dubbata;
afaan isaa illee murtii hin jal'isu.
- ¹¹ Madaallii fi safartuun qajeelaan kan WAAQAYYOO ti;
ulfinni korojoo keessa jiru hundinuu hojii isaa ti.
- ¹² Sababii teessoon qajeelummaadhaan jabaatee dhaabatuuf
mootonni waan hamaa hojjechuu ni balfu.
- ¹³ Mootonni afaan dhugaa dubbatutti ni gammadu;
isaan nama dhugaa dubbatu ni jaallatu.
- ¹⁴ Dheekkamsi mootii ergamaa du'aa ti;
namni ogeessi garuu ni qabbaneessa.
- ¹⁵ Jireenyi ifa fuula mootii keessa jira;
surraan isaa akkuma duumessa bokkaa arfaasaa ti.
- ¹⁶ Ogummaa argachuun warqee caala;
hubannaa argachuunis meetii caala!
- ¹⁷ Daandiin nama tolaa hammina irraa fagoo dha;
namni karaa isaa eegus jireenya isaa eeggata.

- 18 Of tuuluun badiisaan dura,
of bokoksuunis kufaatiin dura deema.
- 19 Warra of tuulu wajjin boojuu qooddachuu mannaa,
hafuuraan gad of qabanii warra cunqurfame wajjin jiraachuu wayya.
- 20 Namni gorsa fudhatu kam iyyuu ni milkaa'a;
kan WAAQAYYON amanatus eebbifamaa dha.
- 21 Namni garaadhaan ogeessa ta'e qalbeeffataa jedhama;
dubbiin mi'aawu immoo gorsa dabala.
- 22 Hubannaan nama isa qabuuf madda jireenyaa ti;
gowwummaan garuu gowwootatti adabbii fida.
- 23 Garaan nama ogeessaa arraba isaa qajeelcha;
afaan isaas gorsa dabala.
- 24 Dubbiin nama gammachiisu dhaaba dammaa ti;
inni lubbuutti ni mi'aawa; lafees ni fayyisa.
- 25 Karaan qajeelaa namatti fakkaatu tokko jira;
dhuma irratti garuu du'atti nama geessa.
- 26 Fedhiin hojjetaan tokko nyaataaf qabu
hojiif isa kakaasa; beela'uun isaas ittuma cima.
- 27 Namni faayidaa hin qabne hammina malata;
haasaan isaas akkuma ibidda waa gubuu ti.
- 28 Namni jal'aan lola kakaasa; hamattuun immoo
michoota walitti dhi'aatan gargar baafti.
- 29 Namni jeequmsaan deemu ollaa isaa gowwoomsee
karaa jal'aatti isa geessa.
- 30 Namni ija qisu jal'ina karoorfata;
kan hidhii ciniinnatu immoo hammina fida.
- 31 Arriin gonfoo ulfinaa ti;
innis karaa qajeelaadhaan argama.
- 32 Goota waraanaa irra nama obsa qabu,
nama magaalaa tokko booji'ee fudhatu irra kan of qabu wayya.
- 33 Ixaan gudeeda irratti buufama;
murtoon isaa garuu guutumaan guutuutti WAAQAYYO biraa dhufa.

17

- 1 Mana nyaataa dhugaatiin guutame kan lola qabuu mannaa,
iddoo nagaan jirutti hurraa'aa buddeena goggogaa wayya.
- 2 Garbichi hubataan ilma salphaa bulcha;
obboloota gidduuttis dhaala qooddata.
- 3 Okkoteen waa itti baqsan meetiif, boolli ibiddaa immoo warqeef;
WAAQAYYO garuu garaa namaa qora.
- 4 Namni hamaan dubbii gowwoomsaa dhaggeeffata;
sobaanis arraba bala'amaadhaaf gurra kenna.
- 5 Namni hiyyeeyyiitti qoosu kan isaan Uume sana tuffata;
kan badiisa namaatti gammadu utuu hin adabamin hin hafu.

- 6 Nama jaare tokkoof ilmaan ilmaan isaa gonfoo dha;
haadhaa fi abbaanis ijoollee isaaniitiif ulfina.
- 7 Dubbiin ba'eessi nama gowwaatti hin tolu;
hidhiin sobu immoo hammam bulchaa tokkotti haa hammaatu ree!
- 8 Matta'aan namicha kennuuf mi'a falfalaa ti;
inni lafa dhaqu kamitti iyyuu ni milkaa'a.
- 9 Namni balleessaa namaaf dhiisu jaalala guddisa;
namni waan tokko irra deddeebi'u,
garuu michoota walitti dhi'aatan gargar baasa.
- 10 Hamma gowwaan yeroo dhibba garafamee itti dhaga'amu caalaa
ifannaan nama waa hubatutti dhaga'ama.
- 11 Namni hamaan fincila qofa barbaada;
ergamaan namaa hin naane isatti ni ergama.
- 12 Gowwaa gowwummaa isa keessa jiruun
walitti dhufuu mannaa amaaketa dhaltuu ilmaan ishee
jalaa fudhatamaniin walitti dhufuu wayya.
- 13 Nama qooda gaarii hamaa deebisu,
hamminni mana isaa keessaa hin ba'u.
- 14 Lola jalqabuun akkuma bishaan cabsanii yaasuu ti;
kanaafuu utuu lolli hin ho'in dubbii dhiisi.
- 15 WAAQAYYO waan kana lachuu ni balfa;
kunis nama yakka qabu qulqulluu gochuu fi
nama balleessaa hin qabnetti muruu dha.
- 16 Sababii inni ogummaa argachuuf fedhii hin qabneef,
maallaqni harka gowwaa jiru faayidaa maalii qaba?
- 17 Michuun yeroo hunda nama jaallata;
obboleessi immoo guyyaa rakkootiif dhalata.
- 18 Namni qalbii hin qabne harka dha'ee waa namaaf kakata;
fuula ollaa ofii isaa durattis wabii ta'a.
- 19 Namni lola jaallatu cubbuu jaallata;
namni karra ol dheeraa ijaarus badiisa waama.
- 20 Namni yaada hamaa qabu hin milkaa'u;
kan arrabni isaa nama gowwoomsus rakkoo keessa seena.
- 21 Ilmi gowwaan abbaa isaatti gadda fida;
abbaan ilma gowwaas hin gammadu.
- 22 Garaan gammadu qoricha gaarii dha;
hafuurri cabe immoo lafee gogsa.
- 23 Namni hamaan karaa murtii qajeelaa jal'isuuf jedhee
dhoksaadhaan matta'aa fudhata.
- 24 Namni hubataan fuula isaa gara ogummaatti deebifata;
iji gowwaa garuu hamma handaara lafaatti jooraa.
- 25 Ilmi gowwaan abbaa isaatti gadda fida;
haadha isa deessettis jireenya hadheessa.

- 26 Nama balleessaa hin qabne tokko adabuun gaarii miti;
qondaaltota amanamoo rukutuunis sirrii miti.
- 27 Namni beekaan of qusachaa dubbata;
namni hubataanis hafuura qabanaa'aa qaba.
- 28 Gowwaan iyyuu yommuu cal'isu ogeessa fakkaata;
yommuu arraba isaa to'atus hubataa fakkaata.

18

- 1 Namni addaan of baasu ofittummaa duukaa bu'a;
murtii dhugaa hundaanis ni norma.
- 2 Namni gowwaan hubannaa argachuutti hin gammadu;
garuu yaaduma isaa ibsuutti gammada.
- 3 Yeroo hamminni dhufu tuffiin dhufa;
salphinnis qaanii wajjin dhufa.
- 4 Dubbiin afaan namaa bishaan gad fagoo dha;
burqaan ogummaa garuu bishaan yaa'uu dha.
- 5 Gara nama hamaa goruun
yookaan nama balleessaa hin qabne
murtii qajeelaa dhowwachuun gaarii miti.
- 6 Hidhiin gowwaa lola fida;
afaan isaas rukutamu itti waama.
- 7 Afaan gowwaa badiisa isaa ti;
hidhiin isaas kiyyoo lubbuu isaa ti.
- 8 Dubbiin hamattuu akkuma gurshaa mi'aawuu ti;
gara kutaa garaattis gad bu'a.
- 9 Namni hojii isaa irratti dhibaa'u,
obboleessa nama waa balleessuu ti.
- 10 Maqaan WAAQAYYOO gamoo jabaa dha;
namni qajeelaan itti baqatee badiisa oola.
- 11 Qabeenyi sooreyyii isaaniif magaalaa da'oo qabduu dha;
isaanis akka dallaa ol dheeraatti hedu.
- 12 Kufaatiidhaan dura garaan namaa of tuula;
gad of qabuun garuu ulfinaan dura dhufa.
- 13 Utuu hin dhaggeeffatin deebii kennuun,
gowwummaa fi qaanii dha.
- 14 Hafuurri namaa dhukkuba ni obsa;
hafuura cabe garuu eenyutu obsuu danda'a?
- 15 Garaan nama hubataa beekumsa argata;
gurri ogeessaas waan kana barbaada.
- 16 Kennaan abbicha kennuuf karaa bana;
fuula namoota gurguddaa durattis isa dhi'eessa.
- 17 Hamma namni biraa dhufee isaan mormutti,
namni jalqabatti himata isaa dhi'eeffatu tokko
dhugaa qabeessa fakkaata.

- 18 Ixaa buusuun wal falmii qabbaneessa;
namoota wal lolan jajjaboos addaan galcha.
- 19 Obboleessa yakkame tokko deebisuun
magaalaa da'oo qabdu irra ulfaata;
wal falmiin akkuma danqaraa karra dallaa dhagaa ti.
- 20 Ija afaan isaatiin garaan namaa quufa;
dubbii arraba isaatiinis ni guuta.
- 21 Arrabni humna jireenyaatii fi du'aa qaba;
warri isa jaallatanis ija isaa nyaatu.
- 22 Namni niitii argatu waan gaarii argata;
fuula WAAQAYYOO durattis surraa argata.
- 23 Hiyyeessi arraba laafaadhaan dubbata;
sooressi garuu sagalee jabaadhaan deebii kenna.
- 24 Namni michoota baay'isu ni bada;
garuu michuun obboleessa caalaa namatti aanu ni jira.

19

- 1 Gowwaa daba dubbatuu mannaa
hiyyeessa amanamummaadhaan jiraatu wayya.
- 2 Namni beekumsa hin qabne gaarii miti;
miilli jarjarus karaa irraa jal'ata.
- 3 Gowwummaan namaa karaa isaa jal'isa;
garaan isaa immoo WAAQAYYOTTI aara.
- 4 Badhaadhummaan michoota hedduu nama argachiisa;
hiyyeessi garuu michoota isaa irraa gargar ba'a.
- 5 Namni sobaan dhugaa ba'u utuu hin adabamin hin hafu;
namni soba odeessuus jalaa hin ba'u.
- 6 Namni hedduun bulchaa biratti surraa argachuu barbaada;
namni hundis michuu nama waa namaa kennuu ti.
- 7 Obbolloonni hiyyeessaa hundinuu isa jibbu;
yoos michoonni isaa hammam caalaa isa irraa haa fagaatan ree!
Inni kadhachaa isaan duukaa bu'u iyyuu
isaan eessattuu hin argaman.
- 8 Namni qalbii qabu ofii isaa jaallata;
namni hubannaa jaallatu ni milkaa'a.
- 9 Namni sobaan dhugaa ba'u utuu hin adabamin hin hafu;
namni soba odeessus ni bada.
- 10 Jireenya qananii jiraachuun gowwaaf hin malu;
yoos ilmaan mootii bulchuun garbichaaf
hammam caalaa haa hammaatu ree?
- 11 Ogummaan nama tokkoo obsa kennaaf;
balleessaa namaa irra darbuunis isaaf ulfina.
- 12 Dheekkamsi mootii akkuma aaduu leencaa ti,
surraan isaa immoo akkuma fixeensa marga irratti.
- 13 Ilmi gowwaan abbaa isaatiif badiisa;

niitiin nyakkiftunis
akka mana yeroo hundumaa dhimmisuu ti.

- 14 Manaa fi qabeenyi warra ofii irraa dhaalamu;
niitii qalbii qabdu garuu WAAQAYYOTU namaaf kenna.
- 15 Dhibaa'ummaan hirriba guddaa namatti buusa;
namni hojii malee taa'us ni beela'a.
- 16 Namni ajaja eegu lubbuu isaa eeggata;
kan karaa isaa tuffatu immoo ni du'a.
- 17 Namni hiyyeessaaf garaa laafu WAAQAYYOOF liqeessa;
Waaqnis waan inni hojjete sanaaf isa badhaasa.
- 18 Yeroo abdiin jirutti ilma kee adabadhu;
akka inni du'uufis cal'istee hin ilaalin.
- 19 Namni dafee aaru adabamuu qaba;
ati yoo isa oolchite, amma illee akkasuma gochuu qabda.
- 20 Gorsa namaa dhaggeeffadhu; sirreeffamas fudhadhu;
dhuma irratti ati nama ogeessa taata.
- 21 Garaa namaa keessa karoora baay'eeu jira;
garuu wanni fiixaan ba'u kaayyoo WAAQAYYOO ti.
- 22 Wannii namni hawwu jaalala dhuma hin qabnee dha;
sobduu ta'uu mannaa hiyyeessa ta'uu wayya.
- 23 WAAQAYYOON sodaachuun jireenyatti nama geessa;
yoos namni boqonnaadhaan jiraata;
rakkinnis isa hin argatu.
- 24 Dhibaa'aan harka isaa waciitii keessa kaa'a;
gara afaan isaattis hin deebifatu!
- 25 Qoostuu garafi; wallaalaan hubannaa argataa;
nama qalbii qabu ifadhu; inni beekumsa argataatii.
- 26 Namni abbaa isaa saamu, haadha isaas kan manaa ari'u,
ilma qaani fi salphina fiduu dha.
- 27 Yaa ilma ko, mee qajeelfama dhaggeeffachuu dhiisi;
ati dubbii beekumsaa irraa ni baddaa.
- 28 Dhuga ba'aan faayidaa hin qabne murtii qajeelaa tuffata;
afaan hamootaa immoo hammina liqimsa.
- 29 Qoostotaaf adabbii,
dugda gowwootaatiif immoo rukuttaatu qopheeffama.

20

- 1 Daadhiin wayinii nama qoostuu,
dhugaatiin cimaan immoo waccuu nama godha;
namni isaaniin fudhatamus ogeessa miti.
- 2 Dheekkamsi mootii akkuma aaduu leencaa ti;
namni isa aarsus lubbuu ofii isaa dhaba.
- 3 Lola irraa fagaachuun ulfina;
gowwaan hundi garuu lolatti ariifata.

- ⁴ Dhibaa'aan yeroodhaan hin qotatu;
kanaafuu inni yeroo haamaatti ni ilaala malee
homaa hin argatu.
- ⁵ Yaadni qalbii namaa akkuma bishaan gad fagoo ti;
hubataan namaa garuu ni waraabbata.
- ⁶ Namni hedduun akka jaalala hin dhumne qabu dubbata;
nama amanamaa garuu eenyutu argachuu danda'a?
- ⁷ Namni qajeelaan amanamummaadhaan jiraata;
ijoolleen isaa warri booddee dhalatanis ni eebbifamu.
- ⁸ Mootiin tokko yeroo murtii kennuuf teessoo isaa irra taa'utti,
waan hamaa hunda ijuma isaatiin gingilchee addaan baasa.
- ⁹ Eenyutu, "Ani garaa koo qulqulleeffadheera;
ani qulqulluu dha; cubbuus hin qabu" jechuu danda'a?
- ¹⁰ Madaalii jal'aa fi safartuu jal'aa
lamaanuu WAAQAYYO ni balfa.
- ¹¹ Mucaan xinnaan iyyuu amalli isaa qulqulluu fi
qajeelaa ta'uun isaa hojii isaatiin beekama.
- ¹² Gurra dhaga'uu fi ija argu,
lachaanuu WAAQAYYOTU uume.
- ¹³ Akka hin hiyyoomneef, hirriba hin jaallatin;
midhaan akka quufuu, dammaqii jiraadhu.
- ¹⁴ Namni waa bitatu, "Wanni kun gaarii miti;
wanni kun gaarii miti!" jedha;
ergasii immoo dhaqee waa'ee waan bitate sanaa boona.
- ¹⁵ Warqeen ni jira; lulli diimaanis baay'inaan jira;
arrabni beekumsa dubbatu garuu faaya gatii guddaa ti.
- ¹⁶ Nama nama ormaatiif wabii ta'e irraa uffata isaa fudhadhu;
yoo inni dubartii ormaatiif wabii ta'es uffata sana qabdi qabadhu.
- ¹⁷ Nyaanni gowwoomsaadhaan argame namatti mi'aawa;
dhuma irratti garuu afaan nama sanaa cirrachatu guuta.
- ¹⁸ Gorsaan karoora baafadhu;
qajeelfama ogummaatiin waraana bani.
- ¹⁹ Hamattuun icciitii baafiti;
kanaafuu odeessituu wajjin tokkummaa hin qabaatin.
- ²⁰ Namni tokko yoo abbaa isaa yookaan haadha isaa abaare,
ibsaan isaa dukkana hamaa keessatti dhaama.
- ²¹ Dhaalli jalqabumatti dafee argame
dhumni isaa eebba hin qabaatu.
- ²² Ati, "Yakka ati hojjetta kanaaf
ani gatii kee siifin kennal!" hin jedhin;
WAAQAYYON eeggadhu; inni si baasa.
- ²³ WAAQAYYO madaalii jal'aa ni balfa;
safartuu sobaattis hin gammadu.

- 24 Adeemsi namaa WAAQAYYON qajeelfama.
Yoos namni kam iyyuu akkamiin karaa ofii isaa hubachuu danda'a ree?
- 25 Namni utuu itti hin yaadin,
"Wanni kun Waaqaaf qulqulleeffameera" jedhee
ergasii immoo waan wareege sana gaabbe kiyyoo isatti ta'a.
- 26 Mootiin ogeessi hamoota gingilchee addaan baasa;
geengoo ittiin midhaan dha'an illee isaan irra oofa.
- 27 Ibsaan WAAQAYYOO hafuura namaa sakatta'a;
inni keessa namaa illee isumaan qora.
- 28 Jaalallii fi amanamummaan mootii tokko nagaan jiraachisu;
teessoon mootummaa isaas jaalalaan eegama.
- 29 Ulfinni dargaggootaa jabina isaanii ti;
arriin mataa kabaja nama umuriin dheeratee ti.
- 30 Abootteen nama madeessu hammina nama irraa qulqulleessa;
garaffiin immoo keessa namaa geeddara.

21

- 1 Yaadni mootii akkuma yaa'aa bishaanii harka WAAQAYYOO keessa jira;
innis garuma fedhetti qajeelcha.
- 2 Karaan namaa hundinuu ija ofii isaa duratti qajeelaa itti fakkaata;
WAAQAYYOO garuu yaada namaa madaala.
- 3 Fuula WAAQAYYOO duratti aarsaa caalaa,
waan qajeelaa fi sirrii ta'e hojjechuutu fudhatama qaba.
- 4 Iji of jajuu fi garaan of tuuluu maasii hamootaa
kan hin qotaminii dha;
innis cubbuu dhala.
- 5 Karoorri nama tattaaffatuu bu'aa argamsiisa;
namni ariifatu garuu ni hiyyooma.
- 6 Qabeenyi arraba sobuun argamu,
urrii bittinnaa'ee baduu fi kiyyoo du'aa ti.
- 7 Sababii isaan waan qajeelaa hojjechuu didaniif,
fincilli hamootaa isaanuma balleessa.
- 8 Karaan nama balleessaa qabuu jal'aa dha;
amalli nama qulqulluu garuu qajeelaa dha.
- 9 Niitii nyakkiftuu wajjin mana tokko keessa jiraachuu mannaa,
golee bantii manaa irra jiraachuu wayya.
- 10 Namni hamaan jal'ina dharra'a;
ollaan isaa gara laafina tokko iyyuu isa irraa hin argatu.
- 11 Yeroo namni goosu tokko adabamutti,
wallaalaan ogummaa argata;
namni ogeessi yeroo gorfamutti beekumsa argata.
- 12 Namni qajeelaan mana hamootaa qalbeeffatee ilaala;
hamootas ni balleessa.
- 13 Namni tokko yoo iyya hiyyeessaatiif gurra kennuu dide,
innis ni iyya; deebiis hin argatu.

- 14 Wannii dhoksaadhaan namaaf kennan aarii qabbaneessa;
matta'aan harka bobaa jalaatiin kennanis
dheekkamsa guddaa gab godha.
- 15 Murtii qajeelaa kennuun qajeeltotaaf gammachuu kenna;
hamootatti immoo raafama fida.
- 16 Namni karaa hubannaa irraa badu kam iyyuu
waldaa warra du'aniitti dabalama.
- 17 Namni qananii jaallatu ni deega;
kan daadhii wayiniitii fi zayitii jaallatu immoo hin sooromu.
- 18 Namni hamaan nama qajeelaadhaaf,
kan hin amanamne immoo nama tolaadhaaf furii ta'a.
- 19 Niitii nyakkiftuu fi kan daftee aartu wajjin jiraachuu mannaa,
gammoojjii keessa jiraachuu wayya.
- 20 Mana nama ogeessaa keessa qabeenya gatii guddaatii fi zayitiitu jira;
gowwaan garuu waan qabu hunda nyaatee fixa.
- 21 Namni qajeelummaa fi jaalala duukaa bu'u,
jireenya, badhaadhummaa fi ulfina argata.
- 22 Namni ogeessi magaalaa nama jabaatti ba'ee
da'oo jabaa inni amanatu jalaa diiga.
- 23 Namni afaan isaatii fi arraba isaa eeggatu,
balaa irraa of eega.
- 24 Nama of jajuu fi of tuulu maqaan isaa, "Qoostuu dha;"
inni akka malee koorra.
- 25 Sababii harki isaa hojii hojjechuu hin jaallanneef,
hawwiin nama dhibaa'aa du'a isatti fida.
- 26 Inni guyyaa guutuu kajeela;
namni qajeelaan garuu utuu hin qusatin kenna.
- 27 Aarsaan nama hamaa balfamaa dha;
yoos yoo inni yaada hamaadhaan dhi'eesse
hammam sana caalaa haa balfamu ree!
- 28 Dhuga baatuun sobaa ni bada;
namni isa dhaga'u kam iyyuus bara baraan bada.
- 29 Namni hamaan ija jabaata;
namni tolaan garuu karaa isaa qajeelfata.
- 30 Ogummaan, hubannaanii fi karoorri
WAAQAYYON mormee milkaa'uu hin jiru.
- 31 Fardi guyyaa waraanaatiif qopheeffama;
mo'ichi garuu kan WAAQAYYOO ti.

22

- 1 Maqaan gaariin badhaadhummaa guddaa caalaa filatamaa dha;
kabajamuunis meetii fi warqee caala.
- 2 Wannii sooressaa fi hiyyeessa wal fakkeessu kanaa dha:
Umaan hunda isaanii WAAQAYYOO dha.

- ³ Namni hubataan balaa argee jalaa dhokata;
wallaalaan immoo ittuma deemee adabama.
- ⁴ Gad of qabiisnii fi WAAQAYYON sodaachuun,
qabeenya, ulfinaa fi jireenya namaa kennu.
- ⁵ Karaa hamootaa irra qoraattii fi kiyyootu jira;
namni lubbuu isaa eeggatu garuu
waan kana irraa fagaatee jiraata.
- ⁶ Daa'ima tokko karaa inni irra deemuu qabu barsiisi;
inni gaafa dulloome iyyuu karaa sana irraa hin jal'atu.
- ⁷ Sooressi hiyyeessa bulcha;
liqeffataan garbicha liqeessituu ti.
- ⁸ Namni hammina facaasu rakkina haammata;
uleen aarii isaas ni hurraa'aa.
- ⁹ Namni arjaan waan nyaata isaa hiyyeeyyiif qooduuf
ofii isaatii ni eebbifama.
- ¹⁰ Qoostuu of biraa ari'i; loli ni qabbanaa'aa;
wal diddaa fi arrabsoonis hin jiraatu.
- ¹¹ Nama qulqullina garaa jaallatuu fi
dubbiin isaa namatti tolu mootiin michuu isaaf ta'a.
- ¹² Iji WAAQAYYOO xiyyeeffatee beekumsa ilaala;
inni garuu dubbii nama hin amanamnee ni busheessa.
- ¹³ Dhibaa'aan, "Leenci ala jira!
Ani karaa gubbaatti nan ajjeefama!" jedha.
- ¹⁴ Afaan ejjituu boolla gad fagoo dha;
namni dheekkamsa WAAQAYYOO jala jiru achi keessa bu'a.
- ¹⁵ Gowwummaan yaada daa'imaa keessatti hidhameera;
uleen ittiin adaban garuu irraa fageessa.
- ¹⁶ Namni qabeenya isaa guddifachuuf jedhee
hiyyeessa hakuucuu fi kan sooreessaaf kenna kennu ni deega.

Jechoota Soddoman Nama Ogeessaa

Jecha tokkoffaa

- ¹⁷ Qalbeeffadhuutii waan namni ogeessi jedhu dhaggeeffadhu;
yaada kees gara waan ani barsiisuutti deebifadhu;
- ¹⁸ yoo ati qalbiitti qabattee
hunduma isaa hidhii kee irratti qopheeffatte
wanni kun nama gammachiisaatii.
- ¹⁹ Akka abdiin kee WAAQAYYOO ta'uuf
ani har'a suma mataa kee iyyuu nan barsiisa.
- ²⁰ Ani jecha soddoma, jecha gorsaatii fi
beekumsaa siif hin barreessinee?
- ²¹ Kanas ani akka ati warra si erganiif
deebii dhugaa kennituuf waan qajeelaa fi
dhugaa si argisiisuufin barreesse mitii?

Jecha lammaffaa

- ²² Ati sababii inni hiyyeessa ta'eef jettee hiyyeessa hin saamin;
rakkataas mana murtiitti hin cunqursin;
- ²³ WAAQAYYOO dubbii isaanii ni ilaalaaf;
jireenya warra isaan saamaniis ni saamaatii.

Jecha sadaffaa

- ²⁴ Nama dafee aaru michuu hin godhatin;
 nama akka salphaatti dheekkamu wajjinis
 tokkummaa hin qabaatin;
²⁵ yoo kana goote karaa isaa baratta;
 ofii kees kiyyootti galchita.

Jecha afraffaa

- ²⁶ Nama harka dha'ee waadaa galu
 yookaan nama liqii namaatiif wabii ta'u hin ta'in;
²⁷ yoo ati waan baafuu dhabde,
 sireen kee iyyuu si jalaa fudhatama.

Jecha shanaffaa

- ²⁸ Dhagaa daarii durii,
 kan abbootiin kee dhaaban hin dhiibin.

Jecha ja'affaa

- ²⁹ Nama hojii isaa keessatti ogummaa qabu argitee?
 Inni fuula moototaa dura dhaabata;
 fuula namoota kaanii dura garuu hin dhaabatu.

23*Jecha torbaffaa*

- ¹ Ati yeroo waa nyaachuuf bulchaa tokko wajjin teessutti,
 waan fuula kee dura jiru hubadhuu ilaali;
² ati yoo nyaataaf fedhii guddaa qabaatte,
 qoonqoo kee irra billaa kaa'i.
³ Waan nyaanni sun nama gowwoomsuuf,
 mi'aa isaatti hin gaggabin.

Jecha saddeettaffaa

- ⁴ Sooromuuf jettee of hin dadhabsiisin;
 of qabuufis ogummaa qabaadhu.
⁵ Sooromni yommuu ati ija irra buufattutti ni bada;
 inni dhugumaan Baallee baafatee
 akkuma risaa gara samiitti ol barrisaatii.

Jecha saglaffaa

- ⁶ Buddeena doqnaa hin nyaatin;
 cidha isaas hin kajeelin;
⁷ inni yeroo hunda waa'ee gatii yaadaatii.
 Inni, "Nyaadhuu dhugi" siin jedha;
 garaan isaa garuu si wajjin hin jiru.
⁸ Ati waanuma xinnoo nyaatte sana ni diddigda;
 dubbii kee gaarii sana illee ni dhabda.

Jecha kurnaffaa

- ⁹ Sababii inni ogummaa dubbii keetii tuffatuuf
 ati nama gowwaatti hin dubbatin.

Jecha kudha tokkoffaa

- ¹⁰ Dhagaa daangaa durii hin dhiibin
 yookaan lafa qotiisaa ijoollee abbaa hin qabneetti hin darbin.
¹¹ Furiin isaanii jabaadhaatii;
 inni gara isaanii goree sitti falma.

Jecha kudha lammaffaa

- ¹² Qalbii kee gara gorsaatti, gurra kee immoo
 gara dubbii beekumsaatti deebifadhu.

Jecha kudha sadaffaa

- ¹³ Ijoollee kee adabachuu hin dhiisin;
 yoo ati arcummeedhaan adabde isaan hin du'an.
¹⁴ Arcummeedhaan isaan adabiitii
 lubbuu isaanii du'a oolchi.

Jecha kudha afraffaa

- 15 Yaa ilma ko, yoo garaan kee ogeessa ta'e,
garaan koo ni gammada;
16 yoo arrabni kee waan qajeelaa dubbate,
keessi koo baay'ee gammada.

Jecha kudha shanaffaa

- 17 Garaan kee cubbamootatti hin hinaafin;
garuu yeroo hunda WAAQAYYOON sodaadhu.
18 Ati dhugumaan gara fuulduraatti abdii qabda;
abdiin kees hin citu.

Jecha kudha ja'affaa

- 19 Yaa ilma ko, dhaggeeffadhu; ogeessa ta'i;
qalbii kee daandii qajeelaa irra buufadhu.
20 Warra daadhii wayinii baay'ee dhuganitti
yookaan warra foonitti gaggabanitti hin makamin;
21 machooftuu fi albaadheyyiin ni hiyyoomu;
hirriba baay'isuunis moofaa nama uffachiisa.

Jecha kudha torbaffaa

- 22 Abbaa kee kan si dhalche dhaga'i;
haadha kees yeroo isheen jaartu hin tuffatin.
23 Dhugaa bitadhu malee hin gurgurin;
ogummaa, qajeelfamaa fi hubannaas bitadhu.
24 Abbaan nama qajeelaa gammachuu guddaa qaba;
namni ilma ogeessa qabu isatti gammada.
25 Abbaan keetii fi haati kee haa gammadan;
isheen si deesse sun haa ililchitu!

Jecha kudha saddeettaffaa

- 26 Yaa ilma ko, garaa kee naa kenni;
iji kees karaa koo haa ilaalu;
27 sagaagaltuun boolla gad fagoodhaatii,
niitiin ganda labeenis boolla bishaanii dhiphaa dha.
28 Isheen akkuma saamtuutti riphxee nama eeggatti;
namoota gidduuttis warra hin amanamne baay'ifti.

Jecha kudha saglaffaa

- 29 Eenyutu, "Anaaf wayyoo!" jedha? Eenyutu gadda qaba?
Eenyutu lola qaba? Eenyutu komii qaba?
Eenyutu sababii malee madaa'a? Kan iji isaa diimatu eenyu?
30 Warra daadhii wayinii dhuguu irra akka malee turan,
warra daadhii wayinii walmakaa afaaniin qabuu dhaqanii dha.
31 Yeroo inni diimatutti, yeroo inni billillee keessa ol xixinni qutti,
yeroo inni suuta jedhee gad bu'utti
daadhii wayinii ija itti qabdee hin ilaalin.
32 Dhuma irratti akkuma bofaa nama idda;
akkuma buutiis nama ciniina.
33 Iji kee waan haaraa arga;
qalbiin kees jal'ina yaada.
34 Ati akkuma nama walakkaa galaana guddaa ciisuu ti;
akkuma nama fiixee utubaa doonii irra ciisuu taata.
35 Ati akkana jetta; "Isaan na dha'an;
ani garuu hin miidhamne!
Isaan na tuman; garuu natti hin dhaga'amne!
Ani dhugaatii biraa barbaaddachuuf yooman dammaqa?"

24*Jecha digdammaffaa*

- 1 Hamootatti hin hinaafin;
garee isaanii ta'uus hin hawwin;
2 garaan isaanii hammina malataatii;
hidhiin isaaniis rakkina odeessa.

Jecha digdamii tokkoffaa

- ³ Manni ogummaadhaan ijaarama;
hubannaadhaanis jabeeffamee dhaabama;
⁴ kutaawwan isaas, beekumsaan, qabeenya gatii guddaatii fi
miidhagaadhaan guutamuu.

Jecha digdamii lammaffaa

- ⁵ Ogeessi humna guddaa qaba;
beekaan namaa immoo jabina itti dabalata;
⁶ waraana banuuf qajeelfama,
mo'annaa argachuudhaaf immoo gorsitoota hedduu si barbaachisa.

Jecha digdamii sadaffaa

- ⁷ Gowwaa irraa ogummaan akka malee ol fagoo dha;
inni karra duratti afaan isaa hin saqqatu.

Jecha digdamii afraffaa

- ⁸ Namni hammina malu,
"Maltee" jedhama.
⁹ Malli gowwummaa cubbuu dha;
namoonnis qoostuu ni balfu.

Jecha digdamii shanaffaa

- ¹⁰ Ati yoo gaafa rakkinnaa laafte,
jabinni kee dhugumaanuu xinnaa dha!
¹¹ Warra gara du'aatti geeffamaa jiran du'a jalaa baasi;
warra ajjeefamuuf qopheeffamanis oolchi.
¹² Yoo ati, "Nu waan kana homaa hin beekne" jette,
inni yaada namaa madaalu sun hin hubatuu?
Kan lubbuu kee eegu sun waan kana hin beekuu?
Inni nama hundaaf akkuma hojii isaatti gatii hin kennuu?

Jecha digdamii ja'afaa

- ¹³ Yaa ilma ko, dammi waan gaarii ta'eef nyaadhu;
nadhiin dammaa sitti ni mi'aawa.
¹⁴ Akka ogummaan lubbuu keetti mi'aawu illee beeki;
ati yoo isa argatte fuul duratti abdi qabda;
abdiin kees hin citu.

Jecha digdamii torbaffaa

- ¹⁵ Akka nama seeraan hin bulleetti mana nama qajeelaa
riphxee hin eeggatin;
mana jireenya isaas hin saamin.
¹⁶ Namni qajeelaan yeroo torba kufu iyyuu, deebi'ee ni ka'aatii;
namni hamaan garuu yeroo balaan itti dhufutti ni gufata.

Jecha digdamii saddeettaffaa

- ¹⁷ Yeroo diinni kee kufutti hin lilchin;
yeroo inni gufatuttis garaan kee hin gammadin;
¹⁸ yoo kanaa achii WAAQAYYO waan kanatti ni gaddaatii;
dheekkamsa isaas isa irraa deebisa.

Jecha digdamii saglaaffaa

- ¹⁹ Ati sababii jal'ootaatiif aariidhaan hin gubatin;
hamootattis hin hinaafin.
²⁰ Namni jal'aan fuul duratti abdi hin qabuutii;
ibsaan hamootaas ni dhaama.

Jecha soddommaffaa

- ²¹ Yaa ilma ko, WAAQAYYOO fi mootii sodaadhu;
finciltootattis hin makamin;
²² badiisni akkuma tasaa isaanitti dhufaatii;
balaan isaan lachuu fidan eenyutu beeka?

Jecha Ogeessaa Kan Itti Fufe

- ²³ Kunneenis jechoota ogeessaa ti:
Murtii kennuu irratti nama wal caalchisuun gaarii miti:

- 24 Kan nama yakka qabuun, “Ati balleessaa hin qabdu”
jedhu kam iyyuu namni isa abaara; sabnis isa balaaleffata.
- 25 Warri nama yakka hojjetu ifatan garuu ni gammadu;
eebbi guddaanis ni dhufaaf.
- 26 Deebiin qajeelaan,
akkuma hidhii dhungachuu ti.
- 27 Hojii kee kan diidaa raawwadhuutii
lafa qotiisaa kees qopheeffadhu;
ergasii mana kee ijaarradhu.
- 28 Sababii tokko malee ollaa keetti dhugaa hin ba’in
yookaan hidhii keetiin hin gowwoomsin.
- 29 Ati, “Waanuma inni na godhe anis isa nan godha;
waan inni hojjeteeffis gatii isaa nan deebisa” hin jedhin.
- 30 Ani lafa qotiisaa nama dhibaa’aa keessa ba’ee,
iddoo dhaabaa wayinii nama qalbii hin qabnee keessas darbe;
- 31 qoraattiin lafa hunda guuteera;
laftis aramaadhaan fudhatameera;
dallaan dhagaas diigameera.
- 32 Ani argeen waan sana qalbeeffadhe;
waan arge sana irraas barumsa nan argadhe:
- 33 hirriba xinnaa; mugaatii xinnaa;
xinnoo harka walitti marachuu;
- 34 hiyyummaan is akkuma hattuu,ti,
deegummaan is akkuma loltuu hidhateetti sitti dhufa.

Fakkeenya Solomoon Dabalataa

25

- 1 Fakkeenyawwan kunneen fakkeenyawwan Solomoon kanneen namoonni Hisqiyaa,
mooticha Yihuudaa garagalchani dha;
- 2 Waa dhoksuun Waaqaaf ulfina isaa ti;
waa sakatta’anii bira ga’uun immoo ulfina moototaa ti.
- 3 Akkuma samiiwwan ol dheeratanii
laftis gad fagaatu sana, yaadni moototaa qoratamee bira hin ga’amu.
- 4 Meetii irraa xurii baasi;
ergasii tumtuun qooda tolchuu danda’a.
- 5 Nama hamaa fuula mootii duraa balleessi;
ergasii teessoon isaa qajeelummaadhaan ni jabaata.
- 6 Fuula mootii duratti ol of hin qabin;
iddoo namoota gurguddaas hin dhaabatan;
- 7 inni fuula namoota bebeekamoo duratti si salphisuu irra,
yoo inni, “As ol kottu” siin jedhe wayyaa.
- Ati waan ija keetiin argite,
8 dafttee mana murtiitti hin fidin;
yoo ollaan kee si qaanesse,
dhuma irratti ati maal gochuu dandeessa?
- 9 Dhimma kee ollaa kee wajjin falmadhu;
iccitii nama kaanii immoo hin baasin;
- 10 yoo kanaa achii namni waan sana dhaga’ee si qaanessa;
maqaan hamaan siif kenname sunis sirraa hin ba’u.
- 11 Dubbiin yeroo isaatti dubbatame,
akkuma hudhaa warqee kan meetii irratti hojjetamee ti.
- 12 Ifanni nama ogeessaa gurra dhaggeeffatuuf,
lootii warqee yookaan faaya warqee qulqulluu ti.

- 13 Ergamaan amanamaan tokko warra isa ergataniif
akkuma qabbana cabbii kan yeroo midhaan haamanii ti;
inni hafuura gooftota isaa haaromsaatii.
- 14 Namni kennaa namaaf hin kennineen boonu tokko
akkuma duumessaa fi bubbee bokkaa hin qabnee ti.
- 15 Obsaan bulchaa tokko garaa laafifachuun ni danda'ama;
dubbiin malaan dubbatame lafee ni cabsa.
- 16 Damma yoo argatte hamma si ga'u nyaadhu;
yoo baay'iftee nyaatte ni diddigda.
- 17 Mana ollaa keetii dhaquu hin baay'isin;
yoo ati miilla itti baay'ifte inni si jibba.
- 18 Namni sobaan ollaa isaatti dhugaa ba'u, akkuma bokkuu yookaan
goraadee yookaan xiyya gara qabuu ti.
- 19 Nama hin amanamne tokko yeroo rakkootti abdachuun
akkuma ilkaan cabee yookaan miilla okkoluu ti.
- 20 Nama garaan isaa gaddeef sirba sirbuun
akkuma nama guyyaa dhaamochaa wayyaa of irraa baasuu,
yookaan madaa irratti dhangaggaa'aa dhangalaasuu ti.
- 21 Yoo diinni kee beela'e waan inni nyaatu kenniif;
yoo inni dheebotes bishaan inni dhugu kenniif.
- 22 Kana gochuu keetiin barbadaa ibiddaa mataa isaa irra tuulta;
WAAQAYYOS si badhaasa.
- 23 Akkuma bubbleen kaabaa bokkaa fidu,
arrabni hamatus fuula dheekkamu fida.
- 24 Niitii nyakkiftuu wajjin mana tokko keessa jiraachuu mannaa,
golee bantii manaa irra jiraachuu wayya.
- 25 Oduun gaariin biyya fagootii dhufu,
akkuma bishaan qabbanaa'aa lubbuu dheebotteef ta'uu ti.
- 26 Namni qajeelaan fuula hamootaa duratti kufu,
akkuma burqaa dhoqqaa'ee yookaan boolla bishaanii faalame tokkoo ti.
- 27 Damma baay'ee nyaachuun gaarii miti;
ulfina mataa ofii barbaaduunis ulfina miti.
- 28 Namni of hin qabne,
akkuma magaalaa dallaan isaa diigamee ti.

26

- 1 Akkuma cabbii yeroo bonaa yookaan bokkaa yeroo haamaa,
nama gowwaaf ulfinni hin malu.
- 2 Akkuma simbirri barriftu yookaan daaloteen barriftu
abaarsi sababii malee dhufu nama irra hin bu'u.
- 3 Alangaan fardaaf, luugamni harreef,
uleen immoo dugda gowwaatiif mala!
- 4 Gowwaadhaaf akka gowwummaa isaatti hin deebisin;
yoo akkas goote ati mataan kee iyyuu akkuma isaa taata.
- 5 Gowwaadhaaf deebii gowwummaa isaatiif malu kenni;
yoo kanaa achii inni ogeessa of se'aa.
- 6 Harka nama gowwaatti ergaa ergachuun,
akkuma miilla ofii irraa muruu yookaan summii dhuguu ti.
- 7 Afaan nama gowwaa keessatti,
fakkeenyi akkuma miilla naafaa ti.
- 8 Namni gowwaadhaaf ulfina kennu,
akkuma nama furrisaatti dhagaa guduunfuu ti.
- 9 Fakkeenyi afaan gowwaa keessatti

- akkuma qoraattii harka nama machaa'ee keessaa ti.
¹⁰ Namni gowwaa yookaan kara deemaa qaxaratu
 akkuma adamsaa nama hunda xiyyaan madeessuu ti.
¹¹ Akkuma sareen diddiga isheetti deebitu sana,
 gowwaan gowwummaa isaa irra deddeebi'a.
¹² Ati nama akka ilaalcha ofii isaatti ogeessa ta'e argitaa?
 Isa irra gowwaatu abdii caalu qaba.
¹³ Dhibaa'aan, "Leenci karaa irra jira;
 leenci sodaachisaan daandii irra jira!" jedha.
¹⁴ Akkuma saanqaan muchoo isaa irra naanna'u,
 dhibaa'aan siree ofii irra gaggaragala
¹⁵ Dhibaa'aan harka isaa wacitii keessa kaa'a;
 gara afaan isaatti deebifachuuf ni dhibaa'a.
¹⁶ Dhibaa'aan namoota hubannaadhaan
 deebii kennan torba caalaa ogeessa of se'a.
¹⁷ Namni lola nama biraa keessa seenu,
 akkuma nama harkaan gurra saree qabuu ti.
¹⁸ Akkuma maraatu ibidda yookaan xiyya
 namatti gad dhiisu tokkoo
¹⁹ namni, "Ani nan qoose!" jedhee
 ollaa isaa gowwoomsus akkasuma.
²⁰ Ibiddi yoo qoraan dhabe ni dhaama;
 hamiin yoo hin jiraanne, lolli ni qabbanaa'a.
²¹ Akkuma cileen barbadaa ibiddaa bobeessee
 qoraan ibidda qabsiisu sana
 namni lola jaallatu lola kakaasa.
²² Dubbiin hamattuu akkuma gurshaa mi'aawuu ti;
 gara kutaa garaattis gad bu'a.
²³ Dubbiin gaariin garaa hamaa keessaa ba'u
 akkuma okkotee meetiin irra dibamee ti.
²⁴ Namni maqaa namaa balleessu tokko
 arrabuma ofiitiin nama tolaa of fakkeessa;
 garaa isaa keessatti immoo gowwoomsaa guduunfata.
²⁵ Yoo dubbiin isaa sitti mi'aawe iyyuu isa hin amanin;
 wannu jibbisiisaan torba garaa isaa guuteeraatii.
²⁶ Jal'inni isaa sobaan haguugamee dhokfamuu danda'a;
 hamminni isaa garuu fuula waldaa duratti ifatti ba'a.
²⁷ Namni boolla qotu boolla keessa bu'a;
 nama dhagaa gangalchus,
 dhagaan sun isumatti deebi'a.
²⁸ Arrabni sobu tokko warruma miidhu sana jibba;
 afaan saadu tokkos badiisa fida.

27

- ¹ Ati waa'ee boriitiin hin boonin;
 waan guyyaan fidu hin beektuutii.
² Namni biraa si haa jaju malee ati afaan keetiin of hin jajin;
 namni kaan si haa jajuu malee hidhiin kee si hin jajin.
³ Dhagaan ni ulfaata; cirrachis ba'aa dha;
 tuttuqaan gowwaa garuu lachuu caalaa ulfaata.
⁴ Dheekkamsi gara jabeessa; aariinis guutee dhangala'a;
 hinaaffaa dura garuu eenyutu dhaabachuu danda'a?
⁵ Jaalala dhokfamee mannaa

ifannaa ifatti ba'e wayya.

- ⁶ Madaan michuun nama madeessu amanamaa dha;
dhungachuun diinaa garuu gowwoomsaa dha.
- ⁷ Namni quufe damma illee ni balfa;
kan beela'e garuu wanni hadhaa'u iyyuu itti mi'aawa.
- ⁸ Namni mana isaatii badu tokko,
akkuma simbirroo man'ee isheetii badduu ti.
- ⁹ Shittoo fi ixaanni garaa nama gammachiisu;
gorsi michuus garaa nama ciibsa.
- ¹⁰ Michoota keetii fi michoota abbaa keetii hin gatin;
yoo balaan sitti dhufe mana obboleessa keetii hin dhaqin;
obboleessa fagoo jiru irra ollaa dhi'oo jiru wayya.
- ¹¹ Yaa ilma ko, ogeessa ta'itii garaa koo gammachiisi;
ergasii ani nama na tuffatu hundaaf
deebii kennuu nan danda'a.
- ¹² Namni hubataan balaa argee jalaa dhokata;
wallaalaan immoo ittuma deemee adabama.
- ¹³ Nama nama ormaatiif wabii ta'e irraa uffata isaa fudhadhu;
yoo inni dubartii ormaatiif wabii ta'es uffata sana qabdi qabadhu.
- ¹⁴ Namni tokko ganamaan sagalee ol fudhatee
ollaa isaa yoo eebbise
wannu akka abaarsaatti fudhatama.
- ¹⁵ Niitiin nyakkiftuun, akkuma bokkaa guyyaa roobaa
dhimmisaa ooluu ti;
- ¹⁶ ishee ittisuun akkuma bubbee ittisu ti
yookaan akkuma zayitii harkaan qabuu ti.
- ¹⁷ Akkuma sibiilli sibiila qaru,
namni tokko nama kaan qara.
- ¹⁸ Namni muka harbuu eeggatu tokko ija isaa nyaata;
namni gooftaa isaa eeggatus ulfina argata.
- ¹⁹ Akkuma bishaan fuula namaa argisiisu sana
garaan nama tokkoo eenyummaa namichaa argisiisa.
- ²⁰ Du'aa fi Badiisni gonkumaa hin quufan;
iji namaas akkasuma.
- ²¹ Okkoteen waa itti baqsan meetiif;
boolli ibiddaa immoo warqeeff;
namni immoo ulfina argatuun qorama.
- ²² Gowwaa mooyyee keessatti yoo tumte iyyuu,
akkuma midhaaniitti muka mooyyeetiin isa bulleessite iyyuu,
ati gowwummaa isa irraa hin balleessitu.
- ²³ Haala bushaayeen kee keessa jiran sirriitti beeki;
loon keetiifis xiyyeeffannaa kenni;
- ²⁴ soorumni bara baraan itti hin fufuutii;
gonfoonis dhaloota irraa dhalootatti hin darbu.
- ²⁵ Yeroo okaan haamamee biqilaa haaraan jalaan biqilee
margi tulluu irraa walitti qabamutti,

- 26 xobbaallaawwaniin daara baata;
re'oonni immoo gatii lafa qotiisaa siif ta'u.
- 27 Ati ofii keetii fi maatii kee,
xomboreewwan kees ittiin jiraachisuuf
aannan re'ootaa baay'ee ni qabaatta.

28

- 1 Namni hamaan utuu namni tokko iyyuu isa hin ari'in baqata;
qajeeltonni garuu akkuma leencaa ija jabaatu.
- 2 Biyya fincilu keessa bulchitoota hedduutu jira;
bulchaan hubataanii fi beekaan garuu seera eegsisa.
- 3 Bulchaan hiyyeessa hacuucu tokko
akkuma bokkaa jabaa midhaan lafa irraa balleessuu ti.
- 4 Warri seera didan hamoota jaju;
warri seera eegan garuu isaaniin mormu.
- 5 Jal'oonni murtii qajeelaa hin hubatan;
warri WAAQAYYON barbaadan immoo
guutumaan guutuutti hubatu.
- 6 Sooreessa karaan isaa jal'aa ta'e mannaa
hiyyeessa adeemsi isaa mudaa hin qabne wayya.
- 7 Namni seera eegu ilma ogeessa;
michuun albaadhessaa immoo abbaa isaa qaanessa.
- 8 Namni dhalaa fi hiiqqiidhaan qabeenya isaa guddifatu kam iyyuu,
nama hiyyeessaaf garaa laafuuf walitti qaba.
- 9 Nama seeraaf gurra kennuu didu kam iyyuu,
kadhannaan isaa balfamaa dha.
- 10 Namni nama tolaa karaa jal'aa irra adeemsisu kam iyyuu
kiyyoo ofii isaa keessa seena;
namni balleessaa hin qabne garuu dhaala gaarii argata.
- 11 Namni sooressi ogeessa of se'a;
hiyyeessi hubannaa qabu garuu isa qoree bira ga'a.
- 12 Yeroo namni qajeelaan mo'atutti gammachuu guddaatu ta'a;
yeroo namni hamaan aangoo qabatutti garuu
namoonni ni dhokatu.
- 13 Namni cubbuu ofii dhokfatu hin milkaa'u;
kan cubbuu isaa himatee irraa deebi'u garuu araara argata.
- 14 Namni yeroo hunda WAAQAYYON sodaatu eebbifamaa dha;
kan mataa jabaatu garuu rakkoo keessatti kufa.
- 15 Namni hamaan hiyyeeyyii bulchu,
akkuma leenca aaduu yookaan amaaketa wayitti ariifatuu ti.
- 16 Bulchaan akka malee nama cunqursu hubannaa hin qabu;
kan bu'aa karaa hin malleen argamu jibbu garuu bara dheeraa jiraata.
- 17 Namni yakki dhiiga namaa dhangalaasuu isa irra jiru,
boollatti baqata;
namni tokko iyyuu isa hin gargaarin.

- 18 Namni adeemsi isaa mudaa hin qabne nagumaan jiraata;
kan karaan isaa jal'aa ta'e garuu boollatti kufa.
- 19 Namni lafa isaa qotatu nyaata guddaa argata;
kan yaada faayidaa hin qabne duukaa bu'u garuu
hiyyumaan guutama.
- 20 Namni amanamaan eebba quufa;
kan sooromuutti gaggabu garuu adabbii jalaa hin ba'u.
- 21 Nama wal caalchisuun gaarii miti;
namni garuu muraa buddeena argachuuf jedhee yakka hojjeta.
- 22 Namni waa kajeelu sooromuuf jarjara;
inni akka hiyyummaan isa eeggatu hin beeku.
- 23 Namni nama ifatu dhuma irratti
nama arrabaan nama saadu caalaa surraa argata.
- 24 Namni abbaa yookaan haadha isaa saamee,
"Kun balleessaa miti" jedhu
garee nama waa balleessuu ti.
- 25 Namni wayitti gaggabu lola kakaasa;
kan WAAQAYYON amanatu garuu ni badhaadha.
- 26 Namni of amanatu gowwaa dha;
kan ogummaadhaan deemu immoo nagaadhaan jiraata.
- 27 Namni hiyyeessaaf kennu waan tokko illee hin dhabu;
kan ija dunuunfatu garuu abaarsa baay'ee argata.
- 28 Yeroo namni hamaan aangoo qabatutti
namoonni ni dhokatu;
yeroo namni hamaan badutti garuu qajeeltonni ni baay'atu.

29

- 1 Namni ifannaa baay'ee booddee
mataa jabaatu kam iyyuu akkuma tasaa caba; hin fayyus.
- 2 Yommuu namni qajeelaan aangoo qabatutti, sabni ni ililcha;
yommuu namni hamaan bulchu garuu sabni ni guunguma.
- 3 Namni ogummaa jaallatu abbaa isaa gammachiisa;
miiltoon sagaagaltuu garuu qabeenya isaa barbadeessa.
- 4 Mootiin murtii qajeelaadhaan biyyaaf nagaa buusa;
kan matta'aaf gaggabu immoo biyya gargar qoqqooda.
- 5 Namni ollaa isaa jaju,
miilluma isaatiif kiyyoo kaa'a.
- 6 Namni hamaan cubbuu ofii isaatiin qabama;
qajeelaan garuu ni faarfata; ni ililchas.
- 7 Namni qajeelaan mirga hiyyeessaatiif dhaabata;
namni hamaan garuu dhimma akkanaa hin qabu.
- 8 Qoostonni magaalaa jeequ;
ogeeyyiin garuu aarii qabbaneessu.
- 9 Yoo ogeessi gowwaa wajjin mana murtii dhaqe,

gowwaan sun ni aara yookaan ni kolfa; nagaanis hin jiraatu.

- 10 Namoonni dhiiga dheebotan, nama amanamaa jibbu;
nama tolaas ajjeesuu barbaadu.
- 11 Gowwaan guutumaan guutuutti aariitti of kenna;
ogeessi garuu of qaba.
- 12 Yoo bulchaan tokko soba dhaggeeffate,
qondaaltonni isaa hundi ni hammaatu.
- 13 Hiyyeesaa fi namni nama cunqursu waan kanaan wal fakkaatu:
WAAQAYYO ija lachan isaaniitiifuu agartuu kenna.
- 14 Yoo mootiin tokko wal qixxummaadhaan
hiyyeeyyiif murtii kenne,
teessoon isaa bara baraan jabaatee dhaabata.
- 15 Ulee fi ifannaan ogummaa kennu; daa'imni akkasumatti
gad dhiifame garuu haadha isaa salphisa.
- 16 Yommuu hamoonni aangoo qabatan, cubbuutu baay'ata;
qajeeltonni garuu kufaatii jaraa argu.
- 17 Ilma kee adabadhu, inni nagaa siif kenna;
lubbuu kees ni gammachiisa.
- 18 Iddoo mul'anni hin jirretti sabni gad dhiisii ta'a;
namni seera eegu garuu eebbifamaa dha.
- 19 Garbichi dubbii afaanii qofaan hin sirreeffamu;
inni yoo hubate illee deebii hin kennuutii.
- 20 Ati nama jarjarsuun dubbatu argitee?
Isa irra gowwaatu abdii caalu qaba.
- 21 Nama garbicha ofii isaa
ijoollummaa isaatii jalqabee qanansiisu,
galgalli isaa rakkina.
- 22 Namni aaru lola kakaasa;
kan dafee aarus cubbuu hedduu hojjeta.
- 23 Of tuulummaan namaa isuma gad deebisa;
namni hafuuraan gad of qabu garuu ulfina argata.
- 24 Namni hattuu wajjin qooddatu lubbuu ofii isaa jibba;
inni ni kakata; garuu waan tokko illee hin himu.
- 25 Nama sodaachuun kiyyoo namatti ta'a;
kan WAAQAYYON amanatu garuu nagaadhaan jiraata.
- 26 Namni hedduun bulchaa biratti surraa argachuu barbaada;
murtiin qajeelaan garuu WAAQAYYO biraa dhufa.
- 27 Qajeelaan sobduu xireeffata;
hamaan immoo nama tolaa jibba.

Jecha Aguur

30

¹ Jecha Aguur ilma Yaaqee.
Dubbiin nama kanaa akkana jedhee Iitii'eeliitti dubbatame:

- “Innis Iitii’eeliittii fi Ukaalitti dubbate:
² Ani dhugumaan doofaa nama hundaa gadii ti;
 ani hubannaa namni qabu hin qabu.
³ Ani ogummaa hin baranne yookaan beekumsa
 Isa Qulqulluu sanaa hin qabu.
⁴ Eenyutu samiitti ol ba’ee deebi’ee dhufe?
 Kan harki isaa bubbee walitti qabe eenyu?
 Namni bishaan uffataan mare eenyu?
 Kan daarii lafaa hunda jabeessee dhaabe eenyu?
 Maqaan isaatii fi maqaan ilma isaa eenyu?
 Mee yoo beekte natti himi!
- ⁵ “Dubbiin Waaqaa hundinuu hir’ina hin qabu;
 warra isatti kooluu galaniif, inni gaachana.
⁶ Dubbii isaatti homaa hin dabalini;
 yoo kanaa achii inni si ifata; atis sobduu taatee argamta.
- ⁷ “Yaa WAAQAYYO ani wantoota lama sin kadhadha;
 isaanis utuu hamman jirutti ana hin dhowwatin.
⁸ Gowwoomsaa fi soba narraa fageessi;
 hiyyummaa yookaan sooruma naaf hin kennin;
 garuu buddeena koo guyyaa guyyaan naaf kenni.
⁹ Yoo kanaa achii ani akka malee quufee si ganee
 ‘WAAQAYYO eenyuu dha?’ nan jedha;
 yookaan hiyyoomee hatee,
 akkasiin maqaa Waaqa koo nan salphisa.
- ¹⁰ “Garbicha tokko gooftaa isaa biratti hin hamatin,
 yoo kanaa achii inni si abaraa; atis waan kanatti ni gaafatamta.
- ¹¹ “Dhaloota abbaa isaa abaaruu
 kan haadha isaa illee hin eebbifnetu jira;
¹² dhaloota qulqulluu of se’u,
 kan xurii isaa irraa hin qulqulleeffamintu jiru;
¹³ dhaloota iji isaa akka malee of tuulu,
 kan baalleen ija isaas nama tuffatutu jira;
¹⁴ dhaloota hiyyeeyyii lafa irraa fixuuf
 rakkattoota illee gidduu namaatii balleessuuf
 ilkaan isaa goraadee,
 ha’oon isaa immoo billaa ta’e jira.
- ¹⁵ “Dhulaandhulli intallan,
 ‘Kenni! Kenni!’ jedhanii iyyan lama qabdi.
- “Wantoota gonkumaa hin quufne sadiitu jira;
 kanneen gonkumaa, ‘Nu ga’e!’ hin jenne immoo afurtu jira:
¹⁶ isaanis Sii’ool,
 gadameessa maseene,
 lafa gonkumaa bishaan hin quufnee fi
 ibidda gonkumaa, ‘Na ga’e!’ hin jennee dha.
- ¹⁷ “Ija abbaatti qoosu,
 kan ajaja haadhaa tuffatu
 arraagessa sululaatiin baafama;
 joobiraanis ni nyaatama.
- ¹⁸ “Wantoonni akka malee na dinqisiisan sadiitu jira;
 afur immoo ani hin hubadhu; kunis:
¹⁹ Karaan risaa samii irra,
 karaan bofaa kattaa irra,
 karaan doonii galaana guddaa irra,

karaan dhiiraa immoo dubartii wajjin ta'uu isaa ti.

²⁰ “Karaan ejjituu kana:

Isheen waa nyaattee afaan haqatti;
ergasii immoo, ‘Ani homaa hin balleessine’ jetti.

²¹ “Lafti waan sadii jalatti hollatti;

afur immoo baachuu hin dandeessu; kunis:

²² Garbicha mootii ta’u,

gowwaa nyaatee quufu,

²³ dubartiin jibbamte yeroo dhirsa argattu,
garbittii giiftii ishee dhaaltu.

²⁴ “Wantoonni xixinnoon afur lafa irra jiru;

ta’u illee isaan akka malee ogeeyyii dha; isaanis:

²⁵ Goondaawwan tuuta jabina hin qabnee dha;

ta’us isaan yeroo bonaa nyaata isaanii walitti qaban;

²⁶ osoleewwan uumamawwan humna hin qabnee dha;

garuu kattaa keessa jiraatu;

²⁷ hawwaannisni mootii hin qabu;

garuu tarree galee yaa’a;

²⁸ loccuun harkaan qabamuu dandeessi;

garuu masaraa mootii keessatti argamti.

²⁹ “Wantoota deemsa tolan sadiitu jira;

kanneen tarkaanfii bareedanis afurtu jira; isaanis:

³⁰ Leenca bineensa hunda keessaa jabaa, kan waan tokko illee sodaatee duubatti
hin deebine;

³¹ korma indaanqoo kan kooraa deemu,

korbeessa re’etii fi,

mootii loltoota isaa dura deemu.

³² “Ati yoo of jajuudhaan gowwoomte,

yookaan yoo hammina malatte,

harka kee afaan kee irra kaa’adhu!

³³ Akkuma aannan raasuun dhadhaa baasu,

funyaan micciiruunis dhiiga baasu sana,

aarii kakaasuun lola fida.”

Jecha Limuu’el Mootichaa

31

¹ Jecha Lemuu’eel mootichaa kan haati isaa isa barsiifte:

² “Maali yaa ilma ko, maali yaa ilma gadameessa ko,

maali yaa ilma wareega ko,

³ humna kee dubartoota irratti,

jabina kee warra mootota balleessan irratti hin fixin.

⁴ “Yaa Lemuu’eel, wanni kun moototaaf hin malu;

daadhii wayinii dhuguun moototaaf hin malu;

dhugaatii cimaatti gaggabuunis bulchitootaaf hin malu;

⁵ kunis akka isaan dhuganii waan seerri jedhu dagatanii

warra hacuucaman hunda mirga isaanii hin dhowwanneef.

⁶ Warra baduuf jiraniif dhugaatii cimaa,

warra jireenyi itti hadhaa’eef daadhii wayinii kenni;

⁷ isaan dhuganii hiyyummaa isaanii haa irraanfatan;

rakkina isaaniis deebi’anii hin yaadatin.

⁸ “Warra ofii isaaniitiif dubbachuu hin dandeenyeef,

mirga warra gatamaniitiifis falmi.

⁹ Afaan kee banadhu; murtii qajeelaas kenni;

mirga hiyyeeyyiitii fi rakkattootaatiif falmi.”

Xumura: Niitii Amala Gaarii Qabdu

- 10 Niitii amala gaarii qabdu eenyutu argachuu danda'a?
Isheen lula diimaa caalaa gati qabeettii dha.
- 11 Dhirsi ishee guddisee ishee amanata;
inni waan faayidaa qabu tokko illee hin dhabu.
- 12 Isheen bara jireenya ishee guutuu
waan gaarii isaaf fiddi malee isa hin miitu.
- 13 Isheen suufii fi quncee talbaa barbaaddee
harka ishee kan hojii jaallatuun footi.
- 14 Isheen akkuma doonii daldalaatti
lafa fagoodhaa nyaata ishee fidatti.
- 15 Isheen utuu lafti hin bari'in hirribaa kaatee
maatii isheetiif nyaata kenniti;
xomboreewwan isheefis hojii qooddi.
- 16 Isheen lafa qotiisaa hubatee ilaaltee bitti;
waan hojjettee argattu keessaa wayinii dhaabdi.
- 17 Isheen jabinaan mudhii ishee hidhattee
hojiidhaaf irree ishee jabeeffatti.
- 18 Isheen akka daldalli ishee bu'aa qabu hubatti;
ibsaan ishees halkaniin hin dhaamu.
- 19 Mukni itti jirbii maran harka ishee keessa jira;
quba isheetiin immoo calii qabatti.
- 20 Isheen hiyyeessaaf harka hiixatti;
dhabaadhaaf illee harka bal'ifti.
- 21 Yoo cabbiin bu'e illee isheen maatii isheetiif hin yaaddoftu;
isaan hundinuu uffata bildiimaa uffataniiruutti.
- 22 Isheen wayyaa siree dha'atti;
uffata dhiilgee quncee talbaa haphii irraa
hojjetames uffatti.
- 23 Dhirsi ishee yommuu karra magaalaa dura,
jaarsolii biyyaa gidduu taa'u ni kabajama.
- 24 Isheen wayyaa quncee talbaa dhooftuu gurgurti;
daldaltootaafis sabbata dhi'eessiti.
- 25 Isheen jabinaa fi ulfina uffatti;
bara dhufaa jiruttis kolfuu dandeessi.
- 26 Afaan ishee ogummaadhaan banatti;
gorsi gara laafinaas arraba ishee irra jira.
- 27 Isheen mana ishee to'atti;
isheen buddeena dhibaa'ummaas hin nyaattu.
- 28 Jjoolleen ishee ka'anii, eebbifamtuu jedhuun;
dhirsi ishees akkasuma jedhaan; akkana jedhees ishee jaja:
- 29 "Dubartoonni hedduun waan gaarii hojjetu;
ati garuu isaan hunda caalta."
- 30 Simboon nama gowwoomsa; miidhaginnis ni darba;
dubartiin WAAQAYYON sodaattu garuu galateeffamtuu dha.
- 31 Bu'aa harka ishee kennaafii;
hojiin ishee karra magaalaa duratti ishee haa jaju.

Kitaaba Lallabaa

Wanni Hundinuu Faayidaa Hin qabu

- ¹ Dubbii lallabaa ilma Daawit, isa Yersaaleem keessaatti mootii ta'e sanaa:
² Lallabichi, "Faayidaa hin qabu!
 Faayidaa hin qabu!
 Guutumaan guutuutti faayidaa hin qabu!
 Wanni hundinuu faayidaa hin qabu" jedha.
- ³ Namni hojii isaa kan aduudhaa gaditti
 itti dadhabu hunda keessaa, bu'aa maalii argata?
⁴ Dhaloonni ni dhufa; dhaloonni ni darba;
 lafti garuu bara baraan jiraatti.
⁵ Biiftuun ni baati; biiftuun ni lixxi;
 gara baate sanatti deebi'uufis ni ariifatti.
⁶ Bubbeen gara kibbaatti bubbisa;
 gara kaabaattis ni deebi'a;
 innis naanna'uma naanna'ee deema;
 karaa isaa irras deddeebi'a.
⁷ Lagni hundi galaanatti yaa'a;
 galaanni garuu hin guutu.
 Lageen garuma dhufanitti
 deebi'anii yaa'u.
⁸ Wanni hundinuu hamma namni tokko
 dubbachuu danda'u caalaa dadhabsiisaa dha.
 Iji argee hin quufu;
 yookaan gurri dhaga'ee hin guutu.
⁹ Wanni duraan ture ammas ni ta'a;
 wanni duraan hojjetame ammas ni hojjetama;
 aduudhaa gaditti wanni haaraan tokko iyyuu hin jiru.
¹⁰ Wanni namni tokko, "Ilaa! Wanni kun haaraa dha"
 jechuu danda'u kam iyyuu jiraa?
 Wanni kun duraanuu bara dheeraan dura as ture;
 bara keenyaan dura iyyuu asuma ture.
¹¹ Namoonni bara durii hin yaadataman;
 kanneen dhufuuf jiranis
 warra isaan duubaan dhufaniin hin yaadataman.

Ogummaan Faayidaa Hin qabu

- ¹² Ani Lallabaan, Yersaaleem keessatti mootii Israa'elin ture. ¹³ Ani waan samii
 gaditti hojjetame hunda ogummaadhaan qu'adhee qoradhee bira ga'uuf of kenneen
 ture. Waaqni ba'aa ulfaataa akkamii nama irra kaa'e! ¹⁴ Ani waan aduudhaa gaditti
 hojjetame hunda argeera; hundi isaanii iyyuu faayidaa hin qaban; kun akkuma nama
 bubbee ari'uu ti.
¹⁵ Wanni jal'ifame tokko deebi'ee hin qajeelfamu;
 wanni hin jirres lakkaa'amu hin danda'u.
¹⁶ Anis akkana jedheen yaade; "Kunoo, ani nama aanan dura Yersaaleemin bulchaa
 ture kam iyyuu caalaa guddadhee ogummaas dabaladheera; ani muuxannoo ogum-
 maatii fi beekumsaa guddaa argadheera." ¹⁷ Kanaafuu ani ogummaa, maraatummaa
 fi gowwummaa hubachuufin of kenne; garuu ani akka wanni kunis bubbee ari'uu ta'e
 nan baradhe.
¹⁸ Ogummaa guddaa keessa gadda baay'eetu jiraatii;
 akkuma beekumsi dabalamuun gaddis dabalama.

2

Gammachuun Faayidaa Hin Qabu

- ¹ Ani garaa koo keessatti, "Ani waan gaarii barbaaduudhaaf gammachuudhaan sin
 qoraatii mee kottu" jedheen yaade. Garuu wanni kunis waan faayidaa hin qabne

ta'uu isaa nan mirkaneeffadhe. ² Anis, "Kolfi gowwummaa dha; gammachuunis maal fayyada?" nan jedhe. ³ Anis utuma qalbiin koo ogummaadhaan na qajeelchaa jiruu gowwummaa qabadhee daadhii wayiniitiin of gammachiisu nan yaale. Waan namoonni bara jireenya isaanii muraasa keessatti samii gaditti hojjetan arguu nan fedhe.

⁴ Ani hojii guddaa nan hojjedhe; Manneen ijaarradhee wayiniis dhaabadhe. ⁵ Ani iddoo biqiltuutii fi iddoo bashannanaa qopheeffadhe mukkeen ija naqatan kanneen gosa hundaa achi keessa nan dhaabadhe. ⁶ Bosona mukkeen guddachaa jiranii ittiin obaafachuufis kuusaa bishaanii nan qopheeffadhe. ⁷ Ani garboota dhiiraa fi dubartii nan bitadhe; garboota mana kootti dhalatan biraas nan qabaadhe; nama naan dura Yersaalem keessa jiraate kam iyyuu caalaas loonii fi bushaayee hedduu nan horadhe. ⁸ Ani meetii fi warqee, qabeenya moototaatii fi kutaawwan biyyaa walitti nan qabadhe. Ani faarfattoota dhiiraa fi dubartii akkasumas saajjatoowwan nama gammachiisan hedduu qaban ture. ⁹ Kanaafuu ani akka malee guddadhee nama anaan dura Yersaalem keessa ture kam iyyuu caale. Waan kana hunda keessatti ogummaan koo anuma wajjin ture.

¹⁰ Ani waan iji koo hawwe hunda isa hin dhowwine;
garaa koos gammachuu tokko illee hin lagne.

Garaan koo hojii koo hundatti gammade;
kunis dadhabii koo hundaaf badhaasa ture.

¹¹ Ta'us ani yeroon waan harki koo hojjete hundaa fi
waan argachuuf jedhee itti dadhabe hubadhee ilaaletti,
wannii hundi akkuma bubbee ari'uuti malee
faayidaa hin qabu ture;
aduudhaa gaditti bu'aan tokko iyyuu hin turre.

Ogummaa Fi Gowwummaan Faayidaa Hin Qaban

¹² Anis yaada koo gara ogummaa,
maraatummaa fi gowwummaa hubachuutti nan deebifadhe.
Namni mootii iddoo bu'u tokko waan duraan hojjetame caalaa
maal gochuu danda'a?

¹³ Ani akkuma ifni dukkana irra wayyu sana,
akka ogummaan gowwummaa irra wayyu nan arge.

¹⁴ Ogeessi mataa isaa keessaa ija qaba;
gowwaan garuu dukkana keessa deema;
ani garuu akka galgalli isaan lamaanii
tokkuma ta'e nan hubadhe.

¹⁵ Ergasii ani akkana jedheen garaa koo keessatti nan yaade;
"Wanni gowwaa quunname, anaanis ni quunname;
yoos ani ogeessa ta'uudhaan maalan argadha ree?"

Ani garaa koo keessatti,
"Kunis faayidaa hin qabu" nan jedhe.

¹⁶ Ogeessi akkuma gowwaa yeroo dheeraaf hin yaadatamuutii;
bara dhufuuf jiru keessa isaan lachuu ni irraanfatu.
Ogeessis akkuma gowwaa du'uu qaba!

Hojiin Dadhabuun Faayidaa Hin Qabu

¹⁷ Sababii wannii aduu gaditti hojjetamu na gaddisiiseef ani jireenya nan jibbe; kun hundinuu bubbee ari'uu dha; faayidaas hin qabu. ¹⁸ Ani sababii nama ana duubaan dhufuuf waan kana dhiisuu qabuuf, waanan aduudhaa gaditti itti dadhabe hunda nan jibbe. ¹⁹ Eenyutu akka inni ogeessa yookaan gowwaa ta'u beeka? Ta'us inni hojii ani aduudhaa gaditti yaalii fi ogummaa koo itti dhangalaase hundatti abbaa ta'a. Kunis faayidaa hin qabu. ²⁰ Kanaafuu garaan koo sababii hojii koo dadhabsiisaa ani aduudhaa gaditti itti dadhabe hundaatiif abdi kutachuu jalqabe. ²¹ Namni tokko hojii isaa ogummaan, beekumsaa fi harka toliisaan hojjetee ergasii immoo waan qabu hunda nama homaa itti hin dadhabiniif dhiisuu qabaatii. Wannii kunis faayidaa hin qabu; hammina guddaadhas. ²² Namni tokko dadhabii isaatiif yaalii cimaa aduudhaa gaditti godhe sana hundaaf maal argata? ²³ Hojiin isaa bara jireenya isaa hunda rakkinnaa fi gadda; sammuun isaa halkan iyyuu hin boqotu. Kunis waan faayidaa hin qabnee dha.

²⁴ Namni nyaatee dhugee hojii isaatti gammaduu caalaa homaa gochuu hin danda'u. Ani akka wannii kun harka Waaqaatii dhufe nan arge; ²⁵ Waaqaan malee eenyutu nyaachuu yookaan gammaduu danda'a? ²⁶ Waaqni nama isa gammachiisuuf ogummaa, beekumsaa fi gammachuu kenna; nama cubbamaa garuu akka inni namicha Waaqa

gammachiisuuf kennuuf jedhee hojii qabeenya walitti qabuutii fi kuusuu hojjetu godha. Kunis bubbee ari'uu dha; faayidaas hin qabu.

3

Wanni Hundinuu Yeroo Qaba

¹ Wanni hundinuu yeroo qaba;

hojiin samiidhaa gaditti hojjetamu hundis waqtii qaba:

² Dhalachuuf yeroo qaba; du'uufis yeroo qaba;

dhaabuuf yeroo qaba; buqqisuufis yeroo qaba;

³ ajjeesuuf yeroo qaba; fayyisuufis yeroo qaba;

diiguuf yeroo qaba; ijaaruufis yeroo qaba;

⁴ boo'uuf yeroo qaba; kolfuufis yeroo qaba;

gadduuf yeroo qaba; sirbuufis yeroo qaba;

⁵ dhagaa bittinneessuuf yeroo qaba; walitti qabuufis yeroo qaba;

hammachuuf yeroo qaba; hammachuu dhiisuufis yeroo qaba;

⁶ barbaaduuf yeroo qaba; barbaaduu dhiisuufis yeroo qaba;

kaa'uuf yeroo qaba; gatuufis yeroo qaba;

⁷ tarsaasuuf yeroo qaba; hodhuufis yeroo qaba;

cal'isuuf yeroo qaba; dubbachuufis yeroo qaba;

⁸ jaallachuun yeroo qaba; jibbuufis yeroo qaba;

loluuf yeroo qaba; nagaafis yeroo qaba.

⁹ Hojjetaan tokko dadhabbii isaa irraa bu'aa maalii argata? ¹⁰ Ani ba'aa Waaqni namoota irra kaa'e argeera. ¹¹ Inni waan hunda yeruma isaatti miidhagsee tolcheera. Akkasumas yaada baraa baraa garaa namootaa keessa kaa'e. Ta'us isaan waan Waaqni jalqabaa hamma dhumaatti hojjetee beekuu hin danda'an. ¹² Ani akka namootaaf bara jireenya isaanii keessa wanni gammaduu fi waan gaarii hojjechuu caalu tokko iyyuu hin jirre nan beeka. ¹³ Tokkoon tokkoon namaa nyaatee dhugee bu'aa hojii isaa hundatti gammaduun kenna Waaqaa ti. ¹⁴ Ani akka wanni Waaqni hojjetu hundi bara baraan jiraatu beeka; wanni tokko illee itti hin dabalamu; wanni tokko iyyuus irraa hin fudhatamu. Waaqni akka namoonni isa sodaataniif waan kana godha.

¹⁵ Wanni amma jiru kam iyyuu duraanuu tureera;

wanni dhufuuf jirus duraanuu jira ture;

Waaqni waan darbes deebisee fida.

¹⁶ Anis aduudhaa gaditti waan biraa nan arge; kunis:

Iddoo murtiin qajeelaan jiraachuu malu, hamminatu ture;

iddoo qajeelummaan jiraachuu malu immoo jal'inatu ture.

¹⁷ Ani garaa koo keessatti akkana jedheen yaade;

"Waaqni qajeeltotaa fi hamoota, gara murtiitti ni fida;

wanni hundinuu, hojiin hundinuus yeroo ni qabaatii."

¹⁸ Ani amma illee akkana jedhee garaa koo keessatti nan yaade; "Waaqni akka isaan akkuma bineensotaa ta'uu isaanii arganiif ilmaan namaa qora. ¹⁹ Wanni nama irra ga'u, bineensota irras ni ga'a; lachan isaanii iyyuu waanuma tokkotu eeggata; akkuma inni tokko du'uu, inni kaanis ni du'a. Hundi isaanii hafuuruma tokko qabu; namni bineensa caalaa faayidaa argatu tokko illee hin qabu. Wanni hundinuu faayidaa hin qabu. ²⁰ Isaan hundi idduma tokko dhaqu; hundinuu biyyoo irraa dhufan; hundinuus biyyooti deebi'u. ²¹ Akka hafuurri namaa ol ba'ee hafuurri bineensaa immoo lafa keessa seenu eenyutu beeka?"

²² Kanaafuu ani sababii wanni sun ixaa isaa ta'eef akka namaaf wanni hojii isaatti gammaduu caalu tokko iyyuu hin jirre nan arge. Akka inni waan isa duubaan ta'uu arguuf eenyutu isa fiduu danda'a?

4

Cunqursaa, Hojiidhaan Dadhabuu, Michuu Dhabuu

¹ Ani ammas ilaalee cunqursaa aduudhaa gaditti adeemsifamaa jiru hunda nan arge:

Ani imimmaan cunqurfamtootaa nan arge;

nama isaan jajjabeessu tokko illees hin qaban;

humni gama cunqursitoota isaanii ture;

isaan nama isaan jajjabeessu tokko illee hin qaban.

² Anis akka warri du'an,

kanneen kanaan dura du'an,

- jiraattota amma lubbuudhaan jiraatan caalan nan labse.
- ³ Garuu namni hamma ammaatti hin dhalatin
kan hammina aduudhaa gaditti
hojjetamu hin argin,
lachan isaanii irra wayya.
- ⁴ Anis akka dadhabbiin hojii hundii fi milkaa'uun hundi hinaaffaa namni ollaa isaa wajjin qabu irraa burqu nan arga. Kunis bubbee ari'uu dha; faayidaas hin qabu.
- ⁵ Gowwaan harka isaa maratee taa'a;
foonuma ofii isaas nyaata.
- ⁶ Dadhabbiin fi bubbee ari'uudhaan
konyee lama argachuu irra
nagaan konyee tokko argachuu wayya.
- ⁷ Ani amma illee waan faayidaa hin qabne tokko aduudhaa gaditti nan arge:
- ⁸ Nama kophaa isaa jiraatu tokkotu jira;
innis ilma yookaan obboleessa hin qabu ture.
- Yeroo hunda hojiitti dadhaba;
ta'us iji isaa qabeenya isaa ilaalee quufe hin jedhu.
- Innis, "Ani eenyuuf jedheen dadhaba?
Maaliifan gammachuus of laga?" jedhee gaafate.
- Kunis faayidaa hin qabu;
hojii bu'aa hin qabnee dha!
- ⁹ Isaan sababii hojii isaaniitiif gatii gaarii waan argataniif
nama tokko irra nama lama wayya:
- ¹⁰ Yoo inni tokko kufe,
inni kaan ol isa qaba.
- Garuu namni kufee kan ol isa kaasu hin qabne
garaa nama nyaata!
- ¹¹ Yoo namoonni lama wajjin ciisan itti ho'a;
nama tokko garuu akkamitti kophaa isaa itti ho'uu danda'a?
- ¹² Namni tokko mo'atamuu danda'a;
namoonni lama garuu of irraa deebisuu danda'u.
- Funyoon fo'aa sadiin fo'ame dafee hin citu.

Caalanii Argamuun Faayidaa Hin qabu

¹³ Mootii dullooma fi gowwaa si'achi gorsa hin fudhanne irra, dargaggeessa hiyyeessa ogeessa wayya. ¹⁴ Inni yoo hiyyumaan mootummaa sana keessatti dhalate iyyuu mana hidhaatii ba'ee mootii ta'uu danda'aatii. ¹⁵ Ani akka namni aduudhaa gad jiraate hundi dargaggeessa mootii dhaalu sana duukaa bu'e nan arge. ¹⁶ Baay'inni nama fuula isaanii dura jiruu hamma hin qabu ture. Warri duubaan dhufan garuu dargaggeessa dhaalu sanatti hin gammanne. Kun hundis bubbee ari'uu dha; faayidaas hin qabu.

5

Waaqa Sodaadhu

- ¹ Ati yeroo gara mana Waaqaa dhaqxu tarkaanfii kee eeggadhu. Dhaggeeffachuuf dhi'aachuun aarsaa gowwootaa dhi'eessuu caala; isaan akka hammina hojjechaa jiran hin beekaniitii.
- ² Fuula Waaqaa duratti waan tokko dubbachuuf
afaan keetiin hin jarjarin;
garaan kees hin ariifatin.
- Waaqni samii keessa jira;
ati immoo lafa irra jirta;
kanaafuu dubbiin kee haa gabaabbatu.
- ³ Abjuun baay'ina hojiitiin dhufa; haasaan gowwaa
baay'ina dubbiitiin beekama.
- ⁴ Ati yeroo wareega tokko Waaqaaf wareegdutti wareega sana of irraa baasuuf lafa irra hin harkifatin. Inni gowwootatti hin gammadu; ati wareega kee of irraa baasi.
- ⁵ Wareegani of irraa baasuu dhiisuu mannaa wareeguu dhiisuu wayya. ⁶ Afaan kee cubbuu keessa si hin buusin. Ergamaa mana qulqullummaatiinis, "Wareegni koo dogoggora ture" hin jedhin. Waaqni maaliif waan ati jettetti aaree hojii harka keetii balleessa? ⁷ Abjuun baay'eenii fi dubbiin baay'een faayidaa hin qaban. Kanaafuu Waaqa sodaadhu.

Badhaadhummaan Faayidaa Hin qabu

⁸ Ati yoo hiyyeessa aanaa tokko keessatti hacuucamee murtii qajeelaa fi mirgi dhowwatame argite, waan akkanaa hin dinqisiifatin; qondaalli tokko qondaala isaa oliitiin ilaalaamaatii; isaanii olittis qondaaltonni biraa jiru. ⁹ Faayidaan lafa irraa argamu kan nama hundaa ti; mootichi mataan isaa iyyuu qonna lafaa irraa fayyadama.

¹⁰ Nama maallaqa jaalatu kam iyyuu maallaqni isa hin ga'uu;
nama qabeenya jaalatu illee galiin isaa isa hin quubsu.
Kunis faayidaa hin qabu.

¹¹ Akkuma qabeenyi baay'atuun,
warri nyaatanis ni baay'atu.

Yoos abbootiin qabeenyaa
ijumaan ilaaluu malee faayidaa maalii argatu ree?

¹² Xinnaas nyaatu, guddaas nyaatu,
hirribni hojjetaa tokkoo mi'aawaa dha;
baay'inni qabeenyaa garuu
sooressa tokko hirriba dhowwa.

¹³ Ani aduudhaa gaditti hammina nama gaddisiisu nan arge; kunis:
qabeenya abbuma isaa miidhuuf kuufame,

¹⁴ yookaan qabeenya milkii dhabuudhaan badee
yeroo namichi sun ilma dhalchetti
ilma isaatiif homaa hin hafinii dha.

¹⁵ Namni qullaadhuma isaa gadameessa haadha isaatii ba'a;
inni akkuma dhufetti deebi'ee deema.

Inni waan itti dadhabe keessaa
waan tokko illee harkatti qabatee hin deemu.

¹⁶ Kunis hammina nama gaddisiisuu dha:

Namni akkuma dhufetti deema;
inni waan bubbeedhaaf dadhabuuf
faayidaa maalii argata?

¹⁷ Inni bara jireenya isaa hunda yaaddoo,
dhukkubbii fi aarii guddaadhaan dukkana keessatti nyaata.

¹⁸ Anis akka namni bara jireenya isaa kan Waaqni isaaf kenne gabaabaa kana keessa nyaatee dhugee hojii isaa kan aduudhaa gaditti itti dadhabe sanatti illee gammaduun isaaf gaarii fi barbaachisaa ta'e nan hubadhe; qoodni isaa kanumaatii. ¹⁹ Akkasumas Waaqni nama kamiifuu badhaadhummaa fi qabeenya kennee akka inni itti gammadu, akka inni qooda ofii isaa fudhatee hojii ofii isaatti gammadu isa godhuun isaa, kennaa Waaqaa ti. ²⁰ Sababii Waaqni garaa isaa gammachuudhaan guuteef inni bara jireenya isaa baay'ee hin yaadatu.

6

¹ Ani aduudhaa gaditti waan hamaa biraa argeera; kunis akka malee namatti ulfaata:
² Waaqni akka namni waan garaa isaatti hawwu tokko iyyuu hin dhabneef qabeenya, badhaadhummaa fi ulfina isaaf kenne; Waaqni garuu akka inni itti gammadu hin goone; qooda namichaa nama ormaatu itti gammada. Kun waan faayidaa hin qabnee dha; hammina nama gaddisiisuudhas.

³ Namni tokko ijoollee dhibba qabaatee waggoota baay'ee jiraachuu danda'a; inni hamma fedhe jiraatu illee yoo qabeenya isaatti gammaduu baatee awwaala gaariis argachuu baate, ani, "Isaa mannaa gatata wayya" nan jedha. ⁴ Inni akkasumaan dhufa; dukkana keessa bada; maqaan isaas dukkana haguugama. ⁵ Inni yoo aduu arguu baate iyyuu yookaan yoo homaa beekuu baate iyyuu boqonnaa namichi sun argatu caalaa boqonnaa qabaata. ⁶ Inni waggaa kuma yeroo lama jiraatu illee yoo jireenya gaarii hin jiraatin, namni hundi idduma tokko dhaqa mitii?

⁷ Dadhabbiin nama hundaa afaanuma isaatiif;
fedhiin isaa garuu yoom iyyuu hin guutu.

⁸ Ogeessi maaliin gowwaa caala?

Hiyyeessi akka itti fuula namootaa dura jiraatu beekuudhaan
faayidaa maalii argata?

⁹ Hawwiidhaan jooruu mannaa waan iji argu wayya.
Kunis bubbee ari'uu malee faayidaa hin qabu.

- 10 Waan jiru hundaaf duraanuu maqaan ba'eera;
maalummaan namaas beekamaa dha;
namni tokko iyyuu nama isa caalaa humna qabuun
morkachuu hin danda'u.
- 11 Dubbiin akkuma baay'atuun faayidaa dhaba;
yoos wanni sun akkamiin nama kam iyyuu fayyada?
- 12 Bara jireenya namaa kan inni akkuma gaaddisaatti keessa ba'ee darbu gabaabaa
faayidaa hin qabne kana keessa eenyutu waan namaaf gaarii ta'e beeka? Waan erga
inni deemee booddee aduudhaa gaditti ta'us eenyutu isatti himuu danda'a?

7

Ogummaa

- 1 Shittoo urgaa'aa irra maqaa gaarii wayya;
guyyaa dhalootaa irra guyyaa du'aa wayya.
- 2 Mana cidhaa dhaquu mannaa
mana boo'ichaa dhaquu wayya;
galgalli nama hundaa du'umaatii;
namni lubbuun jiraatu waan kana garaatti haa qabatu.
- 3 Fuulli gaddu waan garaa gammachiisuuf
kolfa irra gadda wayya.
- 4 Qalbiin ogeessaa mana boo'ichaa jira,
qalbiin gowwaa garuu mana gammachuu jira.
- 5 Sirba gowwootaa dhaga'uu mannaa
ifannaa ogeessaa dhaggeeffachuu wayya.
- 6 Kolfi gowwaa akkuma qoraattii
xuwwee jalaa xaaxa'uu ti.
Kunis faayidaa hin qabu.
- 7 Cunqursaan ogeessa gowwaa godha;
matta'aanis sammuu nama xureessa.
- 8 Jalqaba waan tokkoo irra dhuma isaa wayya;
of tuuluu irras obsa wayya.
- 9 Hafuura keetiin aaruuf hin ariifatin;
aariin bobaa gowwootaa keessa jiraatii.
- 10 Ati, "Barri durii maaliif bara kana caale?" hin jedhin;
waan kana gaafachuun ogummaa miti.
- 11 Ogummaan akkuma dhaalaa waan gaarii dha;
warra aduu arganiifis bu'aa qaba.
- 12 Akkuma maallaqni da'oo ta'e sana
ogummaanis da'oo dha;
faayidaan beekumsaa garuu kana:
innis ogummaan warra ishee qabaniif jireenya kennuu ishee ti.
- 13 Waan Waaqni hojjete mee ilaali:
Waan inni jal'ise
eenyutu qajeelchuu danda'a?
- 14 Yommuu yeroon gaarii ta'utti gammadi;
yommuu yeroon hammaatu garuu itti yaadi:
Waaqni isa tokko hojjete isa kaanis hojjeteera.
Kanaafuu namni egeree isaa beekuu hin danda'u.
- 15 Ani jireenya koo kan faayidaa hin qabne kana keessatti waan kana lachuu argeera;
kunis:
Qajeelaan qajeelummaa isaatiin baduu isaatii fi
hamaan immoo hammina isaatiin bara dheeraa jiraachuu isaa ti.
- 16 Ati akka malee qajeelaa hin ta'in;
yookaan akka malee ogeessa hin ta'in;
maaliif of galaafatta?
- 17 Ati akka malee hamaa hin ta'in;
gowwaas hin ta'in;
maaliif utuu yeroon kee hin ga'in duuta?

- 18 Utuu isa kaan gad hin dhiisin
 waan tokko qabaachuun gaarii dha.
 Namni Waaqa sodaatu waan hundaan ni milkaa'a.
- 19 Ogummaan, bulchitoota magaalaa tokko keessa jiran kudhan caalaa
 nama ogeessa tokko humna qabeessa gooti.
- 20 Namni qajeelaan waan qajeelaa malee
 cubbuu tokko illee hin hojjenne lafa irra hin jiru.
- 21 Waan namni jedhu hunda hin dhaggeeffatin;
 yoo kana goote utuu hojjetaan kee si abaaruu dhageessaa;
- 22 ati mataan kee iyyuu yeroo baay'ee
 namoota kaan akka abaarte garaan kee beekaatii.
- 23 Ani waan kana hunda ogummaadhaanan qoradhee,
 "Ani ogeessan ta'a" nan jedhe.
 Wannu kun garuu narraa fagoo ture.
- 24 Wanti jiru hundi fagoo dha; gad fagoo dha;
 eenyutu qoratee bira ga'uu danda'a?
- 25 Kanaafuu ani gara ogummaa fi
 maalummaa wantootaa hubachuutti, sakatta'uutti, qorachuutti
 akkasumas hammina gowwummaatii fi
 maraatummaa gowwummaa hubachuutti qalbii koo nan deebifadhe.
- 26 Ani waan du'a caalaa hadhaa'uu nan arge; kunis:
 dubartii kiyyoo taate,
 kan yaadni ishee kiyyoo,
 harki ishee immoo foncaa ta'ee dha.
 Namni Waaqa gammachiisu ishee jalaa ni ba'a;
 cubbamaan garuu isheedhaan qabama.
- 27 Lallabaan akkana jedha; "Kunoo wannu ani qoradhee bira ga'e kanaa dha:
 "Mala isaa beekuuf waan tokko fuudhanii waan kaanitti dabaluu dha;
 28 ani ammas nan sakatta'e;
 garuu hin arganne.
 Ani kuma keessaa dhiira qajeelaa tokko nan argadhe;
 hunduma isaanii keessaa garuu dubartii qajeeltuu tokko iyyuu hin arganne.
- 29 Kunoo ani waan kana qofa nan argadhe:
 Waaqni qajeeltota godhee ilmaan namaa uume;
 namoonni garuu mala baay'ee barbaacha deeman."

8

- 1 Kan akka nama ogeessaa eenyu?
 Eenyutu hiikkaa waan tokkoo beeka?
 Ogummaan fuula namaa ibsa;
 nyaara guurames ni hiika.
Mootiif Ajajami
- 2 Ati sababii fuula Waaqaa duratti kakuu galteef ajaja mootii eegi. 3 Fuula mootii duraa deemuuf hin jarjarin. Waan hamaa keessatti hin hirmaatin; inni waan fedhe kam iyyuu ni godhaatii. 4 Sababii dubbiin mootii waan hundaa ol ta'eef eenyutu, "Ati maal hojjechaa jirra?" isaan jechuu danda'a?
- 5 Namni ajaja mootii eegu kam iyyuu hin miidhamu;
 qalbiin ogeessaa immoo yeroo fi haala mijaa'aa beeka.
- 6 Rakkinni namaa akka malee isatti ulfaatu iyyuu
 wannu hundi yeroo fi haala mijaa'aa qabaatii.
- 7 Sababii namni tokko iyyuu waan eger ta'u hin beekneef,
 eenyutu waan dhufuuf jiru isatti himuu danda'a?
- 8 Namni tokko iyyuu hafuura isaa of keessatti dhowwu hin danda'u;
 kanaafuu eenyu iyyuu guyyaa du'a isaa irratti humna hin qabu.
 Akkuma namni tokko yeroo waraanaatti duula keessaa hin ari'amne sana,
 hamminnis warra isa hojjetu gad hin dhiisu.

⁹ Anis qalbii koo gara waan aduudhaa gaditti hojjetamu hundaatti deebifadhee waan kana hunda nan arge. Yeroon namni tokko warra kaan humnaan nan bulcha jedhee ofuma miidhu jira. ¹⁰ Ergasiis ani hamoota iddoo qulqulluu seenanii ba'aa turan sana akka isaan awwaalaman nan arge; isaanis magaalaa itti waan akkasii hojjetan keessatti ni jajamu ture. Kunis faayidaa hin qabu.

¹¹ Sababii yakka hojjetame tokkootiif adabbiin dafee hin kennamneef, garaan namootaa mala hammina hojjechuutiin guutama. ¹² Cubbamaan tokko yeroo dhibba yakka hojjetee bara dheeraa jiraatu iyyuu, ani akka namoonni Waaqa sodaatan kanneen sodaadhaan fuula isaa dura jiraatan nagaa qabaatan nan beeka. ¹³ Ta'us hamoonni sababii Waaqa hin sodaanneef nagaa hin qabaatan; barri jireenya isaaniis akka gaaddidduu hin dheeratu.

¹⁴ Waan faayidaa hin qabne kan lafa irratti ta'u tokkotu jira; kunis qajeeltota waan hamootaaf malu argatanii fi hamoota waan qajeeltotaaf malu argatanii dha. Ani wanni kun faayidaa hin qabu nan jedha. ¹⁵ Kanaafuu namaaf wanni aduudhaa gaditti nyaachuu, dhuguu fi gammaduu caalu tokko iyyuu sababii hin jirreef ani akka namni jireenyatti gammadu nan gorsa. Akkasiin bara jireenya isaa kan Waaqni aduudhaa gaditti kenneef hunda keessatti hojii isaa irratti gammachuun isa duukaa bu'a.

¹⁶ Ani yommuun qalbii koo gara ogummaa beekuu fi hojii namni utuu jji isaa halkanii fi guyyaa hirriba hin argatin hojjetu ilaaluutti deebifadhetti, ¹⁷ waan Waaqni hojjete hunda nan arge. Namni tokko iyyuu waan aduudhaa gaditti ta'aa jiru hubachuu hin danda'u. Namni waan kana bira ga'uuf tattaaffatu iyyuu hiikkaa isaa argachuu hin danda'u. Ogeessi waan beeku yoo of se'e illee inni dhugumaan hubachuu hin danda'u.

9

Galgalli Nama Hundaa Tokkuma

¹ Kanaafuu ani waan kana hunda garaatti qabadhee akka qajeelaan, ogeessii fi hojjiwwan isaanii harka Waaqaa keessa jiran nan hubadhe; garuu namni tokko iyyuu akka jaalalli yookaan jibbi isa eeggatu hin beeku. ² Nama qajeelaa fi jal'aa, nama gaarii fi hamaa, nama qulqulluu fi xuraa'aa, warra aarsaa dhi'eessanii fi warra hin dhi'eessine hunda galgalli isaanii tokkuma.

Waanuma nama gaarii irra ga'utu,

cubbammaa irras ga'a;

waanuma warra kakuu seenan irra ga'utu,

warri kakuu seenuu sodaatan irra ga'a.

³ Hamminni waan aduudhaa gaditti ta'u hunda keessa jiru kanaa dha: Galgalli nama hundaa tokkoo dha. Kana malees garaan namootaa hamminaan guutameera; bara jireenya isaanii keessas maraatummaatu garaa isaanii keessa jira; ergasii isaan warra du'anitti dabalamu. ⁴ Namni warra lubbuun jiran hundatti dabalamu kam iyyuu abдии qaba. Leenca du'ee mannaa saree lubbuun jirtu wayyaatii!

⁵ Warri lubbuun jiran akka du'an ni beekuutii;

warri du'an garuu homaa hin beekan;

isaan si'achi gatii hin qaban;

yaadannoon isaanii iyyuu ni irraanfata.

⁶ Jaalalli isaanii, jibbi isaaniitii fi

hinaaffaan isaanii erga badee tureera;

isaan waan aduudhaa gaditti ta'u kam iyyuu keessatti

lammata qooda hin qabaatan.

⁷ Sababii Waaqni waan ati hojjetetti gammadeef dhaqiitii nyaata kee gammachuudhaan nyaadhu; daadhii wayiniis keetiis garaa gammadduun dhugi. ⁸ Yeroo hunda uffata adii uffadhu; zayitiinis mataa kee irraa hin dhabamin. ⁹ Bara jireenyaa kan faayidaa hin qabne, kan Waaqni aduudhaa gaditti siif kenne kana hunda bara kee kan faayidaa hin qabne hunda keessatti haadha manaa kee kan jaallattu wajjin gammachuudhaan jiraadhu. Jireenyaa fi hojii ati aduudhaa gaditti itti dadhabde sanaaf qoodni kee kanumaatii. ¹⁰ Waan harki kee hojjechuu danda'u hunda humna kee guutuudhaan hojjedhu; awwaala ati itti deemuuf jirtu keessa hojiin yookaan yaadni yookaan beekumsi yookaan ogummaan hin jiruutii.

¹¹ Ani aduudhaa gaditti waan biraa argeera:

Fiigichi warra saffisaniif

yookaan lolli irree jabeeyyiif miti;

yookaan nyaanni ogeeyyiif

yookaan qabeenyi hubattootaaf

yookaan fudhatama argachuun beektotaaf miti;
yeroo fi carraan hunda isaanii argata.

¹² Namni tokko iyyuu yeroon isaa yoom akka ta'e hin beeku:
Akkuma qurxummiin kiyyoo hamaadhaan qabamu,
yookaan akkuma simbirri kiyyoodhaan qabamtu sana
namoonnis bara hamaa
akkuma tasaa isaanitti dhufuun qabamu.

Gowwummaa Irra Ogummaa Wayya

¹³ Ani amma illee fakkeenya ogummaa kan akka malee na dinqisiise kana aduudhaa
gaditti nan arge: ¹⁴ Magaalaa xinnoo namoonni muraasni keessa jiraatan tokkotu ture.
Mootiin jabaan tokkos isheetti ba'ee marse; koobii biyyoo guddaa naannessee itti ijaare.
¹⁵ Yeroo sanatti hiyyeessa ogeessa tokkotu magaalaa sana keessa jiraachaa ture; innis
ogummaa isaatiin magaalattii baraare. Namni tokko iyyuu garuu hiyyeessa sana hin
yaadanne. ¹⁶ Kanaafuu ani, "Jabina irra ogummaa wayya" nan jedhe. Ogummaan
hiyyeessa sanaa garuu ni tuffatame; dubbiin isaas fudhatama hin arganne.

¹⁷ Iyya bulchaa gowwootaa irra

hasaasa ogeessaatu dhaga'ama.

¹⁸ Meeshaalee waraanaa irra ogummaa wayya;
cubbamaan tokko garuu waan gaarii hedduu balleessa.

10

¹ Akkuma tisiisni duute tokko shittoo ajeessitu sana
gowwummaan xinnoon ogummaa fi ulfina balleessa.

² Yaadni ogeessaa karaa mirгаа,
yaadni gowwaa immoo karaa bitaa jira.

³ Gowwaan yoo karaa deemu illee qalbii hin qabu;
akka gowwaa ta'es nama hundatti argisiisa.

⁴ Yoo dheekkamsi bulchaa tokkoo sitti hammaate,
ati iddoo kee gad hin dhiisin;
tasgabbaa'uun dogoggora guddaa hambisuu danda'aatii.

⁵ Hamminni ani aduudhaa gaditti arge tokko jira;
kunis dogoggora bulchaan tokko uumuu dha.

⁶ Utuma badhaadhonni iddoo gad aanu qabatani jiranuu,
gowwoonni iddoo ulfinaa qabatu.

⁷ Ani utuma ilmaan moototaa akka garbootaa miillaan deemanii
garboonni immoo fardaan utuu deemanii nan arge.

⁸ Namni boolla qotu kam iyyuu ofuma isaatii keessa bu'a;
nama dallaa cabsee keessaan ba'u kam iyyuu bofatu idda.

⁹ Namni dhagaa baasu kam iyyuu dhagaa sanaan miidhamuu danda'a;
namni jirma baqaqsu hundinuus jirmuma sanaan miidhama.

¹⁰ Qottoon doomee
afaan isaa yoo hin qaramin,
humna guddaa barbaachisa;
ogummaan garuu milkaa'inna fida.

¹¹ Bofiti tokko utuu hin raateffamin yoo nama idde,
namichi bofa raatessu sun homaa hin argatu.

¹² Dubbiin afaan ogeessaatii ba'u ulfina qaba;
namni gowwaan immoo hidhii ofii isaatiin bada.

¹³ Dubbiin isaa jalqabatti gowwummaa dha;
dhuma irratti garuu maraatummaa hamaa dha;
¹⁴ namni gowwaan dubbii baay'isa.

Namni tokko iyyuu waan dhufuuf jiru hin beeku;
eenyutu waan isa duubaan ta'u isatti himuu danda'a?

¹⁵ Dadhabbiin gowwaa isuma butuchiti;

inni karaa gara magaalatti geessu hin beeku.

- 16 Yaa biyya mootiin kee mucaa turee,
kan ilmaan moototaa kee ganamaan nyaatanii dhugan siif wayyoo.
- 17 Yaa biyya mootiin kee sanyii beekamaa irraa dhalate,
kan ilmaan moototaa utuu machaa'uuf hin ta'in,
jabina argachuuf jedhanii yeroo malutti nyaatanii dhugan,
ati eebbifamtuu dha.
- 18 Dhibaa'ummaan, mana duuffisa;
harki hin hojjennes mana dhimmisiisa.
- 19 Cidhi kolfaaf qopheeffama;
daadhiin wayiniis jireenya gammachiisa;
maallaqni immoo deebii waan hundaa ti.
- 20 Sababii simbirri samii dubbii kee geessituuf,
yookaan simbirri barrisaa jirtu dhaqxee waan ati jettu himtuuf,
ati yaada kee keessatti mootii hin arrabsin;
yookaan kutaa hirribaa keessatti sooressa hin abaarin.

11

Buddeena Bishaan Irraa

- 1 Buddeena kee bishaan gubbaa buusi;
guyyaa baay'ee booddee deebiftee argattaatii.
- 2 Qabeenya kee iddoo torbatti yookaan saddeetitti qoodi;
bala biyyatti dhufuuf jiru hin beektuutii.
- 3 Duumessi yoo bishaaniin guutame,
bokkaa lafatti gad dhangalaasa.
Mukni tokko yoo kibbatti yookaan kaabatti jige,
idduma itti kufe sana ciisa.
- 4 Namni qilleensa eeggatu tokko hin facaafatu;
kan duumessa ilaallatus hin haammatu.
- 5 Ati akkuma daandii bubbee,
yookaan akka itti namni gadameessa haadhaa keessatti uumamu
hin beekne sana,
hojii Waaqaa, Uumaa waan hundaa sana illee
beekuu hin dandeessu.
- 6 Inni kun yookaan inni sun,
yookaan lachanu wal qixxee tolu;
inni kam akka tolu hin beektuutii;
ati sanyii kee ganamaan facaafadhu;
galgalas harki kee hojii malee hin taa'in.
- Dargaggummaatti Uumaa kee Yaadadhu*
- 7 Ifni mi'aawaa dha;
aduu arguunis ija gammachiisa.
- 8 Namni yoo hammam waggoota baay'ee jiraate illee,
inni hunduma isaatti gammadaa haa jiraatu.
Garuu inni guyyoota dukkanaa haa yaadatu;
isaan ni baay'atuutii.
Wanni dhufuuf jiru hundinuu faayidaa hin qabu.
- 9 Yaa dargaggeessa, hamma dargaggummaa keessa jirtutti gammadi;
bara dargaggummaa keetii keessas garaan kee si haa gammachiisu.
Yaada garaa keetii, waanuma iji kee argu duukaa bu'i;
garuu akka Waaqni waan kana hundaaf
gara murtiitti si fidu beekkadhu.
- 10 Kanaafuu garaa kee keessaa yaaddoo balleessi;

sababii dargaggummaa fi jabinni faayidaa hin qabneef dhagna kee keessaa hammina baasii gati.

12

¹ Utuu guyyaan rakkinaa hin dhufin,
utuu barri ati itti, “Ani itti hin gammadu” jettu hin ga’in,
bara dargaggummaa keetii keessa Uumaa kee yaadadhu;

² utuu aduu fi ifni,
ji’ii fi urjiin hin dukkanaa’in,
utuu duumessi bokkaatti aanee hin deebi’in,

³ yeroo itti eegdonni manaa hollatanii
namoonni jajjaboon immoo gugguufanitti,
yeroo itti warri midhaan daakan sababii muraasa ta’aniif
hojii dhiisanii,

kanneen foddaa keessaan ilaalan arguu dadhabanitti,
⁴ yeroo itti balballi daandii guddaatti geessu cufamee
sagaleen dhagaa daakuu immoo gad bu’aa deemutti,
yeroo itti namni waca simbirrootiin dammaqee
sirbi ishee hundi garuu gad bu’aa deemutti,

⁵ yeroo itti namni lafa ol dheeraa fi
balaa daandii irraa sodaatu,
yeroo itti mukni lawuzii daraaru,
yeroo itti korophisni tiratuu fi
hawwiin nama keessaa badutti Uumaa kee yaadadhu.
Ergasii namni mana isaa bara baraatti gala;
warri boo’anis daandii irra deddeebi’u.

⁶ Utuu funyoon meetii hin citin,
yookaan utuu waciitiin warqee hin cabin isa yaadadhu;
utuu okkoteen burqaa biratti hin caccabin,
yookaan utuu geengoon ittiin bishaan warraaban
boolla bishaanii biratti hin cabin,

⁷ utuu biyyoon lafa turetti hin deebi’in,
utuu hafuurris Waaqa isa kennetti hin deebi’in isa yaadadhu.

⁸ Lallabaanis, “Wanni hundi faayidaa hin qabu!
Faayidaa hin qabu! Wanni hundi faayidaa hin qabu!” jedha.

Xumura Dubbii

⁹ Lallabaan sun ogeessa qofa utuu hin ta’in beekumsas namaaf ni qooda ture. Inni itti yaadee, qoratee fakkeenya baay’ee tartiibaan kaa’eera. ¹⁰ Lallabaan kun jecha sirrii argachuuf jedhee qorate; wanni inni barreesses qajeelaa fi dhugaa dha.

¹¹ Dubbiin ogeessaa akkuma meeshaa ittiin loon oofanii ti; jechi isaa kan walitti qabames akkuma mismara jabeeffamee rukutamee ti; kanas tiksee tokkotu kenne.

¹² Yaa ilma ko, waan kana irraa hafe hunda of eeggadhu.
Kitaaba hedduu barreessuun hojii dhuma hin qabnee dha; qu’annaan baay’eenis nama dadhabsiisa.

¹³ Amma wanni hundinuu dhaga’ameera;
dhumni dubbii kunoo ti;

Waaqa sodaadhuutii seera isaa eegi;
wanni namni hojjechuu malu guddaan isa kanaatii.

¹⁴ Waaqni hojii hunda,
waan dhokfame hundas
gaarii yookaan hamaa taanaan murtiitti dhi’eessaatii.

Weeduu Weeddotaa

¹ Weeduu Weeddotaa Solomoon.

Ishee

² Inni dhungoo afaan isaatiin na haa dhungatu;
jaalalli kee daadhii wayinii caalaatii.

³ Urgaan shitto keetii namatti tola;
maqaan kee akkuma shitto dhangalaafamee ti.
Kanaafuu dubbarran si jaallatu!

⁴ Na fudhadhuu deemi; si duukaa fiignaa!
Mootichi diinqa isaatti ol na galfate.

Michoota

Nu sitti gammannee ililchina;
jaalala kees daadhii wayinii caalaa jajanna.

Ishee

Si jaallachuun isaanii akkam sirrii dha!

⁵ Intallan Yerusaalem,
ani akkuma dunkaana Qeedaar,
akkuma golgaa dunkaana Solomoonis gurraattii dha;
garuu bareedduu dha.

⁶ Sababii ani gurraattii ta'eef, ija babaaftee na hin ilaalin;
aduutu na gurraachesseetii.

Ilmaan haadha koo natti aaranii
akka ani iddoo dhaabaa wayinii eegu na taasisan;
ani garuu iddoo dhaabaa wayinii koo hin eegganne.

⁷ Yaa isa ani si jaalladhu,
iddoo bushaayee kee tikfattuu fi
iddoo itti guyyaa saafaa hoolota kee boqochiifattu natti himi.
Ani maaliifan akka dubartii fuula ishee haguugattee
bushaayee michoota keetii bira asii fi achi joortu tokkoo ta'a?

Michoota

⁸ Yaa dubartii dubartoota hunda caalaa bareeddu,
ati yoo beekuu baatte hoolota duukaa bu'i;
ilmoolee re'oota keetiis
dunkaana tiksootaa bira tikfadhu.

Isa

⁹ Yaa jaalallee ko, ani akka farda dhalaa
fardeen gaarii Fara'oon harkisan keessaa tokkootti sin ilaala.

¹⁰ Maddiin kee amartii gurraatiin,
mormii kees dirata warqetiin miidhagfameera.

¹¹ Nu warqee gurraa
meetiidhaan wal make siif tolchina.

Ishee

¹² Utuma mootichi maaddiitti dhi'aatee jiruu
shittoon koo urgaa isaa kenne.

¹³ Michuun koo anaaf korojoo gumbii ti;
inni guntuta koo gidduu boqota.

¹⁴ Michuun koo anaaf hurbuu daraaraa heenna
kan iddoo dhaabaa wayinii Een Gaadiitii dhufee dha.

Isa

¹⁵ Yaa jaalallee ko, ati akkam bareedda!
Dinqii akkam bareedda!
Iji kee gugee fakkaata.

Ishee

¹⁶ Yaa michuu ko, ati akkam miidhagda!
Dinqii akkam namatti tola!
Margi lalisaan siree keenya.

Isa

¹⁷ Dareersumaan mana keenyaa birbirsaa;
dagaleen isaa immoo gaattiraa dha.

2

Ishee

¹ Ani daraaraa Shaaroon;
daraaraa sulula keessaa ti.

Isa

² Jaalalleen koo dubbarran kaan gidduu ti
akkuma daraaraa qoraattii keessaa ti.

Isa

³ Michuun koo dargaggoota gidduutti
akkuma muka hudhaa kan mukkeen bosonaa keessa jiruu ti.
Ani gaaddisa isaa jala taa'uu nan jaalladha;
iji isaas natti mi'aawa.

⁴ Inni galma cidhaatti na geesse;
akeekni inni naaf qabu jaalala.

⁵ Sababii ani jaalalaan gaggabeef
isin bixxillee wayiniitiin na jajjabeessaa;
muka hudhaatiinis na haaromsaa.

⁶ Harki isaa bitaa mataa koo jala jira;
harki isaa mirgaa immoo na hammata.

⁷ Yaa intallan Yerusaaalem,
ani kuruphee fi borofaan isin kakachiisa;
hamma isheen ofumaan feetea kaatutti
jaalala hin tuttuqinaa yookaan hin dadammaqsinaa.

⁸ Sagaleen michuu kootii, tulluuwwan irra utaalee
gaarran irras qaari'ee dhufaa jira.

⁹ Michuun koo akkuma kuruphee yookaan korma gadamsaa ti.
Kunoo inni dallaa keenya duuba dhaabatee
foddaa keessaan ilaalaa
qaawwa keessaanis mimil'achaa jira.

¹⁰ Michuun koo dubbatee akkana naan jedhe;
"Yaa miidhagduu koo ka'ii!
Baredduu koo kottuu na wajjin deemi.

¹¹ Kunoo! Ganni darbeera;
bokkaanis caamee sokkeera.

¹² Daraaraan lafa irratti mul'ateera;
waqtiin sirbaa ga'eera;
wacni gugees

biyya keenya keessatti dhaga'amaa jira.

¹³ Mukni harbuu ija jalqabaa baasuu jalqabeera;
wayiniin daraares urgaa kenneera.

Yaa miidhagduu ko, ka'ii kottu;
yaa baredduu koo na wajjin deemi."

Isa

¹⁴ Gugee koo kan holqa dhagaa keessaa,
kan iddoo dhoksa tulluu cinaa keessaa,
mee fuula kee na argisiisi;
mee sagalee kee na dhageessisi;
sagaleen kee mi'aawaadhaatii;
fuulli kees namatti tola.

¹⁵ Mee waangoo,
waangoodhuma xixinnoo ishee
kanneen iddoo dhaabaa wayinii balleessitu nuuf qabaa;
iddoon dhaabaa wayinii keenyaa daraaraa jiraatii.

Ishee

¹⁶ Michuun koo kanuma koo ti; anis kan isaa ti;
inni daraaraa keessa dheechifata.

¹⁷ Yaa michuu ko,
hamma bari'ee gaaddisni baddutti deebi'i;

akkuma kuruphee yookaan akkuma korma gadamsaa
kan tulluuwwan irra jiruus ta'i.

3

- ¹ Ani halkan guutuu siree koo irra ciisee
nama garaan koo jaallatu sana nan barbaade;
ani isa nan barbaade; garuu isa hin arganne.
- ² Ani amma ka'een magaalaa keessa,
daandiiwwanii fi oobdiiwwan irra nan deema;
nama garaan koo jaallatu sana nan barbaada.
Kanaafuu ani isa nan barbaade;
garuu isa hin arganne.
- ³ Eegdonni utuu magaalaa keessa naanna'anuu na argan;
anis, "Michuu koo argitanii?"
jedheen isaan gaafadhe.
- ⁴ Ani akkuman xinnoo isaan bira darbeen,
nama lubbuun koo jaallattu sana nan argadhe.
Anis isa nan qabadhe; hamman mana haadha kootti,
diinqa haadha koo ishee garaatti na baatte sanaatti
ol galchutti gad isa hin dhiisne.
- ⁵ Yaa intallan Yerusaalem,
ani kuruphee fi borofaan isin kakachiisa;
hamma isheen ofumaan feete kaatutti,
jaalala hin tuttuqinaa yookaan hin dadammaqsinaa.
- ⁶ Isheen qumbii fi ixaana
urgooftuu daldalootaa hunda irraa hojjetameen urgeeffamtee
akkuma utubaa aaraa
gammoojjii keessaa ol baatu kun eenyu?
- ⁷ Kunoo! Siree Solomoon kan loltoota jaatama
warra Israa'el keessaa bebeekamoo ta'aniin marfamteerti.
- ⁸ Hundi isaanii goraadee hidhatu;
hundinuu muuxannoo waraanaa qabu;
tokkoon tokkoon isaanii goraadee isaanii
luqqeettuutti hidhatanii lola halkaniitiif qophaa'an.
- ⁹ Solomoon mootichi ofii isaatii gaarii tolfate;
innis muka Libaanon irraa tolfate.
- ¹⁰ Inni utubaa isaa meetiidhaan hojjete;
jala isaa garuu warqeedhaan hojjete.
Teessoon isaa kirrii diimaa dhiilgeedhaan hojjetame;
keessi isaas jaalala intallan Yerusaalemiitiin bareechamee hojjetame.
- ¹¹ Yaa intallan Xiyoon gad ba'aatii Solomoon Mooticha ilaalaa;
inni gonfoo haati isaa gaafa fuudha isaa,
guyyaa garaan isaa gammadetti,
mataa isaa irra keesseef sana kaa'ateera.

4

Isa

- ¹ Yaa bareedduu ko, ati akkam miidhagda!
Dinqii ati akkam bareedda!
Iji kee haguuggii kee duubaan gugee fakkaata.
Rifeensi mataa keetii akkuma karra re'ootaa
kan gaara Gili'aad irraa gad bu'uu ti.
- ² Ilkaan kee akkuma karra hoolotaa kan rifeensi irraa haadamee
dhiqamee ol dhufaa jiruu ti.
Tokkoon tokkoon isaanii lakkuu qabu;
isaan keessa maseenni tokko iyyuu hin jiru.
- ³ Hidhiin kee akkuma kirrii bildiimaa ti;
haasaan kee namatti tola.
Maddiin kee lamaan haguuggii kee keessatti
roomaanii tokkicha iddoo lamatti qoodame fakkaata.

- 4 Mormi kee gamoo Daawit
kan mi'a lolaa itti kuusuuf ijaarame sana fakkaata;
isa irratti gaachana kumatu rarraafama;
hundinuu gaachana loltootaa ti.
- 5 Guntunni kee lamaan akkuma ilmoolee kuruphee
kanneen lakkuu dhalatanii daraaraa keessa dheedanii ti.
- 6 Hamma bari'ee gaaddisni baduutti,
ani gara tulluu qumbiitii fi gara gaara ixaanaa nan dhaqa.
- 7 Yaa jaalallee ko, ati guutumaan guutuutti bareedduu dha;
ati mudaa tokko illee hin qabdu.
- 8 Yaa misirrittii ko, Libaanoonii na wajjin kottu;
Libaanoonii na wajjin kottu.
Fiixee Amaanaa irraa,
fiixee Seniir, fiixee Hermoon irraa gad bu'i;
holqa leencaa keessaa,
tulluu oolmaa qeerransaa irraas gad bu'i.
- 9 Yaa obboleettii ko, yaa misirrittii ko, ati qalbii koo hatteerta;
ati mil'uu ija keetii tokkoon,
faaya morma keetii tokkoon qalbii koo hatteerta.
- 10 Yaa obboleettii ko, yaa misirrittii ko,
jaalalli kee akkam nama gammachiisa!
Jaalalli kee daadhii wayinii caalaa, urgaan shittooo keetii
urgooftuu kam iyyuu caalaa akkam namatti tola!
- 11 Yaa misirrittii ko,
hidhiin kee akkuma dhaaba dammaa nadhii coccobsa;
aannanii fi dammi arraba kee jala jira.
Urgaan uffata keetii
akkuma urgaa Libaanoon.
- 12 Yaa obboleettii ko, yaa misirrittii ko,
ati akkuma iddoo biqiltuu cufamee ti;
ati burqaa dallaan itti ijaaramee fi madda chaappaan cufamee dha.
- 13 Biqiltuun kee iddoo roomaanii
kan ija filatamaa heenna fi naardoos qabuu dha;
14 akkasumas naardoosii fi marga urgaa'u,
qundhii fi qarafaa, muka ixaanaa gosa garaa garaa,
qumbii, argeessaa fi urgooftuu akka malee gaarii hunda qaba.
- 15 Ati burqaa biqiltuu keessaa ti;
bishaan boollaa yaa'u
kan Libaanoon irraa gad dhangala'uu dha.

Ishee

- 16 Yaa bubbee kaabaa dammaqi;
bubbeen kibbaas kottu!
Akka urgaan isaa naannoo hunda waliin ga'uuf
biqiltuu koo irratti bubbisi.
Michuun koo dhufee, biqiltuu seenee
ija filatamaa haa nyaatu.

5

Isa

- 1 Yaa obboleettii ko, misirrittii ko,
ani dhufee biqiltuu koo seeneera;
ani qumbii koo urgooftuu koo wajjin walitti qabadheera.
Ani dhaaba damma koo nadhii isaa wajjin nyaadheera;
daadhii wayinii koos aannan koo wajjin dhugeera.

Michoota

- Yaa michoota, nyaadhaa dhugaa;
jaalalas dhugaa quufaa.

Ishee

- 2 Ani rafeera; garaan koo garuu dammaqeera.
Mee dhaggeeffadhaa! Michuun koo balbala rurrukutaa jiraatii;
inni akkana jedha; "Yaa obboleettii ko, miidhagduu ko,

gugee koo kan mudaa hin qabne, balbala naaf bani.
 Mataan koo fixeensaan,
 rifeensi koos jiidha halkaniiitiin tortoreera.”
³ Ani uffata koo of irraa baaseera;
 akkamittan deebisee uffadha ree?
 Miilla koo dhiqadheera;
 akkamittan deebisee xureessa ree?
⁴ Michuun koo qaawwa balbalaatiin harka galche;
 lapheen koo isaaf ni dha'ate.
⁵ Ani michuu kootiif balbala banuuf nan ka'e;
 qabannoo balbalaa irrattis harka koo irraa qumbiin,
 quba koo irraa immoo qumbiin dhangala'aan coccobe.
⁶ Ani michuu kootiif balbala nan bane;
 michuun koo garuu achi hin jiru; inni deemeera.
 Deemuu isaattis garaan koo ni rifate.
 Ani isa nan barbaade; garuu hin arganne.
 Ani isa nan waame; inni garuu hin owwaanne.
⁷ Eegdonni utuu magaalaa keessa naanna'anuu na argan.
 Isaanis na reebanii na madeessan;
 warri dallaa eegan sunis wayyaa koo narraa baafatan!
⁸ Yaa intallan Yerusaalem,
 isin michuun koo yoo argitan
 jaalalaan dhukkubsachuu koo akka
 isatti naaf himtan isinan kakachiisa.

Michoota

⁹ Yaa ishee dubartoota hunda caalaa bareeddu,
 michuun kee maaliin warra kaan caala?
 Ati kan akkas nu kakachiiftu,
 michuun kee maaliin warra kaan caala?

Ishee

¹⁰ Michuun koo diimaa cululuqaa dha;
 inni namoota kuma kudhan keessaa ni mul'ata.
¹¹ Mataan isaa warqee akka malee qulqulluu dha;
 rifeensi mataa isaa jigaa dha;
 akkuma arraagessaas gurraacha.
¹² Iji isaa akkuma gugee burqaa bishaanii biraa
 kan aannaniin dhiqamee akka faayaatti kaa'atamuu dha.
¹³ Maddiin isaa akkuma madabii biqiltuu urgooftuu kan shitto baasuu ti.
 Hidhiin isaa akkuma daraaraa qumbiin irraa coccobuu ti.
¹⁴ Harki isaa ulee warqee
 kan biiraleedhaan faayeffamee dha.
 Dhagni isaa akkuma ilka arbaa
 kan sanpeeriin miidhagfamee dha.
¹⁵ Miilli isaa utubaa dhagaa adii
 kan baattuu warqee qulqulluu irraa hojjetame irra dhaabamee dha.
 Bifti isaa akkuma Libaanon,
 akkuma birbirsaa Libaanon filatamaa dha.
¹⁶ Dubbiin isaa waan hunda caalaa mi'aawaa dha;
 inni guutummaan guutuutti namatti tola.
 Yaa intallan Yerusaalem,
 kun michuu koo ti; kun michuu koo ti.

6

Michoota

¹ Yaa ishee dubartoota hunda caalaa bareeddu,
 michuun kee eessa dhage?
 Akka nu si wajjin barbaannuuf
 michuun kee garamitti gore?

Ishee

² Michuun koo iddoo biqiltuu keessa
 hoolota isaa tikfachuu fi
 daraaraa walitti qabachuuf jedhee gara iddoo biqiltuu,

lafa madabiin biqiltuu urgooftuuwwanii jirutti gad bu'eera.

³ Ani kan michuu koo ti; michuun koos kanuma koo ti;
inni daraaraa keessa dheechifata.

Isa

⁴ Yaa jaalallee ko, ati akkuma Tiirzaa bareedduu dha;
akkuma Yerusaalem namatti tolta;
akkuma loltoota faajjii baataniis ulfina qabda.

⁵ Ija kee narraa buqqisi;
inni na jeeqeeraatii.

Rifeensi mataa keetii akkuma karra re'oota
Gili'aad irraa gad bu'anii ti.

⁶ Ilkaan kee akkuma karra hoolotaa
kan dhiqamee ol dhufaa jiruu ti.

Tokkoon tokkoon isaanii lakkuu qabu;
isaan keessa maseenni tokko iyyuu hin jiru.

⁷ Maddiin kee lamaan haguuggii kee keessatti
roomaanii tokkicha iddoo lamatti qoodame fakkaata.

⁸ Mootittiiwwan jaatamni,
saajjatoon saddeettamni fi
dubarran lakkoobsa hin qabne qulqulluun
jiraachuu danda'u;

⁹ gugeen koo kan mudaa tokko iyyuu hin qabne sun kan addaa ti;
isheen haadha isheetiif intala tokkittii dha;
haadha ishee deesseefis filatamtuu dha.

Dubarran ishee arganii ishee eebbisan;
mootittiiwwanii fi saajjatoowwanis ishee jajan.

Michoota

¹⁰ Kan akka boruu baqaquutti mul'attu,
kan akka ji'aa bareeddu, kan akka biiftuu iftu,
kan akka urjiwwan tooraan yaa'anii ulfina qabdu kun eenyu?

Isa

¹¹ Anis daraaraa sulula keessatti dhi'oo biqile arguuf,
akka wayiniin hudhaa baase

yookaan akka roomaaniin daraare ilaaluuf
gara lafa gotiisaa ocholooniitti gad nan bu'e.

¹² Utuu ani hin hubatin,
lubbuun koo gaarii mootii saba kootii keessa na teessiste.

Michoota

¹³ Yaa Sulaamaaxittii deebi'i; deebi'i;
akka nu si ilaalluuf deebi'i; deebi'!

Isa

Isin akkuma nama sirba Mahanayyim ilaaluutti
maaliif Sulaamaaxittii ilaaltu?

7

¹ Yaa intala ilma mootii,
miilli kee kophee keessatti akkam bareeda!
Gudeedni kee miidhagaan sun dooqa gatii guddaa
kan ogeessi hojii harkaa tolche fakkaata.

² Handhuurri kee xoofoo geengoo
kan takkumaa daadhiin wayinii wal makaan keessaa
hin dhabamin fakkaata.

Mudhiin kee immoo tuullaa qamadii
kan daraaraadhaan marfame fakkaata.

³ Guntunni kee lamaan akkuma ilmoolee kuruphee
kanneen lakkuu dhalatanii ti.

⁴ Mormi kee gamoo ilka arbaa fakkaata.
Iji kee haroo Heshboon

kan karra Baatrabii biraa fakkaata.

Funyaan kee gamoo Libaanon
kan gara Damaasqoo gad ilaalu fakkaata.

⁵ Mataan kee akkuma Tulluu Qarmeloos gonfoo siif ta'a.

Rifeensi mataa keetii afaa mana mootii fakkaata;
mootiin dheerina isaatiin qabamee booji'ama.

⁶ Yaa jaalallee ati gammachuu kee wajjin
akkam bareedda; akkamis namatti tolta!

⁷ Dhaabni kee dhaaba meexxi fakkaata;
guntunni kees hurbuu ijaa fakkaata.

⁸ Anis, "Muka meexxi kana nan yaabbadha;
ija isaa nan qabadha" nan jedhe.

Guntunni kee akkuma hurbuu wayinii,
urgaan hafuura keetii akkuma urgaa hudhaa ti;

⁹ afaan kees akkuma daadhii wayinii kan akka malee gaarii ta'ee ti.

Ishee

Daadhiin wayinii suutumaan hidhii fi
ilkaan irra gad yaa'ee gara michuu koo haa dhaqu.

¹⁰ Ani kan michuu koo ti;
hawwiin isaas anumaaf.

¹¹ Yaa michuu ko, kottu mee gara baadiyyaa haa deemnu;
gandoota achii keessa haa bullu.

¹² Akka mukni wayinii hudhaa baafate,
akka daraaraan ija banatee fi
akka roomaaniin daraare ilaaluuf ganama bariin kaanee
gara iddoo dhaabaa wayinii haa deemnu;
anis achitti jaalala koo siif nan kenna.

¹³ Hudhaan urgaa isaa gad dhiisa;
yaa michuu ko, wanni ani siif kuuse,
haaraa fi moofaanis wanni filatamaan hundi
balbala keenya dura jira.

8

¹ Utuu ati akka obboleessa koo
kan harma haadha koo hodhee guddatee naa taatee!

Ani yoon alatti si arge sin dhungadhan ture;
namni tokko iyyuu na hin tuffatu.

² Anis si dura deemee mana haadha koo
ishee na barsiifte sanaatti sin geessa ture.
Akka ati dhugduufis daadhii wayinii kan mi'eeffame
cuunfaa roomaanii koos siifn kenna ture.

³ Harki isaa bitaa mataa koo jala jira;
harki isaa mirgaa immoo na hammata.

⁴ Yaa intallan Yerusaaalem, ani isin kakachiisa;
hamma isheen ofumaan feetee kaatutti
jaalala hin tuttuqinaa yookaan hin dadammaqsinaa.

Michoota

⁵ Kan michuu isheetti irkattee
gammoojjii keessaa ol dhufaa jirtu kun eenyu?

Ishee

Ani muka hudhaa jalatti sin kakaase;
haati kee achitti si ulfoofte;
achumattis ciniinsifattee si deesse.

⁶ Akkuma chaappaatti laphee kee irra,
akkuma chaappaatti irree kee irra na kaa'adhu;
jaalalli akkuma du'aa jabduudhaatii;
hinaaffaan isaas akkuma awwaalaa hamaa dha.

Inni akkuma ibidda balali'uu,
akkuma arraba ibidda jabaa boba'a.

⁷ Bishaan baay'een jaalala dhaamsuu hin danda'u;
lagnis dhiqee isa balleessuu hin danda'u.

Namni tokko qabeenya mana isaa hunda
yoo jaalalaaf kenne
qabeenyi sun guutumaan guutuutti ni tuffatama.

Michoota

8 Nu obboleettii xinnoo tokko qabna;
 isheen guntuta iyyuu hin baafne.
 Guyyaa isheen heerumaaf kadhatamtutti
 nu obboleettii keenyaaf maal goona?
 9 Utuu isheen dallaa dhagaa taatee
 nu silaa gamoo meetii ishee irratti ijaarra ture.
 Utuu isheen balbala taatee
 nu silaa birbirsaa ishee marsina.

Ishee

10 Ani dallaa dhagaa ti;
 guntunni koos akkuma gamoo ti.
 Kanaafuu ani fuula isaa duratti
 akkuma nama nagaa fidu tokkootti nan ilaalaman ture.
 11 Solomoon Ba'aal Haamoon keessaa iddoo dhaabaa wayinii qaba ture;
 innis iddoo dhaabaa wayinii ofii isaa qottuuwwanitti kiraa kennate.
 Tokkoon tokkoon isaaniis ija argatan irraa
 meetii saqilii kuma tokko fiduufii qabu ture.
 12 Iddoon dhaabaa wayinii kootii, kanuma koo ti;
 yaa Solomoon, saqiliin kumni sun sumaa;
 dhibbi lama immoo kan warra ija isaa eeganii ti.

Isa

13 Yaa ishee iddoo biqiltuu keessa jiraattu,
 michoonni sagalee kee dhaggeeffachaa jiru;
 mee anis nan dhaga'a!

Ishee

14 Yaa michuu ko, daffi kottu;
 akka kuruphee
 yookaan akka korma gadamsaa
 kan gaara urgooftuu irra burraaquu ta'i.

Raajii Isaayyaas

¹ Mul'ata Isaayyaas ilmi Amoos bara bulchiinsa Uziyaan, bara Yootaam, bara Aahaazii fi bara Hisqiyaas keessa waa'ee Yihuudaatii fi Yerusaaalem arge.

Saba Fincilaa Tokko

² Yaa Samiiwwan dhaga'aa! Yaa lafa dhaggeeffadhu!

WAAQAYYO akkana jedhee dubbateeraatii:

“Ani ijoollee horadheen guddifadhe;
isaan garuu natti fincilaniiru.

³ Qotiiyyoon gooftaa isaa,
harreenis gola gooftaa isaa ni beeka;
Israa'el garuu hin beeku;
sabni koo hin hubatu.”

⁴ Yaa saba cubbamaa,
uummata balleessaan itti baay'ate,
ilmaan warra waan hamaa hojjetuu,
ijoollee xuraa'ummaadhaan guutamte isiniif wayyoo!
Isaan WAAQAYYON dhiisaniiru;
Qulqullicha Israa'el sana tuffatanii
dugda isaanii itti garagalfataniiru.

⁵ Isin si'achi maaliif rukutamtu?
Maaliif fincila keessa jiraatu?
Mataan keessan guutuun miidhameera;
garaan keessan guutuunis dadhabeera.
⁶ Faana miilla keessaniitii hamma gubbee mataa keessaniitti,
fayyaa hin qabdan;
madaa fi dirmammuun, madaan dhiigu,
kan hin qulqulloofne yookaan hin maramne
yookaan zayitiidhaan hin laafne.

⁷ Biyyi keessan duwwaa hafteerti;
magaalaawwan keessan ibiddaan gubamaniiru;
alagoonni fuuluma keessan duratti
lafa qotiisaa keessan saamu;
akkuma waan ormi ishee saameettis onti.

⁸ Intalli Xiyoon akkuma da'annoo iddoo
dhaabaa wayinii keessaatti,
akkuma daasii lafa qotiisa buqqee keessaatti,
akkuma magaalaa marfame tokkootti dhiifamti.

⁹ Utuu WAAQAYYON Waan Hunda Danda'u
hambaa muraasa nuuf hambisuu baatee,
nu silaa akkuma Sodoom taanee,
Gomoraas fakkaanna turre.

¹⁰ Yaa bulchitoota Sodoom
dubbii WAAQAYYOO dhaga'aa;
yaa saba Gomoraa,
Seera Waaqa keenyaa dhaggeeffadhaa!

¹¹ WAAQAYYO akkana jedha;
“Baay'inni aarsaa keessanii anaaf maali?”
Ani aarsaa gubamu kan korbeeyyii hoolaatii fi
horii gabbifamanii baay'een qaba;
ani dhiiga korommii looniitti,
kan xobbaallaawwan hoolaattii fi re'eetti hin gammadu.

¹² Isin yommuu fuula koo duratti mul'achuuf dhuftan,

akka oobdii koo dhidhiittan
eenyutu isin irraa barbaade?

¹³ Kenna faayidaa hin qabne fiduu dhiisaa!
Ixaanni keessan na jibbiisiisa.

Ayyaana Baatii, Sanbataa fi yaa'ii keessan
jechuunis wal ga'ii keessan hamaa sana ani hin fedhu.

¹⁴ Ayyaana Baatii keessanii fi
ayyaanota keessan bebbeekamoo lubbuun koo ni jibbiti.

Isaan ba'aa natti ta'aniiru;
anis obsuu dadhabeera.

¹⁵ Yeroo isin kadhannaaf harka keessan bal'ifattan,
ani ija koo isinan dhokfadha;
yoo isin kadhaa baay'ee kadhattan illee ani hin dhaggeeffadhu.

Harki keessan dhiigaan guutameera!

¹⁶ Dhiqadhaatii of qulqulleessaa.
Hojii keessan hamaa sana fuula koo duraa balleessaa!
Yakka hojjechuus dhiisaa;

¹⁷ waan qajeelaa hojjechuu baradhaa!
Murtii qajeelaa barbaadaa;

warra hakuucame jajjabeessaa.
Ijoollaa abbaa hin qabneef falmaa;
haadha hiyyeessaatiif dhaabadhaa.

¹⁸ WAAQAYYO akkana jedha;
"Kottaa wal qorraa;
cubbuun keessan yoo akka bildiimaa ta'e iyyuu,
inni addaatee akka cabbii ni ta'a;
yoo akka alalaa diimate iyyuu,
akka suufii ni addaata.

¹⁹ Isin yoo fedhii qabaattanii ajajamtan,
waan lafti baaftu filatamaa ni nyaattu;
²⁰ garuu yoo diddaniif finciltan goraadeetu isin nyaata."
Afaan WAAQAYYOO waan kana dubbateeraatii.

²¹ Akka magaalaa amanamtuun sun
sagaagaltuu taate ilaalaa!
Isheen dur murtii qajeelaadhaan guutamtee
qajeelummaan ishee keessa jiraata ture;
amma immoo namoota nama ajjeesantu ishee keessa jiraata!

²² Meettiin kee ligidaa'era;
daadhiin wayinii kee filatamaan bishaaniin makameera.

²³ Bulchitoonni kee finciltoota;
michuu hattuuwwanii ti;
isaan hundinuu matta'aa jaallatu;
kennaas akka malee barbaadu.
Isaan ijoollaa abbaa hin qabneef hin falman;
himata haadha hiyyeessaa hin dhaggeeffatan.

²⁴ Kanaafuu Gooftaan, WAAQAYYON Waan Hunda Danda'u,
Jabaan Israa'el sun akkana jedha:
"Ani amajaajota koo irraa boqonnaa nan argadha;
diinota koos haaloo nan baafadha.

²⁵ Ani harka koo sitti nan deebisa;
ligidaa'ummaa kees akka malutti sirraa nan haqa;
xurii kee hundas sirraa nan balleessa.

²⁶ Ani akkuma bara durii abbootii murtii iddootti,
akkuma jalqabaatti gorsitoota kee illee siifin deebisa.
Ergasii ati magaalaa qajeelummaa,
magaalaa amanamtuu jedhamtee ni waamamta."

- 27 Xiyoon murtii qajeelaadhaan,
qalbii jijjiirrattoonni ishee immoo qajeelummaadhaan furamu.
- 28 Finciltoonni fi cubbamoondi garuu ni caccabu;
warri WAAQAYYON dhiisanis ni badu.
- 29 “Isin sababii muka qilxuu itti gammaddan sanaatiif ni qaanoftu;
sababii iddoo biqiltuu filattan sanaatiif immoo ni salphattu.
- 30 Isin akka qilxuu baalli irraa harca’ee,
akka iddoo biqiltuu bishaan hin qabnee ni taatu.
- 31 Namni jabaan akkuma huubaa,
hojiin isaas akkuma qaanqee ta’a;
isaan lachuu walumaan gubatu;
namni ibidda sana dhaamsus hin jiru.”

2

Tulluu WAAQAYYOO
2:1-4 kwf – Mik 4:1-3

- 1 Wanni Isaayyaas ilmi Amoos waa’ee Yihuudaatii fi Yerusaaalem arge kanaa dha:
- 2 Bara dhumaa keessa,
tulluun mana qulqullummaa WAAQAYYOO
tulluuwwan hunda keessaa ol dheeratee dhaabata;
inni tulluuwwan caalaa ol ol jedha;
saboondi hundinuu gara isaatti yaa’u.
- 3 Namoonni baay’een dhufanii akkana jedhu;
“Kottaa gara tulluu WAAQAYYOO,
gara mana Waaqa Yaaqoob ol baanaa.
Inni akka nu daandii isaa irra deemnuuf
karaa isaa nu barsiisa.”
- Seerri Xiyoon keessaa,
dubbiin WAAQAYYOO immoo
Yerusaaalem keessaa ni ba’a.
- 4 Inni saboota gidduutti murtii kenna;
namoota hedduudhaafis ni murteessa.
Isaan goraadee isaanii tumanii maarashaa tolfatu;
eeboo isaaniis tumanii haamtuu tolfatu.
Sabni tokko saba biraatti goraadee hin luqqifatu;
yookaan lolaaf nama hin leenjifatan.
- 5 Yaa mana Yaaqoob,
kottaa ifa WAAQAYYOO keessa deddeebinaa.
- Guyyaa WAAQAYYOO*
- 6 Kanaafuu saba kee,
mana Yaaqoob dhiifteerta.
Isaan bartee Ba’a Biiftuutiin guutamaniiru;
akkuma Filisxeemotaa falfala hojjetu;
duudhaa namoota ormaattis ni cichu.
- 7 Biyyi isaanii meetii fi warqeen guutamteerti;
qabeenyi isaanii dhuma hin qabu.
Biyyi isaanii fardeeniin guutamteerti;
gaariwwan isaaniis dhuma hin qaban.
- 8 Biyyi isaanii waaqota tolfamoodhaan guutamteerti;
isaan hojiidhuma harka isaanii,
waanuma qubni isaanii tolcheef sagadu.
- 9 Kanaafuu namni gad qabama;
ilmaan namaa gad deebifamu;
ati isaaniif hin dhiisin.
- 10 Argamuu WAAQAYYOO isa sodaachisaa fi
surraa ulfina isaa duraa, kattaa keessa lixu;
lafa keessas dhokadhu!

- 11 Iji nama of tuuluu gad qabama;
of jajuun namootaas gad deebifama;
gaafas WAAQAYYO qofatu ol ol jedha.
- 12 WAAQAYYOON Waan Hunda Danda'u
warra of jajuu fi warra of tuulu hundaaf,
warra ol ol jedhan hundaaf guyyaa tokko qaba;
isaanis gad deebifamu.
- 13 Inni birbirsa Libaanoon dheeraa fi
guddaa hundaaf, qilxuu Baashaan hundaaf,
14 tulluuwwan ol dhedheeroo hundaaf,
gaarran ol dhedheeroo hundaaf,
15 gamoo gurguddaa hundaaf,
dallaa dhagaadhaan jabeeffamee ijaarame hundaaf,
16 doonii daldalaa hundaa fi waan gatii guddaa qabu hundaaf
guyyaa murteeffate tokko qaba.
- 17 Of tuulummaan namaa gad qabama;
of jajuun namootaas gad deebifama;
gaafas WAAQAYYO qofatu ol ol jedha;
18 waaqonni tolfamoon guutummaan guutuutti ni barbadeeffamu.
- 19 Namoonni yommuu inni lafa raasuuf ka'utti,
sodaachisa WAAQAYYOOTII fi
surraa isaa ulfina qabeessa sana duraa
gara holqa kattaa keessaattii fi
boolla lafa keessaatti ni baqatu.
- 20 Gaafas namoonni waaqota isaanii tolfamoo
kanneen waaqeffachuuf jedhanii
meetii fi warqee irraa tolfatan sana
tuqaa fi simbira halkaniitiif darbatu.
- 21 Isaan yommuu inni lafa raasuuf ka'utti
sodaachisa WAAQAYYOOTII fi
surraa ulfina isaa duraa gara holqa guddaa
kattaawwan keessaattii fi baqaqaa kattaatti ni baqatu.
- 22 Nama du'a hin oolle,
kan hafuurri isaa funyaan irra jiru abdachuu dhiisaa.
Inni maalitti lakkaa'ama?

3

Murtii Yerusaalemii fi Yihuudaa Eeggatu

- 1 Kunoo Gooftaan,
WAAQAYYOON Waan Hunda Danda'u
Yerusaalemii fi Yihuudaa irraa
kennaa fi gargaarsa isaa
kan midhaaniitii fi kan bishaanii hunda irraa fudhata;
2 gootaa fi loltuu,
abbaa murtiitii fi raajii,
hooda himaa fi maanguddoo,
3 ajajaa shantamaatii fi nama ulfina qabu,
gorsituu, ogeessa hojii harkaatii fi
ogeessa waa dawweessuu beeku irraa fudhata.
- 4 "Ani dargaggoota qondaaltota isaanii nan godha;
ijoolleen isaan bulchu."
- 5 Namoonni wal hacuucu;
namni tokko nama kaanitti, ollaanis, ollaa isaatti ka'a.
Dargaggeessi jaarsatti,
tuffatamaanis kabajamaatti ka'a.
- 6 Namni tokko mana abbaa isaatti,

obboloota isaa keessaa tokko qabee,
 “Ati qoloo qabda; kanaafuu bulchaa nuuf ta’i;
 tuullaa waan diigamee kanattis itti gaafatama fudhu!” jedha.

⁷ Inni garuu gaafas,

“Ani furmaata ta’uu hin danda’u.

Ani nyaata yookaan uffata tokko illee mana kootii hin qabu;
 bulchaa sabaa na hin taasisinaa” jedhee iyya.

⁸ Yerusaaalem gatantaraa jirti;

Yihuudaan immoo kufteerti;

dubbii isaaniitii fi gochi isaanii WAAQAYYON mormuudhaan
 ulfina argamuu isaa xureessa.

⁹ Haalli fuula isaanii dhugaa isaanitti ba’a;

isaan akkuma Sodoom cubbuu isaanii ifa baasu;

isaan cubbuu isaanii hin dhokfatan.

Isaaniif wayyoo!

Isaan balaa guddaa ofitti fidaniiru.

¹⁰ Akka wannii kun isaaniif tolu qajeeltotatti himaa;

isaan bu’aa hojii isaanii nyaatu.

¹¹ Hamaadhaaf wayyoo!

Badiisni isatti ni dhufa!

Inni gatii harka isaa ni argata.

¹² Dargaggoonni saba koo cunqursu;

dubartoonni isaan bulchu.

Yaa saba ko, qajeelchitoonni keessan karaa irraa isin jal’isaniiru;

isaan irraa isin gorsaniiru.

¹³ WAAQAYYO murtii kennuuf taa’eera;

saba isaattis muruuf ka’eera.

¹⁴ WAAQAYYO akkana jedhee

maanguddootaa fi hooggantoota saba isaatti mura:

“Kan iddoo dhaabaa wayinii kootii balleesse isin;

wannii hiyyeeyyii irraa saamame mana keessan jira.

¹⁵ Isin saba koo caccabsuun keessan,

fuula hiyyeeyyiis butuchuun keessan maal gochuu keessan?” jedha Gooftaan,

WAAQAYYON Waan Hunda Danda’u.

¹⁶ WAAQAYYO akkana jedha;

“Dubartoonni Xiyyoon of tuulu;

isaan morma dheereffatanii yaa’u;

ijaanis ni waammatu;

faaya miilla isaanii kilillisaa cillaanfachaa deemu.

¹⁷ Kanaafuu Gooftaan mataa intallan Xiyyoonitti qaaqee ni fida;

WAAQAYYO gubbee mataa isaanii moleessa.”

¹⁸ Gaafas Gooftaan faaya miidhagina isaanii: albuu, marata mataa, faaya mormaa kan baatii fakkaatu, ¹⁹ amartii gurraa, bitawoo, haguuggii fuulaa, ²⁰ Marata mataa, faaya miillaa, sabbata, bilqaaxxii shittoo, kudhaama, ²¹ qubeelaa chaappaa, amartii funyaanii ²² wandaboo filatamaa, koofiyyaa, qoloo, korojoo harkaa, ²³ of ilaaleewwan, wayyaa quncee talbaa irraa hojjetame, gonfoo dubartootaatii fi uffata mormaa isaan irraa mulqa.

²⁴ Qooda urgaa, ajaa;

qooda sabbataa, funyoo;

qooda mataa sirriitti dha’amee, moluu;

qooda uffata miidhagaa, wayyaa gaddaa;

qooda miidhaginaa fokkisuuu dhufa.

²⁵ Namoonni keessan goraadeedhaan,

loltoonni keessanis lola keessatti dhumu.

²⁶ Karri Xiyyoon faarsitee boossi;

isheen ontee lafa teessi.

4

¹ Bara sana keessa dubartoonni torba
 nama tokkicha qabatanii,
 “Nu nyaatuma keenya nyaanna;
 uffata keenya uffanna;
 garuu maqaa keetiin haa waamamnu.
 Salphina keenya nurraa fageessi!” jedhuun.

Damee WAAQAYYOO

² Bara sana keessa dameen WAAQAYYOO bareedee ulfina qabaata; iji lafaas hambaa Israa’eliif waan isaan ittiin boonanii fi ulfina ta’a. ³ Warri Xiyoon keessatti hafan, warri Yerusaalem keessatti hambifaman, warri namoota Yerusaalem keessa jiraatan keessatti galmeeffaman hundi qulqulloota jedhamanii ni waamamu. ⁴ Gooftaan xurii dubartoota Xiyoon irraa dhiga; inni Yerusaalem irraa hafuura murtiitii fi hafuura ibiddaatiin dhiiga ni qulqulleessa. ⁵ Ergasiis WAAQAYYOO guutummaa Tulluu Xiyoonii fi warra achitti walitti qabaman hundaa irratti guyyaadhaan duumessa aaraa, halkanii immoo ifa arraba ibiddaa ni uuma; ulfina sana hunda irra dunkaanatu jiraata. ⁶ Innis ho’aa guyyaa irraa da’oo fi gaaddisa, iddoo bubbee hamaa fi bokkaa jalaa itti baqatanii fi iddoo itti dhokatan ta’a.

5

Faarfannaa Iddoo Dhaaba Wayinii

¹ Ani naman jaalladhu sanaaf,
 faarfannaa waa’ee iddoo dhaabaa wayinii isaa nan faarfadha:
 Michuun koo gaara gabbataa irraa
 iddoo dhaabaa wayinii qaba.

² Innis lafa sana qotee isa irraa dhagaa balleessee
 wayinii filatamaa isa irra dhaabe.

Qoxxii eegumsaa isa keessatti ijaaree
 boolla wayinii itti cuunfan illee qote.

Ergasii akka lafti qotiisaa sun ija gaarii kennu eeggate;
 inni garuu ija hamaa qofa kenne.

³ “Yaa jiraattota Yerusaalemii fi saba Yihuudaa,
 mee dubbii anaa fi iddoo dhaabaa wayinii koo
 gidduu jiruuf murtii kenna.

⁴ Waan ani godheef kana caalaa
 wannii iddoo dhaabaa wayinii kootiif godhamuu malu maali?
 Yeroo ani ija wayinii gaarii barbaadetti
 inni maaliif ija hadhaa’aa qofa naqate?

⁵ Ani amma waanan iddoo dhaabaa wayinii koo gochuuf jiru
 isinitti nan hima;
 ani dallaa isaa nan diiga;
 innis ni bada;

dallaa isaa dhagaa nan jigsaa;
 innis gad dhidhiitama.

⁶ Ani isa nan onsa;
 mukni wayinii isaas hin qoramu yookaan lafti isaa hin qotamu.
 Sokorruu fi qoraattiin achi keessatti guddata.
 Ani akka bokkaan itti hin roobneef duumessa nan ajaja.”

⁷ Iddoon dhaabaa wayinii
 WAAQAYYOO Waan Hunda Danda’uu mana Israa’el;
 namoonni Yihuudaa immoo
 iddoo biqiltuu inni itti gammaduu dha.

Inni murtii qajeelaa barbaade;
 garuu dhiiga dhangalaafamu arge;
 qajeelummaa barbaade;
 garuu iyya warra miidhamee dhaga’e.

Wayyoo fi Murtii

⁸ Isin warra hamma iddoon
 tokko iyyuu hin hafnetti mana irratti mana,

- lafa qotiisaa irratti lafa qotiisaa dabalattanii
 kophuma keessan biyya keessa jiraattaniif wayyoo!
⁹ WAAQAYYON Waan Hunda Danda'u utumaa ani dhaga'uu akkana jedhee dubbate:
 "Dhugumaan manneen hedduun ni onu;
 manneen gurguddaanii fi babbareedoon nama keessa jiraatu dhabu.
¹⁰ Iddoo dhaabaa wayinii cimdii kudhan irraa daadhii wayinii
 baadoosii tokko qofatu galfama;
 sanyii qoroosii tokkoo irraa midhaan iifii tokkoo qofatu galfama."
- ¹¹ Warra dhugaatii barbaachaaf ganamaan ka'an,
 kanneen hamma daadhii wayiniitiin machaa'anitti
 halkan dheereffataniif wayyoo.
- ¹² Isaan cidha isaanii irratti baganaa, kiraaraa fi dibbee,
 ulullee fi daadhii wayinii qabu;
 garuu hojii WAAQAYYOOTIF dhimma hin qaban;
 hojii harka isaatiifis ulfina hin kennan.
- ¹³ Kanaafuu sabni koo
 sababii hubannaa dhabeef booji'ama;
 namoonni isaanii bebbeekamoon beelaan,
 uummanni isaaniis dheebuudhaan dhumu.
- ¹⁴ Kanaafuu Sii'ool garaa isaa bal'ifatee
 afaan ofii isaa illee hamma malee banata;
 namoonni isaanii bebbeekamoonii fi uummanni isaanii
 warri wacanii fi warri gammadan hundis achi keessa bu'u.
- ¹⁵ Kanaafuu namni gad qabama;
 ilmaan namaa gad deebifamu;
 iji of tuultotaas lafa ilaala.
- ¹⁶ WAAQAYYON Waan Hunda Danda'u garuu
 murtii qajeelaa ofii isaatiin ol ol jedha;
 Waaqni qulqulluun qajeelummaa ofii isaatiin
 akka qulqulluu ta'e of argisiisa.
- ¹⁷ Yeroo sanatti hoolonni akkuma waan
 lafa dheeda isaanii keessa jiraniitti ni dheedu;
 xobbaallaawwan hoolaas iddoo sooreyyiin itti barbadaa'an keessa dheedu.
- ¹⁸ Warra funyoo gowwoomsaatiin cubbuu,
 funyoo gaariitiinis hammina harkisan,
- ¹⁹ kanneen, "Waaqni haa ariifatatu;
 akka nu arginuuf inni hojii ofii isaa haa saffisiisu,
 wanni kun haa dhi'aatu;
 akka nu beeknuufis
 karoorri Qulqullicha Israa'el haa dhufu"
 jedhaniif wayyoo.
- ²⁰ Warra hamaadhaan gaarii,
 gaariidhaan immoo hamaa jedhaniif,
 kanneen ifaan dukkana,
 dukkanaa immoo ifa jedhaniif,
 warra mi'aawaadhaan hadhaa'aa,
 hadhaa'aadhaan immoo mi'aawaa jedhaniif wayyoo.
- ²¹ Warra akka yaada isaaniitti ogeeyyii,
 akka ilaalcha isaaniitti immoo abshaala of se'aniif wayyoo.
- ²² Warra daadhii wayinii dhuguutti jabaa,
 dhugaatii walitti makuuttis goota ta'aniif,
- ²³ warra matta'aa fudhatanii yakkamaa gad lakkisaniif,
 murtii nama balleessaa hin qabnee immoo jal'isaniif wayyoo.
- ²⁴ Kanaafuu akkuma arrabni ibiddaa cidii lafa irraa arraabu,
 akkuma okaan ibiddaan gubatee badu sana hiddi isaanii ni tortora;
 daraaraan isaaniis akkuma awwaaraa bittinnaa'ee bada;
 isaan seera WAAQAYYOO Waan Hunda Danda'uu didanii

dubbii Qulqullicha Israa'el tuffataniiruutii.

²⁵ Kanaafuu dheekkamsi WAAQAYYOO saba isaatti ni boba'a;
harki isaa ol ka'ee isaan rukuta.
Tulluuwwan ni raafamu;
reeffi isaaniis akkuma kosii daandii irratti gatamee ta'a.

Kana hundaan illee dheekkamsi isaa hin qabbanoofne;
harki isaas akkuma ol kaafametti jira.

²⁶ Inni saboota fagoo jiraniif faajjii ol qaba;
warra moggaa lafaa jiranitti ni siiqsa.
Isaanis kunoo ariifatanii dafanii dhufu.

²⁷ Isaan keessaa namni tokko iyyuu hin dadhabu yookaan hin gufatu;
namni tokko iyyuu hin mugu yookaan hin rafu;
sabbanni mudhii isaanii hin laafu;
hidhaan kophee isaaniis hin citu.

²⁸ Xiyyi isaanii qaramaa dha;
iddaan isaanii hundi qopheeffameera;
kotteen fardeen isaanii akkuma dhagaa gara qabuu ti;
gommaan gaarii isaaniis akkuma bubbee hamaa ti.

²⁹ Aduun isaanii akkuma aduu leencaa ti;
isaan akkuma saafela leencaa adu;
yeroo waan adamsatan qabatanitti ni gururi'u;
isaan waan qabatan fudhatanii deemu;
namni isaan harkaa buusuu danda'us hin jiru.

³⁰ Gaafas isaan akkuma huursaa galaanaa
waan sana irraa huursu.

Namni tokko yoo biyya sana ilaale,
inni dukkanaa fi rakkina arga;
aduunis duumessaan dukkaneeffama.

6

Ergama Isaayyaas

¹ Bara Uziyaan Mootichi du'ee keessa, ani utuu Gooftaan teessoo ol dheeraa fi ulfina qabeessa irra taa'ee, handaarri uffata isaa mana qulqullummaa guutee jiruu nan arge.

² Isaa olittis suraafeloota tokkoon tokkoon isaanii qoochoo ja'a ja'a qabantu ture; isaanis qoochoo lamaan fuula isaanii haguuggatu; qoochoo lamaan miilla isaanii haguuggatu; qoochoo lamaan immoo ni barrisu turan. ³ Isaanis:

"WAAQAYYON Waan Hunda Danda'u
qulqulluu, qulqulluu, qulqulluu dha;

lafti hundinuu ulfina isaatiin guutamteerti"
jedhanii walitti lallabaa turan. ⁴ Sagalee isaaniitiin hundeen dhaaba balbalaa ni raafame; manni qulqullummaas aaraan guutame.

⁵ Anis akkana jedheen iyye; "Anaaf wayyoo! Ani bade! Ani nama hidhii xuraa'aa kan namoota hidhii xuraa'aa qaban gidduu jiraatuudhaatii; iji koo Mooticha, WAAQAYYOO Waan Hunda Danda'u argeeraatii."

⁶ Suraafeloota keessaa inni tokko cilee boba'u kan qabduudhaan iddoo aarsaa irraa fuudhe tokko harkatti qabatee gara kootti barrise. ⁷ Innis cilee sanaan afaan koo tuqee, "Ilaali, wanni kun hidhii kee tuqeera; balleessaan kee sirraa fuudhameera; cubbuun kees siif dhiifameera" jedhe.

⁸ Anis sagalee Gooftaa kan, "Ani eenyunan ergadha? Eenyutu nuuf deema?" jedhu nan dhaga'e.

Kana irratti ani, "Kunoo anuu jira. Na ergi!" nan jedhe.

⁹ Innis, "Dhaqiiiti akkana jedhii saba kanatti himi:
"Dhaga'uu ni dhageessu; garuu hin hubattan;
arguus inuma argitu; garuu hin qalbeeffattan!"

¹⁰ Qalbii saba kanaa doomsii;
gurra isaanii cuqqaali;
ija isaaniis cufi.

Yoo kanaa achii isaan ija ofii isaaniitiin arganii
gurra isaaniitiin dhaga'anii
qalbii isaaniitiin hubatanii deebi'anii fayyu."

¹¹ Ani, “Yaa Gooftaa, wanni kun hamma yoomiitti akkana ta’a?” nan jedhe.
 Innis akkana jedhee deebise:
 “Hamma magaalawwan diigamanii
 nama isaan keessa jiraatu dhabanitti,
 hamma manneen onanii lafti qotiisaas
 barbadaa’ee duwwaa hafutti,
¹² hamma WAAQAYYO nama hunda fageessee
 lafti sun guutumaan guutuutti dagatamutti ta’a.
¹³ Kudhan keessaa tokko yoo hafe iyyuu,
 biyyi sun amma illee deebitee onti.
 Garuu akkuma mukni laaftootii fi qilxuu,
 yoo muran gufuu isaa latu sana
 akkasuma sanyiin qulqulluun gufuu ta’ee achitti hafa.”

7

Mallattoo Amaanu’el

¹ Bara Aahaaz ilmi Yootaam, ilmi Uziyaan Mootii Yihuudaa turetti, Reziin mootichi Sooriyaatii fi Pheqaan ilmi Remaaliyaa mootichi Israa’el Yerusaalemiin loluuf itti duulan; garuu ishee mo’achuu hin dandeenye.

² Yeroo kanattis, “Sooriyaan Efreem wajjin tokkummaa uummatteerti” jedhanii mana Daawititti himan; kanaafuu garaan Aahaaziitii fi garaan saba isaa akkuma mukni bosonaa bubbeedhaan raafamu sana raafame.

³ Kana irratti WAAQAYYO Isaayyaasiin akkana jedhe; “Atii fi ilmi kee She’ar-Yaashuub dhuma jal’isii Haroo Ol aanuu kan karaa Lafa qotiisaa namicha wayyaa miicuutti geessu sana biratti Aahaazin simachuuf gad ba’aa. ⁴ Akkana jedhiin; ‘Of eeggadhu; cal’isi; hin sodaatin. Ati sababii gufuuwwan muka ibiddaa kanneen seeqaa jiran lamaan kanneeniitiif jechuunis sababii aarii Reziin kan Sooriyaatii fi aarii ilma Remaaliyaa hamaa sanaatiif jettee abdiin hin kutatin. ⁵ Sooriyaan, Efreemii fi ilmi Remaaliyaa akkana jedhanii badiisa keetiif mari’ataniiru; ⁶ “Kottaa Yihuudaatti duullaa; kottaa ishee kukkunnee gargar qooddanna; ilma Xaabi’eelis ishee irratti moosifannaa.” ⁷ Ta’us WAAQAYYO Gooftaan akkana jedha:

“Wanni kun hin raawwatu;

wanni kun hin ta’u;

⁸ mataan Sooriyaa Damaasqoodhaatii;
 mataan Damaasqoo immoo Reziinii dha.

Waggaa jaatamii shan keessatti,
 Efreem ni bittinnaa’a; saba tokko ta’uun isaas ni hafa.

⁹ Mataan Efreem Samaariyaa dha;
 mataan Samaariyaa immoo ilma Remaaliyaa ti.

Isin yoo amantii keessaniin jabaattanii dhaabachuu baattan;
 yoom iyyuu hin dhaabattan.”

¹⁰ WAAQAYYO amma illee akkana jedhee Aahaazitti dubbate; ¹¹ “Qilee akka malee gad fagoo keessatti yookaan samii akka malee ol fagoo keessatti, WAAQAYYON Waaqa kee mallattoo gaafadhu.”

¹² Aahaaz garuu, “Ani hin gaafadhu; WAAQAYYONIS hin qoru” jedhe.

¹³ Isaayyaasis akkana jedhe; “Yaa mana Daawit mee dhaga’aa! Isin obsa namaa qoruu isin hanqatee obsa Waaqa koo qortuu? ¹⁴ Kanaafuu Gooftaan mataan isaa mallattoo isiniif kenna: Kunoo durbi tokko ni ulfoofti; ilma ni deessi; Amaanu’el jettees isa moggaafi. ¹⁵ Inni yeroo waan hamaa lagatee waan gaarii filachuu beekutti itittuu fi damma nyaata. ¹⁶ Garuu utuu mucaan sun waan hamaa lagatee waan gaarii filachuu hin beekin dura biyyi mootota lamaan ati sodaatte sana ni ona. ¹⁷ WAAQAYYO erga Efreem Yihuudaa irraa citee jalqabee bara takkumaa ta’ee hin beekin tokko sitti, saba keetii fi mana Abbaa keetiitti ni fida; jechuunis mootii Asoor ni fida.”

Asoor; Meeshaa WAAQAYYOO

¹⁸ Bara sana keessa WAAQAYYO tisiisota burqaa laga Gibxi keessa jirani fi kanniisota biyya Asoor siiqsee waama. ¹⁹ Hundi isaanii dhufanii dhooqa lafaa keessa, holqa kattaa keessa, daggala qoraattiitii fi boolla bishaanii hunda keessa qubatu. ²⁰ Bara sana keessa Gooftaan haaduu laga gamaa kireeffateen jechuunis mootiin Asoor rifeensa mataa keessaniin rifeensa miilla keessaniitii fi areeda keessan ni haada. ²¹ Bara sana keessa namni tokko goromsa tokkoo fi hoolaa lama qabaata. ²² Sababii baay’ina aannan isaan kennaniif, inni itittuu sooratu qabaata. Namni biyya sanatti hafu hundinuu itittuu fi

damma nyaata. ²³ Bara sana keessa, lafa mukkeen wayinii kunni tokko kanneen meetii saqilii kuma baasan jiran hunda irra sokorruu fi qoraattii qofatu jiraata. ²⁴ Sababii lafti sun sokorruu fi qoraattiin guutameef, namoonni iddaa fi xiyya qabatan iyyuu achi dhaqu. ²⁵ Ati sababii sokorruu fi qoraattii sodaattuuf si'achi gara gaarran kanaan dura gasoon soqamaa turan sanaa hin dhaqxu; isaan lafa loon itti bobba'anii fi lafa hoolonni keessa burraaqan ta'u.

8

Isaayyaasii fi Ijoollee Isaa

¹ WAAQAYYO akkana naan jedhe; “Gabatee guddaa tokko fuudhiitii isa irratti, ‘Maheer-Shaalaal-Haash-Baaz’* jedhii qubee beekamaadhaan barreessi.” ² Anis akka isaan dhuga baatota amanamoo ta’anii Uuriyaa lubichaa fi Zakkaariyaas ilma Yeberekiyaa nan waammadha. ³ Anis raajittii bira nan ga’e; isheenis ulfoofttee ilma deesse. WAAQAYYO akkana naan jedhe; “Maqaa isaa Maheer-Shaalaal-Haash-Baaz jedhii moggaasi. ⁴ Utuu mucaan kun ‘Aabboo’ yookaan ‘Aayyoo’ jechuu hin beekin dura qabeenyi Damaasqootii fi boojiun Samaariyaa mootii Asooriin fudhatama.”

⁵ WAAQAYYO ammas akkana jedhee natti dubbate:

⁶ “Sabni kun bishaan Shiloo’aa
kan suuta yaa’u sana dhiisee
Reziinii fi ilma Remaaliyaatti
gammadeeraatii;

⁷ kanaafuu Gooftaan,
lola guddaa kan laga Efraaxiis jechuunis mootii Asoor
ulfina isaa hunda wajjin saba kanatti fida.
Lolaan sunis guutee bo’oo isaa irra yaa’ee
ededa isaa hunda irra dhangala’a.

⁸ Lolaan sunis hamma morma ga’utti guutee irra dhangala’ee
keessa darbuudhaan waan hundumaa haxaa’ee Yihuudaatti geessa.

Yaa Amaanu’el!†

Qoochoon isaa bal’ifamee guutummaa biyya keetii ni haguuga.”

⁹ Yaa saboota, burkutaa’aa!

Insi warri biyya fagoo jirtan hundi dhaggeeffadhaa.

Waraanaaf hidhadhaa; ta’us burkutaa’aa!

Waraanaaf hidhadhaa; ta’us burkutaa’aa!

¹⁰ Mari’adhaa; garuu faayidaa hin qabu;
karoorfadhaa; garuu fiixaan hin ba’u;
Waaqni nu wajjin jiraatii.

¹¹ WAAQAYYO harka isaa jabaa sanaan natti dubbatee akka ani karaa saba kanaa irra hin deemneef akkana jedhee na akeekkachiseeraatii:

¹² “Insi waan uummanni kun fincila jedhu

hundaan fincila hin jedhinaa;

waan isaan sodaatan hin sodaatinaa;
hin raafaminaa.

¹³ Kan isin akka qulqulluutti ilaalu qabdan
WAAQAYYOO Waan Hunda Danda’u tokkicha;
kan isin sodaachuu qabdan isuma;
kan isin hollachuufii qabdanis isuma.

¹⁴ Inni iddoo qulqulluu ta’a;
manneen Israa’el lamaaniif garuu
inni dhagaa nama gufachiisu,
kattaa nama kuffisu ta’a.

Saba Yerusaleemitti garuu
inni kiyoo fi futtaasaa ta’a.

¹⁵ Hedduun isaanii ni gufatu;
isaan kufanii caccabu;
futtaasaa seenanii qabamu.”

¹⁶ Dhuga ba’umsa kana walitti qabsiisi;

* 8:1 8:1 Maheer-Shaalaal-Haash-Baaz jechuun dafii booji’i; ariifadhuu saami jechuu dha. † 8:8 8:8 Amaanu’el jechuun Waaqni nu wajjin jira jechuu dha.

seera kanas barattoota koo gidduutti chaappaadhaan cufi.

¹⁷ WAAQAYYO mana Yaaqoob duraa
fuula isaa dhokfate sana nan eeggadha.

Ani isa nan amanadha.

¹⁸ Anii fi ijoolleen WAAQAYYO naa kenne kunoo ti. Nu Israa'el keessatti WAAQAYYOO
Waan Hunda Danda'u kan Tulluu Xiyyoon irra jiraatu sanaaf mallattoo fi fakkeenya.

Dukkanni Ifatti Jijjiirama

¹⁹ Yommuu namni tokko dhaqaatii ilaaltootaa fi eker dubbistoota kanneen hasaasaniif
fi guunguman waa gaafadhaa isiniin jedhutti sabni tokko Waaqa isaa gorsa gaafachuu
hin qabuu? Isaan waa'ee jiraattotaa maaliif warra du'an gaafatu? ²⁰ Akka seeraa fi
dhuga ba'umsa sanaatti jiraadhaa! Isaan yoo akka dubbii kanaatti dubbachuu baatan
ifa barii hin qaban jechuu dha. ²¹ Isaan rakkina guddaa fi beelaan biyya keessa jooru;
yommuu beela'anittis akka malee aaranii, ol ilaalani mootii isaanii fi Waaqa isaanii
abaaru. ²² Ergasis gara lafaa ilaalani rakkina guddaa, dukkanaa fi hurrii sodaachisaa
argu; isaanis dukkana hamaatti darbatamu.

9

Mucaan Nuuf Dhalateera

¹ Warri rakkina guddaa keessa turan garuu si'achi gadda keessa hin jiraatan. Inni
duraan biyya Zebuuloonii fi biyya Niftaalem gad deebise; gara fuulduraatti garuu
Galiilaa Namoota Ormaa kan Yordaanosiin gama, qarqara Daandii Galaanaa irra jiran
sana ni kabaja.

² Sabni dukkana keessa jiraatu ifa guddaa argeera;
warra biyya dukkana limixii keessa jiraataniifis ifni ba'eera.

³ Ati saba baay'iftee
gammachuu isaanii illee guddifteerta;
isaan akkuma uummanni yeroo
midhaan haamamutti gammadu sana,
akkuma namoonni yeroo boojuu qooddatanitti
gammadan sana fuula kee duratti ni ililchu.

⁴ Ati akkuma bara Midiyaanin mo'atame sanaa,
waanjo isaanitti ulfaate
soma gatiittii isaanii irraa
ulee cunqursaa isaanii illee caccabsiteerta.

⁵ Kopheen loltuun ittiin duulte hundi,
uffanni dhiiga keessa cuuphame hundi
ibiddaan gubama;

qoraan ibiddaas ta'a.
⁶ Mucaan nuuf dhalateera;
ilmi nuuf kennameera;
mootummaan gatiittii isaa irra jiraata.

Innis Gorsaa Dinqisiisaa, Waaqa Jabaa,
Abbaa Bara baraa, Mootii Nagaa
jedhamee ni waamama.

⁷ Babal'inni mootummaa isaatii fi
nagaan isaa dhuma hin qabu.
Innis murtii qajeelaa fi qajeelummaadhaan
hundeessaa jabeessaa dhaabuudhaan
yeroo sanaa jalqabee bara baraan
teessoo Daawit irra taa'ee mootummaa isaa bulcha.
Hinaaffaan WAAQAYYOO Waan Hunda Danda'uus
waan kana ni raawwata.

WAAQAYYO Israa'elitti Dheekkame

⁸ Gooftaan dhaamsa tokko Yaaqoobitti ergeera;
kunis Israa'el irra bu'a.

⁹ Uummanni hundi,
Efremii fi jiraattonni Samaariyaa waan kana ni beeku;
isaanis of tuuluu fi garaa of jajuun akkana jedhu;

¹⁰ "Xuubiiwwan diigamaniiru;
nu garuu dhagaa soofameen deebisnee ijaarra;

mukkeen harbuu murmuramaniiru;
nu garuu birbirsa iddoo buusna.”

¹¹ Kanaafuu WAAQAYYO amajaajota Reziin isaanitti jabeesse;
diinota isaanii illee isaanitti kakaase.

¹² Warri Sooriyaa gama ba’aatii,
Filisxeemonni immoo gama lixaatiin
afaan banatanii Israa’elin liqimsan.

Kana hundaan illee dheekkamsi isaa hin qabbanoofne;
harki isaas amma iyyuu akkuma ol kaafametti jira.

¹³ Sabni sun garuu gara isa isaan dha’e sanaatti hin deebine
yookaan WAAQAYYOO Waan Hunda Danda’u hin barbaaddanne.

¹⁴ Kanaafuu WAAQAYYO Israa’el irraa mataa fi eegee kuta;
damee meexxiitii fi shambaqqoo guyyuma tokkoon balleessa;

¹⁵ maanguddoonnii fi kabajamoonni mataa dha;
raajonni soba barsiisan immoo eegee dha.

¹⁶ Namoonni saba kana qajeelchan isaan dogoggorsu;
warri isaaniin qajeelfamanis karaa irraa badu.

¹⁷ Kanaafuu Gooftaan dargaggootatti hin gammadu
yookaan ijoollee abbaa hin qabnee fi

haadhota hiyyeessaatiif hin na’u;
namni hundinuu kan Waaqa hin sodaannee fi hamaadhaatii;
afaan hundinuu hamaa dubbata.

Kana hundaan illee dheekkamsi isaa hin qabbanoofne;
harki isaas amma iyyuu akkuma ol kaafametti jira.

¹⁸ Hamminni dhugumaan akka ibiddaa boba’a;
inni sokorruu fi qoraattii illee gubee balleessa,

bosona gobbuus ni qabata;
akkuma aara ol ba’uuttis ol ba’a.

¹⁹ Dheekkamsa WAAQAYYOO Waan Hunda Danda’uutiin
lafti ni gubatti;
namoonnis qoraan ibiddaa ta’u;
namni kam iyyuu obboleessa isaa oolchuu hin danda’u.

²⁰ Karaa mirgaatiin ni butatu;
garuu beela hin ba’an;

karaa bitaatiin ni nyaatu;
garuu hin quufan.

Tokkoon tokkoon isaanii foon aantee isaa nyaata;
²¹ Minaaseen Efreemin nyaata; Efreemis Minaasee nyaata;
isaan tokkummaadhaan Yihuudaatti garagalu.

Kana hundaan illee dheekkamsi isaa hin qabbanoofne;
harki isaas amma iyyuu akkuma ol kaafametti jira.

10

¹ Warra seera jal’aa baasan,
kanneen labsii cunqursaa labsaniif wayyoo;

² isaan murtii rakkattootaa jal’isu;
mirga hiyyeeyyii saba koos ni dhiibu;

haadhota hiyyeessaa boojuu godhatu;
ijoollee abbaa hin qabnes ni saamu.

³ Isin yeroo badiisni fagoodhaa dhufu
guyyaa adabbiitti maal gootu?

Gargaarsa argachuuf eenyutti baqattu?
Qabeenya keessan eessatti dhiiftu?

⁴ Warra booji’aman jala gugguufuu
yookaan warra ajjeefaman jalatti kufuu malee homtuu hin hafu.

Kana hundaan illee dheekkamsi isaa hin qabbanoofta;
harki isaas amma iyyuu akkuma ol kaafametti jira.

Murtii Waaqni Asooritti Murteesse

- ⁵ "Asooricha isa ulee aarii kootii ta'eef,
isa bokkuun dheekkamsa kootii harka isaa jiruuf wayyoo!
⁶ Ani akka inni isaan saamuu fi booji'uuf
akka inni akkuma dhoqqee karaa irraa lafatti isaan dhidhiituu
saba Waaqatti hin bulletti isa nan erga;
uummata na aarsuttis isa nan ajaja.
⁷ Garuu kun waan inni yaadu miti;
yaadni akkasiis garaa isaa keessa hin jiru;
kaayyoon isaa barbadeessuu dha;
saba baay'ees fixuu dha.
⁸ Innis akkana jedha; 'Ajajjoonni koo hundinuu mootota mitii?
⁹ Kaalnoon akkuma Karkemiish mitii?
Hamaati akkuma Arfaad mitii?
Samaariyaanis akkuma Damaasqoo mitii?
¹⁰ Akkuma harki koo mootummoota waaqota tolfamoo
kanneen fakkiiwwan soofamoo kan Yersaaleemii fi
Samaariyaa caalan qabe sana,
¹¹ ani waanan Samaariyaa fi fakkiiwwan ishee godhe sana
Yersaaleemii fi waaqota ishee tolfamoo hin godhuu?"
¹² Gooftaan yeroo Tulluu Xiyoon irrattii fi Yersaaleem keessatti hojii isaa hunda
fixatutti akkana jedha; "Ani sababii of jajuu garaa isaatii fi ilaalcha isaa kan of
tuulummaan guutame sanaatiif jedhee mooticha Asoor nan adaba. ¹³ Inni akkana
jedhaatii:
" 'Ani jabina harka kootiin waan kana hojjedheera;
ani sababiin hubannaa qabuuf,
ogummaa kootiin hojjedheera.
Ani daangaa sabootaa iddoodhaa buqqiseera;
qabeenya isaanii illee saameera.
Akkuma nama jabaa tokkoo ani mootota isaanii
of jala galfadheera.
¹⁴ Akkuma namni tokko man'ee simbiraa keessa harka kaa'u sana
anis harka koo qabeenya sabootaa keessa nan kaa'a;
akkuma namoonni hanqaaquu dagatame
walitti qaban sana, anis biyya hunda walitti nan qabe;
kan qoochoo hurgufate,
yookaan wacuuf afaan banate tokko iyyuu hin turre.' "
¹⁵ Qottoon nama ittiin waa murutti ni koora?
Yookaan wannii ittiin waa muran nama itti fayyadamutti of jajaa?
Kunis akka waan uleen tokko nama isa qabatutti of mirmirsuu ti;
yookaan akkuma bokkuun tokko akka waan muka hin ta'iniitti ol of guddisuu ti!
¹⁶ Kanaafuu Gooftaan, WAAQAYYON Waan Hunda Danda'u,
loltoota gagabbatan kanatti dhukkuba nama huqqisu ni erga;
ulfina isaa jalaanis ibiddi tokko
akkuma arraba ibiddaa ni qabsiifama.
¹⁷ Ifni Israa'el ibidda,
Qulqullichi isaanii sunis arraba ibiddaa ta'a;
ibiddi sun guyyuma tokkoon
qoraattii isaatii fi sokorruu isaa gubee balleessa.
¹⁸ Akkuma namni tokko yeroo dhukkubsatu huqqatu sana,
ibiddi sun ulfina bosonaa isaatii fi lafa qotiisaa gabbataa,
lubbuu fi foonis ni barbadeessa.
¹⁹ Mukkeen bosona isaa keessatti hafan waan akka malee muraasa ta'aniif
mucaan tokko galmeessuu ni danda'a.
Hambaa Israa'el
²⁰ Bara sana keessa hambaan Israa'el,
mana Yaaqoob keessaa warri hafan,
dhugumaan WAAQAYYO Qulqullicha Israa'el abdatu malee

- lammata isa isaan dha'e sana hin abdatan.
- ²¹ Hambaan tokko, hambaan Yaaqoob
gara Waaqa Jabaa sanaatti ni deebi'a.
- ²² Yaa Israa'el, yoo sabni kee
akkuma cirracha qarqara galaanaa ta'e iyyuu,
hambaa qofatu deebi'a.
Badiisni qajeelummaadhaan guutame labsameera.
- ²³ Gooftaan, WAAQAYYON Waan Hunda Danda'u
badiisa lafa hundatti labsame ni raawwata.
- ²⁴ Kanaafuu Gooftaan, WAAQAYYON Waan Hunda Danda'u akkana jedha:
"Yaa saba koo warri Xiyoon keessa jiraattan,
warra Asoor kanneen uleedhaan isin rukutan,
kanneen akkuma warra Gibxi bokkuu ol isinitti fudhatan hin sodaatinaa.
- ²⁵ Aariin ani isinitti aare dafee qabbanaa'a;
dheekkamsi koos isaan balleessuuf itti garagala."
- ²⁶ WAAQAYYON Waan Hunda Danda'u sun,
akkuma kattaa Hereeb biratti Midiyaanin qacceen garafe sana,
akkuma biyya Gibxi keessatti godhe sana,
ulee isaa bishaan irratti ol fudhata.
- ²⁷ Gaafas ba'aan isaanii gatiittii keessan irraa,
waanjoon isaaniis morma keessan irraa fuudhama;
waan isin akka malee gabbataniif waanjoon ni caccaba.
- ²⁸ Isaan gara Ayyati seenan;
Migroon keessa ba'an;
nyaataa fi hidhata isaaniis Mikmaas keessatti kuuftan.
- ²⁹ Isaan karaa qal'aa irra ba'anii,
"Nu Gebaa qubannee bulla" jedhan.
Raamaan ni sodaatti;
Gibe'aan Saa'olis ni baqatti.
- ³⁰ Yaa intala Galiim, iyyi!
Yaa Laayishaa dhaggeeffadhu!
Yaa Anaatoot deebii isheef kenni!
- ³¹ Maadmanaan baqataa jirti;
uummanni Geebiimis baqachuuf walitti qabama.
- ³² Isaan har'a Noob ga'u;
isaan tulluu Intala Xiyoonitti,
gaara Yerusaalemitti harka isaanii raasu.
- ³³ Kunoo Gooftaan, WAAQAYYON Waan Hunda Danda'u,
humna guddaadhaan dameewwan murmura;
mukkeen gurguddaan ni cicciramu;
mukkeen dhedheeroonnis gad qabamu.
- ³⁴ Inni bosona gobbuu gottoodhaan cira;
Libaanoonis fuula Waaqa Jabaa duratti kufa.

11

Damee Isseey

- ¹ Lataan tokko jirma Isseey irraa ni lata;
hidda isaa irraas dameen tokko ija naqata.
- ² Hafuurri WAAQAYYOO,
Hafuurri ogummaatii fi hubannaa,
Hafuurri gorsaatii fi humnaa,
Hafuurri beekumsaatii fi kan WAAQAYYON sodaachuu isa irra qubata;
- ³ inni WAAQAYYON sodaachuutti ni gammada.
- Inni waanuma iji isaa arguun murtii hin kennu;
yookaan waanuma gurra isaatiin dhaga'uun hin murteessu;
⁴ garuu nama rakkataaf qajeelummaadhaan murteessa;
hiyyeeyyii lafa irraatiifis murtii qajeelaadhaan murtii kenna.
Inni ulee afaan isaatiin lafa rukuta;

- hafuura afaan isaatii ba'uun hamoota ni fixa.
⁵ Qajeelummaan teepha mudhii isaa ti;
 amanamummaan inmoo sabbata mudhii isaa ti.
- ⁶ Yeeyyiin xobbaallaa hoolaa wajjin jiraata;
 qeerransi ilmoo re'ee bira ciisa;
 jabbiin, leencii fi horiin gabbataan walii wajjin bobba'u;
 mucaan xinnaan isaan bobbaasa.
- ⁷ Saan amaaqeta wajjin soorata;
 ilmaan isaanii wal cina ciciisu;
 leencis akka sangaa cidii nyaata.
- ⁸ Daa'imni boolla bofaa irra taphata;
 mucaan xinnaan boolla buutii keessa harka kaa'a.
- ⁹ Isaan tulluuwwan koo qulqulloota hunda irratti
 waa hin miidhan yookaan waa hin balleessan;
 akkuma bishaan galaana guutu sana
 lafti WAAQAYYON beekuudhaan guutamtiitii.
- ¹⁰ Bara sana keessa hiddi Isseey akkuma faajjiitti uummataaf dhaabata; saboonni gara
 isaatti walitti qabamu; lafti inni boqotus ulfina qabeessa ta'a. ¹¹ Gaafas Gooftaan yeroo
 lammaffaaf harka isaa diriirsee Asoor irraa, Gibxi Gadii irraa, Gibxi Ollii irraa, Itoophiyaa
 irraa, Eelaam irraa, Baabilon irraa, Hamaatii fi biyyoota bishaan gidduu galaanaa irraa
 hambaawwan saba isaa walitti qabata.
- ¹² Inni sabootaaf faajjii ol kaasee
 booji'amtoota Israa'el walitti qaba;
 inni roga laafaa afran irraa
 saba Yihuudaa kan bittinnaa'ee ture walitti qaba.
- ¹³ Hinaaffaan Efreem ni bada;
 diinonni Yihuudaas ni barbadeeffamu;
 Efreem gaafas Yihuudaatti hin hinaafu;
 yookaan Yihuudaan Efreemitti hin hammaatu.
- ¹⁴ Isaan karaa lixa biiftuutiin gatiittii Filisxeemitti gad bu'u;
 tokko ta'aniis uummata ba'a biiftuu saamu.
 Isaan Edoonii fi Mo'aabin qabatu;
 warri Amoonis isaan jalatti bulu.
- ¹⁵ WAAQAYYO guutummaan guutuutti,
 galoo galaana Gibxi ni gogsa;
 inni bubbee isaa kan nama waxaluun
 harka isaa laga Efraaxiis irra sochoosa.
 Akka namoonni kopheen ce'aniifis
 inni laga torbatti gargar isa qooda.
- ¹⁶ Akkuma gaafa isaan Gibxii ba'an
 Israa'eliif ta'e sana,
 hambaa saba isaa kan Asoor irraa hafeef
 karaan guddaan ni argama.

12

Faarfannaa Galataa

- ¹ Ati gaafas akkana jetta:
 "Yaa WAAQAYYO, ati natti aartee turte;
 aariin kees narraa deebi'eera;
 na jajjabeessiteertaatii sin galateeffadha.
- ² Dhugumaan Waaqni fayyina koo ti;
 ani isa nan abdadha; hin sodaadhus.
 WAAQAYYO, WAAQAYYO mataan isaa,
 jabinaa fi faarfannaa koo ti;
 inni fayyina koo ta'eera."
- ³ Isin burqaa fayyinaa keessaa
 gammachuudhaan bishaan waraabbattu.
- ⁴ Isin bara sana keessa akkana jettu:
 "WAAQAYYOOF galata galchaa; maqaa isaa waammadhaa;
 waan inni hojjete sabootatti beeksisaa;

akka maqaan isaa ol ol jedhe lallabaa.

⁵ Inni waan ulfina qabu hojjeteeraatii WAAQAYYON faarfadhaa;
wanni kun addunyaa hunda keessatti haa beekamu.

⁶ Yaa saba Xiyoon, Qulqulichi Israa'el
isin gidduutti guddaadhaatii
sagalee ol fudhadhaatii gammachuudhaan faarfadhaa.”

13

Raajii Baabiloniin Mormu

¹ Raajii waa'ee Baabilon kan Isaayyaas ilmi Amoos arge:

² Tulluu homaa itti hin biqilin irratti
faajjii ol kaasaatii isaanitti iyyaa;

akka isaan karra namoota
bebeekamootiin ol galaniif harkaan itti himaa.

³ Ani qulqulloota koo ajajeera;
akka isaan dheekkamsa koo hojii irra naa oolchaniif
ani loltoota koo kanneen mo'annoo kootti gammadan
waammadheera.

⁴ Waca tulluuwwan irraa,
kan akka tuuta guddaa tokkoo dhaggeeffadhaa!
Guungummii mootummootaa
kan saboota walitti qabamanii dhaggeeffadhaa!

WAAQAYYON Waan Hunda Danda'u
lolaaf jedhee loltoota qopheeffachaa jira!

⁵ Isaan biyya fagoodhaa
daarii samiiwwaniitii dhufan;
WAAQAYYOO fi mi'a lolaa kan dheekkamsa isaatiin
guutummaa biyyattii balleessuuf dhufu.

⁶ Waan guyyaan WAAQAYYOO dhi'aateef boo'aa;
guyyaan sun akkuma badiisa
Waaqa Waan Hunda Danda'u biraa ergameetti ni dhufa.

⁷ Kanaafuu harki hundinuu ni laamsha'a;
onneen nama hundaas ni baqa.

⁸ Sodaan isaan qabata;
dhukkubbii fi gaddi isaan qabata;
akkuma dubartii ciniinsuun qabeetti wixxirfatu.

Isaan rifatanii wal ilaalu;
fuulli isaanii akka ibiddaa diimata.

⁹ Kunoo guyyaan WAAQAYYOO,
guyyaan hamaan, dheekkamsaa fi aarii sodaachisaadhaan,
lafa onsuu fi cubbamoota ishee keessa jiraatan
barbadeessuuf ni dhufa.

¹⁰ Urjiiwwan samiitii fi tuunni isaanii
ifa isaanii hin kennan.

Aduun baatu ni dukkanoofti;
ji'is ifa ishee hin kennitu.

¹¹ Ani addunyaa kana sababii jal'ina isaatiif,
hamoota sababii cubbuu isaaniitiif nan adaba.

Ani of tuulummaa of jajjootaa nan balleessa;
of guddisuu gara jabeeyyii illee gadin deebisa.

¹² Ani akka namni warqee qulqulluu caalaa gati qabeessa,
warqee Oofiir caalaas muraasa ta'u nan godha.

¹³ Kanaafuu ani akka samiiwwan hollatan nan godha;
gaafa aariin isaa boba'utti
dheekkamsa WAAQAYYOO Waan Hunda Danda'uutiin
lafti iddoo isheetii ni raafanti.

¹⁴ Namni hundinuu akkuma kuruphee adamsamtuu,

- akkuma hoolota tiksee hin qabnee
gara saba isaatti deebi'a;
namni kam iyyuu biyya isaatti baqata.
- 15 Namni booji'ame hundinuu ni waraanaama;
kan qabame kam iyyuu goraadeedhaan du'a.
- 16 Daa'imman isaanii fuuluma isaanii duratti ni cicciram;
manneen isaanii ni saamamu;
niitonni isaanii humnaan gudeedamu.
- 17 Kunoo ani warra Meedee
kanneen meetii irraa dhimma hin qabne
warra wargeen hin gammachiifne jarattin kakaasa.
- 18 Idnaan isaanii dargaggoota fixxi;
isaan daa'immaniif hin na'an;
ijoolleefis garaa hin laafan.
- 19 Baabylon ulfinni moototaa,
miidhaginni of jaja warra Baabylon
akkuma Sodoomii fi Gomoraa
irree Waaqaatiin garagalfamti.
- 20 Namni ishee keessa hin qubatu;
yookaan dhaloota hunda keessatti
namni ishee keessa hin jiraatu;
namni Arabaa tokko iyyuu dunkaana isaa achi hin dhaabbatu;
tikseen tokko iyyuu bushaayee isaa achi hin boqochiifattu.
- 21 Garuu bineensonni bosonaa achi ciciisu;
waangoowwan mana ishee ni guutu;
urunguun achi jiraatti;
re'een diidaa achi keessa buburraaqxi.
- 22 Waraabessi da'annoowwan ishee keessaa yuusa;
waangoonis manneen ishee mimmiidhagoo kan mootummaa
keessaa iyyiti.
- Yeroon ishee ga'eera;
barri ishees hin dheeratu.

14

- 1 WAAQAYYO Yaaqoobiif garaa ni laafa;
inni amma illee Israa'elin filatee
biyya isaanii keessa isaan qubachiisa.
Ormoonni isaanitti dabalamu;
mana Yaaqoob wajjinis tokko ta'u.
- 2 Saboonni isaan fudhatu;
iddoo ofii isaaniitti isaan deebisu.
Manni Israa'el immoo akkuma hojjetoota dhiiraa fi dubartiitti
lafa WAAQAYYO keessatti dhaala godhanii isaan fudhatu.
Isaan boojitoota isaanii booji'anii
warra isaan hakuucanis bulchu.
- 3 Guyyaa WAAQAYYO itti dhiphina, rakkinnaa fi hojii hamaa isin itti garboomfamtanii
turtan sana jalaa isin boqochiisutti, ⁴ akkana jettee mootii Baabylonitti ni qoosta:
Cunqursichi akkamitti bade!
Aariin isaas akkamitti isa irraa gale!
- 5 WAAQAYYO ulee hamootaatii fi
bokkuu bulchitootaa,
- 6 kan dheekkamsa wal irraa hin cinneetiin
uummata rukute;
kan gara laafina tokko malee ari'ee
saboota dha'e sana caccabseera.
- 7 Lafti hundi boqonnaa fi nagaa argatti;
faarfachuuttis kaati.
- 8 Gaattiraawwanii fi birbirsawwan
Libaanoon iyyuu isinitti burraaqanii,

“Amma ati kufteerta;
namni tokko iyyuu nu muruuf hin dhufu” jedhu.

9 Sii’ool isheen gadii yeroo ati dhuffutti si simachuuf kaati;
isheen akka isaan si dubbisaniif hafuurota warra du’anii,
warra addunyaa irratti hooggantoota
turanii hunda dammaqsiteerti;
isheen warra mootota sabootaa turan hunda
teessoo isaanii irraa kaafti.

10 Isaan hundinuu deebisanii akkana jedhu;
“Atis akkuma keenya dadhabdeerta;
akkuma keenya taateerta.”

11 Ulfinni kee hundinuu, sagalee baganaa keetii wajjin
awwaala keessa buufameera;
ilmaan raammoo si jala afamanii
raammoon si haguugdi.

12 Yaa bakkalcha barii, ilma barii barraaqaa,
ati akkamitti samii irraa lafa dhoofta!

Ati kan duraan saboota gad qabde,
lafatti gad darbatamteerta!

13 Ati garaa keetti akkana jette;
“Ani samiitti olin ba’a;

ani urjiiwwan Waaqaatii olitti
teessoo koo olin baafadha;

ani tulluu wal ga’ii irra,
fixee tulluu qulqullichaa irra teessoo irra nan taa’a.

14 Ani fixee duumessootaa gara irraatti ol nan ba’a;
ani akka Waaqa Waan Hundaa Oliy ofin taasisa.”

15 Garuu ati sii’ool keessa,
boolla qilee keessa buufamteerta.

16 Warri si argan ija babaasanii si ilaalu;
akkana jedhaniis dinqisiifatu:

“Kun namichuma lafa sochoosee
akka mootummoonni raafaman godhe,

17 namicha addunyaa kana gammoojjii godhe,
kan magaalawwan ishee gaggaragalchee
akka warri booji’aman mana isaaniitti hin deebine godhe sanaa?”

18 Mootonni sabootaa hundi,
ulfinaan awwaala isaanii keessa ciciisaniiru.

19 Ati garuu akkuma damee jibbame tokkootti,
awwaala kee keessaa baafamtee gatamteerta;

ati warra ajjeefamaniin,
warra goraadeen waraanamaniin,
warra gara dhagaa boollaatti gad bu’aniin haguugamteerta.

Akkuma reeffaa miillaan dhidhiitamteerta;

²⁰ ati sababii biyya kee balleessitee
namoota kee fixxeef,
isaan gidduutti hin awwaalamtu.

Maqaan sanyii hamootaa
lammata hin dha’amu.

21 Sababii cubbuu abbootii isaaniitiif
iddoo ilmaan isaa itti qalaman qopheessaa;

isaan biyya dhaaluudhaaf,
magaalaawwan isaaniitiinis lafa guutuuf hin ka’an.

22 “Ani isaanitti nan ka’a,”
jedha WAAQAYYON Waan Hunda Danda’u.

“Ani Baabylon keessaa maqaa isheetii fi hambaa ishee,
ilmaan isheetii fi sanyii ishee nan balleessa”
jedha WAAQAYYO.

²³ “Ani iddoo urunguun keessa jiraattuu fi
lafa caffee ishee nan godha;
ani hartuu badiisaatiin ishee nan haxaa’a”
jedha WAAQAYYOON Waan Hunda Danda’u.

Raajii Asooriin Mormu

²⁴ WAAQAYYOON Waan Hunda Danda’u akkana jedhee kakateera;
“Dhugumaan akkuma ani duraan karoorfadhe sana
wannu kun ni ta’a;

akkuma ani yaade sanas ni dhaabata.

²⁵ Ani biyya koo keessatti Asoorota nan barbadeessa;
tulluuwwan koo irratti ani isa gad dhidhiita.

Waanjoon isaa saba koo irraa ni fuudhama;
ba’aan isaas gatiittii isaanii irraa ni bu’a.”

²⁶ Karoorri guutummaa addunyaatiif murtaa’e kanaa dha;
kun harka saboota hunda irratti diriirfamee dha.

²⁷ WAAQAYYOON Waan Hunda Danda’u
waan kana yaadeeraatii, eenyutu isa garagalcha?
Harki isaa diriirfameeraa;
eenyutu duubatti isa deebisuu danda’a?

Raajii Filisxeemotaan Mormu

²⁸ Raajiin kun bara Aahaaz mootichi du’e keessa dhufe:

²⁹ Yaa Filisxeemota, uleen isin dha’e waan cabeef,
isin hundinuu hin gammadinaa;

hidda bofa sanaa keessaa buutiitu ba’a;
iji isaa bofa darbatamaa summii qabu ni ta’a.

³⁰ Hiyyeessi gadadamaan iddoo itti bobba’u argata;
rakkataanis nagaadhaan ciisa.

Hidda kee garuu ani beelaan nan barbadeessa;
beellis hambaa kee ni fixa.

³¹ Yaa karra, ati boo’i! Yaa magaalaa, iyyi!
Filisxeemonni hundi baqaatii badaa!

Duumessi aaraa tokko karaa kaabaatiin ni dhufa;
raayyaa waraana isaa keessas kan citee hafu tokko iyyuu hin jiru.

³² Ergamoota saba sanaatiif
deebii akkamiitu kennamuu mala?

“WAAQAYYO jabeessee Xiyooinin dhaabeera;
ishee keessattis namoonni isaa kanneen miidhaman
da’annoo ni argatu.”

15

Raajii Mo’aabiin Mormu

16:6-12 kwf – Erm 48:29-36

¹ Raajii waa’ee Mo’aab:

Aari isheen Mo’aab keessaa diigamteerti;
halkanuma tokkottis baddeerti!

Qiir isheen Mo’aab keessaa diigamteerti;
halkanuma tokkottis baddeerti!

² Diiboona gara mana qulqullummaatti,
iddoowwan ol ka’aatti boo’uuf ol ba’a;
Mo’aabis Neboo fi Meedebaaf ni boo’a.

Mataan hundinuu haadamaa dha;
areedni hundinuu cicciramaa dha.

³ Isaan daandii irratti wayyaa gaddaa uffatu;
bantii manaatii fi waltajjii saba irratti
hundi isaanii ni boo’u;

- imimmaan isaaniis ni dhangalaasu.
⁴ Heshboonii fi Ele'aaleen ni iyyu;
 sagaleen isaaniis hamma Yaahaziitti fagaatee dhaga'ame.
 Kanaafuu loltoonni Mo'aab ni iyyu;
 lubbuun isaaniis ni rom'ite.
- ⁵ Garaan koo Mo'aabiif iyya;
 kooluu galtoonni ishee hamma Zo'aariitti,
 hamma Eglaati Sheelishiyaatti baqatu.
 Isaan boo'aa, gara Luuhiititti ol ba'u;
 karaa Hooronaayim irrattis,
 waa'ee badii isaanii faarsanii boo'u.
- ⁶ Bishaanonni Niimriim goganiiru;
 margis coollageera;
 biqiltuuwwan lafaa badaniiru;
 wannu magariisni tokko iyyuu hin hafne.
- ⁷ Kanaafuu isaan qabeenya argatanii kuufatan sana
 Laga Alaltuu irraan baatanii dabarfatu.
- ⁸ Iyyi isaanii hamma daarii Mo'aabitti dhaga'ame;
 wawwaachuun isaanii hamma Eglayiimitti
 faaruun boo'icha isaaniis hamma Be'eer Eeliimiinitti dhaga'ame.
- ⁹ Bishaanonni Diimon dhiigaan guutamaniiru;
 ani immoo waan kana caalu iyyuu Diimonitti nan fida;
 warra Mo'aab keessaa baqatan
 kanneen biyya sanatti hafanitti leenca nan erga.

16

- ¹ Seelaa, gammoojjii gama jirtu sana irraa
 bulchaa biyyattiitiif,
 gara tulluu Intala Xiyoonitti
 xobbaallaawwan hoolaa gibira ergaa.
- ² Akkuma simbira man'ee ishee keessaa ari'amtee
 asii fi achi fiigduu dubartoonni Mo'aabis
 malkaa laga Arnoonitti akkasuma ta'u.
- ³ "Gorsa nuuf kennaa; murtii murteessaa.
 Guyyaa saafaadhaan gaaddidduu keessan
 akkuma halkanii dukkaneessaa.
 Baqattootas dhoksaa;
 kooluu galtoota hin ganinaa.
- ⁴ Baqattoonni Mo'aab isin wajjin haa jiraatan;
 balleessituu irraa da'oo isaaniif ta'aa."
- Cunqursaan ni bada;
 badiisnis ni hafa;
 warri nama miidhan lafa irraa badu.
- ⁵ Teessoon jaalalaan hundeeffama;
 mana Daawit keessaa namni murtii kennuu irratti
 murtii qajeelaa barbaadu,
 kan waan qajeelaa hojjechuuf ariifatu tokko
 amanamummaadhaan teessoo sana irra ni taa'a.
- ⁶ Nu of tuulummaa Mo'aab,
 of guddisuu fi kooruu ishee,
 of tuuluu fi addagee ta'uu ishee dhageenyerra;
 of jajuun ishee garuu faayidaa hin qabu.
- ⁷ Kanaafuu Mo'aabonni ni boo'u;
 isaan tokkummaadhaan Mo'aabiif boo'u.
 Namoota Qiir Hareeshetiif
 faarsanii boo'uudhaan gaddu.

- ⁸ Lafti qotiisaa Heshboon,
mukni wayinii Sibimaas coollageera.
Bulchitoonni sabootaa
mukkeen wayinii filatamoo
kanneen duraan Ya'izeerin ga'anii
gara gammoojjiitti babal'atan dhidhiitaniiru.
Lataan isaanii dheeratee hamma galaanaatti diriire.
- ⁹ Kanaafuu ani akkuma Ya'izeer boosse sana,
mukkeen wayinii Sibimaatiif nan boo'a.
Yaa Heshboon, yaa Ele'aalee,
ani imimmaan kootiin sin jiisa!
Ililleen yeroo midhaan siif ga'eetii fi
gammachuun yeroo midhaan siif
haamamu ture sun hafeera.
- ¹⁰ Ililchuu fi gammaduun iddoo biqiltuu keessaa badaniiru;
namni tokko iyyuu iddoo dhaabaa wayinii keessatti
hin faarfatu yookaan hin ililchu:
sababii ani ilillee balleesseef
namni iddoo wayinii itti cuunfanitti wayinii dhidhiitu tokko hin jiru.
- ¹¹ Garaan koo akkuma baganaa faarsee Mo'aabiif boo'a;
keessi koos Qiir Hareeshetiif boo'a.
- ¹² Mo'aab yoo iddoo ol ka'aatti mul'atte,
isheen ofuma dadhabsiifti;
yoo kadhannaaf gara iddoo qulqulluu ishee dhaqxee
kunis faayidaa tokko illee hin qabu.
- ¹³ Kun dubbii WAAQAYYO duraanuu waa'ee Mo'aab dubbatee dha. ¹⁴ WAAQAYYO garuu
amma akkana jedha: "Waggaa sadii keessatti, ulfinni Mo'aabii fi namoonni ishee
hedduun hundi akkuma hojjetaan tokko guyyaa isaa lakkaa'atu sana ni tuffatamu;
kanneen hafanis akka malee muraasaa fi dadhaboo ta'u."

17

Raajii Damaasqoodhaan mormu

- ¹ Raajii Damaasqoodhaan mormu:
"Kunoo, Damaasqoon tuullaa diigamte taati malee
si'achi magaalaa hin taatu.
- ² Magaalaawwan Aro'eer ni onu;
bushaayeen achi ciciisu;
wanni isaan sodaachisu tokko iyyuu hin jiru.
- ³ Magaalaan jabeeffamtee ijaaramte Efreem keessaa,
humni mootummaas Damaasqoo keessaa ni bada;
hambaan Sooriyaa akka ulfina Israa'elootaa ta'a"
jedha WAAQAYYON Waan Hunda Danda'u.
- ⁴ "Bara sana keessa ulfinni Yaaqoob gad deebi'a;
furdinni dhagna isaas ni huqqata.
- ⁵ Akkuma namni midhaan haamu tokko,
midhaan dhaabbatu walitti qabee irree isaatiin haamu sana
kunis akkuma yeroo namni tokko
Sulula Refaayim keessaa qarmii funaanuu ni ta'a.
- ⁶ Ta'us akkuma yeroo mukni ejersaa dha'amuutti,
qarmii guuruun amma iyyuu jira;
fiixee ol aanu irratti gumaa lama yookaan sadiitu hafa;
damee gad aanu irratti gumaa afur yookaan shantu hafa"
jedha WAAQAYYO, Waaqni Israa'el.
- ⁷ Gaafas namoonni gara Uumaa isaanii ilaalu;
ija isaaniis gara Qulqulicha Israa'el deebifatu.
- ⁸ Isaan gara iddoo aarsaa,
gara hojii harka isaanii hin ilaalan;
isaan galma waaqeffannaa Aasheeraa,
iddoo aarsaa ixaanaa kan quba isaaniitiin tolchanis
wayittuu hin lakkaa'an.

⁹ Gaafas magaalaawwan jajjaboon isaan sababii Israa'elootaatiif keessaa ba'an sun akkuma lafa bosona keessaa kan namni dhiisee deemee ta'u. Hundi ni onu.

¹⁰ Ati Fayyisaa kee, Waaqa irraanfatteerta;
ati kattaa, da'oo kee hin yaadanne.

Kanaafuu yoo biqiltuu akka malee gaarii dhaabbattee
muka wayinii kan alaa dhufe biqilfatte iyyuu,

¹¹ yoo guyyuma dhaabde sana akka inni biqilu goote iyyuu
ganama yeroo dhaabdetti akka inni daraaru goota;
garuu guyyaa dhukkubaa fi dhibee hin fayyineetti
wayinichi homaa hin fayyadu.

¹² Saboota baay'ee kanneen aaraniif wayyoo!
Isaan akkuma galaana aaruutti aaru!

Saboota wacaniif wayyoo!
Isaan akkuma bishaan guddaan huursutti huursu.

¹³ Saboonni akkuma huursaa bishaan cabsee deemuu
yoo huurse iyyuu yommuu inni isaanitti dheekkamu
isaan baqatanii badu;

akkuma habaqaan tulluu irraa fuula bubbee dura ari'amu,
akkuma awwaarri fuula bubbee hamaa duraa bittinnaa'u
isaan ni bittinnaa'u.

¹⁴ Galgala sodaan akkuma tasaa isaan qabatti!
Isaan utuu lafti hin bari'in ni dhabamu!

Kun qooda warra nu booji'ee,
hiree warra nu saamee ti.

18

Raajii Itoophiyaadhaan Mormu

¹ Biyya lageen Itoophiyaatiin gamaa
kan qoochoo isheetiin shaakkiftuuf wayyoo;

² isheen galaana irra,
bidiruu dhallaadduutiin ergamoota bishaan irra ergiti.

Yaa ergamoota ariifattoota,
gara saba dhedheeroo kanneen gogaan isaanii lallaafuu,
gara saba fagoo fi dhi'oottis sodaatamuu,
saba jabaa fi afaan isaa hin beekamne
kan biyyi isaanii lageeniin gargar qoodamte sanaa dhaqaa.

³ Isin uummanni addunyaa hundi,
warri lafa irra jiraattan yeroo mallattoon gaara irratti
ol qabamu ni argitu;
yeroo malakanni afuufamus
inuma dhageessu.

⁴ WAAQAYYO akkana naan jedhe:
"Ani akkuma ho'a ifa aduu keessatti calaqqisuu,
akkuma duumessa fixeensaa kan ho'a yeroo midhaan galchaniitti
cal'isee iddoo jireenya kootii nan ilaala."

⁵ Haamaa midhaaniitiin dura, yeroo hudhaan daraaree
daraaraan sunis ija wayinii bilchaatee ta'utti
inni billaa ittiin qoraniin lataa isaa ni ciccira;
damee babal'ates irraa murmuree ni balleessa.

⁶ Isaan hundinuu allaattii tulluu kan waa adamsuu fi
bineensota bosonaatiif dhiifamu;
allaattiin bona guutuu,
bineensonni bosonaas ganna guutuu isaan nyaatu.

⁷ Gaafas saba dhedheeroo kanneen gogaan isaanii lallaafu irraa,
saba fagoo fi dhi'oottis sodaatamu irraa,
saba jabaa fi afaan isaa hin beekamne
kan biyyi isaanii lageeniin gargar qoodamte irraa
WAAQAYYOO Waan Hunda Danda'uuf kennaan ni fidama;

kennaan sunis gara Tulluu Xiyoon, iddoo Maqaan WAAQAYYO Waan hunda danda'u jiraatutti ni fidama.

19

Raajii Gibxiin Mormu

- ¹ Raajii Gibxiin mormu:
kunoo WAAQAYYO duumessa
saffisaa yaabbatee gara Gibxi dhufaa jira.
Waaqonni Gibxi tolfamoon fuula isaa duratti hollatu;
garaan warra Gibxis isaan keessatti baqa.
- ² “Ani warra Gibxi walitti nan naqa;
obboleessi obboleessa isaa, ollaan ollaa isaa,
magaalaan tokko magaalaa kaan,
mootummaan is mootummaa kaan lola.
- ³ Hafuurri warra Gibxi isaan keessatti jeeqama;
anis karoora isaanii nan fashaleessa;
isaanis waqota tolfamoo fi hafuurota warra du’anii,
ilaaltotaa fi eker dubbistoota gorsa gaafatu.
- ⁴ Anis dabarsee warra Gibxi
humna gooftaa garaa jabaatu tokkootti nan kenna;
mootiin hamaan tokkos isaan ni bulcha” jedha Gooftaan,
WAAQAYYON Waan Hunda Danda’u.
- ⁵ Bishaanonni galaanaa ni gogu;
lagni isaas ni hir’ata; ni gogas.
- ⁶ Burqaawwan isaa ni ajaa’u;
lageen Gibxiis qal’atanii gogu.
Shambaqqoo fi dhallaadduun ni coollagu;
⁷ biqiltuuwwan ededa Abbayyaa,
kanneen qarqara lagichaa jiranis ni coollagu.
Wanni laga Abbayyaa biratti facaafame hundi ni goga;
bubbeedhaan fudhatama; deebi’ees hin argamu.
- ⁸ Qurxummii qabdoonni,
warri hokkoo Abbayyaa keessa buusan
hundi aadanii boo’u;
warri kiyyoo bishaanitti darbatanis ni dadhabu.
- ⁹ Warri quncee talbaa iddame qopheessan,
wayyaa dhooftannis abdiin kutatu.
- ¹⁰ Warri wayyaa dha’an mataa buusu;
warri mindaadhaan hojjetan hundis ni gaddu.
- ¹¹ Qondaaltonni Zoo’aan gowwoota;
gorsitoonni Fara’oon ogeeyyiinis
gorra faayidaa hin qabne kennu.
Isin akkamitti Fara’ooniin,
“Ani namoota ogeeyyii keessaa tokkoo dha;
ani barataa mootota durii ti” jechuu dandeessu?
- ¹² Namoonni keessan ogeeyyiin amma eessa jiru?
Mee isaan waan WAAQAYYON Waan Hunda Danda’u
Gibxiin mormuudhaan karoofate;
isinni haa himan; haa beeksisanis.
- ¹³ Qondaaltonni Zoo’aan gowwoota ta’aniiru;
bulchitoonni Memfiis gowwoomfamaniiru;
gurguddoonni saba ishee
Gibxiin karaa irraa jal’isaniiru.
- ¹⁴ WAAQAYYO hafuura nama hadoochu isaanitti dhangalaaseera;
isaan akkuma machaa’aan tokko hoqqisaa gatantaru sana
biyya Gibxi waan isheen hojjetu hunda keessatti
gatantarsan.

¹⁵ Wanni mataan yookaan eegeen, dameen meexxii
yookaan shambaqoon,

Gibxiif gochuu danda'an tokko iyyuu hin jiru.

¹⁶ Bara sana warri Gibxi akka dubartii ta'u. Harka ol ka'e kan WAAQAYYON Waan Hunda Danda'u isaanitti ol fudhatu sana arganii sodaan ni hollatu. ¹⁷ Biyyi Yihuudaas warra Gibxi ni naasisa; namni maqaan Yihuudaa biratti dha'amu hundinuu sababii waan WAAQAYYON Waan Hunda Danda'u isaanitti karoofachaa jiru sanaatiif ni na'a.

¹⁸ Gaafas biyya Gibxi keessatti magaalaa'wan shan afaan Kana'aan dubbatu; isaanis WAAQAYYON Waan Hunda Danda'uuf amanamoo ta'uuf ni kakatu. Isaan keessaa tokko Magaalaa Badiisaa jedhamti.

¹⁹ Gaafas wiirtuu Gibxi keessatti iddoon aarsaa tokko WAAQAYYOF ni hojjetama; daangaa biyyattii irrattis siidaan tokkoo WAAQAYYOF ni dhaabama. ²⁰ Kunis biyya Gibxi keessatti WAAQAYYON Waan Hunda Danda'uuf mallattoo fi dhuga ba'umsa ta'a. Yeroo isaan sababii cunqursitoota isaanitiif gara WAAQAYYOTTI iyyatanitti, inni fayyisaa fi baraaraa tokko ergeefii isaan oolcha. ²¹ Kanaafuu WAAQAYYO warra Gibxitti of beeksisa; isaanis gaafas WAAQAYYON ni beeku. Isaanis qalmaa fi kennaa midhaaniitiin waaqeffatu; WAAQAYYOFIS ni wareegu; wareega sanas ni baafatu. ²² WAAQAYYO biyya Gibxi ni rukuta; rukutees ni fayyisa. Isaan gara WAAQAYYOTTI ni deebi'u; innis kadhannaa isaanitiif deebii kennee isaan fayyisa.

²³ Gaafas Gibxii hamma Asooritti karaa guddaa tokkotu jiraata. Warri Asoor gara Gibxi, warri Gibxis gara Asoor ni dhaqu. Warri Gibxii fi warri Asoor walii wajjin ni waaqeffatu. ²⁴ Israa'el bara sana keessa Gibxii fi Asooritti dabalantee sadaffaa taati; kunis lafa irratti eebba ta'a. ²⁵ WAAQAYYON Waan Hunda Danda'us, "Gibxi sabni koo, Asoor hojiin harka kootii fi Israa'el dhaalli koo haa eebbifaman" jedhee isaan eebbisa.

20

Raajii Gibxii fi Itoophiyaadhaan Mormu

¹ Bara ajajaan muummichi Sargoon mooticha Asooriin ergame sun gara Ashdood dhufee lolee ishee qabate sana keessa, ² yeroodhuma sanatti WAAQAYYO karaa Isaayyaas ilma Amoosiitiin dubbate. Innis, "Uffata gaddaa dhagna kee irraa, kophees miilla kee irraa baasi" jedheen. Innis akkasuma godhe; qullaa fi miilla duwwaa asii fi achi deeme.

³ Kana irratti WAAQAYYO akkana jedhe; "Akkuma garbichi koo Isaayyaas, akka Gibxii fi Itoophiyaaf mallattoo fi akeekkachiisa ta'uuf jedhee waggaa sadii qullaa fi miilla duwwaa deeme sana, ⁴ akkasuma mootiin Asoor booji'amtota Gibxii fi baqattoota Itoophiyaa dargaggeessaa fi jaarsa, qullaa fi miilla duwwaa hambisee teessuma isaanii illee qullaa godhee fudhatee deeme; kun warra Gibxiitiif qaanii dha. ⁵ Warri Itoophiyaa amanatanii Gibxiin boonan ni sodaatu; ni qaana'us. ⁶ Gaafas warri qarqara galaanaa irra jiraatan akkana jedhu; 'Warra nu itti irkanne, warra mooticha Asoor jalaa nu baasu jennee gargaarsaaf itti baqanne sana irra waan ga'e mee ilaalaa! Yoos nu akkamitti jalaa ba'uu dandeenya?' "

21

Raajii Baabiloniin Mormu

¹ Raajii Gammoojjii Galaana bira jirtuun mormu:
Akkuma bubbleen hamaan biyya kibbaa haxaa'u sana,
weeraraan tokko gammoojjiiidhaa,
biyya sodaachisaa keessaa ni dhufa.

² Mul'anni hamaan tokko natti mul'ateera:
gantuun ni ganti; saamtuunis ni saamti.
Yaa Eelaam, ol ba'! Yaa Meedee marsii qabi!
Ani aaduu isheen fidde hunda nan xumura.

³ Kana irratti dugdi na cite;
akkuma dubartii ciniinsifattuu muddamni na qabe;
ani waanan dhaga'een nan holladhe;
waanan argeenis nan raafame.

⁴ Qalbiin koo ni raafame;
sodaan na hollachiise;
dimimmisni ani hawwe sun
sodaatti na jalaa geeddarama.

⁵ Isaan maaddii qopheessu;
afaa diriirsu;

ni nyaatu, ni dhugu!

Isin qondaaltonni ka'aa;
gaachanas zayitii dibaa.

⁶ Gooftaan akkana naan jedha:

“Dhaqiitii eegduu tokko ramadi;

innis waan argu haa himu.

⁷ Inni yommuu warra farda yaabbatan

kanneen lama lamaan yaa'an,

warra harree yaabbatan

yookaan warra gaala yaabbatan argutti,

haa dammaqu;

guutumaa guutuutti haa dammaqu.”

⁸ Eegduun sunis akkana jedhee iyye;

“Yaa gooftaa ko, ani guyyuma guyyaan

qooxii eegumsaa irra nan dhaabadha;

halkan hundas ani hojii koo irra nan tura.

⁹ Kunoo, warri farda yaabbatan,

lama lamaan dhufaa jiru;

inni akkana jedhee deebise:

‘Baabilon jigdeerti; jigdeerti!

Fakkiiwwan waaqota ishee hundinuu

burkutaa'anii lafa dha'aniiru!’”

¹⁰ Yaa saba koo warra oobdii midhaanii irratti dha'amtan,

ani waan WAAQAYYON Waan Hunda Danda'u,

Waaqa Israa'el irraa dhaga'ee isinittin hima.

Raajii Edoomiin mormu

¹¹ Raajii Duumaan mormu:

Namni tokko See'iirii na waamee,

“Yaa eegduu, halkan kun bari'uuf hammamtu hafe?

Yaa eegduu, halkan kun bari'uuf hammamtu hafe?” jedhe.

¹² Eegduun sunis,

“Bari'uu ga'eera; garuu deebi'ee dhi'a.

Yoo gaafachuu barbaaddan gaafadhaa;

garuu deebi'aa kottaa” jedhee deebisa.

Raajii Biyya Arabaatiin Mormu

¹³ Raajii biyya Arabaatiin mormu:

Isin imaltoonni Dedaan

kanneen bosona Arabaa keessa qubattan,

¹⁴ warra dheeboteef bishaan fidaa;

isin warri Teemaa keessa jiraattan,

baqattootaaf waan nyaatan fidaa.

¹⁵ Isaan goraadee jalaa,

goraadee luqqifame jalaa,

xiyya aggaamame jalaa,

ho'a waraanaa jalaa baqataniiruutii.

¹⁶ Gooftaan akkana naan jedhe: “Akkuma waggoota hojjetaa qaxaramaa tokkootti ulfinni Qeedaar hundinuu waggaa tokko keessatti ni dhuma. ¹⁷ Warra xiyya darbatan keessaa kanneen hafan, gootonni Qeedaar muraasa ta'u.” WAAQAYYO Waaqni Israa'el dubbateeraatii.

22

Raajii Waa'ee Yerusaaalem

¹ Raajii waa'ee Sulula Mul'ataa:

Amma maaltu isin rakkisee

isin hundi fiixee manaatti ol baatan?

² Yaa magaalaa wacaan guutamte,

yaa magaalaa jeeqamtuu fi fandalaltuu,

namoonni si jalaa qalaman goraadeedhaan hin ajjeefamne

- yookaan waraana keessatti hin dhumne.
- ³ Hooggantoonni kee hundi walumaan baqatan;
isaan utuma xiyya hin darbatin qabaman.
Isin utuma diinni fagoo jiruu baqattan iyyuu
warri qabamtan hundi walumaan mana hidhaatti galfamtaniirtu.
- ⁴ Kanaafuu ani, “Ana irraa garagalaa;
ani hiqqifadhee nan boo’a.
Badiisa saba koo irratti
na jajjabeessuu hin yaalinaa” nan jedhe.
- ⁵ Gooftaan, WAAQAYYON Waan Hunda Danda’u,
Sulula Mul’ataa keessatti, guyyaa jeequmsaa,
dhidhiitamuutii fi burjaajii,
akkasumas guyyaa itti dallaa diiguutii fi
tulluuwwanittis iyyuu qaba.
- ⁶ Eelaam man’ee xiyyaa qabatee
gaariiwwanii fi abbootii fardaa fudhattee baati;
Qiiris gaachana ishee qabatti.
- ⁷ Sululawwan kee filatamoon gaariiwwaniin guutamaniiru;
abbootiin fardaas karra magaalattii irratti ramadamaniiru.
- ⁸ Gooftaan ittisa Yihuudaa irraa mulqeera.
Atis gaafas mi’a lolaa kan Masaraa Bosonaa
keessa jiru sana abdatta.
- ⁹ Dallaan Magaalaa Daawit
karaa baay’ee akka urame argitaniirtu;
Haroo Gad aanaa keessattis
bishaan kuufattaniirtu.
- ¹⁰ Isin manneen Yerusaalem lakkoofan;
dallaa ishee dhagaa jabeessuuf jettaniis manneen sana diigdan.
- ¹¹ Bishaan Haroo Moofaatiif dallaa lamaan gidduutti
kuusaa bishaanii tolchitan;
garuu isin gara Isa waan sana hojjetee hin ilaalle;
yookaan Isa bara dheeraan dura waan sana karoorseef
ulfina hin kennene.
- ¹² Gooftaan, WAAQAYYON Waan Hunda Danda’u,
akka ati boossee wawwaattuuf,
akka ati rifeensa mataa keetii of irraa cirtee
wayyaa gaddaa uffatuuf guyyaa sana si waame.
- ¹³ Qooda kanaa garuu gammachuu fi fandalaluu,
loon gorra’uu fi hoolota qaluu,
foon nyaachuu fi daadhii wayinii dhuguutu jira!
Isin, “Kottaa ni nyaannaa; ni dhugnas;
bor ni duunaatii!” jettu.
- ¹⁴ WAAQAYYON Waan Hunda Danda’u utuma gurri koo dhaga’uu waan kana naa ibse:
“Hamma guyyaa du’a keessaniitti cubbuun kun isin irraa hin haqamu” jedha Gooftaan,
WAAQAYYON Waan Hunda Danda’u.
- ¹⁵ Gooftaan, WAAQAYYON Waan Hunda Danda’u akkana jedha:
“Dhaqiitii itti gaafatamaa kanaan,
Shebnaa, bulchaa masaraa mootummaatiin akkana jedhi:
- ¹⁶ Ati maal asii hojjetta?
Akka ati iddoo kanatti iddoo awwaalaa qopheeffattu,
akka iddoo ol ka’aa irratti boolla awwaala keetii qotattu,
akka kattaa keessatti iddoo boqonnaa keetii tolchattu
eenyutu eeyyama siif kenne?
- ¹⁷ “Yaa nama jabaa kunoo,
WAAQAYYO jabeessee qabee si darbachuuf jira.
- ¹⁸ Inni akkuma kubbaa furuurse
biyya bal’aa tokko keessa si buusa.
Yaa salphina mana gooftaa keetii, ati achitti duuta;

gaariwwan kee mimmiidhagoonis achitti hafu!

¹⁹ Ani aangoo kee irraa sin buusa;

atis taayitaa kee irraa ni ari'amta.

²⁰ "Ani gaafas garbicha koo Eliiyaaqiimin ilma Hilqiyya nan waama. ²¹ Ani uffata kee isatti nan uffisa; sabbata kee mudhii isaatti nan hidha; aangoo kees dabarsee isaaf nan kenna. Inni warra Yerusaaalem keessa jiraatanii fi mana Yihuudaatiif abbaa ni ta'a.

²² Ani furtuu mana Daawit gatiittii isaa irra nan kaa'a; waan inni banu namni tokko iyyuu cufuu hin danda'u; waan inni cufus namni tokko iyyuu banuu hin danda'u. ²³ Ani akkuma fannoo waa itti fannisan tokkootti iddoo jabaa irra isa nan dhaaba; innis mana abbaa isaatiif teessoo ulfinaa ni ta'a. ²⁴ Isaanis kabaja mana abbaa isaa hunda, ijoollee isaatii fi ijoollee ijoollee isaa, mi'a xixinnaa kan waciitiidhaa jalqabee hamma okkoteetti jiru hunda isatti fannisu."

²⁵ WAAQAYYON Waan Hunda Danda'u akkana jedha; "Gaafas qofoon iddoo jabaa dhaabame sun ni buuqa'a; muramee lafa bu'a; ba'aan isatti fannifame sun harca'ee caccaba." WAAQAYYO waan kana dubbateeraatii.

23

Raajii Waa'ee Xiiroos

¹ Raajii waa'ee Xiiroos:

Yaa dooniiwwan Tarshiishi wawwaadhaa!

Xiiroos barbadooftee

mana yookaan buufata doonii malee hafteertii.

Biyya Qophroos

oduun isaan qaqqabeera.

² Isin jiraattoonni qarqara galaanaatii fi daldaltoonni Siidoonaa, warri marmaaran isin sooromsan cal'isaa.

³ Midhaan Shihoor

bishaanota gurguddaa irraan dhufe;

oomishni Abbayyaa Xiiroosiif galii ture;

isheenis lafa gabaa kan sabootaa taate.

⁴ Yaa Siidoonaa, yaa da'annoo galaanaa qaana'i;

galaanni akkana jedhee dubbateeraatii:

"Ani hin ciniinsifanne yookaan hin deenye;

ilmaan hin horanne yookaan intallan hin guddifanne."

⁵ Yeroo oduun gara Gibxi dhufutti

isaan gabaasa Xiiroos irraa dhufuun ni dhiphatu.

⁶ Isin gara Tarshiishitti ce'aa;

yaa warra qarqara galaanaa jiraattan wawwaadhaa.

⁷ Magaalaa dulloomtuun durii,

kan miilli ishee ishee fuudhee,

akka isheen biyya fagoo keessa qubattuuf ishee geesse kun,

magaalaa kee ishee fandalaltuudhaa?

⁸ Xiiroos ishee gonfoo nama gonfachiiftu

kan daldaltoonni ishee ilmaan moototaa ta'an

kan daldaltoonni ishee lafa irratti kabajamoo ta'anitti

eenyutu waan kana karoofate?

⁹ WAAQAYYON Waan Hunda Danda'u

of jaja ishee kan ulfina ishee hunda keessa jiru gad deebisuu fi

warra lafa irratti kabajaman hunda salphisuuf

waan kana karoofateera.

¹⁰ Yaa Intala Tarshiish,

ati si'achi buufata doonii hin qabaattuutii,

lafa kee hamma Abbayyaa bira ga'utti qotadhu.

¹¹ WAAQAYYO harka isaa galaana irra qabee

mootummoota hollachiiseera.

Inni akka da'annoowwan ishee diigamaniif

waa'ee Kana'aan ajaja kenneera.

¹² Innis akkana jedha; “Yaa Durba Siidoonaa,
ati kana caalaa hin fandalaltu!

“Ka’iitii gara Qophiroositti ce’i;
ati achitti iyyuu boqonnaa hin argattu.”

¹³ Mee biyya Baabilonotaa ilaali;
uummanni kun amma seenaa hin qabu!

Warri Asoor akka isheen
iddoo jireenya uumamawwan gammoojjii taatu godhan;
isaan siree eegumsaa ijaarratan;
da’annoowwan ishee qullaa hambisan;
ishees ni barbadeessan.

¹⁴ Yaa dooniiwwan Tarshiish wawwaadhaa;
da’annoon keessan barbadeeffameeraatii!

¹⁵ Yeroo sanaa jalqabee Xiiroos hamma waggaa torbaatamaatti ni dagatamti; kunis bara jireenya mootii tokkoo ti. Dhuma waggaa torbaatamman sanaatti garuu akkuma sirba sagaagaltuu tokkoof sirbame sanaatti Xiiroos irra ga’a:

¹⁶ “Yaa sagaagaltuu irraanfatamtuu,
baganaa qabadhuutii magaalaa keessa naanna’i;
ati akka yaadatamtuuf baganaa sirriitti rukuti;
sirba baay’ee sirbi.”

¹⁷ Dhuma waggaa torbaatamaatti WAAQAYYO Xiiroosin ni yaadata; isheenis gara daldala isheetti deebitee mootummoota fuula lafaa irra jiran hunda wajjin sagaagalti.
¹⁸ Ta’us bu’aan isheetii fi wannii isheen argattu WAAQAYYOOF addaan baafama; hin kuufamu; walittis hin qabamu. Bu’aan ishees warra fuula Waaqaa dura jiraataniif nyaata ga’aa fi uffata babbareedaa ta’u.

24

WAAQAYYO Lafa Ni barbadeessa

¹ Kunoo, WAAQAYYO lafa ni onsa;
ishees ni barbadeessa;
inni ishee gaggaragalchee
warra ishee irra jiraatan bittinneessa;

² Kan saba irra ga’u luba irra,
kan garbicha irra ga’u gooftaa irra,
kan garbittii irra ga’u giiftii irra,
kan bitataa irra ga’u gurgurataa irra,
kan isa ergifatu irra ga’u, isa ergisu irra,
kan liqeeffataa irra ga’u, isa liqeessu ni ga’aatii.

³ Lafti guutumaan guutuutti ni onti;
guutumaan guutuuttis ni saamamti.
WAAQAYYO waan kana dubbateeraatii.

⁴ Lafti ni gogdi; bifti ishees ni geeddarama;
addunyaan ni bututti; bifti ishees ni geeddarama;
gurguddoonni saba lafaas ni bututu.

⁵ Lafti saba isheetiin xuroofteerti;
isaan seeraaf ajajamuu didan;
sirnaan buluu didanii
kakuu bara baraa sana cabsaniiru.

⁶ Kanaafuu abaarsi lafa balleessa;
sabni ishees balleessaa isaatiif adabama.
Kanaafuu jiraattonni lafaa ni gubatu;
nama muraasatu hafa.

⁷ Daadhiin wayinii haaraan ni goga;
mukni wayiniis ni coollaga;
warri gammadan hundinuu ni aadu.

⁸ Dibbeen sagaleen isaa namatti tolu ni cal’isa;
wacni fandalalootaa qabbanaa’eera;
baganaan nama gammachiisus cal’iseera.

- 9 Isaan si'achi sirbaa daadhii wayinii hin dhugan;
dhugaatiin jabaan warra isa dhuganitti ni hadhaa'a.
- 10 Magaalaan diigamte sun ontee hafti;
akka namni tokko iyyuu ol hin seenneef manni hundi ni cufama.
- 11 Isaan daadhii wayinii dhabanii daandii irratti boo'u;
gammachuun hundi gaddatti geeddarama;
ililchuun hundis lafa irraa dhabama.
- 12 Magaalaan sun diigamtee hafti;
karri ishees ni caccaba.
- 13 Akkuma yeroo mukni ejersaa dha'amuu fi
akkuma yeroo wayiniin galfamutti qarmiin hafu ta'u sana,
lafa irratti saboota gidduuttis
akkasuma ni ta'a.
- 14 Isaan sagalee ol fudhatanii gammachuun iyyu;
gama lixa biiftuutti ulfina WAAQAYYOO labsu.
- 15 Kanaafuu isin ba'a biiftuu irraa WAAQAYYOOF ulfina kennaa;
qarqara galaanaattis maqaa WAAQAYYO
Waaqa Israa'el leellisaa.
- 16 Nu moggaa lafaa irraa faarfannaa,
"Isa qajeelaa sanaaf ulfinni haa ta'u" jedhu dhageenya.
- Ani garuu akkanan jedhe;
"Ani bade, ani bade! Anaaf wayyoo!
Gantoonni ni ganu!
Gantoonni gantummaa isaaniiitiin ganu!"
- 17 Yaa uummata lafa irraa,
sodaan, qilee fi kiyyoon si eeggatu.
- 18 Namni sagalee goolii baqatu kam iyyuu
qilee keessa bu'a;
namni qilee keessaa ol ba'u kam iyyuu
kiyyoodhaan qabama.
- Foddaan samiiwwanii banameeraatii
hundeewwan lafaa ni raafamu.
- 19 Lafti baqaqxeerti;
lafti gargar baateerti;
lafti akka malee raafamteerti;
- 20 Lafti akkuma nama machaa'ee gatantarti;
isheen akkuma daasii bubbeedhaan raafamti;
yakki fincila ishee akka malee itti ulfaateera;
isheen ni jigdi; deebitees hin kaatu.
- 21 WAAQAYYO gaafas
humnoota samii, samii irratti,
mootota lafaa immoo lafa irratti ni adaba.
- 22 Isaan akkuma hidhamtootaa
boolla keessaatti walitti qabamu;
manni hidhaa itti cufamee
guyyaa hedduu booddee adabamu.
- 23 Ji'i ni burjaajofti; aduunis ni qaanofti;
WAAQAYYOON Waan Hunda Danda'u,
Tulluun Xiyoon irrattii fi Yerusaalem keessatti
fuula maanguddootaa duratti ulfinaan ni mo'aatii.

25

WAAQAYYOOF Galata Galchuu

- 1 Yaa WAAQAYYO, ati Waaqa koo ti;
waan ati amanamummaa kee kan mudaa hin qabneen
wantoota dinqisiisoo
bara dheeraan dura karoorfame hojjetteef,

- ani ulfina siif nan kenna; maqaa kees nan leellisa.
² Ati magaalaa sana tuullaa dhagaa,
 magaalaa dallaa jajjabaa qabdu immoo diigamaa goote;
 magaalaa da'annoo Namoota Ormaa turte sun
 si'achi hin jiraattu;
 isheen gonkumaa deebitee hin ijaaramtu.
³ Kanaafuu namoonni jajjaboon si kabaju;
 magaalaaawwan saboota gara jabeeyyii si sodaatu.
⁴ Ati hiyyeeyyiiif lafa itti baqatan,
 rakkataaf immoo dhiphina isaa keessatti da'oo,
 bubbee hamaa jalaa iddoo itti baqatu,
 ho'a jalaa immoo iddoo itti qabbaneeffatu turte.
 Hafuurri gara jabeeyyiin baafatan,
 akkuma bubbee hamaa dallaa dhagaa dha'uutii fi
⁵ akkuma ho'a gammoojjii ti.
 Ati waca alagootaa ni cal'isiifta;
 akkuma ho'i gaaddisa duumessaatiin qabbanaa'u sana,
 sirbi gara jabeeyyiis ni qabbanaa'a.
- ⁶ WAAQAYYON Waan Hunda Danda'u
 tulluu kana irratti uummata hundaaf cidha nyaata gaarii,
 affeerraa daadhii wayinii gogee,
 foon coomaa fi daadhii wayinii filatamaa ni qopheessa.
⁷ Inni tulluu kana irratti,
 haguuggii uummata hundatti haguugame,
 golgaa saba hundatti golgame ni balleessa;
⁸ inni bara baraan du'a ni liqimsa.
 WAAQAYYO Gooftaan fuula hunda irraa imimmaan ni haqa;
 inni lafa hunda irratti salphina saba isaa ni balleessa.
 WAAQAYYO waan kana dubbateeraatii.
⁹ Isaan gaafas akkana jedhu;
 "Dhugumaan kun Waaqa keenya;
 nu isa amananne; innis nu oolche.
 Kun WAAQAYYOO dha; nu isa amananne;
 kottaa fayyisuu isaatti gammannaa; ni ililchinas."
- ¹⁰ Harki WAAQAYYOO tulluu kana irra ni boqota;
 Mo'aab garuu akkuma cidiin dikee keessatti dhidhiitamu sana
 isa jalatti dhidhiitama.
¹¹ Innis akkuma namni bishaan daaku tokko daakuuf harka bal'ifatu sana,
 gaara sana irratti harka isaa ni bal'ifata.
 Waaqnis of tuulummaa isaanii,
 ogummaa harka isaanii wajjin gad deebisa.
¹² Inni dallaa kee ol dheeraa dhagaan ijaarame sana,
 akka inni duufu godha;
 lafatti gad jigsees biyyootti dabala.

26

Faarfannaa Galataa

- ¹ Bara sana faarfannaan kun biyya Yihuudaa keessatti faarfatama:
 Nu magaalaa jabaa qabna;
 Waaqnis fayyina,
 dallaa eegumsa isheetii fi da'annoo ishee taasisa.
² Akka sabni qajeelaan,
 sabni amanamummaadhaan jiraatu ol seenuuf,
 karrawwan banaa.
³ Inni sitti irkateeraatii,
 nama yaadni garaa isaa si wajjin jiru,
 ati nagaa hir'ina hin qabneen isa eegda.
⁴ Sababii WAAQAYYO, WAAQAYYO mataan isaa,
 Kattaa bara baraa ta'eef, bara baraan WAAQAYYON amanadhaa.

- 5 Inni warra iddoo ol ka'aa irra jiraatan gad qaba;
magaalaa tabba irra jirtu gad buusa;
lafatti gatees awwaaratti ishee maka.
- 6 Miilli, miilli warra hacuucamee,
faanni hiyyeeyyii ishee dhidhiita.
- 7 Daandiin nama qajeelaa wal qixxaataa dha;
yaa Isa Tolaa, ati qajeeltotaaf karaa baafta.
- 8 Yaa WAAQAYYO,
nu karaa seera keetii irra deemaa si eegganna,
maqaan keetii fi beekamuun kee
hawwii garaa keenyaa ti.
- 9 Halkan lubbuun koo si yaaddi;
ganamas hafuurri koo baay'isee si barbaada.
Yeroo murtiin kee gara lafaa dhufutti,
uummanni addunyaa qajeelummaa barata.
- 10 Namni hamaan gara laafinni godhamuuf iyyuu,
qajeelummaa hin baratu;
biyya qajeelummaan jirutti iyyuu inni ittuma fufee jal'ina hojjeta;
surraa WAAQAYYOOS hin hubatu.
- 11 Yaa WAAQAYYO, harki kee ol kaafameera;
isaan garuu isa hin argan.
Isaan hinaaffaa ati saba keetiif qabdu arganii haa qaana'an;
ibiddi diinota keetiif kuufame sun isaan haa balleessu.
- 12 Yaa WAAQAYYO, ati nagaa nuuf kenniteerta;
ati hojii keenya hunda nuuf hojjettaati.
- 13 Yaa WAAQAYYO Waaqa keenya,
si malee gooftonni biraa nu bulchaniiru;
nu garuu maqaa kee qofa ulfeessina.
- 14 Isaan amma du'aniiru; si'achi hin jiraatan;
isaan gaaddidduu dha; deebi'aniis hin ka'an.
Ati isaan adabde; isaan balleessites;
yaadannoo isaanii hundas ni barbadeessite.
- 15 Yaa WAAQAYYO, ati saba baay'isteerta;
ati saba baay'isteerta;
ati ofii keetiif ulfina argatteerta;
daarii biyyaa hunda bal'ifteerta.
- 16 Yaa WAAQAYYO, isaan yeroo dhiphinaatti si barbaaddatan;
yeroo ati isaan adabdetti
isaan kadhannaa gad roobsan.
- 17 Akkuma dubartiin ulfaa yeroo da'uu geessutti,
ciniinsuudhaan wixxirfattee iyyitu sana,
yaa WAAQAYYO, nus fuula kee duratti akkasuma taaneerra.
- 18 Nu ulfoofnee, ciniinsuudhaan wixxirfanne;
nu garuu bubblee deenye.
Nu lafaaf fayyina hin fidne;
nu uummata addunyaa hin deenye.
- 19 Garuu namoonni kee kanneen du'an ni jiraatu;
dhagni isaaniis du'aa ni ka'a.
Isin warri biyyoo keessa jiraattan,
dammaqaatii gammachuudhaan ililchaa.
Fixeensi kee akkuma fixeensa ganamaa ti;
laftis warra du'an of keessaa baafti.
- 20 Yaa saba ko, kutaa mana keetti ol galiitii
duubaan balbala ofitti cufi;
hamma dheekkamsi isaa darbutti,
yeroo muraasaaf of dhoksi.
- 21 Kunoo, WAAQAYYO sababii cubbuu isaaniitiif

uummata lafa irraa adabuuf
iddoo jireenya isaatii ba'ee dhufaa jira.
Lafti dhiiga ishee irratti dhangalaafame sana ifa baafti;
si'achi warra ishee irratti qalaman hin dhoksisu.

27

Furamuu Israa'el

- ¹ Bara sana,
WAAQAYYO goraadee isaatiin,
goraadee isaa sodaachisaa, guddaa fi jabaa sanaan,
Lewaataan boficha mirmirfamuu,
Lewaataan boficha marmaramu sana ni adaba;
inni jawwee galaana keessa jiraatu ni kukkuta.
- ² Bara sana akkana jedhama;
“Waa'ee iddoo dhaabaa wayinii kan namatti tolu sanaa faarfadhaa;
³ ani WAAQAYYO isa nan eega;
ani yeroo hunda bishaan nan obaasa;
akka namni tokko iyyuu isa hin miineef
ani halkanii fi guyyaa isa nan eega.
⁴ Ani hin aaru.
Sokorruu fi qoraattiin waraanaaf utuu natti ba'anii!
Ani silaa isaanitti nan duula;
walitti qabees isaan nan guba.
- ⁵ Yoo kanaa achii isaan kooluu natti haa galan;
isaan na wajjin nagaa haa uuman;
eeyyee, isaan na wajjin nagaa haa uuman.”
- ⁶ Bara dhufuuf jiru keessa Yaaqoob hidda baasa;
Israa'el latee daraara;
ijaanis addunyaa hunda guuta.
- ⁷ WAAQAYYO akkuma warra ishee rukutan sana rukute,
ishee illee rukuteeraa?
Akkuma warri ishee ajjeesan sun ajjeefaman,
isheenis ajjeefamteertii?
- ⁸ Ati waraanuu fi ari'uudhaan isheedhaan wal falmite;
inni guyyaa bubbeen ba'aa bubbisutti,
bubbee isaa sodaachisaa sanaan ishee balleessa.
- ⁹ Yommuu inni dhagoota iddoo aarsaa hunda
akkuma dhagaa nooraa caccabsamee godhutti,
siidaan asheeraa yookaan iddoon aarsaa ixaanaa tokko iyyuu
dhaabatee hin hafu.
Akkasiinis balleessaan Yaaqoob ni haqamaaf;
kunis cubbuun isaa guutumaan guutuutti haqamuu isaa mirkaneesa.
- ¹⁰ Magaalaan dallaa jabaa qabdu ni onti;
akka gammoojjii gatamteetii fi dhiifamtee taati;
jabboonni achi dheeddi;
achis ni ciciifti;
jabboonni damee ishee qorqanii qullaa hambisu.
- ¹¹ Dameen ishee yeroo gogutti irraa caccaba;
dubartoonnis dhufanii ibiddatti naqatu.
Uummanni kun hubannaa hin qabuutii;
kanaafuu Tolchaan isaaniif garaa hin laafuuf;
Uumaan isaaniis isaaniif hin araaramu.
- ¹² Bara sana WAAQAYYO Laga Efraaxiisii hamma laga Gibxitti midhaan dha'a; yaa Israa'eloota, isin tokko tokkoon walitti ni qabamtu. ¹³ Bara sana malakanni guddaan tokko ni afuufama. Warri Asoor keessatti badanii turanii fi warri Gibxi keessatti faffaca'anii turan dhufanii tulluu qulqulluu irratti Yerusaleem keessatti WAAQAYYOON waageffatu.

28

Hooggantoota Efreemiif Wayyoo

- ¹ Gonfoo of tuulummaa kan machoofota Efreem sanaaf,
daraaraa coollagu kan ulfina miidhagina isaaniitiif,
kan mataa sulula gabbataa irra jiruuf,
magaalaa warra daadhii wayiniitiin fudhataman
sanaatiif wayyoo!
- ² Kunoo, Gooftaan isa humna qabeessaa fi jabaa tokko qaba.
Inni akkuma cabbiiitiif fi bubbee waa balleessuu,
akkuma bokkaa jabaatii fi bishaan guutee irra dhangala'uu,
humnaan lafatti gad ishee darbata.
- ³ Gonfoon of tuulummaa,
machooftonni Efreem miilla jalatti dhidhiitamu.
- ⁴ Daraaraan harca'u, miidhaginni isaa kabajamaan,
kan mataa sulula gabbataa irra jiru sun,
akkuma muka harbuu utuu bonni hin ga'in bilchaatu sanaa ta'a;
namni isa argu hundi akkuma isa harka keessa galfateen
isa nyaatee fixa.
- ⁵ Bara sana WAAQAYYON Waan Hunda Danda'u
hambaa saba isaatiif,
gonfoo ulfinaa,
mi'a miidhaginaa ni ta'a.
- ⁶ Inni nama murtii kennuuf taa'uuf hafuura murtii qajeelaa ta'a;
warra karra irraa waraana deebisaniif immoo
madda jabinaa ta'a.
- ⁷ Jarri kuni daadhii wayiniitiin gatantaru;
dhugaatii jabaadhaan dogoggoru;
luboonnii fi raajonni dhugaatii jabaadhaan gatantaru;
daadhii wayiniitiin fudhatamu;
isaan dhugaatii jabaadhaan karaa irraa badu;
yeroo mul'ata arganittis ni dogoggoru;
yeroo murtii kennanittis ni dogoggoru.
- ⁸ Maaddiin hundinuu diddigaan guutameera;
iddoon hin xureeffamin tokko iyyuu hin jiru.
- ⁹ "Namni inni waa barsiisuu yaalu kun eenyu?
Inni eenyuuf ergaa isaa ibsaa jira?
Ijoollee aannan dhiifteef moo
ijoollee harma guuteef?
- ¹⁰ Ajaja irratti ajaja; ajaja irratti ajaja;
sirna irratti sirna; sirna irratti sirna;
asitti muraasa; achitti muraasa" ta'aatii.
- ¹¹ Yoos Waaqni afaan alagootaatiin,
afaan hin beekamneenis saba kanatti ni dubbata;
- ¹² inni akkana isaaniin jedhe;
"Kun iddoo boqonnaa ti; warri dadhaban haa boqotan;
kun iddoo aara galfannaa ti."
Isaan garuu dhaga'uu didan.
- ¹³ Yoo akkasii dubbiin WAAQAYYOO akkana isaanitti ta'a;
ajaja irratti ajaja; ajaja irratti ajaja;
sirna irratti sirna; sirna irratti sirna;
asitti muraasa; achitti muraasa;
kunis akka isaan dhaqanii dugda duubatti kufanii fi
akka isaan caccabaniin kiyyoodhaan qabamaniif.
- ¹⁴ Kanaafuu isin qoostonni
warri uummata Yerusaleem bulchitan dubbii
WAAQAYYOO dhaga'aa.
- ¹⁵ Isin akkana jettanii of tuultu; "Nu du'a wajjin kakuu galleerra;

sii'ool wajjinis walii galtee gooneerra.
 Sababii nu soba da'oo godhannee,
 sobas iddoo itti dhokannu godhanneef,
 balaan hamaan yeroo dhufee lafa balleessutti
 nu tuquu hin danda'u."
 16 Kanaafuu WAAQAYYO Gooftaan akkana jedha;
 "Kunoo ani dhagaa tokko, dhagaa qoratame,
 dhagaa golee gati jabeessa tokko
 hundee mirkanaa'aadhaaf Xiyoon keessa nan kaa'a;
 namni amanu kam iyyuu hin qaana'u.
 17 Ani murtii qajeelaa funyoo ittiin safaran,
 qajeelummaa immoo madaalii nan godhadha;
 soba isin da'oo godhattan sana bokkaan jabaan ni balleessa;
 bishaanis lafa isin itti dhokattan keessa ni lola'a.
 18 Kakuun isin du'a wajjin godhattan ni diigama;
 walii galteen isin sii'ool wajjin godhattanis
 ni barbadeeffama.
 Yeroo balaan hamaan dhufee lafa balleessutti
 isin lafatti gad dhidhiitamtu.
 19 Inni yeroo dhufu hunda isin fudhatee deema;
 ganama ganama halkanii fi guyyaas,
 inni waa balleessa."

Ergaa kana hubachuun
 naasuu guddaa namatti fida.
 20 Sireen irratti diriirfachuuf baay'ee gabaabaa dha;
 uffata halkanii ofitti marachuuf baay'ee dhiphaa dha.
 21 WAAQAYYO hojii isaa, hojii isaa haaraa sana hojjechuuf,
 gocha isaa, gocha isaa kan hin beekamne sana hojjechuuf,
 akkuma Tulluu Pheraaziim keessatti godhe sana ni ka'a;
 akkuma Sulula Gibe'oonitti godhe sana ni ka'a.
 22 Amma qoosaa keessan dhiisaa;
 yoo akkas hin ta'in foncaan keessan isinitti jabaata;
 Gooftaan, WAAQAYYON Waan Hunda Danda'u,
 labsii guutummaa biyyattii balleessuuf labse natti himeera.
 23 Dhaggeeffadhaatii sagalee koo dhaga'aa;
 qalbeeffadhaatii waan ani dubbadhu dhaga'aa.
 24 Qonnaan bulaan tokko yeroo sanyii facaasuuf lafa qotatutti,
 ittuma fufee qotaa?
 Inni ittuma fufee biyyoo caccabsee bulleessaa?
 25 Inni yeroo lafa wal qixxeessutti
 dimbilaalaa fi kamuunii hin facaasuu?
 Inni qamadii toora tooraan,
 garbuu iddoo isaa irratti,
 honboriis lafa qotiisaa isaa irratti hin facaasuu?
 26 Waaqni isaa isa barsiisa;
 karaa qajeelaa irras isa buusa.
 27 Abasuudni gangalchaadhaan hin dha'amu;
 kamuunii irras gommaan gaarii hin oofamu;
 abasuudni uleedhaan,
 insilaalli immoo shimalaan dha'ama.
 28 Midhaan buddeena tolchuuf daakamuu qaba;
 kanaafuu namni tokko bara baraan midhaan hin dha'u.
 Inni gommaa gaarii kan midhaan dha'u midhaan sana irra oofu iyyuu
 fardeen isaa midhaanicha hin bulleessan.
 29 Wannii kun hundinuu WAAQAYYOO Waan Hunda Danda'u,
 isa mariidhaan dinqisiisaa,
 ogunmaadhaanis guddaa ta'e biraa dhufa.

29

Magaalaa Daawitiif Wayyoo

- ¹ Yaa Arii'eel, yaa Arii'eel,
magaalaa Daawit keessa jiraate, siif wayyoo!
Waggaa irratti waggaa dabalaa;
ayyaanonni waggas ittuma haa fufan.
- ² Ta'us ani Arii'eelin marsee nan qaba;
isheen boossee ni wawwaatti;
isheen anaaf akka Arii'eel taati.
- ³ Ani karaa hundaan naannoo kee nan qubadha;
gamoowwaniinis sin marsa;
tuullaa biyyoos sitti naannessee nan dhaaba.
- ⁴ Ati gad deebifamtee lafa irraa ni dubbatta;
haasaan kee biyyoo keessaa guunguma.
Sagaleen kee akka sagalee ekeraa lafa keessaa ba'a;
haasaan kees biyyoo keessaa hasaasa.
- ⁵ Diinonni kee hedduun garuu akka awwaara bullaa'ee,
gara jabeeyyiin baay'eenis akka habaqii bubbeen fudhatee ta'u.
Akkuma tasaa utuu hin beekaminis,
⁶ WAAQAYYON Waan Hunda Danda'u,
bakakkaadhaan, sochii lafaatii fi waca guddaadhaan,
bubbeedhaan, bubbee hamaa fi arraba ibidda waa fixuutiin ni dhufa.
- ⁷ Ergasii tuunni saboota hundaa kan Arii'eeliin lolu,
kan ishee fi da'oo ishee jajjaboo dha'ee marsee qabu,
akkuma abjuu,
akkuma mul'ata halkan keessaa ta'a;
- ⁸ kunis akkuma namni beela'e tokko akka waa nyaachaa jiru abjuudhaan argee
yeroo dammaqutti garuu amma illee beela qabu sana,
yookaan akkuma namni dheebote tokko akka waa dhugaa jiru abjuudhaan argee
yeroo dammaqutti garuu amma illee dheebuudhaan gaggabu sana ta'a.
Tuuta saboota hundaa
kan Tulluu Xiyoon lolu irrattis akkasuma ta'a.
- ⁹ Rifadhaa; dinqisiifadhaas;
of jaamsaatii nama waa hin argine ta'aa;
machaa'aa; garuu daadhii wayiniitiin hin ta'in;
gatantaraa; garuu dhugaatii jabaadhaan hin ta'in.
- ¹⁰ WAAQAYYO hirriba cimaa isiniitti buuseera;
ija keessan raajota, cufeera;
mataa keessan ilaaltootas, haguugeera.
- ¹¹ Mul'anni kun hundi isiniif dubbii kitaaba maramaa irratti chaappeffame malee
homaa miti. Yoo isin kitaaba kana nama dubbisuu danda'u tokkotti kennitanii, "Maaloo
mee waan kana dubbisi" jettaniin inni, "Sababii kitaabichi chaappeffameef ani dubbisuu
hin danda'u" jedhee deebisa. ¹² Yookaan yoo isin kitaaba maramaa kana nama dubbisuu
hin dandeenye tokkotti kennitanii, "Maaloo mee waan kana dubbisi" jettaniin inni, "Ani
akkamitti akkan dubbisu hin beeku" jedhee deebisa.
- ¹³ Gooftaan akkana jedha:
"Uummanni kun afaan isaatiin natti dhi'aata;
hidhii isaatiinis na kabaja;
garaan isaa garuu narraa fagoo jira.
Waaqeffannaan isaan na waaqeffatanis
seera namni barsiisu qofaan tolfame.
- ¹⁴ Kanaafuu ani amma illee dinqii irratti dinqii dabalee
uummata kana nan dinqisiisa;
ogummaan nama ogeessaa ni bada;
hubannaan hubattootaas ni dhokata."
- ¹⁵ Warra karoora isaanii
WAAQAYYO duraa dhokfachuuf jedhanii
qileetti gad bu'aniif,
warra hojii isaanii dukkana keessatti hojjetanii,

“Eenyutu nu arga? Eenyutu beeka?”
jedhanii yaadaniif wayyoo!

¹⁶ Kun jal’ina keessan,
suphee dhooftuu akka supheetti ilaaltu!
Wanni tolchame tokko nama isa tolcheen
“Inni na hin tolchine” jedhaa?
Okkoteen tokko suphee dhooftuudhaan,
“Inni homaa hin beeku” jechuu danda’aa?

¹⁷ Libaanoon yeroo gabaabaa keessatti
lafa qotiisaa gabbatte hin taatuu?
Lafii qonnaa gabbataan sunis bosona hin fakkaattuu?
¹⁸ Gaafas duudaan dubbii kitaaba maramaa ni dhaga’a;
iji nama jaamaa dimimmisaa fi dukkana keessatti ni arga.
¹⁹ Namni gad of qabu ammas WAAQAYYOTTI ni gammada;
rakkattoonnis Qulqullicha Israa’el sanaan ni gammadu.

²⁰ Gara jabeeyyiin ni badu;
warri namatti goosan ni barbadaa’u;
warri hammina hojjechuu jaallatan hundinuu ni balleeffamu;
²¹ warri dubbiin yakkamaa nama godhan,
warri namicha mana murtiitti namaaf falmu dura kiyyoo kaa’anii
sobaan dhugaa ba’uudhaan
murtii qajeelaa nama yakka hin qabnee jal’isan ni balleeffamu.

²² Kanaafuu WAAQAYYO inni Abrahaamin fure sun mana Yaaqoobiin akkana jedha:
“Yaaqoob si’achi deebi’ee hin qaana’u;
fuulli isaas si’achi hin dukkanaa’u.

²³ Isaan yeroo gidduu isaaniitti ijoollee isaanii
hojii harka kootii sana arganitti,
maqa koo ni qulqulleessu;
isaan qulqullummaa Qulqullicha Yaaqoob ni beeku;
Waaqa Israa’elis sodaachuudhaan ni jiraatu.
²⁴ Warri dogoggoran hubannaa ni argatu;
warri guungumanis qajeelfama ni fudhatu.”

30

Saba Fincilaadhaaf Wayyoo

¹ WAAQAYYO akkana jedha:

“Ijoollee fincilan,
kanneen karoora karoora koo hin ta’in duukaa bu’an,
kanneen fedhii kootiin alatti walii galtee uuman,
kanneen cubbuu irratti cubbuu dabalaniif wayyoo;
² kanneen utuu anaan hin mari’atin Gibxitti gad bu’an,
kanneen gaaddisa Gibxi da’oof,
eegumsa Fara’oon immoo
gargaarsaaf abdataniif wayyoo.
³ Eegumsi Fara’oon garuu qaani isinitti ta’a;
gaaddisni Gibxis salphina isinitti fida.
⁴ Isaan yoo Zoo’aan keessatti qondaaltota qabaatan iyyuu,
yoo ergamoonni isaaniis Haanees ga’an iyyuu,
⁵ tokkoon tokkoon isaanii sababii uummata isaan hin fayyadne
kanneen qaani fi salphina malee
gargaarsa yookaan bu’aa hin kennine
sanaatiif ni qaaneffamu.”

⁶ Raajii waa’ee bineensota Negeeb dubbatame:
Ergamoonni qabeenya isaanii harreetti,
meeshaa isaanii gaalatti fe’atanii
biyya leenci kormii fi leenci dhalaan,
bofti summii qabuu fi bofti darbatamu jiraatan,
lafa rakkinnaa fi dhiphinaan guute keessa ba’anii
gara biyya homaa hin fayyadnee

⁷ gara Gibxi kan gargaarsi ishee gonkumaa bu’aa hin qabne sanaa dhaqu.

Kanaafuu ani, “Ra’aab, kan homaa hin fayyadne”
jedhee ishee nan waama.

⁸ Amma dhaqiitii gabatee irratti barreessiif;
kitaaba maramaa irratti katabiif;
kunis akka baroota dhufuuf jiran keessa
dhuga ba’umsa bara baraa ta’uuf.

⁹ Jarri kunneen uummata fincilaa, ijoollee sobduu dha;
ijoollee seera WAAQAYYOO dhaga’uuf fedhii hin qabnee dha.

¹⁰ Isaan mul’ata argitootaan,
“Si’achi mul’ata tokko illee hin arginaa!” jedhu;
raajotaanis akkana jedhu;
“Isin si’achi mul’ata qajeelaa ta’e nutti hin himinaa!
Waan nama gammachiisu nutti himaa;
gowwoomsaa nuuf raajaa.

¹¹ Karaa kana gad dhiisaa;
daandii kana irraa jal’adhaa;
Qulqullicha Israa’el fuula keenya duraa
dhabamsiisaa!” jedhu.

¹² Kanaafuu Qulqullichi Israa’el akkana jedha:
“Sababii isin ergaa kana diddanii
nama hacuucuu abdattanii
gowwoomsaatti irkattaniif,
¹³ cubbuun kun, akkuma dallaa ol dheeraa
dhagaan ijaarame kan baqaqee bosose
kan utuu hin beekamin tasa jiguu isinitti ta’a.
¹⁴ Dallaan sun akkuma mi’a supheetti,
hamma wanni ittiin cilee boba’u
iddoo ibiddaatii fuudhan iyyuu hin hafnetti
yookaan hamma wanni ittiin boolla bishaanii keessaa
bishaan budduuqsan hin hafnetti akka malee caccabee burkuta’a.”

¹⁵ WAAQAYYO Gooftaan, Qulqullichi Israa’el akkana jedha:

“Deebi’uu fi boqochuudhaan ni fayyitu;
tasgabbaa’uu fi abdachuudhaan ni jabaattu;
isin garuu kana hin goone.

¹⁶ Isinis, ‘Lakki, nu fardeeniin ni baqanna’ jettu.
Kanaafuu isin ni baqattu!
Isin, ‘Nu fardeen ariifatanii fiiganiin ni gulufna’ jettu.
Kanaafuu warri isin gugsan ni saffisu!

¹⁷ Doorsisa nama tokkootiin, kumatu baqata;
doorsisa nama shaniitiin immoo,
isin hamma akkuma muka alaabaa fiixee tulluu irra jiruu,
akkuma faajjii gaara irra jiruu taatanii haftanitti
hundi keessan ni baqattu.”

¹⁸ Ta’us WAAQAYYO isiniif arjoomuu barbaada;
isiniif na’uufis ni ka’a:

WAAQAYYO Waaqa murtii qajeelaa ti.
Warri isa eeggatan hundi eebbifamoo dha.

¹⁹ Yaa saba Xiyoon, warri Yerusaaalem keessa jiraattan, isin si’achi hin boossan. Yeroo isin gargaarsa barbaachaaf gara isaatti iyyattanitti inni dhugumaan isiniif arjooma! Akkuma dhaga’eenis deebii isiniif kenna. ²⁰ Gooftaan buddeena rakkinaatii fi bishaan dhiphinaa siif kennu illee barsiisaan kee si’achi hin dhokatu; ati ijuma keetiin isa argita. ²¹ Ati yeroo gara mirgaatti yookaan gara bitaatti gortutti, dugda kee duubaan sagalee, “Karaan kana; isa irra deemi” jedhu tokko gurri kee ni dhaga’a. ²² Ati ergasii waaqota kee tolfamoo kanneen meetiin irra dibamee fi fakkiiwwan kee kanneen warqeen itti uffifame sana ni xureessita; akkuma huccuu xuraa’ummaas of irraa isaan darbattee, “Asii badaa!” jettaan.

²³ Inni sanyii ati lafatti facaafattuuf bokkaa siif kenna; midhaan lafti baaftus kan misee fi kan akka malee baay’ate ta’a. Bara sana keessa loon kee lafa dheedaa bal’aa irratti bobba’u. ²⁴ Qotiyyoo fi harreen qotiisaa okaa filatamaa qorbii fi afarsaadhaan qulqulleeffame nyaatu. ²⁵ Guyyaa badiisa guddaatti, yeroo qoxxiiwwan eegumsaa

jijjiganitti yaa'awwan bishaanii tulluuwwanii fi gaarran ol dhedheeroo hunda irra yaa'u.

²⁶ Gaafa WAAQAYYO cabaa saba isaa hidhee warra madeesse illee fayyisutti ji'i akkuma aduu ifa; ifni aduus akkuma ifa guyyaa torbaa dachaa torba ni ifa.

²⁷ Kunoo Maqaan WAAQAYYOO aarii boba'uu fi duumessa gobbuu aaraatiin fagoodhaa dhufaa jira; afaan isaa dheekkamsaan, arrabni isaas ibidda gubee balleessuun guutameera.

²⁸ Hafuurri inni baafatu akkuma laga guatee hamma morma ga'utti ol ka'uu ti.

Inni gingilchaa badiisaatiin saboota gingilcha; inni luugama karaa irraa isaan balleessu ha'oo sabootaa keessa kaa'a.

²⁹ Isin akkuma halkan ayyaana qulqulluu ayyaaneffattanitti, faarfannaa ni faarfattu;

garaan keessan akkuma yeroo namoonni ulullee afuufaa

gara tulluu WAAQAYYOOTTI, gara Kattaa Israa'elitti ol ba'an sanaa ni gammada.

³⁰ WAAQAYYO akka namoonni sagalee isaa surra qabeessa sana dhaga'an ni godha; inni akka isaan irree isaa

kan aarii guddaa fi ibidda gubee balleessuun, bokkaa hamaadhaan, bakakkaa fi cabbiidhaan dhufaa jiru argan ni godha.

³¹ Sagaleen WAAQAYYOO Asoorin ni caccabsa; bokkuu isaatiinis isaan barbadeessa.

³² Adabbiin ulee kan WAAQAYYO isaan irra buusu hundi sagalee dibbeetii fi sagalee kiraaraa of keessaa qaba; innis rukutaa irree isaatiin waraana keessatti isaan lola.

³³ Toofet dur qopheeffame; inni mootichaaf qopheeffame.

Boolli ibiddaa isaa gad fageeffamee bal'ifamee hojjetame; innis ibiddaa fi qoraaniin guutameera;

hafuurri afaan WAAQAYYOOTII ba'us akkuma dinyii dhangala'uu akka inni boba'u godha.

31

Warra Gibxin Abdataniif Wayyoo

¹ Warra gargaarsa barbaacha gara Gibxitti gad bu'aniif, warra fardeen abdataniif warra gaariwwan isaaniitii fi jabina abbootii fardeen isaanii amanatanii garuu gara Qulqulicha Israa'el hin ilaalle yookaan gargaarsa WAAQAYYOO hin barbaanneef wayyoo.

² Ta'us inni ogeessa; balaas fiduu danda'a; inni waan jedhe irraa duubatti hin deebi'u.

Inni mana hamootaatti, warra namoota hammina hojjetan gargaaraniitti ni ka'a.

³ Warri Gibxi namootuma malee Waaqa miti; fardeen isaaniis foonuma malee hafuura miti.

Yeroo WAAQAYYO harka isaa diriirfatutti, inni gargaaru ni gufata; inni gargaaramus ni kufa; isaan lachuu walii wajjin badu.

⁴ WAAQAYYO akkana naan jedha: "Akkuma leenci,

leenci guddaan tokko waan qabate irratti aadu sana, tuunni tiksootaa guutuun isatti wal waammatan iyyuu, inni iyya isaanii hin sodaatu; yookaan waca isaaniitiin hin raafamu; akkasuma WAAQAYYON Waan Hunda Danda'u

- Tulluu Xiyoon irratti waraana banuuf gad bu'a.
⁵ Akkuma simbirroon mataa namaa irra naannoftu sana
 WAAQAYYON Waan Hunda Danda'u
 Yerusaalemiif gaachana ta'a;
 inni gaachana ta'eeffii ishee baraara;
 ishee bira darba; ishee oolchas."
⁶ Yaa saba Israa'el, gara Isa akka malee itti finciltan sanaatti deebi'aa. ⁷ Bara sana
 tokkoon tokkoon keessan waaqota tolfamoo harki keessan cubbamaan sun meetii fi
 warqee irraa hojjetee ture sana ni gattuutii.
⁸ "Asoor goraadee kan namaa hin ta'iniin kufti;
 goraadeen nama du'a hin oolles isaan fixa.
 Isaan goraadee duraa baqatu;
 dargaggoonni isaaniis dirqamaan hojii humnaa hojjetu.
⁹ Da'oon isaani sababii sodaatiifi ni jiga;
 ajajjoonni isaaniis faajjii waraanaa arganii hollatu"
 jedha WAAQAYYO, inni ibiddi isaa Xiyoon keessa,
 kan boolli ibidda isaa immoo Yerusaalem keessa jiru sun.

32

Mootummaa Qajeelummaa

- ¹ Kunoo mootiin qajeelummaadhaan mo'a;
 bulchitoonnis murtii qajeelaadhaan bulchu.
² Tokkoon tokkoon namaa akkuma da'annoo bubbee jalaa itti da'atanii,
 akkuma iddoo itti jabaa jalaa baqataniitti,
 akkuma bishaan gammoojjii keessa yaa'uutii fi
 akkuma gaaddisa kattaa guddaa kan lafa gogaa keessaa ni ta'a.
³ Ergasiis iji warra waa arguu hin dunuunfatu;
 gurri warra waa dhaga'uus ni dhaggeeffata.
⁴ Qalbiin nama jarjaru tokkoo ni beeka; ni hubata;
 arrabni giingees qajeelchee qulqulleessee dubbata.
⁵ Si'achi gowwaan ulfina qabeessa hin jedhamu;
 addaggeenis baay'ee hin kabajamu.
⁶ Gowwaan sababii gowwummaa dubbatuuf
 qalbiin isaa hammina hojjeta;
 inni waan Waaqni hin jaallanne hojjeta;
 waa'ee WAAQAYYOS dogoggora odeessa;
 inni nama beela'e beela hin baasu;
 nama dheebote illee bishaan dhowwata.
⁷ Malli addaggee hammina;
 inni utuma iyyanni rakkattootaa qajeelaa ta'ee jiruu
 sobumaan hiyyeeyyii balleessuuf jedhee jal'ina yaada.
⁸ Namni ulfina qabeessi garuu karoora ulfaataa baasa;
 hojii ulfina qabeessa sanattis ni jabaata.

Dubartoota Yerusaalem

- ⁹ Yaa dubartoota akka malee boontan
 ka'aatii na dhaggeeffadhaa;
 yaa intallan waan nagaa qabdan of seetan
 waan ani jedhu dhaga'aa!
¹⁰ Isin warri waan nagaa qabdan of seetan
 erga waggaan tokko xinnuma darbee booddee ni hollattu;
 wayiniin ija hin kennu;
 yeroon itti iji walitti qabamus hin dhufu.
¹¹ Yaa dubartoota boontuuwwan isin holladhaa;
 intallan waan nagaa qabdan of seetanis raafamaa!
 Uffata keessan of irraa baasaatii
 wayyaa gaddaa mudhii keessanitti hidhadhaa.
¹² Lafa gotiisaa gaariif,
 muka wayinii ija naqatuufis laphee keessan dha'aa;
¹³ lafa uummata koo kan qoraattii fi
 sokorruun irratti guddatuuf laphee keessan dha'aa;

- dhugumaan manneen gammachuu hundaa fi
magaalaa fandalaltuu kanaaf boo'aa.
- 14 Da'annoon ni ona;
magaalaan namni keessa guutes duwwaa hafti;
magaalaan jabduunii fi qooxiin eegumsaa bara baraan ni onu;
iddoo harreen diidaa keessa burraaqxuu fi iddoo bushaayeen itti bobba'an ta'u;
- 15 kunis hamma Hafuurri Qulqulluun
gubbaadhaa nurratti dhangalaafamuu fi
hamma gammoojjiin lafa qotiisaa gabbataa ta'ee
lafti qotiisaa gabbataan immoo bosona fakkaatutti ta'a.
- 16 Murtii qajeelaan gammoojjii keessa jiraata;
qajeelummaan immoo lafa qotiisaa gabbataa keessa jiraata.
- 17 Bu'aan qajeelummaa nagaan dha;
faayidaan qajeelummaa immoo utuu hin bir'atin
tasgabbiin bara baraan jiraachuu dha.
- 18 Sabni koo iddoo jireenyaa nagaan qabu,
manneen bultii sodaa hin qabne
iddoo boqonnaa jeequmsi hin jirre keessa jiraata.
- 19 Yommuu cabbiiin bosona irratti bu'u,
magaalattiin guutumaan guutuutti gad deebiti;
- 20 isin warri qarqara laga hundaatti sanyii facaafattanii
loon keessanii fi harroota keessan
nagaan bobbaafattan akkam eebbifamoo dha.

33

Dhiphinaa fi Gargaarsa

- 1 Yaa barbadeessaa,
ati kan hin barbadeeffamin siif wayyoo!
Yaa gantuu, ati kan hin ganamin siif wayyoo!
Ati yommuu barbadeessuu dhiiftutti ni barbadeeffamta;
yommuu ganuu dhiiftuttis ni ganamta.
- 2 Yaa WAAQAYYO, nu maari; nu si eeggannaa.
Ati ganama ganama jabina keenya,
yeroo dhiphinaatti immoo fayyina keenya nuuf ta'i.
- 3 Sagalee kakawwee keetiitiin, namoonni baqatu;
yeroo ati ol kaatutti, saboonni ni bittinnaa'u.
- 4 Yaa saboota, akkuma hawwaannisni walitti qabamu sana
boojiin keessan walitti qabama;
namoonnis akkuma tuuta hawwaannisaa irra u'utaalu.
- 5 WAAQAYYO ol ol jedha; inni ol gubbaa jiraataatii;
inni murtii qajeelaa fi qajeelummaadhaan Xiyyoonin guuta.
- 6 Inni bara keetiif hundee amansiisaa, kuusaa fayyinaa,
kan ogummaatii fi kan beekumsaa ta'a;
WAAQAYYON sodaachuun furtuu badhaadhummaa kanaa ti.
- 7 Kunoo gootonni isaanii sagalee ol fudhatanii daandii irratti iyyu;
ergamoonni nagaas hiqqifatanii boo'u.
- 8 Karaawwan gurguddaan onaniiru;
namni karaa irra deemu hin jiru.
- Walii galteen diigameera;
dhuga baatonni ishee tuffatamaniiru;
namni tokko iyyuu hin kabajamu.
- 9 Lafti ni boossi; ni barbadoofti;
Libaanoon ni qaanofiti; ni coollagdi;
Shaaron akka gammoojjii taati;
Baashaanii fi Qarmeloos baala isaanii harcaafatu.
- 10 WAAQAYYO akkana jedha; "Ani amma nan ka'a;
ani amma ol ol nan jedha;

- ani amma nan kabajama.
- 11 Isin habaqqii ulfooftu; cidii deessu;
hafuurri isin baafattan ibidda gubee isin fixuu dha.
- 12 Namoonni akkuma nooraa gubamu;
akkuma qoraattii cirameettis ibiddi itti qabsiifama.”
- 13 Isin warri fagoo jirtan waan ani hojjedhe dhaga’aa;
warri dhi’oo jirtanis humna koo beekaa!
- 14 Cubbamooinni Xiyoon keessaa ni sodaatu;
warri Waaqatti hin bulles hollachaa,
“Nu keessaa eenyutu ibidda waa balleessu wajjin jiraachuu danda’a?
Nu keessaa eenyutu
ibidda bara baraan hin dhaamne wajjin jiraachuu danda’a?” jedhu.
- 15 Namni qajeelummaan jiraatee dhugaa dubbatu,
kan faayidaa karaa dabaatiin argamu lagatee
harka isaa matta’aa fudhachuu irraa eeggatu,
namni marii nama ajjeesuu irraa gurra isaa cuqqaallatee
jal’ina ilaaluu irraa ija isaa dunuunfatu,
- 16 iddoo ol ka’aa irra jiraata;
da’annoon isaas kattaa jabaa ta’a.
Buddeenni isaaf ni kennama;
bishaanis isatti hin hir’atu.
- 17 Iji kee mooticha miidhagummaa isaatiin arga;
biyya fagoo jirtu illee ni ilaala.
- 18 Atis akkana jettee garaa keetti raafama durii sana yaadda:
“Ajajaan ol aanaan sun eessa jira?
Namichi gibira fuudhu sun eessa jira?
Ajajaan itti gaafatamaan gamoowwanii eessa jira?”
- 19 Ati si’achi saba hamaa,
kan haasaan isaa namaaf hin galle,
kan afaan isaa haaraa ta’ee fi hin hubatamne hin argitu.
- 20 Xiyoon, magaalaa ayyaana keenyaa hubadhuu ilaali;
iji kee Yerusaaleemin, iddoo jireenyaa nagaa qabu,
dunkaana hin buqqifamne arga;
qofoon ishee hin buqqifamu;
yookaan funyoon ishee tokko iyyuu hin citu.
- 21 WAAQAYYO achitti Humna keenya ta’a.
Iddoon sunis akkuma lageen gurguddaatii fi burqaawwanii ta’a.
Dooniin waraanaa kan batoodhaan oofamu tokko iyyuu
isaan irra hin deemu;
dooniin jabaan tokko iyyuu isaan irra hin qaxxaamuru.
- 22 WAAQAYYO abbaa murtii keenyaatii;
WAAQAYYO seera nuuf kenna;
WAAQAYYO mootii keenya;
inni nu fayyisa.
- 23 Funyoon kee laafeera;
utubaan isaa jabaatee hin dhaabamne;
sharaanis hin diriirfamne.
Ergasii boojiun baay’een ni qoodama;
okkolaan iyyuu boojuu ni fudhata.
- 24 Namni Xiyoon keessa jiraatu kam iyyuu, “Na dhukkuba” hin jedhu;
cubbuun warra achi jiraatanis ni dhiifamaaf.

34

Murtii Saboota Eggattu

- 1 Yaa saboota, isin as dhi’aadhaatii dhaggeeffadhaa;
yaa namoota, isinis qalbeeffadhaa!
Lafti haa dhageessu; kan ishee keessa jiraatu hundis,

- addunyaa fi wannii ishee keessaa ba'u hundinuu haa dhaga'an!
² WAAQAYYO saboota hundatti aareera;
 dheekkamsi isaa loltoota isaanii hunda irra bu'eera.
 Inni guutumaan guutuutti isaan barbadeessa;
 inni akka qalamaniif dabarsee isaan kenna.
³ Isaan keessaa warri du'an alatti gad darbataman;
 reeffi isaanii ni ajaa'a;
 tulluuwwan dhiiga isaaniitiin tortoru.
⁴ Raayyaawwan samii hundinuu ni baqu;
 samiinis akkuma kitaaba maramaa ni marmarama;
 raayyaan urjiwwanii hundinuu akkuma baala wayinii coollagee,
 akkuma harbuu muka harbuu irraa harca'uutti harca'u.
⁵ Goraadeen koo samii keessatti hamma quufutti dhugeera;
 kunoo inni Edoomitti muruuf,
 gara saba ani guutumaan guutuutti barbadeesseetti gad bu'eera.
⁶ Goraadeen WAAQAYYOO dhiiga keessa cuuphameera;
 inni coomaan, dhiiga xobbaallaawwan hoolaatii fi re'ootaatiin,
 moora kalee korbeeyyii hoolaatiin haguugameera.
 WAAQAYYO Bozraa keessatti aarsaa,
 Edoom keessatti immoo qalma guddaa qopheesseeraatii.
⁷ Gafarsi isaan wajjin,
 jiboonnis korommii gurguddaa wajjin dhumu.
 Lafti isaanii dhiigaan jiiti;
 biyyoon isaaniis moora quufa.
⁸ WAAQAYYO guyyaa itti haaloo ba'u,
 waggaa itti waa'ee Xiyoon falmu qabaatii.
⁹ Burqaawwan Edoom leeleetti,
 biyyoon ishees dinyii boba'utti geeddarama;
 lafti ishee immoo leelee boba'u ta'a!
¹⁰ Inni halkan yookaan guyyaa hin dhaamu;
 aarri isaas bara baraan ol ba'a.
 Lafti sun dhalootaa hamma dhalootaatti ontee hafti;
 namni tokko iyyuu deebi'ee ishee keessaan hin darbu.
¹¹ Cululleen gammoojjitii fi dhaddeen lafa sana ni fudhatu;
 urunguu fi arraagessi mana isaanii achitti ijaarratu.
 Waaqni Edoom irra, funyoo jeequmsaatii fi
 madaalii badiisaa ni diriirsa.
¹² Gurguddoonni ishee waan mootummaa jedhamee waamamu
 achii hin qabaatan;
 ilmaan mootota ishee hundi ni badu.
¹³ Masaraa ishee qoraattii,
 da'annoo ishee doobbii fi sokorruutu dhaala.
 Isheen boolla waangoo,
 iddoo urunguun jiraattu ni taati.
¹⁴ Uumamawwan gammoojjii waraabessa wajjin wal ga'u;
 hafuuronni hamoo re'ee diidaa fakkaatan wal waamu;
 uumamawwan halkanii achi boqotan;
 ofii isaaniitiifis iddoo aara galfannaa argatu.
¹⁵ Urunguun achitti man'ee ijaarrattee hanqaaquu hanqaaqxi;
 cuucii yaaftees qoochoo jalatti kunuunfatti;
 allaattiinis dhirsaa fi niitii taatee achitti walitti qabamti.
¹⁶ Kitaaba WAAQAYYOO keessaa ilaalaatii kan akkana jedhu dubbifadhaa:
 Isaan kanneen keessaa tokko iyyuu hin dhabamu;
 tokkittiin iyyuu dhirsaa ishee hin dhabdu.
 Afaan Waaqaa ajajeeraatii;
 Hafuurri isaas walitti isaan qaba.
¹⁷ Isatu qooda isaanii hiraaf;
 harki isaa safartuudhaan isaaniif qooda.
 Isaan bara baraan qooda kana ni qabaatu;
 dhalootaa hamma dhalootaattis achi jiraatu.

35

Gammachuu Warra Furamanii

¹ Gammoojjii fi lafti gogaan ni gammadu;
 lafti onaan ni ililcha; ni daraaras.
 Akka arfaasee, ² baay'inaan daraara;
 akka malee gammadees ililcha.
 Ulfinni Libaanoon, surraan Qarmeloosii fi
 Shaaroon ni kennamaaf;
 isaan ulfina WAAQAYYOO,
 surraa Waaqa keenyaas ni argu.

³ Harka dadhabe jajjabeessaa;
 jilba laafes cimsaa;

⁴ warra garaan isaanii sodaatuun akkana jedhaa:
 “Jabaadhaa; hin sodaatinaa;
 Waaqni keessan ni dhufa;
 inni haaloo baasuuf dhufa;
 gatii malu qabatee
 isin oolchuuf ni dhufa.”

⁵ Ergasii jji nama jaamaa ni banama;
 gurri nama duudaas ni dhaga'a.

⁶ Gaafas namni naafti akkuma gadamsaa utaala;
 arrabni hidhamaanis gammachuudhaan faarfata.
 Bishaan gammoojjii keessaa,
 burqaanis gammoojjii keessaa cabsee ba'a.

⁷ Lafti nama gubu haroo,
 lafti gogaan immoo burqaa bishaanii ta'a.
 Boolla duraan waangoonni keessa ciisan irratti marga,
 shambaqqoo fi dhallaadduutu biqila.

⁸ Karaan guddaan tokko achi ni jiraata;
 innis, Karaa Qulqullinaa jedhamee waamama;
 inni warra Karaa sana irra deemaniif ta'a.
 “Xuraa'onni” isa irra hin deeman;
 gowwoonni achiinuu hin ba'an.

⁹ Leenci achitti hin argamu;
 yookaan bineensi hamaan achi irra hin ba'u;
 isaan achitti hin argaman.

Garuu warra furaman qofatu achi irra deema;
¹⁰ warri WAAQAYYOO isaan fure ni deebi'u.

Isaan faarfannaadhaan Xiyoon seenu;
 gammachuun bara baraa mataa isaanii irra jiraata.
 Isaan gammachuu fi ililleedhaan guutamu;
 gaddii fi boo'ichi isaan irraa fagaatu.

36

Senaaheriib Yerusaaalemin Doorsise

36:1-22 kwf - 2Mt 18:13,17-37; 2Sn 32:9-19

¹ Bara mootummaa Hisqiyaas mootichaa keessa waggaa kudha afuraffaatti Senaaheriib mootichi Asoor magaalaawwan Yihuudaa kanneen dallaa jabaa qaban hunda lolee ni qabate. ² Ergasii mootichi Asoor, Raafaasqiis ajajaa waraana isaa loltoota hedduu wajjin Laakkiishii gara Yerusaaalem, Hisqiyaas mootichatti erge. Ajajaan sunis jal'isii Haroo Ol aanu kan karra Lafa Qotiisaa Namicha Wayyaa Miicuutti geessu bira ga'ee dhaabate; ³ Eliiyaaqiim ilmi Hilqiya bulchaan masaraa mootummaa, Shebnaa barreessaanii fi Yoo'aa ilmi Asaaf galmeessaan gara isaatti gad ba'an.

⁴ Ajajaan waraanaa sunis akkana isaaniin jedhe; “Akkana jedhaa Hisqiyaasitti himaa: “Mootiin guddaan, mootichi Asoor akkana jedha: Of amanachuu kee kana maal irratti hundeeffatte? ⁵ Ati, “Ani tooftaa fi jabina waraanaa qaba” jetta; garuu dubbii faayidaa hin qabne dubbatta. Ati eenyun abdattee natti fincilta? ⁶ Kunoo ati Gibxin jechuunis ulee shambaqqoo caccabaa harka nama isatti irkatu kamii iyyuu waraanee

madeessu sana abdatteerta! Fara'oon Mootichi Gibxis nama isa abdatu hundaaf akkasuma. ⁷ Yoo ati, "Nu WAAQAYYO Waaqa keenya abdanna" naan jette, inni isuma Hisqiyaas iddoowwan sagadaa isaatii fi iddoowwan aarsaa isaa diigee Yihuudaa fi Yerusaleemiin, "Isin fuula iddoo aarsaa kanaa duratti waageffachuu qabdu" jedhe sana mitii?

⁸ "Amma kottuutii gooftaa koo mooticha Asoor wajjin dubbadhu; anis yoo ati namoota farda yaabbatan qopheeffachuu dandeesse fardeen kuma lama siifin kenna! ⁹ Yoos ati yoo gaariiwwanii fi abbootii fardaatiif jettee Gibxin abdatte iyyuu, akkamiin qondaaltota gooftaa kootii keessaa ajajaa gad aanaa isaa illee of irraa deebisuu dandeessa? ¹⁰ Ati waan ani dubbii WAAQAYYOO malee biyya kana lollee barbadeessuuf dhufe seetaa? WAAQAYYO mataan isaa akka ani biyya kanatti duulee ishee barbadeessu natti dubbateera."

¹¹ Kana irratti Eliiyyaaqiiim, Shebnaa fi Yoo'aa ajajaa waraanaa sanaan, "Maaloo waan nu dhageenyuuf afaan warra Araamaayikiitiin garboota keetti dubbadhu. Utuma namoonni dallaa irra jiran dhaga'anii afaan Ibrootaatiin nutti hin dubbatin" jedhan.

¹² Ajajaan waraanaa sun garuu akkana jedhee deebise; "Namni gooftaan koo akka ani waan kana itti himuuf itti na erge gooftaa keessanii fi isin qofaa? Namoota dallaa irra tataa'an warra akkuma keessan udaan ofii isaanii nyaatanii fincaan ofii isaanii dhuguu qabaniifis mitii?"

¹³ Ergasii ajajaan waraanaa sun ol ka'ee afaan Ibrootaatiin akkana jedhe; "Dubbii mooticha guddaa, dubbii mootii Asoor dhaga'aa! ¹⁴ Mootichi akkana jedha: Hisqiyaas isin hin gowwoomsin. Inni isin baasuu hin danda'u! ¹⁵ Hisqiyaas, 'WAAQAYYO dhugumaan nu baasa; magaalaan kunis dabarfamtee harka mooticha Asooritti hin kennamtu' jechuudhaan akka isin WAAQAYYON amanattaniif isin hin sossobin.

¹⁶ "Hisqiyaasin hin dhaggeeffatinaa. Mootiin Asoor akkana jedha: Ana wajjin nagaa buusaatii gara koo kottaa. Ergasii tokkoon tokkoon keessan muka wayiniitti fi muka harbuu keessan irraa ni nyaattu; boolla bishaan keessanii keessaas ni dhugu; ¹⁷ kunis hamma ani dhufee gara biyya akkuma biyya keessanii jirtuu, gara biyya midhaanii fi daadhii wayinii haaraatti, biyya buddeena fi iddoo dhaabaa wayiniitti isin geessutti ta'a.

¹⁸ "Hisqiyaas, 'WAAQAYYO nu baraara' jedhee isin hin dogoggorin; Waaqni saboota kamii iyyuu takkumaa harka mooticha Asoor keessaa biyya ofii baafatee beekaa?

¹⁹ Waaqonni Hamaatii fi waaqonni Arfaad eessa jiru? Waaqonni Seefarwaayim eessa jiru? Isaan harka koo keessaa Samaariyaa baasaniiruu? ²⁰ Waaqota biyyoota kanneenii hunda keessaa kamtu biyyoota isaanii harka koo keessaa baasuu danda'e? Yoos WAAQAYYO akkamiin harka koo keessaa Yerusaleemin baasuu danda'a ree?"

²¹ Namoonni garuu sababii mootichi, "Deebii hin kenninaafii" jedhee ajajeef inuma cal'isan malee deebii tokko iyyuu hin kennine.

²² Kana irratti Eliiyyaaqiiim ilmi Hilqiyaa bulchaan masaraa mootummaa, Shebnaa barreessaanii fi Yoo'aa ilmi Asaaf galmeessaan, uffata isaanii tatarsaasaniin gara Hisqiyaas dhaqanii waan ajajaan waraanaa sun jedhe itti ni himan.

37

Bilisoomuun Yerusaleem Himame

37:1-13 kwf - 2Mt 19:1-13

¹ Hisqiyaas mootichi yommuu waan kana dhaga'etti, uffata isaa tarsaasee wayyaa gaddaas uffatee mana qulqullummaa WAAQAYYOO seene. ² Innis Eliiyyaaqiiim bulchaa masaraa mootummaa, Shebnaa barreessaa fi luboota dura bu'oota hundi isaanii wayyaa gaddaa uffatan Isaayyaas raajicha ilma Amoos sanatti erge. ³ Isaanis akkana jedhanii isatti himan; "Hisqiyaas akkana jedha: Guyyaan kun akkuma yeroo daa'imni tokko dhalachuu ga'ee garuu dubartiin humna ittiin ciniinsifatee deessu dhabduutti guyyaa lubbamuu, kan dheekkamsaatii fi kan salphinaa ti. ⁴ WAAQAYYO Waaqni kee dubbii ajajaa waraanaa kan gooftaan isaa mootichi Asoor akka inni Waaqa jiraataatti qoosuuf erge sanaa dhaga'ee dubbii WAAQAYYO Waaqni kee dhaga'e sanaaf jedhee isatti dheekkama ta'a. Kanaafuu ati hambaawwan hamma ammaatti jiraniif kadhadhu."

⁵ Yommuu qondaaltonni Hisqiyaas Mootichaa gara Isaayyaas dhufanitti, ⁶ Isaayyaas akkana isaaniin jedhe; "Akkana jedhaa gooftaa keessanitti himaa; 'WAAQAYYO akkana jedha: Ati waan dhageesse jechuunis dubbii garboonni mootii Asoor ittiin na arrabsan sana hin sodaatin. ⁷ Dhaggeeffadhaa! Ani akka inni oduu wayii dhaga'ee gara biyya ofii isaatti deebi'uuf hafuura tokko isa keessa nan kaa'a; achittis akka inni goraadeedhaan ajjeefamu nan godha."

⁸ Ajajaan waraanaas yommuu akka mootiin Asoor Laakkiishii ba'ee deeme dhaga'etti, duubatti deebi'ee utuu mootichi Libnaa lolaa jiruu argate.

⁹ Senaaheriibis akka Tiirhaaq mootichi Itoophiyaa sun isa loluuf dhufaa jiru dhaga'e. Innis yommuu waan kana dhaga'etti, akkana jedhee Hisqiyaaasitti ergamoota erge: ¹⁰ "Hisqiyaaas mooticha Yihuudaatiin akkana jedhaa: Waaqni ati abdattu sun, 'Yerusaalem dabarfamtee harka mootii Asooritti hin kennamtu' jedhee si hin gowwoomsin. ¹¹ Ati waan mootonni Asoor guutumaan guutuutti isaan balleessuudhaan biyyoota hunda godhan dhageesseerta. Ati immoo ni haftaa ree? ¹² Waaqonni saboota abbootiin koo barbadeessan sanaa jechuunis waaqonni Goozaan, waaqonni Kaaraan, waaqonni Rezefii fi waaqonni namoota Eden kanneen Telaasaar keessa turan sanaa isaan oolchaniiruu? ¹³ Mootiin Hamaati yookaan mootiin Arfaad eessa jira? Mootiin magaalaa Seefarwaayim, mootiin Heenaa yookaan mootiin Iwaa eessa jira?"

Kadhannaa Hisqiyaaas

37:14-20 kwf - 2Mt 19:14-19

¹⁴ Hisqiyaaasis ergamoota sana harkaa xalayaa fuudhee dubbifate. Ergasiis gara mana qulqullummaa WAAQAYYOOTTI ol ba'ee xalayaa sana fuula WAAQAYYOO duratti diriirise. ¹⁵ Hisqiyaaas akkana jedhee WAAQAYYON kadhate: ¹⁶ "Yaa WAAQAYYOO Waan Hunda Dandeessu, Waaqa Israa'el, kan Kiirubeel gidduu teessoo irra jirtu, si qofatu mootummoota lafaa hunda irratti Waaqa. Ati samii fi lafa uumteerta. ¹⁷ Yaa WAAQAYYOO, gurra kee as qabiitii dhaga'i; yaa WAAQAYYOO, ija kees banadhuu ilaali; dubbii Senaaheriib kan inni Waaqa jiraataa arrabsuuf erge kana hunda dhaggeeffadhu.

¹⁸ "Yaa WAAQAYYOO, mootonni Asoor uummata kana hundaa fi biyyoota isaanii balleessuun dhugaa dha. ¹⁹ Isaan waaqota jaraa ibiddatti naqanii barbadeessaniiru; waaqonni sun mukaa fi dhagaa harka namaatiin soofaman turan malee waaqota hin turreetii. ²⁰ Kanaafuu yaa WAAQAYYOO Waaqa keenya, akka mootummoonni lafaa hundinuu akka ati qofti WAAQAYYOO Waaqa taate beekaniif, harka isaatii nu baasi."

Kufaatii Senaaheriib

37:21-38 kwf - 2Mt 19:20-37; 2Sn 32:20-21

²¹ Sana booddee Isaayyaas ilmi Amoos akkana jedhee Hisqiyaaasitti ergaa erge; "WAAQAYYOO Waaqni Israa'el akkana jedha: Sababii ati waa'ee Senaaheriib mooticha Asoor na kadhateef, ²² dubbii WAAQAYYOO isaan mormuudhaan dubbate kunoo kanaa dha:

"Intalli Xiyoon durbi qulqullittiin
si tuffattee sitti qoosti.

Intalli Yerusaalem

yeroo ati baqattutti mataa ishee sitti raafti.

²³ Kan ati itti qoostee arrabsite sun eenyu?

Ati eenyutti sagalee kee ol fudhattee

of tuulummaadhaan ija ol qabatte?

Qulqullichuma Israa'el sanatti mitii!

²⁴ Ati karaa ergamoota keetiitiin,

Gooftaatti qoosteerta.

Ati akkanas jetteerta;

'Ani gaariwwan koo hedduudhaan

fiixee tulluuwwaniitti,

fiixee Libaanoon kan akka malee ol dheeratuttis ol ba'eera.

Ani birbirsawwan isaa akka malee dhedheeroo,

gaattiraawwan isaa filatamoo sanas ciccireera.

Ani fiixeewwan isaa kanneen akka malee ol fagoo,

bosonoota akka malee mimmiidhagoo qaqqabeera.

²⁵ Ani biyya ormaatti boolla bishaanii qotadhee

achitti bishaan dhugeera.

Ani faana miilla kootiin

lageen Gibxi hunda gogseera.'

²⁶ "Ati waan kana hin dhageenyee?

Bara dheeraan dura anatu waan kana hojjete.

Ani bara durii keessa waan kana nan karoorfadhe;

amma immoo hojii irra oolfadheera;

kunis akka ati magaalawwan

dallaa jabaa qaban diigdee tuullaa dhagaa gootuu dha.

27 Namoonni isaanii humna dhabanii
 abdii kutataniis qaana'an.
 Isaan akkuma biqiltuu diidaa,
 akkuma biqiltuu kichuu tokkoo,
 akkuma marga mana gubbaatti biqilu
 kan utuu hin guddatin gubatee ti.

28 "Ani garuu lafa ati jirtu,
 yoom akka dhuftuu fi yoom akka deemtu,
 akka ati akka malee natti aartu illee nan beeka.

29 Sababii ati akka malee natti aartee
 of tuulummaan kees gurra koo seeneef,
 ani funyaan keetti hokkoo koo,
 afaan keetti immoo luugama koo kaa'ee
 akka ati karuma dhufte sanaan deebitu sin godha.

30 "Yaa Hisqiyaas kun mallattoo siif ta'a:
 "Isin waggaa kana waan ofumaan biqilu,
 waggaa lammaffaatti immoo waanuma isa irraa latu nyaattu.

Waggaa sadaffaatti garuu facaafadhaa galfadhaa;
 muka wayiniis dhaabbadhaatii ija isaa nyaadhaa.

31 Ammas hambaan mootummaa Yihuudaa tokko,
 jalaan hidda baafatee gubbaan immoo ija naqata.

32 Yerusaalem keessaa hambaan tokko,
 Tulluu Xiyooniitii immoo
 gareen warra badiisa jalaa ba'e tokkoo ni dhufa.

Hinaaffaan WAAQAYYOO Waan Hunda Danda'uu
 waan kana ni raawwata.

33 "Kanaafuu WAAQAYYOO waa'ee mooticha Asoor akkana jedha:
 "Inni magaalaa kana hin seenu,
 yookaan xiyya tokko illee asitti hin darbatu.

Inni gaachana qabatee fuula isaa duratti hin dhi'aatu
 yookaan tuullaa biyyoo itti hin marsu.

34 Inni karuma dhufe sanaan ni deebi'a;
 magaalaa kanas hin seenu"
 jedha WAAQAYYOO.

35 "Anis sababii ofii kootii fi sababii garbicha koo Daawitiif jedhee
 magaalaa kana nan eega; nan oolchas!"

36 Ergasii ergamaan WAAQAYYOO gad ba'ee qubata warra Asoor keessatti nama kuma
 dhibba tokkoo fi saddeettamii shan fixe. Yommuu namoonni guyyaa itti aanu ganama
 bariin ka'anitti kunoo reeffi namaa lafa guutee ture. 37 Kanaafuu Senaaheriib mootichi
 Asoor qubata sana keessaa ba'ee baqate; Nanawweetti deebi'ees achi jiraate.

38 Gaaf tokko utuu inni mana sagadaa Waaqa isaa Nisrook jedhamuu keessatti
 waaqeffachaa jiruu ilmaan isaa Adramelekii fi Sharezer goraadeedhaan isa ajjeesanii
 gara biyya Araaraatitti baqatan. Ilmi isaa Eesarhadoonis iddoo isaa bu'ee mootii ta'e.

38

Hisqiyaas Dhukkubsachuu Isaa

38:1-8 kwf - 2Mt 20:1-11; 2Sn 32:24-26

1 Bara sana keessa Hisqiyaas dhukkubsatee du'uu ga'ee ture. Isaayyaas ilmi Amoos
 raajichi gara isaa dhaqee, "WAAQAYYOO akkana jedha: Mana kee tottoffadhu; ati ni duuta
 malee hin fayyituutii" jedheen.

2 Hisqiyaasis fuula isaa gara keenyan manaatti garagalatee akkana jedhee WAAQAYY-
 OON kadhate; 3 "Yaa WAAQAYYOO, akka ani amanamummaa fi garaa tokkoon fuula kee
 dura jiraadhee waan fuula kee duratti gaarii ta'es hojjedhe yaadadhu." Hisqiyaasis
 hiqqifatee ni boo'e.

4 Ergasiis dubbiin WAAQAYYOO akkana jedhee gara Isaayyaas dhufe: 5 "Dhaqiitii
 akkana jedhii Hisqiyaasitti himi; 'WAAQAYYOO Waaqni abbaa kee Daawit akkana jedha:
 Ani kadhannaa kee dhaga'eera; imimmaan kees argeera; ani umurii kee irratti waggaa
 kudha shan siifan dabala. 6 Ani si'ii fi magaalaa kana harka mooticha Asooriitii nan
 baasa. Ani magaalaa kana nan eega.

7 “Kun mallattoo WAAQAYYOO kan akka inni waan waadaa gale sana guutu mirka-neessuuf WAAQAYYO biraa siif kennamee dha: ⁸ Ani akka gaaddidduun aduu tarkaanfii kurnan gulantaa Aahaaz irraan gad bu’e sana dugda duubatti deebi’u nan godha.” Kanaafuu gaaddidduun tarkaanfii kurnan gad bu’ee ture sun dugda duubatti deebi’e.

⁹ Barreeffama Hisqiyaas mootichi Yihuudaa erga dhukkubsatee fayyee hooddee barresse:

¹⁰ Anis, “Walakkaa umurii kootiitti,

ani sii’ool seenuun qabaa?

Bara jireenya koo kan hafes dhabuun qabaa?” nan jedhe.

¹¹ Ani akkanan jedhe; “Ani biyya jiraattotaa keessatti, lammata WAAQAYYON hin argu;

ani si’achi sanyii namaa hin ilaalu,

yookaan warra addunyaa kana irra jiraatan wajjin hin jiraadhu.

¹² Manni koo akkuma dunkaana tiksootaa

buqqifamee narraa fudhatameera.

Ani akkuma wayyaa dhooftuu jireenya koo marmareera;

inni mi’a wayyaa dhooftuu irraa na kuteera;

ati halkanii guyyaa na balleessita.

¹³ Ani hamma bariitti obsaan nan eeggadhe;

inni garuu akka leencaa lafee koo hunda caccabse;

ati halkanii guyyaas na balleessita.

¹⁴ Ani akka simbirroo yookaan akkuma daalotee nan wace;

akka gugee boossuus nan aade;

iji koo gara samii ilaaluudhaan dadhabe;

yaa Gooftaa ani rakkadheeraa kottuu na gargaari!”

¹⁵ Ani garuu maal jechuun danda’a?

Inni natti dubbate; inni mataan isaas waan kana godhe.

Ani waa’ee dhiphinaa lubbuu kootiif

umurii koo guutuu gad of qabee nan jiraadha.

¹⁶ Yaa Gooftaa, namoonni

waanuma akkasiiitiin jiraatu;

hafuurri koos isaanumaan jireenya argata.

Ati na fayyiftee lubbuudhaanis na jiraachifte.

¹⁷ Dhugumaan akkas dhiphachuun koo faayidaa kootiif.

Ati jaalala keetiin boolla badiisaa irraa na eegde;

cubbuu koo hundas, dugda kee duubatti gatte.

¹⁸ Sii’ool si galateeffachuu hin danda’utii;

duutis si jajachuu hin danda’u.

Warri qileetti gad bu’an,

amanamummaa kee abdachuu hin danda’an.

¹⁹ Isaan akkuma ani har’a gochaa jiru kana yaa jiraataa,

yaa jiraataa jedhanii si jajatu;

abbootiin waa’ee amanamummaa keetii

ijoollee isaaniitti ni odeessu.

²⁰ WAAQAYYO na baraara;

nus bara jireenya keenyaa guutuu,

mana qulqullummaa WAAQAYYOO keessatti

mi’a ribuu irraa hojjetameen faarfanna.

²¹ Isaayyaas, “Maxinoo harbuu tolchaatii dhullaa isaa irra kaa’aa; innis ni fayyaa” jedhee ture.

²² Hisqiyaasis, “Akkani gara mana qulqullummaa WAAQAYYOOTI ol ba’uuf maaltu mallattoo ta’a?” jedhee gaafate.

39

Ergamoota Baabilonii Dhufan

39:1-8 kwf - 2Mt 20:12-19

¹ Yeroo sanatti Meroodak Baladaan ilmi Baladaan mootiin Baabilon sababii akka Hisqiyaas dhukkubsatee fayyee dhaga’eef xalayootaa fi kenna ergeef. ² Hisqiyaasis ergamoota sana gammachuudhaan simatee waan mankuusa isaa keessa ture meetii,

warqee, urgooftuu, zayitii qulqulluu akkasumas kuusaa mi'a lolaa isaa guutuu fi waan mankuusa isaa keessatti argamu hunda isaanitti argisiise. Wannii Hisqiyaa masaraa mootummaa isaa keessaa yookaan mootummaa isaa hunda keessaa isaanitti hin argisiisin tokko iyyuu hin turre.

³ Kana irratti Isaayyaas raajichi gara Hisqiyaa mootichaa dhaqee, "Namoonni sun maal jedhan? Isaan eessaa dhufan?" jedhee gaafate.

Hisqiyaa is, "Isaan Baabilonii biyya fagoodhaa na bira dhufan" jedhee deebise.

⁴ Raajichi, "Jarri masaraa mootummaa keetii keessatti maal argan?" jedhee gaafate.

Hisqiyaa immoo, "Isaan waan masaraa mootummaa koo keessa jiru hunda argan; wannii ani mankuusa koo keessaa isaanitti hin argisiisin tokko iyyuu hin jiru" jedheen.

⁵ Isaayyaas kana irratti Hisqiyaa siin akkana jedhe; "Dubbi WAAQAYYOO Waan Hunda Danda'u u dhaga'i: ⁶ Yeroon itti wannii masaraa mootummaa keetii keessa jiru hundii fi wannii abbootiin kee hamma har'aatti kuusan hundinuu saamamee gara Baabilonitti geeffamu tokko dhugumaan ni dhufa. Wannii tokko iyyuu hin hafu, jedha WAAQAYYOO.

⁷ Sanyii kee keessaa namoonni tokko tokko, foonii fi dhiigni kee kanneen siif dhalatan booji'amanii masaraa mootummaa mooticha Baabilon keessatti xu'aashiiwwan ta'u."

⁸ Hisqiyaa is, "Dubbiin WAAQAYYOO kan ati dubbatte kun gaarii dha" jedhee deebise. Inni, "Bara jirenya koo keessa nagaan fi tasgabbiin ni jiraata" jedhee yaadee tureetii.

40

Sabni Waaqaa Jajjabeeffame

¹ Jajjabeessaa; saba koo jajjabeessaa;
jedha Waaqni keessan.

² Garaa Yersaaleemitti dubbadhaa;
hojiin garbummaa ishee akka dhume,
gatiin cubbuu ishee akka baafameef,
isheen cubbuu ishee hundaaf
harka WAAQAYYOOTII adabbii dachaa
akka fudhatte isheetti labsaa.

³ Sagalee akkana jedhee iyyu tokko:
"Gammoojjii keessatti
WAAQAYYOO karaa qopheessaa;
gammoojjii keessatti Waaqa keenyaaf
karaa guddicha qajeelchaa.

⁴ Sululli hundi ni guutama;
tulluu fi gaarii hundinuu gad deebifama;
lafti wal caalu, wal qixxeffama;
lafti bu'aa ba'iinis dirree ta'a.

⁵ Ulfinni WAAQAYYOO ni mul'ata;
sanyiin namaa hundinuu tokkummaadhaan ni arga.
Afaan WAAQAYYOO dubbateeraatii."

⁶ Sagaleen tokko "Iyyi" jedha.
Anis, "Maal jedheen iyya?" nan jedhe.

"Namni hundi akkuma margaa ti;
ulfinni isaa hundis akkuma daraaraa dirree ti.

⁷ Sababii hafuurri WAAQAYYOO baafatu isaanitti bubbisuuf margi
ni coollaga; daraaraanis ni harca'a.
Dhugumaan namni marguma.

⁸ Margi ni coollaga; daraaraanis ni harca'a;
dubbiin Waaqa keenyaa garuu bara baraan ni jiraata."

⁹ Ati kan Xiyooniif oduu gaarii fiddu,
tulluu dheeraatti ol ba'i.

Ati kan Yersaaleemiif oduu gaarii fiddu,
sagalee kee ol fudhuutii iyyi;
ol fudhadhuu iyyi; hin sodaatin;
magaalaawwan Yihuudaatiinis,
"Waaqni keessan kunoo ti!" jedhi.

- 10 Kunoo, WAAQAYYO Gooftaan humnaan ni dhufa;
irreen isaa jabaadhaanis ni bulcha.
Kunoo, gatiin isaa isa wajjin jira;
gatiin inni namaaf kennu isuma harka jira.
- 11 Inni akkuma tiksee tokkootti bushaayee isaa tikfata;
xobbaallaawwan hoolaas irree isaatiin walitti qaba;
ofitti qabees qoma isaatti hammata;
haadhota hoolotaa warra hoosisanis suutuma oofa.
- 12 Bishaanota konyee isaatiin kan safare
yookaan samiiwwan taakkuu isaatiin kan safare eenyu?
Biyyoo lafaa safartuudhaan walitti kan qabe
yookaan tulluuwwan madaaliidhaan
gaarran immoo madaaliidhaan kan madaale eenyu?
- 13 Eenyutu Hafuura WAAQAYYOO qajeelchuu danda'e?
Yookaan namni gorsaa isaa ta'ee isa barsiise eenyu?
- 14 WAAQAYYO hubannaa argachuuf eenyun gorsa gaafate?
Daandii qajeelaas eenyutu isa barsiise?
Eenyutu beekumsa isaaf kennee
yookaan daandii hubannaa isa argisiise?
- 15 Dhugumaan saboonni akkuma cophaa baaldii keessaa ti;
isaan akkuma awwaara madaalii irra jiruutti ilaalamu;
inni biyyoota bishaan gidduu illee akkuma biyyoo bullaa'aatti madaala.
- 16 Libaanon qoraan iddoo aarsaatiif ga'u hin qabdu,
yookaan horiin ishee aarsaa gubamuuf hin ga'an.
- 17 Fuula isaa duratti saboonni hundinuu wayittuu hin lakkaa'aman;
isaan akka ilaalcha isaatti homaattuu hin hedaman;
gatiis hin qaban.
- 18 Yoos Waaqa eenyutti fakkeessitu?
Fakkii kam wajjin isa wal bira qabdu?
- 19 Waaqa tolfamaa tumtuu sibiilaatu baqsee tolcha;
tumtuun warqees warqee itti uffisa;
foncaa meetiitiinis ni miidhagsa.
- 20 Hiyyeessi aarsaa akkasii dhi'eessuu
hin dandeenye tokko muka hin tortorre filata.
Waaqa tolfamaa hin jigne dhaabuufis
nama ogummaa hojii harkaa qabu barbaaddata.
- 21 Isin hin beektanii?
Isin hin dhageenyee?
Wanni kun jalqabumaa kaasee isinitti hin himamnee?
Isin erga lafti hundeeffamtee jalqabee hin hubannee?
- 22 Inni geengoo lafaatii ol taa'a;
uummanni lafaas akkuma korophisaa ti.
Inni samiiwwan akkuma golgaatti diriirsa;
akka dunkaana keessa jiraataniittis isaan diriirsa.
- 23 Inni ilmaan moototaa faayidaa dhabsiisa;
bulchitoota addunyaas harka duwwaa hambisa.
- 24 Akkuma isaan dhaabamaniin,
akkuma isaan facaafamaniin,
akkuma isaan lafa keessatti hidda yaafataniin,
inni isaanitti bubbise;
isaanis ni coollagan;
obombolettiinis akkuma habaqqiitti isaan haxaa'e.
- 25 "Isin eenyutti na fakkeessitu?
Yookaan eenyutu anaan qixxaata?" jedha Qulqullichi.
- 26 Ija keessan ol fudhadhaatii samiiwwan ilaalaa:
Eenyutu kanneen hunda uume?
Isa tuuta urjiiwwanii tokko tokkoon fidee

tokkoo tokkoo isaanii maqaa maqaadhaan waamu sanaa dha.
Sababii humna isaa cimaa sanaatii fi jabina isaa guddaa sanaatiif
isaan keessaa tokko iyyuu hin dhabamu.

- 27 Yaa Yaaqoob, yaa Israa'el, ati maaliif,
"Karaan koo WAAQAYYO duraa dhokateera;
haajaan koos fuula Waaqa koo duratti
tuffatameera" jettee guungumta?
28 Ati hin beektuu?
Ati hin dhageenyee?
WAAQAYYO Waaqa bara baraa ti;
inni Uumaa handaara lafaa ti.
Inni hin dadhabu yookaan haara hin galfatu;
hubannaa isaas kan qoree bira ga'u hin jiru.
29 Inni dadhabdootaaf jabina kenna;
nama laafaaf immoo humna dabala.
30 Ijoolleen iyyuu ni dadhabu; ni bututus;
dargaggoonnis gufatanii kufu;
31 Warri WAAQAYYON abdatan garuu
humna isaanii ni haaromfatu.
Isaan akkuma risaa goochoodhaan barrisu;
ni fiigu; hin dadhaban;
ni deemu; hin bututan.

41

Gargaaraa Israa'el

- 1 Waaqayyo akkana jedha;
"Yaa biyyoota bishaan gidduu, fuula koo duratti cal'isaa!
Saboonni jabina isaanii haa haaromfatan!
Isaan fuula duratti ba'anii haa dubbatan;
walii wajjin murtiidhaaf haa dhi'aannu.
2 "Kan ba'a biiftuutii nama tokko kakaasee
qajeelummaadhaan tajaajila isaatiif isa waame eenyu?
Inni saboota dabarsee harka isaatti kenna;
moototas isa jalatti bulcha.
Inni goraadee isaatiin daaraa,
xiyya isaatiinis habaqii bubbeedhaan
bittinnaa'u isaan godha.
3 Inni isaan ari'ee,
daandii miilli isaa irra deemee hin beekne irra nagaan darba.
4 Jalqabaa kaasee dhaloota waamee
waan kana kan tolchee fi hojjete eenyu?
Ani WAAQAYYO isa duraa ti;
isa dhumaatiifis ani isuma."
5 Biyyoonni bishaan gidduu arganii sodaatu;
daariwwan lafaa ni hollatu.
Isaanis ni dhi'aatu; gara fuula duraattis dhufu;
6 tokkoon tokkoon namaa wal gargaara;
obboleessa isaatiinis, "Jabaadhu!" jedha.
7 Tumtuun sibiilaa tumtuu warqee ni jajjabeessa;
inni burruusaan wal qixxeessu,
isa gemmoo irratti sibiila tumu jajjabeessa.
Waa'ee sibiila walitti baqsuu, "Wanni kun gaarii dha" jedha.
Akka inni hin sochooneefis Waaqa tolfamaa sana
mismaaraan walitti qabsiisa.
8 "Ati garuu, yaa garbicha koo Israa'el,
yaa Yaaqoob kan ani filadhe,
sanyii Abrahaam michuu kootii,
9 ani handaara lafaatii si fudhadhe;

- golee fagoodhaan si waammadhe.
 Ani, 'Ati garbicha koo ti' siin jedhe;
 ani si filadheera; si hin gannes,
 10 Kanaafuu ati hin sodaatin; ani si wajjin jiraatii;
 hin raafamin; ani Waaqa keetii.
 Ani sin jabeessa; sin gargaaras;
 ani harka koo mirgaa qajeelaa sanaan hirkisee ol sin qaba.
- 11 "Kunoo, warri sitti aaran hundi,
 ni qaana 'u; ni salphatus;
 warri siin morman akka waan hin jirree ta'u; ni badus.
 12 Ati diinota kee barbaadduu iyyuu, isaan hin argattu.
 Warri waraana sitti banan,
 guutumaan guutuutti akka waan hin jirree ta'an.
 13 Ani WAAQAYYO Waaqni kee
 harka kee mirgaa nan qabaatii;
 inni, 'Hin sodaatin;
 ani sin gargaaraa' siin jedhus anuma.
 14 Yaa Yaaqoob raammoo nana,
 Yaa Israa'el xinnoo nana hin sodaatin;
 ani mataan koo sin gargaaraatii" jedha WAAQAYYO,
 Furaan kee, Qulqullichi Israa'el sun.
 15 "Ani kunoo, meeshaa ittiin midhaan dha'an,
 meeshaa haaraa fi qaramaa kan ilkaan baay'ee qabu sin taasisa.
 Ati tulluuwwan dhoofttee caccabsita;
 gaarran immoo akka habaqii goota.
 16 Ati jara ni afarsita; qilleensis ol isaan fudhata;
 bubbeen jabaan isaan bittinneessa.
 Ati garuu WAAQAYYOTTI ni gammadda;
 Qulqullicha Israa'elinis ulfina argatta.
- 17 "Hiyyeeyyii fi rakkattoonni bishaan barbaadu;
 garuu homaa hin argatan;
 arrabni isaanii dheebuudhaan goggogeera.
 Ani WAAQAYYO garuu deebii nan kennaaf;
 ani Waaqni Israa'el jara hin gatu.
 18 Lafa ol ka'aa qullaa irra lageen nan yaasa;
 sululoota keessa immoo burqaa nan burqisiisa.
 Gammoojjii haroo bishaaniitti,
 lafa goges burqaa bishaaniitti nan geeddara.
 19 Gammoojjii keessatti
 gaattiraa, laaftoo, kusaayee fi ejersa nan biqilcha.
 Lafa onaa keessatti immoo,
 Birbirsaa, qararoo fi hadheessa wal faana nan dhaaba.
 20 Kunis akka namoonni
 akka harki WAAQAYYOO waan kana hojjete,
 akka Qulqullichi Israa'el waan kana uume arganii beekaniif,
 akkasumas akka hundi isaanii waan kana qalbeeffatanii hubataniif.
- 21 "Dhimma keessan dhi'eeffadhaa" jedha WAAQAYYO;
 "Ragaa keessan fidadhaa" jedha mootiin Yaaqoob.
 22 "Akka isaan waan ta'uuf jiru nutti himaniif,
 waaqota keessan tolfamoo fidadhaa.
 Akka nu isaan hubannee
 waan isaan dhuma irratti ta'an beeknuuf,
 wantoonni bara dur maal akka turan nutti himaa.
 Yookaan wantoota dhufuuf jiran nutti odeessaa;
 23 akka nu akka isin waaqota taatan beeknuuf,
 waan fuul duratti ta'uuf jiru nutti himaa.
 Akka nu rifannee sodaan guutamnuuf,
 waan gaarii yookaan waan hamaa hojjedhaa.
 24 Kunoo isin wayittuu hin hedamtan;

hojiin keessanis gonkumaa gatii hin qabu;
kan isin filatu kam iyyuu jibbisiisaa dha.

- 25 “Ani nama tokko kaabaa nan kaase; innis dhufa;
inni ba’ a biiftuutii dhufus maqaa koo ni waammata.
Inni akkuma suphee dhooftuun suphee dhidhiitu sana,
bulchitoota akka dhoqqeetti dhidhiita.
- 26 Akka nu beekuu dandeenyuuf
eenyutu jalqabumaa kaasee waan kana dubbate?
Yookaan akka nu, ‘Inni sirrii dha’ jechuu dandeenyuuf
eenyutu duraan dursee waan kana dubbate?
Eenyu iyyuu waan kana hin himne;
namni tokko iyyuu duraan dursee hin himne;
namni tokko iyyuu dubbii keessan hin dhageenye.
- 27 Namni jalqabatti, ‘Kunoo isaan as jiru!’
jedhee Xiyoonti hime ana ture.
Ani nama oduu gaarii himu tokko Yerusaalemiif kenneera.
- 28 Ani nan ilaale; garuu homtuu hin turre;
isaan keessaa namni gorsa kennu tokko iyyuu hin jiru;
yommuu ani isaan gaafadhus namni deebii kennu tokko iyyuu hin jiru.
- 29 Kunoo, hundi isaanii faayidaa hin qaban!
Hojiin isaaniis gatii hin qabu;
fakkiiwwan isaaniis qilleensuma duwwaa dha.

42

Garbicha WAAQAYYOO

- 1 “Tajaajilaan koo inni ani utubee dhaabu,
filatamaan koo kan ani itti gammadu isa kana;
ani Hafuura koo isa irra nan kaa’ a;
inni sabootaaf murtii qajeelaa ni kenna.
- 2 Inni hin wacu yookaan hin iyyu;
yookaan daandii irratti sagalee isaa hin dhageessisu.
- 3 Shambagqoo buruqe hin cabsu;
fo’aa ibsaa kan seequs hin dhaamsu.
Inni amanamummaadhaan murtii qajeelaa ni fida;
4 hamma murtii qajeelaa lafa irratti fidutti,
inni hin dadhabu; abdiis hin kutatu.
Biyyoonni bishaan gidduu seera isaa ni abdatu.”
- 5 WAAQAYYO Waaqni samiiwwan uumee diriirse,
inni lafaa fi wantoota ishee keessa jiran hunda hojjete,
inni saba isheetiif hafuura baafatan kennee
warra ishee irra jiraataniifis
jireenya kenne sun akkana jedha:
- 6 “Ani WAAQAYYO qajeelummaadhaan si waameera;
harka kees nan qaba.
Ani si eegee sabootaaf kakuu,
Namoota Ormaatiif immoo ifa sin taasisa;
- 7 atis ija jaamotaa ni banta;
mana hidhaatii booji’amtoota ni hiikta;
warra dukkana keessa jiraatanis hidhaadhaa ni baafta.
- 8 “Ani WAAQAYYO; maqaan koos kanaa dha!
Ani ulfina koo kan biraatiif,
galata koos waaqota tolfamoof dabarsee hin kennu.
- 9 Kunoo wanni duraanii raawwatameera;
anis waan haaraa nan dubbadha;
utuu isaan hin biqilin,
ani waa’ ee isaanii sitti nan odeessa.”

Faarfannaa Galataa

- 10 Isin warri galaana buutanii fi wantoonni achi keessa jiraattan hundi,

- biyyoonni bishaan gidduu fi warri achi keessa jiraattan hundi,
faarfannaa haaraa WAAQAYYOOF faarfadhaa;
handaara lafaatiis galata isaa faarfadhaa.
- 11 Gammoojii fi magaalawwan ishee sagalee isaanii ol haa fudhatan;
gandoonni Qeedaar keessa jiraatan haa gammadan.
Namoonni Seelaa gammachuudhaan haa faarfatan;
fixee tulluuwwanii irraa haa iyyan.
- 12 Isaan WAAQAYYOOF ulfina haa kennan;
biyyoota bishaan gidduu keessattis galata isaa haa labsan.
- 13 WAAQAYYO akka nama jabaa tokkootti ni duula;
akka goota tokkoottis onnee isaa kakaasa;
sagalee ol fudhatees ni dhaadata;
diinota isaa irrattis ol aantummaa argata.
- 14 “Ani yeroo dheeraaf cal’iseera;
ani afaan qabadhee of dhowweera.
Amma garuu akka dubartii ciniinsuun qabeetti nan iyya;
nan argana; hafuurris na cita.
- 15 Ani tulluuwwanii fi gaarran nan onsa;
biqiltuuwwan isaanii hundas nan gogsa;
ani lageen biyyoota bishaan gidduutti nan geeddara;
haroowwanis nan gogsa.
- 16 Ani jaamota karaa isaan hin beekne irra nan qajeelcha;
daandii duraan hin beekamin irra nan deemsisa;
ani dukkana fuula isaanii dura jiru ifatti nan geeddara;
lafa bu’aa bayiis wal nan qixxeessa.
Wanni ani hojjedhu kanneenii dha;
ani isaan hin dhiisu.
- 17 Warri waaqota tolfamoo amanatan,
kanneen fakkiwwaniin, ‘Isin waaqota keenya’ jedhan garuu
duubatti deebi’u; ni salphatus.
- Israa’el Jaamaa fi Duudaa dha*
- 18 “Isin duudota nana, dhaga’aa;
jaamota nana, ilaalaa; argaas!
- 19 Tajaajilaa koo malee jaamaan eenyu?
Duudaan akka ergamaa ani ergu sanaas eenyu?
Jaamaan akka nama anaaf of kennee,
jaamaan akka Garbicha WAAQAYYOO eenyu?
- 20 Ati waan baay’ee argite; garuu hin qalbeeffanne;
gurri kee banaa dha; garuu ati waan tokko iyyuu hin dhageessu.”
- 21 Waa’ee qajeelummaa isaatiif jedhee
seera isaa guddisuu fi ulfina qabeessa gochuun
WAAQAYYOON gammachiiseera.
- 22 Sabni kun garuu saba saamamee booji’amee dha;
hundii isaanii boolla keessatti kiyyoodhaan qabamaniiru;
mana hidhaa keessas dhokfamaniiru.
Isaan fudhatamaniiru;
kan isaan baraaruu hin jiru;
isaan booji’amaniiru;
namni, “Isaan deebisaa” jedhus hin jiru.
- 23 Isin keessaa eenyutu waan kana dhaggeeffata?
Bara dhufuuf jiru keessas eenyutu qalbeeffatee dhaga’a?
- 24 Eenyutu Yaaqoobin boojiuf,
Israa’elinis saamtotatti dabarsee kenne?
Kan nu cubbuu itti hojjenne, WAAQAYYO mitii?
Isaan sababii karaa isaa duukaa hin buuneef,
seera isaatiif hin ajajamne.
- 25 Kanaafuu inni dheekkamsa isaa boba’aa sana,
waraana hamaas isaanitti erge.
Arraba ibiddaatiin isaan marse; isaan garuu hin hubanne;

ibiddi sunis isaan gube; isaan garuu hin qalbeeffanne.

43

Fayyisaa Israa'el Tokkicha

- ¹ Amma garuu yaa Yaaqoob, WAAQAYYO inni si uume,
yaa Israa'el, inni si tolche akkana jedha:
“Ani si fureeraatii hin sodaatin;
ani maqaa keetiin si waameera; ati kan koo ti.
- ² Yommuu ati bishaan keessa dabartu,
ani si wajjinan jira;
yommuu ati lageen ceetus, isaan si hin liqimsan.
Yommuu ibidda keessa deemtu,
ati hin gubattu;
arrabni ibiddaas si hin gubu.
- ³ Ani WAAQAYYO Waaqni kee,
Qulqullichi Israa'el Fayyisaa keeti;
ani biyya Gibxi furii keetiif,
gooda kee immoo Kuushii fi Saabaa nan kenna.
- ⁴ Waan ati ija koo duratti jaallatamaa fi kabajamaa taateef,
anis waanan si jaalladhuuf,
gooda kee namoota
gooda lubbuu keetii immoo saboota nan kenna.
- ⁵ Ani si wajjinan jiraatii hin sodaatin;
ani ijoollee kee ba'a biiftuutii nan fida;
lixa biiftuutiis walitti sin qaba.
- ⁶ Ani Kaabaan, 'Isaan gad dhiisi!'
Kibbaan immoo 'Isaan hin dhowwin' nan jedha.
Ilmaan koo fagoodhaa,
intallan koo immoo handaara lafaatii fidi;
- ⁷ kan maqaa kootiin waamame hunda,
kanneen ani ulfina kootiif uume,
warra ani tolchee fi hojjedhe sana fidaa.”
- ⁸ Warra utuu ija qabanuu jaamanii
utuu gurra qabanuu duudan gad baasi.
- ⁹ Sabni hundi tokkummaadhaan walitti haa qabamu;
namoonnis wal haa ga'an.
Isaan keessaa namni duraan dursee waan kana nutti himee
wantoota duraas nuuf labse eenyu?
Akka warri kaan dhaga'anii, “Kun dhugaa dha” jedhaniif,
akka dhugaa qabeeyyii ta'uun isaanii mirkaneeffamuuf
isaan dhuga baatota isaanii haa dhi'eeffatan.
- ¹⁰ WAAQAYYO akkana jedha;
“Akka isin beektanii na amantaniif
akka ani isa ta'es akka hubattaniif
isin dhuga baatota koo, garbicha koo kan ani filadhee dha.
Aanaan dura waaqni hin hojjetamne;
anaan booddees hin jiraatu.
- ¹¹ Ana, anuma qofatu WAAQAYYO;
ana malees fayyisaan biraa hin jiru.
- ¹² Ani mul'iseera; fayyiseera; labseeras;
ana malee waaqni ormaa gidduu keessan hin turre.
Akka ani Waaqa ta'e, isin dhuga baatota koo ti”
jedha WAAQAYYO.
- ¹³ “Bara duriitii jalqabee ani isuma.
Namni tokko iyyuu harka kootii waa baasuu hin danda'u.
Ani nan hojjedha; eenyutu dhowwuu danda'a?”
- Araara Waaqaatii fi Amanamummaa Dhabuu Israa'el*
- ¹⁴ WAAQAYYO Furiin kee,
Qulqullichi Israa'el akkana jedha:
“Ani isiniif jedhee Baabilonitti loltoota ergee

- dooniiwwan isaan ittiin boonaniin
namoota Baabilon hunda booji'ee nan fida.
- 15 Ani WAAQAYYO, Qulqullicha keessan,
Uumaa Israa'el, Mootii keessanii dha.”
- 16 WAAQAYYO inni, galaana keessaan karaa,
bishaanota jajjaboo keessaan immoo daandii tolche akkana jedha;
- 17 inni gaariiwwanii fi fardeen, loltootaa fi gargaartota isaanii
tokkummaadhaan ari'ee baase akkana jedha;
isaan achuma ciciisu; lammatas hin ka'an;
akkuma fo'aa ibsaattis dhaamanii badu;
- 18 “Wantoota durii irraanfadhaa;
waan darbettis hin cichinaa.
- 19 Kunoo, ani waan haaraa tokko nan hojjedhaa!
Innis amma ni biqila; isin hin hubattanii?
Ani gammoojjii keessatti karaa nan qopheessa;
lafa onaa keessattis burqaa nan burqisiisa.
- 20 Bineensonni bosonaa,
waangoowwanii fi guchiiwwan ulfina naaf kennu;
akka sabni koo kan ani filadhe dhuguuf,
ani gammoojjii keessatti bishaan,
lafa onaa keessattis burqaa nan kennaatii;
- 21 sabni ani ofii kootiif filadhe
akka na galateeffatuuf ture.
- 22 “Yaa Yaaqoob, ati garuu na hin waammanne;
yaa Israa'el, ati fuula koo duratti dadhabdeerta.
- 23 Ati aarsaa gubamuu fi hoolota naaf hin fidne;
yookaan aarsaa keetiin ulfina naaf hin kennine.
Ani aarsaa midhaaniitiin si hin rakkifne;
yookaan aarsaa ixaanaa gaafachuudhaan si hin dadhabsiifne.
- 24 Ati qundhii urgaa gaarii qabu naa hin binne;
yookaan cooma qalma keetiitiin na hin quubsine.
Garuu ba'aa cubbuu keetii natti feete;
yakka keetiinis na dadhabsiifte.
- 25 “Kan ofii kootiif jedhee yakka kee sirraa haqee
cubbuu kees deebi'ee hin yaadanne, ani anuma.
- 26 Mee waan darbe irra naa deebi'i;
walitti dhufnee dubbii kana irratti haa falminu;
dubbii kee dhi'eeffadhuutii qajeelaa ta'uu kee mirkaneeffadhu.
- 27 Abbaan kee kan jalqabaa cubbuu hojjete;
barsiistonni kee natti fincilan.
- 28 Kanaafuu ani itti gaafatamtoota
mana qulqullummaa keetii nan salphisa;
Yaaqoobin badiisaaf,
Israa'elin immoo tuffiif dabarsee nan kenna.

44

Israa'el Saba Filatamaa

- 1 “Amma garuu yaa Yaaqoob garbicha ko,
yaa Israa'el kan ani si filadhe, dhaggeeffadhu.
- 2 WAAQAYYO inni si uume,
kan gadameessa keessatti si tolche,
inni si gargaaru sun akkana jedha:
Yaa garbicha koo Yaaqoob,
yaa Yishuruun kan ani si filadhe hin sodaatin.
- 3 Ani lafa dheebote irratti bishaan,
lafa gogaa irratti burqaa nan dhangalaasaatii;
ani ijoollee kee irratti Hafuura koo,
sanyii kee irratti immoo eebba koo nan dhangalaasa.
- 4 Isaan akkuma marga bishaan gidduutii fi

akka muka alaltuu kan qarqara lagaa jiruutti ni lalisu.

⁵ Namni tokko, 'Ani kan WAAQAYYOO ti' ofiin jedha;
kan biraa maqaa Yaaqoobiin of waama;
kaan immoo harka isaa irratti, 'Ani kan WAAQAYYOO ti'
jedhee barreeffata;
maqaa Israa'eliinis of waama.

WAAQAYYO Tokkichuma

⁶ "WAAQAYYO Mootii fi Furiin Israa'el
WAAQAYYON Waan Hunda Danda'u akkana jedha:
Ani kan jalqabaa ti; ani kan dhumaatis;
ana malee Waaqni biraa hin jiru.
⁷ Yoos kan akka koo eenyu? Mee inni hafuura haa baafatu.
Inni waan erga ani saba koo kan durii hundeessee as ta'e,
waan hamma ammaatti hin ta'in haa dubbatu;
fuula koo durattis haa ibsu;
waan gara fuulduraatti ta'u illee duraan dursee haa himu.
⁸ Hin rifatinaa; hin sodaatinaa.
Ani waan kana labsee bara dheeraan dura sitti hin himnee?
Isin dhuga baatota koo ti. Ana malee Waaqni biraa jiraa?
Lakkii, Kattaan biraa hin jiru; ani tokko iyyuu hin beeku."

⁹ Warri waaqota tolfamoo tolchan hundi gatii hin qaban;
wannu isaan hawwan faayidaa hin qabu.
Warri isaaniif falmanis jaamota;
isaan beekumsa hin qaban; kanaafuu ni qaaneffamu.
¹⁰ Eenyutu waaqa tolfamaa fi
fakkii homaa isa hin fayyadne tolcha?
¹¹ Isaa fi namni akka isaa ni qaaneffama;
ogeeyyiin hojii harkaas namootuma malee homaa miti.
Isaan hundi walitti qabamanii iddoo tokko haa dhaabatan;
isaan ni na'u; ni salphatus.

¹² Tumtuun meeshaa ittiin waa tumu harkatti qabatee
cilee boba'u irratti ittiin hojjeta;
inni burruusaan waaqa tolfamaa tolcha;
irree isaa jabaadhaanis ni miidhagsa.
Inni ni beela'a; humnas ni dhaba;
bishaan hin dhugu; ni gaggabas.

¹³ Namni muka soofu funyoodhaan safara
cilaattiidhaan mallattoo itti godha;
qirixiidhaan qiriixee
safartuudhaan mallattoo itti godha.
Fakkii namaatiin hojjeta;
akka inni galma waaqeffannaa keessa jiraatuufis
miidhagina namaa itti tolcha.

¹⁴ Inni birbirsaa mura;
gaattiraa yookaan qilxuu filata.
Akka inni mukkeen bosonaa keessatti guddatuuf ni dhiisa;
yookaan hadheessa dhaaba; bokkaanis isa guddisa.
¹⁵ Mukni sun qoraan bobeeffamu ta'a;
namni muraasa isaa fudhatee bobeessee qaqqammata;
ibidda qabsiisee buddeena ittiin tolfata.

Waaqa sobaas tolfatee waaqeffata;
waaqa tolfamaas tolfatee gad jedhee sagadaaf.
¹⁶ Gartokkee mukkeen sanaa ni bobeesa;
isa irratti nyaata bilcheeffata;
foonis irratti waaddatee hamma quufutti nyaata.
Ibidda qaqqammachaas,
"Ishoo! Ibiddi natti ho'e; ibidda nan arga" jedha.

¹⁷ Mukkeen hafaniin immoo waaqa sobaa,
waaqa isaa tolfamaa tolfata;

- gad jedhees ni sagadaaf.
 Isa kadhatees,
 "Situ Waaqa koo ti; na baraari" jedhaan.
- 18 Isaan homaa hin beekan; homaa hin hubatanis;
 akka arguu hin dandeenyeef iji isaanii haguugameera;
 akka hin hubanneefis qalbiin isaanii cufameera.
- 19 Namni tokko iyyuu itti hin yaadu;
 namni tokko iyyuu akkana jechuuf beekumsa
 yookaan hubannaa hin qabu;
 "Ani walakkaa isaa qoraan godhadheera;
 cilee isaa irratti buddeena tolfadhee
 foon ittiin waaddadhee nyaadheera.
 Ani amma waan hafe kanaan waan jibbisiisaa nan hojjedhaa?
 Ani gad jedhee jirmaaf sagaduu qabaa?"
- 20 Inni daaraa nyaata; garaan gowwoomfames karaa irraa isa jal'iseera;
 inni of oolchuu yookaan,
 "Wanni harka koo mirgaa keessa jiru kun soba mitii?"
 jechuu hin danda'u.
- 21 "Yaa Yaaqoob, ati waan kana yaadadhu;
 yaa Israa'el, ati garbicha koo ti.
 Ani si tolcheera; atis garbicha koo ti;
 yaa Israa'el, ani si hin dagadhu.
- 22 Ani yakka kee akkuma duumessaa,
 cubbuu kees akkuma hurrii ganamaa haxaa'ee balleesseera.
 Ani si fureeraatii,
 ati gara kootti deebi'i."
- 23 Yaa samiiwwan, WAAQAYYO waan kana godheeraatii
 gammachuudhaan faarfadhaa;
 yaa qileewwan lafaa, gammachuudhaan iyyaa.
 Isin yaa tulluuwwan, bosoonoonii fi mukkeen keessan hundi ililchaa;
 WAAQAYYO Yaaqoobin furee Israa'el keessatti ulfina isaa ibseeraatii.
- Yerusaalem Lafa Jireenyaa Ni Taati*
- 24 "WAAQAYYO Furiin kee,
 kan gadameessa keessatti si tolche akkana jedha:
- Ani WAAQAYYO Tolchaan waan hundaa
 isa samiiwwan diriirse,
 isa ofuma kootiin lafa illee diriirsee dha;
- 25 isa mallattoo raajota sobaa
 busheessee ilaaltota raatessu,
 isa ogeeyyii duubatti deebisee
 beekumsa isaanii faayidaa dhabsiisuu dha;
- 26 isa dubbii garboota isaa mirkaneessee
 raajii ergamoota isaa fixaan baasu,
- isa, 'Isheen iddoo jireenyaa ni taati' jedhee
 waa'ee Yerusaalem dubbate, isa, 'Isaan ni ijaaramu,
 diigamaa isaanis nan haaromsa' jedhee
 waa'ee magaalaawwan Yihuudaa dubbatuu dha;
- 27 isa tuujubaan, 'Ati gogi;
 ani lageen kee nan gogsa' jedhu,
- 28 isa Qirosin, 'Inni tiksee koo ti;
 fedhii koo hundas ni raawwata;
 inni waa'ee Yerusaalem, "Isheen deebifamtee haa ijaaramtu"
 waa'ee mana qulqullummaa immoo, "Hundeen isaa haa hundeeffamu"
 jedhee dubbatu sun anuma.'

45

- ¹ “WAAQAYYO dibamaa isaa Qiiros,
kan ani saboota isa jalatti bulchuu fi
hidhannaa moototaa hiiksisiuuf jedhee
harka isaa mirgaa qabee
akka karrawwan hin cufamneef,
balbalawwan banuuf sanaan akkana jedha:
- ² Ani fuula kee dura deemee
tulluuwwan wal nan qixxeessa;
karrawwan naasii nan caccabsa;
danqaraawwan sibiilaas nan kukkuta.
- ³ Ati akka ani WAAQAYYO
Waaqa Israa’el isa maqaa keetiin si waamu ta’e akka beektuuf,
ani badhaadhummaa dukkana keessaa,
qabeenya lafa dhoksaatti kuufames siif nan kenna.
- ⁴ Ati na beekuu baattu iyyuu,
ani garbicha koo Yaaqoobiif,
Israa’el filatamaa kootiif jedhee
maqaa keetiin si waameera;
maqaa ulfinaas siif kenneera.
- ⁵ Ani WAAQAYYO; ana malee kan biraa hin jiru;
ana malee Waaqni tokko iyyuu hin jiru.
Ati na beekuu baattu iyyuu, ani sin jabeessa;
- ⁶ Kunis akka namoonni ba’a biiftuutii hamma lixa biiftuutti,
ana malee kan biraa akka hin jirre beekaniif.
Ani WAAQAYYO; ana malee
tokko iyyuu hin jiru.
- ⁷ Ani ifa nan tolcha; dukkanas nan uuma;
badhaadhummaa nan fida; balaas nan uuma;
ani WAAQAYYO wantoota kanneen hunda nan godha.
- ⁸ “Yaa samiiwwan, isin ol gubbaadhaa qajeelummaa roobsa;
duumessoonnis gad coccobsaa.
Lafti haa banamtu;
fayyinni haa biqilu;
qajeelummaan isin wajjin haa guddatu;
ani WAAQAYYO waan kana uumeera.
- ⁹ “Qiraacii qiraaciidhuma lafaa ta’ee
Uumaa isaatiin wal loluuf wayyoo.
Supheen, suphee dhooftuudhaan,
‘Ati maal hojjechaa jirta?’ jedhaa?
Hojiin ati hojjettus,
‘Inni harka hin qabu’ siin jedhaa?
- ¹⁰ Nama Abbaadhaan, ‘Ati maal dhalchite?’
yookaan haadhaan, ‘Ati maal deesse?’ jedhuuf wayyoo.
- ¹¹ “WAAQAYYO, Qulqulichi Israa’el
Uumaan ishee sun akkana jedha:
Isin waa’ee wantoota dhufuuf jiranii jechuunis,
‘Waa’ee ijoollee koo na gaafadhaa;
yookaan waa’ee hojii harka koo na ajajaa.’
- ¹² Kan lafa tolchee namas ishee irratti uume ana.
Harki koo samiiwwan diriirseera;
raayyaa isaanii hundas ajajeera.
- ¹³ Ani qajeelummaa kootiin Qiirosin ol nan kaasa:
Karaa isaa hundas wal nan qixxeessa.
Inni magaalaa koo deebisee ijaara;
booji’amtoota koos bilisa baasa;
garuu gatiidhaan yookaan badhaasaan miti,
jedha WAAQAYYON Waan Hunda Danda’u.”
- ¹⁴ WAAQAYYO akkana jedha:

“Qabeenyi Gibxii fi daldalli Itoophiyaa,
 namoonni dhedheeroon Saabaa,
 gara kee ni dhufu;
 kan kees ni ta’u;
 isaan foncaadhaan hidhamanii
 dugda duubaan si duukaa bu’u.
 Fuula kee durattis gad jedhanii
 ‘Dhugumaan Waaqni si wajjin jira;
 isa malees tokko iyyuu hin jiru;
 isa malees Waaqni biraa hin jiru’
 jedhanii si kadhatu.”

- 15 Yaa Waaqi, Fayyisaa Israa’el,
 ati dhugumaan Waaqa of dhoksiituu dha.
- 16 Warri waaqota tolfamoo tolchan hundinuu ni qaana’u; ni salphatu;
 walii wajjinis salphina keessa bu’u.
- 17 Israa’el garuu fayyina bara baratiin
 WAAQAYYO ni fayyifama;
 isin bara baraan hin qaanoftan;
 yookaan hin salphattan.
- 18 WAAQAYYO akkana jedha;
 kan samiiwwan uume, inni Waaqa;
 inni lafa miidhagsee tolchee ishee hundeesse;
 inni akka isheen iddoo jireenyaa taatuuf ishee uume malee
 akka isheen ona taatuuf ishee hin uumne;
 inni akkana jedha;
 “Ani WAAQAYYO; ana malee kan biraa hin jiru.
- 19 Ani biyya dukkanaa keessaa
 dhoksaadhaan hin dubbanne;
 ani sanyiiwwan Yaaqoobiin,
 ‘Akkasumaan na barbaadaa’ hin jenne.
 Ani WAAQAYYO dhugaa nan dubbadha;
 waan qajeelaas nan labsa.
- 20 “Walitti qabamaa kottaa;
 isin baqattoonni sabootaa wal ga’aa.
 Warri waaqa tolfamaa muka irraa hojjetame baatan,
 kanneen waaqota fayyisuu hin dandeenye kadhatan
 homaa beekumsa hin qaban.
- 21 Waanan ta’uu qabu dubbadhaa; dhi’eeffadhaas;
 isaanis walii wajjin haa mari’atan.
 Eenyutu waan kana duraan dursee bara dheeraan dura hime?
 Duruma iyyuu eenyutu labse?
 Anuma WAAQAYYO mitii?
 Ana malee Waaqni qajeelaa fi
 Fayyisaan tokko iyyuu hin jiru;
 ana malee tokko illee hin jiru.
- 22 “Isin warri handaara lafaa hundi,
 gara kootti deebi’aatii fayyaa;
 ani Waaqa; ana malee kan biraa hin jiruutii.
- 23 Ani mataa kootiin kakadheera;
 afaan koos akkana jedhee qajeelummaadhaan
 dubbii hin geeddaramne dubbateera;
 ‘Jilbi hundi fuula koo duratti ni jilbeenfata;
 arrabni hundis anaan kakata.’
- 24 Isaanis, ‘Qajeelummaa fi jabinni WAAQAYYO qofaan argama’
 jedhanii waa’ee koo ni dubbatu.”
 Warri aariidhaan isatti ka’an hundi,
 gara isaa dhufanii ni qaana’u.
- 25 Sanyiin Israa’el hundi garuu,

WAAQAYYON qajeeltota taasifamu;
ni kabajamus.

46

Waaqota Baabilon

- ¹ Beel gad jedha; Neboo akka malee gugguufa;
waaqonni isaanii tolfamoon kotte duudaa fi horiitti fe'amaniiru;
fakkiiwwan isaan qabatani jooran ba'aa dha;
horii dadhabeef ba'aa dha.
- ² Isaan gugguufanii walii wajjin gad jedhu;
ba'aa sana oolchuu hin danda'an;
isaan iyyuu ni booji'amu.
- ³ "Yaa mana Yaaqoob,
isin hambaan mana Israa'el hundi,
warri ani gaafa isin gadameessa keessatti
uumamtanii jalqabee ol isin qabee
gaafa dhalattanii jalqabees isin baadhe hundi dhaggeeffadhaa.
- ⁴ Hamma dulloomtanii arrii baafanitti,
ani isa; isuma isin jiraachisuu dha.
Ani isin uumeera; isinan baadhas;
ani isinan jiraachisa; isinan baraaras.
- ⁵ "Isin eenyuun wal bira na qabdu yookaan eenyuun wal na qixxeessitu?
Akka wal madaalluufis eenyutti na fakkeessitu?
- ⁶ Namoonni tokko tokko korojoo isaanii keessaa warqee gad naqanii
madaalliidhaan meetii madaalu;
Waaqa tolfamaa tolchuuf jedhanii tumtuu warqee qacaru;
isaanis gad jedhanii sagaduuf.
- ⁷ Ol fuudhanii gatiittii isaaniitti ni baatu;
iddoo isaatti ni deebisu; innis achi dhaabata.
Inni iddoo sanaa socho'uu hin danda'u.
Yoo namni gara isaatti iyye iyyuu, inni deebii hin kennu;
inni rakkoo isaa keessaa isa baasuu hin danda'u.
- ⁸ "Yaa finciltoota, waan kana yaadadhaa;
qalbiittis qabadhaa; garaa keessan keessas kaa'adhaa.
- ⁹ Wantoota darban kanneen bara durii yaadadhaa;
ani Waaqa; kan biraa hin jiru;
ani Waaqa; kan akka koo hin jiru.
- ¹⁰ Ani dhuma waan tokkoo jalqabumatti nan labsa;
waan amma iyyuu dhufuuf jiru, ani durumaa jalqabee dubbadheera.
Ani, 'Kaayoon koo cimee jiraata;
waan na gammachiisu hundas nan hojjedha' nan jedha.
- ¹¹ Ba'a biiftuutii allaattii waa adamsitu,
lafa fagootii immoo nama kaayyoo koo fiixaan baasu nan waama.
Ani waanan dubbadhe nan guuta;
waan karoofadhes nan raawwadha.
- ¹² Yaa mata jabeeyyii,
isin warri qajeelummaa irraa fagoo jirtan na dhaggeeffadhaa.
- ¹³ Ani qajeelummaa koo nan dhi'eessa;
innis fagoo hin jiru;
fayyisuun koos hin barfatu.
Ani Xiyooniif fayyina,
Israa'eliif immoo ulfina koo nan kenna.

47

Kufaatii Baabilon

- ¹ "Yaa intala Baabilon Durba Qulqullittii,
gad bu'i; awwaara irra taa'i;
yaa Intala Baabilonotaa,

- teessoo malee lafa taa'i!
 Ati si'achi bareedduu
 yookaan kichuu jedhamtee hin waamamtu.
² Dhagaa daakuu fudhadhuutii midhaan daaki;
 haguuggii kee of irraa fuudhi.
 Wandaboo kee soqoladhu;
 gudeeda kee mul'isi; laga ce'i.
³ Qullaan kee ifatti ni ba'a;
 qaaniin kees hin dhokatu.
 Ani haaloo nan ba'a;
 ani nama tokko iyyuu hin dhiisu."
- ⁴ Furiin keenya maqaan isaa WAAQAYYOO Waan Hunda Danda'uu dha;
 inni Qulqullicha Israa'el.
- ⁵ "Yaa Intala Baabilonotaa,
 cal'isii taa'iitii dukkana seeni;
 ati si'achi
 mootittii mootummootaa jedhamtee hin waamamtu.
⁶ Ani saba kootti dheekkameera;
 handhuuraa koos xureesseera;
 ani dabarsee harka keetti isaan kenneera;
 atis garaa hin laafneef.
 Warra dullooman irra iyyuu
 waanjoo ulfaataa keesse.
⁷ Ati, 'Ani bara baraan itti fufee
 mootittii bara baraa nan ta'a!' jette.
 Ati garuu wantoota kana hin hubanne
 yookaan dhumni isaanii maal akka ta'u hin yaadanne.
- ⁸ "Ammas yaa ishee qananiituu,
 kan nagaan jiraattee
 garaa kee keessattis,
 'Anuma; ana malee tokko iyyuu hin jiru;
 ani si'achi haadha hiyyeessaa
 yookaan nama dhalee dhabe hin ta'u' ofiin jettu dhaga'i.
⁹ Wantoonni kunneen lamaan,
 dhalanii dhabuu fi haadha hiyyeessaa ta'uun
 akkuma tasaa guyyuma tokkotti sitti dhufu.
 Isaan baay'ina falfala keetiitii fi
 tolcha kee cimaa sanaa hunda irraan iyyuu
 humna isaanii guutuudhaan sitti dhufu.
¹⁰ Ati hammina kee amanattee,
 'Namni tokko iyyuu na hin argu' jette.
 Yeroo ati garaa kee keessatti, 'Ana;
 ana malee namni biraa hin jiru' jettutti,
 ogummaa fi beekumsi kee si dogogorsu.
¹¹ Wannii hamaan sitti dhufa;
 ati immoo eessaa akka inni dhufu hin beektu.
 Balaan ati of irraa ittisuu hin dandeenye tokko sitti dhufa;
 badiisni ati duraan dursitee hin beekin akkuma tasaa sitti dhufa.
- ¹² "Yoos ati tolcha keetii fi
 falfala kee baay'ee ijoollummaa keetii jalqabdee
 itti dadhabde sana jabeessii eegi.
 Yoo akkas ta'e ati ni milkoofa;
 yoo akkas ta'e nama ni sodaachifta ta'a.
¹³ Gorsii ati argatte hundi dadhabbii qofa sitti fide!
 Urjii lakkooftonni kee
 warri ji'a ji'aan urjii ilaalanii raajan sun,
 mee waan sitti dhufu duraa si haa baasan kaa.
¹⁴ Dhugumaan isaan akkuma cidii ti;

ibiddi isaan guba.

Isaan mataa isaanii iyyuu,
humna arraba ibiddaa jalaa baasuu hin danda'an.
Barbadaan ibiddaa kan namni ho'ifatu
tokko iyyuu hin jiru;

ibiddi bira taa'anis hin argamu.

¹⁵ Wanni warri ati wajjin dadhabdee
jjoollummaa keetii jalqabdee wajjin daldalte sun
siif gochuu danda'an kanuma.

Tokkoon tokkoon isaanii dogoggora isaanii itti fufan;
kan si baasuu danda'u tokko iyyuu hin jiru.

48

Mataa Jabaachuu Israa'el

- ¹ "Yaa mana Yaaqoob,
isin warri maqaa Israa'eliin waamantan,
kanneen sanyii Yihuudaa irraa argamtan,
isin warri maqaa WAAQAYYOOTIIN kakattanii
garuu dhugaadhaan yookaan qajeelummaadhaan utuu hin ta'in
maqaa Waaqa Israa'el dhooftan waan kana dhaggeeffadhaa;
² isin warri maqaa magaalaa qulqullittiitiin of waamantan,
kanneen Waaqa Israa'elitti irkattan,
waan kana dhaggeeffadhaa;
maqaan isaa WAAQAYYOO Waan Hunda Danda'uu dha:
³ Ani wantoota durii duraan dursee dubbadheera;
isaan afaan kootii ba'an; 1 anis akka isaan beekaman nan godhe;
anis akkuma tasaa hojjedhe; isaanis ni raawwataman.
⁴ Ani akka ati mata jabeessa taate beekkeen tureetii;
ribuun morma keetii sibiila ture;
addi kee naasii ture.
⁵ Kanaafuu ani wantoota kanneen bara dheeraan dura sitti himeera;
ani akka ati, 'waaqota koo tolfamootu isaan hojjete;
fakkii koo kan muka irraa hojjetamee fi
waaqa sibiila irraa hojjetametu murteesse'
jechuu hin dandeenyeef
utuu isaan hin uumaminiin dura sitti himeera.
⁶ Ati wantoota kanneen dhageesseerta; isaan hunda ilaali.
Ati isaan amantee hin fudhattuu?

"Ani ammaa jalqabee waan haaraa,
waan dhokfamee jiru kan ati hin beekin sitti nan hima.

⁷ Isaan amma uumaman malee bara dheeraan dura miti;
ati har'aan dura waa'ee isaanii hin dhageenye.

Kanaafuu ati,

'Kunoo ani waa'ee isaanii beekkeen ture'
jechuu hin dandeessu.

⁸ Ati takkumaa dhageessee yookaan hubattee hin beektu;
gurri kee durumaa jalqabee hin banamne.

Ani akka ati micciiramaa taate beeka;
ati dhaloota keetii jalqabdee fincilaa jedhamtee waamamte.

⁹ Ani maqaa kootiif jedhee dheekkamsa koo nan tursiisa;
ani akka si hin balleessineef galata kootiif jedhee
dheekkamsa koo duubatti harkisa.

¹⁰ Kunoo, ani yoo akka meetiitti ta'uu baate iyyuu
si qulqulleesseera;

ibidda dhiphinaa keessattis qoree si ilaaleera.

¹¹ Ani ofii kootiif jedhee, ofuma kootiif jedhee waan kana nan godha.
Maqaan koo akkamitti baduu danda'a?

Ani ulfina koo dabarsee kan biraatiif hin kennu.

Israa'el Bilisoomte

¹² "Yaa Yaaqoob, Yaa Israa'el kan ani si waame,

na dhaggeeffadhu;
 Ani isuma; ani kan jalqabaa ti;
 ani kan dhumaa ti.
¹³ Harki koo hundeewwan lafaa dhaabe;
 harki koo mirgaa immoo samiiwwan diriirse;
 yommuu ani isaan waamutti,
 hundi isaanii walii wajjin dhaabatu.

¹⁴ “Hundi keessan walitti qabamaatii dhaggeeffadhaa;
 waaqota tolfamoo keessaa kamitu duraan dursee
 wantoota kanneen dubbate?
 Michuun WAAQAYYOO filatamaan
 kaayyoo Waaqaa Baabilon irratti fiixaan baasa;
 irreen isaa Baabilonotatti ka’a.
¹⁵ Ani, ani mataan koo dubbadheera;
 dhugumaan ani isa waameera.
 Ani isa nan fida;
 innis karaa isaa irratti ni milkaa’a.
¹⁶ “Natti dhi’aadhaatii waan kana dhaga’aa:
 “Ani jalqabumaa kaasee dhoksaatti hin dubbanne;
 yeroo wanni sun ta’ettis ani achuman ture.”

Ammas WAAQAYYOO Gooftaanii fi
 Hafuurri isaa na erganiiru.

¹⁷ WAAQAYYOO Furiin kee,
 Qulqullichi Israa’el akkana jedha:
 “Ani WAAQAYYOO Waaqa kee,
 kan waan siif tolu si barsiisu,
 kan karaa ati deemuu qabdu irra si qajeelchuu dha.
¹⁸ Ati utuu ajaja koo qalbeeffattee jiraattee,
 nagaan kee akka lagaa,
 qajeelummaan kee immoo akka dha’aa galaanaa ta’a ture.
¹⁹ Sanyiin kee akkuma cirrachaa,
 ijoolleen kee akkuma biyyoo lafaa baay’atu ture;
 maqaan isaanii hin haqamu;
 isaanis fuula koo duraa hin dhabaman ture.”

²⁰ Baabilon keessaa ba’aa;
 Baabilonota duraa baqadhaa!
 Waan kana iyya gammachuutiin beeksisaa; labsaas.
 Hamma handaara lafaatti dabarsaa;
 “WAAQAYYOO garbicha isaa Yaaqoobin fureera” jedhaa.
²¹ Isaan yommuu inni lafa gammoojjii keessa isaan qajeelchetti
 hin dheebonne;
 inni kattaa keessaa bishaan burqisiiseef;
 inni kattaa dhoosee,
 bishaanis humnaan cabsee ba’e.

²² “Hamootaaf nagaan hin jiru” jedha WAAQAYYOO.

49

Tajaajilaa WAAQAYYOO

¹ Yaa biyyoota bishaan gidduu na dhaggeeffadhaa;
 yaa saboota fagoo jiraattan waan kana dhaga’aa:
 Utuu ani hin dhalatin dura WAAQAYYOO na waame;
 utuu ani gadameessa haadha koo keessa jiruu maqaa naa baase.

² Inni afaan koo akka goraadee qaramee godhe;
 gaaddidduu harka isaatiin na dhokse;
 xiyya cululuqfame na godhee,
 man’ee xiyya isaa keessa na kaa’ate.

³ Innis, “Yaa Israa’el, ati garbicha koo

kan ani ulfina koo isa irratti mul'isuu dha" anaan jedhe.

⁴ Ani garuu, "Akkasumaanan itti dadhabe;
humna koos waanuma faayidaa hin qabnettan fixe.
Ta'us dhugaan koo harka WAAQAYYOO,
gatiin koos Waaqa bira jira" nan jedhe.

⁵ Waan ani fuula WAAQAYYOO duratti ulfina argadhee
Waaqni koo jabina naa ta'eef,
WAAQAYYOO inni akka ani Yaaqoobin deebisee gara isaatti fiduuf,
Israa'elin isa biratti walitti qabuuf,
akka ani garbicha isaa ta'uuf
gadameessa keessatti na tolche sun akkana jedha;

⁶ Innis, "Ati gosoota Yaaqoob deebiftee dhaabuuf,
Israa'eloota ani eege sanas deebiftee fiduuf
garbicha koo ta'uun kee siif baay'ee salphaa dha.
Akka fayyinni koo qarqara lafaa ga'uuf
ani Namoota Ormaatiif ibsaa sin taasisa" jedha.

⁷ WAAQAYYOO Furi fi Qulqullichi Israa'el,
isa namaan tuffatamee sabnis jibbe,
tajaajilaa bulchitootaa sanaan akkana jedha:
"Sababii WAAQAYYOO amanamaa
Qulqullicha Israa'el isa si filate sanaatiif
jedhanii mootonni si arganii ol ka'u;
ilmaan moototaas arganii sagadu."

Deebifamtee Ijaaramuu Israa'el

⁸ WAAQAYYOO akkana jedha:
"Ani yeroo fudhatama qabutti siifin deebisa;
gaafa fayyinaattis sin gargaara;
akka ati dhaala abbaa hin qabne
deebiftee dhaalchiftuuf,
ani sin eega;
akka ati sabaaf kakuu taatus sin godha;
⁹ akka ati warra booji'amaniin, 'Kottaa ba'aa'
warra dukkana keessa jiraataniin immoo, 'Bilisa ba'aa' jettu sin godha.

"Isaan karaa irratti waa nyaatu;
gaara qulqullaa'aa irrattis iddoo qubataa argatu.

¹⁰ Isaan hin beela'an; hin dheebotanis;
ho'i gammoojjii yookaan aduun isaan hin gubu.
Inni isaaniif garaa laafu isaan geggeessa;
qarqara burqaa bishaanii irra isaan qajeelcha.
¹¹ Tulluuwwan koo hunda karaatti nan geeddara;
daandiiwwan koo gurguddaanis wal qixxeffamu.

¹² Kunoo, isaan biyya fagoodhaa ni dhufu;
gariin kaabaa, gariin dhi'aa,
kaan immoo biyya Aswaaniitii ni dhufu."

¹³ Yaa samiiwwan, ililchaa;
yaa lafa gammadi;
yaa tulluuwwan, guddisaa faarfadhaa!
WAAQAYYOO saba isaa ni jajjabeessa;
warra rakkataniifis garaa ni laafaatii.

¹⁴ Xiyyoon garuu, "WAAQAYYOO na gateera;
Gooftaanis na irraanfateera" jette.

¹⁵ "Haati daa'ima ishee kan hoosiftu
irraanfachuu ni dandeessii?
Mucaa deesseefis garaa hin laaftuu?
Yoo isheen irraanfate iyyuu ani si hin irraanfadhu!
¹⁶ Kunoo, ani barruu harka koo irratti si qirixeera;

- dallaawwan kee yeroo hunda fuula koo dura jiru.
- 17 Ilmaan kee ariitiidhaan ni dacha'u;
warri si diiganis sirraa baqatu.
- 18 Ija kee ol fudhadhuutii naannoo kee ilaali;
ilmaan kee hundi walitti qabamanii gara kee ni dhufu.
Ani jiraataadhaatii" jedha WAAQAYYO.
"Ati isaan kanneen hunda akka faayaatti ni uffatta;
akka misirroottis ittiin miidhagfamta.
- 19 "Ati diigamtee ontee
biyyi kee barbadaa'u iyyuu
amma saba keetti lafti ni dhiphata;
warri si liqimsan sirraa ni fagaatu.
- 20 Ijoolleen ati yeroo gadda keetiitti deesse,
utuma gurri kee dhaga'uu,
'Lafti kun nutti dhiphateera;
lafa irra jiraannu nuuf kenni' siin jedhu.
- 21 Ergasii ati garaa keetti akkana jetta;
'Eenyutu jara kanneen naa da'e?
Ani gaddituu fi maseentuun ture;
ani baqattuu fi jibbamtuun ture.
Isaan kanneen eenyutu guddise?
Ani kophaatti hafeen ture;
yoos, isaan kunneen eessaa dhufan ree?"
- 22 WAAQAYYO Gooftaan akkana jedha:
"Kunoo ani namoota ormaa harkaan nan waama;
faajjii koos uummataaf ol nan qaba;
isaan ilmaan kee hammatanii fidu;
intallan kee immoo gatiittii isaaniitti baatu.
- 23 Mootonni abbootii kee kanneen si guddisan,
niitonni isaanii immoo haadhota kee kanneen harma si hoosisan ni ta'u.
Isaan adda isaaniitiin lafatti gombifamanii siif sagadu;
awwaara miilla keetii illee ni arraabu.
Ergasii ati akka ani WAAQAYYO ta'e ni beekta;
warri na abdatan hin salphatan."
- 24 Gootota harkaa boojuu fudhachuun,
gara jabeeyyii harkaas boojuu baasuun ni danda'amaa?
- 25 WAAQAYYO garuu akkana jedha:
"Eeyyee, gootota harkaa booji'amtoonni ni baafamu;
gara jabeeyyii harkaas boojiun ni fudhatama;
warra siin falmaniin nan falma;
ijoollee kees nan baraara.
- 26 Ani akka warri si hacuucan foon ofii isaanii nyaatan nan godha;
isaan akkuma nama daadhii wayiniitiin machaa'uu
dhiiga ofii isaaniitiin ni machaa'u.
Ergasii sanyiin namaa hundi,
akka ani WAAQAYYO, Fayyisaan kee,
Furiin kee, Jabaa Yaaqoob ta'e ni beeka."

50

Cubbuu Israa'elii fi Ajajamuu Tajaajiltichaa

¹ WAAQAYYO akkana jedha:

"Waraqaan ragaa, kan ani ittiin haadha keessan hiikee
of irraa ittiin ishee geggeesse meerre?

Yookaan namni liqqi narraa qabu
kan ani itti isin gurgure eenyu?

Isin sababii cubbuu keessaniif gurguramtaniirtu;
sababii yakka keessaniitiifis haati keessan ari'amteerti.

² Yeroo ani dhufetti namni maaliif achi hin jiraatin?

Yeroo ani waametti namni owwaatu maaliif achii dhabame?

Harki koo akka furuu hin dandeenyeef gabaabateeraa?

Ani isin baraaruuf humna dhabeeraa?

Ani dheekkamsa qofaan galaana nan gogsaa;

lageenis gammoojjiitti nan geeddara;

qurxummiwwan isaanii bishaan dhabanii ajaa'u;

dheebuudhaanis ni dhumu.

³ Ani samiitti dukkana nan uffisa;

wayyaa gaddaas itti nan haguuga."

⁴ Akka ani warra dadhaban jajjabeessuuf,

WAAQAYYO Gooftaan arraba barate naa kenneera.

Inni ganama ganama na dammaqsa;

akka inni akkuma barataa tokkootti dhaggeeffatuufis

gurra koo dammaqsa.

⁵ WAAQAYYO Gooftaan gurra koo naa baneera;

anis fincila hin turre;

ani dugda duubatti hin deebine.

⁶ Ani warra na rukutanitti dugda koo,

warra areeda narraa buqqisanitti immoo maddii koo nan kenne;

yeroo isaan natti qoosanii hancufa natti tufanitti,

ani fuula koo isaan hin dhokfanne.

⁷ Sababii WAAQAYYO Gooftaan na gargaaruuf,

ani hin salphifamu.

Kanaafuu ani fuula koo akkuma dhagaa gurraachaa godhadheera;

ani akka hin qaaneffamne illee nan beeka.

⁸ Inni dhugaa naaf baasu dhi'oo jira.

Yoos eenyutu na himata ree?

Mee waliitti gad haa baanu!

Himataan koo eenyu?

Inni mee natti gad haa ba'u!

⁹ WAAQAYYO Gooftaatu na gargaara.

Eenyutu natti mura?

Isaan hundi akkuma wayyaa moofa'u;

dholdholeenis isaan nyaatti.

¹⁰ Isin keessaa kan WAAQAYYON sodaatee

dubbii garbicha isaatiif ajajamu eenyu?

Namni dukkana keessa deddeebi'u,

kan ifa hin qabne,

maqaa WAAQAYYOO amanatee

Waaqa isaatti haa irkatu.

¹¹ Amma garuu isin warri ibidda bobeesitanii

guca boba'aa deemu qabattan hundinuu

ifa ibiddaa keessaniitii fi ifa guca

bobeesitanii keessa deemaa.

Wanni isin harka koo irraa argattan kanaa dha;

isin dhiphinaan ni ciciiftu.

51

Fayyina Bara baraa Xiyooniif

¹ "Isin warri qajeelummaa duukaa butan,

warri WAAQAYYON barbaaddan na dhaggeeffadhaa:

Isin kattaa irraa argamtan,

boolla keessaa baafamtan sana ilaalaa.

² Abbaa keessan Abrahaamii fi

Saaraa ishee isin deesse sana ilaalaa.

Yeroo ani isa waametti, inni tokkicha ture;

ani isa nan eebbise; nan baay'ises.

³ WAAQAYYO dhugumaan Xiyoonin ni jajjabeessa;

diigama ishee hundas gara laafinaan ni ilaala;

inni gammoojjii ishee goggogaa akka Eeden,
 lafa onaa ishees akka iddoo biqiltuu WAAQAYYOO ni godha.
 Ililchuu fi gammaduun,
 galannii fi sagaleen faarfannaa ishee keessatti argama.

⁴ “Yaa uummata koo na dhaggeeffadhaa;
 yaa saba koo na dhaga’aa;

seerri na biraa ba’a;
 murtiin koos sabootaaf ifa ta’a.

⁵ Qajeelummaan koo dafee dhi’aata;
 fayyisuun koos dhufaa jira;
 irreen koo moototaaf murtii qajeelaa fida;
 biyyoonni bishaan gidduu na eeggatu;
 irree koos ni abdatu.

⁶ Ija keessan gara samiiwwaniitti ol qabadhaa;
 lafas gad ilaalaa;
 samiiwwan akkuma aaraa ni badu;
 lafti akkuma wayyaa moofofti.
 Jiraattonni ishees akkuma tisiisaa ni du’an.
 Fayyisuun koo garuu bara baraan jiraata;
 qajeelummaan koos hin badu.

⁷ “Isin warri waan qajeelaa beektan
 namoonni seera koo garaa keessaa qabdan na dhaga’aa;
 tuffii namootaa hin sodaatinaa;
 yookaan arrabsoo isaaniitiin hin raafaminaa.

⁸ Biliin akka wayyaatti isaan nyaatti;
 raammoonis akkuma rifeensa hoolaatti isaan fixxi.

Garuu qajeelummaan koo bara baraan,
 fayyisuun koos dhalootaa gara dhalootaatti itti fufa.”

⁹ Yaa irree WAAQAYYOO, ka’i; ka’i! Jabina uffadhu;
 akkuma baroota darbanii,
 akkuma dhaloota durii keessatti ta’e sana ka’i.
 Kan Ra’aabin kukkute,

kan jawwee galaanaa waraane sun suma mitii?

¹⁰ Inni akka warri furaman ce’aniif, galaanicha,
 bishaan tuujuba guddichaa gogse,
 kan dhidhima galaanaa keessaan karaa baase suma mitii?

¹¹ Warri WAAQAYYO isaan fure ni deebi’u.
 Isaan faarfannaadhaan Xiyoon seenu;
 gammachuun bara baraa mataa isaanii irra jiraata.
 Isaan gammachuu fi ililleedhaan gutamu;
 gaddii fi boo’ichi isaan irraa fagaatu.

¹² “Kan isin jajjabeessu ana; anuma.
 Yoos maaliif namoota du’a hin oolle,
 ilmaan namaa kanneen akkuma margaa ta’an sodaattu ree?”

¹³ Ati kan WAAQAYYO Tolchaa kee,
 isa samiiwwan diriirsee
 hundee lafaa buuse sana dagattu eenyu?
 Ati kan sababii dheekkamsa cunqursaa
 waa balleessuuf qophaa’e sanaatiif
 utuu gargar hin kutin guyyaa guyyaan sodaattu eenyu?
 Yoos dheekkamsi cunqursaa sanaa meerree?

¹⁴ Booji’amtoonni hidhaman ariitiidhaan gad dhiifamu;
 isaan boolla itti hidhaman keessatti hin du’an
 yookaan buddeena hin dhaban.

¹⁵ Ani WAAQAYYO Waaqa kee,
 kan akka dha’aan bishaanii huursuuf galaana raasuu dha;
 maqaan isaas WAAQAYYOO Waan Hunda Danda’uu dha.

¹⁶ Ani kan samiiwwan iddoo isaanii kaa’e,

kan hundee lafaa hundeessee
 Xiyooniin, 'Ati saba koo ti' jedhe sun,
 dubbii koo afaan kee keessa kaa'eera;
 gaaddidduu harka kootiinis si haguugeera."

Xoofoo Dheekkamsa WAAQAYYOO

- 17 Yaa Yerusaalem, ati kan harka WAAQAYYOO irraa,
 xoofoo dheekkamsa isaa keessaa dhugde,
 ati kan xoofoo dhugaatii nama gatantarsuu keessaa
 siicoo isaa xuruurfattee dhugde,
 dammaqi, dammaqi! Ol ka'i.
- 18 Ilmaan isheen deesse hunda keessaa,
 kan ishee qajeelchu tokko iyyuu hin turre;
 ilmaan isheen guddifte hunda keessaas,
 kan harka ishee qabu tokko iyyuu hin turre.
- 19 Balaawwan kunneen dachaadhaan sitti dhufaniiru;
 eegaa eenyutu si jajjabeessuu danda'a?
 Diigamnii fi badiisni, beellii fi goraadeen sitti dhufaniiru;
 eegaa eenyutu si jajjabeessuu danda'a?
- 20 Ijoolleen kee gaggabaniiru;
 akkuma borofa kiyyoon qabame tokkoo,
 roga karaa irra ciciisu.
- Isaan dheekkamsa WAAQAYYOOTIIN,
 ifata Waaqa keetiinis gutamaniiru.

- 21 Kanaafuu yaa ishee miidhamte,
 kan utuu daadhii wayinii hin dhugin machoofte,
 waan kana dhaga'i.
- 22 WAAQAYYO Gooftaan kee,
 Waaqni kee inni saba isaa eegu akkana jedha:
 "Kunoo ani xoofoo dhugaatii nama gatantarsu
 harka keetii fuudheera;
 ati si'achi xoofoo dheekkamsa koo
 keessaa deebitee hin dhugdu.
- 23 Anis xoofoo sana harka warra si dhiphisan
 kanneen, 'Akka nu sirra yaanuuf, lafa irra diriirfami'
 siin jedhan sanaa keessa nan kaa'a.
- Ati immoo dugda kee akkuma lafaa,
 akkuma daandii namni irra deemuu goote."

52

- 1 Yaa Xiyoon, dammaqi, dammaqi;
 jabina kee uffadhu!
 Yaa Yerusaalem, yaa magaalaa qulqullittii,
 wayyaa kee miidhagaa sana uffadhu.
 Namoonni dhagna hin qabaminii fi
 xuraa'onna lammaffaa sitti hin seenan.
- 2 Yaa Yerusaalem, awwaara of irraa dhadha'adhu;
 ka'iitii teessoo irra taa'i.
- Yaa intala Xiyoon booji'amtittii,
 foncaa morma keetii of irraa hiiki.
- 3 WAAQAYYO akkana jedhaatii:
 "Isin gatii malee gurguramtanii turtan;
 amma immoo maallaqa malee furamtan."
- 4 WAAQAYYO Gooftaan akkana jedhaatii:
 "Jalqabatti sabni koo jiraachuuf jedhee Gibxitti gad bu'e;
 ergasii Asoor sababii malee isaan cunqurse.
- 5 "Yoos ani amma maalan asii qaba?" jedha WAAQAYYO.
 "Sabni koo sababii malee fudhatameera;
 warri isaan bulchanis ni qoosu" jedha WAAQAYYO.

- “Guyyaa guutuus,
 maqaan koo ittuma fufee arrabsama.
 6 Kanaafuu sabni koo maqaa koo ni beeka;
 kanaafuu isaan gaafas kan duraan dursee waan sana dubbate
 akka ana ta’e ni beeku.
 Eeyyee, inni anuma.”
- 7 Miilli warra wangeela fidanii,
 kan nagaa labsanii,
 kan oduu gammachiisaa fidanii,
 kan fayyina labsanii, kan Xiyooniin,
 “Waaqni kee mo’eera!” jedhanii
 tulluuwwan irratti akkam miidhagaa dha!
- 8 Dhaggeeffadhu! Eegdonni kee sagalee isaanii ol fudhataniiru;
 isaan tokkummaadhaan gammachuudhaan iyyu.
 Yeroo WAAQAYYO Xiyoonitti deebi’utti,
 isaan ijuma isaaniitiin ni argu.
- 9 Yaa diigamtoota Yerusaaalem
 tokkummaadhaan faarfannaa gammachuu faarfadhaa;
 WAAQAYYO uummata isaa jajjabeessee
 Yerusaaaleminis fureeraa.
- 10 WAAQAYYO fuula saboota hundaa duratti,
 irree isaa qulqulluu sana ni mul’isa;
 handaarri lafaa hundis
 fayyisuu Waaqa keenyaa ni argu.
- 11 Isin warri mi’a WAAQAYYOO baattan, addaan ba’aa;
 addaan ba’aa; achii fagaadhaa!
 Waan xuraa’aa tokko illee hin tuqinaa!
 Ishee keessaa ba’aatii qulqulloota ta’a.
- 12 Isin garuu ariitiidhaan achii hin baatan;
 yookaan baqattanii hin deemtan;
 WAAQAYYO fuula keessan dura deemaatii;
 Waaqni Israa’el dugda duubaan isin eega.
- Dhiphinaa fi Ulfina Garbicha Sanaa*
- 13 Kunoo, garbichi koo ogummaadhaan hojjeta;
 inni ni kabajama; ol kaafama; ulfina guddaas ni argata.
- 14 Namoonni baay’een waa’ee isaa hamma na’anitti,
 fuulli isaa nama hundumaa caalaa golgolaa’eera;
 bifti isaas nama hundumaa caalaa badeera;
- 15 akkasiinis inni saboota hedduu dinqisiifachiisa;
 mootonni sababii isaatiif afaan isaanii qabatu.
 Isaan waan isaanitti hin himamin arguutii;
 waan hin dhaga’inis ni hubatu.

53

- 1 Ergaa keenya eenyutu amane?
 Irreen WAAQAYYOS eenyutti mul’ate?
- 2 Inni fuula isaa duratti akkuma biqiltuu kichuu,
 akkuma hidda lafa gogaa keessaa ba’u tokkootti guddate.
 Akka nu isa ilaalluuf, inni bifa hin tolu,
 yookaan simboo hin qabu;
 akka nu isa hawwinuufis miidhagina hin qabu.
- 3 Inni nama biratti tuffatamee jibbame;
 inni nama gaddaa fi gadadamuun jiraatuu dha.
 Akkuma nama namoonni fuula isaanii irraa garagalatanii,
 inni ni tuffatame; nus ulfina hin kennineef.
- 4 Dhugumaan inni dhukkuba keenya fudhate;
 gadda keenyas baate;

- nu garuu akka waan Waaqni isa dha'eetti,
akka waan inni rukutee isa miidheetti isa hedne.
- ⁵ Inni garuu sababii yakka keenyaatiif waraaname;
balleessaa keenyaafis caccabsame;
nu adabamuu isaatiin nagaa arganne;
madaa'uu isaatiin immoo fayyine.
- ⁶ Hundi keenya akka hoolaa
karaa irraa badnee turre;
tokkoon tokkoon keenya gara karaa keenyaatti gorre;
WAAQAYYOS balleessaa hunda keenyaa isa irra kaa'e.
- ⁷ Inni ni cunqurfame; ni dhiphates;
garuu afaan isaa hin saaqqanne;
inni akkuma ilmoo hoolaa kan iddoo qalmaatti geeffamuu,
akkuma hoolaa fuula nama rifeensa irraa murmuruu duratti cal'isuu,
akkasuma afaan isaa hin saaqqanne.
- ⁸ Inni cunqursaa fi murtiidhaan fudhatame.
Eenyutu waa'ee dhaloota isaa dubbachuu danda'a?
Inni biyya jiraattotaa irraa kutameeraatii;
dogoggora saba kootiifis rukutameera.
- ⁹ Inni goolii kaasuu baatu iyyuu,
yookaan sobni afaan isaatii ba'uu baatu iyyuu
akka awwaalli isaa hamoota wajjin
duuti isaas sooreyyii wajjin ta'u godhan.
- ¹⁰ Ta'us isa dirmammeessuu fi isa dhiphisuun fedhii WAAQAYYOO ture;
WAAQAYYO lubbuu isaa aarsaa yakkaa godhu iyyuu
inni sanyii isaa ni arga; umurii isaas ni dheeressa;
fedhiin WAAQAYYOS harka isaatti ni raawwatama.
- ¹¹ Inni erga lubbuun isaa dhiphatee booddee,
ifa ni arga; ni gammadas;
garbichi koo qajeelaan sun beekumsa isaatiin namoota baay'ee
qajeeltota taasisa;
yakka isaaniis ni baata.
- ¹² Kanaafuu ani gurguddoota gidduutti qooda nan kennaaf;
innis jajjaboota wajjin boojuu ni qooddata;
inni lubbuu isaa du'aaf kennee
yakkitootatti lakkaa'ameeraatii.
Ta'us inni cubbuu nama hedduu baatee
yakkamtootaaf araara buuseera.

54

Ulfina Egeree Xiyoon

- ¹ "Yaa dubartii dhabduu,
kan takkumaa hin da'in, amma faarfadhu;
ati kan takkumaa ciniinsifattee hin beekin iyyii faarfadhu;
guddisiitii ililchi.
Ijoollee dubartii dhirsaa qabduu caalaa
ijoolleen dubartii gatamtee ni baay'atu"
jedha WAAQAYYO.
- ² "Iddoo dunkaana keetii bal'ifadhu;
golgaa dunkaana keetii bal'isii diriirsi;
walitti hin dachaasin;
funyoo kee dheereffadhu;
qofoo kees jabeeffadhu.
- ³ Ati gara mirgaattii fi gara bitaatti ni babal'attaatii;
sanyiwwan kee saboota ni dhaalu;
magaalaawwan isaanii kanneen duwwaa hafan keessas ni qubatu.
- ⁴ "Hin sodaatin; ati hin qaanoftuutii.
Hin yaadda'in; ati hin salphattuutii;

- Qaanii ijoollummaa keetii ni dagatta;
tuffii dhirsi kee sirraa duunaan sirra ga'es si'achi hin yaadattu.
- ⁵ Uumaan kee dhirsa keeti;
maqaan isaas WAAQAYYOO Waan Hunda Danda'uu dha;
Qulqullichi Israa'el Furiin kee ti;
innis Waaga guutummaa lafaa jedhama.
- ⁶ WAAQAYYOO akka waan ati
akkuma niitii gatamtee garaan ishee gaddee,
akka niitii dargaggeessaa kan jibbanteetti
deebisee ofitti si waama" jedha Waaqni kee.
- ⁷ "Ani yeroo muraasaafan si dhiise;
garuu gara laafina guddaadhaan deebisee sin fida.
- ⁸ Ani dheekkamsa guddaadhaan
yeroo muraasaaf fuula koo si dhokfadheen ture;
garuu jaalala bara baraatiin,
garaa siifin laafa"
jedha WAAQAYYOO Furiin kee.
- ⁹ "Wanni kun anaaf akkuma bara Nohi,
yeroo ani itti bishaan Nohi deebi'ee lafa irra hin garagalu jedhee
kakadhe sanaa ti.
- Kanaafuu ani akkan sitti hin aarre,
gonkumaas lammata akkan si hin ifanne kakadheera.
- ¹⁰ Tulluuwwan raafamanii,
gaarran buqqifaman iyyuu,
jaalalli hin geeddaramne kan ani siif qabu garuu hin raafamu;
yookaan kakuun koo kan naggaa hin diigamu"
jedha WAAQAYYOO inni garaa siif laafu sun.
- ¹¹ "Yaa magaalaa miidhamte kan dambaliidhaan garagalfamtee
nama si jajjabeessu dhabde,
ani dhagaa gatii guddaatiin si ijaaree
sanpeeriidhaanis si hundeesa.
- ¹² Ani fiixee kee lula diimaadhaan,
karrawwan kee dooqa calaqqisuun,
dallaa kee hunda immoo dhagaawwan gati jabeeyyiidhaan nan ijaara.
- ¹³ WAAQAYYOO ilmaan kee hunda ni barsiisa;
nagaan ijoollee keetiis guddaa ta'a.
- ¹⁴ Ati qajeelummaadhaan hundeeffamta;
cunqurfamuun sirraa fagaata;
wannu si sodaachisu tokko iyyuu hin jiru.
Gooliin sirraa fageeffama;
sitti iyyuu hin dhi'aatu.
- ¹⁵ Yoo namni tokko iyyuu lola sitti kaase ani keessaa hin qabu;
namni lola sitti kaasu kam iyyuu harka sitti kennata.
- ¹⁶ "Kunoo, kan tumtuu sibiilaa kan cilee buufee
ibidda bobeessee mi'a waraanaa tumee
hojii isaatiif mijeessu sana uume anuma.
Kan nama waa balleessu tokko akka inni balaa buusuuf uumes anuma;
¹⁷ meeshaan si miidhuuf tolfame kam iyyuu hin milkaa'u;
atis arraba si himatu hunda of irraa deebifta.
Kun dhaala tajaajiltoota WAAQAYYOO ti;
innis qajeelummaa isaan narraa argatanii dha"
jedha WAAQAYYOO.

55

Affeerraa Warra Dheebotaniif Godhame

- ¹ "Isin warri dheebottan hundinuu kottaa;
gara bishaanii kottaa;
isin warri maallaqa hin qabne,

- kottaatii bitadhaa; nyaadhaas!
 Kottaatii maallaqaa fi gatii malee
 daadhii wayiniitii fi aannan bitadhaa.
- ² Isin maaliif waan buddeena hin ta'iniiti maallaqa baafu?
 Waan nama hin quubsine irrattis maaliif humna keessan fixxu?
 Dhaga'aa; na dhaga'aa; waan gaarii nyaadhaa;
 lubbuun keessanis coomaan haa gammaddu.
- ³ Gurra naaf kennaatii gara koo kottaa;
 akka lubbuun keessan jiraattuufis na dhaga'aa.
 Ani kakuu bara baraa isin wajjin nan gala;
 innis jaalala amanamaa isa Daawit
 abdachiifame sanaa dha;
- ⁴ kunoo ani sabootaaf dhuga baatuu isa godheera;
 hoogganaa fi ajajaa sabootaas isa taasiseera.
- ⁵ Sababii WAAQAYYO Waaqni kee,
 Qulqullichi Israa'el sun, ulfina siif kenneef,
 ati dhugumaan saboota hin beekne ni waamta;
 saboonni si hin beeknes ariitiidhaan gara kee dhufu."
- ⁶ Yeroo inni argamutti WAAQAYYON barbaaddadhaa;
 yeroo inni dhi'oo jiruttis isa waammadhaa.
- ⁷ Namni hamaan karaa isaa,
 namni jal'aan immoo yaada isaa haa dhiisu.
 Inni gara WAAQAYYOOTTI haa deebi'u; innis ni araaramaaf;
 gara Waaqa keenyaatti haa deebi'u; dhiifamni isaa baay'eedhaatii.
- ⁸ "Yaadni koo yaada keessan,
 karaan keessanis karaa koo miti"
 jedha WAAQAYYO.
- ⁹ "Akkuma samiiwwan lafa irraa ol fagaatan sana,
 karaan koo karaa keessan irraa,
 yaadni koos yaada keessan irraa ol fagoo dha.
- ¹⁰ Akkuma bokkaa fi cabbiin samiidhaa roobu sana,
 akka lafti biqila biqilchitee isa facaafatuuf sanyii,
 isa nyaatuuf immoo buddeena kennituuf malee
 utuu ishee hin quubsin hin deebine sana,
- ¹¹ dubbiin koo kan afaan kootii ba'us
 fedhii koo raawwata;
 kaayyoo ani isa ergeefis galmaan ga'a malee
 harka duwwaa gara kootii hin deebi'u.
- ¹² Isin gammachuudhaan baatu;
 nagaadhaan geggeeffamtu;
 tulluuwwanii fi gaarran,
 fuula keessan duratti ililchani faarfatu;
 mukkeen dirree hundinuu
 harka walitti rukutu.
- ¹³ Qooda qoraattii birbirsi,
 qooda sokorruus kusaayeen ni biqila.
 Kunis WAAQAYYOOF yaadannoo,
 mallattoo bara baraa kan hin badne ta'a."

56

Fayyina Warra Kaaniif Kenname

- ¹ WAAQAYYO akkana jedha:
 Sababii fayyisuun koo dhi'aatee fi
 qajeelummaan koo dafee mul'atuuf,
 "Murtii qajeelaa eegaa;
 waan qajeelaas hojjedhaa.
- ² Namni waan kana hojjetu,
 kan waan kanattis cimuu,
 kan Sanbata utuu hin xureessin
 eegu fi waan hamaa kam iyyuu

hojjechuu irraa harka isaa eeggatu eebbifamaa dha.”

³ Alagaan WAAQAYYOTTI cichee tokko,

“WAAQAYYO dhugumaan

saba isaa irraa addaan na baasa” hin jedhin.

Xu’aashiin kam iyyuus,

“Ani mukuma gogaadha” ofiin hin jedhin.

⁴ WAAQAYYO akkana jedhaatii:

“Xu’aashiiwwan Sanbatoota koo eegan,

kanneen waan na gammachiisu

filatanii fi kakuu koo jabeessanii eeganiif,

⁵ ani mana qulqullummaa kootii fi

dallaa isaa keessatti yaadannoo fi maqaa

ilmaanii fi intallan caalu tokko nan kennaaf;

ani maqaa bara baraa

kan hin haqamne isaaniif nan kenna.

⁶ Alagoota isa tajaajiluuf,

maqaa WAAQAYYOO jaallachuuf,

isa waaqeffachuuf

WAAQAYYOTTI cichan

kanneen Sanbata utuu hin xureessin eeganii fi

kakuu koos cimsanii eegan hunda,

⁷ ani gara tulluu koo qulqulluutti isaan nan fida;

mana kadhannaa koo keessattis gammachuu isaaniif nan kenna.

Aarsaan isaanii kan gubamuu fi qalmi,

iddoo aarsaa koo irratti fudhatama ni argata;

manni koo saboota hundaaf,

mana sagadaa jedhamee waamamaatii.”

⁸ WAAQAYYO Gooftaan,

inni Israa’eloota bittinnaa’an walitti qabu sun akkana jedha:

“Ani warra duraan walitti qabaman biratti,

warra kaanis gara isaaniitti walitti nan qaba.”

Waaqni Dura Bu’oota Israa’el himate

⁹ Bineensonni dirree hundi,

bineensonni bosonaa hundis kottaatii itti gaggabaa nyaadhaa!

¹⁰ Eegdonni Israa’el jaamota,

isaan hundi beekumsa hin qaban;

hundi isaanii saroota duudaa dha;

dutuus hin danda’an;

isaan ciisanii abjootu;

rafuus ni jaallatu.

¹¹ Isaan saroota albaadheyyii dha;

nyaataniis hin quufan.

Isaan tiksoota hubannaa hin qabnee dha;

hundi isaanii daandii ofii isaanii irra deemu;

tokkoon tokkoon isaanii faayidaa ofii isaanii barbaadu.

¹² Tokkoon tokkoon isaanii akkana jedhu;

“Kottaa daadhii wayinii dhugnaa!

Kottaa dhugaatii cimaa dhugnee quufnaa!

Guyyaan borii akkuma har’aa ta’a;

yookaan caaluu iyyuu ni danda’a.”

57

¹ Namni qajeelaan ni du’a;

kan waan kana yaadatti qabatu tokko iyyuu hin jiru;

warri Waaqaaf of kennan ni fudhatamu;

akka qajeeltonni

waan hamaa jalaa baraaramuuf fudhataman

namni tokko iyyuu hin hubatu.

² Namni qajeelummaadhaan jiraatu,
gara nagaa seena;
isaan siree isaanii irra boqotu.

³ “Isin garuu yaa ilmaan falfaltittii,
isin sanyiin ejjituutii fi sagaagaltuu as kottaa!

⁴ Isin eenyutti qoostu?
Eenyutti afaan banattu?
Eenyuttis arraba baafu?

Isin ilmaan finciltootaa,
sanyii sobdootaa mitii?

⁵ Isin mukkeen qilxuu gidduutti,
mukkeen dagaagan hunda jalatti hawwii hamaadhaan gubattan;
sululoota keessatti,

holqa kattaa keessattis ijoollee keessan qaltan.

⁶ Dhagaawwan cululuqoon sulula keessaa qooda kee ti;
dhugumaan carraan kee isaanuma.

Ati dhibaayyuu isaaniif dhangalaafte;
aarsaa midhaanii isaaniif dhi’eessiteerta.
Ani wantoota kanneen cal’isee nan ilaalaa?

⁷ Ati siree kee tulluu guddaa fi ol dheeraa irra dhaabbatteerta;
aarsaa kee dhi’effachuufis achi ol baate.

⁸ Ati cufaa keetii fi michichila cufaa keetii duubaan,
yaadannoo kee fannifatteerta.

Ana dhiiftee siree kee saaqqatte;
yaabdees bal’iftee banattee keessa seente;

ati warra siree isaanii jaallatte
wajjin walii galte sana qullaa isaanii ilaalte.

⁹ Ati zayitii ejersaa fudhattee gara Moolek dhaqxe;
shittoo kee illee ni baay’ifatte.

Ergamoota kee biyya fagootti ergite;
sii’oolittis gad ergite!

¹⁰ Dheerina karaa keetiitiin dadhabdee turte;
ati garuu, ‘Wanni kun faayidaa hin qabu’ hin jenne.

Jabina haaromfame argatte;
kanaafuu ati hin dadhabne.

¹¹ “Ati akka na sobduuf
akka na hin yaadanneef,
yookaan akka waan kana garaatti hin qabanneef,
eenyuun sodaattee akkas naate?

Ati sababii ani yeroo dheeraa cal’iseef,
na sodaachuu dhiifte mitii?

¹² Ani qajeelummaa keetii fi hojii kee ifatti nan baasa;
isaan garuu si hin fayyadan.

¹³ Yeroo ati gargaarsaaf iyyitutti,
mee waaqonni tolfamoon ati walitti qabatte sun si haa baasan!

Bubbeen hunda isaanii fudhatee bada;
hafuurri baafatan iyyuu afuufee isaan balleessa.

Namni da’annoo isaa ana godhatu garuu
biyyattii ni dhaala;
tulluu koo qulqulluu sana illee ni dhuunfata.”

Abdii Warra Gad Qabamaniif Kenname

¹⁴ Akkanas ni jedhama:
“Tolchaa; tolchaa; daandii qopheessaa!
Karaa saba kootii irraa gufuuwwan bubuqqisaa.”

¹⁵ Inni guddaanii fi ol ol jedhe,
kan bara baraan jiraatuu fi
kan maqaan isaa qulqulluu jedhamu sun akkana jedha:
“Ani iddoo ol ka’aa fi iddoo qulqulluu irra nan jiraadha;
hafuura warra gad qabamanii bayyanachiisuuf,

- garaa warra gad of qabanii jajjabeessuuf garraamii fi
 kan hafuuraan gad qabame wajjinis nan jiraadha.
- 16 Ani bara baraan namatti hin falmu;
 yookaan yeroo hunda hin dheekkamu;
 yoo akkas ta'e hafuurri namaa,
 hafuurri namni ani uume baafatu ni citaatii.
- 17 Ani dharraa isaa kan cubbuun guutame sanattan dheekkame;
 isa adabees aariidhaan fuula koo isa duraa nan dhokfadhe;
 inni garuu karuma fedhii isaatiin itti fufe.
- 18 Ani karaa isaa argeera; garuu isa nan fayyisa;
 ani isa nan qajeelcha; deebisees nan jajjabeessa;
 19 arraba boossuuwwan Israa'el keessa jiraatanii irrattis
 galata nan uuma.
- Warra fagoo jiraataniif nagaan, warra dhi'oo jiraataniifis nagaan haa ta'u.
 Anis isaan nan fayyisa" jedha WAAQAYYO.
- 20 Namoonni hamoon garuu akkuma galaana olii gadi daddarbatamu,
 kan boqochuu hin dandeenye,
 kan dambaliin isaa laaqii fi dhoqqee tufuu ti.
- 21 "Namoota hamoof nagaan hin jiru" jedha Waaqni koo.

58

Sooma Waaqni itti Gammadu

- 1 "Guddisii iyyi; hin qusatin.
 Akkuma malakataa sagalee kee ol fudhadhu.
 Saba kootti fincila isaanii,
 mana Yaaqoobitti immoo cubbuu isaanii labsi.
- 2 Isaan guyyuma guyyaan na barbaaduutii;
 isaan akkuma saba waan qajeelaa hojjetee
 ajajawwan Waaqa isaa hin dhiisin tokkootti
 waan karaa koo beekuu barbaadan fakkaatu.
- Isaan murtii qajeelaa na kadhatu;
 akka Waaqni isaanitti dhi'aatus waan hawwan fakkaatu.
- 3 Isaanis, 'Yoo ati waan kana hin argine,
 nu maaliif soomne?
 Yoo ati waan kana hin qalbeeffanne
 nu maaliif gad of qabne?' jedhu.
- "Ta'us isin guyyaa sooma keessanii waan feetan gootan;
 hojjetoota keessan hundas ni hakuuccan.
- 4 Soomni keessan wal loluu fi wal qoccoluudhaan,
 aboottee hamminaatiin wal tumuudhaan raawwata.
 Soomni isin har'a soomaa jirtan kun,
 akka sagaleen keessan gubbaatti dhaga'amu hin godhu.
- 5 Soomni ani filadhe sooma akkanaatii?
 Namni tokko guyyuma tokko qofaaf gad of qabaa?
 Wanni kun akkuma dhallaadduu mataa gad qabachuu fi
 wayyaa gaddaatii fi daaraa irra ciisuu qofaafii?
 Wanni isin sooma jettaniin
 guyyaan fuula WAAQAYYOO duratti fudhatama qabu kanaa?
- 6 "Soomni ani itti gammadu,
 kan foncaa jal'inaa furu,
 kan funyoo waanjoo hiiku,
 kan cunqurfamtoota bilisa baasuu fi
 waanjoo hunda caccabsu mitii?
- 7 Akka ati warra beela'aniif nyaata kee qoodduu fi
 akka hiyyeeyyii mana hin qabne mana keetti simattu,
 akka ati yeroo nama daare argitutti
 daara isa baaftuu fi
 akka nama foonii fi dhiiga kee ta'etti
 dugda hin galle mitii?

⁸ Yoos ifni kee akka biiftuu ganamaa ni ba'a;
fayyinni kees dafee ni dhufa;
qajeelummaan kee fuula kee dura deema;
ulfinni WAAQAYYOO immoo duubaan si eega.
⁹ Yeroo sana ati ni waammatta; WAAQAYYOS deebii siif kenna;
ati gargaarsa barbaacha iyyatta; innis, 'Ani asan jira' siin jedha.

"Ati yoo waanjoo cunqursaa, haasa'a hamminaatii fi
quba namatti qabuu of irraa fageessite,
¹⁰ ati yoo warra beela'aniif nyaata kennite,
warra rakkatanis rakkinaa baafte,
ifni kee dukkana keessa ni ibsa;
halkan kees akka guyyaa saafaa ta'a.
¹¹ WAAQAYYO yeroo hunda si geggeessa;
inni lafa aduudhaan gubate keessatti iyyuu
fedhii kee siif guuta;
lafee kees ni jabeessa.
Ati akka lafa biqiltuu bishaan quufee,
akka burqaa hin gognees ni taata.
¹² Uummanni kee diigamaa durii deebisee ni ijaara;
atis hundee dhaloota baay'ee ol kaasta;
atis, Suphaa Dallaawwan Jijjigani,
Haaromsaa Daandiiwwan Jireenyaa jedhamtee waamamta.
¹³ "Ati yoo miilla kee Sanbata cabsuu irraa eeggattee
guyyaa koo qulqulluu waan jaallattu gochuu dhiifte,
ati yoo Sanbataan, 'Gammachuu'
guyyaa qulqullaa'aa WAAQAYYOOTIIN immoo, 'Kabajamaa' jette,
yoo daandii ofii keetii deemtuu fi yoo waan feete gochuu
yookaan haasaa faayidaa hin qabne haasa'uu baattee
Sanbata ulfeessite,
¹⁴ yeroo sana WAAQAYYOTTI ni gammadda;
anis akka ati lafa ol dheeraa irra guluftu,
dhaala abbaa kee Yaaqoob nyaattee akka quuftus sin taasisa."
Afaan WAAQAYYOO dubbateeraatii.

59

Cubbuu, Balleessaa Himachuu fi Furama

¹ Dhugumaan harki WAAQAYYOO fayyisuuf gabaabaa miti;
yookaan gurri isaa dhaga'uu hin didne.
² Yakki keessan garuu Waaqa keessaniin
gargar isin baaseera;
akka inni isin hin dhageenyeeff,
cubbuun keessan fuula isaa isin duraa dhokseera.
³ Harki keessan dhiigaan,
qubni keessan immoo yakkaan faalameeraatii.
Afaan keessan soba dubbata;
arrabni keessan immoo waan hamaa guunguma.
⁴ Namni murtii qajeelaa barbaadu hin jiru;
kan himata isaa amanamummaadhaan dhi'eeffatu
tokko iyyuu hin jiru.
Isaan waan faayidaa hin qabne amanatan; soba dubbatan;
gowwoomsaa ulfaa'anii hammina dhalan.
⁵ Isaan hanqaaquu buutii yaasan; man'ee sariitii fo'an.
Namni hanqaaquu isaanii nyaatu kam iyyuu ni du'a;
yommuu tokkoon isaa cabutti
buutiitu keessaa ba'a.
⁶ Fo'aan isaanii uffata hin ta'u;
waan tolchaniinis dhagna isaanii haguuggachuu hin danda'an.
Hojiin isaanii hojii hamminaa ti;
harka isaanii keessas hojii fincilaatu jira.

- 7 Miilli isaanii gara cubbuutti fiiga;
isaan dhiiga qulqulluu dhangalaasuuf ariifatan.
Yaadni isaanii jal'aa dha;
diiguu fi barbadeessuun mallattoo karaa isaanii ti.
- 8 Isaan karaa nagaa hin beekan;
murtiin qajeelaan karaa isaanii irra hin jiru.
Daandii isaanii jal'isaniiru;
namni achi irra deemu tokko iyyuu nagaa hin beeku.
- 9 Kanaafuu murtiin qajeelaan nurraa fagaateera;
qajeelummaan is nu bira hin ga'u.
Nu ifa barbaanna; garuu hundinuu dukkana;
ifa guyyaa barbaanna; garuu dimimmisa keessa deemna.
- 10 Nu akkuma jaamaa dallaa qaqqabachaa deemna;
akkuma warra ija hin qabnee harkaan karaa keenya barbaaddanna.
Akka nama halkaniin deemuu guyyaa saafaadhaan guggufanne;
namoota jajjaboo gidduutti akka warra du'anii taaneerra.
- 11 Nu hundi akka amaaketaa gururiina;
akka gugees gaddaan aadna.
Murtii qajeelaa barbaanna; garuu hin arganne;
fayyina barbaanna; inni garuu nurraa fagaateera.
- 12 Yakki keenya fuula kee duratti baay'ateeraatii;
cubbuun keenyas dhugaa nutti ba'a.
Yakki keenya nu wajjin jiraata;
nus balleessaa keenya ni beekna;
- 13 nu fincillee WAAQAYYON sobne;
Waaqa keenya duukaa bu'uu irraa garagalleerra;
goolii fi fincila kakaafneerra;
soba garaan keenya yaades dubbanneerra.
- 14 Kanaafuu murtii qajeelaan duubatti deebifameera;
qajeelummaan is fagoo dhaabata;
dhugaan karaatti gufate;
tollis ol seenuu hin danda'u.
- 15 Dhugaan eessumattuu hin argamu;
namni cubbuu irraa fagaatus waan hamaaf saaxilama.
- WAAQAYYO akka murtii qajeelaan hin jirre arge;
kunis isa gaddisiise.
- 16 Inni akka namni tokko iyyuu hin jirre arge;
kan gara isaatti kadhannaa dhi'eessu waan dhabameefis
ni dinqisiifate.
- Kanaafuu irreen isaa fayyina isaa fidde;
qajeelummaan ofii isaas isa utube.
- 17 Qajeelummaa akka gaachana qomaatti kaa'atee
gonfoo fayyinaas mataatti gombifate;
wayyaa ittiin haaloo ba'u uffate
akka nama waaroo uffatuutis hinaaffaa ofitti marate.
- 18 Kanaafuu inni akkuma hojii isaniitti,
diinota isaatiif dheekkamsa,
amajaajota isaniitiif immoo adabbii malu ni kenna;
biyyoota bishaan gidduutiifis hojii harka isaanii kennaaf.
- 19 Namoonni lixa biiftuu maqaa WAAQAYYOO sodaatu;
warri ba'a biiftuutti argaman immoo ulfina isaa kabaju.
Inni akkuma lolaa,
kan bubbleen WAAQAYYOO oofuutti ni dhufaatii.
- 20 "Furaan gara Xiyoona, gara warra mana Yaaqoob keessaa
galbii jijjiirratanii ni dhufa"
jedha WAAQAYYOO.
- 21 "Gama kootiin kakuun koo kan ani isaan wajjin qabu kana" jedha WAAQAYYOO.
"Hafuurrin koo kan sirra jiru, dubbiin koo kan ani afaan kee keessa kaa'e sun afaan

keetii yookaan afaan ijoollee keetiitii yookaan afaan ijoollee ijoollee isaaniitii har'aa jalqabee bara baraan hin badu" jedha WAAQAYYO.

60

Ulfina Xiyyoon

- 1 "Ifni kee dhufeeraatii ka'ii ibsi;
ulfinni WAAQAYYOO siif ba'eera.
- 2 Kunoo, dukkanni lafa,
dukkanni hamaan immoo uummattoota haguuga;
WAAQAYYO garuu siif ka'eera;
ulfinni isaas sirraa mul'ata.
- 3 Saboonni gara ifa keetii,
mootonni immoo gara ifa kee 2 isa bariitti ni dhufu.
- 4 "Tja kee ol fudhadhuutii naannoo kee ilaali;
hundinuu wal ga'anii gara kee ni dhufu;
ilmaan kee fagoodhaa,
intallan kees qomatti baatamanii gara kee ni dhufu.
- 5 Ergasii ni ilaalta; ni calaqqiftas;
lapheen kee ni dha'ata; gammachuudhaanis ni guutama;
qabeenyi galaanotaa hundinuu gara kee dhufu;
badhaadhummaan sabootaas kan kee ta'a.
- 6 Gaalli baay'een, ilmaan gaalaa kan Midiyaanii fi
kan Eefaa biyya kee ni guutu.
Namoonni hundi warqee fi ixaana fidanii,
galata WAAQAYYOO labsaa
biyya Shebaatii ni dhufu.
- 7 Bushaayeen Qeedaar hundinuu gara keetti walitti qabamu;
korbeeyyiin hoolaa Nabaayot si tajaajilu;
isaan iddoo aarsaa koo irratti aarsaawwan fudhatama qaban ni ta'u;
anis mana ulfina kootii nan kabaja.
- 8 "Warri akkuma gugeewwanii manneen isaaniitti barrisan,
kanneen akka duumessaa gugatan kunneen eenyu fa'i?
- 9 Dhugumaan biyyoonni bishaan gidduu na abdatu;
sababii inni ulfina sitti uffiseef,
maqaa WAAQAYYO Waaqa keetii,
Qulqullicha Israa'eliitiif jedhanii
dooniiwwan Tarshiish dursanii,
meetii fi warqee isaanii wajjin
ilmaan kee fagoodhaa ni fidu.
- 10 "Namoonni ormaa dallaa kee ni ijaaru;
mootonni isaaniis si tajaajilu;
Ani aariidhaan si dha'u illee,
gara laafina koo jaalalaan sitti nan argisiisa.
- 11 Akka namoonni badhaadhina sabootaa gara keetti fidaniif,
akka mootonni isaaniis hiriiraan gara keetti seenaniif,
karrawwan kee yeroo hunda banamaa ta'u;
isaan halkanii guyyaa gonkumaa hin cufaman;
- 12 Sabni yookaan mootummaan si hin tajaajille
ni barbadaa'uutii;
guutummaan guutuuttis ni balleeffamu.
- 13 "Ulfinni Libaanoon,
gaattiraan, qararoo fi hadheessi,
lafa iddoo qulqulluu koo miidhagsuuf gara kee ni dhufu;
anis iddoo miilli koo dhaabatu nan kabaja.
- 14 Ilmaan warra si cunqursanii siif sagadaa gara kee dhufu;
warri si tuffatan hundinuu miilla keetti kufu;
isaanis Magaalaa WAAQAYYOO

Xiyoon kan Qulqullicha Israa'el jedhanii si waamu.

- 15 “Yoo ati jibbamtee gatamtee namni tokko iyyuu
si keessaan darbuu lagate iyyuu,
ani boontuu bara baraatii fi
gammachuu dhaloota hundaa sin taasisa.
- 16 Ati aannan sabootaa ni dhugda;
harma moototaas ni hoota.
Yommuu ani WAAQAYYO Jabaan Yaaqoob,
Fayyisaa kee fi Furaa kee akkan ta'e ni beekta.
- 17 Ani qooda naasii warqee,
qooda sibiilaa immoo, meetii siif nan fida.
Qooda mukaa naasii,
qooda dhagaa immoo, sibiila siif nan fida.
Nagaa mootii kee,
qajeelummaa immoo, bulchaa kee nan godha.
- 18 Si'achi biyya kee keessatti gooliin,
daarii kee keessatti immoo diigamni yookaan badiisni
hin dhaga'amu;
ati garuu dallaa kee Fayyina,
karrawwan kee immoo Galata jettee waamta.
- 19 Si'achi aduun guyyaadhaan,
ifni ji'aas halkaniin ifa kee hin ta'u;
WAAQAYYO ifa kee bara baraa ta'atii;
Waaqni kee ulfina kee ni ta'a.
- 20 Aduun kee deebitee hin dhiitu;
ji'i kee hin badu;
WAAQAYYO ifa kee bara baraa ni ta'a;
barri gadda kees ni raawwatama.
- 21 Yoos uummanni kee hundi qajeelaa ni ta'a;
bara baraanis lafa ni dhaala.
Isaan biqiltuu ani dhaabbadhee dha;
hojii harka koo, kan ani ittiin ulfina koo mul'isuuf
jedhee hojjedhee dha.
- 22 Maatiin muraasni kuma,
gareen xinnaan immoo saba guddaa ta'a.
Ani WAAQAYYOO dha;
waan kana yeroo isaatti dafee nan hojjedha.”

61

Bara Tola WAAQAYYOO

- 1 Sababii WAAQAYYO akka ani
hiyyeeyyiitti oduu gaarii lallabuuf na dibeeff,
Hafuurri WAAQAYYO Gooftaa narra jira.
Inni akka ani garaa cabe fayyisuuf,
akka ani booji'amtootaaf bilisummaa,
warra hidhamaniif immoo hiikamuu lallabuuf na ergeera;
- 2 akka ani bara tola WAAQAYYOOTII fi
guyyaa haaloo ba'uu Waaqa keenyaa labsuuf,
akka ani warra boo'an hunda jajjabeessuuf,
³ akka ani warra Xiyoon keessatti gaddaniif arjoomee,
qooda daaraa miidhagina,
qooda boo'ichaa, zayitii gammachuu,
qooda abdiin kutachuu immoo,
wayyaa galataa kennuuf na erge.
Isaanis qilxuu qajeelummaa, biqiltuu WAAQAYYO,
kan inni ittiin kabajamu jedhamanii waamaman.
- 4 Isaan waan dur diigame deebisanii ijaaru;
iddoowwan bara dheeraan dura onanii turanis
akka duraatti deebisu;

- magaalaawwan diigaman,
 kanneen dhaloota hedduun dura onanii turan ni haaromsu.
- ⁵ Alagoonni bushaayee keessan ni tiksu;
 ormoonnis lafa qotiisaa fi
 iddoo dhaabaa wayinii keessanii keessa ni hojjetu.
- ⁶ Isin luboota WAAQAYYOO jedhamtanii ni waamamtu;
 tajaajiltoota Waaqa keenyaa jedhamtaniis ni moggaafamtu.
 Isin qabeenya sabootaa ni nyaattu;
 badhaadhummaa isaaniiitiin illee ni boontu.
- ⁷ Qooda qaanii keessanii hiree dachaa ni argattu;
 gooda salphinaa isin dhaala keessanitti ni gammaddu;
 kanaafuu isin biyya keessan keessatti hiree dachaa ni dhaaltu;
 gammachuun bara baraas kan keessan.
- ⁸ “Ani WAAQAYYO murtii qajeelaa nan jaalladhaatii;
 saamichaa fi yakka nan jibba.
 Ani amanamummaa kootiin isaan nan badhaasa;
 kakuu bara baraas isaan wajjin nan gala.
- ⁹ Sanyiin isaanii saboota gidduutti,
 ijoolleen isaanii immoo uummata gidduutti ni beekamu.
 Warri isaan argan hundi,
 akka isaan saba WAAQAYYO eebbise ta’an ni beeku.”
- ¹⁰ Ani WAAQAYYO itti guddaa nan gammada;
 lubbuun koos akka malee Waaqa kootti gammaddi.
 Inni akkuma misirrichi akka lubaatti mataa isaa miidhagfatu,
 misirrittiin immoo faayaan of bareechitu sana,
 wayyaa fayyinaa natti uffiseera
 uffata qajeelummaa narra buuseeraatii.
- ¹¹ Akkuma lafti biqiltuu biqilchitee
 iddoo biqiltuu immoo akka sanyiin guddattu godhu sana
 WAAQAYYO Gooftaan akka qajeelummaa fi
 galanni fuula saboota hundaa duratti biqilan ni godha.

62

Maqaa Xiyoon Haaraa

- ¹ Hama qajeelummaan ishee akka barii barraaqaa,
 fayyinni ishee akka guca boba’uu ifutti,
 ani waa’ee Xiyoon hin cal’isu;
 waa’ee Yerusaalemis afaan hin qabadhu.
- ² Saboonni qajeelummaa kee,
 mootonni hundinuus ulfina kee ni argu;
 ati maqaa haaraa,
 kan afaan WAAQAYYOO siif baasuun ni waamamta.
- ³ Ati harka WAAQAYYOO keessatti gonfoo ulfinaa,
 harka Waaqa keetii keessattis marata mootii ni taata.
- ⁴ Ati si’achi, Gatamtuu hin jedhamtu,
 yookaan biyyi kee Ontuu hin jedhamtu.
 Ati garuu, “Ani isheetti nan gammada” jedhamta;
 biyyi kees “kan heerumte” jedhamti;
 WAAQAYYO sitti gammadaatii,
 biyyi kee ni heerumti.
- ⁵ Akkuma dargaggeessi durba fuudhu,
 ilmaan kee si fuudhu;
 akkuma misirrichi misirrittiitti gammadu,
 Waaqni kees sitti gammada.
- ⁶ Yaa Yerusaalem, ani dallaawwan kee irratti
 eegdota ramadeera;
 isaan gonkumaa halkanii fi guyyaa hin cal’isan.

- Isin warri WAAQAYYON waammattan,
 ofii keessaniif boqonnaa hin kenninaa;
 7 hamma inni Yerusaaalemin cimsee ijaaree
 akka isheen lafa irratti leellifamtuu taatu godhutti
 boqonnaa isaaf hin kenninaa.
- 8 WAAQAYYO akkana jedhee
 harka isaa mirgaatii fi irree isaa jabaan sanaan kakateera;
 “Ani lammata midhaan kee
 nyaata godhee diinota keetiif hin kennu;
 namoonni ormaas lammata daadhii wayinii haaraa
 kan ati itti dadhabde hin dhugan;
 9 garuu warri galfatan midhaan sana ni nyaatu;
 WAAQAYYONIS ni galateeffatu;
 warri ija wayinii guurratanis
 oobdii iddoo qulqulluu koo keessatti ni dhugu.”
- 10 Keessa darbaa; karrawwan keessaan darbaa!
 Uummataaf karaa qopheessaa.
 Tolchaa; karaa guddaa tolchaa!
 Dhagaawwan bubuqqisaa.
 Sabootaafis faajjii ol qabaa.
- 11 WAAQAYYO akkana jedhee
 hamma moggaa lafaatti labseera;
 “Intala Xiyooniin akkana jedhaa:
 ‘Kunoo Fayyisaan kee ni dhufa!
 Badhaasni isaa kunoo isa harka jira;
 beenyaan inni namaaf baasus isuma wajjin jira.’ ”
- 12 Isaanis Saba Qulqulluu,
 Furamtoota WAAQAYYOO jedhamanii ni waamamu;
 atis barbaadamtuu,
 Magaalaa Si’achi Hin Onne ni jedhamta.

63

Guyyaa WAAQAYYO Haaloo Ba’u

- 1 Kan uffata isaa halluu diimaa cuuphee
 Edoom keessaa, Bozraadhaa dhufaa jiru kun eenyu?
 Kan ulfina uffatee guddina jabina isaatiin
 fuula duratti deemaa jiru kun eenyu?
- “Inni anuma, kan qajeelummaan dubbatu,
 kan oolchuufis humna qabu anaa dha.”
- 2 Uffanni kee maaliif akkuma uffata
 nama boolla wayinii itti cuunfan keessatti
 wayinii dhidhiitu tokkoo diimata?
- 3 “Ani kophaa koo boolla itti wayinii cuunfan keessatti
 wayinii nan dhidhiite;
 saboota keessaa namni tokko iyyuu na wajjin hin turre.
 Ani aarii kootiin isaan irra dhaabadhee
 dheekkamsa kootiin gad isaan dhidhiite;
 dhiigni isaanii wayyaa kootti faffaca’e;
 wayyaa koo hundas ni faale.
- 4 Guyyaan haaloo ba’uu garaa koo keessa jiraatii;
 waggaan ani itti nama furus dhufeera.
- 5 Anis mil’adhee nama na gargaaru tokko iyyuu nan dhabe;
 gargaarsa tokko iyyuu dhabnaan nan dinqisiifadhe;
 kanaafuu irreen koo fayyina naa fide;
 dheekkamsi koos na utube.
- 6 Ani aarii kootiin saboota irra nan dhidhiite;

dheekkamsa kootiinis isaan nan macheesse;
dhiiga isaanii lafa irra nan lolaase.”

Galateeffannaa fi Kadhannaa

- 7 Akkuma waan inni nuuf hojjete hundaatti
ani waa’ee jaalala WAAQAYYOO // kan hin geeddaramne sanaa
hojii inni ittiin galateeffamuu qabu nan odeessa;
wantoota gaggaarii inni akkuma gara laafinaa fi
arjummaa isaa hedduu sanaatti mana Israa’eliif hojjete baay’ee
ani dhugumaan nan odeessa.
- 8 Innis, “Isaan dhugumaan saba koo ti;
ijoollee hin sobnee dha” jedhe;
kanaafuu inni Fayyisaa isaanii ta’e.
- 9 Dhiphina isaanii hunda keessatti, innis ni dhiphate;
ergamaan Waaqayyoo kan fuula isaa dura dhaabatu isaan baraare.
Jaalalaa fi araara isaatiin isaan fure;
bara durii hunda keessa,
inni ol fuudhee isaan baate.
- 10 Isaan garuu fincilanii
Hafuura isaa Qulqulluu gaddisiisan.
Kanaafuu inni deebi’ee diina isaanii ta’e;
inni mataan isaas isaan lole.
- 11 Kana irratti sabni isaa bara durii,
bara Museetii fi saba isaa yaadatee akkana jedhe:
Inni tiksee bushaayee isaa wajjin
galaana keessaa isaan baase sun eessa jira?
Inni Hafuura isaa Qulqulluu gidduu isaanii buuse,
- 12 kan akka irreen isaa ulfina qabeessi jabaan sun,
harka mirgaa kan Musee wajjin jiraatuuf erge,
kan maqaa bara baraa ofii isaatiif godhachuudhaaf
fuula isaanii duratti bishaan gargar goode,
- 13 kan tuujuba keessaan isaan qajeelche sun eessa jira?
Isaan akkuma farda biyya bal’aa keessa gulufu tokkoo hin gufanne;
- 14 akkuma loon dirreetti bobba’aniitti,
Hafuurri WAAQAYYOO boqonnaa isaaniif kenne.
Akki ati itti maqaa ulfina qabu ofii keetiif godhachuudhaaf jettee
saba kee qajeelchite kanaa dha.
- 15 Ati samii irraa, teessoo kee qulqulluu fi
ulfina qabeessa sana irraa gad ilaali.
Hinaaffaan keetii fi jabinni kee eessa jiru?
Jaalallii fi gara laafinni kee nurraa ittifamaniiru.
- 16 Yoo Abrahaam nu beekuu baatee,
yookaan Israa’el nu yaadachuu baate iyyuu,
ati dhugumaan abbaa keenya;
Yaa WAAQAYYO, ati abbaa keenya;
Furaan keenya durumaa jalqabee maqaa kee ti.
- 17 Yaa WAAQAYYO, ati maaliif akka nu karaa kee irraa badnuu fi
akka garaan keenya jabaatee nu si sodaachuu didnu nu goota?
Sababii garboota kee,
gosoota handhuuraa kee ta’aniitiif jedhii deebi’i.
- 18 Sabni kee yeroo yartuuf iddoo kee qulqulluu dhaalee ture;
amma garuu diinonni keenya iddoo kee qulqulluu
gad dhidhiitaa jiru.
- 19 Nu durumaa jalqabnee kanuma kee ti;
ati garuu isaan hin bulchine;
isaanis maqaa keetiin hin waamamne.

64

- ¹ Akka tulluwwan fuula kee duratti raafamaniif,
maaloo ati utuu samiwwan tarsaaftee gad buutee!
- ² Akkuma ibiddi hanxaxii gubee, bishaan danfisu sana,
akka maqaan kee diinota kee biratti beekamuuf
gad bu'itii akka saboonni fuula kee
duratti hollatan godhi!
- ³ Ati yeroo waan sodaachisaa nu hin yaadin hojjettetti gad buute;
tulluwwanis fuula kee duratti hollatan.
- ⁴ Si malee Waaqa warra isa abdataniif dhaabatu,
bara duriitii jalqabee namni tokko iyyuu hin dhageenye;
yookaan gurri tokko iyyuu hin qalbeeffanne;
iji tokko iyyuu hin argine.
- ⁵ Ati warra gammachuudhaan waan tolaa hojjetan
kanneen karaa kee yaadatan gargaaruuf ni dhufta.
Garuu yommuu nu ittuma fufnee
cubbuu hojjennetti ati ni dheekkamte.
Yoos nu akkamitti fayyuu dandeenya ree?
- ⁶ Hundi keenya akka nama qulqullina hin qabnee taaneerra;
hojiin qajeelummaa keenyaa hundis akka huccuu xuraa'ummaa ti;
hundi keenya akkuma baalaa coollagne;
cubbuun keenyas akkuma bubbee haxaa'ee nu fudhate.
- ⁷ Namni maqaa kee waammatu tokko iyyuu hin jiru;
yookaan namni si qabachuuf carraaqu hin jiru;
ati fuula kee nu dhokfattee
sababii cubbuu keenyaatiifis nu fixxeertaatii.
- ⁸ Ta'us yaa WAAQAYYO, ati Abbaa keenya.
Nu suphee dha; ati immoo dhooftuu suphee ti;
hundi keenya hojii harka keetii ti.
- ⁹ Yaa WAAQAYYO, ati akka malee hin dheekkamin;
cubbuu keenyas bara baraan hin yaadatin.
Maaloo si kadhannaa, fuula kee nuuf deebisi;
nu hundinuu saba keetii.
- ¹⁰ Magaalaawwan kee qulqullooni onaniiru;
Xiyoon iyyuu onteerti; Yerusaalemis duwwaa hafteerti.
- ¹¹ Manni qulqullummaa keenya qulqullichii fi ulfina qabeessi,
iddoon abbootiin keenya itti si galateeffatan sun ibiddaan gubameera;
wanni nu itti gammannu hundis barbadeeffameera.
- ¹² Yaa WAAQAYYO, ati wantoota kanneen hunda
cal'uma jettee ilaaltaa?
Ati cal'istee akka malee nu adabdaa?

65

Murtii fi Fayyina

- ¹ "Ani warra na hin iyyaafatinitti nan mul'adhe;
warri na hin barbaadinis na argatan.
Ani saba maqaa koo hin waammadiniin,
'Ani asan jira; ani asan jira' nan jedhe.
- ² Ani guyyaa guutuu gara uummata didaa ta'eetti,
kan karaa gaarii hin ta'in irra deemu,
kan yaada ofii isaa duukaa bu'uuf
harka koo nan diriirfadhe;
- ³ Isaan saba iddoo biqiltuu keessatti aarsaa dhi'eessuudhaan,
iddoo aarsaa kan xuubii irrattis ixaana aarsuudhaan,
utuu gargar hin kutin, utuma ani arguu
dheekkamsaaf na kakaasani dha;
- ⁴ isaan warra awwaala gidduu tataa'anii
lafa dhoksa bulanii dha;
warra foon booyyee nyaatanii
okkoteen isaanii bishaan foon xuraa'aa baatuu dha;
- ⁵ isaan warra, 'Achi fagaadhu; natti hin dhi'aatin;

ani si caalaa qulqulluudhaatii' jedhanii dha.
Sabni akkasii funyaan koo keessatti akkuma aaraa,
akkuma ibidda guyyaa guutuu boba'uu ti.

6 "Kunoo, wanni kun akkana jedhamee fuula koo duratti barreeffameera:
ani hin cal'isu; garuu gatii hojii isaanii guutuu nan kennaaf;
dhugumaanis qomatti isaan nan baachisa.

7 Kunis cubbuu keessanii fi cubbuu abbootii keessanii ti"
jedha WAAQAYYO.

"Isaan tulluuwwan irratti aarsaa dhi'eessanii,
gaarran irratti waan na arrabsaniif,
ani hojii isaanii kan duriitiif,
kaffaltii guutuu isaaniifin kenna."

8 WAAQAYYO akkana jedha:
"Akkuma yeroo hurbuu wayinii keessa cuunfaan jirutti,
namoonni, 'Amma iyyuu eebbatu keessa jiraatii,
hin balleessinaa' jedhan sana,
anis tajaajiltoota kootiif akkasuma nan godha;
isaan hundas hin balleessu.

9 Anis Yaaqoob keessaa sanyii tokko,
Yihuudaa keessaa immoo warra tulluuwwan koo dhaalan nan biqilcha;
sabni koo filatamaan tulluuwwan sana dhaala;
tajaajiltoonni koos achi ni jiraatu.

10 Saba koo kan na barbaaduuf
Shaaroon lafa bushaayeen itti bobba'an,
Sululli Aakoor immoo lafa loon boqotan ni ta'an.

11 "Garuu isin warra WAAQAYYON dhiiftanii
tulluu koo qulqulluu dagattan,
kanneen waaqa 'Milkii' jedhamuuf
maaddii qopheessitanii,
waaqa, 'Hiree' jedhamuuf immoo dhibaayyuu kubbaayyaatti guuttan,

12 ani irbaata goraadee isinan godha;
isin hundis qalamuuf gad jettu; ani isin waameen ture;
isin garuu na jalaa hin owwaanne;
ani dubbadheen ture; isin garuu na hin dhaggeeffanne.
Isin fuuluma koo duratti waan hamaa hojjettanii
waan na hin gammachiifne filattan."

13 Kanaafuu WAAQAYYO Gooftaan akkana jedha:
"Garboonni koo ni nyaatu;
isin garuu ni beeloftu;
garboonni koo ni dhugu;
isin garuu ni dheebottu;
garboonni koo ni gammadu;
isin garuu ni qaanoftu.

14 Garboonni koo
gammachuu garaa irraa maddeen ni faarfatu;
isin garuu,
waan garaan keessan miidhameef ni boossu;
waan hafuurri keessan gaddeef ni wawwaattu.

15 Filatamtoonni koo maqaa isin dabarfattan sana
abaarsaaf itti fayyadamu;
WAAQAYYO Gooftaan isin fixa;
garboota isaatiif garuu maqaa biraa ni kenna.

16 Namni lafa irratti eebbifamu kam iyyuu,
Waaqa dhugaatiin eebbifamu;
namni lafa irratti kakatus,
Waaqa dhugaatiin kakata.
Rakkinni durii ni irraanfataa;
ija koo duraas ni dhokataatii.

Samiwwan Haaraa fi Lafa Haaraa

- 17 “Kunoo ani, samiiwwan haaraa fi
lafa haaraa nan uuma.
Wanni durii hin yaadatamu;
yookaan qalbii namaatti hin dhufu.
- 18 Isin garuu waan ani uumutti,
bara baraan gammadaa ililchaa;
ani Yersaalemin gammachuuf,
saba ishee immoo ililleef nan uumaatii.
- 19 Ani Yersaalemitti nan gammada;
saba koottis nan gammada;
si’achi sagaleen boo’ichaatii fi
iyyaa ishee keessatti hin dhaga’amu.
- 20 “Si’achi, daa’imni guyyaa muraasa qofa jiraatu,
yookaan jaarsi umuriin isaa hanqatu tokko iyyuu
ishee keessatti hin argamu;
namni waggaa dhibbatti du’u,
akka waan dargaggummaan du’eetti yaadama;
namni waggaa dhibba hanqate tokko,
akka waan abaarameetti hedama.
- 21 Namoonni mana ni ijaarratu; achi keessas ni jiraatu;
wayinii dhaabbatu; ija isaas ni nyaatu.
- 22 Si’achi isaan mana ijaaranii namoonni biraa keessa hin jiraatan;
yookaan isaan biqiltuu dhaabaniis namoonni biraa hin nyaatan.
Umuriin saba koo,
akkuma umurii mukaa ni ta’a;
warri ani filadhe,
hojii harka isaaniitiin bara dheeraa ni gammadu.
- 23 Isaan akkasumaan hin dadhaban
yookaan ijoollee balaan eeggattu hin dhalchan;
isaan sanyii isaaniis wajjin
saba WAAQAYYO eebbisu ni ta’u.
- 24 Ani utuu isaan na hin waammatin nan deebisaaf;
utuu isaan dubbatanii hin fixinis nan dhaga’a.
- 25 Yeeyyii fi xobbaallaan hoolaa walii wajjin nyaatu;
leenci akka sangaa okaa nyaata;
biyyoon garuu soora bofaa ta’a.
Isaan tulluu koo qulqulluu hunda irratti homaa hin miidhan
yookaan homaa hin balleessan”
jedha WAAQAYYO.

66

Murtii fi Abdii

- ¹ WAAQAYYO akkana jedha:
“Samiin teessoo koo ti;
laftis ejjeta miilla kootii ti.
Manni isin naaf ijaartan meerre?
Lafti boqonnaa kootii eessa?”
- ² Waan kana hunda harki koo hin hojjennee?
Kanaafuu wantoonni kunneen hundi kanuma koo ti”
jedha WAAQAYYO.
- “Ani garuu nama gad of qabuu fi
kan garaa isaa keessatti gaabbee
dubbii kootiin hollatuu nan ilaala.
- ³ Garuu namni korma qalu kam iyyuu
akkuma nama nama ajjeesu tokkoo ti;
namni xobbaallaa hoolaa qalu kam iyyuu
akkuma nama morma saree cabsu tokkoo ti;
namni aarsaa midhaanii dhi’eessu kam iyyuu
akkuma nama dhiiga booyyee dhi’eessu tokkoo ti;

namni ixaana yaadannoo aarsu kam iyyuus
 akkuma nama waaqa tolfamaa waaqeffatu tokkoo ti.
 Isaan karaa ofii isaani filataniiru;
 lubbuun isaaniis xuraa'ummaa isaaniitti gammaddi.
 4 Kanaafuu ani gidiraa isaaniif nan fila;
 waan isaan akka malee sodaatanis isaanitti nan fida.
 Yeroo ani waametti namni tokko iyyuu na jalaa hin owwaanne;
 yeroo ani dubbadhetti namni tokko iyyuu
 hin dhaggeeffanneetii.
 Isaan fuula koo duratti waan hamaa hojjetanii
 waan na hin gammachiifne illee filatan."

5 Warri dubbii isaatiin hollattan
 dubbii WAAQAYYOO dhaga'aa:
 "Obboleeyyan keessan warri sababii maqaa kootiif isin jibbanii
 isin ari'an sun akkana jedhan;
 'Akka nu gammachuu keessan arginuuf,
 mee WAAQAYYO haa ulfaat!'
 Ta'us isaan ni qaana'u.
 6 Huursaa magaalaa keessaa sana dhaga'aa;
 waca mana qulqullummaa keessaa dhaga'aa!
 Wannii kun sagalee WAAQAYYOO kan yeroo inni
 gatii diinota isaa hundaaf malu isaaniif kennuu ti.

7 "Isheen utuu hin ciniinsifatin,
 ni deessi;
 utuu miixuun da'umsaa ishee hin qabatin,
 ilma deessi.
 8 Eenyutu takkumaa waan akkasii dhaga'e?
 Waan takkumaa akkasii eenyutu arge?
 Biyyi tokko guyyuma tokkotti dhalachuu dandeessii?
 Yookaan sabni yeruma tokkotti biqiluu danda'aa?
 Xiyoon garuu akkuma ciniinsifatteen,
 ijoollee ishee deesse.

9 Ani yeroo da'umsaatiin nama ga'ee
 da'uu nan dhowwaa?"
 jedha WAAQAYYO.
 "Ani da'umsaan ga'ee
 gadameessa nan cufaa?"
 jedha Waaqni kee.

10 "Isin warri ishee jaallattan hundi,
 Yerusaalem wajjin gammadaa; isheefis ililchaa;
 isin warri isheef boossan hundi,
 guddisaatii ishee wajjin gammadaa.

11 Isin harma ishee kan nama
 jajjabeessu sana hootanii ni quufuutii;
 ulfina ishee guddaa sana irraas
 gammachuudhaan ni dhugdu."

12 WAAQAYYO akkana jedhaatii:
 "Kunoo ani nagaa akkuma bishaan laga,
 badhaadhummaa sabootaas akkuma laga yaa'uu
 isheef nan dhangalaasa;
 isin ni hootu; harka ishee irratti ni baatamtu;
 gudeeda ishee irra illee ni taphattu.

13 Akkuma haati daa'ima ishee urursitu sana,
 anis isinan urursa;
 isinis Yerusaalem keessatti ni ururfamtu."

14 Isin yommuu waan kana argitanitti garaan keessan ni gammada;
 lafeen keessan akka margaa ni haaromfama;
 harki WAAQAYYOO akka garboota isaa wajjin jirus ni beekama;
 dheekkamsi isaa garuu amajaajota isaa irratti ni mul'ifama.

¹⁵ Kunoo, WAAQAYYO ibiddaan ni dhufa;
 gaariwwan isaas akkuma bubbee hamaa ti;
 inni aarii isaa dha'ichaan,
 ifannaa isaa immoo arraba ibiddaatiin gad buusa.

¹⁶ WAAQAYYO ibiddaa fi goraadee isaatiin
 namoota hunda irratti murtii raawwataatii;
 namoonni WAAQAYYOON ajjeefaman ni baay'atu.

¹⁷ "Warri iddoo biqiltuu seenuuf jedhanii, isa warra foon booyyee, foon hantuutaatii fi wantoota jibbisiisoo biraa nyaatan gidduutti argamu duukaa bu'uudhaan addaan of baasanii of qulqulleessan wajjin barbadeeffamu" jedha WAAQAYYO.

¹⁸ "Ani waanan hojii fi yaada isaanii beekuuf, sabootaa fi afaanota hunda walitti qabuuf jedhee nan dhufa; isaanis dhufanii ulfina koo ni argu.

¹⁹ "Ani gidduu isaanii mallattoo nan kaa'a; hambaawwan keessaa namoota tokko tokko gara sabootaa jechuunis gara Tarshiish, Phuulii fi gara Luud warra xiyyaan lolan, gara Tuubaalii fi Yaawaan akkasumas gara biyyoota bishaan gidduu fagoo jiran kanneen waa'ee koo hin dhaga'inii yookaan ulfina koo hin arginiitti nan erga. Isaanis saboota gidduutti ulfina koo ni labsu. ²⁰ Isaanis saboota hunda keessaa obboloota keessan hunda akkuma aarsaa WAAQAYYOOF dhi'eeffamu tokkootti fardeeniin, gaariiwwaniin, harrootaan, gaangolii fi gaalawwaniin gara tulluu koo qulqulluutti, gara Yerusaaalem ni fidu" jedha WAAQAYYO. "Isaanis akkuma Israa'eloonni mi'a akka seeraatti qulqulluu ta'een aarsaa midhaan isaanii gara mana qulqullummaa WAAQAYYOOTTI fidan sanatti jara fidu. ²¹ Anis isaan keessaa namoota tokko tokko akka isaan lubootaa fi Lewwota ta'aniif nan filadha" jedha WAAQAYYO.

²² "Akkuma samiin haaraanii fi lafti haaraan ani uumu itti fufanii fuula koo dura jiraatan sana maqaa fi sanyiin keessan itti fufanii jiraatu" jedha WAAQAYYO. ²³ "Ayyaana Baatii tokkoo hamma Ayyaana Baatii kaaniitti, Sanbata tokkoo hamma Sanbata kaaniittis sanyiin namaa hundi dhufee fuula koo duratti ni sagada" jedha WAAQAYYO. ²⁴ "Isaanis gad ba'anii reeffa warra natti fincilanii ni ilaalu; raammoon isaanii hin du'u; ibiddi isaaniis hin dhaamu; isaanis sanyii namaa hundaaf jibbisiisoo ta'u."

Raajii Ermiyaas

¹ Kun dubbii Ermiyaas ilma Hilqiyaa kan luboota biyya Beniyaam keessa magaalaa Anaatoot jiraatan keessaa tokko ta'e sanaa ti. ² Dubbiin WAAQAYYOO bara Yosiyaa ilma Aamoon mooticha Yihuudaa keessa waggaa kudha sadaffaatti gara Ermiyaas dhufe; ³ akkasumas bara Yehooyaaqiim ilma Yosiyaa mooticha Yihuudaatii jalqabee hamma dhuma bara Zedeqiyaa ilma Yosiyaa mooticha Yihuudaa waggaa kudha tokkoffaatti waggaa sana keessaas hamma ji'a shanaffaatti, yeroo sabni Yerusaalem booji'ametti dubbiiin kun gara isaa dhufaa ture.

Waamamuu Ermiyaas

- ⁴ Dubbiin WAAQAYYOO akkana jedhee gara koo dhufe:
⁵ "Ani utuu gadameessa keessatti si hin uumin dura si beeke; utuu ati hin dhalatin dura addaan si baafadhe; akka ati sabootaaf raajii taatuufis si muude."
⁶ Anis, "Wayyoo, yaa WAAQAYYOO Gooftaa ani akkamitti akkan dubbadhu hin beeku; ani mucaa xinnoo dha" nan jedhe.
⁷ WAAQAYYOO garuu akkana naan jedhe; "Ati, 'Ani mucaa xinnoo dha' hin jedhin. Ati gara nama ani itti si ergu hundaa dhaqqee waan ani si ajaju hunda dubbachuu qabda.
⁸ Ati jara hin sodaatin; ani si baasuuf si wajjinan jiraatii" jedha WAAQAYYOO.
⁹ Ergasiis WAAQAYYOO harka isaa hiixatee afaan koo tuqee akkana naan jedhe; "Kunoo, ani dubbii koo afaan kee keessa kaa'eera. ¹⁰ Ilaa, ani akka ati buqqiftuu fi diigduuf, akka barbadeessituu fi garagalchituuf, akka ijaartuu fi dhaabduuf har'a sabootaa fi mootummoota irratti si muudeera."
¹¹ Dubbiin WAAQAYYOO gara koo dhufee, "Ermiyaas, ati maal argaa jirta?" naan jedhe. Anis deebisee, "Damee muka lawuzii arguuttin jira" jedhe.
¹² WAAQAYYOO immoo, "Ati sirriitti argite; ani akka dubbiiin koo fiixaan ba'uuf kutadhee ka'eeraatii" naan jedhe.
¹³ Dubbiin WAAQAYYOO amma illee gara koo dhufee, "Ati maal argaa jirta?" naan jedhe. Anis deebisee, "Xuwwee danfaa jiru kan kaaba irraa as garagalee jiru tokko nan arga" jedhe.
¹⁴ WAAQAYYOO akkana naan jedhe; "Gara kaabaatii balaan warra biyyattii keessa jiraatan hundatti ni bu'a. ¹⁵ Kunoo saboota mootummoota kaabaa hunda walitti nan waama" jedha WAAQAYYOO.
 "Mootonni isaanii dhufanii karrawwan Yerusaalem dura teessoowwan isaanii ni dhaabbatu; isaan dallaawwan naannoo ishee hundaa fi magaalawwan Yihuudaa hunda marsu.
¹⁶ Sababii isaan na dhiisanii waaqota biraaf ixaana aarsuudhaan waan harki isaanii hojjete waaqeffachuudhaan hammina hojjetaniif ani saba kootti murtii nan labsa.
¹⁷ "Ati garuu mudhii kee hidhadhuu ka'iitii waan ani si ajaju hunda isaanitti himi. Ati jara hin sodaatin; ati isaan sodaannaan ani fuula isaanii duratti sodaa sittin buusaa. ¹⁸ Akka ati guutuu biyyattiitiin jechuunis mootota Yihuudaatiin, qondaaltota isheetiin, lubootaa fi uummata biyyattiitiin mormituuf ani har'a magaalaa dallaa jabaan marfamte, utubaa sibiilaatii fi dallaa naasii si taasiseera. ¹⁹ Isaan si lolu; garuu si hin mo'atan; ani si baasuuf si wajjin jiraatii" jedha WAAQAYYOO.

2

Israa'el Waaqa Gante

¹ Dubbiin WAAQAYYOO akkana jedhee gara koo dhufe; ² "Dhaqiiiti gurra Yerusaalemiitti akkana jedhii labisi:

"Waaqayyoo akkana jedha:
 "Ani amanamummaa kee kan yeroo dargaggummaa, akka ati akkuma misirrittiitti na jaallattee

lafa gammoojjii keessa,
lafa midhaan itti hin facaafamin keessa na duukaa buute
nan yaadadha.

³ Israa'el kan WAAQAYYOOF qulqulloofte sun,
mataa midhaan isaa turte;
warri ishee nyaatan hundis
akka nama yakka hojjeteetti ilaalamu ture;
badiisnis isaanitti dhufe' " jedha WAAQAYYO.

⁴ Yaa mana Yaaqoob,
isin maatiiwwan mana Israa'el hundinuus
dubbii WAAQAYYOO dhaga'aa.

⁵ WAAQAYYO akkana jedha:
"Abbootiin keessan kan akkas narraa fagaatan
balleessaa maalii narratti arganiitii?
Isaan waaqota tolfamoo faayidaa hin qabne faana bu'anii
isaanumtuu warra faayidaa hin qabne ta'an.

⁶ Isaanis, 'WAAQAYYO inni Gibxii nu baasee,
gammoojjii homtuu keessa hin jirre keessaan,
lafa gammoojjii fi dhoqaa keessaan
lafa hongee fi dukkanaa,

biyya namni tokko iyyuu keessa hin dabarree fi
keessa hin jiraanne keessaan dabarsee
nu fide sun eessa jira?' jedhanii hin gaafanne.

⁷ Ani akka isin ija ishee nyaattanii midhaan isheetti gammaddaniiif
gara lafa gabbataatti isin fideera.
Isin garuu dhuftanii biyya koo xureessitan;
handhuuraa koos akka jibbamuu gootan.

⁸ Luboonnis, 'WAAQAYYO eessa jira?'
jedhanii hin gaafanne.
Warri seera wajjin oolanis na hin beekne;
bulchitoonni natti fincilan;
raajonnis waaqota faayidaa hin qabne duukaa bu'anii
maqaa Ba'aaliin raajii dubbatan.

⁹ "Kanaafuu ani amma iyyuu isin wajjin falmii qaba"
jedha WAAQAYYO.
"Tjoolllee ijoollee keessanii wajjinis falmii nan qabaadha.

¹⁰ Mee gara qarqara Kitiimitti ce'aatii ilaalaa;
gara Qeedaarittis nama ergaatii qalbiidhaan qoradhaa;
yoo duraan wanni akkasii ta'ee jiraates ilaalaa.

¹¹ Yoo isaan waaqota ta'uu baatan iyyuu
sabni tokko takkumaa waaqota isaa geeddaree beekaa?

Uummanni koo garuu
ulfina isaa waaqota tolfamoo
faayidaa hin qabneen geeddareera.

¹² Yaa samiiwwan, waan kana dinqifadhaa;
naasuu guddaadhaanis holladhaa"
jedha WAAQAYYO.

¹³ "Uummanni koo cubbuu lama hojjete:
Isaan ana burqaa bishaan jireenyaa dhiisanii
boolla bishaanii ofii isaanii,
boolla bishaanii baqaqaa
bishaan qabachuu hin dandeenye qotataniiru.

¹⁴ Israa'el garbaa? Inni garbicha manatti dhalatee?
Yoos inni maaliif booji'ame ree?

¹⁵ Leenconni aadaniiru;
isattis gururi'aniiru.
Isaan biyya isaa onsaniiru;
magaalaawwan isaas gubamanii duwwaa hafaniiru.

¹⁶ Akkasumas namoonni Memfiisii fi
Tahiphaanhees mataa kee buruqsaniiru.

- 17 Ati yeroo inni karaa irra si qajeelchetti,
WAAQAYYON Waaqa kee dhiisuudhaan
waan kana ofitti fiddeerta mitii?
- 18 Egaa ati maaliif Shihoorii bishaan dhuguuf jettee
biyya Gibxi dhaqxa?
Maaliifis bishaan laga Efraaxiis
dhuguuf jettee Asoor dhaqxa?
- 19 Hamminni kee si adaba;
duubatti deebi'uun kees si ifata.
Ati WAAQAYYON Waaqa kee dhiiftee
na sodaachuu diduun kee
hammam hamaa fi hadhaa'aa akka sitti ta'e ilaalii hubadhu"
jedha Gooftaan, WAAQAYYON Waan Hunda Danda'u.
- 20 "Ani bara dheeraan dura waanjoo kee sirraa cabseera;
hidhaa kees sirraa kukkuteera.
Ati garuu, 'Ani si hin tajaajilu' jette!
Ati garuu akkuma sagaagaltuu tokkootti
tulluuwwan dhedheeroo hunda irraa fi
mukkeen lalisoo hunda jala ciifte.
- 21 Ani garuu muka wayinii filatamaa,
kan sanyiin isaa guutumaan guutuutti qulqulluu ta'e godhee
si dhaabbadheen ture.
Yoos ati akkamitti wayinii diidaa
taatee natti geeddaramte ree?
- 22 Ati yoo daaraadhaan dhiqattee
saamunaa hedduutti fayyadamte iyyuu,
xuriin yakka keetii amma illee fuula koo dura jira"
jedha WAAQAYYON Gooftaan.
- 23 "Ati akkamitti, 'Ani hin xuroofne;
Ba'aal duukaas hin buune' jechuu dandeessa?
Waan sulula keessatti ta'aa turte yaadadhu;
waan hojjechaa turtes qalbeeffadhu.
Ati gaala dhalaa asii fi
achi fiigduu dha;
- 24 harree diidaa kan gammoojjii barattee
fedhii kormaatiin qilleensa suufattu tokko,
maaltu fedhii ishee irraa ishee deebisuu danda'a?
Kormi ishee barbaadu kam iyyuu ishee argachuuf hin rakkatu;
inni yeroo gaanaatti ishee argata.
- 25 Miilla kee kophee malee deemuu irraa,
laagaa kee immoo dheebuu irraa eeggadhu.
Ati garuu, 'Kun waan abdii hin qabnee dha!
Ani waaqota ormaa nan jaalladha;
isaan faanas nan bu'a' jette.
- 26 "Akkuma hattuun yeroo qabamtu salphifamtu sana
manni Israa'el ni salphifama;
isaan, mootonni isaaniitii fi qondaaltonni isaanii,
luboanni isaaniitii fi raajonni isaanii ni salphifamu.
- 27 Isaan mukaan, 'Ati abbaa koo ti,'
dhagaadhaan immoo, 'Situ na dhale' jedhu.
Isaan dugda isaanii malee
fuula isaanii natti hin deebifanneetii;
ta'us isaan yeroo rakkatanitti,
'Kottuu nu baasi!' jedhu.
- 28 Waaqonni ati ofif tolfatte sun eessa jiru?
Isaan yoo si baasuu danda'an
mee yeroo ati rakkina keessa jirtutti haa dhufan!
Yaa Yihuudaa, ati akkuma magaalaa hedduu qabdu sana
waaqota hedduu qabdaatii.

- 29 “Isin maaliif na himattu?
Isin hundinuu natti finciltaniirtu”
jedha WAAQAYYO.
- 30 “Ani akkasumaanan ijoollee keessan adabe;
isaan sirreeffama fudhachuu didan.
Goraadeen keessan akkuma
leenca beela’e tokkootti raajota keessan fixxe.
31 “Isin dhaloonni ammaa dubbii WAAQAYYOO qalbeeffadhaa:
“Ani Israa’eliif gammoojjii
yookaan biyya dukkana hamaan turee?
Sabni koo maaliif, ‘Nu asii fi achi jooruu ni dandeenya;
si’achi gara kee hin dhufnu’ jedha?
32 Durbi tokko faaya ishee,
misirrittiin tokko immoo mi’a ittiin heerumtu ni irraanfattii?
Sabni koo garuu,
guyyaa hamma hin qabne na irraanfateera.
33 Ati jaalala adamsuutti akkam ogeettii dha!
Dubartoota akka malee hamoo ta’an iyyuu amala kee barsiifteerta.
34 Ati utuu isaan cabsanii seenanuu isaan qabuu baattu iyyuu,
dhiigni hiyyeeyyii balleessaa hin qabnee
wayyaa kee irratti ni argama.
Utuma wanni kun hundi ta’ee jiruu
35 ati, ‘Ani balleessaa hin qabu;
inni natti hin dheekkamu’ jetta.
Ani garuu sababii ati, ‘Ani cubbuu
hin hojjenne’ jettuuf, sitti nan mura.
36 Ati maaliif karaa kee geeddaruudhaan,
asii fi achi deemuu baay’ifta?
Akkuma Asoor si qaanessite sana
Gibxis si qaanessiti.
37 Ati mataa kee qabattee,
iddoo sanaa baata;
WAAQAYYO warra ati itti irkatte tuffateeraatii;
ati isaaniin hin milkooftu.

3

- 1 “Namni tokko yoo niitii isaa hiikee
isheenis isa dhiiftee nama biraatti heerumte,
inni lammata isheetti deebi’aa?
Biyyattiinis guutumaan guutuutti hin xurooftuu?
Ati garuu akka sagaagaltuutti
sanyoowwan hedduu wajjin jiraatteerta;
ta’us amma gara kootti deebi’i?”
jedha WAAQAYYO.
- 2 “Mee ol mil’adhuutii gaara duwwaa ilaali.
Iddoon ati itti hin sagaagalin tokko iyyuu jiraa?
Ati akkuma godaantuu gammoojjii keessaa tokkootti
warra si jaallatan eeggachuuf qarqara karaa teesse;
sagaagaltummaa fi hammina keetiin
biyyattii xureessiteerta.
3 Kanaafuu tiifuun ni ittifame;
birraa keessa illee bokkaan hin roobne.
Ati garuu nyaara sagaagaltuu qabda;
qaana’uus ni didde.
4 Ati amma iyyuu akkana jettee na hin waamnee?
‘Abbaa koo, ijoollummaa kootii jalqabdee michuu koo,
5 ati yeroo hunda ni aartaa?
Dheekkamsi kee baruma baraan itti fufaa?’
Ati akkasitti dubbatta;
garuu waan hamaa dandeessu hunda ni hojjetta.”

Israa'el Amanamummaa Dhabde

⁶ WAAQAYYO bara Yosiyaas Mootichaa keessa akkana naan jedhe; “Ati waan Israa’el isheen amanamummaa hin qabne sun hojjette argitee? Isheen dhaqxee tulluu of dheeraa hunda irrattii fi muka lalisaa hunda jalatti sagaagalte. ⁷ Ani waan isheen erga wantoota kanneen hunda hojjettee booddee gara kootti deebitu se’een ture; isheen garuu hin deebine. Obboleettiin ishee Yihuudaan hin amanamne sunis waan kana argite. ⁸ Ani sababii ejjummaa ishee hundaatiif waraqa ragaa hiikkaa kenneefiin Israa’el amanamummaa hin qabne sana of irraa ari’e; ta’u illee ani akka obboleettiin ishee Yihuudaan amanamummaa hin qabne sun hin sodaanne nan arge; isheen dhaqxee ejjite. ⁹ Israa’el sababii sagaagalummaa ofii akka waan salphaa tokkootti ilaalteef dhagaa fi muka wajjin ejuudhaan biyya xureessite. ¹⁰ Isheen waan kana hunda hojjettu iyyuu obboleettiin ishee Yihuudaan hin amanamne sun fakkeessuuf malee garaa guutuudhaan gara kootti hin deebine” jedha WAAQAYYO.

¹¹ WAAQAYYO akkana naan jedhe; “Yihuudaa hin amanamne irra Israa’el amantii hin qabnetu qajeeltu dha. ¹² Dhaqiiiti ergaa kana kaabatti labsi:

“Yaa Israa’el amantii dhabeettii, deebi’i” jedha WAAQAYYO;

‘Ani si’achi ija aariitiin si hin ilaalu;

ani araara qabeessaatii’ jedha WAAQAYYO.

‘Ani bara baraan hin dheekkamu.

¹³ Ati akka WAAQAYYO Waaqa keetti fincilte,

akka mukkeen lalisoo hunda jalatti

jaalala kee waaqota ormaatiif kennitee naa ajajamuu didde,

balleessaa kee sana qofa himadhu”

jedha WAAQAYYO.

¹⁴ “Yaa saba amantii hin qabne, deebi’aa” jedha WAAQAYYO; “ani dhirsa keessaniitii. Ani magaalaa tokko irraa nama tokko, balbala tokko irraa nama lama filadhee Xiyoonitti isin nan fida. ¹⁵ Ergasii ani tiksoota akka garaa kootii ta’an, kanneen beekumsaa fi hubannaadhaan isin qajeelchan isinii nan kenna. ¹⁶ Bara sana keessa, yeroo baay’inni keessan biyyattii keessatti akka malee guddatutti,” jedha WAAQAYYO, “Nameonni si’achi, ‘Taabota kakuu WAAQAYYOO’ hin jedhan.” Wannu kun gonkumaa sammuu isaanii keessa hin seenu, yookaan hin yaadatamu; kan isa barbaadu hin jiru, yookaan kan biraa hin tolfamu. ¹⁷ Isaan yeroo sanatti Yerusaleemiin Teessoo WAAQAYYOO jedhanii waamu; saboonni hundinuus maqaa WAAQAYYOO ulfeessuuf Yerusaleemitti walitti ni qabamu. Isaan si’achi mata jabina hammina garaa isaanii duukaa hin bu’an. ¹⁸ Bara sana keessa manni Yihuudaa mana Israa’elitti ni makama; isaanis tokkummaadhaan biyya kaabaatii gara biyya ani akka dhaalaatti abbootii keessaniif kenne sanaa ni dhufu.

¹⁹ “Ani mataan koo akkana nan jedhe;

“ ‘Ani silaa hamman akkuma ilmaan kootti

si fudhadhee biyya namatti toltu,

dhaala akka malee miidhagu kan saba kamii iyyuu

siif nan kenna ture.’

Ani waan ati, ‘Abbaa ko’ jettee na waamtuuf,

waan ati na duukaa bu’uu hin dhiifne se’ee ture.

²⁰ Yaa mana Israa’el,

ati garuu akkuma niitii dhirsa isheetiif hin amanamne tokkoo,

anaaf hin amanamne turte”

jedha WAAQAYYO.

²¹ Isaan karaa isaanii jal’isanii

WAAQAYYO Waaqa isaanii waan irraanfataniiif

gaara duwwaa irratti iyyi,

boo’ichii fi waammannaan saba Israa’el ni dhaga’ama.

²² “Yaa saba amantii hin qabne deebi’aa;

ani duubatti deebi’uu keessan nan fayyisaatii.”

“Kunoo, nu gara kee ni dhufna;

Ati WAAQAYYO Waaqa keenyaatii.

²³ Dhugumaan wacni gaarranii fi

tulluuwwan irraa gowwoomsaa dha;

dhugumaan fayyinni Israa’el

harka WAAQAYYO Waaqa keenyaa jira.

24 Ijoollummaa keenyaa jalqabnee waaqonni nama qaanessan,
 bu'aa dadhabbi abbootii keenyaa
 jechuunis bushaayee fi loon isaanii,
 ilmaan isaaniitii fi intallan isaanii fixaniiru.
 25 Nu qaani keenyaan haa ciifnuu;
 salphinni keenyas nu haa haguugu.
 Nus abbootiin keenyas WAAQAYYO Waaqa keenyatti
 cubbuu hojjenneerra;
 nu ijoollummaa keenyaa jalqabnee
 hamma ammaatti
 WAAQAYYO Waaqa keenyaaf hin ajajamne.”

4

1 “Yaa Israa’el, ati yoo deebite,
 gara kootti deebi’i” jedha WAAQAYYO.
 “Yoo ati waaqota kee jibbisiisoo sana
 fuula koo duraa balleessitee
 si’achi karaa irraa jal’achuu baatte,
 2 yoo ati, ‘Dhugaa WAAQAYYO jiraataa’ jettee
 dhugaadhaan, murtii qajeelaa fi qajeelummaadhaan kakatte,
 saboonni isaan ni eebbifamu;
 isumaanis ni kabajamu.”
 3 WAAQAYYO namoota Yihuudaatii fi namoota Yerusaalemiin akkana jedha:
 “Bajjii keessan qotadhaa;
 qoraattii keessas hin facaasinaa.
 4 Yaa namoota Yihuudaatii fi uummata Yerusaalem
 WAAQAYYOOF dhagna of qabaa;
 qola qalbii keessaniis dhagna qabadhaa;
 yoo kanaa achii sababii hammina isin hojjetaniitiif
 dheekkamsi koo ka’ee akka ibiddaa ni boba’a;
 namni isa dhaamsus hin jiru.
Balaa Kaaba irraa Dhufu
 5 “Yihuudaa keessatti beeksisaa;
 Yerusaalem keessattis akkana jedhaa labsaa:
 ‘Biyyattii guutuu keessatti malakata afuufaa!
 Sagalee ol fudhadhaatii akkana jedhaa:
 walitti qabamaa!
 Kottaa gara magaalawwan dallaa jaba qabaniitti baqanna!’
 6 Xiyoon dhaquuf faajjii ol qabaa?
 Dafaa baqadhaa malee duubatti hin harkifatinaa!
 Ani karaa kaabaatiin balaa,
 badiisa suukaneessaas nan fidaatii.”
 7 Leenci bosona isaatii ba’eera;
 barbadeessaan sabootaa karaa qabateera.
 Inni biyya kee onsuuf jedhee
 iddo isaatii ka’eera.
 Magaalawwan kee onanii
 jiraattota malee ni hafu.
 8 Kanaafuu isin uffata gaddaa uffadhaatii
 boo’aa wawwadhaa;
 dheekkamsi WAAQAYYO sodaachisaan sun
 nurraa hin deebineetii.
 9 WAAQAYYO akkana jedha:
 “Guyyaa sana mootiinii fi qondaaltonni onnee dhabu;
 luboonni akka malee na’u;
 raajonnis ni raafamu.”

¹⁰ Anis akkana nan jedhe; “Yaa WAAQAYYO Gooftaa, ati utuu goraadeen kokkee keenya irra jiruu, ‘Isin nagaan qabaattu’ jechuudhaan saba kanaa fi Yersaalemin guutumaa guutuutti gowwoomsiteerta?”

¹¹ Yeroo sanatti saba kanaa fi Yersaalemitti akkana jedhamee ni himama; “Bubbeen waa gubu tokko iddoowwan ol ka’oo qullaa kanneen gammoojjii keessaa irraa gara saba kootiitti ni bubbisa; garuu afarsuuf yookaan qululleessuuf miti; ¹² bubbeen waan sanaaf akka malee cimaa ta’e tokko na biraa ni dhufa. Anis murtii koo isaanitti nan labsa.”

¹³ Kunoo, inni akka duumessaatti,
gaariin isaas akka bubbeetti ni dhufa;
fardeen isaa risaa caalaa saffisu.

Wayyoo nu baduu keenya!

¹⁴ Yaa Yersaaleem, ati akka fayyituuf
qalbii kee keessaa hammina dhiqadhu.
Hamma yoomiitti yaadni hamaan si keessa jiraata?

¹⁵ Sagaleen tokko Daan irraa lallaba;
tulluuwwan Efreem irraas badiisa labsa.

¹⁶ “Waan kana sabootatti himaa;
Yersaalemittis akkana jedhaa lallabaa:
‘Loltoonni marsanii biyya qabatan tokko
lafa fagoodhaa ni dhufu;
isaanis magaalaawwan Yihuudaatti ni iyyu.

¹⁷ Sababii isheen natti fincilteef,
isaan akkuma nama lafa qotiisaa eegu tokkootti
ishee ni marsu,’ ”
jedha WAAQAYYO.

¹⁸ “Amalli keetii fi hojiin kee
waan kana sitti fidaniiru.

Adabbiin kee kanaa dha.
Innis hammam hadhaa’a!
Onnees hammam waraana!”

¹⁹ Mar’umaan ko, mar’umaan ko!
Ani dhukkubbiidhaan nan wixxirfadha.

Onneen koo na keessaa waca;
onneen koo na keessatti dha’ata;
ani cal’isuu hin danda’u.

Ani sagalee malakataa dhaga’eeraatii;
waca waraanaas dhaga’eera.

²⁰ Badiisni badiisa irraan dhufa;
biyyattiin guutumaa guutuutti ni onti.

Dunkaanni koo akkuma tasaa,
golgaan koos yeroo gabaabaa keessatti bade.

²¹ Ani hamma yoomiittin mallattoo waraanaa ilaala?
Hamma yoomiittis sagalee malakataa dhaga’a?

²² “Uummanni koo gowwaa dha;
anas hin beekan.

Isaan ijoollee qalbii hin qabnee dha;
hubannaas hin qaban.

Isaan waan hamaa hojjechuutti ogeeyyii dha;
waan gaarii hojjechuu garuu hin beekan.”

²³ Ani lafa nan ilaale;
isheenis bifa hin qabdu; duwwaas turte;

samiwwanis nan ilaale;
ifni isaanii dhaamee ture.

²⁴ Ani tulluuwwan nan ilaale;
isaan socho’aa turan;
gaarran hundinuus raafamaa turan.

²⁵ Ani nan ilaale; namni tokko iyyuu hin turre;
simbirroonni samii hundis barrisanii badanii turan.

- 26 Ani nan ilaale; kunoo biyyi midhaan baafu ontee turte;
 magaalaawwan ishee hundis,
 fuula WAAQAYYOO duratti
 dheekkamsa isaa sodaachisaa sanaan diigaman.
 27 WAAQAYYO akkana jedha:
 “Yoo ani guutumaan guutuutti ishee balleessuu baadhe iyyuu
 biyyattiin guutumaan guutuutti ni barbadoofti.
 28 Kanaafuu lafti ni boossi;
 samiiwwan oliis ni dukkanaa ‘u;
 ani dubbadheeraatii hin gaabbu;
 murteesseera; dugda duubas hin deebi’u.”
- 29 Sababii iyya abbootii fardeenitii fi futtaaftota xiyyaatiin,
 tokkoon tokkoon magaalaa ni baqata.
 Garri tokko bosona gobbuu seena;
 kaan immoo kattaatti ol ba’a;
 magaalaawwan hundi duwwaa hafaniiru;
 namni tokko iyyuu isaan keessa hin jiraatu.
- 30 Yaa ontuu nana, ati maal gochaa jirta?
 Ati maaliif wayyaa bildiimaa uffattee
 faaya warqee kaa’atte?
 Maaliif ija kee kuulate?
 Ati akkasumaan of miidhagsita.
 Warri jaallatan si tuffatu;
 lubbuu kees balleessuu barbaadu.
- 31 Ani iyya akka iyya dubartii ciniinsifattu tokkoo,
 miixuu akka miixuu dubartii mucaa
 hangafa deessuu tokko nan dhaga’e;
 ani iyya Intala Xiyoon kan yeroo hafuurri ishee citutti argantee
 harka ishee facaasuudhaan,
 “Wayyoo! Ani bade;
 lubbuun koo harka warra nama ajjeesuutti
 dabarfamtee kennamteerti” jettuu nan dhaga’e.

5

Namni Tolaan Tokko Iyyuu Hin jiru

- 1 “Daandiiwwan Yerusaaalem irra olii gadi deddeebi’aa;
 asii fi achi ilaalaatii qalbeeffadhaa;
 oobdiiwwan ishee sakatta’aa.
 Isin yoo nama waan qajeelaa hojjetu,
 kan dhugaa barbaadu tokko illee argattan
 ani magaalaa kanaaf dhiifama nan godha.
 2 Isaan utuma ‘Dhugaa WAAQAYYO jiraataa’ jedhanuu
 amma iyyuu sobaan kakatu.”
- 3 Yaa WAAQAYYO, iji kee dhugaa hin barbaaduu?
 Ati isaan dhoofte; garuu isaan hin dhukkubne;
 ati isaan caccabsite; isaan garuu sirreeffamuu didan.
 Isaan dhagaa caalaa mataa jabaatanii
 qalbii jijjiirrachuu didan.
 4 Anis akkana jedheen yaade;
 “Jarri kunneen hiyyeeyyii dha; isaan gowwoota;
 isaan karaa WAAQAYYOO,
 seera Waaqa isaanii hin beekaniitii.
 5 Kanaafuu ani hangafoota bira dhaqee isaanitti nan dubbadha;
 dhugumaan isaan karaa WAAQAYYOO,
 seera Waaqa isaanis ni beeku.”
 Isaanis akkasuma waanjoo of irraa caccabsanii
 hidhaas of irraa kukkutaniiiru.
 6 Kanaafuu leenci bosonaa ba’ee isaan nyaata;

yeeyyiin gammoojjiis dhufee isaan balleessa;
 qeerransi warra gad ba'an ciccirachuuf
 magaalaawwan isaanii biratti riphee eeggata;
 fincilli isaanii akka malee guddate;
 duubatti deebi'uun isaaniis baay'ateeraatii.

7 "Ani akkamiinan dhiifama isiniif gochuu danda'a?

Ijoolleen kee na dhiisanii
 waaqota waaqota hin ta'iniin kakataniiru.

Ani waan isaaniif barbaachisu hunda kenneefiin ture;
 isaan garuu ni ejjan;
 gara manneen sagaagaltuuwwaniitis gugatan.

8 Isaan korommii fardeenii kanneen akka gaariitti sooramanii dha;
 tokkoon tokkoon isaanii niitii namaatti himimsu.

9 Ani waan kanaaf isaan hin adabuu ree?"
 jedha WAAQAYYO.

"Ani mataan koo saba akka saba kanaa
 haaloo hin ba'uu?

10 "Dallaa dhagaa isheetti ol ba'aatii balleessaa;
 garuu guutumaan guutuutti miti.

Dameewwan ishee irraa ciraa;
 sabni kun saba WAAQAYYOO miti.

11 Manni Israa'elii fi manni Yihuudaa,
 guutumaan guutuutti anaaf hin amanamne"
 jedha WAAQAYYO.

12 Isaan waa'ee WAAQAYYOO soba dubbatan;
 akkanas jedhan; "Inni homaa hin godhu!

Miidhaan tokko iyyuu nutti hin dhufu;
 goraadee yookaan beela hin arginu.

13 Raajonni bubbee malee homaa miti;
 dubbii isaan keessa hin jiru;
 wanni isaan dubbatan isaanumatti haa deebi'u."

14 Kanaafuu WAAQAYYO Waan Hunda Danda'u akkana jedha:

"Sabni kun waan dubbii kana dubbateef,
 ani dubbii koo afaan kee keessatti ibidda,
 saba kana immoo qoraan ibiddi gubu nan godha.

15 Yaa mana Israa'el," jedha WAAQAYYO;

"Ani saba duriitii fi jabaa,
 saba ati afaan isaa hin beekne,
 kan ati dubbii isaa illee hin hubanne tokko
 biyya fagoodhaa sitti nan fida.

16 Man'een xiyya isaanii akkuma awwaala banamaa ti;
 hundi isaaniis loltoota jajjaboo dha.

17 Isaan midhaan keetii fi buddeena kee ni nyaatu;
 ilmaan keetii fi intallan kee ni ajjeesu;

bushaayee fi loon kee ni nyaatu;
 wayinii keetii fi mukkeen harbuu keetii ni nyaatu.

Magaalaawwan dallaa jabaa qaban
 kanneen ati amanatte sana goraadeedhaan barbadeessu.

18 "Ta'us ani bara sana keessa iyyuu guutumaan guutuutti isin hin balleessu" jedha
 WAAQAYYO. 19 "Yommuu namoonni, 'WAAQAYYO Waaqni keenya maaliif waan kana
 hunda nutti fide?" jedhanii gaafatanitti, ati, 'Isin akkuma na dhiifanii biyya keessan
 keessatti waaqota ormaa tajaajiltan sana, ammas biyya kan mataa keessanii hin ta'in
 keessatti ormoota ni tajaajiltu' jettee isaanitti himta.

20 "Waan kana mana Yaaqoobitti himaa;
 Yihuudaa keessattis labsaa:

21 Isin uummanni gowwaan hubannaa hin qabne,
 warri utuu ija qabdanuu hin argine
 kanneen utuu gurra qabdanuu
 hin dhageenye waan kana dhaga'a.

- 22 Isin na hin sodaattanii?"
jedha WAAQAYYO.
"Fuula koo duratti hin hollattanii?
Ani galaanaaf cirracha daarii dallaa bara baraa kan inni
qaxxaamuruu hin dandeenye godhee tolcheera.
Dha'aan galaanaa yoo itti bu'e iyyuu isa diiguu hin danda'u;
galaanichi yoo huurse iyyuu, isa cabsee darbuu hin danda'u.
- 23 Sabni kun garuu mata jabeessaa fi fincilaa dha;
innis karaa irraa jal'atee badeera.
- 24 Isaan garaa isaaniitti akkana hin jedhan;
'Kottaa WAAQAYYO Waaqa keenya isa bokkaa arfaasaatii fi
bokkaa birraa waqtiidhaan kennu,
isa torbanoota itti midhaan walitti qabannu
yeroo isaaniitti nuu kennu sana haa sodaannu.'
- 25 Balleessaan keessan waan kana isin irraa deebiseera;
cubbuun keessan waan gaarii isin dhabsiiseera.
- 26 "Saba koo gidduu namoota hamoo
akka warra nama qabuuf kiyyoo kaa'aniitti,
akkuma nama kiyyoon simbirroo qabuutti
riphanii eeggatantu jira.
- 27 Akkuma man'een simbiraan guutamu,
manneen isaanii sobaan guutamu;
isaanis sooreyyii fi jajjaboo ta'anii,
28 gabbatanii bareedaniiru;
hamminni isaanii dhuma hin qabu;
isaan murtii qajeelaa hin barbaadan.
Isaan dhimma ijoollee abbaa hin qabneetiif hin falman;
mirga hiyyeeyyiitiifis hin dhaabatan.
- 29 Ani waan kanaaf isaan hin adabuu?"
jedha WAAQAYYO.
"Ani saba akkasii
haaloo hin baafadhuu?
- 30 "Wanni suukaneessaan nama rifachiisu tokko
biyyattii keessatti ta'eera:
- 31 Raajonni raajii sobaa dubbatu;
luboanni humnuma isaaniitiin biyya bulchu;
sabni koos waan akkasii jaallata;
isin garuu dhuma irratti maal gochuuf jirtu?"

6

Yerusaalem Marfamte

- 1 "Yaa saba Beniyaam baqadhaa ba'aa!
Yerusaalem keessaa baqadhaa!
Teqoo'aa keessatti malakata afuufaa!
Beet Hakerem irratti mallattoo ol qabaa!
Karaa kaabaatiin balaan,
badiisni suukaneessaan ni dhufaatii.
- 2 Ani Intala Xiyyoon ishee bareedduu fi
qananiituu sana nan galaafadha.
- 3 Tiksoonni bushaayee isaanii fudhatanii isheetti dhufu;
dunkaana isaaniis isheetti naannessanii dhaabatu.
Tokkoon tokkoon isaaniis iddoo isaaniitti bobbaafatu."
- 4 "Isheetti waraana kaasuuf qophaa'aa!
Ka'aa, guyyaa saafaadhaan ishee waraanaa!
Wayyoo, aduun dhi'aa jirti;
gaaddisni galgalaas dheerateera.
- 5 Kanaafuu ka'aa, halkaniin ishee dhoofnee
da'annoowwan ishee barbadeessinaa!"

⁶ WAAQAYYO Waan Hunda Danda’u akkana jedha;
 “Mukkeen ishee ciraa;

naannoo Yerusaalemitti tuulaa biyyoo tolchaa;
 magaalaa kun adabamuu qabdi;
 isheen cunqursaadhaan guutamteertii.

⁷ Akkuma boolli bishaanii bishaan yaasu sana,
 isheenis hammina ishee gad yaafti;
 jeequmsii fi badiisni ishee keessatti ni dhaga’ama.

Dhukkubnii fi madaan ishee yeroo hunda fuula koo dura jiran.

⁸ Yaa Yerusaalem gorsa koo dhaga’i;
 yoo kanaa achii ani sirraa garagalee,
 akka namni tokko iyyuu keessa jiraachuu
 hin dandeenyeef, biyya kee nan onsa.”

⁹ WAAQAYYO Waan Hunda Danda’u akkana jedha:

“Akkuma wayiniin sirriitti funaanamu sana,
 isaanis hambaa Israa’el haa funaanan;
 akkuma nama ija wayinii ciru tokkootti;
 ammas harka kee gara dameewwaniitti hiixadhu.”

¹⁰ Ani eenyuttin dubbadhee akeekkachiisuu danda’a?

Eenyutu na dhaggeeffata?
 Kunoo, gurri isaanii dhagna hin qabanne;
 dhaga’uus hin danda’an.

Dubbiin WAAQAYYOO isaanitti hin tolu;
 ittis hin gammadan.

¹¹ Ani garuu dheekkamsa WAAQAYYOOTIIN guutameera;
 obsuus hin danda’u.

“Ijoollee daandii irra jiran irratti,
 dargaggoota walitti qabaman irratti,
 dhirsaa fi niitii irratti,
 warra dulloomanittis dheekkamsa nan dhangalaasa.

¹² Yeroo ani harka koo
 warra biyyattii keessa jiraatanitti ol fudhadhutti
 manneen isaanii, lafa qotiisaa isaaniitii fi
 niitota isaanii wajjin namoota kaaniif kennamu”
 jedha WAAQAYYO.

¹³ “Xinnaadhaa hamma guddaatti
 hundi isaanii iyyuu bu’aa argachuuf gaggabu;
 raajonnii fi luboonnis akkasuma
 hundi isaanii nama gowwoomsu.

¹⁴ Isaan madaa saba kootii
 akkuma waan xinnaa tokkootti ilaalani wal’aanu.
 Utuu nagaan hin jiraatinis
 ‘Nagaa, nagaa’ jedhu.

¹⁵ Isaan amala isaanii jibbisiisaa sanatti ni qaana’uu?
 Lakkii, isaan qaanii tokko iyyuu hin qaban;
 qaana’uun maal akka ta’e iyyuu hin beekan.

Kanaafuu isaan warra kufan wajjin ni kufu;
 yeroo ani isaan adabutti gad gatamu”
 jedha WAAQAYYO.

¹⁶ WAAQAYYO akkana jedha:
 “Karaa qaxxaamuraa irra dhaabadhaatii ilaalaa;
 daandii durii iyyaafadhaa;
 karaan gaariin garam akka jiru gaafadhaatii irra deemaa;
 lubbuu keessaniif boqonnaa ni argattuutii.
 Isin garuu, ‘Nu isa irra hin deemnu’ jettan.

¹⁷ Ani eegdota isinitti ramadeen
 ‘Sagalee malakataa dhaggeeffadhaa!’ jedhe,
 isin garuu, ‘Hin dhaggeeffannu’ jettan.

¹⁸ Kanaafuu yaa saboota dhaga’aa;
 yaa waldaa,

- waan isaanitti dhufuuf jiru hubadhaa.
- 19 Yaa lafaa dhaga'i:
Ani waan isaan dubbii koo dhaga'uu didanii
seera koos tuffataniif,
saba kanatti badiisa nan fida;
kunis ija daba isaanii ti.
- 20 Ixaanni biyya Shebaatii dhufu,
yookaan qayyii biyya fagootii dhufu maal na fayyada?
Aarsaan keessan kan gubamu fudhatama hin qabu;
qalmi keessanis hin tolu."
- 21 Kanaafuu WAAQAYYO akkana jedha:
"Ani fuula saba kanaa dura gufuu nan kaa'a.
Abbootiinii fi ijoolleen walii wajjin itti gufatu;
olloonnii fi michoonni ni barbadaa'u."
- 22 WAAQAYYO akkana jedha;
"Kunoo, gareen loltootaa tokko
biyya kaabaatii dhufaa jira;
sabni guddaan tokkos
andaara lafaatii sosocho'aa jira.
- 23 Isaan xiyyaa fi eeboo qabataniiru;
isaan gara jabeeyyii, namaafis naasuu hin qabnee dha.
Yommuu isaan fardeen isaanii gulufanitti
gigigsuun isaanii akkuma huursaa galaanaa ti;
yaa Intala Xiyoon, isaan akkuma namoota
duulaaf hiriiraniitti si loluuf dhufu."
- 24 Nu oduu waa'ee isaanii dhageenyeerra;
harki keenyas ni laafe.
Dhiphinni nu qabateera;
miixuunis akkuma dubartii ciniinsifattuu nu qabe.
- 25 Sababii diinni goraadee qabatee fi
sababii iddoo hunda gooliin jiruuf
isin diidatti gad hin ba'inaa;
yookaan karaa irra hin deemnaa.
- 26 Yaa saba ko, uffata gaddaa uffadhaatii
daaraa keessa gangaladhaa;
akka nama ilma isaa tokkicha dhabeetti
hiqqifadhaa boo'aa;
inni nama balleessu sun
akkuma tasaa nutti dhufaatii.
- 27 "Akka ati karaa isaanii qortee beektuuf
ani saba koo gidduutti qorataa si godheera.
- 28 Hundi isaanii finciltoota mata jabeeyyii
maqaa namaa balleessuuf asii fi achi jooranii dha.
Isaan naasii fi sibiila;
isaan hundinuu malaa maltummaa hojjetu.
- 29 Buufaan dilaalii ibiddaan gubee balleessuuf
humna guddaan buufa;
hojiin ibiddaan qulqulleessuu kun faayidaa malee hojjetama;
namoonni hamoon hin balleeffamneetii.
- 30 Sababii WAAQAYYO isaan gateef
isaan meetii gatamaa jedhamu."

7

Amantiin Sobaa Faayidaa Hin Qabu

¹ Dubbiin WAAQAYYO biraa gara Ermiyaas dhufe isa kanaa dha; ² "Balbala mana WAAQAYYOO dura dhaabadhuutii akkana jedhii ergaa kana labasi:

" 'Tsin sabni Yihuudaa warri WAAQAYYON waaqeffachuuf balbalawwan kanneeniin ol seentan hundi dubbii WAAQAYYOO dhaga'aa. ³ WAAQAYYO Waan Hunda Danda'u, Waaqni Israa'el akkana jedha: karaa keessanii fi hojii keessan qajeelfadhaa; anis akka isin iddoo

kana jiraattan nan godha. ⁴ Isin dubbii sobaa amanattanii, “Kun mana qulqullummaa WAAQAYYOO ti; mana qulqullummaa WAAQAYYOO ti; mana qulqullummaa WAAQAYYOO ti!” hin jedhinaa. ⁵ Isin utuu dhugumaan karaa keessanii fi hojii keessan qajeelfattanii murtii qajeelaa walif kennitanii, ⁶ utuu isin alagaa, ijoollee abbaa hin qabne yookaan haadha hiyyeessaa cunqursuu baattanii iddoo kanatti dhiiga nama yakka hin qabnee dhangalaasuu baattanii, utuu waaqota isin balleessan duukaa bu’uu baattanii, ⁷ silaa ani akka isin iddoo kana, biyya ani bara baraan abbootii keessaniif kenne keessa jiraattan nan godha. ⁸ Isin garuu dubbii sobaa kan faayidaa hin qabne amanachaa jirtu.

⁹ “Isin hattanii nama ajjeftanii, sagaagaltanii, sobaan kakattanii, Ba’aaliif ixaana aarsitanii, waaqota hin beekin duukaa buutanii, ¹⁰ ergasii dhuftanii mana maqaa kootiin waamamu kana keessatti fuula koo dhaabatani, utuma amma iyyuu wantoota jibbisiisoo kanneen hunda hojjechaa jirtanuu, “Nu keessaa hin qabnu” jettuu? ¹¹ Manni maqaa kootiin waamame kun holqa saamtotaa isiniif ta’ee? Ani garuu waan kana ergeera! jedha WAAQAYYOO.

¹² “Mee gara Shiiloo iddoo ani jalqabatti iddoo jireenya Maqaa kootiif godhadhe sanaa dhaqaatii waan ani sababii hammina saba koo Israa’eliif ishee godhe ilaalaa. ¹³ WAAQAYYOO akkana jedha: Yeroo isin waan kana hunda gootanitti, ani ammumaa amma isinitti dubbadheera; isin garuu na hin dhaggeeffanne. Ani isinan waame; isin garuu hin owwaanee. ¹⁴ Kanaafuu ani waanan Shiilootti fide sana amma mana Maqaa kootiin waamamu, mana Qulqullummaa kan isin amanattan, iddoo ani isinii fi abbootii keessaniif kenne kanattis nan fida. ¹⁵ Ani akkuman obboloota keessan jechuunis saba Efreem hunda fuula koo duraa ari’e sana isiniinis nan ari’a.’

¹⁶ “Kanaafuu ati saba kanaaf hin kadhatin; yookaan waa’ee isaaniitiif hin boo’in yookaan waammata hin dhi’eessin; ani si hin dhaga’uutii na hin kadhatin. ¹⁷ Ati waan isaan magaalawwan Yihuudaa keessattii fi daandiiwwan Yerusaalem irratti hojjetan hin argituu? ¹⁸ Ijoolleen qoraa funaanuu; abbootiin ibidda qabsiisu; dubartoonni immoo Mootittii Samiitiif keekii tolchuuf bukoo bukeessu. Isaan dheekkamsaaf na kakaasuuf waaqota biraatiif dhibaayyuu dhibaafatu. ¹⁹ Garuu kan isaan dheekkamsaaf kakaasan anaa? jedha WAAQAYYOO. Isaan ofuma miidhanii qaana’an mitii?

²⁰ “Kanaafuu WAAQAYYOO Gooftaan akkana jedha: Aarii fi dheekkamsi koo iddoo kana irratti, namaa fi horii irratti, mukkeen diidaattii fi waan lafti baafuu irratti ni dhangala’a; inni inuma boba’a malee hin dhaamu.

²¹ “WAAQAYYOO Waan Hunda Danda’u, Waaqni Israa’el akkana jedha: Aarsaa keessan kan gubamu qalma keessanitti dabalaatii foon nyaadhaa! ²² Ani yeroon biyya Gibxii abbootii keessan baasetti waa’ee aarsaa gubamuutii fi qalma isaaniitti hin dubbanne yookaan isaan hin ajajne; ²³ ani garuu ajaja kana isaaniif nan kenne: Anaaf ajajamaa; ani Waaqa keessan nan ta’a; isinis saba koo ni taatu. Akka isinii toluuf karaa ani isin ajaju hunda irra deemaa. ²⁴ Isaan garuu hin dhaggeeffanne yookaan hin qalbeeffanne; qooda kanaa mata jabina fedhii garaa isaanii duukaa ba’an. Isaan dugda duubatti deebi’an malee gara fuula duraatii hin deemne. ²⁵ Gaafa abbootiin keessan biyya Gibxii ba’anii jalqabee hamma ammaatti ani guyyuma guyyaan, ammumaa amma tajaajiltoota koo raajota isiniif ergeera. ²⁶ Isaan garuu na hin dhaggeeffanne yookaan hin qalbeeffanne. Isaan mataa jabaatanii abbootii isaanii caalaa waan hamaa hojjetan.’

²⁷ “Yeroo ati waan kana hunda isaaniitti himtu isaan si hin dhaga’an; yeroo ati isaan waamtus si jalaa hin owwaatan. ²⁸ Kanaafuu akkana isaaniin jedhi; ‘Sabni kun saba WAAQAYYOO Waaqa isaatiif hin ajajanne, kan adabbii isaa illee hin fudhannee dha. Dhugaan badeera; afaan isaanii keessaas dhabameera.

²⁹ “Rifeensa mataa keetii of irraa cirii gati; iddoo ol ka’aa qullaatii ol ba’ii boo’i; WAAQAYYOO dhaloota dheekkamsa isaa jala jiru kana tuffatee gateeraatii.

Sulula Qalmaa

³⁰ “Sabni Yihuudaa fuula koo duratti waan hamaa hojjeteera; jedha WAAQAYYOO. Isaan waaqota isaanii tolfamoo jibbisiisoo mana maqaa kootiin waamamu keessa dhaabani manicha xureessaniiru. ³¹ Isaan ilmaanii fi intallan isaanii achitti ibiddaan gubuu jedhanii Sulula Ben Hinoom keessatti iddoo sagadaa Toofet ijaaran; kun immoo waan ani isaan hin ajajin yookaan yaada kooti hin dhufinii dha. ³² Kanaafuu beekadhaa! Barri itti namoonni iddoo sanaan, si’achi Sulula qalma jedhanii waaman malee Toofet yookaan Sulula Ben Hinoom hin jenne ni dhufa; isaan hamma iddoo hanqatutti Toofetitti warra du’an awwaaluutii, jedha WAAQAYYOO. ³³ Reefi namoota kanaa simbirroota samiitii fi bineensota lafaatiif nyaata ta’a; namni sodaachisee irraa isaan ari’u tokko iyyuu hin jiru. ³⁴ Ani magaalawwan Yihuudaa keessaa fi daandiiwwan

Yerusaalem irra sagalee kolfaatii fi gammachuu, sagalee misirrichaatii fi misirrittii nan balleessa; biyyattiin ni ontiitii.

8

¹ “Bara sana lafeen moototaatii fi qondaaltota Yihuudaa, lafeen lubootaatii fi raajotaa, lafeen namoota Yerusaalem awwaala isaanii keessaa ni baafama’ jedha WAAQAYYO. ² ‘Isaan fuula aduu fi ji’aa duratti, fuula guutummaa urjiiwwan samii hundaa, kanneen jaallatanii fi tajaajilanii, kanneen faana bu’anii gorsa gaafatanii fi waageffatan sanaa duratti ni saaxilamu. Isaan akkuma kosii lafatti gatamee ta’an malee walitti hin qabaman yookaan hin awwaalaman. ³ Hambaan saba hamaa kanaa hundi lafa ani itti isaan ari’u hundatti jireenya irra du’a filata’ jedha WAAQAYYO Waan Hunda Danda’u.

Cubbuu fi Adabbii

- ⁴ “Ati akkana isaaniin jedhi; ‘WAAQAYYO akkana jedha:
 “‘Namoonni yoo kufan hin ka’anii?
 Namni tokko yoo karaa irraa bade hin deebi’uu?
⁵ Yoos sabni kun maaliif karaa irraa jal’ata?
 Yerusaalem maaliif yeroo hunda karaa irraa jal’atti?
 Isaan gowwoomsaatti cichu;
 deebi’uus ni didu.
⁶ Ani qalbeeffadhee dhaggeeffadheera;
 isaan garuu waan qajeelaa hin dubbatan.
 Namni tokko iyyuu, “Ani maalan balleesse?” jedhee
 hammina isaa irraa hin deebi’u.
 Tokkoon tokkoon isaanii akkuma farda lolatti gulufuu
 karaa ofii isaanii irra qajeelu.
⁷ Huummoon samii keessaa iyyuu
 waqtii isheef murtaa’e ni beekti;
 gugeen, daalotee fi cuquliisni
 yeroo godaansa isaanii ni eegu.
 Sabni koo garuu
 seera WAAQAYYOO hin beeku.
- ⁸ “‘Isin akkamitti, “Nu seera WAAQAYYOO
 waan qabnuuf ogeeyyii dha” jechuu dandeessu?
 Garuu kunoo, qalamni sobaa
 kan barreessitootaa sobee barreesseera.
⁹ Namoonni ogeeyyiin ni qaaneffamu;
 isaan na’anii kiywoodhaan ni qabamu;
 isaan erga dubbii WAAQAYYOO tuffatanii,
 ogummaa akkamii qabu ree?
¹⁰ Kanaafuu ani niitota isaanii namoota biraatiif,
 lafa qotiisaa isaanii immoo mo’attootaaf nan kenna.
 Xinnaadhaa hamma guddaatti
 hundi isaanii iyyuu bu’aa argachuuf gaggabu;
 raajonnii fi luboonnis akkasuma
 hundi isaanii nama gowwoomsu.
¹¹ Isaan madaa saba kootii,
 akkuma waan xinnaa tokkootti ilaalanii wal’aanu.
 Utuu nagaan hin jiraatinis
 “Nagaa, nagaa” jedhu.
¹² Isaan amala isaanii jibbisiisaa sanatti ni qaana’uu?
 Lakkii, isaan qaanii tokko iyyuu hin qaban;
 qaana’uun maal akka ta’e iyyuu hin beekan.
 Kanaafuu isaan warra kufan wajjin ni kufu;
 yeroo adabamanitti gad gatamu
 jedha WAAQAYYO.
- ¹³ “‘Ani guutumaan guutuutti isaan nan balleessa;
 jedha WAAQAYYO.
 Wayinii irratti iji hin argamu.
 Iji harbuu muka harbuu irratti hin argamu.

Baalli isaaniis ni coollaga.
Wanni ani isaaniif kenne
isaan irraa ni fudhatama.’ ”

14 Nu maaliif as teenya?

Walitti qabamaa!

Kottaa gara magaalaawwan

dallaa jabaa qabaniitti baqannee achitti haa dhumnu!

Waan nu cubbuu isatti hojjenneef

WAAQAYYO Waaqni keenya badiisatti

dabarsee nu kenneeraatii;

akka dhugnuufis bishaan summaa’aa nuu kenneera.

15 Nu nagaa abdanne;

garuu wannu gaariin tokko iyyuu hin dhufne;

nu yeroo fayyinaa abdanne;

garuu goolii qofatu ture.

16 Daan keessaa korrisuu fardeen diinaatu dhaga’ama;

guutuun biyyattii himimsuu korommii fardeen isaaniitiin hollatti.

Isaan biyyattii fi waan ishee keessa jiru hunda,

magaalaa fi warra ishee keessa jiraatan hunda,

balleessuuf dhufaniiru.

17 “Ani kunoo bofa hadhaa qabu,

buutii falfalli dawweessuu hin dandeenye isinitti nan erga;

isaanis isin iddu”

jedha WAAQAYYO.

18 Yaa isa gadda keessatti na Jajjabeessitu,

onneen koo na keessatti gaggabdeerti.

19 Kunoo, iyyi saba kootii

biyya fagoodhaa ni dhaga’ama:

“WAAQAYYO Xiyoon keessa hin jiruu?

Mootiin ishee achi hin jiruu?”

“Isaan maaliif fakkiwwan isaaniitiin,

waaqota isaanii tolfamoo biyya ormaatiin

dheekkamsaaf na kakaasu?”

20 “Yeroon itti midhaan galfamu darbeera;

bonnis hobba’eera;

nu garuu hin fayyine.”

21 Sabni koo waan miidhameef anis miidhameera;

Ani nan boo’e; sodaan guddaanis na qabate.

22 Qorichi dibatan Gili’aad keessa hin jiruu?

Abbaan qorichaa tokko iyyuu achi hin jiruu?

Yoos madaan intala saba kootii

maaliif hin fayyu ree?

9

1 Akka ani halkanii guyyaa,

saba koo dhume sanaaf boo’uuf,

maaloo utuu mataan koo madda bishaanii

iji koo immoo burqaa imimmaanii ta’e!

2 Ani akkan saba koo dhiisee

biraa fagaadhuuf,

maaloo utuu gammoojjii keessaa

lafa bultii kara deemtotaa qabaadhee!

Hundi isaanii sagaagaltoota,

tuuta saba hin amanamne tokkoo ti.

3 “Isaan soba darbachuuf

arraba isaanii akka xiyyaatti qopheeffatu;
isaan biyyattii keessatti
dhugaadhaan hin mo'anne.
Isaan cubbuu irratti cubbuu dabaluu;
anaanis hin beekan”
jedha WAAQAYYO.

⁴ “Michoota keessan irraa of eegaa;
obboleessa hin amaninaa.

Obboleessi hundi gowwoomsituu dha,
michuun hundis maqa balleessituudhaatii.

⁵ Michuun michuu gowwoomsaa;
namni tokko iyyuu dhugaa hin dubbatu.

Isaan arraba isaanii soba barsiifataniiiru;
cubbuu hojjechuudhaanis of dadhabsiisaniiru.

⁶ Ati gidduu gowwoomsitootaa jiraatta;
isaan gowwoomsaa isaanii keessatti na beekuu didan”
jedha WAAQAYYO.

⁷ Kanaafuu WAAQAYYO Waan Hunda Danda'u akkana jedha:
“Kunoo, ani sababii cubbuu saba kootiif baqseen isaan qora;
ani sababii intala saba kootiitiif maal gochuun danda'a?”

⁸ Arrabni isaanii xiyya nama galaafatuu dha;
inni gowwoomsaa dubbata.

Tokkoon tokkoon namaa ollaa isaatti afaan isaatiin nagaa dubbata;
garaa isaa keessa garuu kiyyoo kaa'aaf.

⁹ Ani waan kanaaf isaan hin adabuu ree?”
jedha WAAQAYYO.

“Ani mataan koo saba akka saba kanaa,
haaloo hin ba'uu ree?”

¹⁰ Ani tulluuwwaniif gadoodee nan boo'a;
lafa dheedaa gammoojjitiifis faarsee nan boo'a.

Sababii isaan onanii hafaniif namni tokko iyyuu achiin hin darbu;
mar'achuun looniis hin dhaga'amu.

Simbirroonni samii achii baqataniiru;
bineensonnis godaananiiru.

¹¹ “Ani Yerusaalemin tuullaa waan diigameetii fi
boolla waangoo nan godha;

akka namni tokko iyyuu achi jiraachuu hin dandeenyeef
magaalaawwan Yihuudaa nan onsa.”

¹² Ogeessi waan kana hubachuu danda'u eenyu? Namni WAAQAYYON qajeelfamee
waan kana ibsuu danda'u eenyu? Biyyattiin maaliif akkuma gammoojjii namni tokko
iyyuu keessa darbuu hin dandeenye tokkootti diigamtee onte?

¹³ WAAQAYYO akkana jedhe; “Kun sababii isaan seera koo kan ani fuula isaanii dura
kaa'e sana dhiisaniifii dha; isaan anaaf hin ajajamne yookaan seera koo duukaa hin
buune. ¹⁴ Qooda kanaa mata jabinaan fedhii garaa isaanii duukaa bu'an; akkuma
abbootiin isaanii isaan barsiisanittis Ba'aal duukaa bu'an.” ¹⁵ Kanaafuu WAAQAYYO
Waan Hunda Danda'u, Waaqni Israa'el akkana jedha: “Kunoo, ani akka sabni kun
nyaata hadhaa'aa nyaatuu fi akka inni bishaan summaa'aa dhugu nan godha. ¹⁶ Ani
saboota isaan yookaan abbootiin isaanii hin beekin keessa isaan nan bittinneessa; ani
hamman lafa irraa isaan barbadeessuttis goraadeedhaan isaan nan ari'a.”

¹⁷ WAAQAYYO Waan Hunda Danda'u akkana jedha:
“Mee qalbeeffadhaa!

Akka dubartoonni nama boossisan dhufaniif waamaa;
isaan keessaa warra ogummaadhaan caalanitti
nama ergaa waamsisaa.

¹⁸ Isaan dafanii dhufanii
hamma iji keenya imimmaan yaasee
bishaanis baallee ija keenyaa keessaa burqutti
iyyanii nuuf haa boo'an.

¹⁹ Sagaleen boo'ichaa kan,
'Nu hammam badneerra!

Qaaniin keenyas hammam guddaa dha!
 Sababii manneen keenya diigamaniif
 nu biyya keenya keessaa ba'uu qabna' jedhu tokko
 Xiyoon keessaa ni dhaga'ama."

²⁰ Yaa dubartoota, eгаа dubbii WAAQAYYOO dhaga'aa;
 dubbii afaan isaatii ba'uuf gurra keessan banadhaa.

Akka itti boo'an intallan keessan barsiisaa;
 faaruus wal barsiisaa.

²¹ Duuti foddada keenyaan ol lixeera;
 da'annoowwan keenyas seeneera;
 innis daandiiwwan irraa ijoollee
 oobdiiwwan sabaa irraa dargaggoota balleesseera.

²² Ati akkana jedhi: "WAAQAYYOO akkana jedha:
 "Reeffi namootaa
 akkuma kosii diidatti gatamee,
 akkuma bissii midhaanii kan nama haamuu duubaan hafee
 nama walitti qabu dhabeetti ciciisa.'"

²³ WAAQAYYOO akkana jedha:
 "Ogeessi, ogummaa isaatiin hin boonin;
 yookaan namni jabaan, jabina isaatiin hin boonin
 yookaan sooressi, soorama isaatiin hin boonin;

²⁴ namni boonu garuu,
 akka ani WAAQAYYOO garaa namaaf laafu,
 kan lafa irratti murtii qajeelaa fi qajeelummaa hojjetu ta'e
 hubatee na beekuu isaatiin haa boonu;
 ani waan kanatti nan gammadaatii,"
 jedha WAAQAYYOO.

²⁵ WAAQAYYOO akkana jedha; "Barri ani itti warra foon isaanii qofaan dhagna qabaman
 hunda adabu ni dhufa; isaanis: ²⁶ Gibxi, Yihuudaa, Edoom, Amoon, Mo'aabii fi warra
 gammoojjii keessa iddoo fagoo jiraatan hunda. Saboonni kunneen hundi dhugumaan
 dhagna hin qabamne; garaan mana Israa'el hundaa iyyuu dhagna hin qabamne."

10

WAAQAYYOO fi Waaqota Tolfamoo

10:12-16 kwf - Erm 51:15-19

¹ Yaa mana Israa'el, waan WAAQAYYOO isiniin jedhu dhaga'aa. ² WAAQAYYOO akkana
 jedha:

"Isin karaa saboota ormaa hin baratinaa;
 saboonni ormaa isaan sodaatan iyyuu
 isin mallattoowwan samii hin sodaatinaa.

³ Barteem uummattootaa faayidaa hin qabu;
 isaan bosona keessaa muka muru;
 ogeessi hojii harkaa immoo qottoodhaan bifa itti baasa.

⁴ Isaanis meetii fi warqeedhaan miidhagsu;
 akka inni hin sochooneef
 burruusaa fi mismaaraan walitti qabsiisu.

⁵ Waaqonni isaanii tolfamoon
 akkuma fakkeettii ittiin waa sodaachisan
 kan lafa qotiisaa buqqee keessaa sana dubbachuu hin danda'an;
 isaan waan deemuu hin dandeenyeef baatamuu qabu.
 Sababii isaan nama miidhuu
 yookaan waan gaarii tokko iyyuu hojjechuu hin dandeenyeef
 isaan hin sodaatinaa."

⁶ Yaa WAAQAYYOO kan akka keetii tokko iyyuu hin jiru;
 ati guddaa dha;
 maqaan kees humna guddaa qaba.

⁷ Yaa mootii sabootaa eenyutu si hin sodaanne?
 Kun siif ni malaatii.

Ogeeyyii sabootaa hunda keessaa,

mootummoota isaanii hunda keessaas
kan akka keetii tokko iyyuu hin jiru.

- ⁸ Isaan hundinuu qalbii hin qaban; gowwootas;
isaan waaqota tolfamoo mukkeenii kanneen faayidaa hin qabneen qajeelfamu.
- ⁹ Meetiin tumame Tarshiishii,
warqeen immoo Uufaazii fidama.
Wanni ogeessi hojii mukaatii fi tumtuun warqee hojjetan,
wanni hojjetoota ogummaa qabaniin hojjetaman hundi
halluu cuquliisaa fi diimaa dhiilgee uffifamaniiru.
- ¹⁰ WAAQAYYO garuu Waaqa dhugaa ti;
inni Waaqa jiraataa, Mootii bara baraa ti.
Yeroo inni dheekkamutti lafti ni hollatti;
saboonnis dheekkamsa isaa dura dhaabachuu hin danda’an.
¹¹ “Isin waan kana isaanitti himaa; ‘Waaqonni samii fi lafa hin uumin kunneen lafa
irraa fi samii jalaa ni barbadaa’u.’ ”
- ¹² Waaqni garuu humna isaatiin lafa uume;
ogummaa isaatiin addunyaa hundeesse;
hubannaa isaatiinis samiiwwan diriirse.
- ¹³ Yommuu inni qaqaawweessa’utti bishaanonni samii ni huursu;
inni akka duumessoonni daarii lafaatii ol ka’an ni godha.
Inni bokkaa wajjin balaqqee ni erga;
mankusaalee isaa keessaa immoo bubbee ni fida.
- ¹⁴ Tokkoon tokkoon namaa gowwaa fi kan beekumsa hin qabnee dha;
tokkoon tokkoon tumtuu warqee waaqota tolfamoo isaatiin qaaneffama.
Fakkiiwwan inni tolchu kan sobaa ti;
isaan hafuura baafatan of keessaa hin qaban.
- ¹⁵ Isaan faayidaa hin qaban; meeshaa qoosaa ti.
Yeroo adabbiin isaanii ga’utti ni badu.
- ¹⁶ Inni Qooda Yaaqoob ta’e sun garuu akka warra kanaa miti;
inni Uumaa waan hundumaa ti,
Israa’el immoo gosa dhaala isaa ti;
maqaan isaas WAAQAYYOO Waan Hunda Danda’uu dha.
- Badiisa Dhufaa Jiru*
- ¹⁷ Ati kan marfamtee jirtu,
biyyattii keessaa ba’uuf qabeenya kee
walitti qabadhu.
- ¹⁸ WAAQAYYO akkana jedhaatii;
“Kunoo, ani amma warra biyyattii keessa jiraatan
furguggisee nan baasa;
akka isaan dhiphataniifis
rakkina isaanitti nan fida.”
- ¹⁹ Waan ani miidhameef anaaf wayyoo!
Madaan koo kan hin fayyinee dha!
Ta’us ani ofii kootiin,
“Kun dhukkuba koo ti; anis isa obsuun qaba” nan jedhe.
- ²⁰ Dunkaanni koo diigameera;
funyoon isaa hundis cicciteera.
Ilmaan koo na dhiisanii sokkaniiru;
isaan hin jiran; namni dunkaana naa dhaabu,
yookaan golgaa naa hidhu tokko iyyuu hin jiru.
- ²¹ Tiksoonni qalbii hin qaban;
WAAQAYYONIS hin barbaaddatan;
kanaafuu isaan hin milkaa’an;
bushaayeen isaanii hundinuus bittinnaa’aniiru.
- ²² Kunoo, oduun, raafamni guddaan tokko
biyya kaabaatii dhufaa jira!
Innis magaalaawwan Yihuudaa onsee
iddoo waangoonni jiraatan godha.

Kadhannaa Ermiyaas

- ²³ Yaa WAAQAYYO, ani akka jireenyi namaa
kan mataa isaa hin ta'in nan beeka;
namni adeemsa isaa ofumaan qajeelfachuu danda'u hin jiru.
- ²⁴ Yaa WAAQAYYO dheekkamsa keetiin utuu hin ta'in,
murtii qajeelaadhaan na sirreessi;
yoo kanaa achii ati na balleessitaatii.
- ²⁵ Saboota si hin beeknetti
uummata maqaa kee hin waammannetti
dheekkamsa kee dhangalaasi.
- Isaan Yaaqoobin nyaataniiruutii;
guutumaan guutuuttis isa nyaatanii;
iddoo jireenya isaa illee barbadeessaniiru.

11*Kakuun Cabee Jira*

¹ Dubbiin WAAQAYYO biraa gara Ermiyaas dhufe isa kanaa dha: ² “Dubbi kakuu kanaa dhaga'aatii saba Yihuudaattii fi namoota Yerusaalem keessa jiraatanitti himaa. ³ WAAQAYYO Waaqni Israa'el akkana jedha, jedhiitii isaanitti himi; 'Namni dubbii kakuu kanaatiif hin ajajamne haa abaaramu. ⁴ Dubbiin kunis dubbii ani yeroon biyya Gibxi jechuunis boolla ibiddaa kan itti sibiila baqsan keessaa isaan baasetti abbootii keessan ajajee dha.' Anis akkanan jedhee, 'Naa ajajamaatii waan ani isin ajaju hunda hojjedhaa; yoo isin saba koo taatu. Anis Waaqa keessan nan ta'a. ⁵ Ergasiis ani kakuu akka biyya aannanii fi dammii keessaa yaa'u isaaniif kennuuf abbootii keessaniif kakadhe sana fiixaan nan baasa;' biyyi sunis biyya isin har'a dhaaltanii jirtanii dha.”

Anis “Ameen, Yaa WAAQAYYO” nan jedhe.

⁶ WAAQAYYO akkana naan jedhe; “Dubbi kana hunda magaalawwan Yihuudaa keessattii fi daandiiwwan Yerusaalem irratti akkana jedhii labi; 'Dubbi kakuu kanaa hunda dhaga'aatii duukaa bu'aa. ⁷ Ani gaafan abbootii keessan biyya Gibxiitii baasee jalqabee hamma har'aatti, “Naa ajajamaa” jedhee ammumaa amma isaan akeekkachiisaan ture. ⁸ Isaan garuu hin dhaggeeffanne yookaan hin qalbeeffanne; gooda kanaa isaan mata jabina garaa isaanii hamaa sanaa faana bu'an. Kanaafuu ani abaarsa kakuu ani akka isaan duukaa bu'aniif isaan ajajee isaan garuu eeguu didan sanaa hunda isaanittan fide.'”

⁹ Ammas WAAQAYYO akkana naan jedhe; “Saba Yihuudaatii fi uummata Yerusaalem jiraatu gidduutti fincila tokkotu argame. ¹⁰ Isaan gara cubbuu abbootii isaanii kanneen dubbii koo dhaga'uu didan sanaatti deebi'aniiru. Waaqota biraa tajaajiluudhaaf jedhaniis isaan faana bu'aniiru. Manni Israa'elii fi manni Yihuudaa kakuu ani abbootii isaanii wajjin kakadhe sana cabsaniiru. ¹¹ Kanaafuu WAAQAYYO akkana jedha; 'Ani bala jarri jalaa ba'uu hin dandeenye tokko isaanitti nan fida. Yoo isaan natti iyyatan iyyuu ani isaan hin dhaga'u. ¹² Magaalawwan Yihuudaatii fi namoonni Yerusaalem dhaqanii waaqota duraan ixaana aarsaniif sanatti iyyatan; waaqonni sun garuu yeroo rakkinni isaanitti dhufutti isaan gargaaruu hin danda'an. ¹³ Yaa Yihuudaa ati akkuma magaalawwan baay'ee qabdu sana waaqota baay'ee qabda; iddoowwan aarsaa kanneen isin Ba'aal waaqa qaansaa sanaaf qopheessitanis akkuma daandiiwwan Yerusaalem baay'atan.'”

¹⁴ “Sababii ani yeroo isaan rakkina isaanii keessatti na waammatanitti isaan hin dhageenyeeef ati saba kanaaf hin kadhatin; waammata yookaan iyyata tokko illee hin dhi'eessiniif.

¹⁵ “Michuun koo namoota hedduu wajjin hojii hamaa hojjechaa
mana qulqullummaa koo keessaa maal qabdi?
Foon qulqulleeffamee addaan baafame
adabbii kee sirraa deebisuu ni danda'aa?

Gaafa waan hamaa hojjettu,
ati ni gammaddaatii.”

¹⁶ WAAQAYYO duraan, Muka ejersaa lalisaa
miidhagaa ija qabu siin jedhee ture.
Amma garuu huursaa bubbee jabaatiin
ibidda itti qabsiisa;
dameewwan isaas ni caccabsamu.

17 Sababii manni Israa'elii fi manni Yihuudaa waan hamaa hojjetanii, Ba'aaliif ixaana aarsuudhaan dheekkamsaaf na kakaasaniif WAAQAYYO Waan Hunda Danda'u inni si dhaabe sun badiisa sitti labseera.

Marii Ermiyaasitti Mari'atame

18 Sababii WAAQAYYO mala isaanii naaf ibseef ani waan sana nan beeke; inni yeroo sanatti waan isaan hojjechaa jiran natti argisiiseeraatii. 19 Anis akkuma xobbaallaa hoolaa isa garraamii kan gara qalmaatti oofamu tokkoon ture; ani akka isaan, "Kottaa muka sanaa fi ija isaa haa barbadeessinuu;

akka maqaan isaa si'achi hin yaadatamneef,
kottaa biyya jiraattotaa keessaa isa balleessinaa" jechuudhaan
natti malatan ani hin hubannen ture.

20 Garuu yaa WAAQAYYOO Waan Hunda Dandeessu,
kan murtii qajeelaa kennitu, kan garaa fi yaada namaa qortu,
ani dhimma koo sitti kennadheeraatii

ati akka haaloo isaanitti baatu na argisiisi.

21 "Kanaafuu WAAQAYYO akkana jedhee waa'ee namoota Anaatoot warra, 'Ati maqaa WAAQAYYOOTIIN raajii hin dubbatin yoo kanaa achii harka keenyatti duuta' jechuudhaan si ajjeesuu barbaadan sanaa dubbata. 22 Kanaafuu WAAQAYYON Waan Hunda Danda'u akkana jedha: 'Ani jara nan adaba. Dargaggoonni isaanii goraadeedhaan, ilmaan isaanii fi intallan isaanii immoo beelaan ni dhumu. 23 Sababii ani bara isaan itti adabaman keessa namoota Anaatootitti balaa fiduuf isaan hambaa tokko iyyuu hin qabaatan.'"

12

Gungummii Ermiyaas

1 Yaa WAAQAYYO yommuu ani iyyata koo fuula kee duratti dhi'eeffadhutti
ati yeroo hunda qajeelaa dha.

Ta'u iyyuu ani waa'ee qajeelummaa keetii nan dubbadha;
karaan jal'ootaa maaliif milkaa'a?

Warri hin amanamne hundi maaliif nagaan jiraatu?

2 Ati isaan dhaabde; isaanis hidda gad fageeffataniiru;
ni guddatu; ijas ni naqatu.

Ati yeroo hunda afaan isaaniitii hin buutu;
garaa isaanii irraa garuu fagoo jirta.

3 Ta'us yaa WAAQAYYO ati na beekta;
na ilaaltees yaada ani siif qabu ni qorta.

Akka hoolaa qalamuuf deemuutti
harkisii isaan geessi!
Guyyaa qalmaatiifis kophaatti isaan baasi!

4 Biyyattiin hamma yoomiitti boossee
margi dirree hundis goga?

Sababii hammina warra biyyattii
keessa jiraataniitii fi sababii namoonni,
"Inni waan nurra ga'aa jiru hin argu" jedhaniif
horii fi simbirroonni dhumaniiru.

Deebii Waaqayyoo

5 "Ati namoota lafoo wajjin fiigdee erga
isaan si dadhabsiisani,
fardeen wajjin akkamitti dorgomuu dandeessa ree?

Ati biyya nagaa keessatti erga gufatte,
bosona Yordaanos keessatti akkam taata ree?

6 Obboloonni kee, maatiin abbaa keetii,
isaan iyyuu si gananiiru;
isaan sagalee ol fudhatanii sitti iyyu.

Yoo isaan afaan nagaa sitti dubbatan iyyuu,
ati isaan hin amanin.

7 "Ani mana koo dhiiseera;
handhuuraa koos gateera;
ani ishee garaan koo jaallatu sana

- harka diinota isheetti dabarsee kenneera.
⁸ Handhuuraan koo
 akkuma leenca bosonaa natti taateerti.
 Isheen natti aadde;
 kanaafuu ani ishee jibbeera.
⁹ Handhuuraan koo akka allaattii burree
 kan allaattiiwwan biraa marsanii miidhan
 tokkoo natti hin taanee?
 Dhaqaatii bineensota bosonaa hunda walitti qabaa;
 akka ishee nyaataniifis isaan fidaa.
¹⁰ Tiksoonna hedduun
 iddo dhaabaa wayinii kootii ni balleessu;
 qooda koos ni dhidhiitu;
 qooda natti tolu ni onsu.
¹¹ Isaan isa onsu;
 inni onee gara kootti iyya;
 namni dhimma isaa qabus
 waan hin jirreef lafti guutuun onee hafa.
¹² Lafa ol ka'aa qullaa gammoojjii
 keessaa hunda irra balleessitoonni ni raam'isu;
 goraadeen WAAQAYYOO // moggaa biyyattii tokko irraa
 hamma moggaa kaaniitti ni fixaatii;
 namni tokko iyyuu hin hafu.
¹³ Isaan qamadii facaasu garuu qoraatii haammatu;
 ni dhama'u garuu homaa hin argatan.
 Sababii dheekkamsa WAAQAYYOO isa cimaa sanaatiif
 midhaan galfatanitti ni qaana'u."
¹⁴ WAAQAYYOO akkana jedha; "Ani olloota koo hamoo kanneen handhuuraa ani saba
 koo Israa'eliif kenne qabatan hunda biyya isaanii keessaa nan buqqisa; mana Yihuudaas
 isaan gidduudhaa nan buqqisa. ¹⁵ Ani ergan isaan buqqisee booddee deebi'ee na'eeffii
 tokkoo tokkoo isaanii gara handhuuraa isaaniitii fi gara biyya ofii isaaniitti nan deebisa.
¹⁶ Yoo isaan haala jireenya saba koo akka gaarii baratani akkuma duraan saba koo
 Ba'aaliin kakachuu barsiisan sana, 'Dhugaa WAAQAYYOO jiraataa' jechuudhaan maqaa
 kootiin kakatan, isaan saba koo gidduutti ni hundeeffamu. ¹⁷ Garuu yoo sabni kam
 iyyuu naa ajajamuu dide, ani guutumaan guutuutti isa nan buqqisa; nan balleessas"
 jedha WAAQAYYOO.

13

Sabbata Quncee Talbaa Irraa Hojjetame

¹ WAAQAYYOO akkana naan jedhe: "Dhaqiiitti sabbata quncee talbaa irraa hojjetame bitadhuu mudhii keetti hidhadhu; garuu bishaan hin tuqsiisin." ² Kanaafuu ani akkuma WAAQAYYOO na ajajetti sabbata bitadhee mudhii kootti nan hidhadhe.

³ Ergasii dubbiin WAAQAYYOO akkana jedhee yeroo lammaffaa gara koo dhufe: ⁴ "Sabbata bitattee mudhiitti hidhatte sana fuudhiitti gara Laga Efraaxiis dhaqi; sabbata sanas baqaaqaa kattaa keessa dhoksi." ⁵ Kanaafuu ani akkuma WAAQAYYOO na ajajetti dhaqee sabbata sana Laga Efraaxiis bira nan dhokse.

⁶ Bultii hedduu booddee WAAQAYYOO, "Amma gara Efraaxiis dhaqiiitti sabbata ani akka ati achitti dhoksite si ajaje sana fudhadhu" naan jedhe. ⁷ Kanaafuu ani gara Efraaxiis dhaqee sabbata sana iddoon itti dhoksee ture sanaa qotee baasee nan fudhadhe; sabbanni sun garuu yeroo sanatti ciccitee guutummaan guutuutti horoomaa ba'ee ture.

⁸ Ergasii dubbiin WAAQAYYOO akkana jedhee gara koo dhufe; ⁹ "WAAQAYYOO akkana jedha; 'Ani haaluma wal fakkaatuun of tuulummaa Yihuudaatii fi of tuulummaa Yerusaalem guddaa sana nan balleessa. ¹⁰ Sabni hamaan dubbii koo dhaga'uu didee mata jabina garaa isaa duukaa bu'ee waaqota biraa tajaajilu fi waaqeffachuuf isaan faana bu'e kun akkuma sabbata kanaa ni ta'a; guutummaan guutuuttis horoomaa ba'a. ¹¹ Akkuma sabbanni tokko mudhii namaatti hidhamu sana anis akka isaan saba, maqaa, galataa fi ulfina naa ta'aniif guutummaa mana Israa'elii fi guutummaa mana Yihuudaa ofitti maxxanseen ture. Isaan garuu na hin dhaggeeffanne' jedha WAAQAYYOO.

Qalqalloo Daadhii Wayinii

¹² "Ati akkana isaaniin jedhi: 'WAAQAYYOO Waaqni Israa'el akkana jedha: qalqalloon daadhii wayinii hundi daadhii wayiniitiin guutamuu qaba.' Yoo isaan, 'Nu akka

qalqalloon daadhii wayinii hundi daadhii wayiniitiin guutamuu qabu hin beeknuu?' siin jedhan, ¹³ ati akkana jedhiin; 'WAAQAYYO akkana jedha: Ani namoota biyya kana keessa jiraatan hunda, mootota teessoo Daawit irra taa'an, luboota, raajotaa fi warra Yerusaalem keessa jiraatan hunda machiidhaan nan guuta. ¹⁴ Ani tokkoo tokkoo isaanii walittin buusa; abbootii fi ilmaanis akkasuma walitti nan buusa, jedha WAAQAYYO. Ani isaan nan balleessa malee isaaniif hin na'u yookaan isaaniif hin araaramu yookaan garaa hin laafuuf.' "

Akeekkachiisa Of tuulummaa Irratti Kenname

- ¹⁵ Dhaga'aa; qalbeeffadhaas;
of hin tuulinaa;
WAAQAYYO dubbateeraatii.
- ¹⁶ Utuu inni dukkana hin fidin,
utuu miilli keessan
tulluu dukkanaa'aa jiru irratti hin gufatin
WAAQAYYO Waaqa keessaniif ulfina kennaa.
Isin ifa abdattu; inni garuu ifa sana
dimimmissatti deebisee
dukkana duudaatti geeddara.
- ¹⁷ Yoo isin dhaga'uu baattan garuu,
sababii of tuulummaa keessaniitiif
lubbuun koo dhoksaatti ni boossi;
sababii bushaayeen WAAQAYYO boojiin fuudhamaniif
iji koo akka malee boossee
imimmaan ishee keessaa ni rooba.
- ¹⁸ Mootichaa fi haadha mootichaatiin,
"Teessoo keessan irraa bu'aa;
gonfoon keessan ulfina qabeessi sun
mataa keessan irraa ni bu'aatii" jedhi.
- ¹⁹ Magaalaawwan Negeeb ni cufamu;
namni isaan banu tokko iyyuu hin jiru.
Yihuudaan hundi ni booji'anti;
guutumaan guutuuttis biyyaa fudhatamti.
- ²⁰ Ija keessan ol fudhadhaatii
warra gama kaabaatii dhufaa jiran ilaalaa.
Bushaayeen imaanaa sitti kennaman,
hoolonni ati ittiin boonte sun eessa jiru?
- ²¹ Yommuu WAAQAYYO warra ati akka isaan michoota siif ta'aniif leenjifte sana
sirratti muudutti ati maal jetta?
Akkuma dubartii ciniinsifattu tokkoo
dhiphinni si hin qabuu?
- ²² Yoo ati, "Wanni kun maaliif natti dhufe?"
jettee of gaafatte
wanni wandaboon kee sirraa mulqamee
dhagni kee salphifameef
sababii cubbuu kee baay'ee sanaatiif.
- ²³ Namni Itoophiyaa tokko bifa isaa
yookaan qeerransi buburrina isaa geeddaruu ni danda'aa?
Isin warri hammina hojjechuu barattanis
waan gaarii hojjechuu hin dandeessan.
- ²⁴ "Akkuma bubbeen gammoojjii habaqii bittinneessu sana
anis isin nan bittinneessa.
- ²⁵ Sababii ati na irraanfatee
waaqota sobaa amanatteef,
kun ixaa kee, qooda ani siif safaree dha"
jedha WAAQAYYO.
- ²⁶ "Akka qaaniin kee mul'atuuf
ani wandaboo kee fuula keetti ol nan soqola.
- ²⁷ Ejjummaa fi himimsuun kee,

sagaagalummaan kee kan qaanii hin qabne sunis ni mul'ata!
 Ani hojii kee jibbiisaa sana
 gaarran irraa fi bakkee keessatti argeera.
 Yaa Yerusaalem, siif wayyoo!
 Ati hamma yoomiitti xurooftee hafta?"

14

Hongee, Beela, Goraadee

¹ Dubbiin WAAQAYYOO waa'ee hongee akkana jedhee gara Ermiyaas dhufe:
² "Yihuudaan ni boossi;
 magaalaawwan ishees gad deebi'aa jiru;
 isaan biyyattiidhaaf ni wawwaatu;
 iyyi tokkos Yerusaaleemii dhaga'amaa jira.
³ Namoonni gurguddoonni hojjettoota isaanii bishaan waraabuuf ergatu;
 isaanis gara boolla bishaanii dhaqu;
 garuu bishaan hin argatan.
 Isaan okkotee isaanii duwwaa qabatanii deebi'u;
 isaan qaana'anii abdi kutatanii
 mataa isaanii haguuggatu.
⁴ Sababii biyyattii keessaa
 bokkaan dhabameef lafti ni babbaqaqxe;
 qonnaan bultoonnis abdi kutatanii
 mataa isaanii haguuggatu.
⁵ Sababii margi hin jirreef,
 borofni bakkee iyyuu
 ilmoo ishee kan reefuu dhalatte gattee deemti.
⁶ Harroonni diidaa lafa ol ka'aa qullaa irra ijaajjani
 akkuma waangotaa arganu;
 sababii waan dheedan dhabaniif
 iji isaanii waa arguu dadhabe."

⁷ Yaa WAAQAYYO, cubbuun keenya nutti dhugaa ba'u iyyuu
 ati maqaa keetiif jedhiitii waa nuu godhi.
 Duubatti deebi'uun keenya baay'ateera;
 nu cubbuu sitti hojjenneerra.
⁸ Yaa abdi Israa'el,
 Fayyisaa ishee kan yeroo rakkinnaa,
 ati maaliif akkuma kara deemtuu halkan tokko qofa bultuu
 biyyattii keessatti akkuma keessummaa taata?
⁹ Ati maaliif akka nama waan godhu wallaale tokkoo,
 akkuma loltuu nama oolchuu hin dandeenye tokkoo taata?
 Yaa WAAQAYYO, ati nu gidduu jirta;
 nu maqaa keetiin waamamna;
 ati nu hin gatin.
¹⁰ WAAQAYYO waa'ee saba kanaa akkana jedha:
 "Isaan jooruu jaallatu;
 miilla isaanii hin ittifatan.
 Kanaafuu WAAQAYYO isaanitti hin gammadu;
 inni amma hammina isaanii ni yaadata;
 cubbuu isaaniitiifis isaan adaba."
¹¹ WAAQAYYO akkana naan jedhe; "Akka sabni kun nagaan jiraatu na hin kadhatin.
¹² Yoo isaan sooman iyyuu ani iyya isaanii hin dhaga'u; yoo isaan aarsaa gubamuu fi
 aarsaa midhaanii dhi'eessan iyyuu ani hin fudhadhu. Qooda kanaa ani goraadeedhaan,
 beelaa fi dha'ichaan isaan nan balleessa."
¹³ Ani garuu akkana nan jedhe; "Wayyoo yaa WAAQAYYO Gooftaa, raajonni saba
 kanaan, 'Isin goraadee hin argitan yookaan hin beeloftan. Ani dhugumaan nagaa dhuma
 hin qabne iddoo kanatti isiniif nan kenna' jedhu."
¹⁴ Amma illee WAAQAYYO akkana naan jedhe; "Raajonni sun maqaa kootiin soba
 raaju. Ani isaan hin ergine yookaan isaan hin muudne yookaan isaanitti hin dubbanne.
 Isaan mul'ataa fi raajii sobaa, waaqa tolfamaa waqeffachuu fi waan ofuma isaaniitii
 yaadan isinitti himu. ¹⁵ Kanaafuu WAAQAYYO waa'ee raajota maqaa isaatiin raajan sanaa

akkana jedha: ani isaan hin ergine; isaan garuu, 'Goraadeen yookaan beelli tokko iyyuu biyya kana hin tuqu' jedhu. Raajonni sun iyyuu goraadee fi beelaan dhumu. ¹⁶ Namoonni isaan raajii dubbataniif sunis beelaa fi goraadeedhaan daandiiwwan Yerusaalem irratti harcaafamu. Namni isaan yookaan niitota isaanii, ilmaan isaanii yookaan intallan isaanii awwaalu tokko iyyuu hin jiru. Ani badiisa isaanii fi malu isaanitti nan dhangalaasaatii.

¹⁷ "Akkana jedhii dubbii kana isaanitti dubbadhu:
 " 'Tji koo halkanii fi guyyaa utuu gargar
 hin kutin imimmaan haa lolaasu;
 intalli, Durbi Qulqullittiin saba kootii
 akka malee madooftee
 dha'icha hamaadhaan dha'amte.

¹⁸ Ani yoon baadiyyaa dhaqe,
 warra goraadeedhaan dhuman nan arga;
 yoon magaalaa seene immoo,
 warra beelaan dhuman nan arga.
 Raajonni fi luboonni
 biyya hin beekne keessa jooru.' "

¹⁹ Ati Yihuudaa guutummaan guutuutti gatteertaa?
 Xiyooniinis ni tuffattaa?

Ati maaliif
 akka nu fayyuu hin dandeenyeef nu miita?
 Nu nagaa abdanne;
 garuu wannii gaariin tokko iyyuu hin dhufne;
 nu yeroo fayyinaa abdanne;
 garuu raafama qofatu jira.

²⁰ Yaa WAAQAYYO, nu hammina keenyaa fi
 yakka abbootii keenyaa ni beekna;
 nu dhugumaan cubbuu sitti hojjenneerra.

²¹ Ati maqaa keetiif jedhiitii nu hin tuffatin;
 teessoo kee ulfina qabeessa sanas hin qaanessin.
 Kakuu nu wajjin galte sana yaadadhu;
 isas hin cabsin.

²² Waaqota Namoota Ormaa kanneen faayidaa hin qabne sana keessaa
 tokko iyyuu bokkaa ni roobsaa?
 Samiiwwan mataan isaanii iyyuu tiifuu gad erguu?
 Yaa WAAQAYYO Waaqni keenya suma mitii?
 Kanaafuu abdiin keenya suma;
 situ waan kana hunda hojjetaatii.

15

¹ WAAQAYYO akkana naan jedhe; "Yoo Musee fi Saamu'eel fuula koo dura dhaabatan iyyuu garaan koo gara saba kanaatti hin deebi'u. Fuula koo duraa isaan ari'i! Isaan haa deeman! ² Yoo isaan, 'Eessa dhaqna?' jedhanii si gaafatan immoo akkana jedhii isaanitti himi; 'WAAQAYYO akkana jedha:

" 'Namni du'aaf ramadame gara du'aa,
 namni goraadeedhaaf ramadame gara goraadee,
 namni beelaaf ramadame gara beelaa,
 namni bojuudhaaf ramadame immoo gara bojuu dhaqa.'

³ "Ani waan isaan balleessu gosa afur isaanitti nan erga" jedha WAAQAYYO. "Akka isaan ajjeesuuf goraadee, akka isaan harkisaniif saroota, akka isaan nyaatanii fixaniif immoo allaattiiwwan samiitii fi bineensota lafaa isaanitti nan erga. ⁴ Ani sababii Minaaseen ilmi Hisqiyaa mootichi Yihuudaa Yerusaalem keessatti hojjete waan sanaatiif fuula mootummoota lafa irraa hunda duratti jibbamtoota isaan nan godha.

⁵ "Yaa Yerusaalem, eenyutu garaa siif laafa?
 Eenyutu siif boo'a?
 Eenyutu si dubbisuuf sitti gora?

⁶ Ati na dhiifteerta;
 ittuma fuftes duubatti deebi'aa jirta"
 jedha WAAQAYYO.

“Kanaafuu ani harka koo sitti hiixadhee sin balleessa;
ani si’achi siif na’uu hin danda’u.

⁷ Ani karrawwan magaalaa biyyattii duratti,
qorbiidhaan qilleensatti isaan nan kenna.

Ani saba kootti gaddaa fi badiisa nan fida;
isaan karaa isaanii irraa hin deebineetii.

⁸ Ani haadhota hiyyeessaa isaanii
cirracha galaanaa caalaa nan baay’isa.

Ani haadhota dargaggoota isaaniitti,
guyyuma saafaadhaan
waan isaan balleessu tokko nan fida;

ani goolii fi naasuu
akkuma tasaa isaanitti nan gadhiisa.

⁹ Haati ilmaan torbaa gaggabdee
hafuura dhumaa baafatti.

Aduun ishee guyyuma adiidhaan dhiiti;
isheen isalphattee namaa gad taati.

Ani hambaawwan isaanii fuula diinota isaanii duratti
goraadeef dabarsee nan kenna”
jedha WAAQAYYO.

¹⁰ Wayyoo yaa haadha ko,
kan ana nama biyyattii guutuu
loluu fi falmu deesse?

Ani hin liqeessine yookaan hin liqeeffanne;
namni hundi garuu na abaara.

¹¹ WAAQAYYO akkana jedhe;
“Ani dhugumaan kaayyoo gaariidhaaf sin baraara;
Ani dhugumaan yeroo rakkinaatii fi gidiraatti,
akka diinonni kee si kadhatan nan godha.

¹² “Namni kam iyyuu sibiila,
sibiila kaabaa dhufe yookaan naasii cabsuu ni danda’aa?

¹³ “Sababii cubbuu kee hunda
kan biyya kee guutuu keessa jiru sanaatiif
ani badhaadhummaa keetii fi
qabeenya kee toluma boojiif nan kenna.

¹⁴ Sababii dheekkamsi koo
ibidda ishee gubu qabsiisuuf,
ani biyya ati hin beekne keessatti
diinota keetiif sin garboomsa.”

¹⁵ Yaa WAAQAYYO situ beeka;
na yaadadhu; na tiksisi.
Warra na ari’atan haaloo naaf ba’i.

Ati obsa guddaa qabdaatii na hin balleessin;
akka ani siif jedhee tuffatamu beeki.

¹⁶ Dubbiin kee ni argame; anis nan nyaadhe;
innis na gammachiise; gammachuu garaa kootiis ta’ee;
yaa WAAQAYYO, Gooftaa Waan Hunda Dandeessu,
ani maqaa keetiin nan waamamaatii.

¹⁷ Ani gongumaa tuuta fandalalootaa wajjin hin teenye;
gongumaa isaan wajjin hin gammanne;
sababii harki kee narra turee fi
sababii ati aariidhaan na guutteef ani kophaa koo nan taa’ee.

¹⁸ Rakkinni koo maaliif dhuma dhabe?
Madaan koos maaliif fayyuu dide?

Ati akka laga nama gowwoomsuu
akka burqaa goguus natti taataa?

¹⁹ Kanaafuu WAAQAYYO akkana jedha:
“Yoo ati qalbii jijjiirratte,

ani akka ati na tajaajiltuuf deebisee sin dhaaba;
 Ati yoo dubbii faayidaa hin qabne
 dhiiftee dubbii faayidaa qabu dubbatte afaan naaf taata.
 Sabni kun gara keetti haa deebi'uu malee
 ati gara isaaniitti deebi'uu hin qabdu.
 20 Ani saba kanaaf dallaa dhagaa,
 dallaa naasii kan jabeeffamee ijaarame sin taasisa;
 isaan si lolu;
 garuu si hin mo'atan;
 ani si baraaruu fi si baasuuf si wajjin jiraatii"
 jedha WAAQAYYO.
 21 "Ani harka namoota hamoo jalaa sin baasa;
 harka warra gara jabeeyyii jalaas sin fura."

16

Guyyaa Badiisaa

¹ Ergasii dubbiin WAAQAYYOO akkana jedhee gara koo dhufe: ² "Ati iddoo kanatti niitii fuutee ilmaan yookaan intallan hin dhalchin." ³ WAAQAYYO waa'ee ilmaanii fi intallan iddoo kanatti dhalatanii, waa'ee dubartoota haadhota isaanii ta'aniiitii fi waa'ee dhiirota abbootii isaanii ta'anii akkana jedhaatii: ⁴ "Isaan dhukkuba nama ajjeesuun dhumu. Isaan akkuma kosii lafatti gatamee ta'uu malee boo'icha hin argatan; hin awwaalamanis. Isaan goraadee fi beelaan dhumu. Reeffi isaaniis allaattii samiitii fi bineensota lafaatiif nyaata ta'a."

⁵ WAAQAYYO akkana jedhaatii: "Ati mana boo'ichaa hin seenin yookaan dhaqxee hin boo'in yookaan isaan hin jajjabeessin; ani eebba koo, jaalala kootii fi gara laafina koo saba kana irraa fudhadheeraatii" jedha WAAQAYYO. ⁶ "Namni xinnaa fi guddaan biyya kana keessatti ni du'a. Isaan hin awwaalaman yookaan boo'icha hin argatan; namni tokko iyyuu isaaniif jedhee of hin murmuruu yookaan mataa hin haaddatu. ⁷ Namni tokko iyyuu warra namni irraa du'e jajjabeessuuf jedhee nyaata hin geessuuf; yookaan namni tokko iyyuu nama abbaan yookaan haati jalaa duute jajjabeessuuf jedhee dhugaatii hin geessu.

⁸ "Mana cidhi jiru hin seenin; nyaachuu fi dhuguuf jettees isaan wajjin hin taa'in. ⁹ WAAQAYYO Waan Hunda Danda'u, Waaqni Israa'el akkana jedhaatii: Ani ija keessan durattii fi bara keessan keessa sagalee ililleetii fi gammachuu, sagalee misirrittiitii fi misirrichaa iddoo kanaa nan balleessa.

¹⁰ "Yeroo ati waan kana hunda saba kanatti himtee isaan, 'WAAQAYYO maaliif badiisa guddaa akkanaa nurratti labse? Nu maal balleessine? WAAQAYYO Waaqa keenyattis cubbuu maalii hojjennee?' jedhanii si gaafatanitti, ¹¹ akkana isaaniin jedhi; 'Kun sababii abbootiin keessan na dhiisanii waaqota kaan duukaa bu'anii isaan tajaajilanii fi isaan waaqeffataniif' jedha WAAQAYYO; 'isaan na dhiisan; seera koos hin eegne. ¹² Isin garuu abbootii keessan iyyuu caalaa hammaattaniirtu. Kunoo tokkoon tokkoon keessan qooda anaaf ajajamuu mata jabina hammina garaa keessanii duukaa buutaniirtuutii. ¹³ Kanaafuu ani biyya kana keessaa isin baasee, biyya isin yookaan abbootiin keessan hin beeknetti isin nan gata; isinis achitti halkanii guyyaa waaqota biraa tajaajiltu; ani isiniif hin na'uutii.'

¹⁴ "Ta'us" jedha WAAQAYYO, "barri itti namoonni si'achi, 'Dhugaa WAAQAYYO jiraataa, isa biyya Gibxii Israa'eloota baase sanaa' jedhanii hin kakanne ni dhufa, ¹⁵ isaan garuu, 'Dhugaa WAAQAYYO jiraataa isa biyya kaabaatii fi biyyoota itti isaan bittinneesse hunda keessaa baasee fide sanaa' ni jedhu. Ani biyya abbootii isaaniitiif kenne sanatti isaan nan deebisaatii.

¹⁶ "Amma immoo ani akka isaan qurxummii qabdoota hedduu fidaniif namoota nan erga" jedha WAAQAYYO; "isaanis jara ni qabu. Ergasii ani akka isaan adamsitoota hedduu fidaniif namoota nan erga; isaanis tulluu hundaa fi gaara hunda irra, baqaqaa kattaa hunda keessas jara ni adamsu. ¹⁷ Iji koo karaa isaanii hunda irra jira; isaanis na duraa hin dhokatan; cubbuun isaaniis ija koo duraa hin dhokfamu. ¹⁸ Sababii isaan fakkiwwan isaanii lubbuu dhabeeyyii faayidaa hin qabne sanaa biyya koo xureessanii, waaqota isaanii jibbisiisoo sanaanis handhuuraa koo guutaniif ani gatii hamminaa fi lubbuu isaaniitiif malu harka lama nan baasaaf."

¹⁹ Yaa WAAQAYYO, jabina kootii fi da'annoo ko,
 da'oo koo kan yeroo rakkinaa,
 ormoonni handaara lafaatii

- gara kee dhufanii akkana jedhu,
 “Abbootiin keenya waaqota sobaa, waaqota tolfamoo faayidaa hin qabne
 kanneen waan gaarii tokko illee isaaniif hin goone sana malee
 homaa hin dhaalle.
 20 Namoonni ofii isaaniitiif waaqota ni tolfatuu?
 Eeyyee, garuu isaan waaqota miti!”
 21 “Kanaafuu ani isaan nan barsiisa;
 yeroo kanatti ani humna koo fi
 jabina koo isaan nan barsiisa.
 Yoos isaan
 akka maqaan koo WAAQAYYO ta’e ni beeku.

17

- 1 “Cubbuun Yihuudaa meeshaa sibiilaatiin qirixaameera;
 qara dhagaatiinis
 gabatee garaa isaanii irrattii fi
 gaanfa iddoo aarsaa isaanii irratti barreeffameera.
 2 Ijoollen isaanii iyyuu
 iddoowwan aarsaa isaaniitii fi siidaa Aasheeraa
 kanneen mukkeen lalisaa cinaatii fi
 gaarran ol dheeroo irraa sana yaadatan.
 3 Ani sababii cubbuu biyya kee guute sanaatiif
 tulluu koo kan biyya keessaa,
 qabeenya keetii fi badhaadhummaa kee hunda
 iddoo ol ka’aa kee wajjin
 dabarsee boojuu fi kenna.
 4 Ati dogoggora mataa keetiitiin
 dhaala ani siif kenne ni dhabda.
 Ani biyya ati hin beekne keessatti
 diinota keetiif sin garboomsa;
 ati dheekkamsa koo qabsiifteertaatii;
 innis bara baraan ni boba’a.”
 5 WAAQAYYO akkana jedha:
 “Namni nama amanatu,
 kan jabina foonii irree isaa godhatu,
 kan garaan isaa WAAQAYYO irraa garagalu abaaramaa dha.
 6 Inni akka daggala gammoojjii keessaa ta’a;
 yeroo wanni gaariin dhufutti hin argu.
 Inni gammoojjii keessaa iddoo gogaa
 biyya soogiddaa kan namni tokko iyyuu hin jiraanne keessa jiraata.
 7 “Namni WAAQAYYOON amanatu,
 kan abdiin isaas isuma ta’e garuu eebbifamaa dha.
 8 Inni akkuma muka qarqara bishaanii dhaabame,
 kan hidda isaa ededa lagaa irra yaafatuu ta’a.
 Yommuu ho’i dhufu hin sodaatu;
 baalli isaa yeroo hunda lalisaa dha.
 Mukni sun bara hongee illee hin yaadda’u;
 ija naqachuus hin dhiisu.”
 9 Garaan namaa waan hunda caalaa haxxee dha;
 garmalees hamaa dha.
 Eeniyutu isa hubachuu danda’a?
 10 “Ani WAAQAYYO nama hundaaf akkuma amala isaatti,
 akkuma waan hojii isaatiif maluutti
 gatii isaaf kennuuf garaa isaa nan sakatta’a;
 qalpii isaas nan qora.”
 11 Namni karaa hin malleen badhaadhummaa walitti qabatu

akkuma gogorrii hanqaaquu hin hanqaaqin hammattu ti.
Walakkaa umurii isaatti badhaadhummaan sun isa dhiisee bada;
dhuma irrattis gowwaa ta'uun isaa ni mirkaneeffama.

12 Teessoon ulfina qabeessi durumaa jalqabee ol ol jedhu sun,
iddoo qulqullummaa keenyaa ti.

13 Yaa WAAQAYYO, abdii Israa'el,
warri si dhiisan hundi ni qaaneffamu.

Warri sirraa garagalan biyyoo keessatti galmeeffamaniiru;
isaan WAAQAYYON
burqaa bishaan jireenyaa dhiisaniiruutii.

14 Yaa WAAQAYYO na fayyisi; anis nan fayyaa;
na oolchi, anis nan oolfama;
kan ani jajadhu sumaatii.

15 Isaan ittuma fufanii,
"Dubbiin WAAQAYYOO eessa jira?
Mee amma haa raawwatamu!" naan jedhu.

16 Ani tiksee ta'ee si tajaajiluu irraa duubatti hin deebine;
ati akka ani guyyaa badiisaa hin hawwine ni beekta.
Wanni afaan kootii ba'u fuuluma kee dura jira.

17 Ati na hin rifachiisin;
guyyaa badiisaatti ati da'oo koo ti.

18 Warri na adamsan haa qaaneffaman;
ana garuu qaanii irraa na oolchi;

isaan haa rifatan;
ana garuu rifaatii irraa na eegi.

Guyyaa badiisaa isaanitti fidi;
badiisa dachaatiin isaan balleessi.

Sanbata Kabajuu

19 WAAQAYYO akkana naan jedhe: "Dhaqiitii karra uummataa karaa mootonni Yihuudaa ittiin seenanii ba'an dura dhaabadhu; akkasumas karrawwan Yersaalem kaan hunda dura dhaabadhu. 20 Akkanas isaaniin jedhi; 'Yaa mootota Yihuudaa, sabni Yihuudaa hundii fi namoonni Yersaalem keessa jiraattan kanneen karra kanaa ol galtan hundi dubbii WAAQAYYOO dhaga'aa. 21 WAAQAYYO akkana jedha: Akka guyyaa Sanbataatiin ba'aa hin baanne yookaan karrawwan Yersaalemiin ol hin galchine of eeggadhaa. 22 Akkuma ani abbootii keessan ajajetti guyyaa Sanbataa kabajaa malee guyyaa Sanbataatiin mana keessanii ba'aa gad hin baasinaa yookaan hojii kam iyyuu hin hojjetinaa. 23 Ta'us isaan hin dhaggeeffanne yookaan hin qalbeeffanne; garuu akka hin dhageenyee fi akka qajeelfama hin fudhanneef mataa jabaatan. 24 WAAQAYYO akkana jedha; yoo isin na dhageessanii guyyaa Sanbataatiin ba'aa tokko illee karrawwan magaalaa kanaatiin ol galchuu dhiiftanii qooda kanaa gaafas hojii kam iyyuu hojjechuu dhiisuudhaan guyyaa Sanbataa addaan baaftanii eegdan, 25 mootonni teessoo Daawit irra taa'an qondaaltota isaanii wajjin karrawwan magaalaa kanaatiin ol seenu. Isaanis qondaaltota isaanii wajjin gaariiwwanii fi fardeen yaabbatanii namoota Yihuudaatii fi warra Yersaalem keessa jiraatan wajjin ni dhufu; magaalaa kunis magaalaa namni bara baraan keessa jiraatu ni ta'a. 26 Namoonnis magaalawwan Yihuudaatii fi gandoota naannoo Yersaalemiitii, biyya Beniyaamiitii fi biyya gaara keessaatii, biyya gaaraatii fi Negeebii aarsaa gubamuu fi qalma, aarsaa midhaanii, ixaanaa fi aarsaa galataa fidanii gara mana WAAQAYYOO ni dhufu. 27 Yoo isin guyyaa Sanbataa addaan baaftanii eeguuf jettanii guyyaa Sanbataatiin ba'aa tokko iyyuu baattanii karrawwan Yersaalemiin ol seenuu dhiisuudhaan anaaf ajajamuu baattan garuu ani ibidda hin dhaamne tokko karrawwan Yersaalemitti nan qabsiisa; ibiddi sunis da'annoowwan Yersaalem gubee barbadessa.'"

18

Mana Namicha Suphee Dha'u Tokkootti

1 Dubbiin WAAQAYYO biraa gara Ermiyaas dhufe isa kanaa dha: 2 "Ka'iitii gara mana namicha suphee dha'u sanaa dhaqi. Anis achitti dubbii koo sitti nan hima." 3 Kanaafuu ani gara mana namicha suphee dha'u sanaatti gad nan bu'e; innis geengoo irratti waa hojjechaa ture. 4 Okkoteen inni suphee irraa hojjechaa ture sun garuu harka

isaatti fashalaa 'e; kanaafuu namichi suphee dha'u sun akkuma itti toletti suphee sanaan okkotee kan biraa hojjete.

⁵ Ergasii dubbiin WAAQAYYOO akkana jedhee gara koo dhufe: ⁶ "Yaa mana Israa'el, anis akkuma suphee dhooftuun kun hojjetu isin gochuu hin danda'uu?" jedha WAAQAYYO. "Yaa mana Israa'el, akkuma supheen harka suphee dhooftuu keessa jiru isinis harka koo keessa jirtu. ⁷ Yeroo ani akka sabni yookaan mootummaan tokko buqqifamu, gargar goodamuu fi barbadeeffamu labsutti, ⁸ yoo sabni ani akeekkachiise sun hammina isaa irraa deebi'e, ani waan hamaa isatti fiduuf yaade sana irraa nan deebi'a. ⁹ Yoo ani yeroo biraa immoo akka sabni yookaan mootummaan tokko ijaaramee dhaabamu labse, ¹⁰ yoo inni fuula koo duratti waan hamaa hojjetee anaaf ajajamuu dide, ani waan gaarii isaaf gochuu barbaade sana nan dhiisa.

¹¹ "Kanaafuu amma saba Yihuudaatii fi warra Yerusaleem keessa jiraataniin akkana jedhi; 'WAAQAYYO akkana jedha: Kunoo! Ani badiisa isiniif qopheesseen mala isinitti karoorsaa jira. Kanaafuu tokkoon tokkoon keessan karaa keessanii fi hojii keessan qajeelfadhaa.' ¹² Isaan garuu akkana jedhanii deebii kennan: 'Kun faayidaa hin qabu. Nu karoorama keenyaan itti fufna; tokkoon tokkoon keenya mata jabinaa fi hammina garaa keenyaa duukaa buuna.' "

¹³ Kanaafuu WAAQAYYO akkana jedha:

"Mee saboota keessa iyyaafadhaa:

Eenyutu takkumaa waan akkanaa dhaga'ee beeka?

Israa'el Durbi Qulqullittiin

waan sukaneeessaa tokko hojjetteerti.

¹⁴ Cabbiin Libaanon

takkumaa ededa kattaa isaa irraa badee beekaa?

Bishaan isaa diilallaa'aan burqaa fagootii dhufu sun

takkumaa citee beekaa?

¹⁵ Sabni koo garuu na irraanfateera;

isaan waaqota tolfamoo faayidaa hin qabne

kanneen karaawwan isaanii irrattii fi

daandiiwwan durii irratti isaan gufachiisaniif

ixaana aarsu.

Isaan karaa hin tolfamne irra

daandii qal'oo irra isaan deemsisaniiru.

¹⁶ Biyyi isaanii ni ona;

bara baraanis biyya qoosaa ta'a;

warri achiin darban hundi ni na'u;

mataa isaaniis ni raasu.

¹⁷ Akkuma bubbee ba'a biiftuutii dhufuu,

ani fuula diinota isaanii duratti isaan nan bittinneessa;

bara badiisa isaanii keessa,

ani dugda koo malee fuula koo isaanitti hin argisiisu.

¹⁸ "Jarriis, 'Seerri luba biraa, gorsi ogeeyyii biraa, dubbiin immoo raajota biraa waan hin dhabamneef kottaa Ermiyaasitti mari'annaa; kanaafuu kottaa nu arraba keenyaan isa miinaa; waan inni dubbatu kam iyyuus hin fudhannu' " jedhan.

¹⁹ Yaa WAAQAYYO, na dhaggeeffadhu;

waan warri na himatan jedhanis dhaga'i!

²⁰ Gatiin waan gaarii waan hamaadhaa?

Isaan garuu boolla anaaf qotaniiru.

Ani akkan dheekkamsa kee isaan irraa

deebisuuf fuula kee dura dhaabadhee

iddoo isaanii bu'ee dubbadhe yaadadhu.

²¹ Kanaafuu ati ijoollee isaanii dabarsii beelatti kenni;

jara immoo dabarsii humna goraadeetti kenni.

Niitota isaanii jalaa ijoollee fi dhirsoonni haa dhuman;

dhiironni isaanii haa ajjeefaman;

dargaggoonni isaanii immoo lola keessatti goraadeedhaan haa qalaman.

²² Yeroo ati akkuma tasaa weeraartoota isaanitti fiddutti,

iiyyi mana isaaniitii haa dhaga'amu;

isaan na qabuuf boolla qotanii,

miilla kootiifis kiyyoo kaa'aniiruutii.

²³ Yaa WAAQAYYO, ati garuu mala isaan na ajjeesuuf

malatan hunda ni beekta.

Yakka isaanii hin dhiisiniif;

yookaan cubbuu isaanii fuula kee duraa hin haqin.

Isaan fuula kee duratti lafatti haa gataman;

yeroo dheekamtuttis isaan adabi.

19

¹ WAAQAYYO akkana jedha; “Dhaqitiiti suphee dhooftuu irraa okkotee suphee bitadhu. Maanguddoota sabaatii fi luboota keessaa namoota muraasa fudhadhuuti, ² gara Sulula Ben Hinoomitti kan balbala karra qiraacii biraa sana dhaqi. Achittis dubbii ani sitti himu labasi; ³ akkanas jedhi; ‘Yaa mootota Yihuudaatii fi saba Yerusaaalem dubbii WAAQAYYOO dhaga’aa. WAAQAYYO Waan Hunda Danda’u, Waaqni Israa’el akkana jedha: Dhaggeeffadhaa! Kunoo, ani balaa gurra nama waan sana dhaga’u hundatti hin tolle tokko iddoo kanatti nan fida. ⁴ Isaan na dhiisanii iddoo kana iddoo waaqota ormaa godhaniiruutii; iddoo kanattis waaqota isaanii yookaan abbootiin isaanii yookaan mootonni Yihuudaa hin beekiniif aarsaa gubamu dhi’eessaniiru; iddoo kanas dhiiga namoota balleessaa hin qabneetiin guutaniiru. ⁵ Isaan ilmaan isaanii aarsaa ibiddaan gubamu godhanii Ba’aaliif dhi’eessuuf iddoo ol ka’aa Ba’aaliif ijaaraniiru; kunis waan ani isaan hin ajajin yookaan maqaa hin dha’in yookaan yaada koo keessa iyyuu hin turinii dha. ⁶ Kanaafuu beekkadhaa; barri itti namoonni iddoo sanaan, si’achi Sulula Qalmaa jedhanii waamuu malee Toofet yookaan Sulula Ben Hinoom hin jenne ni dhufa, jedha WAAQAYYO.

⁷ “‘Ani iddoo kanatti karoora Yihuudaatii fi karoora Yerusaaalem nan diiga; akka isaan fuula diinota isaanii duratti, harka warra lubbuu isaanii galaafachuu barbaadaniitti goraadeedhaan dhuman nan godha; reeffa isaanii immoo allaattii samiitii fi bineensota lafaatiif nyaata godhee nan kenna. ⁸ Ani magaalaa kana onsee waan sodaa fi goosaa nan godha; kan achiin darbu hundi sababii madaa ishee hundaatiif dinqisiifatee isheetti kolfa. ⁹ Ani akka isaan foon ilmaan isaaniiitti fi intallan isaanii nyaatan nan godha; isaanis yeroo diinonni isaanii kanneen lubbuu isaanii galaafachuu barbaadan sun marsanii isaan dhiphisanitti foon walii isaanii nyaatu.’

¹⁰ “Ergasii okkotee sana fuula warra si wajjin deemanii duratti cabsiitti ¹¹ akkana isaanii jedhi; ‘WAAQAYYO Waan Hunda Danda’u akkana jedha: Akkuma okkoteen suphee dhooftuu kun erga caccabee booddee deebi’ee haaromfamuu hin dandeenye sana ani saba kanaa fi magaalaa kana nan caccabsa; sababii iddoo itti nama awwaalan biraa hin jirreef namoonni Toofetitti reeffa awwaalu. ¹² Ani iddoo kanaa fi warra as jiraatanitti waan kana nan fida, jedha WAAQAYYO. Magaalaa kanas akkuma Toofet nan godha. ¹³ Manneen Yerusaaalem keessaatii fi manneen mootota Yihuudaa jechuunis manneen jarri bantii isaanii irratti urjiwwan samii hundaaf ixaana aarsanii waaqota biraafis dhibaayyuu dhibaafatan sun hundi akkuma iddoo Toofet kanaa ni xureffamu.’”

¹⁴ Ermiyaasis ergasii Toofet iddoo WAAQAYYO akka inni achitti raajii dubbatuuf itti isa erge sanaa deebi’ee oobdii mana qulqullummaa WAAQAYYOO keessa dhaabatee saba hundaan akkana jedhe; ¹⁵ “WAAQAYYO Waan Hunda Danda’u, Waaqni Israa’el akkana jedha; ‘Mee dhaggeeffadhaa! Sababii isaan mata jabeeyyii ta’anii dubbii koo dhaga’uu didaniif balaa ani isaanitti labsee ture hunda magaalaa kanaa fi gandoota naannoo ishee jiranitti nan fida.’”

20

Ermiyaasii fi Phaashihuur

¹ Phaashihuur lubichi, ilmi Imeerii inni mana qulqullummaa WAAQAYYOO keessatti bulchaa hangafa ture sun yommuu Ermiyaasii waan kana raaju dhaga’etti, ² akka Ermiyaas raajichi tumamee Karra Beniyaam isa ol aanu kan mana WAAQAYYOO biratti argamu sana keessatti miilli isaa jirma lama gidduu galee hidhamu godhe. ³ Ermiyaasis guyyaa itti aanu yeroo Phaashihuur jirma lamaan gidduudhaa isa baasetti akkana jedheen; “Maqaan WAAQAYYO siif baase Maagormiisaabiib malee Phaashihuur miti. ⁴ WAAQAYYO akkana jedhaatii; ‘Ani akka ati ofii keetii fi michoota keetti sodaachisaa taatu sin godha; yeroo isaan goraadee diinota isaaniitiin dhuman ijuma keetiin argita. Ani Yihuudaa hunda dabarsee mootii Baabiloniitti nan kenna; innis Baabilonitti isaan geessa yookaan goraadeedhaan isaan fixa. ⁵ Ani qabeenya magaalaa kanaa hunda jechuunis oomisha ishee hunda, waan gatii guddaa qabu hundaa fi badhaadhummaa mootota Yihuudaa hunda dabarsee diinota isaaniitti nan kenna. Isaanis booji’anii fudhatanii Baabilonitti isaan geessan. ⁶ Yaa Phaashihuur ati, warri mana kee jiraatan

hundis booji'amtanii Baabilonitti geeffamtu. Atii fi michoota kee warri ati raajii sobaa dubbatteef hundi achitti duutanii awwaalantu.'"

Gungummii Ermiyaas

⁷ Yaa WAAQAYYO, ati na gowwoomsite;
anis nan gowwoomfame;

ati humnaan na caaltee na mo'atte.

Ani guyyaa guutuu waan kolfaa nan ta'e;
namni hundis natti qoosa.

⁸ Ani yeroon dubbadhu hunda nan iyya;
"Goolii, badiisa" jedhees nan labsa.

Kanaafuu dubbiin WAAQAYYO
guyyaa guutuu arrabsoo fi tuffii natti fide.

⁹ Garuu yoo ani, "Ani maqaa isaa hin dha'u
yookaan si'achi maqaa isaatiin hin dubbadhu" jedhe,
dubbiin isaa onnee koo keessatti akka ibiddaa,
akkuma ibidda lafee koo keessatti ukkaamsameera.

Ani of keessatti isa qabachuu nan dadhabe;
dhuguma iyyuu ani hin danda'u.

¹⁰ Ani hasaasa, "Karaa hundaan sodaa!
Isa balaaleffadhaa! Isa haa balaaleffannu!"
jedhu hedduu nan dhaga'a.

Michoonni koo hundi,
"Inni ni gowwoomfama ta'a;
nus ergasii isa ni mo'anna;
haaloo keenya illee ni baafanna" jechaa
kufaatii koo eeggatu.

¹¹ WAAQAYYO garuu akkuma goota humna qabeessa tokkootti
na wajjin jira;
kanaafuu warri na adamsan ni gufatu malee hin mo'atan.

Isaan baay'ee qaaneffaman; hin milkaa'aniitii;
salphinni isaanii gonkumaa hin irraanfatu.

¹² Yaa WAAQAYYOO Waan Hunda Dandeessu,
kan nama qajeelaa qortu,
kan garaa fi yaada namaa keessa argitu,
ani falmii koo sitti kennadheeraatii
ati yeroo isaanitti haaloo baatu na argisiisi.

¹³ WAAQAYYOOF faarfadhaa!
WAAQAYYOON galateeffadhaa!
Inni lubbuu namoota hiyyeeyyii
harka hamootaatii ni baasa.

¹⁴ Guyyaan ani dhaladhe haa abaaramu!
Guyyaan haati koo na deesse sunis hin eebbifamin!

¹⁵ Namichi, "Daa'imni tokko jechuunis
ilmi siif dhalatee jira!" jedhee abbaa kootiif oduu fidee
akka malee isa gammachiise sun haa abaaramu!

¹⁶ Namichi sun akkuma magaalawwan
WAAQAYYO gara laafina malee garagalchee haa ta'u.

Inni ganamaan wawwaannaa,
saafaan immoo iyya waraanaa haa dhaga'u.

¹⁷ Akka haati koo awwaala naa taatuuf,
akka gadameessi ishees iddoo jireenya bara baraa naaf ta'uuf
inni utuu ani gadameessa keessaa hin ba'in na hin ajjeefneetii.

¹⁸ Ani maaliifan rakkinnaa fi gadda arguuf
jireenya koos qaaniin fixuuf
gadameessa keessaa ba'e?

¹ Yeroo Zedeqiyaa Mootichi Phaashihuur ilma Malkiyaatii fi Sefaaniyaa lubicha ilma Ma'aseyaa gara Ermiyaasitti ergetti dubbiin akkana jedhu WAAQAYYO biraa gara Ermiyaas dhufe. Jarri ergamanis akkana jedhan; ² "Sababii Nebukadnezar mootichi Baabilon nu waraanaa jiruuf WAAQAYYON nuu gaafadhu. Tarii WAAQAYYO akkuma duraan godhe sana hojiiwwan dinqii nuuf hojjetee akka mootichi nurraa deebi'u ni godha ta'aatii."

³ Ermiyaas garuu akkana isaaniin jedhe; "Zedeqiyaadhaan akkana jedhaa; ⁴ 'WAAQAYYO Waaqni Israa'el akkana jedha: Ani mi'oota waraanaa harka keessan jiran, kanneen isin ittiin mootii Baabilonii fi Baabilonota isin marsanii dallaan ala jiran loluuf itti fayyadamtan kana isinitti nan garagalcha. Anis magaalaa kana keessatti isaan walitti nan qaba. ⁵ Ani mataan koo harka diriirfamee fi irree jabaadhaan, aarii boba'uu fi dheekkamsa guddaadhaan waraana isinitti nan bana. ⁶ Ani waan magaalaa kana keessa jiraatu jechuunis namaa fi horii nan dha'a; isaanis dha'icha hamaadhaan dhumu. ⁷ Anis ergasii, jedha WAAQAYYO, Zedeqiyaa mooticha Yihuudaa, qondaaltota isaatii fi jiraattota magaalaa kanaa kanneen dha'icha jalaa, goraadee fi beela jalaa ba'an Nebukadnezar mooticha Baabilonii fi diinota isaanii kanneen lubbuu isaanii balleessuu barbaadanitti dabarsee nan kenna. Mootichis goraadeedhaan isaan fixa; inni isaaniif hin hilu yookaan hin na'uuf yookaan garaa hin laafuuf.'

⁸ "Amma illee akkana jedhii saba kanatti himi; WAAQAYYO akkana jedha: 'kunoo, ani karaa jireenyaatii fi karaa du'aa fuula keessan dura nan kaa'a. ⁹ Namni magaalaa kana keessatti hafu kam iyyuu goraadeedhaan, beelaan yookaan dha'ichaan du'a. Namni gad ba'ee Baabilonota isin marsanii jiranitti harka kennatu kam iyyuu garuu ni jiraata; lubbuu isaas ni oolfata. ¹⁰ Ani magaalaa kanaaf waan gaarii gochuuf utuu hin ta'in ishee miidhuuf kutadheera, jedha WAAQAYYO. Isheenis dabarfamtee harka mootii Baabilonitti ni kennamti; inni immoo ibiddaan ishee barbadeessa.'

¹¹ "Akkasumas mana mootii Yihuudaatiin akkana jedhi; 'Isin dubbii WAAQAYYOO dhaga'aa; ¹² Yaa mana Daawit, WAAQAYYO akkana jedha:

"Ganama hunda murtii qajeelaa kenna;

nama saamame tokko

harka nama isa cunqursuutii baasaa;

yoo kanaa achii sababii jal'ina isin hojjetaniitiif

dheekkamsi koo bu'ee akkuma ibiddaa boba'a;

namni isa dhaamsu tokko iyyuu hin jiraatu.

¹³ Yaa ishee sulula kanaan ol dirree kattaa qabu irra jiraattu,

ani sitti ka'een jira, jedha WAAQAYYO;

isin warri, "Eenyuttu nutti dhufuu danda'a?"

Eenyutus da'annoo keenya seenuu danda'a?" jettan,

¹⁴ ani akkuma hojii keessaniif malutti isinan adaba,

jedha WAAQAYYO.

Ani ibidda waan naannoo keessan jiru hunda barbadeessu

bosona keessanitti nan qabsiisa.'"

22

Murtii Mootota Hamootti Murame

¹ WAAQAYYO akkana jedha: "Gara masaraa Mootii Yihuudaatti gad bu'iitii akkana jedhii ergaa kana achitti labsi; ² 'Yaa Mootii Yihuudaa, ati kan teessoo Daawit irra teessu, ati, qondaaltonni keetii fi sabni kee warri karra kanaan ol galтан dubbii WAAQAYYOO dhaga'aa. ³ WAAQAYYO akkana jedha: Waan qajeelaa fi sirrii ta'e hojjetthaa. Nama saamame tokko harka nama isa cunqursuutii baasaa. Alagaatti, ijoollee abbaa hin qabnetti yookaan haadha hiyyeessaatti daba yookaan jal'ina hin hojjetinaa; dhiiga nama balleessaa hin qabnees iddoo kanatti hin dhangalaasinaa. ⁴ Yoo isin ajajawwan kanneen sirriitti eegdan mootonni teessoo Daawit irra taa'an, qondaaltotaa fi saba isaanii wajjin gaarii moototaatii fi fardeen yaabbatanii karrawwan masaraa mootummaa kanaan ol galu. ⁵ Yoo isin ajajawwan kanneen eegu baattan garuu akka masaraan mootummaa kun barbadeeffamu ani maqaa kootiin kakadheera, jedha WAAQAYYO.'

⁶ WAAQAYYO waa'ee masaraa mootii Yihuudaa akkana jedhaatii:

"Ati akka Gili'aad,

akka fiixee Libaanon naaf taate iyyuu,

ani dhugumaan akka gammoojjii,

akka magaalawwan namni keessa hin jiraannee sin taasisa.

⁷ Ani balleessitoota tokkoon tokkoon isaanii

mi'a lolaa qabatan, sitti nan erga;
isaanis birbirsa kee filatamaa ni ciru;
ibiddattis ni naqu.

⁸ "Namoonni biyya hedduus yommuu magaalaa kana biraan darbanitti, 'WAAQAYYO maaliif magaalaa guddaa kanatti waan akkanaa fide?' jedhanii wal gaafatu. ⁹ Isaanis, 'Sababii isaan kakuu WAAQAYYO Waaqa isaanii dhiisanii waaqota biraa waaqeffatanii tajaajilaniifii dha' jedhanii deebisu."

¹⁰ Isin nama du'eef hin boo'inaa yookaan hin gaddinaa;
qooda kanaa nama booji'ameef hiqqifadhaa boo'aa;
inni lammata hin deebi'u
yookaan biyya itti dhalate hin arguutii.

¹¹ WAAQAYYO waa'ee Shaluum ilma Yosiyaa kan qooda abbaa isaa mootii Yihuudaa ta'ee garuu iddoo kanaa deeme sanaa akkana jedhaatii: "Inni gonkumaa hin deebi'u. ¹² Inni iddoo booji'amee itti geeffame sanatti du'a; biyya kanas lammaffaa hin argu."

¹³ "Nama ollaa isaa utuu gatii humna isaa hin kenniniif
akkasumaan hojjechiifachuudhaan
mana isaa karaa qajeelaa hin ta'iniin,
kuta isaa kan mana gubbaa immoo karaa sirrii hin ta'iniin
ijaarratuuf wayyoo.

¹⁴ Inni, 'Ani masaraa guddaa tokko,
kuta mana gubbaa bal'aa isaa wajjin
ofii kootiif nan ijaarradha' jedha.
Kanaafuu inni foddaawwan itti baasee
muka birbirsatiin bareechee
halluu diimaadhaan miidhagsa.

¹⁵ "Birbirsa hedduu qabaachuun kee mootii si taasisaa?
Abbaan kee nyaataa dhugaatii hin qabu turee?

Inni waan qajeelaa fi haqa hojjete;
kanaafuu wannu hundinuu ni qajeeleef.

¹⁶ Inni hiyyeeyyii fi rakkattootaaf ni falme;
kanaafuu wannu hundi ni qajeeleef.

Na beekuu jechuun kanuma mitii?"
jedha WAAQAYYO.

¹⁷ Iji keetii fi garaan kee garuu
bu'aa karaa hin maliniin argamu irra,
dhiiga nama balleessaa hin qabnee dhangalaasuu irra,
cunqursaa fi goolii kaasuu gofa irra bu'eera.

¹⁸ Kanaafuu WAAQAYYO waa'ee Yehooyaaqiim mooticha Yihuudaa, ilma Yosiyaa akkana jedha:

"Isaan, 'Anaaf wayyoo, yaa obboleessa koo!
Anaaf wayyoo, yaa obboleettii koo!'
jedhanii hin boo'aniif.

Isaan, 'Anaaf wayyoo, yaa gooftaa koo!
Anaaf wayyoo yaa ulfina isaa!'
jedhanii hin boo'aniif.

¹⁹ Inni awwaala harree argata,
jechuunis lafa irra harkifamee
karrawwan Yerusaalem keessaa gad baafamee gatama."

²⁰ "Libaanoonitti ol ba'ii iyyi;
sagaleen kee Baashaan keessatti haa dhaga'amu;
Abaariim keessaas iyyi;

michoanni kee hundi barbadeeffamaniiruutii.

²¹ Ani yeroo ati nagaa qabdutti si akeekkachiiseen ture;
ati garuu, 'Ani hin dhaggeeffadhu!' jette.

Kun ijoollummaa keetii jalqabee amala kee ture;
ati naaf hin ajajamne.

²² Tiksoota kee hunda bubbeen fudhatee sokka;
michoanni kees ni booji'amu.

Sababii hammina kee hundaatiif
ati ni qaanofta; ni salphattas.

23 Ati kan Libaanoon keessa jiraattu,
kan muka birbirsaatiin mana ijaarrattu,
yeroo dhiphinni si qabee akkuma dubartii ciniinsifattu tokkoo
miixattutti ati akkama aadda!

24 “Akkuma ani dhugumaan jiraataa ta’e” jedha WAAQAYYO; “Yaa Yehooyaakiin mooticha Yihuudaa, ilma Yehooyaaqiim, yoo ati qubeelaa chaappaa harka koo mirgaa taatee illee ani baaseen si gata. 25 Ani warra lubbuu kee galaafachuu barbaadanitti, warra ati sodaattu jechuunis Nebukadnezar mooticha Baabilonii fi Baabilonotatti dabarsee sin kenna. 26 Ani si’ii fi haadha si deesse biyya biraatti, biyya tokkoon keessan iyyuu itti hin dhalatinitti isin nan darbadhaa; isin lachuu achitti duutu. 27 Isin biyya itti deebi’uu hawwitanitti gonkumaa hin deebitan.”

28 Yehooyaakiin kun nama akkuma okkotee cabaa tuffatame,
mi’a namni tokko iyyuu hin barbaanneedhaa?
Ijoolleen isaatii fi inni maaliif
darbatamanii biyya hin beeknetti gatamani?

29 Yaa lafaa, yaa lafaa, yaa lafaa,
dubbii WAAQAYYOO dhaga’i!

30 WAAQAYYO akkana jedha:

“Namicha kana akka nama ijoollee hin qabne tokkootti,
akka nama bara jireenya isaa keessa hin milkoofne tokkootti galmeessaa;
sanyii isaa keessaa namni tokko iyyuu hin milkaa’u,
namni tokko iyyuu teessoo Daawit irra hin taa’u,
yookaan si’achi Yihuudaa hin bulchuutii.”

23

Damee Qajeelaa

1 “Tiksoota hoolota karra koo balleessanii bittinneessiniif wayyoo!” jedha WAAQAYYO.

2 Kanaafuu WAAQAYYO Waaqni Israa’el tiksoota saba koo tiksaniin akkana jedha:
“Waan isin bushaayee koo bittinneessitanii ariitanii fi eegumsa barbaachisu isaaniif hin godhiniif ani kunoo hammina isin hojjettaniif adabbii isinittin fida” jedha WAAQAYYO.

3 “Ani mataan koo hambaa bushaayee kootii biyyoota ani itti isaan ari’ee ture hunda keessaa walitti qabee karra isaaniitti nan deebisa; isaanis achitti ni horu; ni baay’atus.

4 Anis tiksoota isaan tiksan isaaniif nan ramada; isaanis si’achi hin sodaatan; yookaan hin rifatan, yookaan isaan keessaa tokko iyyuu hin badu” jedha WAAQAYYO.

5 “Barri ani itti Daawitiif damee qajeelaa tokko,
mootii ogummaadhaan bulchuu fi

waan sirrii fi qajeelaa ta’e
biyya kana keessatti hojjetu tokko kaasu ni dhufa”
jedha WAAQAYYO.

6 Bara isaa keessa Yihuudaan ni fayya;

Israa’elis nagaan jiraata;
maqaan inni ittiin waamamus:

WAAQAYYO Qajeelummaa Keenya jedhama.

7 “Kanaafuu barri itti namoonni si’achi, ‘Dhugaa WAAQAYYO jiraataa isa Israa’eloota Gibxii baasee fide sanaa’ hin jenne tokko ni dhufa” jedha WAAQAYYO; 8 “Isaan garuu, ‘Dhugaa WAAQAYYO jiraataa isa biyya Kaabaatii fi biyyoota itti isaan ari’ee ture hunda keessaa sanyiiwwan Israa’el baasee fide sanaa’ jedhu. Ergasiis isaan biyya ofii isaani keessa ni jiraatu.”

Raajota Sobduu

9 Waa’ee raajotaa,
onneen koo na keessatti cabeera,
lafeen koo hundi ni hollata;
sababii WAAQAYYOOTII fi

sababii dubbii isaa qulqulluu sanaatiif
ani akkuma nama machaa’ee
akka nama daadhii wayiniitiin mo’atamee nan ta’e.

10 Biyyattiin ejjitootaan guutamteerti,
sababii abaarsaatiif biyyattiin ni boossi;
kaloon gammoojjii keessaas ni goga.

Raajonni karaa hamaa duukaa bu’u;
aangoo isaaniittis karaa malee fayyadamu.

11 “Raajonnis, lubnis Waaqaaf hin bulan;
ani mana koo keessatti iyyuu hammina isaanii argeera”
jedha WAAQAYYO.

12 “Kanaafuu karaan isaanii mucuca ta’a;
isaan dukkanatti gad darbatamu;
achittis ni kufu.

Bara isaan adabaman keessa,
ani badiisa isaanitti nan fida”
jedha WAAQAYYO.

13 “Raajota Samaariyaa gidduutti,
ani waan jibbisiisaa kana argeera:

Isaan maqaa Ba’aaliin raajanii
saba koo Israa’elin karaa irraa jal’isan.

14 Raajota Yerusaalem gidduutti
ani waan nama suukaneessu tokko argeera;
isaan ni ejju; sobaan jiraatus.

Akka namni tokko iyyuu hammina isaa irraa hin deebineef
isaan harka jal’ootaa jajjabeessu.

Isaan hundi anaaf akkuma Sodoom;
sabni Yerusaalem immoo akkuma Gomoraa ti.”

¹⁵ Kanaafuu WAAQAYYO Waan Hunda Danda’u waa’ee raajotaa akkana jedha:
“Sababii raajota Yerusaalemiif,

waan xuraa’ummaan biyyattii keessa guuteef
ani akka isaan nyaata hadhaa’aa

nyaatanii bishaan summaa’ees dhugan nan godha.”
¹⁶ WAAQAYYO Waan Hunda Danda’u akkana jedha:

“Waan raajonni isinii raajan hin dhaggeeffatinaa;
isaan abdiin sobaatiin isin guutu.

Isaan utuu afaan WAAQAYYOOTII hin ta’in
mul’ata yaada ofii isaanii dubbatu;
yaada isaanii keessaa fuudhanii mul’ata dubbatu.

¹⁷ Isaan ittuma fufanii warra na tuffataniin,
‘WAAQAYYO akkana jedha: isin nagaa ni qabaattu’ jedhu.

Warra mata jabina yaada ofii isaanii
duukaa bu’an hundaan immoo, ‘Hamaan isin hin argatu’ jedhu.

¹⁸ Garuu isaan keessaa namni dubbii isaa arguuf yookaan dhaga’uuf
waldaa WAAQAYYOO keessa dhaabate eenyu?

Namni dubbii isaatiif gurra kennee dhaga’e eenyu?
¹⁹ Kunoo bubbleen WAAQAYYOO,

dheekkamsaan ni bu’a;
bubbleen hamaanis
mataa hamootaa irratti gad bubbisa.

²⁰ Dheekkamsi WAAQAYYOO
hamma inni kaayyoo yaada garaa isaa
guutummaan guutuutti raawwatutti duubatti hin deebi’u.

Isin bara dhumaa keessa
waan kana akka gaariitti ni hubattu.

²¹ Ani raajota kanneen hin ergine;
isaan garuu ergaa ofii isaanii qabatanii fiiganiiru;

ani isaanitti hin dubbanne;
isaan garuu raajii dubbataniiru.

²² Isaan utuu waldaa koo keessa dhaabatanii jiraatanii
silaa dubbii koo saba kootti labsanii,

karaa isaanii jal’aa sanaa fi
hojii isaanii hamaa sana irraa isaan deebisu ture.

²³ “Ani Waaqa fagootis malee
Waaqa dhi’oo qofaa?”

jedha WAAQAYYO.
²⁴ “Namni tokko iyyuu akka ani isa arguu hin dandeenyeef
iddoo dhoksaa ta’e dhokachuu ni danda’a?”

jedha WAAQAYYO.

“Ani samii fi lafa illee nan guuta mitii?”

jedha WAAQAYYO.

²⁵ “Ani waan raajonni maqaa kootiin soba raajan sun jedhan dhaga’eera; isaanis, ‘Ani abjuu abjoodheera! Ani abjuu abjoodheera!’ jedhu. ²⁶ Wannii akkasii kun hamma yoomiitti garaa raajota yaaduma ofii isaanii keessaa fuudhanii soba dubbatan kanneenii keessa jiraata? ²⁷ Raajonni kunneen abjuu walitti odeessaniin akka sabni koos akkuma abbootiin isaanii Ba’aalin waageffachuudhaan maqaa koo irraanfatanii turan sana maqaa koo irraanfachiisuu yaadu. ²⁸ Raajiin abjuu qabu abjuu isaa haa dubbatu; namni dubbii koo qabu immoo amanamummaadhaan haa dubbatu. Cidiin midhaan irraa maal qaba?” jedha WAAQAYYO. ²⁹ “Dubbiin koo akkuma ibiddaati fi akkuma burruusa kattaa caccabsu tokkoo mitii?” jedha WAAQAYYO.

³⁰ “Kanaafuu ani kunoo raajota dubbii koo wal irraa hatan sanaan nan morma” jedha WAAQAYYO. ³¹ “Kunoo ani raajota afaanuma isaaniitiin, ‘WAAQAYYO akkana jedha’ jedhaniin nan morma” jedha WAAQAYYO. ³² “Ani dhugumaan warra abjuu sobaa raajaniin nan morma” jedha WAAQAYYO, “Isaan soba itti odeessanii saba koo karaa irraa balleessu; ani garuu isaan hin ergine yookaan isaan hin muudne. Isaan gonkumaa saba kana hin fayyadan” jedha WAAQAYYO.

Raajii Sobaa

³³ “Yoo sabni kun yookaan raajiin tokko yookaan lubni tokko, ‘Ba’aan WAAQAYYOO maal?” jedhee si gaafatutti, ati immoo, ‘Ba’aa maalii? Ani sin gata jedha WAAQAYYO’ jedhiin. ³⁴ Yoo raajiin tokko yookaan lubni tokko yookaan namni kam iyyuu, ‘Ba’aan WAAQAYYOO kanaa dha,’ jedhe, ani nama sanaa fi warra mana isaa jiraatan nan adaba. ³⁵ Tokkoon tokkoon namaa michuu isaatiin yookaan fira isaatiin, ‘Deebiin WAAQAYYO kenne maali?’ Yookaan, ‘WAAQAYYO maal dubbata?’ jechuu qaba. ³⁶ Egaa isin lammata, ‘Ba’aa WAAQAYYOO,’ jettanii dubbachuu hin qabdan; dubbiiin nama hundaa ba’aa ofii isaa ta’ee isin immoo dubbii Waaqa keenyaa, Waaqa jiraataa, WAAQAYYO Waan Hunda Danda’u sanaa jal’istuutii. ³⁷ Ati ittuma fuftee raajii tokkoon, ‘Deebiin WAAQAYYO siif kenne maali?’ Yookaan ‘WAAQAYYO maal dubbate?’ jetta. ³⁸ Isin, ‘Ba’aan WAAQAYYO kanaa dha’ yoo jettan iyyuu, WAAQAYYO akkana jedha; ani ‘Ba’aan WAAQAYYOO kanaa dha’ jechuu hin qabdan isiniin jedhu iyyuu isin jecha, ‘Ba’aan WAAQAYYOO kanaa dha’ jedhutti fayyadamtu. ³⁹ Kanaafuu ani dhugumaan isin irraanfadhee magaalaa isiniin fi abbootii keessaniif kenne wajjin fuula koo duraa isin nan gata. ⁴⁰ Salphina bara baraa jechuunis qaanii bara baraa kan hin irraanfatanne isinitti nan fida.”

24

Ijaa Harbuu Guuboo Lama

¹ Erga Nebukadnezar mootichi Baabilon Yehooyaakiin mooticha Yihuudaa ilma Yehooyaqaamiin fi qondaalota Yihuudaa, ogeeyyii hojii harkaatii fi tumtuuwwan Yihuudaa booji’ee Yerusaaileemii gara Baabilonitti geessee booddee WAAQAYYO ija harbuu guuboo lama fuula mana qulqullummaa WAAQAYYOO duratti na argisiise. ² Guuboon tokko ija harbuu akka malee gaarii kan ijaa duraan bilchaate fakkaatu qaba ture; guuboon kaan immoo ija harbuu akka malee tortoree, sababii tortoruu isaatiif nyaatamuu hin dandeenye qaba ture.

³ WAAQAYYOS, “Yaa Ermiyaas, ati maal argita?” naan jedhe.

Anis, “Ija harbuu nan arga; ija gaariin akka malee gaarii dha; inni tortoraan immoo sababii akka malee tortoreef nyaatamuu hin danda’u” jedheen deebise.

⁴ Ergasii dubbiin WAAQAYYOO akkana jedhee gara koo dhufe: ⁵ “WAAQAYYO Waaqni Israa’el akkana jedha; ‘Ani booji’ amtoota Yihuudaa warra ani iddoo kanaa baasee biyya Baabilonotaatti erge sana akkuma ija gaarii kanaatti ija gaariin nan ilaala. ⁶ Ani faayidaa isaaniitiif ija koo isaan irra buufadhee biyya kanatti deebisee isaan nan fida; ani isaan ijaara malee isaan hin diigu; ani isaan dhaaba malee isaan hin buqqisu. ⁷ Ani akka isaan akka ani WAAQAYYO isaanii ta’e beekaniif qalbii nan kennaaf. Isaan saba koo ta’u; anis Waaqa isaanii nan ta’a; isaan garaa guutuudhaan gara kooti ni deebi’uutii.

⁸ “WAAQAYYO akkana jedha; ani garuu Zedeqiyaan mooticha Yihuudaa, qondaalota isaatii fi hambaawwan Yerusaaileemii kanneen biyya kana keessatti hafanii fi warra Gibxi keessa jiraatan akkuma ija harbuu kan waan akka malee tortoreef namni nyaachuu hin dandeenye sanaatti nan dhiisa. ⁹ Ani fuula mootummoota lafaa hundaa duratti balfamoo fi jibbamoo isaan nan godha; iddoo ani itti isaan bittinneessu hundattis tuffatamoo, waan kolfaa, waan qoosaatii fi waan abaarsaa isaan nan godha. ¹⁰ Ani hamma isaan

biyya ani isaanii fi abbootii isaaniitiif kenne irraa barbadaa'anitti goraadee, beelaa fi dha'icha isaanitti nan erga.'"

25

Waggaa Torbaatamaaf Booji'amu

¹ Bara Yehooyaaqii ilmi Yosiyaas mootii Yihuudaa ture keessaa waggaa afurafaatti jechuunis bara mootummaa Nebukadnezar mooticha Baabilon keessa waggaa tokkoffaatti dubbiin waa'ee saba Yihuudaa hundaatiif gara Ermiyaas dhufe kanaa dha. ² Kanaafuu Ermiyaas raajichi saba Yihuudaa hundaa fi warra Yerusaalem keessa jiraatan hundaan akkana jedhe: ³ Waggaa kudha sadaffaa bara mootummaa Yosiyaas ilma Aamoon mooticha Yihuudaatii jalqabee hamma guyyaa har'aatti jechuunis waggaa digdamii sadii guutuu dubbiin WAAQAYYOO gara koo dhufeera; anis irra deddeebi'ee isinitti himeera; isin garuu hin dhaggeeffanne.

⁴ Yoo WAAQAYYOO raajota isaa tajaajiltoota hunda ammumaa amma isinitti erge iyyuu, isin hin dhaggeeffanne yookaan xiyyeeffannaa tokko iyyuu hin kennineef. ⁵ Isaanis akkana jedhan; "Egaa tokkoon tokkoon keessan karaa keessan jal'aa fi hojii keessan hamaa sana irraa deebi'aa; yoos isin biyya WAAQAYYOO isinii fi abbootii keessanii bara baraan kenne keessa jiraachuu ni dandeessu. ⁶ Isaan tajaajiluu fi isaan waaqeffachuuf jettanii waaqota biraa duukaa hin bu'inaa; waanuma harki keessan hojjeteen dheekkamsaaf na hin kakaasinaa. Yoos ani isin hin miidhu."

⁷ "Isin garuu na hin dhaggeeffanne; waanuma harki keessan hojjeteen dheekkamsaaf na kakaafan; mataa keessanittis miidhaa fiddan" jedha WAAQAYYOO.

⁸ Kanaafuu WAAQAYYOO Waan Hunda Danda'u akkana jedhe: "Sababii isin dubbii kootiif hin ajajamiif, ⁹ ani saboota biyya kaabaa hundaa fi garbicha koo Nebukadnezar mooticha Baabilon walitti qabee biyya kanatti, jiraattota isheettii fi saboota naannoo ishee jiraatan hundatti nan kaasa; guutummaan guutuutti isaan nan balleessa; waan qaanii, waan tuffiitii fi waan bara baraan one isaan nan godha" jedha WAAQAYYOO. ¹⁰ "Ani sagalee ililleetii fi gammachuu, sagalee misirritiitii fi misirrichaa sagalee dhagaa daakuutii fi ifa ibsaa isaan keessaa nan balleessa. ¹¹ Biyyi kun guutuun barbadooftee onti; saboonni kunneenis waggaa torbaatama mooticha Baabiloniitiif garboomu.

¹² "Garuu erga waggaa torbaatamni sun dhume boodde ani mooticha Baabiloniitii fi saba isaa, biyya Baabilonotaas sababii yakka isaaniitiif nan adaba; biyyattis bara baraan nan onsa" jedha WAAQAYYOO. ¹³ "Ani waanan biyyattii irratti dubbadhe hunda, waan kitaaba kana keessatti barreeffamee fi waan Ermiyaas saboota hundatti raajii dubbate hunda biyya sanatti nan fida. ¹⁴ Isaan mataan isaanii iyyuu saboota hedduu fi mootota gurguddoo fi garboomu; anis akkuma hojii isaaniitii fi akkuma hojii harka isaaniitti gatii isaaniif malu nan kennaaf."

Xoofoo Dheekkamsa Waaqaa

¹⁵ WAAQAYYOO Waaqni Israa'el akkana naan jedhe: "Xoofoo daadhii wayinii dheekkamsa kootiitiin gutame kana ana harkaa fuudhiitii saboota ani itti si ergu hunda obaasi. ¹⁶ Isaanis yeroo isa dhuganitti ni gatantaru; sababii goraadee ani isaan gidduutti ergu sanaatiifis ni maraatu." ¹⁷ Kanaafuu ani xoofoo sana harka WAAQAYYOOTII fuudhee akka saboonni inni itti na erge hundi dhugan nan godhe:

¹⁸ Kunis akka Yerusaaleemii fi magaalaawwan Yihuudaa, mootonni fi qondaaltonni ishee akkuma har'a ta'anii jiran kana barbadeeffamanii waan salphinaa, waan tuffiitii fi waan abaarsaa ta'aniif dha;

¹⁹ Fara'oon mootichi Gibxi, tajaajiltoonni isaa, qondaaltonni isaatii fi sabni isaa hundi,

²⁰ namoonni biyya ormaa kanneen achi jiran hundi, mootonni Uuzi hundi,

mootonni Filisxeemotaa hundi jechuunis warri Eqroon, warri Gaazaa, warri Ashqaloonii fi sabni Ashdooditti hafee hundi,

²¹ Edoom, Mo'aabii fi Amoon,

²² mootonni Xiirsoosii fi Siidoonaa hundi,

mootonni biyyoota qarqara galaanaa warri galaana gama jiraatan,

²³ Dedaan, Teemaan, Buuzii fi warri biyya fagoo jiraatan hundi,

²⁴ mootonni Arabaa hundii fi mootonni Namoota Ormaa kanneen gammoojjii keessa jiraatan hundi,

²⁵ mootonni Zimrii, kan Eelaamii fi kan Meedee hundi,

²⁶ mootonni biyyoota Kaabaa kanneen dhi'oo fi fagoo, wal duraa duubaan jechuunis mootonni lafa irra jiran hundi daadhii sana dhuganiiru.

Hunda isaanii booddee immoo mootiin Sheeshaakiis ni dhuga.

²⁷ “Ergasii akkana isaaniiin jedhi; ‘WAAQAYYO Waan Hunda Danda’u, Waaqni Israa’el sun akkana jedha: Sababii goraadee ani isin gidduutti erguu sanaatiifis dhugaa, machaa’aa, hoqqisaa; akka lammata ol hin kaaneefis kukkufaa.’ ²⁸ Yoo isaan xooffoo kana si harkaa fuudhanii dhuguu didan garuu akkana jedhiin; ‘WAAQAYYO Waan Hunda Danda’u akkana jedha: Isin dhuguu qabdu! ²⁹ Kunoo, ani magaalaa Maqaa kootiin waamamutti balaa buusuu jalqabeera; isin immoo utuu hin adabamin haftuu ree? Isin utuu hin adabamin hin haftan; ani warra lafa irra jiraatan hundatti goraadee nan waamaatii, jedha WAAQAYYO Waan Hunda Danda’u.’

³⁰ “Kanaafuu dubbii kana hunda isaanitti raajiitii akkana jedhiin:

“WAAQAYYO ol gubbaadhaa guunguma;
iddoo jireenya isaa qulqulluu sanaa qaqaawweessa’ee
biyya isaattis guddisee ni guunguma.

Inni akkuma warra ija wayinii dhidhiitaniitti
warra lafa irra jiraatan hundatti ni lallaba.

³¹ Wacni hamma daarii lafaatti ni dhaga’ama;

WAAQAYYO sabootatti ni muraatii;
inni sanyii namaa hundatti murtii fida;
hamoota immoo goraadeedhaan fixa’ ”
jedha WAAQAYYO.

³² WAAQAYYO Waan Hunda Danda’u akkana jedha:

“Ilaa! Sabaa gara sabaatti
balaan babal’achaa jira;
bubbeen hamaan jabaan tokko
daarii lafaatii ka’aa jira.”

³³ Gaafas warri WAAQAYYO fixe handaara lafaa tokkoo hamma kaaniitti firfirfamanii argamu. Isaan akkuma kosii lafatti gatamu malee boo’icha hin argatan yookaan walitti hin qabaman yookaan hin awwaalaman.

³⁴ Yaa tiksoota, boo’aa, wawwaadhaas;
eegdonni bushaayees daaraa irra gangaladhaa.

Yeroon isin itti gorra’amtan dhufeeraatii;
isin kuftanii akkuma mi’a suphee miidhagaa caccabdu.

³⁵ Tiksoonni iddoo itti baqatan,
eegdonni bushaayee immoo iddoo itti miliqan hin qaban.

³⁶ Iyya tiksootaatii fi wawwaannaa
eegdota bushaayee dhaga’aa!
WAAQAYYO lafa dheeda isaanii balleessaa jiraatii.

³⁷ Sababii dheekkamsa WAAQAYYOO jabaana sanaatiif,
lafti nagaa qabu ni ona.

³⁸ Sababii goraadee cunqursitootaatii fi
sababii dheekkamsa WAAQAYYOO hamaa sanaatiif,
inni akkuma leencaa man’ee isaatii ni ba’a;
biyyi isaaniis ni onti.

26

Ermiyaas Du’aan Doorsifame

¹ Jalqaba bara mootummaa Yehooyaaqiim ilma Yosiyaa mooticha Yihuudaa sanaatti dubbiin kun WAAQAYYO biraa dhufe: ² “WAAQAYYO akkana jedha: Oobdii mana WAAQAYYOO keessa dhaabadhuutii namoota magaalaaawwan Yihuudaa keessaa ba’anii mana WAAQAYYOO keessatti waaqeffachuu dhufan hundatti dubbadhu. Waan ani si ajaju hunda itti himi; jecha tokko illee hin hambisin. ³ Tarii isaan dhaga’anii tokkoon tokkoon namaa karaa isaa hamaa sana irraa ni deebi’a ta’a. Anis gaabbee badiisa sababii hammina isaaniitiif isaanitti fiduuf yaadaa ture sana nan hambisa. ⁴ Atis akkana jedhiin; WAAQAYYO akkana jedha; ‘Yoo isin na dhaga’uu diddanii, seera koo kan ani fuula keessan dura kaa’e sana duukaa bu’uu baattan, ⁵ amma illee yoo isin dubbii tajaajiltoota koo raajota ani utuma isin dhaga’uu diddanuu amnumaa amma isinitti erge sanaa illee dhaggeeffachuu baattan, ⁶ ani mana kana akkuma Shiiloo, magaalaa kana immoo saboota lafaa hunda keessatti waan abaarsaa nan godha.’ ”

⁷ Luboonni, raajonnii fi sabni hundi Ermiyaasii dubbii kana mana WAAQAYYOO keessatti dubbatu dhaga’an. ⁸ Garuu akkuma Ermiyaas waan WAAQAYYO akka inni

dubbatsuuf isa ajaje hunda namoota hundatti, himee raawwateen luboonni, raajonni fi namoonni hundi isa qabanii akkana jedhaniin; “Ati du’uu qabda! ⁹ Ati maaliif akka manni kun akkuma Shiiloo ta’uu fi akka magaalaa kunis onee duwwaa hafu maqaa WAAQAYYOOTIIN raajii dubbatta?” Namoonni hundis mana WAAQAYYOO keessatti Ermiyaasin marsan.

¹⁰ Qondaaltonni Yihuudaa yommuu waan kana dhaga’anitti mana Mootii keessaa gara mana WAAQAYYOOTI ol ba’anii balbala karra Haaraa kan mana WAAQAYYOO dura tataa’an. ¹¹ Kana irratti luboonni fi raajonni sun qondaalotaa fi namoota hundaan, “Waan namichi kun magaalaa kana irratti raajii dubbateef duuti isatti muramuu qaba. Isin waan kana gurruuma keessaniin dhageessaniirtu!” jedhan.

¹² Ermiyaas qondaalotaa hunda fi namoota hundaan akkana jedhe; “WAAQAYYOO akka ani waan isin dhageessan kana hunda mana kanaa fi magaalaa kana irratti raajii dubbadhuuf na erge. ¹³ Kanaafuu isin amma karaa keessani fi hojii keessan qajeelfadhaa; WAAQAYYOO Waaqa keessaniif illee ajajamaa. Yoos WAAQAYYOO gaabbee balaa isinitti fiduuf yaade sana ni dhiisa. ¹⁴ Ani garuu harkuma keessan keessa nan jira; isin tarkaanfii gaarii fi qajeelaa isinitti fakkaate narratti fudhadhaa. ¹⁵ Garuu isin yoo na ajjeftan akka dhiiga nama balleessaa hin qabnee dhangalaasuu keessaniin ofitti, magaalaa kanattii fi warra ishee keessa jiraatanitti balaa fiddan beekkadhaa; WAAQAYYOO dhugumaan akka ani dubbii isin dhageessan kana hunda dubbadhuuf isinitti na ergeeraatii.”

¹⁶ Kana irratti qondaaltonni fi namoonni hundi, lubootaa fi raajotaan, “Namicha kanatti duuti muramuu hin qabu! Inni maqaa WAAQAYYOO Waaqa keenyaatiin nutti dubbatee jiraa” jedhan.

¹⁷ Maanguddoota biyyaa keessaas tokko tokko ka’anii waldaa saba guutuudhaan akkana jedhan; ¹⁸ “Bara Hisqiyaa mootii Yihuudaa ture keessa Miikiyaas namni biyya Mooresheet akkana jedhee saba Yihuudaa hundatti raajii dubbate; ‘WAAQAYYOO Waan Hunda Danda’u akkana jedha:

“Xiyoon akkuma lafa qotiisaatti qotamti;

Yerusaalemis tuullaa waan diigamee taati;

gaarri mana qulqullummaa tabba daggalaan liqimfame ta’a.’

¹⁹ “Hisqiyaa mootichi Yihuudaa yookaan saba Yihuudaa keessaa namni tokko iyyuu isa ajjeeseeraa? Hisqiyaa WAAQAYYON sodaatee araara isaa hin kadhannee? WAAQAYYOS gaabbee badiisa isaanitti fiduu yaade sana hin dhiifnee? Nus badiisa hamaa ofitti fiduu geenyeerra!”

²⁰ Namni maqaa WAAQAYYOOTIIN raajii dubbate kan biraa immoo Uuriyaa ilma Shemaa’iyaa nama biyya Kiriyaati Ye’aariim ture; innis akkuma Ermiyaas magaalaa kanaa fi biyya kana irratti raajii dubbate. ²¹ Yommuu Yehooyaaqii mootichi, ajajoonni fi qondaaltonni isaa hundi dubbii Uuriyaa dhaga’anitti mootichi isa ajjeesisuu barbaade; Uuriyaan garuu waan kana dhageenyaan sodaatee gara Gibxitti baqate.

²² Yehooyaaqii mootichi garuu Elnaataan ilma Akboor namoota biraa wajjin gara Gibxitti erge. ²³ Isaanis Uuriyaa Gibxii fidanii Yehooyaaqii mootichatti kennan; mootichis goraadeedhaan isa ajjeese; reeffa isaa immoo iddoo namoonni ulfina hin qabne itti awwaalamanitti gate.

²⁴ Ahiiqaam ilmi Shaafaan garuu Ermiyaasin deeggarre; kanaafuu Ermiyaas ajjeefamuuf dabarfamee namootatti hin kennamne.

27

Yihuudaan Nebukadnezar Tajaajila

¹ Jalqaba bara Zedeqiyaa ilmi Yosiyaa mootii Yihuudaa turetti dubbiin kun WAAQAYYOO biraa gara Ermiyaas dhufe: ² WAAQAYYOO akkana naan jedhe; “Teephaa fi danqaraadhaan waanjoo tolchiiti morma keetti kaa’adhu. ³ Ergasii karaa ergamoota Zedeqiyaa mooticha Yihuudaa bira gara Yerusaalem dhufaniitiin gara mootii Edoom, mootii Mo’aab, mootii Amoon, mootii Xiirroosii fi mootii Siidonaatti dhaamsa ergi. ⁴ Gooftota isaanitiif dhaamsa kana dabarsii akkana jedhiin; ‘WAAQAYYOO Waan Hunda Danda’u, Waaqni Israa’el akkana jedha; “Waan kana gooftota keessanitti himaa. ⁵ Ani humna koo guddaa fi irree koo diriifameen lafa, uummata isheetii fi bineensota ishee irra jiraatan uumeera; abbaa fedheef illee nan kenna. ⁶ Ani amma biyyoota keessan hunda harka garbicha koo Nebukadnezar mooticha Baabiloniitti dabarsee nan kenna. Akka bineensonni bosonaa iyyuu isa jalatti bulan nan godha. ⁷ Hamma guyyaan biyya isaa ga’utti saboonni hundi isa, ilmaan isaatii fi ilmaan ilmaan isaa tajaajilu; ergasii immoo saboonni hedduunii fi mootonni gurguddaan isa garboomfatu.

8 “ “Garuu yoo sabni yookaan mootummaan kam iyyuu Nebukadnezar mooticha Baabilon hin tajaajille yookaan yoo morma isaa waanjoo mootichaatiif gad hin qabanne ani hamman harkuma isaatiin isaan balleessutti saba sana goraadeedhaan, beelaa fi dha'ichaan nan adaba, jedha WAAQAYYO. ⁹ Kanaafuu isin raajota keessan, ilaaltota keessan, warra abjuu isiniif hiikan, eker dubbistoota keessanii fi falfaloota keessan kanneen, 'Isin mootii Baabilon hin tajaajiltan' isiniin jedhan sana hin dhaga'inaa. ¹⁰ Isaan akka isin biyya keessan keessaa buqqifamtanii fagaattaniif soba isiniif raaju; anis ari'ee isin nan baasa; isinis ni baddu. ¹¹ Garuu yoo sabni kam iyyuu morma isaa waanjoo mootii Baabiloniitiif gad qabatee isa tajaajille, ani akka sabni sun biyya ofii isaa keessatti hafee lafa qotatee achi jiraatu nan dhiisa, jedha WAAQAYYO.” ”

¹² Anis Zedeqiyaa mooticha Yihuudaatti ergaadhuma kana nan hime. Akkanan jedheen; “Morma keessan waanjoo mootii Baabiloniitiif gad qabadhaa; isaa fi saba isaa tajaajilaa; isinis ni jiraattu. ¹³ Atii fi sabni kee maaliif goraadee, beelaa fi dha'icha WAAQAYYO ittiin saba mootii Baabilon hin tajaajille kam iyyuu sodaachiseen duutu? ¹⁴ Dubbii raajota, 'Isin mootii Baabilon hin tajaajiltan' isiniin jedhanii hin dhaga'inaa; isaan raajii sobaa isiniiti dubbatuutii. ¹⁵ 'Ani isaan hin ergine' jedha WAAQAYYO. 'Jarri maqaa kootiin soba raaju. Kanaafuu ani isinii fi raajota isinii raajan illee ari'ee nan baasa; isinis ni baddu.”

¹⁶ Anis lubootaa fi namoota kana hundaan akkanan jedhe, “WAAQAYYO akkana jedha: raajota, 'Mi'i mana WAAQAYYOO ammuma Baabilonii ni deebifama' jedhan hin dhaga'inaa. Isaan soba isiniif raaju. ¹⁷ Isin jara hin dhaggeeffatinaa. Mootii Baabilon tajaajilaa; ni jiraattuutii. Magaalaan kun maaliif diigamti? ¹⁸ Isaan yoo raajota ta'anii fi yoo dubbii WAAQAYYOO of keessaa qabaatan mee akka mi'i mana WAAQAYYOO kan masaraa mootii Yihuudaatii fi Yersaaleem keessatti hafe sun gara Baabilonitti hin fudhatamneef WAAQAYYO Waan Hunda Danda'u haa kadhatan. ¹⁹ WAAQAYYO Waan Hunda Danda'u waa'ee utubootaa, waa'ee mi'a bishaan itti kuusanii, waa'ee baattuwwaniitii fi waa'ee mi'oota magaalaa kanatti hafan kanneen biraa akkana jedhaatii; ²⁰ Nebukadnezar mootiin Baabilon sun gaafa Yehooyaakiin ilma Yehooyaqaqii mooticha Yihuudaa sana namoota Yihuudaatii fi Yersaaleem ulfaatoo hunda wajjin Yersaaleemii gara Baabilonitti booji'e sana mi'oota kanneen hin fudhanne. ²¹ WAAQAYYO Waan Hunda Danda'u, Waaqni Israa'el waa'ee mi'oota mana WAAQAYYOOTII fi masaraa mootii Yihuudaatii fi Yersaaleem keessatti hafanii akkana jedha: ²² 'Isaan Baabilonitti ni geeffamu; hamma guyyaan ani isaanii dhufu ga'uttis achuma turu' jedha WAAQAYYO. 'Ergasii ani deebisee iddoo kanatti isaan nan fida.' ”

28

Hanaaniyaan Raajii Sobaa

¹ Jalqaba bulchiinsa mootummaa Zedeqiyaa mootii Yihuudaatti, ji'a shanaffaa waggaa sanaatti, waggaa afuraffaatti, Hanaaniyaan raajichi ilmi Azuri, namni Gibe'oon sun mana WAAQAYYOO keessatti, fuula lubootaatiif fi uummata hundaa duratti akkana naan jedhe: ² “WAAQAYYO Waan Hunda Danda'u, Waaqni Israa'el akkana jedha; 'Ani waanjoo mootii Baabilon nan cabsa. ³ Ani waggaa lama keessatti mi'oota mana WAAQAYYOO kanneen Nebukadnezar mootichi Baabilon asii guuree Baabilonitti geesse hunda iddoo kanatti deebisee nan fida. ⁴ Ani amma illee Yehooyaakiin ilma Yehooyaqaqii mooticha Yihuudaa sanaa fi booji'amtoota Yihuudaadhaa gara Baabilonitti geeffaman kaan hunda iddoo kanatti deebisee nan fida; ani waanjoo mootii Baabilon nan cabsaatiif' jedha WAAQAYYO.”

⁵ Ermiyaas raajichi fuuluma lubootaatiif fi uummata mana WAAQAYYOO keessa dhaabachaa turan hundaa duratti akkana jedhee Hanaaniyaa raajichaaf deebii kenne; ⁶ “Ameen! WAAQAYYO waan kana haa godhu! WAAQAYYO mi'a mana WAAQAYYOOTII fi booji'amtoota booji'aman hunda Baabilonii iddoo kanatti deebisuudhaan raajii ati dubbatte haa raawwatu. ⁷ Ta'us waan ani utuu atii fi namoonni kun hundi dhageessanuu dubbadhu kana dhaga'i: ⁸ Raajonni anaaf fi siin dura turan bara duritiiti jalqabanii akka biyyoota baay'ee fi mootummoota gurguddooti waraanni, badiisnii fi dha'ichi dhufu raajaniiru. ⁹ Raajiin nagaa raaju garuu yoo raajiin isaa sun fiixaan ba'e qofa akka WAAQAYYO biraa ergame beekama.”

¹⁰ Ergasii Hanaaniyaan raajichi morma Ermiyaas raajichaa irraa waanjoo fuudhee cabse; ¹¹ innis fuula nama hundaa duratti akkana jedhe; “WAAQAYYO akkana jedha; 'Ani waggaa lama keessatti waanjoo Nebukadnezar mooticha Baabilon morma saboota hundaa irraa akkanuma nan cabsa.' ” Kana irratti Ermiyaas raajichi karaa isaa qabatee qajele.

¹² Erga Hanaaniyaan raajichi waanjoo morma Ermiyaas raajichaa irraa cabsee booddee dubbiiin WAAQAYYOO akkana jedhee gara Ermiyaas dhufe: ¹³ “Dhaqiitii akkana jedhii Hanaaniyaatti himi; ‘WAAQAYYOO akkana jedha: Ati waanjoo mukaa cabsiteerta; garuu qooda isaa waanjoo sibiilaa ni argatta. ¹⁴ WAAQAYYOO Waan Hunda Danda’u, Waaqni Israa’el akkana jedha: Ani akka isaan Nebukadnezar mooticha Baabilon tajaajilan gochuuf morma saboota kana hundaa irra waanjoo sibiilaa nan ka’aa; isaanis isa ni tajaajilu. Ani bineensa irratti illee ol aantummaa isaaf nan kenna.’”

¹⁵ Ermiyaas raajichis Hanaaniyaa raajichaan akkana jedhe: “Yaa Hanaaniyaa dhaga’i! WAAQAYYOO si hin ergine; ati garuu akka sabni kun sobaa abdatu gooteerta. ¹⁶ Kanaafuu WAAQAYYOO akkana jedha: ‘Ani lafa irraa sin balleessa; ati waan WAAQAYYOO irratti fincila lallabdeef baruma kana duuta.’”

¹⁷ Hanaaniyaa raajichis wagguma sana keessa ji’a torbaffaatti du’e.

29

Xalayaa Booji’ amtootaaf Ergame

¹ Dubbiiin xalayaa kan Ermiyaas raajichi Yerusaaalem irraa gara maanguddoota namoota booji’aman gidduutti hafaniitii fi lubootatti, raajotattii fi warra Nebukadnezar Yerusaaaleemii booji’ee Baabilonitti geesse kaan hundatti erge sanaa kanaa dha. ² Kunis erga Yehooyaaqni mootichii fi haati isaa mootiitii, xu’aashiiwwan, dura buutota Yihuudaatii fi Yerusaaalem, ogeeyyii hojii mukaatii fi tumtuuwwan Yerusaaaleemii booji’amanii deemanii booddee ta’e. ³ Innis xalayaa sana harka Ele’asaa ilma Shaafaaniitii fi Gemaariyaa ilma Hilqiyaa warra Zedeqiyaa mootichi Yihuudaa gara Nebukadnezar mooticha Baabilonitti erge sanaatti kenne. Xalayaan sunis akkana jedha:

⁴ WAAQAYYOO Waan Hunda Danda’u, Waaqni Israa’el warra boojuudhaan Yerusaaaleemii gara Baabilonitti geffaman hundaan akkana jedha: ⁵ “Manneen ijaarradhaatii keessa jiraadhaa; biqiltuu dhaabbadhaatii ija isaa nyaadhaa. ⁶ Niitii fuudhaatii ilmaanii fi intallan dhalchaa; akka isaanis ilmaanii fi intallan dhalchaniif ilmaan keessan niitii fuusisaa; intallan keessan illee heerumsisaa. Isinis achitti baay’adhaa malee hin xinnaatinaa. ⁷ Magaalaa ani boojuudhaan itti isin ergeef illee nagaa fi badhaadhummaa hawwaa. Yoo isheen badhaate, isinis waan badhaataniif isheedhaaf WAAQAYYON kadhadaa.” ⁸ WAAQAYYOO Waan Hunda Danda’u, Waaqni Israa’el akkana jedhaatii: “Raajotaa fi ilaaltota isin gidduu jiraataniin hin gowwoomamina. Abjuu akka isaan abjootaniif isaan kakaaftan sana hin dhaggeffatinaa. ⁹ Isaan maqaa kootiin soba isiniif raaju. Ani isaan hin ergine” jedha WAAQAYYOO.

¹⁰ WAAQAYYOO akkana jedha: “Yeroo Waggaan torbaatamni Baabiloniif kenname sun xumuramutti ani gara keessan dhufeen waadaa akka iddoo kanatti isin deebisuuf gale sana nan raawwadha. ¹¹ Yaada ani isiniif qabu anatu beekaatii; innis yaada nagaati malee yaada hamaa miti; akkasumas yaada abdiitii fi kan galgala keessaniif toluu dha” jedha WAAQAYYOO. ¹² “Isinis na waammattu; dhufaniis na kadhattu; anis isin nan dhaga’a. ¹³ Isin yoo garaa keessan guutuudhaan na barbaaddan, na argattu. ¹⁴ Ani akka isin na argattan nan godha; boojuudhaa deebisees isin nan fida” jedha WAAQAYYOO. “Ani sabootaa fi lafa ani itti isin ari’ee ture hunda keessaa walitti isin qabee gara biyya ani keessaa baasee isin booji’amsiise sanaatti deebisee isinan fida” jedha WAAQAYYOO.

¹⁵ Sababii isin, “WAAQAYYOO Baabilon keessatti raajota nuu kaaseera” jettaniif ¹⁶ WAAQAYYOO waa’ee mootii teessoo Daawit irra taa’uutii fi waa’ee namoota magaalaa kana keessatti hafan hundaa, firoota keessan kanneen isin wajjin booji’amanii Baabilonitti hin geffaminii akkana jedha; ¹⁷ WAAQAYYOO Waan Hunda Danda’u akkana jedha: “Ani goraadee, beelaa fi dha’icha isaanitti nan erga; akka isaan akkuma ija harbuu kan tortoree namni nyaachuu hin dandeenyee ta’anis isaan nan godha. ¹⁸ Ani goraadee, beelaa fi dha’ichaan isaan nan ari’a; akka isaan saboota ani itti isaan ari’e hunda gidduutti waan abaarsaatii fi waan sodaachisaa, waan tuffiitii fi waan fafaa ta’anii ani fuula mootummoota lafaa hundaa duratti jibbisiisoo isaan nan godha. ¹⁹ Isaan dubbii koo, dubbii ani ammumaa amma karaa tajaajiltoota koo raajotaatiin isaanitti erge hin dhaggeeffanneetii” jedhan WAAQAYYOO. “Isin warri booji’amtanis akkasuma hin dhaggeeffanne” jedha WAAQAYYOO.

²⁰ Kanaafuu isin booji’amtoonni ani Yerusaaaleemii baasee gara Baabilonitti erge hundi dubbii WAAQAYYOO dhaga’aa. ²¹ WAAQAYYOO Waan Hunda Danda’u, Waaqni Israa’el waa’ee Ahaab ilma Qolaayaatii fi waa’ee Ma’aseyaa ilma Zedeqiyaa warra maqaa kootiin raajii sobaa isinitti dubbatan sanaa akkana jedha: “Ani dabarsee Nebukadnezar mooticha Baabilonitti isaan kenna; innis ijuma keessan duratti isaan

fixa. ²² Sababii isaaniitiifis booji'amtoonni Yihuudaa warri biyya Baabilon jiraatan, 'WAAQAYYO akka Zedeqiyaatii fi akka Ahaab warra Nebukadnezar mootichi Baabilon ibiddaan gube sanaa si haa godhu!' jedhanii wal abaaru. ²³ Isaan waan akka malee hamaa ta'e Israa'el keessatti hojjetaniiruutii; isaan niitota ollaa isaanii wajjin ejjaniiru; waan ani akka isaan hojjetan isaanitti hin himin hojjechuudhaan maqaa kootiin soba dubbatanii; ani waan kana nan beeka; dhugaa illee nan ba'a" jedha WAAQAYYO.

Dhaamsa Shemaa'iyaa Ergame

²⁴ Shemaa'iyaa namicha Nehelaamiin akkana jedhi: ²⁵ "WAAQAYYO Waan Hunda Danda'u, Waaqni Israa'el akkana jedha: Ati namoota Yerusaalem keessa jiraatan hundatti, Sefaaniyaa ilma Ma'aseyaa lubichaattii fi luboota biraa hundatti maqaa keetiin xalayaa ergiteerta. Sefaaniyaanis akkana jetteerta; ²⁶ 'WAAQAYYO akka ati mana WAAQAYYO keessatti itti gaafatamaa taatuuf iddoo Yehooyaa luba godhee si muudeera; ati maraatu raajii dubbatu kam iyyuu miilla isaa jirma gidduu, morma isaa immoo hudhaa sibiilaa keessa galchitee hidhuu qabda. ²⁷ Yoos ati maaliif Ermiyaas namicha Anaatoot kan gidduu keessanitti raajii dubbatu sana ifachuu dhiifte ree? ²⁸ Inni akkana jedhee dhaamsa kana gara keenya, gara Baabilonitti ergera: Barri boojuu ni dheerata. Kanaafuu manneen ijaarradhaatii keessa jiraadhaa; biqiltuu illee dhaabadhaa ija isaa nyaadhaa.'"

²⁹ Sefaaniyaa lubichis xalayaa sana Ermiyaas raajichaaf dubbise. ³⁰ Kana irratti dubbiin WAAQAYYO akkana jedhee gara Ermiyaas dhufe: ³¹ "Ergaa kana booji'amtoota hundatti ergi; 'WAAQAYYO waa'ee Shemaa'iyaa namicha Nehelaam sana akkana jedha: Waan Shemaa'iyaa yoo ani isa erguu baadhe iyyuu raajii isinii dubbatee akka isin soba amanattan godheef ³² WAAQAYYO akkana jedha: ani dhugumaan Shemaa'iyaa namicha Nehelaam sanaa fi sanyii isaa nan adaba. Inni saba kana gidduutti hamba tokko iyyuu hin qabaatu yookaan waan gaarii ani saba kootiif godhu hin argu; inni na mormuun fincila lallabeeraatii' jedha WAAQAYYO."

30

Sabni Israa'el Boojiudhaa Deebi'e

¹ Dubbiin WAAQAYYO biraa gara Ermiyaas dhufe isa kanaa dha: ² "WAAQAYYO Waaqni Israa'el akkana jedha: 'Dubbi ani sitti dubbadhe hunda kitaabatti barreessi. ³ Barri tokko ni dhufa' jedha WAAQAYYO; 'Innis yeroo ani itti saba koo Israa'elii fi Yihuudaa boojiudhaa deebisee biyya ani akka isaan dhaalaniif abbootii isaaniitii kenne sanatti isaan galchuu dha,' jedha WAAQAYYO."

⁴ Dubbiin WAAQAYYO waa'ee Israa'elii fi Yihuudaa dubbate kanaa dha: ⁵ "WAAQAYYO akkana jedha:

"'Iyyi sodaa ni dhaga'ama;
kun raafama malee nagaa miti.

⁶ Mee iyyaafadhaa ilaalaa:

Dhiirri tokko da'uu ni danda'aa?

Yoos ani maaliifan dhiira hunda isaa akkuma dubartii ciniinsifattuu,

harka isaa garaa ofii isaa irra kaa'atee,
fuulli isaas akka malee gurraacha'e arga ree?

⁷ Guyyaan sun akkam sodaachisaa ta'a!

Guyyaan akka guyyaa sanaa tokko iyyuu hin jiraatu.

Guyyaan sun Yaaqoobiif yeroo rakkinnaa ta'a;
inni garuu rakkina sana keessaa ni ba'a.

⁸ "'Guyyaa sana' jedha WAAQAYYO Waan Hunda Danda'u,
'Ani morma isaanii irraa waanjoo nan cabsa;

hidhaa isaanii illee nan kukkuta;

ergasii namoonni biyya ormaa isaan hin garboomfatan.

⁹ Qooda kanaa isaan WAAQAYYO Waaqa isaaniitii fi

Daawit mootii isaanii isa ani isaaniif kaasu ni tajaajilu.

¹⁰ "'Kanaafuu yaa tajaajilaa koo Yaaqoob, ati hin sodaatin;
yaa Israa'el hin rifatin'
jedha WAAQAYYO.

'Ani dhugumaan biyya fagootii sin baasa,
sanyiiwwan kee immoo biyya isaan booji'amani
itti geffamani nan baasa.

Yaaqoob ammas nagaa fi tasgabbii ni qabaata;
namni isa sodaachisu tokko iyyuu hin jiru.

11 Ani si baasuuf si wajjinan jiraatii’
jedha WAAQAYYO;

‘Ani sabootan gidduu isaanii si bittinneesse sana
guutummaan guutuutti barbadeessu iyyuu
si’i garuu guutummaan guutuutti hin barbadeessu.

Ani karaa sirrii ta’een sin adaba;
utuu si hin adabin akkasumatti si hin dhiisu.’

12 “WAAQAYYO akkana jedha:
“Madaan kee hin fayyu;
miidhamni kee waldhaansa hin qabu.

13 Namni siif falmu tokko iyyuu hin jiru;
madaa keetiif qorichi hin jiru;
ati hin fayyitu.

14 Michoonni kee hundi si dagataniiru;
isaan dhimma kee hin qaban.
Sababii yakki kee akka malee guddaa ta’ee
cubbuun kees baay’ateef
ani akkuma diinaatti si dha’ee
akkuma nama garaa jabaatu tokkoottis si adabeera.

15 Ati maaliif madaa keetii fi
dhukkuba kee kan hin fayyine sanaaf iyyita?
Sababii yakki kee guddatee cubbuun kees baay’ateef,
ani wantoota kanneen sitti fideera.

16 “ ‘Warri si nyaatan hundi garuu ni nyaatamu;
diinonni kee hundis boojiudhaan ni fudhatamu.

Warri qabeenya kee booji’an ni booji’amu;
warri si saaman hundis ni saamamu.

17 Ani garuu fayyaa kee siifin deebisa;
madaa kees siif nan fayyisa’ jedha WAAQAYYO.

‘Ati Xiyoon gamatuu
kan namni tokko iyyuu dhimma ishee hin qabne jedhamteertaatii.’

18 “WAAQAYYO akkana jedha:
“ ‘Ani hambaa dunkaana Yaaqoob kan booji’amee deebisee nan dhaaba;
iddoo jireenya isaaniiifis garaa nan laafa;
magaalattiin idduma diigamte sanatti deebitee ni ijaaramti;
masaraanis iddoo isaaf malu ni dhaabata.

19 Faarfannaan galataatii fi sagaleen gammachuu
isaan keessaa ni dhaga’ama.

Ani isaan nan baay’isa;
isaaniis hin xinnaatan;
ani ulfina nan kennaaf;
isaanis hin tuffataman.

20 Ijoolleen isaanii akka warra jabana durii ta’u;
waldaan isaanii jabaatee fuula koo dura ni dhaabata;
ani warra isaan cunqursu hunda nan adaba.

21 Hoogganaan isaanii namuma isaanii ta’a;
bulchaan isaanii isaanuma gidduudhaa ka’a.

Ani isa ofitti nan dhi’eessa;
innis natti dhi’aata;
yoo kanaa achii eenyutu natti dhi’aachuuf ija jabaata?’
jedha WAAQAYYO.

22 ‘Akkasiin isin saba koo ni taatu;
anis Waaqa keessan nan ta’a.’”

23 Kunoo, bubbleen WAAQAYYOO,
inni jabaan dheekamsaan ni bu’a;
bubbleen hamaanis
mataa hamootaa irratti gad bubbisa.

24 Aariin WAAQAYYOO, sodaachisaan sun

hamma inni kaayyoo yaada isaa
guutuumaan guutuutti fiixaan baasutti duubatti hin deebi’u.
Isin bara dhumaa keessa
waan kana ni hubattu.

31

¹ “Yeroo sanatti” jedha WAAQAYYO, “Ani balbala Israa’el hundaaf Waaqa nan ta’a; isaanis saba koo ni ta’u.”

² WAAQAYYO akkana jedha:

“Namoonni goraadee irraa hafan

gammoojjii keessatti fudhatama ni argatu;
anis Israa’eliif boqonnaa kennuuf nan dhufa.”

³ WAAQAYYO fagoodhaa natti mul’atee akkana jedhe:

“Ani jaalala bara baratiin si jaalladheera;
kanaafuu ani arjummaa kootiin ofitti si harkiseera.

⁴ Yaa Israa’el durba qulqullittii, ani amma illee sin ijaara;
atis deebitee ni ijaaranta.

Ati amma illee dibbee kee fudhattee

warra gammadan wajjin shuubbisuuf gad baata.

⁵ Ati amma illee gaarran

Samaariyaa irratti wayinii ni dhaabbatta;

qotee bulaanis wayinii dhaabbatee

ija isaa ni nyaata.

⁶ Guyyaa itti eegdonni

gaarran Efreem irra dhaabatani,

‘Kottaa gara Xiyoonitti, gara WAAQAYYO Waaqa keenyaatti ol baanaa’
jedhanii iyyan tokko ni dhufa.”

⁷ WAAQAYYO akkana jedha:

“Yaaqoobiif gammachuudhaan faarfadhaa;
hangafa sabootaatiif ililchaa.

Galata keessan dhageessisaatii,

‘Yaa WAAQAYYO saba kee,

hambaa Israa’el baraari’ jedhaa.

⁸ Kunoo, ani biyya kaabaatii isaan nan fida;

handaara lafaatiis walitti isaan nan qaba.

Isaan keessattis jaamotaa fi naafota,

haadhota ulfaatii fi dubartoota ciniinsifatantu argama;

saba guddaa ta’aniis ni deebi’u.

⁹ Isaanis boo’aa dhufu;

yeroo ani deebisee isaan fidutti Waaqa kadhatu.

Waan ani abbaa Israa’el ta’ee fi

Efreem immoo ilma koo hangafa ta’eef,

ani qarqara burqaa bishaanii irra,

daandii qajeelaa isaan achi irratti hin gufanne irra isaan nan qajeelcha.

¹⁰ “Yaa saboota, dubbii WAAQAYYO dhaga’aa;

isin, ‘Inni Israa’elin bittinneesse sun walitti isaan qabee

akkuma tiksee tokkootti bushaayee isaa ni tiksa’ jedhaatii
biyyoota qarqara galaanaa kanneen fagoo jiranitti labsaa.

¹¹ WAAQAYYO Yaaqoobin fureera,

warra isa caalaa jajjaboo ta’an harkaas isa baaseeraatii.

¹² Isaan ni dhufanii gaarran Xiyoon irrattis gammadani ililchu;

isaan arjummaa WAAQAYYOOTTI jechuunis

midhaanitti, daadhuu wayinii haaraa fi

zayitiitti, ilmoolee bushaayeettii fi jabbootaattis ni gammadu.

Jireenyi isaanii akkuma biqiltuu bishaan quufee ta’a;

isaan si’achi hin gaddan.

¹³ Ergasiis shamarran ni shuubbisu; ni gammadu;

dargaggoonni fi maanguddoonni akkasuma ni gammadu.

Ani boo’icha isaanii gammachuutti nan geeddara;

qooda gaddaa jajjabinaa fi gammachuu nan kennaaf.

¹⁴ Ani arjummaadhaan luboota nan quubsa;

sabni koos badhaadhummaa kootiin ni guutama,”
jedha WAAQAYYO.

- ¹⁵ WAAQAYYO akkana jedha:
“Sagaleen boo’ichaatii fi wawwaannaa guddaan tokko
Raamaa keessaa dhaga’ame;
sababii isaan hin jirreef,
Raahel ijoollee isheetiif boo’aa jirti;
jajjabaachuus ni didde.”
- ¹⁶ WAAQAYYO akkana jedha:
“Sagalee kee boo’icha irraa,
ija kee immoo imimmaan irraa eeggadhu;
hojiin kee ni badhaafamaatii”
jedha WAAQAYYO.
“Isaan biyya diinaatii ni deebi’u.”
- ¹⁷ Kanaafuu galgalli kee abdii qaba”
jedha WAAQAYYO.
Ijoolleen kee biyya ofii isaaniitti ni deebi’u.

- ¹⁸ “Ani dhugumaan Efreemii akkana jedhee boo’u dhaga’eera:
‘Ati akkuma dibicha hin leenjifamin
tokkootti na adabdeerta; anis adabameera.
Ati sababii WAAQAYYO Waaqa koo taateef,
na deebisi; anis nan deebi’a.”
- ¹⁹ Ani ergan duubatti deebi’ee booddee,
qalbi jijjiirradheera;
ani ergan hubadhee booddee,
qoma koo nan dha’e.
Ani sababiin salphina dargaggummaa koo baadhuuf,
nan qaana’e; gad nan deebi’es.’
- ²⁰ Efreem ilma koo jaallatamaa,
mucaa ani itti gammadu mitii?
Ani yeroo baay’ee yoon isaan morme iyyuu
amma illee isa nan yaadadha.
Kanaafuu garaan koo isaaf ni yaada;
garaas nan laafaaf”
jedha WAAQAYYO.

- ²¹ “Ati mallattoo daandii dhaabbadhu;
waan karaa nama argisiisu illee kaa’adhu.
Karaa irra deemtu,
daandii guddaa sana hubadhu.
Yaa Israa’el durba qulqullittii deebi’i;
magaalaawwan keetti deebi’i.”
- ²² Yaa intala hin amanamne,
ati hamma yoomiitti asii fi achi joorta?
WAAQAYYO waan haaraa tokko lafa irratti ni uuma;
dubartiin dhiira marsiti.”

²³ WAAQAYYO Waan Hunda Danda’u, Waaqni Israa’el akkana jedha: “Yeroo ani booji’amtoota isaanii deebisutti namoonni biyya Yihuudaatii fi magaalawwan ishee keessa jiraatan amma illee yeroo tokko, ‘Yaa iddoo murtiin qajeelaan jiraatu, yaa tulluu qulqulluu, WAAQAYYO si haa eebbisu’ jedhanii dubbatu. ²⁴ Biyya Yihuudaatii fi magaalawwan isaa hunda keessa namoonni jechuunis qonnaan bultoonnii fi warri bushaayee fudhatanii asii fi achi nanaanna’an tokkummaadhaan achi keessa jiraatu. ²⁵ Ani warra dadhaban nan jajjabeessa; warra gaggaban illee nan bayyanachiisa.”

²⁶ Kana irratti ani dammaqee asii fi achi nan ilaale. Hirribni koos natti mi’aaawee ture.
²⁷ “Barri ani itti mana Israa’elii fi mana Yihuudaa sanyii namaatii fi sanyii horiitiin guutu tokko ni dhufa” jedha WAAQAYYO. ²⁸ “Ani akkuman isaan buqqisuu fi diiguuf, isaan garagalchuuf, isaan barbadeessuu fi badiisa isaanitti fiduuf isaan ilaale sana akkasuma immoo isaan ijaaruu fi isaan dhaabuuf gara isaanii nan ilaala” jedha WAAQAYYO. ²⁹ “Bara sana keessa namoonni lammata,
“‘Abbootiin isaanii ija wayinii dhangaggaa’aa nyaannaan
ilkaan ijoollee hadoodde’ hin jedhan.

³⁰ Qooda kanaa tokkoon tokkoon namaa cubbuu ofii isaatiin du'a; nama ija wayinii dhangaggaa'aa nyaatu kam iyyuu ilkaanuma isaatu hadooda.

³¹ "Yeroon ani itti mana Israa'el wajjin,

mana Yihuudaa wajjinis
kakuu haaraa galu ni dhufa,"

jedha WAAQAYYO.

³² "Kakuun kunis kakuu ani,

yeroo biyya Gibxiitii isaan baasuuf jedhee
harka isaanii qabe sana abbootii isaanii wajjin gale,
kakuu koo kan utuma ani dhirsa isaanii ta'ee jiruu
isaan cabsan sanaan tokko miti"
jedha WAAQAYYO.

³³ "Kakuun ani yeroo sana booddee

mana Israa'el wajjin galu kanaa dha" jedha WAAQAYYO.

"Ani seera koo qalbii isaanii keessa nan kaa'a;
garaa isaanii keessattis nan barreessa.

Ani Waaqa isaanii nan ta'a;

isaanis saba koo ta'u.

³⁴ Sababii hundi isaanii,

xinnaa hamma guddaatti na beekaniif,
si'achi namni kam iyyuu, 'WAAQAYYON beeki' jedhee
ollaa isaa yookaan obboleessa isaa hin barsiisu"
jedha WAAQAYYO.

"Ani yakka isaanii nan dhiisaaf;
cubbuu isaanis si'achi hin yaadadhu."

³⁵ WAAQAYYO akkana jedha;

inni akka isheen guyyaan ibsituuf aduu ramadu,

inni akka isaan halkaniin ibsaniif,

ji'aa fi urjiwwan ajaju,

inni akka dambaliin isaa huursuuf

galaana raasu sun maqaan isaa

WAAQAYYOO Waan Hunda Danda'uu dha:

³⁶ "Yoo seerri kun fuula koo

duraa bade qofa, sanyiin Israa'el,
fuula koo duratti bara baraan saba ta'uun isaa hafa"
jedha WAAQAYYO.

³⁷ WAAQAYYO akkana jedha:

"Yoo samiin gubbaa safaramuu danda'ee fi

hundeen lafaa kan gadii qoratamee argamuu danda'e qofa

ani sanyii Israa'el hunda

sababii waan isaan hojjetan hundaatiif nan gata"

jedha WAAQAYYO.

³⁸ WAAQAYYO akkana jedha: "Barri itti magaalaa kun gamoo Hanaani'eeliitii jalqabee hamma Karra Goleetti deebi'ee naaf ijaaramu tokko ni dhufa. ³⁹ Funyoon safaraas achii ka'ee gara tulluu Gaareebitti qajelee gara Go'aatti diriirfama. ⁴⁰ Sululli reeffii fi daaraan itti gatamu guutuun, karaa ba'aas sulula Qeedroon qabatee dirreen hamma Karra Fardaatti jiru hundi WAAQAYYOF ni qulqulleeffama. Magaalaa kun gonkumaa lammaffaa hin buqqifamtu yookaan hin diigamtu."

32

Ermiyaas Lafa qotiisaa Bitate

¹ Bara Zedeqiyaa mooticha Yihuudaa keessa waggaa kudhannaffaatti bara mootummaa Nebukadnezar keessa waggaa kudha saddeettaffaatti, dubbiin kun WAAQAYYO biraa gara Ermiyaas dhufe. ² Yeroo sanatti loltoonni mootii Baabilon Yerusaleemin marsanii turan; Ermiyaas raajichi immoo masaraa mootii Yihuudaa keessatti oobdii eegumsaa keessatti itti cufamee ture.

³ Zedeqiyaa mootichi Yihuudaa akkana jedheenii isa hiisisee ture; "Ati maaliif akkana jettee raajii dubbatta? 'WAAQAYYO akkana jedha: Ani magaalaa kana dabarsee mootii Baabilonitti nan kenna; innis ni qabata. ⁴ Zedeqiyaa mootichi Yihuudaa dabarfamee mootii Baabilonitti ni kennama malee harka warra Baabilon jalaa hin ba'u; fuula mootichaa dura dhaabatees isa wajjin dubbata; ija isaatiinis isa ni arga. ⁵ Innis

Zedeqiyaa gara Baabilonitti geessa; Zedeqiyaa hamma ani isa Yaadadhutti achuma tura, jedha WAAQAYYO. Isin yoo Baabilonota loltan hin milkoofan.’”

⁶ Ermiyaas akkana jedhe; “Dubbiin WAAQAYYO akkana jedhee gara koo dhufe: ⁷ Hanani’eel ilmi eessuma keetii ilmi Shaluum si bira dhufee, ‘Ati sababii lafa kana bitachuuf mirga aantummaa qabduuf lafa qotiisaa koo kan Anaatoot keessaa sana bitadhu’ siin jedha.

⁸ “Ergasii akkuma WAAQAYYO dubbate sana Hanani’eel durbiin koo gara oobdii eegumsaatti na bira dhufee, ‘Lafa koo kan biyya Beniyaam keessa Anaatoot jiru sana bitadhu. Waan mirgi furuutii fi dhuunfachuu kan kee ta’eef ati ofii keetii bitadhu’ jedhe.

“Kana irratti ani akka wanni kun dubbii WAAQAYYO ture nan beeke; ⁹ kanaafuu ani lafa qotiisaa Anaatoot jiru sana durbiin koo Hanani’eel irraa bitadhee meetii saqilii kudha torba safaree kenneef. ¹⁰ Anis walii galtee sana mallatteessee, chaappaa itti godhee, dhuga baatota waamee meetii sana madaaliitti safareef. ¹¹ Walii galtee bittaa fi gurgurtaa jechuunis garagalchaa chaappaa qabu kan akka seeraa fi barteetti hojjetamee fi kan chaappaa hin qabnee illee nan fudhadhe; ¹² geessee fuula durbiin koo Hanani’eelii fi fuula dhuga baatota walii galtee sana irratti mallatteessaniitii fi fuula Yihuudoota oobdii eegumsaa keessa tataa’aa turan hundaa duratti Baaruk ilma Neeriya ilma Mahiseyaatti kenne.

¹³ “Anis fuuluma isaanii duratti qajeelcha kana Baarukiif kenne; ¹⁴ ‘WAAQAYYO Waan Hunda Danda’u, Waaqni Israa’el akkana jedha: walii galtee bittaa fi gurgurtaa kan chaappaa qabu fi kan chaappaa hin qabne fuudhiitii akka isaan bara dheeraa turuu danda’aniif lachuu okkotee suphee keessa kaa’i. ¹⁵ WAAQAYYO Waan Hunda Danda’u, Waaqni Israa’el akkana jedhaatii; biyya kana keessatti manneen, lafa qotiisaa fi iddoon dhaabaa wayinii amma illee ni bitamu.’

¹⁶ “Anis erga walii galtee bittaa fi gurgurtaa sana Baaruk ilma Neeriyaatti kennee booddee akkana jedheen WAAQAYYON kadhade:

¹⁷ “Yaa WAAQAYYO Gooftaa, ati humna kee guddaa fi irree kee diriirfame sanaa samiwwanii fi lafa uumteerta. Wanti ati hin dandeenye tokko iyyuu hin jiru. ¹⁸ Ati namoota kumaatamatti jaalala ni argisiifta; garuu sababii cubbuu abbootiitiif jettee ijoollee isaanii kanneen isaan booddee illee ni adabda. Yaa Waaqa guddaa fi humna qabeessa maqaan kee WAAQAYYO Waan Hunda Danda’u dha; ¹⁹ kaayyoon kee guddaa dha; hojiin kees jabaa dha. Iji kee karaa namaa hunda ilaala; ati tokkoo tokkoo namaatiif gatii karaa isaatii fi hojii isaatiif malu kennita. ²⁰ Ati Gibxi keessatti mallattoo fi dinqii hojjetee hamma har’aatti illee Israa’elii fi sanyii namaa hunda keessatti waan kana ittuma fuftee maqaa hamma ammaatti qabdu kana argatte. ²¹ Saba kee Israa’elii mallattoo fi dinqiidhaan, harka humna qabeessaan, irree diriirfamaa fi haala akka malee nama sodaachisuun Gibxi keessaa baafte. ²² Biyya aannanii fi damma baasu kan ati abbootii isaaniitiif kennuuf kakatte kana isaaniif kennite. ²³ Isaanis biyyattii seenanii dhaalan; garuu siif hin ajajamne yookaan seera kee duukaa hin buune. Waan ati akka isaan hojjetan ajajjes hin hojjenne. Kanaafuu ati badiisa kana hunda isaanitti fidde.

²⁴ “Kunoo magaalaa fudhachuuf tuullaan biyyoo itti marfameera. Sababii goraadee, beelaatii fi dha’ichaatiif magaalaa kun Baabilonota amma isa lolaa jiranitti dabarfamee ni kennama. Wanni ati dubbatte sun akkuma ati amma argitu kana fiixaan ba’eera. ²⁵ Yaa WAAQAYYO Gooftaa, ati yoo magaalattiin kun dabarfamtee Baabilonotatti kennamte iyyuu ‘Meetiidhaan lafa qotiisaa bitadhuutii bittaa fi gurgurtaa isaa illee ragaa qabaachisi’ naan jetta.”

²⁶ Ergasiis dubbiin WAAQAYYO akkana jedhee gara Ermiyaas dhufe: ²⁷ “Ani WAAQAYYO, Waaqa nama hundaa ti; wanni ani hin dandeenye tokko iyyuu jiraa? ²⁸ Kanaafuu WAAQAYYO akkana jedha: Ani magaalaa kana dabarsee Baabilonotaa fi Nebukadnezar mooticha Baabilonitti kennuuf jira; innis ishee ni qabata. ²⁹ Baabilononni magaalaa kana lolaa jiran kunneen magaalattii seenanii ibidda itti qabsiisu; isaanis manneen namoonni bantii isaanii irratti Ba’aaliif ixaana aarsuu fi waaqota biraafis dhibaayyuu dhibaafachuudhaan dheekkamsaaf na kakaasan sana illee walumaan ni gubu.

³⁰ “Sabni Israa’elii fi sabni Yihuudaa ijoollummaa isaaniitii jalqabanii fuula koo duratti waan hamaa malee homaa hin hojjenne; dhugumaan sabni Israa’el waan harkuma isaaniitiin hojjetaniin dheekkamsaaf na kakaasan malee homaa hin hojjenne, jedha WAAQAYYO. ³¹ Magaalattiin kun gaafa ijaaramtee jalqabdee hamma ammaatti akka ani fuula koo duraa ishee balleessuuf na aarsitee dheekkamsaaf na kakaaste. ³² Sabni Israa’elii fi sabni Yihuudaa jechuunis isaan, mootonni isaaniitii fi qondaaltonni isaanii, luboonni isaaniitii fi raajonni isaanii, namoonni Yihuudaatii fi namoonni Yersaaleem hammna hojjetan hundaan dheekkamsaaf na kakaasaniiru. ³³ Isaan fuula isaanii

dhiisanii dugda isaanii natti garagalfatan; yoo ani ammumaa amma isaan barsiisee iyyuu isaan na hin dhaggeeffanne yookaan qajeelfama kootiin hin geeddaramne. ³⁴ Isaan waaqota isaanii balfamoo sana mana Maqaa kootiin waamamu keessa dhaabatanii manicha xureessan. ³⁵ Isaanis ilmaan isaaniitii fi intallan isaanii aarsaa godhanii Moolekiif dhi'eessuuf jedhanii Sulula Ben Hinoom keessatti Ba'aaliif iddoo sagadaa ijaaran; ani garuu akka isaan waan jibbisiisaa akkanaa hojjetanii Yihuudaa illee cubbuu hojjechiisan gonkumaa isaan hin ajajne yookaan wannu kun qalbii koo keessa illee hin turre.

³⁶ "Ati waa'ee magaalattii kanaa, 'Isheen goraadeedhaan, beelaa fi dha'ichaan dabarfamtee mooticha Baabilonitti kennamti' jetta; WAAQAYYO Waaqni Israa'el akkana jedha: ³⁷ Ani dhugumaan biyyoota ani aarii koo sodaachisaa fi dheekkamsa koo guddaadhaan itti isaan ari'e hunda keessaa walitti isaan nan qaba; iddoo kanattis isaan deebisee nagaan isaan jiraachisa. ³⁸ Isaan saba koo ta'u; anis Waaqaa isaanii nan ta'a. ³⁹ Ani akka isaaniitii fi ijoollee isaanii kanneen isaan booddeettis jireenyi toluuf jedhanii akka bara baraan na sodaataniif garaa tokkoo fi karaa tokko isaaniifin kenna. ⁴⁰ Ani kakuu bara baraa isaan wajjin nan gala; akka isaan gonkumaa narraa hin garagalleef ani waan gaarii isaaniif gochuu hin dhiisu; akka isaan na sodaataniifis isaan nan kakaasa. ⁴¹ Ani waan gaarii isaaniif gochuutti nan gammada; garaa koo fi lubbuu koo guutuudhaan, amanamummaadhaanis biyya kana keessa isaan nan dhaaba.

⁴² "WAAQAYYO akkana jedha: Ani akkuman badiisa guddaa kana hunda saba kanatti fide sana waan gaarii waadaa isaaniif seene sana hunda nan kennaaf. ⁴³ Biyya isin, 'Biyyattiin kun ontee duwwaa hafteerti; namni yookaan bineensi ishee keessa hin jiru; isheen dabarfamtee Baabilonotatti kennamteertiitii' jettanii waa'ee ishee dubbattan kana keessatti lafti qotiisaa amma illee ni bitama. ⁴⁴ Biyya Beniyaam keessatti, gandoota naannoo Yerusaalem keessatti, magaalaawwan Yihuudaatii fi magaalaawwan biyya gaaraa keessatti, magaalaawwan gaarran dhi'aatii fi kan Negeeb keessatti lafti qotiisaa meetiidhaan ni bitama; walii galteen bittaa gurgurtaa isaas mallatteeffamee chaappaan itti godhamee dhuga baatotaa ni rageeffama; ani boojuu isaanii iddoo duriitti nan deebisaatii, jedha WAAQAYYO."

33

Waadaa Biyyatti Deebi'uu

¹ Utuu Ermiyaas amma iyyuu oobdii eegumsaa keessatti hidhamee jiruu, dubbiin WAAQAYYOO yeroo lammaffaa akkana jedhee gara isaa dhufe: ² "WAAQAYYO inni lafa uume, WAAQAYYO inni lafa tolchee jabeessee ishee dhaabe, kan maqaan isaa WAAQAYYO jedhamu sun akkana jedha; ³ 'Ati gara kooti iyyadhu; anis deebii siifin kenna; waan guddaa fi dhoksaati hin beekne sitti nan hima.' ⁴ WAAQAYYO Waaqni Israa'el waa'ee manneen magaalaana kanaatii fi waa'ee masaraa mootota Yihuudaa kanneen ittiin tuulaa biyyootii fi goraadee of irraa dhowwuuf diigaman sanaa akkana jedhaatii; ⁵ Baabilononni loluuf ni dhufu; 'Isaanis magaalaana kana reeffa namoota ani aarii fi dheekkamsa kootiin fixuutiin ni guutu. Ani sababii hammina ishee hundaatii fi magaalaana kana duraa fuula koo dhokfadheeraatii.

⁶ "Ta'us ani isaan nan fayyisa; nan bayyanachiisaa; ani saba koo nan fayyisa; akka isaan nagaa fi tasgabii guddaan jiraatan nan godha. ⁷ Ani Yihuudaa fi Israa'elin boojuudhaa deebisee akka isaan dur turanitti nan ijaara. ⁸ Cubbuu isaan natti hojjetan hunda irraa isaan nan qulqulleessa; cubbuu isaan natti finciluun hojjetan hundas nan dhiisaaf. ⁹ Magaalaana kun fuula saboota lafa irraa warra waan gaarii ani isheef godhe hunda dhaga'an hundaa duratti maqaa, gammachuu, galataa fi ulfina naa taati; isaan sababii badhaadhummaa fi nagaa ani isheef kennu hundaatiif sodaatanii hollatan.'

¹⁰ "WAAQAYYO akkana jedha: 'Isin waa'ee iddoo kanaa, 'Biyyattiin kun ontee duwwaa hafteerti; namni yookaan bineensi ishee keessa hin jiru' jettu. Ta'u illee magaalaawwan Yihuudaatii fi daandiiwwan Yerusaalem kanneen duwwaa hafanii namni yookaan bineensi keessa hin jirre sana keessatti amma illee, ¹¹ sagaleen ililleetii fi gammachuu, sagaleen misirrihaatii fi misirritii, sagaleen warra mana WAAQAYYOOTTI aarsaa dhi'eessanii kan,

"WAAQAYYO Waan Hunda Danda'u galateeffadhaa;

WAAQAYYO gaariidhaatii;

jaalalli isaas bara baraan ni jiraata"

jedhu ni dhaga'ama. Ani booji'amtoota biyyattii akkuma isaan duraan turanittin deebisaatii' jedha WAAQAYYO.

¹² “WAAQAYYO Waan Hunda Danda’u akkana jedha: ‘Iddoo onaa namni yookaan horiin keessa hin jiraanne kanaa fi magaalawwan ishee hunda keessa lafti dheedaa kan tiksoonni bushaayee isaanii itti boqochiifatan ammas ni jiraata. ¹³ Magaalawwan biyya gaaraa keessatti, kanneen gaarran dhi’aatii fi Negeeb keessatti, biyya Beniyaam keessatti, gandoota naannoo Yerusaalemii fi magaalawwan Yihuudaa keessatti amma illee bushaayeen harka nama isaan to’atuu jala ni hulluuqu’ jedha WAAQAYYO.

¹⁴ “ ‘Barri ani’ jedha WAAQAYYO ‘waadaa gaarii ani mana Israa’elii fi mana Yihuudaatiif seene sana itti fiixaan baasu ni dhufa.’

¹⁵ “ ‘Bara sana keessa, yeroo sanatti

ani akka dameen qajeelaan tokko sanyii Daawit keessaa latu nan godha; inni waan qajeelaa fi sirrii ta’e biyyattii keessatti ni hojjeta.

¹⁶ Bara sana keessa Yihuudaan ni fayya;

Yerusaalemis nagaan jiraatti.

Maqaan isheen ittiin waamamtus,

WAAQAYYO qajeelummaa keenya’ jedhama.

¹⁷ WAAQAYYO akkana jedhaatii: ‘Daawit gonkumaa nama teessoo mana Israa’el irra taa’u hin dhabu; ¹⁸ yookaan luboonni warri Lewwota ta’an gonkumaa nama aarsaa gubamu dhi’eessuuf, kennaa midhaanii gubuu fi qalma dhi’eessuuf ittuma fufee fuula koo dura dhaabatu hin dhaban.’ ”

¹⁹ Dubbiin WAAQAYYOO akkana jedhee gara Ermiyaas dhufe: ²⁰ “WAAQAYYO akkana jedha; ‘Yoo isin akka halkanii fi guyyaan yeroo isaanii kennametti hin dhufneef kakuu ani halkan wajjin galee fi kakuu ani guyyaa wajjin gale sana cabssu dandeesan, ²¹ kakuun ani garbicha koo Daawit wajjin galee fi kakuun ani Lewwota luboota ta’anii fuula koo dura tajaajilan wajjin gale sun cabuu danda’a; Daawitis si’achi sanyii teessoo isaa irra taa’ee bulchu hin qabaatu. ²² Ani sanyii garbicha koo Daawitii fi Lewwota fuula koo dura tajaajilan akkuma urjiwwan samiitii fi akkuma cirracha qarqara galaanaa kan madaalamuu hin dandeenyee nan baay’isa.’ ”

²³ Dubbiin WAAQAYYOO akkana jedhee gara Ermiyaas dhufe: ²⁴ “Ati akka uummanni kun, ‘WAAQAYYO mootummoota filatee ture lamaan gateera’ jechaa jiru hin qalbeeffannee? Kanaafuu isaan saba koo tuffataniiru; si’achis akka saba tokkootti isa hin ilaalan. ²⁵ WAAQAYYO akkana jedha: ‘Ani utuu halkanii fi guyyaa wajjin kakuu koo jabeessee dhaabuu baadhee, samii fi lafaafis seera kaa’uu baadhee, ²⁶ silaa sanyii Yaaqoobii fi sanyii tajaajilaa koo Daawit gatee akka inni sanyii Abrahaam, sanyii Yisihaaqii fi kan Yaaqoob bulchuuf ilmaan isaa keessaa nama tokko hin filadhu ture. Anis booji’amtoota isaanii nan deebisa; garaa illee nan lafaaf.’ ”

34

Akeekkachiisa Zedeqiyaaif Kenname

¹ Yeroo Nebukadnezar mootichi Baabiloniitii fi loltoonni isaa hundi, mootummoonni fi saboonni biyya inni bulchu keessa jiraatan hundi Yerusaalemii fi magaalawwan naannoo ishee hunda lolaa turanitti dubbiin akkana jedhu tokko WAAQAYYO biraa gara Ermiyaas dhufe; ² “WAAQAYYO Waaqni Israa’el akkana jedha: Gara Zedeqiyaa mooticha Yihuudaa dhaqii akkana jedhiin; ‘WAAQAYYO akkana jedha: Ani magaalaa kana dabarsee mootii Baabilonitti nan kenna; innis ishee guba. ³ Ati dhugumaan qabamtee dabarfamtee isatti kennamta malee harka isaa jalaa hin miliqxu. Mootii Baabilon ijuma keetii ni argita; innis kallattiin si wajjin ni dubbata. Atis Baabilonitti ni geeffamta.

⁴ “ ‘Ta’us yaa Zedeqiyaa mooticha Yihuudaa, ati dubbii WAAQAYYOO dhaga’i. WAAQAYYO waa’ee kee akkana jedha: Ati goraadeen hin duutu; ⁵ garuu nagumaan duuta. Namoonni akkuma ulfina awwaala abbootii keetii mootota siin duraatiif ibidda qabsiisan sana ulfina keetiif ibidda qabsiisanii, “Wayyoo yaa Gooftaa!” jedhanii boo’u. Ani mataan koo dubbii kana dubbadheeraatii, jedha WAAQAYYO.’ ”

⁶ Ermiyaas raajichi Yerusaaalem keessatti waan kana hunda Zedeqiyaa mooticha Yihuudaatti hime; ⁷ yeroo sanatti loltoonni mootii Baabilon Yerusaalemii fi magaalawwan Yihuudaa jechuunis Laakkiishii fi Azeeqaa lolaa turan. Magaalawwan Yihuudaa kanneen dallaa jabaa qaban keessaa kanneen hafan isaanuma kana qofa turaniitii.

Garboota Bilisoomsuu

⁸ Erga Zedeqiyaa mootichi bilisummaa garbootaa labsuuf jedhee uummata Yerusaaalem keessa jiraatu hunda wajjin kakuu galee booddee dubbiin tokko WAAQAYYO biraa gara Ermiyaas dhufe. ⁹ Tokkoon tokkoo namaa garba isaa dhiiraa dubartii sanyii Ibrootaa ta’an bilisa baasuu qaba ture; namni kam iyyuu Yihuudii sanyii isaa ta’e tokko garbummaa keessatti hambisuu hin qabu. ¹⁰ Kanaafuu qondaaltonnii fi namoonni

kakuu sana seenan hundi garboota isaanii dhiirotaa dubartii bilisa baasuu fi akka si'achis isaan hin garboomfanne walii galan. Isaanis tole jedhanii jara bilisa baasan. ¹¹ Ergasii garuu yaada isaanii geeddaratanii garboota bilisa baasanii turan sana deebifatanii amma illee garboomfatan.

¹² Ergasii dubbiin WAAQAYYOO akkana jedhee gara Ermiyaas dhufe: ¹³ "WAAQAYYOO Waaqni Israa'el akkana jedha: Ani yeroon Gibxii biyya garbummaatii isaan baasetti abbootii keessan wajjin akkana jedhee kakuu gale; ¹⁴ 'Tokkoon tokkoon keessan waggaa torba torbatti nama sanyii Ibrootaa kan isinitti of gurgure kam iyyuu bilisa baasuu qabdu. Erga inni waggaa ja'a isin tajaajilee booddee isin gad isa dhiisuu qabdu.' Abbootiin keessan garuu na hin dhageenye; gurras naa hin kennine. ¹⁵ Isin immoo dhi'oo kana qalbii jijjiirrattanii waan fuula koo duratti qajeelaa ta'e gootaniirtu: Tokkoon tokkoon keessanis lammiiwwan keessaniif bilisummaa labsitaniirtu. Mana Maqaa kootiin waamamu keessatti fuula koo duratti kakuu galtaniirtu. ¹⁶ Amma garuu garagaltanii maqaa koo xureessitan; tokkoon tokkoon keessan garboota dhiiraa dubartii isin akka isaan gara fedhan deemaniif bilisa baaftanii turtan sana deebifatanii fudhattaniirtu. Akka isaan ammas garboota keessan ta'aniif isaan dirqamsiiftaniirtu.

¹⁷ "Kanaafuu WAAQAYYOO akkana jedha: Isin naaf hin ajajanne; lammiiwwan keessaniif bilisummaa hin labsine. Kanaafuu ani amma, 'Bilisummaa isinii nan labsa' jedha WAAQAYYOO; 'Bilisummaan' kunis bilisummaa goraadeedhaan, dha'ichaa fi beelaan dhumuu ti. Ani fuula mootummoota lafaa hundaa durattis akka isin jibbantannan godha. ¹⁸ Warra kakuu koo cabsanii walii galtee kakuu fuula koo duratti godhan sanaa hin eegin immoo akkuma qabbii isaan iddoo lamatti qoodanii gidduu isaanii ba'ani darban sanaa nan godha. ¹⁹ Dura buutota Yihuudaatii fi Yersaaleem, qondaaltota mana murtii, lubootaa fi uummata biyyattii kanneen jabbii gargar qoodame sana gidduu ba'ani darban hunda, ²⁰ dabarsee diinota lubbuu isaanii balleessuu barbaadanitti nan kenna. Reefi isaanii allaattii samiitii fi bineensota lafaatiif nyaata ni ta'a.

²¹ "Anis Zedeqiyaa mooticha Yihuudaatii fi qondaaltota isaa dabarsee diinota isaanii warra lubbuu isaanii balleessuu barbaadanitti, loltoota mootii Baabilon kanneen isin loluu irraa deebi'anitti nan kenna. ²² Ani ajaja kennee, gara magaalaa kanaatti deebisee isaan nan fida jedha WAAQAYYOO. Isaanis ishee ni lolu; qabataniis ibiddaan ishee gubu. Anis akka namni tokko iyyuu keessa hin jiraanneef magaalawwan Yihuudaa nan onsa."

35

Rekaabota

¹ Dubbiin bara Yehooyaaqiim ilmi Yosiyaa mootii Yihuudaa turetti WAAQAYYOO biraa gara Ermiyaas dhufe akkana jedha: ² "Gara mana Rekaabotaa dhaqiiiti gara mana WAAQAYYOOTTI isaan waami; kutaa manaa tokkotti ol isaan galchiitii akka dhuganiif daadhii wayinii kenniif."

³ Anis dhaqeen Yaazaniyaa ilma Ermiyaas, ilma Habazneyaa, obboloota isaatii fi ilmaan isaa hunda jechuunis maatii Rekaabotaa guutuu waame. ⁴ Anis gara mana WAAQAYYOOTTI isaan fidee kutaa mana ilmaan Haanaan ilma Yigdaaliyaa nama Waaqaa sanaatti ol galche. Kutaan sunis kutaa qondaaltotaa kan kutaa Ma'aseyaa ilma Shaluun namicha balbala eegu sanaatii ol jirutti aana ture. ⁵ Anis waciitiwwan daadhii wayiniitiin guutamaniif fi xooffoo fuula Rekaabotaa duratti dhi'eesseen, "Daadhii wayinii kana dhugaa" jedheen.

⁶ Isaan garuu akkana jedhanii deebisan: "Nu sababii abbaan keenya Yoonadaab ilmi Rekaab akkana jedhee nu ajajeef daadhii wayinii hin dhugnu: 'Isin yookaan sanyiin keessan gonkumaa daadhii wayinii hin dhuginaa. ⁷ Akkasumas isin mana ijaarrachuu, sanyii faacaafachuu yookaan wayinii dhaabbachuu hin qabdan; isin yeroo hunda dunkaanota keessa jiraachuu qabdu malee waan kanneen keessaa tokko illee qabaachuu hin qabdan. Yoos isin biyya itti keessummaa taatan keessa bara dheeraa ni jiraattu.' ⁸ Nu waan abbaan keenya Yehoonaadaab ilmi Rekaab nu ajaje hunda eegneerra. Nu yookaan niitonna keenya yookaan ilmaanii fi intallan keenya daadhii wayinii hin dhugne. ⁹ Yookaan mana keessa jiraannu yookaan wayinii, lafa qotiisaa yookaan midhaan hin qabnu. ¹⁰ Nu dunkaana keessa jiraannee waan abbaan keenya Yoonadaab nu ajaje hunda eegneerra. ¹¹ Garuu yeroo Nebukadnezar mootichi Baabilon biyya kana qabatetti nu, 'Kottaa; nu Baabilonotaa fi loltoota Sooriyaa duraa baqannee Yersaaleemitti galuu qabna' waliin jenne. Akkasiinis nu Yersaaleem keessatti hafne."

¹² Ergasii dubbiin WAAQAYYOO akkana jedhee gara Ermiyaas dhufe: ¹³ "WAAQAYYOO Waan Hunda Danda'u, Waaqni Israa'el akkana jedha: Dhaqiiiti namoota Yihuudaatii fi saba Yersaaleemiin 'Isin gorsa koo fudhattanii naaf hin ajajantanii?' jedhi, jedha

WAAQAYYO. ¹⁴ 'Yehoonaadaab ilmi Rekaab akka ilmaan isaa daadhii wayinii hin dhugne ajaje; ajajni kunis eegameera. Isaan sababii ajaja abbaa isaanii eeganiif hamma har'aatti daadhii wayinii hin dhugan. Ani garuu ammumaa amma isinitti dubbadheera; isin immoo naaf hin ajajamne. ¹⁵ Ani tajaajiltoota koo raajota hunda ammumaa amma isinitti erge. Isaan akkana isiniin jedhan; "Tokkoon tokkoon keessan karaa keessan hamaa sana irraa deebitanii hojii keessan qajeelfachuu qabdu. Isaan tajaajiluuf jettanii waaqota biraa duukaa hin bu'inaa. Yoos isin biyya ani isinii fi abbootii keessaniif kenne keessa ni jiraattu." Isin gurra keessan naaf hin kennine, yookaan na hin dhaggeeffanne. ¹⁶ Sanyiin Yehoonaadaab ilma Rekaab ajaja abbaan isaanii isaaniif kenne eeganiiru; sabni kun garuu naaf hin ajajamne.'

¹⁷ "Kanaafuu WAAQAYYO Waan Hunda Danda'u, Waaqni Israa'el akkana jedha: 'Dhaggeeffadhaa! Ani Yihuudaattii fi nama Yerusaaalem keessa jiraatu hundatti balaa nan fida jedhee labse sana hunda nan fida. Ani isaanitti dubbadheen ture; isaan garuu hin dhaggeeffanne. Ani isaan waameen ture; isaan garuu hin owwaanne.'

¹⁸ Ermiyaasis maatii Rekaabotaatiin akkana jedhe; "WAAQAYYO Waan Hunda Danda'u, Waaqni Israa'el akkana jedha: 'Isin ajaja abbaa keessan Yehoonaadaab eegdanii gorsa isaa hunda illee duukaa butaniirtu; waan inni isin ajaje hundas hojjettaniirtu.' ¹⁹ Kanaafuu WAAQAYYO Waan Hunda Danda'u, Waaqni Israa'el akkana jedha: 'Yoon-aadaab ilmi Rekaab gonkumaa nama fuula koo dura dhaabatee na tajaajilu hin dhabu.'"

36

Barreeffama Kitaaba Maramaa Irraa

¹ Bara Yehooyaaqiim ilmi Yosiyaa mootii Yihuudaa ture keessa waggaa afuraffaatti dubbiiin akkana jedhu WAAQAYYO biraa gara Ermiyaas dhufe: ² "Kitaaba maramaa fudhadhuutii dubbii ani bara mootummaa Yosiyaa sii jalqabee hamma ammaatti waa'ee Israa'elii fi waa'ee Yihuudaa, waa'ee saboota kaan hundaas sitti dubbadhe sana hunda irratti barreessi. ³ Tarii sabni Yihuudaa yeroo waa'ee badiisa ani isaanitti fiduuf yaade hundaa dhaga'anitti tokkoon tokkoon isaanii karaa isaanii hamaa sana irraa ni deebi'u ta'a; yoos ani hammina isaaniitii fi cubbuu isaanii nan dhiisaaf."

⁴ Ermiyaasis Baaruk ilma Neeriyaa waame; Baaruk immoo dubbii WAAQAYYO dubbate sana Ermiyaas irraa dhaga'ee kitaaba maramaa irratti barreesse. ⁵ Ermiyaas akkana jedhee Baarukin ajaje; "Ani mana WAAQAYYOO seenuu dhowwameera. ⁶ Kanaafuu ati guyyaa soomaa tokko mana WAAQAYYOO dhaqiitii dubbii WAAQAYYOO kan narraa dhageessee barreessite sana kitaaba maramaa irraa sabaaf dubbisi. Namoota Yihuudaa warra magaalawwan isaanii irraa dhufan hundaaf dubbii sana dubbisi. ⁷ Tarii isaan kadhannaa isaanii fuula WAAQAYYOO duratti dhi'eefatanii tokkoon tokkoon isaanii karaa isaanii hamaa sana irraa ni deebi'u ta'a; aarii fi dheekkamsi WAAQAYYO saba kana irratti labse guddadhaatii."

⁸ Baaruk ilmi Neeriyaa waan Ermiyaas raajichi isatti hime hunda ni hojete; mana WAAQAYYOO keessattis kitaaba maramaa sana irraa dubbii WAAQAYYOO dubbise. ⁹ Bara Yehooyaaqiim ilmi Yosiyaa mootii Yihuudaa ture keessa ji'a saglaaffaa waggaa shanaffaatti guyyaan fuula WAAQAYYO duratti sooman tokko saba Yerusaaalem keessa jiraatuu fi warra magaalawwan Yihuudaatii dhufan hundaaf ni labsame. ¹⁰ Baarukis kutaa Gemaariyaa ilma Shaafaan barreessaa sanaa kan oobdi ol aanaa keessa balbala mana qulqullummaa, kan Karra Haaraa jedhamu biraa sana keessa dhaabatee saba mana qulqullummaa WAAQAYYOO keessa ture hundaaf dubbii Ermiyaas sana kitaaba maramaa irraa dubbise.

¹¹ Miikiyaas ilmi Gemaariyaa ilma Shaafaan yeroo dubbii WAAQAYYOO hunda kitaaba maramaa irraa dhaga'etti, ¹² gara kutaa barreessaa kan masaraa mootummaa keessaa, iddoo qondaaltonni hundi tataa'aa turanitti gad bu'e; isaanis Eliishaamaa barreessaa, Delaayaa ilma Shemaa'iyaa, Elnaataan ilma Akboor, Gemaariyaa ilma Shaafaan, Zedeqiyaas ilma Hanaaniyaatii fi qondaaltota biraa hundaa dha. ¹³ Miikiyaas waan yeroo Baaruk kitaaba maramaa irraa uummataaf dubbisetti dhaga'e sana hunda isaaniitti hime. ¹⁴ Qondaaltonni hundis akka inni Baarukiin, "Kitaaba maramaa uummataaf dubbifte sana fidii kottu" jedhuuf Yehudii ilma Naataaniyaa, ilma Shelemiyaa, ilma Kuushii ergan. Kanaafuu Baaruk ilmi Neeriyaa kitaaba maramaa sana harkatti qabatee gara isaanii dhaqe. ¹⁵ Jarris, "Maaloo, taa'iitii kitaabicha nuu dubbisi" jedhaniin.

Kanaafuu Baaruk kitaaba sana isaaniif dubbise. ¹⁶ Isaanis yommuu dubbii kana hunda dhaga'anitti sodaadhaan wal ilaalanii Baarukiin, "Nu waan kana hunda mootichatti himuu qabna" jedhan. ¹⁷ Ergasii isaan Baarukiin, "Mee nutti himi; ati akkamitti waan kana hunda barreessite? Ermiyaasitu sitti himee?" jedhanii gaafatan.

¹⁸ Baarukis, “Eeyyee, Ermiyaasitu dubbii kana hunda natti hime; ani immoo qalamiidhaan kitaaba maramaa irratti barreesse” jedhee deebise.

¹⁹ Kana irratti qondaaltonni sun Baarukiin, “Atii fi Ermiyaas dhaqaa dhokadhaa. Namni tokko iyyuu iddoo isin jirtan hin beekin” jedhan.

²⁰ Isaanis kitaaba maramaa sana kutaa Eliishaamaa barreessaa sanaa keessa kaa’anii mooticha bira gara oobdii dhaganii waan hunda isatti himan. ²¹ Mootichis akka inni kitaabicha fiduuf Yihuudii erge; Yehuudiinis kutaa Eliishaamaa barreessaa sanaa keessaa kitaabicha fidee mootichaa fi qondaaltota isa bira dhaabachaa turan hundaaf dubbise. ²² Yeroon sun ji’a sagalaffaa ture; mootichis mana itti yeroo gannaa dabarsu keessa taa’aa ture; ibiddi girgiraa guddaa irratti boba’us fuula isaa dura ture. ²³ Yommuu Yehuudii kitaaba maramaa sana keessaa bo’oo sadii yookaan afur dubbisutti, mootichi hamma kitaabni sun guutumaan guutuutti gubatee dhumutti haaduu barreessaatiin kukkutee girgiraa ibiddaatti darbachaa ture. ²⁴ Ta’u illee mootichii fi tajaajiltoonni isaa kanneen dubbii kana hunda dhaga’an hundi homaa hin sodaan yookaan uffata isaanii hin tarsaafne. ²⁵ Mootichi yoo Elnaataan, Delaayaa fi Gemaariyaan akka inni kitaabicha hin gubneef isa kadhatan iyyuu isaan hin dhageenye. ²⁶ Qooda kanaa mootichi akka isaan Baaruk barreessaa sanaa fi Ermiyaas raajicha hidhaniif Yerami’eel ilma mootii, Seraayaa ilma Azrii’eeliitii fi Shelemiyaa ilma Abdi’eel ajaje. WAAQAYYO garuu isaan dhoksee ture.

²⁷ Erga mootichi kitaaba maramaa kan Baaruk dubbii Ermiyaas irraa dhaga’e itti barreesse sana gubee booddee dubbiin WAAQAYYOO akkana jedhee gara Ermiyaas dhufe: ²⁸ “Kitaaba maramaa biraa fuudhiitii dubbii kitaabicha duraa kan Yehooyaaqiim mootichi Yihuudaa gube irra ture sana hunda itti barreessi. ²⁹ Yehooyaaqiim mooticha Yihuudaatiinis akkana jedhi; ‘WAAQAYYO akkana jedha: Ati kitaaba maramaa sana gubdee, “Ati maaliif akka mootiin Baabilon dhugumaan dhufee biyya kana balleessee namaa fi horii keessaa hobbaasu kitaabicha irratti barreessite?” jettee gaafatte. ³⁰ Kanaafuu WAAQAYYO waa’ee Yehooyaaqiim mooticha Yihuudaa akkana jedha: Inni nama teessoo Daawit irra taa’u hin qabaatu; reeffi isaas gad darbatamee ho’a guyyaatii fi qorra halkaniitii ni saaxilama. ³¹ Ani sababii hamma isaaniitiif isa, ijoollee isaatii fi tajaajiltoota isaa nan adaba; sababii isaan na dhageeffachuu didaniif ani balaa isaaniitii fida jedhee labse sana hunda isaaniitti, namoota Yersaalem keessa jiraatanii fi namoota Yihuudaatti nan fida.’”

³² Ergasii Ermiyaas kitaaba maramaa kan biraa fuudhee Baaruk ilma Neeriyaa barreessaa sanatti kenne; Baarukis akkuma Ermiyaas itti himetti dubbii kitaaba maramaa Yehooyaaqiim mootichi Yihuudaa ibiddaan gube sana irra ture hunda itti barreesse. Dubbiin dubbii kana fakkaattu hedduunis itti dabalameera.

37

Ermiyaas Hidhamuu Isaa

¹ Nebukadnezar mootichi Baabilon Zedeqiyaa ilma Yosiyas mootii Yihuudaa taasise; innis iddoo Yehooyaaqiin ilma Yehooyaaqiim bu’ee mootii ta’e. ² Garuu inni yookaan tajaajiltoonni isaa yookaan sabni biyya sanaa dubbii WAAQAYYO karaa Ermiyaas raajichaatiin dubbate sana hin qalbeeffanne.

³ Ta’us Zedeqiyaa mootichi, “Maaloo WAAQAYYO Waaqa keenya nuu kadhadu” jedhee Yehukaal ilma Shelemiyaatii fi Sefaaniyaa lubicha ilma Ma’aseyaa gara Ermiyaas raajichaatti erge.

⁴ Ermiyaas waan yeroo sanatti mana hidhaatti hin galfaminiif sodaa malee saba gidduu ni deddeebi’aa ture. ⁵ Loltoonni Fara’oon Gibxii ba’anii turan; Baabilononni Yersaalemin marsanii turanis yommuu waan kana dhaga’anitti Yersaalemin dhiisanii ba’an.

⁶ Kana irratti dubbiin WAAQAYYOO akkana jedhee gara Ermiyaas raajichaa dhufe: ⁷ “WAAQAYYO, Waaqni Israa’el akkana jedha: Mooticha Yihuudaa isa akka isin waa na gaafattaniif isin erge sanaan akkana jedhaa; ‘Loltoonni Fara’oon kanneen isin gargaaruuf dhufan sun gara biyya isaanii, gara Gibxitti ni deebi’u. ⁸ Ergasii Baabilononni deebi’anii magaalaa kana ni dha’u; ni qabatu; ni gubus.’

⁹ “WAAQAYYO akkana jedha: ‘Baabilononni dhugumaan nu dhiisanii deemu’ jettanii yaaduudhaan of hin gowwoomsinaa; isaan hin deemaniitii!’ ¹⁰ Utuu isin loltoota Baabilonotaa kanneen isin lolaa jiran kana hunda mo’attanii warri madaa’an gofti dunkaana isaanii keessatti hafanii iyyuu isaan gad ba’anii magaalaa kana ni gubu.”

¹¹ Erga loltoonni Baabilonotaa sababii waraana Fara’ooniif jedhanii Yersaalemin dhiisanii ba’anii as, ¹² Ermiyaas saba achi jiraatu keessaa qooda qabeenyaa kan isa

ga'u argachuuf jedhee Yerusaaemii ka'ee biyya Beniyaam dhage. ¹³ Garuu yeroo inni karra Beniyaam bira ga'etti Yiriyaan ilmi Shelemiyaa, ilmi Hanaaniyaa itti gaafatamaan eegumsaa sun, "Ati gara Baabilonotaatti sokkaa jirta!" jedhee Ermiyaas raajicha qabee hidhe.

¹⁴ Ermiyaas immoo, "Kun dhugaa miti! Ani gara Baabilonotaatti sokkuutti hin jiru" jedhe. Yiriyaan garuu isa dhaga'u ude; qooda kanaa Ermiyaasin qabee gondaaltotatti dhi'eesse. ¹⁵ Isaanis Ermiyaasitti aaranii isa tuman; mana Yoonaataan barreessaa sanaa kan mana hidhaa godhatan sana keessatti isa hidhan.

¹⁶ Ermiyaasis kutaa mana boollaa keessa buufame; achis yeroo dheeraa ture. ¹⁷ Ergasii Zedeqiyaa Mootichi nama itti ergee gara masaraa ofii isaatti isa fichisiise. Achittis kophaatti baasee, "Dubbiin WAAQAYYO biraa dhufe tokko iyyuu jiraa?" jedhee isa gaafate.

Ermiyaasis, "Eeyyee; ati dabarfamtee mootii Baabiloniitti ni kennamta" jedhee deebise.

¹⁸ Ergasii Ermiyaas, Zedeqiyaa mootichaan akkana jedhe; "Ani sitti yookaan gondaaltota keetti yookaan saba kanatti balleessaa maalii hojjennaan isin mana hidhaa keessa na buufan?" ¹⁹ Raajonni kee warri, 'Mootiin Baabilon si'i yookaan biyya kana hin lollu' jedhanii raajii siif dubbatan sun eessa jiru? ²⁰ Amma garuu gooftaa koo yaa mootichaa, maaloo na dhaga'i. Ani iyyata koo fuula kee duratti nan dhi'eeffadhaatii, mana Yoonaataan barreessaa sanaatti deebiftee na hin ergin; yoo ati na ergite ani achumatti du'aatii."

²¹ Kana irratti Zedeqiyaa Mootichi akka Ermiyaas oobdii eegumsaa keessa kaa'amuu fi akka isaan hamma buddeenni magaalaa sanaa dhumutti guyyaa guyyaatti buddeena tokko tokko warra buddeena tolchan irraa fuudhanii isaaf kennan ajaje. Akkasiin Ermiyaas oobdii eegumsaa keessa ture.

38

Ermiyaas Boolla Bishaaniitti Darbatame

¹ Shefaaxiyaa ilmi Mataan, Gedaaliyaas ilmi Phaashihuur, Yuukaal ilmi Shelemiyaatii fi Phaashihuur ilmi Malkiyaa waan Ermiyaas akkana jedhee saba hundatti hime dhaga'an; ² "WAAQAYYO akkana jedha: 'Namni magaalaa kana keessatti hafu kam iyyuu goraadeen, beelaan yookaan dha'ichaan ni du'a; namni gara Baabilonotaatti baqatu kam iyyuu garuu ni jiraata. Inni lubbuu isaatiin ni ba'a; ni jiraatas.' ³ WAAQAYYO akkana jedha: 'Magaalaan kun dhugumaan dabarfamtee harka waraana mootii Baabilonitti ni kennamti; innis ishee qabata.'"

⁴ Kana irratti gondaaltonni sun mootichaan akkana jedhan; "Namichi kun ajjeefamuu qaba. Inni waan isaaniitti dubbatuun loltoota magaalaa kana keessatti hafanii fi namoota hunda onnee dhabsiisa. Namichi kun saba kanaaf badiisa malee waan gaarii hin hawwu."

⁵ Zedeqiyaa Mootichi immoo, "Inni harkuma keessan keessa jira; mootiin isiniin mormee homaa gochuu hin danda'u" jedhee deebise.

⁶ Kanaafuu isaan Ermiyaasin fuudhanii boolla bishaanii kan Malkiyaa ilma mootichaa keessa buusan; boolli bishaanii sunis oobdii eegumsaa keessa ture. Isaan funyoodhaan Ermiyaasin boolla sana keessa buusan; boolli sun dhoqqee malee bishaan hin qabu ture; Ermiyaasis dhoqqee keessa dhidhime.

⁷ Garuu Ebeed-Melek gondaalli Itoophiyaa kan masaraa mootii keessa ture sun akka isaan Ermiyaasin boolla bishaanii keessa buusan dhaga'e. Utuma mootichi Karra Beniyaam bira taa'ee jiruu, ⁸ Ebeed-Melek masaraadhaa ba'ee dhagee akkana isaan jedhe; ⁹ "Yaa gooftaa koo mooticha, jarri kun waan Ermiyaas raajicha godhan hundaan waan hamaa hojjetaniiru. Isaan akka inni beelaan du'uuf yeroo buddeenni tokko iyyuu magaalaa keessa hin jirretti boolla bishaanii keessa isa buusan."

¹⁰ Mootichis ergasii Ebeed-Melek namicha Itoophiyaa sanaan, "Nama soddoma asii fudhadhuu dhaqiitii utuu inni hin du'in Ermiyaas raajicha boolla bishaanii keessaa baasi" jedhee ajaje.

¹¹ Kanaafuu Ebeed-Melek namoota sana fudhatee gara kutaa mankuusaa masaraa mootichaa keessaatiin jala jiru sanaa dhage. Innis darsaa fi wayyaa moofaa achii fudhatee funyoon gara boolla bishaaniitti Ermiyaasiif gad buuse. ¹² Ebeed-Melek namichi Itoophiyaa sunis Ermiyaasiin, "Akka funyoon si hin luqqisneef darsaa fi wayyaa moofaa bobaa kee jala kaa'adhu" jedhe. Ermiyaasis akkasuma godhe; ¹³ isaanis funyoo sanaan ol harkisanii boolla bishaanii keessaa isa baasan. Ermiyaasis oobdii eegumsaa keessa ture.

Zedeqiyaa Ammas Ermiyaasin Gaaffii Gaafate

¹⁴ Zedeqiyaa Mootichi Ermiyaasitti nama ergee gara balbala sadaffaa mana qulqullummaa WAAQAYYOOTTI isa fichisiise. Mootichis Ermiyaasiin, “Ani waa sin gaafadha; ati waan tokko illee na hin dhoksin” jedhe.

¹⁵ Ermiyaasis Zedeqiyaadhaan, “Yoo ani deebii siif kenne, ati na hin ajjeeftuu? Yoo ani si gorse iyyuu ati na hin dhageessu” jedhe.

¹⁶ Zedeqiyaa Mootichi garuu, “Dhugaa WAAQAYYO jiraataa isa jireenya nuu kenne sanaa ani si hin ajjeesu; warra lubbuu kee balleessuu barbaadanittis dabarsee si hin kennu” jedhee kakuu kana dhoksaatti Ermiyaasiif kakate.

¹⁷ Kana irratti Ermiyaas deebisee Zedeqiyaadhaan akkana jedhe; “WAAQAYYO Waaqni, inni Waan Hunda Danda’u, Waaqni Israa’el akkana jedha: ‘Yoo ati qondaaltota mootii Baabilonitti harka kennatte lubbuun kee du’a ni oolfamti; magaalaa kunis hin gubamtu; atii fi maatiin kee ni jiraattu. ¹⁸ Garuu yoo ati qondaaltota mootii Baabilonitti harka kennachuu baatte magaalaa kun dabarfamtee Baabilonotatti ni kennamti; isaanis ishee gubu; ati mataan kee iyyuu isaan jalaa hin baatu.’”

¹⁹ Zedeqiyaa Mootichi Ermiyaasiin, “Ani Yihuudota Baabilonotatti galan nan so-daadha; Baabilonni dabarsanii isaanitti na kennanii isaan immoo natti taphatuutii” jedhe.

²⁰ Ermiyaasis akkana jedhee deebise; “Isaan dabarsanii si hin kennan; ati waan ani sitti himu gochuudhaan WAAQAYYOF ajajami. Yoos ati milkoofttee lubbuun kees du’a oolfamti. ²¹ Garuu yoo ati harka kennachuu didde, WAAQAYYO waan kana naa ibseera: ²² Dubartoonni mana mootii Yihuudaa keessatti hafan hundi gara qondaaltota mootii Baabilonitti geffamu. Dubartoonni sunis akkana jedhu:

“ ‘Michoonni kee kanneen ati amanatte sun,
si gowwoomsanii; si mo’atan.

Miilli kee dhogqee keessa lixe;
michoonni kees si dhiisanii deeman.’

²³ “Niitonni keetii fi ijoolleen kee hundi Baabilonotatti geffamu. Ati mataan kee iyyuu mootii Baabiloniin qabamta malee isaan harkaa hin baatu; magaalaa kunis ni gubamti.”

²⁴ Zedeqiyaa Ermiyaasiin akkana jedhe; “Dubii nu amma dubbanne kana namni tokko iyyuu hin beekin; yoo kanaa achii ati ni duutaa. ²⁵ Yoo qondaaltonni akka ani si wajjin haasa’e dhaga’anii si bira dhufanii, ‘Waan ati mootiidhaan jettee fi waan mootiin siin jedhe nutti himi; nu hin dhoksin; yoo kanaa achii nu si ajjeefnaa’ siin jedhan, ²⁶ ‘Ani akka inni gara mana Yoonataanitti deebisee na ergee anis achitti hin duuneef mooticha kadhachaa ture’ jedhiin.”

²⁷ Ergasii qondaaltonni hundi dhufanii Ermiyaasin gaafatan; innis waan mootichi akka inni dubbatu isa ajaje hunda isaanitti hime. Sababii namni waan inni mooticha wajjin dubbate dhaga’e tokko iyyuu hin turiniif, jarri waan kana caalaa homaa isatti hin dubbanne.

²⁸ Ermiyaasis hamma gaafa Yersaalem qabamteetti oobdii eegumsaa sana keessa ture.

39*Kufaatii Yersaalem*

39:1-10 kwf - 2Mt 25:1-12; Erm 52:4-16

¹ Akki Yersaalem itti fudhatamte kana ture: Bara Zedeqiyaa Mooticha Yihuudaa keessa ji’a kurnaffaa waggaa saglaffaatti, Nebukadnezar mootichi Baabilon loltoota isaa hunda wajjin duulee Yersaalemin marse. ² Bara Zedeqiyaa keessa bultii saglaaffaa ji’a afuraffaa waggaa kudha tokkoffaatti, dallaan magaalaa sanaa ni cabsame. ³ Ergasii qondaaltonni mootii Baabilon hundi dhufanii Karra Giddu Galeessa dura tataa’an; isaanis Nergaal-Sharezer namicha Samgaar, Neboo-Sarsekiim ajajaa hangafa, Nergaal-Sharezer shuumii hangafaa fi qondaaltota mootii Baabilon hundaa dha. ⁴ Zedeqiyaa Mooticha Yihuudaatii fi loltoonni hundi yommuu jara arganitti ni baqatan; isaanis halkaniin karaa biqiltuu mootichaatiin magaalaa keessaa ba’anii karra dallaa lamaan gidduutiin gara Arabbaatti qajeelan.

⁵ Loltoonni Baabilonotaa garuu isaan ari’anii dirree Yerikoo irratti Zedeqiyaa in qaqqaban. Isaanis isa qabani Riiblaa Hamaati keessatti gara Nebukadnezar mooticha Baabilonitti geessan; mootichis achitti isatti mure. ⁶ Mootiin Baabilonis achuma Riiblaatti ijuma isaa duratti ilmaan Zedeqiyaa gorra’ee namoota Yihuudaa beebkamoo

hundas ajjeese. ⁷ Innis ergasii Zedeqiyaa keessaa ija isaa baasee Baabilonitti isa geessuuf foncaa naasiitiin isa hidhe.

⁸ Baabilononnis masaraa mootiitii fi manneen sabaatti ibidda qabsiisanii dallaa Yersaaleem diigan. ⁹ Nebuzaradaan ajajaan eegumsaa, namoota magaalaa keessatti hafan, namoota isatti harka kennatanii fi namoota kaan wajjin booji'ee Baabilonitti geesse. ¹⁰ Nebuzaradaan ajajaan eegumsaa sun garuu hiyyeeyyii homaa hin qabne tokko tokko biyya Yihuudaatti hambise; innis yeroo sanatti iddoo dhaabaa wayiniitii fi lafa qotiisaa kenneef.

¹¹ Nebukadnezar mootichi Baabilon akkana jedhee karaa Nebuzaradaan ajajaa eegumsaa sanaatiin waa'ee Ermiyaas ajaja kenne: ¹² "Isa fuudhiitii akka gaarii kunuunsi; waan inni barbaadu kam iyyuu godhiif malee isa hin miidhin." ¹³ Kanaafuu Nebuzaradaan ajajaan eegumsaa sun Nebuushazbaan shuumiin hangafti, Nergaal-Sharezer shuumiin ol aanaan, akkasumas qondaaltonni mootii Baabilon kaan hundi ¹⁴ ergamanii oobdii eegumsaa keessaa Ermiyaasin baasisan. Isaanis akka Gedaaliyaas ilmi Shaafaan, ilmi Ahiigaam mana isaatti isa geessuuf imaanaa itti kennan. Ermiyaasis akkasiin saba ofii isaa keessa jiraate.

¹⁵ Utuma Ermiyaas oobdii eegumsaa keessatti hidhamee jiruu dubbiin WAAQAYYOO akkana jedhee gara isaa dhufe: ¹⁶ "Dhaqiitii Ebeed-Melek namicha Itoophiyaa sanaan akkana jedhi; 'WAAQAYYOO Waan Hunda Danda'u, Waaqni Israa'el akkana jedha: Ani dubbii koo waan tolaadhaaf utuu hin ta'in waan hamaadhaaf magaalaa kana irratti fiixaan nan baasa. Yeroo sanatti wannii kun ijuma kee duratti fiixaan ba'a. ¹⁷ Ani garuu gaafas sin oolcha, jedha WAAQAYYOO; ati dabarfamtee warra sodaattu sanatti hin kennamtu. ¹⁸ Ani sin baasa; ati waan na amanattuuf lubbuu keetiin baata malee goraadeedhaan hin duutu, jedha WAAQAYYOO.'"

40

Ermiyaas Gad Dhiifame

¹ Erga Nebuzaradaan ajajaan eegumsaa sun Raamaatti gad isa dhiisee booddee dubbiin kun WAAQAYYOO biraa gara Ermiyaas dhufe. Ajajaan sun isaa booji'amtoota Yersaaleemii fi Yihuudaadhaa booji'amanii gara Baabilonitti geeffamaa turan hunda gidduutti foncaan hidhamee jiru Ermiyaasin arge. ² Ajajaan eegumsaa sunis yommuu Ermiyaasin argetti akkana jedheen; "WAAQAYYOO Waaqni kee badiisa kana iddoo kanatti labseera. ³ WAAQAYYOO amma iyyuu waan kana fideera; inni akkuma dubbate sana godheera. Sababii isin WAAQAYYOTTI cubbuu hojjettanii fi isaaf hin ajajamiif wannii kun hundi ta'e. ⁴ Ani garuu har'a foncaa harka keetii sirraa hiikeera. Ati yoo na wajjin Baabilon dhaquu feete kottu; anis sin kunuunsaa; yoo fedhuu baatte garuu hin dhufin. Kunoo biyyattiin guutumaan guutuutti fuula kee dura jirti; iddoo jaallatte dhaqi." ⁵ Ta'us utuu Ermiyaas of irra hin deebi'in Nebuzaradaan itti dabalee, "Gara Gedaaliyaas ilma Shaafaan ilma Ahiigaam isa mootichi Baabilon magaalaaawwan Yihuudaa irratti muude sanaa deebi'iitii isa wajjin saba keessa jiraadhu, yookaan iddoo jaallatte kam iyyuu dhaqi" jedheen.

Akkasiin ajajaan eegumsaa sun galaa fi kennaa kenneefii gad isa dhiise. ⁶ Kanaafuu Ermiyaas gara Gedaaliyaas ilma Ahiigaam kan Miisphaa jiraatu sanaa dhaqee isa wajjin saba biyya sanatti hafe gidduu jiraate.

Ajjeefamuu Gedaaliyaas

40:7-9; 41:1-3 kwf - 2Mt 25:22-26

⁷ Ajajjoonni loltootaa hundii fi namoonni isaanii kanneen hamma yeroo sanaatti ala turan yeroo akka mootichi Baabilon Gedaaliyaas ilma Ahiigaam sana bulchaa kutaa biyyaa godhee muudee fi akka inni dhiiraa dubartii fi ijoollee hiyyeeyyii kanneen booji'amanii gara Baabilonitti hin geffamin irratti itti gaafatama kenneef dhaga'anitti, ⁸ Gedaaliyaas bira gara Miisphaa dhufan. Isaanis Ishmaa'eel ilma Naataaniyaa, Yoohaanaanii fi Yoonaataan ilmaan Qaareyaa, Seraayaa ilma Tanhumeeti, ilmaan Eefayi namicha Netoof sanaatii fi Yezaaniyaa ilma namicha Ma'akaat, akkasumas namoota isaanii turan. ⁹ Gedaaliyaas ilmi Shaafaan, ilmi Ahiigaam akkana jedhee isaanii fi namoota isaaniiif kakate; "Baabilonota tajaajiluu hin sodaatinaa; biyyattii keessa qubadhaatii mooticha Baabilon tajaajilaa; waan gaariitu isinii ta'aatii. ¹⁰ Ani mataan koo fuula Baabilonota gara keenya dhufanii duratti iddoo keessan bu'uuf Miisphaa keessa nan tura; isin garuu wayinii, ija bonaatii fi zayitii walitti qabaatii gombisaatti naqadhaa; magaalaaawwan qabattan keessas jiraadhaa."

¹¹ Yihuudoonni Mo'aab, Amoon, Edoomii fi biyyoota biraa hunda keessa jiraatan hundi yommuu akka mootiin Baabilon Yihuudaa keessatti hambaa hambisee fi akka

inni Gedaaliyaas ilma Shaafaan ilma Ahiqaam bulchaa godhee isaan irratti muude dhaga'anitti, ¹² hundi isaanii biyyoota itti bittinnaa'an hunda keessaa ba'anii Yihuudaatti deebi'anii Miisphaatti Gedaaliyaas bira dhufan. Isaanis wayinii fi ija bonaa baay'ee walitti qabatan.

¹³ Yeroo kanatti Yoohaanaan ilmi Qaareyaatii fi ajajjoonni loltoota ala turanii hundi Gedaaliyaas bira Miisphaa dhaqanii, ¹⁴ akkana jedhaniin; "Ati akka mootiin Amoonotaa Ba'aaliis jedhamu sun si ajjeesuuf jedhee, Ishmaa'eel ilma Naataaniyaa erge hin beektuu?" Gedaaliyaas ilmi Ahiqaam garuu isaan hin amanne.

¹⁵ Kana irratti Yoohaanaan ilmi Qaareyaa Miisphaa keessatti Gedaaliyaasin kophaatti baasee akkana jedheen; "Akka ani dhaqee Ishmaa'eel ilma Naataaniyaa sana ajjeesu naa eeyyami; namni tokko iyyuu waan kana hin beeku. Inni maaliif si ajjeese akka Yihuudoonni naannoo keetti walitti qabaman hundi bittinneeffamanii hambaan Yihuudaas barbadaa'u godha?"

¹⁶ Gedaaliyaas ilmi Ahiqaam garuu, Yoohaanaan ilma Qaareyaatiin, "Ati waan akkasii hin hojjetin! Wannii ati waa'ee Ishmaa'eel dubbattu kun dhugaa mitii" jedhe.

41

¹ Ji'a torbaffaa keessa Ishmaa'eel ilmi Naataaniyaa, ilma Eliishaamaa kan sanyii mootootaa irraa dhalatee fi ajajjoota loltoota mootichaa keessaa tokko ture sun namoota kudhan wajjin Gedaaliyaas ilma Ahiqaam bira Miisphaa dhufe. Achittis utuma wajjin waa nyaatanuu ² Ishmaa'eel ilmi Naataaniyaatii fi namoonni kurnan isa wajjin turan sun ka'anii goradeedhaan Gedaaliyaas ilma Ahiqaam, ilma Shaafaan isa mootiin Baabilon bulchaa kutaa biyyaa godhee muude sana rukutanii ajjeesan. ³ Ishmaa'eel akkasumas Yihuudoota Gedaaliyaas wajjin Miisphaa turan hundaa fi loltoota Baabilonotaa kanneen achi turan illee ni fixe.

⁴ Gedaaliyaas ajjeefamee guyyaa itti aanutti utuu namni tokko iyyuu hin beekin, ⁵ namoonni areeda isaanii haaddatanii, wayyaa isaanii tatarsaasaniin, of cicciran Saddeettamni kennaa midhaaniitii fi ixaana qabatanii Sheekemii, Shiiloo fi Samaariyaadhaa gara mana WAAQAYYOO dhufan. ⁶ Ishmaa'eel ilmi Naataaniyaas jara simachuuf Miisphaadhaa boo'aa gad ba'ee. Yommuu isaan argettis "Gara Gedaaliyaas ilma Ahiqaam kottaa" jedheen. ⁷ Yeroo isaan magaalaa sana seenanitti immoo Ishmaa'eel ilmi Naataaniyaatii fi namoonni isa wajjin turan jara sana gogorra'anii boolla bishaaniitti gad darbatan. ⁸ Namoonni utuu hin ajjeefamin hafan kudhan garuu Ishmaa'eeliin, "Nu hin ajjeesin! Nu qamadii fi garbuu, zayitii fi damma lafa qotiisaa keessa dhokfanne qabnaatii" jedhan. Kanaafuu inni gad isaan dhiise; warra kaan wajjinis isaan hin ajjeefne. ⁹ Boalli bishaanii Ishmaa'eel reeffa namoota Gedaaliyaas wajjin ajjeefaman sanaa hunda itti naqe sun boolla bishaanii Aasaan Mootichi ittiin Ba'ishaan mooticha Israa'el of irraa dhowwuuf hojjetate ture. Ishmaa'eel ilmi Naataaniyaa boolla bishaanii sana reeffa namaatiin guute.

¹⁰ Ishmaa'eel namoota Miisphaa keessaa hafan hunda intallan mootichaatii fi warra achitti hafan kanneen Nebuzaradaan ajajaan eegumsaa sun Gedaaliyaas ilma Ahiqaam isaan irratti shuume ture hunda booji'e. Ishmaa'eel ilmi Naataaniyaas isaan fudhatee gara Amoonotaatti ce'uuf ka'ee qajele.

¹¹ Yoohaanaan ilmi Qaareyaatii fi ajajjoonni waraanaa kanneen isa wajjin turan hundi yeroo waa'ee yakka Ishmaa'eel ilmi Naataaniyaa hojjet hundaa dhaga'anitti ¹² namoota isaanii hunda fudhatanii Ishmaa'eel ilma Naataaniyaa loluu dhaqan. Isaanis haroo Gibe'oon guddicha biratti isa qaqqaban. ¹³ Namoonni Ishmaa'eel wajjin turan hundi yommuu Yoohaanaan ilma Qaareyaatii fi ajajjoota loltootaa kanneen isa wajjin turan arganitti ni gammadan. ¹⁴ Namoonni Ishmaa'eel Miisphaadhaa booji'ee ture hundis isa biraa deebi'anii gara Yoohaanaan ilma Qaareyaa dhaqan. ¹⁵ Garuu Ishmaa'eel ilmi Naataaniyaatii fi namoota isaa keessaa saddeeti Yoohaanaan jalaa miliqanii gara Amoonotaatti baqatan.

Gara Gibxitti Baqachuu

¹⁶ Yoohaanaan ilmi Qaareyaatii fi ajajjoonni loltoota warri isa wajjin turan hundi namoota Miisphaa warra Ishmaa'eel ilmi Naataaniyaa erga Gedaaliyaas ilma Ahiqaam ajjeese booddee booji'ee kaan hunda fuudhanii deeman; isaanis loltoota, dubartoota, ijoollee fi qondaalota mana murtii kanneen Yoohaanaan Gibe'oonii deebisee fidee dha. ¹⁷ Isaanis achii ka'anii gara Gibxitti qajeeluudhaan Beetlihem biratti Geeroti Kimhaam keessa boqotan; ¹⁸ kunis Baabilonota jalaa miliquuf ture. Isaan sababii Ishmaa'eel ilmi Naataaniyaa sun Gedaaliyaas ilma Ahiqaam isa mootiin Baabilon biyyattii irratti bulchaa godhee shuume sana ajjeeseef jara sodaatan.

42

¹ Ergasii ajajjoonni waraanaa hundi Yoohaanaan ilma Qaareyaatii fi Yezaaniyaa ilma Hoosha'iyaa dabalatee, namni hundi, xinnaa guddaan dhufanii ² Ermiyaas raajichaan akkana jedhan; "Maaloo kadhaa keenya dhaga'iitii hambaa kana hundaaf WAAQAYYO Waaqa kee kadhaddu. Nu dur baay'ee turre; amma garuu akkuma ati argitu kana nu nama muraasa qofattu hafe. ³ Akka WAAQAYYO Waaqni kee gara nu dhaquu qabnuu fi waan nu gochuu qabnu nutti himuuf nuu kadhaddu."

⁴ Ermiyaas raajichis, "Ani isin dhaga'eera; akkuma isin na gaafattan sana ani dhugumaan WAAQAYYO Waaqa keessan nan kadhadda. Waan WAAQAYYO dubbatu hundas isinitti nan hima; waan tokko illees isin hin dhoksu" jedhee deebise.

⁵ Jarris Ermiyaasiin akkana jedhan; "Yoo nu akkuma WAAQAYYO Waaqni kee akka ati nutti himtuuf si erge sana gochuu baanne WAAQAYYO mataan isaa dhuga baatuu dhugaatii fi amanamaa nutti haa ta'u. ⁶ Akka yeroo nu dubbii WAAQAYYO Waaqa keenyaatiif ajajamnutti wanni hundi nutti toluuf yoo wanni sun jaallatamaa yookaan jibbamaa ta'e illee nu dubbii WAAQAYYO Waaqa keenyaa kan itti si erganne sanaatiif ni ajajamna."

⁷ Dubbiin WAAQAYYOOS guyyaa kudhan booddee gara Ermiyaas dhufe. ⁸ Kanaafuu inni Yoohaanaan ilma Qaareyaatii fi ajajjoota waraanaa kanneen isa wajjin turan hunda, akkasumas nama xinnaa guddaa hunda walitti waame. ⁹ Innis akkana isaanin jedhe; "WAAQAYYO Waaqni Israa'el inni isin akka ani iyyata keessan itti isinii dhi'eessuuf itti na ergitan sun akkana jedha: ¹⁰ 'Yoo biyya kana keessa turtan, ani isinan ijaara malee isin hin diigu; ani isinan dhaaba malee isin hin buqqisu; ani badiisa isinitti fide sanaaf gaabbeeraatii. ¹¹ Mootii Baabilon isa amma sodaattan kana hin sodaatinaa. Ani isin baraaree harka isaatii isin baasuuf isin wajjin jiraatii. Isa hin sodaatinaa, jedha WAAQAYYO. ¹² Ani akka inni garaa isinii laafee biyya keessanitti isin deebisuuf garaa isiniif nan laafa.'

¹³ "Garuu yoo isin, 'Nu biyya kana keessa hin turru' jettanii akkasiin WAAQAYYO Waaqa keessaniif ajajamuu diddan, ¹⁴ amma illee yoo isin, 'Hin ta'u, nu biyya Gibxi keessa iddoo itti waraana hin argine yookaan malakata hin dhageenye yookaan iddoo itti hin beelofne sana dhaqnee achi jiraanna' jettan, ¹⁵ egaa yaa hambaa Yihuudaa, dubbii WAAQAYYO dhaga'aa. WAAQAYYO Waan Hunda Danda'u, Waaqni Israa'el akkana jedha: 'Yoo isin biyya Gibxitti galuu barbaaddanii achi jiraachuu dhaqan, ¹⁶ goraadeen isin sodaattan sun achumatti isin argata; beelli isin sodaattanis hamma Gibxitti isin faana bu'a; isinis achitti dhumtu. ¹⁷ Dhugumaan warri biyya Gibxitti galanii achi qubachuu barbaadan hundi goraadeen, beelaa fi dha'ichaan dhumu; isaan keessaa namni badiisa ani isaanitti fidu jalaa ba'u yookaan miliqu tokko iyyuu hin jiru.' ¹⁸ WAAQAYYO Waan Hunda Danda'u, Waaqni Israa'el akkana jedha: 'Akkuma aariin koo fi dheekkamsi koo warra Yerusaalem keessa jiraatan irratti dhangala'e sana, yoo isin biyya Gibxitti galtan dheekkamsi koo isin irratti ni dhangala'a. Isinis waan abaarsaa, waan sodaa, waan yakkaatii fi waan fafaa ni taatu; iddoo kana illee gonkumaa deebitanii hin argitan.'

¹⁹ "Yaa hambaa Yihuudaa WAAQAYYO, 'Biyya Gibxi hin dhaqinaa' isiniin jedheera. Waan kana qalbeeffadhaa: Ani har'a isin akeekkachiisaatii; ²⁰ Isin gaafa 'WAAQAYYO Waaqa keenya nuu kadhaddu; waan inni dubbate hundas nutti himi; nus ni ajajamnaaf' jettanii gara WAAQAYYO Waaqa keessanii na ergitan sana balleessaa guddaa hojjetan. ²¹ Ani har'a isinitti himeera; isin garuu waan inni akka ani isinitti himuuf na erge sana hundaan WAAQAYYO Waaqa keessaniif hin ajajamne. ²² Kanaafuu isin amma waan kana qalbeeffadhaa: Isin iddoo jiraachuu dhaquu feetan sana keessatti goraadeen, beelaa fi dha'ichaan ni dhumtu."

43

¹ Erga Ermiyaas dubbii WAAQAYYO Waaqa isaanii kan WAAQAYYO akka inni nama hundatti himuuf isa erge sana dubbatee fixee booddee, ² Azaariyaa ilmi Hoosha'iyaa, Yoohaanaan ilmi Qaareyaatii fi namoonni of tuulan hundi Ermiyaasiin akkana jedhan; "Ati ni sobda! WAAQAYYO Waaqni keenya akka ati, 'Isin achi jiraachuuf jettanii biyya Gibxi dhaquu hin qabdan' jettuuf si hin ergine. ³ Baaruk ilmi Neeriyaa garuu akka ati akka isaan nu fixaniif yookaan booji'anii Baabilonitti nu geessaniif dabarsitee harka Baabilonotaatti nu kennituuf si kakaasaa jira."

⁴ Kanaafuu Yoohaanaan ilmi Qaareyaatii fi ajajjoonni waraanaa hundii fi sabni hundi ajaja WAAQAYYO akka isaan biyya Yihuudaa turaniif kenneef sana didan. ⁵ Qooda kanaa Yoohaanaan ilmi Qaareyaatii fi ajajjoonni waraanaa hundi hambaa Yihuudaa kanneen biyyoota itti bibittinneeffaman hunda keessaa deebi'anii biyya Yihuudaa keessa jiraachuuf dhufan hunda fudhatanii deeman. ⁶ Akkasumas dhiiraa dubartii,

ijoollee fi intallan mootii kanneen Nebuzaradaan ajajaan eegumsaa sun Gedaaliyaas ilma Ahiigaam, ilma Shaafaan, Ermiyaas raajichaa fi Baaruk ilma Neeriya biratti dhiise sana hunda fudhatanii deeman. ⁷ Isaanis akkasiin WAAQAYYOOF ajajamuu diduudhaan biyya Gibxitti galanii hamma Tahiphaanhees keessa lixan.

⁸ Tahiphaanheesittis dubbiin WAAQAYYOO akkana jedhee gara Ermiyaas dhufe: ⁹ “Dhagaa gurguddaa guuriitii balbala masaraa Fara’oon kan Tahiphaanhees jiru sanaa biratti utuma Yihuudoonni ilaalanuu afaa suphee keessatti awwaali. ¹⁰ Ergasii akkana isaanin jedhi; ‘WAAQAYYO Waan Hunda Danda’u, Waaqni Israa’el akkana jedha: Ani tajaajilaa koo Nebukadnezar mooticha Baabilonitti nama ergee nan waama; teessoo isaa illee dhagaa asitti awwaale kana irra nan dhaaba; innis dunkaana mootummaa ofii isaa isa irratti ni diriirfata. ¹¹ Inni dhufee Gibxin ni lola; warra du’aaf ramadamanitti du’a, warra boojiuf ramadamanitti boojiu, warra goraadeef ramadamanitti goraadee ni fida. ¹² Inni manneen waaqeffannaa waaqota Gibxitti ibidda qabsiisa; manneen waaqeffannaa isaanii gubee waaqota isaanii tolfamoo illee booji’a. Akkuma Tikeen tokko wayyaa marxifattu sana innis biyya Gibxi marxifatee nagumaanis achii deema. ¹³ Inni achuma galma waaqeffannaa aduu biyya Gibxi keessatti utuboota waaqeffannaa caccabsee galma waaqeffannaa waaqota Gibxii illee ni guba.’”

44

Badiisa waaqota tolfamoo waaqeffachuun fide

¹ Dubbiin waa’ee Yihuudoota biyya Gibxi keessa jechuunis Migdool, Tahiphaanhees, Memfiisii fi Phaxroos keessa jiraatan hundaa dubbatu kun akkana jedhee gara Ermiyaas dhufe; ² “WAAQAYYO Waan Hunda Danda’u, Waaqni Israa’el akkana jedha: Isin badiisa guddaa ani Yersaaleemii fi magaalawwan Yihuudaa hundatti fide sana argitaniiru. Kunoo, isaan har’a onaniiru; namni tokko iyyuu isaan keessa hin jiraatu; ³ kunis sababii hammina isaan hojjetaniitiif ta’e. Isaan ixaana aarsuu fi waaqota isaan yookaan isin yookaan abbootiin keessan hin beekin biraa waaqeffachuudhaan dheekkamsaaf na kakaasan. ⁴ Anis, ‘Waan jibbiisiiisaa ani hin jaallanne kana hin hojjetinaa!’ jedhee tajaajiltoota koo raajota ammumaa amma isaanitti erge. ⁵ Isaan garuu hin dhaggeeffanne yookaan gurra hin kennineef; isaan hammina isaanii irraa hin deebine yookaan waaqota biraatiif ixaana aarsuu hin dhiifne. ⁶ Kanaafuu dheekkamsi koo sodaachisaan sun dhangala’ee magaalawwan Yihuudaatii fi daandiiwwan Yersaaleem irratti boba’e; isaanis akkuma har’a ta’ee jiru kana ni barbadaa’an; ni onanis.

⁷ “Ammas WAAQAYYO Waan Hunda Danda’u, Waaqni Israa’el akkana jedha: Isin maaliif dhiiraa fi dubartii, ijoollee fi daa’imman Yihuudaa irraa kuttanii badiisa guddaa akkanaa ofitti fiduudhaan hambaa malee of hambiftu? ⁸ Isin maaliif biyya Gibxi, lafa keessa jiraachuuf dhuftanitti waaqota biraatiif ixaana aarsuudhaan waanuma harki keessan hojjeten dheekkamsaaf na kakaaftu? Isin ofuma balleessitanii saboota lafa irraa hunda gidduutti waan abaarsaatii fi waan fafaa of gootu. ⁹ Isin hammina abbootiin keessan, mootonni Yihuudaatii fi niitonni isaanii hojjetan, akkasumas hammina isinii fi niitonni keessan biyya Yihuudaatii fi daandiiwwan Yersaaleem irratti hojjetan sana ni irraanfatanii? ¹⁰ Isaan hamma har’aatti gad of hin qabne yookaan na hin sodaanne yookaan seera kootii fi qajeelfama koo kan ani fuula keessanii fi fuula abbootii keessanii dura kaa’e sana duukaa hin buune.

¹¹ “Kanaafuu WAAQAYYO Waan Hunda Danda’u, Waaqni Israa’el akkana jedha: Ani badiisa isinitti fiduu fi Yihuudaa hunda balleessuuf kutadheera. ¹² Ani hambaa Yihuudaa kanneen biyya Gibxi dhaqanii achi jiraachuu murteeffatan nan balleessa. Isaan hundi Gibxitti dhumu; isaan goraadeedhaan kukkufu yookaan beelaan dhumu. Xinnaa guddaan isaanii goraadeedhaan yookaan beelaan du’a. Isaan waan abaarsaatii fi waan sodaa, waan yakkaatii fi waan fafaa ta’u. ¹³ Ani akkuma Yersaaleem adabe sana warra Gibxi keessa jiraatan illee goraadeedhaan, beelaa fi dha’ichaan nan adaba. ¹⁴ Hambaa Yihuudaa kanneen biyya Gibxi keessa jiraachuu dhaqan keessaa namni miliqu yookaan biyya Yihuudaa kan achi jiraachuuf hawwan sanatti deebi’u tokko iyyuu hin jiru; baqattoota tokko tokko malee isaan hin deebi’anii.”

¹⁵ Ergasii namoonni akka niitonni isaanii waaqota biraatiif ixaana aarsan beekan hundii fi dubartoonni achi turan, walumatti waldaan guddaan tokkoo fi namoonni biyya Gibxi keessa Phaxroos jiraatan hundi Ermiyaasiin akkana jedhan; ¹⁶ “Nu dubbii ati maqaa WAAQAYYOOTIIN nutti dubbatte sana hin dhageenyu! ¹⁷ Nu waan ni hojjenna jenne hunda dhugumaan ni hojjenna: Akkuma nuu fi abbootiin keenya, mootonni keenyaa fi qondaaltonni keenya magaalawwan Yihuudaatii fi daandiiwwan Yersaaleem irratti goone sana nu Mootittii Samiitiif ixaana ni aarsina; dhibaayyuus ni

dhibaafanna. Nu yeroo sanatti nyaata akka malee baay'ee qabna turre; haala tolaa keessa jiraanne malee hin miidhamne. ¹⁸ Erga Mootittii Samiitiif ixaana aarsuu fi dhibaayyuu dhibaafachuu dhiifne garuu nu goraadee fi beelaan dhumaa jirra malee homaa hin arganne.”

¹⁹ Dubartoonnis kana irratti, “Yeroo nu Mootittii Samiitiif ixaana aarsinee dhibaayyuu illee dhibaafanneef sana akka nu fakkii isheetiin keekii tolchinee dhibaayyuu dhibaafannuuf dhirsoonni keenya ni beeku mitii?” jedhan.

²⁰ Ermiyaas uummata deebii isaaf kenna ture dhiiraa dubartii hundaan akkana jedhe; ²¹ “WAAQAYYO waa'ee ixaana isinii fi abbootiin keessan, mootonni keessanii fi qondaaltonni keessan, sabni biyyattii magaalawwan Yihuudaatii fi daandiiwwan Yerusaaleem keessatti aarsitan sanaa yaadatee garaatti hin qabannee? ²² Yeroo WAAQAYYO hojii keessan hamaa fi waan jibbisiisaa isin hojjetan sana argee obsuu dadhabetti biyyi keessan akkuma amma jirtu kana waan abaarsaatii fi ona duwwaa namni keessa hin jiraanne ta'ee hafe. ²³ Sababii isin ixaana aarsitanii WAAQAYYOTTI cubbuu hojjetanii fi isaaf ajajamuu diddaniif yookaan seera isaa yookaan labsii isaa yookaan qajeelfama isaa illee duukaa bu'uu diddaniif balaan kun akkuma isin amma argitan kana isinitti dhufe.”

²⁴ Ermiyaasis saba hundaa fi dubartoota hundaan akkana jedhe; “Isin sabni Yihuudaa warri biyya Gibxi keessa jiraattan hundi dubbii WAAQAYYOO dhaga'aa. ²⁵ WAAQAYYO Waan Hunda Danda'u, Waaqni Israa'el akkana jedha: Isinii fi niittonni keessan waan, 'Nu dhugumaan wareega waaqittii samiitiif ixaana aarsuu fi dhibaayyuu illee dhibaafachuuf wareegne sana ni guunna' jettanitti waadaa galan sana hojiidhaan argisiiftaniirtu.

“Eгаа ittuma fufaatii waan waadaa galan sana raawwadhaa! Wareega keessanis guutadhaa! ²⁶ Isin Yihuudoonni biyya Gibxi keessa jiraattan hundi garuu dubbii WAAQAYYOO dhaga'aa: WAAQAYYO akkana jedha; 'Akka namni Yihuudaadhaa dhufee biyya Gibxi keessa eessa iyyuu jiraatu tokko iyyuu lammata maqaa koo hin dhoofne yookaan, “Dhugaa WAAQAYYO Goofticha jiraataa” jedhee hin kakanneen ani maqaa koo guddaadhaan nan kakadha. ²⁷ Ani waan hamaaf isaan ilaalaa jira malee waan tolaaf isaan ilaalaa hin jiruutii; Yihuudoonni biyya Gibxi keessa jiraatan hamma hundi isaanii barbadeeffamanitti goraadee fi beelaan dhumu. ²⁸ Warri goraadee jalaa miliqanii biyya Gibxi gara Yihuudaatti deebi'an akka malee xinnoo ta'u. Gaafas hambaawwan Yihuudaa kanneen biyya Gibxi keessa jiraachuuf dhufan guutuun akka dubbiin kootii fi kan isaanii keessaa kan eenyuu fiixaan ba'u ni beeku.

²⁹ “'Akka ani iddoo kanatti isin adabu wannu kun mallattoo isiniif ta'a;’ jedha WAAQAYYO; ‘kunis akka isin akka dubbiin koo dhugumaan isiniin mormee dhaabatu beektaniif.’ ³⁰ WAAQAYYO akkana jedha: ‘Ani akkuma Zedeqiyaa Mooticha Yihuudaa dabarsee diina lubbuu isaa galaafachuu barbaadutti Nebukadnezar mooticha Babilonitti kenne sana Fara'oon Hofraa mooticha Gibxi illee dabarsee diinota isaa warra lubbuu isaa galaafachuu barbaadanitti nan kenna.’”

45

Dhaamsa Baarukitti Ergame

¹ Bara Yehooyaaqiimi ilmi Yosiyaa mootii Yihuudaa ture keessa waggaa afuraffaatti Baaruk ilmi Neeriyaa dubbii Ermiyaas irraa dhaga'e kitaaba maramaa irratti barreesse; dubbiin Ermiyaas raajichi Baarukitti himes kanaa dha: ² “Yaa Baaruk, WAAQAYYO Waaqni Israa'el akkana siin jedha: ³ ati, 'Anaaf wayyoo! WAAQAYYO dhibe koo irratti gadda natti dabaleera; ani aaduuhaan laafee boqonnaa dhabeera' jette. ⁴ WAAQAYYO akkana jedhe; 'Akkana jedhiin: WAAQAYYO akkana jedha; ani guutummaa biyyattii keessaa waanan ijaare nan diiga; waanan dhaabe illee nan buqqisa. ⁵ Eгаа ati offii keetiif waan gurguddaa ni barbaaddaa? Isaan hin barbaadin. Ani saba hundatti badiisa nan fida; garuu lafa dhaqxu hundatti lubbuu kee boojuu godhee siifan kenna, jedha WAAQAYYO.’”

46

Ergaa Waa'ee Gibxi

¹ Dubbiin WAAQAYYOO kan waa'ee sabootaatiif gara Ermiyaas raajichaa dhufe kanaa dha:

² Waa'ee Gibxi:

Bara Yehooyaaqiim ilmi Yosiyaa mootii Yihuudaa ture keessa, waggaa afuraffaatti ergaan kun gara waraana Fara'oon Nekkoo mooticha Gibxi kan Nebukadnezar mootichi Baabilon laga Efraaxiis biratti Karkerniishitti mo'ate sanaa dhufe:

³ “Gaachana keessan xinnaa fi

guddaa qopheeffadhaatii lolaaf ba'aa!

⁴ Fardeen fe'adhaa;

isaan yaabbadhaas!

Qoobii sibiilaa kaa'adhaatii

iddoo iddoo keessan qabadhaa.

Eeboo keessan qaradhaa;

qomee sibiilaa illee uffadhaa!

⁵ Ani maal argaan jira?

Isaan na'anii jiru;

dugda duubatti deebi'aa jiru;

gootonni isaanii mo'atamaniiru.

Isaan utuu of duuba hin mil'atin ariitiin baqatu;

qixa hundaanuu gooliitu jira”

jedha WAAQAYYO.

⁶ “Fiigaan baqachuu hin danda'u;

yookaan namni jabaan jalaa hin ba'u.

Isaan karaa kaabaatiin

Laga Efraaxiis biratti guggufatanii kukkufu.

⁷ “Kan akka Abbayyaa,

akka laga bishaan isaa cabsee yaa'uu ol ka'u kun eenyu?

⁸ Gibxi akkuma Abbayyaa,

akkuma laga bishaan isaa cabsee yaa'uutti ol kaati.

Isheenis, 'Ani ol ka'ee lafa nan haguuga;

magaalaawwanii fi saba isaanii nan balleessa' jetti.

⁹ Yaa fardeen, isin garmaamaa!

Yaa gaariwwan, isinis guulaa!

Yaa gootota Itoophiyaatii fi Fuuxi warri gaachana baattan,

yaa namoota Luudi warri iddaa qabattan ka'aatii

fuula duratti qajeelaa.

¹⁰ Guyyaan sun garuu guyyaa Gooftaa,

kan WAAQAYYO Waan Hunda Danda'uu,

guyyaa haaloo ba'uu, kan inni itti diinota isaa haaloo baafatuu dha.

Goraadeen hamma quufutti,

hamma dheebuu dhiigaan ba'utti nyaata.

Gooftaan, WAAQAYYON Waan Hunda Danda'u

biyya kaabaa keessatti, Laga Efraaxiis biratti aarsaa dhi'eessaatii.

¹¹ “Yaa Gibxi durba qulqullittii,

Gili'aaditti ol ba'iitii qoricha fudhadhu.

Ati akkasumaan qoricha hedduutti fayyadamta;

garuu hin fayyitu.

¹² Saboonni qaanii kee ni dhaga'u;

boo'ichi kee lafa guuta.

Goonni tokko goota kaanitti gufata;

isaan lamaanuu wal qabatanii kufu.”

¹³ “Dubbiin WAAQAYYO akka Nebukadnezar mootiin Baabilon dhufee Gibxi dha'u Ermiyaas raajichatti dubbate kanaa dha:

¹⁴ “Waan kana Gibxi keessatti dubbadhu; Migdoolittis labsi;

Memfiisii fi Tahiphaanhees keessatti illee akkana jedhaa labsaa:

'Goraadeen warra naannoo keessan jiru ni fixaatii

isin iddoo iddoo keessan qabadhaatii qophaa'aa.'

¹⁵ Gootonni kee maaliif kufanii diriiru?

Sababii WAAQAYYO gad isaan qabuuf isaan dhaabachuu hin danda'an.

¹⁶ Isaan ammumaa amma gufatu;

wal irrattis kukkufu.

Isaanis, 'Ka'aa goraadee cunqursaa

jalaa baanee gara saba keenyaattii fi

biyya itti dhalannetti ni deebinaa' waliin jedhu.

¹⁷ Isaan achitti,

'Fara'oon mootichi Gibxi waca qofa;
inni carraa ofii isaa dhabeera' jedhanii iyyu.

¹⁸ "Dhugaa ana jiraataa" jedha mootichi inni maqaan isaa
WAAQAYYOO Waan Hunda Danda'u ta'e sun

"kan gaarran keessaa Taaboor fakkaatu,
inni galaana cinatti Qarmeloosin fakkaatu tokko ni dhufa.

¹⁹ Ati kan Gibxi keessa jiraattu,
waan qabdu walitti qabadhuutii baqaaf qophaa'i;

Memfiis ontee diigamtee
jiraattota malee haftiitii.

²⁰ "Gibxi goromsa bareedduu dha;
garuu qarxaasaan
biyya kaabaatii isheetti ni dhufa.

²¹ Loltoonni isheen kiraadhaan bitattee gidduu ishee jiranis
akkuma jiboota cocoomanii ti.

Sababii guyyaan badiisaa,
yeroon itti isaan adabaman isaanitti dhufeef
isaanis garagalanii walumaan ni baqatu;
iddoo isaanii dhaabatanii of irraa deebisuu hin danda'an.

²² Gibxi yeroo diinni isheetti dhufutti
akkuma bofa waa baqatuu siiqsiti;
isaan akkuma namoota muka muraniitti
qottoo qabatanii isheetti dhufu.

²³ Yoo inni hamma fedhe gobbate iyyuu,
isaan bosona ishee ciranii balleessu"
jedha WAAQAYYOO.

"Isaan hawwaannisa caalaa baaya'atu;
lakkaa'amuus hin danda'an.

²⁴ Intalli Gibxi ni qaaneffamti;
dabarfamtees namoota kaabaatti ni kennamti."

²⁵ WAAQAYYOO Waan Hunda Danda'u, Waaqni Israa'el akkana jedha: "Ani Aamoon Waaqa Tebesitti, Fara'oonitti, Gibxittii fi Waaqa isheetti, mootota isheettii fi warra Fara'oonin amanatanitti adabbii nan fida. ²⁶ Ani dabarsee warra lubbuu isaanii galaafachuu barbaadanitti, jechuunis Nebukadnezar mooticha Baabilonittii fi qondaal-tota isaatti isaan kenna. Ergasii garuu Gibxi akkuma durii lafa namni keessa jiraatu ni taati" jedha WAAQAYYOO.

²⁷ "Yaa Yaaqoob tajaajilaa ko, ati hin sodaatin;
yaa Israa'el atis hin na'in.

Ani lafa fagootii sin baasa;
sanyii kee immoo biyya isaan itti booji'amanii nan fida.

Yaaqoob ammas nagaa fi tasgabbii ni qabaata;
namni isa sodaachisu tokko iyyuu hin jiru.

²⁸ Yaa Yaaqoob garbicha ko, ati hin sodaatin;
anis si wajjinan jiraatii"
jedha WAAQAYYOO.

"Ani yoo saboota gidduu isaaniitti si bittinneesse sana
guutumaan guutuutti balleesse iyyuu
ani guutumaan guutuutti si hin balleessu.

Ani sin adaba; garuu qajeelummaa qofaan;
akka ati utuu hin adabaminuu gad dhiifamtu hin godhu."

47

Ergaa Waa'ee Filisxeemotaa

¹ Dubbiin WAAQAYYOO kan waa'ee Filisxeemotaa kan utuu Fara'oon Gaazaa hin dha'in dura gara Ermiyaas raajichaa dhufe kanaa dha:

² WAAQAYYOO akkana jedha:

“Kunoo, karaa kaabaatiin bishaan ol ka’aa jira;
 bishaan kunis lolaa guutee irra dhangala’u ta’a.
 Innis biyyattii fi waan ishee keessa jiru,
 magaalaawwanii fi warra isaan keessa jiraatan hunda irra garagala.
 Uummanni ni boo’a;
 warri ishee keessa jiraatan hundis ni wawwaatu;
³ kunis sababii didicha kottee fardeen gulufanii,
 girrisa gaariwwan diinaatii fi
 qaqaawweessa goomaa isaaniitiif.
 Abbootiin ijoollee isaanii gargaaruuf duubatti gara hin galan;
 harki isaaniis isaan irratti laamsha’a.
⁴ Filisxeemota hunda balleessuuf
 hambaa Xiiroosii fi Siidoonaa
 gargaaruuf hafan hundas balleessuuf
 guyyaan sun dhufeeraatii.
 WAAQAYYO Filisxeemota,
 hambaa qarqara Kaftoor balleessuu ga’eera.
⁵ Gaazaan gaddaan mataa ishee haaddatti;
 Ashqaloon ni cal’isti.
 Yaa hambaa dirree irraa
 isin hamma yoomiitti of ciccirtu?
⁶ “Isin, ‘Yaa goraadee WAAQAYYOO
 ati hamma yoomiitti hin boqonne?
 Man’ee keetti deebi’i;
 cal’isii taa’i’ jettanii iyyitu.
⁷ Garuu utuu WAAQAYYO isa ajajuu,
 yeroo Waaqni akka inni Ashqaloonii fi
 qarqara galaanaa dha’uuf qajeelfama isaa kennutti
 inni akkamitti boqochuu danda’a?”

48

Ergaa Waa’ee Mo’aab
 48:29-36 kwf - Isa 16:6-12

¹ Waa’ee Mo’aab:

WAAQAYYO Waan Hunda Danda’u, Waaqni Israa’el akkana jedha:
 “Neboof wayyoo; isheen ni diigamtiitii.
 Kiriyaataayimis ni salphatti; ni qabamti;
 da’oowwan ishees ni qaaneffamu; ni diigamus.
² Mo’aab si’achi hin jajamtu;
 namoonni Heshboon keessatti,
 ‘Kottaa saba sana ni balleessinaa’
 jedhanii waa’ee kufaatii ishee mari’atu.
 Yaa magaalaa Maadmeen jedhamtu atis ni cal’ista;
 goraadeen si ari’aatii.
³ Iyya Hooronaayimii dhufu,
 iyya barbadaa’uu fi badiisaa guddaa dhaga’aa!
⁴ Mo’aab ni cabdi;
 ijoolleen ishees ni boo’u.
⁵ Isaan akka malee boo’aa,
 Luuhiitiitti ol ba’u;
 karaa gara Hooronaayimitti gad buusu irratti
 iyya badiisaa dhaga’u.
⁶ Baqadhaa! Lubbuu keessan baafadhaa;
 akka daggala gammoojjii keessaa ta’aa.
⁷ Isin waan hojii keessanii fi qabeenya keessan amanattaniif,
 boojiudhaan fudhatamtanii ni deemtu;
 Kemooshis luboota isaatii fi
 gondaaltota isaa wajjin booji’amee ni fudhatama.
⁸ Balleessituun sun magaalaa hundatti ni dhufa;

magaalaan tokko iyyuu isa jalaa hin ba'u.
Sabbatii WAAQAYYO dubbateef sululli ni bada;
dirreenis ni barbadeeffama.

⁹ Mo'aabitti soogidda firfirs;
isheen ni baddiitii;

magaalaawwan ishees
nama isaan keessa jiraatu dhabanii onu.

¹⁰ "Namni garaa hir'uudhaan hojii WAAQAYYOO hojjetu abaaramaa haa ta'u!
Namni goraadee isaatiin dhiiga dhangalaasuu didus abaaramaa haa ta'u!

¹¹ "Mo'aab akkuma daadhii wayinii kan siicoo isaa irratti hafe
kan okkotee tokko keessaa gara okkotee kaaniitti gara hin galfaminii
ijoollummaa isheetii jalqabdee boqochaa turte;
booji'amtees hin fudhatamne.

Kanaafuu isheen akkuma durii mi'oofti;
urgaan ishees hin geeddaramne.

¹² Garuu barri ani itti namoota okkotee keessaa dhangalaasan
ergu tokko ni dhufa.

Isaanis gad ishee naqu;
okkotee ishee duwwaa hambisanii
gaanii ishee cabsu" jedha WAAQAYYO.

¹³ "Yoos akkuma manni Israa'el
yeroo Beet'eelin amanatetti qaana'e sana
Mo'aabis Kemooshitti ni qaana'a.

¹⁴ "Isin akkamiin 'Nu gootota;
nu waraana keessatti jajjaboo dha' jechuu dandeessu?

¹⁵ Mo'aab ni barbadoofti; magalaawwan ishees ni qabatamu;
dargaggoonni ishee filatamoon gara qalmaatti geeffamu"
jedha Mootichi maqaan isaa WAAQAYYOO Waan Hunda Danda'u jedhamu sun.

¹⁶ "Kufaatiin Mo'aab ga'eera;
badiisni ishees dafee ni dhufa.

¹⁷ Warri naannoo ishee jiraatan hundi,
warri maqaa ishee beektan hundi

'Bokkuun jabaan sun akkamitti cabe!
Uleen ulfina qabeessi sun akkamitti cabe!' jedhaa boo'aafii.

¹⁸ "Yaa jiraattuu Diiboon,
ulfina kee irraa gad bu'iitii
lafa goggogaa irra taa'!

Barbadeessaan Mo'aab sun sitti dhufee
magaalaawwan kee kanneen
dallaa jabaan marfaman ni diigaatii.

¹⁹ Ati kan Aro'eer keessa jiraattu,
karaa cina dhaabadhuutii ilaali.

Dhiira baqatuu fi dubartii miliqxu gaafadhu;
'Maaltu dhalate?' jedhii isaan gaafadhu.

²⁰ Mo'aab waan diigamteef qaanofteerti.
Wawwaadhuu boo'!

Arnoon biratti
akka Mo'aab barbadooftee jirtu labsi.

²¹ Murtiin dirree ol ka'aatti:
Hooloonitti, Yaahizaa fi Meefi'aatti,
²² Diiboonitti, Neboo fi Beet Diblaataayimitti,

²³ Kiriyaataayimitti, Beet Gaamulii fi Beet Me'oonitti,

²⁴ Keriiyoottii fi Bozraatti,
magaalaawwan Mo'aab kanneen fagoo fi
dhi'oo jiran hundatti dhufeera.

²⁵ Gaanfi Mo'aab irraa murameera;
irreen ishees caccabeera"
jedha WAAQAYYO.

- 26 “Waan isheen WAAQAYYOTTI koorteef
dhugaatiidhaan ishee macheessaa.
Mo’aab diddiga ofii ishee irra haa gangalattu;
waan qoosaas haa taatu.
- 27 Israa’el si duratti waan qoosaa hin turree?
Akka ati yeroo waa’ee ishee dubbattu hunda
tuffiidhaan mataa kee isheetti raafuu
isheen hattoota gidduutti qabamtee?
- 28 Isin warri Mo’aab keessa jiraattan,
magaalaawwan keessaa ba’aatii kattaawwan keessa jiraadhaa.
Akkuma gugee mana ishee
afaan holqaatti ijaarrattuu ta’a.
- 29 “Nu waa’ee of tuulummaa Mo’aab
jechuunis akka malee of guddisuu fi ofiin boonuu ishee,
of tuuluu fi of jajuu ishee,
of bokoksuu ishee dhageenyeerra.
- 30 Ani addaggummaa Mo’aab beeka;
garuu faayidaa hin qabaatu” jedha WAAQAYYO;
“Of tuuluun ishees homaa hin fayyaduuf”
- 31 Kanaafuu ani Mo’aabiiif nan wawwaadha;
Mo’aab hundaaf hiqqifadhee boo’a;
ani namoota Qiir Hareeshetiif nan gadda.
- 32 Yaa muka wayinii Sibimaa,
ani akkuma Ya’izeeriif boo’u sana siifin boo’a.
Dameen kee hamma galaanaatti diriirtee fagaate;
isheen hamma galaana Ya’izeeritti diriirtee deemti.
Balleessituun sun ija kee bilchaataa fi
hurbuu wayinii keetii irra bu’eera.
- 33 Lafa biqiltuutii fi lafa qotiisaa
midhaan Mo’aab keessaa ilillee fi gammachuun badeera.
Ani iddoo itti wayinii cuunfan irraa wayinii kuteera;
namni tokko iyyuu gammadaa sirbee isaan hin cuunfu.
Wacni yoo jiraatee illee
inni waca gammachuu miti.
- 34 “Sababii bishaan Niimriim gogeef,
sagaleen iyya isaanii ol ka’ee,
Heshboonii hamma Ele’aaleettii fi Yaahaziitti,
Zo’aarii hamma Hooronaayimittii fi hamma Eglaaati Sheelishiyaatti
ni dhaga’ama ture.
- 35 Ani warra iddoowwan sagadaa kanneen gaarran irraatti
aarsaa dhi’eessanii waaqota isaaniif ixaana aarsan
Mo’aab keessaa nan balleessa” jedha WAAQAYYO.
- 36 “Kanaafuu garaan koo akkuma ulullee faarsee Mo’aabiiif boo’a;
akkuma ulullee faarsee namoota Qiir Hareeshetiif boo’a.
Qabeenyi isaan horatan duraa badeera.
- 37 Mataan hundinuu haadamee
haredni hundinuu cirameera;
harki hundinuu muramee mudhiin hundis
wayyaa gaddaatiin hidhameera.
- 38 Waan ani akkuma okkotee namni tokko iyyuu hin feeneetti
Mo’aabin caccabseef
bantii mana Mo’aab hunda irraa fi oobdii sabaa keessa
boo’icha malee wanni tokko iyyuu hin jiru”
jedha WAAQAYYO.
- 39 “Isheen akkam akkas caccabde! Isaan akkam akkas wawwaatu!
Mo’aab akkam akkas dugda ishee qaaniidhaan garagalfatte!
Mo’aab waan kolfaa taatee,
warra naannoo ishee jiraatan hundaaf waan sodaa taateerti.”
40 WAAQAYYO akkana jedha:
“Ilaa! Risaan tokko Mo’aab irratti

- qoochoo bal'isee furguggifamaa gad bu'aa jira.
⁴¹ Keriiyooti ni qabamti;
 da'annoon ishee jajjaboonis ni fudhatamu.
 Bara sana keessa garaan loltoota Mo'aab
 akkuma garaa dubartii ciniinsifachuutti jirtu tokkoo ta'a.
⁴² Mo'aab sababii WAAQAYYON tuffatteef
 barbadooftee saba ta'uun ishee ni hafa.
⁴³ Yaa saba Mo'aab sodaan,
 boollii fi kiyyoon si eeggata"
 jedha WAAQAYYO.
⁴⁴ "Namni sodaa sana duraa baqatu
 kam iyyuu boolla keessa bu'a;
 namni boolla sana keessaa ol ba'u
 kam iyyuu kiyyoodhaan qabama;
 ani Mo'aabitti
 waggaa adabamuu ishee nan fidaatii"
 jedha WAAQAYYO.
⁴⁵ "Baqattoonni waan ta'an dhabanii
 gaaddisa Heshboon jala dhadhaabatu;
 Heshboon keessaa ibiddi tokko,
 Sihoon gidduudhaas arrabni ibiddaa ni ka'aatii;
 inni adda Mo'aab guba,
 buqqee mataa of tuultotaas ni guba.
⁴⁶ Yaa Mo'aab siif wayyoo!
 Uummanni Kemoosh barbadaa'eera;
 ilmaan kee booji'amani fudhatamaniiru;
 intallan kees booji'amaniiru.
⁴⁷ "Ta'u illee ani bara dhufuuf jiru keessa
 hambaa Mo'aab deebisee nan dhaaba"
 jedha WAAQAYYO.
 Murtiin Mo'aabitti murame sun asitti dhuma.

49

Ergaa Waa'ee Amoon

- ¹ Waa'ee Amoonotaa:
 WAAQAYYO akkana jedha:
 "Israa'el ilmaan hin qabuu?
 Inni nama isa dhaalu hin qabuu?
 Yoos Moolek maaliif Gaadin dhalche ree?
 Namoonni isaa maaliif magaalaa ishee keessa jiraatu?
² Garuu barri ani itti Rabbaa Amoonotaatti
 sagalee waca waraanaa dhageessisu tokko ni dhufa"
 jedha WAAQAYYO.
 "Isheen tuullaa badiisaa ni taati;
 gandoonni naannoo ishee jiranis ibiddaan gubamu.
 Ergasii Israa'el warra ishee ari'ee baase sana
 ariitee biyyaa ni baafti,"
 jedha WAAQAYYO.
³ "Yaa Heshboon wawwaadhu, Aayi barbadoofteertii!
 Yaa jiraattota Rabbaa iyyaa!
 Wayyaa gaddaa uffadhaatii boo'aa;
 dallaa keessa asii fi achi fiigaa;
 Moolek lubootaa fi qondaaltota isaa wajjin
 booji'amee ni fudhatamaatii.
⁴ Ati maaliif sulula keetiin boonta?
 Maaliif sulula kee gabbataa sanaan boonta?
 Yaa intala hin amanamne ati sooruma kee abdattee,
 'Eenyutu na tuqa?' jetta.
⁵ Ani warra naannoo kee jiraatan hunda irraa

sodaa sitti nan fida”

jedha Gooftaan, WAAQAYYON Waan Hunda Danda’u.

“Tokkoon tokkoon keessan ni ari’amu;

namni baqattoota walitti qabu tokko iyyuu hin jiru.

⁶ “Ta’u illee ani ergasii hambaawwan Amoonotaa deebisee nan dhaaba”
jedha WAAQAYYO.

Ergaa Waa’ee Edoom

49:9-10 kwf - Abd 5-6

49:14-16 kwf - Abd 1-4

⁷ Waa’ee Edoom:

WAAQAYYO Waan Hunda Danda’u akkana jedha:

“Si’achi Teemaan keessa ogummaan hin jiruu?

Hubattoota duraa gorsi badeeraa?

Ogummaan isaanii sameeraa?

⁸ Warri Deedaan keessa jiraattan garagalaa,

baqadhaatii holqa gad fagoo keessa dhokadhaa;

ani yeroo Esaawun adabutti

badiisa isatti nan fidaatii.

⁹ Warri gumaa wayinii guuran utuu gara kee dhufanii silaa

qarmii wayii hin hambisanii?

Hattuun yoo halkan dhufte,

Isaan hammuma barbaadan qofa fudhatanii hin deemanii?

¹⁰ Ani garuu Esaawun qullaa nan hambisa;

akka inni itti hin da’anneef

ani iddoo inni itti dhokatu ifatti nan baasa.

Ijoolleen isaa, firoonni isaatii fi olloonni isaa ni badu;

innis si’achi hin jiraatu.

¹¹ “Daa’imman kee kanneen warra hin qabne dhiisi;

anatu isaan jiraachisaatii.

Haadhonni hiyyeessaa kee na amanachuu danda’u.’”

¹² WAAQAYYO akkana jedha: “Yoo warri xoofoo dhuguun isaanii hin malin ishee dhuguu qabaatan, ati maaliif utuu hin adabamin hafta ree? Ati ishee dhuguu qabda malee utuu hin adabamin hin haftu. ¹³ Ani akka Bozraan diigamtee waan sodaa, waan fafaatii fi waan abaarsaa taatu maqaa kootiin nan kakadha” jedha WAAQAYYO. “Magaalaawwan ishee hundis bara baraan ni diigamu.”

¹⁴ Ani ergaa tokko WAAQAYYO irraa dhaga’eera:

Ergamaan tokko akkana jechuuf gara sabootaatti ergame;

“Ishee loluuf walitti qabamaa!

Waraanaafis ba’aa!”

¹⁵ “Ani amma saboota gidduutti sin xinneessa;

namoota keessatti illee tuffatamaa sin godha.

¹⁶ Ati kan hallayyaa kattaa irra jiraattee

fiixee tulluu qabattee jirtu,

sodaan ati odeessituu fi

of tuulummaan garaa keetii si gowwoomseera.

Yoo ati akkuma risaa ol fageessitee

mana ijaarrattu iyyuu ani achii gad sin buusa”

jedha WAAQAYYO.

¹⁷ “Edoom waan sodaa taati;

namni achiin darbu hundis sababii madaa ishee hundaatii

dinqisiifatee isheetti kolfa.

¹⁸ Isheen akkuma Sodoomii fi Gomoraan

magaalaawwan naannoo isaanii jiran wajjin balleeffaman sana ni taati”

jedha WAAQAYYO,

“namni tokko iyyuu achi hin jiraatu,

sanyiin namaa tokkos ishee keessa hin qubatu.

¹⁹ “Ani akkuma leenca bosona Yordaanosii ba’ee

gara lafa dheedaa gabbataa dhufu tokkoo
 dafee Edoomin biyya isheetii nan ari'a.
 Filatamaan ani waan kanaaf muudu eenyu?
 Kan akka koo eenyu? Eenyutus naan morkuu danda'a?
 Tiksee akkamiitu fuula koo dura dhaabachuu danda'a?"

²⁰ Kanaafuu waan WAAQAYYO Edoomitti karoorfate,
 waan inni warra Teemaan keessa jiraatanitti yaades dhaga'aa.
 Ilmaan bushaayee harkifamanii ni fudhatamu;
 innis sababii isaaniitiif jedhee lafa dheeda isaanii ni barbadeessa.
²¹ Sagalee kufaatii isaaniitiin lafti ni raafamti;
 iyyi isaanii hamma Galaana Diimaatti ni dhaga'ama.
²² Ilaa! Risaan tokkoo Bozraa irratti qoochoo bal'isee
 furguggifamaa gad bu'aa jira.
 Bara sana keessa garaan loltota Edoom
 akkuma garaa dubartii ciniinsifachuutti jirtu tokkoo ta'a.

Ergaa Waa'ee Damaasqoo

²³ Waa'ee Damaasqoo:
 "Hamaatii fi Arfaad ni raafamu;
 isaan oduu hamaa dhaga'aniiruutii.
 Isaan abdii kutatanii akkuma galaana boqonnaa
 hin qabne tokkoo jeeqamaniiru.
²⁴ Damaasqoon dadhabdeerti;
 isheen baqachuuf gara galteerti;
 sodaan guddaan ishee qabateera;
 akkuma miixuu dubartii ciniinsifattuu,
 rakkinnaa fi miixuun isa qabeera.
²⁵ Magaalaan beekamaan,
 magaalaan ani itti gammadu sun akkam gatamti!
²⁶ Dhugumaan dargaggoonni ishee karaa irratti dhumu;
 loltoonni ishee hundinuu gaafas afaan qabatu"
 jedha WAAQAYYO.
²⁷ "Ani dallaawwan Damaasqootti ibidda nan qabsiisa;
 ibiddi sunis da'annoo Ben-Hadaad gubee balleessa."

Ergaa Waa'ee Qeedariitii fi Haazoor

²⁸ Waa'ee Qeedariitii fi waa'ee mootummoota Haazoor kanneen Nebukadnezar
 mootiin Baabilon lele sanaa:

WAAQAYYO akkana jedha:
 "Ka'aa, Qeedarin lolaatii
 saba gama Ba'a Biiftuu barbadeessaa.
²⁹ Dunkaanonni isaaniitii fi bushaayeen isaanii ni fudhatamu;
 golgaawwan isaanii mi'aa fi
 gaalawwan isaanii wajjin fudhatamu.
 Namoonnis, 'Gama hundaan sodaatu jira!'
 jedhanii iyyu.

³⁰ "Isin warri Haazoor keessa jiraattan dafaa baqadhaa!
 Holqa gad fagoo keessa dhokadhaa"
 jedha WAAQAYYO.

"Nebukadnezar mootiin Baabilon isinitti malateera;
 inni daba isinitti yaadeera.

³¹ "Ka'aatii saba nagaa qabu kan of amanatee jiraatu
 saba karra yookaan danqaraa karraa hin qabne sanatti duulaa;
 uummanni isaa kophuma ofii isaa jiraata"
 jedha WAAQAYYO.

³² "Gaalawwan isaanii ni hatamu,
 horiin isaanii baay'eenis ni booji'ama.
 Ani warra lafa fagoo jiran qilleensatti bittinnessee
 gama hundaan balaa isaanitti nan fida"

jedha WAAQAYYO.

- ³³ “Haazoor iddoo jireenyaa waangoo,
lafa bara baraan onte taati.
Namni tokko iyyuu achi hin jiraatu;
namni tokko iyyuu ishee keessa hin qubatu.”

Ergaa Waa’ee Eelaam

- ³⁴ Jalqaba bara mootummaa Zedeqiyaa mooticha Yihuudaa keessa dubbiin WAAQAYYOO waa’ee Eelaam akkana jedhee gara Ermiyaas raajichaa dhufe:

³⁵ WAAQAYYO Waan Hunda Danda’u akkana jedha:

- “Kunoo ani madda jabina isaanii,
iddaa Eelaam nan cabsa.
³⁶ Ani kutaalee samiiwwanii afran irraa
bubbee afran Eelaamittan fida;
ani bubbee afranitti isaan nan bittinneessa;
sabni baqattoonni Eelaam
itti hin galle tokko iyyuu hin jiraatu.
³⁷ Ani fuula diinota isaanii,
fuula warra lubbuu isaanii galaafachuu barbaadanii duratti
Eelaamin nan barbadeessa;
ani balaa isaanittan fida;
dheekkamsa koo sodaachisaa sanas isaanittan fida;
ani hamma isaan fixutti goraadeedhaan isaan ari’a”
jedha WAAQAYYO.
³⁸ “Ani teessoo koo Eelaam keessa dhaabbadhee
mootii fi qondaaltota ishee nan barbadeessa”
jedha WAAQAYYO.
³⁹ “Ta’u illee ani bara dhufuuf jiru keessa
hambaa Eelaam deebisee nan dhaaba”
jedha WAAQAYYO.

50

Ergaa Waa’ee Baabilon

51:15-19 kwf - Erm 10:12-16

- ¹ Dubbiin WAAQAYYO karaa Ermiyaas raajichaatiin waa’ee Baabilonii fi waa’ee biyya Baabilonotaa dubbate kanaa dha:
² “Saboota gidduutti lallabaatii labsaa;
faajjii ol qabaatii labsaa;
utuu homaa hin hambisin akkana jedhaa;
‘Baabilon ni qabamti;
Beel ni salphifama;
Meroodak gooliidhaan guutama.
Fakkiiwwan Baabilon ni salphifamu;
waaqonni ishee tolfamoonis sodaan guutamu.’
³ Sabni Kaabaa dhufu tokko ishee lolee
lafa ishee duwwaa hambisa.
Namni tokko iyyuu ishee keessa hin jiraatu;
namaa fi horiin baqatee keessaa ba’a.

⁴ “Bara sana keessa, yeroo sanatti,
sabni Israa’elii fi sabni Yihuudaa
imimmaaniin WAAQAYYO Waaqa isaanii barbaacha
tokkummaadhaan ni dhufu” jedha WAAQAYYO;
⁵ “Isaan karaa gara Xiyoon geessu ni gaafatu;
fuula isaaniis garasitti garagalfatu.
Isaan dhufanii kakuu bara baraa
kan gonkumaa hin irraanfatanneen
WAAQAYYOTTI of maxxansu.

⁶ “Sabni koo hoolota badan ta’aniiru;

tikseen isaanii isaan dogoggorsee
 akka isaan tulluuwwan irra jooran godhe.

Isaan tulluu fi gaara irra jooranii
 lafa boqonnaa isaanii illee wallaalan.

⁷ Kan isaan argu hundi isaan liqimse;
 diinonni isaanii, 'Nu balleessaa hin qabnu;
 isaan WAAQAYYO iddoo jireenya isaanii kan dhugaa ta'e,
 WAAQAYYO abdii abbootii isaaniitti cubbuu hojjetaniiruutii' jedhan.

⁸ "Baabilonii baqadhaa ba'aa;
 biyya Baabilonotaa keessaa ba'aa;
 akkuma korbeessa re'ee kan bushaayee qajeelchuu ta'aa.

⁹ Ani biyya kaabaatii garee saboota gurguddaa kaasee
 Baabilonitti nan ergaatii.

Isaanis hiriiranii isheetti dhufu;
 isheenis karaa kaabaatiin ni qabamti.

Xiyyi isaanii akkuma loltoota ogeeyyii
 harka duwwaa hin deebinee ti.

¹⁰ Baabilonis ni saamamti;
 warri ishee saaman hundis ni quufu"
 jedha WAAQAYYO.

¹¹ "Isin warri handhuuraa koo saamtan
 waan gammaddanii fi ililchitaniif,
 akkuma raadaa marga keessaa burraaqxanii
 akka korma fardaa imimsitan illee,

¹² haati keessan akka malee qaanofiti;
 kan isin deesses ni salphatti.

Isheen saboota hunda keessaa gad aantuu,
 lafa onaa, lafa gogaa fi gammoojjii taati.

¹³ Isheen sababii dheekkamsa WAAQAYYOOTIIF guutumaan guutuutti
 ni onti malee namni ishee keessa hin jiraatu.

Sababii madaa ishee hundaatiif
 namni Baabilon keessa darbu hundi ni dinqisiifata; itti qoosas.

¹⁴ "Isin warri iddaa luqqifattan hundinuu,
 naannoo Baabilonitti hiriiraa.
 Sababii isheen WAAQAYYOTTI cubbuu hojjetteef,
 xiyyawwan itti darbadhaa! Homaa hin hambisinaa.

¹⁵ Karaa hundaan isheetti iyyaa!
 Isheen harka kennatti; gamoon ishee ni jiga;
 dallaan ishee diigameera.

Kun haaloo WAAQAYYOO waan ta'eef
 isheetti haaloo ba'aa;
 waanuma isheen warra kaanitti hojjette isheetti hojjedhaa.

¹⁶ Nama sanyii facaasuu fi kan yeroo midhaan haamamutti
 haamtuu qabatus Baabilon keessaa balleessaa.

Sababii goraadee cunqursatiin
 tokkoon tokkoon namaa gara saba ofii isaatti haa deebi'u;
 tokkoon tokkoon namaa gara biyya ofii isaattis haa baqatu.

¹⁷ "Israa'el hoolaa bittinnaa'ee dha;
 leenconni isa ari'an.

Kan jalqabatti isa nyaate mootii Asoor;
 kan dhuma irratti lafee isaa caccabse immoo
 Nebukadnezar mooticha Baabilon ture."

¹⁸ Kanaafuu WAAQAYYO Waan Hunda Danda'u, Waaqni Israa'el akkana jedha:

"Ani akkuma mootii Asoor adabe sana
 mootii Baabilonii fi biyya isaa nan adaba.

¹⁹ Israa'elin garuu lafa tika isaatti nan deebisa;
 innis Qarmeloosii fi Baashaan irra ni dheeda;
 tulluu Efreemii fi Gili'aad irra dheedee ni quufa.

20 Bara sana keessa, yeroo sanatti,
 yakki Israa'el ni barbaadama" jedha WAAQAYYO;
 "garuu tokko iyyuu hin jiru;
 cubbuun Yihuudaas ni barbaadama;
 garuu tokko iyyuu hin argamu;
 ani hambaan baraare sanaaf
 dhiifama nan godhaatii.

21 "Biyya Meraataayimii fi
 jiraattota Phegood lolaa.
 Ari'aa, ajjeesaa, guutumaan guutuutti isaan balleessaa,"
 jedha WAAQAYYO.

"Waan ani isin ajaje hunda godhaa.

22 Sagaleen waraanaa,
 sagaleen badiisa guddaas biyya sana keessa jira!

23 Burruusni guutummaa lafaa akkamitti cabe!
 Akkamittis bullaa'e!

Baabilon saboota gidduutti,
 akkam onte!

24 Yaa Baabilon, ani kiyyoo siif diriirseera;
 atis utuu hin beekin qabamte;
 ati sababii WAAQAYYON mormiteef,
 argamtee qabamte.

25 WAAQAYYO mankuusaa mi'a lolaa isaa banee
 mi'a lola dheekkamisa isaa gad baafateera;
 Gooftaan, WAAQAYYON Waan Hunda Danda'u
 waan biyya Baabilonotaatti hojjetu qabaatii.

26 Biyya fagootii isheetti kottaa.
 Gombisaawwan ishee diigaa;
 akkuma tuullaa midhaaniitti ishee tuulaa.
 Guutumaan guutuutti ishee balleessaa;
 waan tokko illee isheef hin hambisinaa.

27 Korommii ishee hunda qalaa;
 isaan gara qalmaatti haa geffaman!
 Isaaniif wayyoo! Yeroon isaan itti adabaman,
 guyyaan isaani dhufeeraatii.

28 Akka WAAQAYYO Waaqni keenya haaloo ba'e,
 akka inni mana qulqullummaa isaatiif haaloo ba'e,
 kooluu galtootaa fi baqattoota Baabilonii dhufanii
 Xiyoon keessatti lallaban irraa dhaga'aa.

29 "Namoota Xiyyaan lolan
 kanneen iddaa luqqifatan hunda Baabilonitti waamaa.
 Naannoo ishee hunda marsaa;
 namni tokko iyyuu hin miliqin.
 Gatii hojii ishee kennaafii;
 waanuma isheen warra kaanitti hojjette isheettis hojjedhaa.
 Isheen Qulqullicha Israa'el,
 WAAQAYYOTTI koortteerii.

30 Kanaafuu dargaggoonni ishee karaa irratti dhumu;
 gaafas loltoonni ishee hundi ni barbadaa'u"
 jedha WAAQAYYO.

31 "Yaa koortuu nana, kunoo ani sitti ka'eera"
 jedha Goftaan, WAAQAYYON Waan Hunda danda'u;
 "yeroon ati itti adabamtu,
 guyyaan kee dhufeeraatii.

32 Koortuun sun gufattee lafa dhoofti;
 namni gargaaree ol ishee qabu tokko iyyuu hin jiru;
 ani magaalaawwan ishee keessatti
 ibidda warra naannoo ishee jiru hunda
 gubee fixu nan qabsiisa."

33 WAAQAYYO Waan Hunda Danda'u akkana jedha:

- “Sabni Israa’el cunqurfameera;
 sabni Yihuudaas akkasuma cunqurfameera.
 Warri isaan booji’an hundi jabeessanii isaan qabataniiru;
 isaan gad dhiisuus didaniiru.
- 34 Ta’u illee Furaan isaanii jabaa dha;
 maqaan isaas WAAQAYYO Waan Hunda Danda’uu dha.
 Inni biyya isaaniitiif boqonnaa kenne;
 warra Baabylon keessa jiraatan garuu boqonnaa dhowwuuf
 dhimma isaaniitiif jabetessee ni falma.
- 35 “Goraadeen tokko Baabylonotatti dhufe!”
 jedha WAAQAYYO;
 “warra Baabylon keessa jiraatanitti,
 gondaalootaa fi namoota ishee ogeeyyiitti dhufeera!
- 36 Goraadeen raajota ishee sobdootatti, dhufeera!
 Isaan gowwoota ta’u.
 Goraadeen gootota isheetti dhufeera!
 Isaanis sodaadhaan guutamu.
- 37 Goraadeen fardeenii fi gaariiwwan isheetti,
 Namoota Ormaa kanneen gidduu ishee jiraatan hundatti dhufe!
 Isaan dadhaboo ta’u.
 Goraadeen qabeenya isheetti dhufe!
 Isaan ni saamamu.
- 38 Caamsaan bishaan isheetti ni dhufa!
 Isaanis ni gogu.
 Isheen biyya waaqota tolfamoo,
 kan waaqota tolfamoo sodaadhaan maraataniiiti.
- 39 “Kanaafuu uumamawwan gammoojjiitii fi
 waraabeyyiin achi jiraatu;
 urunguunis achi jiraatti.
 Lammata namni ishee keessa hin jiraatu;
 yookaan dhalootaa hamma dhalootaatti
 namni keessa jiraatu hin jiru.
- 40 Akkuma Waaqni Sodoomii fi Gomoraa,
 magaalaawwan naannoo isaanii jiran wajjin balleesse sana”
 jedha WAAQAYYO;
 “namni tokko iyyuu achi hin jiraatu;
 sanyiin namaa tokkos ishee keessa hin qubatu.
- 41 “Kunoo! Gareen loltootaa tokko kaaba irraa dhufaa jira;
 sabni guddaan tokkoo fi mootonni baay’een
 moggaa lafaatii sosocho’aa jiru.
- 42 Isaan xiyyaa fi eeboo qabataniiru;
 isaan gara jabeeyyii namaafis naasuu hin qabnee dha.
 Yommuu isaan fardeen isaanii gulufanitti
 gigigsuun isaanii akkuma huursaa galaanaa ti;
 yaa intala Baabylon,
 isaan akkuma namoota duulaaf hiriiraniitti si loluuf dhufu.
- 43 Mootiin Baabylon oduu waa’ee isaanii dhaga’e;
 harki isaas irratti du’e.
 Dhiphinni isa qabateera;
 miixuunis akkuma dubartii ciniinsifattuu isa qabeera.
- 44 Ani akkuma leenca bosona Yordaanosii ba’ee
 gara lafa dheedaa gabbataa dhufu tokkoo
 dafee Baabylonin biyya isheetii nan ari’a.
 Filatamaan ani waan kanaaf muudu eenyu?
 Kan akka koo eenyu?
 Eenyutus naan morkuu danda’a?
 Tiksee akkamiitu fuula koo dura dhaabachuu danda’a?”
- 45 Kanaafuu waan WAAQAYYO Baabylonitti karoorfate,

waan inni biyya Baabilonotaatti yaades dhaga'aa;
 Ilmaan bushaayee harkifamanii ni fudhatamu;
 innis sababii isaaniitiif lafa dheeda isaanii
 guutumaan guutuutti ni barbadeessa.
⁴⁶ Waca qabamuu Baabiloniitiin lafti ni raafamti;
 iyyi ishees saboota gidduutti ni dhaga'ama.

51

¹ WAAQAYYO akkana jedha:
 “Kunoo ani Baabilonii fi saba ishee keessa jiraatutti
 bubbee waa balleessu nan kaasa.
² Ani akka isaan gingilchani ishee balleessaniif
 ormoota Baabilonitti nan erga;
 isaan gaafa badiisa ishee,
 karaa hundaanuu isheen mormu.
³ Abbaan xiyyaa iddaa isaa hin aggaamin,
 yookaan mi'a lolaa hin hidhatin.
 Dargaggoota ishee hin baasinaa;
 loltoota ishee illee guutummaan guutuutti barbadeessaa.
⁴ Isaan qalamanii Baabilon keessa ni harcaafamu;
 daandiiwwan ishee irrattis ni madaa'u.
⁵ Yoo biyyi isaanii fuula Qulqullicha Israa'el duratti
 yakkaan guutamtee jiraatte iyyuu
 Waaqni isaanii, WAAQAYYON Waan Hunda Danda'u
 Israa'elii fi Yihuudaa hin ganne.
⁶ “Baabilon keessaa baqadhaa!
 Lubbuu keessan oolfadhaa!
 Isin sababii cubbuu isheetiif hin dhuminaa.
 Yeroon kun yeroo haaloo ba'uu Waaqayyoo ti;
 innis gatii isheef malu ni kennaaf.
⁷ Baabilon harka WAAQAYYOO keessatti xooffoo warqee turte;
 isheen guutummaa lafaa ni macheessite.
 Saboonni daadhii wayinii ishee dhugan;
 kanaafuu amma maraataniiiru.
⁸ Baabilon akkuma tasaa
 kuftee caccabdi; isheef boo'aa!
 Qoricha isheen madaa dibattu fidaafii;
 tarii isheen ni fayyiti ta'aatii.
⁹ “Nu Baabilonin fayyisu yaalleerra;
 isheen garuu fayyuu hin dandeessu;
 kottaa tokkoon tokkoon keenya ishee dhiifnee
 gara biyya ofii keenyaatti haa qajeellu;
 murtiin ishee hamma samiitti ol ba'ee,
 hamma duumessaatti ol fagaateeraatii.’
¹⁰ “WAAQAYYO qajeelummaa keenya dhugaa nuu ba'eera;
 kottaa, waan WAAQAYYO Waaqni keenya hojjete
 Xiyoon keessatti haa odeessinu.’
¹¹ “Xiyya qaradhaa;
 gaachana illee fudhadhaa!
 Sababii kaayyoon isaa Baabilonin balleessuu ta'eef
 WAAQAYYO mootota Meedee kakaaseera.
 WAAQAYYO haaloo ni ba'a;
 mana qulqullummaa isaatii haaloo ni ba'a.
¹² Dallaa Baabilonitti faajjii kaasaa!
 Egumsa jajjabeessaa;
 eegduu dhaabaa;
 warra riphee eeggatu qopheessaa!
 WAAQAYYO kaayyoo isaa

waan saba Baabilonitti mure sana fiixaan baafata.

13 Ati kan bishaan baay'ee qabdu,
kan qabeenyaanis badhaate,
dhumni kee dhufeera;

yeroon ati itti baddu ga'eera.

14 WAAQAYYO Waan Hunda Danda'u ofiin kakateera:
Ani dhugumaan namoota akkuma hoomaa hawwaannisaa
sitti gad dhiisa;
isaanis mo'annaadhaan sitti dhaadatu.

15 "Inni humna isaatiin lafa uume;
ogummaa isaatiin addunyaa hundeesse;
hubannaa isaatiinis samiiwwan diriirse.

16 Yommuu inni qaqaawweessa'utti bishaanonni samii ni huursu;
inni akka duumessoonni daarii lafaatii ol ka'an ni godha.

Bokkaa wajjin balaqqee ni erga;
mankuusaalee isaa keessaa immoo bubbee ni fida.

17 "Tokkoon tokkoon namaa gowwaa fi kan beekumsa hin qabnee dha;
tokkoon tokkoon tumtuu warqee waaqota tolfamoo isaatiin qaaneffama.

Fakkiiwwan inni tolchu kan sobaa ti;
isaan hafuura baafatan of keessaa hin qaban.

18 Isaan faayidaa hin qaban; meeshaa qoosaa ti;
yeroo adabbiin isaanii ga'utti ni badu.

19 Inni gooda Yaaqoob ta'e sun garuu akka warra kanaa miti;
inni uumaa waan hundumaa ti;

Israa'el immoo gosa dhaala isaa ti;
maqaan isaas WAAQAYYOO Waan Hunda Danda'uu dha.

20 "Ati bokkuu koo kan duulaa
mi'a lolaa kootii ti;

ani siin saboota nan caccabsa;
siin mootummoota nan barbadeessa;

21 Ani siin fardaa fi yaabbataa fardaa nan caccabsa;
siin gaarii fi ooftuu isaa nan caccabsa;

22 ani siin dhiiraa dubartoota nan caccabsa;
siin jaarsaa dargaggeessa nan caccabsa;
siin ga'eessaa fi shamarree nan caccabsa;

23 ani siin tiksee fi bushaayee nan caccabsa;
siin qottuu fi qotiyyoo nan caccabsa;
siin bulchitootaa fi qondaaltota nan caccabsa.

24 "Ani utuma iji keessan arguu waan isaan Xiyoona godhan hundaaf Baabilonii fi warra
Baabilon keessa jiraatan hundaaf gatii isaanii nan kenna" jedha WAAQAYYO.

25 "Yaa tulluu barbadeessaa,
ati kan lafa hunda balleessitu ani sitti ka'eera;
ani harka koo sitti nan kaafadha;

ededa irraa gad gangalchee
tulluu gubamaa sin godha"
jedha WAAQAYYO.

26 "Waan ati bara baraan ontuuf,
kattaa dhagaa golee ta'u,
yookaan dhagaan hundeeff ta'u tokko iyyuu si keessaa hin fudhatamu"
jedha WAAQAYYO.

27 "Biyyattii keessatti faajjii ol qabaa!
Saboota gidduuttis malakata afuufaa!

Saboota waraanaaf isheetti qopheessaa;
mootummoota Araaraat,
kan Miiniitii fi Ashkenas isheetti waamaa.

Ajjajaa waraanaa isheetti shuumaa;
fardeen akka hoomaa hawwaannisaa itti ergaa.

28 Ishee waraanuudhaaf saboota jechuunis,

- mootota Meedee
 bulchitoota isaaniiiti fi qondaaltota isaanii hunda,
 biyyoota isaan bulchan hundas qopheessaa.
- ²⁹ Sababii wanni WAAQAYYO
 akka namni tokko iyyuu achi hin jiraanneef
 biyya Baabilon onsuf Baabilonitti karoofate sun
 jabaatee dhaabatuuf biyyattiin ni raafamti; ni dhidhiitattis.
- ³⁰ Gootonni Baabilon lola dhiisaniiru;
 isaan da'annoo isaanii keessatti hafaniiru.
 Jabinni isaanii dhumeera;
 isaan akkuma dubartootaa ta'aniiru.
- Iddoo jireenya isheetti ibiddi qabsiifameera;
 danqaraawwan balbala ishees caccabaniiru.
- ³¹ Akka magaalaa isaa mogga hamma moggaatti qabamte
 mootii Baabilonitti himuuf,
 fiigduun tokko isa kaan qaqqabuuf,
 ergamaan tokkos ergamaa kaan qaqqabuuf fiiga;
- ³² kunis akka malkaan qabame,
 akka da'annoowwan ishee gubamanii fi
 akka loltoonni ishee na'an himuudhaaf.”
- ³³ WAAQAYYO Waan Hunda Danda'u, Waaqni Israa'el akkana jedha:
 “Intalli Baabilon akkuma oobdii ti;
 yeroo sanatti isheen ni dhidhiitamti;
 yeroon isheen itti haamamtus dafee ni dhufa.”
- ³⁴ “Nebukadnezar mootiin Baabilon na nyaateera;
 inni barbadeesseera;
 akkuma okkotee duwwaa na godhe.
 Inni akkuma jawwee na liqimse;
 qabeenya koo filatamaadhaanis garaa guuttate;
 ergasii immoo na tufe.”
- ³⁵ Jiraattonni Xiyoon,
 “Dabni foon keenyatti hojjetame Baabilonitti illee haa dhufu” jedhan.
 Yerusaalemis, “Dhiigni keenya
 warra Baabilon keessa jiraatan haaloo haa ba'u” jetti.
- ³⁶ Kanaafuu WAAQAYYO akkana jedha:
 “Kunoo, ani dubbii kee siif falmee
 haaloo siifin ba'a;
 ani galaana ishee nan gogsa;
 burqaa ishee illee nan kuta.
- ³⁷ Baabilon tuullaa diigame,
 iddoo waangoonni keessa burraaqan,
 waan naasuutii fi qoosaa,
 lafa namni tokko iyyuu irra hin jiraanne ni taati.
- ³⁸ Sabni ishee hundi akka saafela leencaa ni aada;
 isaanis akka ilmaan leencaa gururi'u.
- ³⁹ Yommuu dhagni isaanii ho'utti,
 ani akka isaan kolfaa gammadanii
 bara baraan rafanii hin dammaqneef
 cidha isaaniif qopheessee
 akka isaan machaa'an nan godha”
 jedha WAAQAYYO.
- ⁴⁰ “Ani akka ilmoolee hoolaa,
 akkuma korbeeyyii hoolaatii fi
 re'ee gara qalmaatti gad isaan buusa.
- ⁴¹ “Sheeshaak akkamitti booji'amti!
 Boonuun lafa hundaas akkamitti qabame!
 Baabilon saba gidduutti
 akkam waan sodaa taati!
- ⁴² Baabilon irra galaanni garagala;
 dambaliin galaanaas ishee haguuga.

- 43 Magaalaawwan ishee onanii
biyya gogaa fi gammoojjii,
biyya namni tokko iyyuu keessa hin jiraanne,
kan namni keessa hin dabarre ni ta'u.
- 44 Ani Baabilon keessatti Beelin nan adaba;
waan inni liqimse illee nan tufsiisa.
Saboonni lammata gara isaatti hin yaa'an;
dallaan Baabilonis ni jiga.
- 45 "Yaa saba ko, ishee keessaa ba'aa!
Lubbuu keessan oolfachuuf fiigaa!
Dheekkamsa WAAQAYYOO sodaachisaa sana jalaa baqadhaa.
- 46 Yeroo oduun biyya keessatti dhaga'amutti
garaan keessan hin raafamin yookaan hin sodaatin;
akka gooliin biyya keessa jiru,
akka bulchaan tokko bulchaa kaanitti ka'u,
oduun tokko barana, kaan immoo bara dhufu dhaga'ama.
- 47 Yeroon ani itti waaqota Baabilon tolfamoo adabu
dhugumaan ni dhufaatii;
biyyi ishee guutumaan guutuutti ni salphatti;
qalamtoonni ishee hundis ishee keessatti kukkufu.
- 48 Ergasii samii fi lafti, wanni isaan keessa jiru hundis,
gammadanii Baabilonitti ililchu;
barbadeessitoonni kaabaa ba'anii
ishee waraanuutii"
jedha WAAQAYYOO.
- 49 "Akkuma qalamtoonni lafa irraa hundi
sababii Baabiloniif harca'an sana
Baabilonis sababii qalamtoota Israa'eliif harca'uu qabdi.
- 50 Isin warri goraadee jalaa miliqxaan,
deemaa; lafa irra hin harkifatinaa!
Biyya fagootti illee WAAQAYYON yaadadhaa;
waa'ee Yerusaalemis yaadaa."
- 51 "Sababii ormoonni iddoo qulqullaa'aa
mana WAAQAYYOOTTI qalaniif,
nu salphifamneerra;
waan arrabsamneefis
qaaniidhaan fuula keenya haguuganne."
- 52 "Garuu barri ani itti,
waaqota ishee tolfamoo adabuu fi
yeroon guutummaa lafa ishee irratti
warri madaa'an aadan dhufaa jira" jedha WAAQAYYOO.
- 53 "Yoo Baabilon samiitti ol baatee
da'annoo ishee ol dheeraa jabeeffatte iyyuu,
ani warra ishee barbadeessan itti nan erga"
jedha WAAQAYYOO.
- 54 "Baabilonii iyyi,
lafa Baabilonotaatii immoo
sagaleen badiisa guddaa ni dhaga'ama.
- 55 WAAQAYYOS Baabilonin ni barbadeessa;
inni waca ishee ni cal'isiisa,
dambaliin isaaniis akkuma bishaan guddaa ni huursa;
sagaleen huursaa isaaniis ni dhaga'ama.
- 56 Barbadeessaan tokko Baabilonitti ni dhufa;
gootonni ishee ni qabamu;
futtaaftuun isaaniis ni caccaba;
WAAQAYYOO, Waaqa haaloo ba'uudhaatii;
inni guutumaan guutuutti gatii ishee ni deebisaaf.

⁵⁷ Ani qondaaltotaa fi ogeeyyii ishee,
 akkasumas bulchitoota, ajajjoota waraanaatii fi
 gootota ishee nan macheessa;
 isaanis bara baraan ni rafu; hin dammaqanis,"
 jedha mootichi maqaan isaa WAAQAYYO Waan Hunda Danda'u,
 jedhamu sun.

⁵⁸ WAAQAYYO Waan Hunda Danda'u akkana jedha;
 "Dallaan Baabilon yabbuun sun ni jiga;
 karrawwan ishee dhedheeroon ibiddaan gubamu;
 namoonni akkasumaan of dadhabsiisu;
 dadhabbiin sabootaa qoraan ibiddaa qofa ta'a."

⁵⁹ Yeroo Seraayaan ilmi Neeriyaa, ilmi Mahiseyaa bara Zedeqiyaa mooticha Yihuudaa keessa waggaa afuraffaatti mooticha wajjin gara Baabilon deemetti ajajni Ermiyaas Raajichi isaaf kenne kanaa dha. ⁶⁰ Ermiyaas badiisa Baabilonitti dhufu hunda, jechuunis waa'ee Baabilon kan barreeffame hunda kitaaba maramaa irratti barreessee ture. ⁶¹ Innis Seraayaadhaan akkana jedhe; "Yommuu Baabilon geessutti dubbii kana hunda sagalee ol fudhattee dubbisuu hin dagatin. ⁶² Akkanas jedhi: 'Yaa WAAQAYYO, akka namni yookaan horiin ishee keessa hin jiraanneef ati akka iddoo kana barbadeessitu dubbatteerta; isheenis bara baraan ni onti.' ⁶³ Yeroo kitaaba maramaa kana dubbiftee fixxutti dhagaa itti hidhiitii Laga Efraaxiisitti darbadhu. ⁶⁴ Akkanas jedhi; 'Sababii badiisa ani isheetti fiduutiin akka lammata hin kaaneef Baabilon akkasitti ni liqimfamti. Ummanni ishees ni harca'a.'"

Dubbiin Ermiyaas as irratti raawwatama.

52

Kufaatii Yerusaalem

52:1-3 kwf - 2Mt 24:18-20; 2Sn 36:11-16

52:4-16 kwf - Erm 39:1-10

52:4-21 kwf - 2Mt 25:1-21; 2Sn 36:17-20

¹ Zedeqiyaa yeroo mootii ta'etti nama umuriin isaa waggaa digdamii tokkoo ture; innis Yerusaalem keessa taa'ee waggaa kudha tokko bulche. Maqaan haadha isaa Hamuutaal ture; isheenis intala Ermiyaas kan magaalaa Libnaatii dhufte turte. ² Innis akkuma Yehooyaaqiim hojjete sana, fuula WAAQAYYOO duratti waan hamaa ni hojjete. ³ Wannii kun hundi sababii dheekkamsa WAAQAYYOOTIF Yerusaalemii fi Yihuudaa irra ga'e; dhuma irrattis inni fuula isaa duraa isaan balleesse.

Zedeqiyaa mooticha Baabilonitti fincile.

⁴ Bara mootummaa Zedeqiyaa keessa waggaa saglaffaatti, bultii kurnaffaa ji'a kurnaffaatti Nebukadnezar mootiin Baabilon guutummaa loltoota isaa wajjin Yerusaalemitti duule; isaanis magaalattiin ala qubatanii naannoo ishee hundatti tuullaa biyyoo marsan.

⁵ Magaalaan sunis hamma waggaa kudha tokkoffaa bara Zedeqiyaa Mootichaatti akkuma marfamtetti turte.

⁶ Bultii saglaffaa ji'a afuraffaatti, magaalattii keessatti beelli akka malee hammaatee namni waan nyaatu tokko illee dhabe. ⁷ Ergasii dallaan magaalattii cabsamee loltoonni hundinuus ba'anii baqatan. Isaanis utuma Baabilononni magaalaa sana marsanii jiranuu karaa karra dallaa iddoo biqiltuu mootichaa bira jiru lamaan gidduu baasu sanaatiin halkaniin ba'anii baqatan. Isaanis Arabbaatti baqatan; ⁸ loltoonni Baabilon garuu Zedeqiyaa Mooticha ari'anii dirree Yerikoo irratti isa qaqqaban; loltoonni isaa hundis isa irraa gargar ba'anii bibittinnaa'anii turan; ⁹ innis ni qabame.

Gara mootii Baabilonitti Riiblaa biyya Hamaati keessaatti geeffame. Achittis itti murame. ¹⁰ Mootiin Baabilonis Riiblaatti ijuma isaa duratti ilmaan Zedeqiyaa gorra'e; qondaaltota Yihuudaa hundas fixe. ¹¹ Innis ergasii Zedeqiyaa keessaa ija isaa baasee foncaa naasiitiin hidhee Baabilonitti isa geesse; hamma gaafa inni du'uuttis manuma hidhaa keessa isa tursiise.

¹² Bara mootummaa Nebukadnezar mooticha Baabilon keessa waggaa kudha saglaffaatti, bultii kurnaffaa ji'a shanaffaatti Nebuzaradaan ajajaan eegumsa mootummaa inni mootii Baabilon tajaajilu sun gara Yerusaalem dhufe. ¹³ Innis mana qulqullummaa WAAQAYYOOTTI, masaraa mootummaattii fi manneen Yerusaalem hundatti ibidda qabsiise; manneen gurguddaa hundas ni gube. ¹⁴ Loltoonni Baabilon kanneen ajajaa

eegumsa mootummaa jala turan hundi dallaawwan naannoo Yerusaaalem turan hunda diigan. ¹⁵ Nebuzaradaan ajajaan eegumsaa sun namoota hiyyeeyyii tokko tokkoo fi warra magaalaa keessatti hafan, warra ogummaa harkaa qabanii fi warra baqatanii mootii Baabilonitti kooluu galan booji'ee fudhate. ¹⁶ Nebuzaradaan garuu hiyyeeyyii biyyattii warra hafan akka wayinii kunuunsanii fi lafa qotaniif achitti dhiise.

¹⁷ Baabilononni sun utubaawwan naasii, baattuwwan iddoodhaa socho'anii fi Gaanii naasii irraa hojjetamee mana qulqullummaa WAAQAYYOO keessa ture caccabsanii naasii sana hunda immoo Baabilonitti geessan. ¹⁸ Akkasumas okkoteewwan, waan ittiin daaraa hammaaran, waan ittiin ibsaa irraa daaraa dhadha'an, wacitiwwan ittiin dhiiga facaasan, caabiiwwanii fi mi'oota naasii irraa hojjetaman kanneen tajaajila mana qulqullummaatiif oolan hunda fudhatan. ¹⁹ Ajajaan eegumsaa sunis mi'oota warqee qulqulluu fi meetii irraa hojjetaman hunda jechuunis caabii dhoogaa, girgiraawwan, wacitiwwan ittiin dhiiga facaasan, okkoteewwan, baattuwwan ibsaa, caabiiwwanii fi wacitiwwan ittiin dhiibaafatan fudhatee deeme.

²⁰ Ulfinni naasii kan Solomoon Mootichi ittiin utubaawwan lamaan, Gaanii fi jiboota kudha lamaan isa jala jirani fi baattuwwan iddoodhaa socho'aniin mana qulqullummaa WAAQAYYOOTIIF hojjetee ture waan madaalliin madaaluu danda'uu oli turan. ²¹ Tokkoon tokkoon utubaa sanaa dhundhuma kudha saddeet ol dheeratee marsaan isaa immoo dhundhuma kudha lama ture; yabbinni isaa quba afur ta'ee keessi isaas banaa ture. ²² Guutuun naasii kan utubaa tokko irraas dhundhuma shan ol dheeratee naannoon isaa guutuun sibiila wal keessa loofamee tolfamee fi roomaanii naasiitiin miidhagamee ture. Utubaan kaanis roomaanii naasii wajjin kanuma fakkaata ture. ²³ Roomaanoonni bitaa mirgaan turan sagaltamii sagal turan; walumatti faaya naannoo utubichaa gubbaan jiru wajjin roomaanoota dhibba tokkootu ture.

²⁴ Ajajaan eegumsaa sun Seraayaa lubicha hangafa, Sefaaniyaa lubicha Sadarkaan isatti aanuu fi eegdota balbalaa sadan hidhee fuudhee deeme. ²⁵ Warra amma illee magaalaa keessatti hafan keessaa ajajaa loltootaatii fi gorsitoota mootii torba fudhate. Akkasumas barreessaa qondaala ol aanaa ture kan saba keessaa loltummaaf namoota filatu sanaa fi namoota magaalaa keessatti argaman jaatama fudhate. ²⁶ Nebuzaradaan ajajaan sun hunda isaani guuree Riiblaatti gara mooticha Baabilonitti geesse. ²⁷ Mootichis achuma Riiblaat biyya Hamaati keessatti isaan ni fixe.

Yihuudaanis akkasii booji'amee biyya isheetii baate.

²⁸ Baay'inni namoota Nebukadnezar boojiudhaan fudhatee kanaa dha:

Waggaa torbaffaa keessa

Yihuudoota 3,023;

²⁹ bara Nebukadnezar keessa waggaa kudha saddeettaffaatti,

Yerusaalemii namoota 832;

³⁰ waggaa digdamii sadaffaa isaa keessa Yihuudoonni 745,

Nebuzaradaan ajajaa eegumsaa sanaa boojiudhaan fudhataman.

Isaanis walumatti namoota 4,600 turan.

Yehooyaakiin Hiikamuu Isaa

52:31-34 kwf - 2Mt 25:27-30

³¹ Yehooyaakiin mootiin Yihuudaa booji'amee waggaa soddonii torbaffaa isaatti, Eewiil Marodaak mootii Baabilon ta'e; innis wagguma sana keessa bultii digdamii shanaffaa ji'a kudha lammaffaatti Yehooyaakiin mooticha Yihuudaa sana mana hidhaatii gad dhiisee bilisa isa baase. ³² Afaan tolaadhaanis isatti dubbatee barcumaa ulfinaa kan barcumaa mootota isa wajjin Baabilon keessa turan kaanii caalu kenneef.

³³ Kanaafuu Yehooyaakiin uffata isaa kan mana hidhaatti uffachaa ture sana of irraa baasee bara jireenya isaa guutuu yeroo hunda maaddii mootichaa irraa nyaate.

³⁴ Mootiin Baabilonis hamma inni lubbuudhaan jiraatetti guyyuma guyyaadhaan waan isaaf barbaachisu Yehooyaakiiniif kenna ture.

Faaruu Ermiyaas

1

- ¹ Magaalaan dur namaan guutamtee turte sun
akkamitti ontee hafte!
Isheen yeroo tokko saboota gidduutti guddoo turte
akkamitti akka haadha hiyyeessaa taate!
Isheen kutaalee biyyaa gidduutti mootii turte sun
amma garbittii taateerti.
- ² Isheen halkan halkan hiqqifattee boossi;
maddii ishee irra imimmaantu yaa'a.
Michoota ishee hunda keessaa
kan ishee jajjabeessu tokko iyyuu hin jiru.
Michoonni ishee hundinuu ishee gananiiru;
isaan diinota ishee ta'aniiru.
- ³ Rakkinnaa fi cunqurfama guddaa booddee
Yihuudaan booji'amtee fudhatamteerti.
Isheen saboota gidduu jiraatti,
lafa itti boqottu illee hin arganne.
Warri ishee ari'an hundi
rakkina ishee keessatti ishee qabatan.
- ⁴ Daandiiwwan Xiyoon ni boo'u;
namni ayyaana ishee kan murteeffame kabajuuf dhufu
tokko iyyuu hin jiruutii.
Karrowwan ishee hundi onanii jiru;
luboanni ishee ni aadu;
shamarran ishee ni gaddu,
isheen is dhiphina guddaa keessa jirti.
- ⁵ Amajaajonni ishee gooftota ishee ta'aniiru;
diinota isheetti toleera.
Sababii cubbuu ishee baay'ee sanaatiif
WAAQAYYO gadda itti fideera.
Ijoolleen ishee fudhatamanii deemaniiru;
fuula amajaajota ishee duratti booji'amaniiru.
- ⁶ Intala Xiyoon irraa
miidhaginni hundi fudhatameera.
Ilmaan mootota ishee
akkuma gadamsa lafa dheedaa dhabee ta'aniiru;
isaan dadhabbiidhaan
fuula warra isaan ari'anii dura baqatan.
- ⁷ Baroota rakkinnaa fi asii achi jooruu ishee keessa
Yerusaalem qabeenya
bara durii kan ishee ture hunda ni yaadatti.
Yeroo namoonni ishee harka diinaa seenanitti
namni ishee gargaaru tokko iyyuu hin turre.
Diinonni ishee ishee ilaalanii
badiisa isheetti kolfan.
- ⁸ Yerusaalem akka malee cubbuu hojjette;
akkasiinis xuroofte.
Warri ulfina kennaniifii turan hundi ishee tuffatan;
isaan qullaatti hafuu ishee arganiiruutii;
isheen mataan ishee guungumtee

of irra garagalti.

⁹ Xuraa'ummaan ishee wandaboo isheetti maxxane;
isheen waan gara duraatti itti dhufu hin yaadne;
kufaatiin ishee nama rifachiisa;
kan ishee jajjabeessu tokko iyyuu hin jiru ture.
“Yaa WAAQAYYO rakkina koo ilaali;
diinni mo'ateeraatii!”

¹⁰ Qabeenya ishee hundatti
diinni harka isaa diriirseera;
isheen Namoota Ormaa
warra ati akka isaan
waldaa kee hin seenne dhowwite sana
utuu isaan iddoo ishee qulqulluu seenanuu argite.

¹¹ Namoonni ishee hundinuu utuma
aadanuu buddeena barbaaddatu;
isaan lubbuu ofii isaanii turfachuuf jecha
qabeenya isaanii nyaataan geeddarratu.
“Yaa WAAQAYYO na ilaali, na yaadadhus;
ani tuffatameeraatii.”

¹² “Warra karaa irra dabartan hundi, kun isiniif homaa mitii?
Naannoo keessan ilaalaatii argaa.
Rakkinni akka rakkina koo
kan ani ittiin rakkadhe,
kan WAAQAYYO guyyaa dheekkamisa isaatti
natti fide sanaa jiru tokko iyyuu jiraa?”

¹³ “Inni ol gubbaadhaa ibidda erge;
ibidda sana lafee koo keessa seensisa.
Inni miilla kootiif kiyoo diriirsee
dugda duubatti na deebise;
inni kophaatti na hambisee
guyyaa guutuu na dadhabsiise.

¹⁴ “Cubbuun koo waanjootti hidhameera;
isaan harka isaatiin walitti fo'aman.
Isaan morma kooti rarraafaman;
gooftaan humna koo dadhabsiise.
Inni warra ani of irraa deebisuu
hin dandeenyetti dabarsee na kenneera.

¹⁵ “Gooftaan gootota na keessatti argaman
hunda gateera;
inni dargaggoota koo caccabsuuf
yaa'ii waammate.
Gooftaan iddoo cuunfaa wayinii isaatti
Durba Qulqullittii Intala Yihuudaa dhidhiiteera.

¹⁶ “Wanni ani boo'ee
iji koo imimmaaniin guutameef kanaa dha.
Namni na jajjabeessuuf dhi'oo jiru tokko iyyuu hin jiru;
kan hafuura koo bayyanachiisus hin jiru.
Sababii diinni humna argateef
ijoolleen koo harka duwwaa hafan.”

¹⁷ Xiyoon harka ishee bal'ifatteerti;
garuu namni ishee jajjabeessu tokko iyyuu hin jiru.
Akka olloonna isaa amajajota isaa ta'aniif
WAAQAYYO Yaaqoobitti ajajeera;

Yerusaalemis gidduu isaaniitti
waan xuraa'aa taateerti.

18 “WAAQAYYO qajeelaa dha;
ta'us ani ajajawwan isaatti fincileen ture.
Yaa saboota, hundi keessan dhaga'aa;
rakkina koos ilaalaa.
Dargaggoonni fi shamarran koo
booji'amaniif fudhatamaniiru.

19 “Ani tumsitoota koo nan waammadhe;
isaan garuu na ganan.
Luboonni koo fi maanguddoonni koo
utuu lubbuu isaanii oolfachuuf
nyaata barbaadatanuu
magaalaa keessatti dhuman.

20 “Yaa WAAQAYYO akka ani dhiphadhe ilaali!
Ani keessa kootti dhiphadheera;
garaa koo keessatti raafameera;
ani nama akka malee fincilun tureetii.
Alaa goraadeen nama qala;
mana keessa immoo du'a qofatu jira.

21 “Namooni akka ani aadaa jiru dhaga'aniiru;
kan na jajjabeessu garuu hin jiru.
Diinonni koo hundinuu rakkina koo dhaga'aniiru;
isaan waan ati gootetti gammadaniiru.
Akka isaan akkuma koo ta'aniif
maaloo ati guyyaa jette sana fidi.

22 “Hamminni isaanii hundinuu
fuula kee duratti haa dhi'aatu;
waanuma sababii cubbuu koo hundaatiif
natti fidde sana isaanitti illee fidi!
Aaduun koo baay'ateeraatii;
onneen koos dadhabdeerti.”

2

1 Gooftaan akkamitti duumessa dheekkamsa isaatiin
intala Xiyoon haguuge!
Inni ulfina Israa'el
samiidhaa lafatti gad daddarbateera;
inni guyyaa dheekkamsa isaatti
ejjeta miilla isaa hin yaadanne.

2 Gooftaan gara laafina tokko malee
iddoo jireenya Yaaqoob hunda liqimseera;
da'annoo intala Yihuudaas
dheekkamsa isaatiin diige.
Inni mootummaa isheetii fi
bulchitoota ishee salphisee lafatti gad deebise.

3 Inni dheekkamsa sodaachisaadhaan
gaanfa Israa'el hunda caccabse.
Yommuu diinni dhi'aatettis
harka isaa mirgaa duubatti deebifate.
Inni akkuma arraba ibiddaa kan waan naannoo isaa jiru gubu sanaa
Yaaqoob keessatti boba'e.

4 Inni akkuma diinaatti iddaa isaa dabsate;

harki isaa mirgaa qophaa'eera.
 Warra ijatti bareedan hunda
 akkuma amajaajitti qale;
 dunkaana intala Xiyoonitti
 dheekkamsa isaa akkuma ibiddaa roobse.

⁵ Gooftaan akkuma diinaa ta'e;
 inni Israa'elin liqimseera.
 Inni masaraawwan ishee hunda liqimsee
 da'annoo ishee jabaan illee diigeera.
 Inni Intala Yihuudaatti
 boo'ichaa fi faaruu boo'ichaa baay'iseera.

⁶ Inni lafa jireenya isaa akkuma iddoo biqiltuu onseera;
 iddoo wal ga'ii isaas balleesseera.
 WAAQAYYO akka Xiyoon ayyaana ishee kan murtaa'ee fi
 Sanbatoota ishee irraanfattu godheera;
 inni dheekkamsa isaa sodaachisaa sanaan
 mootota fi luboota akka malee tuffate.

⁷ Gooftaan iddoo aarsaa isaa tuffateera;
 iddoo qulqulluu isaa illee dhiiseera.
 Dallaawwan masaraawwan ishee
 dabarsee harka diinotaatti kenneera;
 isaan akkuma guyyaa ayyaana murteeffameetti
 mana WAAQAYYOO keessatti sagalee ol fudhatanii iyyan.

⁸ WAAQAYYO dallaa naannoo
 Intala Xiyoon jiru diiguuf murteesseera.
 Inni safartuu diriirseera;
 barbadeessuu irraas harka isaa hin deebifanne.
 Akka dallaan eegumsaatii fi keenyan faarsanii boo'an godhe;
 isaanis tokkummaadhaan badan.

⁹ Karrawwan ishee lafa keessa dhidhimaniiru;
 inni danqaraawwan sibiila ishee caccabsee balleesseera.
 Mootiin isheetii fi ilmaan mootota ishee booji'amanii
 saboota gidduu bibittinnaa'aniiru;
 seerri si'achi hin jiraatu;
 raajonni ishees si'achi
 WAAQAYYO biraa mul'ata hin argan.

¹⁰ Maanguddoonni Intala Xiyoon
 cal'isanii lafa tataa'an;
 isaan daaraa mataatti firfiratanii
 uffata gaddaas uffatan.
 Shamarran Yerusaalem
 mataa isaanii gad qabatan.

¹¹ Iji koo boo'ichaan dadhabeera;
 keessa kootti dhiphadheera;
 sababii sabni koo dhumeef
 sababii ijoollee fi daa'imman
 daandiiwwan magaalaa irratti gaggabaniif
 garaan koo gaddaan laafeera.

¹² Isaan yommuu daandiiwwan magaalaa irratti
 akkuma namoota madaa'aniitti gaggabanitti,
 yommuu lubbuun isaanii
 hammuu haadha isaanii irratti ba'uuf jirtutti
 "Buddeennii fi daadhiin wayinii eessaa jiru?"
 jedhanii haadhota isaanii gaafatu.

- 13 Yaa intala Yerusaalem,
 ani maal siif jechuun danda'a?
 Maaliinan wal si qixxeessa?
 Yaa Intala Xiyoon durba qulqullittii
 ani akkan si jajjabeessuuf
 maalittin si fakkeessuuf danda'a?
 Madaan kee akkuma galaanaa gad fagoo dha.
 Eenyutu si fayyisuu danda'a?
- 14 Mul'anni raajota keetii
 sobaa fi kan faayidaa hin qabnee dha;
 isaan booji'amu kee hambisuuf
 cubbuu kee ifa hin baafne.
 Raajiin isaan siif kennanis
 sobaa fi kan karaa irraa nama balleessuu dha.
- 15 Warri karaa keetiin darban hundinuu
 harka isaanii sitti rurrukutu;
 isaanis intala Yerusaalemitti
 qoosuu fi mataa raasuudhaan,
 "Magaalaan muummee miidhaginaa
 gammachuu guutuu lafaa
 jedhamtee waamamte sun kanaa?" jedhu.
- 16 Diinonni kee hundinuu
 afaan isaanii sitti banatu;
 isaan qoosuu fi ilkaan isaanii qaruudhaan
 "Nu ishee liqimsineerra.
 Guyyaan nu eeggachaa turre sun kanaa dha;
 nu waan kana arguuf jiraanneerra" jedhu.
- 17 WAAQAYYO waan karoorfate hojjeteera;
 dubbii isaa kan bara dheeraan dura
 dubbate sana guuttateera.
 Inni gara laafina tokko malee si garagalcheera;
 akka diinni kee sitti gammadu godheera;
 gaanfa amajaajii keetii ol ol qabeera.
- 18 Onneen namootaa
 gara Gooftaatti iyya.
 Yaa dallaa Intala Xiyoon
 halkanii guyyaa
 imimmaan kee akka lagaa haa yaa'u;
 boqonnaa tokko illee ofii keetiif hin kennin;
 iji kees hin boqotin.
- 19 Yommuu eegumsi halkanii jalqabutti
 ka'iitii halkaniin iyyi;
 fuula Gooftaa duratti
 onnee kee akka bishaanii dhangalaasi.
 Lubbuu ijoollee keetii
 kanneen fixee daandii hundaatti
 beelaan gaggabaniitiif jedhiitii
 harka kee gara isaatti ol qabadhu.
- 20 "Yaa WAAQAYYO, ati ilaali; argis:
 Ati takkumaa eenyu irratti waan akkasii gootee beekta?
 Haadhonni daa'imman isaanii,
 ijoollee kunuunsanii guddisan nyaachuu qabuu?
 Lubnii fi raajiin,
 iddoo qulqulluu kan Gooftaa keessatti ajjeefamuu qabuu?"

21 “Dargaggoonnii fi maanguddoonni,
walii wajjin awwaara karaa irra ciisu;
dargaggoonnii fi shamarran koo
goraadeedhaan ajjeefamaniiru.
Ati gaafa dheekkamsa keetiitti isaan fixxe;
gara laafina tokko malee isaan qalte.

22 “Ati akkuma guyyaa ayyaana murteeffameetti
nama waamtutti qixa hundaanuu sodaa natti waamte.
Guyyaa dheekkamsa WAAQAYOOTTI,
homaa hin miliqne yookaan hin hafne;
warra ani da’ee guddise
diinni koo na jalaa balleesseera.”

3

1 Namni ulee dheekkamsa isaatiin
rakkina arge anaa dha.

2 Inni fuula isaa duraa na ari’ee
akka ani qooda ifaa dukkana keessa deemu na godhe;

3 dhugumaan inni guyyaa guutuu,
ammumaa amma harka isaa natti deebise.

4 Inni foon kootii fi gogaa koo dulloomseera;
lafee koo illee caccabseera.

5 Inni na marsee hadhaa ‘ummaa fi
gidiraa natti naannesseera.

6 Akkuma warra dur dhumanii
akka ani dukkana keessa jiraadhu na godhe.

7 Inni akka ani hin miliqneef dallaa natti ijaare;
foncaa ulfaatuu natti fe’e.

8 Yommuu ani waammadhu yookaan gargaarsaaf iyyadhutti illee
inni kadhannaa koo dhaga’uu dida.

9 Karaa koo dhagaa soofameen cufe;
daandii koo illee ni jal’isa.

10 Inni akkuma amaaketa riphee waa eeggatuu,
akkuma leenca dhokatee jiruu

11 daandii irraa na harkisee na ciccire;
kophaatti na gate.

12 Inni iddaa isaa luqqifatee
xiyya isaa natti qabe.

13 Korojoo isaa keessaa xiyya baasee
onnee koo waraane.

14 Ani saba koo hundaaf waan kolfaa nan ta’e;
isaan guyyaa guutuu faaruudhaan natti qoosu.

15 Inni waan hadhaa ‘aa na nyaachise;
hadhooftuu illee na quubse.

16 Inni dhagaadhaan ilkaan koo cabse;
awwaara keessattis na dhidhiite.

17 Ani nagaa nan dhabe;
gammachuun maal akka ta’es nan irraanfadhde.

18 Kanaafuu ani “Ulfinni koo,
abdiin ani WAAQAYYO irraa qabu hundinuu badeera” nan jedhe.

19 Ani rakkinaa fi asii achi jooruu koo,
hadhaa ‘ummaa fi hadhooftuus nan yaadadha.

20 Lubbuun koo yeroo hunda waan kana yaaddi;

- na keessattis gad of qabdi.
 21 Ta'us ani waan kana nan qalbeeffadha;
 kanaafuu ani abdii qaba.
- 22 Nu sababii jaalala WAAQAYYOO guddaa sanaatiif hin badnu;
 gara laafinni isaa hin dhumuutii.
- 23 Isaan ganama hunda haaraa dha;
 amanamummaan kees guddaa dha.
- 24 Anis, "WAAQAYYO qooda koo ti;
 kanaafuu ani isa nan eeggadha" ofiin nan jedha.
- 25 WAAQAYYO warra isa abdataniif,
 kanneen isa barbaadaniif gaarii dha;
- 26 Fayyisuu WAAQAYYOO
 cal'isanii eeggachuun gaarii dha.
- 27 Yeroo dargaggummaa isaatti
 waanjoo baachuun namaaf gaarii dha.
- 28 Inni kophaa isaa cal'isee haa taa'u;
 WAAQAYYO isa baachiseeraatii.
- 29 Amma illee abdiin ni jira ta'aatii,
 inni fuula isaa awwaara keessa haa suuqqatu.
- 30 Inni nama isa dha'utti maddii isaa haa qabu;
 salphinaanis haa guutamu.
- 31 Gooftaan bara baraan
 nama hin gatuutii.
- 32 Inni gadda fidu illee garaa ni laafa;
 jaalalli isaa kan hin geeddaramne sun guddaadhaatii.
- 33 Inni itti yaadee rakkina
 yookaan dhiphina sanyii namaatti hin fiduutii.
- 34 Yommuu hidhamtoonni biyyattii keessa jiran hundi
 miilla jalatti dhidhiitaman,
- 35 yommuu fuula Waaqa Waan Hundaa Olii duratti
 mirgi nama tokkoo dhiibamu,
- 36 yommuu murtiin qajeelaan dhabamu,
 Gooftaan waan akkasii hin arguu?
- 37 Yoo Gooftaan ajajuu baate
 eenyutu dubbatee waan sana fiixaan baasuu danda'a?
- 38 Wannii hamaanii fi wannii gaariin
 afaanuma Waaqa Waan Hundaa Oliitii ba'a mitii?
- 39 Yoos namni lubbuun jiraatu kam iyyuu
 maaliif yommuu cubbuu isaatiif
 adabamutti guunguma ree?
- 40 Kottaa nu daandii keenya qorree haa ilaallu;
 gara WAAQAYYOOTIS haa deebinu.
- 41 Nu onnee keenyaa fi harka keenya
 gara Waaqa samii keessa jiruutti ol qabnee akkana haa jennu:
- 42 "Nu cubbuu hojjenneerra; fincilleerras;
 atis nuuf hin dhiifne.
- 43 "Ati dheekkamsaan of haguugdee nu ariite;
 gara laafina malees nu fixxe.
- 44 Akka kadhannaan tokko iyyuu gara kee hin dhufneef
 ati duumessaan of haguugde.
- 45 Ati saboota gidduutti
 xurii fi kosii nu goote.
- 46 "Diinonni keenya hundinuu,

- afaan nutti banataniiru.
 47 Sodaa fi kiyyoon,
 diigamuu fi badiisni nutti dhufeera.”
 48 Sababii uummanni koo barbadaa’eeff
 lolaan imimmaanii ija koo keessaa yaa’a.
 49 Iji koo boqonnaa malee
 utuu gargar hin kutin imimmaan lolaasa;
 50 kunis hamma WAAQAYYO
 ol samiidhaa gad ilaalee argutti.
 51 Sababii dubartoota magaalaa koo hundaatiif
 wannani argu lubbuu koo gaddisiisa.
 52 Warri sababii malee diina natti ta’an
 akkuma simbiraa na adamsan.
 53 Isaan lubbuu koo boolla keessatti galaafatanii
 dhagaa natti garagalchuu yaalan;
 54 bishaan mataa koo irra gara gale;
 anis, “Baduu koo ti” nan jedhe.
 55 Yaa WAAQAYYO, ani boolla qilee keessaa
 maqaa kee nan waammadha.
 56 Ati kadhannaa koo kan,
 “Iyya ani gargaarsa barbaachaaf iyyu
 dhaga’uu hin didin” jedhu dhageesseerta.
 57 Yeroo ani si waammadhetti ati natti dhi’aattee
 “Hin sodaatin” naan jette.
 58 Yaa gooftaa ati dubbii koo naa falmite;
 lubbuu koos ni baraarte.
 59 Yaa WAAQAYYO, ati daba natti hojjetame argiteerta;
 dubbii koo naa ilaali!
 60 Ati haaloo ba’uu isaaniitii fi
 natti malachuu isaanii hundas argiteerta.
 61 Yaa WAAQAYYO, ati arraba isaaniitii fi
 natti malachuu isaanii hunda dhageesseerta;
 62 kunis arraba warra natti ka’aniitii fi
 waan isaan guyyaa guutuu waa’ee koo hasaasanii dha.
 63 Ati isaan ilaali! Isaan ta’anii yookaan dhadhaabatanii
 weedduu isaaniitiin natti qoosu.
 64 Yaa WAAQAYYO, waan isaaniif malu
 akkuma hojii harka isaaniitti deebisii kenniif.
 65 Onnee isaanii haguugi;
 abaarsi kees isaan irra haa bu’u!
 66 Samiiwwan WAAQAYYOO jalaa
 dheekkamsaan isaan ari’ii isaan balleessis.

4

- 1 Warqeen akkamitti boorrajaa’e?
 Warqeen qulqulluunis akkamitti geeddaramel!
 Dhagaawwan iddoo qulqulluu
 fiixee daandiiwwan hundaa irratti bibittinnaa’aniiru.
 2 Ilmaan Xiyyoon kanneen akka
 warqee qulqulluutti ilaalamaa turan sun
 amma akkamitti akka okkotee supheetti,
 akka hojii suphee dhooftuutti ilaalamu!
 3 Waangoonni iyyuu ilmaan isaanii hoosisuuf

harma isaanii ni kennu;
 sabni koo garuu akkuma guchii gammoojjii
 gara jabeessa ta'eera.

⁴ Sababii dheebuutiif arrabni daa'immanii
 laagaatti maxxana;
 ijoolleen buddeena kadhatti:
 garuu namni isaaniif kennu tokko iyyuu hin jiru.

⁵ Warri dur cidha nyaachaa turan,
 rakkatanii daandii irra jiru.
 Warri dur uffata diimaa dhiilgee uffachaa turan
 har'a tuullaa dikee hammatu.

⁶ Adabbiin yakka saba koo
 adabbiin yakka Sodoom
 kan utuu harki nama ishee gargaaruuf hin tuqin
 tasa badde sanaa caalaa guddaa ture.

⁷ Ilmaan mootota isaanii cabbii caalaa qulqulluu,
 aannan caalaa adaadii turan;
 dhagni isaanii lula diimaa caalaa diimaa,
 bifti isaanii immoo sanpeer fakkaata ture.

⁸ Amma garuu qa'aa caalaa gurraacha'aniiru;
 daandii irrattis namni isaan hubatu hin jiru.
 Gogaan isaanii lafee isaaniitti maxxaneera;
 akka mukaas gogeera.

⁹ Warra beelaan dhumaniin mannaa,
 warra goraadeedhaan ajjeefaman wayya;
 Isaan waan nyaatamu lafa qotiisaa irraa dhabanii
 beelaan alatti goggoganiin dhumu.

¹⁰ Yeroo sabni koo dhumetti
 dubartoonni gara laafoon harkuma isaaniitiin
 akka nyaata isaanii ta'aniif
 ijoollee ofii affeelan.

¹¹ WAAQAYYO dheekkamsa isaa guutuu gad dhiise;
 aarii isaa sodaachisaa sanas ni dhangalaase.
 Xiyyoon keessattis
 ibidda hundeeffan ishee barbadeessu qabsiise.

¹² Akka diinonni yookaan amajaaJonni
 karraawan Yerusaa'lem seenuu danda'an,
 mootonni biyya lafaa
 yookaan sabni addunyaa tokko iyyuu hin amanne.

¹³ Garuu wanni kun sababii cubbuu
 raajota isheetii fi balleessaa luboota ishee
 kanneen ishee keessatti dhiiga qajeelotaa
 dhangalaasan sanaatiif ta'e.

¹⁴ Isaan akkuma jaamotaa
 daandii irra gatantaru.
 Hama namni tokko iyyuu wayyaa isaanii tuquu hin dandeenyetti
 akka malee dhiigaan xuraa'aniiru.

¹⁵ Namoonnis, "Isin xuraa'oo dha! Asii badaa!
 Badaa! Badaa! Nu hin tuqinaa!" jedhanii isaaniitti iyyu.
 Yommuu baqatanii asii fi achi jooranittis
 saboonni Namoota Ormaa gidduu jiran,

“Isaan si’achi as jiraachuu hin danda’an” jedhu.

16 WAAQAYYO mataa isaatu isaan bittinneesse;
inni si’achi isaan hin eegu.

Luboonna hin kabajamne;
maanguddoonni surraa hin arganne.

17 Akkasumaan gargaarsa eeggachuudhaan
iji keenya dadhabe;
gamoo keenya irra teenyee
saba nu baasuu hin dandeenye irraa gargaarsa eegganne.

18 Akka nu daandii keenya irra deemuu hin dandeenyeef
namoonni tarkaanfii keenya eegu.

Dhumni keenya dhi’aateera;
guyyoonni keenyas gabaabataniiru;
badiisni keenya dhufeeraatii.

19 Warri nu ari’an
risaa samii caalaa saffisu;
isaan tulluuwwan irraa nu ari’anii
gammoojjii keessatti riphanii nu eeggatu.

20 Hafuurri lubbuu keenyaa kan WAAQAYYO dibe,
kiyyoo isaaniitiin qabame.
Nu waan gaaddidduu isaa jala,
Namoota Ormaa gidduu jiraannu seenee turre.

21 Yaa Intala Edoom kan biyya Uuzi keessa jiraattu
ati ililchi, gammadis.
Garuu xoofoon sun siifis ni kennama;
atis machoofttee qullaa kee hafta.

22 Intala Xiyoon adabamuun kee ni dhuma;
inni bara booji’amu keetii hin dheeressu.
Garuu yaa Intala Edoom, inni cubbuu kee ni adabe;
hammina kees ifatti baasa.

5

1 Yaa WAAQAYYO, waan nurra ga’e yaadadhu;
ilaali; salphina keenyas argi.

2 Handhuuraan keenya alagootaaf,
manneen keenyas Namoota Ormaatiif
dabarfamarii kennamaniiru.

3 Nu ijoollee abbaa hin qabne taane;
haadhonna keenya immoo
haadhota hiyyeessaa ta’aniiru.

4 Nu bishaan dhugnuuf kaffaluu qabna turre;
qoraan illee bittaa qofaan arganna.

5 Warri nu ari’an koomee keenya bira jiru;
nu dadhabneerra; boqonnaas hin qabnu.

6 Nu buddeena ga’aa argachuuf jennee
warra Gibxittii fi warra Asooritti harka kennine;

7 Abbootiin keenya cubbuu hojjetanii darban;
nu immoo adabbii isaanii baanne.

8 Garbootatu nu bulcha;
namni harka isaaniitii bilisa nu baasu tokko iyyuu hin jiru.

9 Sababii goraadee gammoojjii jiruutiin
lubbuu keenya balaaf saaxillee buddeena arganna.

10 Gogaan keenya sababii beelaatiin
akkuma badaa ibiddaa ho’a.

- 11 Xiyoon keessatti dubartoonni,
magaalaawwan Yihuudaa keessattis dubbarran qulqulluun
humnaan gudeedaman.
- 12 Ilmaan moototaa harka isaaniitiin fannifamaniiru;
maanguddoonni ulfina hin arganne.
- 13 Ga'eessonni akka midhaan daakan dirqisiifaman;
ijoolleen dhiiraa muka baachuun gatantaran.
- 14 Maanguddoonni karra magaalaa duraa deemaniiru;
dargaggoonnis weedduu isaanii dhiisaniiru.
- 15 Gammachuun garaa keenya keessaa badeera;
shuubbisuun keenyas boo'ichatti geeddaramaera.
- 16 Gonfoon mataa keenya irraa bu'eera.
Nuuf wayyoo; nu cubbuu hojjenneerraatii!
- 17 Sababii waan kanaatiif onneen keenya ni gaggabe;
sababii waan kanaatiif immoo iji keenya dadhabe;
- 18 Tulluun Xiyoon kan onee hafe sun
lafa waangoonni irra burraaqan ta'eeraatii.
- 19 Yaa WAAQAYYO, ati bara baraan bulchi;
teessoon kees dhalootaa gara dhalootaatti itti fufa.
- 20 Ati maaliif guutumaan guutuutti nu irraanfatta?
Maaliif bara dheeraas nu dhiifta?
- 21 Yaa WAAQAYYO, akka nu deebinuuf ofitti nu deebisi;
bara keenya illee akkuma duriitti haaromsi.
- 22 Ati yoo guutumaan guutuutti nu gatuu baatte,
yoo akka malees nutti dheekkamu baatte waan kana godhi.

Raajii Hisqi'eel

Uumamawwan Jiraatoo fi Ulfina WAAQAYYOO

¹ Waggaa soddommaffaa keessa, bultii shanaffaa ji'a afuraffaatti utuu ani Laga Kebaar biratti booji'amtoota gidduu jiruu samiiwwan ni banaman; anis mul'ata Waaqaa nan arge.

² Ji'a sana keessaas bultii shanaffaatti jechuunis Yehooyaakiin Mootichi booji'amee waggaa shanaffaatti, ³ dubbiin WAAQAYYOO Laga Kebaar biratti biyya Baabilonotaa keessatti gara Hisqi'eel lubicha ilma Buuz dhufe. Achittis harki WAAQAYYOO isa irra ture.

⁴ Anis mil'adhee bubbee hamaa karaa kaabaatiin dhufaa jiru jechuunis duumessa guddaa balaqqeessa ifuu fi ifa guddaan marfame tokkon arge. Wiirtuun ibidda sanaas sibiila ibiddaan diimeffame fakkaata ture; ⁵ ibidda sana keessas waan uumamawwan jiraatoo afur fakkaatu tokkotu ture. Bifti isaas bifa namaa fakkaata ture; ⁶ tokkoon tokkoon isaanii fuula afur afurii fi qoochoo afur afur qabu turan. ⁷ Miilli isaanii qajeelaa dha; faanni isaanii immoo kottee jabbii fakkaatee akka naasii dibameetti ni calaqqisa ture. ⁸ Qoochoo isaanii jalaanis qixa afraniin harka namaa qabu ture. Afran isaanii hundi fuulaa fi qoochoo qabu turan; ⁹ qoochoon isaaniis wal tuqa ture. Tokkoon tokkoon isaanii qajeelanii fuula duratti deeman; yeroo deemanittis of duuba hin mil'atan ture.

¹⁰ Fuulli isaanii kana fakkaata ture: Afran isaanii iyyuu tokkoon tokkoon isaanii fuula namaa qabu ture; karaa mirgaatiin tokkoon tokkoon isaanii fuula leencaa, karaa bitaatiin immoo fuula qotiyyoo qabu ture; akkasumas tokkoon tokkoon isaanii fuula risaa qabu ture. ¹¹ Egaa fuulli isaanii akkas ture. Qoochoon isaaniis ol diriirfama ture. Tokkoon tokkoon isaanii qoochoo lama lama qabu ture. Qoochoo tokkoo tokkoo isaanii karaa lamaaniinuu qoochoo uumama kaanii tuqa; qoochoon lama immoo dhagna isaa haguuga ture. ¹² Tokkoon tokkoon isaanii qajeelanii fuula duratti ni deeman. Isaanis utuu of irra hin mil'atin iddoo hafuurri deemu hunda dhaqu turan. ¹³ Bifti uumamawwan jiraatoo sanaa cilee ibiddaa kan boba'u yookaan guca boba'u fakkaata ture. Uumamawwan sana gidduus ibiddi asii fi achi sosocho'a ture; ni ifas ture; bakakkaanis isa keessaa ni ba'a ture. ¹⁴ Uumamawwan sunis akka ifa bakakkaa asii fi achi darbatamu ture.

¹⁵ Anis akkuman uumamawwan jiraatoo sana ilaaleen tokkoo tokkoo uumama fuula afur afur qabu sanaa cinatti geengoo tokko tokko nan arge. ¹⁶ Biftii fi haalli geengoowwan sun ittiin hojjetamaniis akkana ture: Isaanis akka dhagaa gati jabeessa biiralee jedhamuu calaqqisu ture; afran isaanii hundinuu wal fakkaatu ture. Tokkoon tokkoon geengoo sanaa waan geengoo kaanitti diramee hojjetame fakkaata ture. ¹⁷ Isaanis yommuu deemanitti utuu of irra hin mil'atin kallattii afran kamiin iyyuu deeman; yommuu uumamawwan sun deemanis geengoowwan kallattii hin geeddaratan ture. ¹⁸ Qarqarri geengoowwan sanaas ol dheeraa fi sodaachisaa ture; qarqarri geengoowwanii afranuus guutumaan guutuutti ijaan marfamarii turan.

¹⁹ Yeroo uumamawwan jiraatoon sun deemanitti geengoowwan isaan cinaan jiranis ni deeman; yommuu uumamawwan jiraatoon ol ka'anitti geengoowwanis ol ka'an. ²⁰ Iddoo hafuurri dhaqu hundas ni dhaqu ture; sababii hafuurri uumamawwan jiraatoo sanaa geengoowwan keessa jiruuf geengoowwanis isaan wajjin ol ka'an. ²¹ Yommuu uumamawwan sun deemanitti isaanis ni deeman; yommuu uumamawwan dhaabatanitti isaanis ni dhaabatan; sababii hafuurri uumamawwan jiraatoo sanaa geengoowwan keessa jiruuf yommuu uumamawwan sun lafaa ol ka'anitti geengoowwanis isaanuma wajjin ol ka'an.

²² Mataa uumamawwan jiraatoo sanaatiin ol waan akka bantii samii kan akka bilillee calaqqisuu fi kan nama sodaachisu tokkotu diriirfamee ture. ²³ Bantii samii sana jalatti qoochoowwan isaaniis walitti diriirfamarii turan; tokkoon tokkoon isaaniis qoochoowwan ittiin dhagna isaanii haguuggatan lama lama qabu turan. ²⁴ Yeroo uumamawwan sun deemanitti ani sagalee qoochoowwan isaanii nan dhaga'e; sagaleen kunis sagalee akka bishaan guutee huursuu, akka sagalee Waaqaa Waan Hunda Danda'utii fi akka waca tuuta loltootaa ture. Isaan yeroo dhaabatan qoochoowwan isaanii gad qabatu ture.

²⁵ Akkuma isaan qoochoo isaanii gad qabatanii dhaabataniinis bantii samii kan mataa isaaniitiin ol jiru sana irraa sagaleen tokko dhufe. ²⁶ Bantii samii kan mataa isaaniitiin

ol jiru gubbaa waan akka teessoo sanpeer fakkaatu tokkodu ture; teessoo sanaa olittis fakkaattii akka fakkaattii namaa tokkodu ture. ²⁷ Anis waan mudhii isaa fakkaatuun olitti sibiila diimeffamee ibidda fakkaatu kan ibiddaan guutame tokko nan arge; waan mudhii isaa fakkaatu sanaan gadittis inni ibidda fakkaata ture; ifni guddaanis isa marsee ture. ²⁸ Gonfoon ifaa kan naannoo isaa ture sunis bifa sabbata Waaqaa kan guyyaa roobni roobuu fakkaata ture.

Kunis bifa fakkaattii ulfina WAAQAYYOO ture. Anis yeroon waan kana argetti addaan lafatti gombifamee sagalee waan dubbachaa jiru tokkoo nan dhaga'e.

2

Waamamuu Hisqi'eel

¹ Innis, "Yaa ilma namaa, miilla keetiin dhaabadhu; ani sittan dubbadhaa" naan jedhe. ² Akkuma inni dubbateenis Hafuurri anatti seenee miilla kootiin na dhaabachiise; anis isaa natti dubbatu nan dhaga'e.

³ Innis akkana naan jedhe: "Yaa ilma namaa, ani gara Israa'elootaatti, gara saba fincilaan kan natti fincile sanaatti sin erga; isaanii fi abbootiin isaanii hamma har'aatti natti fincilaniiru. ⁴ Sabni ani itti si ergu sun didaa fi mata jabeessa. Atis, 'WAAQAYYO Gooftaan akkana jedha' jedhiin. ⁵ Isaan mana fincilaadhaatii; dhaga'anis dhaga'uu baatanis akka raajiin isaan gidduu jiru ni beeku. ⁶ Yaa ilma namaa, ati isaan yookaan dubbii isaanii hin sodaatin. Sokorruu fi qoraatiin si marsus, torbaanqabaa gidduu jiraattus hin sodaatin. Isaan mana fincilaan ta'an iyyuu ati waan isaan dubbatan hin sodaatin yookaan isaan si hin rifachiisin. ⁷ Waan isaan finciltoota ta'aniif, dhaga'anis dhaga'uu baatanis ati dubbii koo isaanitti himuu qabda. ⁸ Yaa ilma namaa, ati garuu waan ani siin jedhu dhaggeeffadhu; ati akka mana fincilaan sanaa hin fincilin; afaan kee banadhuutii waan ani siif kennu nyaadhu."

⁹ Kana irratti ani utuu harki tokko natti hiixatuun arge. Harka sana keessas kitaaba maramaa tokkodu ture; ¹⁰ innis fuula koo duratti kitaaba sana diriirse. Kitaaba sana irrattis, duraa duubaan faaruun boo'ichaa, gaddii fi wawwaannaan barreeffamanii turan.

3

¹ Innis, "Yaa ilma namaa waan fuula kee dura jiru nyaadhu; kitaaba maramaa kana nyaadhu; ergasii dhaqiiiti mana Israa'elitti himi" naan jedhe. ² Kanaafuu ani afaan koon banadhe; innis akka ani nyaadhuuf kitaaba maramaa sana naa kenne.

³ Innis, "Yaa ilma namaa, kitaaba maramaa ani siif kennu kana nyaadhu; garaa kees ittiin guuttadhu" naan jedhe. Anis nan nyaadhe; afaan koo keessattis akka dammaa natti mi'aawe.

⁴ Ergasii immoo akkana naan jedhe: "Yaa ilma namaa, amma gara mana Israa'el dhaqiiiti dubbii koo isaanitti himi. ⁵ Ati gara mana Israa'elitti malee gara uummata haasaan isaa namaa hin gallee fi afaan isaa nama rakkisuutti hin ergamne; ⁶ ati gara uummata haasaan isaanii namaa hin gallee fi afaan isaanii nama rakkisu kan ati dubbii isaanii illee hubachuu hin dandeenyeetti hin ergamne. Dhugumaan utuu ani isaanitti si ergee jiraadhee silaa isaan si dhaggeeffatu ture. ⁷ Manni Israa'el garuu sababii ana dhaga'uu hin feeneef siinis dhaga'uu hin fedhan; manni Israa'el hundi didaa fi mata jabeeyyiidhaatii. ⁸ Kunoo, ani fuula kee fuula isaanitti jabeesseera; adda kee illee adda isaatiin jabeesseera. ⁹ Adda kee akka dhagaa akka malee jabaa kan dhagaa baalcii caalaa jabaatuu nan godha. Isaan mana fincilaan ta'an iyyuu ati isaan hin sodaatin yookaan isaan si hin rifachiisin."

¹⁰ Innis akkana naan jedhe; "Yaa ilma namaa, waan ani sitti dubbadhu hunda sirriitti dhaga'iitii garaatti qabadhu. ¹¹ Amma gara saba kee warra booji'aman sanaa dhaqiiiti isaanitti dubbadhu. Isaan dhaga'anis dhaga'uu baatanis, 'WAAQAYYO Gooftaan akkana jedha' jedhiin."

¹² Ergasii Hafuurri ol na kaase; anis sagalee guddaa gigigsu kan, "Ulfinni WAAQAYYOO iddoo jireenya isaatti haa eebbifamu!" jedhu tokko of duubaan nan dhaga'e. ¹³ Sagaleen kunis sagalee guddaa gigigsu kan yeroo qoochoowwan uumamawwan jiraatoo sanaa wal riganii fi sagaleen geengoowwan isaan cina jiran dhageessisan ture. ¹⁴ Hafuurris ol na kaase na fudhatee deeme; anis hadheeffadhee utuma hafuurri koo aaree gubatuu nan deeme; harki WAAQAYYOO jabaan sunis ana irra ture. ¹⁵ Anis gara booji'amtoota Teel Abiib keessa Laga Kebaar bira jiraatan sanaan dhufe. Achittis waanan godhu wallaalee guyyaa torba isaan gidduu nan ta'a'e.

Akeekkachiisa Israa'eliiif Kenname

¹⁶ Dhuma guyyaa torbaffaatti dubbiin WAAQAYYOO akkana jedhee gara koo dhufe; ¹⁷ "Yaa ilma namaa, ani mana Israa'eliitiif eegduu si godheera; kanaafuu dubbii ani dubbadhu dhaga'iitii akeekkachiisa na biraa ba'u isaaniif kenni. ¹⁸ Yeroo ani nama hamaa tokkoon, 'Ati dhugumaan ni duuta' jedhutti, yoo ati isa akeekkachiisuu yookaan akka inni karaa isaa hamaa irraa deebi'ee lubbuu isaa oolfatu itti himuu baatte, namichi hamaan sun sababii cubbuu isaatiin ni du'a; dhiiga isaa godhuu ani harka kee irraa nan barbaada. ¹⁹ Garuu yoo ati nama hamaa sana akeekkachiiftee inni immoo hammina isaa irraa yookaan karaa isaa isa hamaa sana irraa deebi'uu baate, inni cubbuu isaatiin ni du'a; ati garuu lubbuu kee ni oolfatta.

²⁰ "Amma illee yoo namni qajeelaan tokko qajeelummaa isaa irraa jal'atee hammina hojjete, ani fuula isaa dura gufuu nan kaa'a; innis ni du'a. Waan ati isa hin akeekkachiisiniif inni cubbuu isaatiin ni du'a; wanni qajeelaan inni hojjete sunis isaaf hin herregamu; anis dhiiga isaatiif sin gaafadha. ²¹ Garuu yoo ati nama qajeelaa sana akka inni cubbuu hin hojjenneef isa akeekkachiiftee innis cubbuu hojjechuu baate, inni sababii akeekkachiisa sana fudhateef dhugumaan lubbuudhaan ni jiraata; atis lubbuu kee ni oolfatta."

²² Achittis harki WAAQAYYOO narra ture; innis, "Ka'iitii gara dirreetti ba'i; anis achitti sitti nan dubbadhaa" naan jedhe. ²³ Kanaafuu ani ka'ee gara dirreetti nan ba'e. Ulfinni WAAQAYYOS achi dhaabatee ture; innis ulfina ani Laga Kebaar biratti argee ture sana fakkaata; anis adda kootiin lafatti nan gombifame.

²⁴ Ergasii Hafuurri anatti seenee miilla kootiin na dhaabachiise. Innis akkana jedhee natti dubbate: "Mana keetti galiitii ofitti cufi. ²⁵ Yaa ilma namaa, isaan funyoodhaan si hidhu; ati akka uummata gidduu deemu hin dandeenyeef ni hidhamta. ²⁶ Isaan mana fincilaa ta'an iyyuu, ani akka ati hin dubbannee fi isaanitti dheekkamuu hin dandeenyeef arraba kee laagaa keetti nan maxxansa. ²⁷ Ani yeroon sitti dubbadhutti garuu afaan kee siifan bana; atis, 'WAAQAYYO Gooftaan akkana jedha' isaanii jetta. Namni dhaga'uu barbaadu kam iyyuu haa dhaga'u; namni dhaga'uu hin barbaanne kam iyyuu dhaga'uu haa dhiisu; isaan mana fincilaadhaatii.

4

Marfamuu Yerusaalem

¹ "Yaa ilma namaa, gabatee suphee tokko fuudhii fuula kee dura kaa'iitii kaartaa magaalaa Yerusaalem irratti kaasi. ² Ergasii waan ittiin marsan itti ijaari; dallaa dhagaatiin ishee marsi; kaabii itti naannessii tuuli; waan ittiin dallaa dhagaa jigsanis itti marsii kaa'i. ³ Eelee sibiilaa fuudhiitii akka dallaa sibiilaatti si'i fi magaalattii gidduu dhaabi; fuula kees gara isheetti deebifadhu; magaalattiin ni marfanti; atis ishee marsita. Kunis mana Israa'eliif mallattoo ni ta'a.

⁴ "Ergasii cinaacha bitaatiin ciisiitii cubbuu mana Israa'el of irra kaa'i. Guyyaa cinaacha keetiin ciifte sana hundas ati cubbuu isaanii ni baatta. ⁵ Ani baay'ina waggoota isaan itti cubbuu hojjetan sanaa akka guyyootaatti ramadee siif kenneera. Kanaafuu ati cubbuu mana Israa'el guyyaa 390 ni baatta.

⁶ "Ati erga waan kana fixxee booddee amma illee ciisi; yeroo kana immoo cinaacha kee kan mirgaatiin ciisiitii cubbuu mana Yihuudaa baadhu. Anis tokkoo tokkoo waggaa'itii guyyaa tokko tokko ramadee, guyyaa 40 siif kenneera. ⁷ Fuula kee gara marfama Yerusaaleemitti deebifadhuutti irree qullaadhaan isheetti raajii dubbadhu. ⁸ Hamaa ati guyyoota marfama keetii fixattutti akka ati cinaacha tokko irraa gara cinaacha kaaniitti hin garagalleef ani funyoodhaan sin hidha.

⁹ "Qamadii fi garbuu, baaqelaa fi misira, bisingaa fi honborii fuudhii okkotee keessa kaa'adhuutti ittiin buddeena tolfadhu. Buddeena kanas yeroo guyyoota 390 cinaacha keetiin ciiftutti nyaatta. ¹⁰ Ati akka guyyaa guyyaan nyaattuuf nyaata saqilii digdama madaali; isas yeroo murteeffametti nyaadhu. ¹¹ Akkasuma bishaan safartuu iinii tokko harka ja'a keessaa harka tokko safariitii yeroo murteeffametti dhugi. ¹² Nyaata sanas akkuma Maxinoo garbuu nyaattutti nyaadhu; isas udaan namaa bobeesiitii Maxinoo tolchi." ¹³ WAAQAYYOS "Haala kanaan ijoolleen Israa'el saboota ani itti isaan bittinneessu keessatti nyaata xuraa'aa nyaatu" jedhe.

¹⁴ Anis akkanan jedhe; "Yaa WAAQAYYO Gooftaa akkana miti! Ani takkumaa of xureessee hin beeku. Ijoollummaa kootii jalqabee hamma ammaatti takkumaa waan ofiin du'e yookaan waan bineensi ajjeese nyaadhee hin beeku. Foon qulqulluu hin ta'in gonkumaa afaan koo seenee hin beeku."

¹⁵ Innis, "Kun gaarii dha; ani akka ati qooda udaan namaatiin buddeena kee tolfattu akka dikee sa'aatiin tolfattu siifin eeyyama" naan jedhe.

¹⁶ Innis ittuma fufee akkana naan jedhe: “Yaa ilma namaa ani madda nyaata Yerusaaalem nan gogsa; uummanni nyaata safarame yaaddoodhaan nyaata; bishaan safarames sodaadhaan dhuga; ¹⁷ hanqinni midhaaniitti fi bishaanii ni jiraataatii. Isaanis naasuudhaan wal ilaalu; sababii cubbuu isaaniitiinis ni badu.

5

¹ “Yaa ilma namaa, goraadee gara qabu fudhadhuutti akkuma qarabaa ittiin haaddatanitti mataa keetii fi areeda kee ittiin haaddadhu. Rifeensa sanas madaaliidhaan madaaliitii gargar qoodi. ² Yeroo barri marfamuu keetii dhumatutti rifeensa sana keessaa harka sadii keessaa harka tokko magaalattii keessatti ibiddaan gubi. Harka sadii keessaa harka tokko fuudhii magaalattii marsiitii goraadeen cicciri. Harka sadii keessaa harka tokko immoo bubbeetti bittinneessi. Ani goraadee luqqifameen isaanan ari'aatii. ³ Rifeensa sana irraa xinnoo fuudhiitii handaara wayyaa keetiitti guduunfadhu. ⁴ Ammas kanneen keessaa xinnoo fuudhiitii ibiddatti naqi; gubis. Ibiddi achii ka'ee guutummaa mana Israa'el keessa faffaca'a.

⁵ “WAAQAYYO Gooftaan akkana jedha: Yerusaaalem isheen ani biyyoota itti naannessee saboota walakkaa teessise sun ishee kanaa dha. ⁶ Isheenis sabootaa fi biyyoota naannoo ishee jiraatan caalaa hammina isheetiin seera kootii fi ajaja kooti fincilteerti; isheen seera koo gatteerti; ajaja koos duukaa hin buune.

⁷ “Kanaafuu WAAQAYYO Gooftaan akkana jedha: Isin saboota naannoo keessan jiraatan caalaa warra hin ajajamne taataniirtu; isin ajaja koo duukaa hin buune yookaan seera koo hin eegne. Isin seera saboonni naannoo keessan jiraatan eegani iyyuu hin eegne.

⁸ “Kanaafuu WAAQAYYO Gooftaan akkana jedha: Yaa Yerusaaalem, ani mataan koo sittan ka'a; fuula sabootaa durattis sin adaba. ⁹ Ani sababii waaqota kee jibbisiisoo hundaatiif waanan kanaan dura takkumaa godhee hin beekin, waanan si'achis gonkumaa hin goone sitti nan fida. ¹⁰ Kanaafuu si keessatti abbootiin ijoollee isaanii ni nyaatu; ijoolleen immoo abbootii isaanii ni nyaatu. Ani sin adaba; hambaawwan kee hundas bubbeetti nan bittinneessa. ¹¹ Kanaafuu akkuma ani dhugumaan jiraataa ta'e, jedha WAAQAYYO Gooftaan; sababii ati fakkiiwwan kee kanneen faayidaa hin qabne hundaa fi gochawwan kee jibbisiisoo sanaan mana qulqullummaa koo xureessiteef ani fuula koo sirraa nan deebiffadha; ani si hin baraaru yookaan garaa siif hin laafu. ¹² Uummanni kee harka sadii keessaa harki tokko dha'ichaan du'a yookaan beelaan si keessatti dhuma; harka sadii keessaa harki tokko dallaa keetiin alatti goraadeedhaan galaafatama; harka sadii keessaa harka tokko immoo anatu bubbeetti bittinneessa; goraadee luqqifameenis ari'a.

¹³ “Ergasii aariin koo narraa gala; dheekkamsi koo kan isaanitti dhufe sun ni qabbanaa'a; anis haaloo nan baafadha. Yeroo ani dheekkamsa koo isaanitti fidetti isaan akka ani WAAQAYYO hinaaffaa kootiin dubbadhe ni beeku.

¹⁴ “Saboota naannoo kee jiraatan gidduutti fuula warra achiin darban hundaa duratti onaa fi waan fafaa sin godha. ¹⁵ Yeroo ani aariidhaan, dheekkamsaa fi adabbiidhaan si adabutti, ati fuula saboota naannoo kee jiraatanii duratti waan fafaa, waan kolfaa, waan ilaalani quba itti qabani fi waan sodaa ni taata. Ani WAAQAYYO dubbadheera. ¹⁶ Ani yeroon xiyya beelaa kan nama ajjeesuu fi nama barbadeessu isinitti darbadhutti isin balleessuuf jedheen darbadha. Ani beela irratti beela isinittin fida; madda nyaata keessaniis nan gogsa. ¹⁷ Ani beelaa fi bineensa isinittan erga; isaanis ijoollee malee isin hambisu. Dha'ichii fi dhangalaafamuun dhiigaa isin haxaa'a; ani goraadee isinittin fida. Ani WAAQAYYO dubbadheera.”

6

Adabii Tulluwwan Israa'el Eggatu

¹ Ergasii dubbiin WAAQAYYO akkana jedhee gara koo dhufe: ² “Yaa ilma namaa, fuula kee gara tulluwwan Israa'elitti deebifadhuutti isaanii mormuudhaan raajii dubbadhu; ³ akkanas jedhi; ‘Yaa tulluwwan Israa'el, dubbii WAAQAYYO Gooftaa dhaga'aa. WAAQAYYO Gooftaan tulluwwanii fi gaarraniin, hallayyaawwanii fi sululawwaniin akkana jedha: Ani goraadee isinitti fiduufan jira; iddoowwan sagadaa keessan kanneen iddoo ol ka'aa irraa illee nan balleessa. ⁴ Iddoowwan aarsaa keessan ni diigamu; iddoowwan aarsaa keessanii kan ixaanaa ni caccabu; anis namoota keessan fuula waaqota keessan tolfamoo duratti nan gorra'a. ⁵ Reeffa Israa'elootaa fuula waaqota isaanii tolfamoo dura nan ciciibsa; lafee keessanis naannoo iddoo aarsaa keessaniitti nan bittinneessa. ⁶ Akka iddoowwan aarsaa keessanii diigamanii barbadeeffamaniif, akka waaqonni keessan tolfamoon caccabani hunkutaa'aniif, akka iddoowwan aarsaa keessanii kan ixaanaa burkuteeffamani fi akka hojiin harka keessanii balleeffamuuf

iddoo isin jiraattan hunda keessatti magaalaaawwan keessan ni onu; iddoowwan sagadaa keessan kanneen iddoowwan ol ka'oo irraas ni barbadeeffamu. ⁷ Namoonni keessan qalamaniid gidduu keessanitti harca'u; isinis akka ani WAAQAYYO ta'e ni beektu.

⁸ " 'Ani garuu yommuu isin biyyootaa fi saboota gidduutti bittinnooftanitti sababii isin keessaa gariin goraadee jalaa miliqhaniif, namoota muraasa nan hambisa. ⁹ Warri miliqan sun saboota itti booji'aman sana keessa taa'anii yaada isaanii ejjaa isa narraa garagalee fi ija isaanii isa waaqota isaanii tolfamoo dharra'e sanaan hammam akka na gaddisiisan ni yaadatu. Isaanis hammina hojjetanii fi gochawwan isaanii jibbisiisoo hundaaf of jibbu. ¹⁰ Isaanis akka ani WAAQAYYO ta'e ni beeku; ani waan hamaa kana isaanittin fida jedhee akkasumaan hin dubbanne.

¹¹ " 'WAAQAYYO Gooftaan akkana jedha: Sababii hamminaatii fi gochaawwan jibbisiisoo mana Israa'el hundaatiif isaan goraadeedhaan, beelaa fi dha'ichaan ni dhumuutii harka kee walitti rukutii, miilla keetiinis lafa dhiitii, "Ani bade!" jedhii boo'i. ¹² Inni fagoo jiru dha'ichaan ni du'a; kan dhi'oo jirus goraadeedhaan ni galaafatama; kan hafee fi kan miliqe immoo beelaan du'a. Anis haala kanaan dheekkamsa koo isaanitti nan roobsa. ¹³ Isaan yeroo namoonni isaanii naannoo iddoowwan aarsaa isaanitti, waaqota isaanii tolfamoo gidduutti, gaarran ol dhedheeroo hunda irratti, fiixee tulluuwwanii hunda irratti, mukkeen lalisoo hunda jalattii fi qilxuun baala baay'atu hunda jalatti jechuunis iddoowwan isaan itti waaqota isaanii tolfamoo sanaaf ixaana urgaa'aa aarsan hundatti gorra'amanii ciciisanitti, akka ani WAAQAYYO ta'e ni beeku. ¹⁴ Anis harka koo isaanitti nan kaasa; iddoo isaan jiraatan hundatti jechuunis gammoojjiidhaa jalqabee hamma Diblaatiitti biyyattii nan onsa. Isaanis akka ani Waaqa ta'e ni beeku.' "

7

Dhumni Dhufeera

¹ Ergasii dubbiin WAAQAYYOO akkana jedhee gara koo dhufe: ² "Yaa ilma namaa, WAAQAYYO Gooftaan biyya Israa'eliin akkana jedha:

"Dhuma! Golee biyyattii afranitti

dhumni dhufeera.

³ Ammas dhumni kee ga'eera;

dheekkamsa koo sirratti nan dhangalaasa;

ani akkuma amala keetiitti sitti nan mura;

gochawwan kee jibbisiisoo hundaafis ani sin adaba.

⁴ Ani gara laafinaan si hin ilaalu

yookaan si hin baasu;

ani hamma gochawwan kee jibbisiisoon sun si gidduu jiranitti,

amala keetiif sin adaba.

"Ergasiis isin akka ani WAAQAYYO ta'e ni beektu.'

⁵ "WAAQAYYO Gooftaan akkana jedha:

"Badii! Badiin takkaa hin dhaga'amin

tokko dhufaa jira.

⁶ Dhumni dhufeera!

Dhumni dhufeera!

Inni mataan isaa isinitti ka'eera.

Inni dhufeera!

⁷ Yaa warra biyyattii keessa jiraattan,

badiin isinitti dhufeera.

Yeroon ga'eera; guyyaan dhi'aateera;

tulluuwwan irratti gammachuu utuu hin ta'in jeequmsatu ta'a.

⁸ Ani dheekkamsa koo sitti dhangalaasuudhaafan jira;

aarii koo illee sitti nan ba'a;

akkuma amala keetiittis sitti nan mura;

gochaawwan kee jibbisiisoo sana hundaafis sin adaba.

⁹ Ani gara laafinaan si hin ilaalu

yookaan si hin baraaruu.

Hamma gochawwan kee jibbisiisoon sun si gidduu jiranitti

ani akkuma amala keetiitti sin adaba.

"Ergasiis akka kan rukutu sun ana WAAQAYYO ta'e isin ni beektu.

¹⁰ " 'Guyyaan sun kunoo ti!

- Inni dhufeera!
 Badiin cabsee dhufeera;
 uleen lateera;
 of tuulummaan daraareera!
- 11 Gooliin guddatee ulee hammina adabu ta'eera;
 isaan keessaa namni tokko iyyuu hin hafu;
 waldaa isaanii keessaa,
 qabeenya isaaniitii fi
 waan faayidaa qabu keessaa
 tokko iyyuu hin hafu.
- 12 Yeroon sun dhufeera;
 guyyaan sun ga'eera.
 Inni bitu hin gammadin;
 kan gurgurus hin gaddin;
 dheekkamsi guutummaa isaaniitti dhufaatii.
- 13 Hamma lamaan isaanii iyyuu lubbuun jiranitti
 inni lafa gurgure hin deebifatu;
 mul'anni waa'ee sabaatiif mul'ate
 duubatti hin deebi'utii.
 Sababii cubbuu isaaniitiif isaan keessaa namni tokko iyyuu
 lubbuu ofii isaa hin oolfatu.
- 14 " Sababii dheekkamsi koo waldaa hunda irra jiruuf
 isaan malakata afuufanii
 waan hunda qopheeffatan iyyuu,
 namni tokko iyyuu gara adda waraanaa hin dhaqu.
- 15 Alaan goraadeetu jira;
 keessaan immoo dha'ichaa fi beelatu jira;
 warri baadiyyaa goraadeedhaan du'u;
 warri magaalaa keessaa immoo beelaa fi dha'ichaan dhumu.
- 16 Baqattoonni warri miliqan
 tulluuwwanitti baqatu.
 Tokkoon tokkoon isaanii
 akkuma gugeewwan sululaa
 sababii cubbuu isaaniitiif ni aadu.
- 17 Harki hundi ni naafata;
 jilbi hundinuus bishaan ta'a.
- 18 Isaan wayyaa gaddaa uffatanii
 sodaadhaan haguugamu.
 Fuulli isaanii qaaniif uffata;
 mataan isaaniis ni haadama.
- 19 " Isaan meetii isaanii daandiiwwan irratti gatu;
 warqeen isaanii akka waan xuraa'aa ta'a.
 Guyyaa dheekkamsa WAAQAYYOOTTI meetii fi
 warqeen isaanii isaan oolchuu hin danda'u.
 Isaan nyaatanii beela hin ba'an
 yookaan garaa isaanii hin guuttatan;
 meetii fi warqeen isaanii isaan gufachiisee
 cubbuutti isaan galcheeraatii.
- 20 Isaan faaya bareedaa isaaniitiin of tuulanii
 waaqota isaanii jibbisiisoo fi fakkiwwan faayidaa hin qabne sana
 tolchuuf itti fayyadaman.
 Kanaafuu ani wantoota kanneen
 gara waan xuraa'aatti isaan duraa nan geeddara.
- 21 Ani harka namoota biyya ormaatti boojiudhaaf,
 hamoota lafaattis saamichaaf dabarsee ishee nan kenna;
 isaanis isa ni xureessu.
- 22 Ani fuula koo isaan irraa nan deebifadha;
 isaanis iddoo koo jaallatamaa sana ni xureessu;
 saamtonnis itti seenanii ni xureessu.

- 23 “ ‘Sababii biyyattiin dhiiga dhangalaasuudhaan, magaalattiin immoo gooliidhaan guutamteef foncaa qopheessi.
- 24 Ani akka isaan manneen isaanii dhaalaniif warra saboota keessaa akka malee hamoo ta’an nan fida; of tuulummaa namoota jajjaboo nan cabsa; manneen qulqullummaa isaaniis nan xureessa.
- 25 Yeroo raafamni dhufutti isaan nagaa barbaadu; garuu tokko illee hin argatan.
- 26 Badiin badii irratti, oduunis, oduu irratti ni dhufa.
- Isaan raajii irraa mul’ata argachuu ni yaalu; seerri luboota biraa, gorsi immoo maanguddoota biraa ni dhabama.
- 27 Mootiin ni boo’a; ilmi mootii abdii kutata; harki uummata biyyattii ni hollata.
- Ani akkuma hojii isaaniitti gatii isaanii nan kennaaf; akkuma seera ofii isaaniittis murtii nan kennaaf.

“ ‘Ergasiis isaan akka ani WAAQAYYO ta’e ni beeku. ”

8

Mana Qulqullummaa keessatti Waaqa Tolfamaa Waaqessuu

¹ Wagga ja’affaatti, ji’aa ja’affaa keessa guyyaa shanaffaatti, utuu ani mana koo keessa taa’ee, maanguddoonni Yihuudaas fuula koo dura tataa’anii jiranuu achumatti harki WAAQAYYO Gooftaa narra bu’e. ² Anis mil’adhee fakkaattii akka fakkaattii namaa tokko nan arge. Innis waan mudhii isaa fakkaatuu gaditti ibidda fakkaata ture; achii olitti immoo bifti isaa sibiila ibiddaan diimeffamee ifu fakkaata ture. ³ Innis waan harka fakkaatu tokkoon hiixatee rifeensa mataa kootii qabe. Hafuurris lafaa fi samii gidduutti ol na fuudhee mul’ata Waaqaatiin gara Yerusaaalem, gara karra balbala kaabaa kan oobdii gara keessaatti, iddoo waaqni tolfamaan hinaaffaaf nama kakaasu sun dhaabatee jiruutti na geesse. ⁴ Ulfinni Waaqa Israa’el kan ani mul’ataan dirree keessatti argee ture sun achittis fuula koo dura ture.

⁵ Innis, “Yaa ilma namaa, gara kaabaa ilaali” naan jedhe; anis mil’adhee karaa karra balbala kaabaa kan iddoo aarsaatiin waaqa tolfamaa kan hinaaffaa sana nan arge.

⁶ Innis akkana naan jedhe; “Yaa ilma namaa, wantoota akka malee jibbisiisoo kanneen akka ani iddoo qulqulluu koo irraa fagaadhu na godhan kan manni Israa’el asitti gochaa jiru kana ni argitaa? Ati garuu waan waan kana caalaa jibbisiisaa ta’e iyyuu ni argita.”

⁷ Ergasii inni gara karra oobdiitti na fide. Anis mil’adhee qaawwa keenyan manaa nan arge. ⁸ Innis, “Yaa ilma namaa, keenyan manaa uri” naan jedhe. Kanaafuu ani keenyan manaa sana uree balbala tokko achitti nan arge.

⁹ Innis, “Ol seeniitii waan hamaa fi jibbisiisaa isaan asitti hojjechaa jiran kana ilaali” naan jedhe. ¹⁰ Anis ol seeneen ilaale; kunoo ani gosa uumamawwan lafa irra loo’anii hunda, bineensota jibbisiisoo hundaa fi waaqota tolfamoo mana Israa’el hunda keenyan manaa hunda irratti fakkeeffamanii nan arge. ¹¹ Fuula isaanii duras maanguddoonni mana Israa’el torbaatamni dhadhaabatanii turan; Yaazaniyaan ilmi Shaafaan immoo gidduu isaanii dhaabatee ture. Tokkoon tokkoon isaaniis harka isaaniitti girgiraa qabatanii turan; duumessi aara isaanaa urgaa’aanis ol ba’a ture.

¹² Innis, “Yaa ilma namaa, waan maanguddoonni mana Israa’el tokkoon tokkoon isaanii galma waaqeffannaa waaqa isaanii tolfamaa sanaa keessatti dukkana keessa hojjetan argiteertaa? Isaan, ‘WAAQAYYO nu hin argu; WAAQAYYO biyyattii dhiiseera’ jedhan.” ¹³ Ammas inni, “Ati wantoota kana caalaa jibbisiisoo ta’an kan isaan hojjetan iyyuu ni argita” jedhe.

¹⁴ Ergasii gara karra balbala kaabaa kan mana WAAQAYYOOTTI na fide; achittis dubartoota tataa’anii waaqa tolfamaa Tamuuz jedhamuuf boo’aa jiran nan arge.

¹⁵ Innis, “Yaa ilma namaa, kana argitaa? Ati wantoota kana caalaa jibbisiisoo ta’ani iyyuu ni argita” naan jedhe.

¹⁶ Ergasii immoo gara oobdii mana WAAQAYYOO isa gara keessaatti na fide; achis balbala mana qulqullummaa dura gardaafuu fi iddoo aarsaa gidduu namoota gara digdamii shaniitu ture. Isaanis dugda isaanii mana qulqullummaa WAAQAYYOOTTI, fuula

isaanii immoo gara ba'a biiftuutti deebifatani, gara ba'aatti garagalanii aduuf sagadaa turan.

¹⁷ Innis akkana naan jedhe; "Yaa ilma namaa, ati waan kana argitaa? Wantoota jibbisiisoo kanneen asitti hojjechuun isaanii mana Yihuudaatiif laayyoodhaa? Isaan gooliidhaan biyyattii guutani yeroo hunda aariif na kakaasuu qabuu? Kunoo isaan funyaan isaanii damee kaa'ataniiru!" ¹⁸ Kanaafuu ani dheekkamsaan isaanitti nan dhufa; ija gara laafinaatiinis isaan hin ilaalu yookaan isaan hin baasu. Isaan gurra kootti iyyan iyyuu, ani isaan hin dhaga'u."

9

Waaqeffattoonni waaqota tolfamoo Ajjeefamuu Isaanii

¹ Ergasis ani isaa, "Warra tokkoon tokkoon isaanii mi'a lolaa harkatti qabatani magaalattii balleessan as dhi'eessi" jedhee gurra kootti iyyu nan dhaga'e. ² Anis utuu namoonni ja'a kallattii karra ol aanuu kan gara kaabaa ilaaluun tokkoon tokkoon isaanii meeshaa nama ajjeesu harkatti qabatani dhufaa jiranuu nan arge. Isaan wajjinis nama uffata quncee talbaa irraa hojjetame uffate kan mudhii isaatti korojoo katabbii hidhate tokkotu ture. Isaanis ol seenanii iddoo aarsaa naasii bira dhaabatan.

³ Ulfinni Waaqa Israa'elis iddoo irra bu'ee ture kiirubeelii irraa ka'ee gara gulantaa mana qulqullummaatti qajeele. Ergasiis WAAQAYYO namicha wayyaa quncee talbaa irraa tolfame uffate mudhii isaatti korojoo katabbii hidhate sana waame; ⁴ innis akkana jedheen; "Guutummaa magaalaa Yersaalem keessa deemiitii adda namoota sababii wantoota jibbisiisoo ishee keessatti hojjetaman hundaatiif gaddanii boo'an irratti mallattoo godhi."

⁵ Inni utuma ani dhaga'uu warra kaaniin akkana jedhe; "Magaalattii keessa isa faana deemaatii utuu garaa hin laafin yookaan utuu hin mararfatin ajjeesaa. ⁶ Jaarsota, dargaggeeyyii, shamarran, dubartootaa fi ijoollee ajjeesaa; nama mallattoo qabu kam iyyuu garuu hin tuqinaa. Iddoo qulqullummaa koo irraa jalqabaa." Kanaafuu isaan jaarsota fuula mana qulqullummaa dura jiran irraa jalqaban.

⁷ Innis, "Mana qulqullummaa xureessaa; waltajjichas reeffaan guutaa. Itti ba'aa!" jedheen. Kanaafuu isaan gad ba'anii magaalattii guutuu keessatti ajjeesuu jalqaban. ⁸ Utuu isaan ajjeesaa jirani, ani kophaa koo hafee addaan lafatti gombifamee, "Ani bade yaa WAAQAYYO Gooftaa! Ati dheekkamsa kee Yersaalem irratti roobsuudhaan hambaawwan Israa'el hunda balleesuuf jirtaa?" jedheen iyye.

⁹ Innis akkana jedhee naaf deebise; "Cubbuun mana Israa'elii fi Yihuudaa akka malee guddaa dha; biyyattiin dhiiga dhangalaasuudhaan, magaalaa immoo jal'inaan guutamteerti. Isaan, 'WAAQAYYO biyyattii gateera; WAAQAYYO hin argu' jedhu. ¹⁰ Kanaafuu ani ija gara laafinaatiin isaan hin ilaalu yookaan hin hiluufis; garuu ani waanuma isaan hojjetan mataa isaaniiitti nan fida."

¹¹ Ergasii namichi uffata quncee talbaa irraa hojjetame uffate korojoo katabbii mudhii isaatti hidhate sun deebi'ee dhufee, "Ani akkuma ati na ajajje sana godheera" jedhe.

10

Ulfinni Waaqaa Mana Qulqullummaa Dhiisee Deeme

¹ Anis mil'adhee bantii samii gubbaatti mataa kiirubeeliitiin olitti fakkaattii teessoo sanpeer tokko nan arge. ² WAAQAYYOS namicha wayyaa quncee talbaa irraa hojjetame uffate sanaan akkana jedhe; "Geengoowwan kiirubeelii jalaan jiran gidduu seeni. Barbadaa cilee boba'uu kan kiirubeelii gidduu jiru sana irraa harka kee guuttadhuutii magaalattii keessa faffacaasi." Innis utuma ani ilaalu ol seene.

³ Yeroo namichi ol seenetti kiirubeeliin karaa kibba mana qulqullummaatiin dhaabatanii turan; duumessi oobdii gara keessaa guutee ture. ⁴ Ulfinni WAAQAYYOS kiirubeelii irraa ka'ee gara gulantaa mana qulqullummaatti qajeele. Duumessis mana qulqullummaa guute; waltajjichis ifa ulfina WAAQAYYOOTIIN guutame. ⁵ Sagaleen qoochoowwan kiirubeelii hamma oobdii gara alaatti akkuma sagalee yeroo Waaqni Waan Hunda Danda'u dubbatu dhaga'amu sanaa fagootti dhaga'ama ture.

⁶ Yeroo WAAQAYYO namicha wayyaa quncee talbaa irraa hojjetame uffatu sanaan, "Geengoowwan gidduudhaa, kiirubeelii gidduudhaas ibidda fudhi" jedhee ajajetti namichi ol seenee geengoo bira dhaabate. ⁷ Ergasii kiirubeelii keessaa inni tokko harka isaa gara ibidda isaan gidduu jiruutti hiixate. Innis ibidda sana irraa xinnoo fuudhee harka namicha wayyaa quncee talbaa irraa hojjetame uffate sanaa keessa

kaa'ee; namichis ibidda sana fudhatee ba'ee. ⁸ Qoochoowwan kiirubeelii jalaanis wanni harka namaa fakkaatu tokko ni mul'ata ture.

⁹ Anis mil'adhee geengoowwan afur kiirubeelii biratti nan arge; geengoowwan sunis tokkoo tokkoo kiirubeelii bira turan; geengoowwan sunis akka biiralee calaqqisu turan. ¹⁰ Bifti afranuu wal fakkaata ture; tokkoon tokkoon geengoo sanaa geengoo kaanitti waan dirame fakkaata ture. ¹¹ Isaanis yommuu deemanitti utuu of irra hin mil'atin kallattii afran kiirubeeliin itti gara galan kamiin iyyuu deeman; geengoowwanis yeroo kiirubeeliin deemanitti asii fi achi hin socho'an ture. Kiirubeeliin qixa mataan isaanii itti gara gale kamiin iyyuu utuu of irra hin mil'atin deeman. ¹² Dhagni isaanii guutuun, dugda isaanii, harka isaaniitti fi qoochoo isaanii dabalatee akkuma geengoowwan isaanii afran sanaatti akkuma jiraniin ijaan guutamanii turan. ¹³ Geengoowwan sunis utuma ani dhaga'uu, "Geengoowwan konkolaatan" jedhamanii waamaman. ¹⁴ Tokkoon tokkoon kiirubeelii fuula afur afur qabu ture: fuulli tokkoffaan fuula kiirubeelii, fuulli lammaffaan fuula namaa, fuulli sadaffaan fuula leencaa, fuulli afuraffaan immoo fuula risaa ture.

¹⁵ Ergasiis kiirubeeliin ol ba'an; isaan kunneen uumamawwan jiraatoo ani Laga Kebaar biratti argee ture sanaa dha. ¹⁶ Yeroo kiirubeeliin deemanitti geengoowwan isaan cina jiraniis ni deeman; yeroo kiirubeeliin lafa irraa ol ka'uuf qoochoowwan isaanii diriirfatanitti geengoowwanis isaan biraa hin hafan ture. ¹⁷ Yeroo kiirubeeliin dhaabatanitti isaanis ni dhaabatu turan; yeroo kiirubeeliin ol ka'anittis isaanuma wajjin ol ka'u turan; hafuurri uumamawwan jiraatoo sanaa isaan keessa tureetii.

¹⁸ Ergasiis ulfinni WAAQAYYOO gulantaa mana qulqullummaa irraa ka'ee kiirubeelii gubbaadhaan dhaabate. ¹⁹ Kiirubeeliin utuma ani arguu qoochoowwan isaanii diriirffatanii lafaa ol ka'an; yeroo isaan deemanittis geengoowwan isaan wajjin deeman. Isaan karra balbala mana WAAQAYYOO kan karaa ba'aa irra dhaabatan; ulfinni Waaqa Israa'elis isaan gubbaadhaan ture.

²⁰ Isaan kunneen uumamawwan jiraatoo ani Laga Kebaar biratti Waaqa Israa'el jalatti argee turee dha; anis akka isaan kiirubeelii ta'an nan hubadhe. ²¹ Tokkoon tokkoon isaanii fuula afur afurii fi qoochoowwan afur afur; qoochoowwan isaanii jalaan immoo waan harka namaa fakkaatu qabu ture. ²² Bifti fuula isaanis akkuma bifa uumamawwan jiraatoo ani Laga Kebaar biratti arge sanaa ture. Tokkoon tokkoon isaanii qajeelanii fuula duratti deeman.

11

Murtii Yerusaaalemin Eeggatu

¹ Hafuurri ol na fuudhee gara balbala mana WAAQAYYOO kan gara ba'aa ilaaluutti na fide. Achis karra balbala sanaa dura namoota digdamii shantu ture; anis isaan gidduutti hooggantoota sabaa Yaazaniyaa ilma Azurii fi Phelaatiyaa ilma Benaayaa nan arge. ² WAAQAYYOS akkana naan jedhe; "Yaa ilma namaa, isaan kunneen namoota magaalaa kana keessatti hammina malanii fi gorsa hamaa gorsanii dha. ³ Isaanis, 'Yeroon itti manneen ijaaraman ga'eera mitii? Magaalattiin kun okkotee waa itti affeelanii dha; nu immoo ishee keessatti foon' jedhan. ⁴ Kanaafuu isaanitti raajii dubbadhu; yaa ilma namaa raajii dubbadhu."

⁵ Ergasii Hafuurri WAAQAYYOO narra bu'ee akkana naan jedhe; "WAAQAYYOO akkana jedha: Yaa mana Israa'el isin akkas jettu; ani garuu waan isin qalbii keessanitti yaaddan nan beeka. ⁶ Isin magaalaa kana keessatti namoota hedduu ajjeffanii daandii ishee reeffaan guuttaniirtu.

⁷ "Kanaafuu WAAQAYYOO Gooftaan akkana jedha: Reefferi isin achitti gattan foon; magaalaa kun immoo okkotee dha; ani garuu magaalaa kana keessaa isinan baasa. ⁸ Isin goraadee sodaattu; wannii ani isinitti fidu immoo goraadeedha, jedha WAAQAYYOO Gooftaan. ⁹ Ani magaalaa keessaa isin baasee alagaatti dabarsee isin kennee isinan adaba. ¹⁰ Isin goraadeedhaan dhumtu; anis daangaa Israa'el irratti isinitti mura. Kanaanis akka ani WAAQAYYOO ta'e ni beektu. ¹¹ Magaalaa kun okkotee isinii hin taatu yookaan isin achi keessatti foon hin taatan; anis daangaa Israa'el irratti isinitti nan mura. ¹² Isin akka ani WAAQAYYOO ta'e ni beektu; sirna saboota naannoo keessan jiraatanii duukaa buutan malee seera koo hin eegne yookaan naamusa koo hin eegneetii."

¹³ Utuma ani raajii dubbachaa jiruu Phelaatiyaan ilmi Benaayaa du'e. Kana irratti ani addaan lafatti gombifamee, "Ani bade yaa WAAQAYYOO Gooftaa! Ati hambaa Israa'el guutumaan guutuutti balleessitaa?" jedheen sagalee guddaadhaan iyye.

¹⁴ Ergasii dubbiin WAAQAYYOO akkana jedhee gara koo dhufe; ¹⁵ “Yaa ilma namaa, obboloota kee jechuunis obboloota kee kanneen firoota kee dhiigaatii fi manni Israa’el guutuun kanneen namoonni Yerusaaalem, ‘Isaan WAAQAYYOO irraa fagaataniiru; biyyi kunis akka handhuuraatti nuuf kennamteerti’ jedhaniinii dha.

¹⁶ “Kanaafuu akkana jedhi: ‘WAAQAYYOO Gooftaan akkana jedha: Ani saboota gidduutti fageessee isaan ergee biyyoota keessa isaan faffacaasu iyyuu, amma illee yeroo xinnoof biyyoota isaan dhaqan keessatti isaaniif iddoo qulqullummaa ta’eera.’

¹⁷ “Kanaafuu akkana jedhi: ‘WAAQAYYOO Gooftaan akkana jedha: Ani saboota keessaa walitti isin qabee biyyoota itti bittinnooftan keessaa deebisee isin nan fida; biyya Israa’elis deebisee isiniif nan kenna.’

¹⁸ “Isaan biyyattiitti deebi’anii wantoota ishee jibbisiisoo hundaa fi wantoota ishee balfamoo hunda ishee keessaa ni balleessu. ¹⁹ Ani garaa gargar hin qoodamne isaaniif nan kenna; hafuura haaraas isaan keessa nan kaa’a; garaa isaanii isa dhagaa isaan keessaa baasee garaa foonii nan kennaaf. ²⁰ Isaanis sirna koo duukaa bu’u; seera kootiifis ni ajajamu. Isaan saba koo ni ta’u; anis Waaqa isaanii nan ta’a. ²¹ Warra qalbiin isaanii fakkiwwan isaanii kanneen faayidaa hin qabnee fi waqota isaanii tolfamoo jibbisiisoo sanaan fudhatame garuu ani waan isaan hojjetan matuma isaaniitti nan deebisa jedha WAAQAYYOO Gooftaan.”

²² Ergasiis kiirubeeliin qoochoowwan isaanii diriirfatan; geengoowwanis isaan cina turan; ulfinni Waaqa Israa’el immoo isaan gubbaadhaan ture. ²³ Ulfinni WAAQAYYOOOS magaalaa keessaa ol ba’ee tulluu ba’a magaalattiitiin jiru gubbaadhaan dhaabate. ²⁴ Hafuurri ol na fuudhee mul’ata Hafuura Waaqaatiin gara booji’amtota biyya Baabilon jiraniitti na fide.

Ergasiis mul’anni ani argee ture sun na dhiisee ol ba’e; ²⁵ anis waan WAAQAYYOO na argisiise hunda booji’amtotatti nan hime.

12

Fakkeennoo Booji’amu

¹ Ergasii dubbiin WAAQAYYOO akkana jedhee gara koo dhufe; ² “Yaa ilma namaa, ati uummata fincilaa gidduu jiraatta. Isaan arguudhaaf ija qabu; garuu hin argan; dhaga’uudhaafis gurra qabu; garuu hin dhaga’an; isaan uummata fincilaadhaatii.

³ “Kanaafuu yaa ilma namaa, utuma isaan arganuu guyyaa adiidhaan waan qabdu qopheeffadhuutti booji’amuuf iddoo jirtuu ba’iitti iddoo biraa deemi. Isaan mana fincilaa ta’ani iyyuu tarii ni hubatu ta’a. ⁴ Mi’a kee kan booji’amuuf qopheeffatte sana utuma isaan arganuu guyyaa adiidhaan baafadhu. Utuma isaan arganuu galgalaan akkuma warra booji’amuuf deemaniitti ba’ii deemi. ⁵ Utuma isaan arganuu dallaa uriiiti mi’a kee achi keessaan baafadhu. ⁶ Utuma isaan arganuu dimimmisa galgala keessa mi’a sana ol fuudhii gatiittii keetti baadhuu ba’i. Ati akka biyyattii hin argineef fuula kee haguuggadhu; ani mana Israa’eliif mallattoo si godheeraatii.”

⁷ Isaan akkaman ajajama nan godhe. Mi’a koos boojiuf qopheeffadhee guyyaa adiidhaan baafadhe. Galgalaanis dallaa sana harkuma kootiin nan ure. Utuma isaan arganuu mi’a koo gatiittii irratti baadhadhee dimimmisaan nan ba’e.

⁸ Guyyaa itti aanu ganamas dubbiin WAAQAYYOO akkana jedhee gara koo dhufe; ⁹ “Yaa ilma namaa, manni Israa’el fincilaan sun, ‘Ati maal gochaa jirta?’ jedhee si hin gaafannee?

¹⁰ “Akkana isaaniin jedhi; ‘WAAQAYYOO Gooftaan akkana jedha: Raajiin kun waa’ee ilma mootii isa Yerusaaalem keessa jiraatuu fi guutummaa mana Israa’el kan achi jiraatuu ti.’ ¹¹ Atis, ‘Ani mallattoo keessan’ isaaniin jedhi.

“Wanni ani hojjedhe sun isaan irra ni ga’a. Isaan booji’amanii ni fudhatamu.

¹² “Ilmi mootii inni gidduu isaanii jiraatu mi’a isaa gatiittii isaatti baadhatee dimimmisaan ni deema; akka inni keessaan ba’uuf dallaan ni uramaaf. Akka biyyattii hin argineefis fuula isaa ni haguuggata. ¹³ Ani kiyyoo koo nan diriirsaaf; innis kiyyoo kootiin ni qabama; ani gara Baabilon, biyya Kaldootaatti isa nan geessa; inni garuu biyyattii hin argu; achittis ni du’a. ¹⁴ Ani warra isa wajjin jiran hunda gargaartota isaatii fi loltoota isaa hunda bubbeetti nan bittinneessa; goraadee luqqifameenis isaan nan ari’a.

¹⁵ “Isaan yommuu ani saboota gidduutti isaan bittinneessee biyyoota keessa isaan faffacaasutti, akka ani WAAQAYYOO ta’e ni beeku. ¹⁶ Ani garuu akka isaan saboota itti geeffaman sana keessatti gochawwan isaanii jibbisiisoo hunda himataniif isaan keessaa namoota muraasa goraadee irraa, beelaa fi dha’icha irraa nan hambisa. Isaanis akka ani WAAQAYYOO ta’e ni beeku.”

¹⁷ Ergasii dubbii WAAQAYYOO akkana jedhee gara koo dhufe: ¹⁸ "Yaa ilma namaa, raafamuudhaan nyaata kee nyaadhu; sodaadhaan hollachaa bishaan kee dhugi. ¹⁹ Saboota biyyattiitiin akkana jedhi: 'WAAQAYYOO Gooftaan waa'ee warra Yerusaalem keessaa fi biyya Israa'el keessa jiraatanii akkana jedha: Sababii jeequmsa namoota achi jiraatan hundaatiif biyyattiin waan ontuuf isaan nyaata isaanii dhiphinaan nyaatu; bishaan isaanii immoo sodaadhaan dhugu. ²⁰ Magaalaawwan namoonni keessa jiraatan ni barbadaa'u; biyyattiin immoo ni onti. Sana booddee isin akka ani WAAQAYYOO ta'e ni beektu.'"

²¹ Ergasii dubbii WAAQAYYOO akkana jedhee gara koo dhufe: ²² "Yaa ilma namaa, fakkeenya isin biyya Israa'el keessatti, 'Barri dheerateera; mul'annis faayidaa dhabeera' jettan kun maali? ²³ Akkana isaaniiin jedhi; 'WAAQAYYOO Gooftaan akkana jedha: Ani fakkeenya kana nan balleessa; isaan si'achi Israa'el keessatti itti hin fayyadaman.' Atis, 'Barri itti mul'anni hundi fiixaan ba'u dhi'aateera, isaaniiin jedhi. ²⁴ Si'achi mul'anni sobaa yookaan raajiin sobaa uummata Israa'el keessa hin jiraatuutti. ²⁵ Ani WAAQAYYOO garuu waanan fedhe nan dubbadha; dubbiiin sunis utuu hin turin ni raawwatama. Isin yaa mana fincilaa nana, ani waanan dubbadhu hunda bara keessan keessa nan raawwadha, jedha WAAQAYYOO Gooftaan.'"

²⁶ Ergasii dubbii WAAQAYYOO akkana jedhee gara koo dhufe: ²⁷ "Yaa ilma namaa, manni Israa'el, 'Mul'anni inni argu waan bara dheeraa booddee raawwatamuu dha; wanni inni raajus waan bara fagootti guutamuu dha.'

²⁸ "Kanaafuu ati akkana isaaniiin jedhi; 'WAAQAYYOO Gooftaan akkana jedha: Si'achi dubbiiin koo tokko iyyuu lafa irra hin harkifatu; wanni ani jedhu kam iyyuu ni raawwatama, jedha WAAQAYYOO Gooftaan.'"

13

Raajonni Sobaa Balaaleffataman

¹ Ergasii dubbii WAAQAYYOO akkana jedhee gara koo dhufe: ² "Yaa ilma namaa, raajota Israa'el kanneen amma raajii dubbachaa jiraniin mormuudhaan raaji. Warra yaaduma ofii isaanii raajaniin akkana jedhi: 'Dubbii WAAQAYYOO dhaga'aa! ³ WAAQAYYOO Gooftaan akkana jedha: Raajota gowwaa kanneen utuu homaa hin argin hafuura ofii isaanii duukaa bu'an sanaaf wayyoo! ⁴ Yaa Israa'el, raajonni kee akkuma waangota waan diigame gidduu jiraatanii ti. ⁵ Isin akka dallaan sun guyyaa waraana WAAQAYYOOTTI jabaatee dhaabatuuf dallaa cabe sana mana Israa'eliiif deebifanii ijaaruuhaaf jettanii ol hin baane. ⁶ Mul'anni isaanii soba; raajiin isaanii soba. Isaan utuu WAAQAYYOO isaan hin ergin, "WAAQAYYOO akkana jedha" jedhu; ta'us isaan akka dubbiiin isaanii raawwatamu eeggatu. ⁷ Ani dubbachuu baadhu iyyuu isin, "WAAQAYYOO akkana jedha" jechuun keessan mul'ata sobaa arguu keessanii fi raajii sobaa dubbachuu keessan mitii?

⁸ "Kanaafuu WAAQAYYOO Gooftaan akkana jedha: Sababii dubbii sobaa keessaniitti fi mul'ata sobaa keessaniitiif ani isiniitti ka'a, jedha WAAQAYYOO Gooftaan. ⁹ Harki koo raajota mul'ata sobaa arganii raajii sobaa dubbatanitti ni ka'a. Isaan miseensa waldaa saba kootii hin ta'an yookaan galmee mana Israa'el irratti hin galmeeffaman yookaan biyya Israa'el hin seenan. Ergasii isin akka ani WAAQAYYOO Gooftaa ta'e ni beektu.

¹⁰ "Isaan yeroo nagaan hin jirretti, "Nagaa dha" jechaa saba koo karaa irraa waan jal'isani yeroo namoonni dallaa dhagaa ijaaranitti nooraa dibaniif, ¹¹ ati akka dallaan sun jigu warra nooraa itti diban sanatti himi. Bokkaan hamaan ni rooba; dhagaan cabbii ni bu'a; bubbeen jabaan ni bubbisa. ¹² Yeroo dallaan sun jigutti namoonni, "Nooraan isin itti dibdan sun eessa jira" jedhanii isin hin gaafatanii?

¹³ "Kanaafuu WAAQAYYOO Gooftaan akkana jedha: Ani dheekkamsa kootiin bubbee hamaa nan kaasa; aarii kootiin dhagaa cabbii fi bokkaa hamaan badiisa fidu ni rooba. ¹⁴ Ani akka hundeen isaa qullaatti hafuuf dhagaa isin nooraa dibdan sana diigee lafaan wal nan qixxeessa. Yommuu inni jigutti isin isa keessatti ni barbadeeffamtu; akka ani WAAQAYYOO ta'es ni beektu. ¹⁵ Dallaa sanaa fi warra nooraa itti dibanitti dheekkamsa koo nan roobsa. Anis akkana isiniin nan jedha; "Dallaan sunii fi warri dallaa sana nooraa diban sun ni badu; ¹⁶ raajonni Israa'el kanneen Yerusaalemiif raajani utuu nagaan hin jiraatin mul'ata nagaa isheef argan sunis ni badu, jedha WAAQAYYOO Gooftaan.'"

¹⁷ "Ammas yaa ilma namaa, fuula kee gara intallan saba keetii kanneen waanuma ofii yaadan raajaniitti deebifadhuutti isaaniiin mormuudhaan raaji; ¹⁸ akkanas jedhi; 'WAAQAYYOO Gooftaan akkana jedha: Dubartoota kiyyoo keessa nama galchuuf jedhanii many'ee harka isaanii hundaaf kudhaama hodhatanii haguuggii garaa garaa mataa isaaniiitti haguuggataniif wayyoo. Isin lubbuu saba koo kiyyoo keessa galchitanii kan

ofii keessanii immoo oolfattuu? ¹⁹ Isin garbuu konyee tokkoo fi buddeena cabaa tokkoof jettanii uummata koo gidduutti na xureessitaniirtu. Uummata koo isa soba keessan dhaga'uttis sobuudhaan warra du'uu hin qabne ajjeftanii warra jiraachuu hin qabne immoo baraartaniirtu.

²⁰ "Kanaafuu WAAQAYYO Gooftaan akkana jedha: Kunoo, ani kudhaama keessan kan isin akkuma simbira kiyyeeffamtuutti uummata ittiin kiyyeessitanitti nan ka'a; harka keessan irraas nan cira; uummata isin akkuma simbirri kiyyeeffamtutti kiyyeessitan sanas kiyyoo keessaa nan baasa. ²¹ Ani haguuggii keessan tarsiasee saba koo harka keessan keessaa nan baasa; isaan si'achi harka keessan jalatti hin bulan. Ergasii isin akka ani WAAQAYYO ta'e ni beektu. ²² Ani isa dirqisiisuu baadhu iyyuu isin waan soba keessaniin nama qajeelaa dirqisiiftanii fi waan akka namni hamaana karaa isaa hamaa sana irraa deebi'ee lubbuu isaa oolfatuuf hin jajjabeessiniif, ²³ isin si'achi mul'ata sobaa hin argitan yookaan raajii sobaa hin dubbattan. Anis saba koo harka keessan keessaa nan baasa. Ergasii isin akka ani WAAQAYYO ta'e ni beektu."

14

Warri Waaqa Tolfamaa waaqeffatan Balaaleffatamuu Isaanii

¹ Maanguddoota Israa'elii keessaa tokko tokko na bira dhufanii fuula koo dura tataa'an. ² Ergasii dubbiin WAAQAYYOO akkana jedhee gara koo dhufe; ³ "Yaa ilma namaa, namoonni kunneen waaqota tolfamoo garaa isaanii keessa dhaabbataniiru; fuula isaanii dura immoo dhagaa hamaa nama gufachiisu kaa'aniiru. Ani akka isaan na kadhatan eeyyamuufiin qabaa? ⁴ Kanaafuu akkana jedhii isaanitti himi; 'WAAQAYYO Gooftaan akkana jedha: Yommuu namni Israa'elii kam iyyuu garaa isaa keessa Waaqa tolfamaa dhaabbatee dhagaa hamaa nama gufachiisu immoo fuula isaa dura kaa'atee raajii bira dhaqutti, ani WAAQAYYO akkuma baay'ina waaqota isaa tolfamoo sanaatti nan deebisaaf. ⁵ Ani qalbii saba Israa'el kanneen waaqota isaanii tolfamoof jedhanii na dhiisan sana hundaa deebisuuf waan kana nan godha.'

⁶ "Kanaafuu mana Israa'eliin akkana jedhi; 'WAAQAYYO Gooftaan akkana jedha: qalbii jijjiirradhaa! Waaqota keessan tolfamoo irraa deebi'aa; hojii keessan jibbisiisaa hundas dhiisaa!

⁷ "Yommuu namni Israa'el kam iyyuu yookaan alagaan Israa'el keessa jiraatu kam iyyuu na dhiisee garaa isaa keessa waaqota tolfamoo dhaabbatee fuula isaa dura immoo dhagaa hamaa nama gufachiisu kaa'atee waan ani jedhu gaafachuuf raajii bira dhaqutti, ani WAAQAYYO mataan koo deebii nan kennaaf. ⁸ Ani namicha sana miidhuuf fuula koo isatti garagalfadhee fakkeenya waan kolfaa isa nan godha. Saba koo irraas isa nan kuta. Ergasii isin akka ani WAAQAYYO ta'e ni beektu.

⁹ "Raajichi yoo raajii dubbachuuf gowwoomfame, ani WAAQAYYO raajii sana nan gowwoomsa; harka koos isatti kaafadhee saba koo Israa'el gidduudhaa isa nan balleessa. ¹⁰ Isaan yakka isaanii ni baadhatu; raajiin sunis akkuma nama gorsa isa gaafate sanaa yakkamaa ta'a. ¹¹ Kunis akka sabni Israa'el si'achi narraa goree yookaan deebi'ee cubbuu isaa hundaan of hin xureessineef. Isaan saba koo ni ta'u; anis Waaqa isaanii nan ta'a, jedha WAAQAYYO Gooftaan.'

Murtii Namni Jalaa Hin baane

¹² Ergasii dubbiin WAAQAYYOO akkana jedhee gara koo dhufe; ¹³ "Yaa ilma namaa, yoo biyyi tokko amanamuu diduudhaan cubbuu natti hojette ani harka koo isheetti kaasee madda nyaata ishee nan gogsa; beelas itti ergee namoota isheetii fi horii ishee jalaa nan fixa; ¹⁴ yoo namoonni sadan kunneen jechuunis Nohi, Daani'elii fi Iyyoob biyya sana keessa jiraatani iyyuu isaan qajeelummaa isaaniitiin mataa ofii isaanii qofa oolfatu, jedha WAAQAYYO Gooftaan.

¹⁵ "Yookaan yoo ani guutummaa biyya sanaatti bineensa ergee bineensi sun immoo biyya sana ijoolle malee hambise, yoo hamma namni tokko iyyuu sababii bineensa sanaatiif achiin darbuu dadhabutti biyyi sun one, ¹⁶ ani jiraataadhaatii, jedha WAAQAYYO Gooftaan; yoo namoonni kunneen biyya sana keessa jiraatani iyyuu isaan ilmaan yookaan intallan ofii isaanii oolfachuu hin danda'an. Isaanuma qofatu oolfama; biyyi sun garuu ni onti.

¹⁷ "Yookaan yoo ani goraadee biyyattiitti fidee, 'Goraadeen biyyattii keessa haa darbu' jedhee namaa fi horii ishee fixe, ¹⁸ ani jiraataadhaatii, jedha WAAQAYYO Gooftaan; yoo namoonni kunneen biyya sana keessa jiraatani iyyuu isaan ilmaan yookaan intallan ofii isaanii oolfachuu hin danda'an. Isaanuma qofatu oolfama.

¹⁹ "Yookaan yoo ani biyya sanatti dha'icha ergee namaa fi horii ishee fixee dhiiga lolaasuudhaan dheekkamsa koo itti roobse, ²⁰ ani jiraataadhaatii, jedha WAAQAYYO

Gooftaan; yoo Nohi, Daani'elii fi Iyyoob biyya sana keessa jiraatani iyyuu isaan ilmaan yookaan intallan ofii isaanii oolfachuu hin danda'an. Isaan qajeelummaa isaaniitiin mataa ofii isaanii qofa oolfatu.

²¹ "WAAQAYYO Gooftaan akkana jedhaatii: Yeroo ani namaa fi horii ishee fixuuf murtiiwwan hadhaa'aa afran sana jechuunis goraadee fi beela, bineensaa fi dha'icha Yersaaleemitti ergutti hammam wanni hamaan haa ta'uu ree! ²² Ta'us ilmaanii fi intallan isaanii kanneen ishee keessaa baafamanii baraaraman muraasni achi ni jiraatu. Isaanis gara keessan ni dhufu; isin immoo yeroo amala isaaniitii fi gocha isaanii argitanitti sababii ani Yersaaleemitti badiisa fideef jechuunis badiisa ani isheetti fide hundaaf ni jajjabaattu. ²³ Isin yeroo amala isaaniitii fi gocha isaanii argitanitti akka ani sababii malee homaa ishee keessatti hin godhin waan beektaniif ni jajjabaattu, jedha WAAQAYYO Gooftaan."

15

Yersaalem Wayinii Faayidaa Hin qabne

¹ Ergasii dubbiin WAAQAYYOO akkana jedhee gara koo dhufe: ² "Yaa ilma namaa, mukni wayinii akkamitti damee muka bosona keessa jiru kamii iyyuu caala? ³ Waan faayidaa qabu tolfachuuf muka wayinii sana irraa takkumaa mukni fudhatamee beekaa? Waa isatti fannifachuuf namoonni isa irratti fannoo ni hojjetuu? ⁴ Inni erga akkuma qoraan ibiddatti naqamee ibiddi sun fiixee isaa lamaan gubee gidduu xaphi godhee booddee waan tokkoof iyyuu faayidaa qabaa? ⁵ Inni utuu hin tuqamin faayidaa yoo hin qabaatin, erga ibiddaan gubamee xaphi jedhee immoo hammam faayidaa gad aanaa haa qabaatuu ree?

⁶ "Kanaafuu WAAQAYYO Gooftaan akkana jedha: Ani akkuma muka wayinii mukkeen bosona gidduu jiru akka inni boba'uuf ibiddatti naqe sana, uummata Yersaalem keessa jiraatu illee akkasuma nan godha. ⁷ Ani hamminaan fuula koo isaanitti nan deebisa. Isaan ibidda keessaa ba'an iyyuu, ibiddi amma iyyuu isaan ni balleessa. Yeroo ani hamminaan fuula koo isaanitti deebifadhutti, isin akka ani WAAQAYYO ta'e ni beektu. ⁸ Sababii isaan amanamuu didaniif ani biyyattii nan onsa, jedha WAAQAYYO Gooftaan."

16

Yersaalem Niitii Ejjituu

¹ Dubbiin WAAQAYYOO akkana jedhee gara koo dhufe: ² "Yaa ilma namaa, hojii ishee jibbiisaa sana Yersaaleemitti himi; ³ akkanas jedhi; 'WAAQAYYO Gooftaan Yersaaleemiin akkana jedha: Sanyii fi dhaloonni kee biyya Kana'aanotaa ti; abbaan kee nama Amoor; haati kee immoo nama Heet. ⁴ Ati gaafa dhalatte hin handhuuranne yookaan akka qulqulloofuu fi bishaaniin hin dhiqamne yookaan soogiddaan hin sukkuumanne yookaan huccuudhaan hin maramne. ⁵ Namni tokko iyyuu ija gara laafinaatiin si hin ilaalle yookaan wantoota kanneen siif gochuuf garaa siif hin laafne. Qooda kanaa ati dirreetti gatamte; ati gaafa dhalatte tuffatamtee turteetii.

⁶ "Anis utuun achiin darbuu si'ii dhiiga kee keessa ciiftee dhidhiitattu sin arge; utuma ati achi dhiiga kee keessa ciiftuu ani, "Jiraadhu!" siinan jedhe. ⁷ Akkuma biqiltuu dirreetti sin guddise. Atis guddattee jabaattee lula akka malee miidhagu taate. Ati qullaa fi harka duwwaa turte, guntata baaftee rifeensi kees guddate.

⁸ "Ani yeroon deebi'ee achiin darbutti si ilaaleen akka ati jaalalaaf geesse sin arge; handaara wayyaa kootiis sirra buuseen qullummaa kee haguuge. Siif kakadhees si wajjin waadaa nan gale, jedha WAAQAYYO Gooftaan; atis kan koo taate.

⁹ "Ergasii ani bishaaniin si dhiqee dhiiga sirraa miicee zayitii si dibe. ¹⁰ Ani uffata faayeffamee sitti uffisee kophee gogaa irraa hojjetame illee sitti nan kaa'e. Wayyaa miidhagaa quncee talbaa irraa hojjetame sitti uffisee uffata gatii guddaa immoo sirra buuse. ¹¹ Ani faayaan si miidhagseera jechuunis irree keetti bitawoo, morma keetti immoo amartii siif godheera; ¹² ani funyaan keetti qubeelaa, gurra keetti amartii, mataa keetti immoo gonfoo miidhagaa kaa'eera. ¹³ Atis akasiin warqee fi meetiidhaan miidhagfante; uffanni kees quncee talbaatii fi haarriidhaan faayeffamee hojjetamee ture; nyaanni kee daakuu bullaa'aa, dammaa fi zayitii ejersaa ture. Ati akka malee bareeddee mootitii ta'uuf kaate. ¹⁴ Waa'ee bareedina keetiitiifis maqaan kee saboota gidduu tamsa'e; surraan ani siif kenne bareedina kee kan hanqina hin qabne godheeraatii, jedha WAAQAYYO Gooftaan.

¹⁵ "Ati garuu miidhagina kee amanattee maqaa kee sagaagalummaadhaaf itti fayyadamte. Kara deemaa kam iyyuu wajjin sagaagaltee miidhagina kees kenniteef. ¹⁶ Uffata kee keessaas tokko tokko fuutee iddoowwan sagadaa kanneen itti sagaagaltu

sana ittiin miidhagsite. Wanni akkasii takkumaa ta'ee hin beeku; fuuldurattis hin ta'u. ¹⁷ Faayawwan miidhagoo ani siif kenne kan warqee fi meetii koo irraa hojjetaman fudhattee korommii waaqota tolfamoo ofii keetiif hojjetattee isaan wajjin sagaagalte. ¹⁸ Uffata kee kan faayeffamee hojjetames isaanitti uffistee, zayitii fi ixaana koos fuula isaanii duratti dhi'eessite. ¹⁹ Nyaata ani siif kenne jechuunis daakuu bullaa'aa, zayitii ejersaatii fi damma ani akka ati nyaattuuf siif kenne sana akka ixaana urgaa gaarii qabuutti fuula isaanii duratti dhi'eessite. Wanni akkasii ta'eera, jedha WAAQAYYO Gooftaan.

²⁰ " 'Ati ilmaanii fi intallan kee kanneen naaf deesse fuutee akka isaan nyaata waaqota tolfamoo ta'aniif aarsaa gootee dhi'eessite. Sagaagalummaa kee hin ga'u turee? ²¹ Ati ijoollee koo qaltee waaqota tolfamoof aarsaa goote. ²² Ati hojii kee jibbisiisaa fi sagaagalummaa hojjetee hundaan baroota ijoollummaa keetii, yeroo qullaa fi miilla duwwaa, yeroo dhiiga kee keessa gangalachaa turte sana hin yaadanne.

²³ " 'Wayyoo! Siif wayyoo, jedha WAAQAYYO Gooftaan. Jal'ina kee kaan hunda irratti immoo, ²⁴ ofii keetiif waltajjii qopheeffatte; oobdiiwwan uummataa hundatti galma waageffannaa ol dheeraa hojjetee. ²⁵ Fiixee daandii hundaatti gaarran sagadaa kee ol dhedheeroo ijaarratte; nama achiin darbu hundaaf dhagna kee dhi'eessitee sagaagalummaa kee baay'isuudhaan miidhagina kee busheessite. ²⁶ Ati warra Gibxi, olloota kee kanneen dhagna guddaa qaban wajjin sagaagaltee sagaagalummaa kee kan hamma hin qabne sanaan dheekkamsaaf na kakaafte. ²⁷ Kanaafuu ani harka koo sitti kaasee qooda kee sirraa nan hir'ise; ani intallan Filisxeemotaa warra diinota kee ta'an kanneen amala sagaagalummaa kee saalfatanitti dabarsee si kenneera. ²⁸ Ati sababii dharraa hin ba'iniif warra Asoor wajjin akkasuma sagaagalte; ati amma illee dharraa hin baane. ²⁹ Ergasii itti fuftee daldaloota biyya Baabilon wajjin sagaagalte; garuu kanaan iyyuu dharraa hin baane.

³⁰ " 'Ati akka sagaagaltuu hin saalfanne tokkootti waan kana hunda gochuun kee yaada dadhabaa akkamii qabaatteeti! jedha WAAQAYYO Gooftaan. ³¹ Ati yeroo fiixee daandii hundaatti waltajjii tolfattee oobdii uummataa hunda irratti iddoowwan sagadaa keetii ol dhedheeroo ijaarrattetti, ati sababii gatii hin baasisiniif akka sagaagaltuu tokkoo hin turre.

³² " 'Yaa niitii sagaagaltuu nana! Ati qooda dhirsa keetii kara deemaa filatta! ³³ Sagaagaltoon kam iyyuu gatii fudhatti; ati garuu michoota kee hundaaf kennaa kennita; akka isaan iddoo kamii iyyuu gara kee dhufanii si wajjin sagaagalaniif jettee matta'aa kennitaaf. ³⁴ Kanaafuu sagaagalummaan kee kan warra kaaniitiin adda; namni kam iyyuu si argachuuf si faana hin bu'u. Ati gatii kennita malee waan gatiin siif hin kennanneef ati kan addaa ti.

³⁵ " 'Kanaafuu yaa sagaagaltuu nana, dubbii WAAQAYYOO dhaga'i! ³⁶ WAAQAYYO Gooftaan akkana jedha: Sababii ati qabeenya kee dhangalaaftee michoota kee wajjin sagaagalummaa baay'isuudhaan qullaa kee dhaabatteef, sababii waaqota kee jibbisiisoo hundaatii fi sababii dhiiga ijoollee keetii isaanii kenniteef, ³⁷ ani michoota kee kanneen ati isaan wajjin bashannante jechuunis warra ati jaallattus warra ati jibbitus walitti nan qaba. Ani iddoo hundaatii isaanii sitti waamee fuula isaanii duratti qullaa sin dhaaba; isaanis qullaa kee hunda ni argu. ³⁸ Ani adabbii dubartoota sagaagalaniitii fi dhiiga namaa dhangalaasaniif malu sitti nan murteessa; dheekkamsa koo fi hinaaffaa kootiin dhiiga kee nan dhangalaasa. ³⁹ Ergasii ani harka michoota keetiitti dabarsee sin kenna; isaanis waltajjii kee ni diigu; iddoowwan sagadaa keetii ol dhedheeroos ni barbadeessu. Isaan wayyaa kee sirraa baasanii faaya kee miidhagaa sana illee sirraa fudhatu; qullaa keetii fi harka duwwaas si hambisu. ⁴⁰ Isaan jeeqxota sitti kakaasu; jarris dhagaadhaan si tuman; goraadeedhaanis si kukkutu. ⁴¹ Isaan manneen keessan ni gubu; fuula dubartoota hedduu durattis isin adaban. Ani sagaagalummaa kee sin dhiisaa; si'achis michoota keetiif gatii hin kaffaltu. ⁴² Yoos dheekkamsi koo sirraa qabbanaa'a; hinaaffaan koos sirraa ni deebi'a; ani nan cal'isa; si'achis hin aaru.

⁴³ " 'Sababii ati bara ijoollummaa keetii yaadachuu dhiiftee wantoota kanneen hundaan na aarsiteef, ani dhugumaan waan ati hojjetee matuma keetii nan deebisa, jedha WAAQAYYO Gooftaan. Ati hojii kee jibbisiisaa kaan hunda irratti wal bira ga'uu haala hamaadhaan hojjetamu dabalatteerta miti?

⁴⁴ " 'Namni mammaaksa mammaaku kam iyyuu, "Intalli akkuma haadhaa ti" jedhee waa'ee kee mammaaksa kana mammaaka. ⁴⁵ Ati intala haadha kee kan dhirraa fi ijoollee ishee balfite sanaa ti; ati obboleettii obboleettota kee kanneen dhirsoota isaanitii fi ijoollee isaanii balfan sanaa ti. Haati kee nama Heeti, abbaan kee immoo nama Amoor turan. ⁴⁶ Obboleettiin kee hangafni Samaariyaa ishee intallan ishee wajjin siin gama kaabaa jiraattu sanaa ti; obboleettiin kee quxisuu Sodoom ishee intallan ishee

wajjin siin gama kibbaa jiraattuu ti. ⁴⁷ Ati karaa isaani duukaa buutee hojiiwwan isaani jibbisiisoo sana hojjechuu qofa utuu hin ta'in karaa kee hundumaan dafee isaan caalaa amala badde. ⁴⁸ Ani jiraataadhaatii, jedha WAAQAYYO Gooftaan; obboleettiin kee Sodoomii fi intallan ishee iyyuu takkumaa waan atii fi intallan kee hojjetan kana hin hojjenne.

⁴⁹ "Egaa cubbuun obboleettii kee Sodoom kana ture: Ishee fi intallan ishee of tuultootaa fi quufoo turan; yaada malees jiraatan; isaan hiyyeeyyii fi rakkattoota hin gargaarre. ⁵⁰ Isaan of tuultota turan; fuula koo duratti waan jibbisiisaa hojjetan. Kanaafuu ani akkuma isin argitan sana isaan nan balleesse. ⁵¹ Samaariyaan cubbuu ati hojjetee sana walakkaa isaa illee hin hojjenne. Ati isaan caalaa waan jibbisiisaa hojjettee waanuma hojjetee kana hundaan obboleettota kee qajeeltota fakkeessite. ⁵² Ati waan obboleettota keetiif falmii qopheessiteef qaani kee baadhadhu. Sababii cubbuun kee cubbuu isaani caalaa hamaa ta'eef isaan si caalaa qajeeltota fakkaatu. Kanaafuu qaana'iitii salphina kee baadhadhu; ati akka obboleettonni kee qajeeltota fakkaatan gooteertaatii.

⁵³ "Ta'us ani hambaa Sodoomii fi kan intallan ishee, kan Samaariyaatii fi kan intallan ishee, kan kees kan isaani wajjin nan deebisa; ⁵⁴ kunis akka ati salphina kee baadhattee waan isaan jajjabeessuuf hojjetee sana hundaan qaanoftuuf. ⁵⁵ Obboleettonni kee Sodoomii fi intallan ishee, Samaariyaa fi intallan ishee akkuma duraan turanitti ni deebi'u; atii fi intallan kees akkuma duraan turtanitti ni deebitu. ⁵⁶ Ati bara of tuulaa turte sana keessa obboleettii kee Sodoomiin maqaa iyyuu hin dhoofne; ⁵⁷ kunis utuu hamminni kee ifatti hin ba'in ture. Ta'us ati amma intallan Edoomiin, olloota ishee hundaa fi intallan Filisxeemotaa jechuunis warra naannoo kee jiraatan kanneen si tuffatan hundaan ni balfamta. ⁵⁸ Ati gatii wal bira ga'uu haala hamaadhaan hojjetteetii fi kan hojji kee jibbisiisaa sanaa ni argatta, jedha WAAQAYYO.

⁵⁹ "WAAQAYYO Gooftaan akkana jedha: Sababii ati kakuu cabsuudhaan walii galtee koo tuffattee, ani akkuma siif malutti sin adaba. ⁶⁰ Ta'us ani kakuun yeroo ijoollummaa keetiitti si wajjin gale sana nan yaadadha; kakuu bara baraan hin diigamnes si wajjin nan gala. ⁶¹ Ati gaafas yeroo obboleettota kee hangafaa fi quxisuu simattutti, karaa kee yaadattee ni qanofta. Ani intallan taasisee isaan siifan kenna; garuu kun akka kakuu ani si wajjin gale sanaa miti. ⁶² Ani si wajjin kakuu nan gala; atis akka ani WAAQAYYO ta'e ni beekta. ⁶³ Yeroo ani waan ati hojjetee hunda siif dhiisutti, ati sababii salphina keetiitiif yaadattee ni qanofta; lammatas afaan hin saaqattu, jedha WAAQAYYO Gooftaan.' "

17

Risaa Lamaa fi Muka Wayinii Tokko

¹ Ergasii dubbiin WAAQAYYOO akkana jedhee gara koo dhufe: ² "Yaa ilma namaa, hibboo dubbadhuutii mana Israa'elitti fakkeenya himi. ³ Akkanas isaaniin jedhi; 'WAAQAYYO Gooftaan akkana jedha: Risaa guddaan qoochoo jabaa, baallee dhedheeraa fi bifa adda addaa qabu tokko gara Libaanon dhufe. Innis mataa muka birbirsaa fudhattee ⁴ lataa fiixee isaa irraa cabsee biyya daldalootaatti geesse; magaalaa daldalootaa keessas dhaabe.

⁵ "Innis sanyii biyya keetii keessaa waa fudhee biyyoo gabbataa keessa kaa'e. Akka muka qarqara lagaatti biqiluutti bishaan guddaa bira dhaabe; ⁶ innis biqilee hidda yaafatee muka wayinii dagaage ta'e. Dameewwan isaa gara isaatti deebi'an; hiddi isaa garuu isuma jalatti hafe. Inni akkasiin muka wayinii ta'ee dameewwan baala hedduu qaban baafate.

⁷ "Ergasii risaa guddaa kan qoochoo guddaa fi baallee baay'ee qabu kan biraatu ture. Mukti wayinii sunis bishaan akka argatuuf lafa qotiisaa dhaabamee ture sana keessaa gara risaa sanaatti hidda yaafatee dameewwanis bal'ifate. ⁸ Mukti wayinii sun akka dameewwan baasuuf, akka ija naqatuu fi akka wayinii itti tole ta'uuf biyyoo gaarii qarqara bishaan guddaa jiru keessa dhaabamee ture.'

⁹ "Akkana isaaniin jedhi; 'WAAQAYYO Gooftaan akkana jedha: Inni ni guddataa? Inni akka goguuf buqqifamee iji isaa irraa harca'a mitii? Lataan isaa hundinuus ni goga. Hidda isaa wajjin isa buqqisuuf irree jabaa yookaan nama hedduu hin barbaachisu. ¹⁰ Inni utuma iddoo tokkoo buqqifamee iddoo biraa dhaabamee iyyuu ni guddataa? Inni yeroo bubbeen ba'a biiftuu itti bubbistutti lafa qotiisaa keessatti biqile sana irratti guutumaan guutuutti coollagee hin goguu?' "

¹¹ Ergasii dubbiin WAAQAYYOO akkana jedhee gara koo dhufe: ¹² "Mana fincila kanaan, 'Isin hiikkaa wantoota kanneenii hin beektanii?' jedhi. Akkana isaaniin jedhi: 'Mootiin Baabilon gara Yerusaaalem dhaqee, mootii isheetii fi namoota ishee ulfaatoo

fuudhee Baablonitti deebi'e. ¹³ Ergasii immoo maatii mootichaa keessaa nama tokko fuudhee kakachiisuudhaan isa wajjin walii galtee uummate. Akkasumas namoota biyya sanaa jajjaboo fuudhee deeme; ¹⁴ kunis akka mootummaan sun gad deebi'ee mataa ol qabachuu dadhabee walii galtee sana qofaan jiraachuu danda'uuf. ¹⁵ Mootichi garuu fardeenii fi loltoota hedduu argachuuf jedhee ergamoota isaa Gibxitti ergachuudhaan isatti fincile. Inni amma ni milkaa'aa? Namni waan akkanaa hojjetu ni miliqaa? Inni walii galtee sana cabsee jalaa ba'uu danda'aa?

¹⁶ " 'Ani jiraataadhaatii, jedha WAAQAYYO Gooftaan; inni Baablon keessatti biyyuma mooticha teessoo irra isa kaa'e kan inni kakuu isaa tuffatee walii galtee isaas cabse sanaa keessatti ni du'a. ¹⁷ Yeroo lubbuu hedduu galaafachuuf tuullaan biyyoo tuulamee da'annoon ijaaramutti, Fara'oon loltoota isaa jajjaboo fi tuuta nama baay'ee wajjin waraana keessatti homaa isa hin fayyadu. ¹⁸ Inni walii galtee tuffatee kakuu cabse. Sababii walii galteedhaan harka dha'ee garuu waan kana hunda hojjeteeff inni hin ba'au.

¹⁹ " 'Kanaafuu WAAQAYYO Gooftaan akkana jedha: Ani jiraataadhaatii, ani kakuu koo kan inni tuffatee fi walii galtee koo kan inni cabse sana matuma isaatti nan deebisa. ²⁰ Ani kiyyoo koo isaaf nan diriirsa; innis kiyyoo kootiin ni qabama. Sababii inni anaaf amanamuu dideef ani Baablonitti isa geessee achitti isatti nan mura. ²¹ Loltoonni isaa kanneen baqatan hundinuu goraadeedhaan ajjeefamu; warri hafan immoo bubbeetti bittinneffamu. Gaafas isin akka ani WAAQAYYO dubbadhe ni beektu.

²² " 'WAAQAYYO Gooftaan akkana jedha: Ani mataan koo mataa birbirsaa irraa damee tokko kutee nan dhaaba; fiixee isaa irraa immoo lataa kichuu cabsee tulluu guddaa ol dheeraa tokko irra nan dhaaba. ²³ Anis ol dheerina tulluu Israa'el irra isa nan dhaaba; inni immoo dameewwan yaafatee, ija naqatee birbirsaa guddaa ta'a. Simbirroonni gosa hundaas isa irra jiraatu; isaanis gaaddisa dameewwan isaa jalatti iddoo bultii ni qabaatu. ²⁴ Mukkeen bosonaa hundinuu akka ani WAAQAYYO muka dheeraa gabaabsee muka gabaabaa immoo dheeressu ni beeku. Ani muka jiidhaa gogsee muka gogaa immoo akka inni lalisu nan godha.

" 'Ani WAAQAYYO dubbadheera; waan kana nan raawwadha.' "

18

Lubbuun Cubbuu Hojjetu Ni duuti

¹ Ergasii dubbiin WAAQAYYOO akkana jedhee gara koo dhufe: ² "Isin yeroo, " 'Abbootiin ija wayinii dhangaggaa'aa nyaannaan, ilkaan ijoollee hadoode'

jettanii waa'ee biyya Israa'el mammaaktan, maal jechuu keessan?

³ "Ani jiraataadhaatii, jedha WAAQAYYO Gooftaan; isin si'achi mammaaksa kana Israa'el keessatti hin mammaaktan. ⁴ Lubbuun hundi kan koo ti; akkuma lubbuun abbaa kan koo taate sana lubbuun ilmaas kan koo ti. Lubbuun cubbuu hojjetu ni duuti.

⁵ "Mee nama qajeelaa murtii qajeelaa fi waan qajeelaa hojjetu tokkotu jira haa jennu.

⁶ Inni tulluu waaqeffannaa irratti hin nyaatu yookaan waaqota tolfamoo mana Israa'el hin abdatu.

Inni niitii ollaa isaa hin xureessu

yookaan dubartii xurii qabdu wajjin hin ciisu.

⁷ Inni nama tokko illee hin cunqursu;

garuu waan qabsiisaan liqeeffate ni deebisa.

Inni nama hin saamu;

garuu nyaata ofii isaa nama beela'eef kenna;

uffata isaas nama qullaa deemutti uffisa.

⁸ Inni hiiqiidhaan namaaf hin liqeessu

yookaan dhala nama irraa hin fudhatu.

Inni waan hamaa hojjechuu irraa of qusata;

nama tokkoo fi nama kaan gidduuttis murtii qajeelaa kenna.

⁹ Inni qajeelfama koo duukaa bu'ee

seera koos amanamummaadhaan eega.

Namni akkasii qajeelaa dha;

inni dhugumaan ni jiraata,

jedha WAAQAYYO Gooftaan.

¹⁰ "Mee inni ilma jeequmsa kaasu kan dhiiga namaa dhangalaasu yookaan wantoota kanneen fafakkaatan kan biraa hojjetu qaba haa jennu; ¹¹ abbaan wantoota kanneen keessaa tokko illee gochuu baatu iyyuu,

“Ilmi immoo tulluu waaqeffannaa irratti nyaata.

Niitii ollaa isaa xureessa.

¹² Inni hiyyeeyyii fi rakkattoota cunqursa.

Nama saama.

Waan qabsiisaan qabate hin deebisu.

Gara waqota tolfamoo ilaala.

Wantoota jibbisiisoo hojjeta.

¹³ Inni hiiqiidhaan liqeessee dhala fudhata.

Namni akkasii lubbuun ni jiraataa? Hin jiraatu! Inni sababii wantoota jibbisiisoo kanneen hunda hojjeteef dhugumaan ni ajjeefama; dhiigni isaas matuma isaatti deebi'a.

¹⁴ “Ilmi kun garuu yoo ilma dhalchee, ilmi sun immoo cubbuu abbaan isaa hojjete hunda utuma arguu sodaatee hojjechuu dhiisa haa jennu:

¹⁵ “Inni tulluu waaqeffannaa irratti hin nyaatu

yookaan gara waqota tolfamoo mana Israa'el hin ilaalu.

Niitii ollaa isaas hin xureessu.

¹⁶ Nama tokko illee hin cunqursu

yookaan liqii liqeesuuf qabsiisa hin gaafatu.

Inni nama hin saamu;

garuu nyaata ofii nama beela'eef kenna;

nama daares daara baasa.

¹⁷ Harka isaa hiyyeeyyii miidhuu irraa eeggata;

hiiqii yookaan dhala hin fudhatu.

Inni seera koo ni eega; ajajawwan koo duukaas ni bu'a.

Inni sababii cubbuu abbaa isaatiif hin du'u; inni dhugumaan ni jiraata. ¹⁸ Abbaan isaa garuu waan nama gowwomseef, waan obboleessa isaa saamee uummata isaa gidduutti daba hojjeteef cubbuudhuma ofii isaatiin du'a.

¹⁹ “Isin garuu, ‘Ilmi maaliif cubbuu abbaa isaatiin hin adabanne?’ jettanii gaafattu. Ilmi sun waan qajeelaa fi sirrii hojjete ajajawwan koo hundas of eeggannoodhaan eegeef inni dhugumaan lubbuudhaan ni jiraata. ²⁰ Lubbuun cubbuu hojjetu ni duuti. Ilmi cubbuu abbaa isaatiin hin adabamu yookaan abbaan cubbuu ilma isaatiin hin adabamu. Qajeelinni nama qajeelaa isumaaf ta'a; hamminni nama hamaas isumatti deebi'a.

²¹ “Namni hamaan tokko garuu yoo cubbuu hojjete hunda irraa deebi'ee ajajawwan koo hunda eegee, waan qajeelaa fi waan sirrii hojjete inni dhugumaan ni jiraata; hin du'us. ²² Balleessaa inni hojjete keessaa tokko iyyuu isatti hin herregamu. Sababii wantoota qajeelaa hojjeteef inni lubbuudhaan ni jiraata. ²³ Ani du'a hamootaatti nan gammadaa? jedha WAAQAYYO Gooftaan. Qooda kanaa yoo isaan cubbuu isaanii irraa deebi'anii lubbuudhaan jiraatan ani hin gammaduu?

²⁴ “Garuu namni qajeelaan tokko yoo qajeelummaa isaa irraa deebi'ee cubbuu hojjete wantoota jibbisiisoo namichi hamaan sun hojjechaa ture sana hojjete inni lubbuudhaan ni jiraataa? Waan qajeelaa inni hojjete keessaa tokko iyyuu isaaf hin yaadatamu. Inni sababii amanamuu didee cubbuu hojjeteef ni du'a.

²⁵ “Isin garuu, ‘Karaan Gooftaa qajeelaa miti' jettu. Yaa mana Israa'el dhaga'aa: Karaan koo qajeelaa dha mitii? Jal'aan karaa keessan mitii? ²⁶ Namni qajeelaan yoo qajeelummaa isaa irraa deebi'ee cubbuu hojjete inni cubbuu sanaan ni du'a. Inni sababii cubbuu hojjete sanaatiif ni du'a. ²⁷ Namni hamaan tokko garuu yoo hammina isaa irraa deebi'ee murtii qajeelaa fi waan qajeelaa hojjete inni lubbuu isaa ni oolfata. ²⁸ Inni sababii yakka hojjete hunda hubatee irraa deebi'eef dhugumaan lubbuudhaan ni jiraata; hin du'us. ²⁹ Ta'u illee manni Israa'el, ‘Karaan Gooftaa qajeelaa miti' jedha. Yaa mana Israa'el, karaan koo qajeelaa dha mitii? Jal'aan karaa keessan mitii?

³⁰ “Kanaafuu yaa mana Israa'el, ani tokkoo tokkoo keessanitti akkuma hojii keessanitti nan mura, jedha WAAQAYYO Gooftaan. Qalbii jijjiirradhaa! Yakka keessan hunda irraa deebi'aa; yoos isin cubbuudhaan hin baddan. ³¹ Daba natti hojjetan hunda of irraa gataatii garaa haaraa fi hafuura haaraa qabaadhaa. Yaa mana Israa'el isin maaliif duutu? ³² Ani du'a nama kamiitti iyyuu hin gammaduutii, jedha WAAQAYYO Gooftaan. Qalbii jijjiirradhaatii lubbuudhaan jiraadhaa!

19

Faaruu Boo'ichaa

¹ “Waa'ee ilmaan mootota Israa'eliif faarsii boo'i; ² akkanas jedhi:
“Haati kee leencota gidduutti,

- leenca akkamii turte!
 Isheen leencota gidduu ciiftee
 ilmoolee ishee guddifatte.
³ Ilmoolee ishee keessaas tokko guddifatte;
 innis leenca jabaa ta'e.
 Inni waa adamsee ciccirachuu barate;
 namootas nyaate.
⁴ Saboonni waa'ee isaa dhaga'an;
 inni boolla isaanii keessatti qabame.
 Isaan hokkoodhaan harkisanii
 gara biyya Gibxitti isa geessan.
- ⁵ " 'Isheen yommu akka abdiin ishee hin guutamin,
 akka wanni isheen yaaddes hin milkaa'in argitetti,
 ilmoolee ishee keessaa kan biraa fudhattee
 leenca jabaa gootee guddifte.
⁶ Inni leencota gidduu biddiiq;
 leenca jabaa ta'eeraatii.
 Inni waa adamsee ciccirachuu barate;
 namootas nyaate.
⁷ Inni da'annoo isaanii diige;
 magaalaawwan isaanis onse.
 Biyyattii fi kanneen ishee keessa jiraatan hundi
 aaduu isaatiin raafaman.
⁸ Ergasii saboonni warri kutaalee biyya naannoo
 sanaa jiran isatti ka'an.
 Isaanis kiyyoo isaanii isa duratti diriirsan;
 innis boolla isaanii keessatti qabame.
⁹ Isaan hokkoodhaan qabanii mana shiboo keessa isa kaa'an;
 gara mootii Baabilonitti isa fidan.
 Mana hidhaatti isa galchan;
 kanaafuu aaduun isaa
 tulluuwwan Israa'el irratti ergasii hin dhaga'amne.
- ¹⁰ " 'Haati kee akkuma wayinii
 lafa gotiisaa kee keessa bishaan bira dhaabatee ti;
 biqiltuun sunis sababii bishaan baay'ee argatteef
 mistee damee hedduu baaffatte.
¹¹ Dameewwan isaas jajjaboo
 bokkuu bulchaatiif ta'an turan.
 Isheen baalawwan gobbatan gidduutti
 ol dheerina isheetii fi
 baay'ina dameewwan isheetiin
 ol dheeratte mul'atti turte.
¹² Isheen garuu aariidhaan buqqifamtee
 lafatti gatamte.
 Bubbeen ba'a biiftuu ishee gogsee
 ija ishee irraa harcaase;
 dameewwan ishee ciccimoonis ni coollagan;
 ibiddis isaan fixe.
¹³ Amma isheen gammoojjii keessa,
 lafa gogaa dheebote irra dhaabamte.
¹⁴ Damee ishee tokko keessaa ibiddi ba'ee
 ija ishee fixe.
 Dameen jabaan bokkuu bulchaatiif ta'u
 tokko iyyuu ishee irratti hin hafne.'
 Kun faaruu boo'ichaa kan boo'ichaaf itti fayyadamanii dha."

¹ Wagga torbaffaa, ji'a shanaffaa keessa guyyaa kudhannaaffaatti maanguddoota Israa'el keessaa tokko tokko waan WAAQAYYO jedhu gaafachuuf dhufanii fuula koo dura tataa'an.

² Ergasii dubbiin WAAQAYYOO akkana jedhee gara koo dhufe; ³ "Yaa ilma namaa, akkana jedhii maanguddoota Israa'elitti dubbadhu; 'WAAQAYYO Gooftaan akkana jedha: Isin yaada koo gaafachuu dhuffanii? Ani jiraataadhaatii, ani akka isin yaada koo gaafattaniif isinii hin eeyyamu, jedha WAAQAYYO Gooftaan.'

⁴ "Ati isaanitti murtaa? Yaa ilma namaa, ati isaanitti murtaa? Ergasiis akka isaan hojiiwwan abbootii isaanii jibbisiisoo sana beekan godhi; ⁵ akkanas isaaniiin jedhi: 'WAAQAYYO Gooftaan akkana jedha: Ani gaafan Israa'el filadhetti harka koo ol qabadhee sanyii mana Yaaqoobiif kakachuudhaan biyya Gibxi keessatti isaanitti of mul'iseera. Harka koo ol kaasee, "Ani WAAQAYYO Waaqa keessan" isaaniiin jedheera. ⁶ Gaafas ani biyya Gibxii isaan baasee biyya ani isaaniif file kan aannanii fi damma baastu, biyya biyyoota hunda caalaa miidhagduutti isaan galchuudhaaf isaanii nan kakadhe. ⁷ Anis akkanan isaaniiin jedhe; "Tokkoon tokkoon keessan wantoota jibbisiisoo kan iji keessan itti gammadu sana balleessaa; waaqota Gibxiinis of hin xureessinaa. Ani WAAQAYYO Waaqa keessan."

⁸ "Isaan garuu natti fincilanii na dhaga'uu didan; wantoota jibbisiisoo iji isaanii itti gammade sanas hin balleessine yookaan waaqota Gibxi tolfamoo sanas hin dhiisne. Kanaafuu ani biyya Gibxi keessatti aarii koo isaanitti ba'uudhaaf dheekkamsa koo isaan irratti nan dhangalaasa jedheen ture. ⁹ Ani garuu akka maqaan koo fuula saboota Israa'eloonni gidduu isaanii jiraatan kanneen ani Israa'eloota biyya Gibxii baasuudhaan fuula isaanii duratti of beeksise sanaa duratti hin xuroofne gochuudhaaf maqaa kootiif jedheen hojjedhe. ¹⁰ Kanaafuu ani biyya Gibxii isaan baaseen gammoojjitti isaan fide. ¹¹ Akka namni isaaniif ajajamu isaaniiin jiraatuuf ani sirnawwan koo isaaniif nan kenne; seerawwan koos isaaniitti nan beeksise. ¹² Akkasumas akka isaan akka ani WAAQAYYO isaan qulqulleesse beekaniif, akka anaa fi isaan gidduutti mallattoo ta'uuf Sanbatoota koo isaaniif nan kenne.

¹³ "Manni Israa'el garuu gammoojjii keessatti natti fincile. Sirna koo isa namni yoo itti bule isaan jiraatu isa hin eegne; seera koos ni tuffatan. Sanbatoota koos guutumaa guutuutti xureessan. Kanaafuu ani dheekkamsa koo isaanitti roobsee gammoojjii keessatti isaan barbadeessa jedhen ture. ¹⁴ Ani garuu akka maqaan koo fuula saboota utuma iji isaanii arguu Israa'elin achii baase sanaa duratti hin xuroofneef maqaa kootiif jedhee waan kana nan hojjedhe. ¹⁵ Akkasumas biyya ani isaaniif kenne kan biyyoota hunda caalaa miidhagdu kan aannanii fi damma baastutti akka isaan hin galchine harka koo ol qabadhee gammoojjii keessatti isaanitti nan kakadhe; ¹⁶ kunis waan isaan seera koo tuffataniif, sirna koo duukaa hin bu'ini fi Sanbatoota koo xureessaniif. Yaadni isaanii waaqota isaanii tolfamoo faana bu'eeraatii. ¹⁷ Ta'us ani gara laafinaan isaan ilaale malee isaan hin balleessine yookaan gammoojjii keessatti isaan hin fixne. ¹⁸ Ani gammoojjii keessatti ijoollee isaaniitiin akkana nan jedhe; "Sirna abbootii keessanii duukaa hin bu'inaa yookaan seera isaanii hin eeginaa yookaan waaqota isaanii tolfamoon of hin xureessinaa. ¹⁹ Ani WAAQAYYO Waaqa keessan; sirna koo duukaa bu'aa; seera koos of eeggannaadhaan eegaa. ²⁰ Akka inni nu gidduutti mallattoo ta'uuf Sanbata koo qulqullinaan eegaa. Ergasii isin akka ani WAAQAYYO Waaqa keessan ta'e ni beektu."

²¹ "Ijoolleen isaanii garuu natti fincilan; isaan sirna koo isa, "Namni yoo itti bule isaan jiraatu" sana duukaa hin buune; seera koos of eeggannoodhaan hin eegne. Sanbatoota koos ni xureessan. Kanaafuu ani dheekkamsa koo isaanitti roobsee gammoojjii keessatti aarii koo isaanitti nan ba'a jedheen ture. ²² Ani garuu maqaa kootiif jedhee akka maqaan koo fuula saboota ani utuma isaan ilaalanuu achii isaan baase sanaa duratti hin xuroofneef harka koo dachaafadhe. ²³ Akkasumas ani gammoojjii keessatti harka koo ol qabadhee akkan saboota gidduutti isaan fafacaasuu fi biyyoota keessa isaan bittinneessu fuula isaanii duratti nan kakadhe; ²⁴ isaan seera kootiif ajajamuu didan; sirna koos ni tuffatan; Sanbatoota koos ni xureessan; iji isaaniis waaqota tolfamoo kan abbootii isaanii duukaa bu'e. ²⁵ Anis sirna gaarii hin ta'ini fi seera isaan itti hin jiraannetti dabarseen isaan kenne; ²⁶ anis sodaadhaan isaan guutuufan aarsaa isaan ilmaan isaanii hangafa dhi'eessuudhaan kennan sanaan akka isaan xuraa'an nan godha; kanas ani akka isaan akka ani WAAQAYYO ta'e beekaniifan godhe.'

²⁷ "Kanaafuu yaa ilma namaa, akkana jedhii saba Israa'elitti dubbadhu; 'WAAQAYYO Gooftaan akkana jedha: Kanaanis abbootiin keessan na gananii na arrabsan; ²⁸ yeroo ani gara biyya ani isaaniif kennuuf kakadhee ture sanaatti isaan galchee isaan immoo gaara ol dheeraa kam iyyuu yookaan muka lalisaa kam iyyuu arganitti, isaan achitti

aarsaa isaaniif dhi'eessan; aariif na kakaasuuf jedhanii qalma dhi'eessan; ixaana isaanii urgaa'aa dhi'eessanii dhibaayyuu isaaniis dhibaafatan. ²⁹ Anis lafti ol dheeraan isin dhaqxaan kun maal?' isaaniin jedhe." Hamma har'aatti lafti sun Baamaa jedhamee waamama.

Murtii fi Araara

³⁰ "Kanaaf mana Israa'eliin akkana jedhi: 'WAAQAYYO Gooftaan akkana jedha: Isin akkuma abbootii keessanii of xureessitanii hawwii wantoota jibbisiisoo isaaniitiin gubattanii?' ³¹ Isin yeroo kennaa keessan dhi'eessitanii ilmaan keessan ibiddaan aarsaa gootanitti, hamma har'aatti ittuma fuftanii waaqota keessan tolfamoo hundaan of xureessitan. Yaa mana Israa'el, akka isin na kadhattani ani isiniif nan eeyyamaa? Ani dhugumaan jiraataadhaatii, jedha WAAQAYYO Gooftaan; akka isin na kadhattan ani isiniif hin eeyyamu.

³² " 'Isin, "Nu akka sabootaa, akka uummata addunyaa kanneen mukaa fi dhagaadhaaf sagadan sanaa ta'uu feena" jettu. Garuu wanni isin garaatti yaaddan gonkumaa hin ta'u. ³³ Ani dhugumaan jiraataadhaatii, jedha WAAQAYYO Gooftaan; ani irree jabaa fi harka diriirfameen, dheekkamsa roobsuudhaan isinan bulcha. ³⁴ Ani harka jabaadhaan, irree diriirfamee fi dheekkamsa roobeen saboota keessaa isinan fida; biyyoota isin itti bibittinnooftan keessaas walitti isinan qaba. ³⁵ Ani gammoojjii sabootaatti isin fidee achitti ifaan ifatti isinitti nan mura. ³⁶ Ani akkuman biyya Gibxitti abbootii keessaniitti mure sana isinittis nan mura, jedha WAAQAYYO Gooftaan. ³⁷ Ani akka isin ulee koo jalaan lootan nan godha; hidhaa kakuuttis isin nan galcha. ³⁸ Warra natti ka'anii natti fincilan isin keessaa nan baasa. Biyya isaan jiraachaa turan sana keessaa isaan nan baasa; garuu isaan biyya Israa'el hin seenan. Kanaanis isin akka ani WAAQAYYO ta'e ni beektu.

³⁹ " 'Yaa mana Israa'el waa'ee keessan garuu WAAQAYYO Gooftaan akkana jedha: Tokkoon tokkoon keessan dhaqaatii waaqota tolfamoo keessan tajaajilaa! Ergasii garuu dhugumaan na dhaggeeffattu; kennaa fi waaqota keessaniinis lammata maqaa koo qulqullicha hin xureessitan. ⁴⁰ Tulluu koo qulqullicha irratti, tulluu Israa'el dheeraa sana irratti, jedha WAAQAYYO Gooftaan, achitti guutummaan mana Israa'el na tajaajilu; anis achitti isaan nan simadha. Achittis buusii keessanii fi kennaa keessan filatamaa sana aarsaa keessan qulqulluu hunda wajjin nan barbaada. ⁴¹ Ani yeroon saboota keessaa isin baasee biyyoota isin itti bittinnooftanii turan keessaa walitti isin qabutti, ixaana urgaa'aa godhadhee isin nan simadha; fuula sabootaa durattis isin gidduutti qulqulluu ta'uu koo of nan mul'isa. ⁴² Yeroo ani biyya Israa'el, biyya ani abbootii keessaniif kennuuf harka ol qabadheen kakadhee ture sanatti isin galchutti isin akka ani WAAQAYYO ta'e ni beektu. ⁴³ Achitti isin amala keessanii fi gochawwan ittiin of xureessitan hunda ni yaadattu; hammina hojjettan hundaafis of balfitu. ⁴⁴ Yaa mana Israa'el, yeroo ani utuu akka hammina keessaniittii fi akka hojii keessan fokkisaa sanaatti hin ta'in, maqaa kootiif jedhee isinii araramutti, isin akka ani WAAQAYYO ta'e ni beektu, jedha WAAQAYYO Gooftaan.' "

Raajii Negeebiin Mormuudhaan Dubbatame

⁴⁵ Ergasii dubbiin WAAQAYYOO akkana jedhee gara koo dhufe: ⁴⁶ "Yaa ilma namaa, fuula kee gara kibbaatti garagalfadhu; biyya kibbaatti lallabiitii bosona biyya Negeebiitiin mormuudhaan raajii dubbadhu. ⁴⁷ Bosona Negeebiin akkana jedhi: 'Dubbi WAAQAYYOO dhaga'i. WAAQAYYO Gooftaan akkana jedha: Ani ibidda sitti qabsiisuufan jira; innis mukkeen kee hunda jiidhaa fi goggogaa illee ni fixa. Arrabni isaa hin dhaamu; wanni kibbaa hamma kaabaatti jiru hundinuus ni gubama. ⁴⁸ Namni hundinuus akka ani WAAQAYYO ibidda sana qabsiise ni beeka; ibiddi sunis hin dhaamu.' "

⁴⁹ Anis, "Yaa WAAQAYYO Gooftaa, ani bade! Isaan waa'ee koo, 'Inni fakkeenya dubbata mitii?' anaan jedhu" jedhe.

21

Baabilon Goraadee Murtii Waaqaa ti

¹ Dubbiin WAAQAYYOO akkana jedhee gara koo dhufe: ² "Yaa ilma namaa, fuula kee gara Yerusaleemitti garagalfadhuutti iddoo qulqulluu kanaan mormii lallabi. Biyya Israa'eliinis mormii raajii dubbadhu; ³ akkanas isheen jedhi: 'WAAQAYYO akkana jedha: Ani sitti nan ka'a. Goraadee koo man'ee isaa keessaa luqqifadhee nama qajeelaas, hamaas si keessaa nan balleessa. ⁴ Waan ani nama qajeelaas, nama hamaas balleessuudhaaf goraadeen koo saba kibbaa hamma kaabaatti jirutti ni luqqifama. ⁵ Akka ani WAAQAYYO goraadee koo man'ee isaa keessaa luqqifadhe, namni hundi ni beeka; innis man'ee isaatti hin deebi'u.'

⁶ “Kanaafuu yaa ilma namaa, aadi! Fuula isaanii duratti garaa cabaa fi gadda hadhaa’aadhaan aadi. ⁷ Yommuu isaan, ‘Ati maaliif aadda?’ jedhanii si gaafatanitti, ‘Sababii oduu dhaga’amaa jiruutiif. Onneen hundi ni baqxi; harki hundis ni laafa; hafuurri hundi ni gaggaba; jilbi hundis bishaan ta’a.’ Oduuni sun dhaga’amaa jira! Dhugumaanis ni ta’a, jedha WAAQAYYOO Gooftaan.”

⁸ Ergasii dubbiiin WAAQAYYOO akkana jedhee gara koo dhufe; ⁹ “Yaa ilma namaa, raajii dubbadhuutii, ‘Gooftaan akkana jedha’ jedhi:

“Goraadee! Goraadee!

Goraadee qaramee cululuqfame,

¹⁰ kan ajjeesuuf qarame,

akka balaqqee calaqqisuudhaaf cululuqfame!

“Nu bokkuu ilma koo Yihuudaatiin gammannaa? Goraadeen ulee akkasii hunda tuffata.

¹¹ “Goraadeen akka harkaan qabatamuuf

cululuqfamuuf ramadameera;

harka warra nama qaluutti kennamuuf

qaramee cululuqfameera.

¹² Yaa ilma namaa, kun saba kootti,

ilmaan mootota Israa’el hundatti dhufeeraatii,

iiyii wawwaadhu.

Isaan saba koo wajjin

goraadeedhaaf kennamaniiru.

Kanaafuu ati laphee kee rukuti.

¹³ “Qorumsi dhugumaan ni dhufa. Yoo bokkuun goraadeen tuffate sun itti fufuu baate hoo? jedha WAAQAYYOO Gooftaan.’

¹⁴ “Kanaafuu yaa ilma namaa, ati raajii dubbadhu;

harka kees walitti rurrukuti.

Goraadeen yeroo lama,

yeroo sadiis haa dha’u.

Goraadeen kun goraadee nama fixu,

goraadee akka malee nama fixu,

kan qixa hundaan isaan marsuu dha.

¹⁵ Kunis akka onneen baqxee

hedduun isaanii barbadeeffamaniif

ani balbala isaanii hunda dura

ajjeechaaf goraadee kaa’eera.

Wayyoo! Inni akka calaqqisuuf haxaa’ameera;

inni nama ajjeesuuf cululuqfame.

¹⁶ Yaa goraadee,

kallattii gara keetii hundaan

karaa mirgaatiinis, karaa bitaatiinis kuti.

¹⁷ Anis harka koo walitti nan rurrukuta;

dheekkamsi koos ni qabbanaa’a.

Ani WAAQAYYOO dubbadheeraa.”

¹⁸ Dubbiin WAAQAYYOO akkana jedhee gara koo dhufe: ¹⁹ “Yaa ilma namaa, akka goraadeen mootii Baabilon ittiin dhufuuf daandii lama baasi; lachanuu biyyuma tokkoo ka’u. Iddoo daandiin sun gara magaalatti goru irras mallattoo dhaabi. ²⁰ Goraadee Rabbaa Amoonotaatti dhufuuf daandii tokko mallattoo godhadhu; kan Yihuudaa fi magaalaa Yerusaleem ishee da’annoo qabdu sanatti dhufu immoo daandii lammaffaa mallattoo godhadhu. ²¹ Mootiin Baabilon milkii ilaallachuuf jedhee iddoo daandiin sun wal ga’u irra, fiixee daandiiwwan lamaanii irra dhaabata; innis xiyyaan ixaa buufata; waaqota isaa tolfamoo sanaan ni mari’ata; tiruus ni ilaallata. ²² Akka inni waan ittiin dallaa diigu dhaabuuf, akka qajaa ajjeechaa kennuuf, akka waca waraanaa dhageessisuuf, akka waan ittiin dallaa diigan karra dura kaa’uuf, akka biyyoo tuuluu fi akka da’annoo hojjetuuf harka isaa mirgaatti ixaan Yerusaleemiif ba’e. ²³ Wannis kunis warra isa wajjin kakuu galaniif milkii sobaa fakkaata; inni garuu dogoggora isaanii isaan yaadachiisee bojuudhaan isaan fudhata.

²⁴ “Kanaafuu WAAQAYYOO Gooftaan akkana jedha: ‘Isin sababii akka cubbuun keessan waan isin hojjetan hunda keessatti mul’atuuf, akka balleessan keessan hin dhokanne gochuudhaan waan akka yakki keessan yaadatamu gootaniif jechuunis waan akkana gootaniif ni booji’amtu.

²⁵ “Yaa ilma mootii Israa’el xuraa’aa fi hamaa nana, kan guyyaan kee dhi’aate, kan yeroon adabama keetii fiixee ga’e, ²⁶ WAAQAYYO Gooftaan akkana jedha: Marata of irraa hiiki; gonfoos of irraa fuudhi. Wanti akka amma jirutti hafu hin jiru; kan gad qabame ol qabama; kan ol qabame immoo gad qabama. ²⁷ Diigama! Diigama! Ani ishee nan diiga! Hamma namni isheen isaaf maltu dhufutti isheen akka kanaan duraa hin taatu; ishees isaaf nan kenna.’

²⁸ “Yaa ilma namaa, akkana jedhii raajii dubbadhu; ‘WAAQAYYO Gooftaan waa’ee Amoonotaa fi arrabsoo isaanii akkana jedha:

“ ‘Goraadee, goraadee,
kan ajjeesuuf luqqifame,
akka fixuu fi akka calaqqisuuf
kan haxaa’ame!

²⁹ Mul’anni sobaa waa’ee keetiif,
raajiin sobaa siif jiraatu iyyuu,
inni morma hamoota ajjeefamuu qaban
kanneen guyyaan isaanii dhi’aate,
warra yeroon adabbii isaanii
ga’e irra ni kaa’ama.

³⁰ Goraadee man’ee isaatti deebisi;
iddoo ati itti dhalattetti,
biyya akaakayyuu keetiitti,
ani sitti nan mura.

³¹ Ani dheekkamsa koo sirratti nan dhangalaasa;
ibidda aarii kootiis sitti nan buufa;
ani namoota hamoo kanneen balleessuudhaan beekamanitti
dabarsee sin kenna.

³² Ati qoraan ibiddaa taata;
dhiigni kee biyya kee keessatti dhangala’a;
si’achi hin yaadatamtu;
ani WAAQAYYO dubbadheeraatii.’”

22

Cubbuu Yerusaalem

¹ Dubbiin WAAQAYYOO akkana jedhee gara koo dhufe:

² “Yaa ilma namaa, isheetti murtaa? Magaalaa dhiiga dhangalaafuu kanatti ni murtaa? Yoos hojii ishee jibbisiisaa sana itti himi; ³ akkanas jedhi: ‘WAAQAYYO Gooftaan akkana jedha: Yaa magaalaa of keessatti dhiiga dhangalaasuudhaan badii ofitti fiddee waaqota tolfamoo tolchuudhaan of xureessitu, ⁴ ati sababii dhiiga dhangalaafte sanaatiif yakka hojjeteeerta; sababii waaqota tolfamoo tolchiteef immoo xuroofteerta. Ati bara kee gabaabsiteerta; xumuramuun bara keetiis dhi’aateera. Kanaafuu ani namoota ormaa biratti tuffatamtuu, biyyoota hundaaf immoo waan qoosaa sin taasisa. ⁵ Yaa magaalaa salphatee gooliin si keessa guute, warri dhi’oo fi fagoo jiraatan sitti qoosu.

⁶ “ ‘Akka tokkoon tokkoon ilmaan moototaa kanneen si keessa jiraatan humna isaaniitti fayyadamani dhiiga dhangalaasan ilaali. ⁷ Abbootii fi haadhonni si keessatti salphifaman; alagoonni ni hacuucaman; ijoolleen abbaa hin qabnee fi haadhonni hiyyeessaa si keessatti miidhaman. ⁸ Ati mi’oota koo qulqulluu tuffatee Sanbata koos xureessite. ⁹ Namoonni dhiiga dhangalaasuuf maqaa nama balleessan si keessa jiru; warri galma waaqeffannaa tulluuwwan irraattii nyaatanii fi sagaagalan si keessa jiru. ¹⁰ Namoonni siree abbaa isaanii xureessan si keessa jiru; namoonni dubartoota xurii ji’aa qaban kanneen akka seeraatti qulqulluu hin ta’in wajjin ciisanis si keessa jiru. ¹¹ Si keessatti namni tokko niitii ollaa isaa wajjin waan jibbisiisaa hojjeta; kaan haala fokkisaadhaan niitii ilma isaa xureessa; kaan immoo obboleettii isaa, intaluma abbaa isaa xureessa. ¹² Namoonni dhiiga dhangalaasuuf jedhanii si keessatti matta’aa fudhatu; atis hiiqii fi dhala fudhachuudhaan ollaa kee irraa bu’aa hin malle argachaa jirta. Ati na irraanfateerta, jedha WAAQAYYO Gooftaan.

¹³ “ ‘Ani dhugumaan bu’aa ati karaa hin malleen argattee fi dhiiga ati gidduu keetti dhangalaafte sanaaf harka koo walitti nan rurrukuta. ¹⁴ Gaafa ani si adabutti garaan kee jabaatee dhaabachuu yookaan harki kee humna qabaachuu danda’aa? Ani WAAQAYYO dubbadheera; waan kanas nan godha. ¹⁵ Ani saboota keessa sin bittinneessa; biyyoota

keessa sin facaasa; xuraa'ummaa kees sirraa nan qulqulleessa. ¹⁶ Ati yeroo fuula sabootaa duratti xurooftetti akka ani WAAQAYYO ta'e ni beekta.'"

¹⁷ Ergasii dubbiin WAAQAYYOO akkana jedhee gara koo dhufe: ¹⁸ "Yaa ilma namaa, manni Israa'el udaan sibiilaa natti ta'eera; hundi isaanii naasii, qorqorroo, sibiilaa fi dilaalii boolla ibiddaa keessatti dhiifame natti ta'aniru. Isaan udaanuma meetiiti malee homaa miti. ¹⁹ Kanaafuu WAAQAYYO gooftaan akkana jedha: 'Sababii hundi keessan udaan sibiilaa taatanii, ani Yersaaleem keessatti walittan isin qaba. ²⁰ Akkuma namoonni meetii, naasii, sibiila, dilaalii fi qorqorroo baqsuuf jedhanii boolla ibiddaatti guuran sana, anis aarii fi dheekkamsa kootiin walitti isin qabee magaalaa keessatti isinan baqsa. ²¹ Ani walitti isin qabee ibidda dheekkamsa kootii isinitti nan buufa; isinis ishee keessatti ni baqfantu. ²² Akkuma meetiin boolla ibiddaa keessatti baqfamu sana, isinis ishee keessatti ni baqfantu; akka ani WAAQAYYO dheekkamsa koo isinitti roobsee ni beektu.'"

²³ Ammas dubbiin WAAQAYYOO akkana jedhee gara koo dhufe: ²⁴ "Yaa ilma namaa biyya sanaan, 'Ati biyya hin qulqulleeffamin yookaan kan bara dheekkamsaa keessa bokkaan itti hin roobinii dha' jedhi. ²⁵ Ilmaan mootota ishee akkuma leenca waan adamsate ciccirachaa aaduu ti; isaan saba nyaatu; qabeenyaa fi mi'oota gatii guddaa saamuudhaan dubartoota hedduu dhirsa malee hambisu. ²⁶ Luboonni ishee seera koo cabsanii mi'oota koo qulqulluu xureessu; isaan waan qulqullaa'ee fi waan hin qulqullaa'in gargar hin baasan; kan hin qulqullaa'inii fi kan qulqullaa'e gidduu garaa garummaan hin jiru jedhanii barsiisu; akka ani isaan gidduutti tuffatamuuf Sanbatoota koo eegu irraa ija isaanii dunuufatu. ²⁷ Ishee keessatti qondaaltonni ishee akkuma yeeyyiwwan waan adamsatan ciccirachaa jiranii ti; isaan bu'aa hin malle argachuuf jedhanii dhiiga dhangalaasu; namootas ni ajjeesu. ²⁸ Raajonni ishees hojii kana mul'ata sobaatii fi raajii sobaatiin haguugu. Isaan utuma WAAQAYYO hin dubbatin, 'WAAQAYYO Gooftaan akkana jedha' jedhu. ²⁹ Sabni biyya sanaa ni cunqursu; ni saamus; murtii qajeelaa gananii hiyyeeyyii fi rakkattoota hacuucu; alagootas ni miidhu.

³⁰ "Nama akka ani biyyattii hin balleessineef dallaa ijaaree biyyattiidhaaf jedhee karaa qaawwaatiin fuula koo dura dhaabatu isaan gidduu nan barbaade; garuu nama tokko illee hin arganne. ³¹ Kanaafuu ani dheekkamsa koo isaanitti roobsee ibidda aarii kootiitiin isaan nan fixa; waan isaan godhan hunda mataa isaaniitti nan fida, jedha WAAQAYYO Gooftaan."

23

Obboleettota Sagaagaltoota Lamaan

¹ Ergasii dubbiin WAAQAYYOO akkana jedhee gara koo dhufe: ² "Yaa ilma namaa, dubartoota lama, intallan haadha tokkootu ture. ³ Isaanis shamarrummaa isaaniitti jalqabaniis sagaagalummaadhaaf of kennuudhaan biyya Gibxi keessatti sagaagaltoota ta'an. Biyya sanattis harmi isaanii ni tuttuqame; fixeen guntuta isaanii kan yeroo durbummaa immoo ni qaqqabatame. ⁴ Ishee hangafni Oholaa, obboleettiin ishee immoo Oholaa jedhamte. Isaanis kan koo turan; ilmaanii fi intallanis da'an. Aholaan Samaariyaa dha; Oholiibaan immoo Yersaaleemii dha.

⁵ "Oholaan utuma kan koo taatee jirtuu sagaagalummaa jalqabde; isheenis michoota ishee jechuunis loltoota Asoor kajeelte; ⁶ isaanis loltoota wayyaa bifa cuquliisaa uffatan, bulchitootaa fi ajajjoota; isaan hundinuus namoota mimmiidhagoo kanneen farda yaabbatan turan. ⁷ Isheenis hayyoota Asoor hundaaf sagaagalummaadhaan of kennite; waagota tolfamoo namoota isheen kajeelte sana hundaanis of xureessite. ⁸ Isheen sagaagalummaa ishee kan biyya Gibxi keessatti jalqabde sana hin dhiifne; yeroo shamarrummaa isheetti namoonni ishee wajjin ciisan fixee guntuta ishee kan yeroo durbummaa qaqqabataniis dharraa sagaagalummaa isaanii ishee irratti dhangalaasan.

⁹ "Kanaafuu ani michoota ishee, Asoorota isheen dharraatetti dabarsee ishee nan kenne. ¹⁰ Isaanis qullaa ishee mul'isan; ilmaanii fi intallan ishee ni fudhatan; goraadeedhaanis ishee ajjeesan. Isheen dubartoota keessatti waan kolfaa taatee murtiin ishee irratti raawwatame.

¹¹ "Obboleettiin ishee Oholiibaa waan kana argitee turte; ta'us isheen dharraa isheetii fi sagaagalummaa isheetiin obboleettiin ishee caalaa xuroofte. ¹² Akkasumas isheen Asoorota jechuunis bulchitootaa fi ajajjoota, loltoota wayyaa irraa fi jalaa uffatan, namoota farda yaabbatan kanneen hundi isaanii dargaggeeyyii mimmiidhagoo ta'an dharraate. ¹³ Ani akka isheenis of xureessite nan arge; lachan isaanii iyyuu daandii tokko irra deemu.

¹⁴ "Isheen garuu sagaagalummaa ishee ittuma fufte. Fakkii namootaa kan keenyan mana irratti fakkeeffame, fakkiiwwan Kaldootaa kan halluu diimaadhaan fakkeeffame, ¹⁵ kan mudhii isaanii irraa sabbata, mataa isaanii irraa immoo marata qaban argite; isaan hundi ajajjoota gaarii waraanaa kan Baabilonotaa, dhalattoota biyya Kaldootaa fakkaatu ture. ¹⁶ Isheenis akkuma isaan argiteen isaan dharraatee gara biyya Kaldootaati ergamoota isaanitti ergatte. ¹⁷ Warri Baabilonis gara ishee, gara siree jaalalaa seenanii dharraa sagaagalummaa isaanitiin ishee xureessan. Isheenis erga isaanin xurooftee hooddee jibbitee isaan irraa garagalte. ¹⁸ Yeroo isheen ifaan ifatti sagaagalummaa ishee itti fuftee qullaa of dhaabdetti, ani akkuman obboleettii ishee irraa gara gale sana jibbaan ishee irraa nan gara gale. ¹⁹ Ta'us isheen akkuma yeroo shamarrummaa ishee, yeroo biyya Gibxi keessatti sagaagaltuu turte sana yaadatten sagaagalummaa ishee ittuma fufte. ²⁰ Isheenis achitti michoota ishee kanneen dhagni saala isaanii, dhagna hormaata korma harree fakkaatu, fincaan isaanii kan dhiiraa immoo fincaan korma fardaa fakkaatu sana dharraate. ²¹ Kanaafuu ati addaggummaa yeroo shamarrummaa keetii kan yeroo biyya Gibxi turtetti harmi kee qaqqabatamee guntunni kee immoo tuttuqame sana yaadatte.

²² "Kanaafuu yaa Oholiibaa, WAAQAYYO Gooftaan akkana jedha: Ani michoota kee kanneen ati xireeffatee irraa garagalte sana sitti kaasee qixa hundaan sitti nan fida. ²³ Isaan kunneenis Baabilonotaa fi Kaldoota hunda, namoota Pheqood kan Shoo'aatii fi Qo'aa turan; isaan wajjinis Asoorota hundattu ture; Asooronni kunneenis dargaggeeyyii mimmiidhagoo hundi isaanii bulchitootaa fi ajajjoota waraanaa, ajajjoota gaarii waraanaatii fi namoota sadarkaa ol aanaa kanneen hundi isaanii fardaana deeman turan. ²⁴ Isaanis mi'a lolaatii fi gaarii waraanaa, gaariwwan biraatii fi tuuta uummataa wajjin sitti dhufu; isaanis gaachana guddaa fi xinnaan, gonfoo sibiilaatiin qixa hundaan sitti hiriiru; ani dabarsee isaanitti adabbiif sin kenna; isaan akkuma seera isaaniitti si adabu. ²⁵ Ani dheekkamsa koo sitti nan erga; isaanis aariidhaan sirra yaa'u. Funyaniin fi gurra kee sirraa kutu; warri si keessaa hafan iyyuu goraadeedhaan dhumu. Isaan ilmaan keetii fi intallan kee fudhatanii deemu. Warri si keessaa hafan immoo ibiddaan barbadeeffamu. ²⁶ Akkasumas wayyaa kee sirraa baafatanii faaya kee miidhagaa fudhatu. ²⁷ Akkasiin ani addaggummaa fi sagaagalummaa ati biyya Gibxitti jalqabde sana nan dhaaba. Ati dharraadhaan wantoota kanneen hin ilaaltu yookaan lammata biyya Gibxi hin yaadattu.

²⁸ "WAAQAYYO Gooftaan akkana jedhaatii: Ani warra ati jibbite, kanneen ati xireeffatee irraa garagalte sanatti dabarsee sin kenna. ²⁹ Isaanis jibbaan sitti dhufanii waan ati itti dadhabde hunda sirraa fudhatu. Qullaa fi harka duwwaa si hambisu; qaaniin sagaagalummaa keetii ifatti ba'a. Addaggummaan keetii fi halalummaan kee, ³⁰ waan kana sitti fidaniiru; ati saboota ormaa dharraatee waaqota isaanii tolfamoodhaan of xureessiteertaatii. ³¹ Ati karaa obboleettiin kee deemte irra deemeerta; kanaafuu ani harka kee keessa xoofoo ishee nan kaa'a.

³² "WAAQAYYO Gooftaan akkana jedha:

"Atis xoofoo guddaa fi gad fagoo,
xoofoo obboleettii keetii ni dhugda;
ati arrabsoo fi tuffii ni quufta;
xofoon sun dhugaatii baay'ee qabataatii.

³³ Ati xoofoo obboleettii keetii kan Samaariyaatiin,
xoofoo diigamuutii fi badiisaatiin,
kan machiitii fi gaddaatiin ni guutamta.

³⁴ Ati ni dhugda; keessaas ni fixxa;
xoofoo sana ni caccabsita;
harma kee of irraa ciccirta.

Ani waan kana dubbadheera, jedha WAAQAYYO Gooftaan.

³⁵ "Kanaafuu WAAQAYYO Gooftaan akkana jedha: Ati waan na irraanfatee duubatti na gateef gatii addaggummaa keetiitii fi sagaagalummaa keetii ni argatta."

³⁶ WAAQAYYO akkana naan jedhe: "Yaa ilma namaa, ati Oholaa fi Oholiibaatti ni murtaa? Yoos hojii isaanii jibbisiisaa sana isaanitti himi; ³⁷ isaan sagaagalaniiru; dhiigni harka isaanii irra jira. Isaan waaqota isaanii tolfamoo wajjin sagaagalaniiru; isaan ijoollee naaf da'an iyyuu nyaata godhanii isaaniif aarsaa dhi'eessaniiru. ³⁸ Dabalaniis waan kana narratti raawwatan: Yeruma sana iddoo koo qulqulluu xureessan; Sanba-toota koos ni salphisaa. ³⁹ Gaafuma ijoollee isaanii waaqota tolfamoof aarsaa godhanitti iddoo koo qulqulluu seenanii xureessan. Wannii isaan mana koo keessatti godhan kanaa dha.

⁴⁰ "Akka namoonni biyya fagootii dhufaniif ergamoota itti ergan; isaanis ni dhufan; yommuu isaan dhufanitti ati dhagna kee dhiqattee, ija kee kuulattee faaya kee kaa'atte. ⁴¹ Ati siree ulfinaa irra teesse; fuula siree sana dura minjaala keesse; minjaala sana irras ixaana kootii fi zayitii koo keesse.

⁴² "Wacni fandalalootaa naannoo isheetti dhaga'ame; machooftonni namoota wacan sana wajjin gammoojjidhaa dhufanis achi turan; isaanis irree dubartii sanaattii fi kan obboleettii isheetti bitawoo, mataa isaanii immoo gonfoo miidhagaa kaa'aniif. ⁴³ Anis, 'Namoonni yeroo ishee wajjin sagaagalanitti isaan amma ejja hojjechuu isaanii mitii?' nan jedhe. ⁴⁴ Jarris ishee wajjin ciisan. Isaanis akkuma namoonni sagaagaltoota wajjin ciisan sana Oholaa fi Oholiibaa addageewwan sana wajjin ciisan. ⁴⁵ Sababii isaan ejjitoota ta'anii fi dhiigni harka isaanii irratti argameef, namoonni qajeeltonni adabbii dubartoota ejjitoota fi dhiiga dhangalaasaniif malu isaanitti muru.

⁴⁶ "WAAQAYYO Gooftaan akkana jedha: Ani jeeqxota itti nan kakaasa; raafamaa fi saamichaaf dabarsee isaan nan kenna. ⁴⁷ Jeeqxonni sunis dhagaan isaan tumanii goraadee isaaniiitiin isaan kukkutu; ilmaan isaaniiiti fi intallan isaanii fixanii manneen isaanii immoo ni gubu.

⁴⁸ "Kanaafuu akka dubartoonni hundi of eeggatanii fi isin duukaa hin buuneef ani biyyattii keessaa addagummaa nan balleessa. ⁴⁹ Isin addagummaa keessaniif ni adabamtu; gatii cubbuu keessan kan waaqota tolfamoo waaqessuudhaan hojjetan sanaa ni argattu. Ergasii akka ani WAAQAYYO Gooftaa ta'e ni beektu."

24

Okkotee Itti Afeelan

¹ Waggaa saglaffaa, ji'a kurnaffaa keessa bultii kurnaffaatti; dubbiin WAAQAYYO akkana jedhee gara koo dhufe: ² "Yaa ilma namaa guyyaa kana, guyyaa har'aa kana galmeeffadhu; mootiin Baabilon guyyaa har'aa kana Yerusaleemin marseeraatii. ³ Mana fincilaa kanatti akkana jedhii fakkeenya himi: 'WAAQAYYO Gooftaan akkana jedha:

"Okkotee itti afeelan ibidda irra kaa'i;
ibidda irra kaa'iitii bishaan itti naqi.

⁴ Foon murmuramaa, foon murmuramaa filatamaa hunda
jechuunis tafaa fi cinaacha itti naqi.

Lafeewwan filatamoodhaanis isa guuti;
⁵ bushaayee keessaa filatamaa isaa fuudhi.

Lafee bilcheessuudhaaf okkotee sana jala qoraan naqi;
akka gaariitti afeeli;
lafee isaas bilcheessi.

⁶ "WAAQAYYO Gooftaan akkana jedhaatii:

"Magaalaa dhiiga namaa dhangalaafuu,
okkotee xuriin itti qabatee
xuriin sun irraa hin ba'iniif wayyoo!

Utuu ixaa hin buusin
gumaa gumaa isaa keessaa fuudhii duwwaa hambisi.

⁷ "Dhiigni isheen dhangalaafte ishee keessa jiraatii;
isheen kattaa qulullaa'aa irratti dhiiga sana dhangalaafte;
isheen dhiiga sanatti biyyoo deebisuuf
lafatti hin dhangalaafne.

⁸ Ani dheekkamsa koo kakaasee haaloo ba'uuf jedhee
akka dhiigni sun hin haguugamneef
dhiiga ishee kattaa qulullaa'aa irratti nan dhangalaase.

⁹ "Kanaafuu WAAQAYYO Gooftaan akkana jedha:

"Magaalaa dhiiga dhangalaafuu sanaaf wayyoo!
Anis qoraan ibiddaa nan tuula.

¹⁰ Qoraan irra tuuli;
ibiddas itti qabsiisi.

Urgooftuu itti naqiitii
foon isaa akka gaariitti afeeli;
lafeen isaas haa gubamu.

¹¹ Ergasii akka xuriin isaa irraa baqee

wanni irratti ligidaa'e gubatee baduuf,
hamma inni ho'ee sibiilli diimaan isaa baqutti,
okkotee duwwaa sana cilee boba'u irra kaa'i.

12 Yaaliin godhame hundi akkasumaan hafe;
ligidaa'uun isaa
ibiddaan iyyuu gad hin dhiifne.

13 "Xuraa'ummaan kee addaggummaa dha. Ani si qulqulleessuu yaaleera; ati garuu xuraa'ummaa kee irraa hin qulqulloofne; hamma dheekkamsi koo sirraa deebi'utti ati lammata hin qulqullooftu.

14 " 'Ani WAAQAYYO dubbadheera. Yeroon ani itti hojjedhu naaf dhufeera. Ani duubatti hin deebi'u; ani garaa hin laafu yookaan hin gaabbu. Akkuma amala keetiittii fi hojii keetiitti sitti murama, jedha WAAQAYYO Gooftaan.' "

Niitiin Hisqi'eel Du'uu Ishee

15 Ergasii dubbiin WAAQAYYOO akkana jedhee gara koo dhufe: 16 "Yaa ilma namaa, ani waan iji kee itti gammadu dha'icha tokkoon si duraa nan fuudha. Ta'us ati hin gaddin yookaan hin boo'in yookaan imimmaan tokko iyyuu hin dhangalaasin. 17 Of keessatti aadi; nama du'eef hin boo'in. Marata kee maradhu; kophee kees miilla keetti kaa'adhu; fuula kee gara gadiitiin hin haguuggatin yookaan buddeena warra gaddaa hin nyaatin."

18 Kanaafuu ani ganamaan sabatti nan hime; niitiin koos galgala duute. Guyyaa itti aanu ganama ani akkuman ajajame sana nan godhe.

19 Namoonnis, "Waan kana gochuun kee hiikkaa maalii akka nuuf qabu ati nutti hin himtuu?" jedhanii na gaafatan.

20 Anis akkanan isaanii jedhe; "Dubbiin WAAQAYYOO akkana jedhee gara koo dhufe:

21 Mana Israa'eliin akkana jedhi; 'WAAQAYYO Gooftaan akkana jedha: Ani iddoo koo qulqulluu jechuunis da'annoo isin ittiin boontan, waan iji keessan itti gammadu, waan isin jaallattan sana nan xureessa. Ilmaanii fi intallan keessan kanneen isin dhiiftanii deemtan immoo goraadeedhaan ni dhumu. 22 Isinis akkuma ani godhe sana gootu. Fuula keessan gara gadiitiin hin haguuggattan yookaan buddeena warra gaddaa hin nyaattu. 23 Maranni keessan mataa keessan irra, kopheen keessan immoo miilla keessan irra haa turu. Isin sababii cubbuu keessaniitiif ni huqqattan; walii wajjinis ni aaddu malee hin gadditan yookaan hin boossan. 24 Hisqi'eel mallattoo isiniif ta'a; isinis akkuma inni godhe sana ni gootan. Yeroo wannu kun ta'utti isin akka ani WAAQAYYO Gooftaa ta'e ni beektu.'

25 "Yaa ilma namaa, gaafa ani da'annoo isaanii, gammachuu fi ulfina isaanii, waan iji isaanii itti gammadu, waan garaan isaanii hawwuu fi ilmaanii fi intallan isaanii fudhadhutti, 26 gaafas namni miliqee ba'e tokko dhufee oduu sitti hima. 27 Gaafas afaan kee ni banama; atis isa wajjin ni haasofta; ergasii hin cal'istu. Kanaafuu ati isaaniif mallattoo ni taata; isaanis akka ani WAAQAYYO ta'e ni beektu."

25

Raajii Amooniin Mormuudhaan Dubbatame

1 Ergasii dubbiin WAAQAYYOO akkana jedhee gara koo dhufe: 2 "Yaa ilma namaa, fuula kee gara Amoonotaatti garagalfadhuutii isaaniiin mormuudhaan raaji. 3 Akkanas isaaniiin jedhi; 'Dubbiin WAAQAYYO Gooftaa dhaga'aa. WAAQAYYO Gooftaan akkana jedha: Yeroo iddoo koo qulqulluun xureeffametti, yeroo biyyi Israa'el onetti, yeroo uummanni Yihuudaa booji'amee fudhatametti, "Baga!" jettaniiruutii; 4 kanaafuu ani saba ba'a biiftuutti handhuuraa godheen dabarsee isin kenna. Isaan gidduu keessanitti qubata hundeeffatanii dunkaana isaanii ni dhaabbatu; isaan midhaan keessan nyaatu; aannan keessanis ni dhugu. 5 Magaalaa Rabbaa iddoo gaalli dheedu, Amoon immoo iddoo hoolaana boqotu nan godha. Ergasiis isin akka ani WAAQAYYO ta'e ni beektu. 6 WAAQAYYO Gooftaan akkana jedhaatii: Isin jal'ina garaa keessaniitiin badiisa biyya Israa'elitti gammaduudhaan harka keessan walitti rurrukuttanii miilla keessaniin lafa dhidhiitaniiruutii; 7 kanaafuu ani harka koo isiniiti diriirfadhee boojuf dabarsee sabootatti isinan kenna. Ani saboota irraa isin kutee biyyoota keessaa isinan balleessa. Ani isinan barbadeessa; isinis akka ani WAAQAYYO ta'e ni beektu.' "

Raajii Mo'aabiin Mormuudhaan Dubbatame

8 "WAAQAYYO Gooftaan akkana jedha: 'Mo'aabii fi See'iir, "Kunoo manni Yihuudaa akkuma saboota biraa hundaa ta'e" jedhaniiruutii; 9 kanaafuu magaalaa daangaa biyyattii irra jiran kanneen ishee kabajamsiisan jechuunis Beet Yashiimooti, Ba'aal

Me'oonii fi Kiriyaataayimii jalqabee hamma Mo'aabitti jiran qullaa nan hambisa. ¹⁰ Ani akka Amoononni saboota gidduutti hin yaadatamneef Mo'aabotaa fi Amoonota handhuuraa godhee uummata ba'aatti nan kenna; ¹¹ anis Mo'aabin nan adaba. Ergasii isaan akka ani WAAQAYYO ta'e ni beeku.'"

Raajii Edoomiin Mormuudhaan Dubbatame

¹² "WAAQAYYO Gooftaan akkana jedha: 'Sababii Edoom mana Yihuudaatti haaloo ba'ee waan kana gochuudhaan yakka guddaa hojjeteef, ¹³ WAAQAYYO Gooftaan akkana jedha: Ani Edoomitti harka koo diriirfadhee namoota isheetii fi horii isaanii nan fixa. Ani ishee nan onsa; isaanis Teemaanii hamma Dedaaniitti goraadeedhaan ni dhumu. ¹⁴ Ani harka saba koo Israa'eliin Edoomitti haaloo nan ba'a; isaanis akkuma aarii fi dheekkamsa kootiitti Edoomin adabu; Edoomis haaloo baafachuu koo ni beekti, jedha WAAQAYYO Gooftaan.'"

Raajii Filisxeemiin Mormuudhaan Dubbatame

¹⁵ "WAAQAYYO Gooftaan akkana jedha: 'Sababii Filisxeemonni didhaan kaka'anii garaa hamminaatiin haaloo ba'anii fi sababii isaan diinummaa duriitiin Yihuudaa balleessuu barbaadaniif, ¹⁶ WAAQAYYO Gooftaan akkana jedha: Ani harka koo diriirfadhee Filisxeemota nan balleessa; Kereetota nan balleessa; warra qarqara galaanaatti hafan nan barbadeessa. ¹⁷ Ani haaloo guddaa isaanitti ba'ee dheekkamsa kootiin isaan nan adaba. Yeroo ani haaloo isaan ba'utti isaan akka ani WAAQAYYO ta'e ni beeku.'"

26

Raajii Xiiroosiin Mormuudhaan Dubbatame

¹ Waggaa kudha tokkoffaatti, ji'a sana keessaa guyyaa jalqabaatti dubbiin WAAQAYYOO akkana jedhee gara koo dhufe: ² "Yaa ilma namaa, Xiiroos waa'ee Yerusaalem, 'Baga! Karri sabootaa cabeera; balbalawwan ishees naaf banamaniiru; egaa amma waan isheen onteef ani nan soorama' jetteertii; ³ kanaafuu WAAQAYYO Gooftaan akkana jedha: Yaa Xiiroos, kunoo ani sitti ka'eera; akkuma galaanni dambalii isaa kaasuu sana anis saboota baay'ee sitti nan kaasa. ⁴ Isaan dallaa Xiiroos ni diigu; gamoo ishees ni jigsu; ani biyyoo ishee irraa haxaa'ee kattaa qullaa hafe ishee nan godha. ⁵ Isheen galaana keessatti iddoo itti kiyoo qurxummii diriirsan ni taati; ani dubbadheeraatii, jedha WAAQAYYO Gooftaan. Isheen sabootaaf boojuu taati; ⁶ intallan ishee kanneen walakkaa biyyaa jiranis goraadeedhaan ajjeefamu. Ergasii isaan akka ani WAAQAYYO ta'e ni beeku.

⁷ "WAAQAYYO Gooftaan akkana jedhaatii: Ani karaa kaabaatii Nebukadnezar mooticha Baabilon, mootii moototaa sana fardeenii fi gaariwwan wajjin, abbootii fardaatii fi raayyaa waraanaa guddaa isaa wajjin Xiiroositti nan fida. ⁸ Innis intallan kee kanneen biyya walakkaa jiran goraadeedhaan fixa; dallaa ittiin si marsu ijaarrata; hamma dallaa keetiitti biyyoo ol tuula; gaachana isaas sitti ol kaafata. ⁹ Innis jirma ittiin waa diigan dallaa keetti garagalata; gamoowwan kees mi'a lolaatiin diiga. ¹⁰ Fardeen isaas hamma awwaaraan si haguuguu danda'anitti gar malee baay'ee ta'u. Yeroo inni akkuma namoota magaalaan dallaan ishee diigame seenaniitti karrawwan keetiin ol seenutti dallaan kee didichuu fardeen waraanaatiin, kan gaariwwan waraanaatii fi kan gaariwwan kaaniitiin ni raafama. ¹¹ Kotteewwan fardeen isaa daandiiwwan kee hunda ni dhidhiitu; innis namoota kee goraadeedhaan ajjeesa; utubaawwan kee jajjaboonis ni jigu. ¹² Isaan qabeenya kee booji'u; mi'a kee kan daldalaa ni saamu; dallaa kee ni jigsu; manneen kee mimmiidhagoo ni diigu; dhagaa kee, jirmaa fi biyyoo kee galaanatti naqu. ¹³ Ani sirba kee nan hambisa; sagaleen baganaa keeti si'achi hin dhaga'amu. ¹⁴ Ani kattaa qullaa hafe si taasisa; atis iddoo itti kiyoo qurxummii diriirsan taata. Ati gonkumaa deebifamtee hin ijaaramtu; ani WAAQAYYO dubbadheeraatii, jedha WAAQAYYO Gooftaan.

¹⁵ "WAAQAYYO Gooftaan Xiiroosiin akkana jedha: Yeroo warri madaa'an aadaanii fi yeroo namni si keessatti qalamutti biyyoonni qarqara galaanaa sagalee jigu keetiitiin hin hollataniif? ¹⁶ Ilmaan moototaa kanneen qarqara galaanaa jiraatan hundi teessoo isaanii irraa ni bu'u; uffata isaanii lafa kaa'u; wayyaa isaanii kan faayeffames of irraa baasu. Isaan sodaadhaan guutamani daaraa irra taa'anii utuu addaan hin kutin waan sirra ga'e sanaan naasuudhaan hollatu. ¹⁷ Isaanis waa'ee keetiif akkana jedhanii faarsanii siif boo'u:

"Yaa magaala beekamtuu,

kan namoota galaanaatiin guutamte ati akkamitti barbadoofte!

Ati lammiwwan kee wajjin

galaana irratti irree jabeettii turte;

warra achi jiraatan hundas
sodaa keetiin guutte.

¹⁸ Gaafa ati jigdutti,

biyyoonni qarqara galaanaa ni hollatu;
jigaatii keetiinis biyyoonni bishaan gidduu

kanneen galaanaan marfaman akka malee sodaatan.'

¹⁹ "WAAQAYYO Gooftaan akkana jedha: Yommuu ani akka magaalaawwan namni keessa hin jiraanee magaalaa onte si taasisutti, yommuu ani tujuba sirra garagalchee bishaan guddaadhaan si haguugutti, ²⁰ ani gara namoota duriitti, warra boolla bu'an wajjin boolla sin buusa. Ani akkuma diigama duriitti, warra boolla bu'an wajjin akka ati lafa jala jiraattu sin godha; atis lammata hin deebitu yookaan biyya warra lubbuun jiranii keessatti iddoo hin argattu. ²¹ Anis dhuma kee suukaneessaa nan godha; atis si'achi hin jiraattu. Ati ni barbaadamta; garuu si'achi hin argamtu, jedha WAAQAYYO Gooftaan."

27

Faaruu Boo'ichaa Xiiroosif Godhame

¹ Ergasii dubbii WAAQAYYO akkana jedhee gara koo dhufe: ² "Yaa ilma namaa, waa'ee Xiirros faarsii boo'i. ³ Xiirros ishee balbala galaanaa irra jiraattu, kan uummata qarqara galaanaa hundaaf daldaltuu taate sanaan akkana jedhi; 'WAAQAYYO Gooftaan akkana jedha:

"Yaa Xiirros,

ati, "Ani bareedinaan hir'ina hin qabu" jetta.

⁴ Daangaan kee garaa galaanaa keessa;

warri si ijaaran bareedduu hir'ina hin qabne si taasisaniiru.

⁵ Isaan laaxaa doonii keetii

birbirsaa Seniirii dhufeen hojjetan;

utubaa doonii siif tolchuuffis

Libaanoonii birbirsaa fidan.

⁶ Qilxuu Baashaanii dhufeen

batoo kee hojjetan;

muka birbirsaa kan qarqara Qophiroosiitii dhufeen

lafa doonii keessaa ilka arbaatiin

miidhagsanii siif hojjetan.

⁷ Sharaan doonii keetii quncee talbaa

kan miidhagfamee biyya Gibxii dhufe ture;

innis akka faajjiitti si fayyade;

haguuggiin kees bifa cuqullisaa fi diimaa dhiilgee

kan qarqara Eliishaatii dhufe ture.

⁸ Mooqxonni kee namoota Siidoonaa fi Arwaadii dhufan turan;

yaa Xiirros hayyoonni kee ooftota doonii keetii turan.

⁹ Ogeeyyiin Gebaal kanneen muuxannoo guddaa qaban,

qaawwa doonii keetii duuchuuf si gidduu turan.

Dooniwwan galaanaatii fi ooftonni isaanii hundi,

si wajjin daldaluuf gara kee dhufu turan.

¹⁰ "Namoonni Faaresi, kan Luudii fi kan Fuuxii,

loltummaadhaan loltoota kee gidduu tajaajilan.

Isaanis si miidhagsuuf gaachanawwan isaanii fi

gonfoo isaanii si keessatti fannisan.

¹¹ Namoonni Arwaadii fi Heeleekii

dallaa kee qixa hundaan eegan;

namoonni Gamaadii

gamoowwan kee keessa turan.

Gaachana isaaniis naannessanii dallaa keetti fannisan;

isaan bareedduu hanqina hin qabne si taasisan.

¹² "Sababii guddina qabeenya keetiitiif Tarshiish si wajjin daldalaa turte; isaan meetii, sibiila, qorqorroo fi dilaalii fidanii si wajjin wal geeddaraa daldalaa turan.

¹³ "Giriik, Tuubaalii fi Meshek si wajjin daldalan; isaanis mi'oota gurguraa keetiin garbootaa fi mi'oota naasii geeddaru turan.

¹⁴ "Namoonni Beet Toogarmaa immoo fardeen fe'iisaa, fardeen lolaatii fi gaangoliidhaan mi'a kee kan daldalaa geeddaratu ture.

15 “ Namoonni Dedaanii si wajjin daldalan; biyyoonni qarqara galaanaa baay’eenis maamiloota kee turan; isaanis ilka arbaatii fi muka harsammeessaa siif baasan.

16 “ Sababii ati oomisha guddaa qabduuf Sooriyaan si wajjin daldalti ture; isaanis maragdiin, uffata diimaa dhilgeen, wayyaa faayeffameen, uffata quncee talbaa irraa hojjetame haphii isaatiin, eellaanii fi lula diimaadhaan mi’oota kee daldalaa geeddaratan.

17 “ Yihuudaa fi Israa’elis si wajjin daldalan; isaanis qamadii biyya Miiniiti, Maxinoo mi’aawaa, damma, zayitii fi baalmiin mi’a daldalaa kee geeddaratan.

18 “ Sababii oomisha kee hedduutii fi qabeenya mi’a kee guddaa sanaatiif Damaasqoon daadhii wayinii Helbooniitii fi rifeensa hoolaa Zaahariitiin si wajjin daldalteerti. 19 Warri Daanii fi Yaawaan kanneen Oseelii dhufan mi’a daldalaa kee bitatan; isaanis sibiila baqfamee hojjetameen burgudii fi qarafaadhaan mi’oota daldalaa kee ni geeddaratu ture.

20 “ Dedaan immoo uffata kooraan si wajjin daldalte.

21 “ Biyyi Arabaatii fi ilmaan mootota Qeedaar hundi maamiloota kee turan. Isaanis xobbaallaa hoolaa, korbeeyyii hoolaatii fi re’oota si wajjin daldalu turan.

22 “ Daldaltoonni Shebaatii fi Ra’imaa si wajjin daldalaniiru; urgooftuuwwan gosa hundaa, dhagaawwan gati jabeeyyii fi warqeedhaan mi’oota daldalaa kee geeddarataniiru.

23 “ Kaaraan, Kaneen, Eden, daldaltoonni Shebaa, Ashuuri fi Kilmaad si wajjin daldalaa turan. 24 Isaan iddoo gabaa keetii keessatti uffata mimmiidhagaa, uffata bifa cuquliisaa, uffata faayeffamee fi afaa halluu garaa garaa kan kirrii micciiramee jabeeffamee dha’ameen daldalan.

25 “ Dooniwwan Tarshiish,
mi’oota kee kan daldalaa siif fe’an.

Ati walakkaa galaanaatti
fe’iisa ulfaataadhaan guutamteerta.

26 Mooqxonni kee,
gara galaana guddaatti si geessan.

Bubbeen ba’a biiftuu garuu
galaana walakkaatti si caccabsa.

27 Gaafa dooniin kee caccabutti
qabeenyi kee, meeshaan keetii fi mi’i daldalaa kee,
namoonni kee kanneen dooniidhaan hojjetan,
ooftonni dooniitii fi warri doonii haaromsan,
daldaltoonni keetii fi loltoonni kee hundi
namni doonii irra jiru biraa hundi
garaa galaanaa keessatti gad liqimfamu.

28 Yeroo ooftonni doonii keetii iyyanitti
biyyoonni qarqara galaanaa ni raafamu.

29 Warri batoo qabatan hundi,
warri doonii irra hojjetanii fi ooftonni doonii,
doonii isaanii irraa bu’anii
qarqara galaanaa dhaabatu.

30 Isaanis sagalee isaanii ol fudhatanii
hiqqifatanii siif boo’u;
mataa isaaniittis awwaara firfirsanii
daaraa keessa gangalatu.

31 Waa’ee keetiifis mataa haaddatanii
wayyaa gaddaa uffatu.
Lubbuu isaaniitiin akka malee hiqqifatanii
gadda guddaadhaan ni boo’u.

32 Isaanis yeroo wawwaatanii siif boo’anitti,
“Kan akka Xirooms
galaanaan liqimfamee bade eenyu?”
jedhanii faaruu boo’ichaa siif faarsu.

33 Yeroo mi’i daldalaa kee galaana irra ergamutti,
ati saboota hedduu quufsite;
qabeenya kee guddaa fi mi’a keetiin
mootota lafaa sooromsite.

34 Amma immoo ati galaana keessatti,
tujuba bishaanii keessatti caccabdeerta;

mi'oonni keetii fi miiltonni kee hundi
 suma wajjin liqimfamaniiru.
 35 Warri qarqara galaanaa jiraatan hundi
 waa'ee keetiin rifataniiru;
 mootonni isaanii sodaadhaan hollatanii
 fuulli isaanis naasuudhaan geeddarameera.
 36 Daldaltoonni saboota gidduu jiran sitti siiqsu;
 dhumni kee suukaneessaa ta'eera;
 ati si'achi bara baraan ni dhabamta.' "

28

Raajii Mootii Xiirsoosii Mormuudhaan Dubbatame

1 Ergasii dubbiin WAAQAYYOO akkana jedhee gara koo dhufe: 2 "Yaa ilma namaa,
 bulchaa Xiirsoosii akkana jedhi; 'WAAQAYYOO Gooftaan akkana jedha:

" 'Ati of tuulummaa garaa keetiitiin,

"Ani waaqa;

ani handhuura galaanaa keessa,
 teessoo waaqaa irra nan taa'a" jette.

Qaroo akka waaqaa of seetu iyyuu,
 ati nama malee waaqa miti.

3 Ati Daani'el caalaa ogeessaa?
 Icciiitiin tokko iyyuu si jalaa hin dhokatuu?

4 Ati ogummaa fi hubannaa keetiin
 qabeenya argatteerta;

warqee fi meetii
 mankuusaa kee keessatti kuufatteerta.

5 Ati ogummaa guddaa daldala keessatti qabduun
 qabeenya kee baay'ifatteerta;

sababii qabeenya keetiitiif immoo
 garaan kee of tuulumaadhaan guutameera.

6 " 'Kanaafuu WAAQAYYOO Gooftaan akkana jedha:
 "Sababii ati qaroo akka waaqaa
 of seetuuf,

7 ani namoota biyya ormaa
 saboota akka malee gara jabeeyyii sitti nan fida;
 isaan goraadee isaanii miidhagina keetii fi ogummaa keetti luqqifatanii
 ulfina kee guddaa sana balleessu.

8 Isaan boolla keessa si buusu;
 atis garaa galaanaa keessatti
 du'a hamaa duuta.

9 Yoos ati fuula warra si ajjeesanii duratti,
 "Ani waaqa" ni jettaa?

Ati harka warra si gorra'anii keessatti
 namuma malee waaqa miti.

10 Ati harka namoota biyya ormaatti
 du'a nama dhagna hin qabatinii duuta.

Ani dubbadheera, jedha WAAQAYYOO Gooftaan.' "

11 Dubbiin WAAQAYYOO akkana jedhee gara koo dhufe: 12 "Yaa ilma namaa, waa'ee
 mootii Xiirsoos faarsii boo'iitii akkana jedhiin: 'WAAQAYYOO Gooftaan akkana jedha:

" 'Ati fakkeenya guutummaa ti;
 ogummaadhaan guutamteerta; miidhaginaanis hir'ina hin qabdu.

13 Ati iddoo biqiltuu Waaqaa,
 Eeden keessa turte;
 dhagaawwan gati jabeeyyiin hundi si bareechu; isaanis:
 lula diimaa, tophaaziyoon, almaazii fi maragdi,
 kirisooliixos, sardooniiksii fi yaasphiidi,
 sanpeer, baluurii fi biiralee.

Diranni keetii fi faayni kee warqee irraa tolfaman;
 isaanis guyyaa ati uumamte qopheeffaman.

14 Ati Kiirubii waa eegu taatee dibamte;
 anis kanumaafan si muude.

Ati tulluu Waaqaa qulqullicha sana irra jiraatte;
dhagaawwan ibiddaa gidduus deddeebite.

¹⁵ Ati gaafa uumamtee jalqabdee
hamma gaafa hamminni si keessatti argameetti
jireenyi kee hir'ina hin qabu ture.

¹⁶ Babal'ina daldala keetiitiin
gooliidhaan guutamtee cubbuu hojjette.

Kanaafuu yaa kiirubii eegumsaa,
ani tulluu Waaqaa irraa
dhagaawwan ibiddaa gidduudhaa
si salphisee ari'een si baase.

¹⁷ Sababii miidhagina keetiitiif,
ati koorsteerta;

sababii ulfina keetiitiif,
ogummaa kee balleessite.

Kanaafuu ani gara lafaattan si darbadhe;
fuula mootota durattis waan kolfaa si godhe.

¹⁸ Ati cubbuu kee hedduu fi shaqqaba daldala keetiitiin
iddoowwan kee qulqulluu xureessiteerta.

Kanaafuu ani akka ibiddi si keessaa ba'u nan godhe;
innis gubee si fixe;

anis fuula namoota si ilaalaa turan hundaa duratti
lafa irratti daaraan si taasise.

¹⁹ Saboonni si beekan hundinuu
si arganii rifatan;

dhumni kee suukaneessaa ta'eera;
ati si'achi bara baraan ni dhabamta.' "

Raajii Siidonaadhaan Mormuudhaan dubbatame

²⁰ Ergasii dubbiin WAAQAYYOO akkana jedhee gara koo dhufe; ²¹ "Yaa ilma namaa,
fuula kee Siidonaatti garagalfadhuutii isheedhaan mormuudhaan raajii dubbadhu;
²² akkanas jedhi: 'WAAQAYYOO Gooftaan akkana jedha:

" 'Yaa Siidonaana, ani sitti ka'eera;
si keessatti ulfina nan argadha.

Yeroo ani ishee adabee

akka ani qulqulluu ta'e ishee keessatti of argisiisuutti,
isaan akka ani WAAQAYYOO ta'e ni beeku.

²³ Ani dha'icha isheetti ergee

akka daandii ishee irra dhiigni lola'u nan godha.

Namoonni goraadee karaa hundaan

ishee marseen gorra'aman ishee keessatti ni harca'u.

Ergasiis isaan akka ani WAAQAYYOO ta'e ni beeku.

²⁴ " 'Sabni Israa'el si'achi olloota hamoo akka sokorruu nama waraananii akka
qoraattii immoo nama madeessan hin qabaatu. Ergasiis isaan akka ani WAAQAYYOO
Gooftaa ta'e ni beeku.

²⁵ " 'WAAQAYYOO Gooftaan akkana jedha: Yeroo ani mana Israa'el saboota isaan keessa
bibittinna'an keessaa walitti qabutti, ani akkan isaan gidduutti qulqulluu ta'e fuula
sabootaa duratti of nan argisiisa. Ergasii isaan biyya ofii isaanii kan ani garbicha koo
Yaaqoobiif kenne sana keessa ni jiraatu. ²⁶ Isaan nagaadhaan achi jiraatanii manneen
ijaarratanii wayiniis dhaabbatu; yeroo ani olloota isaanii kanneen isaan cunqursan
adabutti, isaan nagumaan jiraatu. Ergasii isaan akka ani WAAQAYYOO Waaqa isaanii ta'e
ni beeku.' "

29

Raajii Gibxiin Mormuudhaan Dubbatame

¹ Waggaa kurnaffaatti, ji'a kurnaffaa keessa, guyyaa kudha lammaffaatti dubbiin
WAAQAYYOO akkana jedhee gara koo dhufe: ² "Yaa ilma namaa, fuula kee gara Fara'oon
mooticha Gibxitti garagalfadhuutii isaa fi warra Gibxi hundaan mormuudhaan raajii
dubbadhu. ³ Isatti dubbadhuutii akkana jedhiin: 'WAAQAYYOO Gooftaan akkana jedha:

" 'Ati bineensi guddichi, kan lageen kee gidduu ciiftu,
yaa Fara'oon mooticha Gibxi, ani sitti nan ka'a.

Ati, "Lagni Abbayyaa kan koo ti;

anatu ofuma kootiif isa uummate" jetta.

⁴ Ani garuu ha'oo kee keessa hokkoo kaa'ee akka qurxummiwwan lageen keetii qola keetti maxxanan nan godha. Ani qurxummiwwan qola keetti maxxanan hunda wajjinis lageen kee keessaa harkiseen si baasa.

⁵ Si'ii fi qurxummiwwan lageen keetii hunda gammoojjiiitti nan gata.

Ati dirree duwaa irratti ni kufta; walitti hin qabantu; hin awwaalamtus.

Ani bineensota lafaatii fi allaattii samiitiif nyaata godheen si kenna.

⁶ Warri Gibxi keessa jiraatan hundis akka ani WAAQAYYO ta'e ni beeku.

"Ati mana Israa'eliif ulee shambaqqoo taateerta. ⁷ Yommuu isaan harkaan si qabatanitti baqaqxee gatiitti isaanii waraante; yommuu isaan sitti irkatanittis ati caccabdee akka dugdi isaanii hollatu goote.

⁸ "Kanaafuu WAAQAYYO Gooftaan akkana jedha: Ani goraadee sitti fidee namoota keetii fi horii isaanii nan fixa. ⁹ Gibxi duwaa fi ona taati; isaanis akka ani WAAQAYYO ta'e ni beeku.

"Ati, "Lagni Abbayyaa kan koo ti; anatu isa uume" jetteertaatii; ¹⁰ kanaafuu ani sitti ka'eera; lageen keettis ka'eera; biyya Gibxis Migdoolii jalqabee hamma Aswaanitti, hamma daarii Itoophiyaatti diigamtuu fi ontuu nan godha. ¹¹ Miilli namaa yookaan kotteen horii karaa sana hin darbu; namni tokko iyyuu hamma waggaa afurtamaatti ishee keessa hin jiraatu. ¹² Ani biyyoota onan gidduutti biyya Gibxi nan onsa; magaalawwan ishees magaalawwan diigaman gidduutti waggaa afurtama ni onu. Namoota Gibxi immoo saboota keessa nan faffacaasa; biyyoota keessas isaan nan bittinneessa.

¹³ "Ammas WAAQAYYO Gooftaan akkana jedha: Dhuma waggaa afurtamaatti ani namoota Gibxi saboota isaan itti bittinneeffaman keessaa walitti nan qaba. ¹⁴ Ani boojiidhaa isaan deebisee Phaxroos biyya abbootii isaaniitti isaan nan galcha. Achittis isaan mootummaa gad aanaa ni ta'u. ¹⁵ Isheenis mootummoota keessaa gad aantuu ni taati; deebitees saboota kaaniin olitti gonkumaa ol of hin kaafuu. Anis akka isheen lammata saboota kaan hin bulchineef ishee nan dadhabsiisa. ¹⁶ Biyyi Gibxi si'achi uummata Israa'eliif irkoo hin taatu; yoo isaan gargaarsaaf gara isheetti deebi'an garuu isheen yaadannoo cubbuu isaanii taati. Ergasii isaan akka ani WAAQAYYO Gooftaa ta'e ni beeku."

¹⁷ Waggaa digdamii torbaffaatti, ji'a tokkoffaa keessa, guyyaa tokkoffaatti dubbiin WAAQAYYO akkana jedhee gara koo dhufe: ¹⁸ "Yaa ilma namaa, Nebukadnezar mootiin Baabilon duula jabaadhaan loltoota isaa Xiirrositti kaaseera; mataan nama hundaa molaa'eera; gatiittiin nama hundaas luqqa'eera. Ta'us innii fi loltoonni isaa duula jabaa Xiirrositti kaasaniin bu'aa tokko illee hin arganne. ¹⁹ Kanaafuu WAAQAYYO Gooftaan akkana jedha: Ani biyya Gibxi Nebukadnezar mootii Baabiloniif nan kenna; innis ishee booji'ee qabeenya ishee saama. Kunis mindaa loltoota isaa ta'a. ²⁰ Ani Gibxiin gatii dadhabii isaa godhee isaaf kenneera; innii fi loltoonni isaa waan kana anaaf hojjetaniiruutii, jedha WAAQAYYO Gooftaan.

²¹ "Ani Guyyaa sana akka manni Israa'el gaanfa baasu nan godha; isaan gidduuttis afaan kee nan saqa. Isaanis akka ani WAAQAYYO ta'e ni beeku."

30

Faaruu Boo'ichaa Gibxiif Faarsame

¹ Ergasii dubbiin WAAQAYYO akkana jedhee gara koo dhufe: ² "Yaa ilma namaa raaji; akkanas jedhi; 'WAAQAYYO Gooftaan akkana jedha:

"Wawwaadhuutii akkana jedhi;

"Guyyaa sanaaf wayyoo!"

³ Guyyaan sun dhi'oo dha;

Guyyaan WAAQAYYO dhi'oo dha;

innis guyyaa duumessaa,

sabootaaf immoo yeroo badiisaa ni ta'a.

⁴ Gibxitti goraadeen ni dhufa;

Itoophiyaatti immoo dhiphinni ni dhufa.

Yommuu warri qalaman Gibxi keessatti kukkufanitti,

qabeenyi ishee saamamee fudhatama;
hundeewwan ishee immoo ni diigamu.

⁵ Itoophiyaa fi Fuuxi, Luudii fi biyyi Arabaa hundi, Liibiyaa fi uummanni biyya kakuu
Gibxi wajjin goraadeedhaan ni dhumu.

⁶ “WAAQAYYO akkana jedha:

“Tumsitoonni Gibxi ni kufu;
humni isheen ittiin boontu ni dadhaba.

Migdoolii hamma Aswaanitti,
isaan ishee keessatti goraadeedhaan ni dhumu,
jedha WAAQAYYO Gooftaan.

⁷ Isaan biyyoota onan gidduutti, onanii hafu;
magaalaawwan isaaniis
magaalaawwan diigaman
gidduutti argamu.

⁸ Yommuu ani Gibxitti ibidda qabsiisee
warri ishee gargaaran hundi barbadaa’anitti,
isaan akka ani WAAQAYYO ta’e ni beeku.

⁹ “Gaafas namoota Itoophiyaa kanneen yaaddoo malee jiraatan sodaachisuuf,
ergamoonni dooniidhaan na biraa ni ba’u. Guyyaa badiisa Gibxitti dhiphinni isaan
qabata; wanni kun dhugumaan ni dhufaatii.

¹⁰ “WAAQAYYO Gooftaan akkana jedha:

“‘Ani harka Nebukadnezar mooticha Baabiloniin
namoota Gibxi hedduu nan barbadeessa.

¹¹ Innii fi loltoonni isaa kanneen saboota keessaa
akka malee hamoo ta’an,
akka biyyattii balleessaniif ni fidamu.

Isaanis goraadee isaanii Gibxitti luqqifatanii
reeffaan biyyattii guutu.

¹² Ani bishaan Abbayyaa nan gogsa;
biyyattiis namoota hamootti nan gurgura;

harka alagootaatiin biyyattii fi
waan ishee keessa jiru hunda nan onsa.

Ani WAAQAYYO dubbadheera.

¹³ “WAAQAYYO Gooftaan akkana jedha:

“‘Ani waaqota tolfamoo nan balleessa;
fakkiiwwan Memfiis keessa jiranis nan facaasa.

Si’achi Gibxi keessatti bulchaan hin argamu;
biyyattii guutuu keessas sodaa nan buusa.

¹⁴ Phaxroosin nan onsa;
Zoo’aanitti ibidda nan qabsiisa;
Tebesiin immoo nan adaba.

¹⁵ Da’annoo Gibxi jabaa jechuunis
Siin irratti dheekkamsa koo nan dhangalaasa;
uummata Tebesi hedduu sana illee nan balleessa.

¹⁶ Ani Gibxitti ibidda nan qabsiisa;
Siin dhiphinaan raafamti.

Tebesi dambaliidhaan ni fudhatamti;
Memfiis dhiphina wal irraa hin cinneen ni dhiphatti.

¹⁷ Dargaggoonni Aawwenii fi
Phii-Beseti goraadeedhaan dhumu;
magaalaawwan mataan isaanii iyyuu ni booji’amu.

¹⁸ Yommuu ani waanjoo Gibxi cabsutti,
Tahiphaanheesitti guyyaan ni dukkanaa’a;
humni isheen ittiin boontus ni laafa.

Isheen hurriidhaan haguugamti;
gandoonni ishee immoo ni booji’amu.

¹⁹ Kanaafuu ani Gibxiin nan adaba;
isaanis akka ani WAAQAYYO ta’e ni beeku.’”

²⁰ Waggaa kudha tokkoffaatti, ji’a tokkoffaa keessa, guyyaa torbaffaatti dubbiin
WAAQAYYOO akkana jedhee gara koo dhufe: ²¹ “Yaa ilma namaa, ani irree Fara’oon

mooticha Gibxi cabseera. Inni akka fayyuuf hin hidhamne yookaan shambaqqoon hidhamee akka jabaatee goraadee qabachuu danda'u hin godhamne. ²² Kanaafuu WAAQAYYO Gooftaan akkana jedha: Ani Fara'oon mooticha Gibxitti ka'eera. Ani irree isaa lachanuu, isa fayyaa, isa cabe sana illee cabsee akka goraadeen harka isaatii bu'u nan godha. ²³ Ani namoota Gibxi saboota gidduutti nan faffacaasa; biyyoota keessas isaan nan bibittinneessa. ²⁴ Irree mootii Baabilon nan jabeessa; goraadee koos harka isaa keessa nan kaa'a; irree Fara'oon garuu nan cabsa; innis fuula isaa duratti akkuma nama akka malee madaa'eetti ni aada. ²⁵ Irree mootii Baabilon nan jabeessa; irreen Fara'oon garuu ni laafa. Yommuu ani goraadee koo harka mootii Baabilon keessa kaa'ee inni immoo Gibxitti isa mirmirsutti isaan akka ani WAAQAYYO ta'e ni beeku. ²⁶ Ani namoota Gibxi saboota gidduu nan faffacaasa; biyyoota keessas isaan nan bibittinneessa. Isaanis akka ani WAAQAYYO ta'e ni beeku."

31

Gaattiraa Libaanon

¹ Waggaa kudha tokkoffaatti, ji'a sadaffaa keessa, guyyaa tokkoffaatti dubbiiin WAAQAYYOO akkana jedhee gara koo dhufe: ² "Yaa ilma namaa, Fara'oon mooticha Gibxii fi tuuta namoota isaatiin akkana jedhi:

" 'Surraadhaan eenyutu siin qixxaata?

³ Kunoo Asoor akka birbirsaa Libaanon
kan dameewwan mimmiidhagoo qabuu fi
bosonaaf gaaddisa ta'ee

akka malee ol dheeraa fi
kan fiixeen isaa duumessa tuqe ture.

⁴ Bishaan isa biqilche;
burqaawwan gad fagoon immoo isa guddise;
lageen isaanii

hidda isaa hunda marsanii yaa'anii
bishaan isaanii
gara mukkeen bosonaa hundaatti ergu.

⁵ Kanaafuu inni mukkeen bosonaa hundaan olitti
akka malee ol dheerate;
lataan isaa ni baay'ate;
dameen isaas ni guddate;
inni bishaan baay'ee argatee babal'ateeraatii.

⁶ Simbirroonni samii hundi
damee isaa irratti man'ee ijaarratan;
bineensonni dirree hundi

damee isaa jalatti dhalan;
saboanni gurguddaan hundinuus,
gaaddisa isaa jala jiraatan.

⁷ Inni sababii hidda isaa
gara bishaan baay'eetti gad fageeffateef,
dameewwan isaa kanneen babal'atan wajjin
akka malee miidhagaa ture.

⁸ Gaattiraawwan iddoo biqiltuu Waaqaa keessa jiran
isa gituu hin dandeenye;
yookaan mukkeen birbirsaa
dameewwan isaatiin hin qixxaatan;
mukni waddeessaas

dameewwan isaatiin hin qixxaatu;
mukni iddoo biqiltuu Waaqaa keessa jiru tokko iyyuu
miidhagina isaatiin wal bira hin qabamu.

⁹ Ani dameewwan baay'eedhaan
isa nan miidhagse;
mukkeen Eeden

kanneen iddoo biqiltuu Waaqaa keessa jiran hundi
isatti hinaafan.

¹⁰ "Kanaafuu WAAQAYYO Gooftaan akkana jedha: Sababii inni ol dheeratee fiixeen isaa duumessa tuqee inni dheerina isaatiin of tuuleef, ¹¹ akka inni waan hammina isaatiif malu isaaf kennuuf, ani dabarseen bulchaa sabootaatti isa kenne. Darbadhees

isa nan gate; ¹² alagoonni akka malee hamoonis cicciranii isa gatan. Lataawwan isaa gaarran irraa fi sululawwan keessatti harca'a; dameewwan isaa immoo cicciramanii bo'ooowwan bishaanii hunda keessa bu'an. Saboonni lafaa hundi gaaddisa isaa jalaa ba'anii isa dhiisanii deeman. ¹³ Simbirroonni samii hundi muka jige sana irra qubatan; bineensonni dirree hundinuus dameewwan isaa gidduu turan. ¹⁴ Kanaafuu mukni bishaan bira jiru kam iyyuu akka malee hin guddatu yookaan fiixeen isaa duumessa hin tuqu. Mukni akkasitti bishaan quufe kam iyyuu akkas ol dheeratee hin beeku. Isaan hundi warra du'anii boolla qileetti gad bu'an wajjin akka du'an itti murteeffameera.

¹⁵ "WAAQAYYO Gooftaan akkana jedhe: Guyyaa inni awwaalametti ani isaaf jedhee burqaawwan gad fagoo gaddaan nan guute; lageen isaa nan ittise; bishaan isaa guddichis yaa'uu dhiise. Sababii isaatiif ani Libaanoonitti dukkana nan uffise; mukkeen dirree hundis ni gogan. ¹⁶ Yommuu ani warra boolla bu'an sanatti dabalee awwaala keessa isa buusutti sagalee kufaatii isaatiin ani saboota nan hollachiisa. Ergaasiis mukkeen Eeden kanneen Libaanoon keessaa filatamoo fi kan addaa ta'an hundi, mukkeen akka gaarii bishaan obaafaman hundi boolla keessatti jajjabeeffaman. ¹⁷ Warri gaaddisa isaa jala jiraatan kanneen saboota gidduudhaa isaaf tumsan, warra goraadeedhaan ajjeefamanitti makamuuf isa wajjin awwaala keessa bu'an.

¹⁸ "Mukkeen Eeden keessaa kan ulfinaa fi surraadhaan siin qixxaatu kami? Ta'u iyyuu mukkeen Eeden wajjin boolla buuta; ati warra goraadeedhaan ajjeefaman wajjin, namoota dhagna hin qabatin gidduu ciifta.

"'Kun Fara'oonii fi waldaa uummata isaa hunda, jedha WAAQAYYO Gooftaan.'"

32

Faaruu Boo'ichaa Fara'oonif Faarsame

¹ Waggaa kudha lammaffaatti, ji'a kudha lammaffaa keessa, guyyaa tokkoffaatti dubbii WAAQAYYO akkana jedhee gara koo dhufe: ² "Yaa ilma namaa, waa'ee Fara'oon mooticha Gibxi faaruu baasiitii akkana jedhi:

"'Ati saboota gidduutti akka leencaa ti;

galaanota keessatti immoo bineensa akka jawwee ti;

ati lageen borcita;

miilla keetiin bishaan ni booressita;

lageenis ni dhoqqeesita.

³ "WAAQAYYO Gooftaan akkana jedha:

"'Gumii namoota baay'ee keessatti

ani kiyyoo koo sitti nan darbadha;

isaanis kiyyoo kootiin harkisanii si baasu.

⁴ Ani lafatti sin gata;

bakkeettis sin darbadha.

Akka simbirroonni samii hundi sirra qubatan,

akka bineensonni lafaa hundinuus si nyaatanii quufan nan godha.

⁵ Ani foon kee tulluuwwan irratti nan bittinneessa;

raqa keetiinis sululawwan nan guuta.

⁶ Hamma tulluuwwan bira ga'utti

dhiiga kee kan lola'uun biyyattii nan guuta;

sululawwanis foon keetiin ni guutamu.

⁷ Ani yommuun si balleessutti samiiwwan nan haguuga;

urjiiwwan isaanii immoo nan dukkaneessa;

aduu duumessaan nan haguuga;

ji'is ifa isaa hin kennu.

⁸ Ifawwan calaqqisoo samii irra jiran hunda sitti nan dukkaneessa;

ani biyya kee irra dukkana nan buusa,

jedha WAAQAYYO Gooftaan.

⁹ Ani yeroon boojuu godhee

saboota gidduutti gara biyyoota ati hin beekiniitti si ergutti

garaa saboota hedduu nan dhiphisa.

¹⁰ Ani yeroon goraadee koo fuula isaanii duratti mirmirsutti

akka namoonni hedduun si arganii na'an,

akka mootonni isaaniis waa'ee keetiif sodaadhaan hollatan nan godha.

Guyyaa kufaatii keetii

tokkoon tokkoon isaanii

yeruma yeroon lubbuu isaaniiitiif ni kirkiru.

- 11 “ WAAQAYYO Gooftaan akkana jedhaatii:
 “Goraadeen mootii Baabylon
 sitti dhufa.
- 12 Ani akka namoonni kee hedduun
 goraadee namoota jajjabootiin jechuunis
 kanneen saboota hunda keessaa akka malee hamoo ta’an sanaatiin
 dhuman nan godha.
- Isaan of tuulummaa Gibxi ni balleessu;
 waldoonni ishee hundinuus ni barbadeeffamu.
- 13 Bishaanota baay’ee biraa
 loon ishee hunda nan fixa;
 si’achi miilli namaa hin booressu
 yookaan kotteen loonii hin dhoqqeessu.
- 14 Ergasii bishaan ishee akka qulqullaa’u,
 lageen ishee immoo akkuma zayitii akka dhangala’an nan godha,
 jedha WAAQAYYO Gooftaan.
- 15 Gaafa ani biyya Gibxi onsee
 biyyattiin waan ishee keessa jiru hunda dhabdutti,
 yommuu ani waan achi jiraatu hunda dha’utti
 isaan akka ani WAAQAYYO ta’e ni beeku.’
- 16 “Faaruun isaan isheef faarsan kana. Intallan sabootaas ni faarsu; biyyi Gibxii fi
 waldaan ishee hundi ni faarsu, jedha WAAQAYYO Gooftaan.”
- 17 Waggaa kudha lammaffaatti, ji’a tokkoffaa keessa, guyyaa kudha shanaffaatti
 dubbiin WAAQAYYO akkana jedhee gara koo dhufe: 18 “Yaa ilma namaa, waldaa
 namoota Gibxiif wawwaadhu; ishee fi intallan saboota jajjaboo kanneen boolla bu’anitti
 dabaliti qileetti darbadhu. 19 Akkanas isaaniin jedhi; ‘Ati eenyu caalaa miidhagda? Gad
 bu’iitii warra dhagna hin qabanne sana gidduu ciisi.’ 20 Isaan warra goraadeedhaan
 ajjeefaman gidduutti kufu. Goraadeen luqqifameera; isheen waldaa namoota ishee
 hunda wajjin lafa irra haa harkifamtu. 21 Hooggantoonni jajjaboon awwaala keessaa
 waa’ee Gibxii fi waa’ee tumsitoota ishee, ‘Isaan gad bu’aniiru; warra dhagna hin qabatin
 kanneen goraadeedhaan qalaman wajjin ciciisaniiru’ jedhu.
- 22 “Asoor loltoota ishee hunda wajjin achi jirti; isheen awwaala namoota ishee
 warra qalaman hundaa kanneen goraadeedhaan dhuman hundaatiin marfamteerti.
- 23 Awwaalli isaanii boolla qilee keessa; loltoonni ishees naannoo awwaala ishee
 ciciisaniiru. Warri biyya jiraattotaa keessatti sodaa faffacaasan hundi gorra’amanii
 goraadeedhaan dhumaniiru.
- 24 “Eelaam waldaa namoota ishee kanneen naannoo awwaalaa ishee jiran hunda
 wajjin achi jirti. Hundi isaanii gorra’amanii goraadeedhaan dhumaniiru. Warri
 biyya jiraattotaa keessa sodaa faffacaasan hundi utuu dhagna hin qabatin qilee keessa
 bu’aniiru. Isaan warra boolla bu’an wajjin qaanii isaanii baadhataniiru. 25 Waldaa
 namoota ishee kanneen naannoo awwaala ishee jiran hunda wajjin warra gorra’aman
 gidduutti sireen isheedhaaf qopheeffameera. Hundi isaanii warra dhagna hin qabatin
 kanneen goraadeen dhumani dha. Sababii sodaan isaanii biyya jiraattotaa keessa
 faffaca’eeff, isaan warra boolla bu’an wajjin qaanii isaanii baadhataniiru; isaan warra
 gorra’aman gidduu ciciisaniiru.
- 26 “Meshekii fi Tuubaal waldaa namoota ishee kanneen naannoo awwaala isaanii jiran
 hunda wajjin achi jiru. Hundi isaanii iyyuu warra dhagna hin qabatin kanneen sababii
 biyya jiraattotaa keessa sodaa faffacaasaniif goraadeedhaan dhumani dha. 27 Isaan
 gootota dhuman kanneen dhagna hin qabatin kaan, warra mi’a lolaa isaanii wajjin
 awwaalaman kanneen goraadeewwan boraafatan wajjin hin ciciisani? Sodaachisuun
 gootota kanneenii biyya jiraattotaa keessa jiraatu iyyuu adabbiin cubbuu isaaniitiif malu
 lafee isaanii irra bu’e.
- 28 “Yaa Fara’oon, atis cabdee warra dhagna hin qabatin kanneen goraadeedhaan
 ajjeefaman gidduu ni ciifta.
- 29 “Edoom, mootonni isheetii fi bulchitoonni ishee hundi achi jiru; isaan humna
 qabaatan iyyuu, warra goraadeedhaan ajjeefaman wajjin ciciisaniiru. Isaan warra
 dhagna hin qabatin kanneen boolla bu’an wajjin ciciisu.
- 30 “Bulchitoonni kaabaa hundii fi warri Siidoonaa hundi achi jiru; isaan warra jabina
 isaaniitiin goolii uumaa turan ta’an iyyuu warra gorra’aman wajjin salphinaan gad
 bu’an. Utuu dhagna hin qabatin warra goraadeedhaan ajjeefaman wajjin ciciisu; warra
 boolla bu’an wajjin salphina isaanii baadhatu.

³¹ "Fara'oonii fi loltoonni isaa hundi jara argu; waldaan namoota isaa hundi goraadeedhaan ajjeefamani iyyuu inni of jajjabeessa, jedha WAAQAYYO Gooftaan. ³² Ani akka inni biyya jiraattotaa keessa goolii faffacaasu godhu iyyuu, Fara'oonii fi waldaan namoota isaa hundi warra dhagna hin qabatn kanneen goraadeedhaan ajjeefaman gidduu ni ciciisu, jedha WAAQAYYO Gooftaan."

33

Hisqi'eel Eegduu Ta'e

¹ Ergasii dubbiin WAAQAYYOO akkana jedhee gara koo dhufe: ² "Yaa ilma namaa, namoota biyya keetiitti dubbadhuutii akkana jedhiin: 'Yeroo ani biyya tokkotti goraadee fidutti, sabni biyya sanaa namoota isaa keessaa nama tokko filatee eegduu isa godhatee, ³ eegduun sun goraadee biyyattiitti dhufaa jiru argee uummata akeekkachiisuuf malakata yeroo afuufutti, ⁴ yoo namni kam iyyuu sagalee malakataa dhaga'ee garuu akeekkachiisa sana fudhachuu didee goraadeen sun dhufee lubbuu isaa galaafate, dhiigni isaa matuma isaatti deebi'a. ⁵ Inni sagalee malakataa dhaga'ee garuu akeekkachiisa waan hin fudhatiniif dhiigni isaa matuma isaatti deebi'a. Inni utuu akeekkachiisa sana fudhatee jiraatee silaa of baasa ture. ⁶ Garuu yoo eegduun sun goraadee dhufaa jiru argee namoota akeekkachiisuuf malakata afuufuu baatee goraadeen sun dhufee isaan keessaa lubbuu nama tokkoo galaafate, namichi sun sababii cubbuu isaatiif ajjeefama; eegduu sana garuu sababii dhiiga nama sanaatiif nan gaafadha.'

⁷ "Yaa ilma namaa, ani mana Israa'eliitiif eegduu si godheera; kanaafuu dubbii ani dubbadhu dhaga'iitti akeekkachiisa na biraa ba'u isaaniif kenni. ⁸ Yeroo ani nama hamaa tokkoon, 'Yaa namicha hamaa nana, ati dhugumaan ni duuta' jedhutti, yoo ati akka inni qalbii jijjiirratu akeekkachiisuu baatte namichi hamaan sun cubbuu isaatiin ni du'a; dhiiga isaa garuu ani harka kee irraa nan barbaada. ⁹ Garuu yoo ati nama hamaa sana akka inni karaa isaa irraa deebi'u akeekkachiiftee inni immoo deebi'uu baate, inni cubbuu isaatiin ni du'a; ati garuu lubbuu kee oolfatteerta.

¹⁰ "Yaa ilma namaa, mana Israa'eliin akkana jedhi; 'Isin akkana jettu: "Yakkii fi cubbuun keenya nutti ulfaateera; nuus sababii kanaaf nyaatamnee dhumne. Yoos akkamiin jiraachuu dandeenya ree?"' ¹¹ Akkana isaaniin jedhi; 'Akkuma ani dhugumaan jiraataa ta'e, ani akka namoonni hamoon karaa isaanii irraa deebi'anii jiraatan malee du'a isaaniitti hin gammadu, jedha WAAQAYYO Gooftaan. Deebi'aa! Karaa keessan hamaa sana irraa deebi'aa! Yaa mana Israa'el isin maaliif duutu?'

¹² "Kanaafuu yaa ilma namaa, namoota biyya keetiitiin akkana jedhi; 'Qajeelummaan nama qajeelaa yommuu inni ajajamuu didutti isa hin baasu; hamminni nama hamaas yommuu inni hammina isaa irraa deebi'utti isa hin balleessu. Namni qajeelaa yoo cubbuu hojjete sababii qajeelummaa isaa duraatiif lubbuudhaan hin jiraatu.' ¹³ Yoo ani nama qajeelaa tokko akka inni dhugumaan jiraatu itti himee, inni garuu qajeelummaa isaa amanatee cubbuu hojjete, waan qajeelaa inni hojjete keessaa tokko iyyuu hin yaadatamu; inni cubbuu hojjete sanaan ni du'a. ¹⁴ Yoo ani nama cubbamaa tokkoon, 'Ati dhugumaan ni duuta' jedhee inni garuu cubbuu isaa irraa deebi'ee waan sirrii fi waan qajeelaa hojjete jechuunis, ¹⁵ inni yoo qabdiin waan liqeesse tokkoof fudhate deebise, yoo waan hate deebise, yoo seera jireenya namaaf kennu duukaa bu'ee hammina hojjechuu baate, inni dhugumaan ni jiraata; hin du'us. ¹⁶ Cubbuu namichi sun hojjete keessaa tokko iyyuu isatti hin herregamu. Inni waan sirrii fi qajeelaa hojjetee raatii, dhugumaan lubbuudhaan ni jiraata.

¹⁷ "Ta'us namoonni biyya keetii, 'Karaan Gooftaa qajeelaa miti' jedhu. Garuu karaan qajeelaa hin ta'in kanama isaanii ti. ¹⁸ Namni qajeelaa yoo qajeelummaa isaa irraa deebi'ee hammina hojjete, inni hammina sanaan ni du'a. ¹⁹ Namni hamaan tokko immoo yoo hammina isaa irraa deebi'ee murtii qajeelaa fi waan qajeelaa hojjete, inni waan kana hojjechuu isaatiin ni jiraata. ²⁰ Ta'u illee yaa mana Israa'el isin, 'Karaan Gooftaa qajeelaa miti' jettu. Ani garuu hunda keessanitti akkuma hojii keessaniitti nan mura."

Kufaatiin Yerusaalem Ibsame

²¹ Wagga kudha lammaffaa booji'amuu keenyaatti, ji'a kurnaffaa keessa, bultii shanaffaatti, namichi Yerusaaleemii baqatee ba'e tokko gara koo dhufee, "Magaalattiin kufterti!" jedhe. ²² Galgala dhufaatiin namichaatiin duraa sana harki WAAQAYYOO narra ture; utuu namichi ganamaan gara koo hin dhufinis Waaqni afaan koo bane. Afaan koo banameeraatii ani lammata hin cal'isne.

²³ Ergasii dubbiin WAAQAYYOO akkana jedhee gara koo dhufe: ²⁴ "Yaa ilma namaa, namoonni diigama biyya Israa'el keessa jiru keessa jiraatan akkana jedhu; 'Abrahaam

namuma tokko ture; ta'us inni biyyattii dhaale. Nu garuu baay'ee dha; biyyattiinis dhugumaan akka nu dhaalluuf nuu kennamteerti.' ²⁵ Kanaafuu akkana isaaniin jedhi; 'WAAQAYYO Gooftaan akkana jedha: Isin foon utuma dhiigni keessa jiruu nyaattu; waaqota keessan tolfamoo abdattu; dhiiga namaas dhangalaafuu; yoos isin biyyattii dhaaluu qabduu?' ²⁶ Isin goraadee keessan abdattu; waan jibbisiisaa hojjetu; tokkoon tokkoon keessan niitii ollaa keessanii xureessitu. Yoos isin biyyattii dhaaluu qabduu?'

²⁷ "Akkana isaaniin jedhi; 'WAAQAYYO Gooftaan akkana jedha: Ani jiraataadhaatii, warri diigama keessatti hafan goraadeedhaan dhumu; warra baadiyyaa keessa jiran akka isaan nyaatamaniif bineensatti dabarsee nan kenna; warri da'annoo fi holqa keessa jiraatan immoo dha'ichaan ni dhumu. ²⁸ Ani biyyattii onsee duwwaa nan hambisa; humni isheen ittiin of jajjus ni dhuma; gaarran Israa'elis akka namni tokko iyyuu irra hin qaxxaamurreef qullaa hafu. ²⁹ Yeroo ani sababii wantoota jibbisiisoo isaan hojjetan hundaatiif biyyattii onsee duwwaa hambisutti, isaan akka ani WAAQAYYO ta'e ni beeku.'

³⁰ "Waa'ee kee immoo yaa ilma namaa, namoonni biyya keetii keenyan manaa birattii fi balbala duratti waa'ee kee dubbachaa, 'Kottaa dhaqnee ergaa WAAQAYYO biraa dhufe dhageenyaa' waliin jedhu. ³¹ Sabni koo akkuma yeroo kaaniitti gara kee dhufanii dubbii kee dhaga'uudhaaf fuula kee dura tataa'u; isaan garuu waan sana hojiidhaan hin argisiisan. Isaan afaan isaaniitiin jaalala guddaa dubbatu; garaan isaaniin garuu bu'aa hin malle argachuuf gaggaba. ³² Dhugumaan ati isaaniif nama sagalee gaariidhaan sirba jaalalaa sirbee meeshaa sirbaa taphatu irra hin jirtuutii; isaan dubbii kee ni dhaga'u mallee hojiidhaan hin argisiisaniitii.

³³ "Yeroo wannu kun ta'utti, dhugumaan ni ta'aatii isaan gaafas akka raajjin gidduu isaaniin ture ni beeku."

34

Tiksoota Israa'el

¹ Ergasii dubbiin WAAQAYYOO akkana jedhee gara koo dhufe: ² "Yaa ilma namaa, tiksoota Israa'elitti raajii dubbadhuutii akkana jedhiin: 'WAAQAYYO Gooftaan akkana jedha: Tiksoota Israa'el warra ofuma isaaniin qofa sooraniif wayyoo! Tiksoonni bushaayee sooruu hin qabani? ³ Isin cooma ni nyaattu; suufii ni uffattu; horii gabbataa ni qalattu; bushaayee garuu hin soortan. ⁴ Isin dadhabaa hin jabeessine yookaan dhukkubsataa hin fayyifne yookaan cabaa hin wal'aanne. Kanneen miliqan hin deebifne yookaan kanneen badan hin barbaanne. Humnaa fi gara jabinaan isaan ajajju. ⁵ Kanaafuu isaan sababii tikseen hin jirreef bittinnaa'an; yeroo bittinnaa'anittis bineensota bosonaatiif soora ta'an. ⁶ Hoolonni koo gaarran hundaa fi tulluuwwan ol dhedheeroo hunda irra asii fi achi jooran. Isaan guutummaa lafaa irra faffaca'an; namni isaan ilaalu yookaan isaan barbaadu tokko iyyuu hin turre.

⁷ " 'Kanaafuu isin tiksoonni, dubbii WAAQAYYOO dhaga'aa: ⁸ Ani jiraataadhaatii, jedha WAAQAYYO Gooftaan; sababii bushaayeen koo tiksoota dhabanii akkasiin saamamaniin bineensa bosonaatiif nyaata ta'aniif, sababii tiksoonni koo bushaayee koo barbaaduu didanii qooda bushaayee ofuma isaaniin sooraniif ⁹ yaa tiksoota, kanaafuu isin dubbii WAAQAYYOO dhaga'aa: ¹⁰ WAAQAYYO Gooftaan akkana jedha: Ani tiksootatti nan ka'a; bushaayee koos harka isaaniin irraa nan barbaada. Akka tiksoonni si'achi of hin soorreef bushaayee tiksuu irraa isaan nan ari'a. Ani bushaayee koo afaan isaaniitii nan buusa; isaaniis si'achi soora isaaniin hin ta'an.

¹¹ " 'WAAQAYYO Gooftaan akkana jedhaatii: Ani mataan koo hoolota koo nan barbaadadha; nan tikfadhas. ¹² Akkuma tikseen tokko yommuu bushaayee isaa bira jirutti hoolota isaa warra bittinnaa'an barbaaddatu sana anis hoolota koo nan barbaadadha. Ani lafa isaan guyyaa duumessaatii fi guyyaa dukkanaa itti bittinneeffaman hundaa baasee isaan nan galfadha. ¹³ Anis saboota keessaa isaan baasee biyyoota keessaa immoo walitti isaan nan qaba; biyya isaaniittis isaan nan deebisa. Ani gaarran Israa'el irra, qarqara burqaawwaniitii fi lafa namni jiraatu kan biyya sana keessaa hunda isaan nan tikfadha. ¹⁴ Ani marga gaarii keessa isaan nan tiksa; tulluun Israa'elis iddoo dheeda isaaniin ta'a. Isaan achitti lafa dheedaa tolaa isaa irra ciciisu; marga misaa tulluuwwan Israa'el irraa ni dheedu. ¹⁵ Ani mataan koo hoolota koo nan tikfadha; akka isaan boqotanis nan godha, jedha WAAQAYYO Gooftaan. ¹⁶ Kanneen badan nan barbaada; kanneen miliqan deebisee nan galcha. Kan cabe nan hidha; kan dadhabe illee nan jajjabeessa; gabbataa fi jabaa isaa immoo nan balleessa. Ani murtii qajeelaadhaan bushaayee nan tikfadha.

¹⁷ “Isin garuu yaa bushaayee ko, WAAQAYYO Gooftaan akkana jedha: Ani hoolaa fi hoolaa gidduutti, korbeessa hoolaatii fi korbeessa re'ee gidduutti murtii nan kenna. ¹⁸ Marga misaa keessa dheeduun keessan isin hin ga'uu? Isin marga keessan kan hafe lafatti dhidhiituu qabduu? Bishaan qulqulluu dhuguun isinitti xinnaatee? Bishaan hafe immoo miilla keessaniin booressuu qabduu? ¹⁹ Bushaayeen koo waan isin lafatti dhidhiitan soorachuu, waan isin miilla keessaniin dhoqqeesitan immoo dhuguu qabuu?

²⁰ “Kanaafuu WAAQAYYO Gooftaan akkana isaanii jedha: Kunoo, ani mataan koo hoolaa gabbatee fi hoolaa huqqate gidduutti murtii nan kenna. ²¹ Sababii isin hoolota dadadhaboo hunda cinaachaa fi gatiittii keessaniin dhiibdanii, gaanfa keessaniin immoo jifattanii alatti baaftaniif, ²² ani bushaayee koo nan oolfadha; isaanis si'achi hin saamaman. Ani hoolaa fi hoolaa gidduutti murtii nan kenna. ²³ Ani tiksee tokko jechuunis garbicha koo Daawitiin isaanittan ramada; inni isaan eega; tiksee isaanis ni ta'a. ²⁴ Ani WAAQAYYO Waaqa isaanii nan ta'a; Daawit garbichi koo immoo gidduu isaanii bulchaa ni ta'a. Ani WAAQAYYO waan kana dubbadheera.

²⁵ “Ani isaan wajjin kakuu nagaan gala; akka isaan gammoojjii keessa jiraatanii bosona keessa nagaan ciciisaniif bineensota hamoo biyyattii keessaa nan baasa. ²⁶ Ani isaanii fi iddoowwan tulluu koo marsanii jiran nan eebbisa. Bokkaas yeroo isaatti nan roobsa; roobni sunis rooba eebbaa ni ta'a. ²⁷ Mukkeen bakkee ija naqatu; laftis midhaan ni baafiti; namoonni biyya isaanii keessatti tasgabbiin ni jiraatu. Yeroo ani danqaraa waanjoo isaanii cabsee harka warra isaan garboomfataniitii isaan baasutti, isaan akka ani WAAQAYYO ta'e ni beeku. ²⁸ Isaan si'achi sabootaan hin saamaman yookaan bineensota bosonaatiin hin nyaataman. Nagaadhaan jiraatu; wanni isaan sodaachisu tokko iyyuu hin jiru. ²⁹ Ani lafa midhaan baasuudhaan beekame isaanii nan kenna; isaan biyyattii keessatti si'achi beelaan hin miidhaman yookaan sabootaaf waan kolfaa hin ta'an. ³⁰ Yommuu akka ani WAAQAYYO Waaqni isaanii isaan wajjin jiruu fi akka manni Israa'el saba koo ta'e isaan ni beeku, jedha WAAQAYYO Gooftaan. ³¹ Isin hoolonni koo, hoolonni tika koo namoota; anis Waaqa keessan, jedha WAAQAYYO Gooftaan.”

35

Raajii Edoomiin Mormuudhaan Dubbatame

¹ Ergasii dubbiin WAAQAYYOO akkana jedhee gara koo dhufe: ² “Yaa ilma namaa, fuula kee gara Tulluu See'iiritti deebifadhu; isaan mormuudhaanis raajii dubbadhu; ³ akkanas jedhiin: 'WAAQAYYO Gooftaan akkana jedha: Yaa Tulluu See'iir ani sitti ka'eera; ani harka koo sitti hiixadhee onaa fi gatamaa sin godha. ⁴ Ani magaalawwan kee nan diiga; atis ni onta. Ergasii akka ani WAAQAYYO ta'e ni beekta.

⁵ “Ati sababii haaloo diinummaa durii garaatti qabateef bara rakkina isaanii keessa jechuunis yeroo adabbiin isaanii dhuma irra ga'etti Israa'eloota dabarsitee goraadeetti kennite; ⁶ kanaafuu ani jiraataadhaatii, jedha WAAQAYYO Gooftaan; ani dhiiga dhangalaasuutti dabarsee sin kenna; ati dhiiga dhangalaasuu jalaa hin baatu. Ati waan dhiiga dhangalaasuu hin jibbineef dhiiga dhangalaasuu jalaa hin baatu. ⁷ Ani Tulluu See'iir onsee duwwaa nan hambisa; warra dhaquu fi deebi'u achi irraa nan kuta. ⁸ Ani tulluuwwan kee reeffaan nan guuta; warri goraadeedhaan ajjeefamanis gaarran kee irra, sululawwan kee keessaa fi lageen kee hunda keessa ni ciciisu. ⁹ Ani bara baraan sin onsa; magaalawwan kees lafa jireenyaa hin ta'an. Ergasii akka ani WAAQAYYO ta'e ni beektu.

¹⁰ “Sababii ati, “WAAQAYYO achi jiraatu iyyuu, saboonni lamaan kunneenii fi biyyoonni lamaan kunneen kan koo ni ta'u; nus isaan dhuunfanna” jetteef, ¹¹ ani jiraataadhaatii, jedha WAAQAYYO Gooftaan; kanaafuu ani akkuma ati aarii fi hinaaffaa jibba isaanii qabduun argisiifte sanaatti gatii kee siif nan kenna; anis yeroon sitti murteessutti isaan gidduutti of nan beeksisa. ¹² Ergasii akka ani WAAQAYYO wantoota ati tulluuwwan Israa'elitti, “Isaan onanii duwwaa hafaniiru; akka nu nyaannuufis nuu kennamaniiru” jettee tuffiin dubbatte hunda dhaga'ee jiru ni beekta. ¹³ Ati afaan keetiin natti of jajjee oduu natti baay'ifteerta; anis waan kana dubbadheera. ¹⁴ WAAQAYYO Gooftaan akkana jedha: Yommuu guutummaan lafaa gammadutti ani sin onsa. ¹⁵ Sababii ati yeroo dhaalli mana Israa'el onetti gammaddeef ani akkana sin godha. Yaa Tulluu See'iir ati ni onta; atii fi guutummaan Edoom ni onta. Ergasii isaan akka ani WAAQAYYO ta'e ni beeku.”

36

Abdii Tulluwwan Israa'eliif Dubbatame

¹ “Yaa ilma namaa, akkana jedhii tulluwwan Israa'eliitiif raaji; ‘Yaa tulluwwan Israa'el, dubbii WAAQAYYOO dhaga’aa. ² WAAQAYYOO Gooftaan akkana jedha: Diinni waa’ee keessan, “Ishoo! Iddoowwan ol ka’oon durii dhuunfaa keenya ta’aniiru” jedhe.’ ³ Kanaafuu raajitii akkana jedhi; ‘WAAQAYYOO Gooftaan akkana jedha: Sababii isaan qixa hundaan marsanii isin waraananiiif, isin saboota kaaniif dhuunfaa taatan; namootaafis waan mammaaksaatii fi waan qoosaa taatan; ⁴ kanaafuu yaa tulluwwan Israa'el, dubbii WAAQAYYOO Gooftaa dhaga’aa: WAAQAYYOO Gooftaan tulluwwanii fi gaarraniin, lageenii fi sululawwaniin, onawwan diigamanii fi magaalawwan duwwaa hafan kanneen saboota naannoo keessan jiraniin saamamanii waan qoosaa ta’aniin akkana jedha: ⁵ WAAQAYYOO Gooftaan akkana jedha: Ani aarii koo kan boba’u sanaa saboota hafanii fi Edoom hunda irratti dubbadheera; isaan gammachuu fi tuffii garaadhaa qabaniin lafa dheeda ishee saamuuf jedhanii biyya koo handhuuraa ofii isaanii godhatan.’ ⁶ Kanaafuu waa’ee biyya Israa’eliif raajii dubbadhuutii tulluwwanii fi gaarraniin, lageenii fi sululawwaniin akkana jedhi; ‘WAAQAYYOO Gooftaan akkana jedha: Sababii isin sabootaan tuffatamantiif, ani hinaaffaa dheekkamsa kootiitiin nan dubbadha. ⁷ Kanaafuu WAAQAYYOO Gooftaan akkana jedha: Ani akka saboonni naannoo keessan jiraatani tuffatamaniif harka koo ol qabadhee nan kakadha.

⁸ “ ‘Yaa tulluwwan Israa'el, isin garuu saba koo Israa'eliif dameewwanii fi ijawwan naqattu; isaan dhi'eenyatti biyyatti ni deebi'utii. ⁹ Ani isiniif nan yaada; gara laafinaanis isinan ilaala; isin ni qotamtu; sanyiinis isinitti facaafama; ¹⁰ ani lakkoobsa uummataa kan guutummaa mana Israa'el nan baay'isa. Magaalawwan namaan ni guutama; wanni diigame deebi'ee ni ijaarama. ¹¹ Ani lakkoobsa namootaatii fi horii irratti nan dabala; isaanis wal horanii baay'atu. Ani akkuma bara durii sana namoota isin irra qubachiisee kan durii caalaa isinan sooromsa. Ergasii isin akka ani WAAQAYYOO ta'e ni beektu. ¹² Ani akka namoonni jechuunis sabni koo Israa'el isin irra deemu nan godha. Isaan isin dhuunfatu; isinis dhaala isaanii ni taatu; lammatas warra ijoollee hin qabne isaan hin gootan.

¹³ “ ‘WAAQAYYOO Gooftaan akkana jedha: Namoonni, “Ati nama nyaatta; saba kees ijoollee malee hambifta” siin jedhu; ¹⁴ ati garuu si'achi nama hin nyaattu yookaan saba kee ijoollee malee hin hambiftu, jedha WAAQAYYOO Gooftaan. ¹⁵ Ani si'achi akka ati doorsisa sabootaa dhageessu hin godhu; si'achi ati tuffii namootaatiin hin dhiphattu yookaan akka sabni kee gufatu hin gootu, jedha WAAQAYYOO Gooftaan.’”

¹⁶ Ammas dubbii WAAQAYYOO akkana jedhee gara koo dhufe: ¹⁷ “Yaa ilma namaa, namoonni Israa'el yeroo biyya isaanii keessa jiraachaa turanitti amala isaaniitii fi hojii isaaniitiin biyyattii xureessan. Amalli isaanii fuula koo duratti akkuma laguu dubartii kan ji'a ji'aan itti dhufu sanaa ture. ¹⁸ Sababii isaan biyyaattii keessatti dhiiga dhangalaasaniif fi sababii waqota isaanii tolfamoodhaan biyyattii xureessaniif, ani dheekkamsa koo isaanitti nan roobse. ¹⁹ Ani saboota keessa isaan nan faffacaase; isaanis biyyoota keessa bitinnaa'an; ani akkuma amala isaaniitii fi hojii isaaniitii isaanitti nan mure. ²⁰ Iddoo dhaqan hundatti saboota keessatti maqaa koo qulqulluu sana xureessan; waa'ee isaanii, 'Jarri kun saba WAAQAYYOO ti; isaan garuu biyya isaatii ba'aniiru' jedhameeraatii. ²¹ Ani maqaa koo qulqulluu manni Israa'el iddoo dhaqan hundatti saboota gidduutti xureessan sanaaf yaadeera.

²² “Kanaafuu mana Israa'eliin akkana jedhi; ‘WAAQAYYOO Gooftaan akkana jedha: Yaa mana Israa'el, ani waa'ee maqaa koo qulqulluu isin iddoo dhaqanitti saboota gidduutti xureessitan sanaatiif malee isiniif jedhee wantoota kanneen hin godhu. ²³ Ani qulqullina maqaa koo guddichaa kan saboota gidduutti xuraa'e kan isin saboota gidduutti xureessitan sana nan argisiisa. Yommuu ani karaa keessaniin fuula isaanii duratti qulqulluu ta'uu koo argisiisutti akka ani WAAQAYYOO ta'e saboonni ni beeku, jedha WAAQAYYOO Gooftaan.

²⁴ “ ‘Ani saboota keessaa isinan baafadhaatii; ani biyyoota keessaa walitti isin qabee biyya keessanitti deebisee isinan fida. ²⁵ Ani bishaan qulqulluu isinitti nan facaasa; isinis ni qulqullooftu; ani xuraa'ummaa keessan hunda irraa fi waqota keessan tolfamoo hunda irraa isinan qulqulleessa. ²⁶ Ani onnee haaraa isiniif nan kenna; hafuura haaraas isin keessa nan kaa'a; onnee dhagaa isin keessaa baasee onnee foonii isiniif nan kenna. ²⁷ Akka isin dambii koo duukaa buutanii fi seera koo sirriitti eegdaniif ani Hafuura koo isin keessa nan kaa'a. ²⁸ Isin biyya ani abbootii keessaniif kenne keessa ni jiraattu; isin saba koo ni taatu; anis Waqa keessan nan ta'a. ²⁹ Ani xuraa'ummaa keessan hunda irraa isinan qulqulleessa. Ani midhaan nan waama; nan baay'isas; beelas isiniiti hin

fidu. ³⁰ Akka isin si'achi sababii beelaatiin fuula sabootaa duratti hin salphanneef, ija mukkeeniiiti fi midhaan lafa qotiisaa nan baay'isa. ³¹ Ergasii karaa hammina keessaniiti fi hojii jal'ina keessanii ni yaadattu; sababii cubbuu keessaniiti fi hojii keessan jibbiisiisaa sanaatiifis of balfitu. ³² Akka ani waan kana isiniif jedhee hin hojjetin akka beektan nan barbaada, jedha WAAQAYYO Gooftaan. Yaa mana Israa'el, waa'ee amala keessaniitiif qaana'aa; saalfadhaas!

³³ "WAAQAYYO Gooftaan akkana jedha: Ani gaafan cubbuu keessan hunda irraa isin qulqulleessutti, akka magaalaawwan keessan deebi'anii lafa jireenyaa ta'a nan godha; kanneen diigamanis deebi'anii ijaaramu. ³⁴ Lafti onee ture qooda fuula namoota karaa sanaan darban hunda duratti onee hafu ni qotama. ³⁵ Isaan, "Lafti ona ture kun akka lafa biqiltuu Eeden ta'eera; magaalaawwan diigamanii, onanii barbadaa'anis amma dallaan itti ijaaramee namaan guutamaniiru" jedhu. ³⁶ Ergasii namoonni hafan kanneen naannoo kee jiraatan akka ani WAAQAYYO waan barbadaa'ee deebisee ijaaree waan ones deebisee dhaabe ni beeku. Ani WAAQAYYO dubbadheera; nan raawwadhas.'

³⁷ "WAAQAYYO Gooftaan akkana jedha: Ammas kadhannaa mana Israa'el dhaga'ee waan kana isaaniif nan godha: Namoota isaani akkuma hoolootaa nan baay'isa; ³⁸ akkuma bushaayee yeroo ayyaanaa Yerusaleem keessatti aarsaaf dhi'eeffamaniitti nan baay'isa. Kanaafuu magaalaawwan diigamanii turan waldaa namootaatiin ni guutamu. Ergasii isaan akka ani WAAQAYYO ta'e ni beeku."

37

Sulula Lafeewwan Goggogaa

¹ Harki WAAQAYYOO narra ture; innis Hafuura WAAQAYYOOTIIN na fuudhee, walakkaa sululaa na dhaabe; sululli sunis lafeewwaniin guutamee ture. ² Isaan gidduus asii fi achi na deddeebise; anis lafeewwan akka malee baay'ee kanneen akka malee goggogan lafa sululaa irratti nan arge. ³ Innis, "Yaa ilma namaa, lafeewwan kunneen jiraachuu danda'uu?" jedhee na gaafate.

Ani immoo, "Yaa WAAQAYYO Gooftaa, si qofatu beeka" nan jedhe.

⁴ Kana irratti inni akkana naan jedhe; "Lafeewwan kanneenitti raajiiiti akkana jedhiin; Yaa lafeewwan goggogoo, dubbii WAAQAYYOO dhaga'aa! ⁵ WAAQAYYO Gooftaan lafeewwan kanneeniin akkana jedha: Ani hafuura isinitti nan galcha; isinis lubbuudhaan ni jiraattu. ⁶ Ribuu isinitti nan baasa; akka foon isinitti ba'u nan godha; gogaas isinitti nan uffisa; hafuuras isin keessa nan kaa'a; isinis lubbuudhaan ni jiraattu. Ergasii isin akka ani WAAQAYYO ta'e ni beektu."

⁷ Kanaafuu ani akkuman ajajametti raajii nan dubbadhe. Utuma ani raajii dubbachaa jiruus sagaleen tokko dhaga'ame; lafeewwanis walitti dhufan; lafeenis lafeetti maxxane. ⁸ Yeroo ani isaan ilaaletti, kunoo ribuu isaanitti ba'ee ture; foonis isaan irra ture; gogaas uffatanii turan; hafuurri garuu isaan keessa hin jiru ture.

⁹ Ergasii inni akkana naan jedhe; "Yaa ilma namaa, bubbeetti raajii dubbadhu; akkanas jedhiin; WAAQAYYO Gooftaan akkana jedha: Yaa bubbee, bubbeewwan afran irraa kottu; akka isaan lubbuudhaan jiraataniif warra gorra'aman kanneenitti bubbisi."

¹⁰ Kanaafuu ani akkuma inni na ajajetti raajii nan dubbadhe; hafuurris isaanitti gale; isaanis lubbuu horatanii miilla isaaniitiin ka'anii dhadhaabatan; isaanis raayyaa guddaa turan.

¹¹ Innis akkana naan jedhe: "Yaa ilma namaa, lafeewwan kunneen guutummaa mana Israa'eli. Jarris, 'Lafeewwan keenya goggoganiiru; nu abdi hin qabnu; cinneerras' jedhu. ¹² Kanaafuu raajii dubbadhuutti akkana isaaniin jedhi: 'WAAQAYYO Gooftaan akkana jedha: Yaa saba koo ani awwaala kee banee isa keessaa sin baasa; ani biyya Israa'elitti deebisee sin fida. ¹³ Isinis yaa saba ko, yeroo ani awwaala keessan banee isa keessaa isin baasutti, akka ani WAAQAYYO ta'e ni beektu. ¹⁴ Ani Hafuura koo isin keessa nan kaa'a; isinis lubbuudhaan jiraattu; ani biyyuma keessa isinan qubachiisa. Ergasii isin akka ani WAAQAYYO dubbadhee hojjedhe ni beektu, jedha WAAQAYYO.'"

Sabni Tokko Mootii Tokko Jalatti

¹⁵ Ergasii dubbiin WAAQAYYOO akkana jedhee gara koo dhufe; ¹⁶ "Yaa ilma namaa, ulee mukaa tokko fuudhiitii, 'Kan Yihuudaatii fi kan Israa'eloota isa wajjin tumsanii' jedhii isa irratti barreessi. Ulee mukaa kan biraas fuudhiitii, 'Ulee Efreem, kan Yoosefii fi kan guutummaa mana Israa'el kanneen isa wajjin tumsanii' jedhii isa irratti barreessi. ¹⁷ Akka isaan harka kee keessatti tokko ta'aniif uleewwan sana walitti qabsiis.

¹⁸ "Yommuu namoonni biyya keetii, 'Kun maal jechuu kee akka ta'e nutti hin himtuu?' jedhanii si gaafatanitti, ¹⁹ akkana isaaniin jedhi; 'WAAQAYYO Gooftaan akkana jedha: Ani ulee Yoosef kan harka Efreem jiru kan gosoota Israa'el kanneen isa wajjin tumsanii,

ulee Yihuudaa wajjin walitti qabsiisee ulee mukaa tokko nan godha; isaanis harka koo keessatti tokko ni ta'u.' ²⁰ Fuula isaanii durattis uleewwan isaan irratti barreessite sana harkatti qabadhuutii ²¹ akkana isaaniin jedhi; 'WAAQAYYO Gooftaan akkana jedha: Ani saboota isaan keessa turan keessaa Israa'eloota nan baasa. Qixa hundaa walitti isaan qabee biyya isaaniitti isaan nan galcha. ²² Ani tulluuwwan Israa'el irratti, biyyattii keessatti saba tokko isaan nan godha. Isaan hunda irratti mootii tokkotu mo'a; isaanis gonkumaa deebi'anii saboota lama hin ta'an yookaan mootummaan isaanii iddoo lamatti hin qoodamu. ²³ Isaan si'achi waaqota isaanii tolfamoodhaa fi fakkiwwan faayidaa hin qabneen yookaan balleessaa isaanii kamiin iyyuu of hin xureessan; ani cubbuudhaan dugda duubatti mucucaachuu isaanii hunda irraa deebisee isaan nan qulqulleessaatii. Isaan saba koo ni ta'u; anis Waaqa isaanii nan ta'a.

²⁴ "Daawit garbichi koo isaan irratti mootii ni ta'a; isaan hundis tiksitoo tokko ni qabaatu. Isaan seera koo duukaa ni bu'u; sirna koos of eeggannaadhaan ni eegu. ²⁵ Isaan biyya abbootiin keessan jiraatan, biyya ani Yaaqoobiif kenne keessa ni jiraatu. Isaanii fi ijoolleen isaanii, ijoolleen ijoollee isaanis bara baraan achi ni jiraatu; Daawit garbichi koos bara baraan bulchaa isaanii ni ta'a. ²⁶ Ani isaan wajjin kakuu nagaa nan seena; kakuun kunis kakuu bara baraa ni ta'a. Ani jabeessee isaan nan dhaaba; lakkoobsa isaanis nan baay'isa; gidduu isaaniittis iddoo qulqulluu koo bara baraan nan dhaaba. ²⁷ Iddoon jireenya koo isaan bira ta'a; ani Waaqa isaanii nan ta'a; isaanis saba koo ni ta'u. ²⁸ Ergasii yommuu iddoon qulqulluun koo bara baraan isaan gidduu jiraatutti, akka ani WAAQAYYO Israa'elin qulqulleessu saboonni ni beeku.' "

38

Raajii Googiin Mormuun Dubbatame

¹ Ergasii dubbiin WAAQAYYOO akkana jedhee gara koo dhufe: ² "Yaa ilma namaa, fuula kee gara Googi, bulchaa hangafticha Meshekii fi Tuubaalii kan biyya Maagoogitti garagalfadhu; isaan mormuudhaanis raajii dubbadhuutii ³ akkana jedhi: 'WAAQAYYO Gooftaan akkana jedha: Yaa Googi, bulchaa hangafticha Meshekii fi Tuubaal, ani sitti ka'a. ⁴ Ani duubatti sin deebisa; ha'oo kee keessa hokkoo galchee loltoota kee hunda wajjin, fardeen kee, abbootii fardeenii kee kanneen hidhata waraanaa guutuu hidhatan, waldaa guddaa kanneen gaachana gurguddaa fi xixiqqaa qabatanii fi kanneen hundi isaanii goraadee qabatan wajjin sin baasa. ⁵ Faaresi, Itoophiyaa fi Fuuxi kanneen hundi isaanii gaachanaa fi gonfoo sibiilaa qabatan isaan wajjin ta'u; ⁶ akkasumas Goomer loltoota ishee hunda wajjin, kaaba fagootii Beet Toogarmaa loltoota ishee hunda wajjin, saboota hedduus sitti dabalee nan baasa.

⁷ " 'Qophaa'i; atii fi waldaan si biratti walitti qabame hundi qophaa'aa; ajajaa isaanis ta'i. ⁸ Guyyaa hedduu booddee ati lolaaf ni waamamta. Waggoota fuula duraa keessa ati biyyattii lola irraa dandamatte, kan namoonni ishee saboota baay'ee keessaa tulluuwwan Israa'el irratti walitti qabaman, kan bara dheeraaf ontee turte sana ni weerarta Isaan saboota keessaa baafamaniiru; amma hundi isaanii nagaadhaan jiraatu. ⁹ Atii fi loltoonni kee hundi, saboonni baay'een si wajjin jiranis akka bubbee ol ni baatu; ati akka duumessa biyyattii haguuguu ni taata.

¹⁰ " 'WAAQAYYO Gooftaan akkana jedha: Gaafas yaadni sammuu keetti ni dhufa; atis hammina ni malatta ¹¹ Ati akkana jetta; "Ani biyya gandoonni ishee dallaa hin qabne tokko nan weerara; ani namoota nagaa fi tasgabbiidhaan jiraatan jechuunis warra dallaa, balbalaa fi danqaraawwan hin qabne hunda nan dha'a. ¹² Ani nan booji'a; nan saamas; namoota saboota keessaa walitti qabamanii iddoowwan diigamanitti deebi'anii qubatan kanneen horii fi meeshaaleedhaan sooromanii handhuura biyyattii keessa jiraatanitti harka koo nan kaasa." ¹³ Shebaa fi Dedaan, daldaltoonni Tarshiishii fi gandoonni ishee hundi akkana siin jedhu; "Ati booji'uuf dhuftee? Ati saamuuf, meetii fi warqee fudhattee deemuuf, horii fi meeshaalee fudhachuuf, boojuu hedduus qabachuuf tuuta kee walitti qabattee?" "

¹⁴ "Kanaafuu yaa ilma namaa, raajii dubbadhuutii Googiin akkana jedhi: 'WAAQAYYO Gooftaan akkana jedha: Gaafas yeroo sabni koo Israa'el nagaan jiraatutti ati waan kana hin qalbeeffattuu? ¹⁵ Ati iddoo kee kan kaaba fagootii ni dhufu; saboonni baay'een kanneen hundi isaanii farda yaabatan, waldaan guddaan, loltoonni jajjaboon si wajjin ni dhufu. ¹⁶ Ati akkuma duumessa biyya haguuguutti saba koo Israa'elitti ni kaata. Yaa Googi, akka saboonni yommuu ani karaa keetiin fuula isaanii duratti qulqullummaa koo argisiisutti na beekaniif, ani bara dhufuuf jiru keessa biyya kootti sin kaasa.

¹⁷ " 'WAAQAYYO Gooftaan akkana jedha: Namni ani bara durii karaa tajaajiltoota koo raajonni Israa'eliin waa'ee isaa dubbadhe sun si'ii mitii? Yeroo sana isaan akka ani

isaanitti si kaasu bara dheeraaf ni raajan. ¹⁸ Gaafas waan kanatu ta'a; yeroo Googi biyya Israa'el miidhutti aariin koo ni boba'a, jedha WAAQAYYO Gooftaan. ¹⁹ Yeroo sana Israa'el keessatti sochiin lafaa guddaan isaa akka ta'u, ani hinaaffaa fi dheekkamsa koo boba'aa sanaan nan dubbadha. ²⁰ Qurxummiin galaanaa, simbirrooni samii, bineensoni dirree, uumamawwan lafa irra munyuuqan, namoonni lafa irra jiraatan hundi argamuu kootti ni hollatu. Tulluuwwan ni jingu; ededni hallayyaa ni fottoqa; dallaan hundis ni jiga. ²¹ Ani tulluuwwan koo hunda irratti Googitti goraadee nan waama, jedha WAAQAYYO Gooftaan. Goraadeen nama hundaa obboleessa isaatti ni ka'a. ²² Ani adabbii dha'ichaatii fi dhiiga dhangalaasuu isatti nan mura; isaa fi loltoota isaatti, saboota isa wajjin jiran hedduutis bokkaa hamaa, cabbii fi dinyii boba'u nan roobsa. ²³ Kanaanis guddinaa fi qulqullina koo nan argisiisa; fuula saboota baay'ee durattis of nan beeksisa; ergasii isaan akka ani WAAQAYYO ta'e ni beeku.'

39

¹ "Yaa ilma namaa, Googiin mormuudhaan raajii dubbadhu; akkanas jedhi: 'WAAQAYYO gooftaan akkana jedha: Yaa Goog, bulchaa hangafticha Meshekii fi Tuubaal ani sitti ka'eera. ² Ani dugda duubatti si deebisee gara fuula duraatti sin oofa. Ani kaaba fagoottii si fidee tulluuwwan Israa'elitti sin erga. ³ Ergasii ani harka kee bitaa irraa iddaa kee dha'ee harka kee mirgaa irraa immoo akka xiyyi kee bu'u nan godha. ⁴ Aatii fi loltoonni kee hundi, saboonni si wajjin jiranis tulluuwwan Israa'el irratti ni kuftu. Ani allaattii raqaa kan gosa hundaatii fi bineensota bosonaatiif nyaata godhee sin kenna. ⁵ Ati dirree duwwaa irratti ni kufta; ani dubbadheeraatii, jedha WAAQAYYO Gooftaan. ⁶ Ani Maagoogii fi warra qarqara galaanaa irra nagaadhaan jiraatanitti ibidda nan erga; isaanis akka ani WAAQAYYO ta'e ni beeku.

⁷ " 'Ani akka saba koo Israa'el gidduutti maqaan koo qulqulluun sun beekamu nan godha. Si'achi akka maqaan koo qulqulluun sun xuraa'u hin godhu; saboonnis akka ani WAAQAYYO Qulqullicha Israa'el ta'e ni beeku. ⁸ Kunoo, wanni kun dhufaa jira! Dhugumaanis ni ta'a, jedha WAAQAYYO Gooftaan. Guyyaan ani jedhes kanaa dha.

⁹ " 'Ergasii warri magaalawwan Israa'el keessa jiraatan ba'anii mi'a lolaa jechuunis gaachanawwan xixinnaa fi gurguddaa, iddaa fi xiyya, bokkuu lolaatii fi eeboo qoraan godhatanii bobeeffatu. Wagga torbaafis akka qoraaniitti itti fayyadamu. ¹⁰ Isaan sababii meeshaalee waraanaa qoraan godhatanii itti fayyadamanii, dirreedhaa qoraan funaanuun yookaan bosona keessaa qoraan cabsuun isaan hin barbaachisu. Isaan warra isaan saaman ni saamu; warra isaan booji'anis ni booji'u, jedha WAAQAYYO Gooftaan.

¹¹ " 'Ani gaafas Israa'el keessaa sulula karaa deemtotaa kan gama ba'a Galaanaatiin jiru sana keessatti Googiif lafa awwaalaa nan kenna. Sababii Googii fi tuunni isaa hundi achitti awwaalamaniiif daandii imaltootaa ni cufu. Kanaafuu inni Sulula Hamoon Goog jedhamee waamama.

¹² " 'Manni Israa'elis biyyattii qulqulleessuuf jedhanii ji'a torba guutuu isaan awwaalu. ¹³ Namoonni biyyattii hundi isaan awwaalu; guyyaan ani itti ulfaadhus guyyaa yaadannoo isaaniif ta'a, jedha WAAQAYYO Gooftaan.

¹⁴ " 'Namoonnis akka biyyattii qulqulleessaniiif yeroo yerootti ni qaxaramu. Namoonni tokko tokko guutummaa biyyattii keessa deemu; kaan immoo warra utuu hin awwaalamin hafan awwaalu. Dhuma ji'a torbaffaattis sakatta'uu jalqabu. ¹⁵ Yommuu isaan biyya keessa deemanitti namni lafee namaa arge kam iyyuu mallattoo itti godha; kunis hamma warri awwaala qotan sun Sulula Hamoon Googiitti awwaalanitti ta'a. ¹⁶ Magaalaan Hamoonaa jedhamtu tokko achi jirti; isaan akkasiin biyya sana qulqulleessu.'

¹⁷ "Yaa ilma namaa, WAAQAYYO Gooftaan akkana jedha: Simbirroo gosa hundaa fi bineensota bosonaa hundatti dubbadhu; akkanas jedhiin: 'Naannoo hundaa walitti qabamaatii gara aarsaa ani isiniif qopheessuu, aarsaa guddicha tulluuwwan Israa'el irratti dhi'aatu biratti wal ga'aa. Achittis foon nyaattu; dhiigas ni dhugdu. ¹⁸ Akka waan isaan korbeeyyii fi xobbaallaa hoolaa, re'ootaa fi jiboota ta'aniitti, isin foon namoota jajjaboo ni nyaattu; dhiiga bulchitoota lafaas ni dhugdu; hundi isaaniis horii Baashaan kanneen coomanii dha. ¹⁹ Aarsaa ani isiniif qopheessu irratti hamma quuffanitti cooma nyaattu; hamma machoofanitti illee dhiiga dhugdu. ²⁰ Maaddii koo irraas hamma quuffanitti fardeenii fi warra fardeen yaabbatan, namoota jajjaboo fi loltoota gosa hundaa ni nyaattu' jedha WAAQAYYO Gooftaan.

²¹ "Ani saboota gidduutti ulfina koo nan argisiisa; saboonni hundi adabbii ani isaan adabee fi harka koo kan ani isaan irra kaa'e sana ni argu. ²² Gaafa sanaa jalqabees manni Israa'el akka ani WAAQAYYO Waaqa isaa ta'e ni beeka. ²³ Saboonnis

akka uummanni Israa'el sababii cubbuu anaaf amanamuu diduu isaanitiin hojjetan sanaatiif booji'aman ni beeku. Kanaafuu ani fuula koo isaan irraa garagalfadhee diinota isaanitti dabarsee isaan kenne; hundi isaanis goraadeedhaan dhuman. ²⁴ Ani akkuma xuraa'ummaa isaanititii fi yakka isaanititii waan kana isaanitti nan fide; fuula koos isaan duraa dhokfadhe.

²⁵ "Kanaafuu WAAQAYYO Gooftaan akkana jedha: Yaaqoobin booji'adhaa nan deebisa; uummata Israa'el hundaaf garaa nan laafa; maqaa koo qulqullichaafis nan hinaafa. ²⁶ Isaan yeroo utuu namni tokko iyyuu isaan hin sodaachisin nagaadhaan biyya isaanii keessa jiraatanitti qaani isaanitii fi naaf amanamuu diduu isaanii hunda ni irraanfatu. ²⁷ Ani yeroon saboota keessaa isaan deebisee biyyoota diinota isaanii keessaa walitti isaan qabutti, qulqulluu ta'uu koo karaa isaanitiin fuula saboota baay'ee duratti nan argisiisa. ²⁸ Ani akka isaan booji'amanii saboota gidduu jiraataniif isaan ergu iyyuu, utuu tokkoo isaanii illee duubatti hin hambisin biyya isaanii keessatti walitti isaan nan qaba; ergasiis isaan akka ani WAAQAYYO Waaga isaanii ta'e ni beeku. ²⁹ Si'achi ani fuula koo isaan duraa hin dhokfadhu; ani Hafuura koo mana Israa'el irratti nan dhangaalaasati, jedha WAAQAYYO Gooftaan."

40

Mana Qulqullummaa Haaraa

¹ Waggaa digdamii shanaffaa booji'amu keenyaa keessa, waggaa jalqabaatti, ji'a kurnaffaatti, erga magaalattiin diigamtee booddee waggaa kudha afuraffaatti, guyyuma sana harki WAAQAYYOO narra ture; innis achi na geesse. ² Mul'ata Waaqaatiinis gara biyya Israa'el na geessee tulluu baay'ee ol dheeraa irra na dhaabe; karaa kibba isaatiinis waan ijaarsa magaalaa fakkaatanitu ture. ³ Inni achi na geesse; anis nama bifti isaa naasii fakkaatu tokko nan arge; innis harka isaati funyoo fo'aa quncee talbaatii fi ulee safaraa qabatee balbala dura ijaajjaa ture. ⁴ Namichi sunis akkana naan jedhe; "Yaa ilma namaa, ati sababii kanaaf waan as fidamteef, ija keetiin ilaali; gurra keetiinis dhaga'iitii waan ani sitti argisiisu hunda hubadhu. Mana Israa'eliitii waan argite hunda himi."

Karra Ba'a Biiftuu

⁵ Anis dallaa guutummaan guutuutti lafa mana qulqullummaa marsee jiru tokko nan arge. Dheerinni ulee ittiin safaran kan harka namicha sanaa keessa ture dhundhuma ja'aa dha; tokkoon tokkoon dhundhuma sanaa dhundhuma tokkoo fi bal'ina barruu harkaa tokko ture. Innis dallaa sana safare; dallaan sunis ulee safartuu tokko yabbatee ulee safartuu tokko ol dheerata ture.

⁶ Ergasii inni gara balbala gara ba'aa ilaaluutti dhufe. Gulantaawwanitti ol ba'ee waltajjii balbalaa safare; innis ulee safartuu tokko gad fagaata ture. ⁷ Sireewwan eegumsaa ol dheerinni isaanii ulee tokko, bal'inni isaanii immoo ulee tokko ture; keenyan manneen gidduu turanis dhundhuma shan yabbatu ture. Dooyaan karraa kan gardaafootti aanee gara mana qulqullummaatti garagaluu sunis ulee safartuu tokko gad fagaata ture.

⁸ Sana booddee inni gardaafuu balbalaa safare; ⁹ balballi sunis dhundhuma saddeet gad fagaatee tuggeewwan isaas dhundhuma lama furdatu turan. Gardaafoon balbala sanaa gara mana qulqullummaatti garagala ture.

¹⁰ Karra gara ba'a biiftuu jiru keessa bitaa fi mirgaan manneen waardiyyootaa sadii sadiitu ture; sadan isaanii iyyuu wal qixxee turan. Tuggeewwan gama lamaan jiranis waluma qixxee turan. ¹¹ Ergasii inni bal'ina balbala ittiin ol seenanii safare; innis dhundhuma kudhan ture; dheerinni isaa immoo dhundhuma kudha sadii ture. ¹² Tokkoo tokkoo mana waardiyyaa dura keenyan dhundhuma tokko ol dheeratu ture; manneen kunneenis gama lamaanin dhundhuma ja'a ja'a turan. ¹³ Ergasii inni bantii keenyan manichaa kan boroo irraa jalqabee hamma bantii kaaniitti balbala sana safare; wal irraa fageenyi isaas balbala tokko irraa hamma balbala kaaniitti dhundhuma digdamii shan ture. ¹⁴ Akkasumas balbala ittiin ol seenan safare; innis dhundhuma jaatama ta'e; safarri sunis hamma utubaa gara oobdii ilaalu sanaatti taasifame. ¹⁵ Fageenyi balbala ol seensisuu jalqabee hamma dhuma gardaafootti jirus dhundhuma shantama ta'e. ¹⁶ Kutaawwan manichaatii fi keenyan isaa karaa ittiin ol seenaniin foddaa gama lachuutiin dhiphachaa deemu qabu ture; gardaafoon sunis akkasuma naanna'ee gara keessaatiin foddaa qaba ture; utubaawwan sun immoo muka meexxiitiin faayeffamanii turan.

Oobdii Alaani Jiru

¹⁷ Ergasii inni gara oobdii alaatti na fide. Achittis dareewwanii fi karaa dhagaadhaan tolfame tokko naannoo oobdiitti nan arge; qarqara karaa sanaas daree soddomatu ture. ¹⁸ Karaan sunis balbala sana bira ture; bal'inni isaas hamma ol dheerina balbalawwanii ture; karaan kunis karaa isa gad aanuu dha. ¹⁹ Sana booddee balbala gad aanu keessaa jalqabee hamma oobdii isa keessaa kan gara alaatti fageenya isaa safare; innis karaa ba'aatii fi karaa kaabaatiin dhundhuma dhibba tokko ture.

Karra Kaabaa

²⁰ Ergasii inni lafa irra dheerinaa fi bal'ina karra gara kaabaa ilaalu kan gara oobdii alaatti baasuu safare. ²¹ Safarri utubaawwanii fi gardaafoo manneen waardiyyaa kanneen bitaa mirgaan dareewwan sadii sadii qaban sanaas kan karra jalqabaa wajjin wal qixxee ture. Innis dheerina dhundhuma shantamaatii fi bal'ina dhundhuma digdamii shanii qaba ture. ²² Foddaawwan isaanii, gardaafowwan isaaniiiti fi faaya isaanii kan muka meexxii irraa hojjetame safarri isaanii safara karra gara ba'aa ilaalu wajjin wal qixxee ture. Gulantaawwan gara karra sanaatti geessan torbatu ture; fuullee isaanii immoo gardaafoo isaatu ture. ²³ Akkuma karra karaa ba'aatiin ture sanaa karra gara kaabaa ilaalu kan gara oobdii keessaatti geessu tokkotu ture. Innis karra tokko irraa jalqabee hamma karra fuullee isaa jiruutti safare; innis dhundhuma dhibba tokko ture.

Karra Kibbaa

²⁴ Innis gara kibbaatti na geesse; anis karra gara kibbaa ilaalu nan arge. Innis utubaawwanii fi gardaafowwan isaa safare; safarri isaanii safara warra kaanii wajjin wal qixxee ture. ²⁵ Karri sunii fi gardaafoon isaa foddaawwan akkuma foddaawwan kaanii dhidhiphatan naannoo isaaniitii qabu ture. Innis dheerina dhundhuma shantamaatii fi bal'ina dhundhuma digdamii shanii qaba ture. ²⁶ Gulantaawwan gara karra sanaatti geessan torbatu ture; fuullee isaanii immoo gardaafoo isaatu ture; balballi sunis fuula utubaawwan sanaa irraa bitaa mirgaan faaya muka meexxiitiin hojjetame qaba ture. ²⁷ Oobdiin gara keessaas karra gara kibbaa ilaalu qaba ture; innis karra kana irraa kaasee hamma karra karaa kibbaa kan gara alaatiin jiruutti safare; safarri isaas dhundhuma dhibba tokko ture.

Karrawwan Gara Oobdii Keessaatti Geessan

²⁸ Ergasiis inni karaa balbala kibbaatiin gara oobdii isa keessaatti na fide; innis karra kibbaa safare; safarri karaa sanaas safara karrawwan kaaniitiin wal qixxee ture. ²⁹ Safarri manneen waardiyyaa kan utubaawwan isaatii fi kan gardaafoo isaa safara karrawwan kaanii wajjin wal qixxee ture. Karri sunii fi gardaafoon isaa foddaawwaniin marfamaniin turan. Innis dheerina dhundhuma shantamaa fi bal'ina dhundhuma digdamii shanii qaba ture. ³⁰ Gardaafoowwan karraa kanneen naannoo oobdii gara keessaa jiran lafa irra dheerinni isaanii dhundhuma digdamii shan, bal'inni isaanii immoo dhundhuma shan qaba ture. ³¹ Gardaafoon isaa gara oobdii alaa ilaala ture; tuggeewwan isaa muka meexxiitiin faayeffamaniin turan; gulantaawwan saddeetis gara isaa geessu turan.

³² Ergasii inni karaa ba'aatiin gara oobdii isa keessaatti na fide; innis balbala sana safare; safarri isaas safara karrawwan kaanii wajjin wal qixxee ture. ³³ Safarri manneen waardiyyaa, kan utubaawwan isaatii fi kan gardaafoo isaa safara karrawwan kaanii wajjin wal qixxee ture. Karri sunii fi gardaafoon isaa foddaawwaniin marfamaniin turan. Innis dheerina dhundhuma shantamaa fi bal'ina dhundhuma digdamii shanii qaba ture. ³⁴ Gardaafoon isaa gara oobdii alaa ilaala ture; tuggeen isaa bitaa mirgaan muka meexxiitiin faayeffamee ture; gulantaawwan saddeetis gara isaa geessu turan.

³⁵ Ergasii inni gara karra kaabaatti na fide; isas ni safare. Safarri isaas safara karrawwan kaanii wajjin wal qixxee ture. ³⁶ Innis akkuma manneen waardiyyaa isaa, utubaawwan isaatii fi gardaafoo isaa foddaawwaniin marfamee ture. Innis dheerina dhundhuma shantamaatii fi bal'ina dhundhuma digdamii shanii qaba ture. ³⁷ Gardaafoon isaa gara oobdii alaa ilaala ture; tuggeen isaa bitaa mirgaan muka meexxiitiin faayeffamee ture; gulantaawwan saddeetis gara isaa geessu turan.

Dareewwan Aarsaan Itti Qopheffamu

³⁸ Kutaan balballi isaa gara gardaafoo karra sanatti ba'u tokko jira ture; innis lafa aarsaan gubamu itti miicamu ture. ³⁹ Gardaafoo karraa keessa karaa bitaa fi mirgaatiin minjaalota lama kanneen aarsaan gubamu, aarsaan cubbuutii fi aarsaan yakkaa irratti qalamutu ture. ⁴⁰ Gardaafoo karraa kan gara alaa jiru cina, gulantaawwan balbalaa kanneen ittiin gara karra kaabaa seenan bira minjaalota lamatu ture; gulantaawwan sana irraa qixa kaaniin minjaalota lamatu ture. ⁴¹ Kanaafuu karra sana irraa gara

tokkoon minjaalota afur, gara kaaniin immoo minjaalota afur, walumatti minjaalota saddeeti kanneen aarsaan irratti qalamutu ture. ⁴² Akkasumas minjaalota dhagaa soofame irraa aarsaa gubamuuf tolfaman afurtu ture; tokkoon tokkoon isaaniis dheerina dhundhuma tokkoo fi walakkaa, bal'ina dhundhuma tokkoo fi walakkaatii fi ol dheerina dhundhuma tokkoo qabu ture. Isaan irras meeshaalee ittiin aarsaan gubamuu fi aarsaawwan biraa ittiin qalaman kaa'amani turan. ⁴³ Hokkoowwan gaanfa lama lama qaban kanneen tokkoon tokkoon isaanii dheerina barruu harkaa tokko qaban itti qabsiifamanii turan. Minjaalonni sunis kan foon aarsaawwaniitiif qopheeffaman turan.

Dareewwan Lubootaaf Ramadan

⁴⁴ Balbala isa keessaa duubaan oobdii isa keessaa keessa dareewwan lamatu ture; tokko karaa balbala kaabaa gara kibbaatti garagaleera; tokko immoo karaa balbala kibbaa gara kaabaatti garagaleera. ⁴⁵ Innis akkana naan jedhe; "Dareen gara kibbaatti garagalee jiru luboota warra mana qulqullummaa keessatti ramadamaniiif dha; ⁴⁶ kan gara kaabaatti garagalee jiru immoo luboota warra iddoo aarsaatti ramadamaniiif dha. Warri kunneen ilmaan Zaadoq; kanneen Lewwota keessaa gara WAAQAYYOOTTI dhi'aatanii fuula isaa dura tajaajilan isaan qofa."

⁴⁷ Achii immoo oobdii safare; innis roga afur kan wal qixxee ta'ee dheerinni isaa dhundhuma dhibba tokko, bal'inni isaas dhundhuma dhibba tokkoo ti. Iddoon aarsaas fuula mana qulqullummaa dura ture.

Mana Qulqullummaa

⁴⁸ Innis gara gardaafoo mana qulqullummaatti na fidee tuggeewwan gardaafoo sanaa safare; isaanis qixa lamaaniiin dhundhuma shan shan babal'atan ture. Bal'inni balbala isaa immoo dhundhuma kudha afur ture; keenyan isaas qixa lamaaniiin dhundhuma sadii sadii babal'ata ture. ⁴⁹ Gardaafoon sun bal'inni isaa dhundhuma digdama, fuula isaa duraa hamma dugda duubaatti immoo dhundhuma kudha lama ture. Gulantaawwan gara mana qulqullummaatti geessan kudhanitu ture; qixa lamaaniiis tuggeewwan gurguddaan, tuggeewwan xixinnaa cina turan.

41

¹ Ergasiis gara mana qulqullummaatti na fidee tuggeewwan isaa safare; bal'inni tuggeewwan sanaas qixa hundaanuu dhundhuma ja'a ja'a ture. ² Bal'inni balbala isaa dhundhuma kudhan, bal'inni isaa immoo karaa hundaan dhundhuma shan shan ture. Akkasumas inni karaa mana qulqullummaa kan gara alaa safare; innis dhundhuma afurtama dheeratee bal'inni isaa immoo dhundhuma digdama ture.

³ Sana booddee gara mana qulqullummaa isa gara keessaa seenee utubaawwan balbalaa safare; tokkoon tokkoon isaaniis dhundhuma lama lama babal'atu ture. Balballi isaa dhundhuma ja'a bal'atee qixa hundaanuu dhundhuma torba torba bal'ata ture. ⁴ Lafa irra dheerina mana qulqullummaa isa gara keessaas ni safare; innis fiixee tokko irraa hamma fiixee kaaniitti dhundhuma digdama dheeratee bal'inni isaa immoo dhundhuma digdama ture. Innis, "Kun Iddoo Qulqullummaa kan Hunda Caaluu dha" naan jedhe.

⁵ Ergasii immoo keenyan mana qulqullummaa safare; innis yabbinna dhundhuma ja'a qaba ture; bal'inni dareewwanii kan naannoo mana qulqullummaa biraas dhundhuma afur afur ture. ⁶ Dareewwan sunis darbii sadiitti qoodamanii wal irratti ijaaraman; tokkoon tokkoon darbii immoo dareewwan soddoma soddoma qaba ture. Dareewwan sana deeggaruufis naannoo keenyan mana qulqullummaa tuggeewwantu ture; tuggeewwan sun garuu keenyan mana qulqullummaa deeggaruuf keessa hin suuqamne. ⁷ Dareewwan mana qulqullummaa bira jiran sunis darbiidhaa gara darbiitti babal'achaa deemu turan. Ijaarsi mana qulqullummaa marsee jiru waan gadii gara oliitti ijaarameef dareewwan sun akkuma ol ba'aa deemaniin babal'atu turan. Gulantaan tokkos darbii gadiitti jalqabee darbii walakkaa keessa ba'ee gara darbii oliitti baasa ture.

⁸ Akkasumas manni qulqullummaa sun naannoo isaatii madabii ol ka'aa akka qabu nan arge; madabiin sunis dareewwan sanaaf hundee ta'e. Hundeen sunis lafa irra dheerina ulee tokkoo jechuunis dhundhuma ja'a qaba ture. ⁹ Keenyan dareewwan sanaa gara alaatiin dhundhuma shan yabbata ture. Iddoon duwwaan dareewwan mana qulqullummaatii fi ¹⁰ dareewwan lubootaa gidduu jiru kan naannoo mana qulqullummaa guutumaan guutuutti dhundhuma digdama bal'ata ture. ¹¹ Iddoo duwwaa sana irraa jalqabees balbalawwan dareewwan sanatti ol seensisan, tokko karaa kaabaa, kaan immoo karaa kibbaa turan; madabiin iddoo duwwaa sana marsee jiru dhundhuma shan bal'ata ture.

¹² Ijaarsi oobdii mana qulqullummaatti garagalee jiruu karaa dhi'aatiin dhundhuma torbaatama bal'ata. Keenyan ijaarsa sanaas dhundhuma shan yabbata; dheerinni isaas dhundhuma sagaltama ture.

¹³ Ergasii inni mana qulqullummaa safare; dheerinni isaas dhundhuma dhibba tokko ture; oobdiin mana qulqullummaatii fi ijaarsi sun keenyan isaa wajjin dhundhuma dhibba tokko dheerata ture. ¹⁴ Bal'inni oobdii mana qulqullummaa kan karaa ba'aatiin jiru iddoo fuullee mana qulqullummaa dabalatee dhundhuma dhibba tokko ture.

¹⁵ Ergasiis inni dheerina ijaarsaa kan gara oobdii isa mana qulqullummaa duubaatti garagalee jiru keenyan gama lamaanii dabalatee safare; innis dhundhuma dhibba tokko ture.

Manni qulqullummaa kan gara alaa, kan gara keessaatii fi gardaafoon gara oobdiitti garagalee jiru, ¹⁶ akkasumas waltajjiwwan, foddaawwan dhidhiphoonii fi darbiwwan naannoo sadan isaanii jiran kan waltajjiin oliitii fi waltajjiin mataan isaa mukaan haguugamee ture. Lafti isaa, keenyan hamma foddaawwaniitti jiruu fi foddaawwan haguugamanii turan. ¹⁷ Keessa iddoo balbala mana qulqullummaa gubbaan jiruu fi naannoo keenyan mana qulqullummaa kan gara keessaatii fi kan gara alaa irratti ¹⁸ fakkiin kiirubeelii fi mukkeen meexxi tolfamanii turan. Mukkeen meexxi sunis kiirubeel gidduutti tolfaman. Tokkoon tokkoon kiirubis fuula lama lama qaba ture: ¹⁹ Fuulli namaa tokko gara muka meexxi kan gama tokkoon jirutti garagalee ture; fuulli leencaa immoo gara muka meexxi kan gama kaaniitti garagalee ture. Isaanis guutumaa guutuutti mana qulqullummaa irratti marfamanii tolfamanii turan. ²⁰ Lafa mana qulqullummaa keessaa hamma balbala gubbaa jiruutti kiirubeelii fi mukkeen meexxi keenyan mana qulqullummaa isa gara alaa irratti tolfamanii turan.

²¹ Manni qulqullummaa karaa alaatiin hidhii balbalaa kan roga afurii qaba ture; hidhiin balbalaa kan Iddoo Iddoo Hunda Caalaa Qulqulluu ta'e fuuldura jirus wal fakkaata ture. ²² Iddoo aarsaa kan muka irraa tolfame kan ol dheerinni isaa dhundhuma sadii, lafa irra dheerinni isaa dhundhuma lamaa fi bal'inni isaa immoo dhundhuma lamaatu ture; goleewwan isaa, madabiin isaatii fi cinaachi isaa muka irraa tolfame. Namichi sunis, "Maaddiin kun maaddii fuula WAAQAYYOO dura jiruu dha" naan jedhe. ²³ Manni qulqullummaa inni gara alaatii fi Iddoon Iddoo Hunda Caalaa Qulqulluu ta'e sun balbala lama lama qabu turan. ²⁴ Tokkoon tokkoon balbala sanaas saanqaawwan lama lama qaba ture; tokkoon tokkoon balbala sanaas saanqaawwan qabsiiftuu qaban lama lama qaba ture. ²⁵ Balbalawwan mana qulqullummaa isa gara alaa irratti kiirubeelii fi mukkeen meexxi akkuma keenyan mana irratti tolfaman sana tolfamanii turan; gardaafoo sana fuula duraanis dibaabee mukaa tokkotu ture. ²⁶ Keenyan bitaa fi mirgaa kan gardaafoo sanaa irra foddaawwan dhidhiphoo kanneen bitaa mirgaan mukkeen meexxiitiin faayeffamantu ture. Dareewwan mana qulqullummaa kanneen bitaa fi mirgaas dibaabeewwan qabu turan.

42

Dareewwan Lubootaaf Ramadan

¹ Sana booddee namichi sun karaa kaabaatiin gara oobdii alaatti na baasee gara fuullee dareewwan oobdii mana qulqullummaa fi gara fuullee ijaarsa alaa kan karaa kaabaa jiruutti na fide. ² Ijaarsi balballi isaa gara kaabaatti garagalu sun dheerina dhundhuma dhibba tokkoo fi bal'ina dhundhuma dhibba tokko qaba ture. ³ Kutaa oobdii isa gara keessaa kan dhundhuma digdamaa keessaa fi kutaa fuullee madabii oobdii kan gara alaa jiru keessa sadarkaa sadiin darbiin tokko darbii kaanitti garagalee ture. ⁴ Dareewwan sana fuula duraanis karaan mana keessaan nama baasu kan dhundhuma kudhan bal'atee dhundhuma dhibba tokko dheeratutu ture. Balbalawwan isaanis karaa kaabaatiin turan. ⁵ Sababii darbiwwan sun iddoo dareewwan kanneen gara gadii irraa fi gamoo isa gidduu irraa qabatan caalaa dareewwan olii jalaa qabataniif dareewwan olii dhidhiphoo dha. ⁶ Dareewwan darbii sadaffaa irra jiran akka oobdiwwanii utubaawwan hin qaban ture; kanaafuu darbiwwan gara gadiitii fi walakkaa jiran caalaa lafa xinnaa qabu ture. ⁷ Keenyan karaa alaa tokkos dareewwanii fi oobdii gara alaa fuullee jira ture; innis dareewwan sana fuula duraan dhundhuma shantamaa dheerata ture. ⁸ Dheerinni dareewwan oobdii alaatti aananii tarreedhaan jiranii dhundhuma shantama, tarreen mana qulqullummaatti aanee jiru immoo dhundhuma dhibba tokko dheerata ture. ⁹ Yommuu oobdii alaati ol seenanitti, balballi karaa ba'aatiin gara dareewwan gadiitti nama seensisu tokko ni argama ture.

¹⁰ Karaa kibbaatiinis dheerina dallaa oobdii gara alaa qabatee, oobdii mana qulqullummaa qabatee fuullee dallaa gara alaatiin dareewwan ¹¹ fuula isaanii duraan karaa

namni irra darbu qabantu ture. Dareewwan kunneenis akkuma dareewwan karaa kaabaa sanaa turan; isaanis dheerinaa fi bal'ina, karaa ittiin gad ba'anii fi guddina wal fakkaatu qabu turan. Balbalawwan karaa kaabaa ¹² balbalawwan dareewwan karaa kibbaa wajjin wal fakkaatu turan. Karaa namni irra darbu kan dallaa gara ba'aatti ijaarameen wal cina deemuun fuullee jiru kan ittiin dareewwan seenan tokkoti jira ture.

¹³ Ergasiis inni akkana naan jedhe; "Dareewwan kaabaatii fi kibbaa kanneen gara oobdii mana qulqullummaatti garagalanii jiran sun dareewwan lubootaa, iddoo itti luboonni warri fuula WAAQAYYOO duratti dhi'aatan aarsaa aarsaa hunda caalaa qulqulluu ta'e jechuunis kennaa midhaanii, aarsaa cubbuutii fi aarsaa yakkaa achi kaa'u; iddoo sun qulqulluudhaatii. ¹⁴ Luboonni iddoo qulqulluu sana takkaa seennaan hamma uffata ittiin tajaajilan sana of irraa baasanitti gara oobdii gara alaatti hin ba'an; wayyaan sun qulqulluudhaatii. Isaan utuu iddoo uummataaf ramadametti hin dhi'aatin uffata biraa uffachuu qabu."

¹⁵ Inni erga waan mana qulqullummaa keessa jiru safaree xumuree booddee karaa balbala ba'aatiin na baasee naannoo sana hunda safare. ¹⁶ Kallattii ba'aas ulee ittiin safaraniin safare; wanni inni safaree dhundhuma dhibba shan ta'e. ¹⁷ Kallattii gara kaabaas safaree safarri sun ulee safaraatiin dhundhuma dhibba shan ta'e. ¹⁸ Kallattii kibbaatiinis safaree safarri sun ulee ittiin safaraniin dhundhuma dhibba shan ta'e. ¹⁹ Ergasii inni gara kallattii dhi'aatti garagalee safaree, safarri sun ulee ittiin safaraniin dhundhuma dhibba shan ta'e. ²⁰ Kanaafuu inni iddoo kallattii afraniin jiru safare. Iddoon sun dallaa iddoo qulqulluu, iddoo xuraa'aa irraa addaan baasu kan dheerinni isaa dhundhuma dhibba shan, bal'inni isaas dhundhuma dhibba shan qaba ture.

43

Ulfinni Waaqaa Gara Mana Qulqullummaatti Deebi'uu Isaa

¹ Ergasii namichi sun gara balbala ba'a biiftuutti garagaluutti na fide; ² anis utuu ulfinni Waaqa Israa'el ba'a biiftuutii dhufuu nan arge. Sagaleen isaa akka sagalee huursaa bishaan yaa'uu ture; laftis ulfina isaatiin ifte. ³ Mul'anni ani arges mul'ata ani yommuu inni magaalaa barbadeesuuf dhufetti argee fi mul'ata ani Laga Kebaar biratti argee ture sana fakkaata; anis adda kootiin lafatti nan gombifame. ⁴ Ulfinni WAAQAYYOO sun karaa balbala gara ba'a biiftuutti garagaluun mana qulqullummaa seene. ⁵ Ergasiis Hafuurri ol na fuudhee gara oobdii gara keessaatti na fide; ulfinni WAAQAYYOS mana qulqullummaa guute.

⁶ Utuu namichi sun na bira dhaabatee jiruu, nama wayii kan mana qulqullummaa keessaa natti dubbatu nan dhaga'e. ⁷ Innis akkana naan jedhe: "Yaa ilma namaa, kun iddoo teessoo kootii fi faanni miilla koo irra ejetuu dha. Kunis iddoo ani bara baraan Israa'eloota gidduu jiraadhuu dha. Manni Israa'el jechuunis isaan yookaan mootonni isaanii sagaagalummaa isaaniitii fi reeffa mootota isaaniitiin lammata gaarran waaqeffannaa isaanii irratti maqaa koo qulqulluu sana hin xureessan. ⁸ Isaan yommuu anaa fi isaan gidduutti dallaa qofa hambisani buusaa balbala isaanii buusaa balbala kootii bira, michichila balbala isaanii immoo michichila balbala kootii bira dhaabatanitti hojii isaanii jibbisiisaa sanaan maqaa koo qulqulluicha xureessan. Kanaafuu ani dheekkamsa kootiin isaan balleesse. ⁹ Isaan amma sagaagalummaa isaaniitii fi reeffa mootota isaanii sana narraa haa fageessani; anis bara baraan isaan gidduu nan jiraadha.

¹⁰ "Yaa ilma namaa, akka isaan cubbuu isaaniitiin qaana'aniif namoota Israa'elitti mana qulqullummaa argisiisi. Isaan karoora isaa haa hubatan; ¹¹ yoo isaan waan hojjetan hundatti qaana'an, karoora mana qulqullummaa jechuunis haala inni ittiin hojjetame, balbala ol seensisuu fi gad baasu, karoora isaa guutuu jechuunis sirna isaatii fi seera isaa hunda akka beekan godhi. Akka isaan karoora isaatii fi guutummaa sirna isaatiif amanamanii fi duukaa bu'aniifis fuula isaanii duratti waan kana barreessi.

¹² "Seerri mana qulqullummaa kanaa dha: Lafti naannoo fiixee tulluu jiru hundi waan hunda caalaa qulqulluudhaa. Kun seera mana qulqullummaa ti.

Iddoo Aarsaa

¹³ "Lafa irra dheerinni iddoo aarsaa dhundhuma dheeraadhaan isa kana: Innis dhundhuma tokkoo fi bal'ina barruu harkaa tokkoo dha; jalli isaa gad fageenya dhundhuma tokkootii fi bal'ina dhundhuma tokkoo qaba; naannoon isaa immoo xiyyoo taakkuu tokkoo qaba. Ol dheerinni iddoo aarsaa sanaa kana: ¹⁴ Jala isaatii kaasee hamma gulantaa gadiitti ol dheerina dhundhuma lamaatii fi bal'ina dhundhuma tokkoo qaba; gulantaa xinnaadhaa hamma gulantaa guddaatti ol dheerina dhundhuma afuriitii

fi bal'ina dhundhuma tokkoo qaba. ¹⁵ Iddoon ibiddaa kan iddoo aarsaa dhundhuma afur ol dheerata; badaan ibiddaa kun gaanfawwan ol babba'an afur qaba. ¹⁶ Iddoon ibiddaa kun roga wal qixxee afur qaba; dheerinni isaa dhundhuma kudha lama, bal'inni isaa immoo dhundhuma kudha lama; ¹⁷ Gulantaan ol aanus roga wal qixxee afur qaba; dheerinni isaa dhundhuma kudha afur, bal'inni isaas dhundhuma kudha afur; xiyyoon isaa walakkaa dhundhuma, naannoon jala isaa immoo dhundhuma tokkoo dha. Gulantaawwan iddoo aarsaa sanaa gara ba'a biiftuutti garagalu."

¹⁸ Inni akkana naan jedhe; "Yaa ilma namaa, WAAQAYYO Gooftaan akkana jedha: Yeroo iddoon aarsaa ijaaramutti dambiiwwan ittiin aarsaan gubamu dhi'effamuu fi dhiigni iddoo aarsaa irratti facaafamu kanaa dha; ¹⁹ luboota Lewwota maatii Zaadoq kanneen na tajaajiluuf fuula koo duratti dhi'aataniif akka aarsaa cubbuu ta'uuf dibicha kennita, jedha WAAQAYYO Gooftaan. ²⁰ Atis dhiiga isaa irraa xinnoo fudhattee gaanfa afran kan iddoo aarsaa, goleewwan gulantaa ol aanuu afranii fi naannoo xiyyoo isaa hunda dibda; haala kanaanis iddoo aarsaa sana qulqulleessitee araara buufta. ²¹ Dibicha sanas aarsaa cubbuutiif fuutee iddoo qulqulluudhaan alatti, kutaa mana qulqullummaa kan waan kanaaf ramadame keessatti ni gubda.

²² "Guyyaa lammaffaatti korbeessa re'ee kan hir'ina hin qabne aarsaa cubbuutiif dhi'eessita; iddoon aarsaas akkuma dibichaan qulqulleeffame sanatti qulqulleeffama. ²³ Erga iddoo aarsaa sana qulqulleessitee booddee, horii keessaa dibichaa fi korbeessa bushaayee kanneen lamaan isaani iyyuu hir'ina hin qabne dhi'eessita. ²⁴ Ati fuula WAAQAYYOO duratti isaan dhi'eessita; luboonni immoo soogidda itti facaasanii aarsaa gubamu godhanii WAAQAYYOOF isaan dhi'eessu.

²⁵ "Ati guyyaa torbaaf guyyuma guyyaan korbeessa re'ee aarsaa cubbuutiif dhi'eessuu qabda; akkasumas horii keessaa dibichaa fi korbeessa bushaayee kan hir'ina hin qabne dhi'eessuu qabda. ²⁶ Isaanis guyyaa torbaaf iddoo aarsaatiif araara buusanii isa qulqulleessuu qabu; akkasittis isa qulqulleessu. ²⁷ Dhuma guyyoota kanaatti, guyyaa saddeettaffaa irraa jalqabee luboonni aarsaa keessan kan gubamuu fi aarsaa keessan kan nagaa iddoo aarsaa irratti dhi'eessuu qabu. Ergasii ani isinan simadha, jedha WAAQAYYO Gooftaan."

44

Bulchaa, Lewwota, Luboota

¹ Sana booddee namichi sun balbala iddoo qulqulluu kan karaa alaatiin gara ba'a biiftuutti garagalutti deebisee na fide; balballi sunis cufamee ture. ² WAAQAYYO akkana naan jedhe; "Balballi kun cufamee hafa; inni banamuu hin qabu; namni tokko iyyuu achiin hin seenu. Sababii WAAQAYYO Waaqni Israa'el karaa sanaan seeneef, balballi sun cufamee hafa. ³ Namni fuula WAAQAYYOO duratti waa nyaachuuf karra ittiin seenan keessa taa'uu danda'u bulchaa sana qofa. Inni karra ittiin gardaafoo seenan sanaan ol galee achumaan gad ba'uu qaba."

⁴ Namichi sun karra kaabaatiin gara fuullee mana qulqullummaatti na fide. Anis mil'adheen akka ulfinni WAAQAYYOO mana qulqullummaa WAAQAYYOO guute arge; adda kootiin is lafattan gombifame.

⁵ WAAQAYYO akkana naan jedhe; "Yaa ilma namaa, waa'ee danbiiwwan mana qulqullummaa WAAQAYYOO waan ani sitti himu hunda hubadhuu ilaali; sirriitti dhaggeeffadhu; qalbeeffadhus. Waa'ee karra ittiin mana qulqullummaa seenaniiti fi karra ittiin iddoo qulqulluudhaa ba'anii hunda yaadatti qabadhu. ⁶ Mana Israa'el fincilaa sanaan akkana jedhi; 'WAAQAYYO Gooftaan akkana jedha: Yaa mana Israa'el, hojiin keessan jibbisiisaan sun haa ga'u! ⁷ Hojiwwan keessan jibbisiisoo kaan hundatti dabaltanii alagoota yaada garaa fi fooniin dhagna hin qabatin iddoo qulqulluu kootti galchitan; nyaata, coomaa fi dhiiga naaf dhi'eessuudhaan mana qulqullummaa koo xureessitan; kakuu koos cabsitan. ⁸ Isin itti gaafatamummaa wantoota koo qulqulluu irratti qabdan fiixaan baasuu diddanii iddoo koo qulqulluu irratti alagoota muuddatan. ⁹ WAAQAYYO Gooftaan akkana jedha: Alagaan yaada garaa fi fooniin dhagna hin qabatin iddoo koo qulqulluu sana seenuu hin qabu; alagoonni Israa'eloota gidduu jiraatan iyyuu seenuu hin qaban.

¹⁰ "Lewwonni warri yeroo Israa'eloonni narraa jal'atanitti waaqota isaanii duukaa bu'uudhaan joran cubbuu isaaniitti gaafatamuu qabu. ¹¹ Isaan itti gaafatamummaa karrawwan mana qulqullummaa qabaachuudhaan, isa keessas tajaajiluudhaan iddoo qulqulluu koo keessa tajaajilu danda'u; qalma gubamu qalanii maqaa uummataatiin dhi'eessuu, fuula uummataa dura dhaabataniis uummata tajaajilu ni danda'u. ¹² Garuu sababii isaan fuula waaqota isaanii duratti uummata tajaajilani mana Israa'el

cubbuudhaan kuffisaniif ani akka isaan cubbuu isaaniitti gaafatamaniif harka ol kaafadhee kakadheera, jedha WAAQAYYO Gooftaan. ¹³ Isaan luboota ta'anii na tajaajiluuf natti dhi'aachuu hin qaban yookaan wantoota koo qulqulluu kamitti iyyuu yookaan aarsaawwan koo kanneen aarsaawwan hunda caalaa qulqulluu ta'anitti dhi'aachuu hin qaban; gaanii hojjiwwan isaanii jibbisiisoo baadhachuu qabu. ¹⁴ Ta'us ani akka isaan itti gaafatama mana qulqullummaa qabaataniif, akka isaan hojii isaa hunda hojjetanii fi waan achi keessatti hojjetamuu qabu hunda hojjetaniif isaan nan muuda.

¹⁵ "Luboonni warri Lewwotaa fi sanyii Zaadoq ta'anii fi warri yeroo Israa'eloonni karaa koo irraa jal'atanitti hojii iddoo qulqulluu koo amanamummaadhaan deemsisan fuula koo dura tajaajiluudhaaf dhi'aachuu qabu; coomaa fi dhiigas aarsaa godhanii dhi'eessuuf fuula koo dura dhaabachuu qabu, jedha WAAQAYYO Gooftaan. ¹⁶ Iddoo qulqulluu koo isaan qofatu seenuu qaba; isaan qofatu na tajaajiluu fi hojii koo hojjechuuf maaddii kootti dhi'aachuu qaba.

¹⁷ "Isaan yeroo karra oobdii gara keessaatiin seenanitti wayyaa quncee talbaa irraa dha'ame uffachuu qabu; yeroo karra oobdii gara keessaa dura yookaan mana qulqullummaa keessa tajaajilanitti wayyaa suufii irraa dha'ame kam iyyuu uffachuu hin qaban. ¹⁸ Isaan marata quncee talbaa irraa dha'ame mataa isaaniitti maratanii wayyaa jalaa kan quncee talbaa irraa dha'ame mudhii isaaniitti hidhachuu qabu. Wayyaa isaan dafqisiisu kam iyyuu uffachuu hin qaban. ¹⁹ Isaan yeroo gara oobdii alaa iddoo uummanni jirutti gad ba'anitti uffata ittiin tajaajilaa turan sana of irraa baasanii dareewwan qulqulluu keessa kaa'uu qabu; akka uffata isaaniitiin uummata hin qulqulleessineefis uffata biraa uffachuu qabu.

²⁰ "Rifeensa mataa isaanii haaddachuu yookaan guddisuu hin qaban; garuu rifeensa mataa isaanii murachuu qabu. ²¹ Lubni kam iyyuu yeroo oobdii gara keessaa seenutti daadhii wayinii dhuguu hin qabu. ²² Isaan haadha hiyyeessaa yookaan niitii dhirsi hiike fuudhuu hin qaban; durba sanyii Israa'el yookaan niitii lubni irraa du'e qofa fuudhuu danda'u. ²³ Isaan garaa garummaa waan qulqulluu fi waan qulqulluu hin ta'in gidduu jiru saba koo barsiisani akka isaan waan xuraa'aa fi waan qulqullaa'aa addaan baafatan itti argisiisuu qabu.

²⁴ "Falmii kam iyyuu keessatti luboonni akka abbootii seeraatti haa tajaajilan; akka sirna koottis haa murteessan. Isaan seera koo fi ajaja koo kan ayyaana kootiif murteeffame hundaaf kenname sana eeguu qabu; Sanbatoota koos qulqulleessanii eeguu qabu.

²⁵ "Lubni tokko nama du'etti dhi'aachuudhaan of xureessuu hin qabu; haa ta'u malee yoo namni du'e sun abbaa isaa yookaan haadha isaa, ilma isaa yookaan intala isaa, obboleessa isaa yookaan obboleettii isaa kan hin heerumin ta'e garuu inni of xureessuu danda'a. ²⁶ Inni erga qulqullaa'ee booddee guyyaa torba eeguu qaba. ²⁷ Innis gaafa iddoo qulqulluu keessa tajaajiluuf oobdii iddoo qulqulluu isa gara keessaa seenutti aarsaa cubbuu waa'ee ofii isaatiif dhi'eessuu qaba, jedha WAAQAYYO Gooftaan.

²⁸ "Dhaalli luboonni qaban anuma qofa. Isin Israa'el keessatti qabeenya tokko illee isaaniif kennuu hin qabdan; ani qabeenya isaaniin nan ta'a. ²⁹ Isaan kennaa midhaanii, aarsaa cubbuutii fi aarsaa yakkaa ni nyaatan; wanni Israa'el keessaa WAAQAYYOOF kenname hundi kan isaaniin ni ta'a. ³⁰ Mataa oomisha midhaanii keessaa filatamaan hundii fi kennaan keessan kan addaa hundinuu kan lubootaa ti. Akka eebbi warra mana keessan jiraataniif dhufuuf, daakuu keessan keessaa kan jalqabaa isaaniif kennuu qabdu. ³¹ Luboonni simbira yookaan horii, waan du'ee argame yookaan kan bineensi madeesse kam iyyuu nyaachuu hin qaban.

45

Biyyattii Hirachuu

¹ "Isin yeroo lafa ixaadhaan dhaala godhattanii qoqqooddattanitti, biyyattii keessaa kutaa dheerinni isaa dhundhuma 25,000, bal'inni isaa immoo dhundhuma 20,000 ta'e tokko aanaa qulqulluu gootanii WAAQAYYOOF kennuu qabdu; lafti sunis guutummaan guutuutti qulqulluu ta'a. ² Kana keessaas lafti rogni isaa wal qixxee kan lafa irra dheerinni isaa dhundhuma 500, bal'inni isaas dhundhuma 500 ta'e iddoo qulqulluudhaaf, dhundhumni 50 immoo iddoo duwwaa naannoo isaatti hafuuf haa ta'u. ³ Aanaa qulqulluu sana irraas kutaa lafa irra dheerinni isaa dhundhuma 25,000, bal'inni isaa immoo dhundhuma 10,000 safari. Isa keessas iddoo qulqulluu jechuunis Iddoo Iddoo Hunda Caalaa Qulqulluu ta'etu jiraachuu qaba. ⁴ Iddoon kunis lafa sana keessatti luboota iddoo qulqulluu keessatti tajaajilanii fi kanneen fuula WAAQAYYO duratti tajaajiluuf dhi'aataniif kutaa qulqulluu ni ta'a. Innis iddoo manneen isaaniitii fi iddoo

mana qulqullummaa ta'a. ⁵ Lafti dhundhuma 25,000 dheeratee bal'inni isaa immoo dhundhuma 10,000 ta'e akka isaan magaalaa keessa jiraatan itti ijaarrataniif Lewwota mana qulqullummaa keessa tajaajilaniif ta'a.

⁶ "Lafa bal'inni isaa dhundhuma 5,000, dheerinni isaa immoo dhundhuma 25,000 ta'e kutaa qulqulluu sanatti aansaatii akka qabeenya ishee ta'uuf magaalaa sanaaf kennaa; innis mana Israa'el hundaaf ta'a.

⁷ "Bulchaan sunis lafa aanaa qulqulluu sanaatii fi qabeenya magaalaa gama lamaaninuun daangessitu tokko qabaata. Lafti sunis karaa lixaatiin gara lixaatti diriirtee karaa ba'aatiin immoo gara ba'aatti diriirtee kutaalee lafa gosaa keessaa tokko biraan daarii lixaatii hamma daarii ba'aatti dheeratti. ⁸ Lafti kun Israa'el keessatti handhuuraa isaa taati. Bulchitoonni koos akka manni Israa'el akkuma gosa isaaniitti lafa handhuuraa qabaatan godhu malee si'achi saba koo hin hakuucan.

⁹ "WAAQAYYO Gooftaan akkana jedha: Yaa bulchitoota Israa'el isin seera dabartaniirtu! Jeequmsaa fi hakuuccaa keessan dhiisaatii waan sirrii ta'ee fi qajeelaa hojjedhaa. Saba koo hin saaminaa, jedha WAAQAYYO Gooftaan. ¹⁰ Isin madaalii sirrii, iifii sirrii fi baadoosii* sirrii ta'etti fayyadamuu qabdu. ¹¹ Iifii fi baadoosiin wal qixxee ta'uu qabu; baadoosiin tokko homeerii† kudhan keessaa tokko, iifiin tokko immoo homeerii kudhan keessaa tokko qabata; kanaafuu homeeriin lachan isaaniitiifuu madaalii walii galaa ta'a. ¹² Saqiliin‡ tokko geeraa§ digdama qabata; saqiliin jaatamni immoo minnaanii* tokko ta'a.

Aarsaawwanii fi Guyyoota Ayyaanaa

¹³ "Kennaan isin dhi'eessuu qabdan kanaa dha: Tokkoo tokkoo qamadii homeerii tokkoo keessaa iifii qooda ja'a keessaa qooda tokko, tokkoo tokkoo garbuu homeerii tokkoo keessaa iifii qooda ja'a keessaa qooda tokko. ¹⁴ Zayitiin ajajame yoo baadoosiidhaan safarame, baadoosii qooda kudhan keessaa qooda tokko kan tokkoo tokkoo qoroosii† irraa fudhatamee dha. Qoroosiin tokko baadoosii kudhan yookaan homeerii tokko qabaata; baadoosiin kudhan homeerii tokkoon wal qixceedhaatii. ¹⁵ Akkasumas lafa tika Israa'el kan bishaan quufe irraa bushaayee dhibba lama keessaa hoolaa tokko haa fudhatu. Kun hundi akka sabaaf araari bu'uuf kennaa midhaanii, aarsaa gubamuu fi aarsaa nagaatiif ta'a, jedha WAAQAYYO Gooftaan. ¹⁶ Sabni biyyattii hundinuu kennaa kana bulchaa Israa'eliif ni kenna. ¹⁷ Yeroo ayyaanotaatti, yeroo Ayyaana Baatiitti, guyyoota Sanbataatti, yeroo ayyaanota mana Israa'eliif murteeffaman hunda aarsaa gubamu, kennaa midhaaniiti fi dhibaayyuu dhi'eessuun itti gaafatama bulchaa ti. Innis akka mana Israa'eliif araari bu'uuf aarsaa cubbuu, kennaa midhaanii, aarsaa gubamuu fi aarsaa nagaa ni dhi'eessa.

¹⁸ "WAAQAYYO Gooftaan akkana jedha: Guyyaa jalqabaa, ji'a jalqabaatti dibicha hir'ina hin qabne geessitee mana qulqullummaa ni qulqulleessita. ¹⁹ Lubichis dhiiga aarsaa cubbuu sana irraa waa fuudhee dhaabawwan balbala mana qulqullummaa irra, qarqara goleewwan iddoo aarsaa kanneen ol aannan afranii fi dhaabawwan karra oobdii kan gara keessaa irra dibuu qaba. ²⁰ Nama utuu itti hin yaadin yookaan utuu hin beekin cubbuu hojjetu kamiif iyyuu ji'a sana keessaa bultii torbaffaatti akkasuma gochuu qabdan; isin akkasitti mana qulqullummaa sanaaf araara buufu.

²¹ "Ji'a jalqabaa keessa, bultii kudha afuraffaatti isin Faasiikaa jechuunis ayyaana torban tokko turu ayyaanefattu; yeroo kanattis buddeena raacitii malee tolfame nyaatu. ²² Gaafas bulchaan sun ofii isaatii fi uummata biyyattii hundaaf dibicha tokko aarsaa cubbuu godhee dhi'eessuu qaba. ²³ Innis yeroo ayyaana bultii torbaa sana keessa guyyuma guyyaan korommii loonii torbaa fi korbeeyyii hoolaa torba kanneen hir'ina hin qabne aarsaa gubamu godhee, korbeessa re'ee tokko immoo aarsaa cubbuu godhee WAAQAYYOOF dhi'eessuu qaba. ²⁴ Tokkoo tokkoo dibicha looniitiif iifii tokko, tokkoo tokkoo korbeessa hoolaatiifis iifii tokko kennaa midhaanii godhee, zayitii iinii tokkoo tokkoo tokkoo iifii sanaatti dabalee qopheessuu qaba.

²⁵ "Yeroo ayyaana bultii torba turu kan ji'a torbaffaa keessa guyyaa kudha shanaffaatti jalqabamu sana keessa illee aarsaa cubbuutiif, aarsaa gubamuuf, kennaa midhaaniiti fi kan zayitiitiif akkasuma haa qopheessu.

* 45:10 45:10 Baadoosiin tokko liitiroo 40. † 45:11 45:11 Homeeriin tokko kiiloo giraamii 400. ‡ 45:12 45:12 Saqiliin tokko giraamii 11.5. § 45:12 45:12 Geeraan tokko giraamii 6. * 45:12 45:12 Minnaaniin tokko giraamii 600. † 45:14 45:14 Qoroosiin tokko kiiloo giraamii 400.

46

1 " 'WAAQAYYO Gooftaan akkana jedha: Karri oobdii gara keessaa kan ba'a biiftuutti garagalu guyyaa hojii ja'anuu cufamuu qaba; gaafa Sanbataatii fi guyyaa Ayyaana Baatii garuu banamuu qaba. ² Bulchaan sun karaa gardaafoo balbalaatiin ol galee dhaaba balbalaa bira dhaabachuu qaba. Luboonni immoo aarsaa isaa kan gubamuu fi aarsaa isaa kan nagaa dhi'eessuu qabu. Innis buusaa karraa duratti sagadee ergasii gad ba'uu qaba; karri sun garuu hamma galgalaatti hin cufamu. ³ Guyyoota Sanbataattii fi Baatii Haaraatti sabni biyyattii karra ittiin ol seenan irratti fuula WAAQAYYOO duratti sagaduu qaba. ⁴ Aarsaan gubamu kan bulchaan sun guyyaa Sanbataatiin WAAQAYYOO fidu xobbaallaawwan hoolaa ja'aa fi korbeessa hoolaa tokko, kanneen hundi isaanii mudaa hin qabne ta'uu qabu. ⁵ Kennaan midhaanii kan korbeessa hoolaa wajjin kennamu sun iifii* tokko, kennaan midhaanii kan xobbaallaawwan hoolaa wajjin kennamu immoo akkuma bulchaan sun fedhetti ta'ee tokkoo tokkoo iifii sanaatti zayitiin iiniin† tokko dabalamee dhi'effamuu qaba. ⁶ Innis guyyaa Baatii Haaraatti dibicha tokko, xobbaallaawwan hoolaa ja'aa fi korbeessa hoolaa tokko, kanneen hundi isaanii iyyuu mudaa hin qabne dhi'eessuu qaba. ⁷ Iifii tokko korma loonii wajjin, iifii tokko korbeessa hoolaa wajjin, xobbaallaawwan hoolaa wajjin immoo akkuma bulchaan sun kennuu fedhetti kenna midhaanii godhee tokkoo tokkoo iifii sanaatti zayitii iinii tokko dabalee dhi'eessuu qaba. ⁸ Bulchaan sun yeroo ol seenutti karaa gardaafoo karra sanaatiin seenuu, karuma sanaanis gad ba'u qaba.

⁹ " 'Yoo sabni biyyattii guyyaa ayyaana murteeffameetti fuula WAAQAYYOO duratti dhi'aatutti namni waqeffachuudhaaf karra gama kaabaatiin ol seenu kam iyyuu, karra gama kibbaatiin ba'uu qaba; namni karra gama kibbaatiin seenu kam iyyuus karra gama kaabaatiin ba'uu qaba; namni kam iyyuu karra karra sanatti dugda galee jiruun ba'uu qaba malee karra ittiin seene sanaan ba'uu hin qabu. ¹⁰ Bulchaan sun isaan gidduu jiraachuu qaba; inni yeroo isaan ol seenanitti seenee yeroo isaan gad ba'anitti ba'a.

¹¹ " 'Guyyoota ayyaanaatii fi ayyaanota murteeffamaniif, kennaan midhaanii iifii tokko dibicha tokko wajjin, iifii tokko korbeessa hoolaa tokko wajjin, xobbaallaawwan hoolaa wajjin immoo akkuma namichi sun kennuu fedhetti tokkoo tokkoo iifiitti zayitii iinii tokko dabalee dhi'eessuu qaba. ¹² Yommuu bulchaan fedhii isaatiin WAAQAYYOO aarsaa dhi'eessutti jechuunis yommuu aarsaa gubamu yookaan aarsaa nagaa dhi'eessutti karri gara ba'a biiftuutti garagaluu isaaf banamuu qaba. Inni akkuma guyyaa Sanbataa godhu sana aarsaa isaa kan gubamu yookaan aarsaa isaa kan nagaa dhi'eessuu qaba. Ergasii inni ba'ee deema; erga inni deeme booddee karri sun ni cufama.

¹³ " 'Ati guyyuma guyyaan xobbaallaa hoolaa waggaa tokkoo kan mudaa hin qabne aarsaa gubamu gootee WAAQAYYOO dhi'eessuu qabda; waan kanas ganama ganama dhi'eessita. ¹⁴ Kana wajjinis daakuu midhaanii iifii ja'a keessaa tokko, daakuu sana jiisuufis zayitii iinii sadii keessaa tokko itti dabaltee ganama ganama kenna midhaanii dhi'eessuu qabda; kenna midhaanii kana WAAQAYYOO dhi'eessuun sirna baraa baraa ti. ¹⁵ Kanaafuu xobbaallaan hoolaa, kennaan midhaaniitii fi zayitiin aarsaa gubamu kan yeroo hundaatiif ganama ganama haa dhi'effamu.

¹⁶ " 'WAAQAYYO Gooftaan akkana jedha: Yoo bulchaan sun dhaala isaa irraa ilmaan isaa keessaa isa tokkoof kenne dhaalli sun sanyii isaatiifis ni ta'a; kunis dhaalaan handhuuraa isaanii ta'a. ¹⁷ Haa ta'u malee yoo bulchaan sun dhaala isaa irraa garboota isaa keessaa isa tokkoof kenne garbichi sun hamma waggaa inni itti bilisoomu ga'utti kan isaa ti; sana booddee dhaalli sun bulchaa sanaaf deebi'a. Dhaalli isaa ilmaan isaa qofaaf ta'a; dhaalli sun kan isaanii ti. ¹⁸ Bulchaan sun qabeenya isaa irraa isaan buqqisee dhaala sabaa kam iyyuu fudhachuu hin qabu. Akka sabni koo kam iyyuu qabeenya isaa irraa hin buqqifamneefis inni qabeenya isaa irraa ilmaan isaatiif dhaala isaanii kennuu qaba.'"

¹⁹ Ergasii namichi sun balbala isa karra gara dareewwan qulqulluu gara kaabaatti garagalanii jiran kanneen lubootaaf kennamanitti geessu cina jiru keessaan na baasee moggaa gara dhi'aa'atiin iddoo tokko natti argisiise. ²⁰ Innis akkana naan jedhe; "Iddoon kun iddoo itti luboonni uummata qulqulleessuuf jedhanii akka aarsaan gara oobdii alaatti gad hin baafamneef aarsaa yakkaatii fi aarsaa cubbuu bilcheessanii kenna midhaanii immoo itti tolchanii dha."

²¹ Innis ergasii gara oobdii alaatti na baasee golee isaa afran irra na naannesse; ani immoo tokkoo tokkoo golee sanaa keessatti oobdii biraa nan arge. ²² Goleewwan oobdii alaa afran keessa oobdiiwwan xixinnaatu ture; isaanis lafa irra dheerina dhundhuma

* 46:5 46:5 Iifin tokko kiiloo giraamii 40. † 46:5 46:5 Iiniin tokko liitiroo 6.

afurtamaa fi bal'ina dhundhuma soddoma qabu; bal'inni tokkoo tokkoo oobdiwwan goleewwan afran keessa jiranii wal qixxee ture. ²³ Naannoo tokkoo tokkoo goleewwan afranii keessa marsaa dhagaa kan naannoo isaa jalatti iddoon ibiddaa jiru tokkodu ijaamee ture. ²⁴ Innis, "Isaan kunneen manneen warri mana qulqullummaa keessa tajaajilan aarsaawwan sabaa itti bilcheessanii dha" naan jedhe.

47

Laga Mana Qulqullummaatii Yaa'u

¹ Namichi sun deebisee gara balbala mana qulqullummaatti na fide; anis bishaan gulantaa mana qulqullummaa jalaa ba'ee gara ba'a biiftuutti yaa'u nan arge; manni qulqullummaa sun gara ba'a biiftuutti garagala tureetii. Bishaan sunis kibba mana qulqullummaa jalaa ba'ee kibba iddoo aarsaatiin gad yaa'a ture. ² Ergasii karaa balbala kaabaatiin na baasee ala keessa na naannessee gara karra alaa kan gara ba'a biiftuutti garagalee jiruutti na fide; bishaan sunis karaa kibbaatiin yaa'a ture.

³ Namichi sunis funyoo ittiin safaru harkatti qabatee gara ba'a biiftuutti deemuudhaan dhundhuma kuma tokko safare; ergasiis bishaan koronyoo ga'u keessa na deemsise. ⁴ Ammas dhundhuma kuma tokko safaree bishaan jilba ga'u keessa na deemsise; itti aansees dhundhuma kuma tokko safaree bishaan mudhii ga'u keessa na deemsise. ⁵ Ammas inni dhundhuma kuma tokko safare; sababii bishaan sun guutee tureef ani laga sana ce'uu hin dandeenye; lagni sun daakuudhaaf akka malee gad fagoo waan ta'eef namni tokko iyyuu ce'uu hin danda'u ture. ⁶ Innis, "Yaa ilma namaa, waan kana argitaa?" naan jedhe.

Ergasii inni deebisee gara afaan lagaatti na fide. ⁷ Anis yommuun achi ga'etti bitaa fi mirga laga sanaatti mukkeen hedduu nan arge. ⁸ Innis akkana naan jedhe; "Bishaan kun gara biyya ba'a biiftuutti yaa'ee gara Arabbaatti bu'ee galaanatti makama. Yommuu galaanatti makamuttis bishaan sun ni qulqullaa'a. ⁹ Iddoo lagni sun itti yaa'u hunda uumamawwan lubbuu qabeeyyiin ni jiraatu ture. Sababii bishaan kun achi yaa'ee bishaan qulqulleessuuf, qurxummiin baay'inaan argama; kanaafuu lafa bishaan sun itti yaa'u wanni hundi ni jiraata. ¹⁰ Qurxummii qabdoonni qarqara bishaanii dhadhaabatu; lafti Een Gaadiidhaa hamma Een Eglayiimiitti jiru lafa itti kiyyoo diriirsan ta'a; qurxummiin isaa akka qurxummii Galaana Meeditiraaniyaan gosa adda addaa qabaata. ¹¹ Raaree fi caffaan garuu hin qulqullaa'u; isaanis soogidda ta'anii hafu. ¹² Mukkeen ija naqatan gosti hundinuu bitaa fi mirga qarqara laga sanaatti ni guddatu. Baalawwan isaanii hin gogan yookaan ija hin dhaban. Sababii bishaan iddoo qulqulluudhaa gara isaaniitti yaa'uuf mukkeen sun ji'a ji'aan ija naqatu. Iji isaanii nyaataaf, baalli isaanii immoo nama fayyisuuf fayyada."

Daangaawwan Biyyattii

¹³ WAAQAYYO Gooftaan akkana jedha: "Daangaawwan kunneen daangaawwan isin ittiin biyyattii dhaala gootanii gosoota Israa'el kudha lamaaniif qoqqoodanii dha; Yoosef qooda lama haa argatu. ¹⁴ Isin wal qixxeessitanii isaaniif qoqqooduu qabdu. Sababii ani abbootii keessanii kennuuf harka ol kaafameen kakadheef biyyattiin kun dhaala keessan ni taati.

¹⁵ "Daangaan biyyattii kanaa dha:

"Karaa kaabaatiin Galaana Meeditiraaniyaanii kaasee daandii Hetilooniitiin karaa Haamaat darbee hamma Zedaadi ga'utti, ¹⁶ Beerootaanii fi Sibraayim isa daangaa Damaasqootii fi Hamaatii gidduutti argamu irraa hamma Hazeer Hatiikoon isa daangaa Hawiraanii irratti argamu sanaa ga'a. ¹⁷ Daangaan kun galaana irraa ka'ee karaa kaabaatiin daangaa Damaasqoo qabatee, daangaa Hamaatis gara kaabaati dhisee hamma Hazar Eenooniitti deema. Kunis daangaa kaabaa ta'a.

¹⁸ Daangaan sun karaa ba'a biiftuutiin Hawiraanii fi Damaasqoo gidduu ba'ee Yordaanosin qabatee Gili'aadii fi biyya Israa'el gidduudhaan karaa Galaana ba'a biiftuutiin hamma Taamaaritti deema. Kunis daangaa ba'a biiftuu ni ta'a.

¹⁹ Innis karaa kibbaatiin Taamaarii ka'ee hamma bishaan Mariibaa Qaadeshiitti deema; ergasiis laga Gibxi qabatee hamma Galaana Guddichaatti deema. Kun daangaa kibbaa ta'a.

²⁰ Karaa lixaatiin immoo hamma iddoo fuullee Hamaati jiru tokkootti Galaanni Meeditiraaniyaan daangaa isaa ni ta'a. Kunis daangaa lixaa ni ta'a.

²¹ "Isinis akkuma baay'ina gosoota Israa'elitti biyya kana ni qoqqooddattu. ²² Isin ofii keessanii fi alagoota isin gidduu jiraatan kanneen ijoollee qabaniif biyyattii dhaala godhaatii ixaadhaan qoqoodaa. Akka dhalatoota Israa'elittis isaan ilaalaa; isaanis isin wajjin gosoota Israa'el gidduutti ixaadhaan dhaala qooddachuu qabu. ²³ Isin alagaa gosa kam iyyuu keessa qubateef dhaala isaa kennuufii qabdu" jedha WAAQAYYO Gooftaan.

48

Qoqqoodamuu Biyyattii

¹ "Gosoonni maqaan isaanii galmeeffame kanneenii dha:

"Karaa daarii kaabaatiin gosti Daan qooda tokko qabaata; kunis daandii Hetiloon qabatee hamma qaxxaamura Hamaatitti deema; Hazar Eenaanii fi daariin Damaasqoo kan gara kaabaa inni Hamaatitti aanee jiru daarii isaa kan karaa ba'aatii jalqabee hamma karaa lixa biiftuutti jiruu ta'a.

² Gosti Aasheer qooda tokko qabaata; kunis biyya Daan kan ba'aa hamma lixaatti jiru daangessa.

³ Gosti Niftaalem qooda tokko qabaata; kunis biyya Aasheer kan ba'aa hamma lixaatti jiru daangessa.

⁴ Gosti Minaasee qooda tokko qabaata; kunis biyya Niftaalem kan ba'aa hamma lixaatti jiru daangessa.

⁵ Gosti Efreem qooda tokko qabaata; kunis biyya Minaasee kan ba'aa hamma lixaatti jiru daangessa.

⁶ Gosti Ruubeen qooda tokko qabaata; kunis biyya Efreem kan ba'aa hamma lixaatti jiru daangessa.

⁷ Gosti Yihuudaa qooda tokko qabaata; kunis biyya Ruubeen kan ba'aa hamma lixaatti jiru daangessa.

⁸ "Biyyi ba'a biiftuutti gara lixa biiftuutti Yihuudaa daangessu qooda isin kennaa addaa gootanii dhi'eessuu qabdani dha. Bal'inni isaas dhundhuma 25,000, dheerinni isaa immoo ba'a biiftuutti gara lixa biiftuutti qooda gosaa keessaa isa tokko wajjin wal qixxee ta'a; iddoon qulqulluun sunis biyya sana gidduutti argama.

⁹ "Qoodni addaa kan isin WAAQAYYOOF dhi'eessuu qabdan dheerinni isaa dhundhuma 25,000, bal'inni isaa immoo dhundhuma 10,000 ta'a. ¹⁰ Kunis lubootaaf qooda qulqulluu ta'a. Innis karaa kaabaatiin dhundhuma 25,000 dheerata; karaa lixa biiftuutiin dhundhuma 10,000 bal'ata; karaa ba'a biiftuun dhundhuma 10,000 bal'ata; karaa kibbaatiin immoo dhundhuma 25,000 dheerata. Manni qulqullummaa WAAQAYYOOS gidduu isaatti argama. ¹¹ Kunis luboota qulqullaa'oo jechuunis ilmaan Zaadoq kanneen amanamummaadhaan na tajaajilaa turan kanneen yeroo Israa'eloonni karaa irraa badanitti akka Lewwonni karaa irraa badan sana karaa irraa hin badin sanaaf ta'a. ¹² Innis qooda biyyattii isa qulqulluu irraa jechuunis qooda qulqulluu kan qooda hunda caalaa qulqulluu ta'e irraa kan biyya Lewwotaa daangessu sun isaaniiif kennaa addaa ta'a.

¹³ "Biyya lubootaa biraan Lewwonni lafa dheerinni isaa dhundhuma 25,000, bal'inni isaa immoo dhundhuma 10,000 qabaatu. Walumaa galatti dheerinni isaa dhundhuma 25,000 bal'inni isaa immoo dhundhuma 10,000 ta'a. ¹⁴ Isaanis lafa sana irraa waan tokko illee gurguruu yookaan geeddaruu hin qaban. Lafti kun biyyattii keessaa filatamaa dha; sababii WAAQAYYOOF qulqulluu ta'eefis harka nama biraatti darbuu hin qabu.

¹⁵ "Lafti hafe kan bal'inni isaa dhundhuma 5,000, dheerinni isaa immoo dhundhuma 25,000 ta'e faayidaa magaalattiitiif oola; kunis ijaarsa manneeniitii fi lafa dheedaatiif ta'a. Magaalattiin immoo isa gidduu jiraatti; ¹⁶ magaalattiinis karaa kaabaatiin dhundhuma 4,500, karaa kibbaatiin dhundhuma 4,500, karaa ba'aatiin dhundhuma 4,500 karaa lixaatiinis dhundhuma 4,500 bal'atti. ¹⁷ Magaalattiin kaabaan dhundhuma 250, kibbaan dhundhuma 250, ba'aan dhundhuma 250, dhi'aanis dhundhuma 250 lafa dheedaa ni qabaatti. ¹⁸ Wanni lafa sana irraa hafe kan kutaa qulqulluu daangessuu fi dheerina lafa sanaa qabatee jiru karaa ba'aatiin dhundhuma 10,000, karaa dhi'aatiin illee dhundhuma 10,000 ni ta'a. Oomishni lafa sanaas hojjetoota magaalattiitiif nyaata ni ta'a. ¹⁹ Hojjettoonni magaalattii kanneen lafa qotatan gosoota Israa'el hunda keessaa dhufu. ²⁰ Kutaan lafa sanaa hundi roga wal qixxee afur qabaata; tokkoon tokkoon roga sanaas dhundhuma 25,000 ta'a. Qabeenya magaalaa wajjinis akka kennaa addaa ta'uuf kutaa qulqulluu hambisaa.

²¹ “Wanni karaa kutaa qulqulluu lamaanii fi qabeenya magaalattii irraa hafe bulchaa sanaaf ta’a. Innis karaa ba’aa kutaa qulqulluu kan dhundhuma 25,000 dheeratu sana irraa jalqabee gara daangaa ba’aatti, karaa dhi’aa immoo lafa dhundhuma 25,000 dheeratu sana irraa jalqabee gara daangaa dhi’aatti bal’ata. Lafti dheerina qoodawwan gosaa qabatee jiru sun lamaan bulchaa sanaaf ta’a; kutaan qulqulluun iddoo qulqulluu kan mana qulqullummaa wajjin jiru sun isaan gidduutti argama. ²² Kanaafuu qabeenyi Lewwotaatii fi qabeenyi magaalattii lafa bulchaa sanaaf kenname sana walakkaatti argama. Lafti bulchaa sanaaf kenname sunis daangaa Yihuudaatii fi daangaa Beniyaam gidduutti argama.

²³ “Qoodni gosoota hafanii kan armaan gad jiruu dha:

“Gosti Beniyaam qooda tokko qabaata; kunis gara ba’aatii hamma gara dhi’aatti bal’ata.

²⁴ Gosti Simi’oon qooda tokko qabaata; kunis ba’aa hamma lixaatti biyya Beniyaam daangessa.

²⁵ Gosti Yisaakorii qooda tokko qabaata; kunis ba’aa hamma lixaatti biyya Simi’oon daangessa.

²⁶ Gosti Zebuuloon qooda tokko qabaata; kunis ba’aa hamma lixaatti biyya Yisaakor daangessa.

²⁷ Gosti Gaad qooda tokko qabaata; kunis ba’aa hamma lixaatti biyya Zebuuloon daangessa.

²⁸ Daangaan Gaad kan karaa kibbaa sun Taamaarii jalqabee hamma bishaan Mariibaa Qaadeshiitti, ergasiis ededa Laga Gibxi irra hamma Galaana Guddichaatti gara Kaabaa deema.

²⁹ “Kunis biyya isin dhaala gootanii ixaadhaan gosoota Israa’eliif qoqqooduu qabdaniid dha; isaan kunneenis qoodawwan isaanii ta’an” jedha WAAQAYYO Gooftaan.

Karrawwan Magaalaa Sanaa

³⁰ “Karrawwan magaalaa sana keessaa ittiin ba’an kanneenii dha:

“Karaa kaabaatii jalqabee kan dhundhuma 4,500 dheeratu, ³¹ karrawwan magaalaa sanaa maqaa gosoota Israa’eliin moggaafamu. Karrawwan sadan karaa kaabaatiin jiran karra gosa Ruubeen, karra gosa Yihuudaa fi karra gosa Lewwii ta’u.

³² Karaa ba’aa karrawwan dhundhuma 4,500 dheeratan sadiitu jira; isaanis karra Yoosef, karra Beniyaamii fi karra Daan.

³³ Karaa kibbaa karrawwan dhundhuma 4,500 dheeratan sadiitu jira; isaanis karra Simi’oon, karra Yisaakorii fi karra Zebuuloon.

³⁴ Karaa dhi’aa karrawwan dhundhuma 4,500 dheeratan sadiitu jira; isaanis karra Gaad, karra Aasheerii fi karra Niftaalem.

³⁵ “Naannoon magaalaa sanaa guutumaan guutuutti dhundhuma 18,000 ta’a.

“Maqaan magaalaa sanaas yeroo sanaa jalqabee, ‘WAAQAYYO achi jira ta’a.’”

Raajii Daani'el

Daani'el Baabilon keessatti Leenjifame

¹ Bara Yehooyaaqii mooticha Yihuudaa keessa, waggaa sadaffaatti Nebukadnezar mootiin Baabilon dhufee Yerusaalemin marse. ² Gooftaanis Yehooyaaqii mooticha Yihuudaa mi'oota mana qulqullummaa Waaqaa tokko tokko wajjin dabarsee harka isaatti kenne. Mi'oota kanneenis gara mana Waaqa isaa, gara Baabilonitti geeffatee mankuusaa mana Waaqa isaa keessa kaa'ate.

³ Mootichis ergasii Ashfenaz itti gaafatamaa qondaaltota isaa sana waamee akka inni Israa'eloota sanyii mootootaati fi maatii ulfina qabeeyyii ta'an tokko tokko ol galchu ajaje; ⁴ isaanis dargaggeeyyii hir'ina dhagnaa hin qabne, babbareedoo, kanneen barumsa gosa kamii iyyuu barachuuf dandeettii ogummaa qaban, kanneen beekumsaan badhaadhan, kanneen waan hunda hubachuu danda'anii fi masaraa mootummaa keessa tajaajiluuf ga'umsa qaban turan. Innis afaanii fi katabbii Baabilonotaa isaan barsiisuu qaba ture. ⁵ Mootichis nyaataa fi daadhii wayinii kan guyyaa guyyaatti isaan barbaachisu maaddii mootummaa irraa isaanii ajaje. Isaanis tajaajila mootichaa seenuuf waggaa sadii leenjifamuu qabu ture.

⁶ Isaan kanneen keessaa warri Yihuudaadhaa dhufan Daani'el, Hanaaniyaa, Miishaa'eelii fi Azaariyaa turan. ⁷ Itti gaafatamaan qondaaltotaa sun Daani'eliin Beelxishaazaar, Hanaaniyaadhaan Shaadraak, Miishaa'eelin, Meeshak, Azaariyaadhaan immoo Abdanaagoo jedhee maqaa haaraa baaseef.

⁸ Daani'el garuu nyaataa fi daadhii wayinii mootichaatiin of xureessuu dide; innis akkasiin akka of hin xureessineef itti gaafatamaa qondaaltotaa sana eeyyama gaafate. ⁹ Waaqnis yeroo kanatti akka Daani'el fuula qondaala sanaa duratti surraa fi gara laafina argatu godhe; ¹⁰ qondaalli sun garuu Daani'eliin, "Ani gooftaa koo isa nyaataa fi dhugaatii keessan isiniif ramade sana nan sodaadha; inni maaliif dargaggoota hiriyoota keessan kaan caalaa huqqattanii isin arga? Kanaan isin mootichi balaa mataa kootti fidhu" jedhe.

¹¹ Kana irratti Daani'el waardiyyaa itti gaafatamaan qondaaltotaa sun Daani'elii fi Hanaaniyaa irratti, Miishaa'eelii fi Azaariyaa irratti muude Meldaariin akkana jedhe; ¹² "Maaloo tajaajiltoota kee bultii kudhaniif ilaali; biqiltuu nyaatamuu fi bishaan dhugamu malee waan biraa nuuf hin kennin. ¹³ Sana booddee bifa keenyaa fi bifa dargaggoota nyaata mootii nyaatanii wal biratti ilaali; waan argite irratti hundaa'iitii tajaajiltoota kee irratti waan feete murteessi." ¹⁴ Innis yaada kana fudhatee bultii kudhan isaan qore.

¹⁵ Dhuma bultii kurnan sanaattis isaan dargaggoota nyaata mootii nyaatan sana caalaa fayyaaleyyii fi warra dhagni isaanii furdatee miidhage ta'anii argaman. ¹⁶ Kanaafuu waardiyyaan sun qooda nyaata filatamaa fi daadhii wayinii kan isaan dhuguu qaban sanaa raafuu qofa isaanii kenne.

¹⁷ Waaqnis dargaggoota afran kanneeniif barumsaa fi ogummaa hunda keessatti beekumsaa fi dandeettii kenneef. Daani'elis mul'ataa fi abjuu hunda hubachuu danda'a ture.

¹⁸ Yommuu guyyaan mootichi akka isaan gara isaatti dhi'aatan murteesse ga'ettis, qondaalli hangaftichi fuula Nebukadnezar duratti isaan dhi'eesse. ¹⁹ Mootichis isaan haasofsiise; innis nama Daani'eliin, Hanaaniyaan, Miishaa'eelii fi Azaariyaan qixxaatu tokko illee hin arganne; kanaafuu isaan hojii mootichaa jalqaban. ²⁰ Mootichis waa'ee ogummaa fi beekumsaa kan isaan gaafate hundaan akka isaan ilaaltotaa fi falfaloota biyyattiitti argaman hunda harka kudhan caalan arge.

²¹ Daani'elis hamma waggaa tokkoffaa Qiros mootichaatti achuma ture.

2

Abjuu Nebukadnezar

¹ Nebukadnezar bara mootummaa isaa keessa, waggaa lammaffaatti abjuu abjoote; hafuurri isaa jeeqamee hirribas rafuu dadhabe. ² Kanaafuu mootichi akka isaan abjuu inni abjoote sana itti himaniif tolchitoota, mortoota, falfalootaa fi warra urjii ilaalan waamsise; isaanis ol galanii fuula isaa dura dhadhaabatan; ³ mootichis, "Ani abjuu na dhiphise tokko nan abjoodhe; hiikkaa abjuu sanaa maal akka ta'e beekuu nan barbaada" jedheen.

⁴ Kana irratti warri urjii ilaalan sun afaan Araamaayikiitiin mootichaana, “Yaa mootii, bara baraan jiraadhu! Abjuu kee tajaajiltoota keetti himi; nu siif hiikkaa” jedhanii mootichaaf deebisan.

⁵ Mootichis warra urjii ilaalan sanaan akkana jedhe; “Ani waan kana murteesseera: Yoo isin abjuu koo fi hiikkaa isaa natti himuu baattan ani isinan kukkuta; manneen keessanis tuulaa waan dagaamee ta’u. ⁶ Garuu yoo abjuu sanaa fi hiikkaa isaa natti himtan isin kennaa, badhaasaa fi ulfina guddaa narraa argattu. Kanaafuu abjuu sanaa fi hiikkaa isaa natti himaa.”

⁷ Isaan amma illee deebisanii, “Mootichi abjuu isaa tajaajiltoota isaatti haa himu; nu ni hiikkaaf” jedhan.

⁸ Kana irratti mootichi akkana jedhee deebiseef; “Ani akka isin sababii waan ani cimsee murteesse beektaniif, akka isin yeroo dheeressuu yaalaa jirtan hubadheera: ⁹ Yoo isin abjuu sana natti himuu baattan, adabbii tokkoto isin eeggata. Isin waan haalli geeddaramu seetanii dubbii dogoggorsaa fi hamaa natti himuu mari’attaniiru. Kanaafuu abjuu sana natti himaa; anis akka isin hiikkaa isaa natti himuu dandeessan kanaan nan beekaa.”

¹⁰ Warri urjii ilaalan sunis akkana jedhanii mootichaaf deebise; “Namni waan mootichi gaafate kana hojjechuu danda’u tokko iyyuu lafa irratti hin argamu! Mootiin kam iyyuu hammuma fedhee guddaa fi jabaa ta’u illee tolchituu, moortuu yookaan warra urjii ilaalu kam iyyuu gaaffii akkanaa gaafatee hin beeku. ¹¹ Wannii mootichi gaafate akka malee rakkisaa dha. Waaqota malee namni tokko iyyuu waan kana mootichaaf ibsuu hin danda’u; isaan immoo namoota gidduu hin jiraatan.”

¹² Wannii kunis mooticha akka malee aarse; isa dallansiisees akka inni ogeeyyii Baabilon hundatti murtii du’aa muru godhe. ¹³ Kanaafuu akka namoonni ogeeyyiin hundi ajjeefaman labsiin ba’e; namoonnis akka Daani’elii fi michoota isaa barbaadanii ajjeesaniif ergaman.

¹⁴ Yommuu Ariyook itti gaafatamaan eegumsa mootichaa namoota Baabilon ogeeyyii ajjeesuuf ba’etti, Daani’el ogummaa fi malaan isa haasofsiise. ¹⁵ Innis qondaala mootichaatiin, “Mootichi maaliif labsii cimaa akkasii baase?” jedhee gaafate. Ariyookis waan sana Daani’elitti hime. ¹⁶ Kana irratti Daani’el ol seenee akka abjuu sana isaaaf hiikuuf akka mootichi yeroo isaa kennu gaafate.

¹⁷ Ergasii Daani’el gara mana isaatti deebi’ee waan sana michoota isaa Hanaaniyaatti, Miisaa’elii fi Azariyaatti hime. ¹⁸ Kanaafuu akka innii fi michoonni isaa ogeeyyiin Baabilon kaan hin ajjeefamneef akka isaan waa’ee icciitii kanaa Waaqa samii araara kadhahan isaan akeekkachiise. ¹⁹ Halkan sanas icciitiin sun mul’ataan Daani’elitti mul’ifame. Ergasii Daani’el Waaqa samii galateeffatee ²⁰ akkana jedhe:

“Maqaan Waaqaa bara baraa

hamma bara baraatti haa eebbifamu;

ogummaanii fi humni kan isaa ti.

²¹ Inni barootaa fi waqtiilee ni geeddara;

mootota teessoo irra ni teessisa; irraa buusas.

Inni ogeeyyiif ogummaa,

beektotaafis hubannaa ni kenna.

²² Inni waan gad fagoo fi waan dhokfame ni mul’isa;

waan dukkana keessa jiru ni beeka;

ifnis isa wajjin jiraata.

²³ Yaa Waaqa abbootii ko, ani sin galateeffadha; sin jasadhas:

Ati ogummaa fi humna naa kenniteerta;

waan nu si kadhanne na beeksifteerta;

ati abjuu mootichaa nu beeksifteerta.”

Daani’el Abjuu sana Hiike

²⁴ Daani’elis Ariyook isa mootichi akka inni ogeeyyii Baabilon ajjeesuuf ajaje sana bira deeme, “Ati ogeeyyii Baabilon hin ajjeesin. Mooticha biratti na geessi; ani abjuu isaa nan hiikaaf” jedheen.

²⁵ Ariyookis Daani’elin mooticha bira geessee, “Ani booji’ amtoota Yihuudaa keessaa nama hiikkaa abjuu mootichaa himuu danda’u tokko argeera” jedheen.

²⁶ Mootichis Daani’el isa Beelxishaazaar jedhame sanaan, “Ati abjuu ani argee fi hiikkaa isaa natti himuu dandeessaa?” jedhe.

²⁷ Daani’elis deebisee akkana jedhe; “Namni ogeessi kam iyyuu, mortuun, tolchituu yookaan ilaaltuun icciitii waan mootichi gaafate sanaa ibsuu danda’u tokko iyyuu hin jiru; ²⁸ garuu Waaqni icciitii mul’isuu tokko samii irra jira. Innis wantoota baroota

dhufan keessa ta'an Nebukadnezar mootichatti argisiiseera. Abjuun keetii fi mul'anni utuu ati siree kee irra ciiftuu yaada keetti dhufe kanaa dha:

²⁹ "Yaa mooticha utuu ati ciiftee jirtuu wanni gara fuula duraatti ta'uuf jiru yaada keetti dhufe; inni icciitii mul'isus waan fuula duratti ta'u sitti argisiise. ³⁰ Yaa mootii, akka kooti sababiin icciitiin kun natti mul'ateef ani namoota jiraato kaan caalaa ogummaa qabaadheef utuu hin ta'in, akka ati hiikkaa isaa beektee waan yaada kee keessa jiru hubattuuf.

³¹ "Yaa mootii, ati ni ilaalte; fuula kee duras fakkii guddaa jechuunis fakkii akka malee guddaa, bifa calaqqisaa fi sodaachisaa tokkotu ture. ³² Mataan fakkii sanaas warqee qulqulluu irraa, qomaa fi irreen isaa meetii irraa, garaa fi tafni isaa naasii irraa hojjetaman; ³³ miilli isaa sibiila irraa, faanni isaa gartokko sibiila irraa, gartokko immoo suphee irraa hojjetame. ³⁴ Utuma ati ilaalaa jirtuu dhagaan tokko utuu harki namaa hin tuqin fottogee. Innis miilla fakkii sanaa kan sibiilaa fi suphee irraa hojjetame dha'ee caccabse. ³⁵ Ergasii sibiilli, supheen, naasii, meetii fi warqeen sun yeruma tokkotti caccabanii akkuma habaqqii yeroo bonaa oobdii irra jiruu ta'an. Bubbeenis utuu waan tokko illee hin hambisin haree deeme. Dhagaan fakkii sana caccabse sun garuu tulluu guddaa ta'ee lafa hunda guute.

³⁶ "Abjuun sun kana ture; nus mootichaaf ni hiikna. ³⁷ Yaa mootii, ati mootii moototaa ti. Waaqni samii mootummaa fi humna, jabinaa fi ulfina siif kenneera; ³⁸ inni sanyii namaa, bineensota bosonaatii fi simbirroota samii dabarsee harka keetti siif kenneera. Lafa isaan jiraatani kamitti iyyuu hunda isaanii irratti bulchaa si godheera. Ati mataa warqee ti.

³⁹ "Si'iin duuba mootummaan mootummaa keetii gadii biraa tokko ni ka'a. Itti aansee mootummaan Naasii sadaffaan kan tokko guutummaa lafaa ni bulcha. ⁴⁰ Dhuma irrattis mootummaan afuraffaan akkuma sibiilaa jabaa ta'e tokko ni ka'a; sibiilli waan hunda caccabsee bulleessaatii; mootummaan kunis akkuma sibiilli waan hunda caccabsee balleessu sana mootummoota isa duraan turan hunda caccabsee ni bulleessa. ⁴¹ Akkuma ati akka faannii fi qubni miilla isaa gartokko suphee, gartokko immoo sibiila ta'e argite sana mootummaan kun mootummaa gargar qoodame ta'a; ta'us inni akkuma sibiila gartokkeen isaa supheedhaan makame kan ati argite sanaa jabina sibiilaa of keessaa ni qabaata. ⁴² Akkuma qubni miillaa sun gartokko sibiila, gartokko immoo suphee ta'e sana mootummaan kunis gartokko jabaa, gartokko immoo dadhabaa ta'a. ⁴³ Akkuma ati sibiila supheedhaan wal make argite sana uummanni kunis walmakaa ta'a; innis si'achi sibiilaa fi supheen walitti makame sana caalaa tokko ta'ee hin jiraatu.

⁴⁴ "Bara mootota sanaa keessa, Waaqni samii mootummaa gonkumaa hin diigamne yookaan saba biraatiif hin kennamne hundeessa. Innis mootummoota duraa sana ni barbadeessa; hamma dhumaattis isaan balleessa; inni mataan isaa garuu bara baraan jabaatee ni dhaabata. ⁴⁵ Hiikkaan mul'ata dhagaa utuu harka namaatiin hin ta'in ofuma isaatiin tulluu irraa fottogee sibiila, naasii, suphee, meetii fi warqee caccabse sanaa kanaa dha.

"Waaqni guddaan waan gara fuula duraatti ta'u mootichatti argisiiseera. Abjuun sun dhugaa dha; hiikkaan isaas amanamaa dha."

⁴⁶ Nebukadnezar mootichi addaan lafatti gombifamee Daani'eliif sagade; ulfinas kenneef; akka aarsaa fi ixaana isaaf dhi'eessanis ajaje. ⁴⁷ Mootichis Daani'eliin, "Ati dhoksaa kana mul'isuu dandeesseeraatii dhugumaan Waaqni kee Waaqa waaqotaatii fi Gooftaa moototaa kan dhoksaa mul'isuu dha" jedhe.

⁴⁸ Ergasii mootichi Daani'eliif taayitaa guddaa kennee, kennaa akka malee baay'ees itti dhangaalase. Bulchaa guutummaa kutaalee biyyaa Baabilon isa godhee namoota Baabilon hunda irratti isa muude. ⁴⁹ Daani'el mooticha kadhannaan mootichi Shaadraak, Meeshakii fi Abdanaagoo bulchitoota biyya Baabilon godhee muude. Daani'el garuu mana mootichaa keessatti hafe.

3

Fakkii Warqetii fi Boolla Ibidaa

¹ Nebukadnezar Mootichi fakkii warqee kan dheerinni isaa dhundhuma jaatamaa fi bal'inni isaa dhundhuma ja'aa hojjetee kutaa biyyaa Baabilon keessa dirree Duuraa jedhamu irra dhaabe. ² Ergasii mootichi akka isaan eebba fakkii inni dhaabe sanaa irratti argamaniif ilmaan mootota, muudamoota, bulchitoota gorsitoota, itti gaafatamtoota mankuusa qabeenyaa, abbootii murtii, hayyoota seeraatii fi qondaaltota biyya hundaa waame. ³ Kanaafuu eebba fakkii Nebukadnezar Mootichi dhaabe sanaa irratti argamuuf ilmaan moototaa, muudamoorni, bulchitoorni, gorsitoorni, itti

gaafatamtoonni mankuusa qabeenyaa, abbootiin murtii hayyoonni seeraa biraatii fi qondaaltonni biyyaa hundi walitti qabamanii fuula fakkii sanaa dura dhadhaabatan.

⁴ Kana irratti labsituun tokko akkana jedhee sagalee guddaadhaan labse; “Yaa namoota, sabootaa fi namoonni afaan garaa garaa dubbattan hundi, wanni isin akka gootan ajajamtan kanaa dha: ⁵ Isin akkuma sagalee gaanfaa, ulullee, masiinqoo, kiraaraa, baganaa, kan faaggaatii fi sirbaa dhageessaniin addaan lafatti gombifamanii fakkii warqee kan Nebukadnezar Mootichi dhaabeef sagaduu qabdu. ⁶ Namni addaan lafatti gombifamee hin sagadne kam iyyuu yoosuma boolla ibiddi keessaa balali’utti darbatama.”

⁷ Kanaafuu namoonni, saboonni fi namoonni afaan garaa garaa dubbatan hundi yommuu sagalee gaanfaa, ulullee, masiinqoo, kiraaraa, baganaa fi sirbaa hunda dhaga’anitti addaan lafatti gombifamanii fakkii warqee kan Nebukadnezar Mootichi dhaabe sanaaf sagadan.

⁸ Yeroo kanatti Kaldoonni tokko tokko gara fuula duraatti dhufanii dabaan Yihuudoota himatan. ⁹ Isaanis Nebukadnezar Mootichaan akkana jedhan; “Yaa mootii, ati bara baraan jiraadhu! ¹⁰ Yaa mootii, ati akka namni kam iyyuu yommuu sagalee gaanfaa, ulullee, masiinqoo, kiraaraa, baganaa kan faaggaatii fi kan sirbaa dhaga’u kam iyyuu addaan lafatti gombifamee fakkii warqee sanaaf sagaduu qabu seera baafteerta; ¹¹ akka namni lafatti gombifamee sagaduu didu kam iyyuus boolla ibiddi keessaa balali’utti darbatamu seera baafteerta. ¹² Garuu yaa Mooticha, Yihuudoonni ati dhimma biyya Baabilon irratti muudde tokko tokko ajaja kee didaniiru; isaanis Shaadraak, Meeshakii fi Abdanaagoo dha. Isaan waaqota kee hin tajaajilan yookaan fakkii warqee ati dhaabdeef hin sagadan.”

¹³ Nebukadnezaris akka malee aaree Shaadraak, Meeshakii fi Abdanaagoo waamsise. Kanaafuu namoonni kunneen mooticha duratti dhi’eefaman; ¹⁴ Nebukadnezaris akkana isaaniin jedhe; “Yaa Shaadraak, Meeshakii fi Abdanaagoo, isin dhugumaan waaqota koo hin tajaajiltanii? Yookaan fakkii warqee ani dhaabeef hin sagaddanii? ¹⁵ Amma isin yeroo sagalee gaanfaa, ulullee, masiinqoo, kiraaraa, baganaa, kan faaggaatii fi sirba kam iyyuu dhageessanitti kuftanii fakkii ani dhaabeef yoo sagaddan gaarii dha. Garuu yoo isin sagaduu baattan, yoosuma boolla ibiddi keessaa balali’utti darbatamtu. Ega waaqa kamitu harka kootii isin baasuu danda’a?”

¹⁶ Shaadraak, Meeshakii fi Abdanaagoon deebisanii mootichaan akkana jedhan; “Yaa Nebukadnezar, nu fuula kee duratti waan kana falmachuu hin barbaannu. ¹⁷ Yaa Mootii, nu yoo boolla ibiddi keessaa balali’utti darbatamne, Waaqni nu isa tajaajillu sun nu oolchuu danda’a; harka keetii illee nu baasuu danda’a. ¹⁸ Yaa Mootii, yoo inni nu baasuu baate iyyuu nu waaqota kee akka hin tajaajille yookaan fakkii warqee ati dhaabe sanaaf akka hin sagadne akka beektu barbaanna.”

¹⁹ Kana irratti Nebukadnezar akka malee aaree fuulli isaa Shaadraak, Meeshakii fi Abdanaagootti geeddarama. Akka ibiddi boollaa sunis hamma durii caalaa harka torba ho’ee finiinu ajaje; ²⁰ akka isaan Shaadraak, Meeshakii fi Abdanaagoo hidhanii boolla ibiddi keessaa boba’u sanatti darbataniif loltoota isaa keessaa jajjaboo tokko tokko ajaje. ²¹ Kanaafuu namoonni kunneen akkuma wandaboo isaanii, fiddoo isaanii, marata isaanii kan mataatii fi uffata biraas uffatanitti hidhamanii boolla ibiddi keessaa balali’u sanatti darbataman. ²² Ajajni mootichaa akka malee ariifachiisaa ture; sababii ibiddi boollaa sun akka malee boba’aa tureef arrabni ibidda sanaa loltoota Shaadraak, Meeshakii fi Abdanaagoo geessan sana fixe; ²³ namoonni sadan kunneen jabeffamanii hidhamanii boolla ibiddi keessaa balali’u sana keessatti kufan.

²⁴ Nebukadnezar Mootichi dinqisiifachuudhaan utaalee ka’ee, “Namoonni nu hiinee ibiddatti darbanne sadii hin turree?” jedhee gorsitoota isaa gaafate.

Isaanis, “Yaa Mootii, kun dhuguma” jedhanii deebisan.

²⁵ Innis, “Ilaa! Ani namoota ibidda keessa deddeebi’an afur nan arga; isaanis hin hidhamne; hin miidhamnes; inni afuraffaan immoo ilma waaqotaa fakkaata” jedheen.

²⁶ Nebukadnezaris gara afaan boolla ibiddi keessaa boba’utti dhi’aatee sagalee guddaadhaan, “Yaa Shaadraak, Meeshakii fi Abdanaagoo, tajaajiltoota Waaqa Waan Hundaa Olii, kottaa ba’aa! As kottaa” jedhe.

Akkasiin Shaadraak, Meeshakii fi Abdanaagoon ibidda keessaa ba’an; ²⁷ ilmaan moototaa, muudamoonni, bulchitoonni fi gorsitoonni mootii naannoo isaaniitti walitti qabaman. Isaanis akka ibiddi sun dhagna jaraa hin miidhin yookaan akka rifeensa mataa isaanii keessaa tokko iyyuu hin gubatin ni argan; wandaboon isaanii iyyuu homaa hin taane; fooliin ibiddaas isaan irra hin turre.

²⁸ Kana irratti Nebukadnezar akkana jedhe; “Waaqa Shaadraak, Meeshakii fi Abdanaagoo isa ergamaa isaa ergee tajaajiltoota isaa baraareef galanni haa ta’u! Isaan

isa amanatanii ajaja mootii didanii akka Waaqa isaanii malee waaqota biraa hin tajaajille yookaan hin waaqeffanne lubbuu isaanii dabarsanii kennaniiru. ²⁹ Kanaafuu Waaqni akkasitti nama oolchu kan biraa Waaqa hin jirreef, ani akka uummanni saba kamii iyyuu yookaan afaan kamii iyyuu yoo Waaqa Shaadraak, Meeshakii fi Abdanaagoo irratti waan hamaa dubbate kukkutamu, akka manni isaas tuullaa waan diigamee ta'u labseera."

³⁰ Ergasii mootichi Shaadraak, Meeshakii fi Abdanaagoo kutaa biyyaa Baabilon irratti muude.

4

Nebukadnezar Abjuudhaan Muka Tokko Arge

¹ Nebukadnezar Mooticha irraa,

Sabootaa fi namoota afaan garaa garaa dubbatan kanneen guutummaa addunyaa irra jiraatan hundaaf:

Nagaan isiniif haa baay'atu!

² Mallattoowwanii fi hojiiwwan dinqii kanneen Waaqni Waan Hundaa Olii naaf godhe isinitti himuun na gammachiisa.

³ Mallattoowwan isaa akkam gurguddaa dha; dinqiin isaas akkam jabaa dha!

Mootummaan isaa mootummaa bara baraa ti;

bulchiinsi isaas dhalootaa hamma dhalootaatti jabaatee dhaabata.

⁴ Ani Nebukadnezar natti tolee masaraa mootummaa koottis qananiidhaan mana koo nan jiraadhan ture. ⁵ Ani abjuu na sodaachise tokko nan arge. Utuu ani siree koo irra ciisee jiruu fakkii fi mul'anni qalbii koo keessa darbu na sodaachise.

⁶ Kanaafuu ani akka isaan abjuu sana naa hiikaniif akka ogeeyyiin Baabilon hundi fuula koo duratti dhi'effaman nan ajaje. ⁷ Yommuu tolchitoonni, mortooinni, warri urjii ilaalanii fi waa himtoonni dhufanitti abjuu sana isaanitti nan hime; isaan garuu naaf hiikuu hin dandeenye. ⁸ Dhuma irratti Daani'el fuula duratti dhi'aate; anis abjuu sana isatti nan hime. Inni Beelxishaazaari jedhamee maqaa waaqa kootiin waamama; hafuurri waaqota qulqulluu isa keessa ture.

⁹ Anis akkanan jedhe; "Yaa Beelxishaazaari, hangafa tolchitootaa, ani akka hafuurri waaqota qulqulluu si keessa jiru nan beeka; iccitiin kam iyyuu sitti hin ulfaatu. Abjuun ani arge kana; hiikkaa isaa natti himi. ¹⁰ Mul'anni utuun siree koo irra ciisee jiruu arge isa kanaa dha: Ani nan ilaale; mukni tokko fuula koo dura walakkaa lafaa dhaabatee ture. Dheerinni isaas guddaa ture. ¹¹ Mukni sun akka malee guddatee jabaate; fiixeen isaas samii tuqe; hamma daarii lafaattis ni mul'ata ture. ¹² Baalli isaa bareedaa, iji isaa akka malee baay'ee ture; mukicha irras nyaata waan hundaaf ta'utu ture. Bineensonni gaaddisa isaa jala boqotu; simbirroon samiis dameellee isaa irra jiraatu; lubbuu qabeeyyiin hundinuus isa irraa nyaatu ture.

¹³ "Ani mul'ata utuun siree koo irra ciisee jiruu arge sana keessatti nan ilaale; fuula koo duras ergamaa qulqulluu samiidhaa gad bu'aa jiru tokkotu ture. ¹⁴ Innis sagalee guddaadhaan akkanaa jedhe: 'Mukicha muraa; dameewwan isaa cicciraa; baala isaa harcaasaa; ija isaa bittinneessaa. Bineensonni isa jalaa, simbirroonnis dameewwan isaa irraa haa baqatani. ¹⁵ Gufuu fi hiddi isaa garuu sibiilaa fi naasiidhaan hidhamee lafa keessa, marga dirree keessa haa turu.

"Inni fixeensa samiitiin haa jiidhu; biqiltuu keessas bineensota wajjin haa jiraatu. ¹⁶ Qalbiin isaas qalbii namaa irraa geeddaramee qalbiin horii isaaf haa kennamu; kunis hamma waggaan torba darbutti haa ta'u.

¹⁷ "'Akka namni lubbuun jiraatu hundinuu akka Waaqni Waan Hundaa Olii mootummoota namootaa irratti bulchaa ta'ee fi akka inni abbaa barbaadeef isaan kennee nama namoota hundaa gad ta'e isaanitti muudu beekaniif ergatamtoonni murtii labsanii qulqullooni murtoo lallaban.'

¹⁸ "Abjuun ani Nebukadnezar mootiin arge kanaa dha. Egaa yaa Beelxishaazaari waan namoota mootummaa kootii qaqqaroo keessaa tokko iyyuu naa hiikuu hin dandeenyeef abjuun sun maal akka ta'e natti himi. Ati garuu sababii hafuurri waaqota qulqulluu si keessa jiruuf ni dandeesa."

Daani'el Abjuu Hiikuu Isaa

¹⁹ Ergasii Daani'el inni Beelxishaazaari jedhamu sun yeroodhaaf akka malee jeegamee yaadni isaas isa rifachiise. Kanaafuu mootichi, "Yaa Beelxishaazaar, abjuun kun yookaan hiikkaan isaa si hin rifachiisin" jedhe.

Beelshazaaris akkana jedhee deebise; “Yaa gooftaa koo abjuun kun warra si jibbaniif, hiikkaan isaa immoo diinota keetiif haa ta’u! ²⁰ Mukni ati argite kan akka malee guddatee fi cimaan, kan fiixeen isaa samii tuqee hamma daarii lafaatti mul’atu, ²¹ kan baalli isaa bareedu, kan ija baay’ee qabu, kan iji isaa waan hundaaf nyaata ta’u, kan bineensotaaf gaaddisa, kan damee isaa irratti simbirroonni samii mandhee ijaarratan, ²² yaa Mootii, mukni sun si’i! Ati guddaa fi jabaa taateerta; guddinni kee hamma samii ga’utti ol ba’ee bulchiinsi kees hamma daarii lafaatti bal’ata.

²³ “Yaa Mootii, ati ergamaa qulqulluu tokko utuu inni, ‘Mukicha muraa balleessaa; gufuu fi hidda isaa garuu sibiilaa fi naasiidhaan hidhaatii lafa keessatti marga dirree irratti dhiisaa; inni fixeensa samiitiin haa jiidhu; akka bineensota bosonaatti haa jiraatu; waggaa torbas isa haa darbu’ jechaa samiidhaa bu’u argite.

²⁴ “Yaa Mootii hiikkaan isaa kana; labsiin Waaqni Waan Hundaa Olii gooftaa koo irratti baases kana: ²⁵ Ati saba keessaa ari’amtee bineensota bosonaa wajjin jiraatta; akka loonii marga nyaatta; fixeensa samiitiinis ni jiita. Ati hamma akka Waaqni Waan Hundaa Olii mootummoota namootaa irratti bulchaa ta’ee fi akka inni mootummoota kanas abbaa barbaadeef kennuu danda’u beektutti waggaa torba si darba. ²⁶ Ajajni akka gufuu muka sanaa hidda isaa wajjin hafuuf kenname sunis akka mootummaan kee yeroo ati ol aantummaan kan samii ta’e beektutti siif deebifamu argisiisa. ²⁷ Kanaafuu yaa Mootii, gorsa koo fudhadhu: Waan qajeelaa hojjechuudhaan cubbuu kee of irraa haqi; hammina kees cunqurfamtootaaf garaa laafuudhaan of irraa balleessi; yoos barri jireenya keetii ni dheerataa.”

Abjuun Fiixaan Ba’uu Isaa

²⁸ Kun hundi Nebukadnezar Mooticha irra ga’ee. ²⁹ Ji’a kudha lama booddee mootichi utuu gubbaa masaraa mootummaa Baabylon irra asii fi achi deddeebi’aa jiruu, ³⁰ “Kun Baabylon guddittii ani akka isheen mana jireenya mootii taatuuf ulfina maqaa kootiif jedhee humna koo jabaadhaan ijaare sanaa mitii?” jedhe.

³¹ Utuu inni dubbii isaa afaanii hin fixatin sagaleen akkana jedhu tokko samiidhaa dhufe; “Yaa Nebukadnezar Mooticha, wanni sirratti labsame kana: Aangoon mootummaa keetii sirraa fudhatameera. ³² Ati uummata keessaa ari’amtee bineensota bosonaa wajjin jiraatta. Akka looniis marga nyaatta. Hamma ati akka Waaqni Waan Hundaa Olii mootummoota namootaa irratti Gooftaa ta’ee fi akka inni mootummoota sana abbaa fedheef kennu beektutti waggaa torba si darba.”

³³ Yommusuma wanni waa’ee Nebukadnezar dubbatame sun ni raawwatame. Inni uummata keessaa ari’amee akka loonii marga nyaate. Inni hamma rifeensi isaa akka baallee risaa guddatee qeensi isaa akka qeensa allaattii fakkaatutti dhagni isaa fixeensa samiitiin jiidhe.

³⁴ Dhuma yeroon sanaatti, ani Nebukadnezar gara samii ol nan ilaale; qalbiin koos naa deebi’e. Anis Waaqa Waan Hundaa Olii nan galateeffadhe; isa bara baraan jiraatus nan jajadhe; ulfinas nan kenneef.

Bulchiinsi isaa bulchiinsa bara baraa ti;

mootummaan isaas dhalootaa hamma dhalootaatti itti fufee dhaabata.

³⁵ Uummanni lafaa hundi wayittuu hin hedaman.

Inni humnoota samii irratti, namoota lafaa irrattis, waanuma fedhe hojjeta.

Namni harka isaa dhowwuu yookaan “Ati maal hojjechaa jirta?” jedhee isa gaafachuu danda’u tokko iyyuu hin jiru.

³⁶ Akkuma qalbiin koo naaf deebi’eenis, ulfina mootummaa kootiitiif ulfinnii fi miidhaginii koo yommusuma naaf deebi’an. Gorsitoonni fi qondaaltonni koo na barbaadan; anis teessoo kootti deebifamee kan durii caalaas guddaa nan ta’ee.

³⁷ Sababii wanni inni hojjetu hundi dhugaa, karaan isaa hundinuus qajeelaa ta’eef ani Nebukadnezar, Mooticha samii sana nan jajadha; isa nan leellisa; ulfinas nan kennaaf. Inni warra of tuulan gad deebisuu danda’aatii.

5

Katabbii Keenyan Manaa Irraa

¹ Beelshazaar mootichi qondaaltonni isaa kuma tokkoof dhangaa guddaa qopheessee fuula isaanii duratti daadhii wayinii dhuge. ² Beelshazaaris utuu daadhii wayinii dhugaa jiruu akka innii fi qondaaltonni isaa, niitonnii fi saajatoowwan isaa ittiin

dhuganiif akka isaan xooffoo warqeetii fi meetii kan abbaan isaa Nebukadnezar mana qulqullummaa Yerusaaleemii fide sana fidan ajaje. ³ Kanaafuu isaan xooffoo warqee kan mana qulqullummaa Waaqaa kan Yerusaaleemii fudhataman sana fidan; mootichi, qondaaltonni, niitonnii fi saajjatoowwan isaa ittiin dhugan. ⁴ Isaan utuma daadhii wayinii sana dhugaa jiranuu, waaqota warqeetii fi meetii, kan naasiitii fi sibiilaa, kan mukaatii fi dhagaa galateeffatan.

⁵ Akkuma tasaa qubni harka namaa mul'atee keenyan manaa kan masaraa mootii keessa baattuu ibsaa bira jiru irratti barreesse. Mootichis harka sana utuu inni barreesuu arge. ⁶ Fuulli mootichaa ni geeddaramee; innis sodaadhaan guutamee jilbii isaa hollatee waldha'ee; miilli isaas ni laafe.

⁷ Mootichis sagalee isaa ol fuudhee akka mortoota, warra urjii ilaalanii fi ilaaltota ol isaaf galchan ajaje. Ogeeyyii Baabiloniinis akkana jedhe; "Nama katabbii kana dubbisee hiikkaa isaa natti himu kamitti iyyuu uffanni diimaan dhiilgeen uffifamee morma isaatti faayi warqee ni kaa'amaaf; mootummaa koo keessattis bulchaa ol aanaa sadaffaa ta'a."

⁸ Ergasiis ogeeyyiin mootichaa hundi ol seenan; isaan keessaa garuu namni katabbii sana dubbisuu yookaan hiikkaa isaa mootichatti himuu danda'u tokko iyyuu hin argamne. ⁹ Kana irratti Beelshaazaar mootichi kan duraa caalaa sodaatee fuulli isaa geeddarame; qondaaltonni isaas waan godhan wallaalan.

¹⁰ Mootittiinis waca mootichaatii fi qondaaltota isaa dhageessee galma cidha sanaa ol seente. Isheenis akkana jette; "Yaa mootii, bara baraan jiraadhu! Hin rifatin; fuulli kees hin geeddaramin!" ¹¹ Mootummaa kee keessa namichi hafuurri waaqota qulqullootaa keessa jiru tokko jira. Namichi kun bara abbaa keetii keessa nama hubannaa, beekumsaa fi ogummaa akkuma waaqotaa qabu ta'ee argame. Abbaan kee Nebukadnezar Mootichi, itti gaafatamaa tolchitootaa, mortoootaa, kan warra urjii ilaalaniitii fi ilaaltotaa godhee isa muudee ture. ¹² Daani'el namichi mootichi Beelxishaazaar jedhee waamu kun nama hafuurri gaariin, beekumsii fi hubannaan keessa jiru ta'ee argame; innis abjuu, hibboo fi rakkoo hiikuuf dandeettii addaa qaba ture. Daani'elin waami; innis hiikkaa katabbii kanaa sitti himaatii."

¹³ Kanaafuu Daani'el fuula mootichaa duratti dhi'eeffame; mootichis akkana jedheen; "Warra abbaan koo mootichi booji'ee Yihuudaadhaa fide keessaa kan Daani'el jedhamu si'ii?" ¹⁴ Ani akka hafuurri waaqotaa si keessa jiruu fi akka ati hubannaa, beekumsaa fi ogummaa addaa qabdu dhaga'eera. ¹⁵ Ogeeyyiinii fi mortooni akka katabbii kana dubbisani hiikkaa isaa natti himaniif fuula koo duratti fidamani turan; isaan garuu ibsuu hin dandeenye. ¹⁶ Ani akka ati hiikkaa kennitee rakkoo fala kennuu dandessu dhaga'eera. Yoo ati katabbii kana dubbiftee hiikkaa isaa natti himuu dandeesse, uffata diimaa dhiilgeetu sitti uffifama; faayi warqees morma keetti siif kaa'ama; mootummaa koo keessattis bulchaa ol aanaa sadaffaa taata."

¹⁷ Kana irratti Daani'el deebisee mootichaan akkana jedhe; "Kennaan kee sumaaf haa hafu; badhaasni kee immoo nama biraatiif haa kennamu. Ta'u iyyuu ani katabbicha dubbisee hiikkaa isaa mootichatti nan hima."

¹⁸ "Yaa mootii, Waaqni Waan Hundaa Olii abbaa kee Nebukadnezariif surraa fi guddina, ulfinaa fi kabaja kenne. ¹⁹ Sababii ol aantummaa inni isaaf kenneef saboonnii fi mootummoonni hundi, namoonni afaan garaa garaa dubbatan ni hollataniif; isa sodaatanis. Mootichis warra ajjeesuu barbaade ni ajjeesa; warra oolchuu barbaade ni oolcha, kan muuduu barbaade ni muuda, kan salphisuu barbaades ni salphisu ture. ²⁰ Gaafa garaan isaa ol tuulee mataa jabaatetti garuu inni teessoo isaa irraa kaafamee ulfinni isaas isa irraa fudhatame. ²¹ Inni uummata keessaa ari'amee qalbiin horii kennameef; harroota diidaa wajjin jiraatee akka loonii marga nyaate; inni hamma akka Waaqni Waan Hundaa Olii mootumoota namootaa irratti bulchaa ta'ee fi akka inni abbaa fedhe isaan irratti muudu beekutti dhagni isaa fixeensa samiiitiin jiidhe."

²² "Yaa Beelshaazaar; ati ilmi isaa utuma waan kana hunda beektuu mataa kee gad hin qabanne. ²³ Qooda kanaa ati Gooftaa samii irratti mataa ol qabatte. Ati xooffoowwan mana qulqullummaa isaatii fichisiiftee atii fi qondaaltonni kee, niitonnii fi saajjatoowwan kee isaan keessaa dhugdan. Ati waaqota meetii, warqee, naasii, sibiilaa, mukaatii fi kan dhagaa kanneen arguu yookaan dhaga'uu yookaan hubachuu hin dandeenye jajatte. Waaqa lubbuu keetii fi karaa kee hunda harka isaatti qabatee jiru garuu hin ulfeessine. ²⁴ Kanaafuu inni harka katabbii sana barreesse erge."

²⁵ "Katabbiin barreeffamee tures kana:

Maanee, Maanee, Teeqeel, Faares.

²⁶ "Hiikkaan isaas kana:

"Maanee jechuun Waaqni bara kee murteessee gara dhumaatti fide jechuu dha.

²⁷ "Teeqeel jechuun ati madaalliidhaan madaalamtee salphattee argamte jechuu dha.

²⁸ “Faares jechuun mootummaan kee qoodamee namoota Meedeetii fi Faaresiitiif kenname jechuu dha.”

²⁹ Ergasii ajaja Beelshaazaariin Daani'elitti uffata diimaa dhiilgee uffisan; morma isaattis faaya warqee kaa'aniif; mootummaa sana irrattis bulchaa ol aanaa sadaffaa ta'ee muudame.

³⁰ Halkanuma sana Beelshaazaar mootiin Baabilonotaa ajjeefame; ³¹ Daariyoos namichi Meedee umurii isaa jaatamii lammaffaatti mootummaa sana fudhate.

6

Daani'el Boolla Leencaa Buufame

¹ Daariyoos akka isaan guutummaa mootummaa isaa keessatti bulchitoota ta'aniif ilmaan moototaa 120 muuduu barbaade; ² innis isaan irratti bulchitoota ol aantota sadii muude; isaan keessaa tokko Daani'el ture. Akka mooticha irra rakkinni hin geenyeeffis ilmaan moototaa kunneen bulchitoota ol aantota sadan jalatti bulu. ³ Mootichi sababii Daani'el ilmaan moototaatii fi bulchitoota ol aantota kaan caalaa dandeettii addaa qabuuf isa jaallatee guutummaa mootummaa irratti isa muuduu barbaade. ⁴ Sababii kanaaf bulchitoonni ol aantonnii fi ilmaan moototaa waan hojii mootummaa ilaaluu Daani'elin himachuuf karaa barbaadan; garuu akkas gochuu hin dandeenye. Daani'el amanamaa, of eeggataa fi nama mudaa hin qabne waan ta'eef isaan isa irratti dogoggora tokko iyyuu argachuu hin dandeenye. ⁵ Dhuma irrattis namoonni kunneen, “Yoo waan seera Waaqa isaatiin wal qabatu ta'e malee waan ittiin namicha Daani'el jedhamu kana himannu tokko iyyuu hin argannu” jedhan.

⁶ Kanaafuu bulchitoonni ol aantonnii fi ilmaan moototaa tokkummaadhaan mooticha bira dhaqanii akkana jedhan; “Yaa Daariyoos mooticha, bara baraan jiraadhu! ⁷ Yaa mootii, akka namni hamma bultii soddomaatti si malee Waaqa yookaan nama kam iyyuu kadhatu kam iyyuu boolla leencaatti darbatamu, akka mootichi labsii baasee ajajni isaas cimuu bulchitoonni mootummaa, muudamoonni, ilmaan moototaa, gorsitoonnii fi gondaaltonni hundi walli galaniiru. ⁸ Yaa mootii, labsii baasi, akka seera Meedee fi Faares kan hin geeddaramne sanaas mallatteessi.” ⁹ Kanaafuu Daariyoos mootichi labsii sana barreesse baase.

¹⁰ Daani'elis yommuu akka labsiin sun ba'e beeketti kutaa mana isaa kan foddan isaa gara Yersaalemitti garagalutti ol ba'e. Innis akkuma yeroo kaan godhu guyyaatti yeroo sadii jilbeenfatee Waaqa isaa kadhate, galatas galcheef. ¹¹ Namoonni kunneen gareedhaan dhaqanii Daani'elii kadhatuu fi Waaqa isaa gargaarsa gaafatuu argatan. ¹² Kanaafuu isaan gara mootichaa dhaqanii, “Yaa mootii, ati akka namni guyyoota soddoman kana keessa si malee Waaqa yookaan nama tokko iyyuu kadhatu kam iyyuu boolla leencaatti darbatamu labsii hin baafnee?” jedhanii waa'ee labsii inni baase sanaa isa gaafatan.

Mootichis, “Seerri sun seera akkuma seera Meedeetii fi Faares kan hin geeddaramnee dha” jedhee deebise.

¹³ Isaan mootichaan, “Yaa mootii, warra Yihuudaadhaa booji'aman keessaa Daani'el siifis seera ati baafteefis xiyyeeffannaa hin kennu. Inni ammas guyyaatti yeroo sadii Waaqa isaa kadhata” jedhan. ¹⁴ Mootichi yommuu waan kana dhaga'etti akka malee gadde; Daani'elin baasuufis murteeffatee hamma biiftuun lixxutti waan danda'ame hunda godhe.

¹⁵ Ergasii jarri gareedhaan mootichatti dhi'aatanii, “Yaa mootii, akka seera Meedeetii fi Faares akka seerri mootiin tokko baase yookaan ajajni inni kenne geeddaramuu hin dandeenye beeki” jedhaniin.

¹⁶ Kanaafuu mootichi ajaja kenne; isaanis Daani'elin fidanii boolla leencaatti darbatan. Mootichis Daani'eliin, “Waaqni kee kan ati yeroo hunda isa tajaajiltu si haa baraaruu!” jedhe.

¹⁷ Dhagaan is fidamee afaan boolla leencaa sanatti qadaadame; mootichis akka wanni Daani'el irratti murtaa'e sun hin geeddaramne chaappaa mallattoo qubeelaa isaatii fi kan qubeelaa gondaaltota isaa irratti chaappesse. ¹⁸ Ergasii mootichi gara masaraa mootummaa isaatti deebi'ee halkan guutuu utuu waa hin nyaatinii fi gammachuu hin argatin hirriba malee bule.

¹⁹ Barii barraaqaanis mootichi ka'ee gara boolla leencaatti ariifate. ²⁰ Innis yommuu boolla sanatti dhi'aatetti sagalee guddaadhaan, “Yaa Daani'el tajaajilaa Waaqa jiraataa, Waaqni ati yeroo hunda isa tajaajiltu sun leencota irraa si baraaruu danda'eeraa?” jedhee Daani'elin waame.

²¹ Daani'elis deebisee akkana jedhe; "Yaa mootii bara baraan jiraadhu! ²² Waaqni koo ergamaa isaa ergee afaan leencotaa cufe. Sababii ani fuula isaa duratti qulqulluu ta'ee argameef isaan homaa na hin goone. Yaa Mootii ani fuula kee durattis yakka tokko illee hin hojjenneetii."

²³ Mootichis akka malee gammadee akka Daani'el boolla keessaa baafamu ajaje. Daani'elis waan Waaqa isaa amanatee tureef yommuu boollaa ba'etti madaan tokko iyyuu isa irratti hin argamne.

²⁴ Warri sobaan Daani'elin himatanis ajaja mootichaatiin niitotaa fi ijoollee isaanii wajjin fidamanii boolla leencaatti darbataman. Utuu isaan boolla sana keessa lafa hin ga'in leenconni isaan cicciratanii lafee isaanii hunda caccabsan.

²⁵ Kana irratti Daariyoos Mootichi uummata, sabootaa fi namoota guutummaa biyyattii keessatti afaan garaa garaa dubbatan hundatti akkana jedhee barreesse:

"Nagaan isiniif haa baay'atu!

²⁶ "Ani akka namni kutaa mootummaa kootii hunda keessatti Waaqa Daani'el sodaatuu fi akka ulfina isaaf kennu labsii kana baaseera.

"Inni Waaqa jiraataa,
kan bara baraan jiraatuu dha;
mootummaan isaa hin badu;
bulchiinsi isaas dhuma hin qabu.

²⁷ Inni ni baraara; ni oolchas;
samii keessaa fi lafa irratti
mallattoowwanii fi dinqiiwwan hojjeta.

Inni Daani'elin,
afaan leencotaatii baaseera."

²⁸ Kanaafuu bara Daariyoosii fi bara mootummaa Qiirros namicha Faares sanaa keessa Daani'elitti jireenyi ni tole.

7

Abjuu Daani'el Waa'ee Bineensota Afranii Arge

¹ Bara Beelshaazaar mootii Baabilon keessa waggaa tokkoffaatti Daani'el utuu siree isaa irra ciisee jiruu abjuu fi mul'ata arge. Abjuu sanas barreessee waan arges ibse.

² Daani'el akkana jedhe; "Ani halkan sana mul'ata koo keessatti nan ilaale; kunoo qilleensoni samii afran fuula koo duratti galaana guddaa raasaa turan. ³ Bineensoni gurguddaan tokkoon tokkoon isaanii wal hin fakkaanne afur galaana sana keessaa ol ba'an.

⁴ "Inni jalqabaa leenca fakkaata ture; qoochoowwan risaa qaba ture. Anis hamma qoochoowwan isaa irraa bubuqqaa'anitti nan ilaale; innis lafaa ol qabamee akkuma namaa miilla lamaan dhaabate; qalbiin namaas ni kennameef.

⁵ "Kunoo bineensi lammaffaan amaaketa fakkaatu fuula koo dura ture. Innis cinaacha isaa tokkoon ol jedhee ture; afaan isaa keessatti ilkaan isaa gidduutti lafee cinaachaa sadii qabatee ture. Bineensa sanaanis, 'Ka'iitii hamma quufutti foon nyaadhu!' jedhan.

⁶ "Ergasii ani nan ilaale; fuula koo duras bineensa biraa kan qeerransa fakkaatutu ture. Dugda isaa irras qoochoo akka qoochoo simbirroo afurtu ture. Bineensi kun mataa afur qaba ture; akka bulhuufis aangoon isaa kenname.

⁷ "Ergasiis ani halkan keessa mul'ata nan arge; kunoo fuula koo dura bineensa afuraffaa akka malee jabaa, sodaachisaa nama rifachiisu tokkotu ture. Innis ilkaan sibiilaa dheeraa qaba ture; innis waan qabate caccabsee nyaatee kan hafe immoo miilla isaa jalatti dhidhiita ture. Bineensi kun bineensota duraan turaniin adda ta'ee gaanfa kudhan qaba ture.

⁸ "Utuu ani waa'ee gaanfawwan sanaa yaadaa jiruu gaanfi xinnaan isaan gidduudhaa ba'e biraa tokko fuula koo duratti mul'ate; gaanfawwan jalqabaa keessaa sadan isaanii fuula isaa duratti bubuqqaa'an. Gaanfi kunis ija ija namaa fakkaatuu fi afaan of tuulummaadhaan dhabatu qaba ture.

⁹ "Utuma ani ilaaluu,

"Teessoowwan iddoo iddoo isaanii kaa'aman;

Inni Bara Durii teessoo isaa irra taa'e.

Uffanni Isaa adii akka cabbii ture;

rifeensi mataa isaa qulqulluu akka suufii ture.

Teessoon Isaa akka arraba ibiddaa,

geengoowwan isaa hundinuus

akka ibidda boba'aa jiruu turan.

¹⁰ Lagni ibiddaa tokko

fuula isaa duraa ni yaa'a ture.

Kumni kumaatamni irratti isa tajaajilu turan;

kumni kudhan kan yeroo kuma kudhan baay'atan

fuula isaa dura dhaabatanii turan.

Dhaddachi taa'amee ture;

kitaabonnis banamanii turan.

¹¹ "Ani sababii dubbii of tuulummaa gaanfi sun dubbachaa jiruutiif ilaaluu koo ittan fufe. Anis amma illee ittuma fufee hamma bineensi sun qalamee dhagni isaa barbadaa'ee ibidda boba'utti darbatamutti nan ilaale. ¹² Bineensota kaan irraa immoo aangoon isaanii ni fudhatame; garuu akka isaan yeroof jiraatan ni eeyyamameef.

¹³ "Anis mul'ata halkaniiitiin nan ilaale; kunoo fuula koo dura ilma namaa kan fakkaatu tokkodu duumessa samiitiin dhufaa ture. Innis gara Isa Bara Duriiti dhufe; fuula isaa durattis isa dhi'eessan. ¹⁴ Isaafis taayitaan, ulfinnii fi mootummaan ni kenname; uummanni hundi, saboonnii fi namoonni afaan garaa garaa dubbatanis isa waaqeffatan. Bulchiinsi isaa bulchiinsa bara baraa kan hin dabarree dha; mootummaan isaas kan gonkumaa hin badnee dha.

Hiikkaa Abjuu Sanaa

¹⁵ "Ani Daani'el hafuura kootiin nan jeeqame; mul'anni ani arges akka malee na sodaachise. ¹⁶ Anis warra achi dhadhaabachaa turan keessaa isa tokkotti dhi'aadhee hiikkaa dhugaa kan waan kana hundaa nan gaafadhe.

"Kanaafuu inni natti himee akkana jedhee hiikkaa waan kanaa anaaf ibse: ¹⁷ 'Bineensonni gurguddaan afran mootota afran ka'anii lafa irratti mo'anii dha. ¹⁸ Garuu qulqulloonni Waaqa Waan Hundaa Olii mootummaa sana ni fudhatu; bara baraanis ni fudhatu; eeyyee, bara baraa hamma bara baraatti ni dhaalu.'

¹⁹ "Ergasiis ani hiikkaa dhugaa kan bineensa afuraffaa isa bineensota kaan irraa adda ta'ee ilkaan sibiilaatii fi qeensa naasii qabu kan akka malee sodaachisaa ta'e kan waan qabate nyaatu fi waan hafe immoo miilla isaa jalatti dhidhiitu sanaa beekuu nan barbaade. ²⁰ Akkasumas waa'ee gaanfawwan kurnan mataa isaa irra jiraniitii fi gaanfa ba'e inni biraa kan isaan kaan fuula isaa duratti kufanii, isa hunda isaanii caalu kan ijaa fi afaan ittiin of jajaa dubbatu qabu sanaa beekuu nan barbaade. ²¹ Gaanfi kunis utuma ani arguu qulqulloota irratti waraana labsee isaan mo'achaa ture; ²² kunis hamma Inni Bara Durii dhufee qulqulloota Waaqa Waan Hundaa Oliitiif murutti ture; yeroon itti qulqulloonni mootummaa dhaalanis ni dhufe.

²³ "Innis akkana naan jedhe: 'Bineensi afuraffaan sun mootummaa afuraffaa lafa irratti mul'atuu dha. Inni mootummoota kaan hunda irraa adda; guutummaa lafaa barbadessee gad dhidhiitee daaraa godha. ²⁴ Gaanfawwan kurnan mootota kurnan mootummaa kana keessaa dhufanii dha. Isaan booddees mootiin biraa kan warra duraa irraa adda ta'e tokko ni ka'a; innis mootota sadii of jala galfata. ²⁵ Inni Waaqa Waan Hundaa Olii mormuudhaan qulqulloota isaa cunqursee yeroo murteeffameef seera illee geeddaruuf yaala. Qulqulloonnis bara tokkoof, bara lamaa fi walakkaa baraatiif dabarfamanii harka isaatti ni kennamu.

²⁶ "Garuu dhaddachi ni taa'ama; aangoon isaas irraa fudhatamee inni bara baraan guutumaan guutuutti ni barbadeeffama. ²⁷ Ergasiis gooftummaan, humnii fi guddinni mootummootaa guutummaa samii gaditti qulqulloota, Waaqa Waan Hundaa Oliitiif ni kennamu. Mootummaan isaas mootummaa bara baraan itti fufuu dha; bulchitoonni hundinuu isa waaqeffatu; ni ajajamuufis.'

²⁸ "Dhumni waan sanaa kana. Ani Daani'el yaada kootiin akka malee nan dhiphadhe; fuulli koo ni geeddarame; ani garuu waan sana garaa kootti qabadheen ture."

8

Mul'ata Daani'el Arge

¹ Bara Beelshaazaar mootichaa keessa waggaa sadaffaatti, ani Daani'el, mul'ata duraan natti mul'ate sana booddee mul'ata tokko nan arge. ² Anis mul'ata koo keessatti gamoo Suusaa kan kutaa biyyaa Eelaam keessattan of arge. Ani mul'ata sana keessatti Laga Uulayi biran ture. ³ Anis ija ol fudhadhee korbeessa hoolaa gaanfa lama qabu utuu laga cina dhaabatu nan arge; gaanfi isaas dheeraa ture. Gaanfa isaa keessaa inni tokko isa kaan irra dheerata; ergasii garuu ni guddate. ⁴ Ani utuu korbeessi hoolaa sun gara lixa biiftuutti, gara kaabaa fi gara kibbaatti jifatu nan arge; horiin fuula isaa dura dhaabachuu danda'e tokko iyyuu hin turre; kan humna isaa jalaa baasuu danda'u tokko iyyuu hin turre. Inni waanuma barbaade hojjetee guddaa ta'e.

⁵ Utuma ani waan kana yaadaa jiruu korbeessi re'ee kan ija isaa lamaan gidduudhaa gaanfa qabu tokko utuu lafa hin tuqin guutummaa lafaa qaxxaamuraa akkuma tasaa lixa biiftuutii dhufe. ⁶ Innis gara korbeessa hoolaa kan gaanfa lama qabu kan ani utuu inni laga cina dhaabatuu arge sanaa dhufee aarii guddaadhaan isa jifate. ⁷ Ani utuu inni akka malee aaree isa dha'ee gaanfa isaa lamaanis isa irraa caccabsuu nan arge. Hoolaan sun of irraa isa dhowwuuf humna hin qabu ture; re'een sun lafaan isa dha'ee of jalatti dhidhiite; hoolaa sanas humna isaa jalaa baasuu kan danda'u tokko iyyuu hin turre. ⁸ Re'een sunis akka malee guddate; garuu yeroo humni isaa jabaatetti gaanfi isaa guddichi isa irraa cabe; qooda isaas gaanfawwan afur guddatanii gara bubbeewwan samii afraniitti ba'an.

⁹ Afran isaanii keessaa isa tokko keessaa gaanfi biraa ba'e; innis xinnaa fakkaatee ergasii garuu humnaan jabaatee gara kibbaa, gara lixa biiftuutii fi Biyya Bareedduu sanaatti guddate. ¹⁰ Gaafni sunis hamma raayyaa samiiwwanii qaqqabee raayyaa urjiiwwanii keessaa tokko tokko lafatti gad darbaate of jalatti dhidhiitutti guddate. ¹¹ Akka waan ajajaa loltoota Waaqaatiin wal qixxaateettis mataa ol qabate; aarsaa guyyaa guyyaa illee isa irraa fudhate; iddoon isaa qulqulluunis gad darbatame. ¹² Sababii cubbuutiif raayyaan qulqullootaatii fi aarsaan guyyaa guyyaan dhi'eeffamu dabarfamanii isaaf kennaman. Inni waan hojjetu hunda keessatti ni milkaa'e; dhugaanis lafatti gatame.

¹³ Anis utuu qulqullichi dubbatuu nan dhaga'e; qulqulluun kaan, "Mul'anni waa'ee aarsaa guyyaa guyyaa, kan cubbuu badiisa fiduu, kan iddoo qulqulluutii fi raayyaawwan akka miilla jalatti dhidhiitamaniif dabarfamanii kennaman sanaa yoomi raawwata?" jedheen.

¹⁴ Innis, "Wanni sun galgalaa fi ganama 2,300 fudhata; ergasii iddoon qulqulluun deebi'ee ni qulqulleeffama" naan jedhe.

Hiikkaa Mul'ata sanaa

¹⁵ Utuma ani Daani'el mul'ata sana argee hiikkaa isaa hubachuuf yaalaa jiruu inni nama fakkaatu tokko fuula koo dura dhaabate. ¹⁶ Anis sagalee nama tokkoo kan "Yaa Gabri'eel, hiikkaa mul'ata sanaa nama kanatti himi" jedhu tokko Uulay nan dhaga'e.

¹⁷ Akkuma inni iddoo ani dhaabachaa ture dhufeen ani rifadheen addaan lafatti gombifame. Innis, "Yaa ilma namaa, akka mul'anni sun waa'ee bara dhumaa argisiisu hubadhu" naan jedhe.

¹⁸ Yeroo inni natti dubbachaa turettis, ani addaan lafatti gombifamee hirriba cimaa keessan ture. Inni garuu na tuqee ol na qabee miilla kootiin na dhaabe.

¹⁹ Innis akkana jedhe; "Ani waan booddee yeroo dheekkamsaatti dhufuuf jiru sitti nan hima; mul'anni sun waan bara dhumaa kan murtaa'e sana keessatti ta'u argisiisaatii.

²⁰ Korbeessi hoolaa kan gaafa lamaa ati argite sun, mootota Meedee fi Faares argisiisa. ²¹ Re'een rifeensa qabu sun mootii Giriik; gaanfi guddaan ija isaa lamaan gidduu immoo mootii jalqabaa ti. ²² Gaanfawwan afran gaanfa cabe tokko iddoo bu'an mootummoota saba isaa keessaa ba'an afran argisiisan; isaan garuu humna akka isaa hin qaban.

²³ "Dhuma bulchiinsa isaaniitti, yeroo finciltoonni akka malee hammaachaa deemanitti mootiin adda jabeessi hibboo hubatu tokko ni ka'a. ²⁴ Innis akka malee jabaa ta'a; garuu humna isaatiin miti. Inni badiisa suukaneessaa fida; waan hojjetu hundaan ni milkaa'a. Namoota jajjaboo fi qulqulloota ni balleessa. ²⁵ Inni badhaadhuuf jedhee gowwoomsaa hojjeta; akka nama guddaattis of ilaala. Inni yommuu isaan waan nagaa qaban se'anitti baay'ee isaanii balleessee Mootii moototaattis ni ka'a. Ta'u illee inni ni bada; garuu humna namaatiin miti.

²⁶ "Mul'anni galgalaa fi ganama sitti mul'ifame sunis dhugaa dha; garuu sababii inni waan bara dheeraa booddee ta'uuf jiru argisiisuuf isa cufi."

²⁷ Ani Daani'elis akka malee dadhabee guyyoota baay'ee dhukkubsadheen ciise. Ergasiis ka'ee gara hojii mootichaa nan dhaqe. Anis mul'atan argee sanaan rifadheen ture; dubbiin isaas naaf hin galte.

9

Kadhannaa Daani'el

¹ Bara Daariyoos ilma Ahashweroos namicha Meedee kan mootummaa Kaldootaa irratti bulchaa taasifame sanaa keessa waggaa tokkoffaatti ² bara mootummaa isaa keessa waggaa tokkoffaatti ani Daani'el dubbii WAAQAYYOO kan Ermiyaas raajichaaf kenname irraa akka Yerusaleem waggaa torbaatamaaf ontee turtu kitaabota qulqulluu irraa nan hubadhe. ³ Kanaafuu ani deebii barbaadee kadhannaa fi waammataan,

soomaan, wayyaa gaddaa uffachuudhaa fi daaraa keessa taa'uudhaan gara Waaqayyoo Gooftaatti nan deebi'e.

⁴ Anis WAAQAYYOO Waaqa kootti kadhannaa dhi'eessee akkana jedheen cubbuu saba kootii himadhe:

"Yaa Gooftaa, Waaqa guddaa fi akka malee sodaachisaa kan warra si jaallatanii ajaja kee eegan hundaaf kakuu jaalala keetii eegdu, ⁵ nu cubbuu hojjenneerra; balleessineerras. Nu jal'oota turre; fincilleerras; ajajaa fi seera kee irraa garagalleerra. ⁶ Nu tajaajiltoota kee raajota warra maqaa keetiin mootota keenyatti, ilmaan mootota keenyaatti, abbootii keenyaa fi saba lafaa hundatti dubbatan sana hin dhaggeeffanne.

⁷ "Yaa Gooftaa, ati qajeelaa dha; garuu nu namoonni Yihuudaa, sabni Yerusaaileemii fi Israa'el kanneen ati sababii amanamummaa dhabuu keenyaatiin biyyoota dhi'oo fi fagoo keessa bittinneessite hundi har'a qaaniidhaan haguuganneerra. ⁸ Yaa WAAQAYYOO nuu fi mootonni keenya, ilmaan moototaatii fi abbootiin keenya waan cubbuu sitti hojjenneef qaaniidhaan haguuganneerra. ⁹ Yoo nu isatti fincillee jiraanne iyyuu Waaqni keenya Gooftichi araara qabeessa; dhiifamas namaaf godha; ¹⁰ nu WAAQAYYOO Waaqa keenyaaf hin ajajamne yookaan seera isaa kan inni karaa tajaajiltoota isaa raajotaatiin nuuf kenne sana hin eegne. ¹¹ Israa'eloonni hundinuu siif ajajamuu diduudhaan seera kee cabsaniiru; sirraa garagalaniirus.

"Kanaafuu sababii nu cubbuu sitti hojjenneef abaarsaa fi kakuun Seera Musee garbicha Waaqaa sanaa keessatti barreeffame nurratti dhangala'e. ¹² Ati balaa guddaa nutti fiduudhaan dubbii nuu fi bulchitoota keenya irratti dubbatame sana raawwateerta. Wannii akka waan Yerusaaileem irratti ta'e sanaa takkumaa guutummaa samiitii gaditti ta'ee hin beeku. ¹³ Akkuma Seera Musee keessatti barreeffametti balaan kun hundi nutti dhufeera; ta'u iyyuu nu qalbii jijjiirrannee dhugaa duukaa bu'uudhaan WAAQAYYOO Waaqa keenya irraa araara hin barbaanne. ¹⁴ WAAQAYYOO balaa nutti fiduu irraa duubatti hin deebine; WAAQAYYOO Waaqni keenya waan hojjetu hundaan qajeelaadhaatii; nu garuu isaaf hin ajajamne.

¹⁵ "Egaa amma yaa Waaqa keenya Gooftaa, kan irree jabaadhaan saba kee biyya Gibxi baafttee akka maqaan kee akkuma har'a jiru kana beekamu goote, nu cubbuu hojjenneerra; balleessineerras. ¹⁶ Yaa Gooftaa, akkuma hojii kee qajeelaa sana hundaatti Yerusaaileem magaalaa keetii fi gaara kee qulqulluu irraa aarii fi dheekkamsa kee deebisi. Cubbuun keenyaa fi balleessaan abbootii keenyaa namoota naannoo keenya jiraatan hunda biratti akka Yerusaaileemii fi sabni kee waan kolfaa ta'an godheera.

¹⁷ "Egaa yaa Waaqa keenya, kadhannaa fi waammata garbicha keetii dhaga'i. Yaa Gooftaa, ulfina keetii jedhiitii fuula kee gara iddoo kee qulqulluu one sanaatti deebisi. ¹⁸ Yaa Waaqa ko, gurra itti qabii dhaga'i; ija kee banadhuutii badii keenyaa fi magaalaa Maqaan kee ittiin waamame sana ilaali. Nu utuu waa'ee qajeelummaa keenyaatiif hin ta'in sababii araara kee guddaa sanaatiif si kadhanna. ¹⁹ Yaa Gooftaa dhaggeeffadhu! Yaa Gooftaa dhiifama nuu godhi! Yaa Gooftaa dhaga'iitii waa hojjedhu! Yaa Waaqa ko, sababii magaalaa keetii fi sabni kee Maqaan keetiin waamamuuf ati hin turin."

Torban "Torbaatama"

²⁰ Utuu ani dubbichaa fi kadhachaa, cubbuu kootii fi cubbuu saba koo Israa'el himachaa, tulluu isaa qulqulluufis WAAQAYYOO Waaqa koo gaafachaa jiruu, ²¹ utuu ani amma illee kadhannaa irra jiruu, Gabri'el namichi ani mul'ata koo duraa keessatti arge sun, yeroo aarsaa galgalaatti ariitiidhaan barrisaa gara koo dhufe. ²² Innis akkana jedhee na barsiise; akkanas naan jedhe; "Yaa Daani'el ani amma ogummaa fi hubannaa siif kennuuf dhufeera. ²³ Akkuma ati Waaqa kadhachuu jalqabdeen deebiin ani sitti himuuf dhufe kun siif kenname; ati akka malee jaalatamaadhaatii. Kanaafuu ergaa kana qalbeeffadhuutii mul'ata sana hubadhu:

²⁴ "Dogoggora hambisuuf, cubbuu balleessuuf, araara yakkaa buusuuf, qajeelummaa bara baraa fiduuf, mul'ataa fi raajii chaappaadhaan cufuuf, Iddoo Iddoo Hunda Caalaa Qulqulluu ta'e sana dibuuf saba keetii fi magaalattii qulqulluu keetiiif 'torban' torbaatamni labsameera.

²⁵ "Waan kana beeki; hubadhus: Gaafa labsiin Yerusaaileem haaromsuu fi deebisanii ijaaruuuf labsame kun ba'ee jalqabee hamma Masiihichi, Bulchaan dhufutti 'torban' torbaatamaa fi torban jaatamii lama ta'a. Isheen daandiiwwanii fi dallaa wajjin ni haaromfamti; garuu wannii kun yeroo rakkinna keessa ta'a. ²⁶ "Torban' jaatamii lama booddee Masiihichi ni ajjeefama; wannii tokko iyyuu isaaf hin hafu. Namoonni bulchaa dhufuuf jiru tokkoo magaalaa sanaa fi iddoo qulqulluu ni barbadeessu. Dhumnis akkuma lolaatti dhufa: Waraanni hamma dhumaatti itti fufa; badiinis labsameera.

27 Bulchaan kunis 'Torban' tokkoof namoota baay'ee wajjin kakuu godhata; walakkaa 'Torban' sanaatti aarsaa fi kennaan akka hafu godha. Innis hamma wanni labsame sun isa irratti dhangala'utti waan xuraa'aa badiisa fidu mana qulqullummaa gubbaa ni dhaaba."

10

Daani'el Mul'ataan Nama Arguu Isaa

¹ Bara Qiros mooticha Faares keessa waggaa sadaffaatti Daani'el isa Beelxishaazaar jedhame sanatti mul'anni tokko mul'ate. Ergaan isaas dhugaa fi kan waa'ee waraanaa isuu ture. Hubannaan ergaa sanaas mul'ataan isaaf kenname.

² Yeroo sanatti ani Daani'el torban sadii nan boo'e. ³ Hamma torban sadan sun raawwatamanitti ani nyaata filatamaa tokko illee hin nyaanne; fooni yookaan daadhiin wayinii afaan koo hin seenne; dibata tokko illees hin dibanne.

⁴ Bultii digdamii afuraffaa ji'a jalqabaatti ani utuuu qarqara laga guddichaa Laga Xegroos irra dhaabadhee jiruu, ⁵ ol ilaalee namicha wayyaa quncee talbaa irraa hojjetame uffatee sabbata warqee Uufaaazii qulqulluu mudhii isaatti hidhate tokko fuula koo duratti arge. ⁶ Nafni isaa akka biiralee, fuulli isaa akka balaqqee, iji isaa akka guca boba'uu, irree fi miilli isaa akka naasii dibamee cululuqee, sagaleen isaa immoo akka sagalee namoota baay'ee ture.

⁷ Namni mul'ata sana arge anuma Daani'el qofa ture; namoonni na wajjin turan hin argine; garuu sodaan guddaan isaan qabatee baqatanii dhokatan. ⁸ Kanaafuu ani mul'ata guddaa kana ilaalaan kophaatti hafe; humna nan dhabe; fuulli koos ni geeddarame; nan laafes. ⁹ Kana irratti ani utuu inni dubbatuu nan dhaga'e; ani akkuman isa dhaga'een adda kootiin lafatti gombifamee hirribni cimaan na qabe.

¹⁰ Ergasii garuu harki tokko na qabee utuu ani holladhuu harkaa fi jilba kootiin na dhaabe. ¹¹ Innis, "Yaa Daani'el, ati kan akka malee jaallatamte dubbii ani sitti himuuf jiru sirriitti qabadhu; mul'anni sun waan yeroon isaa amma illee hin ga'in argisiisaatii."

¹² Ammas akkana naan jedhe; "Yaa Daani'el hin sodaatin. Guyyaa tokkoffaa gaafa ati hubannaa argachuu fi fuula Waaqa keetii duratti of xinneessuuf murteessitee jalqabee dubbiin kee dhaga'ameera; anis deebii isaa fidee dhufeera. ¹³ Ergamaan guddichi mootummaa Faares garuu bultii digdamii tokko naan morme. Sababii ani ilma mooticha mootummaa Faares wajjin achitti hafee tureef hangafoota ergamootaa keessaa Miikaa'el na gargaaruuf dhufe. ¹⁴ Ani amma waan gara fuula duraatti saba kee irra ga'uuf jiru sitti himuuf dhufeera; mul'anni sun waan yeroon isaa amma illee hin ga'in argisiisaatii."

¹⁵ Utuma inni waan kana natti dubbachaa jiruu ani mataa gad qabadhee waanan dubbadhus dhabe. ¹⁶ Ergasii inni nama fakkaatu tokko hidhii koo tuqe; anis afaan banadheen dubbachuu jalqabe. Isa fuula koo dura dhaabachaa ture sanaanis akkanan jedhe; "Yaa gooftaa ko, ani sababii mul'ata sanaatiif dhiphadheera; humnas dhabeera. ¹⁷ Yaa gooftaa ko, ani garbichi kee akkamittan si wajjin haasa'uu danda'a? Humni koo dhumeera; ani hafuura baafachuu illee dadhabeera."

¹⁸ Ammas inni nama fakkaatu sun na tuqee humna naa kenne. ¹⁹ Innis, "Yaa namicha akka malee jaallatamte, hin sodaatin; nagaan siif haa ta'u! Amma jabaadhu; jajjabaadhus" naan jedhe.

Yeroo inni natti dubbatetti ani nan jajjabaadhee, "Yaa Gooftaa ko, ati waan na jajjabeessiteef dubbadhu" isaan jedhe.

²⁰ Kana irratti inni akkana naan jedhe; "Ati waan ani gara kee dhufeef beektaa? Ani ergamaa guddicha mootummaa Faares loluuf nan deebi'a; yeroo ani deemutti immoo ergamaan guddichi mootummaa Giriik ni dhufa; ²¹ garuu ani duraan dursee waan Kitaaba Dhugaa keessatti barreeffame sittin hima. Isaan loluufis Miikaa'el hangafticha keessan malee kan na gargaaru kan biraa hin jiru.

11

¹ Anis bara Daariyoos namicha Meedon keessaa waggaa tokkoffaatti isa jajjabeessuu fi eeguuf isa bira dhaabadheen ture.

Mootota Kibbaatii fi Kaabaa

² "Egaa ani dhugaan sitti hima: Mootonni biraa sadii Faares keessatti ni ka'u; ergasiis mootiin afuraffaan warra kaan hunda irra sooressa ta'e tokko ni ka'a. Innis erga qabeenya isaatiin jabina argatee booddee tokkoo tokkoo namaa mootummaa Giriik irratti ni kakaasa. ³ Ergasii mootiin jabaan tokko ni ka'a; innis humna guddaadhaan ni bulcha; waan fedhes ni hojjeta. ⁴ Erga inni dhufee booddee mootummaan isaa diigamee

gara qilleensota samii afraniitti gargar qoqqoodama. Mootummaan isaa buqqa'ee mootota biraatiif waan kennamuuf sanyii isaatti hin darbu yookaan humna inni argateeture sana hin qabaatu.

⁵ “Mootiin Kibbaa ni jabaata; ajajjoota loltoota isaa keessaa tokko garuu isa caalaa iyyuu jabaatee humna guddaadhaan mootummaa sana bulcha. ⁶ Waggoota muraasaan booddee isaan tokko ta'u; walii galtee godhachuufis intalli mooticha Kibbaa gara mootii Kaabaa ni dhaqxi; garuu humna ishee qabattee turuu hin dandeessu; innii fi humni isaa jabaatee hin jiraatu. Bara sana keessa isheen, qondaaltota ishee, abbaa isheetii fi nama ishee gargaare wajjin dabarfamtee ni kennamti.

⁷ “Hidda sanyii ishee keessaa namni tokko iddoo ishee qabachuuf ni ka'a. Innis humnoota mootii Kaabaa dha'ee da'annoowwan isaas cabsee ni seena; lolees isaan mo'ata. ⁸ Inni waaqota isaanii, fakkiwwan isaanii kan sibiilaatii fi mi'oota isaanii gati jabeeyyii meetii fi warqee booji'ee gara Gibxitti ni geessa. Waggoota muraasaafis mootii Kaabaa waraanuu ni dhiisa. ⁹ Ergasii mootiin Kaabaa daangaa walitti qabataa ni qabata; garuu of irra garagalee biyya isaatti deebi'a. ¹⁰ Ilmaan isaa waraanaaf qophaa'anii humna waraanaa guddaa tokko walitti qabatu; humni kunis akkuma lolaa namni of irraa deebisuu hin dandeenye tokkootti hamma da'annoo isaatti duulee lola.

¹¹ “Ergasii mootiin Kibbaa aariidhaan duulee mootii Kaabaa kan loltoota hedduu walitti qabate sana ni waraana; loltoonni hedduun sun garuu ni mo'amu. ¹² Mootiin Kibbaa sun yommuu loltoota baay'ee booji'utti garaan isaa of tuulummaadhaan guutamee kuma baay'ees ni gogorra'a; garuu mo'ichi isaa itti hin fufu. ¹³ Mootiin kaabaa humna waraanaa kan isa duraa sana caalaa guddaa walitti qabataa; waggoota baay'ee booddees humna waraanaa guddaa kan guutummaatti hidhate qabatee ni dhufa.

¹⁴ “Yeroo sanatti namoonni baay'een mootii Kibbaatti ni ka'u. Mul'ata sana raawwachuuf uummata kee keessaa finciltoonni ni ka'u; garuu ni kufu. ¹⁵ Ergasii mootiin Kaabaa dhufee tuulaa biyyoo hojjetee magaalaa dallaadhaan marfamte ni qabata. Humnoonni waraana Kibbaas of irraa deebisuuf humna ni dhabu; loltoonni isaanii jajjaboon iyyuu isaan dura dhaabachuuf humna dhabu. ¹⁶ Inni itti duule sun waanuma fedhee hojjeta; namni tokko iyyuu of irraa isa deebisuu hin danda'u. Inni Biyya Bareedduu sana keessa jabaatee dhaabata; ishee balleessuufis humna qabaata. ¹⁷ Inni jabina mootummaa isaa guutuudhaan dhufuu murteessa; mootii Kibbaa wajjinis walii galtee godhata. Inni mootummaa sana kuffisuuf intala isaa itti heerumsiisa; karoori isaa kun garuu hin milkaa'u yookaan isa hin fayyadu. ¹⁸ Ergasii inni gara biyyoota qarqara galaanaa jiraniitti yaada isaa deebifatee baay'ee isaanii qabata; garuu ajajaan tokko of tuulummaa isaa ni fashaleessa; of tuulummaa isaas matuma isaatti deebisa. ¹⁹ Kana irratti inni fuula isaa gara da'annoowwan biyya isaatti deebifata; garuu gufatee kufa; deebi'ees hin argamu.

²⁰ “Namni iddoo isaa bu'u ulfina mootummaa eegsisuuf warra gibira walitti qaban ni erga. Ta'us inni utuu aariidhaan yookaan waraanaa hin ta'in yeroo gabaabaa keessatti bada.

²¹ “Iddoo isaas nama tuffatamaa ulfinni mootummaa hin kennaminiifitu qabata. Inni utuu sabni nagaadhaan jiraatuu mootummaatti duulee dabaan qabata. ²² Ergasii raayyaan guddaan tokko fuula isaa duraa ni haxaa'ama; innii fi hangafni kakuus ni balleeffamu. ²³ Inni erga isa wajjin walii galtee godhatee booddee hojii gowwoomsaa hojjeta; namoota muraasa wajjinis aangoo qabata. ²⁴ Yeroo kutaawwan biyya sooreyyiin nagaadhaan jiraatanitti isaanitti duulee waan abbootiin isaa yookaan akaakileen isaa hin hojjetin hojjeta. Innis waan booji'ame, waan saamamee fi qabeenya duuka bu'oota isaatiif ni qoqqooda. Inni da'annoowwan jigsuuf ni malata; garuu yeroo muraasaaf waan kana godha.

²⁵ “Inni raayyaa loltootaa guddaadhaan ciminaa fi jabina isaa mootii Kibbaa irratti ni kakaasa. Mootiin Kibbaas loltoota akka malee baay'ee fi humna qabaniin waraana labsa; garuu sababii mariin isa irratti mari'amuuf of irraa ittisuu hin danda'u. ²⁶ Warri maaddii mootichaa irraa nyaachaa turan isa balleessuu yaalu; loltoonni isaa ni barbadaa'u; baay'een isaaniiis waraana keessatti dhumu. ²⁷ Mootonni garaan isaanii hammina yaadu lamaan minjaala tokkotti naanna'anii tataa'anii wal sobu; garuu sababii barri dhuma yeroo murteeffametti dhufuuf wanni kun isaanii hin milkaa'u. ²⁸ Mootiin Kaabaa qabeenya guddaadhaan gara biyya isaatti deebi'a; garaan isaa garuu kakuu qulqulluu morma. Waanuma fedhee itti hojjetee gara biyya isaatti deebi'a.

²⁹ “Yeroo murteeffamettis deebi'ee Kibba weerara; yeroo kanatti garuu haalli isaa kan duraa sanaan adda ta'a. ³⁰ Doonniwwan Kitiim isa mormu; innis abdi kutata. Ergasii duubatti deebi'ee kakuu qulqulluutti dheekkamsa isaa buusa. Deebi'ees warra kakuu qulqulluu dhiisan jaallata.

³¹ “Humni loltoota isaas dallaa mana qulqullummaa jabaa sana xureessuuf ni ka’a; aarsaa guyyaa guyyaas ni hambisa. Ergasiis isaan xuraa’ummaa badiisa fidu tokko dhaabu. ³² Inni warra kakuu sana dhiisan gowwoomsee ni dogoggora; warri Waaqa isaanii beekan garuu jabaatani dhaabachuudhaan isa mormu.

³³ “Ogeeyyiin yoo yeroodhaaf goraadeedhaan dhuman illee yookaan gubaman illee yookaan booji’aman illee yookaan saamaman illee namoota hedduu ni barsiisu. ³⁴ Isaan yeroo dhumuu ga’anitti gargaarsa xinnaa argatu; fakkeessitoonni hedduunis isaan deeggaru. ³⁵ Ogeeyyii keessaa tokko tokko akka hamma dhumaatti calalamaniif, akka qulqulleeffamanii warra hir’ina hin qabne ta’aniif ni gufatu; wanni kun amma iyyuu yeroo murteeffametti ni dhufaatii.

Mootii Ol Ol Of Qabu

³⁶ “Mootiin waan jaallate hojjeta. Inni Waaqa kam iyyuu caalaa ol ol of qabee Waaqa waaqota mormuudhaan waan dhaga’amee hin beekne dubbata. Inni hamma yeroon dheekkamsaa guutamutti ni milkaa’a; wanni murteeffame sun guutamu qabaatii. ³⁷ Inni waaqota abbootii isaatiif yookaan kan dubartoonni isa jaallataniif yookaan Waaqa kamiif iyyuu ulfina hin kennu; garuu hunda isaanii caalaa ol ol of qaba. ³⁸ Qooda isaanii waaqa da’annoowwaniitiif ulfina kenna; inni waaqa abbootiin isaa hin beekin warqee fi meetiidhaan, dhagaawwan gati jabeeyyii fi kennaawwan gati jabeeyyiidhaan ulfeessa. ³⁹ Inni gargaarsa waaqa ormaatiin da’annoowwan jajjaboo waraana; warra isa jalatti bulanis akka malee kabaja. Namoota baay’ee irrattis bulchitoota isaan godhee gatiidhaan lafa qoodaaf.

⁴⁰ “Bara dhumaa keessa mootiin Kibbaa waraana itti bana; mootiin Kaabaas fardeen, gaariiwwanii fi dooniwwan hedduudhaan akkuma dambalii isa irra garagala. Biyyoota baay’ee weeraree akkuma lolaa isaan keessa ba’ee darba. ⁴¹ Akkasumas Biyya Bareedduu weerara. Biyyoonni baay’een harka isaa jala galu; Edoom, Mo’aabii fi hooggantoonni Amoon garuu isa jalaa ni ba’u. ⁴² Innis biyyoota baay’ee irratti aangoo isaa ni babal’ifata; Gibxis hin miliqxu. ⁴³ Qabeenya warqetii fi meetii, akkasumas badhaadhummaa Gibxi hunda to’annaa ofii isaa jala galfata; namoonni Liibiyatiif fi Itoophiyaas isa jalatti bulu. ⁴⁴ Garuu oduun ba’aa fi kaabaa dhufu isa sodaachisa; inni namoota baay’ee balleessuu fi fixuuf aarii guddaadhaan ni ba’a. ⁴⁵ Dunkaana mootummaa isaas galaanotaa fi tulluu bareedaa qulqulluu gidduu ni dhaabbata. Ta’u illee inni dhuma ofii isaatti ni dhufa; namni tokko iyyuu isa hin gargaaru.

12

Bara Dhumaa

¹ “Yeroo sanatti Miikaa’el hangafni ergamootaa inni saba kee eegu ni ka’a. Yeroon rakkinaa kan erga saboonni uumamanii jalqabee hamma gaafasiitti takkumaa ta’ee hin beekne tokko ni dhufa. Yeroo sanatti garuu namoonni kee kanneen maqaan isaanii kitaabicha keessatti galmeeffamee jiru hundi ni baraaramu. ² Warri biyyoo lafaa jala ciciisan baay’een ni ka’u: Gariin jireenya bara baraatiif, kaan immoo qaanii fi salphina bara baraatiif ka’u. ³ Ogeeyyiin akkuma ifa samiiwwaniitti calaqqisu; warri nama baay’ee gara qajeelummaatti fidanis akkuma urjiitti bara baraa hamma bara baraatti ni ifu. ⁴ Yaa Daani’el, ati garuu hamma bara dhumaatti dubbii kitaaba maramaa cufiitii chaappessi. Namoonni baay’een beekumsa dabalachuuf asii fi achi fiigu.”

⁵ Ani Daani’el nan ilaale; kunoo fuula koo dura namoonni biraa lama dhadhaabatani turan; tokko qarqara lagaa gamanaan, inni lammaffaan immoo qarqara lagaa gamasiin ture. ⁶ Isaan keessaa tokko namicha uffata quncee talbaa irraa hojjetame uffatee bishaanota lagaatii ol jiruun, “Waantonni dinqii kunneen raawwatamuuf yeroo hammantu hafa?” jedhe.

⁷ Namichi uffata quncee talbaa irraa hojjetame uffatee bishaanota lagaatiin ol ture sun harka isaa mirgaatii fi bitaa ol qabe; anis isaa, “Wanni kun baraan, barootaaf walakkaa baraatiif ta’a. Yeroo humni namoota qulqulluu dhuma irratti cabutti wanni kun hundi fiixaan ba’a” jedhee isa bara baraan jiraatu sanaan kakatu nan dhaga’e.

⁸ Anis nan dhaga’e; garuu hin hubanne. Kanaafuu ani, “Yaa gooftaa ko, dhumni waan kana hundaa maal ta’a?” jedheen gaafadhe.

⁹ Innis akkana jedhee deebise. “Yaa Daani’el, sababii hamma bara dhumaatti dubbiin sun chaappaan chaappeffameef ati karaa kee qabadhu. ¹⁰ Namoonni baay’een ni qulqulleeffamu; warra hir’ina hin qabne ni ta’u; ni calalamus; hamoonni garuu ittuma fufanii hammaatu. Namoota hamoo keessaa tokko iyyuu hin hubatan; ogeeyyiin garuu ni hubatu.

¹¹ “Gaafa aarsaan guyyaa guyyaatti dhi’atu hambifamee jalqabee hamma gaafa wanni jibbiisaan badiisa fidu sun achi dhaabatuutti guyyoota 1,290 ta’a. ¹² Namni obsee dhuma guyyoota 1,335 qaqqabu eebbifamaa dha.

¹³ “Ati garuu hamma dhumaatti karaa kee qabadhu. Ati ni boqotta; dhuma barootaattis dhaala kee kan siif qoodame fudhachuuf ni kaata.”

Raajii Hoose'aa

¹ Dubbiin WAAQAYYOO kan bara Uziyaan, Yootaam, Aahaaziitii fi Hisqiyaas mootota Yihuudaa keessa, akkasumas bara Yerobi'aam ilma Yoo'aash mooticha Israa'el keessa gara Hoose'aa ilma Bi'eer dhufe kanaa dha:

Niitii fi Ijoollee Hoose'aa

² Yeroo WAAQAYYOO karaa Hoose'aatiin dubbachuu jalqabetti WAAQAYYOO akkana isaan jedhe; "Sababii biyyattiin WAAQAYYOO irraa gortee yakka sagaagalummaa guddaa isaa hojjetteef ati dhaqiiitii niitii sagaagaltuu fi ijoollee hin amanamne ofii keetiif fudhadhu."

³ Kanaafuu inni dhaqee Goomer intala Diblaayim fuudhe; isheenis ulfoofttee ilma deesseef.

⁴ Kana irratti WAAQAYYOO Hoose'aatiin akkana jedhe; "Ani sababii dhiiga Yizri'eel keessatti dhangala'e sanaatiif dafee mana Yehuu waanan adabuuf Yizri'eel jedhii isa moggaasi; ani mootummaa Israa'el nan balleessa. ⁵ Gaafas ani Sulula Yizri'eel keessatti iddaa Israa'el nan cabsa."

⁶ Goomer amma illee ulfoofttee intala deesse. WAAQAYYOO Hoose'aatiin akkana jedhe; "Sababii ani isaaniif araaramuu fi si'achis mana Israa'eliif garaa hin laafneef Loo-Ruhaamaa jedhii ishee moggaasi. ⁷ Ta'us ani mana Yihuudaatiif garaa nan laafa; ani xiyyaan yookaan goraadeedhaan yookaan waraanaan yookaan fardeenin yookaan abbootii fardaatiin isaan hin oolchu; garuu ani WAAQAYYOO Waaqni isaanii isaan nan oolcha."

⁸ Goomer erga Loo-Ruhaamaa harma guusiftee booddee ulfoofttee ilma deesse. ⁹ Ergasiis WAAQAYYOO akkana jedhe; "Isin waan saba koo hin ta'inii fi anis Waaqa keessan hin ta'iniif Loo-Amii jedhii isa moggaasi.

¹⁰ "Ta'us Israa'el akkuma cirracha qarqara galaanaa kan madaalamuu yookaan hedamuu hin danda'amnee ta'a. Isaan iddoodhumaa itti, 'Isin saba koo miti' isaaniin jedhame sanatti, 'Ilmaan Waaqa jiraataa' jedhamanii ni waamamu. ¹¹ Guyyaan Yizri'eel waan guddaa ta'uuf, sabni Yihuudaatii fi sabni Israa'el deebi'anii tokko ta'u; isaan hoogganaa tokko muuddatanii biyya sana keessaa ni ba'u.

2

¹ "Obboolota keessaniin, 'Saba koo' obboleettota keessaniin immoo, 'Jaallatamtuu koo' jedhaa.

Adabamuu fi Haaromfamuu Israa'el

² "Haadha keessanitti dheekkamaa; isheetti dheekkamaa; isheen niitii koo mitiitii; anis dhirsaa ishee miti.

Isheen fuula ishee irraa ilaalcha ejjummaa haa balleessitu; amanamummaa dhabuus harma ishee gidduudhaa haa balleessitu.

³ Yoo kanaa achii ani wayyaa ishee irraa baasee akkuma guyyaa isheen dhalatte sanaa qullaa ishee nan hambisaa; akkuma gammoojjii ishee nan godha; lafa goggogaatti ishee nan geeddara; dheebuudhaanis ishee nan ajjeesa.

⁴ Isaan ijoollee ejjummaa waan ta'aniif, ani ijoollee isheettiif garaa hin laafu.

⁵ Haati isaanii amanamummaa dhabdee karaa salphinaatiin isaan ulfoofttee.

Isheen, 'Ani warra na jaallatu, warra nyaata koo fi bishaan koo, warra suufii koo fi wayyaa quncee talbaa irraa hojjetame, warra dibataa fi dhugaatii koo naaf kennan duukaa nan bu'a' jette.

⁶ Kanaafuu ani haafa qoraattiitiin daandii ishee nan cufa; akka isheen karaa ittiin baatu hin arganneef dallaa itti nan ijaara.

⁷ Isheen michoota ishee duukaa buuti; garuu isaan hin qaqqabdu; isaan barbaaddi; garuu hin argitu.

Ergasii isheen, 'Ani akkuma duraa
gara dhirsa kootti nan deebi'a;
amma caalaa yeroo sana wayya tureetii' jetti.

⁸ Isheen akka ani midhaan,
daadhii wayinii haaraa fi zayitii isheedhaaf kenne,
meetii fi warqee isaan Ba'aaliif dhi'eessanis
kan ishee irratti dhangalaase anuma akka ta'e hin beekne.

⁹ "Kanaafuu ani yeroo inni bilchaatutti midhaan koo,
daadhii wayinii koo haaraa illee yeroo inni qophaa'utti
irraa nan fudhadha.

Ani suufii koo fi wayyaa koo kan quncee talbaa irraa hojjetame
kanan qullaa ishee dhoksuudhaaf kenneefis
amma ishee irraa nan fudhadha.

¹⁰ Ani amma ijuma michoota ishee duratti
addaggummaa ishee nan saaxila;
namni tokko iyyuu harka koo keessaa ishee hin baasu.

¹¹ Ani ayyaana ishee hunda jechuunis,
ayyaana ishee kan waggaa, ayyaana ishee kan gaafa baatii haaraa,
ayyaana ishee kan Sanbataatii fi
ayyaanota ishee kanneen murtaa'an hunda nan hambisa.

¹² Ani muka wayinii isheetii fi muka harbuu ishee
kan isheen michoota kootu naaf kenne jettu sana nan barbadeessa.
Ani daggala isaan nan godha;
bineensi bosonaa isaan dheeda.

¹³ Ani guyyoota isheen itti
Ba'aaliif ixaana aarsite sanaaf ishee nan adaba;
isheen qubeelaa fi faaya garaa garaatiin
of miidhagsitee michoota ishee duukaa butee na irraanfate"
jedha WAAQAYYO.

¹⁴ "Kanaafuu ani amma ishee nan sossoba;
gara lafa gammoojjiitti ishee geessee
jaalalaan itti nan dubbadha.

¹⁵ Ani iddoo dhaabaa wayinii ishee deebisee nan kennaaf;
Sulula Aakooris balbala abdiin nan godha.
Isheen achitti akkuma gaafa shamarrummaa isheetti,
akkuma gaafa biyya Gibxii baateetti sirbiti.

¹⁶ "Ati gaafa sana" jedha WAAQAYYO;
" 'Dhirsa koo' jettee na waamta;
ati lammata deebitee, 'Gooftaa koo' naan hin jettu.

¹⁷ Ani maqaawwan Ba'aal afaan isheetii nan balleessa;
maqaan isaani lammata hin dha'amu.

¹⁸ Ani gaafas bineensa bosonaatii fi simbirroota samii wajjin,
uumamawwan lafa irra munyuuqan wajjin
isaaniif kakuu nan gala.

Ani akka isin nagaadhaan bultaniif
xiyya, goraadee fi waraana
lafa irraa nan balleessa.

¹⁹ Ani bara baraan ofii kootiif sin kaadhimadha;
ani qajeelummaa fi dhugaadhaan
jaalalaa fi gara laafinaan sin kaadhimadha.

²⁰ Ani amanamummaadhaan sin kaadhimadha;
atis WAAQAYYON ni beekta."

²¹ WAAQAYYO akkana jedha;
"Ani gaafas deebii siif nan kenna;
ani samiif deebii nan kenna;
samiinis lafaaf deebii ni kenna;

²² laftis midhaaniif, daadhii wayinii haaraa fi
zayitiif deebii kenniti;

isaanis Yizri'eeliif deebii kennu.

- ²³ Ani ofii kootiif lafa irra ishee nan dhaabbadha;
 ani kanan, 'Ati jaalallee koo miti' jedheen sana nan jaalladha.
 Ani warra, 'Isin saba koo miti' jedhaman sanaan, 'Isin saba koo ti' nan jedha;
 isaanis, 'Ati Waaqa koo ti' naan jedhu."

3

Hoose'aan Niitii Ofiitti Araarame

¹ WAAQAYYO akkana naan jedhe; "Namni biraa ishee jaallatee isheen sagaagaltuu taatu iyyuu, ati dhaqiitii ammas niitii keetti jaalala kee argisiisi. Akkuma WAAQAYYOO utuma isaan waaqota biraatti deebi'anii bixxillee wayinii jaallatanuu Israa'eloota jaallate sana atis ishee jaalladhu."

² Kanaafuu ani meetii saqilii kudha shaniin, garbuu hoomeerii tokkoo fi walakkaatiin ishee nan bitadhe. ³ Ani ergasii akkana nan jedheen; "Ati bara hedduu na wajjin jiraachuu qabda; ati sagaagaltuu ta'uu yookaan nama kam iyyuu wajjin tokko ta'uu hin qabdu; ani si wajjin nan jiraadha."

⁴ Israa'eloonni mootii yookaan ilma mootii malee, aarsaa yookaan utubaa waaqeffanna malee dirata yookaan waaqota tolfamoo malee bara baay'ee ni jiraatuutii. ⁵ Ergasii immoo Israa'eloonni deebi'anii WAAQAYYO Waaqa isaanii fi Daawit mootii isaanii barbaadu. Isaan bara dhumaa keessa hollachaa gara WAAQAYYOOTII fi gara eebba isaa ni dhufu.

4

Himatamuu Israa'el

¹ Yaa Israa'eloota, WAAQAYYO isin warra biyyattii keessa jiraattan irratti himata dhi'eeffatu waan qabuuf dubbii WAAQAYYOO dhaga'aa:

"Biyyattii keessa amanamummaan,
 jaalallii fi Waaqa beekuun hin jiru.

² Abaaruu, sobuu fi ajjeesuu,
 hanna fi ejja qofatu jira;

isaan kakuu hunda ni cabsu;
 dhiiga dhangalaasuutu baay'ata.

³ Sababii kanaaf biyyattiin ni gadditi;
 warri ishee keessa jiraatan hundis ni badu;
 bineensonni bosonaa, simbirroonni samiitii fi
 qurxummiin galaanaa dhumaa jiru.

⁴ "Garuu namni tokko iyyuu dubbii hin kaasin;
 namni tokko iyyuu nama kaan hin himatin;
 sabni keessan

akkuma nama luba himatu tokkoo ti.

⁵ Ati halkanii fi guyyaa gufatta;
 raajonnis isin wajjin gufatu.

Kanaafuu ani haadha kee nan balleessa;

⁶ sabni koo beekumsa dhabuudhaan badeera.

"Waan ati beekumsa tuffatteef
 anis akka ati luba naaf hin taaneef si tuffadheera;
 sababii ati seera Waaqa keetii gatteef
 anis ilmaan kee nan gata.

⁷ Luboonni akkuma baay'achaa deemaniin,
 akkasuma cubbuu natti hojjechuu baay'isan;
 isaan ulfina isaanii salphinatti geeddaraniiru.

⁸ Isaan cubbuu saba kootii nyaatu;
 hammina isaaniis ni hawwu.

⁹ Wannii kunis akkuma sabaa, akkuma lubootaa ta'a.
 Anis sababii karaa isaanii fi
 lachan isaanii iyyuu nan adaba;
 hojii isaaniis isaanumatti nan deebisa.

- 10 "Isaan ni nyaatu; garuu hin quufan;
ni sagaagalu; garuu hin baay'atan;
kunis sababii isaan WAAQAYYON dhiisanii
dabarsanii ¹¹ sagaagaltummaatti,
daadhii wayinii moofaa fi
haaraa hubannaa isaanii fudhatetti of kennaniif.
- 12 Sabni koo waaqa muka irraa tolfame gorsa gaafata;
uleen falfaltuus isaanitti dubbata.
Hafuurri sagaagaltummaa karaa irraa isaan jal'isa;
isaan Waaqa isaaniitiif hin amanaman.
- 13 Isaan fiixeewwan tulluu irratti qalma,
aarsaa gubamu immoo gaarran irratti,
qilxuu jalatti, alaltuu fi hoomii
gaaddisni isaanii namatti tolu jalatti dhi'eessu.
Kanaafuu intallan keessan sagaagaltummaatti deebi'u;
niittonni ilmaan keessaniis ejjatti deebi'u.
- 14 "Sababii warri dhiiraa iyyuu sagaagaltummaatti deebi'anii
galma waaqeffannaa ejaatti qalma dhi'eessaniif,
yommuu intallan keessan
sagaagaltummaatti deebi'anitti
yookaan yommuu niittonni ilmaan keessanii
ejjatti deebi'anitti ani isaan hin adabu;
sabni hubannaa hin qabne ni badaatii!
- 15 "Yaa Israa'el, ati yoo eja hojjette illee
akka Yihuudaan yakka qabaatu hin godhin.
- "Isin Gilgaal hin dhaqinaa;
Beet Aawwenittis ol hin ba'inaa.
'Dhugaa WAAQAYYO jiraataa!' jettaniis hin kakatinaa.
- 16 Israa'eloonni akkuma goromsa
mataa jabaate tokkoo mataa jabeeyyii ta'aniiru.
Yoos WAAQAYYO akkamiin akka xobbaallaawwan hoolaatti
kaloo bal'aatti isaan bobbaasuu danda'a ree?
- 17 Efreem waaqota tolfamootti galeera;
isa ittuma dhiisaa!
- 18 Dhugaatiin isaanii yoo dhume iyyuu
isaan sagaagaltummaa isaanii ittuma fufu;
bulchitoonni isaanii ulfina irra qaanii jaallatu.
- 19 Bubbeen hamaan haxaa'ee isaan balleessa;
aarsaan isaaniis qaanii isaanitti fida.

5

Murtii Israa'elitti Murteeffame

- 1 "Isin luboonni waan kana dhaga'aa!
Israa'eloonnis qalbeeffadhaa!
Yaa mana mootii dhaggeeffadhu!
Murtiin kun isinitti murama:
Isin Miisphaatti kiyyoo,
Taabor irratti immoo xaxoo diriirsaa turtan.
- 2 Finciltoonni ajjechaatti jabaataniiru.
Ani isaan hunda nan adaba.
- 3 Ani waa'ee Efreem hunda beeka;
Israa'elis na duraa hin dhokattu.
Yaa Efreem, ati amma sagaagaltummaatti deebiteerta;
Israa'elis xuraa'eera.
- 4 "Hojiin isaanii akka isaan gara Waaqa isaaniitti
deebi'an hin eeyyamuuf.
Hafuurri sagaagaltummaa garaa isaanii keessa jira;
isaan WAAQAYYON hin beekan.

- ⁵ Of tuulummaan Israa'el dhugaa isaanitti ba'a;
 Israa'eloonni, Efreem mataan isaa iyyuu
 cubbuu isaanii keessatti gufatu;
 Yihuudaanis isaan wajjin gufata.
- ⁶ Isaan yommuu WAAQAYYOON barbaaduudhaaf
 bushaayee fi loon isaanii fudhatanii deemanitti,
 isa hin argatan;
 inni isaan dhiisee deemeeraatii.
- ⁷ Isaan WAAQAYYOOF amanamoo miti;
 seeraan ala ijoollee godhatu.
 Yeroo isaan Ayyaana Baatii Haaraa ayyaaneffatanitti
 inni lafa qotiisaa isaanii ni balleessa.
- ⁸ "Gibe'aa keessatti malakata,
 Raamaa keessatti immoo gaanfa afuufaa.
 Beet Aawwen keessatti iyya lolaa dhageessisaa;
 yaa Beniyaam, ati dura qajeeli.
- ⁹ Guyyaa ifannaatti
 Efreem ni ona.
 Ani gosoota Israa'el gidduutti
 waan mirkanaa'e nan labsa.
- ¹⁰ Bulchitoonni Yihuudaa
 akkuma nama dhagaa daarii dhiibu tokkoo ti.
 Ani akkuma lolaa bishaanii
 dheekkamsa koo isaanitti gad nan lolaasa.
- ¹¹ Efreem sababii waaqota tolfamoo
 duukaa bu'uu jaallateef akka malee hacuucamee
 murtiidhaan lafatti dhidhiitame.
- ¹² Ani Efreemitti akka bilii,
 Yihuudaatti immoo akka daana'oo ti.
- ¹³ "Yommuu Efreem dhukkuba isaa,
 Yihuudaanis madaa isaa argetti,
 Efreem gara Asooritti garagalee
 mooticha guddaa gargaarsa kadhachuudhaaf
 nama itti erge.
 Inni garuu isin fayyisuu,
 madaa keessanis wayyeessuu hin danda'u.
- ¹⁴ Ani Efreemitti akkuma leencaa,
 Yihuudaattis akkuma saafela leencaa nan ta'a.
 Ani gargar isaan ciccireen biraa deema;
 ani isaan guureen deema; namni isaan oolchus hin jiru.
- ¹⁵ Ergasii ani hamma isaan
 balleessaa isaanii fudhatanitti
 iddoo kootti nan deebi'a.
 Isaan fuula koo barbaaddatu;
 rakkoo isaanii keessatti jabaatanii na barbaaddatu."

6

Israa'el Qalbii Jijjiirrachuu Didde

- ¹ "Kottaa gara WAAQAYYOOTTI deebinaa.
 Inni nu ciccireera;
 garuu nu fayyisa;
 inni nu madeesseera;
 garuu madaa keenya ni waldhaana.
- ² Akka nu fuula isaa dura jiraannuuf,
 guyyaa lama booddee nu bayyanachiisa;
 guyyaa sadaffaatti immoo deebisee nu dhaaba.
- ³ Kottaa WAAQAYYOON haa beeknu;
 isa beekuufis haa tattaaffannu.
 Akkuma aduun dhugumaan baatu sana

inni dhugumaan ni dhufa;
 inni akkuma bokkaa gannaa,
 akkuma bokkaa birraa kan lafa quubsu sanaatti
 gara keenya ni dhufa.

4 “Yaa Efreem, ani maalan si godha?

Yaa Yihuudaa, ani maalan si godha?

Jaalalli keessan akkuma hurrii ganamaa,
 akkuma fixeensa barrii baduu ti.

5 Kanaafuu ani raajota kootiin isin cicciree
 dubbii afaan kootiin isin fixe;
 murtiin koos akkuma aduu ni ba’a.

6 Ani araraan fedha malee aarsaa hin fedhuutii;
 aarsaa gubamu caalaa Waaqa beekuu nan fedha.

7 Isaan akkuma Addaam kakuu cabsaniiru;
 achittis anaaf hin amanamne.

8 Gili’aad magaalaa hamootaa
 kan dhiigaan faalamtee dha.

9 Akkuma saamtuun riphxee nama eeggattu sana,
 gareen lubootaas akkasuma godhu;
 isaan yakka qaannessaa hojjechuudhaan
 karaa Sheekem irratti nama ajjeesu.

10 Ani mana Israa’el keessatti
 waan suukaneessaa tokko argeera.
 Achitti Efreem ni sagaagale;
 Israa’elis ni xuraa’e.

11 “Yaa Yihuudaa sittis
 haamamuun murteeffameera.

“Yeroo ani boojuu saba koo deebisutti,

7

1 yeroo ani Israa’elin fayyisutti
 cubbuun Efreem saaxilamee
 yakki Samaariyaas ifatti baafama.

Isaan nama gowwoomsu;
 hatuun cabsitee mana seenti;
 saamtonni daandii irratti nama saamu;

2 isaan garuu akka ani jal’ina isaanii hunda
 yaadadhu hin hubatan.

Cubbuun isaanii isaan marseera;
 yeroo hundas fuula koo dura jira.

3 “Isaan hammina isaaniitiin mootii,
 soba isaaniitiin immoo ilmaan mootii gammachiisu.

4 Isaan hundinuu ejjitoota,
 akkuma badaa ibiddaa
 kan tolchituun tokko yeroo bukoo sukkuumanii jalqabee
 hamma inni bukaa’utti itti tuttuquu hin barbaannee ti.

5 Guyyaa ayyaana mootii keenyaatti
 ilmaan moototaa daadhii wayiniitiin finiinan;
 innis qoostota wajjin harka isaa diriirsa.

6 Akkuma badaa ibiddaatti garaa isaanii qopheessaniiru;
 isaan dabaan gara isaatti dhi’aatu.

Aariin isaanii halkan guutuu irraa hin galu;
 ganama immoo akkuma arraba ibiddaa balali’a.

7 Hundi isaanii akkuma badaa ibiddaa ho’u;
 bulchitoota isaaniis ni fixu.

Mootonni isaanii hundinuu ni dhumu;
 tokkoon isaanii iyyuu na hin waammatan.

- 8 "Efreem sabootaan walitti makama;
Efreem maxinoo gara hin galfaminii dha.
- 9 Namoonni ormaa humna isaa nyaatan;
inni garuu hin hubatu.
Arriin isatti ba'e;
inni garuu hin beeku.
- 10 Of tuulummaan Israa'el dhugaa isatti ba'a;
inni garuu utuu wanni kun hundi akkana ta'ee jiruu,
gara WAAQAYYO Waaqa isaatti hin deebi'u
yookaan isa hin barbaaddatu.
- 11 "Efreem akkuma gugee
gowwaa sammuu hin qabnee ti;
isaan Gibxin waammatu;
isaan gara Asooritti deebi'u.
- 12 Yommuu isaan deeman ani kiyoo koo isaan irra nan buusa;
ani akkuma simbirroo samii gad isaan nan harkisa.
Ani yommuun akka isaan walii wajjin yaa'an dhaga'utti,
isaan nan qaba.
- 13 Waan narraa goraniif
isaaniif wayyoo!
Waan natti fincilaniif
badiisni isaaniif mala!
Ani isaan furuu nan barbaada;
isaan garuu waa'ee koo soba dubbatu.
- 14 Isaan garaa isaani guutuudhaan gara kootti hin iyyatan;
garuu siree isaani irra tataa'ani boo'u.
Isaan midhaanii fi daadhii wayiniitiif walitti qabamu;
garuu natti fincilu.
- 15 Ani leenjiseen irree isaani jajjabeesse;
isaan garuu waan hamaa natti yaadu.
- 16 Isaan gara Waaqa Waan Hundaa Oliitti hin deebi'an;
isaan akkuma xiyya jal'atee ti.
Hooggantoonni isaani sababii soba dubbataniif
goraadeedhaan dhumu.
Sababii kanaaf isaan biyya Gibxitti
ni tuffatamu.

8

Israa'el Bubbee Hamaa Haammata

- 1 "Malakata afaan keetti kaa'adhu!
Sababii namoonni kakuu koo cabsanii
seera kootti fincilaniif
risaan tokko mana WAAQAYYOOTIIN ol jira.
- 2 Israa'el, 'Yaa Waaqa keenya nu si beekna!' jedhee
gara kootti iyyate.
- 3 Ta'u iyyuu Israa'el waan gaarii dideera;
kanaafuu diinni isa ari'a.
- 4 Isaan walii galtee koo malee mootota moosifatan;
utuu ani hin fudhatiniif ilmaan moototaa filatan.
Isaan meetii fi warqee isaaniitiin
badiisa isaaniitiif
waaqota tolfamoo ofii isaaniitiif tolfatan.
- 5 Yaa Samaariyaa, waaqa kee tolfamaa bifa jabbii sana baasii gati!
Dheekkamsi koo isaaniitti boba'a.
Isaan hamma yoomiitti qulqullaa'uu dadhabu?
- 6 Isaan warra Israa'el!
Jabbii kana ogeessa hojii harkaatu tolche;
inni Waaqa miti.
Jabbiin Samaariyaa ni hurraa'a.
- 7 "Isaan bubbee facaafatanii

- bubbee hamaa haammatu.
 Mukni isaa mataa hin qabu;
 daraaraas hin baasu.
 Utuu inni midhaan naqatee
 silaa namoonni ormaa ni nyaatu ture.
- ⁸ Israa'el liqimfameera;
 isaan amma saboota gidduutti
 akka waan faayidaa hin qabne tokkoo ti.
- ⁹ Isaan akkuma harree diidaa kan asii fi
 achi kophaa jooruu gara Asooriitti ol ba'aniiruutii;
 Efreemis michootatti of gurgureera.
- ¹⁰ Isaan saboota gidduutti yoo of gurguran iyyuu
 ani amma walitti isaan nan qaba.
 Isaan hacuuccaa mooticha jabaa jalatti
 ni sukkuumamu.
- ¹¹ "Efreem aarsaa cubbuutiif
 iddoo aarsaa hedduu yoo hojjete iyyuu,
 lafti sun iddoo aarsaa itti cubbuu hojjechuuf
 qopheessan ta'eera.
- ¹² Ani waa'ee seera koo waan baay'ee isaaniif barreesseera;
 isaan garuu akkuma waan alaa dhufe tokkootti ilaalu.
- ¹³ Isaan aarsaa naaf kenname dhi'eessu;
 foon sanas ni nyaatu;
 WAAQAYYO garuu isaanitti hin gammanne.
 Inni amma hammina isaanii yaadatee
 cubbuu isaanii adaba:
 Isaan gara Gibxitti deebi'u.
- ¹⁴ Israa'el Uumaa isaa irraanfatee
 masaraawwan mootummaa ijaare;
 Yihuudaan magaalaawwan hedduutti dallaa ijaare.
 Ani garuu ibidda da'annoowwan isaanii
 barbadeessu magaalaawwan isaaniitti nan erga."

9

Adabbii Israa'elitti Dhufu

- ¹ Yaa Israa'el hin ililchin;
 akka saboota kaanii hin gammadin.
 Ati Waaqa keetiif amanamaa hin turreetii;
 ati oobdii hunda irratti gatii
 sagaagaltummaadhaaf baafamu jaallatteerta.
- ² Oobdiwwanii fi iddoon cuunfaa wayinii saba hin sooran;
 daadhiin wayinii haaraan isaaniif hin tolu.
- ³ Isaan biyya WAAQAYYOO keessatti hin hafan;
 Efreem gara Gibxitti deebi'ee
 Asoor keessatti nyaata xuraa'e nyaata.
- ⁴ Isaan dhibaayyuu daadhii wayinii WAAQAYYOO hin dhibaafatan;
 yookaan aarsaan isaanii isa hin gammachiisu.
 Aarsaan akkasii akkuma buddeena warra gaddaa isaanitti ta'a;
 namni buddeena kana nyaatu hundinuu ni xuraa'a.
 Nyaanni kun kanuma mataa isaanii ta'a;
 mana qulqullummaa WAAQAYYOO ol hin seenu.
- ⁵ Isin guyyaa ayyaana keessan murteeffameetti,
 guyyoota ayyaana WAAQAYYOO sanatti maal hojjetu?
- ⁶ Yoo isaan badiisa jalaa ba'an iyyuu
 Gibxi walitti isaan qabdi;
 Memfiis immoo isaan awwaala.
- Qabeenyi meetii isaanii sokorruudhaan liqimfama;
 dunkaana isaanii immoo qoraattiitu haguuga.
- ⁷ Guyyoonni adabbii dhufaa jiru;

- guyyoonni itti gatii baasan dhi'aataniiru.
 Israa'el waan kana haa beeku.
 Sababii cubbuun kee akka malee baay'atee
 hamminni kees akka malee guddaa ta'eef,
 raajiin akka raatuutti ilaalame;
 namni Hafuura Waaqaatiin qajeelfamu immoo
 akka maraatuutti hedame.
- ⁸ Raajichi Waaqa koo wajjin
 eegduu Efreem ta'e;
 ta'us daandii isaa hunda irratti kiyoon isa eeggata;
 mana Waaqa isaa keessatti jibbi isa eeggata.
- ⁹ Isaan akkuma bara Gibe'aa keessatti ta'e sana
 xuraa'ummaa keessa dhidhiman.
 Waaqni hammina isaanii yaadatee
 sababii cubbuu isaaniitiif isaan adaba.
- ¹⁰ "Yeroo ani Israa'elin argetti,
 inni akkuma ija wayinii gammoojjii keessatti argamee ture;
 yeroo ani abbootii keessan argetti,
 isaan akkuma waan ija jalqabaa harbuu irratti argamee turan.
 Isaan garuu yommuu gara Ba'aal Phe'oor dhufanitti,
 waaqa tolfamaa qaanessaa sanaaf of qulqulleessanii
 akkuma waan jaallatan sanaa jibbisiisoo ta'an.
- ¹¹ Ulfinni Efreem akkuma simbirroo barrisee bada;
 dhalchuun, garaatti baachuun, ulfaa'uun hin jiru.
- ¹² Yoo isaan ijoollee guddifatan iyyuu
 ani jalaa fixee ilmaan malee isaan nan hambisa.
 Gaafa ani isaan irraa garagalu
 isaaniif wayyoo!
- ¹³ Ani Efreemin isaa akkuma Xiirros
 lafa namatti tolu irra dhaabatee jiru nan arge.
 Sabni Efreem garuu ijoollee isaa gad baasee
 warra gogorra'utti kenna."
- ¹⁴ Yaa WAAQAYYO isaaniif kenni;
 ati maal isaaniif kennita?
 Gadameessa ulfa hin baannee fi
 harma goggogaa kenniif.
- ¹⁵ "Sababii hammina isaanii kan Gilgaal keessatti hojjetame sana hundaatiif,
 ani achitti isaan nan jibbe.
 Sababii hojii isaanii kan cubbuudhaan guutamee sanaatiif
 ani mana koo keessaa isaan ari'a.
 Ani si'achi isaan hin jaalladhu;
 bulchitoonni isaanii hundinuu finciltoota.
- ¹⁶ Efreem rukutameera;
 hiddi isaanii goggogeera;
 isaan ija tokko illee hin godhatan.
 Yoo isaan ijoollee godhatan iyyuu
 ani sanyii isaanii jaallatamoo isaan jalaa nan qala."
- ¹⁷ Sababii isaan isaaf hin ajajaminiif,
 Waaqni koo isaan dida;
 isaan warra asii fi achi saboota gidduu jooru ta'u.

10

- ¹ Israa'el muka wayinii dagaage ture;
 inni matuma isaatiif ija naqata.
 Akkuma iji isaa baay'ateen
 inni iddoo aarsaa hedduu ijaarrate;
 akkuma lafti isaa gabbatteen

utubaawwan waaqeffannaa isaa miidhagfate.

² Garaan isaanii gowwoomsaadhaan guutameera;
isaan amma yakka isaanii baadhachuu qabu.

WAAQAYYO iddoo aarsaa isaanii ni diiga;
utubaawwan waaqeffannaa isaaniis ni barbadeessa.

³ Ergasii isaan akkana jedhu;
“Nu sababii WAAQAYYOON sodaachuu didneef mootii hin qabnu.

Garuu utuu mootii qabaanne iyyuu
inni silaa maal nuuf godha?”

⁴ Isaan waan hedduu waadaa galu;
kakuu sobaas seenanii
walii galtee uummatu;
kanaafuu seera dhabeeyyiin
akkuma aramaa summii qabu kan lafa qotiisaa keessaatti latu.

⁵ Namoonni Samaariyaa keessa jiraatan
sababii waaqa tolfamaa fakkii jabbii
kan Beet Aawwen keessaa sanaatiif sodaatu.

Sabni ishee isheedhaaf boo'a.
Luboonni ishee ejjitoonni
warri ulfina isheetiin gammadan sunis
sababii isheen isaan irraa booji'amteef ni boo'u.

⁶ Jabbichis akka harka fuudhaatti
Yaariim mootichaaf Asooritti geeffama.

Efreem ni salphifama;
Israa'el waaqota ishee kanneen muka irraa tolfamaniif ni qaanofti.

⁷ Samaariyaa fi mootiin ishee
akkuma hoomacha bishaan irraatti fudhatamanii badu.

⁸ Iddoowwan sagadaa kanneen Awween ni barbadeeffamu;
kunis cubbuu Israa'el.

Qoraattii fi sokorruun irratti biqilee
iddoo aarsaa isaanii haguuga.
Yeroo sana namoonni tulluuwwaniin, “Nurratti jigaa!”
gaarraniin immoo, “Nu dhoksa!” jedhu.

⁹ “Yaa Israa'el isin bara Gibe'aatii jalqabdani
cubbuu hojjettaniirtu;
ammas achumatti haftaniirtu.

Gibe'aa keessatti waraanni ka'ee
jal'oota hin fixuu?

¹⁰ Ani yoon fedhe isaan nan adaba;
sababii cubbuu isaanii dachaa sanaatiif
hidhaa keessa isaan buusuuf
saboonna naannoo isaaniitti walitti qabamu.

¹¹ Efreem goromsa leenjifame
kan midhaan siribsiisuu jaallatuu dha;
kanaafuu ani morma ishee irra
waanjoo nan kaa'a.

Ani Efreemin nan oofa;
Yihuudaan lafa qotiisaa qotuu qaba;
Yaaqoobis biyyoo bulleessuu qaba.

¹² Ofii keessaniif qajeelummaa facaafadhaatii
ija jaalalaa kan hin dhumne haammadhaa;
lafa keessan kan hin qotamin illee baqaqsaa;
yeroon kun yeroo hamma inni dhufee
qajeelummaa isinitti roobsutti
WAAQAYYOON barbaaddataniitii.

¹³ Isin garuu hammina facaafattanii
jal'ina haammattan;
isin ija sobaa nyaattaniirtu.
Sababii ati jabina keetii fi
loltoota kee baay'ee sana abdatteef,

- 14 akkuma Shalmaan gaafa lolaatti Beet Arbeelin balleessee
haadhota ijoollee isaanii wajjin biyyootti makaman sana,
da'annoowwan kee hundi ni barbadaa'u;
huursaan waraanaas saba keetti ni ka'a.
- 15 Yaa Beet'eel, sababii hamminni kee akka malee guddaa ta'eef,
wannu akkasii sittis ni dhufu.
- Gaafa guyyaan sun bari'utti
mootiin Israa'el guutumaan guutuutti ni barbadeeffama.

11

- Jaalala Waaqni Israa'eliif Qabu*
- 1 "Israa'el yeroo daa'ima turetti, ani isa nan jaalladhe;
ani Gibxii ilma koo waameera.
- 2 Garuu hammuma ani itti deddeebi'ee isaan waamu,
isaan narraa fagaachaa deeman.
- Isaan Ba'aaliif aarsaa dhi'eessanii
fakkiwwaniif ixaana aarsan.
- 3 Kan irree isaanii qabee Efreemin
miillaan deemuu barsiise anuma;
isaan garuu akka ani
isaan fayyise hin hubanne.
- 4 Ani funyoo gara laafina namaatiin,
hidhaa jaalalaatiinis isaan nan harkise;
ani morma isaanii irraa waanjoo fuudhee
isaan sooruuf gadan jedhe.
- 5 "Isaan qalbii jijjiirrachuu waan didaniif
Gibxitti hin deebi'an;
Asoor garuu isaan bulcha.
- 6 Goraadeen magaalawwan isaanii keessatti balaqqisa;
raajota sobduu isaanii ni barbadeessa;
karoora isaaniis ni fashaleessa.
- 7 Sabni koo narraa deebi'uuf kutateera.
Yoo isaan Waaqa Waan Hundaa Olii waammatan iyyuu
inni gonkumaa ol isaan hin qabu.
- 8 "Yaa Efreem ani akkamiinan danda'ee si dhiisa?
Yaa Israa'el ani akkamiinan dabarsee si kenna?
Ani akkamiinan danda'ee akka Adimaa si godha?
Akkamiinan akka Zeboo'iim si godha?
Garaan koo na keessatti geeddaramaera;
gara laafinni ani siif qabu guddateera.
- 9 Ani dheekkamsa koo sodaachisaa sana gad hin dhiisu;
yookaan ani deebi'ee Efreemin hin balleessu.
- Ani Waaqa malee nama miti;
ani Isa Qulqulluu gidduu kee jiruu dha.
Ani dheekkamsaan hin dhufu.
- 10 Isaan WAAQAYYON duukaa bu'u;
inni akkuma leencaa aada;
yommuu inni aadutti
ilmaan isaa hollachaa lixa biiftuutii dhufu.
- 11 Isaan akkuma simbirroo Gibxi irraa,
akkuma gugee ollachaa
Asoor irraa dhufu.
- Ani mana isaanii keessa isaan nan jiraachisa"
jedha WAAQAYYO.
- Cubbuu Israa'el*
- 12 Efreem sobaan, manni Israa'el immoo
gowwoomsaadhaan na marse.
- Yihuudaanis Waaqatti,
amanamaa Qulqullicha Sanatti iyyuu fincile.

12

- ¹ Efreem bubbee nyaata;
inni guyyaa guutuu bubbee ba'a biiftuu duukaa fiiga;
sobaa fi gooliis ni baay'isa.
Inni Asoor wajjin walii galtee godhatee
biyya Gibxiitti zayitii ejersaa erga.
- ² WAAQAYYO waan Yihuudaa himatu qaba;
inni akkuma amala isaatti Yaaqoobin adaba;
akkuma hojii isaattis gatii isaa kennaaf.
- ³ Inni gadameessa keessatti koomee obboleessa isaa qabe;
erga guddatee immoo Waaqa wajjin wal'aansoo qabe.
- ⁴ Inni ergamaa Waaqaa wajjin wal'aansoo qabee mo'ate;
boo'ees surraa kadhate.
Inni Beet'eelitti isa argatee
achitti isa wajjin haasa'e.
- ⁵ WAAQAYYO Waaqa Waan Hunda Danda'u,
maqaan isaa WAAQAYYO!
- ⁶ Ati garuu Waaqa keetti deebi'i;
jaalalaa fi murtii qajeelaa jabeessii
yeroo hunda Waaqa kee eeggadhu.
- ⁷ Daldalaan madaalii sobaa ofi harkaa qabu
nama gowwoomsuu jaallata.
- ⁸ Efreem akkana jedhee boona;
"Ani akka malee sooressa; qabeenya guddaa argadheera.
Isaan qabeenya koo kana hunda keessatti iyyuu
balleessaa yookaan cubbuu tokko illee
narratti argachuu hin danda'an."
- ⁹ "Ani WAAQAYYO Waaqa kee
kan biyya Gibxii si baasee dha;
ani akka ati akkuma guyyaa ayyaanota kee
kanneen murteeffaman sanaatti
deebitee dunkaana keessa jiraattu sin godha.
- ¹⁰ Ani raajotatti dubbadhee
mul'ata hedduu kenneefii
karaa isaaniitiin fakkeenyaan nan dubbadhe."
- ¹¹ Gili'aad hamaadhaa?
Sabni ishee faayidaa hin qabu!
Isaan Gilgaal keessatti korma qaluu?
Iddoon aarsaa isaanii akkuma tuullaa dhagaa isa lafa qotiisaa
kan qotame irra jiruu ni ta'a.
- ¹² Yaaqoob gara Sooriyaatti baqate;
Israa'el niitii argachuuf nama tajaajile;
gabbara ishee baasuufis hoolota tikse.
- ¹³ WAAQAYYO biyya Gibxiitii Israa'elin baasuuf
raajiitti fayyadame;
inni karuma raajii sanaatiin isa kunuunse.
- ¹⁴ Efreem garuu aarii isaa guddicha kakaase;
Gooftaan isaa yakka dhiiga namaa dhangalaasuu sana
isumatti deebisa;
arrabsoo isaas matuma isaatti deebisa.

13*WAAQAYYO Israa'elitti Dheekkame*

- ¹ Yeroo Efreem dubbatetti namoonni ni hollatan;
inni Israa'el keessatti ol ol jedhee ture.
Garuu yakka Ba'aalin waaqeffachuutiin du'e.
- ² Isaan ammas itti deddeebi'anii cubbuu hojjetu;
meetii ofii isaaniitiin waaqa tolfamaa tolfatu;
fakkii mimmiidhagaa kanneen hundi isaanii

- harka ogeeyyiitiin hojjetaman.
 Waa'ee saba kanaas,
 "Isaan nama qalanii aarsaa dhi'eessu;
 waaqa tolfamaa jabbiis ni dhungatu!" jedhame.
- ³ Kanaafuu isaan akkuma hurrii ganamaa,
 akkuma fixeensa barii baduu, akkuma habaqqii
 oobdii midhaan itti dha'an irraa ka'uu
 akkuma aara foddaadhaan ba'uu ni ta'u.
- ⁴ "Ani garuu yeroo ati Gibxii baatee jalqabee
 WAAQAYYO Waaqa kee ti.
 Ati ana malee Waaqa tokko illee beekuu hin qabdu;
 ana malee fayyisaa tokko illee hin qabdu.
- ⁵ Ani gammoojjii keessatti,
 biyya ho'a gubaa keessatti si kunuunseera.
- ⁶ Yeroo ani isaan sooretti ni quufan;
 isaan yeroo quufanitti of tuulan;
 ergasii immoo na irraanfatan.
- ⁷ Kanaafuu ani akkuma leencaa isaanitti nan ta'a;
 akkuma qeerransaa riphee daandii irratti isaan nan eeggadha.
- ⁸ Ani akkuma amaaketa ilmaan ishee jalaa fudhatamaniitti
 isaan lolee garaa isaanii nan baqaqsa.
 Ani akkuma leencaatti qorqee isaan nan nyaadha;
 bineensi bosonaa gargar isaan ciccira.
- ⁹ "Yaa Israa'el, waan ana gargaaraa kee
 mormiteef ati baddeerta.
- ¹⁰ Akka si oolchuuf mootiin kee eessa jira?
 Bulchitoonni kee warri magaalaa kee hunda keessaa
 kanneen ati, 'Mootii fi ilmaan moototaa naaf kenni'
 jettee kadhatte sun eessa jiru?
- ¹¹ Ani aarii kootiin mootii siifan kenne;
 dheekkamsa kootiin immoo isa sirraa nan fudhadhe.
- ¹² Balleessaan Efreem walitti kuufamee
 cubbuun isaas galmeeffameera.
- ¹³ Miixuun akkuma dubartii ciniinsuun qabatteetti isatti dhufa;
 inni garuu daa'ima wallaalaa dha;
 inni yommuu yeroon ga'utti,
 gadameessa keessaa ba'uu hin fedhu.
- ¹⁴ "Ani saba kana humna awwaalaa jalaa nan baraara;
 du'a jalaa isaan nan baasa.
 Yaa du'a, dha'ichi kee meerre?
 Yaa awwaala, balleessuun kee meerre?"
- "Ani gara laafina tokko illee hin qabaadhu;
¹⁵ Yoo inni obbooloota ofii gidduu jireenya tolaa jiraate iyyuu,
 bubbleen ba'aa WAAQAYYO biraa ni dhufa;
 lafa gammoojjii keessaa ni bubbisa;
 burqaan isaa bishaan dhaba;
 boolli bishaan isaas ni goga.
 Mankuusni isaa,
 qabeenyi inni qabu hundis ni saamama.
- ¹⁶ Sabni Samaariyaa waan Waaqa isaatti fincileef
 gatii balleessaa isaa ni argata.
 Isaan goraadeedhaan dhumu;
 daa'imman isaanii lafatti harcaafamu;
 dubartoonni isaanii kanneen
 ulfa qabanis ni baqaqfamu."

¹ Yaa Israa'el, gara WAAQAYYO Waaqa keetiitti deebi'i.

Ati sababii cubbuu keetiitiif gufatteetii!

² Dubbicha fudhadhuutii

gara WAAQAYYOO deebi'i.

Akkanas jedhiin:

"Cubbuu keenya hunda nuuf dhiisi;

akka nu ija arraba keenyaa siif dhi'eessinuuf,

arjumaadhaan nu simadhu.

³ Asoor nu oolchuu hin danda'u;

nu fardeen lolaa hin yaabbannu.

Nu si'achi deebinee, waan harki keenya hojjeteen,

'Waaqota keenya' hin jennu;

daa'imman abbaa hin qabne gara laafina sirraa argatuutii."

⁴ "Ani gantummaa isaanii nan fayyisa,

toluman isaan jaalladha;

aariin koo isaan irraa deebi'eeraatii.

⁵ Ani Israa'elitti akkuma fixeensaa nan ta'a;

inni akkuma daraaraa ni daraara.

Inni akkuma gaattiraa Libaanoon

hidda isaa gad fageeffata;

⁶ dameen isaa ni guddata.

Miidhaginni isaa akkuma muka ejersaa ta'a;

urgaan isaa akkuma gaattiraa Libaanoon.

⁷ Namoonni ammas deebi'anii gaaddisa isaa jala jiraatu.

Inni akkuma midhaanii lalisa.

Akkuma muka wayinii dagaaga;

maqaan isaas akkuma daadhii wayinii Libaanoon beekama.

⁸ Yaa Efreem, ani kana caalaa

waaqota tolfamoo wajjin dhimma maaliin qaba?

Kan deebii siif kennee si eegu anuma.

Ani akkuma muka birbirsaa lalisaa ti;

amanamummaan kee ana irraa dhufa."

⁹ Namni ogeessi eenyu? Inni waan kana ni beeka.

Qalbii qabeessi eenyu? Inni waan kana ni hubata.

Karaan WAAQAYYOO qajeelaa dha;

namni qajeelaan isa irra deema;

finciltoonni garuu isa irratti gufatu.

Raajii Yoo'eel

¹ Dubbii WAAQAYYOO kan gara Yoo'eel ilma Phetuu'eel dhufe.

Weerara Hawwaannisaa

² Yaa maanguddoota, waan kana dhaga'aa;
warri biyyattii keessa jiraattan hundinuu dhaggeeffadhaa.
Wanni akkanaa takkumaa bara keessan keessa
yookaan bara abbootii keessanii keessa ta'ee beekaa?
³ Isin waan kana ijoollee keessanitti himaa;
ijoolleen keessanis ijoollee ofii isaaniitti haa himan;
ijoolleen isaanii immoo dhaloota itti aanutti haa dabarsan.
⁴ Waan tuunni hawwaannisaa dhiise,
hawwaannisni guddaan fixe;
waan hawwaannisni guddaan dhiise,
hawwaannisni xixinnaan nyaatee fixe;
waan hawwaannisni xixinnaan dhiise immoo
hawwaannisni biraa dhufee nyaate.

⁵ Yaa machooftota, ka'aatii boo'aa!
Isin warri daadhii wayinii dhugdan
hundinuu wawwaadhaa;
sababii daadhii wayinii haaraatiif
wawwaadhaa;
inni afaan keessan irraa butameeraatii.
⁶ Sabni jabaan akka malee baay'een tokko
biyya koo weerareera;
inni ilkaan leencaa,
qarriffaa leenca dhalaa qaba.
⁷ Inni muka wayinii koo onsee
harbuu koos barbadeesseera.
Inni qola isaanii irraa quncisee lafatti gatee
dameelee isaanii duwwaa hambise.

⁸ Isin akkuma durba wayyaa gaddaa uffattee
dhirsa ijoollummaa isheetiif gaddituutti boo'aa.

⁹ Kennaan midhaaniitii fi dhibaayyuun
mana WAAQAYYOO irraa citaniiru.
Luboanni fuula WAAQAYYOO dura tajaajilan
boo'aa jiru.

¹⁰ Lafti gotiisaa oneera;
laftis gogeera;
midhaan barbadaa'eera;
daadhiin wayinii haaraan dhumeera;
zayitiinis dhabameera.

¹¹ Yaa qonnaan bultoota, isin raafamaa;
warri wayinii dhaabbattan boo'aa;
sababii midhaan lafa gotiisaa keessanii
barbadaa'eef qamadii fi garbuudhaaf boo'aa.

¹² Wayiniin gogeera;
harbuunis coollageera;
roomaaniin, meexxi fi hudhaan,
mukkeen lafa gotiisaa hundinuu goganiiru.
Dhugumaan gammachuun ilmaan namaa
irraa badeera.

Waamicha Qalbii Fijjiirrachuu

¹³ Yaa luboota, wayyaa gaddaa uffadhaatii boo'aa;

isin warri iddoo aarsaa dura tajaajiltan wawwaadhaa.

Isin warri fuula Waaqa koo dura tajaajiltan
kottaatii wayyaa gaddaa uffadhaa bulaa;
kennaan midhaaniitii fi dhibaayyuun
mana Waaqaa irraa hambifamaniiruutii.

¹⁴ Sooma qulqulluu labsaa;
waldaa qulqulluu waamaa.

Maanguddootaa fi
warra biyyattii keessa jiraatan hunda
gara mana WAAQAYYOO Waaqa keessaniitti waamaatii
WAAQAYYOOTTI boo'aa.

¹⁵ Badne kaa! Guyyaan sun dhi'aateera.
Guyyaan WAAQAYYOO ga'eeraatii;
inni akkuma badiisaatti
Waaqa Waan Hunda Danda'u biraa dhufa.

¹⁶ Ijuma keenya duratti
nyaanni cite;
ilillee fi gammachuunis
mana Waaqa keenyaa irraa hin cinnee?

¹⁷ Sanyiin lafa keessatti
tortoree hafe.

Mankuusni diigameera;
gombisaan caccabeera;
midhaan gogee hafeeraatii.

¹⁸ Loon akkam mar'atu!
Karri loonii sababii waan dheedu dhabeef
asii fi achi joora;
bushaayeenis dhiphataniiru.

¹⁹ Yaa WAAQAYYO ani sin waammadha;
ibiddi lafa dheedaa barbadeessee
arrabni ibiddaa immoo mukkeen diidaa hunda gubee fixeeraatii.

²⁰ Bineensonni bosonaa sitti gaggabu;
lagni bishaanii gogeera;
ibiddis dirree dheedaa gubee balleesera.

2

Raayyaa Hawwaanisaa

¹ Xiyoon keessatti malakata afuufaa;
gaara koo qulqulluu irratti sagalee
akeekkachiisaa dhageessisaa.

Guyyaan WAAQAYYOO dhufaa jiraatii;
warri lafa irra jiraatan hundi haa hollatan.

Guyyaan sun dhi'aateera;
² guyyaan dukkanaatii fi dimimmisaa,
guyyaan duumessaatii fi dukkana hamaa ni dhufa.

Sabni guddaa fi jabaan tokko
akkuma ifa ganama tulluuwwan irratti ba'uutti ni dhufa;
wannii akkasii takkumaa bara durii keessa ta'ee hin beeku
yookaan dhaloota dhufuuf jiru keessatti illee hin ta'u.

³ Fuula isaanii duraa ibiddi ni barbadeessa;
dugda isaanii duubaan immoo arraba ibiddaatu boba'a.

Fuula isaanii duraan lafti iddoo biqiltuu Eeden fakkaata;
dugda isaanii duubaan immoo lafti akkuma gammoojjii onee ti;
wannii tokko iyyuu isaan duraa hin miliqu.

⁴ Isaan bifa fardeenii qabu;
akkuma fardeen lolaas ni gulufu.

⁵ Isaan sagalee akka gaarii waraanaatiin

fiixee tulluu irra utaa;u;
 akkuma ibidda yeroo qarmii gubutti xaaxa'uu,
 akkuma waraana jabaa lolaaf ba'e tokkoo ti.

⁶ Saboonni jara arginii dhiphatu;
 fuulli nama hundaas ni gurraacha'a.

⁷ Isaan akkuma namoota jajjaboo figu;
 akkuma loltootaa dallaa yaabbatanii seenu.
 Hundi isaanii tarree galanii deemu;

isaan keessaa tokko iyyuu daandii isaa irraa hin jal'atu.

⁸ Isaan wal hin dhiiban;
 hundi isaanii qajeelanii fuula duratti deemu.
 Utuu toora isaanii hin dhiisin
 ittisa cabsanii seenu.

⁹ Isaan magaalaa keessa asii fi achi figu;
 dallaa irra figu.

Isaan mana yaabbatu;
 akkuma hattuus foddaadhaan ol seenu.

¹⁰ Fuula isaanii duratti lafti ni sochooti;
 samiin ni raafama;

aduu fi ji'i ni dukkanaa'u;
 urjiwwan deebi'anii hin ibsan.

¹¹ WAAQAYYO fuula loltoota isaa duratti
 sagalee dhageessisa;

loltoonni isaa akka malee baay'ee dha;
 warri ajaja isaa eegan jajjaboo dha.

Guyyaan WAAQAYYOO guddaa dha;
 guyyaan sun akka malee nama sodaachisa.
 Eenyutu dura dhaabachuu danda'a?

Cubbuu Irraa Deebi'aa

¹² "Amma iyyuu garaa guutuudhaan,
 soomaan, boo'ichaa fi gaddaan
 gara kootti deebi'aa" jedha WAAQAYYO.

¹³ Isin utuu wayyaa keessan hin ta'in
 garaa keessan tarsiisaa.

Gara WAAQAYYO Waaqa keessaniitti deebi'aa;
 inni arjaa fi gara laafessaatii;

inni dafee hin aaru; jaalalli isaa baay'ee dha;
 inni badiisa erguu irraa of qusata.

¹⁴ Maaltu beeka? Tarii inni deebi'ee gaabbee
 eebba, kennaa midhaaniitii fi kennaa dhugaatii
 kan WAAQAYYO Waaqa keessaniif ta'u
 isiniif hambisa ta'a.

¹⁵ Xiyyoon keessatti malakata afuufaa;
 sooma qulqulluu labsaa;
 waldaa qulqulluu waamaa.

¹⁶ Saba walitti qabaa;
 waldaa sana qulqulleessaa;
 maanguddoota walitti fidaa;
 ijoollee walitti qabaa;
 daa'imman harma hodhan illee hin hambisinaa.

Misirrichi kutaa isaa keessaa haa ba'u;
 misirrittiin diinqa isheetii haa baatu.

¹⁷ Luboonni fuula WAAQAYYOO dura tajaajilan
 gardafoo fi iddoo aarsaa gidduutti haa boo'an.
 Isaan akkana haa jedhan; "Yaa WAAQAYYO saba kee baraari.
 Handhuuraa kee waan qoosaa,
 saboota gidduuttis waan kolfaa hin godhin.

Isaan maaliif namoota gidduutti,
 'Waaqni isaanii eessa jira?' jedhu?"

Deebii WAAQAYYO Kenne

¹⁸ WAAQAYYO biyya isaatiif ni hinaafa;
 saba isaatiifis garaa laafa.

¹⁹ WAAQAYYO akkana jedhee deebii kennaaf:
 "Ani midhaan, daadhii wayinii haaraa fi zayitii ejersaa
 kan isin quubsu isiniif nan erga;
 ani lammata saboota gidduutti
 waan qoosaa isin hin godhu.

²⁰ "Ani loltoota kaabaa isin duraa balleessee
 gara lafa gogaa fi duwwaatti isaan ari'a;
 loltoonni fuula duraan yaa'an galaana ba'a biiftuu,
 kanneen dugda duubaan yaa'an immoo
 galaana gama lixa biiftuu seenu.
 Reefi isaanii ni xiraa'a;
 xiraan isaaniis ol ba'a."

Dhugumaan inni waan guddaa hojjeteera!

²¹ Yaa biyya Yihuudaa, hin sodaatin;
 gammadiitti ililchi.

WAAQAYYO dhugumaan waan guddaa hojjeteera!

²² Yaa bineensota bosonaa, isinis hin sodaatinaa;
 dirreen dheedaa gabbachaa jiraatii.

Mukkeen ija naqachaa,
 harbuu fi wayiniinis ija kenna jiru.

²³ Yaa uummata Xiyoona gammadi;
 WAAQAYYO Waaqa keetti gammadi;
 inni qajeelummaadhaan
 rooba arfaasaa siif kenneeraatii.
 Inni akkuma durii bokkaa baay'ee,
 rooba arfaasaa fi kan birraa siif erga.

²⁴ Oobdiin midhaaniin guutama;
 boolli itti wayinii cuunfanis daadhii wayinii haaraa fi
 zayitiidhaan guutamanii dhangalaasu.

²⁵ "Ani waan bara hawwaannisni nyaate,
 waan hawwaannisni gurguddaa fi xixinnaan nyaate,
 waan hawwaannisni kaanii fi tuunni hawwaannisaa
 jechuunis loltoonni koo jajjaboon ani gidduu keessanitti erge sun nyaatan
 iddoo isiniif nan buusa.

²⁶ Isin waan hamma quuftanitti nyaattan baay'ee ni qabaattu;
 maqaa WAAQAYYO Waaqa keessanii
 kan waan dinqii isiniif hojjete sanaa ni galateeffattu;
 uummanni koo lammata hin qaaneffamu.

²⁷ Ergasii isin akka ani Israa'el keessa jiru
 akka ani WAAQAYYO Waaqa keessan ta'e,
 akka ana malee Waaqni biraa hin jirre ni beektu;
 uummanni koo lammata hin qaaneffamu.

Guyyaa WAAQAYYOO

²⁸ "Anis kana booddee,
 Hafuura koo nama hunda irratti nan dhangalaasa.

Ilmaanii fi intallan keessan raajii dubbatu;
 jaarsoliin keessan abjuu abjootu;
 dargaggoonni keessan mul'ata argu.

²⁹ Bara sana keessa, garboota koo
 warra dhiiraa fi dubartii irratti illee
 Hafuura koo nan dhangalaasa.

³⁰ Ani ol samii irratti dinqii,
 gad lafa irrattis dhiiga,

ibiddaa fi hurrii aaraa nan argisiisa.
³¹ Utuu guyyaan WAAQAYYOO inni guddichii fi
 sodaachisaan sun hin dhufin dura,
 aduun dukkanatti geeddaramti;
 ji'i immoo dhiigatti geeddarama.
³² Namni maqaa WAAQAYYOO waammatu
 hundinuu ni fayya;
 akkuma WAAQAYYO dubbatettis
 Tulluu Xiyoon irraa fi
 Yerusaalem keessa, furamatu jiraata;
 hambaa gidduuttis warri WAAQAYYO
 isaan waame ni argamu.

3

Sabootatti Murame

¹ "Bara sana keessa, yeroo sanatti,
 ani yommuun boojuu Yihuudaatii fi
 Yerusaalem deebisutti,
² saboota hunda walitti qabeen
 gara Sulula Yehooshaafaaxitti
 gad isaan nan buusa.
 Anis achitti sababii dhaala koo,
 sababii Israa'eliif isaanitti nan mura;
 isaan saboota gidduutti saba koo
 bittinneessanii biyya koos gargar qooddataniiruutii.
³ Isaan uummata kootti ixaa buufatanii
 ijoollee dhiiraas sagaagalummaatti geeddarataniiru;
 akka dhuganiif dubara illee daadhii wayiniitti gurguratan.
⁴ "Yaa Xiirrosii fi Siidoonaa, isin kutaaleen Filisxeem hundinuu, amma maal narraa
 qabdu? Isin waan ani godheef haaloo na baafachaa jirtuu? Yoo isin haaloo na baafachaa
 jirtu ta'e ani dafee ariitiidhaan waan isin hojjetan sana matuma keessanittin deebisa.
⁵ Isin meetii fi warqee koo guurratanii qabeenya koo filatamaas mana waaqeffannaa
 keessanitti geeffattaniiruutii. ⁶ Isin biyya isaanii irraa isaan fageessitanii uummata
 Yihuudaatii fi Yerusaalem Giriikotatti gurgurattan.
⁷ "Kunoo, ani biyya isin itti isaan gurgurattan keessaa isaan baasee waan isin hojjetan
 sana matuma keessanitti nan deebisa. ⁸ Ani ilmaanii fi intallan keessan saba Yihuudaatii
 nan gurgura; isaan immoo saba fagoo jiru kan Saabaa jedhamutti dabarsanii isaan
 gurguratu." WAAQAYYO dubbateeraatii.
⁹ Waan kana saboota gidduutti labsaa:
 Waraanaaf qophaa'aa!
 Gootota kakaasaa!
 Loltoonni hundi dhi'aatanii haa lolan.
¹⁰ Maarashaa keessan tumaatii goraadee godhadhaa;
 haamtuu keessanis tumaatii eeboo godhadhaa.
 Namni lafaan,
 "Ani jabaa dha!" haa jedhu.
¹¹ Isin saboonni qixa hundaan dafaa kottaattii
 achitti walitti qabamaa.
 Yaa WAAQAYYO, loltoota kee gad ergi!
¹² "Saboonni haa ka'an;
 isaan dafanii gara Sulula Yehooshaafaax haa dhufan;
 ani saboota gama hundaan jiranitti muruuf
 achi nan taa'aatii.
¹³ Midhaan ga'eeraatii
 haamtuu itti kaa'aa.
 Kottaatii ija wayinii dhidhiitaa;
 boolli itti wayinii cuunfan guuteeraatii;
 sababii hamminni isaanii guddaa ta'eef
 boolli itti wayinii cuunfan guutee irra dhangala'eera!"

14 Waldaan guddaan, waldaan nama baay'ee
sulula murtii keessatti wal ga'eera!

Guyyaan WAAQAYYOO

sulula murtii keessatti dhufuu ga'eeraatii.

15 Biiftuu fi addeessi ni dukkanaa'u;
urjiiwwanis si'achi ifa hin kennan.

16 WAAQAYYO Xiyoon irraa ni iyya;
Yerusaalem keessaas sagalee dhageessisa;
lafaa fi samiin ni raafamu.

WAAQAYYO garuu saba isaatiif iddoo itti baqatan,
saba Israa'eliif immoo da'oo ni ta'a.

Eebba Saba Waaqaatiif kenname

17 "Ergasii isin akka ani WAAQAYYO Waaqni keessan Xiyoon keessa,
gaara koo qulqulluu sana irra jiraadhu ni beektu.

Yerusaalem qulqulluu taati;
namoonni biyya alaa gonkumaa lammata ishee hin weeraran.

18 "Gaafas tulluuwwan daadhii wayinii haaraa ni coccobsu;
gaarranis annan yaasu;
lageen Yihuudaa hundinuu bishaaniin guutamu.

Burqaan tokko mana WAAQAYYOO keessaa
burqee sulula Shixiim ni obaasa.

19 Gibxi garuu ni onti;
Edoomis duwwaa hafti;
isaan dhiiga nama yakka hin qabnee biyyattii keessatti
dhangalaasuudhaan
saba Yihuudaatti daba hojjetaniiruutii.

20 Yihuudaan bara baraan,
Yerusaalemis dhaloota hundaaf iddoo jireenyaa ni taati.

21 Ani dhiiga isaanii kan yakka hin qabne sana
utuun haaloo hin ba'in nan dhiisaa?
Lakkii, hin dhiisu."

WAAQAYYO Xiyoon keessa jiraata!

Raajii Amoos

¹ Kun mul'ata Amoos inni tikseewwan Teqoo'aa keessaa tokko ture sun bara Uziyaan mootii Yihuudaa, Yerobi'aam ilmi Yoo'aash immoo mootii Israa'el turetti, utuu sochiin lafaa hin ta'in waggaa lama dura waa'ee Israa'el argee dha.

² Innis akkana jedhe:

“WAAQAYYO Xiyoon keessaa iyya;
Yerusaaalem keessaa sagalee dhageessisa;
dirreen tiksoonni itti bobbaasan ni goga;
fiixeen gaara Qarmeloosis ni coollaga.”

Murtii Olloota Israa'elitti Murame

³ WAAQAYYO akkana jedha:

“Ani cubbuu Damaasqoo sadiif,
afuriifis dheekkamsa koo duubatti hin deebisu.
Sababii isaan meeshaa ittiin midhaan dha'an
kan ilkaan sibiilaa qabuun Gili'aadin tumaniif,
⁴ ani ibidda da'annoo Ben-Hadaad
barbadeessu tokko, mana Hazaa'eelitti nan erga.
⁵ Ani karra Damaasqoo nan cabsa;
mootii Sulula Aawwen keessa jiruu fi
isa Beet Eden keessatti bokkuu qabatu nan balleessa.
Uummanni Sooriyaa booji'amee Qiiritti ni geeffama”
jedha WAAQAYYO.

⁶ WAAQAYYO akkana jedha:

“Ani cubbuu Gaazaa sadiif,
afuriifis dheekkamsa koo duubatti hin deebisu.
Sababii isheen hawaasa hunda boojitee
Edoomitti gurguratteef,
⁷ ani ibidda da'annoo ishee barbadeessu tokko
dallaa Gaazaatti nan erga.
⁸ Ani mootii Ashdoodii fi isa Ashqaloon keessatti
bokkuu qabatu sana nan balleessa.
Ani hamma hambaan Filisxeemotaa du'uutti
harka koo Eqroonitti nan deebifadha”
jedha WAAQAYYO Gooftaan.

⁹ WAAQAYYO akkana jedha:

“Ani cubbuu Xiirros sadiif,
afuriifis dheekkamsa koo duubatti hin deebisu.
Sababii isheen walii galtee obbolummaa cabsitee
hawaasa booji'ame guutuu Edoomitti gurguratteef
¹⁰ ani ibidda da'annoo ishee barbadeessu tokko
dallaa Xiirrositti nan erga.”

¹¹ WAAQAYYO akkana jedha:

“Ani cubbuu Edoom sadiif,
afuriifis dheekkamsa koo duubatti hin deebisu.
Sababii inni gara laafina hunda gatee
obboleessa isaa goraadeedhaan ari'eef,
sababii aariin isaa ittuma fufee ho'ee
dheekkamsi isaas utuu hin dhowwamin boba'eef,
¹² ani ibidda da'annoo Bozraa barbadeessu tokko
Teemaanitti nan erga.”

¹³ WAAQAYYO akkana jedha:

“Ani cubbuu Amoon sadiif,
afuriifis dheekkamsa koo duubatti hin deebisu.
Sababii inni daangaa isaa babal'ifachuuf jedhee
dubartoota Gili'aad kanneen ulfa qaban baqaqseef

14 ani guyyaa lolaatti wacaan,
 guyyaa qilleensa hamaatti immoo bubbee jabaadhaan
 ibidda da'annoo ishee barbadeessu tokko
 dallaa Rabbaatti nan erga.
 15 Mootiin ishee booji'amee innii fi
 gondaaltonni isaa wajjin ni booji'amu"
 jedha WAAQAYYO.

2

1 WAAQAYYO akkana jedha:
 "Ani cubbuu Mo'aab sadiif,
 afuriifis dheekkamsa koo duubatti hin deebisu.
 Sababii inni lafee mootii Edoom
 gubee daaraa godheef,
 2 ani ibidda da'annoo Keriiyooti barbadeessu tokko
 Mo'aabitti nan erga.
 Mo'aab iyya waraanaatii fi
 sagalee malakataatiin du'a.
 3 Ani bulchaa ishee ajjeesee
 qondaaltota ishee hundas isa wajjinin fixa"
 jedha WAAQAYYO.
 4 WAAQAYYO akkana jedha:
 "Ani cubbuu Yihuudaa sadiif,
 afuriifis dheekkamsa koo duubatti hin deebisu.
 Sababii isaan seera WAAQAYYOO didanii
 ajaja isaas hin eeginiif,
 sababii isaan waaqota sobaa,
 waaqota abbootiin isaanii duukaa bu'an sanaan
 karaa irraa jal'ataniif,
 5 ani ibidda da'annoo Yerusaaalem barbadeessu tokko
 Yihuudaatti nan erga."

Murtii Israa'elitti Murame

6 WAAQAYYO akkana jedha:
 "Ani cubbuu Israa'el sadiif,
 afuriifis dheekkamsa koo duubatti hin deebisu.
 Isaan qajeeltota meetiitti,
 rakkattoota immoo kophee cimtii tokkotti gurguratan.
 7 Isaan akkuma biyyoo lafaatti
 mataa hiyyeeyyii irra ijaajjani
 cunqurfamaas murtii qajeelaa dhowwatan.
 Abbaa fi ilmi durba tokkotti galanii
 akkasiin maqaa koo qulqulluu xureessan.
 8 Isaan uffata qabdiidhaan nama irraa
 fudhatan irra iddoo aarsaa hunda bira ciciisan.
 Isaan daadhii wayinii kan warra adabaman biraa dhufe,
 mana waaqa isaanii keessatti dhugu.
 9 "Inni akkuma birbirsaa dheeratee
 akka qilxuu jabaatu iyyuu,
 ani namicha Amoor sana fuula isaanii duratti galaafadheera.
 Ani gubbaadhaa ija isaa,
 jalaan immoo hidda isaa balleesseera.
 10 "Ani biyya Amoorotaa isiniif kennuuf jedhee,
 biyya Gibxiitii isin baasee
 waggaa afurtama gammoojjii keessa isinan geggeesse.
 11 "Akkasumas ani ilmaan keessan gidduudhaa raajota,
 dargaggoota keessan gidduudhaa immoo Naaziroota kaaseera.
 Yaa saba Israa'el, wanni kun dhuguma mitii?"
 jedha WAAQAYYO.

- 12 "Isin garuu Naaziroota daadhii wayinii obaaftanii akka raajonnis raajii hin dubbanne ajajjan.
- 13 "Ani akkuma gaariin yommuu midhaaniin guutamu caccabu sana, amma isinan caccabsa.
- 14 Saffisaan hin miliqu;
namoonni jajjaboon humna isaanii hin jabeeffatan;
loltuunis lubbuu isaa hin oolfatu.
- 15 Abbaan xiyyaa jabaatee dhaabachuu hin danda'u;
loltuun saffisaan fiigee jalaa hin ba'u;
abbaan fardaas lubbuu isaa oolfachuu hin danda'u.
- 16 Loltoonni akka malee jajjaboon iyyuu gaafas qullaa isaanii baqatu"
jedha WAAQAYYO.

3

Dhuga baatota Israa'elitti Dhugaa Ba'an

¹ Yaa saba Israa'el, dubbii WAAQAYYO isiniin mormuudhaan, maatii ani biyya Gibxii baasee fide hundaan mormuudhaan dubbate kana dhaga'aa:

- ² "Ani maatiwwan lafa irra jiraatan
hunda keessaa isin qofa filadheera;
kanaafuu ani cubbuu keessan
hundaaf isinan adaba."
- ³ Yoo walii galan malee
namoonni lama wajjin ni deemuu?
- ⁴ Leenci tokko yoo waan adamsu hin argatin
bosona keessaa ni aadaa?
Inni yoo waa qabate malee
holqa isaa keessaa ni aadaa?
- ⁵ Simbirri tokko lafa kiyyoon hin kaa'aminitti
kiyyoo keessa ni seentii?
Kiyyoon tokko yoo wanni qabamu hin jirre
akkasumatti lafaa ni utaalaa?
- ⁶ Yoo magaalaa keessatti malakanni afuufame,
namoonni hin raafamanii?
Balaan magaalaa tokkotti yoo dhufe,
WAAQAYYOTU waan sana fide mitii?
- ⁷ Dhugumaan WAAQAYYO Gooftaan
utuu tajaajiltoota isaa raajotatti hin mul'isin
waan tokko illee hin hojjetu.
- ⁸ Leenci aadeera;
eenyutu hin sodaanne ree?
WAAQAYYO Gooftaan dubbateera;
yoos eenyutu raajii hin dubbanne ree?
- ⁹ Da'annoo Ashdoodiitii fi
da'annoo Gibxitti akkana jedhaa labsaa:
"Tulluwwan Samaariyaa irratti walitti qabamaa;
jeequmsa guddaa ishee keessa jiruu fi
cunqursaa uummata ishee keessa jiru ilaalaa."
- ¹⁰ "Warri da'annoo isaanii keessatti waan booji'amee fi
waan saamame kuufatan
akka itti waan qajeelaa hojjetan hin beekan"
jedha WAAQAYYO.
- ¹¹ Kanaafuu WAAQAYYO Gooftaan akkana jedha:
"Diinni biyya keessan marsa;
jabina keessan gad buusa;
da'annoowwan keessanis ni saama."

- ¹² WAAQAYYO akkana jedha:
 “Akkuma tikseen tokko lafee miilla lamaanii
 yookaan fiixee gurraa qofa afaan leencaatii buusu sana,
 Israa’eloonni Samaariyaa keessa, qarqara siree isaanii irra,
 Damaasqoo keessas siree isaanii dinkii irra taa’an
 akkasuma ni baraaramu.”
- ¹³ “Waan kana dhaga’aatii mana Yaaqoobitti dhugaa ba’aa” jedha Gooftaan, WAAQAYYO
 Waaqni Waan Hunda Danda’u.
- ¹⁴ “Guyyaa ani cubbuu isheetiif jedhee Israa’elin adabutti,
 iddoowwan aarsaa Beet’eel nan barbadeessa;
 gaanfawwan iddoo aarsaas caccabanii
 lafatti ni harca’u.
- ¹⁵ Ani mana gannaatii fi
 mana bonaa nan diiga;
 manneen ilka arbaatiin miidhagfaman ni diigamu;
 manneen gurguddaanis ni balleffamu”
 jedha WAAQAYYO.

4

Israa’el Gara Waaqaatti Hin deebine

- ¹ Isin yaa saawwan Baashaan kanneen Tulluu Samaariyaa irra jirtan,
 yaa dubartoota, isin warri hiyyeeyyii fi rakkattoota cunqursitanii
 dhirsoota keessaniin, “Dhugaatii nuuf fidaa!” jettan
 dubbii kana dhaga’aa.
- ² WAAQAYYO Gooftaan akkana jedhee
 qulqullummaa isaatiin kakateera:
 “Yeroon isin itti hokkoodhaan,
 isin keessaa namni dhumaa immoo qabduu qurxummiitiin
 qabamu tokko dhugumaan ni dhufa.
- ³ Isin tokko tokkoon qajeeltanii
 qaawwa dallaatiin ni baatu;
 gara Harmoonittis ni darbatamtu”
 jedha WAAQAYYO.
- ⁴ “Beet’eel dhaqaatii cubbuu hojjedhaa;
 Gilgaal dhaqaatii cubbuu baay’ee hojjedhaa.
 Ganama ganama aarsaa keessan dhi’eessaa;
 waggaa sadii sadiitti immoo kenna keessan harka kudhan keessaa
 harka tokko fidaa.
- ⁵ Buddeena raacitii qabu aarsaa galataa godhaatii gubaa;
 aarsaa fedhiidhaan kennitan labsaa; beeksisaas;
 yaa Israa’eloota, wanni isin hojjechuu jaallattan kanaatii,
 ittiin boonaa”
 jedha WAAQAYYO Gooftaan.
- ⁶ “Ani magaalaa hunda keessatti garaa duwwaa isiniif kenneera;
 magaalaa hunda keessattis buddeena isin dhabsiiseera;
 isin garuu gara kootti hin deebine”
 jedha WAAQAYYO.
- ⁷ “Ani yeroo midhaan haamamuuf ji’i sadii hafutti
 bokkaa isin irraa nan kute.
 Ani magaalaa tokkotti bokkaa ergee
 kaan irraa immoo nan dhaabe.
 Lafti qonnaa tokko bokkaa argatee
 kaan garuu homaa dhabee goge.
- ⁸ Uummanni bishaan barbaacha magaaladhaa gara magaalatti joore;
 garuu waan dhugaatiif isa ga’u hin arganne;
 ta’us isin gara kootti hin deebine”
 jedha WAAQAYYO.
- ⁹ “Ani yeroo hedduu iddoo biqiltuutii fi

wayinii keessan waagii fi awwaaroodhaan dha'een balleesse.
Hawwaannisni harbuu fi ejersa keessan barbadeesse;
ta'us isin gara kootti hin deebine"
jedha WAAQAYYO.

10 "Ani akkuman biyya Gibxi godhe sana
dha'icha isinitti nan erge.
Ani fardeen isin boojitan wajjin
dargaggoota keessan goraadeedhaan nan fixe.
Ajaa qubata keessaniitiin funyaan keessan nan guute;
isin garuu gara kootti hin deebine"
jedha WAAQAYYO.

11 "Ani akkuman Sodoomii fi Gomorraa garagalche sana
isin keessaa nama tokko tokko garagalcheera.
Isin akkuma muka boba'u kan ibidda keessaa butamee ti;
ta'us isin gara kootti hin deebine"
jedha WAAQAYYO.

12 "Kanaafuu yaa Israa'el, ani akkanan isin godha;
sababii ani akkana isin godhuuf
yaa Israa'el Waaqa kee arguuf qophaa'i."

13 Inni tulluuwwan tolchee
bubbee uumee yaada isaa namatti mul'isu sun,
inni barii dukkaneessee
iddoowwan lafa ol ka'oo irra ejjetu sun,
maqaan isaa WAAQAYYO,
Waaqa Waan Hunda Danda'uu dha.

5

Faaruu Boo'ichaatii fi Waamicha Qalbii Jijjiirrachuu

1 Yaa mana Israa'el dubbii kana, faaruu boo'ichaa kan ani waa'ee keessaniif boo'u
kana dhaga'aa:

2 "Durbi qullullittiin Israa'el kufteerti;
isheen lammata hin kaatu;
biyyuma ishee keessatti gatamtee
nama ol ishee qabu tokko illee dhabde."

3 WAAQAYYO Gooftaan akkana jedha:
"Magaalaa loltoota kuma tokko Israa'eliif bobbaafteef
dhibba tokko qofatu hafa;
magaalaa loltoota dhibba tokko bobbaafteef
kudhan qofatu hafa."

4 WAAQAYYO mana Israa'eliin akkana jedha:
"Na barbaaddadhaatii jiraadhaa;

5 Beet'eelin hin barbaaddatinaa;
Gilgaal hin dhaqinaa;
Bersheebaattis hin ce'inaa.
Gilgaal dhugumaan ni booji'amti;
Beet'eelis ni dhabamti."

6 WAAQAYYOON barbaaddadhaatii jiraadhaa;
yoo kanaa achii inni akkuma ibiddaa
mana Yoosef keessa ba'ee haxaa'aa;
ibiddi sun ishee guba;
Beet'eelis nama irraa dhaamsu tokko iyyuu
hin qabaattu.

7 Isin warra murtii qajeelaa hadhaatti geeddartanii
qajeelummaas lafatti harcaaftanii dha.

8 Inni urjiiwwan Torbii fi urjiiwwan Sadee uume,
kan dukkana bariitti geeddaru,

inni guyyaa dukkaneessee halkan godhu,
kan galaana keessaa bishaan ol waamee
fuula lafa gogaa irratti dhangalaasu
maqaan isaa WAAQAYYOO dha.

⁹ Inni da'oo jabaatti badiisa tasaa fida;
magaalaa dallaa jabaa qabdus ni barbadeessa.

¹⁰ Isaan nama karra irratti nama ifatu ni jibbu;
kan dhugaa dubbatus ni balfu.

¹¹ Isin hiyyeeyyii dhidhiittanii
akka isaan midhaan isinii kennan dirqisiiftu.
Kanaafuu isin manneen dhagaa yoo ijaarrattan iyyuu
manneen sana keessa hin jiraattan;
isin iddoowwan qotiisaa gaarii keessa wayinii yoo dhaabbattan iyyuu
daadhii wayinii isaanii hin dhugdan.

¹² Balleessaan keessan hammam akka baay'atu fi
cubbuun keessanis hammam guddaa akka ta'e nan beekaatii.

Isaan qajeeltota hacuucanii matta'aa irraa fudhatu;
hiyyeeyyiis mana murtii keessatti murtii qajeelaa dhowwatu.

¹³ Kanaafuu namni qalbeeffataan yeroo akkasiitti afaan qabata;
barri kun bara hamaadhaatii.

¹⁴ Akka lubbuudhaan jiraattaniif
waan hamaa dhiisaatii waan gaarii barbaadaa.

Yoos akkuma isin jettan sana
WAAQAYYOO Waaqni Waan Hunda Danda'u isin wajjin ta'a.

¹⁵ Waan hamaa jibbaa; waan gaarii jaalladhaa;
mana murtii keessatti murtii qajeelaa jabeessaa;

WAAQAYYOO Waaqni Waan Hunda Danda'u
tarii hambaa Yoosefiif garaa laafa ta'aatii.

¹⁶ Kanaafuu Gooftaan, WAAQAYYOO Waaqni Waan Hunda Danda'u akkana jedha:
"Daandii hunda irra boo'icha,

oobdii uummataa hunda irra immoo iyya dhiphinaatu jira.
Qonnaan bultoonni akka boo'aniif,

warri boo'an immoo akka wawwaataniif ni waamamu.

¹⁷ Ani gidduu keessan waanan darbuuf
iddoo dhaabaa wayinii hunda keessaa boo'ichatu ta'a"
jedha WAAQAYYOO.

Guyyaa WAAQAYYOO

¹⁸ Isin warra guyyaa WAAQAYYOO
arguu hawwitaniif wayyoo!

Isin maaliif guyyaa WAAQAYYOO arguu hawwitu!
Guyyaan sun dukkana malee ifa hin ta'utii.

¹⁹ Wannii kun akkuma nama leenca jalaa ba'ee
afaan amaaketaa bu'u tokkoo ti;

yookaan akka nama mana isaa seenee
harka isaa keenyan manaa irra kaa'atee
bofti isa idde tokkoo ti.

²⁰ Guyyaan WAAQAYYOO ifa utuu hin ta'in dukkana mitii?
Dukkana hamaa ifa tokko illee of keessaa hin qabne mitii?

²¹ "Ani ayyaana amantaa keessanii nan jibba; nan tuffadhas;
waldaa keessanittis hin gammadu.

²² Utuu isin aarsaa gubamuu fi kennaa midhaanii naaf fiddanii iyyuu
ani jaalladhee isin irraa hin fudhadhu.

Utuu isin aarsaa nagaa filatamaa naaf fiddanii iyyuu
ani homaattuu isa hin lakkaa'u.

²³ Waca faarfannaa keessanii asii balleessaa!
Ani muuziiqaa baganaa keessanii hin dhaggeeffadhu.

²⁴ Garuu murtiin qajeelaan akkuma lagaa,

qajeelummaan is akkuma burqaa hin gognee haa yaa'u!

- 25 "Yaa mana Israa'el isin waggaa afurtama
gammoojjii keessatti takkumaa aarsaa fi kennaa naaf fiddaniirtuu?
26 Isin waan harkuma keessaniin tolfattan
jechuunis galma waaqeffannaa mootii keessanii,
utubaa waaqa keessan tolfamaatii fi
fakkii urjii waaqa keessanii ol fuutaniirtu.
27 Kanaafuu ani akka isin booji'amtaniif,
Damaasqoodhaan gamatti isinan erga"
jedha WAAQAYYO inni maqaan isaa
Waaqa Waan Hunda Danda'u ta'e sun.

6

Warra Yaaddoo Malee Jiraataniif Wayyoo

- 1 Yaa warra yaaddoo malee Xiyoon keessa jiraattan,
kanneen Tulluu Samaariyaa irra waan nagaadhaan jiraatan seetan,
isaan namoota ulfaatoo saba durii,
kanneen sabni Israa'el gara isaanii dhufuuf wayyoo!
2 Gara Kaalneetti darbaatii ilaalaa;
achii ka'aatii gara Hamaati guddichaa dhaqaa;
ergasii immoo Gaati Filisxeem keessaatti gad bu'aa.
Isaan mootummoota keessan lamaan caaluu?
Biyyi isaanii biyya keessan caalaa bal'ataa?
3 Isin guyyaa hamaa fageessitanii
bulchiinsa jeequmsaa fiddu.
4 Isin siree ilka arbaatiin miidhagfame irra ciiftu;
siree keessan dinkii irra boqottu.
Isin xobbaallaa hoolaa filatamoo fi
jabbii coccoomoo nyaattu.
5 Isin sagalee baganaatiin weedduu faayidaa hin qabne weeddiftu;
akkuma Daawitis meeshaa muuziiqaa qaqqajeelfattu.
6 Isin xoofoo keessaa daadhii wayinii dhugdu;
dibata akka malee gaarii dibattu;
garuu badiisa Yoosefiif hin gadditan.
7 Kanaafuu isin warra jalqabatti booji'aman wajjin
booji'amtanii fudhatamtu;
burraaquu fi bashannanuun keessan ni hafa.
WAAQAYYO Of Tuulummaa Israa'el Jibba
8 WAAQAYYO Gooftaan ofii isaatiin kakateera; WAAQAYYO Waaqni Waan Hunda Danda'u
akkana jedha:
"Ani of tuulummaa Yaaqoob nan balfa;
da'annoo isaas nan jibba;
ani magaalattii fi waan ishee keessa jiru hunda
dabarsee nan kenna."
9 Namoonni kudhan yoo mana tokko keessatti hafan isaanis ni dhumu. 10 Yoo firri
reeffa baasee gubu tokko mana sana keessaa baasuuf dhufee nama dhokatee achi jiru
kamiin iyyuu, "Namni tokko iyyuu si wajjin jiraa?" jedhee gaafatee namichi sun, "Hin
jiru" jedheen, inni "Cal'isi! Nu maqaa WAAQAYYOO dha'uu hin qabnu" jedhaan.
11 Kunoo WAAQAYYO ajaja kenneeraatii,
manneen gurguddaan ni barbadaa'u;
manneen xixinnoonis ni caccabu.
12 Fardeen kattaawwan irra ni fiiguu?
Namni tokko qotiyyoodhaan achi ni qotaa?
Isin garuu murtii qajeelaa gara summiitti,
ija qajeelummaas gara hadhaatti geeddartaniirtu;
13 isin warra Lodebaar mo'achuutti gammaddanii,
"Nu humna keenyaan Qaarnaayim qabanne mitii?" jettanii dha.
14 WAAQAYYO Waaqni Waan Hunda Danda'u akkana jedhaatii;

“Yaa mana Israa’el, ani saba Leeboo Hamaatii jalqabee
hamma sulula Arabbaatti
karaa keessan hunda irratti isin cunqursu tokko isinittin kaasa.”

7

Hawwaannisa, Ibiidaa fi Tumbii

¹ WAAQAYYO Gooftaan waan kana natti argisiise: Inni erga qoodni mootichaa haamamee booddee, utuma midhaan lammaffaan ga’aa jiruu tuuta hawwaannisaa qopheesse. ² Anis erga hawwaannisni sun lafa barbadeessee booddee, “Yaa WAAQAYYO Gooftaa, nuuf araarami! Yaaqoob akkamiin danda’ee badiisa irraa hafa? Inni daa’ima xinnaa dha!” jedheen iyye.

³ Kanaafuu WAAQAYYO ni gaabbe.

WAAQAYYOS, “Wanni kun hin ta’u” jedhe.

⁴ WAAQAYYO Gooftaan waan kana natti argisiise; WAAQAYYO Gooftaan murtii kennuuf ibidda waamaa ture; ibiddi sunis tuujuba guddaa gogsee lafas ni barbadeesse. ⁵ Kana irratti ani, “Yaa WAAQAYYO Gooftaa, ani sin kadhadaa, waan kana nurraa dhaabi! Yaaqoob akkamiin waan kana irraa hafa? Inni daa’ima xinnaa dha!” jedheen iyye.

⁶ Kanaafuu WAAQAYYO ni gaabbe.

WAAQAYYO Gooftaan, “Wanni kunis hin ta’u” jedhe.

⁷ Inni waan kana na argisiise: Gooftaan tumbii harkatti qabatee dallaa tumbiidhaan ijaarame bira dhaabachaa ture. ⁸ WAAQAYYOS, “Amoos, ati maal arguutti jirta?” jedhee na gaafate.

Anis, “Tumbii nan arga” jedheen deebise.

Gooftaanis akkana naan jedhe; “Kunoo ani saba koo Israa’el gidduu tumbii tokko nan kaa’a; ani si’achi isaan hin baraaru.

⁹ “Iddoowwan sagadaa Yisihaaq ni barbadaa’u;

iddoon qulqulluun Israa’elisi ni ona;

ani goraadee kootiin mana Yerobi’aamitti nan ka’a.”

Amoosii fi Amasiyaa

¹⁰ Ergasii Amasiyaa lubni Beet’eel akkana jedhee Yerobi’aam mooticha Israa’elitti ergaa tokko erge; “Amoos garaa Israa’el keessatti sitti malateera. Dubbii isaa hunda lafti iyyuu baachuu hin dandeessu. ¹¹ Amoos akkana jedheeraatii:

“Yerobi’aam goraadeedhaan du’a;

Israa’elisi dhugumaan booji’amee

biyya isaatii ni fudhatama.”

¹² Kana irratti Amasiyaan Amoosiin akkana jedhe; “Yaa ilaaltuu nana, sokki! Biyya Yihuudaatti deebi’i. Achitti buddeena nyaadhu; raajjisi dubbadhu. ¹³ Sababii inni iddoo qulqulluu mootichaatii fi mana qulqullummaa mootummaa ta’eef ati lammata Beet’eel keessatti raajji hin dubbatin.”

¹⁴ Amoos immoo akkana jedhee Amasiyaaf deebise; “Ani raajji yookaan ilma raajji miti; garuu ani tiksee fi eegduu muka harbuun ture. ¹⁵ WAAQAYYO garuu tika bushaayee keessaa na fuudhee, ‘Dhaqii saba koo Israa’elitti raajji dubbadhu’ naan jedhe. ¹⁶ Egaa amma dubbii WAAQAYYOO dhaga’i. Ati akkana jetta;

“‘Ati Israa’eliin mormuudhaan raajji hin dubbatin;

mana Yisihaaq mormuudhaan lallabuu dhiisi.’

¹⁷ “Kanaafuu WAAQAYYO akkana jedha:

“Niitiin kee magaalaa keessatti sagaagaltuu taati;

ilmaan keetii fi intallan kee goraadeedhaan dhumu.

Biyyi kee safaramtee gargar qoodamti;

ati mataan kee iyyuu biyya ormaatti duuta.

Israa’el dhugumaan booji’amee

biyya isaatii ni fuudhama.”

8

Guuboo Ija Bilchaateen Guutame

¹ WAAQAYYO Gooftaan waan kana natti argisiise: kun guuboo ija bilchaateen guutamee dha. ² Innis, “Amoos, ati maal arguutti jirta?” jedhee na gaafate.

Ani immoo, “Guuboo ija bilchaateen guutame tokko” jedheen deebiseef.

Ergasii WAAQAYYO akkana naan jedhe; “Saba koo Israa’elitti yeroon dhufeera; ani si’achi isaan hin baraaru.”

³ WAAQAYYO Gooftaan akkana jedha; “Gaafas faarfannaan mana qulqullummaa keessaa boo’ichatti geeddarama. Reeffi akka malee hedduun lafa hundatti gatama! Cal’isuunis ni ta’a!”

⁴ Isin warri rakkattoota dhidhiittanii

hiyyeeyyii biyyattii balleessitan waan kana dhaga’aa;

⁵ isin akkana jettu;

“Akka nu midhaan gurgurannuuf

Baatiin Haaraan yoom goobana?

Akka nu qamadii gabaa baafannuuf

Sanbanni yoom darba?”

Isin warri safartuu xinnootti fayyadamtanii

gatii immoo ol kaaftan, madaalii sobaatiin

nama gowwoomsitanii saamtu;

⁶ hiyyeeyyii meetiidhaan,

rakkataa immoo kophee miilla lamaaniiitiin bitattanii

girdiis qamadii wajjin gurgurattu.

⁷ WAAQAYYO akkana jedhee ulfina Yaaqoobiin kakateera; “Ani gonkumaa waan isaan hojjetan tokko illee hin irraanfadhu.

⁸ “Sababii kanaaf lafti kirkirtee

namoonni ishee keessa jiraatan hundi hin boo’anii?

Guutummaan biyya sanaa akkuma laga Abbayyaa ol ka’aa;

isheen akkuma laga Gibxi

ol dadarbatamtee liqimfamti.”

⁹ WAAQAYYO Gooftaan akkana jedha; “Bara sana,

“Ani akka aduun saafaadhaan dhiitee

laftis guyyuma adiidhaan dukkanooftu nan godha.

¹⁰ Ani ayyaana amantii keessanii gaddatti,

sirba keessan hundas boo’ichatti nan geeddara.

Ani akka isin hundi wayyaa gaddaa uffattanii

mataa keessan haaddattan nan godha.

Ani yeroo sana akkuma boo’icha ilma tokkichaa,

dhuma isaas akka guyyaa hadhaa’aa nan godha.”

¹¹ WAAQAYYO Gooftaan akkana jedha;

“Yeroon ani biyyattiitti beela fidu tokko ni dhufa;

innis beela dubbii WAAQAYYOO dhaga’uu ti malee

beela nyaataa yookaan dheebuu bishaanii miti.

¹² Namoonni dubbii WAAQAYYOO barbaacha

galaanaa gara galaanaatti,

kaabaa gara ba’a biiftuutti ni jooru;

garuu hin argatan.

¹³ “Bara sana

“Shamarran babbareedoo fi

dargaggoonni dhiiraa jajjaboon dheebotanii gaggabu.

¹⁴ Warri cubbuu Samaariyaatiin kakatan

yookaan ‘Yaa Daan dhugaa waaqa kee jiraataa’ jedhan,

yookaan warri ‘Dhugaa waaqa Bersheebaa’ jedhanii

kakatan akka lammata hin kaaneef ni kufu.”

9

Barbadeeffamuu Israa’el

¹ Utuu Gooftaan iddoo aarsaa bira dhaabatuu nan arge; innis akkana jedhe:

“Akka buusaawwan balbalaa raafamaniif

fixee utubaa dha’i.

Mataa nama hundaa irratti gad isaan harcaasi;

warra hafe immoo anatu goraadeedhaan fixa.

Tokkoon isaanii iyyuu baqatanii hin ba’an;

isaan keessaa namni tokko iyyuu hin miliqu.

² Yoo isaan boolla qilee qotatan iyyuu

harki koo achii isaan fuudha.

Yoo isaan samiitti ol ba'an iyyuu
ani achii gad isaan nan buusa.

³ Yoo isaan fiixee Qarmeloos irra
dhokatan iyyuu, ani achii adamsee qabee
gad isaan nan fida.

Yoo isaan galaana jala na dhokatan iyyuu,
ani akka inni achitti isaan idduuf bofa itti nan ajaja.

⁴ Yoo diinonni isaanii booji'anii isaan fudhatan,
achitti goraadee isaan fixxu itti nan ajaja.

“Ani waan gaariidhaaf utuu hin ta'in
waan hamaadhaaf ija koo isaan irra nan buusa.”

⁵ Gooftaan, WAAQAYYO Waan Hunda Danda'u lafa ni tuqa;
isheenis ni baqxi;

wanni ishee irra jiraatu hundinuu ni boo'a;
biyyattiin guutuun akka laga Abbayyaa ol kaati;
ergasiis akka laga Gibxi gad galti;

⁶ inni darbii isaa ol dheeraa samii irratti ijaarratee
hundee isaa lafa irra dhaabbatu,
inni bishaanota galaanaa waamee
fuula lafaa irratti gad roobsu sun
maqaan isaa WAAQAYYO.

⁷ “Isin Israa'eloonni
anaaf akkuma saba Itoophiyaa mitii?”
jedha WAAQAYYO.

“Ani Israa'eloota biyya Gibxiitii,
Filisxeemota Kaftoorii,
warra Sooriyaa immoo Qiirii baasee hin fidnee?”

⁸ “Dhugumaan iji WAAQAYYO Gooftaa
mootummaa cubbamaa irra jira.
Ani fuula lafaa irraa isa nan balleessa;
ta'us ani guutummaan guutuutti mana Yaaqoob hin balleessu”
jedha WAAQAYYO.

⁹ “Ani ajaja kennee
akkuma midhaan gingilchaadhaan
gingilfamee iji tokko iyyuu lafa hin buune sana
saboota hunda gidduutti

mana Israa'el nan gingilcha.
¹⁰ Cubbamoanni saba koo gidduu jiraatan hundi
Warri, 'Balaan nu hin argatu
yookaan nutti hin dhufu' jedhan
hundi goraadeedhaan dhumu.

Haaromfamuu Israa'el

¹¹ “Ani bara sana keessa dunkaana Daawit
“Kan kufe sana deebisee nan dhaaba.

Kan tarsa'es walitti nan supha;
diigamaa isaa iddootti deebisee
akka duraatti nan ijaara;

¹² kunis akka isaan hambaa Edoonii fi
saboota maqaa kootiin waamaman hunda dhaalaniif”
jedha WAAQAYYO, inni waan kana hojjetu.

¹³ WAAQAYYO akkana jedha; “Kunoo, barri itti namni haamu tokko isa qotu qaqqabu,
“namni wayinii dhaabu immoo

isa cuunfu qaqqabu tokko ni dhufa;
Daadhiin wayinii haaraan tulluuwwan irraa ni coccopha;
gaarran hunda keessaas ni yaa'a.

¹⁴ Ani saba koo Israa'elin boojiudhaa nan deebisa.

“Isaanis magaalaawwan diigaman deebisanii ijaaranii keessa ni jiraatu.

Isaan wayinii dhaabanii, daadhii wayinii isaanii ni dhugu;
isaan biqiltuu dhaabbatanii ija isaa ni nyaatu.

- ¹⁵ Ani Israa'eloota biyya ofii isaanii keessa nan dhaaba;
isaan biyya ani isaaniif kenne keessaa
lammata hin buqqifaman,"
jedha WAAQAYYO Waaqni kee.

Raajii Obaadiyaa

¹ Mul'ata Obaadiyaa.

1-4 kwf - Erm 49:14-16

5-6 kwf - Erm 49:9-10

WAAQAYYO Gooftaan waa'ee Edoom akkana jedha.

Nu ergaa tokko WAAQAYYO irraa dhageenyeerra:

Ergamaan tokko, "Ka'aa dhaqnee ishee lollaa;
waraanaafis ba'aa" jechuuf gara sabootaatti ergame.

² "Kunoo, ani saboota gidduutti sin xinneessa;
atis akka malee tuffatamta.

³ Ati kan baqaqaa kattaa keessa jiraattee
mana kee lafa ol ka'aa irratti ijaarrattu,
kan, 'Eenyutu lafatti gad na buusa?' ofiin jettu,
of tuulummaan garaa keetii si gowwoomseera.

⁴ Yoo ati akkuma risaa ol fagaattee
urjiiwwan gidduutti man'ee kee ijaarratte iyyuu,
ani achii gad sin buusa"
jedha WAAQAYYO.

⁵ "Hattuun yoo sitti dhuftee
saamtuun halkaniin sitti seente,
balaa akkamiitu si eeggata!
Isaan hammuma barbaadan qofa fudhatanii hin deemanii?
Warri ija wayinii guuran utuu gara kee dhufanii,
silaa qarmii wayii hin dhiisanii?

⁶ Esaawu garuu akkam saamamee
qabeenyi isaa dhokfamaanis jalaa guurame!

⁷ Gareen kee hundinuu gara moggaatti si dhiiba;
michoonni kee si gowwoomsanii si mo'atu;
warri buddeena kee nyaatan kiyoo si dura kaa'u;
ati garuu waan kana hin hubattu.

⁸ "Ani bara sana ogeeyyii Edoom,
namoota hubannaa qaban tulluuwwan Esaaw irraa
hin balleessuu?" jedha WAAQAYYO.

⁹ "Yaa Teemaan qabsaa'onni kee ni rifatu;
namni tulluuwwan Esaawuu irra
jiraatu hundinuus gorra'amee dhuma.

¹⁰ Sababii daba obboleessa kee Yaaqoobitti hojjetameetiif
ati qaaniidhaan haguugamta;
bara baraanis ni balleeffamta.

¹¹ Gaafa alagoonni qabeenya isaa
gurratanii namoonni ormaa immoo karra isaa seenanii
Yerusaalemitti isaa buufatanitti,
atis kophaa dhaabattee
isaan keessaa akka isa tokkoo taate.

¹² Gaafa inni milkii dhabetti
ati obboleessa kee tuffachuu hin qabdu turte;
yookaan guyyaa badii isaaniitti
saba Yihuudaatti gammaduu hin qabdu turte;
yookaan bara rakkina isaanii keessa
akka malee of tuuluu hin qabdu turte.

¹³ Bara balaan isaanitti dhufe keessa
karra saba kootiin ol seenuu hin qabdu turte;
yookaan bara dha'ichi isaanitti dhufe keessa
rakkina isaanii keessatti isaan tuffachuu hin qabdu turte;

yookaan bara balaan isaanitti dhufe keessa
 qabeenya isaanii saamuu hin qabdu turte.
 14 Baqattoota isaa fixuuf jettee qaxxaamura karaatti
 isaan eeggachuu hin qabdu turte;
 yookaan bara rakkina isaa keessa
 hambaa isaa dabarsitee kennuu hin qabdu turte.

15 “Guyyaan WAAQAYYOO
 saboota hundaaf dhi’aateera.
 Akkuma ati hojjette sittis ni hojjetama;
 hojiin kees matuma keetti deebi’a.
 16 Akkuma isin gaara koo qulqulluu irratti dhugdan sana,
 saboonni hundinuu ittuma fufanii ni dhugu;
 isaan itti deddeebi’anii dhugu;
 akka waan gonkumaa hin dhuginii ta’u.
 17 Tulluu Xiyoona irra garuu furamuun ni jiraata;
 inni ni qulqullaa’a;
 manni Yaaqoobis dhaala isaanii ni dhuunfatu.
 18 Manni Yaaqoob ibidda,
 manni Yoosef immoo arraba ibiddaa ta’a;
 manni Esaaw huura ta’a;
 isaanis ibidda itti qabsiisanii gubanii barbadeessu.
 Mana Esaaw keessaa
 namni tokko iyyuu hin hafu”
 jedhee dubbateera WAAQAYYOO.

19 Namoonni Negeeb
 tulluuwwan Esaaw ni qabatu;
 namoonni gaarran jala jiraatan immoo
 biyya Filisxeemotaa qabatu.
 Isaan dirree Efreemii fi Samaariyaa ni qabatu;
 Beniyaam immoo biyya Gili’aad qabata.
 20 Gareen booji’amtoota Israa’el kan Kana’aan jiraatu kun
 biyya hamma Saaraptaatti jiru dhaala;
 booji’amtoonni Yerusaalem kanneen
 Sefaaraad jiraatan magaalawwan Negeeb dhaalu.
 21 Bilisa baastonni tulluuwwan Esaaw bulchuudhaaf
 Tulluu Xiyoona ol ba’u.
 Mootummaan kan WAAQAYYOO ta’a.

Raajii Yoonas

Yoonas WAAQAYYO Duraa Baqate

¹ Dubbiin WAAQAYYOO akkana jedhee gara Yoonas ilma Amitaayi dhufe: ² “Sababii hamminni ishee fuula koo dura dhufee, gara Nanawwee magaalaa guddittii dhaqiitii isheedhaan mormuudhaan itti lallabi.”

³ Yoonas garuu WAAQAYYO duraa baqatee Tarshiishitti qajeete. Innis Yoopheetti gad bu’ee doonii gara Tarshiish deemu tokko argate. Erga gatii geejjibaa baasee booddee WAAQAYYO duraa miliquuf jedhee doonii yaabbatee Tarshiishitti imale.

⁴ WAAQAYYO bubbee jabaa tokko galaanatti erge; dambaliin akka malee jabaan tokko kaanaan dooniin sun gargar caccabuu ga’e. ⁵ Warri doonii sana oofan hundinuu akka malee sodaatanii tokkoon tokkoon isaanii waaqa isaaniitti iyyatan. Isaanis ba’aa xinneessuuf jedhanii doonii irraa fe’iisa galaanatti gad dadarbatan.

Yoonas garuu garaa doonii seenee ciisee achitti hirribni guddaan isa qabe. ⁶ Ajajaan doonii sanaa gara isaa dhufee, “Ati akkam akkas rafuu dandeessa? Ka’ii waaqa kee waammadhu! Tarii inni nuu dhaga’ee nus du’a oolla ta’aatii” jedheen.

⁷ Warri doonii oofanis, “Kottaa nama balaa kana nutti fide beekuuf ixa buufannaatii” waliin jedhan. Isaan ixa buufannaan ixaan sun Yoonas irra bu’e. ⁸ Kanaafuu isaan, “Mee nutti himi; namni balaa nutti dhufe kana hundaaf itti gaafatamu eenyu? Hojiin kee maali? Ati eessaa dhufte? Biyyi kee eessa? Ati saba kam keessaa dhalatte?” jedhanii isa gaafatan.

⁹ Innis, “Ani Ibricha WAAQAYYO, Waaqa isa samii, galaanaa fi lafa uume sana waaqeffatuu dha” jedhee deebise.

¹⁰ Wanni kun isaan sodaachisnaan, “Ati maal goote?” jedhanii isa gaafatan. Isaanis sababii inni duraanuu isaanitti himeef akka inni WAAQAYYO duraa miliquuf baqachuutti jiru beekan.

¹¹ Galaanni sunis ittuma caalchisee raafamaa dhufe. Kanaafuu isaan, “Nu amma galaana kana tasgabbeessuuf maal si gochuu qabna?” jedhanii isa gaafatan.

¹² Innis, “Ol na fuudhaatii galaanatti na darbadhaa; ergasii galaanichi gab jedha. Ani akka dha’aan galaanaa hamaan kun sababii balleessaa kootiitiif dhufe nan beeka” jedhee deebise.

¹³ Namoonni sun garuu qooda kanaa doonii sana gara qarqaraatti baasuuf waan danda’an hunda yaalan. Isaan garuu galaanni sun ittuma caalchisee raafamaa waan dhufeeff baasuu hin dandeenye. ¹⁴ Kana irratti isaan, “Yaa WAAQAYYO, ati sababii lubbuu namicha kanaatiif jettee nu hin fixin. Yaa WAAQAYYO ati waan akkuma feete hojjetteef yakka lubbuu nama balleessaa hin qabnee ajjeesuu nutti hin herregin” jedhanii gara WAAQAYYOOTTI iyyatan. ¹⁵ Akkasii Yoonasiin fuudhanii doonii irraa gad darbatan; galaanni raafamaa ture sunis gab jedhe. ¹⁶ Kana irratti namoonni sun akka malee WAAQAYYON sodaatanii aarsaa WAAQAYYOOOF dhi’eessan; wareegas wareeganiif.

¹⁷ WAAQAYYO garuu akka inni Yoonasiin liqimsuuf qurxummii guddaa tokko qopheesse; Yoonasiis guyyaa sadii fi halkan sadii garaa qurxummii sanaa keessa ture.

2

Kadhannaa Yoonas

¹ Yoonas garaa qurxummii keessaa WAAQAYYON Waaqa isaa kadhate. ² Innis akkana jedhe:

“Ani rakkina koo keessatti WAAQAYYON waammadhe;
innis deebii naaf kenne.

Ani gargaarsa barbaacha garaa sii’ool keessaa nan iyye;
atis iyya koo naaf dhageesse.

³ Ati tuujubatti,
garaa galaanaatti gad na darbatte;

lolaanis na marse;
dambalii fi dha’aan kee

hundinuu narra garagalan.

⁴ Anis, ‘Kunoo ani fuula kee duraa balleeffameera;
ta’us ani deebi’ee gara mana qulqullummaa keetii
qulqulluu sanaan ilaala’ nan jedhe.

- ⁵ Bishaanonni na haguugan;
tuujubni immoo na marse;
aramaan galaanaas mataatti na marame.
- ⁶ Ani gara hundee tulluuwwaniittin gad liqimfame;
balballi lafa jalaas bara baraan natti cufame.
Yaa WAAQAYYO Waaqa ko,
ati garuu lubbuu koo boolla keessaa ol baafte.
- ⁷ “Yaa WAAQAYYO, yeroo lubbuun koo dadhabdetti
ani sin yaadadhe;
kadhannaan koos gara kee
gara mana qulqullummaa kee qulqullichaatti ol ba’e.
- ⁸ “Warri waaqota tolfamoo faayidaa hin qabnetti cichan
araara Waaqaa irraa garagalu.
- ⁹ Ani garuu faarfannaa galataatiin
aarsaa siif nan dhi’eessa.
Ani wareegan wareege sanas nan baasa.
Anis, ‘Fayyinni WAAQAYYO biraa dhufa’ ” nan jedha.
- ¹⁰ WAAQAYYOS qurxummii sana ajaje; qurxummiin sunis lafa gogaa irratti Yoonas tufe.

3

Yoonas Nanawwee Dhaqe

- ¹ Ergasii dubbii WAAQAYYOO akkana jedhee yeroo lammaffaa gara Yoonas dhufe:
² “Gara Nanawwee magaalaa guddittii sanaa dhaqiitii ergaa ani sitti himu kana itti lallabi.”
- ³ Yoonasis dubbii WAAQAYYOOTIIF ajajamee Nanawwee dhaqe. Yeroo sanatti Nanawween magaalaa akka malee guddoo turte; keessa ba’anii darbuufis guyyaa sadii fudhata ture. ⁴ Yoonas imala guyyaa tokkoo deemuudhaan magaalattiitti gale. Akkana jedhees lallabe: “Nanawween guyyaa afurtama keessatti ni garagalfanti.” ⁵ Warri Nanawwees Waaqatti aman. Soomas labsanii hundi isaanii xinnaa fi guddaan uffata gaddaa uffatan.
- ⁶ Yommuu oduun kun mooticha Nanawwee ga’etti inni teessoo isaa irraa ka’ee uffata mootii of irraa baase; wayyaa gaddaa uffatee daaraa keessa taa’e. ⁷ Ergasii akkana jedhee Nanawwee keessatti labsii labse:
“Ajajni mootichaatii fi qondaaltota isaa kanaa dha:
Akka namni yookaan horiin tokko iyyuu, karri loonii yookaan bushaayeen waan tokko iyyuu afaaniin qabu hin eeyyaminaa; akka isaan waa nyaatan yookaan dhugan hin eeyyaminaa. ⁸ Garuu namnis, horiinis wayyaa gaddaa haa uffatan. Namni hundinuu dafee Waaqa isaa haa waammatu. Isaan karaa isaanii hamaa sanaa fi yakka harki isaanii hojjetu irraa haa deebi’an. ⁹ Maaltu beeka? Tarii Waaqni gaabbee garaa nuu laafee dheekkamsa isaa sodaachisaa sana nurraa deebisee, nuus badii oolla ta’aatii.”
- ¹⁰ Waaqnis akka isaan waan hamaa irraa deebi’an hojii isaanii arge; Waaqnis garaa laafeefii balaa isaanitti erguuf yaade sana isaanitti fiduu dhiise.

4

Yoonas Gara Laafina WAAQAYYOTTI Aare

- ¹ Wanni kun Yoonas baay’ee hin gammachiifne; inni ni aare. ² Akkana jedhees WAAQAYYON kadhate; “Yaa WAAQAYYO wannu ani yeroo biyya koo turetti jedhe sun kanuma mitii? Wannu ani Tarshiishitti baqachuuf ariifadheefis kana. Ani akka ati Waaqa arjaa fi garaa laafessa, kan dafee hin aarree fi kan jaalalli isaa guddaa ta’e, Waaqa balaa buusuu irraa of qusatu taate nan beeka. ³ Yaa WAAQAYYO jiraachuu mannaa du’uu naaf wayyaatii amma lubbuu koo fudhadhu.”
- ⁴ WAAQAYYO garuu, “Ati aaruun kee sirriidhaa?” jedheen.
- ⁵ Yoonasis magaalatti keessaa ba’ee karaa ba’a magaalattiitiin taa’e. Innis achitti daasii tokko ijaarratee gaaddisa isaa jala taa’ee waan magaalattiin ta’uuf jirtu arguuf eege. ⁶ WAAQAYYO Waaqni biqiltuu qopheessee akka inni Yoonasiin olitti guddatee mataa isaa irra gaaddisa buusee akka gaddi itti qabbanaa’u godhe; Yoonas sababii biqiltuu sanaatiif baay’ee gammade. ⁷ Borumtaa bariis Waaqni biqiltuun sun akka

goguuf raammoo isa nyaatu itti erge. ⁸ Yeroo biiftuun baatettis Waaqni bubbee ba'a biiftuu ho'aa tokko erge; aduunis akka inni gaggabuuf mataa Yoonasitti baate. Innis du'uu barbaadee, "Jiraachuu mannaa du'uu naaf wayya" jedhe.

⁹ Waaqni garuu, "Ati waa'ee biqiltuu sanaatiif aaruun kee sirriidhaa?" jedheen.

Yoonas, "Eeyyee. Ani hamma du'aatti utuun aare iyyuu nan barbaada" jedhe.

¹⁰ WAAQAYYO garuu akkana jedhe; "Ati yoo biqiltuu kana eeguu yookaan akka inni guddatu gochuu baatte illee waa'ee isaa yaaddofteerta. Biqiltuun kun halkanuma tokkoon guddatee halkanuma tokkoon du'e. ¹¹ Nanawween garuu namoota bitaa fi mirga isaanii iyyuu gargar baasanii hin beekne kuma dhibba tokkoo fi kuma digdamaa fi loon hedduu qabdi. Ani magaalaa guddoo akkasiitiif yaaduu hin qabuu ree?"

Raajii Miikiyaas

¹ Bara Yootaam, Aahaazii fi Hisqiyaa mootota Yihuudaa turan keessa dubbiin WAAQAYYOO gara Miikiyaas namicha Mooresheet dhufe; kunis mul'ata inni waa'ee Samaariyaatii fi waa'ee Yerusaalem argee dha.

² Yaa namoota, isin hundinuu dhaga'aa;
lafaa fi wantoonni ishee irra jiraattan hundinuu dhaggeeffadhaa;
WAAQAYYOO Gooftichi,
Gooftaan mana qulqullummaa isaa qulqulluu sana keessaa
dhugaa isinitti ba'a.

Murtii Samaariyaa fi Yerusaalemin Eggatu

³ Kunoo! WAAQAYYOO iddoo jireenya isaatii dhufaa jira;
inni gad dhufee iddoo ol ka'aa lafaa irra ni ejjeta.

⁴ Akkuma gagaa fuula ibiddaa dura jiruu,
akkuma bishaan tabba irraa gad yaa'uu
tulluuwwan isa jalatti ni baqu;
sululawwanis gargar baqaqu.

⁵ Wannii kun hundi sababii dogoggora Yaaqoobiif,
sababii cubbuu mana Israa'eliif ta'e.
Dogoggorri Yaaqoob maali?

Samaariyaa mitii?
Iddoon sagadaa Yihuudaa maali?
Yerusaalem mitii?

⁶ "Kanaafuu ani Samaariyaa tuullaa diigamaa,
lafa wayinii itti dhaabbatan nan godha.
Ani dhagaawwan ishee sululatti naqee,
hundee ishee qullaa nan hambisa.

⁷ Waaqonni ishee tolfamoon hundinuu ni hurreeffamu;
kennaawwan mana qulqullummaa ishee hundinuu ibiddaan gubamu;
ani fakkii ishee hunda nan barbadeessa.
Isheen gatii sagaagaltootaa irraa kennaa ishee walitti waan qabatteef,
kennaan sun ammas gatii sagaagaltootaa ta'ee ni deebi'a."

Boo'uu fi Gadduu

⁸ Sababii waan kanaatiif ani boo'ee nan wawwaadha;
ani miilla duwwaa fi qullaa nan deema.

Ani akkuma waangoo iyyee,
akkuma urunguu nan aada.

⁹ Madaan ishee waan hin fayyineef,
Yihuudaattis darbeera.

Karra saba koo dura ga'eera;
Yerusaalemittis dhufeera.

¹⁰ Isin waan kana Gaati keessatti hin dubbatinaa;
gonkumaa hin boo'inaa.

Beet Le'afraatti,
awwaara keessa gangaladhaa.

¹¹ Isin warri Shaafiir keessa jiraattan,
qullaa fi qaaniidhaan darbaa.

Warri Zanaan keessa jiraatan,
gad hin ba'an.

Beet Eezel boo'icha irra jirti;
eegumsi ishee isin irraa fuudhameera.

¹² Sababii balaan WAAQAYYOO biraa dhufee
karra Yerusaalem iyyuu ga'eef,
warri Maaroot keessa jiraatan
gargaarsa argachuuf wixxirfatu.

- 13 Ati Laakkiish keessa kan jiraattu,
fardeen gaariitti hidhadhu.
Ati Intala Xiyooniif
jalqaba cubbuu ti;
dogoggorri Israa'el
si'i keessatti argamaatii.
- 14 Kanaafuu ati Mooresheet Gaatiif
kennaa kennita.
Manneen Akziib mootota Israa'eliif
gowwoomsitoota ta'u.
- 15 Ani warra Maareeshaa keessa jiraattanitti
mo'ataa tokko nan fida.
Inni ulfina Israa'el ta'e
gara Adulaam ni dhufa.
- 16 Sababii gadda ijoollee itti gammadduutiif jedhii
mataa kee haaddadhu;
akkuma goggocoroo mataa kee moleeffadhu;
isaan boojuudhaan sirraa fudhatamuutii.

2

Karoora Namaatii fi Karoora Waaqaa

- 1 Warra daba karoorfatan
kanneen siree isaanii irra
ciisanii hammina yaadaniif wayyoo!
Sababii waan kana hojjechuun humna isaanii jala jiruuf
isaan ifa bariitiin ka'anii waan sana hojjetu.
- 2 Isaan lafa qotiisaa kajeelanii qabatu;
manneenis akkasuma kajeelanii fudhatu.
Isaan gowwoomsaadhaan mana namaa,
dhaala isaas ni fudhatu.
- 3 Kanaafuu WAAQAYYO akkana jedha;
"Kunoo ani balaa isin jalaa ba'uu hin dandeenye tokko
saba kanatti fiduuf karoorfadheen jira.
Isin si'achi of tuulummaadhaan jiraachuu hin dandeesan;
yeroon kun yeroo rakkinaa ta'aatii.
- 4 Bara sana keessa namoonni isinitti ga'isu;
akkana jedhaniis faaruu boo'ichaa kanaan isinitti qoosu;
'Nu guutumaan guutuutti barbadoofneerra;
qabeenyi saba kootiis gargar qooddatameera.
Inni narraa fudhata!
Lafa qotiisaa keenya warra nu mo'ataniif kenna.' "
- 5 Kanaafuu ati nama ixaadhaan lafa qoodu tokko illee
waldaa WAAQAYYOO keessaa hin qabaattu.
- Raajota Sobaa*
- 6 Raajonni isaanii, "Isin raajii hin dubbatinaa;
waa'ee waan kanaa raajii hin dubbatinaa;
salphinni nutti hin dhufu" jedhu.
- 7 Yaa mana Yaaqoob, "Wanni kun akkana jedhamuu qabaa?
Hafuurri WAAQAYYOO obsa hin qabuu?
Inni waan akkasii ni hojjetaa?"
- "Nama karaan isaa qajeelaa ta'eef
dubbiin koo waan gaarii hin hojjetuu?
- 8 Sabni koo akka diinaatti ka'eera.
Isin namoota yaaddoo malee achiin darban
kanneen duulaa galaa jiran irraa uffata baafattu.
- 9 Isin dubartoota saba kootii
manneen isaanii babbareedoo keessaa ariitu.
Eebba koos bara baraan
ijoollee isaanii irraa fudhattu.

10 Ka'aatii asii deemaa!

Iddoon kun lafa boqonnaa keessanii miti;
isheen xurooftee diigamtee baddeerti.

11 Namni sobaa fi gowwoomsaan tokko yoo dhufee,
'Ani waa'ee daadhii wayiniitii fi
dhugaatii cimaa raajii siif nan dubbadha' jedhe;
inni raajii saba kanaa ta'a!

Furamni Waadaa Galame

12 "Yaa Yaaqoob, ani dhugumaan
isin hunda walitti nan qaba;
ani hambaa Israa'el walitti nan fida.

Ani akkuma hoolota gola keessaatti,
akkuma bushaayee lafa dheedaa jiraniitti walitti isaan nan fida;
lafti sunis tuuta namaatiin guutamti.

13 Inni cabsee karaa baasu fuula isaanii dura deema;
isaan cabsanii karraan ba'u.

Mootiin isaanii isaan dura ba'a;
WAAQAYYO fuula isaanii dura deema."

3

Hooggantoonnii fi Raajonni Balaaleffataman

¹ Ergasii ani akkanan jedhe;

"Isin hooggantoonni Yaaqoob,
bulchitoonni mana Israa'el mee dhaggeeffadhaa.

Isin murtii qajeelaa beekuu hin qabdani?

² Isin warri waan gaarii jibbitanii waan hamaa jaallattan,

warri saba koo irraa gogaa,
lafee isaanii irraa immoo foon baafan,

³ warri foon saba koo nyaattan,
kanneen gogaa isaanii irraa qunciftanii
lafee isaanii caccabsitan,

isin warri akka foon eeleetti waadamuutii fi
okkoteetti affeelamuu isaan ciccirtan
murtii qajeelaa beekuu hin qabdani?"

⁴ Ergasii isaan WAAQAYYOTTI iyyatu;
inni garuu deebii hin kennuuf.

Yeroo sanatti inni sababii cubbuu
isaan hojjetaniitiif fuula isaa isaan duraa ni dhokfata.

⁵ WAAQAYYO akkana jedha:

"Waa'ee raajota
saba koo karaa irraa jal'isanii,
yoo namni tokko nyaata kenneef
isaan 'Nagaa' labsu;

yoo inni akkas gochuu baate immoo
lola isatti kaasuuf qophaa'u.

⁶ Kanaafuu utuu isin mul'ata hin argin halkan,
utuu isin hooda hin dubbatin immoo dukkanni isinitti dhufa.

Aduun raajotatti dhiiti;
guyyaanis isaanitti dukkanaa'a.

⁷ Ilaaltonni ni qaana'u;
warri hooda dubbatanis ni salphifamu.

Sababii deebiin tokko iyyuu Waaqa biraa hin dhufneef
isaan hundi fuula haguuggatu."

⁸ Ani garuu Yaaqoobitti balleessaa isaa,
Israa'elittis cubbuu isaa himuuf
humnaan guutameera;

Hafuura WAAQAYYOOTIIN
murtii qajeelaa fi jabinaan guutameera.

⁹ Isin hooggantoonni mana Yaaqoob

bulchitoonni mana Israa'el
 warri murtii qajeelaa tuffatanii
 waan sirrii ta'e hunda jal'iftan waan kana dhaga'aa;
¹⁰ warri dhiiga dhangalaasuudhaan Xiyooin,
 hamminaan immoo Yerusaaalemin ijaartan waan kana dhaga'aa.
¹¹ Hooggantoonni ishee gatiidhaan barsiisu;
 luboonni ishee gatiidhaan barsiisu;
 raajonni ishees maallaqa fudhatanii hooda dubbatu.
 Ta'us isaan WAAQAYYOTTI irkatanii,
 "WAAQAYYO gidduu keenya jira mitii?
 Balaan tokko iyyuu nutti hin dhufu" jedhu.
¹² Kanaafuu sababii keessanii,
 Xiyoon akkuma lafa qotiisaatti qotamti;
 Yerusaaalemis tuullaa waan diigamee taati;
 gaarri mana qulqullummaas tabba daggalaan liqimfame ta'a.

4

Tulluu WAAQAYYOO

4:1-3 kwf - Isa 2:1-4

¹ Bara dhumaa keessa
 tulluun mana qulqullummaa WAAQAYYOO
 tulluuwwan hunda keessaa ol dheeratee dhaabata;
 inni gaarran caalaa ol ol jedha;
 namoonnis itti yaa'u.
² Saboonni baay'een dhufanii akkana jedhu;
 "Kottaa gara tulluu WAAQAYYOO,
 gara mana Waaqa Yaaqoob ol baanaa.
 Inni akka nu daandii isaa irra deemnuuf
 karaa isaa nu barsiisa."
 Seerri Xiyoon keessaa,
 dubbiin WAAQAYYOO immoo Yerusaaalem keessaa dhufa.
³ Inni namoota hedduu gidduutti murtii kennee
 saboota jajjaboo gargar fagoo jiranis walitti araarsa.
 Isaan goraadee isaanii tumanii maarashaa,
 eeboo isaanii illee haamtuu tolfatu.
 Sabni tokko saba biraatti goraadee hin luqqifatu
 yookaan waraanaaf jedhanii si'achi nama hin leenjisan.
⁴ Namni hundi muka wayinii isaatii fi
 muka harbuu isaa jala taa'a;
 WAAQAYYON Waan Hunda Danda'u dubbateeraatii
 namni isaan sodaachisu tokko iyyuu hin jiru.
⁵ Saboonni hundinuu
 maqaa waagota isaaniitiin deddeebi'u;
 nu immoo bara baraa hamma bara baraatti
 maqaa WAAQAYYO Waaqa keenyaatiin deddeebina.
Karoora WAAQAYYOO
⁶ WAAQAYYO akkana jedha;
 "Ani bara sana naafa walittin qaba;
 warra booji'amanii fi
 warra ani gaddisiises walittin qaba.
⁷ Ani warra naafa hambaa,
 warra ari'ame immoo saba jabaa nan godha.
 WAAQAYYO guyyaa sanaa jalqabee
 hamma bara baraatti Tulluu Xiyoon irratti bulchaa isaanii ta'a.
⁸ Yaa gamoo eegumsa bushaayee,
 yaa da'oo Intala Xiyoon,
 ol aantummaan durii siif ni deebifama;
 mootummaan Intala Yerusaaalem ni dhufa."
⁹ Ati amma maaliif akkana iyyitee boossa?
 Ati mootii hin qabduu?

Wanni ati akka dubartii ciniinsuun qabee miixattuuf
gorsaan kee badeetii?

¹⁰ Yaa Intala Xiyoon,
akkuma dubartii ciniinsuun qabeetti aadi;
ati amma bakkee keessa qubachuuf
magaalaa keessaa ba'uu qabdaatii.

Ati Baabilon dhaqxa;
achitti ni baraaramta.

WAAQAYYO achitti
harka diina keetii keessaa si fura.

¹¹ Amma garuu saboonni hedduun si marsaniiru.

Isaanis, "Isheen haa xurooftu;
iji keenya xiyyeeffatee
Xiyoonin haa ilaalu!" jedhu.

¹² Isaan garuu yaada WAAQAYYOO hin beekan;
isaan karoora isaa kan inni akkuma bissii
oobdiitti walitti qabe sana hin hubatan.

¹³ "Yaa Intala Xiyoon ka'iitii midhaan dha'i;
ani gaanfa sibiilaa siif nan kennaatii;
ani kottee naasii siif nan kenna;
atis saboota baay'ee caccabsita."

Ati horii isaan karaa hamaadhaan argatan WAAQAYYOOF kennita;
qabeenya isaaniis Gooftaa lafa hundaatiif kennita.

5

Bulchaa Beetlihemii Dhufu

¹ Yaa magaalaa raayyaa waraanaa, raayyaa kee hiriirsi;
nu marfamneerraatii.

Isaan uleedhaan
maddii bulchaa Israa'el dha'u.

² "Garuu yaa Beetlihem Efraataa,
ati yoo balbala Yihuudaa keessaa xinnoo taate iyyuu,
kan bulchaa Israa'el ta'u,
kan jiraachuun isaa durumaa,
kan bara duriitii jalqabee ture tokko
si keessaa ba'ee naaf dhufa."

³ Kanaafuu Israa'el
hamma isheen ciniinsifachaa jirtu deessee
obboloonni isaa warri hafan
Israa'elootatti makamuuf deebi'anitti kophaa hafti.

⁴ Inni jabina WAAQAYYOOTIIN
surraa maqaa WAAQAYYO, Waaga isaatiin
dhaabatee bushaayee isaa tikfata.
Yeroo sanatti surraan isaa
waan daarii lafaa ga'uuf isaan nagaadhaan jiraatu.

⁵ Inni nagaa keenya ta'a;
yeroo warri Asoor biyya keenya weeraranii
da'annoo keenya keessa ba'anitti
nu tiksoota torbaa fi
ajajjuuwwan saddeet itti kakaasna.

⁶ Isaan biyya Asoor goraadeedhaan
biyya Naamruudis goraadee luqqifameen bulchu.
Yeroo warri Asoor biyya keenya weeraranii
daarii keenya keessa ba'anitti,
inni warra Asoor sana jalaa nu baasa.

⁷ Hambaan Yaaqoob

namoota hedduu gidduutti
 akkuma fixeensa WAAQAYYO biraa dhufuu,
 akkuma tiifuu marga irraa
 kan nama hin eegnee
 yookaan ilmaan namaa hin eeggannee ta'a.
 8 Hambaan Yaaqoob saboota gidduutti,
 uummata hedduu gidduuttis,
 akkuma leenca bineensota bosonaa gidduu jiruu,
 akkuma leenca saafela bushaayee gidduu jiru
 kan irra ejjetee isaan cicciruutii fi
 kan namni tokko iyyuu harkaa buusuu hin dandeenyee ta'a.
 9 Harki kee mo'annaadhaan diinota keetti ka'a;
 amajaajonni kee hundinuu ni barbadeeffamu.
 10 WAAQAYYO akkana jedha;
 "Gaafas ani fardeen keessan gidduu keessanii nan balleessa;
 gaariwwan keessan kan waraanaas nan barbadeessa.
 11 Ani magaalaaawwan biyya keessanii nan barbadeessa;
 da'annooowwan keessan hundas nan diiga.
 12 Ani falfaloota keessan nan balleessa;
 isinis deebitanii hin mortan.
 13 Ani fakkiwwan kee soofamoo fi utubaawwan waaqeffannaa keetii
 gidduu keetii nan balleessa;
 ati si'achi gad jettee
 hojii harka keetiitiif hin sagaddu.
 14 Ani siidaa Aasheeraa gidduu keetii buqqisee
 magaalaaawwan kees nan barbadeessa.
 15 Ani saboota naaf hin ajajamin irratti
 aarii fi dheekkamsaan haaloo nan ba'a."

6

WAAQAYYO Israa'el Irraa Dubbii Qaba

1 Waan WAAQAYYO jedhu dhaggeeffadhaa:
 "Ol kakka'aatii fuula tulluuwwanii duratti dubbii keessan dhi'eeffadhaa;
 gaarranis waan isin jettan haa dhaga'an.
 2 "Yaa tulluuwwan himata WAAQAYYOO dhaga'aa;
 hundeewwan lafaa kanneen bara baraa isinis dhaggeeffadhaa.
 WAAQAYYO saba isaa irraa dubbii qabaatii;
 inni Israa'el wajjin falmii qaba.
 3 "Yaa saba ko, ani maalan si godhe?
 Ani maaliinan si dadhabsiise? Mee deebii naaf kenni.
 4 Ani biyya Gibxii sin baasee
 biyya garbummaa keessaa sin fure.
 Ani akka inni si qajeelchuuf Musee,
 akkasumas Aroonii fi Miiriyaamin siifan erge.
 5 Yaa saba ko, mee gorsa Baalaaq mootiin Mo'aab gaafatee fi
 deebii Bala'aam ilmi Be'oor kenneef yaadadhu.
 Ati akka hojii qajeelummaa WAAQAYYOO beektuuf
 karaa ati Shixiimii hamma Gilgaalitti deemte sana yaadadhu."
 6 Ani maaliinan fuula WAAQAYYOO dura dhufee
 fuula Waaqa ol gubbaa jiruu duratti sagada?
 Ani aarsaa gubamuun,
 jabbii waggaa tokkootiin fuula isaa duratti dhi'aadhuu?
 7 WAAQAYYO korbeeyyii hoolaa kuma hedduutti,
 zayitii laga kuma kudhaniitti ni gammadaa?
 Ani ilma koo hangafa, sababii yakka kootiitiif,
 sababii cubbuu lubbuu kootiitiifis dhala garaa koo aarsaa dhi'eessuu?
 8 Yaa nama, inni waan gaarii si argisiiseera.
 WAAQAYYO maal sirraa barbaada?
 Murtii qajeelaa kennuu fi araara jaallachuu,

akka ati gad of qabdee Waaqa kee wajjin deemtu
sirraa barbaada mitii?

Yakkaa fi Adabamuu Israa'el

- ⁹ Isin dhaggeeffadhaa! WAAQAYYO akkana jedhee magaalattii waama:
Maqaa kee sodaachuun ogummaa dha;
"Ulee fi Isa ulee sana filate qalbeeffadhaa.
- ¹⁰ Yaa mana hamaa, ani qabeenya isin dabaan argattanii fi
madaalii sobaa abaaramaa sana irraanfadhaa?
- ¹¹ Ani nama madaallii sobaatiin hojjetuu fi
kan madaalii sobaa korojootti baatu akkasumatti dhiisaa?
- ¹² Sooreyyiin ishee jal'oota;
uummanni ishee sobdoota;
arrabni isaaniis gowwoomsaa dubbata.
- ¹³ Kanaafuu ani sababii cubbuu keessaniitiif isin diigee,
isin balleessuu jalqabeera.
- ¹⁴ Ati inuma nyaatta; garuu hin quufu;
garaan kee amma illee duwwaa dha.
Ati ni kaa'atta; garuu homaa siif hin kuufamu;
waan ati kuufattu sana ani goraadeetti kennaatii.
- ¹⁵ Ati ni facaafatta; garuu hin haammattu;
ejersa ni cuunfatta; garuu zayitii isaa hin dibattu;
ija wayinii ni cuunfatta; garuu daadhii wayinii hin dhugdu.
- ¹⁶ Ati sirna Omriitii fi
hojii mana Ahaab hunda jabeessiteerta;
gorsa isaaniis duukaa buuteerta.
Kanaafuu ani si balleessee,
uummata kee nan salphisa;
isin tuffii sabootaa ni baattu."

7

Dhiphachuu Israa'el

- ¹ Anaaf wayyoo!
Ani akkuma nama yeroo qarmii bonaa funaananitti
wayinii walitti qabu tokkoo ta'eera;
hurbuun wayinii kan nyaatamu tokko iyyuu hin jiru;
iji harbuu jalqabaa kan ani dharra'u tokko iyyuu hin jiru.
- ² Namni gaariin lafa irraa badeera;
namni qajeelaan tokko iyyuu hin hafne.
Namoonni hundinuu dhiiga
dhangalaasuuf riphani eeggatu;
tokkoon tokkoon namaa
kiyyoodhaan obboleessa isaa eeggata.
- ³ Harki lachuu waan hamaa hojjechuu barateera;
bulchaan kennaa barbaada;
abbaan murtiis matta'aa fudhata;
namni humna qabu waanuma fedhe dubbata;
hundi isaanii walii wajjin malatu.
- ⁴ Kan isaan hunda caalaa gaarii ta'e akka sokorruu ti;
inni akka malee qajeelaan immoo dallaa qoraattii caala.
Guyyaan eegdotaa keetii,
guyyaan itti Waaqni si ilaalu dhufeera.
Amma yeroo itti isaan joonja'anii dha.
- ⁵ Ollaa hin amanatin;
michuus hin abdatin.
Ishee hammattee ciiftu biratti iyyuu
arraba kee eeggadhu.
- ⁶ Ilmi abbaa isaa tuffata;
intalli haadha isheetti,
niitiin ilmaas amaatii isheetti kaati;
diinonni namaa miseensotuma mana isaa ta'uutii.

7 Ani garuu abdiidhaan WAAQAYYON nan eeggadha;
fayyisaa koo Waaqa nan eeggadha;
Waaqni koo na dhaga'a.

Israa'el ni Kaati

8 Yaa diina koo natti hin gammadin!
Ani yoon kufe iyyuu nan ka'a.

Ani dukkana keessa taa'u iyyuu
WAAQAYYO ifa naaf ta'a.

9 Ani sababiin cubbuu isatti hojjedheef,
hamma inni dubbii koo ilaalee naaf murteessutti
dheekkamsa Waaqayyoo nan baadha.

Inni ifatti na baasa;
anis gajeelummaa isaa nan arga.

10 Ergasii diinni koo isheen,
"WAAQAYYO Waaqni kee eessa jira?" naan jette sun
waan kana argitee qaaniin haguuganti.

Iji koo kufaatii ishee ni arga;
Isheen amma iyyuu miilla jalatti
akkuma dhoqqee daandii irraatti dhidhiitami.

11 Guyyaan itti dallaan kee ijaaramu,
guyyaan itti daangaan kee bal'ifamu tokko ni dhufa.

12 Gaafas namoonni
Asoorii fi magaalaawwan Gibxi,
Gibxii hamma Efraaxiisitti iyyuu,
galaanaa hamma galaanaatti,
tulluudhaa hamma tulluutti jiraatan gara kee ni dhufu.

13 Sababii jiraattota isheetii fi
sababii waan isaan hojjetaniitiif lafti ni onti.

Kadhannaa fi Galata

14 Uummata kee, bushaayee dhaala keetii
kanneen ofumaan bosona keessa,
lafa dheedaa gabbataa irra jiraatan
ulee keetiin tikfadhu.
Isaan akkuma bara duriitti
Baashaanii fi Gili'aad keessa haa bobba'an.

15 "Ani akkuma yeroo ati Gibxii baatee dhufte sanaa
dinqii koo isaan nan argisiisa."

16 Saboonni arganii ni qaana'u;
humna ofii hunda iyyuu ni dhabu.

Isaan afaan isaanii qabatu;
gurri isaaniis ni duuda.

17 Isaan akkuma bofaa,
akkuma uumamawwan lafa irra loo'anii biyyoo arraabu.

Isaan hollachaa holqa keessaa ba'anii dhufu;
Isaan WAAQAYYO Waaqa keenya sodaachuudhaan
deebi'anii fuula kee dura sodaadhaan dhaabatu.

18 Waaqni akka keetii kan cubbuu namaa bira darbee
balleessaa hambaa dhaala isaa dhiisuuf eenyu?

Ati araara gochuutti gammadda malee
bara baraan hin dheekkamtu.

19 Ati deebitee garaa nuu laafta;
cubbuu keenya miilla kee jalatti dhidhiittee
balleessaa keenya hundas tuujuba galaanaatti
gad darbatta.

20 Ati akkuma bara durii
abbootii keenyaaf kakatte sana
Yaaqoobiif amanamaa taata;
Abrahaamittis jaalala ni argisiifta.

Raajii Naahoom

1 Raajii waa'ee Nanawwee dubbatame. Kitaaba mul'ata Naahoom Elqooshicha.

Dheekkamsa WAAQAYYOO Nanawweetti Dheekkame

2 WAAQAYYO Waaqa hinaafuu fi Waaqa haaloo ba'uu dha;

WAAQAYYO haaloo ni ba'a; dheekkamsaanis guutameera.

WAAQAYYO diinota isaa haaloo ni ba'a;

dheekkamsa isaas amajaajota isaatiif ni kuusa.

3 WAAQAYYO dheekkamuuf hin jarjaru; humni isaa immoo guddaa dha;

WAAQAYYO nama balleessaa qabu utuu hin adabin hin dhiisu.

Bubbee hamaa fi dha'aa galaanaa keessaas karaa qaba;

duumessi immoo awwaara miilla isaa ti.

4 Inni galaanatti dheekkamee gogsa;

akka lagni hundinuu gogu godha.

Baashaanii fi Qarmeloos ni coollagu;

daraaraa Libaanoonis ni harca'a.

5 Fuula isaa duratti tulluuwwan ni kirkiru;

gaarranis baqanii badu.

Iddoo inni jirutti lafti ni hollatti;

addunyaa fi wanni addunyaa irra jiraatu hundi ni hollatu.

6 Eenyutu dheekkamsa isaa dura dhaabachuu danda'a?

Eenyutu dheekkamsa isaa sodaachisaa sana obsuu danda'a?

Dheekkamsi isaa akkuma ibiddaa dhangala'a;

fuula isaa duratti kattaawwan ni burkutaa'u.

7 WAAQAYYO gaarii dha;

yeroo rakkinaattis da'oo dha.

Inni warra isa amanatan ni beeka;

8 Garuu inni lolaa jabaadhaan

Nanawwee ni balleessa;

amajaajota isaas ari'ee dukkanatti galcha.

9 Wanni isin WAAQAYYOTTI yaaddan maali?

inni guutumaa guutuutti ni balleessa;

rakkoonis lammata hin dhufu.

10 Isaan qoraattii keessatti xaxamanii

daadhii wayinii isaaniitiin machaa'u;

akkuma cidii gogeetti gubatanii dhumu.

11 Yaa Nanawwee,

namni WAAQAYYOTTI hammina malatee

waan hamaa karoofatu si keessaa argameera.

12 WAAQAYYO akkana jedha:

"Isaan jabinaa fi baay'ina yoo qabaatan iyyuu

isaan ni barbadeeffamu; ni badus.

Yaa Yihoodaa, ani yoon duraan si miidhee

jiraadhe iyyuu, si'achi si hin miidhu.

13 Ani amma waanjoo isaanii gurmuu keessan irraa nan cabsa;

hudhaa kees sirraa nan kuta."

14 Yaa Nanawwee, WAAQAYYO akkana jedhee waa'ee kee ajaja kennee jira:

"Ati sanyii maqaan kee ittiin waamamu hin qabaattu.

Ani fakkiwwan soofamanii fi waaqota tolfamoo baqfamanii tolfaman

kanneen galmawwan waaqota keetii keessa jiran nan barbadeessa.

Waan ati akka malee balfamaa taateef

ani awwaala siif nan qopheessa."

15 Kunoo, miilli nama oduu gaarii fidu,

kan nagaa labsu tokkoo tulluuwwan irra jira!
 Yaa Yihuudaa, ayyaanota kee ayyaaneffadhu;
 wareega kees baafadhu.
 Si'achi hamaan si hin weeraru;
 inni guutumaan guutuutti ni barbadeeffama.

2

Kufaatii Nanawwee

¹ Yaa Nanawwee, namni si lolu sitti dhufeera.
 Da'oo eeggadhu;
 karaa ilaalladhu.
 Mudhii kee hidhadhu;
 humna kee hunda walitti qabadhu!

² Yoo balleessitoonni isaan onsanii
 mukkeen wayinii isaanii barbadeessan iyyuu,
 WAAQAYYO akkuma ulfina Israa'el deebise sana
 ulfina Yaaqoobis iddootti ni deebisa.

³ Gaachanawwan loltoota isaa diddiimoo dha;
 gootonnis uffata bildiimaa uffataniiru.
 Guyyaa isaan itti qopheeffaman sana,
 sibiilli gaarii lolaa irra jiru ni calaqqisa;
 eeboon gaattiraa isaaniis ni mirmirfama.

⁴ Gaariwwan lolaa karaa irra dadarbatamu;
 oobdiwwan keessas asii fi achi gulufu.
 Isaan guca boba'u fakkaatu;
 akkuma bakakkaas ni darbatamu.

⁵ Inni gootota isaa ni yaadata;
 isaan garuu karaatti gufatu.
 Isaan gara dallaa magaalattiitti ariifatu;
 da'oonis qopheeffameefii jira.

⁶ Balballi lageenii banamaa dha;
 masaraan mootummaas ni jiga.

⁷ Magaalattiin qullaatti hambaa
 akka booji'amu murteeffameera.

Xomboreewwan ishee
 qoma isaanii rurrukutanii akka gugee boo'u.

⁸ Nanawween akkuma haroo ti;
 bishaan ishees keessaa yaa'ee dhuma.
 Isaanis, "Dhaabadhaa! Dhaabadhaa!" jedhanii iyyu;
 garuu namni tokko iyyuu dugda duubatti hin deebi'u.

⁹ Meetii saamaa!

Warqee saamaa!

Maddi ishee, badhaadhummaan
 kuusaa qabeenya ishee hundaas dhuma hin qabu!

¹⁰ Isheen duwwaa, qullaa fi ona taateerti!
 Lapheen baqeera; jilbi laafeera;
 dhagni hollateera; fuulli hundis gurraacha'eera.

¹¹ Holqi leencotaa,
 iddoon isaan itti ilmaan isaanii sooran,
 iddoon leenci kormaa fi dhalaa keessa yaa'an,
 saafelli isaanis sodaa malee nagaadhaan jiraatan eessa?

¹² Leenci waan ilmaan isaatiif ga'u ajjeefate;
 leenca dhalaa isaatiifis waa hudhee ajjeese;
 boolla isaa waan adamseen,
 holqa isaa immoo gumaa fooniitiin guuttate.

¹³ WAAQAYYO Waan Hunda Danda'u akkana jedha;
 "Ani sitti ka'eera;

ani gaariwwan kee kanneen waraanaa gubee daaraa nan godha;
 goraadeen leenca kee saafela ni fixa.
 Ani waan ati adamsattu tokko illee
 lafa irratti siif hin hambisu.
 Sagaleen ergamoota keetii
 lammata hin dhaga'amu."

3

Nanawweef Wayyoo

- ¹ Magaalattii dhiigaatiif,
 kan sobaan guutamteef,
 kan saamichaan guutamteef,
 kan warri hammina hojjetan keessaa
 hin dhabamne sanaaf wayyoo!
- ² Iyyi qaccee,
 kakaksuun gommaa,
 gulufuun fardaa,
 didichuun gaarii lolaa ni dhaga'ama!
- ³ Abbaan fardaa ni gulufa;
 goraadeen ni balaqqisa;
 eeboon ni calaqqisa!
 Balaan hedduun nama irra ga'eera;
 namni baay'een du'eera;
 reeffi lakkoobsa hin qabu;
 namoonnis reeffa isaanii gufatu;
- ⁴ kun hundi sababii baay'ina sagaagalummaa sagaagaltuu,
 giiftii falfalootaa,
 kan sagaagaltummaa isheetiin saboota,
 tolcha isheetiin immoo uummata garboomsite sanaatiin ta'e.
- ⁵ WAAQAYYO Waan Hunda Danda'u akkana jedha:
 "Ani sitti ka'een jira.
 Ani uffata kee fuula keetti ol soqola.
 Ani sabootatti qullaa kee,
 mootummootatti immoo qaani kee nan mul'isa.
- ⁶ Ani xuriidhaan sin faala;
 akka malee sin tuffadha;
 waan kolfaa illee sin godha.
- ⁷ Namni si argu hundi sirraa baqatee,
 'Nanawween baduutti jirti; eenyutu boo'aaf?' siin jedha.
 Ani nama si jajjabeessu tokko illee eessaa argadha?"
- ⁸ Ati, Noo'i Amoon
 biyya laga Abbayyaa irraa
 kan bishaaniin marfante sana caaltaa?
 Lagni da'oo ishee ti;
 bishaanis dallaa ishee ti.
- ⁹ Itoophiyaa fi Gibxi jabina ishee kan dhuma hin qabnee dha;
 Fuuxii fi Liibiyaan tumsitoota ishee ti.
- ¹⁰ Ta'us isheen booji'amtee
 biyya ormaatti geeffamte.
 Daa'imman ishee mataa daandii hundaa irratti
 miciriqfamani dhuman.
 Namoota ishee ulfaatootti ixaa buufatanii
 namoonni ishee gurguddoonni hundinuu
 foncaadhaan hidhaman.
- ¹¹ Atis ni machoofta; ni dhokattas;
 diina jalaa ba'uufis da'oo barbaaddatta.
- ¹² Da'oon kee hundi mukkeen harbuu
 kanneen ija jalqabatti bilchaate qaban fakkaata;

- yeroo mukkeen sun hurgufamanitti
 iji isaanii afaan nama waa nyaatuu keessa bu'a.
- 13 Mee raayyaawwan kee ilaali;
 isaan hundinuu dubartoota!
 Karrawwan biyya keetii diinota keetiif
 bal'atanii banamanii jiru;
 ibiddis danqaraa isaanii gubee fixeera.
- 14 Utuu hin marfamin bishaan waraabbadhu;
 humna hittisaa kee jajjabeeffadhu!
 Suphee tolfadhu;
 dhoqqee suphee dhiittadhu;
 xuubii tolfadhu.
- 15 Achitti ibiddi si fixa;
 goraadeenis si cicciree
 akkuma korophisaas si barbadeessa.
 Akka korophisaa hori;
 akkuma hawwaannisaa baay'adhu.
- 16 Ati hamma isaan urjii samii caalaa
 baay'atanitti daldaloota kee baay'ifatteerta;
 isaan garuu akkuma hawwaannisaa biyyatii qullaa hambisanii
 ergasii barrisanii deemu.
- 17 Eegdonni kee akkuma hawwaannisaa ti;
 qondaaltonni kees akkuma tuuta hawwaannisaa
 kan guyyaa qabbanaa dallaa irra qubatu ti;
 yeroo aduun baatu garuu barrisanii badu;
 namni tokko iyyuu gara isaan dhaqan hin beeku.
- 18 Yaa mootii Asoor tiksoonni kee ni mugu;
 namoonni kee ulfaatoon boqochuuf gad ciciisaniiru.
 Namoonni kee nama walitti isaan qabu dhabanii
 tulluuwwan irratti bibittinnaa'aniiru.
- 19 Wannii tokko iyyuu madaa kee fayyisuu hin danda'u;
 miidhamni kees kan du'aan si ga'uu dha.
 Namni oduu waa'ee keetii dhaga'u hundinuu
 kufaatii keetti harka walitti rurrukuta;
 gara jabina kee kan dhuma hin qabne sanaan
 eenyutu hin miidhamin?

Raajii Anbaaqoom

¹ Raajii Anbaaqoom raajichi arge.

Guungummii Anbaaqoom

² Yaa WAAQAYYO, ani hamma yoomiittin gargaarsaaf sitti iyyadha?

Ati garuu na hin dhaggeeffattu;
yookaan ani hamma yoomiitti, “Goolii!”
jedhee sitti boo’ee ati garuu na hin oolchitu?

³ Ati maaliif akka ani murtii dabe argu na goota?
Ati maaliif balleessaa namaa obsita?

Badiisnii fi gooliin fuula koo dura jiru;
lollii fi waldhabiinsi baay’ateera.

⁴ Kanaafuu seerri laamsha’eera;
murtiin qajeelaan dabsameera.

Akka murtiin qajeelaan jal’ifamuuf;
namoonni hamoon qajeelota marsu.

Deebii WAAQAYYOO

⁵ “Saboota hubadhaa ilaalaa;
akka malees dinqisiifadhaa.

Ani bara keessan keessa
waan isin yoo isinitti himame illee
hin amanne tokko nan hojjedha.

⁶ Ani warra Baabilon,
uummata gara jabeessaa fi ariifataa,
kan iddoo jireenya isaa hin ta’in qabachuuf
guutummaa lafaa keessa yaa’u sana nan kaasa.

⁷ Isaan saba sodaatamuu fi naasisuu dha;
isaan ofii isaaniitiifuu seera;
ulfina isaaniis ni guddifatu.

⁸ Fardeen isaanii qeerransa caalaa saffisu;
yeeyyii galgalaa caalaa sodaachisu.

Namoonni isaanii kanneen farda yaabbatan
ariitiidhaan gulufu;
abbootiin farda isaaniis fagoodhaa dhufu.

Isaan akkuma risaa waa nyaachuuf ariifatuu barrisu;
⁹ isaan hundinuu jeequmsaaf dhufu.

Tuunni isaanii akkuma bubbee gammoojjii gara fuula duraatti qajeela;
namoota hidhamanis akkuma cirrachaa walitti qaba.

¹⁰ Isaan mootota tuffatanii
bulchitootatti goosu.

Da’annoo hundatti ni kolfu;
biyyoos tuulanii isa qabatu.

¹¹ Ergasii namoonni yakka hojjetan kanneen humna isaanii
waaqa isaanii godhatan,
akka bubbee lafa haxaa’anii karaa isaanii itti fufu.”

Gungummii Anbaaqoom isa Lamaffaa

¹² Yaa WAAQAYYO, ati bara baraa jalqabdee jirta mitii?
Yaa Waaqa ko, yaa Qulqullicha ko, ati gonkumaa hin duutu.

Yaa WAAQAYYO, ati akka isaan murtii kennaniif
isaan muuddeerta;

yaa Kattaa ko, ati akka isaan nama adabaniif isaan ramaddeerta.

¹³ Iji kee akka waan hamaa hin ilaalleef akka malee qulqulluu dha;
ati daba argitee obsaan dhiisuu hin dandeessu.

Yoos ati maaliif obsaan namoota hamoo ilaalta?
Ati maaliif yeroo namoonni hamoon

- warra isaan caalaa qajeeloo ta'an liqimsanitti cal'istaa?
 14 Ati namoota akka qurxummii galaana keessaa,
 akka uumamawwan galaanaa kanneen bulchaa
 hin qabnee gooteerta.
 15 Diinni hokkoodhaan isaan hunda ol baasa;
 kiyyoo isaatiinis isaan harkisa;
 kiyyoo isaa keessatti walitti isaan qabata;
 kanaafuu inni ni gammada; ni ililchas.
 16 Inni sababii kiyyoo isaatiin bashannanee
 nyaata isaa filatamaatti gammaduuf
 kiyyoo isaatiif aarsaa dhi'eessa;
 kiyyoo isaatiif illee ixaana aarsa.
 17 Inni kiyyoo isaa keessaa garagalchuudhaan,
 gara laafina malee ittuma fufee saboota balleessuu qabaa?

2

- 1 Ani iddoo koo dhaabadhee
 dallaa eegumsaa irra nan tura;
 mee waan inni naan jedhu arguuf
 deebii ani guungummii kanaaf kennuu malu beekuuf nan ilaala.

Deebii WAAQAYYOO

- 2 Ergasii WAAQAYYO akkana jedhee deebii kenne:
 "Akka namni dubbisu tokko qabatee fiiguuf,
 mul'ata sana ifa godhii
 gabatee irratti barreessi.
 3 Mul'anni kun yeroo murtaa'ee tokko eeggataatii;
 inni waa'ee dhuma isaa dubbata malee hin sobu.
 Yoo tures isa eegi;
 inni dhugumaan ni dhufa; hin turus.
 4 "Kunoo inni of bokokseera;
 hawwiin isaas sirrii miti;
 namni qajeelaan garuu amantii isaatiin jiraata;
 5 dhugumaan inni daadhii wayiniitiin ni gowwoomfama;
 of tuula; boqonnaas hin qabu.
 Inni akkuma sii'ool sassata;
 akka du'aas kan hin quufnee dha.
 Inni saboota hunda walitti qabata;
 uummata hundas booji'ee fudhata.
 6 "Isaan hundi isa tuffatanii itti kolfaa,
 "Nama mi'a hatame tuullatee
 saamichaan of sooromsuuf wayyoo!
 Wannu kun hamma yoomiitti itti fufa'
 jedhanii itti hin qoosanii?
 7 Warri liqii sirraa qaban akkuma tasaa sitti hin ka'anii?
 Isaan ka'anii si hin hollachiisanii?
 Ergasii ati harka isaanii jala galta.
 8 Sababii ati saba hedduu saamteef
 namoonni hafan si saamu.
 Ati dhiiga namaa dhangalaafteertaatii;
 ati biyyoota, magaalawwanii fi
 namoota isaan keessa jiraatan hunda balleessiteerta.
 9 "Nama bu'aa hin malleen mana ijaarratu
 kan badiisa jalaa ba'uuf jedhee
 lafa ol ka'aa irratti iddoo jireenyaa tolfatuuf wayyoo!
 10 Ati lubbuu nama baay'ee galaafachuudhaaf,
 waan nama qaanessu mana keetti malattee
 lubbuu keetti badiisa fidde.

- 11 Dhagaawwan keenyan keessaa iyyu;
demdemoon mukaas jalaa qaba.
- 12 “Nama dhiiga dhangalaasuudhaan magaalaa ijaaruuf,
kan yakkaan magaalaa hundeessuuf wayyoo!
- 13 Akka dadhabbiin namaa akkuma qoraan ibiddaa ta’e,
akka saboonnis akkasumaan of dadhabsiisan
WAAQAYYON Waan Hunda Danda’u murteesseera mitii?
- 14 Akkuma bishaan galaana guutu sana
lafti ulfina WAAQAYYON beekuutiin guutamtiitii.
- 15 “Nama qullaa dhagna ollaa isaa ilaaluuf jedhee
hamma inni machaa’utti
qalqalloo keessaa daadhii wayinii isaaf buusuuf wayyoo.
- 16 Ati gooda ulfinaa qaaniidhaan guutamta.
Amma dabareen kan kee ti! Akka qullaan kee mul’atuuf dhugi.
Xofooon mirga WAAQAYYOO sitti garagala;
salphinnis ulfina kee haguuga.
- 17 Fincilli ati Libaanoonitti hojjete si liqimsa;
horii fixuun kee si rifachiisa.
Ati dhiiga namaa dhangalaafteertaatii;
ati biyyoota, magaalaaawwanii fi namoota isaan keessa jiraatan
hunda balleessiteerta.
- 18 “Waaqni tolfamaan ogeessa harkaatiin soofamu
yookaan fakkiin soba barsiisu faayidaa maalii qaba?
Namni isa tolchu tokko hojjiidhuma harka isaa amanataatii;
inni waaqota tolfamoo dubbachuu hin dandeenye tolcha.
- 19 Nama mukaan, ‘Dammaqi!’
yookaan dhagaa lubbuu hin qabneen, ‘Ka’i!’ jedhuuf wayyoo.
Inni barsiisuu ni danda’aa?
Kunoo inni warqee fi meetii dibameera;
hafuurri tokko iyyuu isa keessa hin jiru.”
- 20 WAAQAYYO garuu mana qulqullummaa isaa
qulqulluu sana keessa jira;
lafti hundi fuula isaa duratti haa cal’istu.

3

Kadhannaa Anbaaqoom

- 1 Kadhannaa Anbaaqoom raajichaa shigiyonootiidhaan.*
- 2 Yaa WAAQAYYO, ani oduu kee dhaga’eera;
yaa WAAQAYYO, ani gochawwan kee nan sodaadha.
Bara keenya keessa isaan haaromsi;
jabana keenya keessa isaan beekkamsiisi;
yeroo dheekamtutti araara yaadadhu.
- 3 Waaqni Teemaan irraa,
Inni Qulqullichi Tulluu Phaaraaniitii dhufe.
Ulfinni isaa samiiwwan haguuge;
galanni isaas lafa guute.
- 4 Miidhaginni isaa akkuma ba’iisa aduu ti;
gaanfawwan lama harka isaatii ba’u;
humni isaas achi dhokateera.
- 5 Fuula isaa dura dha’ichatu deeme;
golfaanis isa duukaa bu’e.
- 6 Inni dhaabatee lafa raase;
ilaalee akka saboonni hollatan godhe.
Tulluuwwan durii ni burkutaa’an;
gaarran bara hedduu jiraatanis ni diigaman.

* 3:1 3:1 Shigiyootiin gosa muuziiqaa ti.

Karaan isaa kan bara baraa ti.

⁷ Ani utuu dunkaanonni Itoophiyaa dhiphatanuu nan arge;
golgaawwan Midiyaaniis ni hollatu.

⁸ Yaa WAAQAYYO, ati lageenitti aartee turtee?

Burqaawwanittis dheekkamtee?

Ati yeroo fardeen keetiin guluftetti,
yeroo gaariwwan mo'annaa kee yaabbatetti
galaanatti dheekkamtee turtee?

⁹ Ati iddaa kee luqqifattee
xiyya itti dhaabbatte.

Lafas lageeniin gargar baqaqsite;
¹⁰ tulluuwwan si arganii hollattan.

Dha'aawwan bishaanii achiin darban;
tuujubni ni huurse;
dambalii isaas ol kaase.

¹¹ Sababii xiyya kee calaqqisaa figu sanaatii fi
sababii ifa eeboo keetii sanaatiif aduu fi
ji'i samii keessa dhaabatanii hafan.

¹² Ati dheekkamsaan lafa irra marmaarte;
aariidhaanis saboota lafatti dhidhiitte.

¹³ Ati saba kee furuuf,
dibamaa kee oolchuuf dhufte.

Hoogganaa biyya hamootaa ni daakte;
mataadhaa hamma miillaatti qullaa isa hambifte.

¹⁴ Yeroo loltoonni isaa nu bittinneessuuf ka'anii,
akkuma waan rakkattoota dhokatanii jiran
fixuu ga'aniitti gammadanitti,
ati eeboo ofii isaatiin mataa isaa waraante.

¹⁵ Ati fardeen keetiin bishaanota gurguddaa
hoomacheessaa galaana irra deemte.

¹⁶ Ani dhaga'een garaan koo raafame;
hidhiin koo sagalee sanaan hollate;
tortorri lafee koo seene;
miilli koos ni hollate.

Ta'us ani hamma guyyaan badiisaa
saboota nu weeraranitti dhufutti obsaan nan eeggadha.

¹⁷ Yoo mukni harbuu daraaruu baatee
iji wayinii muka wayinii irra jiraachuu baate iyyuu,

yoo mukni ejersaa ija naqachuu didee
lafti qotiisaa midhaan dhowwate iyyuu,

yoo hoolonni gola keessaa,
loonis dallaa keessaa dhabaman iyyuu,

¹⁸ ani garuu WAAQAYYOTTI nan gammada;
Waaqa isa na fayyisutti nan gammada.

¹⁹ WAAQAYYO Gooftaan jabina koo ti;
inni miilla koo akka miilla borofaa godha;
lafa ol ka'aa irras na deemsisa.

Dura bu'aa faarfannaatiif. Meeshaa koo kan ribuutiin kan faarfatame.

Raajii Sefaaniyaa

¹ Dubbiin WAAQAYYOO kan bara Yosiyaa ilma Aamoon mootii Yihuudaa ture keessa gara Sefaaniyaa ilma Kuushii, ilma Gedaaliyaas, ilma Amariyaa, ilma Hisqiyaa dhufe kanaa dha:

Akeekkachiisa Waa'ee Badiisa Dhufaa Jiruu

² “Ani fuula lafaa irraa

waan hunda haxaa'ee nan balleessa”

jedha WAAQAYYO.

³ “Ani namaa fi horii haxaa'ee nan balleessa;

simbirroota samiitii fi qurxummii galaanaa,

waaqota tolfamoo namoota hamoo

gufachiisan haxaa'ee nan balleessa.”

“Ani sanyii namaa lafa irraa nan balleessa”

jedha WAAQAYYO.

⁴ “Ani Yihuudaa fi warra Yersaalem keessa

jiraatan hundatti harka koo ol nan fudhadha.

Ani hambaa Ba'aal hundaa fi

maqaa luboota waaqota tolfamoo waaqeffatanii

iddoo kanaa nan balleessa;

⁵ warra raayyaa samii waaqeffachuuf

qinaaxxii manaa irratti sagadan,

warra sagadanii fi WAAQAYYON kakatan,

warra Moolekiinis kakatan,

⁶ warra WAAQAYYON duukaa bu'uu dhiisanii duubatti deebi'an,

warra WAAQAYYON hin barbaanne

yookaan gorsa isaa hin gaafanne nan balleessa.”

⁷ Guyyaan WAAQAYYOO waan dhi'aateef

fuula WAAQAYYOO Gooftaa duratti cal'isaa.

WAAQAYYO aarsaa tokko qopheesseera;

inni warra affeere qulqulleesseera.

⁸ “Guyyaa aarsaa WAAQAYYOOTTI

ani qondaaltota ilmaan mootichaatii fi

warra wayyaa ormaa uffatan hunda nan adaba.

⁹ Ani gaafas warra buusaa irra utaaan,

kanneen galma waaqota isaanii jeequmsaa fi

gowwoomsaadhaan guutan nan adaba.”

¹⁰ WAAQAYYO akkana jedha;

“Gaafas Karra Qurxummii irraa iyya,

Waltajjii Lammaffaa irraa wawwaannaa,

gaarran irraa immoo

sagalee diigama guddaatu dhaga'ama.

¹¹ Isin warri Makteesh keessa jiraattan wawwaadhaa;

daldaltoonni keessan hundi lafa irraa haxaa'amu;

warri meetii daldalan hundinuus ni barbadaa'u.

¹² Ani yeroo sana Yersaalemin ibsaadhaan nan sakatta'a;

warra qananiidhaan jiraatan,

kanneen akka daadhii wayinii siicoo irratti hafee ta'an,

kanneen, 'WAAQAYYO waan tolaas ta'u waan hamaa

homaa hin godhu' jedhanii yaadan nan adaba.

¹³ Qabeenyi isaanii ni saamama;

manni isaanii ni ona.

Isaan mana ijaarratu;

garuu keessa hin jiraatan;
isaan biqiltuu wayinii ni dhaabbatu;
garuu daadhii wayinii hin dhugan.”

¹⁴ Guyyaan WAAQAYYOO guddichi dhi'aateera;
dhi'aatees dafee dhufaara.
Dhaga'aa! Iyyi guyyaa WAAQAYYOO hadhaa'aa dha;
goonni achitti sagalee ol fudhatee iyya.

¹⁵ Guyyaan sun guyyaa dheekkamsaa,
guyyaa dhiphinaa fi gaddaa,
guyyaa rakkinnaa fi badiisaa,
guyyaa dukkanaa fi dimimmisaa,
guyyaa duumessaa fi dukkana hamaa ni ta'a;
¹⁶ magaalaa dallasaa jabbaa qabanii fi
gamooowwan ol dhedheeroo irratti
guyyaa itti malakata afuufanii fi iyya waraanaa ta'a.

¹⁷ “Sababii isaan WAAQAYYOOTTI cubbuu hojjetaniif,
ani akka isaan akkuma jaamotaatti deemaniif
uummatatti dhiphina nan fida.

Dhiigni isaanii akkuma awwaaraa,
mi'í garaa isaaniis akkuma kosii gatama.

¹⁸ Guyyaa dheekkamsa WAAQAYYOOTTI
meetiin isaanii yookaan warqeen isaanii
isaan oolchuu hin danda'u.”

Ibidda hinaaffaa isaatiin
addunyaan hundi ni barbadoofti;
warra lafa irra jiraatan hundatti
inni badiisa tasaa ni fidaatii.

2

Yihuudaa fi Yerusaalem Saboota waliin itti Murteeffame

Yihuudaan akka Qalbii Jijjiirratuuf Akeekkachiifame

¹ Yaa saba qaaniin hin qabne,
walitti qabamaa; walitti qabamaa;
² utuu yeroon murtaa'e sun ga'ee
guyyaan sun akkuma habaqiitti isin hin haxaa'in,
utuu aariin WAAQAYYOO boba'aan sun
isinitti hin dhufin,
utuu guyyaan dheekkamsa WAAQAYYOO
isinitti hin dhufin walitti qabamaa.
³ Isin garraamonna lafaa
kanneen waan inni ajaju hojjetan hundi
WAAQAYYON barbaaddadhaa.
Qajeelummaa barbaadaa; gad of qabiisa barbaadaa;
isin guyyaa dheekkamsa WAAQAYYOOTTI
ni golbomamtu ta'aatii.

Filisxeemitti

⁴ Gaazaan duwwaa hafti;
Ashqaloon immoo ni onti.
Sabni Ashdood guyyuma Saafaadhaan ari'amee ba'a;
Eqroon immoo ni buqqifamti.
⁵ Yaa Kereetota qarqara galaanaa jiraattan,
isiniif wayyoo;
yaa Kana'aan, biyya Filisxeemotaa,
dubbiin WAAQAYYOO akkana jedhee sitti dhufeera;
“Ani sin barbadeessa;
namni tokko iyyuu hin hafu.”
⁶ Biyyi qarqara galaanaa,
iddoon Kaliitonni jiraatan,

iddoo tiksoonni jiraatanii fi gola bushaayee ta'a.

⁷ Innis handhuuraa hambaa mana Yihuudaa ta'a;
isaan achitti lafa dheedaa argatu.

Isaan galgala galgala
mana Ashqaloon keessa ciciisu.

WAAQAYYO Waaqni isaanii isaan tiksa;
boojuu isaaniis ni deebisaaf.

Mo'aabii fi Amoon

⁸ "Ani arrabsoo Mo'aabii fi
Qoosaa Amoonotaa,

warra saba koo arrabsanii fi
biyya isaanii doorsisan sanaa dhaga'eera.

⁹ Kanaafuu akkuma ani dhugumaan jiraataa ta'e sana"
jedha WAAQAYYO Waan Hunda Danda'u,
Waaqni Israa'el;

"Mo'aab dhugumaan akkuma Sodoom,
Amoononnis akka Gomoraa,

iddoo aramaatii fi boolla soogiddaa,
lafa bara baraan one ni ta'u.

Hambaan uummata kootii isaan saamu;
warri saba koo keessaa badii jalaa ba'an biyya isaanii ni dhaalu."

¹⁰ Kun gatii isaan of tuulummaa isaaniitiif argatanii dha;
isaan saba WAAQAYYOO Waan Hunda Danda'uu arrabsanii
itti qoosaniiruutii.

¹¹ WAAQAYYO yeroo waaqota biyyattii hunda barbadeessutti,
akka malee isaan sodaachisa.

Saboonni qarqara galaana hundaa irra jiraatan,
namni biyya isaa keessa jiraatu hundinuus isa waaqeffata.

Itoophiyaa

¹² "Yaa warra Itoophiyaa
isinis goraadee kootiin ni gorra'amtu."

Asoor

¹³ Inni kaabatti harka ol fudhata;
Asoorinis ni barbadeessa;
Nanawwee guutumaan guutuutti ni onsa;
akkuma gammoojjiitti gogsee hambisa.

¹⁴ Bushaayee fi loon,
uumamawwan gosa hundaa achi ciciisu.

Urunguu fi dhaddeen
utubaa ishee irra boqotu.

Sagaleen isaanii foddaawwan keessaan dhaga'ama;
diigamni balbala isaanii dura jira;
demdemon birbirsaa hundinuu qullaa hafa.

¹⁵ Kun magaalaa of hin eegganne
kan garuu nagumaan jiraattuu dha.

Magaalaan kun,
"Anuma qofa malee kan biraa na bira hin jiru" ofiin jette.

Isheen akkam akkas ontee,
iddoo bineensi bosonaa jiraatu taate!

Namni ishee bira ba'ee darbu hundinuu ni qoosa;
harka isaas ni raasa.

3

Yerusaalem

¹ Magaalaa cunqursitootaa,
finciltuu fi xurooftuu sanaaf wayyoo!

² Isheen nama tokkoof iyyuu hin ajajantu;
sirreeffama tokko iyyuu hin fudhattu.

Isheen WAAQAYYON hin amanattu;

Waaqa isheettis hin dhi'aattu.

³ Qondaaltonni ishee leenca aaduu dha;
bulchitoonni ishee yeeyyii galgalaa
kanneen waan tokko illee ganamaaf
hin bulfannee dha.

⁴ Raajonni ishee of tuultota;
isaan namoota hin amanamnee dha.

Luboanni ishee iddoo qulqulluu
xureessanii seeras cabsu.

⁵ WAAQAYYO inni ishee keessa jiru qajeelaa dha;
inni dogoggora tokko illee hin hojjetu.

Inni ganama ganama murtii qajeelaa kenna;
guyyaa tokko iyyuu waan kana hojjechuu hin dadhabu;
jal'oonni garuu qaani tokko iyyuu hin beekan.

⁶ "Ani saboota nan balleessa;
da'annoowwan isaanii diigamaniiru.
Akka namni tokko iyyuu achiin hin dabarreef
ani daandiiwwan ishee onseera.

Magaalaawwan isaanii onanii
nama malee, duwwaa hafu.

⁷ Ani magaalaa sanaan,
'Ati dhugumaan na sodaatta;
sirreeffamas ni fudhatta!' nan jedhe.
Ergasii iddoon jireenya ishee hin badu
yookaan adabbiin koo hundinuu isheetti hin dhufu.

Isaan garuu waan hojjetan hunda keessatti
daba hojjechuutti ciman.

⁸ Kanaafuu guyyaa ani itti dhugaa ba'u eeggadhu"
jedha WAAQAYYO;

"Ani sabootaa fi
mootummoota walitti qabee
dheekkamsa kootii fi
aarii koo sodaachisaa sana hunda
isaanitti dhangalaasuuf murteesseera.

Addunyaan guutuun ibidda
hinaaffaa kootiin gubatee barbadoofti.

⁹ "Ergasii ani akka hundi isaanii
maqaa WAAQAYYOO waammataniif,
akka walii galuudhaan isa tajaajilaniifis
afaan namootaa nan qulqulleessa.

¹⁰ Warri anaaf sagadan,
intallan koo kanneen bittinnaa'an
lageen Itoophiyaa gamaa kennaa naaf fidu.

¹¹ Sababii ani warra of tuulummaa isaaniitti gammadan
magaalaa kana keessaa baasuuf,
gaafas yakka ati natti hojjette
sana hundaaf salphinni sitti hin dhufu.

Ati lammata gaara koo
qulqulluu irratti of hin tuultu.

¹² Ani garuu garraamotaa fi
gad of qabeeyyii
kanneen maqaa WAAQAYYOO amanatan
si keessatti nan hambisa.

¹³ Hambaan Israa'el
yakka tokko illee hin hojjetan.
Isaan soba hin dubbatan
yookaan gowwoomsaan afaan isaanii keessatti hin argamu.
Isaan nyaatanii boqotu;
kan isaan sodaachisus hin jiru."

- 14 Yaa Intala Xiyoona ati faarfadhu;
yaa Israa'el sagalee ol fudhadhuu iyyi!
Yaa Intala Yerusaaalem gammadiitii
garaa kee guutuudhaan ililchi!
- 15 WAAQAYYO adaba kee sirraa fuudheera;
inni diinota kee sirraa deebiseera.
WAAQAYYO Mootiin Israa'el, si wajjin jira;
ati lammata balaa tokko illee hin sodaattu.
- 16 Isaan gaafas
Yerusaalemiin akkana ni jedhu;
“Yaa Xiyoona hin sodaatin;
harki kees hin laafin.
- 17 WAAQAYYO Waaqni kee
inni si wajjin jiru jabaa dha.
Inni baay'ee sitti gammada;
inni jaalala isaatiin si boqochiisa;
faarfannaadhaanis sitti gammada.”
- 18 “Ani gadda ati ayyaanota murteeffamaniif gadditu
sirraa nan fuudha;
isaan boo'ichaa fi salphina sitti ta'u.
- 19 Ani yeroo sanatti
warra si cunqursan hunda nan adaba;
ani okkolaa nan baraara;
warra gatamanis walitti nan qaba.
Ani biyya isaan itti qaaneffaman hunda keessatti
maqaa fi ulfina isaaniifin kennaaf.
- 20 Ani yeroo sanatti walittin isin qaba;
yeroo sanatti ani biyya keessanitti isin nan galcha.
Ani yeroo utuma isin argitanuu
boojuu keessan deebisutti
saba lafaa hunda gidduutti
ulfinaa fi maqaa isiniifin kenna”
jedha WAAQAYYO.

Raajii Haagee

Waamicha Mana WAAQAYYOO Ijaaruuif Godhame

¹ Bara bulchiinsa Daariyoos Mootichaa keessaa waggaa lammaffaatti, guyyaa tokkoffaa ji'a ja'afaatti, dubbiin WAAQAYYOO karaa Haagee Raajichaatiin gara ilma She'altii'eel gara Zarubaabel bulchaa Yihuudaatii fi gara Iyyaasuu ilma Yehoozaadaaq lubicha ol aanaa akkana jedhee dhufe:

² WAAQAYYOO Waan Hunda Danda'u akkana jedha: "Sabni kun, 'Yeroon itti manni WAAQAYYOO ijaaramu amma illee hin geenye' jedha."

³ Ergasii dubbiiin WAAQAYYOO karaa Haagee Raajichaatiin akkana jedhee dhufe: ⁴ "Yeroon kun yeroo isin utuu manni kun diigamee jiruu manneen keessan kanneen miidhagfaman keessa jiraattaniidhaa?"

⁵ Ammas WAAQAYYOO Waan Hunda Danda'u akkana jedha: "Yaada keessan karaa keessan irra kaa'adhaa. ⁶ Isin sanyii baay'ee facaafattanii waan xinnoo haammattani-irtu. Isin ni nyaattu; garuu hin quuftan. Ni dhugdu; garuu dheebuu hin baatan. Wayyaa ni uffattu; garuu isinitti hin ho'u. Namni mindaa fudhatu akkuma nama mindaa isaa korojoo tarsa'aa keessa kaa'atu ti."

⁷ WAAQAYYOO Waan Hunda Danda'u akkana jedha: "Karaa keessan hubadhaa. ⁸ Tulluutti ol ba'aa; muka fidaa; manicha ijaaraa; anis isatti nan gammada; nan kabajamas" jedha WAAQAYYOO. ⁹ "Isin waan baay'ee abdattan; garuu ni xinnaate. Isin manatti galfattan ani immoo nan afuufe. Kun maaliif ta'ee?" jedha WAAQAYYOO Waan Hunda Danda'u. "Kun sababii utuu manni koo diigamee jiruu tokkoon tokkoon keessan gara mana keessaniitti fiigdaniif. ¹⁰ Kanaafuu sababii keessaniif samiiwwan fixeensa isaanii dhowwatan; laftis midhaan ishee dhowwatte. ¹¹ Anis lafa qotiisaa fi tulluwwaniitti, midhaanii fi daadhii wayinii haaraatti, zayitii fi waan lafti kennitu hundatti, namaa fi loonitti, hojii dadhabii harka keessaniittis hongee waameera."

¹² Zarubaabel ilmi She'altii'eel, Iyyaasuun ilmi Yehoozaadaaq lubichi ol aanaanii fi hambaawwan uummataa hundi sagalee WAAQAYYOO Waaga isaaniiitti fi ergaa Haagee raajichaatiif ajajaman; WAAQAYYOO Waagii isaanii isa ergeeraatii. Ummannis WAAQAYYON sodaate.

¹³ Ergasii Haageen ergamaan WAAQAYYOO sun akkana jedhee ergaa WAAQAYYOO kana sabatti hime: "Ani isin wajjinan jira" jedha WAAQAYYOO. ¹⁴ Akkasiin WAAQAYYOO hafuura Zarubaabel ilma She'altii'eel bulchaa Yihuudaa, hafuura Iyyaasuu ilma Yehoozaadaaq lubicha ol aanaatii fi hafuura hamba uummata hundaa kakaase. Isaanis dhufanii mana WAAQAYYOO Waan Hunda Danda'uu, mana Waaga isaanii ijaaruu jalqaban; ¹⁵ kunis bara Daariyoos mootichaa keessaa waggaa lammaffaatti, bultii digdamii afuraffaa ji'a ja'afaatti ta'e.

2

Ulfina Manicha Haaraa

¹ Ji'a torbaffaa keessaa, bultii digdamii tokkoffaatti dubbiin WAAQAYYOO akkana jedhee karaa Haagee raajichaatiin dhufe; ² "Zarubaabel ilma She'altii'eel bulchaa Yihuudaatti, Iyyaasuu ilma Yehoozaadaaq lubicha ol aanaatii fi hamba uummataatti dubbadhu. Akkanas jedhii isaan gaafadhu; ³ 'Isin keessaa namni mana kana ulfina isaa kan duraa sana argee amma iyyuu jiru eenyu? Inni amma maal isinitti fakkaata? Waanuma faayidaa hin qabne tokko isinitti hin fakkaatu? ⁴ Yaa Zarubaabel, egaa amma jabaadhu' jedha WAAQAYYOO. 'Yaa Iyyaasuu ilma Yehoozaadaaq lubicha ol aanaa atis jabaadhu. Isinis sabni biyya kanaa hundinuu jabaadhaatii hojjedhaa' jedha WAAQAYYOO. 'Ani isin wajjinan jiraatii' jedha WAAQAYYOO Waan Hunda Danda'u. ⁵ 'Yeroo isin biyya Gibxii baatan sanatti, kakuun ani isin wajjin galee kanaa dha. Hafuurri koo isin gidduu jira. Isin hin sodaatinaa.'

⁶ "WAAQAYYOO Waan Hunda Danda'u akkana jedha: 'Ani ammas yeroo gabaabaa keessatti deebi'ee samiiwwanii fi lafa, galaanaa fi lafa goggogaa nan raasa. ⁷ Ani saboota hunda nan raasa; qabeenyi sabootaa hundi ni dhufa; anis mana kana ulfinaan nan guuta' jedha WAAQAYYOO Waan Hunda Danda'u. ⁸ 'Meetiin kan koo ti; warqeenis kan koo ti' jedha WAAQAYYOO Waan Hunda Danda'u. ⁹ 'Ulfinni mana ammaa kun ulfina mana

duraa sanaa ni caala' jedha WAAQAYYO Waan Hunda Danda'u. 'Anis iddoo kanatti nagaa nan kenna' jedha WAAQAYYO Waan Hunda Danda'u."

Qulqullummaa fi Xuraa'ummaa

¹⁰ Waggaa lammaffaa bulchiinsa Daariyoos keessa, bultii digdamii afuraffaa ji'a saglaffaatti, dubbiin WAAQAYYOO akkana jedhee gara Haagee raajichaa dhufe; ¹¹ "WAAQAYYO Waan Hunda Danda'u akkana jedha; 'Waan seerri jedhu luboota gaafadhu; ¹² yoo namni tokko foon qulqulleeffamee Waaqaaf kenname fuudhee dachaa wayyaa isaa keessatti baatee wayyaan sun buddeena yookaan ittoo, daadhii wayinii, zayitii yookaan nyaata gosa biraa tuqe, nyaanni sun ni qulqulleeffamaa?" "

Luboonnis, "Wawuu" jedhanii deebisaniif.

¹³ Ergasii Haageen akkana jedhe; "Namni reeffa tuqee xuraa'e tokko yoo wantoota kanneen keessaa tokko tuqe wanni sun ni xuraa'aa?"

Luboonna sunis, "Eeyyee, wanni sun ni xuraa'a" jedhanii deebisaniif.

¹⁴ Haageen akkana jedhe; "Uummanni kunii fi sabni kun fuula koo duratti akkasuma' jedha WAAQAYYO. 'Wanni isaan hojjetan hundii fi wanni isaan achitti dhi'eessan hundi xuraa'aa dha.

¹⁵ "Egaa guyyaa kanaa jalqabaatii of eeggannaadhaan qalbeeffadhaa; mana qulqullummaa WAAQAYYOO keessatti haala utuu dhagaan tokko dhagaa kaan irra hin kaa'amin dura ture hubadhaa. ¹⁶ Namni kam iyyuu yeroo gara tuullaa safartuu digdamaa dhufetti safartuu kudhan qofa argate. Namni kam iyyuu yeroo daadhii wayinii safartuu shantama waraabbachuuf gara boolla itti wayinii cuunfanii dhaqetti safartuu digdama qofa argate. ¹⁷ Ani hojii harka keessanii hunda waagiidhaan, awwaaroo fi cabbiidhaan nan rukute; isin garuu gara kootti hin deebine' jedha WAAQAYYO. ¹⁸ Guyyaa kanaa jalqabaatii jechuunis guyyaa digdamii afuraffaa ji'a saglaffaa kanaa jalqabaatii hamma guyyaa hundeen mana qulqullummaa WAAQAYYOO buufameetti of eeggannaadhaan qalbeeffadhaa. ¹⁹ Amma iyyuu sanyiin gombisaa keessatti hafe tokko iyyuu jiraa? Hama ammaatti mukni wayiniitii fi mukni harbuu, roomaanii fi mukni ejersaa ija hin naqanne.

"'Ani guyyaa kanaa jalqabee isin nan eebbisa.'"

Zarubaabel Qubeelaa Chaappaa WAAQAYYOO

²⁰ Dubbiin WAAQAYYOO bultii digdamii afuraffaa ji'a sanaatti yeroo lammaffaa akkana jedhee gara Haagee dhufe; ²¹ "Akka ani samiiwwanii fi lafa raasuuf jiru Zarubaabel bulchaa Yihuudaatti himi. ²² Ani teessoo moototaa nan garagalcha; humna mootummoota biyya alaa nan barbadeessa. Ani gaariiwwanii fi ooftota isaanii nan garagalcha; fardeenii fi warra fardeen yaabbatan ni kufu; tokkoon tokkoon isaanii goraadee obboleessa isaaniitiin ni kufu.

²³ "'Guyyaa sana' jedha WAAQAYYO Waan Hunda Danda'u; 'Yaa tajaajilaa koo Zarubaabel ilma She'altii'eel, ani sin fudhadha' jedha WAAQAYYO; 'Ani waanan si filadheef akka qubeelaa chaappaa koo sin godhadha' jedha WAAQAYYO Waan Hunda Danda'u."

Raajii Zakkaariyaas

Gara WAAQAYYOOTTI Deebi'uu

¹ Bara Daariyoos keessa, ji'a saddeettaffaa waggaa lammaffaatti dubbiin WAAQAYYOO akkana jedhee gara Zakkaariyaas raajicha ilma Berekiyaa, ilma Iddoo dhufe:

² "WAAQAYYOO akka malee abbootii keessanitti aaree ture. ³ Kanaafuu akkana jedhii sabatti himi; WAAQAYYOO Waan Hunda Danda'u akkana jedha; 'Gara kootti deebi'aa' jedha WAAQAYYOO Waan Hunda Danda'u; 'Anis gara keessanitti nan deebi'aa' jedha WAAQAYYOO Waan Hunda Danda'u. ⁴ Isin akka abbootii keessan kanneen raajonni durii, WAAQAYYOO Waan Hunda Danda'u, 'Karaa keessan hamaa fi gochawwan keessan hamaa sana irraa deebi'aa' jedha, jedhanii itti lallaban sanaa hin ta'inaa. Isaan garuu hin dhaggeeffatan yookaan na hin qalbeeffatan, jedha WAAQAYYOO. ⁵ Abbootiin keessan amma eessa jiru? Raajonnis bara baraan jiraatuu? ⁶ Garuu dubbiin koo fi seerri koo kan ani tajaajiltoota koo raajota ajaje sun abbootii keessan irra hin geenyee?"

"Ergasii isaan qalbii jijjiirratanii, 'WAAQAYYOO Waan Hunda Danda'u akkuma gochuuf murteesse sanatti waan karaa keenyaa fi gochawwan keenyaaf malu nutti godhe' jedhan."

Namicha Mukkeen Kusaayee Gidduu Dhaabate

⁷ Bara Daariyoos keessa, waggaa lammaffaatti, bultii afuraffaa ji'a kudha tokkoffaa, ji'a Shebaaxi jedhamu keessa dubbiin WAAQAYYOO gara Zakkaariyaas raajichaa ilma Berekiyaa, ilma Iddoo dhufe.

⁸ Ani halkan keessa mul'ataan namicha farda diimaa yaabbatu tokko fuula koo duratti nan arge! Innis mukkeen kusaayee kanneen laga keessaa gidduu dhaabatee ture. Dugda isaa duubaan fardeen diddiimoo, mammagaallanii fi adaadiitu ture.

⁹ Anis, "Yaa gooftaa ko, wantoonni kanneen maali!" jedheen gaafadhe.

Ergamaan Waaqayyoo kan natti dubbachaa tures, "Isaan maal akka ta'an ani sin argisiisa" naan jedhe.

¹⁰ Kana irratti namichi mukkeen kusaayee gidduu dhaabatee jiru sun, "Kunneen warra akka isaan guutamaa lafaa keessa deemaniif WAAQAYYOO ergee dha" jedhee naa ibse.

¹¹ Isaanis, "Nu lafa guutuu irra naannofnee akka lafti guutuun boqonnaa fi nagaa qabdu argine" jedhanii ergamaa WAAQAYYOO kan mukkeen kusaayee gidduu dhaabate sanatti himan.

¹² Ergamaan WAAQAYYOOOS, "Yaa WAAQAYYOO Waan Hunda Dandeessu, ati Yersaalemii fi magaalawwan Yihuudaa kanneen waggoota torbaatama itti aarteef hamma yoomiitti hin araaramtu?" jedhe. ¹³ WAAQAYYOS dubbii gaarii fi dubbii jajjabeessuun ergamaa Waaqayyoo kan na wajjin dubbachaa ture sanatti dubbate.

¹⁴ Ergasii ergamaan Waaqayyoo kan natti dubbachaa ture sun akkana jedhe; "Dubbii kana labsi: WAAQAYYOO Waan Hunda Danda'u akkana jedha; 'Ani Yersaalemii fi Xiyooniif akka malee nan hinaafa; ¹⁵ ani garuu saboota waan nagaa qaban of se'anitti akka malee aareera. Ani xinnuma aareen ture; isaan garuu ittuma fufanii hamaa hojjetan."

¹⁶ "Kanaafuu WAAQAYYOO akkana jedha: 'Ani araaraan Yersaalemitti nan deebi'a; manni koos deebifamee ni ijaarama. Funiyon ittiin safaranis Yersaalem irra ni diriirfama' jedha WAAQAYYOO Waan Hunda Danda'u.

¹⁷ "Ammas ittuma fufiitii WAAQAYYOO Waan Hunda Danda'u akkana jedha, jedhii labsi: 'Magaalawwan koo deebi'anii badhaadhummaadhaan ni guutamu; WAAQAYYOS Xiyoonin ni jajjabeessa; Yersaalemis ni filata.'"

Gaanfa Afurii fi Ogeeyyii Harkaa Afur

¹⁸ Ammas ol nan mil'adhe; kunoo, fuula koo dura gaanfa afurtu ture! ¹⁹ Anis, "Kun maali?" jedheen ergamaa Waaqayyoo kan natti dubbachaa ture sana gaafadhe.

Innis, "Kunneen gaanfawwan Yihuudaa, Israa'elii fi Yersaalemin gargar bittinneessanii dha" jedhee naaf deebise.

²⁰ WAAQAYYOS ergasii ogeeyyii hojii harkaa afur na argisiise. ²¹ Anis, "Isaan kunneen maal hojjechuuf dhufan?" jedheen gaafadhe.

Innis akkana jedhee deebise; "Isaan kunneen gaanfawwan akka namni tokko mataa isaa ol hin qabanneef Yihuudaa bittinneessanii dha; ogeeyyiin hojii harkaa

kunneen garuu isaan rifachiisuuf fi gaanfawwan saboota uummata ishee bittinneessuuf gaanfawwan isaanii biyya Yihuudaatti ol fudhatan kanneenii balleessuuf dhufan.”

2

Namicha Funyoo Safaraa Qabu

¹ Ani ol nan mil’adhe; kunoo, namichi funyoo safaraa harkatti qabate tokko fuula koo dura ture! ² Anis, “Ati garam deemuutti jirta?” jedheen gaafadhe.

Innis, “Ani Yerusaalemin safaree bal’inaa fi dheerina ishee beekuufan deema” jedhee naaf deebise.

³ Ergasii ergamaan Waaqayyoo kan natti dubbachaa ture sun ka’ee deeme; ergamaan Waaqayyoo kan biraa isa arguu dhufee ⁴ akkana jedheen: “Dhaqitiiti dargaggeessa sanatti akkana jedhii himi; ‘Yerusaalem sababii baay’ina namaa fi horii ishee keessa jiraataniitiif magaalaa dallaa hin qabne taati. ⁵ Ani mataan koo naannoo isheetti dallaa ibiddaa nan ta’a; ishee keessattis ulfina nan ta’a’ jedha WAAQAYYOO.

⁶ “Kottaa! Kottaa! Biyya kaabaa sana keessaa baqadhaa” jedha WAAQAYYOO; “Ani buubbee samii afranitti isin bittinneesseeraatii” jedha WAAQAYYOO.

⁷ “Yaa Xiyoon kottu! Ati kan intala Baabilon keessa jiraattu baqadhu!” ⁸ WAAQAYYOO Waan Hunda Danda’u akkana jedhaatii: “Namni si tuqu kam iyyuu argituu ija isaa waan tuquuf, erga Inni Ulfina Qabeessi saboota si saaman sanatti na ergee booddee, ⁹ akka garboonni isaanii isaan saamaniif ani dhugumaan harka koo isaanitti ol nan kaafadha. Ergasii isin akka WAAQAYYOO Waan Hunda Danda’u na erge ni beektu.

¹⁰ “Yaa Intala Xiyoon gammadii ililchi. Ani dhufee gidduu kee nan jiraadhaatii” jedha WAAQAYYOO. ¹¹ “Bara sana saboonni hedduun gara WAAQAYYOOTTI deebi’anii saba koo ta’u. Ani immoo gidduu kee nan jiraadha; ati akka WAAQAYYOO Waan Hunda Danda’u sitti na erge ni beekta. ¹² WAAQAYYOO akkuma qooda isaa kan biyya qulqulluu keessaatti Yihuudaa ni dhaala; Yerusaalemin deebi’ee ni filata. ¹³ Sababii inni iddoo jireenya isaa qulqulluu sanaa ol ka’eef, sanyiin namaa hundi fuula WAAQAYYOO duratti cal’isaa.”

3

Uffata Qulqulluu Luba Ol Aanaa

¹ Innis utuu Iyyaasuun lubichi ol aanaan fuula ergamaa WAAQAYYOO dura dhaabatee, Seexanni immoo isa himachuuf karaa harka mirga isaa dhaabatuu na argisiise.

² WAAQAYYOS Seexanaan akkana jedhe; “Seexana nana, WAAQAYYOO si haa ifatu! WAAQAYYOO inni Yerusaalemin filate si haa ifatu! Namichi kun mukukkula ibidda boba’u keessaa butame mitii?”

³ Iyyaasuun yeroo ergamaa Waaqayyoo sana dura dhaabatetti uffata xuraa’aa uffatee ture. ⁴ Ergamaan Waaqayyoo sunis warra isa dura dhaabachaa turan sanaan, “Uffata isaa xuraa’aa isa irraa baasaa” jedhe.

Innis ergasii Iyyaasuudhaan, “Kunoo ani cubbuu kee sirraa fuudhee uffata miidhagaa sittin uffisa” jedhe.

⁵ Anis, “Mataa isaa irra marata qulqulluu kaa’aafii” nan jedhe. Kanaafuu isaan utuma ergamaan WAAQAYYOO sun achi dhaabatee jiruu, marata qulqulluu mataa isaa irra kaa’anii uffata itti uffisan.

⁶ Ergamaan WAAQAYYOO sunis ajaja kana Iyyaasuuf kenne: ⁷ “WAAQAYYOO Waan Hunda Danda’u akkana jedha; ‘Ati yoo karaa koo irra deemtee ajaja koo eegde, mana koo ni bulchita; itti gaafatamaa oobdii koo ni taata; anis warra as dhadhaabatan kana gidduutti iddoo siif nan kenna.

⁸ “Yaa Iyyaasuun lubicha ol aanaa, atii fi gareen kee warri fuula kee dura tataa’an, namoonni waan dhufuuf jiruuf mallattoo ta’an waan kana dhaggeeffadhaa. Ani tajaajilaa koo Damee sana nan fida. ⁹ Dhagaa ani fuula Iyyaasuun dura kaa’e ilaalaa! Dhagaa tokkicha sana irra ija torbatu jira; anis barreeffama isa irratti nan qiriixaa” jedha WAAQAYYOO Waan Hunda Danda’u; ‘cubbuu biyya kanaas guyyuma tokkotti nan balleessa.

¹⁰ “Bara sana tokkoon tokkoon namaa muka wayiniitii fi muka harbuu isaa jala taa’uuf ollaa isaa ni waammata’ jedha WAAQAYYOO Waan Hunda Danda’u.”

4

Baattuu Ibsaatii fi Mukkeen Ejersaa

¹ Ergasii ergamaan Waaqayyoo kan natti dubbachaa ture sun deebi’ee akkuma nama hirribaa dammaqfamuutti na dammaqse. ² Innis, “Ati maal argita?” jedhee na gaafate.

Anis akkana jedheen deebise; “Ani baattuu ibsaa kan guutumaa guututti warqee ta’e cuggeen tokko isa irra dhaabamee, ibsaawwan torba of irraa qabu kan ibsaawwan sanaaf ujummoowwan torba qabu tokko nan arga. ³ Akkasumas mukkeen ejersaa lama, tokko karaa mirga cuggeetiin, kaan immoo karaa bitaa cuggeetiin jira.”

⁴ Anis, “Yaa gooftaa wanni kun maali?” jedheen ergamaa Waaqayyoo kan natti dubbachaa ture sana gaafadhe.

⁵ Inni immoo, “Ati isaan maal akka ta’an hin beektuu?” jedhee naaf deebise.

Anis, “Yaa gooftaa ko, ani hin beeku” jedheen deebise.

⁶ Kanaafuu inni akkana naan jedhe; “Kun dubbii WAAQAYYOO kan Zarubaabeliif kennamee dha: ‘Hafuura kootiin malee jabinaan yookaan humnaan miti’ jedha WAAQAYYOO Waan Hunda Danda’u.

⁷ “Yaa tulluu guddaa ati maali? Ati fuula Zarubaabel duratti lafa diriiraa taata. Innis, ‘Surraan, surraan isaaf haa ta’u!’ jedhanii iyyaa inni dhagaa xumuraa baasa.”

⁸ Ergasii dubbii WAAQAYYOO akkana jedhee gara koo dhufe: ⁹ “Harki Zarubaabel hundee mana qullummaa kanaa buuseera; harkuma isaatu ijaaree fixa. Ergasii isin akka WAAQAYYOO Waan Hunda Danda’u isinitti na erge ni beektu.

¹⁰ “Eenyutu guyyicha waan xinnoo tuffata? Namoonni gaafa harka Zarubaabel keessatti tunbii arganitti ni ililchu. Wantoonni torban kunneen ijawwan WAAQAYYOO kanneen lafa hunda irra nanaanna’anii ilaalanii dha.”

¹¹ Anis, “Mukkeen ejersaa lamaan karaa mirgaa fi bitaa baattuu ibsaa jiran kunneen maali?” jedheen ergamaa Waaqayyoo sana gaafadhe.

¹² Ammas ani, “Dameen muka ejersaa lamaan ujummoo warqee lamaan biraa kanneen zayitii warqee gad dhangalaasan kunneen maali!” jedheen isa gaafadhe.

¹³ Innis, “Isaan maal akka ta’an ati hin beektuu?” naan jedhe.

Anis, “Yaa gooftaa ko, ani hin beeku” nan jedheen.

¹⁴ Kanaafuu inni, “Isaan kunneen warra lamaan akka Gooftaa lafa hundaa tajaajilaniif dibamani dha” jedhe.

5

Kitaaba Maramaa Barrisu Tokko

¹ Ani ammas ol mil’adhe; kunoo kitaabni maramaan barrisu tokko fuula koo dura ture!

² Ergamaan Waaqayyoo sunis, “Ati maal argita?” jedhee na gaafate.

Anis, “Kunoo ani kitaaba maramaa dhundhuma digdama dheeratee dhundhuma kudhan bal’atu tokko nan arga” jedheen deebise.

³ Kana irratti inni akkana naan jedhe; “Kun abaarsa lafa hundumatti dhufaa jiruu dha; akka kitaabicha irratti barreeffametti, hattuun hundinuu ni barbadoofti; akkuma barreeffamni gama kaan irraa jedhutti namni sobaan kakatu hundinuu ni barbadeeffama. ⁴ WAAQAYYOO Waan Hunda Danda’u akkana jedha; ‘Ani abaarsa kana gad nan erga; innis mana hattuutii fi mana nama sobaan maqaa kootiin kakatuu ni seena. Abaarsi kun mana isaa keessatti hafee, mana isaa, muka isaatii fi dhagaa isaa ni barbadeessa.’”

Dubartii Quunnaa Keessa Jirtu Tokko

⁵ Ergamaan Waaqayyoo kan natti dubbachaa ture sun dhufee, “Mee ol jedhii waan dhufaa jiru sana ilaali” naan jedhe.

⁶ Anis, “Inni maali?” jedheen gaafadhe.

Innis, “Kun quunnaa ittiin waa safaranii dha” jedhee deebise. Ammas itti dabalee, “Kun hammina saba guutummaa lafaa irra jiraatuu ti” jedhe.

⁷ Ergasii qadaadni dilaalii irraa hojjetame irraa ol fuudhame; kunoo dubartiin tokko quunnaa sana keessa teessee turte! ⁸ Innis, “Kun hammina” jedhe; ergasii quunnaa keessatti gad ishee dhiibee qadaada dilaalii irraa hojjetame sana afaan quunnaatti deebise.

⁹ Ergasii ani ol nan mil’adhe; kunoo dubartoonni qoochoo isaanii jalaa bubbee qaban lama fuula koo dura turan! Isaanis qoochoo akka qoochoo huummoo qabu ture; quunnaa sanas samii fi lafa gidduutti ol fuudhan.

¹⁰ Anis, “Isaan quunnaa sana eessatti geessu?” jedheen ergamaa Waaqayyoo kan natti dubbachaa ture sana gaafadhe.

¹¹ Innis, “Mana ijaaruuf jedhanii gara biyya Baabilonitti geessu. Yeroo manni sun ijaaramee qopheeffamutti quunnaa sana fuudhanii iddoos isaa kaa’u.”

6

Gaarii Afur

¹ Ani ammas ol nan mil'adhee; kunoo gaariwwan afur kanneen gaarran lama jechuunis tulluwwan naasii gidduu gad ba'an nan arge! ² Gaariin jalqabaa fardeen didiimoo, lammaffaan gugurraa, ³ sadaffaan adaadii, afuraffaan immoo farda daamaa qaba ture; isaan hundinuu jajjaboo turan. ⁴ Anis, "Yaa gooftaa ko, isaan kunneen maali?" jedheen ergamaa Waaqayyoo natti dubbachaa ture sana gaafadhe.

⁵ Ergamaan Waaqayyoo sunis akkana jedhee naaf deebise; "Isaan kunneen hafuurota samii afran fuula Gooftaa lafa hundaa dura iddoo dhaabachaa turanii gad ba'anii dha. ⁶ Kan fardeen gugurraa qabu gara biyya kaabaa deema; kan fardeen adaadii qabu gara biyya lixa biiftuu deema; kan fardeen daamaa qabu immoo gara biyya kibbaa deema."

⁷ Fardeen jajjaboon sun yeroo gad ba'anitti guutummaa lafaa irra asii fi achi deemuu barbaadanii turan. Innis "Guutummaa lafaa irra deema!" jedheen. Kanaafuu isaan guutummaa lafaa irra deeman.

⁸ Ergasii inni na waamee, "Ilaali, warri gara biyya kaabaa deeman sun biyya kaabaatti Hafuura koo boqochiisaniiru" nan jaan jedhe.

Gonfoo Iyyaasuuf Kenname

⁹ Ergasii dubbiin WAAQAYYOO akkana jedhee gara koo dhufe; ¹⁰ "Booji'amtoota Baabilon irraa dhufan jechuunis Heldaayi, Xoobbiyaa fi Yedaa'iyaa irraa meetii fi warqee fuudhi. Gaafasuma gara mana Yosiyaa ilma Sefaaniyaa dhaqi. ¹¹ Meetii fi warqee sana fuudhiitii gonfoo tolchi; gonfoo sanas mataa Iyyaasuu lubicha ol aanaa ilma Yehoozaadaaq irra kaa'i. ¹² WAAQAYYOO Waan Hunda Danda'u akkana jedha, jedhii itti himi: 'Kunoo namichi maqaan isaa Damee jedhamu tokko as jira; innis damee baasee iddoo isaatii dagaagee dhagee mana qulqullummaa WAAQAYYOO ijaara. ¹³ Namni mana qulqullummaa WAAQAYYOO ijaaru isa; inni ulfina uffatee teessoo isaa irra taa'ee ni bulcha. Inni teessoo isaa irratti luba ta'a. Waliigalteen nagaas isaan lamaan gidduu ni jiraata.' ¹⁴ Gonfoon sunis yaadannoo Heelem, Xoobbiyaa, Yedaa'iyaa fi Heeni ilma Sefaaniyaa tiif mana qulqullummaa WAAQAYYOO keessa ni kaa'ama. ¹⁵ Warri fagoo jiraatan dhufanii ijaarsa mana qulqullummaa WAAQAYYOO ni gargaaru; isinis akka WAAQAYYOO Waan Hunda Danda'u isinitti na erge ni beektu. Yoo isin akka gaarii WAAQAYYOO Waaqa keessaniif ajajamtan wanni kun ni ta'a."

7

Murtii Qajeelaa fi Araara

¹ Bara Daariyoos Mootichaa keessa waggaa afuraffaatti, bultii afuraffaa ji'a saglaaffaa, ji'a Kaaseluu jedhamu keessa dubbiin WAAQAYYOO gara Zakkaariyaas dhufe. ² Namoonni Beet'eel akka isaan WAAQAYYON kadhatanii Sharezerii fi Reege-Meleekin namoota isaanii wajjin ergan; ³ kunis akka isaan, "Ani akkuman waggoota hedduu godhe sana ammas ji'a shanaffaa keessa gadde soomuu qabaa?" jedhanii luboota mana qulqullummaa WAAQAYYOO Waan Hunda Danda'uutii fi raajota gaafataniif.

⁴ Dubbiin WAAQAYYOO Waan Hunda Danda'uu akkana jedhee gara koo dhufe; ⁵ "Uummata biyya kanaatii fi luboota hunda akkana jedhii gaafadhu; 'Isin waggoota torbaatan darban yeroo ji'a shanaffaa fi torbaffaa keessa soomtanii gadditanitti dhugumaan anaaf soomtanii? ⁶ Yeroo nyaattanii fi dhugdaniitis ofuma keessaniif nyaattanii dhugdan mitii? ⁷ Dubbiin kun isa WAAQAYYOO gaafa Yerusaaleemii fi magaalawwan naannoo ishee nagaa fi badhaadhummaadhaan jiraatanitti, yeroo Negeebii fi gaarran lixa bira namoonni jiraachaa turanitti karaa raajota isaa kanneen duriitiin dubbate mitii?'"

⁸ Dubbiin WAAQAYYOO ammas akkana jedhee gara Zakkaariyaas dhufe: ⁹ "WAAQAYYOO Waan Hunda Danda'u akkana jedha: 'Murtii qajeelaadhaan bulchaa; waliif araaramaa; garaas waliigal lafaa. ¹⁰ Isin haadha hiyyeessaa yookaan ijoollee abbaa hin qabne yookaan alagaa yookaan hiyyeeyyii hin hacuucinaa. Garaa keessanitti hammina walitti hin yaadinaa.'

¹¹ "Isaan garuu dhaga'uu didan; mataa jabinaanis dugda isaanii itti gatani gurma isaanii cuqqaallatan. ¹² Isaan garaa isaanii akkuma dhagaa jabeeffatanii seera yookaan dubbii WAAQAYYOO Waan Hunda Danda'u karaa raajota isaa kanneen duriitiin Hafuura isaatiin erge dhaggeeffachuu didan. Kanaafuu WAAQAYYOO Waan Hunda Danda'u akka malee aare.

¹³ " 'Yeroo ani waametti, isaan na hin dhaggeeffanne; kanaafuu yoo isaan na waammatan ani isaan hin dhaggeeffadhu' jedha WAAQAYYOO Waan Hunda Danda'u.

14 'Ani bubbeedhaan saba isaan hin beekne hunda gidduutti isaan nan bittinneesse. Biyyi isaanii hamma namni itti galuu fi keessaan darbu tokko iyyuu dhabamutti isaan booddee ni onte. Isaan akkasiin biyya namatti toltu sana onsan.'"

8

WAAQAYYO Yersaalemin Ebbisuuf Waadaa Gale

1 Dubbiin WAAQAYYO Waan Hunda Danda'uu ammas gara koo dhufe.
2 WAAQAYYO Waan Hunda Danda'u akkana jedha: "Ani Xiyooniif hinaaffaa guddaa qaba; hinaaffaa isheetiin guggubachaan jira."

3 WAAQAYYO akkana jedha: "Ani Xiyoonitti deebi'ee Yersaaleem keessa nan jiraadha. Yersaaleemis Magaalaa Dhugaa jedhamti; tulluun WAAQAYYO Waan Hunda Danda'uus Tulluu Qulqulluu jedhamee ni waamama."

4 WAAQAYYO Waan Hunda Danda'u akkana jedha: "Ammas yeroo tokko jaarsolii fi jaartoliin daandii Yersaaleem irra ni tataa'u; tokkoon tokkoon isaanii sababii dulluma isaaniiitii ulee harkatti qabatu. 5 Daandiin magaalattii ijoollee dhiiraa fi durbaa kanneen achi taphataniin ni guutama."

6 WAAQAYYO Waan Hunda Danda'u akkana jedha: "Yeroo sanatti wanni kun hambaa saba kanaatiif dinqii ta'u danda'a; anaaf garuu kun dinqii ta'uu danda'aa?" jedha WAAQAYYO Waan Hunda Danda'u.

7 WAAQAYYO Waan Hunda Danda'u akkana jedha: "Ani biyyoota ba'a biiftuutii fi lixa biiftuu keessaa saba koo nan baasa. 8 Ani akka isaan Yersaaleem keessa jiraataniif isaan nan deebisa; isaan saba koo ni ta'u; anis dhugaa fi qajeelummaadhaan Waaqa isaanii nan ta'a."

9 WAAQAYYO Waan Hunda Danda'u akkana jedha: "Isin warri amma dubbii raajonni yeroo hundeen mana WAAQAYYO Waan Hunda Danda'uu buufametti achi turan dubbatan kana dhageessan, akka manni qulqullummaa ijaaramuuf irreen keessan haa jabaatu. 10 Yeroo sanaan dura mindaan tokko iyyuu namaaf yookaan horiif hin baafamu turre. Namni tokko iyyuu sababii diina isaatiif nagaadhaan hojii isaatiif ba'ee hin galu ture; ani nama hunda walitti kaaseen tureetii. 11 Garuu ani amma akkan duraan hojjedhe sana hambaa saba kanaatti hin hojjedhu" jedha WAAQAYYO Waan Hunda Danda'u.

12 "Sanyiin akka gaarii biqila; mukni wayiniis ija naqata; lafti midhaan kenniti; samiiwwanis fixeensa isaanii coccobsu. Ani waan kana hunda dhaala godhee hambaa saba kanaatiif nan kenna. 13 Yaa Yihuudaa fi Israa'el akkuma isin saboota gidduutti waan abaarsaa turan sana, ani isin baasee akka isin eebba taatan nan godha. Harki keessan haa jabaatuu malee hin sodaatinaa."

14 WAAQAYYO Waan Hunda Danda'u akkana jedha: "Ani akkuma gaafa abbootiin keessan na aarsanitti balaa isinitti fiduu yaadee isinii na'uu dide sana" jedha WAAQAYYO Waan Hunda Danda'u; 15 "Kanaafuu ani amma Yersaaleemii fi Yihuudaaf waan gaarii hojjechuu murteesseera. Isin hin sodaatinaa. 16 Wanni isin gochuu qabdan kana: Dhugaa walitti dubbadhaa; karra keessan duratti murtii dhugaa fi nagaa kenna; 17 ollaa keessanitti waan hamaa hin malinaa; sobaan kakachuu illee hin jaalatinaa. Ani waan kana hunda nan jibbaa" jedha WAAQAYYO.

18 Ammas dubbiin WAAQAYYO Waan Hunda Danda'uu gara koo dhufe.

19 WAAQAYYO Waan Hunda Danda'u akkana jedha: "Soomni ji'a afuraffaa, shanaffaa, torbaffaa fi kurnaffaa Yihuudaaf yeroo gammachuu fi liilchuu, akkasumas yeroo ayyaana gammachuu ta'a. Kanaafuu dhugaa fi nagaa jaalladhaa."

20 WAAQAYYO Waan Hunda Danda'u akkana jedha: "Uummanni hedduunii fi jiraattonni magaalaa hedduun ammas ni dhufu; 21 jiraattonni magaalaa tokkoo gara magaalaa biraa dhaqanii, 'Kottaa mee WAAQAYYO kadhachuu fi WAAQAYYO Waan Hunda Danda'u barbaadachuuf dafnee haa deemnu. Ani mataan koo iyyuu nan deema' jedhu. 22 Uummanni baay'eenii fi saboonni humna qabeeyyiin WAAQAYYO Waan Hunda Danda'u barbaadachuu fi isa kadhachuuf gara Yersaaleem ni dhufu."

23 WAAQAYYO Waan Hunda Danda'u akkana jedha: "Bara sana keessa afaanii fi saba hunda keessaa namoonni kudhan dhufanii handaara wandaboo namicha Yihuudii tokkoo qabatani, 'Nu akka Waaqni isin wajjin jiru waan dhageenyeeff, si wajjin haa deemnu' jedhuun."

9

Murtii Diinota Israa'elitti Murame

1 Raajiin dubbii WAAQAYYOO biyya Hadraakitti ni dhufa;

- Damaasqoo irras ni bu'a;
 iji nimoota hundaa fi gosoota Israa'el hundaa gara
 WAAQAYYO ni ilaalaatii;
² akkasumas gara Hamaati ishee daangaa irraa,
 isaan ogeeyyii ta'an iyyuu gara Xiirrosii fi Siidonaas ni ilaala.
³ Xiirros da'annoo jabaa ijaarratteerti;
 meetii akka awwaraatti,
 warqees akkuma kosii daandii irraatti tuullateerti.
⁴ Gooftaan garuu qabeenya ishee irraa fuudhee humna ishee
 galaana irratti barbadeessa;
 isheen is ibiddaan dhumti.
⁵ Ashqaloon waan kana argitee ni sodaatti;
 Gaazaan immoo dhukkubsattee aaddi;
 Eqroonis akkasuma taati; abdiin ishee coollageeraatii.
 Gaazaan mootii ishee ni dhabdi;
 Eqroonis ontee hafti.
⁶ Namoonni ormaa Ashdoodin ni qabatu;
 anis of tuulummaa Filisxeemotaa nan balleessa.
⁷ Ani dhiiga afaan isaanii keessa jiru,
 nyaata dhowwames ilkaan isaanii gidduudhaa nan baasa.
 Warri hafanis kan Waaqa keenyaa ta'anii
 Yihuudaa keessattis bulchitoota ta'u;
 Eqroon immoo akka warra Yebuusotaa ni taati.
⁸ Ani garuu loltuu cabsitee seentu
 mana koo irraa nan dhowwa.
 Lammata hacuuccuun saba koo irra hin burraaqxu;
 ani amma dammaqee nan eegaatii.

Dhufaatii Mooticha Xiyoon

- ⁹ Yaa Intala Xiyoon ati guddisii gammadi!
 Yaa Intala Yerusaalem iyyi!
 Kunoo mootiin kee qajeelaan,
 fayyina qabatee,
 gad of qabee harree yaabbatee,
 ilmoo harree jechuunis harree xinnoo yaabbatee gara kee dhufaa jira.
¹⁰ Ani gaariwwan lolaa Efreem keessaa,
 fardeen lolaa Yerusaalem keessaa nan balleessa;
 iddaan waraanaas ni caccaba.
 Inni sabootatti nagaa ni labsa;
 bulchiinsi isaa galaana tokkoo irraa hamma galaana biraatti,
 Laga Efraaxiisiitii hamma daarii lafaatti bal'ata.
¹¹ Si'i immoo, sababii dhiiga kakuu ani si wajjin qabuutiif
 hidhamtoota kee ani boolla bishaan hin qabne keessaa baasee
 gad nan dhiisa.
¹² Yaa hidhamtoota abdiin qabdan, da'annoo keessanitti deebi'aa;
 ani ammas harka lama godhee isiniif nan deebisa.
¹³ Ani akkan iddaa koo dabsadhutti Yihuudaa dabsee
 Efreem keessa nan guuta.
 Yaa Xiyoon, ani ilmaan kee
 ilmaan Giriikitti nan kaasa;
 si'i immoo akka goraadee goota tokkoo nan godhadha.

Waaqayyo Ni Mul'ata

- ¹⁴ WAAQAYYO isaan irratti ni mul'ata;
 xiyyi isaa akka bakakkaa ni balaqqisa.
 WAAQAYYO Gooftaan malakata ni afuufa;
 inni bubbee kibbaatiin deema;
¹⁵ WAAQAYYO Waan Hunda Danda'u isaan eega.
 Isaan dhagaa furrisaatiin barbadeessanii mo'atu.
 Isaan akkuma daadhii wayinii dhuganii
 akkuma waciitii ittiin golee iddoo aarsaatti facaasaniitti ni guutamu.
¹⁶ Akkuma tikseen bushaayee isaa oolchu sana,
 WAAQAYYO Waaqni isaanii gaafas saba isaa ni oolcha.

Isaan akkuma faaya gonfoo irraatti
 biyya isaa keessatti ni calaqqisu.
 17 Isaan akkam nama hawwatu! Akkamis miidhagu!
 Midhaan dargaggoota,
 daadhiin wayinii haaraan immoo shamarran jajjabeessa.

10

WAAQAYYO Yihuudaa ni Kunuunsa

- 1 Yeroo bokkaa isa booddeetti akka inni bokkaa isiniif kennuuf
 WAAQAYYON kadhadhaa;
 bakakkaa kan ergu WAAQAYYOO dha.
 Inni bokkaa lola'u nama hundaaf,
 biqiltuu dirree immoo tokkoo tokkoo namaatiif ni kenna.
- 2 Waaqonni tolfamoon gowwoomsaa dubbatu;
 raajonni mul'ata sobaa argu;
 isaan abjuu sobaa namatti himu;
 waan faayidaa hin qabneen nama jajjabeessu.
 Kanaafuu sabni kun akkuma hoolaa tiksee hin qabnee
 hacuucamee asii fi achi joora.
- 3 "Aariin koo tiksootatti boba'eera;
 ani re'oota nan adaba;
 WAAQAYYO Waan Hunda Danda'u
 bushaayee isaa, mana Yihuudaa ni to'ata;
 lola keessattis akka farda jabaa isaan taasisa.
- 4 Yihuudaa keessaa dhagaan golee,
 isa keessaa qofoon dunkaanaa,
 isa keessaa iddaan lolaa,
 isa keessaa bulchaan hundi ni dhufa.
- 5 Isaan akkuma namoota jajjaboo
 waraana keessatti tokkummaadhaan daandii dhoqqee irra deemu.
 Sababii WAAQAYYO isaan wajjin jiruuf
 isaan lolanii abbootii fardeenii gaanessu.
- 6 "Ani mana Yihuudaa nan jajjabeessa;
 mana Yoosefis nan oolcha.
 Ani waanan garaa isaaniif laafuuf
 deebisee isaan nan dhaaba.
 Isaan akkuma waan ani duraanuu
 isaan hin gatinii ta'u;
 ani WAAQAYYO Waaqa isaanii ti;
 deebiis isaaniif nan kenna.
- 7 Efreemonni akkuma namoota jajjaboo ta'u;
 garaan isaaniis akkuma nama daadhii wayiniitiin gammaduu ni gammada.
 Ijoolleen isaanii waan kana arganii ni gammadu;
 garaan isaanii WAAQAYYOOTTI ni gammada.
- 8 Ani siiqsee
 walitti isaan nan qaba.
 Ani dhugumaan isaan nan fura;
 isaan akkuma duraa sana ni baay'atu.
- 9 Yoo ani saboota gidduutti
 isaan bittinneesse iyyuu isaan biyya fagootti na yaadatu.
 Isaanii fi ijoolleen isaanii lubbuudhaan ni jiraatu;
 ni deebi'us.
- 10 Ani biyya Gibxiitii deebisee isaan nan fida;
 Asoor keessaas walittin isaan qaba.
 Ani gara Gili'aadii fi Libaanoonitti isaan nan fida;
 iddoon isaan ga'us hin argamu.
- 11 Inni galaana rakkinna keessa darba;
 dha'aa galaanaas ni rukuta;
 tuujubawwan Abbayyaa hundinuu ni gogu.

Of tuulummaan Asoor gad deebi'a;
 bokkuun mootummaa Gibxis ni bada.
¹² Ani WAAQAYYON isaan nan jabeessa;
 isaanis maqaa isaatiin deddeebi'u"
 jedha WAAQAYYO.

11

¹ Yaa Libaanoon, akka ibiddi birbirsaa kee gubee fixuuf
 balbala kee banadhu!
² Yaa muka gaattiraa, birbirsii kufeeraatii wawwaadhu;
 mukkeen ulfina qaban badaniiru!
 Yaa qilxuu Baashaan wawwaadhu;
 bosonni gobbuun ciramee dhumeera!
³ Wawwaannaa tiksootaa dhaggeeffadhaa;
 lafti tika isaanii inni gabbataan barbadaa'eeraatii!
 Aaduu leencaa dhaga'aa;
 bosonni Yordaanos gobbuun sun barbadaa'eeraatii!

Tiksootaa Lama

⁴ WAAQAYYO Waaqni koo akkana jedha: "Bushaayee qalmaaf qopheeffaman tiksii.
⁵ Warri isaan bitatan, qalatanii utuu hin adabamin hafu. Warri gurguratanis,
 'WAAQAYYON galanni haa ga'u; ani soressa!' jedhu. Tiksoonni isaanii garaa isaaniif
 hin laafan. ⁶ Ani si'achi uummata biyyattiitiif garaa hin laafuuti" jedha WAAQAYYO. "Ani
 nama hunda dabarsee ollaa isaatii fi mootii isaatti nan kenna. Isaan biyyattii ni rukutu;
 anis harka isaaniitii isaan hin baasu."

⁷ Kanaafuu ani bushaayee qalmaaf qopheeffaman, keessumattuu kanneen bushaayee
 cunqurfaman nan tikfadhe. Ergasii ani ulee lama fudhadhee isa tokkoon Surraa isa
 kaaniin immoo Tokkummaa jedheen moggaase; akkasiinis bushaayee nan tikfadhe.
⁸ Ani ji'uma tokko keessatti tiksoota sadan nan balleesse.

Lubbuun koo isaan balfite; lubbuun isaanis na balfite; ⁹ akkanas jedheen; "Ani tiksee
 keessan hin ta'u. Kan du'u haa du'u; kan badus haa badu. Kanneen hafanis foon walii
 haa nyaatan."

¹⁰ Ergasii ani kakuu saboota hunda wajjin gale cabsuudhaaf ulee koo kan Surraa
 jedhamu fuudhee nan cabse. ¹¹ Innis guyyuma sana cabe; kanaafuu bushaayeen
 dhiphatan kanneen na ilaalaa turan akka wanni kun dubbii WAAQAYYO ta'e beekan.

¹² Anis, "Yoo wanni kun waan gaarii isiniitti fakkaate, gatii koo naaf kenna; yoo ta'uu
 baate immoo dhiisaa" nan jedheen. Kanaafuu isaan meetii soddoma naaf kennan.

¹³ WAAQAYYOS gatii gaarii isaan itti na shallagan sana, "Mankuusa keessa buusi!"
 naan jedhe. Kanaafuu ani meetii soddoman sana fuudhee mana WAAQAYYO keessatti
 mankuusa keessa nan buuse.

¹⁴ Ergasii ani obbolummaa Yihuudaatii fi Israa'el diiguudhaaf ulee koo lammaffaa kan
 Tokkummaa jedhamu sana nan cabse.

¹⁵ Kana irratti WAAQAYYO akkana naan jedhe; "Ammas mi'a tiksee gowwaa sanaa
 fuudhi. ¹⁶ Ani kunoo biyyattii keessatti tiksee hoolotaa nan kaasa; innis isa bade hin
 yaadatu; isa joore hin barbaadu; isa cabe hin wal'aanu; isa fayye hin sooru; garuu foon
 coomaa ni nyaata; kottee isaanis ni caccabsa.

¹⁷ "Tiksee faayidaa hin qabne
 kan bushaayee gatee deemuuf wayyoo!
 Goraadeen irree isaatii fi ija isaa mirgaa haa dha'u!
 Irreen isaa guutummaan guutuutti haa goggogu;
 iji isaa mirgaa guutummaan guutuutti haa jaamu!"

12

Diinonni Yerusaalem ni barbadeeffamu

¹ Kun raajii dubbii WAAQAYYO waa'ee Israa'el dubbatuu dha.

WAAQAYYO samiiwwan diriirse, inni hundee lafaa buuse, inni nama keessatti hafuura
 namaa uume sun akkana jedha: ² "Ani Yerusaalemin namoota naannoo ishee jiraatan
 hundatti xofoo gatantarsu nan godha. Yihuudaan akkuma Yerusaalem marfamtee
 ni qabamti. ³ Gaafas, yeroo saboonni lafaa hundi isheen mormuudhaan walitti
 qabamanitti, ani Yerusaalemin saboota hundatti kattaa hin sochoofamne nan godha.

Warri ishee sochoosuu yaalan hundi of miidhu. ⁴ Gaafas ani fardeen hunda nan naasisa; isa yaabbatus nan maraacha” jedha WAAQAYYO. “Ani Yihuudaa eeguuf ija koo nan banadha; ija fardeen saboota hundaa garuu nan jaamsa. ⁵ Ergasii hangafoonni Yihuudaa garaa isaanii, ‘Jiraatonni Yerusaalem sababii WAAQAYYO Waan Hunda Danda’u Waaqa isaanii ta’eef jajjaboo dha’ jedhu.

⁶ “Ani gaafas hangafoota Yihuudaa badaa ibiddaa tuullaa qoraanii keessaa, akkuma guca ibiddaa bissii keessaa nan godha. Isaan saboota naannoo isaanii kanneen mirgaa fi bitaan jiran hunda ni barbadeessu; Yerusaalem garuu utuu hin miidhamin iddoodhuma isheetti hafti.

⁷ “WAAQAYYO akka ulfinni mana Daawitii fi jiraattota Yerusaalem ulfina Yihuudaa hin caalleef duraan dursee iddoo jireenya Yihuudaa ni baraara. ⁸ Gaafas WAAQAYYO jiraattota Yerusaalemiif ni qolata; guyyaa sana isaan keessaa inni dadhabaan akka Daawit ta’a; manni Daawitis akka Waaqaa, akka ergamaa WAAQAYYOO isa isaan dura deemuu ni ta’a. ⁹ Ani gaafas saboota Yerusaalem lolan hunda balleessuuf nan ba’a.

Isa Waraanan Sanaaf Boo’uu Isaanii

¹⁰ “Ani mana Daawitii fi jiraattota Yerusaalem irratti hafuura surraatii fi kadhannaa nan dhangalaasa. Isaan ana isa waraanan sana ni ilaalu; isaan akkuma nama ilma tokkichaaf boo’uutti ni boo’uuf; akkuma nama ilma hangaafaaf baay’isee gadduuttis ni gadduuf. ¹¹ Gaafas boo’ichi Yerusaalem keessaa akkuma boo’icha dirree Megidoonitti Hadaad Rimooniif boo’ame sanaa guddaa ta’a. ¹² Biyyattiin ni boossi; tokkoon tokkoon balbalaas niitota isaanii wajjin ofii isaaniiitiif ni boo’u; balballi mana Daawitii fi niitonni isaanii, balballi mana Naataaniitii fi niitonni isaanii, ¹³ balballi mana Lewwii fi niitonni isaanii, balballi Shime’iitii fi niitonni isaanii, ¹⁴ balbalawwan hafan hundii fi niitonni isaanii ni boo’u.

13

Cubbuu Irraa Qulqullaa’uu

¹ “Gaafas mana Daawitii fi jiraattota Yerusaalem cubbuu fi xuraa’ummaa irraa akka qulqulleessuuf burqaan tokko ni banama.

² “Ani gaafas maqaa waaqota tolfamoo biyyattii keessaa nan balleessa; isaan lammata hin yaadataman” jedha WAAQAYYO Waan Hunda Danda’u. “Ani raajotaa fi hafuura xuraa’ummaa biyyattii keessaa nan balleessa. ³ Yoo namni tokko ammas raajii dubbate, abbaa fi haati isaa, warri isa dhalche, ‘Ati maqaa WAAQAYYOOTIN waan soba dubbatteef du’uu qabda’ jedhuun. Yeroo inni raajii dubbatutti abbaa fi haati isaa warri isa dhalche isa waraanu.

⁴ “Guyyaa sana raajiin hundinuu sababii mul’ata raajii isaatiif ni qaana’a; inni gowwoomsuudhaaf wayyaa raajii kan rifeensa irraa hojjetame hin uffatu. ⁵ Inni, ‘Ani qotee bulaadha malee raajii miti; ijoollummaa kootii jalqabee namni na gurguree ture’ jedha. ⁶ Yoo namni tokko, ‘Madaan dhagna kee irraa kun maali?’ jedhee gaafate, inni, ‘Madaan kun madaa ani mana michoota kootti madaa’ee dha’ jedhee deebisa.

Tikseen Ni Rukutama, Hoolonni ni Bittinnaa’u

⁷ “Yaa goraadee, tiksee kootti,
nama natti dhi’aatu sanatti ka’i!” jedha
WAAQAYYON Waan Hunda Danda’u.

“Ati tiksee rukuti;
hoolonni ni bittinneffamu;
anis harka koo warra xixinnaatti nan deebifadha.

⁸ Lafa hunda irratti” jedha WAAQAYYO,
“Harka sadii keessaa harki lama rukutamee bada;
ta’us harka sadii keessaa harki tokko achitti hafa.

⁹ Ani harka sadaffaa kana ibiddattin naqa;
akkuma meetii baqsee isaan nan qulqulleessa;
akka warqeetti isaan nan qora.

Isaan maqaa koo ni waammatu;
anis deebii nan kennaaf;
ani, ‘Isaan saba koo ti’ nan jedha;
isaan immoo, ‘WAAQAYYO Waaqa keenya’ jedhu.”

14

¹ Kunoo guyyaan WAAQAYYOO ni dhufa; boojiun kees si keessatti ni qoqqoodama.

² Ani akka isaan ishee waraananiif saboota hunda Yerusaalementi walitti nan qaba; magaalattiin ni qabamti; manneen ni saamamu; dubartoonni isaanii humnaan gudeedamu. Gartokkeen magaalattii ni booji'ama; uummanni hafe garuu magaalattii keessaa hin fudhatamu. ³ WAAQAYYOO akkuma guyyaa duulaa dhaqee lolu sana, dhaqee saboota sana lola. ⁴ Guyyaa sana miilli isaa Tulluu Ejersaa isa karaa ba'a Yerusaalementiin jiru irra dhaabata; Tulluun Ejersaas ba'aa gara dhi'aatti sulula guddaa uumee iddoo lamatti baqaqfama. Tulluun sunis gartokkeen isaa gara kaabaatti, gartokkeen isaa immoo gara kibbaatti siqa. ⁵ Isin karaa sulula tulluu kootiin baqattu; inni gara Aazeelitti diriirfamaatii. Isin akkuma bara Uziyaan mooticha Yihuudaa keessa sochii lafaa jalaa baqattan sana ammas ni baqattu. Ergasii WAAQAYYOO, Waaqni koo ni dhufa; qulqulloonni hundinuus isa wajjin ni dhufu.

⁶ Guyyaa sana ifni, dhaamochii fi qorri hin jiraatan. ⁷ Guyyaan sun guyyaa addaa, guyyaa WAAQAYYOO qofa biratti beekamu, yeroo itti garaagarummaan guyyaa fi halkanii hin beekamne ni ta'a. Yeroo dhi'utti ifa ni ta'a.

⁸ Gaafas bishaan jireenyaa Yerusaalementi keessaa ni yaa'a; walakkaan isaa gara galaana ba'aatti, walakkaan immoo gara galaana lixaatti bonaa fi ganna yaa'a.

⁹ WAAQAYYOO guutummaa lafaa irratti mootii ta'a. Gaafas WAAQAYYOO tokko, maqaan isaas maqaa tokko ta'a.

¹⁰ Guutummaan biyyattii Gebaadhaa hamma Rimoon ishee kibba Yerusaalementi jirtuutti akka Arabbaa ta'a. Yerusaalementi garuu Karra Beniyaamii hamma Karra Jalqabaatti, hamma Karra Goleetti, Gamoo Hanaani'eelii hamma iddoo cuunfaa wayinii mootichaatti ol kaafamtee iddoodhuma ishee durii ni turti. ¹¹ Namni ishee keessa jiraata; isheen si'achi hin diigamtu. Yerusaalementi nagaadhaan jiraatti.

¹² Kun dha'icha WAAQAYYOO ittiin saboota Yerusaalementi lolan hunda rukutu dha: Foon isaanii utuma isaan miilla isaaniitiin dhaabatani jiranuu tortora; iji isaanii boolla ija isaanii keessatti tortora; arrabni isaanii afaan isaanii keessatti tortora.

¹³ Gaafas jeequmsi guddaan WAAQAYYOO biraa namootatti ni dhufa. Isaanis harkaan wal qabatani wal haleelu ¹⁴ Yihuudaanis Yerusaalementi lola. Qabeenyi saboota naannoo ishee jiraatanii hundi warqeen, meetii fi uffanni baay'een walitti qabama. ¹⁵ Dha'ichi akkasii fardeenii fi gaangolii, gaalaa fi harree, akkasumas horii qubata keessaa hunda ni rukuta.

¹⁶ Ergasii hambaawwan saboota Yerusaalementi lolan hundaa wagguma waggadhaan Mooticha, WAAQAYYOO Waan Hunda Danda'u waaqeffachuu fi Ayyaana Daasii ayyaan-effachuuf ol ba'u. ¹⁷ Uummanni lafa irra jiraatu kam iyyuu yoo Mooticha, WAAQAYYOO Waan Hunda Danda'u waaqeffachuuf Yerusaalementi ol ba'uu baate bokkaa hin argatu. ¹⁸ Uummanni Gibxiis yoo ol ba'ee hirmaachuu baate bokkaa hin argatu. WAAQAYYOO dha'icha ittiin saboota Ayyaana Daasii ayyaan-effachuuf ol hin baane rukutu isaanitti ni fida. ¹⁹ Kun adabbii Gibxii fi adabbii saboota Ayyaana Daasii ayyaan-effachuuf ol hin baane hundaa ta'a.

²⁰ Gaafas katabbiin, "WAAQAYYOOOF qulqullaa'e" jedhu bilbila fardeenii irratti ni barreeffama. Xuwween mana WAAQAYYOO keessaas akkuma waciitii qulqulluu fuula iddoo aarsaa dura jiru sanaa ni ta'a. ²¹ Xuwween Yerusaalementi fi Yihuudaa keessaa hundi WAAQAYYOO Waan Hunda Danda'uuf qulqulluu ta'a; namni aarsaa dhi'eessuuf dhufu hundinuus xuwweewwan sana keessaa muraasa ni fudhata. Foon aarsaa itti bilcheeffata. Gaafas namni Kana'an tokko iyyuu deebi'ee mana WAAQAYYOO Waan Hunda Danda'uu keessatti hin argamu.

Raajii Miilkiyaas

1 Raajii dubbii WAAQAYYOO kan karaa Miilkiyaasiin gara Israa'el dhufe.

Israa'el Jaalala Waaqaa Shakke

2 “Ani isin jaalladheera” jedha WAAQAYYOO.

“Isin immoo, ‘Ati akkamitti nu jaallatte?’ jettanii gaafattu.

“Esaawu obboleessa Yaaqoob hin turree?” jedha WAAQAYYOO. “Ta’us ani Yaaqoobin jaalladhee, ³ Esaawun garuu jibbeera; ani tulluuwwan isaa lafa onaa godhee dhaala isaas waangoo gammoojjiitiif kenneera.”

⁴ Edoomiyaas, “Nu caccabnu iyyuu, diigama sana deebisnee ni ijaarra” jedha ta’a.

Garoo WAAQAYYOO Waan Hunda Danda’u akkana jedha: “Isaan ni ijaaru ta’a; ani garuu nan diiga. Isaan Biyya Hamaa, saba yeroo hunda dheekkamsa WAAQAYYOO jala jiraatu jedhamanii ni waamamu. ⁵ Isin waan kana ija keessaniin argitanii, ‘Daarii biyya Israa’eliin gamatti iyyuu WAAQAYYOO Guddaa dha!’ jettu.

Aarsaa Mudaa Qabuun Kakuu Cabsuu

6 “Ilmi abbaa isaa, garbichis gooftaa isaa ulfeessa. Egaa ergan abbaa ta’e, ulfinni naaf malu meerre ree? Ergan gooftaa ta’e, kabajni naaf malu meerree ree?” jedha WAAQAYYOO Waan Hunda Danda’u.

“Yaa luboota; isintu maqaa koo tuffata.

“Isin garuu, ‘Nu akkamiin maqaa kee tuffanne?’ jettanii gaafattu.

7 “Isin nyaata xuraa’aa iddoo aarsaa koo irratti dhi’eessitu.

“Isin garuu, ‘Nu akkamiin si xureessine’ jettanii gaafattu.

“Maaddiin WAAQAYYOO tuffatamaa dha jechuudhaan. ⁸ Isin yoo horii jaamaa aarsaadhaaf dhi’eessitan, sun balleessaa mitii? Isin yoo horii naafa yookaan horii dhukkubsataa naaf qaltan, sun balleessaa mitii? Mee horii sana bulchaa keessaniif kennuu yaalaa! Inni isinitti ni gammadaa? Inni isin harkaa ni fudhataa?” jedha WAAQAYYOO Waan Hunda Danda’u.

⁹ “Egaa mee akka inni garaa nuu laafuuf Waaqa nuuf kadhadhaa. Isin yoo aarsaa akkasii qabattanii dhi’aattan inni isin harkaa ni fudhataa?” jedha WAAQAYYOO Waan Hunda danda’u.

¹⁰ “Isin keessaa namni tokko akka isin ibidda faayidaa hin qabne iddoo aarsaa koo irratti hin bobeessineef utuu balbala mana qulqullummaa cufee jiraatee! Ani isinitti hin gammadu; aarsaa tokko iyyuu isin harkaa hin fudhu” jedha WAAQAYYOO Waan Hunda Danda’u. ¹¹ “Maqaan koo ba’a aduutii kaasee hamma lixa aduutti saboota gidduutti guddaa ni ta’a. Iddoo hundatti ixaannii fi aarsaan qulqulluun ni kennama; maqaan koo saboota gidduutti guddaa ni ta’aatii” jedha WAAQAYYOO Waan Hunda Danda’u.

¹² “Isin garuu maaddiin Gooftaa ‘xuraa’aa dha’ nyaanni isaas ‘tuffatamaa dha’ jechuudhaan maqaa koo xureessitu. ¹³ ‘Kun dadhabbii dha!’ jettaniis tuffiidhaan itti cirriiqfattu” jedha WAAQAYYOO Waan Hunda Danda’u.

“Isin yoo horii hatame, kan naafate yookaan kan dhukkuba qabu fiddanii aarsaa gootanii dhi’eessitan, ani isin harkaa fudhachuutu narra jiraa?” jedha WAAQAYYOO.

¹⁴ “Namni bushaayee isaa keessaa korbeessa jaallatamaa qabu kan korbeessa sana aarsaa dhi’eessuuf wareega kennee garuu sobee horii hir’ina qabu Gooftaadhaaf dhi’eessu abaaramaa haa ta’u. Ani mootii guddaadhaatii, maqaan koo saboota gidduutti sodaatamuu qaba” jedha WAAQAYYOO Waan Hunda Danda’u.

2

Akeekkachiisa Lubootaaf Kenname

1 “Yaa luboota akeekkachiisni kun isiniif kenname. ² Yoo isin dhaggeeffachuu baattan, yoo isin maqaa koo kabajuuf garaa keessan qopheessuu baattan, ani abaarsa isinitti nan erga; eebba keessanis nan abaara” jedha WAAQAYYOO Waan Hunda Danda’u. “Sababii isin maqaa koo kabajuuf garaa keessan hin qopheessiniif dhugumaan ani amma iyyuu eebba keessan abaareera.

³ “Sababii keessaniif ani sanyii keessan nan ifadha; faandoo aarsaa isin guyyaa ayyaanaa dhi’eessitanii fuula keessanitti nan facaasa; isa wajjinis ni baddu. ⁴ Kakuun ani Lewwii wajjin qabu akka itti fufuuf, ajaja kana isinitti erguu koo isin ni beektu” jedha WAAQAYYOO Waan Hunda Danda’u. ⁵ “Kakuun ani isa wajjin gale kakuu jireenyaatii

fi kakuu nagaa ture; isas nan kenneef; kunis kabaja fide; innis na kabaje; maqaa koo sodaachuudhaanis ni dhaabate. ⁶ Gorsidhugaa afaan isaa keessa ture; sobni tokko iyyuu hidhii isaa irraa hin argamne. Inni nagaa fi qajeelummaadhaan na wajjin jiraate; nama hedduus qalbii jijjiirraachiise.

⁷ “Sababii inni ergamaa WAAQAYYO Waan Hunda Danda’uu ta’eef, hidhiin luba tokkoo beekumsa kuufata; namoonnis afaan isaa irraa gorsa barbaadu. ⁸ Isin garuu karaa irraa jal’attaniirtu; barsiisa keessaniinis namoota baay’ee gufachiiftaniirtu; kakuu Lewwiis cabsitaniirtu” jedha WAAQAYYO Waan Hunda Danda’u. ⁹ “Kanaafuu ani akka isin saboota hunda duratti tuffatamtanii fi salphattan nan godha; isin waa’ee seeraa keessatti looggii hojjettan malee karaa koo duukaa hin buuneetii.”

Dhirsaa Niitiin Wal Hiikuudhaan Kakuu Cabsuu

¹⁰ Nu hundi Abbaa tokko qabna mitii? Waaquma tokkodu nu uume mitii? Yoos nu maaliif waliif amanamuu diduudhaan kakuu abbootii keenyaa xureessina ree?

¹¹ Yihuudaan hin amanamne. Israa’elii fi Yerusaaalem keessatti wanni jibbisiisaan tokko raawwatameera; Yihuudaan dubartoota waaqa ormaa waaqeffatan fuudhuudhaan iddoo qulqulluu WAAQAYYO jaallatu xureesseera. ¹² Nama waan kana hojjetu abbaa fedhe illee yoo ta’e, WAAQAYYO Waan Hunda Danda’uuf aarsaa fidu iyyuu dunkaana Yaaqoob keessaa WAAQAYYO isa haa balleessu.

¹³ Wannii isin hojjettan kan biraas kanaa dha: iddoo aarsaa WAAQAYYOO irra imimmaan lolaafu. Sababii inni si’achi aarsaa keessaniif xiyyeeffannoo hin kennineef yookaan aarsaa keessan gammachuudhaan isin harkaa hin fudhanneef ni boossu; ni wawwaattus. ¹⁴ Isinis, “Kun maaliif ta’e?” jettanii gaafattu. Kun sababii ati utuma isheen hidhata kee, niitii kee kan kakuu taatee jirtuu amanamummaa isheef dhabdeef WAAQAYYO si’ii fi niitii qeerrummaa kee gidduutti ragaa ta’eeffii dha.

¹⁵ WAAQAYYO tokko isaan hin goonee? Isaan fooniinis hafuuraanis kanuma isaa ti. Inni maaliif tokko isaan godhe? Sababii inni sanyii Waaqa sodaatu barbaadaa tureef. Kanaafuu of eeggadhaa; eenyu iyyuu amanamummaa niitii qeerrummaa isaatiif qabu hin cabsin.

¹⁶ “Ani wal hiikuu dhirsaa fi niitii nan jibba” jedha WAAQAYYO Waaqni Israa’el; “Ani nama wayyaa isaatiin jal’ina haguugu nan jibba” jedha WAAQAYYO Waan Hunda Danda’u.

Kanaafuu of eeggadhaa; amanamummaas hin dhabinaa.

Murtii Dabsuudhaan Kakuu Cabsuu

¹⁷ Isin dubbii keessaniin WAAQAYYON dadhabsiiftaniirtu.

“Nu akkamiin isa dadhabsiifne?” jettaniis gaafattu.

“Warri waan hamaa hojjetan hundinuu fuula WAAQAYYOO duratti gaarii dha; innis isaanitti gammada” yookaan “Waaqni murtii qajeelaa meerre?” jechuudhaan.

3

¹ “Kunoo ani ergamaa koo isa fuula koo duraan karaa naaf qopheessu nan erga. Ergasii Gooftaan isin eeggattan akkuma tasaa gara mana qulqullummaa isaa ni dhufa; ergamaan kakuu kan isin hawwitan sun ni dhufa” jedha WAAQAYYO Waan Hunda Danda’u.

² Garuu eenyutu guyyaa dhufaati isaa sana obsuu danda’a? Yeroo inni mul’attuttis eenyutu isa dura dhaabachuu danda’a? Inni akka ibidda nama sibiila baqsee qulqulleessuu yookaan akka saamunaa nama wayyaa miicuu ti. ³ Inni akkuma nama meeti baqsee qulqulleessuu ni ta’a; Lewwotas calalee akka warqeettii fi meetiitti qulqulleessa. Ergasiis WAAQAYYO namoota qajeelummaadhaan aarsaa isaaf fidan ni gabaata; ⁴ akkuma bara darbee, akkuma waggoota duraa aarsaan Yihuudaatii fi Yerusaaalem WAAQAYYON ni gammachiisa.

⁵ “Kanaafuu ani murtiif gara keessan nan dhufa. Ani falfalootatti, sagaalootatti, warra sobaan kakanatti, warra mindaa hojjetootaa dhowwatanitti, warra haadhota hiyyeessaa fi ijoollee abbaa hin qabne hakuucanitti, warra alagoota murtii qajeelaa dhowwatanii fi na hin sodaannetti dhugaa ba’uuf nan ariifadha” jedha WAAQAYYO Waan Hunda Danda’u.

Kudhan Keessaa Tokko Dhowwachuudhaan Kakuu Cabsuu

⁶ “Ani WAAQAYYO hin geeddaramu. Kanaafuu yaa ilmaan Yaaqoob isin hin barbadoofne. ⁷ Isin bara abbootii keessaniitii jalqabdaniis sirna koo irraa jal’attaniirtu; hin eegnes. Gara kootti deebi’aa; anis gara keessanitti nan deebi’aa” jedha WAAQAYYO Waan Hunda Danda’u.

“Isin garuu, ‘Nu akkamiin deebina?’ jettanii gaafattu.

⁸ “Namni Waaqa ni saamaa?” Ta’us isin na saamtan.

“Isin garuu, ‘Nu akkamiin si saamne?’ jettanii gaafattu.

“Kudhan keessaa tokkoo fi aarsaadhaan. ⁹ Isin guutummaan saba keessanii sababii na saamtaniif abaarsa jala jirtu. ¹⁰ Akka mana koo keessa nyaanni jiraatuuf, kudhan keessa tokko guutummaatti gombisaatti galchaa. Kanaan na qoraatii akka ani karra burqaa samii banee hamma isin iddoo itti kuufattan dhabdanitti eebba guddaa isiniif hin roobsine ilaalaa” jedha WAAQAYYO Waan Hunda Danda’u. ¹¹ “Ani akka daana’oon midhaan keessan hin balleessineef nan ifadha; mukni wayinii lafa qotiisa keessaniis ija hin harcaafatu” jedha WAAQAYYO Waan Hunda Danda’u. ¹² “Ergasii isin biyya gammaddu waan taataniif, saboonni hundinuu eebbifamtoota isiniin jedhu” jedha WAAQAYYO Waan Hunda Danda’u.

Israa’el Of Tuulummaadhaan Waaqatti Dubbate

¹³ “Isin of tuulummaadhaan natti dubbattan” jedha WAAQAYYO.

“Ta’us, ‘Nu maal siin jenne?’ jettanii gaafattu.

¹⁴ “Isin akkana dubbattan; ‘Waaqa tajaajiluun faayidaa hin qabu. Nu fedhii isaa duukaa buunee akkuma nama boo’uu, fuula WAAQAYYO Waan Hunda Danda’uu dura jooruudhaan maal arganne?’ ¹⁵ Amma garuu of tuultotaan eebbifamtoota jenna. Dhugumaan warri hamaa hojjetan ni eebbifamu; warri Waaqa qoranis ni miliqu.’”

¹⁶ Warri WAAQAYYOON sodaatan walitti dubbatan; WAAQAYYOS isaan dhageeffate; ni dhaga’es. Warra WAAQAYYOON sodaatanii fi maqaa isaa kabajaniifis kitaabni maramaan yaadannoodhaaf fuula isaa duratti barreeffame.

¹⁷ WAAQAYYO Waan Hunda Danda’u akkana jedha; “Guyyaa ani hojjedhutti isaan handhuuraa koo addaa ni ta’u. Akkuma namni tokko ilma isaa kan isa tajaajilu baraaru sana ani isa nan baraara. ¹⁸ Isin ammas garaa garummaa nama qajeelaatii fi nama hamaa, garaa garummaa warra Waaqa tajaajilaniitii fi warra hin tajaajillee ni argitu.

4

Dhufaatii Guyyaa WAAQAYYOO

¹ “Dhugumaan guyyaan akka badaa ibiddaa boba’u ni dhufa. Of tuultonna hundii fi warri hammina hojjetan hundi cidii ta’u; guyyaan sunis isaan guba” jedha WAAQAYYO Waan Hunda Danda’u. “Hiddi yookaan dameen tokko iyyuu isaaniif hin hafu. ² Isin warra maqaa koo kabajaniif garuu Aduun qajeelummaa qoochoo isaa jalatti fayyina qabatee ni ba’a. Isinis baatanii akkuma jabbii golaa gad dhiifamteetti burraaqxu. ³ Ergasii isin hamoota ni dhidhiittu; isaanis guyyaa ani wantoota kanneen hojjedhutti faana miilla keessanii jalatti daaraa ni ta’u” jedha WAAQAYYO Waan Hunda Danda’u.

⁴ “Seera garbicha koo Musee, sirnaa fi ajaja ani Israa’eloota hundaaf Kooreebitti isatti kenne sana yaadadhaa.

⁵ “Kunoo ani, guyyaan WAAQAYYOO inni guddaanii fi sodaachisaan sun utuu hin dhufin dura Eeliyaas raajicha isiniif nan erga. ⁶ Inni qalbii abbootii gara ijoolleetti, qalbii ijoollee immoo gara abbootiitti ni deebisa; yoo kanaa achii ani dhufee abaarsaan biyyattii nan rukuta.”

Wangeela Maatewos

Hidda Dhaloota Yesuus Kiristoos

1:1-17 kwf - Luq 3:23-38

1:3-6 kwf - Rut 4:18-22

1:7-11 kwf - 1Sn 3:10-17

¹ Hiddi dhaloota Yesuus Kiristoos sanyii Daawit, sanyii Abrahaam ta'e sanaa kanaa dha:

- ² Abrahaam Yisihaaqin dhalche;
- Yisihaaq Yaaqoobin dhalche;
- Yaaqoob Yihuudaa fi obbaloota isaa dhalche;
- ³ Yihuudaan Taamaar irraa Faaresii fi Zeraa dhalche;
- Faares Hezroonin dhalche;
- Hezroon Arraamin dhalche;
- ⁴ Arraam Amiinaadaabin dhalche;
- Abiinaadaab Nahishoonin dhalche;
- Nahishoon Salmoonin dhalche;
- ⁵ Salmoon Rahaab irraa Bo'eezin dhalche;
- Bo'eez Ruut irraa Yoobeedin dhalche;
- Yoobeed Isseeyin dhalche;
- ⁶ Isseey Daawit Mooticha dhalche.

- Daawit niitii Uuriyaa irraa Solomoonin dhalche;
- ⁷ Solomoon Rehoobo'aamin dhalche;
- Rehoobo'aam Abiyaa dhalche;
- Abiyaan Asaafin dhalche;
- ⁸ Asaaf Yehooshaafaaxin dhalche;
- Yehooshaafaax Yehooraamin dhalche;
- Yehooraam Uziyaan dhalche;
- ⁹ Uziyaan Yootaamin dhalche;
- Yootaam Akaazin dhalche;
- Akaaz Hisqiyaasin dhalche;
- ¹⁰ Hisqiyaas Minaasee dhalche;
- Minaaseen Aamoonin dhalche;
- Aamoon Yosiyaasin dhalche;
- ¹¹ Yosiyaas bara boojuu Baabilon keessa, Yekooniyaanii fi obbaloota isaa dhalche.

- ¹² Boojuu Baabilon booddee,
- Yekooniyaan She'altii'eelin dhalche;
- She'altii'eel Zarubaabelin dhalche;
- ¹³ Zarubaabel Abiyuudin dhalche;
- Abiyuud Eliyaaqeemin dhalche;
- Eliyaaqeem Azoorin dhalche;
- ¹⁴ Azoor Zaadoqin dhalche;
- Zaadoq Akiimin dhalche;
- Akiim Eliyuudin dhalche;
- ¹⁵ Eliyuud Ele'aazaarin dhalche;
- Ele'aazaar Maattaanin dhalche;
- Maattaan Yaaqoobin dhalche;
- ¹⁶ Yaaqoob Yoosefin dhalche; Yoosef kunis dhirsaa Maariyaam ishee Yesuus isa Kiristoos jedhamu deesse sanaa ti.

¹⁷ Egaa walumaa galatti Abrahaamii hamma Daawititti dhaloota kudha afur, Daawitii hamma boojuu Baabilonitti dhaloota kudha afur, boojuu Baabilonii hamma Kiristoosiitti dhaloota kudha afurtu ture.

Dhalachuu Yesuus Kiristoos

¹⁸ Dhalachuun Yesuus Kiristoos akkana ture: Haati isaa Maariyaam kaadhima Yoosef turte; isheenis utuu Yoosef wajjin wal bira hin ga'in Hafuura Qulqulluudhaan ulfooftee argamte. ¹⁹ Yoosef kaadhimni ishee sunis nama qajeelaa waan tureef, dhoksaadhaan ishee dhiisuu murteesse malee uummata duratti ishee qaanessuu hin barbaanne.

²⁰ Utuu inni waan kana yaadaa jiruu, ergamaan Gooftaa abjuu keessa itti mul'atee akkana jedheen; "Yaa Yoosef ilma Daawit, kaadhimni kee Maariyaam Hafuura Qulqulluudhaan waan ulfooftee ishee fuudhuu hin sodaatin. ²¹ Isheen ilma deessi; atis maqaa isaa Yesuus jettee ni moggaafata; inni saba isaa cubbuu isaanii irraa ni fayyisaatii."

²² Kun hundinuu akka wanni Gooftaan karaa raajichaatiin dubbate sun raawwatu-muuf ta'e. ²³ Innis, "Kunoo, durbi tokko ni ulfoofti; ilma ni deessi; maqaa isaas Amaanu'el jedhu"* jedha. Amaanu'el jechuunis, "Waaqni nu wajjin jira" jechuu dha.

²⁴ Yoosefis hirribaa dammaqee akkuma ergamaan Gooftaa isa ajajetti Maariyaamin niitummaadhaan mana isaatti fudhate. ²⁵ Garuu inni hamma isheen ilma deessutti ishee bira hin geenye. Maqaa isaas, "Yesuus" jedhee moggaase.

2

Beektonni Kiristoosin Daawwatan

¹ Bara Heroodis Mootichaa keessa, erga Yesuus magaalaa Beetlihem Yihuudaatti argamtu keessatti dhalatee booddee, beektonni ba'a biiftuutii gara Yerusaaalem dhufan; ² isaanis, "Mootiin Yihuudootaa inni dhalate sun eessa jira? Nu urjii isaa ba'a biiftuutti arginee isaaf sagaduu dhufneerra" jedhanii gaafatan.

³ Heroodis Mootichi yommuu waan kana dhaga'etti ni jeeqame; Yerusaaalemis guutummaatti isa wajjin jeeqamte. ⁴ Innis luboota hangafootaa fi barsiistota seeraa hunda saba keessaa walitti qabee, Kiristoos eessatti akka dhalatu isaan gaafate. ⁵⁻⁶ Isaanis akkana jedhanii deebisaniif; "Beetlihem Yihuudaatti dhalata; kunis dubbii raajichi,

"Yaa Beetlihem ishee biyya Yihuudaa,

ati gonkumaa bulchitoota Yihuudaatii gad miti;

bulchaan saba koo Israa'elin tiksu

si keessaa ni ba'aatii*"

jedhee barreesse sanaa dha."

⁷ Ergasii Heroodis beektota sana dhoksaatti waamee yeroo itti urjiin sun mul'ate isaan irraa hubate. ⁸ Innis, "Dhaqaatii jabeessaa mucicha barbaadaa. Yeroo argitanitti immoo akka anis dhufee isaaf sagaduuf natti himaa" jedhee Beetlihemitti isaan erge.

⁹ Isaanis erga waan mootichi jedhe sana dhaga'anii booddee karaa isaanii itti fufan; urjiin isaan ba'a biiftuutti argan sunis hamma iddoo mucichi ture ga'ee dhaabatutti isaan dura deeme. ¹⁰ Isaanis yeroo urjii sana arganitti akka malee gammadan.

¹¹ Akkuma mana ol seenaniinis mucicha, haadha isaa Maariyaam wajjin argan; kufaniis sagadaniif. Qorxii isaaniis bananii kennaa warqee, ixanaana fi qumbii dhi'eessaniif.

¹² Beektonnis akka gara Heroodisitti hin deebineef waan abjuudhaan of eeggachiisni isaaniif kennameef karaa biraatiin biyya isaaniitti deebi'an.

Gibxitti Baqachuu Isaanii

¹³ Yommuu beektonni sun deemanitti, kunoo ergamaan Gooftaa abjuudhaan Yoosefitti mul'atee, "Sababii Heroodis mucicha ajjeesuu barbaaduuf ka'iitii mucichaa fi haadha isaa fudhadhuutii Gibxitti baqadhu. Hamma ani yeroo ati itti deebitu sitti himutti achuma turi" jedheen.

¹⁴ Kanaafuu Yoosef ka'ee mucichaa fi haadha isaa halkaniin fudhatee Gibxitti qajelee; ¹⁵ hamma Heroodis du'uttis achi jiraate. Kunis akka wanni Gooftaan karaa raajichaatiin, "Ani Gibxii ilma koo waameera"† jedhe sun raawwatamuuf ta'e.

¹⁶ Heroodis yommuu akka beektonni sun isa gowwoomsan hubatetti akka malee aare; innis akka yeroo beektota sana irraa bareetti, ijoollee dhiiraa warra umuriin isaanii waggaa lamaa fi hammasii gad ta'e kanneen Beetlihemii fi naannoo ishee keessa jiraatan hunda nama itti ergee ficciise. ¹⁷ Kanaanis wanni Ermiyaas raajichi dubbate ni raawwatame. Innis akkana jedha:

¹⁸ "Sagaleen boo'ichaatii fi wawwaannaa guddaan tokko

Raamaa keessaa dhaga'ame;

sababii isaan hin jirreef,

Raahel ijoollee isheetiif boo'aa jirti;

jajjabaachuus ni didde."‡

* 1:23 1:23 Isa 7:14 * 2:5-6 2:6 Mik 5:2,4 † 2:15 2:15 Hos 11:1 ‡ 2:18 2:18 Erm 31:15

Naazreetitti Deebi'uu Isaanii

¹⁹ Erga Heroodis du'ee booddee, ergamaan Gooftaa tokko Gibxitti abjuudhaan Yoosefitti mul'atee, ²⁰ "Warri lubbuu mucichaa barbaadan waan du'aniif ka'iitii mucichaa haadha isaa wajjin fudhadhuutii biyya Israa'el dhaqi" jedheen.

²¹ Kanaafuu Yoosef ka'ee mucichaa fi haadha isaa fudhatee biyya Israa'el dhaqe. ²² Garuu yommuu akka Arkelaawos iddoo abbaa isaa, iddoo Heroodis Yihuudaa irratti mo'e dhaga'etti achi dhaquu sodaate; abjuudhaanis waan of eeggachiisni isaaf kennameef gara aanaa Galilaa deeme; ²³ achis dhaqee magaalaa Naazreeti jedhamtu keessa jiraate. Kunis dubbiin, "Inni Naaziricha jedhamee ni waamama" jedhamee karaa raajotaatiin dubbatame sun akka raawwatamuuf ta'e.

3*Lallaba Yohannis Cuuphaa*

3:1-12 kwf - Mar 1:3-8; Luq 3:2-17

¹ Bara sana Yohannis Cuuphaan gammoojjii Yihuudaa keessatti lallabaa dhufe; ² innis, "Mootummaan samii dhi'aateeraatii qalbii jijjiirradhaa" jedhe. ³ Kunis isa waa'een isaa karaa Isaayyaas raajichaatiin, "Sagalee nama, 'Gooftaadhaaf karaa qopheessaa; daandii qajeelaas isaaf hojjedhaa'

jedhee gammoojjii keessaa iyyu tokkoo"*
jedhamee dubbatame sanaa dha.

⁴ Uffanni Yohannis rifeensa gaalaa irraa hojjetame; innis mudhii isaatti sabbata teephaa hidhata ture. Nyaanni isaa immoo hawwaannisaa fi damma bosonaa ture. ⁵ Namoonnis Yerusaleem irraa, Yihuudaa hundaa fi biyya naannoo Yordaanos guutuu irraa gara isaa dhaqaa turan. ⁶ Cubbuu isaaniis himachaa, Laga Yordaanos keessatti isaan cuuphamaa turan.

⁷ Inni garuu yommuu Fariisotaa fi Saduugota keessaa baay'een isaanii utuu gara iddoo inni itti cuuphaa turee dhufanuu argetti akkana jedheen; "Isin ijoollee buutii nana! Dheekkamsa dhufu jalaa akka baqattaniif eenyutu isinitti hime?" ⁸ Egaa ija qalbii jijjiirranaa mirkaneessu naqadhaa. ⁹ Isin, 'Abbaan keenya Abrahaamii dha' ofiin jechuu waan dandeessan hin se'inaa. Waaqni dhagoota kanneen irraa Abrahaamiif ijoollee kaasuu akka danda'u ani isinittan himaati. ¹⁰ Qottoon amma iyyuu hidda mukkeenii irra kaa'ameera; mukti ija gaarii hin naqanne hundinuu muramee ibiddatti darbatama.

¹¹ "Ani qalbii jijjiirraanaadhaafin bishaaniin isin cuupha. Inni na duubaan dhufu garuu na caalaa jabaa dha; ani kophee isaa iyyuu baachuuf hin malu. Inni Hafuura Qulqulluu fi ibiddaan isin cuupha. ¹² Inni afarsaa ittiin midhaan qulleessu of harkaa qaba; qamadii isaa gombisaatti naqata; oobdii isaa ni qulqulleessa; habaqqii garuu ibidda hin dhaamneen guba."

Cuuphamuu Yesuus

3:13-17 kwf - Mar 1:9-11; Luq 3:21,22; Yoh 1:31-34

¹³ Yesuus ergasii Yohanniisiin cuuphamuuf Galilaadhaa gara Laga Yordaanos dhufe. ¹⁴ Yohannis garuu, "Ani siin cuuphamuu na barbaachisa; ati immoo gara koo dhufaa?" jedhee isa dhowwe.

¹⁵ Yesuusis deebisee, "**Ammaaf akkanuma haa ta'uu dhiisi; nu qajeelummaa hunda raawwachuudhaaf waan kana gochuu qabnaatii**" jedheen. Yohannis isaa dhowwuu dhiise.

¹⁶ Yesuusis akkuma cuuphameen bishaan keessaa ol ba'e. Innis yommuusama samiin banamee, utuu Hafuurri Waaqaa akkuma gugeetti gad bu'ee isa irras qubatu arge. ¹⁷ Sagaleen tokkos samii irraa, "Kun ilma koo isa ani jaalladhuu dha; isatti baay'ee nan gammada" jedhe.

4*Yesuus Qoramu Isaa*

4:1-11 kwf - Mar 1:12-13; Luq 4:1-13

¹ Ergasii Yesuus akka diiyaabiloosiin qoramuuf Hafuuraan gammoojjiitti geeffame. ² Inni nama erga guyyaa afurtamaa fi halkan afurtama soomee booddee ni beela'e. ³ Inni nama qoru sun gara isaa dhufee, "Ati yoo ilma Waaqaa taate, akka dhagooni kunneen buddeena ta'an ajaji" jedheen.

* 3:3 3:3 Isa 40:3

⁴ Yesuus immoo deebisee, “**‘Namni dubbii afaan Waaqayyootii ba’u hundaan malee buddeena qofaan hin jiraatu’*jedhamee barreeffameera**” jedheen.

⁵ Ergasii diiyaabiloos gara magaalaa qulqulluutti isa geessee fiixee mana qagullummaa irra dhaabachiise. ⁶ Akkanas jedheen; “Ati yoo ilma Waaqaa taate, gad of darbadhu. Akkana jedhamee barreeffameeraatii:

“Inni ergamoota isaa siif ni ajaja;
isaanis akka ati miilla keetiin dhagaatti hin buuneef,
harka isaaniitiin ol si fuudhu.”[†]

⁷ Yesuus immoo deebisee, “**‘Waaqa kee Goofticha hin qorin’*jedhamee barreeffameera**” jedheen.

⁸ Ammas diiyaabiloos tulluu akka malee ol dheeraa tokkotti ol isa baasee mootumoota addunyaa hundaa fi ulfina isaanii isatti argisiise. ⁹ Akkanas jedheen; “Yoo ati gad jettee naaf sagadde, waan kana hundumaa siifin kenna.”

¹⁰ Yesuusis, “**‘Seexana nana, narraa fagaadhu! ‘Waaqa kee Gooftichaaf sagadi; isuma qofa tajaajili’§jedhamee barreeffameeraatii**” jedheen.

¹¹ Diyaabiloosis isa dhiisee deeme; ergamoonni immoo dhufanii isa tajaajilan.

Yesuus Lallaba Jalqabuu Isaa

¹² Yesuus yommuu akka Yohannis mana hidhaatti galfame dhaga’etti Galiilaatti deebi’e. ¹³ Innis Naazreetii ba’ee gara Qifirnaahom ishee biyya Zebuuloonii fi Niftaalem keessatti qarqara galaanaatti argamtu sanaa dhaqee achi jiraate; ¹⁴ kunis akka dubbiin karaa Isaayyaas raajichaatiin dubbatame sun raawwatamuuf ta’e; dubbichis akkana jedha:

¹⁵ “Biyyi Zebuuloonii fi biyyi Niftaalem
kanneen Yordaanos gama,

qarqara Daandii Galaanaa irra jiran,
Galiilaan Namoota Ormaas,

¹⁶ sabni dukkana keessa jiraatu,
ifa guddaa argeera;

warra biyya gaaddidduu du’aa keessa jiraataniifis,
ifni ba’eera.”*

¹⁷ Yesuus yeroo sanaa jalqabee, “**Mootummaan samii dhi’aateeraatii qalbii jijjiirradhaa**” jedhee lallabuutti ka’e.

Waamamuu Barattoota Jalqabaa

4:18-22 kwf – Mar 1:16-20; Luq 5:2-11; Yoh 1:35-42

¹⁸ Yesuus utuu qarqara Galaana Galiilaa irra deemaa jiruu, obboloota lama jechuunis Simoon isa Phexros jedhamuu fi obboleessa isaa Indiriiyaasin arge. Isaanis qurxummii qabdoota waan ta’anii kiyyoo galaanatti darbachaa turan. ¹⁹ Yesuusis, “**Kottaa, na duukaa bu’aa; anis akka isin qabduu namootaa taataniif isin nan erga**” jedheen.

²⁰ Isaanis yommusuma kiyyoo isaanii dhiisanii isa duukaa bu’an.

²¹ Innis utuu achii ka’ee deemuu obboloota gara biraa lama jechuunis Yaaqoob ilma Zabdewoosii fi obboleessa isaa Yohannisin arge. Isaanis abbaa isaanii Zabdewoos wajjin kiyyoo isaanii qopheeffachaa bidiruu keessa turan. Yesuusis isaan waame; ²² isaanis yommusuma bidiruu sanaa fi abbaa isaanii dhiisanii isa duukaa bu’an.

Yesuus Dhukkubsattoota Fayyisuu Isaa

²³ Yesuus manneen sagadaa isaanii keessatti barsiisaa, wangeela mootummaa lallabaa, dhibee fi dhukkuba saba keessa jiru hunda fayyisaa Galiilaa guutuu keessa deeme. ²⁴ Oduun waa’ee isaas Sooriyaa hunda keessatti dhaga’ame; namoonnis warra dhukkuba garaa garaatiin qabaman, warra dhukkuba hamaan dhiphatan, warra hafuura hamaan qabaman, warra dhukkuba gaggabdootiin dhiphatanii fi warra dhagni irratti du’e isatti fidan; innis isaan fayyise. ²⁵ Tuunni namoota baay’ees Galiilaadhaa, Magaalaa Kurnanii, Yerusaleemii, Yihuudaa fi biyya Yordaanos gamaatii isa duukaa bu’e.

5

Warra Eebbifamoo

5:3-12 kwf – Luq 6:20-23

* 4:4 4:4 KeD 8:3 † 4:6 4:6 Far 91:11,12 ‡ 4:7 4:7 KeD 6:16 § 4:10 4:10 KeD 6:13 * 4:16 4:16 Isa 9:1,2

¹ Yesuus yommuu namoota baay'ee argetti, tulluutti ol ba'ee taa'e. Barattoonni isaa gara isaa dhufan; ² innis isaan barsiisuu jalqabe. Akkanas jedhe:

³ **“Warri hafuuraan hiyyeeyyii ta’an eebbifamoo dha; mootummaan samii kan isaaniitii.**

⁴ **Warri gaddan eebbifamoo dha; jajjabina ni argatuutii.**

⁵ **Warri garraamiin eebbifamoo dha; lafa ni dhaaluutii.**

⁶ **Warri qajeelummaa beela’anii fi dheebotan eebbifamoo dha; isaan ni quufuutii.**

⁷ **Araara qabeeyyiin eebbifamoo dha; araara ni argatuutii.**

⁸ **Warri garaan isaanii qulqulluu eebbifamoo dha; Waaqa ni arguutii.**

⁹ **Warri nagaa buusan eebbifamoo dha; ijoollee Waaqaa ni jedhamuutii.**

¹⁰ **Warri qajeelummaadhaaf jedhanii ari’ataman eebbifamoo dha; mootummaan samii kan isaaniitii.**

¹¹ **“Yommuu namoonni sababii kootiif jedhanii isin arrabsan, yommuu isin ari’atanii fi yommuu waan hamaa gosa hundaa sobaan isin irratti dubbatan isin eebbifamoo dha. ¹² Sababii gatiin keessan samii keessatti guddaa ta’eef iilichaa; gammadaas; isaan raajota isin dura turanis haaluma kanaan ari’ataniiruutii.**

Soogiddaa fi Ifa

¹³ **“Isin soogidda lafaa ti. Garuu soogiddi yoo mi’aa isaa dhabe, mi’aan isaa akkamiin deebifamuu danda’a? Gad gatamee miillaan dhidhiitama malee si’achi waan tokko illee hin fayyadu.**

¹⁴ **“Isin ifa addunyaa ti. Magaalaan gaara gubbaa jiru tokko dhokachuu hin danda’u. ¹⁵ Yookaan namoonni ibsaa qabsiisanii gombisaa jala hin kaa’an. Qooda kanaa baattuu isaa irra kaa’u; ibsaan sunis namoota mana keessa jiran hundaaf ifa kenna. ¹⁶ Akka namoonni hojii keessan isa gaarii arganii abbaa keessan kan samii irraatiif ulfina kennaniif ifni keessanis akkasuma fuula namootaa duratti haa ifu.**

Raawwatamuu Seeraa

¹⁷ **“Isin waan ani Seera yookaan Raajota diiguu dhufe hin se’inaa; ani isaan raawwachuuf malee diiguuf hin dhufne. ¹⁸ Ani dhuguman isinitti hima; hamma samii fi lafti darbanitti, Seerri guutummaatti raawwatama malee seericha keessaa qubeen tokko iyyuu, tuqaan xinnoon ishee iyyuu gonkumaa hin baddu. ¹⁹ Kanaafuu namni ajajawwan kanneen keessaa xinnaa isaa illee diigu, kan akka warri kaanis diiganiif barsiisu kam iyyuu mootummaa samii keessatti xinnaa jedhama; namni ajajawwan kanneen eeguu fi kan warra kaanis barsiisu kam iyyuu garuu mootummaa samii keessatti guddaa jedhama. ²⁰ Ani isinittin hima; qajeelummaan keessan qajeelummaa Fariisotaatii fi qajeelummaa barsiistota seeraa yoo caaluu baate isin dhugumaan mootummaa samiitti hin galtan.**

Nama Ajeesuu

5:25,26 kwf - Luq 12:58,59

²¹ **“Isin akka bara dheeraan dura namootaan, ‘Hin ajjeesin; nama ajjeese kamitti iyyuu ni muramaa’* jedhame dhageessaniirtu. ²² Ani garuu isinittin hima; nama obboleessa isaatti dheekkamu hundumaa murtiitu eeggata. Namni obboleessa isaatiin ‘Raattuu’ jedhu hundis murtii waldaatti dhi’aata. Nama obboleessa isaatiin ‘Doofaa nana!’ jedhu immoo ibidda gahaannamtu isa eeggata.**

²³ **“Kanaafuu ati yeroo kenna kee iddoo aarsaatti dhi’eessitutti yoo akka obboleessi kee komii sirraa qabu yaadatte, ²⁴ kenna kee achuma iddoo aarsaa duratti dhiisii dhaqiitii duraan dursii obboleessa keetti araarami; ergasii kottuutii kenna kee dhi’eessi.**

²⁵ **“Amajaajii kee isa mana murtiitti si geessaa jiru wajjin dafii walii gali. Kanas utuma isa wajjin karaa jirtuu godhi; yoo kanaa achii amajaajiin kee dabarsee abbaa seeraatti si kenna; abbaan seeraa immoo poolisiitti si kenna; atis mana**

* 5:21 5:21 Bau 20:13

hidhaatti darbatamta. ²⁶ Ani dhuguman sitti hima; ati hamma saantima ishee dhumaa baaftutti achii hin baatu.

Ejja

²⁷ "Isin akka, 'Hin ejjin'" jedhame dhageessaniirtu. ²⁸ Ani garuu isinittin hima; namni hawwiidhaan dubartii ilaalu hundinuu yaada isaatti ishee wajjin ejjeera. ²⁹ Yoo iji kee mirgaa si gufachiise, of keessaa baasii gati. Dhagni kee guutuun gahaannamitti darbatamuu irra, kutaa dhagna keetii keessaa tokko dhabuu siif wayyaatii. ³⁰ Yoo harki kee mirgaa si gufachiise of irraa murii gati. Dhagni kee guutuun gahaannamitti galuu irra, kutaa dhagna keetii keessaa tokko dhabuu siif wayya.

Wal Hiikuu Dhirsaa fi Niitii

³¹ "Namni niitii isaa hiiku kam iyyuu, 'Waraqaa ragaa hiikkaa haa ken-uuf' jedhameera. ³² Ani garuu isinittin hima; namni utuu isheen halalummaa hin hojjetin niitii isaa hiiku kam iyyuu akka isheen ejjitu ishee taasisa; namni dubartii hiikamte fuudhu kam iyyuus ni ejja.

Kakaa

³³ "Ammas akka warra duritiin, 'Waan kakatte Gooftaadhaaf guuti malee sobaan hin kakatin' jedhame dhageessaniirtu. ³⁴ Ani garuu isinittin hima; gonkumaa hin kakatinaa: samiidhaan hin kakatinaa; inni teessoo Waaqaatii; ³⁵ yookaan lafaan hin kakatinaa; isheen ejjeta miilla isaatii; yookaan Yerusaalemiin hin kakatinaa; isheen magaalaa Mooticha Guddaatii. ³⁶ Mataa keetiinis hin kakatin; ati rifeensa tokko illee addeessuu yookaan gurraachesuu hin dandeessuutii. ³⁷ Wannii isin jechuu qabdan, 'Eeyyee' yookaan 'Waawuu' haa ta'u; wannii kanaa achii kam iyyuu isa hamaa sana irraa dhufa.

Qooda Ijaa, Ija

³⁸ " 'Qooda ijaa, ija; qooda ilkaanii immoo ilkaan' akka jedhame dhageessaniirtu. ³⁹ Ani garuu isinittin hima. Nama hamaadhaan hin morkatinaa. Yoo namni tokko maddii kee mirgaa si kabale, kaanis itti qabi. ⁴⁰ Yoo namni tokko si himatee kittaa kee sirraa fudhate, kootii kees kenniif. ⁴¹ Yoo namni tokko akka ati gara kiiloo meetira tokkoo fi walakkaa isa wajjin deemtu si dirqisiise, ati immoo gara kiiloo meetira sadii isa wajjin deemi. ⁴² Nama si kadhatuuf kenni; nama sirraa liqeeffachuu barbaaduttis dugda hin garagalchin.

Diina Jaallachuu

⁴³ " 'Ollaa kee jaalladhu; diina kee jibbi' akka jedhame dhageessaniirtu. ⁴⁴ Ani garuu isinittin hima; diinota keessan jaalladhaa; warra isin ari'ataniifis kadhadaa; ⁴⁵ kanaanis abbaa keessan kan samii irraatiif ijoollee ni taatu. Inni warra hamoo fi warra gaggaariidhaaf aduu isaa ni baasa; qajeeltotaa fi jal'ootaafis bokkaa ni roobsa. ⁴⁶ Isin warra isin jaallatan qofa yoo jaallattan gatii maalii argattu? Kana immoo qaraxxoonni iyyuu ni godhu mitii? ⁴⁷ Isin yoo obboloota keessan qofa nagaan gaafattan warra kaan caalaa maal hojjechuutti jirtu? Kana immoo ormoonni iyyuu ni godhu mitii? ⁴⁸ Akkuma abbaan keessan inni samii irraa mudaa hin qabne sana, isinis warra mudaa hin qabne ta'aa.

6

Rakkataaf Waa Kennuu

¹ "Akka isaan isin arganiif jettanii 'Hojii qajeelummaa' keessan fuula namootaa duratti akka hin hojjenneef of eeggadhaa. Yoo akkas gootan abbaa keessan kan samii irraa biraa gatii hin qabaattaniitii.

² "Kanaafuu ati yommuu warra rakkataniif waa kennitutti akka fakkeessi-toonni namoota biratti jajamuuf jedhanii manneen sagadaa keessattii fi karaa irratti godhan sana malakataan hin labsatin. Ani dhuguman isinitti hima; isaan gatii isaanii argataniiru. ³ Yeroo ati rakkattootaaf waa kennitutti garuu waan harki kee mirgaa godhu, harki kee bitaa hin beekin; ⁴ kunis akka kennaan kee dhoksaan ta'uuf. Abbaan kee inni waan dhoksaatti hojjetamu argu sun ifaan ifatti gatii siif kenna.

Kadhannaa

6:9-13 kwf - Luq 11:2-4

⁵ "Isin yommuu kadhattan akka fakkeessitootaa hin ta'inaa; isaan namatti mul'achuuf jedhanii manneen sagadaa keessaa fi golee karaa irra dhaabatanii kadhachuu jaallatuutii. Ani dhuguman isinitti hima; isaan gatii isaanii argataniiru. ⁶ Ati garuu yeroo kadhattu mana keetti ol gali; balbala cufadhuutii Abbaa kee isa hin mul'anne sana kadhaddhu. Abbaan kee inni waan dhoksaatti hojjetamu argu sun ifaan ifatti gatii siif kenna. ⁷ Isinis yommuu kadhattan akka ormootaa dubbii faayidaa hin qabne irra hin deddeebi'inaa; isaan baay'ina dubbii isaaniitiin waan isaaniif dhaga'amu se'u. ⁸ Isin akka isaanii hin ta'inaa; abbaan keessan utuma isin hin kadhatin iyyuu waan isin barbaachisu ni beekaatii.

⁹ "Egaa akkana jedhaa kadhaddhaa:

" 'Yaa Abbaa keenya kan samii irra jirtu, maqaan kee haa qulqullaa'u;

¹⁰ mootummaan kee haa dhufu;

fedhiin kee akkuma samii irratti ta'e sana, lafa irrattis haa ta'u.

¹¹ Buddeena keenya kan guyyuma guyyaa har'a nuu kenni.

¹² Akkuma nu warra yakka nutti hojjetaniif dhiifnu sana, atis yakka keenya nuuf dhiisi.

¹³ Isa hamaa jalaa nu baasi malee qoramatti nu hin galchin.*
Mootummaan, humni, ulfinnis bara baraan kan kee ti.

Ameen.†

¹⁴ Yoo isin namootaaf cubbuu isaanii dhiifan, Abbaan keessan inni samii irraas akkasuma isiniif dhiisaatii. ¹⁵ Yoo isin namootaaf cubbuu isaanii dhiisuu baattan garuu, Abbaan keessanis akkasuma cubbuu keessan isiniif hin dhiisu.

Sooma

¹⁶ "Isin yommuu soomtanitti akka fakkeessitootaa fuula hin dukkaneeffatinaa; isaan akka soomuutti jiran argisiifachuuf jedhanii fuula isaanii hammeessu. Ani dhuguman isinitti hima; isaan gatii isaanii argataniiru. ¹⁷ Ati garuu yeroo soomtu mataa kee dibadhu; fuula kees dhiqadhu. ¹⁸ Kunis akka sooma kee sana abbaa kee isa namatti hin mul'anne malee namni hin beekneefii dha. Abbaan kee inni waan dhoksaatti hojjetamu argu sun gatii kee ifaan ifatti siif kenna.

Badhaadhummaa Samii Irraa

6:22-23 kwf - Luq 11:34-36

¹⁹ "Isin iddoo itti bilii fi daana'oon balleessituu fi iddoo itti hatuun cabsitee hatu lafa irratti badhaadhummaa ofii keessaniif hin kuufatinaa. ²⁰ Garuu iddoo itti bilii fi daana'oon nyaattee hin balleessinee fi iddoo itti hatuun cabsitee hin hanne samii irratti badhaadhummaa ofii keessaniif kuufadhaa. ²¹ Idduma badhaadhummaan kee jiru sana garaan kees jiraatii.

²² "Iji ibsaa dhagnaa ti. Iji kee fayyaa taanaan, dhagni kee guutuun ifaan guutama. ²³ Yoo iji kee fayyaa hin ta'in garuu, dhagni kee guutuun ni dukkanaa'a. Erga ifni si keessa jiru sun dukkanaa'ee, dukkanni sun hammaa haa jabaatu ree!

²⁴ "Namni gooftota lama tajaajiluu danda'u tokko iyyuu hin jiru. Isa tokko jibbitee isa kaan jaallattatii; yookaan isa tokkoof of kennitee isa kaan immoo tuffatta. Isinis Waaqaa fi Maallaqa tajaajiluu hin dandeessan.

Hin Yaadda'inaa

6:25-33 kwf - Luq 12:22-31

²⁵ "Kanaafuu ani isinittin hima; 'Maal nyaanna yookaan maal dhugna?' jettanii waa'ee jireenya keessanii hin yaadda'inaa; yookaan 'maal uffanna?' jettanii waa'ee dhagna keessanii hin yaadda'inaa. Jireenyi nyaata hin caaluu? Dhagnis uffata hin caaluu? ²⁶ Mee simbirroota samii ilaalaa; isaan hin faacaafatan yookaan hin haammatan yookaan gombisaatti hin galfatan; ta'us Abbaan keessan inni samii irraa isaan soora. Isin immoo isaan caalaa gatii guddaa qabdu mitii? ²⁷ Isin keessaa namni yaadda'uudhaan hojjaa isaa irratti dhundhuma tokko dabalachuu danda'uu eenyu?

* 6:13 6:13 Akka Giriikotaatti qoramatti jechuun qormaataatti jechuu. † 6:13 6:13 Yookaan isa hamaa jalaa hiikkaawwan durii tokko tokko jecha isa / Mootummaan, humni, ulfinnis bara baraan kan kee ti. Ameen jedhu hin gaban.

²⁸ “Isin maaliif waa’ee uffataa yaaddoftu? Daraaraawwan dirree akkamitti akka guddatan mee ilaalaa. Isaan hin dhama’an yookaan hin fo’an. ²⁹ Ani garuu isinittin hima; Solomoon iyyuu ulfina isaa hunda keessatti, akka tokkoo isaaniitti hin uffanne. ³⁰ Isin yaa warra amantii xinnoo nana. Waagni erga marga dirree kan har’a jiruu fi kan bor immoo ibiddatti naqamutti iyyuu akkasitti uffisee, isinitti immoo guddaa caalchisee hin uffisuu ree? ³¹ Kanaafuu, ‘Maal nyaanna?’ yookaan ‘Maal dhugna?’ yookaan ‘Maal uffanna?’ jettanii hin yaadda’inaa. ³² Kana hunda ormoonni iyyuu ni barbaaduutii; Abbaan keessan inni samii irraa akka wanni kun hundinuu isin barbaachisu ni beeka. ³³ Garuu duraan dursaatii mootummaa isaatii fi qajeelummaa isaa barbaadaa; wanni kun hundinuu akkasuma isiniif kennama. ³⁴ Kanaafuu waa’ee boriitiif hin yaadda’inaa; bor ofii isaatiif ni yaadda’aatii. Hamminni guyyaa sanaa mataan isaa guyyicha ni ga’a.

7

Nama Kaanitti Muruu

7:3-5 kwf - Luq 6:41,42

¹ “Akka isinitti hin muramneef namoota kaanitti hin murinaa. ² Murtiidhuma isin namatti murtaniin isinitti muramaatii; safartuu ittiin safartaniinis isiniif safarama.

³ “Ati maaliif jirma ija kee keessa jiru arguu dhiiftee huuba ija obboleessa keetii keessa jiru ilaalta? ⁴ Ati utuu jirmi ija kee keessa jiruu akkamitti obboleessa keetiin, ‘Kottu mee ani huuba ija kee keessa jiru siif nan baasa’ jechuu dandeessa? ⁵ Fakkeessitu nana; duraan dursiitii jirma ija kee keessa jiru baafadhu; ergasiis huuba ija obboleessa keetii keessa jiru baasuudhaaf sirriitti argita.

⁶ “Waan qulqulluu sarootaaf hin kenninaa; lula keessanis booyyee dura hin buusinaa. Yoo kana gootan isaan miilla isaaniitiin dhidhiitu; gara galanis isin cicciru.

Kadhadaa, Barbaadaa, Balbala Rurrukutaa

7:7-11 kwf - Luq 11:9-13

⁷ “Kadhadaa, isiniif ni kennamaa; barbaadaa, ni argattuu; rurrukutaa, balballi isiniif ni banamaa. ⁸ Namni kadhatu hundi ni argataatii; namni barbaadu ni argata; nama rurrukutuufis balballi ni banama.

⁹ “Isin keessaa namni yoo ilmi isaa buddeena isa kadhate, dhagaa kennuuf eenyu? ¹⁰ Yookaan yoo inni qurxummii isa kadhate, bofa kennuuf eenyu?

¹¹ Erga isin warri hamoon iyyuu kennaa gaarii ijoollee keessaniif kennuu beektanii, abbaan keessan inni samii irraa immoo hammam caalchisee warra isa kadhataniif kennaa gaarii haa kennuu ree! ¹² Kanaafuu waan akka namoonni isiniif godhan barbaaddan hundumaa isinis akkasuma isaaniif godhaa; Seerris Raajonnis kanumaatii.

Karra Dhiphaa fi Karra Bal’aa

¹³ “Karra dhiphaadhaan seenaa. Karaan badiisatti geessu bal’aadhaatii; karri isaas bal’aa dha; namoonni ittiin seenanis baay’ee dha. ¹⁴ Garuu karri isaa dhiphaa dha; karaan jireenyatti nama geessu qal’aa dha; warri isa argatanis muraasa.

Mukaa fi Ija Isaa

¹⁵ “Raajota sobaa warra kal’ee hoolaa uffatanii gara keessan dhufan, kanneen keessi isaanii garuu yeeyyii akka malee beela’ee waa cicciratu ta’e irraa of eeggadhaa. ¹⁶ Isin ija isaaniitiin isaan beektu. Namoonni qoraattii irraa wayinii yookaan sokorruu irraa harbuu ni ciruu? ¹⁷ Akkasumas mukni gaariin hundumtuu ija gaarii naqata; mukni gadheen immoo ija gadhee naqata. ¹⁸ Mukni gaariin ija gadhee naqachuu hin danda’u; mukni gadheenis ija gaarii naqachuu hin danda’u. ¹⁹ Mukni ija gaarii hin naqanne hundi muramee ibiddatti naqama. ²⁰ Kanaaf isin ija isaaniitiin isaan beektu.

²¹ “Nama fedhii Abbaa koo isa samii irraa raawwatu malee namni, ‘Yaa Gooftaa, yaa Gooftaa’ naan jedhu hundi mootummaa samiitti hin galu. ²² Guyyaa sana namoonni hedduun, ‘Yaa Gooftaa, yaa Gooftaa, nu maqaa keetiin raajii dubbanneerra mitii? Maqaa keetiin hafuurota hamoo baafneerra mitii? Maqaa keetiin dinqii hedduu hojjenneerra mitii?’ naan jedhu. ²³ Ani immoo, ‘Narraa

fagaadhaa! Isin warra hammina hojjettan, ani gonkumaa isin hin beekne' jedhee ifaan ifatti isaanitti nan hima.

Ijaartota Ogeeyyii fi Gowwoota

7:24-27 kwf - Luq 6:47-49

²⁴ “Kanaafuu namni dubbii koo kana dhaga’ee hojjiidhaan argisiisu hundi, nama ogeessa mana isaa kattaa irratti ijaarrate fakkaata. ²⁵ Bokkaan roobee, lolaan lola’ee, bubbeenis bubbisee mana sana dha’e; manichi garuu waan kattaa irratti hundeeffameef hin jigne. ²⁶ Namni dubbii koo kana dhaga’ee hojjiidhaan hin argisiifne hundi garuu nama gowwaa mana isaa cirracha irratti ijaarrate fakkaata. ²⁷ Bokkaan roobee, lolaan lola’ee, bubbeenis bubbisee manicha dha’e; manni sunis ni jige; jiguun isaas akka malee hamaa ture.”

²⁸ Yommuu Yesuus dubbii kana dubbatee raawwatetti namoonni barsiisa isaa ni dinqisiifatan; ²⁹ inni akka barsiistota seeraatti utuu hin ta’in, akka nama taayitaa qabu tokkootti isaan barsiisa tureetti.

8

Namicha Lamxaa’aa

8:2-4 kwf - Mar 1:40-44; Luq 5:12-14

¹ Yeroo Yesuus gaara irraa bu’etti, tuuta namoota baay’etu isa duukaa bu’e. ² Kunoo namichi lamxaa’aan tokkos dhufee, fuula isaa duratti jilbeenfatee, “Yaa Gooftaa, yoo fedhii kee ta’e, ati na qulqulleessuu ni dandeessa” jedheen.

³ Yesuus harka isaa hiixatee namicha qaqqabee, “**Fedhii koo ti; qulqullaa’i!**” jedheen. Lamxiin isaas yeruma sana qulqullaa’e. ⁴ Ergasiis Yesuus, “**Nama tokkotti illee akka hin himne beekkadhu. Garuu dhaqiitii akka isaaniif ragaa ta’uuf lubatti of argisiisi; kennaa Museen ajaje sana illee dhi’eessi**” jedheen.

Amantii Ajajaa Dhibbaa

8:5-13 kwf - Luq 7:1-10

⁵ Yeroo Yesuus Qifirnaahom seenetti, ajajaan dhibbaa tokko gara isaa dhufee akkana jedhee isa kadhate; ⁶ “Yaa Gooftaa, tajaajilaan koo dhagni irratti du’ee mana ciisa; akka malees dhiphachaa jira.”

⁷ Yesuus, “**Ani dhufeen isa fayyisa**” jedheen.

⁸ Ajajaan dhibbaa sun immoo akkana jedhee deebiseef; “Yaa Gooftaa, ati bantii mana kootii jala seenuun naaf hin malu. Garuu dubbicha qofa dubbadhu; tajaajilaan koo ni fayyaatii. ⁹ Ani mataan koo iyyuu nama taayitaa jala jiruu dha; loltootas of jalaa qaba. Isa tokkoon, ‘Deemi’ nan jedha; innis ni deema; isa kaaniin immoo, ‘Kottu’ nan jedha; innis ni dhufa. Tajaajilaa kootiin, ‘Waan kana hojjedhu’ nan jedha; innis ni hojjeta.”

¹⁰ Yesuus yommuu waan kana dhaga’etti dinqifatee warra isa duukaa bu’aa turaniin akkana jedhe; “**Ani dhuguma isinittin hima; ani Israa’el keessatti nama amantii guddaa akkanaa qabu tokko illee hin arganne. ¹¹ Ani isinittin hima; namoonni hedduun ba’a biiftuutii fi lixa biiftuutii ni dhufu; isaanis Abrahaam, Yisihaaqii fi Yaaqoob wajjin mootummaa samii keessatti maaddiitti ni dhi’aatu. ¹² Ijoolleen mootummaa garuu dukkana alaatti gad darbatamu; achitti boo’uu fi ilkaan qaruuu ta’a.**”

¹³ Yesuus deebisee ajajaa dhibbaa sanaan, “**Akkuma amantii keetii siif haa ta’u; deemi!**” jedhe. Tajaajilaan isaas yeruma sana fayye.

Yesuus Nama Hedduu Fayyisuu Isaa

8:14-16 kwf - Mar 1:29-34; Luq 4:38-41

¹⁴ Yesuus yommuu mana Phexros seenetti, haati niitii Phexros dhukkuba dhagna gubaadhaan qabamtee ciiftee arge. ¹⁵ Innis harka ishee tuqe; dhagna gubaan sunis ishee dhiise; isheenis kaatee isa tajaajiluu jalqabde.

¹⁶ Galgala sanas namoota hafuurota hamoon qabaman hedduu gara isaa fidan; innis jecha tokkoon hafuurota sana baase; dhukkubsattoota hundumaa ni fayyise. ¹⁷ Kunis akka dubbiin karaa Isaayyaas raajichaatiin, “Inni dhibee keenya nurraa fuudhe;

dhukkuba keenyas ni baate”^{*}
jedhame sun raawwatamuuf ta’e.

Gatii Yesuus Duukaa Bu’uun Nama Baasisu

8:19-22 kwf - Luq 9:57-60

* 8:17 8:17 Isa 53:4

¹⁸ Yesuus yommuu tuuta namoota baay'ee naannoo isaatti argetti akka gama ce'aniif ajaje. ¹⁹ Barsiisaan seeraa tokkos gara isaa dhufee, "Yaa barsiisaa, ani iddoo ati dhaqxu hundatti si duukaa nan bu'a" jedhe.

²⁰ Yesuusis deebisee, "**Waangooni boolla qabu; simbirroonis man'ee qabu; Ilmi Namaa garuu iddoo itti mataa isaa irkifatu illee hin qabu**" jedhe.

²¹ Barattoota isaa keessaas inni tokko, "Yaa Gooftaa, dura akka ani dhaqee abbaa koo awwaalladhu naa eeyyamii!" jedheen.

²² Yesuus garuu, "**Warri du'an du'aa isaanii haa awwaallatan; ati immoo na duukaa bu'i**" jedheen.

Yesuus Bubbee Jabaa Gab gochuu Isaa

8:23-27 kwf - Mar 4:36-41; Luq 8:22-25

8:23-27 kwi - Mat 14:22-33

²³ Yommuu inni bidiruu yaabbatettis, barattooni isaa isa duukaa bu'an. ²⁴ Akkuma tasaa bubbeen hamaan tokko galaana irratti ka'e; dambaliinis bidiruu sana irra gara gale. Yesuus garuu rafaa ture. ²⁵ Barattooni isaa gara isaa dhufanii, "Yaa Gooftaa, nu oolchi! Nu dhumuufii!" jedhanii isa dammaqsan.

²⁶ Innis deebisee, "**Isin warra amantii xinnoo nana; maaliif akkana sodaattu?**" jedheen. Ka'ees bubbee sanaa fi galaana sana ifate; tasgabbiin guddaanis ni ta'e.

²⁷ Namoonnis dinqifatanii, "Namni bubbee fi galaanni ajajamaniif kun nama akkamii ti?" jedhan.

Yesuus Namoota Hafuura Hamaan Qabaman Fayyisuu Isaa

8:28-34 kwf - Mar 5:1-17; Luq 8:26-37

²⁸ Yommuu Yesuus gama ce'ee biyya Gadareen ga'etti, namoonni hafuura hamaan qabaman lama iddoo awwaalaatii ba'anii itti dhufan. Isaanis waan akka malee hamoo turaniif namni tokko iyyuu karaa sana irra darbuu hin danda'u ture. ²⁹ Isaanis, "Yaa ilma Waaqaa, ati maal nurraa barbaadda? Utuu yeroon sun hin ga'in nu dhiphisuu dhufte moo?" jedhanii iyyan.

³⁰ Hoomaan booyyee guddaan isaas xinnoo isaan irraa fagaatee dheedaa ture. ³¹ Hafuuronni hamoon sunis, "Yoo nu baafte, gara hoomaa booyyee sanaatti nu ergi" jedhanii Yesuusin kadhatan.

³² Innis, "**Dhaqaa!**" jedheen. Isaanis namicha keessaa ba'anii hoomaa booyyee sanatti galan; hoomaan sun guutuunis ededa hallayyaa irraa gad gugatee galaanatti nam'ee bishaan keessatti dhume. ³³ Warri booyyee'wan tiksan sunis baqatanii magaalaa seenan; isaanis waan hunda, waan namoota hafuurota hamoon qabamanii turan irra ga'es ni odeessan. ³⁴ Magaalaan sun guutuunis Yesuusin arguuf ba'e. Yommuu isa argettis akka inni biyya isaanii keessaa ba'uuf isa kadhate.

9

Yesuus Nama Dhagni Irratti Du'e Fayyisuu Isaa

9:2-8 kwf - Mar 2:3-12; Luq 5:18-26

¹ Yesuus bidiruu yaabbatee galaana ce'ee gara magaalaa isaa dhufe. ² Kunoo, jarri tokko nama dhagni irratti du'ee siree irra ciisu tokko gara isaa fidan. Yesuusis yommuu amantii isaanii argetti namichaan, "**Ilma koo jabaadhu; cubbuun kee siif dhiifameeraatii**" jedhe.

³ Kana irratti barsiistota seeraa keessaa tokko tokko garaa isaanii keessatti, "Kunoo, namichi kun Waaqa arrabsa!" jedhan.

⁴ Yesuusis yaada isaanii beekke akkana jedhe; "**Isin maaliif garaa keessan keessatti waan hamaa yaaddu?**" ⁵ "**Cubbuun kee siif dhiifameera**" jechuu moo "**Ka'ii deemi**" jechuutu salphaa dha? ⁶ "**Ani garuu akka Ilmi Namaa cubbuu namaaf dhiisuudhaaf lafa irratti taayitaa qabu akka beektan nan barbaada.**" Kanaafuu inni namicha dhagni irratti du'e sanaan, "**Ka'i; siree kee fudhadhuutii mana keetti gali**" jedhe. ⁷ Namichis ka'ee mana isaatti gale. ⁸ Namoonnis yommuu waan kana arganitti ni dinqifatan; Waaqa taayitaa akkasii namaaf kenneefis ulfina kennan.

Waamamuu Maatewos

9:9-13 kwf - Mar 2:14-17; Luq 5:27-32

⁹ Yesuus achii ka'ee utuu deemuu namicha Maatewos jedhamu tokko utuu inni iddoo itti qaraxa walitti qaban taa'uu argee, "**Na duukaa bu'i**" jedheen. Maatewosis ka'ee isa duukaa bu'e.

¹⁰ Yeroo Yesuus mana Maatewositti irbaata nyaachaa turetti, qaraxxoonnii fi cubbamooni baay'een dhufanii isaa fi barattoota isaa wajjin nyaatan. ¹¹ Fariisonni

yommuu waan kana arganitti, “Barsiisaan keessan maaliif qaraxxootaa fi cubbamoota wajjin nyaata?” jedhanii barattoota isaa gaafatan.

¹² Yesuus immoo waan kana dhageenyaan akkana jedhe; **“Ogeessi fayyaa warra dhukkubsataniif malee warra fayyaa qabaniif hin barbaachisu.** ¹³ **Garuu dhaqaatii dubbiin, ‘Ani araaran fedha malee aarsaa hin fedhu’;** jedhu sun maal jechuu akka ta’e hubadhaa. **Ani cubbamoota waamuufin dhufe malee qajeeltota waamuuf hin dhufneetii.”**

Gaaffii Waa’ee Soomaa

9:14-17 kwf – Mar 2:18-22; Luq 5:33-39

¹⁴ Barattoonni Yohannis dhufanii, “Sababiin utuu nuu fi Fariisonni soomnuu, barattoonni kee hin soomneef maali?” jedhanii isa gaafatan.

¹⁵ Yesuus immoo akkana jedhee deebise; **“Keessummoonni misirrichaa akkamiin utuu inni isaan wajjin jiruu gadduu danda’u? Yeroon itti misirrichi isaan biraa fudhatamu ni dhufa; isaanis yeroo sana ni soomu.**

¹⁶ **“Namni uffata moofaa irratti erbee haaraa erbu tokko illee hin jiru; erbeen sun uffata sana irraa tarsiisaatii; tarsi’aan sunis isa duraa ni caala.** ¹⁷ **Akkasuma immoo namoonni daadhii wayinii haaraa qalqalloo moofaatti hin naqan. Yoo isaan itti naqan qalqallichi ni dho’a; daadhiinis ni dhangala’a; qalqalloonis horoomaa ba’a. Daadhiin wayinii haaraan garuu yoo qalqalloo haaraatti naqame lachanuu yeroo dheeraa turu.”**

Intala Duutee fi Dubartii Dhukkubsatte

9:18-26 kwf – Mar 5:22-43; Luq 8:41-56

¹⁸ Utuu inni waan kana dubbachaa jiruu, bulchaan mana sagadaa tokko dhufee fuula isaa duratti jilbeenfatee, “Intalli koo ammuma na duraa duute. Garuu kottuutii harka kee ishee irra kaa’i; isheenis ni jiraattii” jedheen. ¹⁹ Yesuus ka’ee barattoota isaa wajjin isa duukaa bu’e.

²⁰ Kunoo, dubartiin dhiigni ishee waggaa kudha lama dhangala’aa ture tokko dugda isaa duubaan dhuftee handaara uffata isaa tuqxe. ²¹ Isheenis garaa ishee keessatti, “Ani yoon uffatuma isaa illee tuqe nan fayya” jettee yaaddee turteetii.

²² Yesuusis garagalee ishee ilaalee, **“Yaa intalaa, amantiin kee si fayyiseeraatii jabaadhu!”** jedheen. Dubartiin sunis yeruma sana fayyite.

²³ Yesuusis yommuu mana bulchaa mana sagadaa sanaa seenee warra ulullee afuufanii fi uummata wacu argetti, ²⁴ **“Asii deemaa! Intalattiin rafteerti malee hin duunee”** jedhe. Isaan garuu isatti kolfan. ²⁵ Erga namoonni gad baafamanii booddees inni ol seenee harka intalattii qabe; isheenis kaatee dhaabatte. ²⁶ Oduun waa’ee kanaas biyya sana guutuu keessa faca’e.

Yesuus Jaamota Lama Fayyisuu Isaa

²⁷ Yesuus utuu achii ka’ee deemaa jiruu, jaamonni lama isa duukaa bu’anii, “Yaa Ilma Daawit nu maari!” jedhanii iyyan.

²⁸ Yommuu inni mana seenettis jaamonni sun gara isaa dhufan; innis, **“Akka ani waan kana gochuu danda’u ni amantuu ree?”** jedhee isaan gaafate.

Isaanis, “Eeyyee, yaa Gooftaa!” jedhanii deebisaniif. ²⁹ Yesuusis ija isaanii qaqqabee, **“Akkuma amantiin keessanii isiniif haa ta’u”** jedheen. ³⁰ Iji isaanis ni baname. Yesuusis, **“Akka namni tokko iyyuu waan kana hin beekne of eeggadhaa”** jedhee jabeessee isaan akeekkachiise. ³¹ Jarri garuu achii ba’anii biyya sana hunda keessatti waa’ee isaa odeesan.

³² Utuu isaan gad ba’uutti jiranuu jarri tokko nama hafuura hamaadhaan qabamee dubbachuu hin dandeenye tokko Yesuusitti fidan. ³³ Namichi sunis erga hafuurri hamaan isa keessaa baafamee booddee ni dubbate. Namoonnis, “Wanni akkanaa gonkumaa Israa’el keessatti hin argamne” jedhanii dinqifatan.

³⁴ Fariisonni garuu, “Inni hangafa hafuurota hamootiin hafuurota hamoo baasa” jedhan.

Hojjettoonni Muraasa

³⁵ Yesuus manneen sagadaa isaanii keessatti barsiisaa, wangeela mootummaa lallabaa, akkasumas dhibee fi dhukkuba hunda irraa namoota fayyisaa magaalawwanii fi gandoota hunda keessa deeme. ³⁶ Innis yommuu tuuta namootaa argetti garaa laafeef; isaan akkuma hoolota tiksee hin qabneetti dhiphatanii, gatamaniis turaniitii.

³⁷ Barattoota isaatiinis akkana jedhe; **“Midhaan walitti qabamu baay’ee dha;**

hojjettoonni garuu muraasa. ³⁸ **Kanaaf akka Gooftaan midhaan sanaa gara lafa qotiisaa midhaan isaatti hojjettoota erguuf isa kadhadhaa.”**

10

Yesuus Barattoota Kudha Lamaan Erguu Isaa
 10:2-4 kwf - Mar 3:16-19; Luq 6:14-16; Hoj 1:13
 10:9-15 kwf - Mar 6:8-11; Luq 9:3-5; 10:4-12
 10:19-22 kwf - Mar 13:11-13; Luq 21:12-17
 10:26-33 kwf - Luq 12:2-9
 10:34,35 kwf - Luq 12:51-53

¹ Yesuus barattoota isaa kudha lamaan ofitti waamee akka isaan hafuurota xuraa’oo baasaniif, dhibee fi dhukkuba hundumaa akka fayyisaniif taayitaa kenneef.

² Maqaan ergamoota kudha lamaaniis kana:

Jalqabatti Simoon isa Phexros jedhamuu fi obboleessa isaa Indiriiyaas,
 Yaaqoob ilma Zabdewoosii fi obboleessa isaa Yohannis,

³ Fiiliphooos, Bartaloomewoos,
 Toomaas, Maatewos isa qaraxa walitti qabu,
 Yaaqoob ilma Alfewoosii fi Taadewoos,

⁴ Simoon Hinaafticha, Yihuudaa Keeriyoticha isa Yesuusin dabarsee kenne.

⁵ Yesuusis warra kudha lamaan kanneen erge; akkanas jedhee isaan ajaje; **“Gara Namoota Ormaa hin dhaqinaa; magaalaaawwan Samaariyaa tokko illee hin seeninaa.** ⁶ **Qooda kanaa gara hoolota mana Israa’el kanneen badan sanaa dhaqaa.** ⁷ **Yommuu dhaqanittis, ‘mootummaan samii dhi’aateera’ jedhaa lallabaa.** ⁸ **Dhukkubsattoota fayyisaa; warra du’an kaasaa; warra lamxaa’an qulqulleessaa; hafuurota hamoo baasaa. Tola waan argattaniif toluma kennaa.**

⁹ **“Sabbata keessanitti warree yookaan meetii yookaan sibiila diimaa hin qabatinaa;** ¹⁰ **karaa keessaniif korojoo yookaan kittaa lama yookaan kophee yookaan ulee hin qabatinaa; hojjetaaf waan isa barbaachisu argachuun ni malaatii.** ¹¹ **Magaalaa yookaan ganda seentan kam iyyuu keessa nama malu barbaadaa; hamma achii baatanittis manuma isaa turaa.** ¹² **Yommuu mana sana seentanittis nagaa gaafadhaa.** ¹³ **Nagaan keessan yoo mana sanaaf male, mana sanaaf haa ta’u; yoo isaaf hin malin garuu nagaan keessan isiniif haa deebi’u.** ¹⁴ **Yoo namni tokko illee isin simachuu baate yookaan dubbii keessan dhaga’uu baate, yeroo mana yookaan magaalaa sanaa baatanitti awwaara miilla keessanii dhadha’adhaa.** ¹⁵ **Ani dhuguma isinittin hima; guyyaa murtiitti magaalaa sana irra Sodoomii fi Gomoraaf ni salphata.**

¹⁶ **“Kunoo, ani akka hoolotaa gara gidduu yeeyyiittin isin erga. Kanaafuu akka bofaa ogeeyyii, akka gugee garraamii ta’aa.** ¹⁷ **Namoota irraa of eeggadhaa; isin dabarfamtanii yaa’iitti ni kennamtu; manneen sagadaa keessattis ni garafamtu.** ¹⁸ **Isinis akka isaaniif fi Namoota Ormaatti dhuga baatota taataniif anaaf jettanii fuula bulchitootaatiif fi moototaa duratti ni dhi’effamtu.** ¹⁹ **Yommuu dabarsanii isin kennanis akkamitti akka dubbattan yookaan maal akka dubbattan hin yaadda’inaa. Wannii isin dubbattan yeruma sanatti isiniif kennamea;** ²⁰ **Hafuura Abbaa keessaniitu isin keessaa dubbata malee isintu dubbata miti.**

²¹ **“Obboleessi dabarsee obboleessa du’atti kenna; abbaan dabarsee ijoollee isaa du’atti kenna; ijoolleenis warra isaaniitti ka’anii isaan ajjeesu.** ²² **Namni hundinuu sababii kootiif isin jibba; kan hamma dhumaatti jabaatee dhaabatu garuu ni fayya.** ²³ **Yommuu magaalaa tokko keessatti isin ari’atanitti, gara magaalaa kaaniitti baqadhaa; ani dhuguma isinittin hima; hamma Ilmi Namaa dhufutti magaalaaawwan Israa’el hundumaa keessa naannoftanii waliin hin geessan.**

²⁴ **“Barataan barsiisaa isaatii ol miti; garbichis gooftaa isaatii ol miti.** ²⁵ **Barataan tokko akka barsiisaa isaa ta’uun, garbichi tokko immoo akka gooftaa isaa ta’uun ni ga’a. Erga abbaa manaatiin ‘Bi’eelzebuul’ jedhani, warra mana isaa jiraataniin immoo hammam kana caalaa haa jedhan ree!**

²⁶ **“Kanaafuu isaan hin sodaatinaa. Wannii haguugamee utuu hin mul’ifamin hafu yookaan wannii dhokfamee utuu hin beekamin hafu tokko iyyuu hin jiruutii.** ²⁷ **Waan ani dukkana keessatti isinitti himu guyyaa adiin odeessaa; waan gurraatti**

isinitti hasaasan, bantii manaa irraa labsaa. ²⁸ Warra foon malee lubbuu ajjeesuu hin dandeenye hin sodaatinaa. Qooda kanaa Isa gahaannam keessatti foonii fi lubbuu balleessuu danda'u sana sodaadhaa. ²⁹ Daaloteen lama saantima tokkotti gurguramu mitii? Isaan keessaa garuu tokko iyyuu fedhii Abbaa keessanii malee lafa hin buutu. ³⁰ Rifeensi mataa keessanii hundis lakkaa'ameera. ³¹ Kanaaf hin sodaatinaa; isin daalotee hedduu caalaa gatii qabduutii.

³² "Kanaafuu nama fuula namootaa duratti dhugaa naa ba'u kamiif iyyuu, anis fuula Abbaa koo isa samii irraa duratti dhugaa nan ba'a. ³³ Nama fuula namootaa duratti na ganu kam iyyuu garuu anis fuula Abbaa koo isa samii irraa duratti nan gana.

³⁴ "Isin waan ani lafa irratti nagaa buusuuf dhufe hin se'inaa. Ani goraadee fiduuf malee nagaa buusuuf hin dhufne. ³⁵ Ani,

"Nama abbaa isaatti,
intala immoo haadha isheetti,

niitii ilmaas amaatii isheetti kaasuuf dhufeeraatii;

³⁶ diinonni namaa, miseensotuma mana isaatii.*

³⁷ "Namni abbaa isaa yookaan haadha isaa na caalchisee jaallatu kam iyyuu naaf hin malu; namni ilma isaa yookaan intala isaa na caalchisee jaallatu kam iyyuu naaf hin malu. ³⁸ Namni fannoo ofii isaa baadhatee na duukaa hin buune kam iyyuu naaf hin malu. ³⁹ Namni lubbuu isaa oolfatu kam iyyuu lubbuu isaa ni dhaba; garuu namni naaf jedhee lubbuu isaa dhabu kam iyyuu lubbuu isaa ni argata.

⁴⁰ "Namni isin simatu na simata; namni na simatu immoo isa na erge sana simata. ⁴¹ Namni raajii tokko sababii inni raajii ta'eef simatu kam iyyuu gatii raajii ni argata; namni nama qajeelaa tokko sababii inni nama qajeelaa ta'eef simatu gatii nama qajeelaa tokkoo ni argata. ⁴² Ani dhuguman isinitti hima; namni kam iyyuu yoo warra xixinnaa kanneen keessaa isa tokkoof sababii inni barataa koo ta'eef bishaan qabbanaa'aa budduusaa tokkoo illee kenne, inni dhugumaan gatii isaa hin dhabu."

11

Yesuusii fi Yohannis Cuuphaa

11:2-19 kwf - Luq 7:18-35

¹ Yesuus erga barattoota isaa kudha lamaanii ajaja kennuu raawwatee booddee magaalaawwan Galiilaa keessatti barsiisuu fi lallabuuf jedhee achii ka'ee karaa isaa itti fufe.

² Yohannis mana hidhaa ta'ee yommuu waan Kiristoos hojjechaa ture dhaga'etti barattoota isaa ergee, ³ "Inni dhufuuf jiru sun si'i moo yookaan kan biraa eegganna?" jedhee isa gaafate.

⁴ Yesuus akkana jedhee deebiseef; "Deebi'aatii waan dhageessanii fi waan argitan Yohannisitti himaa; ⁵ jaamonni ni argu; warri naafatan ni deemu; warri lamxaa'an ni qulqullaa'u; warri duudan ni dhaga'u; warri du'an ni ka'u; hiyyeeyyiifis wangeelli ni lallabama. ⁶ Namni natti hin gufanne kam iyyuu eebbifamaa dha."

⁷ Akkuma barattoonni Yohannis ba'anii qajeelaniin, Yesuus akkana jedhee waa'ee Yohannis namootatti himuu jalqabe; "Isin maal arguuf gammoojjitti gad baatan? Shambaqqoo qilleensi raasu moo? ⁸ Yoos maal arguu baatan ree? Nama uffata miidhagaa uffate moo? Lakki, warri uffata miidhagaa uffatan masaraa moototaa jiru. ⁹ Yoos maal arguu baatan ree? Raajii moo? Eeyyee; ani isinittin hima; kan raajii iyyuu caalu. ¹⁰ Kunis isa waa'een isaa akkana jedhamee barreeffamee dha. "Kunoo, ani ergamaa koo isa fuula kee duraan

karaa kee qopheessu, si dura nan erga.*

¹¹ Ani dhuguma isinittin hima; namoota dubartoota irraa dhalatan keessaa namni Yohannis Cuuphaa caalu tokko iyyuu hin kaane; namni mootummaa samii keessatti nama hundumaa gad ta'e kam iyyuu garuu isa ni caala. ¹² Mootummaan samii bara Yohannis Cuuphaatii jalqabee hamma ammaatti humnaan dhiibbachaa jira; namoonni dhiibbatanis humnaan mootummaa sana argatu. ¹³ Raajonni hundinuu, Seerris hamma Yohannis Cuuphaatti raajii

dubbataaniiruutii. ¹⁴ **Isinis kana fudhachuuf yoo fedhii qabaattan, inni Eeliyaas isa dhufuuf jiruu dha.** ¹⁵ **Namni gurra dhaga'u qabu haa dhaga'u.**

¹⁶ **"Ani dhaloota kana maaliinan wal fakkeessuu danda'a? Isaan akkuma ijoollee iddoo gabaa taa'anii warra kaan waamanii akkana jedhanii ti:**

¹⁷ **"Nu ulullee isinii afuufne;**

isin garuu hin sirbine;

faaruu boo'ichaas faarsine;

isin garuu hin booye.'

¹⁸ **Yohannis yeroo dhufetti hin nyaatu, hin dhugus tureetii; isaan immoo, 'Inni hafuura hamaa qaba' jedhu.** ¹⁹ **Ilmi Namaa nyaachaa, dhugaas dhufe; isaan immoo, 'Kunoo albaadhessaa fi machaa'aa, michuu qaraxxootaatii fi cubbamootaa' jedhu. Ogummaan garuu hojii isheetiin mirkaneeffanti."**

Magaalaawwan Qalbii Hin Jijjiirranneef Wayyoo

11:21-23 kwf - Luq 10:13-15

²⁰ Ergasii Yesuus sababii magaalawwan inni itti hojii dinqii isaa gara caalu hojjete sun qalbii hin jijjiirratiniif akkana jedhee isaan balaaleffachuu jalqabe. ²¹ **"Yaa Koraaziin siif wayyoo! Yaa Beetisayidaa siif wayyoo! Hojiin dinqii isin keessatti hojjetame sun utuu Xiirrosii fi Siidoonaa keessatti hojjetamee jiraatee, isaan silaa yeroo dheeraan dura uffata gaddaa uffatanii, daaraas ofitti firfirsanii qalbii jijjiirratu turan.** ²² **Ani garuu isinittin hima; guyyaa murtiitti isin irra Xiirrosii fi Siidoonaa ni salphata.** ²³ **Atis yaa Qifirnaahom, hamma samiitti ol kaafamtaa? Lakki, sii'oolitti gad buuta. Hojiin dinqii kan si keessatti hojjetame sun utuu Sodoom keessatti hojjetamee jiraatee, isheen silaa hamma har'aatti ni jiraatti turte.** ²⁴ **Ani garuu sittin hima; guyyaa murtiitti sirra Sodoomiif ni salphata."**

Boqonnaa Abdachiifame

11:25-27 kwf - Luq 10:21,22

²⁵ Yesuus yeroo sana akkana jedhe; **"Yaa Abbaa, Gooftaa samiitti fi lafaa, sababii ati wantoota kanneen ogeeyyii fi hubattoota jalaa dhoksatee daa'immanitti mul'ifteef ani sin galateeffadha.** ²⁶ **Eeyyee yaa Abbaa, ati waan kana gochuutti gammaddeertaatii.**

²⁷ **"Abbaan koo waan hunda dabarsee natti kenneera. Abbaa malee namni tokko iyyuu ilma hin beeku; ilmaa fi nama Ilmi isa itti mul'isuu fedhu malee namni tokko iyyuu Abbaa hin beeku.**

²⁸ **"Isin dadhabdoonni, warri ba'aan isinitti ulfaate hundinuu gara koo kottaa; ani isinan boqochiisa.** ²⁹ **Waanjoo koo baadhaa; narraas baradhaa; waan ani garraamii fi gad of qabeessa ta'eef isin lubbuu keessaniif boqonnaa ni argattu.** ³⁰ **Waanjoon koo lafaa dha; ba'aan koos salphaa dha."**

12

Gooftaa Sanbataa

12:1-8 kwf - Mar 2:23-28; Luq 6:1-5

12:9-14 kwf - Mar 3:1-6; Luq 6:6-11

¹ Yesuus yeroo sana guyyaa Sanbataatiin lafa qotiisaa midhaanii keessa darbe. Barattoonni isaas beela'anii asheetii midhaanii ciratanii nyaachuu jalqaban. ² Fariisonni yommuu waan kana arganitti, "Ilaa! Barattoonni kee waan guyyaa Sanbataatiin hojjechuun seeraan hin eeyyamamne hojjetu" jedhaniin.

³ Innis akkana jedhee deebise; **"Yeroo Daawitii fi warri isa wajjin turan beela'anitti waan Daawit godhe isin hin dubbifnee?"** ⁴ **Inni mana Waaqaa seene; innii fi warri isa wajjin turanis buddeena kennaa nyaatan; buddeenni sun immoo luboota qofaaf malee isaanii hin eeyyamamu ture.** ⁵ **Yookaan akka luboonni mana qulqullummaa keessaa guyyaa Sanbataatiin Sanbata xureessan, ta'us akka yakka ta'ee isaanitti hin hedamne isin Seera keessatti hin dubbifnee?** ⁶ **Ani isinitti nan hima; kan mana qulqullummaa caalu as jira.** ⁷ **Isin, utuu dubbiin, 'Ani araaran fedha malee aarsaa hin fedhu' jedhu sun maal jechuu akka ta'e beektanii jiraattanii silaa warra yakka hin qabnetti hin murtan ture.** ⁸ **Ilmi Namaa Gooftaa Sanbataatii."**

⁹ Innis achii ka'ee mana sagadaa isaanii seene; ¹⁰ kunoo, namichi harki irratti goge tokkos achi ture. Isaanis sababii ittiin Yesuus himatan barbaadaa waan turaniif, "Guyyaa Sanbataatiin nama fayyisuun seeraa?" jedhanii isa gaafatan.

* 12:7 12:7 Hos 6:6

¹¹ Yesuus immoo akkana isaaniin jedhe; **“Isin keessaa namni hoolaa tokko qabu, yoo hoolaan sun guyyaa Sanbataatiin boolla keessa bu’e, kan harkisee hin baafanne jiraa?”** ¹² **Namni immoo hammam hoolaa caalaa gatii guddaa haa qabaatu ree! Kanaafuu Sanbataan waan gaarii hojjechuun eeyyamamaa dha.”**

¹³ Namichaanis, **“Harka kee diriirfadhu”** jedhe. Namichis harka diriirfate; harki isaas guutummaatti fayyee akkuma isa kaanii ta’e. ¹⁴ Fariisonni garuu gad ba’anii akka ittiin Yesuusin ajjeesan mari’atan.

Tajaajilaa Waaqni Filate

¹⁵ Yesuus waan kana beekke iddoo sanaa ka’ee deeme. Namoonni baay’eenis isa duukaa bu’an; innis dhukkubsattoota isaanii hunda fayyise; ¹⁶ akka isaan akka inni beekamu hin goones isaan ajaje. ¹⁷ Kunis akka wanni Isaayyaas raajichi dubbate sun raawwatamuuf ta’e; innis akkana jedha:

¹⁸ “Tajaajilaan koo inni ani filadhe,
inni ani jaalladhuu fi inni ani itti gammadu isa kana;

ani Hafuura koo isa irra nan kaa’a;
innis sabootatti murtii qajeelaa ni labsa.

¹⁹ Inni hin wacu yookaan hin iyyu;
namni tokko illee sagalee isaa karaa irratti hin dhaga’u.

²⁰ Inni hamma akka murtiin qajeelaan mo’u godhutti,
shambaqqoo buruqe hin cabsu;

fo’aa ibsaa kan seequs hin dhaamsu.

²¹ Saboonnis maqaa isaa ni abdatu.”†

Yesuusii fi Bi’eelzebuul

12:25-29 kwf - Mar 3:23-27; Luq 11:17-22

²² Yeroo sanatti namicha hafuura hamaan qabame, kan iji isaa jaamee arrabni isaas dubbachuu dide tokko gara isaa fidan; Yesuusis namicha sana fayyise; namichis dubbachuu fi arguu danda’e. ²³ Namoonni hundinuus dinqifatanii, “Kun Ilma Daawit ta’innaa?” jedhan.

²⁴ Fariisonni garuu yommuu kana dhaga’anitti, “Namichi kun Bi’eelzebuul, hangafa hafuurota hamoo qofaan hafuurota hamoo baasa” jedhan.

²⁵ Yesuusis yaada isaanii beekke akkana jedheen; **“Mootummaan gargar of qoodu hundinuu ni diigama; magaalaa yookaan maatiin gargar of qoodu hundinuu hin dhaabatu. Seexannis Seexana baafnaan, inni gargar of qooda. Yoos mootummaan isaa akkamitti dhaabachuu danda’a ree?”** ²⁷ **Erga ani Bi’eelzebuuliin hafuurota hamoo baasee, ijoolleen keessan immoo maaliin baasu ree? Kanaafuu isaan abbootii murtii isinitti ta’u. 28 Garuu ani Hafuura Waaqaatiin hafuurota hamoo baasa taanaan, yoos mootummaan Waaqaa isinitti dhufeera.**

²⁹ **“Yookaan namni kam iyyuu yoo duraan dursee nama jabaa tokko hidhe malee akkamitti mana nama jabaa sana seenee qabeenya isaa saamuu danda’a? Ergasii inni mana isaa saamuu danda’a.**

³⁰ **“Namni na wajjin hin jirre kam iyyuu naan morma; namni na wajjin walitti hin qabne kam iyyuus ni bittinneessa. 31 Kanaafuu ani isinittin hima; cubbuu fi arrabsoon hundinuu namaaf ni dhiifama; Hafuura Qulqulluu arrabsuun garuu hin dhiifamu. 32 Nama Ilma Namaatiin mormee jecha tokko dubbatu kamiif iyyuu ni dhiifama; nama Hafuura Qulqulluudhaan mormee dubbatu kamiif iyyuu garuu, addunyaa kana irratti yookaan addunyaa dhufuuf jiru irratti hin dhiifamu.**

³³ **“Muka gaarii qabaadhaa; iji isaa gaarii ta’aa; muka gadhee qabaadhaa; iji isaa gadhee ta’aa; mukni ija isaatiin beekamaatii. 34 Isin yaa ijoollee buutii nana, isin warri hamoon akkamitti waan gaarii dubbachuu dandeessu? Waan garaa guute afaan dubbataatii. 35 Namni gaariin waan gaarii garaa isaa keessa jiru keessaa waan gaarii baasa; namni hamaan immoo waan hamaa garaa isaa keessa jiru keessaa waan hamaa baasa. 36 Ani garuu isinittin hima; guyyaa murtiitti namoonni dubbii akkuma argan dubbatan hundumatti ni gaafatamu. 37 Dubbii keetiin qajeelaa taasifamtaatii; dubbii keetiinis sitti murama.”**

Mallattoo Yoonas

12:39-42 kwf - Luq 11:29-32

12:43-45 kwf - Luq 11:24-26

³⁸ Ergasii barsiistonni seeraatii fi Fariisonni tokko tokko, “Yaa barsiisaa, nu mallattoo sirraa arguu barbaanna” jedhaniin.

³⁹ Innis deebisee akkana isaaniin jedhe; “**Dhaloonni hamaa fi ejaan mallattoo barbaada! Garuu mallattoo Yonaas raajichaa sana malee mallattoon tokko iyyuu hin kennamuuf.** ⁴⁰ Akkuma Yonaas guyyaa sadii fi halkan sadii garaa qurxummii guddaa tokkoo keessa ture sana, Ilmi Namaas guyyaa sadii fi halkan sadii garaa lafaa keessa ni turaatii. ⁴¹ Namoonni Nanawwee guyyaa murtiitti dhaloota kana wajjin ka’anii itti muru; isaan lallaba Yonaasiin qalbii jijjiirrataniitii; kunoo, kan Yonaasiin caalu as jira. ⁴² Mootittiin kibbaa guyyaa murtiitti dhaloota kana wajjin kaatee itti murti; isheen ogummaa Solomoon dhaga’uuf jettee daarii lafaatii dhufteetii; kunoo, kan Solomoonin caalu as jira.

⁴³ “**Hafuurri xuraa’aan yommuu nama keessaa ba’utti, boqonnaa barbaacha lafa gogaa keessa joora; garuu hin argatu.** ⁴⁴ Innis, ‘Mana koo isa ani keessaa ba’e sanatti nan deebi’a’ jedha. Yommuu achi ga’uttis manicha duwwaa ta’ee, haramee qulqulleeffamee, qopheeffames argata. ⁴⁵ Ergasii dhaqee hafuurota biraa torba kanneen isa caalaa hamoo ta’an fudhatee dhufa; isaanis itti galanii achi jiraatu. Haalli namicha sanaa kan dhuma isa jalqabaa caalaa hammaata. Dhaloonni hamaan kunis akkasuma ta’a.”

Haadhaa fi Obbolloota Yesuus

12:46-50 kwf – Mar 3:31-35; Luq 8:19-21

⁴⁶ Utuu Yesuus amma iyyuu namootatti dubbachaa jiruu kunoo, haatii fi obbolloonni isaa isa wajjin haasa’uu barbaadanii ala dhadhaabachaa turan. ⁴⁷ Namni tokkos, “Haati keetii fi obbolloonni kee si wajjin haasa’uu barbaadanii ala dhadhaabatu” jedhee isatti hime.

⁴⁸ Innis deebiseefii, “**Haati koo eenyu? Obbolloonni koos eenyu fa’i?**” jedheen. ⁴⁹ Harka isaas gara barattoota isaatti qabee akkana jedhe; “**Haati kootii fi obbolloonni koo kunoo ti.** ⁵⁰ Namni fedhii Abbaa koo isa samii irraa guutu kam iyyuu obboleessa koo ti; obboleettii koo ti; haadha kootis.”

13

Fakkeenya Namicha Sanyii Facaasuu

13:1-15 kwf – Mar 4:1-12; Luq 8:4-10

13:16,17 kwf – Luq 10:23,24

13:18-23 kwf – Mar 4:13-20; Luq 8:11-15

¹ Guyyuma sana Yesuus manaa ba’ee galaana bira taa’e. ² Tuunni namootaa guddaan naannoo isaatti walitti qabame; utuu namoonni hundi qarqara galaanichaa dhadhaabachaa jiranuu, inni bidiruu yaabbatee taa’e. ³ Innis akkana jedhee waan baay’ee fakkeenyaan isaanitti hime; “**Kunoo, namichi sanyii facaasu tokko sanyii facaafachuu ba’e.** ⁴ Utuu inni facaasaa jiruu sanyiin tokko tokko karaa irra bu’e; simbirroonnis dhufanii nyaatanii fixan. ⁵ Kaan immoo lafa kattaa, iddoo biyyoo baay’ee hin qabne irra bu’e. Sanyiin sunis sababii biyyoon sun gad fageenya hin qabaatiniif dafee biqile. ⁶ Yommuu aduun baatetti garuu biqiltuun sun ni coollage; waan hidda hin qabaatiniifis ni goge. ⁷ Sanyiin biraas qoraattii keessa bu’e; qoraattiin sunis guddatee biqiltuu sana hudhe. ⁸ Ammas sanyiin kaan biyyoo gaarii irra bu’ee achitti ija naqate; garri tokko dachaa dhibba, kaan dachaa jaatama, kaan immoo dachaa soddama naqate. ⁹ Namni gurra qabu kam iyyuu haa dhaga’u.”

¹⁰ Barattoonnis gara isaa dhufanii, “Ati maaliif fakkeenyaan namootatti dubbatta?” jedhanii isa gaafatan.

¹¹ Innis akkana jedhee deebiseef; “**Icciiiti mootummaa samii beekuun isiniif kennameera; isaaniif garuu hin kennamne.** ¹² Kan qabu kamiif iyyuu itti dabalamee ni kennama; irraa hafaas ni qabaata. Kan hin qabne garuu wanni inni qabu iyyuu irraa fudhatama. ¹³ Wannani akkana jedhee fakkeenyaan isaanitti dubbadhuufis kana:

“**Isaan utuma ilaalanuu hin argan;**

utuma dhaggeeffatanuus hin dhaga’an yookaan hin hubatan.

¹⁴ **Raajiin Isaayyaas dubbate sun isaan irratti raawwatameera; innis akkana jedha:**

“**Dhaga’uu inuma dhageessu; garuu hin hubattan; ilaalus inuma ilaaltu; garuu hin qalbeeffattan.**

15 **Qalbiin saba kanaa doomeeraatii;
gurri isaanii sirriitti hin dhaga’u;
ija isaaniis dunuunfataniiru.**

**Utuu akkas ta’uu baatee silaa ija isaaniitiin arganii,
gurra isaaniitiin dhaga’anii,
qalbii isaaniitiinis hubatanii ni deebi’u turan;**

anis isaan nan fayyisa ture.*

16 Iji keessan garuu waan arguuf eebbifamaa dha; gurri keessanis waan dhaga’uuf eebbifamaa dha. 17 Ani dhuguma isinittin himaatii; raajonnii fi qajeeltonni baay’een waan isin argitan kana arguu hawwan; garuu hin argine; waan isin dhageessan kanas dhaga’uu hawwan; garuu hin dhageenye.

18 “Egaa fakkeenya namicha sanyii facaasuu maal akka ta’e dhaga’aa: 19 Yoo namni kam iyyuu dubbii mootummichaa dhaga’ee hubachuu baate, inni hamaan sun dhufee waan garaa isaa keessatti facaafame sana butata. Kun sanyii karaa irratti facaafamee dha. 20 Sanyiin lafa kattaa irratti facaafame, nama dubbicha dhaga’ee yommuuma gammachuun fudhatuu dha. 21 Garuu inni waan hidda hin qabneef yeroo gabaabaa qofa tura. Yeroo rakkinni yookaan ari’atamni sababii dubbichaatiif dhufutti inni dafee gufata. 22 Sanyiin qoraattii keessatti facaafame sunis nama dubbicha dhaga’u argisiisa; garuu yaaddoon addunyaa kanaatii fi gowwoomsaan qabeenyaa dubbicha hudhee ija naqachuu dhowwa. 23 Sanyiin biyyoo gaarii irratti facaafame garuu nama dubbicha dhaga’ee hubatu argisiisa. Innis ija kenna; garri tokko dhibba, kaan jaatama, kaan immoo soddoma naqata.”

Fakkeenya Aramaa

24 Yesuus akkana jedhee fakkeenya biraa isaanitti hime; “Mootummaan samii nama lafa qotiisaa isaa keessatti sanyii gaarii facaafate tokko fakkaata. 25 Garuu utuu namoonni rafanuu diinni isaa dhufee qamadii keessatti inkirdaada facaasee deeme. 26 Yeroo qamadiin sun guddatee ija naqatetti inkirdaadnis ni mul’ate.

27 “Garboonni abbaa lafa qotiisaa sanaas gara isaa dhufanii, ‘Gooftaa, ati lafa qotiisaa kee keessatti sanyii gaarii hin facaafnee? Yoos inkirdaadni eessaa dhufee?’ jedhaniin.

28 “Innis deebisee, ‘Diinatu kana hojjete’ jedhe.

“Garboonnis, ‘Akka nu dhaqqee buqqifnu ni barbaaddaa?’ jedhanii isa gaafatan.

29 “Namichi garuu akkana jedhee deebiseef; ‘Lakki, utuu inkirdaada buqqif-tanuu, akka isa wajjin qamadii hin buqqifneef dhiisaa. 30 Hamma yeroo haamaatti lachanuu walumaan haa guddatan. Anis yeroo sana warra midhaan haamaniin, ‘Jalqabatti inkirdaada sana buqqisaa; akka gubamuufis bissii bissiidhaan hidhaa; qamadii garuu walitti qabaatii gombisaa kootti naa naqaa’ jedhee isaanitti nan hima.’”

Fakkeenya Raacitiitii fi Sanyii Sanaaficaa

13:31,32 kwf - Mar 4:30-32

13:31-33 kwf - Luq 13:18-21

31 Innis akkana jedhee fakkeenya biraa isaanitti hime; “Mootummaan samii sanyii sanaaficaa kan namni fuudhee lafa qotiisaa isaa keessatti facaase tokko fakkaata. 32 Inni dhugumaan sanyii hunda irra xinnaa dha; erga guddatee garuu biqiltuu hunda caalee muka ta’a; simbirroonnis dhufanii dameewwan isaa irra jiraatu.”

33 Amma illee akkana jedhee fakkeenya biraa isaanitti hime; “Mootummaan samii raacitii dubartiin tokko fuutee hamma inni guutummaatti bukeessutti daakuu safartuu sadiitti makte fakkaata.”

34 Yesuus waan kana hundumaa fakkeenyaan namootatti dubbate; innis fakkeenyaan malee waan tokko illee isaanitti hin dubbanne. 35 Kunis akka wanni raajichi, “Ani fakkeenyaan afaan koo nan banadha;

waan gaafa addunyaan uumamee jalqabee dhokfames nan dubbadha”†
jedhe sun raawwatamuuf ta’e.

Hiikkaa Fakkeenya Inkirdaadaa

* 13:15 13:15 Isa 6:9,10 † 13:35 13:35 Far 78:2

³⁶ Yesuusis tuuta namootaa achumatti dhiisee mana ol seene. Barattoonni isaas gara isaa dhufanii, “Hiikkaa fakkeenya inkirdaada lafa qotiisaa keessaa sana nutti himi” jedhaniin.

³⁷ Innis akkana jedhee deebise; “**Namichi sanyii gaarii facaase sun Ilma Namaa ti.** ³⁸ **Lafti qotiisaa sun addunyaa dha; sanyiin gaariinis ijoollee mootummichaa ti.** Inkirdaadni sun ijoollee isa hamaa sanaa ti; ³⁹ **diinni inkirdaada facaase immoo diiyaabiloos dha. Haamaan dhuma addunyaa ti; warri haaman immoo ergamoota Waaqaa ti.**

⁴⁰ “**Akkuma inkirdaadni walitti qabamee ibiddaan gubamu sana, dhuma addunyaattis akkasuma ta’a.** ⁴¹ **Ilmi Namaa ergamoota isaa ni erga; isaanis waan cubbuutti nama geessu hundaa fi warra waan hamaa hojjetan hunda mootummaa isaa keessaa baasanii walitti qabu.** ⁴² **Boolla ibiddaattis isaan darbatu; achittis wawwaannaa fi ilkaan qaruuu ta’a.** ⁴³ **Yeroo sana qajeeltonni mootummaa Abbaa isaanii keessatti akka aduu ni ifu. Namni gurra qabu haa dhaga’u.**

Fakkeenya Qabeenya Dhokfameetii fi Lula

⁴⁴ “**Mootummaan samii qabeenya lafa qotiisaa keessa dhokfame fakkaata. Namni tokkos qabeenya kana argatee deebisee dhokse; innis waan gammadeef dhaqee waan qabu hunda gurguree lafa qotiisaa sana bitate.**

⁴⁵ “**Akkasumas mootummaan samii daldalaa lula gaarii barbaadu tokko fakkaata.** ⁴⁶ **Daldalaan sunis lula gatii guddaa tokko argate; innis dhaqee waan qabu hundumaa gurguree lula sana bitate.**

Fakkeenya Kiyoo

⁴⁷ “**Akkasumas mootummaan samii kiyoo galaanatti darbatamee qurxummii gosa hundaa walitti qabe fakkaata.** ⁴⁸ **Yeroo kiyoon sun guutamettis qurxummii qabdoonni gara qarqara galaanaatti isa harkisan. Ergasiis tataa’anii qurxummii gaarii filanii qodaa isaaniitti naqatan; qurxummii gadhee immoo ni gatan.** ⁴⁹ **Dhuma addunyaattis akkasuma ta’a. Ergamoonni dhufanii warra hamoo warra qajeeltota irraa gargar baasu; ⁵⁰ boolla ibiddaattis isaan darbatu; achittis wawwaannaa fi ilkaan qaruuu ta’a.”**

⁵¹ Yesuusis, “**Waan kana hunda hubattaniirtuu?”** jedhee isaan gaafate.

Isaanis, “Eeyyee” jedhanii deebisan.

⁵² Innis, “**Kanaafuu barsiisaan seeraa kan barataa mootummaa samii ta’e kam iyyuu abbaa manaa kan qabeenya haaraa fi moofaa mana mi’a isaa keessaa gad baasu tokko fakkaata”** jedheen.

Raajii Tuffatame

13:54-58 kwf - Mar 6:1-6

⁵³ Yesuus erga fakkeenya kana dubbatee raawwatee booddee achii ka’ee deeme.

⁵⁴ Innis gara magaalaa itti dhalatee dhaqee mana sagadaa isaanii keessatti namoota barsiisuu jalqabe; isaanis ni dinqisiifatan. Akkana jedhaniis gaafatan; “**Namichi kun ogummaa kanaa fi hojiiwwan dinqii kanneen eessaa argate?** ⁵⁵ **Inni ilma namicha muka soofu sanaati mitii? Maqaan haadha isaas Maariyaam mitii? Obbolloonni isaas Yaaqoob, Yoosif, Simoonii fi Yihuudaa mitii?** ⁵⁶ **Obboleettonni isaa hundinuu nu bira jiru mitii? Yoos namichi kun waan kana hundumaa eessaa argate?”** ⁵⁷ **Isaanis isatti gufatan.**

Yesuus garuu, “**Raajiin magaalaa itti dhalatee fi mana isaatti malee kabaja hin dhabu**” jedheen.

⁵⁸ Innis sababii amantii dhabuu isaaniitiif hojii dinqii hedduu achitti hin hojjenne.

14

Ajjeefamuu Yohannis Cuuphaa

14:1-12 kwf - Mar 6:14-29

¹ Bara sana Heroodis bulchaan oduu waa’ee Yesuus dhaga’e; ² innis tajaajiltoota isaatiin, “**Kun Yohannis Cuuphaa dha; inni warra du’an keessaa kaafameera! Sababiin hojiin dinqii isaan hojjetamuufis kanuma**” jedhe.

³ Heroodis sababii niitii obboleessa isaa Fiiliphoos, sababii Heroodiyaasiitiif jedhee Yohannisin qabee, hidhee mana hidhaatti galchee tureetii. ⁴ Kunis sababii Yohannis Heroodisiin, “**Ati ishee fuudhuun kee seera miti**” jechaa tureef. ⁵ Inni immoo Yohannisin ajjeesuu barbaade; garuu sababii namoonni Yohannisin akka raajiitti ilaalaa turaniif isaan sodaate.

⁶ Intalli Heroodiyaas guyyaa dhaloota Heroodisitti keessummoota duratti sirbitee Heroodisiin gammachiifte; ⁷ kanaafuu inni waan isheen gaafatte kam iyyuu isheef kennuuf kakuudhaan waadaa gale. ⁸ Isheenis haadha isheetiin gorfamtee, “Mataa Yohannis Cuuphaa gabatee irra kaa’ii naa kenni” jette. ⁹ Mootichis ni gadde; garuu sababii kakuu isaatii fi sababii warra isa wajjin maaddiitti dhi’aataniitiif jedhee akka wanni isheen barbaadde sun isheef kennamu ajaje; ¹⁰ innis nama ergee mana hidhaa keessatti mataa Yohannis isa irraa kute. ¹¹ Mataan isaas gabatee irra kaa’amee fidamee intalattiitti kenname; isheenis haadha isheetti geessite. ¹² Barattoonni Yohannis dhufanii reeffa isaa fuudhanii awwaalan. Isaanis dhaqanii Yesuusitti himan.

Yesuus Nama Kuma Shan Sooruu Isaa

14:13-21 kwf - Mar 6:32-44; Luq 9:10-17; Yoh 6:1-13

14:13-21 kwi - Mat 15:32-38

¹³ Yesuus yommuu waan kana dhaga’etti achii ka’ee kophaa isaa bidiruudhaan iddoo namni hin jirre tokko dhage. Namoonnis yommuu waan kana dhaga’anitti magaalawwanii ba’anii miillaan isa duukaa bu’an. ¹⁴ Yesuus yommuu bidiruu irraa bu’etti tuuta guddaa tokko arge; innis garaa laafeefii dhukkubsattoota isaanii fayyiseef.

¹⁵ Yommuu galgalaa’etti barattoonni gara isaa dhufanii, “Iddoon kun gammoojjii dha; aduunis dhiiteerti. Namoonni kunneen gara gandootaa dhaqanii akka nyaata bitataniif isaan gad dhiisi” jedhaniin.

¹⁶ Yesuus garuu, “**Deemuun isaan hin barbaachisu. Isinuu waan isaan nyaatan kennaafii**” jedhee deebise.

¹⁷ Isaanis, “Nu buddeena shanii fi qurxummii lama qofa asii qabna” jedhanii deebisan.

¹⁸ Yesuusis, “**Isuma natti fidaa**” jedhe. ¹⁹ Innis akka namoonni marga irra tataa’an ajajee buddeena shanii fi qurxummii lamaan sana fuudhee, gara samii ol ilalee galata galchee buddeena sana caccabsees barattootatti kenne; barattoonni immoo namootaaf kennan. ²⁰ Isaan hundi nyaatanii quufan; barattoonnis hurraa’aa hambifame gundoo kudha lama guutuu walitti qaban. ²¹ Warri nyaatanis dubartootaa fi ijoollee malee gara dhiira kuma shanii turan.

Yesuus Bishaan irra Deeme

14:22-33 kwf - Mar 6:45-51; Yoh 6:15-21

14:34-36 kwf - Mar 6:53-56

²² Yesuus yommuuma akka barattoonni bidiruu yaabbatanii hamma inni tuuta sana of irraa geggeessutti isa dura gamatti darbaniif isaan dirqisiise. ²³ Innis erga namoota of irraa geggeessee booddee kadhachuuf kophaa isaa gaaratti ol ba’ee. Yommuu galgalaa’ettis kophaa isaa achi ture; ²⁴ yeroo kanatti immoo bidiruun sun lafa irraa xinnoo achi hiixxee turte; sababii bubbeen fuula duraan itti bubbiseef bidiruun sun dambaliidhaan asii fi achi raafamaa turte.

²⁵ Yesuusis halkan keessaa kutaa afuraffaatti galaana irra deemaa gara isaanii dhufe. ²⁶ Barattoonnis yommuu galaana irra deemuu isaa arganitti akka malee rifatan. Sodaataniis, “Kun ekeraa dha” jedhanii iyyan.

²⁷ Yesuus garuu yommuuma, “**Jabaadhaa! Anumaatii hin sodaatinaa**” jedhee isaanitti dubbate.

²⁸ Phexros immoo, “Yaa Gooftaa! Egaa si taanaan, akka ani bishaan irra deemee gara kee dhufu na ajaji” jedhee deebiseef.

²⁹ Yesuusis, “**Kottu**” jedheen.

Phexros immoo bidiruu sana irraa bu’ee bishaan irra deemaa gara Yesuus dhufe. ³⁰ Yommuu bubbee jabaa sana argetti garuu ni sodaate; liqimfamuu jalqabnaanis, “Yaa Gooftaa na oolchi!” jedhee iyye.

³¹ Yesuus yommuuma harka isaa hiixatee isa qabee, “**Yaa namicha amantii xinnoo nana, ati maaliif mamte?**” jedheen.

³² Yommuu isaan bidiruu yaabbatanittis bubbeen sun gab jedhe. ³³ Warri bidiruu sana keessa turanis, “Ati dhuguma Ilma Waaqaa ti!” jedhanii isaaf sagadan.

³⁴ Isaanis yommuu gama ce’anitti Geensereexitti bidiruu irraa bu’an. ³⁵ Namoonni iddoo sanaas yommuu Yesuus beekanitti biyya naannoo sanaa hundatti dhaamsa ergan. Namoonnis dhukkubsattoota isaanii hunda isatti fidan; ³⁶ akka dhukkubsattoonni sun handaara wayyaa isaa illee tuqaniif isa kadhatan; warri handaara wayyaa isaa tuqan hundinuus ni fayyan.

15

Wantoota Nama Xureessan

15:1-20 kwf - Mar 7:1-23

¹ Ergasii Fariisonnii fi barsiistonni seeraa tokko tokko Yerusaaemii gara Yesuus dhufanii, ² “Barattoonni kee maaliif duudhaa maanguddootaa cabsu? Isaan yommuu buddeena nyaatanitti harka hin dhiqataniitii!” jedhan.

³ Yesuusis akkana jedhee deebise; **“Isinis maaliif duudhaa keessaniif jettanii ajaja Waaqaa cabsitu? ⁴ Waaqni, ‘Abbaa keetii fi haadha keetiif ulfina kenni,* namni abbaa isaa yookaan haadha isaa arrabsu kam iyyuu haa ajjeefamu’ jedheeraatii.**

⁵ Isin garuu yoo namni kam iyyuu akka wanni silaa abbaa isaatiif yookaan haadha isaatiif kennamuu malu ‘Waaqaaf kennameera’ jedhee dubbate, ⁶ inni waan sanaa abbaa isaatiif yookaan haadha isaatiif ulfina kennuu hin qabu jettu. Akkanaanis isin duudhaa keessaniif jettanii dubbii Waaqaa busheessitu. ⁷ Yaa fakkeessitoota! Isaayyaas yommuu waa’ee keessan raajii dubbatetti sirrii ture; innis akkana jedhe:

⁸ “‘Uumanni kun hidhii isaatiin na kabaja; garaan isaa garuu narraa fagoo jira.

⁹ Isaan akkanumaan na waaqeffatu; barsiisni isaaniis sirnuma namaa ti.’”

¹⁰ Yesuusis tuuta sana ofitti waamee akkana jedheen; **“Dhaga’aa; hubadhaas. ¹¹ Waan afaan namaa keessaa ba’utu nama xureessa malee wanni afaan namaa seenu nama hin xureessu.”**

¹² Ergasii barattoonni gara isaa dhufanii, “Ati akka Fariisonni dubbii kana dhaga’anii mufatan beektaa?” jedhanii gaafatan.

¹³ Innis deebisee akkana jedhe; **“Biqiltuun abbaan koo inni samii irraa hin dhaabin hundinuu ni buqqifama. ¹⁴ Isaan dhiisaa; isaan qajeelchitoota jaamota. Jaamaan yoo jaamaa qajeelche, isaan lachuu boolla keessa bu’u.”**

¹⁵ Phexrosis, “Mee hiikkaa fakkeenya kanaa nuu ibsi!” jedheen.

¹⁶ Yesuus immoo akkana jedhee isaan gaafate; **“Isinis hamma ammaatti hin hubattanii? ¹⁷ Akka wanni afaan seenu kam iyyuu garaa seenee achumaan darbee dhagna keessaa ba’u hin argitanii? ¹⁸ Wanni afaan namaatii ba’u garuu nama keessaa ba’a; namichas ni xureessa. ¹⁹ Sababiin isaas yaadni hamaan jechuunis ajjeesuun, ejjummaan, halalummaan, hanni, sobaan dhugaa ba’uun, maqaa nama balleessuun garaa namaa keessaa ba’aatii. ²⁰ Wantoota kanneentu nama ‘xureessa’ malee utuu harka hin dhiqatin nyaachuun nama hin xureessu.”**

Amantii Dubartii Kana’an Tokkoo

15:21-28 kwf - Mar 7:24-30

²¹ Yesuusis iddoo sanaa ka’ee gara biyya Xiirsoosii fi Siidonaatti qajelee. ²² Kunoo, dubartiin Kana’an tokko naannoo sanaa gara isaa dhuftee iyyaa, “Yaa Gooftaa, yaa Ilma Daawit, intalli koo hafuura hamaadhaan qabamtee akka malee dhiphachaa jirti; na maarii” jette.

²³ Yesuus garuu deebii tokko illee hin kennineef. Barattoonni isaas gara isaa dhufanii, “Kunoo isheen iyyaa nu faana deemtiitii achi deebisi” jedhanii isa kadhatan.

²⁴ Inni immoo, **“Ani hoolota mana Israa’el kanneen badan sana qofaafan ergame”** jedhee deebise.

²⁵ Dubartiin sunis dhuftee sagaddeefii, “Yaa Gooftaa na gargaari!” jette.

²⁶ Innis, **“Buddeena ijoollee fuudhanii saroota dura buusuun sirrii miti”** jedhee deebise.

²⁷ Isheenis, “Eeyyee yaa Gooftaa, saroonni iyyuu hambaa maaddii gooftota isaanii irraa harca’u nyaatu” jettee deebiftee.

²⁸ Yesuusis, **“Dubartii nana, amantiin kee guddaa dha! Akkuma fedhii keetii siif haa ta’u”** jedhee deebise. Intalli ishees sa’aatidhuma sana fayyite.

Yesuus Nama Kuma Afur Soore

15:29-31 kwf - Mar 7:31-37

15:32-39 kwf - Mar 8:1-10

15:32-39 kwi - Mat 14:13-21

²⁹ Yesuus achii ka’ee gara Galaana Galiilaa dhage. Gaarattis ol ba’ee taa’ee.

³⁰ Namoonni hedduunis warra okkolan, warra jaaman, warra naafatan, warra arrabni

* 15:4 15:4 Bau 20:12; KeD 5:16 † 15:4 15:4 Bau 21:17; Lew 20:9 ‡ 15:9 15:9 Isa 29:13

isaanii dubbachuu didee fi kanneen biraa hedduu fidanii miilla Yesuus jala kaa'an; innis isaan fayyise. ³¹ Namoonni sunis yommuu akka warri arrabni hin dubbanne dubbatan, warri naafatan fayyan, warri okkolan deeman, warra jaamaniif immoo akka iji isaanii baname arganitti ni dinqifatan. Waaqa Israa'eliifis ulfina kennan.

³² Yesuus barattoota isaa ofitti waamee, **"Ani namoota kanneeniif garaa nan laafa; isaan guyyaa sadii na bira turan; waan nyaatan tokko illee hin qaban. Akka isaan karaa irratti hin gaggabneefis ani agabuu isaanii gad isaan dhiisuu hin barbaadu"** jedhe.

³³ Barattoonni isaas deebisanii, "Buddeena tuuta guddaa akkanaa ga'u gammoojjii kana keessatti eessaa argachuu dandeenya?" jedhan.

³⁴ Yesuus immoo, **"Isin buddeena meeqa qabdu?"** jedhee gaafate.

Isaanis deebisanii, "Buddeena torbaa fi qurxummii xixinnoo muraasa qabna" jedhan.

³⁵ Innis akka namoonni sun lafa tataa'an itti hime. ³⁶ Ergasii buddeena torbanii fi qurxummii sana fuudhee erga galateeffatee booddee kukutee barattootatti kenne; isaanis namootaaf kennan. ³⁷ Isaan hundi nyaatanii kuufan. Ergasiis barattoonni hambaa gundoo torba guutuu walitti qaban. ³⁸ Baay'inni warra nyaataniis ijoollee fi dubartoota malee dhiira kuma afur ture. ³⁹ Yesuus erga tuuta sana of irraa geggeessee booddee bidiruu yaabbatee naannoo Magadaan dhaqe.

16

Mallattoon Gaafatamuu Isaa

16:1-12 kwf - Mar 8:11-21

¹ Fariisonnii fi Saduugonni gara Yesuus dhufanii akka inni samii irraa mallattoo isaan argisiisu gaafachuudhaan isa qoran.

² Innis akkana jedhee deebise; **"Isin yeroo galgalaa'utti, 'Samiin diimateera; caama ta'a' jettu; ³ ganama immoo, 'Samiin diimatee duumessaa'eeraatii har'a bokkaan jabaan ni rooba' jettu. Isin bifa samii addaan baasuu ni beektu; garuu mallattoo baraa addaan baasuu hin dandeesan. ⁴ Dhaloonni hamaa fi ejaan mallattoo barbaada; garuu mallattoo Yoonas malee mallattoon hin kennamuuf."** Yesuus isaan dhiisee deeme.

Raacitii Fariisotaatii fi Saduugotaa

⁵ Barattoonni yommuu galaanicha ce'anitti buddeena fudhachuu irraanfatani. ⁶ Yesuus, **"Beekkadhaa; raacitii Fariisotaatii fi Saduugotaa irraa of eeggadhaa"** isaanin jedhe.

⁷ Isaanis, "Kun sababii nu buddeena hin fidatiniif" jedhanii waan kana walii wajjin haasa'an.

⁸ Yesuus waan isaan haasa'an beekke akkana jedhee gaafate; **"Yaa warra amantii xinnoo nana, isin maaliif waa'ee buddeena dhabuu keessanii walii wajjin dudubbattu? ⁹ Isin amma iyyuu hin hubattanii? Buddeenni shan nama kuma shaniif dhi'effamee gundoo hammam guutuu akka walitti qabdan hin yaadattanii? ¹⁰ Yookaan buddeenni torba nama kuma afuriif dhi'effamee hambaa gundoo hammam guutuu akka walitti qabdan hin yaadattanii? ¹¹ Akka ani waa'ee buddeena isinitti dubbachaa hin turin isin akkamitti hin hubanne? Garuu raacitii Fariisotaatii fi Saduugotaa irraa of eeggadhaa."** ¹² Isaanis ergasii akka inni akka isaan raacitii buddeena irraa of eeggataniif utuu hin ta'in akka barsiisa Fariisotaatii fi Saduugotaa irraa of eeggataniif isaanitti himaa ture hubatan.

Phexros Eenyummaa Kiristoos Beeksise

16:13-16 kwf - Mar 8:27-29; Luq 9:18-20

¹³ Yesuus yeroo gara biyya Fiiliphoos Qiisaariyaa dhufetti, **"Namoonni ilma Naamaatiin eenyu jedhu?"** jedhee barattoota isaa gaafate.

¹⁴ Isaanis, "Namoonni tokko tokko inni Yohannis Cuuphaa dha jedhu; warri kaan inni Eeliyaas jedhu; kaan immoo inni Ermiyaas yookaan raajota keessaa isa tokko dha jedhu" jedhanii deebisan.

¹⁵ Innis, **"Isin hoo? Eenyu anaan jettu?"** jedhee gaafate.

¹⁶ Simoon Phexrosis, "Ati Kiristoos, ilma Waaqa jiraataa ti" jedhee deebise.

¹⁷ Yesuus immoo akkana jedhee deebiseef; **"Yaa Simoon ilma Yoonas, ati eebbifamaa dha; kana abbaa koo isa samii irraatu siif ibse malee nama miti. ¹⁸ Ani sittin hima; ati Phexrosii dha; kattaa kana irratti waldaa kiristaanaa koo nan ijaara; karri gahaannamis ishee hin mo'atu. ¹⁹ Ani furtuu mootummaa samii siifin kenna; wanni ati lafa irratti hiitu kam iyyuu samii irratti ni hidhama;**

wanni ati lafa irratti hiiktu kam iyyuu samii irrattis ni hiikama.” ²⁰ Ergasiis akka isaan akka inni Kiristoos ta’e nama tokkotti illee hin himneef barattoota isaa akeekkachiise.

Yesuus Duraan Dursee Waa’ee Du’a Isaa Dubbate
16:21-28 kwf – Mar 8:31-9:1; Luq 9:22-27

²¹ Yesuus yeroo sanaa jalqabee akka Yerusaaalem dhaqee harka maanguddootaatti, harka luboota hangafootaattii fi harka barsiistota seeraatti waan hedduun dhiphachuu qabu, akka ajjeefamuu qabuu fi akka guyyaa sadaffaatti immoo du’aa kaafamu barattoota isaatiif ibsuu jalqabe.

²² Phexrosis kophaatti baasee, “Yaa Gooftaa, kun gonkumaa hin ta’in! Kun sirraa haa fagaatu!” jedhee isa ifachuu jalqabe.

²³ Yesuus garuu of irra garagalee Phexrosiin, **“Yaa Seexana nana! Na duubatti deebi’i! Ati gufuu natti taateerta; ati kan namaa yaadda malee kan Waaqaa hin yaadduutii”** jedhe.

²⁴ Ergasii Yesuus barattoota isaatiin akkana jedhe; **“Namni kam iyyuu yoo na faana dhufuu barbaade, inni of haa ganu. Fannoo ofii isaa baadhatees na duukaa haa bu’u.** ²⁵ **Namni lubbuu isaa oolfachuu barbaadu kam iyyuu lubbuu isaa ni dhabaatii; garuu namni naaf jedhee lubbuu isaa dhabu kam iyyuu lubbuu isaa ni argata.** ²⁶ **Namni yoo addunyaa guutuu argatee lubbuu isaa immoo dhabe, bu’aan isaa maali? Yookaan namni qooda lubbuu isaa maal kennuu danda’a?** ²⁷ **Ilmi Namaa ulfina Abbaa isaatiin ergamoota isaa wajjin dhufuuf jiraatii; innis yeroo sana tokkoo tokkoo namaatiif akkuma hojii isaatti gatii isaa ni kenna.**

²⁸ **“Ani dhuguman isinitti hima; warra as dhadhaabachaa jiran keessaa namoonni tokko tokko hamma utuu Ilmi Namaa mootummaa isaatiin dhufuu arganitti du’a hin dhandhaman.”**

17

Bifti Yesuus Geeddaramuu Isaa
17:1-8 kwf – Luq 9:28-36
17:1-13 kwf – Mar 9:2-13

¹ Yesuus guyyaa ja’a booddee Phexrosin, Yaaqoobii fi Yohannis obboleessa Yaaqoob fudhatee kophaa isaaniitulluu dheeraa tokkotti ol baase. ² Innis achitti fuula isaaniit duratti geeddarama. Fuulli isaa akka aduu ife; uffanni isaas akkuma ifaa addaate. ³ Kunoo Musee fi Eeliyaas utuu Yesuus wajjin haasa’anuu isaaniit mul’atan.

⁴ Phexrosis Yesuusiin, “Yaa Gooftaa, as jiraachuun nuuf gaarii dha. Yoo fedhii kee ta’e, ani daasii sadii jechuunis tokko siif, tokko Museef, tokko immoo Eeliyaasiif asitti nan ijaara” jedhe.

⁵ Utuma inni dubbachaa jiruu kunoo, duumessi ifaan tokko isaan haguuge; duumes-sicha keessaas sagaleen tokko, “Kun Ilma koo isa ani jaalladhuu dha; ani isatti baay’ee nan gammada. Isinis isa dhaga’aa!” jedhe.

⁶ Barattoonnis yommuu waan kana dhaga’anitti akka malee sodaatanii adda isaaniitiin lafatti gombifaman. ⁷ Yesuus garuu itti dhi’aatee isaan tuqee, **“Ka’aa! Hin sodaatinaa”** jedheen. ⁸ Isaanis yommuu ol jedhanii ilaalanitti Yesuus malee nama tokko illee hin argine.

⁹ Utuu tulluu sana irraa bu’uutti jiranuus Yesuus, **“Hamma Ilmi Namaa warra du’an keessaa kaafamutti waan argitan sana nama tokkotti illee hin himinaa”** jedhee isaan seerrate.

¹⁰ Barattoonnis, “Yoos barsiistonni seeraa maaliif Eeliyaas akka duraan dursee dhufuu qabu dubbatu ree?” jedhanii isa gaafatan.

¹¹ Yesuus akkana jedhee deebise; **“Dhugumaan, Eeliyaas waan hunda iddootti deebisuuf jedhee duraan dursee ni dhufa.** ¹² **Ani garuu isinittin hima; Eeliyaas amma iyyuu dhufeera; isaanis isa hin hubanne; garuu waanuma fedhan hunda isatti hojjetan. Ilmi Namaas akkasuma harka isaaniitti dhiphachuuf jira.”**

¹³ Barattoonnis ergasii akka wanni inni isaanitti dubbachaa ture sun waa’ee Yohannis Cuuphaa ta’e hubatan.

Gurbaa Gaggabdoodhaan Qabame Tokko
17:14-19 kwf – Mar 9:14-28; Luq 9:37-42

¹⁴ Yommuu isaan gara tuuta sanaa dhufanittis namichi tokko Yesuusitti dhi’aatee fuula isaa duratti jilbeenfate; ¹⁵ akkanas jedhe; “Yaa Gooftaa, ilmi koo gaggabdoodhaan qabamee akka malee rakkachaa jiraatii naaf maari. Yeroo hedduu ibidda keessatti

yookaan bishaan keessatti kufa. ¹⁶ Ani barattoota keetti isa nan fide; isaan garuu isa fayyisuu hin dandeenye.”

¹⁷ Yesuusis deebisee, **“Isin dhaloota hin amannee fi jal’aa nana; ani hamma yoomiittin isin wajjin jiraadha? Hamma yoomiittin ani isinii obsa? Mee gurbicha as natti fidaa!”** jedhe. ¹⁸ Yesuusis hafuura hamaa sana ifate; hafuurri hamaanis sunis gurbaa sana keessaa ba’ee; gurbichis yommuuma fayye.

¹⁹ Ergasiis barattoonni kophaa isaanii gara Yesuus dhufanii, “Nu maaliif hafuura hamaa sana baasuu dadhabne?” jedhanii isa gaafatan.

²⁰ Innis akkana jedhee deebise; **“Sababii amantiin keessan xinnaateefii dha. Ani dhuguman isinitti hima; isin utuu amantiin xinnoo hamma sanyii sanaaficaa qabaattanii silaa tulluu kanaan, ‘Asii ka’ii achi darbi’ jechuu ni dandeessu; innis ni darba. Wannii isiniif hin danda’amne tokko iyyuu hin jiru. [²¹ Hafuurri hamaan akkanaa garuu soomaa fi kadhannaadhaan malee hin ba’u.”]**^{*}

²² Yeroo isaan Galiilaatti walitti qabamanitti inni akkana isaanii jedhe; **“Ilmi Namaa dabarfamee harka namootaatti ni kennama. ²³ Isaanis isa ni ajjeesu; inni immoo guyyaa sadaffaatti ni kaafama.”** Barattoonnis akka malee gaddan.

Gibira Mana Qulqullummaa

²⁴ Yommuu Yesuusii fi barattoonni isaa Qifirnaahom ga’anitti qaraxxoonni gara Phexros dhufanii, “Barsiisaan keessan gibira hin kaffaluu?” jedhanii gaafatan.

²⁵ Innis deebisee, “Ni kaffala” jedheen.

Yesuus yommuu Phexros mana seenetti duraan dursee, **“Yaa Simoon ati maal yaadda? Mootonni lafaa eenyu irraa qaraxaa fi gibira walitti qabu? Ijoollee isaanii irraa moo keessummoota irraa walitti qabu?”** jedhee gaafate.

²⁶ Phexrosis deebisee, “Keessummoota irraa walitti qabu” jedhe.

Yesuusis akkana jedhee deebiseef; **“Yoos ijoolleen isaanii bilisa. ²⁷ Garuu nu akka isaan hin mufachiifneef dhaqiitii okkoo galaanatti darbadhu. Qurxummii jalqabatti qabdu fuudhi; yommuu afaan isaa bantuttis maallaqa argatta. Maallaqa sanas geessiitii ana fi ofii keetiif isaanitti kenni.”**

18

Nama Mootummaa Samii Keessatti Nama Hunda Caalu

18:1-5 kwf - Mar 9:33-37; Luq 9:46-48

¹ Yeruma sana barattoonni gara Yesuus dhufanii, “Yoos mootummaa samii keessatti kan hundumaa caalu eenyu?” jedhanii gaafatan.

² Innis mucaa xinnaa tokko ofitti waamee isaan gidduu dhaabe. ³ Akkanas jedhe: **“Ani dhuguman isinitti hima; isin yoo deebitanii akkuma ijoollee taatan malee gonkumaa mootummaa samiitti hin galtan. ⁴ Kanaaf namni akka daa’ima kanaa gad of qabu kam iyyuu mootummaa samii keessatti nama hunda caala. ⁵ Namni daa’ima akkanaa tokko maqaa kootiin simatu kam iyyuu na simata.**

⁶ **“Namni kam iyyuu warra natti amanan xixinnaa kanneen keessaa tokko illee yoo gufachiise, dhagaan daakuu guddaan morma isaatti hidhamee tuujuba galaanaa keessa dhidhimuu isaaf wayya ture. ⁷ Sababii wantoota akka namoonni gufatan godhan sanaatiif addunyaaf wayyoo! Wantoonni akkanaa dhufuu qabu; garuu nama wantoonni kunneen karaa isaatiin dhufan sanaaf wayyoo! ⁸ Yoo harki kee yookaan miilli kee si gufachiise, of irraa kutii gati. Harka lama yookaan miilla lama qabaatee ibidda bara baraatti darbatamuu irra, dooluu taatee yookaan laamshoftee jireenyatti galuu siif wayya. ⁹ Yoo iji kee si gufachiise of keessaa baasii gati. Ija lama qabaatee ibidda gahaannamiitti darbatamuu irra ija tokko qabaatee jireenyatti galuu siif wayya.**

Fakkeenya Hoolaa Badee

18:12-14 kwf - Luq 15:4-7

¹⁰ **“Warra xixinnaa kanneen keessaa tokko illee akka hin tuffanneef of eeggadhaa. Ani isinitti nan hima; ergamoonni isaanii samii irratti yeroo hunda fuula Abbaa koo isa samii irraa ni arguutii. [¹¹ Ilmi Namaa isa bade oolchuudhaaf dhufetii.]”**^{*}

¹² **“Isin maal seetu? Namni tokko yoo hoolota dhibba qabaatee hoolota sana keessaas tokko bade, namichi sun sagaltamii sagallan hafan kaan tulluuwwan**

^{*} **17:21** 17:21 Waraabbileen durii tokko tokko luqqisaa 21 hin qaban. **18:11** 18:11 Hiikkaawwan tokko tokko dubbii Luq 19:10 irra jiru dabalatu.

^{*} **18:11** 18:11 Hiikkaawwan tokko tokko

irratti dhiisee tokkicha bade sana barbaaduu hin dhaquu? ¹³ Ani dhuguman isinitti hima; inni yoo hoolaa sana argate, hoolota sagaltamii sagallan hin badin irra hoolaa tokkicha sanatti caalaa ni gammada. ¹⁴ Akkasuma immoo isaan xixinnoo kanneen keessaa tokko iyyuu akka badu fedhii Abbaa keessan isa samii irraa miti.

Cubbuu Walitti Hojjechuu

¹⁵ “Yoo obboleessi kee cubbuu sitti hojjete, dhaqiitii iddoo isin lamaan qofti jirtanitti balleessaa isaa itti himi. Yoo inni si dhaga’e ati obboleessa kee deebifatteerta. ¹⁶ Yoo si dhaga’uu baate garuu ‘dubbiin hundinuu dhuga baatota lamaan yookaan sadiin waan mirkaneeffamuuf’ nama biraa tokko yookaan nama lama fudhadhuu dhaqi. ¹⁷ Yoo inni jara dhaga’uu dide waldaa kiristaanaatti himi; yoo inni waldaa kiristaanaa iyyuu dhaga’uu dide akka nama ormaattii fi akka qaraxxuutti isa fudhadhu.

¹⁸ “Ani dhuguman isinitti hima; wanni isin lafa irratti hiitan kam iyyuu samii irratti ni hidhama; wanni isin lafa irratti hiiktan kam iyyuu samii irrattis ni hiikama.

¹⁹ “Ammas ani isinitti nan hima; isin keessaa yoo namoonni lama lafa irratti waa’ee waan kadhatan kamii iyyuu walii galan Abbaan koo inni samii irraa isaaniif taasisa. ²⁰ Iddoo itti namoonni lama yookaan sadii maqaa kootiin walitti qabamanitti ani gidduu isaaniitti nan argamaatii.”

Tajaajilaa Dhiifama Hin Goone Tokko

²¹ Ergasii Phexros gara Yesuus dhufee, “Yaa Gooftaa, yoo obboleessi koo cubbuu natti hojjete ani yeroo hammam dhiisaaf? Hamma yeroo torbaattii?” jedhee gaafate.

²² Yesuus akkana jedhee deebiseef; “Ani sitti nan hima; yeroo torbaatamii torba malee yeroo torba miti.

²³ “Kanaafuu mootummaan samii mootii herrega garboota isaa harka jiru to’achuu barbaade tokko fakkaata. ²⁴ Akkuma inni herrega isaa to’achuu jalqabeenis nama mootichi taalaantii kuma kudhan irraa qabu tokko itti fidan. ²⁵ Namichi sun waan baasu dhabnaan gooftaan isaa akka inni, niitiin isaa, ijoolleen isaatii fi wanni inni qabu hundinuu gurguramanii gatiin sun kaffalamu ajaje.

²⁶ “Garbichi sunis miilla isaatti kufee, ‘Yaa gooftaa, naaf obsi; hunduma isaa iyyuu siif nan kaffalaa’ jedhee isa kadhate. ²⁷ Gooftaan garbicha sanaas garaa laafeef; gatii isa irraa qabus dhiiseefii gad isa lakkise.

²⁸ “Garbichi sun garuu akkuma achii ba’een garbicha akka isaa kan gatii diinaarii dhibbaa irraa qabu tokko arge. Innis morma namichaa hudhee qabee, ‘Waan ani sirraa qabu naa kaffali’ jedheen.

²⁹ “Garbichi akka isaa sunis miilla isaatti kufee, ‘Naaf obsi; waan narra jiru siif nan kaffalaa’ jedhee isa kadhate.

³⁰ “Inni garuu ni dide; gooda kanaa hamma inni gatii isaa kaffalutti mana hidhaatti isa galchisiise. ³¹ Garboonni kaan yommuu waan ta’e sana arganitti akka malee gaddan; dhaqaniis waan ta’e hundumaa gooftaa isaaniitti himan.

³² “Gooftichis garbicha sana ofitti waamee akkana jedheen; ‘Yaa garbicha hamaa! Ani sababii ati na kadhatteef gatii sirra ture hunda siif dhiise. ³³ Akkuma ani garaa siif laafe sana atis garbicha akka keetiitiif garaa laafuu hin qabduu?’ ³⁴ Gooftaan isaas aariidhaan hamma inni gatii sana hunda kaffalutti warra isa dhiphisaniitti dabarsee isa kenne.

³⁵ “Isinis yoo garaa keessan guutuudhaan obboleessa keessaniif dhiisuu baattan Abbaan koo inni samii irraa tokkoo tokkoo keessan akkana godha.”

19

Wal Hiikuu Dhirsaa fi Niitii

19:1-9 kwf - Mar 10:1-12

¹ Yesuus erga dubbii kana dubbatee fixatee booddee, Galilaadhaa ka’ee gama Yordaanos gara biyya Yihuudaa dhaqe. ² Namoonni baay’eenis isa duukaa bu’an; innis achitti isaan fayyise.

³ Fariisonni tokko tokkos isa qoruuf gara isaa dhufanii, “Namni tokko waanuma argeen niitii isaa hiikuun ni eeyyamamaa?” jedhanii gaafatan.

⁴ Yesuusis akkana jedhee deebise; **“Isin akka inni jalqabatti isaan uume sun, ‘dhiiraa fi dubartii taasisee isaan uume’* hin dubbifnee? ⁵ Inni akkana jedhee; ‘Sababii kanaaf namni abbaa fi haadha isaa dhiisee niitii isaatti maxxana; lamaan isaanii iyyuu foon tokko ta’u.’† ⁶ Egaa isaan si’achi foon tokko malee lama miti. Kanaafuu waan Waaqni tokko taasise namni gargar hin baasin.”**

⁷ Isaanis, “Yeos Museen maaliif akka namni tokko waraqaq ragaa hiikkaa kenneefi niitii isaa of irraa geggeessu ajaje ree?” jedhanii isa gaafatan.

⁸ Yesuusis akkana jedhee deebise; **“Museen sababii mata jabina keessaniitiif jedhee akka isin niitota keessan hiiktan isiniif eeyyame. Jalqabatti garuu akkana hin turre. ⁹ Ani isinittin hima; namni utuu isheen halalummaa hin hojjetin niitii isaa hiikee dubartii biraa fuudhu kam iyyuu ejja raawwata.”**

¹⁰ Barattoonni isaas, “Haalli dhirraa fi niitii akkana taanaan fuudhuu dhiisuu wayya” jedhaniin.

¹¹ Yesuusis akkana jedheen; **“Waan kana warra isaaniif kenname qofa malee namni hundi fudhachuu hin danda’u. ¹² Warri xu’aashii ta’anii gadameessa haadha isaaniitii dhalatan jiruutii; warri harka namaatiin xu’aashii ta’anis jiru; kanneen mootummaa samiitiif jedhanii xu’aashii of taasisanis jiru; namni kana fudhachuu danda’u haa fudhatu.”**

Yesuus Daa’imman Xixinnoo Eebbise

19:13-15 kwf - Mar 10:13-16; Luq 18:15-17

¹³ Ergasii akka inni harka isaan irra kaa’ee isaaniif kadhatuuf ijoollee xixinnoo Yesuusitti fidan. Barattoonni garuu isaan ifatan.

¹⁴ Yesuusis, **“Ijoolleen xixinnoon gara koo haa dhufaniitii hin dhowwinaa; mootummaan samii kan warra akkanaatii”** jedhe. ¹⁵ Innis erga harka isaa isaan irra kaa’ee booddee achii deeme.

Dargaggeessa Sooreessa Tokko

19:16-29 kwf - Mar 10:17-30; Luq 18:18-30

¹⁶ Kunoo namichi tokko gara Yesuus dhufee, “Yaa barsiisaa, jireenya bara baraa argachuuf wanni gaariin ani gochuu qabu maali?” jedhee gaafate.

¹⁷ Yesuus immoo, **“Ati maaliif waa’ee waan gaarii na gaafatta? Gaariin Isa Tokkicha qofatu jira. Ati yoo jireenyatti galuu barbaadde ajajawwan eegi”** jedhee deebise.

¹⁸ Namichis, “Ajajawwan kami?” jedhee gaafate.

Yesuus immoo akkana jedhee deebise; **“Hin ajjeesin; hin ejjin; hin hatin; sobaan dhugaa hin ba’in; ¹⁹ abbaa keetii fi haadha kee kabaji; ollaa kee akkuma ofii keetiitti jaalladhu.’S”**

²⁰ Dargaggeessi sunis, “Ani ajajawwan kanneen hunda eegeera. Yeos maaltu amma iyyuu na duraa hir’ata ree?” jedheen.

²¹ Yesuusis, **“Ati yoo nama hir’ina hin qabne ta’uu barbaadde, dhaqitiin waan qabdu gurgurii hiyyeeyyiif kenni; samii keessatti badhaadhummaa ni qabaattaa. Ergasii kottuu na duukaa bu’i”** jedhee deebiseef.

²² Dargaggeessi sunis yommuu waan kana dhaga’etti gaddee achii deeme; inni qabeenya guddaa qaba tureetii.

²³ Yesuusis barattoota isaatiin akkana jedhe; **“Ani dhuguma isinittin hima; mootummaa samiitti galuun nama sooreessaaf rakkisaa dha. ²⁴ Ammas isinittin hima; namni sooreessi mootummaa Waaqaatti galuu irra qaawwa lilmoo keessa ba’uutu gaalaaf salphata.”**

²⁵ Barattoonni yommuu waan kana dhaga’anitti akka malee raajeffatanii, “Yeos eenyutu fayyuu danda’a ree?” jedhanii gaafatan.

²⁶ Yesuusis isaan ilaalee, **“Kun namaaf hin danda’amu; Waaqaaf garuu wanni hundinuu ni danda’ama”** jedhe.

²⁷ Kana irratti Pheeros, “Kunoo, nu waan hunda dhiifnee si duukaa buuneerra! Egaa maal arganna ree?” jedhee deebise.

²⁸ Yesuus immoo akkana isaaniin jedhe; **“Ani dhuguma isinittin hima; addunyaa haaraa keessatti, yeroo Ilmi Namaa teessoo isaa ulfina qabeessa sana irra tarra’utti, isin warri na duukaa buutanis akkasuma teessoowwan kudha lama irra teessanii gosoota Israa’el kudha lamaaniitti murtu. ²⁹ Namni maqaa kootiif jedhee manneen yookaan obboloota yookaan obboleettota yookaan abbaa**

* 19:4 19:4 Uma 1:27 † 19:5 19:5 Uma 2:24 ‡ 19:19 19:19 Bau 20:12-16; KeD 5:16-20 § 19:19 19:19 Lew 19:18

yookaan haadha yookaan niitii yookaan ijoollee yookaan lafa gotiisaa dhiise hundi dachaa dhibba ni argata; jireenya bara baraas ni dhaala. ³⁰ Garuu warri jalqabaa hedduun warra dhumaa ni ta'u; warri dhumaa hedduun immoo warra jalqabaa ni ta'u.

20

Fakkeenya Warra Iddoo Dhaaba Wayinii Keessa Hojjetanii

¹ “Mootummaan samiis abbaa lafaa kan iddoo dhaabaa wayinii isaatti hojjetoota qacarachuuf jedhee barii obboroo manaa ba'e tokko fakkaata. ² Innis guyyaatti diinaarii* tokko tokko isaanii kaffaluuf hojjetoota sanaan walii galee gara iddoo dhaabaa wayinii isaatti isaan erge.

³ “Namichi sunis gara sa'aatii sadiitti gad ba'ee namoota hojii malee iddoo gabaa dhadhaabatan kanneen biraa arge. ⁴ 'Isinis dhaqaatii iddoo dhaabaa wayinii kootii keessa hojjedhaa; anis waan isiniif malu isiniifin kaffalaa' jedheen. ⁵ Isaanis ni dhaqan.

“Ammas gara sa'aatii ja'aa fi gara sa'aatii sagaliitti gad ba'ee akkasuma godhe. ⁶ Naannoo sa'aatii kudha tokkootti gad ba'ee namoota hojii malee dhadhaabatan biraa argee, 'Isin maaliif guyyaa guutuu hojii malee as dhadhaabattu?' jedhee isaan gaafate.

⁷ “Isaanis, 'Sababii namni tokko illee nu hin qacaratiiniif' jedhanii deebisan. “Inni immoo, 'Isinis dhaqaatii iddoo dhaabaa wayinii kootii keessa hojjedhaa' jedheen.

⁸ “Yommuu galgalaa'etti abbaan iddoo dhaabaa wayinii sanaa hoogganaa hojii isaatiin, 'Hojjetoota waami; warra gara dhumaatti qacaramanii jalqabii hamma warra dura qacaramaniitti mindaa isaanii kaffaliif' jedheen.

⁹ “Warri gara sa'aatii kudha tokkootti qacaraman sunis dhufanii tokkoon tokkoon isaanii diinaarii tokko tokko fudhatan. ¹⁰ Warri jalqabatti qacaraman yommuu dhufanitti waan warra kaan caalaa argatan se'an. Garuu tokkoon tokkoon isaanii diinaarii tokko tokko fudhatan. ¹¹ Isaan yommuu diinaarii sana fudhatanitti abbaa lafaa sanatti gunguman. ¹² Isaanis, 'Warri gara dhumaatti qacaraman kunneen sa'aatii tokko qofa hojjetan; ati garuu nu warra dadhabbii hojichaatii fi ho'a guyyaa obsine isaaniin wal qixxeessite' jedhaniin.

¹³ “Inni garuu hojjetoota sana keessaa isa tokkoon, 'Yaa michuu ko, ani waan tokkoon illee si hin miine. Ati diinaarii tokkoon naan walii hin gallee? ¹⁴ Qooda kee fudhadhuu deemi; ani namicha isa gara dhumaa kanaafis hammuma siif kenne sana kennuufii nan barbaada. ¹⁵ Ani qarshii kootiin waan barbaade gochuuf mirga hin qabuu? Yookaan sababii ani arjaa ta'eef hinaaftaa?' jedhe.

¹⁶ “Akkasuma warri dhumaa warra jalqabaa ni ta'u; warri jalqabaa immoo warra dhumaa ni ta'u.”

Yesuus Yeroo Sadaffaa Waa'ee Du'a Isaa Duraan Dursee Dubbate
20:17-19 kwf - Mar 10:32-34; Luq 18:31-33

¹⁷ Yesuus utuu Yerusaalemitti ol ba'aa jiruu barattoota kudha lamaan kophaatti baasee akkana jedheen: ¹⁸ “Kunoo nu Yerusaalemitti ol ba'aa jirra; Ilmi Namaas dabarfamee luboota hangafootattii fi barsiistota seeraatti ni kennama. Isaanis du'a itti muru; ¹⁹ akka isaan itti qoosaniif, isa garafanii fi isa fannisaniifis dabarsanii Namoota Ormaatti isa kennu. Innis guyyaa sadaffaatti du'aa ni kaafama!”

Gaaffii Haadha Ilmaan Zabdewoos
20:20-28 kwf - Mar 10:35-45

²⁰ Ergasiis haati ilmaan Zabdewoos ilmaan ishee wajjin gara Yesuus dhuftee jilbeenfattee waa isa kadhatee.

²¹ Yesuus, “**Ati maal barbaadda?**” jedheen. Isheenis, “Akka ilmaan koo kunneen lamaan mootummaa kee keessatti inni tokko mirga keetiin, inni kaan immoo bitaa keetiin taa'u naa godhi” jetteen.

²² Yesuus immoo, “**Isin waan kadhattan hin beektan; xooffoo ani dhuguuf jiru dhuguu ni dandeessuu?**” jedheen.

Isaanis, “Ni dandeenya” jedhanii deebisan.

* 20:2 20:2 Diinaariin mindaa guyyaatti hojjetaa tokkoof kaffalamu ture.

²³ Yesuusis, **“Dhugumaan xoofoo koo irraa illee ni dhugdu; garuu mirga kootii fi bitaa kootiin taa’uu kan kennu ana miti. Iddoon kun kan warra Abbaan koo isaaniif qopheesse sanaa ti”** jedheen.

²⁴ Warri kurnan yommuu waan kana dhaga’anitti obboloota lamaanitti aaran. ²⁵ Yesuusis walitti isaan waamee akkana jedhe; **“Isin akka bulchitoonni Namoota Ormaa isaan irratti gooftummaa mul’isan, gurguddoonni isaaniis akka isaan irratti taayitaa argisiisan ni beektu. ²⁶ Isin biratti akkas miti. Qooda kanaa namni isin keessaa nama guddaa ta’uu barbaadu kam iyyuu tajaajilaa keessan ta’uu qaba; ²⁷ namni nama jalqabaa ta’uu barbaadu kam iyyuu garbicha keessan ta’uu qaba; ²⁸ Ilmi Namaa iyyuu tajaajiluu fi lubbuu isaa immoo namoota baay’eedhaaf furii godhee kennuuf dhufe malee tajaajilamuuf hin dhufneetii.”**

Jaamonni Lama Fayyifamuu Isaanii

20:29-34 kwf - Mar 10:46-52; Luq 18:35-43

²⁹ Utuu Yesuusii fi barattoonni isaa Yerikoodhaa ba’aa jiranuu, tuunni namootaa guddaan isa duukaa bu’e. ³⁰ Kunoo, jaamonni lama qarqara karaa tataa’aa turan; isaanis yommuu akka Yesuus achiin darbaa jiru dhaga’anitti iyyanii, **“Gooftaa, yaa Ilma Daawit nu maari!”** jedhan.

³¹ Tuunni sunis akka isaan cal’isaniif isaan ifate; isaan garuu, **“Yaa Gooftaa, yaa Ilma Daawit nu maari!”** jedhanii ittuma caalchisanii iyyan.

³² Yesuusis dhaabatee isaan waamee, **“Akka ani maal isinii godhu barbaaddu?”** jedhee isaan gaafate.

³³ Isaan immoo, **“Yaa Gooftaa, akka iji keenya nuuf banamu barbaana”** jedhanii deebisan.

³⁴ Yesuusis garaa laafeefii ija isaanii qaqqabe. Isaanis yeruma sana arganii isa duukaa bu’an.

21

Yesuus Akka Mootiitti Yerusaaalem Seenuu Isaa

21:1-9 kwf - Mar 11:1-10; Luq 19:29-38

21:4-9 kwf - Yoh 12:12-15

¹ Akkuma isaan Yerusaaalemitti dhi’aatanii Beetfaagee ishee Gaara Ejersaa irraa sana ga’aniin Yesuus barattoota lama erge; ² akkanas isaaniin jedhe; **“Gara ganda fuula keessan dura jiru sanaa dhaqaa; yommusuma harree hidhamte tokko ilmoo ishee wajjin ni argattu. Lachan isaanii hiikaatii naa fidaa. ³ Yoo namni tokko iyyuu waan tokko isiniin jedhe, ‘Gooftaatu isaan barbaada’ jedhaa; innis yommusuma erga.”**

⁴ Kunis akka wanni karaa raajichaatiin dubbatame sun raawwatamuuf ta’e; innis akkana jedha:

⁵ **“Akkana jedhaa Intala Xiyoonitti himaa;**

‘Kunoo, mootiin kee gad of qabee,

harree yaabbatee, ilmoo harree jechuunis

harree xinnoo yaabbatee, gara kee dhufa.’”*

⁶ Barattoonnis dhaqanii akkuma Yesuus isaan ajaje godhan. ⁷ Isaanis harree fi ilmoo harree sana fidan; uffata isaaniis isaan irra buusan; Yesuusis isaan irra taa’e.

⁸ Namoonni akka malee baay’een uffata isaanii karaa irra afan; warri kaan immoo dameewwan mukaa kukkutanii karaa irra bubuusan. ⁹ Namoonni isa dura deemaa turanii fi warri isa duukaa bu’aa turan iyyanii, **“Hoosaa’inaa Ilma Daawitii!”**

“Inni maqaa Gooftaatiin dhufu eebbifamaa dha!”†

“Hoosaa’inaa ol gubbaatti!” jedhan.

¹⁰ Yommuu Yesuus Yerusaaalem seenetti, magaalaa sun guutummaatti raafamtee, **“Kun eenyu?”** jette.

¹¹ Tuunni sun immoo, **“Kun Yesuus, raajicha Naazreeti Galiilaati”** jedhee deebise.

Yesuus Mana Qulqullummaa Keessatti

21:12-16 kwf - Mar 11:15-18; Luq 19:45-47

¹² Yesuus mana qulqullummaa seenee warra mana qulqullummaa keessatti bitatanii fi gurguratan hundumaa ari’e. Minjaala warra maallaqa geeddarataniitii fi barcumaa

* 21:5 21:5 Zak 9:9 † 21:9 21:9 Far 118:26

warra gugee gurguratani garagalche. ¹³ Innis, “**‘Manni koo mana kadhannaa jedhama’[‡] jedhamee barreeffameera; isin garuu holqa saamtotaa gootaniirtu**”[§] isaaniin jedhe.

¹⁴ Jaamonnii fi warri naafatan mana qulqullummaa keessatti gara isaa dhufan; innis isaan fayyise. ¹⁵ Luboonni hangafoonnii fi barsiistonna seeraa yommuu hojii dinqisiisaa inni hojette arganii ijoollee mana qulqullummaa keessatti, “Hoosaa inaa ilma Daawitiif” jedhaniin iyyan dhaga’anitti ni aaran.

¹⁶ Isaanis, “Ati waan ijoolleen kunneen jedhan dhageessaa?” jedhaniin isa gaafatan.

Yesuus immoo, “**Eeyyee; isin waan, ‘Yaa Gooftaa, ati afaan daa’immaniitii fi mucoolii harma hodhaniin irraa, galata qopheessiteerta’**

jedhu sana takkumaa hin dubbifnee?’* jedhee deebise.

¹⁷ Innis isaan biraa deemee magaalaa sanaa ba’e; Biitaaniyaa dhaqee achi bule.

Mukni Harbuu Goguu Isaa

21:18-22 kwf - Mar 11:12-14,20-24

¹⁸ Yesuus ganama barii utuu gara magaalattiitti deebi’uu beela’e. ¹⁹ Muka harbuu tokkos karaa biratti argee itti gore; garuu baala malee waa tokko illee hin arganne. Innis, “**‘Iji bara baraan sirratti hin argamin!’** jedheen. Mukni sunis yeruma sana goge.

²⁰ Barattoonnis yommuu waan kana arganitti ni dinqisiifatan. Isaanis, “Harbuun sun akkamitti yommuuma goge?” jedhaniin gaafatan.

²¹ Yesuusis akkana jedhee deebise; “**Ani dhuguman isinitti hima; yoo amantii qabaattan, yoo mamuu baattanis, waan muka harbuu sana irratti ta’e qofa utuu hin ta’in, tulluu kanaan illee, ‘Ka’i! Galaanatti darbatami!’ yoo jettan ni ta’a.** ²² **Isin yoo amantii qabaattan waan kadhannaadhaan gaafattan hunda ni argattu.”**

Taayitaan Yesuus Gaaffii Uume

21:23-27 kwf - Mar 11:27-33; Luq 20:1-8

²³ Utuu Yesuus mana qulqullummaa seenee barsiisaa jiruu luboonni hangafoonnii fi maanguddoonni sabaa gara isaa dhufanii, “Ati taayitaa maaliitiin wantoota kanneen hojjetta? Eenyutu taayitaa kana siif kenne?” jedhaniin gaafatan.

²⁴ Yesuusis akkana jedhee deebise; “**Anis gaaffii tokkon isin gaafadha; yoo isin naaf deebifatan, isin taayitaa maaliitiin wantoota kanneen akkan hojjedhu isinittiin hima.** ²⁵ **Cuuphaan Yohannis eessaa dhufe? Samii irraa moo nama biraa dhufe?’**

Isaanis waliin mari’atanii akkana jedhan; “Yoo nu, ‘Samii irraa dhufe’ jenne, inni immoo, ‘Yoos isin maaliif isa hin amanin ree?’ nuun jedha. ²⁶ Yoo nu, ‘Nama biraa dhufe’ jenne garuu namoota sodaanna; isaan hundinuu Yohannisin akka raajiitti ilaaluutii.”

²⁷ Kanaaf isaan, “Hin beeknu!” jedhaniin Yesuusif deebisan.

Inni immoo akkana jedhe; “**Anis taayitaa maaliitiin akkan wantoota kanneen hojjedhu isinitti hin himu.”**

Fakkeenya Ilmaan Lamaanii

²⁸ “**Maal seetu? Nama ilmaan lama qabu tokkotu ture; innis gara ilma isaa hangafaa dhaqee, ‘Yaa ilma ko, har’a dhaqitiin iddoo dhaabaa wayinii keessa hojjedhu’ jedheen.**

²⁹ “**Ilmi sunis deebisee, ‘Ani hin dhaqu’ jedhe; ergasii garuu gaabbee dhaqe.**

³⁰ “**Namichis gara ilma isaa isa kaanii dhaqee akkasuma jedheen. Ilmi isaa sunis, ‘Yaa gooftaa nan dhaqa’ jedhee deebiseef; garuu hin dhaqne.**

³¹ “**Ilmaan lamaan keessaa isa kamtu fedhii abbaa isaa guute?’**

Isaanis, “Isa jalqabaa ti” jedhan.

Yesuusis akkana isaaniin jedhe; “**Ani dhuguman isinitti hima; qaraxxoonnii fi sagaagaltoonni isin dura mootummaa Waaqaatti ni galu.** ³² **Yohannis karaa qajeelummaa isinitti argisiisuu dhufetiin; isin immoo isa hin amanne. Qaraxxoonnii fi sagaagaltoonni garuu isa amanan; isin erguma waan kana argitan illee qalbii jijjiirrattanii isatti hin amanne.**

Fakkeenya Qottuuwwanii

21:33-46 kwf - Mar 12:1-12; Luq 20:9-19

³³ “Fakkeenya biraa tokko dhaga’aa; abbaa lafaa kan iddoo dhaabaa wayinii irra wayinii dhaabbate tokkotu ture. Innis naannoo isaatti dallaa ijaaree, achi keessatti boolla itti wayinii cuunfan qotee qooxii eegumsaa ijaare. Ergasiis lafa wayinii sana qonnaan bulootatti kiraa kennatee biyya fagoo dhaqe. ³⁴ Innis yeroon itti midhaan walitti qaban geenyaan akka isaan ija isaa fidaniifiif garboota isaa qottuuwwan sanatti ergate.

³⁵ “Qottuuwwan sunis garboota namichaa qabanii, isa tokko ni dhaanan; isa kaan ni ajjeesan; isa sadaffaa immoo dhagaan tuman. ³⁶ Ammas garboota warra duraa caalaa baay’atan biraa ergate; qonnaan bultoonni sunis akkuma sana isaan godhan. ³⁷ Dhuma irrattis inni, ‘Ilma koo ni kabaju’ jedhee ilma isaa isaanitti ergate.

³⁸ “Qottoonni sun garuu yommuu ilma sana arganitti, ‘Dhaaltuun isa kana. Kottaa isa ajjeefnee dhaala isaa fudhannaa!’ waliin jedhan. ³⁹ Kanaafuu isaan fuudhanii iddoo dhaabaa wayinii keessaa gad baasanii isa ajjeesan.

⁴⁰ “Egaa abbaan iddoo dhaabaa wayinii sanaa yommuu dhufutti qottuuwwan sana maal godhinna laata?”

⁴¹ Isaanis, “Inni namoota hamoo sana haala hamaadhaan ni balleessa; iddoo dhaabaa wayinii sanas qottuuwwan yeroo midhaan walitti qabamutti qooda midhaan isaa kennaniif kanneen biraatti dabarsee ni kenna” jedhanii deebisan.

⁴² Yesuus akkana isaaniin jedhe; “Isin dubbii Katabbiiwwan Qulqulluu keessatti, “‘Dhagaan ijaartoonni tuffatan,

dhagaa golee ta’eera;

kanas Gooftaatu godhe;

kun immoo ija keenyatti dinqii dha†jedhu sana

gonkumaa hin dubbifnee?”

⁴³ “Kanaafuu ani isinittin hima; mootummaan Waaqaa isin irraa fudhatamee saba ija isaa godhatutti ni kennama. ⁴⁴ Namni dhagaa kana irratti kufu kam iyyuu caccabee bututa; namni dhagichi irratti kufu kam iyyuu ni daakama.”

⁴⁵ Luboonni hangafoonnii fi Fariisonni yommuu fakkeenyawwan Yesuus dhaga’anitti akka inni waa’ee isaani dubbate beekan. ⁴⁶ Isaanis isa qabuu barbaadan; garuu sababii namoonni Yesuus akka raajiitti ilaalaa turaniif namoota sana sodaatan.

22

Fakkeenya Cidha Fuudhaa fi Heerumaa

22:2-14 kwi - Luq 14:16-24

¹ Yesuus ammas akkana jedhee fakkeenyaan deebii kenneef: ² “Mootummaan samii mootii ilma isaatiif cidha fuudhaa qopheesse tokko fakkaata. ³ Innis akka isaan warra cidha sanatti affeeraman waamaniif garboota isaa erge; warri waamaman sun garuu dhufuu hin barbaanne.

⁴ “Ammas akkana jedhee garboota biraa erge; ‘Kunoo ani irbaata koo qopheesseera: Sangoonni koo, horiin koo coccoomoonis qalamanii wanni hundinuu qopheeffameera. Gara cidha fuudhaa fi heerumaa kottaa jedhaatii warra affeeraman sanatti himaa.’

⁵ “Isaan garuu tuffatanii, inni tokko gara lafa qotiisaa isaa, kaan immoo gara daldala isaa dhaqe. ⁶ Warri hafan immoo garboota isaa qabanii salphisan; ni ajjeesanis. ⁷ Mootichis ni aare. Loltoota isaas ergee warra garboota isaa ajjeesan sana balleesse; magaalaa isaaniis ni gube.

⁸ “Ergasii inni garboota isaatiin akkana jedhe; ‘Dhangaan cidha fuudhaa qopheeffameera; warri affeeraman garuu cidha kanaaf hin malle. ⁹ Kanaafuu gara qaxxaamura karaatti ba’atii nama argitan hunda gara cidhaatti affeeraa.’

¹⁰ Garboonni sunis karaatti ba’anii nama argan hunda, hamaas gaariis walitti qaban; galmi cidhaa sunis keessummootaan guutame.

¹¹ “Mootichi yommuu keessummoota ilaaluuf ol senettii, nama uffata cidhaa hin uffatin tokko achitti arge. ¹² Innis, ‘Yaa michuu ko, ati akkamitti utuu uffata cidhaa hin uffatin as seente?’ jedhee isa gaafate. Namichi garuu waan dubbatu dhabe.

¹³ “Mootichis tajaajiltoota isaatiin, ‘Namicha kana harkaa fi miilla hidhaatii dukkana alaatti gad darbadhaa; achittis boo’uu fi ilkaan qaruutu ta’a’ jedhe.

¹⁴ “Warri affeeraman baay’eedhaatii; warri filataman garuu muraasa.”

*Qeesaariif Gibira Kaffaluu**22:15-22 kwf - Mar 12:13-17; Luq 20:20-26*

¹⁵ Ergasiis Fariisonni waanuma inni dubbatuun isa qabuuf gad ba’anii Yesuusitti mari’atan. ¹⁶ Isaanis barattoota isaanii garee Heroodis wajjin isatti ergan. Akkanas jedhan; “Yaa barsiisaa, akka ati nama dhugaa taate, akka ati dhugaadhaan karaa Waaqaa barsiiftu beekna. Ati nama wal hin caalchiftu; fuula namaas hin ilaaltu. ¹⁷ Egaa mee nutti himi; yaadni kee maali? Qeesaariif gibira kaffaluu eeyyamameera moo hin eeyyamamne?”

¹⁸ Yesuus garuu hammina isaanii beekke akkana jedhe; “**Yaa fakkeessitoota nana, isin maaliif na qortu?** ¹⁹ **Mee maallaqa gibira kaffaltan natti argisiisaa.**” Isaanis diinaarii tokko isatti fidan; ²⁰ inni immoo, “**Fakkiin kun kan eenyuu ti? Katabbiin kunis kan eenyuu ti?**” jedhee isaan gaafate.

²¹ Isaanis, “Kan Qeesaari” jedhanii deebisan.

Kana irratti inni, “**Yoos kan Qeesaar Qeesaariif, kan Waaqaa immoo Waaqaaf kennaa**” jedheen.

²² Isaanis yommuu waan kana dhaga’anitti ni dinqifatan. Kanaaf isa dhiisanii qajeelan.

*Waa’ee Du’aa Ka’uu**22:23-33 kwf - Mar 12:18-27; Luq 20:27-40*

²³ Guyyuma sana Saduuqonni warri du’aa ka’uun hin jiru jedhan tokko tokko gara isaa dhufanii gaaffii isa gaafatan. ²⁴ Akkanas jedhan; “Yaa barsiisaa, Museen, ‘Namni tokko niitii fuudhee utuu ijoollee hin dhalchin yoo du’e obboleessi isaa niitii sana dhaalee obboleessa isaatiif sanyii haa dhaabu’ jedhee nutti himeera. ²⁵ Kunoo obboloota torbatu nu bira ture. Inni jalqabaa niitii fuudhee utuu ijoollee hin qabaatin niitii isaa obboleessa isaatti dhiisee du’e. ²⁶ Obboleessa lammaffaa fi sadaffaa irratti, hamma isa torbaffaattis waanuma sanatu ta’e. ²⁷ Dhuma irratti dubartittiinis ni duute. ²⁸ Egaa guyyaa du’aa ka’uutti, torban isaanii keessaa isheen niitii isa kamii taati? Hundi isaanii iyyuu ishee fuudhaniiruutii.”

²⁹ Yesuus immoo akkana jedhee deebise; “**Isin waan Katabbiwwan Qulqulluu yookaan humna Waaqaa hin beekneef dogogortu.** ³⁰ **Guyyaa du’aa ka’uutti namoonni akka ergamoota samii ta’u malee hin fuudhan; hin heerumanis.** ³¹ **Garuu isin waan Waaqni waa’ee du’aa ka’uu warra du’anii isiniin jedhe hin dubbifnee? Innis akkana jedha;** ³² **‘Ani Waaqa Abrahaam, Waaqa Yisihaaqii fi Waaqa Yaaqoob.’* Inni Waaqa warra jiraataniiti malee Waaqa warra du’anii miti.”**

³³ Namoonni yommuu waan kana dhaga’anitti, barsiisa isaa dinqifatan.

*Ajaja Ajajawwan Hunda Caalu**22:34-40 kwf - Mar 12:28-31*

³⁴ Fariisonni yommuu akka Yesuus Saduuqota afaan qabachiise dhaga’anitti walitti qabaman. ³⁵ Isaan keessaas hayyuu seeraa tokko akkana jedhee gaaffii kanaan isa qore; ³⁶ “Yaa barsiisaa, seera keessaa ajajni guddaan isa kami?”

³⁷ Yesuus akkana jedheen; “**Waaqa kee Goofticha garaa kee guutuudhaan, lubbuu kee guutuudhaan, yaada kee guutuudhaan jaalladhu.**† ³⁸ **Kunis ajaja jalqabaatii fi guddicha.** ³⁹ **Ajajni lammaffaanis isuma fakkaata: ‘Ollaa kee akkuma ofii keetiitti jaalladhu.’‡ jedha. ⁴⁰ Seerrii fi Raajonni hundinuu ajajawwan kanneen lamaan irratti hundeeffamu.”**

*Kiristoos Ilma Eenyyu ti?**22:41-46 kwf - Mar 12:35-37; Luq 20:41-44*

⁴¹ Utuu Fariisonni walitti qabamanii jiranuu Yesuus gaaffii tokko isaan gaafate; ⁴² innis, “**Isin waa’ee Kiristoos maal yaaddu? Inni ilma eenyyu ti?**” jedhe.

Isaanis, “Inni Ilma Daawit” jedhanii deebisan.

⁴³ Innis akkana isaaniin jedhe; “**Yoos Daawit akkamitti Hafuuraan geggeeffamee, ‘Gooftaa’ isaan jedha ree? Inni akkana jedhaatii:**

⁴⁴ “**Gooftaan Gooftaa kootiin:**

“**Hamma ani diinota kee miilla kee jala siif galchutti gara mirga koo taa’i”§ jedhe.’**

* 22:32 22:32 Bau 3:6 † 22:37 22:37 KeD 6:5 ‡ 22:39 22:39 Lew 19:18 § 22:44 22:44 Far 110:1

⁴⁵ **Erga Daawit, 'Gooftaa' jedhee isa waame, yoo inni akkamitti ilma isaa ta'uu danda'a ree?"** ⁴⁶ Namni tokko iyyuu waan tokko isaaf deebisuu hin dandeenye; gaafasii jalqabee namni tokko iyyuu deebi'ee gaaffii isa gaafachuuf ija hin jabaanne.

23

Akeekkachiisa Yesuus Kenne

23:1-7 kwf - Mar 12:38,39; Luq 20:45,46

23:37-39 kwf - Luq 13:34,35

¹ Yesuus ergasii uummataa fi barattoota isaatiin akkana jedhe: ² **"Barsiistonni seeraatii fi Fariisonni barcuma Musee irra taa'aniiru.** ³ **Kanaafuu waan isaan isinitti himan hundumaa godhaa; eegaas. Garuu waan isaan hojjetan hin hojjetinaa; isaan ni dubbatu malee waan dubbatan sana hin hojjetaniitti.** ⁴ **Isaan ba'aa ulfaataa hidhanii gatiittii namaa irra kaa'u; ofii isaanii garuu ba'aa sana sochoosuuf qubaan illee tuquu hin barbaadan.**

⁵ **"Isaan waan hojjetan hundumaa namootatti of argisiisuuf hojjetu: Kudhaama isaanii ni bal'ifatuutii; handaara uffata isaanii ni dheereffatu.** ⁶ **Iddoo cidhaatti iddoo ulfinaa, manneen sagadaa keessatti immoo taa'umsa ulfinaa jaallatu.** ⁷ **Gabaa keessattis akka namoonni naggaa isaan gaafatanii fi akka 'Yaa barsiisaa' jedhanii isaan waaman jaallatu.**

⁸ **"Isin garuu, 'Barsiisaa' jedhamtanii hin waamaminaa; Barsiisaa tokko qofa qabduutii. Isin hundis obbolloota wallii keessanii ti.** ⁹ **Lafa irratti nama tokkoon illee 'Abbaa' hin jedhinaa; isin Abbaa tokko qofa qabduutii; innis isa samii irraa ti.** ¹⁰ **'Gooftota' jedhamtanii hin waamaminaa; isin Gooftaa tokko qofa qabduutii; innis Kiristoos.** ¹¹ **Isin keessaa namni hunda keessan caalu tajaajilaa keessan haa ta'u.** ¹² **Namni ol of qabu kam iyyuu gad qabamaatii; namni gad of qabu kam iyyuu garuu ol qabama.**

Wayyoowwan Torba

¹³ **"Yaa barsiistota seeraatii fi Fariisota fakkeessitoota nana, isiniif wayyoo! Isin mootummaa samii namoota duraa cuftuutii. Ofii keessanii hin seentan; warra seenuu yaalanis akka isaan seenan hin gootan. [¹⁴ Yaa barsiistota seeraatii fi Fariisota fakkeessitoota nana, isiniif wayyoo! Mana haadha hiyyeessaa saamtanii onsiituutii; itti fakkeessuuf kadhannaa ni dheeressitu; kanaafuu murtii caalutu isinitti murama.]"**

¹⁵ **"Yaa barsiistota seeraatii fi Fariisota fakkeessitoota nana, isiniif wayyoo! Nama tokko amantii keessanitti galfachuuf jettanii lafaa fi galaana irra joortu; yommuu inni amanuttis akka inni isin caalaa dachaa lama ilma gahaannam ta'u isa gootu.**

¹⁶ **"Qajeelchitoota jaamota nana, isiniif wayyoo! Isin, 'Namni kam iyyuu yoo mana qulqullummaatiin kakate, kun homaa miti; namni kam iyyuu yoo warqee mana qulqullummaatiin kakate garuu kakuun sun isa qaba' jettu.** ¹⁷ **Isin gowwootaa fi jaamota nana, warqee moo mana qulqullummaa kan warqee sana qulqulleessutu caala?** ¹⁸ **Akkasumas isin, 'Namni kam iyyuu yoo iddoo aarsaatiin kakate, kun homaa miti; yoo kennaa iddoo aarsaa irra jiru sanaan kakate garuu kakuun sun isa qaba' jettu.** ¹⁹ **Isin jaamota nana, kennaa sana moo iddoo aarsaa isa kennaa sana qulqulleessutu caala?** ²⁰ **Kanaafuu namni iddoo aarsaatiin kakatu, iddoo aarsaati fi waan isa irra jiru hundumaan ni kakata.**

²¹ **Namni mana qulqullummaatiin kakatu, mana qulqullummaatii fi isa mana qulqullummaa keessa jiraatuun kakata.** ²² **Namni samiidhaan kakatu, teessoo Waaqaatii fi isa teessoo sana irra taa'uun kakata.**

²³ **"Yaa barsiistota seeraatii fi Fariisota fakkeessitoota nana, isiniif wayyoo! Isin abasuuda, insilaalaa fi kamuunii kudhan keessaa tokko ni kennitu. Garuu seera keessaa waan caalaatii barbaachisaa ta'e jechuunis murtii qajeelaa, araaraa fi amanummaa dhiiftaniirtu. Silaa utuu isa duraa hin dhiisin isa duubaa hojii irra oolchuu qabdu ture.** ²⁴ **Isin qajeelchitoota jaamota nana! Bookee ni calaltu; gaala immoo ni liqimsitu.**

²⁵ **"Yaa barsiistota seeraatii fi Fariisota fakkeessitoota nana, isiniif wayyoo! Duuba xoofotii fi caabii ni qulqulleessitu; keessi isaanii garuu saamichaa fi ofittummaadhaan guutameera.** ²⁶ **Yaa Fariisicha jaamaa nana! Jalqabatti keessa xoofotii fi caabii qulqulleessi; ergasii duubni isaas ni qulqullaa'aa.**

* **23:14** 23:14 Hiikkaawwan tokko tokko kutaa kana hin dabalani.

²⁷ “Yaa barsiistota seeraatii fi Fariisota fakkeessitoota nana, isiniif wayyoo! Isin akkuma awwaala nooraa dibame kan duubni isaa bareedaa fakkaatee keessi isaa immoo lafee namoota du’aniitiin, xuraa’ummaa hundaanis guutamee ti. ²⁸ Isinis akkasuma duubaan qajeeltota fakkaattanii namootatti mul’attu; keessi keessan garuu fakkeessuu fi hamminaan guutameera.

²⁹ “Yaa barsiistota seeraatii fi Fariisota fakkeessitoota nana, isiniif wayyoo! Isin raajotaaf awwaala ijaartuutii; soodduu qajeeltotaas ni bareechitu. ³⁰ Isin, ‘Nu utuu bara abbootii keenyaa sana jiraannee silaa dhiiga raajotaa dhangalaasuu keessatti isaan wajjin hin hirmaannu ture’ jettu. ³¹ Kanaafuu isin akka sanyii warra raajota ajjeesan sanaa taatan ofuma keessanitti dhugaa baatu. ³² Egaa safartuu cubbuu abbootii keessanii guutaa!

³³ “Bofoota nana! Ijoollee buutii nana! Isin akkamitti murtii gahaannam jalaa ba’uu dandeessu? ³⁴ Kanaafuu, kunoo ani raajotaa fi ogeeyyii, barsiistotas gara keessanitti nan erga. Isinis isaan keessaa gartokko ni ajjeefu; ni fanniftu; warra kaan immoo manneen sagadaa keessan keessatti garaftu; magaalaa tokko irraa gara magaalaa biraattis isaan ariitu. ³⁵ Kanaaf dhiiga Abeel nama qajeelaa sanaatii jalqabee hamma dhiiga Zakkaariyaas ilma Baraakiyuu isa isin mana qulqullummaatii fi iddoo aarsaa gidduutti ajjeeftaniitti, dhiiga qulqulluu lafatti dhangalaafame hundumatti ni gaafatamtu. ³⁶ Ani dhuguma isinittin hima; kun hundinuu dhaloota kanatti ni dhufa.

³⁷ “Yaa Yerusaaalem, yaa Yerusaaalem, ati kan raajota ajjeefu, warra gara keetti ergamanis kan dhagaadhaan tumtu, akkuma indaanqoon cuucii ishee qoochoo ishee jalatti walitti qabattu sana anis ijoollee kee walitti qabuuf yeroo meeqaan hawwe! Isin garuu hin barbaanne. ³⁸ Kunoo, manni keessan onnee isinii hafa. ³⁹ Ani isinittin himaati; isin hamma, ‘Inni maqaa Gooftaatiin dhufu sun eebbifamaa dha’ jettanitti lammata na hin argitan.”

24

Mallattoo Dhuma Baraa

24:1-51 kwf – Mar 13:1-37; Luq 21:5-36

¹ Utuu Yesuus mana qulqullummaatii ba’ee deemaa jiruu barattoonni isaa gamoowwan mana qulqullummaa isatti argisiisuuf gara isaa dhufan. ² Innis, “**Waan kana hunda argituu? Ani dhuguma isinittin hima; asitti dhagaan dhagaa irratti hafu tokko hin jiru; hundi isaa iyyuu ni diigama**” jedhee deebiseef.

³ Utuu Yesuus Tulluu Ejersaa irra taa’ee jiruu, barattoonni isaa kophaa isaanii gara isaa dhufanii, “Mee nutti himi; wanni kun yoom ta’a? Mallattoon dhufa keetii fi mallattoon dhuma barichaa maali?” jedhan.

⁴ Yesuus akkana jedhee deebiseef; “**Akka namni tokko iyyuu isin hin gowwoomsineef of eeggadhaa.** ⁵ **Namoonni hedduun, ‘Ani Kiristoot’ jedhanii maqaa kootiin ni dhufuutii; nama hedduus ni gowwoomsu.** ⁶ **Isin waa’ee waraanaatii fi oduu waraanaa ni dhageessu; garuu akka hin rifanne of eeggadhaa. Wanni akkanaa ta’uu qabaatii; dhumni garuu amma iyyuu hin geenye.** ⁷ **Sabni sabatti, mootummaanis mootummaatti ni ka’a. Beellii fi sochiin lafaa iddoo garaa garaatti ni ta’a.** ⁸ **Garuu kun hundinuu jalqaba ciniinsuu da’umsaa ti.**

⁹ “**Isaan dabarsanii dhiphinatti isin kennu; isin ajjeesus; sababii maqaa kootiifis saba hundaan ni jibbantu.** ¹⁰ **Yeroo sanatti namoonni baay’een ni gufatu; dabarsanii wal kennu; wal jibbus; ¹¹ raajonni sobaa hedduun ni dhufu; nama hedduus ni gowwoomsu.** ¹² **Sababii baay’ina hamminaatiif jaalalli namaa baay’ee ni qabbanaa’a; ¹³ namni hamma dhumaatti jabaatee dhaabatu garuu ni fayya.** ¹⁴ **Wangeelli mootummaa kunis akka saba hundaaf dhuga ba’umsa ta’uuf addunyaa hunda keessatti ni lallabama; ergasiis dhumni sun ni dhufa.**

¹⁵ “**Kanaafuu, ‘Isin yommuu wanni jibbisiisaan badiisa fidu’* kan Daani’el raajichi waa’ee isaa dubbate sun iddoo qulqulluu dhaabatee argitanitti, namni dubbisu haa hubatu; ¹⁶ yommuu warri Yihuudaa keessa jiran tulluuwwanitti haa baqatan.** ¹⁷ **Namni bantii manaa irra jiru tokko iyyuu waan tokko illee mana isaatii fudhachuuf gad hin bu’in.** ¹⁸ **Namni lafa qotiisaa keessa jiru tokko iyyuu uffata isaa fudhachuuf duubatti hin deebi’in.** ¹⁹ **Bara sana keessa dubartoota ulfaatii fi haadhota hoosisaniif wayyoo!** ²⁰ **Garuu akka baqachuun keessan ganna keessa yookaan Guyyaa Sanbataatiin hin taaneef kadhadaa.** ²¹ **Yeroo sanatti**

* 24:15 24:15 Dan 9:27; 11:31; 12:11

dhiphinni guddaan isaa ni dhufaatii; dhiphinni akkasiis uumama addunyaatii jalqabee hamma ammaatti hin dhufne; si'achis gonkumaa hin dhufu.

²² "Utuu guyyoonni sun gabaabbachuu baatanii silaa namni tokko iyyuu hin hafu ture; garuu sababii filatamtootaatiif guyyoonni sun ni gabaabbatu. ²³ Yeroo sana yoo namni kam iyyuu, 'Ilaa, Kiristoos as jira!' yookaan 'Achi jira!' isiniin jedhe, hin amaninaa. ²⁴ Kiristoosonni sobaatiif fi raajonni sobaa ni ka'uuatii; isaanis yoo danda'ameef filatamtoota illee gowwoomsuuf jedhanii mallattoo gurguddaa fi dinqii ni hojjetu. ²⁵ Kunoo ani duraan dursee isinitti himeera.

²⁶ "Kanaafuu yoo isaan, 'Kunnoo, inni gammoojjii keessa jira' isiniin jedhan achi hin dhaqinaa; yookaan yoo isaan, 'Kunoo, mana keessa gola jira' isiniin jedhan hin amaninaa. ²⁷ Akkuma bakakkaan ba'a biiftuutii bu'ee hamma lixa biiftuutti mul'atu sana dhufaatiin Ilma Namaas akkasuma ta'a. ²⁸ Iddoo raqni jiru kamitti iyyuu gogocorroowwan walitti qabamu.

²⁹ "Akkuma dhiphinni bara sanaa darbeen,

" 'Aduun ni dukkanoofti;

ji'is ifa ishee hin kennitu;

urjiiwwan samii irraa ni harca'u;

humnoonni samiis ni raafamu.†

³⁰ "Ergasii mallattoon Ilma Namaa samii irratti ni mul'ata; saboonni addunyaa hundinuus ni boo'u. Isaanis utuu Ilmi Namaa duumessa samiitiin humnaa fi ulfina guddaadhaan dhufuu ni argu. ³¹ Innis ergamoota isaa sagalee malakataa guddaa isaatiin erga; isaanis filatamtoota isaa kanneen handaara samiiwwanii tokko irraa hamma isa kaaniitti jiran bubbeewwan afran irraa walitti qabu.

³² "Fakkeenya kana muka harbuu irraa baradhaa; yommuu dameen isaa latee baala baafatutti akka bonni dhi'aate ni beektu. ³³ Akkasuma isinis yommuu waan kana hunda argitanitti akka inni dhi'aate, akka balbala irras ga'e ni beektu. ³⁴ Ani dhuguma isinittin hima; hamma wanni kun hundi ta'utti dhaloonni kun hin darbu. ³⁵ Samii fi lafti ni darbu; dubbiin koo garuu gonkumaa hin darbu.

Guyyaa fi Sa'aatiin Hin Beekamu

24:37-39 kwf - Luq 17:26,27

24:45-51 kwf - Luq 12:42-46

³⁶ "Waa'ee guyyaa sanaa yookaan waa'ee sa'aatii sanaa garuu Abbaa qofatu beeka malee namni tokko iyyuu hin beeku; ergamoonni samii irraa iyyuu hin beekan; yookaan Ilmi iyyuu hin beeku. ³⁷ Akkuma bara Nohi ta'e sana yeroo dhufaatiif Ilma Namaattis akkasuma ni ta'a. ³⁸ Bara bishaan badiisaatiin dura ture sana, hamma gaafa Nohi doonii seeneetti namoonni nyaachaa, dhugaa, fuudhaa, heerumaas turaniitii. ³⁹ Isaanis hamma bishaan badiisaa dhufee hunda isaaniif fudhatetti waan dhufuuf jiru hin beekne. Yeroo Ilmi Namaa dhufuttis akkasuma ta'a. ⁴⁰ Gaafas namoonni lama lafa qotiisaa keessa hojjetu; inni tokko ni fudhatama; kaan immoo ni hafa. ⁴¹ Dubartoonni lama dhagaa daakuutiin daaku; tokko ni fudhatamti; kaan immoo ni hafti.

⁴² "Kanaafuu isin dammaqaa; Gooftaan keessan guyyaa kam akka dhufu hin beektaniitii. ⁴³ Garuu waan kana hubadhaa: Abbichi manaa utuu yeroo kamitti akka hattuun dhufu beekke silaa dammaqee eeggata malee akka manni isaa cabsamee seenamu itti hin dhiisu ture. ⁴⁴ Kanaafuu isinis akkasuma qophaa'uu qabdu; Ilmi Namaa sa'aatii isin hin eegnetti dhufaatiif.

⁴⁵ "Eгаа garbichi amanamaa fi ogeessi kan gooftaan isaa akka inni nyaata isaaniif yeroo malutti isaaniif kennuuf jedhee garboota mana isaa jiraatan irratti isa muudu eenyu? ⁴⁶ Garbichi gooftaan isaa yommuu deebi'utti utuu inni akkasuma hojjetuu isa argu sun eebbifamaa dha. ⁴⁷ Ani dhuguma isinitti nan hima; inni qabeenya isaa hunda irratti isa muuda. ⁴⁸ Garbichi sun garuu yoo hamaa ta'e, 'Gooftaan koo yeroo dheeraa tura' ofiin jedhee ⁴⁹ garboota isa wajjin tajaajilan tumuu, machooftota wajjin immoo nyaachuu fi dhuguu jalqaba. ⁵⁰ Gooftaan garbicha sanaa guyyaa inni isa hin eegnee fi sa'aatii inni hin beeknetti ni dhufa. ⁵¹ Innis isa kukkuta; fakkeessitoota keessattis isa ramada; achittis boo'ichaa fi ilkaan qaruuu ta'a.

¹ “Yeroo sanatti mootummaan samii dubbarran kudhan kanneen ibsaa isaanii fudhatanii misirricha simachuudhaaf gad ba’an fakkaata. ² Isaan keessaas shan gowwoota, shan immoo ogeeyyii turan. ³ Warri gowwoonni ibsaa isaanii fudhatan malee zayitii hin fudhanne. ⁴ Warri ogeeyyiin garuu ibsaa isaanii wajjin zayitii qodaatti qabatanii turan. ⁵ Misirrichi sun turraan hundumti isaanii mugaan; ni rafanis.

⁶ “Halkan walakkaattis sagaleen guddaan, ‘Kunoo, misirrichi dhufeera! Ba’aatii isa simadhaa!’ jedhu tokko dhaga’ame.

⁷ “Dubbarri sun hundinuus ka’anii ibsaa isaanii qopheeffatan. ⁸ Warri gowwoonni sun warra ogeeyyiidhaan, ‘Ibsaan keenya nu duraa dhaamuutti jiraatii zayitii keessan irraa xinnoo nuu kennaa’ jedhan.

⁹ “Warri ogeeyyiinis deebisanii, ‘Hin kenninu; tarii wanni nuu fi isin ga’u hin jiru ta’aatii. Qooda kanaa warra gurguran bira dhaqaatii ofii keessaniif bitadhaa’ jedhaniin.

¹⁰ “Garuu utuma isaan zayitii bitachuu dhaquutti jiranuu misirrichi dhufe. Dubbarri qophaa’anis isa wajjin galma cidha fuudhaatti ol galan. Balballis ni cufame.

¹¹ “Ergasii dubbarran kaanis dhufanii, ‘Yaa Gooftaa, yaa Gooftaa, balbala nuuf bani!’ jedhaniin.

¹² “Inni garuu deebisee, ‘Dhuguman isinitti hima; ani isin hin beeku’ jedheen.

¹³ “Kanaafuu isin sababii guyyaa sana yookaan sa’aatii sana hin beekneef dammaqaa.

Fakkeenya Taalaantii

25:14-30 kwi – Luq 19:12-27

¹⁴ “Ammas mootummaan samii nama biyya fagoo dhaqu tokko fakkaata; namichis garboota isaa waamee qabeenya isaa imaanaa itti kennate. ¹⁵ Tokkoo tokkoo isaaniiittis akkuma dandeettii isaaniiitti, isa tokkotti taalaantii shan, isa kaanitti taalaantii lama, isa kaanitti immoo taalaantii tokko kennee ka’ee deeme. ¹⁶ Namichi taalaantii shan fudhate sun, yeroodhuma sana dhaqee ittiin daldalee taalaantii biraa shan irraa buufate. ¹⁷ Inni taalaantii lama fudhates akkasuma taalaantii biraa lama irraa buufate. ¹⁸ Namichi taalaantii tokko fudhate garuu dhaqee lafa qotee maallaqa gooftaa isaa dhokse.

¹⁹ “Yeroo dheeraa booddee gooftaan garboota sanaa deebi’ee herrega isaan bira jiru herregate. ²⁰ Namichi taalaantii shan fudhatee ture sun taalaantii biraa shan fidee, ‘Yaa gooftaa, ati taalaantii shan imaanaa natti kennitee turte. Ani immoo kunoo, taalaantii shan irraa buufadheera’ jedheen.

²¹ “Gooftaan isaas deebisee, ‘Yaa garbicha gaarii fi amanamaa, waan gaarii hojjetto! Ati waan akka malee xinnoo irratti amanamaa taateerta; ani immoo waan baay’ee irratti sin muuda. Kottuutii gammachuu gooftaa keetiitti gali!’ jedheen.

²² “Namichi taalaantii lama fudhatee tures dhufee, ‘Yaa gooftaa, ati taalaantii lama imaanaa natti kennitee turte; ani immoo kunoo, taalaantii biraa lama irraa buufadheera’ jedheen.

²³ “Gooftaan isaas deebisee, ‘Yaa garbicha gaarii fi amanamaa, waan gaarii hojjetto! Ati waan xinnoo irratti amanamaa taateerta; ani immoo waan baay’ee irratti sin muuda. Kottuutii gammachuu gooftaa keetiitti gali!’ jedheen.

²⁴ “Namichi taalaantii tokkicha fudhatee tures dhufee akkana jedhe; ‘Yaa gooftaa, ati nama gara jabeessa iddoo itti hin facaasinii galfattu, iddoo itti hin bittinneessiniis walitti qabattu akka taate nan beeka. ²⁵ Kanaafuu ani sodaadhee dhaqeen taalaantii kee lafa keessa dhokse. Taalaantiin kee kunoo ti.’

²⁶ “Gooftaan isaas deebisee akkana jedhe; ‘Yaa garbicha hamaa dhibaa’aa! Ati akka ani iddoo itti hin facaasinii galfadhu, iddoo itti hin bittinneessiniis walitti qabadhu beektaa? ²⁷ Yoos akka ani yommuun deebi’utti dhala isaa wajjin fudhadhuuf silaa maallaqa koo warra baankii bira naa kaa’uu qabda ture.

²⁸ “‘Kanaaf taalaanticha isa harkaa fuudhaatii namicha taalaantii kudhan qabuuf kennaa. ²⁹ Kan qabu kamiif iyyuu itti dabalamee ni kennama; irraa hafaas ni qabaataatii. Kan hin qabne garuu wanni inni qabu iyyuu irraa fudhatama. ³⁰ Garbicha faayidaa hin qabne kana dukkana alaatti gad darbadhaa; achittis boo’ichaa fi ilkaan qaruuu ta’a.’

³¹ “Ilmi Namaa yommuu ulfina isaatiin ergamoota Waaqaa hunda wajjin dhufutti, teessoo isaa kan ulfinaa irra ni taa’a. ³² Saboonni hundinuu fuula isaa duratti walitti qabamu; innis akkuma tikseen tokko hoolotaa fi re’oota gargar footu sana namoota gargar ni fo’a. ³³ Inni hoolota karaa mirga isaa, re’oota immoo karaa bitaa isaa ni dhaabachiisa.

³⁴ “Yeroo sana Mootichi warra mirga isaa jiraniin akkana jedha; ‘Isin warri Abbaan koo eebbise kottaa mootumicha uumamuu addunyaatii jalqabee isinii qopheeffame sana dhaalaa. ³⁵ Sababiin isaas ani beelofnaan isin nyaata naaf kennitan; dheebonnaan waan ani dhugu naaf kennitan; ani keessummaan ture; isin immoo na simattan; ³⁶ ani daarraan daara na baafatan; dhukkubsannaan na gaafattan; hidhamnaan dhuftanii na ilaaltan.’

³⁷ “Qajeeltonni sunis deebisanii akkana jedhaniin; ‘Yaa Gooftaa, yoom beeloftee si arginee waan ati nyaattu siif kennine? Yookaan yoom dheebottee si arginee waan ati dhugdu siif kennine? ³⁸ Yoom keessummaa ta’uu kee arginee si simanne? Yookaan yoom daartee si arginee daara si baafne? ³⁹ Yoom dhukkubsattee yookaan hidhamtee si arginee dhufnee si ilaalle?’

⁴⁰ “Mootiin sunis deebisee, ‘Ani dhuguman isinitti hima; waan obboloota koo warra nama hundumaa gad ta’an kanneen keessaa isa tokkoof gootan kam iyyuu naaf gootan’ jedhaan.

⁴¹ “Ergasiis warra bitaa isaa jiraniin akkana jedha; ‘Isin yaa abaaramoo, na duraa badaatii ibidda bara baraa isa diiyaabiloosii fi ergamoota isaatiif qopheeffametti galaa. ⁴² Ani beelofnaan isin waan ani nyaadhu naaf hin kennineetii; ani dheebonnaan waan ani dhugu naaf hin kennineetii; ⁴³ ani keessummaan ture; isin na hin simanne; ani daarraan isin daara na hin baafne; dhukkubsannaan yookaan hidhamnaan dhuftanii na hin ilaalle.’

⁴⁴ “Isaanis, ‘Yaa Gooftaa, ati yoom beeloftee yookaan dheebottee yookaan keessummaa taatee yookaan daartee yookaan dhukkubsattee yookaan hidhamtee si arginee si gargaaruu didne?’ jedhanii deebisu.

⁴⁵ “Innis deebisee, ‘Ani dhuguman isinitti hima; waan obboloota koo warra nama hundaa gad ta’an kanneen keessaa isa tokkoof hin godhin naafis hin goone’ jedha.

⁴⁶ “Isaan kunneen adabbii bara baraatti, qajeeltonni immoo jireenya bara baraatti galu.”

26

Marii Yesuusitti Mari’atame

26:2-5 kwf - Mar 14:1,2; Luq 22:1,2

¹ Yesuus erga waan kana hunda dubbatee raawwatee booddee barattoota isaatiin akkana jedhe; ² “**Akkuma isin beektan Faasiikaaf guyyaa lamatu hafa; Ilmi Namaas fannifamuuf dabarfamee ni kennama.**”

³ Ergasii luboonni hangafoonnii fi maanguddoonni uummataa dallaa luba ol aanaa isa Qayyaaffaa jedhamuu keessatti walitti qabaman. ⁴ Isaanis haxxummaadhaan Yesuus qabuu fi ajjeesuuf mari’atan. ⁵ Isaanis, “Garuu akka namoota gidduutti gooliin hin kaaneef yeroo ayyaanaatti hin ta’in” jedhan.

Yesuus Biitaaniyaatti Shittoo Dibamuu Isaa

26:6-13 kwf - Mar 14:3-9

26:6-13 kwi - Luq 7:37,38; Yoh 12:1-8

⁶ Utuu Yesuus Biitaaniyaa keessa mana Simoon isa lamxaa’aa sanaa jiruu, ⁷ dubartiin tokko shittoo gatiin isaa akka malee guddaa ta’e bilqaaxxii albaasxirositti qabattee gara isaa dhuufte; akkuma inni maaddiitti dhi’aateenis shittoo sana mataa isaatti dhangalaafte.

⁸ Barattoonnis yommuu waan kana arganitti aaranii akkana jedhan; “Waan kana balleessuun maaliif? ⁹ Silaa shittoon kun gatii guddaatti gurguramee maallaqa isaa hiyyeeyyiif kennuun ni danda’ama tureetii.”

¹⁰ Yesuus kana hubatee akkana isaaniin jedhe; “**Isin maaliif dubartii kana rakkiftu? Isheen waan gaarii naaf gooteerti.** ¹¹ Hiyyeeyyii yeroo hunda of biraa qabdu; ana garuu yeroo hunda of biraa hin qabdan. ¹² Dubartiin kun yommuu shittoo kana dhagna koo irrati dhangalaaftetti awwaalaaf na qopheessudhaaf waan kana goote. ¹³ Ani dhuguma isinittin hima; addunyaa hunda irratti, iddoo wangeelli kun itti lallabamu kamitti iyyuu wanni isheen gootes yaadannoo isheetiif ni odeeffama.”

Yihuudaan Yesuusin Dabarsee Kennuuf Walii Galuu Isaa

26:14-16 kwf - Mar 14:10,11; Luq 22:3-6

¹⁴ Ergasiis warra Kudha Lamaan keessaa namichi Yihuudaa Keeriyotii jedhamu tokko gara luboota hangafootaa dhaqee, ¹⁵ "Yoo ani isa dabarsee isinitti kenne isin maal naaf kennitu?" jedhee gaafate. Isaanis meetii soddomaan walii galan. ¹⁶ Yihuudaanis yeroo sanaa jalqabee Yesuusin dabarsee kennuuf haala mijaa'aa eeggachaa ture.

Irbaata Gooftaa

26:17-19 kwf - Mar 14:12-16; Luq 22:7-13

26:20-24 kwf - Mar 14:17-21

26:26-29 kwf - Mar 14:22-25; Luq 22:17-20; 1Qr 11:23-25

¹⁷ Guyyaa jalqaba Ayyaana Maxinootti barattoonni gara Yesuus dhufanii, "Akka ati Faasiikaa nyaattuuf eessatti akka siif qopheessinu barbaadda?" jedhanii gaafatan.

¹⁸ Innis deebisee akkana jedhee; **"Magaalaa seenaati nama wayiitiin, 'Barsiisaan, yeroon koo ga'eera; ani barattoota koo wajjin Ayyaana Faasiikaa mana keetti nan kabaja siin jedha' jedhaa."** ¹⁹ Barattoonnis akkuma Yesuus isaan ajaje sana godhan; Faasiikaas ni qopheessan.

²⁰ Yesuusiis yommuu galgalaa'etti warra Kudha Lamaan wajjin maaddiitti dhi'aate.

²¹ Innis utuma nyaachaa jiranuu, **"Ani dhuguma isinitti nan hima; isin keessaa tokko dabarsee na kenna"** jedhe.

²² Isaanis akka malee gaddanii tokko tokkoon, "Yaa Gooftaa, na ta'innaa laata?" jedhanii gaafachuu jalqaban.

²³ Yesuusiis akkana jedhee deebise; **"Namichi na wajjin gabatee keessa harka kaa'ee cuuphate dabarsee na kenna. ²⁴ Ilmi Namaa akkuma waa'een isaa barreeffame sanatti ni deema. Garuu namicha dabarsee Ilma Namaa kennu sanaaf wayyoo! Inni utuu dhalachuu baatee isaaf wayya ture."**

²⁵ Yihuudaan inni dabarsee isa kennuuf jiru sunis, "Yaa Barsiisaa, na ta'innaa laata?" jedhe.

Yesuusiis, **"Atuu jette kaa!"** jedhee deebise.

²⁶ Utuu nyaachaa jiranuus Yesuus buddeena fuudhee eebbise; caccabsees, **"Fudhad-haa nyaadhaa; kun foon koo ti"** jedhee barattoota isaatiif kenne.

²⁷ Xoofos fuudhee galata galchee isaaniif kenne; akkanaas jedhee; **"Hundi keessan kana irraa dhugaa. ²⁸ Kun dhiiga koo, dhiiga kakuu haaraa kan dhiifama cubbuu namoota baay'eetiif dhangalaafamuu dha. ²⁹ Ani isinitti nan hima; ani hamman guyyaa isin wajjin mootummaa Abbaa koo keessatti deebi'ee dhugutti ammaa jalqabee ija wayinii kana irraa hin dhugu."**

³⁰ Isaanis erga faarfannaa faarfatanii booddee Tulluu Ejersaatti qajeelan.

Yesuus Akka Phexros Isa Ganu Duraan Dursee Dubbate

26:31-35 kwf - Mar 14:27-31; Luq 22:31-34

³¹ Ergasii Yesuus akkana isaaniin jedhee; **"Hundi keessan edana sababii kootiif ni gufattu; akkana jedhamee barreeffameeraatii:**

"Ani tiksee nan rukuta;

hoolonni karra sanaas ni bittinneeffamu.'^{*}

³² **Ani garuu ergan du'aa ka'ee booddee isin dura Galiilaa nan dhaqa."**

³³ Phexrosii immoo deebisee, "Yoo namni hundinuu sababii keetiif gufate iyyuu ani gonkumaa hin gufadhu" jedheen.

³⁴ Yesuus immoo deebisee, **"Ani dhuguma sitti nan hima; ati edana utuu indaanqoon hin iyyin yeroo sadii na ganta"** jedheen.

³⁵ Phexros garuu, "Ani yoon si wajjin du'uu qabaadhe illee gonkumaa si hin ganu" jedheen. Barattoonni hundinuus akkasuma jedhan.

Geetesemaanee

26:36-46 kwf - Mar 14:32-42; Luq 22:40-46

³⁶ Ergasiis Yesuus barattoota isaa wajjin iddoo Geetesemaanee jedhamu tokko dhaqee; innis, **"Hamma ani achi dhaqee kadhadhutti isin as taa'aa"** jedheen. ³⁷ Innis Phexrosii fi ilmaan Zabdeewos lamaan of faana fudhatee deeme; gadduu fi yaadda'uus jalqabe. ³⁸ Ergasiis inni, **"Lubbuun koo akka malee gadditee du'uu geesseerti. Isin asuma turaatii na wajjin dammaqaa"** jedheen.

³⁹ Innis xinnoo achi hiiqee adda isaatiin lafatti gombifamee, **"Yaa Abbaa ko, yoo danda'ame xofoon kun narra haa darbu. Garuu akka fedhii keetii malee akka fedhii kootii hin ta'in"** jedhee kadhate.

* 26:31 26:31 Zak 13:7

⁴⁰ Innis gara barattoota isaatti deebi'ee utuu rafanuu isaan arge. Phexrosiinis akkana jedhe; **“Jarana, isin sa'aatii tokkitti illee dammaqanii na wajjin turuu hin dandeenyee?”** ⁴¹ **Isin akka qorumsatti hin galleef dammaqaa kadhadaa. Hafuurri qophaa'aa dha; foon garuu dadhabaa dha.”**

⁴² Ammas yeroo lammaffaa achi hiiqee, **“Yaa Abbaa ko, xoofoon kun utuu ani hin dhugin yoo narra darbuu hin dandeenye akkuma fedhii keetii haa ta'u”** jedhee kadhate.

⁴³ Inni yommuu deebi'ee dhufetti, ammas utuu rafanuu isaan arge; iji isaanii itti ulfaatee tureetii. ⁴⁴ Ammas isaan dhiisee achi hiiqee waanuma kanaan dura kadhate sana irra deebi'ee yeroo sadaffaa kadhate.

⁴⁵ Innis gara barattootaatti deebi'ee akkana jedheen; **“Isin amma iyyuu raftanii boqochaa jirtuu? Kunoo, sa'aatiin sun ga'eera; Ilmi Namaas dabarfamee harka cubbamoottaatti ni kennama. ⁴⁶ Ka'aa ni deemnaa! Kunoo, namichi dabarsee na kennu sun dhufaa jira.”**

Yesuus Qabamuu Isaa

26:47-56 kwf - Mar 14:43-50; Luq 22:47-53

⁴⁷ Utuma inni amma iyyuu dubbachaa jiruu, Yihuudaan namichi warra Kudha Lamaan keessaa tokko ta'e sun dhufe. Tuunni luboota hangafootaa fi maanguddoota uummataa biraa ergame guddaanis goraadee fi bokkuu qabatee isa wajjin dhufe. ⁴⁸ Inni dabarsee Yesuus kennu sunis, “Namichi ani dhungadhu isa; isinis isa qabaa” jedhee mallattoo kenneefii ture. ⁴⁹ Yihuudaanis yommusuma Yesuusitti dhi'aatee, “Nagumaa yaa barsiisaa!” jedhee isa dhungate.

⁵⁰ Yesuusis deebisee, **“Yaa michuu ko, waan dhufteef sana raawwadhu kaa!”** jedhe.

Namoonni sun itti dhi'aatanii Yesuus qabanii hidhan. ⁵¹ Kunoo, warra Yesuus wajjin turan keessaa inni tokko goraadee isaa luqqifatee garbicha luba ol aanaa dha'ee gurra isaa irraa kute.

⁵² Yesuus immoo akkana jedheen; **“Goraadee kee iddoo isaatti deebisi; warri goraadee luqqifatan hundinuu goraadeedhaan balleffamuutii. ⁵³ Ati waan ani Abbaa kootti iyyachuu hin dandeenye, waan innis yeruma sana ergamoota Waaqaa Leegewoonii? Kudha Lamaa olii naa hin ergine seetaa? ⁵⁴ Utuu akkas ta'ee immoo wanni Katabbiiwwan Qulqulluun karaa kanaan ta'uu qaba jedhan sun silaa akkamitti raawwatama ree?”**

⁵⁵ Sa'aatii sanatti Yesuus tuuta sanaan akkana jedhe; **“Isin goraadee fi bokkuu qabattanii akka nama hattuu qabuutti na qabuu dhufanii? Ani guyyuma guyyaan mana qulqullummaa keessa taa'ee barsiisaan ture; isinis na hin qabne. ⁵⁶ Kun hundinuu garuu akka Katabbiiwwan raajotaa Qulqulluun raawwatamaniif ta'e.”** Barattoonni hundinuu isa dhiisanii baqatan.

Yesuus Yaa'ii Yihuudootaa Duratti

26:57-68 kwf - Mar 14:53-65; Yoh 18:12,13,19-24

⁵⁷ Warri Yesuus qaban sunis gara mana luba ol aanaa isa Qayyaaffaa jedhamuu iddoo barsiistonni seeraatii fi maanguddoonni itti walitti qabamaniitti isa geessan. ⁵⁸ Phexros garuu hamma dallaa mana lubicha ol aanaatti fagootti isa duukaa bu'e. Innis waan ta'uuf jiru arguuf jedhee ol lixee waardiyyoota wajjin taa'e.

⁵⁹ Luboonni hangafoonnii fi yaa'iin Yihuudootaa guutuun Yesuus ajjeesuuf jedhanii ragaa sobaa isatti barbaadaa turan. ⁶⁰ Isaan garuu yoo dhuga baatonni sobaa hedduun dhi'aatan illee homaa hin arganne.

Dhuma irratti dhuga baatonni lama dhufanii, ⁶¹ “Namichi kun, 'Ani mana qulqullummaa Waaqaa diiguu, guyyaa sadii keessatti deebisee ijaaruu nan danda'a' jedheera” jedhan.

⁶² Lubichi ol aanaanis ka'ee dhaabatee, “Ati deebii tokko illee hin kennituu? Wanni namoonni kunneen dhugaa sitti ba'an kun maali?” jedhee Yesuus gaafate. ⁶³ Yesuus garuu inuma cal'ise.

Lubichi ol aanaan, “Ani Waaqa jiraataadhaan sin kakachiisa: Ati yoo Kiristoos Ilma Waaqaa taate mee nutti himi” jedheen.

⁶⁴ Yesuus deebisee, **“Atuu jetteerta. Ani garuu isinitti nan hima; isin si'achi utuu Ilmi Namaa mirga isa Humna qabeessa sanaatiin taa'ee, duumessa samiitiin dhufuu ni argitu”** jedhe.

⁶⁵ Kana irratti lubichi ol aanaan uffata isaa tarsaasee akkana jedhe; “Inni Waaqa arrabseera! Kana caalaa dhuga baatota maalii nu barbaachisa? Kunoo, Waaqa arrabsuu isaa isin iyyuu amma dhageessaniirtu. ⁶⁶ Maal isinitti fakkaata?”

Isaanis, “Du’atu isaaf mala” jedhanii deebisan.

⁶⁷ Ergasii isaan fuula isaatti tufan; abootteenis isa rukutan. Warri kaan immoo isa kabalaniis, ⁶⁸ “Yaa Kiristoos! Eenyutu si rukute? Mee raajii nutti dubbadhu” jedhaniin.

Phexros Yesuusin Ganuu Isaa

26:69-75 kwf – Mar 14:66-72; Luq 22:55-62; Yoh 18:16-18,25-27

⁶⁹ Phexrosis dallaa keessa ala taa’aa ture; xomboreen tokko isatti dhi’aattee, “Atis Yesuus namicha Galiilaa sana wajjin turte!” jetteen.

⁷⁰ Inni garuu, “Ani waan ati dubbachuutti jirtu hin beeku” jedhee hunduma isaanii duratti gane.

⁷¹ Utuu inni gara karra dallaa sanaatti deema jiruu xomboreen biraa tokko isa argitee, “Namichi kun Yesuus nama Naazreeti wajjin ture” jettee warra achi turanitti himte.

⁷² Innis kakatee, “Ani namicha kana hin beeku!” jedhee ammas gane.

⁷³ Yeroo xinnoo booddee warri achi dhadhaabachaa turan Phexrositti dhi’aatanii, “Atis dhuguma iyyuu jara keessaa tokkoo dha; loqodni kee si saaxilaatii” jedhan.

⁷⁴ Yommuu inni, “Ani namicha kana hin beeku” jedhee of abaaruu fi kakachuu jalqabe.

Yommusuma indaanqoon iyye. ⁷⁵ Phexrosis dubbii Yesuus, “**Ati utuu indaanqoon hin iyyin yeroo sadii na ganta**” jedhee ture sana yaadate. Gad ba’ees hiqqifatee boo’e.

27

Yihuudaan Of Fannisuu Isaa

¹ Ganama barii luboonni hangafoonnii fi maanguddoonni sabaa hundinuu Yesuusin ajjeesuuf walii wajjin mari’atan. ² Isaanis isa hidhanii geessanii Phiilaaxoos bulchaatti dabarsanii kennan.

³ Yihuudaan inni Yesuusin dabarsee kenne sun yommuu akka Yesuusitti murame argetti ni gaabbe; meetii soddoma sanas luboota hangafootattii fi maanguddootatti deebise. ⁴ Innis, “Ani dhiiga qulqulluu dabarsee kennuudhaan cubbuu hojdedheera” jedhe.

Isaanis deebisanii, “Maaltu nu dhibe ree? Situ itti gaafatama!” jedhaniin.

⁵ Yihuudaanis meetii sana mana qulqullummaa keessatti gatee gad ba’e; dhaqees of fannise.

⁶ Luboonni hangafoonnii meetii sana fuudhanii, “Meetiin kun waan gatii dhiigaa ta’eef meetii mana qulqullumaatti dabaluun seera miti” jedhan. ⁷ Isaanis walii wajjin mari’atanii akka namoota biyya ormaatiif iddoo awwaalaa ta’uuf meetii sanaan lafa namicha suphee dha’u tokkoo bitan. ⁸ Kanaaf lafti sun hamma har’aatti, “Lafa Dhiigaa” jedhamee waamama. ⁹ Kanaanis wanni Ermiyaas raajichi dubbate sun ni raawwatame: Innis akkana jedha; “Isaan meetii soddomman, gatii isaa kan ijoolleen Israa’el isatti shallagan sana fuudhanii, ¹⁰ akkuma Gooftaan na ajajetti lafa namicha suphee dha’u sanaa ittiin bitan.”*

Yesuus Fuula Phiilaaxoos Duratti

27:11-26 kwf – Mar 15:2-15; Luq 23:2,3,18-25; Yoh 18:29-19:16

¹¹ Yeroo sanatti Yesuus fuula bulchaa dura dhaabate; bulchaan sunis, “Ati mootii Yihuudootaati?” jedhee isa gaafate.

Yesuus immoo, “**Atuu jette kaal!**” jedhee deebise.

¹² Inni yeroo luboonni hangafoonnii fi maanguddoonni isa himatanittis deebii tokko illee hin kennine. ¹³ Phiilaaxoosis, “Ati akka isaan waan meeqa sirratti dhugaa ba’an hin dhageessuu?” jedhee isa gaafate. ¹⁴ Yesuus garuu himata tokkoof illee deebii tokko iyyuu hin kennine; bulchaan sunis akka malee waan kana dinqisiifate.

¹⁵ Bulchaan sun nama hidhame tokko ayyaanaan akkuma fedhii sabaatti gad dhiisuu bartee godhatee ture. ¹⁶ Yeroo sana namichi Barabbaas jedhamu beekamaan tokko hidhamee ture. ¹⁷ Kanaafuu yommuu isaan walitti qabamanitti Phiilaaxoos, “Akka ani isa kam gad isinii dhiisu barbaaddu? Barabbaas moo Yesuus isa Kiristoos jedhamu sana?” jedhee isaan gaafate. ¹⁸ Akka isaan hinaaffaadhaan Yesuusin dabarsanii isatti kennan ni beeka tureetii.

* 27:10 27:10 Zak 11:12,13; Erm 19:1-13; 32:6-9

¹⁹ Utuu Phiilaaxoos barcuma murtii irra taa'uu niitiin isaa, "Namicha qajeelaa sana hin tuqin; ani eda sababii isaatiif abjuudhaan akka malee dhiphadheeraatii" jettee itti dhaamte.

²⁰ Luboonni hangafoonnii fi maanguddoonni garuu akka Barabbaas gad dhiifamee, Yesuus immoo ajjeefamu akka isa kadhataaniif namoota sossoban.

²¹ Bulchaan sun, "Isaan lamaan kanneen keessaa akka ani isa kam gad isinii dhiisu barbaaddu?" jedhee ammas gaafate.

Isaanis, "Barabbaasin" jedhanii deebisan.

²² Phiilaaxoosis, "Yesuus isa Kiristoos jedhamu immoo ani maal godhu ree?" jedhee gaafate.

Hundi isaaniis, "Isa fannisi!" jedhanii deebisan.

²³ Phiilaaxoos immoo, "Maaliif? Inni yakka maalii hojjete?" jedhee gaafate.

Isaan garuu ittuma caalchisanii, "Isa fannisi!" jedhanii iyyan.

²⁴ Phiilaaxoos yommuu akka wanni kun goolii kaasuu malee faayidaa tokko illee hin qabne argetti, "Ani dhiiga nama kanaa irraa qulqulluu dha; isintu itti gaafatama!" jedhee bishaan fudhatee fuula namootaa duratti harka isaa dhiqate.

²⁵ Namoonni hundinuus, "Dhiigni isaa nuu fi ijoollee keenya irra haa ga'u!" jedhanii deebisan.

²⁶ Ergasii inni Barabbaasin gad isaaniif dhiise. Yesuus garuu garafsiisee akka inni fannifamuuf dabarsee kenne.

Loltoonni Yesuusitti Qoosuu Isaanii

27:27-31 kwf - Mar 15:16-20

²⁷ Ergasii loltoonni bulchaa sanaa Yesuusina mana bulchaatti ol galchan; raayyaa loltootaa hundas naannoo Yesuusitti walitti qaban. ²⁸ Isaanis uffata isaa irraa baasanii uffata bildiimaa itti uffisan; ²⁹ gonfoo qoraattii micciiranii dha'anii mataa isaa irra kaa'an. Harka isaa mirgaa keessas ulee kaa'an. Fuula isaa durattis jilbeenfatanii, "Akkam ree, yaa mootii Yihuudootaa!" jedhanii isatti qoosan. ³⁰ Isaanis isatti tufan; ulee sanas fuudhanii mataa isaa rukutan. ³¹ Erga itti qoosanii booddee uffata sana irraa baasanii wayyaa isaa deebisanii isatti uffisan. Fannisuufis isa fuudhanii deeman.

Yesuus Fannifamuu Isaa

27:33-44 kwf - Mar 15:22-32; Luq 23:33-43; Yoh 19:17-24

³² Utuu gad ba'anuus namicha Qareenaa kan Simoon jedhamu tokko arganii akka inni fannoo sana baatuuf isa dirqisiisan. ³³ Isaanis iddoo Golgootaa jedhamu ga'an; Golgootaa jechuun "Iddoo buqqee mataa" jechuu dha. ³⁴ Achittis akka inni dhuguuf daadhii wayinii kan hadhooftuun itti makame kennaniif; inni garuu afaaniin qabee dhuguu dide. ³⁵ Isaanis erga isa fannisanii booddee ixaa buufatanii uffata isaa gargar qooddatan. ³⁶ Isaanis achi taa'anii isa eegaa turan. ³⁷ Katabbiin waan inni ittiin himatamees mataa isaatii ol kaa'amee ture; katabbiin sunis,

Kun Yesuus Mooticha Yihuudootaa ti,

jedha.

³⁸ Hattoonni lamas, inni tokko mirga isaatiin, kaan immoo bitaa isaatiin isa wajjin fannifaman. ³⁹ Warri achiin darbanis isa arrabsan; mataa isaaniis raasanii, ⁴⁰ "Ati kan mana qulqullummaa ddiigdee guyyaa sadiitti ijaartu, mee of oolchi! Ati yoo ilma Waaqaa taate fannoo irraa gad bu'i!" jedhan. ⁴¹ Akkasumas luboonni hangafoonnii, barsiistoonni seeraatii fi maanguddoonni isatti qoosan. Akkanas jedhan; ⁴² "Inni warra kaan oolcheera; ofii isaa garuu oolchuu hin danda'u! Inni yoo mootii Israa'el ta'e amma fannoo irraa gad haa bu'u; nuus isatti ni amannaatii. ⁴³ Inni Waaqaa amanata; Waaqni yoo isa jaallate, mee amma isa haa oolchu; inni, 'Ani ilma Waaqaa ti' jedheeraatii." ⁴⁴ Akkasuma hattoonni isa wajjin fannifamanis isa arrabsan.

Yesuus Du'uu Isaa

27:45-56 kwf - Mar 15:33-41; Luq 23:44-49

⁴⁵ Sa'aatii ja'aa jalqabee hamma sa'aatii sagaliitti dukkanni lafa hunda irra bu'e. ⁴⁶ Gara Sa'aatii sagaliitti Yesuus sagalee guddaadhaan, "**Eloohē, Eloohē,† laamaa sabaqtaanii?**" jedhee iyye; hiikkaan isaas, "**Yaa Waaqaa ko, yaa Waaqaa ko, ati maaliif na dhiifte?**"‡ jechuu dha.

⁴⁷ Warra achi dhadhaabatan keessaa tokko tokko yommuu waan kana dhaga'anitti, "Namichi kun Eeliyaasin waama" jedhan.

† 27:46 27:46 Waraabbileen tokko tokko Eelii, Eelii jedhu. ‡ 27:46 27:46 Far 22:1

⁴⁸ Yommusuma isaan keessaa namichi tokko fiigee dhaqee ispoonjii daadhii wayinii dhangaggaa'aadhaan guutee, uleetti kaa'e; akka inni dhuguufis Yesuusiif kenne. ⁴⁹ Warri kaan garuu, "Mee isa dhiisaa. Akka Eeliyaas dhufee isa oolchu arginaatii" jedhan.

⁵⁰ Yesuus ammas sagalee guddaadhaan iyyee hafuura isaa kenne.

⁵¹ Yeruma sana golgaan mana qulqullummaa olii hamma gadiitti iddoo lamatti tarsa'e. Lafti ni sochoote; kattaawwanis ni babbaqaqan. ⁵² Awwaalonnis banamanii dhagnawwan qulqullootaa kanneen du'anii turan hedduun du'aa kaafaman. ⁵³ Isaanis du'aa ka'uu Yesuus booddee awwaala keessaa ba'anii magaalattii qulqulluu seenan. Namoota hedduuttis mul'atan.

⁵⁴ Ajajaan dhibbaa sunii fi warri isa wajjin Yesuusin eegaa turan yommuu sochii lafaatii fi waan achitti ta'e hunda arganitti akka malee sodaatanii, "Dhugumaanuu inni Ilma Waaqaa ture!" jedhan.

⁵⁵ Dubartoonni Yesuusin tajaajiluuf jedhanii Galiilaadhaa isa duukaa bu'an baay'eenis fagoo dhaabatanii ilaalaa turan. ⁵⁶ Isaan keessaas Maariyaam ishee Magdala, Maariyaam haadha Yaaqoobii fi Yoosef, akkasumas haadha ilmaan Zabdewoos turan.

Yesuus Awwaalamuu Isaa

27:57-61 kwf - Mar 15:42-47; Luq 23:50-56; Yoh 19:38-42

⁵⁷ Yommuu galgala'ettis namichi soressi Yoosef jedhamu tokko Armaatiyaa dhufe; inni mataan isaas barataa Yesuus ture. ⁵⁸ Innis gara Phiilaaxoos dhaqee reeffa Yesuus kadhate; Phiilaaxoosis akka reeffi sun isaaf kennamu ajaje. ⁵⁹ Yoosefis reeffa sana fudhatee huccuu quncee talbaa irraa hojjetame qulqulluudhaan kafane; ⁶⁰ innis awwaala ofii isaa kan garaa kattaa keessatti qotate haaraa tokko keessa kaa'e. Dhagaa guddaa tokkos balbala awwaala sanaatti gangalchee biraa deeme. ⁶¹ Maariyaam isheen Magdalaatii fi Maariyaam isheen kaan fuullee awwaala sanaa tataa'aa turan.

Egduu Awwaalaa

⁶² Guyyaa itti aanutti jechuunis guyyaa qophii booddee luboonni hangafoonnii fi Fariisonni fuula Phiilaaxoos duratti walitti qabaman. ⁶³ Isaanis akkana jedhan; "Gooftaa! Akka namichi gowwoomsaan sun utuu lubbuudhaan jiruu, '**Ani guyyaa sadii booddee du'aa nan ka'a**' jedhe nu ni yaadanna. ⁶⁴ Kanaafuu akka awwaalli sun hamma guyyaa sadaffaatti eegamu ajaji. Yoo kun ta'uu baate barattoonni isaa dhaqanii reeffa isaa hatanii, 'Inni warra du'an keessaa ka'eera' jedhanii namatti odeessu. Gowwoomsaan dhuma kun immoo isa duraa caalaa ni hammaata."

⁶⁵ Phiilaaxoosis deebisee, "Waardiyyaa fudhadhaa dhaqaatii akkuma beektanitti awwaalicha eegsifadhaa" jedheen. ⁶⁶ Kanaaf isaan dhaqanii dhagicha irratti mallattoo godhan; waardiyyaas ramadanii awwaala sana eegsisan.

28

Du'aa Ka'uu Yesuus

28:1-8 kwf - Mar 16:1-8; Luq 24:1-10

¹ Sanbata booddee, guyyaa jalqaba torban sanaa Maariyaam isheen Magdalaatii fi Maariyaam isheen kaan barii barraaqaan awwaala ilaaluu dhaqan.

² Kunoo, sababii ergamaan Gooftaa samii irraa gad bu'ee gara awwaalaa dhaqee balbala awwaalaa irraa dhagaa sana garagalchee irra taa'eef, sochiin lafaa guddaan ta'e. ³ Bifti isaa ifaa akka bakakkaa, uffanni isaa immoo adii akka cabbii ture. ⁴ Waardiyyoonni sunis sababii isa sodaataniif hollatanii akkuma nama du'ee ta'an.

⁵ Ergamaan sunis dubartoota sanaan akkana jedhe; "Hin sodaatinaa! Akka isin Yesuus isa fannifamee ture sana barbaaddan anuu beeka. ⁶ Inni as hin jiru; akkuma jedhe sana du'aa ka'eeraatii. Kottaatii iddoo inni ciisaa ture ilaalaa. ⁷ Eгаа dafaa dhaqaatii akkana jedhaa barattoota isaatii himaa; 'Inni warra du'an keessaa ka'eera; kunoo, inni isin dursee Galiilaa ni dhaqa. Achittis isa ni argitu.' Kunoo ani isinitti himeera."

⁸ Dubartoonni sunis sodaatanii, ta'us gammachuu guddaan guutamani ariitiidhaan awwaala sana biraa deeman; barattoota isaatii himuufis fiigan. ⁹ Yeruma sana kunoo Yesuus isaanitti dhufee, nagaa isaan gaafate. Isaanis isatti dhi'aatanii miilla isaa qabatanii sagadaniif. ¹⁰ Yesuusiis, "**Hin sodaatinaa! Dhaqaatii akka isaan gara Galiilaa deemaniif obboloota kootti himaa; isaanis achitti na argu**" jedheen.

Gabaasa Waardiyyootaa

¹¹ Utuu dubartoonni sun karaa jiranuu waardiyyoota sana keessaa tokko tokko magaalaa seenanii waan ta'e hunda luboota hangafootatti himan. ¹² Luboonni hangafoonnis erga maanguddoota wajjin walitti qabamanii mari'atanii booddee loltootaaf maallaqa

hedduu kennan. ¹³ Akkanas jedhaniin; “‘Utuu nu rafnuu barattoonni isaa halkaniin dhufanii isa hatan’ jedhaatii namootatti himaa. ¹⁴ Yoo wanni kun gurra bulchaa seene nu isa amansiifnee rakkina jalaa isin baafnaa.” ¹⁵ Loltoonnis maallaqa sana fudhatanii akkuma ajajaman godhan. Oduun kunis hamma har’aatti Yihuudoota biratti odeeffamaa jira.

Ergama Guddicha

¹⁶ Barattoonni kudha tokkoon sun gara biyya Galiilaa, gara tulluu Yesuus dhaqaa isaaniin jedhee ture sanaa dhaqan. ¹⁷ Isaanis yommuu isa arganitti ni sagadaniif; isaan keessaa tokko tokko garuu ni maman. ¹⁸ Yesuus immoo isaanitti dhi’aatee akkana jedhe; **“Taayitaan hundinuu samii fi lafa irratti naa kennameera. ¹⁹ Kanaaf dhaqaatii saba hundumaa maqaa Abbaatti, maqaa Ilmaatti, maqaa Hafuura Qulgulluuttis cuuphaatii barattoota taasisaa; ²⁰ akka waan ani isin ajaje hunda eeganiifis isaan barsiisaa. Kunoo, ani hamma dhuma addunyaatti guyyaa hunda isin wajjinan jira.”**

Wangeela Maarqos

Yohannis Cuuphaan Karaa Qopheessuu Isaa

1:2-8 kwf - Mat 3:1-11; Luq 3:2-16

¹ Jalqaba wangeela Yesuus Kiristoos Ilma Waaqaa. ² Kitaaba Isaayyaas raajichaa keessatti akkana jedhamee barreeffameera:

“Kunoo, ani ergamaa koo isa karaa kee qopheessu,*
si dura nan erga;”

³ “Sagalee nama, ‘Gooftaaf karaa qopheessaa;
daandii qajeelaas isaaf hojjedhaa’ jedhee
gammoojjii keessaa iyyu tokkoo.”†

⁴ Kanaafuu Yohannis gammoojjii keessatti nama cuuphaa, dhiifama cubbuutiif immoo cuuphaa qalbii jijjiirranaa lallabaa dhufe. ⁵ Biyyi Yihuudaa guutuunii fi namoonni Yerusaaalem hundinuus gara isaa dhaqanii cubbuu isaanii himachaa, Laga Yordaanos keessatti isaan cuuphamaa turan. ⁶ Yohannis uffata rifeensa gaalaa irraa hojjetame uffatee, mudhii isaas sabbata teephaatiin hidhata ture; inni hawwaannisaa fi damma bosonaa nyaata ture. ⁷ Innis akkana jedhee lallabaa ture; “Kan na caalaa jabaa ta’e, hidhaa kophee isaa illee gad jedhee hiikuun kan naaf hin malle tokko na duubaan ni dhufa. ⁸ Ani bishaaniinan isin cuupha; inni garuu Hafuura Qulqulluudhaan isin cuupha.”

Cuuphamuu fi Qoramuu Yesuus

1:9-11 kwf - Mat 3:13-17; Luq 3:21,22

1:12,13 kwf - Mat 4:1-11; Luq 4:1-13

⁹ Yeroo sana Yesuus Naazreeti ishee Galiilaatii dhufee Laga Yordaanos keessatti Yohannisii cuuphame. ¹⁰ Yesuus utuma bishaan keessaa ol ba’aa jiruu, samiin banamee utuu Hafuurri akkuma gugeetti isa irratti gad bu’uu arge. ¹¹ Sagaleen, “Ati Ilma koo isa ani jaalladhuu dha; ani baay’ee sitti nan gammada” jedhu tokkos samii irraa dhufe.

¹² Yeruma sana Hafuurri gammoojjiitti isa baase; ¹³ inni guyyaa afurtama Seexanaan qoramaa gammoojjii keessa ture. Inni bineensota wajjin ture; ergamoonnis isa tajaajilan.

Barattoonni Jalqabaa Waamamuu Isaanii

1:16-20 kwf - Mat 4:18-22; Luq 5:2-11; Yoh 1:35-42

¹⁴ Erga Yohannis mana hidhaatti galfamee booddee, Yesuus wangeela Waaqaa lallabaa Galiilaa seene. ¹⁵ Innis, “**Barri sun ga’eera; mootummaan Waaqaas dhi’aateera; qalbii jijjiirradhaatii wangeelatti amanaa!**” jedhe.

¹⁶ Yesuus utuu qarqara Galaana Galiilaa irra deemaa jiruu Simoonii fi obboleessa isaa Indiriyaas utuu isaan kiyoo galaanatti darbachaa jiranuu arge; isaan qurxummii qabdoota turaniitii. ¹⁷ Yesuusis, “**Kottaa, na duukaa bu’aa; anis akka isin qabduu namootaa taataniif isin nan erga**” jedheen. ¹⁸ Isaanis yommusuma kiyoo isaanii dhiisanii isa duukaa bu’an.

¹⁹ Innis yommuu xinnoo achi hiiqetti Yaaqoob ilma Zabdewoosii fi obboleessa isaa Yohannis utuu isaan bidiruu keessatti kiyooowwan isaanii qopheeffatanuu arge. ²⁰ Innis yommusuma isaan waame; isaanis abbaa isaanii Zabdewoosin hojjetoota qacaraman wajjin bidiruu sana keessatti dhiisanii isa duukaa bu’an.

Yesuus Hafuura Xuraa’aa Baasuu Isaa

1:21-28 kwf - Luq 4:31-37

²¹ Isaan gara Qifirnaahom dhaqan; innis yommusuma Sanbataan mana sagadaa seenee barsiise. ²² Inni akka barsiistota seeraatti utuu hin ta’in akka nama taayitaa qabu tokkootti waan barsiisaa tureef namoonni barsiisa isaa ni dinqisiifatan. ²³ Yeruma sana namichi mana sagadaa isaanii keessaa kan hafuura xuraa’aan qabame tokko iyyee ²⁴ akkana jedhe; “Yaa Yesuus nama Naazreeti, ati maal nurraa qabda? Nu balleessuu dhufte moo? Ati eenyu akka taate ani nan beeka, yaa Qulqullicha Waaqaa!”

²⁵ Yesuus immoo, “**Cal’isii isa keessaa ba’i!**” jedhee ifate. ²⁶ Hafuurri xuraa’aan sunis namicha dhidhiitachiisee, sagalee guddaadhaan iyyee keessaa ba’e.

* 1:2 1:2 Mil 3:1 † 1:3 1:3 Isa 40:3

²⁷ Namoonni hundinuu baay'ee dinqifatanii, "Kun maalii? Inni taayitaadhaan barsiisa haaraa barsiisa! Hafuurota xuraa'oo illee ni ajaja; isaanis ni ajamuuf" waliin jedhan. ²⁸ Oduun waa'ee isaas dafee biyya Galiilaa guutuu keessa faffaca'e.

Yesuus Nama Hedduu Fayyisuu Isaa
1:29-31 kwf - Mat 8:14,15; Luq 4:38,39
1:32-34 kwf - Mat 8:16,17; Luq 4:40,41

²⁹ Isaanis akkuma mana sagadaatii ba'aniin Yaaqoobii fi Yohannis wajjin mana Simoonii fi Indiriiyaas dhaqan. ³⁰ Haati niitii Simoonis dhukkuba dhagna gubaadhaan qabamtee ciifti turte; isaanis yommusuma waa'ee ishee Yesuusitti himan. ³¹ Innis dhaqee harka qabee ishee kaase. Dhagna gubaan sunis ishee dhiise; isheenis isaan tajaajiluu jalqabde.

³² Namoonnis galgala sana erga biiftuun lixxee booddee, dhukkubsattootaa fi warra hafuurota hamoon qabaman hunda Yesuusitti fidan. ³³ Magaalaan sun guutuunis balbala duratti walitti qabame. ³⁴ Yesuusis namoota dhibee garaa garaa qaban hedduu fayyise; hafuurota hamoo baay'ees ni baase; garuu inni sababii hafuuronni hamoon sun eenyunmaa isaa beekaniif akka isaan dubbatan hin eeyyamneef.

Yesuus Iddoo Namni Hin Jirretti Kadhachuu Isaa
1:35-38 kwf - Luq 4:42,43

³⁵ Yesuus ganama barrii dimimmisaan ka'ee manaa ba'ee iddoo namni hin jirre tokko dhaqee achitti kadhate. ³⁶ Simoonii fi warri isa wajjin turan isa barbaaduu deeman; ³⁷ isaanis yommuu isa argatanitti, "Namni hundinuu si barbaadaa jira!" jedhaniin.

³⁸ Yesuus immoo deebisee, "**Akka ani achittis lallabuuf kottaa gara magaalawwan dhi'oo jiran kaanii dhaqnaa. Sababiin ani dhufeeffis kanuma**" jedhe. ³⁹ Kanaafuu inni manneen sagadaa isaanii keessatti lallabaa, hafuurota hamoos baasaa, Galiilaa guutuu keessa deeme.

Namicha Lamxaa'aa Tokko
1:40-44 kwf - Mat 8:2-4; Luq 5:12-14

⁴⁰ Namichi lamxaa'aan tokko gara isaa dhufee jilbeenfatee, "Yoo fedhii kee ta'e, ati na qulqulleessuu ni dandeessa" jedhee isa kadhate.

⁴¹ Yesuusis garaa laafeefii, harka isaa hiixatee namicha qaqqabee, "**Fedhii koo ti; qulqullaa'ii!**" jedheen. ⁴² Yeruma sana lamxiin sun namicha irraa bade; namichis ni qulqullaa'e.

⁴³ Yesuusis of eeggannoo jabaa kenneefii yommusuma gad isa dhiise. ⁴⁴ Akkanas jedheen; "**Ati waan kana nama tokkotti illee akka hin himne beekkadhu; garuu dhaghiiti akka isaaniif ragaa ta'uuf lubatti of argisiisi; qulqullaa'uu keetiifis aarsaawwan Museen ajaje sana dhi'eessi.**" ⁴⁵ Namichi garuu achii ba'ee baay'isee odeessuu jalqabe. Kanaafis Yesuus ergasii magaalaa ala, lafa namni hin jirre ture malee ifaan ifatti magaalattii seenuu hin dandeenye. Namoonni garuu iddoo hundatti isa bira dhufaa turan.

2

Yesuus Nama Dhagni Irratti Du'e Tokko Fayyisuu Isaa
2:3-12 kwf - Mat 9:2-8; Luq 5:18-26

¹ Yesuus guyyaa muraasa booddee Qifirnaahomitti deebi'e; namoonnis akka inni mana jiru dhaga'an. ² Namoonni akka malee baay'atan walitti qabamnaa iddoon dhabamee balballi durris dhiphate; innis dubbicha isaanitti lallabaa ture. ³ Jarri tokko nama dhagni irratti du'e kan namoota afuriin baatame tokko gara isaa fidan. ⁴ Isaanis sababii baay'ina namaatiif namicha sana Yesuusitti dhi'eessuu dadhabanii qixa Yesuus tureen bantii manaa saaqanii siree namichi dhagni irratti du'e irra ciise sana gad buusan. ⁵ Yesuusis yommuu amantii isaanii argetti namicha dhagni irratti du'e sanaan, "**Gurbaa, cubbuun kee siif dhiifameera**" jedhe.

⁶ Barsiistota seeraa keessaa tokko tokko achi tataa'anii garaa isaanii keessatti, ⁷ "Namichi kun maaliif akkana dubbata? Inni Waaqa arrabsa! Waaqa tokkicha malee eenyutu cubbuu namaaf dhiisuu danda'a?" jedhanii yaadan.

⁸ Yesuusis yeruma sana akka wanni isaan garaa isaanii keessatti yaadaa turan kana ta'e hafuuraan beekke akkana jedheen; "**Isin maaliif waan kana yaaddu?**" ⁹ Namicha dhagni irratti du'e kanaan, "**Cubbuun kee siif dhiifameera**" jechuu moo 'Ka'ii siree kee fudhadhuu deemi' jechuutu salphaa dha? ¹⁰ Ani garuu akka Ilmi Namaa cubbuu namaaf dhiisuudhaaf lafa irratti taayitaa qabu akka beektan nan barbaada." Kanaafuu inni namicha sanaan, ¹¹ "Ani sitti nan hima; ka'i; siree kee

fudhadhuutii mana keetti gali" jedhe. ¹² Innis ka'ee, yommusuma siree isaa fudhatee utuma isaan hundinuu arganuu ba'e deeme. Kunis hunda isaanii dinqisiise; isaanis, "Nu takkumaa waan akkanaa arginee hin beeknu!" jedhanii Waaqa jajan.

Waamamuu Lewwii

2:14-17 kwf - Mat 9:9-13; Luq 5:27-32

¹³ Yesuus amma illee gara qarqara galaanichaatti gad ba'e. Namoonni baay'eenis isa biratti walitti qabaman; innis isaan barsiisuu jalqabe. ¹⁴ Innis utuu achiin darbaa jiruu, Lewwii ilma Alfewos utuu inni iddoo itti qaraxa walitti qaban taa'uu argee, "**Na duukaa bu'i**" jedheen. Lewwiinis ka'ee isa duukaa bu'e.

¹⁵ Yeroo Yesuus mana Lewwiitti irbaata nyaachaa turetti, qaraxxoonnii fi cubbamoonnii baay'een isaa fi barattoota isaa wajjin nyaachaa turan; namoonni isa duukaa bu'an baay'ee turaniitii. ¹⁶ Barsiistoonni seeraa warri Fariisota turan yommuu isaa cubbamoootaa fi qaraxxoota wajjin nyaatu arganitti, "Inni maaliif qaraxxootaa fi cubbamooota wajjin nyaata?" jedhanii barattoota isaa gaafatan.

¹⁷ Yesuus immoo waan kana dhageenyaan, "**Ogeessi fayyaa tokko warra dhukkub-sataniif malee warra fayyaa qabaniif hin barbaachisu. Ani cubbamooota waamuufin dhufe malee qajeeltoota waamuuf hin dhufne**" jedheen.

Yesuus Waa'ee Soomaa Gaafatame

2:18-22 kwf - Mat 9:14-17; Luq 5:33-38

¹⁸ Barattoonni Yohannisii fi Fariisonni ni soomu turan. Namoonni tokko tokko dhufanii, "Barattoonni Yohannisii fi barattoonni Fariisotaa ni soomu; barattoonni kee garuu maaliif hin soomne?" jedhanii Yesuus gaafatan.

¹⁹ Yesuus immoo akkana jedhee deebise; "**Keessummoonni misirrichaa akkamiin utuu inni isaan wajjin jiruu soomuu danda'u? Isaan hamma isa of biraa qabanitti soomuu hin danda'an.** ²⁰ Garuu yeroon itti misirrichi isaan biraa fudhatamu ni dhufa; isaanis gaafas ni soomu.

²¹ "**Namni uffata moofaa irratti erbee haaraa erbu tokko iyyuu hin jiru. Yoo kun godhame, erbeen haaraan sun uffata sana irraa tarsaasa; tarsa'aan sunis isa duraa ni caala.** ²² **Namni daadhii wayinii haaraa qalqalloo moofaatti naqu tokko iyyuu hin jiru. Yoo itti nage immoo daadhiin sun qalqalloo sana dhoosa; daadhichii fi qalqalichi horoomaa ba'u. Qooda kanaa daadhiin wayinii haaraan qalqalloo haaraatti naqamuu qaba.**"

Yesuus Gooftaa Sanbataa Ta'uu Isaa

2:23-28 kwf - Mat 12:1-8; Luq 6:1-5

3:1-6 kwf - Mat 12:9-14; Luq 6:6-11

²³ Guyyaa Sanbataa tokko Yesuus lafa qotiisaa midhaanii keessa darbaa ture; barattoonni isaas utuu isa wajjin deemaa jiranuu asheetii midhaanii cirachuu jalqaban.

²⁴ Fariisonnis, "Ilaa, isaan maaliif waan Sanbataan hojjechuun hin eeyyamamne hojjetu?" jedhaniin.

²⁵ Innis akkana jedhee deebise; "**Isin waan Daawit yeroo innii fi miiltonni isaa beela'anii fi rakkatanitti godhe sana takkumaa hin dubbifnee?** ²⁶ **Bara Abiyaataar luba ol aanaa ture keessa, inni mana Waaqaa seenee buddeena qulqulleffame kan akka luboonni qofti nyaataniif eeyyamame sana nyaate. Warra isa wajjin jiraniifis ni kenne.**"

²⁷ Yesuus akkana jedheen; "**Sanbataatu namaaf uumame malee namni Sanbataaf hin uumamne.** ²⁸ **Kanaafuu Ilmi Namaa Sanbataaf illee Gooftaa dha.**"

3

Yesuus Guyyaa Sanbataatiin Fayyisuu Isaa

¹ Ammas Yesuus mana sagadaa seene; namichi harki irratti goge tokkos achi ture. ² Isaan keessaas namoonni tokko tokko Yesuus himachuuf jedhanii sababa barbaadaa turan; kanaafuu akka inni Sanbataan namicha fayyisu ilaaluuf isa gaadan. ³ Yesuus namicha harki irratti goge sanaan, "**Ka'ii fuula nama hundaa dura dhaadhu**" jedhe.

⁴ Yesuus, "**Sanbataan isa kamtu eeyyamamaa dha? Waan gaarii hojjechuu moo waan hamaa hojjechuu? Lubbuu oolchuu moo ajjeesuu?**" jedhee isaan gaafate. Isaan garuu ni cal'isan.

⁵ Innis mata jabina isaaniitti akka malee gaddee, aariidhaan garagalee isaan ilaale; namicha sanaanis, "**Harka kee diriirfadhu!**" jedhe. Namichis harka diriirfate; harki

isaas guutumaa guutuutti fayye. ⁶ Fariisonnis gad ba'anii akka ittiin Yesuusini ajjeesuu danda'an garee Heroodis wajjin mari'achuu jalqaban.

Namoonni Yesuus Duukaa Bu'an

3:7-12 kwf - Mat 12:15,16; Luq 6:17-19

⁷ Yesuus barattoota isaa wajjin achii ka'ee gara galaanichaatti qajeele; tuunni namoota baay'ees Galiilaadhaa isa duukaa bu'e. ⁸ Namoonni baay'eenis yommuu waan inni hojjechaa ture hunda dhaga'anitti Yihuudaadhaa, Yerusaleemii, Edoomiyaasii, biyya Yordaanos gamaatii, naannoo Xiirrosiitii fi Siidoonaatii gara isaa dhufan. ⁹ Innis akka baay'ina namaatiin hin dhiibamneef akka isaan bidiruu xinnoo tokko isaaf qopheessan barattoota isaatti hime. ¹⁰ Sababii inni nama baay'ee fayyisee tureef, warri dhukkubsatan hundinuu isa tuquuf jedhanii irratti wal cabsaa turan. ¹¹ Hafuuronni xuraa'oonis yeroo isa argan fuula isaa duratti kufanii, "Ati Ilma Waaqaa ti!" jedhanii iyyu turan. ¹² Inni garuu akka isaan akka inni beekamu hin goone jabeessee isaan ajaje.

Filatamuu Ergamoota Kudha Lamaanii

3:16-19 kwf - Mat 10:2-4; Luq 6:14-16; Hoj 1:13

¹³ Yesuusis tulluutti ol ba'ee warra ofii isaatii barbaade ofitti waame; isaanis gara isaa dhufan. ¹⁴ Innis akka isaan isa wajjin jiraatanii fi akka lallabaaf isaan erguuf namoota kudha lama muudee barattoota jedhee moggaase; ¹⁵ akka isaan hafuurota hamoo baasaniifis taayitaa kenneef.

¹⁶ Warri kudha lamaan inni muudes isaan kana:

Simoon isa inni "Phexros" jedhee moggaase,

¹⁷ Yaaqoob ilma Zabdewoosii fi obboleessa isaa Yohannis warra inni "Bo'anergees" jedhee moggaase; Bo'anergees jechuun ilmaan "Kakawwee" jechuu dha;

¹⁸ Indiriiyaas,

Filiphoos,

Bartaloomwoos,

Maatewos,

Toomaas,

Yaaqoob ilma Alfewoos,

Taadewoos,

Simoon Hinaafticha,

¹⁹ Yihuudaa Keeriyoticha isa Yesuusini dabarsee kenne.

Yesuusii fi Bi'eelzebuul

3:23-27 kwf - Mat 12:25-29; Luq 11:17-22

²⁰ Yesuusis mana tokko seene; sababii namoonni akka malee baay'atan ammas walitti qabamaniif innii fi barattoonni isaa waa nyaachuu illee hin dandeenye. ²¹ Firoonni isaas yommuu waan kana dhaga'anitti isa qabuu dhaqan; namoonni, "Inni qalbii dabarseera" jechaa turaniitii.

²² Barsiistonni seeraa warri Yerusaleemii gad bu'an, "Inni Bi'eelzebuuliin qabameera! Hangafa hafuurota hamootiin hafuurota hamoo baasaa jira" jedhan.

²³ Yesuus immoo ofitti isaan waamee akkana jedhee fakkeenyaan isaanitti dubbate: **"Seexanni akkamitti Seexana baasuu danda'a? ²⁴ Mootummaan tokko yoo gargar of goode, mootummaan sun dhaabachuu hin danda'u. ²⁵ Manni tokko yoo gargar of goode, manni sun dhaabachuu hin danda'u. ²⁶ Seexannis yoo gargar of goode, inni dhaabachuu hin danda'u; dhumni isaa ga'eeraatii. ²⁷ Dhugumaan namni kam iyyuu utuu duraan dursee nama jabaa tokko hin hidhin, mana nama jabaa sanaa seenee qabeenya isaa saamuu hin danda'u. Ergasii inni mana namicha jabaa sanaa saamuu danda'a. ²⁸ Ani dhuguma isinittin hima; cubbuun isaanii hundii fi arrabsoon isaan dubbatan hundi namootaaf dhiifamuu ni danda'a; ²⁹ namni Hafuura Qulqulluu arrabsu kam iyyuu garuu gonkumaa dhiifama hin argatu; inni itti gaafatamaa cubbuu bara baraa ti."**

³⁰ Yesuusis sababii isaan, "Inni hafuura xuraa'aa qaba" jechaa turaniif waan kana dubbate.

Haadha Yesuusii fi Obboloota Isaa

3:31-35 kwf - Mat 12:46-50; Luq 8:19-21

³¹ Haatii fi obboloonni isaa dhufanii, ala dhaabatani nama itti erganii isa waamsisan. ³² Namoonni baay'eenis isatti naanna'anii taa'aa turan; isaanis, "Haati keetii fi obboloonni kee ala dhadhaabatani si iyyaafachaa jiru" jedhanii isatti himan.

³³ Inni immoo, “Haati kootii fi obbolloonni koo eenyu?” jedhee gaafate.

³⁴ Innis warra naannoo isaa marsanii tataa’an ilaalee akkana jedhe; “Haati kootii fi obbolloonni koo kunoo ti! ³⁵ Namni fedhii Waaqaa raawwatu kam iyyuu obboleessa koo ti; obboleettii koo ti; haadha kootis.”

4

Fakkeenya Nama Sanyii Facaasuu

4:1-12 kwf – Mat 13:1-15; Luq 8:4-10

4:13-20 kwf – Mat 13:18-23; Luq 8:11-15

¹ Yesuus ammas qarqara galaanichaatti barsiisuu jalqabe. Tuunni naannoo isaatti walitti qabame akka malee guddaa ture; utuu namoonni hundi qarqara galaanichaa irra afaan bishaanii jiranuu, inni bidiruu yaabbatee galaanicha irra achi hiiqee taa’e.

² Fakkeenyaanis waan baay’ee isaan barsiise; barsiisa isaa keessattis akkana jedhe: ³ “Mee dhaga’aa! Kunoo, namichi sanyii facaasu tokko sanyii facaafachuu ba’e.

⁴ Utuu inni facaasaa jiruus sanyiin tokko tokko karaa irra bu’e; simbirroonnis dhufanii nyaatanii fixan. ⁵ Kaan immoo lafa kattaa, iddoo biyyoo baay’ee hin qabne irra bu’e. Sanyiin sunis sababii biyyoon sun gad fageenya hin qabaatiniif dafee biqile. ⁶ Yommuu aduun baatetti garuu biqiltuun sun ni coollage; waan hidda hin qabaatiniifis ni goge. ⁷ Sanyiin biraas qoraattii keessa bu’e; qoraattiin sunis guddatee biqiltuu sana hudhe; biqiltuun sunis ija hin naqanne. ⁸ Ammas sanyiin kaan biyyoo gaarii irra bu’e. Ni biqile; ni guddate; ijas ni naqate. Inni tokko soddoma, kaan jaatama, kaan immoo dhibba naqate.”

⁹ Yesuusis, “Namni gurra dhaga’u qabu kam iyyuu haa dhaga’u” jedhe.

¹⁰ Yeroo inni kophaa turettis warri Kudha Lamaanii fi namoonni naannoo isaa turan biraa waa’ee fakkeenya sanaa isa gaafatan. ¹¹ Innis akkana jedheen; “Iccitiin mootummaa Waaqaa isiniif kennameera. Warra ala jiranitti garuu wanni hundinuu fakkeenyaan himama; ¹² kunis,

“Isaan akka hin deebinee fi akka dhiifama hin arganneef, arguu inuma argu, garuu hin qalbeeffatan;

dhaga’uus inuma dhaga’u, garuu hin hubatan.”*

¹³ Yesuusis akkana isaaniin jedhe; “Isin fakkeenya kana hin hubattanii? Yoos isin akkamitti fakkeenya hunda hubattu ree? ¹⁴ Namichi sanyii facaasu sun dubbicha facaasa. ¹⁵ Namoonni tokko tokko sanyii karaa irraa, lafa dubbichi itti facaafame sana fakkaatu. Akkuma isaan dubbicha dhaga’aniin Seexanni dhufee dubbicha isaan keessatti facaafame sana fudhata. ¹⁶ Warri kaan akkuma sanyii lafa kattaa irratti facaafamee ti; isaan yommuu dubbicha dhaga’anitti yommusuma gammachuun fudhatu. ¹⁷ Garuu isaan waan hidda hin qabneef yeroo gabaabaa qofa turu. Yeroo rakkinni yookaan ari’atamni sababii dubbichaatiif dhufutti isaan dafanii gufatu. ¹⁸ Ammas warri kaan sanyii qoraattii keessatti facaafame fakkaatu; isaanis warra dubbicha dhaga’anii dha; ¹⁹ garuu yaaddoon addunyaa kanaa, gowwoomsaan qabeenyaatii fi hawwiin waan garaa garaa isaan seenee dubbicha hudhee ija naqachuu dhowwa. ²⁰ Warri kaanis sanyii biyyoo gaarii irratti facaafame fakkaatu; isaanis dubbicha ni dhaga’u; ni fudhatu; ijas ni naqatu; inni tokko soddoma, kaan jaatama, kaan immoo dhibba naqata.”

Ibsaa Gombisaa Jalaa

²¹ Innis akkana isaaniin jedhe; “Isin ibsaa gombisaa jala yookaan siree jala kaa’uuf fidduu? Qooda kanaa baattuu isaa irra keessu mitii? ²² Wanni dhokfame kam iyyuu mul’ifamuuf jiraatii; wanni haguugame kam iyyuus ifatti baafamuuf jiraatii. ²³ Namni kam iyyuu yoo gurra dhaga’u qabaate haa dhaga’u.”

²⁴ Innis itti fufee akkana jedheen; “Waan dhageessan qalbeeffadhaa. Safartuu ittiin safartaniinis, hammas caalaa iyyuu isiniif safarama. ²⁵ Kan qabu kamiif iyyuu itti dabalamee ni kennama; kan hin qabne garuu wanni inni qabu iyyuu irraa fudhatama.”

Fakkeenya Sanyii Guddatuu

²⁶ Ammas akkana jedhe; “Mootummaan Waaqaa nama lafa isaa irratti sanyii facaasu tokko fakkaata. ²⁷ Akkamitti akka ta’e namichi beekuu baatu illee, inni rafus yookaan dammaqus, sanyiin sun halkanii guyyaa ni biqila; ni guddatas. ²⁸ Lafti ofuma isheetiin midhaan baafti; jalqabatti biqila, itti aansee

* 4:12 4:12 Isa 6:9,10

hudhaa midhaanii, ergasii immoo midhaan guutuu baafti. ²⁹ **Namichis akkuma midhaanichi bilchaateen haamuu jalqaba; yeroon haamaa ga'eeraatii."**

Fakkeenya Sanyii Sanaaficaa

4:30-32 kwf - Mat 13:31,32; Luq 13:18,19

³⁰ Ammas inni akkana jedhe; **"Mootummaan Waaqaa maal fakkaata jechuu dandeenya? Yookaan fakkeenya maaliitiin isa ibsina?"** ³¹ **Inni sanyii sanaaficaa kan sanyiiwwan lafa irra jiran hunda irra xinnaa ta'e fakkaata.** ³² **Erga fa-caafamee booddee garuu guddatee biqiltuu hunda caala; dameewwan gurguddaa simbirroonis gaaddisa isaa jala jiraachuu danda'anis qabaata."**

³³ Yesuus fakkeenyawwan akkanaa baay'eedhaan hamma isaan dhaga'uu danda'an dubbicha isaanitti dubbate. ³⁴ Innis fakkeenyaan malee waan tokko illee isaanitti hin dubbanne. Yeroo kophaa turanitti garuu waan hunda barattoota isaatiif ni ibse.

Yesuu Bubbee Gab Gochuu Isaa

4:35-41 kwf - Mat 8:18,23-27; Luq 8:22-25

³⁵ Inni gaafas, yeroo galgalaa'etti, **"Kottaa gama ceenaa"** isaaniiin jedhe. ³⁶ Isaanis tuuta namootaa sana achitti dhiisanii Yesuusin akkuma inni bidiruu keessa jirutti fuudhanii deeman. Bidiruuwwan biraas isa wajjin turan. ³⁷ Bubbeen hamaan tokko ni ka'e; dambaliinis bidiruu sana dha'ee bidiruun sun bishaaniin guutamuu ga'e. ³⁸ Yesuus bidiruu sana keessa karaa duubaa boraatii tokko irra rafaaf ture. Barattoonis isa dammaqsanii, **"Yaa barsiisaa, dhumuun keenya homaa si hin dhibuu?"** jedhaniin.

³⁹ Innis ka'ee bubbee sana ifate; dambalii sanaanis, **"Cal'isi! Gab jedhis!"** jedhe. Bubbeen sunis ni cal'ise; tasgabbiin guddaanis ni ta'e.

⁴⁰ Innis barattoota isaatiin, **"Isin maaliif akkana sodaattu? Isin amma iyyuu amantii hin qabdani?"** jedhe.

⁴¹ Isaanis akka malee sodaatanii, **"Namichi bubbee fi dambaliin iyyuu ajajamaniif kun eenyu?"** jedhani waa gaafatan.

5

Yesuus Nama Hafuura Hamaan Qabame Tokko Fayyise

5:1-17 kwf - Mat 8:28-34; Luq 8:26-37

5:18-20 kwf - Luq 8:38,39

¹ Isaanis galaanicha ce'anii biyya Gergeesenoon dhaqan. ² Yommuu Yesuus bidiruu irraa bu'etti, yommuusuma namichi hafuura xuraa'aadhaan qabame tokko iddoo awwaalaatii ba'ee isatti dhufe. ³ Namichi kun iddoo awwaala jiraata ture; namni tokko iyyuu foncaan illee lammata isa hidhuu hin dandeenye. ⁴ Inni yeroo baay'ee funyoo sibiilaatii fi foncaadhaan hidhama ture; garuu foncaaa sana kukkutee funyoo sibiilaa sanas caccabsa tureetii. Namni gad isa qabuu danda'u tokko iyyuu hin turre. ⁵ Innis yeroo hundumaa, halkanii guyyaa iddoo awwaala keessattii fi gaarran gubbaatti iyyaa, dhagna isaas dhagaadhaan murmuraaf ture.

⁶ Innis yommuu Yesuus fagootti argetti itti fiigee, fuula isaa duratti jilbeenfate.

⁷ Sagalee ol fudhatee iyyees, **"Yaa Yesuus ilma Waaqa Waan Hundaa Ollii, ati maal narraa barbaadda? Maqaa Waaqaatiin sin kadhadaatii maaloo na hin dhiphisin!"** jedheen.

⁸ Yesuus, **"Yaa hafuura xuraa'aa, namicha kana keessaa ba'i!"** jedheenii tureetii.

⁹ Yesuus, **"Maqaan kee eenyu?"** jedhee isa gaafate.

Innis, **"Nu waan baay'ee taaneef, maqaan koo Leegewoon*"** jedhee deebise. ¹⁰ Akka inni biyya sana keessaa isaan hin ariineefis guddisee Yesuus kadhate.

¹¹ Hoomaan booyyee guddaan isaas gaara bira dheedaa ture. ¹² Hafuuronni hamoon sunis, **"Gara hoomaa booyyee sanaatti nu ergi; akka itti galluufis nuu eeyyami"** jedhani Yesuus kadhate. ¹³ Innis ni eeyyameef; hafuuronni xuraa'oon sun ba'anii booyyee sanatti galan. Hoomaan gara booyyee kuma lamaa of keessaa qabu sunis ededa hallayyaa irraa gad furguffamee galaanatti nam'ee liqimfame.

¹⁴ Warri booyyeewwan tiksan sunis baqatanii magaalaa fi baadiyyaatti waan kana odeessan; namoonnis waan ta'e sana ilaaluu yaa'an. ¹⁵ Isaanis yommuu gara Yesuus dhufanitti namicha Leegewoonii hafuurota hamootiin qabamee ture sana wayyaa uffatee, qalbii isaattis deebi'ee achi taa'ee argan; ni sodaatanis. ¹⁶ Warri waan kana arganii turanis waan namicha hafuurota hamoon qabamee ture sanaaf ta'ee fi waa'ee hoomaa booyyees namootatti odeessan. ¹⁷ Kana irratti jarri akka Yesuus biyya isaanii keessaa ba'uuf isa kadhachuu jalqaban.

* 5:9 5:9 Leegewooniin Roomaa tokkichi loltoota 6,000 qabata.

¹⁸ Utuu Yesuus bidiruu yaabbachaa jiruu namichi hafuura hamaan qabamee ture sun isa wajjin deemuuf isa kadhate. ¹⁹ Yesuus garuu, **“Gara mana keetii, warra keetti galiitii waan guddaa Gooftaan siif godhee fi akkamitti akka inni si maares isaanitti odeessi!”** jedheen malee hin eeyyamneef. ²⁰ Kanaafuu namichi sun dhaqee waan Yesuus isaaf godhe Magaalaa Kurnan keessatti odeessuu jalqabe. Namoonni hundinuus ni dinqifatan.

Durba Duutee fi Dubartii Dhukkubsatte Tokko

5:22-43 kwf – Mat 9:18-26; Luq 8:41-56

²¹ Yommuu Yesuus bidiruudhaan ammas gara gama galaanaatti ce’etti namoonni hedduun isa biratti walitti qabaman; innis qarqara galaanaa ture. ²² Hooggantoota mana sagadaa keessaas namichi Yaa’iirros jedhamu tokko dhufe; innis yommuu Yesuusin argetti, miilla isaa irratti kufee, ²³ “Intalli koo xinnoon du’uu geesseerti. Akka isheen fayyitee jiraattuuf, maaloo kottuutii harka kee ishee irra ka’i” jedhee jabeessee isa kadhate. ²⁴ Kanaafuu Yesuus isa wajjin dhaqe.

Namoonni baay’eenis isa duukaa bu’an; gara isaatti wal dhiibaa turan. ²⁵ Dubartiin dhiigni ishee waggaa kudha lama dhangala’aa ture tokkos achi turte. ²⁶ Isheenis ogeeyyii fayyaa baay’ee biratti akka malee dhiphatte; waan qabdu hundumas of harkaa fixxe; garuu ittuma hammaachaa deeme malee itti hin wayyoofne. ²⁷ Isheenis yommuu waa’ee Yesuus dhageessetti dugda isaa duubaan namoota gidduudhaan dhuftee uffata isaa tuqxe. ²⁸ Isheen, “Ani yoon uffatuma isaa illee tuqe nan fayya” jettee yaadde turteeti. ²⁹ Dhiigni ishees yommusuma cite; isheenis akka dhiphina ishee irraa fayyite dhagna ishee keessatti hubatte.

³⁰ Yesuusis yommusuma akka humni isa keessaa ba’e hubate. Innis namoota keessa garagalee, **“Eenyutu uffata koo tuqe?”** jedhee gaafate.

³¹ Barattoonni isaas deebisanii, **“Akka namoonni si dhiibaa jiran utuma argituu, ‘Eenyutu na tuqe?’ jettee gaafattaa?”** jedhan.

³² Yesuus garuu namni waan kana godhe eenyuu akka ta’e arguuf jedhee garagalee ilaale. ³³ Dubartittiinis waan isheef godhame hubattee sodaadhaan hollachaa dhuftee miilla isaa irratti kufte; dhugaa hundumas isatti himte. ³⁴ Innis, **“Yaa intalaa, amantiin kee si fayyiseera. Nagaan deemi; dhiphina kee irraas fayyi”** jedheen.

³⁵ Utuu Yesuus dubbachaa jiruu namoonni tokko tokko mana Yaa’iirros bulchaa mana sagadaatii dhufanii, “Intalli kee duuteerti; ati si’achi maaliif barsiisicha rakkifta?” jedhan.

³⁶ Yesuus garuu waan isaan jedhan jalaa qabuu didee bulchaa mana sagadaa sanaan, **“Amani malee hin sodaatin!”** jedhe.

³⁷ Innis Phexros, Yaaqoobii fi Yohannis obboleessa Yaaqoob malee akka namni tokko iyyuu isa faana deemu hin eeyyamne. ³⁸ Yommuu mana hoogganaa mana sagadaa sanaa bira ga’anittis Yesuus uummata wacu, namoota boo’anii fi wawwaatan arge. ³⁹ Innis ol seenee, **“Wacnii fi boo’ichi kun hundi maali? Intalattiin ni rafti malee hin duune”** jedheen. ⁴⁰ Isaan garuu isatti kolfan.

Innis erga hunda isaanii gad baasee booddee, abbaa fi haadha intalattii, barattoota isa wajjin turanis fudhatee iddoo intalattiin jirtu seene. ⁴¹ Innis harka ishee qabee, **“Xaaliitaa qumii!”** jedheen; kunis, **“Yaa mucattii xinnoo, ani siin nan jedha, ka’i!”** jechuu dha. ⁴² Mucattiinis yommusuma kaatee dhaabatte; asii fi achis deemuu jalqabde. Umuriin ishee waggaa kudha lama ture. Isaanis yommusuma akka malee dinqifatan. ⁴³ Innis akka namni tokko iyyuu waan kana hin beekneef ajaja cimaa kenne; akka isaan waan isheen nyaattu isheef kennan isaanitti hime.

6

Raajii Kabaja Dhabe

6:1-6 kwf – Mat 13:54-58

¹ Yesuus achii ba’ee gara magaalaa itti dhalatee dhaqe; barattoonni isaas isa wajjin dhaqan. ² Innis guyyaan Sanbataa geenyaan mana sagadaatti barsiisuu jalqabe; warri isa dhaga’an baay’eenis ni dinqisiifatan.

Isaanis akkana jedhanii gaafatan; “Namichi kun wantoota kanneen eessaa argate? Ogummaan isaaf kenname kun maali? Hojiiwwan dinqisiisoon harka isaatiin hojjetaman kanneen akkanaa maali? ³ Namichi kun sooftuu mukaa mitii? Inni ilma Maariyaam, obboleessa Yaaqoob, kan Yoosaa, kan Yihuudaa fi kan Simoon mitii? Obboleetonni isaa as nu bira jiru mitii?” Isaanis isatti gufatan.

⁴ Yesuus immoo, **“Raajiin magaalaa itti dhalatetii, firoota isaa keessattii fi mana isaatti malee kabaja hin dhabu”** jedheen. ⁵ Innis dhukkubsattoota muraasa irra harka

isaa kaa'ee fayyisuu malee hojii dinqisiisaa tokko illee achitti hojjechuu hin dandeenye.
⁶ Innis amantii dhabuu isaaniitiif dinqifate.

Yesuus Jara Kudha Lamaan Erguu Isaa
 6:7-11 kwf - Mat 10:1,9-14; Luq 9:1,3-5

Yesuusis namoota barsiisaa ganda tokko irraa gara ganda biraatti naanna'aa ture.
⁷ Warra Kudha Lamaan ofitti waamee lama lamaan isaan erguu jalqabe; hafuurota xuraa'oo irrattis taayitaa kenneef.

⁸ Akkana jedhees isaan ajaje: **"Adeemsa keessaniif ulee malee waan tokko illee jechuunis buddeenaa fi korojoo hin qabatinaa; sabbata keessanitti immoo maallaqa hin guduunfatinaa. ⁹ Kophee kaa'adhaa; garuu kittaa lama hin uffatinaa. ¹⁰ Yeroo mana tokko seentaa kam iyyuu, hamma magaalaa sanaa baatanitti manuma sana turaa. ¹¹ Yoo iddoon kam iyyuu isin simachuu baate yookaan isin dhaga'uu baate, iddoo sanaa ba'aatii akka ragaa isaanitti ta'uuf awwaara miilla keessanii dhadha'adhaa."**

¹² Isaanis achii ba'anii akka namoonni qalbii jijjiirrataniif lallaban. ¹³ Hafuurota hamoo baay'ee baasan; dhukkubsattoota baay'ees zayitii dibanii fayyisan.

Ajjeefamuu Yohannis Cuuphaa
 6:14-29 kwf - Mat 14:1-12
 6:14-16 kwf - Luq 9:7-9

¹⁴ Heroodis mootichi waa'ee waan kanaa dhaga'ee; maqaan Yesuus sirriitti beekamee tureetii. Namoonni tokko tokko, "Yohannis cuuphaan warra du'an keessaa kaafameera; sababii hojiin dinqii isaan hojjetamuufis kanuma" jedhan.

¹⁵ Warri kaan, "Inni Eeliyaas" jedhan.

Kaan immoo, "Inni raajota durii keessaa akka isa tokkoo ti" jedhan.

¹⁶ Heroodis garuu yommuu waan kana dhaga'etti, "Yohannis isa ani mataa isaa irraa kutetu warra du'an keessaa kaafame!" jedhe.

¹⁷ Heroodis mataan isaa akka Yohannis qabamee, hidhamee mana hidhaatti galfamu ajajee tureetii. Innis sababii niitii obboleessa ofii isaa Fiiliphoos, sababii Heroodiyaas ishee ofii fuudhee ture sanaatiif jedhee waan kana godhe. ¹⁸ Yohannis Heroodisiin, "Ati niitii obboleessa keetii fuudhuun kee seera miti" jedhaanii tureetii. ¹⁹ Kanaafuu Heroodiyaas Yohannisitti haaloo qabattee isa ajjeesuu barbaadde. Garuu isheen hin dandeenye; ²⁰ Heroodis akka Yohannis nama qajeelaa fi nama qulqulluu ta'e beeke, isa sodaatee, eegumsa isaaf gochaa tureetii. Heroodis yommuu waan Yohannis dubbatu dhaga'etti akka malee rifate; ta'us gammachuudhaan isa dhageeffachuu barbaade.

²¹ Dhuma irrattis yeroon mijaa'aa argame. Heroodis guyyaa dhaloota isaatti qondaaloota gurguddootaaf, ajajjoota loltootaatii fi namoota Galilaa keessatti beekamaniif irbaata qopheesse. ²² Intalli Heroodiyaas yommuu ol seentee sirbitetti Heroodisii fi keessummoota isaa warra irbaata affeeraman gammachiifte.

Mootichis intalattiidhaan, "Waanuma barbaadde na kadhahu; ani siif nan kenna!" jedhe. ²³ Innis, "Hamma walakkaa mootummaa kootti illee waan ati na kadhattu kam iyyuu siif nan kenna!" jedhee kakuudhaan waadaa galeef.

²⁴ Isheenis gad baatee haadha isheetiin, "Maal kadhahu?" jette.

Haati immoo, "Mataa Yohannis Cuuphaa" jettee deebifteef.

²⁵ Intalattiinis yommusuma ariitiidhaan gara mootichaatti ol seentee, "Akka ati ammuma mataa Yohannis Cuuphaa gabatee irra keessee naa kennitu nan barbaada" jetteen.

²⁶ Mootichis akka malee gadde; garuu sababii kakuu isaatii fi sababii warra isa wajjin maaddiitti dhi'aataniitiif jedhee ishee diduu hin barbaanne. ²⁷ Innis yommusuma loltuu tokko akka inni mataa Yohannis fiduuf ajajee erge. Loltuun sunis dhagee mana hidhaa keessatti mataa Yohannis isa irraa kute; ²⁸ mataa isaas gabatee irra kaa'ee fidee intalattiitti kenne. Isheenis haadha isheetti kennite. ²⁹ Barattoonni Yohannis waan kana dhageenyaan dhufanii reeffa isaa fuudhanii awwaala keessa kaa'an.

Yesuus Namoota Kuma Shan Sooruu Isaa
 6:32-44 kwf - Mat 14:13-21; Luq 9:10-17; Yoh 6:5-13
 6:32-44 kwi - Mar 8:2-9

³⁰ Ergamoonnis Yesuus biratti walitti qabamanii waan hojjetanii turanii fi waan barsiisanii turan hunda isatti himan. ³¹ Innis, **"Kophaa keessan gara iddoo namni hin jirre tokkoo kottaatii takka boqodhaa"** jedheen; isaan sababii namoonni baay'een dhufaa, deemaas turaniif carraa itti waa nyaatan illee hin qaban tureetii.

³² Isaanis kophaa isaanii bidiruudhaan iddoo namni hin jirre tokko dhaqan. ³³ Namoonni deemuu isaanii argan baay'een garuu isaan beekan; magaalawwan hunda keessaa ba'anii miillaan fiigani isaan dursanii iddoo sana ga'an. ³⁴ Yesuus yommuu bidiruu irraa bu'etti tuuta guddaa tokko arge; innis sababii isaan akkuma hoolota tiksee hin qabnee turaniif garaa laafeef. Kanaafuu inni waan baay'ee isaan barsiisuu jalqabe.

³⁵ Yeroo kanatti galgalaa'ee ture; kanaafuu barattoonni isaa gara isaa dhufanii akkana jedhaniin; "Iddoon kun gammoojjii dha; aduunis dhiiteerti. ³⁶ Akka isaan gara baadiyyaatii fi gandoota naannoo kana jirani dhaqanii waan nyaatan bitataniif namoota kanneen gad dhiisi."

³⁷ Inni garuu, "**Isinuu waan isaan nyaatan kennaafii**" jedhee deebise.

Isaanis, "Dhaqnee buddeena diinaarii dhibba lamaa binnee akka nyaataniif isaaniif kenninuu ree?" jedhaniin.

³⁸ Innis, "**Buddeena meeqa qabdu? Mee dhaqaa ilaalaa!**" jedheen.

Isaanis yommuu arganitti, "Buddeena shanii fi qurxummii lama" jedhan.

³⁹ Yesuus akka isaan namoota hundumaa garee gareedhaan marga lalisaa irra teteessisan isaan ajaje. ⁴⁰ Kanaafuu namoonni dhibba dhibbaa fi shantama shantamaan garee gareedhaan tataa'an. ⁴¹ Innis buddeena shanii fi qurxummii lamaan sana fuudhee, gara samii ol ilaalaa galata galchee buddeena sana caccabse. Akka isaan namootaaf dhi'eessaniifis barattoota isaatti kenne. Qurxummii lamaanis hunduma isaaniitiif qoqqoode. ⁴² Isaan hundi nyaatanii quufan; ⁴³ barattoonnis hurraa'aa buddeenaatii fi qurxummii gundoo kudha lama guutuu walitti qaban. ⁴⁴ Warri nyaatanis dhiira kuma shan turan.

Yesuus Galaana Irra Deemuu Isaa

6:45-51 kwf - Mat 14:22-32; Yoh 6:15-21

6:53-56 kwf - Mat 14:34-36

⁴⁵ Yesuus yommuusuma akka barattoonni isaa bidiruu yaabbatanii hamma inni tuuta sana of irraa geggeessutti isa dura gara Beetisayidaatti darbaniif isaan dirqisiise. ⁴⁶ Innis erga namoota of irraa geggeesse booddee kadhachuuf gaaratti ol ba'e.

⁴⁷ Yommuu galgalaa'ettis bidiruun sun galaana walakkaa ture; Yesuus immoo kophaa isaa lafa irra ture. ⁴⁸ Innis utuu barattoonni sababii bubbeen fuula isaanii duraan itti dhufee bishaan mooquudhaan dhiphatanuu arge. Innis halkan keessaa kutaa afuraffaatti galaana irra deemaa gara isaanii dhufe. Innis waan isaan bira darbu fakkaate; ⁴⁹ isaan garuu yommuu galaana irra deemuu isaa arganitti ekeraa se'anii iyyan; ⁵⁰ isaan hundi isa arganii akka malee na'aniitii.

Inni immoo, "**Jabaadhaa! Anumaatii hin sodaatinaa**" jedhee yommuusuma isaanitti dubbate. ⁵¹ Innis isaan wajjin bidiruu yaabbate; bubbeen sunis gab jedhe. Isaanis akka malee dirqisiifatan; ⁵² isaan waa'ee buddeennan sanaa hin hubanneetii; mata jabeeyyiis turan.

⁵³ Isaanis yommuu gama ce'anitti Geensereexitti bidiruu irraa bu'an; bidiruu sanas achitti hidhan. ⁵⁴ Akkuma isaan bidiruu irraa bu'aniinis namoonni Yesuus beekan. ⁵⁵ Namoonni sunis biyya sana guutuu keessa asii fi achi fiigani iddoo Yesuus achi jira jechuu dhaga'an hundumatti dhukkubsattoota sireedhaan baatanii fiduu jalqaban. ⁵⁶ Iddoo inni dhaqe kam illee jechuunis gandoota, magaalawwan yookaan baadiyyaa hundatti warra dhukkubsatan fidanii lafa gabaa kaa'an. Isaanis akka dhukkubsattoonni sun handaara wayyaa isaa illee tuqaniif isa kadhatan; warri handaaruma wayyaa isaa tuqan hundinuus ni fayyan.

7

Waan Qulqulluu fi Waan Xuraa'aa

7:1-23 kwf - Mat 15:1-20

¹ Fariisotaa fi barsiistota seeraa keessaa warri Yerusaaleemii dhufan tokko tokko Yesuus biratti walitti qabamanii ² barattoota isaa keessaa tokko tokko harka, "Hin qulqulleffaminiin" jechuunis utuu harka hin dhiqatin buddeena nyaachuu isaanii argan. ³ Sababiin isaas Fariisonni, Yihuudoonni hundinuus duudhaa maanguddootaa eeguuf jedhanii utuu harka hin dhiqatin hin nyaataniitii. ⁴ Yommuu gabaadhaa galanittis utuu of hin qulqulleessin hin nyaatan. Dudhaa biraa baay'ees kan akka xofoo dhiqqu, okkotee fi huuroo dhiqqu ni eegu.

⁵ Kanaafuu Fariisonnii fi barsiistonni seeraa, "Barattoonni kee qooda harka 'Hin qulqulleeffaminiin' nyaatan maaliif akkuma duudhaa maanguddootaatti hin jiraanne?" jedhanii Yesuus gaafatan.

⁶ Innis akkana jedhee deebise; **“Yaa fakkeessitoota, Isaayyaas yommuu waa’ee keessan raajii dubbatetti sirrii ture; kunis akkuma akkana jedhamee barreeffamee dha:**

“‘Uumanni kun hidhii isaatiin na kabaja; garaan isaa garuu narraa fagoo jira.

⁷ **Isaan akkanumaan na waageffatu;**

barsiisni isaaniis sirnuma namaa ti.’*

⁸ **Isin ajaja Waaqaa dhiiftanii, duudhaa namootaa jabeessitanii eegdu.”**

⁹ Innis ittuma fufee akkana jedheen; **“Isin duudhaa ofii keessanii eeguuf jettanii ajaja Waaqaa tuffachuuf mala gaarii qabdu!** ¹⁰ **Museen, ‘Abbaa keetii fi haadha keetiif ulfina kenni; namni abbaa isaa yookaan haadha isaa arrabsu kam iyyuu haa ajjeefamu’ jedheeraatii.** ¹¹ **Isin garuu yoo namni kam iyyuu akka wanni silaa abbaa isaa yookaan haadha isaa gargaaruuf oolu Qurbaana jechuunis Waaqaaf kennameera jedhee dubbate,** ¹² **isin akka inni abbaa isaatiif yookaan haadha isaatiif waan tokko illee godhu si’achi hin eeyyamtaniif.** ¹³ **Akkanaanis duudhaa keessan isa walitti dabarsitan sanaan dubbii Waaqaa busheessitu. Waan akkanaa baay’ees ni hojjetu.”**

¹⁴ **Yesuus ammas namoota sana ofitti waamee akkana jedheen; “Isin hundi na dhaga’aa; kanas hubadhaa.** ¹⁵ **Waan nama keessaa ba’utu nama ‘xureessa’ malee wanni alaa namatti seenee nama ‘xureessuu’ danda’u tokko iyyuu hin jiru. [**

16 **Namni kam iyyuu yoo gurra dhaga’u qabaate haa dhaga’u.”]**[§]

¹⁷ **Erga inni namoota biraa mana ol seenee booddee barattoonni isaa waa’ee fakkeenya sanaa isa gaafatan.** ¹⁸ **Innis akkana jedhee gaafate; “Isin hin hubattanii? Akka wanni alaa namatti seenu tokko iyyuu nama ‘xureessuu’ hin dandeenye hin qalbeeffattanii?** ¹⁹ **Wanni sun garaa isaa seenee ergasii dhagna isaa keessaa gad ba’a malee yaada garaa’ isaa hin seenuutii.”** Yesuusis kana jechuudhaan akka nyaannu hundinuu qulqulluu ta’e labse.

²⁰ **Innis itti fufee akkana jedhe: “Wanni nama ‘xureessu’ waan nama keessaa ba’uu dha.** ²¹ **Yaadni hamaan keessa namaatii, garaa namaa keessaa ba’aatii; innis halalummaa, hanna, nama ajjeesuu, ejja,** ²² **doqnummaa, hammina, gowwoomsaa, jireenya gad dhiisii, hinaaffaa, maqaa nama balleessuu, of tuulummaa fi gowwummaa.** ²³ **Wantoonni hamoon kunneen hundinuu nama keessaa ba’u; namas ‘ni xureessu.’”**

Amantii Dubartii Tokkoo

7:24-30 kwf - Mat 15:21-28

²⁴ **Yesuus iddoo sanaa ka’ee aanaa Xiirrositti qajelee. Mana tokkos ol seene; innis akka namni tokko iyyuu achi jiraachuu isaa beeku hin barbaanne; garuu dhokachuu hin dandeenye.** ²⁵ **Dubartiin intalli ishee hafuura xuraa’aan qabamte tokko akkuma waa’ee isaa dhageesseen dhuftee miilla isaa irratti kufte.** ²⁶ **Dubartittiinis nama Giriik, kan biyya Sooriyaa keessatti Finiiqeetti dhalatee dha. Isheen akka inni intala ishee keessaa hafuura hamaa sana baasuuf Yesuusis kadhatte.**

²⁷ **Innis, “Dura ijoolleen haa quufu; buddeena ijoollee fuudhanii saroota dura buusuun sirrii miti” jedheen.**

²⁸ **Isheen garuu, “Eeyyee yaa Gooftaa, saroonni iyyuu maaddii jalaa hambaa ijoolleen harcaafuu nyaatuu” jettee deebifteef.**

²⁹ **Yesuusis, “Jecha kee kanaaf gali; hafuurri hamaan sun intala kee keessaa ba’eera” jedheen.**

³⁰ **Isheenis yommuu manatti galtetti intalli ishee siree irra ciiftee, hafuurri hamaan sunis keessaa ba’ee argatte.**

Namichi Duudaa fi Arrab-didaan Tokko Fayyuu Isaa

7:31-37 kwf - Mat 15:29-31

³¹ **Ergasii Yesuus biyya Xiirsoosiitti ka’ee Siidoonaa keessa darbee, kutaa Magaalaa Kurmanii keessa ba’ee gara galaana Galiilaa dhufe.** ³² **Jarri tokkos namicha gurra duudaa fi arrab-didaa tokko isatti fidanii akka inni harka isa irra kaa’uuf kadhatan.**

³³ **Yesuusis namicha sana tuuta keessaa kophaatti baasee quba isaa gurra namichaa keessa kaa’e. Hancufaa tufees arraba namichaa tuqe.** ³⁴ **Gara samiiis ol ilaaltee, hafuura guddaa baafatee, “Eftaah!” jedheen; kana jechuunis “Banami!” jechuu dha.**

* ⁷ 7:7 Isa 29:13 † ⁷ 10:7 7:10 Bau 20:12; KeD 5:16 ‡ ⁷ 10:7 7:10 Bau 21:17; Lew 20:9 § ⁷ 16:7 7:16 Waraabbileen durii tokko tokko luqqisaa kana hin qaban. * ⁷ 19:7 7:19 Akka hubannaa Yihuudootaatti yaadni garaa eenyummaa nama tokkoo guutummaatti argisiisa.

³⁵ Gurri namichaas yommusuma baname; arrabni isaas hiikamee rakkina tokko malee dubbachuu jalqabe.

³⁶ Yesuus akka isaan nama tokkotti illee hin himneef namoota sana ajaje. Hammuma inni cimsee isaan ajaje sana, isaanis ituma caalchisanii odeessan. ³⁷ Warri oduu sana dhaga'anis akka malee dinqifatanii, "Inni waan hunda gaarii godheera; warri duudaanis akka dhaga'an, warri arrabni isaanii dubbachuu dides akka dubbatan ni godha" jedhan.

8

Yesuus Nama Kuma Afur Sooruu Isaa

8:1-9 kwf - Mat 15:32-39

8:1-9 kwi - Mar 6:32-44

8:11-21 kwf - Mat 16:1-12

¹ Gidduu sana tuunni biraa guddaan isaa ammas walitti qabame. Yesuus sababii tuunni sun waan nyaatu hin qabaatiniif barattoota isaa ofitti waamee akkana jedhe; ² **"Sababii isaan guyyaa sadii na bira turanii waan nyaatan tokko illee hin qabneef, ani namoota kanneeniif garaa nan laafa.** ³ **Yoo ani agabuu isaanii gad isaan dhiise, isaan karaa irratti ni gaggabu; isaan keessaa tokko tokko fagoodhaa dhufaniitii."**

⁴ Barattoonni isaas deebisanii, "Namni kam iyyuu gammoojjii kana keessatti buddeena isaan ga'u eessaa argachuu danda'a?" jedhan.

⁵ Yesuus immoo, **"Isin buddeena meeqa qabdu?"** jedhee gaafate.

Isaanis, "Torba" jedhan.

⁶ Innis akka namoonni sun lafa tataa'an itti hime. Buddeena torban fuudhee erga galateeffatee booddee kukkutee akka isaan namootaaf dhi'eessanii barattoota isaatti kenne; isaanis namootaaf dhi'eessan. ⁷ Akkasumas qurxummii xixinnoo muraasa qabu turan; qurxummii sanas eebbisee akka isaan namootaaf hiraniif barattoota isaatti hime. ⁸ Namoonnis nyaatanii quufan. Ergasiis barattoonni hambaa gundoo torba guutuu walitti qaban. ⁹ Isaanis gara nama kuma afurii turan. Innis erga of irraa isaan geggeessee booddee, ¹⁰ barattoota isaa wajjin yommusuma bidiruu yaabbatee biyya Daalmaanutaa dhaqe.

¹¹ Fariisonnis dhufanii Yesuusitti falmuu jalqaban; isa qoruuf jedhaniis mallattoo samii irraa isa irraa barbaadan. ¹² Innis hafuura dheeraa baafatee, **"Dhaloonni kun maaliif mallattoo barbaada? Ani dhuguma isinitti hima; mallattoon tokko iyyuu dhaloota kanaaf hin kennamu"** jedheen. ¹³ Innis isaan dhiisee bidiruutti deebi'ee gama ce'e.

Raacitii Fariisotaa

¹⁴ Barattoonnis buddeena tokkicha bidiruu keessaa of biraa qaban sana malee buddeena fudhachuu irraanfatanii turan. ¹⁵ Yesuus, **"Beekkadhaa; raacitii Fariisotaatii fi raacitii Heroodis irraa of eeggadhaa"** jedhee isaan akeekkachiise.

¹⁶ Isaanis, "Kun sababii nu buddeena hin qabneef" jedhanii walii wajjin haasa'an.

¹⁷ Yesuus waan isaan haasa'an beekke akkana jedhee isaan gaafate; **"Isin maaliif waa'ee buddeena dhabuu keessanii dudubbattu? Isin amma iyyuu hin argitanii? Yookaan hin hubattanii? Mataa jabaattanii?"** ¹⁸ **Isin utuma ija qabdanuu hin argitanii? Utuma gurra qabdanuus hin dhageessanii? Hin yaadattanii?** ¹⁹ **Yeroo ani buddeena shanan sana nama kuma shaniif caccabsetti isin hurraa'aa gundoo meeqa guutuu kaaftan?"**

Isaanis, "Kudha lama" jedhaniin.

²⁰ Innis, **"Yeroo ani buddeena torba nama kuma afuriif caccabsetti hambaa gundoo meeqa guutuu walitti qabdan?"** jedhee gaafate.

Isaanis, "Torba" jedhaniin.

²¹ Innis, **"Isin amma iyyuu hin hubattanii?"** jedheen.

Yesuus Beetisayidaatti Nama Jaamaa Fayyise

²² Isaanis Beetisayidaa dhaqan; jarri tokkos namicha jaamaa tokko fidanii akka inni isa qaqqabuuf Yesuus kadhahan. ²³ Innis namicha jaamaa sana harka qabee ganda sana keessaa baase. Ija isaattis tufee, harka isaas irra kaa'ee, **"Waa arguu dandeessaa?"** jedhee gaafate.

²⁴ Namichis ol ilaalee, "Namoota nan arga; isaan muka deemmu natti fakkaatu" jedhe.

²⁵ Yesuus amma illee harka isaa ija namichaa irra kaa'ee. Iji namichaas ni baname; agartuun isaa ni deebi'eef; waan hundas sirriitti arge. ²⁶ Yesuus namichaan, **"Gara**

ganda sanaa seentee waan kana nama tokkotti illee hin himin” jedhee gara mana isaatti isa erge.

Phexros Eenyummaa Kiristoos Beeksise

8:27-29 kwf – Mat 16:13-16; Luq 9:18-20

²⁷ Yesuusii fi barattooni isaa gara gandoota naannoo Fiiliphoos Qiisaariyaa jiraniitti darban. Innis, **“Namoonni anaan eenyu jedhu?”** jedhee karaa irratti isaan gaafate.

²⁸ Isaanis, “Namoonni tokko tokko, ‘Inni Yohannis Cuuphaa dha’ jedhu; warri kaan, ‘inni Eeliyaas’ jedhu; kaan immoo, ‘inni raajota keessaa isa tokkoo dha’ jedhu” jedhanii deebisan.

²⁹ Innis, **“Isin eenyu anaan jettu?”** jedhee gaafate.

Phexrosis, “Ati Kiristoos” jedhee deebise.

³⁰ Yesuusis akka isaan waa’ee isaa nama tokkotti illee hin himneef isaan akeekkachiise.

Yesuus Duraan Dursee Waa’ee Du’a Isaa Dubbate

8:31-9:1 kwf – Mat 16:21-28; Luq 9:22-27

³¹ Yesuusis akka Ilmi Namaa waan hedduun dhiphachuu qabu, akka maanguddootaan, luboota hangafootaa fi barsiistota seeraatiin tuffatamuu qabuu fi akka ajjeefamuu qabu, guyyaa sadii booddee immoo akka du’aa ka’u isaan barsiisuu jalqabe. ³² Innis waa’ee kanaa ifatti baasee dubbate; Phexrosis kophaatti baasee isa ifachuu jalqabe.

³³ Yesuus garuu of irra garagalee barattoota isaa ilaale; Phexrosiinis, **“Seexana nana! Na duubatti deebi’i! Ati kan namaa yaadda malee kan Waaqaa hin yaadduutii”** jedhee ifate.

Haala Karraa Fannoo

³⁴ Ergasii inni tuuta sanaa fi barattoota isaa ofitti waamee akkana jedhe; **“Namni kam iyyuu yoo na faana dhufuu barbaade, inni of haa ganu; fannoo isaa baadhatees na duukaa haa bu’u.** ³⁵ **Namni lubbuu isaa oolfachuu barbaadu kam iyyuu lubbuu isaa ni dhabaatii; garuu namni anaa fi wangeelaaf jedhee lubbuu isaa dhabu kam iyyuu lubbuu isaa ni oolfata.** ³⁶ **Namni yoo addunyaa guutuu argatee lubbuu isaa immoo dhabe bu’aa maalii argata?** ³⁷ **Yookaan namni qooda lubbuu isaa maal kennuu danda’a?** ³⁸ **Yoo namni kam iyyuu dhaloota ejjaa fi cubbamaa kana keessatti anaa fi dubbii kootti qaana’e, Ilmi Namaa yommuu ulfina Abbaa isaatiin ergamoota qulqulluu wajjin dhufutti isatti ni qaana’a.”**

9

¹ Innis, **“Ani dhuguman isinitti hima; warra as dhadhaabachaa jiran keessaa namoonni tokko tokko hamma mootummaan Waaqaa humnaan dhufee arganitti du’a hin dhandhaman”** isaaniin jedhe.

Bifti Yesuus Geeddaramuu Isaa

9:2-8 kwf – Luq 9:28-36

9:2-13 kwf – Mat 17:1-13

² Yesuus guyyaa ja’a booddee Phexrosin, Yaaqoobii fi Yohannisin fudhatee tulluu dheeraa* tokkotti iddoo isaan hundi kophaa turuu danda’anitti ol isaan baase. Innis achitti fuula isaanii duratti geeddarame. ³ Uffanni isaas uffata namni addunyaa kanaa kam iyyuu miicee addeessuu danda’u caalaa akka malee addaate. ⁴ Eeliyaasii fi Museenis isaanitti mul’atan; isaanis Yesuus wajjin haasa’aa turan.

⁵ Phexrosis Yesuusiiin, “Yaa Barsiisaa, as jiraachuun nuuf gaarii dha; daasii sadii, tokko siif, tokko Museef, tokko immoo Eeliyaasiif ni ijaarra” jedhe. ⁶ Inni waan dubbatu hin beeku ture; isaan akka malee sodaatanii turaniitii.

⁷ Duumessis† dhufee isaan haguuge; sagaleen, “Kun Ilma koo isa ani jaalladhuu dha. Isinis isa dhaga’aa!” jedhu tokko duumessicha keessaa dhufe.

⁸ Isaanis yommuu akkuma tasaa naannoo isaanii ilaalanitti Yesuus malee nama tokko illee of biratti hin argine.

⁹ Utuu tulluu sana irraa bu’utti jiranuus Yesuus akka isaan hamma Ilmi Namaa warra du’an keessaa ka’utti waan argan sana nama tokkotti illee hin himne isaan ajaje.

¹⁰ Isaanis “warra du’an keessaa ka’uun” maal akka ta’e wal gaggaafachaa dubbicha garaatti qabatan.

¹¹ Isaanis, “Barsiistonni seeraa maaliif Eeliyaas akka duraan dursee dhufuu qabu dubbatu?” jedhanii isa gaafatan.

* 9:2 9:2 Akka hubannaa Yihuudootaatti tulluun ol dheeraan iddoo mijaa’aa itti Waaqni namatti of mul’isuu dha.

† 9:7 9:7 Duumessi argamuu Waaqaa mul’isa (Bau 13:21-22; 16:10; 19:9; 2Sn 5:13-14).

¹² Yesuus akkana jedhee deebise; **“Dhugumaan Eeliyaas duraan dursee ni dhufa; waan hundas iddootti deebisa. Yoo maaliif Ilmi Namaa akka malee dhiphachuu fi tuffatamuu qaba jedhamee barreeffame ree? ¹³ Ani garuu isinittin hima; Eeliyaas dhufeera; isaanis akkuma waa’ee isaa barreeffame sanatti waanuma fedhan hunda isatti hojjetan.”**

Gerbaan Hafuura Xuraa’aadhaan Qabame Tokko Fayye

9:14-28,30-32 kwf - Mat 17:14-19,22,23; Luq 9:37-45

¹⁴ Isaanis yommuu gara barattoota kaanii dhufanitti, namoonni hedduun isaanitti naanna’anii, barsiistonna seeraa immoo utuu isaanitti falmanuu argan. ¹⁵ Namoonni hundinuus akkuma Yesuusin arganiin akka malee dinqifatanii isa dubbisuudhaaf itti fiigan.

¹⁶ Innis, **“Isin maal isaanitti falmitu?”** jedhee isaan gaafate.

¹⁷ Namoota sana keessaas namichi tokko akkana jedhee deebise; “Yaa barsiisaa, ani ilma koo kan hafuura arraba didaadhaan qabame sitti fideera. ¹⁸ Hafuurichi yeroo itti ka’u kam iyyuu, darbatee lafaan isa dha’a. Gurbichis hoomacha afaaniin baasa; ilkaan qara; ni kokottaa’as. Ani akka hafuura sana baasaniif barattoota kee nan gaafadhe; isaan garuu hin dandeenye.”

¹⁹ Yesuusis deebisee, **“Isin dhaloota hin amanne nana; ani hamma yoomiittin isin wajjin jiraadha? Hamma yoomiittis ani isinii obsa? Mee gurbicha natti fidaa”** jedhe.

²⁰ Isaanis gurbicha isatti fidan. Hafuurichis akkuma Yesuusin argeen gurbicha dhidhiitachiise; gurbichis lafa dha’ee hoomacha afaaniin baasee gangalate.

²¹ Yesuusis, **“Wanni kun erga isa qabee hammam ture?”** jedhee abbaa gurbichaa gaafate.

Innis akkana jedhe; “Tjoollummaadhaa jalqabee ti. ²² Isa ajjeesuuf jedhees yeroo baay’ee ibidda keessa yookaan bishaan keessa isa buuseera. Ati garuu yoo waanuma tokko illee gochuu dandeesse garaa nuu laafitii nu gargaari.”

²³ Yesuusis, **“Yoo dandeesse’ jettaa? Nama amanuuf wanni hundi ni danda’ama”** jedheen.

²⁴ Yommusuma abbaan mucaa sanaa, “Ani nan amana; amantii dhabuu koo na gargaari” jedhee iyye.

²⁵ Yesuusis yommuu namoota girrisanii dhufan argetti, **“Yaa hafuura duudaa fi arrab-didaa nana, akka ati isa keessaa baatu, deebitees akka isatti hin galle sin ajaja”** jedhee hafuura xuraa’aa sana ifate.

²⁶ Hafuurri sun iyyee, akka malees isa dhidhiitachiisee keessaa ba’ee. Gurbichis akkuma reeffaa ta’ee; namoonni baay’eenis, “Inni du’eera” jedhan. ²⁷ Yesuus garuu harka qabee ol isa kaase; gerbaan sunis ka’ee dhaabate.

²⁸ Erga Yesuus manatti ol galee booddee barattoonni isaa, “Nu maaliif hafuura hamaa sana baasuu dadhabne?” jedhanii kophaatti isa gaafatan.

²⁹ Innis deebisee, **“Inni akkanaa kun kadhannaa fi sooma qofaan ba’a malee waan biraatiin hin ba’u”** jedheen.

³⁰ Isaan achii ka’anii Galiilaa keessa darban. Yesuusis akka namni tokko iyyuu kana beeku hin barbaanne; ³¹ sababiin isaas, **“Ilmi Namaa dabarfamee harka namootaatti ni kennama. Isaanis isa ni ajjeesu; innis guyyaa sadii booddee du’aa ni ka’a”** jedhee barattoota isaa barsiisaa ture. ³² Isaan garuu waan inni jedhe hin hubanne; isa gaafachuus ni sodaatan.

Namni Nama Hundumaa Caalu Eenyu?

9:33-37 kwf - Mat 18:1-5; Luq 9:46-48

³³ Isaanis Qifirnaahom dhaqan. Innis yeroo mana keessa turetti, **“Isin karaatti maal walitti falmaa turta?”** jedhee isaan gaafate. ³⁴ Isaan garuu eenyu akka nama hundumaa caalu karaatti waan walitti falmaa turaniif ni cal’isan.

³⁵ Yesuusis taa’ee warra kudha lamaan waamee, **“Namni nama jalqabaa ta’uu barbaadu kam iyyuu nama hundaa gadii fi tajaajilaa nama hundaa ta’uu qaba”** jedheen.

³⁶ Innis mucaa xinnaa tokko fidee isaan gidduu dhaabe. Hammatees akkana isaaniin jedhe; ³⁷ **“Namni ijoollee xixinnoo kanneen keessaa tokko maqaa kootiin simatu kam iyyuu na simata; namni na simatu kam iyyuus isa na erge sana simata malee na qofa hin simatu.”**

Namni Nuun Hin Mormine Kam iyyuu Garee keenya

9:38-40 kwf - Luq 9:49,50

³⁸ Yohannis, “Yaa barsiisaa, nu utuu namni tokko maqaa keetiin hafuurota hamoo baasuu arginee waan inni nu duukaa hin buuneeffata isa dhowwine” jedhe.

³⁹ Yesuus garuu akkana jedhe; **“Isa hin dhowwinaa; namni maqaa kootiin dinqii hojjetu kan ergasii immoo dafee waa’ee koo waan hamaa dubbachuu danda’u tokko iyyuu hin jiruutii.** ⁴⁰ Namni nuun hin mormine kam iyyuu kanuma keenyaatii. ⁴¹ Ani dhuguman isinitti hima; namni sababii isin kan Kiristoos taataniif jedhee bishaan budduqsaa tokkoo isinii kennu kam iyyuu dhugumaan gatii isaa hin dhabu.

Cubbuu Nama Hojjechiisuu

⁴² **“Namni kam iyyuu warra natti amanan xixinnaa kanneen keessaa tokko gufachiisuu irra, utuu dhagaan daakuu guddaan isaa morma isaatti hidhamee galaanatti darbatamee isaaf wayya ture.** ⁴³ Yoo harki kee si gufachiise, of irraa muri. Harka lama qabaatee gahaannamitti, iddoo ibiddi isaa hin dhaamnetti galuu irra, harka dooluudhaan jireenyatti galuu siif wayya. [⁴⁴ Gahaannamis iddoo,

“‘raammoon isaanii hin duune, ibiddis hin dhaamnee dha.’]‡

⁴⁵ Yoo miilli kee si gufachiise of irraa muri. Miilla lama qabaatee gahaannamitti darbatamuu irra, laamshoftee jireenyatti galuu siif wayya. [⁴⁶ Gahaannamis iddoo,

“‘raammoon isaanii hin duune, ibiddis hin dhaamnee dha.’]§

⁴⁷ Yoo iji kee si gufachiise, of keessaa baasi. Ija lama qabaatee gahaannamitti darbatamuu irra ija tokkoon mootummaa Waaqaatti galuu siif wayya.

⁴⁸ Gahaannamis iddoo,

“‘raammoon isaanii hin duune, ibiddis hin dhaamnee dha.’*

⁴⁹ Namni hundinuu ibiddaan mi’eeffama.†

⁵⁰ **“Soogiddi gaarii dha; garuu yoo mi’aa isaa dhabe, mi’aa isaa akkamiin deebisuufii dandeessu? Isinis soogidda of keessaa qabaadhaa; walii wajjinis nagaan jiraadhaa.”**

10

Wal Hiikuu Dhirsaa fi Niitii

10:1-12 kwf - Mat 19:1-9

¹ Yesuus achii ka’ee gara biyya Yihuudaatii fi Yordaanos gamaa dhaqe. Amma illee namoonni isa biratti walitti qabaman; innis akkuma bartee isaatti isaan barsiise.

² Fariisonni dhufanii, “Namni tokko niitii isaa hiikuun ni eeyyamamaa?” jedhanii gaafachuudhaan isa qoran.

³ Innis deebisee, **“Museen maal isin ajaje?”** jedheen.

⁴ Isaanis, “Namni tokko akka waraqaan ragaa hiikkaa barreesseefii niitii isaa hiiku Museen eeyyameera” jedhan.

⁵ Yesuus akkana jedhee deebise; **“Museen sababii mata jabina keessaniitiif jedhee seera kana isiniif barreesse.** ⁶ Jalqaba uumamaatii kaasee garuu Waaqni, **‘Dhiiraa fi dubartii isaan taasise.’* ⁷ ‘Kanaafis namni abbaa isaatii fi haadha isaa ni dhiisa; niitii isaa wajjinis tokko ta’a; ⁸ lamaan isaanii iyyuu foon tokko ni ta’u.’†Egaa isaan si’achi foon tokko malee lama miti. ⁹ Kanaafuu waan Waaqni tokko taasise namni gargar hin baasin.”**

¹⁰ Utuu ammas mana jiranuu barattoonni waa’ee dubbii kanaa Yesuusin gaafatan.

¹¹ Innis akkana jedhee deebiseef; **“Namni niitii isaa hiikee dubartii biraa fuudhu kam iyyuu ishee irratti ejja raawwata. ¹² Isheenis yoo dhirsaa ishee hiiktee nama biraatti heerumte ejja raawwatti.”**

Yesuus Ijoollee Eebbisuu Isaa

10:13-16 kwf - Mat 19:13-15; Luq 18:15-17

‡ **9:44** 9:44 Kutaan kun waraabbilee tokko tokko keessatti hin argamu. § **9:46** 9:46 Kutaan kun waraabbilee tokko tokko keessatti hin argamu. * **9:48** 9:48 Isa 66:24 † **9:49** 9:49 Mi’eeffama (qulqulleeffama) - jechi kun mi’aa soogidda irraa argamu mul’isa. Namoonni durii akka aarsaan tokko fuula Waaqaa duratti fudhatama

argatuuf jechuunis aarsaa qulqulleessuuf soogiddatti fayyadamaa turan (Lew 2:13; His 43:24). * **10:6** 10:6 Uma

1:27 † **10:8** 10:8 Uma 2:24

¹³ Namoonni akka inni harka isaan irra kaa'uuf ijoollee xixinnoo Yesuusitti fidaa turan; barattoonni garuu isaan ifatan. ¹⁴ Yesuus yommuu waan kana argetti aaree akkana isaaniin jedhe; **"Ijoolleen xixinnoo gara koo haa dhufaniitii hin dhowwinaa; mootummaan Waaqaa kan warra akkanaatii.** ¹⁵ **Ani dhuguman isinitti hima; namni akkuma ijoolleetti mootummaa Waaqaa hin simanne kam iyyuu gonkumaa itti hin galu."** ¹⁶ Innis ijoollee sana fuudhee ofitti qabe; harka isaas isaan irra kaa'ee isaan eebbise.

Dargaggeessa Sooressa Tokko

10:17-31 kwf - Mat 19:16-30; Luq 18:18-30

¹⁷ Akkuma Yesuus deemuuf karaa qabateen namichi tokko fiigaa dhufee fuula isaa duratti jilbeenfatee, "Yaa barsiisaa gaarii, ani jireenya bara baraa dhaaluuf maal gochuun qaba?" jedhee gaafate.

¹⁸ Yesuus akkana jedhee deebise; **"Ati maaliif gaarii naan jetta? Waaqa tokkicha malee gaariin hin jiru.** ¹⁹ **Ati ajajawwan ni beekta; Hin ajjeesin; hin ejjin; hin hatin; sobaan dhugaa hin ba'in; hin gowwoomsin; abbaa keetii fi haadha keetiif ulfina kenni."**

²⁰ Namichis, "Yaa barsiisaa, ani ijoollummaa kootii jalqabee ajajawwan kanneen hunda eegeera" jedhe.

²¹ Yesuus namicha ilaalee isa jaallatee, **"Waan tokkotu si duraa hir'ata; dhaqiiiti waan qabdu hunda gurgurii hiyyeeyyiif kenni; samii irratti badhaadhummaa ni qabaataa. Ergasii kottuu na duukaa bu'i"** jedheen.

²² Kana irratti fuulli namichaa ni geeddarama. Inni gaddee achii deeme; qabeenya guddaa qaba tureetii.

²³ Yesuus naannoo isaa ilaalee barattoota isaatiin, **"Mootummaa Waaqaatti galuun sooreyyiif akkam rakkisaa dha!"** jedhe.

²⁴ Barattoonnis dubbii isaa ni dinqisiifatan. Yesuus garuu ammas akkana jedheen; **"Ijoolle, mootummaa Waaqaatti galuun akkam rakkisaa dha! ²⁵ Namni soressi mootummaa Waaqaatti galuu irra qaawwa lilmoo keessa ba'uutu galaaf salphata."**

²⁶ Barattoonnis akka malee raajeffatanii, "Yoos eenyutu fayyuu danda'a ree?" waliin jedhan.

²⁷ Yesuus isaan ilaalee, **"Kun garuu Waaqaaf malee namaaf hin danda'amu; Waaqaaf wanni hundinuu ni danda'amaatii"** jedhe.

²⁸ Kana irratti Phexros, "Kunoo, nu waan hunda dhiifnee si duukaa buuneerra!" jedhe.

²⁹ Yesuus deebisee akkana jedheen; **"Ani dhuguma isinitti nan hima; namni anaa fi wangeelaaf jedhee mana yookaan obboloota yookaan obboleettota yookaan haadha yookaan abbaa yookaan ijoollee yookaan lafa qotiisaa dhiise kam iyyuu, ³⁰ kan bara ammaa kana keessa ari'atama wajjin manneen, obboloota, obboleettota, haadhota, ijoollee fi lafa qotiisaa dachaa dhibba hin arganne, kan bara dhufuttis jireenya bara baraa hin dhaalle tokko iyyuu hin jiru.** ³¹ **Garuu warri jalqabaa hedduun warra dhumaa, warri dhumaa immoo warra jalqabaa ni ta'u."**

Yesuus Ammas Waa'ee Du'a Isaa Duraan Dursee Dubbate

10:32-34 kwf - Mat 20:17-19; Luq 18:31-33

³² Isaanis Yerusaaleemitti ol ba'uuf jedhanii karaa irra turan; Yesuus immoo isaan dura deema ture; barattoonnis ni dinqisiifatan; warri duukaa bu'aa turan immoo ni sodaatan. Yesuus amma illee warra kudha lamaan kophaatti baasee waan isatti dhufuuf jiru isaanitti hime. ³³ Akkanas jedhe; **"Kunoo, nu Yerusaaleemitti ol ba'aa jirra; Ilmi Namaas dabarfamee luboota hangafootattii fi barsiistota seeraatti isa kennama. Isaanis du'a itti muru; akkasumas dabarsanii Namoota Ormaatti isa kennu; ³⁴ isaanis isatti qoosu; isatti tufu; isa garafu; isa ajjeesus. Inni garuu guyyaa sadii booddee du'aa ni ka'a."**

Kadhaa Yaaqoobii fi Yohannis

10:35-45 kwf - Mat 20:20-28

³⁵ Ilmaan Zabdewoos jechuunis Yaaqoobii fi Yohannis gara Yesuus dhufanii, "Yaa Barsiisaa, akka ati waan nu si kadhannu kam iyyuu nuu gootu barbaanna" jedhan.

³⁶ Innis, **"Akka ani maal isiniif godhu barbaaddu?"** jedheen.

³⁷ Isaanis deebisanii, "Yeroo ulfina keetiitti, tokkoon keenya mirga keetiin, tokkoon keenya immoo bitaa keetiin akka teenyuuf nuuf eeyyami" jedhanii deebisan.

³⁸ Yesuusis, **“Isin waan kadhattan hin beektan; xooffoo ani dhugu, dhuguu yookaan cuuphaa ani cuuphamu, cuuphamuu ni dandeessuu?”** jedheen.

³⁹ Isaanis, **“Ni dandeenya”** jedhanii deebisan.

Yesuusis akkana jedheen; **“Xooffoo ani dhugu ni dhugdu; cuuphaa ani cuuphamus ni cuuphamtu; ⁴⁰ garuu mirga koo yookaan bitaa koo taa’uu kan kennu ana miti. Iddoon kun kan warra isaaniif jedhamee qopheeffame sanaa ti.”**

⁴¹ Warri kurnan yommuu waan kana dhaga’anitti Yaaqoobii fi Yohannisitti aaran.

⁴² Yesuusis walitti isaan waamee akkana jedhe; **“Isin akka warri akka bulchitoota Namoota Ormaatti ilaalaman sun isaan irratti gooftummaa mul’isan, gurguddoonni isaaniis akka isaan irratti taayitaa argisiisan ni beektu. ⁴³ Isin biratti akkas miti. Qooda kanaa namni isin keessaa nama guddaa ta’uu barbaadu kam iyyuu tajaajilaa keessan ta’uu qaba; ⁴⁴ namni nama jalqabaa ta’uu barbaadu kam iyyuu garbicha nama hundaa ta’uu qaba. ⁴⁵ Ilmi Namaa iyyuu tajaajiluu fi lubbuu isaa immoo namoota baay’eedhaaf furii godhee kennuuf dhufe malee tajaajilamuuf hin dhufneetii.”**

Iji Barxiimewos Banamuu Isaa

10:46-52 kwf - Mat 20:29-34; Luq 18:35-43

⁴⁶ Isaanis Yerikoo dhufan. Utuu Yesuus barattoota isaatii fi tuuta namootaa guddaa isaa wajjin Yerikoodhaa ba’aa jiruu, namichi jaamaan Barxiimewos jedhamu ilmi Ximeewos karaa irra taa’ee kadhachaa ture. ⁴⁷ Barxiimewos yommuu akka inni Yesuus isa Naazreeti ta’e dhaga’etti, **“Yesuus, yaa ilma Daawit na maari!”** jedhee iyyuu jalqabe.

⁴⁸ Namoonni baay’een akka inni cal’isuuf ifatan; inni garuu, **“Yaa ilma Daawit na maari!”** jedhee ittuma caalchisee iyye.

⁴⁹ Yesuusis dhaabatee, **“Isa waamaa”** jedhe.

Isaanis, **“Jabaadhu! Ka’i inni si waamaatii”** jedhanii namicha jaamaa sana waaman.

⁵⁰ Innis wayyaa isaa of irraa darbatee, utaalee ka’ee gara Yesuus dhufe.

⁵¹ Yesuusis, **“Akka ani maal siif godhu barbaadda?”** jedhee isa gaafate.

Namichi jaamaan sunis, **“Yaa barsiisaa, ani arguun barbaada”** jedheen.

⁵² Yesuusis, **“Amantiin kee si fayyiseeraa deemi”** jedheen. Innis yeruma sana argee karaa irra bu’ee Yesuus duukaa bu’ee.

11

Yesuus Akka Mootiitti Yerusaaalem Seenuu Isaa

11:1-10 kwf - Mat 21:1-9; Luq 19:29-38

11:7-10 kwf - Yoh 12:12-15

¹ Akkuma isaan Yerusaaalemitti dhi’aatani, Beetfaagee fi Biitaaniyaa kanneen Tulluu Ejersaa biraa sana ga’aniin Yesuus Barattoota isaa keessaa lama erge; ² akkanas isaaniin jedhe; **“Gara ganda fuula keessan dura jiru sanaa dhaqaa; akkuma achi seentaniinis, ilmoo harree kan namni tokko iyyuu takkumaa hin yaabbatin tokko achitti hidhamee jiru ni argattu; isa hiikaatii as fidaa. ³ Yoo namni tokko iyyuu, ‘Isin maaliif waan kana gootu?’ jedhee isin gaafate, ‘Gooftaatu isa barbaada; dafees deebisee ni erga’ jedhaa.”**

⁴ Isaanis dhaqanii ilmoo harree kan balbala duratti, karaa irratti hidhame tokko argan. Akkuma isaan hiikaniinis, ⁵ namoonni achi dhadhaabachaa turan tokko tokko, **“Maal gochuuf ilmoo harree sana hiiktu?”** jedhanii isaan gaafatan. ⁶ Isaanis akkuma Yesuus isaaniin jedhe sanatti deebisaniif; namoonni sunis akka isaan deeman isaan dhiisan. ⁷ Ilmoo harree sanas Yesuusitti fidan; uffata isaaniis ilmoo harree irra buusan; innis irra taa’ee. ⁸ Namoonni baay’een uffata isaanii karaa irra afan; warri kaan immoo dameewwan baala qaban kanneen alaa kukkutan sana karaa irra bubuusan. ⁹ Warri dura deemaa turanii fi warri duukaa bu’aa turan iyyanii akkana jedhan; **“Hoosaa’inaa!”***

“Inni maqaa Gooftaatiin dhufu eebbifamaa dha!”†

¹⁰ **“Mootummaan abbaa keenya Daawit inni dhufu sun eebbifamaa dha!”**

“Hoosaa’inaa ol gubbaatti!”

* **11:9** 11:9 Hoosaa’inaa! Hosaa’inaa jechuun, “Amma fayyisi!” yookaan “Maaloo fayyisi!” jechuu dha. † **11:9** 11:9 Far 118:25,26

¹¹ Yesuusis Yerusaaalem seenee mana qulqullummaatti ol gale. Gara galees waan hundumaa ilaale; sababii galgalaa'ee tureefis warra Kudha Lamaan wajjin ba'ee Biitaaniyaa dhaqe.

Yesuus Mana Qulqullummaa Qulqulleessuu Isaa

11:12-14 kwf - Mat 21:18-22

11:15-18 kwf - Mat 21:12-16; Luq 19:45-47; Yoh 2:13-16

¹² Guyyaa itti aanutti utuu Biitaaniyaadhaa ba'anuu Yesuus beela'e. ¹³ Innis muka harbuu baala qabu tokko fagootti argee ija qabaachuu fi qabaachuu baachuu isaa ilaaluu dhaqe. Garuu waan yeroon sun waqtii harbuu hin ta'iniif inni yommuu muka sana bira ga'etti baala malee waa tokko illee hin arganne. ¹⁴ Yesuusis muka sanaan, "**Namni tokko iyyuu deebi'ee ija sirraa hin nyaatin**" jedhe. Barattoonni isaas ni dhaga'an.

¹⁵ Yommuu Yerusaaalem ga'anittis Yesuus mana qulqullummaa seenee warra achitti bitatanii fi gurguratan ari'uu jalqabe. Minjaala warra maallaqa geeddarataniitii fi barcuma warra gugee gurguratanii garagalche. ¹⁶ Akka namni tokko iyyuu waan tokko illee baatee mana qulqullummaa keessa darbus hin eeyyamne. ¹⁷ Innis akkana jedhee isaan barsiise; "**Manni koo saba hundumaaf mana kadhannaa ni jedhama**" jedhamee **hin barreeffamnee? Isin garuu 'Holqa saamtotaa' Sgootaniirtu.**"

¹⁸ Luboonni hangafoonnii fi barsiistonni seeraa waan kana dhaga'anii karaa ittiin isa ajjeesan barbaaduu jalqaban; isaan sababii namoonni hundinuu barsiisa isaa dingqisiifatanii isaa sodaatanii turaniitii.

¹⁹ Isaanis yommuu galgalaa'etti magaalaa sana keessaa ba'an.

Mukti Harbuu Goguu Isaa

11:20-24 kwf - Mat 21:19-22

²⁰ Isaanis ganamaan utuu karaa sana darbanuu akka mukti harbuu sun hidda isaatii jalqabee goge argan. ²¹ Phexrosis yaadatee Yesuusiin, "Yaa barsiisaa ilaa! Harbuun ati abaarte sun gogeeral!" jedhe.

²² Yesuus immoo akkana jedhee deebise; "**Waaqatti amanaa. ²³ Ani dhuguman isinitti hima; eenyu iyyuu yoo tulluu kanaan 'Buqqaa'iitii galaanatti darbatami' jedhe, yoo garaa isaattis mamuu baatee akka wanni inni jedhe sun ta'u amane, wanni sun ni ta'aaf. ²⁴ Kanaafuu ani isinittin hima; waan kadhannaadhaan gaafattan hunda akka argattan amanaa; innis isiniif ni ta'a. ²⁵ Yeroo kadhachuuf dhaabattan, akka Abbaan keessan inni samii irraa cubbuu keessan isiniif dhiisuuf, isinis yoo waanuma tokko illee nama kam iyyuu irraa qabaattan dhiisaafii. [²⁶ Yoo dhiisuufii baattan garuu Abbaan keessan inni samii irraas cubbuu keessan isiniif hin dhiisu.**"]*

Taayitaan Yesuus Gaaffii Uume

11:27-33 kwf - Mat 21:23-27; Luq 20:1-8

²⁷ Isaanis deebi'anii gara Yerusaaalem dhufan; utuu Yesuus mana qulqullummaa keessa deddeebi'aa jiruu luboonni hangafoonni, barsiistonni seeraatii fi maanguddoonni gara isaa dhufan. ²⁸ Isaanis, "Ati taayitaa maaliitiin wantoota kanneen hojjetta? Akka wantoota kanneen hojjetuufis eenyutu taayitaa siif kenne?" jedhaniin.

²⁹ Yesuusis akkana jedhee deebise; "**Anis gaaffii tokkon isin gaafadha. Isin immoo deebii naaf kennaa; anis taayitaa maaliitiin wantoota kanneen akkan hojjedhu isinittin hima. ³⁰ Cuuphaan Yohannis samii irraa dhufe moo nama biraa dhufe? Mee natti himaa!**"

³¹ Isaanis waliin mari'atanii akkana jedhan; "Yoo nu, 'Samii irraa dhufe' jenne inni immoo, 'Yoo isin maaliif isa hin amanin ree?' jedhee nu gaafata; ³² Yookaan, 'Nama biraa dhufe' jennuu?" jedhan. Sababii namni hundinuu dhugumaan Yohannisin akka raajiitti ilaaleef uummata sodaatan.

³³ Kanaaf isaan, "Hin beeknu" jedhanii Yesuusiif deebisan.

Yesuus immoo, "**Anis taayitaa maaliitiin akkan wantoota kanneen hojjedhu isinitti hin himu**" jedheen.

12

Fakkeenya Qottuuwwanii

12:1-12 kwf - Mat 21:33-46; Luq 20:9-19

¹ Yesuus akkana jedhee fakkeenyaan isaanitti dubbachuu jalqabe; **“Namichi tokko iddoo dhaabaa wayinii irra wayinii dhaabbate. Innis naannoo isaatti dallaa ijaaree, boolla itti wayinii cuunfan qotee qooxii eegumsaa ijaare. Ergasiis iddoo dhaabaa wayinii sana qonnaan bulootatti kiraa kennatee biyya fagoo dhaqe.** ² **Innis yeroo midhaan walitti qabamutti akka inni ija iddoo dhaabaa wayinii irraa waa fiduufif garbicha tokko qottuwwan sanatti ergate.** ³ **Isaan garuu qabanii, tumanii harka duwwaa of irraa isa deebisan.** ⁴ **Ammas garbicha biraa isaanitti ergate; isaanis mataa isaa buruqsanii isa qaannessan.** ⁵ **Amma illee garbicha biraa ergate; isas ni ajjeesan. Garboota biraa baay’ees ergate; isaanis gartokko ni tuman; kaan immoo ni ajjeesan.**

⁶ **“Amma iyyuu inni nama ergu tokko qaba ture; innis ilma isaa jaallatamaa dha. Namichis, ‘Ilma koo ni kabaju’ jedhee dhuma irratti isa ergate.**

⁷ **“Qottoonni sun garuu, ‘Dhaaltuun isa kana. Kottaa isa ajjeefnaa; dhaalli sun keenya ta’aatii’ waliin jedhan.** ⁸ **Kanaafuu isaan fuudhanii isa ajjeesan; iddoo dhaabaa wayinii keessaas gad baasanii isa gatan.**

⁹ **“Egaa abbaan iddoo dhaabaa wayinii sanaa maal godhinna laata? Inni dhufee qottuwwan sana ni ajjeesa; iddoo dhaabaa wayinii sanas namoota biraatti kennata.** ¹⁰ **Isin Katabbii Qulqulluu hin dubbifnee? Innis akkana jedha:**

**“‘Dhagaan ijaarttonni tuffatan,
dhagaa golee ta’eera;**

¹¹ **kanas Gooftaatu godhe;**

kunis ija keenyatti dinqii dha.*”

¹² Isaanis akka inni isaaniin mormuudhaan fakkeenya sana dubbate waan beekaniif isa qabuu barbaadan. Garuu namoota sana sodaatan; kanaafuu isa dhiisanii qajeelan.

Waa’ee Gibira Baasuu

12:13-17 kwf - Mat 22:15-22; Luq 20:20-26

¹³ Ergasii waan inni dubbatuun isa qabuuf jedhanii Fariisotaa fi garee Heroodis keessaara jara tokko Yesuusitti ergan. ¹⁴ Isaanis gara isaa dhufanii akkana jedhaniin; “Yaa barsiisaa, akka ati nama dhugaa taate beekna. Ati waan fuula namaa hin ilaalleef namni kam iyyuu karaa irraa si hin jal’isuutii; garuu ati dhugaadhaan karaa Waaqaa barsiifta. Qeesaariif gibira baasuun eeyyamameera moo hin eeyyamamne? ¹⁵ Haa baasnu moo haa dhiifnuu?”

Yesuus garuu fakkeessitummaa isaanii beekke, **“Isin maaliif na qortu? Mee diinaarii tokko natti fidaa nan ilaalaa”** jedheen. ¹⁶ Isaanis diinaarii tokko isatti fidan; innis, **“Fakkiin kun kan eenyuu ti? Katabbiin kunis kan eenyuu ti?”** jedhee isaan gaafate.

Isaanis, “Kan Qeesaari” jedhanii deebisan.

¹⁷ Kana irratti Yesuus, **“Kan Qeesaar Qeesaariif, kan Waaqaa immoo Waaqaaf kennaa”** jedheen.

Isaanis isa dinqifatan.

Gaaffii Waa’ee Du’aa Ka’uu

12:18-27 kwf - Mat 22:23-33; Luq 20:27-38

¹⁸ Ergasii Saduqqonni, du’aa ka’uun hin jiru jedhan gara Yesuus dhufanii akkana jedhanii gaaffii tokko isa gaafatan; ¹⁹ “Yaa barsiisaa yoo obboleessi nama tokkoo niitti fuudhee utuu ijoollee hin dhalchin niitti isaa irraa du’e, obboleessi isaa niitti sana dhaalee obboleessa isaatiif sanyii haa dhaabuu jedhee Museen nuu barreesseera.

²⁰ Kunoo obboloota torbatu ture. Inni jalqabaa niitti fuudhee utuu ijoollee hin dhalchin du’e. ²¹ Inni lammafaanis ishee fuudhee utuu ijoollee hin dhalchin du’e. Inni sadaffaanis akkasuma ta’e. ²² Torban isaanii iyyuu ijoollee hin dhalchine. Dhuma irratti dubartittiinis ni duute. ²³ Guyyaa du’aa ka’uutti isheen niitti isa kamii taati? Torban isaanii iyyuu ishee fuudhaniiruutii.”

²⁴ Yesuus immoo akkana jedhee deebise; **“Isin waan Katabbiwwan Qulqulluu yookaan humna Waaqaa hin beekneef dogoggortu mitii? ²⁵ Warri du’an yommuu du’aa ka’anitti akka ergamoota samii ta’u malee hin fuudhan; hin heerumanis.**

* **12:11** 12:11 Far 118:22,23 † **12:15** Hiikkaan tokko tokko saantima jedha. Saantimni maallaqaa kunis saantima mootummaa Roomaa ture. Innis fakkii fuula mootii Roomaa qofa utuu hin ta’in mormii mootiin sun amantii irratti qabus ni mul’isa. Fakkeenyaaf Xibaariyoot mootichi bara sana saantima isaa irratti katabbii, “Xibaariyoot Qeesaar, ilma Awugisxoos Waaqichaa” jedhu qaba ture (Luq 3:1). Fakkii fuula namaa saantima irratti qabaachuun fuula Yihudoota amantii qabanii duratti jibbisiisaa ture. Kitaaba qulqulluu keessattis dhowwameera (Bau 20:4; KeD 5:8).

²⁶ **Waa'ee warri du'an du'aa ka'uu garuu akka Waaqni Kitaaba Musee keessatti, daggala hoba'u biratti, 'Ani Waaqa Abrahaam, Waaqa Yisihaaqii fi Waaqa Yaaqoob' jedhee isatti dubbate isin hin dubbifnee?** ²⁷ **Inni Waaqa warra jiraataniiti malee Waaqa warra du'anii miti. Isin akka malee dogoggartaniirtu!"**

Ajaja Ajaja Hundumaa Caalu

12:28-34 kwf - Mat 22:34-40

²⁸ Barsiistota seeraa keessaa inni tokko dhufee wal falmuu isaanii dhaga'e. Innis akka Yesuus deebii gaarii isaaniif kenne hubatee, "Ajajni ajajawwan hunda caalu isa kami?" jedhee isa gaafate.

²⁹ Yesuusis akkana jedhee deebise; "Ajajni ajajawwan hunda caalu isa kana; 'Yaa Israa'el dhaga'i! Waaqayyo Gooftaan keenya Gooftaa tokkicha." ³⁰ **Waaqa kee Goofticha garaa kee guutuudhaan, lubbuu kee guutuudhaan, yaada kee guutuudhaan, humna kee guutuudhaan jaalladhu.** ³¹ **Inni lammaffaan immoo, isa kana; 'Ollaa kee akkuma ofii keetiitti jaalladhu.'** ³² **Ajajni ajajawwan kanneen caalu tokko iyyuu hin jiru."**

³² Barsiisaan seeraa sunis akkana jedhee deebise; "Yaa barsiisaa, ati dhugaa jette; Waaqa tokkicha malee Waaqni biraa hin jiruutii. ³³ Garaa kee guutuudhaan, yaada kee guutuudhaan, humna kee guutuudhaan isa jaallachuun, ollaa kees akkuma ofii keetiitti jaallachuun, qalma gubamuu fi aarsaa hunda caala."

³⁴ Yesuusis yommuu akka inni hubannaadhaan deebise argetti, "Ati mootummaa **Waaqaa irraa fagoo hin jirtu"** jedheen. Ergasii namni tokko iyyuu deebi'ee gaaffii isa gaafachuuf ija hin jabaanne.

Kiristoos Ilma Eenyuu ti?

12:35-37 kwf - Mat 22:41-46; Luq 20:41-44

12:38-40 kwf - Mat 23:1-7; Luq 20:45-47

³⁵ Yesuus utuu mana qulqullummaa keessatti barsiisaa jiruu akkana jedhee gaafate; "Barsiistonna seeraa maaliif Kiristoos ilma Daawit jedhu?" ³⁶ **Daawit mataan isaa iyyuu Hafuura Qulqulluudhaan geggeeffamee akkana jedhe:**

"Gooftichi Gooftaa kootiin,

"Hamma ani diinota kee,

miilla kee jala siif galchutti,

gara mirga koo taa'i." ³⁷

³⁷ **Daawit mataan isaa iyyuu 'Gooftaa' jedhee isa waama. Yoos inni akkamitti ilma isaa ta'uu danda'a ree?"**

Tuunni guddaan sunis gammachuudhaan isa dhaga'e.

Barsiistota Seeraa Irraa of Eeggachuu

³⁸ Yesuusis utuu barsiisuu akkana jedhe; "Barsiistota seeraa irraa of eeggadhaa. Isaan uffata dhedheeraa uffatanii nanaanna'uu fi gabaa keessattis naga gaafatamuu jaallatu; ³⁹ manneen sagadaa keessatti taa'umsa ulfinaa, lafa cidhaatti immoo iddoo ulfinaa jaallatu. ⁴⁰ Isaanis mana haadha hiyyeessaa saamanii onsu; of argisiisuuf jedhaniis kadhannaa dheeressu. Namoonni kunneen adaba guddaa adabamu."

Kennaa Haadha Hiyyeessaa

12:41-44 kwf - Luq 21:1-4

⁴¹ Yesuusis fuullee iddoo kennaan kaa'amuu taa'ee namoota maallaqa isaanii mi'a buusii keessa buusan ilaala ture. Sooreyyiin baay'eenis maallaqa baay'ee mi'a sana keessa buusaa turan. ⁴² Haati hiyyeessaa hiyyeettiin tokko dhuftee saantima sibilla diimaa xixinnoo lama kan gatiin isaa gara saantima tokkoo ta'e mi'a sana keessa buufte.

⁴³ Yesuusis barattoota isaa ofitti waamee akkana jedhe; "Ani dhuguman isinitti hima; haati hiyyeessaa hiyyeettiin kun warra mi'a buusii kana keessa kennaa buusan hunda caalaa buufteerti. ⁴⁴ Isaan hundi qabeenya isaanii irraa kennan; isheen garuu hiyyuma ishee keessaa waan hunda, waan ittiin jiraattu hunda kennite."

13

Mallattoo Dhuma Baraa

13:1-37 kwf - Mat 24:1-51; Luq 21:5-36

¹ Utuu Yesuus mana qulqullummaatii ba'aa jiruu barattoota isaa keessaa inni tokko, "Yaa Barsiisaa! Dhagaawwan gurguddaa kanneenii fi gamoowwan babbareedoo kanneen mee ilaali!" jedheen.

² Yesuusis, "**Gamoowwan gurguddaa kanneen argitaa? Ni diigama malee asitti dhagaan dhagaa irratti hin hafu**" jedheen.

³ Utuu Yesuus Tulluu Ejersaa irra fuullee mana qulqullummaa taa'ee jiruu Phexros, Yaaqoob, Yohannisii fi Indiriyaas akkana jedhanii kophaatti isa gaafatan; ⁴ "Mee nutti himi; wantoonni kunneen yoom ta'u? Mallattoon yeroo wantoonni kunneen hundi itti raawwatamanii maali?"

⁵ Yesuusis akkana isaaniin jechuu jalqabe; "**Akka namni tokko iyyuu isin hin gowwoomsineef of eeggadhaa.** ⁶ Namoonni hedduun, 'Ani isa' jechaa maqaa kootiin ni dhufu; nama hedduus ni gowwoomsu. ⁷ Isin yommuu waa'ee waraanaatii fi oduu waraanaa dhageessanitti hin rifatinaa. Wannii akkanaa ta'uu qabaatii; dhumni garuu amma iyyuu hin geenye. ⁸ Sabni sabatti, mootummaanis mootummaatti ni ka'a. Sochiin lafaa iddoo garaa garaatti ni ta'a; beellis ni bu'a. Kunis jalqaba ciniinsuu da'umsaa ti.

⁹ "Isin of eeggachuu qabdu. Isin dabarfamtanii yaa'iitti ni kennamtu; manneen sagadaa keessattis ni garafamtu. Isinis akka isaanitti dhuga baatota taataniif anaaf jettanii fuula bulchitootaatii fi moototaa dura ni dhaabattu. ¹⁰ Duraan dursee wangeelli saba hundatti lallabamuu qaba. ¹¹ Yommuu qabamtanii qorumsaaf dhi'effamtanitti waa'ee waan dubbattanii duraan dursitanii hin yaadda'inaa. Waanuma yeroo sana isinii kennamu dubbadhaa; kan dubbatu Hafuura Qulqulluudha malee isin miti.

¹² "Obboleessi dabarsee obboleessa du'atti kenna; abbaan dabarsee ijoollee isaa du'atti kenna. Ijoolleenis warra isaaniitti ka'anii isaan ajjeesu. ¹³ Namni hundinuu sababii maqaa kootiif isin jibba; kan hamma dhumaatti jabaatee dhaabatu garuu ni fayya.

¹⁴ "Isin yommuu wannii jibbisiisaan badiisa fidu* sun iddoo isaaf hin malle dhaabatee argitanitti, namni dubbisu haa hubatu; yommuu warri Yihuudaa keessa jiran tulluuwwanitti haa baqatan. ¹⁵ Namni bantii manaa irra jiru tokko iyyuu waan tokko illee fudhachuuf gad hin bu'in yookaan mana hin seenin. ¹⁶ Namni lafa gotiisaa jiru tokko iyyuu uffata isaa fudhachuuf duubatti hin deebi'in. ¹⁷ Bara sana keessa dubartoota ulfaatii fi haadhota hoosisaniif wayyoo! ¹⁸ Kunis akka ganna keessa hin taaneef kadhadhaa. ¹⁹ Guyyoota sana keessa dhiphinni jalqaba uumama Waaqni uumee kaasee hamma ammaatti hin dhufin, kan gara fuula duraattis hin dhufne ni dhufaatii.

²⁰ "Utuu Gooftaan guyyoota sana gabaabsuu baatee silaa namni tokko iyyuu hin hafu ture. Garuu inni sababii filatamtoota filateetiif jedhee guyyoota sana gabaabseera. ²¹ Yeroo sana yoo namni kam iyyuu, 'Ilaa Kiristoos as jira!' yookaan 'Ilaa, inni achi jira!' isiniin jedhe hin amaninaa. ²² Kiristoosonni sobaatii fi raajonni sobaa ni ka'utii; isaanis yoo danda'ameef, filatamtoota illee gowwoomsuuf jedhanii mallattoo fi dinqii ni hojjetu. ²³ Isin garuu of eeggadhaa! Ani waan hunda duraan dursee isinitti himeera.

²⁴ "Bara sana keessa garuu dhiphina sana booddee, "Aduun ni dukkanoofti;

ji'is ifa ishee hin kennitu;

²⁵ urjiiwan samii irraa ni harca'u; humnoonni samiis ni raafamu.†

²⁶ "Yeroo sana namoonni utuu Ilmi Namaa humna guddaa fi ulfinaan duumessaan dhufuu ni argu. ²⁷ Innis Ergamoota isaa ergee filatamtoota isaa kanneen handaarawwan lafaa irraa hamma handaarawwan samiiwwaniitti jiran bubbeewwan afran irraa walitti qaba.

²⁸ "Fakkeenya kana muka harbuu irraa baradhaa; yommuu dameen isaa latee baala baafatutti akka bonni dhi'aate ni beektu. ²⁹ Akkasuma isinis yommuu wannii kun raawwatamuu isaa argitanitti akka inni dhi'aate, akka balbala irras ga'e ni beektu. ³⁰ Ani dhuguma isinittin hima; hamma wannii kun hundi ta'utti dhaloonni kun hin darbu. ³¹ Samii fi lafti ni darbu; dubbiin koo garuu gonkumaa hin darbu.

* 13:14 13:14 Dan 9:27; 11:31; 12:11 † 13:18 13:18 Ganni yeroo bokkaan cimaan roobee lagni guutee rakkina uumuu dha. Akkasumas akka ganna keessa hir'inni nyaataa jiru argisiisuu danda'a. ‡ 13:25 13:25 Isa 13:10; 34:4

Guyyaa fi Sa'aatiin Sun Hin beekamu

³² “Waa’ee guyyaa sanaa yookaan waa’ee sa’aatii sanaa garuu Abbaa qofatu beeka malee namni tokko iyyuu hin beeku; ergamoonni samii irraa iyyuu hin beekan; yookaan ilmi iyyuu hin beeku. ³³ Of eeggadhaa! Dammaqaas! Yeroon sun yoom akka ta’e hin beektaniitii. ³⁴ Innis nama garboota isaatti taayitaa kennee, tokkoo tokkoo isaaniittis hojii isaa kennee, akka garbichi karra eegu immoo dammaqee eegu ajajee, mana isaa dhiisee karaa dheeraa deeme tokko fakkaata.

³⁵ “Kanaafuu isin dammaqaa; yeroo itti abbaan mana sanaa deebi’u, jechuunis galgala yookaan halkan walakkaa yookaan iyya indaanqoo yookaan barii obboroo ta’uu isaa hin beektaniitii. ³⁶ Kunis akka inni akkuma tasaa dhufee utuu raftaanuus isin hin arganneef. ³⁷ Ani waanan isiniin jedhu nama hundumaan nan jedha; ‘dammaqaa!’ ”

14

Yesuus Biitaaniyaatti Shittoo Dibame

14:1-11 kwf - Mat 26:2-16

14:1,2,10,11 kwf - Luq 22:1-6

14:3-8 kwi - Yoh 12:1-8

¹ Egaa Faasiikaa fi Ayyaana Maxinootiif guyyaa lama qofatu hafe; luboonni hangafooonii fi barsiistonni seeraa haxxummaadhaan Yesuus qabanii ajjeesuuf mari’achaa turan. ² Isaanis, “Garuu akka namoonni goolii hin kaafneef yeroo ayyaanaatti hin ta’in” jedhan.

³ Utuu inni Biitaaniyaa keessa mana Simoon isa lamxaa’aa sanaatti maaddiitti dhi’atees jiruu, dubartiin tokko shittoo gatiin isaa guddaa ta’e kan naardoos qulqulluu irraa qopheeffame bilqaaxxii albaasxirositti qabattee dhufte. Isheenis bilqaaxxicha cabsitee shittoo sana mataa isaatti dhangalaafte.

⁴ Namoota achi turan keessaa tokko tokko aaranii akkana waliin jedhan; “Shittoo kana balleessuun maaliif? ⁵ Silaa shittoon kun diinaarii dhibba sadii* olitti gurguramee maallaqa isaa hiyyeeyyiif kennuun ni danda’ama tureetii.” Isaanis isheetti dheekkaman.

⁶ Yesuus garuu akkana jedhe; “**Ishee dhiisaa. Maaliif ishee rakkiftu? Isheen waan gaarii naaf gooteerti.** ⁷ Hiyyeeyyii yeroo hunda of biraa qabdu; isin yeroo feetan kamitti iyyuu isaan gargaaruu ni dandeessu. Ana garuu yeroo hunda of biraa hin qabdan. ⁸ Isheen waan dandeessu hojjette. Isheen duraan dursitee dhagna koo awwaalaaf dibde.† ⁹ Ani dhuguma isinittin hima; addunyaa hunda irratti, iddoo wangeelli itti lallabamu kamitti iyyuu wanni isheen gootes yaadannoo isheetiif ni odeeffama.”

¹⁰ Ergasiis warra Kudha Lamaan keessaa tokko, Yihuudaa Keeriyotichi, Yesuusin dabarsee isaanitti kennuuf jedhee gara luboota hangafootaa dhaqe. ¹¹ Isaanis yommuu waan kana dhaga’anitti gammadani, maallaqa isaaf kennuuf waadaa galan. Kanaafuu Yihuudaan dabarsee isa kennuuf haala mijaa’aa eeggachaa ture.

Irbaata Gooftaa

14:12-26 kwf - Mat 26:17-30; Luq 22:7-23

14:22-25 kwf - 1Qr 11:23-25

¹² Guyyaa jalqaba Ayyaana Maxinoo, yeroo itti hoolaan Faasiikaa qalamutti barattoonni Yesuus, “Akka ati Faasiikaa nyaattuuf nu eessa dhaqnee akka siif qopheessinu barbaadda?” jedhanii isa gaafatan.

¹³ Innis barattoota isaa keessaa nama lama erge; akkanas isaaniin jedhe; “**Magaalaa seenaa; namichi okkotee bishaanii baatu tokko isinitti dhufa; isa duukaa bu’aa.** ¹⁴ Abbaa mana namichi sun seenutiinis, ‘Barsiisaan, manni keessumaa ko, iddoon ani itti barattoota koo wajjin Faasiikaa nyaadhu eessa? jedhee gaafata’ jedha. ¹⁵ Abbaan manaa sunis darbi bal’aa miidhagamee qopheeffame tokko isinitti argisiisa. Isinis achitti nuuf qopheessaa.”

¹⁶ Barattoonnis ka’anii magaalaa sana seenanii akkuma Yesuus isaanitti hime sanatti argatan. Faasiikaas ni qopheessan.

¹⁷ Yesuus yommuu galgalaa’etti warra Kudha Lamaan wajjin achi ga’e. ¹⁸ Utuu isaan maaddiitti dhi’aatanii jiranuu Yesuus, “**Ani dhuguma isinitti nan hima; isin keessaa tokko, kan amma na wajjin nyaachuutti jiru dabarsee na kenna**” jedheen.

* **14:5** 14:5 Diinaariin dhibba sadii mindaa waggaatti hojjetaa tokkoof kaffalamu. † **14:8** 14:8 Yihuudoonni yommuu reeffa tokko awwaalaaf qopheessanitti shittootti fayyadamu ture (Mar 16:1).

¹⁹ Isaanis gaddanii, tokko tokkoon, “Na ta’innaa laata?” jechuu jalqaban.

²⁰ Innis akkana jedhee deebise; **“Namichi sun warra kudha Lamaan keessaa tokkoo dha. Innis isa na wajjin gabatee keessaa cuuphatuu dha. ²¹ Ilmi Namaa akkuma waa’een isaa barreeffame sanatti ni deema. Garuu namicha dabarsee Ilma Namaa kennu sanaaf wayyoo! Inni utuu dhalachuu baatee isaaf wayya ture.”**

²² Utuu nyaachaa jiranuus Yesuus buddeena fuudhee eebbise; caccabsees, **“Fudhad-haa; kun foon koo ti”** jedhee isaaniif kenne.

²³ Xoofos fuudhee galata galchee isaaniif kenne; hundi isaaniis xofoo sana irraa dhugan.

²⁴ Innis akkana isaaniin jedhe; **“Kun dhiiga ko, dhiiga kakuu haaraa kan namoota baay’eef dhangalaafamuu dha. ²⁵ Ani dhuguma isinitti nan hima; ani hamman guyyaa sana mootummaa Waaqaa keessatti deebi’ee dhugutti ija wayinii kana irraa deebi’ee hin dhuga.”**

²⁶ Isaanis erga faarfannaa faarfatanii booddee Tulluu Ejersaatti qajeelan.

Yesuus Akka Phexros Isa Ganu Duraan Dursee Dubbate

14:27-31 kwf - Mat 26:31-35

²⁷ Yesuus akkana isaaniin jedhe; **“Hundi keessan ni gufattu; akkana jedhamee barreeffameeraatii:**

“‘Ani tiksee nan rukuta;

hoolonnis ni bittinneffamu.’”

²⁸ **Ani garuu ergan du’aa ka’ee booddee isin dura Galiilaa nan dhaqa.”**

²⁹ Phexros garuu, “Yoo namni hundinuu gufate iyyuu ani hin gufadhu” jedheen.

³⁰ Yesuus immoo deebisee, **“Ani dhuguma sitti nan hima; ati har’aa, edanuma utuu indaanqoon yeroo lama hin iyyin, yeroo sadii na ganta”** jedheen.

³¹ Phexros garuu, “Ani yoon si wajjin du’uu qabaadhe illee gonkumaa si hin ganu” jedhee jabeessee dubbate. Hundi isaaniis akkasuma jedhan.

Geetesemaanee

14:32-42 kwf - Mat 26:36-46; Luq 22:40-46

³² Isaanis iddoo Geetesemaanee jedhamu tokko dhaqan; Yesuusis barattoota isaatiin, **“Hamma ani kadhadhutti isin as taa’aa”** jedhe. ³³ Innis Phexrosin, Yaagoobii fi Yohannisin of faana fudhatee, akka malee dhiphachuu fi yaadda’uus jalqabe. ³⁴ Innis, **“Lubbuun koo akka malee gadditee du’uu geesseerti. Isin asuma turaatii dammaqaa”** jedheen.

³⁵ Innis xinnoo achi hiiqee lafatti gombifamee, yoo danda’ame akka sa’aatiin sun isa irra darbituuf kadhate. ³⁶ Innis, **“Aabbaa, Sya Abbaa, wanni hundinuu siif ni danda’ama. Xofoo kana narraa fuudhi. Garuu akka fedhii keetii malee akka fedhii kootii hin ta’in”** jedhe.

³⁷ Innis gara barattoota isaatti deebi’ee utuu rafaanuu isaan arge. Phexrosiin is akkana jedhe; **“Simoon, ati amma illee inuma raftaa? Sa’aatii tokkittii illee dammaquu hin dandeenyee?”** ³⁸ **Isin akka qorumsatti hin galleef dammaqaa kadhadaa. Hafuurri qophaa’aa dha; foon garuu dadhabaa dha.”**

³⁹ Ammas achi hiiqee waanuma duraan kadhate sana kadhate. ⁴⁰ Inni yommuu deebi’ee dhufetti, ammas utuu rafaanuu isaan arge; iji isaani itti ulfaatee tureetii. Isaanis akka maal jedhanii deebisaniif hin beekne.

⁴¹ Yeroo sadaffaa deebi’ee akkana jedheen; **“Isin amma iyyuu raftanii boqochaa jirtuu? Ni ga’a! Sa’aatiin sun ga’eera. Kunoo, Ilmi Namaa dabarfamee harka cubbamootaatti ni kennama. ⁴² Ka’aa ni deemnaa! Kunoo, namichi dabarsee na kennu sun dhufaa jira.”**

Yesuus Qabamuu Isaa

14:43-50 kwf - Mat 26:47-56; Luq 22:47-50; Yoh 18:3-11

⁴³ Utuma inni dubbachaa jiruu, Yihuudaan namichi warra Kudha Lamaan keessaa tokko ta’e sun dhufe. Tuunni luboota hangafoota, barsiistota seeraatii fi maanguddoota biraa ergames goraadee fi bokkuu qabatee isa wajjin dhufe.

⁴⁴ Inni dabarsee Yesuusin kennu sunis, “Namichi ani dhungadhu isa; isinis isa qabaatii eegaa isa fuudhaa deemaa” jedhee mallattoo kenneefii ture. ⁴⁵ Yihuudaanis yommuuma Yesuusitti dhi’aatee, “Yaa Barsiisaa!” jedhee isa dhungate. ⁴⁶ Namoonni

sun Yesuusin qabanii hidhan. ⁴⁷ Warra achi dhadhaabachaa turan keessaa inni tokko garuu goraadee isaa luqqifatee garbicha luba ol aanaa dha'ee gurra isaa irraa kute.

⁴⁸ Yesuusis akkana jedhe; **“Isin goraadee fi bokkuu qabattanii akka nama hattuu qabuutti na qabuu dhuftanii?”** ⁴⁹ **Ani guyyuma guyyaan mana qulqullummaa keessatti barsiisaa isin wajjin ture; isinis na hin qabne.** Garuu **Katabbiwwan Qulqulluun raawwatamuu qabu.** ⁵⁰ Isaan hundinuus isa dhiisanii baqatan.

⁵¹ Dargaggeessi tokkos uffata quncee talbaa irraa hojjetame tokko qullaa isaa irra buufatee Yesuus faana deema ture. Yeroo isa qabanittis, ⁵² dargaggeessi sun uffata isaa dhiisee, qullaa isaa harkaa ba'e.

Yesuus Yaa'ii Duratti

14:53-65 kwf – Mat 26:57-68; Yoh 18:12,13,19-24

14:61-63 kwf – Luq 22:67-71

⁵³ Isaanis Yesuusin luba ol aanaatti geessan; luboonni hangafoonni, maanguddoonnii fi barsiistonni seeraa hundinuu walitti qabaman. ⁵⁴ Phexrosis hamma dallaa luba ol aanaa keessaatti fagootti isa duukaa bu'e. Innis waardiyyoota wajjin ibidda bira taa'ee qaqqaaammachaa ture.

⁵⁵ Luboonni hangafoonnii fi yaa'iin guutuun Yesuusin ajjeesuuf jedhanii ragaa isatti barbaadaa turan; isaan garuu homaa hin arganne. ⁵⁶ Namoonni baay'een sobaan isatti dhugaa ba'an; dhuga ba'umsi isaanii garuu tokko hin taane.

⁵⁷ Tokko tokko immoo ka'anii akkana jedhaanii sobaan isatti dhugaa ba'an: ⁵⁸ “Mana qulqullummaa kan harka namaatiin ijaarame kana diigee kan biraa kan harka namaatiin hin ijaaramin guyyaa sadii keessatti deebisee nan iljaara' jechuu isaa dhageenyerra.” ⁵⁹ Haa ta'uu malee dhuga ba'umsi isaanii amma illee tokko hin taane.

⁶⁰ Lubichi ol aanaanis ka'ee fuula isaanii dura dhaabatee, “Ati deebii tokko illee hin kennituu? Wannii namoonni kunneen dhugaa sitti ba'an kun maali?” jedhee Yesuusin gaafate. ⁶¹ Yesuus garuu inuma cal'ise malee deebii tokko illee hin kennine.

Lubichi ol aanaan ammas, “Kiristoos Ilmi isa Eebbifamaa Sanaa sii?” jedhee isa gaafate.

⁶² Yesuusis, **“Eeyyee ana; isin utuu Ilmi Namaa karaa mirga Humna Qabeessa sanaatiin taa'ee, duumessa samiitiin dhufuu ni argitu”** jedhe.

⁶³ Lubichi ol aanaan uffata isaa tarsiasee akkana jedhe; “Kana caalaa dhuga baatota maalii nu barbaachisa? ⁶⁴ Waaqa arrabsuu isaa isini iyyuu dhageessaniirtu. Maal isinitti fakkaata?”

Hundi isaanis du'atu isaaf mala jedhanii isatti muran. ⁶⁵ Namoonni tokko tokko isatti tufuu jalqaban; fuula isaas haguuganii abootteen isa rukutanii, “Mee raajii dubbadhu!” jedhan. Eegdonnis fuudhanii isa kakkabalan.

Phexros Yesuusin Ganuu Isaa

14:66-72 kwf – Mat 26:69-75; Luq 22:56-62; Yoh 18:16-18,25-27

⁶⁶ Utuu Phexros dallaa sana keessa gara gadii jiruu xomboreewwan luba ol aanaa keessaa tokko dhuftu. ⁶⁷ Isheen utuu Phexros ibidda qaqqaaammattuu argite; hubattees isa ilaalte.

Isheenis, “Atis Yesuus nama Naazreeti sana wajjin turte” jetteen.

⁶⁸ Inni garuu, “Ani waan ati jettu hin beeku; naaf hin galus” jedhee gane. Karra dallaatiinis gad ba'e; indaanqoonis ni iyye.

⁶⁹ Xomboreen sun ammas isa argitee warra achi dhadhaabataniin, “Namichi kun jara keessaa tokkoo dha” jette. ⁷⁰ Inni garuu ammas ni gane.

Yeroo xinnoo booddee immoo warri achi dhadhaabachaa turan Phexrosiin, “Atis nama Galiilaa waan taateef dhuguma iyyuu jara keessaa tokkoo dha!” jedhaniin.

⁷¹ Innis, “Ani namicha isin waa'ee isaa dubbattan kana hin beeku” jedhee of abaaruu fi kakachuu jalqabe.

⁷² Yommusuma indaanqoon lammata iyye. Phexrosis dubbii Yesuus, **“Utuu indaanqoon yeroo lama hin iyyin, ati yeroo sadii na ganta”** isaan jedhee ture sana yaadatee boo'e.

15

Yesuus Fuula Phiilaaxoos Duratti

15:2-15 kwf – Mat 27:11-26; Luq 23:2,3,18-25; Yoh 18:29-19:16

¹ Ganama barii luboonni hangafoonni, maanguddoota, barsiistota seeraatii fi guutummaa yaa'ii Yihuudootaa wajjin mari'atanii Yesuusin hidhanii, geessanii Phiilaaxoositti dabarsanii kennan.

² Phiilaaxoosis, “Ati mootii Yihuudootaatii?” jedhee isa gaafate.

Yesuus immoo, **“Atuu jette kaa!”** jedhee deebise.

³ Luboonni hangafoonni waan baay’eedhaan isa himatan. ⁴ Phiilaaxoos amma illee, “Ati deebii hin kennituu? Isaan waan meeqaan akka si himatan mee ilaali” jedhee isa gaafate.

⁵ Yesuus garuu amma illee deebii tokko iyyuu hin kennine; Phiilaaxoosis ni dinqisiifate.

⁶ Innis nama hidhame kan sabni gaafate tokko Guyyaa Ayyaanaa hunda gad dhiisa ture. ⁷ Namichi Barabbaas jedhamu tokko finciltoota goolii kaasanii nama ajjeesan wajjin mana hidhaa keessa ture. ⁸ Ummanni sunis Phiilaaxoos bira dhaqee akka inni waan duraan gochaafii ture sana isaanii godhu isa kadhate.

⁹ Phiilaaxoos garuu, “Akka ani mootii Yihuudootaa gad isinii dhiisu barbaadduu?” jedhee gaafate; ¹⁰ inni akka luboonni hangafoonni hinaaffaadhaan Yesuusni dabarsanii isatti kennan ni beeka tureetii. ¹¹ Luboonni hangafoonni garuu akka Phiilaaxoos qooda Yesuus Barabbaasin gad dhiisu akka isa kadhataaniif namoota kakaasan.

¹² Phiilaaxoosis, “Yoos namicha isin mootii Yihuudootaa jettaniin kana maal godhu ree?” jedhee amma illee isaan gaafate.

¹³ Isaan amma illee, “Isa fannisi!” jedhanii iyyan.

¹⁴ Phiilaaxoos immoo, “Maaliif? Inni yakka maalii hojjete?” jedhee gaafate.

Isaan garuu ittuma caalchisanii, “Isa fannisi!” jedhanii iyyan.

¹⁵ Kanaafuu Phiilaaxoos namoota gammachiisuuf jedhee Barabbaasin gad isaaniif dhiise. Yesuusni garuu garafsiisee akka inni fannifamuuf dabarsee kenne.

Loltoonni Yesuusitti Qoosuu Isaanii

15:16-20 kwf – Mat 27:27-31

¹⁶ Ergasii loltoonni Yesuusni mana bulchaatti, jechuunis *Piraayitooriyoonitti* ol galchan; raayyaa loltootaa hundas walitti waaman. ¹⁷ Uffata dhiilgee* itti uffisan; gonfoo qoraattiis micciiranii dha’anii isa irra kaa’an. ¹⁸ Isaanis, “Akkam ree, yaa mootii Yihuudootaa!” jedhanii nagaa isa gaafachuu jalqaban. ¹⁹ Uleedhaanis mataa isaa rukutan; isattis tufan. Jilbeenfataniis sagadaniif. ²⁰ Erga itti qoosanii booddee uffata diimaa dhiilgee sana irraa baasanii wayyaa isaa deebisanii isatti uffisan. Fannisuufis isa fudhanii deeman.

Yesuus Fannifamuu Isaa

15:22-32 kwf – Mat 27:33-44; Luq 23:33-43; Yoh 19:17-24

²¹ Isaanis namicha Qareena[†] kan Simoon jedhamu tokko utuu inni baadiyyaadhaa dhufee achiin darbaa jiruu arganii akka inni fannoo Yesuus baatuuf isa dirqisiisan. Namichi kunis abbaa Iskindiroosii fi Ruufoosii ti. ²² Isaanis iddoo Golgootaa jedhamutti Yesuusni geessan; Golgootaa jechuun “Iddoo buqqee mataa” jechuu dha. ²³ Jarris akka inni daadhii wayiin kan qumbiin walitti makame dhuguuf kennaniif; inni garuu fudhachuu dide. ²⁴ Isaanis isa fannisan. Uffata isaas gargar qoodatanii tokkoon tokkoon namaa maal akka argatu murteessuuf ixaa buufatan.

²⁵ Yeroon isaan itti isa fannisanis ganama sa’aatii sadii ture. ²⁶ Katabbiin waan inni ittiin himatamee kan,

Mooticha Yihuudootaa,

jedhu mataa isaatiin ol ture.

²⁷ Hattoota lamas, isa tokko mirga isaatiin, kaan immoo bitaa isaatiin isa wajjin fannisan. [²⁸ Kanaanis dubbiiin kitaabni, “Inni akka seera cabsitootaatti lakkaa’ame” jedhu sun ni raawwatame.][‡] ²⁹ Warri achiin darbanis isa arrabsan; mataa isaaniis raasanii, “Muu! Ati kan mana qulqullummaa diigdee guyyaa sadiitti ijaartu, ³⁰ mee fannoo irraa gad bu’iitii of oolchi!” jedhan. ³¹ Akkasumas luboonni hangafoonni fi barsiistonna seeraa wajjin itti qoosan. Akkanas jedhan; “Inni warra kaan oolcheera; ofii isaa garuu oolchuu hin danda’u!” ³² Akka nu arginee amannuuf Kiristoos mootichi Israa’el kun mee amma fannoo irraa gad haa bu’u.” Warri isa wajjin fannifamanis isa arrabsan.

Yesuus Du’uu Isaa

15:33-41 kwf – Mat 27:45-56; Luq 23:44-49

³³ Sa’aatii ja’aa jalqabee, hamma sa’aatii sagaliitti dukkanni lafa hunda irra bu’e.

³⁴ Sa’aatii sagalittis Yesuus sagalee guddaadhaan, **“Eloohē! Eloohē!”[§] Laamaa**

* **15:17** 15:17 Uffata loltoota Roomaa kan wayyaa kaan irratti uffatamu. † **15:21** 15:21 Qareenaan magaalaa Giriik kan qarqara kaaba Afrikaa naannoo har’a Liibiyaa jedhamutti argamuu dha. ‡ **15:28** 15:28 Waraabbileen tokko tokko luqqisaa 28 hin qaban. § **15:34** 15:34 Waraabbileen tokko tokko Eelii, Eelii jedhu.

Sabaqtaanii? jedhee iyye. Hiikkaan isaas, **“Yaa Waaqa ko! Yaa Waaqa ko! Ati maaliif na dhiifte?”*** jechuu dha.

³⁵ Warra achi dhadhaabatan keessaa tokko tokko yommuu waan kana dhaga’anitti, “Ilaa, inni Eeliyaasin waamaa” jedhan.

³⁶ Namichi tokkos fiigee, ispoonjii dhangaggaa’aadhaan guutee, uleetti kaa’ee; akka inni dhuguufis Yesuusiif kennee, “Mee isa dhiisaa. Akka Eeliyaas dhufee gad isa buusu arginaatii” jedhe.

³⁷ Yesuusis sagalee guddaadhaan iyyee hafuura dhumaa baafate.

³⁸ Golgaan mana qulqullummaas olii hamma gadiitti iddoo lamatti tarsa’ee. ³⁹ Ajajaan dhibbaa kan fuula Yesuus dura dhaabachaa tures yommuu iyyuu Yesuus dhaga’ee akka inni itti hafuura dhumaa baafate argetti, “Dhugumaanuu namichi kun Ilma Waaqaa ture!” jedhe.

⁴⁰ Dubartoonni tokko tokkos fagoodhaa ilaalaa turan. Isaan keessaa Maariyaam ishee Magdala, Maariyaam haadha Yaaqoob isa quxisuutii fi Yosaa akkasumas Saloomee turan. ⁴¹ Isaanis yeroo inni Galiilaa turetti isa duukaa bu’anii isa tajaajilaa turan. Dubartoonni isa wajjin Yerusaleemitti ol ba’an baay’een kaanis achi turan.

Yesuus Awwaalamuu Isaa

15:42-47 kwf - Mat 27:57-61; Luq 23:50-56; Yoh 19:38-42

⁴² Guyyaan sun Guyyaa Qophii jechuunis guyyaa Sanbataan duraa ture. Yommuu galgala’ettis, ⁴³ Yoosif namni Armaatiyaa, miseensi yaa’ii beekamaan kan mataan isaa mootummaa Waaqaa eeggachaa ture tokko ija jabinaan gara Phiilaaxoos dhaqee reeffa Yesuus kadhate. ⁴⁴ Phiilaaxoosis yommuu akka inni du’ee dhaga’etti ni dinqifate. Ajajaa dhibbaa sanas ofitti waamee Yesuus erga du’ee turuu fi turuu baachuu isaa gaafate. ⁴⁵ Akka inni du’ees ajajaa dhibbaa sana irraa erga mirkaneeffatee booddee reeffa sana Yoosifiif kenne. ⁴⁶ Yoosifis huccuu quncee talbaa irraa hojjetame bitee, reeffa sana gad buusee, huccuu sanaan kafanee awwaala garaa kattaa keessatti qotate keessa kaa’ee. Dhagaa tokkos balbala awwaala sanaatti gangalchee cufe. ⁴⁷ Maariyaam isheen Magdalaatii fi Maariyaam haati Yosaa lafa inni kaa’ame ni argan.

16

Yesuus Du’aa Ka’uu Isaa

16:1-8 kwf - Mat 28:1-8; Luq 24:1-10

¹ Erga Sanbanni darbee booddee Maariyaam isheen Magdala, Maariyaam haati Yaaqoobii fi Saloomeen dhaqanii reeffa Yesuus dibuuf jedhanii urgooftuu bitan. ² Isaanis guyyaa jalqaba torbaan sanaa ganama barii, akkuma biiftuun baateen gara awwaalaa dhaqan; ³ isaanis, “Eenyutu balbala awwaalaa irraa dhagaa sana nuu gangalcha?” waliin jedhan.

⁴ Yommuu mil’atanii ilaalanitti garuu akka dhagaan baay’ee guddaan sun afaan awwaalaa irraa gangalfame argan. ⁵ Isaanis awwaala keessa seenanii dargaggeessa uffata adii uffate tokko karaa mirgaatiin taa’ee arganii rifatan.

⁶ Innis akkana isaaniin jedhe; “Hin rifatinaa! Isin Yesuus Nama Naazreeti isa fannifamee ture barbaaddu. Inni ka’eera! As hin jiru. Mee iddoo isaan isa kaa’anii turan ilaalaa. ⁷ Garuu dhaqaatii barattoota isaatii fi Phexrositti, ‘Inni isin dursee Galiilaa ni dhaqa. Akkuma isinitti hime sanas achitti isa ni argitu’ jedhaatii himaa.”

⁸ Dubartoonni sunis hollachaa fi dinqisiifachaa gad ba’anii awwaalicha biraa baqatan. Sababii sodaataniifis nama tokkotti illee homaa hin himne.

[⁹ Yesuusis barii guyyaa jalqaba torban sanaa yeroo du’aa ka’etti duraan dursee Maariyaam ishee Magdalaatii mul’ate; Maariyaam kunis kan inni hafuurota hamoo torba ishee keessaa baasee turee dha. ¹⁰ Isheen dhaqxee utuu warri isa wajjin turan wawwaachuu fi boo’uutti jiranuu isaanitti himte. ¹¹ Isaan garuu yommuu akka Yesuus jiraataa ta’ee fi akka isheen isa argite dhaga’anitti waan sana hin amanne.

¹² Ergasiis isaan keessaa utuu namoonni lama baadiyyaa dhaqaa jiranuu Yesuus bifa biraatiin isaanitti mul’ate. ¹³ Jarris deebi’anii warra hafanitti himan; isaan garuu warra kanas hin amanne.

¹⁴ Ergasiis Yesuus utuu isaan maaddiitti dhi’aatanii jiranuu warra Kudha Tokkotti mul’ate; innis sababii isaan warra erga inni du’aa ka’ee isa argan sana amanuu didaniif, amantii dhabuu isaaniitii fi mata jabina isaaniitiif isaan ifate.

¹⁵ Innis akkana isaaniin jedhe; **“Gara addunyaa hundaa dhaqaa; uumama hundumattis wangeela lallabaa.** ¹⁶ **Namni amanuu fi cuuphamu kam iyyuu ni**

* 15:34 15:34 Far 22:1

fayya; nama hin amannetti garuu ni murama. ¹⁷ Mallattoon kunis warra amanan irraa mul'ata; isaan maqaa kootiin hafuurota hamoo baasu; afaan haaraadhaan dubbatu; ¹⁸ harka isaaniitiin bofa ni qabu; yoo summii nama ajjeesu dhugan isaan hin miidhu; harka isaanii namoota dhukkubsatan irra ni kaa'u; namoonnis ni fayyu."

¹⁹ Yesuus Gooftaan erga isaanitti dubbatee booddee samiitti ol fudhatamee gara mirga Waaqaatiin taa'e. ²⁰ Barattoonnis achii ba'anii iddoo hundatti lallaban; Gooftaanis isaan wajjin hojjechaa ture; dubbii isaas dinqiiwwan hojjetamaniin ni mirkaneessa ture.]*

* **16:20** 16:9-20 Waraabbileen durii tokko tokko kutaa luqqisaa 9 fi 20 gidduu jiru hin qaban.

Wangeela Luqaas

Seensa

1:1-4 kwi – Hoj 1:1

¹ Namoonni baay'een seenaa wantoota nu gidduutti raawwatame sanaa barreessuu yaalaniiru; ² kunis akka warri jalqabaa kaasanii ijaan arganii fi tajaajiltoota dubbichaa turan sun nutti dabarsanii kennanitti. ³ Kanaafuu yaa Tewofilos kabajamaa, anis jalqabumaa kaasee waan hundumaa sirriitti ergan qoradhee booddee seenaa sana wal duraa duubaan siif barreessuun waan gaarii natti fakkaateera. ⁴ Kunis akka wannii ati baratte sun dhugaa ta'e akka beekuuf.

Dhalachuu Yohannis Cuuphaa

⁵ Bara Heroodis mootii Yihuudaa turetti ramaddii lubummaa Abiyaa keessaa luba Zakkaariyaas jedhamu tokkodu ture; niitiin isaa Elsaabeexis sanyii Aroon. ⁶ Lamaan isaanii iyyuu ajajaa fi seera Gooftaa hunda mudaa malee eeguudhaan fuula Waaqaa duratti qajeeltota turan. ⁷ Garuu Elsaabeex waan dhabduu turteef ijoollee hin qaban ture; lamaan isaanii iyyuu dulloomanii turan.

⁸ Zakkaariyaasis dabareen garee isaa geenyaan utuu fuula Waaqaa duratti tajaajila lubummaa isaa kennaa jiruu, ⁹ akkuma duudhaa lubummaatti akka mana qulqullummaa Gooftaa seenee ixaana aarsuuf ixaadhaan filatame. ¹⁰ Yeroo ixaanni aarfamuttis* namoonni baay'een alatti kadhachaa turan.

¹¹ Ergamaan Gooftaas iddoo aarsaa ixaanaatiin mirga dhaabatee Zakkaariyaasitti mul'ate. ¹² Zakkaariyaasis yommuu isa argetti ni rifate; sodaanis isa qabate. ¹³ Ergamaan sun garuu akkana isaan jedhe; "Yaa Zakkaariyaas, hin sodaatin; kadhannaan kee dhaga'ameera. Niitiin kee Elsaabeex ilma siif deessi; atis maqaa isaa Yohannis jedhii moggaasi. ¹⁴ Ati ilillee fi gammachuu ni qabaatta; namoonni baay'eenis dhalachuu isaatti ni gammadu; ¹⁵ inni fuula Gooftaa duratti guddaa ta'aatii. Daadhii wayinii yookaan dhugaatii nama macheessu gonkumaa dhuguu hin qabu;† utuma garaa haadha isaa keessa jiruu Hafuura Qulqulluudhaan ni guutama. ¹⁶ Saba Israa'el keessaas namoota baay'ee gara Gooftaa, gara Waaqa isaanitti ni deebisa. ¹⁷ Innis saba Gooftaaf qophaa'e tokko kurfeessuuf jedhee garaa abbootii gara ijoollee isaanitti, warra hin ajajamne immoo gara ogummaa qajeeltotaatti deebisuuf hafuuraa fi humna Eeliyaasiin fuula Gooftaa dura ni deema."

¹⁸ Zakkaariyaasis, "Ani akkamittin kana beeka? Ani dulloomeera; umuriin niitii kootiis deemee jira" jedhee ergamaa sana gaafate.

¹⁹ Ergamaan sunis akkana jedhee deebiseef; "Ani Gabri'eel isa fuula Waaqaa dura dhaabatuu dha; anis sitti dubbachuu fi oduu gammachiisaa kana sitti himuuf ergameera. ²⁰ Kunoo, ati sababii dubbii koo isa yeroo isaatti mirkanaa'u hin amaniniif hamma gaafa wannii kun ta'utti ni duudda; dubbachuus hin dandeessu."

²¹ Uummannis yeroo sana sababii Zakkaariyaas yeroo akkas dheeratu mana qulqullummaa keessa tureef dinqifachaa isa eegaa ture. ²² Garuu Zakkaariyaas yommuu gad ba'etti waan isaanitti dubbachuu hin danda'iiniif isaan akka inni mana qulqullummaa keessatti mul'ata wayii arge hubatan; innis mallattoon isaanitti himaa ture malee dubbachuu hin dandeenye.

²³ Innis yommuu yeroon tajaajila isaa raawwatetti gara mana isaatti deebi'e. ²⁴ Ergasii niitiin isaa Elsaabeex ulfooftee hamma ji'a shaniitti manaa hin baane. ²⁵ Isheenis, "Gooftaan salphina namoota gidduutti narra ture narraa kaasuuf jedhee guyyaa arjumaan na yaadatetti waan kana naa godhe" jette.

Dhalachuu Yesuus

²⁶ Ji'a ja'affaattis Gabri'eel Ergamichi Waaqa biraa gara magaalaa Naazreeti ishee Galiilaa keessatti argamtuutti ergame; ²⁷ innis gara durba namichi sanyii Daawit irraa dhalate kan maqaan isaa Yoosef jedhamu tokkoof kaadhimamtee‡ dhufe. Maqaan durba

* **1:10** 1:10 Yeroo itti aarsaan galgalaa dhi'eeffamuu dha. Yeroon isaas guyyaa keessaa gara sa'aatii sagalii ti. † **1:15** 1:15 Kun dirqama addaa kan namni kakuu Naazirummaa of irraa qabu tokko guutuu qabuu dha. ‡ **1:27** 1:27 Kaadhima qabaachuun akka bartee Yihuudootaatti akkuma nama wal fuudheetti cimaa dha. Intalli kaadhimamte tokko nama biraa wajjin ciisuun garuu akkuma ejaatti ilaalama. Walii galtee kaadhimaa diiguunis niitii ofii yookaan dhirsaa ofii hiikuu wajjin tokkuma.

qulqullittii sanaas Maariyaam ture. ²⁸ Ergamaan Waaqaa sunis gara ishee dhaqee, “Yaa ishee surraa argatte; nagaan siif haa ta’u! Gooftaan si wajjin jira” jedhe.

²⁹ Maariyaam garuu dubbii ergamaa sanaatiin akka malee jeeqamtee, “Kun nagaa akkamiitii?” jettee yaadde. ³⁰ Ergamichi garuu akkana isheedhaan jedhe; “Yaa Maariyaam, hin sodaatin; ati Waaqa biraa surraa argatteertaatii. ³¹ Kunoo ni ulfoofta; Ilmas ni deessa; maqaa isaas Yesuus jettee moggaafa. ³² Innis guddaa ni ta’a; Ilma Waaqa Waan Hundaa Ollii jedhamees ni waamama. Waaqni Gooftaanis teessoo Abbaa isaa Daawit ni kennaaf; ³³ inni mana Yaaqoob irratti bara baraan ni mo’a; mootummaan isaas dhuma hin qabu.”

³⁴ Maariyaamis, “Ani durba; yoos wanni kun akkamitti ta’uu danda’a ree?” jettee ergamaa sana gaafatte.

³⁵ Ergamaan sunis akkana jedhee deebiseef; “Hafuurri Qulqulluun sirra bu’a; humni Waaqa Waan Hundaa Ollis si golbooba. Kanaaf inni qulqulluun dhalatu sun Ilma Waaqaa ni jedhama. ³⁶ Kunoo, firri kee Elsaabeexi iyyuu dulluma ishee keessa ilma ulfoofteerti; isheen dhabduu jedhamaa turte sun ji’a ja’affaa qabatteerti. ³⁷ Wanni Waaqaaf hin danda’amne hin jiruutii.”

³⁸ Maariyaamis, “Kunoo, ani garbittii Gooftaa ti. Akkuma ati dubbatte naaf haa ta’u” jetteen. Ergamichis ishee dhiisee deeme.

Maariyaam Elsaabeexin Dubbisuu Dhaqxe

³⁹ Yeroo sana Maariyaam kaatee ariitiidhaan gara magaalaa baddaa biyya Yihuudaa tokkoo dhaqxe. ⁴⁰ Isheenis mana Zakkaariyaas seentee Elsaabeexin nagaa gaafatte. ⁴¹ Elsaabeexis yommuu nagaa Maariyaam dhageessetti mucaan sun gadameessa ishee keessa u’utaale. Elsaabeexis Hafuura Qulqulluudhaan ni guutamte. ⁴² Isheenis sagalee ishee ol fudhattee iyyitee akkana jette; “Ati dubartoota keessaa eebbifamtuu dha; mucaan ati deessus eebbifamaa dha. ⁴³ Garuu akka haati Gooftaa koo gara koo dhufuuf arjummaan akkanaa akkamitti naa godhame? ⁴⁴ Kunoo, akkuma sagaleen nagaa keetii gurra koo seeneen ulfi gadameessa koo keessa jiru gammachuun utaaleera. ⁴⁵ Wanni Gooftaan isheetti dubbate akka raawwatamu kan amante isheen eebbifamtuu dha!”

Faarfannaa Maariyaam

⁴⁶ Maariyaamis akkana jette:

“Lubbuun koo Gooftaadhaaf ulfina kenniti;

⁴⁷ hafuurri koos fayyisaa koo Waaqatti ni gammada;

⁴⁸ inni salphina garbittii isaa argeeraatii.

Kunoo ammaa jalqabee dhaloonni hundinuu eebbifamtuu naan jedha;

⁴⁹ Inni humna qabeessi sun

waan guddaa naa godheeraatii;

maqaa isaa qulqulluu dha.

⁵⁰ Araarri isaas warra isa sodaataniif

dhalootaa hamma dhalootaatti itti fufa.

⁵¹ Inni irree isaatiin hojiiwwan gurguddaa hojjeteera;

of tuultotas yaada garaa isaaniitiin bittinnesseera.

⁵² Bulchitoota teessoo isaaniirraa buuseera;

gad of qabeeyyii garuu ol kaaseera.

⁵³ Warra beela’an waan gaariidhaan quufseera;

sooreyyii garuu harka duwwaa deebiseera.

⁵⁴ Inni araara qabeessa ta’uu isaa

yaadachaa garbicha isaa Israa’elin gargaareera;

⁵⁵ kunis akkuma inni abbootii keenyaaf,

Abrahaamii fi sanyii isaatiif bara baraan waadaa galetti.”

⁵⁶ Maariyaamis gara ji’a sadii Elsaabeexi bira turtee gara mana ofii isheetti deebite.

Dhalachuu Yohannis Cuuphaa

⁵⁷ Elsaabeexi yeroon da’umsa ishee geenyaan ilma deesse. ⁵⁸ Ollooni isheetii fi firooni ishee akka Gooftaan araara guddaa isheef godhe dhaga’anii ishee wajjin gammadan.

⁵⁹ Isaanis guyyaa saddeettafaatti daa’ima sana dhagna qabuu dhufan; Zakkaariyaas jedhaniis maqaa abbaa isaatiin isa moggaasuu fedhan. ⁶⁰ Haati isaa garuu, “Lakkii! Inni Yohannis jedhamee waamamuu qaba” jette.

⁶¹ Isaanis, “Firoota kee keessa namni maqaa akkanaa qabu tokko iyyuu hin jiru” jedhaniin.

⁶² Namoonni sunis akka Zakkaariyaas eenyu jedhee daa'ima sana waamuu barbaadu beekuuf jedhanii mallattoon isa gaafatan. ⁶³ Innis gabatee irratti barreesu kadhatee, "Maqaan isaa Yohannis" jedhee barreesse; hundi isaaniis ni dinqifatan. ⁶⁴ Yommusuma afaan isaa banamee arrabni isaa hiikame; innis Waaqa galateeffachuudhaan dubbachuu jalqabe. ⁶⁵ Ollooni isaanii hundinuu sodaadhaan guutaman; wanni kunis baddaa biyya Yihuudaa hunda keessatti odeeffame. ⁶⁶ Warri kana dhaga'an hundinuus, "Yoos daa'imni kun nama akkamii ta'inna laata?" jedhanii garaa isaaniitti dinqifatan. Harki Gooftaa isa wajjin tureetii.

Faarfannaa Zakkaariyaas

⁶⁷ Zakkaariyaas abbaan Yohannis Hafuura Qulqulluudhaan guutamee akkana jedhees raajii dubbate:

⁶⁸ "Sababii dhufee saba isaa fureef Gooftaan,

Waaqni Israa'el haa eebbifamu.

⁶⁹ Inni mana garbicha isaa mana Daawit keessatti

gaanfa fayyinaa nuuf kaaseera;

⁷⁰ akkuma afaan raajota isaa qulqulloota duriitiin dubbatetti

⁷¹ diinota keenya jalaa,

harka warra nu jibban hundumaa keessaas nu baasuuf jedhee

⁷² araara abbootii keenyaaf waadaa gale sana raawwachuudhaaf,

kakuu isaa qulqulluu,

⁷³ inni abbaa keenya Abrahaamiif kakate yaadachuudhaaf,

⁷⁴ harka diinota keenyaa keessaa nu baasuudhaaf,

akka nu sodaa malee isa tajaajillu nu dandeessisuudhaaf,

⁷⁵ akka nu bara jireenya keenyaa guutuu qulqullinaa fi qajeelinaa,

fuula isaa duratti tajaajilluuf waan kana godhe.

⁷⁶ "Yaa mucaa ko, ati raajii Waaqa Waan Hundaa Ollii ni jedhamta;

ati karaa isaa gopheessuuf fuula Gooftaa dura ni deemtaatii;

⁷⁷ kunis akka ati dhiifama cubbuu argachuu isaaniitiin beekumsa fayyinaa

saba isaatiif kennituuf;

⁷⁸ sababii araara Waaqa keenyaa kan gara laafinaan guutame

kan bariin fayyinaa samii irraa ittiin nuu bari'uu,

⁷⁹ warra dukkana keessa,

gaaddidduu du'aa jala jiraniif akka ifa kennuuf;

miilla keenyas karaa nagaa irra deemsisuuf."

⁸⁰ Mucichis guddatee hafuuraan jabaachaa deeme; hamma guyyaa saba Israa'elitti mul'ateettis gammoojjii keessa jiraate.

2

Dhalachuu Yesuus

¹ Bara sana keessa akka addunyaan Roomaa hundi galmeeffamuuf Awugisxoos Qeesaar biraa labsiin ba'e. ² Lakkooobi sabaa kunis bara Qereenewoos bulchaa biyya Sooriyaa turetti yeroo jalqabaatiif taasifame. ³ Namni hundinuu galmeeffamuuf gara magaalaa itti dhalatee dhaqe.

⁴ Yoosefis manaa fi sanyii Daawit keessaa waan dhalateef magaalaa Naazreeti ishee Galiilaa keessaatii ka'ee gara magaalaa Daawit ishee Yihuudaa keessaa kan Beetlihem jedhamtuutti ol ba'e. ⁵ Innis kaadhima isaa Maariyaam ishee ulfa turte sana wajjin galmeeffamuu dhaqe. ⁶ Utuma isaan achi jiranuus yeroon da'umsa ishee ga'e. ⁷ Isheenis ilma ishee isa hangafa deesse. Waan mana bultii keessummootaa keessa iddoon hin jiraatiniif huccuudhaan martee bidiruu keessa isa ciibsite.

Tiksootaa fi Ergamoota Waaqaa

⁸ Tiksoota halkan halkan ala bulanii bushaayee isaanii tikfatanitu biyya sana ture. ⁹ Ergamaan Gooftaa isaanitti mul'ate; ulfinni Gooftaas naannoo isaaniitti ibse; isaanis akka malee sodaatan. ¹⁰ Ergamaan sun garuu akkana isaaniin jedhe; "Hin sodaatinaa. Kunoo, ani oduu gaarii baay'ee nama gammachiisu kan saba hundumaaf ta'u isinii fideeraatii. ¹¹ Har'a magaalaa Daawit keessatti fayyisaan isiniif dhalateera; innis Kiristoos Goofticha. ¹² Kunis mallattoo isiniif ta'a: Daa'ima huccuudhaan maramee bidiruu keessa ciisu tokko ni argitu."

¹³ Ergamaa sana wajjinis raayyaan samii irraa baay'een akkuma tasaa mul'atanii Waaqa galateeffachaa akkana jedhan;

¹⁴ "Samii gubbaatti ulfinni Waaqaaf,

lafa irrattis nagaan namoota inni itti gammaduuf haa ta'u."

¹⁵ Erga Ergamoonni tiksoota dhiisanii gara samiitti ol ba'anii booddee tiksoonni sun, "Kottaa Beetlihemin dhaqnee waan ta'e kan Gooftaan nutti hime kana ilaalaa" waliin jedhan.

¹⁶ Isaanis dafanii dhaqanii Maariyaamii fi Yoosefin, daa'ima bidiruu keessa ciisus argan. ¹⁷ Yommuu isa arganitti waan waa'ee mucichaa isaanitti himame sana odeessan; ¹⁸ warri waan kana dhaga'an hundinuu waan tiksoonni isaanitti himan sana ni dinqifatan. ¹⁹ Maariyaam garuu waan kana hunda garaatti qabattee itti yaadaa turte. ²⁰ Tiksoonnis sababii waan dhaga'anii fi arganiitiif Waaqaaf ulfina kennaa, isa jajachaas deebi'an; wanni hundinuu akkuma isaanitti himame sana tureetii.

Yesuus Mana Qulqullummaatti Dhi'eeffame

²¹ Innis guyyaa saddeettaffaatti, akkuma yeroon dhagna qabaa isaa ga'een maqaa utuu haati isaa iyyuu isa hin ulfaa'iniin dura ergamaan Waaqaa isaaf baaseen Yesuus jedhamee moggaafame.

²² Akka Seera Museetti yeroon qulqullaa'ummaa isaanii geenyaan Yoosefi fi Maariyaam daa'ima sana Gooftaa duratti dhi'eessuuf jedhanii isa fudhatanii Yerusaalementi ol ba'an. ²³ Akkuma Seera Gooftaa keessatti barreeffametti, "Dhiirri hangafni hundinuu gooftaaf ni qulqulleeffama."* ²⁴ Isaanis akkuma Seerri Gooftaa jedhutti, "Gugee lama yookaan gugee sosookkee lama"† aarsaa dhi'eessuu dhaqan.

²⁵ Kunoo, namichi qajeelaan Waaqa sodaatu kan maqaan isaa Simi'oon jedhamu tokko Yerusaalementi keessa ture. Innis jajjabeeffama Israa'el eeggachaa ture; Hafuurri Qulqulluunis isa irra ture. ²⁶ Hafuurri Qulqulluunis akka inni utuu Kiristoos Goofticha hin argin hin duune isatti mul'isee ture. ²⁷ Innis Hafuuraan qajeelfamee mana qulqullummaa seene. Abbaa fi haati Yesuus yommuu akka duudhaa seerichaatti waan barbaachisu isaaf guutuuf jedhanii Yesuus mucicha baadhatanii ol seenanitti, ²⁸ Simi'oon fuudhee isa hammatee akkana jedhee Waaqa galateeffate:

²⁹ "Yaa Gooftaa, akkuma dubbii keetiitti, ati garbicha kee amma nagaan geggeessis.

³⁰ Iji koo fayyina kee isa ati

³¹ saba hundumaa duratti qopheessite argeera;

³² innis mul'ata Namoota Ormaatiif ifa;

saba kee Israa'eliif immoo ulfina."

³³ Abbaa fi haati isaas waan waa'ee isaa dubbatame sana ni dinqifatan. ³⁴ Simi'oonis isaan eebbise; haadha daa'ima sanaa Maariyaamiinis akkana jedhe; "Daa'imni kun Israa'el keessatti kufaatiidhaa fi ka'umsa namoota baay'eeitiif sababii, mormii isa irratti dubbatamuufis mallattoo akka ta'u murteeffameera; ³⁵ kunis akka yaadni garaa namoota baay'ee ifatti ba'uuf. Goraadeen lubbuu kee ni waraana."

³⁶ Gosa Aasheer keessaas raajittii Haannaa jedhamtu tokkotu ture. Isheenis intala Faanu'el turte; baay'ees jaarree turte; dhirsaa ishee kan durbummaadhaan itti heerumte wajjin waggaa torba jiraatte; ³⁷ isheenis hamma umuriin ishee waggaa 84 guuteetti haadha hiyyeessaa taatee jiraatte. Utuu mana qulqullummaatii hin dhabaminis soomaa fi kadhannaadhaan halkanii guyyaa waaqeffachaa turte. ³⁸ Yeruma sanas isaanitti dhi'aattee Waaqaaf galata galchite; warra furama Yerusaalementi eeggachaa turan hundattis waa'ee daa'ima sanaa odeessite.

³⁹ Yoosefi fi Maariyaamis waan seerri Gooftaa ajaju hunda raawwatanii gara Galiilaatti gara magaalaa isaanii Naazreetitti deebi'an. ⁴⁰ Mucichis guddatee jabaachaa deeme; ogummaadhaanis ni guutame; ayyaanni Waaqaas isa irra ture.

Yesuus Mucichi Mana Qulqullummaa Keessatti

⁴¹ Abbaa fi haati isaa waggama waggaan Ayyaana Faasiikaatiif jedhanii Yerusaalementi dhaqaa turan. ⁴² Yommuu umuriin mucaa sanaa waggaa kudha lama‡ guutettis akkuma sirna Ayyaanichaatti Yerusaalementi ol ba'an. ⁴³ Erga ayyaanichi raawwatee booddee utuu abbaa fi haati isaa gara mana isaaniitti deebi'aa jiranuu, Yesuus mucichi Yerusaalementi isaan biraa hafe; isaan garuu waan kana hin hubanne. ⁴⁴ Isaanis waan

* **2:23** 2:23 Bau 13:2,12 † **2:24** 2:24 Lew 12:8 ‡ **2:42** 2:42 Ijoolleen dhiiraa Yihuudootaa yommuu umuriin isaanii waggaa kudha sadii guututti itti gaafatama ofii isaanii fudhatu. Ta'us yeroo sanaan dura utuu gargaarsa haadhaatii fi abbaa hin barbaadin ajajawwan tokko tokko eeguu qabu. Ajajawwan kanneen keessaas tokko waggaa waggaa Yerusaalementi dhaqanii waaqeffachuu dha.

inni miiltoota isaanii wajjin jiru se'anii guyyaa tokko deeman. Ergasiis firoota isaanitiifi fi michoota isaanii keessa isa barbaaduu jalqaban. ⁴⁵ Yommuu isa dhabanittis, isa barbaaduuf Yerusaalemitti deebi'an. ⁴⁶ Guyyaa sadii booddee utuu inni barsiistota gidduu taa'ee isaan dhaggeeffatuu, gaaffiis isaan gaafatuu mana qulqullummaa keessatti isa argatan. ⁴⁷ Warri isa dhaga'an hundinuus hubannaa isaatii fi deebii inni kennu ni dirqifatan. ⁴⁸ Abbaa fi haati isaas yommuu isa arganitti ni raajeffatan. Haati isaas, "Gurbaa, maaliif akkana nu goote? Kunoo, anii fi abbaan kee yaaddoo guddaadhaan si barbaadaa turree!" jetteen.

⁴⁹ Innis deebisee, **"Maaliif na barbaaddan? Akka ani mana Abbaa kootti argamuu qabu hin beekne moo?"** isaaniin jedhe. ⁵⁰ Isaan garuu dubbii inni isaanitti dubbate hin hubanne.

⁵¹ Innis isaan wajjin Naazreetitti gad bu'e; isaaniifis ni ajajama ture. Haati isaa garuu waan kana hunda garaatti qabatte. ⁵² Yesuusis ogummaadhaan, hojjaa fi surraadhaan fuula Waaqaatii fi fuula namaa duratti guddachaa deeme.

3

Lallaba Yohannis Cuuphaa

3:2-10 kwf - Mat 3:1-10; Mar 1:3-5

3:16,17 kwf - Mat 3:11,12; Mar 1:7,8

¹ Xibeeriyoos Qeesaar mo'ee waggaa kudha shanaffaatti jechuunis yommuu Phonxoos Phiilaaxoos bulchaa Yihuudaa turetetti, Heroodis bulchaa Galiliilaa ture; obboleessi isaa Fiiliphooos bulchaa Ixuriyaasii fi Xiraakonitiis, Lisaaniyaas immoo bulchaa Abileeniis turan; ² yeroo sana Haannaasii fi Qayyaaffaan luboota ol aantota turan. Dubbiin Waaqaa gammoojjii keessatti gara Yohannis ilma Zakkaariyaas dhufe. ³ Innis dhiifama cubbuttiif cuuphaa qalbii jijjiirranmaa lallabaa biyya naannoo Yordaanos hunda keessa deeme. ⁴ Kunis isa kitaaba dubbii Isaayyaas raajichaa keessatti akkana jedhamee barreeffamee dha:

"Sagalee nama gammoojjii keessaa iyyu tokkoo:

'Karaa Gooftaa qopheessaa;
daandii isaas qajeelchaa.

⁵ Sululli hundi ni guutama;
tulluu fi gaarri hundinuus gad deebifamu.

Karaan jal'aan ni qajeela;
daandiin bu'aa ba'iinis wal qixxeeffama.

⁶ Sanyiin namaa hundinuus fayyisuu Waaqaa ni arga.' ^{6*}

⁷ Yohannis warra harka isaatti cuuphamuuf dhufaniin akkana jedhe; "Isin ijoollee buutii nana! Dheekkamsa dhufu jalaa akka baqattaniif eenyutu isinitti hime? ⁸ Egaa ija qalbii jijjiirranmaa mirkaneessu naqadhaa. Isin, 'Abbaan keenya Abrahaamii dha' ofiin jechuu hin jalqabinaa. Waaqni dhagoota kanneen irraa Abrahaamiif ijoollee kaasuu akka danda'u ani isinittan himaatii. ⁹ Qottoon amma iyyuu hidda mukkeenii irra kaa'ameera; mukti ija gaarii hin naqanne hundinuus muramee ibiddatti darbatama."

¹⁰ Namoonni sunis, "Yoos maal haa goonuu ree?" jedhanii isa gaafatan.

¹¹ Yohannis deebisee, "Namni uffata lama qabu isa homaa hin qabneef haa qoodu; kan nyaata qabus akkasuma haa godhu" jedheen.

¹² Qaraxxoonni cuuphamuu dhufanii, "Yaa barsiisaa, nu hoo maal haa goonu?" jedhanii isa gaafatan.

¹³ Innis, "Waan ajajamtan caalaa walitti hin qabinaa" jedheen.

¹⁴ Loltoonnis akkasuma, "Nu immoo maal haa goonu ree?" jedhanii isa gaafatan.

Innis, "Humnaan nama irraa maallaqa hin fudhatinaa; sobaan nama hin himatinaa; mindaan keessan isin haa ga'u" jedheen.

¹⁵ Namoonni sun hawwiidhaan eegaa turan; hundi isaaniis, "Yohannis kun inni Kiristooos' ta'innaa laata?" jedhanii garaa isaaniitti yaadaa turan. ¹⁶ Yohannis akkana jedhee isaan hundaaf deebii kenne; "Ani bishaaniin isin cuupha. Garuu kan na caalaa jabaa ta'e tokko ni dhufa; ani hidhaa kophee isaa illee hiikuun naaf hin malu. Inni Hafuura Qulqulluu fi ibiddaan isin cuupha. ¹⁷ Innis oobdii isaa qulqulleessee gombisaa isaatti qamadii galfachuudhaaf afarsaan isaa harka isaa jira; habaqii garuu ibidda hin dhaamneen guba." ¹⁸ Yohannis dubbii biraa baay'eedhaan namoota gorsee wangeelas isaanitti lallabe.

* 3:6 3:6 Isa 40:3-5 † 3:15 3:15 yookaan Masihiicha

¹⁹ Heroodis bulchaan garuu yommuu sababii inni niitii obboleessa isaa Heroodiyaas fuudhee fi sababii hammina inni hojjetee ture kaan hundaatiif Yohannis isa ifate, ²⁰ hammina isaa hunda irratti dabalee Yohannisin mana hidhaatti galchee itti cufe.

Cuuphamuu Yesuus

3:21,22 kwf - Mat 3:13-17; Mar 1:9-11

3:23-38 kwf - Mat 1:1-17

²¹ Yeroo namoonni hundinuu cuuphamaa turanitti, Yesuus ni cuuphame. Utuu inni kadhachaa jiruu samiin banamee, ²² Hafuurri Qulqulluun bifa gugeetiin mul'atee isa irratti gad bu'e. Sagaleen, "Ati ilma koo isa ani jaalladhuu dha; ani sitti nan gammada" jedhu tokkos samii irraa ni dhufe.

Hidda Dhaloota Isaa

²³ Yesuus yeroo tajaajila isaa jalqabetti umuriin isaa gara waggaa soddomaa ture. Innis akka waan ilma Yoosef tureetti yaadamaa ture:

ilma Eelii, ²⁴ ilma Maataat,
 ilma Lewwii, ilma Melkii,
 ilma Yaanaa, ilma Yoosef,
²⁵ ilma Maataatiyaas, ilma Amoos,
 ilma Naahoom, ilma Asiiliim,
 ilma Naagee, ²⁶ ilma Maa'at,
 ilma Maataatiyaas, ilma Semee'i,
 ilma Yoosef, ilma Yoodaa,
²⁷ ilma Yoonaan, ilma Resaa,
 ilma Zarubaabel, ilma She'altii'eel,
 ilma Neeri, ²⁸ ilma Melkii,
 ilma Hadii, ilma Qoosaam,
 ilma Elmaadaam, ilma Eer,
²⁹ ilma Iyyaasuu, ilma Elii'ezer,
 ilma Yoorim, ilma Maataat,
 ilma Lewwii, ³⁰ ilma Simi'oon,
 ilma Yihuudaa, ilma Yoosef,
 ilma Yoonaan, ilma Eliyaaqem,
³¹ ilma Meeleyaa, ilma Mennaa,
 ilma Maataataa, ilma Naataan,
 ilma Daawit, ³² ilma Isseey,
 ilma Yoobeed, ilma Bo'eez,
 ilma Salmoon, ilma Nahishoon,
³³ ilma Amiinaadaab, ilma Aaraam,
 ilma Hezroon, ilma Faares,
 ilma Yihuudaa, ³⁴ ilma Yaaqoob,
 ilma Yisihaaq, ilma Abrahaam,
 ilma Taaraa, ilma Naahoor,
³⁵ ilma Seruug, ilma Re'uu,
 ilma Feleg, ilma Eeber,
 ilma Saalaa, ³⁶ ilma Qaayinaam
 ilma Arfaaksaad, ilma Seem,
 ilma Nohi, ilma Laamehi,
³⁷ ilma Matuuselaa, ilma Henook,
 ilma Yaared, ilma Mahalaleel,
 ilma Keenaan, ³⁸ ilma Enoos,
 ilma Seeti, ilma Addaam,
 ilma Waaqaa.

4

Yesuus Qoramu Isaa

4:1-13 kwf - Mat 4:1-11; Mar 1:12,13

¹ Yesuus Hafuura Qulqulluudhaan guutamee Yordaanosii ka'ee Hafuuruma sanaan gammoojjii geeffame; ² achittis guyyaa afurtama diyaabiloosiin qorame. Innis guyyoota sana keessa homaa hin nyaanne; dhuma irrattis ni beela'e.

³ Diiyaabiloosis, “Ati yoo Ilma Waaqaa taate, akka dhagaan kun buddeena ta’u ajaji” jedheen.

⁴ Yesuus immoo deebisee, “**‘Namni buddeena qofaan hin jiraatu’*jedhamee barreeffameera**” jedheen.

⁵ Diiyaabiloosis gaara dheeraa tokkotti ol isa baasee hamma liphsoo ijaatti mootum-moota addunyaa hunda isatti argisiise. ⁶ Akkanas jedheen; “Ani taayitaa isaanii fi ulfina isaanii hundumaa siihin kenna; taayitaa fi ulfinni kun waan naa kenneameef ani abbaa kennuufi barbaadeef kennuu nan danda’a. ⁷ Yoo ati naa sagadde, wannani kun hundinuu kan kee ta’a.”

⁸ Yesuus immoo, “**‘Waaqa kee Gooftichaaf sagadi, isuma qofa tajaajili’jedhamee barreeffameera**” jedhee deebiseef.

⁹ Diiyaabiloosis Yersaaleemitti isa geessee, fiixee mana qulqullummaa irra dhaabachiise. Akkanas jedheen; “Ati yoo Ilma Waaqaa taate, asii gad of darbadhu. ¹⁰ Akkana jedhamee barreeffameeraatii:

“Inni akka isaan sirriitti si eeganiif,
ergamoota isaa siif ni ajaja;

¹¹ isaanis akka ati miilla keetiin dhagaatti hin buuneef,
harka isaaniiitiin ol si fuudhu.”[‡]

¹² Yesuus immoo deebisee, “**‘Waaqa kee Goofticha hin qorin’§jedhameera**” jedheen.

¹³ Diiyaabiloos immoo erga qorumsa kana hunda raawwatee booddee hamma yeroo mijaa’aa argatutti isa dhiisee deeme.

Yesuus Naazreetitti Fudhatama Dhabe

¹⁴ Yesuus humna Hafuuraatiin Galiilaatti deebi’e; oduun waa’ee isaas baadiyyaa guutuu keessa faffaca’e. ¹⁵ Inni manneen sagadaa isaanii keessatti barsiisaa ture; namni hundinuu isa jaje.

¹⁶ Innis Naazreeti iddoo itti guddate dhaqe; guyyaa Sanbataas akkuma amala isaa mana sagadaa seene. Kitaaba dubbisuufis ka’ee dhaabate; ¹⁷ kitaabni raajicha Isaayyaas isatti kenname. Innis kitaabicha banee kutaa akkana jedhamee barreeffame argate:

¹⁸ **“Hafuurri Gooftaa narra jira;**

**akka ani hiyyeeyyiitti oduu gaarii lallabuuf,
inni na dibeeraatii.**

Inni akka ani akka warri hidhaman hiikaman,

akka warri jaaman argan,

akka warri cunqurfamanis bilisa ba’an lallabuuf na ergeera;

¹⁹ inni akka ani bara tola Gooftaa labsuufis na ergeera.”*

²⁰ Innis kitaabicha cufee tajaajiltichatti deebisee kennee taa’ee; warri mana sagadaa sana keessa turan hundinuu xiyyeeffatanii isa ilaalaa turan. ²¹ Innis, **“Barreeffamni kun har’a gurra keessanitti raawwatame”** isaaniiin jechuu jalqabe.

²² Hundi isaanii waa’ee isaa waan gaarii dubbachaa turan; dubbii ayyaan qabeessa afaan isaatii ba’us ni dinqisiifatan. Isaanis, “Kun ilma Yoosif mitii?” jedhanii gaafatan.

²³ Yesuusis, **“Akka isin, ‘Yaa abbaa qorichaa, of fayyisi! Waan Qifirnaahomitti hojjechuu kee dhageenye sana as biyya keettis hojjedhu’ jettanii natti mammaaktan ani shakkii hin qabu”** isaaniiin jedhe.

²⁴ Innis itti fufee akkana jedhe; **“Ani dhuguma isinitti nan hima; raajiin tokko iyyuu iddoo itti dhalatetti fudhatama hin qabu. ²⁵ Ani dhuguman isiniin jedha; bara Eeliyaas yeroo samiin waggaa sadii fi walakkaa cufamee beelli hamaan bu’eetti haadhota hiyyeessaa baay’etu Israa’el keessa ture. ²⁶ Ta’us Eeliyaas gara haadha hiyyeessaa magaalaa Saraaphtaa biyya Siidoon keessa jiraattu tokkootti ergame malee haadhota hiyyeessaa sana keessaa gara tokkoo isaanii illee hin ergamne. ²⁷ Bara Elsaai’i raajichaa namoota lamxaa’an hedduutu Israa’el keessa ture; garuu Na’amaan, namicha Sooriyaa tokkicha sana malee warra kaan keessaa namni tokko iyyuu hin qulqulloofne ture.”**

²⁸ Namoonni manicha sagadaa keessa turan hundinuu yommuu waan kana dhaga’anitti akka malee aaran. ²⁹ Isaanis ka’anii magaalaa sana keessaa gad isa baasan; gad isa darbachuuf jedhaniis ededa tulluu magaalaa isaanii irratti ijaaramteetti ol isa baasan. ³⁰ Inni garuu gidduudhuma isaanii ba’ee deeme.

* 4:4 4:4 KeD 8:3 † 4:8 4:8 KeD 6:13 ‡ 4:11 4:11 Far 91:1,12 § 4:12 4:12 KeD 6:16 * 4:19 4:19 Isa 61:1,2

Yesuus Hafuura Xuraa'aa Baasuu Isaa

4:31-37 kwf - Mar 1:21-28

³¹ Innis gara Qifirnaahom, magaalaa Galiilaa keessaatti gad bu'ee; guyyaa Sanbataas namoota barsiise. ³² Isaanis waan dubbiin isaa taayitaa qabuuf barsiisa isaa ni dinqisiifatan.

³³ Namichi hafuura hamaa xuraa'aadhaan qabame tokko mana sagadaa keessa ture. Innis sagalee guddaadhaan iyyee akkana jedhe; ³⁴ "Uffi! Yaa Yesuus nama Naazreeti, ati maal nurraa qabda? Nu balleessuu dhufte moo? Ati eenyu akka taate ani nan beeka, yaa Qulqullicha Waaqaa!"

³⁵ Yesuus immoo, "**Cal'isii isa keessaa ba'i!**" jedhee ifate. Hafuurri hamaan sunis isaan hunda duratti namicha kuffisee utuu hin miidhin isa keessaa ba'ee.

³⁶ Namoonni hundinuu dinqifatanii, "Maal barsiisni akkanaa! Inni taayitaadhaan, humnaan is hafuurota xuraa'oo ni ajaja; isaanis ni ba'u" waliin jedhan. ³⁷ Oduun waa'ee isaas biyya naannoo sanaa guutuu keessa faffaca'ee.

Yesuus Nama Baay'ee Fayyise

4:38-41 kwf - Mat 8:14-17

4:38-43 kwf - Mar 1:29-38

³⁸ Yesuus mana sagadaatii ba'ee mana Simoon dhage. Haati niitii Simoonis dhukkuba dhagna gubaa hamaadhaan qabamtee dhiphachaa turte; isaanis akka Yesuus ishee gargaaru isa kadhahan. ³⁹ Innis isheetti gad jedhee, dhagna gubaa sana ifate; dhagna gubaan sunis ishee dhiise. Isheen is yeruma sana kaatee isaan tajaajiluu jalqabde.

⁴⁰ Namoonnis yeroo aduu lixetti namoota dhukkuba gosa garaa garaa qaban hunda gara Yesuus fidan; innis tokkoo tokkoo isaanii irra harka isaa kaa'ee isaan fayyise.

⁴¹ Akkasumas hafuuronni hamoon iyyanii, "Ati Ilma Waaqaa ti!" jedhanii namoota baay'ee keessaa ba'an. Inni garuu sababii isaan akka inni Kiristoos† ta'e beekaniif isaan ifate; akka isaan dubbatanis hin eeyyamneef.

⁴² Yommuu bari'ettis Yesuus achii ba'ee, iddoo namni hin jirre tokko dhage. Namoonnis isa barbaadaa turan; yommuu gara isaa dhufanittis akka inni isaan dhiisee hin deemneef isa dhowwu yaalan. ⁴³ Inni garuu, "**Ani magaalawwan kaanittis wangeela mootummaa Waaqaa lallabuun qaba; sababiin ani ergameefis kanuma**" jedhe. ⁴⁴ Innis ittuma fufee manneen sagadaa Yihuudaa keessatti lallabaa ture.

5

Waamamuu Barattoota Jalqabaa

5:1-11 kwf - Mat 4:18-22; Mar 1:16-20; Yoh 1:40-42

¹ Gaaf tokko Yesuus utuu Haroo Geensereex bira dhaabatee jiruu, utuu namoonnis isatti naanna'anii dubbii Waaqaa dhaga'aa jiranuu, ² bidiruwwan lama ededa bishaanichaa irratti arge; qurxummii qabdoonni garuu keessaa ba'anii kiyyoo isaanii miicachaa turan. ³ Innis bidiruwwan sana gidduudhaa ishee kan Simoon taate tokko yaabbate; akka inni qarqara lafaa irraa gara gidduu bishaaniitti xinnoo achi butus isa kadhate. Yesuus bidiruu sana irra ta'ee namoota barsiisuu jalqabe.

⁴ Innis yommuu dubbatee fixetti Simooniin, "**Gara tuujuba bishaaniitti achi siqi; qurxummii qabuufis kiyyoo keessan darbadhaa**" jedhe.

⁵ Simoonis deebisee, "Yaa barsiisaa, nu halkan guutuu akka malee itti dadhabnee waa tokko illee hin qabne. Ani garuu waan ati jetteef kiyyoo nan darbadha" jedhe.

⁶ Isaanis kiyyoo isaanii darbatanii hamma kiyyoon isaanii ciccituu jalqabutti qurxummii akka malee baay'ee qabatan. ⁷ Kanaafuu akka michoonni isaanii warri bidiruu kaan keessa turan dhufanii isaan gargaaraniif mallattoon waammatan; isaanis dhufanii bidiruu lachuu qurxummiidhaan guutan; bidiruwwan sunis liqimfamuu jalqaban.

⁸ Simoon Phexrosis yommuu waan kana argetti jilba Yesuusitti kufee, "Yaa Gooftaa, ani nama cubbamaa dha; narraa fagaadhu!" jedhe. ⁹ Kunis sababii qurxummiin baay'een qabame sun Sim'oonii fi warra isa wajjin turan hunda dinqisiiseef; ¹⁰ ilmaan Zabdewoos warri michoota Simoon turan jechuunis Yaaqoobii fi Yohannis akkasuma dinqisiifatan.

Yesuus Sim'ooniin, "**Hin sodaatin; ati ammaa jalqabdee qabduu namootaa ni taataa**" jedhe. ¹¹ Isaanis bidiruwwan isaanii gara qarqaraatti ol baasanii waan hunda dhiisanii isa duukaa bu'an.

Namicha Lamxaa'aa Tokko

5:12-14 kwf - Mat 8:2-4; Mar 1:40-44

† 4:41 4:41yookaan Masiihii

¹² Utuu Yesuus magaalaawwan sana keessaa isa tokko keessa jiruu namichi dhagni isaa guutuun lamxaa'e tokko gara isaa dhufe. Innis yommuu Yesuusin argetti adda isaatiin lafatti gombifamee, "Yaa Gooftaa, yoo fedhii kee ta'e, ati na qulqulleessuu ni dandeessa" jedhee isa kadhate.

¹³ Yesuusis harka isaa hiixatee namicha qaqqabee, "**Fedhii koo ti; qulqullaa'i!**" jedheen; lamxiin sunis yeruma sana namicha irraa bade.

¹⁴ Yesuusis, "**Nama tokkotti illee hin himin; garuu dhaqitiiti akka isaaniif ragaa ta'uuf lubatti of argisiisi; qulqullaa'uu keetiifis aarsaawwan Museen ajaje sana dhi'eessi**" jedhee isa ajaje.

¹⁵ Haa ta'uu malee oduun waa'ee isaa ittuma caalee faca'ee; namoonni hedduunis isa dhaga'uu fi dhukkuba isaaniin irraa fayyuuf jedhanii gara isaa dhufaa turan. ¹⁶ Yesuus garuu yeroo baay'ee lafa namni hin jirre dhaqee kadhachaa ture.

Yesuus Nama Laamsha'aa tokko Fayyisuu Isaa

5:18-26 kwf - Mat 9:2-8; Mar 2:3-12

¹⁷ Gaaf tokko Yesuus utuu barsiisaa jiruu, Fariisonnii fi barsiistonni seeraa warri gandoota Galiilaatii fi Yihuudaa hunda keessaa akkasumas Yersaaleemii dhufan achi tataa'aa turan. Akka inni dhukkubsattoota fayyisuufis humni Gooftaa isa wajjin ture. ¹⁸ Jarri tokko nama dhagni irratti du'e tokko sireedhaan baatanii dhufan; isaanis fuula Yesuus dura isa kaa'uuf jedhanii manatti ol isa galchuu yaalan. ¹⁹ Sababii baay'ina namaatiifis karaa ittiin ol isa galchan dhabnaan bantii manaatti ol ba'anii qadaada bantii manaa saaqanii walakkaa namootaatiin fuula Yesuus duratti siree isaatiin gad isa buusan.

²⁰ Yesuusis yommuu amantii isaanii argetti, "**Namichoo, cubbuun kee siif dhiifameera**" jedhe.

²¹ Fariisonnii fi barsiistonni seeraas, "Namichi Waaqa arrabsu kun eenyu? Waaqa tokkicha malee eenyutu cubbuu namaaf dhiisuu danda'a?" jedhanii garaa isaaniitti yaaduu jalqaban.

²² Yesuusis waan isaan yaadaa turan beekke akkana jedhee gaafate; "**Isin maaliif garaa keessan keessatti waan kana yaaddu?** ²³ **'Cubbuun kee siif dhiifameera' jechuu moo 'Ka'ii deemi' jechuutu salphaa dha?** ²⁴ **Ani garuu akka Ilmi Namaa cubbuu namaaf dhiisuudhaaf lafa irratti taayitaa qabu akka beektan nan barbaada.**" Kanaafuu inni namicha dhagni irratti du'e sanaan, "**Ani sitti nan hima; ka'i; siree kee fudhadhuutii mana keetti gali**" jedhe. ²⁵ Innis yeruma sana ka'ee fuula isaaniin dura dhaabate; waan irra ciisaa tures fudhatee Waaqa jajachaa mana offii isaatti qajeele. ²⁶ Hundi isaaniis dinqifatanii Waaqa jajan. Sodaadhaanis guutamani, "Nu har'a waan takkumaa hin ta'in argine" jedhan.

Waamamuu Lewwii

5:27-32 kwf - Mat 9:9-13; Mar 2:14-17

²⁷ Ergasii Yesuus achi ba'ee qaraxxuu Lewwii jedhamu tokko utuu inni iddoo itti qaraxa walitti qaban taa'uu arge. Yesuusis, "**Na duukaa bu'i**" jedheen. ²⁸ Lewwiinis waan hunda dhiisee ka'ee isa duukaa bu'e.

²⁹ Lewwiinis mana isaatti cidha guddaa Yesuusii qopheesse; qaraxxoonnii fi namoonni kaan baay'eenis isaan wajjin nyaachaa turan. ³⁰ Fariisonnii fi Barsiistonni seeraa kanneen garee isaaniin ta'an garuu, "Isin maaliif qaraxxootaa fi cubbamoota wajjin nyaattanii dhugdu?" jedhanii barattoota isaatti guunguman.

³¹ Yesuus immoo deebisee akkana isaaniin jedhe; "**Ogeessi fayyaa tokko warra dhukkubsataniif malee warra fayyaa qabaniif hin barbaachisu.** ³² **Ani cubbamoota gara qalbii jijjiirranaatti waamuufin dhufe malee qajeeltota waamuuf hin dhufne.**"

Yesuus Waa'ee Soomaa Gaafatamuu Isaa

5:33-39 kwf - Mat 9:14-17; Mar 2:18-22

³³ Isaanis, "Barattoonni Yohannis yeroo baay'ee ni soomu; ni kadhatus; barattoonni Fariisotaas akkasuma godhu; barattoonni kee garuu ni nyaatu; ni dhugus" jedhaniin.

³⁴ Yesuus immoo akkana jedhee deebise; "**Isin utuu inni isaan wajjin jiruu michoota misirrichaa soomsisuu ni dandeessuu?** ³⁵ **Garru yeroon itti misirrichi isaan biraa fudhatamu ni dhufa; isaanis yeroo sana ni soomu.**"

³⁶ Innis akkana jedhee fakkeenya kana isaaniitti hime; "**Namni uffata moofaa erbuuf jedhee huccuu uffata haaraa tarsiisa tokko iyyuu hin jiru. Yoo kun godhame, isaan uffata haaraa sana tarsiisaaniru; erbeen haaraan sunis uffata moofaa**

wajjin wal hin fudhatu. ³⁷ Namni daadhii wayinii haaraa* qalqalloo moofaatti naqu tokko iyyuu hin jiru. Yoo itti nage immoo daadhiin haaraan sun qalqalloo sana ni dhoosa; daadhiin sun ni dhangala'a; qalqallichis horoomaa ba'a. ³⁸ Qooda kanaa daadhiin wayinii haaraan qalqalloo daadhii wayinii haaraatti naqamuu qaba. ³⁹ Namni kam iyyuu erga daadhii wayinii kan goge dhugee booddee daadhii wayinii haaraa hin barbaadu; isaan, 'Daadhii wayinii kan goge wayya' jedhuutii."

6

Yesuus Gooftaa Sanbataa ti

6:1-11 kwf - Mat 12:1-14; Mar 2:23-3:6

¹ Guyyaa Sanbataa tokko Yesuus lafa qotiisaa midhaanii keessa darbaa ture; barattoonni isaas asheetii midhaanii ciratanii harka isaaniitiin sukkuummatanii nyaachuu jalqaban. ² Fariisota keessaas tokko tokko, "Isin maaliif waan Sanbataan hojjechuu hin eeyyamame hojjettu?" jedhanii gaafatan.

³ Yesuusis akkana jedhee deebiseef; "Isin waan Daawit yeroo innii fi miiltonni isaa beela'anitti godhe sana takkumaa hin dubbifnee?" ⁴ Inni mana Waaqaa seenee buddeena qulqulleeffame* kan luboota qofaaf eeyyamame fudhatee nyaate. Warra isa wajjin jiraniifis kenne." ⁵ Yesuusis, "Ilmi Namaa Gooftaa Sanbataa ti" isaaniin jedhe.

⁶ Sanbata biraas inni mana sagadaa seenee barsiisaa ture; namichi harki isaa mirgaa irratti goge tokkos achi ture. ⁷ Fariisonnii fi barsiistonni seeraa Yesuusin himachuuf jedhanii sababa barbaadaa turan; kanaafuu akka inni Sanbataan nama fayyisu ilaaluuf isa gaadan. ⁸ Yesuus garuu waan isaan yaadan beekke namicha harki irratti goge sanaan, "Ka'ii fuula nama hundaa dura dhaabadhu" jedhe. Innis ka'ee achi dhaabate.

⁹ Yesuusis, "Anis isinan gaafadha; Sanbataan isa kamtu eeyyamamaa dha? Waan gaarii hojjechuu moo waan hamaa hojjechuu? Lubbuu oolchuu moo balleessuu?" isaaniin jedhe.

¹⁰ Gara galees hunda isaanii ilaalee namichaan, "Harka kee diriirfadhu" jedhe. Innis akkasuma godhe; harki isaas guutumaan guutuutti fayye. ¹¹ Fariisonnii fi barsiistonni seeraa garuu akka malee aaranii Yesuusin maal gochuu akka danda'an waliin mari'achuu jalqaban.

Ergamoota Kudha Lamaan

6:13-16 kwf - Mat 10:2-4; Mar 3:16-19; Hoj 1:13

¹² Yesuusis guyyoota sana keessaa gaaf tokko kadhannaadhaaf tulluutti ol ba'ee; halkan guutuus Waaqa kadhachaa bule. ¹³ Innis yommuu lafti bari'etti barattoota isaa ofitti waamee nama kudha lama isaan keessaa filate; ergamoota jedhees isaan moggaase.

¹⁴ Isaanis Simoon isa inni Phexros jedhee moggaase, obboleessa isaa Indiriiyaas,

Yaaqoob,

Yohannis,

Filliphoos,

Bartaloomewoos,

¹⁵ Maatewos,

Toomaas,

Yaaqoob ilma Alfewoos,

Simoon isa Hinaafticha jedhamee waamame,

¹⁶ Yihuudaa ilma Yaaqoob,

Yihuudaa Keeriyoticha isa Yesuusin dabarsee kenne.

Ebbaa fi Wayyoowwan

6:20-23 kwf - Mat 5:3-12

¹⁷ Innis isaan wajjin gad bu'ee iddoo diriiraa tokko irra dhaabate. Tuunni barattoota isaa guddaanis achi ture; namoonni Yihuudaa hunda keessaa, Yerusaalem keessaa, biyya qarqara galaanaa kan naannoo Xiirsoosii fi Siidonaatii dhufan baay'een, ¹⁸ warri isa dhaga'uu fi dhukkuba isaanii irraa fayyuuf dhufanis achi turan. Warri hafuurota xuraa'oon dhiphachaa turanis ni fayyan; ¹⁹ sababii humni isa keessaa ba'ee hunduma isaanii fayyisaa tureef, namoonni hundinuu isa tuquuf carraaqaa turan.

* 5:37 5:37 Daadhii wayinii haaraa - Daadhii wayinii kan amma illee danfaa jiru yookaan kan hin bilchaatin jechuu dha. * 6:4 6:4 Buddeena kudha lamaan guyyaa Sanbataa mana Waaqaa keessa minjaala warqee dibame irra kaa'amuu dha. Buddeenni kun achitti Gooftaaf dhi'eeffama. Sanbata itti aanutti immoo lubootaaf kennama. Luboonnis iddoo qulqulluu tokkotti nyaachuu qabu.

²⁰ Innis barattoota isaa ilaalee akkana jedhe:

“Isin warri hiyyeeyyiin eebbifamoo dha; mootummaan Waaqaa kan keessaniitii.

²¹ **Isin warri amma beeloftan eebbifamoo dha; ni quuftuutii.**

Isin warri amma boossan eebbifamoo dha; ni kolfituutii.

²² **Yommuu namoonni sababii ilma namaatiif jedhanii isin jibban, yommuu isaan of keessaa isin baasanii fi isin arrabsan, yommuu isaan maqaa keessan akka waan hamaa tokkootti tuffatan, isin eebbifamoo dha.**

²³ **“Sababii gatiin keessan samii keessatti guddaa ta’eef gaafa sana ililchaatii gammachuudhaan buburraaqaa. Abbootiin isaanii iyyuu akkasuma raajota godhaniitii.**

²⁴ **“Garuu warri sooreyyiin isiniif wayyoo; isin jajjabina keessan argattaniirtuutii.**

²⁵ **Warri amma quuftan isiniif wayyoo, beela’uuf jirtuutii,**

warri amma kolfitan isiniif wayyoo; wawwaachuu fi boo’uuf jirtuutii.

²⁶ **Yommuu namni hundinuu isin saadu isiniif wayyoo; abbootiin isaanii iyyuu akkanuma raajota sobaa saadaa turaniitii.**

Diina Ofii Jaallachuu

6:29,30 kwf - Mat 5:39-42

²⁷ **“Ani garuu isin warra na dhageessanitti nan hima; diinota keessan jaalladhaa; warra isin jibbaniif waan gaarii hojjedhaa; ²⁸ warra isin abaaran eebbisaa; warra isin miidhaniifis kadhadhaa. ²⁹ Yoo namni tokko maddii tokko si kabale, maddii kaanis itti qabi. Yoo namni tokko kootii kee sirraa baafate immoo, kittaa kee illee hin dhowwatin. ³⁰ Nama si kadhatu hundumaaf kenni; yoo namni kam iyyuu waan kan kee ta’e fudhate, akka wanni sun siif deebifamu hin gaafatin. ³¹ Isinis akkuma namoonni kaan akka isiniif godhan barbaaddan sana isaaniif godhaa.**

³² **“Isin warra isin jaallatan qofa yoo jaallattan, kun galata maalii isinii qaba? Cubbamoonni iyyuu warra isaan jaallatan ni jaallatuutii. ³³ Isin yoo warra waan gaarii isinii godhaniif waan gaarii gootan, kun galata maalii isiniif qaba? Kana immoo cubbamoonni iyyuu ni godhuutii. ³⁴ Warruma akka isiniif deebisan abdattaniif yoo liqeessitan galata maalii argattu? ‘Cubbamoonni iyyuu’ hammuma liqeessan sana deebisanii argachuuf jedhanii cubbamootaaf ni liqeessuutii. ³⁵ Isin garuu diinota keessan jaalladhaa; waan gaariis isaaniif hojjedhaa; utuu waan isinii deebi’u tokko illee hin abdatin isaaniif liqeessaa. Yoos gatiin keessan guddaa ni ta’a; isinis ijoollee Waaqa Waan Hundaa Ollii ni taatu; inni warra hin galateffannee fi hamootaaf illee arjaadhaatii. ³⁶ Akkuma abbaan keessan araara qabeessa ta’e sana, isinis araara qabeeyyii ta’aa.**

Namatti Muruu

6:37-42 kwf - Mat 7:1-5

³⁷ **“Namatti hin murinaa; isinittis hin muramuutii. Nama hin yakkinnaa; isinis hin yakkamtanii. Dhiifamas godhaa; dhiifamni isinii godhamaatii. ³⁸ Kennaa; isiniifis ni kennamaa. Safartuun gaariin itti hudumame, kan sochoofamee fi guutamee irra dhangala’e bobaa keessanitti isinii naqama. Safartuu ittiin safartaniinis isiniif safaramaatii.”**

³⁹ Innis akkana jedhee fakkeenya kana isaanitti hime; **“Jaamaan tokko jaamaa qajeelchuu ni danda’aa? Isaan lachuu boolla keessa hin bu’anii? ⁴⁰ Barataan barsiisaa isaatii ol miti; namni guutumaan guutuutti leenjifame hundinuu garuu akka barsiisaa isaa ni ta’a.**

⁴¹ **“Ati maaliif jirma ija kee keessa jiru arguu dhiiftee huuba ija obboleessa keetii keessa jiru ilaalta? ⁴² Ati utuu ofii keetii jirma ija kee keessa jiru arguu hin danda’in, akkamitti obboleessa keetiin, ‘Obboleessaa, kottu mee ani huuba ija kee keessa jiru siif nan baasa’ jechuu dandeessa? Fakkeessituu nana, duraan dursiitii jirma ija kee keessa jiru baafadhu; ergasiis huuba ija obboleessa keetii keessa jiru baasuudhaaf sirriitti argita.**

Mukaa fi Ija Isaa

6:43,44 kwf - Mat 7:16,18,20

⁴³ **“Mukni gaariin ija gadhee naqatu tokko iyyuu hin jiru; mukni gadheenis ija gaarii hin naqatu.** ⁴⁴ **Tokkoon tokkoon mukaa ija isaatiin beekama. Namoonni muka qoraattii irraa harbuu, yookaan sokorruu irraa wayinii hin ciran.** ⁴⁵ **Namni gaariin waan gaarii garaa isaa keessatti kuufate keessaa waan gaarii baasa; namni hamaan immoo waan hamaa garaa isaa keessatti kuufate keessaa waan hamaa baasa. Waan garaa guute afaan dubbataatii.**

Ijaartota Manaa Lamaan

6:47-49 kwf - Mat 7:24-27

⁴⁶ **“Isin waan ani jedhu hin hojjetan; yoo maaliif, ‘Yaa Gooftaa, yaa Gooftaa’ naan jettu?** ⁴⁷ **Namni garaa koo dhufu, kan dubbii koo dhaga’ee hojiidhaan argisiisu hundi maal akka fakkaatu ani isinitti nan argisiisa.** ⁴⁸ **Isaan nama mana ijaaru, kan boolla gad fageessee qotee hundee mana sanaa kattaa irra dhaabe tokko fakkaatu. Sababii manichi sirriitti ijaarama, lolaan yeroo lola’ee humnaan itti bu’etti mana sana sochoosuu hin dandeenye.** ⁴⁹ **Namni dubbii koo dhaga’ee hojiidhaan hin argisiifne garuu nama lafa irratti mana hundee hin qabne ijaarratu tokko fakkaata. Yeroo lolaan humnaan itti bu’etti manni sun ni jige; guutumaa guutuuttis diigame.”**

7

Amantii Ajajaa Dhibbaa

7:1-10 kwf - Mat 8:5-13

¹ Yesuus yeroo waan kana hundumaa namoota isa dhaggeeffachaa turanitti himee fixatetti, Qifirnaahom seene. ² Achis tajaajilaan ajajaa dhibbaa kan gooftaan isaa akka malee isa jaallatu tokko dhukkubsatee du’uu ga’ee ture. ³ Ajajaan dhibbaa sunis waa’ee Yesuus dhaga’ee akka inni dhufee garbicha isaa fayyisuuf maanguddoota Yihuudootaa isatti ergee kadhate. ⁴ Isaanis yommuu gara Yesuus dhufanitti akkana jedhanii jabeessanii isa kadhate; “Ati waan kana isaaf gochuun namicha kanaaf ni mala; ⁵ inni saba keenya ni jaallataatii; mana sagadaas nuuf ijaareera.” ⁶ Kanaafuu Yesuus isaan wajjin deeme.

Yeroo inni manichatti dhi’aatetti ajajaan dhibbaa sun akkana jedhee michoota isaa Yesuusitti erge; “Yaa gooftaa of hin rakkisin; ati bantii mana koo jala seenuun naaf hin maluutii. ⁷ Sababiin ani ofii koo akka nama gara kee dhufuun maluufitti hin ilaaliniif iyyuu kanama. Garuu dubbicha qofa dubbadhu; tajaajilaan koo ni fayyaatii. ⁸ Ani mataan koo iyyuu nama taayyitaa jala jiruu dha; loltootas of jalaa qaba. Isa tokkoon, ‘Deemi’ nan jedha; innis ni deema; isa kaaniin immoo, ‘Kottu’ nan jedha; innis ni dhufa. Tajaajilaa kootiinis, ‘Waan kana hojjedhu’ nan jedha; innis ni hojjeta.”

⁹ Yesuus yommuu waan kana dhaga’etti isa dinqifate; namoota isa duukaa bu’aa turanittis garagalee, **“Ani isinittin hima; ani amantii guddaa akkanaa Israa’el keessatti iyyuu hin arganne”** jedhe. ¹⁰ Yommuu namoonni ergamanii turan manatti deebi’anitti garbichi sun fayyee isaan eege.

Yesuus Ilma Haadha Hiyyeessaa Du’aa Kaase

7:11-16 kwi - 1Mt 17:17-24; 2Mt 4:32-37; Mar 5:21-24,35-43; Yoh 11:1-44

¹¹ Yesuus ergasii magaalaa Naayin jedhamtu tokko dhaq; barattoonni isaatii fi namoonni baay’eenis isa wajjin dhaqan. ¹² Yommuu inni karra magaalatti dhi’aatetti jarri tokko nama du’ee tokko baatanii isatti dhufan; namichi du’ee sunis haadha isaatiif ilma tokkicha ture; haati isaas haadha hiyyeessaa turte. Namoonni magaalattii baay’eenis ishee wajjin turan. ¹³ Gooftaanis yommuu ishee argetti na’eefii, **“Hin boo’in”** jedheen.

¹⁴ Innis itti dhi’atee wasaasaa reeffa sanaa tuge; warri reeffa baatanis ni dhaabatan. Innis, **“Gurbayyoo, ani siin nan jedhaa, ka’i!”** jedheen. ¹⁵ Gurbaan du’ee sunis ka’ee taa’ee dubbachuu jalqabe; Yesuusis deebisee haadha isaatti isa kenne.

¹⁶ Hundi isaanii ni sodaatan; “Raajiin guddaan nu keessaa argameera. Waaqnis saba isaa gargaaruuf dhufu” jedhanii Waaqaaf ulfina kennan. ¹⁷ Oduun waa’ee Yesuus kunis Yihuudaa guutuuf biyya naannoo sana jiru hundumaa keessa faffaca’ee.

Yesuusii fi Yohannis Cuuphaa

7:18-35 kwf - Mar 11:2-19

¹⁸ Barattoonni Yohannis waa'ee waan kana hundaa isatti himan. Yohannis isaan keessaa nama lama ofitti waamee, ¹⁹ "Inni dhufuuf jiru si'i moo yookaan kan biraa eegganna?" jedhee gaafachuudhaaf Gooftaatti isaan erge.

²⁰ Namoonni sunis yommuu gara Yesuus dhufanitti, "Yohannis cuuphaan, 'Inni dhufuuf jiru sun si'i moo yookaan kan biraa eegganna?' jedhee gaafachuudhaaf sitti nu ergeera" jedhaniin.

²¹ Yesuusis yeruma sana namoota dhibee, dhukkubaa fi hafuura hamaa qaban hedduu fayyise; warra jaamaa turan baay'eedhaafis agartuu deebise. ²² Innis akkana jedhee ergamoota sanaaf deebii kenne; **"Deebi'aatii waan argitanii fi waan dhageessan Yohannisitti himaa; jaamoonni ni argu; warri naafatan ni deemu; warri lamxaa'an ni qulqullaa'u; warri duudan ni dhaga'u; warri du'an ni ka'u; hiyyeeyyiifis wangeelli ni lallabama.** ²³ **Namni natti hin gufanne kam iyyuu eebbifamaa dha."**

²⁴ Erga ergamoonni Yohannis ba'anii qajeelanii booddee Yesuus akkana jedhee waa'ee Yohannis namootatti himuu jalqabe; **"Isin maal arguuf gammoojjitti gad baatan? Shambaqqoo qilleensi raasu moo? ²⁵ Yoos maal arguu baatan ree? Nama uffata miidhagaa uffate moo? Lakki, warri uffata miidhagaa uffatanii qananiidhaan jiraatan masaraawwan keessa jiru.** ²⁶ **Garuu isin maal arguu baatan? Raajii moo? Eeyyee; ani isinittin hima; kan raajii iyyuu caalu.** ²⁷ **Kunis isa waa'een isaa akkana jedhamee barreeffamee dha:**

"Kunoo, ani ergamaa koo isa fuula kee duraan karaa kee qopheessu,

fuula kee dura nan erga.*

²⁸ **Ani isinittin hima; namoota dubartoota irraa dhalatan keessaa namni Yohannis cuuphaa caalu tokko iyyuu hin jiru; namni mootummaa Waaqaa keessatti nama hundumaa gad ta'e garuu isa ni caala."**

²⁹ Namoonni hundi, qaraxxoonni iyyuu waan harka Yohannisitti cuuphamanii turaniif yommuu dubbii Yesuus dhaga'anitti, karaan Waaqaa qajeelaa ta'uu isaa mirkaneessan.

Yesuusii fi Fariisota

³⁰ Fariisonnii fi beektonni seeraa garuu sababii harka Yohannisitti hin cuuphaminiif kaayyoo Waaqni isaaniif qabu fudhachuu didan.

³¹ Yesuus itti fufee akkana jedhe; **"Yoos ani namoota dhaloota kanaa maaliinan wal fakkeessuu danda'a ree? Isaan maal fakkaatu? ³² Isaan akkuma ijoollee iddoo gabaa taa'anii wal waamanii akkana jedhanii ti:**

"Nu ulullee isinii afuufne;

isin garuu hin sirbine;

faaruu boo'ichaas faarsine;

isin garuu hin boonye.'

³³ **Yohannis cuuphaan yeroo dhufetti buddeena hin nyaatu, daadhii wayiniis hin dhugu tureetii; isin immoo, 'Inni hafuura hamaa gaba' jettu.** ³⁴ **Ilmi Namaa nyaachaa, dhugaas dhufe; isin immoo, 'Kunoo albaadhessaa fi machaa'aa, michuu qaraxxootaatii fi dubbamootaa' jettu.** ³⁵ **Ogummaan garuu ijoollee ishee hundumaan mirkaneeffamti."**

Yesuus Shittoo Dibamuu Isaa

7:37-39 kwi - Mat 26:6-13; Mar 14:3-9; Yoh 12:1-8

7:41,42 kwi - Mat 18:23-34

³⁶ Fariisota keessaa namichi tokko akka inni isa wajjin nyaatuuf Yesuusin affeere; innis mana Fariisichaa dhaqee maaddiitti dhi'aate. ³⁷ Dubartiin cubbamtuun magaalaa sanaa tokkos yommuu akka Yesuus mana Fariisichaatti waa nyaachaa jiru bartetti bilqaaxxii albaasxirositti shittoo qabattee dhufte. ³⁸ Isheenis boo'aa dugda isaa duubaan miilla isaa bira dhaabattee imimmaan isheetiin miilla isaa jiiisu jalqabde. Rifeensa mataa isheetiin miilla isaa haqxee, dhungattees miilla isaa shittoo dibde.

³⁹ Fariisichi isa affeere sunis waan kana argee, "Namichi kun utuu raajii ta'ee, dubartiin isa tuqxu kun eenyu akka taate, nama akkamiis akka taate ni beeka ture; isheen cubbamuudhaatii" jedhee garaa isaa keessatti yaade.

⁴⁰ Yesuus immoo, **"Yaa Simoon, ani waanan sitti himu tokko qaba"** jedheen.

Innis, "Yaa barsiisaa natti himi" jedhe.

⁴¹ Yesuusis akkana jedheen; **"Namoonni lama nama maallaqa liqeessu tokko irraa maallaqa liqeeffatan. Inni tokko diinaarii dhibba shan liqeeffate; kaan immoo diinaarii shantama liqeeffate.** ⁴² **Jarri lachuu waan isaaf kaffalan dhabnaan dhiiseef. Egaa jara lamaan keessaa kamtu caalaa isa jaallata?"**

* 7:27 7:27 Mil 3:1

⁴³ Simoonis deebisee, “Isa liqiin guddaan dhiifameef sana natti fakkaata” jedheen.

Yesuusis, “**Ati dhugaa dubbatte**” isaan jedhe.

⁴⁴ Innis gara dubartittiitti garagalee Simooniin akkana jedhe; “**Dubartii kana argitaa? Ani mana kee nan dhufe. Ati bishaan miillaa illee naaf hin kennine; isheen garuu imimmaan isheetiin miilla koo dhiqxee rifeensa mataa isheetiin haqxe.** ⁴⁵ **Ati na hin dhuganne; dubartiin kun garuu yeroo ani ol seenee jalqabdee miilla koo dhungachuu hin dhiifne.** ⁴⁶ **Ati Zayitii iyyuu mataa koo hin dibne; isheen garuu miilla koo shittoo dibde.** ⁴⁷ **Kanaafuu ani sittin hima; sababii jaalalli ishee guddaa ta’eef cubbuun ishee baay’een sun isheef dhiifameera. Kan xinnoon dhiifameef garuu jaalalli isaa xinnoo dha.”**

⁴⁸ Yesuusis dubartittiidhaan, “**Cubbuun kee siif dhiifameera**” jedhe.

⁴⁹ Warri isa wajjin maaddiitti dhi’aatanii turanis, “Namni cubbuu iyyuu namaa dhiisu kun eenyu?” jedhanii garaa isaaniitti yaaduu jalqaban.

⁵⁰ Yesuusis dubartittiidhaan, “**Amantiin kee si fayyiseera; nagaan deemi**” jedhe.

8

Fakkeenya Namicha Sanyii Facaasuu

8:4-15 kwf – Mat 13:2-23; Mar 4:1-20

¹ Yesuusis ergasii wangeela mootummaa Waaqaa lallabaa magaalaa tokko irraa gara magaalaa biraatti, ganda tokko irraas gara ganda biraatti naanna’aa ture. Warri Kudha Lamaanis isa wajjin turan; ² dubartoonni hafuurota hamoo fi dhibee irraa fayyifaman tokko tokkos isa wajjin turan; isaanis Maariyaam ishee Magdalaan kan hafuuronni hamoon torba ishee keessaa ba’an, ³ Yohaanaa niitii Kuuzaa isa eegduu mana Heroodis turee, Suusanaa fi dubartoota biraa baay’ee turan. Dubartoonni kunneenis waan qabaniin Yesuusii fi barattoota isaa tajaajilaa turan.

⁴ Yeroo tuunni guddaan walitti qabamee namoonnis magaalaa gara garaatii gara isaa dhufanitti Yesuus akkana jedhee fakkeenya kana isaanitti hime: ⁵ “**Namichi sanyii facaasu tokko sanyii facaafachuu ba’e. Utuu inni facaasaa jiruu sanyiin tokko tokko karaa irra bu’ee irra ejjetame; simbirroonnis nyaatanii fixan.** ⁶ **Kaan immoo lafa kattaa irra bu’e; innis waan jiidha hin qabneef yeroo biqiletti ni goge.** ⁷ **Sanyiin biraas qoraattii keessa bu’e; qoraattiin sunis biqiltuu sana wajjin guddatee isa hudhe.** ⁸ **Ammas sanyiin kaan biyyoo gaarii irra bu’e. Ni biqile; ijas dachaa dhibba naqate.”**

Innis yommuu waan kana dubbatetti lallabee, “**Namni gurra dhaga’u qabu haa dhaga’u**” jedhe.

⁹ Barattoonni isaas hiikkaan fakkeenya kanaa maal akka ta’e isa gaafatan. ¹⁰ Innis akkana jedhe; “**Tcciitii mootummaa Waaqaa beekuun isinii kennameera; warra kaanitti garuu ani fakkeenyaan nan dubbadha; kunis,** “**Akka isaan utuma ilaalanuu hin argineef,**

utuma dhaga’anuus, hin hubanneef.”*

¹¹ “**Hiikkaan fakkeeniyichaa kanaa dha: Sanyiin sun dubbii Waaqaa ti.** ¹² **Sanyiin karaa irraa sun namoota dubbicha dhaga’anii garuu akka isaan amananii hin fayyineef diyaabiloo dhufee dubbicha garaa isaanii keessaa fudhatuu dha.** ¹³ **Sanyiin lafa kattaa irraa sunis warra yommuu dubbicha dhaga’anitti gammachuudhaan fudhatanii dha; isaan garuu hidda hin qaban. Yeroof amanu malee yeroo qorumsaatti ni ganu.** ¹⁴ **Sanyiin qoraattii keessa bu’es warra dubbicha dhaga’anii dha; isaanis akkuma karaa isaanii itti fufaniin yaaddoo jireenyaatiin, badhaadhummaa fi qananiidhaan hudhamu; hin bilchaatanis.** ¹⁵ **Sanyiin biyyoo gaarii irraa garuu warra garaa tolaa fi gaariidhaan dubbicha dhaga’anii jabeessanii qabataniis obsaan ija naqatan argisiisa.**

Ibsaa fi Baattuu Isaa

¹⁶ “**Namni kam iyyuu ibsaa qabsiisee okkotee keessa hin dhoksu yookaan siree jala hin kaa’u. Qooda kanaa akka warri ol seenan ifa arguu danda’aniiif baattuu ibsaa irra kaa’u.** ¹⁷ **Wanni dhokfamee utuu hin mul’ifamin hafu, wanni haguugamee utuu hin beekamin hafu yookaan utuu ifatti hin baafamin hafu tokko jiruu hin jiruutii.** ¹⁸ **Kanaaf akkamitti akka dhaggeeffattan qalbeeffadhaa. Kan qabu kamiif iyyuu itti dabalamee ni kennama; kan hin qabne kam iyyuu garuu wanni inni waan qabu of se’u iyyuu isa irraa fudhatama.”**

* 8:10 8:10 Isa 6:9

*Haadha Yesuusii fi Obboloota Isaa**8:19-21 kwf - Mat 12:46-50; Mar 3:31-35*

¹⁹ Haatii fi obboloonna Yesuus isa arguu dhufan; garuu sababii baay'ina namaatiif isa bira ga'uu hin dandeenye. ²⁰ Namni tokkos, "Haati keetii fi obboloonna kee si arguu barbaadani alaa dhadhaabatanii jiru" jedhee isatti hime.

²¹ Innis, "**Haati kootii fi obboloonna koo warra dubbii Waaqaa dhaga'anii hojii irra oolchani dha**" jedhee deebise.

*Yesuus Bubbee Gab gochuu Isaa**8:22-25 kwf - Mat 8:23-27; Mar 4:36-41**8:22-25 kwi - Mar 6:47-52; Yoh 6:16-21*

²² Gaaf tokko Yesuus barattoota isaatiin, "**Kottaa galaana gama ceenaa**" jedhe. Kanaafuu isaan bidiruu yaabbatanii qajeelan. ²³ Inni utuu isaan bidiruudhaan deemaa jiranuu hirribni qabee rafe. Bubbeen tokkos galaana sana irratti ka'ee, bidiruu sun bishaaniin guutamuu jalqabe; isaanis balaa guddaa keessa seenan.

²⁴ Barattoonnis dhaqanii, "Yaa Gooftaa, yaa Gooftaa, nu dhumuuf jirra!" jedhanii isa dammaqsan.

Innis ka'ee bubbee fi bishaan raafamaa ture sana ifate; bubbeen sunis gab jedhe; wanni hundinuus ni tasgabbaa'e. ²⁵ Barattoota isaas, "**Amantiin keessan eessa jira?**" jedhee gaafate.

Isaanis sodaa fi dinqifannaadhaan, "Namichi bubbee fi bishaan illee ajaju kun eenyu? Isaanis ni ajajamuuf" jedhanii wal gaafatan.

*Yesuus Hafuura Hamaa Baasuu Isaa**8:26-37 kwf - Mat 8:28-34**8:26-39 kwf - Mar 5:1-20*

²⁶ Isaanis gara biyya Gergeesenoon ishee galaanaan gama fuullee Galiilaatti argamuutti bidiruudhaan ce'an. ²⁷ Yommuu Yesuus qarqara galaanaatti bu'ettis namichi magaalaa sana kan hafuura hamaadhaan qabamee ture tokko isatti dhufe. Namichi kun yeroo dheeraadhaaf uffata hin uffatu ture; awwaala gidduu jiraata malee mana keessa hin jiraatu ture. ²⁸ Innis yommuu Yesuus argetti iyee miilla isaa irratti kufe; sagalee ol fudhatee iyyees, "Yaa Yesuus Ilma Waaqa Waan Hundaa Olii, ati maal narraa barbaadda? Ani sin kadhada; na hin dhiphisin!" jedhe. ²⁹ Yesuus akka hafuurri xuraa'aan sun namicha keessaa ba'u ajajee tureeti. Hafuurri sunis yeroo baay'ee itti ka'aa ture; namichi sun yoo harkaa fi miilli isaa foncaan hidhamee eegamaa ture iyyuu, hidhaa isaa of irraa kukkutee, hafuura hamaa sanaan gara lafa namni hin jirreetti geeffamaa ture.

³⁰ Yesuus, "**Maqaan kee eenyu?**" jedhee isa gaafate.

Innis sababii hafuuronni hamoon baay'een isatti galanii turaniif, "Leegewoon" jedhee deebise. ³¹ Hafuuronni hamoon sunis akka inni akka isaan Qilee keessa bu'an isaan hin ajajneef Yesuus kadhatan.

³² Hoomaan booyyee guddaan isaas gaara irra achi dheedaa ture. Hafuuronni hamoon sunis akka inni akka isaan booyyeeffan sanatti galaniif isaanii eeyyamu Yesuus kadhatan; innis ni eeyyameef. ³³ Yommuu hafuuronni hamoon sun namicha keessaa ba'anii booyyeeffanitti galanitti, hoomaan sun ededa hallayyaa irraa gad furguggifamee galaanatti nam'ee liqimfame.

³⁴ Warri booyyeeffan tiksan sunis yommuu waan ta'e sana arganitti, baqatanii magaalaa fi baadiyyaatti waan kana odeessan; ³⁵ namoonnis waan ta'e sana ilaaluu ba'an. Isaanis yommuu gara Yesuus dhufanitti namicha hafuuronni hamoon keessaa ba'an sana wayyaa uffatee, qalbii isaattis deebi'ee miilla Yesuus jala taa'ee argan; ni sodaatanis. ³⁶ Warri waan kana arganii turanis namichi hafuura hamaan qabame sun akkamitti akka fayye namootatti odeessan. ³⁷ Kana irratti namoonni biyya Gergeesenoon hundinuu waan sodaadhaan guutamaniif akka Yesuus isaan biraa deemu isa kadhatan. Innis bidiruu yaabbatee achii deeme.

³⁸ Namichi hafuuronni hamoon keessaa ba'an sun Yesuus wajjin deemuuf isa kadhate; Yesuus garuu akkana jedhee of biraa isa deebise; ³⁹ "**Mana keetti deebi'itii wanni Waaqni siif godhe hammam guddaa akka ta'e odeessi.**" Namichis dhaqee wanni Yesuus isaaf godhe hammam guddaa akka ta'e magaalaa sana hunda keessatti odeesse.

*Mucattii Duutee fi Dubartii Dhukkubsatte**8:40-56 kwf - Mat 9:18-26; Mar 5:22-43*

⁴⁰ Yommuu Yesuus deebi'etti namoonni baay'een isa simatan. Hundi isaanii isa eeggachaa turaniitii. ⁴¹ Namichi Yaa'iros jedhamu, bulchaan mana sagadaa tokko

dhufee miilla Yesuus irratti kufee akka inni mana isaa dhaqu isa kadhate; ⁴² sababiin isaas intalli isaa tokkittiin, durbi umuriin ishee gara waggaa kudha lamaa ta'u tokko du'uu geessee turte.

Utuu Yesuus deemaa jiruu namoonni qixa hundaan dhiibanii hafuura isa kutuu ga'an. ⁴³ Dubartiin dhiigni ishee waggaa kudha lama dhangala'aa ture tokkos achi turte; garuu namni tokko iyyuu ishee fayyisuu hin dandeenye. ⁴⁴ Isheen dugda isaa duubaan dhuftee handaara uffata isaa tuqxe; dhiigni ishees yommusuma cite.

⁴⁵ Yesuusis, **“Eenyutu na tuqe?”** jedhee gaafate.

Yommuu hundi isaanii haalanitti Phexros, **“Yaa barsiisaa namoonni tuutta'anii si dhiibaa jiru”** jedhe.

⁴⁶ Yesuus garuu, **“Namni wayii na tuqeera; ani akka humni na keessaa ba'e nan beekaa”** jedhe.

⁴⁷ Dubartittiinis akka utuu hin beekamin deemuu hin dandeenye hubannaan hollachaa dhuftee miilla isaa irratti kufte. Isheen maaliif akka isa tuqxee fi akkamittis akka yommusuma fayyite namoota sana hunda duratti dubbate. ⁴⁸ Kana irratti inni, **“Yaa intalaa, amantiin kee si fayyiseera. Nagaan deemi”** jedheen.

⁴⁹ Utuu Yesuus dubbachaa jiruu namni tokko mana Yaa'irooms bulchaa mana sagadaatii dhufee, **“Intalli kee duuteerti; ati si'achi barsiisicha hin rakkisin”** jedhe.

⁵⁰ Yesuus garuu yommuu dhaga'etti Yaa'iroomsiin, **“Amani malee hin sodaatin; isheen ni fayyitii”** jedhe.

⁵¹ Inni yommuu mana Yaa'irooms ga'etti Phexros, Yohannisii fi Yaaqoob akkasumas abbaa fi haadha intalattii malee akka namni tokko iyyuu isa wajjin ol seenu hin eeyyamne. ⁵² Kana irratti namoonni hundinuu isheef wawwaachaa, faarsaas turan. Yesuus garuu, **“Hin boo'inaa; isheen ni rafti malee hin duuneetii”** jedhe.

⁵³ Isaan immoo akka isheen duute waan beekaniif isatti kolfan. ⁵⁴ Inni garuu harka ishee qabee, **“Intala ko, ka'il”** jedhe. ⁵⁵ Hafuurri ishees ni deebi'e; isheen yommusuma kaatee dhaabatte. Ergasii Yesuus akka isaan waan isheen nyaattu isheef kennan isaanitti hime. ⁵⁶ Abbaa fi haati ishees ni dinqifatan; inni garuu akka isaan waan ta'e sana nama tokkotti illee hin hinne isaan ajaje.

9

Yesuus Barattoota Kudha Lamaan Erguu Isaa

9:3-5 kwf - Mat 10:9-15; Mar 6:8-11

9:7-9 kwf - Mat 14:1,2; Mar 6:14-16

¹ Yesuus warra Kudha Lamaan walitti waamee, akka isaan hafuurota hamoo hunda baasanii fi akka dhibeewwan fayyisaniif humnaa fi taayitaa kenneef; ² inni akka isaan mootummaa Waaqaa labsanii fi akka dhukkubsattoota fayyisaniif isaan erge. ³ Akkanas isaanin jedhe; **“Adeemsa keessaniif waan tokko illee jechuunis ulee yookaan koroojoo yookaan buudeena yookaan maallaqa akkanumas kittaa lama hin qabatinaa.”** ⁴ Mana seentan kam iyyuu keessa hamma magaalaa sanaa baatanitti achuma turaa. ⁵ **Yoo namoonni isin simachuu baatan, magaalaa isaaniitii ba'aatii akka ragaa isaanitti ta'uuf awwaara miilla keessanii dhadha'adhaa.”** ⁶ Isaanis achii ba'anii iddoo hundatti wangeela lallabaa, namootas fayyisaa ganda tokko irraa gara ganda kaanii deemaa turan.

⁷ Heroodis bulchaan waa'ee waan ta'aa ture hundaa dhaga'e. Innis waan namoonni tokko tokko Yohannis cuuphaan warra du'an keessaa kaafameera jechaa turaniif, ⁸ warri kaanis Eeliyaas mul'ateera jechaa waan turaniif, warri kaan immoo raajota durii keessaa inni tokko du'aa ka'eera jechaa waan turaniif akka malee burjaaja'e. ⁹ Heroodis garuu, **“Ani Yohannis mataa isaa kuteen ture. Yoos namichi ani waa'ee isaa waan akkanaa dhaga'u kun eenyu ree?”** jedhe. Yesuus arguufis ni hawwa ture.

Yesuus Nama Kuma Shan Sooruu Isaa

9:10-17 kwf - Mat 14:13-21; Mar 6:32-44; Yoh 6:5-13

9:13-17 kwi - 2Mt 4:42-44

¹⁰ Ergamoonnis yommuu deebi'anitti waan hojjetanii turan Yesuusitti himan. Innis ofitti isaan fudhate; isaanis ofumaan gara magaalaa Beetisayidaa jedhamtuu dhaqan; ¹¹ namoonni baay'een garuu waan kana beekani isa duukaa bu'an. Innis isaan simatee waa'ee mootummaa Waaqaa isaanitti hime; warra fayyuun isaan barbaachises ni fayyise.

¹² Gara galgalaatti warri Kudha Lamaan gara isaa dhufanii, **“Waan nu as gammoojjii keessa jirruuf, akka namoonni kunneen gara gandootaatii fi baadiyyaa naannoo kana jiranii dhaqanii waan nyaatanii fi iddoo bultii barbaadatanii isaan gad dhiisi”** jedhaniin.

¹³ Inni immoo, **“Isinuu waan isaan nyaatan kennaafii”** jedhee deebise.

Isaanis, “Nama kana hundaaf nyaata yoo dhaqnee binne malee nu buddeena shanii fi qurxummii lama qofa qabna” jedhanii deebisan. ¹⁴ Dhiira gara kuma shantu achi ture.

Inni garuu barattoota isaatiin, **“Garee tokkoon tokkoon isaa gara nama shantama shantamaa qabuun isaan teessisaa”** jedhe. ¹⁵ Barattoonnis akkasuma godhan; namni hundis ni taa’ee. ¹⁶ Innis buddeena shananii fi qurxummii lamaan fuudhee, gara samii ol ilaalee galata galchee caccabse. Ergasii akka isaan namootaaf dhi’eessaniif barattootatti kenne. ¹⁷ Isaan hundi nyaatanii quufan; barattoonnis hurraa’aa hambifame gundoo kudha lama guutuu walitti qaban.

Phexros Eenyummaa Kiristoos Beeksise

9:18-20 kwf – Mat 16:13-16; Mar 8:27-29

9:22-27 kwf – Mat 16:21-28; Mar 8:31-9:1

¹⁸ Gaaf tokko Yesuus kophaa isaa kadhannaa irra ture; barattoonni isaas isa wajjin turan. Innis, **“Namoonni anaan eenyu jedhu?”** jedhee isaan gaafate.

¹⁹ Isaanis, “Namoonni tokko tokko inni Yohannis Cuuphaa dha jedhu; warri kaan inni Eeliyaas jedhu; kaan immoo raajota durii keessaa isa tokkotu du’aa ka’ee jedhu” jedhanii deebisan.

²⁰ Innis, **“Isin hoo? Eenyu anaan jettu?”** jedhee gaafate.

Phexros, “Ati Kiristoos* Waaqaa ti” jedhee deebise.

²¹ Yesuus akka isaan waan kana nama tokkotti illee hin himneef jabeessee isaan akeekkachiise. ²² Innis, **“Ilmi Namaa waan hedduun dhiphachuu, maangud-dootaan, luboota hangafootaa fi barsiistota seeraatiin tuffatamuu, ajjeefamuu fi guyyaa sadaffaatti immoo du’aa ka’uu qaba”** jedhe.

²³ Ergasii inni hunduma isaaniitiin akkana jedhe; **“Namni kam iyyuu yoo na faana dhufuu barbaade, inni of haa ganu; fannoo isaa guyyuma guyyaan baadhatees na duukaa haa bu’u. ²⁴ Namni lubbuu isaa oolfachuu barbaadu kam iyyuu lubbuu isaa ni dhabaatii; garuu namni naaf jedhee lubbuu isaa dhabu kam iyyuu lubbuu isaa ni oolfata. ²⁵ Namni yoo addunyaa guutuu argatee ofii isaa immoo dhabe yookaan yoo gatame inni bu’aa maalii argata? ²⁶ Nama anattii fi dubbii kootti qaana’u kam iyyuu Ilmi Namaa yommuu ulfina isaatiin, ulfina Abbaatii fi ulfina ergamoota qulqulluutiin dhufutti isatti ni qaana’a.**

²⁷ **“Ani dhuguman isinitti hima; warra as dhadhaabachaa jiran keessaa namoonni tokko tokko utuu mootummaa Waaqaa hin argin du’a hin dhandhaman.”**

Bifti Yesuus Geeddaramuu Isaa

9:28-36 kwf – Mat 17:1-8; Mar 9:2-8

²⁸ Yesuus erga waan kana dubbatee gara guyyaa saddeetii booddee Phexros, Yohannisii fi Yaaqoobin fudhatee kadhannaadhaaf tulluu tokkotti ol ba’ee. ²⁹ Utuu inni kadhachaa jiruu bifti fuula isaa geeddarama; uffanni isaas adii calaqqisu ta’ee. ³⁰ Kunoo namoonni lama jechuunis Musee fi Eeliyaas, ulfina guddaadhaan mul’atanii Yesuus wajjin haasa’aa turan. ³¹ Isaanis ulfinaan mul’atanii waa’ee addunyaa kana irraa deemuu isaa kan inni Yersaaleemitti raawwachuuf jiru sanaa dudubbachaa turan. ³² Phexrosii fi warri isa wajjin turan garuu akka malee mugan; yeroo dammaqanitti immoo ulfina Yesuusii fi namoota Yesuus wajjin dhadhaabachaa turan lamaan argan. ³³ Phexros akkuma namoonni sun Yesuus biraa deemuu jalqabaniin, “Yaa Goofaa, as jiraachuun nuuf gaarii dha. Daasii sadii jechuunis tokko siif, tokko Museef, tokko immoo Eeliyaasiif ni ijaarra” jedhe. Inni waan dubbatu hin beeku ture.

³⁴ Utuma inni dubbachaa jiruu duumessi tokko dhufee isaan haguuge; isaanis yommuu duumessa sana keessa seenanitti ni sodaatan. ³⁵ Sagaleen, “Kun ilma koo isa ani filadhee dha; isinis isa dhaga’aa” jedhu tokko duumessicha keessaa dhufe. ³⁶ Yommuu sagaleen sun dubbatetti, Yesuus kophaa isaa argame. Barattoonnis ni cal’isan malee waan argan keessaa tokko illee yeroo sanatti nama tokkottuu hin himne.

Yesuus Gurbaa Tokko Fayyise

9:37-45 kwf – Mat 17:14-18,22,23; Mar 9:14-27,30-32

³⁷ Guyyaa itti aanu, yommuu isaan tulluu irraa gad bu’anitti namoonni baay’een isatti dhufan. ³⁸ Namoota sana keessaas namichi tokko iyeye akkana jedhe; “Yaa Barsiisaa akka ati ilma koo naa ilaaltu sin kadhada; inni anaaf mucaa tokkichaatii. ³⁹ Hafuurri wayii itti ka’a; gurbichis akkuma tasaa iyya; hafuurri sun lafaan dha’ee isa dhidhiitachiisa. Gurbichis hoomacha afaaniin baasa; hafuurichi dafee irraa hin

* 9:20 9:20yookaan Masihihi

galu; yeroo hundas isa miidha. ⁴⁰ Ani akka hafuura sana baasaniif barattoota kee nan kadhade; isaan garuu hin dandeenye.”

⁴¹ Yesuusis deebisee, **“Isin dhaloota hin amannee fi jal’aa nana; ani hamma yoomiitti isin wajjin jiraadha? Hamma yoomiittis isinii obsa?”** jedhe. Namichaanis, **“Mee ilma kee as fidi”** jedhe.

⁴² Utuma gurbaan sun gara Yesuus dhufaa jiruus, hafuurri hamaan sun lafaan dha’ee isa dhidhiitachiise. Yesuus garuu hafuura xuraa’aa sana ifate; gurbichas fayyisee abbaa isaatiif kenne. ⁴³ Hundumti isaaniis humna Waaqaa isa jabaa sana ni dinqifatan.

Utuu hundi isaaniin waan Yesuus hojjetee sana dinqisiifachaa jiranuu inni barattoota isaatiin akkana jedhe; ⁴⁴ **“Waan ani isinitti himuuf jiru of eeggannaadhaan dhaggeeffadhaa: Ilmi Namaa dabarfamee harka namootaatti ni kennama.”**

⁴⁵ Isaan garuu dubbii kana hin hubanne. Akka isaaniif hin galleefis isaan jalaa dhokfamee ture; isaan waa’ee waan kanaa isa gaafachuus ni sodaatan.

Namni Nama Hunda Caalu Eenyu?

9:46-48 kwf - Mat 18:1-5

9:46-50 kwf - Mar 9:33-40

⁴⁶ Isaan keessaa namni nama hundumaa caalu eenyu akka ta’e barattoota gidduutti wal falmiin ka’e. ⁴⁷ Yesuusis waan isaan garaatti yaadan beekke mucaa xinnaa tokko fidee of bira dhaabe; ⁴⁸ akkanas isaaniin jedhe; **“Namni mucaa xinnaa kana maqaa kootiin simatu kam iyyuu na simata; namni na simatus isa na erge sana simata; namni isin hundaa gad ta’e inni hunda caalaatii.”**

⁴⁹ Yohannis, “Yaa Barsiisaa, nu utuu namni tokko maqaa keetiin hafuurota hamoo baasuu arginee waan inni nu duukaa hin buunee isa dhowwine” jedhe.

⁵⁰ Yesuus garuu, **“Isa hin dhowwinaa; namni isiniin hin mormine kam iyyuu gara keessan jiraatii”** jedhe.

Mormii Warra Samaariyaa

⁵¹ Yesuusis yommuu yeroon inni itti gara samiitti ol fudhatamu ga’etti Yersaalem dhaquuf hidhatee ka’e. ⁵² Innis ergamoota of dura erge; isaanis waan isa barbaachisu qopheessuudhaaf ganda Samaariyaa tokko seenan. ⁵³ Namoonni naannoo sanaa garuu sababii inni fuula isaa Yersaalemitti deebifatee deemaa tureef isa hin simanne. ⁵⁴ Barattoonni isaa jechuunis Yaaqoobii fi Yohannis yommuu waan kana arganitti, “Yaa Gooftaa, akka inni isaan balleessuuf, akka nu samii irraa ibidda gad waamnu barbaaddaa?” jedhan. ⁵⁵ Yesuus garuu garagalee isaan ifate. ⁵⁶ Isaanis darbanii ganda biraa dhaqan.

Yesuus Duukaa Bu’uun Gatii Nama Baasisa

9:57-60 kwf - Mat 8:19-22

⁵⁷ Utuu isaan karaa deemaa jiranuus namichi tokko Yesuusiin, “Ani iddoo ati dhaqxu hundatti si duukaa nan bu’a” jedhe.

⁵⁸ Yesuusis deebisee, **“Waaqoonni boolla qabu; simbirroonnis man’ee qabu; Ilmi Namaa garuu iddoo itti mataa isaa irkifatu illee hin qabu”** jedhe.

⁵⁹ Nama biraatiinis, **“Na duukaa bu’i!”** jedhe.

Namichi garuu, “Yaa Gooftaa, dura akka ani dhaqee abbaa koo awwaalladhu naa eeyyami” jedhee deebise.

⁶⁰ Yesuusis, **“Warri du’an du’aa isaanii haa awwaallatan; ati garuu dhaqitiiti mootummaa Waaqaa lallabi”** jedheen.

⁶¹ Ammas namni biraa, “Yaa Gooftaa, anis si duukaa nan bu’a; garuu dura akka ani dhaqee maatii kootti nagaa dhaamadhu naa eeyyami” jedhe.

⁶² Yesuusis deebisee, **“Namni harkaan hordaa qabatee of duuba ilaalu kam iyyuu mootummaa Waaqaatiif hin malu”** jedhe.

10

Yesuus Nama Torbaatamii Lama Erguu Isaa

10:4-12 kwf - Luq 9:3-5

10:13-15,21,22 kwf - Mat 11:21-23,25-27

10:23,24 kwf - Mat 13:16,17

¹ Kana booddee Gooftaan namoota biraa 72 muudee gara magaalawwanii fi lafa ofii dhaquuf ture hundaatti lama lamaan of dura isaan erge. ² Akkanas isaaniin jedhe; **“Midhaan walitti qabamu baay’ee dha; hojjettoonni garuu muraasa. Kanaaf akka Gooftaan midhaan sanaa gara lafa qotiisaa midhaan isaatti hojjettoota erguuf isa kadhadaa.”** ³ Deemaa! Ani akka ilmoolee hoolaa gara gidduu yeeyyiitti isin

erga. ⁴ Borsaa yookaan koroojoo yookaan kophee hin qabatinaa; karaa irrattis nama tokko illee nagaan hin gaafatinaa.

⁵ “Yeroo mana tokko seentannitti dursaatii, ‘Nagaan mana kanaaf haa ta’u’ jedhaa. ⁶ Yoo namni nagaan achi jiraate, nagaan keessan isaaf ta’a; yoo kanaa achii nagaan keessan isiniif deebi’a. ⁷ Waan isaan isinii kennan hunda nyaachaa, dhugaas achuma turaa; hojjetaaf mindaa isaa argachuun ni malaatii. Manaa gara manaatti hin labinaa.

⁸ “Yeroo magaalaa tokko seentannii simatamtannitti waanuma isinii dhi’aate nyaadhaa. ⁹ Dhukkubsattoota achi jiran fayyisaatii, ‘Mootummaan Waaqaa isinitti dhi’aateera’ jedhaa isaanitti himaa. ¹⁰ Yoo magaalaa tokko seentannii isin simachuu baatan garuu gara daandii magaalaa ba’aatii akkana jedhaa; ¹¹ ‘Nu akka akeekkachiisa isinii ta’uuf awwaara magaalaa keessanii illee miilla keenya irraa dhadha’anna. Ta’us waan kana beekaa: Mootummaan Waaqaa dhi’aateera.’ ¹² Ani isinittin hima; gaafas magaalaa sana irra Sodoomiif ni salphata.

¹³ “Yaa Koraaziin siif wayyoo! Yaa Beetisaayidaa siif wayyoo! Hojiin dinqii kan isin keessatti hojjetame sun utuu Xiiroosii fi Siidoonaa keessatti hojjetamee jiraatee isaan silaa yeroo dheeraan dura uffata gaddaa uffatanii, daaraa keessas tataa’anii qalbii jijjiirratu turan. ¹⁴ Garuu guyyaa murtiitti isin irra Xiiroosii fi Siidoonaaf ni salphata. ¹⁵ Atis yaa Qifirnaahom, hamma samiitti ol kaafamtaa? Lakki, Sii’oolitti gad buuta.

¹⁶ “Namni isin dhaga’u kam iyyuu na dhaga’a; namni isin dhaga’uu didu anas dhaga’uu dida; namni na dhaga’uu didu immoo isa na erge sana dhaga’uu dida.”

¹⁷ Namoonni torbaatamii lamaan sunis gammachuudhaan deebi’anii, “Yaa Gooftaa, hafuuronni hamoon iyyuu maqaa keetiin nuu ajajamaniiru,” jedhan.

¹⁸ Yesuusis deebisee akkana jedhe; “Ani utuu Seexanni akkuma balaqqeetti samii irraa bu’uu nan arge. ¹⁹ Kunoo, ani akka isin bofaa fi torbaanqabaa lafatti dhidhiittanii fi akka humna diinaa hundas mo’attaniif aangoo isinii kenneera; wanni kam iyyuu isin hin miidhu. ²⁰ Garuu sababii maqaan keessan samii keessatti barreeffameef gammadaa malee sababii hafuuronni isinii ajajamaniif hin gammadinaa.”

²¹ Yesuus yeroo sana Hafuura Qulqulluudhaan gammachuun guutamee akkana jedhe; “Yaa Abbaa, Gooftaa samiitii fi lafaa, sababii ati wantoota kanneen ogeeyyii fi hubattoota jalaa dhoksatee daa’immanitti mul’ifteef ani sin galateeffadha. Eeyyee yaa Abbaa, ati waan kana gochuutti gammaddeertaatii.

²² “Abbaan koo waan hunda dabarsee natti kenneera. Abbaa malee namni tokko iyyuu Ilmi enyu akka ta’e hin beeku; Ilmaa fi nama Ilmi isa itti mul’isuu fedhu malee namni tokko iyyuu Abbaan enyu akka ta’e hin beeku.”

²³ Barattoota isaattis garagalee kophaatti akkana jedheen; “Iji waan isin argitan argu eebbifamaa dha. ²⁴ Ani isinittin himaati raajonnii fi mootonni baay’een waan isin argitan kana arguu barbaadan; garuu hin argine. Waan isin dhageessan kanas dhaga’uu barbaadan; garuu hin dhageenye.”

Fakkeenya Namicha Samaariyaa Tokkoo

10:25-28 kwf - Mat 22:34-40; Mar 12:28-31

²⁵ Gaaf tokko, hayyuun seeraa tokko Yesuus qoruuf jedhee ka’ee dhaabate. Innis, “Yaa Barsiisaa, ani jireenya bara baraa dhaaluudhaaf maal gochuun qaba?” jedhee gaafate.

²⁶ Yesuusis deebisee, “Seera keessatti maaltu barreeffame? Atis akkamitti dubbifta?” jedheen.

²⁷ Namichis, “Waaqa kee Goofticha garaa kee guutuudhaan, lubbuu kee guutuudhaan, humna kee guutuudhaan, yaada kee guutuudhaan jaalladhu;” ollaa kees akkuma ofii keetiitti jaalladhu[†] jedhee deebise.

²⁸ Yesuusis, “Sirriitti deebifteerta; atis kanuma godhi ni jiraattaa” jedheen.

²⁹ Namichi sun garuu qajeelaa of gochuu barbaadee, “Ollaan koo enyu?” jedhee Yesuusin gaafate.

³⁰ Yesuusis deebisee akkana jedhe; “Namichi tokko utuu Yerusaalemii ba’ee Yerikootti gad bu’aa jiruu harka saamtotaa seene. Isaanis uffata isaa irraa baafatanii, tumanii, du’aa fi jireenya gidduutti isa dhiisanii deeman. ³¹ Lubni tokko utuu akkuma tasaa karaa sanaan gad bu’uu namicha argee irraa goree

* 10:27 10:27 KeD 6:5 † 10:27 10:27 Lew 19:18

darbe. ³² Akkasumas namichi gosa Lewwii tokko yommuu iddoo sana ga'eetti namicha sana argee irraa goree darbe. ³³ Namichi Samaariyaa tokko garuu utuu deemaa jiruu iddoo namichi sun jiru ga'e; yommuu isa argettis garaa laafeef. ³⁴ Innis itti dhi'aatee zayitii fi daadhii wayinii madaa isaatti naqee hidheef; harree isaa irras kaa'ee, mana boqonnaa keessumootaatti isa geesse; achittis isa gargaare. ³⁵ Guyyaa itti aanutti diinaarii lama baasee abbaa mana boqonnaa sanaatti kennee, 'Namicha kana ittiin naa wal'aani; yoo kana caalaa baafte ani yeroon deebi'ee dhufutti siifin kenna' jedheen.

³⁶ "Eгаа jara sadan kanneen keessaa ollaan namicha harka saamtotaa seene sanaa isa kam seeta?"

³⁷ Hayyuun seeraa sunis, "Isa garaa laafeef sana" jedheen. Yesuusis, "Atis dhaqiitii akkasuma godhi" jedheen.

Yesuus mana Maartaatii fi Maariyaam Dhaquu Isaa

³⁸ Utuu karaa deemaa jiranuu Yesuus ganda tokko seene; dubartiin Maartaa jedhamtu tokkos mana isheetti isa simatte. ³⁹ Isheenis obboleettii Maariyaam jedhamtu tokko qabdi turte; Maariyaamis miilla Gooftaa jala teessee waan inni jedhu dhageeffachaa turte. ⁴⁰ Maartaan garuu baay'ina hojjiitiin waan dadhabaa turteef gara isaa dhuftee, "Yaa Gooftaa, obboleettiin koo akka ani hojii hunda kophaa koo hojjedhu natti dhiisuun ishee si hin gaddisiisuu? Akka isheen na gargaartu itti himi!" jette.

⁴¹ Gooftaanis deebisee akkana jedheen; "Yaa Maartaa, yaa Maartaa, ati waa'ee waan baay'ee yaaddofta; ni raafamtas. ⁴² Wannii barbaachisu garuu waanuma tokko qofa; Maariyaam isa caalu filatteerti; innis ishee irraa hin fudhatamu."

11

Yesuus Waa'ee Kadhannaa Barsiisuu Isaa

11:2-4 kwf - Mat 6:9-13

11:9-13 kwf - Mat 7:7-11

¹ Gaaf tokko Yesuus iddoo tokkotti kadhachaa ture; yommuu inni fixatettis, barattoota isaa keessaa namni tokko, "Yaa Barsiisaa, akkuma Yohannis barattoota isaa barsiise sana, atis kadhachuu nu barsiisi" jedheen.

² Innis akkana isaaniin jedhe; "Isin yommuu kadhattan akkana jedhaa: "Yaa Abbaa,

maqaan kee haa qulqullaa'u;
mootummaan kee haa dhufu.

³ **Buddeena keenya kan guyyuma guyyaa,**
guyyuma guyyaan nuu kenni.

⁴ **Akkuma nus warra cubbuu nutti hojjetaniif dhiifnu sana**
atis cubbuu keenya nuu dhiisi;
qoramatti nu hin galchin."

⁵ Innis akkana isaaniin jedhe; "Mee isin keessaa namni tokko michuu qaba haa jennuu; innis halkan walakkaa michuu isaa sana bira dhaqee, 'Yaa michuu ko, mee buddeena sadii naa liqeessi; ⁶ michuun koo kan karaa deemu tokko natti goreeraatii; anis waanan dhi'eessuuf tokko illee hin qabu' haa jedhu. ⁷ Namichi mana keessaa sunis, 'Na hin rakkisin; balballi cufameera; ijoolleen koos na wajjin siree irra jiru; ani ka'ee waan tokko illee siif kennuu hin danda'u' jedhaanii? ⁸ Ani isinittin hima; sababii inni michuu isaa ta'ee jedhee ka'ee buddeena sana isaaf kennuu baatu illee, sababii ija jabina namicha sanaatiif jedhee ka'ee waan isa barbaachisu hunda ni kennaaf.

⁹ "Kanaafuu ani isinittin hima: Kadhadhaa, isiniif ni kennamaa; barbaadaa, ni argattuu; rurrukutaa, balballi isiniif ni banamaa. ¹⁰ Namni kadhatu hundi ni argataatii; namni barbaadu ni argata; nama rurrukutuufis balballi ni banama.

¹¹ "Yaa abbootii, isin keessaa namni yoo ilmi isaa qurxummii isa kadhate, gooda qurxummii hofa kennuuf eenyu? ¹² Yookaan namni yoo ilmi isaa hanqaquu isa kadhate torbaanqabaa kennuuf eenyu? ¹³ Erga isin warri hamoon iyyuu kenna gaarii ijoollee keessaniif kennuu beektanii, Abbaan keessan inni samii irraa immoo hammam caalchisee warra isa kadhataniif Hafuura Qulqulluu haa kennuu ree!"

Yesuusii fi Bi'eezebuul

11:14,15,17-22,24-26 kwf - Mat 12:22,24-29,43-45

11:17-22 kwf - Mar 3:23-27

¹⁴ Yesuusis hafuura hamaa arrab-didaa ta'e tokko baasaa ture. Yommuu hafu-urri hamaan sun ba'etti arrab-didaan sun ni dubbate; namoonnis ni dinqifatan. ¹⁵ Isaan keessaa namoonni tokko tokko garuu, "Inni Bi'eelzebuuliin, hangafa hafuurota hamootiin hafuurota hamoo baasaa jira" jedhan. ¹⁶ Warri kaan immoo mallattoo samii irraa isa gaafachuudhaan isa qoran.

¹⁷ Yesuusis yaada isaanii beekke akkana jedheen; "**Mootummaan gargar of qoodu kam iyyuu ni diigama; manni gargar of qoodus ni jiga.** ¹⁸ **Seexanni yoo gargar of qoode, mootummaan isaa akkamitti dhaabachuu danda'a?** Wannani ani akkana jedhuuf sababii isin akka waan ani Bi'eelzebuuliin hafuurota hamoo baasuu dubbataniif. ¹⁹ **Egaa yoo ani Bi'eelzebuuliin hafuurota hamoo baasee, ilmaan keessan immoo maaliin baasu ree?** Kanaafuu isaan abbootii murtii isinitti ta'u. ²⁰ **Garuu ani quba Waaqaatiin hafuurota hamoo baasa taanaan, yoo mootummaan Waaqaa isinitti dhufeera.**

²¹ "**Yommuu namni jabaan guutummaatti mi'a lolaa hidhate tokko mana isaa eeggatutti, qabeenyi isaa nagaadhaan taa'aaf.** ²² **Garuu namni jabinaan isa caalu tokko yoo lolee isa mo'ate, mi'a lolaa kan namichi sun amanate sana isa irraa fudhatee boojuu isaas qoqqooda.**

²³ "**Namni na wajjin hin jirre kam iyyuu naan morma; namni na wajjin walitti hin qabne kam iyyuus ni bittinneessa.**

²⁴ "**Hafuurri xuraa'aan yommuu nama keessaa ba'utti, boqonnaa barbaacha lafa gogaa* keessa joora; garuu hin argatu.** Innis, 'Mana koo isa ani keessaa ba'e sanatti nan deebi'a' jedha. ²⁵ **Yommuu achi ga'uttis manicha haramee qulqulleffamee argata.** ²⁶ **Ergasiis dhaqee hafuurota biraa torba kanneen isa caalaa hamoo ta'an fudhatee dhufa; isaanis itti galanii achi jiraatu.** Haalli namicha sanaa kan dhuma isa jalqabaa caalaa hammaata."

²⁷ Utuu Yesuus waan kana dubbachaa jiruu, dubartiin tokko namoota gidduudhaa sagalee ishee ol fudhattee, "Garaan si baate, harmi ati hootes eebbifamaa dha" jette.

²⁸ Inni garuu deebisee, "**Kana caalaa iyyuu, warri dubbii Waaqaa dhaga'anii ajajamaniif eebbifamoo dha**" jedhe.

Mallattoo Yoonas

11:29-32 kwf - Mat 12:39-42

²⁹ Akkuma baay'inni namootaa dabalameen Yesuus akkana jedhe; "**Dhaloonni kun dhaloota hamaa dha. Inni mallattoo barbaada; garuu mallattoo Yoonas malee mallattoon tokko iyyuu isaaf hin kennamu.** ³⁰ **Akkuma Yoonas mallattoo saba Nanawwee ture sana, Ilmi Namaas mallattoo dhaloota kanaa ni ta'aatii.** ³¹ **Mootittiin kibbaa guyyaa murtiitti namoota dhaloota kanaa wajjin kaatee isaanitti murti; isheen ogummaa Solomoon dhaga'uuf jettee daarii lafaatii dhufteetii. Kunoo kan Solomoonin caalu as jira.** ³² **Namoonni Nanawwee guyyaa murtiitti dhaloota kana wajjin ka'anii itti muru; isaan lallaba Yoonasiin qalbii jijjiirrataniitii; kunoo kan Yoonasiin caalu as jira.**

Ibsaa Dhagnaa

11:34,35 kwf - Mat 6:22,23

³³ "**Namni kam iyyuu ibsaa qabsiisee iddoo hin mul'anne yookaan gombisaa jala hin kaa'u. Qooda kanaa akka warri ol seenan ifa isaa arganiif baattuu isaa irra kaa'u.** ³⁴ **Iji kee ibsaa dhagna keetii ti. Iji kee fayyaa taanaan, dhagni kee guutuun ifaan guutama. Yoo iji kee fayyaa hin ta'in garuu dhagni kee dukkana guutama.** ³⁵ **Kanaafuu akka ifni si keessaa dukkana hin taaneef of eeggadhu.** ³⁶ **Egaa yoo dhagni kee hundinuu ifaan guutame, yoo kutaan tokko iyyuu dukkana hin qabaatin, akkuma waan ifni ibsaa tokkoo ifa isaatiin siif ibsuutti dhagni kee guutummaatti ifa ni qabaata."**

Fariisonni fi Barsiistonni Seeraa Ifataman

³⁷ Akkuma Yesuus haasaa isaa fixateen Fariisota keessaa namichi tokko akka Yesuus isa wajjin nyaata nyaatuuf mana isaatti isa waame; Yesuusis ol seenee maaddiitti dhi'aate. ³⁸ Fariisichi garuu akka Yesuus nyaataan dura hin dhiqatin argee dinqisiifate.

³⁹ Gooftaanis akkana isaan jedhe; "**Isin Fariisonni duuba xoofootii fi caabii ni qulqulleessitu; keessi keessan garuu saamichaa fi hammiinaan guutameera.** ⁴⁰ **Yaa namoota gowwoota! Inni duuba isaa uume sun keessa isaa immoo hin**

* **11:24** 11:24 Lafti gogaan akka waan jireenya hafuurota hamootiif mijaa'aa ta'eetti herregama ture (Isa 13:21-22; 34:14 ilaalaa).

uumnee? ⁴¹ Isin garuu waan xooffoo fi caabii keessa jiru hiyyeeyyiif kennaa; yoois wannii hundinuu isinii qulqullaa'aa.

⁴² "Fariisota nana isiniif wayyoo! Isin insilaala, cilaaddamaa fi biqiltuu gosa hundaa kudhan keessaa tokko Waaqaaf ni kennitu; murtii qajeelaa fi jaalala Waaqaa garuu ni tuffattu. Silaa utuu isa duraa hin dhiisin isa booddee hojii irra oolchuu qabdu ture.

⁴³ "Yaa Fariisota, isiniif wayyoo! Isin manneen sagadaa keessatti taa'umsa ulfinaa, gabaa keessattis nagaa gaafatamuu jaallattu.

⁴⁴ "Isin sababii awwaala mallattoo hin qabne kan namoonni utuu hin beekin irra deeman fakkaattaniif isinii wayyoo!"

⁴⁵ Hayyoota seeraa keessaas tokko deebisee, "Yaa Barsiisaa, ati yommuu waan kana jettutti nuus arrabsaa jirta!" jedheen.

⁴⁶ Yesuus immoo akkana jedhee deebise; "Hayyoota seeraa, isiniif wayyoo! Isin ba'aa namni baachuu hin dandeenye isaanitti feetu; ofii keessanii garuu isaan gargaaruudhaaf qubaan illee hin tuqzan.

⁴⁷ "Isiniif wayyoo! Isin raajotaaf awwaala ijaartuutii; kan isaan ajjeeses abbootuma keessan. ⁴⁸ Kanaafuu isin akka waanuma abbootiin keessan hojjetan sana deeggartan dhugaa baatu; isaan raajota ajjeesan; isin immoo awwaala raajotaa ijaartu. ⁴⁹ Sababii kanaaf Waaqni ogummaa isaatiin, 'Ani raajotaa fi ergamoota isaanittin erga; namoonni sunis isaan keessaa tokko tokko ni ajjeesu; kaan immoo ni ari'atu' jedhe. ⁵⁰ Kanaaf dhaloonni kun dhiiga raajota hundaa kan uumama addunyaatii jalqabee dhangala'etti ni gaafatama; ⁵¹ dhiiga Abeel irraa jalqabee hamma dhiiga Zakkaariyaas isa iddoo aarsaatii fi mana qulqullummaa gidduutti ajjeefame sanaatti ni gaafatama. Eeyyee ani isinittin hima; dhaloonni kun waan kana hundumatti ni gaafatama.

⁵² "Yaa hayyoota seeraa, isiniif wayyoo! Isin furtuu beekumsaa fudhattaniirtu. Ofii keessanii hin seenne; warra seenaa turanis dhowwitaniirtu."

⁵³ Yommuu Yesuus achii deemetti, Fariisonnii fi barsiistonni seeraa jabeessanii isaan mormuu, akka inni waan baay'ee dubbatuufis isa tuttuquu jalqaban. ⁵⁴ Waan afaan isaatii ba'uun isa qabuufis eeggachaa turan.

12

Of eeggachiisa

12:2-9 kwf - Mat 10:26-33

¹ Gidduu sana yommuu tuunni namoota kuma hedduu tokko hamma isaan wal irra ejjetanitti walitti qabametti, Yesuus duraan dursee barattoota isaatiin akkana jechuu jalqabe; "Raacitii Fariisotaa irraa of eeggadhaa; kunis fakkeessitummaa dha.

² Wannii haguugamee utuu hin mul'ifamin hafu yookaan wannii dhokfamee utuu hin beekamin hafu tokko iyyuu hin jiru. ³ Wannii isin dukkana keessatti dubbattan, ifa guyyaatiin dhaga'ama; wannii isin gola keessatti gurratti hasaastanis bantii manaa irraa labsama.

⁴ "Yaa michoota ko, ani isinittin hima; warra dhagna ajjeesani ergasii immoo kana caalaa homaa gochuu hin dandeenye hin sodaatinaa. ⁵ Ani garuu kan isin sodaachuu qabdan isinittin argisiisa; isa erga ajjeese booddee gahaannamitti darbachuudhaaf taayitaa qabu sana sodaadhaa; eeyyee, ani isinittin hima; isa sodaadhaa. ⁶ Daaloteen shan saantima lamatti gurguramu mitii? Isaan keessaa garuu tokko iyyuu Waaqni hin irraanfatu. ⁷ Dhugumaanuu rifeensi mataa keessanii hundi lakkaa'ameera. Hin sodaatinaa; isin daalotee hedduu caalaa gatii qabduutii.

⁸ "Ani isinittin hima; nama fuula namootaa duratti ifaan ifatti dhugaa naa ba'u kamiif iyyuu, Ilmi Namaas fuula ergamoota Waaqaa duratti dhugaa ni ba'a.

⁹ Namni fuula namootaa duratti na ganu kam iyyuu garuu fuula ergamoota Waaqaa duratti ni ganama. ¹⁰ Nama Ilma Namaatiin mormee jecha tokko dubbatu hundaaf ni dhiifama; nama Hafuura Qulqulluudhaan mormee dubbatu kamiif iyyuu garuu hin dhiifamu.

¹¹ "Yommuu manneen sagadaa, bulchitootaa fi abbootii taayitaa duratti dhi'effamtanitti akkamitti akka falmattan yookaan maal akka jettan hin yaadda'inaa. ¹² Hafuurri Qulqulluun yeruma sana Waan isin jechuu qabdan isin barsiisaatii."

¹³ Tuuta sana keessaa namichi tokko, “Yaa Barsiisaa, akka obboleessi koo dhaala naa hiruuf maaloo itti naa dubbadhu” jedheen.

¹⁴ Yesuus garuu deebisee, “**Namana, eenyutu isin gidduutti abbaa murtii yookaan hirtuu dhaalaa na godhe?**” jedheen. ¹⁵ Innis, “**Ilaalladhaa! Doqnummaa hunda irraas of eegaa; jireenyi nama tokkoo baay’ina qabeenya isaatiin hin murteeffamuutii**” jedheen.

¹⁶ Innis akkana jedhee fakkeenya kana isaanitti hime; “**Lafti qotiisaa namicha sooreessa tokkoo midhaan guddaa kenneef.**” ¹⁷ Namichi sunis, ‘Ani waan lafan itti midhaan koo galfadhu hin qabneef maal gochuu naa wayya?’ jedhee garaa isaatti yaade.

¹⁸ “**Innis akkana jedhe; ‘Wanni ani godhu kana; gombisaa koo diigee guddaa isaa nan ijaarradha; midhaan koo fi mi’a koo hunda achittin kuufadha.**” ¹⁹ Lubbuu kootiinis, “**Yaa lubbuu ko, ati waan gaarii hedduu kan waggaa baay’eef kuufame qabda; boqodhu; nyaadhu; dhugi; gammadis**” nan jedha.’

²⁰ “**Waaqni garuu, ‘Yaa gowwicha, edanuma lubbuu kee sirraa fudhachuu barbaadu; egaa wannu ati walitti qabatte sun kan eenyuu ta’a?’ jedheen.**”

²¹ “**Kanaafuu namni ofii isaatiif badhaadhummaa kuufatee fuula Waaqaa duratti immoo hin sooromin kam iyyuu akkasuma ta’a.**”

Hin Yaadda’inaa

12:22-31 kwf – Mat 6:25-33

²² Yesuusis barattoota isaatiin akkana jedhe; “**Kanaafuu ani isinittin hima; ‘maal nyaanna?’ jettanii waa’ee jireenya keessanii hin yaadda’inaa; yookaan ‘maal uffanna?’ jettanii waa’ee dhagna keessanii hin yaadda’inaa.**” ²³ Jireenyi nyaata caala; dhagnis uffata caalaatii. ²⁴ Mee arraageyyii ilaalaa: Isaan hin facaafatan yookaan hin haammatan; gombisaa yookaan gumbii hin qaban; ta’us Waaqni isaan soora. Isin immoo hammam simbirroota caalaa gatii guddaa qabdu! ²⁵ Isin keessaa namni yaadda’uudhaan hojjaa isaa irratti dhundhuma tokko dabalachuu danda’u eenyu? ²⁶ Yoos isin erga waan xinnoo akkasii illee godhachuu hin dandeenye, maaliif waan biraaf yaaddoftu ree?

²⁷ “**Daraaraawwan bosonaa akkamitti akka guddatan mee ilaalaa; isaan hin dhama’an yookaan hin fo’an. Ani garuu isinittin hima; Solomoon iyyuu ulfina isaa hunda keessatti, akka tokkoo isaaniitti hin uffanne.**” ²⁸ Isin yaa warra amantii xinnoo nana! Waaqni erga marga dirree kan har’a jiruu fi kan bor immoo ibiddatti naqamutti iyyuu akkasitti uffisee, isinitti immoo hammam kana caalaa haa uffisuu ree. ²⁹ Qalbii keessan waan nyaattan irra yookaan waan dhugdan irra hin kaa’atinaa; waa’ee isaas hin yaadda’inaa. ³⁰ Addunyaan ormootaa waan kana hunda ni barbaadutti; Abbaan keessan akka wannu kun hundinuu isin barbaachisu ni beeka. ³¹ Garuu mootummaa isaa barbaadaa; wannu kun akkasuma isiniif kennama.

³² “**Isin karra xinnoo nana, hin sodaatinaa; Abbaan keessan mootummaa isinii kennuu jaallateeraatii.**” ³³ Waan qabdan gurguraatii hiyyeeyyiif kennaa. Koroojoo hin moofofne, qabeenya dhuma hin qabnes samii irratti, iddoo hattuun itti hin dhi’aannee fi biliinis hin balleessinetti ofii keessaniif kuufadhaa. ³⁴ Idduma badhaadhummaan keessan jiru sana garaan keessanis jiraatii.

Qophaa’anii Eeguu

12:35,36 kwf – Mat 25:1-13; Mar 13:33-37

12:39,40,42-46 kwf – Mat 24:43-51

³⁵ “**Tajaajilaaf hidhadhaatii qophaa’aa; ibsaa keessanis ibsadhaa; ³⁶ akkuma namoota yommuu Gooftaan isaanii cidha fuudhaa fi heerumaatii galee bal-bala dhadha’utti dafanii isaaf banuuf jedhanii qophaa’anii isa eeganii ta’aa.**” ³⁷ Garboonni gooftaan isaanii yeroo galutti isaanii dammaqanii jiran argu sun eebbifamoo dha; ani dhuguman isinitti hima; inni marxifatee akka isaan nyaataaf taa’an ni godha; dhufees isaan tajaajila. ³⁸ Garboonni gooftaan isaanii halkanicha keessaa kutaa lammaffaatti yookaan kutaa sadaffaatti dhufee akkasuma isaanii dammaqanii jiran isaan argu sun eebbifamoo dha. ³⁹ Garuu waan kana hubadhaa: Abbichi manaa utuu sa’aatii kamitti akka hattuun dhufu beekke, silaa akka manni isaa cabsamee seenamu itti hin dhiisu ture. ⁴⁰ Isinis akkasuma qophaa’uu qabdu; Ilmi Namaa sa’aatii isin hin eegnetti dhufaatii.”

⁴¹ Phexrosis, “Yaa Gooftaa, ati fakkeenya kana nu qofatti moo nama hundumatti himta?” jedhee gaafate.

⁴² Gooftaanis akkana jedhee deebise; “Eгаа hojii adeemsisaan amanamaa fi ogeessi kan gooftaan isaa akka inni nyaata isaanii yeroo malutti isaanii kennuuf jedhee garboota isaa irratti isa muudu eenyu?” ⁴³ Garbichi gooftaan isaa yommuu deebi’utti utuu inni akkasuma hojjetuu isa argu sun eebbifamaa dha. ⁴⁴ Ani dhuguma isinitti nan hima; inni qabeenya isaa hunda irratti isa muuda. ⁴⁵ Garbichi sun garuu yoo, ‘Gooftaan koo dhufuuf yeroo dheeraa tura’ ofiin jedhee, garboota dhiiraatii fi dubartootaa tumuu jalqabe, yoo nyaatee dhugee machaa’e, ⁴⁶ gooftaan garbicha sanaa guyyaa inni isa hin eegnee fi sa’aatii inni hin beeknetti ni dhufa. Innis isa kukkuta; warra hin amanne keessattis isa ramada.

⁴⁷ “Garbichi utuu fedhii gooftaa isaa beekuu hin qophoofne yookaan waan gooftaan isaa barbaadu hin hojjenne sun akka malee tumama. ⁴⁸ Nama utuu hin beekin waan isa adabamsiisu hojjete garuu adaba salphaatu isa irra ga’a. Nama wanni baay’een itti kenname hunda irraa waan baay’eeu eegama; nama imaanaan guddaan itti kenname irraa immoo kan caalutu barbaadama.

Gargar Ba’uu Malee Nagaa miti
12:51-53 kwf - Mat 10:34-36

⁴⁹ “Ani ibidda lafa irra buusuufin dhufe; utuu inni ammuma iyyuu qabatee ani akkam hawwa! ⁵⁰ Garuu cuuphaa ani cuuphamu tokkotu jira; hamma inni raawwatamutti ani akka malee nan dhiphadha! ⁵¹ Isin waan ani lafa irratti nagaa buusuuf dhufe seetuu? Akkas miti; ani isinittin hima; ani gargar ba’uu fiduufan dhufe malee nagaa buusuuf hin dhufne. ⁵² Si’achi maatiin nama shan qabu tokko gargar qoodama; namni sadii nama lamatti ka’a; namni lama immoo nama sadiitti ka’a. ⁵³ Abbaan ilmatti, ilmi abbaatti, haati intalatti, intalli haadhatti, amaatiin niitti ilmaatti, niitiin ilmaas amaatii isheetti ka’uudhaan gargar ba’u.”

Bara Ilaalanii Waa Himuu

⁵⁴ Yesuusis tuuta sanaan akkana jedhe; “Isin yommuu duumessa karaa lixa biiftuutiin ol ba’u argitanitti yeruma sana, ‘Bokkaan ni rooba’ jettu; innis ni rooba. ⁵⁵ Yommuu bubbeen kibbaa bubbisutti immoo, ‘Ni ho’a’ jettu; innis ni ho’a. ⁵⁶ Fakkeessitoota nana! Isin bifa lafaatii fi samiitiif hiikkaa kennuu ni beektu. Bara ammaa kanaaf immoo hiikkaa kennuu akkamitti wallaaltu?”

⁵⁷ “Isin maaliif ofuma keessanii waan qajeelaa hin murteessine? ⁵⁸ Ati yommuu amajaajii kee wajjin gara abbaa murtii dhaqxutti, karuma irratti isaan walitti araaramuu cimsii yaali; yoo kanaa achii amajaajiin kee abbaa seeraatti si geessa; abbaan seeraas dabarsee poolisiitti si kenna; poolisiin immoo mana hidhaatti si darbata. ⁵⁹ Ani sitti nan hima; ati hamma saantima ishee dhumaa of irraa baaftutti achii hin baatu.”

13

Qalbii Jijjiirrachuu Yookaan Baduu

¹ Yeroo sana namoonni waa’ee warra Galiilaa kanneen Phiilaaxoos dhiiga isaanii aarsaa isaaniitti make sanaa Yesuusitti himan tokko tokko achi turan. ² Yesuusis deebisee akkana jedheen; “Sababiin namoonni Galiilaa kanneen akkas dhiphataniif waan isaan saba Galiilaa kaan hunda irra cubbamoota turaniif seetuu? ³ Ani isinittin hima; akkas miti; garuu isinis qalbii jijjiirrachuu baannaan hundi keessan akkasuma baddu. ⁴ Yookaan namoonni kudha saddeettan gamoon Saliihoom isaan irratti jgee isaan fixe sun warra Yerusaalem keessa jiraatan kaan hunda irra waan yakka hojjetan seetuu? ⁵ Ani isinittin hima; akkas miti. Garuu isinis qalbii jijjiirrachuu baannaan, hundi keessan akkasuma baddu.”

⁶ Innis akkana jedhee fakkeenya kana dubbate; “Namichi tokko muka harbuu kan iddoo dhaabaa wayinii isaa keessa dhaabame tokko qaba ture; innis muka sana irra ija barbaaduu dhaqee waan tokko illee dhabe. ⁷ Innis hojjetaa iddoo dhaaba wayinichaatiin, ‘Ani waggaa sadan darban kana muka harbuu kana irraa ija barbaadachuuf jedhee marmaraan ture; garuu waan tokko illee irraa hin arganne; muriitti gati! Inni maaliif lafa balleessa?’ jedhe.

⁸ “Namichi sunis deebisee akkana jedheen; ‘Yaa Gooftaa, anuu naannoo isaa goteen xaa’oo itti naqaatii mee waggama tokko haa turu. ⁹ Yoo inni waggaa dhufu ija naqate, gaarii dha! Yoo kanaa achii murtee gatu dandeessa.’”

Dubartiin Dugdi Ishee Goophate Tokko Fayyifamuu Ishee

¹⁰ Yesuus guyyaa Sanbataa tokko manneen sagadaa keessaa isa tokkotti barsiisaa ture. ¹¹ Dubartiin hafuurri hamaan waggaa kudha saddeeti dugda ishee goophesse tokkos achi turte; isheen isaan waan gad gogdeef gonkumaa ol jechuu hin dandeessu turte. ¹² Yesuusis yommuu ishee argetti ofitti ishee waamee, **“Dubartii nana, ati dhukkuba kee irraa fayyiteerta”** jedheen, ¹³ Innis harka isaa ishee irra kaa'e; isheen isaan yeruma sana ol jettee Waaqa galateeffatte.

¹⁴ Bulchaan mana sagadaas sababii Yesuus guyyaa Sanbataatiin nama fayyiseef aaree namootaan, “Guyyaan hojii ja'atu jira; guyyoota sana kottaatii fayyifamaa malee guyyaa Sanbataa hin dhufinaa” jedhe.

¹⁵ Gooftaan immoo akkana jedhee deebiseef; **“Yaa fakkeessitoota! Isin keessaa namni guyyaa Sanbataa qotiyyoo isaa yookaan harree isaa dallaa keessaa hiikee bishaan obaasuu hin geessine jiraa?”** ¹⁶ Yoos dubartiin kun intalli Abrahaam kan Seexanni waggaa kudha saddeeti guutuu hidhee ture kun guyyaa Sanbataatiin hidhaa kana irraa hiikamuun isheef hin malu?”

¹⁷ Yommuu inni waan kana dubbatetti mormitoonni isaa hundi ni qaana'an; namoonni garuu hojjiwwan dinqii kanneen inni hojjechaa ture hundatti ni gammadan.

Fakkeenya Sanyii Sanaaficaatii fi Fakkeenya Raacitii

13:18,19 kwf – Mar 4:30-32

13:18-21 kwf – Mat 13:31-33

¹⁸ Yesuusis akkana jedhee gaafate; **“Mootummaan Waaqaa maal fakkaata? Anis maaliinan wal isa fakkeessa?”** ¹⁹ Mootummaan Waaqaa sanyii sanaaficaa kan namni tokko fuudhee lafa qotiisaa isaa keessatti facaase fakkaata. Sanyiin sunis guddatee muka ta'e; simbirroonis dameewwan isaa irra jiraatan.”

²⁰ Amma illee akkana jedhee gaafate; **“Ani mootummaa Waaqaa maaliinan wal fakkeessa?”** ²¹ Inni raacitii dubartiin tokko fuutee hamma inni guutummaatti bukeessutti daakuu safartuu sadiitti makte fakkaata.”

Balbala Dhiphaa

²² Yesuusis utuu gara Yerusaaalem deemuu namoota barsiisaa magaalaawwanii fi gandoota keessa darbaa ture. ²³ Namichi tokkos, “Yaa Gooftaa warri fayyifaman namoota muraasa qofaa?” jedhee isa gaafate.

Innis akkana isaaniin jedhe; ²⁴ **“Balbala dhiphaadhaan seenuuf tattaaffadhaa; ani isinittin hima; namoonni baay'een seenuu ni yaaluutii; garuu hin danda'an.** ²⁵ Abbaan mana sanaa takkaa ka'ee balbalicha cufannaan isin ala dhaabatani balbala rurrukutaa, ‘Yaa Gooftaa balbala nuu bani’ jettanii kadhattu.

“Inni garuu deebisee, ‘Ani isin hin beeku yookaan eessaa akka dhuftan hin beeku’ isiniin jedha.

²⁶ **“Isin immoo, ‘Nu si wajjin nyaannee dhugneerra; atis daandii keenya irratti barsiifteerta’ jettuun.**

²⁷ **“Inni garuu deebisee, ‘Ani isin hin beeku yookaan eessaa akka dhuftan hin beeku. Isin warri hammina hojjetan hundinuu na biraa badaa!’ jedha.**

²⁸ **“Yommuu Abrahaam, Yisihaaq, Yaaqoobii fi raajota hunda mootummaa Waaqaa keessatti argitanii, ofii keessanii immoo gad darbataman, achitti boo'uu fi ilkaan qaruu ta'a.** ²⁹ Namoonnis ba'a biiftuutii fi lixa biiftuutii, kaabaa fi kibbaa dhufanii mootummaa Waaqaa keessatti maaddiitti ni dhi'aatu.

³⁰ **Dhugumaanuu kanneen warra dhumaa ta'an keessaa kanneen warra jalqabaa, kanneen warra jalqabaa ta'an keessaa immoo warra dhumaa ta'an jiru.”**

Yesuus Yerusaalemiif Gadduu Isaa

13:34,35 kwf – Mat 23:37-39

13:34,35 kwi – Luq 19:41

³¹ Yeroo sana Fariisota keessaa namoonni tokko tokko gara Yesuus dhufanii, “Sababii Heroodis si ajjeesuu barbaaduuf asii deemii iddoo biraa dhaqi” jedhaniin.

³² Innis akkana jedhee deebise; **“Dhaqaatii waangoo sanaan, ‘Kunoo, ani har'aa fi bori hafuurota hamoo nan baasa; namoota dhukkubsatanis nan fayyisa; guyyaa sadaffaatti immoo hojii koo nan fixadha’ jedhaa.** ³³ Waan fedhe iyyuu taanaan, ani har'aa fi bori, iftaanis adeemsa koo itti fufuutu naa mala; raajiin Yerusaalemiin alatti du'uu hin qabuutii!

³⁴ **“Yaa Yerusaaalem, yaa Yerusaaalem, ati kan raajota ajjeefu, warra gara keetti ergamanis kan dhagaadhaan tumtu, akkuma indaanqoon cuucii ishee qoochoo ishee jalatti walitti qabattu sana anis ijoollee kee walitti qabuuf yeroo meeqaan hawwe! Isin garuu hin barbaanne.** ³⁵ Kunoo, manni keessan onee isinii hafa.

Ani isinittin hima; isin hamma, 'Inni maqaa Gooftaatiin dhufu sun eebbifamaa dha' jettanitti lammata na hin argitan."

14

Yesuus Mana Fariisicha Tokkootti

¹ Guyyaa Sanbataa tokko yommuu Yesuus buddeena nyaachuuf mana Fariisicha beekamaa tokkoo dhaqetti, namoonni xiyyeeffatanii isa ilaalaa turan. ² Namichi dhagni isaa dhiita'e tokkos fuula isaa dura ture. ³ Yesuus, **"Guyyaa Sanbataatiin nama fayyisuun ni eeyyamama moo hin eeyyamamu?"** jedhee Fariisotaa fi hayyoota seeraa gaafate. ⁴ Isaan garuu ni cal'isan; innis namicha harkaan qaqqabee fayyisee gad isa lakkise.

⁵ Innis, **"Isin keessaa namni tokko yoo ilma yookaan qotiyyoo guyyaa Sanbataatiin boolla keessa bu'e qabaate, inni yeruma sana harkisee boolla keessaa hin baasuu?"** jedhee isaan gaafate. ⁶ Isaan garuu deebii kennuu hin dandeenye.

⁷ Innis yommuu akka keessumoonni sun iddoo ulfinaa filatan hubatetti akkana jedhee fakkeenya kana isaanitti hime; ⁸ **"Yoo namni tokko cidha fuudhaa fi heerumaatti si waame, iddoo ulfinaa hin taa'in; tarii namni si caalaa ulfina qabu tokko waamameera ta'aatii.** ⁹ Namichi isin lamaanuu waame sun dhufee, 'Namicha kanaaf ka'i' siin jedha; atis qaanoftee dhaqqee lafa iddoo hundumaa gad ta'e teessa. ¹⁰ Ati garuu yommuu waamamtu akka namichi si waame sun yeroo dhufutti, 'Yaa michuu koo iddoo ol aanutti hiiqi' siin jedhuuf dhaqii lafa iddoo hundumaa gad ta'e taa'i; yoo fuula warra si wajjin maaddiitti dhi'aatan hundumaa duratti ulfina argattaatii. ¹¹ Namni ol of qabu hundinuu gad qabamaatii; namni gad of qabu hundinuu immoo ol qabama."

¹² Yesuus namicha isa waame sanaan akkana jedhe; **"Ati yommuu laaqana yookaan irbaata qopheessitu michoota kee yookaan obboloota kee, yookaan firoota kee, yookaan olloota kee warra sooreyyii hin waamin; yoo akkas goote isaanis deebisanii si waamu; gatiin kees siif deebifama.** ¹³ Garuu yommuu cidha qopheessitu hiyyeeyyii, naafa, okkolaa fi jaamaa waami. ¹⁴ Sababii isaan waan siif deebisan hin qabneef ati ni eebbifamta; gatiin kee guyyaa du'aa ka'uu qajeeltotaatti siif deebifamaatii."

Fakkeenya Cidha Guddaa

14:16-24 kwi - Mat 22:2-14

¹⁵ Warra isa wajjin maaddiitti dhi'aatan keessaa namichi tokko yommuu waan kana dhaga'etti Yesuusiin, "Namni mootummaa Waaqaa keessatti maaddiitti dhi'aatu eebbifamaa dha" jedhe.

¹⁶ Yesuus immoo akkana jedhee deebise; **"Namichi tokko cidha guddaa qopheessee keessumoota hedduu affeere.** ¹⁷ Namichi sunis sa'aatii nyaataatti akka inni, 'Kunoo, wanni hundinuu qopheeffameeraatii kottaa' jedhee warra affeeraman sanatti himuuf garbicha isaa erge.

¹⁸ **"Garuu isaan hundi bifuma tokkoon sababa dhi'eeffachuu jalqaban; inni jalqabaa, 'Ani lafa qotiisaa bitadheera; kanaafuu dhaqeen ilaaluu qabaatii maaloo na hin komatin' jedheen.**

¹⁹ **"Inni kaan, 'Ani qotiyyoo cimtii shan bitadheera; isaan leenjisuuf deemuutin jiraatii, maaloo na hin komatin' jedheen.**

²⁰ **"Amma illee inni kaan, 'Ani dhi'oon niitii fuudhe; kanaafuu dhufuu hin danda'u' jedheen.**

²¹ **"Garbichi sunis deebi'ee waan kana gooftaa isaatti hime. Abbaan mana sanaas aaree, 'Dafii karaa guddaa fi daandii qal'aa magaalatti achi ba'iitii hiyyeeyyii, naafa, jaamaa fi okkolaa fidii ol seensis' jedhee garbicha isaa ajaje.**

²² **"Garbichi sunis, 'Yaa gooftaa, wanni ati ajajje hundi raawwateera; garuu amma illee iddoo jira' jedheen.**

²³ **"Gooftichis garbicha isaatiin akkana jedhe; 'Akka manni koo guutamuu karaa guddaa fi daandii baadiyyaatti achi ba'iitii akka isaan ol galan dirqisiisi.**

²⁴ **Ani isinittin hima; namoota waamaman sana keessaa namni tokko iyyuu maaddii koo irraa afaaniin hin qabu.'"**

Gatii Barataa Yesuus Ta'uun Nama Baasisu

²⁵ Namoonni baay'een Yesuus wajjin deema turan; innis garagalee akkana isaaniin jedhe; ²⁶ **"Namni gara koo dhufu kam iyyuu yoo abbaa isaatii fi haadha isaa, niitii**

isaatii fi ijoollee isaa, obbuloota isaatii fi obboleettota isaa akkasumas lubbuu isaa illee hin jibbine inni barataa koo ta'uu hin danda'u. ²⁷ Namni fannoo offi isaa baadhatee na duukaa hin buune kam iyyuus barataa koo ta'uu hin danda'u.

²⁸ "Mee isin keessaa namni tokko gamoo ijaarrachuu barbaada haa jennuu; namichi sun gamoo sana ijaaree fixuuf horii ga'aa qabaachuu fi qabaachuu baachuu isaa beekuuf duraan dursee taa'ee gatii isaa hin herregatuu? ²⁹ Yoo kanaa achii yommuu inni hundee kaa'ee fixuu dadhabutti, namoonni argan hundi itti qoosu. ³⁰ Isaanis, 'Namichi kun ijaaruu jalqabee fixuu dadhabe' jedhu.

³¹ "Yookaan mee mootiin tokko mootii biraa loluu dhaga haa jennuu; inni mootii loltoota kuma digdamaan isatti dhufu tokko loltoota kuma kudhaniin of irraa loluu danda'uu fi danda'uu baachuu isaa duraan dursee taa'ee itti hin yaaduu? ³² Yoo hin dandeenye immoo utuu mootichi kaan isa irraa fagoo jiruu bakka bu'oota itti ergee akka nagaan bu'u kadhata. ³³ Akkanumas isin keessaa namni waan qabu hunda hin dhiifne kam iyyuu barataa koo ta'uu hin danda'u.

³⁴ "Soogiddi gaarii dha; garuu yoo inni mi'aa isaa dhabe, mi'aa isaa akkamiin deebifamuu danda'a? ³⁵ Inni biyyoof yookaan tuulaa kosiitiif faayidaa hin qabu; inni gad gatama.

"Namni gurra dhaga'u qabu kam iyyuu haa dhaga'u."

15

Fakkeenya Hoolaa Badee

15:4-7 kwf - Mat 18:12-14

¹ Gaaf tokko warri qaraxa fuudhanii fi cubbamooni hundi Yesuus dhaqqeeffachuudhaaf isa biratti walitti qabamaa turan. ² Fariisonnii fi barsiistonni seeraa garuu, "Namichi kun cubbamoota simata; isaan wajjinis ni nyaata" jedhanii guunguman.

³ Yesuus akkana jedhee fakkeenya kana isaanitti hime; ⁴ "Isin keessaa namni hoolota dhibba qabu tokko yoo hoolaan tokko jalaa bade, hoolota sagaltamii sagallan kaan lafa tikaatti dhiisee hamma hoolaa bade sana argatutti kan barbaaduu hin deemne eenyu? ⁵ Yommuu argatus gammadee gatiitii isaa irratti baatee, ⁶ mana isaatti gala. Innis michoota isaatii fi olloota isaa walitti waamee, 'Ani hoolaa koo kan bade sana argadheeraatii na wajjin gammadaa' jedha. ⁷ Ani isinittin hima; sababii qajeeltota qalbii jijjiirrachuun isaan hin barbaachifne sagaltamii sagalii irra sababii cubbamaa qalbii jijjiirratu tokkootiif samii keessatti gammachuun guddaan akkasuma ni ta'a.

Fakkeenya Saantima Badee

⁸ "Yookaan mee dubartii saantima meetii kudhan qabdu jalaa tokko badeera haa jennuu; isheen ibsaa qabsiifatee, manas hartee hamma saantima sana argatutti jabeessitee hin barbaaddattuu? ⁹ Isheenis yommuu argatutti michoota isheetii fi olloota ishee walitti waamtee, 'Ani saantima koo kan bade sana argadheeraatii na wajjin gammadaa' jetti. ¹⁰ Ani isinittin hima; sababii cubbamaa qalbii jijjiirratu tokkootiif ergamoonni Waaqaa akkasuma ni gammadu."

Fakkeenya Ilma Badee

¹¹ Yesuus ittuma fufee akkana jedhe; "Namicha ilmaan lama qabu tokkotu ture. ¹² Imi quxisuun abbaa isaatiin 'Yaa abbaa ko, qabeenya kee irraa qooda na ga'uu naa kenni' jedhe. Abbaanis qabeenya isaa lamaan isaaniitiif ni hire.

¹³ "Imi quxisuun sunis utuu hin turin waan qabu hunda walitti qabatee biyya fagoo dhage; achittis qabeenya isaa jireenya bashannanuu irratti balleesse. ¹⁴ Erga inni waan hunda fixee booddee beelli hamaan biyya sanatti bu'e; innis rakkachuu jalqabe. ¹⁵ Kanaafuu dhagee lammiiwwan biyyasii keessaa isa tokkotti gale; namichi sunis akka inni booyyee tiksuuf lafa tikaatti isa erge. ¹⁶ Gurbichis qola booyeen nyaattu sana nyaatee garaa guutachuu kajeela ture; garuu namni tokko iyyuu waa isatti hin kennu ture.

¹⁷ "Innis yommuu of beeketti akkana jedhe; 'Tajaajiltoonni mana abbaa kootti qacaraman hammamitu buddeena ga'ee irraa hafu qaba! Ani garuu asitti beelaan nan du'a. ¹⁸ Ani ka'een abbaa kootti deebi'ee akkana jedhaan; 'Yaa abbaa ko, ani samii fi sitti cubbuu hojjedheera. ¹⁹ Si'achi ilma kee jedhamuun naaf hin malu; tajaajiltoota kee keessaa akka isa tokkootti na ilaali.'" ²⁰ Innis ka'ee gara abbaa isaa dhage.

"Garuu utuu inni fagoo jiruu abbaan isaa isaa argee akka malee garaa laafeef; gara ilma isaattis fiigee itti marmee dhungate.

21 “Gurbichis, ‘Yaa abbaa ko, ani samii fi sitti cubbuu hojjedheera; si’achi ilma kee jedhamuun naaf hin malu’ jedheen.

22 “Abbaan isaa garuu garboota isaatiin akkana jedhe; ‘Dafaatii uffata uffata hunda caalu fidaa isatti uffisaa; quba isaatti qubeelaa, miilla isaattis kophee kaa’aa. 23 Dibicha gabbataa fidaatii qalaa; haa nyaannuu; haa gammannus. 24 Ilmi koo kun du’ee tureetii; amma immoo jireenyatti deebi’eeraa. Badees ture; amma immoo argameera.’ Isaanis gammaduu jalqaban.

25 “Yeroo sanatti ilmi inni hangafti lafa qotiisaa ture; innis yeroo dhufee manatti dhi’aatetti muuziiqaa fi sirba dhaga’e. 26 Kanaafuu tajaajiltoota keessaa nama tokko waamee waan ta’aa jiru gaafate. 27 Tajaajilaan sunis deebisee, ‘Obboleessi kee galeera; abbaan kees waan ilma isaa nagaan fi fayyaadhaan argateef dibicha gabbataa qale’ jedheen.

28 “Obboleessi hangafni garuu aaree ol seenuu dide; kanaaf abbaan isaa gad ba’ee isa kadhate. 29 Inni immoo deebisee abbaa isaatiin akkana jedhe; ‘Ilaa ani waggoota kanaan hunda akkuma garbaatti siif hojjechaan ture; ajaja kee illee didee hin beeku. Ati garuu akka ani michoota koo wajjin gammaduuf takkumaa ilmoo re’ee tokko illee naa hin kennine. 30 Garuu ilmi kee inni sagaagaltoota wajjin qabeenya kee balleesse kun deebi’ee manatti gallaan dibicha gabbataa qalteef!’

31 “Abbaan isaas akkana jedheen; ‘Yaa ilma koo ati yeroo hunda anuma wajjin jirta; wannii ani qabu hundinuus kanuma kee ti. 32 Garuu obboleessi kee inni du’ee ture kun waan jireenyatti deebi’eef nu gammaduu fi ililchuu qabna. Inni badee ture; amma immoo argameera.’”

16

Fakkeenya Hojii Adeemsisaa Abshaala Tokkoo

1 Yesuus barattoota isaatiin akkana jedhe; “Namicha sooreessa nama hojii isaa adeemsisuuf qabu tokkoota ture; akka hojii adeemsisaan sun qabeenya isaa jalaa balleessaa jirus sooreessa sanatti himan. 2 Sooreessi sunis hojii adeemsisaa sana ofitti waamee, ‘Wanni ani waa’ee kee dhaga’u kun maalii? Ati si’achi waan hojii adeemsisaa ta’uu hin dandeenyeef, hojii adeemsisaa turte sana irratti gabaasa naa dhi’eessi’ jedheen.

3 “Hojii adeemsisaan sunis garaa isaa keessatti akkana jedhe; ‘Waan gooftaan koo hojii keessaa na baasuuf, maal naa wayya? Lafa qotuuf humna hin qabu; kadhachuu immoo nan qaana’a. 4 Akka yeroo ani hojii keessaa ari’amutti namoonni mana isaaniitti na simataniif waanan godhu anuu beeka.’

5 “Innis warra gatiin gooftaa isaa irra jiru tokko tokkoon waamee, isa jalqabaatiin, ‘Idaan gooftaa koo hammamitu sirra jira?’ jedhee gaafate.

6 “Namichis, ‘Zayitii ejersaa hubboo dhibba saddeeti’ jedhee deebise. ‘Hojii adeemsisaan sunis, ‘Waraqaa walii galtee kee hoo’u; dafii taa’iitii dhibba afur jedhii barreessi’ jedheen.

7 “Isa lammaffaadhaanis, ‘Sirra immoo hammamitu jira?’ jedhee gaafate.

8 “Innis, ‘Qamadii guuboo kuma tokkoo’ jedheen.

9 “Hojii adeemsisaan sunis, ‘Waraqaa walii galtee kee hoo’uutii, 80 jedhii barreessi’ jedheen.

10 “Hojii adeemsisaan hin amanamne sun waan abshaala ta’eef gooftichi isa jaje; namoonni addunyaa kanaa warra akka isaani wajjin haajaa isaani guutachuu irratti namoota ifaa caalaa abshaalotaatii. 11 Ani isinitin hima; akka isaan yeroo qabeenya sun dhumutti mana bara baraatti isin simataniif qabeenya addunyaatiin ofii keessaniif michoota horadhaa.

12 “Namni waan xinnootti amanamu kam iyyuu waan baay’eettis ni amanama; namni waan xinnootti hin amanamne kam iyyuu immoo waan baay’eettis hin amanamu. 13 Yoos isin yoo qabeenya addunyaatti hin amanamne, qabeenya dhugaatti immoo eenyutu isin amana ree? 14 Yoo isin qabeenya nama biraa irratti hin amanamne, qabeenya mataa keessanii immoo eenyutu isinii kenna ree?

15 “Namni gooftota lama tajaajiluu danda’u tokko iyyuu hin jiru. Isa tokko jibbitee isa kaan jaallattaatii; yookaan isa tokkoof of kennitee isa kaan immoo tuffatta. Isinis Waqaa fi maallaqa tajaajiluu hin dandeessan.”

16 Fariisonni warri maallaqa jaallatan waan kana hunda dhaga’anii Yesuusitti goosan.

17 Innis akkana isaaniin jedhe; “Isin warra fuula namootaa duratti qajeeltota of

gootanii dha; Waaqni garuu garaa keessan beeka. Wanni nama biratti akka malee kabajamu fuula Waaqaa duratti jibbisiisaadhaatii.

Barsiisa Dabalame

¹⁶ “Seerrii fi raajonni hamma Yohannisitti labsaman. Yeroo sanaa jalqabee wangeelli mootummaa Waaqaa lallabamaa jira; namni hundinuus itti galuuf wal dhiiba. ¹⁷ Seera keessaa tuqaan hundumaa gadii dhabamuu irra samii fi lafti dhabamuutu salphata.

¹⁸ “Namni niitii isaa hiikee dubartii biraa fuudhu kam iyyuu ejja raawwata; namni dubartii dhirsa ishee hiiakte fuudhus ejja raawwata.

Namicha Sooressaa fi Al’aazaar

¹⁹ “Namicha sooressa uffata dhiilgee haphii kan quncee talbaa irraa hojjetame uffatee, guyyuma guyyaan qananiidhaan jiraatu tokkootu ture. ²⁰ Karra isaa dura immoo namichi hiyyeessi Al’aazaar jedhamu kan dhagni isaa hundi mammadaa’e tokko ciisaa ture. ²¹ Innis hambaa maaddii sooressa sanaa irraa harca’u illee nyaachuu ni kajeela ture; saronni iyyuu dhufanii madaa isaa arraabu turan.

²² “Gaaf tokko namichi hiyyeessi sun duunaan ergamoonni Waaqaa isa baatanii gara bobaa Abrahaamitti isa geessan; sooressichis du’ee awwaalame. ²³ Utuu Sii’ool keessatti dhiphachaa jiruus ol mil’atee Abrahaamin fagootti, Al’aazaarin immoo bobaa Abrahaam keessatti arge. ²⁴ Innis iyyee, ‘Yaa Abbaa koo Abrahaam, waan ani ibidda kana keessatti dhiphachaa jiruuf maaloo garaa naa laafiitii akka inni fiixee quba isaa bishaan keessa cuuphee arraba koo naa qabbaneessuuf Al’aazaarin naa ergi’ jedheen.

²⁵ “Abrahaam garuu akkana jedhee deebise; ‘Yaa ilma ko, ati bara jirenya keetiitti waan gaarii akka argatte, Al’aazaar immoo waan hamaa akka argate yaadadhu; amma garuu asitti isatti toleera; ati immoo dhiphachaa jirta. ²⁶ Waan kana hunda irrattis, akka warri nu biraa gara keessan dhufuu barbaadan dhufuu hin dandeenyeef yookaan akka warri isin biraa gara keenyatti ce’uu hin dandeenyeef nuu fi isin gidduu boolla guddaatu jira.’

²⁷ “Dureessi sunis akkana jedhee deebise; ‘Yoos yaa Abbaa, akka ati gara mana abbaa kootti Al’aazaarin naa ergitu sin kadhada; ²⁸ ani obboloota shan qabaatii; akka isaanis iddoo dhiphinaa kana hin dhufneef inni dhaqee isaan haa akeekkachiisu.’

²⁹ “Abrahaam garuu, ‘Isaan Musee fi raajota qabu; isaanuma haa dhaga’an’ jedhe.

³⁰ “Dureessichis, ‘Akkas miti; yaa abbaa koo Abrahaam; yoo warra du’an keessaa namni tokko gara isaanii dhaqe garuu, isaan qalbii ni jijjiirratu’ jedheen.

³¹ “Abrahaamis, ‘Isaan yoo Musee fi raajota hin dhageenye, yoo namni tokko warra du’an keessaa ka’e illee hin amanan’ jedheen.”

17

Cubbuu, Amantii, Dirqama

¹ Yesuus barattoota isaatiin akkana jedhe; “Wantoonni akka namoonni gufatan godhan dhufuun hin oolu; garuu nama wantoonni kunneen karaa isaatiin dhufaniif wayyoo! ² Inni warra xixinnaa kanneen keessaa tokko illee gufachiisuu mannaa dhagaan daakuu morma isaatti hidhamee galaanatti utuu darbatamee isaa wayya ture. ³ Kanaafuu of eeggadhaa.

“Yoo obboleessi kee yakka sitti hojjete isa ifadhu; yoo inni qalbii jijjiirrate immoo dhiifama godhiif. ⁴ Yoo inni guyyaa tokkotti yeroo torba cubbuu sitti hojjetee yeroo torbanuu sitti deebi’ee, ‘Ani qalbii nan jijjiirradha’ siin jedhe dhiifama godhiif.”

⁵ Ergamoonnis Gooftaadhaan, “Amantii keenya nuu guddisi” jedhan.

⁶ Innis akkana jedhee deebise; “Isin amantii xinnoo hamma ija sanaaficaa illee yoo qabaattan, muka qilxuu kanaan, ‘Buqqa’iitii galaana keessa dhaabami!’ jechuu dandeesu; innis isinii ajajama.

⁷ “Isin keessaa namni tokko garbicha lafa qotu yookaan kan hoolota tiksu qaba haa jennu; inni yeroo garbichi sun alaa galutti, ‘Dafii kottuutii taa’ii waa nyaadhu’ jedhaanii? ⁸ Qooda kanaa inni garbicha sanaan, ‘Irbaata naa qopheessi; hamma ani nyaadhee dhugutti marxifadhuutii na tajaajili; sana booddee ati ni nyaattaa; ni dhugas’ hin jedhuunii? ⁹ Namichis sababii garbichi sun waan

ajajame sana raawwateef isa ni galateeffataa? ¹⁰ **Kanaafuu isinis yommuu waan ajajaman hunda raawwattanitti, 'Nu garboota faayidaa hin qabnee dha; waanuma hojjechuu qabnu qofa hojjenne' jedhaa."**

Lamxaa'onni Kudhan Fayyuu Isaanii

¹¹ Yesuus utuu Yerusaalem dhaquu Samaariyaa fi Galiilaa gidduu darbaa ture. ¹² Akkuma inni ganda tokko seeneenis, namoonni lamxaa'an kudhan isatti dhufan. Isaanis fagoo dhadhaabatani, ¹³ sagalee isaanii ol fudhatanii, "Yesuus yaa Gooftaa, nuu na'ii!" jedhan.

¹⁴ Innis yommuu isaan argetti, "**Dhaqaatii lubootatti of argisiisaa!**" jedheen; isaanis utuma deema jiranuu qulqullaa'an.

¹⁵ Isaan keessaas inni tokko yommuu fayyuu isaa argetti sagalee guddaadhaan Waaqaaf ulfina kennaa deebi'ee dhufe. ¹⁶ Adda isaatiinis miilla Yesuus irratti gombifamee isa galateeffate; innis nama Samaariyaa ture.

¹⁷ Yesuusis akkana jedhee gaafate; "**Kurnanuu qulqullaa'aniiru mitii? Yoos warri hafan sagallan eessa dhaqan?**" ¹⁸ **Nama ormaa kana malee namni deebi'ee Waaqaaf galata galchu tokko iyyuu hin argamnee?"** ¹⁹ Yesuusis, "**Ka'ii deemi; amantiin kee si fayyiseeraatii**" jedheen.

Dhufaatii Mootummaa Waaqaa

17:26,27 kwf - Mat 24:37-39

²⁰ Fariisonnis mootummaan Waaqaa yoom akka dhufu Yesuusin gaafatan; innis akkana jedhee deebiseef; "**Mootummaan Waaqaa namatti mul'achaa hin dhufu;**" ²¹ **namoonnis, 'Mootummaan Waaqaa kunoo as jira' yookaan 'Kunnoo achi jira' hin jedhan; mootummaan Waaqaa isin gidduu jiraatii."**

²² Innis barattoota isaatiin akkana jedhe; "**Yeroon isin itti guyyoota Ilma Namaa keessaa isa tokko arguu hawwitan ni dhufa; garuu hin argitan.**" ²³ **Namoonni, 'Inni kuunnoo achi jira!' yookaan 'Kunoo as jira' isiniin jedhu; isin garuu hin dhaqinaa; isaan duukaas hin bu'inaa.** ²⁴ **Ilmi Namaa guyyaa isaatti akkuma balaqqeessi balaqqeessa'ee gama tokkoo hamma gama kaaniitti samii ibsuu ni ta'aatii.** ²⁵ **Inni garuu duraan dursee akka malee dhiphachuu fi dhaloota kanaan tuffatamuu qaba.**

²⁶ "**Akkuma bara Nohi ta'e sana, yeroo Ilma Namaattis akkasuma ni ta'a.**" ²⁷ **Hamma gaafa Nohi doonii seeneetti namoonni nyaachaa, dhugaa, fuudhaa, heerumaas turan. Bishaan badiisaas dhufee hunda isaanii ballesee.**

²⁸ "**Bara Looxis akkasuma ture; namoonni nyaachaa, dhugaa, bitachaa, gurgurachaa, biqiltuu dhaabbachaa, manas ijaarrachaa turan.**" ²⁹ **Guyyaa Looxi Sodoomii ba'etti garuu ibiddii fi dinyiin samii irraa roobee hunda isaanii ballesee.**

³⁰ "**Guyyaa Ilmi Namaa mul'atuttis akkasuma ta'a.**" ³¹ **Guyyaa sana namni bantii manaa irra jiru kan mana keessaa mi'a qabu mi'a sana fudhachuuf gad bu'uu hin malu. Akkasuma immoo namni lafa qotiisaa keessa jiru tokko iyyuu waan tokkoof illee manatti hin deebi'in.** ³² **Niitii Looxi yaadadhaa!** ³³ **Namni lubbuu isaa eeggachuu yaalu kam iyyuu lubbuu isaa ni dhaba; namni lubbuu isaa dhabu kam iyyuu lubbuu isaa ni turfata.** ³⁴ **Ani isinittin hima; halkan sana namoonni lama siree tokko irra ni rafu; inni tokko ni fudhatama; kaan immoo ni hafa.** ³⁵ **Dubartoonni lama walii wajjin midhaan daaku; isheen tokko ni fudhatamti; kaan immoo ni hafti.** [³⁶ **Namoonni lama lafa qotiisaa keessa jiru; tokko ni fudhatama; kaan immoo ni hafa.**]*

³⁷ Isaanis, "Yaa Gooftaa, eessatti?" jedhanii gaafatan.

Innis, "**Iddoo raqni jirutti gogorroowwan walitti qabamu**" jedhee deebiseef.

18

Fakkeenya Haadha Hiyyeessaa Tokkoo

¹ Yesuus akka isaan yeroo hunda kadhachuu qabani fi akka isaan abdii hin kutanne isaan barsiisuuf jedhee fakkeenya tokko barattoota isaatti hime. ² Innis akkana jedhe; "**Magaalaa tokko keessa abbaa murtii kan Waaqa hin sodaanne, namas kan hin kabajne tokkotu ture.**" ³ **Haati hiyyeessaa tokkos magaalaa sana keessa turte; isheenis, 'Diina koo irratti murtii qajeelaa naa kenni' jettee isatti deddeebi'aa turte.**

* **17:36** 17:36 Waraabbileen tokko tokko luqqisaa 36 hin qaban.

⁴ “Innis yeroo gabaabaaf didee ture; ergasii garuu akkana jedhee garaa isaatti yaade; ‘Ani yoon Waaqa hin sodaanne illee, yoon namas hin kabajne illee, ⁵ sababii niitiin kun deddeebitee na rakkiftuuf murtii qajeelaa nan kennaaf; yoo kanaa achii deddeebitee na dadhabsiifti.’”

⁶ Gooftaanis akkana jedhe; “Egaa waan abbichii murtii dabaan sun jedhu dhaga’aa; ⁷ Waaqni immoo filatamtoota isaa warra halkanii guyyaa gara isaatti iyyataniif murtii qajeelaa hin kennuu? Isaan duraa tursaa ree? ⁸ Ani isinittin hima; inni dafee murtii qajeelaa kennaaf; garuu Ilmi Namaa gaafa dhufu lafa irratti amantii ni argataa?”

Fakkeenya Fariischaatii fi Namicha Qaraxa Walitti Qabuu

⁹ Yesuusis namoota qajeelummaa ofiitti amananii warra kaan immoo tuffatanitti akkana jedhee fakkeenya kana hime. ¹⁰ “Namoonni lama Waaqa kadhachuuf gara mana qulqullummaatti ol ba’an; isaanis Fariisicha tokkoo fi nama qaraxa walitti qabu tokko turan. ¹¹ Fariisichi ka’ee dhaabatee, waa’ee mataa isaa akkana jedhee kadhate; ‘Yaa Waaqayyo, ani akka namoota kaanii jechuunis akka saamtotaa, jal’ootaa fi sagaagaltootaa keessumattuu waan akka namicha qaraxa walitti qabu kanaa hin ta’iniif sin galateeffadha. ¹² Ani torbanitti yeroo lama nan sooma; waanan argadhu hundumaa irraas harka kudhan keessaa tokko nan kenna.’

¹³ “Namichi qaraxa walitti qabu sun garuu fagoo dhaabate, qoma isaa dhadha’aa, ‘Yaa Waaqayyo, ani nama cubbamaadhaatii naa na’i!’ jedhe malee ija isaatiin illee ol jedhee gara samii hin ilaalle.

¹⁴ “Ani isinittin hima; namichi kun namicha duraa irra fuula Waaqaa duratti qajeelaa ta’ee mana isaatti gale. Namni ol of qabu hundinuu gad qabamaatii; namni gad of qabu garuu ol qabama.”

Yesuusii fi Ijoollee Xixinnoo

18:15-17 kwf – Mat 19:13-15; Mar 10:13-16

¹⁵ Namoonni akka inni harka isaan irra kaa’uuf daa’immanis Yesuusitti fidaa turan. Barattoonni garuu yommuu waan kana arganitti isaan ifatan. ¹⁶ Yesuus garuu ijoollee sana ofitti waamee akkana jedhe; “Ijoolleen xixinnoon gara koo haa dhufaniitii hin dhowwinaa; mootummaan Waaqaa kan warra akkanaatii. ¹⁷ Ani dhuguman isinitti hima; namni akkuma ijoolleetti mootummaa Waaqaa hin simanne kam iyyuu gonkumaa itti hin galu.”

Fakkeenya Sooressaatii fi Mootummaa Waaqaa

18:18-30 kwf – Mat 19:16-29; Mar 10:17-30

¹⁸ Bulchaan tokko, “Yaa Barsiisaa gaarii, ani jireenya bara baraa dhaaluuf maal gochuun qaba?” jedhee isa gaafate.

¹⁹ Yesuusis akkana jedhee deebise; “Ati maaliif gaarii naan jetta? Waaqa tokkicha malee gaariin hin jiru. ²⁰ Ati ajajawwan ni beekta; ‘Hin ejjin; hin ajjeesin; hin hatin; sobaan dhugaa hin ba’in; abbaa keetii fi haadha keetiif ulfina kenni.’”

²¹ Namichis, “Ani ijoollummaa kootii jalqabee ajajawwan kanneen hunda eegeera” jedhe.

²² Yesuusis yommuu waan kana dhaga’etti, “Amma illee waan tokkotu si duraa hir’ata; waan qabdu hunda gurgurii hiyyeeyyiif kenni; samii keessatti badhaadhummaa ni qabaattaa. Ergasii kottuu na duukaa bu’i” jedheen.

²³ Inni yommuu waan kana dhaga’etti baay’ee gadde; akka malee sooressa tureetii. ²⁴ Yesuusis isa ilaalee akkana jedhe; “Mootummaa Waaqaatii galuun sooreyyiif akkam rakkisaa dha! ²⁵ Dhugumaan namni sooressi mootummaa Waaqaatii galuu irra qaawwa ilmoo keessa ba’uutu gaalaaf salphata.”

²⁶ Warri waan kana dhaga’anis, “Yoos eenyutu fayyuu danda’a ree?” jedhanii gaafatan.

²⁷ Yesuusis, “Wanni namaaf hin danda’amne, Waaqaaf ni danda’ama” jedhee deebise.

²⁸ Pheexrosis, “Kunoo, nu waan qabnu hunda dhiifnee si duukaa buuneerra” jedheen.

²⁹ Yesuus immoo akkana isaaniin jedhe; “Ani dhuguman isinitti hima; namni sababii mootummaa Waaqaatiif jedhee mana yookaan niitii yookaan obboloota yookaan haadhaa fi abbaa yookaan ijoollee dhiisee, ³⁰ bara kana keessa dachaa baay’ee, hara dhufuuf jiru keessa immoo jireenya bara baraa utuu hin argatin hafu tokko iyyuu hin jiru.”

Yesuus Yeroo Sadaffaa Waa'ee Du'a Isaa Dubbate

18:31-33 kwf - Mat 20:17-19; Mar 10:32-34

³¹ Yesuus warra kudha lamaan kophaatti baasee akkana jedheen; **“Kunoo nu Yerusaaletti ol ba'aa jirra; wanni raajonni waa'ee ilma Namaa barreessan hundinuus ni raawwatama. ³² Inni dabarfamee Namoota Ormaatti ni kennama. Isaanis isatti qoosu; isa arrabsu; isatti tufu; isa garafu; isa ajjeesu. ³³ Innis guyyaa sadaffaatti du'aa ni ka'a.”**

³⁴ Barattoonni garuu waan kana hunda keessaa tokko illee hin hubanne; hiikkaan isaas isaan duraa dhokfamee ture. Inni maal akka dubbachaa tures isaanii hin galle.

Namichi Jaamaan Tokko Fayyifamuu Isaa

18:35-43 kwf - Mat 20:29-34; Mar 10:46-52

³⁵ Yeroo Yesuus Yerikootti dhi'aatetti, namichi jaamaan tokko qarqara karaa taa'ee kadhachaa ture. ³⁶ Innis akka tuunni namootaa karaa sana darbaa jiru dhageenyaan, waan ta'aa ture gaafate. ³⁷ Isaanis, “Yesuus nama Naazreetitu asiin darbaa jira” jedhanii isatti himan.

³⁸ Innis, “Yesuus, yaa ilma Daawit, na maari!” jedhee iyye.

³⁹ Namoonni fuula dura deemaa turanis akka inni cal'isuuf isa ifatan; inni garuu, “Yaa ilma Daawit na maari!” jedhee ittuma caalchisee iyye.

⁴⁰ Yesuusis dhaabatee akka isaan namicha gara isaa fidan ajaje. Yommuu inni gara isaatti dhi'aatetti Yesuus akkana jedhee isa gaafate; ⁴¹ **“Akka ani maal siif godhu barbaadda?”**

Namichis, “Yaa Gooftaa, ani arguun barbaada” jedhee deebise.

⁴² Yesuusis, **“Argi; amantiin kee si fayyiseeraa”** jedheen. ⁴³ Innis yeruma sana argen Waaqa jajachaa Yesuus duukaa bu'e. Namoonni hundinuus yommuu waan kana arganitti Waaqa jajan.

19

Yesuusii fi Zakkewoos

¹ Yesuus Yerikoo seenee achi keessa darbaa ture. ² Namichi Zakkewoos jedhamu tokkos achi ture; innis hangafa warra qaraxa walitti qabaniitii fi sooreessa ture. ³ Innis Yesuus nama akkamii akka ta'e arguu barbaade; garuu gabaabaa waan tureef, sababii baay'ina namootaatiif isa arguu hin dandeenye. ⁴ Yesuus waan karaa sana irra darbaa tureef, Zakkewoos isa arguuf jedhee fiigee dura darbee muka qilxuu tokko yaabe.

⁵ Yesuus yommuu iddoo sana ga'etti ol mil'atee, **“Yaa Zakkewoos, har'a mana kee ooluun narra jiraatii dafii gad bu'i”** jedheen. ⁶ Innis yommuusuma gad bu'ee gammachuudhaan isa simate.

⁷ Namoonni hundinuus yommuu waan kana arganitti, “Inni keessummaa ‘Nama cubbamaa’ ta'uu dhaqe!” jedhanii guungumuu jalqaban.

⁸ Zakkewoos garuu ka'ee dhaabatee Gooftaadhaan, “Yaa Gooftaa kunoo, ani walakkaa qabeenya koo hiyyeeyyiif nan kenna; ani yoon nama tokko illee gowwoomsee saamee jiraadhe, waanan fudhadhe sana harka afur godhee nan deebisa” jedhe.

⁹ Yesuus deebisee akkana jedheen; **“Namichi kunis waan ilma Abrahaam ta'eef, har'a fayyinni mana kanaaf dhufeera. ¹⁰ Ilmi Namaa isa bade barbaaduu fi fayyisuudhaaf dhufeetii.”**

Fakkeenya Minnaanii Kudhannanii

19:12-27 kwi - Mat 25:14-30

¹¹ Yesuusis utuma isaan waan kana dhaga'aa jiranuu itti fufee, fakkeenya tokko isaanitti hime; kanas sababii inni Yerusaaletti dhi'aatee fi sababii namoonni waan mootummaan Waaqaa yeruma sana mul'atu se'aniif dubbate. ¹² Innis akkana jedhe; **“Namichi sanyii mootii tokko muudamee mootii ta'ee deebi'uuf biyya fagoo dhaqe. ¹³ Namichi sunis garboota isaa keessaa nama kudhan waamee, ‘Hamma ani deebi'utti maallaqa kanaan daldalaa’ jedhee minnaanii kudhan isaanitti kenne.**

¹⁴ **“Namoonni biyya isaa garuu isa jibbanii, ‘Akka namichi kun nurratti mootii ta'u hin feenu!’ jedhanii bakka bu'oota isaanii isa duubaan ergatan.**

¹⁵ **“Innis erga muudamee mootii ta'ee deebi'ee booddee garboonni inni maallaqa itti kennee ture sun ittiin daldalanii maal akka argatan beekuuf jedhee nama itti ergee isaan waamsise.**

¹⁶ **“Garbichi jalqabaa dhufee, ‘Yaa Gooftaa, minnaaniin kee minnaanii gara biraa kudhan dhaleera’ jedheen.**

¹⁷ “Gooftaan isaas deebisee, ‘Yaa garbicha gaarii, ati waan gaarii hojjetee. Sababii ati waan akka malee xinnoo irratti amanamaa taateef, magaalaa kudhan irratti taayitaa qabaadhu’ jedheen.

¹⁸ “Garbichi lammaffaanis dhufee, ‘Yaa Gooftaa, minnaaniin kee minnaanii gara biraa shan dhaleera’ jedheen.

¹⁹ “Gooftaan isaas deebisee, ‘Atis magaalaa shan irratti mo’i’ jedheen.

²⁰ “Inni sadaffaan immoo dhufee akkana jedhe; ‘Yaa Gooftaa, minnaaniin kee kunoo ti; ani huccuudhaan maree dhokseen ture. ²¹ Ati gara jabeessa waan taateef ani sin sodaadhe; ati waan hin kaa’atin fudhatta; waan hin facaasinis haammatta.’

²² “Gooftaan isaas deebisee akkana jedhe; ‘Yaa garbicha hamaa nana; ani dubbama afaan keetiitiin sittin mura; ati akka ani nama dabaa waan hin kaa’atin fudhatu, waan hin facaasinis haammatu ta’e beekta mitii? ²³ Yoos akka ani yommuun deebi’utti dhala isaa wajjin fudhadhuuf maaliif maallaqa koo mana baankii naa hin kaa’atin ra?’

²⁴ “Gooftichis warra achi dhadhaabataniin, ‘Minnaanii sana isa harkaa fuudhaatii namicha minnaanii kudhan qabuuf kennaa’ jedhe.

²⁵ “Isaanis deebisanii, ‘Yaa Gooftaa, inni duraanuu minnaanii kudhan qaba’ jedhaniin.

²⁶ “Inni immoo deebisee akkana jedhe; ‘Ani isinittin hima; kan qabu hundaafuu itti dabalamee ni kennama; kan hin qabne garuu wannii inni qabu iyyuu irraa fudhatama; ²⁷ diinota koo kanneen akka ani isaan irratti mootii ta’u hin barbaadin immoo as fidaatii fuula koo duratti isaan gogorra’aa.’”

Yesuus Akka Mootiitti Yerusaaalem Seenuu Isaa

19:29-38 kwf - Mat 21:1-9; Mar 11:1-10

19:35-38 kwf - Yoh 12:12-15

²⁸ Yesuus erga waan kana dubbatee booddee Yerusaaalemitti ol ba’uuf isaan dura deema ture. ²⁹ Innis akkuma Beetfaagee fi Biitaaniyaa kanneen tulluu Gaara Ejersaa jedhamu biraa sanatti dhi’aateen barattoota isaa keessaa lama erge; ³⁰ akkanas isaaniiin jedhe; “Gara ganda fuula keessan dura jiru sanaa dhagaa; akkuma achi seentaniinis, ilmoo harree kan namni tokko iyyuu takkumaa hin yaabbatin tokko achitti hidhamee jiru ni argattu. Isa hiikaatii as fidaa. ³¹ Yoo namni tokko iyyuu, ‘Isin maaliif hiiktu?’ jedhee isin gaafate, ‘Gooftaatu isa barbaada’ jedhaa.”

³² Warri ergamanis dhaqanii waan hunda akkuma inni isaanitti himetti argatan. ³³ Utuu isaan ilmoo harree sana hiikaa jiranuus warri harree sanaa, “Ilmoo harree kana maaliif hiiktu?” jedhanii isaan gaafatan.

³⁴ Isaanis, “Gooftaatu isa barbaada” jedhanii deebisan.

³⁵ Ilmoo harree sanas Yesuusitti fidan; uffata isaaniis harree sana irra buusan; Yesuusinis irra teessisan. ³⁶ Utuu inni deemuus namoonni uffata isaanii karaa irra afan.

³⁷ Yeroo inni daandii Tulluu Ejersaa irraa gad bu’utti dhi’aatettis, barattoonni hundi hojii dinqii arganii turan hundatti gammadanii, sagalee guddaan akkana jedhanii Waaqa galateeffachuu jalqaban.

³⁸ “Mootiin maqaa Gooftaatiin dhufu eebbifamaa dha!”*

“Nagaan samii irratti, ulfinnis ol gubbaatti!”

³⁹ Namoota achi turan keessaas Fariisonni tokko tokko Yesuusiin, “Yaa Barsiisaa, barattoota kee ifadhu!” jedhan.

⁴⁰ Innis deebisee, “Ani isinittin hima; yoo isaan cal’isan illee dhagoonni ni iyyu” jedheen.

⁴¹ Yesuusis yommuu Yerusaaalemitti dhi’aatee magaalattii argetti ni boo’eef; ⁴² akkanas jedhe; “Utuu atumti waan har’a nagaa siif kennu beektee gaarii ture! Amma garuu ija kee duraa dhokfameera. ⁴³ Guyyoonni itti diinonni kee koobii sitti ijaaranii, si marsanii, karaa hundaanis ba’uu si dhowwan sitti ni dhufuutii. ⁴⁴ Diinonni si’ii fi ijoollee kee warra dallaa kee keessa jiraatan biyyootti maku. Isaan dhagaa tokko dhagaa kaan irratti hin dhiisan; ati yeroo itti Waaqni gara kee dhufu hin beekneetii.”

Yesuus Mana Qulqullummaa Keessatti

19:45,46 kwf - Mat 21:12-16; Mar 11:15-18; Yoh 2:13-16

* 19:38 19:38 Far 118:26

⁴⁵ Yesuus mana qulqullummaa seenee warra gurgurachaa turan ari'uu jalqabe. ⁴⁶ Innis, “**‘Manni koo mana kadhannaa ta’a’ jedhamee barreeffameera; isin garuu ‘Holqa saamtotaa’ gootaniirtu**”[†] isaaniin jedhe.

⁴⁷ Guyyuma guyyaanis mana qulqullummaa keessatti barsiisaa ture; luboonni hangafoonni, barsiistonni seeraatii fi dura bu’oonni sabaa garuu isa ajjeesuudhaaf jabeessanii barbaadaa turan. ⁴⁸ Ta’us isaan karaa ittiin isa ajjeesan hin arganne; namoonni hundinuu yaada tokkoon waan inni dubbate dhaggeeffachaa turaniiti.

20

Taayitaan Yesuus Gaaffii Uume

20:1-8 kwf - Mat 21:23-27; Mar 11:27-33

¹ Gaaf tokko utuu Yesuus mana qulqullummaa keessatti namoota barsiisuu, utuu wangeelas lallabuu luboonni hangafoonni fi barsiistonni seeraa maanguddoota wajjin gara isaa dhufan. ² Isaanis, “Ati akka taayitaa maaliitiin waan kana hojjetu nutti himi. Eenyutu taayitaa kana siif kenne” jedhan.

³ Innis akkana jedhee deebise; **“Anis gaaffii tokkon isin gaafadha. Isin immoo natti himaa: ⁴ Cuuphaan Yohannis samii irraa dhufe moo nama biraa dhufe?”**

⁵ Isaanis waliin mari’atanii akkana jedhan; “Yoo nu, ‘Samii irraa dhufe’ jenne inni immoo, ‘Isin maaliif isa hin amanin ree?’ jedhee nu gaafata. ⁶ Yoo nu, ‘Nama biraa dhufe’ jenne garuu namoonni hundinuu akka Yohannis raajii ta’e waan amananiif dhagaadhaan nu tumu.”

⁷ Kanaaf isaan, “Inni eessaa akka dhufe nu hin beeknu” jedhan.

⁸ Yesuus immoo, **“Anis taayitaa maaliitiin akkan waan kana hojjedhu isinitti hin himu”** jedheen.

Fakkeenya Qottuwwanii

20:9-19 kwf - Mat 21:33-46; Mar 12:1-12

⁹ Innis akkana jedhee fakkeenya kana namootatti himuu jalqabe; **“Namichi tokko iddoo dhaabaa wayinii irra wayinii dhaabbatee, qonnaan bultootatti kiraa kennatee biyya fagoo dhaqee yeroo dheeraa ture. ¹⁰ Innis yeroo midhaan walitti qabamutti akka isaan ija iddoo dhaabaa wayinii irraa waa kennaniif garbicha tokko qottuwwan sanatti ergate. Qottuwwan sun garuu tumanii harka duwaa of irraa isa deebisan. ¹¹ Innis garbicha biraa ergate; isaan garuu isas tumanii, qaanessaniis harka duwaa of irraa isa deebisan. ¹² Amma illee garbicha sadaffaa ergate; isaan immoo isas madeessanii gad isa darbatan.**

¹³ **“Ergasii abbichi iddoo dhaabaa wayinii, ‘Maal gochuu naa wayya? Ka’een ilma koo jaallatamaa itti erga; tarii isa ni kabaju ta’aatii’ jedhe.**

¹⁴ **“Qottoonni sun garuu yommuu isa arganitti, ‘Dhaaltuun isa kana; kottaa isa ajjeefnaa; dhaalli sun kan keenya ta’aatii’ jedhanii walii wajjin dudubbatan.**

¹⁵ **Kanaafuu isaan iddoo dhaabaa wayinii keessaa gad baasanii isa ajjeesan.**

“Egaa abbaan iddoo dhaabaa wayinii sanaa maal isaan godhinna laata? ¹⁶ Inni dhufee qottuwwan sana ni ajjeesa; iddoo dhaabaa wayinii sanas namoota biraatti kennata.”

Namoonnis yommuu waan kana dhaga’anitti, “Waaqni waan kana hin fidin!” jedhan.

¹⁷ Yesuus isaan ilaalee, akkana jedhe; **“Egaa inni,**

“‘Dhagaan ijaarttonni tuffatan

dhagaa golee ta’eera jedhamee barreeffame maal jechuu isaati ree’*?”

¹⁸ **Namni dhagaa sana irratti kufu hundinuu caccabee bututa; namni dhagichi irratti kufu kam iyyuu ni daakama.”**

¹⁹ Barsiistonni seeraatii fi luboonni hangafoonni akka inni fakkeenya kana isaaniin mormuun dubbate waan beekaniif yeruma sana isa qabuu barbaadan. Garuu namoota sana sodaatan.

Qeesariif Gibira Kaffaluu

20:20-26 kwf - Mat 22:15-22; Mar 12:13-17

²⁰ Jarris isa gaadaa, akka isaan waan inni dubbatuun isa qabanii dabarsanii humnaa fi taayitaa bulchaatti isa kennaniif jedhanii basaastota nama nagaa of fakkeessan ergan.

²¹ Basaastonni sunis akkana jedhanii isa gaafatan; “Yaa Barsiisaa, nu akka ati waan qajeelaa dubbatuu fi waanuma qajeelaa barsiiftu, akkasumas akka ati dhugaadhaan

karaa Waaqaa barsiisuu malee nama wal hin caalchifne beekna. ²² Qeesaariif gibira kaffaluun eeyyamameera moo hin eeyyamamne?"†

²³ Inni garuu haxxummaa isaanii argee akkana isaaniin jedhe; ²⁴ **"Mee diinaarii tokko natti argisiisaa. Fakkii fi katabbii eenyuutu isa irra jira?"**

Isaanis, "Kan Qeesaar" jedhanii deebisan.

²⁵ Kana irratti inni, **"Yoos kan Qeesaar Qeesaariif, kan Waaqaa immoo Waaqaaf kennaa"** jedheen.

²⁶ Isaanis waan inni dubbateen fuula namootaa duratti isa gabuu hin dandeenye. Deebii isaas dinqisiifatanii cal'isan.

Gaaffii Waa'ee Du'aa Ka'uu

20:27-40 kwf - Mat 22:23-33; Mar 12:18-27

²⁷ Sadauuqota du'aa ka'uun hin jiru jedhan keessaa tokko tokko waa gaafachuuf jedhanii gara Yesuus dhufan; ²⁸ akkanas jedhan; "Yaa Barsiisaa yoo obboleessi nama tokkoo niitii fuudhee utuu ijoollee hin dhalchin du'ee, akka namichi sun niitii sana dhaalee ijoollee dhalchee obboleessa isaatiif sanyii dabarsu Museen nuu barreesseera. ²⁹ Kunoo obbolloota torbatu ture. Inni hangafni niitii fuudhee ijoollee malee du'ee. ³⁰ Inni lammaffaan, ³¹ inni sadaffaanis ishee fuudhan; haaluma wal fakkaatuun isaan torbanuu utuu ijoollee hin dhalchin du'an. ³² Dhuma irratti dubartittiinis ni duute. ³³ Egaa guyyaa du'aa ka'uutti isheen niitii isa kamii taati? Torban isaanii iyyuu ishee fuudhaniiruutii."

³⁴ Yesuusis akkana jedhee deebiseef; **"Namoonna addunyaa kanaa ni fuudhu; ni heerumus. ³⁵ Warri addunyaa dhufuuf jiruu fi du'aa ka'uu keessatti hirmaachuun isaanii malu garuu hin fuudhan; hin heerumanis. ³⁶ Isaan waan akka ergamootaa ta'aniif deebi'anii hin du'an; waan ijoollee du'aa ka'uu ta'aniif isaan ijoollee Waaqaa ti. ³⁷ Garuu Museen iyyuu seenaa waa'ee daggalaa keessatti akka warri du'an du'aa ka'an argisiiseera; inni Gooftaadhaan, 'Waaqa Abrahaam, Waaqa Yisihaaqii fi Waaqa Yaaqoob' jedhee waamaatii. ³⁸ Inni Waaqa warra jiraataniiti malee Waaqa warra du'anii miti; hundinuu isaa jiraatoodhaatii."**

³⁹ Barsiistota seeraa keessaa tokko tokko, "Yaa Barsiisaa, dhugaa jette!" jedhanii deebisan. ⁴⁰ Namni tokko iyyuu deebi'ee gaaffii isa gaafachuuf ija hin jabaanne.

Kiristoos Ilma Eenyuu ti?

20:41-47 kwf - Mat 22:41-23:7; Mar 12:35-40

⁴¹ Yesuusis akkana isaaniin jedhe; **"Isaan akkamitti Kiristoos Silma Daawit jechuu danda'u? ⁴² Daawit mataan isaa iyyuu kitaaba faarfannaa keessatti akkana jedha;**

"'Gooftichi Gooftaa kootiin akkana jedhe;

"Karaa mirga koo taa'i;

⁴³ **hamma ani diinota kee,**

ejjeta miilla keetii siif godhutti."*

⁴⁴ **Daawit 'Gooftaa' jedhee isa waama. Yoos inni akkamitti ilma isaa ta'uu danda'a ree?"**

⁴⁵ Utuu namoonni hundinuu isa dhaga'aa jiranuu, Yesuus barattoota isaatiin akkana jedhe; ⁴⁶ **"Barsiistota seeraa irraa of eeggadhaa. Isaan uffata dhedheeraa uffatanii nanaanna'uu fi gabaa keessattis nagaa gaafatamuu, manneen sagadaa keessatti taa'umsa ulfinaa, lafa cidhaatti immoo iddoo ulfinaa jaallatu. ⁴⁷ Isaanis mana haadha hiyyeessaa saamanii onsu; of argisiisuuf jedhaniis kadhannaa dheeressu. Namoonna kunneen adaba guddaa adabamu."**

21

Buusii Haadha Hiyyeessaa Tokkoo

21:1-4 kwf - Mar 12:41-44

¹ Yesuusis ol mil'atee sooreyyii kennaa isaanii mi'a buusii keessa buusaa jiran arge. ² Akkasumas haadha hiyyeessaa hiyyeettii tokko saantima sibiila diimaa xixinnoo lama buusuu ishee arge. ³ Innis akkana jedhe; **"Ani dhuguman isinitti hima; haati**

† 20:22 20:22 Qeesaariif gibira kaffaluun - Mootummaan Roomaa biyya isaanii qabachuu isaa Yihuudoonni hin beekan ture. Utuu Yesuus hin dhufin waggaa digdamii shaniin dura, sababii gibira kaffaluutiin mootummaa Roomaatti mormiin guddaan tokko ka'ee ture. Kanaaf gaaffiin kun gaaffii miicciiramaa dha. Yesuus yoo kaffaltii gibiraa deeggare, fudhatama nama biratti qabu sana dhaba. Yoo kaffaltii gibiraa morme immoo dabarfamee abbootii aangoo mootummaatti kennama. ‡ 20:37 20:37 Bau 3:6 § 20:41 20:41 yookaan Masiihichi * 20:43 20:43 Far 110:1

hiyyeessaa hiyyeettiin kun warra kaan hunda caalaa buufteerti. ⁴ Namoonni kunneen hundi qabeenya isaanii irraa kennan; isheen garuu hiyyuma ishee keessaa waan ittiin jiraattu hunda kennite.”

Mallattoo Dhuma Baraa

21:5-36 kwf - Mat 24; Mar 13

21:12-17 kwf - Mat 10:17-22

⁵ Barattoota isaa keessaas tokko tokko waa’ee mana qulqullummaa, haala manni qulqullummaa sun dhagaawwan babbareedanii fi kennaawwan Waqaaf kennamaniin itti miidhagfame dudubbachaa turan. Yesuus garuu akkana jedhe; ⁶ “Yeroon itti wanni isin ilaaltan kun hundinuu, utuu dhagaan tokko iyyuu wal irratti hin hafin diigamu tokko ni dhufa.”

⁷ Isaanis, “Yaa barsiisaa, wanni kun yoom ta’a? Mallattoon yeroo wanni kun itti fiixaan ba’uu ga’uu maali?” jedhanii gaafatan.

⁸ Innis akkana jedhee deebise; “Isin akka hin gowwoomfanneef of eeggadha. Namoonni hedduun, ‘Ani isa; yeroon sun dhi’aateera’ jechaa maqaa kootiin ni dhufuutii. Isin garuu isaan duukaa hin bu’inaa. ⁹ Yommuu waa’ee waraanaatii fi waa’ee fincilaa dhageessanitti, hin sodaatinaa. Wanni kun duraan dursee ta’uu qabaatii; dhumni garuu yeruma sana hin ta’u.”

¹⁰ Innis akkana isaaniiin jedhe; “Sabni sabatti, mootummaan mootummaatti ni ka’a. ¹¹ Iddoo garaa garaatti sochiin lafaa guddaan, beellii fi golfaan ni ta’a; samii irrattis wanni sodaachisaanii fi mallattoon gurguddaan ni ta’a.

¹² “Kana hunda dura garuu isaan isin qabu; isin ari’atus. Dabarsanii manneen sagadaatti isin kennu; mana hidhaa keessas isin buusu; isin maqaa kootiif jettanii fuula mootootaatiif fi bulchitootaa duratti ni dhi’effamtu. ¹³ Akkasiin isin anaaf dhugaa baatu. ¹⁴ Isin garuu akkamitti akka falmattan duraan dursitanii akka hin yaaddofne yaadatti qabadhaa. ¹⁵ Anuu afaanii fi ogummaa diinonni keessan tokko iyyuu danda’anii dura hin dhaabanne yookaan hin mormine isiniif nan kennaatii. ¹⁶ Abbaa fi haati, obbolooni, firoonii fi michoonni dabarsanii isin kennu; isin keessaas tokko tokko ni ajjeesu. ¹⁷ Namni hundinuu sababii maqaa kootiif isin jibba. ¹⁸ Garuu rifeensi mataa keessanii tokko iyyuu hin badu. ¹⁹ Isin jabaadhaa dhaabadhaa; yoo lubbuu keessan ni oolfattu.

²⁰ “Isin yommuu Yersaalem loltootaan marfamtee argitanitti akka badiin ishee dhi’aate beekaa. ²¹ Yommuu warri Yihuudaa keessa jiran gaarranitti haa baqatan; warri magaalaa keessa jiranis achii haa ba’an; warri baadiyyaa jiran immoo magaalaa hin seenin. ²² Akka wanni barreeffame hundinuu raawwatamuuf yeroon kun yeroo haaloo baasuutii. ²³ Bara sana keessa dubartoota ulfaatii fi haadhota hoosisaniif wayyoo! Lafa irratti dhiphinni guddaan, saba kanatti immoo dheekkamsi ni dhufaati. ²⁴ Isaanis goraadeedhaan ajjeefamu; booji’amaniis biyyoota ormaa hundatti ni geeffamu; hamma barri Namoota Ormaa dhumutti Yersaalem Namoota Ormaatiin dhidhiitami.

²⁵ “Aduu irratti, ji’a irratti, urjiwwan irrattis mallattoon ni ta’a. Lafa irrattis sababii huursaatii fi dha’aa galaanaatiif saboonni ni muddamu; waan ta’anis ni wallaalu. ²⁶ Namoonnis sababii humnoonni samii irraa raafamaniif, waan addunyaa kanatti dhufuuf jiru yaadda’anii sodaadhaan ni gaggabu. ²⁷ Isaanis yeroo sana utuu Ilmi Namaa humnaa fi ulfina guddaadhaan duumessaan dhufuu ni argu. ²⁸ Yommuu wanni kun ta’uu jalqabutti mataa keessan ol qabadhaa; olis ilaalaa; furamuun keessan dhi’aateeraatii.”

²⁹ Innis akkana jedhee fakkeenya kana isaanitti hime; “Mee muka harbuutii fi muka hunda ilaalaa. ³⁰ Yommuu isaan baala baafatanitti isin mataan keessan iyyuu ilaaltanii akka bonni dhi’aate beekuu dandeessu. ³¹ Akkasuma isinis yommuu wanni kun raawwatamuu isaa argitanitti akka mootummaan Waaqaa dhi’aate ni beektu.

³² “Ani dhuguma isinittin hima; hamma wanni kun hundi ta’utti dhaloonni kun hin darbu. ³³ Samii fi lafti ni darbu; dubbiin koo garuu gonkumaa hin darbu.

³⁴ “Isin of eeggadhaa; yoo kanaa achii qalbiin keessan qananiidhaan, machii fi yaaddoo jireenyaatiin fudhatamee guyyaan sunis utuu isin hin beekin akkuma kiyyoo isin qabata. ³⁵ Guyyaan sun warra lafa irra jiraatan hundatti ni dhufaati. ³⁶ Kanaafuu akka waan dhufuuf jiru hunda jalaa baataniif, akka fuula Ilma Namaa duras dhaabachuu dandeessaniif yeroo hunda dammaqaa; kadhadaas.”

³⁷ Yesuus guyyuma guyyaan mana qulqullummaa keessatti barsiisaa ture; halkan halkan immoo tulluu Gaara Ejersaa jedhamu irra bula ture. ³⁸ Namoonni hundinuu isa dhaggeeffachuuf jedhanii barrii barraqaan mana qulqullummaa dhufu turan.

22

Yihuudaan Yesuusin Dabarsee Kennuu Isaa

22:1,2 kwf – Mat 26:2-5; Mar 14:1,2,10,11

¹ Yeroo sana Ayyaanni Maxinoo kan Faasiikaa jedhamu dhi'aate ture; ² luboonni hangafoonnii fi barsiistonni seeraa waan namoota sodaataniif, mala ittiin Yesuusin ajjeesan barbaadaa turan. ³ Ergasiis seexanni namicha Yihuudaa Keeriyoticha jedhamu kan jara Kudha Lamaan keessaa tokko ture sanatti gale. ⁴ Yihuudaanis gara luboota hangafootaatii fi ajajoota waardiyyaa mana qulqullummaa dhaqee haala ittiin Yesuusin dabarsee kennu irratti isaan wajjin mari'ate. ⁵ Isaanis gammadanii maallaqa isaaf kennuuf walii galan. ⁶ Innis tole jedhee yeroo namoonni hin jirretti Yesuusin dabarsee isaanitti kennuudhaaf haala mijaa'aa eeggachaa ture.

Irbaata Gooftaa

22:7-13 kwf – Mat 26:17-19; Mar 14:12-16

22:17-20 kwf – Mat 26:26-29; Mar 14:22-25; 1Qr 11:23-25

22:21-23 kwf – Mat 26:21-24; Mar 14:18-21; Yoh 13:21-30

22:25-27 kwf – Mat 20:25-28; Mar 10:42-45

22:33,34 kwf – Mat 26:33-35; Mar 14:29-31; Yoh 13:37,38

⁷ Guyyaan Ayyaana Maxinoo kan hoolaan Faasiikaa itti qalamuu qabu ga'ee ture. ⁸ Yesuusis, “**Akka Faasiikaa nyaannuuf dhaqaatii nuu qopheessaa**” jedhee Phexrosii fi Yohannisin erge.

⁹ Isaanis, “Akka nu eessatti qopheessinu barbaadda?” jedhanii isa gaafatan.

¹⁰ Inni immoo deebisee akkana jedhe; “**Akkuma isin magaalaa seentaniin, namichi okkotee bishaanii baatu tokko isinitti dhufa. Gara mana inni seenuutti isa duukaa bu'aatii, ¹¹ abbaa mana sanaatiin, 'Barsiisaan, 'Manni keessummaa, iddoo ani itti barattoota koo wajjin Faasiikaa nyaadhu eessaa?**” siin jedha' jedhaa. ¹² **Abbaan manaa sunis darbii bal'aa mi'a manaatiin guutame tokko isinitti argisiisa. Isinis achitti qopheessaa.**”

¹³ Isaanis dhaqanii akkuma Yesuus isaanitti hime sanatti argatan. Faasiikaas ni qopheessan.

¹⁴ Yommuu sa'aatiin sun ga'etti Yesuusii fi ergamoonni isaa maaddiitti dhi'aatan.

¹⁵ Innis akkana isaaniin jedhe; “**Ani utuu hin dhiphatiniin dura isin wajjin Faasiikaa kana nyaachuu akka malee hawween ture. ¹⁶ Ani isinittin himaatii; hamma Faasiikaan kun mootummaa Waaqaa keessatti raawwatamutti ani deebi'ee isa hin nyaadhu.**”

¹⁷ Innis erga xoofoo fuudhee galata galchee booddee akkana jedhe; “**Kana fudhadhaatii gargar qooddadhaa. ¹⁸ Ani isinitti nan himaatii; ani hamma mootummaan Waaqaa dhufutti ija wayinii kana irraa deebi'ee hin dhugu**” jedhe.

¹⁹ Innis buddeena fuudhee galata galchee, caccabsee isaaniif kennee, “**Kun foon koo kan isiniif kennamuu dha; kanas yaadannoo kootiif godhadhaa**” jedheen.

²⁰ Akkasumas irbaata booddee xoofoo sana fuudhee akkana jedhe; “**Xoofoon kun Kakuu Haaraa dhiiga koo kan isiniif dhangalaafamuun ta'uu dha. ²¹ Garuu harki namicha dabarsee na kennu sanaa kunoo harka koo wajjin maaddii irra jira. ²² Ilmi Namaa akkuma murteeffame sanatti ni deema. Garuu namicha dabarsee isa kennu sanaaf wayyoo!**” ²³ Isaanis namni isaan keessaa waan kana gochuuf jiru eenyu akka ta'e wal gaggaafachuu jalqaban.

²⁴ Akkasumas isaan keessaa namni akka nama nama hundumaa caaluutti ilaalamu eenyu akka ta'e irratti wal falmiin gidduu isaaniitti ka'e. ²⁵ Yesuusis akkana isaaniin jedhe; “**Mootonni Namoota Ormaa isaan irratti gooftummaa mul'isu; warri isaan irratti taayitaa argisiisan immoo Gargaartota ofiin jedhu. ²⁶ Isin garuu akkas ta'uu hin qabdan. Qooda kanaa isin keessaa namni nama hunda caalu, akka quxisuu nama hundaa, bulchaan immoo akka tajaajilaa haa ta'u. ²⁷ Eenyutu guddaa dha? Nama maaddiitti dhi'aatu moo nama tajaajilu? Nama maaddiitti dhi'aatu mitii? Ani garuu isin gidduutti akka tajaajilaa tokkoo ti. ²⁸ Isin immoo warra yeroo qorama koo na wajjin turtanii dha. ²⁹ Akkuma Abbaan koo mootummaa natti kenne, anis akkasuma isinittin kenna; ³⁰ kunis akka isin mootummaa koo keessatti maaddii koo irraa nyaattanii fi dhugdan, akka teessoowwan irra teessanii gosoota Israa'el kudha lamaanitti murtaniif.**”

³¹ “**Yaa Simoon, yaa Simoon; kunoo, Seexanni akkuma qamadiitti isin gingilchuuf kadhateera.** ³² **Yaa Simoon, ani garuu akka amantiin kee hin dadhabneef siif kadhadheera; atis yommuu deebitutti, obbolloota kee jajjabeessi.**”

³³ Sim’oon garuu deebisee, “Yaa Gooftaa, ani si wajjin hidhamuu fi du’uuf illee qophaa’eera” jedhe.

³⁴ Yesuus, “**Yaa Phexros, ani sittin hima; ati har’a utuu indaanqoon hin iyyin akkuma na beektu illee yeroo sadii ni ganta**” jedhee deebise.

³⁵ Yesuusis, “**Yeroo ani horsaa, korojoo yookaan kophee malee isin erge sana waa isin duraa hir’ateera?**” jedhee isaan gaafate.

Isaanis deebisanii, “Wanni tokko iyyuu hin hir’anne” jedhan.

³⁶ Inni immoo akkana isaaniin jedhe; “**Amma garuu yoo horsaa qabaattan fudhadhaa; yoo korojoo qabaattanis fudhadhaa; yoo goraadee hin qabaannes uffata keessan gurguraatii goraadee bitadhaa.** ³⁷ **Wanni, ‘Inni yakkitootatti lakkaa’ame’* jedhamee barreeffame sun akka narratti raawwatamuu qabu ani isinitti hima; wanni waa’ee koo barreeffame raawwatamuu ga’eeraatii.**”

³⁸ Barattoonnis, “Yaa Gooftaa, kunoo goraadee lamatu as jira” jedhan.

Innis, “**Ni ga’a**” jedhee deebiseef.

Yesuus Tulluu Ejersaa Irratti kadhachuu Isaa

22:40-46 kwf - Mat 26:36-46; Mar 14:32-42

³⁹ Yesuusis achii ba’ee, akkuma amala isaa gara Tulluu Ejersaa dhaqe; barattoonni isaas isa duukaa bu’an. ⁴⁰ Innis akkuma iddoo sana ga’een, “**Isin akka qorumsatti hin galleef kadhadaa**” isaaniin jedhe. ⁴¹ Innis hamma darbata dhagaa tokkoo achi hiigee, jilbeenfatees akkana jedhee kadhate; ⁴² “**Yaa Abbaa, yoo fedhii kee ta’e, xooffoo kana narraa fuudhi; garuu akka fedhii malee akka fedhii kootii hin ta’in.**” ⁴³ Ergamaan Waaqaa tokkos samii irraa isatti mul’atee isa jajjabeesse. ⁴⁴ Innis lubbamee jabeessee kadhate; dafqi isaas akka coccopha dhiigaa lafatti cophaa ture.

⁴⁵ Innis yommuu kadhannaa irraa ka’ee gara barattootaatti deebi’etti, isaani gaddaan bututanii rafaaf jiran isaan arge. ⁴⁶ Innis, “**Isin maaliif raftu? Isin akka qorumsatti hin galleef ka’aatii kadhadaa**” isaaniin jedhe.

Yesuus Qabamuu Isaa

22:47-53 kwf - Mat 26:47-56; Mar 14:43-50; Yoh 18:3-11

⁴⁷ Utuma inni amma iyyuu dubbachaa jiruu, tuunni namootaa tokko dhufe; namichi Yihuudaa jedhamu kan warra Kudha Lamaan keessaa tokko ta’e sunis isaan dura deemaa ture. Innis Yesuusin dhungachuuf itti dhi’aate; ⁴⁸ Yesuus garuu, “**Yaa Yihuudaa, ati dhungoodhaan ilma Namaa dabarsitee kennitaa?**” jedhee gaafate.

⁴⁹ Warri isa wajjin turanis yommuu waan ta’uuf jiru arganitti, “Yaa Gooftaa, goraadeedhaan isaan dhoofnuu” jedhan. ⁵⁰ Isaan keessaas namni tokko garbicha luba ol aanaa dha’ee gurra isaa mirgaa irraa kute.

⁵¹ Yesuusis deebisee, “**Dhiisaa! Waan akkanaa itti hin deebi’inaa**” jedhe; gurra namichaas tuttuqee fayyise.

⁵² Ergasiis Yesuus luboota hangafoota, dura bu’oota mana qulqullummaatii fi maanguddoota isa qabuu dhufaniin akkana jedhe; “**Isin goraadee fi bokkuu qabattanii akka nama hattuu qabuutti dhufanii?** ⁵³ **Ani guyyuma guyyaan mana qulqullummaa keessa isin wajjinan ture; isin harkaanuu na hin tuqne. Garuu sa’aatii kun sa’aatii keessan; innis yeroo itti dukkanni mo’uu dha.**”

Phexros Yesuusin Ganuu Isaa

22:55-62 kwf - Mat 26:69-75; Mar 14:66-72; Yoh 18:16-18,25-27

⁵⁴ Isaanis isa qabanii fuudhanii deeman; fidaniis mana luba ol aanaa ol isa seensisan. Phexros immoo fagootti duukaa bu’aa ture. ⁵⁵ Yommuu isaan walakkaa lafa dallaa keessaatti ibidda qabsiisani wali wajjin tataa’anitti Phexros isaan wajjin taa’e. ⁵⁶ Xomboreen tokkos utuu inni ifa ibiddaa keessa taa’ee jiruu isa argite. Isheenis hubattee isa ilaaltee, “Namichi kunis isa wajjin ture” jette.

⁵⁷ Inni garuu, “Dubartii nana, ani isa hin beeku” jedhee gane.

⁵⁸ Yeroo xinnoo booddee namni biraa isa argee, “Atis jara keessaa tokkoo dha” jedhe.

Phexros garuu, “Namichoo, ana miti” jedhee deebise.

⁵⁹ Gara Sa’aatii tokkoo booddee namni biraa, “Namichi kunis waan nama Galiilaa ta’eef dhuguma iyyuu isa wajjin ture” jedhee jabeessee dubbate.

⁶⁰ Phexros immoo deebisee, “Namichoo, ani waan ati jettu kana hin beeku” jedhe. Utuma inni dubbachaa jiruu indaanqoon iyye. ⁶¹ Gooftaanis karagalee Phexrosin ilaale.

* 22:37 22:37 Isa 53:12

Pheoxrosis waan Gooftaan, **“Ati har’a utuu indaanqoon hin iyyin yeroo sadii na ganta”** isaan jedhee ture sana yaadate. ⁶² Innis gad ba’ee hiqqifatee boo’e.

Egdonna Yesuusitti Qoosuu Isaanii

22:63-65 kwf – Mat 26:67,68; Mar 14:65; Yoh 18:22,23

⁶³ Namoonni Yesuusini eegaa turan sun isatti qoosuu fi isa tumuu jalqaban. ⁶⁴ Isaanis isa haguuganii, “Mee raajii dubbadhu! Eenyutu si rukute?” jedhanii isa gaafatan. ⁶⁵ Isaanis isa arrabsaa waan hedduu isaan jedhan.

Yesuus Yaa’ii Yihuudootaa Duratti Dhi’aachuu Isaa

22:67-71 kwf – Mat 26:63-66; Mar 14:61-63; Yoh 18:19-21

23:2,3 kwf – Mat 27:11-14; Mar 15:2-5; Yoh 18:29-37

23:18-25 kwf – Mat 27:15-26; Mar 15:6-15; Yoh 18:39-19:16

⁶⁶ Yommuu lafti bari’ettis yaa’iin maanguddoota saba akkasumas luboonni hangafoonnii fi barsiistonna seera walitti qabaman; yaa’ii isaanii durattis Yesuusini dhi’eessanii, ⁶⁷ “Ati yoo Kiristoos† taate mee nutti himi” jedhaniin.

Yesuus akkana jedhee deebise; **“Yoo ani isinitti hime isin na hin amantan; ⁶⁸ yoo ani isin gaafadhes hin deebifan. ⁶⁹ Garuu si’achi Ilmi Namaa karaa mirga humna Waaqaatiin ni taa’a.”**

⁷⁰ Hundi isaanis, “Yoo ati ilma Waaqaatii ree?” jedhanii gaafatan.

Innis deebisee, **“Akka ana ta’e isinuu ni dubbattu!”** jedhe.

⁷¹ Kana irratti isaan, “Kana caalaa dhuga ba’umsa maalii nu barbaachisa? Nu mataan keenya iyyuu afaanuma isaa irraa dhageenyeerraatii” jedhan.

23

¹ Ergasii yaa’iin sun guutuun ka’ee Yesuusini gara Phiilaaxoositti geesse. ² Isaanis, “Nu utuu namichi kun saba keenya karaa irraa jal’isuu, utuu inni akka Gibirri Qeesaariif hin baafamne godhuu, akkasumas utuu inni akka mataan isaa Kiristoos* mooticha ta’e dubbatuu argineerra” jedhanii isa himachuu jalqaban.

³ Kanaafuu Phiilaaxoos, “Ati mootii Yihuudootaatii?” jedhee Yesuusini gaafate.

Yesuus immoo, **“Atuu jette kaa!”** jedhee deebise.

⁴ Phiilaaxoosis luboota hangafootaa fi tuuta namootaatiin, “Ani namicha kana irratti yakka tokko illee hin arganne” jedhe.

⁵ Isaan garuu ittuma caalchisanii, “Inni Galiilaa irraa jalqabee Yihuudaa hunda keessatti barsiisa isaatiin saba jeeqaa hamma asiitti illee dhufeera” jedhan.

⁶ Phiilaaxoosis yommuu waan kana dhaga’etti, “Namichi kun nama Galiilaatii?” jedhee gaafate. ⁷ Innis yommuu akka Yesuus nama kutaa Heroodis bulchuu ta’e beeketti Heroodisitti isa erge; Heroodis yeroo sana Yerusaalem keessa ture.

⁸ Heroodis yommuu Yesuusini argetti akka malee gammade; inni sababii waa’ee Yesuus dhaga’aa fi hojii dinqin kan inni hojjetu tokko tokko akka arguu abdachaa tureef yeroo dheeraaf isa arguu barbaadaa ture. ⁹ Innis Gaaffii baay’ee isa gaafate; Yesuus garuu deebii tokko illee hin kennineef. ¹⁰ Luboonni hangafoonnii fi barsiistonna seera achi dhadhaabatanii cimsanii isa himachaa turan. ¹¹ Heroodisii fi loltoonni isaa isa tuffatan; isatti qoosanis. Isaanis uffata miidhagaa isatti uffisanii deebisanii Phiilaaxoositti isa ergan. ¹² Guyyuma sana Heroodisii fi Phiilaaxoos walitti michooman; isaan duraan diina walii turaniitti.

¹³ Phiilaaxoosis luboota hangafoota, bulchitootaa fi saba walitti waamee, ¹⁴ akkana isaaniiin jedhe; “Isin namichi kun, ‘karaa irraa saba jal’isa’ jettanii isa natti fiddan; anis fuuluma keessan duratti isa qoree akka inni waan isin ittiin isa himattan sana keessaa tokko illee hojjete hin argine. ¹⁵ Heroodis waan tokko illee isa irratti hin argine; inni deebisee isa nutti ergeeraatii. Akkuma isin argitan kana namichi kun waan du’aan isa ga’u tokko illee hin hojjenne. ¹⁶ Kanaafuu ani namicha kana adabeen gad isa dhiisa.” [¹⁷ Phiilaaxoosis guyyaa ayyaanaatiin nama tokko mana hidhaatii gad isaanii dhiisuun dirqama ture.]†

¹⁸ Isaan garuu sagalee tokkoon iyyanii, “Namicha kana balleessi! Barabbaasin gad nuu dhiisi!” jedhan. ¹⁹ Barabbaas sababii fincila magaalaa keessatti ka’etii fi ajjeechaa namaatiin mana hidhaa keessa buufamee ture.

²⁰ Phiilaaxoosis Yesuusini gad dhiisuu barbaadee amma illee isaanitti dubbate. ²¹ Isaan garuu, “Isa fannisi! Isa fannisi!” jedhanii iyyaa turan.

† **22:67** 22:67 yookaan Masihiicha * **23:2** 23:2 yookaan Masihihi † **23:17** 23:17 Waraabbileen durii tokko tokko luqqisaa kana hin dabalatan.

²² Innis yeroo sadaffaa, “Maaliif? Namichi kun yakka maalii hojjete? Ani yakka du’aan isa ga’u isa irratti hin arganne. Kanaafuu ani isa adabeen gad isa dhiisa” isaaniin jedhe. ²³ Isaan garuu akka inni fannifamuuf sagalee guddaadhaan ittuma cichanii gaafatan; iyyi isaaniis ittuma jabaate. ²⁴ Kanaaf Phiilaaxoos waan isaan kadhatan sana isaaniif kennuu murteesse. ²⁵ Innis namicha sababii fincilaatii fi sababii ajjeechaa namaatiin mana hidhaa keessa buufame kan isaan akka inni hiikamuuf kadhatan sana gad dhiise; Yesuusinn immoo dabarsee fedhii isaaniitti kenne.

Yesuus Fannifamuu Isaa

23:33-43 kwf – Mat 27:33-44; Mar 15:22-32; Yoh 19:17-24

²⁶ Isaanis utuu Yesuusinn geessaa jiranuu Simoon namicha Qareenaa tokko utuu inni baadiyyaadhaa dhufaa jiruu qaban; fannoo sanas isa irra kaa’anii akka inni baatee Yesuus duubaan deemu isa dirqisiisan. ²⁷ Namoonni baay’een, dubartoota keessaas warri isaaf gaddaa fi boo’aa turan isa duukaa bu’an. ²⁸ Yesuusis isaanitti garagalee akkana jedhe; **“Yaa durboota Yerusaaalem, ofii keessanii fi ijoollee keessaniif boo’aa malee naaf hin boo’inaa.”** ²⁹ **Kunoo guyyoonni itti namoonni, ‘dubartoonni dhabdoonni, garaan takkumaa ulfa hin baatini fi harmi takkumaa hin hoosisin eebbifamoo dha’ jedhan ni dhufuutii.** ³⁰ **Yeroo sana, “‘Namoonni gaarraniin, “Nurratti jigaa!”**

tulluuwwaniin immoo, “Nu dhoksa!”[‡]ni jedhu.’

³¹ **Isaan erga muka jiidhaa akkana godhanii muka gogaa immoo akkam haa godhan?”**

³² Namoonni biraa kanneen yakkitoota turan lamas isa wajjin ajjeefamuuf geeffaman. ³³ Yommuu iddoo Buqgee Mataa jedhamu ga’anitti achitti isa fannisan; yakkitoota sanas, isa tokko mirga isaatiin, kaan immoo bitaa isaatiin fannisan. ³⁴ Yesuusis, **“Yaa Abbaa, isaan waan hojjetan hin beekaniitii isaaniif dhiisi”** jedhe. Isaanis ixaa buufatanii uffata isaa gargar qooddattan.

³⁵ Namoonnis achi dhadhaabatanii ilaalaa turan; bulchitoonni garuu, “Inni warra kaan oolcheera. Inni yoo dhuguma Kiristoos Waaqaa isa Filatamaa sana ta’e mee of haa oolchuu!” jedhanii isatti qoosan.

³⁶ Loltoonnis isatti dhi’aatanii itti qoosaa daadhii wayinii dhangaggaa’aa kennaniifii, ³⁷ “Ati yoo mootii Yihuudootaa taate mee of oolchi” jedhan.

³⁸ Katabbiin,

Kun Mooticha Yihuudootaa ti,

jedhu tokkos mataa isaatii ol ture.

³⁹ Yakkitoota achitti fannifaman keessaa tokko, “Ati Kiristoos mitii? Mee of oolchi; nu illee oolchi!” jedhee isa arrabse.

⁴⁰ Yakkituun kaan garuu akkana jedhee isa ifate; “Atis waan murtii wal fakkaatu jala jirtuuf, Waaqa illee hin sodaattuu?” ⁴¹ Nu adabbii sirrii adabamaa jirra; gatii hojii keenyaaf malu argachaa jirraatii. Namichi kun garuu yakka tokko illee hin hojjenne.”

⁴² Yesuusiniis, “Yaa Yesuus, yeroo mootummaa keetiin dhufutti na yaadadhu” jedhe.

⁴³ Yesuusis deebisee, **“Ani dhuguman sitti hima; ati har’a na wajjin jannatatti ni galta”** jedheen.

Du’uu Yesuus

23:44-49 kwf – Mat 27:45-56; Mar 15:33-41

⁴⁴ Yeroon sun gara sa’aatii ja’aa ture; hamma sa’aatii sagaliitti dukkanni lafa hunda irra bu’e; ⁴⁵ aduun ifa dhowwateetii. Golgaan mana qulqullummaas iddoo lamatti ni tarsa’e. ⁴⁶ Yesuusis sagalee guddaadhaan iyyee, **“Yaa Abbaa, ani hafuura koo dabarsee harka keettiin kennadha”** jedhe. Kana jedhees hafuura dhumaa baafate.

⁴⁷ Ajajaan dhibbaa sunis yommuu waan ta’e sana argetti Waaqaaf ulfina kennee, “Dhugumaanuu namichi kun nama qajeelaa ture” jedhe. ⁴⁸ Namoonni waan kana ilaaluuf iddoo sanatti walitti qabaman hundi yommuu waan ta’e sana arganiitti qoma isaaniir rurrukutaa achii deeman. ⁴⁹ Warri isa beekan hundi, dubartoonni Galiilaadhaa isa duukaa bu’anis fagoo dhaabatanii waan kana ilaalaa turan.

Awwaalamuu Yesuus

23:50-56 kwf – Mat 27:57-61; Mar 15:42-47; Yoh 19:38-42

⁵⁰ Kunoo namicha miseensa waldaa Yihuudootaa kan Yoosef jedhamu tokkootu ture; inni nama gaarii fi qajeelaa ture; ⁵¹ innis murtii fi hojii isaaniir irratti jaraan walii hin galle. Yoosef magaalaa Yihuudaa kan Armaatiyaa jedhamtuu dhufe; innis mootummaa Waaqaa eeggachaa ture. ⁵² Namichi kun gara Phiilaaxoos dhaqee reeffa Yesuus kadhate.

⁵³ Reeffa sanas gad buusee huccuu quncee talbaa irraa hojjetameen kafanee awwaala garaa kattaa keessatti qotame kan namni tokko iyyuu duraan itti hin awwaalamini tokko keessa kaa'e. ⁵⁴ Guyyaan sun Guyyaa qophii ture; Sanbannis seenuu ga'eera.

⁵⁵ Dubartoonni Yesuus wajjin Galilaadhaa dhufanis Yoosef duukaa bu'anii awwaala sanaa fi akka itti reeffi Yesuus awwaala keessa kaa'ame argan. ⁵⁶ Achii deebi'aniiis qayyaa fi shitto qopheessan. Guyyaa Sanbataa garuu seeraaf ajajamuuf jedhanii boqotan.

24

Yesuus Du'aa Ka'uu Isaa

24:1-10 kwf - Mat 28:1-8; Mar 16:1-8; Yoh 20:1-8

¹ Guyyaa jalqaba torban sanaa ganama barii, dubartoonni sun urgooftuu qopheessan sana fudhatanii gara awwaalaa dhaqan. ² Isaanis dhagaa sana balbala awwaalaa irraa gara galfamee argan; ³ yommuu seenanitti garuu reeffa Gooftaa Yesuus hin arganne. ⁴ Utuma isaan waa'ee kanaa dinqisiifachaa jiranuu, namoonni uffata caccalaqqisaa uffatan lama isaan bira dhadhaabatan. ⁵ Dubartoonni sunis sodaatanii mataa buusanii lafa ilaalan; namoonni sun garuu akkana isaaniin jedhan; "Isin maaliif warra du'an keessa isa jiraataa barbaaddu?" ⁶ Inni as hin jiru; ka'eera! Waan inni yeroo isin wajjin Galilaa turetti isinitti hime sana yaadadhaa. ⁷ **'Ilmi Namaa dabarfamee harka cubbamootaatti ni kennama; ni fannifama; guyyaa sadaffaatti immoo ni kaafama'** jedhee tureetii." ⁸ Dubartoonnis dubbii isaa yaadatan.

⁹ Isaanis yommuu iddoo awwaalaatii deebi'anitti waan kana hunda barattoota kudha tokkottii fi namoota hafan hundatti himan. ¹⁰ Warri waan kana ergamootatti himanis Maariyaam ishee Magdala, Yohaanaa, Maariyaam haadha Yaaqoobii fi dubartoota biraa warra isaan wajjin turanii dha. ¹¹ Isaan garuu sababii dubbichi oduu sobaa itti fakkaateef dubartoota sana hin amanne. ¹² Ta'us Phexros ka'ee gara awwaala sanaatti fiige. Yommuu gad jedhee ilalettis huccuu quncee talbaa irraa hojjetame qofa arge; innis waan arge sana dinqifachaa deebi'e.

Karaa Gara Emaahuus Geessu Irratti

¹³ Guyyuma sana isaan keessaa namoonni lama ganda Emaa'uus jedhamu dhaqaa turan; Emaa'uusis Yerusaalem irraa gara kiiloo meetira kudha tokkoo fagaata. ¹⁴ Isaanis waa'ee waan ta'e sana hundaa walitti dudubbachaa turan. ¹⁵ Utuma isaan walitti dudubbachaa fi wajjin haasa'aa jiranuu Yesuus mataan isaa itti dhi'aatee isaan wajjin deemu jalqabe. ¹⁶ Garuu akka isaan isa hin hubanneef iji isaanii qabamee ture.

¹⁷ Innis, **"Wanni isin dudubbachaa deemtan kun maali?"** jedhee isaan gaafate. Isaanis gaddanii achuma dhadhaabatan. ¹⁸ Isaan keessaa namichi Qileyoophaa jedhamu tokko immoo deebisee, "Waan gidduu kana achitti ta'e kan hin beekne ati Yerusaalemiif keessummaadhaa?" jedheen.

¹⁹ Innis, **"Maal faatu ta'e?"** jedhee gaafate. Isaanis deebisanii akkana jedhan, "Waa'ee Yesuus nama Naazreeti; inni raajii ture; fuula Waaqaatii fi fuula nama hundaa durattis dubbii fi hojiidhaan jabaa ture. ²⁰ Luboonni hangafoonnii fi bulchitoonni keenya akka duuti itti muramuuf dabarsanii isa kennan; isa fannisanis. ²¹ Nu garuu namni Israa'elin furu isa jennee abdannee turre. Kana irratti immoo erga wannii kun hundi ta'ee har'a guyyaa sadaffaa dha. ²² Akkasumas dubartoota keenya keessaa tokko tokko nu dinqisiisaniiru; isaanis barii barraaqan gara awwaala sanaa dhaqanii, ²³ reeffa isaa achii dhaban. Dubartoonni sunis deebi'anii akka ergamoonni isaanitti mul'atanii, Yesuus jiraataa ta'uu isaa isaanitti himan nutti odeessan. ²⁴ Warra nu wajjin turan keessaas namoonni tokko tokko gara awwaalaa dhaqanii akka wannii sun akkuma dubartoonni nutti odeessan sana ta'e argan; isa garuu hin argine."

²⁵ Innis akkana isaaniin jedhe; **"Isin yaa warra hin hubannee fi warra waan raajonni dubbatan hunda amanuuttis mataa jabaattan! ²⁶ Kiristoos* waan kana hundaan dhiphatee ergasii immoo ulfina isaatti galuu hin qabu turee?"** ²⁷ Innis Musee fi raajota hunda irraa jalqabee waan Katabbiwwan Qulqulluu hunda keessatti waa'ee isaa dubbatame isaaniif ibse.

²⁸ Yommuu ganda dhaqaa turan sanatti dhi'aatanittis Yesuus waan darbee deemu of fakkeesse. ²⁹ Isaan garuu, "Sababii galgalaa'uu ga'ee fi dukkanaa'aa jiruuf, nu bira buli" jedhanii jabeessanii isa kadhatan. Innis isaan bira buluuf gore.

* 24:26 24:26yookaan Masiihichi

³⁰ Innis yommuu isaan wajjin maaddiitti dhi'aatetti buddeena fuudhee, eebbisee, caccabsees isaaniif kenne. ³¹ Iji isaanii ni baname; isas ni beekan; innis ija isaanii duraa dhokate. ³² Isaanis, "Yeroo inni karaatti nu wajjin dubbachaa turee fi yeroo inni Katabbiwwan Qulqulluu nuu ibsaa ture sana, garaan keenya nu keessatti boba'aa hin turree?" jedhanii wal gaafatan.

³³ Yeruma sanas ka'anii Yerusaalemitti deebi'an; achitti immoo barattoota kudha tokkoo fi namoota isaan wajjin turan sana walitti qabamanii argan. ³⁴ Warri walitti qabaman sunis, "Dhugumaan Gooftaan du'aa ka'eera; Simoonittis mul'ateera" jechaa turan. ³⁵ Namoonni lamaan sunis waan karaa irratti ta'e hundumaa fi yeroo Yesuus buddeena caccabse sana akkamitti akka isa beekan odeessan.

Yesuus Barattootatti Mul'achuu Isaa

³⁶ Utuu isaan waan kana dudubbachaa jiranuu, Yesuus mataan isaa isaan gidduu dhaabatee, "Nagaan isiniif haa ta'u" jedheen.

³⁷ Isaan garuu waan ekeraa argan se'anii na'an; ni sodaatanis. ³⁸ Innis akkana isaaniin jedhe; "**Maaliif sodaattu? Mamiinis maaliif garaa keessan keessatti uumama?** ³⁹ **Akka anuma mataa koo ta'e mee harka koo fi miilla koo ilaalaa! Qaqqabadhaatii na ilaalaa; ekeraan foonii fi lafee hin qabu; ani garuu akkuma isin argitan kana foonii fi lafee qaba.**"

⁴⁰ Innis waan kana dubbatee harka isaatii fi miilla isaa isaanitti argisiise. ⁴¹ Utuma isaan sababii gammachuutii fi sababii dinqifannaatiif amma illee hin amanin, "**Isin waan nyaatamu asii qabduu?**" jedhee isaan gaafate. ⁴² Isaanis qurxummii waadame kennaniif; ⁴³ innis fudhatee fuuluma isaaniin duratti nyaate.

⁴⁴ Innis, "**Yeroo ani isin bira turetti, 'Wanni seera Musee keessatti, kitaabota raajotaatii fi kitaaba faarfannaa keessatti waa'ee koo barreeffame hundi raawwatamuu qaba' jedhee isinitti hime sun isa kana**" jedheen.

⁴⁵ Innis akka isaan Katabbiwwan Qulqulluu hubataniif qalbii isaaniin baneef. ⁴⁶ Akkanas isaaniin jedhe; "**Wanni barreeffame akkana jedha; 'Kiristoos ni dhiphata; guyyaa sadaffaatti immoo warra du'an keessaa ni ka'a;** ⁴⁷ **maqaa isaatiinis qalbii jijjiirrachuunii fi dhiifamni cubbuu Yerusaaleemii jalqabee saba hundatti ni lallabama.**" ⁴⁸ **Isinis dhuga baatota waan kanaa ti.** ⁴⁹ **Kunoo ani waan Abbaan koo waadaa isinii gale sana isiniif nan erga; isin garuu hamma olii humna uffattanitti magaalaa Yerusaalem keessa turaa.**"

Yesuus Samiitti Ol Ba'e

⁵⁰ Innis achii baasee hamma Biitaaniyaatti isaan geesse; harka isaa lamaanis ol kaafatee isaan eebbise. ⁵¹ Utuma isaan eebbisaa jiruu isaan dhiisee samiitti ol fudhatame. ⁵² Isaanis isaaf sagadanii gammachuu guddaadhaan Yerusaalemitti deebi'an. ⁵³ Yeroo hundas mana qulqullummaa keessatti Waaqa galateeffachaa turan.

Wangeela Yohannis

Dubbiin Foon Ta'uu Isaa

¹ Jalqabatti dubbii ture; dubbichis Waaqa wajjin ture; dubbii sunis Waaqa ture. ² Innis jalqabatti Waaqa wajjin ture. ³ Wannii hundinuu isaan ta'e; waan ta'e hunda keessaas wannii isa malee ta'e tokko iyyuu hin jiru. ⁴ Jireenyi isa keessa ture; jireenyi sunis ifa namootaa ture. ⁵ Ifni sun dukkana keessatti ni ibsa; dukkanni garuu isa hin mo'anne.

⁶ Nama Waaqa biraa ergame kan maqaan isaa Yohannis jedhamu tokkodu ture. ⁷ Innis akka namni hundinuu karaa isaatiin amanuuf dhuga baatuu ta'ee waa'ee ifa sanaa dhugaa ba'uuf dhufe. ⁸ Waa'ee ifa sanaa dhugaa ba'uu dhufe malee inni mataan isaa ifa hin turre.

⁹ Ifni dhugaa kan nama hundaaf ifa kennu sun gara addunyaa dhufaa ture. ¹⁰ Inni addunyaa keessa ture; addunyaan isaan uumame; addunyaan garuu isa hin beekne. ¹¹ Innis gara saba isaa dhufe; sabni isaa garuu isa hin fudhanne. ¹² Warra isa fudhatanii maqaa isaatti amananiif garuu akka ijoollee Waaqaa ta'aniif mirga kenne. ¹³ Isaanis Waaqa irraa dhalatan malee dhiiga irraa yookaan fedhii foonii irraa yookaan fedhii dhiiraa irraa hin dhalanne.

¹⁴ Dubbiin foon ta'ee nu gidduu jiraate. Nus ulfina isaa, ulfina Ilma Tokkicha ayyaanaa fi dhugaadhaan guutamee Abbaa biraa dhufe sanaa argineerra.

¹⁵ Yohannis waa'ee isaa dhugaa ba'e. Sagalee isaas ol fudhatee akkana jedhe; "Inni ani, 'Inni na duubaan dhufu na caala; inni na dura tureetii' jedhee waa'ee isaa dubbadhe sun isa kana." ¹⁶ Guutama isaa irraas hundi keenya ayyaana irratti ayyaana arganneerra. ¹⁷ Seerri karaa Museetiin kennameetii; ayyaannii fi dhugaan garuu karaa Yesuus Kiristoosiitiin dhufe. ¹⁸ Eenyu iyyuu takkumaa Waaqa hin argine; garuu Ilma Tokkicha Abbaa bira jiru sanatu isa beeksise.

Yohannis Cuuphaan Akka Ofii Isaatii Kiristoos Hin ta'in Dubbate

¹⁹ Yommuu Yihuudoonni lubootaa fi Lewwota Yerusaaalem Yohannisitti erganii, "Ati eenyu?" jedhanii gaafachiisanitti dhuga ba'umsi Yohannis kenne kana ture. ²⁰ Inni dhugaa ba'e malee hin ganne; "Ani Kiristoos* miti" jedhee dhugaa ba'e.

²¹ Isaanis, "Yoos ati eenyu ree? Eeliyaas moo?" jedhanii isa gaafatan.

Innis, "Lakki, ani isa miti" jedhee deebiseef.

Isaanis, "Yoos ati Raajichaa ree?"† jedhaniin.

Inni immoo, "Lakki" jedheen.

²² Isaanis, "Ati eenyu ree? Akka warra nu erganiif deebii kenninuuf ati eenyu ofiin jetta?" jedhaniin.

²³ Yohannis dubbii Isaayyaas raajichi dubbate sanaan deebisee, "Ani sagalee gammoojjii keessaa, 'Gooftaaf karaa qajeelchaa'‡ jedhee iyyu sanaa dha" jedheen.

²⁴ Fariisonni ergaman tokko tokkos, ²⁵ akkana jedhanii isa gaafatan; "Ati erga Kiristoos yookaan Eeliyaas yookaan raajicha ta'uu baatee maaliif cuuphaa ree?"

²⁶ Yohannis immoo akkana jedhee deebiseef; "Ani bishaaniin nan cuupha; namni isin isa hin beekne tokko garuu isin gidduu dhaabata. ²⁷ Innis isa na duubaan dhufu kan ani hidhaa kophee isaa iyyuu hiikuufii hin mallee dha."

²⁸ Wannii kun hundi Yordaanos gama iddoo Yohannis itti cuuphaa ture Biitaaniyaa keessatti ta'e.

Yesuus Hoolaa Waaqaa

²⁹ Guyyaa itti aanutti Yohannis utuu Yesuus gara isaa dhufuu argee akkana jedhe; "Tlaa Hoolaa Waaqaa isa cubbuu addunyaa balleessu! ³⁰ Inni ani, 'Namni na duubaan dhufu na caala; inni na dura tureetii' jedhee waa'ee isaa dubbadhe sun isa kana. ³¹ Ani mataan koo iyyuu isa hin beekun ture; sababiin ani bishaaniin cuuphaa dhufeeff garuu akka inni saba Israa'elitti mul'ifamuuf."

³² Yohannis itti fufee akkana jedhee dhugaa ba'e; "Ani utuu Hafuurri akkuma gugeetti samii irraa gad bu'ee isa irra jiraatuu nan arge. ³³ Inni akka ani bishaaniin cuuphuuf na erge sun, 'Namichi ati utuu Hafuurri gad bu'ee isa irra jiraatuu argitu sun, isa Hafuura

* 1:20 1:20 yookaan Masiichicha † 1:21 1:21 KeD 18:15 ‡ 1:23 1:23 Isa 40:3

Qulqulluudhaan cuuphu dha' jedhee utuu natti himuu baatee silaa ani iyyuu isa hin beeku ture. ³⁴ Anis argeera; akka inni ilma Waaqaa ta'es dhugaa ba'eera."

Barattoonni Yohannis Yesuus Duukaa Bu'uu Isaanii

1:40-42 kwf - Mat 4:18-22; Mar 1:16-20; Luq 5:2-11

³⁵ Guyyaa itti aanutti Yohannis ammas barattoota isaa keessaa lama wajjin achi ture.

³⁶ Innis utuu Yesuus achi irra darbuu argee, "Ilaa, Hoolaa Waaqaa!" jedhe.

³⁷ Barattoonni lamaanis waan kana dubbachuu isaa dhaga'anii Yesuus duukaa bu'an.

³⁸ Yesuusis of irra garagalee isa duukaa bu'uu isaanii argee, "**Isin maal barbaaddu?**" jedheen.

Isaanis, "Rabbii, ati eessa jiraatta?" jedhaniin. Rabbii jechuun Barsiisaa jechuu dha.

³⁹ Innis, "**Kottaatii ilaalaa**" jedheen.

Isaanis dhaqanii akka inni eessa jiraatu argan; gaafa sana isa wajjin oolan. Yeroon sunis gara sa'aatii kurnaffaa ture.

⁴⁰ Warra waan Yohannis dubbate dhaga'anii Yesuus duukaa bu'an lamaan keessaa inni tokko Indiriiyaas obboleessa Simoon Phexros ture. ⁴¹ Innis duraan dursee obboleessa isaa Simoonin argatee, "Nu Masiihicha arganneerra" jedheen; Masiihii jechuun Kiristoos jechuu dha. ⁴² Indiriiyaasis Sim'oonin gara Yesuusitti fide.

Yesuusis isa ilaalee, "**Ati Simoon ilma Yohannis, Keefaa jedhamtee ni waamamta**" jedheen. Keefaa jechuun Phexros jechuu dha.

Yesuus Fiiliphosii fi Naatnaa'elin Waamuu Isaa

⁴³ Yesuusis guyyaa itti aanutti Galiilaa dhaquu barbaade. Innis Fiiliphosin argee, "**Na duukaa bu'i**" jedheen.

⁴⁴ Fiiliphosis akkuma Indiriiyaasii fi Phexros nama magaalaa Beetisayidaa ture.

⁴⁵ Fiiliphos Naatnaa'elin argee, "Isa Museen kitaaba Seeraa keessatti waa'ee isaa barreessee fi isa raajonnis waa'ee isaa barreessan, ilma Yoosef, Yesuus nama Naazreeti arganneerra" jedheen.

⁴⁶ Naatnaa'elis, "Naazreeti keessaa wanni gaariin ba'uu ni danda'aa?" jedhee gaafate.

Fiiliphosis, "Kottuutii ilaali" jedheen.

⁴⁷ Yesuusis utuu Naatnaa'el gara isaa dhufuu argee, "**Ilaa Israa'elicha dhugaa kan haxxummaan keessa hin jirre!**" jedhee waa'ee isaa dubbate.

⁴⁸ Naatnaa'elis, "Ati eessatti na beekta?" jedheen.

Yesuusis, "**Utuu Fiiliphos si hin waamin dura yeroo ati muka harbuu jala turtettin si arge**" jedhee deebiseef.

⁴⁹ Naatnaa'elis, "Yaa Barsiisaa, ati ilma Waaqaa ti! Ati Mootii Israa'el" jedheen.

⁵⁰ Yesuus immoo akkana jedheen; "**Ati sababii ani muka harbuu jalattan si arge siin jedheef amantee? Waan kana caalu iyyuu arguuf jirta.**" ⁵¹ Innis itti dabalee, "**Ani dhuguman, dhuguman isiniin jedha; samiin banamee utuu ergamoonni Waaqaa ilma Namaa irra ol ba'anii gad bu'anuu ni argitu**" jedheen.

2

Yesuus Bishaan Gara Daadhii Wayiniitti Geeddaruu Isaa

¹ Guyyaa sadaffaatti Qaanaa Galiilaa keessa cidha gaa'elaatu* ture. Haati Yesuusis achi turte; ² Yesuusii fi barattoonni isaa gara cidha sanaatti waamamanii turan. ³ Yommuu Daadhiin wayinii dhumetti haati Yesuus, "Jarri daadhii wayinii hin qaban" isaan jette.

⁴ Yesuus immoo deebisee, "**Dubartii nana! Maal godhi naan jetta? Yeroon koo amma illee hin geenye**" jedheen.

⁵ Haati isaas tajaajiltootaan, "Waanuma inni isinitti himu hunda godhaa" jette.

⁶ Gaaniwwan dhagaa ja'a sirna qulqulleessuu Yihuudootaatiif achi dhaabamanii turan; tokkoon tokkoon isaanis gara liitiroo 75 hamma 115 qabata ture.

⁷ Yesuus tajaajiltootaan, "**Gaaniwwanitti bishaan guutaa**" jedhe; isaanis hamma afaan gaaniwwaniitti guutan.

⁸ Innis, "**Egaa budduuqsatii abbaa cidhaatti kennaa**" jedheen.

Isaanis akkasuma godhan; ⁹ abbaan cidhaas bishaan gara daadhii wayiniitti geeddarame sana afaaniin qabee ilaale. Daadhiin wayinii sun eessaa akka dhufe tajaajiltoota bishaan waraabanitu beeka malee abbaan cidhaa sun hin beeku ture. Innis misirricha waamee ¹⁰ akkana jedheen; "Namni hundi daadhii wayinii isa gaarii

* 2:1 2:1 Cidha gaa'elaatu - Cidhi gaa'elaa torban tokko guutuu fudhata ture.

jalqabatti dhi'eessee, erga keessumoonni machaa'anii booddee immoo daadhii isa laafaa dhi'eessa; ati garuu daadhii gaarii hamma ammaatti tursite."

¹¹ Yesuus mallattoowwan isaa keessaa isa jalqabaa kana Qaanaa Galiilaa keessatti hojjete. Ulfina isaas ni mul'ise; barattoonni isaas isatti aman.

Yesuus Mana Qulqullummaa Qulqulleessuu Isaa

2:14-16 kwf - Mat 21:12,13; Mar 11:15-17; Luq 19:45,46

¹² Kana booddees inni haadha isaa, obboloota isaatii fi barattoota isaa wajjin Qifirnaahomitti gad bu'e. Isaanis guyyoota muraasa achi turan.

¹³ Yesuusis waan Faasiikaan Yihuudootaa dhi'aateef Yerusaaletti ol ba'e. ¹⁴ Mana qulqullummaa keessattis warra loon, hoolootaa fi gugee gurgurataniif fi warra taa'anii maallaqa geeddaran arge. ¹⁵ Innis quncee irraa qaccee dha'atee nama hundumaa hoolootaa fi loon wajjin mana qulqullummaa keessaa ari'e; saantima warra maallaqa geeddaraniis bittinneesse; minjaala isaaniis garagalche. ¹⁶ Warra gugee gurguraniinis, **"Kana hunda asii baasaa! Mana Abbaa koo mana daldalaa hin godhinaa!"** jedhe. ¹⁷ Barattoonni isaas, "Hinaaffaan mana keetii na gugguba"[†] jedhamee akka barreeffame yaadatan.

¹⁸ Yihuudoonnis deebisanii, "Kana hunda hojjechuuf akka taayitaa qabdu mirka-neessuuf mallattoo maalii nutti argisiisuu dandeesa?" jedhaniis isa gaafatan.

¹⁹ Yesuus, **"Mana qulqullummaa kana jigsaa; ani immoo guyyaa sadiitti olin dhaabaa"** jedhee deebiseef.

²⁰ Yihuudoonnis deebisanii, "Mana qulqullummaa kana ijaaruun waggaa afurtamii ja'a fudhate; ati immoo guyyaa sadii keessatti ol dhaabdaa?" jedhaniin. ²¹ Manni qulqullummaa kan inni waa'ee isaa dubbate sun garuu dhagna isaa ti. ²² Erga inni du'aa ka'ee booddee barattoonni isaa waan inni dubbatee ture sana yaadatan. Isaanis Katabbii Qulqulluu fi dubbii Yesuus dubbate aman.

²³ Yeroo inni Ayyaana Faasiikaatiif jedhee Yerusaaletti turetti namoonni baay'een mallattoo inni hojjetee arganii maqaa isaatti aman. ²⁴ Yesuus garuu waan nama hunda beekuuf, amanee isaanitti of hin dhiifne. ²⁵ Akka namni tokko iyyuu waa'ee namaa isaaf dhugaa ba'u isa hin barbaachifne; inni waan nama keessa jiru beeka tureetii.

3

Yesuus Niqoodemoosin Barsiisuu Isaa

¹ Fariisicha Niqoodemoos jedhamu bulchaa Yihuudootaa tokkotu ture. ² Innis halkaniin Yesuus bira dhagee, "Yaa barsiisaa, akka ati barsiisaa Waaqa biraa dhufte taate nu beekna; nama Waaqni isa wajjin jiru malee namni mallattoo ati hojjetu kana hojjechuu danda'u tokko iyyuu hin jiruutii" jedheen.

³ Yesuusis deebisee, **"Ani dhuguman, dhuguman sitti hima; namni yoo lammata dhalate malee mootummaa Waaqaa arguu hin danda'u"** jedheen.

⁴ Niqoodemoos immoo, "Namni erga dulloomee booddee akkamitti dhalachuu danda'a? Dhalachuuf jedhee lammata gadameessa haadha isaa keessa seenuu danda'aa?" jedhee gaafate.

⁵ Yesuusis akkana jedhee deebise; **"Ani dhuguman, dhuguman sitti hima; namni yoo bishaanii fi Hafuura irraa dhalate malee mootummaa Waaqaatti galuu hin danda'u. ⁶ Kan foon irraa dhalate foon; kan Hafuura irraa dhalate garuu hafuura. ⁷ Jecha ani, 'Ati lammata dhalachuu si barbaachisa siin jedhe hin dinqifatin.'** ⁸ Bubbeen gara fedhetti bubbisa. Atis huursuu isaa dhageessa malee akka inni eessaa dhufee fi akka inni garamitti demu hin beektu; namni Hafuura irraa dhalate hundinuus akkanuma."

⁹ Niqoodemoosis, "Kun akkamitti ta'uu danda'a?" jedhee gaafate.

¹⁰ Yesuus akkana jedhee deebiseef; **"Ati utuu barsiisaa Israa'el taatee jirtuu waan kana hin beektuu? ¹¹ Ani dhuguman, dhuguman sitti hima; nu waan beeknu dubbanna; waan argines dhugaa ni baana; isin garuu dhugaa ba'umsa keenya hin fudhattan. ¹² Isin yoo ani waan addunyaa isinitti himnaan hin amanin, yoo ani waan samii isinitti hime akkamitti amantu ree? ¹³ Ilma Namaa isa samii irraa gad bu'e malee eenyu iyyuu samiitti ol hin baane. ¹⁴ Akkuma Museen gammoojjii keessatti bofa fannise *sana Ilmi Namaas fannifamuu qaba. ¹⁵ Kunis akka namni isatti amanu hundi jireenya bara baraa qabaatuuf."**

¹⁶ Kan isatti amanu hundi jireenya bara baraa akka qabaatuuf malee akka hin badneef, Waaqni hamma Ilma isaa tokkicha kennutti addunyaa jaallateeraatii. ¹⁷ Waaqni karaa

isaatiin addunyaa fayyisuudhaaf malee addunyaatti muruuf ilma isaa gara addunyaatti hin ergineetii. ¹⁸ Kan isatti amanutti hin muramu; kan isatti hin amanne garuu waan inni maqaa ilma Waaqaa tokkichaatti hin amaniniif ammuma iyyuu itti murameera. ¹⁹ Murtiin sunis isa kana: Ifni gara addunyaa dhufe; namoonni garuu waan hojiin isaanii hamaa tureef ifa caalaa dukkana jaallatan. ²⁰ Namni waan hamaa hojjetu kam iyyuu ifa jibba; akka hojiin isaa ifatti hin baafamneefis gara ifaa hin dhufu. ²¹ Namni dhugaa hojjetu kam iyyuu garuu akka hojiin isaa akka fedhii Waaqaatti hojjetamuun isaa mul'atuuf gara ifaa dhufa.

Yohannis Cuuphaan Waa'ee Yesuus Dhugaa Ba'e

²² Ergasiis Yesuusii fi barattoonni isaa gara biyya Yihuudaa dhaqan; innis isaan wajjin achi ture; ni cuuphes. ²³ Yohannis naannoo Saalem iddoo Enoon jedhamutti ni cuupha ture; bishaan baay'een achi tureetii; namoonnis achi dhaqanii cuuphamu turan. ²⁴ Kunis utuu Yohannis mana hidhaatti hin galfamin ta'e. ²⁵ Yommuu barattoota Yohannisii fi Yihuudii tokko gidduutti waa'ee qulqulleeffamuu irratti wal falmiin uumame. ²⁶ Isaanis Yohannis bira dhufanii, "Yaa barsiisaa, namichi si wajjin Yordaanos gama ture, kan ati waa'ee isaa dhugaa baate sun kunoo cuuphuutti jira; namni hundis gara isaa dhaquutti jira" jedhaniin.

²⁷ Yohannis akkana jedhee deebise; "Namni yoo samii irraa isaaf kenname malee homaa fudhachuu hin danda'u. ²⁸ Akka ani, 'Ani Kiristoos† miti; garuu isa dura nan ergame' jedhee isin mataan keessan iyyuu dhugaa naa baatu. ²⁹ Misirritiin kan misirrichaa ti. Miinjeen misirricha bira dhaabatuu fi isa dhaggeeffatu, yommuu sagalee misirrichaa dhaga'utti akka malee gammada. Gammachuun sun kan koo ti; gammachuun koos amma guutuu ta'eera. ³⁰ Inni guddaa ta'uu qaba; ani immoo xinnaa ta'uun qaba.

³¹ "Kan olii dhufu inni hundumaa oli; inni lafaa immoo kanuma lafaa ti; waanuma lafaa dubbatas. Kan samii irraa dhufu inni hundumaa oli. ³² Inni waan argee fi waan dhaga'e dhugaa ba'a; dhuga ba'umsa isaa garuu eenyu iyyuu hin fudhatu. ³³ Namni dhuga ba'umsa kana fudhates akka Waaqni dhugaa ta'e mirkaneesse. ³⁴ Inni Waaqni erge dubbii Waaqaa dubbata; Waaqnis safara malee Hafuura isaa ni kennaatii. ³⁵ Abbaan ilma ni jaallata; waan hundas harka isaatti kenneera. ³⁶ Namni Ilmatti amanu jireenya bara baraa qaba; namni Ilmaaf hin ajajamne garuu dheekkamsa Waaqaatu isa irra jiraata malee jireenya hin argu."

4

Yesuusii fi Dubartii Samaariyaa Tokko

¹ Egaa Yesuus Yohannis caalaa barattoota akka baay'ifatee fi akka cuuphe Fariisonni dhaga'uu isaanii Gooftaan ni beeke; ² ta'us barattoota isaatu cuuphaa ture malee Yesuus ofii isaatii hin cuuphine. ³ Inni Yihuudaa dhiisee amma illee Galilaatti deebi'e.

⁴ Innis Samaariyaa keessa darbuu qaba ture. ⁵ Kanaafuu gara magaalaa Samaariyaa kan Siikaar jedhamu tokkoo dhufe; magaalaa sunis lafa Yaaqoob ilma isaa Yoosefiif kenne sanatti dhi'oo dha. ⁶ Boollii bishaanii kan Yaaqoob tokko achi ture; Yesuus waan karaa deemuudhaan dadhabeef boolla bishaanii sana bira taa'e. Yeroonis gara sa'aatii ja'aa ture.

⁷ Dubartiin Samaariyaa tokkos bishaan waraabbachuu dhufte; Yesuus, "**Mee na obaasi**" jedheen. ⁸ Barattoonni isaa nyaata bituuf gara magaalaa dhaqanii turaniitti.

⁹ Dubartiin Samaariyaa sunis Yesuusii, "Ati utuu Yihuudii taatee jirtuu akkamitti 'na obaasi' jettee ana dubartii Samaariyaa kadhata?" jetteen. Yihuudoonni warra Samaariyaa wajjin walitti dhufeenya hin qaban tureetii.

¹⁰ Yesuus deebise, "**Kennaa Waaqaatii fi inni, 'na obaasi' siin jedhu kun eenyu akka ta'e utuu beektee silaa situ isa kadhata ture; innis bishaan jireenyaa siif kenna ture**" jedheen.

¹¹ Dubartittiinis akkana jetteen; "Yaa gooftaa, ati waan ittiin waraabbattu hin qabdu; boollii bishaanii kunis gad fagoo dha. Yoos bishaan jireenyaa eessaa argatta? ¹² Ati abbaa keenya Yaaqoob isa boolla bishaanii kana nuu kenne caalta moo? Inni mataan isaa, ijoolleen isaatii fi horiin isaa boolla bishaanii kana keessaa dhugaa turan."

¹³ Yesuus immoo akkana jedhee deebise; "**Namni bishaan kana dhugu hundinuu deebi'ee ni dheebota; ¹⁴ garuu namni bishaan ani isaaf kennu dhugu kam iyyuu gonkumaa hin dheebotu. Bishaan ani isaaf kennu isa keessatti burqaa bishaanii isa jireenya bara baratiif burqu ni ta'a.**"

† 3:28 3:28 yookaan Masiihicha

¹⁵ Dubartittiinis, “Yaa Gooftaa, akka ani hin dheebonneef, bishaan waraabuufis akka ani as hin dhufneef bishaan sana naa kenni” jetteen.

¹⁶ Yesuus immoo, “**Dhaqiiiti dhirsaa kee waamii kottu!**” jedheen.

¹⁷ Dubartittiin, “Ani dhirsaa hin qabu” jetteen.

Yesuusis akkana jedheen; “**Dhirsaa hin qabu jechuun kee sirrii dha; ¹⁸ ati dhirsoota shan qabda turteeti; namichi amma si wajjin jirus dhirsaa kee miti. Wannii ati amma dubbate dhugaa dha.**”

¹⁹ Dubartittiinis akkana jette; “Yaa Gooftaa, akka ati raajii taate nan hubadha.

²⁰ Abbootiin keenya tulluu kana irratti sagadaa turan; isin Yihuudoonni garuu iddoon namni itti waqeffachuu qabu Yerusaalem jettu.”

²¹ Yesuusis akkana jedheen; “**Dubartii nana, na amani; yeroon isin itti tulluu kana irrattis ta’u yookaan Yerusaalemitti Abbaa hin waqeffanne tokko ni dhufa.**

²² Isin waan hin beekne waqeffattu; nu sababii fayyinni Yihuudoota keessaa dhufuuf kan beeknu waqeffanna. ²³ Warri dhugaan waqeffatan yeroon isaan itti hafuura fi dhugaadhaan Abbaa waqeffatan tokko ni dhufa; amma iyyuu dhufeera; Abbaan warra akkasitti isa waqeffatan barbaada. ²⁴ Waaqni hafuura; warri isa waqeffatanis Hafuura fi dhugaadhaan waqeffachuu qabu.”

²⁵ Dubartittiinis, “Ani akka Masiihiin Kiristoos jedhamu dhufu nan beeka. Inni yommuu dhufutti waan hunda nutti hima” jetteen.

²⁶ Yesuusis, “**Ani, namni amma sitti dubbachaa jiru kun isuma**” jedheen.

Barattoonni Gara Yesuusitti Deebi’uu Isaanii

²⁷ Barattoonni isaa yommuusuma deebi’anii utuu inni dubartii tokko wajjin dubbatuu arganii dinqisiifatan. Garuu namni, “Maal barbaadda?” yookaan “Maaliif ishee wajjin haasofta?” jedhee isa gaafatu tokko iyyuu hin turre.

²⁸ Dubartiin sunis okkotee ishee dhiiftee gara magaalatti deebite; namootaanis akkana jette; ²⁹ “Kottaatii nama waan ani hojjedhe hunda natti hime tokko ilaalaa! Tarii inni Kiristoos* ta’innaa?” ³⁰ Isaanis magaalaa keessaa ba’anii Yesuus bira dhufan.

³¹ Kana gidduutti barattoonni isaa, “Yaa barsiisaa, mee waa nyaadhu!” jedhanii isa kadhatan.

³² Inni garuu, “**Ani nyaata isin hin beekne kanan nyaadhu qaba**” jedheen.

³³ Barattoonni isaas, “Namatu nyaata fideefii laata?” jedhanii wal gaafatan.

³⁴ Yesuus immoo akkana jedheen; “**Nyaanni koo fedhii isa na ergee guutuu fi hojii isaa raawwachuu dha. ³⁵ Isin, ‘Ji’a afurtu hafe; ergasii midhaan walitti qabama’ jettu mitii? Kunoo, ani isinittan hima; akka midhaan bilchaatee walitti qabamuu ga’e mee ol jedhaatii lafa qotiisaa ilaalaa! ³⁶ Inni midhaan haamu amma iyyuu mindaa ni argata; jireenya bara baraatiif ija walitti ni qaba; kunis akka inni facaasuu fi inni walitti qabu waliin gammadaniif. ³⁷ Haala kanaan mammaaksi, ‘Inni tokko ni facaasa; kaan immoo ni haama’ jedhu sun dhugaa dha. ³⁸ Ani akka isin waan itti hin dadhabin haammattaniifan isin erge. Warri kaan itti dadhabaniiru; isin garuu bu’aa dadhabbii isaanii galfattu.**”

Namoonni Samaariyaa Baay’een amanuu Isaanii

³⁹ Sababii dubartittiin, “Inni waan ani hojjedhe hunda natti hime” jettee dhugaa baateef namoonni Samaariyaa warri magaalaa sanaa baay’een isatti amanan. ⁴⁰ Kanaafuu namoonni Samaariyaa yommuu gara isaa dhufanitti akka inni isaan wajjin turuuf isa kadhatan; innis guyyaa lama achi ture. ⁴¹ Sababii dubbii isaatiinis namoonni biraa baay’een isatti amanan.

⁴² Isaanis dubartittiidhaan, “Si’achi wannii nu amannuuf sababii dubbii ati nutti himte sanaatiif miti; nu mataan keenya iyyuu isa dhageenyerraatii; akka inni dhugumaan Fayyisaa addunyaa ta’es beekneerra” jedhan.

Yesuus Ilma Qondaala Tokkoo Fayyisuu Isaa

⁴³ Guyyaa lamaan sana booddee Yesuus Galiilaa dhaqe. ⁴⁴ Yesuus mataan isaa iyyuu akka raajiin tokko biyya isaa keessatti kabaja hin qabne dubbatee tureetii. ⁴⁵ Yommuu inni Galiilaa ga’ettis warri Galiilaa isa simatan. Isaanis sababii Yerusaalem turaniif waan inni yeroo Ayyaana Faasiikaatti achitti hojjete hunda arganii turan.

⁴⁶ Kanaafuu inni deebi’ee gara Qaanaa ishee Galiilaa keessaa iddoo itti bishaan gara daadhii wayiniitti geeddaree ture sanaa dhaqe. Qondaalli mootii kan ilmi isaa dhukkubate tokkos Qifirnaahom keessa ture. ⁴⁷ Namichi kunis yommuu akka Yesuus Yihuudaadhaa ka’ee Galiilaa dhufe dhaga’etti isa bira dhaqee akka inni dhufee ilma isaa kan du’uu ga’e sana fayyisu isa kadhate.

* 4:29 4:29 yookaan Masiihiichaa

⁴⁸ Kana irratti Yesuus, **“Isin yoo mallattoo fi dinqii argitan malee hin amantan!”** isaan jedhe.

⁴⁹ Qondaaltichis, “Yaa Gooftaa, maaloo utuu mucaan koo hin du’in naa qaqqabi” jedheen.

⁵⁰ Yesuusis, **“Ilmi kee ni jiraataatii gali!”** jedheen.

Namichis waan Yesuus isatti dubbate amanee deeme. ⁵¹ Utuu inni deemaa jiruus tajaajiltoonni isaa itti dhufanii akka ilmi isaa lubbuun jiru itti himan. ⁵² Innis yeroo itti mucaa isaatti wayyaa’e gaafate; isaanis, “Kaleessa sa’aatii torbatti dhagna gubaan isa dhiise” jedhaniin.

⁵³ Abbaan mucichaas akka yeroon sun yeroo Yesuus itti, **“Ilmi kee ni jiraataa”** jedheen ta’e hubate. Kanaafuu innis, warri mana isaa hundinuus ni amanaman.

⁵⁴ Kun mallattoo lammaffaa Yesuus erga Yihuudaadhaa Galiilaa dhufee hojjetee dha.

5

Yesuus Beetisayidaatti Dhukkubsataa Fayyisuu Isaa

¹ Yeroo xinnoo booddee ayyaana Yihuudootaa tokkodu ture; Yesuusis Yerusaleemitti ol ba’e. ² Yerusaleem keessa Karra Hoolaa bira haroo afaan Ibraayisxiitiin Beetizaataa jedhamu tokkodu jira; haroon sun gardaafuu shan qaba. ³ Gardaafoowwan sana keessas namoonni dhukkubsatan, jechuunis jaamonni, warri naafatanii fi warri dhagni irratti du’e baay’een ciisanii raafama bishaanii eeggachaa turan. [⁴ Ergamaan Gooftaa yeroo yerootti gad bu’ee bishaanicha ni raasa ture; raafama bishaanichaa booddee namni jalqabatti bishaan sana keessa seenu kam iyyuu dhukkuba qabu hunda irraa ni fayya ture.]^{*} ⁵ Namichi waggaa soddonii saddeeti dhukkubsate tokko achi ture. ⁶ Yesuusis yommuu isaa achi ciisu argee akka inni yeroo dheeraa haala kana keessa ture beeketti, **“Ati fayyuu barbaaddaa?”** jedhee isa gaafate.

⁷ Dhukkubsataan sunis, “Yaa Gooftaa, ani nama na gargaaree yommuu bishaanichi raafamutti haroo sana keessa na buusu hin qabu. Yeroo ani seenuu yaaluttis namni biraa na dursee seena” jedheen.

⁸ Kana irratti Yesuus, **“Ka’i! Siree kee fudhadhuutii deemi”** jedheen. ⁹ Namichis yeruma sana fayye; siree isaas fudhatee deeme.

Guyyaan wanni kun ta’e sunis Sanbata ture; ¹⁰ Yihuudoonnis namicha fayye sanaan, “Har’a Sanbata; seerri siree kee baachuu si dhowwa” jedhaniin.

¹¹ Inni garuu, “Namicha na fayyisetu **‘Siree kee fudhadhuu deemi’** naan jedhe” jedheen.

¹² Isaanis, “Namichi siree kee fudhadhuu deemi siin jedhe sun eenyu?” jedhanii isa gaafatan.

¹³ Namichi fayye sun sababii Yesuus achi hiiqee tuuta iddoo sana ture keessa seeneef inni eenyu akka ta’e hin beekne.

¹⁴ Yesuusis ergasii namicha sana mana qulqullummaa keessatti argee, **“Ati kunoo amma fayyiteerta. Wanni kana caalu akka sitti hin dhufneef si’achi cubbuu hin hojjetin”** jedheen. ¹⁵ Namichis dhaqee kan isa fayyise Yesuus akka ta’e Yihuudootatti hime.

Jireenya Ilmi Kennu

¹⁶ Kanaafuu sababii inni Sanbataan waan kana hojjeteeff, Yihuudoonni Yesuusin ari’achuu jalqaban. ¹⁷ Yesuus garuu, **“Abbaan koo hamma ammaatti hojjechaa jira; anis hojjechaan jira”** isaaniiin jedhe. ¹⁸ Sababii kanaaf Yihuudoonni ittuma caalchisanii isa ajjeesuu barbaadan; inni Waaqaan of qixxeessuudhaan Waaqa iyyuu Abbaa ofii isaa godhee waamaa ture malee Sanbata qofa hin cabsine.

¹⁹ Yesuus immoo akkana jedhee deebiseef; **“Ani dhuguman, dhuguman isinitti hima; Ilmi ofii isaatiin waan tokko illee hojjechuu hin danda’u; inni waanuma utuu Abbaan isaa hojjetuu arge qofa hojjechuu danda’a; waanuma Abbaan hojjetu Ilmis akkasuma hojjetaatii.** ²⁰ Abbaan Ilma ni jaallataatii; waan hojjetu hundumas isatti ni argisiisa. Akka isin dinqisiifattaniifis inni hojjiwwan hojjiwwan kanneen caalan iyyuu isatti ni argisiisa. ²¹ Akkuma Abbaan warra du’an du’aa kaasee jireenya kennuuf sana, Ilmis akkasuma abbaa fedheef jireenya ni kenna. ²² Abbaan eenyutti illee hin muru; murtii hunda garuu Ilmatti kenneera; ²³ kunis akka namni hundi akkuma Abbaaf ulfina kennutti Ilmaafis

* 5:4 5:4 Waraabbileen durii tokko tokko kutaa walakkaa luqqisaa sadii irraa jalqabee hamma luqqisaa afuriitti jiru hin qaban.

ulfina kennuuf. Namni Ilmaaf ulfina hin kennine, Abbaa isa Ilma ergeefis ulfina hin kennu.

²⁴ “Ani dhuguman, dhuguman isinitti hima; namni dubbii koo dhaga’u, isa na ergettis kan amanu hundi jireenya bara baraa qaba; murtiittis hin dhi’aatu; inni du’a jalaa gara jireenyaatti darbeera. ²⁵ Ani dhuguman, dhuguman isinitti hima; yeroon warri du’an itti sagalee Ilma Waaqaa dhaga’an tokko ni dhufa; ammuma iyyuu dhufeera; warri dhaga’anis ni jiraatu. ²⁶ Akkuma Abbaan ofuma isaatiin jireenya qabu sana, Ilmis akkasuma akka ofuma isaatiin jireenya qabaatuuf isaaf kenneeraatii. ²⁷ Sababii inni Ilma Namaa ta’eeffis Abbaan akka inni murtii kennuuf taayitaa isaaf kenneera.

²⁸ “Kana hin dinqisiifatinaa; sa’aatiin itti warri awwaala keessa jiran hundi sagalee isaa dhaga’an tokko ni dhufaatii. ²⁹ Warri waan gaarii hojjetan du’aa ka’uu jireenyaatiif, warri waan hamaa hojjetan immoo du’aa ka’uu murtiitiif du’aa ni ka’u. ³⁰ Ani ofii kootiin waan tokko illee gochuu hin danda’u; ani akkuman dhaga’utti nan murteessa; ani fedhii isa na ergee malee fedhii mataa kootii waan hin barbaanneef murtiin koo qajeelaa dha.

Dhuga ba’umsa Waa’ee Yesuus

³¹ “Ani yoon waa’ee ofii kootii dhugaa ba’e, dhuga ba’umsi koo dhugaa miti. ³² Garuu kan waa’ee koo dhugaa ba’u biraa jira; anis akka dhuga ba’umsi inni waa’ee koo kennu sun dhugaa ta’e beeka.

³³ “Isin Yohannisitti ergitaniirtu; innis dhugaa sanaaf, dhugaa ba’eera. ³⁴ Ani dhuga ba’umsa namaa hin fudhadhu; garuu akka isin fayyitaniif wantoota kanneen nan dubbadha. ³⁵ Yohannis ibsaa boba’ee ifa kennu ture; isinis yeroo xinnoo ifa isaatti gammaduu barbaaddan.

³⁶ “Ani garuu dhuga ba’umsa, dhuga ba’umsa Yohannis sana caalu qaba. Hojiin akka ani raawwaduuf Abbaan natti kenne, kan ani hojjedhu kun iyyuu akka Abbaan na erge mirkaneessaatii. ³⁷ Abbaan inni na erges ofii isaatii waa’ee koo dhugaa ba’eera. Isin takkumaa sagalee isaa hin dhageenye; bifa isaas takkumaa hin argine. ³⁸ Isin sababii isa inni erge hin amaniniif dubbiin isaa isin keessa hin jiraatu. ³⁹ Isin Katabbiiwwan Qulqulluudhaan jireenya bara baraa arganna jettanii waan yaaddaniif Katabbiiwwan Qulqulluu sana qorattu. Katabbiiwwan Qulqulluu kunneenis waa’ee koo dhugaa ba’u; ⁴⁰ isin garuu jireenya argachuudhaaf gara koo dhufuu hin barbaaddan.

⁴¹ “Ani nama irraa ulfina hin fudhadhu; ⁴² garuu akka isin jaalala Waaqaa of keessaa hin qabne nan beeka. ⁴³ Ani maqaa Abbaa kootiin dhufeera; isin na hin simattan; utuu namni biraa maqaa ofii isaatiin dhufee garuu isa ni simattu. ⁴⁴ Isin yoo wal irraa ulfina argattanii ulfina Waaqa tokkicha biraa dhufu garuu hin barbaanne akkamitti amanuu dandeessu ree?

⁴⁵ “Waan ani Abbaa duratti isin himadhu hin se’inaa. Kan isin himatu tokko jira; innis Musee isin abdattan sana. ⁴⁶ Utuu Musee amantanii silaa anas ni amantu ture; inni waa’ee koo barreesseetii. ⁴⁷ Isin erga waan inni barreesse hin amanee, dubbii koo immoo akkamitti amantu ree?”

6

Yesuus Nama Kuma Shan Sooruu Isaa

6:1-13 kwf - Mat 14:13-21; Mar 6:32-44; Luq 9:10-17

¹ Wantoota kanneen booddee Yesuus Galaana Galiilaa isa Galaana Xibeeriyaas jedhamu gama ce’e; ² namoonni baay’eenis sababii mallattoo inni warra dhukkubsatan fayyisuudhaan hojjetee arganiif isa duukaa bu’an. ³ Yesuusis barattoota isaa wajjin gaaratti ol ba’ee taa’e. ⁴ Yeroo sana Ayyaanni Yihuudootaa, Faasiikaan dhi’aatee ture.

⁵ Yesuus yommuu ol ilaaletti tuuta guddaa gara isaa dhufaa jiru tokko arge; Fiiliphoosiinis, “**Namoota kanneeniif buddeena isaan nyaatan eessaa bitanna?**” jedhe. ⁶ Kanas Fiiliphoosin qoruudhaaf jedhee gaafate; inni mataan isaa waan gochuu qabu beeka tureetii.

⁷ Fiiliphoos immoo, “Akkata tokkoon tokkoon isaanii waanuma xinnoo illee argataniif buddeena ga’u bituuf diinaarii* dhibba lama fudhata” jedhee deebiseef.

⁸ Barattoota isaa keessaa tokko Indiriiyaas, obboleessi Simoon Phexros akkana jedheen; ⁹ “Gurbaan buddeena garbuu shanii fi qurxummii lama qabu tokko kunoo ti; garuu nama akkana baay’atu kanaaf kun maali?”

* 6:7 6:7 Diinaariin tokko mindaa hojjetaan tokko guyyaatti argatu ture.

¹⁰ Yesuusis, **“Namoota teessisaa”** jedhe. Iddoo sanas marga baay’etu ture; namoonnis ni tataa’an; dhiira gara kuma shantu achi ture. ¹¹ Yesuusis ergasii buddeena fuudhee, galata galchee warra tataa’aniif hamma isaan barbaadan qoqqoode. Qurxummii sana illee akkasuma godhe.

¹² Innis yommuu isaan hundi nyaatanii quufanitti barattoota isaatiin, **“Hurraa’aa hambifame walitti qabaa. Wanni tokko iyyuu hin badin”** jedhe. ¹³ Kanaafuu isaan hurraa’aa buddeena garbuu shananii kan namoonni nyaatanii hambisan walitti qabanii gundoo kudha lama guutan.

¹⁴ Namoonnis yommuu mallattoo Yesuus hojjete arganitti, **“Kun dhugumaanuu Raajii gara addunyaa dhufuuf jiru”** jedhan. ¹⁵ Yesuusis akka namoonni sun dhufanii humnaan qabanii mootii isa gochuu yaadan hubatee ammas kophaa isaa gara tulluu deeme.

Yesuus Bishaan Irra Deemuu Isaa

6:16-21 kwf – Mat 14:22-33; Mar 6:47-51

¹⁶ Yommuu galgalaa’etti barattoonni isaa gara galaanaatti gad bu’an; ¹⁷ achittis bidiruu yaabbatanii galaana irra gama Qifirnaahomitti qajeelan. Yeroon sun dukkana ture; Yesuus amma iyyuu gara isaanii hin dhufne ture. ¹⁸ Bubbeen jabaan isaa waan bubbisaa tureef bishaanichi ni raafame. ¹⁹ Isaanis erga gara kiiloo meetira shanii yookaan ja’aa mooqanii booddee utuu Yesuus galaana irra deemaa, bidiruu sanattis dhi’aachaa jiruu argan; ni sodaatanis. ²⁰ Inni garuu, **“Anumaatii hin sodaatinaa”** jedheen. ²¹ Isaanis bidiruutti ol isa fudhachuu barbaadan; bidiruun sunis yommusuma lafa isaan dhaqaa turan sana ga’e.

²² Guyyaa itti aanutti namoonni galaanicha gamatti hafanii turan akka bidiruun tokko qofti achi ture, akka Yesuus barattoota isaa wajjin bidiruu hin yaabbatinii fi akka isaan kophaa isaanii deeman hubatan. ²³ Bidiruuwwan biraa Xibeeriyaasii ka’anii iddoo itti Gooftaan galata galchee isaanis itti buddeena nyaatan sana bira ga’an. ²⁴ Namoonni sunis yommuu akka Yesuusii fi barattoonni isaa achi hin jirre baranitti bidiruuwwan yaabbatanii Yesuusin barbaaduuf Qifirnaahom dhaqan.

Yesuus Buddeena Jireenyaa

²⁵ Namoonni yommuu galaanicha gamatti isa arganitti, **“Yaa Barsiisaa, ati yoom as dhufte?”** jedhanii isa gaafatan.

²⁶ Yesuusis akkana jedhee deebise; **“Ani dhuguman, dhuguman isinitti hima; isin waan mallattoo argitaniif utuu hin ta’in, waan buddeena nyaatanii quuftaniif na barbaaddu. ²⁷ Nyaata jireenya bara baraatiif ta’u kan Ilmi Namaa isinii kennuuf dadhabaa malee nyaata baduuf hin dadhabinaa. Waaqni Abbaan chaappaa isaa kan mirkaneessu ilma irratti rukuteeraatii.”**

²⁸ Isaanis, **“Nu akka hojii Waaqaa hojjennuuf maal gochuu qabna?”** jedhanii isa gaafatan.

²⁹ Yesuusis, **“Isa inni ergetti amanuun keessan kun hojii Waaqaa ti”** jedhee deebiseef.

³⁰ Kanaafuu isaan akkana jedhanii isa gaafatan; **“Akka nu isa arginee si amannuuf, mallattoo maalii argisiifta? Maal hojjetas? ³¹ ‘Akka isaan nyaataniif samii irraa buddeena isaaniif kenne’ jedhamee akkuma barreeffame, abbootiin keenya gammoojjii keessatti mannaa nyaatan.”**[†]

³² Yesuusis akkana jedheen; **“Ani dhuguman isinitti hima; kan samii irraa buddeena isinii kenne Musee miti; kan samii irraa buddeena dhugaa isiniif kennu garuu Abbaa koo ti. ³³ Buddeenni Waaqaa isa samii irraa gad bu’ee addunyaaf jireenya kennu sanaatii.”**

³⁴ Isaanis, **“Yaa Gooftaa, yeroo hunda buddeena kana nuu kenni”** jedhaniin.

³⁵ Yesuusis akkana isaaniin jedhe; **“Buddeenni jireenyaa ana. Namni gara koo dhufu gonkumaa hin beela’u; kan anatti amanus gonkumaa hin dheebotu.**

³⁶ **Akkuma ani isinitti hime isin na argitaniirtu; garuu amma iyyuu hin amantan. ³⁷ Kan Abbaan naa kennu hundi gara koo ni dhufa; anis kan gara koo dhufu gonkumaa alatti hin ari’u. ³⁸ Ani fedhii isa na erge sanaa guutuuf malee, fedhii koo guutachuuf samii irraa gad hin buuneetii. ³⁹ Fedhiin isa na ergees akka ani warra inni natti kenne hunda guyyaa dhumaatti du’aa kaasuuf malee akka ani isaan keessaa tokko illee balleessuuf miti. ⁴⁰ Fedhiin Abbaa kootiis akka namni ilma ilaalee isatti amanu hundi jireenya bara bara qabaatuuf; anis guyyaa dhumaatti du’aa isa nan kaasa.”**

[†] 6:31 6:31 Bau 16:4; Nah 9:15; Far 78:24,25

⁴¹ Kana irratti Yihuudoonni sababii inni, **“Ani buddeena samii irraa gad bu’ee dha”** jedheef isatti guungumuu jalqaban. ⁴² Isaanis, “Kun Yesuus ilma Yoosif, isa nu abbaa fi haadha isaa beeknu sana mitii? Yoos inni akkamitti, **‘Ani samii irraa gad bu’eera’** jedhaa ree?” jedhan.

⁴³ Yesuus immoo akkana jedhee deebiseef; **“Walitti hin guunguminaa.** ⁴⁴ **Abbaan na erge sun isa harkisuu baannaan namni kam iyyuu gara koo dhufuu hin danda’u; anis guyyaa dhumaatti du’aa isa nan kaasa.** ⁴⁵ **Raajota keessatti, ‘Isaan hundi warra Waaqa irraa baratan ni ta’u’ jedhamee barreeffameera. Namni Abbaa irraa dhaga’ee fi kan isa irraa barate hundi gara koo ni dhufa.** ⁴⁶ **Isa Waaqa biraa dhufe sana malee namni tokko iyyuu Abbaa hin argine; isa qofatu Abbaa arge.** ⁴⁷ **Ani dhuguman isinitti hima; kan amanu jireenya bara baraa qaba.** ⁴⁸ **Buddeenni jireenyaa ana.** ⁴⁹ **Abbootiin keessan gammoojjii keessatti mannaa nyaatan; ta’us ni du’an.** ⁵⁰ **Buddeenni samii irraa gad bu’ee garuu isa kana; namni isa nyaatu gonkumaa hin du’u.** ⁵¹ **Buddeenni jiraataan samii irraa bu’e ana. Namni kam iyyuu yoo buddeena kana irraa nyaate bara baraan ni jiraata. Buddeenni ani jireenya addunyaatiif kennus foon koo ti.”**

⁵² Yihuudoonnis, “Namichi kun akkamitti akka nu nyaannuuf foon isaa nuu kennuu danda’a?” jedhanii wal falman.

⁵³ Yesuus immoo akkana jedheen; **“Ani dhuguman isinitti hima; isin foon ilma Namaa nyaachuu baannaan, dhiiga isaas dhuguu baannaan ofii keessaniin jireenya hin qabdan.** ⁵⁴ **Namni foon koo nyaatuu fi dhiiga koo dhugu jireenya bara baraa qaba. Anis guyyaa dhumaatti du’aa isa nan kaasa.** ⁵⁵ **Foon koo nyaata dhugaatii; dhiigni koos dhugaatii dhugaa ti.** ⁵⁶ **Namni foon koo nyaatuu fi dhiiga koo dhugu hundi na keessa jiraata; anis isa keessa nan jiraadha.** ⁵⁷ **Akkuma Abbaan jiraataan na ergee anis sababii Abbaatiin jiraadhu sana, namni na nyaatus sababii kootiin ni jiraata.** ⁵⁸ **Buddeenni samii irraa bu’e isa kana; innis kan akka mannaa Abbootiin keessan nyaatanii du’an sanaa miti; namni buddeena kana nyaatu bara baraan ni jiraata.”** ⁵⁹ **Innis Qifirnaahomitti utuu mana sagadaa keessatti barsiisaa jiruu waan kana dubbate.**

Barattoonni Baay’een Yesuusini Dhiisanii Baqatan

⁶⁰ Barattoota isaa keessaa baay’een yommuu waan kana dhaga’anitti, “Barsiisni kun cimaa dha; eenyutu fudhachuu danda’a?” jedhan.

⁶¹ Yesuus akka barattoonni isaa waa’ee waan kanaa gunguman hubatee akkana jedheen; **“Kun isin gufachiisaa ree? ⁶² Yoos yoo utuu Ilmi Namaa iddoo dur turetti ol ba’uu argitan akkam ta’inna ree? ⁶³ Kan jireenya kennu Hafuura; foon faayidaa hin qabu. Dubbiin ani isinitti dubbadhe Hafuura; jireenyas.** ⁶⁴ **Isin keessas warri hin amanne tokko tokko jiru.”** Yesuus jalqabumaa kaasee isaan keessaa eenyu akka hin amaninii fi eenyu akka dabarsee isa kennu ni beeka tureetii. ⁶⁵ **Innis ittuma fufee, “Sababiin ani, ‘Yoo Abbaa biraa isaaf kenname malee namni kam iyyuu gara koo dhufuu hin danda’u’ isiniin jedheefis kanuma” jedhe.**

⁶⁶ Yeroo kanaa jalqabee barattoota isaa keessaa baay’een duubatti deebi’an; ergasiis isa wajjin hin deemne.

⁶⁷ Yesuus warra Kudha Lamaaniin, **“Isinis deemuu barbaadduu?”** jedhee gaafate.

⁶⁸ Simoon Phexrosis akkana jedhee deebise; “Yaa Gooftaa, gara eenyuu deemna? Ati dubbii jireenya bara baraa qabdaa. ⁶⁹ Nu akka ati Qulqullicha Waaqaa taate amanneerra; beekneerra.”

⁷⁰ Yesuus deebisee, **“Anumatu Kudha Lamaan keessan filate mitii? Ta’us isin keessaa inni tokko diiyaabiloosii dha!”** jedhe. ⁷¹ **Innis waa’ee Yihuudaa ilma Simoon Keeriyotichaa dubbate; Yihuudaan warra Kudha Lamaan keessaa tokko ta’us Yesuusini dabarsee kennuuf tureetii!**

7

Yesuus Ayyaana Daasii Irratti Argamuu Isaa

¹ Kana booddee Yesuus Galiilaa keessa deddeebi’aa ture; sababii Yihuudoonni isa ajjeesuu barbaadaniif inni Yihuudaa keessa hin deddeebine. ² Ayyaanni Daasii Yihuudootaa dhi’ate ture. ³ Obbolloonni isaas akkana jedhaniin; “Akka barattoonni kee warri achii waan ati hojjetu arganiif ka’iitii Yihuudaa dhaqi. ⁴ Namni utuu ifaan ifatti beekamuu barbaaduu dhoksaatti waa hojjetu hin jiruutii. Atis sababii waan kana hojjetuuf addunyaatti of mul’isi.” ⁵ Obbolloonni isaa iyyuu isatti hin amanne tureetii.

⁶ Yesuusis akkana jedheen; **“Yeroon koo amma illee hin geenye; isiniif garuu yeroon hundi mijaa’aa dha. ⁷ Addunyaan isin jibbuu hin danda’u; ana garuu akka hojiin isaa hamaa ta’e waanan itti dhugaa ba’uuf na jibba. ⁸ Isin gara Ayyaana sanaa dhaqaa. Ani garuu waan yeroon koo amma illee hin ga’iniif gara Ayyaanichaatti ol hin ba’u.”**⁹ Inni waan kana isaanitti dubbatee Galilaatti hafe.

¹⁰ Garuu erga obbolloonni isaa gara Ayyaanichaatti ol ba’anii booddee innis utuu ifaan ifatti hin ta’in dhoksaadhaan ol ba’e. ¹¹ Yihuudoonnis Ayyaanicha irratti, “Namichi sun eessa jira?” jedhanii gaafachaa isa barbaadaa turan.

¹² Namoota gidduuttis waa’ee isaa guungummii guddaatu ture. Namoonni tokko tokko, “Inni nama gaarii dha” jedhan.

Warri kaan immoo, “Akkas miti; inni nama dogoggorsa” jedhan. ¹³ Garuu waan Yihuudoota sodaataniif namni tokko iyyuu ifaan ifatti waa’ee isaa hin dubbanne.

Yesuus Ayyaana Irratti Barsiisuu Isaa

¹⁴ Gara walakkaa Ayyaanichaattis Yesuus mana qulqullummaa seenee barsiisuu jalqabe. ¹⁵ Yihuudoonnis dinqifatanii, “Namichi kun akkamitti utuu hin baratin beekumsa akkanaa qabaate?” jedhan.

¹⁶ Yesuusis akkana jedhee deebiseef; **“Barsiisni koo kan isa na ergeeti malee kan koo miti. ¹⁷ Namni fedhii Waaqaa gochuu barbaadu kam iyyuu barsiisni koo Waaqa biraa dhufuu fi dhufuu baachuu isaa yookaan ani ofuma kootiin dubbachuu fi dubbachuu baachuu koo ni beeka. ¹⁸ Namni ofuma isaatiin dubbatu inni ofuma isaatii ulfina argachuu barbaada; namni ulfina kan isa erge sanaa barbaadu garuu inni nama dhugaa ti; jal’innis isa keessa hin jiru. ¹⁹ Museen seera isinii kenneera mitii? Isin keessaa garuu namni tokko iyyuu seera sana hin eegu. Isin maaliif na ajjeesuu barbaaddu?”**

²⁰ Jarris deebisanii, “Hafuura hamaatu si keessa jira; eenyutu si ajjeesuu barbaada?” jedhaniin.

²¹ Yesuusis deebisee akkana jedheen; **“Ani hojii tokko hojjennaan hundi keessan dinqifattan. ²² Museen seera dhagna qabaa isinii kenne; dhagna qabaa garuu abbootiitu jalqabe malee Musee miti; isinis Sanbataan nama dhagna qabdu. ²³ Akka seerri Musee hin cabneef erga namni tokko Sanbataan dhagna qabachuu danda’ee, isin maaliif sababii ani Sanbataan dhagna namaa guutuu fayyiseef natti aartu? ²⁴ Murtii qajeelaa kenna malee, bifa qofa ilaaltanii hin murteessinaa.”**

Yesuus Kun inni Kiristoosii dha?

²⁵ Kana irratti namoota Yerusaaalem keessaa tokko tokko akkana jedhan; “Inni kun namicha isaan ajjeesuuf barbaadan sana mitii? ²⁶ Kunoo inni ifatti ba’ee dubbata; isaanis homaa isaan hin jenne. Abbootiin taayitaa akka inni Kiristoos* ta’e sirriitti beekaniiruu laata? ²⁷ Ta’us namichi kun nama eessaa akka ta’e nu beekna. Kiristoos yommuu dhufutti garuu inni eessaa akka dhufu namni tokko iyyuu hin beeku.”

²⁸ Yesuus utuu mana qulqullummaa keessatti barsiisuu sagalee isaa ol fudhatee akkana jedhe; **“Isin na beektu; akka ani eessaa dhufe illee bektu. Ani ofii kootiin hin dhufne; inni na erge sun dhuga qabeessa. Isin garuu isa hin beektan; ²⁹ ani garuu sababiin isa biraa dhufee fi sababii inni na ergeef isa nan beeka.”**

³⁰ Kana irratti isaan isa qabuu yaalan; garuu waan sa’aatiin isaa hin ga’iniif namni tokko iyyuu harkaan isa hin tuqne. ³¹ Ta’us namoonni baay’een isatti amanani. Isaanis, “Kiristoos yommuu dhufutti namicha kana caalaa mallattoo hojjetaa?” jedhan.

³² Fariisonnis utuu namoonni waa’ee isaa waan akkanaa guungumanuu dhaga’an. Luboonni hangafoonnii fi Fariisonni Yesuus qabsiisuudhaaf eegdotaa mana qulqullummaa ergan.

³³ Yesuusis akkana jedheen; **“Ani yeroo gabaabaa isin wajjin jira; ergasii gara isa na erge sanaa nan dhaqa. ³⁴ Isin na barbaaddu; garuu na hin argattan; iddoo ani jirus dhufuu hin dandeessan.”**

³⁵ Yihuudoonnis akkana waliin jedhan; “Namichi kun akka nu isa hin argineef eessa dhaquu yaade laata? Gara saba keenya warra Giriikota keessa faffaca’anii dhaqee Giriikota barsiisaa? ³⁶ **“Isin na barbaaddu; garuu na hin argattan; iddoo ani jirus dhufuu hin dandeessan’** jechuun isaas maal jechuu isaati?”

³⁷ Guyyaa Ayyaanichi itti hobba’u, guyyaa guddaa sana, Yesuus ka’ee dhaabatee sagalee guddaadhaan akkana jedhe; **“Eenyu iyyuu yoo dheebote, gara koo dhufee haa dhugu. ³⁸ Akkuma Katabbiin Qulqulluun jedhe nama natti amanu kam**

* 7:26 7:26 yookaan Masihiin

iyuu laga bishaan jirenyaatu garaa isaa keessaa burqa.” ³⁹ Kunis waa’ee Hafuura Qulqulluu warri isatti amanani argachuuf jirani dubbachuu isaa ti. Sababii Yesuus amma illee ulfina hin argatiniif Hafuuri Qulqulluun hamma yeroo sanaatti hin kennamne turetii.

⁴⁰ Namoota sana keessaa tokko tokko yommuu dubbii kana dhaga’anitti, “Kun dhugumaanuu Raajicha” jedhan.

⁴¹ Warri kaan immoo, “Inni Kiristoosii dha” jedhan.

Namoonni kaanis akkana jedhan; “Kiristoos Galiilaadhaa dhufaa? ⁴² Akka Kiristoos sanyii Daawit keessaa dhalatuu fi akka inni Beetlihemii, ganda Daawitii dhufu Katabbiin Qulqulluun ni dubbata mitii?” ⁴³ Akkasiin waa’ee Yesuus irratti garaa garummaan waldaa gidduutti uumame. ⁴⁴ Isaan keessaas tokko tokko isa qabuu barbaadan; garuu namni tokko iyyuu harkaan isa hin tuqne.

Amantii Dhabuu Dura Bu’oota Yihuudootaa

⁴⁵ Eegdonni sun gara luboota hangafootaatii fi gara Fariisotaatti deebi’an; isaanis, “Isin maaliif isa hin fidin?” jedhani eegdota sana gaafatan.

⁴⁶ Eegdonnis, “Takkumaa namni akka namicha kanaatti hin dubbanne” jedhani deebisan.

⁴⁷ Fariisonnis deebisanii akkana jedhan, “Isinis gowwoomfamtaniirtuu? ⁴⁸ Bulchitoota keessaa yookaan Fariisota keessaa namni tokko iyyuu isatti amaneeraa? ⁴⁹ Sabni seera hin beekne kun garuu abaaramaa dha.”

⁵⁰ Niqoodemoos inni duraan Yesuus bira dhaqee fi isaan keessaas tokko ta’e sun akkana isaaniin jedhe; ⁵¹ “Seerri keenya utuu isa irraa hin dhaga’in, waan inni hojjetes utuu hin beekin nama tokkotti ni muraa?”

⁵² Isaanis, “Atis nama Galiilaatii? Akka raajiin Galiilaadhaa hin kaane qoradhuu bira ga’i” jedhaniin.

[⁵³ Ergasii isaan hundinuu gara mana isaaniitti galan.]

8

Dubartii Ejja Irratti Qabamte

¹ Yesuus garuu gara Tulluu Ejersaa dhage.

² Ganama bariis deebi’ee mana qulqullummaa dhufe; innis namni hundumtuu isa biratti walitti qabamaan taa’ee isaan barsiise. ³ Barsiistonni seeraatii fi Fariisonni dubartii ejja irratti qabamte tokko isatti fidan. Gidduu isaaniis dhaabachiisani, ⁴ Yesuusiin akkana jedhan; “Yaa barsiisaa, dubartiin kun utuu ejja hojjettuu qabamte. ⁵ Museen Seera keessatti akka warri akkanaa dhagaadhaan tumaman nu ajajeera. Ati immoo maal jetta?” ⁶ Isaanis waan ittiin isa himatan argachuuf jedhani isa qoruudhaaf waan kana gaafatan.

Yesuus garuu gad jedhee quba isaatiin lafa irratti barreessuu jalqabe. ⁷ Isaanis ittuma fufanii isa gaafannaan ol jedhee, “**Isin keessaa namni cubbuu hin qabne dursee isheetti dhagaa haa darbatu**” jedheen. ⁸ Ammas gad jedhee lafa irratti barreesse.

⁹ Isaanis yommuu kana dhaga’anitti maanguddootaa jalqabanii tokko tokkoon ba’anii sokkan; Yesuus immoo dubartitii achuma dhaabatee jirtu wajjin kophaa hafe. ¹⁰ Yesuusiis ol jedhee, “**Dubartii nana, warri si himatan meerre? Namni tokko iyyuu sitti hin murree?**” jedheen.

¹¹ Isheenis, “Yaa Gooftaa, namni tokko iyyuu natti hin murre” jetteen.

Yesuusiis, “**Anis sitti hin muruu deemi; garuu si’achi cubbuu hin hojjetin**” jedheen.]*

Yesuus ifa addunyaa ti

¹² Yesuus ammas, “**Ani ifa addunyaa ti. Namni na duukaa bu’u kam iyyuu ifa jireenyaa qabaata malee dukkana keessa hin deddeebi’u**” jedhee isaanitti dubbate.

¹³ Fariisonnis, “Ati waa’ee mataa keetii dhugaa baata; dhuga ba’umsi kee immoo dhugaa miti” jedhaniin.

¹⁴ Yesuusiis akkana jedhee deebise; “**Ani yoon offii kootiif dhugaa ba’e illee ani akkan eessaa dhufee fi akkan garam deemu waanan beekuuf dhuga ba’umsi koo dhugaa dha. Isin garuu akka ani eessaa dhufe yookaan akka ani garam deemu hin beektan.** ¹⁵ **Isin akka yaada fooniitti murteessitu; ani nama tokkotti illee hin muru.** ¹⁶ **Garoo ani yoon mure illee murtiin koo dhugaa dha; kan murus na qofa miti. Ani Abbaa na erge sana wajjinan jiraatii.** ¹⁷ **Dhuga ba’umsi nama lamaa**

* **8:11** 8:11 Waraabbileen durii hedduun kutaa (Yoh 7:53-8:11) hin qaban yookaan iddoo biraa yookaan immoo wangeelota biraa keessa seensisan.

akka dhugaa ta'e Seera keessan keessatti barreeffameera. ¹⁸ Ani ofii kootiif dhugaa nan ba'a; Abbaan na erges waa'ee koo dhugaa ba'a."

¹⁹ Isaanis, "Abbaan kee eessa jira?" jedhanii isa gaafatan.

Yesuus immoo deebisee, "**Isin anas, Abbaa koos hin beektan; utuu na beektanii silaa Abbaa koos ni beektu turtan**" jedhe. ²⁰ Yesuus utuu mana qulqullummaa keessatti, kutaa buusiin itti kuufamu keessatti barsiisaa jiruu dubbii kana dubbate. Garuu waan sa'aatiin isaa hin ga'iniif namni tokko iyyuu isa hin qabne.

²¹ Yesuus amma illee, "**Ani nan deema; isin na barbaaddu; cubbuu keessaniinis ni duutu. Isin iddoo ani dhaqu dhufuu hin dandeessan**" isaaniin jedhe.

²² Yihuudoonnis, "'Isin iddoo ani dhaqu dhufuu hin dandeessan' jechuun isaa of ajjeesuufii laata?" jedhan.

²³ Innis ittuma fufee akkana jedhe; "**Isin kan gadii ti; ani kan olii ti. Isin kan addunyaa kanaa ti; ani immoo kan addunyaa kanaa miti.** ²⁴ Akka isin cubbuu keessaniin duutan ani isinitti himeera; isin yoo akka ani isa ta'e amanuu baattan, cubbuu keessaniin ni duutu."

²⁵ Isaanis, "Ati eenyu?" jedhanii isa gaafatan.

Yesuus immoo akkana jedhee deebise; "**Ani isuma jalqabaa kaasee isinitti dubbachaa turee dha.** ²⁶ Ani waa'ee keessan waanan jedhuu fi waanan murteessu baay'een qaba. Garuu inni na erge dhugaa qabeessa; anis waanan isa irraa dhaga'e addunyaatti nan hima."

²⁷ Isaan garuu akka inni waa'ee Abbaa isaa isaanitti himaa ture hin hubanne.

²⁸ Kanaafuu Yesuus akkana isaaniin jedhe; "**Yommuu ilma Namaa ol fuutanitti akka ani isa ta'e, waanuma Abbaan na barsiisen dubbadha malee akka ani ofii kootiin homaa hin hojjennee ni beektu.** ²⁹ Inni na erge na wajjin jira; sababii ani yeroo hunda waan isa gammachiisu hojjedhuuf, inni kophaa koo na hin dhiifne."

³⁰ Utuma inni dubbatuus, namoonni baay'een isatti amanani.

Ijoollee Abrahaam

³¹ Yesuus Yihuudoota isatti amananiin akkana jedhe; "**Yoo dubbii kootti cichitanii jiraattan isin dhuguma barattoota koo ti.** ³² Dhugaas ni beektu; dhugaanis bilisa isin baasa."

³³ Isaanis, "Nu sanyii Abrahaam; nu eenyumaafuu takkumaa hin garboomne. Yoos ati akkamitti bilisa baatu nuun jetta ree?" jedhanii.

³⁴ Yesuus deebisee akkana jedhe; "**Ani dhuguman, dhuguman isinitti hima; namni cubbuu hojjetu hundi garbicha cubbuu ti.** ³⁵ Garbichi bara baraan mana hin jiraatu; ilmi garuu bara baraan ni jiraata. ³⁶ Kanaafuu yoo Ilmi bilisa isin baase, isin dhugumaan bilisa ni baatu. ³⁷ Isin sanyii Abrahaam ta'uu keessan anuu beeka. Garuu sababii dubbiin koo isin keessatti iddoo hin qabneef na ajjeesuu barbaaddu. ³⁸ Ani waanan Abbaa koo biratti argen dubbadha; isinis waanuma abbaa keessan irraa dhageessan hojjetu."

³⁹ Isaanis, "Abbaan keenya Abrahaam" jedhan.

Yesuus immoo akkana jedhe; "**Isin utuu ijoollee Abrahaam taatanii silaa hojii Abrahaam hojete ni hojjetu turtan.** ⁴⁰ Isin garuu ana nama dhugaa Waaqa irraa dhaga'e isinitti hime ajjeesuu barbaaddu. Abrahaam waan akkasii hin hojjenne.

⁴¹ Isin waan abbaan keessan hojjetu hojjetu."

Isaanis, "Nu ejaan hin dhalanne. Abbaa tokkicha qabna; innis Waaqa" jedhanii.

Ijoollee Diyaabiloos

⁴² Yesuus akkana isaaniin jedhe; "**Isin utuu Waaqni abbaa keessan ta'ee silaa na jaallattu turtan; ani Waaqa biraa ba'een dhufetii. Isatu na erge malee ani ofii kootiin hin dhufne.** ⁴³ Wannani dubbadhu maaliif isinii hin galu? Sababiin isaas waan isin waan ani jedhu fudhachuu hin feeneef. ⁴⁴ Isin ijoollee abbaa keessanii ijoollee diyaabiloos; fedhiin keessanis hawwii abbaa keessanii raawwachuu dha. Inni jalqabumaa kaasee nama ajjeesaa ture; waan dhugaan isa keessa hin jirreef inni dhugaadhaan hin jiraatu. Inni sobduu fi abbaa sobaa waan ta'eef yommuu soba dubbatutti ofuma keessaa fuudhee dubbata. ⁴⁵ Isin garuu waan ani dhugaa dubbadhuuf na hin amantan! ⁴⁶ Isin keessaa namni cubbuudhaan na himatu eenyu? Erga ani dhugaa dubbadhee, isin maaliif na hin amanne? ⁴⁷ Namni kan Waaqaa ta'e kam iyyuu dubbii Waaqaa ni dhaga'a. Isin waan kan Waaqaa hin ta'iniif hin dhageessan."

⁴⁸ Yihuudoonnis deebisanii, “Ati nama Samaariyaa ti; hafuura hamaatu si keessa jira jechuun keenya dhugaa mitii?” jedhaniin.

⁴⁹ Yesuus immoo akkana jedhe; **“Hafuurri hamaan na keessa hin jiru; ani Abbaa koo nan kabaja; isin garuu na hin kabajjan.** ⁵⁰ **Ani ulfina mataa koo hin barbaadu; garuu kan isa barbaadu tokkodu jira; innis Abbaa murtii ti.** ⁵¹ **Ani dhuguman, dhuguman isinitti hima; eenyu iyyuu yoo dubbii koo eege bara baraan du’a hin argu.”**

⁵² Yihuudoonnis akkana jedhaniin; “Akka hafuurri hamaan si keessa jiru nu amma barreerra. Abrahaam du’eera; raajonnis du’aniiru; ati garuu, ‘Eenyu iyyuu yoo dubbii koo eege bara baraan du’a hin dhandhamu’ jetta. ⁵³ Ati abbaa keenya Abrahaam caaltaa? Inni du’eera; raajonnis du’aniiru. Egaa ati eenyu ofiin jetta ree?”

⁵⁴ Yesuus akkana jedhee deebise; **“Ani yoon ofii kootiif ulfina kenne, ulfinni koo gatii hin qabu. Kan ulfina naa kennu Abbaa koo isuma isin Waaqa keenya jettaniin sanaa dha.** ⁵⁵ **Yoo isin isa beekuu baattan illee ani isa beeka. Ani utuu isa hin beeku jedhee silaa akkuma keessan sobduu nan ta’a ture. Ani garuu isa beeka; dubbii isaa illee nan eega.** ⁵⁶ **Abbaan keessan Abrahaam guyyaa koo arguuf gammadee ture; innis ni arge; ni gammades.”**

⁵⁷ Yihuudoonnis, “Umuriin kee waggaa shantama iyyuu hin guunne; yoos Abrahaamin argiteertaa?” jedhaniin.

⁵⁸ Yesuus, **“Ani dhuguman, dhuguman isinitti hima; utuu Abrahaam hin dhalatin iyyuu ani anuma”** isaaniin jedhe. ⁵⁹ Kana irratti isaan isa dha’uuf jedhaniin dhagaa guurratan; Yesuus garuu dhokatee mana qulqullummaatii ba’ee deeme.

9

Yesuus Namicha Jaamaa Tokko Fayyisuu Isaa

¹ Yesuus utuu darbuu namicha dhalootuma isaatii jalqabee jaamaa ture tokko arge. ² Barattoonni isaas, “Yaa barsiisaa, akka namichi kun jaamaa ta’ee dhalatuuf eenyutu cubbuu hojjetee? Isuma moo abbaa fi haadha isaa ti?” jedhaniin isa gaafatan.

³ Yesuus akkana jedhee deebise; **“Akka hojiin Waaqaa isaan mul’atuuf malee inni yookaan abbaa fi haati isaa cubbuu hojjetanii miti.** ⁴ **Utuu guyyaa ta’ee jiruu hojii isa na ergee hojjechuun qabna. Halkan namni tokko iyyuu itti hojjechuu hin dandeenye ni dhufa.** ⁵ **Ani yommuun addunyaa irra jiru, ifa addunyaa ti.”**

⁶ Innis erga waan kana dubbatee booddee lafatti tufee dhoqqee tolche; dhoqqee sanas ija namichaatti dibe. ⁷ Innis namicha sanaan, **“Dhaqiti Haroo Saliihoomitti dhiqadhu”** jedhe. Saliihoom jechuun kan ergame jechuu dha. Namichis dhaqee dhiqate; argaas deebi’ee dhufe.

⁸ Olloonna isaatii fi namoonni duraan utuu inni kadhatuu argan, “Namichi kun isuma taa’ee kadhachaa ture sana mitii?” jedhan. ⁹ Namoonni tokko tokko, “Eeyyee, isa” jedhan.

Kaan immoo, “Miti, isa fakkaata malee” jedhan.

Inni garuu, “Namichi sun anuma” jedhe.

¹⁰ Jarris, “Iji kee akkamitti baname ree?” jedhaniin.

¹¹ Innis deebisee, “Namicha Yesuus jedhamutu dhoqqee tolchee ija koo dibee, ‘Gara Haroo Saliihoom dhaqiti dhiqadhu’ naan jedhe; anis dhaqeen dhiqadhe; arguus nan danda’e.”

¹² Isaanis, “Namichi sun eessa jira?” jedhaniin isa gaafatan.

Inni immoo, “Ani hin beeku” jedheen.

Fariisonni Waa’ee Fayyuu Namichaa Qorachuu Isaanii

¹³ Isaanis namicha jaamaa ture sana Fariisotatti geessan. ¹⁴ Guyyaan itti Yesuus dhoqqee tolchee ija namichaa bane Sanbata ture. ¹⁵ Fariisonnis namichi akkamitti akka arguu danda’e isa gaafatan; namichis, “Inni dhoqqee tolchee ija koo dibee; anis nan dhiqadhe; nan arges” jedheen.

¹⁶ Fariisota keessaas tokko tokko, “Namichi kun waan Sanbata hin eegneef, inni Waaqa biraa hin dhufne” jedhan.

Warri kaan garuu, “Cubbamaan tokko akkamitti dinqii akkanaa hojjechuu danda’a?” jedhan. Garaa garummaan isaan gidduutti uumame.

¹⁷ Isaanis amma illee namicha jaamaa ture sanaan, “Waa’ee namicha ija kee siif bane sanaa maal jetta?” jedhan.

Namichis deebisee, “Inni raajii dha” jedhe.

¹⁸ Yihuudoonnis hamma abbaa fi haadha namicha agartuu isaa argate sanaa waamanitti akka inni jaamaa turee fi akka inni agartuu isaa argate amma illee hin

amanne. ¹⁹ Isaanis, “Inni kun ilma keessan isuma isin jaamaa ta’ee dhalate jettan sanaa? Yoos amma immoo akkamitti arguu danda’a ree?” jedhanii gaafatan.

²⁰ Abbaa fi haati namichaas deebisanii akkana jedhan; “Akka inni ilma keenya ta’ee fi akka inni jaamaa ta’ee dhalate ni beekna. ²¹ Garuu amma akkamitti akka arguu danda’e yookaan ija isaa eenyu akka baneef nu hin beeknu. Inni nama ga’aa dha; waa’ee mataa isaa dukbachuu ni danda’a; isuma gaafadhaa.” ²² Abbaa fi haati isaa sababii Yihuudoota sodaataniif waan kana jedhan; namni kam iyyuu yoo Yesuus inni Kiristoos* jedhee dhugaa ba’e akka mana sagadaa keessaa ari’amu Yihuudoonni kanaan dura walii galanii murteessanii turaniitii. ²³ Kanaafuu abbaa fi haati isaa, “Inni nama ga’aa dha; isuma gaafadhaa” jedhan.

²⁴ Isaanis yeroo lammaffaa namicha jaamaa ture sana waamanii, “Waaqaaf ulfina kenni. Namichi kun cubbamaa ta’uu isaa nu ni beekna” jedhaniin.

²⁵ Innis, “Cubbamaa ta’uu fi ta’uu baachuu isaa ani hin beeku. Ani waan tokkon beeka. Ani jaamaan ture; amma garuu nan arga!” jedhee deebise.

²⁶ Isaanis, “Inni maal siif godhe? Ija kees akkamitti siif bane?” jedhanii isa gaafatan.

²⁷ Inni immoo, “Ani kanaan dura isinitti himeera; isinis hin dhageenye. Ammas maaliif dhaga’uu barbaaddu? Isinis barattoota isaa ta’uu barbaadduu?” jedheen.

²⁸ Isaanis akkana jedhanii isa arrabsan; “Barataan namicha kanaa si’i! Nu barattoota Musee ti! ²⁹ Akka Waaqni Museetti dubbate nu beekna; namichi kun garuu eessaa akka dhufe iyyuu hin beeknu.”

³⁰ Namichis deebisee akkana jedhe; “Inni eessaa akka dhufe wallaaluun keessan waan nama dinguu dha; garuu inni ija koo naa bane. ³¹ Akka Waaqni cubbamoota hin dhageenye ni beekna. Inni nama isa waaqeffatuu fi dhufii isaa guutu dhaga’a. ³² Eenyu iyyuu ija nama jaamaa ta’ee dhalate tokkoo akka bane uumama addunyaatii jalqabee hin dhaga’amne. ³³ Namichi kun utuu Waaqa biraa ta’uu baatee silaa homaa gochuu hin danda’u ture.”

³⁴ Isaanis deebisanii, “Ati kan guutummaatti cubbuun dhalatte, situ nu barsiisaa?” jedhaniin. Alattis gad isa baasan.

Jaamummaa Hafuura

³⁵ Yesuusis akka isaan gad isa baasan dhaga’e; yommuu isa argettis, “**Ati Ilma Namaatti ni amantaa?**” jedheen.

³⁶ Namichis, “Yaa gooftaa, akka ani isatti amanuuf inni eenyu?” jedhe.

³⁷ Yesuusis, “**Ati amma isa argiteerta; inni si wajjin haasa’aa jiru isuma**” jedheen.

³⁸ Namichi sunis, “Yaa Gooftaa, ani nan amana” jedhe; ni sagadeefis.

³⁹ Yesuus immoo, “**Warri hin argine akka arganiif, warri argan immoo akka jaamaniif ani murtiif gara addunyaa kanaa dhufeera**” jedhe.

⁴⁰ Fariisota isa wajjin turan keessaa tokko tokko waan kana jechuu isaa dhaga’anii, “Nus jaamota miti ree?” jedhanii gaafatan.

⁴¹ Yesuusis, “**Utuu jaamota taatanii silaa cubbuu hin qabdan ture; isin garuu, ‘Ni argina’ jettu; cubbuun keessan ni jiraata**” jedheen.

10

Tiksee Gaarii fi Hoolota Isaa

¹ “**Ani dhuguman, dhuguman isinitti hima; namni balbalaan gola hoolotaa hin seennee, garuu karaa biraatiin koree seenu inni hattuu fi saamtuu dha.**

² **Namni balbalaan seenu immoo tiksee hoolotaa ti.** ³ **Eegduunis balbala isaaf bana; hoolonnis sagalee isaa ni dhaga’u. Innis hoolota isaa maqaa maqaan waamee gad yaasa.** ⁴ **Erga warra kan isaa ta’an hunda gad yaasee booddee isaan dura deema; hoolonni isaas waan sagalee isaa beekaniif isa faana bu’u.** ⁵ **Orma garuu ni baqatu malee faana hin bu’an; sagalee ormaa hin beekaniitii.**” ⁶ Yesuus fakkeenya kana isaanitti hime; isaan garuu akka inni maal isaanitti himaa ture hin hubanne.

⁷ Kanaafuu Yesuus ammas akkana jedheen; “**Dhuguman, dhuguman isinitti hima; ani balbala hoolotaa ti.** ⁸ **Warri na dura dhufan hundi hattootaa fi saamtota; hoolonni garuu isaan hin dhageenye.** ⁹ **Balbala ani; namni karaa kootiin ol seenu kam iyyuu ni fayya. Inni ni seena; ni ba’as; lafa dheedaas ni argata.**

¹⁰ **Hattichi hatuuf, ajjeesuu fi balleessuu qofaaf dhufa; ani garuu akka isaan jireenya qabaataniif, jireenya irraa hafaas akka qabaataniif dhufeera.**

* 9:22 9:22 yookaan Masiihicha

¹¹ “Tikseen gaariin ana. Tikseen gaariin hoolota isaatiif jedhee lubbuu isaa dabarsee kenna. ¹² Namni qacaramaan kan tiksee hin ta’in garuu waan hoolonni kan isaa hin ta’iniif yommuu dhufaatii yeeyyii argutti hoolota dhiisee baqata. Yeeyyiinis bushaayee ni butata; ni bittinneessas. ¹³ Namichi waan qacaramaa ta’eef ni baqata; dhimma hoolotaas hin qabu.

¹⁴ “Tikseen gaariin ana; ani hoolota koo beeka; hoolonni koos na beeku; ¹⁵ kunis akkuma Abbaan na beekutti fi akkuma ani Abbaa beekutti. Anis lubbuu koo hoolotaaf nan kenna. ¹⁶ Ani warra gola kanatti galan malees hoolota gara biraan qaba. Isaanis fiduun qaba. Isaanis sagalee koo ni dhaga’u; karra tokkos ni ta’u; tikseen isaaniis tokko ta’a. ¹⁷ Kanaafuu Abbaan waan ani deebisee fudhachuuf lubbuu koo dabarsee kennuuf na jaallata. ¹⁸ Lubbuu koo anumatu ofii kootiin dabarsee kenna malee eenyu iyyuu narraa hin fudhatu. Ani lubbuu koo dabarsee kennuuf taayitaan qaba; deebisee fudhachuufis taayitaan qaba. Ajaja kanas Abbaa koo biraa fudhadheera.”

¹⁹ Amma illee sababii dubbii kanaatiif Yihuudoota gidduutti garaa garummaan uumame. ²⁰ Baay’een isaaniis, “Hafuura hamaatu isa keessa jira; inni maraateera. Isin maaliif isa dhageessu?” jedhan.

²¹ Warri kaan immoo, “Kun jecha nama hafuura hamaadhaan qabame miti. Hafuurri hamaan ija nama jaamaa banuu ni danda’aa?” jedhan.

Amantii Dhabuu Yihuudoota

²² Yeroo sana Ayyaanni mana qulqullummaa haaromsuu * Yerusaaemitti ayyaanef-famee ture. Yeroon sunis ganna ture; ²³ Yesuusis mana qulqullummaa keessa gardaafoo Solomoon keessa deddeebi’aa ture. ²⁴ Yihuudoonnis isa marsanii, “Hamma yoomiitti galbii nu rarraaftaa? Ati yoo Kiristoos† taate ifatti baasii nutti himi” jedhaniin.

²⁵ Yesuusis akkana jedhee deebiseef; “Ani isinitti himeera; isin garuu hin amantan. Hojiin ani maqaa Abbaa kootiitiin hojjedhu waa’ee koo dhugaa ba’a. ²⁶ Isin garuu waan hoolota koo hin ta’iniif hin amantan. ²⁷ Hoolonni koo sagalee koo ni dhaga’u; anis isaan beeka; isaanis na faana bu’u. ²⁸ Anis jireenya bara baraa nan kennaaf; isaanis gonkumaa hin badan. Eenyu iyyuu harka koo keessaa isaan hin butatu. ²⁹ Abbaan koo kan natti isaan kenne sun hunduma caala; namni tokko iyyuu harka Abbaa kootii keessaa isaan butachuu hin danda’u. ³⁰ Anii fi Abbaan tokkuma.”

³¹ Yihuudoonni isa dha’uuf jedhanii ammas dhagaa guurratan. ³² Yesuusis, “Ani hojii Abbaa kootii gaarii baay’ee isinitti argisiiseera. Hojii kana keessaa isin sababii isa kamiitiif dhagaadhaan na dhoofu?” jedheen.

³³ Yihuudoonnis, “Nu hojii gaariif jennee dhagaadhaan si hin dhoofnu; garuu waan ati Waaqa arrabsitee utumaa nama taatee jirtuu Waaqa of gooteef si dhoofna” jedhanii deebisaniif.

³⁴ Yesuus immoo akkana jedhee deebiseef; “Seera keessan keessatti, ‘Anuu isin, “waaqota” jedheera’; jedhamee barreeffameera mitii? ³⁵ Inni erga warra dubbiin Waaqaa isaaniif dhufeen ‘waaqota’ jedhee, Katabbiin Qulqulluun immoo waan hin diigamneef, ³⁶ sababii ani, ‘Ani ilma Waaqaa ti’ jedheef, isin maaliif isa Abbaan qulqulleessee gara addunyaatti erge sanaan ‘Ati Waaqa arrabsita’ jettu? ³⁷ Yoo ani hojii Abbaa kootii hojjechuu baadhe na hin amaninaa. ³⁸ Yoo ani hojii sana hojjedhe garuu yoo na amanuu baattan illee hojicha amanaa; kunis akka Abbaan na keessa jiru, akka anis Abbaa keessa jiru beektanii akka hubattaniif.”

³⁹ Isaan amma illee isa qabuu barbaadan; inni garuu isaan harkaa miliqe.

⁴⁰ Yesuus ergasii deebi’ee Yordaanos gama iddoo Yohannis jalqabatti itti cuuphaa ture sana dhaqee achis ture. ⁴¹ Namoonni baay’eenis gara isaa dhufanii, “Yohannis mallattoo tokko illee hin hojjenne; garuu wanni inni waa’ee namicha kanaa dubbate hundinuu dhugaa dha” jedhan. ⁴² Achittis namoonni hedduun Yesuusitti amanan.

11

Du’uu Al’aazaar

* **10:22** 10:22 Ayyaanni mana qulqullummaa haaromsuu Hanukkaajedhamee beekama - Ji’i Hanukkaa Sadaasaa wajjin tokkuma. Ayyaanni kunis guyyaa itti Yihuudaa Maqaabiis (dhaloota Kiristoos dura bara 164 keessa) mana qulqullummaa kan namoonni Sooriyaa waggaa sadii xureessan sana haaromse yaadachuuf godhame. Ayyaanichis guyyaa digdamii shanaffaa ji’a sanaa irraa jalqabee hamma guyyaa saddeetiitti ayyaanefama ture. Yeroon kun Yihuudootaaf yeroo gammachuu guddaa ture. † **10:24** 10:24 yookaan Masiihicha ‡ **10:34** 10:34 Far 82:6

¹ Namichi Al'aazaar jedhamu kan Biitaaniyaa keessa jiraatu tokko dhukkubsatee ture. Biitaaniyaan ganda Maariyaamii fi obboleettiin ishee Maartaan keessa jiraatanii dha. ² Maariyaam isheen obboleessi ishee Al'aazaar dhukkubsate kun, isheedhuma Gooftaa shattoo dibdee rifeensa mataa isheetiin miilla isaa haqxee sanaa dha. ³ Kanaaf obboleettonni isaa, "Yaa Gooftaa, inni ati jaallattu kunoo dhukkubsatee jira" jedhanii Yesuusitti dhaaman.

⁴ Yesuusis yommuu waan kana dhaga'etti, "**Dhibeen kun akka Ilmi Waaqaa ittiin ulfaatuuf, ulfina Waaqaatiif dhufe malee du'aan hin ga'u**" jedhe. ⁵ Yesuusis Maartaa fi obboleettii ishee, Al'aazaarinis ni jaallata ture. ⁶ Innis yommuu akka Al'aazaar dhukkubsate dhaga'etti guyyaa lama idduma jiru sana ture. ⁷ Innis ergasii barattoota isaatiin, "**Kottaa Yihuudaatti deebinaa**" jedhe.

⁸ Barattoonni isaa immoo, "Yaa Barsiisaa, Yihuudoonni dhi'eenya kana dhagaadhaan si tumuu barbaadaa turan; ati amma illee deebitee achi dhaqxaa?" jedhaniin.

⁹ Yesuusis akkana jedhee deebiseef; "**Guyyaan tokko sa'atii kudha lama qaba mitii? Namni guyyaan deemu waan ifa addunyaa kanaatiin arguuf hin gufatu.**" ¹⁰ **Kan halkaniin deemu garuu sababii ifni isa keessa hin jirreef ni gufata."**

¹¹ Innis erga waan kana dubbatee booddee, "**Michuun keenya Al'aazaar rafeera; ani garuu hirribaa isa kaasuu nan dhaqa**" isaaniin jedhe.

¹² Barattoonni isaas, "Yaa Gooftaa, yoo rafee jiraate ni fayya" jedhaniin. ¹³ Yesuus waa'ee du'a Al'aazaar dubbate; barattoonni isaa garuu waan inni waa'ee rafitii hirribaa dubbate se'an.

¹⁴ Kanaafuu Yesuus akkana jedhee ifatti baasee isaanitti hime; "**Al'aazaar du'eera; akka isin amantaniif ani waan achi hin turiniif waa'ee keessaniif nan gammada. Ta'us kottaa gara isaa dhaqnaa.**"

¹⁶ Toomaas inni Didimoos jedhamu immoo barattoota kaaniin, "Nus akka isa wajjin duunuuf ka'aa ni dhaqnaa" jedhe.

Yesuus Obboleettota Al'aazaar Jajjabeessuu Isaa

¹⁷ Yesuus yommuu achi ga'etti Al'aazaar erga awwaalamee guyyaa afur akka ture beeke. ¹⁸ Biitaaniyaan Yerusaalem irraa gara kiiloo meetira sadii fagaatti turte; ¹⁹ Yihuudoonni baay'een Maartaa fi Maariyaamin sababii obboleessa isaaniitiif isaan jajjabeessuu dhaqanii turan. ²⁰ Maartaan yommuu dhufaatii Yesuus dhageessetti isa simachuu gad baate; Maariyaam garuu mana teesse.

²¹ Maartaanis Yesuusiin akkana jette; "Yaa Gooftaa, utuu ati as jiraattee silaa obboleessi koo hin du'u ture. ²² Ammas taanaan akka waan ati Waaqa kadhattu hunda Waaqni siif kennu nan beeka."

²³ Yesuusis, "**Obboleessi kee ni ka'a**" jedheen.

²⁴ Maartaanis deebitee, "Akka inni du'aa ka'uu guyyaa dhumaa sanatti ka'u anuu beeka" jetteen.

²⁵ Yesuus immoo akkana isheedhaan jedhe; "**Du'aa ka'uu fi jireenyi ana. Namni natti amanu yoo du'e iyyuu ni jiraata; ²⁶ kan na keessa jiraatuu fi kan natti amanu hundinuu bara baraan hin du'u. Kana ni amantaa ree?"**

²⁷ Isheenis, "Eeyyee yaa Gooftaa, akka ati Kiristoos* Ilma Waaqaa kan gara addunyaa dhufu sana taate nan amana" jetteen.

²⁸ Isheenis erga akkas jettee dhaqxee obboleettii ishee Maariyaamin kophaatti waamtee, "Barsiisaan dhufeera; si waamas" jetteen. ²⁹ Maariyaamis yommuu waan kana dhageessetti ariitiin kaatee gara isaa dhaqxe. ³⁰ Yesuus yeroo sana iddoo Maartaan itti isa simatte ture malee amma illee ganda sana hin seenne. ³¹ Yihuudoonni Maariyaamin jajjabeessaa mana keessa ishee wajjin turanis yommuu akka isheen ariitiidhaan kaatee gad baate arganitti waan isheen achitti boo'uuf jettee gara awwaalaa dhaqxu se'anii ishee duukaa bu'an.

³² Maariyaamis yommuu iddoo Yesuus ture sana geessee isa argitetti, miilla isaa irratti kuftee, "Yaa Gooftaa utuu ati as jiraattee silaa obboleessi koo hin du'u ture" jetteen.

³³ Yesuusis yommuu boo'uu ishee, Yihuudoonni ishee wajjin dhufanis boo'uu isaanii argetti hafuuraan akka malee jeeqame; ni dhiphates. ³⁴ Innis, "**Eessa isa keessan?"** jedhee isaan gaafate.

Isaanis, "Yaa Gooftaa, kottuu ilaali" jedhaniin.

³⁵ Yesuusis imimmaan dhangalaase.

³⁶ Yihuudoonnis, "Inni hammam akka isa jaallatu mee ilaala!" jedhan.

³⁷ Isaan keessaa tokko tokko garuu, "Inni kan ija namicha jaamaa sanaa bane, akka namichi kunis hin duune gochuu hin danda'u turee?" jedhan.

* 11:27 11:27 yookaan Masiihicha

Yesuus Al'aazaarin Du'aa Kaase

³⁸ Yesuus ammas akka malee jeeqamee gara awwaala sanaa dhaqe. Awwaalli sunis holqa balballi isaa dhagaadhaan cufame tokko ture. ³⁹ Yesuus, **“Dhagaa kana achi irraa fuudhaa!”** jedhe.

Maartaan obboleettiin isa du'e sanaa garuu, “Yaa Gooftaa, inni erga awwaalamee waan guyyaa amur tureef yoonaa ni ajaa'a” jetteen.

⁴⁰ Yesuus ifmoo, **“Ati yoo amante akka ulfina Waaqaa argitu ani sitti hin himnee?”** jedheen.

⁴¹ Kanaafuu isaan dhagicha irraa kaasan. Yesuusis ol ilaalaa akkana jedhe; **“Yaa Abbaa, waan ati na dhageesseef sin galateeffadha. ⁴² Akka ati yeroo hunda na dhageessu ani beekeera; garuu akka namoonni as dhadhaabatan kunneen akka ati na ergite amananiif ani isaaniif jedheen waan kana dubbadhe.”**

⁴³ Yesuus waan kana dubbatee, **“Al'aazaar, as ba'i!”** jedhee sagalee guddaadhaan iyye. ⁴⁴ Namichi du'e sunis akkuma harki isaatii fi miilli isaa huccuudhaan kafanamee, fuulli isaa wayyaadhaan marametti gad ba'e.

Yesuus, **“Isa hiikaa, haa deemu”** isaaniin jedhe.

Mala Yesuusin Ajjeesuuf Malatame

⁴⁵ Kanaafuu Yihuudoota gara Maariyaam dhufanii waan Yesuus hojjete argan keessaa hedduun isatti amanan. ⁴⁶ Isaan keessaa tokko tokko garuu Fariisota bira dhaqanii waan Yesuus hojjete itti himan. ⁴⁷ Kana irratti luboonni hangafoonnii fi Fariisonni yaa'ii Yihuudootaa waaman.

Isaanis akkana jedhanii gaafatan; “Namichi kun mallattoo baay'ee argisiisaa jira. Maal haa goonu? ⁴⁸ Yoo akkasumatti isa dhiifne namni hundi isatti amana; warri Romaas dhufanii iddoo keenyaa fi saba keenya nurraa fudhatu.”

⁴⁹ Isaan keessaas namichi Qayyaaffaa jedhamu kan bara sana luba ol aanaa ture tokko akkana isaaniin jedhe; “Isin waan tokko illee hin beektan! ⁵⁰ Sabni guutummaatti dhumu irra namni tokko sabaaf du'uun akka isinii wayyu hin hubattan.”

⁵¹ Inni bara sana waan luba ol aanaa tureef, akka Yesuus saba sanaaf du'u raajii dubbachuu isaati malee dubbii kana of keessaa fuudhee hin dubbanne; ⁵² kunis ijoollee Waaqaa kanneen bittinnaa'an walitti qabee tokko gochuuf malee saba sana qofaaf miti.

⁵³ Kanaafuu isaan gaafasii jalqabaniis isa ajjeesuuf malachaa turan.

⁵⁴ Kanaafuu Yesuus ifatti ba'ee Yihuudoota gidduu hin deddeebine. Achii ka'ee gara magaalaa Efreem jedhamu kan gammoojjiitti dhi'aatu tokkoo dhaqe; barattoota isaa wajjinis achi ture.

⁵⁵ Faasiikaan Yihuudootaa waan dhi'aatee tureef, namoonni hedduun utuu Faasiikaan hin ga'in of qulqulleessuuf jedhanii baadiyyaadhaa Yerusaaletimitti ol ba'an. ⁵⁶ Isaanis Yesuus barbaadaa turan; mana qulqullummaa keessaa dhaabatanii, “Isin maal seetu? Inni gara Ayyaana kana hin dhufuu laata?” waliin jedhan. ⁵⁷ Luboonni hangafoonnii fi Fariisonni garuu Yesuus qabuuf jedhanii namni iddoo inni jiru beeku yoo jiraate akka isaanitti himuuf ajaja kennanii turan.

12*Yesuus Biitaaniyaatti Shittoo Dibame*

12:1-8 kwi - Mat 26:6-13; Mar 14:3-9; Luq 7:37-39

¹ Faasiikaa dura guyyaa ja'ffaatti Yesuus gara Biitaaniyaa ganda Al'aazaar, kan Yesuus du'aa isa kaase sun jiraachaa turee dhaqe. ² Achitti irbaata qopheessaniif. Maartaanis ni tajaajilti turte; Al'aazaaris warra isa wajjin irbaatatti dhi'aatan keessaa tokko ture. ³ Maariyaamis shittoo Naardoo qulqulluu gatiin isaa guddaa kan gara liitirii walakkaa ta'u fiddee miilla Yesuus dibde; rifeensa mataa isheetiinis miilla isaa haqxe. Manichis urgaa shittoo sanaatiin guutame.

⁴ Barattoota isaa keessaa tokko kan dabarsee isa kennuuf jiru Yihuudaa Keeriyotichi garuu akkana jedhe; ⁵ “Shittoon kun maaliif diinaarii dhibba sadiitti* gurguramee hiyyeeyyiif hin kennamne?” ⁶ Akkana jechuun isaa waan hattuu tureef malee hiyyeeyyiif yaade miti. Innis sababii korojoon maallaqaa harka isaa tureef, waan achi keessa buufamu irraa ofii isaatii fudhachaa ture.

⁷ Yesuusis deebisee akkana jedhe; **“Isheen shittoo kana guyyaa awwaala kootiitiif haa tursituutii ishee dhiisaa. ⁸ Hiyyeeyyii yeroo hunda of biraa qabdu; ana garuu yeroo hunda of biraa hin qabdan.”**

* 12:5 12:5 Diinaariin dhibba sadii mindaa hojjetaan tokko waggaatti argatuu dha.

⁹ Yihuudoonni baay'een akka Yesuus achi jiru beekanii Yesuus qofaaf jedhaanii utuu hin ta'in, Al'aazaar isa inni du'aa kaases ilaaluuf dhufan. ¹⁰ Kanaafuu lu-boonni hangafoonni Al'aazaarinis ajjeesuuf mari'atan; ¹¹ Yihuudoota keessaa namoonni baay'een sababii isaatiif dhaqanii Yesuusitti amanaa turaniitii.

Yesuus Akka Mootiitti Yersaalem Seenuu Isaa

12:12-15 kwf - Mat 21:4-9; Mar 11:7-10; Luq 19:35-38

¹² Guyyaa itti aanutti namoonni Ayyaanichaaf dhufanii turan baay'een akka Yesuus gara Yersaalem dhufaa jiru dhaga'an. ¹³ Isaanis damee meexxii harkatti qabatanii isa simachuu ba'an; iyyaniis akkana jedhan; "Hoosaa'inaa!"[†]

"Inni maqaa Gooftaatiin dhufu eebbifamaa dha!"[‡]

"Mootiin Israa'el eebbifamaa dha!"

¹⁴ Yesuusis ilmoo harree tokko argatee yaabbate; kunis akkuma akkana jedhamee barreeffamee dha;

¹⁵ "Yaa Intala Xiyoon, hin sodaatin; kunoo, mootiin kee,

ilmoo harree yaabbatee dhufuutti jira."§

¹⁶ Barattoonni isaa jalqabatti waan kana hin hubanne. Erga Yesuus ulfina argatee booddee garuu akka wanni barreeffame kun waa'ee isaa ta'ee fi akka isaanis waanuma kana isaaf godhan yaadatan.

¹⁷ Namoonni baay'een yommuu inni Al'aazaarin awwaala keessaa waamee du'aa kaasetti isa wajjin turanis ittuma fufanii dhugaa ba'an. ¹⁸ Namoonni baay'eenis sababii mallattoo kana gochuu isaa dhaga'aniif isa simachuu ba'an. ¹⁹ Kanaafuu Fariisonni, "Isin akka waa tokko illee gochuu hin dandeenye argitanii? Ilaa, addunyaan guutuun akkamitti akka isa duukaa bu'ee ilaalaa!" waliin jedhan.

Yesuus Duraan Dursee Waa'ee Du'a Isaa Dubbate

²⁰ Warra yeroo Ayyaanichaatti waageffachuuf ol ba'an keessaa tokko tokko Giriikota turan. ²¹ Isaanis Filiphooos namicha Beetisayidaa Galiilaatii dhufe sanatti dhi'aatanii, "Yaa gooftaa, Yesuus arguu barbaanna" jedhaniin. ²² Fiiliphooos dhaqee Indiriyaa-sitti hime; Indiriyaa-si fi Filiphooos immoo dhaqanii Yesuusitti himan.

²³ Yesuus immoo akkana jedhee isaaniif deebise; "**Sa'aatiin Ilmi Namaa itti ulfina argatu ga'eera.** ²⁴ **Ani dhuguman, dhuguman isinitti hima; iji qamadii tokko yoo lafa bu'ee du'uu baate kophaa isaa hafa. Yoo du'e garuu ija baay'ee naqata.** ²⁵ **Namni lubbuu isaa jaallatu kam iyyuu lubbuu isaa ni dhaba; kan addunyaa kana irratti lubbuu isaa jibbu immoo jireenya bara baraatiif lubbuu isaa kaa'ata.** ²⁶ **Namni na tajaajilu kam iyyuu na faana haa bu'u; iddoo ani jiru tajaajilaan koos ni jiraata. Abbaan koo nama na tajaajilu kamiif iyyuu ulfina ni kenna.**

²⁷ "**Amma lubbuun koo dhiphatteerti; egaa ani maal jedhu ree? 'Yaa Abbaa, sa'aatii kana jalaa na baasi; garuu ani sababii kanaafan gara sa'aatii kanaa dhufe.** ²⁸ **Yaa Abbaa, maqaa kee ulfeessi!**"

Ergasii sagaleen, "Ani isa ulfeesseera; ammas nan ulfeessa" jedhu tokko samiidhaa dhufe. ²⁹ Tuunni achi dhaabachaa ture yommuu sagalee kana dhaga'etti, "Ni kakawwise" jedhe. Warri kaan immoo, "Ergamaa Waaqaatu isatti dubbate" jedhan.

³⁰ Yesuus akkana jedhee deebise; "**Sagaleen kun sababii keessaniif dhufe malee sababii kootiif miti.** ³¹ **Yeroon itti addunyaa kanatti muramu amma; bulchaan addunyaa kanaas amma gad gatama.** ³² **Ani garuu yeroon lafa irraa ol fuudhamutti nama hunda ofitti nan harkisa.**" ³³ Innis akka du'a akkamii du'uuf jiru argisiisuuf kana jedhe.

³⁴ Tuunnis deebisee, "Akka Kiristoos* bara baraan jiraatu nu Seera irraa dhageeny-eerra; yoois atti akkamitti, '**Ilmi Namaa ol fuudhamuu qaba**' jetta? 'Ilmi Namaa' kunis eenyu?" jedheen.

³⁵ Yesuus immoo akkana jedheen; "**Ifni yeroo gabaabaadhaaf isin bira jira. Akka dukkanni isin hin liqimsineef utuu ifa qabdanuu deddeebi'aa. Namni dukkana keessa deddeebi'u eessa akka dhaqu hin beekuutii.** ³⁶ **Ijoollee ifaa akka taataniif utuu ifa qabdanuu ifa sanatti amanaa.**" Yesuusis erga waan kana dubbatee fixee booddee iddoo sanaa ka'ee isaan duraa dhokate.

† 12:13 12:13 Hoosaa'inaa jechuun afaan Ibraayisxiitiin "Amma fayyisi" jechuu dha; kunis jecha galataa ti. ‡ 12:13

12:13 Far 118:25,26 § 12:15 12:15 Zak 9:9 * 12:34 12:34 yookaan Masihiichi

Amantii Dhabuu Yihuudootaa

³⁷ Yesuus fuula isaanii duratti mallattoo hedduu hojjetu iyyuu, isaan isatti hin amanne.

³⁸ Kunis dubbii Isaayyaas raajichaa kan:

“Yaa Gooftaa, ergaa keenya eenyutu amane?”

Irreen Gooftaas eenyutti mul'ate?”[†]

jedhu sun akka raawwatuuf ture.

³⁹ Sababii kanaaf isaan amanuu hin dandeenye; Isaayyaas iddoo biraatti akkana jedheeraatii;

⁴⁰ “Ija isaaniitiin akka hin argineef,

qalbii isaaniitiin akka hin hubanneef,

akka ani isaan fayyisuufis akka gara kootti hin deebineef,

inni ija isaanii jaamseeraatii;

garaa isaaniis jabeesseera.”[‡]

⁴¹ Isaayyaas sababii ulfina isaa argee waa'ee isaas dubbateef waan kana jedhe.

⁴² Ta'us hooggantoota keessaa iyyuu namoonni baay'een isatti amanani. Garuu waan mana sagadaatii nu baasu jedhanii Fariisota sodaataniif amantii isaanii ifatti hin baafne;

⁴³ isaan ulfina Waaqaa irra ulfina namaa jaallataniiruutii.

⁴⁴ Yesuus is iyyee akkana jedhe; **“Namni natti amanu isa na erge sanatti amana malee natti miti.** ⁴⁵ **Kan na argus isa na erge sana arga.** ⁴⁶ **Akka namni natti amanu hundinuu dukkana keessa hin jiraanneef ani ifa ta'ee gara addunyaa dhufeera.**

⁴⁷ **“Namni yoo dubbii koo dhaga'ee eeguu baate kan isatti muru ana miti; ani addunyaa fayyisuufin dhufe malee itti muruuf hin dhufneetii.** ⁴⁸ **Namni na didu kan dubbii koos hin fudhanne abbaa murtii tokko qaba; dubbii ani dubbadhe sun guyyaa dhumaatti isatti mura.** ⁴⁹ **Garuu Abbaa isuma na erge sanatu akka ani waanan dubbadhe sana jedhu na ajaje malee ani ofii kootiin hin dubbanne.** ⁵⁰ **Akka ajajni isaa jireenya bara baraa ta'ee nan beeka. Kanaafuu wanni ani dubbadhu kam iyyuu waan akka ani dubbadhuuf Abbaan natti himee dha.”**

13

Yesuus Miilla Barattoota Isaa Dhiqe

¹ Yeroon sun Ayyaana Faasiikaatiin dura ture. Yesuus akka addunyaa kana keessaa gara Abbaa dhaquudhaaf sa'aatiin isaa ga'e ni beeke. Innis warra kan isaa ta'an kanneen addunyaa keessa turan ni jaallate; hamma dhumaattis isaan jaallate.

² Yeroo irbaataatti diyaabiloos akka inni Yesuusin dabarsee kennuuf Yihuudaa Keeriyoticha ilma Simoon keessa duraan dursee yaada kaa'ee. ³ Yesuus akka Abbaan waan hunda harka isaatti kenne, akka Waaqa biraa dhufee fi akka gara Waaqaatti deebi'u illee beeka ture; ⁴ kanaaf irbaata irraa ka'ee, wayyaa isaa kan irraan uffate of irraa fuudhee lafa kaa'ee; foomaa mudhiitti hidhate. ⁵ Ergasii gabateetti bishaan naqatee miilla barattootaa dhiquu fi foomaa mudhiitti hidhate sanaanis haquu jalqabe.

⁶ Inni gara Simoon Phexros dhufe; Phexros, “Yaa Gooftaa, situ miilla koo naa dhiqaa?” jedheen.

⁷ Yesuus immoo deebisee, **“Waan ani hojjechaa jiru ati amma hin beektu; booddee garuu ni hubatta”** jedheen.

⁸ Phexros, “Hin ta'u; ati gonkumaa miilla koo naa hin dhiqxu” jedheen.

Yesuus deebisee, **“Yoo ani siif dhiquu baadhe ati na biraa qooda hin qabaattu”** jedheen.

⁹ Simoon Phexros deebisee, “Yaa Gooftaa, yoos harka koo fi mataa koos malee miilla koo qofa hin ta'in” jedheen.

¹⁰ Yesuus, **“Namni dhagna isaa dhiqate tokko miilla isaa qofa dhiqachuu isa barbaachisa; dhagni isaa guutuun qulqulluu dha. Isin qulqulluu dha; garuu hunda keessan miti”** jedheen. ¹¹ Innis nama dabarsee isa kennuuf jiru beeka tureetii; sababiin inni, **“Qulqulluun hunda keessan miti”** jedheefis kanuma.

¹² Innis erga miilla isaanii dhiqee booddee, uffata isaa uffatee iddoo isaatti deebi'ee taa'ee. Akkanas jedheen; **“Isin waan ani isiniif godhe hubattanii?”** ¹³ **Isin, ‘Barsiisaa’, ‘Gooftaas’ naan jettu; anis waan isuma isin jettan ta'eef isin dhuguma jettan.**

¹⁴ **Yoos erga ani Gooftaa fi Barsiisaan keessan miilla keessan isinii dhiqee, isinis akkasuma miilla walii dhiquu qabdu.** ¹⁵ **Akkuma ani isinii godhe kana isinis akka gootaniif ani fakkeenya isinii kenneera.** ¹⁶ **Ani dhuguman, dhuguman isinitti**

hima; garbichi gooftaa isaa hin caalu; ergamaanis kan isa erge hin caalu. ¹⁷ Egaa isin yoo waan kana beektanii hojii irra oolchitan isin eebbifamoo dha.

Yesuus Akka Dabarfamee Kennamu Duraan Dursee Dubbate

¹⁸ **“Ani waa’ee hunda keessanii dubbachaa hin jiru; ani warran filadhe nan beeka. Kun garuu dubbiin Katabbii Qulqulluu kan, ‘Inni buddeena koo nyaate koomee isaa natti ol fudhate”**¹⁸ jedhu sun akka guutamuuf.

¹⁹ **“Isin yommuu wanni kun ta’utti akka ani Isa ta’e akka amantaniif utuu inni hin ta’in amma isinitti nan hima.** ²⁰ **Ani dhuguman, dhuguman isinitti hima; kan nama ani ergu kam iyyuu simatu hundinuu na simata; kan na simatu hundis isa na erge sana simata.”**

²¹ Yesuusis erga kana dubbatee booddee hafuuraan jeeqamee, **“Ani dhuguman, dhuguman isinitti hima; isin keessaa tokko dabarsee na kenna”** jedhee dhugaa ba’e.

²² Barattooni akka inni waa’ee eenyuu dubbate wallaalanii wal ilaalan. ²³ Barattoota keessaas inni Yesuus isa jaallatu tokko Yesuusitti irkatee maaddiitti dhi’aatee ture. ²⁴ Simoon Phexrosis, “Mee eenyuu jechuu isaa akka ta’e isa gaafadhu!” jedhee nyaaraan barataa sanatti hime.

²⁵ Innis qoma Yesuusitti hirkatee, “Yaa Gooftaa, eenyu innii?” jedhee gaafate.

²⁶ Yesuusis deebisee, **“Namichi ani buddeena afaan kaa’ata tokkoo caabii keessa cuuphee kennuuf isa”** jedhe. Innis buddeena caabii keessa cuuphee Yihuudaa ilma Simoon Keeriyotichaatiif kenne. ²⁷ Yihuudaas akkuma inni buddeenicha fudhateen Seexanni itti gale.

Yesuusis, **“Waan gochuuf jirtu dafii godhi”** isaan jedhe. ²⁸ Warra nyaataaf tataa’an keessaas namni tokko iyyuu waan inni akkas isaan jedheef hin hubanne. ²⁹ Sababii Yihuudaan korjoo maallaqaa baachaa tureefis isaan keessaa namoonni tokko tokko waan Yesuus, akka inni waan Ayyaanaaf barbaachisu bitu yookaan akka inni hiyyeeyyiif waa kennu isatti hime se’an. ³⁰ Yihuudaanis akkuma buddeena sana fudhateen gad ba’e. Yeroon sunis halkan ture.

Yesuus Akka Phexros Isa Ganu Duraan Dursee dubbate

13:37-38 kwf – Mat 26:33-35; Mar 14:29-31; Luq 22:33-34

³¹ Erga Yihuudaan gad ba’ee booddee Yesuus akkana jedhe; **“Amma Ilmi Namaa ulfaateera; Waaqnis isaan ulfina argateera.** ³² **Waaqni erga isaan ulfina argatee, Waaqni ofuma isaatiin ilma ulfeessa; inni takkumaan isa ulfeessa.**

³³ **“Yaa ijoolle, ani yeroo gabaabaaf isin wajjinan jira. Isin na barbaaddu; ani akkuma Yihuudootaan, ‘Iddoo ani dhaqu isin dhufuu hin dandeessan’ jedhe sana ammas isiniin nan jedha.**

³⁴ **“Akka isin wal jaallataniif ani ajaja haaraa isiniifin kenna. Akkuma ani isin jaalladhetti isinis akkasuma wal jaalladhaa.** ³⁵ **Yoo isin jaalala waliif qabaattan namoonni hundinuu akka isin barattoota koo taatan kanaan ni beeku.”**

³⁶ Simoon Phexrosis, “Yaa Gooftaa, eessa dhaqxa?” jedhee isa gaafate.

Yesuusis, **“Ati amma iddoo ani dhaqu na faana dhaqu hin dandeessu; gara booddeetti garuu na duukaa buuta”** jedhee deebiseef.

³⁷ Phexrosis, “Yaa Gooftaa, ani maaliifan amma si duukaa bu’uu hin dandeenye? Ani siif jedhee lubbuu koo nan kenna” jedheen.

³⁸ Yesuusis deebisee, **“Ati dhuguma naaf jettee lubbuu kee ni kennitaa? Ani dhuguman, dhuguman sitti hima; ati utuu indaanqoon hin iyyin yeroo sadii na ganta”** jedheen.

14

Yesuus Barattoota Isaa Jajjabeesse

¹ **“Garaan keessan hin raafamin. Waaqatti amanaa; nattis amanaa.** ² **Mana Abbaa koo keessa iddoo jireenyaa baay’ee ta’u jira; utuu akkana ta’uu baatee silaa isinittin hima ture. Ani iddoo isinii qopheessuuf achin dhaqaatii.** ³ **Anis yoon dhaqee iddoo isinii qopheesse, akka isinis iddoo ani jiru jiraattaniif deebi’ee dhufeen ofitti isin fudhadha.** ⁴ **Isinis karaa iddoo ani dhaqu ni beektu.”**

Yesuus Karaa Gara Abbaatti Geessu Ta’uu Isaa

⁵ Toomaasis, “Yaa Gooftaa, ati eessa akka dhaqxa nu hin beeknu; yoo akkamitti karaa sana beekuu dandeenya ree?” jedheen.

⁶ Yesuusis akkana jedhee deebiseef; “Karaa fi dhugaan, jireenyis anuma. Yoo anaan ta’e malee eenyu iyyuu gara Abbaa hin dhufu. ⁷ Utuu na beektanii silaa Abbaa koos akkasuma ni beektu turtan; ammaa jalqabdaniis isa beektu; isas argitaniirtu.”

⁸ Fiiliphoos, “Yaa Gooftaa, Abbaa nutti argisiisi; kun nu ga’aatii” jedheen.

⁹ Yesuusis akkana isaan jedhe; “Yaa Fiiliphoos, ani yeroo dheeraa akkanaa isin wajjin jiraadhee, ati amma illee na hin beeknee? Namni na arge Abbaas argeera. Yoos ati akkamitti, ‘Abbaa nutti argisiisi’ jechuu dandeessa ree? ¹⁰ Akka ani Abbaa keessa jiru, Abbaanis akka na keessa jiru ati hin amantuu? Ani dubbii isinitti dubbadhu kana ofuma kootiin hin dubbadhu. Garuu Abbaa isa na keessa jiraatutu hojii isaa hojjeta. ¹¹ Akka ani Abbaa keessa jiru, Abbaanis akka na keessa jiru na amanaa; yookaan sababii hojii sanaatiif na amanaa. ¹² Ani dhuguman, dhuguman isinitti hima; namni natti amanu hojii ani hojjedhu ni hojjeta. Ani waanan gara Abbaa dhaquuf inni waan kana caalu iyyuu ni hojjeta. ¹³ Akka Abbaan ilmaan ulfina argatuuf ani waan isin maqaa kootiin kadhattan kam iyyuu nan raawwadha. ¹⁴ Yoo isin maqaa kootiin waan kam iyyuu na kadhattan ani nan raawwadha.

Yesuus Akka Hafuura Qulqulluu Erguu Abdachiise

¹⁵ “Isin yoo na jaallattan ajaja koo eegaa. ¹⁶ Ani Abbaa nan kadhada; innis akka inni bara baraan isin wajjin jiraatuuf jajjabeessaa biraa isini kenna; ¹⁷ inni Hafuura dhugaa ti. Addunyaan waan isa hin arginee fi waan isa hin beekneef isa fudhachuu hin danda’u. Isin garuu waan inni isin wajjin jiraatuuf, isin keessas waan jiruuf isa ni beektu. ¹⁸ Ani akka ijoollee haadhaa fi abbaa hin qabneetti isin hin dhiisu; gara keessan nan dhufa. ¹⁹ Yeroo muraasa booddee addunyaan deebi’ee na hin argu; isin garuu na argitu. Sababii ani jiraadhuuf isinis ni jiraattu. ²⁰ Akka ani Abbaa koo keessa jiru, akka isin na keessa jirtan akka anis isin keessa jiru gaafas ni beektu. ²¹ Namni ajajawwan koo qabu, isaanis kan eegu, inni na jaallata. Nama na jaallatu Abbaan koo ni jaallata; anis isa nan jaalladha; isattis of nan mul’isa.”

²² Yihuudaa Keeriyoticha utuu hin ta’in inni Yihuudaan kaan, “Yaa Gooftaa, ati maaliif addunyaatti utuu hin ta’in nutti of mul’isuu barbaadda?” jedheen.

²³ Yesuusis akkana jedhee deebiseef; “Namni na jaallatu kam iyyuu dubbii koo ni eega. Abbaan koo isa ni jaallata; nus gara isaa ni dhufna; iddoo jireenyaas isa wajjin ni godhanna. ²⁴ Namni na hin jaallanne dubbii koo hin eegu. Dubbiin isin dhageessan kunis kan Abbaa na erge sanaati malee kan koo miti.

²⁵ “Ani utuman isin wajjin jiruu waan kana isinitti dubbadheera. ²⁶ Jajjabeessaan sun, Hafuurri Qulqulluun kan Abbaan maqaa kootiin ergu garuu waan hunda isin barsiisa; waan ani isinitti hime hundas isin yaadachiisa. ²⁷ Ani nagaa isin biratti nan hambisa; nagaa koos isiniif nan kenna. Ani akka addunyaan kennutti isiniif hin kennu. Garaan keessan hin raafamin; hin sodaatinis.

²⁸ “Isin akka ani, ‘Ani nan deema; deebi’ees gara keessan nan dhufa’ jedhe dhageessaniirtu. Utuu na jaallattanii silaa gara Abbaa dhaquu kooti ni gammaddu turtan; Abbaan na caalaatii. ²⁹ Akka yommuu wanni kun ta’utti isin amantaniif utuu wanni kun hin ta’in ani amma duraan dursee isinitti himeera. ³⁰ Waan bulchaan addunyaa kanaa dhufuuf, ani si’achi isin wajjin baay’ee hin dubbadhu; inni narraa homaa hin qabu; ³¹ garuu akka ani Abbaa jaalladhu addunyaan akka beekuuf, ani akkuma Abbaan na ajajetti nan hojjedha.

“Ka’aa, asii ni deemnaa.

15

Muka Wayiniitii fi Dameewwan Isaa

¹ “Ani muka wayinii dhugaa ti; kan dhaabes Abbaa koo ti. ² Inni damee koo kan ija hin naqanne hunda muree gata; damee ija naqatu immoo akka inni caalaatti naqatuuf irraa qora. ³ Isin dubbii ani isinitti dubbadheen amma qulqulluu dha. ⁴ Na keessa jiraadhaa; anis isin keessa nan jiraadha. Akkuma dameen yoo muka wayiniitii jiraate malee ofuma isaatiin ija naqachuu hin dandeenye, isinis yoo na keessa jiraattan malee ija naqachuu hin dandeessan.

⁵ “Ani muka wayinii ti; isini immoo dameewwan. Namni yoo na keessa jiraate, anis yoon isa keessa jiraadhe inni ija baay’ee naqata; isin narraa gargar baatanii homaa gochuu hin dandeessaniitii. ⁶ Namni na keessa hin jiraanne akka damee

gad gatamee goguu ti. Dameewwan akkanaa walitti qabamanii ibiddatti naqamu; ni gubamus. ⁷ Isin yoo na keessa jiraattan, dubbiin koos yoo isin keessa jiraate, waanuma feetan kadhadaa; innis isiniif ni kennama. ⁸ Isin yoo ija baay'ee naqattanii fi yoo barattoota koo taatan, kanaan Abbaan koo ulfina argata.

⁹ "Akkuma Abbaan na jaallatetti anis akkasuma isin jaalladheera. Egaa jaalala koo keessa jiraadhaa. ¹⁰ Akkuma ani ajajawwan Abbaa kootii eegee jaalala isaa keessa jiraadhu, isinis yoo ajajawwan koo eegdan jaalala koo keessa ni jiraattu. ¹¹ Akka gammachuun koo isin keessa jiraatuu fi akka gammachuun keessanis guutuu ta'uuf ani waan kana isinitti himeera. ¹² Ajajni koo isa kana: Akkuma ani isin jaalladhatti isinis wal jaalladhaa. ¹³ Eenyu iyyuu jaalala guddaa kan namni lubbuu isaa dabarsee michoota isaatiif kennu sana irra caalu hin qabu. ¹⁴ Waan ani isin ajaje yoo raawwattan isin michoota koo ti. ¹⁵ Garbichi waan gooftaan isaa hojjetu waan hin beekneef, ani si'achi garboota isiniin hin jedhu. Qooda kanaa ani michoota isiniin jedheera; ani waanan Abbaa koo irraa dhaga'e hundumaa isin beeksiseeraatii. ¹⁶ Isinis akka dhaqxanii ija naqattaniif, iji keessanis akka jiraatuuf anatu isin filatee isin muude malee isin na hin filanne. Kunis akka Abbaan waan isin maqaa kootiin kadhattan kam iyyuu isinii kennuuf. ¹⁷ Ajajni koo isa kana: Wal jaalladhaa.

Addunyaan Barattoota Jibbuu Isaa

¹⁸ "Yoo addunyaan isin jibbe, akka inni isin dura na jibbe beekaa. ¹⁹ Utuu isin kan addunyaa taatanii silaa addunyaan kan ofii isaa ni jaallata ture. Amma garuu waan ani addunyaa keessaa isin filadheef isin kan addunyaa miti. Kanaafuu addunyaan isin jibba. ²⁰ Dubbii ani, 'Garbichi gooftaa isaa hin caalu' jedhee isinitti hime sana yaadadhaa. Isaan erga na ari'atanii, isinis ni ari'atu. Yoo dubbii kootiif ajajaman, dubbii keessaniifis ni ajajamu. ²¹ Isaan waan Isa na erge sana hin beekneef, sababii maqaa kootiitiif waan kana hunda isin irratti raawwatu. ²² Utuu ani dhufee isaanitti himuu baadhee silaa cubbuu isaanitti hin ta'u ture. Amma garuu cubbuu isaanittiif sababii dhi'eefatan hin qaban. ²³ Namni na jibbu Abbaa koos ni jibba. ²⁴ Utuu ani hojii namni biraa tokko iyyuu hin hojjetin gidduu isaanitti hojjechuu baadhee silaa cubbuu isaanitti hin ta'u ture. Amma garuu utuma waan ani hojjedde arganuu anas Abbaa koos jibhaniiru. ²⁵ Kunis akka dubbiin Seera isaanii keessatti, 'Isaan akkasumaan na jibban' jedhamee barreeffame sun raawwatamuuf ta'e.

²⁶ "Jajjabeessaan ani Abbaa biraa isinii ergu, jechuunis Hafuurri Dhugaa inni Abbaa keessaa ba'u sun yommuu dhufutti waa'ee koo dhugaa ba'a. ²⁷ Isinis jalqabaa kaaftanii waan na wajjin turtaniif dhugaa baatu.

16

¹ "Ani akka isin hin gufanneef jedhee wantoota kanneen isinitti himeera. ² Isaan mana sagadaa keessaa isin ari'u; dhugumaan yeroon itti namni isin ajjeesu kam iyyuu akka waan Waaqa tajaajiluutti yaadu tokko ni dhufa. ³ Isaanis waan Abbaa yookaan na hin beekiniif wantoota kanneen godhu. ⁴ Anis akka isin yommuu yeroon sun ga'utti isaan yaadattaniif wantoota kanneen isinitti himeera. Ani waanan isin wajjin tureef jalqabatti wantoota kanneen isinitti hin himne.

Hojii Hafuura Qulqulluu

⁵ "Amma garuu ani gara isa na ergee nan dhaqa; ta'us isin keessaa namni, 'Ati eessa dhaqxa?' jedhee na gaafatu tokko iyyuu hin jiru. ⁶ Garuu waan ani wantoota kanneen isinitti himeef garaan keessan gaddaan guutameera. ⁷ Ani garuu dhuguman isinitti hima; deemuun koo bu'aa isiniif qaba; yoo ani deeme malee Jajjabeessaan sun gara keessan hin dhufu; ani yoon deeme garuu isa isiniif nan erga. ⁸ Innis yommuu dhufutti akka addunyaan waa'ee cubbuu, waa'ee qajeelummaatii fi waa'ee murtii dogoggorree jiru mirkaneessa; ⁹ waa'ee cubbuu, sababii namoonni natti hin amanneef; ¹⁰ waa'ee qajeelummaa, sababii ani gara Abbaa dhaquu fi sababii isinis si'achi na hin argineef; ¹¹ waa'ee murtii immoo sababii bulchaa addunyaa kanaatti murameef.

¹² "Ani amma iyyuu waanan isinitti himu baay'ee qaba; isin garuu amma baachuu hin dandeessan. ¹³ Hafuurri dhugaa sun yommuu dhufutti gara dhugaa hundaatti isin geessa. Inni waan dhaga'u qofa dubbata malee ofuma isaatiin hin

dubbatu; waan dhufuuf jirus isinitti hima. ¹⁴ **Inni sababii waanuma koo fuudhee isinitti beeksisuuf ulfina naa kenna.** ¹⁵ **Wanni Abbaan qabu hundinuu kan koo ti. Inni waanuma koo fuudhee isinitti beeksisa jechuun koos kanumaaf.**

¹⁶ **“Isin yeroo muraasa booddee na hin argitan; yeroo muraasa booddee immoo deebitanii na argitu.”**

Gaddi Barattootaa Gammachuutti Ni Geeddarama

¹⁷ Barattoota isaa keessaas tokko tokko, “Inni, ‘**Isin yeroo muraasaaf na hin argitan; yeroo muraasaaf immoo deebitanii na argitu**’ akkanumas ‘**Ani waanan gara Abbaa dhaquuf**’ nuun jechuun isaa maal jechuu isaa ti?” waliin jedhan. ¹⁸ Isaanis, “‘**Yeroo muraasaaf**’ jechuun isaa maal jechuu isaa ti? Maal jechuu isaa akka ta’e nu hin beeknu” jedhan.

¹⁹ Yesuus immoo akka isaan isa gaafachuu barbaadan beekke akkana jedheen; “**Wanni ani, ‘Isin yeroo muraasaaf na hin argitan; yeroo muraasaaf immoo deebitanii na argitu**’ jedhe sun maal jechuu koo akka ta’e wal gaafachaa jirtuu?” ²⁰ **Ani dhuguman, dhuguman isinitti hima; isin ni boossu; ni gadittu. Addunyaan garuu ni gammada. Isin ni gadditu; gaddi keessan garuu gammachuutti ni geeddarama.** ²¹ **Dubartiin yommuu ciniinsifattu, waan yeroon ishee ga’eef ni gadditi; erga daa’ima deessee booddee garuu waan addunyaa irratti namni dhalateef, isheenis waan gammadduuf dhiphina sana hin yaadattu.** ²² **Isinis akkasuma amma gadditaniirtu; ani garuu deebi’een isin ilaala; garaan keessanis ni gammada. Gammachuu keessanis eenyu iyyuu isin irraa hin fudhatu.** ²³ **Gaafas isin homaa na hin kadhattan. Ani dhuguman, dhuguman isinitti hima; Abbaan waan isin maqaa kootiin kadhattan kam iyyuu isinii kenna.** ²⁴ **Isin hamma ammaatti maqaa kootiin homaa hin kadhanne. Akka gammachuun keessan guutuu ta’uuf kadhadaa ni argattu.**

²⁵ **“Ani wantoota kanneen fakkeenyaan isinitti himeera; garuu yeroon ani deebi’ee fakkeenyaan isinitti hin dubbanne ni dhufa; yommuu ani waa’ee Abbaa koo ifaan ifatti isinittin hima.** ²⁶ **Isin gaafas maqaa kootiin ni kadhattu. Ani Abbaa isiniif nan kadhada isiniin hin jedhu.** ²⁷ **Isin waan na jaallattaniif, Waaqa biraa ba’uu koo waan amantaniif Abbaan mataan isaa isin jaallata.** ²⁸ **Ani Abbaa biraa ba’ee gara addunyaa dhufeera; ammas addunyaa dhiisee gara Abbaa nan dhaqa.”**

²⁹ Barattoonni isaas akkana jedhan; “Kunoo, ati amma iyyuu fakkeenyaan utuu hin ta’in ifaan ifatti dubbachaa jirta. ³⁰ Akka ati waan hunda beektuu fi akka namni tokko iyyuu gaaffii si gaafachuu hin barbaachifne nu amma ni beekna. Kanaanis nu akka ati Waaqa biraa baate ni amanna.”

³¹ Yesuus deebisee akkana jedheen; “**Isin amma ni amantuu?** ³² **Kunoo yeroon isin itti kophaatti na dhiiftanii tokkoon tokkoon keessan gara feetanitti bittinnooftan tokko ni dhufa. Ammuma iyyuu dhufeera. Garuu waan Abbaan koo na wajjin jiruuf ani kophaa koo miti.**

³³ **“Akka isin anaan nagaa qabaattaniif ani wantoota kanneen isinitti himeera. Addunyaa kana irratti rakkinni isin argata. Garuu jabaadhaa! Ani addunyaa mo’adheeraa.”**

17

Yesuus Ofiif Kadhachuu Isaa

¹ Yesuus wantoota kanneen dubbatee gara samii ol ilaalee akkana jedhe:

“Yaa Abbaa, sa’aatiin sun ga’eera. Akka Ilmi kees ulfina siif kennuuf, ati Ilma keetiif ulfina kenni. ² **Akka inni warra ati isaaf kennite hundaaf jireenya bara baraa kennuuf, nama hunda irratti taayitaa isaaf kenniteertaatii.** ³ **Jireenyi bara baraa kana: innis akka isaan si’i Waaqa dhugaa tokkichaa fi Yesuus Kiristoos isa ati ergite sana beekaniif.** ⁴ **Ani hojii ati akka ani hojjechuuf natti kennite sana raawwachuudhaan lafa irratti ulfina siif kenneera.** ⁵ **Yaa Abbaa, amma immoo ati ulfina ani utuu addunyaan hin uumaminiin dura si biratti qabaadhe sanaan of biratti na ulfessi.**

Yesuus Barattoota Isaatiif Kadhachuu Isaa

⁶ **“Ani namoota ati addunyaa keessaa naa kennitetti maqaa kee beeksiseera. Isaan kan kee turan; ati isaan naa kennite; isaanis dubbii kee eeganiiru.** ⁷ **Isaan akka wannii ati anaaf kennite hundumtuu si biraa dhufe amma beekaniiru.** ⁸ **Ani dubbii ati anaaf kennite isaaniif kenneeraatii; isaanis fudhataniiru. Akka ani si biraa ba’es dhugumaan beekaniiru; akka ati na ergite amananiiru.** ⁹ **Ani**

isaaniif nan kadhada. Warri ati naa kennite waan kan kee ta'aniif isaaniif kadhada malee addunyaaf hin kadhada. ¹⁰ Wannani ani qabu hundinuu kan kee ti; wannani ati qabdu hundinuu kan koo ti. Anis kanaan ulfina nan argadha. ¹¹ Ani si'achi addunyaa keessa hin turu; isaan garuu amma iyyuu addunyaa keessa jiru; ani gara kee nan dhufa. Yaa Abbaa Qulqulluu, akkuma nu tokko taane sana isaanis tokko akka ta'aniif maqaa kee kan naa kennite sanaan isaan eegi. ¹² Ani yeroo isaan wajjin turetti, maqaa kee kan ati naa kennite sanaan isaan nan eege; isaan eegeeras. Akka Katabbiin Qulqulluun raawwatamuufis ilma badii sana malee isaan keessaa namni tokko iyyuu hin badne. ¹³ "Amma garuu ani gara kee nan dhufa; gammachuun koos akka isaan keessatti guutuu ta'uuf, ani amma iyyuu utuman addunyaa keessa jiruu wantoota kanneen nan dubbadha. ¹⁴ Ani dubbii kee isaaniif kenneera; akkuma ani kan addunyaa hin ta'in, isaanis waan kan addunyaa hin ta'iniif, addunyaan isaan jibbeera. ¹⁵ Ani akka ati isa hamaa sana isaan irraa eegduuf malee akka ati addunyaa keessaa isaan baafuuf si hin kadhada. ¹⁶ Akkuma ani kan addunyaa hin ta'in isaanis akkasuma kan addunyaa miti. ¹⁷ Dhugaadhaan isaan qulqulleessi; dubbii kee dhugaa dha. ¹⁸ Akkuma ati gara addunyaatti na ergite sana anis gara addunyaatti isaan ergeera. ¹⁹ Akka isaanis dhugumaan qulqullaa'aniif, ani isaaniif jedhee of nan qulqulleessa.

Yesuus Amantoota Hundaaf Kadhachuu Isaa

²⁰ "Ani warra dubbii isaaniitiin natti amananiifis malee isaan kana gofaaf hin kadhada; ²¹ kunis yaa Abbaa, akkuma ati na keessa jirtu, anis si keessa jiru sana, akka hundi isaani tokko ta'aniif. Akka ati na ergite addunyaan akka amanuuf isaanis nu keessa haa jiraatan. ²² Akkuma nu tokko taane isaanis tokko akka ta'aniif, ulfina ati naaf kennite sana anis isaaniif kenneera; ²³ kunis akka isaan guutummaatti tokko ta'aniif ani isaan keessa nan jiraadha; ati immoo na keessa jiraata. Yoo akka ati na ergitee fi akkuma na jaallattetti akka isaanis jaallatte addunyaan ni beeka.

²⁴ "Yaa Abbaa, akka warri ati naa kennite kunneen iddoo ani jiru na wajjin jiraatanii fi akka isaan ulfina koo kan ati utuu addunyaan hin uumaminiin dura waan na jaallatteef naa kennite sana arganis nan barbaada.

²⁵ "Yaa Abbaa Qajeelticha, addunyaan si hin beeku; ani garuu sin beeka; isaan kunis akka ati na ergite ni beeku. ²⁶ Akkan jaallalli ati ittiin na jaallatte sun isaan keessa jiraatuuf, anis akka isaan keessa jiraadhuuf ani akka maqaan kee isaan biratti beekamu godheera; akka beekamus nan godha."

18

Yesuus Qabame

18:3-11 kwf - Mat 26:47-56; Mar 14:43-50; Luq 22:47-53

¹ Yesuus wantoota kanneen dubbatee barattoota isaa wajjin Sulula Qeediroon gama iddoo biqiltuun ture tokkotti ce'e; innis, barattoonni isaas achi keessa seenan.

² Yesuus yeroo baay'ee barattoota isaa wajjin achitti wal argaa waan tureef, Yihuudaan inni Yesuusin dabarsee kennu sunis iddoo sana beeka ture. ³ Kanaafuu Yihuudaan tuuta loltootaatii fi qondaaloota luboota hangafootaa fi Fariisota biraa ergaman dura deemaa achi dhufe. Isaanis guca, ibsaa fi mi'a lolaa qabatanii turan.

⁴ Yesuus isaan waan isa irra ga'uuf jiru hunda beeknaan gad ba'ee, "Isin eenyun barbaaddu?" jedhee isaan gaafate.

⁵ Isaanis deebisanii, "Yesuus isa Naazreeti" jedhan.

Yesuus immoo, "Ani isaa dha" jedhe. Yihuudaan inni dabarsee isa kennu sunis jara wajjin achi dhaabachaa ture. ⁶ Yommuu Yesuus, "Ani isaa dha" isaaniin jedhetti dugda duubatti deebi'aniif lafatti kukkufan.

⁷ Inni ammas, "Isin eenyun barbaaddu?" jedhee isaan gaafate.

Isaanis, "Yesuus isa Naazreeti" jedhan.

⁸ Yesuus deebisee, "Ani, 'Ani isaa dha' isiniin jedheera. Kanaafuu, isin yoo na barbaaddan namoota kanneen dhiisaa haa deemanii!" jedhe. ⁹ Kunis akka dubbii inni, "Ani warra ati naa kennite keessaa tokko illee hin ganne"* jedhee dubbate sun raawwatamuuf ta'e.

¹⁰ Simoon Phexros goraadee qabu luqqifatee garbicha luba ol aanaa dha'ee gurra isaa mirgaa irraa kute. Maqaan garbicha sanaas Maalkoosii dha.

* 18:9 18:9 Yoh 6:39

¹¹ Yesuusis Phexrosiin, **“Goraadee kee man’ee isaatti deebisi! Ani xooffoo Abbaan naa kenne hin dhuguu?”** jedhe.

Yesuus Haannaatti Geeffame

18:12,13 kwf – Mat 26:57

¹² Tuunni loltootaa, ajajaan isaaniitii fi eegdonni Yihuudootaas Yesuus qabaniid hidhan. ¹³ Isaanis duraan dursanii Haannaasitti isa geessan; Haannaas abbaa niitii Qayyaaffaa ti; Qayyaaffaan immoo bara sana luba ol aanaa ture. ¹⁴ Qayyaaffaan isa akka namni tokko uummataaf du’uun wayyu Yihuudoota gorse turee dha.

Phexros Yeroo Jalqabaatiif Yesuus Ganuu Isaa

18:16-18 kwf – Mat 26:69,70; Mar 14:66-68; Luq 22:55-57

¹⁵ Simoon Phexrosii fi barataan biraa Yesuus faana bu’an. Barataan sunis waan luba ol aanaa biratti beekamaa tureef, Yesuus wajjin dallaa luba ol aanaa keessa seene; ¹⁶ Phexros garuu balbala dura ala dhaabachaa ture. Barataan luba ol aanaa biratti beekamaa ture kaan gad ba’ee intala balbala eegdutti himee Phexrosin ol seensise.

¹⁷ Intalli balbala eegdu sunis Phexrosiin, “Atis barattoota namicha kanaa keessaa tokko mitii?” jette.

Inni immoo deebisee, “Ana miti” jedhe.

¹⁸ Yeroon isaa waan dhaamochaa tureef garboonnii fi eegdonni ibidda qabsiifatanii dhadhaabatanii qaqqammachaa turan. Phexrosis isaan wajjin dhaabatee qaqqammachaa ture.

Gaaffii Lubichi Ol aanaan Yesuusif Dhi’eesse

18:19-24 kwf – Mat 26:59-68; Mar 14:55-65; Luq 22:63-71

¹⁹ Yommuu lubni ol aanaan Yesuus waa’ee barattoota isaatii fi waa’ee barsiisa isaa gaafate.

²⁰ Yesuus akkana jedhee deebiseef, **“Ani ifaan ifatti addunyaatti dubbadheera; iddoo Yihuudoonni hundi itti walitti qabamanitti, manneen sagadaattii fi mana qullullummaa keessattis ani yeroo hunda barsiisaan ture. Ani waan tokko illee icciitiidhaan hin dubbanne. ²¹ Ati maaliif na gaafatta? Warra waan ani isaaniin jedhe dhaga’an gaafadhu. Kunoo isaan waan ani jedhe beeku.”**

²² Yommuu Yesuus wantoota kanneen jedhetti qondaaltota achi ijaajjaa turan keessaa tokko, “Luba ol aanaaf akkana deebiftaa?” jedhee isa kabale.

²³ Yesuus deebisee, **“Yoo ani waan hamaa dubbadhee jiraadhe, waan hamaa sana dhugaa ba’i. Yoo ani waan qajeelaa dubbadhee jiraadhe garuu ati maaliif na rukutta?”** jedhe. ²⁴ Haannaasis Yesuus akkuma inni hidhamee jirutti gara lubicha ol aanaa, gara Qayyaaffaatti erge.

Phexros Yeroo Lammaffaa fi Sadaffaa Yesuus Ganuu Isaa

18:25-27 kwf – Mat 26:71-75; Mar 14:69-72; Luq 22:58-62

²⁵ Simoon Phexros dhaabatee ibidda qaqqammachaa ture. Kanaafuu isaan, “Atis barattoota isaa keessaa tokko mitii?” jedhaniin.

Inni immoo, “Ana mitii” jedhee haale.

²⁶ Garboota luba ol aanaa keessaas firri namicha Phexros gurra isaa irraa kute sanaa tokko, “Ani iddoo biqiltuutti isa wajjin si hin arginee?” jedheen. ²⁷ Phexros ammas ni gane; yommuuma indaanqoon iyye.

Yesuus Fuula Phiilaaxoos Duratti

18:29-40 kwf – Mat 27:11-18,20-23; Mar 15:2-15; Luq 23:2,3,18-25

²⁸ Yihuudoonnis Yesuus mana Qayyaaffaatii fuudhanii masaraa bulchaa warra Roomaatti geessan. Yeroon sun ganama barii ture; Yihuudoonnis akka hin xuroofneef jedhanii masaraa ol hin seenne; kunis akka Faasiikaa nyaachuu danda’aniif. ²⁹ Kanaafuu Phiilaaxoos gara isaaniitti gad ba’ee, “Himanni isin namicha kana irratti dhi’eessitan maali?” jedhee gaafate.

³⁰ Isaanis, “Utuu namichi kun yakka hojjechuu baatee nu silaa isa dabarsinee sitti hin kenninu ture” jedhanii deebisaniif.

³¹ Phiilaaxoosis, “Isin ofuma keessanii isa fuudhaatii akka seera keessaniitti itti muraa” jedheen.

Yihuudoonnis, “Nu garuu nama tokko illee ajjeesuuf mirga hin qabnu” jedhaniin. ³² Kunis wanni Yesuus akka du’a akkamiitiin du’uuf jiru argisiisuuf jedhee dubbate sun akka raawwatamuuf ta’e.

³³ Phiilaaxoos ammas masaraa mootummaa seene; Yesuusinis ofitti waamee, “Ati mootii Yihuudootaati?” jedhee isa gaafate.

³⁴ Yesuusis, **“Waan kana sumatu jedhe moo namoota biraatu waa’ee koo sitti hime?”** jedhee gaafate.

³⁵ Phiilaaxoosis deebisee, “Anatu Yihuudiidhaa ree? Kan dabarsee natti si kenne sabuma keetii fi luboota hangafoota. Garuu ati maali gooteeti?” jedheen.

³⁶ Yesuusis, **“Mootummaan koo kan addunyaa kanaati miti. Utuu kan addunyaa kanaa ta’ee silaa akka ani dabarfamee Yihuudootatti hin kennamneef tajaajiltoonni koo naa lolu turan. Amma garuu mootummaan koo kan addunyaa kanaa miti”** jedhe.

³⁷ Phiilaaxoosis, “Yoos ati mootii dha kaa!” jedheen.

Yesuus immoo, **“Akka ani mootii ta’e atuu jette. Dhugumaan wanni ani dhaladhee gara addunyaa dhufeeffis dhugaadhaaf dhugaa ba’uuf. Namni dhugaaf dhaabatu hundinuu sagalee koo dhaga’a”** jedhee deebise.

³⁸ Phiilaaxoosis, “Dhugaan maal inni?” jedheen. Innis erga waan kana dubbatee boodde amma illee Yihuudootatti gad ba’ee akkana jedheen; “Ani balleessaa tokko illee isa irratti hin arganne. ³⁹ Garuu isin akka ani yeroo Faasiikaatti nama tokko gad isinii dhiisu bartee godhattaniirtu. Kanaafuu akka ani, ‘Mootii Yihuudootaa’ gad isiniif dhiisu barbaadduu?”

⁴⁰ Isaan amma illee iyyanii, “Lakki, Barabbaas malee isa miti!” jedhan. Barbaas kun saamtuu ture.

19

Fannifamuun Yesuusitti Murame

19:1-16 kwf - Mat 27:27-31; Mar 15:16-20

¹ Phiilaaxoosis Yesuusin fuudhee garafsiise. ² Loltoonnis gonfoo qoraattii micciiraniidha’anii mataa isaa irra kaa’an. Isaanis uffata dhiilgee isatti uffisanii. ³ “Akkam ree, yaa Mootii Yihuudootaa!” jechaa gara isaatti deddeebi’aa turan. Isas ni kabalan.

⁴ Phiilaaxoosis amma illee gad ba’ee Yihuudootaan, “Akka ani balleessaa tokko illee isa irratti hin argatin akka beektaniif kunoo ani isa gad isiniifin baasa” jedhe. ⁵ Yesuusis gonfoo qoraattii kaa’atee, wayyaa dhiilgees uffatee gad ba’ee; Phiilaaxoosis, “Namichi kunoo ti!” isaaniin jedhe.

⁶ Luboonni hangafoonnii fi qondaaltonni isaanii yommuu isa arganitti, “Fannisi! Fannisi!” jedhanii iyyan.

Phiilaaxoosis immoo deebisee, “Isin ofuma keessanii fuudhaatii isa fannisaa malee ani balleessaa tokko iyyuu isa irratti hin arganne” jedheen.

⁷ Yihuudoonnis deebisanii, “Nu seera qabna; namichi kun waan ilma Waaqaa of godheef akka seera keenyaatti du’uu qaba” jedhan.

⁸ Phiilaaxoosis yommuu dubbii kana dhaga’etti ituma caalchisee sodaate. ⁹ Innis masaraatti ol deebi’ee, “Ati nama eessaati?” jedhee Yesuusin gaafate. Yesuus garuu deebii tokko iyyuu hin kennineef. ¹⁰ Phiilaaxoosis, “Ati na jalaa dubbachuu diddaa? Akka ani gad si dhiisuuf taayitaa qabuu fi akka ani si fannisuuf taayitaa qabu ati hin beektuu?” jedheen.

¹¹ Yesuus immoo, **“Ati utuu olii siif kennamuu baatee silaa taayitaa tokko illee narratti hin qabdu ture. Kanaaf inni dabarsee sitti na kenne sun cubbuu cubbuu caalu qaba”** jedhee deebiseef.

¹² Phiilaaxoosis yeroo sanaa jalqabee Yesuusin gad dhiisuu barbaada ture; Yihuudoonni garuu, “Ati yoo namicha kana gad dhiifte michuu Qeesaar miti. Namni mootii of godhu kam iyyuu Qeesariin morma” jedhanii iyyan.

¹³ Phiilaaxoosis yommuu dubbii kana dhaga’etti Yesuusin gad baasee, iddoo “Dhagaa Afamaa” kan afaan Ibraayisxiitiin “Gabataa” jedhamutti barcuma murtii irra taa’ee.

¹⁴ Guyyaan sunis guyyaa Qophii Faasiikaa ture; yeroon isaas gara sa’aatii ja’aa ture.

Phiilaaxoosis Yihuudootaan, “Mootiin keessan kunoo ti!” jedhe.

¹⁵ Isaan garuu, “Isa balleessi! Isa balleessi! Isa fannisi!” jedhanii iyyan.

Phiilaaxoosis immoo, “Mootii keessan fannisu moo?” jedhee gaafate.

Luboonni hangafoonnis, “Nu Qeesaar malee mootii biraa hin qabnu” jedhanii deebisaniif.

¹⁶ Kanaaf Phiilaaxoosis akka inni fannifamuuf dabarsee isaanitti kenne.

Yesuus Fannifame

19:17-24 kwf - Mat 27:33-44; Mar 15:22-32; Luq 23:33-43

Isaanis Yesuusin fuudhanii deeman. ¹⁷ Innis fannoo ofii isaa baadhatee iddoo Buqqee Mataa kan afaan Ibraayisxiitiin *Golgoataa* jedhamutti ol ba’ee. ¹⁸ Isaanis achitti isa

fannisan; isa wajjinis namoota biraa lama, isa tokko garanaan, kaan immoo garasiin, Yesuus immoo gidduu isaaniitti fannisan.

¹⁹ Phiilaaxoosis Katabbii,

Yesuus Isa Naazreeti, Mooticha Yihuudootaa, jedhu tokko barreessee fannoo sanatti maxxanse. ²⁰ Iddoon Yesuus itti fannifame waan magaalatti dhi'oo tureef Yihuudoonni hedduun katabbii sana dubbisaniiru; katabbiin sunis afaan Ibraayisxiitiin, Laatiinii fi Giriikiin barreeffame. ²¹ Luboonni Yihuudootaa hangafoonni Phiilaaxoosiin, "Namichi kun, ' "Ani mootii Yihuudootaa ti" jedheera' jedhii barreesi malee, 'Inni Mootii Yihuudootaa ti' jettee hin barreesin" jedhan.

²² Phiilaaxoosis, "Ani waanan barreesse, barreesseera" jedhee deebise.

²³ Loltoonni sunis erga Yesuus fannisanii booddee kittaa isaa hambisanii wayyaa isaa fuudhanii akka tokko tokko isaan ga'uuf iddoo afuritti hiratan. Kitta sun hin hodhamne; olii hamma gadiittis dha'aa tokko ture.

²⁴ Kanaafuu isaan, "Kottaa hin tarsaasnuu; garuu ixaa buufannee akka inni kan eenyuu ta'u ilaallaa"* waliin jedhan.

Kunis akka Katabbiin Qulqulluun,

"Isaan wayyaa koo hiratan;

uffata koottis ixaa buufatan"

jedhu sun raawwatamuuf ta'e. Wannii loltoonni godhanis kanuma.

²⁵ Fannoo Yesuus biras haati isaa, obboleettiin haadha isaa, Maariyaam niitiin Qilophaatii fi Maariyaam isheen Magdala dhaabataniin turan. ²⁶ Yesuusis yommuu haadha isaatii fi barataa inni jaallatu sana utuu inni ishee cina dhaabatuu argetti haadha isaatiin, "**Dubartii nana! Kunoo, ilma kee**" jedhe. ²⁷ Barataa sanaan illee, "**Kunoo haadha kee**" jedhe; barataan sunis sa'aatii sanaa jalqabee gara mana isaatti ishee fudhate.

Du'a Yesuus

19:29,30 kwf – Mat 27:48,50; Mar 15:36,37; Luq 23:36

²⁸ Ergasii Yesuus akka wannii hundinuu raawwatame beekke akka Katabbiin Qulqulluun raawwatamuuf, "**Nan dheebodhe**" jedhe. ²⁹ Qodaan dhangaggaa'aa qabu tokko achi ture; isaanis dhangaggaa'aa sana keessa ispoonjii cuuphanii hiisophiitti kaa'anii afaan isaatti qaban. ³⁰ Yesuusis dhangaggaa'aa sana fudhatee, "**Raawwateera**" jedhe. Mataa buusees hafuura isaa kenne.

³¹ Guyyaan sun guyyaa Qophii ture; guyyaan itti aanus Sanbataa addaa ture. Kanaafuu akka reeffi isaanii Sanbataan fannoo irra hin oolle gochuuf jedhanii akka miilli isaanii cabsamee† fannoo irraa gad buufamuuf Yihuudoonni Phiilaaxoosin kadhatan. ³² Kanaafuu loltoonni dhaqanii miilla namicha jalqabaa, miilla namicha Yesuus wajjin fannifame kaaniis cabsan. ³³ Yommuu gara Yesuus dhufanitti garuu inni du'e waan arganiif miilla isaa hin cabsine. ³⁴ Loltoota sana keessaa inni tokko garuu eeboodhaan cinaacha isaa waraane; yeruma sana dhiignii fi bishaan ba'e. ³⁵ Namni waan kana arge rageesseera; ragaan isaas dhugaa dha. Inni akka dhugaa dubbatu ni beeka; inni akka isinis amantaniif dubbata. ³⁶ Kunis wannii Katabbiin Qulqulluun, "Lafeen isaa tokko iyyuu hin cabsamu"‡ jedhe sun akka raawwatamuuf ta'e. ³⁷ Ammas Katabbiin Qulqulluun biraa, "Isaanis isa waraanan sana ni ilaalu"§ jedha.

Awwaalamuu Yesuus

19:38-42 kwf – Mat 27:57-61; Mar 15:42-47; Luq 23:50-56

³⁸ Ergasii Yoosif namni Armaatiyaa kan sababii Yihuudoota sodaateef dhoksaan barataa Yesuus ture sun reeffa Yesuus fudhachuuf Phiilaaxoosin kadhate. Phiilaaxoosis isaaf eeyyame; kanaafuu inni dhagee reeffa Yesuus fudhate. ³⁹ Niqoodemoos inni duraan halkaniin gara Yesuus dhufee tures walmakaa qumbiitti fi argeessa gara kiiloo giraamii soddonii afur ulfaatu qabatee dhufe. ⁴⁰ Isaanis reeffa Yesuus fuudhanii akka duudhaa Yihuudootaatti awwaaluuf urgooftuu wajjin huccuu quncee talbaa irraa hojjetameen kafanan. ⁴¹ Iddoo Yesuus itti fannifames lafa biqiltuu tokkotu ture; lafa biqiltuu sana keessaa iddoo awwaalaa haaraa kan namni tokko iyyuu duraan itti hin

* 19:24 19:24 Far 22:18 † 19:31 19:31 Akka miilli isaanii cabsame – Miilla yakkamtootaa burruusa guddaadhaan cabsuun gosa adabbii hamaa ture. Walumaa galatti miilla qofatu cabsama ture. Yeroo tokko tokko garuu harkis ni cabsama ture. Adabbiin kun yommuu nama fannifamaa jiru irratti raawwatamutti mataa isaatiin gosa adabbii gara jabinaa ti. Garuu dhiphinni du'a fannoo kan lubbuun dafttee keessaa hin baane sun waan yeroo gabaabaa keessatti raawwatuuf akka gocha araaraatti ilaalama. ‡ 19:36 19:36 Bau 12:46; Lak 9:12; Far 34:20 § 19:37 19:37 Zak 12:10

awwaalamin tokkotu ture. ⁴² Sababii guyyaan sun guyyaa Qophii Yihuudootaa turee fi iddoon awwaalaa sunis waan dhi'oo tureef Yesuusini achi keessa kaa'an.

20

Awwaala Duwwaa

20:1-8 kwf - Mat 28:1-8; Mar 16:1-8; Luq 24:1-10

¹ Guyyaa jalqaba torban sanaa ganama barii utuma dukkanaa'ee jiruu Maariyaam isheen Magdalaara gara awwaalaa dhaqqee akka dhagaan afaan awwaala sanaa irraa fuudhame argite. ² Kanaafuu isheen fiigaa gara Simoon Phexrosii fi gara barataa biraa kan Yesuus isa jaallate sanaa dhaqqee, "Gooftaa awwaala keessaa fudhataniiru; eessa akka isa kaa'anis hin beeknu!" jetteen.

³ Kanaafuu Phexrosii fi barataan kaan ba'anii gara awwaalichaa dhaqan. ⁴ Lachan isaanii iyyuu ni fiigu turan; barataan kaan garuu Phexros bira darbee fiiguudhaan dursee iddoo awwaalaa sana ga'e. ⁵ Innis gad jedhee ilaalaa huccuu quncee talbaa irraa hojjetame lafatti arge malee awwaalichaa keessa hin seenne. ⁶ Simoon Phexros immoo isa duubaan dhufee awwaalichaa keessa seene. Huccuu sanas lafatti arge; ⁷ akkanumas huccuu mataa Yesuusitti maramee ture arge. Huccuu sunis kophaa isaa dachaafamee iddoo biraa ture malee huccuu quncee talbaa irraa hojjetame sana bira hin turre. ⁸ Ergasis barataan biraa inni jalqabatti awwaalichaa bira ga'e sun keessa seene. Innis argee amane. ⁹ Isaan akka Yesuus warra du'an keessaa ka'u Katabbii Qulqulluu irraa amma iyyuu hin beekne tureetii.

Yesuus Maariyaam Ishee Magdalaatti Mul'ate

¹⁰ Barattoonni sunis gara mana isaanitti deebi'an.

¹¹ Maariyaam garuu alaan awwaala bira dhaabatee boo'aa turte. Utuma boossuus awwaallatti gad jettee ilaalte; ¹² isheenis ergamoota lama kanneen uffata adaadii uffatanii iddoo reeffi Yesuus kaa'amee ture sana, inni tokko mataa duraan, kaan immoo miilla jalaan taa'an argite.

¹³ Isaanis, "Dubartii nana, maaliif boossa?" jedhaniin.

Isheen immoo, "Gooftaa koo fudhataniiru; eessa akka isa kaa'anis ani hin beeku" jetteen. ¹⁴ Yommuu waan kana dubbattee of irra gara galtettis Yesuusini isaa achi dhaabatu argite; garuu Yesuus ta'uu isaa hin beekne.

¹⁵ Yesuusis, "**Dubartii nana, maaliif boossa? Eenyun barbaadda?**" jedheen.

Isheen immoo, nama iddoo biqiltuu keessa hojjetu seetee, "Yaa gooftaa, ati yoo isa fuutee jiraatte, akka ani dhaqee fudhadhuuf eessa akka isa keesse natti himi" jetteen.

¹⁶ Yesuusis, "**Maariyaam!**" jedheen.

Isheenis isatti gara galtee afaan Ibraayisxiitiin, "*Rabbuunii!*" jetteen. Hiikkaan isaas "Barsiisaa" jechuu dha.

¹⁷ Yesuus immoo, "**Ani amma illee waan gara Abbaatti ol hin ba'iniif na hin tuqin. Garuu obholoota koo bira dhaqitiiti, 'Ani gara Abbaa kootii fi Abbaa keessaniitti, gara Waaqa kootii fi Waaqa keessaniitti ol nan ba'a' jedheera jedhiiti isaanitti himi'**" jedheen.

¹⁸ Maariyaam isheen Magdalaara gara barattootaa dhaqqee, "Ani Gooftaa argeera!" jette. Akka inni waan kana isheen jedhes isaanitti himte.

Yesuus Barattoota Isaatti Mul'ate

¹⁹ Guyyaa jalqaba torban sanaa galgala utuu barattoonni waan Yihuudoota sodaataniif balbala cufatanii walitti qabamanii jiranuu Yesuus dhufee isaan gidduu dhaabatee, "**Nagaan isiniif haa ta'u**" jedheen. ²⁰ Innis erga waan kana dubbatee booddee harka isaatii fi cinaacha isaa isaanitti argisiise. Barattoonnis yommuu Gooftaa arganitti akka malee gammadan.

²¹ Yesuus amma illee, "**Nagaan isiniif haa ta'u! Akkuma Abbaan na erge sana anis isinan erga**" jedheen. ²² Innis erga waan kana jedhee booddee Hafuura isaanitti baafatee akkana jedheen; "**Hafuura Qulqulluu fudhadhaa.**" ²³ **Yoo isin namootaaf cubbuu isaanii dhiifan isaniif ni dhiifama; yoo isaniif dhiisuu baattan immoo isaniif hin dhiifamu."**

Yesuus Toomaasitti Mul'ate

²⁴ Garuu yeroo Yesuus dhufetti warra Kudha Lamaan keessaa Toomaas inni Didimoos jedhamu tokko barattoota wajjin hin turre. ²⁵ Kanaafuu barattoonni warri kaan, "Nu Gooftaa argineerra!" jedhanii isatti himan.

Inni garuu, “Ani iddoo mismaaraan waraaname harka isaa irratti argu malee, quba koo iddoo mismaaraa sana keessa kaa’u malee, harka koos cinaacha isaa keessa kaa’u malee hin amanu” jedheen.

²⁶ Guyyaa saddeeti booddee barattoonni isaa ammas mana keessa turan; Toomaasis isaan wajjin ture. Utuma balbalichi cufamee jiruu Yesuus ol galee isaan gidduu dhaabatee, “**Nagaan isiniif haa ta’u!**” jedheen. ²⁷ Innis Toomaasiin, “**Quba kee as fidi; harka koo ilaali. Harka kee diriirfadhuutii cinaacha koo keessa kaa’i. Amani malee amantii hin dhabin**” jedhe.

²⁸ Toomaas immoo, “Gooftaa koo! Waaqa koo!” jedheen.

²⁹ Yesuusis, “**Ati waan na argiteef amante; warri utuu hin argin amanan eebbifamoo dha**” jedheen.

³⁰ Yesuus barattoota isaa duratti mallattoowwan biraa kanneen kitaaba kana keessatti hin barreeffamin hedduu hojjete. ³¹ Wantoonni kunneen garuu akka Yesuus inni Kiristoos* ilma Waaqaa ta’e akka amantaniif, amanuudhaanis akka maqaa isaatiin jireenya qabaattaniif barreeffame.

21

Yesuusii fi Dinqii Qurxummii Qabuu

¹ Wantoota kanneen booddee Yesuus ammas galaana Xibeeriyaas biratti barattoota isaatti of mul’ise. Haalli inni ittiin of mul’ises akkana ture: ² Simoon Phexros, Toomaas inni Didimoos jedhamu, Naatnaa’el namichi Qaanaa Galiilaa, ilmaan Zabdewoosii fi barattoonni biraa lama walii wajjin turan. ³ Simoon Phexrosis, “Ani qurxummii qabuu nan dhaqa” isaaniin jedhe; isaanis, “Nus si wajjin dhaqna” jedhaniin. Gad ba’aniis bidiruu yaababatan; halkan sana garuu homaa hin qabne.

⁴ Ganama bariidhaanis Yesuus qarqara galaanichaa irra dhaabachaa ture; barattoonni garuu akka inni Yesuus ta’e hin beekne.

⁵ Innis isaan waamee, “**Ijoolle, qurxummii tokko illee hin qabdani?**” jedhee gaafate.

Isaan immoo, “Hin qabnu” jedhani deebisan.

⁶ Innis, “**Karaa mirga bidiruutiin kiyyoo gad darbadhaa; qurxummii ni argattuu**” jedheen. Kanaafuu isaan kiyyoo sana gad darbatan; sababii baay’ina qurxummiitiifis kiyyoo sana harkisuu dadhaban.

⁷ Barataan inni Yesuus isa jaallachaa ture sunis, “Inni Gooftaa dha!” jedhee Phexrositti hime. Kanaafuu Simoon Phexros yommuu “Inni Gooftaa dha” jechuu isaa dhaga’etti waan marxoo isaa of irraa baasee tureef, marxoo isaa marxifatee bishaanitti gad utaale.

⁸ Barattoonni kaan garuu waan qarqara galaanaa irraa dhundhuma dhibba lama caalaa hin fagaatiniif kiyyoo qurxummiin keessa guute sana harkisaa bidiruudhaan dhufan. ⁹ Yommuu lafatti ba’anittis ibidda cilee kan qurxummiin irra jiruu fi buddeena achitti argan.

¹⁰ Yesuusis, “**Mee qurxummii amma qabdan irraa waa fidaa!**” isaaniin jedhe. ¹¹ Simoon Phexrosis bidiruu sana yaabbatee kiyyoo qurxummiin gurguddaan 153 guute sana gara lafaatti harkise. Kiyyoon sunis qurxummii akkas baay’attuun guutamu illee hin tarsaane. ¹² Yesuusis, “**Kottaa ciree nyaadhaa!**” isaaniin jedhe. Barattoota keessaas namni ija jabaatee, “Ati eenyu?” jedhee isa gaafate tokko iyyuu hin turre. Isaan akka inni Gooftaa ta’e beekaniiruutii. ¹³ Yesuusis dhufee buddeena sana fuudhee isaaniif kenne; qurxummichas akkasuma godhe. ¹⁴ Egaa Yesuus erga du’aa kaafamee, kana wajjin yeroo sadaffaa barattoota isaatti mul’ate.

Yesuus Phexrosin Gaaffii Gaafate

¹⁵ Yesuus erga isaan ciree nyaatanii booddee Sim’oon Phexrosiin, “**Yaa Simoon ilma Yohannis, ati warra kana caalaa na jaallattaa?**” jedhe.

Innis, “Eeyyee, yaa Gooftaa; akka ani si jaalladhu atuun ni beekta” jedheen.

Yesuusis, “**Ilmoolee hoolaa koo soori**” jedheen.

¹⁶ Yesuus amma illee, “**Yaa Simoon ilma Yohannis, ati na jaallattaa?**” jedheen.

Innis deebisee, “Eeyyee, yaa Gooftaa, akka ani si jaalladhu atuun ni beekta” jedheen.

Yesuus immoo, “**Hoolota koo tiksi**” jedheen.

¹⁷ Yeroo sadaffaa, “**Yaa Simoon ilma Yohannis, ati na jaallattaa?**” jedheen.

Phexrosis sababii Yesuus yeroo sadaffaa, “**Ati na jaallattaa?**” jedhee isa gaafateef gadde, “Yaa Gooftaa, ati waan hunda beekta; akka ani si jaalladhuun ni beekta” jedheen.

* 20:31 20:31 yookaan Masiihicha

Yesuusiis akkana jedheen; **“Hoolota koo soori. ¹⁸ Ani dhuguman, dhuguman sitti hima; ati yeroo dargaggeessa turtetti, ofuma keetiin mudhii kee hidhattee lafa barbaadde dhaqxa turte; yeroo dulloomtutti garuu harka kee ni diriirfatta; namni biraas mudhii kee siif hidhee lafa ati hin barbaannetti si geessa.”**
¹⁹ Yesuusiis akka Phexros du’a akkamiitiin Waaqa ulfeessu argisiisuuf jedhee waan kana dubbate; ergasii, **“Na duukaa bu’i”** jedheen.

²⁰ Phexrosis garagalee utuu barataan inni Yesuus isa jaallatu sun isaan duukaa bu’uu arge. Barataan kunis isa yeroo irbaataatti qoma Yesuusiitti irkatee, “Yaa Gooftaa, inni dabarsee si kennu eenyu?” jedhe sanaa dha. ²¹ Phexrosis yommuu isa argetti, “Yaa Gooftaa, namichi kun hoo?” jedhee Yesuusin gaafate.

²² Yesuusiis deebisee, **“Hamma ani dhufutti akka inni jiraatu yoo fedhii koo ta’e, maaltu si dhibe? Ati na duukaa bu’i”** jedheen. ²³ Kanaaf oduun, “Barataan kun hin du’u” jedhu obboloota gidduutti odeeffame. Yesuus garuu, **“Hamma ani dhufutti akka inni jiraatu yoo fedhii koo ta’e maaltu si dhibe?”** jedhe malee, **“Inni hin du’u”** hin jenne.

²⁴ Inni dubbii kana dhugaa ba’u, kan waan kanas barreesse barataadhuma kana. Akka dhuga ba’umsi isaa dhugaa ta’es nu beekna.

²⁵ Kana malees Yesuus waan biraa baay’ee hojjeteera. Utuu tokkoon tokkoon isaanii barreeffamanii jiraatanii silaa ani waan addunyaan mataan ishee iyyuu kitaabota barreeffaman sanaaf iddoo ga’u qabdu hin se’u.

Hojii Ergamootaa

Seensa

¹ Yaa Tewofilos, ani waan Yesuus hojjechuu fi barsiisuu jalqabe hunda kitaaba koo kan jalqabaa keessatti barreesseera. ² Wanni kunis waan erga Yesuus ergamoota filate sanaaf karaa hafuura qulqulluutiin ajaja kennee booddee hamma gaafa inni Samiitti ol fudhatameetti ta'ee dha. ³ Innis du'a isaa booddee namoota kanatti of argisiisee waan akka inni jiraataa ta'e mirkaneessu baay'ees dhi'eesse; bultii afurtama isaanitti mul'atee waa'ee mootummaa Waqaa dubbate. ⁴ Utuu isaan wajjin jiruus akkana jedhee isaan ajaje; **“Waadaa Abbaa kootii kan waa'ee isaa narraa dhageessan sana eeggadhaa malee Yerusaleemii hin ba'inaa.** ⁵ **Yohannis bishaaniin cuupheetii; isin garuu bultii xinnoo booddee Hafuura Qulqulluudhaan ni cuuphamtu.”**

⁶ Isaanis yommuu walitti qabamanitti, “Yaa Gooftaa, ati yeroo kanatti Israa'eliif mootummaa ni deebiftaa?” jedhaniis isa gaafatan.

⁷ Inni immoo akkana isaaniin jedhe; **“Yeroo yookaan guyyaa Abbaan aangoo isaatiin murteesse beekuun hojii keessan miti.** ⁸ **Yeroo hafuurri Qulqulluun isin irra bu'utti garuu humna ni argattu; isinis Yerusaleem keessatti, Yihuudaa hundaa fi Samaariyaa keessatti, hamma qarqara lafaattis dhuga baatota koo ni taatu.”**

Yesuus Gara Samiitti Ol Fudhatame

⁹ Erga inni waan kana dubbatee booddee utuma isaan ilaalanuu ol fudhatame; duumessis ija isaanii duraa isa dhokse.

¹⁰ Yeroo inni ol ba'aa turettis, utuma isaan xiyyeeffatanii gara Samii ilaalaa jiranuu namoonni uffata adaadii uffatan lama isaan bira dhadhaabatan. ¹¹ Akkanas jedhaniin; “Yaa namoota Galiilaa, isin maaliif as dhadhaabattanii gara Samii ilaaltu? Yesuus innumti isin biraa samiitti ol fudhatame kun, akkuma isin utuu inni samiitti ol ba'uu argitan kana deebi'ee ni dhufa.”

Maatiyaas Iddoo Yihuudaa Filatame

¹² Isaanis gaara Tulluu Ejersaa jedhamu irraa Yerusaleemitti deebi'an; gaarri kunis Yerusaleem irraa gara deemsa guyyaa Sanbata* tokkoo fagaata. ¹³ Isaanis yommuu Yerusaleem ga'anitti kutaa darbii kan keessa jiraachaa turan sanatti ol ba'an; isaanis:

Phexrosii fi Yohannis, Yaaqoobii fi Indiriiyaas,
Fiiliphosii fi Toomaas,
Bartaloomewosii fi Maatewos,
Yaaqoob ilma Alfewos, Simoon isa Hinaafticha jedhamuu fi Yihuudaa ilma Yaaqoob turan.

¹⁴ Hundi isaaniis dubartootaa fi Maariyaam haadha Yesuus wajjin, obboloota isaa wajjinis utuu gargar hin kutin yaada tokkoon kadhannaatti jabaachaa turan.

¹⁵ Gidduma sana Phexros ka'ee amantoota gara 120 ta'an gidduu dhaabate. ¹⁶ Akkanas jedhe; “Yaa obboloota, dubbiin kitaabaa kan Hafuurri Qulqulluun yeroo dheeraan dura waa'ee Yihuudaa isa warra Yesuus qaban fide sanaa afaan Daawitiitiin dubbate sun raawwatamuu qaba. ¹⁷ Innis miseensa keenyaa fi nama akka tajaajila kana keessatti qooda qabaatuuf filatame ture.”

¹⁸ Yihuudaan horii hammina hojjetee argate sanaan lafa bitate; innis mataan kufee qixxee lamaanitti tarsi'ee; mar'umaan isaa hundinuus keessaa jige. ¹⁹ Namoonni Yerusaleem keessa jiraatan hundinuus waan kana dhaga'an; lafa sanas afaan isaaniitiin *Akeldaamaa* jedhaniis waaman. Akeldaamaa jechuun “Lafa Dhiigaa” jechuu dha.

²⁰ Phexrosis akkana jedhe; “Kitaaba faarfannaa keessatti akkana jedhamee barreeffameeraatii:

“‘Qe'een isaa haa onu;

namni keessa jiraatu tokko iyyuus hin hafin’†
akkasumas

“‘Aangoo isaa namni biraa haa fudhatu.’‡

* 1:12 1:12 Deemsa guyyaa Sanbata – Deemsa guyyaa Sanbataa gara kiiloo meetira tokkoo ti. † 1:20 1:20 Far 69:25 ‡ 1:20 1:20 Far 109:8

21 Kanaaf warra yeroo gooftaa Yesuus nu gidduu ba'ee galaa ture hundumaa nu wajjin turan keessaa nama tokko filachuun barbaachisaa dha; ²² namni filatamu kun nama cuuphaa Yohannisii jalqabee hamma gaafa Yesuus nu biraa samiitti ol fudhatameetti nu wajjin ture ta'uu qaba. Namoota kanneen keessaa tokko nu wajjin dhuga baatuu du'aa ka'uu Yesuus ta'uu qabaatii.”

²³ Kanaafis namoota lama dhi'eessan; isaanis Yoosef isa Barsaabaas jedhamu kan Yoosxoos jedhamee beekamu tokkoo fi Maatiyaas. ²⁴ Akkanas jedhanii Waaqa kadhatan; “Yaa Gooftaa garaa nama hundumaa beektu, ati namoota kanneen lamaan keessaa isa kam akka filatte nutti argisiisi; ²⁵ kunis akka inni tajaajilaa fi ergamtummaa Yihuudaan dhiisee gara iddoo ofii isaatti gara gale sana fudhatuuf.” ²⁶ Isaanis ixaa buusan; ixaan sunis Maatiyaasiif ba'e. Kanaafuu inni ergamoota kudha tokkotti dabalame.

2

Dhufaatii Hafuura Qulqulluu

¹ Yeroo guyyaan Pheenxeqoosxee* ga'etti, hundi isaanii iddoo tokkotti walitti gabamanii turan. ² Akkuma tasaas sagaleen akka bubbee jabaabubbisu tokko samii irraa dhufee mana isaan keessa tataa'aa turan sana hunda guute. ³ Isaanis waan akka arraba ibiddaa† tokko isaa gargar qoodamee dhufee tokkoo tokkoo isaanii irraa hubbu'u argan. ⁴ Hundi isaanis Hafuura Qulqulluudhaan guutamanii akkuma hafuurri sun isaan dandeessisetti afaan gara biraatiin dubbachuu jalqaban.

⁵ Yeroo sana Yihuudoonni Waaqa sodaatan saboota samii jala jiran hunda keessaa dhufanii Yerusaalem keessa jiraachaa turan. ⁶ Yeroo sagaleen sun dhaga'amettis namoonni hedduun waan jedhan dhabanii walitti qabaman; warri Hafuuraan guutaman sun afaan tokkoo tokkoo namoota sanaatiin dubbachaa turaniitii. ⁷ Isaanis akka malee dinqifatanii akkana jedhan; “Namoonni dudubbatan kunneen hundi warra Galiilaati mitii? ⁸ Yoos akkamiin tokkoon tokkoon keenya isaanii afaanuma keenya kan nu itti dhalanne dubbatan dhageenya ree? ⁹ Nu warri Phartee,‡ warri Meedii§ fi warri Elaam,* jiraattonni Mesophotaamiyaa,† warri Yihuudaa‡ fi Qaphadooqiyaa§ akkasumas jiraattonni Phonxoosii* fi Asiyaa,† ¹⁰ Firiigiyaa‡ fi Phamfiliyaa,§ Gibxii* fi kutaawwan biyya Liibiyaa† kanneen naannoo Qareenaatti‡ argaman, nu warri Roomaadhaa§ dhufne, ¹¹ nu Yihuudoonni fi warri amantii Yihuudootaa fudhanne lamaan, namoonni Qareexii fi Araboonni kunoo yommuu namoonni kunneen afaanuma keenyaan dinqii Waaqaa dubbatan dhageenya!” ¹² Hundi isaanis dinqifatanii, waan jedhaan wallaalanii, “Kun maal jechuu dha?” jedhanii wal gaafatan.

¹³ Namoonni tokko tokko garuu, “Isaan daadhii wayinii baay'ee dhuganiiru” jedhanii isaanitti qoosan.

Haasaa Phexros

¹⁴ Phexrosis ergamoota Kudha Tokkoo sana wajjin ka'ee dhaabate; sagalee isaas ol fudhatee tuuta sanaan akkana jedhe; “Isin yaa namoota Yihuudaatii fi warri Yerusaalem

* **2:1** 2:1 Guyyaan Pheenxeqoosxee - Guyyaan kun naannoo caamsaa 20 ta'a; innis guyyaa Yihuudoonni ayyaana haamaa miidhaanii itti ayyaaneffatan. Pheenxeqoosxee jechuun “Shantamaaffaa” jechuu dha; kunis sababii ayyaanni kun erga ayyaanni Faasiikaa darbee guyyaa shantamaa booddee ayyaaneffamuuf. Ayyaanni kun ayyaana warri Israa'el waggaa keessatti ayyaaneffatan gurguddoo sadan keessaa isa tokko. Isaan guyyaa kanatti kennamuu seeraa yaadatu; yeroo ayyaana kanaatti dhiironni Yihuudootaa gara Yerusaalem dhaquun barbaachisaa ture. † **2:3** 2:3 Waan akka arraba ibiddaa - Ibiddi mallattoo argamuu Waaqaa ti; murtii Waaqaa wajjinis ni deema. ‡ **2:9** 2:9 Phartee - Pharteen naannoo biyya har'a Iraani jedhamtu keessatti gara kaaba ba'aatti argamtuu dha. § **2:9** 2:9 Meedii - Meediin naannoo biyya har'a Iraan jedhamtu keessatti gara kaaba dhi'aatti argamtuu dha. * **2:9** 2:9 Elaam - biyya har'a Iraan jedhamtu keessatti gara kaaba dhi'aatti argamti. † **2:9** 2:9 Mesophotaamiyaa - Biyya har'a Iraaq jedhamtu keessatti, laga Xegroosiitii fi laga Efraaxiis gidduutti argamti. ‡ **2:9** 2:9 Yihuudaa - naannoon kun Yerusaalem illee ofitti dabalata. § **2:9** 2:9 Qaphadooqiyaa - lafa Asiyaa xinnoo keessatti naannoo ba'aatti, biyya har'a Turki jedhamtu keessatti argamtuu dha. * **2:9** 2:9 Phonxoos - mootummaa gama kibbaatiin qarqara galaana gurraachaa gara caalu qabatu. † **2:9** 2:9 Asiyaa - biyya Roomaa kan dhi'a biyya har'a Turki jedhamtuutti argamtu. ‡ **2:10** 2:10 Firiigiyaa - bulchiinsa gidduu gala dhi'a Asiyaa xinnoo keessatti kaaba Ajeeniitii fi laga Haaliisi gidduutti argamtu. § **2:10** 2:10 Phamfiliyaa - biyya Roomaa kan kibba Asiyaa xinnootti biyya har'a Turki jedhamtu keessatti argamtu. * **2:10** 2:10 Gibxi - biyya Roomaa kan lafuma har'a Gibxi jedhamu kana turte. † **2:10** 2:10 Liibiyaa - Biyya kaaba Afrikaanti argamtu kan gama dhi'aatiin Gibxitti aantu. ‡ **2:10** 2:10 Qareenaatti - Magaalaa guddittii biyya Roomaa kan Qareenikaatii fi kutaa bulchiinsa Liibiyaa. § **2:10** 2:10 Roomaa - Magaalaa guddittii teessoo bulchiinsa mootummaa Roomaa.

keessa jiraattan hundi, mee waan kana beekaa; waan ani isinitti himu kana hubadhaa dhaga'aa. ¹⁵ Yeroon kun waan guyyaa keessaa sa'aatii sadaffaa ta'eef namoonni kunneen akka isin yaaddan sana hin machoofne! ¹⁶ Kun garuu waan Yoo'eel raajichi dubbatee dha; innis akkana jedha:

¹⁷ "Bara dhumaa keessa, jedha Waaqayyo,
ani Hafuura koo nama hunda irratti nan dhangalaasa;
ilmaani fi intallan keessan raajii dubbatu;
dargaggoonni keessan mul'ata argu;
jaarsoliin keessan abjuu abjootu.

¹⁸ Bara sana keessa garboota koo warra dhiiraa fi dubartii irratti illee,
Hafuura koo nan dhangalaasa;
isaanis raajii ni dubbatu.

¹⁹ Ani ol samii irratti dinqii,
gad lafa irrattis mallattoo,
dhiiga, ibiddaa fi hurrii aaraa nan argisiisa.

²⁰ Utuu guyyaan Gooftaa inni guddichii fi
ulfina qabeessi sun hin dhufin dura,
aduun dukkanatti geeddaramti;
ji'i immoo dhiigatti geeddarama.

²¹ Namni maqaa Gooftaa waammatu,
hundinuu ni fayya.*

²² "Yaa namoota Israa'el, dubbii kana dhaga'aa; akkuma isinuu beektan, Yesuus namni Naazreeti nama Waaqni dinqii, raajii fi mallattoo karaa isaatiin isin gidduutti hojjeteen isinii mirkaneessee dha. ²³ Namicha kana Waaqatu akkuma dur murteessee fi akkuma duraan dursee beeku sanatti dabarsee isinitti kenne. Isinis namoota hamoo wajjin tokko taatanii fanniftanii isa ajjeftan. ²⁴ Waaqni garuu dhiphina keessaa isa baasee, warra du'an keessaa isa kaase; duuti isa irratti aangoo qabaachuu hin dandeenyeetii.

²⁵ Daawitis akkana jedhee waa'ee isaa dubbate:

"Ani yeroo hunda Gooftaa of duratti nan argan ture.
Waan inni mirga koo jiruuf, ani hin raafamu.

²⁶ Kanaaf garaan koo ni gammada; arrabni koos ni ililcha;
foon koos abdiidhaan jiraata.

²⁷ Ati sii'ool keessatti na hin dhiiftuutii;
qulqullichi kee akka tortoru hin gootu.

²⁸ Karaa jireenyaa na barsiifteerta;
fuula kee durattis gammachuudhaan na guutta.†

²⁹ "Yaa obboloota, akka Daawit hangafni abbootii durii sun du'ee awwaalame, awwaalli isaas hamma har'aatti asuma akka jiru ani ija jabaadhee isinitti himuu nan danda'a. ³⁰ Innis waan raajii tureef akka Waaqni sanyii isaa keessaa nama tokko teessoo isaa irra teessisuuf akka kakatee waadaa galeefii ture beeke. ³¹ Innis waa'ee du'aa ka'uu Kiristoos‡, lubbuun isaa sii'ool keessatti akka hin hafin, yookaan foon isaas akka hin tortorin duraan dursee argee dubbate. ³² Yesuusuma kana Waaqni du'aa kaaseera; nu hundinuu dhuga baatota waan kanaa ti. ³³ Kanaaf inni gara mirga Waaqaatti ol ol jedhee, abdii Hafuura Qulqulluu Abbaa biraa fuudhee waan isin amma argitanii fi dhageessan kana dhangalaase. ³⁴ Daawit gara samiitti ol hin baaneetii; inni mataan isaa garuu akkana jedha:

"Gooftaan Gooftaa kootiin akkana jedhe;
"Gara mirga koo taa'i;

³⁵ hamma ani diinota kee
ejjeta miilla keetii siif godhutti." §

³⁶ "Kanaafuu Yesuusuma isin fannifan kana akka Waaqni Gooftaa fi Kiristoos isa godhe manni Israa'el hundi dhugumaan haa beeku."

³⁷ Namoonni sunis yommuu waan kana dhaga'anitti, garaan isaanii raafamee Phexrosii fi ergamoota kaaniin, "Yaa obboloota, yoo maal haa goonu?" jedhan.

³⁸ Phexrosis akkana jedhee deebise; "Tokkoon tokkoon keessan qalbi jijjiirradhaa; dhiifama cubbuu keessaniitiifis maqaa Yesuus Kiristoosiitiin cuuphamaa; kennaa Hafuura Qulqulluus ni argattu. ³⁹ Abdiin kunis isinii fi ijoollee keessaniif, akkasumas warra Waaqni Gooftaan keenya ofitti waamu kanneen fagoo jiran hundaaf kenname."

* 2:21 2:21 Yoe 2:28-32 † 2:28 2:28 Far 16:8-11 ‡ 2:31 2:31 yookaan Masiihichaa § 2:35 2:35 Far 110:1

⁴⁰ Innis dubbii biraa baay'eedhaan dhugaa ba'ee, "Dhaloota jal'aa kana duraa of oolchaa" jedhee isaan gorse. ⁴¹ Warri dubbii isaa fudhatanis ni cuuphaman; gaafas nama gara kuma sadiitu isaanitti dabalame.

Tokkummaa Amantootaa

⁴² Isaanis barsiisa ergamootaatti, jireenya tokkummaatti, buddeena caccabsuutti, Waaqa kadhachuutis ni jabaatan. ⁴³ Namni hundinuu sodaan guutame; dinqii fi mallattoon baay'een ergamootaan hojjetame. ⁴⁴ Amantoonni hundinuu wajjin turan; waan hundas walumaan qabu turan. ⁴⁵ Qabeenya isaaniitii fi mi'a isaaniis gurguraniis nama rakkina qabu kamiif iyyuu qoodaa turan. ⁴⁶ Isaanis guyyuma guyyaan mana qulqullummaatti wal ga'aa turan; mana tokkoo tokkoo isaaniitii buddeena kukkutanii, gammachuu fi garaa qulqulluudhaan wajjin nyaachaa turan. ⁴⁷ Waaqas galateeffachaa turan. Namoota hunda durattis ulfina qabu turan. Gooftaanis guyyuma guyyaan warra fayyan waldaa isaaniitti dabalaa ture.

3

Phexros Namicha Naafa Tokko Fayyise

¹ Gaaf tokko Phexrosii fi Yohannis yeroo kadhannaatti jechuunis waaree booddee sa'aatii sagalitti mana qulqullummaatti ol ba'aa turan. ² Namoonnis akka inni warra mana qulqullummaa seenan waa kadhatuuf jedhanii namicha dhalootuma isaatii jalqabee naafa ture tokko guyyuma guyyaan baatanii gara karra mana qulqullummaa kan "Miidhagaa" jedhamuutti geessu turan. ³ Innis utuu Phexrosii fi Yohannis mana qulqullummaa seenanuu argee horii isaan kadhate. ⁴ Phexrosis Yohannis wajjin namicha hubatee ilaalee, "Mee nu ilaali!" jedheen. ⁵ Namichis waa isaan irraa argachuu abdatee hubatee isaan ilaale.

⁶ Phexrosis, "Ani meetii yookaan warqee hin qabu; ani garuu waan qabu siifin kenna. Maqaa Yesuus Kiristoos isa Naazreetiin ol ka'ii deemi!" jedhe. ⁷ Phexrosis harka isaa mirgaa qabee ol isa kaase; yeruma sana miillaa fi gulubiin isaa ni jabaate. ⁸ Innis utaaalee ka'ee miillaan deemuu jalqabe; deemaa, utaalaa, Waaqas galateeffachaa isaan wajjin mana qulqullummaa seene. ⁹ Namoonni hundinuu yommuu deemuu isaatii fi Waaqa galateeffachuu isaa arganitti, ¹⁰ akka inni namicha karra mana qulqullummaa kan, "Miidhagaa" jedhamu sana bira taa'ee kadhachaa ture sana ta'e hubatan; isaanis waan isaaf ta'e sanaaf akka malee raajeffatan; ni dinqifatanis.

Dubbii Phexros Dubbate

¹¹ Namoonni hundinuu yeroo namichi fayye sun Phexrosii fi Yohannis biraa deebi'uu didetti dinqisiifatanii utuu isaan iddoo gardaafoo Solomoon jedhamu keessa jiranuu fiigaa isaanitti dhufan. ¹² Phexrosis yommuu waan kana argetti akkana isaaniin jedhe; "Yaa namoota Israa'el wanni kun maaliif isin dinqa? Akka waan nu humna yookaan qulqullummaa mataa keenyaatiin akka namichi kun deemu gooneetti maaliif ija nutti babaafu?" ¹³ Waaqni abbootii keenyaa, Waaqni Abrahaama, Waaqni Yisihaaqii fi Waaqni Yaaqoob tajaajilaa isaa Yesuusina kabajeera. Isin garuu akka inni ajjeefamuuf dabarsitanii isa kennitan; Phiilaaxoos gad isa dhiisuu murteessu iyyuu isin fuuluma Phiilaaxoos duratti isa haaltan. ¹⁴ Isinis isa qulqulluu fi qajeelaa sana gantanii akka namichi nama ajjeese sun gad isinii dhiifamu kadhattan. ¹⁵ Isin burqaa jireenyaa ajjeefatan; Waaqni garuu warra du'an keessaa isa kaase; nus dhuga baatota waan kanaa ti. ¹⁶ Namichi isin argitanii fi isa beektan kun maqaa Yesuusitti amanuudhaan jabaate. Maqaa Yesuusii fi amantii karaa isaatiin dhufutu akkuma isin hundi argitan kana namicha kanaaf fayyaa guutuu kenne.

¹⁷ "Ammas yaa obboloota, akka isinis utuu hin beekin akkuma bulchitoonni keessan gochaa turan sana gootan ani nan beeka. ¹⁸ Waaqni garuu waan akka Kiristoos* dhiphachuuf jiru duraan dursee karaa raajota hundaatiin dubbate sana akkanaa raawwate. ¹⁹ Egaa akka cubbuun keessan haqamuuf, akka barri haaromfamaa Gooftaa biraa dhufuuf qalbii jijjiirradhaa gara Waaqaatti deebi'aa; ²⁰ kunis akka inni Kiristoos isiniif filatame sana jechuunis Yesuusina erguuf. ²¹ Innis hamma yeroon Waaqni itti waan hunda iddootti deebisu sun ga'utti samii irra turuu qaba; Waaqnis bara dheeraadhaan dura karaa raajota isaa qulqullootaatiin waan kana dubbate ture. ²² Museen akkana jedheeraatii; 'Waaqni keessan Gooftaan sabuma keessan keessaa raajii akka kootii tokko isinii kaasa; isinis waan inni isinitti himu hunda dhaga'aa. ²³ Namni raajii sana hin dhageenye kam iyyuu saba isaa keessaa baafamee ni balleeffama.'†

* 3:18 3:18 yookaan Masihiin isaa † 3:23 3:23 KeD 18:15,18,19

²⁴ “Saamu’eel irraa jalqabee raajonni isa duubaan dhufanii waa dubbatan hundi duraan dursanii waa’ee yeroo sanaa labsaniiru. ²⁵ Isin immoo ilmaan raajotaatii fi ilmaan kakuu Waaqni abbootii keessan wajjin seene sanaa ti. Innis Abrahaamiin, ‘Sabni lafa irraa hundi karaa sanyii keetiitiin ni eebbifama”[‡] jedhe. ²⁶ Waaqni yeroo ilma isaa du’aa kaasetti, tokkoo tokkoo keessan hammina irraa isin deebisuudhaan isin eebbisuuf jedhee jalqabatti gara keessanitti isa erge.”

4

Phexrosii fi Yohannis Yaa’ii Yihuudootaa Duratti

¹ Utuu Phexrosii fi Yohannis namootatti dubbachaa jiranuu, luboonni, ajajaan eegdotaa mana qulqullummaatii fi Saduuqonni isaanitti dhufan. ² Sababii ergamoonni sun namoota barsiisanii du’aa ka’uu karaa Yesuusiitiin argamu labsaniifis akka malee aaran. ³ Isaanis Phexrosii fi Yohannis qabanii hamma guyyaa itti aanuutti mana hidhaatti isaan galchan; galgalaa’ee tureetii. ⁴ Warra dubbicha dhaga’an keessaas baay’eeetu amane; baay’inni warra amanees gara kuma shaniitti ol ka’e.

⁵ Guyyaa itti aanuttis bulchitoonni, maanguddoonni fi barsiistonni seeraa Yerusaaleemitti wal ga’an. ⁶ Haannaas lubichi ol aanaan, isa wajjin immoo Qayyaaaffaan, Yohannis, Iskindiroosii fi namoonni maatii lubicha ol aanaa ta’an kaan hundi achi turan. ⁷ Isaanis Phexrosii fi Yohannis gidduu isaanii dhaabani, “Isin humna maaliitiin yookaan maqaa eenyuutiin waan kana gootan?” jedhanii gaafachuu jalqaban.

⁸ Phexrosii Hafuura Qulqulluudhaan guutamee akkana isaaniin jedhe; “Isin yaa bulchitootaa fi maanguddoota uummataa! ⁹ Har’a waa’ee waan gaarii nama naafa tokkoof godhameetii fi akka inni itti fayyifame yoo nu gaafattan, ¹⁰ isinii fi namoonni Israa’el hundinuu waan kana beekaa; namichi kun maqaa Yesuus Kiristoos nama Naazreeti kan isin fanniftanii Waaqni immoo warra du’an keessaa isa kaase sanaatiin fayyee fuula keessan dura dhaabata. ¹¹ Yesuusis,

“Dhagaa isin ijaarttonni tuffattan

kan dhagaa golee ta’ee dha.”*

¹² Fayyinni nama biraa tokko irraa iyyuu hin argamu; maqaan nu ittiin fayyifamnu kan samii gaditti namootaaf kenname biraa tokko iyyuu hin jiruutii.”

¹³ Namoonni sunis yommuu ija jabina Phexrosii fi Yohannis arganii akka isaan warra barumsa hin qabnee fi warra hin beekamne ta’an hubatanitti ni dinqisiifatan; akka isaan Yesuus wajjin turanis ni qalbeeffatan. ¹⁴ Garuu namicha fayyifame sana isaa isaanuma wajjin achi dhaabatu arganii waan dubbatan dhaban. ¹⁵ Kanaaf akka isaan waldaa keessaa gad ba’an ajajanii wajjin mari’achuu jalqaban. ¹⁶ Akkanas jedhan; “Jara kana maal haa goonu? Akka isaan dinqii guddaa hojjetan namni Yerusaalem keessa jiraatu hundi ni beeka; nus waan kana waakkachuu hin dandeenyu. ¹⁷ Garuu akka wanni kun hammana caalaa uummata keessa hin babal’anneef nu akka jarri kun si’achi maqaa kanaan nama tokkotti illee hin dubbanne isaan of eeggachiisuu qabna.”

¹⁸ Isaanis jara waamanii akka isaan gonkumaa maqaa Yesuusiitiin hin dubbanne yookaan hin barsiifne isaan ajajan. ¹⁹ Phexrosii fi Yohannis garuu deebisanii akkana jedhan; “Qooda Waaqaa isiniif ajajamuun fuula Waaqaa duratti akka qajeelaa ta’ee fi akka hin ta’in mee isinuu ilaalaa! ²⁰ Nu waan arginee fi waan dhageenye dubbachuu dhiisuu hin dandeenyuutii.”

²¹ Isaanis erga ittuma fufanii doorsisanii booddee jara gad dhiisan. Waan namoonni sababii waan hojjetame sanaatiif Waaqaa galateeffachaa turaniifis akka itti jara adaban murteeffachuu hin dandeenye. ²² Umuriin namicha karaa dinqiitiin fayyifame sanaa waggaa afurtamaa ol tureetii.

Kadhannaa Amantootaa

²³ Phexrosii fi Yohannis yeroo gad dhiifamanitti gara saba isaanii dhaqanii waan luboonni hangafoonni fi maanguddoonni jedhaniin hundumaa isaanitti himan. ²⁴ Isaanis yommuu waan kana dhaga’anitti kadhannaadhaan sagalee isaanii tokkummaan Waaqatti of fuudhanii akkana jedhan; “Yaa Gooftaa Waan Hundaa Ollii, situ samii, lafa, galaanaa fi waan isaan keessa jiru hunda uume. ²⁵ Ati Hafuura Qulqulluun karaa afaan tajaajilaa kee abbaa keenya Daawitiitiin akkana jettee dubbatteerta;

“Namoonni maaliif akkanumaan mari’atu?

Saboonnis maaliif waan faayidaa hin qabne yaadu?

²⁶ Mootonni lafaa ka’anii,

bulchitoonnis Gooftichaa fi

dibamaa[†] isaatiin mormuuf walitti qabaman.[‡]

²⁷ Dhugumaan Heroodisii fi Phonxoos Phiilaaxoos Namoota Ormaatii fi uummata Israa'el wajjin hojjetaa kee isa qulqulluu, Yesuus isa ati dibdetti mari'achuuf jedhanii magaalaa kana keessatti walitti qabaman. ²⁸ Isaanis waanuma humnii fi fedhiin kee akka wanni kun ta'uuf duraan dursanii murteessan sana hojjetan. ²⁹ Yaa Gooftaa, egaa doorsisa isaanii ilaaliitii akka garboonni kee ija jabinaan dubbii kee dubbataniif dandeettii kenniif. ³⁰ Nama fayyisuu fi maqaa tajaajilaa kee qulqullichaa, maqaa Yesuusitiin mallattoo fi dinqii hojjechuuf harka kee diriirfadhu.”

³¹ Erga isaan Waaqa kadhatanii booddee lafti isaan itti wal ga'an sun ni sosochoote; isaan hundinuus hafuura qulqulluudhaan guutamanii ija jabinaan dubbii Waaqa dubbatan.

Qabeenyi Amantootaa Kan Hunda Isaanii Ta'e

³² Amantoonni hundinuus garaa tokkoo fi yaada tokko qabu turan; waan qaban hundas walumaan qoodachaa turan malee namni tokko iyyuu akka waan qabeenyi inni qabu kam iyyuu kan mataa isaa qofa ta'eetti hin lakkoofne. ³³ Ergamoonnis du'aa ka'uu Gooftaa Yesuus humna guddaadhaan dhugaa ba'aa turan; ayyaanni guddaanis hunduma isaanii irra ture. ³⁴ Rakkataan tokko iyyuu isaan gidduu hin turre. Warri lafa yookaan mana qaban hundinuus gurguranii maallaqa fidanii, ³⁵ miilla ergamootaa bira kaa'u turan; maallaqni sunis nama rakkina qabu kamiif iyyuu ni qoodama ture.

³⁶ Yoosef namni gosa Lewwii kan Qophiroositti dhalate, inni ergamoonna Barnaabaas jedhaniin tokkos achi ture. Barnaabaas jechuun “ilma jajjabinaa” jechuu dha. ³⁷ Innis lafa qotiisaa ofii isaa gurguree horii isaa fidee miilla ergamootaa bira kaa'e.

5

Anaaniyaasii fi Safiraa

¹ Namni Anaaniyaas jedhamu tokko niitii isaa Safiraa wajjin lafa gurgurate. ² Innis utuma niitiin isaa beektuu horii sana irraa gartokko ofii isaatii hambifatee kan hafe immoo geessee miilla ergamootaa bira kaa'e.

³ Phexros garuu akkana jedhe; “Yaa Anaaniyaas, akka ati Hafuura Qulqulluu sobdee horii lafa gurguratee argate irraa gartokko hambifattuuf seexanni maaliif akkas garaa kee guute? ⁴ Lafti sun utuu hin gurguramin iyyuu kan kee ture mitii? Erga gurguramee booddees horiin sun harkuma kee hin turre? Yoos akka ati waan akkasii gootu maalitu si yaachise? Ati Waaqa sobde malee nama hin sobne.”

⁵ Anaaniyaasis yommuu waan kana dhaga'etti kufee du'e. Warri waan kana dhaga'an hundinuus sodaa guddaan qabaman. ⁶ Dargaggoonnis dhufanii, reeffa isaa kafanan; gad baasaniis isa awwaalan.

⁷ Gara sa'aatii sadii booddee niitiin isaa utuu waan ta'e hin beekin dhuftee ol seente. ⁸ Phexrosis, “Gatiin isin Anaaniyaas wajjin lafa gurgurattan sana irraa argattan kanumaa? Mee natti himi!” jedhee ishee gaafate.

Isheenis, “Eeyyee kanuma” jette.

⁹ Phexrosis, “Isin akkam Hafuura Gooftaa qoruuf walii galuu dandeessan? Ilaa! miilli warra dhirsa kee awwaalanii balbala dura ga'eera; sis gad si baasu” jedheen.

¹⁰ Isheenis yeruma sana miilla isaa jalatti lafa dhoofttee duute; dargaggoonni sunis ol seenanii reeffa ishee argan; gad baasaniis dhirsa ishee biratti ishee awwaalan. ¹¹ Waldaan kiristaanaa hundi, warri waan kana dhaga'an hundinuus sodaa guddaan qabaman.

Ergamoonna Dhukkubsattoota Baay'ee Fayyisan

¹² Ergamoonnis mallattoo fi dinqii baay'ee uummata gidduutti hojjetan. Amantoonni hundinuus iddoo gardafoo Solomoon jedhamutti walitti qabamu turan. ¹³ Warra hafan keessaa namni tokko iyyuu isaanitti dabalamuuf ija hin jabaanne, uummanni garuu akka malee isaan ulfeessa ture. ¹⁴ Hamma duraa caalaas dhiironnii fi dubartoonni hedduun Gooftaatti amananii amantootatti dabalaman. ¹⁵ Kanaafis akka yommuu Phexros achiin darbutti gaaddidduutti isaa iyyuu isaan keessaa tokko tokko irra bu'uuf jedhanii namoonni dhukkubsattoota karaatti baasaniis siree fi itillee irra ciciibsan. ¹⁶ Namoonnis magaalaaawwan naannoo Yerusaalem jiran keessaa warra dhukkubsatanii fi warra hafuura xuraa'aan dhiphatan fidanii achitti wal ga'an; warri geeffaman hundinuus ni fayyifaman.

Ergamoonni Ari'ataman

¹⁷ Lubni ol aanaanii fi miseensonni garee Saduuqotaa warri isa wajjin turan hundinuu hinaaffaan guutaman. ¹⁸ Isaanis ergamoota qabani manaa hidhaa uummataa keessa buusan. ¹⁹ Garuu ergamaan Gooftaa tokko halkaniin balbala manaa hidhaa banee gad isaan baase. ²⁰ Innis, “Dhaqaa mana qulqullummaa keessa dhadhaabadhaatii, dubbii jireenya haaraa kana hunda isaa uummatatti himaa” jedheen.

²¹ Isaanis akkuma isaanitti himame sanatti ganama barri manaa qulqullummaa seenanii uummata barsiisuu jalqaban.

Lubni ol aanaanii fi warri isa wajjin turan yommuu achi ga'anitti waldaa Yihuudootaatiif yaa'ii maanguddoota Israa'el walitti waaman; akka ergamoota sana fidaniifis manaa hidhaatti namoota ergan. ²² Qondaaltonni ergaman sun garuu yommuu manaa hidhaa ga'anitti jara achitti hin arganne; kanaafis deebi'anii, ²³ “Manaa hidhaa sana isaa sirriitti qollofamee jiru, eegdotas, utuu isaan balbala dura dhaabatanii jiranuu argine; yeroo bannetti garuu nama tokko illee achi keessatti hin arganne” jedhan. ²⁴ Ajajaan eegdota manaa qulqullummaatiif fi luboonni hangafoonni yommuu oduu kana dhaga'anitti dinqifachuudhaan waan jedhan wallaalani, “Maaltu dhalate immoo?” jedhan.

²⁵ Yommuu namichi tokko dhufee, “Jarri isin manaa hidhaatti galchitan sun kunoo, manaa qulqullummaa keessa dhadhaabatanii uummata barsiisaa jiru!” jedhe. ²⁶ Kana irratti ajajaan sun qondaaltota wajjin dhaqee ergamoota sana fide; isaanis sababii uummanni dhagaan nu tuma jedhanii sodaataniif humnatti hin fayyadamne.

²⁷ Ergamootas fidanii, akka lubni ol aanaan isaan qoruuf fuula yaa'ii Yihuudootaa dura isaan dhadhaabachiisan. ²⁸ Lubichi ol aanaanis, “Nu akka isin maqaa kanaan hin barsiisne jabeessinee isin ajajnee turre; isin garuu barsiisa keessaniin Yerusaalem guuttaniirtu; akka nu itti gaafatamtoota dhiiga namicha kanaa taanu nu gochuu barbaaddu” jedhe.

²⁹ Phexrosii fi ergamoonni kaan garuu akkana jedhanii deebisan; “Nu namaaf ajajamuu irra Waaqaaf ajajamuu qabna! ³⁰ Yesuus isa isin fannoo irratti fanniftanii ajjeftan sana Waaqni abbootii keenyaa warra du'an keessaa isa kaaseera. ³¹ Waaqni akka inni Israa'eliif qalbii jijjiirrachuu fi dhiifama cubbuu kennuuf jedhee bulchaa fi Fayyisaa godhee mirga ofiitti ol ol isa qabe. ³² Nu dhuga baatota waan kanaa ti; akkasumas Hafuurri Qulqulluun Waaqni warra isaaf ajajamaniif kenne sun dhuga ba'aa waan kanaa ti.”

³³ Isaanis yommuu waan kana dhaga'anitti akka malee aariidhaan guggubatanii ergamoota ajjeesuuf mari'atan. ³⁴ Fariisichi Gamaaliyaal jedhamu, barsiisaan seeraa kan namni hundi kabaju tokko garuu waldaa Yihuudootaa keessa dhaabatee akka ergamoonni sun yeroof gad baafaman ajaje. ³⁵ Innis akkana isaaniin jedhe; “Yaa namoota Israa'el, waan jara kana gochuuf deemtan keessatti of eeggadhaa. ³⁶ Bara dheeraan dura Toyidaas akka waan nama guddaa ta'eetti of ilaalte kaanaan namoonni gara dhibba afuriitti hedaman isa faana bu'an; inni ni ajjeefame; duuka buutonni isaa ni bittinneeffaman; akkasumaan badanis. ³⁷ Namicha kana booddee immoo Yihuudaan, namni Galiilaa bara lakkoobsa sabaa keessa ka'ee nama baay'ee ofitti kutate; innis ni ajjeefame; warri isa faana bu'anis ni bittinnaa'an. ³⁸ Kanaafuu dubbii kana keessatti ani isinittin hima; namoota kana gad dhiisaa! Haa deemani! Mariin isaanii yookaan hojiin isaanii kun yoo waan nama irraa dhufe ta'e ni bada. ³⁹ Yoo waan Waaqa irraa dhufe ta'e garuu jara kana dhawwuu hin dandeessan; isin mataan keessan iyyuu akka utuu Waaqaan wal loitanuu hin arganne of eeggadhaa!”

⁴⁰ Isaanis gorsa isaa fudhatan; ergamoota sanas ol waamanii garafan; akka isaan maqaa Yesuusittiin waa hin dubbannes ajajaniif gad isaan dhiisan.

⁴¹ Ergamoonnis akka maqaa sanaaf jedhanii qaana'aniif waan ga'umsa argataniif akka malee gammadaa fuula waldaa duraa deeman. ⁴² Isaanis guyyuma guyyaan manaa qulqullummaati, manaa namaattis utuu gargar hin kutin akka Yesuus Kiristoos* ta'e barsiisaa, lallabaas turan.

6

Namoonni Torba Filatamuu Isaanii

* 5:42 5:42 yookaan Masihi

¹ Bara sana keessa yommuu baay'inni barattootaa dabalamaa deemetti Yihuudoonni Giriikota keessa jiraatan Ibrootatti guunguman; haadhonni hiyyeessaa* Yihuudootaa nyaata guyyaa guyyaan hiramuu keessatti hachuucamanii turaniitii. ² Kanaaf ergamoonni kudha lamaan barattoota hunda walitti qabani akkana jedhaniin; "Maaddii tajaajiluuf jennee dubbii Waaqaa barsiisuu dhiisuun nuuf qajeelaa miti. ³ Kanaaf yaa obboloota isin namoota maqaa gaarii qaban kanneen Hafuura Qulqulluu fi ogummaan guutaman torba gidduu keessanii filadhaa. Nus itti gaafatama kana isaanitti kenninee, ⁴ Waaqa kadhachuu fi dubbii isaa barsiisuutti jabaannaa."

⁵ Wannii isaan jedhanis tuuta sana hunda gammachiise. Isaanis Isxifaanos namicha amantii fi Hafuura Qulqulluudhaan guutame tokko, akkasumas Fiiliphoosii fi Phirookoroosin, Niiqaaroonaa fi Xiimoonaa, Pharmeena fi Niqoolaas namicha Anxookkiyaa isa amantii Yihuudootaatti gale sana filatan. ⁶ Isaanis jara kana fuula ergamootaa dura dhaaban; ergamoonnis Waaqa kadhataniifii harka isaan irra kaa'an.

⁷ Dubbiin Waaqaa ni babal'ate; baay'inni barattootaa Yerusaalem keessatti akka malee dabalame; luboonni hedduun amantii kanaaf ajajaman.

Isxifaanos Qabame

⁸ Isxifaanos ayyaanaa fi humna Waaqaatiin guutamee dinqii fi mallattoo gurguddaa namoota gidduutti hojjette. ⁹ Miseensonni mana sagadaa warra, "Namoota bilisooman" jedhamanii, jechuunis Yihuudoonni Qareenaa fi Iskindiriyaaadhaa dhufan akkasumas Yihuudoonni Kiilqiyaa fi Asiyaadhaa dhufan tokko tokko Isxifaanosiin mormuu jalqaban. ¹⁰ Isaan garuu ogummaa isaa yookaan Hafuura Qulqulluu inni ittiin dubbatu sanaan mormuu hin dandeenye.

¹¹ Kanaafuu akka isaan, "Nu utuu Isxifaanos Musee fi Waaqa irratti dubbii arrabsoo dubbatuu dhageenyeerra" jedhaniif dhoksaan namoota tokko tokko sossobatan.

¹² Isaanis uummata, maanguddootaa fi barsiistota seeraa kakaasan. Isxifaanosiinis qabani fuula waldaa Yihuudootaa duratti isa dhi'eessan. ¹³ Dhuga baatota sobduus qopheeffatan; isaanis akkana jedhan; "Namichi kun iddoo qulqulluu kanaa fi seeraan mormuu takkumaa hin dhiifne. ¹⁴ Nu isaa, 'Yesuus namni Naazreeti kun iddoo kana ni diiga; seera Museen nuu kennes ni geeddara' jedhu dhageenyeerra."

¹⁵ Warri waldaa sana keessa turan hundi ija babaasani Isxifaanosin ilaalani akka fuuli isaa akkuma fuula ergamaa Waaqaa ta'e argan.

7

Haasaa Isxifaanos

¹ Lubni ol aanaanis, "Wanni kun dhugumaa?" jedhee isa gaafate.

² Innis akkana jedhee deebise; "Yaa obbolootaa fi yaa abbootii, mee na dhaga'aa! Waaqni ulfinaa, yeroo abbaan keenya Abrahaam Mesophotaamiyaa turetti, utuu inni biyya Kaaraan hin dhaqin isatti mul'ate. ³ Waaqnis, 'Biyya keetii fi saba kee dhiisiitii gara biyya ani si argisiisuu dhaqi'* jedheen.

⁴ "Innis biyya Kaldootaatii ba'ee dhaqee Kaaraan keessa jiraate. Erga abbaan isaa du'e immoo Waaqni achii isa baasee biyya isin amma keessa jiraattan kanatti isa erge.

⁵ Ta'us Waaqni dhaala tokko illee, lafa taakkuu tokkittii illee biyya sana keessatti hin kennineef; garuu Waaqni akka Abrahaamii fi sanyii isaa warra isaan booddeetiif biyya sana akkuma qabeenyaatti kennuuf waadaa galeef. Abrahaam yeroo sana ijoollee tokko illee hin qabu ture. ⁶ Waaqni akkana jedhee karaa kanaan isatti dubbate; 'Sanyiin kee biyya kan isaa hin ta'in keessatti alagaa ta'a; waggaa dhibba afuris ni garboomfama; ni cunqurfamas.' ⁷ Waaqni akkana jedhe; 'Ani garuu saba isaan akkuma garbootaatti tajaajilan sana nan adaba; ergasii immoo isaan biyya sanaa ba'anii lafa kanatti na waaqeffatu.'† ⁸ Waaqnis kakuu dhagna qabaa Abrahaamiif kenne; Abrahaamis abbaa Yisihaaq ta'ee guyyaa saddeettaffaatti dhagna isa qabe; Yisihaaqis ergasii abbaa Yaaqoob ta'e; Yaaqoob immoo abbaa abbootii gosoota kudha lamaanii ta'e.

⁹ "Abbootiin sunis waan Yoosefitti hinaafaniif akka inni biyya Gibxitti garba ta'uuf isa gurguran; Waaqni garuu isa wajjin ture; ¹⁰ rakkina isaa hunda keessaa isa baase; Waaqnis fuula Fara'oon mooticha Gibxi duratti ulfinaa fi ogummaa Yoosefiif kenne; Fara'oonis biyya Gibxii fi mana mootummaa isaa hunda irratti bulchaa isa godhe.

* 6:1 6:1 haadhonni hiyyeessaa - Kun garee dubartoota akka malee rakkatanii ti. Yerusaalem keessa haadhota hiyyeessaa kanneen dhirsooni isaanii bara jireenya isaanii gara caalu magaalaa qulqullittiin ala jiraatanii akka achitti du'anii itti awwaalamaniif jedhanii gara Yerusaalem dhufanii irraa du'an tokko tokkotu ture. Yihuudoonnis garee kana gargaaruuf jedhanii akka maallaqni isaan ittiin nyaata bitatan isaanii kennamuuf mala tokko qopheessan.

* 7:3 7:3 Uma 12:1 † 7:7 7:7 Uma 15:13,14

¹¹ “Baruma sana biyya Gabxii fi biyya Kana’aan hundatti beelli bu’ee rakkina guddaa fide; abbootiin keenyas waan nyaatan tokko illee argachuu hin dandeenye. ¹² Yaaqoobis akka Gibxi keessa midhaan jiru dhageenyaan yeroo jalqabaatiif abbootii keenya achi erge. ¹³ Imala isaanii lammaffaa irrattis Yoosef eenyummaa isaa obboloota isaatti hime; Fara’oonis waa’ee obboloota Yoosef beeke. ¹⁴ Yoosefis ergasii nama ergee abbaa isaa Yaaqoobii fi maatii isaa hunda jechuunis walumatti qabaatti nama 75 waamsise. ¹⁵ Yaaqoobis Gibxitti gad bu’e; innis, abbootiin keenyas achitti du’an. ¹⁶ Reeffi isaaniis Sheekemitti geffamee lafa awwaalaa kan Abrahaam ijoollee Hamoori irraa horii wayiitiin bitee ture sanatti awwaalame.

¹⁷ “Akkuma yeroon waadaa Waaqni Abrahaamiif gale sun itti raawwatamu dhi’aachaa dhufeen baay’inni saba keenyaa Gibxi keessatti akka malee guddate. ¹⁸ Ergasii ‘Mootiin waa’ee Yoosef hin beekin haaraan tokko bulchaa Gibxi ta’e.’ ¹⁹ Innis akka malee saba keenya cunqurse; abbootii keenyas akka daa’imman isaanii dhumaniif akka isaan gad gatan dirqisiise.

²⁰ “Yeroon Museen dhalates yeruma kana ture; innis fuula Waaqaa duratti miidhagaa ture; ji’a sadiifis mana abbaa isaatti kunuunfamee guddate. ²¹ Yommuu inni alatti gatametti intalli Fara’oon fudhattee akka ilma isheetti isa guddifatte. ²² Museen ogummaa warra Gibxi hunda barate; innis dubbii isaatii fi hojii isaatiin jabaa ture.

²³ “Museen yommuu umuriin isaa waggaa 40 guutetti dhaqee obboloota isaa ijoollee Israa’el ilaaluu murteesse. ²⁴ Museenis utuu namni Gibxi tokko nama isaanii tokko miidhuu arge. Kanaafis nama isaanii gargaaruu dhaqee namicha Gibxi sana ajjeesuun haaloo baaseef. ²⁵ Museen waan sabni isaa akka Waaqni karaa isaatiin saba Israa’el furu hubatu se’ee ture; sabni sun garuu hin hubanne. ²⁶ Guyyaa itti aanutti immoo utuu namoonni Israa’el lama wal lolanuu itti dhufee, ‘Jarana, isin obboloota walii ti; yoo maaliif wal miitu ree?’ jedhee walitti araarsuu yaale.

²⁷ “Namichi hiriyyaa isaa miidhaa ture sun garuu Musee achi of irraa darbatee akkana jedhe; ‘Eenyutu nurratti bulchaa fi abbaa murtii si godhe?’ ²⁸ Akkuma kaleessa namicha Gibxi ajjeefte sana ana illee ajjeesuu barbaaddaa?† ²⁹ Museenis waan kana dhageenyaan biyya Midiyaanitti baqatee galtuu ta’ee achi jiraate; achittis ilmaan lama dhalche.

³⁰ “Erga waggaa afurtamni darbee booddees ergamaan Waaqaa tokko gammoojjii naannoo Tulluu Siinaa keessatti daggala boba’u keessaa arraba ibiddaa keessaan Museetti mul’ate. ³¹ Innis waan kana arginaan waan arge sana dinqifate. Yommuu ilaaluu itti dhi’aatettis sagalee Gooftaa dhaga’ee. ³² Sagaleen sunis, ‘Ani Waaqa abbootii keetii, Waaqa Abrahaam, kan Yisihaaqii fi kan Yaaqoob’^S jedheen. Museenis ni hollate; ilaaluus ni sodaate.

³³ “Gooftaan immoo akkana jedheen; ‘Sababii iddoon ati dhaabatu kun qulqulluu ta’eef kophee kee baafadhu. ³⁴ Ani akka sabni koo biyya Gibxi keessatti cunqurfamaa jiru dhugumaan argeera; boo’icha isaaniis dhaga’ee isaan bilisoomsuuf jedhee gad bu’eera; egaa kottu Gibxittin deebisee si ergaatii.*

³⁵ “Namni isaan, ‘Eenyutu bulchaa fi abbaa murtii si godhe?’ jedhanii tuffatan sun Museedhuma kana. Isas Waaqni akka inni bulchaa fi furaa isaanii ta’uuf harka ergamaa Waaqaa kan daggala keessaan isatti mul’ate sanaatiin erge. ³⁶ Innis Gibxi keessatti, galaana diimaa irratti akkasumas waggaa 40 gammoojjii keessatti dinqii fi mallattoo hojjechaa Gibxi keessaa isaan baase.

³⁷ “Museen kun isuma saba Israa’eliitiin, ‘Waaqni sabuma keessan keessaa raajii akka kootii tokko isinii kaasa’† jedhe sanaa dha. ³⁸ Innis, Ergamaa Waaqaa kan Tulluu Siinaa irratti isatti dubbate sanaa fi abbootii keenya wajjin gammoojjii keessatti waldaa keessa ture; dubbii jiraataas nutti kennuuf fudhate.

³⁹ “Abbootiin keenya garuu isaaf ajajamuu didan; qooda ajajamuu isa tuffatanii garaa isaanitiinis gara Gibxitti deebi’an. ⁴⁰ Arooniinis, ‘Waaqota nu dura deeman nuu tolchi; Museen Gibxii nu baase sun maal akka ta’e hin beeknuutii!’‡ jedhan. ⁴¹ Yeroon isaan Waaqa tolfamaa bifa jabbiitiin qopheeffatanis baruma sana; isaanis Waaqa sanaaf aarsaa dhi’eessanii waanuma harka isaanitiin tolfame sanaaf ayyaana ulfinaa ayyaaneffatan. ⁴² Waaqni garuu isaan irraa garagalee akka isaan humnoota samii irraa waaqeffataniif isaan dhiise. Kunis waan kitaaba raajotaa keessatti barreeffame sanaan wal fakkaata; innis akkana jedha;

“Yaa mana Israa’el isin waggaa afurtama gammoojjii keessatti takkumaa aarsaa fi kennaa naaf fiddaniirtuu?

‡ 7:28 7:28 Bau 2:14 § 7:32 7:32 Bau 3:6 * 7:34 7:34 Bau 3:5,7,8,10 † 7:37 7:37 KeD 18:15 ‡ 7:40 7:40 Bau 32:1

43 Isin fakkii waaqota waaqeffachuuf

tofattanii jechuunis dunkaana Moolekiitii[§] fi
urjii waaqa keessan Reefaan* ol qabdaniirtu.

Kanaafuu ani biyya Baabiloniin gamaattin isin ari'a.[†]

44 "Abbootiin keenya gammoojjii keessatti dunkaana dhuga ba'umsaa of biraa qabu turan. Dunkaanni sunis akkuma Waaqni akka Museen akkuma bifa arge sanaatti hojjetuuf isa qajeelchetti hojjetamee ture. 45 Abbootiin keenyas dunkaanicha fudhatanii biyya saba Waaqni isaan duraa ari'ee baase sanaatti Iyyaasuu wajjin galan; dunkaanni sun hamma bara Daawitiitti biyya sana ture. 46 Daawitis fuula Waaqaa duratti fudhatama argatee Waaqa Yaaqoobitiif mana jireenyaa ijaaruuf kadhate. 47 Garuu kan mana sana ijaareef Solomoon ture.

48 "Ta'us Waaqni Waan Hundaa Ollii mana harki namaa ijaare keessa hin jiraatu; kunis akkuma raajichi akkana jedhee dubbatee dha:

49 "Samiin teessoo koo ti;

laftis ejjeta miilla kootii ti.

Yoos isin mana akkamii naaf ijaartu ree?

jedha Gooftaan.

Yookaan lafti boqonnaa kootii eessa ta'a?

50 Waan kana hunda harki koo hin hojjennee?[‡]

51 "Yaa namoota mata jabeeyyii nana! garaan keessan hin amanu; gurri keessanis hin dhaga'u! Isin yeroo hunda Hafuura Qulqulluun mormitu; akkuma abbootiin keessan godhan sana isinis gootu. 52 Raajiin abbootiin keessan hin ari'atin tokko iyyuu jiraa? Isaan warra duraan dursanii dhufaatii isa qajeelaa sanaa himan illee ni ajjeesan; isinis amma isa dabarsitanii kennitanii ajjeeftaniirtu; 53 warri karaa ergamoota Waaqaatiin seera fudhattanii seera sanaaf ajajamuu diddanis isinuma."

Isxifaanos Dhagaan Tumame

54 Isaanis yommuu waan kana dhaga'anitti aariin guggubatanii isatti ciniinnatan.

55 Isxifaanos garuu Hafuura Qulqulluun guutamee gara samii ol ilaalee ulfina Waaqaatii fi Yesuusinis isaa mirga Waaqaa dhaabatee jiru arge. 56 Innis, "Ani kunoo samiin banamee, ilma Namaas isaa mirga Waaqaa dhaabatee jiru nan arga" jedhe.

57 Kana irratti isaan hundi gurra isaanii qabatanii sagalee guddaan iyyaa isatti girrisan. 58 Magaalaa keessaas gad isa baasanii dhagaan isa tumuu jalqaban. Yeroo sana dhuga baatonni uffata isaanii miilla dargaggeessa Saa'ol jedhamu tokkoo jala kaa'atan.

59 Isxifaanosis utuu isaan dhagaan isa tumaa jiranuu, "Yaa Gooftaa Yesuus, hafuura koo fudhadhu" jedhee kadhate. 60 Jilbeenfatees sagalee guddaadhaan, "Yaa Gooftaa, cubbuu kana isaanitti hin lakkaa'in!" jedhee iyye; innis erga waan kana dubbatee booddee ni du'e.

8

1 Saa'olis ajjeefamuu Isxifaanos irratti namootaan walii galee ture.

Ari'atama Waldaa Kiristaanaa

Guyyuma sana waldaa Kiristaanaa ishee Yerusaalem jirtutti ari'atamni guddaan ka'e; ergamoota malee warri kaan hundinuu biyya Yihuudaatii fi Samaariyaa hunda keessa bibittinnaa'an. 2 Namoonni Waaqa sodaatanis Isxifaanosin awwaalan; boo'icha guddaas boo'anif. 3 Saa'ol garuu waldaa kiristaanaa balleessuu jalqabe; innis mana tokko irraa gara mana biraa dhaqee dhiiraa fi dubartii lafa irra harkisee mana hidhaatti galchaa ture.

Fiiilphoos Samaariyaa Keessatti

4 Warri bittinnaa'an sun lafa dhaqan hundatti dubbii sana lallaban. 5 Fiiilphoosis gara magaalaa Samaariyaa tokkootti gad bu'ee achitti Kiristoos lallabe. 6 Namoonni sunis yommuu waan Fiiilphoos dubbatu dhaga'anii dinqii inni hojjetu arganitti hundi isaanii qalbeeffatanii isa dhaga'an. 7 Hafuurri xuraa'aanis sagalee guddaan iyyee nama hedduu keessaa ba'e; warri laamsha'anii fi warri naafatan baay'eenis ni fayyan. 8 Kanaafis gammachuu guddaatu magaalaa sana keessatti ta'e.

Simoon Falfalticha

§ 7:43 7:43 Moolek - waaqa tolfamaa warra Kana'aan kan waaqeffatamuu isaa keessa ijoollee gubanii aarsaa dhi'eessuunis jiru. * 7:43 Reefaan - waaqa tolfamaa bara durii kan bulchaa pilaaneettii Saatarni jedhamuuti jedhamee waaqeffatamu. † 7:43 7:43 Amo 5:25 ‡ 7:50 7:50 Isa 66:1,2

⁹ Garuu yeroo sanaan dura namichi Simoon jedhamu tokko magaalaa sana keessatti falfala hojjetee namoota Samaariyaa hunda dinqisiisaa ture; innis akka waan nama guddaa ta'eetti of hedaa ture. ¹⁰ Namoonni hundinuu xinnaa guddaan qalbii isaanii gara isaatti deebifatanii, "Namichi kun humna Waaqaa isa 'humna guddaa' jedhamu sanaa dha" jedhanii isa saadan. ¹¹ Namoonni sunis sababii inni yeroo dheeraa falfala isaatiin isaan dinqisiiseef qalbii isaanii gara isaatti deebifatan. ¹² Garuu yommuu Fiiliphoos wangeela waa'ee mootummaa Waaqaatii fi maqaa Yesuus Kiristoos lallabetti amananii dhiiraa dubartiin cuuphaman. ¹³ Simoon mataan isaa iyyuu amanee cuuphame. Innis mallattoo fi dinqii arge sana dinqifachaa Fiiliphoos wajjin deeme.

¹⁴ Ergamoonni Yersaalem turan akka warri Samaariyaa dubbii Waaqaa fudhatan dhaga'anii Phexrosii fi Yohannisin isaanitti ergan. ¹⁵ Ergamoonni sunis yommuu achi ga'anitti akka isaan Hafuura Qulqulluu argataniif ni kadhataniif; ¹⁶ Hafuuri Qulqulluun isaan keessaa nama tokko irra illee hin buune turetii; isaan maqaa Gooftaa Yesuus qofaan cuuphamanii turan. ¹⁷ Phexrosii fi Yohannis harka isaanii jara sana irra kaka'an; isaanis Hafuura Qulqulluu argatan.

¹⁸ Simoon falfaltichis akka yeroo ergamoonni harka isaanii nama irra kaa'an Hafuurri Qulqulluun namaa kennamu arginaan ergamootaaf horii kennee, ¹⁹ "Akka namni ani harka irra kaa'u hundi Hafuura Qulqulluu argatuuf dandeettii kana anaaf illee kennaa" jedheen.

²⁰ Phexros garuu akkana jedhee deebiseef; "Sababii ati kennaa Waaqaa waan horiin bitachuu dandeessu seeteef horiin kee suma wajjin haa badu! ²¹ Garaan kee fuula Waaqaa duratti waan qajeelaa hin ta'iniif ati tajaajila kana keessatti gooda yookaan carraa hin qabdu. ²² Kanaaf hammina kee kana irraa deebi'iitii gooftaa kadhaddhu; inni yaada garaa keetii kana siif dhiisa ta'aatii. ²³ Ani akka ati yaada hadhaa'aan guutamtee fi akka ati garbicha cubbuu taate nan arga."

²⁴ Simoonis, "Akka wannii isin jettan kun tokko iyyuu narra hin geenyeeff Gooftaa naa kadhaddhaa" jedhee deebise.

²⁵ Phexrosii fi Yohannis erga dhugaa ba'anii dubbii Gooftaas labsanii booddee gandoota Samaariyaa hedduu keessatti wangeela lallabaa Yersaalemitti deebi'an.

Fiiliphoosii fi Namicha Itoophiyaa Tokko

²⁶ Ergamaan Gooftaa tokko Fiiliphoosiin, "Ka'iitii karaa Kibbaatiin gara daandii Yersaaleemii ba'ee Gaazaatti gad bu'u sanaa dhaqi" jedhe; daandiin sunis daandii gammoojjii ti. ²⁷ Innis ka'ee deeme; karaa isaa irrattis xu'aashii Itoophiyaa tokko jechuunis qondaalticha Kandakee mootittii saba Itoophiyaa kan qabeenya ishee hunda irratti itti gaafatamaa ta'ee arge; qondaalli sun sagaduuf jedhee Yersaalem dhaqee ture. ²⁸ Innis yeroo biyya isaatti deebi'u gaarii isaa irra taa'ee kitaaba Isaayyaas raajichaa dubbifachaa ture. ²⁹ Hafuurri Qulqulluunis Fiiliphoosiin, "Dhaqitii gaarii sanatti dhi'aadhu" jedhe.

³⁰ Fiiliphoosis gaarii sanatti fiigee utuu namichi sun kitaaba Isaayyaas raajichaa dubbifatu dhaqa'ee, "Ati waan dubbiftu kana ni hubattaa?" jedhee gaafate.

³¹ Namichis, "Yoo namni naa hin ibsin ani akkamiin hubachuu danda'a?" jedhe. Innis akka Fiiliphoos ol ba'ee isa bira taa'uuf waammate.

³² Kutaan kitaabaa kan xu'aashiin sun dubbisaa ture isa kana:

"Inni akkuma hoolaa iddoo qalmaatti geeffamee,

yookaan akkuma ilmoo hoolaa

kan fuula nama rifeensa irraa murmuruu duratti cal'isuu

akkasuma afaan isaa hin saaqqanne.

³³ Inni cunqurfamuu isaatiin murtii qajeelaa dhowwatame;

eenyutu waa'ee sanyii isaa dubbachuu danda'a?

Jireenyi isaa lafa irraa fudhatameeraatii.*

³⁴ Xu'aashiin sunis Fiiliphoosiin, "Raajiin sun waa'ee eenyuu dubbata? Waa'ee mataa isaa moo waa'ee nama biraa ti? Maaloo mee natti himi!" jedhee gaafate. ³⁵ Fiiliphoosis kutaadhuma kitaabaa sanaan afaan saaqatee oduu gaarii waa'ee Yesuus isatti hime.

³⁶ Isaanis utuu karaa deemanuu bishaanitti ba'an; xu'aashiin sunis, "Kunoo bishaan as jira; yoo maaltu cuuphamuu na dhowwa ree?" jedheen. [³⁷ Fiiliphoosis, "Ati yoo garaa kee guutuun amante cuuphamuu ni dandeessa" jedheen. Namichis deebisee, "Akka Yesuus Kiristoos ilma Waaqaa ta'e ani nan amana" jedhe.] ³⁸ Innis akka gaarii sun dhaabatu ajaje; isaan lamaanuu dhaqanii bishaan seenan; Fiiliphoosis isa cuuphe.

³⁹ Yommuu isaan bishaan keessaa ba'anittis Hafuurri Gooftaa Fiiliphoosin fudhate;

* 8:33 8:33 Isa 53:7,8 † 8:37 8:37 Waraabbileen durii tokko tokko kutaa kana hin qaban.

xu'aashiin sunis ergasii isa hin argine; garuu gammadaa karaa isaa itti fufe. ⁴⁰ Fiiliphos immoo Azooxoonitti argame; innis hamma Qiisaariyaa ga'utti magaalaa hunda keessatti wangeela lallabaa darbe.

9

Saa'ol Jijjiirame

9:1-19 kwf – Hoj 22:3-16; 26:9-18

¹ Gidduudhuma sana Saa'ol barattoota Gooftaa ajjeesuuf dhaadachaa gara luba ol aanaa dhaqee, ² nama karaa kana irra jiru kam iyyuu dhiiras dubartiis yoo argate akka hidhee Yersaalemitti geessuuf akka lubni sun gara manneen sagadaa kanneen Damaasqoo jiraniitti xalayaawwan isaaf barreessuuf isa kadhate. ³ Utuu inni deemaa jiruu akkuma Damaasqootti dhi'aateen akkuma tasaa ifni tokko samii irraa naannoo isaatti balaaqqise. ⁴ Innis lafatti kufee sagalee, **“Yaa Saa'ol, Yaa Saa'ol, ati maaliif na ari'atta?”** isaan jedhu tokko dhaga'e.

⁵ Saa'olis, “Yaa Gooftaa, ati eenyu?” jedhee gaafate.

Innis akkana jedhee deebiseef; **“Ani Yesuus isa ati ari'attuu dha. Arfii wayii dhiituun suma miidha. ⁶ Amma ka'ii magaalaa seeni; wanni ati gootu sitti himamaatii”** jedheen.

⁷ Namoonni Saa'ol wajjin deemaa turanis waan dubbatan dhabanii dhadhaabatan; isaanis sagalee dhaga'an malee nama tokko illee hin argine. ⁸ Saa'olis lafaa ka'e; innis yommuu iji isaa banametti homaa arguu hin dandeenye; isaanis harka isaa qabani Damaasqootti isa geessan. ⁹ Iji isaas Guyyaa sadii guutuu arguu hin dandeenye; innis homaa hin nyaanne; homaas hin dhugne.

¹⁰ Damaasqoo keessa barataa Anaaniyaas jedhamu tokkotu ture. Gooftaanis mul'ataan, **“Yaa Anaaniyaas!”** jedhee isa waame.

Innis, “Yaa Gooftaa, kunoo ani asin jira” jedhee deebise.

¹¹ Gooftaanis akkana jedheen; **“Ka'ii gara daandii 'Qajeelaa' jedhamu sanaa mana Yihuudaa dhaqiitii nama Saa'ol jedhamu kan Xarseesii dhufe tokko iyyaafadhu; inni kadhannaa irra jiraatii. ¹² Saa'olis nama Anaaniyaas jedhamu tokko isaa dhufee akka agartuun isaa deebi'uufiif harka isa irra kaa'u mul'ataan arge.”**

¹³ Anaaniyaas deebisee akkana jedhe; “Yaa Gooftaa, ani waa'ee namicha kanaa, miidhaa inni qulqulloota kee warra Yersaalem jiraatan irratti hojjete hundumaa dhaga'eera. ¹⁴ Ammas warra maqaa kee waammatan hunda hidhuuf jedhee luboota hangafoota irraa aangoo fudhatee dhufeera.”

¹⁵ Gooftaan garuu Anaaniyaasiin akkana jedhe; **“Namichi kun mi'a koo kan ani akka inni namoota Ormaatii fi mootota isaanii duratti, saba Israa'el durattis maqaa koo baatuuf jedhee filadhe waan ta'eef ka'ii dhaqi!”** ¹⁶ Ani akka inni maqaa kootiif jedhee rakkachuu qabu isattin argisiisa.”

¹⁷ Anaaniyaas dhaqee mana sana seene. Harka isaas Saa'ol irra kaa'ee, “Yaa obboleessa koo Saa'ol, Gooftaa Yesuus inni utuu ati as dhufuu karaa irratti sitti mul'ate sun akka ati argituu fi akka ati Hafuura Qulqulluun guutamtuuf na ergeera” jedhe. ¹⁸ Yommuusuma wanni akka qolaa ija Saa'ol irraa harca'e; inni ammas arguu danda'e. Ka'ees cuuphame. ¹⁹ Nyaatas nyaatee jajjabaate.

Saa'ol Damaasqoo fi Yersaalemitti Lallabe

Saa'ol bultii gabaabduudhaaf barattoota Damaasqoo jiran bira bubbule. ²⁰ Innis akka Yesuus ilma Waaqaa ta'e yeruma sana manneen sagadaa keessatti lallabuu jalqabe.

²¹ Warri isa dhaga'an hundinuun dinqifatanii akkana jedhan; “Namichi kun isuma Yersaalem keessatti warra maqaa kana waammatan balleessa sana mitii? Ammas hidhee luboota hangafootatti isaan geessuuf dhufe mitii?” ²² Saa'ol garuu ittuma jabaachaa deeme; innis akka Yesuus kun Kiristoos* ta'e mirkaneessuudhaan Yihuudoota Damaasqoo keessa jiraatan afaan qabachiise.

²³ Erga guyyaan hedduun darbee booddees Yihuudoonni isa ajjeesuuf mari'atan. ²⁴ Saa'ol garuu marii isaanii kana beeke; isaanis isa ajjeesuuf jedhanii halkanii guyyaa balbala magaalaa sanaa jabeessanii eegaa turan. ²⁵ Barattoonni isaa garuu halkaniin fuudhanii guuboodhaan dallaa irraan dabarsanii gad isa buusan.

²⁶ Innis yommuu gara Yersaalem dhufetti barattootatti dabalammu yaale; isaanis waan barataa ta'uu isaa hin amaniniif hundi isaanii isa sodaatan. ²⁷ Barnaabaas immoo fuudhee ergamootatti isa geesse; akka Saa'ol itti karaatti gooftaa arge, akka itti gooftaan isatti dubbatee fi akka inni sodaa malee Damaasqoo keessatti maqaa

* 9:22 9:22 yookaan Masihiin

Yesuusitiin lallabe isaanitti hime. ²⁸ Saa'olis isaan wajjin jiraatee Yerusaalem keessa sodaa malee ba'ee galaa ture; maqaa Gooftaatiinis ija jabinaan lallabe. ²⁹ Yihuudoota Giriikota keessa jiraatan wajjinis dubbachaa isaaniinis morkachaa ture; isaan garuu isa ajjeesuu barbaadan. ³⁰ Obbolloonnis yommuu waan kana beekanitti fuudhanii Qiisaariyaatti gad isa buusan; gara Xarsees isa ergan.

³¹ Kanaafis waldaan kiristaanaa Yihuudaa, Galiilaa fi Samaariyaa keessa jirtu guutummaatti nagaa argatte; ni cimtes. Isheenis Hafuura Qulqulluudhaan jajjabaatee sodaa Gooftaatiin jiraachuudhaan baay'inaan guddachaa deemte.

Eeniyaa fi Doorqaa

³² Phexros utuu biyya sana keessa naanna'aa jiruu qulqulloota Liidaa keessa jiraatan ilaaluuf gad bu'e. ³³ Achittis namicha laamsha'aa Eeniyaa jedhamu kan waggaa saddeeti siree irratti hafee ture tokko arge. ³⁴ Phexrosis, "Yaa Eeniyaa, Yesuus Kiristoos si fayyisa; ka'iitii siree kee afadhu" jedheen. Eeniyaanis yommusuma ka'e. ³⁵ Namoonni Liidaa fi Shaaroon keessa jiraatan hundinuu isa arganii Gooftaatti deebi'an.

³⁶ Yoophee keessas barattuu Xaabiitaa jedhamtu tokkodu ture; Xaabiitaa jechuun Doorqaa jechuu dha. Isheenis yeroo hunda waan gaarii hojjetti; hiyyeeyyiis ni gargaarti turte. ³⁷ Isheenis baruma sana keessa dhukkubsattee duute; reeffa ishees dhiqanii kutaa darbii tokko keessa kaa'an. ³⁸ Liidaan kun Yoopheetti dhi'oo turte; barattoonnis yommuu akka Phexros Liidaa jiru dhaga'anitti nama lama isatti erganii, "Maaloo dafii nu bira ga'i!" jedhanii isa kadhata.

³⁹ Phexrosis ka'ee isaan wajjin deeme; akkuma inni achi ga'eenis gara kutaa darbii sanaatti isa gessan. Haadhonni hiyyeessaa hundinuu isa bira dhaabatanii kootii fi wayyaa biraa kan Doorqaan yeroo isaan wajjin turte hojjette sana isatti argisiisani bo'aa turan.

⁴⁰ Phexrosis hunda isaanii gad baasee jilbeenfatee Waaqa kadhate; reeffa sanattis garagalee, "Xaabiitaa ka'ii!" jedhe. Isheenis ija ishee banattee Phexrosin argite; kaatees ni teesse. ⁴¹ Innis harka qabee ishee kaase; amantootaa fi haadhota hiyyeessaa waamee jiraattuu taatee isaan fuuldura dhaabe. ⁴² Kunis Yoophe hunda keessatti beekame; namoonni baay'eenis Gooftaatti aman. ⁴³ Phexrosis Yoophe keessa gogaa duugduu Simoon jedhamu tokko bira guyyaa hedduu ture.

10

Qorneelewoos Phexrosin Waame

¹ Namichi Qorneelewoos jedhamu tokko Qiisaariyaa keessa ture; innis kutaa, "Humna waraana lixaaliyaa" jedhamu keessatti ajajaa dhibbaa ture. ² Qorneelewoosii fi maatiin isaa hundinuu warra Waaqaaf bulanii fi warra Waaqa sodaatan turan; innis warra rakkataniif arjummaadhaan kenna ture; yeroo hundas Waaqa kadhata ture. ³ Innis gaafa tokko ergamaa Waaqa tokko isaa gara isaa dhufee, "Yaa Qorneelewoos!" jedhuun guyyaa keessaa gara sa'aatii sagaliitti ifaan ifatti mul'ataan arge.

⁴ Qorneelewoosis sodaan ija babaasee isa ilaalee, "Yaa Gooftaa, maal barbaadda?" jedhee gaafate.

Ergamaan Waaqaa sun immoo akkana jedhee deebise; "Kadhannaa keetii fi kennaan ati hiyyeeyyiidhaaf kennitu aarsaa yaadachaa ta'ee fuula Waaqaa duratti ol ba'eera. ⁵ Amma Yoopheetti nama ergiitii Simoon isa Phexros jedhamu sana as fichisiisi. ⁶ Innis namicha gogaa duugu kan Simoon jedhamu kan manni isaa qarqara galaanaatti argamu tokko bira jira."

⁷ Qorneelewoosis yommuu ergamaan Waaqaa kan isatti dubbate sun deemetti tajaajiltoota isaa keessaa nama lama, warra isa eegan keessaa immoo loltuu Waaqaaf bulu tokko waamee, ⁸ waan kana hunda itti himee Yoopheetti isaan erge.

Mul'ata Phexros Arge Tokko

10:9-32 kwi - Hoj 11:5-14

⁹ Guyyaa itti aanuttis utuu warri ergaman sun karaa jiranuu, yeroo isaan magaalatti dhi'aatanitti Phexros gara sa'aatii ja'aatti kadhannaaf bantii manaatti ol ba'e. ¹⁰ Innis beela'ee waan nyaatu barbaade; utuu isaan qopheessaafii jiranuus akka waan yaadaan fudhatamee ta'ee. ¹¹ Samii banamee fi waan akka wayyaa bal'aa tokkos isaa roga isaa afraniin qabamee lafatti gad buufamu arge. ¹² Wayyaan sunis bineensota miilla afurii, uumamawwan lafa irra loo'anii fi simbirroota samii kanneen gosa hundaa of keessaa qaba ture. ¹³ Sagaleen tokkos, "Yaa Phexros, ka'iitii qaladhuu nyaadhu" jedheen.

¹⁴ Phexros garuu deebisee, "Yaa Gooftaa, hin ta'u! Ani takkumaa waan balfamaa yookaan waan xuraa'aa hin nyaanne" jedhe.

¹⁵ Sagaleen sunis yeroo lammaffaa, **“Ati waan Waaqni qulqulleesseen xuraa’aa hin jedhin”** jedheen.

¹⁶ Wanni kunis yeroo sadii ta’e; wayyaan sunis yommuuma deebi’ee samiitti ol fudhatame.

¹⁷ Utuu Phexros waa’ee hiikkaa mul’ata sanaa dinqisiifachaa jiruus namoonni Qorneelewoos erge sun mana Simoon iyyaafachaa dhufanii karra dura dhaabatan.

¹⁸ Isaanis lallabani, “Simoon inni Phexros jedhamu tokko as jiraa?” jedhanii gaafatan.

¹⁹ Ammas utuu Phexros waa’ee mul’ata sanaa yaadaa jiruu, Hafuurri Qulqulluun akkana isaan jedhe; “Yaa Simoon, kunoo namoonni sadii si barbaaduutti jiru. ²⁰ Ka’iitii gad bu’i. Isaan wajjin deemuus hin shakkin; anatu isaan ergeetii.”

²¹ Phexrosis gara namoota sanaatti gad bu’ee, “Namni isin barbaadaa jirtan ana; maaliif dhuffani?” jedheen.

²² Jarri sunis akkana jedhanii deebisan; “Nu ajajaa dhibbaa kan Qorneelewoos jedhamu tokko biraa dhufne; inni nama qajeelaa fi nama Waaqa sodaattu kan Yihuudoota hunda birattis kabajamuu dha; ergamaan Waaqaa qulqulluun tokko akka inni mana isaatti si waamsisee waan ati jettu dhaga’uuf isatti dubbate.” ²³ Phexrosis namoota sana manatti ol galchee keessumsise.

Phexros mana Qorneelewoos Dhaqe

Guyyaa itti aanutti Phexros ka’ee isaan wajjin deeme; obboleonni tokko tokkos Yoopheedhaa ka’anii isa wajjin deeman. ²⁴ Isaanis guyyaa itti aanu Qiisaariyaatti galan; Qorneelewoosis firoota isaatii fi michoota isaa warra isatti dhi’aatan walitti waamee isaan eegaa ture. ²⁵ Akkuma Phexros mana seeneen Qorneelewoos isa simatee isaaf sagaduuf jedhee miilla isaa irratti kufe. ²⁶ Phexros garuu, “Ka’i! Anis namumaatii” jedhee ol isa qabe.

²⁷ Phexrosis isa wajjin dudubbachaa mana seenee namoota walitti qabaman hedduu arge. ²⁸ Innis akkana isaaniin jedhe; “Akka Yihuudiin tokko nama ormaa wajjin tokkummaa qabaachuu fi itti dhi’aachuun seera keenya hin ta’in isin mataan keessan iyyuu beektu; garuu Waaqni akka ani nama tokkoonuu jibbamaa yookaan xuraa’aa hin jenne natti argisiiseera. ²⁹ Kanaaf yommuu isin nama natti ergitanitii ani mormii tokko malee dhufe; egaa waan isin na waamtaniif beekuu nan barbaada.”

³⁰ Qorneelewoosis akkana jedhee deebise: “Bultii afuriin dura, sa’aatiidhuma kanatti, ani sa’aatii sagalitti mana kootti kadhachaan ture. Akkuma tasaa namichi wayyaa adii qaanqee uffatu tokko na dura dhaabatee ³¹ akkana jedhe; ‘Yaa Qorneelewoos, Waaqni kadhannaa kee dhaga’eera; kennaa ati hiyyeeyyiif kennituu yaadateera. ³² Yoopheetti nama ergiitii Simoon isa Phexros jedhamu sana waamsisi. Inni mana Simoon namicha gogaa duugu kan qarqara galaanaa jiraatu sanaa jira.’ ³³ Kanaaf ani yeruma sana nama ergeen si waamsise; atis barga dhufte. Egaa nu hundinuu waan akka ati nutti himtu Gooftaan si ajaje hunda dhaga’uuf jennee as fuula Waaqaa dura jirra.”

³⁴ Phexrosis akkana jedhee dubbachuu jalqabe; “Ani amma akka Waaqni nama Wal hin caalchifne dhugumaan nan hubadha. ³⁵ Garuu saba hundumaa keessaa namni isa sodaatuu fi namni waan qajeelaa hojjetu kam iyyuu fuula isaa duratti fudhatamaa dha. ³⁶ Isin ergaa Waaqni karaa Yesuus Kiristoosiin nagaa labsuudhaan saba Israa’elitti erge sana beektu; Yesuus Kiristoos kun Gooftaa waan hundaa ti. ³⁷ Isin waan Cuuphaa Yohannis lallabee booddee Galiilaadhaa jalqabee Yihuudaa hunda keessatti ta’e sana ni beektu. ³⁸ Kunis akka Waaqni Yesuus nama Naazreeti sana Hafuura Qulqulluu fi humnaan dibee fi akka Yesuus waan gaarii hojjechaa fi warra humna diyaabiloos jala turan fayyisaa biyya hunda keessa nanaanna’ee dha; Waaqni isa wajjin tureetii.

³⁹ “Nus waan inni biyya Yihuudootaatii fi Yerusaaalem keessatti hojjetu hundaaf dhuga baatota. Isaanis fannoo irratti fannisanii isa ajjeesan. ⁴⁰ Waaqni immoo guyyaa sadaffaatti warra du’an keessaa isa kaase; akka inni namatti mul’atus godhe. ⁴¹ Inni nama hundatti hin mul’anne; garuu nu dhuga baatota Waaqni duraan dursee filattitii fi erga inni warra du’an keessaa ka’ee booddee isa wajjin nyaannee dhugnetti mul’ate. ⁴² Innis akka nu namootatti lallabnuu fi akka inni nama Waaqni warra jiranii fi warra du’an irratti abbaa murtii godhee muude ta’e akka dhugaa baanuuf nu ajaje. ⁴³ Raajonni hundinuu akka namni isatti amanu hundi maqaa isaatiin dhiifama cubbuu argatu waa’ee isaa dhugaa ba’u.”

⁴⁴ Utuma Phexros amma illee waan kana dubbachaa jiruu, Hafuurri Qulqulluun warra dubbii sana dhaga’aa turan hunda irra bu’e. ⁴⁵ Amantoonni dhagna qabatan kanneen Phexros wajjin dhufan sun waan kennaan Hafuura Qulqulluu Namoota Ormaa irratti illee dhangala’eef ni dinqifatan; ⁴⁶ isaan jaraa afaan haaraa dubbatanii fi Waaqas jajatan dhaga’aniiruutii.

Phexrosis akkana jedhe; ⁴⁷ “Akka namoonni akkuma keenya Hafuura Qulqulluu argatan kunneen hin cuuphamneef namni bishaan dhowwachuu danda’u eenyu?”
⁴⁸ Innis akka isaan maqaa Yesuus Kiristoositti cuuphaman ajaje; isaanis akka Phexros bultii xinnoo isaan bira turuuf isa kadhatan.

11

Phexros Waan Hojjete Gabaase

¹ Ergamoonnii fi obbolloonni Yihuudaa keessa jiran akka Namoonni Ormaas dubbii Waaqaa fudhatan dhaga’an. ² Kanaaf yommuu Phexros Yersaaleemitti ol ba’etti amantoonni dhagna qabatan isaan morman; ³ akkanas jedhan; “Ati maaliif mana namoota dhagna hin qabatiniidhaqxee isaan wajjin nyaatte?”

⁴ Phexrosis akkana jedhee waan ta’e sana tokko tokkoon isaanii ibsuu jalqabe. ⁵ “Ani magaalaa Yoophe keessatti kadhannaa irrann ture; akka waan yaadaan fudhatamuus ta’ee waan akka wayyaa bal’aa tokko isaa roga isaa afraniin qabamee samii irraa gad buufamu mul’ataan arge. Innis iddoo ani turetti gad dhufe. ⁶ Anis xiyyeeffadhee ilaalee bineensota miilla afurii, bineensota bosonaa, uumamawwan lafa irra loo’anii fi simbirroota samii nan arge. ⁷ Anis sagalee, ‘**Yaa Phexros, ka’iitii qaladhuu nyaadhu’** naan jedhu tokkon dhaga’e.

⁸ “Ani garuu deebisee, ‘Yaa Gooftaa, hin ta’u! Takkumaa wanni balfamaan yookaan wanni xuraa’aan tokko iyyuu afaan koo hin seenne’ jedhe.

⁹ “Sagaleen sunis yeroo lammaffaa samii irraa, ‘**Ati waan Waaqni qulqulleeseen xuraa’aa hin jedhin’** jedhe. ¹⁰ Wanni kunis yeroo sadii ta’e; kana booddees hundumti isaa amma illee samiitti ol fudhatame.

¹¹ “Yommusuma namoonni Qiisaariyaadhaa natti ergaman sadii mana ani jiraachaa ture sana dura dhaabatan. ¹² Hafuurri Qulqulluunis akka ani shakkii tokko malee isaan wajjin deemu natti hime. Obbolloonni kunneen ja’aanis na wajjin deeman; nus mana namichaa ol seenne. ¹³ Innis akka ergamaa Waaqaa kan mana isaa keessatti itti mul’ate tokko arge nutti hime; ergamaan sunis akkana isaan jedhe; Yoopheetti nama ergiitii Simoon isa Phexros jedhamu sana waamsisi; ¹⁴ inni ergaa sii fi namoonni mana keetii hundinuu ittiin fayyitan sitti hima.’

¹⁵ “Akkuma ani dubbachuu jalqabeen, Hafuurri Qulqulluun akkuma jalqabatti nurra bu’e sana isaan irras bu’e. ¹⁶ Anis waan Gooftaan, ‘**Yohannis bishaaniin cuuphe; isin garuu Hafuura Qulqulluudhaan cuuphamtu’** jedhee ture sana nan yaadadhe. ¹⁷ Kanaafuu erga Waaqni kennaadhuma yeroo nu gooftaa Yesuus Kiristoositti amanne nuu kenne sana isaaniifis kennee Waaqaan mormuuf ani eenyu?”

¹⁸ Isaanis waan kana dhaga’anii cal’isan; “Yoos Waaqni qalbii jijjiiratanii jiraachuu Namoota Ormaatiifis kenneera” jedhanii Waaqa galateeffatan.

Waldaa Kiristaanaa Anxookiyyaa

¹⁹ Warri sababii ari’atama Isxifaanositti ka’etiin bittinnaa’anii turan sun ergaa sana Yihuudoota qofatti himaa hamma Finiiqee, Qophiroosii fi Anxookiyyaatti deeman. ²⁰ Isaan keessaa namoonni Qophiroosii fi Qareenaa irraa dhufan tokko tokko garuu Anxookiyyaa dhaqanii oduu gaarii waa’ee Gooftaa Yesuus Giriikotattis himuu jalqaban. ²¹ Harki Gooftaa isaan wajjin ture; namoonni hedduunis amananii Gooftaatti deebi’an.

²² Oduun kunis gurra waldaa kiristaanaa ishee Yersaaleem jirtuu seene; isaanis Barnaabaasin Anxookiyyaatti ergan. ²³ Innis yommuu achi ga’ee Ayyaana Waaqaa argetti ni gammade; akka isaan garaa tokkoon Gooftaa amanamanii jiraataniifis isaan hunda jajjabeesse. ²⁴ Inni nama gaarii Hafuura Qulqulluu fi amantiidhaan guutame ture; namoonni baay’eenis Gooftaatti dabalaman.

²⁵ Barnaabaasis Saa’olin barbaaduuf jedhee Xarsees dhaqe; ²⁶ Yommuu isa argettis Anxookiyyaatti isa geesse. Isaanis waggaa tokko guutuu waldaa sanaan wal ga’anii namoota baay’ee barsiisan. Barattoonnis yeroo jalqabaatiif Anxookiyyaatti, “Kiristaana” jedhaman.

²⁷ Gidduudhuma sana raajonni tokko tokko Yersaaleemii ka’anii Anxookiyyaatti gad bu’an. ²⁸ Isaan keessaa namichi Agaaboos jedhamu tokko ka’ee dhaabatee akka beelli guddaan isaa addunyaa hunda irratti bu’u Hafuuraan dubbate. Wanni kunis bara mo’umsa Qilaawudewoos Qeesaar keessa ta’e. ²⁹ Barattoonnis tokkoon tokkoon isaanii akkuma dandheetii isaaniitti obbolloota Yihuudaa keessa jiraatan gargaaruu murteessan. ³⁰ Isaanis harka Barnaabaasii fi harka Saa’olitti gargaarsa isaanii maanguddootaatti erguun gargaarsa kennan.

12

Phexros Dinqiidhaan Mana Hidhaatii Ba'e

¹ Baruma sana keessa Heroodis mootichi isaan ari'achuuf jedhee miseensota waldaa kiristaanaa tokko tokko qabe. ² Innis Yaaqoob obboleessa Yohannis goraadeen ajjeese. ³ Yommuu akka wanni kun Yihuudoota gammachiise argettis, ittuma fufee Phexrosinis qabsiise. Wanni kunis yeroo Ayyaana Maxinoo keessa ta'e. ⁴ Erga isa qabee booddee akka isaan isa eeganiif jedhee gareewwan loltootaa afur kanneen tokkoon tokkoon isaanii loltoota afur afur of keessaa qabanitti dabarsee isa kennuudhaan, mana hidhaa keessa isa buuse; kanas ayyaana Faasiikaa booddee fuula uummataa duratti dhi'eessee isa qoruuf godhe.

⁵ Kanaafuu Phexros mana hidhaa keessatti eegamaa ture; waldaan kiristaanaa garuu jabeessitee waa'ee isaatiif Waaqa kadhachaa turte.

⁶ Edumtii guyyaa Heroodis itti Phexrosin dhi'eessuuf ture sanaa Phexros foncaa lamaan hidhamee loltoota lama gidduu rafaa ture; loltoonni kaanis balbala dura dhaabatanii mana hidhaa sana eegaa turan. ⁷ Akkuma tasaas, ergamaan Gooftaa tokko mul'ate; kutaa mana hidhaa sana keessattis ifni ife; ergamaan sunis cinaacha Phexros tuqee isa dammaqsuudhaan, "Dafii ka'i!" jedheen. Foncaan sunis harka isaa irraa harca'e.

⁸ Ergamaan Waaqaa sunis, "Uffata kee uffadhu; kophee kees kaa'adhu" jedheen. Phexrosis akkasuma godhe. Ergamaan sunis, "Wayyaa kee marxifadhuutii na faana bu'i" jedheen. ⁹ Phexrosis isa duukaa bu'ee mana hidhaatii ba'e; innis waan mul'ata argu se'e malee akka wanni ergamaan Waaqaa hojjechaa ture sun dhugaa ta'e hin beekne. ¹⁰ Isaanis waardiyyaa duraatii fi isa lammaffaa bira darbanii balbala sibiilaa kan magaalatti gad baasu bira ga'an; balballi sunis ofumaan banameef; isaanis gad ba'anii utuu daandii tokko irra gad bu'aa jiranuu ergamaan sun isa biraa sokke.

¹¹ Phexrosis galbii isaatti deebi'ee, "Ani amma akka Gooftaan ergamaa isaa ergee harka Heroodisii fi waan Yihuudoonni natti yaadaa turan hunda jalaa na baase shakkii malee beekeera" jedhe.

¹² Innis erga waan kana hubatee booddee mana Maariyaam haadha Yohannis isa Maarqos jedhamu sanaa iddoo itti namoonni baay'een walitti qabamanii kadhachaa turan dhaqe. ¹³ Yommuu Phexros balbala alaa rurrukutetti intalli hojjetuun Roodaa jedhamtu tokko ilaaluu dhufte. ¹⁴ Isheenis yommuu sagalee Phexros hubattetti akka malee gammadde; balbala banuu dhiiftees fiigdee ol deebitee akka Phexros balbala dura dhaabatu himte.

¹⁵ Isaanis, "Ati maraatteerta!" jedhaniin; isheen garuu cimsitee akka wanni kun akkasuma ta'e dubbatte; isaan immoo, "Yoos ergamaa isaa ti!" jedhan.

¹⁶ Phexros garuu ittuma fufee balbalicha rurrukute; isaanis yommuu bananitti, isa arganii dinqifatan. ¹⁷ Phexrosis akka isaan cal'isaniif harkaan itti hime; akka itti Gooftaan mana hidhaatii isa baases isaanitti odeesse; innis, "Waan kana Yaaqoobii fi obbolootatti himaa" isaaniin jedhe; achii ka'ees lafa biraa dhaqe.

¹⁸ Yommuu bari'etti raafamni guddaan isaa loltoota gidduutti uumame; isaanis, "Phexros maal ta'e?" jedhanii wal gaggaafatan. ¹⁹ Heroodisis cimsee barbaadee isa dhabnaan eegdota sana jabeessee qoree akka isaan ajjeefaman ajaje.

Du'a Heroodis

Heroodis Yihuudaadhaa ka'ee Qiisaariyaatti gad bu'ee xinnoo achi jiraate. ²⁰ Innis warra Xiirrosii fi Siidonaatti akka malee aare; isaanis tajaajilaa mootichaa amanamaa Bilaasxoos jedhamu tokko michoomfatani tokkummaan gara mootichaa dhaqanii araara kadhatan; biyyi isaanii biyya mooticha sanaa irraa midhaan nyaataa argachaa jiraatteetii.

²¹ Guyyaa beellamaattis Heroodis uffata mootii uffatee teessoo isaa irra taa'e; uummatattis dubbate. ²² Namoonnis, "Kun sagalee Waaqaati malee sagalee namaa miti" jedhanii iyyan. ²³ Heroodis waan Waaqaaf ulfina hin kenniniif yeruma sana ergamaan Waaqaa tokko isa dha'e; innis raammoodhaan nyaatamee du'e.

²⁴ Dubbiin Waaqaa garuu ittuma fufee guddachaa, babal'achaa deeme.

Barnaabaasii fi Saa'ol Geggeeffaman

²⁵ Barnaabaasii fi Saa'ol erga ergama isaanii fixatanii booddee Yohannis isa Maarqos jedhamu sana fudhatanii Yersaaleemii deebi'an.

13

Barnaabaasii fi Saa'ol Ergaman

¹ Waldaa kiristaanaa Anxookiiyaa keessa Raajotaa fi barsiistotatu ture; isaanis Barnaabaas, Simi'oon isa Niiger jedhamu, Luukiyoos nama Qareenaa, Maanaa'en isa Heroodis bulchaa sana wajjin guddatee fi Saa'ol fa'a. ² Utuu isaan Gooftaa tajaajilaa, soomaas jiranuu Hafuurri Qulqulluun, "Barnaabaasii fi Saa'olin hojii ani itti isaan waammadheef naa filaa" jedhe. ³ Kanaaf isaan erga soomanii kadhatanii booddee harka isaanii jara irra kaa'anii isaan ergan.

Barnaabaasii fi Saa'ol Qophiroositti Lallaban

⁴ Isaan lachuu Hafuura Qulqulluudhaan ergamanii Seluuqiyaatti gad bu'an; achiis ka'anii dooniin Qophiroos dhaqan. ⁵ Yommuu Salaamiis ga'anittis manneen sagadaa Yihuudootaa keessatti dubbii Waaqaa lallaban; Yohannis isaan gargaaruuf isaan bira ture.

⁶ Isaanis yommuu biyyoota bishaaniin marfaman sana hundumaa keessa ba'anii hamma Phaafositti dhufanitti, Yihuudii falfaltichaa fi raajii sobaa kan maqaan isaa Baaryeesuu jedhamu tokkotti dhufan. ⁷ Innis namicha hubataa bulchaa biyyaa ta'e kan Sergiyoos Phaawulos jedhamu tokko wajjin ture. Bulchaan sunis waan dubbii Waaqaa dhaga'uu barbaadeef nama ergee Barnaabaasii fi Saa'olin waamsifate. ⁸ Eliimaas falfaltichi kan hiikkaan maqaa isaa afaan Giriikiin akkasuma ta'e sun garuu bulchaa biyyaa sana amantii irraa deebisuuf jedhee isaanin morme. ⁹ Saa'ol inni Phaawulos jedhamu sun garuu Hafuura Qulqulluudhaan guutamee Eelimaasin hubatee ilaalee akkana jedheen; ¹⁰ "Ati ilma diyaabiloosii fi diina qajeelummaa hundaa ti! Sobaa fi gowwoomsaa gosa hundaatiinis guutamteerta. Ati karaa Gooftaa isa qajeelaa sana jal'isuu hin dhiiftuu?" ¹¹ Kunoo amma harki Gooftaa sitti ka'eera; atis jaamtee yeroof ifa aduu arguu ni dadhabda."

Yeruma sana hurrii fi dukkanni isa irra bu'e; innis nama harka qabee isa qajeelchu barbaaduu jalqabe. ¹² Bulchaan biyyaa sunis waan kana arginaan amane; barsiisa waa'ee Gooftaa dinqifatee turetti.

Phaawulosii fi Barnaabaas Phisiidiyaa Keessatti

¹³ Phaawulosii fi miiltonni isaa Phaafosii bidiruudhaan ka'anii Phergeen ishee Phamfiliyaa sana dhaqan; Yohannis achitti isaan dhiisee Yerusaalemitti deebi'e. ¹⁴ Isaan garuu Phergeenii ka'anii gara Anxookiiyaa ishee Phisiidiyaatti argamtuu dhufan; guyyaa Sanbataas mana sagadaa seenanii tataa'an. ¹⁵ Bulchitoonni mana sagadaa sanaas erga kitaabonni Seeraatii fi Raajotaa dubbifamanii booddee nama isaanitti erganii, "Yaa obboloota, yoo dubbii gorsaa uummataaf qabaattan mee dubbadhaa" jedhaniin.

¹⁶ Phaawulos ka'ee dhaabatee harkaan mallattoo argisiisee akkana jedhe; "Yaa namoota Israa'el, isin warri Waaqa sodaattanis mee na dhaga'aa! ¹⁷ Waaqni saba Israa'el abbootii keenya filate; innis yeroo isaan biyya Gibxi jiraachaa turanitti sabicha saba guddaa godhe; irree jabaanis achii isaan baase; ¹⁸ gammoojjii keessattis gara waggaa afurtamaa isaanii obse. ¹⁹ Biyya Kana'aan keessaa saboota torba balleessee lafa isaanii akka dhaalaatti saba isaatiif kenne. ²⁰ Wannii kun hundinuu gara waggaa 450 fudhatte.

"Kana booddees Waaqni hamma bara Saamu'el raajichaatti abbootii murtii isaanii kenne. ²¹ Yommuu isaan akka inni mootii kennuufiif isa kadhatanitti Waaqni gosa Beniyaam keessaa Saa'ol ilma Qiisii isaanii kenne; Saa'olis waggaa 40 isaan bulche. ²² Waaqni Saa'olin mootummaa irraa buusee Daawitin mootii isaanii godhe; innis, 'Ani nama akka garaa koo Daawit ilma Isseey argadheera; inni waan ani akka inni hojjetu fedhu hunda ni hojjeta' jedhee waa'ee Daawit rageesseera.

²³ "Waaqnis akkuma abdachiise sana, sanyii nama kanaa keessaa Yesuus fayyisaa saba Israa'elii fide. ²⁴ Yohannis dhufaatii Yesuus duratti cuuphaa qalbii jijjiirranjaa saba Israa'el hundumatti lallabee ture. ²⁵ Yohannis utuu ergama isaa guutachaa jiruu, 'Isin eenyu na seetu? Ani isa isin eeggachaa jirtan miti. Garuu namni ani kophee isaa illee hiikuu hin malle tokko na duubaan ni dhufa' jedhe.

²⁶ "Obboloota, yaa ijoollee Abrahaam, isin warri Waaqa sodaattanis, dubbiiin fayyina kanaa nuu ergame. ²⁷ Warra Yerusaa'el keessa jiraatanii fi bulchitoonni isaanii waan Yesuus hin beekiniif yookaan dubbii raajotaa isa Sanbata Sanbata dubbifamu waan hin hubatiniif isatti muruudhaan dubbii raajotaa sana guutan. ²⁸ Isaanis yoo sababii du'a isatti mursiisuu danda'u argachuu baatan illee akka Yesuus ajjeefamuuf Phiilaaxoosin kadhatan. ²⁹ Erga waan waa'ee isaa barreeffame hunda guutatani booddees fannoo irraa gad buusani awwaala keessa isa kaa'an. ³⁰ Waaqni garuu warra du'an keessaa isa kaase. ³¹ Innis warra isa wajjin Galilaadhaa gara Yerusaa'elitti ol ba'anitti guyyaa hedduu mul'ate; isaanis amma saba keenya duratti dhuga baatota isaa ti.

³² “Nus oduu nama gammachiisu isinitti odeessina; oduun kunis: Waaqni waan abbootii keenya abdachiise sana, ³³ Yesuusini du’aa kaasuudhaan nuu ijoollee isaanitiif guuteera. Kunis akkuma faarfannaa lammaffaa keessatti akkana jedhamee barreeffamee dha;

“ ‘Ati ilma koo ti;

ani har’a si dhalcheera.’* ”

³⁴ Wanni Waaqni, akka inni gonkumaa hin tortorreef jedhee warra du’an keessaa isa kaaseef akkana jedhamee dubbii kana keessatti barreeffameera;

“ ‘Ani eebba qulqulluu fi mirkanaa’aa,

isa Daawit abdachiifame sana isiniif nan kenna.’ † ”

³⁵ Akkasumas iddoo biraatti akkana jedha:

“ ‘Qulqulichi kee akka tortoru hin gootu.’ ‡ ”

³⁶ “Daawitis bara isaa keessa fedhii Waaqaa tajaajilee boqote; abbootii isaa biratti awwaalame; dhagni isaas ni tortore. ³⁷ Inni Waaqni warra du’an keessaa isa kaase sun garuu hin tortorre.

³⁸ “Kanaaf yaa obbolloota ko, isin akka karaa Yesuusiitiin dhiifamni cubbuu isinitti lallabame akka beektan nan fedha. ³⁹ Namni amanu hundinuu waan seera Museetiin furamuu hin danda’in hunda irraa karaa Yesuusiitiin furamuu ni danda’a. ⁴⁰ Isinis akka wannii raajonni dubbatan sun isin irra hin geenyeef of eeggadhaa; innis akkana jedha:

⁴¹ “ ‘Ilaalaa, isin qoostota nana;

dinqisiifadhaa; dhumaas;

ani bara keessan keessa

waan isin yoo namni tokko isinitti hime illee

hin amanne tokko nan hojjedha.’ § ”

⁴² Utuu Phaawulosii fi Barnaabaas mana sagadaatii ba’uutti jiranuu namoonni sun akka isaan Sanbata itti aanu illee deebi’anii dubbii sana lallabaniif isaan kadhatan.

⁴³ Erga wal ga’iin mana sagadaa bittinnaa’ee booddee, Yihuudoonni fi namoonni amantii Yihuudootaa fudhatanii itti bulan baay’een isaan duukaa bu’an; Phaawulosii fi Barnaabaasis jara sana wajjin dudubbatanii akka isaan ayyaana Waaqaatti jiraataniif cimsanii isaan gorsan.

⁴⁴ Sanbata itti aanutti nama muraasa malee uummanni magaalaa sanaa guutuun dubbii Gooftaa dhaga’uuf walitti qabame. ⁴⁵ Yihuudoonni garuu uummata baay’ee arganii hinaaffaan guutaman; Phaawulosinis arrabsanii waan inni dubbateen morman.

⁴⁶ Phaawulosii fi Barnaabaasis akkana jedhanii sodaa malee deebii kennaniif; “Nu duraan dursinee dubbii Waaqaa isinitti himuu qabna ture; isin garuu dubbii sana diddanii akka jireenyi bara baraa isiniif hin malleetti waan of heddaniif kunoo, nu amma gara Namoota Ormaatti gara galla. ⁴⁷ Gooftaan akkana jedhee nu ajajeeraatii;

“ ‘Ani akka ati Namoota Ormaatiif ifa taatee,

hamma qarqara lafaatti fayyina geessituuf si filadheera.’* ”

⁴⁸ Namoonni Ormaas yommuu waan kana dhaga’anitti gammadanii dubbii Gooftaa ulfeessan; warri jireenya bara baraatiif filataman hundinuu ni amanan.

⁴⁹ Dubbiin Gooftaan naannoo sana hunda keessatti faacaafame. ⁵⁰ Yihuudoonni garuu dubartoota bebeekamoo Waaqa sodaatanii fi dura bu’oota magaalattii isaanitti tuttuqan; isaanis Phaawulosii fi Barnaabaas irratti ari’atama kaasanii biyya isaanii keessaa isaan baasan. ⁵¹ Isaan garuu akka akeekkachiisa isaanii ta’uuf, awwaara miilla isaanii dhadha’atanii Iqooniyoonitti qajeelan. ⁵² Barattoonnis gammachuu fi Hafuura Qulqulluudhaan guutaman.

14

Phaawulosii fi Barnaabaas Iqooniyoon Keessatti

¹ Phaawulosii fi Barnaabaas akkuma amala isaanii Iqooniyoonitti mana sagadaa Yihuudootaa seenan; achittis waan akka gaarii dubbataniif Yihuudoonni fi Giriikonni hedduun ni amanan. ² Yihuudoonni hin amanin garuu Namoota Ormaa kakaasanii akka isaan obbollootaan mormaniif yaada isaanii hammeessan. ³ Phaawulosii fi Barnaabaas sodaa malee waa’ee Gooftaa dubbachaa yeroo dheeraa achi turan; Gooftaanis akka isaan mallattoo fi dinqii hojjetan isaan dandeessisuudhaan dubbii ayyaana isaa mirkaneesse.

⁴ Uummanni magaalaa sanaas gargar qoodame; garri tokko Yihuudoota wajjin, kaan immoo ergamoota wajjin dhaabate. ⁵ Namoonni Ormaatii fi Yihuudoonni bulchitoota isaanii wajjin isaan dhiphisuu fi dhagaadhaan isaan tumuuf mari’atan. ⁶ Jarri garuu

* 13:33 13:33 Far 2:7 † 13:34 13:34 Isa 55:3 ‡ 13:35 13:35 Far 16:10 § 13:41 13:41 Anb 1:5 * 13:47

waan kana beekkatanii magaalawwan Liqaa'ooniyaa kanneen Lixiraanii fi Darbeen jedhamanitti, gara biyya naannoo sanaattis baqatan. ⁷ Achittis wangeela lallabuu itti fufan.

Phaawulosii fi Barnaabaas Lixiraanii fi Darbeen keessatti

⁸ Lixiraan keessa namichi miilli isaa laamsha'e, kan dhaloota isaatii jalqabee naafa turee fi takkumaa miillaan deemee hin beekin tokko taa'aa ture. ⁹ Innis yeroo Phaawulos dubbatutti isa dhaggeeffachaa ture; Phaawulos hubatee isa ilaalee akka namichi sun fayyuuf amantii qabu arge; ¹⁰ sagalee guddaadhaanis, "Ka'ii miilla keetiin dhaabadhu!" jedheen. Namichi sunis ol utaalee ka'e; miillaan deemuus jalqabe.

¹¹ Namoonnis yommuu waan Phaawulos hojjete arganitti, sagalee isaanii ol fudhatanii afaan Liqaa'ooniyaatiin, "Waaqonni bifa namaatiin nutti gad bu'aniiru!" jedhan. ¹² Isaanis Barnaabaasiin, "Ze'os" jedhan; Phaawulos immoo waan inni dubbataa hangafa tureef, "Hermeen" jedhaniin. ¹³ Lubni Ze'os uummata wajjin aarsaa isaanii dhi'eessuu barbaadee sangootaa fi daraaraa fo'ame gara balbala magaalaa fide; manni qulqullummaa Diyaas magaalaa sanaan alatti argama ture.

¹⁴ Ergamoonni jechuunis Barnaabaasii fi Phaawulos garuu yommuu waan kana dhaga'anitti wayyaa isaanii tarsiisanii iyyaa fiigani uummata keessa seenan; akkanas jedhan; ¹⁵ "Yaa jarana, isin maaliif waan kana gootan? Nus namuma akka keessanii ti. Akka isin waan faayidaa hin qabne kana irraa deebitanii Waaqa jiraataa isa samii, lafa, galaanaa fi waan isaan keessa jiru hunda uumetti deebitaniif nu oduu gaarii isinitti himna. ¹⁶ Inni bara durii keessa akka saboonni hundinuu akkuma fedhanitti jiraatan isaan dhiise; ¹⁷ ta'us dhuga ba'umsa malee of hin dhiifne. Bokkaa samii irraa roobsee midhaanis yeroo isaatti isinii kennee, garaa laafummaa isaa argisiiseera; soora hedduus isinii kennee garaa keessan gammachuudhaan guuta." ¹⁸ Jarri garuu dubbii kanaan iyyuu rakkina guddaadhaan akka tuunni sun aarsaa isaaniif hin dhi'eessine of irraa deebisan.

¹⁹ Yihuudoonni tokko tokko Anxookiyyaa fi Iqooniyoonii dhufanii uummata gara offi isaaniitti deebifatan. Phaawulosin dhagaadhaan tumanii waan inni du'e se'aniis lafa irra harkisaa magaalaa keessaa gad isa baasan. ²⁰ Inni garuu yeroo barattoonni isatti naanna'anitti ka'ee magaalaa seene; guyyaa itti aanutti immoo Barnaabaas wajjin magaalaa Darbeenitti qajelee.

Gara Anxookiyyaa Ishee Sooriyaa Keessaatti Deebi'an

²¹ Isaanis erga magaalaa sanatti wangeela lallabanii namoota hedduu barattoota godhatanii booddee Lixiraanitti, Iqooniyoonii fi Anxookiyyaatti deebi'an. ²² Isaanis, "Nu mootummaa Waaqaatti galuudhaaf rakkina baay'ee keessa darbuu qabna" jedhanii barattoota jajjabeessaa, akka isaan amantiitti cimaniifis gorsaa turan. ²³ Phaawulosii fi Barnaabaas tokkoo tokkoo waldaa kiristaanaa keessatti maanguddoota muudaniifii kadhaa fi soomaan Goofticha isaan itti amananiitti dabarsanii isaan kennan. ²⁴ Phisiidiyaa keessa darbanii Phamfiliyaa seenan. ²⁵ Phergeenitti dubbicha lallabanii Axaaliyaatti gad bu'an.

²⁶ Axaaliyaadhaa ka'anii gara iddoo itti hojii amma fixatan kanaaf ayyaana Waaqaatti imaanaa kennamanii turanii Anxookiyyaatti dooniin deebi'an. ²⁷ Akkuma achi ga'aniinis waldaa kiristaanaa walitti qabanii waan Waaqni karaa isaaniitiin hojjete hundaa fi akkamitti akka inni Namoota Ormaatiif balbala amantii banes isaanitti himan. ²⁸ Isaanis barattoota wajjin yeroo dheeraa achi turan.

15

Wal ga'ii Yerusaalemitti Godhame

¹ Namoonni tokko tokko Yihuudaa gara Anxookiyyaatti gad bu'anii, "Isin yoo akkuma seera Museetti dhagna qabachuu baattan fayyuu hin dandeessan" jedhanii obbolloota barsiisaa turan. ² Kunis akka Phaawulosii fi Barnaabaas jara wajjin wal diddaa fi wal morkii cimaa keessa seenan isaan godhe; kanaaf Phaawulosii fi Barnaabaas waa'ee dubbii kanaatiif jedhanii akka Yerusaalemitti ol ba'anii ergamootaa fi maanguddoota bira dhaqaniif amantoota tokko tokko wajjin filataman. ³ Waldaan kiristaanaas isaan ergite; isaanis akka Namoonni Ormaa Waaqatti deebi'an odeessaa Finiiqee fi Samaariyaa keessa darban. Oduun kunis obbolloota hunda akka malee gammachiise. ⁴ Yommuu isaan Yerusaalem ga'anitti waldaan kiristaanaa, ergamoonni fi maanguddoonni isaan simatan; isaanis waan Waaqni karaa isaaniitiin hojjete hunda jaratti himan.

⁵ Amantoonni garee Fariisotaa tokko tokko garuu ka’anii dhaabatanii, “Namoonna Ormaa dhagna qabachuu qaban; akka seera Musee eeganiifis itti himamuu qaba” jedhan.

⁶ Ergamoonnii fi maanguddoonni dubbii kana ilaaluf walitti qabaman. ⁷ Phexrosis falmii guddaan booddee ka’ee dhaabatee akkana isaaniin jedhe; “Yaa obboloota, isin akka Waaqni yeroo gabaabaan dura akka Namoonna Ormaa afaan koo irraa dubbii wangeelaa dhaga’anii amananiif jedhee isinuma keessaa na filate beektu. ⁸ Waaqni yaada garaa namaa beeku sun akkuma nuuf kenne sanatti isaaniifis Hafuura Qulqulluu kennuudhaan akka isaan simate mirkaneesse. ⁹ Innis sababii garaa isaani amantiin qulqulleeseeff, nuu fi isaan gidduutti garaa garummaa tokko illee hin goone. ¹⁰ Yoos maaliif waanjoo nus abbootiin keenyas baachuu hin danda’in morma barattootaa irra kaa’uudhaan Waaqa qortu ree? ¹¹ Nu akka ayyaana Gooftaa keenya Yesuusiitiin fayyinu ni amanna; isaanis akkasuma ni fayyu.”

¹² Yommuu Barnaabaasii fi Phaawulos waa’ee mallattoo fi dinqii Waaqni harka isaaniitiin Namoota Ormaa keessatti hojjete sanaa dubbatanitti yaa’in guutuun cal’isee isaan dhaga’aa ture. ¹³ Erga isaan dubbatanii fixanii booddees Yaaqoob akkana jedhe; “Yaa obboloota, mee na dhaggeeffadhaa! ¹⁴ Simoonis akka Waaqni duraan dursee Namoota Ormaa keessaa saba tokko ofii isaatii filachuun jaalala isaa argisiise nutti himeera. ¹⁵ Dubbiin raajotaas waan kana wajjin walii gala; innis akkana jedhamee barreeffameera:

¹⁶ “ ‘Kana booddee ani nan deebi’ a;
dunkaana Daawit kan kufe sana deebisee nan ijaara;
diigamaa isaa immoo deebisee nan ijaara;
deebisees nan dhaaba;

¹⁷ kunis akka namoonni hafan jechuunis,
Namoonna Ormaa warri maqaa kootiin waamaman hundinuu
gooftaa barbaadaniif*”

¹⁸ jedha Gooftichi waan bara dheeraaf beekame hojjete sun.

¹⁹ “Kanaaf nu akka murtii kootiitti Namoota Ormaa kanneen Waaqatti deebi’an rakkisuu hin qabnu. ²⁰ Qooda kanaa akka isaan nyaata waaqonni tolfamoon xureesan, sagaagalummaa, foon horii hudhamee du’etii fi dhiiga lagataniif xalayaa barreessinee itti himuu qabna. ²¹ Seerri Musee dhaloota duriitii jalqabee magaalaa hunda keessatti lallabamaa ture; manneen sagadaa keessattis Sanbata Sanbata ni dubbifama.”

Xalayaa Namoota Ormaatti Ergame

²² Yommuu ergamoonnii fi maanguddoonni miseensota waldaa kiristaanaa guutuu wajjin tokko ta’anii namoota isaani keessaa tokko tokko filatanii Phaawulosii fi Barnaabaas wajjin gara Anxookiiaa erguu murteessan; isaanis namoota lama jechuunis Yihuudaa isa Barsiyaan jedhamuu fi Siilaas kanneen obboloota keessatti dura bu’oota turan sana filatan. ²³ Xalayaa armaan gad jiru kanaas isaanitti ergan:

Obboloota keessan, ergamootaa fi maanguddoota irraa;

Gara Namoota Ormaa kanneen amanan warra Anxookiiaa, Sooriyaa fi Kiilqiyaa keessa jiraataniitti;

Nagaa isinii dhaamna.

²⁴ Nu akka namoonni tokko tokko eeyyama keenya malee nu biraa ba’anii waan dubbataniin qalbii isin raasanii isin jeeqan dhageenyerra. ²⁵ Kanaafuu nu hundi namoota tokko tokko filannee obboloota keenya jaallatamoo Barnaabaasii fi Phaawulos jechuunis ²⁶ namoota maqaa Gooftaa keenya Yesuus Kiristoosiitiif jedhanii jireenya isaani kennan isinitti erguuf walii galle. ²⁷ Kanaafuu akka isaan waanuma nu barreessine sana dubbii afaaniitiin isinii mirkaneessaniif jennee Yihuudaa fi Siilaasin ergineerra. ²⁸ Waan barbaachisaa armaan gad jiru kana malee akka nu ba’aa tokko illee isin irra hin keenye Hafuurri Qulqulluun jaallateera; nus itti gammanneerra; ²⁹ kunis akka isin nyaata waaqota tolfamoof aarsaa dhi’effamu, dhiiga, foon horii hudhamee du’etii fi sagaagalummaa lagatani dha. Isin yoo waan kana irraa of eegdan, waan qajeelaa hojjettan.

Nagaatti.

³⁰ Jarri sunis ergamanii Anxookiiaa gad bu’an; achittis amantoota walitti qabaniin xalayaa sana itti kennan. ³¹ Amantoonnis yommuu xalayaa sana dubbisanitti gorsa jajjabeessaa sanatti ni gammadan. ³² Yihuudaa fi Siilaas warri mataan isaani iyyuu raajota turan sun dubbii baay’een obboloota gorsanii jajjabeessan. ³³ Erga isaan yeroo gabaabaa achi turanii booddees, obboloonni akka isaan warra isaan erganitti

deebi'aniif nagaan isaan geggeessan. [³⁴ Siilaas immoo achumatti hafuu murteesse.][†]
³⁵ Phaawulosii fi Barnaabaas garuu Anxookiyyaatti hafanii namoota biraa hedduu wajjin dubbii Gooftaa barsiisan; ni lallabanis.

Wal dhabuu Phaawulosii fi Barnaabaas

³⁶ Phaawulosis bultii gabaabduu booddee Barnaabaasiin, “Mee kottu, magaalawwan itti dubbii Gooftaa lallabne hundatti deebinee obbolloota dubbifnaa; haala isaan keessa jiranis ni ilaalaa!” jedhe. ³⁷ Barnaabaasis Yohannis isa Maarqos jedhamu sana isaan wajjin fudhatee deemuu barbaade. ³⁸ Phaawulos garuu sababii Maarqos isaan wajjin hojiitti fufuu didee Phamfiliyaatti isaan dhiisee deemeef akka inni isaan wajjin deemu hin jaallanne. ³⁹ Kana irratti waldhabiiisni guddaan gidduu isaaniitti uumamaan gargar ba’an; Barnaabaasis Maarqosin fudhatee dooniidhaan Qophiroositti qajele. ⁴⁰ Phaawulos immoo Siilaasin filatee erga obbollooni dabarsanii ayyaana gooftaatti isa kennanii booddee ka’ee deeme. ⁴¹ Innis waldoota kiristaanaa jajjabeessaa Sooriyaa fi Kiilqiyaa keessa darbe.

16

Xiimotewos Phaawulosii fi Siilaasitti makame

¹ Phaawulos ittuma fufee gara Darbeenii fi Lixxiraanii dhaqe; barataan Xiimotewos jedhamu kan haati isaa Yihuudii amantuu taate tokkos achi ture; abbaan isaa garuu nama Giriik ture. ² Obbolloonni Lixxiraanii fi Iqooniyoon keessa jiraatan waa’ee isaa waan gaarii dubbatan. ³ Phaawulos akka Xiimotewos isa faana deemu barbaade; kanaaf sababii Yihuudoota naannoo sana jiraataniitiif jedhee dhagna isa qabe; isaan hundinuu akka abbaan Xiimotewos nama Giriik ta’e beeku turaniitii. ⁴ Isaanis akkuma magaalaa tokkoo gara magaalaa kaaniitti darbaaniin akka namoonni ajajamaniif jedhanii murtii ergamoonnii fi maanguddoonni Yerusaalem keessa jiraatan murteessan sana namootatti himan. ⁵ Kanaafuu waldoonni kiristaanaa amantiitti cimaa, baay’inaanis guyyuma guyyaan itti dabalamaa deeman.

Phaawulos Mul’ataan Namicha Maqedoonyaa Tokko Arge

⁶ Isaanis Hafuurri Qulqulluun akka isaan biyya Asiyaa keessatti dubbicha hin lallabne isaan dhowwinaan biyya Firiigiyaa fi Galaatiyaa keessa darban. ⁷ Yommuu Miisiyyaa ga’anittis Biitaaniyaa seenuu yaalan; Hafuurri Yesuus garuu isaanii hin eeyyamne. ⁸ Kanaaf Miisiyyaa keessa ba’anii Xiroo’aasitti gad bu’an. ⁹ Phaawulosis halkan sana namicha Maqedoonyaa tokko isaa dhaabatee, “Maqedoonyaa kottuutii nu gargaari” jedhee isa kadhatu mul’ataan arge. ¹⁰ Nus erga Phaawulos mul’ata sana argee booddee, Waaqni akka nu wangeela isaanitti lallabnuuf nu waamuu isaati jennee Maqedoonyaa dhaquuf qophoofnee kaane.

Lidiyaan Kiristoositti Amante

¹¹ Xiroo’aasii dooniidhaan kaanee Saamotraqeetti fuula deebifannee qajeelle; guyyaa itti aanu immoo Ne’aphoolisitti dabarre. ¹² Achii kaanees Fiiliphisiyyuus dhaqne; isheenis magaalaa beekamtuu aanaa Maqedoonyaa kan kolonii mootummaa Roomaa jala turtee dha; nus magaalattii keessa guyyaa muraasa turre.

¹³ Guyyaa Sanbataa immoo magaalattii keessaa baanee gara lagaa iddoo akka lafa kadhannaa itti argannu abdanne tokkootti gad buune; teteenyees dubartoota achitti walitti qabamanitti dubbachuu jalqabne. ¹⁴ Warra nu dhageeffachaa turan keessaas dubartii Liidiyaa jedhamtu tokkotu ture; isheen daldaltuu wayyaa dhiilgee kan magaalaa Tiyaatiraatii dhuftee, Waaqas waaqeffattu turte. Gooftaan akka isheen waan Phaawulos dubbatu qalbeeffattuuf qalbii ishee baneef. ¹⁵ Isheenis erga warra mana ishee jiraatan wajjin cuuphamtee booddee, “Yoo akka nama Gooftaatti amanu tokkootti na ilaaltan, kottaatii mana koo turaa” jettee nu waamte; jabeessitees nu kadhatte.

Phaawulosii fi Siilaas Mana Hidhaa Keessatti

¹⁶ Gaaf tokko utuu iddoo itti kadhatan dhaqnuu xomboree hafuura waa himsiisuun guutamte tokkoon walitti dhufne; isheen waa namaa himuun gooftota isheetiif maallaqa guddaa galchiti turte. ¹⁷ Isheenis, “Namoonni kunneen tajaajiltoota Waaqa Waan Hundaa Ollii kanneen karaa fayyinaa isinitti himanii dha” jettee iyyaa Phaawulosii fi nu duukaa buute. ¹⁸ Waan kanas guyyaa hedduu itti fufte; Phaawulos garuu waan akka malee aareef itti garagalee hafuura sanaan, “Ani akka ati ishee keessaa baatu maqaa Yesuus Kiristoosiitiin sin ajaja” jedhe; hafuurichis yommuuma ishee keessaa ba’e.

† 15:34 15:34 Waraabbileen durii tokko tokko luqqisaa kana hin qaban.

¹⁹ Gooftanni xomboree sanaas yommuu akka abdiin galii isaanii citte hubatanitti Phaawulosii fi Siilaasin qabaniif fuula abbootii taayitaa duratti dhi'eessuuf jedhanii lafa irra harkisaa iddoo gabaatti isaan geessan. ²⁰ Fuula qondaaltotaa durattis isaan dhi'eessanii akkana jedhan; "Namoonni kunneen Yihuudoota; magaalaa keenyas jeequutti jiru. ²¹ Isaanis duudhaa fudhachuun yookaan itti buluun nuu warra Roomaatiif hin eeyyamamne barsiisu."

²² Namoonnis tokkummaadhaan Phaawulosii fi Siilaasitti ka'an; qondaaltonni sunis akka wayyaan isaan irraa baafamee uleedhaan tumaman ajajan. ²³ Jarris erga akka malee garafamanii booddee mana hidhaatti darbataman; eegduun mana hidhaa sanaas akka jabeessee isaan eegu ajajame. ²⁴ Innis ajaja kana fudhatee gola mana hidhaa keessa isaan galche; miilla isaaniis jirma gidduu galchee hidhe.

²⁵ Gara halkan walakkaatti Phaawulosii fi Siilaas kadhachaa, faarfannaadhaanis Waaqa galateeffachaa turan; hidhamtoonni kaanis isaan dhaggeeffachaa turan. ²⁶ Akkuma tasaa sochiin lafaa cimaan tokko ta'e; kanaanis hundeen mana hidhaa sanaa raafame; yommusuma balballi hundinuu ni baname; foncaan nama hundaas ni hiikame. ²⁷ Eegduun mana hidhaa sunis yommuu dammaqee akka balballi mana hidhaa baname argetti waan hidhamtoonni ba'anii badan se'ee of ajjeesuuf goraadee isaa luqqifate. ²⁸ Phaawulos garuu sagalee guddaadhaan iyyee, "Nu hundi asuma jirraatii of hin miidhin" jedheen.

²⁹ Eegduun sunis ibsaa fichisiifatee fiigaa ol gale; sodaadhaanis hollachaa Phaawulosii fi Siilaas duratti kufe; ³⁰ gad isaan baasees, "Yaa Gooftota ko, ani akka fayyuuf maal gochuun qaba?" jedhee gaafate.

³¹ Isaanis deebisanii, "Gooftaa Yesuusitti amani; ati ni fayyitaa; warri mana kee jiraatanis ni fayyuutii" jedhan. ³² Dubbii Gooftaas isaa fi warra mana isaa jiraatan hundatti himan. ³³ Eegduun mana hidhaa sunis sa'aatuma halkanii sana isaan fuudhee madaa isaanii dhiqeeff; yommusumas innii fi maatiin isaa hundinuu cuuphaman. ³⁴ Eegduun sunis mana isaatti isaan geessee nyaata dhi'eesseef; sababii maatiin isaa hundi gara Waaqa amanuutti dhufaniif warri mana isaa jiraatan hundi akka malee gammadan.

³⁵ Yommuu bari'etti qondaaltonni sun, "Namoota sana gad dhiisi" jedhanii eegduu mana hidhaa sanatti poolisii ergan. ³⁶ Eegduun sunis, "Qondaaltonni akka isin hiikamtan ajajaniiru; kanaaf amma deemuu ni dandeessu; nagaan galaa" jedhee Phaawulositti hime.

³⁷ Phaawulos garuu poolisoota sanaan akkana jedhe; "Isaan utuma nu lammiiwwan Roomaa taanee jirruu, murtii tokko malee nu garafanii mana hidhaatti nu darbatan; amma immoo dhoksaan nu baasuu barbaaduu? Kun hin ta'u! Isaanumti mataan isaanii dhufanii nu haa baasanii!" jedhe.

³⁸ Poolisoonnis dubbii kana qondaaltotatti himan; qondaaltonnis yommuu akka Phaawulosii fi Siilaas lammiiwwan Roomaa ta'an dhaga'anitti ni rifatan. ³⁹ Isaanis dhufanii dhiifama isaan gaafatan; mana hidhaatii isaan baasanii akka isaan magaalattii keessaa ba'anii deemaniif isaan kadhatan. ⁴⁰ Phaawulosii fi Siilaas mana hidhaatii ba'anii mana Liidiyaa dhaqan; isaanis yommuu obboloota arganitti isaan jajjabeessan; achiis ba'anii deeman.

17

Phaawulosii fi Siilaas Tasaloniiqee Keessatti

¹ Isaanis Amfiipholiisii fi Apholooniyaa keessa darbanii Tasaloniiqee iddoo manni sagadaa Yihuudootaa ture dhufan. ² Phaawulosis akkuma amala isaa mana sagadaa seenee guyyaa Sanbataa sadii dubbii kitaabaa irratti isaan wajjin dudubbachaa, ³ akka Kiristoos* dhiphachuu fi warra du'an keessaa ka'uu qabu addeessaa, mirkaneessaas ture. Innis, "Yesuus ani amma isinitti himu kun Kiristoosii dha" jedhe. ⁴ Yihuudoota keessaa tokko tokko, Giriikota Waaqa sodaatan keessaas namoonni akka malee baay'atanii fi dubartoonni bebeekamoon hedduun amananii Phaawulosii fi Siilaasitti dabalaman.

⁵ Yihuudoonni garuu hinaaffaan guutaman; isaanis iddoo gabaatii kashlabboota tokko tokko walitti qabatani, uummatas kakaasanii magaalaa keessatti goolii uuman; Phaawulosii fi Siilaasinis fuula uummataa duratti dhi'eessuuf jedhanii isaan barbaacha mana Yaasonitti fiigan. ⁶ Yommuu jara dhabanitti immoo Yaasonii fi obboloota tokko tokko harkisaa fuula qondaaltota magaalaa duratti dhi'eessanii akkana jedhanii iyyan; "Namoonni addunyaa hunda rakkisaa turan kunneen amma kunoo as dhufaniiru;

* 17:3 17:3 yookaan Masiihichi

⁷ Yaasonis mana isaatti isaan simateera. Hundi isaaniis, ‘Mootiin biraa kan Yesuus jedhamu tokko jira’ jedhaniis labsii Qeesaariin mormu.” ⁸ Uummannii fi qondaaltonni magaalaa sanaas yommuu waan kana dhaga’anitti ni raafaman. ⁹ Isaanis Yaasonii fi warra kaan irraa qabsiisa fuudhanii gad isaan dhiisan.

Phaawulosii fi Siilaas Beeriya Keessatti

¹⁰ Obboloonnis yeruma sana Phaawulosii fi Siilaasin halkanii Beeriyaatti ergan; isaanis yommuu achi ga’anitti mana sagadaa Yihuudootaa seenan. ¹¹ Yihuudoonni Beeriya Yihuudoota Tasaloniiqee irra qalbi qabeeyyii turan; isaanis fedhii guddaan dubbii sana fudhatanii akka wanni Phaawulos jedhe sun dhugaa ta’ee fi akka dhugaa hin ta’in ilaaluuf jedhanii guyyuma guyyaan Katabbiwwan Qulqulluu qorachaa turaniiti. ¹² Kanaaf Yihuudoota keessaa baay’een ni amanan; akkasumas dubartoonni Giriik beekamoon hedduunii fi dhiironni Giriik hedduun ni amanan.

¹³ Yihuudoonni Tasaloniiqee yommuu akka Phaawulos Beeriya keessattis dubbii Waaqaa lallabaa ture dhaga’anitti achis dhaqanii rakkoo uumani uummata kakaasan. ¹⁴ Obboloonni immoo yommuusuma Phaawulosin gara qarqara galaanaatti ergan; Siilaasii fi Xiimotewos garuu Beeriyaatti hafan. ¹⁵ Namoonni Phaawulosin geggeessanis Ateenaan isa ga’anii akka Siilaasii fi Xiimotewos hamma isaanii danda’ametti dafanii Phaawulos bira dhaqaniif ajaja fuudhaniifi deebi’an.

Phaawulosii fi Siilaas Ateena Keessatti

¹⁶ Phaawulos utuu Ateena keessatti isaan eegaa jiruu akka magaalaa sun waaqota tolfamoodhaan guutamte argee akka malee gadde. ¹⁷ Kanaaf mana sagadaa keessatti Yihuudootaa fi Giriikota Waaqa sodaatan wajjin, iddoo gabaatti immoo guyyuma guyyaan warra achitti argaman wajjin falmaa ture. ¹⁸ Gareen falaasamtoota Efiqoroosiitii[†] fi Isto’iki[‡] tokkos isaan falmaa ture; isaan keessaa tokko tokko, “Namichi legellegaan kun maal jedha?” jedhan. Warri kaan immoo, “Inni waa’ee waaqota ormaa labsa fakkaata” jedhan. Phaawulos waa’ee Yesuusii fi waa’ee du’aa ka’uu lallabaa turetii. ¹⁹ Isaanis isa qabaniis gara wal ga’ii Ariyoosphaagositti geessan; achittis akkana jedhaniin; “Barsiisni haaraan ati fidde kun maal akka ta’e beekuu dandeenyaa?” ²⁰ Ati waan nu takkumaa hin dhaga’in nutti himaa jirta; kanaaf nu akka wanni kun maal jechuu ta’e beekuu feena.” ²¹ Warri Ateena hundii fi namoonni biyya ormaa kanneen achi jiraatan yeroo isaanii waan haaraa dhaga’uu fi odeessuu irratti malee waan biraa irratti hin balleessan ture. ²² Phaawulosis wal ga’ii Ariyoosphaagos walakkaa dhaabatee akkana jedhe; “Yaa namoota Ateena! Ani akka isin karaa hundaanuu warra amantaa taatan nan hubadha. ²³ Ani yommuun nanaanna’ee waan isin waaqeffattan ilaaletti iddoo aarsaa kan katabbii,

Waaqa hin Beekamneef,

jedhu of irraa qabu argeeraatii. Eegaa amma waan isin utuu hin beekin waaqeffattan kana isinittin hima.

²⁴ “Waaqni addunyaa fi waan ishee keessa jiru hunda uume sun Gooftaa samiitii fi lafaa ti; inni mana qulqullummaa kan harka namaatiin hojjetame keessa hin jiraatu. ²⁵ Inni mataan isaa sababii jireenya hafuura baafatamuu fi waan biraa hunda nama hundaaf kennuuf akka waan waa dhabeetti harka namaatiin hin tajaajilamu. ²⁶ Inni saboota hunda nama tokko irraa uumee akka isaan lafa hunda irra jiraatan godhe; bara jireenyaa kan isaanii kennamee fi daarii lafa isaan jiraatanii murteesse. ²⁷ Waaqni yoo tokkoo tokkoo keenya irraa fagoo jiraachuu baate iyyuu akka namoonni isa barbaadani, tarii carraaqaniis isa argataniif jedhee waan kana godhe. ²⁸ Akkuma beektonni keessan tokko tokko, ‘Nu ilmaan isaa ti’ jedhan sana ‘Nu isa keessa jiraanna; isa keessa sochoona; eenyummaa keenya illee isa keessatti qabaannaatii.’

²⁹ “Kanaafuu nu waan ilmaan Waaqaa taaneef Waaqni waan akka warqee yookaan meetii yookaan dhagaa jechuunis waan ogummaa fi beekumsa namaatiin hojjetame fakkaata jennee yaaduu hin qabnu. ³⁰ Waaqni bara wallaalummaa durii hin ilaalu ture; amma garuu akka namni iddoo hunda jiru hundi qalbi jijjiirraa ajaja. ³¹ Innis guyyaa itti harka namicha filate sanaatiin qajeelummaadhaan addunyaatti muru murteesseeraatii; kanas warra du’an keessaa isa kaasuun nama hundumaaf mirkaneesseera.”

[†] **17:18** 17:18 Efiqoroosiitii - Falaasamaan Giriik kan Efiqoroos jedhamu tokko dhaloota Gooftaatiin dura (Bara 341-270 keessa) akka gammachuun jireenya namaa keessatti waan hundumaa caalaa gaarii ta’e barsiisee ture. Gareen Efiqoroos akka waan waaqonni hin jirreetti yookaan akka waan waaqonni waan addunyaa keessatti ta’u irratti humna hin qabneetti amanan. [‡] **17:18** 17:18 Isto’iki - isaan barumsa falaastuu Zeenoo jedhamu kan Dhaloota Kiristoosiitiin Dura (Bara 340-265 keessa) akka gammachuun jireenya tolaan yookaan dhukkubsachaan yookaan mo’achuun yookaan mo’atamuu tuqamuu dhabuu keessa jiru addeessanii ibsan.

³² Isaan keessaa namoonni tokko tokko yommuu waa'ee du'aa ka'uu warra du'anii dhaga'anitti ni qoosan; warri kaan immoo, "Nu ammas dubbii kana sirraa dhaga'uu barbaanna" jedhan. ³³ Kana irratti Phaawulos isaan keessaa ba'ee deeme. ³⁴ Namoonni tokko tokko garuu gama Phaawulos goranii amanan; isaan keessaas namichi Diyyonaasiyoo jedhamu kan miseensa Ariyoosphaagos ture tokko, dubartiin Damaariis jedhamtuu fi namoonni biraas isaan wajjin turan.

18

Phaawulos Qorontos Keessatti

¹ Kana booddee Phaawulos Ateenaa ka'ee Qorontos dhaqe. ² Achittis Yihuudii Aqilaa jedhamu kan biyya Phonxositti dhalate tokko argate; Aqilaan kunis sababii Qilaawudewoo akka Yihuudoonni hundinuu biyya Roomaa keessaa ba'an ajajeef dhi'oo niitii isaa Phirisqilaa wajjin lixaaliyaadhaa dhufe. Phaawulos isaan ilaalu dhaqe. ³ Innis waan akkuma isaanii hojjetaa dunkaanaa tureef achi jiraatee isaan wajjin hojjetee. ⁴ Guyyaa Sanbataa hundas mana sagadaa keessatti falmee Yihuudootaa fi Giriikota amansiisa ture.

⁵ Phaawulos yeroo Siilaasii fi Xiimotewos Maqedooniyaadhaa dhufanitti akka Yesuus kun Kiristoos* ta'e Yihuudootaaf dhugaa ba'aa dubbicha lallabuutti ni jabaata ture. ⁶ Yommuu Yihuudoonni isaan mormanii isa arrabsanittis garuu Phaawulos uffata isaa hurgufatee, "Dhiigni keessan matuma keessan irra haa jiraatu! Ani qulqulluu dha; ammaa jalqabee gara Namoota Ormaa nan dhaqa" jedheen.

⁷ Innis achii ba'ee mana namicha Waaqa waaqeffatu kan maqaan isaa Tiitoo jedhamu tokkoo dhaqe; manni namicha sanaas mana sagadaatti aana ture. ⁸ Kiriisphoos bulchaan mana sagadaa sanaas warra mana isaa jiraatan hunda wajjin Gooftaatti amane; namoota Qorontos kanneen Phaawulosin dhaga'an keessaa baay'een isaanii amananii cuuphaman.

⁹ Halkan tokko Gooftaan akkana jedhee mul'ataan Phaawulositti dubbate; "**Hin sodaatin; dubbadhu malees hin cal'isin.** ¹⁰ **Sababii ani si wajjin jiruuf namni tokko iyyuu si miidhuuf jedhee si hin tuqu; ani magaalaa kana keessaa nama baay'ee qabaatii.**" ¹¹ Kanaafuu Phaawulos dubbii Waaqaa isaan barsiisaa waggaa tokkoo fi walakkaa achi ture.

¹² Yeroo Gaaliyoon bulchaa Akaayaa turetti Yihuudoonni tokkummaadhaan Phaawulositti ka'anii mana murtiitti isa dhi'eessan. ¹³ Isaanis, "Namichi kun akka isaan karaa seeraan ala ta'een Waaqa waaqeffataniif namoota sossobaa jira" jedhanii isa himatan.

¹⁴ Utuu Phaawulos dubbachuuf jedhee afaan banachuutti jiruu Gaaliyoon Yihuudotaan akkana jedhe; "Yaa Yihuudoota, utuu dubbiin kun waa'ee balleessaa hojjechuu yookaan waa'ee yakka guddaa ta'ee ani silaa obsaan isinan dhaga'a ture. ¹⁵ Gaaffiin keessan garuu waan waa'ee jechootaa, waa'ee maqaawwaniitii fi waa'ee seera keessanii ta'eef kana isinuu fixadhaa; ani waan akkanaatiif abbaa murtii hin ta'uutii." ¹⁶ Kanaafuu mana murtii keessaa gad isaan baase. ¹⁷ Isaan hundi bulchaa mana sagadaa sanatti jechuunis Soosteenesitti garagalanii fuula mana murtii duratti isa tumuu jalqaban. Wannii kun garuu xinnuma illee Gaaliyoo hin yaaddessine.

Phirisqilaa, Aqilaa fi Apholoos

¹⁸ Phaawulos yeroo muraasa Qorontos keessa ture. Ergasiis obboloota biraa deeme Phirisqilaa fi Aqilaa wajjin dooniidhaan Sooriyaa dhaqe; innis waan wareega qabuuf utuu hin deemini Kanchire'aatti mataa haaddate. ¹⁹ Phaawulos yeroo Efesoon ga'anitti Phirisqilaa fi Aqilaa achitti dhiisee ofii isaatii garuu mana sagadaa seenee Yihuudotaan mormaa ture. ²⁰ Yommuu isaan akka inni yeroo dheeraa isaan bira turu kadhatanitti immoo dhaga'uu dide. ²¹ Garuu akkuma isaan biraa deemeen, "Yoo Waaqni jedhe ani deebi'ee nan dhufa" jedheen; dooniidhaanis Efesoonii ka'ee deeme. ²² Innis Qiisaariyaa geenyaan ol ba'ee waldaa kiristaanaa dubbise; ergasiis Anxookiyyaatti gad bu'e.

²³ Phaawulos erga Anxookiyyaa keessa takka bubbulee booddee achii ka'ee barattoota hunda jajjabeessaa biyya Gaalaatiyaatii fi Firiigiyaa hunda keessa iddoo tokko irraa iddoo kaanitti nanaanna'aa ture.

²⁴ Gidduudhuma sana Yihuudiin Iskindiriyaatti dhalate kan Apholoos jedhamu tokko gara Efesoon dhufe; innis nama arraba qajeelu, kan Katabbiwwan Qulqulluu gad fageenyaan beeku ture. ²⁵ Namichi kun duraan karaa Gooftaa baratee ture; inni yoo cuuphaa Yohannis qofa beeke illee hafuura ho'adhaan waa'ee Yesuus qajeelchee dubbachaa, barsiisaas ture. ²⁶ Mana sagadaa keessattis sodaa malee dubbachuu jalqabe;

* 18:5 18:5 yookaan Masihiicha

Phirisqilaa fi Aqiilaanis yommuu isa dhaga’anitti mana isaaniitti isa waamanii karaa Waaqaa isa duraa caalaatti sirriitti addeessaniif.

²⁷ Yeroo Apholoos Akaayaa dhaqu barbaadetti obbolooni isa jajjabeessanii akka barattooni achi jiran sun isa simataniif xalayaa barreessaniif. Innis achi ga’ee warra ayyaana Waaqaatiin amananii turaniif gargaarsa guddaa ta’e. ²⁸ Inni akka Yesuus kun Kiristoos ta’e Katabbiiwwan Qulqulludhaan mirkaneessaa, jabaatee ifaan ifatti Yihuudootaan mormee amansiisaa turetii.

19

Phaawulos Efesoon Keessatti

¹ Utuu Apholoos Qorontos keessa jiruu Phaawulos immoo biyya ol aanu keessa ba’ee Efesoon dhufe; achittis barattoota tokko tokko argate. ² Innis, “Isin yeroo amantanitti Hafuura Qulqulluu argattaniirtuu?” jedhee gaafate.

Isaan immoo deebisanii, “Hin arganne; nu akka Hafuurri Qulqulluun jiru iyyuu takkumaa hin dhageenye” jedhan.

³ Phaawulosis, “Yoos cuuphaa kami cuuphamtan ree?” jedhee gaafate.

Isaanis, “Cuuphaa Yohannis” jedhan.

⁴ Phaawulosis, “Cuuphaan Yohannis cuuphaa qalbii jijjiirranmaa ti; Yohannis akka isaan kan isa duubaan dhufaa jirutti, jechuunis Yesuusitti amananiif namootatti hima ture” jedhe. ⁵ Isaanis waan kana dhaga’anii maqaa Gooftaa Yesuusitti cuuphaman. ⁶ Yommuu Phaawulos harka isaan irra kaa’etti Hafuurri Qulqulluun isaan irra bu’e; isaanis afaan haaraadhaan dubbatan; raajiis ni dubbatan. ⁷ Isaanis walumatti gara nama kudha lamaa turan.

⁸ Phaawulosis mana sagadaa seenee waa’ee mootummaa Waaqaa isaan wajjin falmaa, akka isaan amananiifis yaalaa, ji’a sadii sodaa malee dubbachaa ture. ⁹ Isaan keessaa tokko tokko garuu mata jabeeyyii ta’an; amanuus didanii waa’ee karaa sanaa uummata duratti waan hamaa dubbatan; kanaaf Phaawulos isaan dhiisee deeme; barattootas ofitti fudhatee mana barumsaa Xiraanoos keessatti guyyuma guyyaan isaan wajjin mari’achaa ture. ¹⁰ Kunis waggaa lama itti fufe; kanaaf Yihuudoonnii fi Giriikonni biyya Asiyaa keessa jiraatan hundinuu dubbii Gooftaa dhaga’an.

¹¹ Waaqni harka Phaawulosiitiin hojii dinqii kan akka malee dinqisiisu hojjechaa ture. ¹² Kanaaf maarrabiin yookaan marxoon dhagna isaa tuqe iyyuu dhukkubsattootatti geeffama ture; isaanis ni fayyu; hafuurri hamaanis isaan keessaa ba’a ture.

¹³ Yihuudoonni biyya keessa nanaanna’anii hafuurota xuraa’oo nama keessaa baasan tokko tokkos namoota hafuura hamaan qabaman irratti maqaa Gooftaa Yesuus waamuu yaalan; isaanis, “Ani maqaa Yesuus kan Phaawulos lallabu sanaan sin ajaja” jedhan.

¹⁴ Ilmaan Iskoyaas, isa luba hangafa Yihuudootaa ture sanaa torbanis waan kana hojjetaniiru. ¹⁵ Hafuurri hamaan sun garuu, “Ani Yesuusin beeka; waa’ee Phaawulosis beeka; isin immoo eenyu?” jedhee deebiseef. ¹⁶ Namichi hafuura hamaan qabame sunis isaanitti utaale; hunda isaanis mo’ate; ni tumes; isaanis madaa’anii qullaa isaanii mana keessaa ba’anii baqatan.

¹⁷ Kunis Yihuudootaa fi Giriikota Efesoon keessa jiraatan hunda biratti beekame; isaan hundis sodaan gutaman; maqaan Gooftaa Yesuusis baay’ee kabajame. ¹⁸ Warra amanan keessaas baay’een isaanii dhufanii hojii isaanii hamaa sana ifatti baasanii himachaa turan. ¹⁹ Warra falfala hojjechaa turan keessaas namoonni baay’een kitaabota isaanii walitti qabaniif fuula uummataa duratti guban; gatiin kitaabota sanaas yommuu shallagametti gara meetii* kuma shantama ta’e. ²⁰ Haala kanaanis dubbiin Gooftaa akka malee babal’ate; humnaan is guddate.

²¹ Erga wannu kun hundinuu ta’ee booddee Phaawulos Maqedooniyaa fi Akaayaa keessa darbee Yerusaa’em dhaqu murteeffate; innis, “Ani ergan achi ga’ee booddee Roomaas dhaquun qaba” jedhe. ²² Innis gargaartota isaa keessaa nama lama jechuunis Xiimotewosii fi Erisxoosin Maqedooniyaatti ergee ofii immoo yeroof biyya Asiyaa keessa ture.

Goolii Efesoon Keessatti Ka’e

²³ Gidduma sana waa’ee karaa sana irratti gooliin guddaan uumame. ²⁴ Tumtuun meetii kan Dimeexiroos jedhamu tokko fakkii mana qulqullummaa Arxemiisi[†] meetii irraa hojjechuun ogeeyyii hojii harkaatiif galii guddaa galchaa ture. ²⁵ Innis isaan hundaa fi namoota hojii akkasii qaban kaan walitti waamee akkana jedheen; “Yaa

* **19:19** 19:19 meetii - beesseen meetii tokko mindaa hojjetaan tokko guyyaatti argatuu dha. † **19:24** 19:24 Arxemiisi - waaqitti tolfamtuu dhaltii; manni qulqullummaa ishee dinqiiwwan torban addunyaa durii keessaa tokko ture.

namoota nana, akka nu hojii kana irraa galii guddaa argannu ni beektu. ²⁶ Isin akka namichi Phaawulos jedhamu kun utuu Efesoon qofatti hin ta'in guutummaa biyya Asiyaa gara caalu keessattis akka waaqonni harka namaatiin tolfaman waaqota hin ta'in dubbachuudhaan nama hedduu amansiisee karaa irraa balleesse ni argitu; ni dhageessus. ²⁷ Kanaafuu akka maqaan hojii keenyaa inni gaariin sun badu sodaan jira; garuu kana qofa utuu hin ta'in manni sagadaa Arxemiisi waaqitti guddoo sanaa iyyuu ni salphata; waaqittiin biyya Asiyaa guutuu fi addunyaa keessatti waaqeffatamtu mataan ishee iyyuu ulfina waaqummaa ishee ni dhabdi."

²⁸ Isaanis yommuu waan kana dhaga'anitti akka malee aaranii, "Arxemiisiin warra Efesoon guddoo dha!" jedhanii iyyan. ²⁹ Yommusuma magaalattiin ni raafamte; namoonni sunis miiltota Phaawulos kanneen Maqedooniyaadhaa dhufan jechuunis Gaayoosii fi Arisxirokoosin qabanii akkuma nama tokkootti gara iddoo itti tapha argisiisanii girrisanii fiigan. ³⁰ Phaawulos uummatatti mul'achuu barbaade; barattoonni garuu hin eeyyamneef. ³¹ Qondaaltota biyya Asiyaa warra michoota Phaawulos turan keessaas tokko tokko nama isatti erganii akka inni iddoo itti tapha argisiisan sana hin dhaqne isa kadhatan.

³² Yaa'ichis wacaan guutame: Garri tokko waan tokko, garri kaan waan biraa iyye. Garri caalaan isaanii immoo waan achitti walitti qabamaniif illee hin beekne. ³³ Yihuudoonnis Iskindirosiin dhiibanii fuula uummataa duratti baafnaan, namoonni tokko tokko uummata keessaa iyyanii gorsa kennaniif; innis uummata duratti falmachuuf jedhee akka namoonni cal'isaniif harkaan mallattoo kenne. ³⁴ Yommuu akka inni Yihuudii ta'e hubatanitti garuu isaan hundinuu sagalee tokkoon, "Arxemiisiin warra Efesoon guddoo dha!" jedhanii gara sa'aatii lamaa iyyaa turan.

³⁵ Barreessaan magaalaa sanaas uummata cal'isiisee akkana jedhe; "Yaa namoota Efesoon, akka magaalaa Efesoon kun eegduu mana sagadaa Arxemiisi guddittiiti fi fakkii ishee kan samii irraa bu'e sanaa taate namni hin beekne jiraa? ³⁶ Kanaaf waan namni dhugaa kana falmu hin jirreef isin cal'isuu qabdu; waan tokko illee jarjarsuun hojjechuu hin qabdan. ³⁷ Isaan mana sagadaa saamuu yookaan waaqitti keenya arrabsuu baatan illee isin jara kana as fiddaniirtu. ³⁸ Kanaaf Dimeexiroosii fi ogeeyyiin isa wajjin jiran sun yoo waan ittiin nama tokko iyyuu himatan qabaatan manneen murtii banaa dha; bulchitoonni biyyaas jiru. Isaan himata qaban achitti haa dhi'eeffatan. ³⁹ Yoo wannii biraa kan isin dhi'eeffachuu barbaaddan tokko iyyuu jiraate garuu wannii sun yaa'ii seera qabeessa irratti ilaalama. ⁴⁰ Nu wal ga'ii kanaaf sababii dhi'eeffachuu dandeenyu waan hin qabneef goolii har'a ta'e kanatti akka gaafatamnu sodaa qabna." ⁴¹ Innis erga waan kana dubbatee booddee waldaa sana gad lakkise.

20

Phaawulos Maqedooniyaa fi Giriik Dhaqe

¹ Phaawulos erga gooliin qabbanaa'ee booddee barattoota waamsisee isaan jaj-jabeesse; "Nagaatti" isaanii jedhees Maqedooniyaa dhaquuf ka'e. ² Innis dubbii nama jajjabeessu baay'ee uummatatti dubbachaa naannoo sana keessa darbee dhuma irratti Giriik ga'e; ³ achis ji'a sadii ture. Akkuma inni dooniin Sooriyaa dhaquuf ka'eenis sababii Yihuudoonni isatti malataniif karaa Maqedooniyaatiin deebi'uuf kutate. ⁴ Beeriyaadhaa Soophaaxroos ilma Phiiyiroos, Tasaloniiqeedhaa Arisxirokoosii fi Sekunduus, Darbeeni immoo Gaayoos isa wajjin deeman; akkasumas Xiimotewos, biyya Asiyaatii immoo Xikiqoosii fi Xiroomiimoos isa wajjin deeman. ⁵ Namoonni kunneen nu dura darbanii Xiroomiimoos isa eegan. ⁶ Ayyaana Maxinoo booddee garuu Fiiliphisiyuusii dooniin kaanee bultii shan booddee warra kaan wajjin Xiroomiimoos wal arganne; achis guyyaa torba turre.

Awuxekiis Du'aa Kaafame

⁷ Nus guyyaa jalqaba torban sanaatti buddeena caccabsuuf jennee walitti qabamne; Phaawulos namootatti haasa'e. Innis waan guyyaa itti aanutti deemuu barbaadeef hamma halkan walakkaatti haasaa dheersee. ⁸ Gulantaa darbii iddoo nu itti walitti qabamne keessa ibsaa baay'eetu ture. ⁹ Dargaggeessi Awuxekiis jedhamu tokkos foddaa irra taa'aa ture; yommuu Phaawulos haasaa dheeressettis hirribni cimaan isa fudhate; utuu hirribaan of wallaalee jirus darbii sadaffaa irraa kufe; isaanis reeffa isaa lafaa fuudhan. ¹⁰ Phaawulosis gad bu'ee dargaggeessa sana irratti gombifamee isa hammachuudhaan, "Lubbuun keessa jirtiiti hin rifatinaa!" jedhe. ¹¹ Innis darbii sanatti ol deebi'ee buddeena caccabsee nyaate; hamma lafti bariituttis yeroo dheeraa isaan wajjin haasa'e achii deeme. ¹² Namoonnis dargaggeessa sana jiraataa ta'ee manatti geessan; baay'ees ni jajjabaatan.

Phaawulos Jaarsolii Waldaa Kiristaanaa Efesoon Gorse

¹³ Nus Phaawulosin achii fuudhuuf jennee duraan dursinee gara doonii dhaqnee dooniidhaan Asoositti qajeelle; Phaawulos miillaan deemuuf jedhee ofuma isaatii waan kana karoorfatee tureetii. ¹⁴ Asoosittis isaan wal arginee dooniidhaan Miixiiliinitti dabarre. ¹⁵ Guyyaa itti aanuttis dooniin achii kaanee fuullee Kiiyos geenye; guyyaa tokko booddees Saamooisitti baane; guyyaa itti aanu immoo Miilexos geenye. ¹⁶ Phaawulosis yoo danda'ameef waan guyyaa Pheenxegoosxeetiin Yerusaaalem ga'uuf ariifateef akka biyya Asiyaa keessatti yeroon isa duraa hin dhumneef jedhee dooniidhaan Efesoon bira darbee deemuu murteeffatee ture.

¹⁷ Innis Miilexosii Efesoonitti nama ergee jaarsolii waldaa kiristaanaa ofitti waamsise. ¹⁸ Isaan gara isaa dhufnaan akkana jedheen; "Ani gaafan biyya Asiyaa dhufe kan duraatii jalqabee yeroon isin wajjin jiraachaa ture sana hunda haala akkam keessa akka ani jiraachaa ture isin mataan keessan iyyuu beektu. ¹⁹ Ani yoon mala Yihuudootaatiin akka malee qorame illee gad of qabiisa guddaa fi imimmaaniin Gooftaa tajaajileera. ²⁰ Utuu waan faayidaa isinii qabu tokko illee lallabuu irraa of hin qusatin akka ani mana tokkoo gara mana kaanii deemee ifatti baasee isin barsiise isinuu beektu. ²¹ Ani akka Yihuudoonni fi Giriikonni qalbii jijjiirrachuudhaan gara Waaqaatti deebi'anii fi akka isaan Gooftaa keenya Yesuus Kiristoositti amanana isaanitti hiimeera.

²² "Ammas ani utuu waan achitti narra ga'uuf jiru hin beekin Hafuuraan dirqamee Yerusaaalem dhaquuttin jira. ²³ Hafuurri Qulqulluun immoo akka hidhamuu fi rakkachuun na eegatu magaalaa hunda keessatti dhugaa naa ba'a. ²⁴ Ta'us ani fiigicha sana xumuruu fi hojii Gooftaa Yesuus natti kenne sana hobbaafachuuf jedhee jireenya koo akka waan faayidaa hin qabneetti nan lakkaa'a; hojiiin kunis wangeela ayyaana Waaqaatiif dhugaa ba'uu dha.

²⁵ "Ani akka isin warra ani keessa nanaanna'ee mootummaa Waaqaa lallabe kanneen keessaa namni tokko iyyuu lammata na hin argine nan beeka. ²⁶ Kanaafuu ani dhiiga nama hundaa irraa qulqulluu ta'uu koo har'a isinitti nan hima. ²⁷ Ani fedhii Waaqaa hunda isinitti himuu irraa of hin qusanneetii. ²⁸ Isin of eegaa; karra hoolota Hafuurri Qulqulluun irratti Phaaphaasota isin godhe sanaa hundas eegaa. Waldaa Kiristaanaa Waaqaa kan inni dhiiga ofii isaatiin bitate sanaafis tiksoota ta'aa. ²⁹ Erga ani deemee booddee akka yeeyyiiwwan hamoon dhufanii gidduu keessan seenan, akka isaan karra hoolootaa sana keessaa tokko illee hin hambifnes ani beeka. ³⁰ Isinuma keessaa iyyuu namoonni barattoota of faana fudhachuuf jedhanii dubbii micciiramaa dubbatan ni ka'u. ³¹ Kanaafuu isin of eegadhaa! Akka ani waggaa sadii halkanii guyyaa utuu gargar hin kutin imimmaaniin tokkoo tokkoo keessan gorsaa ture yaadadhaa.

³² "Ani amma Waaqaatti, akkasumas dubbii ayyaana isaa kan isin ijaaruu danda'uu fi kan warra qulqullaa'an hunda keessatti dhaala isinii kennuu danda'u sanatti isinin kennadha. ³³ Ani meetii yookaan warqee yookaan uffata nama tokkoo iyyuu hin kajeelle. ³⁴ Akka ani harkuma koo kanaan hojjedhee waan naa fi warra na wajjin jiraniif barbaachisu argamsiise isin mataan keessan iyyuu ni beektu. ³⁵ Ani waan hojjedhe hunda keessatti nu dubbii Gooftaa Yesuus mataan isaa, **'Fudhachuu irra kennuutu eebba qaba'** jedhee dubbate sana yaadachaa hojii jabaa akkanaatiin akka warra dadhabaa gargaaruu qabnu isin argisiiseera."

³⁶ Innis waan kana dubbatee isaan hunda wajjin jilbeenfatee Waaqa kadhate. ³⁷ Hundi isaanis akka malee boo'aa morma Phaawulositti marmanii isa dhangatan. ³⁸ Wannii akka malee isaan gaddisiise akka isaan yeroo sanaa jalqabaniin lammata isa hin argine dubbachuu isaa ti. Ergasii isaan hamma dooniitti isa geggeessan.

21

Phaawulos Yerusaaalem Dhaqe

¹ Erga isaanin gargar baanee booddees dooniidhaan kaanee utuu mirgaa bitaatti hin gorin Qoositti qajeelle. Guyyaa itti aanutti Roodees dhaqnee achii immoo Phaaxaraatti dabarre. ² Doonii Finiiqeetti ce'u tokkos argannee isa yaabbannee adeemsa itti fufne. ³ Yommuu Qophiroosin arguu dandeenyetti, harka bitaatti ishee dhiifnee Sooriyaatti qajeelle; nus iddoo dooniin keenya fe'iisa isaa itti buufachuuf ture Xiirrositti irraa buune. ⁴ Achitti barattoota argannee guyyaa torba isaan bira turre. Isaanis akka Phaawulos Yerusaaalem hin dhaqneef Hafuura Qulqulluun isa akeekkachiisan. ⁵ Garuu yeroon keenya dhumnaan achii kaanee deemsa keenya itti fufne; barattoonni hundinuu niitota isaaniitti fi ijoollee isaanii wajjin magaalattii keessaa nu baasani nu geggeessan; nus qarqara galaanaatti jilbeenfannee kadhanne. ⁶ Erga nagaatti waliin jennee booddees doonii yaabbanne; isaan immoo mana isaaniitti deebi'an.

⁷ Xiirsoosii kaanee adeemsa keenya itti fufuudhaan Phitolemaayisitti galle; achittis obboloota dubbifnee guyyaa tokko isaan bira oolle. ⁸ Guyyaa itti aanutti achii kaanee Qiisaariyaa geenye; achittis mana lallabaa wangeelaa tokkoo mana Fiiliphoo isa warra torbaan keessaa tokko ture sanaa dhaqnee isa bira turre. ⁹ Innis ijoolllee durbaa kanneen hin heerumin afur qaba ture; isaanis raajii dubbatu turan.

¹⁰ Erga nu guyyaa hedduu achi turre booddee raajiin Agaaboos jedhamu tokko Yihuudaadhaa gad bu'e. ¹¹ Innis gara keenya dhufee sabbata Phaawulos fuudhee harkaa fi miilla ofii isaa hidhee, "Hafuurri Qulqulluun, 'Yihuudoonni Yerusaa'lem jiraatan abbaa sabbata kanaa akkanatti hidhanii dabarsanii Namoota Ormaatti isa kennu' jedha" jedhe.

¹² Nus yommuu waan kana dhageenyetti akka Phaawulos Yerusaa'lemitti ol hin baaneef namoota achi jiran wajjin isa kadhanne. ¹³ Phaawulos immoo deebisee, "Isin maaliif boossanii garaa na raafu? Ani maqaa Gooftaa Yesuusiitiif jedhee Yerusaa'lemitti hidhamuu qofa utuu hin ta'in du'uuf illee qophaa'eeraatii" jedhe. ¹⁴ Yommuu inni nuu sarmuu didettis, "Fedhiin Gooftaa haa ta'u" jennee dhiifme.

¹⁵ Guyyoota kanneen booddees qophoofnee Yerusaa'lemitti ol baane. ¹⁶ Barattoonni Qiisaariyaa keessaa tokko tokko nu miiltessanii gara mana Minaason nu geessan; innis nama Qophiroos kan barattoota durii keessaa tokko turee dha.

Phaawulos Yerusaa'lem Ga'e

¹⁷ Yommuu nu Yerusaa'lem geenyetti obbolloonni gammachuudhaan nu simatan. ¹⁸ Guyyaa itti aanuttis Phaawulos nu wajjin Yaaqoob bira dhaqe; jaarsoliin hundinuu achi turan. ¹⁹ Phaawulosis nagaa isaan gaafatee waan Waaqni tajaajila inni kanneen Namoota Ormaa keessatti hojjete hunda tokko tokkoon isaanii ibse.

²⁰ Isaan yommuu waan kana dhaga'anitti Waaqa galateeffatan. Phaawulosiinis akkana jedhan; "Yaa obboleessa, ati akka Yihuudoonni kuma hedduun amanan ni argita; hundi isaanis hinaaffaa seeraaf qabu. ²¹ Ati akka Yihuudoonni Namoota Ormaa keessa jiraatan hundinuu ilmaan isaanii dhagna hin qabnee fi akka isaan akka duudhaa keenyaatti hin jiraanne itti himtee akka isaan seera Musee irraa gara galan barsiisuun kee isaanitti himameera. ²² Isaan akka ati dhufte dhugumaan ni dhaga'u; egaa maal gochuu wayya? ²³ Kanaaf ati waan nu sitti himnu godhi; namoonni wareega of irraa qaban afur nu bira jiru. ²⁴ Akka isaan mataa isaanii haaddataniif namoota kanneen ofitti fuudhiitii isaan wajjin of qulqulleessitii baasii isaanii ati baasi. Kanaanis namoonni hundinuu akka oduun waa'ee kee odeeffame sun dhugaa hin ta'in, akka ati mataan kee iyyuu seeraaf ajajamtee jiraattu ni beeku. ²⁵ Waa'ee Namoota Ormaa kanneen amananii immoo akka isaan nyaata waaqota tolfamoof aarsaa dhi'eeffame, dhiiga, foon horii hudhamee du'etii fi sagaagalummaa lagataniif nu murtii keenya isaaniiif barreessineerra."

²⁶ Phaawulosis guyyaa itti aanutti namoota sana ofitti fuudhee isaan wajjin of qulqulleesse; ergasii immoo gaafa guyyoonni qulqullaa'ummaa* sun itti xumuramanii fi yeroo itti aarsaan maqaa tokkoo tokkoo isaaniiitiin dhi'eeffamuu malu beeksisuuf mana qulqullummaa seene.

Phaawulos Qabame

²⁷ Yommuu guyyoonni torban sun xumuramuu ga'anitti Yihuudoonni biyya Asiyaatii dhufan tokko tokko Phaawulosin mana qulqullummaa keessatti argan. Isaanis nama hundumaa kakaasanii isa qaban. ²⁸ Iyyaniis, "Yaa namoota Israa'el nu gargaaraa! Namichi kun nama saba keenyaan mormaa, seera keenyaa fi mana qulqullummaa mormaa nama hunda iddoo hundatti barsiisuu dha. Kana malees inni Giriikota mana qulqullummaatti ol galchee iddoo qulqulluu kana xureesseera" jedhan. ²⁹ Isaan waan duraan namicha Efesoon kan maqaan isaa Xiroofiimoo jedhamu tokko Phaawulos biratti magaalaa keessatti arganii turaniif, waan Phaawulos mana qulqullummaatti ol isa galche se'aniitii.

³⁰ Magaalaan sunis guutummaatti ni raafamte; namoonnis karaa hundumaan fiigaa dhufan. Isaanis Phaawulosin qabanii lafa irra harkisaa mana qulqullummaatii gad baasan; yommuusuma karroonni cufaman. ³¹ Utuu isaan isa ajjeesuu yaalanuu akka magaalaa Yerusaa'lem guutummaatti raafamaa jirtu oduun ajajaa waraana Roomaa ga'e. ³² Innis yeruma sana loltootaa fi ajajuuwwan dhibbaa tokko tokko fudhatee figichaan isaanitti gad bu'e. Isaanis yommuu ajajaa sanaa fi loltoota isaa arganitti Phaawulosin tumuu dhiisan.

* **21:26** 21:26 guyyoonni qulqullaa'ummaa - Yeroo guyyoota torbaanii kan itti namoonni afran sirna Naazirummaa guuttatan sun utuu akka adaatti aarsaa dhi'eessuuf jilaan hin qulqulleeffamin dura keessa darbuu malan argisiisa.

³³ Ajajaan sunis dhufee isa qabe; akka inni foncaa lamaan hidhamus ajaje; akka inni eenyu ta'ee fi akka inni maal hojjechaa tures isa gaafate. ³⁴ Tuuta sana keessaas garri tokko waan tokko jedhanii iyyaa, garri kaan immoo waan biraa jedhanii iyyaa turan; ajajaan sunis sababii waca namaatiif waan mirkana ta'e argachuu waan dadhabeef akka Phaawulos gara qubata loltootaatti geeffamu ajaje. ³⁵ Phaawulos gulantaa ittiin gad ba'an bira geenyaan sababii goolii namootaatiif loltoonni isa baatan. ³⁶ Namoonni hedduunis, "Isa ajjeesi!" jedhanii iyyaa duukaa bu'an.

Dubbii Phaawulos Ummatatti Dubbate

22:3-16 kwf - Hoj 9:1-22; 26:9-18

³⁷ Phaawulos yommuu loltoonni isa fuudhanii qubata loltootaatti ol isa galchuuf jedhanitti, ajajaa sanaan, "Akka ani waa sitti himu naa eeyyamttaa?" jedhee gaafate.

Ajajaan sun immoo deebisee akkana jedhe; "Ati afaan Giriik ni dubbattaa?" ³⁸ Ati namicha biyya Gibxi kan dhi'eenya kana goolii kaasee shororkeessitoota† 4,000 fudhatee gammoojjitti gale sana mitii?"

³⁹ Phaawulos, "Ani Yihuudii Xarsees magaalaa beekamtuu Kiilqiya keessaa sanaa ti. Maaloo, akka ani namoota kanatti dubbadhu naa eeyyami" jedhee deebise.

⁴⁰ Phaawulos akkuma eeyyama ajajaa sanaa argateen gulantaa sana irra dhaabatee akka namoonni cal'isaniif harkaan mallattoo kenne; yommuu isaan hundinuu cal'isanitti immoo afaan Araamaayikiitiin akkana jedheen.

22

¹ "Yaa obbolootaa fi abbootii, falmata ani amma isin duratti dhi'effadhu kana mee naa dhaga'aa."

² Jarris yommuu isaa afaan Ibraayisxiitiin isaanitti dubbatu dhaga'anitti kan duraa illee caalaa cal'isan.

Phaawulos akkana jedhe; ³ "Ani Yihuudii dha; magaalaa Xarsees ishee biyya Kiilqiya keessaa sanattin dhaladhe; garuu Yersaaleemittin guddadhe. Miilla Gamaaliyaal jalattis seera Abbootii keenyaa akka gaariitti baradhee, akkuma isin hundi har'a hinaaftan kana anis Waaqaaf nan hinaafa ture. ⁴ Dhiiraa fi dubartii qabee, mana hidhaa keessa isaan buusuudhaan duuka buutota karaa kanaa hamma du'aatti ari'adheera; ⁵ waan kanas lubni ol aanaanii fi waldaan jaarsolii guutuun ragaa naa ba'u. Anis xalayoota isaan gara obboloota warra Damaasqoo jiraniitti barreessan fudhadheen akka namoonni kunneen adabamaniif hidhee Yersaaleemitti isaan fiduuf achi nan dhage.

⁶ "Gara saafaatti, akkuma ani Damaasqootti dhi'adheen ifni guddaan isaa akkuma tasaa samii irraa naannoo kootti balaqqise. ⁷ Anis lafatti kufeen sagalee, 'Yaa Saa'ol! Yaa Saa'ol! Ati maaliif na ari'atta?' naan jedhu tokkon dhaga'e.

⁸ "Anis, 'Yaa Gooftaa ati eenyu?' jedheen gaafadhe.

"Inni immoo deebisee, 'Ani Yesuus nama Naazreeti isa ati ari'attuu dha' naan jedhe. ⁹ Warri na wajjin turanis ifa sana argan malee sagalee isa natti dubbachaa ture sanaa hin hubanne.

¹⁰ "Anis, 'Yaa Gooftaa, ani maal godhu ree?' jedhee gaafadhe.

"Gooftaanis, 'Ka'ii Damaasqoo seeni. Wannii akka ati hojjettuuf siif kaa'ame hundinuu achitti sitti himamaatii' naan jedhe. ¹¹ Anis sababii calaqqisa ifa sanaatiif homaa arguu dadhabnaan, warri na wajjin turan harka qabani Damaasqootti na geessan.

¹² "Namichi Anaaniyaas jedhamu kan sirriitti seera eegu tokko Yihuudoota achi jiraatan hunda biratti maqaa gaarii qaba ture. ¹³ Innis gara koo dhufee na bira dhaabatee, 'Yaa obboleessa koo Saa'ol, agartuun kee siif haa deebi'u!' naan jedhe; agartuun koos yeruma sana naa deebi'e. Anis isa arguu danda'e.

¹⁴ "Innis akkana jedhe; 'Waaqni abbootii keenyaa akka ati fedhii isaa beektu, akka ati Isa Qajeelaa sana argituu fi akka afaan isaa irraa dubbii dhageessuuf si filateera. ¹⁵ Atis waan argitee fi waan dhageesse sana fuula nama hundumaa duratti isaaf dhugaa ni baata. ¹⁶ Egaa amma maal eegda ree? Ka'ii maqaa isaa waammachaa cuuphamiitti cubbuu kee of irraa dhiqi.'

¹⁷ "Anis Yersaaleemitti deebi'ee utuu mana qulqullummaa keessatti kadhannaatti jiruu akka waan of wallaaluu nan ta'e. ¹⁸ Gooftaa illee isaa, 'Jarri kun waan ati waa'ee koo dhugaa baatu hin fudhataniitti dafii ammuma Yersaalem keessaa ba'ii' jedhee natti dubbatu nan arge.

† 21:38 21:38 shororkeessitoota - namoonni kunneen fincilootta ciccimoo akka diinota warra Roomaattii fi akka diinota Yihuudoota warra Roomaa deeggaraniitti of ilaalan hundaatti of lakkaa'anii dha. Isaanis yeroo ayyaana gara garaatti saba kaanitti makamani diinota isaanii ajjeesaa turan.

¹⁹ “Anis deebiseen akkana jedhee; ‘Yaa Gooftaa jarri kun akka ani warra sitti amanan hidhuu fi tumuuf jedhee mana sagadaa tokko irraa gara isa biraatti darbaa ture beeku. ²⁰ Yeroo dhiigni dhuga baatuu keetii, dhiigni Isxifaanos dhangalaafamettis ani ajjeefamuu isaatti namootaan walii galee achi dhaabadheen uffata warra isa ajjeesani eegaa ture.’

²¹ “Gooftaanis, ‘**Ani fagootti, gara Namoota Ormaatti sin ergaatii deemi**’ naan jedhe.”

Phaawulos Akka Lammii Roomaa Ta’e Ibse

²² Namoonni sunis hamma inni dubbii kana dubbatutti isa dhaga’aa turan; ergasiis sagalee isaanii ol fudhatanii, “Namni akkanaa jiraachuu hin qabuutii lafa irraa balleessaa!” jedhanii iyyan.

²³ Utuu isaan uffata isaanii dadarbatanii, awwaaras qilleensa keessa bibittinneessanii iyyanuu, ²⁴ ajajaan sun akka Phaawulos qubata loltootaatti ol galfamuu ajaje; innis waan namoonni akkas isatti iyyaniif beekuuf jedhee akka Phaawulos garafamee qoratamu ajaje. ²⁵ Phaawulos immoo yommuu isaan isa garafuuf* jedhanii teepaan isa hidhanitti ajajaa dhibbaa kan isa bira dhaabachaa tureen, “Lammii Roomaa tokko murtii malee garafuun isiniif ni eeyyamamaa?” jedhe.

²⁶ Ajajaan dhibbaa sunis yommuu waan kana dhaga’etti gara ajajaa kumaa sanaa dhaqee, “Namichi kunoo lammii Roomaati ati maal gochuu yaadda?” jedheen.

²⁷ Ajajaan kumaa sunis Phaawulos bira dhaqee, “Mee natti himi; ati lammii Roomaati?” jedhee gaafate.

Innis, “Eeyyee” jedhee deebise.

²⁸ Ajajaan kumaa sunis, “Ani lammummaa kana argachuudhaaf gatii guddaa baase” jedhe.

Phaawulos immoo deebisee, “Ani garuu ittin dhaladhe” jedhe.

²⁹ Warri isa qoruuf yaadanis yommuuma isa irraa deebi’an; ajajaan kumaa sunis yommuu akka Phaawulos lammii Roomaa ta’ee fi akka ofii isaatii immoo Phaawulosin foncaan hidhe hubatetti ni rifate.

Phaawulos Yaa’ii Yihuudootaa Duratti Dhi’aate

³⁰ Ajajaan kumaa sun sababii Yihuudoonni Phaawulosin himataniif sirriitti beekuu fedhee guyyaa itti aanu isa hiikee akka luboonni hangafoonnii fi waldaan Yihuudootaa hundi walitti qabaman ajaje. Ergasii immoo Phaawulosin fidee akka inni fuula isaanii duratti dhi’aatu godhe.

23

¹ Phaawulos xiyyeeffatee yaa’ii sana ilaalee, “Yaa obboolota ko, ani hamma guyyaa har’aatti fuula Waaqaa dura yaada gaariidhaan jiraadheera” jedhe. ² Kana irratti Anaaniyaas lubni ol aanaan akka warri Phaawulos bira dhaabachaa turan sun afaan isaa keessa dha’an ajaje. ³ Phaawulos deebisee, “Ati keenyan nooraa dibame, Waaqni si rukuta! Seeraan natti muruuf jettee achi teessee atumti mataan kee immoo akka ani dha’amu ajajuudhaan seera cabsitaa?” jedhe.

⁴ Warri Phaawulos bira dhaabachaa turanis; “Ati akkam luba Waaqaa ol aanaa tokko arrabsitaa?” jedhaniin.

⁵ Phaawulos immoo deebisee, “Yaa obboolota, ani akka inni lubicha ol aanaa ta’ee hin beekne; ‘Waa’ee bulchaa saba keetii hamaa hin dubbatin’ jedhamee barreeffameer-aatii”* jedhe.

⁶ Phaawulos yommuu akka isaan keessaa garri tokko Saduuqota, garri kaan immoo Fariisota ta’an beeketti, “Yaa obboolota ko, ani Fariisicha ilma Fariisii ti. Ani sababii akka warri du’an du’aa ka’an abdadhuuf qoramuuf dhi’aadheera” jedhe. ⁷ Yommuu inni waan kana dubbatetti Fariisotaa fi Saduuqota gidduutti falmiin uumame; yaa’iin sun gargar qoodame. ⁸ Saduuqonni, “Du’aa ka’uun hin jiru, ergamoonnis, hafuuronnis hin jiran” jedhu; Fariisonni garuu akka kunneen hundinuu jiran amanu.

⁹ Wacni guddaanis uumame; barsiistonni seeraa tokko tokkos garee Fariisotaa keessaa ka’anii, “Nu balleessaa tokko illee namicha kana irratti hin arganne; Hafuura yookaan ergamaa Waaqaatu isatti dubbate. ⁸ Saduuqonni, “Du’aa ka’uun hin jiru, ergamoonnis, hafuuronnis hin jiran” jedhu; Fariisonni garuu akka kunneen hundinuu jiran amanu. ¹⁰ Ajajaan kumaa sunis yommuu falmiin jabaachaa deemetti jarri kun Phaawulosin cicciru

* **22:25** 22:25 garafuuf – gochi kun akka adabiitti utuu hin ta’in karaa ittiin nama tokko qoratani yookaan rakkisanii akka inni dhugaa baasu mirkaneessuuf itti fayyadamanii dha. Gochi kun garba yookaan maxxantuu irratti raawwatama malee lammii Roomaa tokko irratti hin raawwatamu ture. * **23:5** 23:5 Bau 22:28

jedhee sodaate. Kanaaf akka loltoonni dhaqanii humnaan achii isa fuudhanii qubata loltootaatti ol galchan ajaje.

¹¹ Gooftaanis halkan itti aanutti Phaawulositti mul'atee, **"Jabaadhu! Akkuma Yerusaleem keessatti waa'ee koo dhugaa baate sana Roomaa keessattis dhugaa ba'uu qabdaatii"** jedheen.

Maree Phaawulos irratti Mari'atame

¹² Yihuudoonni tokko tokko barii guyyaa itti aanuu mari'atanii akka hamma Phaawulosin ajjeesanitti waa hin nyaanne yookaan waa hin dhugne walii kakatan. ¹³ Namoota afurtamaa oltu maree kana irratti hirmaate. ¹⁴ Isaanis gara luboota hangafootaatii fi gara maanguddootaa dhaqanii akkana jedhan; "Nu hamma Phaawulosin ajjeefnutti akka homaa afaaniin hin qabne jabeessinee kakanneerra. ¹⁵ Kanaafuu isinii fi waldaan Yihuudootaa waan waa'ee Phaawulos sirriitti cimsitanii qorachuu barbaaddan fakkeessaatii akka ajajaan kumaa sun Phaawulosin gara keessanitti gad ergu kadhadaa; nu utuu inni achi hin ga'in isa ajjeesuuf qophooftneerraatii."

¹⁶ Garuu ilmi obboleettii Phaawulos yommuu maree kana dhaga'etti qubata loltootaatti ol galee Phaawulositti hime.

¹⁷ Phaawulosis ajajjuuwwan dhibbaa keessaa nama tokko waamee, "Dargaggeessi kun waan isatti himu qabaatii mee ajajaa kumaatti isa geessi" jedheen. ¹⁸ Innis ajajaa kumaa sanatti isa geesse.

Ajajaan dhibbaa sunis, "Phaawulos inni mana hidhaa jiru sun na waamsisee waan dargaggeessi kun waan sitti himu qabuuf akka ani isa sitti fidu na kadhate" jedheen.

¹⁹ Ajajaan kumaas dargaggeessa sana harka qabee kophaatti baasee, "Wanni ati natti himuu barbaaddu maali?" jedhee gaafate.

²⁰ Dargaggeessi sunis akkana jedhe; "Yihuudoonni waan waa'ee isaa sirriitti cimsanii qoruu barbaadan fakkeessanii akka ati Phaawulosin bori gara yaa'ii Yihuudootaatti gad ergitu si kadhachuuf walii galaniiru. ²¹ Waan isaan keessaa namoonni afurtamaa oli ta'an riphanii isa eeggachaa jiraniif ati isaan jalaa hin qabin. Isaan akka hamma isa ajjeesanitti homaa hin nyaanne yookaan hin dhugne kakataniiru; qophaa'aniis eeyyama kee eeggachaa jiru."

²² Ajajaan kumaa sunis, "Ati akka waan kana natti himte nama tokkotti iyyuu hin dubbatin" jedhee dargaggeessa sana akeekkachiisee gad dhiise.

Phaawulos Qiisaariyaatti Dabarfame

²³ Ergasii inni ajajjuuwwan dhibbaa keessaa nama lama waamee akkana jedhee ajaje; "Akka loltoonni dhibbi lama, abbootiin fardaa torbaatannii fi warri eeboo qabatan dhibbi lama edana sa'aatii sadiitti Qiisaariyaa dhaqaniif qopheessaa. ²⁴ Phaawulosiifis farda inni yaabbatu qopheessaatii gara Feeliksi Bulchaa Biyyaatti nagaan geessaa."

²⁵ Innis akkana jedhee xalayaa tokko barreesse.

²⁶ Qilaawudewoos Liisiiyaas irraa,

Gara bulchaa kabajamaa, gara Feeliksi:

Nagaa jirtaa.

²⁷ Yihuudoonni namicha kana qabani ajjeesuu barbaadaa turan; ani garuu akka inni lammii Roomaa ta'e beekke loltoota koo wajjin dhaqee isa baase. ²⁸ Anis waan isaan isa himataniif beekuu barbaadeen fuula waldaa isaanii duratti isa dhi'eesse.

²⁹ Ani akka inni waa'ee gaaffii seera isaaniitiin himatame arge malee akka inni waan du'aan yookaan hidhaan isa ga'u tokkumaanuu himatame hin argine. ³⁰ Ani yeroo akka isaan namicha sanatti mari'atan dhaga'etti dafee isa sitti erge. Warra isa himatanis akka isaan himata isaanii sittan dhi'effatan ajajeera.

³¹ Kanaaf loltoonni sun akkuma ajajaman sana Phaawulosin fuudhanii halkaniin Antiiphaaxriisitti geessan. ³² Isaanis guyyaa itti aanutti akka abbootiin fardaa isa wajjin deeman godhanii ofii immoo qubata loltootaatti deebi'an. ³³ Abbootiin fardaa sunis yommuu Qiisaariyaa ga'anitti xalayaa sana bulchaatti kennan; Phaawulosinis fuula isaa dura dhi'eessan. ³⁴ Bulchaan sunis erga xalayaa sana dubbifatee booddee, akka inni biyya kamii dhufe isa gaafate. Yommuu akka inni Kiilqiyaadhaa dhufe beekettis, ³⁵ "Ani yeroo himattoonni kee as ga'anitti dubbii kee nan dhaga'a" jedhe. Innis ergasii akka Phaawulos masaraa Heroodis keessatti eegamus ajaje.

24

Phaawulos Fuula Feeliksi Duratti

¹ Guyyaa shan booddee Anaaniyaas lubni ol aanaan maanguddoota tokko tokkoo fi abukaattoo Xerxuloos jedhamu tokko wajjin Qiisaariyaatti gad bu'e; isaanis waan ittiin

Phaawulosin himatan bulchaa duratti dhi'eeffatan. ² Yommuu Phaawulos waamamee ol galetti, Xerxuloos akkana jedhee himata isaa Feeliksi duratti dhi'eeffate; "Yaa Feeliksi kabajamaa, nu bara kee keessa yeroo dheeraa nagaan jiraanneera; ogummaan kees saba kanaaf geeddarama fideera. ³ Yaa Feeliksi kabajamaa, nu waan kana karaa hundumaa fi iddoo hundatti galata guddaadhaan ni fudhanna. ⁴ Garuu ani akka hammana irra si hin dadhabsiifneef akka ati gabaabumatti gara laafinaan nu dhageessu sin kadhadha.

⁵ "Nu akka namichi kun dhukkuba hamaa ta'ee Yihuudoota addunyaa guutu irra jiran hunda keessatti goolii kaasaa jiru argineerra. Inni hoogganaa garee Naazirootaa ti. ⁶ Inni mana qulqullummaa iyyuu xureessuu yaaleera; nu immoo akka seera keenyaatti itti muruuf jennee isa qabne. [⁷ Garuu Luusiyooos ajajaan kumaa sun dhufee humna guddaan harka keenya keessaa isa baase; akka himattoonni isaa fuula kee duratti dhi'aatanis ni ajaje.]* ⁸ Ati mataan kee iyyuu isa qoruudhaan waa'ee waan nu isa himannu kanaa hunda beeku ni dandeessa."

⁹ Yihuudoonnis akka dubbiiin kun dhugaa ta'e mirkaneessanii himata sana deeggaran.

¹⁰ Phaawulosis yommuu bulchaan sun akka inni dubbatuuf harkaan mallattoo kenneeffitti akkana jedhee deebii kenne; "Ani waan akka ati waggoota hedduuf abbaa murtii saba kanaa taate beekuuf falmii koo gammachuudhaan nan dhi'eeffadha. ¹¹ Akkuma ati rakkoo malee mirkaneeffachuu dandeessu ani waqeffachuuf jedhee Yerusaaalemitti ol ba'uun koo guyyaa kudha lama hin caalu. ¹² Warri na himatan kun anaa mana qulqullummaa keessatti yookaan manneen sagadaa keessatti yookaan magaalaa keessatti nama tokkoon illee falmu yookaan uummata kakaasu na hin arganne. ¹³ Isaan waan amma ittiin na himachaa jiran kanas siif mirkaneessuu hin danda'an. ¹⁴ Ta'us ani akka nama karaa isaan garee mormitootaa jedhaniin sana duukaa bu'u tokkootti akka Waaqa abbootii keenyaa waqeffadhu fuula kee duratti nan amana. Waan seera Museetiin walii galuu fi waan kitaabota raajotaa keessatti barreeffame hundas nan amana. ¹⁵ Anis akkuma jara kanaa akka du'aa ka'uun qajeeltotaatii fi hamootaa jiraatu Waaqa nan abdadha. ¹⁶ Kanaafuu ani akka yeroo hunda Waaqaa fi nama duratti yaada qulqulluu qabaadhu nan tattaaffadha.

¹⁷ "Anis bara baay'ee hiyyeeyyii saba kootiitiif gargaarsa kennuuf, Waaqaafis aarsaa dhi'eessuuf jedhee Yerusaaalem dhufe. ¹⁸ Yeroo ani waan kana hojjechaa turettsi isaan anaa qulqullaa'ee jiru mana qulqullummaa keessatti na argan. Tuunni tokko iyyuu na bira hin turre; anis goolii keessatti hin hirmaanne. ¹⁹ Garuu Yihuudoonni biyya Asiyaa kanneen yoo waan ittiin na himatan tokko illee narraa qabaatan si duratti as dhi'aatanii na himachuu malan tokko tokko jiru. ²⁰ Yookaan warri as jiran kunneen yakka yeroo ani fuula Waldaa Yihuudootaa dura dhaabadhe sana narratti argan haa himan; ²¹ waan ani yeroo fuula isaanii dura dhaabadhe sana iyyee, 'Ani har'a waa'ee du'aa ka'uu warra du'anii irratti qoramuuuf jedhee fuula keessan dura dhaabadheera' jedhe tokkicha sana malee yoo jiraate haa himan."

²² Feeliksi garuu waan waa'ee Karaa sana sirriitti beekuuf, "Ani gaafa Liisiyaas ajajaan kumaa sun dhufutti dubbii keessan nan murteessa" jedhee yeroo biraatti dabarse. ²³ Innis akka ajajaan dhibbaa sun Phaawulosin eegumsa jala tursu, garuu akka haala isaa itti furuu fi akka michoonni isaas waan isa barbaachisu kam iyyuu isaaf dhi'eessan eeyyamuuf ajaje.

²⁴ Feeliksis bultii muraasa booddee niitii isaa Diruusilaa ishee Yihuudii turte wajjin dhufe; innis Phaawulosin waamsisee isaa waa'ee Kiristoos Yesuusitti amanuu dubbatu dhaggeeffate. ²⁵ Yommuu Phaawulos waa'ee qajeelummaa, waa'ee of qabuutii fi waa'ee murtii kan dhufuuf jiru sanaa dubbatetti Feeliksi sodaatee, "Ammaaf ni ga'aatii deemi! Yommuu naa mijaa'utti anuu sin waamsisaatii" jedhe. ²⁶ Yeroodhuma sanattis inni akka waan Phaawulos matta'aa isaaf kennuutti waan abdachaa tureef ammuma amma waamsisee isa wajjin haasa'aa ture.

²⁷ Phoorqiyoos Fesxoos erga waggaan lama darbee booddee iddoo Feeliksi qabate; Feeliksis waan Yihuudoota gammachiisuu barbaadeef Phaawulosin manuma hidhaatti dhiise.

25

Phaawulos Fuula Fesxoos Duratti Qorame

¹ Fesxoosis biyya sana ga'ee guyyaa sadii booddee Qiisaariyaadhaa Yerusaaalemitti ol ba'e; ² achittis luboonni hangafoonni fi dura bu'oonni Yihuudootaa fuula isaa duratti dhi'aatanii himata Phaawulos irraa qaban dhi'eeffatan. ³ Isaanis waan karaatti riphanii Phaawulosin ajjeesuuf qophaa'aa turaniif akka Fesxoos isaan deeggaree nama ergee

* 24:7 24:7 Waraabbileen durii tokko tokko luqqisaa 7 hin qaban.

gara Yersaaleem isa fichisiisu kadhatan. ⁴ Fesxoos immoo akkana jedhee deebise; “Phaawulos Qiisaariyaatti eegamaa jira; ani mataan koo iyyuu dhi’eenyatti achi nan dhaqa. ⁵ Kanaafuu abbootii taayitaa keessan keessaa tokko tokko na wajjin deemanii yoo namichi sun balleessaa wayii qabaate achitti isa haa himatan.”

⁶ Innis erga guyyaa saddeeti yookaan kudhan isaan bira bubbulee booddee Qiisaariyaatti gad bu’ee; guyyaa itti aanuttis barcuma murtii irra taa’ee akka Phaawulos fuula isaa duratti dhi’eeffamu ajaje. ⁷ Yommuu Phaawulos dhi’aatettis Yihuudoonni Yersaaleemii gad bu’an sun isatti naanna’anii dhaabachuun himata ciccimaa hedduu isa irratti dhi’eessan; garuu amansiisuu hin dandeenye.

⁸ Phaawulosis, “Ani seera Yihuudootaa irratti yookaan mana qulqullummaa irratti yookaan Qeesaar irratti yakka tokko illee hin hojjenne” jedhee falmate.

⁹ Fesxoosis Yihuudoota gammachiisuuf jedhee Phaawulosiin, “Ati Yersaaleemitti ol baatee himata kana irratti fuula koo duratti qoratamuu ni feetaa?” jedhe.

¹⁰ Phaawulos garuu akkana jedhee deebise; “Ani amma barcuma murtii Qeesaar dura, iddoo itti qoratamuu qabu dhaabadheen jira; akkuma ati mataan kee iyyuu sirriitti beektu ani yakka tokko illee Yihuudoota irratti hin hojjenne. ¹¹ Ta’us ani utuu balleessaa du’a natti mursiisu tokko illee hojjedhee silaa du’a jalaa ba’uuf hin carraagu; garuu yoo wanni Yihuudoonni kunneen ittiin na himatan dhugaa hin ta’in, namni tokko iyyuu dabarsee harka isaaniitti na kennuuf mirga hin qabu. Ani Qeesaaritti oli nan iyyadha!”

¹² Fesxoosis erga gorsitoota isaa wajjin mari’atee booddee, “Ati Qeesaaritti ol iyyatteerta; gara Qeesaar ni dhaqxa!” jedhe.

Fesxoos Gorsa Agriiphaa Gaafate

¹³ Bultii muraasa booddee Agriiphaa mootichii fi Barniiqeen* Fesxoos simachuuf Qiisaariyaa dhaqan. ¹⁴ Fesxoosis isaan guyyaa hedduu achi bubbullaan akkana jedhee waa’ee himata Phaawulos mooticha wajjin dubbate; “Namichi Feeliksi mana hidhaa keessatti dhiisee deeme tokko as jira. ¹⁵ Yeroo ani Yersaaleem turetti luboonni hangafoonnii fi maanguddoonni Yihuudootaa isa himatanii akka itti muramu kadhatan.

¹⁶ “Anis akka namni kam iyyuu akka seera biyya Roomaatti utuu fuula himattoota isaa duratti dhi’atee himata sana mormachuuf carraa hin argatin dabarfamee kennamuu hin qabne isaanitti himeera. ¹⁷ Kanaafuu ani yommuu isaan na wajjin as dhufanitti barcuma murtii irra taa’een akka namicha natti fidan ajaje malee dubbii sana lafa irra hin harkifne. ¹⁸ Himattoonni isaas yommuu dubbachuuf ka’anitti yakka ani ittiin isa himatu jedhee eege keessaa tokko illee isa irratti hin dhi’eessine. ¹⁹ Garuu isaan waa’ee amantaa isaaniitii fi waa’ee namicha du’e kan Yesuus jedhamu isa Phaawulos immoo, ‘Inni jiraataa dha’ jedhee falmuu tokkoo irratti wal dhaban. ²⁰ Anis akka itti dubbii sana qoradhu wallaale; kanaaf inni Yersaaleem dhaqee himata kana irratti qoratamuuf fedhii qabuu fi akka inni hin qabne isa gaafadhe. ²¹ Garuu yommuu Phaawulos murtii Awugisxoos Qeesaar argachuuf jedhee turfamuu kadhatetti ani akka inni hamma ani Qeesaaritti isa ergutti eegamu nan ajaje.”

²² Agriiphaanis Fesxoosiin, “Ani mataan koo namicha kana dhaga’uu nan barbaada” jedhe.

Inni immoo deebisee, “Bori isa dhageessa” jedheen.

Phaawulos Fuula Agriiphaa Duratti

26:12-18 kwf - Hoj 9:3-8; 22:6-11

²³ Guyyaa itti aanuttis Agriiphaa fi Barniiqeen ulfina guddaan dhufanii Ajajjuuwwan kumaatii fi gurguddoota magaalaa wajjin galma wal ga’ii seenan. Fesxoos ajajnaan Phaawulosin ol galchan. ²⁴ Fesxoosis akkana jedhe; “Yaa Agriiphaa mooticha, warri nu wajjin as jirtan hundinuus isin namicha kana ni argitu! Hawaasni Yihuudootaa guutummaatti, ‘Namichi kun si’achi jiraachuu hin qabu’ jedhanii waa’ee isaa Yersaaleemitti fi as Qiisaariyaatti iyyanii na kadhatan. ²⁵ Ani waan du’aan isa ga’u kan inni hojjetee tokko illee hin argine; ani garuu sababii inni Awugisxoositti ol iyyateef gara Roomaatti isa erguu nan murteesse. ²⁶ Ani waa’ee namicha kanaa waan ifatti ba’ee kan gooftaa kootiif barreessu tokko illee hin qabu; kanaafuu ani erga isa qorannee booddee akka waan barreessu argadhuuf jedhee fuula hunda keessanii duratti, keessumattuu yaa Agriiphaa mooticha, fuula kee duratti isa dhi’eesseera. ²⁷ Ani nama hidhame tokko utuu waan inni ittiin himatame ifatti hin baasin ol dabarsuu qajeela hin se’uutii.”

* **25:13** 25:13 Barniiqeen - Barniiqeen obboleettii Agriiphaa ti; isheen dhiisii irraa duunaan mana obboleessaa jiraatte.

26

¹ Agriiphaan Phaawulosiin, “Akka ati ofii keetiif dubbattu siif eeyyamameera” jedhe. Phaawulosis harkaan mallattoo kennee akkana jedhee falmachuu jalqabe; ² “Yaa Agriiphaa Mooticha, ani sababii waan Yihuudoonni ittiin na himatan hunda falmachuudhaaf jedhee har’a fuula kee dura dhaabadhuuf akka ayyaantuu tokkoottiin of ilaala. ³ Kunis waan ati duudhaa fi wal mormii Yihuudootaa hunda keessa beektuufii dha. Kanaafuu ani akka ati obsaan na dhaggeeffattu sin kadhada.

⁴ “Ani ijoolummaa kootii jalqabee saba koo keessatti, Yerusaalem keessattis akkamitti akka jiraachaa ture Yihuudoonni hundinuu ni beeku. ⁵ Akka ani akka Fariisicha tokkootti akkuma sirna garee akka malee amantaa keenyatti cichu sanaatti jiraadhe isaanuu bara dheeraa waan na beekaniif, yoo fedhii qabaatan dhugaa ba’uu ni danda’u. ⁶ Ammas ani waadaa Waaqni abbootii keenyaaf gale sana waan abdadhuuf qoratamuuf dhi’aadheen as jira. ⁷ Waadaan kun isuma gosoonni keenya kudha lamaan halkanii guyyaa Waaqa tajaajiluutti jabaatanii raawwatamuu isaa arguu hawwan sanaa dha. Yaa Agriiphaa Mooticha, Yihuudoonnis sababuma abdi kanaatiif na himachaa jiru. ⁸ Akka Waaqni warra du’an du’aa kaasu isin maaliif akka waan hin amanamne tokkootti herregdu?

⁹ “Ani mataan koo iyyuu maqaa Yesuus nama Naazreetiitiin mormuudhaaf akka waan danda’amu hunda gochuu qabu nan amana ture. ¹⁰ Wannani ani Yerusaalem keessatti hojjedhes kanuma; ani taayitaa luboota hangafoota irraa argadheen qulqulloota baay’ee mana hidhaatti naquu qofa utuu hin ta’in yeroo isaan ajjeefaman iyyuu dubbicha irratti walii galaan ture. ¹¹ Anis akka isaan adabamaniif yeroo baay’ee mana sagadaa tokko irraa gara mana sagadaa biraatti darbaa, akka isaan amantii isaanii arrabsaniif isaan dirqisiisaan ture. Ani waan akka malee isaanitti aaraa tureef hamma magaalawwan biyya alaatti illee deemee isaan ari’achaan ture.

¹² “Anis gaafa tokko kanumaaf jedhee taayitaa fi ergama luboota hangafoota biraa fudhadhee utuun Damaasqoo deema jiruu, ¹³ yaa mooticha, ani utuman karaa deema jiruu gara saafaatti ifa ifa aduu caalaa ibsu tokko isaa samii irraa naannoo kootti fi naannoo warra na wajjin deemaniitti ibsu arge. ¹⁴ Hundi keenya lafatti kukkufne; anis sagalee afaan Ibraayisxiitiin ‘Yaa Saa’ol, yaa Saa’ol, ati maaliif na ari’atta? Arfii wayii dhiituun suma miidha’ naan jedhu tokkon dhaga’e.

¹⁵ “Anis, ‘Yaa Gooftaa ati Enyu?’ jedheen gaafadhe.

“Gooftaanis deebisee akkana jedhe; ‘Ani Yesuus isa ati ari’attuu dha. ¹⁶ Amma ka’ii miilla keetiin dhaabadhu. Ani akka ati tajaajilaa koo taatee, waa’ee koos waan argitee fi waan ani sitti mul’isuuf jiru dhugaa baatuuf si muuduuf jedhee sitti mul’adheera. ¹⁷ Ani saba keetiif fi Namoota Ormaa kanneen gara isaaniitti si ergu jalaa sin baasa. ¹⁸ Atis ija isaanii bantee dukkana keessaa gara ifaatti, humna Seexanaa jalaas gara Waaqaatti isaan deebifta; kunis akka isaan dhiifama cubbuu argatanii fi akka isaan warra natti amanuun qulqullaa’an gidduutti dhaala argataniif.’

¹⁹ “Kanaafuu yaa Agriiphaa Mooticha, ani mul’ata samii irraa dhufe sanaaf ajajamuu hin didne. ²⁰ Anis akka isaan qalbii jijjiiratanii gara Waaqaatti deebi’aniif, qalbii jijjiirrachuu isaaniis akka hojiidhaan mirkaneessaniif jalqabatti warra Damaasqootti, warra Yerusaalemiitti, warra Yihuudaa guutuutti akkasumas Namoota Ormaatti lalabeera. ²¹ Sababii Yihuudoonni mana qulqullummaa keessatti na qabanii na ajjeesuu yaalaniifis kanuma. ²² Ani garuu hamma guyyaa har’aatti gargaarsa Waaqaa qaba; kanaafuu ani dhaabadhee xinnaa guddaaf dhugaa ba’aan jira. Ani waan raajonnii fi Museen ‘Ni ta’a’ jedhanii dubbataniin alatti waan tokko illee hin dubbadhu. ²³ Kunis akka Kiristoos* dhiphachuu qabu, akka inni warra du’an keessaa ka’uudhaan kan jalqabaa ta’ee saba isaatii fi Namoota Ormaatiif ifa labsuu dha.”

²⁴ Utuma Phaawulos akkasitti falmachaa jiruu Fesxoos sagalee guddaan, “Phaawulos, ati maraateerta! Barumsi kee guddaan sun si maraachisaa jira” jedheen.

²⁵ Phaawulosis akkana jedhee deebise; “Yaa Fesxoos kabajamaa, ani hin maraanne; wannani dubbachaa jirus dhugaa dha; sirrii dhas. ²⁶ Sababii mootichi waan kana beekuuf, ani ifatti baasee isatti himuu nan danda’a. Sababii wannani kun suuqatti hin hojjetamiif ani akka waan kana keessaa tokko iyyuu isa duraa hin dhokatin nan amana. ²⁷ Yaa Agriiphaa Mooticha, ati raajota ni amantaa? Akka ati amantu ani iyyuu beeka.”

²⁸ Agriiphaanis Phaawulosiin, “Ati yeruma gabaabaa keessatti Kiristaana na gochuu yaaddaa?” jedhe.

* 26:23 26:23 yookaan Masihiichi

²⁹ Phaawulosis deebisee, “Yeroo gabaabaattis ta’u dheeraatti, si qofa utuu hin ta’in akka warri na dhaga’aa jiran hundinuu foncaa kanaan hidhamuu malee akkuma koo akka ta’an ani Waaqa nan kadhadha” jedhe.

³⁰ Kana irratti mootichi, bulchaanii fi Barniiqueen, akkasumas warri isaan wajjin tataa’aa turan ol ka’an. ³¹ Isaanis yeroo gad ba’anitti, “Namichi kun waan du’aan yookaan hidhaan isa ga’u tokko illee hin hojjenne” wajjin jedhan.

³² Agriiphaanis Fesxoosiin, “Namichi kun utuu Qeesaaritti ol iyyachuu baatee silaa ni hiikama ture” jedhe.

27

Phaawulos Roomaa Dhaquu Isaa

¹ Yommuu dooniin lixaaliyaa dhaquun keenya murteeffametti, Phaawulosii fi warri hidhaman biraa ajajaa dhibbaa kan Yuuliyoo jedhamu tokkotti dabarfamanii kennaman; innis miseensa kutaa waraanaa “Awugisxoos” jedhamu tokkoo ture. ² Nus doonii Adraamiixooisii ka’ee gara buufatawwan doonii kanneen qarqara galaana biyya Asiyaa dhaquuf ka’ee tokko yaabbannee deemuu jalqabne. Arisxirokoos namichi Maqedooniyaa kan Tasaloniiqee jiraatu tokkos nu wajjin ture.

³ Guyyaa itti aanutti Siidonaatti galle; Yuuliyoois Phaawulosiiif garaa laafee akka inni michoota isaa bira dhaqee waan isa barbaachisu argatu eeyyameef. ⁴ Nus dooniin achii kaanee waan bubbeen fuula keenya duraan nutti bubbisaa tureef Qophiroosiin da’annee dabarre. ⁵ Erga galaana Kiilqiyaa fi Phamfiliyaa irra dooniin darbinee booddee magaalaa Miiraa kan Luuqiyyaa keessatti argamtu geenye. ⁶ Ajajaan dhibbaa sunis doonii Iskindiriyaa kan lixaaliyaa dhaquutti jiru tokko achitti argatee nu yaabbachiise. ⁷ Nus guyyaa hedduu suuta jennee dooniin deemnee rakkinaan naannoo Kiniidoos geenye; yommuu bubbeen karaa sana irra darbuu nu dhowwettis Salmoonee biraan gara da’oo Qareexitti qajeelle. ⁸ Rakkina guddaadhaanis qarqara galaanichaa irra darbinee iddoo “Buufata doonii gaarii” jedhamu kan magaalaa Laasiyaa biraa tokkotti baane.

⁹ Yeroon dheeraan badeera; sababii yeroon sun erga Soomni darbee ta’eef doonidhaan karaa deemuun sodaachisaa ta’eera; kanaafuu Phaawulos akkana jedhee isaan akeekachiise; ¹⁰ “Yaa jarana, ani akka karaan keenya kun badiisa of keessaa qabu, akka inni doonichattii fi mi’a qofatti utuu hin ta’in jireenya keenyatti illee balaa guddaa fiduuf deemu nan arga.” ¹¹ Ajajaan dhibbaa sun garuu qooda waan Phaawulos jedhe dhaga’u gorsa ooftuu dooniitti fi gorsa abbaa doonii fudhate. ¹² Sababii buufanni doonii sun ganna achi turuuf mijaa’aa hin ta’inni baay’een isaanii Finiiqeetti galanii ganna achitti dabarsuu abdatanii akka nu ittuma fufnee dooniin deemnu murteessan. Buufanni Qareexi kun fuulli isaa gara kibba dhi’aattii fi gara kaaba dhi’aatti deebi’ee ture.

Bubbee Galaana Irraa

¹³ Yeroo bubbeen kibbaa suuta bubbisuu jalqabetti waan kaayyoo isaanii guutachuu danda’an se’anii hiituu doonii hiikanii Qareexi biraan qarqara galaana irra darban. ¹⁴ Utuu hin turinis bubbeen hamaan, “Awuraaqiis” jedhamu tokko biyya bishaaniin marfamte sana irraa gad bubbise. ¹⁵ Dooniin sunis bubbeedhaan qabamee gara bubbee sanaatti deemu dadhabe; kanaafuu akka inni bubbeen fudhatamuuf ittuma dhiifne. ¹⁶ Nus biyya bishaaniin marfamte xinnoo Qeedaa jedhamtu tokkoon da’annee rakkina guddaadhaan bidiruu doonichaa oolchuu dandeenye. ¹⁷ Namoonni sunis bidiruu sana dooniitti ol baasanii akka dooniin sun gargar hin diiganneef funyoon xaxanii walitti hidhan. Isaanis tima cirraha Sirtiisitti bu’uu sodaatanii hiituu doonii galaanatti gad buusanii akka dooniin sun bubbeen oofamtuuf ittuma dhiisan. ¹⁸ Waan bubbeen sun akka malee nutti jabaachaa deemeef isaan guyyaa itti aanutti doonii sana irraa fe’iisa guuranii bishaanitti dadarbachuu jalqaban. ¹⁹ Guyyaa sadaffaatti immoo mi’a doonii sanaa harkuma offi isaaniitiin dadarbatan. ²⁰ Nu waan utuu aduu yookaan urjii hin argin guyyaa hedduu turree fi waan bubbeen nutti jabaateef dhuma irratti abdi badiisa ooluuf qabnu hunda ni kutanne.

²¹ Phaawulosis erga namoonni sun agabuu isaanii yeroo dheeraa turanii booddee gidduu isaanii dhaabatee akkana jedhe; “Yaa jarana, isin utuu gorsa koo dhageessanii Qareexii ka’uu hin qabdan ture; silaa balaa fi badiisa kana hundumaa irraa of oolchitu turtan. ²² Amma garuu ani akka isin jabaattan isinan gorsa; doonicha malee isin keessaa lubbuun nama tokkoo iyyuu hin baduutii. ²³ Ergamaan Waaqa ani kan isaa ta’ee fi isa tajaajilu sanaa tokko eda dhufee na cina dhaabatee, ²⁴ Yaa Phaawulos, hin sodaatin; ati Qeesaar dura dhaabachuu qabdaatii; kunoo, Waaqni warra si wajjin deema jiran hunda gaarummaa isaatiin sitti kenneera’ naan jedhe. ²⁵ Kanaaf yaa jarana jabaadhaa!

Ani akka wanni kun akkuma natti himame sana ta'u Waaqa nan amanaatii. ²⁶ Ta'us biyya bishaaniin marfamte tokkotti bu'uun keenya hin oolu."

Dooniin Caccabuu Isaa

²⁷ Halkan kudha afuraffaatti utuu galaana Adiriyaa irra asii fi achi oofamaa jirruu gara halkan walakkaatti warri doonii irra hojjetan sun waan gara lafaatti dhi'aatan se'an. ²⁸ Isaan funyoo ittiin gad fageenya galaanaa ilaalan gad buusanii akka galaanni sun meetira soddonii torba gad fagaatu argan; yeroo gabaabaa booddee ammas funyoo sana gad buusanii akka gad fageenya galaanichaa meetira digdamii saddeet ta'e argan. ²⁹ Isaanis kattaatti buuna jedhanii sodaatanii hiituu doonii afur dugda duubaan doonii irraa gad buusan. Akka lafti bariituufis kadhahan. ³⁰ Warri doonii irra hojjetanis bidiruu keessaa baqachuuf jedhanii waan fuula doonii duraan hiituu doonii buusan fakkaatanii bidiruu sana galaana keessa buusan. ³¹ Phaawulos immoo ajajaa dhibbaatii fi loltootaan, "Yoo namoonni kunneen doonii keessatti hafan malee isin badii ooluu hin dandeessan" jedhe. ³² Kanaafuu loltoonni sun funyoo bidirichi ittiin hidhamee ture sana irraa kutanii galaanatti gad ishee dhiisan.

³³ Gara barii lafaattis Phaawulos akka namoonni hundinuu waa nyaataniif isaan kadhate; akkanas jedheen; "Isin bultii kudha afran darban yaadda'aa, utuu waa tokko illee hin nyaatin agabuu keessan ooltanii bultaniirtu. ³⁴ Kanaaf ani akka isin waa nyaataniif isin kadhada. Nyaanni jiraachuuf isin barbaachisaatii. Isin keessaa nama kam iyyuu rifeensa mataa isaa keessaa tokko iyyuu hin baduutii." ³⁵ Innis erga waan kana dubbatee booddee buddeena fuudhee hunduma isaanii duratti Waaqa galateeffate; kutatees nyaachuu jalqabe. ³⁶ Isaan hundinuu jajjabaatanii ofumaan waa nyaatan. ³⁷ Walumatti nu nama 276 taanee doonii sana keessa ture. ³⁸ Isaanis erga nyaatanii quufanii booddee qamadii fe'amee ture sana galaanatti naqanii akka dooniin salphatu godhan.

³⁹ Isaanis yommuu lafti bariitetti galoo galaanaa kan kuufama cirracha qabu tokko argan malee biyyi fuula isaanii dura jiru sun eessa akka ta'e hin hubanne; doonii sanas yoo isaanii danda'ame dhiibanii qarqara galaanaatti baasuu murteessan. ⁴⁰ Kanaafuu funyoo hiituu doonii kutanii galaana keessatti gad dhiisan; yeruma sana funyoo battoon ittiin hidhame sana hiikan; ergasiis sharaa karaa fuula doonii duraan jiru sana qilleensatti ol fuudhanii gara kuufama cirrachaatti qajeelan. ⁴¹ Garuu dooniin sun iddoo itti galaanni lama wal ga'utti tima cirrachaatti bu'ee lafa tuqe. Mataan isaa achitti qabamee socho'uu dide; dudga duubni isaa immoo humna dha'aa galaanaatiin dha'amee caccabe.

⁴² Loltoonnis akka warra hidhaman sana keessaa namni tokko iyyuu bishaan daakee baqatee jalaa hin baaneef isaan ajjeesuuf karoorfatan. ⁴³ Garuu ajajaan dhibbaa sun waan Phaawulosin du'a oolchuu fedheef akka isaan waan karoorfatan sana hin goone dhowwe; innis akka warri bishaan daakuu danda'an duraan dursanii doonii irraa utaaalanii gara lafaatti ba'an ajaje. ⁴⁴ Akka warri hafan immoo saanqaa yookaan caccabaa dooniitiin achi ga'an ajaje; haala kanaan hundi isaanii nagaan lafatti ba'an.

28

Phaawulos Malaaxiyaa Ga'uu Isaa

¹ Nus nagumaan qarqara galaanaatti baanee akka biyyi bishaaniin marfamte sun Malaaxiyaa jedhamtu beekke. ² Namoonni biyya bishaaniin marfamte sana irra jiraatanis gara laafina dinqisiisaa nu argisiisan. Isaanis sababii roobnii fi dhaamochi tureef ibidda bobeesanii hunda keenya simatan. ³ Utuu Phaawulos hanxaxii qoraanii walitti qabee ibiddatti naqaa jiruu buutiin sababii ho'aaatiin gad baate tokko harka isaatti maxxanteen gad dhiisuu didde. ⁴ Warri biyya bishaaniin marfamte sana irra jiraatan sunis buutii harka isaatti rarraatu arganii, "Namichi kun nama nama ajjeese ta'uu hin oolu; inni yoo balaa galaanaa jalaa ba'e illee Murtiin Qajeelaan akka inni jiraatu hin eeyyamneef" waliin jedhan. ⁵ Phaawulos buutii sana ibidda keessa of irraa buuse; miidhaa tokko malees hafe. ⁶ Namoonni sunis, "Inni nu dhiita'a yookaan akkuma tasaa kufee du'a" jedhanii eegan; garuu yommuu yeroo dheeraa eeganii akka inni waa tokko illee hin ta'in arganitti yaada geeddaratanii, "Inni waaqa" jedhan.

⁷ Bulchaan biyya bishaaniin marfamtee kan Phubiliyoos jedhamu tokkos naannoo sanaa lafa qotiisaa qaba ture; innis mana isaatti nu simatee guyyaa sadii jaalalaan nu keessumsiiise. ⁸ Abbaan Phubiliyoos dhukkuba dhagna nama gubuu fi garaa nama kaasuun qabamee ciisaa ture; Phaawulos isa gaafachuuf ol seenee erga kadhatee booddee harka irra kaa'ee isa fayyise. ⁹ Yommuu wanni kun ta'etti dhukkubsattoonni biyya bishaaniin marfamte sana irra jiraatan biraa hundi dhufanii fayyan. ¹⁰ Isaanis

karaa baay'eedhaan ulfina nuu kennan; yommuu nu dooniin deemuuf kaanettis waan nu barbaachisu hunda nuuf kennan.

Phaawulos Roomaa Ga'e

¹¹ Nus ji'a sadii booddee doonii Iskindiriyaa kan biyya bishaaniin marfamte sana irratti yeroo gannaa dabarse tokkoon kaanee deemsa jalqabne; dooniin sunis asxaa waaqota lakkuu Kastoorii fi Paaluksi adda isaa irraa qaba ture. ¹² Seraakuus geenyees bultii sadii achi turre. ¹³ Achiis kaanee Reegiyuumitti galle; guyyaa tokko booddees waan bubbeen kibbaa bubbiseef guyyaa itti aanutti Putiyooluus geenye. ¹⁴ Achitti obboloota tokko tokko arganne; isaanis akka nu bultii torba isaan bira turru nu kadhatan. Nus akkasiin Roomaatti galle. ¹⁵ Obbolloonni achi turanis yommuu dhufaati keenya dhaga'anitti hamma iddoo gabaa Aphiyuusiitti fi iddoo "Lafa Bultoo Sadii" jedhamuutti nu simachuu dhufan; Phaawulosis isaan argee Waaqaa galateeffate; ofii isaatiis ni jajjabaate. ¹⁶ Yommuu nu Roomaa geenyetti Phaawulos akka loltuu isa eegu tokko wajjin kophaa isaa jiraatu eeyyamameef.

Phaawulos Eegumsa Jalatti Roomaatti Lallabuu Isaa

¹⁷ Phaawulosis guyyaa sadii booddee dura bu'oota Yihuudootaa walitti waame; yommuu isaan walitti qabamanittis akkana jedheen; "Yaa obboloota ko, ani utuu waan saba keenyaan yookaan duudhaa abbootii keenyaatiin mormu tokko illee hin hojjetin Yerusaleem keessatti qabamee dabarfamee harka warra Roomaatti kennameera. ¹⁸ Isaanis erga na qorani booddee sababii ani yakka du'a namatti mursiisu tokko illee hin qabaatiniif gad na dhiisuu barbaadan. ¹⁹ Ani garuu yoo waan ittiin saba koo himadhu tokko iyyuu hin qabaatin illee yommuu Yihuudoonni mormanitti akka Qeesaaritti ol iyyadhu nan dirqame. ²⁰ Wannani isin arguu fi isin wajjin haasa'uu kadhadheefis kanuma. Ani sababuma abdiis Israa'eliif jedhee foncaa kanaan hidhameera."

²¹ Isaanis akkana jedhanii deebisan; "Nu xalayaa waa'ee kee dubbatu tokko illee biyya Yihuudaatii hin arganne; obboloota achii dhufan keessaas namni tokko iyyuu waa'ee kee waan hamaa hin dubbanne; nuttis hin himne. ²² Nu garuu yaadni kee maal akka ta'e sirraa dhaga'uu barbaanna; nu akka namoonni iddoo hunda jiran garee kanaan morman ni beeknaatii."

²³ Isaanis guyyaa itti Phaawulos wajjin wal argan qabatanii, akka malee baay'atanii lafa inni jiraachaa ture dhaqan; innis ganamaa jalqabee hamma galgalaatti waa'ee mootummaa Waaqaa isaanii ibsa, lallabaas ture; waa'ee Yesuusiis Seera Museetii fi Kitaabota Raajotaa keessaa eeree isaan amansiisuu yaalaa ture. ²⁴ Isaan keessaa warri tokko tokko waan inni jedhe ni fudhatan; warri kaan immoo amanuu didan. ²⁵ Isaan gidduutti wal-dhabii isin uumamnaa ka'anii deemuu jalqaban; kunis erga Phaawulos akkana jedhee dubbii dhumaas dubbate booddee; "Hafuurri Qulqulluun yeroo karaa Isaayyaas raajichaatiin abbootii keessanitti dubbate sana dhugaa isaa dubbate; innis akkana jedhe:

²⁶ "Gara saba kanaa dhaqiitti akkana jedhi;
"Dhaga'uu inuma dhageessu; garuu hin hubattan;
ilaaluus inuma ilaaltu; garuu hin qalbeeffattan."

²⁷ Qalbiin saba kanaa doomeeraatii;
gurri isaanii sirriitti hin dhaga'uu;
ija isaaniis dunuunfataniiru;
utuu akkas ta'uu baatee silaa ija isaaniitiin arganii,
gurra isaaniitiin dhaga'anii,
qalbiin isaaniitiinis hubatanii,

ni deebi'u turan; anis isaan nan fayyisa ture.*

²⁸ "Kanaafuu ani akka fayyisuun Waaqaa gara Namoota Ormaatti ergame akka isin beektan nan barbaada! Isaanis ni dhaga'uu." [²⁹ Yihuudoonnis erga inni waan kana dubbatee booddee jabeessanii waliin mormaa achii deeman.]†

³⁰ Phaawulosis waggaa lama guutuu mana ofii isaatii kireeffate keessa jiraachaa, warra isa dubbisuu dhufan hundas simachaa ture. ³¹ Innis ija jabinaan, gufuu tokko malees mootummaa Waaqaa lallabaa, waa'ee Gooftaa Yesuus Kiristoosis barsiisaa ture.

* 28:27 28:27 Isa 6:9,10 † 28:29 28:29 Hiikkaawwan durii tokko tokko luqqisaa kana hin qaban.

Roomaa

Ergaa Phaawulos Warra Roomaatti Erge

¹ Phaawulos tajaajilaa Kiristoots Yesuus, kan ergamaa ta'uuf waamamee fi akka wangeela Waaqaa lallabuuf addaan baafame irraa: ² Wangeelli kunis kan Waaqni duraan dursee karaa raajota isaatiin Katabbiwwan Qulqulluu keessatti waadaa galee dha. ³ Wangeelichis waa'ee ilma isaa kan akka namummaatti sanyii Daawit irraa dhalatee, ⁴ akka Hafuura qulqullummaatti immoo warra du'an keessaa ka'uu isaatiin Ilma Waaqaa humna qabeessa ta'uun isaa labsamee dha; innis Gooftaa keenya Yesuus Kiristoots. ⁵ Nus karaa isaatiin, maqaa isaatiif jecha ormoota hunda keessaa akka gara ajajamuu amantii irraa dhufuutti namoota waamnuuf ayyaanaa fi ergamtummaa arganneerra. ⁶ Isinis warra akka kan Yesuus Kiristoots ta'aniif waamaman sana keessa jirtu.

⁷ Warra Waaqaan jaallatamtanii qulqulloota ta'uuf waamamtan kanneen Roomaa jirtan hundaaf:

Abbaa keenya Waaqaa fi Yesuus Kiristoots Gooftaa irraa ayyaannii fi nagaan isiniif haa ta'u.

Phaawulos Roomaa Daawwachuuf Hawwu Isaa

⁸ Sababii amantiin keessan guutummaa addunyaa irratti odeeffamaa jiruuf, ani duraan dursee waa'ee hunda keessaniitiif karaa Yesuus Kiristoosin Waaqaa koo nan galateeffadha. ⁹ Akka ani kadhannaa koo keessatti utuu wal irraa hin kutin isin yaadadhu Waaqni ani wangeela Ilma isaa lallabuudhaan hafuura kootiin isa tajaajilu sun dhuga baatuu koo ti; ¹⁰ ani akka ammas dhuma irratti gara keessan dhufuuf fedhii Waaqaatiin karaan naa banamu nan kadhada.

¹¹ Akka isin jabaattaniifis kennaa hafuuraa isinii hiruuf isin arguu baay'ee nan hawwa; ¹² kunis akka isinii fi ani amantii keenyaan wal jajjabeessinuuf. ¹³ Yaa obbolloota ko, ani akkuma Namoota Ormaa kaan keessatti ija qabaadhe sana isin keessattis akkasuma akkan qabaadhuuf yeroo baay'ee gara keessan dhufuu yaadaa turuu ko, garuu hamma ammaatti dhowwamuu koo akka isin beekuu dhabdan hin barbaadu.

¹⁴ Ani namoota Giriikii fi warra nama Giriik hin ta'iniif, beektotaa fi wallaaltotaaf gatii of irraa nan qaba. ¹⁵ Sababiin ani isin warra Roomaa jirtanittis wangeela lallabuuf akka malee hawwuuf kanuma.

¹⁶ Ani wangeelatti hin qaana'u; kunis sababii wangeelli humna Waaqaa kan warra amanana hunda fayyisu ta'eef; innis jalqabatti Yihuudootaaf, itti aansee immoo Giriikotaaf. ¹⁷ Wangeela keessatti qajeelummaan Waaqaa amantii irraa gara amantiitti mul'ateeraatii; kunis akkuma, "Namni qajeelaan amantiidhaan jiraata"* jedhamee barreeffamee dha.

Dheekkamsa Waaqaa

¹⁸ Dheekkamsi Waaqaa, Waaqaa malee jiraachuu fi hammina namootaa hunda irratti samii irraa ni mul'ata; namoonni kunneen hammina isaaniitiin dhugaa ukkaamsu; ¹⁹ kunis sababii wanni waa'ee Waaqaa beekamuu malu isaaniif ifa ta'eef; Waaqni isaaniif ibseeraatii. ²⁰ Amalli Waaqaa kan hin mul'anne jechuunis humni isaa kan bara baraatii fi waaqummaan isaa uumama addunyaatii jalqabee wantoota uumaman irraa ifaan ifatti mul'ataatii; kanaafuu isaan waan itti qabatan hin qaban.

²¹ Isaan yoo Waaqaa beekan illee akka waaqummaa isaatti ulfina hin kennineef; galatas hin galchineef. Garuu yaadni isaanii waan faayidaa hin qabne ta'e; qalbiin isaanii kan hin hubannes ni dukkanaa'e. ²² Isaan yoo ogeeyyii ofiin jedhan iyyuu gowwota ta'an; ²³ ulfina Waaqaa hin duunees nama du'utti, simbiratti, horii miilla afuriitti akkasumas uumamawwan lafa irra loo'anitti fakkeessuudhaan geeddaran.

²⁴ Kanaafuu Waaqni akka isaan dhagna walii isaanii salphisaniif hawwii garaa isaanii hamaadhaan dabarsee xuraa'ummaatti isaan kenne. ²⁵ Isaanis dhugaa Waaqaa sobatti geeddaran; Uumaa dhiisanii uumama waaqeffatan; ni tajaajilanis. Uumaan bara baraan eebbifamaa dha. Ameen.

* 1:17 1:17 Anb 2:4

²⁶ Sababii kanaaf Waaqni dabarsee hawwii jibbisiisaatti isaan kenne. Dubartoonni isaaniis karaa ittiin fedhii fooniitiif dhiira wajjin wal bira ga'an isa uumamaan kennameef dhiisanii, gara isa uumamaan isaaniif hin kennaminitti geeddaran. ²⁷ Warri dhiiraas akkasuma karaa ittiin fedhii fooniitiif dubartoota wajjin wal bira ga'an isa uumamaan kennameef dhiisanii kajeellaa walii isaaniitiin gubatan. Warri dhiiraa, dhiira biraa wajjin gocha jibbisiisaa raawwatan; dogoggora isaanii kanaafis adaba isaaniif malu ofuma isaaniitiin fudhatan.

²⁸ Sababii isaan Waaqa beekuu akka waan faayidaa hin qabneetti fudhataniif, Waaqni immoo akka isaan waan hojjetamuu hin malle hojjetaniif qalbii faayidaa hin qabnetti dabarsee isaan kenne. ²⁹ Isaanis hammina gosa hundaatiin, jal'inaan, sassattummaan, amala baduun, hinaaffaan, nama ajjeesuun, wal loluun, gowwoomsuu fi dabaan guutaman. Isaan hamattoota, ³⁰ warra maqaa nama balleessan, warra Waaqa jibban, warra nama arrabsan, warra of jajanii fi warra of tuulanii dha; isaan warra karaa ittiin jal'ina hojjetan yaadan, warra abbaa fi haadha isaaniitiif hin ajajamnee dha; ³¹ isaan warra hubannaa hin qabne, warra walii galtee diigan, warra jaalala hin qabnee fi warra namaaf garaa hin laafnee dha. ³² Isaan seera Waaqaa kan, "Warra waan akkanaa hojjetan du'uutu isaaniif mala" jedhu sana yoo beekan iyyuu ofii isaaniitiif waan akkanaa hojjechuu qofa utuu hin ta'in warra waan kana hojjetan iyyuu ni jajjabeessu.

2

Murtii Waaqaa Qajeelaa

¹ Kanaafuu yaa namichoo, ati yoo abbaa fedhe illee taate kan nama kaanitti murtu waan itti qabattu hin qabdu; waan ittiin namatti murtu hundaan ofittis ni murtaatii; ati kan murtii kennitu iyyuu ofii keetiis isuma hojjettaatii. ² Nu akka murtiin Waaqaa kan warra waan akkanaa hojjetan irratti murteeffamu dhugaa irratti hundaa'e ni beekna. ³ Yaa namichoo, ati yommuu warra waan akkanaa hojjetanitti murtee ofii keetii immoo waanuma akkasii hojjetu waan murtii Waaqaa jalaa baatu seetaa? ⁴ Yookaan ati akka gara laafummaan Waaqaa gara qalbii jijjiirrannaatti si geessu utuu hin beekin baay'ina gara laafummaa isaa, gara bal'ina isaatii fi obsa isaa ni tuffattaa?

⁵ Ati garuu sababii mata jabina keetiitii fi garaa kee isa qalbii hin jijjiirranne sanaatiif guyyaa dheekkamsa Waaqaa kan murtiin qajeelaan itti mul'atu sanaaf dheekkamsa of irratti kuusaa jirta. ⁶ Waaqni, "Nama hundaaf akkuma hojii isaatti gatii isaa ni kenna."* ⁷ Inni warra obsaan waan gaarii hojjechaa kabaja, ulfinaa fi jireenya hin dabarre barbaadaniif jireenya bara baraa ni kenna. ⁸ Warra ofitto kanneen dhugaadhaaf ajajamuu didanii hammina duukaa bu'an garuu dheekkamsaa fi aariitu isaan eeggata. ⁹ Nama hammina hojjetu hunda irratti, jalqabatti Yihuudii irratti, ergasii immoo Nama Ormaa irratti dhiphinnii fi rakkinni ni dhufa. ¹⁰ Garuu nama waan gaarii hojjetu hundaaf, jalqabatti Yihuudiiif, ergasii immoo Nama Ormaatiif kabajni, ulfinnii fi nagaan ni ta'a. ¹¹ Waaqni nama wal hin caalchisuutii.

¹² Warri utuu seera hin qabaatin cubbuu hojjetan hundinuu seera malee barbadaa'u; warra utuu seera qabanuu cubbuu hojjetan hundattis seeruma sanaan murama. ¹³ Sababiin isaas warra seeraaf ajajamanitu fuula Waaqaa duratti qajeeltota taasifama malee warri seera dhaga'an qajeeltota miti. ¹⁴ Namoonni Ormaa waari seera hin qabne yoo uumamaan waan seerri ajaju hojjetan, yoo seera qabaachuu baatan illee isaan ofii isaaniitiifuu seera. ¹⁵ Isaan waan qalbiin isaanii dhugaa ba'uuf, waan yaadni isaaniis yeroo tokko isaan himatee yeroo kaan immoo isaaniif falmuuf, akka ajajni seera gara isaaniis keessatti barreeffame ni argisiisu. ¹⁶ Akka wangeela ani lallabuutti wanni kun gaafa Waaqni icciitii namootaa karaa Yesuu Kiristoosiin murtii itti kennutti ta'a.

Yihuudootaa fi Seera

¹⁷ Ati yoo Yihuudii ofiin jette, yoo seera amanatte, yoo kan Waaqaanis of jajju taate, ¹⁸ yoo fedhii isaa beekte, yoo seera sanaanis qajeelfamtee waan hunda caalu mirkaneeffatte, ¹⁹ warra jji isaanii jaameef dura deemaa, warra dukkana keessa jiraniif immoo ifa ta'uu kee yoo amante, ²⁰ karaa seeraatiinis beekumsaa fi dhugaa qabduun yoo wallaaltota gorsite, daa'immanis yoo barsiifte, ²¹ egaa ati kan warra kaan barsiiftu, ofii kee immoo hin barsiiftuu? Kan "Hin hatin" jettee barsiiftu ofii keetii immoo ni hattaa? ²² Ati kan, "Namni ejjuu hin qabu" jettu ofii keetii ni ejjittaa? Kan waaqota tolfamoo akka malee jibbitu mana qulqullummaa ni saamtaa? ²³ Ati kan Seeraan of jajju seera cabsuudhaan Waaqa ni salphiftaa? ²⁴ "Sababii keessaniif maqaan Waaqaa Namoota Ormaa gidduutti arrabsama"† jedhamee barreeffameeraatii.

* 2:6 2:6 Far 62:12; Fak 24:12 † 2:24 2:24 Isa 52:5; His 36:22

²⁵ Yoo ati seera eegde dhagna qabaan faayidaa qaba; yoo seera cabsite garuu akka waan dhagna hin qabatini taateerta. ²⁶ Warri dhagna hin qabatin yoo waan seerri ajaju eegan, akka waan dhagna qabataniitti hin ilaalamanii ree? ²⁷ Namni utuu fooniin dhagna hin qabatin seera eegu tokko si nama seera barreeffame qabaattee dhagnas qabattee seera cabsitutti ni mura.

²⁸ Namni waan alaan mul'atu qofaan Yihuudii hin ta'u; dhagna qabachuunis waan alaan mul'atu qofa miti. ²⁹ Garuu nama keessa namummaa isaatiin Yihuudii ta'etu Yihuudii dha; dhagna qabaanis dhagna qabaa yaada garaa kan Hafuuraan ta'uudha malee seera barreeffameen miti. Namni akkasii Waaqa biratti malee nama biratti hin jajamu.

3

Amanamummaa Waaqaa

¹ Egaa Yihuudii ta'uun faayidaa maalii qaba? Yookaan bu'aan dhagna qabaa maalii? ² Karaa hundaanuu bu'aa guddaa qaba! Jalqabatti dubbiin Waaqaa Yihuudootatti imaanaa kenname.

³ Isaan keessaa tokko tokko yoo hin amanin maal ree? Amantii dhabuun isaanii amanamummaa Waaqaa ni balleessaa? ⁴ Gonkumaa hin ta'u! Namoonni hundinuu sobdoota, Waaqni immoo dhugaa qabeessa haa ta'u. Kunis akkuma, "Akka ati dubbii keetiin dhuga qabeessa taatuuf,

yommuu murtiitti dhi'aattuttis akka mo'attuuf"*

jedhamee barreeffamee dha. ⁵ Yoo jal'inni keenya qajeelina Waaqaa ifa baase garuu maal jenna ree? Waaqni dheekkamsa isaa nutti fiduun isaa qajeelina dhabeetii? Kanas ani akka namaattin dubbadha. ⁶ Gonkumaa hin ta'u! Utuu akkas ta'ee silaa Waaqni akkamitti addunyaatti muruu danda'a ree? ⁷ Namni tokko, "Yoo soba kootiin dhuga qabeessummaan Waaqaa guddatee ulfinni isaas baay'ate maaliif hamma ammaatti akka cubbamaa tokkootti natti murama ree?" jedhee falma ta'a. ⁸ Kunis isa namoonni tokko tokko, "Isaan, 'Akka wannii gaariin dhufuuf hammina haa hojjennu?' jedhu" jedhanii nurratti odeessisani dha. Murtiin isaanitti muramus waanuma maluu dha!

Namni Kam iyyuu Qajeelaa miti

⁹ Egaa maal jenna ree? Nu Yihuudoonni warra kaan caallaa? Gonkumaa akkas miti! Akka Yihuudoonnii fi Giriikonni hundinuu cubbuu jala jiran duraan dursinee mirkaneeessineerraatii. ¹⁰ Kunis kan akkana jedhamee barreeffamee dha: "Qajeelaan tokko iyyuu hin jiru; namni tokko iyyuu;

¹¹ namni hubannaa qabu,
kan Waaqa barbaadu tokko iyyuu hin jiru.

¹² Hundinuu dogoggoraniiru;
walumatti warra faayidaa hin qabne ta'aniiru;
namni waan gaarii hojjetu tokko iyyuu hin jiru;
tokkumti iyyuu hin jiru."†

¹³ "Laagaan isaanii awwaala banamaa dha;
arraba isaaniitiin ni gowwoomsu."‡

"Hadhaan buutii hidhii isaanii jala jira."§

¹⁴ "Afaan isaanii abaarsaa fi hadhaa'ummaan guutame."*

¹⁵ "Miilli isaanii dhiiga dhangalaasuutti ariifata;

¹⁶ badiisaa fi gadadootu karaa isaanii irra jira;

¹⁷ karaa nagaas hin beekan."‡

¹⁸ "Waaqa sodaachuun ija isaanii dura hin jiru."‡

¹⁹ Akka afaan hundi cufamuu fi akka addunyaan hundinuu murtii Waaqaa jala galuuf, wannii seerri jedhu hundinuu akka warra seera jala jiraniif dubbatu ni beekna. ²⁰ Kanaafis eenyu iyyuu seera eeguudhaan fuula Waaqaa duratti qajeelaa hin ta'u; seeratu cubbuu nu hubachiisaatii.

Qajeelummaa Amantiin Argamu

²¹ Amma garuu qajeelummaan Waaqaan kennamu kan seeraan adda ta'e, kan Seerrii fi Raajonni dhugaa ba'aniif mul'ateera. ²² Qajeelummaan Waaqaa kun amantiidhaan warra Yesuus Kiristoositti amanan hundaaf kenname; nama wal caalchisuun hin jiru;

* 3:4 3:4 Far 51:4 † 3:12 3:12 Far 14:1-3; 53:1-3; Lal 7:20 ‡ 3:13 3:13 Far 5:9 § 3:13 3:13 Far 140:3 * 3:14 3:14 Far 10:7 † 3:17 3:17 Isa 59:7,8 ‡ 3:18 3:18 Far 36:1

²³ sababii hundi isaanii iyyuu cubbuu hojjetaniif isaan ulfina Waaqaa irraa citaniiruutii; ²⁴ isaanis ayyaana Waaqaa isa furama karaa Kiristoos Yesuusiin toluma kennameefiin qajeeltota taasifamaniiru. ²⁵ Dhiiga isaatti amanti qabaachuudhaanis akka inni aarsaa araraa ta'uuf Waaqni isa dhi'esse. Waan kana gochuun isaas cubbuu kanaan dura hojjetame utuu hin adabin waan obsaan bira darbeef qajeelina isaa argisiisuuf jedhee ti; ²⁶ Waaqni yeroo ammaa qajeelummaa isaa argisiisu fi akka nama Yesuusitti amanus qajeelaa ta'uu isaa labsuuf waan kana godhe.

Seerri Kennamuu Isaa

²⁷ Yoos of tuuluun eessa jira ree? Inni hafeera. Seera kamiin? Seera eeguudhaan moo? Miti; seera amantiitiin malee. ²⁸ Nu akka namni seera eeguudhaan utuu hin ta'in amantiidhaan qajeelaa taasifamu ni amannaatii. ²⁹ Waaqni Waaqa Yihuudootaa qofa moo? Inni Waaqa Namoota Ormaas mitii? Eeyyee, inni Waaqa Namoota Ormaatis; ³⁰ egaa kan dhagna qabates amantiin, kan dhagna hin qabatinis amantiidhuma sanaan qajeelaa kan taasisu Waaquma tokkicha. ³¹ Yoos nu amanti kanaan seera sana cabsinaa ree? Gonkumaa akkas miti! Seericha ni cimsina malee.

4

Abrahaam Amantiidhaan Qajeelaa Ta'e

¹ Egaa Abrahaam inni fooniin abbaa keenya ta'e sun haala kanaan maal argate jenna ree? ² Abrahaam utuu hojiin qajeelaa taasifamee jiraatee silaa waan ittiin of jaju qabature; fuula Waaqaa duratti garuu akkas miti. ³ Katabbiin Qulqulluun maal jedha? "Abrahaam Waaqa amane; kunis qajeelummaatti lakkaa'ameef."*

⁴ Nama hojjetu tokkoof Mindaan gatiidha malee akka kenna tolaatti hin hedamu. ⁵ Ta'us nama hin hojjenne, kan Waaqa isa nama hamaa qajeelaa taasisu amanatu garuu amantiin isaa qajeelummaatti lakkaa'amaaf. ⁶ Daawitis akka namni Waaqni qajeelummaa hojii malee argamu lakkaa'uuf eebbifamaa ta'e yommuu dubbatu akkana jedha:

⁷ "Warri yakki isaanii dhiifameef,
kanneen cubbuun isaanii
haguugameef eebbifamoo dha.

⁸ Namni Gooftaan cubbuu isaa itti
hin lakkoofne eebbifamaa dha."†

⁹ Eebbi kun warra dhagna qabatan qofaaf moo warra dhagna hin qabatiniifis? Abrahaamiif amantiin isaa qajeelummaatti lakkaa'ame jenneerraatii. ¹⁰ Kun egaa akkamitti isaaf lakkaa'ame ree? Erga inni dhagna qabatee moo duraanii? Durumaan malee erga dhagna qabate miti! ¹¹ Inni mallattoo dhagna qabaa fudhate; kunis chaappaa qajeelummaa inni utuu dhagna hin qabatin dura amantiin argate sanaa ti. Kanaafis inni warra utuu dhagna hin qabatin amanann kanneen amantiin isaanii qajeelummaatti lakkaa'ameef hundaaf abbaa dha. ¹² Akkasumas inni warra dhagna qabataniif, dhagna qabachuu qofas utuu hin ta'in warra karaa amanti abbaan keenya Abrahaam utuu dhagna hin qabatiniin dura fudhate sana duukaa bu'an hundaaf abbaa dha.

¹³ Abrahaamii fi sanyiin isaa waadaa akka inni dhaaltuu addunyaa ta'u kenname sana karaa qajeelummaa amantiin dhufuutiin argatan malee karaa seeraatiin miti. ¹⁴ Yoo warri seeratti bulan dhaaltota ta'an, amantiin gatii hin qabu; waadaanis homaa hin fayyaduutii; ¹⁵ kunis sababii seerri dheekkamasa fiduuf. Lafa seerri hin jirre yakki hin jiruutii.

¹⁶ Kanaafuu waadaan kun akka ayyaanaan ta'uu fi akka sanyii isaa hundaaf wabii ta'uuf amanti irratti hundeeffame; innis warra akka Abrahaam amananiif malee warra seeratti bulan qofaaf miti; Abrahaam abbaa hunduma keenyaa ti. ¹⁷ Kunis akkuma, "Ani abbaa saboota baay'ee si taasisera"‡ jedhamee barreeffamee dha. Abrahaam Waaqa amanate; innis Waaqa warra du'aniif jireenya kennuu fi isa waan hin jirre akka waan jiruutti waamu sana duratti abbaa keenya.

¹⁸ Abrahaamis akkuma, "Sanyiin kee akkas ni ta'a"§ jedhametti utuu abdiin tokko iyyuu hin jiraatin abdiidhaan amanee abbaa saboota baay'ee ta'e. ¹⁹ Innis akka umuriin isaa gara waggaa dhibbaa ga'ee dhagni isaa du'e, akkasumas akka gadameessi Saaraa du'e beeku illee amanti isaatti hin laafne. ²⁰ Inni amanti isaatti jabaachuun Waaqaaf ulfina kenne malee amanti dhabuun waadaa Waaqaa hin shakkine; ²¹ akka Waaqni waan waadaa gale raawwachuu danda'us guutumaan guutuutti hubateera. ²² Kanaafuu, "Amantiin isaa qajeelummaatti isaaf lakkaa'ame." ²³ Dubbiin, "Qajeelummaatti isaaf

* 4:3 4:3 Uma 15:6 † 4:8 4:8 Far 32:1,2 ‡ 4:17 4:17 Uma 17:5 § 4:18 4:18 Uma 15:5

lakkaa'ame" jedhu kun Abrahaam qofaaf hin barreeffamne; ²⁴ nuufis, warra Waaqa Gooftaa keenya Yesuus warra du'an keessaa kaase sanatti amannuufis, qajeelummaatti ni lakkaa'ama. ²⁵ Yesuus cubbuu keenyaaf dabarfamee du'atti kenname; qajeeltota nu taasisuuf immoo du'aa kaafame.

5

Nagaa fi Gammachuu

¹ Kanaafuu amantiidhaan qajeeltota erga taasifamnee nu karaa Gooftaa keenya Yesuus Kiristoosiin Waaqa wajjin nagaa qabna. ² Ayyaana amma jabaannee ittiin dhaabannu kanattis karaa isaatiin amantiin galuuf carraa arganneerra. Abdii ulfina Waaqaattis ni gammanna. ³ Kana qofa miti; nu dhiphina keenyattis ni gammanna; akka dhiphinni obsa fidu ni beeknaatii; ⁴ obsi jabaatanii dhaabachuu, jabaatanii dhaabachuun immoo abdiif fida. ⁵ Jaalalli Waaqa karaa Hafuura Qulqulluu nuu kennamee sanaatiin garaa keenya keessatti waan dhangalaafameef abdiin nu hin qaanessu.

⁶ Utuu nu amma illee dadhabdoota taanee jirruu yeroo malutti Kiristoos cubbamootaaf jedhee du'e. ⁷ Yoo namni tokko nama gaariif du'uuf ija jabaachuu danda'e iyyuu, namni nama qajeelaaf du'u akka malee muraasa. ⁸ Garuu utuma nu cubbamoota taanee jirruu Kiristoos nuuf jedhee du'e; kunis jaalala Waaqni nuuf qabu argisiisa.

⁹ Egaa nu amma erga dhiiga isaatiin qajeeltota taasifamnee, akkam karuma isaatiin dheekkamsa Waaqaa jalaa hin baane ree! ¹⁰ Nu utuu diinota Waaqaa taanee jirruu erga du'a ilma isaatiin isatti araaramnee, erga isatti araaramnee boodde immoo hammam caalaa jireenya isaatiin hin fayyinu ree! ¹¹ Kana qofa miti; nu garuu Gooftaa keenya Yesuus Kiristoos isa ittiin amma araara arganne sanaan Waaqatti ni gammanna.

Duuti Addaamiin, Jireenyi Immoo Kiristoosiin Dhufe

¹² Kanaaf akkuma cubbuun karaa nama tokkootiin addunyaa seene, duuti immoo karaa cubbuutiin seene; sababii namni hundinuu cubbuu hojjeteeffis duuti nama hundatti dhufe.

¹³ Utuu seerri hin kennaminiin dura iyyuu cubbuun addunyaa keessa tureetii; yeroo seerri hin jirretti garuu cubbuun hin lakkaa'amu. ¹⁴ Ta'us duuti bara Addaam irraa jalqabee hamma bara Museetti warra dogoggora akka Addaam hin hojjetin irratti illee mo'ee ture; Addaamis Isa dhufuuf jiru sanaaf fakkeenya ture.

¹⁵ Kennaan tolaa sun garuu akka balleessaa sanaa miti. Erga sababii balleessaa nama tokkootiin namoonni baay'een du'anii, ayyaanni Waaqaatii fi kennaan karaa ayyaana nama tokkootiin jechuunis kennaan karaa Yesuus Kiristoosiitiin dhufe sun immoo hammam caalaa namootaaf haa baay'atu ree! ¹⁶ Kennaan Waaqaa miidhaa cubbuun namni tokko hojjetee fiduun tokko miti: Murtiin cubbuu tokkichaaf kenname yakkamtummaa fideera; kennaan tolaa kan balleessaa baay'ee irratti kenname garuu qajeelummaa fide. ¹⁷ Erga sababii balleessaa nama tokkootiin karaa namicha sanaatiin duuti mo'ee, warri ayyaana baay'atee irraa hafaa ta'ee fi kenna qajeeltota nama taasisu argatan immoo karaa nama tokkoo karaa Yesuus Kiristoosiitiin hammam caalaa jireenyaan hin mo'an ree!

¹⁸ Kanaafuu akkuma balleessaan tokko nama hundatti yakka mursiise, akkasuma immoo hojiin qajeelummaa tokko nama hundaaf qajeelummaa jireenya fidu ta'e. ¹⁹ Akkuma ajajamuu diduu nama tokkootiin namoonni baay'een cubbamoota ta'an, akkasuma immoo ajajamuu nama tokkootiin namoonni baay'een qajeeltota ni taasi-famu.

²⁰ Seerris akka cubbuun baay'atuuf dhufe. Lafa cubbuun baay'atetti garuu ayyaanni akka malee baay'ate; ²¹ kunis akkuma cubbuun karaa du'aatiin mo'ee sana ayyaannis karaa Gooftaa keenya Yesuus Kiristoosiitiin akka jireenya bara baraa fiduuf karaa qajeelinaatiin akka mo'uuf.

6

Cubbuuf Du'uu, Kiristoosiin Immoo Jiraachuu

¹ Egaa maal jenna ree? Akka ayyaanni baay'atuuf ittuma fufnee cubbuu haa hojjennuu? ² Gonkumaa hin ta'uu! Nu warri cubbuuf duune, si'achi akkamitti cubbuu jala jiraanna? ³ Yookaan nu warri Kiristoos Yesuusitti cuuphamne hundi akka du'a isaattis cuuphamne isin hin beektanii? ⁴ Kanaafuu akkuma Kiristoos ulfina Abbaatiin warra du'an keessaa kaafame sana nus akka jireenya haaraa jiraannuuf cuuphaadhaan du'a isaa keessatti hirmaannee isa wajjin awwaalanne.

⁵ Nu erga du'a isaatiin akkasitti isa wajjin tokko taane, du'aa ka'uu isaatiinis akkasuma isa wajjin tokko ni taana. ⁶ Akka dhagni cubbamaan balleffamuuf, nus akka si'achi garboota cubbuu hin taaneef akka namummaan keenya moofaan sun isa wajjin fannifame ni beekna; ⁷ namni du'e cubbuu irraa bilisoomeraatii.

⁸ Egaa nu yoo Kiristoos wajjin duune, akka isa wajjin jiraannus ni amanna. ⁹ Kiristoos warra du'an keessaa waan ka'eef, akka inni deebi'ee hin duune ni beeknaatii; duutis si'achi isa irratti gooftummaa hin qabu. ¹⁰ Inni du'a du'e sana si'a tokko yeroo hundaaf cubbuuf du'e; jireenya jiraatu sana garuu Waaqaaf jiraata.

¹¹ Isinis akkasuma akka cubbuuf duutanitti, Kiristoos Yesuusiin garuu akka Waaqaaf jiraattota taatanitti of hedaa. ¹² Kanaafuu isin akka fedhii isaa hamaadhaaf hin ajajamneef dhagna keessan kan du'a hin oolle irratti cubbuu hin moosisinaa. ¹³ Akka warra du'a irraa gara jireenyaatti fidamaniitti Waaqaaf of dhi'eessaa malee kutaa dhagna keessanii mi'a jal'inaa gootanii cubbuuf hin dhi'eessinaa; garuu kutaa dhagna keessanii mi'a qajeelinaa godhaatii Waaqaaf dhi'eessaa. ¹⁴ Isin ayyaana jala jirtu malee waan seera jala hin jirreef, cubbuun isin irratti gooftummaa hin qabaatu.

Garboota Qajeelummaa Ta'uu

¹⁵ Egaa maal haa ta'u ree? Nu sababii ayyaana jala malee seera jala hin jirreef cubbuu haa hojjennuu? Gonkumaa hin ta'u! ¹⁶ Cubbuu gara du'aatti nama geessuufis ta'u yookaan ajajamuuf gara qajeelummaatti nama geessuuf, yommuu akka garbootaatti nama tokkoof ajajamuuf of kennitanitti, nama ajajamtaaniif sanaaf akka garboota taatan hin beektanii? ¹⁷ Isin yoo garboota cubbuu turtan illee amma garuu barumsa itti kennamtan sanaaf waan garaa guutuun ajajamtaniif Waaqaaf galanni haa ta'u. ¹⁸ Isin cubbuu irraa bilisoomtanii garoo qajeelummaa taataniirtu.

¹⁹ Sababii isin uumamaanuu dadhaboo taataniif ani jecha namaa galuun nan dubbadha; akkuma kutaa dhagna keessanii xuraa'ummaa fi hammina guddachaa deemuuf garba gootanii dhi'eessaa turtan sana ammas kutaa dhagna keessanii qajeelummaa gara qulqullummaatti geessuuf garba godhaatii dhi'eessaa. ²⁰ Isin yeroo garboota cubbuu turtanitti, qajeelummaa irraa bilisa turtan. ²¹ Waan amma itti qaanoftan kana irraa yeroo sana bu'aa maalii argattan ree? Dhumni waan sanaa du'aatii! ²² Amma garuu waan cubbuu irraa bilisoomtanii garboota Waaqaa taataniif faayidaan isin argattan gara qulqullummaatti isin geessa; dhumni isaas jireenya bara baraa ti. ²³ Mindaan cubbuu du'aatii; kennaan Waaqaa garuu karaa Gooftaa keenya Kiristoos Yesuusiin jireenya bara baraa ti.

7

Fakkeenya Fuudhaa fi Heerumaa

¹ Yaa obboloota, ani warra seera beekanitti nan dubbadhaatii; seerri nama tokko irratti taayitaa kan qabaatu hamma namichi sun lubbuun jiru gofa akka ta'e isin hin beektanii ree? ² Dubartiin heerumte tokko hamma inni lubbuudhaan jirutti seeraan dhirisa isheetti hidhanteerti; yoo dhirsi ishee du'e garuu seera fuudhaa fi heerumaa sana irraa hiikamteerti. ³ Kanaafuu utuu dhirsi ishee lubbuudhaan jiruu yoo nama biraatti heerumte isheen ejjittuu jedhamti. Yoo dhirsi ishee du'e garuu waan seera sana irraa hiikamteef yoo nama biraatti heerumte illee ejjitu miti.

⁴ Kanaafuu yaa obboloota ko, isinis akkasuma karaa dhagna Kiristoosiin seeraaf duutaniirtu; kunis akka isin kan biraa, kan isa warra du'an keessaa kaafame sanaa taataniif; kun immoo akka nu Waaqaaf ija naqannuuf. ⁵ Yeroo nu akka namummaa cubbamaatti jiraachaa turretti, hawwiin cubbuu kan seeraan kakaafame sun akka nu du'aaf ija naqannuuf dhagna keenya keessatti hojjechaa ture. ⁶ Amma garuu waan duraan nu hidhee ture sanaaf du'uudhaan seera irraa hiikamneerra; kunis akka seera moofaa barreeffame sana jalatti tajaajilluuf utuu hin ta'in akka jireenya Hafuuraa haaraa sanaan tajaajilluuf.

Seeraa fi Cubbuu

⁷ Egaa maal jenna ree? Seerri cubbuudhaa? Gonkumaa akkas miti! Garuu ani utuu seeraan ta'uu baatee cubbuun maal akka ta'e hin beeku ture. Utuu seerri "Hin hawwiin" jechuu baatee ani silaa hawwiin maal akka ta'e dhugumaan hin beeku ture. ⁸ Cubbuun garuu carraa ajajni argamsiiseen hawwii hamaa gosa hundaa kan keessatti uume. Lafa seerri hin jirretti cubbuun du'aadhaatii. ⁹ Ani dur seera malee jiraachaan ture; yommuu ajajni dhufetti garuu cubbuun ni bayyanatte; anis nan du'e. ¹⁰ Ajajni jireenya fida jedhamee eegame sunis akka du'a natti fide nan hubadhe. ¹¹ Cubbuun

* 7:7 7:7 Bau 20:17; KeD 5:21

carraa ajajni argamsiiseen na gowwoomse; ajajuma sanaanis na ajjeese. ¹² Kanaafuu seerri qulqulluu dha; ajajni sunis qulqulluu dha; qajeelaa dha; gaarii dhas.

¹³ Egaa waan gaarii sanatu du'a natti ta'ee ree? Gonkumaa akkas miti! Cubbuunis akka cubbuutti akka ilaalamuuf, akka karaa ajajaatiin ittuma caalee cubbuu ta'uufis cubbuun karaa waan gaarii sanaatiin du'a natti fide.

¹⁴ Nus akka seerri sun seera hafuura ta'e ni beekna; ani garuu nama foonii kan akkuma garbaatti cubbuutti gurguramee dha. ¹⁵ Ani waanan hojjedhu hin beeku. Ani waanan jibbun hojjedha malee waanan hojjechuu barbaadu hin hojjedhuutii. ¹⁶ Ani erga waanan hojjechuu hin barbaanne hojjedhee, akka seerri sun gaarii ta'e walii nan gala. ¹⁷ Yoo, si'achi cubbuu na keessa jiraatutu waan kana hojjeta malee ana miti. ¹⁸ Na keessa jechuunis namummaa koo cubbamaa keessa akka wanni gaariin tokko iyyuu hin jirre nan beeka. Ani waan gaarii hojjechuu nan hawwa; garuu hojjechuu hin danda'u. ¹⁹ Wanti ani hojjedhu waan hamaa ani hojjechuu hin barbaanne malee waan gaarii ani hojjechuu barbaadu mitiitii. ²⁰ Egaa ani waanan hojjechuu hin barbaanne yoon hojjedhe, si'achi cubbuu na keessa jiraatu sanatu waan kana hojjeta malee ana miti.

²¹ Kanaafuu akka seerri sun hojjechaa jiru nan hubadha; yommuu ani waan gaarii hojjechuu barbaadu hamminni na biratti argama. ²² Ani keessa namummaa kootti seera Waaqaatiin nan gammadaatii; ²³ ani garuu utuu seerri biraa seera qalbii koo wajjin kutaa dhagna koo keessatti wal lolee seera cubbuu kan kutaa dhagna koo keessa jiruuf na booji'uu nan arga. ²⁴ Ani nama gadadamaa akkamii ti! Dhagna du'u kana jalaa eenyutu na baasa? ²⁵ Karaa Gooftaa keenya Yesuus Kiristoosiin galanni Waaqaaf haa ta'ul!

Kanaafuu ani mataan koo qalbii kootiin garbicha seera Waaqaa ti; namummaa koo cubbamaadhaan garuu ani garbicha seera cubbuu ti.

8

Hafuura Jireenyaa

¹ Egaa amma murtiin warra Kiristoos Yesuus keessa jiraatanitti muramu hin jiru; ² seerri Hafuura jireenyaa karaa Kiristoos Yesuusiin seera cubbuutii fi seera du'aa jalaa na bilisoomseeraatii. ³ Waan seerri sababii fooniitiin dadhabsiifameef hojjechuu hin danda'in, Waaqni Ilma ofii isaa bifa foon cubbamaatiin aarsaa cubbuu akka ta'uuf erguun hojjetee raatii. Kanaanis inni fooniin cubbuutti mure. ⁴ Kunis akka qajeelummaan seera sun nu warra utuu akka namummaa cubbamaatti hin ta'in akka Hafuuraatti jiraannu keessatti raawwatamuufii dha.

⁵ Warri akka fooniitti jiraatan waan foonii yaadu; warri akka Hafuuraatti jiraatan garuu waan Hafuura yaadu. ⁶ Yaadni foonii du'a; yaadni Hafuura garuu jireenyaa fi nagaa dha. ⁷ Yaadni foonii diina Waaqaa ti; seera Waaqaatiifis hin bulu. Buluus hin danda'u. ⁸ Warri akka fooniitti jiraatan Waaqa gammachiisuu hin danda'an.

⁹ Isin garuu yoo Hafuurri Waaqaa isin keessa jiraate akka Hafuuraatti jiraattu malee akka fooniitti hin jiraattan. Eenyu iyyuu yoo Hafuura Kiristoos qabaachuu baate inni kan Kiristoos miti. ¹⁰ Yoo Kiristoos isin keessa jiraate garuu dhagni keessan sababii cubbuutiin du'aa dha; hafuurri keessan immoo sababii qajeelummaatiin jiraataa dha. ¹¹ Hafuurri Waaqaa inni Yesuus warra du'an keessaa kaase sun yoo isin keessa jiraate garuu, inni Kiristoos Yesuus warra du'an keessaa kaase sun karaa Hafuura isaa kan isin keessa jiruutiin dhagna keessan isa du'uufis jireenya kenna.

¹² Egaa yaa obbolloota, nu gatii of irraa qabna; garuu fooniif miti; akka fooniitti jiraachuufis miti. ¹³ Isin yoo akka fooniitti jiraattan ni duutuutii; yoo Hafuuraan hojji foon keessanii ajjeefatan garuu ni jiraattu.

¹⁴ Warri Hafuura Waaqaatiin qajeelfaman hundinuu ilmaan Waaqaatii. ¹⁵ Isin Hafuura ilmummaa isa nu ittiin, "Aabbaa, yaa Abbaa" jennee waammannu sana argattan malee Hafuura garbummaa kan gara sodaatti isin deebisu hin arganne. ¹⁶ Akka nu ijoollee Waaqaa taane kan hafuura keenya wajjin dhugaa ba'us Hafuuruma sana. ¹⁷ Yoo ijoollee taane immoo nu dhaaltota; akka hirmaattota ulfina isaa taanuufis yoo hirmaattota dhiphina isaa taane, nu dhaaltota Waaqaa ti; Kiristoos wajjinis ni dhaalla.

Ulfina Fuul duraa

¹⁸ Dhiphinni keenya kan ammaa kun ulfina nutti mul'achuuf jiruun yommuu wal bira qabamu akka waan tokkottuu hin lakkaa'amne ani nan yaada. ¹⁹ Uumamni mul'achuu ijoollee Waaqaa hawwiidhaan eeggachaa jira. ²⁰ Uumamni utuu filannoo isaatiin hin ta'in, fedhii isa dabarsee isa kenne sanaatiin abdiidhaan waan faayidaa hin qabnetti saaxilameeraatii; ²¹ kunis akka uumamni mataan isaa garbummaa tortoruu jalaa ba'ee bilisummaa ulfina qabeessa ijoollee Waaqaatti galuuf.

²² Uumamni hundinuu hamma ammaatti akkuma dhiphina yeroo ciniinsuutti akka aadaa jiru ni beekna. ²³ Uumama qofa utuu hin ta'in nu mataan keenya warri ija Hafuura kan jalqabaa qabnu iyyuu furii dhagna keenyaa ilmummaatti guddifamuu eeggachaa of keessatti ni aadna. ²⁴ Nu abdii kanaan fayyineetii. Abdiin argamu garuu abdii miti; namni waan amma iyyuu qabu abdatu eenyu ree? ²⁵ Nu yoo waan amma hin qabne abdanne garuu obsaan eegganna.

²⁶ Akkasumas Hafuurri dadhabbi keenya irratti nu gargaara. Nu waan kadhachuu qabnu hin beeknuutii; hafuurri mataan isaa garuu aaduu ibsamuu hin danda'amneen nuuf kadhata. ²⁷ Inni garaa keenya qoru sun yaada Hafuuraas ni beeka; Hafuurri akka fedhii Waaqaatti qulqullootaaf kadhataatii.

Mo'attoota Caaluu

²⁸ Waaqni warra isa jaallatanii akka kaayyoo isaatti waamamaniif akka wanti hundinuu gaarii ta'uuf hojjetu ni beekna. ²⁹ Akka inni obboolota baay'ee keessatti hangafa ta'uuf Waaqni warra duraan dursee beeke akka bifa ilma isaa fakkaataniif duraan dursee murteesseeraatii. ³⁰ Inni warra duraan dursee murteesse sana ni waame; warra waame sanas qajeeltota taasise; warra qajeeltota taasiseef immoo ulfina kenne.

³¹ Egaa kana irratti maal jenna ree? Erga Waaqni nu wajjin ta'ee eenyutu nuun mormuu danda'a? ³² Waaqni ilma isaa illee utuu hin mararfatin hunduma keenyaaf dabarsee kenne sun akkamitti waan biraa hundumas isa wajjin akkasuma arjummaan nuuf hin kennu ree? ³³ Warra Waaqni filate eenyutu himata? Kan qajeelaa nama taasisu Waaqa. ³⁴ Kan itti muru eenyu? Kiristoos Yesuus isuma nuuf du'ee, kana caalaa immoo warra du'an keessaa ka'ee mirga Waaqaa jiruu fi nuuf kadhatu sanaa dha. ³⁵ Jaalala Kiristoos irraa eenyutu gargar nu baasa? Dhiphina moo rakkina, ari'atama moo beela, daaruu moo balaa yookaan goraadee? ³⁶ Kunis akkuma, "Nu siif jennee guyyaa guutuu ni ajjeefamna;

akka hoolota qalamuuf jiraniittis lakkaa'amneerra"* jedhamee barreeffamee dha. ³⁷ Kana hunda keessatti garuu nu isa nu jaallate sanaan mo'attoota ni caalla. ³⁸ Duuti yookaan jireenyi, ergamoonna yookaan bulchitoonni, hangafoonni, wanni ammaa yookaan wanni dhufuuf jiru yookaan humni tokko iyyuu, ³⁹ ol dheerinni yookaan gad fageenyi yookaan uumamni biraa kam iyyuu jaalala Waaqaa kan Kiristoos Yesuus Gooftaa keenyaa irraa akka gargar nu baasuu hin dandeenye ani amaneera.

9

Filannoo Waaqaa

¹ Ani Kiristoosiin dhugaa nan dubbadha; ani hin sobu; yaadni koos Hafuura Qulqulluudhaan naa mirkaneessa; ² ani gadda guddaa fi dhiphina wal irraa hin cinne garaa koo keessaa qaba. ³ Ani iyyuu obboolota koo warra akka fooniitti sanyii koo ta'aniif jedhee utuu Kiristoos irraa gargar ba'ee abaaramee nan hawwa tureetii; ⁴ isaan saba Israa'el. Ilmummaan, ulfinni, kakuun, seera fudhachuun, tajaajiluu fi waadaan kan isaanii ti. ⁵ Abbootiin kan isaanii ti; Kiristoosis* isaan irraa fooniin dhalate; inni waan hunda irratti Waaqa; inni bara baraan haa eebbifamu! Ameen.

⁶ Kun garuu dubbiin Waaqaa diigameera jechuu miti. Kan Israa'el irraa dhalate hundi Israa'el miti. ⁷ Yookaan isaan sababii sanyii Abrahaam ta'aniif hundi isaanii ijoollee isaa miti. Garuu, "Sanyiin kee Yisihaaqiin siif waamama"† jedhameera. ⁸ Kana jechuunis ijoollee waadaatu sanyiitti lakkaa'ama malee ijoolleen foon irraa dhalatan ijoollee Waaqaa miti. ⁹ Dubbiin waadaa sunis kan, "Ani yeroo murteeffametti deebi'ee nan dhufa; Saaraanis ilma ni deessi"‡ jedhu tureetii.

¹⁰ Kana qofa miti; Ribqaan yeroo namuma tokkoof, abbaa keenya Yisihaaqiif ulfooftetti, ¹¹ ijoolleen sun utuu hin dhalatin yookaan utuu waan gaarii yookaan waan hamaa hin hojjetin akka kaayyoon filannoo Waaqaa raawwatamuuf, ¹² utuu hojiin hin ta'in isa waamicha Waaqaatiin, "Inni hangafni isa quxisuu tajaajila"§ jedhamee isheetti himame. ¹³ Kunis akkuma, "Yaaqoobin nan jaalladhe; Esaawun garuu nan jibbe"*† jedhamee barreeffamee dha.

¹⁴ Egaa maal jenna ree? Waaqni jal'aadhaa? Gonkumaa akkas miti! ¹⁵ Inni Museedhaan,

"Ani kanan maaru nan maara;

kanaan garaa laafuufiis garaa nan laafa"†

* 8:36 8:36 Far 44:22 * 9:5 9:5 yookaan Masiihichis † 9:7 9:7 Uma 21:12 ‡ 9:9 9:9 Uma 18:10,14 § 9:12

9:12 Uma 25:23 * 9:13 9:13 Mil 1:2,3 † 9:15 9:15 Bau 33:19

jedhaatii. ¹⁶ Kanaafuu wanti kun araara Waaqaatiin malee hawwii yookaan carraaqqii namaatiin miti. ¹⁷ Katabbiin qulqulluun Fara'ooniin, "Ani humna koo sirratti argisiisuuf, maqaan koos akka lafa hunda irratti labsamuuf kaayyoo kanaaf si kaaseera"[‡] jedhaatii. ¹⁸ Kanaaf Waaqni kan maaruu barbaadu ni maara; kan mata jabeessa gochuu barbaadu immoo mata jabeessa godha.

¹⁹ Isinis, "Yoo Waaqni maaliif amma iyyuu dogoggora nurra barbaada? Fedhii isaas eenyutu mormuu danda'a?" naan jettu. ²⁰ Garuu yaa namichoo, Waaqaan mormuuf ati eenyu? "Wanti tolfame tokko kan isa tolcheen, 'Ati maaliif akkanatti na tolchite?' "[§] jedhaa? ²¹ Suphee dhooftuun tokko dhogqee suphee kan bukaa'e irraa qodaa ulfinaa fi salphinaaf oolu tolchuuf mirga hin qabu?"

²² Waaqni dheekkamsa isaa argisiisuu fi humna isaas beeksisuuf jedhee yoo mi'a dheekkamsaa kanneen badiisaaf qopheeffaman obsa guddaan bira darbe hoo? ²³ Inni badhaadhummaa ulfina isaa yoo mi'a araara isaa kanneen duraan dursee ulfinaaf qopheessetti beeksisuuf jedhee waan kana godhe hoo? ²⁴ 'Nin warra waamaman keessaa tokkoo dha; inni Yihoodoota qofa keessaa utuu hin ta'in Namoota Ormaa keessaas waameera. ²⁵ Inni kitaaba Hoose'aa keessatti akkana jedha:

"Ani warra saba koo hin ta'iniin, 'saba koo' nan jedha;
ishee jaallatamtuu hin ta'iniin immoo,
'jaallatamtuu' nan jedha."^{*}

²⁶ Akkasumas isaan,
'Iddoodhuma itti, 'Isin saba koo miti'
isaaniin jedhame sanatti, 'ilmaan Waaqa jiraataa'
jedhamanii ni waamamu."[†]

²⁷ Isaayyaas akkana jedhee waa'ee Israa'el iyya:
'Baay'inni ilmaan Israa'el
yoo akkuma cirracha qarqara galaanaa ta'e iyyuu,
hambaa qofatu fayya.

²⁸ Gooftaan utuu hin turin,
yeroo dhumaatiif lafa irratti ni muraatii."

²⁹ Kunis akkuma Isaayyaas duraan dursee akkana jedhee dubbatee dha:
'Utuu Gooftaan Waan Hunda Danda'u,
sanyii nuuf hambisuu baatee,
nu silaa akkuma Sodoom taanee,
Gomoraas fakkaanna turre."[‡]

Amantii Dhabuu Israa'el

³⁰ Egaal maal jenna ree? Namoonni Ormaa kan qajeelummaa duukaa hin bu'in qajeelummaa karaa amantiitiin ta'e argataniiru. ³¹ Israa'eloonni seera qajeelummaa duukaa bu'an garuu qajeelummaa hin arganne. ³² Maaliif dhaban? Kunis sababii isaan utuu karaa amantiitiin hin ta'in hojiidhaan qajeelummaa argachuu barbaadaniif; isaanis dhagaa nama gufachiisuun gufatan. ³³ Kunis akkuma,

"Kunoo, ani dhagaa nama gufachiisu,
kattaa nama kuffisu Xiyoon keessa nan kaa'a;
namni isatti amanu gonkumaa hin qaana'u"[§]
jedhamee barreeffame sanaa dha.

10

¹ Yaa obbolloota, hawwiin garaa kootii fi wanni ani Israa'elootaaf Waaqa kadhadhu akka isaan fayyaniif. ² Ani akka isaan Waaqaaf hinaaffaa qaban dhugaa nan ba'a; hinaaffaan isaanii garuu kan beekumsa irratti hundeeffame miti. ³ Isaan waan qajeelummaa Waaqa biraa dhufu hin beekini fi waan qajeelummaa ofii isaanii uumachuu barbaadaniif qajeelummaa Waaqaatiif hin bulle. ⁴ Akka namni amanu hundinuu qajeelummaa argatuuf Kiristoos raawwii seeraatii.

⁵ Museen waa'ee qajeelummaa seeraan argamuu, "Namni waan seerri ajaju godhu ittiin jiraata"^{*} jedhee waan kana barreesseeraatii. ⁶ Qajeelummaan amantiidhaan argamu garuu akkana jedha; "Ati garaa kee keessatti, 'Eenyutu gara samiitti ol ba'a?'[†] hin jedhin;" Kun Kiristoosin gad buusuuf; ⁷ "Yookaan, 'Eenyutu qileetti gad bu'a?'[‡] hin jedhin;" kun Kiristoosin warra du'an keessaa ol baasuuf. ⁸ Inni garuu maal jedha?

‡ 9:17 9:17 Bau 9:16 § 9:20 9:20 Isa 29:16; 45:9 * 9:25 9:25 Hos 2:23 † 9:26 9:26 Hos 1:10 ‡ 9:29 9:29
Isa 1:9 § 9:33 9:33 Isa 8:14; 28:16 * 10:5 10:5 Lew 18:5 † 10:6 10:6 KeD 30:13 ‡ 10:7 10:7 KeD 30:13

“Dubbichi si bira jira; afaan keetii fi garaa kee keessa jira;”[§] innis dubbii amantii isa nu lallabnuu dha; ⁹ kunis yoo ati, “Yesuus Gooftaa dha” jettee afaan keetiin dhugaa baatee akka Waaqni warra du’an keessaa isa kaase garaa keetti amante, ati ni fayyita. ¹⁰ Namni garaa isaatiin amanee qajeelaa taasifamaatii; afaan isaatiinis dhugaa ba’ee fayya. ¹¹ Katabbiin Qulqulluun, “Namni isatti amanu kam iyyuu gonkumaa hin qaana’u”^{*} jedhaatii. ¹² Yihuudii fi Giriikii gidduu garaa garummaan hin jiruutii; Gooftuma tokkicha sanatu Gooftaa hundaa ti; innis warra isa waammatan hunda eebba isaatiin badhaasa. ¹³ “Namni maqaa Gooftaa waammatu hundinuu ni fayyaatii.”[†]

¹⁴ Yoos isaan akkamitti isa itti hin amanin waammachuu danda’u ree? Isa waa’ee isaa hin dhaga’innittis akkamitti amanuu danda’u ree? Utuu namni isaanitti hin lallabini akkamitti dhaga’uu danda’u ree? ¹⁵ Isaanis utuu hin ergamin akkamitti lallabuu danda’u? Kunis isa, “Miilli warra wangeela fidanii akkam miidhagaa dha!”[‡] jedhamee barreeffamee dha.

¹⁶ Oduu gaarii sanas kan fudhate Israa’eloota hunda miti. Isaayyaas, “Yaa Gooftaa, ergaa keenya eenyutu amane?”[§] jedhaatii. ¹⁷ Egaa amantiin ergaa dhaga’uudhaan dhufa; ergaan kunis karaa dubbii waa’ee Kiristoosiin dhaga’ama. ¹⁸ Ani garuu: Isaan hin dhageenye moo? jedhee nan gaafadha; dhugumaanuu isaan dhaga’aniiru: “Sagaleen isaanii lafa hunda,

dubbiin isaaniis handaara addunyaa ga’e.”^{*}

¹⁹ Ammas ani: Israa’el hin hubanne moo? jedheen gaafadha. Museen duraan dursee, “Ani warra saba hin ta’iniin akka isin hinaaftan nan godha;

saba hubannaa hin qabneenis isin nan aarsaa”[†]

jedha. ²⁰ Isaayyaasis ija jabinaan,

“Warri na hin barbaadin na argatan;

warra na hin iyyaafatinittis nan mul’adhe”[‡]

jedha. ²¹ Waa’ee Israa’el garuu,

“Ani guyyaa guutuu gara uummata hin ajajamnee fi didaa ta’eetti

harka koo nan diriirfadhe”[§]

jedha.

11

Hambaa Israa’el

¹ Anis, “Egaa Waaqni saba isaa ni gatee ree?” jedhee nan gaafadha. Kun gonkumaa akkas miti! Ani iyyuu Israa’elicha, sanyii Abrahaam keessaa gosa Beniyaam. ² Waaqni saba isaa warra duraan dursee beeke sana hin ganne; isin waa’ee Eeliyaas, inni akkamitti Waaqni duratti akka Israa’elin himate Katabbiin Qulqulluun maal akka jedhu hin beektanii? Innis akkana jedha: ³ “Yaa Gooftaa isaan raajota kee ajjeesaniiru; iddoo aarsaa keetii illee diiganiiru; anuma qofatu hafe; anas ajjeesuu barbaadu.”^{*} ⁴ Garuu deebiin Waaqni isaaf kenne maal ture? “Ani ofii kootiif namoota Ba’aaliif hin jilbeenfatin 7,000 hambifadheera.”[†] ⁵ Akkasuma yeroo ammaas hambaawwan ayyaanaan filataman jiru. ⁶ Erga ayyaanaan ta’e immoo si’achi hojiin miti; utuu hojiin ta’ee immoo ayyaanni silaa ayyaana hin ta’u ture.

⁷ Egaa maali ree? Israa’el waan jabeessee barbaade sana hin arganne; warri filataman garuu argataniiru. Warri kaan immoo mataa jabaatan. ⁸ Kunis isa,

“Waaqni hamma guyyaa har’aatti,

akka iji isaaniin hin argineef,

akka gurri isaaniis hin dhageenyeef,

hafuura nama dawweessu isaaniif kenne”[‡]

jedhamee barreeffamee dha. ⁹ Daawitis akkana jedha;

“Maaddiin isaaniin iddaa fi kiyyoo,

gufuu nama gufachiisuu fi adaba isaanitti haa ta’u.

¹⁰ Akka arguu hin dandeenyeef iji isaaniin haa haguuggamu;

duddi isaaniis bara baraan haa guophatu.”[§]

Namoonni Ormaa Fayyina Argatan

§ 10:8 10:8 KeD 30:14 * 10:11 10:11 Isa 28:16 † 10:13 10:13 Yoe 2:32 ‡ 10:15 10:15 Isa 52:7 § 10:16 10:16 Isa 53:1 * 10:18 10:18 Far 19:4 † 10:19 10:19 KeD 32:21 ‡ 10:20 10:20 Isa 65:1 § 10:21 10:21 Isa 65:2 * 11:3 11:3 1Mt 19:10,14 † 11:4 11:4 1Mt 19:18 ‡ 11:8 11:8 KeD 29:4; Isa 29:10 § 11:10 11:10 Far 69:22,23

¹¹ Anis deebisee, “Isaan hamma kufanii ka’uu hin dandeenyetti gufatanii?” jedheen gaafadha. Kun gonkumaa akkas miti! Garuu akka sabni Israa’el hinaafuuf sababii balleessaa isaanitiif fayyinni Namoota Ormaatiif dhufe. ¹² Yoos erga balleessaan isaanii addunyaaf badhaadhummaa fidee, kufaatiin isaaniis erga Namoota Ormaatiif badhaadhummaa fidee, guutummaan isaanii immoo hammam caalaa badhaadhummaa haa fiduu ree?

¹³ Yaa Namoota Ormaa, ani isinittin dubbadha. Ani waanan ergamaa Namoota Ormaa ta’eef, tajaajila koo nan kabaja. ¹⁴ Kanaanis ani tarii saba koo hinaaffaaf kakaasee isaan keessaa tokko tokko fayyisuu abdadhee ti. ¹⁵ Erga gatamuun isaanii addunyaaf araara fidee, fudhatamuun isaanii immoo warra du’an keessaa jireenyatti kaafamuu malee maal fida ree? ¹⁶ Kutaan bukoo kan akka kennaa hangafaatti dhi’eeffame tokko erga qulqulluu ta’ee, bukoon guutuun qulqulluu dha; hiddi erga qulqulluu ta’ee, dameewwan isaas akkasuma qulqulloota.

¹⁷ Dameewwan sana keessaa tokko tokko caccabsamaan ati utuma lataa ejersa bosonaa taatee jirtuu iddoo dameewwan caccabaniitti fayyifamtee soora hidda ejersaa irraa argamu kan qooddattu taanaan, ¹⁸ dameewwan sanatti hin koorin. Yoo of jajje garuu hidda sanatu si baata malee akka ati hidda sana hin baanne hubadhu. ¹⁹ Atis, “Akka ani itti fayyifamuuf dameewwan sun caccabsaman” ni jetta. ²⁰ Kun dhuguma. Isaan waan amantii hin qabneef caccabsaman; ati garuu amantiidhaan dhaabatteerta. Kanaafuu sodaadhu malee of hin tuulin. ²¹ Waaqni yoo dameewwan uumamaatiif hin hiliin siifis hin hiluutii.

²² Egaa arjummaa fi gara jabina Waaqaa hubadhu: gara jabinni isaa warra kufan irratti; arjummaan isaa garuu hamma ati arjummaa isaa keessa jiraattutti siif; yoo kanaa achii atis ni kutamta. ²³ Isaanis yoo amantii dhabuutti fufuu baatan itti fayyifamu; Waaqni deebisee itti isaan fayyisuu ni danda’atii. ²⁴ Ati muka uumamaan ejersa bosonaa ta’ee irraa muramtee karaa seera uumamaatiin ala ta’een muka ejersaa kan dhaabame irratti erga fayyifamtee, dameewwan uumamaa kunneen hammam caalaa muka ejersa isaanii irratti deebifamanii hin fayyifaman ree!

Israa’eloonni Hundinuu Ni fayyu

²⁵ Yaa obbolloota, ani akka isin ogeeyyii of seetanii icciitii kana wallaaltan hin barbaadu; hamma lakkoobsi Namoota Ormaa guutuun seenutti Israa’el gariin mata jabinnaan jiraachaa turan. ²⁶ Kanaafuu Israa’el hundi ni fayyu; akkana jedhamee barreeffameeraatii:

“Inni furu Xiyoonii ni dhufa;

Yaaqoob irraas Waaqa malee jiraachuu ni balleessa.

²⁷ Yommuu ani cubbuu isaanii isaan irraa fuudhutti,

kakuun koo kan ani isaan wajjin qabu kana.”*

²⁸ Akka wangeelaatti isiniif jecha isaan diinota; akka filannootti garuu abbootiif jecha isaan jaallatamoo dha; ²⁹ kennaan Waaqaatii fi waamichi isaa gaabbii hin qabuutii.

³⁰ Akkuma isin kanaan dura Waaqaaf ajajamuu diddanii amma garuu ajajamuu diduu isaanitiin araara argattan sana ³¹ isaanis akkasuma araara Waaqaa kan isin argattaniin akka araara argataniif amma ajajamuu didan. ³² Waaqni hunduma isaanitiif araara buusuuf jedhee namoota hunda ajajamuu diduu jala galche.

Waaqa Jajuu

³³ Badhaadhummaan ogummaatii fi

beekumsa Waaqaa hammam gad fagaata!

Murtiin isaa qoramee bira hin ga’amu!

Karaan isaas barbaadamee itti hin ba’amu!

³⁴ “Eenyutu yaada garaa Gooftaa beeke?

Yookaan eenyutu gorsaa isaa ture?”†

³⁵ “Yookaan akka Waaqni deebisee isaaf kennuuf jedhee,

eenyutu takkumaa Waaqaaf waa kenne?”‡

³⁶ Wanti hundinuu isa irraa dhufe; isumaan dhufe; isaaf dhufe.

Bara baraan ulfinni isaaf haa ta’u! Ameen.

12

Aarsaa Jiraataa

* **11:27** 11:27 Isa 27:9; 59:20,21; Erm 31:33,34 † **11:34** 11:34 Isa 40:13 ‡ **11:35** 11:35 Iyo 41:11

¹ Kanaafuu yaa obbolloota, akka isin dhagna keessan aarsaa jiraataa, qulqullaa'aa fi kan Waaqaa gammachiisu gootanii dhi'eessitaniif ani gara laafina Waaqaatiin isin kadhada; kunis waaqeffannaa keessan kan hafuuraa ti. ² Fedhiin Waaqaa gaariin, gammachiisaanii fi kan mudaa hin qabne maal akka ta'e qorattanii akka mirkaneessuu dandeessaniif haaromfamu qalbii keessaniitiin geeddaramaa malee addunyaa kana hin fakkaatinaa.

³ Ani ayyaana naa kennameen tokkoo tokkoo keessan nan gorsaatii: Akka madaalii amantii kan Waaqni isinii kenne sanaatti qalbeeffannaadhaan waa'ee ofii keessanii yaadaa malee hamma yaaduu qabdanii olitti hin yaadinaa. ⁴ Akkuma dhagni keenya kutaa baay'ee qabu, akkuma kutaawwan kunneenis hojii wal fakkaatu hin qabaatin sana ⁵ akkasuma immoo nu warri baay'ee taane Kiristoosiin dhagna tokkoo dha; tokkoon tokkoon kutaa dhagnaa kan walii isaanii ti. ⁶ Nu akkuma ayyaana nuu kennameetti kennaa garaa garaa qabna. Yoo kennaan nama tokkoo raajii dubbachuu ta'e, inni akkuma amantii isaatiiti haa dubbatu. ⁷ Yoo tajaajiluu ta'e, haa tajaajilu; yoo barsiisuu ta'e, haa barsiisu; ⁸ yoo jajjabeessuu ta'e, haa jajjabeessu; yoo warra rakkataniif kennuu ta'e, arjumaadhaan haa kennu; yoo bulchuu ta'e, jabaatee haa bulchu; yoo maaruu ta'e, gammachuun haa maaru.

Jaalala

⁹ Jaalalli keessan itti fakkeessuudhaan hin ta'in. Waan hamaa jibbaa; waan gaariitti maxxanaa. ¹⁰ Jaalala obbolummaatiin jabeessaa wal jaalladhaa. Ulfina walii kennuutti wal dorgomaa. ¹¹ Gooftaa tajaajiluu keessatti hafuura gubaa qabaadhaa malee hinaaffaa hin dhabinaa. ¹² Abdiidhaan gammadaa; dhiphina obsaa; kadhannaatti cimaa. ¹³ Qulqulloota rakkataniif waa gumaachaa. Keessummoota simadhaa.

¹⁴ Warra isin ari'atan eebbisaa; eebbisaa malee hin abaarinaa. ¹⁵ Warra gammadan wajjin gammadaa; warra boo'aa wajjin boo'aa. ¹⁶ Walii galteedhaan wajjin jiraadhaa. Warra jireenya gad aanaa jiraatan wajjin jiraadhaa malee hin koorinaa. Of hin tuulinaa.

¹⁷ Nama kamiif iyyuu hammina hamminaan hin deebisinaa. Nama hunda duratti waan gaarii hojjedhaa. ¹⁸ Yoo danda'ame, gama keessaniin nama hunda wajjin nagaan jiraadhaa. ¹⁹ Yaa jaallatamtoota, dheekkamsa Waaqaatiif iddoo kennaa malee haaloo hin ba'inaa; Gooftaan, "Haaloo baasuun kan koo ti; ani gatii nan deebisa"* jedha, jedhamee barreeffameeraatii. ²⁰ Garuu, "Yoo diinni kee beela'e, beela baasi;

yoo inni dheebotes, waan inni dhugu kenniif.

Kana gochuu keetiin barbadaa ibiddaa mataa isaa irra tuulta."†

²¹ Gaarummaan hammina mo'i malee hamminaan hin mo'amin.

13

Abbootii Taayitaa Jalatti Buluu

¹ Namni kam iyyuu warra taayitaa bulchiinsaa irra jiran jalatti buluu qaba; yoo Waaqaa irraa ta'e malee taayitaa qabaachuun hin danda'amuutii. Warra taayitaa qaban Waaqatu muude. ² Kanaafuu namni abbootii taayitaatiin mormu sirna Waaqaatiin morma; warri akkas godhanis murtii ofitti fidu. ³ Bulchitoonni warra waan hamaa hojjetan malee warra waan gaarii hojjetan hin sodaachisan. Ati akka nama taayitaa qabu hin sodaanne ni barbaadhaa? Egaa waan gaarii hojjedhu; inni iyyuu si galateef-fataatii. ⁴ Inni waan gaarii siif gochuudhaaf tajaajilaa Waaqaatii. Ati garuu yoo waan hamaa hojjetta sodaadhu; inni akkasumaan goraadee hin qabatuu. Inni tajaajilaa Waaqaa kan warra waan hamaa hojjetan irratti dheekkamsa fiduun haaloo baasuu dha. ⁵ Kanaafuu sababii dheekkamsaa qofaaf utuu hin ta'in, yaada qulqulluudhaan warra taayitaa irra jiran jalatti buluun barbaachisaa dha.

⁶ Isinis kanumaaf qaraxa baafu; abbootiin taayitaa tajaajiltoota Waaqaa warra yeroo isaanii guutuu hojii bulchiinsaatiif kennaniidhaatii. ⁷ Waan nama hundaaf kennuun isin irra jiru kenna; yoo qaraxa ta'e qaraxa, yoo gibira ta'e immoo gibira baasaa; yoo sodaachuu ta'e sodaadhaa; yoo ulfina kennuu ta'es, ulfina kenna.

Wal jaalladhaa

⁸ Isin wal jaallachuu malee gatii tokko illee of irraa hin qabaatinaa; namni nama biraa jaallatu kam iyyuu seera raawwateeraatii. ⁹ Ajajawwan, "Hin ejjin; hin ajjeesin; hin hatin; hin hawwin"* jedhanii fi ajajni biraas seera, "Ollaa kee akkuma offi

* 12:19 12:19 KeD 32:35 † 12:20 12:20 Fak 25:21,22 * 13:9 13:9 Bau 20:13-15,17; KeD 5:17-19; 5:21

keetiitti jaalladhu”[†] jedhu kanaan walitti guduunfamu. ¹⁰ Jaalalli ollaa isaa hin miidhu. Kanaafuu jaalalli raawwii seeraa ti.

¹¹ Yeroon isin hirribaa dammaqxaan amma akka ta’e hubadhaa. Yeroo nu itti amanee sana caalaa fayyinni keenya amma nutti dhi’aateeraatii. ¹² Halkan bari’uu ga’eera; guyyaanis dhi’aateera. Kanaafuu hojii dukkanaa of irraa gannee mi’a lolaa kan ifaa haa hidhannu. ¹³ Kottaa akka yeroo guyyaatti amala gaariin haa jiraannu; addaggummaa fi machiidhaan miti; jireenya sagaagalummaa fi gad dhiisiitiin miti; wal loluu fi hinaaffaadhaan miti. ¹⁴ Qooda kanaa Yesuus Kiristoos Goofticha uffadhaa; akka itti hawwii foonii gammachiifan hin yaadinaa.

14

Obboleessa Keetti Hin Murin

¹ Nama amantiitti dadhabaa ta’e ofitti qabaa; waan wal nama falmisiisu irrattis itti hin murinaa. ² Namni tokko akka waan hunda nyaachuu danda’u amana; namni amantiin isaa dadhabaa ta’e kaan garuu biqiltuu qofa nyaata. ³ Namni nyaatu kan hin nyaatin hin tuffatin; inni hin nyaatinis kan nyaatutti hin murin; Waaqni isa ofitti qabeeraatii. ⁴ Hojjetaa nama kaaniitti kan murtu ati eenyu? Inni yoo dhaabates yoo kufes gooftaa isaatiif. Waan Gooftaan isa dhaabachiisuu danda’uufis ni dhaabata.

⁵ Namni tokko akka waan guyyaan tokko guyyaa kaan caaluutti yaada; namni kaan immoo guyyaan hundi tokkuma jedhee yaada. Namni kam iyyuu yaada ofii isaa guutummaatti amanee haa fudhatu. ⁶ Namni guyyicha kabaju Gooftaaf jedhee kabaja; kan guyyicha hin kabajnes Gooftaaf jedhee hin kabaju. Kan nyaatu Gooftaaf jedhee nyaata; inni Waaqa galateeffataatii; kan hin nyaannes Gooftaaf jedhee hin nyaatu; Waaqas ni galateeffata. ⁷ Nu keessaa namni mataa isaatiif jiraatu, kan mataa isaatiif du’us hin jiruutii. ⁸ Nu yoo jiraanne Gooftaaf jiraanna; yoo duunes Gooftaaf duuna. Kanaafuu yoo jiraannes yoo duunes nu kan Gooftaa ti. ⁹ Sababii kanaaf Kiristoos Gooftaa du’aaleyyiitii fi jiraatoo ta’uuf du’e; deebi’ees jiraataa ta’e.

¹⁰ Yoos ati maaliif obboleessa keetti murta ree? Yookaan maaliif obboleessa kee tuffatta ree? Nu hundi teessoo murtii Waaqaa dura ni dhaabannaatii. ¹¹ Kunis: “Ani jiraataadhaatii; jilbi hundi anaaf ni jilbeenfata;

arrabni hundi Waaqaaf dhugaa ba’a’ jedha Gooftaan”^{*} jedhamee barreeffameeraatii. ¹² Kanaafis tokkoon tokkoon keenya waa’ee mataa keenya fuula Waaqaa duratti deebii ni kennina.

¹³ Kanaafuu nu walitti muruu haa dhiifnu. Qooda kanaa akka karaa obboleessa keessanii irra gufuu yookaan waan gufachiisu tokko illee hin keenye murteeffadhaa. ¹⁴ Akka wannii ofuma isaatiin xuraa’aa ta’e tokko iyyuu hin jirre ani karaa Gooftaa Yesuus nan beeka; nan amanas. Nama wannii tokko xuraa’aadha jedhee yaaduuf garuu wannii sun isaaf xuraa’aa dha. ¹⁵ Yoo wannii ati nyaattu obboleessa kee miidhe, ati jaalalaan jiraachaa hin jirtu. Ati waan nyaattuun obboleessa kee isa Kiristoos isaaf du’e hin balleessin. ¹⁶ Kanaafuu wanti isin gaariidha jettan akka arrabsamu hin godhinaa. ¹⁷ Mootummaan Waaqaa qajeelummaa, nagaa fi gammachuu Hafuura Qulqulluun ta’eedha malee waa’ee nyaataa fi dhugaatii mitiitii. ¹⁸ Namni haala kanaan Kiristoosin tajaajilu Waaqa gammachiisaatii; namoota birattis fudhatama argata.

¹⁹ Kanaaf waan nagaa fidu gochuu fi wal ijaaruuf haa tattaaffannu. ²⁰ Nyaataaf jettee hojii Waaqaa hin balleessin. Nyaanni hundi qulqulluu dha; garuu waan nama biraa gufachiisu kam iyyuu nyaachuun nama tokkoof dogoggora. ²¹ Akka obboleessi kee hin gufanneef, foon nyaachuu dhiisuun yookaan daadhii wayinii dhuguu dhiisuun yookaan waan biraa kam iyyuu gochuu dhiisuun gaarii dha.

²² Kanaafuu ati amantiin waan kana irratti qabdu kam iyyuu fuula Waaqaa duratti ofumaa keetii qabaadhu. Namni waan amanee fudhate irratti ofitti hin murre eebbifamaa dha. ²³ Namni shakkii qabu garuu nyaachuun isaa waan amantiin hin ta’iniif yoo nyaate isatti murama; wannii amantiin hin ta’in kam iyyuu cubbuudhaatii.

15

¹ Nu warri jajjaboo taane, dadhabii warra dadhaboo baachuu qabna malee ofuma gammachiisuu hin qabnu. ² Tokkoon tokkoon keenya ollaa keenya ijaaruuf, akka isatti toluuf waan isa gammachiisu gochuu qabna. ³ Kiristoos iyyuu ofii isaa hin gammachiifneetii; kun garuu akkuma, “Arrabsoon warra si arrabsanii narra ga’eera”^{*}

jedhamee barreeffamee dha. ⁴ Nu akka obsaa fi jajjabina Katabbiwwan Qulqulluun kennaniin abdiif qabaannuuf wanti duraan barreeffame hundi barumsa keenyaaf barreeffameetii.

⁵ Waaqni obsaa fi jajjabina namaa kennu sun akka isin yaaduma Kiristoos Yesuus qabaate sana walii qabaattan isin haa gargaaru. ⁶ Kunis akka isin yaada tokkoo fi afaan tokkoon Waaqaaf, Abbaa Gooftaa keenya Yesuus Kiristoosiif ulfina kennitaniif.

⁷ Kanaaf akkuma Kiristoos ulfina Waaqaatiif jedhee isin simatetti isinis wal simadhaa. ⁸ Kiristoos dhugaa Waaqaatiif jedhee waadaa abbootiif kenname mirkaneessuuf akka tajaajilaa warra dhagna qabatanii ta'e ani isinittin himaatiif; ⁹ kunis akka Namoonni Ormaa sababii araara isaatiif Waaqa ulfeessaniif. Innis akkuma, "Kanaafuu ani Namoota Ormaa gidduutti sin jadjadha;

maqaa keetiifis nan faarfadha"[†]

jedhamee barreeffamee dha. ¹⁰ Amma illee,

"Yaa Namoota Ormaa, isin saba isaa wajjin gammadaa"[‡]

jedha. ¹¹ Amma illee,

"Yaa Namoota Ormaa, hundi keessan Gooftaa jadjadha;

namoonni hundinuus faarfannaadhaan isa leellisaa"[§]

jedha. ¹² Akkasumas Isaayyaas,

"Hiddi Isseey kan saboota bulchuuf

ka'u tokko ni dhufa;

Namoonni Ormaas isa abdatu"^{*}

jedha.

¹³ Isinis akka humna Hafuura Qulqulluutiin abdiitti akka malee guddattaniif, Waaqni abdiif sun isa amanachuu keessaniin gammachuu fi nagaa hundumaan isin haa guutu.

Phaawulos Tajaajilaa Namoota Ormaa Ta'uu Isaa

¹⁴ Yaa obbolloota ko, isin ofii keessanii akka gaarummaadhaan guutuu taatan, akka beekumsaan guutamtanii fi akka wal gorsuu dandeessan ani iyyuu hubadheera. ¹⁵ Ani sababii ayyaana Waaqni naaf kenneetiif waan tokko tokko isin yaadachiisuuf jedhee ija jabinaan isinii barreesseera; ¹⁶ kunis akka Namoonni Ormaa Hafuura Qulqulluun Qulqulleeffamanii fuula Waaqaa duratti aarsaa fudhatama qabu ta'anii fi akka ani lubummaa wangeela Waaqaa lallabuutiin Namoota Ormaatiif tajaajilaa Kiristoos Yesuus ta'uuf.

¹⁷ Kanaafuu ani Waaqa tajaajiluu kootiin Kiristoos Yesuusiin nan boona. ¹⁸ Ani waan Kiristoos waan ani jedhee fi hojjedheen akka Namoonni Ormaa Waaqaaf ajajaman gochuudhaan karaa kootiin raawwateen alatti homaa dubbachuuf ija hin jabaadhu; ¹⁹ kunis humna mallattoo fi dinjiitiin, humna Hafuura Qulqulluutiinis raawwatame. Kanaafuu ani Yerusaleemii jalqabee naanna'uun hamma Ilwaariqoonitti guutummaatti wangeela Kiristoos lallabeera. ²⁰ Ani akka hundee namni biraa buuse irratti hin ijaarreef lafa Kiristoos itti hin beekaminitti wangeela lallabuuf yeroo hunda tattaaffadheera.

²¹ Kunis isa,

"Warri waa'een isaa itti hin himamin ni argu;

warri hin dhaga'inis ni hubatu"[†]

jedhamee barreeffamee dha. ²² Anis kan yeroo baay'ee gara keessan dhufuu dhowwameef kanuma.

Phaawulos Roomaa dhaquuf Karoorfate

²³ Amma garuu naannoowwan kanneenitti iddoon itti hojjedhu waan hin jirree fi anis waan isin arguuf waggaa baay'ee hawwaa tureef, ²⁴ yeroo Isphaaniyaa dhaqu isinitti goruu nan yaada. Anis yeroo achi irra darbu erga isin argee xinnoo isin wajjin gammadee booddee akka imala koo irratti na gargaartan nan abdadha. ²⁵ Amma garuu ani qulqulloota tajaajiluuf Yerusaleem dhaquuttin jira. ²⁶ Warri Maqedooniyaatii fi Akaayaa qulqulloota Yerusaleem jiraatan keessaa kanneen hiyyeeyyii ta'aniiif buusii gochuutti gammadaniiruutii. ²⁷ Isaan waan kana gochuuf ni gammadan; dhugumaanuu waan kana isaaniif gochuun dirqama isaanii ti. Namoonni Ormaa erga eebba hafuuraa Yihuudoota irraa qooddatanii, eebba isaanii kan foonii immoo Yihuudootaaf qooduun dirqama isaanii ti. ²⁸ Kanaaf ani ergan waan kana raawwadhee, akka isaan buusii kana fudhatan mirkaneeffadhee booddee goree isin ilaaltee Isphaaniyaa nan dhaqa. ²⁹ Ani yommuu gara keessan dhufu akka eebba Kiristoosiin guutamee dhufu nan beeka.

[†] 15:9 15:9 2Sm 22:50; Far 18:49 [‡] 15:10 15:10 KeD 32:43 [§] 15:11 15:11 Far 11:7:1 ^{*} 15:12 15:12 Isa 11:10

[†] 15:21 15:21 Isa 52:15

³⁰ Yaa obbolloota, akka isin kadhannaa Waaqa kadhattan keessatti naaf kadhachuudhaan na wajjin dhamaatan Gooftaa keenya Yesuus Kiristoosiin, jaalala Hafuura Qulqulluutiinis isinin kadhadha. ³¹ Akka ani namoota Yihuudaa keessa jiraatan kanneen hin amanin jalaa ba'uu fi akka tajaajilli koos Yerusaaalem keessatti qulqulloota achi jiraatan biratti fudhatama argatu naaf kadhadhaa; ³² kunis akka ani fedhii Waaqaatiin, gammachuudhaan isin bira dhufee isin wajjin boqodhuuf. ³³ Waaqni nagaa hunduma keessan wajjin haa ta'u. Ameen.

16

Phaawulos Nagaa Dhaamuu Isaa

¹ Obboleettii keenya Feebeen tajaajiltuu waldaa kiristaanaa ishee Kanchire'aa imaanaa isinitti nan kennadha. ² Isheen namoota baay'eef, anaafis gargaarsa guddaa waan taateef akka isin simannaa qulqullootaaf maluun Gooftaadhaan ishee simattanii fi akka gargaarsa isheen isin irraa barbaaddu kam iyyuu isheef gootan isinin kadhadhaa.

³ Phirisqilaa fi Aqiilaa, warra Kiristoos Yesuusiin na wajjin tajaajilanitti nagaa naa himaa. ⁴ Isaan naa jedhanii lubbuu isaanii balaaf saaxilan. Utuu ana qofa hin ta'in Waldaaleen Kiristaanaa Namoota Ormaa hundinuus isaan galateeffatu.

⁵ Waldaa Kiristaanaa kan mana isaaniitti walitti qabamtuttis nagaa naa himaa. Biyya Asiyaa keessaa Kiristoositti amanuutti hangafa kan ta'e michuu koo jaallatamaa Axeenexoonittis nagaa naa himaa.

⁶ Maariyaam ishee baay'ee isinii dhamaatettis nagaa naa himaa.

⁷ Firoota koo warra na wajjin hidhaman Androoniqoosii fi Yuuniyaanittis nagaa naa himaa. Isaan warra ergamoota keessaa maqaa gaarii qaban kanneen na dura Kiristoositti amananii dha.

⁸ Amphiliyaaxos isa ani Gooftaadhaan jaalladhutti nagaa naa himaa.

⁹ Urbaanos isa Kiristoosin nu wajjin tajaajiluu fi michuu koo jaallatamaa Isxaakisittis nagaa naa himaa.

¹⁰ Apheelees isa Kiristoositti amanamuun isaa qoramee mirkaneeffametti nagaa naa himaa.

Warra mana Arisxoobuluu jiraatanittis nagaa naa himaa.

¹¹ Fira koo Heroodiyoonnaatti, nagaa naa himaa.

Warra mana Naarkisoos jiraatan kanneen Gooftaatti amanannittis nagaa naa himaa.

¹² Warra Gooftaatti amananii dhama'an Tiriifeena fi Tiriifooosaatti nagaa naa himaa.

Pharsiis jaallatamtuu hojii Gooftaatti amantee baay'ee dhamaatettis nagaa naa himaa.

¹³ Ruufoos isa Gooftaadhaan filatamee fi haadha isaa ishee anaafis haadha taatetti nagaa naa himaa.

¹⁴ Asinqiriixoositti, Fileegoonitti, Hermeesitti, Phaaxroobaasitti, Hermaasittii fi obbolloota isaan wajjin jiranitti nagaa naa himaa.

¹⁵ Filologoonitti, Yuuliyaaatti, Neeriyooosittii fi obboleettii isaatti, Olimphaasittii fi qulqulloota isaan wajjin jiran hundattis nagaa naa himaa.

¹⁶ Dhungoo qulqulluudhaan nagaa wal gaafadhaa.

Waldaaleen Kiristoos hundinuu nagaa isinii dhaamu.

¹⁷ Yaa obbolloota, ani akka isin warra gargar ba'uu uumanii barumsa isin barattaniinis mormuudhaan karaa keessan irra gufuu kaa'an irraa of eeggattan isin kadhadha. Isaan irraa fagaadhaa. ¹⁸ Namoonni akkasii garaa ofii malee Gooftaa keenya Kiristoosin hin tajaajilaniitti. Isaan afaan toluu fi saaduudhaan qalbii namoota garraamii ni hatu. ¹⁹ Waa'een ajajamuu keessanii nama hundumaa biratti dhaga'ameera; anis isinitti nan gammada; garuu akka isin waan gaariif ogeeyyii, waan hamaaf immoo garraamota taatan nan barbaada.

²⁰ Waaqni nagaa dafee Seexana miilla keessan jalatti ni burkuteessa.

Ayyaanni Gooftaa keenya Yesuus isin wajjin haa ta'u.

²¹ Xiimotewos inni na wajjin tajaajilu, akkasumas firoonni koo Luukiyoos, Yaasonii fi Soosiiphaaxroos nagaa isinii dhaamu.

²² Ani Xerxiwoos barreessaan xalayaa kanaa Gooftaadhaan nagaa isinii dhaama.

²³ Gaayoos inni ana fi waldaa Kiristaanaa guutuu keessumsisus nagaa isinii dhaama.

Bulchaan maallaqaa kan magaalaa kanaa Erisxoos, akkasumas obboleessi keenya Qu'asxiroos nagaa isinii dhaamu. [²⁴ Ayyaanni Gooftaa keenya Yesuus Kiristoos isin hunda wajjin haa ta'u.]*

²⁵ Eгаа Waaqni akka wangeela koottii fi lallaba waa'ee Yesuus Kiristoositti, akka mul'ata icciitii bara dheeraaf dhokfamee tureettis jabeessee isin dhaabuu ni danda'a; ²⁶ amma garuu akka saboonni hundinuu Waaqatti amananii fi isaaf ajajamaniif icciitiin sun ajaja Waaqa bara baraatiin katabbiwwan raajotaatiin ifatti baafameera; beeksifameeras. ²⁷ Waaqa kophaa isaa ogeessa ta'e sanaaf karaa Yesuus Kiristoosiin ulfinni bara baraan haa ta'u! Ameen.

* **16:24** 16:24 Luqqisaan 24 waraabbilee tokko tokko qofa keessatti argama.

Qorontos Tokkoffaa

¹ Phaawulos isa akka ergamaa Kiristoos Yesuus ta'uuf fedhii Waaqaatiin waamamee fi obboleessa keenya Soosteenes irraa,

² Gara waldaa Waaqaa ishee Qorontos keessa jirtuutti, gara warra Kiristoos Yesuusiin qulqulleffamanii fi warra lafa hundaa kanneen maqaa Gooftaa keenya Yesuus Kiristoos isa Gooftaa isaaniitii fi Gooftaa keenyas ta'e sanaa waammatan hunda wajjin qulqulloota ta'uuf waamamaniitti:

³ Ayyaannii fi nagaan Abbaa keenya Waaqaa fi Yesuus Kiristoos Gooftaa irraa isiniif haa ta'u.

Galata Galchuu

⁴ Ani yeroo hunda ayyaana Waaqaa isa Kiristoos Yesuusiin isinii kennameef waa'ee keessaniif Waaqa nan galateeffadha. ⁵ Isinis karaa hundaan jechuunis dubbii fi beekumsa hundaan isaan badhaataniirtu; ⁶ wanti nu waa'ee Kiristoos dhugaa baane sun isin gidduutti mirkaneeffameeraatii. ⁷ Kanaafuu utuu mul'achuu Gooftaa keenya Yesuus Kiristoos eeggachaa jirtanuu kennaan hafuura tokko iyyuu isin jalaa hin hir'atu. ⁸ Akka isin guyyaa Gooftaa keenya Yesuus Kiristoositti warra mudaa hin qabne taataniifis inni hamma dhumaatti jabeessee isin eega. ⁹ Waaqni gara tokkummaa Ilma isaa Gooftaa keenya Yesuus Kiristoositti isin waame sun amanamaa dha.

Gargar Ba'uu Waldaa Kiristaanaa

¹⁰ Yaa obboloota, ani akka isin gidduu gargar ba'uun hin jiraannee fi akka qalbii fi yaada tokko qabaattanii hundi keessan walii galtaniif maqaa Gooftaa keenya Yesuus Kiristoosiin isin kadhada. ¹¹ Yaa obboloota ko, akka isin gidduu lolli jiru warri mana Kilo'ee jiraatan tokko tokko natti himaniiru. ¹² Wanti ani jedhus kana: Isin keessaa namni tokko, "Ani kan Phaawulos" jedha; inni kaan, "Ani kan Apholoos" jedha; kaanis, "Ani kan Keefaa ti" jedha; kaan immoo, "Ani kan Kiristoos" jedha.

¹³ Kiristoos gargar qoodameeraa? Phaawulositu isinii fannifame ree? Yookaan maqaa Phaawulosiin cuuphamtanii? ¹⁴ Ani Kiriisphoosii fi Gaayoosin malee isin keessaa nama tokko illee waan hin cuuphiniif Waaqa nan galateeffadha. ¹⁵ Kanaaf namni akka isin maqaa kootiin cuuphamtan dubbachuu danda'u tokko iyyuu hin jiru. ¹⁶ Eeyyee, ani warra mana Isxiifaanaas jiraatanis akkasuma cuupheera; sanaan alatti nama biraa tokko illee cuuphuu koo hin yaadadhu. ¹⁷ Kiristoos akka ani wangeela lallabuuf malee akka ani cuuphuuf na hin ergineetii; anis akka fannoon Kiristoos humna hin dhabneef dubbii ogummaa namaatiin hin lallabu.

Kiristoos Ogummaa fi Humna Waaqaa ti

¹⁸ Dubbiin fannoo warra baduuf jiraniif gowwummaadhaatii; nu warra fayyinuuf garuu humna Waaqaa ti. ¹⁹ Kunis, "Ani ogummaa ogeeyyii nan balleessa;

hubannaa hubattootaas nan fashaleessa"*
jedhamee barreeffameera.

²⁰ Namni ogeessi eessa jira? Hayyuun eessa jira? Falaasamaan bara kanaa eessa jira? Waaqni ogummaa addunyaa kanaa gowwummaa hin goonee ree? ²¹ Sababii ogummaa Waaqaatiin addunyaan karaa ogummaa isheetiin Waaqa waan hin beekiniif, Waaqni gowwummaa lallabaatiin warra amananiif fayyisuu jaallate. ²² Yihuudoonni mallattoo fedhu; Giriikonni immoo ogummaa barbaadu; ²³ nu garuu Kiristoos isa fannifame sana lallabna; innis Yihuudootatti gufuu dha; Namoota Ormaatiif immoo gowwummaa dha; ²⁴ warra waamamaniif garuu Yihuudootaafis ta'u Giriikotaaf Kiristoos humna Waaqaatii fi ogummaa Waaqaa ti. ²⁵ Gowwummaan Waaqaa ogummaa namaa caalaa ogeessaatii; dadhabbiin Waaqaas jabina namaa irra jabaa dha.

²⁶ Yaa obboloota, isin yeroo waamamtanitti maal akka turtan yaadadhaa. Akka ilaalcha namaatti baay'een keessan ogeeyyii hin turre; baay'een keessanis beekamoo hin turre; baay'een keessan immoo sanyii warra gurguddaa irraa hin dhalanne. ²⁷ Waaqni garuu ogeeyyii qaanessuuf jedhee waan addunyaa irratti gowwaa ta'ee filate; Waaqni

* 1:19 1:19 Isa 29:14

warra jajjabeeyyii qaanessuuf jedhee waan addunyaa irratti dadhabaa ta'e filate. ²⁸ Waaqni waan jiru waan hin jirre gochuuf, waan addunyaa kana irratti gad aanaa fi tuffatamaa ta'e, waan iddoo hin qabnes filate; ²⁹ kunis akka eenyu iyyuu isa duratti of hin jajneef. ³⁰ Isin sababii isaatiin kan Kiristoos Yesuus taatan; inni ogummaa keenya kan Waaqa biraa dhufe jechuunis qajeelummaa keenya, qulqullummaa fi furii keenyaa dha. ³¹ Kunis akkuma, "Namni boonu Gooftaadhaan haa boonu"† jedhamee barreeffamee dha.

2

¹ Yaa obboloota, ani yeroon gara keessan dhufetti, afaan toluun yookaan ogummaa guddaadhaan dhuga ba'umsa waa'ee Waaqaa lallabaa hin dhufne. ² Ani yeroon isin bira turetti Yesuus Kiristoos isa fannifame sana malee akka waan tokko illee hin beekne murteesseen tureetii. ³ Ani dadhabbiin, sodaa fi hollannaa guddaadhaan gara keessan dhufe. ⁴ Ergaan koo fi lallabni koo Hafuura fi humna argisiisuudhaan malee dubbii ogummaa fi sossobbii of keessaa qabuun hin turre; ⁵ kunis akka amantiin keessan humna Waaqaa irratti malee ogummaa namaa irratti hin hundeeffamneef.

Ogummaa Hafuura Irraa Argamu

⁶ Haa ta'uu malee nu warra bilchaatan gidduutti ogummaa dubbanna; garuu ogummaa addunyaa kanaa yookaan ogummaa bulchitoota addunyaa kanaa kanneen baduuf jiranii miti. ⁷ Garuu nu ogummaa Waaqaa, ogummaa dhokfamee ture, isa Waaqni uumama addunyaatiin dura ulfina keenyaaf jedhee murteesse sanaa icciitiidhaan dubbanna. ⁸ Bulchitoota addunyaa kanaa keessaa tokko iyyuu ogummaa kana hin hubanne; isaan utuu hubatanii jiraatanii silaa Gooftaa ulfina hin fannisan tureetii. ⁹ Ta'u iyyuu akkuma, "Waan Waaqni warra isa jaallataniif qopheesse iji hin argine, gurri hin dhageenye,

garaa namaattis hin yaadamne"*
jedhamee barreeffame sana, ¹⁰ Waaqni garuu Hafuura isaatiin waan kana nutti mul'iseera.

Hafuurri wantoota hunda, wantoota Waaqaa kanneen gad fagoo ta'an illee ni qora. ¹¹ Hafuura isa keessa jiru malee yaada nama tokkoo eenyutu beeka? Akkasuma immoo Hafuura Waaqaa malee kan yaada Waaqaa beeku tokko iyyuu hin jiru. ¹² Nu akka waan Waaqni toluma nuu kenne hubannuuf Hafuura Waaqa irraa dhufe arganne malee hafuura addunyaa hin arganne. ¹³ Wannu nu dubbannu kana; nu dubbii Hafuurri nu barsiisuun malee dubbii ogummaan namaa barsiisuun hin dubbannu; dhugaa Hafuuraas dubbii Hafuuraatiin ibsina. ¹⁴ Namni foonii wantoota Hafuura Waaqaa hin fudhatu; kun isaaf gowwummaadhaatii; wantoonni Hafuura waan Hafuuraan qoramaniif inni hubachuu hin danda'u. ¹⁵ Namni Hafuura waan hundumaa ni qora; ofii isaatii garuu eenyuun iyyuu hin qoramu.

¹⁶ "Akka isa barsiisuuf, eenyutu yaada garaa Gooftaa beeke?"†
Nu garuu yaada garaa Kiristoos qabna.

3

Waa'ee Gargar Ba'uu Waldaa Kiristaanaa

¹ Yaa obboloota, ani akka namoota foonii warra Kiristoositti daa'imman taataniitti malee akka namoota Hafuuraatti isinitti dubbachuu hin dandeenye. ² Waan isin nyaata jabaa nyaachuu hin ga'iniif ani aannan isiniif kenne malee nyaata cimaa isinii hin kennine. Dhugumaan isin amma iyyuu nyaachuu hin dandeenye. ³ Isin amma iyyuu nama foonii ti. Sababii hinaaffaa fi wal qoccoluun isin gidduu jiruuf isin nama foonii mitii? Akkuma namoota kaaniitti jiraattu mitii? ⁴ Namni tokko, "Ani kan Phaawulos" jedhee, inni kaan immoo, "Ani kan Apholoos" yoo jedhe isin namuma qofa mitii ree?

⁵ Egaa Apholoos eenyu? Phaawulosis eenyu? Isaan warra akkuma hojii Gooftaan tokkoo tokkoo isaaniitiif kenneetti tajaajilanii dha; isin immoo karaa isaaniitiin amantan. ⁶ Ani nan dhaabe; Apholoos bishaan obaase; Waaqni garuu ni guddise. ⁷ Kanaafuu Waaqa isa guddisu sana malee namichi dhaabu yookaan inni bishaan obaasu sun homaa miti. ⁸ Inni dhaabus, inni bishaan obaasus tokkuma; tokkoon tokkoon

isaaniis akkuma dadhabbii isaaniitti gatii ni argatu. ⁹ Nu warra Waaqa wajjin hojjennuu dha; isin lafa qotiisaa Waaqaa ti; ijaarsa Waaqaatis.

¹⁰ Anis ayyaana Waaqni naa kenneen akkuma ogeessa ijaarsaa tokkootti hundee buuseera; namni kaan immoo isa irratti ijaaraa jira. Garuu tokkoon tokkoon namaa akkamitti akka ijaaru of eeggachuu qaba. ¹¹ Namni tokko iyyuu hundee duraan buufame sana malee kan biraa buusuu hin danda'uutii; hundeen sunis Yesuus Kiristoos. ¹² Namni kam iyyuu yoo hundee sana irratti warqeen, meetiin, dhagaa gatii guddaatiin, mukaan, citaan yookaan hoffaan ijaare, ¹³ guyyaan sun waan ifatti isa baasuuf hojiin isaa maal akka ta'e ni beekama. Innis ibiddaan ifatti baafama; ibiddi sunis qulqullina hojii nama hundaa ni qora. ¹⁴ Yoo wanni inni ijaare utuu hin gubatin hafeef inni gatii isaa ni argata. ¹⁵ Namni hojiin isaa jalaa gubate kam iyyuu gatii isaa ni dhaba; inni mataan isaa garuu ni oolfama; ta'us akka nama ibidda keessa darbeetti oolfama.

¹⁶ Isin akka mana qulqullummaa Waaqaa taatanii fi akka Hafuurri Waaqaa isin keessa jiraatu hin beektanii? ¹⁷ Eenyuu iyyuu yoo mana qulqullummaa Waaqaa balleesse, Waaqni isa ni balleessa; manni qulqullummaa Waaqaa qulqulluudhaatii; manni qulqullummaa sunis isin.

¹⁸ Eenyuu iyyuu of hin gowwoomsin. Isin keessaa namni tokko yoo addunyaa kana irratti ogeessa of se'e, inni akka ogeessa ta'uuf gowwaa haa ta'u. ¹⁹ Ogummaan addunyaa kanaa fuula Waaqaa duratti gowwummaadhaatii. Kunis isa, "Inni ogeeyyii haxxummaa isaaniitiin qaba"* jedhamee barreeffamee dha. ²⁰ Akkasumas, "Gooftaan akka yaadni ogeeyyii faayidaa hin gabne ni beeka"† jedhameera. ²¹ Kanaafuu eenyu iyyuu namaan hin booniin! Wanni hundinuu keessaniitii; ²² Phaawulosis ta'u Apholoos yookaan Keefaan yookaan addunyaan yookaan jireenyi yookaan duuti yookaan wanti amma jirus ta'u wanti dhufu hundinuu keessan; ²³ isin kan Kiristoos; Kiristoos immoo kan Waaqaa ti.

4

Ergamoota Kiristoos

¹ Kanaafuu namni akka tajaajiltoota Kiristoosii fi akka warra icciitiin Waaqaa imaanaa itti kennameetti nu ilaaluu qaba. ² Warra imaanaan itti kenname sanas amanamoo ta'uutu irraa eegama. ³ Yoo isiniin yookaan nama kaaniin natti murame ani homaattuu hin lakkaa'u; dhugumaan anuu ofitti hin muru. ⁴ Yaadni garaa koo qulqulluu dha; kun garuu qulqullina koo hin mirkaneessu. Kan natti muru Gooftaa dha. ⁵ Kanaafuu isin utuu yeroon murteeffame sun hin ga'in murtii tokko iyyuu hin kenninaa; hamma Gooftaan dhufutti eegaa. Inni waan dukkana keessatti dhokfame ifatti ni baasa; hawwii garaa namaas ni mul'isa. Yeroo sana namni hundinuu Waaqa biraa galata ni argata.

⁶ Eegaa yaa obboloota, ani akka isin jechi, "Waan barreeffame irra hin darbin" jedhu sun maal jechuu akka ta'e nurraa barattaniif bu'aa keessaniif jedhee waan kana hunda Apholoosii fi ofii kootti fakkeesseera; kunis akka isin nama tokko isa kaan caalchiftanii hin koorreef. ⁷ Eenyutu akka ati warra kaan caaltu si godhe? Wanni Waaqni siif hin kennin kan ati qabdu maal faatu jira? Erga siif kennamee immoo akka waan kennaa hin ta'iniitti maaliif boonta ree?

⁸ Amma isin waan barbaaddan hundumaa argattaniirtu! Sooromtaniirtus! Nurraa gargar baatanii mootota taataniirtu! Nus akka isin wajjin mootota taanuuf utuu isin mootota taatanii ani akkaman hawwa ture! ⁹ Waaqni, nu ergamoota akka namoota duuti itti murtaa'eetti waan dhuma hirirraa nu taasisse natti fakkaataatii. Nu addunyaa duratti, ergamootaa fi namoota durattis waan daawwatamu taaneerra. ¹⁰ Nu Kiristoosiif jennee gowwoota; isin garuu Kiristoosiin ogeeyyii dha! Nu dadhaboo dha; isin immoo jajjabeeyyii dha! Isin kabajamtoota; nu immoo tuffatamtoota! ¹¹ Hamma sa'aatii ammaatti ni beelofna; ni dheebonna; ni daarra; ni reebamna; mana jireenyaas hin qabnu. ¹² Harkuma keenyaan hojjechuudhaanis ni dadhabna. Yommuu abaaramnu ni eebbifna; yommuu ari'atamnu ni obsina. ¹³ Yommuu arrabsamnu, waan gaarii deebifna; hamma yeroo kanaattis xurii lafaatii fi kosii addunyaa taaneerra.

Waamichaa fi Akeekkachiisa Phaawulos

¹⁴ Kanas isinii barreessuun koo akka ijoollee koo kanneen jaallatamaniitti isin gorsuudhaaf malee isin qaanessuuf miti. ¹⁵ Isin yoo karaa Kiristoosiin guddiftoota kuma kudhan qabaattan iyyuu, abbootii baay'ee hin qabdan; ani Kiristoos Yesuusiin karaa wangeelaatiin abbaa keessan ta'eeraatii. ¹⁶ Kanaaf ani akka isin fakkeenya koo duukaa buutan isinan kadhada. ¹⁷ Sababii kanaafis ani ilma koo isan jaalladhu, kan Gooftaattis

* 3:19 3:19 Iyo 5:13 † 3:20 3:20 Far 94:11

amanamaa ta'e Xiimotewosin gara keessanitti ergeera. Innis haala jireenya koo kan ani Kiristoos Yesuusiin argadhe kan waan ani iddoo hundatti waldaa kiristaanaa hunda keessatti barsiisu wajjin deemu sana isin yaadachiisa.

¹⁸ Isin keessaa namoonni tokko tokko waan ani gara keessan hin dhufne se'anii of tuulanii jiru. ¹⁹ Yoo fedhii Waaqaa ta'e garuu ani dafee gara keessan nan dhufa; ergasii waan of tuultonni kunneen dubbatan qofa utuu hin ta'in humna isaan qabanis beekuu nan barbaada. ²⁰ Mootummaan Waaqaa humnaan malee dubbiidhaan miti. ²¹ Isin maal barbaaddu? Ani ulee qabadhee moo jaalalaa fi hafuura gad of qabuutiin gara keessan dhufa?

5

Halalummaa Waldaa keessa Jiru

¹ Akka halalummaan ormoota keessatti illee hin beekamin isin gidduu jiru odeeffamaa jira: namni niitii abbaa isaa wajjin ciise tokko jiraatii. ² Isinis of tuultaniirtu! Qooda kanaa akka malee gadditanii namicha waan akkasii hojjetee sana tokkummaa keessan keessaa baasuun isin irra hin jiruu? ³ Ani fooniin isin biratti argamuu baadhu illee hafuuraan isin wajjinan jira. Ani akka waan isin wajjin jiruutti namicha waan akkasii hojjetetti ammuma mureera. ⁴ Yommuu isin maqaa Gooftaa keenya Yesuusiin walitti qabamtanitti anis yeroo hafuuraan isin wajjin ta'uuttii fi humna Gooftaa keenya Yesuus arganutti, ⁵ akka foon isaa balleeffamuuf, akka hafuurri isaa immoo guyyaa Gooftaati fayyuuf namicha kana dabarsaatii Seexanatti kennaa.

⁶ Of tuuluun keessan gaarii miti. Isin akka raacitiin xinnoon bukoo guutuu bukeessitu hin beektanii? ⁷ Isin waan bukoo raacitii hin qabne taataniif akka Maxinoo haaraa taataniif raacitii moofaa of keessaa baasaatii gataa; hoolaan Faasiikaa keenya, Kiristoos aarsaa nuuf ta'eeraatii. ⁸ Kanaafuu kottaa raacitii moofaa yookaan raacitii jal'inaatii fi hamminaatiin utuu hin ta'in Buddeena Hin bukaa'in kan qulqullinaa fi dhugaa of keessaa qabuun ayyaanicha ayyaanefannaa.

⁹ Ani akka isin namoota halalummaadhaan jiraatan wajjin walitti dhufeenya hin qabaanneef xalayaa koo keessatti isinii barreesseen ture; ¹⁰ kunis gonkumaa namoota halalummaadhaan addunyaa kana irra jiraatan yookaan doqnootaa fi saamtota yookaan warra Waaqa tolfamaa waaqeffatan jechuu koo miti. Utuu akkas ta'ee immoo silaa addunyaa kana keessaa ba'uu qabdu ture. ¹¹ Ani garuu akka isin nama, "Ani obboleessa" ofiin jechaa halalummaan jiraatu yookaan doqna yookaan nama Waaqa tolfamaa waaqeffatu yookaan maqaa nama balleessu yookaan machooftuu yookaan saamtuu wajjin walitti dhufeenya hin qabaanneef amma isinii barreessa. Nama akkasii wajjin nyaata iyyuu hin nyaatinaa!

¹² Warra ala jiranitti murruun hojii kootii? Isin warra keessa jiranitti muruu hin qabdani? ¹³ Waaqni warra ala jiranitti ni mura; "Nama hamaa of keessaa baasaa!"*

6

Wal Himachuu Amantootaa

¹ Isin keessaa namni kam iyyuu yoo nama biraa irraa falmii qabaate, dhimma isaa qulqulloota duratti dhi'effachuu irra akkamitti warra Waaqatti hin amanin duratti murtii dhi'effachuuf ija jabaata? ² Isin akka qulqullooni addunyaatti muran hin beektanii? Erga kan addunyaatti muran taatanii waan xixinnooti muruu hin dandeessanii? ³ Isin akka nu ergamoota Waaqaatti murru hin beektanii? Yoos hammam caalaa waan jireenya addunyaa kanaatti haa murru ree? ⁴ Egaa yoo falmii dhimma akkasii qabaattan maaliif namoota waldaa Kiristaanaa keessatti tuffataman duratti dhi'effattu ree? ⁵ Anis isin qaanssuuf waan kana nan dubbadha. Namni beekaan falmii amantoota gidduu jiruuf murtii kennuu danda'u tokko iyyuu hin jiru jechuudhaa? ⁶ Obboleessi tokko obboleessa kaan himachuuf jedhee mana murtii dhaqa; kunis fuula warra hin amannee duratti!

⁷ Wal himachuun keessan amma iyyuu guutamaatti mo'atamuu keessan argisiisa. Qooda kanaa dabni isinitti hojjetamuu hin wayyuu? Gowwoomfamuu isinii hin wayyuu? ⁸ Garuu isin mataan keessan iyyuu ni gowwoomsitu; dabas ni hojjetu; kanas obbolootuma keessanitti hojjetu. ⁹ Isin akka jal'oonni mootummaa Waaqaa hin dhaalle hin beektanii? Hin gowwoominaa: halaleewwan yookaan warri Waaqa tolfamaa waaqeffatan yookaan ejjitoonni yookaan dhiironni sagaagaltoonni yookaan dhiironni dhiira wajjin sagaagalan, ¹⁰ yookaan hattoonni yookaan doqnoonni yookaan

* 5:13 5:13 KeD 17:7; 19:19; 21:21; 22:21,24; 24:7

machooftonni yookaan warri maqaa nama balleessan yookaan saamttonni mootummaa Waaqaa hin dhaalan. ¹¹ Gariin keessan akkas turtan. Ta'us isin maqaa Gooftaa keenya Yesuus Kiristoosii fi Hafuura Waaqa keenyaatiin dhiqamtaniirtu; qulqullooftaniirtu; qajeeltotas taasifamtaniirtu.

Halalummaa

¹² "Wanti hundinuu naaf eeyyamameera;" kan faayidaa qabu garuu hunda isaa miti; "Wanti hundinuu naaf eeyyamameera;" garuu wanti tokko iyyuu na hin mo'atu. ¹³ "Nyaanni garaadhaaf; garaanis nyaataaf;" Waaqni garuu lachan isaanii iyyuu ni balleessa. Dhagni Gooftaa tajaajiluudhaaf malee halalummaaf miti; Gooftaanis dhagnaaf. ¹⁴ Waaqni humna isaatiin warra du'an keessaa Gooftaa kaaseera; nus akkasuma ni kaasa. ¹⁵ Isin akka dhagni keessan kutaa dhagna Kiristoos ta'e hin beektanii? Yoo ani kutaa dhagna Kiristoos fuudhee kutaa dhagna sagaagaltuu godhuu ree? Gonkumaa hin ta'u! ¹⁶ Isin akka namni sagaagaltuu wajjin wal qunnamtii qabu tokko ishee wajjin dhagna tokko ta'u hin beektanii? "Lamaan isaanii iyyuu foon tokko ni ta'u"* jedhameeraatii. ¹⁷ Namni Gooftaa wajjin tokko ta'e garuu Gooftaa wajjin hafuuraan tokko.

¹⁸ Halalummaa irraa baqadhaa. Namni cubbuu biraa hunda dhagna isaatii alatti hojjeta; namni halalummaa hojjetu garuu dhagnuma ofii isaatti cubbuu hojjeta. ¹⁹ Isin akka dhagni keessan mana qulqullummaa Hafuura Qulqulluu isin keessa jiraatu, kan Waaqa irraa argattan sanaa ta'e hin beektanii? Isin kan ofii keessanii miti; ²⁰ isin gatiin bitantan; kanaafuu dhagna keessaniin Waaqaaf ulfina kenna.

7

Waa'ee Fuudhaa fi Heerumaa

¹ Waa'ee waan isin naa barreessitan sanaa, namni tokko utuu fuudhuu baatee isaaf gaarii dha. ² Garuu waan halalummaan jiruuf dhiirri hundi niitii ofii isaa haa qabaatu; dubartiin hundis dhirsa ofii ishee haa qabaatu. ³ Dhirsii waan niitii isaatiif malu haa guutuuf; niitiinis akkasuma dhirsa isheetiif haa guuttu. ⁴ Niitiin dhagna ofii ishee irratti aangoo hin qabdu; kan aangoo qabu dhirsa. Akkasuma immoo dhirsii dhagna ofii isaa irratti aangoo hin qabu; kan aangoo qabdu niitii dha. ⁵ Yoo kadhannaatti jabaachuuf jettanii yeroof itti walii galan malee wal hin didinaa. Ergasiis akka of qabuu dadhabuu keessaniin Seexanni isin hin qorreef deebi'aa wajjin jiraadhaa. ⁶ Kanas ani eeyyamaan malee ajajaaf hin dubbadhu. ⁷ Ani utuu namni hundumtuu akkuma koo ta'ee nan hawwa ture. Garuu namni hundi kenna ofii isaa kan Waaqni isaaf kenne qaba; inni tokko kenna tokko, kaan immoo kenna biraa qaba.

⁸ Ani warra hin fuudhinii fi warra hin heeruminiin, haadhota hiyyeessaatiin illee akkanan jedha: Isaan yoo akkuma koo fuudhaa fi heeruma malee hafan isaanii wayya. ⁹ Yoo of qabuu dadhaban garuu haa fuudhan yookaan haa heeruman; hawwiin gubachuu irra fuudhuu yookaan heerumuu wayyaatii.

¹⁰ Warra fuudhanii fi warra heerumaniifis ajajni ani kennu kana: Ajaja kanas Gooftaatu kenna malee ana miti; niitiin dhirsa isheetiin gargar hin ba'in. ¹¹ Yoo gargar baate garuu utuu hin heerumin haa jiraattu; yoo kanaa achii dhirsa isheeti haa araaramtu. Dhirsii niitii isaa hin hiikin.

¹² Warra hafaniinis ani akkanan jedha: Kana immoo anatu jedha malee Gooftaa miti; obboleessi kam iyyuu yoo niitii amantii hin qabne qabaate, yoo isheenis isa wajjin jiraachuuf fedhii qabaate, inni ishee hin hiikin. ¹³ Dubartiin tokkos yoo dhirsa amantii hin qabne qabaate, yoo innis ishee wajjin jiraachuuf fedhii qabaate, isheen isa hin hiikin. ¹⁴ Dhirsii amantii hin qabne karaa niitii isaatiin qulqulleeffameeraatii; niitiin amantii hin qabnes karaa dhirsa isheetiin qulqulleeffamteertii. Yoo kanaa achii ijoolleen keessan xuraa'oo ta'u; amma garuu qulqulloota.

¹⁵ Namni amantii hin qabne garuu yoo gargar ba'uu fedhe gargar haa ba'u. Obboleessi tokko yookaan obboleettiin tokko haala akkasii keessatti hin hidhaman; Waaqni akka isin nagaan jiraattaniif isin waameeraatii. ¹⁶ Yaa niitii, ati dhirsa kee ni fayyifta ta'aatii maal beekta? Yookaan yaa dhirsa, ati niitii kee ni fayyifta ta'aatii maal beekta?

Eenyummaa Geeddarame

¹⁷ Tokkoon tokkoon namaa garuu akkuma jireenya Gooftaan kenneefiitti, akkuma Waaqni isa waamettis haa jiraatu. Waldoota Kiristaanaa hunda keessattis ajajni koo kanuma. ¹⁸ Namni tokko waamamuu isaatiin dura dhagna qabatee ture? Inni nama dhagna hin qabatan ta'uu hin qabu. Namni tokko waamamuu isaatiin dura dhagna

* 6:16 6:16 Uma 2:24

hin qabannee? Inni dhagna hin qabatin. ¹⁹ Ajaja Waaqaa eeguutu faayidaa qaba malee dhagna qabachuun yookaan qabachuu baachuun faayidaa hin qabu. ²⁰ Tokkoon tokkoon namaa haaluma yeroo Waaqni isa waametti keessa ture keessa haa jiraatu.

²¹ Ati yeroo waamamtetti garba turtee? Yoo akkas ta'e inni si hin yaadessin; yoo bilisa ba'uu dandeesse garuu itti fayyadami. ²² Namni yeroo Gooftaadhaan waamametti garba ture inni gooftaadhaaf bilisa; akkasuma immoo namni yeroo waamametti bilisa ture inni garbicha Kiristoos. ²³ Isin gatiidhaan bitamtan; garboota namootaa hin ta'inaa. ²⁴ Yaa obboloota, tokkoon tokkoon namaa haaluma yeroo itti waamametti keessa tureen fuula Waaqaa dura haa jiraatu.

Waa'ee Warroota Hin fuudhinii

²⁵ Ani waa'ee dubarran qulqulluu ajaja Gooftaan natti kenne hin qabu; garuu akka nama amanamaa ta'uuf araara Gooftaa argate tokkootti yaada koo nan kenna. ²⁶ Sababii rakkina ammaatiif jettanii akkuma jirtanitti turuun isiniif gaarii natti fakkaata. ²⁷ Ati niitiitti hidhamteertaa? Ishee hiikuu hin barbaadin. Ati niitii irraa hiikamteertaa? Niitii hin barbaadin. ²⁸ Ati garuu yoo fuute cubbuu hojjechuu kee miti; durbis yoo heerumte cubbuu hojjechuu ishee miti. Ta'us addunyaa kana irratti warra fuudhanii fi warra heeruman rakkinnatu argata; ani immoo rakkina kana jalaa isin baasuun barbaada.

²⁹ Yaa obboloota, wanti ani jedhu kana; yeroon murteeffame sun gabaabateera; si'achi warri niitii qaban akka waan hin qabaatiniitti haa jiraatan; ³⁰ warri boo'an akka waan hin boo'iniitti, warri gammadan akka waan hin gammadiniitti, warri waa bitatan akka waan wanni bitatan sun kan isaanii hin ta'iniitti, ³¹ warri waan addunyaa kanaatti fayyadamanis akka waan itti hin fayyadaminiitti haa hedan. Bifti addunyaa kanaa ni badaatii.

³² Ani akka isin yaaddoo malee jiraattan nan hawwa. Namni hin fuudhin tokko Gooftaa gammachiisuuf dhimma Gooftaatti dhimma. ³³ Namni fuudhe garuu niitii isaa gammachiisuuf dhimma addunyaatti dhimma; ³⁴ fedhiin isaas gargar qoodameera. Dubartiin hin heerumun yookaan durbi qulqulluun dhagnaa fi hafuuraan qulqulluu ta'uuf dhimma Gooftaatti dhimmiti. Dubartiin heerumte garuu dhirsa ishee gammachiisuuf dhimma addunyaatti dhimmiti. ³⁵ Kana jechuun koos isin fayyaduuf malee kiyyootti isin galchuuf miti; qooda kanaa akka isin yaada gargar hin hiraminiin karaa qajeelaa irra Gooftaaf jiraattan nan hawwa.

³⁶ Namni kam iyyuu yoo durba kaadhimate sirriitti qabuu baate, yoo umuriin ishee dabalaa deemee innis akka ishee fuudhuu qabu yaade, akkuma fedhii isaa haa godhu. Inni cubbuu hojjechuu isaa miti. Isaan wal fuudhuu qabu. ³⁷ Garuu namni waan kana yaada ofii isaatiin murteesse, kan dirqama tokko illee jala hin jirree fedhii ofii isaa mo'achuu danda'u, kan akka durba sana hin fuune murteeffate, innis waan qajeelaa hojjete. ³⁸ Kanaafuu namni durba fuudhu waan qajeelaa hojjete; kan ishee fuudhuu dhiise immoo caalaa waan qajeelaa hojjete.

³⁹ Dubartiin tokko hamma dhirsi ishee jirutti isatti hidhamteerti. Yoo dhirsi ishee du'e garuu isheen abbaa barbaaddetti heerumuuf bilisa; garuu inni nama Gooftaa ta'uu qaba. ⁴⁰ Akka yaada kootti garuu isheen yoo utuu hin heerumin hafte caalaa gammaddi; anis Hafuura Waaqaa of keessaa nan qaba jedheen yaada.

8

Nyaata Waaqota Tolfamoof Dhi'effame

¹ Waa'ee nyaata waaqota tolfamoof aarsaa dhi'effamee akka nu hundinuu beekumsa qabnu beekna. Beekumsi of nama tuulchisa; jaalalli garuu nama ijaara. ² Namni waan waa beeku of se'u inni amma illee akka beekuun isa irra jirutti hin beeku. ³ Namni Waaqa jaallatu garuu Waaqaan beekameera.

⁴ Egaa waa'ee nyaata waaqota tolfamoof aarsaa dhi'effame nyaachuu irratti, "Akkaa addunyaa kana irratti Waaqni tolfamaan homaa hin fayyadne, Waaqa tokkicha malees akka Waaqni biraa hin jirre" beekna. ⁵ Dhugumaan akkuma waaqonni baay'eenii fi gooftonni baay'een jiran sana wantoonni waaqota jedhamaan samii irra yookaan lafa irra jiraatan iyyuu, ⁶ garuu Waaqa tokkicha, Abbaa, kan wanni hundi isa biraa dhufe, kan nu isaaf jiraannu qabna; akkasumas Gooftaa tokkicha, Yesuus Kiristoos kan wanni hundi karaa isaatiin dhufee fi kan nuus karaa isaatiin jiraannutu jira.

⁷ Garuu namni beekumsa kana qabu nama hunda miti. Namoonni tokko tokko waaqota tolfamoo waan baraniif yommuu nyaata akkanaa nyaatanitti akka waan Waaqa tolfamaaf dhi'effameetti hedu; yaadni garaa isaaniis waan dadhabaa ta'eef ni xuraa'a. ⁸ Nyaanni garuu Waaqatti nu hin dhi'eessu; yoo nyaachuu baanne wanni nutti hammaatu, yoo nyaannes wanni nutti tolu hin jiru.

⁹ Ta'us akka mirgi keessan kun warra dadhabootti gufuu hin taaneef of eeggadhaa. ¹⁰ Namni yaada dadhabaa qabu tokko yoo utuu ati iyyuu namni beekumsa qabdu mana qulqullummaa Waaqa tolfamaa keessatti nyaattuu si arge inni waan waaqota tolfamoof dhi'effame sana nyaachuuf ija hin jabaatuu? ¹¹ Akkasiin obboleessi dadhabaan Kiristoos isaaf jedhee du'e kun beekumsa keetiin bada. ¹² Isinis yoo karaa kanaan obboloota keessanitti cubbuu hojjettan, yaada isaanii isa dadhabaas yoo madesstaan, isin Kiristoositti cubbuu hojjettu. ¹³ Kanaafuu yoo wannani ani nyaadhu obboleessa koo gufachiise, ani akka obboleessi koo hin gufanneef gonkumaa deebi'ee foon hin nyaadhu.

9

Mirga Ergamaa Tokkoo

¹ Ani bilisa mitii? Ani ergamaa mitii? Ani Gooftaa keenya Yesuusini hin arginee? Isin bu'aa hojii ani Gooftaaf hojjedhee mitii? ² Ani yoon warra kaaniif ergamaa ta'uu baadhe iyyuu isiniif dhugumaan ergamaa dha! Isin Gooftaadhaan chaappaa ergantummaa koo ti.

³ Deebiin ani warra na qoraniif kennu kana. ⁴ Nu nyaachuu fi dhuguuf mirga hin qabnuu? ⁵ Nu akkuma ergamoota kaanii, akkuma obboloota Gooftaatii fi akkuma Keefaa niitti amantu tokko of faana fudhannee deemuuf mirga hin qabnuu? ⁶ Yookaan anaa fi Barnaabaas qofatu hojii dhiisuuf mirga hin qabnee?

⁷ Namni baasii ofii isaatiin loltuu ta'ee tajaajilu eenyu? Namni iddoo dhaabaa wayinii irra wayinii dhaabee ija isaa hin nyaanne eenyu? Namni bushaayee tiksaa aannan hin dhugne eenyu? ⁸ Kanas ani akka taayitaa namaa qofaan dubbadhaa? Seerris kanuma dubbata mitii? ⁹ Seera Musee keessatti, "Qotiyoo midhaan siribsiisuutti jiru afaan hin hidhin" jedhamee barreeffameeraatii. Eгаа Waaqni qotiyoodhaaf yaaduu isaatii ree? ¹⁰ Inni guutummaatti sababii keenyaaf dubbachuu isaa mitii? Eeyyee, kun sababii keenyaaf barreeffame; sababiin isaa inni qotu qotuun isaa, inni midhaan siribsiisus siribsiisuun isaa akka midhaan sana keessaa qooddatu abdachaa hojjechuu qaba. ¹¹ Nu waan hafuuraa isin keessatti facaafnee yoo waan foonii isin irraa haammanne kun ni guddataa? ¹² Erga warri kaan mirga gargaarsaa kana isin irraa qabaattanii, nu immoo kan caalu hin qabaannuu ree?

Nu garuu mirga kanatti hin fayyadamne. Nu wangeela Kiristoositti gufuu ta'uu mannaa waanuma hunda obsuu qabna.

¹³ Isin akka warri mana qulqullummaa keessa wantoota qulqulluu irra tajaajilan nyaata isaanii mana qulqullummaa irraa argatan, akka warri iddoo aarsaa tajaajilan immoo waan iddoo aarsaa irratti dhi'effamu irraa qooddatan hin beektanii? ¹⁴ Akkasuma immoo akka warri wangeela lallaban waan ittiin jiraatan wangeela irraa argatan Gooftaan ajajeera.

¹⁵ Ani garuu mirga kana keessaa tokkotti illee hin fayyadamne. Kanas isiniif barreessuun koo waan akkasii naa gootu jedhee abdadhee miti. Namni tokko waan ani ittiin of jaju kana na jalaa busheessuu mannaa ani du'uu naa wayya! ¹⁶ Ani yoon wangeela lallabe of jaju hin danda'u; lallabuun dirqama kootii. Yoon wangeela lallabuu baadhe anaaf wayyoo! ¹⁷ Ani yoon fedhii kootiin lallabe badhaasa qaba; yoon fedhii kootiin hin ta'in garuu ani imaanadhuma natti kenname sana raawwachuu koo ti. ¹⁸ Yoos badhaasni koo maali ree? Badhaasni koo, lallaba koo keessatti ani mirga wangeelaan qabutti guutuumaan guutuutti utuu hin fayyadamin kaffaltii malee wangeela lallabuu koo ti.

Phaawulos Mirga Isaatti Fayyadamuu Isaa

¹⁹ Ani nama hunda irraa bilisa ta'uu iyyuu nama gara caaluuf bu'aa buusuuf jedhee nama hundaaf of garboomse. ²⁰ Ani Yihuudootaaf bu'aa buusuuf jedhee Yihuudootaaf akka Yihuudii nan ta'e. Yoon ofii kootii seera jala jiraachuu baadhe iyyuu, warra seera jala jiraniif bu'aa buusuuf jedhee akka nama seera jala jiruu nan ta'e. ²¹ Ani utuun seera Waaqaatiin ala hin ta'in, garuu utuman seera Kiristoos jala jiruu, warra seera hin qabneef bu'aa buusuuf jedhee warra seera hin qabneef akka nama seera hin qabneen ta'e. ²² Ani warra dadhaboof bu'aa buusuuf jedhee warra dadhaboo biratti dadhabaan ta'e. Ani karaa danda'amu hundaan namoota tokko tokko fayyisuuf jedhee nama hunda biratti waanuma hunda nan ta'e. ²³ Akkan wangeela keessatti hirmaadhuufis sababii wangeelaatiif jedhee waan kana hunda nan hojjedha.

Barbaachisummaa Naamusa Dhuunfaa

²⁴ Dorgommii fiigichaa keessatti akka warri fiigan hundinuu dorgoman, garuu akka namni tokko qofti badhaasa argatu hin beektanii? Isinis akkasuma akka badhaasa argattaniif fiigaa! ²⁵ Namni dorgommii keessatti dorgomu hundinuu leenjii cimaa keessa darba. Isaan gonfoo badu argachuuf waan kana godhu; nu garuu gonfoo hin badne argachuuf waan kana goona. ²⁶ Kanaafuu ani akka nama kaayyoo malee fiiguutti hin fiigu; akka nama qilleensa rukutuutti hin lolu. ²⁷ Ani garuu warra kaaniif lallabee akka ofii kootii immoo nama gatame hin taaneef dhagna koo adabee akka inni naa ajajamu nan godha.

10

Israa'eloota Irraa Haa barannu

¹ Yaa obboloota, akka abbootiin keenya hundi duumessa jala turan, akka hundi isaaniis galaana keessa darban akka isin utuu hin beekin haftan ani hin barbaadu. ² Hundi isaaniis kan Musee ta'uuf duumessaa fi galaanaan cuuphaman. ³ Hundi isaaniis nyaata hafuura tokkicha nyaatan. ⁴ Hundi isaaniis dhugaatii hafuura tokkicha dhugan. Isaan kattaa hafuura isa isaan wajjin deemaa ture irraa dhuganiiruutii; kattaan sunis Kiristoos ture. ⁵ Ta'u iyyuu waan Waaqni hedduu isaaniitti hin gammadiniif isaan lafa gammoojjii keessatti dhumani.

⁶ Wantoonni kunneen akka nu akkuma isaaniis waan hamaa hin hawwineef fakkeenya nuu ta'an. ⁷ Akka isaan keessaa namoonni tokko tokko godhan sana isin waaqota tolfamoo hin waaqeffatinaa; kunis akkuma, "Namoonni nyaachuu fi dhuguuf tataa'an; sirbuufis ka'an"* jedhamee barreeffamee dha. ⁸ Akka isaan keessaa namoonni tokko tokko halalummaa raawwataniis guyyaa tokkotti namoonni 23,000 dhumani sana, nu halalummaa raawwachuu hin qabnu. ⁹ Akka isaan keessaa tokko tokko Gooftaa qoraniis bofaan ajjeefaman sana nu Gooftaa qoruu hin qabnu. ¹⁰ Isin akka isaan keessaa tokko tokko guungumaniis isa nama balleessuun balleeffaman sana hin guunguminaa.

¹¹ Kun hundi akka fakkeenya ta'uuf isaan irratti raawwatame; nuu warra dhumni baraa itti dhufeef immoo akka of eeggannaa ta'uuf barreeffame. ¹² Kanaafuu namni waan dhaabate of se'u akka hin kufneef of haa eeggatu. ¹³ Qorama nama irra ga'u malee qoramni tokko iyyuu isinitti hin dhufne. Waaqnis amanamaa dha; inni akka isin waan baachuu hin dandeenyeen qoramtan isin hin godhu. Yommuu qoramtanitti garuu inni akka isin obsuu dandeesaniif karaa ittiin keessaa baatan isiniif qopheessa.

Waaqota Tolfamoo Irraa Fagaachuu

¹⁴ Kanaafuu yaa michoota ko, isin waaqota tolfamoo waaqeffachuu irraa baqadhaa. ¹⁵ Ani namoota hubannaa qabanittin dubbadha; waan ani dubbadhu isinuu murteessaa. ¹⁶ Xofooon eebbaa kan nu eebbifnu sun dhiiga Kiristoos wajjin tokkummaa qaba mitii? Buddeenni nu caccabsinu sunis foon Kiristoos wajjin tokkummaa qaba mitii? ¹⁷ Waan buddeenni tokko qofti jiruuf, nu baay'ee taanu iyyuu dhagnuma tokko; hundi keenya buddeenuma tokkicha sana irraa hirmaannaatii.

¹⁸ Mee saba Israa'el ilaalaa: Warri aarsaa irraa nyaatan sun iddoo aarsaa irraa qooda qabu mitii? ¹⁹ Egaa maal jechuu koo ti? Nyaanni waaqota tolfamoof aarsaa dhi'eeffamu wayi moo ree yookaan Waaqni tolfamaan wayi moo ree jechuu kootii? ²⁰ Akkas miti; aarsaan namoonni ormaa dhi'eessan hafuurota hamoodhaaf malee Waaqaaf miti; ani akka isin hafuurota hamoo wajjin tokkummaa qabaattan hin barbaadu. ²¹ Isin xofooo Gooftaati fi xofooo hafuurota hamoo dhuguu hin dandeesan; maaddii Gooftaati fi maaddii hafuurota hamoo irrattis hirmaachuu hin dandeessan. ²² Nu Gooftaa hinaaffaaf kakaafnaa? Nu isa caalaas jabaannaa?

Bilisummaa Amantootaa

²³ "Wanni hundinuu anaaf eeyyamamaa dha;" kan faayidaa qabu garuu waan hunda miti. "Wanni hundinuu anaaf eeyyamamaa dha;" kan nama fayyadu garuu waan hunda miti. ²⁴ Namni tokko iyyuu waan warra kaaniif gaarii ta'e barbaaduu qaba malee waan ofii isaatiif gaarii ta'e barbaaduu hin qabu.

²⁵ Utuu gaaffii qalbii keessaa tokko illee hin kaasin waan gabaa fooniitti gurguramu kan iyyuu nyaadhaa; ²⁶ "Laftii fi wanni lafa irra jiru hundinuu kan Gooftaati."†

²⁷ Warra hin amanin keessaa yoo namni tokko nyaataaf isin affeere, isinis yoo dhaquu barbaaddan dhaqaa; utuu gaaffii qalbii keessaa tokko illee hin kaasin waan isin duratti dhi'eeffame kan iyyuu nyaadhaa. ²⁸ Garuu yoo namni tokko, "Kun waaqota tolfamoodhaaf dhi'eeffame" isiniin jedhe, sababii namicha isinitti hime sanaatii fi sababii qalbiitiif waan sana hin nyaatinaa. ²⁹ Kanas qalbii namicha sanaati malee kan

* 10:7 10:7 Bau 32:6 † 10:26 10:26 Far 24:1

keeti jechuu koo miti. Maaliif qalbii nama biraatiin bilisummaa kootti murama ree? ³⁰ Ani ergan galateeffachuudhaan nyaata sana irratti hirmaadhee maaliifan waan ittiin Waaqa galateeffadhuun balaaleffatama ree?

³¹ Kanaafuu yoo nyaattan yookaan yoo dhugdan yookaan yoo waanuma fedhe illee hojjetan waan hunda ulfina Waaqaatiif hojjedhaa. ³² Yihuudoota yookaan Giriikota yookaan waldaa kiristaanaa kan Waaqaa hin gufachiisinaa; ³³ kunis akkuma ani nama hunda karaa hundaan gammachiisuuf yaalii godhutti jechuu dha. Ani akka isaan fayyaniif bu'aa namoota baay'eeitiif malee bu'aa kootiif jedhee waan kana hin godhu.

11

¹ Akkuma ani Kiristoosin fakkaadhu, isinis na fakkaadhaa.

Sirna Waaqeffannaa

² Ani sababii isin waan hundaan na yaadattanii fi waan duudhaa ani dabarsee isinitti kennes jabeessitanii qabattaniif isinin galateeffadha. ³ Ani akka mataan dhiira hundumaa Kiristoos ta'e, akka mataan dubartii dhiira ta'e, akka mataan Kiristoos immoo Waaqa ta'e akka beektan nan barbaada. ⁴ Dhiirri mataa isaa haguuggatee kadhatu yookaan raajii dubbatu hundinuu mataa ofii isaa salphisa. ⁵ Dubartiin utuu mataa ishee hin haguuggatin kadhattu yookaan raajii dubbattu kam iyyuu mataa ofii ishee salphifti; kun akka waan mataan ishee haaddameetti hedamaatii. ⁶ Dubartiin tokko yoo mataa ishee haguuggachuu baatte rifeensa mataa ishee murachuu qabdi; dubartiin rifeensa mataa ishee murachuun yookaan haaddachuun yoo qaaniitti ta'e immoo mataa ishee haguuggachuu qabdi.

⁷ Dhiirri fakkaattii fi ulfina Waaqaa waan ta'eef mataa isaa haguuggachuu hin qabu; dubartiin garuu ulfina dhiiraa ti. ⁸ Dubartiitu dhiira irraa argame malee dhiirri dubartii irraa hin argamneetti; ⁹ dubartiitu dhiiraaf uumame malee dhiirri dubartiif hin uumamne. ¹⁰ Kanaafuu dubartiin sababii ergamoota Waaqaatiif mallattoo taayitaa mataa ishee irraa qabaachuu qabdi. ¹¹ Ta'us Gooftaa biratti dubartiin dhiira malee yookaan dhiirri dubartii malee hin ta'u. ¹² Akkuma dubartiin dhiira irraa argamte akkasuma immoo dhiirri dubartii irraa dhalataatii; wanni hundi garuu Waaqa biraa argama.

¹³ Mee isinuu murteessaa; dubartiin utuu mataa ishee hin haguuggatin Waaqa kadhachuun sirriidhaa? ¹⁴ Akka dhiirri rifeensa mataa dheereffachuun isaa salphina ta'e uumamni iyyuu isin hin barsiisuu? ¹⁵ Dubartiin garuu yoo rifeensa dheeraa qabaatte, inni isheef ulfina mitii? Rifeensi dheeraan akka haguuggiitti isheef kennameeraatii. ¹⁶ Garuu yoo abbaan fedhe iyyuu waa'ee kanaa mormuu barbaade, nu yookaan waldaaleen kiristaanaa Waaqaa duudhaa akkasii hin qabnu.

Irbaata Gooftaa

11:23-25 kwf - Mat 26:26-28; Mar 14:22-24; Luq 22:17-20

¹⁷ Walitti qabamuun keessan waan waa balleessu malee waa tolchu hin ta'iniif ani ajaja kana keessatti isin hin jaju. ¹⁸ Waan hunda dura, yommuu isin akka waldaatti walitti qabamtanitti akka gargar ba'uun gidduu keessan jiru nan dhaga'a; kanas karaa tokkoon ani nan amana. ¹⁹ Warra isin keessaa Waaqa biratti fudhatama qaban ifatti baasuuf, garaa garummaan isin gidduu jiraachuu qaba. ²⁰ Yommuu walitti qabamtanitti wanti isin nyaattan Irbaata Gooftaa miti; ²¹ yeroo nyaataatti namni hundinuu irbaata ofii isaa nyaata. Inni tokko ni beela'a; kaan immoo ni machaa'a. ²² Isin mana itti nyaattanii fi itti dhugdan hin qabdan moo? Yookaan waldaa Kiristaanaa Waaqaa tuffattanii warra homaa hin qabne qaanessitu? Ani maalan isiniin jedha? Isin jajuu ree? Ani kanaan isin hin jaju!

²³ Ani waanan dabarsee isinitti kenne kana Gooftaa irraa fudhadheeraatii; Gooftaa Yesuus halkan dabarfamee kenname sana buddeena fuudhee, ²⁴ galata galche; buddeena sanas caccabsee, **“Kun foon koo kan isiniif ta'uu dha; kanas yaadannoo kootiif godhadhaa”** jedhe. ²⁵ Akkasumas irbaata booddee xoofoo fuudhee, **“Xoofoon kun kakuu haaraa dhiiga kootiin ta'uu dha; yeroo isa dhugdan hunda na yaadachuuf godhadhaa”** jedhe. ²⁶ Isinis hamma Gooftaan dhufutti yeroo buddeena kana nyaattanii xoofoo kana dhugdan hunda du'a isaa ni labsitu.

²⁷ Kanaafuu namni haala hin malleen buddeena sana nyaatu yookaan xofooo Gooftaa dhugu kam iyyuu foonii fi dhiiga Gooftaatti ni gaafatama. ²⁸ Namni tokko utuu buddeena sana irraa hin nyaatin, utuu xofooo sana irraas hin dhugin dura of qoruu qaba. ²⁹ Namni utuu foon Gooftaa addaan baasee hin hubatin nyaatee dhugu, inni ofii isaatti murtii nyaatee dhugaatii. ³⁰ Kanaafis isin keessaa hedduun dadhabaniiru; dhukkubsataniirus;

hedduunis boqotaniiru. ³¹ Utuu of qorree garuu nutti hin muramu ture. ³² Gooftaan yommuu nutti muru garuu akka addunyaa wajjin nutti hin muramneef nu adaba.

³³ Kanaafuu yaa obbolloota ko, isin yommuu nyaachuuf walitti qabamtan wal eegaa.

³⁴ Akka walitti qabamuun keessan murtii isinitti hin fidneef eenyu iyyuu yoo beela'e mana isaatti haa nyaatu!

Waan hafe irratti immoo ani yommuun dhufutti qajeelcha nan kenna.

12

Waa'ee Kennaawwan Hafuuraa

¹ Yaa obbolloota ko, egaa ani akka isin waa'ee kennaawwan hafuuraa wallaaltan hin barbaadu. ² Isin yeroo ormoota turantani akka gowwoomfamtanii gara waaqota tolfamoo dubbachuu hin dandeenyeetti geffamtanii turan ni beektu. ³ Kanaafuu namni Hafuura Waaqaatiin dubbatu kam iyyuu akka, "Yesuus abaaramaa dha" hin jenne, akka eenyu iyyuu yoo Hafuura Qulqulluudhaan ta'e malee, "Yesuus Gooftaa dha" jechuu hin dandeenye ani isinitti hima.

⁴ Kennaawwan gosa garaa garaatu jira; Hafuurri garuu tokkuma. ⁵ Tajaajila gosa garaa garaatu jira; Gooftaan garuu tokkuma. ⁶ Hojii gosa garaa garaatu jira; waan hundumaa garuu Waaqa tokkichatu nama hundumaan hojjeta.

⁷ Mul'anni Hafuura Qulqulluu garuu faayidaa waliitiif tokkoo tokkoo namaatiif kennama. ⁸ Isa tokkoof karaa Hafuuraatiin dubbii ogummaatu kennama; isa kaaniif immoo Hafuuruma sanaan dubbii beekumsaatu kennama; ⁹ isa kaaniif Hafuuruma sanaan amantiitu kennama; isa kaaniif immoo Hafuuruma tokkicha sanaan kennaawwan warra dhukkubsatan fayyisuutu kennama; ¹⁰ isa tokkoof dinqiiwwan hojjechuu, isa kaaniif raajii dubbachuu, isa kaaniif hafuurota addaan baasee beekuu, isa kaaniifis afaan haaraa gosa adda addaa dubbachuu, isa kaaniif immoo afaan haaraa sana hiikuutu kennama. ¹¹ Waan kana hundas Hafuuruma tokkicha sanatu akkuma fedhii ofii isaatti tokkoo tokkoo namaatiif dhuunfaatti hiruudhaan hojjeta.

Tokkummaa fi garaa garummaa Kutaa Dhagnaa

¹² Dhagni kutaa baay'ee qabaatu illee dhagnuma tokko; kutaawwan dhagnaa yoo baay'atani illee hundi isaanii dhagnuma tokko ta'u. Kiristoosis akkasuma. ¹³ Nu Yihuudoota yookaan Giriikota, garboota yookaan warra bilisooman taanus hundi keenya Hafuura tokkoon dhagna tokkotti cuuphamneerraatii; hundi keenyas, akka dhugnuuf Hafuurri tokkichi hin nuu kennaameera. ¹⁴ Dhagni kutaa tokko qofa utuu hin ta'in kutaawwan baay'eedhaatii.

¹⁵ Miilli yoo, "Ani waanan harka hin ta'iniif, ani kutaa dhagnaa mitii" jedhe, sababii kanaaf kutaa dhagnaa ta'uun isaa hin hafu. ¹⁶ Gurris yoo, "Ani waanan ija hin ta'iniif, ani kutaa dhagnaa mitii" jedhe, sababii kanaaf kutaa dhagnaa ta'uun isaa hin hafu. ¹⁷ Utuu dhagni guutumaatti ija ta'ee jiraatee silaa dhaga'uun eessa jira? Utuu dhagni guutumaatti gurra ta'ee jiraatee silaa fuunfachuun eessa jira? ¹⁸ Amma garuu Waaqni akkuma ofii barbaadetti kutaawwan sana adduma addaan dhagna keessa kaa'eera. ¹⁹ Utuu hundi isaanii kutaa dhagnaa tokkicha ta'anii silaa dhagni eessa jira? ²⁰ Egaa kutaawwan dhagnaa baay'ee dha; dhagni garuu tokkuma.

²¹ Iji harkaan, "Ati na hin barbaachiftu!" jechuu hin danda'u; yookaan mataan miillaan, "Ati na hin barbaachiftu!" jechuu hin danda'u. ²² Dhagumaanuu kutaawwan dhagnaa kanneen dadhaboo fakkaatan akka malee barbaachisoo dha; ²³ kutaawwan dhagnaa kanneen tuffatamoo nutti fakkaataniifis ulfina addaa ni kennina. Kutaawwan dhagnaa kanneen nu itti qaanofnuuf immoo ulfinni addaa ni kennama; ²⁴ kutaawwan dhagna keenyaa kanneen nu itti hin qaanofne waan kana hin barbaadan. Waaqni garuu kutaawwan dhagnaa walitti fayyisee kutaawwan nu itti qaanofnuuf ulfina caalu kenne; ²⁵ kunis akka kutaawwan haaluma tokkoon walii yaadaniif fi akka dhagna keessa gargar ba'uun hin jiraanneef. ²⁶ Yoo kutaan dhagnaa tokko rakkate kutaawwan hundinuu isa wajjin rakkatu; yoo kutaan tokko ulfina argate kutaawwan hundi isa wajjin gammadu.

²⁷ Isin amma dhagna Kiristoos; tokkoon tokkoon keessanis kutaa dhagna sanaa ti. ²⁸ Waaqni waldaa Kiristaanaa keessatti tokkoffaa ergamoota, lammaffaa raajota, sadaffaa barsiistota, ergasiis warra hojii dinqii hojjetan, itti aansees warra kennaa dhukkubsattoota fayyisuu qaban, warra namoota gargaaruu danda'an, warra kennaa bulchiinsaa qabanii fi warra afaan haaraa gosa addaa addaa dubbatan filateera. ²⁹ Hundumatu ergamootaa? Hundumatu raajotaa? Hundumatu barsiistotaa? Hundinuu hojii dinqii hojjetuu? ³⁰ Hundumatu kennaa dhukkubsattoota fayyisuu qabaa? Hundumatu afaan haaraa dubbataa? Hundumatu afaan sana hiikaa? ³¹ Isin garuu jabeessaatii kennaa caalu barbaadaa.

Jaalala

Amma illee ani karaa karaa hundumaa caalu isinitti nan argisiisa.

13

¹ Ani yoon afaan namootaatii fi afaan ergamoota Waaqaa dubbadhe, garuu jaalala qabaachuu baannaan akkuma sibiila iyyuu yookaan akka kilillee qillisu tokkoo ti. ² Ani yoon kenna raajii dubbachuu qabaadhe, icciitii hundaa fi beekumsa hunda hubachuu yoon danda'e, amantii gaara buqqisuu danda'us yoon qabaadhe, garuu jaalala qabaachuu baannaan ani homaa miti. ³ Ani yoon waanan qabu hunda hiyyeeyyiif kenne, dhagna koos akka gubamuuf yoon kenne, garuu jaalala qabaachuu baannaan homaa na hin fayyadu.

⁴ Jaalalli obsa qaba; jaalalli arjaa dha. Inni hin hinaafu; hin kooru; ofis hin tuulu. ⁵ Jaalalli waan hin malle hin hojjetu; ofittoo miti; dafee hin aaru; hammina namatti hin lakkaa'u. ⁶ Jaalalli dhugaatti gammada malee waan hamaatti hin gammadu. ⁷ Jaalalli waan hunda ni obsa; waan hunda ni amana; waan hunda abdata; waan hunda keessattis jabaatee dhaabata.

⁸ Jaalalli gonkumaa hin badu. Raajii taanaan ni darba; afaan haaraa taanaan ni hafa; beekumsa taanaan ni bada. ⁹ Nu beekumsa irraa gara tokko beeknaatii; raajis gara tokko dubbanna; ¹⁰ yommuu inni guutuun dhufutti garuu inni gartokkeen ni bada. ¹¹ Ani yeroon ijoollee turetti, akka ijoolleettin dubbadha ture; akka ijoolleettin yaada ture; akka ijoolleetti nan herrega ture; ani ergan nama guddaa ta'ee garuu ijoollummaa dhiiseera. ¹² Amma of-ilaalee keessaan bifa dimimmisaa'aa arginaatii; yeroo sana garuu ifaan ifatti ni argina. Ani amma gartokkon beeka; yeroo sana garuu ani akkuma guutummaatti beekame sana guutummaatti beekuufin jira.

¹³ Egaa amantiin, abdii fi jaalalli sadan isaanii iyyuu ni jiraatu. Isaan keessaa garuu jaalalatu caala.

14*Qalbeeffannaa Yeroo Waaqeffannaa*

¹ Karaa jaalalaa duukaa bu'aa; kennaawwan Hafuuraa, keessumattuu kenna raajii cimsaatii barbaadaa. ² Namni afaan haaraan dubbatu kam iyyuu Waaqatti malee namootatti hin dubbatuutii. Dhugumaan namni tokko iyyuu isa hin hubatu; inni Hafuuraan icciitii dubbata. ³ Namni raajii dubbatu garuu isaan ijaaruu, gorsuu fi jajjabeessuuf jedhee namootatti dubbata. ⁴ Namni afaan haaraan dubbatu ofuma isaa cimsa; kan raajii dubbatu garuu waldaa kiristaanaa cimsa. ⁵ Ani akka hundi keessan afaan haaraan dubbattan nan barbaada; caalaatti garuu akka raajii dubbatan nan jaalladha. Namni afaan haaraan dubbatu tokko akka waldaan kiristaanaa ittiin jajjabaattuuf jedhee waan dubbatu sana yoo hiikuu baate isa afaan haaraan dubbatu irra isa raajii dubbatutu caala.

⁶ Egaa yaa obboloata, ani yoon mul'ata yookaan beekumsa yookaan raajii yookaan barsiisa tokko tokko isinitti hime malee yoon afaan haaraa qofa dubbachaa gara keessan dhufe maal isin fayyada? ⁷ Kunis meeshaa lubbuu hin qabne kan akka ululleetii fi kiraaraa kanneen sagalee kennan biratti illee akkanuma; ululleen afuufamee yookaan kiraarri rukutamee yoo sagaleen isaa gargar baafame malee namni tokko akkamitti addaan baasee beekuu danda'a? ⁸ Yoo sagaleen malakataa addaan baafamee beekame malees eenyutu lolaaf qophaa'a? ⁹ Isinis akkasuma. Yoo afaan keessaniin dubbii hubatamaa dubbattan malee namni tokko akkamitti waan isin jettan sana beekuu danda'a? Qilleensatti dubbachuu keessaniitii. ¹⁰ Akka afaan gosa garaa garaa addunyaa irra jiran hin shakkamu. Garuu isaan keessaa kan hiikkaa hin qabne tokko iyyuu hin jiru. ¹¹ Kanaafuu ani yoon hiikkaa waan namni tokko dubbatuu hubachuu baadhe ani namicha dubbatu sanatti alagaa dha. Namichi dubbatu sunis anatti alagaa dha. ¹² Isinis akkasuma. Isin waan jabeessaniin kennaawwan Hafuuraa qabaachuu barbaaddaniif, kennaawwan waldaa kiristaanaa cimsan jabeessaatii barbaadaa.

¹³ Kanaaf namni afaan haaraan dubbatu tokko akka waan dubbatu sana hiikuu danda'uuf kadhachuu qaba. ¹⁴ Yoo ani afaan haaraan kadhade hafuurri koo ni kadhataatii; qalbiin koo garuu hin hirmaatu. ¹⁵ Yoos ani maalan godha ree? Hafuura kootiin nan kadhada; qalbii kootiin nan kadhada; hafuura kootiin nan faarfadha; qalbii kootiin nan faarfadha. ¹⁶ Yoo kanaa achii utuu ati hafuura keetiin Waaqa galateeffachuutti jirtuu, namni iddoo warra hin baratini taa'e tokko waan ati dubbatu waan hin beekiniif akkamitti galata ati dhi'eessitu sanaaf "Ameen" jechuu danda'aa? ¹⁷ Ati dhugumaan sirriitti galateeffata ta'a; namni kaan garuu ittiin hin jajjabeffamu.

¹⁸ Ani waanan hunduma keessan caalaa afaan haaraan dubbadhuuf Waaqa nan galateeffadha. ¹⁹ Waldaa kiristaanaa keessatti garuu dubbii kuma kudhan afaan haaraan dubbachuu irra warra kaan barsiisuuf dubbii hubatamaa shan dubbachuu nan barbaada.

²⁰ Yaa obboloota, akka ijoolleetti yaaduu dhiisaa; waan hamaaf daa'imman ta'aa; hubannaadhaan garuu nama guddaa ta'aa. ²¹ Seera keessatti akkana jedhamee barreeffameera:

“Ani afaan biraatiin,
 afaan alagootaatiinis
 saba kanatti nan dubbadha;
 isaan garuu yeroo sanatti illee na hin dhaga'an,
 jedha Gooftaan.”*

²² Kanaafuu afaan haaraan dubbachuun warra hin amaniniif mallattoo ta'a malee warra amananiif miti; raajii dubbachuun garuu warra amananiif malee warra hin amaniniif miti. ²³ Egaa waldaan amantootaa guutuun walitti qabamee yoo hundi isaanii afaan haaraan dubbatan, yoo namoonni hin baratin yookaan namoonni hin amanne ol seenan isin maraattaniirtu isiniin hin jedhanii? ²⁴ Utuu namni hundi raajii dubbachaa jiruu yoo namni hin amanne tokko yookaan namni hin baratin tokko ol seene inni akka cubbamaa ta'e nama hundaan ni amansiifama; nama hundaanis isatti murama; ²⁵ icciitiin garaa isaa keessaas ifatti ni baafama. Innis, “Waaqni dhugumaan isin gidduu jira” jedhee dubbachaa addaan lafatti gombifamee Waaqa waaqeffata.

Sirna Gaarii Yeroo Waaqeffannaa

²⁶ Yaa obboloota, egaa maal jenna ree? Yommuu isin walitti qabamtanitti namni hundi faarfannaa yookaan barsiisa yookaan mul'ata yookaan afaan haaraa yookaan hiikkaa afaan haaraa sanaa qaba. Wannii hundinuu waldaa kiristaanaa cimsuuf hojjetamuu qabu. ²⁷ Namni afaan haaraan dubbatu yoo jiraate lama yookaan yoo baay'ate sadii ta'anii dabaree dabareen haa dubbatan; namni tokko immoo haa hiiku. ²⁸ Yoo namni hiiku jiraachuu baate garuu namichi dubbatu sun waldaa kiristaanaa keessatti cal'isee ofii isaattii fi Waaqatti haa dubbatu.

²⁹ Raajonnis lama yookaan sadii ta'anii haa dubbatan; warri kaan immoo waan dubbatamu sana haa madaalan. ³⁰ Yoo warra achi taa'an keessaa isa tokkoof mul'anni dhufe, namichi duraan dubbachaa ture sun haa cal'isu. ³¹ Namni hundi akka baratuuf, hundinuu akka jajjabeeffamuuf dabaree dabareedhaan raajii dubbachuu ni dandeessuutii. ³² Hafuuronni raajotaa raajotaaf ni ajajamu. ³³ Waaqni akka waldoota qulqullootaa hundumaa keessatti ta'aa jiru kana Waaqa jeequmsaa utuu hin ta'in Waaqa nagaa ti.

³⁴ Dubartoonni waldaa kiristaanaa keessatti haa cal'isan. Akka seerri jedhutti isaan akka ajajaman malee akka dubbatan hin eeyyamamneefiitii. ³⁵ Wanti isaan beekuu barbaadan yoo jiraate manatti dhirsa isaanii haa gaafatan; dubartiin tokko waldaa kiristaanaa keessatti dubbachuun qaaniidhaatii.

³⁶ Dubbiin Waaqaa isin keessaa argamee? Yookaan isinuma qofa bira ga'ee? ³⁷ Eenyu iyyuu yoo raajii yookaan nama Hafuura of se'e akka wannii ani amma isiniif barreessu kun ajaja Gooftaa ta'e haa beeku. ³⁸ Namni kam iyyuu yoo waan kana beekuu baate, inni hin beekin.

³⁹ Kanaaf yaa obboloota ko, raajii dubbachuu jabeessaatii hawwaa; afaan haaraan dubbachuu hin dhowwinaa. ⁴⁰ Wanti hundinuu garuu karaa qajeelaa fi sirna qabeessa ta'een hojjetamuu qaba.

15

Du'aa Ka'uu Kiristoos

¹ Ammas yaa obboloota, ani waa'ee wangeela ani isinitti lallabe, kan isin fudhattanii ittiin dhaabatan sanaa isin yaadachiisuu nan barbaada. ² Isin yoo dubbii ani isinitti lallabe sana jabeessitanii qabattan wangeeluma kanaan ni fayyitu. Yoo kanaa achii akkasumaan amantan jechuu dha.

³ Anis waanan fudhadhe duraan dursee dabarseen isinitti kenneeraatii; akka Katabbiwwan Qulqulluun dubbatanitti, Kiristoos cubbuu keenyaaf jedhee du'e; ⁴ ni awwaalames; akka Katabbiwwan Qulqulluun dubbatanitti guyyaa sadaffaatti du'aa kaafame. ⁵ Inni duraan dursee Keefaatti, ergasiis warra Kudha Lamaanitti mul'ate. ⁶ Sana booddee yeroo tokkotti obboloota dhibba shanii ol ta'anitti mul'ate; isaan

* 14:21 14:21 Isa 28:11,12

keessaas yoo muraasni boqotan iyyuu hedduun isaanii hamma ammaatti ni jiru. ⁷ Ergasiis Yaaqoobitti, itti aansee ergamoota hundatti mul'ate; ⁸ dhuma irratti immoo ana kan akka gatataatti dhalateetti lakkaa'amutti mul'ate.

⁹ Ani ergamoota hundaa gadi; ergamaa jedhamee waamamuun iyyuu naaf hin malu; ani waldaa kiristaanaa Waaqaa ari'achaan tureetii. ¹⁰ Garuu ani ayyaana Waaqaatiin akkuman jiru kana jira; ayyaanni isaa kan naa kenname akkasumaan hin hafne. Ani hunduma isaanii caalaa jabaadhee hojjedheera; kanas utuu ana hin ta'in ayyaana Waaqaa kan na wajjin jirutu hojjete. ¹¹ Egaa anas ta'u yookaan isaan, wanni nu lallabnu, wanni isin amantanis kanuma.

Du'aa Ka'uu Warra Du'anii

¹² Kiristoos warra du'an keessaa akka kaafame erga lallabamee, isin keessaa namoonni tokko tokko akkamitti du'aa ka'uun warra du'anii hin jiru jechuu danda'u ree? ¹³ Erga du'aa ka'uun warra du'anii hin jirre, Kiristoos iyyuu du'aa hin kaafamne jechuudha kaa! ¹⁴ Erga Kiristoos du'aa hin kaafamin immoo lallabni keenya faayidaa hin qabu; amantiin keessanis faayidaa hin qabu. ¹⁵ Kana malees Waaqni Kiristoosin du'aa kaaseera jennee waa'ee Waaqaa waan dhugaa baaneef, nu waa'ee Waaqaa dhuga baatota sobaa taanee argamneerra. Garuu erga warri du'an hin kaafamin inni Kiristoosin hin kaafne jechuu dha. ¹⁶ Yoo warri du'an kaafamuu baatan, Kiristoosis du'aa hin kaafamneetii. ¹⁷ Erga Kiristoos du'aa hin kaafamin amantiin keessan faayidaa hin qabu; isinis ammuma iyyuu cubbuu keessa jirtu. ¹⁸ Yoo warri utuu Kiristoositti jiranuu boqotan baduu isaanii ti. ¹⁹ Yoo jireenya ammaa qofaaf Kiristoosin abdanne nu warra namni hundi na'uuf ta'uu keenya.

²⁰ Amma garuu Kiristoos warra boqotaniif hangafa ta'ee dhugumaan warra du'an keessaa kaafameera. ²¹ Akkuma duuti karaa nama tokkootiin dhufee, akkasuma immoo du'aa ka'uun warra du'anii karaa nama tokkootiin dhufetii. ²² Akkuma hundinuu Addaamiin du'an, hundinuu Kiristoosiin jiraatoo ni taasifamuutii. ²³ Kun hundinuu yeroo dabaree isaatti ni ta'a; Kiristoos hangafticha, ergasii immoo yeroo inni deebi'ee dhufutti warra kan Kiristoos ta'an. ²⁴ Innis erga bulchiinsa hunda, taayitaa fi humna hunda balleessee booddee, yeroo Waaqa Abbaatti mootummaa dabarsee kennutti dhumni ni ta'a. ²⁵ Inni hamma diinota isaa hunda miilla isaa jala galfatutti mo'uu qabaatii. ²⁶ Diinni dhuma kan barbadeeffamuu qabu du'a. ²⁷ Inni, "Waan hunda miilla isaa jala galcheeraatii."* Garuu "Wanni hundi" isa jala galfameera jechuun akka isa waan hunda isa jala galche sana hin dabalatin beekamaa dha. ²⁸ Erga waan kana godhee booddee akka Waaqni waan hundumaan hundumaa ta'uuf Ilmi mataan isaa iyyuu isa waan hundumaa miilla isaa jala galche sanaaf ni bula.

²⁹ Yoo du'aa ka'uun jiraachuu baate namoonni warra du'aniif jedhanii cuuphaman maal gochuu isaanii ti? Warri du'anis yoo du'aa hin kaafamin namoonni maaliif qooda isaanii cuuphamu ree? ³⁰ Nu maaliif sa'aatii hunda balaaf of saaxilla? ³¹ Yaa obboloota, ani guyyuma guyyaan akkan du'u of jajuu karaa Gooftaa keenya Kiristoos Yesuusiin isin irratti qabuun nan kakadha. ³² Ani akka namaatti Efesoositti bineensa wajjin wal loluun koo, erga warri du'an hin kaafamnee, maal na fayyada?

"Kottaa ni nyaannaa; ni dhugnas;

bor ni duunaatii."[†]

³³ Hin gowwoomfaminaa: "Hiriyaan hamaan amala gaarii balleessa." ³⁴ Gara qalbii keessan isa qajeelaatii deebi'aa; cubbuu hojjechuus dhiisaa; namoonni Waaqa hin beekne tokko tokko isin gidduu jiruutii. Anis isin qaanessuufin waan kana dubbadha.

Dhagna Du'aa Ka'uu

³⁵ Garuu namni tokko, "Warri du'an akkamitti kaafamu? Dhagna akkamiitiin dhufu?" jedhee ni gaafata ta'a. ³⁶ Yaa gowwaa! Wanni ati facaafu yoo du'e malee jireenya hin argatu. ³⁷ Wanni ati facaafu sanyiidhuma, jechuunis sanyii qamadii yookaan sanyii midhaan biraati malee dhagna midhaan biqilee guddachuuf jiru sanaa miti. ³⁸ Waaqni garuu akkuma fedhetti dhagna isaaf kenna; tokkoo tokkoo gosa sanyiitiifis dhagna mataa isaa kenna. ³⁹ Foon hundinuu tokko miti; namni foon gosa tokkoo qaba; horiin foon gosa biraa, simbirroon foon gosa biraa, qurxummiinis foon gosa biraa qabu. ⁴⁰ Akkasuma immoo dhagnawwan samii irraa ni jiru; dhagnawwan lafa irraas ni jiru; garuu ulfinni dhagnawwan samii irraa gosa tokko; ulfinni dhagnawwan lafa irraa immoo gosa biraa ti. ⁴¹ Aduun ulfina gosa tokkoo qabdi; ji'is ulfina gosa biraa, urjiwwanis ulfina gosa biraa qabu; urjiin tokko ulfinaan urji biraatiin addaati.

* 15:27 15:27 Far 8:6 † 15:32 15:32 Isa 22:13

⁴² Du'aa ka'uun warra du'aniis akkasuma. Dhagni facaafamu kan baduu dha; kan hin badne ta'ee immoo kaafama. ⁴³ Inni salphinaan facaafama; ulfinaan kaafama; dadhabbiin facaafama; humnaan kaafama; ⁴⁴ dhagna fooniitu facaafama; dhagna hafuuraatu kaafama.

Erga dhagni foonii jiraate, dhagni hafuuraas ni jira. ⁴⁵ Kanaaf, "Addaam namichi jalqabaa lubbuu jiraataa ta'e" jedhamee barreeffameera; Addaam inni dhumaa immoo hafuura jireenya kennu ta'e. ⁴⁶ Inni jalqabatti dhufe garuu isa hafuura utuu hin ta'in isa foonii ti; inni hafuura immoo ergasii dhufe. ⁴⁷ Namichi duraa lafa irraa dhufe; inni kan lafaa ti; namichi lammaffaan immoo samii irraa dhufe. ⁴⁸ Warri kan lafaa ta'an akkuma namicha lafa irraa sanaa ti; warri kan samii ta'an immoo akkuma namicha samii irraa dhufe sanaa ti. ⁴⁹ Nu akkuma bifa namicha lafaa sanaa uffanne, akkasuma immoo bifa namicha samii sanaa ni uffanna.

⁵⁰ Yaa obboloota, akka foonii fi dhiigni mootummaa Waaqaa dhaaluu hin dandeenye yookaan akka inni badu isa hin badne dhaaluu hin dandeenye ani isinitti nan hima. ⁵¹ Kunoo, ani icciitii tokko isinittin hima: Hundi keenya hin duunu; nu hundi garuu ni geeddaramna; ⁵² kunis yeroo malakanni dhumaa afuufamu yeruma sanatti hamma liphsoo ijaatti raawwatama. Malakanni ni afuufamaatii; warri du'anis kanneen hin badne ta'anii ni kaafamu; nus ni geeddaramna. ⁵³ Inni badu kun isa hin badne, inni du'u kun immoo isa hin duune uffachuu qabaatii. ⁵⁴ Yeroo inni badu isa hin badne uffatee, inni du'u immoo isa hin duune uffatutti dubbii akkana jedhamee barreeffame sun ni raawwatama; "Duuti mo'ichaan liqimfameera." ⁵⁵ Akkasumas,

⁵⁵ "Yaa du'a, mo'ichi kee meerre?"

Yaa du'a, ilkeen kee meerre?"*

⁵⁶ Ilkeen du'aa cubbuu dha; humni cubbuu immoo seera. ⁵⁷ Waaqaa karaa Gooftaa keenya Yesuus Kristoosiin mo'icha nuu kennuuf garuu galanni haa ta'u!

⁵⁸ Kanaafuu yaa obboloota koo jaallatamoo, jabaadhaa dhaabadhaa. Wannii tokko isin hin sochoosin; akka dadhabbiin keessan Gooftaa biratti faayidaa malee hin hafne waan beektaniif yeroo hunda hojii Gooftaatiif guutummaatti of kennaa.

16

Buusii Qulqullootaaf Walitti Qabame

¹ Egaa waa'ee buusii qulqullootaaf walitti qabamuu, isinis akkuma ani waldoota kiristaanaa kanneen Galaatiyaa ajaje sanatti raawwadhaa. ² Akka buusii walitti qabuun yeroo ani dhufutti hin taaneef tokkoon tokkoon keessan akkuma galii keessaniitti torbanuma torbaniin guyyaa jalqabaa waa kophaatti baasaatii kaa'aa. ³ Anis yeroon isin bira dhufutti akka namoonni isin filattan kennaa keessan geessaniif xalayaa ittiin beekaman kenneefii Yerusaalemitti isaan nan erga. ⁴ Yoo dhaquun koo barbaachisaa ta'e immoo isaan na wajjin dhaqu.

Karoorra Karaa Phaawulos

⁵ Ani waanan Maqedooniyaa keessa darbuuf, yeroon Maqedooniyaa keessa darbutti isin bira nan dhufa. ⁶ Akka isin iddoo ani dhaqu hundatti karaa koo irratti na gargaaruu dandeessaniif tarii yeroo xinnoo isin bira nan tura ta'a; yookaan ganna isin bira nan tura ta'a. ⁷ Yoo Gooftaan jedhe ani waanan yeroo muraasa isin bira turuu abdadhuuf, amma utuuun darbuu goree isin arguu hin barbaadu. ⁸ Hamma guyyaa Pheenxeqoosxeetti garuu Efsoon keessa nan tura. ⁹ Balballi guddaanii fi bu'aa qabeessi tokko naa banameeraatii; mormitoonnis baay'ee dha.

¹⁰ Yoo Xiimotewos gara keessan dhufe waan innis akkuma koo hojii Gooftaa hojjetuuf yeroo inni isin bira turutti akka inni waa tokko iyyuu hin sodaanne godhaa. ¹¹ Kanaaf namni tokko iyyuu isa hin tuffatin; akka inni gara kootti deebi'uufis nagaadhaan ergaa; ani obboloota wajjin isa eegaan jiraatii.

¹² Waa'ee obboleessa keenya Apholoos immoo akka inni obboloota kaan wajjin gara keessan dhufuuf ani jabeessee isa kadhadheen ture. Inni garuu amma dhufuuf gonkumaa fedhii hin qabu; yeroo isaaf mijaa'utti garuu ni dhufa.

¹³ Dammaqaa; amantiitti cimaatii dhaabadhaa; jajjabaadhaa; cimaas. ¹⁴ Wannii isin hojjetan hundinuu jaalalaan haa ta'u.

¹⁵ Yaa obboloota, akka warri mana Isxiifaanaas jiraatan Akaayaa keessaa warra jalqabatti amanantaa ta'an isin ni beektu; isaanis qulqulloota tajaajiluuf of kennaniiru. ¹⁶ Anis akka isin namoota akkasiitiif, warra isaan wajjin hojjetanii fi dadhaban hundaaf ajajamtan isinin kadhada. ¹⁷ Isxiifaanaas, Fartunaaxoosii fi Akaayiqos na bira dhufuu

isaaniitti ani gammadeera; isaan waan asii dhabamuu keessaniin hir'ate guutaniiruutii.
¹⁸ Isaan hafuura koo fi hafuura keessan boqochiisaniiruutii. Kanaaf isin namoota akkanaatiif beekamtii kennaa.

Dhaamsa Nagaa Xumuraa

¹⁹ Waldoonni kiristaanaa kanneen biyya Asiyaa nagaa isiniif dhaamu.

Aqiilaa fi Phirisqillaan, waldaan kiristaanaa kan mana isaanii jirtus Gooftaadhaan nagaa guddaa isiniif dhaamu.

²⁰ Obbolloonni hundinuu nagaa isinii dhaamu.

Dhungoo qulqulluudhaan nagaa wal gaafadhaa.

²¹ Ani Phaawulos, xalayaa nagaa kana harkuma kootiin barreessa.

²² Namni Gooftaa hin jaallanne kam iyyuu haa abaaramu. Yaa Gooftaa kottu.

²³ Ayyaanni Gooftaa keenya Yesuus isin wajjin haa ta'u.

²⁴ Jaalalli koo Kiristoos Yesuusiin hunduma keessan wajjin haa ta'u. Ameen.

Qorontos Lammaffaa

Nagaa Gaafachuu

¹ Phaawulos isa fedhii Waaqaatiin ergamaa Kiristoos Yesuus ta'ee fi obboleessa keenya Xiimotewos irraa,

Gara waldaa kiristaanaa Waaqaa ishee Qorontos jirtuutii fi qulqulloota Akaayaa guutuu keessa jiraatan hundumaattii:

² Abbaa keenya Waaqaa fi Yesuus Kiristoos Gooftaa irraa ayyaannii fi nagaan isiniif haa ta'u.

Waaqa Nama Jajjabeessuuf Galata Galchuu

³ Waaqanii fi Abbaan Gooftaa keenya Yesuus Kiristoos, Abbaan araaraatii fi Waaqni jajjabina hundaa haa eebbifamu; ⁴ inni akka nu jajjabina Waaqa biraa arganne sanaan warra dhiphina adda addaa keessa jiran jajjabeessuu dandeenyuuf dhiphina keenya hunda keessatti nu jajjabeessa. ⁵ Akkuma nu dhiphina Kiristoos keessatti baay'ee hirmaannu, akkasuma immoo karaa Kiristoosiin jajjabinni nuu baay'ata. ⁶ Nu yoo dhiphanne jajjabinaa fi fayyina keessaniif ta'a; nu yoo jajjabaanne jajjabina keessaniif ta'a; jajjabinni kunis kan isin yeroo dhiphina nu dhiphannu kana keessa dabartanitti obsaan dhaabachuudhaan argattanii dha. ⁷ Abdiin nu waa'ee keessaniif qabnu cimaa dha; isin akkuma dhiphina keenya keessatti hirmaattan amma immoo jajjabina keenya keessatti akka hirmaattan beeknaatii.

⁸ Yaa obboloota, isin waa'ee dhiphina biyya Asiyaatti nurra ga'ee akka wallaaltan hin barbaannu. Hamma lubbuudhaan jiraachuuf illee abdiin kutannutti dhiphinni baachuudhaaf humna keenyaa ol ta'e nurra ga'ee tureetii. ⁹ Dhugumaanuu murtiin du'aa nutti dhaga'amee turre. Kun garuu akka nu Waaqa warra du'an kaasutti malee ofii keenyatti hin amananneef ta'e. ¹⁰ Inni balaa du'a akkasii jalaa nu baaseera; nu baasas. Inni ittuma fufee akka nu baasu abdiin keenya isa irra kaa'anneerra. ¹¹ Akkuma isin kadhannaa keessaniin nu gargaartan, ayyaana kadhannaa namoota baay'eeittiif deebii ta'ee nuu kenname sanaaf namoonni baay'een nuuf galateeffatu.

Phaawulos Karoora Geeddarate

¹² Egaa wanti nu ittiin of jajnu kanaa dha: Akka nu qulqullummaa fi amanamummaa Waaqa biraa argameen fooniin keessumattuu hariiroo isin wajjin qabnuun jiraachaa turre yaadni garaa keenyaa dhugaa nuuf ba'a. Kanas akka ayyaana Waaqaatti goone malee akka ogummaa addunyaatti miti. ¹³ Nu waan isin dubbisuu yookaan hubachuu hin dandeenye tokko illee isinii hin barreessinuutii. Ani akka isin hamma dhumaatti hubattan nan abdadha; ¹⁴ innis akkuma isin gara tokko nu hubattan kana, akka guyyaa Gooftaa Yesuusitti akkuma nu isiniin of jajnu sana isinis nuun of jajnu dandeessan guutummaatti hubattanii dha.

¹⁵ Anis sababiin waan kana amaneef akka isin ayyaana lammaffaa qabaattaniif jedhee jalqabatti gara keessan dhufuu barbaade. ¹⁶ Ani yeroon Maqedooniyaa dhaquutti isin ilaaluu fi yeroon Maqedooniyaadhaa deebi'uttis gara keessan dhufee, akka isin yeroo ani Yihuudaa dhaquutti na ergitan barbaade. ¹⁷ Ani yeroon waan kana karoofadhetti akka salphaattin hojjedhee? Yookaan akka yaada fooniitti yeruma tokkotti, "Eeyyee, eeyyee" fi "Waawuu, waawuu" jechuufan karoora baafadhaa ree?

¹⁸ Akkuma Waaqni amanamaa ta'e dubbiin nu isinitti dubbannus "Eeyyee" fi "Waawuu" miti. ¹⁹ Yesuus Kiristoos Ilmi Waaqaa inni nu jechuunis ani, Silwaanosiif fi Xiimotewos isin gidduutti lallabne sun, "Eeyyee" fi "Waawuu" hin turreetii; isa keessa "Eeyyeetu" jira. ²⁰ Waadaawwan Waaqaa hundinuu Kiristoosiin "Eeyyeedhaatii". Kanaafuu nu karaa isaatiin ulfina Waaqaatiif "Ameen" jenna. ²¹ Egaa kan akka nu isin wajjin Kiristoositti jabaannee dhaabannu godhuu fi kan nu dibe Waaqa; ²² innis chaappaa nutti chaappesse, qabdiin Hafuura Qulqulluu garaa keenya keessa kaa'e.

²³ Ani garuu isin qusachuudhaaf jecha Qorontositti hin deebine; anis akka inni dhugaa natti ba'uuf Waaqa ofitti nan waama. ²⁴ Nu gammachuu keessaniif isin wajjin hojjenna malee amantii keessan irratti gooftummaa hin qabnu; isin amantiin jabaattanii dhaabattaniitii.

2

¹ Ani akkan lammata gaddaan gara keessan hin dhufne murteeffadheera. ² Yoo ani isin gaddisiise, isinuma warra ani gaddisiisu sana malee eenyutu na gammachiisa ree? ³ Akkasitti barreessuun koo akka yommuu ani dhufutti namoonni na gammachiisuu qaban na hin gaddisiisneefi. Akka gammachuun koo gammachuu hunda keessanii ta'e ani hunda keessan nan amana ture. ⁴ Ani dhiphina guddaa, yaaddoo garaatii fi imimmaan baay'eedhaan isinii barreeseetii; kunis jaalalli ani isiniif qabu hammam guddaa akka ta'e akka beektaniif malee isin gaddisiisuuf miti.

Cubbamaaf Dhiifama Gochuu

⁵ Eenyu iyyuu yoo nama gaddisiise utuu dubbii ho'isuuf hin ta'in inni karaa tokko hunduma keessan gaddisiisuu isaati malee na gaddisiisuu isaa miti. ⁶ Nama akkanaa irratti adabbiin harki caalaan keessan adabdan ni ga'a. ⁷ Qooda kanaa akka inni gadda guddaan hin liqimfamneef dhiifama isaaf gochuu fi isa jajjabeessuutu isin irra jira. ⁸ Kanaafuu ani akka isin jaalala isaaf qabdan cimsitan isinan kadhada. ⁹ Anis akka isin waan hunda irratti ajajamtoota taatan mirkaneeffachuufin waan kana isinii barreese. ¹⁰ Nama isin dhiifama gootaniif, anis dhiifama nan godha. Yoo wanti ani dhiifama godhe tokko iyyuu jiraates ani isiniif jedhee fuula Kiristoos duratti dhiifama godheera; ¹¹ kunis akka Seexanni nu hin gowwoomsineefi. Nu mala isaa hin wallaalluutti.

Tajaajiltoota Kakuu Haaraa

¹² Yeroo ani wangeela Kiristoos lallabuuf Xiroo'aas dhagee Gooftaan balbala naa banetti, ¹³ waan ani obboleessa koo Tiitoo hin argatiniif, hafuurri koo boqonnaa hin arganne. Kanaafuu ani nagaatti isaaniin jedhee Maqedooniyaatti darbe.

¹⁴ Waaqa yeroo hunda akka nu Kiristoosiin mo'annoo qabaannu nu taasisee urgaa beekumsa isaa karaa keenyaan iddoo hundatti facaasuuf galanni haa ta'u. ¹⁵ Nu warra fayyifamaa jirani fi warra baduutti jiran gidduutti Waaqaaf urgaa Kiristoos. ¹⁶ Nu isa tokkoof urgaa du'aa ti; isa kaaniif immoo urgaa jireenya ti. Egaa eenyutu waan kanaaf ga'aa ta'a? ¹⁷ Nu garuu akka namoota Waaqa biraa ergamaniitti Kiristoosiin fuula Waaqaa duratti garaa qulqulluudhaan dubbanna malee akka namoota hedduu kanneen bu'aa argachuuf jedhanii dubbii Waaqaa gurguratan sanaa miti.

3

Amantoonni Qorontos Xalayaa Kiristoos Ta'uu Isaanii

¹ Nu ammas of galateeffachuu jalqabnaa ree? Yookaan akka namoota tokko tokkoo xalayaa deeggarsaa gara keessanitti fiduu yookaan isin biraa argachuu nu barbaachisaa ree? ² Xalayaan keenya kan namni hundinuu beekuu fi dubbisu kan garaa keenya keessatti barreeffame isinuma. ³ Isin akka xalayaa Kiristoos, bu'aa tajaajila keenyaa taatan ifa; xalayaan kunis qalamiidhaan utuu hin ta'in Hafuura Waaqa jiraataatiin, gabatee dhagaa irratti utuu hin ta'in gabatee garaa namaa irratti kan barreeffamee dha.

⁴ Amantiin nu karaa Kiristoosiin fuula Waaqaa duratti qabnus kan akkanaa ti. ⁵ Nu waan tokko illee ofii keenyaan hojjechuuf dandeettii qabna jennee miti; dandeettiin keenya garuu Waaqa irraa dhufa. ⁶ Innis akka nu tajaajiltoota kakuu haaraa taanuuf dandeettii nuu kenneera; kakuun kunis kan qubee utuu hin ta'in kan Hafuuraa ti; qubeen ni ajjeesa; Hafuurri garuu jireenya kenna.

Ulfina Kakuu Haaraa

⁷ Erga tajaajilli du'a fide kan qubeedhaan dhagaa irratti qirixame sun hamma Israa'eloonni sababii ulfina isaa kan irraa badaa deemu sanaatiif xiyyeeffatanii fuula Musee ilaaluu hin dandeenyetti ulfinaan dhufee, ⁸ tajaajilli Hafuuraa immoo hammam caalaa ulfina haa qabaatu ree? ⁹ Erga tajaajilli murtii namatti fidu ulfina qabaatee, tajaajilli qajeelummaa fidu immoo hammam caalaa ulfina haa qabaatu ree! ¹⁰ Wannii ulfina qabeessa ture sun yommuu ulfina caalu biratti ilaalamu amma ulfina hin qabuutii. ¹¹ Erga wannii yeroodhaaf jiraatu sun ulfinaan dhufee, ulfinni isa bara baraan jiraatuu immoo hammam caalaa guddaa haa ta'u ree!

Fuula Hin Haguuggaminiin Ulfina Waaqaa Arguu

¹² Kanaafuu nu abdi akkasii waan qabnuuf baay'ee ija jabaanna. ¹³ Nu warra akka Musee isa akka sabni Israa'el dhuma waan badaa deemu sanaa hin argineef jedhee haguuggiidhaan fuula isaa haguuggatee miti. ¹⁴ Yaadni isaanii garuu hadoodera; isaan hamma har'aatti iyyuu yommuu kakuu moofaa dubbisanitti haguuggiin sun isaan irraa hin fuudhamne. Inni Kiristoos qofaan irraa fuudhamaatii. ¹⁵ Hamma

har'aatti illee yeroo isaan seera Musee dubbisanitti haguuggiin yaada garaa isaanii ni haguuga. ¹⁶ Yeroo namni kam iyyuu gara Gooftaatti deebi'utti garuu haguuggiin sun irraa fuudhama. ¹⁷ Gooftaan Hafuura. Iddoo Hafuurri Gooftaa jiru immoo bilisummaatu jira. ¹⁸ Nu warri utuu fuulli keenya hin haguugamin ulfina Gooftaa calaqqisnu hundi ulfina ittuma caalee guddachaa deemu kan Gooftaa Hafuura ta'e irraa dhufuun gara bifa isaatti geeddaramaa jirra.

4

Dadhabbii Ammaatii fi Jireenya Du'aa Ka'uu

¹ Kanaafuu nu araara Waaqaatiin tajaajila kana waan qabnuuf abdiin hin kutannu. ² Nu waan dhoksaa ta'ee fi waan nama qaanessu dhiifneerra; namas hin gowwoomsinu; dubbii Waaqaas hin micciirru. Garuu dhugaa ifatti baafnee dubbachuudhaan fuula Waaqaa duratti qalbii nama hundumaatti of dhi'eessina. ³ Wangeelli keenya yoo haguugame illee warra baduutti jiran jalaa haguugama; ⁴ Waaqni addunyaa kanaa akka namoonni hin amanin ifa wangeela ulfina Kiristoos isa fakkaattii Waaqaa ta'e sanaa arguu hin dandeenyeef qalbii isaanii jaamseera. ⁵ Nu akka Yesuus Kiristoos Gooftaa ta'e lallabna malee of hin lallabnu; nu mataan keenya Yesuusiif jennee tajaajiltoota keessan. ⁶ Waaqni, "Dukkana keessaa ifni haa ifu"* jedhe sun akka fuula Kiristoos irraa ifa beekumsa ulfina Waaqaa nuu kennuuf ifa isaa garaa keenya keessatti ibseeraatii.

⁷ Garuu akka humni waan hunda caalu kun Waaqa irraa malee nu biraa hin dhufin argisiisuuf nu badhaadhummaa kana qodaa suphee keessaa qabna. ⁸ Nu karaa hundaan ni dhiibamna; garuu hin caccabnu; ni burjaajofna; garuu abdiin hin kutannu; ⁹ ni ari'atamna, garuu hin gatamnu; lafaan dha'amna, garuu hin badnu. ¹⁰ Akka jireenyi Yesuus dhagna keenyaan mul'ifamuuf nu yeroo hunda du'a Yesuus dhagna keenyatti baannee deemna. ¹¹ Nu warri lubbuun jirru akka jireenyi isaa foon keenya kan du'u keessaan mul'ifamuuf yeroo hunda Yesuusiif jennee du'atti dabarfamnee kennamnaatii. ¹² Egaa duuti nu keessatti hojjeta; jireenyi immoo isin keessatti hojjeta.

¹³ "Ani amaneera; kanaafis dubbadheera"† jedhamee barreeffameera. Nu immoo sababii hafuura amantii sanaan ni amanna; kanaafis ni dubbanna; ¹⁴ inni Gooftaa Yesuus warra du'an keessaa kaase sun nuus Yesuus wajjin kaasee isin wajjinis fuula isaa duratti akka nu dhi'eessu ni beekna. ¹⁵ Ayyaanni namoota hedduu waliin ga'aa jiru kun ulfina Waaqaatiif galata guutee dhangala'u akka fiduuf wanni kun hundi bu'aa keessaniif ta'e.

Duuti Akka Hin Hafnee fi Hiikkaa Inni Kiristaanaaf Kennu

¹⁶ Kanaafuu nu abdiin hin kutannu. Yoo namummaan keenya inni alaan mul'atu dhuma deeme iyyuu, namummaan keenya inni keessaa garuu guyyuma guyyaan haaromfamaa deema. ¹⁷ Dhiphinni keenya inni salphaanii fi yeroodhaaf turu kun ulfina bara baraa kan waan hunda caalu nuuf fida. ¹⁸ Kanaafuu nu waan hin mul'anne ilaalla malee waan mul'atu hin ilaallu. Wanti mul'atu waan yeroo ti; wanti hin mul'anne garuu waan bara baraatii.

5

Dhagna Haaraa Eggachuu

¹ Yoo dunkaanni lafa irraa kan nu keessa jiraannu kun diigame mana Waaqni ijaare, mana bara baraa kan harka namaatiin hin ijaaramin samii irraa akka qabnu beekna. ² Hammasitti mana keenya kan samii irraa sana uffachuu hawwuudhaan ni aadna; ³ nu yommuu isa ufannutti qullaa hin argamnuutii. ⁴ Nu utuma dunkaana kana keessa jirruu ni aadna; ba'aanis nutti ulfaateera; nu garuu wanni du'a hin oolle jireenyaan akka liqimfamuuf mana keenya kan samii irraa uffachuu malee akka uffanni nurraa baafamu hin barbaannuutii. ⁵ Kan kaayyoo kanaaf nu qopheesses Waaqa isa Hafuura Qulqulluu wabii waan dhufuuf jirru godhee akka qabdiitti nuu kenne sanaa dha.

⁶ Kanaaf nu yeroo hunda ija jabina qabna; hamma dhagna fooniitiin jirrutti Gooftaa irraa fagoo akka jirru beekna. ⁷ Nu amantiidhaan jiraanna malee arguun miti. ⁸ Nu ija jabina qabna; dhagna foonii kana irraa addaan baanee Gooftaa wajjin jiraachuu filanna. ⁹ Kanaaf nu dhagna fooniitiin jiraannus, dhagna foonii irraa fagaannus kaayyoon keenya Isa gammachiisuu dha. ¹⁰ Tokkoon tokkoon namaa yeroo dhagna fooniitiin jiraachaa turetti akka hojii tolaa yookaan hamaa hojjeteeff gatii isaa argatuuf hundi keenya barcuma murtii Kiristoos duratti dhi'aachuu qabnaatii.

* 4:6 4:6 Uma 1:3 † 4:13 4:13 Far 116:10

Tajaajila Araaraa

¹¹ Nu Gooftaa sodaachuun maal akka ta'e waan beeknuuf namoota amansiisuuf yaalii goona. Eenyummaan keenya Waaqa biratti beekamaa dha; yaada garaa keessaniitiifis beekamaa akka ta'e nan abdadha. ¹² Nu akka isin nuun boontaniif carraa isinii kennuuf malee amma illee isin biratti of galateeffachuuf miti; kunis isin warra waan garaa keessa jiru caalaa waan ijatti mul'atuun boonaniif deebii kennuu akka dandessaniif. ¹³ Nu yoo akka namoonni tokko tokko jedhan sana "qalbii dabarsine," Waaqaaf jennee ti; yoo qalbii qabeeyyii taane immoo isiniif jennee ti. ¹⁴ Jaalalli Kiristoos nu dirqisiisaatii; sababiin isaas waan namni tokko nama hundaaf du'eef namni hundi kan du'e ta'uu isaa amansiifamneerra. ¹⁵ Innis akka warri lubbuun jiran si'achi isa isaaniif jedhee du'ee du'aa kaafame sanaaf malee akka ofii isaaniitiif hin jiraanneef nama hundumaaf du'e.

¹⁶ Kanaafuu nu ammaa jalqabnee nama tokko iyyuu akka ilaalcha fooniitti hin ilaallu. Yoo kanaan dura akka ilaalcha addunyaatti Kiristoosin ilaalaa turre iyyuu, si'achi akkas hin goonu. ¹⁷ Kanaafuu eenyu iyyuu yoo Kiristoositti jiraate inni uumama haaraa dha; wanni moofaan darbeera; kunoo wanni haaraan dhufeera. ¹⁸ Kun hundinuus Waaqa Kiristoosiin ofitti nu araarsee fi tajaajila araaraa nuu kenne sana irraa dhufe; ¹⁹ kunis, Waaqni cubbuu namootaa isaanitti lakkaa'uu dhiisuudhaan Kiristoosiin addunya ofitti araarsaa ture jechuu dha. Innis ergaa araaraa sana imaanaa nutti kenneera. ²⁰ Kanaafuu nu bakka bu'oota Kiristoos; Waaqnis karaa keenyaan isin sossobata; nus akka isin Waaqatti araaramtaniif qooda Kiristoos taanee isin kadhanna. ²¹ Akka nu isumaan qajeelummaa Waaqaa taanuuf Waaqni nuuf jedhee Kiristoos isa cubbuu hin qabne sana cubbuu godhe.

6

¹ Egaa nu warri Waaqa wajjin hojjenu, akka isin ayyaana Waaqaa akka waan gatii hin qabneetti hin fudhanne isin kadhanna. ² Inni,

"Ani yeroo fudhatama qabutti si dhaga'eera;

guyyaa fayyinaattis si gargaareera"*

jedhaatii. Kunoo yeroon fudhatama qabu amma; guyyaan fayyinaas amma.

Gidira Phaawulos Irra Ga'e

³ Nu akka tajaajilli keenya hin tuffatamneef, karaa nama kamii irra iyyuu gufuu hin keenyu. ⁴ Qooda kanaan nu karaa hundaan akka tajaajiltoota Waaqaatti of dhi'eessina; obsa guddaadhaan, dhiphinaan, gidiraa fi yaaddoon, ⁵ garafamuun, mana hidhaatti galfamuun, jeequmsaan, hojii dadhabsiisaa hojjechuun, hirriba dhabuun, beela'uun, ⁶ qulqullaa'ummaan, hubannaan, obsaa fi gara laafinaan, Hafuura Qulqulluu fi jaalala of tuulummaa hin qabneen, ⁷ dubbii dhugaatii fi humna Waaqaatiin, mi'a waraanaa kan qajeelinaa harka mirgaatii fi harka bitaatti qabachuun, ⁸ ulfinaa fi salphinaan, maqaa baduu fi maqaa toluun jiraanneerra; akkasumas utuu dhugaa qabeeyyii taanee jirruu, sobduu jedhamneerra; ⁹ beekamtoota turre; garuu akka warra hin beekamiinitti hedamne; nu du'aa jirra; garuu kunoo ni jiraanna; ni tumamna; garuu hin ajjeefamnu; ¹⁰ ni gaddina; garuu yeroo hunda ni gammanna; hiyyeeyyii dha; garuu namoota hedduu sooromsina; homaa hin qabnu; garuu waan hunda qabna.

¹¹ Yaa warra Qorontos, nu afaan guunnee isinitti dubbanneerra; garaan keenyas isiniif banamaa dha. ¹² Isinitu garaa nu dhokfate malee nu garaa isin hin dhokfanne. ¹³ Ani akka waan isin ijoollee koo taataniittin isinitti dubbadha; isinis akkasuma garaa keessan bal'isaa nuu banaa.

Warra Hin Amanneen Walitti Hin Camadaminaa

¹⁴ Warra hin amanneen walitti hin camadaminaa. Qajeelummaa fi jal'inni maal wal irraa qabu? Yookaan ifni dukkana wajjin tokkummaa maalii qaba? ¹⁵ Kiristoosii fi Belhor gidduu walii galtee maaliitu jira? Namni amanu tokko nama hin amanne wajjin maal wal irraa qaba? ¹⁶ Manni qulqullummaa Waaqaa waaqota tolfamoo wajjin walii galtee maalii qaba? Nu mana qulqullummaa Waaqa jiraataa ti. Waaqnis akkana jedhee dubbateera;

"Ani isaan wajjin nan jiraadha;

isaan gidduus nan deddeebi'a.

Ani Waaqa isaanii nan ta'a;

isaanis saba koo ni ta'u."†

¹⁷ Kanaafuu,

"Isaan keessaa ba'aa;

* 6:2 6:2 Isa 49:8 † 6:16 6:16 Lew 26:12; Erm 32:38; His 37:27

isaan irraas gargar fo'amaa;
jedha Gooftaan.

Waan xuraa'aa hin tuqinaa,
anis isinan simadha.”[‡]

¹⁸ Amma illee,

“Ani Abbaa isiniif nan ta'a;
isinis ilmaanii fi intallan koo ni taatu;
jedha Gooftaan Waan Hunda Danda'u.”[§]

7

¹ Kanaafuu yaa jaallatamtoota, nu waan waadaawwan kanneen qabnuuf kottaa Waaqa sodaachaa qulqullina fiixaan baasuudhaan waan foonii fi hafuura xureessu hundumaa irraa of qulqulleessinaa.

Gammachuu Phaawulus

² Isin garaa nuu bal'adhaa. Nu nama tokko illee hin yakkiine; nama tokko illee amala hin balleessine; nama tokko illee gowwoomsinee waa irraa hin fudhanne. ³ Kana jechuun koos isinitti muruuf miti; nu isin wajjin du'uu fi jiraachuuf akka isin garaa keenya keessa jirtan ani duraan dursee himeeraatii. ⁴ Ani guddiseen isin amanadha; guddisees isiniin nan boona. Ani baay'ee jajjabeeffameera; rakkina keenya hunda keessattis gammachuun koo hamma hin qabu.

Tiitoo Wajjin Wal Arguu

⁵ Yeroo Maqedooniyaa dhufnettis nu qixa hundaan dhiphachaa turre malee foon keenya kun boqonnaa hin arganne; alaan lola, keessaan immoo sodaatu nurra ture. ⁶ Waaqni warra gaddan jajjabeessu garuu dhufaatii Tiitootiin nu jajjabeesse; ⁷ kun immoo isin isa jajjabeessuu keessaniinis malee dhufaatii isaa qofaan miti. Innis na yaaduu keessan, gadduu keessan, hinaaffaa isin naaf qabdan nutti himeera; kanaafuu ani hamma duraa caalaa gammadeera.

⁸ Ani yoon xalayaa kootiin isin gaddisiise illee waan kana gochuu kootiif hin gaabbu. Ani yoon gaabbe illee akka xalayaan sun isin gaddisiise nan hubadha; ta'us isin gaddisiisuun isaa yeruma gabaabaaf; ⁹ amma garuu sababii isin gadditaniif utuu hin ta'in sababii gaddi keessan gara qalbii jijjiirrachuutti isin geesseeffani ani nan gammada. Isin akka fedhii Waaqaatti gadditaniitii; kanaafuu isin karaa kamiin iyyuu nuun hin miidhamne. ¹⁰ Gaddi akka fedhii Waaqaatti ta'u qalbii jijjiirranaa gara fayyinaatti nama geessu fida malee gaabbii hin fidu; gaddi akka fedhii addunyaatti ta'u garuu du'a fida. ¹¹ Gaddi akka fedhii Waaqaatti ta'e kun tattaaffii akkamii, dandeettii falmachuu akkamii, dheekkamsa akkamii, sodaa akkamii, namaa yaaduu akkamii, hinaaffaa qajeelaa akkamii, murtii qajeelaa akkamii isin keessatti akka uume mee ilaalaa! Isin waan kana irratti karaa hundaan akka qulqulloota taatan mirkaneeffattaniirtu. ¹² Kanaafuu ani isinii barreessu iyyuu, isin fuula Waaqaa duratti hammam akka nuuf of kennitan akka ofuma keessaniin argitaniif malee sababii namicha nama miidheettiif yookaan sababii namicha miidhaameetiif miti. ¹³ Nuus kana hundaanuu ni jajjabaanna.

Jajjabina keenyatti dabalees keessumattuu Tiitoo gammaduu isaa arginee gammanneerra; hafuurri isaa isin hundaan haaromfameeraatii. ¹⁴ Ani isiniin isatti booneen ture; isinis na hin qaanessine. Garuu akkuma wanni nu isinitti himne sun hundi dhugaa ta'e, waa'ee keessan Tiitootti boonuun keenyas akkasuma dhugaa ta'uun isaa mirkanaa'eera. ¹⁵ Innis ajajamuu hunda keessanii akkasumas sodaa fi hollannaa isin ittiin isa simattan sana yeroo yaadatutti jaalalli inni isiniif qabu isa durii caalaa dabalama. ¹⁶ Ani abdiin guutuu isin irraa qaba; kanaafuu nan gammada.

8

Arjummaa Qulqullootaaf Taasifame

¹ Yaa obboloota, waa'ee ayyaana Waaqni waldoota kiristaanaa Maqedooniyaatiif kennee isin akka beektan ni barbaanna. ² Isaanis utuu dhiphina baay'een qoramuutti jiranuu, baay'inni gammachuu isaaniitii fi akka malee deeguun isaanii arjummaa isaanii baay'iseera. ³ Ani akka isaan hamma dandeettii isaanii, dandeettii isaaniitii olis fedhii isaaniitiin kennan dhugaa nan ba'aatii. Isaan guutumaan guutuutti ofuma isaaniitiin ⁴ carraa qulqulloota tajaajiluu kana keessatti akka hirmaatan cimsanii nu kadhatan. ⁵ Isaan garuu duraan dursanii Gooftaaf, ergasii immoo fedhii Waaqaatiin nuuf of kennan malee akka nu eegne hin goone. ⁶ Kanaafuu Tiitoo akkuma duraan

[‡] 6:17 6:17 Isa 52:11; His 20:37,41 [§] 6:18 6:18 2Sm 7:8,14

jalqabe sana hojii arjummaa kana gama keessaniin akka fiixaan baasuuf isa kadhanne. ⁷ Isin garuu akkuma waan hundaan jechuunis amantiin, dubbiin, beekumsaan, tattaaffii guutuu fi jaalala nuuf qabdaniin caaltan sana, kennaa arjummaa kaaniinis akka caaltan mirkaneessaa.

⁸ Ani tattaaffii namoota kaaniitiin wal bira qabee jaalalli keessan dhugaa ta'uu isaa qoruu barbaadeeti malee isin ajajaa hin jiru. ⁹ Isin ayyaana Gooftaa keenya Yesuus Kiristoos ni beektuutii; inni utuu sooressa ta'ee jiruu akka isin hiyyummaa isaatiin sooromtaniif isiniif jedhee hiyyoome.

¹⁰ Waan kana irratti gorsi ani waa'ee waan hunda caalaa isiniif wayyuu irratti kennu kanaa dha. Isin waggaa darbe kennuu gofaan utuu hin ta'in fedhii kennuuf qabdaniinis kanneen jalqabaa turtan. ¹¹ Ammas fedhiin cimaan isin hojii sanaaf qabdan isa fiixa baasuu keessaniin akka mirkanaa'uuf waanuma qabdaniin hojii sana fiixaan baasaa. ¹² Erga fedhiin jiraate kennaan sun akkuma waan namni qabuutti fudhatama malee akka waan namni hin qabneetti miti.

¹³ Fedhiin keenya akka isin rakkattanii warra kaanitti immoo toluuf utuu hin ta'in akka wal qixxummaan jiraatuuf. ¹⁴ Akka wanti isaan irraa hafu hir'ina keessan guutuuf, yeroo ammaa wanti isin irraa hafu hir'ina isaanii ni guuta. Yoos wal qixxummaan ni jiraata; ¹⁵ kunis akkuma, "Isa baay'ee walitti qabateef baay'een hin hafne; isa xinnoo walitti qabatettis wanni tokko iyyuu hin hir'anne"* jedhamee barreeffamee dha.

Tiitooon Qorontositti Ergame

¹⁶ Waaqa yaaduma ani isiniif qabu garaa Tiitoo keessa kaa'e sana nan galateeffadha. ¹⁷ Tiitoo gorsa keenya fudhachuu gofaan utuu hin ta'in fedhii guddaan ofuma isaatiin ka'ee gara keessan dhufaa jiraatii. ¹⁸ Nus obboleessa tajaajila wangeelaatiin waldoota kiristaanaa hundaan jajame sana isa wajjin ni ergina. ¹⁹ Kana malees inni hojii nu ulfina Gooftaatiif fi fedhii gaarii qabnu mul'isuuf hojjennu keessatti akka nu wajjin deemuuf waldoota kiristaanaatiin filatameera. ²⁰ Nu kennaa arjummaa kana hojii irra oolchuu keessatti akka namni kam iyyuu maqaa nu hin balleessine of eegganna. ²¹ Nu utuu fuula Gooftaa qofa duratti hin ta'in fuula namootaa durattis waan qajeelaa hojjechuuf tattaaffanna.

²² Kana malees obboleessa keenya isa nu yeroo baay'ee waan hedduun qorree nama hisataa ta'uu isaa mirkaneeffanne sana isaan wajjin engineerra; innis waan amantii guddaa isin irraa qabuuf kan duraa caalaa ni yaada. ²³ Waa'ee Tiitoo irratti, inni garee koo kan na wajjin isin gidduu hojjetuu dha; waa'ee obboloota keenyaa immoo isaan bakka bu'oota waldoota kiristaanaatiif fi ulfina Kiristoos. ²⁴ Kanaafuu akka waldoonni kiristaanaa arguu danda'aniif dhugaa jaalala keessaniitiif fi sababii nu isiniin of jajuuf namoota kanneenitti argisiisaa.

9

¹ Waa'ee tajaajila qulqullootaaf kennamu kanaa isinii barreessuu na hin barbaachisu. ² Ani akka isin gargaaruuf hinaaftan nan beekaatii; anis, "Warri Akaayaa bara darbee jalqabani gargaarsa kennuuf qophaa'aniiru" jedhee namoota Maqedooniyaa biratti of jajeen ture; fedhiin keessanis isaan keessaa namoota baay'ee hojiif kakaaseera. ³ Egaa ani akkuman "Isaan qophaa'aniiru" jedhee dubbadhe sanatti, akka isin qophooftanii argamtaniif malee waa'ee kanaatiif isiniin of jajuun keenya waan akkasumaan dubbatame akka hin taane ani obboloota ergeera. ⁴ Yoo namoonni Maqedooniyaa kam iyyuu na wajjin dhufanii akka isin hin qophaa'in argan, nu warri akkas isin amananne iyyuu waa'ee keessan waan jennu dhabnee ni qaanofna. ⁵ Kanaafuu akka obboloonni kunneen duraan dursanii gara keessan dhufanii kennaa arjummaa kan isin waadaa galtaan sana qopheessaniif isaan gorsuun barbaachisaa natti fakkaate. Yoos kennaan sun akka dirqamaatti utuu hin ta'in akka kennaa arjummaatti qopheeffama.

Arjummaan Jajabeeffamuu Isaa

⁶ Waan kana yaadadhaa: Namni harka isaa utuu hin guutin facaasu utuu harka isaa hin guutin galfata; namni harka isaa guutee facaasu immoo harka isaa guutee galfata. ⁷ Tokkoon tokkoon namaa utuu sassataan yookaan dirqamaan hin ta'in waan kennuuf garaa keessatti yaade haa kennu; Waaqni nama gammachuun kennu jaallataatii. ⁸ Isin yeroo hundumaa waan hundumaan waan isin barbaachisu hunda qabaattanii hojii gaarii hundumaan akka guutamaniifis Waaqni ayyaana hunda isinii baay'isuu ni danda'a. ⁹ Kunis akkuma, "Inni ni bittinneesse; hiyyeeyyiif ni kenne;

* 8:15 8:15 Bau 16:18

qajeelummaan isaa bara baraan ni jiraata”^{*} jedhamee barreeffamee dha. ¹⁰ Inni namicha facaasuuf sanyii, kan nyaatuuf immoo buddeena kennu sun isinis akka facaafattaniif sanyii isinii kenna; isinii baay’isas; ija qajeelummaa keessaniis ni baay’isa. ¹¹ Isinis yeroo hunda akka arjoomtaniif karaa hundaan ni sooromfamtu; arjummaan keessanis karaa keenyaan Waaqaaf galata fida. ¹² Tajaajilli isin kennitan kun waan qulqullootaaf barbaachisu guutuu qofa utuu hin ta’in, akka galanni baay’een guutee Waaqaaf irra dhangala’u taasisa. ¹³ Sababii tajaajila isin ittiin of mirkaneessitan sanaatiin, wangeela Kiristoos lallabuun ajajamuu keessanii fi arjummaan keessan kan isin isaaniif fi warra kaan hundaaf arjoomtan sanaaf namoonni Waaqa jajatu. ¹⁴ Isaanis kadhannaa isiniif kadhatan keessatti sababii ayyaana guddaa kan Waaqni isinii kenne sanaatiif isin yaadu. ¹⁵ Kennaa isaa kan ibsamuu hin dandeenye sanaaf galanni Waaqaaf haa ta’u!

10

Phaawulos Tajaajila Isaatiif Falmate

¹ Ani Phaawulos kan yeroon isin bira jiru “Ija laafessa” yeroon isin irraa fagaadhu immoo “Ija jabeessa” ta’e garraamummaa fi gara laafina Kiristoosiin isinan kadhada! ² Ani yeroon gara keessan dhufutti akka isin ija jabina ani warra waan nu akka yaada fooniitti jiraannu se’an sana irratti nan qabaadha jedhee yaadu sana qabaadhu akka isin na hin goone isin kadhada. ³ Nu yoo fooniin jiraanne iyyuu akka yaada fooniitti hin lollu. ⁴ Mi’i waraanaa kan nu ittiin lollu kan da’annoo jigsuudhaaf humna Waaqaa qabuudha malee mi’a waraana foonii miti. ⁵ Mormii fi of tuulummaa beekumsa Waaqaa irratti ka’u hunda ni diigna; yaada hundas boojinee Kiristoosiif akka ajajamu ni goona. ⁶ Yommuu isin guutummaatti ajajamuu keessan raawwattanitti, nu immoo ajajamuu diduu hunda haaloo ba’uuf ni qophoofna.

⁷ Isin waanuma isinitti mul’atu qofa ilaaltu. Eenyu iyyuu yoo kan Kiristoos ta’uu isaatti amane akkuma inni kan Kiristoos ta’e, nus kan Kiristoos ta’uu keenya haa hubatu. ⁸ Ani taayitaa keenya kan Gooftaan akka ittiin isin diignuuf utuu hin ta’in akka ittiin isin ijaarruuf nuu kenne sanaa caalaatti yoon boone iyyuu itti hin qaana’u. ⁹ Ani waanan ergaa kootiin isin sodaachisuu yaalu fakkaachuu hin barbaadu. ¹⁰ Namoonni tokko tokko, “Ergaan isaa ulfaataa fi cimaa dha; inni yeroo qaamaan argamutti garuu dadhabaa dha; dubbiin isaas tuffatamaa dha” jedhu. ¹¹ Warri akkasii akka wanni nu fagoo jiraannee barreessinuuf fi wanni nu yeroo isaan wajjin jirrutti hojjennu tokkuma ta’e haa hubatan.

¹² Nu warra of saadan tokko tokkotti of ramaduuf yookaan isaaniin of qixxeessuuf ija hin jabaannu. Isaan yeroo walii isaaniitti of madaalanii fi walii isaaniitti of qixxeessan hin hubatan. ¹³ Nu garuu hamma daangaa Waaqni nuu ramade kan isin bira ga’uutti malee dandeettii keenyaa olitti of hin jajnu. ¹⁴ Nu waan wangeela Kiristoos lallabaa gara keessan dhufneef, akka waan isin bira hin ga’iniitti baay’ee hin hiixannuutti. ¹⁵ Nu hojii warra kaaniin hojjetameen baay’ee of hin jajnu. Akkuma amantiin keessan guddachaa deemuun akka iddoon hojii keenyaa kan isin gidduutti argamu akka malee babal’atu ni abdanna; ¹⁶ kunis akka nu hojii duraan dursee biyya nama biraa keessatti hojjetameen utuu of hin jajin biyyoota isinii achi jiran keessatti wangeela lallabuu dandeenyuuf. ¹⁷ Garuu, “Namni boonu Gooftaadhaan haa boonu.”^{*} ¹⁸ Nama Gooftaan galateessutu fudhatama argata malee namni of galateessu fudhatama hin argatuutti.

11

Phaawulosii fi Ergamoota Sobaa

¹ Ani gowwummaa koo ishee xinnoo naa obsitu jedheen abdadha; duraanuu naa obsitaniirtu. ² Ani hinaaffaa Waaqaatiin isiniif nan hinaafa. Ani akka durba tokkooti fuula isaa duratti isin dhi’eessuuf dhirsa tokko jechuunis Kiristoosiif isin kaadhimeeraatii. ³ Garuu akkuma bofti haxxummaa isaatiin Hewaanin gowwomse sana yaadni keessanis akkasuma dhugaa fi qulqullina ittiin Kiristoosiif of kennitan sana irraa ni dogoggorfama jedheen sodaadha. ⁴ Namni tokko gara keessan dhufee yoo Yesuus nu isinii lallabne malee Yesuus kan biraa isinii lallabe, yookaan Hafuura nu isinii lallabne malee hafuura kan biraa yoo fudhattan, yookaan wangeela nu isinii lallabne malee wangeela kan biraa yoo fudhattan ni obsitu.

⁵ Ani, “Ergamoota hangafoota” sanaa gaditti of hin ilaalu. ⁶ Ani dubbiitti leenjii hin qabu; garuu beekumsa qaba. Kanas karaa hundaan sirriitti isinii ibsineerra. ⁷ Wangeela

Waaqaa gatii malee isinitti lallabuudhaan akka isin ol ol jettaniif ani gad of qabuun koo cubbuu turee? ⁸ Ani isin tajaajiluuf jedhee gargaarsa isaan irraa fudhachuudhaan waldoota kiristaanaa kaan saameera. ⁹ Ani yeroon isin bira turee fi yeroo waa na barbaachisetti eenyutti illee ba'aa hin taane; obbollooni Maqedooniyaa irraa dhufan waan na barbaachisuun na gargaaraa turaniitii. Anis waanuma tokkoon illee akka ba'aa isinitti hin taaneef of eggachaan ture; amma illee ittuma fufee ofin eggadha. ¹⁰ Hamma dhugaan Kiristoos na keessa jirutti boonuu koo kana kutaalee biyya Akaayaa keessatti eenyu iyyuu na dhowwu hin danda'u. ¹¹ Maaliif? Ani waan isin hin jaallanneef moo? Isin jaallachuu koo Waaqni ni beeka!

¹² Warra waan ittiin boonaniin nuun qixxaachuuf jedhanii carraa barbaaddatan carraa dhowwachuuf ani waanan amma hojjedhu ittuma fufee nan hojjedha. ¹³ Namoonni akkanaa ergamoota sobaa, hojjetoota nama gowwoomsan, warra ergamoota Kiristoos fakkaachuuf of geeddaranii dha. ¹⁴ Seexanni mataan isaa ergama ifaa fakkaachuuf waan of geeddaruuf kun nama hin dingu. ¹⁵ Egaa tajaajiltoonni isaas yoo tajaajiltoota qajeelummaa fakkaachuuf of geeddaran kun waan nama dingu miti. Dhumni isaaniis akkuma hojii isaani ta'a.

Phaawulos Dhiphinaan Of jaje

¹⁶ Ani ammas irra deebi'ee nan dubbadha: Namni tokko iyyuu gowwaa na hin se'in. Isin yoo gowwaa na seetan ani xinnoo akkan boonuuf akkuma gowwaa tokkootti na fudhadhaa. ¹⁷ Ani of amanadhee boonuu kana keessatti akka gowwaa tokkoottiin dubbadha malee akka Gooftaan dubbatutti hin dubbadhu. ¹⁸ Waan namoonni hedduun akkuma yaada fooniitti boonaniif, anis nan boona. ¹⁹ Isin ogeeyyii waan taataniif gammachuudhaan gowwootaaf obsitu! ²⁰ Yoo eenyu iyyuu isin garboomfate yookaan yoo isin irraa nyaate yookaan yoo faayidaa ofiitii isinitti fayyadame yookaan yoo koore yookaan yoo isin kabale ni obsituutii. ²¹ Akka nu waan akkasii irratti dadhaboo turre ani qaana'aa nan dubbadha.

Ani akka gowwaa tokkoottiin dubbadha; waan namni kam iyyuu ittiin of jajuu fi ija jabaatu sana anis ittiin of jajuuf ija nan jabaa dha. ²² Isaan Ibrootaa? Anis akkasuma. Isaan Israa'elootaa? Anis akkasuma. Isaan sanyii Abrahaamii? Anis akkasuma. ²³ Isaan tajaajiltoota Kiristoosii? Ani akka nama qalbii dabarseettin dubbadhaatii ani nan caala. Ani caalchisee baay'ee itti dadhabeera; caalchisee yeroo baay'ee hidhameera; caalchisee akka malee garafameera; ammumaa ammas du'aaf saaxilameera. ²⁴ Harka Yihuudootaattis si'a shan afurtama jechuu tokko hanquu garafameera. ²⁵ Si'a sadii uleen dhaanameera; si'a tokko dhagaadhaan tumameera; si'a sadii dooniin na jalaa caccabeera; halkan tokkoo fi guyyaa tokko galaana keessa tureera; ²⁶ ani utuun wal irraa hin kutin deemsa irra ture. Balaan lagaa, balaan saamtotaa, balaan saba kootii, balaan Namoota Ormaa, magaalaa keessatti balaan, gammoojjii keessatti balaan, galaana irratti balaan, obbolloota sobaa irraas balaan na mudatee ture. ²⁷ Ani baay'ee hojjedhee bututeera; halkan baay'ee hirriba dhabeera; beela'eera; dheebodheera; yeroo baay'ee soomeera; dhaamodheera; daareeras. ²⁸ Kana hundumaa caalaa yaaddoo ani waldoota kiristaanaa hundumaaf qabutu guyyaa guyyaan natti ulfaata. ²⁹ Eenyyutu dadhabaa dha? Ani hin dadhabuu ree? Eenyyutu hin gufanne? Ani aaree hin gubadhuu ree?

³⁰ Ani yoon of jajuu qabaadhe waan dadhabii koo mul'isuun of nan jaja. ³¹ Waaqaa fi Abbaan Gooftaa Yesuus inni bara baraan eebbifamu sun akka ani hin sobne ni beeka. ³² Damaasqoo keessatti namichi mooticha Areexaas jalatti bulchaa biyyaa ture na qabsiisuuf jedhee magaalaa namoota Damaasqoo eegsisaa ture. ³³ Ani garuu foddaa dallaa keessaan guuboodhaan gad buufamee harka isaa jalaa ba'e.

12

Mul'ata Phaawulos

¹ Yoo bu'aa qabaachuu baate iyyuu ani nan boona. Ani gara waan Gooftaan na argisiiseetii fi mul'ata isa biraa dhufeetti nan qajeela. ² Namichi Kiristoositti jiru tokko waggaa kudha afur dura gara samii sadaffaatti ol fudhatamuu isaa nan beeka. Innis dhagna fooniitiin ta'uu fi ta'uu baachuu isaa Waaqatu beeka malee ani hin beeku. ³ Ani nama akkanaa nan beeka; dhagna fooniitiin ta'uu fi ta'uu baachuu isaa ani hin beeku; Waaqatu beeka; ⁴ innis gara jannataatti ol fudhatamee waan hin dubbatamne kan akka namni himuuf hin eeyyamamne dhaga'e. ⁵ Ani waa'ee nama akkasiitiif nan boona; garuu waa'ee dadhabii kootii malee waa'ee ofii kootii hin boonu. ⁶ Ani waanan dhugaa dubbachaa jiruuf yoon boonuu fladhe iyyuu hin gowwoomu. Garuu namni tokko iyyuu waan narratti arguu fi waan narraa dhaga'u caalaa akka waa'ee koo hin yaadneef ani waan akkasii irraa ofin qusadha; ⁷ akka ani mul'ata akka malee guddaa kanaan of hin

tuulleef qoraattiin foon koo waraanu tokko, ergamaan Seexanaa akka na dhiphisuuf naa kenname. ⁸ Wannii kun akka narraa fagaatuuf si'a sadii Gooftaa nan kadhade. ⁹ Inni garuu, **"Ayyaanni koo si ga'a; humni koo dadhabbii keessatti guutuu ta'aatii"** naan jedhe. Kanaafuu humni Kiristoos akka narra boqotuuf waa'ee dadhabbii kootii caalchisee gammaduudhaan akka malee nan boona. ¹⁰ Ani waa'ee Kiristoosiif jedhee dadhabbii keessatti, arrabsoo keessatti, gidiraa keessatti, ari'atama keessatti, rakkina keessattis gammaduun koo kanumaaf. Yoos ani yeroon dadhabutti nan jabaadhaatii.

Phaawulos Warra Qorontosiiif Yaaduu Isaa

¹¹ Ani of gowwoomseera; waan kanatti garuu isinitu na dhiibe. Ani yoon waanuma tokkotti illee hedamuu baadhe, waan "Ergamoota hangafoota" sanaa gad hin taaneef silaa isin naa dubbachuu qabdu turta. ¹² Mallattoowwan ergamaa dhugaa tokko jechuunis mallatton, hojjiin dinqiitii fi raajiin isin gidduutti obsa guddaadhaan hojjetamaniiru. ¹³ Ani utuu ba'aa isinitti hin ta'in hafuu kootiin alatti wanti isin ittiin waldoota kiristaanaa kaanii gad taatan maali? Yakka kana naa dhiisaa!

¹⁴ Ani si'a sadaffaa gara keessan dhufuuf qophaa'eera; ani isinuma malee qabeenya keessan waan hin barbaanneef ba'aa isinitti hin ta'u. Warratu ijoollee isaaniiitiif qabeenya kuusuu qaba malee ijoolleen warra isaaniiitiif kuusuu hin qaban. ¹⁵ Ani waanan qabu hunda gammachuun isiniif nan kenna; ofii koo illee isiniif nan kenna. Sababii ani baay'isee isin jaalladhuuf isin immoo xinneessitanii na jaallattuu ree? ¹⁶ Haa ta'uu malee ani ba'aa isinitti hin taane. Ani garuu waanan abshaala ta'eef malaan isin qabadhe. ¹⁷ Ani namoota isinitti erge keessaa karaa isa tokkootiin illee waa isin irraa nyaadheera? ¹⁸ Ani akka Tiitoon gara keessan dhufuuf isa kadhade; obboleessa tokkos isa wajjin ergeera. Tiitoon waa isin irraa nyaateera? Nu hafuura tokkoon, karuma tokko irra deddeebi'aa hin turree?

¹⁹ Isin waan nu hamma ammaatti fuula keessan duratti ofii keenyaaf falmannu seetani? Nu akka warra Kiristoositti jiraataniitti fuula Waaqaa duratti dubbanna; yaa michoota, waan kana hunda hojjechuun keenya isinuma jajjabeessuuf. ²⁰ Yeroo ani gara keessan dhufutti isin akka ani fedhu taatanii hin argaman ta'a. Yookaan ani akka isin feetan ta'ee hin argamu ta'a jedheen sodaadhaatii. Wal loluun, hinaaffaan, aariin boba'uun, wal qooduun, maqaa nama balleessuun, hamiin, of tuulummaanii fi jeequmsii isin gidduu jiraata jedheen sodaadha. ²¹ Yeroo ani deebi'ee gara keessan dhufutti Waaqni koo fuula keessan duratti gad na deebisa; anis waa'ee namoota baay'ee kanneen kanaan dura cubbuu hojjetanii fi xuraa'ummaa irraa, halalummaa fi jireenya gad dhiisii hamaa irraa hin deebi'iniif nan gadda jedheen sodaadha.

13

Akeekkachiisa Dhumaa

¹ Ani kanaan walitti si'a sadaffaa gara keessan dhufuu koo ti. "Dubbiin hundinuu dhuga baatota lamaan yookaan sadiin mirkaneeffamuu qaba."* ² Ani duraanuu yommuun si'a lammaffaa isin bira turetti isin akeekkachiiseera. Amma illee fagoo taa'ee isuma irra nan deebi'a; ani yeroon deebi'ee dhufutti warra kanaan dura cubbuu hojjetaniifis ta'uu warra kaan hundaaf garaa hin laafu; ³ kunis isin akka Kiristoos karaa kootiin dubbatu ragaa waan barbaaddaniif. Inni isin gidduutti cimaadha malee waa'ee keessan irratti dadhabaa miti. ⁴ Inni dadhabbiidhaan fannifamu iyyuu, humna Waaqaatiin garuu ni jiraata. Nus akkasuma isatti dadhabdoota; ta'us isin tajaajiluuf humna Waaqaatiin isa wajjin ni jiraana.

⁵ Isin amantiidhaan jiraachuu fi jiraachuu baachuu keessan beekuuf of qoraa; of ilaalaas. Dhugumaan isin yoo qormaatacha kufan malee akka Yesuus Kiristoos isin keessa jiru hin beektanii? ⁶ Anis akka nu qormaatacha hin kufin isin akka hubattan nan amana. ⁷ Nu ammas akka isin waan hamaa tokko illee hin hojjenneef Waaqa kadhanna. Kunis nu yoo waan qormaata kufne fakkaanne illee akka isin waan qajeelaa hojjetaniif malee akka namoonni qormaatacha keessatti cimnee dhaabachuu keenya arganiif miti. ⁸ Nu dhugaaf hojjenna malee, dhugaa mormuudhaan homaa hojjechuu hin dandeenyuutii. ⁹ Yommuu nu dadhabnee isin immoo jabaattanitti ni gammanna; kadhannaan keenyas akka isin warra hir'ina hin qabne taataniif. ¹⁰ Wannii ani yeroo fagoo jirutti barreessuuf kanaa dha; kunis akka ani yeroon gara keessan dhufutti taayitaa Gooftaan akka ani ittiin isin diiguuf utuu hin ta'in, akka ani ittiin isin ijaaruuf naa kennetti fayyadamee isinitti hin jabaanneef.

* 13:1 13:1 KeD 19:15

Dhaamsa Nagaa Xumuraa

¹¹ Eгаа yaa obboloota nagaatti. Haaromfamaa; wal jajjabeessaa; yaada tokko qabaadhaa; nagaadhaan jiraadhaa. Waaqni jaalalaatii fi nagaa isin wajjin ni ta'a.

¹² Dhungoo qulqulluudhaan nagaa wal gaafadhaa.

¹³ Sabni Waaqaa hundinuu nagaa isinii dhaamu.

¹⁴ Ayyaanni Gooftaa Yesuus Kiristoos, jaalalli Waaqaa, tokkummaan Hafuura Qulqulluus hunda keessan wajjin haa ta'u.

Galaatiyaa

Nagaa Gaafachuu

¹ Phaawulos ergamticha isa utuu namoota biraa yookaan namaan hin ta'in garuu Yesuus Kiristoosii fi Waaqa Abbaa isa Yesuus warra du'an keessaa kaaseen ergamee fi ² obboloota na wajjin jiran hundumaa irraa,

Gara Waldoota Kiristaanaa Galaatiyaatti:

³ Abbaa keenya Waaqaa fi Yesuus Kiristoos Gooftaa irraa ayyaannii fi nagaan isiniif haa ta'u; ⁴ inni akka fedhii Abbaa keenyaa fi Waaqa keenyaatti bara hamaa kana jalaa nu oolchuuf jedhee cubbuu keenyaaf of kenne; ⁵ ulfinni bara baraa hamma bara baraatti isaaf haa ta'u. Ameen.

Wangeelli Kan Biraa Hin jiru

⁶ Akkana ariifattanii isa karaa ayyaana Kiristoosiin isin waame sana dhiisuudhaan wangeela biraa duukaa bu'uun keessan baay'ee na dinqeera; ⁷ wangeelli biraa illee hin jiru. Garuu namoonni isin dogoggorsanii wangeela Kiristoos jal'isuu yaalan tokko tokko jiru. ⁸ Nus taanaan yookaan yoo ergamaan Waaqaa samii irraa dhufe tokko wangeela nu kanaan dura isinitti lallabne sana irraa adda ta'e isinitti lallabe, inni bara baraan haa abaaramu! ⁹ Akkuma nu kanaan dura jenne ani ammas irra deebi'ee nan dubbadha; yoo eenyu iyyuu wangeela isin kanaan dura fudhattan sana irraa adda ta'e isinitti lallabe inni abaaramaa haa ta'u!

¹⁰ Ani amma nama biratti moo Waaqa biratti fudhatama argachuu yaalaan jira? Yookaan nama gammachiisuu nan yaalaa? Ani utuun hamma ammaatti nama gammachiisuu yaalee silaa tajaajilaa Kiristoos hin ta'u ture.

Phaawulos Waamamuu Isaa

¹¹ Yaa obboloota, wangeelli ani lallabe sun nama irraa akka hin dhufin isin akka beektan nan barbaada. ¹² Ani wangeelicha mul'ataan Yesuus Kiristoos irraa fudhadhe malee nama tokko irraa illee hin fudhanne; yookaan namni na hin barsiifne.

¹³ Akka ani yeroon amantii Yihuudootaa duukaa bu'aa turetti waldaa kiristaanaa Waaqaa akka malee ari'achaa fi balleessuufis yaalaa ture dhageessaniirtu. ¹⁴ Ani amantii Yihuudootaatiin warra saba koo keessaa hiriyyoota koo ta'an baay'ee nan caala ture; duudhaa abbootii kootiifis akka malee nan hinaafa ture. ¹⁵ Garuu yommuu Waaqni gadameessa haadha kootii jalqabee na filatee fi ayyaana isaatiin na waame sun, ¹⁶ akka ani Namoota Ormaa gidduutti waa'ee ilma isaa lallabuuf isa natti mul'isuu jaallatetti ani nama tokkoon iyyuu hin mari'anne. ¹⁷ Ani warra anaan dura ergamoota turan arguuf Yerusaaleemitti ol hin baane; garuu yeruma sana biyya Arabaan dhaqe. Ergasiis Damaasqoottin deebi'e.

¹⁸ Ergasiis anis waggaa sadii booddee Keefaan wal baruuf jedhee Yerusaaleemitti ol ba'ee; guyyaa kudha shanis isa biran ture. ¹⁹ Ani garuu Yaaqoob obboleessa Gooftaa malee ergamoota kaan keessaa tokko illee hin argine. ²⁰ Wanti ani isinii barreessu akka soba hin ta'in kunoo fuula Waaqaa duratti isiniifin mirkaneessa.

²¹ Ergasiis ani gara Sooriyaa fi biyya Kiilqiyaan dhaqe. ²² Waldoonni Kiristaanaa Yihuudaa kanneen Kiristoositti jiranis fuula koo arganii hin beekan. ²³ Isaanis oduu, "Namichi duraan nu ari'achaa ture sun amma immoo amantiidhuma dur balleessuuf yaalaa ture sana lallabaa jira" jedhu qofa dhaga'an. ²⁴ Isaanis sababii kootiif Waaqaaf ulfina kennan.

2

Phaawulos Fudhatama Argachuu Isaa

¹ Ani waggaa kudha afur booddee deebi'ee Yerusaaleemitti ol ba'ee; ani yeroo kana Barnaabaas wajjin ture. Tiitoo illee of duukaa fudhadhee dhaqe. ² Ani mul'ataanin ol ba'ee; wangeela Namoota Ormaa gidduutti lallabus isaaniif nan ibse. Kanas akka fiigichi koo kan duraa, kan ammaas akkasumaan hin hafne waan sodaadheef kophaatti warra dura bu'oota fakkaatanittin hime. ³ Garuu Tiitoo inni ana wajjin ture iyyuu utuma nama Giriik ta'ee jiruu akka dhagna qabatu hin dirqisiifamne. ⁴ Kunis sababii obboloota sobaa tokko tokko bilisummaa nu karaa Kiristoos Yesuusiin arganne basaasuu

fi nu garboomfachuuf dhokatanii nu gidduu galaniif ta'ee. ⁵ Nus akka dhugaan wangeelaa isin bira jiraatuuf jennee battala tokkoof illee isaaniif hin ajajamne.

⁶ Waa'een warra gurguddaa fakkaatan sanaa yoo isaan waanuma fedhan ta'an iyyuu anaaf homaa miti; Waaqni fuula namaa ilaalee nama wal hin caalchisu; namoonni kunneen ergaa koo irratti waan tokko hin daballe. ⁷ Karaa kaaniin immoo isaan akkuma Phexros warra dhagna qabatanitti wangeela lallabuuf imaanaan itti kenname sana, anis akka warra dhagna hin qabannetti wangeela lallabuuf imaanaan natti kenname argan. ⁸ Waaqni akka Phexros ergamaa ta'ee warra dhagna qabatan tajaajilu hojjete sun akka anis ergamaa ta'ee Namoota Ormaa tajaajilu hojjetee raatii. ⁹ Yaaqoob, Keefaa fi Yohannis warri akka "Utubaatti" ilaalaman sun yommuu ayyaana naa kenname hubatanitti anaa fi Barnaabaasiif harka mirgaa kan tokkummaa kennanii akka nu gara Namoota Ormaa deemnu, isaan immoo akka gara warra dhagna qabatanii dhaqan walii galan. ¹⁰ Wannii isaan nu kadhatanis akka nu hiyyeeyyii yaadannu qofa ture; kun immoo waanuma ani gochuuf hawwaa turee dha.

Phaawulos Phexrosiin Mormuu Isaa

¹¹ Keefaan waan dogoggorree tureef yeroo inni Anxookiiyaa dhufetti ani ifaan ifattin isaan morme. ¹² Utuu jarri tokko Yaaqoob biraa hin dhufin dura inni Namoota Ormaa wajjin nyaachaa ture. Yommuu isaan achi ga'anitti garuu waan garee warra dhagna qabatanii sodaateef dugda duubatti deebi'ee Namoota Ormaa irraa gargar ba'ee. ¹³ Yihuudoonni kaanis itti fakkeessummaa isaa duukaa bu'an; Barnaabaas iyyuu itti fakkeessummaa isaaniitiin dogoggorfamee ture.

¹⁴ Anis yommuu akka isaan daandii dhugaa wangeelaa irra hin deemne argetti hunda isaanii duratti Keefaan akkana jedhee; "Ati Yihuudii dha; garuu utuu akka Yihuudiitti hin ta'in akka Nama Ormaatti jiraata; yos ati akkamitti akka Namoonni Ormaa bartee Yihuudootaa duukaa bu'an dirqisiifta ree?"

¹⁵ "Nu dhalootaan Yihuudoota malee Namoota Ormaa cubbamoota miti; ¹⁶ namni Yesuus Kiristoositti amanuun malee akka seera eeguun qajeelaa hin taasifamne beekna. Kanaafuu seera eeguudhaan utuu hin ta'in amantii Kiristoos irratti qabnuun qajeeltota akka taanuuf Kiristoos Yesuusitti amanneerra; eenyu iyyuu seera eeguudhaan qajeelaa hin ta'utti.

¹⁷ "Egaa nu utuu karaa Kiristoosiin qajeeltota taasifamuu barbaannu nu mataan keenya iyyuu cubbamoota taanee yoo argamnee Kiristoos tajaajilaa cubbuuti jechuudhaa ree? Kun gonkumaa akkas miti! ¹⁸ Ani yoon waanan diige deebisee ijaare akkan seera cabsituu ta'en mirkaneessa.

¹⁹ "Ani akkan Waaqaaf jiraadhuuf, karaa seeraatiin seeraaf du'eeraatii. ²⁰ Ani Kiristoos wajjin fannifameera; si'achi Kiristoositu na keessa jiraata malee kan jiraatu ana miti. Ani jireenya amma fooniin jiraadhu kana amantii Ilma Waaqaa isa na jaallatee naaf jedhee of kennetti qabuun nan jiraadha. ²¹ Ani ayyaana Waaqaa gatii hin dhabsiisu; utuu qajeelummaan karaa seeraatiin argamee Kiristoos akkanumaan du'e jechuu dha kaa!"

3

Amantii Yookaan Seera Eeguu

¹ Yaa warra Galaatiyaa gowwoota! Eenyutu falfala isinitti hojjete? Yesuus Kiristoos akka waan ijuma keessan duratti fannifameetti mul'ifamee hin turree? ² Ani waan tokko qofa isin irraa barachuu nan barbaada: Isin seera eeguun moo waan dhageessan amanuun Hafuura Qulqulluu argattan? ³ Isin akkas gowwaadhaa? Hafuura Qulqulluudhaan jalqabdanii amma immoo fooniin fixxuu ree? ⁴ Kun dhugumaan iyyuu waan hin fayyadne taanaan isin waanuma hin fayyadneef hammama dhiphattanii ree? ⁵ Wannii Waaqni Hafuura isaa isinii kennee hojii dinqii gidduu keessanitti hojjetuuf sababii isin seera eegdaniif moo sababii isin waan dhageessan amantaniif? ⁶ Akkasumas Abrahaam, "Waaqa amane; kunis qajeelummaatti lakkaa'ameef."*

Muuxannoo Jireenya Abrahaam

⁷ Kanaafuu warri amanan ijoolllee Abrahaam akka ta'an hubadhaa. ⁸ Katabbiin Qulqulluun akka Waaqni amantii Namoota Ormaa qajeeltota taasisu duraan dursee argee, "Sabni hundinuu karaa keetiin eebbifama"† jedhee duraan dursee Abrahaamitti wangeela lallabe. ⁹ Kanaaf warri amantii qaban, Abrahaam nama amantii sana wajjin eebbifaman.

* 3:6 3:6 Uma 15:6 † 3:8 3:8 Uma 12:3; 18:18; 22:18

Abaarsa Seeraa

¹⁰ Warri seera eeguu isaanii abdatan hundinuu abaarsa jala jiru; “Namni waan Kitaaba Seeraa keessatti barreeffame hundaaf itti fufee hin ajajamne kam iyyuu abaarama dha”[‡] jedhamee barreeffameeraatii. ¹¹ Waan, “Namni qajeelaan amantiidhaan jiraatuuf”[§] akka eenyu iyyuu fuula Waaqaa duratti seeraan qajeelaa hin taasifamne ifa. ¹² Seerri amantii irratti hin hundeeffamne; inni garuu, “Namni waan seerri ajaju godhu ittiin jiraata”^{*} jedha. ¹³ Waan, “Namni muka irratti fannifamu kam iyyuu abaaramaa dha”[†] jedhamee barreeffameef, Kiristoos nuuf jedhee abaarsa ta’uudhaan abaarsa seeraa irraa nu fure. ¹⁴ Inni akka nu amantiin Hafuura Qulqulluu waadaa kenname sana argannuuf, akka eebbi Abrahaamiif kenname sun karaa Kiristoos Yesuusiin gara Namoota Ormaa dhufuuf nu fure.

Seeraa fi Waadaa

¹⁵ Yaa obbolloota, ani akka namaattin dubbadha. Kakuun namaa iyyuu erga yeroo tokko mirkaneeffamee booddee eenyu iyyuu hin tuffatu yookaan itti hin dabaluu. ¹⁶ Egaa Abrahaamiif fi sanyii isaatiif waadaan galameera. Katabbiin Qulqulluun, akka waan nama hedduuf dubbatameetti, “Sanyiiwwan” hin jedhu; garuu akka waan nama tokkoof dubbatameetti, “Sanyii keetii”[‡] jedha; innis Kiristoos. ¹⁷ Wannii ani jedhus kana: Seerri waggaa 430 booddee dhufe sun kakuu Waaqni duraan dursee gale diigee akkasiin waadaa sana hin balleessu. ¹⁸ Dhaalli utuu karaa seeraatiin ta’ee si’achi waadaadhaan hin ta’u ture; Waaqni garuu ayyaana isaatiin waadaadhaan Abrahaamiif dhaala kenne.

¹⁹ Yoos seerri maaliif kenname ree? Seerri sababii yakka hamma Sanyiin waadaan kennameef sun dhufutti tureetiif kenname. Seerri sunis karaa ergamootaatiin harka araarsaa gidduu galeessa tokkootiin hojii irra oolfame. ²⁰ Ta’us araarsaan gidduu galeessi tokko garee tokko qofaaf hin dhaabatu; Waaqni garuu tokkichuma.

²¹ Kanaafuu seerri waadaa Waaqaatiin mormaa ree? Gonkumaa akkas miti! Utuu seerri jireenya kennuu danda’u kennamee jiraatee silaa qajeelummaan dhugumaan seeraan argama tureeti. ²² Katabbiin Qulqulluun garuu akka wannii karaa Yesuus Kiristoositti amanuutiin waadaa galame sun warra amananiif kennamuuf waan hundumaa cubbuu akka hidhamaa godhe labba.

Ilmaan Waaqaa

²³ Utuu amantiin hin dhufiniin dura hamma amantiin mul’ifamutti seera jalatti hidhamnee nutti cufamee turre. ²⁴ Kanaafuu akka nu amantiin qajeeltota taasifamnuuf Kiristoositti nu geessuuf seerri guddiftuu keenya ture. ²⁵ Amma garuu waan amantiin dhufeeffu nu si’achi guddiftuu jala hin jiraannu.

²⁶ Hundi keessan amantii Kiristoos Yesuusitti qabdaniin ijoollee Waaqaa ti; ²⁷ isin warri Kiristoositti cuuphamtan hundi Kiristoosin uffattaniiruutii. ²⁸ Yihoodii yookaan Giriik, garba yookaan birmaduu, dhiira yookaan dubartii jechuun hin jiru; hundi keessan Kiristoos Yesuusiin tokkumaatii. ²⁹ Erga kan Kiristoos taatanii yoos isin sanyii Abrahaam; akka waadaattis dhaaltota.

4

¹ Wannii ani jedhu kana; dhaaltuun yoo qabeenyi hundi kan isaa ta’ee iyyuu inni hamma daa’ima ta’ee jirutti garba irraa adda miti. ² Inni hamma guyyaan abbaan isaa murteesse sun ga’utti warra isa eeganii fi warra isa guddisan jala jira. ³ Nus akkasuma bara daa’imman turretti garbummaa sirna addunyaa jala turre. ⁴ Yommuu yeroon murteeffame sun ga’etti garuu Waaqni ilma isaa isa dubartii irraa dhalate, kan seera jalatti dhalate sana erge; ⁵ kunis akka nu mirga ilmummaa argannuuf warra seera jala jiran furuuf. ⁶ Sababii isin ilmaan taataniifis Waaqni Hafuura ilma isaa kan, “*Aabbaa*, yaa Abbaa” jedhee waamu sana gara keessa garaa keenyaatti erge. ⁷ Kanaaf ati si’achi ilma malee garba miti; erga ilma taatee immoo Waaqni dhaaltuu si taasiseera.

Phaawulos Warra Galaatiyaatiif Yaaduu Isaa

⁸ Isin utuu Waaqa hin beekiniin dura, waaqota uumama isaaniitiin waaqota hin ta’iniif garboomtanii turtan. ⁹ Amma garuu isin erga Waaqa beektanii, keessumattuu erga Waaqa biratti beekmantanii booddee akkamitti gara sirnoota dadhaboo fi sirnoota faayidaa hin qabneetti deebitu ree? Isin ammas isaaniif garboomuu barbaadduu? ¹⁰ Isin guyyoota, ji’oota, waqtiilee fi waggoota addaa kabajju! ¹¹ Ani akkasumaan isiniitti dadhabe jedheen isiniif sodaadha.

Garbummaa Seeraa Jalaa Ba'uu

¹² Yaa obboloota, akkuma ani isin fakkaadhe, isinis akka na fakkaattan isin kadhada. Isin balleessaa tokko illee natti hin hojjenne. ¹³ Yeroo jalqabaatti akka ani sababii dhukkubaatiin wangeela isinitti lallabe ni beektu; ¹⁴ yoo dhukkubni koo qoramsa isinitti ta'e iyyuu, isin akka waan ani ergamaa Waagaa ta'eetti, akka waan ani Kiristoos Yesuus matuma isaa ta'eetti na simattan malee na hin tuffanne yookaan na hin balfine. ¹⁵ Eebbi keessan sun hundi eessa jira? Utuu danda'amee ija keessan illee akka of keessaa baaftanii naa kennuun fedhii keessan ture ani dhugaa ba'uu nan danda'a. ¹⁶ Egaa ani waan dhugaa isinitti himeef diina keessan ta'ee ree?

¹⁷ Namoonni sun ofitti isin deebisuuf hinaafu; garuu waan gaariif miti. Isaan akka isin isaaniif hinaaftaniif nurraa gargar isin baasuu barbaadu. ¹⁸ Yeroo ani isin bira jiru qofa utuu hin ta'in yeroo hundumaa kaayyoo gaariif hinaaffaa qabaachuun gaarii dha. ¹⁹ Yaa ijoollee ko, ani hamma Kiristoos isin keessatti mul'atutti ammas isiniif jedhee nan ciniinsifadha; ²⁰ ani waa'ee keessaniif waan shakkii keessa jiruuf utuu isin biratti argamee sagalee koo geeddaradhee akkam hawwan ture!

Aggaarii fi Saaraa

²¹ Warri seera jala jiraachuu barbaaddan mee natti himaa; isin waan seerri jedhu hin dhageenyee? ²² "Abrahaam ilmaan lama qaba ture; tokko dubartii garbittii irraa, kaan immoo dubartii birmaduu irraa dhalate" jedhamee barreeffameeraatii. ²³ Ilmi isaa inni dubartii garbittii irraa dhalate akka fedhii fooniitti dhalate; inni dubartii birmaduu irraa dhalate immoo akka waadaatti dhalate.

²⁴ Kunis akka fakkeenyaatti fudhatamuu danda'a; dubartoonni kunneen kakuuwwan lamaan argisiisu. Kakuun tokko kan Tulluu Siinaa ti; kunis garbummaaf ijoollee hortii; isheenis Aggaar. ²⁵ Egaa Aggaar akka Tulluu Siinaa isa biyya Arabaa keessaa ti; isheenis magaalaa Yersaaleem ishee yeroo ammaatti fakkeeffamti; magaalaa kun ijoollee ishee wajjin garbummaa keessa jirtiiti. ²⁶ Yersaaleem isheen samii irraa garuu birmaduu dha; isheenis haadha keenya. ²⁷ Akkana jedhamee barreeffameeraatii:

"Yaa dubartii dhabduu

kan ijoollee tokko illee hin da'in ati gammadi;

atis kan ciniinsifattee hin beekne

guddisiitii ililchi;

ijoollee dubartii dhirsaa qabduu caalaa,

ijoolleen dubartii gamatee ni baay'atu."*

²⁸ Yaa obboloota, isinis akkuma Yisihaaq ijoollee waadaa ti. ²⁹ Yeroo sana ilmi akka fedhii fooniitti dhalate sun ilma humna Hafuuraatiin dhalate ari'ate. Amma illee akkasuma. ³⁰ Garuu Katabbiin Qulqulluun maal jedha? "Garbittii sanaa fi ilma ishee ari'i; ilmi garbittii sun ilma dubartittii birmaduu wajjin hin dhaaluutii"† jedha. ³¹ Kanaafuu yaa obboloota, nu ilmaan dubartii birmaduu sanaati malee ilmaan garbittii miti.

5

Bilisummaa Kiristoosiin Argamu

¹ Akka bilisummaan jiraannuuf Kiristoos bilisa nu baase. Kanaafuu jabaadhaa dhaabadhaa! Deebitaniis waanjoo garbummaatiin hin qabaminaa.

² Kunoo, dhagna yoo qabattan Kiristoos waan tokko akka isin hin fayyadne ani Phaawulos isinitti nan hima. ³ Namni dhagna qabatu hundinuun akka guutummaatti seera eeguun dirqama isaa ta'e ani amma illee nan mirkaneessaaf. ⁴ Isin warri seeraan qajeeltota taasifamuu barbaaddan Kiristoos irraa gargar baataniirtu; ayyaana irraas kuftaniirtu. ⁵ Nu garuu qajeelummaa abdannu sana karaa Hafuuraatiin hawwiidhaan amantiin eegganna. ⁶ Kiristoos Yesuusitti jiraannaan dhagna qabachuun yookaan qabachuu baachuun faayidaa tokko illee hin qabuutii. Wannii gatii qabu amantiin jaalalaan of mul'isu qofa.

⁷ Isin fiigicha gaarii fiigaa turtan. Eenyutu gufuu isinitti ta'ee dhugaadhaaf ajajamuu isin dhowwe ree? ⁸ Sossobbiin akkasii isa isin waame sana biraa hin dhufu. ⁹ "Raacitiin xinnoon bukoo guutuu ni bukeessa." ¹⁰ Ani akka isin yaada biraa hin qabaanne karaa Gooftaatiin isin amanadha. Abbaa fedhe illee taanaan namni isin jeequu murtii ni argata. ¹¹ Yaa obboloota, ani amma iyyuu yoon dhagna qabaa lallabaa jiraadhee ani amma iyyuu maaliifin ari'atama ree? Yoo akkas ta'ee immoo fannoon gufuu ta'uun

* 4:27 4:27 Isa 54:1 † 4:30 4:30 Uma 21:10

isaa ni hafa ture! ¹² Warri isin jeeqan sun dhagna qabachuu qofa utuu hin ta'in utuu of irraa muranii iyyuu narri hawwa!

Hafuuraan Jiraachuu

¹³ Yaa obbolloota ko, isin akka bilisa taataniif waamamtan. Jaalalaan wal tajaajilaa malee bilisummaa keessan fedhii foonii guutuuf hin oolchinaa. ¹⁴ Seerri guutuun ajaja tokkicha, "Ollaa kee akka ofii keetiitti jaalladhu"* jedhuun xumurameeraatii. ¹⁵ Garuu isin yoo wal ciniinuu fi wal nyaachuutti fuftan akka wal hin balleessineef of eeggadhaa.

¹⁶ Kanaafuu ani, "Hafuuraan jiraadhaa; yoo hawwii foonii hin guuttaniitii" jedha. ¹⁷ Foon Hafuuraan ni mormaati; Hafuurris fooniin ni morma. Isaan akka isin waan hojjechuu barbaaddan hin hojjenneef wal mormu. ¹⁸ Isin garuu Hafuuraan yoo geggeeffamtan seera jala hin jirtan.

¹⁹ Hojjiwwan fooniis beekamoo dha; isaanis halalummaa, xuraa'ummaa fi jireenya gad dhiisii, ²⁰ waaqota tolfamoo waaqeffachuu, falfala hojjechuu, jibba, aarii, hinaaffaa, dheekkamsa, ofittummaa, wal loluu, gargar ba'uu, ²¹ weennoo, machii, addaggummaa fi kanneen kana fakkaatan. Ani akkuman kanaan dura godhe sana akka warri waan akkanaa hojjetan mootummaa Waaqaa hin dhaalle isinin akeekkachiisa.

²² Iji Hafuuraan garuu jaalala, gammachuu, nagaa, obsa, arjummaa, gaarummaa, amanamummaa, ²³ garraamummaa fi of qabuu dha. Seerri waan akkanaa mormus hin jiru. ²⁴ Warri kan Kiristoos Yesuus ta'an immoo foon fedhii isaatii fi hawwii isaa wajjin fannisaniiru. ²⁵ Nu erga Hafuuraan jiraannee kottaa Hafuuraan haa deddeebinu. ²⁶ Kottaa of hin tuulluu; wal hin aarsinuu; walittis hin hinaafnuu.

6

Nama Hundumaaf Waan Gaarii Gochuu

¹ Yaa obbolloota, yoo namni tokko cubbuu keessa seene, isin warri hafuuraan jiraattan garraamummaan isa deebisuu qabdu. Garuu atis akka hin qoramneef of eeggadhu.

² Isin ba'aa walii baadhaa; akkasiin isin seera Kiristoos ni eegdu. ³ Namni tokko utuu waan tokko iyyuu hin ta'in, waan waa tokko ta'e yoo of se'e, inni of gowwoomsa. ⁴ Tokkoon tokkoon namaa hojii mataa isaa haa qoru. Ergasiis utuu nama kaanitti of hin madaalin of qofa jajuu ni danda'a; ⁵ tokkoon tokkoon namaa ba'aa ofii isaa baadhachuu qabaatii. ⁶ Namni dubbicha baratu kam iyyuu waan gaarii hundumaa barsiisaa isaa wajjin haa goodatu.

⁷ Hin gowwoominaa; Waaqaatti qoosuun hin danda'amu. Namni waanuma facaafate haammataatii. ⁸ Namni foonitti facaasu foon irraa badiisa galfata; namni Hafuuratti facaasu immoo Hafuura irraa jireenya bara baraa haammata. ⁹ Kottaa waan gaarii hojjechuu hin dadhabnu; yoo abdi kutachuu baanne gaafa yeroon isaa ga'e midhaan isaa ni haammannaatii. ¹⁰ Kanaaf kottaa, carraa qabnuun nama hundaaf, keessumattuu warra maatii amantootaa ta'aniif waan gaarii goonaa.

Uumama Haaraa Ta'uu

¹¹ Akka ani harkuma kootiin qubee gurguddaa hammam ga'uun isinii barreesse mee ilaalaa!

¹² Warri fooniin gaarii ta'anii mul'achuu barbaadan akka isin dhagna qabattan isin dirqisiisuu yaalu. Isaanis fannoo Kiristoosiif jedhanii akka hin ari'atamne qofaaf waan kana godhu. ¹³ Warri dhagna qabatan mataan isaanii iyyuu seera hin eegan; ta'us isaan dhagna qabaa keessan kan fooniitiin boonuuf jedhanii akka isin dhagna qabattan barbaadu. ¹⁴ Fannoo Gooftaa keenya Yesuus Kiristoos kan ittiin addunyaan naaf fannifame, kan anis ittiin addunyaaf fannifame sana malee waan biraatiin of jajuu narraa haa fagaatu. ¹⁵ Uumama haaraa ta'uutu faayidaa qaba malee dhagna qabachuu yookaan qabachuu baachuun faayidaa hin qabu. ¹⁶ Nagaa fi araarri warra seera kana duukaa bu'an hundaaf, Israa'el Waaqaatiifis haa ta'u.

¹⁷ Ani dhagna koo irraa godaannisa Yesuus qabaatii si'achi namni tokko iyyuu na hin rakkisin.

¹⁸ Yaa obbolloota, ayyaanni Gooftaa keenya Yesuus Kiristoos hafuura keessan wajjin haa ta'u. Ameen.

* 5:14 5:14 Lew 19:18

Efesoon

Nagaa Gaafachuu

¹ Phaawulos isa fedhii Waaqaatiin ergamaa Kiristoos Yesuus ta'e irraa,

Gara qulqulloota Efesoon jiraatan kanneen Kiristoos Yesuusitti amanamoo ta'anitti:

² Abbaa keenya Waaqaa fi Yesuus Kiristoos Gooftaa irraa ayyaannii fi nagaan isiniif haa ta'u.

Galata Sababii Eebba Kiristoosiin Argamuu

³ Waaqnii fi Abbaan Gooftaa keenya Yesuus Kiristoos inni Kiristoosiin eebba hafuura hundumaan samii irratti nu eebbise sun haa eebbifamu. ⁴ Inni nu fuula isaa duratti qulqullootaa fi warra mudaa hin qabne akka taanuuf utuu addunyaan hin uumaminiin dura isaan nu filateeraatii. Jaalalaanis ⁵ akka kaayyoo fedhii isaatti akka nu karaa Yesuus Kiristoosiin ilmaan isaa taanuuf duraan dursee nu murteesse; ⁶ kunis akka ulfinni ayyaana isaa kan inni Ilma isaa jaallatamaa sanaan toluma nuu kenne sun jajamuuf. ⁷ Nus isumaan akkuma badhaadhummaa ayyaana Waaqaatti dhiiga isaatiin furama jechuunis, dhiifama cubbuu arganneerra; ⁸ ayyaana isaas ogummaa fi hubannaa hunda wajjin nuu baay'ise. ⁹ Innis akka nu icciitii fedhii isaa kan akka yaada isaa isa gaarii inni karaa Kiristoosiin karoofate sana beeknu godhe; ¹⁰ yaadni isaas yeroo barri murtaa'e sun guutuutti wantoota samii keessaa fi lafa irra jiran hunda Kiristoos jalatti walitti qabuuf jedhee ti.

¹¹ Nus akkuma karoora isa waan hundumaa akka kaayyoo fedhii isaatti hojjetu sanaatti duraan dursee waan murteeffamneef Kiristoosiin dhaala arganneerra; ¹² kunis akka nu warri Kiristoosin abdachuutti kanneen jalqabaa taane galata ulfina isaa taanuuf. ¹³ Isinis dubbii dhugaa jechuunis wangeela fayyina keessanii dhageessanii Kiristoositti amantanii, Hafuura Qulqulluu waadaa galame sanaan chaappeffamtan; ¹⁴ innis warri kan Waaqayyoo ta'an galata ulfina isaatiif yeroo furamanitti wanta nu argachuuf jirruuf qabdi keenya.

Galateeffachuu fi Kadhachuu

¹⁵ Kanaafuu ani waa'ee amantii isin Gooftaa Yesuusitti qabdaniif fi jaalala isin qulqulloota hundaaf qabdaniif dhaga'ee ¹⁶ kadhannaa koo keessatti isin yaadachaa waa'ee keessaniif galateeffachuu hin dhiifne. ¹⁷ Waaqni Gooftaa keenya Yesuus Kiristoos, Abbaan ulfinaa, akka isin guutummaatti isa beektaniif Hafuura ogummaa fi mul'ataa akka isinii kennu nan kadhada. ¹⁸ Abdiin inni itti isin waame maal akka ta'e, badhaadhummaan dhaala qulqullootaa ulfina qabeessi maal akka ta'e akka beektaniif jijji qalbii keessanii akka isinii banamu Waaqaa nan kadhada; ¹⁹ akkasumas humni isaa inni nu warra amannu keessatti hojjetu hammam guddaa akka ta'e akka beektaniifis nan kadhada. Humni sunis akkuma jabina guddaa ²⁰ kan inni ittiin Kiristoosin warra du'an keessaa kaasee samii irratti mirga ofii teessise sana mul'isee dha; ²¹ isas ol aantummaa, taayitaa, humna, gooftummaa hundaa fi bara ammaa qofa utuu hin ta'in bara dhufuuf jiru keessa illee maqaa kennamu hundaa olitti mirga ofii teessise. ²² Waaqnis waan hunda miilla isaa jala galche; waldaa kiristaanaatiifis mataa waan hundaa godhee isa kenne; ²³ waldaan kiristaanaa dhagna isaa ti; isheenis guutama isaa kan inni waan hunda karaa hundaan guutuu dha.

2

Kiristoosiin Jireenya Argachuu

¹ Isin irra daddarbaa keessanii fi cubbuu keessaniin duutanii turtan; ² kunis isuma isin yeroo jireenya addunyaa kanaatii fi bulchaa mootummaa qilleensaa jechuunis hafuura amma iyyuu warra hin ajajanne keessatti hojjetu duukaa buutanitti keessa jiraachaa turtanii dha. ³ Hundi keenyas yeroo tokko dharraa foon keenyaa guutaa, hawwii fi yaada isaa duukaa bu'aa isaan gidduu jiraanne. Uumama keenyaanis akkuma warra kaanii dheekkamsa jala turre. ⁴ Garuu Waaqni araaraan guutame sun sababii jaalala guddaa nuu qabuuf, ⁵ yeroo nu irra daddarbaa keenyaan duunee turretti illee Kiristoos wajjin jiraattota nu taasise; isinis ayyaanaan fayyina argattan. ⁶ Waaqnis Kiristoos wajjin du'aa nu kaase; karaa Kiristoos Yesuusii isaa wajjin iddoo samii irra nu teessise;

⁷ Innis bara dhufuuf jiru keessa badhaadhummaa ayyaana isaa kan gita hin qabne sana arjummaa karaa Kiristoos Yesuusiin nuuf qabu argisiisuuf jedhee waan kana godhe. ⁸ Isinis ayyaanaan karaa amantiitiin fayyitaniirtuutii; kunis kennaa Waaqaati malee hojii ofii keessanii miti; ⁹ akka namni tokko iyyuu of hin jajneefis kun hojiidhaan miti. ¹⁰ Nu hojii harka isaatii; hojii gaarii Waaqni duraan dursee akka nu hojjennuuf qopheesse sana akka hojjennuufis karaa Kiristoos Yesuusiin uumamne.

Kiristoosiin Tokko Ta'uu

¹¹ Kanaaf isin warri durumaa dhalootaan Namoota Ormaa taatan akka warra dhagna qabaa harka namaatiin dhagna namaa irratti hojjetamuun, “Nu warra dhagna qabatee dha” ofiin jedhan biratti “Warra dhagna hin qabatin” jedhamtanii waamamtan sana yaadadhaa; ¹² isin akka yeroo sana Kiristoos irraa cittanii, lammummaa Israa’el keessaa baafamtanii, kakuu waadaatiifis keessumoota taatanii, abdi malee, Waaqa malees addunyaa keessa turtan yaadadhaa. ¹³ Amma garuu isin warri yeroo tokko fagoo turtan Kiristoos Yesuusiin dhiiga Kiristoosiin dhi’effamtaniirtu.

¹⁴ Kiristoos nagaa keenyaatii; innis dallaa diinummaa kan gargar baasu sana diigee jara lamaanuu tokko godheera; ¹⁵ inni foon ofiitiin seera ajajaa fi sirna isaa wajjin diigeera. Kaayyoon isaas jara lamaan keessaa ofuma isaatiin nama haaraa tokko uumee akkasiin nagaa buusuudhaan ¹⁶ fannoo ittiin diinummaa isaanii ajjeese sanaan lamaan isaanii iyyuu dhagna tokko godhee Waaqatti araarse. ¹⁷ Innis dhufee isin warra fagoo turtanitti nagaa, warra dhi’oo turanittis nagaa lallabe. ¹⁸ Nu lamaanuu karaa isaatiin Hafuura tokkicha sanaan akka itti Abbaa bira geenyu qabnaatii.

¹⁹ Kanaafuu isin si’achi saba Waaqaa wajjin lammii fi miseensota warra mana Waaqaa jiraataniiti malee ormaa fi alagoota miti; ²⁰ isin hundee ergamootaa fi raajotaa irratti ijaaramtaniirtu; Kiristoos Yesuus ofii isaatii mataa dhagaa golee ti. ²¹ Karaa isaas ijaarsi sun guutuun tokkummaan wal qabatee mana qulqullummaa qulqulluu ta’uuf Gooftaadhaan guddata. ²² Isinis isumaan mana Waaqni Hafuura isaatiin keessa jiraatu taatanii tokkummaadhaan ijaaramaa jirtu.

3

Karoora Gaarii Waaqni Namoota Ormaatiif Qabu

¹ Sababii kanaaf ani Phaawulos isin Namoota Ormaatiif jedhee hidhamaa Kiristoos Yesuus ta’eera.

² Isin dhugumaan waa’ee hojii ayyaana Waaqaa kan isiniif jedhamee natti kenname sanaa dhageessaniirtu; ³ kunis akkuma ani kanaan dura gabaabsee isinii barressetti icciitii mul’ataatiin natti beeksifame. ⁴ Isin yommuu waan kana dubbifanitti akka ani waa’ee icciitii Kiristoos beekumsa qabu hubachuu ni dandeessu; ⁵ icciitiin kunis akka amma Hafuuraan ergamootaa fi raajota qulqulloota Waaqaati mul’ifametti dhaloota kaanitti hin beeksifamne. ⁶ Iccitiin kunis Namoonni Ormaa karaa wangeelaatiin saba Israa’el wajjin dhaaltota, isaanuma wajjin dhagna tokko, waadaa Kiristoos Yesuusiin kenname keessatti immoo hirmaattota ta’uu isaanii ti.

⁷ Anis kennaa ayyaana Waaqaa kan karaa hojii humna isaatiin naa kennameen tajaajilaa wangeela kanaa ta’eera. ⁸ Ani qulqulloota hundaa gad ta’u iyyuu akka badhaadhummaa Kiristoos kan qoramee bira hin ga’amne sana Namoota Ormaati lallabuuf ayyaanni kun naa kennameera; ⁹ akkasumas icciitiin bara dheeraaf Waaqa waan hunda uumeen dhokfamee ture kun maal akka ta’e ani namoota hundaaf akka ibsuuf. ¹⁰ Kaayyoon isaas akka ogummaan Waaqaa inni dachaa hedduu qabu sun amma karaa waldaa kiristaanaatiin bulchitootaa fi abbootii taayitaa kanneen samii irra jiranitti beeksifamuuf; ¹¹ kunis akkuma kaayyoo isaa kan bara baraa kan inni karaa Gooftaa keenya Yesuus Kiristoosiin raawwate sanaatti ture. ¹² Nus isaan, amantii isa irratti qabnuun, ija jabinnaa fi amanachuudhaan Waaqatti dhi’aachuu dandeenya. ¹³ Kanaafuu sababii ani isiniif dhiphachaa jiruuf jettanii akka abdi hin kutanne isin kadhada; dhiphachuun koo ulfinuma keessan.

Kadhannaa Warra Efesooniif Kadhatame

¹⁴ Sababii kanaaf ani fuula Abbaa duratti nan jilbeenfadha; ¹⁵ maatiin isaa warri samii irraa fi warri lafa irraa hundinuu maqaa isaanii isa irraa argatu. ¹⁶ Inni akkuma badhaadhummaa ulfina isaatti karaa Hafuura isaatiin namummaa keessan kan keessaa humnaan akka cimsuuf nan kadhada; ¹⁷ akka Kiristoosis karaa amantiitiin garaa keessan keessa jiraatuuf nan kadhada. Akka isin hidda gad fageeffatanii jaalalaan dhaabattaniifis nan kadhada; ¹⁸ isinis jaalalli Kiristoos hammam akka bal’atu, hammam akka dheeratu, hammam akka ol fagaatuu fi hammam akka gad fagaatu

qulqulloota hunda wajjin hubachuudhaaf akka humna qabaattaniif, ¹⁹ akka guutama Waaqaa hundaan guutamtaniifis jaalala Kiristoos kan beekumsaa ol ta'e sana akka beektaniif nan kadhada.

²⁰ Waaqa isa humna isaa kan nu keessatti hojjetu sanaan hamma nu kadhannu yookaan hamma nu yaadnu hundumaa oliitti akka malee hojjechuu danda'u sanaaf, ²¹ waldaa kiristaanaa keessatti, dhaloota hunda keessattis karaa Kiristoos Yesuusiin bara baraa hamma bara baraatti ulfinni isaaf haa ta'u! Ameen.

4

Dhagna Kiristoos Keessatti Tokko Ta'uu

¹ Kanaafuu ani kan Gooftaaf jedhee hidhame, isin waamicha itti waamantan sanaaf akka malutti akka jiraattan isin nan kadhada. ² Guutumaan guutuutti gad of qabaa; garraamota ta'aa; obsa qabaadhaa; jaalalaanis wal danda'aa. ³ Hidhaa nagaatiin tokkummaa Hafuura eeguuf carraaqaa. ⁴ Akkuma yeroo waamamtanitti gara abdi tokkootti waamantan sana, dhagna tokkoo fi Hafuura tokkotu jira; ⁵ Gooftaa tokko, amantii tokkoo fi cuuphaa tokkotu jira; ⁶ Waaqaa fi Abbaan waan hundaa, inni waan hundaa ol ta'e, kan waan hunda keessatti hojjetuu fi kan waan hunda keessa jiru tokkichatu jira.

⁷ Garuu akkuma safara kenna Kiristoositti tokkoo tokkoo keenyaaf ayyaanni kennameera. ⁸ Kanaafuu,

“Inni yommuu ol gubbaa ba’etti,
boojuu booji’e;

namootaafis kenna kenne”* jedha.

⁹ Egaa, “Inni ol ba’e” jechuun isaa dhidhima lafaatti gad bu’e jechuu malee maal jechuu isaa ti? ¹⁰ Inni gad bu’e sun isuma waan hunda guutuuf jedhee samiiwwan hundaa oliitti ol ba’ee dha. ¹¹ Innis namoota tokko tokko ergamoota, kaan raajota, kaan lallabdoota wangeelaa, kaan immoo tiksootaa fi barsiistota taasisse kenne; ¹² waan kanas akka dhagni Kiristoos ijaaramuuf qulqulloota hojii tajaajilaatiif qopheessuuf jedhee godhe; ¹³ kunis waan hamma hundi keenya tokkummaa amantiitti fi tokkummaa Ilma Waaqaa beekuu bira geenyutti, akka guddannee sadarkaa guutama Kiristoos bira ga’uudhaan namoota bilchaatoo taanuuf.

¹⁴ Egaa nu si’achi duraa duubatti dadarbatamaa bubbee barsiisa gosa hundaatiin, haxxummaa fi jal’ina marii gowwoomsitootaatiin asii fi achi oofamaa daa’imman hin taanu. ¹⁵ Qooda kanaa jaalalaan dhugaa dubbachaa gara isa mataa ta’e sanaatti waan hundaan ni guddanna; innis Kiristoos. ¹⁶ Isumaanis kutaaleen dhagna guutuun ribuu walitti isaan qabuun hidhamaniiru; yommuu kutaaleen dhagna sun hundi hojii isaanii hojjetanittis dhagni sun jaalalaan guddatee of ijaara.

Akka Ijoollee Ifaatti Jiraachuu

¹⁷ Kanaafuu ani waan kana isinitti nan hima; maqaa Gooftaatiinis jabeessee isinitti nan dubbadha; isin si’achi akka Namoonni Ormaa warri yaadni isaanii faayidaa hin qabne sun jiraatanitti hin jiraatinaa. ¹⁸ Sababii mata jabina isaaniitiinis waan wallaalummaan isaan keessa jiruuf hubannaan isaanii dukkaneeffameera; jireenya Waaqaa keessaas ba’aniiru. ¹⁹ Isaanis waan qalbiin isaanii hadoodeef hamma xuraa’ummaa gosa hundaa keessa galanitti sassattummaan guutaman.

²⁰ Isin garuu akkasitti Kiristoosin hin barre; ²¹ isin dhugumaan akkuma dhugaa Yesuus keessa jiru sanaatti waa’ee Kiristoos dhageessanii isumaanis barsiifamantiirtu. ²² Haala jireenya keessan kan durii, eenyummaa keessan moofaa hawwii gowwoomsaa isaatiin xuraa’ee sana dhabamsiisaa; ²³ hafuura yaada keessaniitiinis haaromfamaa; ²⁴ namummaa haaraa isa qajeelummaa fi qulqullina dhugaatiin fakkeenya Waaqaatiin uumame sana uffadhaa.

²⁵ Kanaafuu waan nu hundi miseensa walii taaneef tokkoon tokkoon keessan soba of keessaa baastanii ollaa keessanitti dhugaa dubbachuu qabdu. ²⁶ “Aaraa malee cubbuu hin hojjetinaa;”† utuma aartanii jirtaniis aduu hin lixin; ²⁷ diyaabiloosiifis carraa hin kenninaa. ²⁸ Namni kanaan dura hataa ture si’achi hin hatin; qooda kanaa akka warra rakkatan gargaaruu danda’uuf harkuma offi isaatiin waan faayidaa qabu haa hojjetu.

²⁹ Waan nama ijaaruuf gargaaru, akkuma barbaachisaa ta’ettis waan warra dhaggeffataniif ayyaana kennu malee dubbiin hamaan tokko iyyuu afaan keessanii hin ba’in. ³⁰ Hafuura Qulqulluu Waaqaa kan guyyaa furamaatiif ittiin chaappeffamtan sana hin gaddisiisinaa. ³¹ Hadhaa’ummaan, dheekkamsii fi aariin, wacnii fi maqaa nama

* 4:8 4:8 Far 68:18 † 4:26 4:26 Far 4:4

balleessuun hundinuu hammina hundumaa wajjin isin irraa haa fagaatu. ³² Akkuma Waaqni karaa Kiristoosiin dhiifama isinii godhe sana, isinis dhiifama walii godhaa; walii na'aa; garaas walii laafaa.

5

¹ Kanaaf akkuma ijoollee jaallatamooti fakkeenya Waaqaa duukaa bu'aa; ² akkuma Kiristoos nu jaallatee nuufis jedhee akka aarsaa fi qalma urgaa'uutti Waaqaaf of kenne sana isinis jaalalaan deddeebi'aa.

³ Garuu waa'een halalummaa yookaan xuraa'ummaa gosa kamii iyyuu yookaan waa'een doqnummaa gidduu keessanitti hin dhaga'amin; wanni akkasii qulqulloota Waaqaa biratti hin barbaachisuutti. ⁴ Galateeffachuu malee haasaan qaani yookaan dubbiin gowwummaa kan faayidaa hin qabne yookaan qoosaan namatti hin tole isin gidduu hin jiraatin. ⁵ Halaleen yookaan xuraa'aan yookaan sassattuun jechuunis kan Waaqa tolfamaa waageffatu mootummaa Kiristoosii fi kan Waaqaa keessaa akka dhaala tokko illee hin qabne beekaa. ⁶ Namni tokko iyyuu dubbii faayidaa hin qabneen isin hin gowwoomsin; sababii waan akkanaatiif dheekkamsi Waaqaa warra hin ajajamnetti ni dhufaatii. ⁷ Kanaafuu isin waan isaan hojjetan keessatti hin hirmaatinaa.

⁸ Isin dur dukkana turtaaniiti; amma garuu Gooftaadhaan ifa taataniirtu. Akka ijoollee ifaatti jiraadhaa; ⁹ iji ifaa gaarummaa, qajeelummaa fi dhugaa hunda keessatti argamaatii; ¹⁰ waan Gooftaa gammachiisu qoradhaa bira ga'aa. ¹¹ Hojji dukkanaa kan ija hin qabne saaxilaa malee irratti hin hirmaatinaa. ¹² Waan isaan icciitiin hojjetan dubbachuun iyyuu qaaniidhaatii. ¹³ Wanni ifni sun saaxilu hundinuu garuu ni mul'ata; ¹⁴ kanaafis,

“Ati yaa isa raftu, dammaqi;
warra du'an keessaas ka'i;
Kiristoos siif ibsaatii” jedhameera.

¹⁵ Egaa isin akkamitti akka jiraattan jabeessaa of eeggadhaa! Akka ogeeyyiitti jiraadhaa malee akka warra ogeeyyii hin ta'iniitti hin jiraatinaa; ¹⁶ waan guyyoonni kunneen hamoo ta'aniif baricha furaa. ¹⁷ Kanaafuu fedhiin Gooftaa maal akka ta'e hubadhaa malee gowwaa hin ta'inaa. ¹⁸ Daadhii wayiniitiin hin machaa'inaa; kun jireenya gad dhiisiitti geessaatii. Qooda kanaa Hafuuraan guutamaa; ¹⁹ faarfannaadhaan, weedduu galataatii fi faarfannaa Hafuuraatiin wal jalaa qabaa. Garaa keessan keessatti Gooftaaf faarfadhaatii muuziiqaa dhageessisaa; ²⁰ yeroo hundas waan hundaaf maqaa Gooftaa keenya Yesuus Kiristoosiin Waaqa Abbaa galateeffadhaa.

Qajeelfama Maatiin Kiristaanaa Ittiin Jiraatu

5:22-6:9 kwf – Qol 3:18-4:1

²¹ Sodaa Kiristoosiif qabdaniin waliif ajajamaa.

²² Yaa niitota, akkuma Gooftaaf ajajamtanitti dhirsoota keessaniif ajajamaa. ²³ Akkuma Kiristoos waldaa kiristaanaatiif mataa ta'e sana dhirsi niitiif mataadhaatii; Kiristoos Fayyisaa waldaa kiristaanaa ti; waldaan kiristaanaa immoo dhagna isaa ti. ²⁴ Egaa akkuma waldaan kiristaanaa Kiristoosiif ajajamtu, niitonnis waan hundaan dhirsoota isaaniitiif haa ajajaman.

²⁵ Yaa dhirsoota, akkuma Kiristoos waldaa kiristaanaa jaallatee isheef of kenne sana isinis niitota keessan jaalladhaa; ²⁶ innis karaa dubbii isaatiin bishaaniin ishee dhiqee qulleessee akka isheen qulqulluu taatuuf, ²⁷ waldaa kiristaanaa ulfina qabeettii, mudaa yookaan suntuura yookaan waan akkanaa tokko illee hin qabnee garuu qulqullooftuu mudaa hin qabne godhee ofitti ishee dhi'eessuuf waan kana godhe. ²⁸ Akkasuma immoo dhirsoonni niitota isaanii akkuma dhagna ofii isaaniitti jaallachuu qabu. Namni niitii ofii jaallatu of jaallata. ²⁹ Akkuma Kiristoos waldaa kiristaanaatiif godhuu sana namni kam iyyuu foon ofii ni soora; ni kunuunsas malee foon ofii hin jibbu; ³⁰ nu kutaalee dhagna isaatii. ³¹ “Sababii kanaaf namni abbaa fi haadha isaa dhiisee niitii isaatti ni maxxana; lamaan isaanii iyyuu foon tokko ni ta'uu.”* ³² Kun icciitii guddaa dha; ani garuu waa'ee Kiristoosii fi waa'ee waldaa kiristaanaa dubbadha. ³³ Ta'us isin keessaa tokkoon tokkoon namaa akkuma of jaallattutti niitii ofii haa jaallatu; niitiinis dhirsa ofii haa kabajju.

6

Ijoollee fi Warra Isaanii

* 5:31 5:31 Uma 2:24

¹ Yaa ijoolle, Gooftaaf jedhaatii abbootii fi haadhota keessaniif ajajamaa; kun qajeelaadhaatii. ² Ajajni jalqabaa kan waadaa qabu, “Abbaa keetii fi haadha keetiif ulfina kenni” jedha; ³ kunis, “Akka sitti toluu fi akka lafa irra bara dheeraa jiraattuuf.”*

⁴ Yaa abbootii, isinis ijoollee keessan barsiisaa fi gorsa Gooftaatiin guddisaa malee hin aarsinaa.

Garbootaa fi Gooftota

⁵ Yaa garboota, akkuma Kiristoosiif ajajamtanitti kabajaa fi sodaadhaan, garaa qulqulluunis gooftota keessan warra addunyaa kanaatiif ajajamaa. ⁶ Yeroo iji isaaniis isin argutti isaan biratti fudhatama argachuu qofaaf utuu hin ta’in garaa guutuun fedhii Waaqaa raawwachaa akka garboota Kiristoositti isaaniif ajajamaa. ⁷ Akka waan nama tajaajiltaniitti utuu hin ta’in akka waan Gooftaa tajaajiltaniitti garaa guutuun hojjedhaa; ⁸ sababiin isaas isin akka Gooftaan tokkoo tokkoo namaatiif garbas ta’u yookaan birmaduu, waan gaarii inni hojjetu kamiif iyyuu gatii kennu ni beektu.

⁹ Yaa gooftota, isinis garboota keessaniif akkasuma godhaa. Isin akka inni isaaniis fi isiniif Gooftaa ta’e sun samii irra jiruu fi akka nama wal caalchisuunis isa bira hin jirre waan beektaniif isaan hin doorsisinaa.

Mi’a Lolaa Kan Waaqaa

¹⁰ Kanaa achi Gooftaa fi humna isaa jabaa sanaan cimaa. ¹¹ Haxxummaa di-yaabiloosiin akka mormuu dandeessaniif mi’a lolaa kan Waaqaa guutuu hidhadhaa. ¹² Wal’aansoon keenya bulchitoota wajjin, abbootii taayitaa wajjin, humnoota addunyaa dukkanaa kanaa fi humnoota hafuura hamaa iddoo samii keessa jiruu wajjin malee foonii fi dhiiga wajjin mitii. ¹³ Kanaafuu akka yommuu guyyaan hamaan sun dhufutti obsaan dhaabachuu dandeessaniif, waan kana hunda gochuunis akka jabaatanii dhaabattaniif mi’a lolaa kan Waaqaa guutuu hidhadhaa. ¹⁴ Egaa mudhii keessan dhugaan hidhadhaatii, qomee sibiilaa kan qajeelummaas uffadhaatii jabaadhaa dhaabadhaa; ¹⁵ qophaa’ummaa wangeela nagaan akka kopheetti miilla keessanitti kaa’adhaa dhaabadhaa. ¹⁶ Kana hundumaa irrattis gaachana amantii kan xiyya boba’aa hamaa sanaa hunda ittiin dhaamsuu dandeessan qabadhaa. ¹⁷ Qoobii sibiilaa kan fayyinaa kaa’adhaa; goraadee Hafuuraas qabadhaa; innis dubbii Waaqaa ti.

¹⁸ Kadhannaa fi waammata gosa hundaa keessatti yeroo hunda Hafuuraan kadhadaa. Kanas yaadatti qabachaa yeroo hunda dammaqaatii qulqulloota hundaaf jabaadhaa kadhadaa. ¹⁹ Yommuun afaan saaqqadhu hunda ija jabinaan icciitii wangeelaa akkan beeksisuuf dubbiin akka naa kennamu anaafis kadhadaa; ²⁰ wangeelli kunis isuma ani isaaf jedhee ergamaa ta’ee foncaan hidhamee dha. Isinis akka ani akkuma narraa eegamutti sodaa malee isa lallabuu danda’uuf naa kadhadaa.

Dhaamsa Nagaa Xumuraa

²¹ Xikiqoos obboleessi jaallatamaan, Gooftaattis tajaajilaan amanamaan haala ani keessa jiruu fi maal akka ani hojjechaa jiru akka beektaniif waan hundumaa isinitti hima. ²² Anis akka isin haala nu keessa jirru beektanii fi akka inni isin jajjabeessuuf, waanuma kanaaf jedhee ani gara keessanitti isa ergeera.

²³ Waaqa Abbaa fi Yesuus Kiristoos Gooftaa irraa nagaan, jaallallis amantii wajjin obboloota hundaaf haa ta’u.

²⁴ Warra jaalala hin badneen Gooftaa keenya Yesuus Kiristoosin jaallatan hundaaf ayyaanni haa ta’u.

* 6:3 6:3 KeD 5:16

Fiiliphisiyuus

Nagaa Gaafachuu

¹ Phaawulosii fi Xiimotewos tajaajiltoota Kiristoos Yesuus irraa,

Gara warra karaa Kiristoos Yesuusiin qulqulloota ta'an kanneen Phaaphaasotaa fi daaqqonoota wajjin Fiiliphisiyuus keessa jiraatan hundaatti:

² Abbaa keenya Waaqaa fi Yesuus Kiristoos Gooftaa biraa ayyaannii fi nagaan isiniif haa ta'u.

Galataa Fi Kadhannaa

³ Ani yeroo isin yaadadhu hunda Waaqa koo nan galateeffadha. ⁴ Ani kadhannaa hunda keessaniif kadhadhu keessatti yeroo hunda gammachuun nan kadhadha; ⁵ isin guyyaa jalqabaatii hamma ammaatti wangeela lallabuu keessatti hirmaattaniirtuuti; ⁶ inni hojii gaarii isin keessatti jalqabe sun hamma guyyaa Kiristoos Yesuusitti akka raawwatu nan amana.

⁷ Waan isin garaa koo keessa jirtaniif ani waa'ee hunda keessanii akkanatti yaaduun koo anaaf sirrii dha; hidhamuu koo keessattis ta'u yookaan wangeelaaf falmuu kootii fi akka wangeelli cimee dhaabatu gochuu koo keessatti hundi keessan na wajjin ayyaana Waaqaa keessatti hirmaatuuti. ⁸ Akka ani jaalala Kiristoos Yesuusiin hammam hunda keessan yaadu Waaqayyo dhuga baatu koo ti.

⁹ Kadhannaan koo kanaa dha: kunis akka jaalalli keessan beekumsaa fi hubannaa hundaan ittuma fufee baay'atu, ¹⁰ akka isin isa waan hundumaa caalu addaan baaftanii beekuu dandeesanii fi akka isin hamma guyyaa Kiristoositti qulqullootaa fi warra mudaa hin qabne taataniif, ¹¹ akka ulfinaa fi galata Waaqaatiifis iji qajeelinaa kan karaa Yesuus Kiristoosiin argamuun guutamaniif.

Hidhamuun Phaawulos Wangeela Babal'ise

¹² Yaa obboloota, wanti narra ga'e kun dhugumaan wangeela babal'isuuf gargaaruu isaa akka beektan nan barbaada. ¹³ Kanaanis Kiristoosiif jedhee hidhamuun koo guutummaa masaraatii fi namoota kaan hunda biratti beekameera. ¹⁴ Sababii ani hidhameefis obboloota keessaa garri caalaan Gooftaa amanatanii, dubbii Waaqaa sodaa malee dubbachuuf ija jabina guddaa argataniiru.

¹⁵ Namoonni tokko tokko dhugumaan weennoo fi morkiidhaan Kiristoosin lallabu; warri kaan garuu yaada gaariidhaan lallabu. ¹⁶ Warri yaada gaariidhaan lallaban kunneen, akka ani wangeelaaf falmuuf jedhee as kaa'ame beekanii jaalalaan lallabu. ¹⁷ Warri weennoo fi morkiidhaan lallaban immoo utuu garaa qulqulluun hin ta'in, mana hidhaa keessatti rakkina natti cimsuuf jedhanii fedhii ofittummaatiin Kiristoosin lallabu. ¹⁸ Yoos wanni kun maal qaba ree? Wanni barbaachisaan fakkeessuunis ta'u yookaan dhugaan karaa kam iyyuu Kiristoos lallabamuu isaa ti. Sababii kanaaf ani akka malee nan gammada.

Eeyyee ani ittuma fufee nan gammada; ¹⁹ akka wanni narra ga'e kun karaa kadhannaa keessaniitii fi karaa gargaarsa Hafuura Yesuus Kiristoosiin gara furamaatti naa geeddaramu nan beekaatii. ²⁰ Ani akkuma yeroo kaanii ammas jireenyaanis ta'u yookaan du'aan ija jabinaan dubbachuun koo akka Kiristoos dhagna koo keessatti ulfina argatuuf malee karaa kamiin iyyuu akka hin qaanooneef baay'isee nan hawwa; nan abdadhas. ²¹ Anaaf jiraachuun Kiristoos; du'uunis bu'aa dha. ²² Ani yoo fooniin jiraadhe kun anaaf hojii bu'a qabeessa; garuu maalan filadha? Ani hin beeku! ²³ Ani yaada kana lamaan gidduutti rarra'eera; ani deemee Kiristoos wajjin jiraachuu nan hawwa; kun waan hunda caalaatii; ²⁴ isiniif garuu fooniin turuun koo caalaa barbaachisaa dha. ²⁵ Anis kana amanadhee akka isin amantiin guddattanii fi akka isin gammaddaniif hunda keessan bira akka turu, isin wajjinis akka jiraadhuun beeka. ²⁶ Kunis ani ammas isin biratti argamuu kootiin of jajuun isin Kiristoos Yesuusitti qabdan sababii kootiin akka baay'atuuf.

Jireenya Wangeelaaf Malu Jiraachuu

²⁷ Waan fedhe iyyuu ta'u akka wangeela Kiristoosiif malutti jiraadhaa. Yoos ani dhufee isin arguunis ta'u yookaan fagoo taa'ee waa'ee keessan dhaga'uu qofaan, akka isin amantii wangeelaatiif jettanii akkuma nama tokkootti tattaaffachuun hafuura tokkoon

jabaattanii dhaabattan nan beeka. ²⁸ Isin waanuma tokkoon illee mormitoota keessanii hin raafaminaa. Kun isaaniif mallattoo badiisaa ti; isiniif immoo mallattoo fayyinaa ti; kunis hojii Waaqaa ti. ²⁹ Isin akka Kiristoositti amantan qofa utuu hin ta'in akka isaaf jettanii dhiphattaniifis kun isaaf jechaa isinii kennameeraatii; ³⁰ kunis wal'aansoo ani keessa ture isa argitan sanaa fi isa ani amma iyyuu keessa jiru kan dhageessan kana keessa darbuutti waan jirtaniifi dha.

2

Gad Of qabuu Kiristoos Duukaa Bu'uu

¹ Kanaafuu gorsa Kiristoosin qabdan kam iyyuu taanaan, jaalalaan wal jajjabeessuu kam iyyuu taanaan, tokkummaa Hafuuraa kam iyyuu taanaan, araaraa fi gara laafina kam iyyuu taanaan, ² gammachuu koo naa guutaa; yaadaan tokko ta'aa; jaalala tokko qabaadhaa; hafuuraa fi kaayyoon tokko ta'aa. ³ Isin gad of qabuudhaan akka waan warri kaan isin caalaniitti ilaalaa malee fedhii ofittummaatiin yookaan of tuulummaatiin waanuma tokko illee hin hojjetinaa. ⁴ Tokkoon tokkoon keessan waan warra kaaniifis ta'u malee waan isin qofaaf ta'u hin ilaalinaa.

⁵ Yaadni Kiristoos Yesuus keessa ture sun, isin keessas haa jiraatu.

⁶ Inni utuma bifa Waaqaatiin jiruu,

wal qixxummaa Waaqa wajjin qabu

akka waan irraa fudhatameetti hin lakkoofne;

⁷ qooda kanaa inni bifa garbaa uffatee

fakkaattii namaa fudhachuudhaan duwwaa of godhe.

⁸ Bifa namaa uffatee argamuudhaanis,

gad of deebise;

du'aaf jechuunis du'a fannoo irraatiif iyyuu ni ajajame!

⁹ Kanaafuu Waaqni akka malee ol isa qabe;

maqaa maqaa hunda caalus isaaf kenne.

¹⁰ Kunis akka jilbi hundinuu samii fi lafa irratti,

lafa jalattis, maqaa Yesuusiif jilbeenfatuuf.

¹¹ Akka arrabni hundinuu

ulfina Waaqa Abbaatiif jedhee

Yesuus Kiristoos Gooftaa ta'uu isaa dhugaa ba'uuf.

Waan Hunda Guungummii Malee Hojjechuu

¹² Kanaafuu yaa jaallatamoo, akkuma yeroo hunda ajajamtan sana, yeroo ani isin bira jiru qofa utuu hin ta'in amma yeroo ani isin bira hin jirretti caalchisaatii sodaa fi hollannaan fayyina keessan fiixaan baasuuf itti fufaa; ¹³ akkuma kaayyoo isaa gaarii sanaatti fedhuu fi hojjechuu isin keessatti kan raawwatu Waaqaatii.

¹⁴ Waan hunda guungummii fi falmii malee hojjedhaa; ¹⁵ kunis akka isin dhaloota micciiramaa fi jal'aa kana gidduutti akkuma ifaa addunyaa keessatti ibsitaniif, akka warra mudaa hin qabnee fi qulqullaa'oo, ijoollee Waaqaa warra yakka hin qabnes taataniif, ¹⁶ yoo isin dubbii jireenyaa jabeessitanii qabattan ani akkasumaan akka hin fiigin yookaan akkasumaan akka hin dadhabin guyyaa Kiristoositti of jajuu nan danda'a. ¹⁷ Ani utuu aarsaa fi tajaajila amantii keessanii irratti akka dhibaayyuu-utti dhangalaafamee iyyuu nan gammada; hunda keessan wajjinis nan gammada.

¹⁸ Kanaafuu isinis na wajjin gammaduu fi ililchuu qabdu.

Xiimotewosii fi Afrodiixuu

¹⁹ Ani oduu waa'ee keessanii dhaga'ee gammaduuf, akka ani dafee Xiimotewosin gara keessanitti erguu danda'u Gooftaa Yesuusin nan abdadha. ²⁰ Ani nama biraa kan akka isaa waa'ee keessan garaa qulqulluun yaadu tokko illee hin qabu. ²¹ Sababiin isaa warri kaan hundi utuu fedhii Yesuus Kiristoosiif hin ta'in fedhii mataa isaaniitiif yaaduutii. ²² Xiimotewos garuu akkuma ilmi abbaa isaa tajaajilutti hojii wangeelaa keessatti na wajjin tajaajiluu isaa akka of mirkaneesse isinuu beektu. ²³ Kanaaf ani akkuma haala koo hubadheen isa erguuf nan abdadha. ²⁴ Ani mataan koo iyyuu dafee dhufuuf Gooftaa nan amanadha.

²⁵ Ani garuu obboleessa koo Ephafroodiixuu hojjetaa hidhata koo ta'ee fi loltuu hidhata koo ta'e, ergamaa keessan kan isin akka inni waan na barbaachisuun na tajaajiluuf ergitan sana deebisee gara keessan erguun barbaachisaa natti fakkaata. ²⁶ Inni hunda keessan yaadaatii; isin akka inni dhukkubsatee ture waan dhageessaniifis dhiphachaa jira. ²⁷ Inni dhugumaan dhukkubsatee du'uu ga'ee ture. Waaqni garuu

isa maareera; utuu isa qofa hin ta'in akka gaddi gadda irratti natti hin dabalanneef anas baraareera. ²⁸ Kanaafuu isin akka yommuu lammata isa argitanitti gammaddanii fi akka yaaddoon koos naa salphatuuf dafee gara keessanitti isa erguu guddaa nan hawwa. ²⁹ Isinis Gooftaadhaan gammachuu guddaan isa simadhaa; namoota akkasiis kabajaa; ³⁰ inni gargaarsa isin naa kennuu hin danda'in naa kennuuf, jireenya isaa illee dabarsee kennuun, hojii Kiristoosiif jedhee du'uu iyyuu ga'ee tureetii.

3

Foon Amanachuu Dhiisuu

¹ Dhuma irrattis yaa obbolloota ko, Gooftaatti gammadaa! Ani waanuma kanaan duraa irra deebi'ee isinii barreessuun na hin dhibu; kun isiniif eegumsa. ² Saroota irraa of eeggadhaa; namoota hammina hojjetan irraa of eeggadhaa; dhagna qabaa sobaa irraas of eeggadhaa. ³ Sababiin isaa nu warri Hafuura Waaqaatiin waaqeffannu, warri Kiristoos Yesuusiin of jajnuu fi warri foon hin amananne dhagna qabanneerraatii; ⁴ ta'us ani mataan koo amanachuu akkanaatiif sababii qaba.

Namni biraa kam iyyuu foon amanachuuf waan sababii qabu yoo of se'e, ani immoo isa caalaa qaba: ⁵ Ani dhaladhee guyyaa saddeettafaattin dhagna qabadhe; sanyii Israa'el keessaas gosa Beniyaam irraa dhaladhe; warra Ibrootaa keessaas Ibricha tokkoo dha; akka seeraattis ani Fariisota keessaa tokko dha; ⁶ waa'ee hinaaffaa, ani waldaa kiristaanaa ari'achaan ture; waa'ee qajeelummaa seera eeguun argamuus ani mudaa hin qabu ture.

⁷ Garuu waan na fayyadaa ture amma Kiristoosiif jedhee akka waan gatii hin qabneetti nan ilaala. ⁸ Dhugumaanuu sababii Gooftaa koo Kiristoos Yesuus isa waan hundumaa caalu sana beekuutiif ani waan hundumaa akka waan gatii hin qabneetti nan ilaala. Ani isaaf jedhee waan hundumaa dhabeera; Kiristoosin argachuufis waan hundumaa akka kosiitti nan ilaala; ⁹ kunis qajeelummaa mataa koo kan seera eeguun argamu utuu hin ta'in qajeelummaa Kiristoositti amanuun argamu jechuunis akka ani qajeelummaa Waaqa biraa amantiidhaan dhufu qabaadhee isa keessa jiraadhuuf. ¹⁰ Ani Kiristoosii fi humna du'aa ka'uu isaa beekuu, dhiphina isaa keessatti hirmaachuu fi du'a isaatiinis isa fakkaachuu nan barbaada; ¹¹ akkasiinis ani du'aa ka'uu warra du'anii argachuu nan danda'a.

Iddoo Yaadame Ga'uuf Fiiguu

¹² Kiristoos Yesuus waan kan ofii isaa na godhateef anis waan kana harkatti galfachuu nan fiiga jechuudha malee waan kana hunda argadheera yookaan nama hir'ina hin qabne ta'eera jechuu miti. ¹³ Yaa obbolloota, ani akka waan harkatti isa galfadheetti hin ilaalu. Waan tokko garuu nan godha: Waan na duuba jiru irraanfadhee gara waan fuula koo dura jiruutti nan hiixadha; ¹⁴ badhaasa Waaqni Kiristoos Yesuusiin ol samiitti itti na waame sana argachuuf gara kaayyoo sanaatti nan fiiga.

¹⁵ Nu warri bilchaatoon hundinuu waan akkanaa haa yaadnu. Yoo waan tokko tokko irratti yaada garaa garaa qabaattan garuu kanas Waaqni isinii ibsa. ¹⁶ Ta'us waanuma kanaan dura irraa geenya sanaa haa jiraannu.

¹⁷ Yaa obbolloota, fakkeenya koo duukaa bu'uudhaan warra kaaniin tokko ta'aa; warra fakkeenya nu isinii kennineen jiraatanis hubadhaa. ¹⁸ Akkuma ani yeroo hedduu isinitti himee fi akkuma ani amma illee imimmaaniin iyyuu isinitti himu, namoonni baay'een diinota fannoo Kiristoos ta'anii jiraatuutii. ¹⁹ Dhumni isaanii badiisa; Waaqni isaanii garaa isaanii ti; ulfinni isaanii salphina isaaniitiin. Yaadni isaanii waanuma lafaa irratti hundeeffama. ²⁰ Nu garuu biyyi keenya samii irra. Fayyisaa achii dhufu, Gooftaa Yesuus Kiristoos eegganna; ²¹ innis humna waan hunda of jala galfachuu isa dandeessisu sanaa akka dhagni keenya inni dadhabaan dhagna isaa ulfina qabeessa sana fakkaatuuf dhagna keenya ni geeddara.

4

Jabaatanii Jiraachuu fi Tokkummaa

¹ Kanaafuu yaa obbolloota ko, isin warri ani jaalladhuu fi warri ani yaadu, warri gammachuu kootii fi gonfoo koos taatan, yaa michoota ko, akkanatti Gooftaati jabaadhaa dhaabadhaa!

Gorsa

² Ani akka isaan Gooftaadhaan yaada tokko qabaataniif Ewoodiyaanin nan kadhada; Sinxiikeenis nan kadhada. ³ Yaa hidhata dhugaa, dubartoonni kunneen Qaleeminxoosii fi warra na wajjin hojjetan kanneen maqaan isaanii kitaaba jireenyaa keessatti

barreeffame kaan wajjin waan hojii wangeelaa keessatti na wajjin dadhabaniif akka ati isaan gargaartuuf sin kadhada.

⁴ Isin yeroo hunda Gooftaatti gammadaa. Ammas ani irra deebi'ee nan jedha, gammadaa! ⁵ Garraamummaan keessan nama hundumaa biratti haa beekamu. Gooftaan dhi'oo jira. ⁶ Waan hundumaa keessatti Waaqa kadhachuu fi waammataan, galata wajjinis gaaffii keessan Waaqatti dhi'eeffadhaa malee waan tokko illee hin yaadda'inaa. ⁷ Nagaan Waaqaa kan hubannaa hundaa ol ta'e sun karaa Kiristoos Yesuusiin qalbii fi yaada keessan ni eega.

⁸ Dhuma irrattis yaa obbolloota, wanni dhugaa ta'e kam iyyuu, wanni ulfina qabeessa ta'e kam iyyuu, wanni qajeelaa ta'e kam iyyuu, wanni qulqulluu ta'e kam iyyuu, wanni jaallatamaa ta'e kam iyyuu, wanni gurra namaatti tolu kam iyyuu, wanni gaarii ta'e yookaan galateeffamaa ta'e kam iyyuu yoo jiraate isin waan akkanaa yaadaa. ⁹ Isin waan narraa barattan yookaan narraa argattan yookaan narraa dhageessan yookaan narratti argitan hunda isinis akkasuma godhaa. Waaqni nagaa isin wajjin ni ta'a.

Kennaa Isaaniitiif Galateeffachuu Isaa

¹⁰ Sababii isin dhuma irratti deebitanii naa yaaduu jalqabaniif ani Gooftaatti baay'ee nan gammada. Dhugumaanuu carraa ittiin argisiifan dhabdaniiti malee isin durumaanuu naa yaadaa turtan. ¹¹ Ani waan waa dhabeef akkana jechaa hin jiru; haala kam iyyuu keessatti na ga'a jechuu baradheeraatii. ¹² Ani dhabuun maal akka ta'e beeka; baay'ee qabaachuunis maal akka ta'e nan beeka. Haala kam iyyuu keessatti, waan hunda keessattis icciitii quufuutii fi beela'uu, baay'ee qabaachuutii fi dhabuu baradheera. ¹³ Ani isa humna naa kennu sanaan waan hunda gochuu nan danda'a.

¹⁴ Haa ta'uu malee rakkina koo keessatti hirmaachuun keessan waan gaarii gochuu keessan ture. ¹⁵ Kana malees isin warri Fiiliphisiyuus akkuma beektan, jalqabatti yeroo ani wangeela isinitti lallabetti, yeroo ani Maqedooniyaadhaa ka'etti isin qofa malee waldaan kiristaanaa tokko iyyuu waa'ee kennuu fi fudhachuu keessatti na wajjin hin hirmaanne. ¹⁶ Yeroo ani Tasaloniiqee turetti illee yommuu ani rakkadhetti isin yeroo tokkoo ol gargaarsa naaf ergitaniituutii. ¹⁷ Kunis akka bu'aan isiniif baay'atu barbaadeen malee ani kennaa keessan barbaadee miti. ¹⁸ Ani kaffaltii guutuu argadhee caalaa iyyuu qabaadheera; kennaa isin ergitanis Ephafroodiixuu harkaa fudhadhee hamma na ga'u argadheera. Kunis kennaa urgaa'aa fi qalma fudhatamaa Waaqa gammachiisuu dha. ¹⁹ Waaqni koos akkuma badhaadhummaa isaa ulfina qabeessa sanaatti waan isin barbaachisu hunda Kiristoos Yesuusiin isiniif guuta.

²⁰ Waaqa keenyaa fi Abbaa keenyaaf bara baraa hamma bara baraatti ulfinni haa ta'u. Ameen.

Dhaamsa Nagaa Xumuraa

²¹ Kiristoos Yesuusiin qulqulloota hundatti nagaa naa himaa.

Obbolloonni na wajjin jiranis nagaa isinii dhaamu.

²² Qulqulloonni hundinuu, keessumattuu warri mana Qeesarii jiraatan nagaa isinii dhaamu.

²³ Ayyaanni Gooftaa keenya Yesuus Kiristoos hafuura keessan wajjin haa ta'u. Ameen.

Qolosaayis

¹ Phaawulos isa fedhii Waaqaatiin ergamaa Kiristoos Yesuus ta'ee fi obboleessa keenya Xiimotewos irraa,

² Gara qulqulloota, obboloota Kiristoosiin amanamoo ta'an kanneen Qolosaayis jiraataniitti:

Abbaa keenya Waaqa biraa ayyaannii fi nagaan isiniif haa ta'u.

Galataa fi Kadhannaa

³ Nu yommuu isiniif kadhannutti Waaqa, Abbaa Gooftaa keenya Yesuus Kiristoos yeroo hunda ni galateeffanna; ⁴ amantii isin Kiristoos Yesuusitti qabdaniif fi jaalala isin qulqulloota hundaaf qabdan sana dhageenyerraatii; ⁵ kunis sababii abdiif samii keessatti isinii kuufame sanaatiif; isin waa'ee abdiif kanaa duraanuu dubbii dhugaa, wangeela keessatti dhageessaniirtu; ⁶ wangeelli kunis isin bira ga'eera. Wangeelli kunis gaafa isin isa dhageessanii dhugumaan ayyaana Waaqaa hubattanii jalqabee akkuma isin gidduutti hojjechaa ture sana addunyaa guutuu keessatti ija naqachaa fi guddachaa jira. ⁷ Kanas tajaajilaa jaallatamaa hidhata keenya ta'e Ephaaqirraa irraa barattaniirtu; innis Kiristoosiif tajaajilaa amanamaa ta'ee iddoo keenya kan bu'ee dha; ⁸ inni waa'ee jaalala keessan kan Hafuurri isinii kenne sanaas nutti himeera.

⁹ Sababii kanaaf nu gaafa waa'ee keessan dhageenyee jalqabnee isinii kadhachuu fi akka Waaqni karaa ogummaatii fi hubannaa hafuura hundaan beekumsa fedhii isaatiin isin guutu kadhachuu hin dhiifne. ¹⁰ Kunis akka isin hojii gaarii hundaan ija naqachaa, Waaqa beekuudhaanis guddachaa, jireenya Gooftaaf malu fi kan karaa hundaan isa gammachiisu jiraataniif; ¹¹ isinis jajjabinaa fi obsa guddaa akka qabaataniif, akkuma aangoo isaa ulfina qabeessa sanaatti humna hundaan jabaachaa, gammadaas ¹² Waaqa Abbaa kan akka isin mootummaa ifaa keessatti qulqulloota wajjin dhaala keessatti hirmaattan isin dandeessise sana galateeffadhaa. ¹³ Inni taayitaa dukkanaa jalaa nu baasee gara mootummaa Ilma inni jaallatuutti nu dabarseeraatii; ¹⁴ nus isumaan furama, jechuunis dhiifama cubbuu arganneerra.

Ol aantummaa Ilma Waaqaa

¹⁵ Inni fakkaattii Waaqa hin mul'anne sanaa ti; uumama hundaafis hangafa. ¹⁶ Wannii hundinuu isumaan uumameetii: Wannii samii keessaa fi lafa irraa, wannii mul'atuuf fi hin mul'anne, teessoowwan yookaan humnoonni yookaan bulchitoonni yookaan taayitaawwan, wannii hundinuu isumaan, isumaaf uumaman. ¹⁷ Inni waan hunda dura jira; wannii hundinuu isumaan wal qabatee dhaabata. ¹⁸ Inni mataa dhagna isaa, mataa waldaa kiristaanaa ti; waan hunda irratti ol aantummaa akka qabaatuufis inni kan jalqabaa ti; warra du'an keessaa kaafamuudhaanis hangafa. ¹⁹ Waaqni guutummaan isaa hundi isa keessa jiraachuu isaatti gammadeeraatii; ²⁰ dhiiga isaa kan fannoo irratti dhangala'e sanaanis nagaa buusuudhaan waan lafa irra jiru yookaan waan samii keessa jiru hunda karaa isaatiin ofitti araarseeraatii.

²¹ Isinis dur amala keessan hamaa sanaan Waaqatti orma taatanii yaada keessaniinis diinota turtan. ²² Amma garuu qulqulloota mudaa hin qabnee fi warra hir'ina hin qabne godhee fuula isaa duratti isin dhi'eessuuf dhagna foon Kiristoosiin, karaa du'a isaatiin isin araarseera; ²³ kunis yoo isin amantii keessaniin itti fuftan, yoo jabaattanii dhaabattanii fi yoo isin abdiif wangeelaa irraa hin sochoone ta'a. Wangeelli kunis isuma isin dhageessanii fi isuma samii gaditti uumama hundatti lallabamee dha; ani Phaawulosis wangeeluma kanaaf tajaajilaa ta'eera.

Phaawulos Waldaa Kiristaanaatiif Dhama'uu Isaa

²⁴ Ani amma isiniif dhiphachuu kootti nan gammada; waan dhiphina Kiristoos dhagna isaatiif jechuunis waldaa kiristaanaatiif jedhee dhiphate sana keessaa hir'ates ani foon kootiin nan guuta. ²⁵ Ergama Waaqni natti kenneen ani akka dubbii Waaqaa guutummaatti isinii dhi'eessuuf tajaajilaa waldaa kiristaanaa ta'eera; ²⁶ dubbiin kunis icciitii barootaa fi dhaloota jalaa dhokfamee turee dha; amma garuu qulqulloota isaatti mul'ifameera. ²⁷ Waaqni badhaadhummaan ulfina icciitii kanaa hammam guddaa akka ta'e Namoota Ormaa gidduutti qulqulloota isaatti beeksisuu filateera; icciitiin kunis Kiristoos, abdiif ulfinaa isa isin keessa jiruu dha.

²⁸ Nus isuma lallabna; nama hunda kan guutumaan guutuutti Kiristoositti bilchaataa ta'e akka dhi'eessinuuf, tokkoo tokkoo namaa ogummaa hundaan gorsaa barsiisna. ²⁹ Kanaafuu ani akkuma hojii humna isaa kan ciminaan na keessatti hojjetu sanaatti carraaqaa nan dhimma.

2

¹ Akka ani isiniif, warra Lodoociyaa jiranii fi warra fooniin fuula koo hin argin hundaafis jedhee hammam carraaqaa jiru isin akka beektan nan barbaada. ² Kunis akka isaan jaalalaan tokko ta'anii garaan isaanii jajjabeeffamuuf, akka isaan badhaadhummaa hubannaa guutuu qabaatanii icciitii Waaqaa jechuunis Kiristoosin beekaniif; ³ badhaadhummaan ogummaa fi beekumsaa hundinuus isuma keessa dhokfameera. ⁴ Anis akka namni tokko iyyuu afaan tolee isin hin gowwoomsineef waan kana isinittin hima. ⁵ Ani yoon fooniin isin irraa fagaadhe illee hafuuraan isin wajjin waanan jiruuf, isin hammam naamusa qabeeyyii akka taatanii fi amantiin isin Kiristoositti qabdanis hammam cimaa akka ta'e arguu kootiif nan gammada.

Jireenya Kiristoosiin Argamu

⁶ Yoos akkuma Kiristoos Yesuus Goofiticha fudhattanitti isatti jiraadhaa; ⁷ akkuma barattan sanatti hidda keessan isa keessatti gad fageeffadhaatii isa irratti ijaaramaa; amantiittis jabaadhaa; galata guutee dhangala'us dhi'eessaa.

⁸ Eenyu iyyuu barsiisa waa'ee Kiristoos irratti hundeeffameen utuu hin ta'in falaasama faayidaa hin qabnee fi gowwoomsaa, kan bartee namaatii fi qajeelfama addunyaa kanaa irratti hundeeffameen akka isin hin boojine of eeggadhaa.

⁹ Guutummaan Waaqummaa hundinuu fooniin Kiristoos keessa jiraataatii; ¹⁰ isinis Kiristoos isa humnaa fi taayitaa hunda irratti mataa ta'e sanaan guutamtaniirtu. ¹¹ Isumaanis foon cubbamaa ta'e sana of irraa gattanii dhagna qabattaniirtu; dhagna qabaan kunis dhagna qabaa harka namaatiin ta'e utuu hin ta'in kan Kiristoosiin ta'ee dha; ¹² isinis cuuphaadhaan isa wajjin awwaalamtanii humna Waaqaa kan Kiristoosin warra du'an keessaa isa kaasetti amanuu keessaniin cuuphaadhuma sanaan isa wajjin kaafamtaniirtu.

¹³ Yeroo isin cubbuu keessanii fi foon keessan kan dhagna hin qabamin sanaan duutanii turtanitti Waaqni Kiristoos wajjin jiraattota isin taasise. Cubbuu keenya hundas nuu dhiise; ¹⁴ innis himata idaa keenya kan seeraa kan nuun mormuu fi nutti muru sana haqee mismaaraan fannootti diree dhabamsiise. ¹⁵ Innis humnootaa fi taayitaawwan fannoodhaan mo'ate hidhannoo hiikkachiisuudhaan ifa baasee uummatatti isaan argisiise.

Sirna Foonii Jalaa Bilisa Ba'uu

¹⁶ Kanaafuu eenyu iyyuu waan nyaattanii fi waan dhugdaniin yookaan waa'ee ayyaanaatiin yookaan waa'ee Baatii Haaraatiin yookaan waa'ee Sanbataatiin isinitti hin murin. ¹⁷ Isaan kunneen gaaddidduu waan dhufuuf jiruu ti; dhugaan isaa garuu Kiristoos keessa jira. ¹⁸ Namni sobee gad of qabuu fi ergamoota waaqeffachuu jaallatu kam iyyuu badhaasa isin hin dhabsiisin. Namni akkasii waan arge hunda baay'isee odeessa; sababii malee yaada foon isaatiin of tuula. ¹⁹ Innis mataa isa dhagni guutuun ittiin soorame, hiddaa fi ribuu isaatiinis walitti hidhamee guddina Waaqni kennuufiin guddatu sana irraa citeera.

²⁰ Isin erga Kiristoos wajjin qajeelfama hundee kan addunyaa kanaatiif duutanii maaliif akka waan amma iyyuu kan addunyaa taataniitti sirna isaatiif bultu ree? ²¹ Innis, "Harkaan hin qabatin! Hin dhandhamin! Hin tuqin!" jedha. ²² Isaanis waan ajajaa fi barsiisa namaa irratti hundeeffamaniif yeroo hojii irra oolanitti baduuf murteeffamaniiru. ²³ Sirni kunis dhugumaan of dirqisiisuun waaqeffachuu isaanii, gad of qabuu sobaatiif fi foon isaanii miidhuu isaaniitiin bifa ogummaa qaba; hawwii foonii dhowwuuf garuu faayidaa tokko illee hin qabu.

3

Akka Warra Kiristoosiin Jiraattota Taasifamaniitti Jiraachuu

¹ Egaa isin erga Kiristoos wajjin kaafamtanii waan ol gubbaa, mirga Waaqaa iddoo Kiristoos taa'u sana jiru barbaadaa. ² Waan ol gubbaa yaadaa malee waan lafa irraa hin yaadinaa. ³ Dootaniirtuutii; jireenyi keessanis Kiristoos wajjin Waaqaa keessa dhokfameera. ⁴ Yommuu Kiristoos inni jireenya keessan ta'e sun mul'atutti isinis isa wajjin ulfinaan ni mul'attu.

⁵ Kanaaf hawwii addunyaa isa isin keessatti hojjechaa jiru hundumaa ajjeesaa; kunis halalummaa, xuraa'ummaa, dharraa foonii, hawwii hamaa fi sassattummaa isa waaqa tolfamaa waaqeffachuu ta'e sanaa dha. ⁶ Sababii kanaafis dheekkamsi Waaqaa warra hin ajajamnetti ni dhufa. ⁷ Isinis jireenya dur jiraattan keessatti karuma akkasii irra deddeebi'aa turtan. ⁸ Amma garuu waan akkasii hunda: aarii, dheekkamsa, hamminaa fi maqaa nama balleessuu of irraa fageessaa; dubbiin gadheenis afaan keessanii hin ba'in. ⁹ Wal hin sobinaa; isin eenyummaa keessan isa moofaa sana hojii isaa wajjin of irraa baaftanii ¹⁰ eenyummaa haaraa kan beekumsa fakkaattii Uumaa isaatiin haaromfamaa jirus uffattaniirtu. ¹¹ Sababii kanaaf, nama Giriik yookaan Yihuudii, nama dhagna qabate yookaan kan dhagna hin qabatin, nama wallaalaa, nama jireenya isaa hin qajeelfatin, garba yookaan birmaduu jechuun hin jiru; Kiristoos garuu hunduma; hunduma keessas jira.

¹² Kanaafuu isin akkuma warra Waaqaaf filatamanii qulqullaa'anii fi jaallatamaniitti, gara laafummaa, arjummaa, gad of qabiisa, garraamummaa fi obsa qabaadhaa. ¹³ Wal danda'aa; yoo eenyu iyyuu nama tokko illee irraa komii qabaate walii dhiisaa. Akkuma Gooftaan isinii dhiise sana isinis walii dhiisaa. ¹⁴ Kana hundumaa irrattis jaalala waan hundumaa tokkummaa hir'ina hin qabneen walitti hidhu qabaadhaa.

¹⁵ Nagaan Kiristoos kan isin akkuma kutaa dhagna tokkootti itti waamantan sun garaa keessan keessatti haa mo'u. Warra galateeffattanis ta'aa. ¹⁶ Dubbiin Kiristoos baay'inaan isin keessa haa jiraatu; ogummaa hundaan wal barsiisaa; wal gorsaa; faarfannaadhaan, weedduu galataatii fi faarfannaa Hafuuraatiin garaa keessan keessatti Waaqa galateeffadhaa. ¹⁷ Dubbiinis ta'u hojiiidhaan, waan hojjettan kam iyyuu maqaa Gooftaa Yesuusiiin hojjedhaa; isumaanis Waaqa Abbaa galateeffadhaa.

Qajeelfama Maatii Kiristaanaatiif Kenname

3:18-4:1 kwf - Efe 5:22-6:9

¹⁸ Yaa niitota, akka Gooftaaf ta'utti dhirsoota keessaniif ajajamaa.

¹⁹ Yaa dhirsoota, isinis niitota keessan jaalladhaa; isaanittis hin hammaatinaa.

²⁰ Yaa ijoolle, waan hundumaan abbootii fi haadhota keessaniif ajajamaa; kun Gooftaa gammachiisaatii.

²¹ Yaa abbootii, isinis akka ijoolleen keessan abdiin hin kutanneef tuttuqxanii isaan hin aarsinaa.

²² Yaa garboota, isinis warra fooniin gooftota keessan ta'aniif waan hundaan ajajamaa; kanas yeroo isaan isin ilaalan qofa isaan gammachiisuuf utuu hin ta'in garaa qulqulluu fi Gooftaa sodaachuudhaan godhaa. ²³ Waan hojjettan hunda akka waan namaaf hojjetaniitti utuu hin ta'in akka waan Gooftaaf hojjetaniitti garaa guutuudhaan hojjedhaa; ²⁴ kunis sababii isin akka Gooftaa biraa badhaasa dhaalaa argattan beektaniif. Kan isin tajaajilaa jirtan Kiristoos Goofticha. ²⁵ Namni balleessaa hojjetu kam iyyuu gatii balleessaa isaa ni argataatii; nama wal caalchisuunis hin jiru.

4

¹ Yaa gooftota, isinis akka samii irraa Gooftaa qabdan waan beektaniif, garboota keessan qajeelummaa fi wal qixxummaadhaan bulchaa.

Gorsa Dabalataa

² Warra dammaqanii galateeffatan ta'uudhaan kadhannaatti jabaadhaa. ³ Nu icciitii Kiristoos kan ani isaaf jedhee hidhamee jiru sana akka lallabnuuf Waaqni balbala dubbichaa akka nuu banu nuufis kadhadaa. ⁴ Anis akka narraa eegamutti ibsee akkan lallabuuf naa kadhadaa. ⁵ Baricha furuudhaan warra alaa wajjin hubannaadhaan jiraadhaa. ⁶ Tokkoo tokkoo namaatiif akkamitti akka deebii kennan akka beektaniif dubbiin keessan yeroo hunda ayyaanaan kan guutame, soogiddaanis kan mi'eeffame haa ta'u.

Dhaamsa Nagaa Xumuraa

⁷ Xikiqoos oduu waa'ee kootii hunda isinitti ni hima. Inni obboleessa jaallatamaa, tajaajilaa amanamaa fi Gooftaatti garbicha hidhata koo ta'ee dha. ⁸ Anis akka isin haala nu keessa jirru beektanii fi akka inni garaa keessan jajjabeessuuf gara keessanitti isa ergeera. ⁹ Innis obboleessa keenya amanamaa fi jaallatamaa isa garee keessan keessaa tokko ta'e Oneesimoos wajjin dhufa. Isaanis waan asitti ta'aa jiru hundumaa isinitti himu.

¹⁰ Arisxirokoos inni na wajjin hidhamee jiru nagaan isinii dhaama; Maarqos durbiin Barnaabaasis akkanuma nagaan isinii dhaama. Waa'ee isaas ajajni, "Yoo inni gara keessan dhufe isa simadhaa" jedhu isin ga'eera.

¹¹ Yesuus inni Yoosxoos jedhamus akkasuma nagaan isinii dhaama. Warra dhagna qabatan keessaas kanneen na wajjin mootummaa Waaqaatiif hojjetan isaanuma qofa; isaanis jajjabina guddaa naa ta'aniiru.

¹² Ephaa'iraan inni isin keessaa tokko ta'ee fi tajaajilaan Kiristoos Yesuus nagaan isinii dhaama. Innis akka isin fedhii Waaqaa hundaan bilchaatoo fi guutuu taatanii jabaatanii dhaabattaniif yeroo hunda kadhannaadhaan isinii dadhabaa jira. ¹³ Ani akka inni isiniif, warra Lodoociyaa fi magaalaa Heraapoolis jiraniifis hinaaffaa gaarii qabu dhugaa nan ba'aaf.

¹⁴ Luqaas ogeessi fayyaa michuun keenya jaallatamaanii fi Deemaas nagaan isinii dhaamu.

¹⁵ Obboloota Lodoociyaa jiranitti, akkasumas Niimfaa fi waldaa kiristaanaa kan mana ishee jirtutti nagaan naa himaa.

¹⁶ Erga xalayaan kun isinii dubbifamee booddee waldaa Kiristaanaa Lodoociyaatti akka dubbifamu godhaa; isinis xalayaa Lodoociyaadhaa dhufu dubbifadhaa.

¹⁷ Arkiphaadhaanis, "Hojii Gooftaadhaan sitti kenname sana akka xumurtu mirkane-effadhu" jedhaa.

¹⁸ Ani Phaawulos, xalayaa nagaan kana harkuma kootiin barreessa. Hidhamuu koo yaadadhaa. Ayyaanni isin wajjin haa ta'u.

Tasaloniique Tökkoffaa

Nagaa Gaafachuu

¹ Phaawulos, Silwaanosiif fi Xiimotewos irraa,

Gara waldaa kiristaanaa warra Tasaloniiquee kan Waaqa Abbaatii fi kan Gooftaa Yesuus Kiristoos taateetti:

Ayyaannii fi nagaan isiniif haa ta’u.

Amantii Warra Tasaloniiqueetiif Galateeffachuu

² Nu kadhannaa keenya keessatti maqaa keessan dhoofnee yeroo hunda waa’ee hunda keessaniitiif Waaqa ni galateeffanna. ³ Nu hojii amantii keessanii, dadhabbii jaalala keessanii fi obsa abdi keessanii kan Gooftaa keenya Yesuus Kiristoositti qabdan sana Waaqa keenyaa fi Abbaa keenya duratti ittuma fufnee ni yaadanna.

⁴ Yaa obboloota Waaqaan jaallatamtan, nu akka inni isin filate beeknaatii; ⁵ wangeelli keenya humnaan, Hafuura Qulqulluu fi amansiisa guddaan malee dubbii afaanii gofaan gara keessan hin dhufneetii. Nu isiniif jennee akkamitti akka isin gidduu jiraanne ni beektu. ⁶ Isinis fakkeenya keenyaa fi fakkeenya Gooftaa duukaa buutaniirtu; utuma dhiphina guddaa keessa jirtanuu gammachuu Hafuurri Qulqulluun isinii kennuun dubbicha fudhattaniirtu. ⁷ Kanaanis amantoota Maqedoonyaa fi Akaayaa jiran hundaaf fakkeenya taatanii jirtan. ⁸ Dubbiin Gooftaa isin biraa ba’ee Maqedoonyaa fi Akaayaa qofatti hin dhaga’amne; amantiin isin Waaqatti qabdanis lafa hunda ga’eera. Kanaafuu waa’ee isaa homaa dubbachuu nu hin barbaachisu; ⁹ isin simannaa akkamii akka nuu gootan isaanuu ni dubbatuutii. Isaan akkamitti akka isin Waaqa jiraataa fi Waaqa dhugaa tajaajiluuf jettanii waaqota tolfamoo irraa gara Waaqaatti deebitanis ni himu; ¹⁰ akkasumas Ilma isaa isa inni warra du’an keessaa kaase jechuunis Yesuus isa dheekkamsa dhufu jalaa nu baasu sana akka samii irraa eeggattan ni himu.

2

Phaawulos Tasaloniiqueetti Tajaajiluu Isaa

¹ Yaa obboloota, isin bira dhufuun keenya sun akkasumaan akka hin ta’in isinuu ni beektu. ² Akkuma isin beektan nu kanaan dura Fiiliphisiyuusitti dhiphanneerra; akka malees qaaneffamneerra. Garuu yoo mormiin cimaan nu qunname illee gargaarsa Waaqa keenyaatiin wangeela isaa isinitti himuudhaaf ija jabina arganneerra. ³ Gorsi nu kenninus kan dogoggora yookaan xuraa’ummaa yookaan gowwoomsaa irraa dhufe miti. ⁴ Qooda kanaa nu akka warra Waaqni wangeela imaanaa itti kennuuf qoratee fudhateetti dubbanna. Yaaliin keenyas Waaqa garaa keenya qoru sana gammachiisuuf malee nama gammachiisuuf miti. ⁵ Akkuma isin beektanii fi akkuma Waaqnis dhugaa ba’u sana nu dubbii sossobbiitti hin fayyadamne; doqnummaa dhokfachuufis haguuggannee gara keessan hin dhufne. ⁶ Nu namoota irraa, isin irraas ta’u yookaan warra kaan irraa ulfina hin barbaanne. Nu akka ergamoota Kiristoosiitti ba’aa isinitti ta’uu ni dandeenya ture; ⁷ nu garuu akkuma haadha daa’imman ishee kunuunfattu tokkoo taane.

Garraamummaadhaan gidduu keessan jiraanne. ⁸ Nu waan akka malee isin jaallanneef wangeela Waaqaa qofa utuu hin ta’in lubbuu keenya illee isinii kennuun fedhii keenya ture; isin nu biratti akka malee jaallatamoo turtaniitii. ⁹ Yaa obboloota, isin dadhabbii fi dhiphina keenya ni yaadattuutii; nu yeroo wangeela Waaqaa isinii lallabnetti nama tokkotti illee akka ba’aa hin taaneef halkanii guyyaa hojjechaa turre. ¹⁰ Nu hammam qulqullummaan, qajeelummaa fi mudaa malee isin warra amantan gidduu akka jiraanne isin dhugaa ni baatu; Waaqnis dhugaa ba’a. ¹¹ Isin akka nu akkuma abbaan ijoollee isaa gorsee jajjabeessutti tokkoo tokkoo keessaniif taane ni beektuutii; ¹² kunis akka isin jireenya Waaqa isa mootummaa isaattii fi ulfina isaattii isin waamu sanaaf malu jiraattaniif.

¹³ Isinis yommuu dubbii Waaqaa kan nurraa dhageessan sana fudhattanitti akkuma inni jirutti, akka dubbii Waaqaa kan isin warra amantan keessatti hojjetuutti fudhattan malee akka dubbii namaatti waan hin fudhatiniif nu utuu gargar hin kutin Waaqa

galateeffanna. ¹⁴ Yaa obbolloota, isin fakkeenya waldoota kiristaanaa Waaqaa warra Kiristoos Yesuusitti jiran kanneen biyya Yihuudaa jiranii duukaa buutaniirtu; akkuma waldoonni kunneen harka Yihuudootaatti dhiphatan sana isinis harka namoota biyya keessaniitti dhiphattaniirtu; ¹⁵ Yihuudoonni kunneen warra Gooftaa Yesuusii fi raajota ajjeesani nu illee ari'atani dha. Isaan Waaqa hin gammachiisan; nama hundattis diina ta'u; ¹⁶ isaanis cubbuu isaanii guuttachuuf jedhanii akka nu akka Namoonni Ormaa fayyifamaniif itti hin dubbanne nu dhowwu. Dhuma irratti garuu dheekkamsi Waaqaa isaanitti dhufeera.

Phaawulos Warra Tasaloniiqee Arguu Hawwe

¹⁷ Garuu yaa obbolloota, erga yaadaan utuu hin ta'in fooniin yeroo gabaabaaf isin irraa gargar baanee jalqabnee fuula keessan arguuf hawwii guddaan caalchifnee dhamaane. ¹⁸ Nu gara keessan dhufuu barbaannee turreetii; dhugumaanuu ani Phaawulos yeroo baay'ee gara keessan dhufuu yaaleera; garuu Seexanatu nu dhowwe. ¹⁹ Yommuu Gooftaan keenya Yesuus Kiristoos dhufutti fuula isaa duratti abdiin keenya yookaan gammachuun keenya yookaan gonfoon nu ittiin of jajnu eenyu? Isinuma mitii? ²⁰ Isin ulfinaa fi gammachuu keenyaatii.

3

¹ Kanaafuu nu waan hammama caalaa obsuu dadhabneef kophaa keenya Ateenaatti hafuun gaarii nutti fakkaate. ² Nus obboleessa keenya Xiimotewos, tajaajilaa Waaqaa isa wangeela Kiristoosiitti hojjetaa hidhata keenya ta'e sana, akka inni amantii keessanitti isin cimsuu fi isin jajjabeessuuf engineerra; ³ kunis akka namni tokko iyyuu dhiphina kanaan hin jeeqamneef. Isinis akka nu waan kanaaf filatamne sirriitti beektu. ⁴ Yeroo isin bira turretti akka dhiphinni nurra ga'u isinitti himaa turreetii. Innis akkuma isin beektan sana ta'e. ⁵ Sababii kanaaf ani yommuun kana caalaa obsuu dadhabetti waa'ee amantii keessanii baruuf jedheen isa erge. Tarii inni nama qoru sun isin qoree dadhabbiin keenyas faayidaa malee hafeera jedheen sodaadhe.

Xiimotewos Oduu Gaarii Fide

⁶ Amma garuu Xiimotewos isin biraa gara keenya dhufee waa'ee amantii keessaniitii fi waa'ee jaalala keessanii oduu gaarii nutti himeera. Akkasumas akka isin yeroo hunda yaada gaariidhaan nu yaaddanii fi akkuma nu isin arguu hawwinu sana akka isinis nu arguu hawwitan nutti himeera. ⁷ Kanaaf yaa obbolloota, nu dhiphinaa fi ari'atama keenya hunda keessatti amantii keessaniin waa'ee keessan jajjabaanneerra. ⁸ Yoo isin Gooftaatti cimtanii dhaabatan nu dhugumaan ni jiraannaatii. ⁹ Gammachuu sababii keessaniin fuula Waaqa keenyaa duratti qabnu hundaaf waa'ee keessaniif hammam Waaqa galateeffachuu dandeenya? ¹⁰ Nu akka deebinee isin arginuu fi waan amantii keessan keessaa hir'ates akka isinii guutuu dandeenyuuf halkanii guyyaa cimsinee kadhanna.

¹¹ Ammas Waaqni keenyaa fi Abbaan keenya mataan isaa, Gooftaan keenya Yesuusis akka nu gara keessan dhufnu karaa nuuf haa qajeelchu. ¹² Akkuma jaalalli nu isinii qabnu dabalaa deemu sana Gooftaan jaalala isin walii keessanii fi nama hundaaf qabdan isinii haa guddisuu; haa baay'isus. ¹³ Akka isin yommuu Gooftaan keenya Yesuus qulqulloota isaa hunda wajjin dhufutti fuula Waaqa keenyaatii fi Abbaa keenyaa duratti warra mudaa hin qabnee fi qulqulloota taataniifis inni garaa keessan haa jajjabeessu.

4

Waaqa Gammachiisuuf Jiraachuu

¹ Kana malees yaa obbolloota, Waaqa gammachiisuuf akkamitti akka jiraachuu qabdan nu isin barsiifneerra; isinis akkuma sanatti jiraachaa jirtu. Ammas akka ittuma caalchiftanii waan kana gootan Gooftaa Yesuusii isin kadhanna; isin gorsinas. ² Nu taayitaa Gooftaa Yesuusiiin ajaja maalii akka isinii kennine beektuutii.

³ Fedhiin Waaqaa akka isin qulqullootanii dha; kunis akka isin halalummaa irraa fagaattaniif; ⁴ tokkoon tokkoon keessan akkamitti akka karaa qulqulluu fi ulfina qabeessa ta'een dhagna keessan eeggattan beekuu qabdu; ⁵ kunis akka ormoota Waaqa hin beekneetti hawwii fooniitiin hin ta'in; ⁶ waan kanaanis namni tokko iyyuu obboleessa isaa hin miidhin yookaan hin gowwoomsin. Akkuma nu kanaan dura isinitti himnee isin akeekkachiifne sana, Gooftaan warra cubbuu akkasii hojjetan hunda haaloo ba'a. ⁷ Waaqni akka nu jireenya qulqulluu jiraannuuf malee akka xuroofnuuf nu hin waamneetii. ⁸ Kanaafuu namni gorsa kana tuffatu Waaqa Hafuura isaa Qulqulluu isinii kennu sana tuffata malee nama hin tuffatu.

⁹ Egaa waan Waaqni akka isin wal jaallattan isin barsiiseef waa'ee jaalala obbolummaa isinii barreessuu nu hin barbaachisu. ¹⁰ Dhugumaan isin obboloata guutummaa Maqedooniyaa keessa jiran hunda ni jaallattu. Yaa obboloata, nu garuu akka kana caalaa isaan jaallattan isin gorsina; ¹¹ akkuma nu kanaan dura isin ajajnetti tasgabbiin jiraachuuf tattaaffadhaa; harkuma keessaniin hojii keessan hojjetadhaa; ¹² kunis akka isin warra alaa biratti ulfina argattanii fi akka harka nama tokko illee hin eegganneef.

Amantoota Warra Lubbuun Hin jirre

¹³ Yaa obboloata, nu akka isin waa'ee warra rafan sanaa wallaaltan yookaan akka namoota abdiin hin qabne kaaniitti gadditan hin barbaannu. ¹⁴ Nu erga akka Yesuus du'ee du'aa ka'e amannee akkasuma immoo Waaqni warra Yesuusitti amananii rafan sana akka isuma wajjin kaasu ni amanna. ¹⁵ Wannu nu akka dubbii Gooftaatti isinitti hinmu kana; nu warri lubbuun jirru kanneen hamma dhufaatii Gooftaatti jiraannu gonkumaa warra rafan sana hin dursinu. ¹⁶ Gooftaan mataan isaa ajajaan, sagalee ergamaa hangafaatii fi sagalee malakata Waaqaatiin samii irraa ni bu'a; warri Kiristoositti amananii du'anis jalqabatti ni ka'u. ¹⁷ Ergasii immoo nu warri hafnee lubbuun jirru qilleensa irratti Gooftaa simachuuf isaan wajjin duumessaan ol fudhatamna. Akkasumas bara baraan Gooftaa wajjin ni jiraanna. ¹⁸ Kanaafuu dubbii kanaan wal jajjabeessaa.

5

¹ Egaa yaa obboloata, waa'ee barootaati fi waa'ee waqtiilee waan tokko iyyuu isinii barreessuu nu hin barbaachisu; ² akka guyyaan Gooftaa akkuma hattuuutti halkaniin dhufu isinuu sirriitti beekuutii. ³ Utuma namoonni, "Nagaa dha; qabbanas" jedhanuu akkuma ciniinsuun dubartii ulfaatti dhufu badiisni akka tasaa isaanitti dhufa; jalaas hin ba'an.

⁴ Isin garuu yaa obboloata, akka guyyaan sun akkuma hattuuutti isinitti hin dhufneef isin warra dukkana keessa jirtan miti. ⁵ Isin hundi ijoollee ifaa ti; ijoollee guyyaatis. Nu warra halkanii yookaan warra dukkanaa miti. ⁶ Egaa kottaa nu akka warra kaanii hin rafnuu; gooda kanaa kottaa ni dammaqnaa; of qabnas. ⁷ Warri rafan halkaniin rafuutii; warri machaa'anis halkaniin machaa'u. ⁸ Nu garuu waan warra guyyaa taaneef kottaa amantii fi jaalala akka qomee sibiilaatti uffannee, abdiin fayyinaa immoo akka qoobii sibiilaatti kaa'annee of qabnaa. ⁹ Waaqni akka nu karaa Gooftaa keenya Yesuus Kiristoosiin fayyina argannuuf malee dheekkamsaaf nu hin filanneetii. ¹⁰ Nu yoo dammaqne yookaan yoo rafne akka isa wajjin tokkummaan jiraannuuf inni nuuf du'e. ¹¹ Kanaafuu akkuma amma gochaa jirtan kana wal jajjabeessaa; wal ijaaraas.

Gorsa Dhumaa

¹² Egaa yaa obboloata, nu akka isin warra gidduu keessanitti cimaniin hojjetan, kanneen karaa Gooftaatiin isin hooggananiin fi isin gorsan sana kabajjan isin kadhanna. ¹³ Sababii hojii isaaniitiifis jaalalaan ulfina guddaa isaaniif kennaa. Nagaadhaanis walii wajjin jiraadhaa. ¹⁴ Yaa obboloata, nu akka isin warra hojii hojjechuu hin jaallanne akeekkachiiftan, sodaattota jajjabeessitan, dadhaboo gargaartan, akka nama hundumaafis obsitan isin gorsina. ¹⁵ Akka namni tokko iyyuu waan hamaaf deebii hamaa hin deebifne of eeggadhaa; gooda kanaa yeroo hunda waliif, nama hundaafis waan gaarii gochuuf carraaqaa.

¹⁶ Yeroo hunda gammadaa; ¹⁷ utuu gargar hin kutin kadhadhaa. ¹⁸ Haala hundumaa keessatti Waaqa galateeffadhaa; fedhiin Waaqni Kiristoos Yesuusitti isiniif qabu kanaatii.

¹⁹ Hafuura hin dhaamsinaa; ²⁰ raajii hin tuffatinaa; ²¹ waan hunda qoraa. Isa gaarii jabeessaatii qabadhaa. ²² Hammina gosa hundumaa irraa fagaadhaa.

²³ Waaqni mataan isaa, Waaqni nagaa guutumaan guutuutti isin haa qulqulleessu. Hafuurri keessan, lubbuun keessanii fi dhagni keessan guutuun guyyaa Gooftaan keenya Yesuus Kiristoos dhufutti mudaa irraa haa eegaman. ²⁴ Inni isin waamu sun amanamaa dha; waan kanas ni godha.

²⁵ Yaa obboloata, nuufis kadhadhaa.

²⁶ Dhungoo qulqulluudhaanis obboloata hunda nagaa gaafadhaa.

²⁷ Ani akka xalayaan kun obboloata hundaaf dubbifamu fuula Gooftaa duratti isin ajaja.

²⁸ Ayyaanni Gooftaa keenya Yesuus Kiristoos isin wajjin haa ta'u.

Tasaloniiqee Lammaffaa

Nagaa Gaafachuu

¹ Phaawulos, Silwaanosisii fi Xiimotewos irraa,

Gara Waldaa Kiristaanaa warra Tasaloniiqee kan Abbaa keenya Waaqaatii fi kan Gooftaa Yesuus Kiristoos taateetti:

² Ayyaannii fi nagaan Waaqa Abbaa fi Gooftaa Yesuus Kiristoos irraa isiniif haa ta'u.

Galataa fi Kadhannaa

³ Yaa obbolloota, sababii amantiin keessan baay'ee guddachaa, jaalalli hundi keessan walii keessaniif qabdanis ittuma dabalaa jiruuf nu yeroo hunda waa'ee keessaniif akka malutti Waaqa galateeffachuu qabna. ⁴ Kanaafuu nu qorumsa isin obsitan sanaaf, ari'atama hunda keessatti jabaattanii dhaabachuu keessanii fi amantii keessaniin waldoota Kiristaanaa Waaqaa keessatti sababii keessaniin of jajna.

⁵ Kun hundinuu akka murtiin Waaqaa qajeelaa ta'e mul'isa; sababii kanaaf isin warra mootummaa isaa kan dhiphachaafii jirtan sanaaf maltan ni taatu. ⁶ Waaqni qajeelaa dha: Inni warra isin rakkisan ni rakkisa; ⁷ isin warra rakkattaniif, nuufis boqonnaa ni kenna. Kunis yommuu Gooftaan Yesuus ibidda balali'uun ergamoota isaa humna qabeeyyii wajjin samii irraa mul'atutti ta'a. ⁸ Inni warra Waaqa hin beeknee fi warra wangeela Gooftaa keenya Yesuusii hin ajajamne ni adaba. ⁹ Isaanis fuula Gooftaa duraa fi ulfina humna isaa irraa fageeffamanii badiisa bara baraatiin ni adabamu; ¹⁰ kunis guyyaa inni qulqulloota isaatiin kabajamuu fi warra amanaman hundumaa gidduutti dinqisiifatuuf dhufutti ta'a. Isinis waan dhuga ba'umsa keenya amantaniif isaanitti lakkaa'amu.

¹¹ Nus waan kana yaadatti qabachaa, akka Waaqni keenya warra waamicha isaatiif malan isin godhuuf, humna isaatiinis kaayyoo keessan gaarii hundaa fi akka hojii amantii keessanii hunda fiixaan isinii baasuuf utuu gargar hin kutin isinii kadhanna. ¹² Nus akkuma ayyaana Waaqa keenyaattii fi Gooftaa Yesuus Kiristoosiitti akka maqaan Gooftaa keenya Yesuus isiniin kabajamuu fi akka isinis isaan kabajamantaniif waan kana kadhanna.

2

Nama Fincilaa

¹ Yaa obbolloota, waa'ee dhufaatii Gooftaa keenya Yesuus Kiristoosii fi waa'ee isa biratti walitti qabamuu keenyaa wanni nu isin kadhannu kana; ² kunis raajii yookaan dubbii yookaan xalayaa akka waan nu biraa dhufeetti hedamuun akka isin guyyaan Gooftaa ammuma iyyuu dhufeera jettanii daftanii hin raafamneef yookaan hin jeeqamneef. ³ Namni tokko iyyuu karaa kamiin iyyuu isin hin gowwoomsin; utuu fincilli dursee hin dhufin, namni cubbuu, ilmi badiisaa sun utuu hin mul'atin guyyaan sun hin dhufuutii. ⁴ Innis waan Waaqa jedhamu yookaan waan waaqeffatamu hundumaan mormee isaan irratti ol ol of qaba; "Ani Waaqa" ofiin jechuudhaanis mana qulqullummaa Waaqaa keessa taa'a.

⁵ Isin akka ani yeroo isin bira turetti waan kana isinitti himaa ture hin yaadattanii? ⁶ Akka inni yeroo murteeffame sanatti mul'atuufis waan amma isa dhowwu ni beektu. ⁷ Iccitiin humna fincila sanaa amma iyyuu hojiitti jiraatii; garuu inni amma humna sana duubatti deebisu sun hamma karaa irraa fuudhamutti ittuma fufee isa dhowwa. ⁸ Inni Hamaan sun ni mul'ata; Yesuus Gooftaan immoo hafuuruma afaan ofii isaatiin isa galaafata; ifa dhufaatii isaatiinis isa barbadeessa. ⁹ Dhufaatiin namicha isa hamaa sanaa akkuma hojii Seexanaatti humna hundaa fi mallattoon, dinqii sobaatiinis ni ta'a; ¹⁰ innis gowwoomsaa gosa hundaa kan warra badan sana ittiin gowwoomsuun mul'ata. Warri badan sunis sababii dhugaa silaa ittiin fayyan sana jaallachuu didaniif badu. ¹¹ Kanaafuu Waaqni akka isaan soba amananiif waan nama walaalchisu isaanitti erga; ¹² kunis akka warra dhugaatti amanuu didanii jal'inatti gammadan hundatti murtaa'uuf.

Jabaadhaatii Dhaabadhaa

¹³ Nu garuu yaa obboloota Gooftaan jaallatamtan, sababii Waaqni warra jalqabaa godhee akka isin karaa Hafuuraan qulqulleeffamuutii fi karaa dhugaatti amanuutiin fayyitaniif isin filateef yeroo hunda Waaqa galateeffachuu qabna. ¹⁴ Innis akka isin ulfina Gooftaa keenya Yesuus Kiristoos keessatti hirmaattaniif karaa wangeela keenyaatiin kaayyoo kanaaf isin waame.

¹⁵ Egaa yaa obboloota, jabaadhaatii dhaabadhaa; barsiisa nu karaa dubbii afaaniitiin yookaan xalayaan isin barsiifne sana jabeessaatii qabadhaa.

¹⁶ Gooftaan keenya Yesuus Kiristoos mataan isaa, Waaqni Abbaan keenya inni nu jaallatee karaa ayyaana isaatiin jajjabina bara baraatii fi abdiin gaarii nuu kenne sun, ¹⁷ hojii fi dubbii gaarii hunda keessatti garaa keessan haa jajjabeessu; isin haa cimsus.

3

Nuuf Kadhadaa

¹ Egaa yaa obboloota, akka dubbiin Gooftaa akkuma isin biratti ta'e sana dafee iddo hunda ga'uu fi akka ulfinas qabaatu nuuf kadhadaa. ² Akka nu harka namoota hamootii fi jal'ootaa jalaa baanuufis nuuf kadhadaa; amantii kan qabu nama hunda mitii. ³ Gooftaan garuu amanamaa dha; inni isin cimsa; isa hamaa irraas isin eega. ⁴ Nu akka isin waan nu isin ajajne sana hojjechaa jirtan, akka ittuma fuftaniis hojjetan Gooftaa ni amananna. ⁵ Gooftaan garaa keessan gara jaalala Waaqaatii fi gara obsa Kiristoositti haa qajeelchu.

Dirqama Hojii Hojjechuu

⁶ Yaa obboloota, isin obboleessa dhibaa'aa fi kan akka bartee isin nurraa argattan sanaattis hin jiraanne hunda irraa akka fagaattaniif maqaa Gooftaa keenya Yesuus Kiristoosiin isin ajajna. ⁷ Isin mataan keessan akkamitti akka fakkeenya keenya duukaa bu'uu qabdan ni beektuutii. Nu yeroo isin bira turretti dhibaa'ota hin turre; ⁸ nus akka isin keessaa nama tokkotti illee ba'aa hin taaneef jennee, dadhabbii fi tattaaffii guddaan halkanii guyyaa hojjechaa turre malee buddeena nama tokkoo illee tola hin nyaanne. ⁹ Nu fakkeenya isinii ta'uuf waan kana goone malee waan aangoo hin qabneef miti. ¹⁰ Nu yommuu isin bira turretti ajaja, "Namni hojjechuu hin barbaanne kam iyyuu hin nyaatin" jedhu isinii kenninee turreetii.

¹¹ Akka isin keessaa namoonni tokko tokko dhibaa'ota ta'anii jiraatan dhageenyeerraatii. Isaan dhimma nama biraa keessa galuu malee ofii isaaniitii waan tokko illee hin hojjetan. ¹² Namoonni akkanaa akka gab jedhanii hojii hojjetanii fi akka buddeena ofii isaanii nyaataniif Gooftaa Yesuus Kiristoosiin isaan ajajna; ni gorsinas. ¹³ Isin garuu yaa obboloota, waan gaarii hojjechuutti hin laafinaa.

¹⁴ Yoo namni kam iyyuu dubbii keenya kan xalayaa kana keessaatiif hin ajajamne, nama kana yaadatti qabadhaa. Akka inni qaana'uufis isa wajjin tokkummaa hin qabaatinaa. ¹⁵ Ta'us akka obboleessaatti isa gorsaa malee akka diinaatti isa hin ilaalinaa.

Dhaamsa Nagaa Xumuraa

¹⁶ Gooftaan nagaa mataan isaas yeroo hunda, karaa hundaan nagaa isinii haa kennu. Gooftaan hunduma keessan wajjin haa ta'u.

¹⁷ Ani Phaawulos xalayaa kana harkuma kootiin barreessa; kunis mallattoo xalayoota koo hundaa ti. Akki ani itti barreessus kanuma.

¹⁸ Ayyaanni Gooftaa keenya Yesuus Kiristoos isin hunda wajjin haa ta'u.

Xiimotewos Tökkoffaa

Nagaa Gaafachuu

¹ Phaawulos isa ajaja fayyisaa keenya Waaqaatii fi abdii keenya Kiristoos Yesuusiin ergamaa Kiristoos Yesuus ta'e irraa,

² Gara Xiimotewos isa amantiidhaan ilma koo dhugaa ta'eetti:

Waaqa Abbaa fi Gooftaa keenya Kiristoos Yesuus irraa ayyaanni, araarrii fi nagaan siif haa ta'u.

Barsiistota Sobaatiin Mormuu

³ Akkuma ani yeroo Maqedooniyaa dhaqetti si gorse sana ati akka namoonni tokko tokko barsiisa addaa hin barsiifne akka ajajjuuf achuma Efesoon turi; ⁴ akkasumas akka isaan oduu hundee hin qabnee fi hidda dhalootaa kan dhuma hin qabne sanaan hin fudhatamne isaan ajaji. Wannii kun hojii Waaqaa kan amantiin ta'u guddisuu irra mormii kakaasaatii. ⁵ Kaayyoon ajaja kanaas jaalala garaa qulqulluu, qalbii gaarii fi amantiitti fakkeessuu hin qabne keessaa ba'uu dha. ⁶ Namoonni tokko tokko karaa kana irraa badanii gara dubbii faayidaa hin qabneetti gara galaniiru. ⁷ Isaanis maal akka jedhan yookaan akka waa'ee maalii cimsanii dubbatan utuu hin hubatin barsiistota seeraa ta'uu barbaadu.

⁸ Yoo namni sirriitti itti fayyadame seerri gaarii akka ta'e ni beekna. ⁹ Seerri warra seera cabsanii fi finciltootaaf, warra Waaqa malee jiraatanii fi cubbamootaaf, warra qulqulluu hin ta'inii fi xuraa'otaaf, warra abbaa isaaniitti fi haadha isaanii ajjeesanii fi warra nama ajjeesaniif malee akka qajeeltotaaf hin tumamin ni beekna; ¹⁰ akkanumas seerri ejjitootaa fi dhiirota dhiira wajjin sagaagalaniif, warra garba daldalanii fi warra soba dubbataniif, warra sobaan dhugaa ba'anii fi warra barsiisa dhugaatiin morman hundamaaf akka tumame ni beekna; ¹¹ kunis wangeela ulfina qabeessa kan Waaqa eebbifamaa irraa imaanaa natti kenname sana wajjin walii gala.

Ayyaana Gooftaa Kan Phaawulosiif kenname

¹² Waan inni tajaajila isaatiif na filatee akka nama amanamaatti na lakkaa'eef, ani Gooftaa keenya Kiristoos Yesuus isa jabina naa kenne sana nan galateeffadha. ¹³ Ani kanaan dura nama arrabsu, kan nama ari'atuu fi kan nama miidhu ta'u iyyuu sababii ani wallaalummaa fi amanti dhabuun waan kana hojjeheef araara argadhe. ¹⁴ Ayyaanni Gooftaa keenyaas amanti fi jaalala Kiristoos Yesuusiin argamu wajjin baay'inaan narratti dhangalaafame.

¹⁵ Dubbiin, "Kiristoos Yesuus cubbamoota fayyisuudhaaf gara addunyaa dhufe" jedhu sun amanamaa dha; namni hundinuus kana fudhachuu qaba; cubbamoota sana keessaas cubbamaan cubbamoota hunda caalu ana. ¹⁶ Ta'us sababuma kanaaf Yesuus Kiristoos akka ani warra jireenya bara baraa argachuuf isatti amananiif fakkeenya ta'uuf ana nama cubbamoota hunda caalaa cubbamaa ta'een obsa isaa kan dhuma hin qabne sana mul'isuuf jedhee naa araarame. ¹⁷ Egaa Mootii bara baraa, isa hin duune, isa ijatti hin mul'anne Waaqa tokkicha sanaaf bara baraa hamma bara baraatti ulfinii fi galanni haa ta'u. Ameen.

Qajeelchi Xiimotewosiif Kenname Cimsamuu Isaa

¹⁸ Yaa ilma koo Xiimotewos, akkuma raajii kanaan dura waa'ee kee dubbatame sanaatti, akka ati lola gaarii loltuuf ani ajaja kana siifin kenna; ¹⁹ waan kanas amanti fi qalbii qajeelaa qabaachuudhaan godhi. Namoonni tokko tokko waan kana gochuu didanii amanti isaanii balleessaniiru. ²⁰ Himenewoosii fi Iskindiroos warri ani akka isaan Waaqa arrabsuu dhiisuu barataniif dabarsee Seexanatti kenne sun isaan keessatti argamu.

2

Qajeelcha Waa'ee Waaqeffannaa

¹ Egaa ani akka waammachuun, kadhannaan, namaaf kadhachuu fi galanni maqaa nama hundaatiin dhi'effamu duraan dursee nan gorsa; ² nus akka Waaqa sodaachuu hundumaan, ulfinaanis jireenya nagaatii fi tasgabbiin jiraannuuf moototaa fi warra

taayitaa qaban hundumaafis akkasuma haa godhamu. ³ Kunis gaarii dha; fuula Fayyisaa keenya Waaqaa durattis fudhatamaa dha; ⁴ Waaqni akka namni hundinuu fayyuu fi akka dhugaa beekuu biras ga'uu barbaada. ⁵ Waaqni tokkicha; Waaqaa fi nama gidduu immoo gidduu galeessa tokkottu jira; innis Kiristoos Yesuus isa nama ta'ee dha; ⁶ Yesuus kunis isa furii ta'ee nama hundaaf dabarsee of kennee dha; kunis yeroo isaatii mirkaneeffameera. ⁷ Sababii kanaaf ani lallabaa fi ergamaa, Namoota Ormaatiif immoo barsiisaa amantii dhugaa ta'ee mudameen jira. Ani dhugaa dubbadha; hin sobu.

⁸ Kanaafuu ani akka dhiironni iddoo hundatti dheekkamsaa fi wal mormii malee harka qulqullaa'aa ol fudhatanii kadhatan nan barbaada. ⁹ Akkasumas dubartoonni akka hin malletti mataa dha'achuun, warqee yookaan lula naqachuun yookaan uffata gatii guddaa uffachuun utuu hin ta'in akka of qabuu fi naamusaaf ta'utti uffatanii akka of miidhagsan nan barbaada; ¹⁰ isaanis akkuma dubartoota, "Nu Waaqa sodaanna" jedhaniitti waan gaarii haa hojjetan.

¹¹ Dubartiin waan hundaan ajajamuun cal'istee haa barattu. ¹² Ani akka dubartiin cal'istu malee akka barsiiftu yookaan akka dhiira irratti taayitaa qabaattu hin eeyyamu. ¹³ Sababiin isaas Addaam jalqabatti uumame; Hewaan immoo ergasii uumamte. ¹⁴ Addaam hin gowwoomfamne; dubartittiin garuu gowwoomfamtee seera cabsite. ¹⁵ Ta'us dubartoonni yoo amantiin, jaalalaa fi qulqullinaan, naamusaan jiraatan ijoollee da'uudhaan ni fayyuu.

3

Ulaagaa Phaaphaasotaa fi Daaqonootaa

¹ Jechi, "Eenyu iyyuu yoo Phaaphaasii ta'uu hawwe, hojii gaarii hawwa" jedhu kun amanamaa dha. ² Egaa Phaaphaasiin kan mudaa hin qabne, kan niitii tokkittii qabu, amala qabeessa, kan of qabu, kabajamaa, kan keessummaa simatu, kan barsiisuu danda'u, ³ kan hin machoofne, kan goolii kaasu utuu hin ta'in obsa qabeessa, kan lola hin jaallannee fi kan maallaqa hin jaallanne ta'uu qaba. ⁴ Innis maatii ofii isaa sirriitti bulfatee akka ijoolleen isaa kabaja maluun isaaif ajajaman mirkaneessuu qaba. ⁵ Namni tokko yoo maatii ofii isaa akka itti bulfatu hin beekne inni akkamitti waldaa kiristaanaa Waaqaa eeguu danda'aa? ⁶ Inni akka of jajuudhaan afuufamee murtii diiyaabiiloos keessatti hin kufneef nama dhi'oo amane hin ta'in. ⁷ Innis akka hin tuffatamnee fi akka kiyyoo diiyaabiiloos keessattis hin kufneef warra alaa biratti maqaa gaarii haa qabaatu.

⁸ Daaqonoonnis akkasuma namoota kabajaman, warra afaan lama hin dubbanne, warra dhugaatii daadhii wayiniitiin hin fudhatamnee fi warra bu'aa hin malle argachuuf hin tattaaffanne ta'uu qabu. ⁹ Yaada qulqulluunis icciitii amantii jabeessanii qabachuu qabu. ¹⁰ Isaanis duraan dursanii haa qorataman; ergasiis yoo mudaan tokko iyyuu isaan irratti hin argamin daaqonoota ta'anii haa tajaajilan.

¹¹ Akkasumas dubartoonni isaanii kabajamoo, kanneen maqaa nama hin balleessine, amala qabeeyyii fi waan hundaan amanamoo ta'uu qaba.

¹² Daaqoniin tokko dhirsa niitii tokkittii, kan ijoollee isaatii fi warra mana isaa jiraatan sirriitti bulchu ta'uu qaba. ¹³ Warri daaqonummaan sirriitti tajaajilan ulfina guddaa, amantii Kiristoos Yesuusitti qabaniin immoo ija jabina guddaa argatu.

Sababii Phaawulos Qajeelcha Kennuuf

¹⁴ Ani akkan dafee gara kee dhufu abdadhee qajeelfama kana siif nan barreessa; ¹⁵ kanas tarii yoo ani ture, namni tokko akkamitti akka mana Waaqaa keessa jiraachuu qabu akka beektuufin siif barreessa; manni Waaqaa kunis waldaa Waaqa jiraataa isa utubaa fi hundee dhugaa ta'ee dha. ¹⁶ Waaqatti buluun shakkii tokko malee icciitii guddaa of keessaa qaba; kunis, Inni fooniin mul'ate;

Hafuuraan mirkaneeffame;
ergamoota Waaqaatu isa arge;
saboota keessatti lallabame;
addunyaa irratti itti amaname;
ulfinaan ol fudhatame.

4

Qajeelfama Xiimotewosiif Kenname

¹ Akka bara dhufuuf jiru keessa namoonni tokko tokko hafuurota sobaati fi barsiisa hafuurota hamoo duukaa bu'uudhaan amantii dhiisan Hafuurri Qulqulluun ifa baasee dubbata. ² Barsiisni akkasii karaa namoota fakkeessuudhaan sobanii warra qalbiin isaanii akka waan gubaan gubameetti hadoodeetiin dhufa. ³ Isaanis fuudhaa fi heeruma

dhowwu; nyaata Waaqni akka warri amananii fi warri dhugaa beekan galataan fudhatanii nyaataniif jedhee uume sanas akka namoonni lagatan ajaju. ⁴ Wanni Waaqni uume hundinuu waan gaarii ta'eef yoo galataan fudhatame wannu gamatu tokko iyyuu hin jiru; ⁵ inni dubbii Waaqaatii fi kadhannaadhaan qulqulleeffameeraatii.

⁶ Atis yoo wantoota kanneen obbolootatti himte, dubbii amantiitiifi fi barsiisa gaarii duukaa bu'aa turte sanaan bilchaattee tajaajilaa gaarii kan Kiristoos Yesuus taata. ⁷ Oduu xuraa'aa fi mammaaksa beeraa irraa fagaadhu; qooda kanaa nama Waaqaa ta'uuf of leenjisi. ⁸ Leenjiin dhagnaa faayidaa xinnaa qabaatii; Waaqatti buluun garuu jireenya ammaatiifis jireenya dhufuuf jiruufis waan waadaa of keessaa qabuuf waan hundaaf fayyada. ⁹ Jechi kun amanamaa fi kan guutummaan guutuutti fudhatamuu malu dha. ¹⁰ Sababii abdii keenya Waaqa jiraataa isa Fayyisaa nama hundaa keessumattuu kan warra isatti amananii ta'e sana irra kaa'anneef nuus kanaaf jennee ni dadhabna; ni tattaaffannas.

¹¹ Wantoota kanneen ajaji; barsiisis. ¹² Ati dubbiidhaan, amalaan, jaalalaan, amantiifi qulqullinaan warra amananiif fakkeenya ta'i malee namni tokko iyyuu dargaggummaa kee hin tuffatin. ¹³ Hamma ani dhufutti Katabbii Qulqulluu namootaaf dubbisuutti, gorsuu fi barsiisuutti jabaadhu. ¹⁴ Kennaa kee isa yommuu jaarsoliin harka isaanii sirra kaa'anitti karaa raajjiitiin siif kenname sana hin dagatin.

¹⁵ Waan kanattis jabaadhu; akka namni hundinuu guddachuu kee arguufis guutummaan guutuutti itti of kenni. ¹⁶ Jireenya keetii fi barsiisa kee eeggadhu. Ittis jabaadhu; waan kana gochuu keetiinis ofii keetii fi warra si dhaga'an ni fayyifaatii.

5

Maanguddootaa fi Dargaggoota

¹ Nama dulloome tokko akka waan inni abbaa kee ta'eetti gorsi malee hin ifatin. Dargaggootas akka obbolootaatti ilaali; ² dubartoota dullooman akka haadhottiiti, dubartoota shamarran akka obboleettotaatti qulqullummaa guutuun ilaali.

Haadhota Hiyyeessaa

³ Haadhota hiyyeessaa kanneen dhugumaan rakkattoota ta'an kabaji. ⁴ Garuu haati hiyyeessaa tokko yoo ijoollee yookaan akkoowwan qabaatte ijoolleen kunneen maatii isaanii gargaaruu fi warra isaaniiif gatii deebisuudhaan amantii isaanii hojiin mul'isuuf duraan dursanii barachuu qabu; kun Waaqa gammachiisaatii. ⁵ Haati hiyyeessaa kan dhugumaan rakkattuu taatee kophaa ishee hafte abdii ishee Waaqa irra kaa'attee halkanii guyyaa kadhannaa fi gargaarsa Waaqaa gaafachuu itti fuuti. ⁶ Haati hiyyeessaa kan jireenya gammachuutti of gattu garuu utuma jirtuu iyyuu duuteerti. ⁷ Akka namni tokko iyyuu mudaa hin qabaanneef ajaja kana kenni. ⁸ Namni firoota isaa keessumattuu miseensota maatii isaa warra isatti aannan hin gargaarre kam iyyuu amantiifi ganeera; inni nama hin amanne caalaattis hamaa dha.

⁹ Haati hiyyeessaa tokko yoo umurii ishee waggaa jaatamaa ol ta'ee akkasumas niitti dhirsa tokkichaa turte taate malee maqaan ishee galme haadhota hiyyeessaa irratti hin galmeeffamin; ¹⁰ akkasumas isheen hojii gaarii hojjechuudhaan jechuunis ijoollee guddisuudhaan, keessummaa simachuudhaan, miilla qulqullootaa dhiquudhaan, warra rakkatan gargaaruudhaan, karaa hundumaanis hojii gaarii hojjechuu keessatti of kennuudhaan kan beekamte ta'uu qabdi.

¹¹ Haadhota hiyyeessaa* kanneen shamarran ta'an garuu hin galmeessin. Isaan yommuu hawwiin foonii Kiristoos irraa gargar isaan baasutti deebi'anii heerumuu barbaaduutii. ¹² Kanaan isaan waan kakuu isaanii kan jalqabaa cabsaniif murtii ofitti fidu. ¹³ Kana malee manaa gara manaatti labanii dhibaa'ummaa baratu. Dhibaa'ummaa qofa utuu hin ta'in waan dubbachuun isaaniif hin malle dubbachuudhaan nama hamatu; dhimma namaa keessas galu. ¹⁴ Kanaafuu haadhonni hiyyeessaa kanneen ijoollummaa qaban akka carraa maqaa nu balleessuu diinaaf hin kennineef ani akka isaan heeruman, akka ijoollee da'anii fi akka mana isaanii bulfatan nan gorsa. ¹⁵ Namoonni tokko tokko Seexana duukaa bu'uuf jedhanii duraanuu karaa irraa goraniiru.

¹⁶ Dubartiin amantu kam iyyuu yoo haadhota hiyyeessaa maatii ishee keessaa qabaatte, akka waldaan kiristaanaa haadhota hiyyeessaa kanneen dhugumaan rakkattoota ta'an gargaartuuf isheen isaan haa gargaartuu malee akka waldaa kiristaanaatti ba'aa ta'an hin godhin.

* 5:11 5:11 Haadhota hiyyeessaa - haati hiyyeessaa tokko gargaarsa argachuuf mirga qabaachuuf akka bara jireenya ishee guutuu Kiristoosin tajaajiluu malee lammata hin heerumne kakatti.

Jaarsolii Waldaa

¹⁷ Jaarsoliin sirriitti waldaa kiristaanaa bulchan keessumattuu warri hojiin isaanii lallabuu fi barsiisuu ta'e ulfina dachaa argachuu qabu. ¹⁸ Katabbiin Qulqulluun, "Qotiyyoo midhaan sirbiisiisuutti jiru afaan hin hidhin;" akkasumas, "Hojjetaaf mindaa isaa argachuun ni mala?" jedhaatii. ¹⁹ Yoo dhuga baatota lamaan yookaan sadiin mirkaneeffame malee himata jaarsa tokko mormuun dhi'eeffamu kam iyyuu hin fudhatin. ²⁰ Akka warri kaan sodaataniif namoota cubbuu hojjetan fuula namoota hundaa duratti itti dheekkami. ²¹ Ani akka ati waan tokko iyyuu loogiidhaan hin goonee fi akka wal caalchisuu malee ajajawwan kanneen eegduuf fuula Waaqaatii fi fuula Kiristoos Yesuus duratti, fuula ergamoota filatamanii durattis sin gorsa.

²² Eenyu irra iyyuu harka kaa'uuf hin ariifatin; cubbuu nama biraa keessatti hin hirmaatin. Qulqullummaadhaanis of eeggadhu.

²³ Sababii garaa keetiitii fi dhukkuba ammumaa amma sitti ka'u sanaatiif daadhii wayinii xinnoo ishee dhugi malee bishaan gofa hin dhugin.

²⁴ Cubbuun namoota tokko tokkoo duraan dursee ifatti mul'ata; isaan dura darbees lafa murtii ga'a; cubbuun warra kaanii garuu duuba irratti beekama. ²⁵ Hojiin gaariinis akkasuma ifatti mul'ata; kan ifatti hin mul'annes dhokfamee hafuu hin danda'u.

6*Garboota*

¹ Akka maqaan Waaqaatii fi barsiisni keenya hin arrabsamneef warri waanjoo garbummaa jala jiran hundinuu akka ulfinni guutuun gooftota isaaniitiif malutti haa ilaalan. ² Warri gooftota amanana qabanis sababii isaan obboloota ta'aniif isaan hin tuffatin. Qooda kanaa warri tajaajila isaaniitiin fayyadaman sun waan isaan amantootaa fi jaallatamtoota ta'aniif ittuma cimsanii isaan haa tajaajilan.

Barsiistota Sobaa fi Jaalala Maallaqaa

Atis waan kana barsiisi; gorsis. ³ Eenyu iyyuu yoo barsiisa addaa barsiise, yoo dubbii dhugaa kan Gooftaa keenya Yesuus Kiristoosii fi barsiisa nama Waaqaa ta'uuf fayyaduun walii hin galle, ⁴ inni of tuulummaan guutameera; waan tokko iyyuus hin hubatu. Inni waa'ee jechootaa irratti morkii fi lolaaf fedhii hamaa qaba; kunis hinaaffaa, wal dhabuu, arrabsoo fi shakkii hamaa fida; ⁵ namoota qalbiin isaanii badee dhugaanis irraa fudhatame kanneen Waaqatti buluu karaa ittiin maallaqni argamu se'an gidduuttis walitti bu'iisa dhuma hin qabnetu uumama.

⁶ Waaqatti buluun, "Wanni ani qabu na ga'a" jechuu of keessaa qabaannaan kun dhugumaan faayidaa guddaa qaba. ⁷ Nu waan tokko illee gara addunyaatti waan hin fidiniif, waan tokko illee addunya keessaa fudhachuu hin dandeenyu. ⁸ Garuu waan nyaannuu fi waan uffannu qabaannaan nu ga'a. ⁹ Warri sooromuu barbaadan garuu qorumsaa fi kiyyoo, hawwii gowwummaa fi miidhaa baay'ee fidu kan diigamaa fi badiisatti nama dhidhimsu keessatti kufu. ¹⁰ Maallaqa jaallachuun hidda hammina gosa hundumaatii. Namoonni tokko tokko akka malee maallaqa jaallachuun amantii irraa badanii dhiphina baay'een of waraananiiiru.

Gorsa Xiimotewosiif Kenname Kan Dhumaa

¹¹ Ati garuu yaa nama Waaqaa, waan kana hunda irraa baqadhu; qajeelummaa, Waaqatti buluu, amantii, jaalala, obsaa fi garraamummaa duukaa bu'i. ¹² Wal'aansoo amantii gaarii sana qabi. Jireenya bara baraa kan yeroo fuula dhuga baatota baay'ee duratti akka gaarii beeksiftetti itti waamante sana jabeessii qabadhu. ¹³ Ani fuula Waaqa waan hundaaf jireenya kennuu duratti, fuula Kiristoos Yesuus kan yommuu Phonxoos Phiilaaxoos duratti dhugaa ba'etti akka gaarii beeksise sanaa durattis, ¹⁴ akka ati hamma dhufaatii Gooftaa keenya Yesuus Kiristoositti ajaja kana xurii fi mudaa malee eegdas sin gorsa. ¹⁵ Waaqni eebbifamaanii fi Bulchaan tokkichi, Mootiin moototaa fi Gooftaan gooftotaa yeroo isaatti waan kana ni mul'isa; ¹⁶ kan hin duune isa qofa; innis ifa namni tokko iyyuu itti dhi'aachuu hin dandeenye keessa jiraata; eenyu iyyuu isa hin argine; isa arguus hin danda'u. Ulfirii fi humni bara baraan isaa haa ta'u. Ameen.

¹⁷ Ati akka sooreyyiin addunya kanaa of tuuluu yookaan qabeenya badu abdachuu dhiisanii Waaqa akka nu itti gammannuuf jedhee waan hunda baay'isee nuu kennu sana abdataniif isaan ajaji. ¹⁸ Akka isaan waan gaarii hojjetan, akka badhaadhummaan isaanii hojii gaarii ta'u, akka arjooman, akka waan qabanis qooduuf fedhii qabaatan isaan ajaji. ¹⁹ Isaanis karaa kanaan jireenya dhugumaan jireenya ta'e qabaachuuf jedhanii badhaadhummaa hundee jabaa ta'u bara dhufuuf jiruuf ofii isaaniitii kuufatu.

²⁰ Yaa Xiimotewos, waan imaanaa sitti kenname jabeessii eegi. Oduu Waaqni hin jaallannee fi yaada mormii kan sobaan “Beekumsa” jedhamu irraa fagaadhu; ²¹ namoonni tokko tokko, “Nu beekumsa akkasii qabna” jechuun amantii irraa badaniiruutii.

Ayyaanni isin wajjin haa ta’u.

Xiimotewos Lammaffaa

¹ Phaawulos isa akkuma waadaa jireenya karaa Kiristoos Yesuusiin galame sanaatti fedhii Waaqaatiin ergamaa Kiristoos Yesuus ta'e irraa,

² Gara Xiimotewos, ilma koo jaallatamaatti:

Abbaa keenya Waaqaa fi Gooftaa keenya Kiristoos Yesuus irraa ayyaanni, araarrii fi nagaan siif haa ta'u.

Galateeffachuu

³ Ani yommuu utuu gargar hin kutin halkanii guyyaa kadhannaa koo keessatti si yaadadhutti Waaqa akkuma abbootii kootii anis yaada qulqulluun isa waaqeffadhu sana nan galateeffadha. ⁴ Ani yommuun imimmaan kee yaadadhutti akka gammachuudhaan guutamuu guddisee si arguu nan hawwa. ⁵ Ani amantii kee isa dhugaa sana nan yaadadha; amantiin kunis jalqabatti akkoo kee Loo'isii fi haadha kee Ewuunqee keessa ture; amma immoo akka si keessa jiru nan amana.

Akka Phaawulosii fi Wangeelaaf Of Kennaniif Sossobachuu

⁶ Sababii kanaaf ani akka ati kenna Waaqaa kan yeroo ani harka koo sirra kaa'etti siif kenname sana akka ibiddaatti akka qabsiiftuuf sin yaadachiisa. ⁷ Waaqni hafuura humnaa, kan jaalalaatii fi kan of dhowwuun nuu kenne malee hafuura sodaa nuuf hin kennineeti. ⁸ Kanaafuu waa'ee Gooftaa keenyaa dhugaa ba'uutti yookaan ana nama isaaf jedhee hidhametti hin qaana'in. Wangeelaaf dhiphachuu keessatti garuu humna Waaqaatiin na wajjin hirmaadhu; ⁹ Waaqni sababii kaayyoo isaatii fi sababii ayyaana isaatiif nu fayyisee gara jireenya qulqulluutti nu waame malee sababii hojii nu hojjenne kamiif iyyuu miti. Ayyaanni kunis uumama addunyaatiin dura karaa Kiristoos Yesuusiin nuu kenname; ¹⁰ amma garuu ayyaanni sun dhufaatii Fayyisaa keenya Kiristoos Yesuus isa karaa wangeelaatiin du'a balleessee jireenyaa fi badiisa ooluu ifatti baase sanaatiin mul'ifameera. ¹¹ Anis wangeela kanaaf lallabaa, ergamaa fi barsiisaa ta'ee muudameera. ¹² Anis akka amma jiru kanatti dhiphachuun koo kanumaaf. Ani garuu eenyun akka amane waan beekuuf hin qaana'u; akka inni waan ani imaanaa itti kennadhe hamma guyyaa sanaatti eeguu danda'us nan amana.

¹³ Waan narraa dhageesse sana akka fakkeenya barsiisa dhugaatti amantii fi jaalala Kiristoos Yesuusiin qabdu jabeessii qabadhu. ¹⁴ Waan gaarii imaanaa sitti kenname sana gargaarsa Hafuura Qulqulluu nu keessa jiraatu sanaatiin eegi.

Fakkeenya Of Kennuu Dhabuu fi Of Kennuu

¹⁵ Namoonni biyya Asiyaa keessa jiraatan hundinuu akka narraa gara galan ni beekta; Fiigeloosii fi Hermoogenees isaan keessa jiru.

¹⁶ Onesifooros yeroo baay'ee waan na boqochiiseef Gooftaan warra mana isaa jiraataniif araara haa buusu; inni hidhamuu kootti illee hin qaanofneetii. ¹⁷ Akkasumas inni yeroo Roomaa dhufetti hamma na argutti dhimmee na barbaadaa ture. ¹⁸ Akka inni guyyaa sanatti Gooftaa irraa araara argatuuf fedhii Gooftaa haa ta'u! Inni Efesoon keessatti karaa baay'een akka na tajaajile ati iyyuu sirriitti beekta.

2

Sossobachuun Haaromfame

¹ Kanaafuu yaa ilma ko, ayyaana Kiristoos Yesuusiin jabaadhu. ² Waan fuula dhuga baatota baay'ee duratti narraa dhageesse sana namoota amanamoo kanneen warra kaan barsiisuu danda'anitti imaanaa kenni. ³ Atis akkuma loltuu jabaa kan Kiristoos Yesuusiitti nu wajjin dhiphadhu. ⁴ Namni loltummaan tajaajilu kam iyyuu ajajaa isaa gammachiisuu yaala malee dhimma jireenyaatiin of hin xaxu. ⁵ Akkasumas dorgomaan tokko yoo akka malutti dorgome malee gonfoo hin argatu. ⁶ Qonnaan bulaan jabaatee hojjetus ija qooddachuutti nama jalqabaa ta'uu qaba. ⁷ Waan ani sitti himu kana qalbeeffadhu; Gooftaan waan hunda keessatti hubannaa siif kennaatii.

⁸ Yesuus Kiristoos isa warra du'an keessaa kaafame, isa sanyii Daawit irraa dhalate yaadadhu. Kun wangeela koo ⁹ kan ani isaaf jedhee akka nama yakka hojjete tokkootti hamma foncaan hidhamuutti dhiphachaafii jiruu dha. Dubbiin Waaqaa garuu hin

hidhamu. ¹⁰ Kanaafuu akka warri filataman fayyina Kiristoos Yesuusiin ta'e sana ulfina bara baraa wajjin argataniif ani isaaniif jedhee waan hundumaa nan obsa.

¹¹ Dubbichi amanamaan akkana jedha:

Nu isa wajjin yoo duune,
isa wajjin ni jiraanna;

¹² nu yoo obsine,
isa wajjin ni moona.

Nu yoo isa ganne,
innis nu gana.

¹³ Nu yoo amanamoo ta'uu baanne,
inni amanamaa ta'ee jiraata;
inni of ganuu hin danda'uutii.

Waa'ee Barsiistota Sobduu

¹⁴ Wantoota kanneen isaan yaadachiisi; waa'ee jechootaatiinis akka wal hin lolleef fuula Waaqaa duratti isaan akeekkachiisi; wanni akkasii warra dhaga'an ni diiga malee waa tokko illee hin fayyaduutii. ¹⁵ Atis dubbii dhugaa sana sirriitti qabachuudhaan hojjetaa qoratamee fudhatame kan itti hin qaanofne ta'iitii fuula Waaqaa duratti of dhi'eessuuf tattaaffadhu. ¹⁶ Garuu dubbii faayidaa hin qabne irraa fagaadhu; dubbiin akkasii ittuma caalchisee nama Waaqaa ta'uu irraa nama fageessaatii. ¹⁷ Barsiisni isaaniis akka dhukkuba gaangiriinii* babal'achaa deema. Himenewoosii fi Filexoosis isaan keessatti argamu; ¹⁸ isaanis du'aa ka'uun ta'ee darbeera jechuudhaan dhugaa irraa fagaataniiru. Amantii namoota tokko tokkoos ni balleessu. ¹⁹ Garuu hundeen Waaqaa hin sochoofanne kan chaappaa, "Gooftaan warra kan isaa ta'an ni beeka,"† akkanumas "Namni maqaa Gooftaa waammatu hundi hammina irraa haa deebi'u" jedhuun chaappeffame jabaatee dhaabateera.

²⁰ Mana guddaa tokko keessa mi'a warqeetii fi meetii qofa utuu hin ta'in, mi'i mukaatii fi suphees jira; kana keessaas tokko tokko ulfinaaf, kaan immoo salphinaaf oola. ²¹ Namni tokko yoo salphina kana irraa of qulqulleesse, inni mi'a ulfinaa kan qulqulleeffame, kan Gooftaa isaa fayyaduu fi kan hojii gaarii kam iyyuu hojjechuuf qopheeffame ta'a.

²² Atis hawwii hamaa yeroo dargaggummaa irraa baqadhu; warra garaa qulqulluun Gooftaa waammatan wajjin qajeelummaa, amantii, jaalalaa fi nagaa duukaa bu'i. ²³ Falmii faayidaa hin qabnee fi gowwummaa keessa hin seenin; kun akka lola fidu atuu ni beektaatii. ²⁴ Garbichi Gooftaa kan nama hundumaaf garaa laafu, kan barsiisuu danda'uu fi obsa qabeessa ta'uu qaba malee kan namaan wal lolu ta'uu hin qabu. ²⁵ Innis akka Waaqni qalbii jijjiirranmaa gara dhugaa beekuutti isaan geessu isaaniif kennu abdachaa warra isaan morman garraamummaan sirreessuu qaba; ²⁶ akkasiinis isaan qalbii horatanii kiyoo diyaabiloos kan akka isaan fedhii isaa guutaniif isaan booji'e sana jalaa ba'u.

3

Waan Guyyoota Dhumaa Keessa Ta'u

¹ Garuu guyyoota dhumaa keessa yeroon rakkinna akka dhufu hubadhu. ² Namoonni of jaallattoota, jaallattoota maallaqaa, of jajjoota, of tuultota, warra Waaqaa arrabsan, warra abbaa fi haadha isaaniitiif hin ajajanne, warra hin galateeffanne, warra qulqullummaa hin qabne, ³ warra jaalala hin qabne, warra dhiifama hin goone, warra maqaa nama balleessan, warra of hin qabne, gara jabeeyyii, warra waan gaarii hin jaallanne, ⁴ gantoota, warra akka malee jarjaran, warra of bokoksan, warra Waaqaa jaallachuu irra waan isaan gammachiisu jaallatan ni ta'u; ⁵ warra Waaqaaf bulan ni fakkaatu; garuu humna isaa ni ganu. Ati warra akkasii irraa fagaadhu.

⁶ Isaan warra manneen seenuudhaan dubartoota dadhaboo warra cubbuun isaan irra tuulamee fi warra hawwii gosa hundaatiin asii fi achi raafaman booji'anii dha; ⁷ dubartoonni kunneen yeroo hunda ni baratuu; garuu gonkumaa dhugaa beekuutti dhufuu hin danda'an. ⁸ Akkuma Yaaneesii fi Yaambiirees Museen morman sana namoonni qalbiin isaanii badee waa'ee amantiitti fudhatama dhaban kunneenis dhugaadhaan ni mormu. ⁹ Ta'us gowwummaan isaanii waan akkuma namoota sanaa nama hunda biratti ifatti ba'uuf isaan fagoo hin deeman.

Gorsa Xiimotewosiif Kenname Kan Dhumaa

* 2:17 2:17 Dhukkuba madaan isaa hin fayyine. † 2:19 2:19 Lak 16:5

¹⁰ Ati garuu barsiisa ko, haala jireenya koo, kaayyoo koo, amantii koo, obsa koo, jaalala koo, jabaadhee dhaabachuu koo hundumaa duukaa buuteerta; ¹¹ ari'atamuu koo, rakkina kootii fi waan Anxookiyyaatti, Iqooniyoonii fi Lixsiraanitti narra ga'e, ari'atama garaa garaa kan ani obsaan keessa darbes duukaa buuteerta. Gooftaan garuu waan kana hunda jalaa na baase. ¹² Dhugumaanuu namni Kiristoos Yesuusiin nama Waaqaa ta'ee jiraachuu barbaadu kam iyyuu ni ari'atama; ¹³ namoonni hamoonii fi gowwoomsitoonni garuu nama gowwoomsaa, of illee gowwoomfamaa hamminaan ittuma caalaa deemu. ¹⁴ Ati garuu waan barattee fi waan hubatte sanatti jabaadhu; eenyu irraa akka baratte beektaatii; ¹⁵ akkasumas ati ijoollummaa keetii jalqabdee Katabbiwwan Qulqulluu kanneen waa'ee fayyina karaa Kiristoos Yesuusitti amanuutiin argamu sanaaf ogeessa si taasisuu danda'an akkamitti akka baratte ni beekta. ¹⁶ Katabbiin Qulqulluun hundi hafuura afaan Waaqaatii ba'een kennaman; isaanis barsiisuuf, akeekkachiisuuf, sirreessuu fi qajeelummaan leenjisuuf ni fayyadu; ¹⁷ kunis akka namni Waaqaa hojii gaarii hundumaaf guutummaatti hidhatee qophaa'uuf.

4

Dubbicha Akka Lallabu Ajajuu Isaa

¹ Ani fuula Waaqaa duratti, fuula Kiristoos Yesuus isa warra jiraatanii fi warra du'anitti muruuf jiruu durattis mul'achuu isaatii fi mootummaa isaatiin sin gorsa. ² Dubbicha lallabi; yeroo mijaa'aattis ta'u yeroo hin mijooftetti qophaa'i; obsa guddaa fi barsiisa of eeggannaatiin sirreessi; ifadhu; jajjabeessis. ³ Yeroon itti namoonni barsiisa dhugaa dhaga'uuf obsa hin qabaanne ni dhufaatii. Qooda kanaa akka waan gurri isaanii inni hoogsisu sun dhaga'uu barbaadu itti himaniif hawwii isaanii guutachuuf barsiistota baay'ee ofii isaaniitiif walitti qabatu. ⁴ Gurra isaanis dhugaa dhaga'uu irraa garagalchanii gara oduu hundee hin qabneetti deebisu. ⁵ Ati garuu waan hunda keessatti ilaallachaa deemi; rakkina obsi; hojii tajaajilaan wangeelaa tokko hojjetu hojjedhu; tajaajila kees fiixaan baasi.

⁶ Ani ammuma iyyuu akka dhibaayyuutti dhangalaafamuuf qophaa'eera; yeroon deemsa koos ga'eera. ⁷ Ani lola gaarii loleera; dorgommii xumureera; amantiis eegeera. ⁸ Amma gonfoon qajeelummaa na eeggata; isas Abbaa Murtii qajeelaa, Gooftichatu guyya sana naa kenna; kanas warra mul'achuu isaa jaallatan hundaaf kenna malee ana qofaaf miti.

Yaadachiisa Dhuma

⁹ Dafii gara koo kottu; ¹⁰ Deemaas addunyaa kana jaallatee na dhiisee gara Tasaloniqqee deemeeraatii. Qeerqis gara Galaatiyaa, Tiitoon immoo gara Dilmaaxiyaa deemaniiru. ¹¹ Luqaas qofatu na bira jira. Maarqos waan tajaajila koo keessatti na gargaaruuf isa of duukaa fidii kottu. ¹² Ani Xikiqoosin Efesootti ergeera. ¹³ Ati yommuu dhuftutti waaroo ani Xiroo'aasitti Kaariphoos biratti dhiisee fi kitaabota maramoo, keessumattuu kitaabota gogaa duugamaa sana naa fidi.

¹⁴ Iskindiroos tumtuun naasii sun akka malee natti hammaate. Gooftaan akka hojii isaatti ni deebisaaf. ¹⁵ Namichi kun waan akka malee ergaa keenya mormeeff atis isa irraa of eeggachuu qabda.

¹⁶ Yeroo ani falmata koo kan jalqabaa dhi'effadhetti hundi isaanii iyyuu na dhiisanii deeman malee namni tokko iyyuu na hin gargaarre. Anis akka wanni kun isaanitti hin lakkaa'amneef Waaqaa nan kadhada. ¹⁷ Garuu akka karaa kootiin ergaan guutummaatti lallabamuu fi akka Namoonni Ormaa hundi dhaga'aniif Gooftaan na bira dhaabatee na jajjabeesse. Anis afaan leencaa jalaa nan baafame. ¹⁸ Gooftaan waan hamaa hunda jalaa na baasee mootummaa isaa kan samiiti nagumaan na galcha. Bara baraa hamma bara baraatti ulfinni isaaf haa ta'u. Ameen.

Dhaamsa Nagaa Xumuraa

¹⁹ Phirisqilaa fi Aqjilaatti, warra mana Oneesifooros jiraatanittis nagaa naa himi.

²⁰ Erisxoos Qorontositti hafe; Xiroofiimoos immoo dhukkubsannaan ani Miilexoositti isa dhiise. ²¹ Gannaan dura dafii kottu.

Ewugiloos nagaa siif dhaama; Phuudenis, Liinoos, Qilaawudiyaa fi obbolooni hundinuus akkasuma nagaa siif dhaamu.

²² Gooftaan hafuura kee wajjin haa ta'u. Ayyaanni si wajjin haa ta'u.

Tiitoo

Nagaa gaafachuu

¹ Phaawulos isa amantii filatamtoota Waaqaatii fi dhugaa beekuu gara Waaqaaf buluutti nama geessuuf garbicha Waaqaatii fi ergamaa Yesuus Kiristoos ta'e irraa; ² kunis abdi jireenya bara baraa isa Waaqni hin sobne sun jalqaba addunyaatiin dura waadaa gale irratti kan hundeeffamee dha; ³ innis yommuu yeroon murteeffame sun ga'etti karaa lallaba isa ajaja Fayyisaa keenya Waaqaatiin imaanaa natti kennameetiin dubbii isaa ifatti baaseera,

⁴ Gara Tiitoo isa amantii walii wajjin qabnuun ilma koo dhugaa ta'eetti:

Waaqa Abbaa fi Fayyisaa keenya Kiristoos Yesuus irraa ayyaannii fi nagaan siif haa ta'u.

Jaarsolii Waan Gaarii Jaallatan Filachuu

⁵ Sababiin ani Qareexitti si hambiseef akka ati waan utuu hin xumuramin hafe toora qabsiiftuu fi akkuma ani si ajajettis magaalawwan hunda keessatti jaarsolii muudduuf ture. ⁶ Jaarsi tokko kan mudaa hin qabne, dhirsa niitii tokkittii, kan ijoolleen isaa amananii jireenya gad dhiisiitii fi ajajamuu diduun maqaan isaanii hin badin ta'uu qaba. ⁷ Phaaphaasiin tokko sababii hojiin Waaqaa imaanaa isatti kennameef inni nama mudaa hin qabne ta'uu qaba malee kan of tuulu, kan dafee aaru, kan machaa'u, kan lola jaallatuu fi kan karaa hin malleen bu'aa argachuuf tattaaffatu ta'uu hin qabu. ⁸ Qooda kanaa inni nama keessumaa simatu, nama waan gaarii jaallatu, kan of qabu, qajeelaa, qulqulluu fi nama naamusa qabu ta'uu qaba. ⁹ Inni akka barsiisa dhugaatiin warra kaan gorsuu, warra barsiisa sanaan morman immoo akka dogoggora isaanii itti himee amansiisuu danda'uuf akkuma barsiifametti dubbii amanamaa sana jabeessee qabachuu qaba.

Warra Waan Gaarii Hin hojjenne Ifachuu

¹⁰ Finciltoonni baay'een, warri dubbii faayidaa hin qabne dubbatanii fi gowwoom-sitoonni keessumattuu miseensonni garee warra dhagna qabatani hadduutu jiraatii. ¹¹ Isaan bu'aa hin malle argachuuf jedhani waan barsiisuun isaan irra hin jirre barsiisuudhaan waan maatii guutuu diiganiif afaan qabachiifamuu qabu. ¹² Raajota isaanii keessaa tokko, "Warri Qareexi yeroo hunda sobdoota; bineensota hamoo dha; albaadheyyii dhibaa'oo dha" jedheera. ¹³ Dhuga ba'umsi kun dhugaa dha. Kanaafuu akka isaan amantii dhugaa qabaataniif jabeessii isaan ifadhu. ¹⁴ Akka isaan mammaaksa Yihuudootaa kan hundee hin qabne yookaan ajaja warra dhugaadhaan mormanii duukaa hin buuneefis jabeessii isaan ifadhu. ¹⁵ Warra qulqullaa'oof wanni hundinuu qulqulluu dha; warra xuraa'oo fi warra hin amanneef garuu wanni tokko iyyuu qulqulluu miti. Dhugumaanuu yaadni isaanitiifi fi qalbiin isaanii xuraa'eera. ¹⁶ Isaan nu Waaqa beekna jedhu; hojii isaanitiin garuu isa ganu. Isaan jibbamoo dha; warra hin ajajamnee fi warra waan gaarii tokko iyyuu hojjechuuf ga'umsa hin qabnee dha.

2

Wangeelaaf Jecha Waan Gaarii Hojjechuu

¹ Ati garuu waan barsiisa dhugaa wajjin deemu barsiisi. ² Jaarsoliin akka amala qabeeyyii, kabajamoo fi warra of qaban ta'aniif, akkasumas akka warra amantii dhugaa, jaalalaa fi obsa qabaatan barsiisi.

³ Akkasuma immoo jaartoliin akka jireenya isaanitiin kabajamoo ta'an, akka waan gaariis barsiisan malee akka maqaa nama hin balleessine yookaan akka dhugaatii daad-hii wayinii baay'etiin hin fudhatamne isaan barsiisi. ⁴ Yoos isaan akka dubartoonni shamarran dhirsoota isaanii fi ijoollee isaanii jaallatan barsiisuu ni danda'u; ⁵ akka dubbii Waaqaa hin tuffatamneefis akka of qaban, akka qulqullaa'an, akka hojii mana keessaatiin qabaman, akka arjoota ta'an, akka dhirsoota isaanitiifi ajajaman ni barsiisi.

⁶ Akkasumas dargaggoonni akka of qabaniif gorsi. ⁷ Waan hunda keessatti waan gaarii hojjechuun fakkeenya isaanii ta'i. Barsiisa kee keessatti amanamaa, kabajamaa fi nama akka salphaatti hin ilaalanne ta'i; ⁸ akka warri siin morman waa'ee keenya waan

hamaa dubbatan tokko illee dhabanii qaana'aniifis dubbii dhugaa kan tuffatamuu hin dandeenye dubbadhu.

⁹ Garboonni waan hundaan akka gooftota isaaniitiif ajajaman, akka gooftota isaanii gammachiisuu yaalan, akka waan gooftonni isaanii dubbataniif deebii mormii hin deebifne barsiisi; ¹⁰ akka isaan gooftota isaanii jalaa hin hanne, garuu akka barsiisni Fayyisaa keenya Waaqaa karaa hundumaan hawwataa ta'u gochuuf akka isaan amanamummaa guutuu argisiisan barsiisi.

¹¹ Ayyaanni Waaqaa kan fayyina fidu nama hundatti mul'ifameeraatii. ¹² Ayyaanni kunis Waaqa malee jiraachuu fi hawwii addunyaa ganuun bara kana keessa jireenya of qabiisaa, jireenya qajeelummaatii fi jireenya Waaqatti buluu akka jiraannu nu barsiisa; ¹³ kunis yommuu nu abdii keenya isa eebbifamaa jechuunis mul'achuu ulfina Waaqa keenya guddichaatii fi Fayyisaa keenya Yesuus Kiristoos eeggachaa jirrutti ta'a; ¹⁴ innis hammina hunda irraa nu furuu fi saba ofii isaa warra waan gaarii hojjechuuf hinaafan ofiif qulqulleffachuuf jedhee of dabarsee nuuf kenneera.

¹⁵ Egaa wantoonni ati barsiisuu qabdu kanneenii dha. Taayitaa guutuun jajjabeessi; ifadhus. Namni tokko iyyuu si hin tuffatin.

3

Waan Gaarii Hojjechuudhaaf Fayyifamuu

¹ Ati akka namoonni bulchitootaa fi abbootii taayitaatiif bulan, akka ajajamanii fi akka waan gaarii kam iyyuu hojjechuuf qophaa'oo ta'an yaadachiisi; ² akka isaan maqaa nama tokko illee hin balleessine, akka namoota nagaatii fi obsa qabeeyyii ta'an, akka nama hundaaf garraamummaa argisiisanis yaadachiisi.

³ Nu mataan keenyas duraan warra gowwoota, warra hin ajajamne, warra gowwoomfamnee fi warra dharraa hamaa fi gammachuu gosa hundaatiif garboomfamne turre. Namootaan jibbamaa fi walis jibbaa, hamminaa fi hinaaffaan jiraachaa turre. ⁴ Yommuu gaarummaa fi jaalalli Fayyisaa keenya Waaqaa mul'atetti garuu, ⁵ inni sababii qajeelummaa nu hojjenneetiif utuu hin ta'in sababii araara isaatiif jedhee nu fayyise. Inni dhiqannaa lammata dhalachuutii fi haaromsuu Hafuura Qulqulluutiin nu fayyise; ⁶ hafuurri kunis isa Waaqni karaa Fayyisaa keenya Yesuus Kiristoosiin arjummaadhaan nurratti dhangalaase sana; ⁷ kunis akka nu ayyaana isaatiin qajeeltota taasifamnee abdii jireenya bara baraa qabaachuun dhaaltota taanuuf. ⁸ Jechi kunis amanamaa dha. Warri Waaqa amanatan akka waan gaarii hojjechuuf of eeggannaan of kennan, akka ati cimsitee waan kana dubbattu nan barbaada. Kunis waan akka malee gaarii fi waan nama hundumaa fayyaduu dha.

⁹ Ati garuu falmii faayidaa hin qabnee fi hidda dhaloootaa lakkaa'uu irraa, waa'ee seeraa irratti wal mormuu fi wal loluu irraa fagaadhu; kun waan bu'aa hin qabnee fi waan hin fayyadnee dhaatii. ¹⁰ Nama gargar ba'uu fidu tokko yeroo tokko akeekkachiisi; yeroo lammaffaas akeekkachiisi. Ergasii immoo isa irraa fagaadhu. ¹¹ Namni akkasii akka micciiramaa fi cubbamaa ta'e atu beekta; inni nama ofuma isaatti muruu dha.

Gorsa Dhumaa

¹² Ani waanan yeroo gannaa Niqoophiliyoonitti dabarsuuf murteesseef akkuma ani Arxemaas yookaan Xikiqoosin sitti ergeen dafii kottu. ¹³ Zenaas abukaattichaa fi Apholoosin imala isaanii irratti gargaaruuf waan dandeessu hunda godhi; waan isaan barbaachisu hunda qabaachuu isaanii illee mirkaneessi.

¹⁴ Namoonni keenya akka waan guyyaa guyyaatti isaan barbaachisu hojjetanii argatanii fi akka jireenya bu'aa hin qabne hin jiraanneefis waan gaarii hojjechuuf of kennuu barachuu qabu.

¹⁵ Warri na wajjin jiran hundinuu nagaa siif dhaamu. Warra amantiin nu jaallatanitti nagaa nuuf himi.

Ayyaanni hunda keessan wajjin haa ta'u.

Fiilmoonaa

Nagaa Gaafachuu

¹ Phaawulos isa Kiristoos Yesuusiif jedhee hidhamee fi obboleessa keenya Xiimotewos irraa,

Gara Fiilmoonaa isa jaallatamaa fi hojjetaa hidhata keenya ta'e sanaatti; ² akkanumas gara obboleettii keenya Aphifiyaatti, gara Arkiphaa isa nu wajjin loltuu ta'eetti, gara waldaa kiristaanaa ishee mana keetti walitti qabamtuuttiis:

³ Abbaa keenya Waaqaa fi Yesuus Kiristoos Gooftaa irraa ayyaannii fi nagaan isiniif haa ta'u.

Galata Galchuu fi Kadhannaa

⁴ Ani yeroo kadhannaa koo keessatti si yaadadhu hunda Waaqa koo nan galateeffadha; ⁵ ani waa'ee amantii kee kan ati Gooftaa Yesuusitti qabduu fi waa'ee jaalala kee kan ati qulqulloota isaa hundaaf qabduu nan dhaga'aatii. ⁶ Ani akka ati waa'ee waan gaarii nu Kiristoosiin qabnu hundumaa hubannaa guutuu qabaatee amantii kee namaan ga'uuf jabaattu nan kadhadha. ⁷ Yaa obboleessa, waan ati garaa qulqullootaa qabbaneessiteef jaalalli kee gammachuu fi jajjabina guddaa naa kenneera.

Phaawulos Oneesimoosiif Kadhachuu Isaa

⁸ Kanaafuu ani akka ati waan hojjechuu qabdu hojjetu si ajajuuf yoo Kiristoosiin ija jabina qabaadhe illee, ⁹ sababii jaalalaatiif cimseen si kadhadha. Egaa ani Phaawulos jaarsichii fi ammas Kiristoos Yesuusiif kanan hidhame, ¹⁰ ilma koo Oneesimoos isa ani hidhamuu kootiin dhalche sanaaf sin kadhadha. ¹¹ Inni kanaan dura nama homaa si hin fayyadne ture; amma garuu siifis anaafis nama faayidaa qabu ta'eera.

¹² Ani isa, nama akka garaa kootii sana deebisee gara keetti nan erga. ¹³ Ani yeroon wangeelaaf hidhametti inni iddoo kee bu'ee akka na tajaajiluuf of biratti isa hambifachuu barbaadeen ture. ¹⁴ Ani garuu gaarummaan kee utuu dirqamaan hin ta'in fedhiidhaan akka ta'uuf waanuma tokko illee eeyyama kee malee gochuu hin barbaanne. ¹⁵ Tarii inni yeroo gabaabaaf siin gargar ba'uun isaa akka ati deebiftee isa simattee hamma dhumaatti of bira tursituuf ta'a; ¹⁶ atis si'achi akka garbichaatti utuu hin ta'in, akka obboleessa jaallatamaa garbicha caalu tokkootti isa simadhu. Inni keessumattuu erga anaaf akkas jaallatamaa ta'e siif immoo fooniinis Gooftaadhaanis hamma caalaa jaallatamaa haa ta'u ree?

¹⁷ Egaa ati yoo akka michuu keetiitti na ilaalte akkuma na simatutti isas simadhu. ¹⁸ Yoo inni waanuma tokkoon illee si yakkee jiraate yookaan ati yoo waanuma tokko illee isa irraa qabaatte natti lakkaa'i. ¹⁹ Ani Phaawulos siifan kaffala jedhee harkuma kootiin barreesseera. Akka ati mataan kee iyyuu kan koo taate ani homaa sitti hin himu. ²⁰ Egaa yaa obboleessa, ani Gooftaadhaan faayidaa kana sirraa argachuu nan barbaada; Kiristoositti garaa koo naa qabbaneessi. ²¹ Akka ati waan ani si kadhadhu caalaa naa gootu beekuudhaan ajajamuu kee amanadhee siifan barreessa.

Nagaa Dhaamuu fi Eebbisuu

²² Kana malees ani kadhannaa keessaniin akkan isiniif kennamu waanan abdadhuuf mana boqonnaa naa qopheessi.

²³ Ephaafiraan inni Kiristoos Yesuusiif jedhee na wajjin hidhame nagaa siif dhaama.

²⁴ Akkasumas warri na wajjin hojjetan Maarqos, Arisxirokoos, Deemaasii fi Luqaas nagaa siif dhaamu.

²⁵ Ayyaanni Gooftaa keenya Yesuus Kiristoos hafuura keessan wajjin haa ta'u.

Ibroota

Dubbii Waaqayyoo Kan Xumuraa: Ilma Isaa

¹ Bara durii Waaqni yeroo baay'ee fi karaa adda addaatiin raajotaan abbootii keenyatti dubbatee ture; ² bara dhumaa kana keessa garuu Ilma isaa kan inni dhaaltuu waan hundumaa godhee muudeen nutti dubbate; isumaanis addunyaawwan uume. ³ Ilmi calaqqisa ulfina Waaqaa ti; eenyummaa Waaqaas akkuma jirutti mul'isa; dubbii isaa humna qabeessa sanaanis waan hunda hirkisee baata. Innis erga cubbuu keenya nurraa qulqulleessee booddee samii irra mirga Waaqa ulfina qabeessa sanaa taa'e. ⁴ Akkuma maqaan inni dhaale sun kan ergamootaa caalaa guddaa ta'e sana innis ergamoota caalaa guddaa dha.

Ilmi Ergamoota Caaluu Isaa

⁵ Waaqni ergamoota keessaa isa kamiin,

"Ati Ilma koo ti;

ani har'a si dhalcheera"*

Yookaan isa kamiin,

"Ani isaaf Abbaa nan ta'a;

innis Ilma naa ta'a"†

jedhee beeka? ⁶ Akkasumas Waaqni yommuu Ilma isaa hangafa gara addunyaa kanaatti ergutti,

"Ergamoonni Waaqaa hundi isa haa waaqeffatan"‡

jedha. ⁷ Yommuu waa'ee ergamootaa dubbatus,

"Inni ergamoota isaa hafuurota,

tajaajiltoota isaa immoo arraba ibiddaa godha"§

jedha. ⁸ Waa'ee Ilmaa garuu akkana jedha;

"Yaa Waaqayyo, teessoon kee bara baraa hamma bara baraatti ni jiraata;

bokkuun qajeelummaas bokkuu mootummaa keetii ni ta'a.

⁹ Ati qajeelummaa jaallatte; jal'ina immoo ni jibbite;

kanaafuu Waaqayyo Waaqni kee zayitii gammachuutiin si dibee,

hiriyoota kee si caalchise."*

¹⁰ Akkasumas inni akkana jedha;

"Yaa Gooftaa, ati jalqabatti lafa hundeessite;

samiwwanis hojii harka keetii ti.

¹¹ Isaan ni badu; ati garuu ni jiraata;

hundumti isaanii akkuma uffataa ni moofa'u;

¹² ati akkuma wayyaatti isaan marta;

isaan akkuma uffataatti geeddaramu;

ati garuu sanuma;

umuriin kees gonkumaa dhuma hin qabu."†

¹³ Waaqni ergamoota keessaa isa kamiin,

"Hamma ani diinota kee ejjeta miilla keetii godhutti,

gara mirga koo taa'i"‡

jedhe? ¹⁴ Ergamoonni hundinuu hafuurota tajaajilan kanneen warra fayyina dhaalan tajaajiluuf ergaman mitii?

2

Akeekkachiisa

¹ Kanaafuu nu akka waan dhageenye irraa hin jal'anneef waan sana irratti xiyyeeffannoo guddaa gochuu qabna. ² Sababiin isaas erga dubbiin ergamootaan dubbatame sun eegamuu qabaatee, seera cabsuu fi ajajamuu diduun hundis erga adabbii malu argatanii, ³ yoo nu yoo fayyina guddaa akkanaa tuffanne, akkamitti adabbii kana jalaa baana ree? Fayyinni jalqabatti Gooftaadhaan labsame kun warra dhaga'aniin nuuf mirkaneeffame. ⁴ Waaqni mallattoon, raajii fi hojii dinqii adda addaatiin akkasumas kennaawwan Hafuura Qulqulluu kanneen akka fedhii isaatti kennamaniin dhugaa ba'eera.

Yesuu Guutummaatti Nama Taasifame

* 1:5 1:5 Far 2:7 † 1:5 1:5 2Sm 7:14; 1Sn 17:13 ‡ 1:6 1:6 Far 104:4 § 1:7 1:7 Far 104:4 * 1:9 1:9 Far 45:6,7 † 1:12 1:12 Far 102:25-27 ‡ 1:13 1:13 Far 110:1

⁵ Inni addunyaa dhufuuf jiru, kan nu waa'ee isaa dubbannu sana ergamoota jala hin galchine. ⁶ Namni tokko garuu iddoo tokkotti akkana jedhee dhugaa ba'eera;

"Akka ati isaaf yaadduuf namni maali?

Akka isaaf dhimmituuf ilmi namaa maali?

⁷ Ati xinnoo ishee ergamootaa gad isa goote;
ulfinaa fi kabajaan isa gonfite;
hojii harka keetii irrattis isa muudde.

⁸ Waan hundas miilla isaa jala galchite."*

Inni yommuu waan hunda isa jala galchetti wanni inni utuu isa jala hin galchin hambise tokko iyyuu hin jiru. Ta'us yeroo ammaa wanni hundinuu isa jala galee hin arginu. ⁹ Garuu Yesuus inni ayyaana Waaqaatiin nama hundaaf du'a dhandhamuuf jedhee xinnoo ishee ergamootaa gad ta'ee ture sun dhiphina du'aa waan dhiphateef amma ulfinaa fi kabajaan gonfamee argina.

¹⁰ Waaqni wanni hundi isaaf jiraatuu fi isaan jiraatu sun ilmaan baay'ee gara ulfinaatti geessuuf jedhee mataa fayyina isaanii dhiphina kan hir'ina hin qabne gochuun isaaf ni mala ture. ¹¹ Inni namoota qulqulleessuu fi kanneen qulqulleeffaman hundi kanuma abbaa tokkoo ti. Kanaafuu Yesuus obboloota jedhee isaan waamuu hin qaana'u. ¹² Inni, "Maqaa kee obboloota kootti nan labasa;

waldaa kiristaanaa keessattis faarfannaadhaan sin jajadha"†

jedha. ¹³ Akkasumas,

"Ani isa nan amanadha"‡

jedha. Ammas inni,

"Anii fi ijoolleen Waaqayyo naa kenne kunoo ti"§

jedha.

¹⁴ Sababii ijoolleen sun foonii fi dhiiga qabaniif, Yesuus is du'a ofii isaatiin diiyaabiloos isa du'a irratti humna qabu sana balleessuuf jedhee namummaa isaanii qoodate; ¹⁵ innis warra bara jireenya isaanii hunda garbummaa sodaa du'aatiin hidhamanii turan bilisa baasuuf jedhee waan kana godhe. ¹⁶ Inni dhugumaanuu sanyii Abrahaam gargaaruuf malee ergamoota Waaqaa gargaaruuf miti. ¹⁷ Kanaafuu inni Waaqa tajaajiluu keessatti akka luba ol aanaa araara qabeessaa fi amanamaa ta'uuf, akka cubbuu namootaatiif araara buusuuf waan hundaan obboloota isaa fakkaachuutu isa irra ture. ¹⁸ Inni mataan isaa waan dhiphina keessatti qorameef warra qoramaa jiran gargaaruu ni danda'a.

3

Yesuus Musee Caala

¹ Kanaafuu yaa obboloota qulqulloota, warra waamicha samii keessatti hirmaattan, Yesuus ergamaa fi luba ol aanaa amantii keenyaa sana ilaalaa. ² Akkuma Musee mana Waaqaa hunda keessatti amanamaa ture sana innis isa isa muudeef amanamaa ture. ³ Akkuma namni mana ijaaru tokko mana sana caalaa kabaja guddaa qabu, innis Musee caalaa kabaja guddaa qaba. ⁴ Tokkoon tokkoon manaa namaan ijaaramaati; kan waan hunda ijaare garuu Waaqa. ⁵ Museen waan fuul duratti dubbatamuuf jiru dhugaa ba'uuf akka tajaajilaa tokkootti mana Waaqaa hunda keessatti amanamaa ture.* ⁶ Kiristoos garuu akka ilmaatti mana Waaqaa irratti amanamaa dha. Nus yoo ija jabina keenyaa fi abdii ittiin boonnu sana jabeessinee qabanne, nu mana isaa ti.

Akeekkachiisa Amantii Dhabuu Irratti Kenname

⁷ Kanaafuu akkuma Hafuurri Qulqulluun jedhu:

"Tsin yoo har'a sagalee isaa dhageessan,

⁸ akka yeroo qorumsaa gammoojjii keessatti finciluun gootan sana,

mataa hin jabaatinaa;

⁹ abbootiin keessan achitti na ilaalan;
waggaa afurtamas waan ani hojjedhe argan.

¹⁰ Kanaafuu ani dhaloota sanatti aaree,
'Yeroo hunda qalbii isaaniitiin dogoggoru;
isaan karaa koo hin beekne' jedhe.

¹¹ Kanaafuu ani dheekkamsa kootiin,
'Isaan boqonnaa kootti hin galan' jedhee kakadhe."†

* 2:8 2:8 Far 8:4-6 † 2:12 2:12 Far 22:22 ‡ 2:13 2:13 Isa 8:17 § 2:13 2:13 Isa 8:18 * 3:5 3:5 Lak 12:7

† 3:11 3:11 Far 95:7-11

¹² Yaa obboloota, akka isin keessaa namni tokko iyyuu garaa hamaa fi hin amanne kan Waaqa jiraataa irraa nama fageessu hin qabaanneef of eeggadhaa. ¹³ Garuu isin keessaa akka namni tokko iyyuu gowwoomsaa cubbuutiin mata jabeessa hin taaneef utuu “Har’a” jedhamaa jiruu guyyuma guyyaan wal jajjabeessaa. ¹⁴ Nus yoo amantii keenya isa jalqabaa sana hamma dhumaatti jabeessinee qabanne Kiristoos wajjin hirmaattota ni taanaatii. ¹⁵ Kunis akkuma, “Isin yoo har’a sagalee isaa dhageessan, akka yeroo fincilaa sana, mataa hin jabaatinaa”[‡] jedhamee barreeffamee dha.

¹⁶ Warri dhaga’anii fincilan sun eenyu? Warra Museen qajeelchee Gibxii baase sana hunda mitii? ¹⁷ Waaqni waggaa afurtama eenyu faatti aare? Warruma cubbuu hojjetanii reefii isaanii gammoojjii keessatti kukkufe sanatti mitii? ¹⁸ Yoo warruma ajajamuu didan sana ta’e malee Waaqni akka isaan gonkumaa boqonnaa isaatti hin galleef eenyu faatti kakate ree? ¹⁹ Kanaafuu akka isaan sababii amantii dhabuu isaaniitiif boqonnaa sanatti galuu hin danda’in argina.

4

Boqonnaa Guyyaa Sanbataa

¹ Kanaaf waadaan boqonnaa isaatti galuu sun amma iyyuu waan jiruuf isin keessaa namni kam iyyuu utuu boqonnaa sanatti hin galin akka hin hafne of haa eeggannu. ² Wangeelli isaanitti lallabame nuttis lallabameeraatii; garuu dubbiin lallabame sun waan amantii isaanitiin wal hin fudhanneef warra dhaga’an sanaaf faayidaa tokko illee hin kennine. ³ Nu warri amanne boqonnaa sanatti ni galla; kunis akkuma inni, “Kanaafuu ani dheekkamaa kootiin,

‘Isaan boqonnaa kootti

hin galan’ jedhee kakadhe”^{*}

jedhu sanaa dha. Ta’us hojiin isaa uumama addunyaatii jalqabee xumurameera. ⁴ Innis iddoo tokkotti waa’ee guyyaa torbaffaa; “Waaqni guyyaa torbaffaatti hojii isaa hundumaa irraa boqote”[†] jedhee dubbate. ⁵ Ammas inni iddoodhuma kanatti, “Isaan boqonnaa kootti hin galan”[‡] jedha.

⁶ Amma iyyuu akka namoonni tokko tokko itti galaniif iddoo boqonnaa sun hambifameera; warri duraan wangeelli itti lallabame sun immoo sababii ajajamuu didaniif boqonnaa sanatti hin galle. ⁷ Kanaafuu Waaqni deebisee guyyaa tokko “Har’a” jedhee waamuudhaan murteesse. Innis akkuma kanaan dura dubbatame sana bara dheeraa booddee karaa Daawitiitiin, “Isin yoo har’a sagalee isaa dhageessan,

mataa hin jabaatinaa”[§] jedha.

⁸ Utuu Iyyaasuun boqonnaa sanatti isaan galchee jiraatee, silaa Waaqni ergasii waa’ee guyyaa biraa hin dubbatu tureetii. ⁹ Kanaafuu boqonnaan Sanbataa saba Waaqaatiif kaa’ameera; ¹⁰ namni boqonnaa Waaqaatti galu kam iyyuu akkuma Waaqni hojii isaa irraa boqote sana, innis hojii isaa irraa ni boqota.^{*} ¹¹ Kanaafuu akka namni tokko illee fakkeenya ajajamuu diduu jara sanaa duukaa bu’ee boqonnaa sanatti galuu hin dhabneef kottaa boqonnaa sanatti galuuf ni tattaaffannaa.

¹² Dubbiin Waaqaa jiraataa fi kan hojjetuudhaatii. Goraadee qara lama qabu kam iyyuu caalaa qaramaa dha; hamma lubbuu fi hafuura, buusaa fi dhuka gargar baasutti waraane seena; yaadaa fi fedhii garaa namaas ni qora. ¹³ Uumama hunda keessaa wanti fuula Waaqaa duraa dhokatu tokko illee hin jiru. Wanti hundi ija isaa duratti qullaa fi saaqamaa dha; nus waa’ee mataa keenyaa deebii kennuufii qabna.

Yesuus Luba Ol Aanaa Guddicha

¹⁴ Egaa luba ol aanaa guddicha isa samiiwwan keessa darbe, Yesuus Ilma Waaqaa waan qabnuuf kottaa amantii keenya jabeessinee qabannaa. ¹⁵ Nu luba ol aanaa dadhabbii keenya keessatti garaa nuu hin laafne hin qabnuutii; garuu kan waan hundaan akkuma keenya qorame qabna; ta’us inni cubbuu hin hojjenne. ¹⁶ Kanaafuu akka araara argannuu fi akka ayyaana yeroo nu barbaachisutti nu gargaaru argannuuf kottaa gara teessoo ayyaanaatti sodaa malee dhi’aannaa.

[‡] 3:15 3:15 Far 95:7,8 * 4:3 4:3 Far 95:11 † 4:4 4:4 Uma 2:2 ‡ 4:5 4:5 Far 95:11 § 4:7 4:7 Far 95:7,8

* 4:10 4:10 Uma 2:2

5

¹ Tokkoon tokkoon luba ol aanaa namoota gidduudhaa filatamee waan Waaqa ilaallatu irratti namoota iddoo bu'ee sababii cubbuutiif kennaa fi aarsaa dhi'eessuuf muudama. ² Inni mataan isaa iyyuu waan dadhabbii keessa jiruuf wallaaltotaa fi warra karaa irraa jallataniif garaa laafuu ni danda'a. ³ Sababii kanaaf inni cubbuu ofii isaatiif, akkasumas cubbuu namootaatiif aarsaa dhi'eessuu qaba. ⁴ Nama akkuma Aroonitti Waaqaan waamame malee, namni kam iyyuu ulfina kana ofii isaatiif hin fudhatu.

⁵ Kiristoosis akkasuma luba ol aanaa ta'uuf of hin ulfeessine. Waaqni garuu, "Ati Ilma koo ti;

ani har'a si dhalcheera"*

jedheen. ⁶ Iddoo biraattis,

"Akkuma sirna Malkiiseedeqitti,

ati luba bara baraa ti"†

jedha.

⁷ Yesuus yeroo lafa irra jiraachaa turetti iyya guddaa fi imimmaaniin isa du'a isa oolchuu danda'u sanatti kadhannaa fi waammata dhi'eeffate; sababii inni sodaa Waaqaa qabuufis kadhannaan isaa ni dhaga'ameef. ⁸ Inni ilma ta'u iyyuu dhiphina isaa sana irraa ajajamuu barate; ⁹ erga kan mudaa hin qabne taasifamee immoo warra isaaf ajajaman hundaaf burqaa fayyina bara baraa ta'e. ¹⁰ Akka sirna Malkiiseedeqittis luba ol aanaa jedhamee Waaqaan waamame.

Akeekkachiisa

¹¹ Nu waa'ee isaa waan jennu baay'ee qabna; isin garuu waan hubachuutti dadhaboo taataniif isinii ibsuun rakkisaa dha. ¹² Isin yeroo kanatti barsiistota ta'uu qabdu ture; isin immoo nama waa'ee dhugaa dubbii Waaqaa kan jalqabaa irra deebi'ee isin barsiisutu isin barbaachisa. Nyaata jabaataas utuu hin ta'in aannan isin barbaachisa. ¹³ Namni aannaniin jiraatu kam iyyuu waan amma illee daa'ima ta'eef dubbii qajeelummaa hin beeku. ¹⁴ Nyaanni jabaataan garuu namoota bilchataoo kanneen waan gaarii fi waan hamaa gargar baasani beekuuf of leenjisanii ta'a.

6

¹ Kanaafuu kottaa barsiisa waa'ee Kiristoos isa jalqabaa sana dhiifnee gara bilchinaatti dabarraa; waa'ee hojii gara du'aatti nama geessuu irraa deebi'uu fi waa'ee Waaqatti amanuu lammata hundee hin buufnu; ² akkasumas barsiisa waa'ee cuuphaa, waa'ee harka nama irra kaa'uu, waa'ee du'aa ka'uu warra du'aniitii fi waa'ee murtii bara baraa ammas hundee hin buufnu. ³ Nus yoo Waaqni jedhe waan kana ni goona.

⁴ Warra yeroo tokko ifni ifeefii kennaa samii dhandhamatan, kanneen Hafuura Qulqulluu irraa qooddatan, ⁵ warra gaarummaa dubbii Waaqaatii fi humna bara dhufuuf jiru sanaa dhandhamatani ⁶ ergasii garuu amantii irraa gara galan, gara qalbii jijjiirranaatti isaan fiduun hin danda'amu; sababiin isaas isaan fedhuma isaaniitiin deebisanii ilma Waaqaa ni fannisu; fuula namootaa durattis salphinatti isa saaxilu. ⁷ Lafti bokkaa yeroo baay'ee irratti roobu dhugdee warra ishee qotataniif midhaan fayyadu kennitu eebba Waaqaa argatti. ⁸ Lafti qoraattii fi sokorruu biqilchitu garuu fayyidaa hin qabdu; abaaramuus geesseerti. Dhumni ishees gubamuu dha.

⁹ Yaa michoota jaallatamtoota, nu yoo akkana dubbanne illee waa'ee keessan waan wayyu, waan fayyina wajjin deemus akka qabdan mirkaneeffanneerra. ¹⁰ Waaqni qulqulloota tajaajiluu keessanii fi ammas tajaajiluu keessaniin hojii isin hojjettanii fi jaalala maqaa isaatiif argisiiftan irraanfachuuf jal'aa mitiitiin. ¹¹ Nus akka tokkoon tokkoon keessan abdi keessan mirkaneessitanii hamma dhumaatti tattaaffii akkanaa argisiiftan barbaanna. ¹² Nu akka isin fakkeenya warra amantii fi obsaan waan waadaa galame sana dhaalanii duukaa buutan barbaanna malee akka isin dhibaa'oo taatan hin barbaannu.

Waadaan Waaqaa Amanamaa Ta'uu Isaa

¹³ Waaqni yeroo Abrahaamiif waadaa galetti kan isa caalu kan inni ittiin kakatu tokko iyyuu waan hin jirreef matuma ofiitiin kakate. ¹⁴ Innis, "Ani dhugumaan eebba, sin eebbisa; baay'isuus si baay'isa"* jedha. ¹⁵ Kanaafuu Abrahaam obsaan eeggatee waan waadaa galame sana argate.

¹⁶ Namoonni kan isaan caaluun kakatu; kakuun sunis waan jedhame sana mirkaneessee akka falmiin hundumtuu fiixaan ba'u godha. ¹⁷ Waaqni haala kaayyoo isaa kan hin geeddaramne sana caalaatti ibsee warra waadaa dhaalanitti argisiisuu waan

* 5:5 5:5 Far 2:7 † 5:6 5:6 Far 110:4 * 6:14 6:14 Uma 22:17

barbaadeef waadaa sana kakuudhaan cimse. ¹⁸ Egaa waan hin geeddaramne kan Waaqni waa'ee isaanii sobuu hin dandeenye lamatu jira; kanaafuu nu warri isatti baqanne abdiif fuula keenya dura kaa'ame sana jabeessinee qabachuuf jajjabina guddaa qabna. ¹⁹ Nus abdiif kana akka hiituu dooniitti lubbuuf qabna. Abdiin kunis iddoo qulqulluu golgaa duuba jiru sana ol seena; ²⁰ iddoo kunis kan Yesuus iddoo keenya bu'ee nu dursee itti ol seenee dha. Innis akka sirna Malkiiseedeqitti luba ol aanaa bara baraa ta'eera.

7

Malkiiseedeq Lubicha

¹ Malkiiseedeq mootii Saalemiitii fi luba Waaqa Waan Hundaa Ollii ture. Innis utuu Abrahaam mootota mo'atee deebi'uu itti dhufee isa eebbise; ² Abrahaamis waan hundumaa kudhan keessaa tokko isaaf kenne. Jalqabatti maqaan isaa, "Mootii qajeelummaa" jechuu dha; ergasii immoo, "Mootii Saalem" jechuunis, "Mootii nagaa" jechuu dha. ³ Inni abbaa yookaan haadha hin qabu; hidda dhalootaas hin qabu; jalqaba guyyootaa yookaan dhuma jireenyaas hin qabu; inni akkuma Ilma Waaqaatti luba bara baraa ta'ee jiraata.

⁴ Egaa Abrahaam hangafni abbootii iyyuu erga waan booji'e irraa kudhan keessaa tokko isaaf kenne, Malkiiseedeq hammam guddaa akka ta'e mee ilaalaa! ⁵ Ilmaan Lewwii warri luboota ta'an yoo obbollooni isaanii sanyii Abrahaam ta'an iyyuu namoota irraa jechuunis obbolutuma isaanii irraa kudhan keessaa tokko akka fudhatan seerri ni ajaja. ⁶ Namichi sanyii isaanii irraa hin ta'in kun garuu Abrahaam isa waadaan galameef sana irraa kudhan keessaa tokko fudhatee isa eebbise. ⁷ Inni xinnaan akka isa guddaadhaan eebbifamu shakkii hin qabu. ⁸ Karaa tokkoon kudhan keessaa tokko namoota du'a hin oolleen walitti qabama; karaa kaaniin immoo isa jiraataa ta'uun isaa dhugaa ba'ameef sana walitti qabama. ⁹ Lewwiin inni kudhan keessaa tokko walitti qabu mataan isaa iyyuu kudhan keessaa harka tokko karaa Abrahaamiitiin baaseera jechuun ni danda'ama; ¹⁰ Malkiiseedeq yommuu Abrahaamin simatetti Lewwiiin mudhii abbaa ofii isaa keessa tureetii.

Yesuus Akka Malkiiseedeqitti

¹¹ Utuu sirni lubummaa Lewwii kan hir'ina hin qabne ta'ee, silaa lubni biraa kan akka sirna lubummaa Aronitti utuu hin ta'in lubni akka sirna lubummaa Malkiiseedeqitti filatame dhufuun isaa maaliif barbaachise ree? Seerri sirna lubummaa Lewwii kana irratti hundeeffamee sabaaf kennameetii. ¹² Yommuu lubummaa geeddaramu seerichis akkasuma geeddaramaati. ¹³ Inni wanni kun waa'ee isaa dubbatame sun gosti isaa kan biraa ti; gosa kana keessaas namni tokko iyyuu takkumaa iddoo aarsaa hin tajaajille. ¹⁴ Gooftaan keenya akka sanyii Yihuudaa irraa dhalate beekamaadhaatii; Museenis gosa sana ilaalchisee waa'ee lubummaa homaa hin dubbanne. ¹⁵ Yommuu lubni akka Malkiiseedeqi kan biraa ka'utti, wanni nu dubbanne sun ittuma caalee ifa ta'a; ¹⁶ innis utuu ajaja fooniitiin hin ta'in humna jireenya hin badneetiin luba ta'e. ¹⁷ Waa'ee isaas,

"Akkuma sirna Malkiiseedeqitti,

ati luba bara baraa ti"*

jedhamee dhugaa ba'ameeraafitii.

¹⁸ Ajajni duraa sun waan dadhabaa fi kan hin fayyadne tureef diigameera. ¹⁹ Sababii seerri waanuma tokko illee kan mudaa hin qabne hin godhiniif abdiin caalu kan nu ittiin gara Waaqaatti dhi'aannu tokko dhufeera.

²⁰ Kunis kakaa malee hin taane! Warri kaan immoo kakaa tokko malee luboota ta'an;

²¹ inni garuu yeroo Waaqni,

"Gooftaan, 'Ati luba bara baraa ti'

jedhee kakateera;

inni yaada isaa hin geeddaru"†

isaan jedhetti kakaadhaan luba ta'e. ²² Yesuus sababii kakaa kanaatiif kakuu caaluuf wabii ta'eera.

²³ Luboonni durii sababii duuti akka isaan tajaajila itti hin fufneef isaan dhowweef baay'ee turan; ²⁴ Yesuus garuu waan bara baraan jiraatuuf lubummaa hin geeddaramne qaba. ²⁵ Kanaaf inni yeroo hundumaa waan isaaniif kadhachuuf jiraatuuf warra karaa isaatiin gara Waaqaa dhufan guutumaan guutuutti fayyisuu ni danda'a.

* 7:17 7:17 Far 110:4 † 7:21 7:21 Far 110:4

²⁶ Egaa luba ol aanaa qulqulluu, kan mudaa hin qabne, kan xurii hin qabne, kan cubbamoota irraa adda ta'e, samii olittis kan kabajame akkasii qabaachuun nu barbaachisa. ²⁷ Inni akka luboota ol aantota kaaniitti guyyuma guyyaan duraan dursee cubbuu ofii isaatiif, ergasii immoo cubbuu namootaatiif aarsaa dhi'eessuun isa hin barbaachisu. Inni yommuu of kenne sanatti al tokko yeroo hundaaf cubbuu namootaatiif aarsaa dhi'esseeraatii. ²⁸ Seerichi namoota dadhaboo, luboota ol aantota godhee muudaatii; dubbiin kakaa kan seera booddee dhufe garuu, ilma Waaqaa isa bara baraan mudaa hin qabne sana muuda.

8

Luba Ol aanaa Kakuu Haaraa

¹ Waan nu dubbannu keessaa ijoo kana: Nu luba ol aanaa samii irra karaa mirga teessoo Isa Ulfina Qabeessa Samii keessaa sanaa taa'e akkasii qabna. ² Innis iddoo qulqullummaa fi dukaana isa dhugaa kan utuu namaan hin ta'in Gooftaadhaan dhaabame keessa tajaajila.

³ Lubni ol aanaan kam iyyuu kennaa fi aarsaa dhi'eessuuf muudama; kanaafuu lubni kun waan dhi'eessu tokko qabaachuu qaba. ⁴ Waan luboonni akka seeraatti kennaa dhi'eessan duraanuu jiraniif, inni utuu lafa irra jiraatee silaa luba hin ta'u ture. ⁵ Isaanis iddoo qulqullummaa kan fakkeenya fi gaaddidduu wantoota samii tajaajilu. Waaqnis yommuu Museen dukaana qulqulluu dhaabuuf ka'etti, "Waan hunda akkuma fakkeenya tulluu irratti sitti argisiifame sanaatti hojjechuu kee mirkaneeffadhu!"* jedhee isa akeekkachiisuun isaa kanumaaf. ⁶ Garuu akkuma kakuun inni Yesuus gidduu galeessa ta'eef sun kakuu moofaa akka malee caalu sana tajaajilli inni fudhates tajaajila isaanii irra guddaa dha; kakuun haaraan waadaa caalu irratti hundeeffameetii.

⁷ Utuu kakuun jalqabaa sun mudaa qabaachuu baatee silaa kakuun lammaffaan hin barbaachisu ture. ⁸ Waaqni garuu saba sana irratti balleessaa argee akkana jedha;

"Yeroon ani itti mana Israa'el wajjin,
mana Yihuudaa wajjinis,
kakuu haaraa galu ni dhufa
jedha Gooftaan.

⁹ Kakuun kunis kakuu ani,
yeroo biyya Gibxiitii isaan baasuuf jedhee
harka isaanii qabe sana
abbootii isaanii wajjin gale sanaan tokko miti;
isaan kakuu kootti jabaatanii waan hin dhaabatiniif,
ani isaan irraa gara galeera,
jedha Gooftaan.

¹⁰ Kakuun ani yeroo sana booddee
mana Israa'el wajjin galu kanaa dha, jedha Gooftaan.
Ani seera koo qalbii isaanii keessa nan kaa'a;
garaa isaanii keessattis nan barreessa.

Ani Waaqaa isaanii nan ta'a;
isaanis saba koo ni ta'u.

¹¹ Sababii hundi isaanii,
xinnaa hamma guddaatti na beekaniif,
si'achi namni kam iyyuu, 'Gooftaa beeki' jedhee,
ollaa isaa yookaan obboleessa isaa hin barsiisu.

¹² Ani daba isaanii nan dhiisaaf;
cubbuu isaaniis si'achi hin yaadadhu."[†]

¹³ Innis kakuu kanaan "haaraa" jedhee kakuu jalqabaa sana moofesseera; wanni moofa'ee fi wanni dulloome dafee bada.

9

Iddoo Qulqulluu Isa Lafaa Keessatti Waaqeffachuu

¹ Kakuun jalqabaa sun iyyuu sirna waaqeffannaatii fi iddoo qulqulluu isa lafa irraa qaba ture. ² Dukaanni qulqulluun dhaabamee ture. Kutaan dukaana sanaa kan jalqabaa, "Iddoo Qulqulluu" jedhama ture; kutaa kana keessas baattuu ibsaatii fi minjaala akkasumas buddeena qulqulleffametu ture. ³ Golgaa lammaffaa duubaan immoo kutaa, "Iddoo Hundumaa Caalaa Qulqulluu" jedhamu tokkodu ture. ⁴ Achis

* 8:5 8:5 Bau 25:40 † 8:12 8:12 Erm 31:31-34

iddoo aarsaa ixaanaa kan warqee irraa hojjetamee fi taabota kakuu kan karaa hundaan warqee dibametu ture. Taabota sana keessas okkotee warqee kan mannaa baatu, ulee Aroon inni latee fi gabatee dhagaa kan kakuun sun irratti barreeffametu kaa'ame. ⁵ Taaboticha gubbaadhaanis kiirubeeliin Ulfinaa teessoo araaraa irra golboobanii turan. Amma garuu waa'ee kanaa gad fageenyaan dubbachuu hin dandeenyu.

⁶ Luboonni yommuu wanni hundinuu haala kanaan qopheeffametti tajaajila kennuuf jedhanii yeroo hunda dunkaana qulqulluu isa jalqabaa seenu turan. ⁷ Dunkaana isa lammaffaa garuu luba ol aanaa qofatu waggaaatti yeroo tokko qofa seena; innis dhiiga cubbuu ofii isaatiif dhi'eessuu fi dhiiga cubbuu namoonni utuu hin beekin hojjetaniif dhi'eessu qabatu malee hin seenu ture. ⁸ Hafuurri Qulqulluunis hamma dunkaanni jalqabaa sun dhaabatee jirutti akka karaan gara Iddoo Iddoo Hunda Caalaa Qulqulluu ta'eetti geessu sun amma illee hin mul'ifamin haala kanaan argisisaa ture. ⁹ Kunis fakkeenya bara ammaa ti; innis akka kennaa fi aarsaan dhi'effamu sun qalbii waaqeffataa tokkoo qulqulleessuu hin dandeenye mul'isa. ¹⁰ Innis waa'ee nyaataatii fi dhugaatii, waa'ee sirna dhiqannaa garaa garaa jechuunis sirna foonii isa hamma seerichi haaromfamutti faayidaa kennaa ture qofa.

Dhiiga Kiristoos

¹¹ Kiristoos garuu yommuu waan gaarii dhufuuf jiruuf luba ol aanaa ta'ee dhufetti, dunkaanicha guddaa mudaa hin qabne, kan harka namaatiin hin hojjetamin jechuunis kan uumama kana irraa hin dhufin sana keessa darbe. ¹² Dhiiga re'ootaatii fi dhiiga jabbootaatiin hin seenne; garuu furii bara baraa nuu fiduudhaan dhiiguma ofitiin yeroo tokko bara baraan gara Iddoo Iddoo Hunda Caalaa Qulqulluu ta'e sanaatti seene. ¹³ Eega dhiigni re'ootaa, dhiigni korommiitii fi daaraan goromsaa kan warra xuraa'anitti facaafamu akka isaan fooniin qulqullaa'an godhee, ¹⁴ yoos dhiigni Kiristoos isa karaa Hafuura bara baraatiin aarsaa hir'ina hin qabne ta'ee Waaqaa of dhi'eesse sanaa akka nu Waaqa jiraataa tajaajilluuf hammam caalaa hojii gara du'aatti nama geessu irraa qalbii keenya haa qulqulleessuu ree!

¹⁵ Sababii kanaaf akka warri waamaman dhaala bara baraa isa abdii kenname sana argataniif Kiristoos araarsaa gidduu galeessa kakuu haaraa ti; inni cubbuu isaan yeroo kakuu jalqabaa jala turanitti hojjetan irraa isaan bilisoomsuuf jedhee furii ta'ee du'eeraatii.

¹⁶ Iddoo dhaamsi dhaalaa jirutti du'a namicha dhaamate sanaa mirkaneessuun barbaachisaa dha; ¹⁷ dhaamsi dhaalaa yommuu namni dhaamate sun du'u qofa hojii irra oola malee utuu inni lubbuun jiruu hin hojjetuutii. ¹⁸ Sababiin kakuun jalqabaa iyyuu dhiiga malee hojii irra hin oolinniif kanuma. ¹⁹ Museen erga ajaja seera sanaa tokko tokkoon saba sana hundatti himee booddeetti, dhiiga jabbootaatii fi dhiiga re'ootaa bishaan wajjin, rifeensa hoolaa bildiimaa fi hiisophii fuudhee kitaaba maramaa fi saba hundatti facaase. ²⁰ Innis, "Kun dhiiga kakuu kan Waaqni isiniif ajajee dha"* jedhe. ²¹ Haaluma wal fakkaatuunis dunkaanichattii fi mi'a dunkaanicha keessatti sirna waaqeffannaatii itti fayyadaman hundumatti dhiiga sana facaase. ²² Dhugumaan akka seeraatti wantoota muraasa malee wanni hundinuu dhiigaan qulqulleeffama; dhiigni dhangalaafamu malees dhiifamni cubbuu hin jiru.

²³ Kanaafuu fakkeenyawwan waan samii irraa aarsaawwan kanneeniin qulqulleeffamuun barbaachisaa ture; wanni samii irraa mataan isaa garuu aarsaawwan waan kanneen caalaniin qulqulleeffamuu isaan barbaachisa. ²⁴ Kiristoos amma iddoo keenya bu'ee fuula Waaqaa duratti argamuuf samii seene malee iddoo qulqulluu kan harka namaatiin ijaarame isa fakkeenya iddoo qulqulluu kan dhugaa ta'e hin seenne. ²⁵ Yookaan inni akkuma luba ol aanaa wagguma waggaan dhiiga kan isaa hin ta'in qabatee Iddoo Iddoo Hunda Caalaa Qulqulluu ta'e seenu sanaatti yeroo baay'ee of dhi'eessuuf samii hin seenne. ²⁶ Utuu akkas ta'ee silaa Kiristoos uumama addunyaatii jalqabee yeroo baay'ee dhiphachuu qaba ture. Amma garuu inni ofii isaa aarsaa godhee cubbuu balleessuuf dhuma baraatti yeroo tokko bara baraan mul'ateera. ²⁷ Akkuma yeroo tokko du'uun ergasii immoo murtiitti dhi'aachuun namatti murteeffame sana ²⁸ akkasuma immoo Kiristoos cubbuu namoota baay'ee baachuuf jedhee yeroo tokko aarsaa ta'eera; yeroo lammaffaa immoo cubbuu baachuuf utuu hin ta'in warra isa eeggachaa jiraniif fayyina fiduuf ni mul'ata.

10

Kiristoos Aarsaa Ta'uu Isaa

* 9:20 9:20 Bau 24:8

¹ Seerri gaaddidduu waan gaarii dhufuuf jiruu qofa malee bifa dhugaa miti. Kanaafuu seerichi aarsaa utuu wal irraa hin citin wagguma waggaan dhi'effamu sanaan gongumaa namoota waaqeffachuuf dhi'aatan sana warra mudaa hin qabne gochuu hin danda'u. ² Utuu isaan waan kana gochuu danda'anii silaa aarsaan dhi'effamuun isaa ni hafa ture mitii? Waaqeffattoonnis si'a tokko yeroo hundaaf ni qulqulleeffamu turaniitii; ergasii sababii cubbuu isaaniitiif yakki isaanitti hin dhaga'amu ture. ³ Aarsaawwan kunneen garuu wagguma waggaan cubbuu nama yaadachiisu. ⁴ Sababiin isaas dhiigni korommiitii fi dhiigni re'oootaa gongumaa cubbuu dhabamsiisuu hin danda'uutii.

⁵ Kanaafuu Kiristoos yommuu gara addunyaa dhufetti akkana jedhe:

“Ati aarsaa fi kenna hin feene;

garuu dhagna naa qopheessite;

⁶ ati aarsaa gubamuu fi

kenna sababii cubbuutiif

dhi'effamutti hin gammanne.

⁷ Yeroo sana ani, 'Ani kunoo ti;

waa'een koo kitaaba maramaa keessatti barreeffameera;

yaa Waaqa ko, ani fedhii kee raawwachuuf dhufeera' nan jedhe.”*

⁸ Isaan akka seeraatti dhi'effaman iyyuu inni jalqabatti, “Ati qalmawwanii fi aarsaawwan, aarsaawwan gubamanii fi aarsaawwan cubbuuf dhi'effaman hin feene yookaan itti hin gammanne” jedhe. ⁹ Ergasiis inni, “Ani kunoo fedhii kee raawwachuuf dhufeera” jedhe. Innis isa lammaffaa dhaabuuf jedhee isa jalqabaa dhabamsiise. ¹⁰ Fedhii sanaanis nu aarsaa dhagna Yesuus Kiristoos isa si'a tokko yeroo hundaaf dhi'effameen qulqulleeffamneerra.

¹¹ Lubni hundinuu guyyuma guyyaan dhaabatee tajaajila isaa raawwata; aarsaa gongumaa cubbuu dhabamsiisuu hin dandeenye sanas yeroo hunda dhi'eessa. ¹² Lubni kun garuu erga aarsaa tokkicha bara baraan cubbuudhaaf dhi'eessee booddee gara mirga Waaqaa taa'e. ¹³ Yeroo sanaa jalqabees hamma diinonni isaa ejjeta miilla isaa taasifamanitti ni eeggata; ¹⁴ inni aarsaa tokkicha sanaan warra qulqulleeffamuutti jiran kanneen bara baraan mudaa hin qabne godheeraatii.

¹⁵ Hafuurri Qulqulluunis waa'ee kanaa dhugaa nuu ba'a. Innis jalqabatti akkana jedha:

¹⁶ “Kakuun ani yeroo sana booddee isaan wajjin galu kanaa dha, jedha Gooftaan.

Ani seera koo qalbi isaanii keessa nan kaa'a;

garaa isaanii keessattis nan barreessa.”†

¹⁷ Ammas,

“Ani cubbuu fi yakka isaanii

si'achi hin yaadadhu”‡

jedha. ¹⁸ Iddoo isaan kunneen itti dhiifama argatanitti si'achi sababii cubbuutiif aarsaa dhi'eessuu hin barbaachisu.

Amantiidhaan Cimani Dhaabachuu

¹⁹ Kanaafuu yaa obboloota, nu dhiiga Yesuusiin gara Iddoo Iddoo Hunda Caalaa Qulqulluu ta'eetti galuuf ija jabina waan qabnuuf ²⁰ karaa haaraa fi jiraataa golgaa keessaan jechuunis karaa foon isaatiin nuu baname sanaan ²¹ waan luba guddaa mana Waaqaa irratti qabnuuf, ²² kottaa akka qalbiin keenya yaada yakka qabaachuu irraa qulqulleeffamuuf garaa keenyatti nuu facaafamee, dhagna keenyas bishaan qulqulluun dhiqannee garaa qulqulluu amantii mirkanaa'aa guutuu qabuun Waaqatti dhi'aannaa. ²³ Inni waadaa gale sun waan amanamaa ta'eef kottaa nu utuu hin raafamin abdi dhugaa baanu sana jabeessinee qabannaa. ²⁴ Kottaa jaalalaa fi hojii gaariif wal kakaasuuf itti yaadnaa. ²⁵ Akka namoonni tokko tokko walitti qabamuu dhiisan sana kottaa nu walitti qabamuu hin dhiifnuu; qooda kanaa akka guyyaan sun dhi'aate waan argitaniif ittuma caalchifnee wal haa jajjabeessinu.

²⁶ Nu erga beekumsa dhugaa argannee booddee yoo beekaa ittuma fufnee cubbuu hojjenne, si'achi aarsaan cubbuuf dhi'effamu hin jiraatu; ²⁷ garuu murtii fi ibidda hamaa diinota Waaqaa barbadeessu sodaan eeggachuu qofatu jiraata. ²⁸ Namni seera Musee tuffate kam iyyuu dhuga baatota lamaan yookaan sadiin gara laafina malee ajjeefama. ²⁹ Nama ilma Waaqaa irra ejjete, nama dhiiga kakuu kan ittiin qulqulleeffame sana akka waan qulqulluu hin ta'iniitti hede fi nama Hafuura ayyaanaa arrabse tokko adabbii hammam caalaa guddaatu isaaf mala seetu? ³⁰ Nu isa, “Haaloo

* 10:7 10:7 Far 40:6-8 † 10:16 10:16 Erm 31:33 ‡ 10:17 10:17 Erm 31:34

baasuun kan koo ti; ani gatii nan deebisa”[§] jedhee sana beeknaatii; akkasumas, “Gooftaan saba isaatti ni mura”^{*} jedhee. ³¹ Harka Waaqa jiraataatti kufuun sodaachisaa dha.

³² Bara duraa yeroo erga ifni isinii ifee booddee wal’aansoo dhiphinaa guddaa obsitanii keessa dhaabattan sana yaadadhaa. ³³ Isin yeroo tokko tokko fuula namootaa duratti arrabsoo fi ari’atamaaf saaxilamtanii turtan; yeroo kaan immoo namoota rakkinni akkasii irra ga’e wajjin hirmaachaa turtan. ³⁴ Isin mataan keessan akka qabeenya wayyu kan hin dabarre qabdan waan beektaniif warra hidhamaan wajjin dhiphattaniirtu; yommuu qabeenyi keessan saamamus gammachuudhaan fudhattaniirtu. ³⁵ Kanaafuu ija jabina keessan isa gatii guddaa qabu sana hin gatinaa.

³⁶ Yommuu fedhii Waaqaa raawwattanittis akka waan inni waadaa gale sana argattaniif obsuu isin barbaachisaatii.

³⁷ “Yeroo xinnoo keessatti,
inni dhufuuf jiru ni dhufa;
hin turus.”[†]

³⁸ Akkasumas,
“Qajeelaan koo garuu amantiidhaan jiraata.
Kan duubatti harkifatu immoo
ani itti hin gammadu.”[‡]

³⁹ Nu garuu warra amananii lubbuu ofii oolfatan malee warra gara badiisaatti harkifatan miti.

11

Hojii Amantiin Hojjetu

¹ Amantiin waan abdannu tokko dhugumaan ni ta’a jennee fudhachuu dha; waan ijaan hin argine tokko immoo qabatamaadha jennee heduu dha. ² Jaarsoliifis kanaan dhugaa ba’ameetii.

³ Addunyaawwan akka ajaja Waaqaatiin uumaman, wanni mul’atus akka waan mul’atu irraa hin hojjetamin nu amantiidhaan hubanna.

⁴ Abeel amantiidhaan aarsaa isa Qaayin dhi’eesse caalu Waaqaaf dhi’eesse. Inni yommuu Waaqni waa’ee kennaa isaa dhugaa ba’ameeffitti nama qajeelaa ta’uun isaa amantiidhaan dhugaa ba’ameef. Abeel du’u iyyuu hamma ammaatti amantiidhaan dubbachaa jira.

⁵ Henook akka du’a hin argineef amantiidhaan fudhatame; waan Waaqni isa fudhateef inni hin argamne.* Inni utuu hin fudhatamin dura akka nama Waaqa gammachiiseetti dhugaa ba’ameefii tureetii. ⁶ Amantiidhaan malee Waaqa gammachiisuun hin danda’amu; sababiin isaas namni gara isaa dhufu kam iyyuu akka inni jiruu fi akka inni warra isa barbaadaniif gatii kennu amanuu qaba.

⁷ Nohi waa’ee waan amma illee ijaan hin argaminii Waaqni isa akeekkachiifnaan sodaatee warra mana isaa jiraatan oolfachuuf jedhee amantiin doonii tolche. Amantii isaatiinis addunyaatti mure; dhaaltu qajeelummaa amantiin argamuus ta’e.

⁸ Abrahaam gara iddoo dhaaluuf jiruu akka dhaqu yommuu waamametti, amantiidhaan ajajame; eessa akka dhaqu iyyuu utuu hin beekin ka’ee deeme. ⁹ Innis akka keessummaa biyya ormaa jiruutti biyya isaaf waadaa galame sana keessa amantiidhaan qubate; akkuma warra isa wajjin waadaadhuma sana dhaalan, akkuma Yisihaaqii fi Yaaqoob dunkaana keessa jiraate. ¹⁰ Inni magaalaa hundee qabdu kan Waaqni ijaaree fi tolche eeggachaa tureetii. ¹¹ Saaraan yoo umurii da’umsaa dabartee, dhabduu turte illee isheen waan Waaqa waadaa isheef gale sana amanamaa gootee fudhatteef, amantiidhaan mucaa da’u dandeesse. ¹² Kanaaf namicha akka waan du’eetti ilaalamu tokkicha kana irraa sanyiin akka urjii samii baay’attuu fi akka cirracha qarqara galaanaa kan hin lakkaa’amne dhalate.

¹³ Namoonni kunneen hundinuu utuu waan waadaa galameef sana hin argatin amantii isaanii immoo utuu hin dhiisin du’an. Waadaa sanas fagootti ilaalanii simatan. Isaanis lafa irratti akka keessummootaa fi godaantota turan beekaniiru. ¹⁴ Warri waan akkasii jedhan kunneen akka biyya ofii isaanii eeggachaa jiran mul’isu. ¹⁵ Isaan utuu waa’ee biyya keessaa ba’an sanaa yaadaa turanii silaa, biyya isaaniitti deebi’uuf carraa ni argatu turan. ¹⁶ Qooda kanaa isaan biyya wayyu tokko jechuunis biyya samii irraa sana hawwaa turan. Kanaafuu Waaqayyo Waaqa isaanii jedhamee waamamuutti hin qaana’u; inni magaalaa isaaniif qopheesseeraatii.

§ 10:30 10:30 KeD 32:35 * 10:30 10:30 KeD 32:36; Far 135:14 † 10:37 10:37 Isa 26:20; Anb 2:3 ‡ 10:38
10:38 Anb 2:3,4 * 11:5 11:5 Uma 5:24

¹⁷ Abrahaam yeroo Waaqni isa qoretti amantiidhaan Yisihaaqin aarsaadhaaf dhi'eesse. Isuma waadaa argate sanatu ilma isaa tokkicha aarsaa godhee dhi'eessuuf qophaa'e; ¹⁸ innis isuma Waaqni, "Sanyiin kee Yisihaaqiin siif waamama"[†] jedheen sana. ¹⁹ Abrahaam akka Waaqni warra du'an keessaa nama kaasuu danda'u illee hubatee ture; kunis karaa tokkoon inni ilma isaa Yisihaaqin warra du'an keessaa deebisee argate jechuu dha.

²⁰ Yisihaaq amantiidhaan waan dhufuuf jiru irratti Yaaqoobii fi Esaawun eebbise.

²¹ Yaaqoob yeroo du'etti amantiidhaan ilmaan Yoosif tokko tokkoon eebbise; mataa ulee isaatti irkatees sagade.

²² Yoosif yeroo du'etti amantiidhaan waa'ee Gibxi keessaa ba'uu ijoollee Israa'el dubbate; waa'ee lafee isaas ajaja kenne.

²³ Yeroo Museen dhalatetti abbaa fi haati isaa mucaa miidhagaa ta'uu isaa arganii utuu labsii mootichaa hin sodaatin amantiidhaan ji'a sadii isa dhoksan.

²⁴ Museen yeroo guddatetti ilma intala Fara'oon jedhamee waamamuu amantiidhaan dide. ²⁵ Inni gammachuu cubbuutiin yeroo gabaabaaf gammaduu irra saba Waaqaa wajjin dhiphachuu filate. ²⁶ Inni waan badhaasa isaa of duratti ilaaleef, Kiristoosiif jedhee salphachuu akka qabeenya Gibxi caalaa gatii guddaa qabuutti fudhate. ²⁷ Innis utuu dheekkamsa mootichaa hin sodaatin amantiidhaan Gibxi keessaa ba'e; isa hin mul'anne sana akka waan argeetti obsee eeggate. ²⁸ Akka ergamaan hangafa ajjeesu sun hangafoota saba Israa'el hin tuqneefis amantiidhaan akka Faasiikaan ayyaaneffamu, dhiignis akka facaafamu godhe.

²⁹ Sabni Israa'el akkuma nama lafa gogaa irra deemuutti amantiin Galaana Diimaa ce'e; warri Gibxi garuu yommuu akkuma sanatti ce'uu yaalanitti ni liqimfaman.

³⁰ Dallaan Yerikoo erga guyyaa torba marfamee booddee amantiidhaan jige.

³¹ Sagaagaltuun Rahaab jedhamtu basaastota simachuu isheetiin amantiidhaan hafte malee warra hin amanin wajjin hin ajjeefamne.

³² Ani egaa kana caalaa maalin jedha ree? Waa'ee Gedewoon, waa'ee Baaraq, waa'ee Saamsoon, waa'ee Yiftaa, waa'ee Daawit, waa'ee Saamu'eelii fi waa'ee raajotaa odeessuuf ani yeroo hin qabu; ³³ isaan amantiidhaan mootummoota mo'atan; murtii qajeelaa kennan; waan waadaa galame argatan; afaan leencotaa cufan; ³⁴ amantiidhaan ibidda jabaa dhaamsan; qara goraadee jalaa ba'an; dadhabbiin isaanii jabinatti geeddarame; waraana keessatti humna argatanii loltoota diinaa ari'an. ³⁵ Dubartoonnis namoonni isaanii kanneen du'an du'aa kaafamaniif deebisanii fudhatan. Warri kaanis du'aa ka'uu wayyu argachuuf jedhanii gad dhiifamuu didanii dhiphatan. ³⁶ Warra kaanitti ni qoosame; ni garafamanis; akkasumas foncaan hidhamanii mana hidhaatti darbataman. ³⁷ Dhagaadhaanis ni tumaman; iddoo lamatti baqaqfaman; goraadeedhaan ajjeefaman. Deeguudhaan, ari'atamuu fi dhiphachuudhaan gogaa hoolotaatii fi re'ootaa uffatanii jooran; ³⁸ addunyaan isaaniif hin maleetii. Isaanis gammoojjii fi gaara irra, holqaa fi boolla keessa jooraa turan.

³⁹ Warri kunneen hundinuu yoo sababii amanti isaaniitiif jajaman iyyuu isaan keessaa namni tokko iyyuu waan waadaa galame sana hin arganne. ⁴⁰ Waaqni akka isaan nu qofa wajjin warra mudaa hin qabne ta'aniif duraan dursee waan nuuf wayyu argeera.

12

¹ Kanaafuu nu waan dhuga baatota akka duumessa guddaa akkanaatiin marfamneef kottaa ba'aa hunda, cubbuu xaxee nu qabates of irraa baafnee gannaa; dorgommii fuula keenya dura jirus obsaan jabaannee fiignaa; ² kottaa Yesuus isa jalqabaa fi fiixaan baasaa amantii keenyaa ta'e sana irra ija keenya kaa'annaa. Innis gammachuu fuula isaa dura jiruuf jedhee qaanii fannoo tuffachuun fannoo obsee mirga teessoo Waaqaa taa'e. ³ Isin akka dadhabdaniid abdiin hin kutanneef isa mormii cubbamoota isa irra ga'e akkasii obse sana yaadatti qabadhaa.

Waaqni Ilmaan Isaa ni Adaba

⁴ Isin amma iyyuu wal'aansoo cubbuu wajjin gootan keessatti hamma dhiiga dhangalaasuutti jabaattanii hin mormine. ⁵ Dubbii jajjabinaa kan akkuma ilmaaniitti isinitti dubbatu sana irraanfattaniirtu; innis akkana jedha:

"Yaa ilma ko, adabbii Gooftaa hin tuffatin;
yommuu inni si ifatus abdiin kutatin;

⁶ Gooftaan warra jaallatu ni adabaatii;

inni nama akka ilmaatti ilaalu kam iyyuu ni adaba."*

⁷ Rakkina akkuma adabbiitti obsaa; Waaqni akka ilmaan isaatti isin adabaatii. Ilmi abbaan isaa hin adabne ilma akkamii ti? ⁸ Isin yoo adabbii ijoolleen hundinuu ittiin adabaman keessatti hin hirmaanne isin diqaalota malee ijoollee dhugaa miti. ⁹ Kana malees nu hundinuu abbootii foonii kanneen nu adaban qabna turre; isaan kabajnas turre. Yoos Abbaa hafuurotaatiif immoo hammam caalaa ajajamnee jiraachuu qabna ree! ¹⁰ Abbootiin keenya akkuma isaanitti gaarii fakkaatetti yeroo gabaabaaf nu adabaa turan; Waaqni garuu akka nu qulqullummaa isaa keessatti hirmaannuuf faayidaa keenyaaf jedhee nu adaba. ¹¹ Adabbiin hundinuu yeroo sana waan nama gaddisiisu malee waan nama gammachiisu hin fakkaatu. Ergasii garuu warra adabbii sanaan leenjifamaniif ija qajeelummaa fi nagaa kenna.

¹² Kanaafuu irree laafee fi jilba dadhabe jabeessaa. ¹³ Naafti akka fayyuuf malee akka karaa irraa hin jal'anneef, "Miilla keessaniif daandii qajeelaa baafadhaa."[†]

Akeekkachiisa

¹⁴ Nama hunda wajjin nagaadhaan jiraachuu fi qulqulluu ta'uuf tattaaffadhaa; qulqul-lummaan malee namni kam iyyuu Gooftaa arguu hin danda'uutii. ¹⁵ Nama kamitti iyyuu ayyaanni Waaqaa akka hin hir'anne of eeggadhaa; hiddi hadhaa'aan biqilee rakkina akka hin uumnee fi namoota baay'ees hin xureessineef of eeggadhaa. ¹⁶ Namni kam iyyuu akka Esaawu isa mirga hangafummaa isaa nyaata tokkittiitti gurgurate sanaa sagaagaltuu yookaan nama Waaqatti hin bulle hin taaneef of eeggadhaa. ¹⁷ Inni ergasii yeroo eebba sana dhaaluu barbaadetti akka didame isin ni beektu. Inni yoo eebba sana imimmaaniin barbaade illee geeddarama tokko illee fiduu hin dandeenye.

¹⁸ Isin gara tulluu tuqamuu danda'uu fi ibiddi irraa boba'u, gara dukkanaa, gara dimimmisaa fi bubbee hin geenye; ¹⁹ gara sagalee malakataatii fi gara sagalee dubbii dubbatuu hin geenye; warri isa dhaga'anis akka dubbiin biraa dabalamee isaanitti hin dubbatamne kadhatan. ²⁰ Isaan waan, "Bineensi iyyuu yoo tulluu sana tuqe dha-gaadhaan tumamee haa ajjeefamu"[‡] jedhamee ajajame sana obsuu hin dandeenyeetii. ²¹ Wanti achitti mul'ates waan sodaachisaa ta'eef Museen, "Ani sodaadhaan hollachaan jira"[§] jedhe.

²² Isin garuu gara Tulluu Xiyyoon, gara magaalaa Waaqa jiraataa jechuunis Yerusaalem ishee samii keessaa dhuftaniirtu. Gara ergamoota kumaatama gammachuun walitti qabamanii dhuftaniirtu; ²³ gara waldaa kiristaanaa hangafoota maqaan isaanii samii keessatti barreeffamee dhuftaniirtu. Gara Waaqa Abbaa Murtii waan hundaa, gara hafuurota namoota qajeeltota warra mudaa hin qabne taasifamanii, ²⁴ gara Yesuus ararsaa gidduu galeessa kakuu haaraa, gara dhiiga facaafame kan dubbii dhiigni Abeel dubbatu sana caalaa dubbatuu dhuftaniirtu.

²⁵ Isinis akka isa dubbachaa jiru sana hin didneef of eeggadhaa. Erga isaan yeroo isa lafa irratti isaan akeekkachiise sana didanitti jalaa hin ba'in, nu immoo yoo isa samii irraa nu akeekkachiisu sana irraa gara galle akkamitti jalaa ba'uu dandeenya ree? ²⁶ Yeroo sanatti sagaleen isaa lafa sochoose; amma garuu inni, "Ani ammas yeroo tokko lafa qofa utuu hin ta'in samiiwwanis nan sochoosa"^{*} jedhee waadaa galeera. ²⁷ Dubbiin, "Ammas yeroo tokko" jedhu kun akka wanni hin sochoofamne hafee jiraatuuf, wanni sochoofamu jechuunis wanni uumame baduu isaa argisiisa.

²⁸ Kanaafuu nu waan mootummaa hin sochoone argannuuf kottaa haa galateeffannu! Kabajaa fi sodaadhaanis karaa fudhatamaa ta'een Waaqa haa waqeffannu; ²⁹ Waaqni keenya ibidda gubee balleessuudhaatii.[†]

13

Gorsa Xumuraa

¹ Akka obbolootaatti wal jaallachuu itti fufaa. ² Keessumoota simachuu hin irraanfatinaa; namoonni tokko tokko akkasiin utuu hin beekin ergamoota Waaqaa simataniiruutii. ³ Warra mana hidhaa jiran akka waan isaan wajjin hidhamtaniitti, warra dhiphina keessa jiranis akka waan ofii dhiphattaniitti yaadadhaa.

⁴ Fuudhaa fi heerumni nama hunda biratti haa kabajamu; sireen fuudhaa fi heerumaas qulqulluu haa ta'u; Waaqni ejjitootaa fi sagaagaltootatti ni muraatii. ⁵ Jireenya keessan jaalala maallaqaa irraa jabeessaa eeggadhaa; wanni qabdan isin haa ga'u; Waaqni, "Ani gonkumaa si hin dhiisu; gonkumaas si hin gatu"^{*}

[†] 12:13 12:13 Fak 4:26 [‡] 12:20 12:20 Bau 19:12,13 [§] 12:21 12:21 KeD 9:19 * 12:26 12:26 Hag 2:6 [†] 12:29

12:29 KeD 4:24 * 13:5 13:5 KeD 31:6

jedheeraatii. ⁶ Kanaaf nu ija jabinaan,
 “Goftaan gargaaraa koo ti; ani hin sodaadhu.

Namni maal na gochuu danda’a?”† jenna.

⁷ Hooggantoota keessan warra dubbii Waaqaa isinitti himanii turan sana yaadadhaa. Waan jireenya isaanii irraa argames ilaalaa; amantii isaanii duukaa bu’aa. ⁸ Yesuus Kiristoos kaleessa, har’a, bara baraanis sanuma.

⁹ Barsiisa gosa hundumaa kan keessummaa ta’een hin fudhataminaa. Garaan keenyas sirna waa’ee nyaataatiin utuu hin ta’in ayyaanaan jabina argachuu qaba; sirni waa’ee nyaataa warra isa kabajan iyyuu hin fayyadu. ¹⁰ Nu iddoo aarsaa kan warri dunkaana qulqulluu keessa aajaajilan irraa nyaachuuf mirga hin gabne tokko qabna.

¹¹ Lubni ol aanaan dhiiga horii qabatee sababii cubbuutiif aarsaa dhi’eessuuf jedhee Iddoo Iddoo Hunda Caalaa Qulqulluu ta’e sana seena; foon horii sanaas qubata keessaa gad baafamee gubama. ¹² Kanaafuu Yesuus dhiiga ofiitiin saba qulqulleessuuf jedhee karra magaalattiitiin alatti dhiphate. ¹³ Eгаа kottaa nus salphina inni baate sana baannee iddoo qubataatiin ala gara isaa haa dhaqnu. ¹⁴ Nu magaalaa dhufuuf jirtu eegganna malee magaalaa bara baraa asii hin qabnuutii.

¹⁵ Kanaafuu kottaa utuu gargar hin kutin karaa Yesuusiitiin aarsaa galataa Waaqaaf haa dhi’eessinu; aarsaan kunis dubbii maqaa isaa beeksisuuf afaan keenya keessaa ba’uu dha. ¹⁶ Waan gaarii gochuu fi waan qabdanis namaan ga’uu hin dhiisinaa; Waaqni aarsaa akkasiitti gammadaatii.

¹⁷ Hooggantoota keessaniif ajajamaa; isaaniifis bulaa. Isaan waan itti gaafatamtoota lubbuu keessanii ta’aniif isin eegu; kanas utuu gaddaan hin ta’in akka isaan gammachuun hojjetaniif isaaniif ajajamaa; yoo isaan gaddaan hojjetan isin hin fayyaduutii.

Akka Kadhannaa Godhaniif Gaafachuu

¹⁸ Isin Waaqa nuu kadhadhaa. Nu akka karaa hundumaan qalbii qulqulluu qabnuu fi akka jireenya kabajamaa jiraachuu hawwinu mirkaneeffanneerra. ¹⁹ Keessumattuu akka ani dafee deebi’ee gara keessan dhufuuf akka Waaqa kadhattan isin gorsa.

Ebbaa fi Dhaamsa Nagaa Xumuraa

²⁰ Waaqni nagaa inni karaa dhiiga kakuu bara baraaatiin Goftaa keenya Yesuus, Tiksee hoolotaa guddicha sana warra du’an keessaa kaase sun, ²¹ akka isin fedhii isaa raawwattaniif waan gaarii hundaan isin haa qopheessu; innis karaa Yesuus Kiristoosiitiin waan isa gammachiisu nu keessatti haa hojjetu; ulfinni bara baraa hamma bara baraatti Yesuus Kiristoosiif haa ta’u. Ameen.

²² Yaa obbolloota nana, ani waan xalayaa gabaabaa isinii barreesseef, akka isin ergaa gorsaa kana obsaan fudhattan isin kadhadha.

²³ Akka obboleessi keenya Xiimotewos mana hidhaatii hiikame akka beektan nan barbaada. Yoo inni dafee as dhufe ani isin arguuf isa wajjin nan dhufa.

²⁴ Hooggantoota keessan hundaa fi qulqulloota hundatti nagaa naa himaa. Warri lixaaliyaa irraa dhufanis nagaa isinii dhaamu.

²⁵ Ayyaanni isin hunda wajjin haa ta’u.

Yaaqoob

Nagaa Gaafachuu

¹ Yaaqoob garbicha Waaqaatii fi kan Yesuus Kiristoos Gooftichaa irraa,

Gara gosoota kudha lamaan bibittinnaa'aniitti:

Nagaan isiniif haa ta'u.

Qorumsaa fi Dhiibbaa

² Yaa obbolloota ko, yommuu qorumsi adda addaa isin irra ga'utti akka gammachuu guutuutti fudhadhaa; ³ amantiin keessan qoramuun isaa akka obsa isiniif argamsiisu beektuutii. ⁴ Akka isin bilchaatoo fi guutuu, warra hir'ina tokko iyyuu hin qabne taataniif obsi hojii isaa haa raawwatu. ⁵ Isin keessaa namni tokko iyyuu hanqina ogummaa yoo qabaate, Waaqa utuu hin tuffatin nama hundumaaf arjummaan kennu haa kadhatu; isaafis ni kennama. ⁶ Inni garuu yommuu kadhatu amantiin haa kadhatu; hin shakkinis; namni shakku akka dambalii galaanaa kan bubbeen dha'amee oofamuu ti. ⁷ Namni sun waan tokko illee Gooftaa biraa nan argadha jedhee hin eeggatin; ⁸ inni nama yaada lamaa ti; iddoo tokkos hin dhaabatu.

⁹ Obboleessi gad qabame ol qabamuu isaatiin of haa jaju. ¹⁰ Sooressi garuu gad qabamuu isaatti of haa jaju; inni akkuma daraaraa margaa ni harca'aatii. ¹¹ Aduun ho'a gubuun baatee marga gogsitiitii; daraaraan biqiltuu sanaas ni harca'a; miidhaginni isaas ni bada. Sooressis utuma hojii isaatiif olii gad figuu bada.

¹² Namni qorumsa obsu eebbifamaa dha; inni yommuu qorametti jabaatee waan dhaabateef gonfoo jireenyaa kan Waaqni warra isa jaallataniif waadaa gale sana ni argataatii.

¹³ Namni kam iyyuu yommuu qoramutti, "Waaqatu na qoraa jira" hin jedhin. Waaqni hamaadhaan hin qoramutii; innis nama tokko illee hin qoru; ¹⁴ tokkoon tokkoon namaa garuu yommuu hawwii ofii isaa hamaa sanaan harkifamee gowwoomfamutti qorama. ¹⁵ Hawwiinis yommuu ulfooftetti cubbuu dhalti; cubbuun immoo yommuu guutumaan guutuutti guddattetti du'a dhalti.

¹⁶ Yaa obbolloota koo jaallatamoo, hin dogoggorinaa. ¹⁷ Kennaan gaariin hundinuu, kennaan mudaa hin qabne hundinuus Abbaa ifaa isa akka gaaddidduu hin geeddaramne sana biraa gubbaadhaa gad bu'a. ¹⁸ Innis akka nu uumama isaa hundumaaf gosa hanqafa taanuuf akkuma fedhii isaatti dubbii dhugaatiin nu dhalche.

Dhaga'uu fi Hojii Irra Oolchuu

¹⁹ Yaa obbolloota koo jaallatamoo, waan kana hubadhaa: Namni hundinuu dhaga'uutti haa ariifatu; dubbachuuf suuta haa jedhu; aaruuttis suuta haa jedhu; ²⁰ aariin namaa qajeelummaa Waaqaa hin hojjetuutii. ²¹ Kanaaf xuraa'ummaa hundaa fi hammina isin keessa jiraatu hunda of irraa fageessaa; dubbii lubbuu keessan fayyisuu danda'u kan isin keessatti facaafame sana garraamummaan fudhadhaa.

²² Isin garuu warra dubbicha hojii irra oolchitan ta'aa malee warra dhaga'uu qofaan of gowwoomsitan hin ta'inaa. ²³ Namni dubbicha dhaga'ee hojii irra hin oolchine kam iyyuu nama of-ilaalee keessatti fuula isaa ilaallatu fakkaata; ²⁴ innis erga of ilaalee booddee ni deema; yommuusuma maal akka fakkaatu ni irraanfata. ²⁵ Garuu namni seera bilisaa kan hir'ina hin qabne sana hubatee ilaalu, kan akka seera sanaattis jiraatu, kan waan dhaga'es hojii irra oolchuu malee hin irraanfanne sun waan hojjetu keessatti ni eebbifama.

²⁶ Namni waan amantaa qabu of se'u, kan garuu arraba isaa hin luugamanne yoo jiraate inni of gowwoomsa; amantaan isaas faayidaa hin qabu. ²⁷ Amantaan Waaqa Abbaa keenya duratti qulqulluu ta'ee fi kan mudaa hin qabne isa kana: kunis ijoollee abbaa fi haadha hin qabnee fi haadhota hiyyeessaa rakkina isaanii keessatti kunuunsuu fi xuraa'ummaa addunyaa irraa of eeggachuu dha.

2

Nama Wal caalchisuun Dhowwaa dha

¹ Yaa obbolloota ko, isin waan Gooftaa keenya kan ulfinaa Yesuus Kiristoositti amantaniif nama wal hin caalchisinaa. ² Namni qubeelaa warqee kaa'atee uffata

bareedaas uffatu tokko gara wal ga'ii keessanii dhufa haa jennu; akkasumas hiyyeessi darsa uffatu ni dhufa haa jennu. ³ Isinis yoo namicha uffata bareedaa uffatu sanaaf ulfina addaa kennitanii, "Maaloo kottuu iddoo gaarii taa'ii!" jettan, yoo namicha hiyyeessa sanaan immoo, "Ati achi dhaabadhu" yookaan "Kottuutii miilla koo bira taa'ii!" jettan, ⁴ isin gidduu keessanitti garaa garummaa uumtanii warra yaada hamaan murteessitan hin taanee?

⁵ Yaa obboloota koo jaallatamoo, mee dhaga'aa! Waaqni akka isaan amantiitti sooreyyii ta'anii fi akka isaan mootummaa inni warra isa jaallataniif waadaa gale sana dhaalaniif hiyyeeyyii addunyaa kanaa filateera mitii? ⁶ Isin garuu hiyyeeyyii salphiftaniirtu. Warri isin qisaasuutti jiran warruma sooreyyii sana mitii? Kanneen gara mana murtiitti isin harkisaa jiranis isaanuma mitii? ⁷ Maqaa kabajamaa isin ittiin waamantan sanas kan arrabsan isaanuma mitii?

⁸ Seera mootii kan Katabbii Qulqulluu keessatti, "Ollaa kee garuu akka ofii keetti jaalladhu"* jedhu sana yoo dhugumaan eegdan isin waan qajeelaa gochaa jirtu. ⁹ Yoo nama wal caalchiftan garuu isin cubbuu hojjetan; seera durattis akka seera cabsitootaatti isinitti murama. ¹⁰ Sababiin isaas namni seera guutummaatti eegee waan tokko qofa cabse kam iyyuu akka waan seera hunda cabseetti ilaalamaatii. ¹¹ Inni, "Hin ejjin"† jedhe sun akkasuma immoo, "Hin ajjeesin"‡ jedheeraatii. Ati yoo ejjuu baatte illee nama ajjeefnaan seera cabsiteerta.

¹² Isin akka warra seera nama bilisoomsuun itti muramuutti dubbadhaa; hojjedhaas; ¹³ nama namaaf hin araaramnetti murtii araara hin qabnetu murama. Araarri murtii mo'a.

Amantii fi Hojii

¹⁴ Yaa obboloota ko, namni tokko yoo, "Ani amanti qaba" jedhee garuu hojiin argisiisuu baate, kun faayidaa maalii qaba? Amantiin akkanaa isa fayyisuu danda'aa ree? ¹⁵ Fakkeenyaaf obboleessi tokko yookaan obboleettiin tokko uffataa fi waan guyyaa guyyaan nyaatan hin qaban haa jennu. ¹⁶ Isin keessaa yoo namni tokko, "Nagaan deemaa; isinitti haa ho'u; quufaas" isaaniin jedhee garuu waan foon isaaniitiif barbaachisu tokko illee hin kenniif, kun faayidaa maalii qaba ree? ¹⁷ Akkasumas amantiin hojiin hin mul'ifamne ofiinuu du'aa dha.

¹⁸ Namni tokko garuu, "Ati amanti qabda; ani immoo hojii qaba" jedha.

Ati amanti kee hojii malee na argisiisi; anis hojii kootiin amanti koo sin argisiisa. ¹⁹ Akka Waaqni tokkichi jiru ati ni amanta. Kun gaarii dha! Hafuuronni hamoon iyyuu waan kana ni amanu; sodaadhaanis ni hollatu.

²⁰ Yaa namicha gowwaa nana, ati akka amantiin hojii of keessaa hin qabne du'aa ta'e beekuu barbaaddaa? ²¹ Abbaan keenya Abrahaam yommuu ilma isaa Yisihaaqin iddoo aarsaa irratti dhi'eessetti waan hojete sanaaf qajeelaa ta'ee hin lakkaa'amnee ree? ²² Akka amantiin isaatii fi hojiin isaa tokkummaan hojjechaa turan ni argita; waan inni hojjetenis amantiin isaa guutuu ta'e. ²³ Kanaanis wanni katabbii qulqulluu keessatti, "Abrahaam Waaqaa amane; kunis qajeelummaatti lakkaa'ameef"§ jedhu ni raawwatame; innis michuu Waaqaa jedhame. ²⁴ Egaa akka namni hojiidhaanis malee amanti qofaan qajeelaatti hin lakkaa'amne ni argitu.

²⁵ Akkasuma immoo sagaagaltuun Rahaab jedhamtu yommuu basaastota simattee karaa kaaniin isaan geggeessitetti waan hojjetteen qajeeltuutti hin lakkaa'amnee ree? ²⁶ Akkuma dhagni hafuura hin qabne du'aa ta'e sana, amantiin hojii hin qabnes du'aa dha.

3

Arraba Leenjifachuu

¹ Yaa obboloota ko, baay'een keessan barsiistota hin ta'inaa; nu warra barsiisnutti murtii cimaan akka muramu ni beektuutii. ² Nu hundinuu karaa baay'eedhaan gufanna. Namni waan dubbatu keessatti hin gufanne kam iyyuu nama hir'ina hin qabnee dha; dhagna isaas guutummaatti to'achuu danda'a.

³ Fardi akka nuuf ajajamuuf yoo afaan isaa luugamne dhagna isaa guutuu gara barbaanne geessuu dandaayya. ⁴ Mee doonii illee ilaalaa! Dooniin yoo akka malee guddaa ta'ee bubbee jabaadhaan oofame illee namichi isa oofu batoo xinnoo isheetiin gara barbaadetti geessa. ⁵ Akkasuma immoo arrabni kutaa dhagnaa xinnoo dha; waan gurguddaadhaan of jaja. Bosonni hammam guddaa ta'u iyyuu qaanqee ibiddaa

* 2:8 2:8 Lew 19:18 † 2:11 2:11 Bau 20:14; KeD 5:18 ‡ 2:11 2:11 Bau 20:13; KeD 5:17 § 2:23 2:23 Uma 15:6

xinnaadhaan akka gubatu hubadhaa. ⁶ Arrabni ibidda; kutaawwan dhagnaa keessattis addunyaa hamminaa ti. Inni dhagna guutuu xureessa; adeemsa uumamaattis ibidda qabsiisa; ofii isaatii immoo ibidda gahaannamiitiin gubama.

⁷ Bineensonni gosa hundaa, simbirroonni, uumamawwan lafa irra loo’anii fi galaana keessa jiraatan hundinuu namaan madaqfamu; madaqfamaniirus; ⁸ arraba garuu namni tokko iyyuu leenjisu hin danda’u. Arrabni hamaa boqonnaa hin qabnee dha; summii nama ajjeesuunis kan guutamee dha.

⁹ Nu arrabaan Gooftaa fi Abbaa eebbifna; isumaan immoo nama bifa Waaqaatiin uumame abaarra. ¹⁰ Afaanuma tokko keessaa eebbii fi abaarsi ba’a. Yaa obboloota ko, wanni kun akkas ta’uu hin qabu. ¹¹ Bishaan mi’aawaa fi hadhaa’aan burqaa tokko keessaa ni ba’aa? ¹² Yaa obboloota ko, mukni harbuu ija ejersaa naqachuu yookaan wayiniin ija harbuu naqachuu danda’aa? Akkasuma immoo burqaan bishaan soogiddaa bishaan mi’aawaa kennuu hin danda’u.

Ogummaa Gosa Lamaa

¹³ Isin keessaa ogeessii fi hubataan eenyu? Kanas inni jireenya isaa gaariidhaan, hojii ogummaa kan gad of qabuudhaan hojjetamuun haa argisiisu. ¹⁴ Isin garuu yoo hinaaffaa hadhaa’aa fi hawwii ofittummaa garaa keessan keessaa qabaattan of hin jajinaa; dhugaa irrattis soba hin dubbatinaa. ¹⁵ Ogummaan kun kan lafaa ti; kan foonii ti; kan hafuura hamaati malee kan samii irraa dhufu miti. ¹⁶ Iddoo hinaaffaa fi hawwiin ofittummaa jiru, jeequmsaa fi hojii hamminaa hundumatu jira.

¹⁷ Ogummaan samii irraa dhufu garuu duraan dursee qulqulluu dha; akkasumas naggaa qabeessa; garraamii dha; ajajamaa dha; kan araaraa fi ija gaariin guutamee dha; wal caalchisuu fi itti fakkeessuus of keessaa hin qabu. ¹⁸ Iji qajeelummaa warra nagaa buusaniin nagaadhaan facaafama.

4

Waaqaaf Bula

¹ Wanni lolaa fi walitti bu’uu isin gidduutti kaasu maali? Isaan hawwii isin keessatti wal lolan irraa dhufu mitii? ² Isin ni hawwitu; garuu hin argattan. Kanaaf ni ajjeeftu; ni hinaaftus. Garuu waan barbaaddan sana argachuu hin dandeessan. Kanaafis walitti buutu; wal loltus. Isin waan Waaqa hin kadhanneef hin qabaattan. ³ Isin dharraa keessan hamaa guutachuuf jettanii yaada hamaan waan kadhattaniif yommuu kadhattan hin argattan.

⁴ Yaa ejjitoota, addunyaatti michoomuun Waaqatti diina ta’uu akka ta’e hin beektanii? Namni michuu addunyaa ta’u kam iyyuu diina Waaqaa ta’a. ⁵ Yookaan wanni Katabbiin Qulqulluun, “Hafuurri nu keessa jiraatu sun hinaaffaadhaan hawwa” jedhu akkasumaan dubbatama seetuu ree? ⁶ Inni garuu ayyaana caalu nuuf kenna. Sababiin Katabbiin Qulqulluun, “Waaqni of tuultotaan ni morma;

warra gad of qabaniif immoo ayyaana kenna”*

⁷ Kanaafuu Waaqaaf bulaa. Diiyaabiloosiin immoo mormaa; innis isin baqataa. ⁸ Waaqatti dhi’aadhaa; innis isinitti ni dhi’aataa. Isin cubbamoonna harka keessan dhiqadhaa; warri yaada lama qabdanis garaa keessan qulqulleeffadhaa. ⁹ Dhiphadhaa; gaddaa; boo’aas. Kolfi keessan boo’ichatti, gammachuun keessan immoo gaddatti haa geeddaramu. ¹⁰ Fuula Gooftaa duratti gad of qabaa; inni immoo ol isin qabaa.

¹¹ Yaa obboloota, wal hin hammeessinaa. Namni obboleessa isaa hammeessu yookaan obboleessa isaatti muru kam iyyuu seera hammeessa; seerattis ni mura. Garuu ati yoo seeratti murte seera sanatti muraa jirta malee isaaf ajajamaa hin jirtu. ¹² Inni seera tumuu fi Abbaan Murtii tokkichuma; innis isa fayyisuu fi balleessuu danda’uu dha. Garuu nama kaanitti muruuf ati eenyu?

Waa’ee Boriitiif of jajuu

¹³ Egaa isin warri, “Har’a yookaan bor magaalaa kana yookaan magaalaa sana dhaqnee waggaa tokko achi turra; daldallees bu’aa arganna” jettan mee dhaga’aa. ¹⁴ Isin waan bor ta’uuf jiru iyyuu hin beektan. Jireenyi keessan maal innii? Isin hurrii yeroo xinnoof mul’attee ergasii immoo badduu dha. ¹⁵ Qooda kanaa isin, “Yoo Gooftaan jedhe, nu ni jiraanna; waan kana yookaan waan sana ni hojjenna” jechuu qabdu. ¹⁶ Amma garuu isin of jajuu keessaniitti gammaddu. Gammachuun akkasii hundi hamaa dha.

* 4:6 4:6 Fak 3:34

¹⁷ Egaa namni kam iyyuu waan gaarii hojjechuu qabu utuma beekuu yoo hojjechuu baate kun cubbuu isatti ta'a.

5

Sooreyyii Nama Cinqursaniif Akeekkachiisa Kennuu

¹ Isin yaa sooreyyii, sababii dhiphinni isinitti dhufuuf jiruutiif boo'aa; wawwaadhaas. ² Qabeenyi keessan tortoreera; biliinis uffata keessan nyaateera. ³ Wargee fi meetiin keessan sameera. Dandaa'uun isaaniis isinitti dhugaa ba'a; akkuma ibiddaattis foon keessan nyaata. Isin bara dhumaatiif qabeenya walitti qabattaniirtu. ⁴ Kunoo, mindaan isin warra midhaan keessan haaman dhowwattan sun ni iyya. Iyyi warra midhaan keessan walitti qabaniis gurra Gooftaa Waan Hunda Danda'u sanaa seeneera. ⁵ Isin qananii fi gammachuun lafa irra jiraattaniirtu. Guyyaa qalmaatiifis of gabbiftaniirtu. ⁶ Nama qajeelaa isiniin hin morminetti murtanii ajjeeftu.

Dhiphina Keessatti Obsa Qabaachuu

⁷ Kanaafuu yaa obboloota, hamma dhufaati Gooftaatti obsaa. Qonnaan bulaan tokko lafa irraa midhaan gaarii argachuuf hammam akka eeggatu, bokkaa duraatii fi kan dhumaa hamma argattuttis hammam akka obsu hubadhaa. ⁸ Isinis akkasuma obsaa; jabaadhaa dhaabadhaas; dhufaatiin Gooftaa dhi'aateeraatii. ⁹ Yaa obboloota, akka isinitti hin muramneef walitti hin guunguminaa. Kunoo, Abbaan Murtii balbala dura dhaabateera.

¹⁰ Yaa obboloota, raajota maqaa Gooftaatiin dubbachaa turan sana akka fakkeenya dhiphinaa fi obsaatti fudhadhaa. ¹¹ Kunoo, nu warra obsaan jabaattanii dhaabatan sanaan eebbifamoo jenna; Iyyoob obsuu isaa dhageessaniirtu; waan Gooftaan dhuma irratti isaaf godhes argitaniirtu. Gooftaan gara laafinaa fi araaraan kan guutamee dha.

¹² Hundumaa caalaa immoo yaa obboloota ko, hin kakatinaa; samiin yookaan lafaan yookaan waan biraa tokkoon illee hin kakatinaa. Wannii isin jechuu qabdan, "Eeyyee" yookaan "waawuu" haa ta'u. Yoo kanaa achii isinitti murama.

Kadhannaa Amantii

¹³ Isin keessaa namni dhiphachaa jiru jiraa? Inni haa kadhatu. Namni gammadu jiraa? Inni faarfannaa galataa haa faarfatu. ¹⁴ Isin keessaa namni dhukkubsatu jiraa? Inni jaarsolii waldaa kiristaanaa haa waamsifatu; isaanis maqaa Gooftaatiin zayitii isa dibanii haa kadhataniif. ¹⁵ Kadhannaan amantiin godhamu nama dhukkubsatu ni fayyisa; Gooftaanis isa ni kaasa. Yoo inni cubbuu hojjetee jiraates ni dhiifamaaf. ¹⁶ Kanaafuu akka fayyitaniif cubbuu keessan walitti himadhaatii walii kadhadaa. Kadhannaan nama qajeelaa humna qaba; waan guddaas ni hojjeta.

¹⁷ Eeliyaas namuma akka keenyaa ture. Innis akka bokkaan hin roobneef jabeessee kadhate; bokkaanis waggaa sadii fi ji'a ja'a lafa irratti hin roobne. ¹⁸ Ammas deebi'ee kadhate; samiin bokkaa kenne; laftis midhaan baafte.

¹⁹ Yaa obboloota ko, isin keessaa namni tokko yoo dhugaa irraa fagaate, namni biraa immoo yoo isa deebise, ²⁰ inni nama cubbamaa karaa jal'aa irraa deebisu lubbuu namicha sanaa akka du'a jalaa baasu, cubbuu baay'ees akka dhoksu haa beeku.

Phexros Tokkoffaa

Nagaa Gaafachuu

¹ Phexros ergamaa Yesuus Kiristoos irraa,

Gara filatamtoota Phonxoos, Galaatiyaa, Qaphadooqiyaa, Asiyaa fi Biitaaniyaa keessa bibittinnaa'an ² kanneen akka beekumsa Waaqa Abbaatti, karaa hojii qulqulleessuu Hafuuraatiin, akka Yesuus Kiristoosiif ajajamanii fi akka dhiigni isaa isaanitti facaafamuuf filatamaniitti:

Ayyaannii fi nagaan isiniif haa baay'atu.

Abdii Jiraataadhaaf Waaqa Galateeffachuu

³ Waaqaa fi Abbaan Gooftaa keenya Yesuus Kiristoos haa eebbifamu! Inni araara isaa guddaa sanaan, warra du'an keessaa ka'uu Yesuus Kiristoosiin abdii jiraataadhaaf lammata nu dhalche; ⁴ akkasumas dhaala hin badne, kan hin xuroofne yookaan hin geeddaramnetti nu galche; dhaalli kunis samii keessa isinii kaa'ameera; ⁵ isin warra karaa amantiitiin hamma fayyina bara dhumaatti mul'achuudhaaf qophaa'e sanaatti humna Waaqaatiin eegamtanii dha. ⁶ Isinis yoo amma yeroo gabaabaaf qorumsa gosa garaa garaa keessa darbuu qabaattan iyyuu waan kanaan akka malee gammaddan. ⁷ Wannii kunis akka amantiin keessan kan warqee yoo ibiddaan qulqulleeffame iyyuu badu sana caalu sun dhugaa ta'uun isaa mirkaneeffamee, yeroo itti Yesuus Kiristoos mul'atutti galata, ulfinaa fi kabaja fiduuf ta'e. ⁸ Isin utuu isa hin argin isa jaallattu; amma yoo isa arguu baattan iyyuu isatti amantu; gammachuu ibsamuu hin dandeenyee fi ulfina qabeessaanis guutamniirtu; ⁹ isin bu'aa amantii keessanii jechuunis fayyina lubbuu keessanii argachaa jirtuutii.

¹⁰ Raajonni waa'ee ayyaana isinii kennamuuf jiru sanaa dubbatan sun itti jabaatanii waa'ee fayyina kanaa qorachaa, iyyaafachaas turan; ¹¹ isaanis yommuu Hafuurri Kiristoos inni isaan keessa ture sun waa'ee dhiphina Kiristoosiiti* fi waa'ee ulfina itti aanu sanaa duraan dursee dubbatetti yoomii fi haala akkamii keessa akka ta'u beekuuf yaalaa turan. ¹² Namoonni Hafuura Qulqulluu isa samiidhaa ergameen wangeela isinitti lallaban sun waan amma isinitti himan keessatti utuu ofii isaanii hin ta'in isin akka tajaajilan ifa ni ta'eef; waan kana ergamoonni iyyuu gad fageenyaan arguu hawwu.

Qulqulloota Ta'aa

¹³ Kanaafuu mudhii qalbii keessanii hidhadhaa; warra of qaban ta'aa; abdii keessanis guutumaan guutuutti ayyaana yeroo Yesuus Kiristoos mul'atutti isinii kennamu sana irra kaa'adhaa. ¹⁴ Akka ijoollee ajajamanii ta'aa malee hawwii hamaa bara wallaalummaa keessanii sana duukaa hin bu'inaa. ¹⁵ Qooda kanaa akkuma inni isin waame sun qulqulluu ta'e, isinis waan hojjetan hundumaan qulqulloota ta'aa; ¹⁶ "Ani qulqulluudhaatii isinis qulqulloota ta'aa"† jedhamee barreeffameeraatii.

¹⁷ Isin erga isa utuu wal hin caalchisin nama hunda akkuma hojii isaatti itti muru sana "Abbaa" jettanii waammattanii bara keessummummaa keessan isa sodaachaa jiraadhaa. ¹⁸ Isin akka jireenya faayidaa hin qabne kan abbootii keessan irraa dhaaltan irraa waan baduu danda'u kan akka meetiitii fi warqetiin hin furamin beektuutii. ¹⁹ Garuu dhiiga gatii guddaa qabu, dhiiga Kiristoos jechuunis hoolaa mudaa yookaan hanqina hin qabne sanaatiin furamtaniirtu. ²⁰ Inni utuu addunyaan hin uumamin duraan dursee beekame; garuu isiniif jedhee bara dhuma kana keessa mul'ate. ²¹ Isinis karaa isaatiin Waaqa warra du'an keessaa isa kaasee ulfina isaaf kenne sanatti amantu; kunis akka amantiif fi abdiin keessan Waaqayyo ta'uuf.

²² Egaa isin waan akka obboloota keessaniif jaalala dhugaa qabaattaniif jettanii dhugaadhaaf ajajamuun of qulqulleessitaniif, cimsaatiin garaa qulqulluudhaan wal jaalladhaa. ²³ Isin karaa dubbii Waaqaa isa jiraatuu fi cimee dhaabatu sanaatiin sanyii hin badne irraa lammata dhalattan malee sanyii badu irraa miti.

²⁴ "Foon hundi akkuma margaa ti;

ulfinni isaa hundis akkuma daraaraa margaa ti;
margi ni coollaga; daraaraanis ni harca'a;

* 1:11 1:11 yookaan Masiichichaa † 1:16 1:16 Lew 11:44,45; 19:2; 20:7

²⁵ dubbiin Gooftaa garuu bara baraan ni jiraata.”‡
Dubbiin kunis wangeela isinitti lallabame sana.

2

¹ Kanaafuu hammina hunda, gowwoomsaa hunda, itti fakkeessummaa, weennoo fi maqaa nama balleessuu hunda of irraa fageessaa. ² Akka ittiin fayyina keessaniin guddattaniifis akkuma daa'imman reeffuu dhalataniitti aannan hafuuraa qulqullaa'aa sana jabeessaa dharra'aa; ³ isin gaarummaa Gooftaa dhandhamattaniirtuutti.

Dhagaa Jiraataa fi Saba Filatame

⁴ Isin erga gara isaa, gara Dhagaa jiraataa namoonni tuffatanii Waaqni garuu filate gati jabeessa sanaa dhuftanii, ⁵ isinis akkuma aarsaa hafuuraa kan karaa Yesuus Kiristoosiin Waaqa biratti fudhatamaa ta'e dhi'eessuudhaan luboota qulqullaa'oo ta'uuf akkuma dhagaawwan jiraatootti mana hafuuraa taatanii ijaaramaa jirtu. ⁶ Katabbiin Qulqulluu, "Kunoo, ani Xiyoona keessa, dhagaa tokko,

dhagaa golee filatamaa gati jabeessa nan kaa'a;
namni isa amanatu

kam iyyuu hin qaana'u"*
jedhaatii. ⁷ Kanaafuu dhagaan kun isin warra amantaniif dhagaa gati jabeessaa dha. Warra hin amanneef garuu,
"Dhagaan ijaarttonni tuffatan,
dhagaa golee ta'eera."†

⁸ Akkasumas,

"Dhagaa nama gufachiisu,
kattaa nama kuffisu ta'e"‡

jedhameera. Isaanis waan dubbii sanaaf ajajamuu didaniif gufatan; dhugumaanuu isaan kanumaaf ramadaman.

⁹ Isin garuu akka galata isa dukkana keessaa gara ifa isaa dinqisiisaatti isin waame sanaa labsitaniif dhaloota filatame, luboota mootii, saba qulqulluu, saba Waaqaa kan addaa taataniirtu. ¹⁰ Isin dur saba Waaqaa hin turre; amma garuu saba Waaqaa ti; isin dur araara hin arganne; amma garuu araara argattaniirtu.

Jireenya Waaqatti Tolu Jiraachuu

¹¹ Yaa michoota jaallatamoo, isin waan addunyaa keessatti alagoottaa fi keessummoota taataniif akka hawwii foonii kan lubbuu keessan lolu irraa fagaattan ani isinin gorsa. ¹² Akka ormoonni akka waan isin hammina hojjetaniitti maqaa isin balleessan sun, hojii keessan isa gaarii arganii guyyaa Waaqni nu ilaaluu dhufutti ulfina isaaf kennaniif isaan gidduutti amala gaarii qabaadhaa.

Bulchitootaaf Buluu

¹³ Gooftaadhaaf jedhaatii taayitaa namaa hunda jalatti bulaa; mootii taayitaa ol aanaa qabu ¹⁴ yookaan bulchitoota inni akka isaan namoota balleessaa hojjetan adabani warra waan qajeelaa hojjetan immoo galateeffataniif erge hundumaa jalattis bulaa. ¹⁵ Waaqni akka isin waan gaarii hojjechuudhaan haasaa wallaalummaa namoota gowwaa afaan qabachiiftan fedhaatii. ¹⁶ Akka warra bilisummaa qabaniitti jiraadhaa; bilisummaa keessan immoo hammina dhoksuuf itti hin fayyadaminnaa; garuu akka tajaajiltoota Waaqaatti jiraadhaa. ¹⁷ Nama hunda kabajaa; obbolummaa amantootaa jaalladhaa; Waaqa sodaadhaa; mootiifis ulfina kennaa.

Gooftoliidhaaf Buluu

¹⁸ Yaa garboota, isinis gooftota keessan warra gaarii fi toloota qofa utuu hin ta'in warra jal'ootas sodaa hundaan jalatti bulaa. ¹⁹ Namni tokko yoo Waaqaaf jedhee dhiphina dabaan isatti dhufe obse galata qaba. ²⁰ Isin yoo sababii balleessaa hojjetaniif dhaanamtanii obsitan galata maalii argattu? Garuu yoo sababii waan qajeelaa hojjetaniif dhiphattanii obsitan kun fuula Waaqaa duratti galata qaba.

Fakkeenya Kiristoos

²¹ Wannii isin waamantaniifis kanuma. Kiristoos akka isin faana isaa duukaa buutaniif jedhee isiniif dhiphachuudhaan fakkeenya isinii kenneeraatii.

²² "Inni cubbuu hin hojjenne;

sobni afaan isaatii hin baane."§

23 Yeroo isaan isa arrabsanitti inni isaan hin arrabsine; yeroo dhiphatettis nama hin doorsifne. Garuu isa qajeelummaan muru sanatti imaanaa of kenne. ²⁴ Inni mataan isaa akka nu cubbuuf duunee qajeelummaaf immoo jiraannuuf jedhee dhagna isaatiin cubbuu keenya fannoo irratti baate; isinis madaa isaatiin fayyitaniirtu. ²⁵ Isin dur akkuma hoolota karaa irraa badanii turtan; amma garuu gara Tiksee fi Phaaphaasii lubbuu keessaniitti deebitaniirtu.

3

Niitonna Dhirsootaaf Buluu

¹ Yaa niitota, yoo dhirsooni dubbicha hin amanne tokko tokko jiraatan akka isaan dubbii tokko malee amaluma niitota isaaniitiin booji'amaniif isinis akkasuma dhirsoota keessaniif ajajamaa; ² isaanis yommuu qulqullinaa fi sodaa isin jireenya keessan keessatti qabdan arganitti ni booji'amu. ³ Miidhaginni keessan faaya alaan mul'atuun jechuunis shurrubbaa dha'achuu, warqee kaa'achuu fi uffata bareedaa uffachuun hin ta'in; ⁴ gooda kanaa miidhaginni keessan miidhagina keessa namummaa keessanii haa ta'u; innis miidhagina hafuura garraamii fi tasgabbaa'aa, kan hin badne, kan fuula Waaqaa duratti gatii guddaa qabu haa ta'u. ⁵ Dubartoonni qulqullooni durii warri Waaqa abdatanis akkasuma dhirsoota isaaniitiif ajajamuudhaan of miidhagsan; ⁶ Saaraanis Abrahaamiin "Gooftaa" jettee waamaa isaaf ajajamaa turte. Isinis yoo waan qajeelaa hojjettanii fi sodaachuu baattan intallan ishee ti.

Dirqama Dhirsootaa

⁷ Yaa dhirsoota, isinis akkasuma akka isaan dadhaboo ta'an hubadhaatii ulfina isaaniif kennuudhaan niitota keessan wajjin jiraadhaa; kanas sababii isaanis isin wajjin ayyaana jireenyaa dhaalaniif akka wanni tokko iyyuu kadhaa keessan hin gufachiifneef jedhaatii godhaa.

Sababii Waan Gaarii Hojjetaniif Dhiphachuu

⁸ Dhuma irratti hundi keessan yaada tokko qabaadhaa; walii na'aa; akka obbolootaatti wal jaalladhaa; garaa laafotaa fi warra gad of qabanis ta'aa. ⁹ Hamaa, hamaadhaan hin deebisinaa; yookaan arrabsoo, arrabsoodhaan hin deebisinaa; gooda kanaa eebbisaa. Isinis akka eebba dhaaltaniif kanumaaf waamamtaniiti.

¹⁰ "Namni jireenya jaallatu,

kan bara gaariis arguu hawwu kam iyyuu,

arraba isaa hammina irraa,

hidhii isaa immoo soba dubbachuu irraa haa eeggatu.

¹¹ Inni hammina irraa deebi'ee gaarii haa hojjetu;

nagaa haa barbaadu; duukaa haa bu'us.

¹² Iji Gooftaa qajeeltota irra jiraatii;

gurri isaas kadhata isaaniitiif banamaa dha;

garuu fuulli Gooftaa warra hamaa hojjetanitti ni hammaata.*"

¹³ Isin gaarii hojjechuuf yoo hinaaftan, eenyutu isin miidha? ¹⁴ Garuu yoo qajeelummaaf jettanii dhiphattan isin eebbifamoo dha. "Sodaachisuu isaanii hin sodaatinaa; hin jeeqaminaas."† ¹⁵ Garuu garaa keessan keessatti Kiristoos Gooftichaaf ulfina guddaa kennaa. Nama sababii abdiin isin qabdan sanaa isin gaafatu kamiif iyyuu deebii kennuuf yeroo hunda qophaa'aa. Waan kana immoo garraamummaa fi sodaan godhaa; ¹⁶ isinis yommuu namoonni waa'ee keessan waan hamaa dubbatanitti akka warri amala gaarii isin Kiristoos keessatti qabdan sana arrabsan qaana'aniif yaada gaarii qabaadhaa. ¹⁷ Dhiphachuun keessan fedhii Waaqaa yoo ta'e, hamaa hojjetanii dhiphachuu irra gaarii hojjetanii dhiphachuu wayya.

Fakkeenya Kiristoos

¹⁸ Kiristoosis Waaqatti isin fiduuf jedhee inni qajeelaa, warra qajeeltota hin ta'iniif si'a tokko cubbuuf dhiphateeraatii. Inni fooniin ni ajjeefame; Hafuuraan garuu jiraataa taasifame; ¹⁹ erga jiraataa taasifamee immoo dhaqee hafuurota mana hidhaa jiranitti lallabe; ²⁰ isaanis bara Nohi keessa utuu dooniin ijaaramaa jiruu, yeroo Waaqni obsaan eegeetti warra hin ajajaminii dha. Doonii kanaanis nama muraasa, walumatti nama saddeeti qofatu badiisa bishaanii jalaa ba'e; ²¹ bishaan kun fakkeenya cuuphaa amma iyyuu isin fayyisuu ti; kunis dhagna irraa xurii baasuu utuu hin ta'in qalbii qulqulluun Waaqaaf waadaa galuu dha. Innis du'aa ka'uu Yesuus Kiristoosiin isin fayyisa;

* 3:12 3:12 Far 34:12-16 † 3:14 3:14 Isa 8:12

²² Kiristoos samiitti ol ba'ee mirga Waaqaa jira; ergamoonni Waaqaa, aangoowwanii fi humnoonni hundinuu isa jalatti bulu.

4

Waaqaaf Jiraachuu

¹ Kanaafuu waan Kiristoos foon isaatiin dhiphateef isinis yaaduma akkasiitiin hidhadhaa; sababiin isaas inni fooniin dhiphate cubbuu dhiiseera. ² Kanaafuu inni bara jireenya isaa kan foonii isa hafe sana akka fedhii Waaqaatti jiraata malee akka hawwii namaatti hin jiraatu. ³ Yeroon isin duraan waan ormoonni hojjechuu jaallatan sana jechuunis jireenya gad dhiisii irratti, hawwii foonii irratti, machii irratti, addaggummaa irratti, gar malee dhuguu fi waageffannaa waaqota tolfamoo kan jibbisiisaa ta'e irratti balleessitan sun haa ga'u. ⁴ Isaanis sababii isin gara jireenya gad dhiisii akkasiitti isaan wajjin hin figneef ni dinqisiifatu; isin arrabsus. ⁵ Garuu isaan Waaqaa warra jiranii fi warra du'anitti muruuf qophaa'e sana duratti deebii ni kennu. ⁶ Kanaafuu karaa fooniitiin akkuma namaatti akka isaanitti muramuuf, karaa hafuuraatiin immoo akka Waaqaatti akka jiraataniif wangeelli warra du'anii jiranitti iyyuu lallabameera.

Dhuma Waan Hundumaa

⁷ Dhumni waan hundaa dhi'aateera. Kanaaf akka Waaqaa kadhachuu dandeessaniif dammaqaa; warra of qabanis ta'aa. ⁸ Waan hunda caalaatti jaalala ho'aa waliif qabaadhaa; jaalalli cubbuu baay'ee dhoksaatii. ⁹ Guungummii malee wal keessumsiiisaa. ¹⁰ Tokkoon tokkoon namaa kennaa warra kaan tajaajiluuf argate kam iyyuu akkuma abbaa imaanaa amanamaa kan ayyaana Waaqaa bifa garaa gaaraatiin jiru sanaa tokkootti itti fayyadamuu qaba. ¹¹ Namni dubbatu kam iyyuu akka nama dubbii Waaqaa dubbatuutti haa dubbatu. Namni tajaajilu kam iyyuu akka Waaqni waan hunda keessatti karaa Yesuus Kiristoosiin galateeffamuuf jedhee jabina Waaqni isaaf kenneen haa tajaajilu. Ulfinnii fi humni bara baraa hamma bara baraatti isaaf haa ta'u. Ameen.

Sababii Kiristaana Ta'aniif Dhiphachuu

¹² Yaa michoota jaallatamoo, qorama akka ibiddaa kan amma ittiin dhiphachaa jirtan kana akka waan wanni haaraan isinitti dhufeetti hin dinqisiifatinaa. ¹³ Garuu isin yeroo ulfinni isaa mul'atutti akka baay'ee gammaddaniif waan dhiphina Kiristoos keessatti qooda fudhattaniif gammadaa. ¹⁴ Yoo maqaa Kiristoosiitiif jettanii arrabsamtan isin eebbifamoo dha; Hafuurri ulfinaatii fi Hafuurri Waaqaa isin irra boqotaatii. ¹⁵ Isin keessaa namni kam iyyuu akka nama nama ajjeesuutti yookaan akka hattuutti yookaan akka nama yakka hojjetuutti yookaan akka nama dubbii namaa keessa seenuutti hin dhiphatin. ¹⁶ Garuu namni tokko yoo sababii Kiristaana ta'eef dhiphate maqaa sanaan Waaqaa haa galateeffatu malee hin qaana'in. ¹⁷ Yeroon itti murtiin mana Waaqaatii jalqabu dhi'aateeraatii; murtiin kun yoo nurratti jalqaba ta'e dhumni warra wangeela Waaqaatiif hin ajajamnee akkam haa ta'u ree?

¹⁸ "Erga qajeeltonni fayyuun rakkisaa ta'e,

namni Waaqatti hin bullee fi cubbamaan maal haa ta'u ree?"*

¹⁹ Kanaafuu warri akka fedhii Waaqaatti dhiphatan lubbuu isaanii Uumaa isaanii amanamaa sanatti imaanaa kennatanii waan gaarii hojjechuutti haa fufan.

5

Maanguddootaa fi Karra Hoolootaatii

¹ Ani akka maanguddoo akkuma isaanii tokkootti, akka dhuga baatuu dhiphina Kiristoosii fi akka nama ulfina mul'achuuf jiru sana keessatti qooda qabu tokkootti akkana jedhee maanguddoota isin gidduu jiran sana nan gorsa; ² karra hoolotaa Waaqaa kan tika keessan jala jiru eeguudhaan tiksoota ta'aa; kanas sababii dirqamtaniif utuu hin ta'in fedhiidhuma keessaniin akka Waaqni akka isin taatan barbaadutti, bu'aa nama qaanessa argachuuf utuu hin ta'in hawwii guddaa tajaajilaaf qabdaniin godhaa; ³ karra hoolootaatii fakkeenya ta'aa malee warra imaanaa isinitti kennaman sana humnaan hin bulchinaa. ⁴ Isinis yommuu hangafni tiksootaa mul'atutti gonfoo ulfina kan miidhaginni isaa irraa hin badne argattu.

Dargaggootaaf

⁵ Yaa dargaggoota, isinis akkasuma maanguddoota jalatti bulaa. Hundi keessanis tokkoo tokkoo keessaniif gad of qabiisa akka wayyaatti uffadhaa; "Waaqni of tuultotaan ni morma;

* 4:18 4:18 Fak 11:31

warra gad of qabaniif immoo ayyaana kennaatii.”*

⁶ Kanaafuu akka Waaqni yeroo malutti ol isin qabuuf, harka isaa humna qabeessa sana jalatti gad of qabaa. ⁷ Inni isiniif waan yaaduuf, yaaddoo keessan hunda isa irra kaa’adhaa.

⁸ Warra of qaban ta’a; dammaqaas. Diiyaabiloos diinni keessan nama liqimsu barbaadee akkuma leenca aaduu nanaanna’aatii. ⁹ Sababii akka obboleenni keessan warri addunyaa guutuu keessa jiraatan dhiphina akkasii dhiphachaa jiran beektaniif amantiitti jabaadhaatii isaan mormaa.

¹⁰ Waaqni ayyaana hundaa karaa Kiristoosiin gara ulfina isaa kan bara baraatti isin waame sun erga isin yeroo gabaabaaf dhiphattanii booddee inni mataan isaa guutuu isin taasisa; isin dhaaba; isin jabeessas. ¹¹ Bara baraa hamma bara baraatti humni isaaf haa ta’u. Ameen.

Dhaamsa Nagaa Xumuraa

¹² Anis isin jajjabeessuudhaaf, akka wanni kun ayyaana Waaqaa isa dhugaa ta’e sana dhugaa ba’uuf harka Silwaanos isa ani akka obboleessa amanamaatti hedu sanaatiin gabaabumatti barreessee isinii ergeera. Ayyaana kanaan jabaadhaa dhaabadhaa.

¹³ Waldaan kiristaanaa isheen isin wajjin filatamtee Baabilon keessa jirtu sun nagaa isinii dhaamti; ilmi koo Maarqosis akkasuma nagaa isinii dhaama.

¹⁴ Dhungoo jaalalaatiin nagaa wal gaafadhaa.

Isin warra kan Kiristoos taatan hundaaf nagaan haa ta’u.

Phexros Lammaffaa

Nagaa Gaafachuu

¹ Simoon Phexros garbichaa fi ergamaa Yesuus Kiristoos irraa,

Gara warra karaa qajeelummaa Waaqa keenyaa fi Fayyisaa keenya Yesuus Kiristoosiin amantii akkuma amantii keenyaa gatii guddaa qabu sana argattaniitti:

² Beekumsa Waaqaatii fi beekumsa Gooftaa keenya Yesuusiin ayyaannii fi nagaan isiniif haa baay'atu.

Waamamuu fi Filatamuu Ofii Mirkaneeffachuu

³ Humni waaqummaa isaa karaa isa ulfina isaatii fi gaarummaa isaatiin nu waame sana beekuu keenyaatiin waan jireenyaa fi Waaqatti buluuf nu barbaachisu hundumaa nuuf kenneera. ⁴ Kennaa kanaanis isin badiisa sababii hawwii hamaatiin addunyaa keessa jiru jalaa baatanii akka amala waaqummaa isaa sana keessatti hirmaattaniif jedhee karaa kennaa kanaatiin waadaa isaa guddaa fi kan gatii guddaa qabu nuuf galeera.

⁵ Sababuma kanaaf amantii keessan irratti gaarummaa, gaarummaa irrattis beekumsa dabalachuuf waan isinii danda'ame hunda godhaa; ⁶ akkasuma beekumsa irratti of qabuu, of qabuu irratti obsaan dhaabachuu, obsaan dhaabachuu irratti Waaqatti buluu, ⁷ Waaqatti buluu irratti jaalala obbolummaa, jaalala obbolummaa irratti immoo jaalala dhugaa dabaladhaa. ⁸ Yoo isin waan kana hunda qabaattanii ittuma isinii baay'achaa deeme, wanni kun akka isin Gooftaa keenya Yesuus Kiristoos beekuu keessatti dadhaboo fi bu'aa dhabeeyyii hin taane isin godha. ⁹ Garuu namni waan kana hin qabne kam iyyuu jaamaa dha; fagoottis arguu hin danda'u; cubbuu isaa durii sana irraa qulqulleeffamuu isaa irraanfateera.

¹⁰ Kanaaf yaa obboloota ko, waamamuu fi filatamuu keessan mirkaneeffachuuf caalaatti hinaaffaa qabaadhaa. Yoo waan kana gootan isin hin gufattan; ¹¹ akkasiin gara mootummaa bara baraa kan Gooftaa keenyaa fi Fayyisaa keenya Yesuus Kiristoositti galuun guutummaatti isiniif kennama.

Raajii Katabbii Qulqulluu

¹² Kanaafuu isin wantoota kanneen beektanii, dhugaa amma qabdan kanatti jabaatanii dhaabattanii iyyuu ani yeroo hunda wantoota kanneen isin yaadachiisuu nan barbaada. ¹³ Ani hamman dunkaana kana keessa jirutti waan kana isin yaadachiisuudhaan isin dammaqsuu koo qajeelaa nan se'a; ¹⁴ ani akka Gooftaan keenya Yesuus Kiristoos naaf ibsetti, dunkaana koo kana akkan dafee of irraa baasu beekaatii. ¹⁵ Ani akka isin erguma ani isin biraa godaanee booddee yeroo hunda waan kana yaadachuu dandeessan gochuuf nan carraaqa.

¹⁶ Nu yommuu waa'ee humnaa fi dhufaati Gooftaa keenya Yesuus Kiristoos isinitti himnetti, surraa isaa ijuma keenyaan argineeti malee oduu haxxummaadhaan uumame duukaa buanee miti. ¹⁷ Innis yommuu sagaleen, "Kun Ilma koo isa ani jaalladhuu dha; ani isatti baay'ee nan gammada"* jedhu sun Ulfina Surra qabeessa sana biraa dhufeeffitti, Waaqa Abbaa biraa kabajaa fi ulfina argateeraatii. ¹⁸ Nu mataan keenya iyyuu yeroo isa wajjin tulluu qulqulluu irra turretti, utuu sagaleen kun samii irraa dhufuu dhageenye.

¹⁹ Kanaafuu dubbiin raajonni dubbatan sun ittuma caalee nuuf mirkaneeffame; isinis hamma boruun baqaaqee bakkalchi barii garaa keessan keessatti ba'utti yoo akkuma ibsaan dukkana keessatti ibsuutti dubbii kanaaf xiyyeeffannoo kennitan waan gaarii gochuu keessan. ²⁰ Raajiin Katabbii Qulqulluu kam iyyuu hiikkaa raajichaa kan mataa isaatiin akka hin dhufin duraan dursitanii beekuu qabdu. ²¹ Raajiin takkumaa fedhii namaatiin hin dhufneetii; garuu namoota Waaqaatu Hafuura Qulqulluudhaan geggeeffamee dubbate.

2

Barsiistota Sobduu fi Badiisa Isaanii

* 1:17 1:17 Mat 17:5; Mar 9:7; Luq 9:35

¹ Akkuma raajonni sobduun saba gidduu turan sana, barsiistonni sobduun isin gidduu ni jiraatu. Isaan Goofticha isaan fure sana gananii, barsiisa sobaa kan nama balleessu dhoksanii galchu; kanaanis badiisa ariifatu ofitti fidu. ² Namoonni baay'eenis amala isaanii isa qaannessaa sana duukaa bu'u; sababii isaaniitiinis karaan dhugaa ni arrabsama. ³ Barsiistonni kunneen doqnummaa isaaniitiin oduu ofumaan uumanii odeessaniin isin qisaasu. Murtiin bara dheeraan dura isaanitti murame sun amma illee hojjechaa jira; badiisni isaaniis hin mugu.

⁴ Waaqni yeroo ergamoonni cubbuu hojjetanitti utuu isaanii hin hilin akka isaan guyyaa murtiitiif turfamaniif foncaadhaan dukkana keessatti hidhee gahaannamitti erga isaan darbatee, ⁵ utuu addunyaa duriitiif hin hilin Nohi isa qajeelummaa lallabu namoota biraa torba wajjin oolchee warra Waaqatti hin bulletti bishaan badiisaa erga fidee, ⁶ magaalaaawwan Sodoomii fi Gomoraas hamma isaan daaraa ta'anitti gubudhaan itti muree, fakkeenya waan warra Waaqaaf hin bulletti dhufuuf jiruu erga isaan godhee, ⁷ namicha qajeelaa jechuunis Looxi isa jireenya xuraa'aa finciltootaatiin dhiphachaa ture sana erga badiisa oolchee, ⁸ namichi qajeelaan sun yeroo gidduu isaanii jiraachaa turetti guyyuma guyyaan fincila isaanii sana arguu fi dhaga'uudhaan lubbuun isaa qajeeltuun sun isa keessatti dhiphachaa turtee, ⁹ wanni kun akkas ta'ee Gooftaan akkamitti akka warra Waaqaaf bulan qorumsa keessaa baasuu fi akka itti warra jal'aa hamma guyyaa murtiitti adabbiif tursu beeka.

¹⁰ Wanni kun keessumattuu warra hawwii foonii xuraa'aa sana duukaa bu'anii fi warra abbootii taayitaa tuffatanitti ni cima.

Namoonni kunneen ija jabeeyyii fi of tuultota; isaan ulfina qabeeyyii samii arrabsuu hin sodaatan; ¹¹ ergamoonni iyyuu yoo isaan caalaa jajjaboo fi humna qabeeyyii ta'an iyyuu fuula Gooftaa duratti uumamawwan akkasii arrabsanii hin himatan. ¹² Namoonni kunneen garuu waanuma hin hubanne arrabsu. Isaan akkuma bineensota qalbii hin qabnee ti; akkuma uumamawwan miira isaaniitiin qajeelfaman kanneen qabamuu fi ajjeefamuu gofaaf dhalatani ti; akkuma bineensonni sun badanitti jarris ni badu.

¹³ Miidhaa isaan hojjetaniif miidhaatu deebi'aaf. Isaan guyyaa adiidhaan gara malee machaa'uu akka gammachuutti fudhatu. Yeroo isin wajjin nyaataa fi dhugaatiitti dhi'aatanittis isaan gowwoomsaa isaaniitiin gidduu keessanitti xurii fi waan fafaa ta'u. ¹⁴ Waan iji isaanii ejaan guutameef isaan cubbuu hojjechuu hin dhiisan; warra hin jabaatin gowwoomsu; garaan isaanii doqnummaa barateera; isaan ijoolee abaaramanii dha! ¹⁵ Karaa qajeelaa dhiisanii karaa Bala'aam ilma Bosoor isa gatii jal'inaa jaallate sanaa duukaa bu'uuf karaa irraa badan. ¹⁶ Bala'aam garuu sababii dogoggora isaatiif harreen isa ifatte; horiin duudaan afaan namaa dubbattee maraatummaa raajii sanaa ittifte.

¹⁷ Namoonni kunneen burqaa bishaan hin qabnee fi hurrii bubbleen oofamuu dha. Dukkana limixiin isaaniif kaa'ameera. ¹⁸ Isaan dubbii faayidaa hin qabnee fi dubbii of tuulummaa odeessu; warra namoota jireenya dogoggoraa keessa jiraatan keessaa baqatanii ba'an hawwii foonii hamaadhaan gowwoomsu. ¹⁹ Isaan utuma ofii isaaniitiin iyyuu garboota badiisaa ta'anii jiranuu birmadummaa isaan abdachiisu; namni tokko waan isa mo'ate kamiifuu ni garboomaatii. ²⁰ Isaan erga Gooftaa keenyaa fi Fayyisaa keenya Yesuus Kiristoos beekuudhaan xuraa'ummaa addunyaa keessaa ba'anii booddee yoo amma illee deebi'anii xuraa'ummaa sanaan qabamanii fudhataman haalli isaanii kan dhumaa isa jalqabaa sana caalaa hammaata. ²¹ Isaan karaa qajeelinaa beekanii ajaja qulqulluu isaanii kenname sanatti dugda galuu irra utuu duraanuu karaa qajeelinaa sana beekuu baatanii isaaniif wayya ture. ²² Mammaaksi, "Sareen diddiga isheetti deebiti"* akkasumas, "Booyyeen dhiqamte dhoqqee keessa gangalachuu isheetti deebiti" jedhu sun isaan irratti mirkaneeffame.

3

Guyyaa Gooftaa

¹ Yaa michoota jaallatamoo, ani amma xalayaa lammaffaa isiniif barreessuu koo ti. Lamaan isaanii iyyuu keessatti isin yaadachiisuudhaan qalbii keessan qulqulluu sana nan kakaasa. ² Isin dubbii dur raajota qulqulluudhaan dubbatamee fi ajaja Gooftaa keenyaa fi Fayyisaa keenyaa kan karaa ergamoota keessaniitiin dubbatame sana akka yaadattan nan barbaada.

³ Akka bara dhumaa keessa ga'istoonni ga'isaa hawwii hamaa kan ofii isaanii duukaa bu'aa dhufan duraan dursaatii beekaa. ⁴ Isaanis, "dhufaatiin" inni waadaa gale kun meerre? Wanni hundinuu erga abbootin keenya du'anii jalqabee akkuma yeroo jalqaba

* 2:22 2:22 Fak 26:11

uumamaatti itti fufeeraatii” jedhu. ⁵ Garuu isaan akka samiiwwan bara baay’een dura dubbii Waaqaatiin uumaman, akka laftis bishaan irraa fi bishaaniin tolfamte utuma beekanuu didan. ⁶ Addunyaan yeroo sanaas bishaanuma kanaan liqimfamee bade. ⁷ Dubbiidhuma kanaanis samiiwwanii fi lafti yeroo ammaa jiran kunneen guyyaa murtii, kan badiisa namoota Waaqaaf hin bulleetiif kaa’amanii ibiddaaf turfamaniiru.

⁸ Yaa michoota jaallatamoo, isin garuu waan tokkicha kana hin irraanfatiinaa. Gooftaa biratti guyyaan tokko akka waggaa kumaa, waggaan kunnis akka guyyaa tokkoo ti. ⁹ Gooftaan akka namoonni tokko tokko lafa irra harkifata jedhanii yaadan sana, waadaa isaa guutuu irratti lafa irra hin harkifatu. Inni akka namni hundinuu qalbii jijjiirrachuuf jedhee isinii obsa malee akka namni tokko iyyuu badu barbaadee miti.

¹⁰ Guyyaan Gooftaa garuu akkuma hattuufti dhufa. Samiiwwan sagalee guddaadhaan dhabamu; wanni samiiwwan keessa jiru hundinuu ho’a guddaadhaan baqa; laftii fi wanni ishee irra jiru hundinuu ni gubata.

¹¹ Wanni hundinuu akkasitti bada erga ta’ee, isin nama akkamii ta’uu qabdu ree? Jireenya qulqulluu fi Waaqaaf bulu jiraachuu qabdu; ¹² kanas guyyaa Waaqaa eeggachaa, dhufaatii isaas ariifachiisaa gochuu qabdu. Guyyaa sana samiiwwan ibiddaan badu; wanni samiiwwan keessa jirus ho’aan baqa. ¹³ Nu garuu akkuma waadaa isaatti samiiwwan haaraa fi lafa haaraa qajeelinni keessa jiraatu eegganna.

¹⁴ Kanaafuu yaa michoota jaallatamoo, isinis sababii waanuma kana eeggataniif akka warra xurii fi hir’ina hin qabne, warra nagaan isa wajjin jiraatan taataniif yaalii isinii danda’ame hunda godhaa. ¹⁵ Akkuma Phaawulos obboleessi keenya jaallatamaan sun ogummaa Waaqni kenneefiin isinii barreesse sana akka obsi Gooftaa keenyaa fayyina ta’e yaadatti qabadhaa. ¹⁶ Innis waa’ee waan kanaa dubbatee xalayoota isaa hunda keessatti haaluma kanaan barreesse. Xalayoota isaa keessas waan hubachuun nama rakkisu tokko tokkoti jira; wallaaltonnii fi warri jabaatanii hin dhaabanne akkuma Katabbiwwan Qulqulluu kaan jal’isan sana kanas badiidhuma ofii isaaniitiif ni jal’isu.

Yaada Xumuraa

¹⁷ Kanaaf yaa michoota jaallatamoo, isin sababii duraan dursitanii waan kana beek-taniif akka dogoggora finciltootaatiin fudhatamni hundee jabaatanii irra dhaabattan irraa hin kufneef of eeggadhaa. ¹⁸ Garuu ayyaanaa fi beekumsa Gooftaa keenyaa fi Fayyisaa keenya Yesuus Kiristoosiin guddadhaa.

Ammas, bara baraanis ulfinni isaaf haa ta’u! Ameen.

Yohannis Tokkoffaa

Dubbii Jireenyaa

¹ Nu waa'ee Dubbii* jireenyaa kan jalqabaa kaasee ture, kan dhageenye, kan ija keenyaan argine, kan ilaallee fi kan harki keenyas qaqqabe kana labsina. ² Jireenyi mul'ateera; nus isa argineerra; dhugaas ni baanaaf; nu jireenya bara baraa isa Abbaa wajjin turee fi isa nutti mul'ate sana isinitti labsina. ³ Akka isinis nu wajjin tokkummaa qabaattaniif waan arginee fi waan dhageenye isinitti labsina. Tokkummaan keenyas Abbaa fi Ilma isaa Yesuus Kiristoos wajjin. ⁴ Nus akka gammachuun keenya guutuu ta'uuf waan kana barreessina.

Ifaa fi Dukkana

⁵ Ergaan nu isa irraa dhageenye, kan isinittis labsinu isa kana: Kunis akka Waaqni ifa ta'ee fi akka dukkanni gonkumaa isa keessa hin jirree dha. ⁶ Nu isa wajjin tokkummaa qabna jennee yoo dukkana keessa deddeebine ni sobna; dhugaa sanaanis hin jiraannu. ⁷ Garuu akkuma inni ifa keessa jiru sana, nus yoo ifa keessa deddeebine walii wajjin tokkummaa qabna; dhiigni Ilma isaa Yesuus cubbuu hundumaa irraa nu qulqulleessa.

Cubbuu fi Dhiifama

⁸ Nu yoo cubbuu hin qabnu jenne of gowwoomsina; dhugaanis nu keessa hin jiru. ⁹ Yoo cubbuu keenya himanne, inni cubbuu keenya nuu dhiisuuf amanamaa fi qajeelaa dha; jal'ina hunda irraas nu qulqulleessa. ¹⁰ Nu yoo cubbuu hin hojjennee jenne immoo sobduu isa goona; dubbiin isaas nu keessa hin jiru.

2

¹ Yaa ijoollee ko, ani akka isin cubbuu hin hojjenneef kana isiniifan barreessa. Garuu yoo namni kam iyyuu cubbuu hojjete nu Abbaa biraa abukaattoo qabna; innis Yesuus Kiristoos Isa Qajeelaa sana. ² Inni aarsaa cubbuu keenyaaf araara buusuu dha; cubbuu addunyaa hundaatiifis malee cubbuu keenya qofaaf miti.

Amantoota Jaallachuu fi Jibbuu

³ Nu yoo ajaja isaa eegne, kanaan akka isa beekne ni beekna. ⁴ Namni, "Ani isa nan beeka" jedhu kan garuu ajaja isaa hin eegne kam iyyuu sobduu dha; dhugaanis isa keessa hin jiru. ⁵ Garuu yoo namni kam iyyuu dubbii isaatiif ajajame, jaalalli Waaqaa dhugumaan isa keessatti guutuu ta'a. Kanaanis nu akka isa keessa jirru ni beekna; ⁶ namni ani isaanan jiraadha ofiin jedhu kam iyyuu akkuma Yesuus jiraate sanatti jiraachuu qaba.

⁷ Yaa obboolota, ani ajaja moofaa isuma jalqabaa kaasee isin bira ture sana malee ajaja haaraa isinii hin barreessu. Ajajni moofaan kunis ergaadhuma isin dhageessan sana. ⁸ Ta'us ani ajaja haaraa tokko isiniif nan barreessa; sababiin isaas dukkanichi darbaa, ifni dhugaa immoo waan amma iyyuu ifaa jiruuf dhugaan isaa isa keessattii fi isin keessatti ni mul'ata.

⁹ Namni ani ifa keessa jira ofiin jechaa obboleessa isaa immoo jibbu kam iyyuu amma illee dukkana keessa jira. ¹⁰ Namni obboleessa isaa jaallatu hundinuu ifa keessa jiraata; wannu isa gufachiisu tokko iyyuu isa keessa hin jiru. ¹¹ Namni obboleessa isaa jibbu garuu dukkana keessa jira; dukkanuma keessa jiraatas; inni waan dukkanni sun isa jaaameef gara itti adeemu hin beeku.

Sababii Ergaan Kun Barreeffameef

¹² Yaa ijoolle, cubbuun keessan sababii maqaa isaatiif waan isinii dhiifameef ani isiniifan barreessa.

¹³ Yaa abbootii, isin waan isa jalqabumaa kaasee jiru sana beektaniif ani isiniifan barreessa.

Yaa dargaggoota, isin waan isa hamaa sana mo'attaniif, ani isiniifan barreessa.

¹⁴ Yaa ijoolle, isin waan Abbaa beektaniif,

* **1:1** 1:1 Dubbii - dubbiin kun dubbii Waaqaa kan addunyaan ittiin uumamtee jiraatuu dha; dubbichi eenyummaa Waaqaa mul'isa; fedhii isaa, ogummaa fi humna isaas ni ibsa. Dubbiin kun Yesuus Kiristoosin foon ta'e.

ani isiniifin barreessa.

Yaa abbootii, isin waan isa jalqabumaa kaasee jiru sana beektaniif,
ani isiniifin barreessa.

Yaa dargaggoota, isin waan jajjaboo taataniif,
waan dubbiiin Waaqaa isin keessa jiraatuuf,
waan isa hamaa sanas mo'attaniif,
ani isiniifin barreessa.

Addunyaa Hin Jaallatinaa

¹⁵ Addunyaa yookaan waan addunyaa keessa jiru tokko illee hin jaallatinaa. Eenyu iyyuu yoo addunyaa jaallate, jaalalli Abbaa isa keessa hin jiru. ¹⁶ Wanni addunyaa keessa jiru hundinuu jechuunis hawwiin foonii, hawwiin ijaa, akkasumas waan qabaniin kooruun kan addunyaati malee kan Abbaa miti. ¹⁷ Addunyaa fi hawwiin ishee ni badu; namni fedhii Waaqaa raawwatu garuu bara baraan jiraata.

Ilma Ganuu Irraa Of Eggachuu

¹⁸ Yaa ijoolle, sa'aatiin kun sa'aatii dhumaa ti; akka farri Kiristoos sun dhufu akkuma dhageessan sana ammuma iyyuu farroonni Kiristoos baay'een dhufaniiru. Kanaanis nu akka sa'aatiin kun sa'aatii dhumaa ta'e beekna. ¹⁹ Isaan nu keessaa ba'an malee dhugumaan kan keenya hin turre. Utuu kan keenya ta'anii silaa nu biratti hafu turan; nu biraa deemuun isaanii garuu akka tokkoon isaanii iyyuu keenya hin ta'in mul'ise.

²⁰ Isin garuu Isa Qulqulluu sanaan dibamtaniirtu; isin hundis dhugaa ni beektu. ²¹ Sababiin ani isinii barreessuuf waan isin dhugaa beektanii fi akka sobni tokko iyyuu dhugaa keessa hin jirres beektaniif malee waan isin dhugaa hin beekneef miti. ²² Nama Yesuus kun Kiristoos miti jedhee ganu malee sobduun eenyu ree? Namni akkasii farra Kiristoos; inni Abbaa fi Ilma ni gana. ²³ Namni Ilma ganu kam iyyuu Abbaa illee hin qabu; namni waa'ee Ilmaa dhugaa ba'u hundinuu Abbaas qaba.

²⁴ Wanni isin jalqabaa kaaftanii dhageessan sun isin keessa haa jiraatu. Yoo wannii jalqabaa kaaftanii dhageessan isin keessa jiraate, isinis Ilmaa fi Abbaadhaan ni jiraattu. ²⁵ Wanni inni waadaa nuu gale kanaa dha; kunis jireenya bara baraa ti.

²⁶ Ani waa'ee warra karaa irraa isin jal'isuu yaalan sanaatiif waan kana isiniifin barreessa. ²⁷ Garuu dibanni isin isa irraa argattan sun waan isin keessa jiraatuuf namni tokko iyyuu isin barsiisuu hin barbaachisu; dibanni isaa sun garuu waan waa'ee hundumaa isin barsiisuuf, dibanni sun waan dhugaa malee soba hin ta'iniif akkuma inni isin barsiise sanatti isumaan jiraadhaa.

Ijoollee Waaqaatii fi Cubbuu

²⁸ Ammas yaa ijoolle, akka yommuu inni mul'atutti ija jabina qabaannuuf, akka nu guyyaa dhufaatii isaattis fuula isaa duratti hin qaanofneef isaan jiraadhaa.

²⁹ Isin yoo akka inni qajeelaa ta'e beektan, akka namni waan qajeelaa hojjetu hundinuu isa irraa dhalate ni beektu.

3

¹ Nu akka ijoollee Waaqaa jedhamnee waamamnuuf jaalalli Abbaan nurratti dhangalaase akkam guddaa dha! Nus akkasuma ijoollee isaa ti! Addunyaan waan isa hin beekiniif nu hin beeku. ² Yaa michoota jaallatamoo, nu amma ijoollee Waaqaa ti; gara fuula duraatti immoo maal akka taanu amma hin ibsamne. Garuu yommuu inni mul'atutti sababii akkuma inni jirutti isa arginuuf nu akkuma isaa akka taanu ni beekna. ³ Namni akkasitti isa abdatu hundinuu akkuma inni qulqulluu ta'e sana of qulqulleessa.

⁴ Namni cubbuu hojjetu kam iyyuu seeratti ni fincila; cubbuun finciluudhaatii. ⁵ Isin garuu akka inni cubbuu keenya balleessuudhaaf mul'ate ni beektu. Isa keessa cubbuun hin jiru. ⁶ Namni isaan jiraatu kam iyyuu cubbuu hin hojjetu. Namni cubbuu hojjetu kam iyyuu isa hin argine yookaan isa hin beekne.

⁷ Yaa ijoolle, namni tokko iyyuu isin hin gowwoomsin. Akkuma inni qajeelaa ta'e sana namni waan qajeelaa hojjetus qajeelaa dha. ⁸ Namni cubbuu hojjetu kan diiyaabiloos; diiyaabiloos jalqabumaa kaasee cubbuu hojjetaatii. Ilmi Waaqaa hojii diiyaabiloos diiguudhaaf mul'ateetii. ⁹ Namni Waaqa irraa dhalate kam iyyuu waan sanyiin Waaqaa isa keessa jiraatuuf cubbuu hojjechuutti hin fufu; inni waan Waaqa irraa dhalateef cubbuu hojjechuu hin danda'u. ¹⁰ Ijoolleen Waaqaatii fi ijoolleen diiyaabiloos kanaan gargar baafamanii beekamu: Namni waan qajeelaa hin hojjenne yookaan obboleessa isaa hin jaallanne kam iyyuu kan Waaqaa miti.

Waa'ee Jaalalaa fi Jibbaa

¹¹ Ergaan isin jalqabaa kaaftanii dhageessan isa, “Nu wal jaallachuu qabna” jedhuu dha. ¹² Isin akka Qaayin isa kan isa hamaa sanaa ta’ee obboleessa isaa ajjeese sanaa hin ta’inaa; inni maaliif obboleessa isaa ajjeese? Sababii hojiin isaa jal’aa ta’ee, kan obboleessa isaa immoo qajeelaa ta’eef. ¹³ Yaa obbolloota ko, yoo addunyaan isin jibbe isin hin dinqin. ¹⁴ Nu sababii obbolloota jaallannuuf du’a keessaa gara jirenyaatti akka ceene ni beekna. Namni obboleessa isaa hin jaallanne du’a keessa jiraata. ¹⁵ Namni obboleessa isaa jibbu kam iyyuu nama nama ajjeesuu dha; isinis akka namni nama ajjeesu jirenya bara baraa of keessaa hin qabne beektu.

¹⁶ Yesuus Kiristoos lubbuu isaa dabarsee nuuf kenneera: Jaalalli maal akka ta’ees kanaan beekna; nus akkasuma lubbuu keenya dabarsinee obbolloota keenyaaf kennuu qabna. ¹⁷ Namni qabeenya addunyaa qabu kam iyyuu yoo obboleessa isaa rakkataa argee garaa itti jabaate jaalalli Waaqaa akkamitti isa keessa jiraachuu danda’a? ¹⁸ Yaa ijoollee jaallatamoo, kottaa dubbiin yookaan afaan qofaan utuu hin ta’in hojii fi dhugaadhaan jaallanna.

¹⁹ Nus kan dhugaa ta’uu keenya kanaan beekna; fuula isaa durattis garaa keenya boqochiifna. ²⁰ Yeroo garaan keenya nutti murutti Waaqni garaa keenya caalaa guddaa akka ta’e ni beeknaatii; inni waan hunda ni beeka. ²¹ Yaa michoota, yoo garaan keenya nutti muruu baate nu fuula Waaqaa duratti ija jabina qabna. ²² Nus sababii ajaja isaa eegnuu fi sababii waan isa gammachiisu hojjennuuf waan kadhannu hunda isa irraa ni arganna. ²³ Ajajni isaas kana: kunis nu maqaa ilma isaa Yesuus Kiristoositti akka amannuu fi akkuma inni nu ajajetti akka wal jaallannuuf. ²⁴ Namni ajaja isaa eegu isa keessa jiraata; innis isa keessa jiraata. Kanaanis akka inni nu keessa jiraatu nu Hafuura inni nuu kenneen ni beekna.

4

Waa’ee Falmii Fooniin Mul’achuu Kiristoos

¹ Yaa michoota, hafuuronni kan Waaqaa ta’uu fi ta’uu baachuu isaanii ilaaluuf qoradhaa malee hafuurota hunda hin amaninaa; raajonni sobduun hedduun addunyaa seenaniiru. ² Haalli isin ittiin Hafuura Waaqaa beektanis kanuma: Hafuurri akka Yesuus Kiristoos fooniin dhufe dhugaa ba’u hundi kan Waaqaa ti; ³ hafuurri akka Yesuus Kiristoos fooniin dhufe dhugaa hin baane hundi kan Waaqaa miti. Inni hafuura farra Kiristoos, kan isin akka inni dhufu dhageessan sanaa ti; innis ammuma iyyuu addunyaa keessa jira.

⁴ Yaa ijoolle, isin kan Waaqaa ti; jaras mo’attaniirtu; inni isin keessa jiru kan addunyaa keessa jiru sana caalaa guddaadhaatii. ⁵ Isaan kan addunyaa ti; kanaaf wanni isaan dubbatanis kanuma addunyaa ti; addunyaanis isaan dhaggeeffata. ⁶ Nu kan Waaqaa ti; namni Waaqaa beeku hundinuu nu dhaggeeffata; namni kan Waaqaa hin ta’in garuu nu hin dhaggeeffatu. Kanaanis Hafuura dhugaatii fi hafuura sobaa addaan baafnee ni beekna.

Jaalala Waaqaatii fi Jaalala Keenya

⁷ Yaa michoota, jaalalli kan Waaqaa waan ta’eef kottaa wal jaallanna. Namni jaallatu hundi Waaqa irraa dhalate; Waaqas ni beeka. ⁸ Sababii Waaqni jaalala ta’eef, namni hin jaallanne hundi Waaqa hin beeku. ⁹ Waaqni akka nu karaa isaatiin jirenya argannuuf jedhee ilma isaa tokkicha sana gara addunyaatti erge. Kanaanis jaalalli Waaqaa nu gidduutti mul’ateera. ¹⁰ Jaalalli isa kana: Kunis nu Waaqa jaallanne miti; garuu Waaqatu nu jaallatee akka inni aarsaa cubbuu keenyaaf araara buusu ta’uuf ilma isaa erge. ¹¹ Yaa michoota, erga Waaqni akkana nu jaallatee nus wal jaallachuu qabna. ¹² Namni tokko iyyuu takkumaa Waaqa hin argine; yoo wal jaallanne garuu Waaqni nu keessa jiraata; jaalalli isaas nu keessatti guutuu ta’a.

¹³ Inni waan Hafuura isaa irraa nuu kenneef nu akka isa keessa jiraannuu fi akka innis nu keessa jiraatu kanaan ni beekna. ¹⁴ Akka inni Fayyisaa addunyaa ta’uuf jedhee Abbaan ilma isaa akka erge argineerra; dhugaa baanas. ¹⁵ Yoo namni kam iyyuu Yesuus ilma Waaqaa akka ta’e dhugaa ba’e, Waaqni isa keessa jiraata; innis Waaqa keessa jiraata.

¹⁶ Kanaafuu jaalala Waaqni nuuf qabu beekneerra; amanneerras.

Waaqni jaalala. Namni jaalalaan jiraatu Waaqa keessa jiraata; Waaqnis isa keessa jiraata. ¹⁷ Nus akka guyyaa murtiitti ija jabina qabaannuuf karaa kanaan jaalalli nu gidduutti guutuu ta’eera; nu addunyaa kana irratti Yesuus fakkannaatii. ¹⁸ Jaalala keessa sodaan hin jiru. Sodaan waan adabbii wajjin wal qabatee jiruuf jaalalli mudaa hin qabne sodaa of keessaa baasee gata. Namni sodaatu tokko jaalalli isaa guutuu miti.

¹⁹ Nu sababii inni duraan dursee nu jaallateef isa jaallanna. ²⁰ Namni, “Ani Waaqa nan jaalladha” jechaa obboleessa isaa immoo jibbu kam iyyuu sobduu dha. Namni obboleessa isaa kan arge sana hin jaallanne kam iyyuu Waaqa hin argin sana jaallachuu hin danda’u. ²¹ Inni ajaja kana nuu kenneera: Namni Waaqa jaallatu kam iyyuu obboleessa ofii isaa jaallachuu qaba.

5

Ilma Waaqaatti Amanuu

¹ Yesuus kun Kiristoos akka ta’e namni amanu hundinuu Waaqa irraa dhalate; namni Abbaa jaallatu hundinuu kan Abbaa irraa dhalates ni jaallata. ² Nu yommuu Waaqa jaallannuu fi yommuu ajaja isaa eegnutti akka ijoollee Waaqaa jaallannu kanaan beekna. ³ Waaqa jaallachuun ajaja isaa eeguu dha. Ajajni isaas hin ulfaatu. ⁴ Namni Waaqa irraa dhalatu hundinuu addunyaa ni mo’ataatii. Kan addunyaa mo’atus amantii keenya. ⁵ Yesuus Ilma Waaqaa ta’uu isaa nama amanu malee eenyutu addunyaa mo’ata?

⁶ Inni bishaanii fi dhiigaan dhufe isa kana; innis Yesuus Kiristoos. Inni bishaanii fi dhiigaan dhufe malee bishaan qofaan hin dhufne. Kanas Hafuuratu dhugaa ba’a; Hafuurri dhugaadhaatii. ⁷ Dhuga baatota sadiitu jira: ⁸ Isaanis Hafuura, bishaanii fi dhiiga; sadanuus walii galu. ⁹ Dhuga ba’umsa namaa ni fudhanna; dhuga ba’umsi Waaqaa garuu kana caalaa guddaa dha; dhuga ba’umsi kun isa Waaqni waa’ee Ilma isaa dhugaa ba’e sana. ¹⁰ Namni Ilma Waaqaatti amanu kam iyyuu dhuga ba’umsa kana garaa isaa keessaa qaba. Namni Waaqa hin amanne garuu waan isa Waaqni waa’ee Ilma isaa dhugaa ba’e sana hin amaniniif inni Waaqa sobduu godheera. ¹¹ Dhuga ba’umsi sunis isa kana: Waaqni jireenya bara baraa nuu kenneera; jireenyi sunis Ilma isaa keessa jira. ¹² Namni Ilma sana qabu jireenya qaba; namni Ilma Waaqaa hin qabne immoo jireenya hin qabu.

Dhaamsa Xumuraa

¹³ Isin warri maqaa Ilma Waaqaatti amantan jireenya bara baraa qabaachuu keessan akka beektaniif ani waan kana isinii barreessa. ¹⁴ Ija jabinni nu fuula Waaqaa duratti qabnu isa kana: yoo nu akka fedhii isaatti waan hunda isa kadhanne inni nuuf dhaga’a. ¹⁵ Nu yoo akka inni waan nu kadhannu hunda nuuf dhaga’u beekne, akka waan isa kadhannes argannu ni beekna.

¹⁶ Namni kam iyyuu utuu obboleessi isaa cubbuu gara du’aatti hin geessine hojjetuu yoo arge Waaqa kadhachufii qaba; Waaqnis warra cubbuun isaanii gara du’aatti isaan hin geessineef jireenya ni kenna. Cubbuun gara du’aatti nama geessu jira; anis waan akkasiitiif inni haa kadhatu jechuu koo miti. ¹⁷ Jal’inni hundinuu cubbuu dha; cubbuun gara du’aatti nama hin geessines jira.

¹⁸ Namni Waaqa irraa dhalate kam iyyuu akka cubbuu hojjechuutti hin fufne ni beekna; Inni Waaqa irraa dhalate sun isa eega; inni hamaan isa tuquu hin danda’u. ¹⁹ Nu ijoollee Waaqaa akka taane, addunyaan guutuunis to’annaa isa hamaa sanaa jala akka jiru ni beekna. ²⁰ Akkasumas akka Ilmi Waaqaa dhufee akka isa dhugaa ta’e sanas beeknuuf hubannaa nuu kenne ni beekna. Nus Ilma isaa isa dhugaa sana, jechuunis Yesuus Kiristoositti jirra. Inni Waaqa dhugaa ti; jireenya bara baraatis.

²¹ Yaa ijoolle, waaqota tolfamoo irraa of eegaa.

Yohannis Lammaffaa

Nagaa Gaafachuu

¹ Jaarsicha irraa,

Gara giiftii filatamtuu fi ijoollee ishee, warra ani dhugaadhaan jaalladhu, warra ana qofa utuu hin ta'in warri dhugaa beekan hundi akkasuma jaallataniitti; ² kunis sababii dhugaa nu keessa jiraatuu fi isa bara baraan nu wajjin jiraatu sanaatiif:

³ Ayyaanni, araarii fi nagaan Waaqa Abbaa biraa, Yesuus Kiristoos Ilma Abbaa biraas, dhugaa fi jaalalaan nu wajjin ni ta'a.

Galata Galchuu

⁴ Ani waan ijoollee kee keessaa tokko tokko akka isaan akkuma Abbaan nu ajajetti dhugaan jiraatan argeef baay'ee gammadeera. ⁵ Ammas yaa giiftii jaallatamtuu, ani ajaja durumaa jalqabee nuuf kenname sana malee ajaja haaraa siif barreessuutti hin jiru. Akka wal jaallannuufis sin kadhada. ⁶ Jaalallis kana: kunis ajaja isaa eegnee jiraachuu dha. Akkuma isin durumaa jalqabdani dhageessan sana ajajni isaa akka isin jaalalaan jiraattanii dha.

⁷ Gowwoomsitoonni akka Yesuus Kiristoos fooniin dhufe hin amanne hedduun addunyaa seenaniiru. Namni akkanaa kam iyyuu gowwoomsituu fi farra Kiristoos. ⁸ Isin akka gatii guutuu argattan malee akka waan hojjetan sana hin dhabneef of eeggadhaa. ⁹ Namni barsiisa Kiristoosiin hin jiraanne kan barsiisa sana keessaa ba'u kam iyyuu Waaqa hin qabu; namni barsiisa Kiristoosiin jiraatu hundinuu immoo Abbaas Ilmas qaba. ¹⁰ Isin yoo namni kam iyyuu gara keessan dhufee garuu barsiisa kana hin fidin, mana keessanitti ol isa hin galchinaa yookaan isa hin simatinaa. ¹¹ Namni isa simatu kam iyyuu hojii isaa hamaa sana keessatti qooda qabaataatii.

Xumuraa fi Dhaamsa Nagaa

¹² Ani waanan isiniif barreessu baay'ee qaba; ta'us waraqaa fi qalamiitti fayyadamuu hin barbaadu. Qooda kanaa akka gammachuun keenya guutuu ta'uuf ani gara keessan dhufee ifaan ifatti haasofnu abdiin qaba.

¹³ Ijoolleen obboleettii kee kan filatamte sanaas nagaa siif dhaamu.

Yohannis Sadaffaa

Nagaa Gaafachuu

¹ Jaarsicha irraa,

Gara Gaayoo michuu koo, isa ani dhugaadhaan jaalladhuutti.

Gaayoo sin Galateeffachuu Isaa

² Yaa michuu ko, akkuma lubbuu keetti tole sana akka wanni hundinuu sitti toluu fi akka ati fayyaa qabaattuuf nan kadhada. ³ Obboloonni tokko tokko dhufanii akka ati dhugaaf amanamaa taatee fi akka ati dhugaadhaan jiraattu natti himnaan ani akka malee gammade. ⁴ Ijoolleen koo dhugaadhaan jiraachuu isaanii dhaga'uu caalaa ani gammachuu guddaa hin qabu.

⁵ Yaa michuu ko, yoo isaan keessummoota sitti ta'an illee ati waan obbolootaaf gootu keessatti amanamaa dha. ⁶ Isaan waa'ee jaalala keetii waldaa kiristaanaatti himaniiru. Maaloo haala Waaqatti toluun karaan isaanii irratti isaan gargaari. ⁷ Isaan Maqaa isaatiif jedhanii utuu ormoota irraa gargaarsa tokko illee hin argatin ba'aniiruutii. ⁸ Kanaafuu nu akka isaan wajjin dhugaaf hojjennuuf namoota akkasii simannee gargaaruu qabna.

⁹ Ani waldaa kiristaanaatiif barreesseera; garuu isaan keessaa Diyo xiraaxiis inni duree ta'uu barbaadu nu hin simatu. ¹⁰ Kanaafuu ani yoon dhufe waan inni maqaa keenya balleessuudhaan hojjechaa jiru ifatti nan baasa. Akka waan wanni kun isa hanqateetti inni obboloota simachuu dida. Warra isaan simachuu barbaadanis ni dhowwa; waldaa kiristaanaa keessaas isaan ari'a.

¹¹ Yaa michuu ko, waan gaarii duukaa bu'i malee waan hamaa duukaa hin bu'in. Namni waan gaarii hojjetu kam iyyuu kan Waaqaa ti. Namni waan hamaa hojjetu garuu takkumaa Waaqaa hin argine. ¹² Namni hundi Dimeexiroosiif dhugaa ba'a; dhugaan mataan ishee iyyuu dhugaa baati. Nus dhugaa baanaaf; isinis akka dhuga ba'umsi keenya dhugaa ta'e ni beektu.

Eebba Dhumaatii fi Nagaa Dhaamuu Isaa

¹³ Ani waanan siif barreessu baay'ee qaba; garuu biirii fi qalamiidhaan barreessuu hin barbaadu. ¹⁴ Qooda kanaa ani dhi'ootti si arguuf abdiif qaba; nus ifaan ifatti ni haasofna.

¹⁵ Nagaan siif haa ta'u.

Michoonni as jiran nagaa siif dhaamu. Atis michoota achi jiran tokko tokkoon maqaa dha'iitii nagaa itti nuu himi.

Yihuudaa

Nagaa Gaafachuu

¹ Yihuudaa obboleessa Yaaqoob garbicha Yesuus Kiristoos irraa,

Gara warra waamamanii Waaqa Abbaadhaan jaallataman kanneen Yesuus Kiristoosiin eegamaniitti:

² Araarri, nagaanii fi jaalalli isiniif haa baay'atu.

Cubbuu fi Badiisa Warra Waaqaaf Hin Bullee

³ Yaa michoota, ani waa'ee fayyina nu walii wajjin qooddannu kanaa isiniif barreessuuf guddisee nan hawwan ture; garuu akka isin amantii yeroo tokko bara baraan qulqulloota Waaqaatti imaanaa kenname sanaaf jabaattanii loltaniif isiniif barreessee isin gorsuun barbaachisaa natti fakkaate. ⁴ Namoonni bara dheeraan dura murtii kanaaf murteeffaman tokko tokko loo'anii gidduu keessan seenaniiruutii. Isaanis namoota Waaqaaf hin bulle, warra ayyaana Waaqa keenyaa gara halalummaatti geeddaran kanneen Gooftaa Ol aanaa tokkicha jechuunis Gooftaa keenya Yesuus Kiristoosiin gananii dha.

Fakkeenya Murtii Gantootatti Muramee

⁵ Yoo isin duraanuu waan kana hunda beektan illee, ani akka Gooftaan yeroo tokko saba isaa Gibxii baasee ergasii immoo warra hin amanin balleesse isin yaadachiisuu nan barbaada. ⁶ Innis ergamoota sadarkaa taayitaa isaanii irra hin turin, kanneen lafa jireenya isaanii dhiisan sana foncaa bara baraatiin hidhee hamma murtii Guyyaa guddaa sanaatti dukkana keessa turseera. ⁷ Sodoomii fi Gomoraan, magaalawwan naannoo isaanii jiranis akkasuma halalummaa fi hawwii foonii kan haala uumamaatiin ala ta'etti dabarsanii of kennaniiru. Isaanis warra adaba ibidda bara baraatiin adabamaniif fakkeenya ta'aniiru.

Gantoota Bara Yihuudaa

⁸ Haaluma wal fakkaatuunis namoonni abjootan kanneen foon ofii isaanii xureessu; gooftummaa ni tuffatu; ulfina qabeeyyii illee ni arrabsu. ⁹ Garuu Miikaa'el hangafni* ergamoota Waaqaa iyyuu yeroo waa'ee reeffa Musee† irratti diyaabiloosiin walitti falmanitti, "Gooftaan si haa ifatu!" jedhe malee isa arrabsuudhaan itti muruuf ija hin jabaanne. ¹⁰ Namoonni kanneen garuu waanuma hin hubanne arrabsu; waan isaan akkuma bineensota waa yaaduu hin dandeenyeetti miiraan hubatantu isaan balleessa.

¹¹ Isaaniif wayyoo! Isaan karaa Qaayin irra deeman; faayidaa argachuuf jedhanii dogoggora Bala'aam keessa of buusan; fincila Qooraaahiitiinis‡ ni barbadaa'an.

¹² Namoonni kanneen utuma xuraa'oo ta'anii jiranuu qaanii tokko malee cidha jaalalaa§ isin wajjin nyaatu; isaan tiksoota ofuma isaanii gofa soorani dha. Isaan akkuma duumessa bokkaa hin qabne kan bubbeen asii fi achi oofuu ti; akkuma

* **1:9** 1:9 hangafni ergamaa hangafa yookaan bulchaa ergamootaa - ergamoota kanneen keessaa ja'a *1 Henok* 20:2-7 keessatti eeramaniiru. Maqaan isaanis "Rufaa'el, Re'uu'eel, Miikaa'el, Saaraaqeel, Gabri'eelii fi Raamaa'eel" fe'a. Miikaa'el kitaaba Dan 12:1 irratti akka Israa'eloota eegu ibsameera. Inni jalqabatti akka ergamaa saba Israa'el irraa humna diyaabiloos eegu tokkootti ilaalama ture. Mul 12:7 irratti Miikaa'el akka waldoota Kiristaanaa irraa boficha seexana jedhamu sana eegu ibsameera. † **1:9** 1:9 Reeffa Musee - oduun kun Kakuu Moofaa keessatti hin argamu. Kakuun Moofaan akka namni tokko iyyuu lafa Museen itti awwaalame hin beekne dubbata (KeD 34:6). Garuu yeroo Museen du'eetti akka inni reeffa Musee awwaaluf akka itti gaafatamni Miikaa'elitti kenname namichi Orgeen jedhamu tokko Waggaa Araaraa keessa waggaa jalqabaatti barreessee ture. Ta'us diyaabiloos waan bulchaa addunyaa tureef reeffa Musee irratti gooftummaa ofii argisiisuu yaale. Yommuu Miikaa'el reeffa Musee kennuufii didetti immoo sababii Museen nama Gibxi tokko ajjeeseef isa himachuuf dubbii barbaade (Bau 2:12). Miikaa'el garuu seexana abaaruuudhaan deebii hin kennine; qooda kanaa harkuma ofiitiin Musee awwaale. ‡ **1:11** 1:11 fincila Qooraaahiitiinis - Qooraaahi tajaajila lubummaa keessatti qooda qabaachuu jedhee namoota biraa 250 wajjin dura bu'ummaa Museetii fi Aroon irratti fincile. Dhuma irratti warri fincilan hundinuu miseensota maatii isaanii hunda wajjin lafa afaan banatteen liqimfaman (Lak 16:1-35). § **1:12** 1:12 Cidha jaalalaa - waldaa kiristaanaa kan durii keessatti yeroo miseensonni tokkummaa isaanii kan Waaqaa fi walii isaaniitiif qaban ibsuuf walitti dhufanitti irbaata halkaniitu ture. "Cidhi jaalalaa" yeroo hunda irbaata tokkummaatiin hobba'a.

muka yeroo itti ija naqachuu qabutti ija dhabee buqqifamee dachaa lama du'ee ti. ¹³ Isaan warra akka dambalii galaanaa hoomacha qaanii isaanii baasanii dha; akkuma urjiiwwan asii fi achi jooran kanneen dukkanni limixiin hamma bara baraatti isaanii kaa'amee ti.

¹⁴ Henook inni Addaam irraa jalqabee torbaffaa ture sun akkana jedhee waa'ee namoota kanaa raajii dubbateera: "Kunoo, Gooftaan qulqulloota isaa kumaatama wajjin ni dhufa; ¹⁵ innis nama hundatti muruuf, warra Waaqaaf hin bulle kanneen karaa Waaqni hin jaallanneen waan Waaqni hin jaallanne hojjetan hundaa fi dubbii hamaa cubbamooni Waaqaaf hin bulle hundinuu isa irratti dubbatan hundatti isaan gaafachuuf ni dhufa." ¹⁶ Namoonni kanneen yeroo hunda ni guungumu; komiis ni qabaatu; hawwii isaanii isa hamaa duukaa bu'u; of jaju; faayidaa argachuuf jedhaniis nama saadu.

Jabaatanii Dhaabachuu

¹⁷ Yaa michoota, isin garuu waan ergamooni Gooftaa keenya Yesuus Kiristoos duraan dursanii himan sana yaadadhaa. ¹⁸ Isaanis, "Qoostonni hawwii fedhii Waaqaatiin ala ta'e duukaa bu'an bara dhumaa keessa ni dhufu" isiniin jedhan. ¹⁹ Namoonni kanneen warra gargar ba'uu uuman, warra hawwii foonii duukaa bu'anii fi warra Hafuura Qulqulluu hin qabnee dha.

²⁰ Isin garuu yaa michoota, amantii keessan kan waan hunda irra qulqulluu ta'e sana irratti of ijaaraa; Hafuura Qulqulluudhaanis kadhadhaa. ²¹ Araarri Gooftaa keenya Yesuus Kiristoos jireenya bara baraatti akka isin geessu eeggachaa jaalala Waaqaatiin of eegaa.

²² Warra shakkii qabaniif garaa laafaa; ²³ Warra kaan ibidda keessaa butaatii oolchaa; kaan immoo uffata hawwii fooniitiin xureeffame iyyuu balfaatii sodaadhaan isaan maaraa.

Eebba Xumuraa

²⁴ Isa gufachuu isin oolchuu danda'uu fi isa fuula ulfina isaa duratti hir'ina malee, gammachuu guddaadhaan isin dhi'eessuu danda'u sanaaf, ²⁵ Fayyisaa keenya Waaqa tokkichaaf ulfinni, surraan, humnii fi taayitaan karaa Gooftaa keenya Yesuus Kiristoosiin bara hundumaan dura, amma, bara baraanis haa ta'u! Ameen.

Mul'ata Yohannis

Seensa

¹ Kun mul'ata Yesuus Kiristoos, kan akka inni waan dhi'ootti ta'uu qabu garboota isaatti argisiisuuf jedhee Waaqni isaaf kennee dha. Innis ergamaa isaa gara garbicha isaa Yohannisitti ergee akka mul'anni sun beekamu godhe; ² Yohannis isa waan arge hundumaa jechuunis dubbii Waaqaatii fi dhuga ba'umsa Yesuus Kiristoos dhugaa ba'uu dha. ³ Namni dubbii raajii kana dubbisu eebbifamaa dha; warri waan raajii sana keessatti barreeffame dhaga'anii eeganis eebbifamoo dha; barichi dhi'aateeraatii.

Nagaa Gaafachuu fi Waaqa Galateeffachuu

⁴ Yohannis irraa,

Gara waldoota kiristaanaa kanneen biyya Asiyaa keessa jiran torbaniitti:

Isa jiru, isa ture, Isa dhufuuf jiruu fi Hafuurota torban fuula teessoo isaa dura jiran irraa, ⁵ akkasumas Yesuus Kiristoos dhuga baatuu amanamaa, hangafa warra du'aniitii fi bulchaa mootota lafaa ta'e sana irraa ayyaannii fi nagaan isiniif haa ta'u.

Isa nu jaallatuu fi isa dhiiga isaatiin cubbuu keenya irraa bilisa nu baase, ⁶ isa akka nu Waaqa isaatii fi Abbaa isaa tajaajilluuf mootummaa fi luboota nu taasise sanaaf ulfinnii fi humni baraa baraa hamma bara baraattii haa ta'u! Ameen.

⁷ "Kunoo, inni duumessa wajjin dhufa;*

iji hundinuu,

warri isa waraanan iyyuu isa ni argu;”

saboonni lafaa hundinuus “sababii isaatiif ni wawwaatu.”†

Akkasuma ta'a! Ameen.

⁸ Waaqni Gooftaan Waan Hunda Danda'u, “Ani Alfaa fi Omeegaa dha; isa jiru, isa turee fi isa dhufuuf jiruu dha” jedha.

Yohannis Mul'ataan Kiristoosin Arguu Isaa

⁹ Ani obboleessi keessan Yohannis dhiphina keessatti, mootummaa fi obsa Yesuus Kiristoos keessattis isin wajjin kan hirmaadhu sababii dubbii Waaqaatii fi sababii dhuga ba'umsa Yesuus Kiristoosiif Phaaximoos biyya bishaaniin marfamte irrann ture. ¹⁰ Anis guyyaa Gooftaatti Hafuuraanin ture; dugda koo duubaanis sagalee guddaa akka malakataa tokko nan dhaga'e; ¹¹ sagaleen sunis, “**Waan argitu kitaaba maramaa irratti barreessiitii gara waldoota kiristaanaa torbaniitti jechuunis Efesoonitti, Samirnaatti, Phergaamoonitti, Tiyaatiraatti, Sardeesitti, Filaadelfiyaattii fi Lodoopiyaatti ergi**” jedhe.

¹² Anis sagalee natti dubbachaa ture sana ilaaluuf jedheen of irra gara gale. Ani yommuun of irra gara galetti baattuwwan ibsaa kanneen warqee irraa hojjetaman torba nan arge; ¹³ baattuwwan ibsaa sana gidduus kan, “ilma namaa fakkaatu”‡ tokkotu ture; innis uffata dheeraa miilla ga'u uffatee, naannoo qoma isaatti immoo sabbata warqee hidhatee ture. ¹⁴ Mataan isaatii fi rifeensi mataa isaa adii akka rifeensa hoolaa, adii akka cabbii ture; iji isaas akka arraba ibiddaa turte. ¹⁵ Miilli isaas naasii boolla ibiddaa keessatti diimeffame fakkaata ture; sagaleen isaa immoo akkuma sagalee bishaan baay'ee ti. ¹⁶ Harka isaa mirgaatiin urjiwwan torba qabatee ture; afaan isaa keessaas goraadee qara lama qabutu ba'aa ture. Fuulli isaas biiftuu humna guutuun iftu fakkaata ture.

¹⁷ Ani yommuun isa argetti akka nama du'ee miilla isaa jalattin kufe. Inni immoo harka isaa mirgaa narra kaa'ee akkana naan jedhe: “**Hin sodaatin. Ani kan Jalqabaatii fi kan Dhumaa ti.** ¹⁸ **Isa jiraataa dhas; ani du'een ture; kunoo, bara baraa hamma bara baraatti nan jiraadha! Furtuu du'aatii fi kan Sii'oolis qaba.**

¹⁹ “**Kanaafuu ati waan argite, waan amma jiruu fi waan gara fuulduraatti ta'u barreessi.** ²⁰ **Iccitiin urjiwwan torbaa kanneen ati harka koo mirgaa keessatti**

* 1:7 1:7 Dan 7:13 † 1:7 1:7 Zak 12:10 ‡ 1:13 1:13 Dan 7:13

argiteetii fi baattuuwwan ibsaa kanneen warqee irraa hojjetaman torbanii isa kana: Urjiwwan torban ergamoota waldaa kiristaanaa torbaa ti; baattuuwwan ibsaa torban immoo waldoota kiristaanaa torbanii dha.

2

Gara Waldaa Kiristaanaa Efesoonitti

1 “Ergamaa Waaqaa kan waldaa kiristaanaa Efesoonitti* akkana jedhii barreessi:

Inni urjiwwan torba harka isaa mirgaatti qabatee baattuuwwan ibsaa kanneen warqee irraa hojjetaman gidduu deddeebi’u sun akkana jedha.

2 Ani hojii kee, dadhabbii keetii fi obsaan dhaabachuu kee beeka. Akka ati cal’iftee namoota hamoo hin dhiifne, warra utuu ergamoota hin ta’in ergamoota ofiin jedhan qortee akka isaan sobduu ta’an mirkaneessites nan beeka. ³ Ati maqaa kootiif jettee obsaan dhaabatteerta; rakkina obsiteerta; hin dadhabnes. ⁴ Ta’us jaalala kee isa jalqabaa dhiisuu keetiif ani waan sirraa jibbu xinnoo qaba. ⁵ Kanaaf ati maal irraa akka kufte yaadadhu! Qalbii jijjiirradhuutii hojii kee kan duraa sana hojdedhu. Yoo ati qalbii jijjiirrachuu baatte immoo ani sittin dhufa; baattuu ibsaa keetiis iddoo isaatii nan fuudha. ⁶ Garuu waan gaarii tokko qabda: Hojii Niqolaawotaa kan ani jibbu sana atis ni jibbita. ⁷ Namni gurra qabu waan Hafuurri waldoota kiristaanaatiin jedhu haa dhaga’u. Nama mo’atu akka inni muka jireenyaa kan jannata Waaqaa keessa jiru irraa nyaatuuf mirga nan kennaaf.

Gara Waldaa Kiristaanaa Samirneesitti

8 “Ergamaa Waaqaa kan waldaa kiristaanaa Samirnaatti+ akkana jedhii barreessi:

Inni Jalqabaatii fi inni Dhumaa, inni du’ee turee fi amma immoo jiraataa ta’e sun akkana jedha.

9 Ani rakkinaa fi hiyyummaa kee beeka; ta’us ati sooressa! Arrabsoo warra utuu Yihuudoota hin ta’in Yihuudoota ofiin jedhan sanaas nan beeka; isaan garuu waldaa Seexanaa ti. ¹⁰ Dhiphina sirra ga’uuf jiru hin sodaatiin. Kunoo, akka qoramaniif diiyaabiloo isin keessaa namoota tokko tokko mana hidhaatti ni galcha. Guyyaa kudhanis ni dhiphattu. Ati hamma du’aatti amanamaa ta’i; ani gonfoo jireenyaa siifin kennaatii. ¹¹ Namni gurra qabu waan Hafuurri waldoota kiristaanaatiin jedhu haa dhaga’u. Namni mo’atu du’a lammaffaan hin miidhamu.

Gara Waldaa Kiristaanaa Phergaamoonitti

12 “Ergamaa Waaqaa kan waldaa kiristaanaa Phergaamoonitti+ akkana jedhii barreessi:

Inni goraadee qaramaa afaan lamaa qabu sun akkana jedha.

13 Ani iddoo ati jiraattu beeka; innis iddoo teessoon Seexanaa jiruu dha. Ta’us ati maqaa koo jabeessitee qabatteerta. Bara Antiiphaas dhuga baatuun koo amanamaan magaalaa keessan keessatti iddoo Seexanni jiraattutti ajjeefame illee ati amantii narratti qabdu hin dhiifne. ¹⁴ Haa ta’uu malee

* 2:1 2:1 Efesoonitti - Efesoon magaalaa guddoo fi beekamtuu biyya Asiyaa ti; Asiyaan immoo biyya Roomaa Keessatti argamti. Isheenis buufata doonii kan hojiin itti baay’attuu fi kan daldalaan badhaatee dha; wiirtuu falfala waaqitii Arxeemis (Hoj 19:27,35 ilaalaa) akkasumas lafa hojiin falfalaa itti hojjetamu turte (Hoj 19:19). † 2:8 2:8 Samirnaatti - Samirnees (amma Ismiir) magaalaa Sooretii fi buufata doonii kan Yihuudoonni hedduun keessa jiraatan turte. Samirnees mana qulqullummaa moofaa (dullacha) tokko waaqitii Roomaatiif qabdi turte; inni haaraan immoo mooticha Xibaariyoosiif kenname. ‡ 2:12 2:12 Phergaamoonitti - manneen qulqullummaa kanneen waaqeffannaa Ziyaasiitii fi waaqota biraa warra akka Asqelephoosiitiif kennaman qabdi turte. Asqelephoosis waaqa tolfamaa nama fayyisuu dha. Phergaamoonis handhuura mootonni Roomaa itti waaqeffatan turte. Isheenis magaalaa kutaa biyya Sanaa keessaa iddoo jalqabatti manni qulqullummaa Awugisxoos waaqichaa fi waaqitii Roomaa jedhamtuuf itti kennamee dha.

sababii ati namoota barsiisa Bala'aam^Sduukaa bu'an achii qabduuf ani waan sirraa jibbu xinnoo qaba; namni akka inni saba Israa'el dura gufuu kaa'ee akka isaan nyaata waaqota tolfamoof aarsaa dhi'effame nyaatanii fi akka isaan halalummaadhaan jiraatan godhuuf jedhee Baalaaqin barsiise Bala'aam tureetii. ¹⁵ Akkasumas namoota barsiisa Niqolaawotaa duukaa bu'an tokko tokko of biraa qabda. ¹⁶ Kanaafuu qalbii jijjiirradhu! Yoo kanaa achii ani dafeen sitti dhufa; goraadee afaan kootiitiinis jara sana nan lola. ¹⁷ Namni gurra qabu waan Hafuurri waldoota kiristaanaatiin jedhu haa dhaga'u. Nama mo'atuuf mannaa dhokfame irraa nan kenna. Akkasumas dhagaa adii maqaan haaraan irratti barreeffame tokko nan kennaaf; maqaa sanas namicha isa fudhatu sana malee namni tokko iyyuu hin beeku.

Gara Waldaa Kiristaana Tiyaaxiroonitti

¹⁸ "Ergamaa Waaqaa kan Waaqaa kan waldaa Kiristaanaa Tiyaatiraatti* akkana jedhii barreessi:

Ilmi Waaqaa inni iji isaa arraba ibiddaa fakkaatu, kan miilli isaa immoo naasii baqfamee qulqulleeffame fakkaatu sun akkana jedha.

¹⁹ Ani hojii kee, jaalalaa fi amantii kee, tajaajilaa fi obsaan dhaabachuu kee beeka; akkasumas akka hojiin kee inni ammaa kun isa duraa caalu nan beeka. ²⁰ Haa ta'uu malee sababii ati dubartittii raajii ofiin jettu Iizaabelin cal'iftee ilaaltuuf ani waan sirraa jibbu xinnoo qaba. Isheenis barsiisa isheetiin tajaajiltoota koo gowwoomsitee akka isaan halalummaa hojjetanii fi akka isaan nyaata waaqota tolfamoof aarsaa dhi'effame nyaatan gooti. ²¹ Ani akka isheen halalummaa ishee irraa qalbii jijjiirratuuf yeroo kenneefiin ture; isheen garuu ni didde. ²² Kanaafuu ani siree dhiphinaa irratti ishee nan gata; warra ishee wajjin ejjanis yoo isaan karaa ishee irraa qalbii jijjiirrachuu baatan rakkina guddaa keessa isaan nan buusa. ²³ Ijoollee ishee immoo dha'ichaan nan ajeesa. Waldoonni kiristaanaa hundinuus akka ani kalee fi onnee qoru ni beeku; anis tokkoo tokkoo keessaniif akkuma hojii keessaniitti gatii keessan isinii nan kenna. ²⁴ Isin warra Tiyaatiraa keessa jiraattan kanneen barsiisa ishee duukaa hin bu'inii fi warra barsiisa Seexanaa kan dhoksaa gad fagoo jedhamu sana hin baratiniin akkana nan jedha; 'Ani ba'aa biraa isinitti hin fe'u; ²⁵ isin garuu hamma ani dhufutti waan qabdan sana jabeessaa qabadhaa.' ²⁶ Ani nama mo'atuuf, kan hamma dhumaattis fedhii koo guutuuf saboota irratti taayitaa nan kenna. ²⁷ 'Inni bokkuu sibiilaatiin isaan bulcha; akkuma qodaa supheettis[†] isaan hurreessa;' kunis akkuma ani itti Abbaa koo biraa taayitaa argadhe sanaan. ²⁸ Ani immoo bakkalcha barii nan kennaaf. ²⁹ Namni gurra qabu waan Hafuurri waldoota kiristaanaatiin jedhu haa dhaga'u.

3

Gara Waldaa Kiristaanaa Sardeesitti

¹ "Ergamaa Waaqaa kan waldaa kiristaanaa Sardeesitti* akkana jedhii barreessi:

Inni Hafuurota Waaqaa torbaa fi urjiiwwan torba qabu sun akkana jedha.

Ani hojii kee beeka; ati maqumaaf jirta malee duuteerta. ² Dammaqi! Ani fuula Waaqa kootii duratti hojiin kee guutuu ta'uu isaa hin argineetii waan du'uu ga'e sana jajjabeessi. ³ Kanaafuu waan fudhattee fi waan dhageesse yaadadhu; waan dhageesse sanaaf ajajami; qalbiis jijjiirradhu. Yoo ati

^S 2:14 2:14 Barsiisa Bala'aam - Bala'aam falfaltuu Baabilon kan Baalaaq mootichi akka inni saba Israa'el abaaruuuf qaxaree dha. Akka seera Lak 31:16 irratti dubbatametti gorsi Bala'aam akka sabni Israa'el waaqota tolfamoo waaqeffatuu fi akka eja raawwatuuf karaa irraa jal'ise (Lak 25:1-3). * 2:18 2:18 Tiyaatiraatti - Tiyaaxiroon wiirtuu industirii turte. Industiroota Tiyaaxiroon gurguddoo keessaas tokko hojiin isaa qalamii dibuu fi uffata suufii hodhuu dha (Hoj 16:14). † 2:27 2:27 Far 2:9 * 3:1 3:1 Sardeesitti - Sardees magaalaa guddoo mootummaa Liidiyaa kan durii turte. Isheenis magaalaa Sooretii wiirtuu industirii beekantuu iddoo uffanni suufii fi mi'oonni qalamii dibaman itti hojjetaman turte; ta'us magaalattiin kun sochii lafaa kan bara 17 (bara araaraa) keessa ta'ee fi waraana garaa garaatiin mo'atamtee gad deebiteerti.

dammaquu baatte garuu ani akkuma hattuutti sitti nan dhufa; sa'aatii kamitti akka ani sitti dhufus ati hin beektu. ⁴ Ta'u iyyuu ati namoota uffata isaanii hin xureessin muraasa Sardees keessaa qabda. Isaanis uffata adaadii uffatanii na wajjin ni deemu; isaan kanaaf warra malanii dha. ⁵ Namni mo'u akkuma isaanii uffata adaadii ni uffata. Anis maqaa isaa kitaaba jireenyaa keessaa gonkumaa hin haqu; fuula Abbaa kootii fi ergamoota isaa durattis maqaa isaa nan beeksisa. ⁶ Namni gurra qabu waan Hafuurri waldoota kiristaanaatiin jedhu haa dhaga'u.

Gara Waldaa Kiristaanaa Filaadelfiyaatti

⁷ "Ergamaa Waaqaa kan waldaa kiristaanaa Filaadelfiyaatti[†]akkana jedhii barreessi:

Inni qulqulluun, inni dhugaan, inni furtuu Daawit harka isaatii qabu, kan waan inni banu eenyu iyyuu cufuu hin dandeenyee fi waan inni cufus eenyu iyyuu banuu hin dandeenye sun akkana jedha.

⁸ Ani hojii kee beeka. Kunoo, ani balbala banamaa namni cufuu hin dandeenye tokko fuula kee dura kaa'eera. Akka ati humna xinnoo qabduus beeka; ta'us dubbii koo eegdeerta; maqaa koos hin ganne. ⁹ Kunoo, ani warra waldaa Seexanaa ta'an kanneen utuu Yihuudoota hin ta'in Yihuudoota ofiin jedhanii soban keessaa tokko tokko akka isaan dhufanii miilla kee irratti kufanii sagadanii fi akka isaan akka ani si jaalladhe beekan nan godha. ¹⁰ Ajaja ani akka ati obsaan dhaabattuuf siif kenne sana waan eegdeef, anis sa'aatii qorumsaa kan warra lafa irra jiraatan qoruuf addunyaa guutuutti dhufuuf jiru sana irraa si oolcha. ¹¹ Ani dafeen dhufa. Atis akka namni tokko iyyuu gonfoo kee hin fudhanneef waan qabduu jabeessii qabadhu. ¹² Nama mo'atus mana qulqullummaa Waaqaa koo keessatti utubaa nan godha. Innis achi keessaa gonkumaa hin ba'u. Anis maqaa Waaqaa kootii fi maqaa magaalaa Waaqaa koo, maqaa Yerusaalem ishee haaraa, ishee Waaqaa koo biraa samii irraa gad buutu sanaa isa irratti nan barreessa; maqaa koo haaraas isa irratti nan barreessa. ¹³ Namni gurra qabu waan Hafuurri waldoota kiristaanaatiin jedhu haa dhaga'u.

Gara Waldaa Kiristaanaa Lodooqiyaatti

¹⁴ "Ergamaa Waaqaa kan waldaa kiristaanaa Lodooqiyaatti[‡]akkana jedhii barreessi:

Ameen, inni amanamaan, dhuga baatuun dhugaatii fi jalqabaan uumama Waaqaa sun akkana jedha.

¹⁵ Akka ati qabbanaa'aa yookaan ho'aa hin ta'in ani hojii kee beeka! Ani utuu ati qabbanaa'aa yookaan ho'aa taatee silaa nan hawwa ture. ¹⁶ Kanaafuu ati waan laphii[§]staateef, ho'aa yookaan qabbanaa'aa waan hin ta'iniif ani afaan kootii si tufuu ga'eera. ¹⁷ Ati, 'Ani sooreessa; qabeenya argadheera; wanni na barbaachisu tokko iyyuu hin jiru' jetta. Garuu ati deegaa, rakkataa, hiyyeessa, jaamaa fi qullaa ta'uu kee hin beektu. ¹⁸ Kanaafuu ati akka sooromuuf, warqee ibiddaan qulqulleeffame akka narraa bitattu, akka qullaa kee qaanessaa sana haguuggattuufis uffata adii uffattu akka narraa bitattu, akka arguu dandeeuuuf immoo kuulii ijatti naqattu akka narraa bitattu sin gorsa. ¹⁹ Ani warran jaalladhu nan ifadha; nan adabas. Kanaafuu jabaadhu; qalbii jijjiirradhus. ²⁰ Kunoo, ani balbala dura dhaabadheen balbala rurrukuta. Yoo namni kam iyyuu sagalee koo dhaga'ee balbala naaf bane, ani ol seenee isa wajjin irbaata nan nyaadha; innis na wajjin ni nyaata. ²¹ Akkuma

[†] 3:7 3:7 Filaadelfiyaatti - Filaadelfiyaan wiirtuu daldalaa kan hojii gogaatii fi jirbiitiin beekamte, kan lafa qotiisaa badhaadhaa isaatiin marfamtee dha; garuu sochii lafaatiif saaxilamtuu dha. [‡] 3:14 3:14 Lodooqiyaatti - Lodooqiyaan magaalaa sooromtuu fi magaalaa daldalaa kan guddachaa jirtu ture. Isheenis iddoo jireenya hojjetoota mi'a suufii biyya sanaa irraa hojjetamee ture. Mi'i suufii kunis gurraacha cululuqaa ta'uu isaatiin beekamaa ture. Akkasumas magaalattiin wiirtuu hojii baankiiti fi iddoo Asqeelphoos waqichii tolfamaan itti waqeffatamu ture.

[§] 3:16 3:16 Laphii - Lodooqiya bira burqaawwan ho'aa bishaanonni isaanii fagoo deemanitu ture. Bishaan kunis laphii (bulluqoo) ta'ee ergasii qilee (hallayyaa) fuula Lodooqiya duraatti dhangala'a ture. Bishaan sunis dhukkuba namatti fida ture.

ani mo'adhee Abbaa koo wajjin teessoo isaa irra taa'e sana, namni mo'atus akka inni na wajjin teessoo koo irra taa'uuf mirga nan kennaaf. ²² Namni gurra qabu waan Hafuurri waldoota kiristaanaatiin jedhu haa dhaga'u."

4

Teessoo Samii Keessaa

¹ Anis ergasii nan ilaale; kunoo balballi banamaan tokko fuula koo dura samii keessa ture. Sagaleen jalqabaa kan ani utuu inni akka malakataatti natti dubbatu dhaga'e sun, **"As ol kottu; anis waan asiin booddee ta'uu qabu sittin argisiisaa"** jedhe. ² Anis yommusuma Hafuuraanan ture; kunoo, teessoon namni tokko irra taa'e tokko samii keessa ture. ³ Inni achi taa'es dhagaa gatii guddaa* yaasphiidiitii fi sardiyoona[†] fakkaata ture. Naannoo teessoo sanaas sabbata Waaqaa kan bifti isaa dhagaa maragdi[‡] fakkaatutu ture. ⁴ Naannoo teessoo sanaas teessoowwan biraa digdamii afurtu ture. Teessoowwan sana irras maanguddoonni digdamii afur uffata adaadii uffatanii, mataa isaaniitti immoo gonfoo warqee kaa'atanii tataa'anii turan. ⁵ Teessoo sana keessaas ifni balaqqee ni mul'ate; kakawwee fi sagaleen ni dhaga'ame. Teessoo sana fuuldurattis guci torba boba'aa ture. Isaan kunneenis Hafuurota Waaqaa torbanii dha. ⁶ Akkasumas wanni galaana bilillee fakkaatu kan akka of-ilaalee qulqullaa'e tokko teessoo sana fuuldura ture.

Walakkaa naannoo teessoo sanaas uumamawwan lubbuu qabeeyyii afurtu ture; isaanis duraa fi duubaan ijaan guutamanii turan. ⁷ Uumamni lubbuu[§] qabeessi jalqabaa leenca, inni lammaffaan sangaa fakkaata ture; inni sadaffaan fuula akka fuula namaa qaba ture; afuraffaan immoo risaa* barrisu fakkaata ture. ⁸ Tokkoon tokkoon uumamawwan lubbuu qabeeyyii afranii qoochoo ja'a ja'a qabu turan; duubni isaaniitii fi keessi isaaniis ijaan guutamee ture. Isaanis utuu aara hin galfatin halkanii guyyaa,

"Waaqni Gooftaan Waan Hunda Danda'u"[†]
inni ture, inni jiruu fi inni dhufuuf jiru,
'Qulqulluu, qulqulluu, qulqulluu dha'"

jedhanii faarfachuu hin dhiisan. ⁹ Uumamawwan lubbuu qabeeyyiin sun isa teessoo irra taa'ee jiru kan bara baraa hamma bara baraatti jiraatu sanaaf ulfina, kabajaa fi galata yommuu kennanitti, ¹⁰ maanguddoonni digdamii afran sunis fuula isa teessoo irra taa'ee jiru sanaa duratti kufanii isa bara baraa hamma bara baraatti jiraatu sanaaf ni sagadan. Gonfoowwan isaaniis fuula teessoo sanaa dura kakaa'anii akkana jedhu:

¹¹ "Yaa Gooftaa fi Waaqa keenya,
ati waan hunda waan uumteef,
isaan fedhii keetiin waan uumamaniif,
waan jiraataniifis, ulfina, kabajaa fi
humna fudhachuun siif ni mala."

5

Kitaaba Maramaa fi Hoolaa Qalame

¹ Anis harka mirga isa teessoo irra taa'e sanaa irratti kitaaba maramaa keessaa fi duubaan itti barreeffamee chaappaa torbaan cufame tokko nan arge. ² Anis ergamaa Waaqaa isa jabaa sagalee guddaadhaan, "Chaappaa hiikuun, kitaaba maramaa banuun kan maluuf eenyu inni?" jedhee labsu tokko nan arge. ³ Garuu namni tokko iyyuu samii keessaa yookaan lafa irraa yookaan lafa jalaa kitaaba maramaa banuu yookaan keessa isaa iyyuu ilaalu hin dandeenye. ⁴ Anis waan namni kitaaba maramaa banuun yookaan keessa isaa ilaaluun maluuf tokko iyyuu dhabameef baay'isee nan boo'e. ⁵ Ergasiis maanguddoota sana keessaa inni tokko, "Hin boo'in! Kunoo, Leenci gosa Yihuudaa, Hiddi Daawit mo'ateera. Inni kitaabicha maramaa banuu, chaappaa isaa torbanuus hiikuu ni danda'a" naan jedhe.

⁶ Anis Hoolaa waan qalame fakkaatee teessoo walakkaa uumamawwan lubbuu qabeeyyii afranii fi maanguddootaan marfamee dhaabatu tokko arge. Hoolichis gaanfa

* **4:3** 4:3 Yaasphiidiitii - Dhagaa gatii guddaa kan yeroo baay'ee magariisa ta'ee dha. Bifa keelloo (daalacha), magaala yookaan diimaa qabaachuu danda'a. [†] **4:3** 4:3 Sardiyoona - dhagaa gatii guddaa kan yeroo baay'ee diimatuu dha.
[‡] **4:3** 4:3 maragdi - dhagaa gatii guddaa kan magariisa ta'ee dha. [§] **4:7** 4:7 His 1:10 * **4:7** 4:7 risaa - (Leenca, sangaa, nama, risaa) afran isaaniis iyyuu tokkumaadhaan guutummaa uumamawwan lubbuu qabeeyyii tokko ta'anii Waaqa galateeffatan sanaa iddoo bu'u. [†] **4:8** 4:8 Isa 6:3

torbaa fi ija torba* qaba ture; iji torban kunneenis Hafuurota Waaqaa kanneen gara lafa hundaatti ergaman torbanii dha. ⁷ Innis dhufee harka mirgaa isa teessoo irra taa'ee jiru sanaa irraa kitaaba maramaa fudhate. ⁸ Yommuu inni kitaaba maramaa sana fudhatettis uumamawwan lubbuu qabeeyyii afranii fi maanguddoonni digdamii afran fuula Hoolichaa duratti kufan. Tokkoon tokkoon isaanii baganaa qabu turan; isaanis mi'a ixaanaa kan warqee irraa hojjetamee fi kan ixaanni keessa guute harkaa qabu turan; ixaanni kunis kadhannaa qulqullootaa ti. ⁹ Isaanis akkana jedhanii faarfannaa haaraa faarfatan;

“Kitaaba maramaa fuudhuun,

chaappaa kitaabicha maramaas hiikuun siif mala;
sababiin isaas ati qalamtee, gosa hundumaa keessaa,
afaan hunda keessaa, saba hunda keessaa,

sanyii hunda keessaa, namoota dhiiga keetiin Waaqaaf bitteertaatii.

¹⁰ Akka isaan mootummaa fi luboota Waaqa keenyaa ta'anis gooteerta;
isaanis lafa irratti ni mo'uu.”

¹¹ Anis ilaalee sagalee ergamoota baay'ee dhaga'e; baay'inni isaanis kumaatamaa fi kuma kumaatama ture. Isaanis teessoo sanatti, uumamawwan lubbuu qabeeyyii fi maanguddootatti naanna'anii turan. ¹² Isaanis akkana jedhanii sagalee guddaadhaan faarfatan;

“Hoolaa qalame sanaaf, humnaa fi qabeenya,

ogummaa fi jabina, kabajaa fi ulfina,
galatas argachuun ni mala!”

¹³ Anis ergasii uumamni samii keessa jiru, kan lafa irra jiru, kan lafa jala jiruu fi kan galaana keessa jiru hundi, uumamni isaan keessa jiru hundinuus,

“Isa teessoo irra taa'u sanaa fi Hoolichaaf,

galannii fi kabajni, ulfannii fi humni,

bara baraa hamma bara baraatti haa ta'uu!”

jedhanii utuu faarfatanuu nan dhaga'e. ¹⁴ Uumamawwan lubbuu qabeeyyiin afran, “Ameen” jedhan; maanguddoonnis kufanii sagadan.

6

Chaappaawwan Torba

¹ Anis yommuu Hoolichi chaappaawwan torban keessaa isa jalqabaa banu nan arge. Ergasii uumamawwan lubbuu qabeeyyii keessaa inni tokko sagalee akka kakawweetiin, “Kottu!” jechuu isaa nan dhaga'e. ² Anis nan ilaale; kunoo, fardi adiin* tokko fuula koo dura ture! Inni farda sana yaabbates iddaa harkatti qabatee ture; gonfoonis ni kennameef; innis mo'achaa, ammas mo'achuuf ba'e.

³ Yommuu Hoolichi chaappaa lammaffaa banettis uumamni jiraataan inni lammaffaan, “Kottu!” jechuu isaa nan dhaga'e. ⁴ Fardi biraa daamaan† tokkos ni dhufe. Isa fardicha yaabbatuufis akka inni nagaa lafa irraa balleessuu fi akka namoonni wal gorra'an akka godhuuf humni kennameef; goraadeen guddaan tokkos ni kennameef.

⁵ Yommuu Hoolichi chaappaa sadaffaa banettis uumamni jiraataan inni sadaffaan, “Kottu!” jechuu isaa nan dhaga'e; nan ilaales; kunoo, fardi gurraachi‡ tokko fuula koo dura ture! Inni fardicha yaabbatus madaalii of harkaa qaba ture. ⁶ Anis waan akka sagalee uumamawwan lubbuu qabeeyyii afran gidduu dubbatame fakkaatu tokko, “Qamadiin safartuu tokkoo mindaa guyyaa tokkootiif, garbuun safartuu sadiis mindaa guyyaa tokkootiif haa ta'uu; garuu zayitii fi daadhii wayinii hin miidhin!” jechuu isaa nan dhaga'e.

⁷ Yommuu Hoolichi chaappaa afuraffaa banetti sagalee uumama jiraataa afuraffaa kan, “Kottu!” jedhu nan dhaga'e. ⁸ Anis nan ilaale; kunoo, fardi daalachi tokko fuula koo dura ture! Inni fardicha yaabbatus maqaan isaa Du'a jedhama ture; Sii'oolis dugda duubaan itti dhi'aatee isa duukaa bu'aa ture. Isaanis goraadeen, beelaan, balaa fi bineensota lafaatiin akka ajjeesaniif kurmaana lafaa irratti humni ni kennameef.

⁹ Yommuu inni chaappaa shanaffaa banetti ani iddoo aarsaa jalatti lubbuuwwan warra sababii dubbii Waaqaatii fi sababii dhuga ba'umsa eegan sanaatiif gorra'amani

* 5:6 5:6 Gaanfa torbaa fi ija torba - kitaaba Qulqulluu keessatti gaafni fakkeenya jabinaatii fi humnaa ti. “Gaanfi torba” Humna akka malee guddaa argisiisa; iji immoo dandeettii Waaqni ittiin waan hunda arguu fi beeku argisiisa.

* 6:2 6:2 Fardi adiin - fakkeenya boojuu fi mo'annaa ti. † 6:4 6:4 daamaan - bifa ibiddaa kan waraana qofa utuu hin ta'in akka qalamuunis waraana keessa jiru argisiisuu dha. ‡ 6:5 6:5 Fardi gurraachi - kun fakkeenya beelaa jechuunis du'a beelli fiduu dha.

nan arge. ¹⁰ Isaanis sagalee guddaadhaan, "Yaa Gooftaa Waan Hundaa Olii, qulqullichaa fi dhugaa, ati warra lafa irra jiraatanitti utuu hin murin hamma yoomiitti turta? Hamma yoomiittis dhiiga keenyaaf haaloo hin baatu?" jedhanii iyyan. ¹¹ Tokkoo tokkoo isaaniitiifis uffanni adaadiin ni kenname; hamma lakkoobsi warra isaan wajjin tajaajilaniitii fi lakkoobsi obboloota isaanii kanneen akkuma isaaniitti ajjeefamuuf jiran sanaa guutamutti akka yeroo xinnoo obsan isaaniitti himame.

¹² Yommuu inni chaappaa ja'afaa banettis nan arge. Sochii lafaa guddaa tokkodu ture. Aduun akka uffata gaddaa gurraachofte; ji'is akkuma dhiigaa diimate; ¹³ urjiwwan samiis akkuma iji muka harbuu yommuu qilleensa jabaan raafamutti harca'u sana lafatti gad harca'an. ¹⁴ Samiin akkuma kitaaba maramaatti marame; tulluu fi biyyi bishaaniin marfamtes iddoo isaaniitii buqqifaman.

¹⁵ Mootonni lafa irraa, bulchitoonni fi abbootiin duulaa, sooreyyii fi namoonni jajjaboonni, namoonni kaan hundi, garbas ta'u birmaduun holqa keessaa fi kattaawwan tulluuwwanii gidduutti dhokatan. ¹⁶ Isaanis tulluuwwanii fi kattaawwan waammatanii akkana jedhu; "Nurratti kufaa; fuula isa teessoo irra taa'u sanaatii fi dheekkamsa Hoolichaa duraa nu dhoksa!" ¹⁷ Guyyaan dheekkamsa isaa guddaan sun ga'eeraatii; egaa eenyutu guyyaa sana dura dhaabachuu danda'a ree?"

7

Namoonni 144,000 Chaappeffaman

¹ Ergasiis ani utuu ergamoonni afur golee lafaa afran irra dhaabatanii akka bubbeen lafatti yookaan galaanatti yookaan muka kamitti iyyuu hin bubbifne bubbee lafaa afran dhowwanuu nan arge. ² Ergamaan chaappaa Waaqa jiraataa qabu kaan immoo utuu karaa ba'a biiftuutiin ol ba'uu nan arge. Innis ergamoota afran akka isaan lafaa fi galaana miidhaniif humni kennameef sana sagalee guddaadhaan waamee, ³ "Hamma nu adda tajaajiltoota Waaqa keenyaa irratti chaappaa goonutti lafa yookaan galaana yookaan muka hin miidhinaa" jedhe. ⁴ Anis baay'ina warra chaappeffamanii dhaga'e: gosa Israa'el hunda keessaa 144,000 ture.

⁵ Gosa Yihuudaa keessaa 12,000,

gosa Ruubeen keessaa 12,000,

gosa Gaad keessaa 12,000,

⁶ gosa Aasheer keessaa 12,000,

gosa Niftaalem keessaa 12,000,

gosa Minaasee keessaa 12,000,

⁷ gosa Simi'oon keessaa 12,000,

gosa Lewwii keessaa 12,000,

gosa Yisaakor keessaa 12,000,

⁸ gosa Zebuuloon keessaa 12,000,

gosa Yoosef keessaa 12,000,

gosa Beniyaam keessaa 12,000 turan.

Tuuta Namoota Uffata Adaadii Uffatanii

⁹ Anis kana booddee nan ilaale; kunoo, tuunni guddaan namni tokko iyyuu lakkaa'uu hin dandeenye kan saba hundumaa, gosa hundumaa, nama hundumaa fi afaan hundumaa keessaa walitti qabame tokko teessoo sana duraa fi fuula Hoolichaa dura dhaabatee ture. Isaanis uffata adaadii uffatanii, damee meexxiis harkatti qabatanii turan. ¹⁰ Isaanis sagalee guddaadhaan,

"Fayyinni kan Waaqa keenya

isa teessoo irra taa'uutii fi

kan Hoolichaati"

jedhanii iyyan. ¹¹ Ergamoonni hundinuu teessichatti, maanguddootaa fi uumamawwan lubbuu qabeeyyii afranitti naanna'anii dhadhaabachaa turan. Isaanis adda isaaniitiin fuula teessoo sanaa walitti gombifamanii Waaqaaf sagadan; ¹² akkanas jedhan:

"Ameen!

Eebii fi ulfinni, ogummaan, galanni,

kabajni, humnii fi jabinni,

bara baraa hamma bara baraatti

Waaqa keenyaaf haa ta'u.

Ameen!"

¹³ Maanguddoota keessaas inni tokko, "Warri uffata adaadii uffatan kunneen eenyu fa'i? Eessaa dhufan?" jedhee na gaafate.

- ¹⁴ Anis, “Yaa Gooftaa, situ beeka” jedheen deebiseef.
 Inni immoo akkana naan jedhe; “Isaan kunneen warra dhiphina guddaa keessaa ba’anii dhufanii dha; isaanis dhiiga Hoolichaatiin uffata isaanii miicatanii addeeffatani-iru. ¹⁵ Kanaafuu,
 “Isaan teessoo Waaqaa dura jiru;
 halkanii guyyaas mana qulqullummaa isaa
 keessatti isa tajaajilu;
 inni teessicha irra taa’ee jiru sunis
 isaan gidduu jiraata.
¹⁶ ‘Isaanis si’achi gonkumaa hin beela’an;
 si’achis gonkumaa hin dheebotan.
 Aduun isaan hin dha’u;’*
 ho’i finiinaanis isaan hin gubu.
¹⁷ Hoolichi walakkaa teessoo sanaa jiru
 tiksee isaanii ni ta’aatii;
 ‘inni gara burqaa bishaan jireenyaatti isaan geessa.’
 ‘Waaqanis imimmaan hunda ija isaanii irraa ni haqa.’”

8

Chaappaa Torbaffaa

¹ Yommuu Hoolichi chaappaa torbaffaa banetti gara walakkaa sa’aatii tokkoo samii keessa tasgabbiitu ture.

Girgiraa Warqee

² Anis ergamoota fuula Waaqaa dura dhadhaabatan torban arge; isaaniifis malakanni torba ni kenname.

³ Ergamaan biraa kan girgiraa warqee qabu tokko dhufee iddoo aarsaa bira dhaabate. Innis iddoo aarsaa warqee kan fuula teessichaa dura jiru sana irratti akka kadhannaa qulqulloota hundumaa wajjin dhi’eessuuf ixaanni baay’een isaaf ni kenname. ⁴ Aarri ixaana sanaas kadhannaa qulqullootaa wajjin harka ergamaa sanaa keessaa fuula Waaqaa duratti ol ba’e. ⁵ Ergamaan sunis girgiraa fuudhee iddoo aarsaa irraa ibidda itti guutee lafatti gad darbate; ergasiis sagaleen kakawwee, balaqqeessaa fi sochii lafaa ni dhaga’ame.

Malakatawwan

⁶ Ergamoonni Waaqaa torban warri malakata torban qabanis malakata afuufuu ni qophaa’an.

⁷ Ergamaan jalqabaa malakata isaa afuufe; cabbii fi ibiddi dhiigaan makames lafatti gad darbatame. Lafti harka sadii keessaa harki tokko ni gubatte; muktis harka sadii keessaa harki tokko ni gubate; margi lalisaan hundinuus ni gubate.

⁸ Ergamaan lammaffaanis malakata isaa afuufe; wanni tulluu guddaa fakkaatu kan ibiddaan gubachaa jiru tokkos galaanatti gad darbatame. Galaannis harka sadii keessaa harki tokko dhiiga ta’e; ⁹ uumamawwan lubbuu qabeeyyiin galaana keessaa harka sadii keessaa harki tokko ni dhuman; dooniiwwan harka sadii keessaas harki tokko ni barbadaa’an.

¹⁰ Ergamaan sadaffaanis malakata isaa afuufe; urjiin guddaan akka gucaa boba’u tokkos samii irraa lafa dha’e; innis lageen harka sadii keessaa harka tokko irratti, burqaawwan bishaanii irrattis kufe; ¹¹ maqaan urjii sanaas “Hadheessaa” jedhama. Bishaan sunis harka sadii keessaa harki tokko ni hadhaa’e; sababii bishaan sun hadheeffameefis namoonni baay’een bishaaniin dhuman.

¹² Ergamaan afuraffaanis malakata isaa afuufe; aduun harka sadii keessaa harki tokko, ji’i harka sadii keessaa harki tokko, urjiinis harka sadii keessaa harki tokko ni rukutaman; kanaanis ifni isaanii harka sadii keessaa harki tokko ni dukkanaa’e. Guyyaan harka sadii keessaa harki tokko akkasumas halkan harka sadii keessaa harki tokko ifa malee hafe.

¹³ Anis ilaalee risaa samii walakkaa barrisaa sagalee guddaadhaan, “Sababii sagalee malakataa kan ergamoota biraa sadaniin dhageessifamuuf jiru sanaatiif warra lafa irra jiraataniif Wayyoo! Wayyoo! Wayyoo!” jedhee iyyu tokko nan dhaga’ee.

* 7:16 7:16 Isa 49:10

9

Malakata Shanaffaa: Dha'icha Hawwaannisaa

¹ Ergamaan shanaffaan malakata isaa afuufe; anis urjii samii irraa lafa dha'e tokko nan arge. Urjii sanaafis furtuu "Boolla Qilee" ni kenname. ² Yommuu inni Boolla Qilee sana banettis aarri tokko akkuma aara boolla ibiddaa guddaa keessaa ba'uutti ol ba'e. Aduu fi samiinis aara Boolla Qilee keessaa ba'u sanaan ni dukkanaa'an. ³ Aara sana keessaas hawwaannisaa baay'etu lafatti yaa'e; hawwaannisoota sanaafis taayitaan akka taayitaa torbaanqabaa lafaa ni kenname. ⁴ Isaanis akka marga lafaa yookaan biqiltuu yookaan muka tokko illee miidhan utuu hin ta'in akka namoota adda isaanii irraa chaappaa Waaqaa hin qabaatin gofa miidhan ajajaman. ⁵ Isaanis akka namoota sana ji'a shan dhiphisiiniif eeyyamameef malee akka jara ajjeesaniif miti. Dhiphinni kunis akkuma dhiphina isa yommuu torbaanqabaan nama iddutti dhiphatanii ti. ⁶ Guyyoota sana keessa namoonni du'a barbaadu; garuu hin argatan. Du'uus ni hawwu; duuti garuu isaan baqata.

⁷ Bifti hawwaannisoota sanaas fardeen duulaaf qopheeffaman fakkaata ture. Mataa isaaniiittis waan akka gonfoo warqee kaa'atanii turan; fuulli isaanis fuula namaa fakkaata ture. ⁸ Rifeensi isaanii rifeensa mataa dubartootaa fakkaata ture; ilkaan isaanis ilkaan leencaa fakkaata ture. ⁹ Isaanis maddaa maddaa sibiilaa fakkaatu qabu turan; sagaleen qoochoo isaanis sagalee fardeenii fi gaariwwan baay'ee kanneen gara duulaatti didichanii fakkaata ture. ¹⁰ Isaanis akkuma torbaanqabaa eegee fi ilkee qabu turan; eegee isaanii keessaa immoo taayitaa ittiin ji'a shan nama dhiphisan qabu turan. ¹¹ Isaanis mootii qabu turan; innis ergamaa Boolla Qilee ti; maqaan isaas afaan Ibraayisxiitiin Abadon, afaan Giriikiin immoo Aphooliyoon jedhama ture.

¹² Wayyoon inni duraa darbeera; kunoo, wayyoowwan biraa lamatu dhufuuf jira.

¹³ Ergamaan ja'affaanis malakata isaa afuufe; anis gaanfa afran kanneen iddoo aarsaa warqee irraa hojjetamee fuula Waaqaa dura jiru irraa sagalee tokko nan dhaga'e. ¹⁴ Sagaleen sunis ergamaa ja'affaa malakata qabu sanaan, "Ergamoota afran kanneen laga Efraaxiisi guddicha biratti hidhaman sana gad dhiisi" jedhe. ¹⁵ Ergamoonni afran sa'aatii kanaaf, guyyaa kanaaf, ji'aa fi waggaa kanaaf qopheeffamanii turanis sanyii namaa harka sadii keessaa harka tokko fixuuf gad dhiifaman. ¹⁶ Baay'inni loltoota fardeeniiin duulanii miliyoona dhibba lama ture. Anis baay'ina isaanis nan dhaga'e.

¹⁷ Anis mul'ata koo keessatti fardeenii fi namoota farda yaabbatan nan arge: Isaanis maddaa diimaa akka ibiddaa, sanpeerii* fi keelloo akka dinyii† qabu turan. Mataan fardeen sanaas mataa leencaa fakkaata ture; afaan isaanii keessaas ibidda, aaraa fi dinyiitu ba'e. ¹⁸ Dha'icha sadan kanaan jechuunis ibidda, aaraa fi dinyii afaan isaanii ba'een sanyiin namaa harka sadii keessaa harki tokko ni ajjeefame. ¹⁹ Taayitaan fardeen sanaas afaan isaaniiitti fi eegee isaanii keessa ture; eegeen isaanii akkuma bofaa mataa qaba tureetti; isaanis mataa sanaan nama miidhu turan.

²⁰ Namoonni dha'icha sanaan ajjeefamuu jalaa ba'anis amma iyyuu qalbi jijjiirratanii hojii harka isaanii irraa hin deebine; hafuurota hamoo waaqeffachuu fi waaqota tolfamoo warqee irraa, meetii irraa, naasii irraa, dhagaa fi muka irraa hojjetaman kanneen arguu yookaan dhaga'uu yookaan deemuu hin dandeenye waaqeffachuu hin dhiifne. ²¹ Akkasumas gaabbanii nama ajjeesuu isaanii irraa yookaan falfala hojjechuu isaanii irraa yookaan halalummaa isaanii irraa yookaan hanna isaanii irraa hin deebine.

10

Ergamichaa fi Kitaaba Maramaa Xinnaa

¹ Anis utuu ergamaan Waaqaa inni jabaan biraa tokko samii irraa gad bu'uu nan arge. Innis duumessa uffatee ture; mataa isaa irraan immoo sabbata Waaqaatu ture; fuulli isaa akka aduu, miilli isaas akka utubaa ibiddaa ture. ² Innis kitaaba maramaa xinnaa baname tokko harkatti qabatee ture. Miilla isaa mirgaa galaana irra, miilla isaa bitaa immoo lafa irra dhaabee ture; ³ innis akkuma leencaa aaduutti sagalee guddaadhaan iyye. Yommuu inni iyyettis bakakkaawwan torban ni dubbatan. ⁴ Yommuu bakakkaawwan torban dubbatanittis ani barreessuuf qophaa'een ture; garuu sagalee, "Waan bakakkaawwan torban jedhan sana chaappaan cufi malee hin barreessin" jedhu tokko samii irraa nan dhaga'e.

⁵ Ergamaan ani utuu inni galaanaa fi lafa irra dhaabatuu argee ture sunis harka isaa mirgaa samiitti ol qabe. ⁶ Innis isa bara baraa hamma bara baraatti jiraatu,

* 9:17 9:17 Sanpeerii - Sanpeeriin dhagaa gatii guddaa gurraacha akka cuquliisaa ti. † 9:17 9:17 dinyii - dinyiin kemikaala keelloo fakkaatu kan ho'a guddaadhaan gubamuu fi kan foolii namatti hin tolle qabuu dha.

isa samiiwwanii fi waan isaan keessa jiru hundumaa, lafaa fi waan isa keessa jiru hundumaa, galaanaa fi waan isa keessa jiru hundumaa uume sanaan kakatee akkana jedhe; "Ammaan achi lafa irra harkisuun hin jiru! ⁷ Garuu guyyoota ergamaan torbaffaan malakata isaa afuufutti icciitiin Waaqaa akkuma inni raajota warra hojjetoota isaa ta'anitti labse sanatti ni raawwatama."

⁸ Sagaleen ani samii irraa dhaga'ee ture sun ammas deebi'ee, "Dhaqiitii kitaaba maramaa banamee ergamaa galaanaa fi lafa irra dhaabatu harka jiru sana fudhadhu" naan jedhe.

⁹ Kanaafuu ani gara ergamichaa dhaqee akka inni kitaaba maramaa xinnaa sana naa kennuuf isa gaafadhe. Innis, "Fudhadhuutii nyaadhu; kitaabni kun garaa kee ni hadheessa; 'afaan kee keessatti garuu akka dammaa mi'aawa*" naan jedhe. ¹⁰ Anis kitaaba maramaa xinnaa sana ergamicha harkaa fudhadhee nan nyaadhe. Innis afaan koo keessatti akkuma dammaa mi'aawe; erga ani nyaadhe garuu garaan koo ni hadheeffame. ¹¹ Ergasii immoo, "Ati waa'ee saba baay'ee, sanyii baay'ee, afaan baay'eetii fi waa'ee mootota baay'ee ammas raajii dubbachuu qabda" jedhamee natti himame.

11

Dhuga Baatota Lamaan

¹ Shambaqqoon ulee safartuu fakkaatu tokko naa kennamee akkana jedhamee natti himame; "Dhaqiitii mana qulqullummaa Waaqaatii fi iddoo aarsaa safari; warra achitti waaqeffatanis lakkaa'i. ² Oobdii mana qulqullummaatii ala ta'e garuu hin safarin; oobdiin sun waan Namoota Ormaatiif kennameef isa itti hin dabaln. Isaanis magaalaa qulqulluu sana ji'a 42 lafatti dhidhiitu. ³ Anis dhuga baatota koo lamaaniiif humna nan kenna; isaanis uffata gaddaa* uffatanii guyyaa 1,260 raajii ni dubbatu." ⁴ Isaan kunneenis mukkeen ejersaa lamaanii fi baattuwwan ibsaa lamaan fuula Gooftaa lafaa dura dhaabatanii dha. ⁵ Namni kam iyyuu isaan miidhuu yaallaan ibiddi afaan isaanitii ba'ee diinota isaanii ni balleessa. Kunis haala namni isaan miidhuu barbaadu kam iyyuu ittiin ajjeefamuu qabuu dha. ⁶ Isaan yeroo raajii dubbatanitti akka bokkaan hin roobneef humna ittiin samii cufan qabu; akkasumas bishaanota dhiigatti geeddaruudhaa fi yeroo barbaadanitti dha'icha gosa hundaatiin lafa rukutuuf taayitaa qabu.

⁷ Yommuu isaan dhuga ba'umsa isaanii xumuranittis bineensi Boolla Qilee keessaa ol ba'u sun lola isaanitti kaasa; isaan mo'ata; isaan ajjeesas. ⁸ Reeffi isaanis daandii magaalaa guddoo irra ni ciciisa; magaalattiin kunis ishee hiikkaa hafuuraatiin Sodoomii fi Gibxi jedhamtu kan Gooftaan isaanis itti fannifamee turee dha. ⁹ Namoonni saba hunda keessaa, gosa hunda keessaa, afaanii fi sanyii hunda keessaa dhufanis guyyaa sadii fi walakkaa reeffa isaanii ilaalu; akka hin awwaalammes ni dhowwu. ¹⁰ Raajonni lamaan kunneen waan warra lafa irra jiraatan dhiphisaa turaniif warri lafa irra jiraatan isaanitti gammadu; ni ililchus; kennaas walii ergu.

¹¹ Guyyaa sadii fi walakkaa booddee garuu hafuurri jireenyaa Waaqa biraa dhufee isaan seene; isaanis ka'anii miilla isaanitiin dhaabatan; warri isaan arganis akka malee sodaatan. ¹² Isaanis sagalee guddaa, "As ol kottaa!" isaanii jedhu tokko samii irraa dhaga'an. Utuma diinonni isaanii ilaalanuus duumessaan gara samiitti ol ba'an.

¹³ Yeroo sanattis sochii lafaa guddaa isaatu ture; magaalaa sunis kudhan keessaa tokko ni barbadaa'e. Namoonni kunni torbas sochii lafaa sanaan dhuman; warri hafan immoo sodaatanii Waaqa samiitiif ulfina kennan.

¹⁴ Wayyoon lammaffaan darbeera; kunoo, wayyoon sadaffaan dafee ni dhufa.

Malakata Torbaffaa

¹⁵ Ergamaan torbaffaanis malakata isaa afuufe; sagaleen guddaan, "Mootummaan addunyaa amma mootummaa Gooftaa keenyaatii fi mootummaa Kiristoos† ta'eera; innis bara baraa hamma bara baraatti ni mo'a" jedhu samii keessa ture. ¹⁶ Maanguddoonni digdamii afran fuula Waaqaa dura teessoo isaanii irra tataa'anii turan sunis adda isaanitiin gombifamanii Waaqaaf ni sagadan; ¹⁷ akkanas jedhan:

"Yaa Waaqayyoo Gooftaa Waan Hunda Dandeessu,
Kan jirtuu fi kan turte,

* 10:9 10:9 His 3:3 * 11:3 11:3 Uffanii gaddaa uffata raajonni yeroo hunda uffatanii dha (Isa 20:2; Zak 13:4 ilaalaa). † 11:15 11:15 yookaan Masihiin

ati humna kee isa guddaa fudhattee

waan mo'uu jalqabdeef galata siif dhi'eessina.

18 Saboonni ni aaran;

dheekkamsi kees dhufeera.

Yeroon warri du'an itti murtii argatan ga'eera;

yeroon ati itti raajota tajaajiltoota kee ta'aniif,

qulqulloota keetii fi warra maqaa kee sodaatan

xinnaafis ta'u guddaaf badhaasa kennitu ga'eera;

yeroon ati itti warra lafa balleessan balleessitus ga'eera.”

¹⁹ Manni qulqullummaa Waaqaa kan samii keessaas ni baname; taabonni kakuu isaas mana qulqullummaa isaa keessatti mul'ate. Ergasiis ifa balaqqee, sagalee, bakakkaa, sochii lafaatii fi bokkaa cabbii guddaa isaatu ture.

12

Dubartittii fi Bineensa Jawwee Fakkaatu

¹ Mallattoon guddaan tokko samii keessatti mul'ate: dubartii biiftuu uffattee miilla ishee jalaa ji'a qabdu kan mataa ishee irraa gonfoo urjiiwwan kudha lamaa qabdu tokkotu ture. ² Isheenis ulfa turte; yommuu da'umsi ishee ga'ettis ciniinsuudhaan qabamtee iyyite. ³ Mallattoon biraas samii keessatti mul'ate; kunoo, bineensa jawwee fakkaatu diimaa guddaa, mataa torbaa fi gaanfa kudhan qabu, kan mataa isaa irraa gonfoo torba qabu tokkotu ture. ⁴ Eegeen isaas urjiiwwan samii irra jiran harka sadii keessaa harka tokko haxaa'ee lafatti gad darbate. Bineensi jawwee fakkaatu sunis yeroo dubartittiin deessutti mucaa ishee liqimsuuf jedhee fuula dubartii da'uuf jirtu sanaa dura dhaabate. ⁵ Isheen ilma bokkuu sibiilaatiin saba hundumaa bulchuuf jiru tokko deesse; daa'imni ishees gara Waaqaatti, gara teessoo isaattis ol butame. ⁶ Dubartittiinis gara lafa gammoojjii iddoo akka isheen guyyaa 1,260 achitti gabbifamtuuf jedhee Waaqni isheef qopheesseetti baqatte.

⁷ Lollis samii keessatti ka'ee. Miikaa'elii* fi ergamoonni isaa bineensa jawwee fakkaatu sana lolan; bineensi jawwee fakkaatu sunii fi ergamoonni isaas of irraa lolan. ⁸ Isaan garuu mo'achuu hin dandeenye; ergasiis iddoo isaanii kan samii keessaa sana ni dhaaban. ⁹ Bineensi guddaan jawwee fakkaatu sunis gad darbatame; innis bofa durii isa diiyaabiloos yookaan Seexana jedhamu, isa addunyaa guutuu karaa irraa jal'isu sanaa dha. Inni lafatti gad darbatame; ergamoonni isaas isa wajjin darbataman.

¹⁰ Anis sagalee guddaa tokko samii keessaa nan dhaga'ee; innis akkana jedha:

“Amma fayyinni, humnii fi
mootummaan Waaqa keenyaa,
taayitaan Kiristoos† isaas dhufeera.

Himataan obboloota keenyaa
inni halkanii guyyaa fuula Waaqaa duratti,
isaan himatu sun gad darbatameeraatii.

11 Isaanis dhiiga Hoolichaatiin,
dubbii dhuga ba'umsa isaanittiinis, isa mo'atan;

isaan hamma du'aatti illee taanaan
lubbuu isaanii hin mararfanne.

12 Kanaafuu yaa samiiwwan,
isin warri isaan keessa jiraattanis gammadaa!

Garuu yaa lafaa fi yaa galaana isiniif wayyoo!
Diiyaabiloos gara keessanitti gad bu'eeraatii!

Innis akka yeroo gabaabaa qabu
waan beekuuf baay'ee aareera.”

¹³ Bineensi jawwee fakkaatu sunis yommuu akka lafatti gad darbatame argetti, dubartittii daa'ima dhiiraa deesse sana ari'achuu jalqabe. ¹⁴ Dubartittiin garuu akka gara gammoojjii iddoo isheef qopheeffametti boficha jalaa barriftuuf, achittis baraa, barootaa fi walakkaa baraatiif akka gabbifamtuuf baalleen risaa guddaan lama isheedhaaf ni kenname. ¹⁵ Bofichis akka dubartittiin lolaadhaan fudhatamtuuf jedhee dugda ishee duubaan bishaan akka lagaa afaan isaa keessaa dhangalaase. ¹⁶ Lafti garuu afaan bantee laga bineensi jawwee fakkaatu sun afaan isaa keessaa dhangalaase sana liqimsuudhaan dubartittii gargaarte. ¹⁷ Bineensi jawwee fakkaatu sun dubartittiiti

* **12:7** 12:7 Miikaa'elii – hangafoota ergamootaa keessaa isa tokko; innis Dan 10:21 irratti eegduu saba Israa'el kan addaa jedhamee ibsame. Ergamoonni Miikaa'eliis warra ajaja isa jirani dha. † **12:10** 12:10 yookaan Masiihii

aaree sanyii ishee warra hafanitti lola kaasuu dhaqe; isaanis warra ajaja Waaqaa eeganii fi warra dhuga ba'umsa Yesuus jabeessanii qabatanii dha.

13

¹ Bineensi jawwee fakkaatu sunis cirracha galaanaa irra dhaabate.

Bineensa Galaana Keessaa Ba'e

Bineensa tokkos utuu inni galaana keessaa ba'uu nan arge. Innis gaanfa kudhanii fi mataa torba qaba ture; gaanfawwan isaa irratti gonfoo kudhan, tokkoo tokkoo mataa isaa irratti immoo maqaa arrabsoo qaba ture. ² Bineensi ani arge sunis qeerransa fakkaata ture. Miilli isaa miilla amaaketaa, afaan isaa immoo afaan leencaa fakkaata ture. Bineensi jawwee fakkaatu sunis humna isaa, teessoo isaatii fi taayitaa guddaas bineensichaaf kenne. ³ Mataa bineensichaa torban keessaa inni tokko waan madaa du'a fidu qabu fakkaata ture; madaan du'a fidu sun garuu fayyee ture. Addunyaan guutuunis dinqisiifatee bineensicha duukaa bu'e. ⁴ Namoonni sababii inni taayitaa isaa bineensa sanaaf kenneef bineensa jawwee fakkaatu sanaaf ni sagadan; akkasumas, "Kan akka bineensichaa eenyuu? Eenyyutus lola isatti kaasuu danda'a?" jedhanii bineensichaaf sagadan.

⁵ Akka bineensichi dubbii of tuulummaatii fi arrabsoo dubbatuuf afaan ni kennameef; ji'a afurtamii lamaaf akka ittiin hojjetuufis taayitaan isaaf kenname. ⁶ Innis Waaqa arrabsuuf, Waaqaa fi iddoo jireenya isaa, akkasumas warra samii keessa jiraatan maqaa balleessuuf jedhee afaan banate. ⁷ Akka inni qulqullootatti waraana kaasee isaan mo'atuufis humni ni kennameef. Gosa hunda, saba hunda, afaanii fi sanyii hunda irrattis taayitaan ni kennameef. ⁸ Warri lafa irra jiraatan hundinuu jechuunis warri maqaan isaanii erga addunyaan uumamee jalqabee kitaaba jireenyaa kan Hoolicha qalame sanaa keessatti hin galmeeffamin hundinuu bineensichaaf ni sagadu.

⁹ Namni gurra qabu kam iyyuu haa dhaga'u.

¹⁰ "Namni booji'amuuf jiru kam iyyuu

inni ni booji'ama.

Namni goraadeedhaan ajjeefamuuf jiru kam iyyuu
goraadeedhaan ni ajjeefama."

Kunis obsaa fi amanamummaa qulqullootaa argisiisa.

Bineensa Lafa Keessaa Ba'e

¹¹ Bineensa biraas utuu inni lafa keessaa ba'uu nan arge. Innis akka hoolaa gaanfa lama qaba ture; akka bineensa jawwee fakkaatuuttis dubbata ture. ¹² Innis taayitaa bineensicha jalqabaa hundaan fuula isaa duratti hojjechaa ture; akka laftii fi warri lafa irra jiraatan bineensicha jalqabaa isa madaan du'a fidu fayyee sanaaf sagadanis godhe. ¹³ Innis hamma akka ibiddi samii irraa lafatti gad bu'u godhutti ija namaa duratti dinqii gurguddaa hojete. ¹⁴ Mallattoo akka inni iddoo bineensichi jalqabaa jirutti hojjetuuf eeyyamameef sanaanis namoota lafa irra jiraatan ni gowwoomse. Akka isaan ulfina bineensicha goraadeedhaan madaa'ee ergasii immoo jiraate sanaatiif fakkii dhaaban ajaje. ¹⁵ Fakkiin bineensa jalqabaa sunis akka dubbachuu danda'uu fi warra fakkii sanaaf sagaduu didan hundas akka ajjeesisuuf bineensi inni lammaffaan akka fakkii sanaaf lubbuu kennuuf humni kennameef. ¹⁶ Akkasumas namni hundinuu xinnaa fi guddaan, soressii fi hiyyeessi, birmaduu fi garbi harka mirgaa irratti yookaan adda irratti akka mallattoo qabaatu dirqisiise; ¹⁷ kunis akka namni mallattoo kana jechuunis maqaa bineensichaa yookaan lakkoobsa maqaa isaa hin qabaatin kam iyyuu bitachuu yookaan gurgurachuu hin dandeenyef.

¹⁸ Ogummaan as jira. Lakkoobsichi waan lakkoobsa namaa ta'eef namni hubannaa qabu kam iyyuu lakkoobsa bineensichaa haa herregu. Lakkoobsi isaas 666.

14

Hoolichaa fi Namoota 144,000

¹ Anis nan ilaale; kunoo, Hoolichi Tulluu Xiyoon irra dhaabachaa ture; namoonni 144,000, kanneen maqaan isaatii fi maqaan Abbaa isaa adda isaanii irratti barreeffames isa wajjin turan. ² Anis sagalee akka sagalee bishaan baay'etii fi akka sagalee kakawwee guddaa samii irraa nan dhaga'e. Sagaleen ani dhaga'e sunis akka sagalee baganaa kan namoonni baganaa taphatan dhageessisanii ture. ³ Isaanis fuula teessichaa duratti, fuula uumamawwan lubbuu qabeeyyii afraniitii fi fuula maanguddootaa duratti faarfannaa haaraa tokko faarfatan. Faarfannaa sanas namoota 144,000 warra lafa irraa furaman sana malee namni tokko iyyuu barachuu hin dandeenye. ⁴ Isaan kunneen waan

qulqullinaan of eegganiif warra dubartootaan of hin xureessinii dha. Isaanis iddoo Hoolichaa dhaqun hundumatti isa duukaa bu'u. Sanyii namaa keessaas hangafa ta'anii Waaqaa fi Hoolichaa ni furaman. ⁵ Sobni tokko iyyuu afaan isaanii keessatti hin argamne; isaan mudaa hin qaban.

Ergamoota Sadan

⁶ Anis ergamaa biraa kan warra lafa irra jiraatanitti jechuunis saba hundatti, gosa hundatti, afaanii fi sanyii hundatti lallabuuf jedhee wangeela bara baraa qabatee samii walakkaa barrisu tokko nan arge. ⁷ Innis sagalee guddaadhaan akkana jedhee; "Sa'aatiin murtii isaa waan dhi'aateef Waaqa sodaadhaa; ulfinas isaaf kennaa. Isa samii fi lafa, galaanaa fi burqaawwan bishaanii uume sanaaf sagadaa."

⁸ Ergamaan lammaffaaniis itti aanse, " 'Kufteerti! Baabilon guddittiin' isheen akka sabni hundi daadhii wayinii dheekkamsa sagaagala ishee dhugu goote sun kufteerti" jedhe.

⁹ Ergamaan Waaqaa inni sadaffaaniis isaanitti aanse sagalee guddaadhaan akkana jedhee; "Namni kan iyyuu bineensichaa fi fakkii isaatiif yoo sagade, mallattoo isaas adda isaa irratti yookaan harka isaa irratti yoo fudhate, ¹⁰ innis akkasuma daadhii wayinii dheekkamsa Waaqaa isa utuu homtuu itti hin makamin xoofoo aarii isaatti buufame irraa ni dhuga. Fuula ergamoota qulqullootaatii fi fuula Hoolichaa durattis ibiddaa fi dinyiidhaan ni dhiphata. ¹¹ Aarri dhiphina isaaniis bara baraa hamma bara baratti ol ba'a. Warri bineensichaa fi fakkii isaatiif sagadan yookaan warri mallattoo maqaa isaa fudhatan hundi halkanii guyyaa boqonnaa hin qabaatan." ¹² Kun obsa qulqulloota ajaja Waaqaa eeganiitii fi Yesuusiiif amanamanii jiraatanii gaafata.

¹³ Anis sagalee, "Waan kana barreessi: Si'achi warri utuu Gooftaadhaan jiranuu du'an eebbifamoo dha" jedhu tokko samii irraa nan dhaga'e.

Hafuurri Qulqulluunis, "Eeyyee; hojiin isaaniis waan isaan duukaa bu'uuf isaan dadhabbii isaanii irraa ni boqotu" jedha.

Haamamuu Lafaatii fi Iddoon Cuunfaa Wayinii Dhidhiitamuu Isaa

¹⁴ Anis nan ilaale; kunoo, duumessa adii tokkotu ture; inni "ilma namaa fakkaatu"* tokkos gonfoo warqee mataa isaatti kaa'atee, haamtuu qaramaa harkatti qabatee duumessa irra taa'ee ture. ¹⁵ Ergamaan Waaqaa kan biraas mana qulqullummaatii ba'ee sagalee guddaadhaan isa duumessa irra taa'e sanaan, "Midhaan lafaa waan bilchaateef, yeroon haamaas waan ga'eef haamtuu kee fudhadhuutii haami" jedhee iyye. ¹⁶ Kanaafis inni duumessa irra taa'e sun haamtuu isaa lafatti dhaabe; laftis ni haamamte.

¹⁷ Ergamaan Waaqaa kan biraas mana qulqullummaa isa samii keessaatii ba'ee; innis akkasuma haamtuu qaramaa qaba ture. ¹⁸ Ammas ergamaan Waaqaa kan biraa inni ibidda irratti taayitaa qabu tokko iddoo aarsaa biraa dhufee, sagalee guddaadhaan ergamaa haamtuu qaramaa qabu sanaan, "Hurbuun wayinii waan bilchaateef haamtuu kee qaramaa sana fudhadhuutii hurbuu wayinii lafaa walitti qabi" jedhe. ¹⁹ Ergamichis haamtuu isaa lafatti dhaabe; hurbuu wayinii lafaas walitti qabee gara iddoo cuunfaa wayinii dheekkamsa Waaqaa isa guddaatti darbate. ²⁰ Isaanis iddoo cuunfaa wayinii kan magaalaa ala jiru keessatti dhidhiitaman; iddoo cuunfaa sana keessaas dhiigni hamma luugama fardaatti ol ka'ee fageenya gara kiiloo meetira 300 lola'e.

15

Ergamoota Torba Kanneen Dha'ichawwan Torba Harkaa Qaban

¹ Anis mallattoo guddaa fi dinqisiisaa biraa samii keessattin arge; mallattoon kunis ergamoota torban kanneen dha'icha dhumaa torba qaban ture; dha'ichi torban kunneenis sababii dheekkamsa Waaqaa isaaniin raawwatamuuf dha'icha dhumaa jedhaman. ² Anis waan galaana bilillee ibiddaan makamee fakkaatu tokko nan arge; warri bineensichaa fi fakkii isaa, lakkoobsa maqaa isaas mo'atan baganaa Waaqni isaaniif kenne harkatti qabatani galanicha bira dhadhaabachaa turan. ³ Isaanis faarfannaa Musee garbicha Waaqaatii fi faarfannaa Hoolichaa akkana jedhanii faarfatan:

"Yaa Waaqa Gooftaa Waan Hundumaa Dandeessu,

hojiin kee guddaa fi dinqisiisaa dha.

Yaa Mootii sabootaa,

karaan kee qajeelaa fi dhugaa dha.

⁴ Yaa Gooftaa, namni si hin sodaanne,

kan maqaa kees hin ulfeessine eenyu?

Si qofatu qulqulluudhaatii.

* 14:14 14:14 Dan 7:13

Hojiin qajeelummaa keetii waan mul'ifameef,
saboanni hundinuu ni dhufu;
fuula kee durattis ni sagadu.”

⁵ Ergasiis nan ilaale; manni qulqullummaa inni samii jechuunis dunkaanni dhuga ba'uu ni baname. ⁶ Mana qulqullummaa sana keessaas ergamoonni torban dha'icha torba qaban ni ba'an. Isaanis uffata qulqulluu fi calaqqisaa quncee talbaa irraa hojjetame uffatanii naannoo qoma isaaniittis sabbata warqee hidhatanii turan. ⁷ Uumamawwan lubbuu qabeeyyii afran keessaas inni tokko waciitiiwwan warqee torba kanneen dheekkamsa Waaqa isa bara baraa hamma bara baraatti jiraatuutiin guutaman ergamoota torbaniif kenne. ⁸ Manni qulqullummaa sunis aara ulfinaa fi humna Waaqaa keessaa ba'uun guutame; hamma dha'ichi torban ergamoota torbanii raawwatamuttis eenyu iyyuu mana qulqullummaa sana seenuu hin dandeenye.

16

Waciitiiwwan Dheekkamsa Waaqaa Torban

¹ Anis sagalee guddaa, ergamoota torbaniin, “Dhaqaatii, waciitiiwwan dheekkamsa Waaqaa torban keessaa lafa irratti dhangalaasaa” jedhu tokko mana qulqullummaa keessaa nan dhaga'e.

² Ergamaan Waaqaa inni jalqabaa dhaqee waciitii isaa keessaa lafa irratti dhangalaase; namoota mallattoo bineensichaa of irraa qabaniif fi fakkii isaatiif sagadanittis madaan hamaaniif fi dhukkubsaan ni yaa'e.

³ Ergamaan lammaffaan waciitii isaa keessaa galaanatti dhangalaase; galaanichis dhiiga akka dhiiga nama du'ee ta'e; lubbuu qabeeyyiin galaana sana keessaa hundinuu ni du'an.

⁴ Ergamaan sadaffaan waciitii isaa keessaa lageenii fi burqaawwan bishaanii irratti dhangalaase; isaanis dhiiga ta'an. ⁵ Ergamaan bishaanota irratti itti gaafatamummaa qabus utuu akkana jedhuu nan dhaga'e:

“Yaa Isa Qulqulluu, kan jirtu, kan turte,

sababii wantoota kanneen murteessiteef, ati qajeelaa dha;

⁶ Waan isaan dhiiga qulqullootaatii fi dhiiga raajotaa dhangalaasaniif,

ati immoo akka isaan dhuganiif dhiiga isaaniif kenniteerta;

kun isaaniif ni malaatii.”

⁷ Anis utuu iddoon aarsaa,

“Eeyyee yaa Waaqayyo Gooftaa Waan Hunda Dandeessu,

murtiin kee dhugaa fi qajeelaa dha”

jedhuu nan dhaga'e.

⁸ Ergamaan afuraffaanis waciitii isaa keessaa aduu irratti dhangalaase; aduudhaafis akka isheen ibiddaan nama gubduuf humni ni kenname. ⁹ Namoonnis ho'a guddaa sanaa ni gubatan; maqaa Waaqa dha'icha kanneen irratti humna qabu sanaas ni abaaran; qalbii jijjiirrachuu fi ulfina isaaf kennuus ni didan.

¹⁰ Ergamaan shanaffaanis waciitii isaa keessaa teessoo bineensichaa irratti dhangalaase; mootummaan bineensichaa dukkanaa liqimfame. Namoonnis dhiphachuudhaan arraba isaani cicciniinan; ¹¹ sababii dhukkubbii fi madaa isaaniitiifis Waaqa samii ni abaaran; garuu hojii isaani irraa qalbii hin jijjiirranne.

¹² Ergamaan ja'affaanis waciitii isaa keessaa Efraaxiis lagicha guddaa irratti dhangalaase; bishaan laga sanaas mootota Ba'a Biiftuutii dhufaniif akka karaan qopheffamuuf ni goge. ¹³ Ergasii afaan bineensa jawwee fakkaatu sanaa keessaa, afaan bineensichaa keessaa fi afaan raajii sobaa keessaa hafuuronni xuraa'oon fattee fakkaatan sadii utuu ba'annu nan arge. ¹⁴ Isaanis hafuurota hafuura hamaa kanneen hojiiwwan dinqii hojjetanii dha; isaanis lola guyyaa guddichaa kan Waaqa Waan Hunda Danda'u sanaatiif walitti isaan qabuuf gara mootota addunyaa hundaatti kan ba'anii dha.

15 “Kunoo, ani akka hattuutti nan dhufa! Namni akka qullaa hin deemneef, akka qaaniin isaas hin mul'anneef dammaqee uffata isaa eeggatu eebbifamaa dha.”

¹⁶ Isaanis iddoo afaan Ibraayisxiitiin Armaageedon jedhamutti mootota sana walitti qaban.

¹⁷ Ergamaan torbaffaanis waciitii isaa keessaa qilleensa keessatti dhangalaase; sagaleen guddaan, “Raawwatameera!” jedhu tokkos mana qulqullummaatii teessoo

keessaa ba'e. ¹⁸ Ergasiis balaqqeen, sagaleen, kakawweetii fi sochiin lafaa hamaan tokko ni ta'e. Sochiin lafaa kan akkanaas erga namni lafa irra jiraachuu jalqabee kaasee takkumaa ta'ee hin beeku; sochiin lafaa sunis akka malee guddaa ture. ¹⁹ Magaalattiin guddoon iddoo sadiitti gargar qoodamte; magaalawwan sabootaas ni kufan. Waaqnis Baabilon Guddittii ni yaadate; xoofoo daadhii wayinii dheekkamsa isaa sodaachisaadhaan guutames ni kenneef. ²⁰ Biyyoonni bishaaniin marfaman hundinuu ni baqatan; tulluuwwanis argamuu hin dandeenye. ²¹ Dhagaan cabbii gurguddaan tokkoon tokkoon isaa gara kiiloo giraamii afurtamii shanii ulfaatu samii irraa namoota irra bubbu'e. Dha'ichi sunis waan akka malee hamaa tureef namoonni sababii dha'icha cabbii sanaatiif Waaqa ni abaaran.

17

Dubartittii Bineensicha Yaabbattu

¹ Ergamoota torban waciiitiwwan torba qaban keessaa inni tokko gara koo dhufee akkana naan jedhe; "Kottu! Adaba sagaagaltittii guddittii ishee bishaanota baay'ee irra teessu sana irratti raawwatamuuf jiru sittin argisiisaa. ² Mootonni lafaa ishee wajjin sagaagalaniiru; warri lafa irra jiraatanis daadhii wayinii sagaagala isheetiin machaa'aniiru."

³ Ergamaan Waaqaa sunis Hafuura Qulqulluudhaan na fuudhee gammoojjiitti na geesse. Achittis dubartii bineensa bildiimaa maqaa arrabsootiin guutame tokko irra teessu nan arge; bineensichis mataa torbaa fi gaanfa kudhan qaba ture. ⁴ Dubartittiinis uffata dhiilgee fi bildiimaa uffatee warqeen, dhagaa gatii guddaatii fi lulaan miidhag-famtee turte. Harka isheettis xofooo warqee kan waan jibbisiisaa fi xuraa'ummaa sagaagala isheetiin guutame qabatee turte. ⁵ Adda ishee irrattis maqaan icciitii kan akkana jedhu tokko barreeffamee ture:

Baabilon Guddittii,
Haadha Sagaagaltootaa fi,
Haadha waan Jibbisiisaa Lafaa.

⁶ Akka dubartittiin dhiiga qulqullootaatii fi dhiiga warra Yesuusiif dhugaa ba'aniitiin machoofte nan arge.

Anis yommuu ishee argetti baay'een dinqifadhe. ⁷ Ergamichis akkana naan jedhe; "Ati maaliif dinqifatta? Icciiiti dubartittii fi icciitii bineensicha ishee baatu kan mataa torbaa fi gaanfa kudhan qabu sanaa sitti nan hima. ⁸ Bineensi ati argite sun dur ture; amma garuu hin jiru; booddee garuu Boolla Qilee keessaa ol ba'ee gara badiisa isaa ni dhaqa. Warri lafa irra jiraatan kanneen maqaan isaanii uumama addunyaatii jalqabee kitaaba jireenyaa keessatti hin galmeeffamin yommuu bineensicha arganitti ni dinqisiifatu; sababiin isaas bineensichi dur ture; amma garuu hin jiru; booddee garuu ni dhufa.

⁹ "Kunis sammuu ogummaa qabu gaafata. Mataawwan torban sunis tulluuwwan torban dubartittiin irra teessuu dha. ¹⁰ Akkasumas mataawwan torban sun mootota torba. Isaan keessaas shan kufaniiru; inni tokko jira; inni kaan immoo amma illee hin dhufne; yommuu dhufutti garuu yeroo gabaabaaf turuu qaba. ¹¹ Bineensichi duraan turee amma immoo hin jirre sun mootii saddeettaffaa dha. Inni mootota torban keessaa tokkoo dha; gara badiisa isaas ni dhaqa.

¹² "Gaanfawwan kurnan ati argite sun mootota kurnan warra amma illee mootummaa hin argatini dha; ta'us isaan bineensicha wajjin sa'atii tokko akka moototaatti mo'uuf taayitaa ni fudhata. ¹³ Isaanis yaaduma tokko qabu; humna isaaniitii fi taayitaa isaaniis dabarsanii bineensichaaf ni kennu. ¹⁴ Isaanis Hoolichatti lola ni kaasu; Hoolichi garuu waan Gooftaa gooftotaatii fi Mootii moototaa ta'ee isaan mo'ata; warri isa wajjin jiranis warra isaaf waamaman, warra isaaf filatamanii fi warra isaaf amanamanii dha."

¹⁵ Ergamaan sunis akkana naan jedhe; "Bishaanonni ati argite kanneen sagaagaltittiin irra teessu sun saboota, namoota, sanyiiwwanii fi afaanota. ¹⁶ Bineensichii fi gaanfawwan kurnan ati argite sun sagaagaltittii ni jibbu. Isaanis ishee onsaanii qullaa ishee hambisu; foon ishee ni nyaatu; ibiddaanis ishee gubu. ¹⁷ Isaanis hamma dubbiin Waaqaa fiixaan ba'utti walii galuudhaan taayitaa isaanii dabarsanii bineensichaaf kennuudhaan akka kaayyoo Waaqaa raawwataniif Waaqni yaada kana garaa isaanii keessa kaa'eeraatii. ¹⁸ Dubartittiin ati argite sun magaalattii guddoo mootota lafaa bulchituu dha."

18

Kufaatii Baabiloniitiif Boo'uu

¹ Ergasiis utuu ergamaan biraa samii irraa gad bu'uu nan arge. Innis taayitaa guddaa qaba ture; ulfina isaatiinis lafti ni ifte. ² Innis akkana jedhee sagalee guddaadhaan iyye: "Kufteerti! Baabilon guddittiin kufteerti!"

Lafa jireenya hafuurota hamoo,
lafa qubata hafuurota xuraa'oo hundaa,
iddoo jireenya simbirroota xuraa'oo,
iddoo jireenya bineensota xuraa'oo fi
jibbiisoo hundaa taateerti.

³ Saboonni hundinuus,
daadhii wayinii dheekkamsa sagaagala ishee dhuganiiruuti.
Mootonni lafaas ishee wajjin sagaagalaniiru;
daldaltoonni addunyaas qananii ishee
guddaa sanaan sooromaniiru."

Murtii Baabilon Jalaa Miliquu

⁴ Sagalee biraas samii irraa nan dhaga'e; innis akkana jedha:
"Yaa saba ko, isin akka cubbuu ishee keessatti hin hirmaanneef,
balaa ishee irra ga'us akka hin goodanneef,
kottaa ishee keessaa ba'aa;*" ⁵

cubbuun ishee hamma samiitti ol tuulameeraatii;
Waaqnis yakka ishee yaadateera.

⁶ Akkuma isheen kennitetti isinis isheef kennaa;
akkuma hojii isheettis dachaa lama godhaatii isheef deebisaa.
Xoofoo isheen itti bulbultettis dachaa lama godhaatii isheef bulbulaa.

⁷ Hammuma isheen ulfina ofii kennitee qananii guddaadhaan jiraatte sana,
qixxeedhuma isaa dhiphinaa fi gadda isheef kennaa.

Isheenis garaa ishee keessatti,
'Ani akka mootittii tokkootti nan taa'a;
ani haadha hiyyeessaa miti;
gonkumaas hin gaddu' jettee of jajji.

⁸ Kanaafuu dha'ichi garaa garaa jechuunis,
duuti, gaddii fi beelli guyyuma tokkotti ishee irra ni ga'a.
Waaqni Gooftaan isheetti murteessu sun waan jabaa ta'eef,
isheen ibiddaan ni gubamti.

Waa'ee Kufaatii Baabiloniitiif Wayyoo

⁹ "Mootonni lafaa warri ishee wajjin sagaagalani fi warri qananii guddaadhaan ishee wajjin jiraatan yommuu aara gubamuu ishee arganitti isheef ni boo'u; ni wawwaatus.

¹⁰ Isaanis dhiphina ishee waan sodaataniif fagoo dhaabatani,
"Wayyoo! Wayyoo! Yaa magaalaa guddittii,
yaa Baabilon magaalattii jabduu!"

Badiin kee sa'aatuma tokko keessatti dhufeeraatii!' jedhu.

¹¹ "Daldaltoonni lafaas si'achi waan namni tokko iyyuu mi'a daldala isaanii hin binneef isheef ni boo'u; ni wawwaatus. ¹² Mi'i daldala isaanis warqee, meetii, dhagaawwan gatii guddaatii fi lula, uffata haphii quncee talbaa irraa hojjetame, uffata dhiilgee, uffata haariiitii fi bildiimaa, muka urgaa'aa gosa hundaa, mi'a ilka arbaa irraa hojjetame hunda, mi'a muka gatii guddaa irraa hojjetame hunda, mi'a naasii irraa hojjetame hunda, mi'a sibiilaatii fi mi'a dhagaa adii irraa hojjetame hundaa fi ¹³ qarafaa fi urgooftuu, ixaana, qumbii, haphee urgaa'aa, daadhii wayiniitii fi zayitii ejersaa, daakuu bullaa'aa fi qamadii, loowwanii fi hoolota, fardeenii fi gaariwwan, akkasumas garbootaa fi lubbuuwwan namootaa fa'a.

¹⁴ "Isaanis, 'Tji waan ati hawwite sanaa si duraa badeera. Badhaadhummaa fi bareedinni kee hundinuu sirraa badeera; gonkumaas deebitee hin argattu' isheedhaan jedhu. ¹⁵ Daldaltoonni mi'a kanneen gurguratani ishee irraa badhaadhummaa argatanis dhiphina ishee sodaataniif fagoo dhaabatu. Isaanis boo'aa, wawwaachaas, ¹⁶ sagalee guddaadhaan akkana jedhu:

"Wayyoo! Wayyoo, yaa magaalaa guddittii;
yaa ishee uffata haphii quncee talbaa irraa hojjetame,
uffata dhiilgee fi uffata bildiimaa uffatte,
yaa ishee warqeedhaan,

dhagaa gatii guddaatii fi lulaan miidhagfante!

¹⁷ Badhaadhummaan guddaan akkanaa sa'aatuma tokko keessatti barbadaa'e!

"Ajajjuun doonii hundinuu, warri dooniin imala deeman hundinuu, warri doonii irra hojjetanii fi warri galaana irra hojjechuun jiraatan hundinuu fagaatanii ni dhaabatu. ¹⁸ Isaan yommuu aara gubamuu ishee arganitti, 'Magaalaan akka magaalaa guddittii kanaa jiraattee beektii?' jedhanii iyyu. ¹⁹ Isaanis awwaara mataatti firfirfatanii boo'aa, wawwaachaas akkana jedhanii iyyu:

"Wayyoo! Wayyoo, yaa magaalaa guddittii,
yaa ishee warri galaana irraa dooniiwwan qaban hundinuu
qabeenya isheetiin sooroman!

Ishee sa'aatuma tokko keessatti barbadoofte!

²⁰ "Yaa samii kufaatii isheetti gammadi!

Isin sabni Waaqaa gammadaa!

Ergamoonnii fi raajonni gammadaa!

Waaqni ishee irratti isiniif mureeraatii."

Xumura Badiisa Baabilon

²¹ Ergamaan jabaan tokkos dhagaa hamma dhagaa daakuu ga'u tokko fuudhee galaanatti gad darbatee akkana jedhe:

"Baabilon magaalaa guddittiin,
akkasuma furguggifamtee ni darbatamti;
gonkumaas deebitee hin argamtu.

²² Sagaleen warra baganaa fi muuziiqaa taphatanii,
sagaleen warra ulullee fi malakata afuufanii
si'achi si keessatti hin dhaga'amu.

Ogeessi hojii harkaa tokko iyyuu,
si'achi si keessatti hin argamu.

Sagaleen dhagaa daakuus,
si'achi si keessatti hin dhaga'amu.

²³ Ifni ibsaa, lammata si keessatti hin ifu.
Sagaleen misirrichaatii fi misirrittii,
lammata si keessatti hin dhaga'amu.

Daldaltoonni kee namoota gurguddaa addunyaa turan.
Falfala keetiin sabni hundinuu gowwoomfameera.

²⁴ Dhiigni raajotaatii fi dhiigni qulqullootaa,
dhiigni warra lafa irratti gorra'aman hundumaas
ishee keessatti argame."

19

Sababii Kufaatii Baabiloniitiif Galata Galchuu!

¹ Kana booddee waan akka huursaa sagalee tuuta namootaa guddaa tokko samii irraa nan dhaga'e; innis akkana jedha:

"Haalleluuyaa!

Fayyinni, ulfinnii fi humni kan Waaqa keenyaa ti;

² murtiin isaa dhugaa fi qajeelaadhaatii.

Inni sagaagaltittii guddoo,

ishee sagaagaltummaa isheetiin lafa xureessite sanatti mureera;
dhiiga garboota isaatiifis isheetti haaloo ba'eera."

³ Ammas,

"Haalleluuyaa!

Aarri ishees bara baraa hamma bara baraatti ol ni ba'a"

jedhanii iyyan.

⁴ Maanguddoonni digdamii afranii fi uumamawwan lubbuu qabeeyyiin afran kufanii Waaqa teessoo irra taa'ee jiru sanaaf sagadan; sagalee guddaadhaanis, "Ameen; Haalleluuyaa!" jedhan.

⁵ Ergasiis sagaleen,

"Isin garboonni isaa hundinuu,

warri isa sodaattan,

xinnaanis guddaanis,

Waaqa keenya jajadhaa"

jedhu tokko teessicha keessaa ni ba'e.

⁶ Anis utuu sagaleen akka sagalee tuuta nama baay'ee, akka sagalee bishaan baay'eetii fi akka sagalee kakawwee guddaan tokko akkana jedhuu nan dhagaa'e:
"Haalleluuyaa!

Waaqni keenya Gooftaan Waan Hunda Danda'u mo'eeraatii.

⁷ Kottaa ni gammannaa; ni ililchinas;
ulfinas isaaf ni kennina!

Yeroon fuudha Hoolichaa ga'eeraatii;
misirrittiin isaas of qopheessiteerti.

⁸ Akka uffattuufis uffanni haphiin quncee talbaa irraa hojjetame,
adii fi qulqulluun isheedhaaf kennameera."

Uffanni haphiin quncee talbaa irraa hojjetame sun hojii qulqulloota isa qajeelaa sana argisiisa.

⁹ Ergamaan Waaqaa sunis, "Warri gara irbaata cidha fuudha Hoolichaatti affeeraman eebbifamoo dha!' jedhii barreessi" naan jedhe; innis, "Dubbiin kun dubbii Waaqaa isa dhugaa dha" naan jedhe.

¹⁰ Anis isaaf sagaduuf jedhee miilla isaa irrattin kufe. Inni garuu akkana naan jedhe; "Naaf hin sagadin! Anis garbicha si'ii fi obboloota kee warra Yesuusiif dhugaa ba'an wajjin tajaajilu dha. Waaqaaf sagadi! Dhuga ba'umsi Yesuus hafuura raajitiiti."

Loltuun Samii Bineensicha Mo'achuu Isaa

¹¹ Anis samii baname nan arge; kunoo, farda adii tokkotu ture; inni farda sana yaabbatus Amanamaa fi Dhugaa jedhama. Innis qajeelummaadhaan murteessa; waraana kaasas. ¹² Iji isaa akka arraba ibiddaa ti; mataa isaa irras gonfoo baay'eetu jira. Innis maqaa isa irratti barreeffame kan isa malee namni tokko iyyuu hin beekne tokko qaba. ¹³ Innis uffata dhiiga keessa cuuphame tokko uffata; maqaan isaas Dubbii Waaqaa jedhama. ¹⁴ Loltoonni samii irraas uffata haphii quncee talbaa irraa hojjetame adaadii fi qulqulluu uffatanii, fardeen adaadii yaabbatanii isa duukaa bu'an. ¹⁵ Afaan isaa keessaas goraadee qaramaa inni ittiin saboota dha'u tokkotu ba'a; "Innis bokkuu sibiilaatiin isaan bulcha."* Iddoo cuunfaa wayinii dheekkamsa sodaachisaa Waaqa Waan Hunda Danda'u sanaas ni dhidhiita. ¹⁶ Innis uffata isaatii fi gudeeda isaa irratti maqaa barreeffame tokko qaba; maqaan sunis akkana jedha:

Mootii Moototaa fi Gooftaa Gooftotaa.

¹⁷ Ergamaa tokkos utuu inni aduu irra dhaabatuu nan arge; innis sagalee guddaadhaan simbirroota samii walakkaa barrisanitti akkana jedhee iyye; "Kottaa, irbaata Waaqaa isa guddaaf walitti qabamaa; ¹⁸ kunis akka isin foon moototaa, foon ajajjoota waraanaa, foon namoota jajjaboo, foon fardeenitiiti fi foon warra farda yaabbatanii akkasumas foon nama hundaa jechuunis foon nama birmaduu ta'etii fi garbaa, foon xinnaatii fi guddaa nyaataniif."

¹⁹ Yeroo sanas bineensichi, mootonni lafaatii fi loltoonni isaanii namicha farda yaabbatu sanaa fi loltoota isaatii waraana kaasuuf jedhanii utuu walitti qabamanuu nan arge. ²⁰ Bineensichi garuu ni qabame; raajichi sobaa kan fuula bineensichaa duratti hojiiwwan dinqii hojjechaa ture sunis isa wajjin qabame. Innis hojiiwwan dinqii kanneeniin warra mallattoo bineensichaa fudhatanii fi warra fakkii isaatiif sagadan ni gowwoomse. Isaan lachuu utuma lubbuun jiranuu haroo ibiddaa kan dinyiidhaan boba'u keessatti gad darbataman. ²¹ Warri hafan immoo goraadee afaan isa farda yaabbatu sanaa keessaa ba'een ajjeefaman; allaatiin hundinuus foon isaanii nyaatanii quufan.

20

Wagga Kuma

¹ Utuu ergamaan tokko furtuu Boolla Qileetii fi foncaa guddaa tokko harkatti qabatee samii irraa gad bu'uu nan arge. ² Ergamaan sunis bineensicha jawwee fakkaatu, bofa durii sana jechuunis diiyaabilooos yookaan Seexana qabee wagga kuma tokko hidhe. ³ Hamma waggaan kumaa sun dhumuttis akka inni deebi'ee saboota hin gowwomsineef Boolla Qileetti gad isa darbatee itti cufe. Chaappaas irratti chaappesse; ergasii immoo yeroo gabaabaadhaaf hiikamuu qaba.

⁴ Anis teessoowwan nan arge; warri akka murtii kennaniif taayitaan kennameef teessoowwan sana irra taa'anii turan. Lubbuuwwan namoota sababii Yesuusiif dhugaa ba'anii fi sababii dubbii Waaqaatiif jedhanii gorra'amaniis nan arge. Isaanis

* 19:15 19:15 Far 2:9

bineensichaaf yookaan fakkii bineensichaatiif hin sagadne; mallattoo isaas adda isaanii irratti yookaan harka isaanii irratti hin fudhanne. Isaanis du'aa ka'anii Kiristoos wajjin waggaa kuma tokko mo'an. ⁵ Warri du'an kaan garuu hamma waggaan kumni sun dhumutti deebi'anii lubbuudhaan hin jiraanne. Kunis du'aa ka'uu jalqabaa ti. ⁶ Warri du'aa ka'uu jalqabaa keessatti qooda qaban eebbifamoo fi qulqulloota. Warri akkasii luboota Waaqaatii fi luboota Kiristoos ta'anii waggaa kuma tokko isa wajjin mo'u malee duuti lammaffaan isaan irratti taayitaa hin qabu.

Seexanatti Muramuu Isaa

⁷ Yommuu waggaan kumni sun dhumutti Seexanni iddoo itti hidhamee ture keessaa gad dhiifama; ⁸ innis saboota golee lafaa afran jiran jechuunis Googii fi Maagoogin gowwoomsuuf ni ba'a; hunduma isaanis waraanaaf walitti ni qaba. Baay'inni isaanis akka cirracha qarqara galaanaa ti. ⁹ Isaanis lafa hunda irratti faffaca'anii qubata qulqullootaatii fi magaalattii jaallatamtuu marsan. Garuu ibiddi samii irraa gad bu'ee isaan fixe. ¹⁰ Diiyaabiloo inni isaan gowwoomse sunis gara haroo dinyii boba'uutti iddoo bineensichii fi raajichi sobaa itti darbataman sanatti gara darbatame. Isaanis bara baraa hamma bara baraatti halkanii guyyaa ni dhiphifamu.

Warra Du'anitti Muramuu Isaa

¹¹ Anis teessoo adii guddaa tokkoo fi isa teessicha irra taa'e nan arge. Laftii fi samiin fuula isaa duraa ni baqatan; iddoonis isaaniif hin argamne. ¹² Warri du'anis xinnaa guddaan fuula teessichaa dura dhaabatanii nan arge; kitaabonnin ni banaman; akkasumas kitaabni biraa jechuunis kitaabni jireenyaa ni baname. Warra du'anis akkuma kitaabota keessatti galmeeffametti, akkuma hojii isaan duraan hojjetaniitti murtiin ni kennameef. ¹³ Galaannis warra du'an kanneen isa keessa turan of keessaa baasee kenne; duutii fi Sii'oolis warra du'an kanneen isaan keessa turan of keessaa baasanii kennan; namni hundis akkuma hojii isaatii murtii argate. ¹⁴ Ergasiis duutii fi Sii'ool haroo ibiddaatti gad darbataman. Haroon ibiddaa kunis du'a lammaffaa ti. ¹⁵ Namni maqaan isaa kitaaba jireenyaa keessatti hin galmeeffamin kam iyyuu haroo ibiddaatti gad darbatame.

21

Samii Haaraa fi Lafa Haaraa

¹ Anis ergasii samii haaraa fi lafa haaraa* nan arge; samiin duraatii fi lafti duraa sun badaniiruutii; galaannis si'achi hin jiraatu. ² Anis magaalaa qulqullittiin Yerusaaalem haaraan akkuma misirroo dhirsa isheetiif miidhagfamteetti qophooftte samii keessaa Waaqa biraa utuu gad buutuu nan arge. ³ Sagalee guddaa teessoo keessaa akkana jedhu tokkos nan dhaga'e; "Kunoo, iddoo Waaqni jiraatu namoota gidduu dha; innis isaan wajjin jiraata. Isaan saba isaa ni ta'u; Waaqni mataan isaas isaan wajjin ni jiraata; Waaqa isaanis ni ta'a. ⁴ Inni imimmaan hunda ija isaanii irraa ni haqa. Si'achi duuti yookaan gaddi yookaan boo'ichi yookaan dhiphinni hin jiraatu; sirni moofaan sun darbeeraatii."

⁵ Inni teessoo sana irra taa'es, "Kunoo, ani waan hundumaa nan haaromsa!" jedhe; innis, "Dubbiin kun waan amanamaa fi dhugaa ta'eef, kana barreessi" naan jedhe.

⁶ Innis akkana naan jedhe: "Raawwatameera. Alfaa fi Omeegaan, Jalqabaa fi Dhumni anuma. Ani nama dheeboteef burqaa bishaan jireenyaa irraa tola nan kenna. ⁷ Inni mo'u waan kana hunda ni dhaala; ani Waaqa isaa nan ta'aaf; innis ilma koo ni ta'a. ⁸ Garuu goodni sodaattotaa, kan warra amantii hin qabnee, kan xuraa'otaa, kan warra nama ajjeesanii, kan halaleewwanii, kan warra falfala hojjetanii, kan warra waaqota tolfamoo waaqeffataniitii fi kan sobduuwwan hundaa haroo ibiddaatii fi dinyii boba'uuti keessa ta'a; kunis du'a lammaffaa ti."

Yerusaaalem Misirrittii Hoolichaa

⁹ Ergamoota torban warra waciiitii torban dha'icha dhumaa torbaniin guutaman qaban keessaas inni tokko dhufee, "Kottu, misirrittii niitii Hoolichaa sitti nan argisiisaatii" naan jedhe. ¹⁰ Innis Hafuuraan na fuudhee tulluu guddaa fi dheeraa tokkotti na geesse; utuu Yerusaaalem Magaalaa Qulqullittiin samii keessaa Waaqa biraa gad buutuu natti argisiise. ¹¹ Isheenis ulfina Waaqaatiin ni ibsiti turte; cululuqni ishees akkuma cululuqa dhagaa gatii guddaa, akka dhagaa yaasphiidii qulqulluu akka bilillee ture. ¹² Magaalattiinis dallaa guddaa fi ol dheeraa karra kudha lama qabu qabdi turte. Karrawwan sana irras ergamoota kudha lamatu dhaabatee ture; karra kudha lamaan

* 21:1 21:1 Isa 65:17; 2Ph 3:13

sana irrattis maqaan gosoota Israa'el kudha lamaanii barreeffamee ture. ¹³ Karaa ba'a biiftuutiin karra sadii, karaa kaabaatiin karra sadii, karaa kibbaatiin karra sadii, karaa lixa biiftuutiinis karra sadiitu ture. ¹⁴ Dallaan magaalattiis hundee kudha lama qaba ture; hundeeffamee sana irrattis maqaan ergamoota Hoolichaa kudha lamaanii barreeffamee ture.

¹⁵ Ergamaan natti dubbate sunis magaalattii, karrawwan isheetii fi dallaawwan ishee safaruudhaaf ulee safartuu kan warqee qaba ture. ¹⁶ Magaalaan sunis golee afur qabdi turte; dheerinni isheetii fi garaan ishee wal qixxee ture. Ergamaan sunis ulee isaatiin magaalattii safare; bal'inni ishees gara kiiloo meetira 2,200 ta'e; dheerinni ishee, garaan isheetii fi ol dheerinni ishees wal qixxee ture. ¹⁷ Dallaa magaalattiis ni safare; innis akka safara namaa kan ergamichi ittiin safaraa ture sanaatti dhundhuma 144 ta'e. ¹⁸ Dallaan sun dhagaa yaasphiidiitiin ijaarame; magaalaan sun immoo warqee qulqulluu akka bilillee qulqulluu ta'een ijaarame. ¹⁹ Hundeeffamee dallas magaalaa sanaas dhagaa gatii guddaa gosa hundumaatiin miidhagfaman. Hundeen jalqabaa yaasphiidiin, lammaffaan sanpeeriin,[†] sadaffaan keelqedooniin,[‡] afuraffaan immoo maragdiin[§] miidhagfame; ²⁰ Inni shanaffaan sardooniksiin,^{*} ja'afaan sardiyooniin,[†] torbaffaan kiristolobeen,[‡] saddeettaffaan biiraleen,[§] saglaaffaan wuraawureen,^{*} kurnaffaan kirispheerisiin,[†] kudha tokkoffaan yaakintiin,[‡] kudha lammaffaan immoo ametiixsinosiin[§] miidhagfame. ²¹ Karrawwan kudha lamaan lula kudha lama turan; tokkoon tokkoon karra sanaas lula tokko irraa hojjetame. Daandiin magaalaa sanaas warqee qulqulluu akkuma bilillee keessaan waa argamuu ti.

²² Waaqni Gooftaan Waan Hunda Danda'uu fi Hoolichi mana qulqullummaa ishee waan ta'aniif ani magaalattii keessatti mana qulqullummaa tokko illee hin argine. ²³ Aduun yookaan ji'i magaalattii ibsuun hin barbaachisu; ulfinni Waaqaa ifa kennaafitti; Hoolichis ibsaa ishee ti. ²⁴ Saboonni ifa isheetiin deddeebi'u; mootonni lafaas ulfina isaanii gara isheeti fidu. ²⁵ Sababii halkan achi hin jirreef karrawwan magaalattii gonkumaa guyyaa tokko iyyuu hin cufaman. ²⁶ Ulfinaa fi kabaja sabootaa gara ishee ni fidu. ²⁷ Warra maqaan isaanii kitaaba jireenyaa kan Hoolichaa keessatti galmeeffame malee wanni xuraa'aan tokko iyyuu yookaan namni waan jibbiisiisaa hojjetu yookaan namni nama sobu kam iyyuu magaalaa sana hin seenu.

22

Eedin Lagni Jireenyaa Iddoo Isaatti Deebifamuu Isaa

¹ Ergamaan sunis laga bishaan jireenyaa, qulqulluu akka bilillee kan teessoo Waaqaatii fi Hoolichaa keessaa burqu tokko natti argisiise; ² bishaan sunis walakkaa daandii magaalattii irra yaa'aa ture. Gamaa gamana lagichaa irras mukni jireenyaa ija gosa kudha lama naqatu dhaabatee ture; innis ji'uma ji'aan ija naqata ture. Baalli muka sanaas saboota fayyisa ture. ³ Si'achi abaarsi tokko iyyuu hin jiraatu. Teessoon Waaqaatii fi Hoolichaa magaalattii keessatti argama; garboonni isaas isa tajaajilu. ⁴ Isaan fuula isaa ni argu; maqaan isaas adda isaanii irratti ni argama. ⁵ Si'achi halkan hin jiru. Ifni ibsaa yookaan ifni biiftuu isaan hin barbaachisu; Waaqni Gooftaan ifa isaaniiif kennaatii. Isaanis bara baraa hamma bara baraatti ni mo'u.

Yohannisii fi Ergamaa

⁶ Ergamaan Waaqaa sunis, "Dubbiin kun amanamaa fi dhugaa dha. Gooftaan, Waaqni hafuurota raajotaa sun waan dafee ta'uu qabu garboota isaatti argisiisuuf jedhee ergamaa isaa ergeera" naan jedhe.

Yesuus Ni Dhufa

⁷ **"Kunoo, ani dafee nan dhufa! Namni dubbii raajii kitaaba kana keessa jiruu eegu eebbifamaa dha."**

[†] **21:19** 21:19 Sanpeeriin - dhagaa gatii guddaa kan bifa cuquliisaa qabu. [‡] **21:19** 21:19 Keelqedooniin - dhagaa gatii guddaa kan bifa adda addaa, yeroo baay'ee magariisaa (hadhoo). [§] **21:19** 21:19 maragdiin - dhagaa magariisaa gatii guddaa. ^{*} **21:20** 21:20 Sardooniksiin - dhagaa gatii guddaa kan bifa adda addaa, yeroo baay'ee diimaa. [†] **21:20** 21:20 sardiyooniin - dhagaa gatii guddaa kan yeroo baay'ee diimaa. [‡] **21:20** 21:20 Kiristolobeen - dhagaa warqee fakkaatu. [§] **21:20** 21:20 Biiraleen - yeroo baay'ee bifa cuquliisaa akka magariisaa ti; akkasumas bifa adda addaa qaba. ^{*} **21:20** 21:20 wuraawureen - yeroo baay'ee biftii isaa keelloo fakkaatu. [†] **21:20** 21:20 Kirispheerisiin - dhagaa magariisaa. [‡] **21:20** 21:20 yaakintiin - dhagaa diimaa burtukaana fakkaatu. [§] **21:20** 21:20 Ametiixsinosiin - dhagaa dhiilgee yookaan gurraacha.

⁸ Kan wantoota kanneen dhaga'ee fi arge ana Yohannis. Anis yommuu wantoota kanneen dhaga'ee argetti ergamaa wantoota kanneen natti argisiisaa ture sanaaf sagaduudhaaf miilla isaa irrattin kufe. ⁹ Inni garuu, "Kana hin godhin! Anis garbicha si'ii fi obboloota kee raajota wajjin, akkasumas warra dubbii kitaaba kanaa eegan wajjin tajaajiluu dha. Waaqaaf sagadi!" naan jedhe.

¹⁰ Inni akkana naan jedhe; "Sababii yeroon sun dhi'aateef dubbii raajii kitaaba kanaa chaappaadhaan hin cufin. ¹¹ Jal'aan jal'ina isaatti haa fufu; xuraa'aan xuraa'ummaa isaatti haa fufu; qajeelaanis qajeelummaa isaatti haa fufu; qulqulluun immoo qulqullummaa isaatti haa fufu."

Waamichaa fi Akeekkachiisa Dhumaa

¹² **"Kunoo, ani dafee nan dhufa! Gatiin koo na bira jira; tokkoo tokkoo namaatiifis akkuma hojii isaatti nan kenna.** ¹³ **Ani Alfaa fi Omeegaa dha; isa Duraatii fi isa Booddee ti; isa Jalqabaatii fi isa Dhumaatis.**

¹⁴ **"Warri akka muka jireenyaa irratti mirga qabaatanii fi akka karrawwaniin magaalattii seenaniif uffata isaanii miicatan eebbifamoo dha.** ¹⁵ **Garuu saroonni, falfaltoonni, halaleewwan, warri nama ajjeesanii fi warri waaqota tolfamoo waaqeffatan akkasumas warri soba jaallatanii fi warri soba dubbatan hundinuu alatti hafu.**

¹⁶ **"Ani Yesuus, akka inni wantoota kanneen waldoota kiristaanaa keessatti dhugaa isinii ba'uuf ergamaa koo ergeera. Ani Hiddaa fi Sanyii Daawit, Bakkalcha Barii kan ifuu dha."**

¹⁷ Hafuurichii fi misirrittiin, "Kottu!" jedhu; namni dhaga'us, "Kottu!" haa jedhu; namni dheebote haa dhufu; kan barbaadu bishaan jireenyaa tola haa fudhatu.

¹⁸ Nama dubbii raajii kitaaba kanaa dhaga'u hunda nan akeekkachiisa: Yoo namni kam iyyuu dubbii kanatti waan tokko illee dabale, Waaqni dha'ichawwan kitaaba kana keessatti ibsaman isatti dabala. ¹⁹ Namni kam iyyuu yoo dubbii kitaaba raajii kana keessaa waan tokko illee hir'ise, Waaqni muka jireenyaatii fi magaalattii qulqulluu kitaaba kana keessatti ibsaman keessaa qooda isaa hir'isa.

²⁰ Inni waan kana dhugaa ba'us, **"Eeyyee, ani dafee nan dhufa"** jedha. Ameen. Yaa Gooftaa Yesuus kottu.

²¹ Ayyaanni Gooftaa Yesuus qulqulloota hundumaa wajjin haa ta'u. Ameen.